


Habo nalolene bi  
gahenge lo winigo  
ogo



The Holy Bible with Deuterocanon in the Huli Language of  
Papua New Guinea

**Habo nalolene bi gahenge lo winigo ogo**  
**The Holy Bible with Deuterocanon in the Huli Language of Papua New Guinea**  
**Buk Baibel long tokples Huli long Niugini**

Copyright © 1983, 1991, 2002 Bible Society of Papua New Guinea

© Faith Comes by Hearing

Language: Huli

Translation by: Bible Society of Papua New Guinea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-12-11

---

PDF generated using Haiola and XeLaTeX on 21 Feb 2024 from source files dated 31 Aug 2023

dbd89e09-6f1d-5903-a411-8b10e4e81fb7

## Contents

FRT	1
PIGANE BINIGO	3
HARU PENEGO	84
LOMA BINIGO	163
DAGALENE	218
MANA LOYANE	281
YOSUA	347
HAGUANE HENERU	385
LUDI	426
1 SAMUELE	432
2 SAMUELE	485
1 KINI	536
2 KINI	596
1 BI TE	657
2 BI TE	708
ESERA	771
NEHEMAIA	789
ESEDA	817
YOBO	831
IBA GANA	881
MINI GIGABI	1079
AGALI MANDABI	1128
SOLOMONO	1143
AISAIA	1154
YAREMAIA	1262
DUGU	1366
ESEGIELE	1380
DANIELE	1472
HOSEA	1499
YOELE	1515
AMOSO	1523
OBADAIA	1536
YONA	1539
MAIGA	1543
NAHUMU	1552
HABAGUGU	1557
SEBANAIA	1562
HAGAI	1568
SEGARAIA	1572
MALAGAI	1590
TOBIDI	1595
YUDIDI	1617
ESEDA GIRIGI	1642
SOLOMONONAGA MINI GIGABI	1653
SIRAGA	1683
BARUGU	1759
Yaremaiahanda	1768
IGIRI TEBIRALI	1773
SUSANA	1779
BELE	1783

1 MAGABI . . . . .	1786
2 MAGABI . . . . .	1838
MADIU . . . . .	1879
MAGA . . . . .	1943
LUGU . . . . .	1980
YONE . . . . .	2045
ABOSOLO . . . . .	2091
LOMO . . . . .	2151
1 KORINDI . . . . .	2181
2 KORINDI . . . . .	2207
GALESIA . . . . .	2223
EBESA . . . . .	2233
PILIBAI . . . . .	2243
KOLOSI . . . . .	2250
1 TESALONAIGA . . . . .	2257
2 TESALONAIGA . . . . .	2263
1 TIMODI . . . . .	2267
2 TIMODI . . . . .	2275
TAIDASA . . . . .	2281
PILIMONO . . . . .	2285
HIBURU . . . . .	2287
YAMESE . . . . .	2310
1 PIDA . . . . .	2317
2 PIDA . . . . .	2326
1 YONE . . . . .	2331
2 YONE . . . . .	2339
3 YONE . . . . .	2341
YUDI . . . . .	2343
MO WALIA . . . . .	2346



# Habo nalolene bi gahenge lo winigo ogo

## The Bible in the Huli language of Papua New Guinea

### Buk Baibel long tokples Huli long Niugini

*Habo nalolene bi gahenge lo winigo ogo*

The Bible in the Huli language of Papua New Guinea  
Buk Baibel long tokples Huli long Niugini  
[hui]

Translation by Bible Society of Papua New Guinea

© 1983, 1991, 2002 Bible Society of Papua New Guinea

Print publication, by the Bible Society of Papua New Guinea

Web version  
2014, Wycliffe Bible Translators, Inc.  
[www.Wycliffe.org](http://www.Wycliffe.org)

<http://pngscriptures.org>

[www.ScriptureEarth.org](http://www.ScriptureEarth.org)

This translation is made available to you under the terms of the Creative Commons license (Attribution-Noncommercial-No Derivative Works).

<http://creativecommons.org/licenses/by-nc-nd/3.0>

**Your are free to share** – to copy, distribute and transmit the text under the following conditions:

- **Attribution.** You must attribute the work to *the Bible Society of Papua New Guinea* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

**Notice** – For any reuse or distribution, you must make clear to others the license terms of this work.

#### **Tok Orait**

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri**. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating**. Na tu, **yu no ken senisim Tok**.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela**.

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.  
Sapos yu gat askim long dispela, **plis askim mipela.**

## **Pigane Binigo**

### **Mbuga ogoha gilibu ngarunaga nemandi ogo**

Mbuga ogame mbirale bibahende pigane tehinalu wabu helenegonaga bi leda. Haribi dindibi bibahende uruniha karubi ngarubi wali agali pigane tehinalu wabu helenegobi mana ko ngarubi genda tandaga ngarubi pigane tehinaga binirunaga bi lo nga. Ngode Datagaliwabe ibunime wali agali baba biabe bayale ogodagua bule lowa hariga mo tigabu ngelenerunagabi agua bulebero laya lalu lo ngeleda.

Be 1-11 Hobane uruniha howa Ngode Datagaliwabehanda dindi harila pigane wabinigonaga bi te gilibu wialu bambaore wali agali dindi ogoria pigane wabu helenegonaga lo nga. Bi te ogoniha Adama Ibala henegonaga bi tebi Keni Abelela henegonaga bi tebi gilibu nga. Hobane ogoniha dege Noa henegonaga bi tebi iba li timbuniore ibalu wali agalirubi mbirale bibahende wiarubi iba li ogonime bo hilu wahenegonaga bi te lo wialu mbirabi Noa aguanerume Babele anda timbuni bugimbu bu migi bima iraga henegonaga gilibu wigi bida.

Be 12-50 Hobane uruniha howa Isaraele hameigininaga mamali hama ibiniru ogodagua hene lalu lo nga. Tinaga mamali piganeore Abarahama hene. Abarahama ibuore agali bayale Ngode Datagaliwabehanda hame ledadagua bialu howa wali agali maninaga mini mbiraore wialu holebiragonaga manane ibunini walia halu ogobi holene nga lalu ibunime bu walia henerunaga mo walia halu te lo nga. Hobane ogoniha dege Abarahama igini Aisaganaga bi tebi Aisaga igini Yagabanagabi Yagaba igini homberia (12) henerunagabi bi te gilibu nga. Yagabanaga mini mende Isaraele winigo ai Isaraele hameigini áyu homberia (12) biarunaga aguanali ka. Bi te dewa luore Yagaba igini Yosebenaga garealo nga. Be hobane ogoniha howa Isaraele wali agali Iyibi dindiha pu henedagoni ogodagua bialu pu hene lalu mo walia halu gilibu nga.

Wali agali dewalime ogoale bini lalubi bi marubi ogodagua lene lowabi gilibu wigi bidago ainde uruni arianaga lalu dege bi dunini lo ngago Ngode Datagaliwabehanda mbirale bibahende binirunaga nga. Pigane howa ibugua wabiniru bayale dege wabu helearia mani howa wali agalirume mana ko wiaru tongo hinalu bini. Noanaga bi te ledagoaha Noa ibu hangu agali tigabi heagola Ngode Datagaliwabehanda ibu ani dabalul helowa hene. Mani howa ibugua Abarahama dabalul ibuhondo lamialu, Ina í mo bayale howa biamogo bialu í waneigini aguanerubi biamogo biaabo holebero, lene. Mbugu ogo ibugua Ngode Datagaliwabe ibunibi wali agali kamarunaga abaore kago howa wali agali mana ko biaga karu pani mialu mana tigabi bayale ngaru bialu ibuni andaneha haga karu ibugua dara halu bayale helo biamogo bialu haga kagoni lalu gilibu nga. Bi dunini mbira mbuga ogoaha ledagome mo walia kago wali agali bamba henerume mini mbiraore hongohu wu howa yu tiga bialu henedagua wali agali áyu kamarumebi nde bi te ogoni daga lowa tale bialu o binidarunidagua yu tiga bialu mini mbiraore hongo howa wu holene nga lalu mo walia ka.

#### **Bulu бага бува кuni gilibu ngago**

*1.1-2.25*

Piganengi Ngode Datagaliwabe ibugua bibahende wabinigo *3.1-24*

Ko bulenebi tandaga nolenebi anda ibinigo *4.1-5.32*

Adama howa hama ibalu Noa henego *6.1-10.32*

Noa howa iba li ibinigo *11.1-9*

Babele anda bima iraga helo bialu henego *11.10-32*

Seme howa hama ibalu Abarama henego *12.1-35.29*

Abarahama Aisaga Yagaba imaru henego *36.1-43*

Iso ibu damene hama ibinigo *37.1-45.28*

Yosebe ibu hamenerubi henego 46.1-50.26  
Yagaba ibu damene heba Iyibi dindi penego

*Ngode Datagaliwabehanda bibahendeore wabiai henego ogo*

<sup>1</sup> Bamba piganengiore Ngode Datagaliwabehanda dindi haribi wabialu uruni karu ngarubi bibahendeore wabiai hene.✧ <sup>2</sup> Anigo dindini áyu ngagobi ndo mbiraleru nahe tara mbira wini. Aruma holeneme iba timbuni bereago dambi haiho wiagola Ngode Datagaliwabenaga Dinini ibu ibani yuluyu pu íbu bialu hene. <sup>3</sup> Ai Ngode Datagaliwabehanda lalu, Wá ha layagola wá hene.✧ <sup>4</sup> Wá hayago hondowa Ngode Datagaliwabe ibugua bayaleoreyane hendene. Ani hondowa aruma holene wá holenela mo tuwia hene. <sup>5</sup> Ani buwa aruma hayago mbiraga lalu wá hayago horo lalu mini wini. Mbiraga piai halu ega bi layagola horo mbira pigane ogoni hene.

<sup>6-7</sup> Mani Ngode Datagaliwabehanda lalu, Iba halu kirani berelo tubari mbira íbu ha layagola tubari ogoni hene. Ibugua iba hari daligaha biralu dindihabi berelo lowa tubari ogoni wini.✧ <sup>8</sup> Ani buwa hanuni tubari wiyadagoni hari mini wini. Mbiraga piai halu ega bi layagola horo mende ogoni hene. <sup>9</sup> Ani heagola mani Ngode Datagaliwabehanda lalu, Dindi yobi pani helo iba dindiha bedamiruni mbiraoreha hangu birumogo bidaba, lene. Ani layagola dindi yobi pani hene. <sup>10</sup> Dindi yobi pani hayago Ngode Datagaliwabehanda dindi mini wini. Ani bialu iba mbiraoreha birumogo biyagola ibugua iba solowara mini wini. Ani buwa Ngode Datagaliwabeibunime o biyaruni bibahende bayaleoreyane hendene. <sup>11</sup> Ani hondowa ibugua lalu, Ai dindini ira dataniru tomo nolene alerubi bibahende anda hai ha, layagola <sup>12</sup> bibahende ira datani tomo nolene alerubi anda hai hene. Ngode Datagaliwabe ibugua mbirale uruni bibahende ani anda hai hayago bayaleoreyane hendene. <sup>13</sup> Mbiraga piai halu ega bi layagola horo tebone ogoni hene.

<sup>14</sup> Mani howa Ngode Datagaliwabe ibugua lalu, Harini wá holene aleru hadaba, lene. Ani lowa ibugua mbi horola tu wuleneru horo malirunaga pongo yuleneru wigi bilonaga helene. <sup>15</sup> Ani bialu nde harini howa wá haragome dindiha wá hadali helobi ani hadaba layagola wá holene ale harini hene. <sup>16</sup> Ibugua wá holene timbuni kira harini helene. Horongi wá timbuni hondo helonaga ni helalu mbiraga wá emene hondo helonaga ege helowa yapibiyarubi hela dege bini. <sup>17-18</sup> Uruni bibahande tigua harini howa dindiha wá hadali helonaga Ngode Datagaliwabehanda helene. Ani helowa horongibi mbiragabi wá haame helonaga horo mbila mo tu wia hene. Ibugua uruni bibahende ani hai heagola bayaleoreyane hendene. <sup>19</sup> Mbiraga piai halu ega bi layagola horo mane ogoni hene.

<sup>20</sup> Mani Ngode Datagaliwabehanda lalu, Ai iba solowaraha buhe lagaru bibahende birai helo. Ani bialu egaru harini yagalo yu ibaga bulene biralu bilo, lene. <sup>21</sup> Ani lowa ibugua, Iba wena timbuniru nogombi timbunirubi buhe laga emene marubi bibahende iba solowaraha biralu egarubi nde yagalo yu ibaga bule biradaba, layadagua birai hayago Ngode Datagaliwabehanda bayaleoreyane hendene. <sup>22</sup> Ani bereagola ibugua ti mo hongo halu lalu, Ibaha biraga bedamiru tigua hono dame bialu ibaha biru tolalimu. Egaru tiguabi nde dindi bibahende ega birai hole hono dame bialu biralimu, lene. <sup>23</sup> Mbiraga piai halu ega bi layagola horo dauni ogoni hene.

<sup>24</sup> Maha Ngode Datagaliwabehanda lalu, Ai dindiha howa buhewi tara tara dewaore birulene nga. Buhewi uruni andaga hinu holenebi tayandaha minana birulenerubi bibahende emene timbunibi birai hadaba, layagola ani birai hene. <sup>25</sup> Ibugua buhewi andagaha hinu holenerubi tayandaha gabua yamo minana birulenebi bibahende hadaba layadagua naina íbu hai heagola ibuni bayaleoreyane hendene.

<sup>26</sup> Lone mani Ngode Datagaliwabe ibugua lalu, Áyu inane ale helonaga wali agali wabimiya. Libugua buhewi tara tara irabuha bedarubi andagani hinini bedarubi ibaha wena bedarubi dindi bibahendebi handaya ho helo wali agalila wabu helamiya, lene. ✧ <sup>27</sup> Ani lowa Ngode Datagaliwabehanda wali agali wabu heleagola libubi ibuni ale dege ona hene. Ibugua walibi agalibi wabu helene. ✧ ✧ <sup>28</sup> Ani hebigola Ngode Datagaliwabehanda libu mo hongo halu bi bayale mbira ogodagua lamini. Ibugua lalu, Dindi bibahende ngaruha wali agali hai howa dindini ngaru baya hangu handaya ho hai helo waneigini hono wialu halibu. Ina ega bedaru ibaha wena bedarubi dindini buhewi timbuni emene bedarubi uruni bibahende libugua haru hai halibulo ngerogoni. <sup>29</sup> Libu nalibulo ira lini daganeru tani lini daganeru ina libu ngerogo tomo uruni nalu halibu. <sup>30</sup> Anigo ai nogo egarubi buhewi tara tara bedaru ti datani yuni bu karuni nalu helo merogoni, lene. Ai henene Ngode Datagaliwabehanda layagodagua aniore bini. <sup>31</sup> Ibumime handalu hearia mbirale bibahende bayaleoreyane hendene. Mbiraga piyai halu ega bi layagola ogoni horo waragane hene.

## 2

<sup>1</sup> Ogonidagua bialu Ngode Datagaliwabehanda dindi haribi bibahende uruniha karu ngarubi wabiai hene. <sup>2</sup> Horo kane hayagola ibunaga biabe bibahendeore bu maro biruyane hondowa horo kaneni ibuni halo hene. ✧ ✧ <sup>3</sup> Ibumime horo kaneore tara wubagi helowa lalu, Sarere bibahendenaga horo kane ininaga ngelarogoni, lene. <sup>4</sup> Horo marungi mbirale bibahende wabu helalu hayago ai horo kane ogoningi ibuni halo birulene wubagiho ngelene.

### *Ngode Datagaliwabehanda wali agali wabuwa Idene mabuni helene go*

Anduane Homogo Ngode Datagaliwabehanda dindi haribi wabu ngelenego <sup>5</sup> dindi ogoriani dalu ibulene mbira ibugua wabia nabi wiagola ai datani irarubi mbira anda nahaga wini. Dindini tomo hongolene wali agalibi nahe dege wini. <sup>6</sup> Dalu naibagago dindiha howa iba dugu daga haga biagagome dindi bibahendeni iba birai hene.

<sup>7</sup> Mani howa Anduane Homogo Ngode Datagaliwabehanda dindi duguwa dindi ogonime agali mbira wabini. Naina wabu ngelowa ngui harigaha buhe lolene pulaanda hayagola agali biago ibu buhe lolenewi hene. ✧

<sup>8</sup> Ani bialu Anduane Homogo Ngode Datagaliwabe ibugua mabu mbira ni tagira ibiragohayagi Ideneni hengene. Ani buwa ibugua agali wabiyago mabu ogoniha helene. <sup>9</sup> Ani helowa ibugua dindiha howa tomo anda helayagola ira lini baya dagaru mabuni andaho helene. Ira lini daga uruni bibahende bayale dege dege hene. Ai mabu dombeni haabo holene miaga ira mbira hene. Ani bialu ogoriani dege ira mende ko bayalela manda bulenenaga mabu ogoniha hene. ✧

<sup>10</sup> Idene dindini mabu winidagoni mo bayale halu dindi mo gomba helonaga iba mbira mabu ogoniha ibilene. Iba ogoni ibu gene maria pugupugu bini. <sup>11-12</sup> Iba mbirago mini Pisono ogonime dindi Habila pu mabu bialu peda. Dindi Habila ogoniha ngolo dewa wialu ira ibane ngabiaga ale dewa ogoniha halu bida. Ai ege tole dege baya tara mbira muni dewaoreme miaganego ogoni mini kaniliana lagago ogonialebi dindi ogoniha wialu bida. <sup>13</sup> Iba mendego mini Gihono pedago ogonime dindi Kusi mbira ngago pu mabu bialu peda. <sup>14</sup> Iba tebone porago mini Taigirisi ogoni ibu ni tagira ibiragohayagi Asiria dindiha pupe halu peda. Iba manego mini Yuberedisi peda.

<sup>15</sup> Anduane Homogo Ngode Datagaliwabe ibugua agali wabiyago haru puwa Idene mabu biagoha howa handaya ho helo helene. <sup>16</sup> Ani buwa ibugua agali biagohondo lalu, Ira o karuni bibahendenaga lini do naga bibe. <sup>17</sup> Anigo ira mbiraore ko bayalela

✧ **1:26:** Pig 5.1, 9.6, Yob 4.17, Iba 100.3, 1 Ko 11.7, Eb 4.24 ✧ **1:27:** Md 19.4, Mg 10.6 ✧ **1:27:** Pig 5.1-2 ✧ **2:2:** Hi 4.4, 4.10 ✧ **2:2:** Har 20.11 ✧ **2:7:** Pig 3.19, 3.23, Yob 33.4, Iba 103.14, Aga 12.7, Ais 64.8, 1 Ko 15.45 ✧ **2:9:** Mo 2.7, 22.2, 22.14

manda bibelonaga mini dugua haga o kagonaga lini dege do nolene nadonabe. Nanabe laro do nariyagua ini abaleore homolebere, lalu lamini.

<sup>18</sup> Ani lowa Anduane Homogo Ngode Datagaliwabe ibugua lalu, Ainde agali ibuni hangu holene nakarulapedago. Ibu biamogo bilonaga ibuni aleore mbirali wabuliya, lene. <sup>19-20</sup> Ani lowa ibugua dindime nogo egarubi ema bialu piaga bibahende wabiniru agali biago bereagoria tinaga mini hangu hangu wigi bilo haru ibuwa helene. Ani biyagola agali biagome uruni bibahende mini wiai hene. Ema bialu piaga gabua tagiraha biragabi andagaha hinagabi ega bedarubi bibahendeore mini wiai hene. Bibahendenaga mini agali ogoni ibugua winidaruni áyu wiaabo ka. Anigo ema bialu piaga uruni aria mbiraoremehi Adamala bi te lo halu ibu biamogo bulene ibuni ale mbira nahe wini.

<sup>21</sup> Ani heagola Anduane Homogo Ngode Datagaliwabeanda agali biago mo paliahondo helowa agali ogoninaga kuabene kuni mbira gilila muwa dongone heneyadagua hadai bilene. <sup>22</sup> Ani buwa kuabene kuni biagome ibugua wali mbira wabu helowa mani agali biago hearia haru pene. <sup>23</sup> Agali biagome wali biago hondowa bi ogodagua lene. Agua ini aleore ogonida. Inaga kunime ibunaga kuni heneda. Inaga tinginime ibunaga tingini hela howa Ngode Datagaliwabeanda inaga kuabene kunime wabiyadago. Ai ina ibu mini wali wero, lene. <sup>24</sup> Ani binigome mana ogobi winigo ngagoni. Agali ibugua ibu aba aiya helalu ibu onela mandagi howa libu ho mbiraore holebira lenego nga.\*

<sup>25</sup> Wali agali libu hura dambale payaburu nabi howa libu taga nahaga hene.

### 3

#### *Wali agalime Ngode Datagaliwabenaga bi mo wahenego ogo*

<sup>1</sup> Anduane Homogo Ngode Datagaliwabeanda ema bialu piagaru bibahende wabiai howa berelenego uruni ti puyame ohaga berenegobi mbira naberene. Puya ibugua wali biagohondo ogodagua hale halu lalu, Ngode Datagaliwabeanda mabuha ira lini bibahende dedaruni mbira donabe nale mbauleda, lene.\*

<sup>2</sup> Ani layagola wali biagome ladai bialu lalu, Iyame ira bibahende karunaga lini do nolene karulapego. <sup>3</sup> Ibugua ira mbiraore hangu amu mabu hanuni kagonaga lini dege nado nalibu. Libu homoligo elabi nahalibu laya, lene.

<sup>4</sup> Ani layagola puya biagome ke howa wali biagohondo ladai bialu lalu, Bi ogoni henene ndo. Libu nahomoleberabi. <sup>5</sup> Libugua ira ogoninaga lini do naribiyagua libunaga de ngalalu Ngode Datagaliwabe ibuni ale dege howa ko bayaleru tale bulene miniha tagira ibai holebira ndobe. Anidagua bulebirago manda buwa Ngode Datagaliwabeanda libu ira lini ogoni nadonalibu layada, lene.

<sup>6</sup> Ani layagola wali biagome ira ogoninaga lini bayaleore nolene karulape dewa dearia hondowa ibu mini dewa wialu hene. Aniore buwa wali biagome manda bialu, Ina ira lini ogoni do nowa miniru dingidangialeore biraruyagua karulapedago manda bini. Ani manda buwa wali biagome ira ogoninaga lini mbira do nalu maru ibu agalini nelu miyagola agali ibubi nene. <sup>7</sup> Nai howa libunaga de ngala hayagola handalu hebira libu tibabe haribayane hendene. Ani hondowa libugua ira yuni mbalape lebumaga howa aga biagadagua buwa hene.

<sup>8</sup> Ani bu hebira alendo hayagola Anduane Homogo Ngode Datagaliwabe uyu mabuha ibagabu hayuago hale halu libu irabu teha puwa ha do hene. <sup>9</sup> Ani hebira Anduane Homogo Ngode Datagaliwabe ibugua agali biago olowa lalu, í agoha kebe, lene.

<sup>10</sup> Ani layagola agali biago ibugua ladai bialu lalu, í mabuha ibayuago hale howa i tibabe haruyagola gi howa ogoha ha do ko, lene.

\* **2:24:** Md 19.5, Mg 10.7-8, 1 Ko 6.16, Eb 5.31    \* **3:1:** Mo 12.9, 20.2



<sup>11</sup> Ani layagola Ngode Datagaliwabehanda ibuhondo hale halu lalu, Í tibabe haruda lowa agua handaribe. Í ani kegoni lalu langiyadago aiwabe. Ira lini nadonabe larugo donaribe, lene.

<sup>12</sup> Ani layagola agali biago ibugua ladai bialu lalu, Ína wali ìni ale dege ìla holobaya ngirigome ira lini ogoni do ngiyagola naru, lene. <sup>13</sup> Ani layagola Anduane Homogo Ngode Datagaliwabehanda wali biagohondo lalu, Ína ogoni biridago aginagabe, layagola wali biago ibugua ladai bialu lalu, Puyame ohowa nolenege do na layagola ìna ira ogoninaga lini do naru, lene.✧

*Ngode Datagaliwabehanda wali agalibi puya biagobi tihondo bi hongohe lenego ogo*

<sup>14</sup> Anduane Homogo Ngode Datagaliwabehanda puya biagohondo lalu, Áyu ìna ì ha halu mo ko howa bi hongoheore laro. Genda timbuniore ìna yulebere. Genda ema bialu piaga maru bedarume yulebiraru emene lowa ìnaga genda timbuni bolanguahe yulebere. Ai áyu ogoni howa ì tombeme pialu dindi himu abalu ngaru dugu naga bima piaga birulebere. <sup>15</sup> ìna ì walìla mo waitigi helowa ibunaga aguanene ìnaga aguaneneru baba waitigi haabo holebira. Wali aguanene mbiru ibugua ìnaga haguane tagada hangeda haragola ìna ibunaga ge ayuendeni hayulebere, lalu lene.✧

<sup>16</sup> Wali biagohondobi nde Ngode Datagaliwabehanda ogodagua lalu, Ai ìna wali gali bere biruwa ndelaheore handalu birabelo mo ngero. Ani biruwa nde waneigini taba hanarengi tandaga timbuniore habe. Anigo uruni embeda howa ìna ì agalini hame lalu biraabo howa ibu andaneha birulebere, lene.

<sup>17</sup> Ani lowa Ngode Datagaliwabe ibugua Adamahondo ogodagua lalu, ìna ì onenaga bi hale howa ira lini nadonabe larugo do naridago. Anidagua biridagonaga ìna tomo bayuwa anda hai nahelo dindi ogo mo ko harogoni. Ani berogola tomo karulape anda helonaga horo bibahendengi erekui biabe biaabo holebere.✧ <sup>18-19</sup> Tomo hangaregola mamunali aniheru datani ko bu karu ì mabuha anda holebira. Ani biragola ìna tomo bayale mbira hongowa bialu nole lo manda buwa hanga dege bialu keria poboyogo giligalalo howa hangalu holebere. Biabe ndelahe dege bialu kene ì homalu ìna ì dindime wabirugo ai lone dindiha dai beregola ìnaga tingini dindi hodaì bulebira, lene.

<sup>20</sup> Adama ibugua ibu one wali agali mani dewa holebirarunaga aiya birulebirago manda buwa ibu mini Iba wini. <sup>21</sup> Mani howa Anduane Homogo Ngode Datagaliwabe ibugua libunaga aga bilo nogo dongoneme wabu miyagola libu ogoni karulo hene.

*Ngode Datagaliwabe ibugua Iba Adamala Idene mabuha howa bo batagi henego ogo*

<sup>22</sup> Mani Anduane Homogo Ngode Datagaliwabehanda lalu, Ai wali agalime ko bayalela manda bialu ìna ale dege hayadago. Anigo iname libu haabobo holene miaga ira kagoria nahelamiya. Libugua ira ogoninaga linibi do nowa nahome haabobo holigo, lene.✧ <sup>23</sup> Ani lowa Ngode Datagaliwabe ibugua dindi mbira wali agali biago Idene mabuha howa bo batagi halu dindi ibuni wabiyagoha biabe bialu tomoru hangalu helo pelene. Ani biyagola wali agali libugua dindi tombalu biabe bialu tomo hongolene wini. <sup>24</sup> Ibugua wali agali talia tagi howa lone dai buligonaga dahuliyali hongoherrume Idene mabunaga gibuni ni tagira ibiragohayagi mamage helene. Ani buwa wai biagane ayu tibu ne gadele mbirani ira hungu bialu hego ogonime mabu bibahendeha mamage ibaga bialu helo helene. Wali agali haabobo holene miaga ira ogoni kagoria dai bulilono dahuliyali o biarubi ayu tibu ne gadele biagobi mabu ogoniha mamage haabo helene.

## 4

*Keni Abelelame Anduane Homogohondo mbirale lomabu minigo ogo*

<sup>1</sup> Adamahanda ibu onela mandagi hebigola wali ibu gali bere berene. Ani biralu ibugua igiri mbira taba hanayagola Adamahanda lalu, Anduane Homogohanda *i* bi-amogo bialu igiri mbira ngiya, lowa igiri gali biago mini Keni wini. <sup>2</sup> Mani Keni hamene Abele taba henene. Ai libu anda howa Keni ibu mabuha tomo hangaga halu Abele ibu nogo sibi hinaga hene. <sup>3</sup> Horo mbirungi Keni ibugua ibu mabuni tomo wiaru maru bu yalu puwa Anduane Homogohondo lomabu mini. <sup>4</sup> Ani biyagola Abele ibubi nde Anduane Homogohondo mbirale bo lomabu mule nogo sibi hungubaluaore habahe nogo angibuni piganeme igini wiyago ogoniore haru halu puwa bo delene. Ani biyagola Abele ibugua nogo sibi bo lomabu miyago handalu Anduane Homogo ibu turu hene.✧  
<sup>5</sup> Kenihanda tomo Anduane Homogohondo bu lomabu miyago turu nahe hene. Ani biyagola Keni ibugua keba timbuni howa ngui higi bu hene. <sup>6</sup> Ani bu heagola Anduane Homogohanda Kenihondo hale halu lalu, *í* keba howa ngui higi bu kegoni aginaga. <sup>7</sup> *Í*na mana tigabi bulene ngadagua bidele nde *ina* ogoni karulape birida larogola *ini* turuho kelego. Ai *ina* mana ko ngaruni biridago kome *í* mo ko hole ka. Mana kome *í* bope halu wayali hole hame lalu kago ai *inabi* ibu bope halu wayali hole habe lene.

<sup>8</sup> Mani howa Kenihanda ibu hamene Abelehondo lalu, Ainde ibaga bialu mba, lene. Ani puwa Kenihanda ibu hamene Abele bo homelene.✧

<sup>9</sup> Ani bu hearia Anduane Homogohanda Kenihondo hale halu lalu, *í* hamene Abele agoha kabe, layagola Keni ibugua lalu, *I* tobara. Agua biya *ina* manda beregola *i* hamene haru haga *i* harudabe, lene.

<sup>10</sup> Ani layagola Anduane Homogohanda Kenihondo ogodagua lalu, *Í*na mana ko ogoni aginaga biribe. *í* hamenenaga darama dindini wiagome *ihondo* agali ogoni pani mia lalu dugu biyago hale harugo.✧ <sup>11</sup> *Á*yu bi hongohe mbira *ihondo* ogodagua laro. Ai *í* hamene balu homelarigonaga darama dindi ogome nelarigoni ndobe. Ani biridagonaga *ina* dindi ogonaga tomo anda holonego mo waharogola *ina* tomo hangalu nanolebere. <sup>12</sup> *Í*na tomo hangariyagua dindime tomo bayale anda helo biamogo nabulebira. Ani biragola *inaga* dindi anda henene nga lene mbira nawi howa *ini* tiga biragoha palia edede biaga holebere, lalu lamini.

<sup>13</sup> Keni ibugua bi ogoni hale howa Anduane Homogohondo ogodagua ladai bialu lalu, Genda *ina* *á*yu *i* mo ngeregoni timbuoredago. <sup>14</sup> Mabu e nahangabe lalu *ini* kegoria nahe dindi kaundiaha hole pobe larida. Ani bialu *inaga* dindi anda henene mbira nawi howa *ini* tiga biragoha palia edede biaga agali habe larida. Ani laridago nde agali mbiragome *i* ngola hayagua *i* homoliya bo waholobadago. Aiore gi ho kogoni, lene.

<sup>15</sup> Ani layagola Anduane Homogohanda Kenihondo lalu, *Í*na gi nahabe. Agali mbi-rame *í* bayagua heneneore *ina* genda timbuniore mo mialu o bayagonaga pani agali karia homelo bolene wulebira, lene. Ani lowa Anduane Homogo ibugua agali mbirame Keni ngola howa nabelonaga manane mbira Keninaga tinginini helene. <sup>16</sup> Ani biya handala Keni ibugua Anduane Homogo helalu dindi mbira mini Ibagadegebiaga Idene mabunaga ni tagira ibiragohayagi winigoha hole pene.

*Keni igini aguane aguaneneru hama ibinigo ogo*

<sup>17</sup> Keni ibu onela mandagi howa wali ibu gali bere berene. Ani biruwa ibugua igiri mbira taba hanayagola igiri ogoni mini Inogo wini. Mani howa Keni ibugua tano mbira bu winigo ogoni mini ibu igini Inogonaga mini wialu Inogo dege lene. <sup>18</sup> Mani howa Inogo igini Irada hene. Irada igini Mehuyale hene. Mehuyale igini Medusale hene. Medusale igini Lamege hene. <sup>19</sup> Lamege ibu wali kira dabu binigo. Mbiragonaga mini Ada biralu mendego ibu mini Sila berene. <sup>20</sup> Ada ibu igini Yabala taba henene. Yabala ogoni ibu balai andaru bia howa nogo bulumaga hinaga karunaga aguanene hene.

✧ 4:4: Hi 11.4 ✧ 4:8: Md 23.35, Lg 11.51, 1 Yo 3.12 ✧ 4:10: Hi 12.24



<sup>21</sup> Yabala ibu hamene Yubala henego ogoni ibu ngida gawa hiliyularu laga karunaga aguanene hene. <sup>22</sup> Mani howa Sila ibugua nde igiri mbira taba honowa ibu mini Tubala Keni wini. Igiri ogoni ibugua ege tole boronosi aeanerume mbirale wabiaga hene. Tubala Keni ibu mbalini mbira berenego ogoni ibu mini Nama berene.

<sup>23</sup> Horo mbirungi Lamegehanda ibu one kira biago labohondo ogodagua lene.

Ada Silala-o libuore Lamege i oneore bedabigonigo

áyu ina bilarogoore baya hangu hale hadaba.

Agali mbirame i balu hearia ina ibu bo tongolo milaru.

Igiri daliahe mbirame i toa balu hearia ina ibu bo tongolo milaru.

<sup>24</sup> Ai agali mbirame Keni homelo bayagonaga pani

agali karia homelo bolene nga manda biyagua

agali mbirame i bayagua

ogoninaga pani agali ngui laai bo waholene wulebira,

lalu lene.

### *Iba ibugua igiri tebone taba henene go*

<sup>25</sup> Mani howa Adama ibu onela mandagi howa wali ibu gali bere berene. Ani biruwa ibugua igiri tebone taba henene. Taba honowa wali biagome lalu, Kenihanda ibu hamene Abele bo wahayagonaga aribia halu Ngode Datagaliwabehanda igiri mbira ngiyago. Ai Abele holene winigoria igiri ogoni ibu ho aribia holebirago, lowaibunaga mini Sede wini. <sup>26</sup> Mani Sede ibu igini mbira hayagola ogoni ibu mini Inoso wini. Ogoningi howa wali agalime Ngode Datagaliwabe mitangi bialu lotu lalu howaibunaga mini mende Anduane Homogo lalu lotu lalu hene.

## 5

### *Adama waneigini aguaneneru henego go*

<sup>1</sup> Adama waneigini aguaneneru hama ibinigo uru. Ngode Datagaliwabe ibugua wali agali wabialu ibuni aleore helo wabini. <sup>2</sup> Ibugua walibi agalibi wabu helowa mo bayale holenaga bi lamialu libu mini wali agalila lene. <sup>3</sup> Mani Adama ibu dindini heagolaibunaga mali handari mbirani pira tebira (130) hayagola ibu oneme igiri mbira Adama ibuni ale taba hanayagola ibugua igiri ogoni mini Sede wini. <sup>4</sup> Ani wialu mani Adama ibu waneigini maru hono wigi bialu heane mali handari halira (800) pene. <sup>5</sup> Ibu dindini heane dege mali hama ibinigo lamaga howa handari dirani pira tebira (930) hayagola Adama ibu homene.

<sup>6</sup> Adama igini Sede ibu mali handari mbirani duria (105) heangi ibu oneme igiri mbira mini Inoso taba hanayagola Sede ibu igiri ogoninaga aba hene. <sup>7</sup> Ani howa Sede ibu waneigini marubi heagolaibunaga mali handari halirani karia (807) hene. <sup>8</sup> Ani howa nde Sede ibu mali handari dirani homberia (912) bibahende halu homene.

<sup>9</sup> Ainde Inoso ibu mali hama ibinigo pira dira (90) hayagola ibu igini Kenana hene. <sup>10</sup> Mani Inoso ibu waneigini marubi heagola mali handari halirani pira mbirani duria (815) hene. <sup>11</sup> Inoso ibu dindini heane dege mali bibahende handari dirani duria (905) halu homene.

<sup>12</sup> Kenana ibu mali pira karia (70) hayagola ibu igini mini Mahalalele hene. <sup>13</sup> Ani howa mani ibu waneigini marubi halu ibu mali handari halirani pira maria (840) hene. <sup>14</sup> Kenana ibu dindini heane dege mali handari dirani huniane pira mbira (910) hayagola ibu homene.

<sup>15</sup> Mahalalele ibu mali pira waragariani duria (65) hayagola ibu igiri Yarede aba hene.

<sup>16</sup> Mahalalele ibu waneigini marubi heagola mali handari halirani pira tebira (830) ha dege bini. <sup>17</sup> Ani howa Mahalalele ibu mali handari halirani pira dirani huniane duria (895) hayagola homene.

<sup>18</sup> Anigo nde Yarede ibu mali handari mbirani pira waragariani kira (162) hayagola ibu igini mbira Inogo hene. <sup>19</sup> Yarede ibu waneigini marubi heagola mali handari halira (800) hene. <sup>20</sup> Ibu mali henego bibahende lamaga halu handari dirani pira waragariani kira (962) hayagola ibu homene.

<sup>21</sup> Inogo ibu mali pira waragariani duria (65) hayagola ibu igiri mbira Medusela henego aba hene. <sup>22</sup> Inogo ibu Ngode Datagaliwabela nenegeore ho hene. Ani henego ibu waneigini marubi heagola mali handari tebira (300) hene. <sup>23</sup> Inogo ibu mali bibahende henego daga lamaga halu handari tebirani pira waragariani duria (365) howa <sup>24</sup> Ngode Datagaliwabehanda ibu mo yu ereba hayagola wali agalime ibu lone handa walia nahene. Ibu abale dindini hayangi Ngode Datagaliwabela nenege haaboore henegome ani bini.\*

<sup>25</sup> Medusela ibu mali handari mbirani pira halirani karia (187) hayagola ibu igini mbira mini Lamege hene. <sup>26</sup> Medusela ibu waneigini marubi heagola mali handari kariani pira halirani kira (782) ha dege bini. <sup>27</sup> Ani henego ai ibu dindini heane dege mali daga lamaga halu handari dirani pira waragariani dira (969) halu homene.

<sup>28</sup> Medusela igini Lamege ibu mali handari mbirani pira halirani kira (182) hayagola ibu igiri mbira aba hene. <sup>29</sup> Ibu igini ogoni mini Noa wuwa ibugua lalu, Bamba Anduane Homogohanda bi hongohe mbira lo wialu lalu, Dindi ogo mo ko holebero, layago ai dindi ogoniore mo ko hene ngagoni. Iname tomo bayaleore anda helo biabe erekuibi bialu haabo harimagoni. Ainde igiri ogoni ibugua dindini tomo mo anda helonaga malia howa emene tigimbira hanguni halo holeberema, lene.\*

<sup>30</sup> Lamege ibu waneigini marubi heagola mali handari duriani pira dirani duria (595) hene. <sup>31</sup> Ani henego ai Lamege ibu dindini heane dege mali bibahende daga lamaga halu handari kariani pira kariani huniane karia (777) halu ibu homene.

<sup>32</sup> Noa ibu mali handari duria (500) hayagola howa ibu igini tebira henego mini Seme Hama Yabede imaru hene.

## 6

### *Wali agalime mana ko binigo ogo*

<sup>1</sup> Dindini wali agali dewaore ho dame bialu uruningi wandari dewa berene. <sup>2</sup> Dahuliyali tara tigua handalu hemiria wandari baya birama pearia hendene. Ani hondowa tini hame layadagua haru pugu buwa dabu bigi bini.\*

<sup>3</sup> Ani biyagola Anduane Homogohanda lalu, Inaga dinini wali agali uruni tiha helo mialu holene tiha pulanda harugo. Ai nde ti dindi tawe hangu haragonidago wahalu inaga dinini tiha haho wia nabilonaga tinaga mali mo tubagi halu handari mbirani pira kira (120) hangu halu homelo, lene. <sup>4</sup> Uruningi howabi maha howabi agali ndo timbu gibiru dindini haga bini. Agali timbuni uruni wandari berearume dahuliyali hearu baba kayu yuwa hono wini. Agali timbuni uruni ti mini lene howa tigua biabe dewa tara tara wiaru biai haga hene.\*

<sup>5</sup> Anduane Homogo ibugua handalu hearia wali agali dindi bibahendehe hearume mana koore wiaru bialu howa tigua mana ko ngubi wiaru hangu bule manda bu hearia hendene.\*\* <sup>6</sup> Ani biyago hondowa ibugua lo mitangi bialu lalu, Ainde wali agali uruni nawabidole nde bayale ngaleda, lowa Anduane Homogohanda ibu miniha genda ho hene.\* <sup>7</sup> Genda howa ibugua lalu, Wali agali uruni inime wabu helene biarunidago ai dindi bibahendehe wali agali karu bibahendeore bo wahai holiya. Ega

\* 5:24: Hi 11.5, Yu 14 \* 5:29: Noa mini ogoni Hiburu bi lalu Ereku Dogolo Holene laga wini. \* 6:2: Dahuliyali tara gilibu ngago irane wa naleore. Hiburu bi gilibu ngago Ngode Datagaliwabenaga iginiru gilibu nga. Marume Adama igini Sedenaga aguaneru tigua Adama igini wahene Keninaga waneru dimagoli haga bini mitangi biaga. Iba 82.6, Ais 14.12-15, Esg 28, 2 Pe 2.4 handabe. \* 6:4: Dag 13.33 \* 6:5: Pig 8.21, Min 6.18, Md 15.19 \* 6:5: Md 24.37, Lg 17.26, 1 Pi 3.20 \* 6:6: Iba 14.1-3

tia nogobi bibahende ema bialu piaga irabuha biraga gabua bedarubi andagaha wali agalime hinaga karubi bibahende inime wabirugo nabidole nde bayale kaleda. Ai uruni bibahendeore bo hilo wahai holiya, lene. <sup>8</sup> Ani la lowa Anduane Homogo ibugua Noahondo dege turuho hene.

### *Noahanda iba talu wabinigo ogo*

<sup>9-10</sup> Noa ibu igini tebira henego urunime tinaga mini Seme Hama Yabede imaru hene. Noa ibu agali bayale howa Ngode Datagaliwabenaga deni ibu tigabiore howa ibuni Ngode Datagaliwabenaga nenegeore hene. <sup>11</sup> Anigo Anduane Homogo ibugua handalu hearia dindi bibahendeni wai hangu bigibigi bialu mana ko timbuni dewaore biyaria hendene. <sup>12</sup> Ibugua dindi bibahendeha mana ko bulene timbuni tagira ibalu wali agali bayale tigabi dindi mbirani heane nahende. Bibahendeme mana ko wiaru hangu bule de buyu hearia hendene.

<sup>13</sup> Ngode Datagaliwabehanda Noahondo ogodagua lalu, Dindi bibahendeni wali agalime mine howa tini bagabaga bialu wai dege bialu karuni mangabago ai bo wahai holebero. Wali agali dindini yu wahene mbira naholebira. <sup>14</sup> Anigo ina irabuha ira bayaleoreru handalu dibu pelowa iba talu mbira wabibe. Iba talu ogoniha hobane maru helalu tamuha tagiraha howabi diri nawilo wagayame ndibu lelo para hai habe. <sup>15</sup> Iba talu ogoni ogodagua wabibe. Luninaga mida magi handari mbirani pira tebira (130) wialu aranenaga mida magi pira kirani kira (22) wibe. Bima iraga hole mida magi pira mbirani tebira (13) wibe. <sup>16</sup> Iba talunaga danginihayagi bule howa dangini ibu haila bu ndibu nale hai danginila hengeneha henge wa anda ibilonaga ngelabe. Tamuha hobane tebira helo. Hobane mbira dindiha mendego obeneni tebonego danginila tubariha helabe. Ani buwa panga haraba mbira abenehayagi dugu wibe. <sup>17</sup> Ani bidegola ina dalu timbuni ibilowa dindini ema bialu piagaru bibahende bo wahai hole iba li timbuni ibilolebero. Ani berogola dindini karubi ngarubi bibahende homaiore holebira. <sup>18</sup> Anigo ila dege habo nalolene bi lo werogo. I one waneiginibi i igini ti onerubi ti bibahende ini heba iba taluha anda puwa biralimu. <sup>19</sup> Ai ema bialu piaga dameneru mbira mbira angibuni taubi kira kira haru halu tini heba iba taluha anda pilimu. <sup>20</sup> Ega tia bedarubi nogo damene bibahendebi ema bialu piagaru bibahendeore angibuni wangabela kira dege dege tini heba homa nabi berelo iba taluha haru anda pilimu. <sup>21</sup> Ani buwa tininaga tomo nolenebi ema bialu piaga uruninaga tomo karulape nalu berelobi tini nagane alego iba taluha bu ngelalimu, lalu lamini. <sup>22</sup> Ani layagola Noa ibugua Ngode Datagaliwabehanda lamiyadagua bibahende biai hene. <sup>\*</sup>

## 7

### *Iba li timbuni ibinigo ogo*

<sup>1</sup> Mani Anduane Homogohanda Noahondo lalu, i hangu wali agali dindini karubi ndo tigabi harigoni handarugo. Ai i one waneiginirubi iba taluha anda piyai halimu. <sup>2</sup> Ani bialu ema bialu piaga inaga deni bayale karu arianaga angibuni karia wangabe karia lowa haru anda pilimu. Anigo ema bialu piaga inaga deni bayale ndo karu angibuni wangabebi mbiraore dege dege haru anda pobe. <sup>3</sup> Anidagua dege ega bedarubi nde angibuni wangabebi karia dege dege haru anda poregola ti homa nabi biruwa mani dindini bira aribia holene tigua hono wilo ani bibe. <sup>4</sup> Horo karu howa dalu timbuniore mbiraga horombebi lamaga halu pira mariani (40) dalu hangu ibiloleberogo iba dalu timbuni ogoni mbirale bibahende inime wabiruruni iba lime nai helolebero, lene. <sup>5</sup> Ani layagola Noa ibugua Anduane Homogohanda bibe layadagua biai hene.

<sup>\*</sup> **6:9-10:** Pig 7.1, Ese 14.14, 2 Pi 2.5    <sup>\*</sup> **6:11:** Ese 8.17, Hab 2.8, 2.17, Lm 3.10-19    <sup>\*</sup> **6:22:** Hi 11.7    <sup>\*</sup> **7:1:** Pig 6.8, Ese 14.14, 2 Pi 2.5

<sup>6</sup> Noa ibunaga mali hama ibinigo handari waragaria (600) hayagola dindini iba li timbuni ogoni ibini. <sup>7</sup> Noa ibu onebi libu iginiru tinaga onerubi bibahende iba li timbuni ibiragome nayilo abale iba taluha anda piai hene.\* <sup>8</sup> Ani bialu ema bialu piaga Ngode Datagaliwabenaga deni bayale hearu ariabi ibunaga deni ko hearu ariabi angibuni wangabela kira dege dege minu baanda <sup>9</sup> halu ega berearubi ema bialu piaga bibahendeorebi minu baanda haiore howa Noa ibuni heba Ngode Datagaliwabehanda bibe layadagua iba taluha anda pu berene. <sup>10</sup> Horo karu biago piai hayagola dindini iba li timbuni ibiyagome dindi bibahende namu lama iraga hene.

<sup>11</sup> Noa ibunaga mali handari waragaria (600) hayagola howa mali ogoninaga dege ege mendegonaga horo pira mbirani karia (17) hayagola horo ogoningi dindi andaneha panga dugua hayagola iba timbuni bereago peago pu daga hene. Ani bialu iba hari daligaha bereago panga dugua hayagola iba timbuni pugulope hene.\* <sup>12</sup> Horo pira mariani (40) mbiraga horombebi dalu ibaho wiaabo hene. <sup>13</sup> Horo pigane dalu ibiyadangi Noabi ibu onebi libu iginu tebirali Seme Hama Yabede imarubi ti onerubi bibahende iba taluha anda piai hene. <sup>14</sup> Ema bialu piaga irabuha biraga emene timbunibi andagaha biraga emene timbunibi bibahendeore Noa ibu damene biaru heba iba taluha anda puwa birai hene. <sup>15-16</sup> Ngode Datagaliwabehanda layadagua ema bialu piaga angibuni wangabela kira dege dege Noa heba iba taluha anda piai hene. Ani bereagola Anduane Homogohanda iba talunaga panga payini.

<sup>17</sup> Dalu iba libi ibu dege bialu heagola horo pira maria (40) hene. Iba biradaga hayagome talu yaraga halu dindi yu wahene. <sup>18</sup> Iba bira timbu howa talu biago ibani yu ibagabu hene. <sup>19</sup> Iba biradaga halu hari bare wiaru namu lai hene. <sup>20</sup> Maniore hayagola iba bira timbuore halu hari bare uruni yu wahai halu bolangua howa ge mandanaga karia birama iraga hene. <sup>21</sup> Ani biyagola ema bialu piaga irabuha biraga emene timbunibi andagaha biraga emene timbunibi ega berearubi wali agali bu hearubi bibahendeore homai hene. <sup>22</sup> Dindini anda holene damene wiaru homaiore hene. <sup>23</sup> Anduane Homogohanda dindini buhewibi anda haga alebi wali agali bibahendeore dindi hangu ngelalu bo hilo wahai henego. Noabi ibu damenerubi ema bialu piaga biarubi ega biarubi bibahende iba taluha anda pu birayaru ti dege iba li timbuni ibiyagome nai nahe tamuha bereagome yo pene.\* <sup>24</sup> Iba biagome nde birama iraga dege halu heane horo handari mbirani pira duria (150) pene.

## 8

### *Iba li hundiinigo ogo*

<sup>1</sup> Ngode Datagaliwabe ibugua Noa halu bibahende iba taluha birayaru mitangi hene. Ani mitangi howa Ngode Datagaliwabehanda puyabu iba bereagoria ibilayagola iba emene birama dalidali bini. <sup>2</sup> Iba dindiha howa dugua daga hayago hundialu daligaha howa pugulope helo panga dugua hene biago payiyagola ai iba birayago hundiama dalini. <sup>3</sup> Iba hundiama dalia dege bialu heane horo handari mbirani pira duria (150) pene. <sup>4</sup> Ani bialu dege howa ege kanegonaga horo pira mbirani karia (17) hayagola iba talu biago hari mbira Ararada dindini weagoria yu paga hene. <sup>5</sup> Iba wene hundiama dalia dege bialu heane ege pinigonaga horo mbira layagola hari wearunaga nene pani hai hene.

<sup>6</sup> Horo pira maria (40) peagola Noa ibugua windo mbira dugua howa <sup>7</sup> ega mbira minu batagi hene. Ega ogoni minu batagi hayagola yagalo yalu pene. Ani puwa lone dai nabi iba hundialu dindi yo biai helo ibu yagaloyu ibaga bialu hene. <sup>8</sup> Ani biyagola Noa ibugua iba hundialu dindi pani hayadabe hondole ega mende mini malibu minu batagi hene. <sup>9</sup> Ani biyagola ega biago ibu birulene henge nawi dindini iba biraho wiagola ibu iba taluha lone dai bini. Ani dai biyagola Noahanda gi yatagi howa ega malibu biago iba

\* 7:7: Md 24.38-39, Lg 17.27    \* 7:11: 2 Pi 3.6    \* 7:23: 1 Pi 3.20, 2 Pi 2.5, 3.6

taluha minu yamini. <sup>10</sup> Ani bialu Noa ibugua horo karia biruwa ega malibu biago lone minu batagi hene. <sup>11</sup> Ega biagome pialu alendo hayagola ira olibenaga yuni gahenge mbira ibunaga neme gilo yalu Noa berearia taluha lone dai bini. Ani biyagola Noa ibugua iba hundiai hayidalo manda bini. <sup>12</sup> Ani manda buwa ibugua horo karia howa ega malibu biago lone minu batagi hene. Ani biyagola ega biago ibu dai nabi puabo hene.

<sup>13</sup> Noa ibunaga mali handari waragariani mbira (601) howa mali ogoninaga ege mbiranaga horo mbira hayagola iba biago wene dege hundialu hene. Noa ibugua iba talu biagonaga dangini mbira gialowa handa tagi hene. Handa amu nana bialu hearia iba wene dege yo bialu hearia hendene. <sup>14</sup> Ai ege mendegonaga horo pira kirani karia (27) hayagola dindi bibahende yobiai hene.

<sup>15-16</sup> Ani biyagola Ngode Datagaliwabehanda Noahondo bi ogodagua lalu, Ai áyu í onebi í iginirubi tinaga onerubi tí bibahende iba taluha howa tagira pudaba. <sup>17</sup> Ega bibahende bedarubi nogo tara tara biarubi bibahende tíni heba haru tagira pilimu. Tigua dindi bibahende ngaruha purogo lalu hono dame bilo, lene. <sup>18</sup> Ani laya handala Noabi ibu one iginirubi ti onerubi ti bibahende iba taluha howa tagira pene. <sup>19</sup> Nogo tararubi egarubi ema bialu piaga bibahendebi ti nde tini aria dege dege piyadagua mandagi wabuni pugupugu bialu iba taluha howa tagira piai hene.

### *Noahanda Anduane Homogohondo mbirale bo lomabu minigo ogo*

<sup>20</sup> Noa ibugua mbirale bo lomabu delaga dabu mbira naina bu helene. Ani bia howa nogo egaru Ngode Datagaliwabenaga deni ko nabi bayale damenerunaga mbira dege dege ibunihondo bo lomabu delole bene. Bowa dabu bia hayagoria lomabu delene. Ani bo lomabu delayagola <sup>21</sup> Anduane Homogohanda loma biagonaga ngaore baya tara dendebiore biyagola ibugua lalu, Wali agalime ko biragonaga mani pani mialu dindi ogo halu mende mo ko naholebero. Wene wandari igiri emene ko howa mana ko bulenela haru anda hagago. Nde wali agalibi ema bialu piaga bedarubi ti halu mende naboleore. ✧ <sup>22</sup> Ai mani tu wigi buwa tomo hongolene henge wialu tomo bulene hengebi wulebira. Ani bialu dindi ogoria ni bayale poboyogobi dolenebi dagarengi holenebi henge wulebira. Dalu ibalu gaea bulene hengebi wia dege bulebira. Dindi ogo mo ko halu ereba nahe ngaha horo uru anidaguaore wiaabobo bu wulebira, lalu Anduane Homogohanda lene.

## 9

### *Ngode Datagaliwabehanda Habo Nalolene bi Noala lo winigo ogo*

<sup>1</sup> Ngode Datagaliwabehanda Noabi ibu iginirubi ti bayale helonaga bi ogodagua lalu, Dindi bibahendeni wali agali palu tolelo tígua waneigini dewa hono wialu halimu. ✧ <sup>2</sup> Nogo tara tara karubi iba wena ega tia bedarubi ema bialu piaga bibahende irabuha gabua biragarubi andagaha hinini bedarubi uruni bibahende tígua handameho halimulo helarogoni. Uruni tigua wali agali hondowa gi halu birulebira. <sup>3</sup> Ai tígua ema bialu piaga dindini biraga bedaru bowa nema bayale andaho ngaru heba tínaga tomo dawa nalu halimulo ina ngero. <sup>4</sup> Mbiraore hangu nanolene ngago ogo. Nogo egaru bowa darama bedaore nanalimu. Darama ogonime dére holene ngiaga tene nga. ✧ <sup>5</sup> Mbiralime wali agali maru balu homelayagua ina ibu biragonaga pani genda timbuniore yu helolebero. Nde ema bialu piaga bedagomebi wali agali mbirago balu homelayagua ina ibuniore bo waholebero. <sup>6</sup> Mbiralime wali agali mbira Ngode Datagaliwabehanda ibuni ale helo wabinigo balu homelayagua wali agali maru karume бага kago ibunibi bo waholene nga, lene. ✧

✧ 8:21: Pig 6.5, Yar 17.9, 2 Ko 2.15, Eb 5.2 ✧ 9:1: Pig 1.28 ✧ 9:4: LBM 7.26-27, 17.10-14, 19.26, Man 12.15-23

✧ 9:6: Pig 1.26, Har 20.13



<sup>7</sup>Ngode Datagaliwabehanda lalu, Dindi bibahendeni tínaga aguanene palu tolelo tígua waneigini dewaore hono wilimu, lene.✧

<sup>8</sup>Ani lowa Ngode Datagaliwabehanda Noabi ibu igini biaruhondobi ogodagua lalu, <sup>9</sup>Áyu howa tínibi tínaga aguanene mani hama polebিরaruhondobi ina habo nalolene bi mbira lo ngero. <sup>10</sup>Ani bialu ema bialu piaga nogo egarubi tia bedarubi ema bialu piaga iba talu biagoha berene tagira ibiyaru bibahendehondo habo nalolene bi mbira lo wialu bulebero. <sup>11</sup>Tí baba habo nalolene bi ogoni ogodagua lo ngelaro. Aiore iba lime ema bialu piagaru lone bo wa naholeore. Iba lime dindi ogobi halu mende namulai naholebiraore laro, lene.✧

<sup>12-13</sup>Ngode Datagaliwabehanda lalu, Ai ina tí bababi ema bialu piaga bedaru bababi habo nalolene bi lo werogo heneneore lowa walia halu ni domo mbira harini helolebero. Ni domo ogonime dindini ngarubi karubi bibahendeore baba habo nalolene bi lo werogoni heneneore lalu walia holene manane ogoni holebira. <sup>14</sup>Ina ginu hagua harini íbu helarogola ni domo ogonibi íbu holebira. <sup>15</sup>Ani íbu kago hondowa ina wali agalibi dére ale ema bialu piagarubi iba lime halu mende nai nahelole lalu habo nalolene bi hongohe lo wirugo lone mitangi bu dai bulebero. <sup>16</sup>Ai ina ni domo naina harini kagola hondowa ina nde wali agalibi ema bialu piaga damenerubi bibahende lone naboleore lalu habo nalolene bi hongohe lo wirugoni mitangiore bulebero, lene. <sup>17</sup>Ani lowa ibugua Noahondo bi ogodagua lamialu, Ni domo ogoni ina dindi bibahendeni ema bialu piagaru heba habo nalolene bi lo wirugoninaga manane ogoni holebira, lene.

*Noahanda ibu igini Hamahondo keba henego ogo*

<sup>18</sup>Noa igini ibuni heba iba taluha biralu tagira ibinidaru ti Seme Hama Yabede imaru hene. Hama ibu Kenana aba hene. <sup>19</sup>Noa igini uruni ti wali agali dindi bibahendeha hama pedarunaga mamali hene.

<sup>20</sup>Noa ibu agali e hangaga howa pu mbira mini gerebi lini dagane mabuha hangaga pigane ibu hene. <sup>21</sup>Ani biaga henego horo mbirungi ibu waini iba hambu na timbu bialu luluyu howa ibuninaga balai anda tamuha agaru golo wahai halu mo koho palu wini. <sup>22</sup>Ani palearia Kenana aba Hama ibugua ibu aba aga nabi tibabe paleago hondowa ibu hamene kirali biago labo lamule pene. <sup>23</sup>Lamiyagola Seme Yabede libugua aga mbira libu aba aga nabi paleago hondoligonaga libuni de gehu yalu tigibebege pialu libu abanaga balai anda ibuni tibabe paleagoha anda puwa agame bu dambi hene. Libu aba tibabe paleago nahende handa taraho yalu dai bini. <sup>24</sup>Ai Noa ibu palenego heyuwa lulu ereba hayagola hale halu hearia ibu igini heyogone biagome aga nabi paleago handaya layagola hale hene. <sup>25</sup>Ani hale howa Noahanda lalu, Kenana ibu genda timbunioreme dambi hene íbu holebira.

Ibuore ibu hamenerunaga garabaya biabe ale biaga holebira.

<sup>26</sup>Semenaga Ngode Datagaliwabe Anduane Homogoibunaga mini yaraga hama.

Kenana ibu Semenaga garabaya biabe ale bia haga holebira.

<sup>27</sup>Yabede waneigini Ngode Datagaliwabehanda mo dewa helo.

Ibunaga aguanene ti Seme waneiginiru heba mandagi helo.

Kenana ibu Yabedenaga garabaya biabe ale biaga dege holebira, lalu Noahanda lene.

<sup>28</sup>Iba li timbuni biago ibini lo howa Noa ibu mali handari tebirani pira duria (350) hene. <sup>29</sup>Ibunaga mali lamaga halu handari dirani pira duria (950) halu nde homene.

**10**

*Noa igini aguaneneru henego ogo*

✧ 9:7: Pig 1.28 ✧ 9:11: Pig 8.21, 9.15, Ais 54.9

<sup>1</sup> Mini ogoha ngaruni Noa igini tebirali Seme Hama Yabede imaru henegonaga waneigini aguaneneru ogodagua hene. Wali agali uruni ti iba li timbuni ibiyago ibalu peaha mani ho aribia hene.

<sup>2</sup> Yabede ibu igini ogodagua hene. Gome Magogo Madai Yabana Tubala Mesege Tirasa imaru ti wali agali maha ha aribia hayarume tinaga mamali mini mo hameigini mini henego wiaabo ka. <sup>3</sup> Ani henego Gome ibunaga aguanene Asagenasa Libada Togama imaru ti dindi uruninaga wali agali hene. <sup>4</sup> Yabana ibunaga aguanene Elisali Sebenali Saibarasali Lodesealiru ti dindi uruni wali agali hene. <sup>5</sup> Wali agali uruni ti áyu unu iba solowara bedago ange angeha paluyu pialu iba dege dombeneha dindi wupe haga bidaruha hearunaga mamali hene. Wali agali uruni ti Yabede aguanene hene. Wali agali uruni ti nde tini dindi wigiwigi binidadagua haga haga bialu tinaga bi lole bi nde tara tara lagalaga biaga hene.

<sup>6</sup> Hama ibu igini henego uru. Kusuali Iyibiali Libiali Kenanali haga biniru ti wali agali maha ha aribia hayarume mini uruni tinaga mamali mo hameigini mini laga bima ibinigo nga. <sup>7</sup> Kusu ibu aguanene Sebali Habilali Sabadali Lamali Sabadegaliru hene. Lama ibu aguanene Seba hameiginibi Dedana hameiginibi howa tinaga dindi minibi ogoni labo dege wini. <sup>8</sup> Kusu ibu igini mbirabi ha dege binigo ibu mini Nimirodo henego ibu dindi bibahendeha agali pari wayali haguane mbira nahe wiangi piganeore ibu hene. <sup>9</sup> Anduane Homogohanda Nimirodo ibuhondo hongo miyagola ibugua nogo gabua ega yáriru ta nabi taya bialu бага hongohe mbira hene. Ani henego mitangi bialu wali agaliru ti mbirame nogo gabua egaru mbira pigane bayagua tigua lalu, Ogoni ibu Anduane Homogohanda Nimirodohondo taya bulenenaga hongo miyadagua ibubi taya bialu holenenaga hongo miyada, laga biaga wini. <sup>10</sup> Nimirodo ibugua dindi handayaho kagotha tano timbuni mini lene maru uru Babilonobi Eregebi Agadabi tano tebira uruni Babilonia dindiha nga. <sup>11</sup> Anigo Nimirodo ibu Babilonia wahalu Asiria dindihayagi puwa ibugua Ninibabi Lehobodiabi Kalabi <sup>12</sup> Lesenebi tano uruni mo heya halu bu helaga bini. Lesene tano ogoni Niniba tanola tano dunini timbuni Kala tanola hengene wiagotha wini.

<sup>13</sup> Iyibinaga aguanene Lidia hameiginirubi Anama hameiginirubi Lehaba hameiginirubi Nabadu hameiginirubi <sup>14</sup> Padarusu hameiginirubi Kasalu hameiginirubi Kiridi hameiginirubi hene. Pilidia wali agali ti Kiridi hameiginime hono winigo Kiridi aguanene hene.

<sup>15</sup> Kenana igini wahene Saidonobi ibu igini mende Hidibi libu wali agali maha ha aribia hayarume mini uruni tinaga mamali mo hameigini mini laga bima ibinigo nga. <sup>16</sup> Yabusu hameiginirubi Amora hameiginirubi Giagasa hameiginirubi <sup>17</sup> Hibi hameiginirubi Aga hameiginirubi Sini hameiginirubi <sup>18</sup> Abada hameiginirubi Semara hameiginirubi Hamada hameiginirubi ti bibahendenaga mamali Kenana ibu hene. Kenanali uruni ti dindi wiagotha pugupugu bialu dindi tara tara wiaruha hai hene. <sup>19</sup> Kenana ibunaga dindi arane timbuni Saidono tano howa wima pialu Gasa tanoha tano mbira mini Gera wiagotha wiairi hene. Mendehayagi wima pialu ni tagira ibiragohayagi Sodomu tano Gomora tanola wiagoria howa wima pialu Adama dindiha wima pialu Seboimi dindi pialu Lasa dindi wiago kawareni wiairi hene. <sup>20</sup> Hameigini uruni ti bibahende Hama aguanene hangu hama ibinigo ti nde tininaga dindi haluni wigiwigi bialu tinaga bi tara tara lagalaga biaga hene.

<sup>21</sup> Seme ibu Yabede hamene wahene howa Hiburuali Ebe aguaneneru bibahendenaga mamali hene. <sup>22</sup> Seme igini uru hene. Elama Asua Abagasada imaru Ludu Arama ti nde wali agali maha ha aribia hayarume mini uruni tinaga mamali mo hameigini mini laga bima ibinigo nga. <sup>23</sup> Arama ibu aguanene urudagua hene. Usualibi Hulualibi Gedealibi Mesegealibi uruni ti Arama aguanene hene. <sup>24</sup> Abagasada igini Sela halu Sela igini Ebe hene. <sup>25</sup> Ebe ibu igini kira henego mende mini Pelege hene. Pelege ibu heangi

wali agali dindi bibahendehe hearu ti tini headagua hoba migimigi bialu hagahaga bini. Ebe igini mendego mini Yogodana hene. <sup>26</sup> Yogodanahanda hono wini ibu aguanene urudagua hene. Alamodadalibi Selebealibi Hasamabedealibi Yaralibi <sup>27</sup> Hadoramalibi Usalalibi Digilalibi <sup>28</sup> Obalalibi Abimaelealibi Sebalibi <sup>29</sup> Obialibi Habilalibi Yobabalibi uruni bibahendeore Yogodanahanda hono winiru howa ibu aguanene dege bu hene. <sup>30</sup> Hameigini uruni ti Mesa dindi wiagoria howa palima pialu amuraore ni tagira ibiragohayagi hari bare bare Seba dindi wiagoria paliari hene. <sup>31</sup> Hameigini uruni ti bibahende Seme aguanene hangu hama ibinigo ti nde tininaga dindi haluni wigiwigi bialu tinaga bi tara tara lagalaga biaga hene.

<sup>32</sup> Hameigini uruni bibahendeore Noanaga aguanene howa ti dindi bibahendehe purogolo hagahaga bini. Ani binidaruni iba li timbuni ala wiyago hundiai hayagola iba taluha howa tagira ibini biaruni purogo lalu dindi tara taraha hameigini maha heneru ti bibahende Noa aguanene hangu hene.

## 11

### *Anduane Homogohanda wali agalinaga bi mo tara tara lelenego ogo.*

<sup>1</sup> Bambaore dindini wali agali heneru ti bi mbiraore laga hene. <sup>2</sup> Ti ni tagira ibiragohayagi howa yu dindi wiagohayagi hama pialu dindi mini Babilonia anda puwa ogoriani hene. <sup>3</sup> Ani biruwa tini lala bialu lalu, Iname abaleore dindi dugu mbera buwa ege timeni helo irani delamiya, lene. Ani lowa tigua ogonidagua bialu anda bule ege timeni wabu bila hene. Ege timeni uruni ndibu laga bulene wagaya tararu manda bu ngela dege bini. <sup>4</sup> Ani ngelowa lalu, Ainde iname anda dewa bu helowa tano timbuni mbira ngelamiya. Tano ogoni dombeneni anda timbuni mbira bugimbu bu migi bima iraga howa hari damindini ela helo mbira bimiya. Ani birimayagua iname bibahende dindi tara tarani hama purogo nale holeberamago. Ogoni hondowa wali agali maru karume inanaga mini yaraga helo ani bimiya, lene. <sup>5</sup> Ani bialu hemiria Anduane Homogo ibu daluwa tigua anda dewa buwa tano ngeleagobi tano ogoni dombeneha anda bima iraga heagobi hendene.✧ <sup>6</sup> Ani hondowa ibugua lalu, Ai áyu wali agali uruni ti hameigini mbiraore halu bi mbiraore laga karuni howa tano timbuni mbira bu heledago handa nabere. Ani bialu howa ai tinime hame ledadagua bialu mbirale bulene bibahende ngaru biai holobadago. <sup>7</sup> Ani biyadagoni lehedago iname dalialu puwa wali agali tininaga bi hale nahene lagalaga bilo bi mo tara tara bimiya ma, lene. <sup>8</sup> Anduane Homogohanda tinaga bi mo tara tara lagalaga bialu dindi tara tarani hama purogo lene. Ani biya handala tigua tano biago bumaro nabi wahalu purogo lene.✧ <sup>9</sup> Tano bialu henedagoni mini Babele. Irane Anduane Homogohanda wali agali uruni tinaga bi tara tara lagalaga bialu tinibi dindi bibahendehe hama purogo lalu pelene. Babele mini ogoni inanaga bi lalu Bi Mo Tara Tara Laga.

### *Seme ibu aguanene henego ogo*

<sup>10</sup> Seme ibu aguanene hama ibinidaruni ogodagua hama ibini. Iba li timbuni biago hundiyagola mali kira howa Seme ibunaga mali handari mbira (100) hayagola ibu igini mbira mini Abagasada hene. <sup>11</sup> Abagasada helowa Seme ibu mali handari duria (500) hama ibalu heagola ibunaga waneigini marubi hene. Ani ho helowa ibuni homene.

<sup>12</sup> Abagasada ibunaga mali pira tebirani duria (35) hayagola ibu igini mbira mini Sela hene. <sup>13</sup> Sela helowa Abagasada ibu mali handari mariani tebira (403) hama ibalu heagola ibunaga waneigini marubi ha dege bini. Ani ho helowa ibuni homene.

<sup>14</sup> Sela ibunaga mali pira tebira (30) hayagola ibu igini mbira mini Ebe hene. <sup>15</sup> Ebe helowa Sela ibu mali handari mariani tebira (403) hama ibalu heagola ibunaga waneigini marubi hene. Ani ho helowa ibuni homene.



<sup>16</sup> Ebe ibunaga mali pira tebirani maria (34) hayagola ibu igini mbira mini Pelege hene. <sup>17</sup> Pelege helowa Ebe ibu mali handari mariani pira tebira (430) hama ibalu heagola ibunaga waneigini marubi ha dege bini. Ani bu helowa ibuni homene.

<sup>18</sup> Pelege ibunaga mali pira tebira (30) hayagola ibu igini mbira mini Leu hene. <sup>19</sup> Leu helowa Pelege ibu mali handari kirani huniane dira (209) hama ibalu heagola ibunaga waneigini marubi hene. Ani helowa ibuni homene.

<sup>20</sup> Leu ibunaga mali pira tebirani kira (32) hayagola ibu igini mbira mini Serugu hene. <sup>21</sup> Serugu helowa Leu ibu mali handari kirani huniane karia (207) hama ibalu heagola ibunaga waneigini marubi hadege bini. Ani bu helowa ibuni homene.

<sup>22</sup> Serugu ibunaga mali pira tebira (30) hayagola ibu igini mbira mini Naho hene.

<sup>23</sup> Naho helowa Serugu ibu mali handari kira (200) hama ibalu heagola ibunaga waneigini marubi hene. Ani helowa ibuni homene.

<sup>24</sup> Naho ibunaga mali pira kirani dira (29) hayagola ibu igini mbira mini Tera hene.

<sup>25</sup> Tera helowa Naho ibu mali handari mbirani pira mbirani dira (119) hama ibalu heagola ibunaga waneigini marubi hadege bini. Ani bu helowa ibuni homene.

<sup>26</sup> Tera ibunaga mali pira karia (70) hayagola howa ibu igini tebira henego mbirago mini Abarama mendego Naho tebonego Harana laga biyaru hene.

### *Tera iginiru henego ogo*

<sup>27</sup> Tera ibunaga igini Abarama Naho Harana imaru hene. Harana ibu igini Lode hene.

<sup>28</sup> Harana ibuni dindi Kaladiaha dindi emene mbira Ua winigoria ibu aba Tera nahome wene daliahe helalu ibu ala homene. <sup>29</sup> Abarama ibugua Sarai dabu biyagola Naho ibugua Harana wane Miliga dabu bini. Harana ibu igini Isagabi hene dege. <sup>30</sup> Ainde Sarai ibu waneigini mbira taba hanabe naheore berene.

<sup>31</sup> Ani howa Tera ibugua Kaladia dindiha dindi emene mbira Ua winigo ogoni yu wahalu Kenana dindiha pole pene. Ibu heba pendaruni uru. Tera ibugua ibu igini Abaramabi ibu one Saraibi Tera aguane Harana igini Lodebi ti bibahende puwa Harana tanoni pu hene. <sup>32</sup> Ani pu howa Tera ibu mali handari kirani duria (205) howa tano ogoriani homene.

## 12

### *Ngode Datagaliwabehanda Abarama olenego ogo*

<sup>1</sup> Anduane Homogohanda Abaramahondo lalu, *ínaga* dindibi *í* hamenerubi *í* aba aiyá damene karubi bibahende helalu dindi gahenge mbira *ina* walia holeberogoha pobelo.✧ <sup>2</sup> Ani poregola *ina* *ínaga* aguaneru mo dewaore helolebero. *Ina* *í* biamogo bialu mini leneore helolebero. Wali agali mani holebirarume mendealihondo bi bayale lalu, Anduane Homogohanda Abarama biamogo binigodagua *í*bi nde biamogo bilo, laga bulebira. <sup>3</sup> Wali agalime *í* biamogo biyagua nde *inabi* ti biamogo bulebero. Mbiralime *í*hondo mo ko holene bi layagua nde *inabi* ti mo ko holebero. Anigo *í*ha howa wali agali bibahende dindi tara tarani mani holebiraru *ina* ti biamogo bialu mo bayale helolebero, lene.✧

<sup>4</sup> Ani laya handala Abarama ibugua Anduane Homogohanda Harana dindi wahalu pobe layadagua pene. Horo ogoningi Abarama ibu mali hama ibinigo pira kariani duria (75) hayagola Lode libu haru pene. <sup>5</sup> Pole howa Abarama ibugua ibu one Saraibi ibu hamene igini Lodebi ibuni haru halu wali agali biabe bia hagabi tinaga dabudabu wiarubi bibahende Harana dindini wu heneru mo yai halu Kenana dindi pole pene.

<sup>6</sup> Abaramabi ibunaga wali agali biarubi bibahende Segeme tano wiagoria anda pene. Ogoniha dindi mbira mini More laga winiyagoria ira mbira hada bia heneyago ogoriani anda pene. Dindi ogoriani Kenana wali agali tini heaore dege pene. <sup>7</sup> Anduane Homogo

ibu Abarama hearia ibuwa lalu, Dindi ogoni inibi inaga waneigini aguane holebirarubi tihondo ngulebero, lene. Ani layagola Abarama ibugua mbirale bo lomabu mulene dabu mbira Anduane Homogonaga ibuni ibu hearia hapani hayagoria howa bia hene.\*  
 8 Ani bialu mani Abarama ibu dindi ogoni ngelalu unurahayagi pene. Puwa Bedele dindi ni paliragohayagi Ai dindi ni tagira ibiragohayagi ngela buwa dombeni ibu balai anda bu hene. Ogoriani howa Abarama ibugua Anduane Homogohondo mbirale lomabu mulene dabu mbira bia hene. Ani buwa ibugua ogoriani howa Anduane Homogo mitangi bialu lotu lalu hene. 9 Ani bialu howa emene mani hayagola ti dindi ogoni ngelalu unurahayagi pene. Tigua balai anda bu palia gelo ya bigi bima pu dege bialu Negebe dindini anda pene.

*Abarama Iyibi dindi pu henego ogo*

10 Ani bialu heagola hina gari timbuniore biyagola Kenana dindini tomo noleneore nawi hene. Ani biyagola Abaramabi ibu damene biarubi ti bibahende Iyibi dindiha togolo yalu pene. 11 Pialu Iyibi dindini anda puwa Abaramahanda ibu one Saraihondo lalu, Hale ha. Iore wali baya mbira bedegoni. 12 Iyibiali karume i hondowa ti dimagoliore holebira. Tigua i onedalo handayagua nde i berelo wahalu i bolobadago. 13 Ai ina tihondo i mbalini lariyagua nde ihondo mana tigabi dege bialu i bo wa nahe baya hangu haru holebira, lene.\* 14 Ani lowa Abarama halu ibu dameneru ti Iyibi dindi tagira pialu hemiria o layagodagua Iyibiali hearume handalu hearia Abarama one Sarai ibu wali bayaore bereago hendene. 15 Iyibiali haguane hearume Sarai hondowa tinaga kini berearia puwa lalu, Wali bayaore mbira ibu beda, lene. Ani lowa tigua Sarai kini berearia haru piyagola kini ibu andaga haru pene. 16 Kini ibugua Sarai hondowa hamelo howa Abarama mo turu halu ibugua nogo sibiru memerubi bulumaga dongi kamelerubi wali agali biabe bia hagarubi bibahende Abarama mini.

17 Anigo kini ibugua Sarai dabu bule heagola Anduane Homogohanda kini damene bu heagoha warago timbuni tara tara dewa tagira ibilene. Irane kini ibugua Abarama one Sarai ibu aribia halu ibu one berelonaga ibilene. 18 Ani biyagola kini ibugua Abarama olowa lalu, Ina Sarai i one nale howa liahe ogonidagua biridagoni irane agibe. Nde Sarai ibu i one beda lalu langia nabirigo. 19 Ibu i mbalini beda larigola nde i dabu bule harugo. Ai mana kagua ogonidagua biridagoni irane aginaga. Ina kagua ogonidagua biridago ai i ogoria nahe i one haru halu pudaba, lene.

20 Ani lowa kinihanda ibunaga agali haguane hearuhondo, Abarama Iyibi dindini nahelo talia tagi hadaba layagola agali haguane biarubigu tigua Abaramabi ibu onebi ibunaga dabudabu wiarubi nogo tara tara hearubi bibahende ibuni heba talia tagi hene.

**13**

*Abarama Lodela haga haga binigo ogo*

1-2 Abarama ibu mbirale dewawi hene. Ibunaga nogo sibi meme bulumagarubi ngolo silibarubi dewawi howa Iyibi dindi yu wahalu tagira puwa Negebe dindi wiagoha pene. Ibunaga nogo bibahendebi dabudaburubi yai halu Lode libu haru pene. 3 Mani Abarama halu ibu damene biarubigu ti dindi Negebe ogoni wahalu uyurahayagi pene. Balai andaru bu haga bima pialu Bedele tano anda pene. Anda puwa Bedele tano Ai tanola hengene abale Abarama ibuni balai anda bu hene biagoria lone puwa ogoriani hene. 4 Pu howa ibugua abale lomabu delaga dabu bia hayagoria puwa Anduane Homogo mitangi bialu lotu lalu hene.

5 Lode ibubi nde nogo meme sibi bulumagarubi dewaore hinalu wali agali biabe biagarubi dewa dege henego Abarama libu haru mandagi hene. 6 Abarama Lodela

\* 12:7: Ab 7.5, Ga 3.16    \* 12:13: Pig 20.2, 26.7

libunaga nogobi dabudaburubi mandagi ngelo habe nahe dindi henge emene ko wini. <sup>7</sup> Ani biyagola Abaramanaga nogo haru haga hearubi Lodenaga nogo haru haga hearubi tini keba hagahaga buwa lai lalu hene. Ogoningi Kenana wali agalibi Perese wali agalibi dindi ogoriani hene. <sup>8</sup> Anigo Abarama ibugua Lodehondo lalu, Iya agali mbiraore igini darama mandagiore kabagonigo ai nde iyanaga biabe bia haga karubi iyanebi mo keba holene wuligo. <sup>9</sup> Dindi timbuni nai ngago handa. Ínime hameledegoria nigohayagi í hariyagua nde ì ligohayagi holiya. Í ligoha holene hame lariyagua nde ì mende hayagi holiya, lene.

<sup>10</sup> Ani layagola Lode ibu heyuwa handa amu halu hearia iba Yodana angehayagi dindi wuyu pialu amuraore Soa tano wia tagi heago hendene. Dindi ogonihayagi bayaleore dindi gede ibane bere Anduane Homogo ibuni mabu aleni howa Iyibi dindi wiagobi dege wini. Anduane Homogohanda Sodomo Gomorala bo wa naheha ogonibi wini.✧

<sup>11</sup> Ani wiagola Lode ibu amu ni ibiragohayagi iba Yodana ange ange dindi uliuli ibane bere uruni bibahende ibugua, Ì hai haro, lowa Lode ibu amu ni tagira ibiragohayagi hole Abarama helalu pene. Ani pialu Abarama Lodela mandagi nahole ogoningi purogo lene.

<sup>12</sup> Ani buwa Abarama ibu Kenana dindi hene. Lode ibu nde pialu iba Yodana angeni dindi uliuli tano dewa buhe wiagoha pialu Sodomo tano kaware ngelowa balai anda bu hene. <sup>13</sup> Tano ogo niha wali agali koorene koru hangu howa Anduane Homogonaga deni mana ko ngubi wiaru hangu bialu haga hene.

#### *Abarama Heberono penego ogo*

<sup>14</sup> Lode ibu peagola Anduane Homogohanda Abaramahondo ogodagua lalu, Ai heyuwa ína ni tagira ibiragohabi ni paliragohabi gi tigahabi gi lehabi bibahendeha handa amunana bialu handa. <sup>15</sup> Dindi áyu o de hendedegoni ínibi ínaga aguanene mani holebirarubi tí bibahendehondo ngulebero. Ani ngerogola dindi ogoni tína gaore wiaabobo wulebira.✧

<sup>16</sup> Ani bialu í waneigini aguaneneru daga labe nahe iba mu ngarubi holebira. Mbiralime iba mu daga lagayagua nde ì waneigini aguaneneru daga labehe holebira.

<sup>17</sup> Ai heyalu puwa dindi ì ngule larugoni handama ibaga bia. Uruni bibahendeore íhondo ngiai holebero, lene.

<sup>18</sup> Ani laya handala Abarama ibu dindi o hayago wahalu Heberono tanoni hole pene. Dindi ogoriani Mamerenaga ira timbuniru buhe mbira wiagoria puwa anda bu hene. Ani buwa ibugua Anduane Homogonaga lomabu delaga dabu mbira dindi ogoriani bia hene.

## 14

#### *Kini dege dege wai timbuni binigo ogo*

<sup>1-9</sup> Bera ibu Sodomo tanonaga kini heagola Bisa ibu nde Gomora tanonaga kini hene. Sinaba ibu Adema tanonaga kini halu Semebe ibu Seboiminaga kini halu tano Bela mini mende Soa lagago ogoninaga kinibi hene. Kedolaome ibu dindi hobane mbira Elama kini howa ibugua kini duriali uruni mali homberiani (12) handaya ho henego ai mali halene (13) hayagola tigua Kedolaomenaga bi mo wahalu muni dagisi nami wahene. Ani bialu hemiria mali dene (14) hayagola Kedolaome ibuguaibunaga nenege kini tebiralimo mogo bu hene. Ibugua Babilonia dindi Kini Amarabelebi Elasa dindi Kini Ariagobi Goima dindi Kini Tidala imarubi ti mo mogo bu halu kini mariali uruni bibahende ami agaliru haru halu wai bule pene. Puwa Lebaimi hameigini Asederodo Kanaimu tanoni hearu baba wai bialu bo podo hana hene. Ani bialu puwa Susi hameigini Hama tanoni hearubi Emimi hameigini dindi tigabi yu dindi Kiriadaimi tanoni hearubi bo podaiore halu bini. Ani bialu Ho hameigini Hari Idomo heagoha

hene hearubi bo podama pialu dindi Elebarana wiagoha piaho wialu amuraore wali agali napale wiagoha bo poda hanaho ngelalu Kadese tano dai bini. Kadese ogoni abale Enemisibada lagago ogoriani ibini. Ani bialu tigua Amalege hameigini bibahendeore mbira wanahe bo podaiore hene. Ani buwa Amoro hameigini Hasasono Tamara tanoha hearu baba wai bialu tigua bo poda dege bini.

Tigua ani bo podai halu Kedolaome ibubi ibunaga nenege kini tebira biarubi tigua tano Sodomobi Gomorabi Ademabi Seboimi Belarunaga kini duriali hearu baba wai bule ibini. Ani ibiyagola kini duriali biarume tinaga wai biaga ami agaliru haru puwa Sidimi dindi ulini mbira wiagoria mo ngoai howa tidiyu howa Kedolaomebi ibu nenege kini tebira biaru heba wai bule manda manda buwa wai hanalu tidiyu haga haga bini. Ani anda ibiyagola kini duriali hene biarume kini maria ibiyaru baba wai timbuniore bialu hene.

<sup>10</sup> Sidiminaga nira ulinihayagi wagaya duguaga gundu uli dewa wini. Ogoriani wai bialu howa Sodomonaga kinibi Gomoranaga kini biagobi libu ibida pole pialu hebiria gundu uli wagaya duguaga biagoha pilo wia handala kini tebira biaru ti ibida hari heagoha piai hene. <sup>11</sup> Kedalaomebi ibunaga nenege kini tebirali biarubi tigua wai hongo howa bialu tinaga waitigi hearu bo podai hene. Ani bialu tigua Sodom Gomorala bo podalu uruni tinaga dabudabu wiarubi tomo bu wiarubi bibahende mo hilu yai halu pene. <sup>12</sup> Lode ibu Abarama hamene Harana igini biago ibubi Sodom dindini dege henego nde wai ibiyarume Lodebi ibunaga mbirale bibahende wiarubi mo yai halu pene.

<sup>13</sup> Ani biyagola agali mbira ibu wai hamani howa ibida pialu Hiburuali Abarama hearia puwa ibugua Abaramahondo mbirale biyaruni bibahende lamiai hene. Abarama ibu Amoroali Mamerenaga ira timbuni bu heagoha balai anda bu henego. Mamere ibu hamenebi nde kirali Esegolo Anela henego tebirali uruni ti bibahende Abaramanaga nenegeore heneya. <sup>14</sup> Ani howa Abarama ibugua hale halu hearia ibu igini Lode waitigime minu yalu piya layago hale howa ibuni agali hongohe hearu handari tebirani pira mbirani halira (318) mo mogo buwa naina tidiyalu pene. Puwa agali kini maria biaru piyiyadagua haruru talima pialu Dana tanoni tagira pene. <sup>15</sup> Ani buwa Abarama ibugua ibunaga agali wai biaga ibiyaru halu kira tagalaki howa mbiraga ogonigi dege kini mariali biaru baba wai bialu Abarama ibugua hongo howaore wai bialu bo podama pialu uyu Damasagasa tano bolangua halu pu dege bialu uyura tano mende Hobani bo poda anda hene. <sup>16</sup> Bo poda anda howa agali kini mariali urunime wai labu halu mbirale mo yalu piyaru Abaramahanda lone mo yalu dai bini. Abarama ibu igini Lodebi Lodenaga dabudaburubi ibu one wanerubi wali agali marubi bibahendeore wai bialu bo gingila miai hene.

*Melegesedegehanda Abarama biamogo bialu mo bayale henego ogo*

<sup>17</sup> Abarama ibugua Kini Kedolaome ibunaga nenege kini tebirali biarubi bibahende wai biyagola Abarama ibu wayali howa ibugua bo podai halu harigani dai bialu hene. Ani biyagola Sodomonaga kini ibugua Kininaga Harigaore laga mbira yu dindi tigabi wiagoha winigo ogoriani Abarama ngola hole pene. <sup>18</sup> Salemenaga kini howa Ngode Datagaliwabe Daligaorene Daliga kagonaga loma binigo mo miaga agali mbira Melegesedege heneyago. Ogoni ibugua mberedi waini ibala Abarama hearia yalu ibini. <sup>19</sup> Ani buwa Melegesedege ibugua Anduane Homogohanda Abarama biamogo bilo bi ogodagua lene. Ibugua lalu, Dindi hariru wabiaga Ngode Datagaliwabe Daligaorene Daliga kago ogoni ibugua í mo bayaleore helo. <sup>20</sup> Ai inaga wai tigruru bo podalu mbirale mo yalu piyaru lone mo yu dai bibelonaga hongo ngiyidago. Ayu iname ibunaga mini yaraga hama, lene. Ani layagola Abarama ibugua wai bialu mbirale gingilo yalu dai biyaru pi halu tale buwa pinigo Melegesedege mini.

<sup>21</sup> Mani Sodomonaga kini biagome Abaramahondo lalu, Mbirale ínime haruru puwa wai bialu gingila miridaruni ínini hai halu ínaga wali agali dege daibi labe, lene.

<sup>22</sup> Ani layagola Abaramahanda ladai bialu lalu, Anduane Homogo Ngode Datagaliwabe Daligaorene Daliga dindi hariru wabiaga kagonaga minini howa ínna heneneore bulego laro. <sup>23</sup> Ina mbirale mbira emene ko aga pu aleyaguabi pu dini emeneoreyaguabi mbira nayuleore. Mani ínna Abarama ínna mo homogo hene lowa wai bi lalu holeberegodagonaga laro, lene. <sup>24</sup> Ani lowa ibugua lalu, Ai ínna agali karume tomo nolene aleru nayago dege í haradagua uruni harogoni. Inaga nenege tebirali Anebi Esegolobi Mamarebi tigua dege dabudabu uruni aria maru mo yilo, lene.

## 15

### *Ngode Datagaliwabehanda Abaramala habo nalolene bi lo winigo ogo*

<sup>1</sup> Mani Abaramahanda de gandeba mbira handalu Anduane Homogohanda ibuhondo bi ogodagua lalu, Abarama-o ínna ínaga humbi ale howa í horo bibahendengi handaya ho haabo kogonigo gi nahabe. Ina í agali timbuni mini leneore helolebero, lene.

<sup>2</sup> Ani layagola Abarama ibugua lalu, Anduane Homogo Bibahende Haru Haame Ho Haga-o ínaga waneigini mbira naheore kogodago. Ai ínna agua beregola í agali mini lene holeberodabe. Mani í homarogola ínaga paluni Damasagali Eliasa ibu hai holebiragodago. <sup>3</sup> Ina í waneigini mbira nangi kegonidago ai ínaga paluni bibahendeore agali ínaga biabe bia haga Eliasa ogoni ibu karulai holobadago, lene.

<sup>4</sup> Ani layagola Anduane Homogohanda Abaramahondo lalu, Inaga paluni agali ínaga biabe bia haga ogoni ibugua nayulebira. Í igini mbira holebirago ogoni ibuniore í hene-goria ha aribia howa ibuni karulai holebira, lene. <sup>5</sup> Ani lalu Anduane Homogohanda Abarama haru tagira puwa lalu, Ai hari daligaha yapibiya li bu karuni handa. Ainde ínna uruni daga labebedabe. Mani ínaga waneigini aguaneneru dewaore yapibiya bu karunidagua holebira, lene.✧

<sup>6</sup> Abarama ibugua Anduane Homogohanda bi layago hale halu mini dunu biaho hene. Ani biyagola Anduane Homogohanda, Ibu agali mini tigabiorewi kagoni, lene.✧

<sup>7</sup> Ani lowa Anduane Homogohanda lalu, I Anduane Homogo í Kaladia dindinaga Ua tano howa haru tagira ibirugoni. Ani birugo irane dindi ogo í ngerogola mani í damenerunaga wiaabo helonaga biru, lene.

<sup>8</sup> Ani layagola Abaramahanda Anduane Homogohondo lalu, Anduane Homogo Bibahende Haru Haame Ho Haga-o ínna dindi ogo ínagaoreda lalu agua hondoliyadabe, lene.

<sup>9</sup> Ani layagola Anduane Homogohanda ladai bialu lalu, Ai nogo bulumaga angibuni mbirabi nogo meme angibuni mbirabi nogo sibi wangabebi bibahende mali tebira henego hondowa haru halu ega malibu kirabi minu yalu ibabe, lene. <sup>10</sup> Ani layagola Abarama ibugua o layaruni ale bibahende haru halu ibuwa helene. Ani buwa nogo biaruni bibahende balu daga bigi buwa obeneni halu kira yabuloki buwa duguni kirani ngelama pene. Ega biago labo dege podaki nabi ngelene. <sup>11</sup> Ani ngelearia ega hariawe alerume ibalu mo nolebiyagola Abarama ibugua tibu yu howa talialu hene.

<sup>12</sup> Ani bialu hearia Abarama ibuni alendo ni dadai biyagome de umu layagola emene ona de mugu lalu palia hondo hene. Ani paluwa emaga handalu hearia aruma timbuni mbirame íbu dambi hayagola mogo lene.✧ <sup>13</sup> Ani biyagola Anduane Homogohanda Abaramahondo lalu, Ai mani ínaga waneigini ti dindi tara nalene mbiraha pu holebira. Ani pu howa ti mali handari mariani (400) wali agali tara uruni tigua ti mo ko howa garabaya biabe ale bialu helolebira.✧ <sup>14</sup> Ani biragola wali agali urunidagua biaga karu ínna ti mo ko halu pani migi bulebero. Ani berogola ínaga aguanene dindi mende



ogoniha wahalú tigua mbirale dabudaburu dewaore dindi tara ogoniha howa mo yalu dai bulebira. ✧ <sup>15</sup> Anigo ínaha ko gendaru mbira naanda ibi bayale dege luore howa homaregola tigua í hora holebira. <sup>16</sup> Anigo ínaga aguanene uruni tigua tininaga dindi dai nabi lu dege holebira. Ani kagola Amoroali karu tigua mana ko ngaru bialu ha holebira. Ti ko timbuni bia timbu hayagua ina ti mana bialu bo batagi harogola ai ínaga aguanene uruni waneigini aguanene dabane maria agima halu nde dai bulebira, lene.

<sup>17</sup> Ni palialu aruma hayagola manane kira ogodagua walía hene. Todobene be ira hagua bialu heaore mbirabi ira hale hungu dalu heaore mende lowa nai nogoru bo podo daga bigi buwa talebuki bu wima piyago dombeni henge wiadagua damadama piyaria hendene. <sup>18</sup> Horo ogoningi Anduane Homogohanda Abaramahondo habo nalolene bi hongohe mbira lo wialu lalu, Ai ina dindi ogoni ínaga aguaneneru ti mulebero. Tubari iba emene Iyibi dindi kawareha pedagoni puabo halu amuraore Yuberedisini hende holebira. ✧ <sup>19</sup> Ani buwa tigua hameigini kira Keniali dindibi Kenisialí dindibi karulalu Kadamonoali dindibi karu dege lolebira. <sup>20</sup> Ani bialu Hidi hameigininaga dindibi Perese hameigini dindibi Lebaimi hameigininaga dindi ngarubi <sup>21</sup> Amoro dindi Kenana dindi wima pedarubi Gigasa hameigininagabi Yabusu hameiginirunaga dindi ngaru bibahendeore ínaga aguanenerume karu laiore holebira, lalu Anduane Homogohanda Abaramahondo lamini.

## 16

### *Hega ibu Abarama one berenego ogo*

<sup>1</sup> Abarama one Sarai ibu waneigini mbira nataba hene dege biraabo hene. Anigo Iyibi wandari mbira mini Hega ibu Sarainaga biabe bia haga berene. <sup>2</sup> Saraihanda Abaramahondo lalu, Anduane Homogohanda ínaga waneigini mbira nataba honoliya tombe mo hangai hayadago ai waneigini mbira taba honole ndo o bedogonidago. Ai ínaga biabe bia haga wandari o bedagonime ínaga waneigini mbira taba hana harabe hondoliya ina ibu haru palibe, lene. Ani layagola Abaramahanda ibu one Sarainaga bi layago hale hene. <sup>3</sup> Sarai ibugua ibunaga biabe bia haga wandari Hega berenego ogoni ibu Abarama one biraradagua berelo haru pene. Ogoni biyago Abarama ibu Kenana dindiha mali pira howa ani bini. <sup>4</sup> Hega Abaramala libu haru mandagi palu heagola Hega ibu walí gali bere berene. Anidagua buwa Hega ibu gali bere bedolo manda buwa ibugua Saraihondo mine haga bialu yo handalu berene. <sup>5</sup> Ani biyago hondowa Saraihanda Abaramahondo lalu, Hega ibugua ihondo mine halu bedagoni tene ínaha howa hangú birigoni. Ibu inime henemane í ngirugo ai ibu wali gali bere bedogodalo manda buwa ibugua mine halu bedagoni. Anigo nde Anduane Homogo ibunime iyanaga bi henenegro tale bilo, lene.

<sup>6</sup> Ani layagola Abarama ibugua Saraihondo ladai bialu lalu, Hega ibu ínaga biabe bia haga birayagonidago. Ibhondo inime hame ledegoale ogobi berogola karulapeda lalu bibe, lene. Ani layagola Sarai ibugua Hegala waitigi halu handabe mangaho berene. Ani biyago hondowa Hega ibu nde tagira pialu ibida pene.

<sup>7</sup> Hega ibu ibida pialu dindi mini Sura wiagoria pialu wali agali nahaga wiagoha anda pene. Ani buwa iba hambiaga uli mbira wiagoria berearia Anduane Homogonaga dahuliyali mbira ibini. <sup>8</sup> Ibuwa ibugua Hegahondo lalu, Sarainaga biabe bia haga Hega- o í agoha howa ibalu ai pu agoha pole bedebe, lene. Ani layagola Hega ibugua ladai bialu lalu, I Sarai wahalú ibida pialu hewariago, lene.

<sup>9</sup> Ani layagola dahuliyali biagome Hegahondo lalu, Ai Sarai ibugua bi larago hale halu bule dai bia, lene. <sup>10</sup> Ani lowa dege lone ogodagua lalu, ínaga waneigini aguaneneru wali agalirume daga labe nahe aulolebe tobaheore holebira. Ai ina gi nahe dai bibe, lalu dahuliyali biagome lene. <sup>11</sup> Ani lowa ibugua lone la dege bialu lalu, Áyu ogoni dege

waneigini taba honole bedegonigo ina igiri mbira taba honolebere. Ai ina tandaga halu genda yu beregoni hondowa igiri ogoni ngirugo. Anidagua birudagonaga igiri ibu mini Isimale wibe. Mini Isimale ogoni irane ina genda yu biruwa Anduane Homogohondo dugu birigonaga hale haya. <sup>12</sup> Ai i igini ibuore nogo dongi gabua ale howa wali agali maru karu baba waitigi hai haragola tiguabi nde ibuhondo waitigi holebira. Ani bialu ibu damene karu baba mandagi naholebira, lalu dahuliyali biagome lene. <sup>13</sup> Mani Hega ibu mitangi bu dai buwa bi ogoni Anduane Homogohanda layadago lowa ibugua Anduane Homogonaga mini Ngode Datagaliwabe i Handaga Kago lene. <sup>14</sup> Irane ogoninaga wali agali tigua iba hambiaaga uli ogoni mini Ngode Datagaliwabe Haluhe Kagome I Handaga ka laga nga. Iba hambiaaga uli ogoni tano Kadesela Beredela hengene wiagoria nga.

<sup>15</sup> Hegahanda Abarama igini mbira taba hanayagola Abaramahanda igiri gali ogoni mini Isimale wini.\*<sup>☆</sup> <sup>16</sup> Ogoningi Abarama ibu ibunaga mali pira halirani waragaria (86) hene.

## 17

### *Abaramanaga mini mende wia aribia henego ogo*

<sup>1</sup> Abarama ibunaga mali henego lamaga halu pira dirani dira (99) hayagola Anduane Homogohanda ibuhondo bi ogodagua lene. I Ngode Datagaliwabe Hongo Haiheore Kogoni. Inaga tuha i haabo howa ininaga deni mana bayale tigabi ngaru dege biaabo halu habe. <sup>2</sup> Ai ina ila habo nalolene bi mbira lo wialu lalu inaga waneigini mani dewaore ngulebero, lene. <sup>3</sup> Ani layagola hale howa Abarama ibu ge duli hanga howa bulu paluwa dengui dindiniore ela ho bereagola Ngode Datagaliwabehanda ogodagua lamini. <sup>4</sup> Ayu ina habo nalolene bi ogo lo werogo ai wali agali hameigini tara tara dewaorenaga mamali i holebere. <sup>5</sup> Anigo ai inaga mini Abarama ndo holebere. I hameigini dewaorenaga mamali holeberegodane ai ina inaga mini Abarama werogoni.\*<sup>☆</sup> <sup>6</sup> Mani i waneigini aguaneneru ti dewa helarogola uruni aria marume handame haga kiniru haga bulebira.

<sup>7</sup> Inilabi inaga aguanene mani holebiraru bababi habo nalolene bi ogoni ayu lo werogoniore wiaabobo bu wulebira. Ai habo nalolene bi ogoni ogodagua lo wero. Inaga Ngode Datagaliwabebi inaga waneigini aguaneneru tinaga Ngode Datagaliwabebi i hanguore kogoni.\*<sup>☆</sup> <sup>8</sup> Kenana dindi ayu kegoni bibahende hameigini mende taranaga ngagoni. Mani howa dindi ogoni bibahende inibi inaga waneigini aguanene holebirarubi ti ngiai harogola tinaga dindi ogoniore wiaho wiaaboboore halu inibi tinaga Ngode Datagaliwabe haabo holebero, lene.\*

### *Ngode Datagaliwabehanda agalinaga dongone podalimu lenego ogo*

<sup>9</sup> Ngode Datagaliwabehanda Abaramahondo lalu, Inibi inaga waneigini mani holebirarubi tigua ina habo nalolene bi lo werogo baya hangu talialu biaore bilimu. <sup>10</sup> Habo nalolene bi lo werogo wiaabo helonaga mana agalinaga dongone poda mabu bilimu lalu langirugobi anidagua bialu haabo halimu.\*<sup>☆</sup> <sup>11-12</sup> Igiri galiru tinaga horo halira pedagola podalimu. Ani bialu agali tinaga garabaya biabe ale bia haga karubi igiri emene gali garabaya biabe ale bia helo walime ti ti andagaha howa taba hanararubi garabaya biabe ale bia helo tinaga dindi taraha howa agali yolo bini karubi bibahendena dongone podaiore halimu. Ogonidagua buleberemigo irane habo nalolene bi lo weremago mo embeda nahe manda bu wiaabo helonaga anidaguaore bilimu. <sup>13</sup> Agali tara mende bu karume habo nalolene bi ogoni tigua yu wanahe manda bu haabo

\* **16:15:** Isimale ogoni inanaga bi lalu, Ngode Datagaliwabehanda hale haga ka. <sup>☆</sup> **16:15:** Ga 4.22 <sup>☆</sup> **17:5:** Lm 4.17 <sup>☆</sup> **17:7:** Lg 1.55 <sup>☆</sup> **17:8:** Ab 7.5 <sup>☆</sup> **17:10:** Ab 7.8, Lm 4.11

kamigo manane tinaga dongone podu mabu bidamigoria hondolebira. <sup>14</sup> Ai bi ogo hale howa agali mbirame talialu bia nabiagua nde agali ogoni ibu inaga habo nalolene bi ti baba lo werogo talia nabi mo wahaga kago. Agali ogonibi kago ti haru mandagi nahe dindi tara ngaruha hama puwa helo bo batagi halimu, lene.

<sup>15</sup> Ani lowa Ngode Datagaliwabehanda Abarahamahondo lalu, Ai í one ibubi nde ibunaga mini Sarai wahalu ibu mini Sara wibe. <sup>16</sup> Ainde Sara ibugua inaga igiri mbira taba henelo ina ibu biamogo bulebero. Ani berogola Sara ibunaga aguaneneru dewaore halu marume handame haga kini holebira, lene.

<sup>17</sup> Bi ogoni hale howa Abarahama ibu bulu paluwa ibugua denguime dindi ela howa ibuni oba halu mitangi bu dai buwa lalu, Agali wahe mali handari mbira heneme waneigini agua hono wuledabe. Ainde Sara ibubi mali pira dira (90) penedago ai ogonibime waneigini hono wibehedabe, lowa <sup>18</sup> Abarahama ibugua Ngode Datagaliwabehondo lalu, Isimale ibu bayale helo handaya ho ha nabiridago, lene.

<sup>19</sup> Ani layagola Ngode Datagaliwabehanda Abarahamahondo lalu, Ina ogonidagua larego agi. Í one Sarahanda igiri mbira taba honolebirago ina igiri ogoni ibu mini Aisaga wibe. Ina ibunaga aguaneneru bababi habo nalolene bi wiaabobo bilo lo wulebero. <sup>20</sup> Ai ina ihondo Isimale biamogo bibe larigonaga nde ina ibu biamogo berogola ibunaga aguanenerubi dewa dege holebira. Ibunaga hameiginirunaga haguane agali homberia (12) holebiraru ai ina ti mo hongo holebero. <sup>21</sup> Anigo ina habo nalolene bi ogoni Aisagala lo wulebero. Mali edegonaga horo áyu ogodaguani Sarahanda igiri ogoni taba honolebira, lene. <sup>22</sup> Abarahamala bi ogoni lai howa Ngode Datagaliwabe ibu Abarahama helalu pene.

<sup>23</sup> Ani biyagola Abarahama ibugua Ngode Datagaliwabehanda bibe lalu layadagua agali damene bibahende hearunaga dongone poda mabu bini. Ibu igini Isimalenagabi agali biabe bia haga ibu andagani taba henene hearubi garabaya biabe ale bia helonaga agali marume muni tagule haru ibiyagola Abarahama ibu yolo bini biarunagabi bibahende dongone poda mabu biai hene.

<sup>24-25</sup> Abarahamanaga mali pira dirani dira (99) heangi ibu igini Isimale ibunaga mali haleria (13) heangibi tigua libunaga dongone podabe layadagua podene. <sup>26</sup> Dongone podabe lalu Abarahamahondo horo lamiyangiore abale puwa libunaga dongone podalu, <sup>27</sup> agali Abarahamanaga garabaya biabe ale bia haga hearunagabi horo ogoningi dege poda mabu biai hene.

## 18

### *Anduane Homogohanda lalu, Sara ibugua igiri mbira taba honolebira lenego ogo*

<sup>1</sup> Anduane Homogo ibu Mamerenaga ira te biagoha Abarahama hearia hapani hene. Ni hongoheore dayagola Abarahama ibu nde ibunaga balai anda haneni berene. <sup>2</sup> Ani biruwa handalu hearia agali tebirali ona ibu hearia hendene. Ani hondowa abaleore heyalu agali tebirali biaru lola hole puwa ibu ge duli hanga howa ibunaga dengui dindini elaore howa ibugua tihondo lalu, <sup>3</sup> Agali timbuniru-o ai tinaga biabe bia haga agali i andaga ibalimulo hamelo kogoni. I andaga helalu pu bolangua halimulo hame naledogoni. <sup>4</sup> Ai tinaga ge wayawaya bilimulo agali mbirame iba hambu yalu ibu laro. Tigua ira te gumba ogoria hondo biralimu. <sup>5</sup> Ina tí tomo nalu hongo kagola pole pirimidagoria pilimulo tomo maru mo yalu ibule porogo. Ai tigua i andaga ibirimidagonaga ina nde tí biamogo buleberogo, lene. Ani layagola tigua ladai bialu lalu, Karulapego ani bia, lene.

<sup>6</sup> Ani layagola Abarahama ibu abaleore ibunaga balai anda biagoha puwa Sarahondo lalu, Balawa bayale nu biagoha hono ngelaribagoni aria maru haealowa mberedi wabuwa abale hirabe, lene. <sup>7</sup> Ani lalu Abarahama ibugua ibunaga nogo bulumaga

✧ 18:2: Hi 13.2



hagaha hearia puwa igini hungubalua habatigi mbira heago bo yalu ibuwa ibunaga biabe bia haga agali mbira heagome abale dawelo podo mini. <sup>8</sup> Nogo mbirini maru podo dawayago dai hayagola Abarahama ibugua nogo mbirinibi nogo andu ibanebi ti bereagoria nelo yalu ibu mini. Ti tomo uruni ira gumba heago teneha nalu bereagola Abarahama ibu handaya ho hene.

<sup>9</sup> Tigua tomo nai howa Abarahamahondo lalu, Í one Sara agoha bedabe, lene. Ani layagola Abarahama ibugua ladai bialu lalu, Ibu amu balai anda tamuha beda, lene. <sup>10</sup> Anidagua layagola agali tebonego ibugua lalu, Mali mende edegonaga ege áyu kagodagua haragola í dai bulebero. Dai berogola í one Sara ibugua igiri mbira taba honolebira, lene.\*

Sara ibu agali ogoninaga erembirahayagi balai anda tamuha biruwa agali ogonime bi layago hale hene. <sup>11</sup> Abarahama Sarabi libu haru waheore howa waneigini mbira hono wibe naheore hene. Sara ibunaga waneigini holene tu biba hene berene. <sup>12</sup> Agali ibiyagome bi ogoni layuagola Sara ibu miniha ibuni hangu mitangi bialu lalu, Inaga agalinibi inibi iyane waheore tinginiru hongo naheore kabagodago. Ai agua bialu í agalinila turu hagabu howa waneigini agua hono wuliyadabe, lowa ibu oba halu berene.\*

<sup>13</sup> Ani bereagola Anduane Homogohanda Abarahamahondo hale lalu, Sara ibu í waheore biruwa waneigini hono wibe nahe bedogodago lowa oba halu bedago agibe. <sup>14</sup> Abarahama-o hale harene. Anduane Homogo ibugua nabibehe mbira nawiore. Anigo mali mende edegonaga ege áyu kamadagua haragola í dai bulebero. Dai berogola Sara ibugua igiri mbira taba honolebirago laro, lene.\* <sup>15</sup> Ani layagola Sara ibu gi lalu ke howa lalu, I oba nahe, layagola Anduane Homogohanda lalu, Í oba haore birigoni, lene.

### *Anduane Homogohanda Sodomo tano bo giallo wahole manda binigo ogo*

<sup>16</sup> Tomo nai lalu agali tebirali biaru pole heyalu piyagola Abarahama ibugua harigani ngua hole ti haru mandagi pene. Pialu howa Sodomo dindiha wá handa amu hene.

<sup>17</sup> Ani hondowa Anduane Homogo ibuni lo mitangi bialu lalu, Agua mbirale ina bule ngogo Abarahama ibu manda bilo mo do holene nakarulapedago lowa manda bini. <sup>18</sup> Mani ibunaga waneigini aguaneneru dewaore hongohe bu holebira. Ani biragola ibuni howa hameigini dindi tara tara bibahendeha karu biamogo bialu mo bayale helolebero. <sup>19</sup> Ina ibu waneigini aguaneneru bibahendeme Anduane Homogo ininaga bi larogo hale howa talialu helobi mana tigabi bulene ngaru bialu helobi Abarahama ibugua lamialu helonaga ibu dabo heledogoni. Ai ina bilimu larugo tigua hale lalu biyagua ina nde tihondo bule lalu lo wirugoni biaore bulebero, lo mitangi bini.

<sup>20</sup> Ani lowa Anduane Homogohanda Abarahamahondo lalu, Bi lolene dewaore Sodomo Gomorala tanoni mana ko timbuni ngagonaga lolene nga. <sup>21</sup> Anidago ai wali agali uruni tigua mana agobi bialu henedabe handama poro, lene.

<sup>22</sup> Ani bialu agali kirali biago libu Sodomo tano pole piyagola Anduane Homogo ibu Abarahamala emene hondo hene. <sup>23</sup> Ani howa Abarahama ibugua Anduane Homogo heagoria hapara howa bi maru ogodagua hale lalu lalu, Ina agali maru bayale heagua uruni heba wali agali ko biaga karu heba bo wahai holeberebe. <sup>24</sup> Agali bayale pira duria (50) tano ogoniha heagua urunibi bibahende ko biaga karu heba bo waholebe. Agali pira duria uruni mitangi lalu tano ogoni ngelo waholebe. <sup>25</sup> Agali bayale tigabi karu ko biaga karu heba bamaga holene liaheda. Agali bayale biaga ko biagabi mana mbiraoregome dambi hai holene nakarulape. Dindi bibahendenaga Dabaga kagome mana tigabi ngadagua tale bulene nga, lene.

\* 18:10: Lm 9.9    \* 18:12: 1 Pi 3.6    \* 18:14: Lg 1.37

<sup>26</sup> Ani layagola Anduane Homogohanda ogodagua ladai bini. Sodomu tanoha agali tigabi pira duria (50) uruni heagua ti bibahende mbirago ereba nahe hai holebira, lene.

<sup>27</sup> Ani layagola Abarahama ibugua lone hale halu lulu. Anduane Homogo-o ina ihondo bi dewa hale harogonaga manga nahabe. I galone nabulene bame nahabane kogoni. Ina ogoale bibeheda lulu mbira labe naheore kogoni. <sup>28</sup> Ai agali bayale pira duria (50) nahe pira mariani duria (45) heagua nde duriali nigome tubagi haruago wahalu uruni heba bo waharo loleberebe, lene. Ani hale hayagola Anduane Homogo ibugua ladai bialu lulu, Agali bayale pira mariani duria (45) heagua ina tano ogoni mo ko naholebero, lene. <sup>29</sup> Abarahamahanda lone lulu, Agali pira maria (40) hangu bayale heagua nde agua buledabe, lene. Ani hale hayagola Anduane Homogohanda ladai bialu lulu, Agali pira maria (40) bayale heagua nde ina tinaga tano mo ko halu tini heba ba nabulebero, lene.

<sup>30</sup> Ani layagola Abarahama ibugua lone lulu, Anduane Homogo-o ina bi lone hale harogo keba nahabe. Ainde agali pira tebira (30) heagua agua buleberebe, lene. Ani layagola Anduane Homogohanda ladai bialu lulu, Agali pira tebira (30) hangu bayale heagua nde tano mo ko naholebero, lene. <sup>31</sup> Abarahamahanda lone dege hale halu lulu, Anduane Homogo-o ina bi dewa laabo harogonaga keba nahabe. Ai agali pira kira (20) hangu bayale heagua nde agua buleberebe, lene. Ani layagola Anduane Homogohanda ladai bialu lulu, Pira kira (20) bayale heagua tano mo ko naholebero, lene.

<sup>32</sup> Ani layagola Abarahama ibugua lone lulu, Anduane Homogo-o aiore nde keba nahabe. Bi mbiraore hangu hale harogo agali pinali bayale heagua nde agua buleberebe, lene. Ani layagola Anduane Homogohanda ladai bialu lulu, Pinali bayale heagua nde tinaga tano mo ko naholebero. Agali bayale uruni tibi ereba naholebira, lene.

<sup>33</sup> Anduane Homogo ibu bi uruni lai halu piya handala Abarahama ibu nde ibuni andaga dai bini.

## 19

### *Sodomu wali agalirume mana ko bialu henego ogo*

<sup>1</sup> Lode ibu nde Sodomu tanonaga panga haraba wali agali ngoai haga hama wiagoha berearia dahuliyali kirali ala Anduane Homogo heba Abarahama berearia ibiyago labo ibini. Lode ibugua abale heyalu libu ibiyago ngola hole pene. Puwa ibu ge duli hanga ho biruwa bulu palialu denguime dindi ela ho biruwa lulu, <sup>2</sup> Agali timbuni-o aiore i libunaga biabe bia haga kogo i andaga ma. Libunaga geru wayawaya balu mbiraga i andaga palialu ega bi laragola nde pilibulo, lene.

Ani layagola libugua ladai bialu lulu, Ani ndo iya wali agali ngoai hagagoria palueberaba, lene.

<sup>3</sup> Ani layagola Lode ibugua hongo howaore ma laabo hayagola nde ti haru Lode andaga pene. Puwa Lodehanda agali ibunaga biabe bia haga hearuhondo lamialu, Mberedi yidi nahe hiralu tomo dendebe maru libu nelo dawalimu, lene. Ani layagola tigua tomo ani dawa yalu ibiyagola libugua tomo biago nalu berene.

<sup>4</sup> Libu palia nabiaore dege Sodomuoli hearume anda libu bereago tagiraha ho mabu biai hene. Igiribi agali wahebi Sodomu tanoni hearuni bibahendeore ibai hene. <sup>5</sup> Ani ibuwa tigua Lode olowa lulu, Agali kirali i andaga palima ibiyago labo agoa padabe. Libu iname yulumaya tagira ibila, lene. <sup>6</sup> Ani layagola Lode ibu tagira puwa panga hongo howa paya tagi halu <sup>7</sup> ibugua tihondo ogodagua lamialu lulu, Inaga nenegeru-o hale halimu. Tigua mana ko ogonidaguaore bulene nawi. <sup>8</sup> I wane kirali agali baba nahene bedago ogoni labo nde tinaga hame ledamigo ale libuha bia halimulo ina libu haru tagira ibuliyago. Agali kira ogolabo dege i andagaha palelowa inime handaya halu mamage holebero. Anigo tigua libuhondo mana ko mbira nabilimu, lene.

☆ 19:5: Hgn 19.22-24

<sup>9</sup> Sodomoali biarume Lodehanda layago hale howa lalu, Lode í dindi haluni tarali howa inahondo mana labe nahego í habagi halu pu. Í habagi habe laramago hale nahariyagua iname agali ogoni libu mo ko halu íbi nde mo ko timbuni howa mo ngubiaore holeberama, lene. Ani lowa tigua Lode hela dai bialu anda panga bo gialole bini. <sup>10</sup> Ani bialu helowa agali kirali biago labome gi yatagi howa Lode tamuha gililo yamialu panga hongo howa payatagi hene. <sup>11</sup> Ani bialu libugua agali tagiraha hayarunaga de bibahende ndibulowa helayagola tigua anda panga biago handabe nahe hene.✧

*Lode ibu Sodomo wahalu penego ogo*

<sup>12</sup> Agali kirali biago labome Lodehondo hale halu lalu, Í damene maru tano ogoha kabe nahebe. Í waneiginirubi ínaga imane balibuni karubi ínaga damene karubi bibahendeore tano ogo yu wahalu piai halimu. <sup>13</sup> Tano ogoha mana ko mbira mbirale ngaru biai halu bi mbira tara ale ngaru lalu biagadago iyame tano ogoni mo ko howa bo tangu delaraba. Anduane Homogo ibugua dindi ogoha ogonidagua bialu ka layago hale halu iyame tano ogo bo tangu wahole pudaba lenego íbu kaba, lene.

<sup>14</sup> Ani laya handala Lode ibugua agali kirali ibu wane biago labo dabu bule lowa lawu henego ogoni labo hearia puwa lalu, Ai dindi ogo mo ko haragonigo abale tagira pialu ma. Anduane Homogohanda tano ogo áyu ogoniore mo ko haragoni, lene. Ani layagola libugua manda bialu hebiria Lode ibu tabirene hayabe toba hene.

<sup>15</sup> Ega bi layagola dahuliyali biago labome Lodebi ibu one wane kirabi abaleore pudaba lowa mo daila halu lalu, Abale gerai ladaba. Wali agali o karu ereba hai holebiradagua tíbi ereba hai holigo í onebi í wanego labobi tí haru tano ogo abale wahalu pilimu, lene. <sup>16</sup> Ani layagola Lodeibunaga miniha yaleyale howa hendore bigi bialu hene. Ani bialu hearia dahuliyali biago labome tinaga gini gililo yalu tano yu wahalu tagira pene. Anduane Homogohanda Lode dara hayago hondowa ani bini.✧ <sup>17</sup> Ani buwa dahuliyali mende biagome lalu, Tíbi nde homoligo abaleore pilimu. Pialu howa handa dai nabilimu. Dindi ulini amu ngaruha nape tí homa nabuleyagua gerai lalu uyu hari bare ngagoha iraga halu puabo halu pilimu, lene.

<sup>18</sup> Ani layagola Lodehanda lalu, Agali timbuni-o ína bibe laregonidagua bibe nahedago. <sup>19</sup> Ainde hale habe. Ína í dara halu biamogo beregonigo hari bare amuraoredago wene harigani pialu kamaore tano abale bo tangu delaragola ina heba homamaga holigo agua buledabe. <sup>20</sup> Ai tano emene ko mbira amu ngago handa. Tano ogoni kawaredago ogoniha dege abale anda puwa bira do kamagola wali agali maru tandaga nararudagua namaga holeberama badago í ogoniha polomaya pudaba la, lene.

<sup>21</sup> Ani layagola dahuliyali biagome lalu, Ogoniha karulapego pudaba. Tano ogoni bo de nalolebero. Ai dai ladaba. <sup>22</sup> Tí wene pialu kamiore ína mbirale mbira nabuleberogo pudaba, lene.

Ti puwa Lodehanda lalu, Tano ogoni emene kooredago, lowa tano ogoni mini Soa wini.\*

*Anduane Homogohanda Sodomo Gomorala bo tangu delenego ogo*

<sup>23</sup> Ni wene tagira ibalu heaore dege Lode ibu Soa tano abale anda pene. <sup>24</sup> Ani piyagola abaleore Anduane Homogohanda ege tole ambuabi mini soloba kundibi heba ira deaore tano Sodomo Gomorala wiagoria ibira helene.✧ <sup>25</sup> Ani biyagola tano ogoninaga dindi ulini wiago labo heba do mundulo wa helene. Wali agali tano ogoniha hagadarubi mbirale mbirale bibahendeore uruniha hearubi do mundu lai helene. <sup>26</sup> Anigo Lode heba ibu one wanerubi ti harigani pialu howa Lode one ibu handadai bialu hearia abaleore mo ibikui bu hinalu naina ema nabi ira tili haradagua bini.✧

✧ 19:11: 2 Kin 6.18 ✧ 19:16: 2 Pi 2.7 \* 19:22: Soa ogoni inanaga bi lalu Emene. ✧ 19:24: Md 10.15, 11.23-24, Lg 10.12, 17.29, 2 Pi 2.6, Yu 7 ✧ 19:26: Lg 17.32

<sup>27</sup> Egerebagiore Abarahama ibu abe dege Anduane Homogola bi lalu haribigoria pene. <sup>28</sup> Puwa Sodomu tano Gomora tanobi ogonihayagi yu dindi wu banga biaruha handape halu hearia hagua timbuniore biyago hendene. <sup>29</sup> Ngode Datagaliwabehanda yu dindi uruniha tano wiaru bibahende bo hilo delai halu Lode dege Abarahama mitangi howa bo dela nabi yo pialu tagira pelene.

*Moaba Amonola hameigini henego ogo*

<sup>30</sup> Lode ibu tano emene Soa biagoha holene gi biyagola tano ogoni wahalu ibu wane biago labo haru halu uyu hari bare wiagoha hole pene. Ti pialu egeanda mbira hearia handa walia howa ogoniha hene. <sup>31</sup> Ani howa wandari wahene biagome mende heyogone biagohondo ogodagua lamialu, Ai iya aba wahe hayadago abale biaga wiyadagua iya dabu bulene dindi bibahende ngaruha agali mbira naheda. <sup>32</sup> Ainde iya aba waini iba dewa nowa mo luluya helo hambu mibiya. Ibuni luluyu ngelowa iyane haru palerabagola nde waneigini holebira. Ani biragola dindi bibahendeha wali agali lone haame helo, lene. <sup>33</sup> Ani lowa mbiraga hayagola wandari biago labome libu aba waini iba dewaore nelu hambu miyagola nowa bu luluyu palene. Palearia wandari wahene biago puwa ibu abala mandagi palene. Waini iba dewa biagome agali biago mo luluya heagola ibu waneme biradago manda nabi hene.

<sup>34</sup> Horo mendengi wandari wahene biagome lalu, Abale mbiraga i abala paliribago ai áyu mbiraga nde iya aba ogonidagua luluyu ngagola íla paliribadagua libu palilibulo. Ogonidagua berabagola iya waneigini mani dindi bibahendeha lone haame holebira, lene. <sup>35</sup> Ani lowa mbiraga mendengi wandari biago labome libu aba waini iba dewa nelu hambu muwa luluyu paleagola wandari heyogone biagola palene. Ani biyagola libu aba ibu mini naibi abale mbiraga paliyadagua dege paluwa ibu wane biagome biarugo manda nabi palene. <sup>36</sup> Libugua ogonidagua bialu libuni waneigini libu abanaga taba honole gali bere berene. <sup>37</sup> Wandari wahene biago ibugua igiri mbira taba honowa igiri ogoni ibu mini Moaba wini. Ani wiyagola Moaba wali agali áyu karunaga mamali ogoni ibu hene.† <sup>38</sup> Wandari mende biago ibuguabi igiri dege taba honowa igiri ogoninaga mini Benami wini. Áyu wali agali Amono hameigini karuni tinaga mamali ogoni ibu hene.‡

## 20

*Abarahama Abimelegelanaga bite ogo*

<sup>1</sup> Abarahama ibu Mamere dindi wahalu puwa Negebe dindiha Kadese Suala hengene wiagoria pu hene. Ani buwa mani ibu one Sara libu pialu Gera tano wiagoria anda pene. <sup>2</sup> Ogoniha pu howa Abarahamahanda Gera wali agali bu hearuhondo lalu, Sara ibu i mbalini beda, lene. Ani layago hale howa Geranaga Kini Abimelegeibunaga biabe bia haga hearuhondo lamialu lalu, Sara ibu i dabu buliya haru ibule pudaba, lene.✱ <sup>3</sup> Ani lowa mbiraga Ngode Datagaliwabehanda Abimelege palearia ibu emagaha ha pani howa lalu, Wali o haru ibirigoni agali onego í homolebere, lene.

<sup>4</sup> Ai Abimelege ibu Sarala mandagi palia nabi hariago ibugua lalu, Anduane Homogo-o i ko mbira nabigo ina agali mbirame mana ko mbira nabi kagola agali ogonibi ibu damenerubi bo waholeberebe. <sup>5</sup> Abarahamaibunime wali ogoni ibu mbalini lalu langiyago. Wali ogo ibuguabi Abarahama ibu mbalini lalu langia dege biya. Ina wali ogoni damu pirudago tigabi birudalo manda bido. Kagua mbira ina nabi kogoni, lene.

<sup>6</sup> Ani layagola emagaha dege Ngode Datagaliwabehanda ladai bialu lalu, Ogoni henene. Ina mana tigabi wiadagua birigola inime í wali ogonila mandagi palia nabibelo

† 19:37: Moaba ogoni inanaga bi lalu, I abaha howa ibini, laga. ‡ 19:38: Amono ogoni inanaga bi lalu, Igiri ini damene darama mbiraoreha howa ibini, laga. ✱ 20:2: Pig 12.13, 26.7

mo habo larugoni. <sup>7</sup> Wali ogoni inaga bi mana latagi haga agali mbira onego áyu ogoni abale dai bilabe. Ibugua í homoligonaga bi la helo ani bibe. Anigo ina wali ogoni ibu agalini andaga daibi nalariyagua inibi wali agali í damene bu karubi bibahende homaiore holeberemi, lene.

<sup>8</sup> Ega bi layagola Abimelegehandaibunaga agali haguane hearu olo ngoai howa Anduane Homogohanda bi lamiyago bibahende tihondo lamiai hene. Bi uruni layago hale howa ti bibahendeme giore hene. <sup>9</sup> Ani howa Abimelege ibugua Abarahama olalu íbu lowa hale halu lulu, Ina mana ogonidagua biridagoni agiale biribe. Ina ihondo agi birugonaga í damenerubi inibi bibahendeore pani nai holomaya mo pe haribe. Ina mana ogonibi biridagoni tiga nabialu nabiore biridagoni, lene. <sup>10</sup> Ani lowa Abimelege ibugua bi laabo halu lulu, Ina mini agua wuwa mana ogonidagua biribe, lene.

<sup>11</sup> Ani layagola Abarahamahanda ladai bialu lulu, Agali dindi ogoha kamiru tigua Ngode Datagaliwabhendo gi nahaga howa í one aribia halu í bo waholigonaga gi haru. <sup>12</sup> Bi ogoni henene dege Sara ibu í mbalinigo iyanaga aiya tara tara howa iya aba mbiraore hangugo nde iyane dabu bini. <sup>13</sup> Ngode Datagaliwabhenda inaga dindi andaru inaga damenerubi bibahende wahai halu pobe laya handala tagira pialu howa ina Sarahondo ogodagua laruli, Dindi mbiraha porabago pialu howa ina ihondo mana tigabiore bulene hame lariyagua nde Abarahama mbalini bedo labe, laru, lene.

<sup>14</sup> Ani layagola Abimelegehanda Abarahama ibuni hearia Sara haru dai bini. Ani haru dai buwa ibugua nogo sibiru bulumagaru wali agali garabaya biabe ale bia hagaru dewaore Abarahama mini. <sup>15</sup> Ani mialu howa ibugua Abarahamahondo lulu, Ai dindi o ngaruni handa. Dindi uruni bibahende ininaga ngogonigo í dindi uruni hobane mbiragoha hole hame lariyagua nde karulape, lene. <sup>16</sup> Ani lowa ibugua Sarahondo lulu, Ainde mana liahe birugonaga taga domalu muni kuni siliba daosini mbira (1,000) í mbalini Abarahama mule manda bido. Anidagua berogola wali agali í baba mandagi haga karu tigua ina kagua mbira biridalo manda nabulebira, lene.

<sup>17-18</sup> Anduane Homogohanda Abimelege ibu damene wali berearu bibahendenaga tombeha waneigini biraga mugube mo wahayagola wali uruni waneigini taba hanabe nahe berene. Abarahama one Sara Abimelegehanda yamo haru piyagonaga Anduane Homogohanda ogoni miadai bini. Ani biyago hondowa Abarahamahanda Ngode Datagaliwabhendo bi la hayagola nde ibugua Abimelegebi ibu onebi wali garabaya biabe ale bia haga berearubi ti mo bayale howa wali urunime waneigini lone taba hanabehe berene.

## 21

### *Sarahanda Aisaga taba henene go*

<sup>1</sup> Anduane Homogohanda Sara biamogo bulebero lulu abale lo wiyadagua bialu biamogo bini. <sup>2</sup> Sara ibu gali bere biruwa ibugua Abarahamabi agali wahe heagola igiri mbira taba henene. Ngode Datagaliwabhenda horo ogoningiore taba honolebere lulu abale lo wiyagongiore igiri ogoni taba henene. <sup>3</sup> Taba hanayagola Abarahamahanda igiri gali ogoni mini Aisaga wini. <sup>4</sup> Sarahanda Aisaga taba hono bereane horo halira piyagola Ngode Datagaliwabhenda bibe lulu mana lamiyadagua bialu igiri gali ogoninaga dongone poda mabu bini. <sup>5</sup> Abarahama ibunaga mali handari mbira (100) hayagola ibu one Sarahanda Aisaga taba henene. <sup>6</sup> Taba honowa Sarahanda lulu, Ngode Datagaliwabhenda í dara halu biamogo biyadagonaga turu ho biruwa oba halu bedogoni. Ainde wali agali mani holebirarume inaga bi te ogoni hale howa ti ina turu harogoha turu hatago holebira, lene. <sup>7</sup> Sarahanda la dege bialu lulu, Abale wali agalime Abarahamanaga waneigini mbira Sarahanda taba hono birulubada lagago ai

✧ 21:2: Hi 11.11 ✧ 21:4: Pig 17.12, Ab 7.8



áyu Abarahama ibuni agali wahe kangí ina ibu igini mbira taba honowa andu mialu bedogoni, lene.

<sup>8</sup> Igiri biago ibu anda halu wahe howa ibu ajiya andu waho heagola Abarahama ibugua turu howa ibu igininaga tomo timbuniore dawene.

*Abarahamahanda Hega Isimalela talu pelenego ogo*

<sup>9</sup> Iyibi wali Hega ibugua igiri mbira Abarahamanaga ala taba henene. Horo mbirungi igiri ogoni ibu Sara igini Aisagala gini bialu hearia Sara ibu hendene. <sup>10</sup> Ani hondowa Abarahamahondo lalu, Wali biabe bia haga ogoni ibu igini heba talu pelabe. Garabaya biabe ale bia haga ogoni iginime ínaga paluni í igini Aisaga ibu hangu hai holene ngago maru ibu mo holigo talu pelabe, lene.✧

<sup>11</sup> Bi ogoni layagola Abarahama ibu Isimalebi nde ibu igini dege biagoha ibu miniha genda ho hene. <sup>12</sup> Ani heagola Ngode Datagaliwabehanda Abarahamahondo lalu, Wali garabaya biabe ale bia haga Hega ibu iginilanaga genda nahabe. Wahalu Sarahanda bi larago hale halu bia laradagua bibe. Ínaga waneigini aguaneru Aisagaha howa hama tagira polebira.✧ <sup>13</sup> Ainde wali garabaya biabe ale bia haga ogoni igini ibunaga damenebi nde dewa dege holebiragonaga mamali ibu holebira. Ibubi nde í igini dege kagoni, lene.

<sup>14</sup> Horo mendengi egerebagiore Abarahama ibuguatomoru iba be nogo meme dongoneme wabini mbiraha iba hambu tolowa Heganaga payani mo ya hene. Ani buwa Abarahama ibugua igiri biago Hega mialu, Libu pudaba, lene. Ani biya handala Hega ibu dindi ko wali agali nahaga Beaseba dindi wiagoha puwa ogoniha ibaga bialu berene. <sup>15</sup> Ani bialu howa iba biba hayagola Hega ibugua igiri ira tene wiagoha berelene. <sup>16</sup> Ani berelalu ibu igini homarago nahondole lowa mabu tu mbira ale birule pene. Ani biruwa nde Hega ibu dugu bialu biru wini.

<sup>17</sup> Ngode Datagaliwabehanda igiri biagome dugu biyago hale hene. Hale hayagola dahuliyali mbira dahuliya andaga howa Hegahondo oladali howa lalu, Hega-o agua biyabe. Ína gi holene nawi. Ngode Datagaliwabehanda igiri dugu biayuago hale hayago <sup>18</sup> ai í heyalu puwa igiri gini mule pu. Ina ibunaga waneigini aguaneneru mo dame bia halu dewaore helolebero, lalu lene. <sup>19</sup> Ani lowa Ngode Datagaliwabehanda Heganaga de mo ngala hayagola handa amu halu hearia iba biraga uli mbira wiaria hendene. Ani wiaria handalu Hega ibugua abale puwa iba be nogo dongoneme wabini biagoha iba hambu yalu dai buwa ibu igini nelo mini.

<sup>20</sup> Igiri biago Ngode Datagaliwabehanda amu wali agali nahaga wiagoha dege halu anda howa hongoheore hene. Ogoniha howa ibuguaore danda timuru yulenenaga dolomini howa pari wayali hene. <sup>21</sup> Ibu Parana dindi ko wali agali nahaga ogoniha halu anda hayagola ibu aiyahanda Iyibi wandari mbira ibu dabu bilo haru ibini.

*Abarahamahanda Habo Nalolene bi Abimelegela lo winigo ogo*

<sup>22</sup> Horo ogonongi Abimelegebi ibunaga ami agali haru haga haguane mbira mini Pigolo heagobi libu haru Abarahama hearia puwa ibuhondo lalu, Ína bialu keruni damene bibahendeha Ngode Datagaliwabe ibu í heba dege bialu haga kegoni.✧ <sup>23</sup> Ani haga kegonigo ai ina Ngode Datagaliwabenaga deni howa heneneore ibi í waneigini aguaneneru bababi mo hondo nahe bayale tigabi bulene ngadagua bialu holebero lalu bi ogoni lo wibe. Ina íhondo mana bayale dege bialu haabo harugoni. Anidagua dege ína íhondobi nde dindi í bai nale o íbu kegoriani howa mana bayale dege bialu holebero lalu lo wibe, lene.

<sup>24</sup> Ani layagola Abarahamahanda ladai bialu lalu, Ína bi o laregonidaguaore bulebero, lalu lowini.

✧ 21:10: Ga 4.29-30 ✧ 21:12: Lm 9.7, Hi 11.18 ✧ 21:22: Pig 26.26

<sup>25</sup> Ani lowiyagola howa Abarahama ibugua iba hambagane uli mbira winigo Abimelegenaga biabe bia haga agali bu hearume ti karulene go ongi nakarulape biya lalu Abimelege lamini. <sup>26</sup> Ani lamiyagola Abimelegehanda ladai bialu lalu, Ongi biyago i manda nabi haruda. Ina abale langia nabi ayu dege laregoni hale haro, lene. <sup>27</sup> Ani layagola Abarahamahanda nogo sibi bulumagaru tale buwa maru Abimelege mialu libugua habo nalolene bi lowini. <sup>28</sup> Ani lo wialu howa Abarahamahanda ibunaga sibi angibuni hinu hearu aria dalua hearu karia sibi maru heba hearia tale bialu naina dababagi ho helene. <sup>29</sup> Ani heleagola Abimelegehanda ibuhondo hale halu lalu, Uruni agi bulenaga talebu dababagiho helarebe, lene.

<sup>30</sup> Ani layagola Abarahamahanda ladai bialu lalu, Ina nogo sibi dalua hinulene egene o ngerogoni irane iba hambagane uli ongi heneneore inime wa winigo mo walia halu ngerogoni haru ha, lene.

<sup>31</sup> Nogo sibi biaru mialu howa libu haru habo nalolene bi ogoriani howa lowini. Ani lo winidagoni mitangi bialu dindi ongi mini Beaseba wini.\* <sup>32</sup> Libugua habo nalolene bi ongi Beaseba dindi ogoriani howa lai halu Abimelegebi ibunaga ami agali haru haga haguane Pigolobi libu haru Pilidia dindiha dai bini. <sup>33</sup> Ani piyagola Abarahama ibu nde Beaseba dindini howa ira mbira hengene. Ani hongowa Anduane Homogo ibu Ngode Datagaliwabe Haluhe Haabobo Haga kago mitangi bialu lotu lalu hene. <sup>34</sup> Ani bialu howa Abarahama ibu luore Pilidia dindiha haabo hene.

## 22

*Ngode Datagaliwabehanda Abarahamahondo lalu, Aisaga ihondo loma bialu bo delabe, lenego ogo*

<sup>1</sup> Mani Ngode Datagaliwabehanda Abarahama ba hondole ibu olowa lalu, Abarahama-o, layagola Abarahama ibugua ladai bialu, Ya-o i kogoni, lene.\*

<sup>2</sup> Ani layagola Ngode Datagaliwabehanda lalu, I igini mbiraore hangu gubalini hariligoni haru halu Moraia dindiha hari mbira ina walia holeberogoha pobe. Hari ogoriani ina Aisaga ihondo loma bialu irani bo delabe, lene.\*

<sup>3</sup> Ani laya handala egerebagiore hayagola Abarahamahanda nogo dongibi ibunaga biabe bia haga igiri kirilibi Aisaga heba pole manda manda bini. Ani bialu tigua ira maru lomabu mulenaga delole gabu mandabu yalu hari nene mbira Ngode Datagaliwabehanda pobe layagoha pole pene. <sup>4</sup> Pialu howa horo tebonengi hari nene pole piyago kaundia dege wiaria hendene. <sup>5</sup> Ani hondowa Abarahama ibugua igiri biabe bia haga biago labohondo lalu, I igini iyame Ngode Datagaliwabe mitangi bialu lotu lole amugoha porabago libugua nogo dongi heba ogoria halibu. Emene howa abale dai bulubago, lene.

<sup>6</sup> Ani lalu lomabu delolene ira Aisaga ibugua yilo gabu mialu Abarahama ibunime ira dene hede yalu ayu nabi mbira ya bialu pene. <sup>7</sup> Libu harigani pialu howa Aisagahanda lalu, Aba-o, layagola Abarahamahanda lalu, Iginio- o agua biyabe, lene. Ani layagola Aisagahanda hale halu lalu, Aba-o ira hede yalu delolene gabu yalu bidabago lomabu delolene nogo sibi igini hungubalua mbira ago haru kabagobe, lene.

<sup>8</sup> Ani layagola Abarahamahanda ladai bialu lalu, Iginio- o iyame lomabu delabiya nogo sibi igini hungubalua Ngode Datagaliwabe ibunime ngulebirago, lene.

<sup>9</sup> Ani lalu libu hari nene polebiribigoria anda puwa lomabu delaga dabu mbira abale bu helowa ira gabu yaribigo ogoriani manda mandabu ngelene. Ani ngelowa Abarahamahanda ibu igini Aisaganaga gi ge pume minu kabu buwa ira gabu manda mandabu ngelayagoria wia dambi hene.\* <sup>10</sup> Ani buwa Abarahamahanda ibu igini

\* 21:31: Hiburu bi lalu, Mini Beaseba ongi inanaga bi lalu, Habo nalolene bi lo winigonaga iba uli ongi, laga.

\* 22:1: Hi 11.17-19 \* 22:2: 2 Bit 3.1 \* 22:9: Ya 2.21

Aisaga ayu nabime bole manda bini. <sup>11</sup> Bole manda bialu heaore Anduane Homogonaga dahuliyali mbirame dahuliya andagaha howa olalu lalu, Abarahama-o Abarahama-o, layagola Abarahamahanda ladai bialu lalu, Ya-o i kogoni, lene.

<sup>12</sup> Ani layagola dahuliyali biagome lalu, Inaga igini mbiraore ogoni hangu mo ko halu ba nabulego ibu pume dabaho ngeledegoni hadapeha. Ina ogonidagua beregome Ngode Datagaliwabenaga andaneha ko lalu walia harigo manda bidogoni, lene.

<sup>13</sup> Ani laya handala Abarahama ibu handa amu nana bialu hearia nogo sibi wangabe mbira ira gini gene dewa heagoha hanaho wiaria hendene. Ibugua Aisaga loma bialu bo delole biyadagua nogo sibi ogoni aribia halu bo delene. <sup>14</sup> Ani buwa dindi ogoni,

Anduane Homogohanda Ngiaga ka, lalu Abarahamahanda mini ogoni wini. Wali agali ayu karu tiguabi, Anduane Homogonaga hari ogoriani mbirale buru palego ngiaga ka, laga nga.

<sup>15</sup> Anduane Homogonaga dahuliyalime Abarahama halu mende olowa bi ogodagua lamini. <sup>16</sup> Anduane Homogo ina ininaga minini howa bi heneneore mbira agua laro. Inaga igini mbira hanguda lowa wa naharigodago ina ihondo mana bayaleore bulebero. <sup>17</sup> Ai ina ihondo mana bayale dege berogola inaga waneigini aguanebi aguanalirubi ti dewaore harini yapibiya kaligobi halu iba angeniha ibamu ngaligobi holebira. Ani buwa mani tigua tinaga waitigi karu bo podalu uruninaga dindini tano ngaru ti aribia howa karulo holebira. <sup>18</sup> Ina inaga bi hale halu bia larudagua birigonaga ina inibi inaga aguanene mani holebirarubi ti bibahende biamogo bialu kogo hondowa wali agali dindi bibahendeha karu tigua nde ihondo lalu, Inabi biamogo biahabe, lalu holebira, lene. <sup>19</sup>

Ani layagola howa Abarahama Aisagala igiri biabe bia haga biago labo hearia dai bialu ti haru mandagi Beaseba dindi dai bialu Abarahama ibu dindi ogoniha haabo hene.

*Naho aguanene henerunaga mini uru*

<sup>20</sup> Mani howa Abarahama ibu hale halu hearia wali Miligahanda igiri halira taba hanaya, layane hale hene. Wali Miliga ogoni ibu Abarahama hamene Naho one berene. <sup>21</sup> Igiri uruni tinaga mini uru. Wahene Usu hene. Ani bialu igiri mende mini Busu ibu hamene Kemuelela hene. Kemuele ibu Arama aba hene. <sup>22</sup> Igiri marubi nde uru hene. Kesedebi Hasobi Pilidasabi Yidilababi Beduelebi ha dege bini. <sup>23</sup> Beduele ibu wandari Lebega aba hene. Igiri halira uruni Abarahama hamene Naho one Miligahanda taba henene. <sup>24</sup> Naho ibu one wali mende mini Leuma berenego ogoni ibuguabi nde igiri maria taba henene mini uru Teba Gahama Tahasa Maga imaru taba hanaga bini.

## 23

*Abarahamahanda Sara homayagola hora hole dindi yolo binigo ogo*

<sup>1</sup> Abarahama one Sara ibu mali handari mbirani pira kirani huniane karia (127) hayagola <sup>2</sup> ibu Kenana dindini Kiriada Araba tano mini mende Heberono laga wiagoria homene. Ani homayagola Abarahamahanda dara timbuni howa dugu bialu hene.

<sup>3</sup> Ani bialu Abarahama ibugua Sara ani tongolomu wia handala Hidiali hearu baba bi lole pene. Ani puwa ibugua tihondo lalu, <sup>4</sup> I dindi tarali ti baba ibu harugoni. Ani harugo ai i one homayagola hora holenaga dindi mbiraibunaga homali ngelo yolo bule hameledogoni, lene. <sup>5</sup>

Ani hale hayagola Hidiali hearu tigua lalu, <sup>6</sup> Agali haguane-o inanaga bi hale ha. I agali haguane dunini mbira kegoni laga kamagoni ndobe. I one inanaga homali bayale

☆ 22:16: Hi 6.13-14 ☆ 22:17: Hi 11.12 ☆ 22:18: Ab 3.25 ☆ 23:3: Ab 7.16 ☆ 23:4: Hi 11.9, 11.13



ngamaruha hora habelo. Ainde ínime homali ogoha hora hole lalu ngi laregola homali anduane kagome í one ogohaore hora habelo ngulebira, lene.

<sup>7</sup> Ani layago hale howa Abarahama ibugua wali agali bu hearuhondo ma podalu <sup>8</sup> lalu, Tígua í one ogoha hora holene karulape larimiyagua nde Soha igini Eberono hale hadaba. <sup>9</sup> Ani hale haramigola ibunaga homali mini Magabela Egeanda laga amu Eberono dindi gibuni mbira ngagoria hora holiya ngilo. Tígua dindi ogoni í mia lalu lamilimu. Ani lameramigola ina tinaga deni howa dindi ogoni í damenerunaga homali wiaabo helonaga ti yolo tiga tiga bulene ngadagua buliya, lene.

<sup>10</sup> Ani bialu Eberono ibunibi nde bi layaruni hale howa ti haru mandagi tanonaga pabe panga haraba wiagoria biruwa dege lalu hene. Ani berearia Hidiali bu hearu bibahende hale hai helo ibugua Abarahamahondo lalu, <sup>11</sup> Agali haguane-o ina bi larogo hale ha. Inaga egeanda ogoni ina yolo nabibelo. Egeanda ogonibi dindi egeanda ogoriani ngarubi í ngerogoni. Í damene bu karunaga deni howa dindi ogoni í one hora habelo turu howa ngero, lene.

<sup>12</sup> Ani layago hale howa Abarahama ibugua wali agali bu hearuhondo ibunaga ma podalu bulu palene. <sup>13</sup> Ani bialu wali agali bu hearunaga deni howa ibugua Eberonohondo lamialu lalu, Eberono-o ihondo bi langerogo hale habelo hameledo. Ai ina í one dindi ogoriani hora holiya áyu í yolo berogoni, lene.

<sup>14</sup> Ani layagola Eberono ibugua Abarahamahondo ladai bialu lalu, <sup>15</sup> Agali haguane-o ina bi larogo nde hale ha. Dindi ogoninaga muni siliba genda magi kilo pira duria (50) hangu yolo karulapego. Ainde uruninaga galone iyame bi mbira lolene nawigo wahalu dindi ogoni í halu í one ogoniha hora habe, lene. <sup>16</sup> Ani layagola Abarahama ibugua hale halu harugo lowa muni siliba tale buwa agali biyinaya biaga hearunaga siliba genda magi handagadagua ibunime Hidiali hearunaga deni howa muni siliba pira duria (50) karulape dindi biago yolo bialu Eberono mini.

<sup>17</sup> Anidagua bialu Eberononaga dindi Magabela ogoni Mamere dindi kaware dege winigo Abarahama ibu mini. Dindi ogoniha egeanda homali ogonibi dindi wiagobi ira bu hearubi Abarahama ibu hai hene. <sup>18</sup> Horo ogoningi howa Hidiali bi lalu henedarume dindi ogoni Abarahama ibunagaore wiragoni lalu manda biai ho hene.

<sup>19</sup> Ani bialu Abarahama ibugua Kenana dindiha dindi emene Mamere wiagoha dege Magabela wiagoria ibu one Sara egeanda homali wiagoha hora hene. Dindi Mamere ogoni Heberono dindiha wini. <sup>20</sup> Ani binigo dindi ogonibi homali egeanda ogonibi Hidi hameigini tinaga ala winigo ai Abarahama ibu damenerunaga homali wia aribia hene.

## 24

### *Abarahamahanda Aisaganaga wali taya bia henego ogo*

<sup>1</sup> Anduane Homogohanda Abarahama biamogo biyagola ibugua biyago bayale dege bialu heane ai ibuni agali waheore hene. <sup>2</sup> Ani howa Abarahama ibuni waheore haruyane handalu agali mbira ibunaga biabe luore bialu haga henego ogoni olowa bi ogodagua lalu, Ina inaga ge dulini yaniho biruwa bi mbira buleore lalu hongo howa lowia. <sup>3</sup> Anduane Homogo dahuliya andaganagabi dindi bibahendenagabi Ngode Datagaliwabe kago ibunaga minini howa í igini Aisaganaga waliore Kenana dindi ogoha bedago nadabu bia hole lalu lowiaore bia, lene. <sup>4</sup> Ani lowa lalu, Ai ininaga dindi henene wirugoha dai buwa wali mbira í igini Aisaga dabu bilo taya bibe, lene.

<sup>5</sup> Ani layagola agali biagome ladai bialu lalu, Walime ibuni dindi andaru yu wahalu naibule layagua agua buledabe. Í igini ibuni ini dindi ogoniha haru dai biaguadabe be agua buliyadabe, lene.

<sup>6</sup> Ani layagola Abarahamahanda ladai bialu lalu, Í igini inaga dindi ogoniha haru daiore nabibe laro. <sup>7</sup> Anduane Homogo dahuliya andaganaga Ngode Datagaliwabe

kago ibunime inaga aba ajiya damenerubi inaga dindibi bibahendeore bu hea handala i hangu haru tagira ibuwa dindi ogoore inaga waneigini aguanene holebiraru tihondo muleore lo nga. Ibugua ibunaga dahuliyali i poleberegoha bamba halu pelaragola ina i igininaga wali mbira bedaria handa walia halu haru dai bulebere. <sup>8</sup> Anigo walime manga layagua nde ina bi habo nalole lalu lo wirigome dariba naholebirago. I iginini dege ibuni dindi haru daiore nabibe laro, lene. <sup>9</sup> Bi lai heagola agali biabe bia haga biagome ibunaga gi Abarahama ge dulini yani howa bi habo nalolene hongohi lo wialu ibugua aniore biai hole, lene.

<sup>10</sup> Bi lo ngelalu nde agali biabe bia haga biagome Abarahamanaga nogo kamele hearu aria pirani yari dabudabu wiaru maru mo paga howa yalu Mesebodemia dindiha Naho hearia pole pene. <sup>11</sup> Horo dewaore puabo halu alendo hayagola iba hambu ngoai haga mbira winiyagoria anda puwa ibunaga nogo kamele biaru mo palia howa berene. Alendo ogonidagua haragola walime iba hambu ibaga winiyago. <sup>12</sup> Ainde agali biago ibugua biruwa lalu, Anduane Homogo-o inaga agali haguane kagonaga Ngode Datagaliwabe ina inaga agali haguane kago nde daraore halu biabe ayu ina buleberogo bayale helo biamogo bibe. <sup>13</sup> Ayu i ogoria bedoria wandari maru iba hambu ibulebira. <sup>14</sup> Ibiragola ina mbiragohondo lalu, Inaga be yidegonime iba noliya hambu ngi, larogola ibugua iba noliya hambu ngialu inaga nogo kamelerubi nelu hambu miyagua ogoni ibu inaga biabe bia haga Aisaga one berelo dabaridalo manda bulebero. Ani manda buwa inaga agali haguane biagohondo dara halu biamogo biridago hondolebero, lalu lene.

<sup>15</sup> Agali biagome bi ogoni lalu bereaore dege wandari mbira Beduele wane Lebega berenego iba be payani yalu iba hambu ibini. Beduele ibu Miliga Nahola igini. Naho ibu Abarahama hamene hene. <sup>16</sup> Wandari Lebega ogoni ibu baya buruguleore mbira biruwa agalila mbira mandagi napaleneya. Ibu abale iba be payani yalu ibuwa iba hambu pialu dai bini.

<sup>17</sup> Ani biyagola agali biabe bia haga biagome heyuwa gerai lalu abale Lebega ibiyago ngola howa lalu, Aiore inaga iba be ogoniha howa iba noliya hambu ngiaore bia, lene.

<sup>18</sup> Ani layagola Lebega ibugua agali biagohondo lalu, Agali timbuni-o iba hambu ngerogo na, lowa iba hambu miyagola iba biago nene. <sup>19</sup> Agali biago ibu iba nai howa heagola Lebegahanda lalu, Inaga nogo kamele tibi nde iba karulape nalu nabe mangaore helo hambu muliya dege, lene. <sup>20</sup> Ani lowa Lebega ibugua iba hambu yu tone bialu nogo kamele iba naga wabu wini wiagoha odo berelayagola nogo biaru tibi nde iba karulape nene. <sup>21</sup> Ani biyagola agali biago ibu nde bi nale Anduane Homogo ibunaga biabe bibe layago agua birabe hondole berene.

<sup>22</sup> Nogo kamele ti iba nai hayagola agali biagome nguira mbira ngolome wabini heneneyago Lebeanaga nguini da halu gi pagida ngolome wabini kira heneneyago gini wia halu bini. Gi pagidabi nguirabi muni dewaoreme yolo mibehe. Nguira o biagonaga genda magi garama duria wialu gi pagida genda magi garama pira pira (100) labolabo mialu bini. <sup>23</sup> Ani buwa agali biabe bia haga biagome Lebegahondo lalu, Aiore i ai wanebe. I damene ibirimadaru ayu mbiraga hangu i aba andaga paluene henge mbira ngabe, lalu hale hene.

<sup>24</sup> Ani layagola Lebegahanda ladai bialu lalu, Miliga Nahola igini Beduele ibu wane Lebega i bedogoni. <sup>25</sup> Inaga nogo kamele ti tani nolenebi ti anda paluenebi henge dewa karulapeore nga, lene. <sup>26</sup> Ani layago hale howa Abarahamanaga biabe bia haga biagome dindini bulu paluwa Anduane Homogo mitangi bialu lotu lalu hene. <sup>27</sup> Ibugua lalu, Anduane Homogonaga mini yaraga haro. Ibu inaga agali haguane Abarahamanaga Ngode Datagaliwabe kago ibugua inaga agali haguane dara halu biamogo biaore biyadane hendedo. Dara kago walia halu ibi nde tiga tigaore inaga agali

haguane Abarahama ibu dameneore andagani haru anda ibiyadagonaga turuore howa ibunaga mini yaraga haro, lene.

<sup>28</sup> Ani lai hayagola wandari biago ibugua gerai lalu ibu aija berearia andaga abale puwa o biyaruni lamiai hene. <sup>29-30</sup> Lamiyagola Lebega mbalini Labana ibu nde bi layaru hale ha nguira gi pagidaru ngolome wabini wiaru handa bialu ibugua abale gerai lalu tagira pene. Puwa handalu hearia agali Abarahamanaga biabe bia haga biago ibu nde nogo kameleru helowa unu iba hambiaaga biagoria hearia hendene. <sup>31</sup> Hondowa Labanahanda lalu, Agali haguane-o Anduane Homogohanda ihondo bayale biyadago. Iogoria nahe ina mbirale manda manda bialu inaga nogo kamele ti palelobi anda mo tiga bialu birugo mba, lene.

<sup>32</sup> Ani laya handala Labana abale andaga pene. Andaga puwa Labanahanda ibunaga biabe bia haga agali hearuhondo lalu, Abarahamanaga biabe bia haga agali biago ibu heba ibiyadarubi tinaga ge waya waya bilo iba hambu midaba. Ani bialu nogo kameleni dabudabu yidaru mo pe halu bidaba, lene. <sup>33</sup> Ani biai halu ti tomo nelu dawa yalu ibalu hearia agali Abarahamanaga biabe bia haga biagome lalu, Tomo nane howa bi mbira ala lolebero, lene. Ani layagola Labanahanda lalu, Karulapego latagi harene, lene.

<sup>34</sup> Ani layagola ibugua lalu, I Abarahamanaga biabe bia haga kogoni. <sup>35</sup> Anduane Homogohanda inaga agali haguane Abarahama biamogo bialu bayale heleagola ibu ayu mbirale dewawi homogoore ka. Nogo sibi memebi bulumagabi dewa hinalu siliba ngolobi dewa dege wialu nogo dongi kamelerubi wali agali biabe bia hagarubi dewa dege halu bida. <sup>36</sup> Ibu one Sarahanda wali dagaheoreni igiri mbiraore hangu taba henene ai inaga agali haguane ogoni ibugua ibunaga mbirale uruni bibahende ibu igini ogonihondo miai haya. <sup>37-38</sup> Ani binigo inaga agali haguane ogoni ibugua ihondo bi hongo howa lalu, I igininaga waliore dindi ayu Kenana o kogoniha berene nadabu bia habe. Ininaga dindi teneore dai bialu ini aba hamene karuha wandari bereagua i igini dabu bilo damu dai bibe, laya. Ani lowa ibugua ihondo lalu, Ani buleore lalu bi habo nalole lalu hongo howa lowia, laya.

<sup>39</sup> Ani layagola ina nde inaga agali haguane ogonihondo ogodagua laru. Ai wali ogoni ibugua ila haru dai bua nahayagua agua buledabe laru. <sup>40</sup> Ani larugola ibugua ogodagua laya. I Anduane Homogonaga bi laragoore taliaga agali kogo ibunime ibunaga dahuliyali mbira ila haru poragola ina biabe berego bibahende bayale dege holebira. Ai i igininaga wali mbira ini damene haruagoha bedaria handa walia holebere. <sup>41</sup> Ani bialu inaga damene karia poregola tigua wandari mbira nanguleberama layagua nde bi habo nalole lalu lo wirigome i dariba ho wiaabo naholebira laya, lene.

<sup>42</sup> Agali biabe bia haga biagome laabo halu lalu, Ayu alendo iba hambiaaga biagoria anda ibu howa ina inaga agali haguane Abarahama kagonaga Ngode Datagaliwabhondo ogodagua bi laru. Anduane Homogo-o ina inaga biabe berego mo bayale helabe. <sup>43</sup> Ayu alendo ogoria bedoria wandari mbira ibiyagua ina ibuhondo lalu, I iba noliya inaga iba be ogoniha hambu ngiaore berene, lolebero. <sup>44</sup> Ani larogola ibugua lalu, E iba nabelo hambu ngerogo na. Inaga nogo kamele karunibi iba nelu hambu muliya, layagua inime inaga agali haguane kagonaga wali ogoniore dabarida manda bulebero. <sup>45</sup> Bi ani lalu berewaria Lebega ibiya. Iba be payani yiniyago abale hambule ibaha dalipe halu piyagola ina lalu, Ainde iba i noliya hambu ngiaore bia, laru. <sup>46</sup> Ani larugola ibugua abaleore iba be yupe halu iba hambu ngialu howa lalu, Agali haguane-o iba ogo na. Inaga nogo kamele karubi nelu hambu muliya, laya. Ai iba nai harugola ibugua nogo kamelerubi hambu miya. <sup>47</sup> Ani biyagola ina ibuhondo lalu, I ai wanebe, lalu hewaria ibugua lalu, Miliga Nahola igini Beduele ibu wane i bedo, laya. Ani layagola ina ibunaga nguirabi gi pagidabi wia haru. <sup>48</sup> Ogonidagua buwa ina Anduane Homogo Ngode Datagaliwabe mitangi bialu ge duli hanga howa lotu lalu haru.

Inaga agali haguane Abarahamanaga Ngode Datagaliwabe ibugua Abarahama ibuni hameneore andagani haru ibiyadago manda buwa ibunaga mini yaraga harugoni. Ai wandari ogoni inaga agali haguane ibu igininaga dabu bia hole haru holiya lo manda biru. <sup>49</sup> Ai tigua inaga agali haguanehondo mana bayale tigabi bule lo manda birimiyagua nde bi áyu ogoniore ladai bilimulo hame ledó. Ndo ogonidagua bulene hame nalarimiyagua nde ina mbirale mbira agoale bibehedabe hondoliya, lene.

<sup>50</sup> Ani leagola Beduele Labanala libugua ladai bialu lalu, Anduane Homogo ibunime urunidagua binidago iname bi mbira lolene nawida. <sup>51</sup> Lebega o bedagoni Anduane Homogohanda layadadagua bialu ibu inaga agali haguane iginini dabu bilo haru pu, lene.

<sup>52</sup> Agali biabe bia haga biago ibugua bi bayale layago hale halu ibu bulu palialu Anduane Homogo mitangi buwa lotu lene. <sup>53</sup> Ani buwa ibugua mani yári bayale damene ngolome silibarume wabinirubi aga bayalebi Lebega ibu karulelo mialu maru wandari aba aiyala mialu yári maru nde wandari mbalini Labana mialu bini.

<sup>54</sup> Bi lai halu Abarahamanaga biabe bia haga biagobi agali maru ibu heba ibiyarubi ti biruwa tomo ibabi nalu bialu palene. Egerebalene palu heyuwa Abarahamanaga biabe bia haga biagome lalu, Áyu ogoningi dege inaga agali haguane karia dai bulene hamelo kogoni, lene.

<sup>55</sup> Ani layagola wandari aiya mbalinilame lalu, Wandari ogoni horo piru agima nde inane birulumaya berelo. Mani nde pilimulo, lene. <sup>56</sup> Ani layagola agali biabe bia haga biagome lalu, Anduane Homogo ibunime biabe timbuniore biyago. Inaga agali haguane karia abale dai buleberogo tigua hapai nahalimu, lene. <sup>57</sup> Ani layagola tigua ladai bialu lalu, Iname wandari ibuninaga hame hale hamiya ibuni olowa ibu lama, lene. <sup>58</sup> Ani lowa tigua Lebega olalu ibu lowa ibuhondo hale halu lalu, Í agali ogola polebe, layagola, E polebero, lene. <sup>59</sup> Ani laya handala Lebegabi ibunaga biabe bia haga wali mbirabi libu haru agali Abarahamanaga biabe bia haga biagobi agali ibu heba ibiyarubi ti haru pole pene. <sup>60</sup> Pole pialu hearia tigua Lebega mo turu halu bi lalu, Mbalibuni-o íore waneigini daga aulolebe tobahe daosini dewa aiya birabelobi inaga aguanenerume tinaga waitigi karunaga wai buwa wayali halu tinaga dindi tano ngaru karulai helobi hamelo kama, lene. <sup>61</sup> Ani laya handala Lebega ibunaga wandari biabe biahaga marubi ti haru nogo kameleni bialu Abarahamanaga biabe bia haga agali biago heba pene.

<sup>62</sup> Tigua hariga ibalu hea tambu Aisaga ibu iba gorene bere mbira mini, Ngode Datagaliwabe Haluhe Kagome I Handaga Kagonaga, lagago ogoni ngelalu ibu bolangua halu Negebe dindini ibu hene. <sup>63</sup> Horo mbirungi alendo hayagola Aisaga ibu ibaga bialu datani tilitilia hangu buhe wiagoria howa handa amu halu hearia nogo kamele dewa ibiyaria hendene. <sup>64</sup> Lebega ibuguabi nde Aisaga hondowa ibu nogo kamelenaga erembirani berenego dalipe hene. Dalipe howa agali biabe bia haga biagohondo hale halu lalu, <sup>65</sup> Agali amu ina poleberemagoha howa ibiragoni aibe, lene. Ani layagola agali biabe bia haga biagome ladai bialu lalu, Inaga agali haguane o ibiragoni, lene. Ani layagola Lebega ibunaga aga mbira emboneni tangi henene yamuwa ibuninaga dengui buyi hene.

<sup>66</sup> Aisaga ngola howa agali biabe bia haga biagome Aisagahondo o biyaruni bibahende ogodagua biya lalu lamiai hene. <sup>67</sup> Ani lalu Aisaga ibugua Lebega ibu aiya Saranaga balai anda paluni heagoha haru puwa ibu dabu bini. Abale Aisaga ibu aiya Sara homayagola dara dege howa henego ibu one Lebega dabu bialu dara holene embeda halu ibu oneore gubalini halu bu miniha dungulo hene.

## 25

*Abarahama ibu iginini aguanene maru henego ogo*

<sup>1</sup> Abarahama ibu mani wali mende mini Kedura dabu bini. <sup>2</sup> Ani dabu buwa wali ogoni ibugua igiri Simirana Yogosana Medana Midiana Isibaga Sua imaru taba hanaga bini. <sup>3</sup> Yogosana ibu Seba Dedanala aba hene. Dedana ibu Asurimi Ledusimi Lemimi uruninaga mamali hene. <sup>4</sup> Midiana ibu iginiru Ebabi Ebebi Hanogobi Abidabi Eledabi haga binigo uruni ti Kedura aguane hene.

<sup>5</sup> Abarahama ibugua ibunaga paluni bibahende Aisagahondo miai hene. <sup>6</sup> Abarahama ibuni homa nabi howa ibu one mani dabu binigo igini bu henedaruni mo turu haga bialu mbirale migi biaga hene. Ani biaga henego ainde igiri uruni ti ibu igini Aisaga kagoria mandagi nahelo ti dindi kaundia ni tagira ibiragohayagi hole pudaba lene.

*Abarahama homayagola tigua hora henego ogo*

<sup>7-8</sup> Abarahama ibu turu haga bialu waheore howa mali handari mbirani pira kariani duria (175) hayagola ibu homene. <sup>9</sup> Ani homayagola ibunaga tingini ibu igini Aisaga Isimalelame Mamere dindini homali Magabela egeanda biagoha hora hene. Homali ogoni Hidi hameigini Soha igini Eberononaga egeanda winigo ogoniha hora hene. <sup>10</sup> Dindi ogoni Abarahama ibugua Hidialinaga yolo bini wini. Ani bini winigoha Aisaga Isimalela libugua homali Sara hora hene wiagoha dege Abarahama hora hene.✧ <sup>11</sup> Abarahama homayagola Ngode Datagaliwabehanda Aisaga bayuwaore biamogo bialu hene. Anigo Aisaga ibu nde iba uli wene mini Ngode Datagaliwabe Haluhe Kagome I Handaga kagonaga laga iba bereagoria dindi mbira kaware wiagoria ibu haabo hene.

*Isimalenaga igini aguaneneru henego ogo*

<sup>12</sup> Isimale ibu Saranaga garabaya biabe ale bia haga Iyibi wali mini Hega Abarahamala libu igini hene. <sup>13</sup> Ani henego Isimale igini waheneni howa daga lama pialu heyogone henego lamaro uru dege hene. Nebaiodo ibu igini wahene howa igini mende Keda tebone Adabele mane Mibisama <sup>14</sup> dauni Misima waragane Duma kane Masa hene. <sup>15</sup> Igin halini Hadada dini Tema pini Yadua beane Nabisi hombeane Kedema uruni haga bini. <sup>16</sup> Ani henego Isimale igini o biaruni ti hameigini hombearia (12) mani henerunaga mamali pigane ti hene. Tinaga mini dindi ti henedaruninaga mini winigo nga. <sup>17</sup> Isimale ibu mali handari mbirani pira tebirani karia (137) hayagola ibu homene. <sup>18</sup> Isimale aguaneneru ti Habila dindi Sua dindila hengeneha dindi wupe kagoha paluyu peda. Dindi Sua ogoni Asiria dindi pole hariga peagoria Iyibi dindi kaware ngelowa dege wia. Anigo hameigini uruni tini Abarahama aguanene maru hearu heba mandagi nahaga hene.

*Iso Yagabala taba heneneo ogo*

<sup>19</sup> Abarahama igini Aisaganaga bi te ogo. <sup>20</sup> Aisaga ibuni mali pira maria (40) howa ibu one Lebega dabu bini. Lebega ibu hameigini Aramia aria Mesobodemia dindini agali mbira Beduele henego wane biruwa Labana mbalini berene. <sup>21</sup> Aisagahanda ibu oneme waneigini nataba hanayagola ibu one biamogo bia lalu Anduane Homogohondo bi layagola Lebega ibu wali gali bere berene. <sup>22</sup> Lebega tombeha waneigini kira biruwa gungu biayuane handalu ibugua Anduane Homogohondo bi ogodagua lene. Iha ogonidagua biaruagoni agidabe, lene. Ibugua Anduane Homogohondo bi layadagoni aginaga binidabe hondolenaga lene.

<sup>23</sup> Ani layagola Anduane Homogohanda bi ogobi ladai bini. Wali agali hameigini kira inaga tombeha bedabigo ina hameigini kira ogoni taba hanarengi libu hongo haga haga buleberabi. Hameigini mbiragome mendego bope holebira. Pigane taba hanarego ibu maha halu maha taba hanarego ibu mo wahene haragola wahene ibugua lone heyogonenaga biabe bia haga holebira, lene.✧



<sup>24</sup> Lebega waneigini taba honolene tu hayagola heneneore igiri kira taba henene.  
<sup>25</sup> Igiri pigane taba hanayidago ibunaga tingini daramabioreni iri dewaheyagola ibunaga mini Iso wini. <sup>26</sup> Hamene mende taba hanayagola ogonime ibu hamene Isonaga ge ayuendeni yaniho yalu ibini. Ani binigonaga ibu mini Yagaba wini. Aisaga ibuni mali pira waragaria (60) heagola Lebegahanda igiri ogoni labo taba henene.

*Iso ibuninaga wahene holene henge yu wahenego ogo*

<sup>27</sup> Igiri biago labo wahe halu Iso ibu tayanda irabuha taya haga mugubeyi hene. Yagaba ibu ibagaru nabi andaga hangu haga hene. <sup>28</sup> Aisaga ibugua ibu igini Isohanda nogo ega bo yalu ibiraru nolenaga turu howa ibu Iso dege gubalini haga hene. Anigo Lebega ibu nde Yagaba gubalini haga berene.

<sup>29</sup> Horo mbirungi Iso ibu irabuha howa dai bialu hearia Yagaba ibu nde paboro subu bayale ngabiore dawaho berearia hendene. <sup>30</sup> Iso ibu tomo garibi timbuniore lama ibalu hariago ibugua lalu, Yagaba ina tomo subu iba baya daramabi dawedegoni maru abale noliya ngi, lene. Irane ogoninaga tigua Iso mini mende Idomo wini.\*

<sup>31</sup> Ani layagola Yagabahanda ladai bialu lalu, Ina nde i wahene holene henge yidegoni i holiya ngiriyagua nde ngi larego ngulebero, lene.

<sup>32</sup> Ani layagola Iso ibugua lalu, Ogoni karulape. Ayu garime tongo labehe kogodago. Wahenenaga holene henge ogonime i biamogo agua bulubadabe, lene.

<sup>33</sup> Ani layagola Yagabahanda lalu, Heneneore inaga henge ihondo ngule la, lene. Iso ibugua lalu, Ina heneneore larogo inaga henge i haore bibe, lene.\* <sup>34</sup> Ani laya handala Yagabahanda mberedi maru mialu paborome dawene subu baya ngabi dawa wiyarubi nelo miyagola Iso ibu nene. Nai halu Iso ibu heyalu pene. Ogoni binidagonime Iso ibuninaga holene henge bame nagalonedanda manda bialu anidagua bini.

## 26

*Aisaga ibu Gera tanoha henego ogo*

<sup>1</sup> Kenana dindini gaea timbuni bialu bamba Abarahama heangi hina gari penedagua dege pene. Ani piya handala Aisaga ibu Kenana wahalu Pilidia dindiha Gera tano pialu Kini Abimelege hearia pene. <sup>2</sup> Ani piyagola Anduane Homogohanda Aisaga hearia ibuwa ibuhondo lalu, I Iyibi dindiha pu nabi dindi mbira ina i habelo nguleberogoria pu habe. <sup>3</sup> I dindi ogoriani pu kegola ina i baya hangu handayaho howa i biamogo bialu holebero. Dindi ogoni bibahende ihondo ngialu inaga aguanene mani holebiraru tihondobi mulebero. Ina i aba Abarahamahondo lo wirugo lola helo ani ngulebero.\*

<sup>4</sup> Ani bialu mani i waneigini aguaneneru dewaore harini yakundi dagalabe nahe bu karunidagua ina mo dewa holebero. Dindi o kegonibi bibahende tihondo miai holebero. Ani berogola hameigini dindi tara tarani bibahende holebirarume ihondo hale halu i waneigini aguaneneru biamogo bialu mo bayale harudagua tibi nde ani biamogo bialu mo bayale ha lalu ihondo bi lolebira. <sup>5</sup> Abarahama ibugua inaga bi hale halu bi mana wiwaru baya hangu talialu bialu hayagonaga ina i biamogo bialu mo bayale holebero, lene.

<sup>6</sup> Ani layagola nde Aisaga ibu Gera tano wiagoha haabo hene. <sup>7</sup> Ani heagola agali tano ogoniha hearume Aisaga one bereago hondowa ibu aibe lalu hale halu hearia Aisagahanda ladai bialu lalu, Wali ogoni ibu i mbalini beda, lalu hene. Ani layagonaga irane ibu gi howa wali ibu one beda nalene. Ibugua mitangi bialu Lebega ibu i one beda laruyagua agali urunime Lebega ti holenaga i bo waholebada manda bialu ani lene. Lebega ibu wali bayaore berenego manda buwa ani lene.\* <sup>8</sup> Aisaga ibu dindi ogoniha lu dege howa horo mbirungi Pilidialirunaga Kini Abimelege ibugua ibu andaga windoha

\* 25:30: Idomo inanaga bi lalu daramabi laga. ✧ 25:33: Hi 12.16 ✧ 26:3: Pig 22.16-18 ✧ 26:7: Pig 12.13, 20.2

howa handatagi halu hearia Aisagahanda ibu one Lebega yu hubi layane de hendene. <sup>9</sup> Ani biyago hondowa Abimelege ibugua Aisaga olalu íbu lowa ibuhondo lamialu lalu, Áyu heneneore wali ogoni í oneoredane hendedogoni. Ai irane aginaga ibu í mbalini beda laribe, lene.

Ani lamiyagola Aisagahanda ladai bialu lalu, Ina wali ogoni í one beda laruyagua agali bu karume í bo wahalu wali ogoni ti holobada manda buwa laru, lene.

<sup>10</sup> Anidagua layagola Abimelege ibugua ladai bialu lalu, Ina inahondo mana agilego o biridagoni. Inanaga agali bu karu aria mbirame í one kayu binidale nde inaha genda timbuni anda ibidalego. Ainde genda ogoni mo yu anda ibaga tene íniore kele, lene. <sup>11</sup> Ani lowa mani Abimelegehanda wali agali bu hearuhondo bi hongo howa lamialu lalu, Agali mbirame agali ogo mo ko harimiyaguabi ibu one o bedago mo ko harimiyaguabi agali ogonidagua biaga kago ibuni homelo bo waholene wulebira, lene.

<sup>12</sup> Aisaga ibu dindi ogoniha howa e bialu tomo dewa hangalu hene. Ani hangalu heagola Anduane Homogohanda Aisaga biamogo bialu mo bayale hayagola ibu mabuha tomo anda hagadagua ndo dewaore anda hene. <sup>13</sup> Ibugua bibahende biyago bayaleore biaabo hayagola ibunaga dabudabu dewaore wuwa ibu agali homogo hene. <sup>14</sup> Ibunaga nogo sibi bulumagaru dewaore hinalu ibunaga biabe biaga agaliru dewa dege heago hondowa Pilidiali bu hearume henge lalu hene. <sup>15</sup> Ani lalu howa tigua iba hambiaga uli dewa abale Abarahamanaga biabe biaga agali hearume wa winigo uruni dindi alu mogo bini.

<sup>16</sup> Ani biyagola mani Abimelege ibugua Aisagahondo lamialu lalu, Í hongoheore halu ina bolangua haridago ai ina baba holene nakarulapedago dindi ogoriani nahe tagira pobelo hameledo, lene. <sup>17</sup> Ani laya handala Aisaga ibugua ti helalu puwa Gera dindiha dindi tigabi ulini wiagoha puwa balai anda bu hene. <sup>18</sup> Ani buwa bamba Abarahamananda iba hambiaga uli dindi ogoniha wa wigi binidaruni Abarahama homeha Pilidiali hearume uli uruni dindi alu mogo biai hayaru Aisaga ibugua lone mo tiga bini. Ani buwa ibugua iba uli uruni ibu aba Abarahamananda mini abale wini wiago lone lalu hene.

<sup>19</sup> Horo mbirungi Aisaganaga biabe biaga agali bu hearu tigua iba uli mbira walu hearia uli ogoniha howa iba duguadaga hene. <sup>20</sup> Ani biyagola Gera agali maru nogo sibi haru haga hearume Aisaganaga nogo sibi haru haga hearu baba lai lalu howa lalu, Iba uli ogoni inanaga ngama, lene. Anidagua layagola Aisagahanda tihondo lai layago manda buwa ibugua iba uli ogoni mini Lai Laga wini.

<sup>21</sup> Ani bialu Aisaganaga biabe biaga agali biarume iba uli mende wene. Ani wa wiagola Gera agali biarume lone ibalu lai lene. Anidagua layagola Aisagahanda iba uli ogoni mini Waitigi Haga Iba laga wini. <sup>22</sup> Ani buwa Aisaga ibu dindi ogoni wahalu puwa iba uli tebone wene. Ani walu heagola agali biaruru tigua lone lai nale hene. Ani wiyago lai nale heagola hondowa Aisagahanda iba uli ogoni mini Bayale Holene laga wini. Wialu howa ibugua lalu, Anidagua larogoni irane Anduane Homogo ibugua ina dindi ogoniha bayale halubi mbirale bayalerubi yu holomaya ngiyada, lene.

<sup>23</sup> Mani howa Aisaga ibu dindi ogoni wahalu dindi mende Beaseba wiagoria pu hene. <sup>24</sup> Horo ogoningsi mbiraga Anduane Homogo ibu Aisaga hearia ibuni hapani howa lalu, Í aba Abarahamanaga Ngode Datagaliwabe í kogonigo í gi nahabe. Í heba mandagi í haabo ko. Ina íninaga biabe biaga agali Abarahama mitangi bialu ibuhondo bi lo wirugonaga lola helo í biamogo bialu mo bayale halu ínaga waneigini aguanenerubi mo dewaore holebero, lene. <sup>25</sup> Ani layagola Aisaga ibugua lomabu delaga dabu mbira dindi o hayadagoriani bia howa Anduane Homogo mitangi bialu lotu lalu hene. Ani bialu ti dindi ogoriani balai anda bu howa ibunaga biabe biaga agali bu hearume iba uli mbira wene.

*Aisaga Abimelegetame habo nalolene bi lowinigo ogo*

<sup>26</sup> Abimelegege ibu Gera tano howa Aisaga hondo pene. Abimelegege mini mandaru talebu miaga agali mbira Ahusada henegobi kininaga ami agaliru haru haga haguane mbira Pilogo henegobi ti haru mandagi Aisaga hearia pene. ✧ <sup>27</sup> Ani hondo ibiyagola Aisagahanda tihondo lalu, Abale i t'naga dindiha nahole lowa taliatagi harimigodago ai áyu agi taya ibirimibe, lene.

<sup>28</sup> Ani layagola tigua ibuhondo ladai bialu lalu, Iname handalu hemaria Anduane Homogo ibu i heba kago manda bu kama. Ani manda buwa ai i baba habo nalolene bi mbira lo wimiya lalu ibirima. Habo nalolene bi ogoni ogodagua. <sup>29</sup> Iname ihondo mana ko mbira nabioire harimago ai ina nde ina mo ko holene mitangi nabi habelo. Abale iname ihondo mana bayale wiaru dege bialu harimagoni ndobe. Ina helalu tagira piriangi i genda nahe pirigoni. Áyubi nde ogonidagua dege Anduane Homogohanda i heba howa biamogo bialu mo bayale halu kago hendedemagoni, lene. <sup>30</sup> Ani layagola Aisagahanda tomo timbuni dawa hayagola ti tomo ibabi nalu berene. <sup>31</sup> Egerebagiore heyuwa tini hangu hangu howa ina mini mbiraore hamiya laga bialu habo nalolene bi hongohe lowini. Ani lowa Aisaga ibugua lalu, Ai mo palia holene ti heba pudaba, laya handala tigua Aisaga helalu turu halu tini dalu dai bini.

<sup>32</sup> Horo ogoningi dege Aisaganaga biabe biaga agali hearume ibu hearia ibuwa lalu, Iname uli mbira walu hemaria iba bayaleore berearia abale handa walia harima, lalu lamini. <sup>33</sup> Ani lamiyagola Aisaga ibugua iba uli ogoni mini Seba lalu wini. Ani lenedagoni wiaabo henegonaga tigua tano ogoni mini Beaseba wini.\*

*Iso one bereneru ogo*

<sup>34</sup> Iso ibu mali pira maria (40) hayagola ibugua Hidi wali kira dabu bini. Wali mbira ibu Hidi agali mini Beri henego wane Yudidi bereago dabu bini. Ani bialu Iso ibu wali mende Hidi agali dege mini Elono henego wane Basemada bereago dabu bini. <sup>35</sup> Wali kira ogoni libugua Aisaga Lebegala mo tandaga haabo haga berene.

**27**

*Yagabahanda ibu aba mo hondo howa Isonaga henge aribia henego ogo*

<sup>1</sup> Aisaga ibu agali waheore halu de au halu mbirale handabe nahe hayagola berene. Ani biruwa ibu igini wahene Iso olowa lalu, Igini-o, layagola Iso ibu ladai bialu lalu, Ya-o i kogoni, lene.

<sup>2</sup> Ani layagola Aisagahanda lalu, Ai i waheore halu angi homolebe tobahe bedogonidago. <sup>3</sup> Áyu inaga danda timu wiridaru yalu irabuha taya puwa nogo mbira babe. <sup>4</sup> Bo yalu dai buwa tomoore dende bi ina noa haruligobiore dawa yalu ibabe. Eberegola inaga paluni bi lalu i nahome howa Anduane Homogohanda i biamogo bialu mo bayale helo bi lamaro bulene yidogo la holiya, lene.

<sup>5</sup> Aisagahanda ibu igini Isola bi ogoni lalu birayuago Lebega ibu nde haleho berene. Libu bi ogoni lai halu Iso ibu irabuha taya pole tagira pialu piyagola <sup>6</sup> Lebegahanda Yagabahondo lalu, Áyu ogoningi i abahanda Isohondo mbira ogodagua layuane hale haru. <sup>7</sup> Nogo mbira bo yalu ibuwa dawale pu. Dawa yalu eberegola nowa nde i nahome howa Anduane Homogohanda i biamogo bialu mo bayale helo bi lamaro bulene yidogo la holiya, layuago hale haru. <sup>8</sup> Aiore i igini-o bi larogoore hale halu bibelonaga larogoni. <sup>9</sup> Ai i nogo pabeha puwa tomo i aba ibu hame lagagobiore ina dawa holiya. Nogo meme igini hungubalua kira bo yalu ibule pu. <sup>10</sup> Nogo ogoni dawa yalu poregola i aba ibugua nowa nde Anduane Homogohanda i biamogo bialu mo bayale helonaga bi lamaro bulene winigo lolebirago, lene.

✧ 26:26: Pig 21.22 \* 26:33: Iba uli mini Seba winigo inanaga bi lalu, Habo Nalolene Bi, laga wini.

<sup>11</sup> Ani layagola Yagabahanda ibu aiyahondo ladai bialu lalu, Anigo Iso ibu iri dewahe halu i nahedago nde <sup>12</sup> abahanda i ela halu karia tingini iri nahedane hondowa ibu mo hondo hole ibiridalo manda buwa ibugua Anduane Homogohondo i mo ko habe lalu bi laragola i biamogo bialu mo bayale naholebirago, lene.

<sup>13</sup> Ani layagola ibu aiyahanda lalu, Igini-o i mini burugu nalabe. Genda mbira ibiyagua nde iniha ibilogo. Ayu ina larudagua bialu nogo meme igini hungubalua larugo bo yalu ibule pu, lene. <sup>14</sup> Ani laya handala Yagaba ibugua nogo meme igini hungubalua biago labo bo yalu ibuwa ibu aiyahondo mini. Ani biyagola Lebegahanda nde Yagaba aba ibu tomo ogobiore hame lagago lowa manda bialu dawene. <sup>15</sup> Ani buwa Isonaga aga bayale maru Lebega andagaha ngeleneyago muwa Yagaba karula hene. <sup>16</sup> Ani karula heagola Lebegahanda Yagabanaga mabi gi kirabalibi nogo meme irini heba dongone lagalo wiyagome biadambi helene. <sup>17</sup> Ogonidagua bia howa Lebega ibugua tomo baya dendebiore dawa wiyagobi mberedi maru hiru wia binigo Yagaba ibu yalu pelo mini.

<sup>18</sup> Miya handala ibu aba berearia yalu puwa lalu, Aba-o, lene.

Ani layagola Aisagahanda lalu, Ya igini-o i aibe, lene.

<sup>19</sup> Ani layagola Yagabahanda ladai bialu lalu, I Iso i igini wahene biagonigo. Ai inime bibe larigodagua bialu tomo dendebi dawa yidogo nole heya. Nowa nde Anduane Homogohanda i biamogo bialu mo bayale helonaga bi lamaro bulene labelo, lene.

<sup>20</sup> Ani layagola Aisagahanda lone hale halu lalu, Igini-o ina nogo ogoni nde abaleore agua handa walia halu baribe, lene.

Ani layagola Yagabahanda ladai bialu lalu, Anduane Homogo inaga Ngode Datagaliwabehanda biamogo biyagola ina nogo ogoni abale handa walia howa balu dawarudagoni, lene.

<sup>21</sup> Ani layagola Aisagahanda lalu, Ai kaware ogoria hapara halu ibu. Ina gime ela halu i i igini Isooredabe be taradabe hondoliya, lene. <sup>22</sup> Ani layagola Yagaba ibu aba bereagoria hapara halu pu heagola Aisagahanda gime baya hanguore yahandaga bialu biruwa lalu, Ina bi larego Yagaba aledago inaga gi ge Isoda, lene. <sup>23</sup> Irane Yagabanaga gi meme dongoneme kabu buwa heagola Aisaga ibugua ogoda lalu handabe nahe berene. Ibu handabe nahe berenedago tene Yagabanaga gi nogo meme dongoneme kabu buwa heagola ibu gi irihe Isodalo manda bu berene. Ani manda buwa dege Aisagahanda ibu biamogo bialu mo bayale hole howa <sup>24</sup> lone hale halu lalu, i henene i igini Isoore ibu kebe, lene.

Yagabahanda ladai bialu lalu, E i Isoore, lene.

<sup>25</sup> Aisagahanda lalu, Nogo dawa yaridagoni noliya ogoria yalu ibu. Nowa i biamogo bialu mo bayale helo bi lamaro bulene yidogo loliya, layagola Yagaba ibugua tomo dawa yalu waini ibabi hambu yalu binigo ibu aba nelo miyagola Aisaga ibu nene. <sup>26</sup> Nai howa lalu, Igini ai kaware birapara howa i nunū la, lene. <sup>27</sup> Ani layagola Yagabahanda ibu aba nunū lole birapara halu hearia Aisaga ibugua Yagabanaga aga ngahene. Ani buwa Aisagahanda Anduane Homogohondo ibu igini biamogo bialu mo bayale habe lowa lalu, I iginiha nga bayale o biaruago Anduane Homogohanda mabu mbira mo bayaleore hene mbauleda, lowa lalu, <sup>28</sup> Ngode Datagaliwabehanda dadimba mbiraga ibira helaragome inaga maburuha tomo bibahende bayale hangu anda hai helo. Ibugua widibi waini iba berelo pu mbira mini gerebi lini delobi dewaore i mabuha bayale anda hai helelo. <sup>29</sup> Ani bialu wali agali bibahende karuni inaga biabe biaga hai halu wali agali dindi tara tarani haghaha bidarubi i andaneha hai helo. i aiyā ibu waneigini aguanene mani holebiraru tibi nde i andaneha hai helo. Agali marume Anduane Homogohanda i mo ko helo bi lalu karu tini mo ko helo. Marume Anduane Homogohanda i biamogo

✧ 27:27: Hi 11.20

bialu mo bayale helonaga bi la halu karu tibi nde Anduane Homogohanda tini biamogo bialu mo bayale helo laro, lalu Aisagahanda lai hene.✧

*Aisagahanda Iso mo bayale helonaga Anduane Homogohondo bi la henego ogo*

<sup>30</sup> Áyu ogoni dege Aisaga ibu Yagaba biamogo bialu mo bayale helonaga Anduane Homogohondo bi lalu berenego Yagaba ibu tagira pialu piyagola ibu hamene Iso irabuha taya penego dai bini. <sup>31</sup>Ibuguabi nde tomo bayale dendebiore dawa yinigo ibu aba berearia yalu puwa lalu, Aba-o Anduane Homogohanda i biamogo bialu mo bayale helo bi lahabelo nogo dendebiore dawa yidogo nole heya, lene.

<sup>32</sup> Ani layagola Aisagahanda lalu, Be í aibe, lene. Ani layagola Isohanda ladai bialu howa lalu, I Iso í igini wahene biago eberogoni, lene.

<sup>33</sup> Ani layago hale howa Aisaga ibu mogo timbuni lowa duru lalu biruwa ogodagua hale halu lalu, Agali abale i berewaria nogo bo dawa yalu ibiyadagoniore aidabe. Ina biamogo bialu mo bayale helonaga bi lamaro bule wirugo abale lai harugo. Ai ogoni ibuha helo lalu mirudago lone mo yu daibulene nakarulape, lene. <sup>34</sup>Iso ibu abahanda bi ogoni layago hale howa dugu timbuni bialu lalu, Aba-o ibi nde Anduane Homogohanda biamogo bialu mo bayale helo bi lahabelo, lene. <sup>35</sup> Ani layagola Aisagahanda lalu, í hamenehanda i mo hondo halu í biamogo bialu bayale holenego ibu hole mo yalu piyada, lene.

<sup>36</sup> Ani layagola Isohanda lalu, Áyu ogoni inaga paluni halu mende mo kayu biyada. Ani biyadagome ibu mini Yagaba ogoni henene tagira poragoni.\* Aba-o aiyahanda i ala taba henene howa wahene i harugo. Ai wahrenenaga henge ogoni ibu miyagola waharugoni. Áyu iniore biamogo bialu mo bayale helonaga Anduane Homogohondo bi lolene winigobi ibu degeme palu bialu piaruago agua binidabe. Áyu i biamogo bialu mo bayale helo bi halu mende labe nahedabe. Lolene wiagua nde labehedago, lene.✧

<sup>37</sup> Ani layagola Aisagahanda ladai bialu lalu, Ibu inaga haguane dabo helalu ibunaga dameneru ti ibunaga biabe biaga helo lalu helaru. Ibunaga mabuha widiru waini ibaru berelobi pu mbira lini daga mini gerebi dewa dege anda hai helo larugo ai íore Anduane Homogohanda biamogo bialu mo bayale helo agialeore loabe, lene.

<sup>38</sup> Ani layagola Isohanda lone dege hale halu lalu, Aba-o íla mo turu ho holene nde mbiraore hangubi nayiorebe. Anduane Homogohondo ibi nde biamogo bialu mo bayale habe lalu mbira laharene, lene. Iso ibugua ani dege lalu biruwa dugu bia timbu hene.✧ <sup>39</sup> Ani biyago hondowa Aisagahanda lalu, í dalu dindi kaundiaha ko mbirale anda habe naheore wulebira. Mbiraga dadimbabi í mabuni ibira naholebira.✧ <sup>40</sup> Ina tomo bayale nalu ini bayale holenaga wai biaga áyu tibu yuwa taya bialu wai dege bialu holebere. Ani bialu howa í hamenenaga biabe bia haga holebere. Ani ha holeberego mani í hamene yu wahalu ini hangu ha tara holebere, lalu lene.✧

<sup>41</sup> Iso ibu abahanda Yagaba biamogo bialu mo bayale helo bi layiyagonaga keba timbuniore Yagabaha ho wia halu lalu, Tigimandi hangu howa i aba homolebirago. Homaragola dugu andaru hai howa dara embeda kagola Yagaba bo waore holiya haro, lene.

<sup>42</sup> Ibugua bi ogonidagua lalu heago Lebega hale howa berene. Ani hale howa ibugua Yagabahondo lalu, Bi ogo baya hangu hale habe. í hamene Isohanda ina biriruninaga ibu bu miniha tandaga timbuniore ho howa í homabelo bo wahole manda bialu kago.

<sup>43</sup> I igini-o aiore ina mbira bia larogo bibelo. Áyu ogoningi Harana dindi ibida pialu i mbalini Labana karia pobelo. <sup>44</sup> í hamenenaga bu miniha tandaga ho kago ereba halu <sup>45</sup> ina biriruni embeda hai helo tagi hole pu. Embeda ho kagola mani í dai bibelo ina

✧ 27:29: Pig 12.3 \* 27:36: Yagaba mini inanaga bi lalu, Henge aribia haga. ✧ 27:36: Pig 25.29-34 ✧ 27:38: Hi 12.17 ✧ 27:39: Hi 11.20 ✧ 27:40: Pig 36.8, 2 Kin 8.20



mbiralihondo damu pu lolebero. Ani larogoni tene libu kirabali nahomalibulonaga larogoni, lene.

*Aisagahanda Yagaba Labana hearia pu lenego ogo*

<sup>46</sup> Lebegahanda Aisagahondo lalu, Iso one Hidi wali libugua mana bialu kagoniore manga kogoni. Mani Yagabahanda Hidi wali kirali o bedagolabo ale dege dabu biyagua i ogoria bira ndo homoleneore karulape, lene.

## 28

<sup>1</sup> Ani layagola Aisagahanda Yagaba olalu ibu lowa ibuhondo ogodagua lene. I Kenana dindi ogo wali nadabu buleore. <sup>2</sup> Ai i aija ibu aba Beduele dalu Mesobodemia pobelo. Puwa i ababuni Labana wane mbira birulebirago ogoni dabu bule pobelo, lene. <sup>3</sup> Ani lowa ibugua lalu, Ngode Datagaliwabe Hongo Haiheore Kagome i biamogo bialu mo bayale howa i hameigini dewali aba habelo ibugua i waneigini dewaore ngilo hamelo ko. <sup>4</sup> Ai Ngode Datagaliwabehanda Abarahama biamogo bialu mo bayale dege henedagua ibi inaga aguanene mani holebirarubi ti biamogo bialu mo bayale dege helo. Mani dindi ogo Ngode Datagaliwabehanda Abarahama minigo ogoni i karulo habelo, lene. ✧ <sup>5</sup> Aisagahanda Aramia hameigini aria agali mbira Beduele igini Labana ibu Yagaba Isola aija Lebega mbalini Harana dindini kago ogoni ibu andaga, Yagaba i pole pu, lene.

*Iso ibu wali mende dabu binigo ogo*

<sup>6</sup> Aisagahanda Yagaba biamogo bialu mo bayale helo ibu Mesobodemia wali mbira dabu bule pu layiyago Iso ibu hale hene. Aisagahanda Yagaba biamogo bialu mo bayale helonaga Anduane Homogohondo bi layangi howa Yagaba ibu Kenana wali nadabu bibe layadalo manda bini. <sup>7</sup> Iso ibugua manda bialu hearia ai Yagaba ibugua aija abalanaga biore hale halu Mesobodemia piyidalo manda bini. <sup>8</sup> Ani biyago hondowa Isohanda ibu aba Aisaga ibugua Iso one Kenana wali berearu hame nale kagonidalo manda bini. <sup>9</sup> Ani biyago hondowa Iso ibugua Abarahama igini Isimale aria wandari mbira ibu mini Mahalada Nebaiodi mbalini berenego ogoni dabu bini.

*Yagabahanda Bedele dindini emaga hendene ogo*

<sup>10</sup> Yagaba ibu Beaseba dindi wahalu Harana dindi pole pene. <sup>11</sup> Alendo halu mbi layagola Yagaba ibu hariga obeneni ege tole mbira mo haguanda howa palene. <sup>12</sup> Ani paluwa emaga handalu hearia egageria mbiranaga tene dindini howa nguni uyura dahuliya andagahayagi paga hearia hendene. Ngode Datagaliwabenaga dahuliyalirume egageria ogoriani iri dali bigi bialu hearia hendene. ✧ <sup>13</sup> Ani hondowa handalu hearia Anduane Homogo kaware ibu howa ibugua lalu, I Anduane Homogo Abarahama Aisagalanaga Ngode Datagaliwabe kogoni. Dindi ayu o padegoni ibi inaga waneigini aguaneneru ti ngulebero. ✧ <sup>14</sup> Inaga waneiginiru dewaore himu dudumbu ale halu ti ho yanga lowa dindi tu ni tagira ibiragoha howa ni paliragoha polebira. Palu yanga lalu uyuraha howa palu yalu unuraha polebira. Ina ti biamogo bialu mo bayale halu kogo hondowa wali agali dindi bibahendeni holebirarume ti nde biamogo bialu bayale holomaya mo biaha lalu ihondo hale halu holebira. ✧ <sup>15</sup> Ai ina i yu wanahe i poregoha inime haru haabo halu mani bi o larogo tagira piai helo dindi ogoria lone haru dai bulebero, lalu Anduane Homogohanda Yagabahondo emagaha lamini.

<sup>16</sup> Yagaba ibu palenego heyuwa lalu, Aiore Anduane Homogo ogoria heneda manda nabi harudago. Heneneore ibu ogoria heneda, lene. <sup>17</sup> Ibugua gi taraore howa lalu, Ai dindi ogo gi ho kogoni. Ogoriani Ngode Datagaliwabe andagabi dahuliya andaga harababi ogoni degeda, lene.

✧ 28:4: Pig 17.4-8 ✧ 28:12: Yo 1.51 ✧ 28:13: Pig 13.14-15 ✧ 28:14: Pig 12.3, 22.18

<sup>18</sup> Egerebalene Yagaba ibugua ege tole haguanda howa paliyago yamuwa mani mitangi bu dai bulenenaga o biagoriani hengene. Ani buwa olibe lininaga weli ege tole biagoria odoba halu ogoni Ngode Datagaliwabenagaore nga lowa ani bini. <sup>19</sup> Ogonidagua buwa dindi ogoni mini Bedele wini.\* Abale dindi ogoniha tano mbira winidagoni mini Lusi laga wini. <sup>20</sup> Yagabahanda bi heneneore mbira Anduane Homogohondo lo wialu lalu, *Í áyu i poleberogoha baya hangu handaya ho halu hariga lu porogoha haru pialu tomo agabi ngialu* <sup>21</sup> nde bayale anda pialu i aba dindini dai buliya handaya ho hariyagua *í inaga Ngode Datagaliwabeore holebere.* <sup>22</sup> Áyu ege tole ogoriani hangarugo í andaga ogonioroda lalu manane o helarogoni. Ai ina mbirale ngerego bibahende pi halu tale buwa pinigo inihondo ngigi bulebero, lene.

## 29

### *Yagaba pialu Labana andaga anda penego ogo*

<sup>1</sup> Yagaba ibu pu dege bialu wali agali ni tagira ibiragohayagi haga hearunaga dindini anda pene. <sup>2</sup> Dindi ogoriani anda pu howa naina handa amunana bialu hearia iba hambiaga uli mbira winiyagoria nogo sibi ti iba ogoniha nagayago naina wabuni tebira palearia hendene. Iba ulidagoha tole timbuni mbirame panga payaria hendene. <sup>3</sup> Nogo sibi bibahende ibu hai kagola nogo sibi haru haga karume ege tole timbuni panga payiyago dugua haragola nogo sibi ti iba naga wini. Nogo sibi ti iba nai kagola haru haga biaru tigua iba hambiapanaga panga ege toleme paya dai biagaya.

<sup>4</sup> Ani bialu heagola Yagaba ibugua tihondo hale halu lalu, Nenegeru-o tí ani howa dege ibu kamibe, layagola tigua ladai bialu lalu, Ina Harana tano howa ibu kama, lene.

<sup>5</sup> Ani layagola Yagabahanda lone hale halu lalu, Tigua agali Naho aguane Labana hendedamibe, lene. Ani layagola tigua ladai bialu lalu, E ina hendedama, lene.

<sup>6</sup> Yagabahanda lone hale halu lalu, Ibu karulape kabe, lene. Ani layagola tigua lalu, Ibu bayale ka. Ai ibu wane Leselo ibu abanaga nogo sibi nai haru ibiragoni, lene.

<sup>7</sup> Yagabahanda lalu, Áyu wene horombedago nogo tani nalu emene helo haru dai bule iba nelo midaba, lene. <sup>8</sup> Ani layagola nogo sibi haru haga biarume lalu, Ani nabule nogo bibahende ibai haragola iba nelo dugupe holeberama, lene.

<sup>9</sup> Yagaba ibu nogo sibi haru haga agali biaru heba bi lalu hearia Leselo ibu nde ibu aba Labananaga nogo sibiru ibuni haru haga henego iba nelo haru halu ibini. <sup>10</sup> Yagaba ibu Leselo ibiyago hondowabi ibu ababuninaga sibi Leselohanda haru ibiyago hondowabi ibugua nogo sibiru iba nelo ege tole panga dugua hene. <sup>11</sup> Ani buwa Yagabahanda Leselo yu nunu lalu turu howa dugu bini. <sup>12</sup> Dugu bialu howa lalu, I í aba Labana mbalini Lebega igini kogoni, lene. Ani laya handala Leselo ibugua gerai lalu andaga ibu aba lamule pene.

<sup>13</sup> Labana ibugua ibu ababuni ibu ka layago hale howa gerai lalu hondole pene. Ani puwa ibunaga ababuni abale yu hubi lalu turuore howa nunu lalu andaga haru pene. Andaga pu biruwa Yagabahanda ibuni bialu heneru bibahende te tihondo lamiai hene.

<sup>14</sup> Ani layagola Labanahanda lalu, Heneneore iya darama mbiraore kabagoni, layagola Yagaba ibu ege mbira Labana andaga ho hai hene.

### *Yagaba ibu Leselo Liala dabu bule lowa Labananaga biabe bia halu henego ogo*

<sup>15</sup> Labanahanda Yagabahondo lalu, Iyaore darama mbiraore howa inaga biabe ina bame buwa habelo hame naledogo. Íore yolo hame ledego ina nguliya. Agile hame ledebe, lene. <sup>16</sup> Labana ibu wane kira berene. Wahenego Lia bialu mendego Leselo berene. <sup>17</sup> Lia ibu de bayale ndo berenego Leselo ibu wandari bayaleore berene.

\* 28:19: Bedele inanaga bi lalu Ngode Datagaliwabe andaga.

<sup>18</sup>Yagabahanda Leselo gubalini ho howa Labanahondo lalu, Í wane Leselo i dabu buliya ngibelonaga mali karia ínaga biabe bia holiya, lene.

<sup>19</sup>Ani layagola Labanahanda ladai bialu lalu, Nde agali maru tara karu nami íniore nguliya karulapego ai iya haba, lene. <sup>20</sup>Ogonidagua lalu, Yagaba ibugua Leselo hame timbuniore leagome mali karia uruni lu ndo yamo horo tebira maria ale hene.

<sup>21</sup>Mali uruni piai heagola Yagabahanda Labanahondo lalu, Ai mali karia piai hayago Leselo i dabu buliya ngi, lene.

<sup>22</sup>Ani layagola Labana ibugua tomo timbuni dawalu wali agali dindi ogoniha hearu tomo nalu turuho biramiya ibalimu laga bini. <sup>23</sup>Tomo no biralu mbiraga hayagola Labanahanda Leselo wahalu Lia Yagaba paleagoha haru puwa pale layagola libu haru mandagi palene. <sup>24</sup>Labanahanda wandari biabe bia haga mbira mini Siliba berenego Lianaga biabe bia haga berelo mini. <sup>25</sup>Egerebalene Yagaba ibu handalu hearia abale mbiraga wali haru paliyago Leselo ndo Lia haru paleneyane mogolo hendene. Ani biniyagola ibugua Labana hearia puwa lalu, Ína o biridagoni tene aginaga biribe. Ina mali lu ínaga biabe bialu harugoni Leselo dabu bule lowa bialu harugo ai i aginaga mo hondo haribe, lene.

<sup>26</sup>Ani layagola Labanahanda ladai bialu lalu, Inanaga mana ngagome wandari wahene ibugua ala agali pedagola mani heyogoneme piaga ngago <sup>27</sup>ainde dabu bini tomo ala nai hamiya sarere mbira hondo harene. Ani howa nde Leselobi dabu bibelo ngulumaya. Ngeramagola ogoninaga mali karia mende biabe bialu habelo, lene.

<sup>28</sup>Yagabahanda bi ogoni hale halu e lowa tomo nai halu sarere mbira piyagola Labanahanda Leselo Yagaba miyagola Leselo ibu Yagaba one berene. <sup>29</sup>Ani birayagola Labanahanda wandari biabe bia haga mbira mini Bila berenego Leselonaga biabe bia haga berelo mini. <sup>30</sup>Ogonidagua biyagola Yagaba ibu Leselola mandagi palialu ibu oneore gubalini timbuni hene. Anigo Yagaba ibugua Lia gubalini emene dege hene. Ani howa Yagaba ibugua mali karia mende lone biabe bialu hene.

### *Yagaba waneigini henerunaga mini uru*

<sup>31</sup>Anduane Homogohanda handalu hearia Yagaba ibu Lia gubalini nahe heane hondowa ibugua Lia dara halu biamogo biyagola ibu wali gali bere berene. Anigo Leselo ibu gali nabere berene. <sup>32</sup>Emene howa Lia ibugua igiri mbira taba henene. Taba hono biruwa lalu, Anduane Homogohanda ínaga bu miniha genda ho berewago hondowa igiri mbira ngiyadago ai i agalinihanda ihondo gubalini timbuni holebira, lene. Ani lowa igiri ogoni ibu mini Lubene wini.\* <sup>33</sup>Mani Lia ibugua igiri mende taba honowa lalu, Yagabahanda i hame lalu gubalini nahe kago hondowa Anduane Homogohanda i dara hayadago ai ibugua igiri mende ngiyada, lowa ibu mini Simiono wini.† <sup>34</sup>Lia ibugua igiri tebone taba honowa lalu, Ai ina igiri tebone taba hanarogonaga Yagabahanda i gubalini halu turu howa ai ina haru mandagi holeberama, lowa ibugua igiri mini Libai wini.‡ <sup>35</sup>Lone dege Liahanda igiri mane taba hono biruwa lalu, Ai áyu ina Anduane Homogonaga mini yaraga holebero, lowa igiri mini Yuda wini.§ Mani Lia ibu nde waneigini maru taba hana nabi biraabo hene.

## 30

<sup>1</sup>Leselo ibugua waneigini mbira taba hana nabi biruwa ibu hagibuni Liahanda waneigini taba hanalu bereago hondowa ibu dimagoli ho biruwa ibu agalini Yagabahondo lalu, Ína nde waneigini mbira ngerene. Nangiriyagua nde i homolebero, lene.

\* **29:32:** Lubene inanaga bi lalu Handayada. † **29:33:** Simiono inanaga bi lalu Hale hayada. ‡ **29:34:** Libai inanaga bi lalu Bimaga. § **29:35:** Yuda inanaga bi lalu Mini Yaraga.

<sup>2</sup> Ani layagola Yagabahanda ibuhondo talialu lalu, Ngode Datagaliwabehanda inaga waneigini taba honolene mo wahayadagoni. I Ngode Datagaliwabe ndo kogoni. Ina waneigini agua bialu i nguliyana larebe, lene.

<sup>3</sup> Ani layagola Leselohanda Yagabahondo lalu, Inaga biabe bia haga wandari Bila bedagome inaga waneigini mbira taba hana helo mandagi haru palibe. Ibugua inaga waneigini dewa taba hanaragola mani i waneigini dewali aiya dege biruliya, lene.

<sup>4</sup> Ani lowa Leselohanda ibunaga biabe bia haga wandari Bila biago Yagaba hearia ibu dabu bilo haru ibini. Ani biyagola Yagaba Bilala libu mandagi palu hene. <sup>5</sup> Ani paluwa Bila ibugua Yagabanaga igiri mbira taba henene. <sup>6</sup> Ani biyagola Leselohanda lalu, Ngode Datagaliwabehanda inaga hame wiwago hondowa i birugobi nde tigabi dege biruyane handayada. Ina bi larugobi nde hale halu igiri mbira ngiyada, lowa igiri mini Dana wini.\* <sup>7</sup> Wali biago ibugua Yagabanaga igiri mende taba henene. <sup>8</sup> Taba heneagola Leselohanda lalu, I hagibunila keba halu harugo ai áyu karulapeore bedogoni, lowa igiri mini Nabadali wini.†

<sup>9</sup> Lia ibugua handalu hearia ibuni nde waneigini lone taba hanabe naheyane hondowa ibunaga biabe bia haga wandari mini Siliba berenego Yagabala helo miyagola ibu one ho berene. <sup>10</sup> Ani biruwa ibugua Yagabanaga igiri mbira taba henene. <sup>11</sup> Ani taba hanayagola Liahanda lalu, Áyu ina bolangua kogoni, lowa igiri mini Gada wini.‡ <sup>12</sup> Mani Silibahanda Yagabanaga igiri mende taba henene. <sup>13</sup> Taba hanayagola Liahanda lalu, Áyu i turu timbuniho bedogoni. Wali maru bedarume i turuho beda lolebira, lene. Ani lowa ibugua igiri mini Ase wini.§

<sup>14</sup> Widi lini gandulo wulenengi hayagola Lubene ibu mabuha ibaga bialu hearia ira lini baya mbira gamugamu biaga ale dearia hendene. Ibugua ira lini ogoni ibu aiya Lia berearia do yalu pene. Ani biyago hondowa Leselo ibugua Liahondo lalu, I iginime ira lini mbira do yalu ibiyago handarugo ai maru i ngerebe, lene. <sup>15</sup> Ani lalu hearia Liahanda ladai bialu lalu, I agalini nde i haru pu waharigo ai ina manda bialu keria ogoni nagalonedabe. Áyu i iginime ira lini do yidagobi nde i dege nguabe, lene.

Ani layagola Leselohanda ladai bialu lalu, Ina ira lini ogoni ngiriyagua áyu mbira-gaore Yagabala palialibulo, lene.

<sup>16</sup> Ogoningi alendo Yagaba ibu mabuha howa dai bialu hearia Lia ibu harigani ngola ho puwa lalu, Áyu mbiraga iya haru mandagi palibiya. Iya palibiyana i iginime ira lini mabuha howa do yalu ibiyagome i yolobu ngeledogo, lene. Ani layagola horo ogoningi mbiraga libu haru mandagi palene.

<sup>17</sup> Ngode Datagaliwabehanda Lianaga bi hale halu biamogo biyagola ibugua igiri dauni taba henene. <sup>18</sup> Honowa Liahanda ogodagua lene. Wandari inaga biabe bia haga i agalini hado mirugola Ngode Datagaliwabehanda i yolo bayaleore ngia dai biyada, lowa ibugua igiri mini Isaga wini.\*\* <sup>19</sup> Mani Lia ibu wali gali bere biruwa igiri waragane taba henene. <sup>20</sup> Taba honowa lalu, Ngode Datagaliwabehanda i mo turu halu igiri waragane ngiyidagome i agalinihanda inaga mini yaraga halu turuore holebira. Ani lowa ibugua igiri mini Sebulunu wini.†† <sup>21</sup> Mani Liahanda wandari mbira taba honowa ibu mini Daina wini.

<sup>22</sup> Ainde Ngode Datagaliwabehanda Leselo mitangi bialu dara howa waneigini taba hanabehe berelene. <sup>23</sup> Ani biyagola Leselo ibu wali gali bere biruwa mani igiri mbira taba henene. Taba hono biruwa lalu, Aiore Ngode Datagaliwabehanda i biamogo bidagonime i lone taga holene nawi. Ibugua inaga genda bibahendeore mo wahai haya.

\* **30:6:** Dana ogoni inanaga bi lalu Dabaya. † **30:8:** Nabadali inanaga bi lalu Mini Wai Hongohe. ‡ **30:11:** Gada inanaga bi lalu Bolangua. § **30:13:** Ase inanaga bi lalu Turubi. \*\* **30:18:** Isaga inanaga bi lalu Danoni Ngini. †† **30:20:** Sebulunu inanaga bi lalu Mini Lene.

<sup>24</sup> Ai Anduane Homogohanda igiri mendebi ngilo hame ledo, lowa ibugua igiri mini Yosebe wini.##

*Yagaba ibugua ogodagua bibiya lalu Labanala bi mbira lowinigo ogo*

<sup>25-26</sup> Yagaba one Leselohanda Yosebe taba hono bereagola Yagaba ibugua Labanahondo lalu, I one waneigini o bu karuni helonaga inaga yolo biabe luore bia halu harugoni. Ai ini dindi polene hamelo kogo pu larene. Inaga biabe bulene wiaruni bibahende baya hanguore bialu harugo i manda bidegoni, lene.

<sup>27</sup> Ani layagola Labanahanda ladai bialu lalu, Karulapego ina bi mbira ala langerogo hale habe. Ai ala ina Anduane Homogonaga hame wiago hondole handalu hewaria i iya haru mandagi kabagome Anduane Homogo ibugua i biamogo bialu mo bayale halu heneyane handa walia haru. <sup>28</sup> Ani birugo ina ihondo yolo ngi laredagua nguliyago agiraore nguliyaha hameledebe, lene.

<sup>29</sup> Ani layagola Yagabahanda ladai bialu lalu, Ina inaga biabe bialu harugo ogodagua biri lalu inime manda bidegoni. Inaga nogo sibi haru harugome ai nogo sibi biaru bayale dewaore bu kagoni. <sup>30</sup> Bamba i nogo sibi dewa ndo emene hangu hinu heneyagoni. Ai i ibu hewagola Anduane Homogohanda i mitangi bialu i biamogo biyagome inaga nogo sibi dewaore henego kagoni. Anigo ayu i mbirale ininagaore handaya ho holene hamelo kogoni, lene. <sup>31</sup> Ani layagola Labanahanda ibuhondo hale halu lalu, Inaga biabe birigonaga yolo agileore nguliyaha hamelo kebe, lene.

Ani hale hayagola Yagabahanda ladai bialu lalu, I muni ngibelo hame nale kogo ai ina mini ngogo karulape lariyagua nde ina inaga nogo meme sibiru hinalu holiyago inaga hame ngogo ogo. <sup>32</sup> Ayu ina inaga nogo meme sibiru kagoaha pialu baya hanguore hondole polebero. Ani puwa sibi igini mindi karu bibahende i hai halu meme mindi pagabua pehagabi karubi i holene hameledo. Ainde inaga biabe berogonaga yolo ogoni karulape holebira. <sup>33</sup> Ani berogola mani howa inime hondo birangi sibi memeru haru harugonaga yolo i harugo handalu ai ina bi larugo tiga tiga larudabe yole larudabe handalu manda bulebere. Ani handalu keria nogo meme mindi mbira pagabua bu gombedaga nabi mbira inaga kagoaha heaguabi sibi mindi ndo mbira heaguabi nde ina inaga nogo kayu biyada lolebere, lalu lai hene.

<sup>34</sup> Ani layagola Labana ibugua ladai bialu lalu, Karulapego ina laregonidagua bibiya, lene. <sup>35</sup> Ani lowa horo ogoingiore Labana ibu meme pagabua pehagabi hearubi sibi mindi hearubi ibu hai hene. Ani howa ibu igini hearuhondo lalu, Nogo uruni haru pubagi halu mendehayagi hinule haru pudaba, lene. <sup>36</sup> Ani bialu Labana ibu ti haru pene. Tigua nogo sibi meme uruni haru halu pialu dindi tara mbiraha pialu heane dege horo tebiru pene. Ani biyagola Yagaba ibu nde Labananaga nogo sibi memeru maru helo wahayaru hinalu hene.

<sup>37</sup> Mani howa Yagaba ibugua ira gahenge tara tara hearunaga magane podo yuwa dongone lagalo wahowa irane pele pana helaga bini. <sup>38</sup> Ani buwa nogo meme biaru iba nole ibaga wiagoria ibalu hendelo lowa handabehe wiagoria ira magane uruni bibahende wa haga bini. Nogo meme ti iba nole ibalu meme wangabe karume angibuni karu hendelelo manda buwa ani bini. <sup>39</sup> Ani wa heagoria ibuwa meme wangabe hearume angibuni hearu ira magane dongone bu wahowa wayagoria howa hendelaga biyagola meme angibuni urunime igini mindi pagabua bu gombedagabi hono yu haga bini.

<sup>40</sup> Ani heagola Yagaba ibugua Labana nogo sibi wangabe hearume sibi angibuni meme igini mindini pagabua bu gombedagabi heagoria kaware helowa hendelaga bilo helene. Ibugua ogonidagua bialu ibunaga meme sibi hearubi Labananaga heba mandagi hela nabi ibunaga haru pu bagiho helene.

## 30:24: Yosebe inanaga bi lalu Ngiatago.



<sup>41</sup> Meme sibi hearubi mandagi iba nalu hearia wangabe bayale hongohe kagome angibuni hendelarangi Yagaba ibugua ira magane podo wiyago yu puwa nogo uruni iba naga biagoria de tiga tiga ngelaga bini. Ngelayagola nogo ti ogoniha howa hendelaga bini. <sup>42</sup> Ani bialu howa meme sibirubi hongo nahe nogo damene bu karu hendelarangi ira magane ogoni nawi wahaga bini. Ani biyagola nogo sibi memebi Labananaga hearu bibahende ko hongo nahe damene hene. Yagaba ibunaga sibi memerubi bibahende hongohe bayale dege hene. <sup>43</sup> Anidagua biyadagome Yagaba ibu mbirale dewa wuwa homogo hene. Ibugua nogo sibirubi memerubi dewaore hinu halu ibunaga biabe bia haga wali agalirubi dewaore bu halu nogo kamele dongibi dewaore hinu haga bini.

## 31

### *Yagabahanda Labana helalu pu yola halu penego ogo*

<sup>1</sup> Yagaba ibu hale halu hearia Labana igini bu hearume lalu, Yagaba ibugua ina abanaga mbirale wiaru ibu mo hai halu kagome ibu mbirale dewawi homogo harago-nida, laga bira layane hale hene. <sup>2</sup> Yagaba ibu bi ogoni hale ho hearia dege Labanahandabi nde ibuhondo ala turuho hagadagua ndo ai mini mende ale wu hearia hendene. <sup>3</sup> Ani bu heago hondowa Anduane Homogohanda Yagabahondo lamialu lalu, Ayu ogoni í aba dindiha ini dameneru bu karia dai bialu pobe. Inime í baya hangu handayaho holeberogo ani bibe, lene.

<sup>4</sup> Ani layagola hale halu Yagaba ibugua ibu one Lia Leselola ibuni nogo sibi memeru haru haga biagoha ibilo libuhondo bi lawia hene. <sup>5</sup> Libu ibiyagola Yagaba ibugua libuhondo lamialu lalu, Libu abahanda ihondo abale bayale bialu hagadagua ndo bialu ka. Anigoyu í abanaga Ngode Datagaliwabe ibu ini heba haabo ka. <sup>6</sup> Ai ina libu abanaga biabe luore biaabo halu harugoni libu manda bidabigoni. <sup>7</sup> Ibugua bia layago ina hongo howa bialu hewagola ibugua ihondo ke halu í yolo bule layadagua nabi mo hondo howa pi halu mo iriari biaabo haga biya. Ani bialu heago helowa Ngode Datagaliwabe ibugua Labanahanda í mo ko helo yupe nahaya. <sup>8</sup> Abale howa Labana ibugua nogo meme pagabua gilimugalimubi harago yolo ogonigo í habelo layagola ai meme igini gilimugalimubi dege dewa hono yu haya. Ani heagola mani howa nogo pagabua luni giligilibi bupe hagabi kago í habelo layagola meme biarume pagabua luni giligilibi bupe hagabi dewa hono yu haya. <sup>9</sup> Ai Ngode Datagaliwabe ibugua libu abanaga nogo hearu anidagua bialu í mo ngiai haya.

<sup>10</sup> Horo mbirungi emaga handalu hewaria nogo meme angibuni bu hearu wangabe pagabua giligili bigibime hendelalu hearia handaru. <sup>11</sup> Ani hondo hewagola Ngode Datagaliwabenaga dahuliyali mbirame lalu, Yagaba-o, layagola ina, Ya í o kogoni, laru. <sup>12</sup> Ani larugola ibugua ihondo lalu, Nogo meme gilimugalimubime hendelalu kagoni í de handa. Ogoni inime ani mo bia harogoni. Ani berogoni irane Labana ibugua ihondo mana liahe bialu heago hondowa ina ani bero. <sup>13</sup> Ala í Bedele dindini paleria Ngode Datagaliwabe ina hapani harugonaga ina mani mitangi budai bule ege tole haguanda harigo weli odoba halu loma bia harigoni. Ani bialu habo nalolene bi mbira ihondo lo wialu birigoni. Ai ayu ogoni heyalu mbirale wu haridaruni mo manda manda bialu ini dalu dai bibe, laya, lene.✧

<sup>14</sup> Lia Leselola libugua bi ogoni hale howa ladai bialu lalu, Iya aba andagaha howa mbirale mbira mo yulene nawi. <sup>15</sup> Iya abahanda iya wali tara berelaradagua biya. Ibugua iya dabuni dewa taguiyagoyu bibahende ibuni mo hole biai haya. <sup>16</sup> Mbirale bibahendeore Ngode Datagaliwabehanda iya abanaga giha howa yamialu í mo ngiai hayagoni. Anigo uruni bibahende iyanebi iya waneigini bu karubi ina harunaga ngago ai Ngode Datagaliwabehanda bibe lalu langiyadadagua bibe, lene.

✧ 31:13: Pig 28.18-22

<sup>17</sup> Ani layagola Yagabahanda ibu one waneiginiru nogo kamele erembirani berelai halu <sup>18</sup>ibunaga nogo sibi memeru haru hai halu mbirale yári damene Mesobodemiaha howa mo yiniru ya bialu ibu bamba halu pene. Anidagua bialu ti dindi ogoni wahalu ibuni dindi ibu aba Aisaga hearia Kenana dai bini. <sup>19</sup>Ti pole howa Labana ibu ibunaga nogo sibi irini podama piyago hondowa ti pene. Pole howa Leselo ibugua ibu abanaga mbirale dama mitangi bialu bi pupu wule gime wabini mbira anda mamage helo mo do ho wiago mo yalu pene. <sup>20</sup>Yagaba ibugua nde ina anidagua poleberema lalu Aramiali Labana lamia nabi ti ohalu <sup>21</sup>ibunaga mbirale wiyadaru bibahende kabu biai halu yalu pene. Ibugua Labana dalu wahalu puwa iba Yuberedisi doma ede halu Gileadaha hari barebare wiago hondo yalu pupe hene.

*Labana ibugua Yagaba talima penego ogo*

<sup>22</sup> Ti ani peaha horo kiru howa horo teboneni agali marume Labana lamialu lalu, Yagaba togo lalu abale piyago ndobe, lene. <sup>23</sup> Ani layago hale howa Labanahanda ibu damene bu hearu haru halu Yagaba talima pialu horo karu harigani handa paligi bima pene. Ani pialu tigua Yagaba ibu Gileada dindiha dindi barebare wiagoria anda pu hearia ibini. <sup>24</sup>Ibiyagola Ngode Datagaliwabehanda mbiraga mbirungi emagaha howa Labanahondo lamialu lalu, Ina Yagaba mo gi hole mbirale mbira nabibe, lalu lamini.

<sup>25</sup> Yagaba ibu hari hambene wiagoria balai anda bu hearia Labana ibu hendene. Ani hondowa Labana halu agali ibuni damene haru hayaru tibi nde Gileada dindiha hari hambene wiagoria dege balai anda bini.

<sup>26</sup> Ani bialu Labana ibugua Yagaba hearia puwa ibuhondo lalu, Irane aginaga ina i mayongo bia halu i wane biago labo wai bialu garabaya haru poradagua bialu pu yola harigo agibe. <sup>27</sup> I ani pole kogoni lalubi i nalangi howa yola halu ibiriyago irane agi. I pole kogoni lalu i abale biago langidele nde ina i dameneruhondo lamialu tigua iba gana lalu ngida balu i baya hanguore turu hama pobe ledole. <sup>28</sup> Ai ani ndo ina i wane biago labohondobi i aguaneruhondobi ti pilimu lalu inime yu nunu loliya ha nabi piriyagoni mana koore biriya. <sup>29</sup> Ina ti mo ko holene karulapeore kogo ainde i abanaga Ngode Datagaliwabehanda ayu mbiraga emagaha howa i langialu lalu, Ina Yagaba mo gi holene ale mbirale mbira nabibe, laya laro. <sup>30</sup> Ainde i yu wahalu ini dalu dai buleore hame laridane manda bidogo. Anigo irane aginaga mbirale dama mitangi bialu bi pupu wule gime wabinigo i andaga mamage helonaga ngelarugo ti mo hilo yai halu ibirimida agibe, lene.

<sup>31</sup> Ani layagola Yagabahanda ladai bialu lalu, I ohalu i handa nabini ibirudagoni irane i wane biaruni ini haru dai bibeheyane biru. <sup>32</sup> Ani birugo ai ina ibirimadago aria mbirame inaga mbirale bi pupu wiaga ogoni mbira mo yiniyagua ogoni ibuni homelo bo wahabe. Ainde i damene bu kamaru bibahendenaga deni howa mbirale iname mo yalu ibirimadaruni handai hole ibu. Handalu keria mbirale mbira inaga lenego wiagua ogoni ini mo yu dai bibelo, lene. Anigo Leselohanda ibu abanaga mbirale bi pupu wule gime wabini uruni mo do ho bereago manda nabi howa Yagaba ibugua anidagua lene.

<sup>33</sup> Ani laya handala Labana ibugua Yagabanaga balai anda heagoha anda puwa mbirale wiaru baya hangu handai hene. Handai halu Lianaga balai anda heagohabi anda puwa handai hene. Ani bialu biabe bia haga wali kirali bereagonaga balai andahabi handalu hearia ibunaga bi pupu wule gime wabini biaruni mbira wiarua handa walia nahe dege hene. Nawioreya handala ai uruninaga balai anda helalu Leselonaga balai anda heagoha taya bule anda pene. <sup>34</sup> Anda puwa mbirale bi pupu wule gime wabini ogoni Leselo ibu mo page buwa nu ale mbira nogo kamele erekunini mo pagaho biraga wiagoha hanado ho ngelowa ibuni bira dambiho berene. Ani bereagola Labana ibugua balai anda tamuha anda puwa taya bialu hearia uruniha nawi degeyane hendene. <sup>35</sup> Ani handalu hearia Leselohanda lalu, Aba-o ina i heya

nalabe. Áyu ina walinaga horongi bedogo, lene. Ani layagola Labanahanda taya bialu heariabi mbirale dama mitangi bialu bi pupu wule gime wabini biagoni mbira handa walia nahe dege hene.

<sup>36</sup> Ani handa walia nahe dege heagola Yagaba ibugua Labanahondo keba howa lalu, Ina ihondo mana ko liahe mbira agi birugonaga ina i haruru talima ibiribe. <sup>37</sup> Ina mbirale inaga wiwaruni bibahende handai harigonidago ai mbirale agilego mo yiwaria handa walia haribe. Inaga mbirale mbirale wiaria handa walia hariyagua nde wali agali i aria bu karubi i aria bu karubi bibahendenaga deni ti hendelo mo pani ha. Ani beregola tigua iyanaga bi hale hai howa ai ibunaga bi tigabidabe hendelo ani bia nabere. <sup>38</sup> Ai ina mali pira kira (20) ila haabo harugo. Ani hewagola inaga nogo sibi memeru bibahende igini bayale wialu haya. Ani howa inaga nogo sibi uruni aria wangabe hearu mbira balu na nabi dege haru. <sup>39</sup> Ani handayaho hewagola ai gabua tara tara karume inaga nogo sibi memeru mbira balu naragola ogoale biya lalu ini langia nabi inime nogo dege aribia haruli. Inaga sibi memeru mbirale mbira ngamiru mbiraga horombeyaguabi mbiralime page bu yalu piyiyagua minalu biyada nale howa ihondo inaga nogo aribia habe larili. <sup>40</sup> Horo bibahendengi ni tandagabi dayagome i do yogo biyagola ina harugo lowa biabe bialu haruli. Mbiragabi dagare nde timbuni biyagola u napale harugo lalu haruli. <sup>41</sup> Ogonidagua ina mali pira kirani (20) inaga biabe biaabo halu haru. I wane kira biago labo dabu bule mali pira mbirani maria (14) inaga biabe bialu nogo meme sibiru ngibelonaga ina mali waragaria biabe bialu haru. Ani bialu hewagola ina yolo ogoore nguliya lalu lo wirigo wahalu mende ale mo iriari biaabo haga birili. <sup>42</sup> Ani biriligo ainde i mamali Abarahama Aisagabi libugua Ngode Datagaliwabe mo tene howa ibu mitangi bialu lotu lalu haga kago ibugua i heba nahenedale ina i mbirale mbira giha nayi bame dai bia ledelego. Ainde Ngode Datagaliwabe ibugua inaga bu miniha genda yu hewago handalu biabe ndelahe bialu harugo mitangi bialubi ibunime bi hongohé mbiraga i talialu bi langiyada, lene.

### *Yagaba Labanalame habo nalolene bi lowinigo ogo*

<sup>43</sup> Labana ibugua Yagabanaga bi layarunaga ladai bialu lalu, Wali kira o bedagoni labo libu i wane bialu libu waneigini bu karunibi nde i aguane bu ka. Ani bialu nogo sibi meme bu karunibi nde i nogo dege bu ka. Mbirale bibahende o ngaruni inaga wini biaruni degedago. Ainde i wane kira ogolabo baba libunaga waneigini bu karunibi ina mandagi holomayanaga tihondo mbirale mbira agilego buliyabe. <sup>44</sup> Mbira bulene nawidago ainde habo nalolene bi mbira dege lo wibiya. Ani lo wialu bi ogoni mo mitangi bia helonaga ege tole dugu hangabiya, lene.

<sup>45</sup> Ani layagola Yagaba ibugua bi ogoni mitangi biaabo holenaga tubari ege tole mbira dugu hengene. <sup>46</sup> Ani hongowa ibu damene bu hearuhondo lamialu, Ege tole dewaore dugu yu ibalu wima irigi hadaba, layagola tigua ani biai hene. Mani ani biai howa Yagaba ibu damenerubi Labana ibu damenerubi bibahende ege tole dewa dugu wima irigi ho heagoria tomo timbuniore dawalu ti mandagi biruwa nene. <sup>47</sup> Ani biruwa Labana ibugua ege tole dugu wima irigi hene wiago mini Yaga Sahaduda wialu Yagabahanda ege tole uruni mini Galede laga wini.\* <sup>48</sup> Labana ibugua lalu, Ege tole dugu wima irigi ho ngago ogoni habo nalolene bi áyu lo wiribagonaga tubari ogoni iya mitangi biaabo holobaya wiaabo helo, lene. Ani lene winigo wali agali heneru tigua ege tole dugu wima irigi hene ogoni mini Galede laga wini. <sup>49</sup> Ani wialu Labana ibugua lalu, Iya haru mandagi nahe haga hagabu kabago iyame mana bialu kabaruni Anduane Homogo ibunime handape halu helo hameledo, lene. Ani layagola dindi ogoni mini

\* **31:47:** Mini kira gilibu ngagoni irane ogo. Ege tole dugu wima irigi hene ogoni bi lo wiyagonaga tubari nga, lalu gilibu nga. Mini mbira Yaga Sahaduda ogoni Aramia bi. Mini mende Galede ogoni Hiburu bi.

mendebi wialu nde Misiba laga hene.† 50 Labana ibugua la dege bialu, Ina i wane kira o bedago labohondo mana ko bialu hariyaguabi wali maru biru ngaruni dabu bialu piriyauguabi bi áyu lo wiribago wali agalime manda nabi heaguabi mana iyame bialu kabaruni bibahende Ngode Datagaliwabe kagome handai ho kagoni manda bibe, lene. 51 Ani lowa Labanahanda Yagabahondo laabo halu lalu, Ege tole uruni iya kabago hengeneha dugu wima irigi hene ngaru handalu ege tole mbiraore luni amu heyu kagobi handabe. 52 Ainde ege tole luni amu heyu kagobi maru o dugu wima irigi haribagobi ogonilabo kirabali habo nalolene bi lo wiribagonaga tubari ogoni holebira. Ina ege tole ogoni bolangua halu i kegohayagi wai bule naibaguago inabi nde ogoni bolangua halu i kogohayagi wai bule naibabe, lene. 53 Ani lowa lalu Labana ibugua ibu mamalirunaga Ngode Datagaliwabenaga minini howa lalu, Abarahamanaga Ngode Datagaliwabe kagomebi Nahonaga Ngode Datagaliwabe kagomebi mana iyame bialu kabaru tiga tigaore ngadagua mo tale bilo, lene.‡ Ani layagola Yagaba ibuguabi nde ibu aba Aisagahanda Ngode Datagaliwabe kago mitangi bialu lotu laga henegonaga minini howa lalu, Ina laredagua ina buleorebero, lalu bi lo wini. 54 Ani lo wialu ibugua hari bare ogoriani Anduane Homogohondo nogo mbira bo lomabu delene. Nogo bo lomabu delayagonaga mbirini wiaru ibu dameneru nole ibidaba lene. Ogoni nalu mbiraga ogoningi ti bibahende hari bare ogoriani ho palu hene. 55 Pialalu gao layagola Labana ibu heyalu ibu wane kira biagobi ibu aguane hearubi yu nunu lai halu hondo halimu lalu ibuni dalu dai bini.

## 32

### *Yagaba ibu Iso lola hole manda manda binigo ogo*

1 Yagababi ibu damene biarubi ti harigani pole pialu hemiria Ngode Datagaliwabenaga dahuliyaliru lola hene. 2 Ti ani hondowa ibugua lalu, Dindi ogoni Ngode Datagaliwabe ibu hagahadago, lowa ibugua dindi ogoni mini Mahanaima wini.

3 Mani Yagabahanda agali maru tale buwa bi yalu Sia dindi mini mende Idomo mbira ngagoria ibu hamene Iso lola hole pudaba lene. 4 Ani pialu bi ogodagua lalimu laya. Agali haguane Iso-o inaga biabe bia haga Yagabahanda ogodagua laya. I Labanala luore howa harugo ai dai bulene hame ledogoni. 5 Ina nogo bulumagaru dongiru sibiru memeru dewa hinalu wali agali inaga biabe bia hagabi dewaore kago. Ai áyu inaga agali haguane-o ina iha mini yaleyale holani nahe howa miniha dungulo habelonaga laro labe, lalu bi ogoni yalu pudaba, lene.

6 Agali bi yalu piyarume dai bialu howa lalu, Iname i hamene Iso hearia bi yalu pirimago ai ibu harigani i lola hole agali handari maria (400) heba ibira, lene. 7 Bi ani layago hale howa Yagaba ibu gi timbuni howa mini burugulo hene. Ani howa ibugua ibunaga biabe bia haga wali agalibi nogo bulumagaru dongiru memeru sibiru kamelerubi bibahende halu kirani talebuki howa halu kirani anda bu paligi paligi bini. 8 Isohanda ibalu wabuni mendegola wai biyagua nde wabuni mendego ibida pelo manda buwa ani talebuki hene.

9 Ani talebu helowa Yagabahanda Ngode Datagaliwabehondo bi ogodagua lene. I mama Abarahamanagabi i aba Aisaganagabi Ngode Datagaliwabe-o inaga bi larogo hale ha. Anduane Homogo-o abale ina ihondo lalu mani inaga dindi dai berogola ina i mo bayale holebero larigoni. 10 I agali baya biaga ndo hewaria inime dara halu ihondo bayale dege biaabo hariligoni. Abale iba Yodana domalu Labana hearia pole pirungi inaga giha mbirale nayiore halimbu hangu yalu pirugoni. Ai áyu mbirale bibahende talebuki buwa wabuni kira ngelo kogoni. 11 I hamene Isohanda wai biba loligo ina mamage habe lalu i onene waneiginirubi bibahende bai holigonaga ihondo bi larogoni.

† 31:49: Misiba ogoni inanaga bi lalu, Handayaho Holene, bi mende mamagealime heyu howa handapeho holene laga. ‡ 31:53: Naho ibu Labana mamali howa ogoni ibu Abarahama hamene mbira hene.

<sup>12</sup> Abale ina ihondo lalu, I waneigini aguanenebi daga labe nahe dewaore iba mu ngaligobi holebira, larigonidane laro, lene.\*

<sup>13</sup> Yagabahanda mbiraga palialu heyuwa egerebalene hayagola ibunaga nogo uruni maru ibu hamene Iso talebu mule manda manda bini. <sup>14</sup> Ibugua nogo meme angibuniru handari kira (200) wangaberu pira kira (20) nogo sibi angibuniru handari kira (200) wangaberu pira kira (20) lowa helene. <sup>15</sup> Nogo kameleru pira tebira (30) tinaga iginiru heba nogo bulumaga angibuniru pira maria (40) wangaberu pira mbira lowa talebu helene. Dongi angibuniru pira kira (20) wangaberu pira mbira tale bigibu helowa <sup>16</sup> nogo uruni damene mbira mbira haru helonaga agali biabe bia haga mbira mbira helowa lalu, Ai tigua ala bamba halu pudaba. Pialu howa nogo ti biamagamaga nabi tini aria degedege wabuni pugupugu bilalimu, lene. <sup>17</sup> Ani lowa Yagabahanda ibunaga biabe bia haga haguane biagohondo bi ogodagua lamini. I hamene Iso i harigani lola haregola ibugua ihondo hale halu lalu, I agali ainaga biabe biagabe. I ani pore. Nogo uruni ainaga haru kebe, laga biyagua <sup>18</sup> ina ogodagua ladai bibe. Uruni inaga biabe bia haga Yagabanaga. Ibugua uruni inaga wia haya. Yagaba ibuni wene mani ibira, lalu lamibe. <sup>19</sup> Ani lowa Yagabahanda ibunaga biabe bia haga mende tebonehondobi bi mbiraore ogonidagua dege lalimu lalu bi endeho mini. <sup>20</sup> Bi maru urunibi ladege bilimu. Inaga biabe bia haga Yagaba ibuni maha ibira lalimu. Yagaba ibugua Iso mo gede harogola ibugua ala keba ho hayago wahalu turu howa ibu lola helo manda buwa ani bini. <sup>21</sup> Nogo biarubi agali nogo haru piyarubi ti pudaba lowa ibuni horo mbira ogoningi ho palene.

*Peniele dindini Yagaba dahuliyalila gi gungu binigo ogo*

<sup>22</sup> Ogoningi dege mbiraga hayagola Yagaba ibugua ibu one kiralibi wali biabe bia haga kirali biago labobi ibu waneigini beriali (11) biarubi ti ibuwa iba mini Yabogo domade hene. <sup>23</sup> Domade howa edeyagi berelalu ibuni ibunaga biabe bia haga agali biarubiarua dai buwa ibunaga dabudabu yarimiru yalu ma lama pene. <sup>24</sup> Ti piyagola ibuni hangu ederayagi hondo hene.\*

Ani hearia agali mbira iraga howa gi gungu bialu hebine ega bi lene. <sup>25</sup> Gungu bialu dege hebine agali biagome Yagaba bope habe naheyane hondowa Yagabanaga ge mendeyagi bo yolope hene. <sup>26</sup> Libu gungu bialu howa agali biagome Yagabahondo lalu, Ai ega bi layadago i poliya yu peha, lene.

Ani layagola Yagabahanda lalu, Ina i biamogo bialu mo bayale helonaga bi mbira ala labe. Bi la kegola pobelo yupe holiya, lene.

<sup>27</sup> Ani layagola agali biagome Yagabahondo lalu, I mini ai kebe, lene.

Ani layagola Yagabahanda ladai bialu lalu, I mini Yagaba kogoni, lene.

<sup>28</sup> Ani layagola agali biagome lalu, Ina agalirubi Ngode Datagaliwabebi baba gungu bialu i wayali harigodago ai inaga mini Yagaba wahalu i mini Isaraele lolebira, lene.\*

<sup>29</sup> Ani layagola Yagabahanda lalu, I nde aibe mini langerene, layagola agali biagome ladai bialu lalu, Inaga mini agi bule languliyabe, lowa ibugua Ngode Datagaliwabehanda Yagaba biamogo bialu mo bayale helonaga bi lene.\*

<sup>30</sup> Ani biyagola Yagabahanda lalu, I Ngode Datagaliwabe dengui hondowa ai homa nabi kogoni, lowa ibugua dindi ogoni mini Peniele wini.† <sup>31</sup> Ni tagira ibiyagola Yagaba ibu dindi Peniele ogoni ngelalu pene. Pialu ibunaga ge tigatiga piagadagua ndo pene. Tene agi ge mendegonaga wabene dugupe hayagome ge kohe hene. <sup>32</sup> Ani binidago manda buwa Isaraele wali agali tigua nogonaga ge kuni mbirini nanaga winigo nga.

\* 32:12: Pig 22.17, 28.13-15    \* 32:24: Hos 12.3-4    \* 32:28: Isaraele inanaga bi lalu Ngode Datagaliwabela gi gungu biaga.    \* 32:28: Pig 35.10    \* 32:29: Hgn 13.17-18    † 32:30: Peniele inanaga bi lalu Ngode Datagaliwabenaga dengui.



## 33

### *Yagaba ibu Iso lola henego ogo*

<sup>1</sup> Yagaba ibugua handalu hearia Isonaga agali handari maria (400) haru halu ibiyaria hendene. Ani ibiyago handalu Yagaba ibu waneigini bu hearuni, Tí aiyá baba hagahaga bu hole pudaba, lene. <sup>2</sup> Ani lalu wali biabe bia haga bereago labo libu waneigini heba bamba halu Lia ibu waneiginiru heba mani pialu Yosebela ibu aiyá Leselola maniore pumaro bini. <sup>3</sup> Ani piyagola Yagaba ibuni ibu dameneru piyadagua mo bamba halu puwa ibugua dindini ge duli hanga halu dengui dindini ela helo bulu paligi bialu kahalú ani dege bima pialu ibu hamene Iso heagoria hapara hene. <sup>4</sup> Ani biyagola Iso ibu abale gerai ibalu ibu hamene yu hubi lalu núnú lene. Ani bialu libu haru dugu bigibigi bialu hene. <sup>5</sup> Ani dugu bialu howa Iso ibugua handa amu howa handalu hearia wali waneigini ibiyaru hondowa ibugua Yagabahondo hale halu lalu, Í heba ibiraru ti aibe, lene.

Ani hale hayagola Yagabahanda ladai bialu lalu, Ngode Datagaliwabehanda ínaga biabe bia haga agali í mo bayale halu wali waneigini uruni ngiya, lene. <sup>6</sup> Ani leagola wali biabe bia haga biagolabo libunaga waneigini heba ala ibalu Isonaga wanakuihayagi ge duli hanga howa dengui dindi ela helo bulu palene. <sup>7</sup> Ani biyagola Lia ibu nde ibuni waneigini heba ibalu Isonaga wanakuihayagi bulu palialu dengui dindini ela helene. Yosebe Leselola mani íbumaro bialu libubi ge duli hanga howa dengui dindi ela hene.

<sup>8</sup> Ani biyagola Iso ibugua lalu, Agali maru nogo sibiru haru ha mbiraleru ya bigi bialu bamba halu pu lariyaruni lola harugo ai irane aginaga yalu pudaba laribe, lene. Ani layagola Yagaba ibugua ladai bialu lalu, Agali haguane-o mbirale uruni íla ínaga bu mini hado habelonaga ibilarugoni, lene.

<sup>9</sup> Ani layagola Isohanda ladai bialu lalu, Hamene-o í mbirale wiai kogo ínaga wia hariyaruni íni holene karulape, lene.

<sup>10</sup> Ani layago lelowa dege Yagabahanda lalu, Anigo ína íla bu miniha hado heyagua nde mbirale uruni ína talebu ngerogoni mo ya. Ai ínaga wanakui handalu koria dengui wálalu Ngode Datagaliwabenaga dengui handalehe hendedogo. Ína íla bu miniha hado kene hendedogoni. <sup>11</sup> Ani hendedogo ainde mbirale ína bame í ngerogoni harugo mo yarene. Ngode Datagaliwabehanda í mo turu halu mbirale bayale dege ngiyagola íni karulapeore yu kogo ai uruni í mo ya, lene. Ani dege lalu lo hongo halu mo yaore laya handala nde Iso ibugua mbirale Yagabahanda miyadaruni mo yini.

<sup>12</sup> Ani mo yuwa Iso ibugua lalu, Ai íbi nde ina haru maliya heyalu ma, lene.

<sup>13</sup> Ani layagola Yagaba ibugua ladai bialu lalu, Agali haguane-o waneiginiru ge hongo halu gerai labe nahedago nogo sibi igini áyu dege hono wini gali bu karubi nde ani degedagola horo mbira hanguni gerai lalu abale anda pobe nahedago í manda bide. Abale pialu horo mbiru hanguni anda polene manda buwa nogo bu karu wara daila harimayagua nde nogo uruni bibahende homai holebira. <sup>14</sup> Anigo agali haguane-o ainde ína bamba halu ala pialu ha. Ina nde mani nogo waneigini bu karuni haru halu hendore ibugu bialu eberogoni. Ani ibalu amu Idomo dindini lola habiya, lene.

<sup>15</sup> Ani layagola Isohanda lalu, Aniyagua nde ínaga agali bu karu maru tí haru mandagi ibalimulo heloliya, lene.

Ani layagola Yagabahanda lalu, Agali haguane-o ína íhondo mana bayaleore berego nde wahalu ínaga agali bu karuni tini karulape haru ibulebirago wahadaba, lene. <sup>16</sup> Ani laya handala Iso ibu horo ogoningi pialu Idomo dindi pole pene. <sup>17</sup> Yagaba ibu nde pialu Sugodo dindi wiagoria anda puwa ibugua ibunaga balai anda bia halu balai anda emene emene maru ibunaga nogo sibi bulumagaru bu hearunaga bia hene. Ani binigo manda bialu tigua dindi ogoni mini Sugodo wini.\*

\* 33:17: Sugodo dindi mini ogoni Hiburu bi lalu Balai Anda Emene Emenebi laga wini.

<sup>18</sup> Yagaba ibu Mesobodemia yu wahalū Kenana dindiha dai buwa Segeme tano kaware wiagoria balai anda bu hene. <sup>19</sup> Ani pu howa dindi ogoni Segeme aba Hamo aguanenerunaga winigo ibugua dindi ogoninaga muni siliba handari mbirame (100) yolo bini.✧ <sup>20</sup> Ani buwa Yagaba ibugua lomabu delaga dabu mbira dindi ogoriani bu helene. Ani bu helowa dabu ogoni mini Ele Isaraele wali agalirunaga Ngode Datagaliwabe lalu bu helene.

## 34

### *Segemealime Yagaba wane Daina minade halu kayu binigo ogo*

<sup>1</sup> Yagaba Liala wane mbira mini Daina berenego ibu nde horo mbiru Segeme tanoha Kenana wali berearu nenege pene. <sup>2</sup> Hibiali mbira mini Hamo henego ibu nde Kenana dindiha tano ogoninaga agali haguane hene. Agali ogoni ibu igini Segeme henegome Daina ibalu hearia hondowa ibugua minu yania halu kayu bini. <sup>3</sup> Ani binidagoni Daina ibu wandari bayaleore bereago hondowa hame timbuni lowa binigo ai ibu Dainahondo ibu hame lelonaga bi gedaoreme ladebodebo bialu hene. <sup>4</sup> Ani lalu puwa Segeme ibu abahondo lamialu lalu, Aba-o wali ogoni i dabu buliya ina damu pu ha, lene.

<sup>5</sup> Yagaba ibu nde ibu wane Daina Segemehanda kayu biya layago hale ho hene. Anigo ibu igini bu hearu ti tagiraha nogo sibi bulumagaru haru hama peaha hale howa Yagaba ibugua nde bi mbira labe naheyagola wahowa ibu iginiru andaga dai bilo lowa hondo hene. <sup>6</sup> Ani hearia Segeme aba Hamo ibu Yagabala bi lole ibini. <sup>7</sup> Libu bi lalu hebira Yagaba igini biaru ti andaga dai buwa bi layalaya hale halu hearia Segemehanda ti mbalini biago kayu biya layago hale howa tigua tandaga timbuni halu keba hai hene. Ainde Isaraele hameigini tinaga deni Segeme ibugua Yagaba wane Daina kayu biyadagoni mana koorene ko mbira bini. Isaraele hameigini tigua mitangi bialu mana ogonidagua bulene nawiore mitangi bu haga wini. <sup>8</sup> Hamohanda Yagabahondo lalu, I igini Segeme ibugua i wane bedago hame timbuniore lo kago ai libu dabu bilo karulapedabe be nakarulapedabe. <sup>9</sup> Ainde ina haru mandagi howa wandari ina wane bedaru nde ti dabu bialu ti wane bedaru nde ina dabu bigi bimiya hamelo ko. <sup>10</sup> Ani bialu tinibi nde ina dindi ogoha mandagi dege hamiya. Ti dindi lene mbira tini holene hame ledamigoriani howa tomo hanga nogo sibi bulumagaru hina bialu biyinayaru bialu tini halimulo, lene.

<sup>11</sup> Segeme ibu nde ibu abala haru mandagi dege ibinigo ibugua Daina aba mbalini hearuhondo bi lamialu lalu, Tigua inaga bi larogoni hale halu karulape larimiyagua nde tinime ihondo ngi laramigo ngiai holebero. <sup>12</sup> Tinime nogo wariabu ogodagua hende habe lalu langeramidagua hende holiya. Aniore buliyago wali ogoniore i dabu buliya ngiaore bilimu, lene.

<sup>13</sup> Anigo Yagaba igini biaru tigua Segemehanda ti mbalini Dainahondo mana ko timbuni biyago miniha mo pehowa mitangi bu hene. Ani mitangi bu howa tigua Segemela ibu aba Hamolahondo ke howa mo hondo halu <sup>14</sup> tigua ogolabohondo lalu, Agali mbiraibunaga dongone podo mabu nabi kagohondo ina mbalini namuleberema. Iname ogonidagua dabu bilo mirimayagua ina tagabi holeberema. <sup>15</sup> Ai tigua mbiraore hangu bulene ngago ogoni ala bule pudaba. Ani bialu ti nde ina kamagobi dege hole agali ti bibahendenaga dongone podo mabu biai hole pudaba. Tigua ogonidagua bidamigola nde mani tigua bi laramigo hale halu karulape loleberema. <sup>16</sup> Anidagua birimiyagua nde ina wane bedarubi ti dabu bilimulo ngialu ti wane bedarubi nde iname dabu buleberema. Ani buwa inanebi ti heba mandagi halu ina hameigini mbiraore hangu holeberema. <sup>17</sup> Ainde tigua tinaga dongone podo mabu nabirimiyagua nde inanaga wali ogoni haru halu tinaga dindi ogobi wahalū tagira poleberema, lene.

✧ 33:19: Yos 24.32, Yo 4.5

<sup>18</sup> Ani layagola Hamo ibu igini Segemelame bi ogoni karulapeda lo manda bini. <sup>19</sup> Ani manda bialu Segeme ibugua Yagaba wane Dainaore hame timbuni lo howa tigua bibe layadagua ibugua bule pene. Segeme ibu damene dindi ogoniha bu hearume ibunaga mini mo yaraga hene howa tinaga deni ibu agali mini lene mbira ona hene.

<sup>20</sup> Ani howa Hamo ibu igini Segemela libuni dalu pialu tanoha ubanda tagi biaga pabe haraba wali agali ngoai haga wiagoria pu howa agali maru hearu heba bi lalu hene. Libugua tihondo lamialu lalu, <sup>21</sup> Agali ibu hearuni ti bayaleore heneyago howa ai ina baba mandagi holene hamelo hea. Inanaga dindi timbuni ngamagoniha howa tinime hoa biragoha ta nabi ibagabu helo wahamiya. Ani howa iname ti wane bedaruni dabu bialu tiguabi nde ina wane bedaruni dabu bilo. <sup>22</sup> Ani bimiyanaga iname mbirale mbira bulenego tigua bilimu laya. Ti kamagobi dege hole agali bibahendenaga dongone podo mabu biai halimu laya. Tigua lalu, Ogonidagua birimayagua nde tigua ina heba mandagi howa hameigini mbiraore ho holene karulapeda, lo manda biya. <sup>23</sup> Ani bialu tinaga nogo sibi bulumagarubi tinaga mbirale tara tara yu karubi bibahende inanaga hangu wiai holebira ndobe. Ani bulebirago ai tigua inahondo bi mbira langiyago hangu bimiya. Ani beremagola bibahende tigabi wiai holebira, lene. <sup>24</sup> Ani layagola agali tanoha hearu tigua Hamo Segemelame bi layagoni karulapeda lowa tinaga dongone podo mabu biai hene.

<sup>25</sup> Horo kiru peagola agali dongone podo mabu bini biaruni ti tandaga howa dege hene. Ani heagola horo tebonengi Daina mbalini kirali Simiono Libailame wai biaga ayu tibu yalu tanoha anda pene. Ani anda puwa mbiralime libu hapai habe naheore pialu agali tanoha bu hearuni bibahendeore homelo bo wahaiore hene. <sup>26</sup> Ani bialu libugua Hamo igini Segemebi homelo bo wahalu Daina ibu Segeme andagaha berearia libuni haru halu dai bini. <sup>27</sup> Simiono Libailame Segemenaga tanoha agali hearu bibahende bo wahai heagola Yagaba igini maru hearume tanoha anda puwa dabudabu bayale damene bu wiaruni bibahende mo yai hene. Ani binidagoni irane ti mbalini Dainahondo mana ko biyagonaga bene. <sup>28</sup> Tigua nogo sibi meme bulumaga dongiru bibahende haru piai hene. Ani bialu mbirale bibahende tano tagirahayagi wini wiarubi tano tamuha wini wiarubi bibahende mo yalu piai hene. <sup>29</sup> Ani bialu mbirale muni timbunime yolo biaga ale dewaore mo yalu wali waneigini biru wiarubi ti haru haga bini. Ani haru howa anda bu hearuha wiaruni damenego bibahendeore mo yaiore halu pene.

<sup>30</sup> Mani howa Yagaba ibugua Simiono Libailahondo lamialu lalu, Libugua genda timbunioire iha mo ya haribida. Dindi ogoha padaru Kenana wali agalirubi Perese wali agalirubi wali agali maru bibahendebi ai tigua jore agali kooredane hondolobada. I agali dewa nahe kogo ainde agali bu karume mo mogo bialu wai ibiyagua nde ibi inaga waneigini bu karunibi ina bibahende bo wahai holobada, lene.

<sup>31</sup> Ani layago lelowa dege libugua lalu, Agilego o lalu kegonibe. Wali iya mbalini ogoni wahalu bayanda wali biralu ibu agali kayu yama ibagabu berelo wahama lalu laribe, lene.

## 35

*Yagaba Bedeleni heagola Ngode Datagaliwabehanda, Ina í biamogo biaabo holebero, lenego ogo*

<sup>1</sup> Ngode Datagaliwabehanda Yagabahondo lamialu lalu, Ayu ogoni heyalu Bedele dindini hole pu. Ani pu howa inaga lomabu delaga dabu mbira ogoriani bu helabe. Horo mbiru í hamene Isohondo gi halu ibida pole pialu heria Ngode Datagaliwabe hapani harugo í kogoni, lene.\*

\* 35:1: Pig 28.11-17

<sup>2</sup> Ani lamiya handala Yagaba ibu one waneiginirubi ibunaga biabe biaga hearubi bibahendehondo lamialu lalu, Tigua mbirale dama mitangi bialu gime wabini yu kamiruni bibahende wahai halimu. Ani bialu mana bayale tigabi holenenaga ngago bialu howa aga dodo nahe bayale ngaru karulo halimu. <sup>3</sup> Ai ina dindi ogo yu wahalu Bedele maliya kamagoni. Bedeleni pu howa ina lomabu delaga dabu mbira Ngode Datagaliwabenaga bia holiya. Ngode Datagaliwabe ogoni ibugua i genda yu hewangi i heba haabo howa i ibaga bialu porogo bibahendeha ila mandagi haabo haga kagoni, lene. <sup>4</sup> Ani layagola tigua mbirale dama mitangi bialu bi pupu wule gime wabini dindi taraha howa mo yu ibini tinime yu haga biniyaruni bibahende Yagabahondo mo miai hene. Ani mialu mbirale haleria daga wiarubi heba golo mialu bini. Ani biyagola Yagaba ibugua mbirale uruni bibahende Segeme dindi kawareni ira mbira mini oga laga heago teneha hora hene.

<sup>5</sup> Anidagua bialu Yagababi ibunaga one waneiginibi wali agali biabe bia haga hearubi bibahende tano yu wahalu piai hene. Ngode Datagaliwabe ibunime tano bibahende wiaruha hearu ti gi holene timbuni mo wia hayagola tigua Yagaba halu ibu damene piyaruni talima pobe nahe hene. <sup>6</sup> Ani hea handala Yagaba halu ibu damene biaru heba pialu Kenana dindiha Lusu tano mbira wiagoria anda pene. Lusu tano ogoni mani mini Bedele laga winigo ogoriani pene. <sup>7</sup> Ani pu howa dindi ogoriani lomabu delaga dabu mbira Yagabahanda bu helene. Ani bu helowa dindi ogoni Ngode Datagaliwabenaga lalu mini Bedele wini. Ani winidagoni irane Yagaba ibu horo mbirungi ibu hamene Iso gi halu ibida pialu hearia Ngode Datagaliwabe ibuni Yagaba hearia hapani henego mitangi bialu wini. ✧ <sup>8</sup> Ti dindi ogoniha hemigola Lebeganaga biabe bia haga wali mbira mini Debora berenego ogoning i ibu homene. Homayagola tigua ibunaga tingini Bedele tanonaga abene ni tagira ibiragohayagi ira timbuni mbira mini oga heago teneha hora hene. Ani hora howa tigua ira ogoni mini Dugu Bulene Oga Ira ka, laga hene.

<sup>9</sup> Yagaba ibu Mesobodemia dindi wahalu Kenana dindiha daibu heagola Ngode Datagaliwabe ibu Yagaba hearia ibuwa ibuhondo lalu, Ina i biamogo biaabo holebero, lalu lamini. <sup>10</sup> Ngode Datagaliwabehanda lalu, Ayu inaga mini Yagaba lene kegonigo mani howa tigua inaga mini Yagaba nalolebira. Tigua inaga mini Isaraele lolebira, lene. Anidagua lalu Ngode Datagaliwabehanda Yagabanaga mini Isaraele lalu wini. ✧ <sup>11</sup> Anigo Ibugua Yagabahondo lalu, I Ngode Datagaliwabe Hongo Haiheore kogoni i waneiginiru dewaore helo hono wibe. Ani beregola wali agali hameigini dewaorenaga mamalibi maru kini holebirarunaga mamalibi i holebere. ✧ <sup>12</sup> Dindi ogo ina abale Abarahama Aisagala libuhondo minigo ayu ihondo ngero. Mani howa inaga waneigini aguaneneru bu holebiraruhondo mulebero, lene. <sup>13</sup> Ani lowa Ngode Datagaliwabe ibu Yagaba helalu pene. <sup>14</sup> Ani peagola Yagaba ibugua ege tole luni mbira duguwa Ngode Datagaliwabela bi lalu haribigoria hengene. Ani hongowa ibugua olibe lini ibanemebi waini ibamebi ege tole ogoni Ngode Datagaliwabehondo loma bia halu o hangayagoriani odo wini. ✧ <sup>15</sup> Yagaba ibugua Ngode Datagaliwabela bi lalu haribidagoni dindi mini Bedele wini.

### *Yagaba one Leselo homenego ogo*

<sup>16</sup> Ani bu howa Yagababi ibu dameneru ti Bedele wahalu Ebarada pole pialu hene. Harigani pialu heaore dege Leselo ibu gali taba honolene tu hayagola ibu tandaga timbuniore hendene. <sup>17</sup> Ani tandaga handalu berearia tidawali ibu biamogo biaga bereagome Leselohondo lalu, Gi halu mogo nalabe. Ayu ogoni i igiri gali mende taba hanarigoni, lene. <sup>18</sup> Ani taba honowa nde Leselo ibuni homole howa buhe emeneore

wuwa bi mbira hangu lalu igiri biago mini Benoni lene. Mani howa igiri biago abahanda ibu mini Beniyamini lene.\*

<sup>19</sup> Leselo homayagola tigua ibunaga tingini Ebarada polene hariga gibuni wiagoria hora hene. Ebarada ogoni mani mini Bedeleheme winigo áyu nga. <sup>20</sup> Ani hora howa Yagaba ibugua homali biagoria ege tole mbira homali lalu mo walia helonaga duguwa Leselonaga homali biagoriani hengene. Ani hengenego ege tole ogoni áyu wiaabo ka.†  
<sup>21</sup> Ani hora howa nde Yagaba halu ibu dameneru ti pialu Ede dindini anda bu gimbu bu migi bialu bima iraga hene heago hapara howa dege balai anda bu hene.

*Yagaba iginiru henego ogo*

<sup>22</sup> Yagaba ibu dindi ogoniha heangi ibu igini Lubenehanda ibu aba one wali mende mini Biliha bereago kayu yini. Lubene ibugua ogonidagua biya layago Yagaba ibu nde hale howa keba timbuniore hene.☆

Yagaba ibu igini hombearia (12) hene. <sup>23</sup> Ibu one Lia igini uru hene. Wahene Lubene halu mende Simiono hene. Tebone Libai halu mane Yuda hene. Dauni Isaga waragane Sebulunu imaru haga bini. <sup>24</sup> Ibu one mende Leselo berenego ibu igini kira hangu Yosebe Beniyaminila hene. <sup>25</sup> Wali mbira Leselonaga biabe bia haga Biliha berenegome igiri kira Dana Nabadalila taba henene. <sup>26</sup> Wali mende Lianaga biabe bia haga Siliba berenegome igiri kira Gada Asela taba henene. Yagaba ibugua Mesobodemia heangi igiri uruni hono wini.

*Aisaga homenego ogo*

<sup>27</sup> Yagaba ibugua ibu aba Aisaga berearia Mamere dindi mbira Kiriada Araba tano laga winigo mini mende Heberono laga ogoni kaware wiagoria pene. Bamba Abarahama Aisagala libu dindi ogoniha haga winigo ogoniha berearia hondo pene.☆ <sup>28</sup> Aisaga ibunaga mali hama ibinigo bibahende handari mbirani pira halira (180) halu <sup>29</sup> ibu agali waheore biru wialu homene. Ani homayagola ibu igini Iso Yagabala libunime ibu hora hene.

**36**

*Iso igini aguaneneru hama penego ogo*

<sup>1</sup> Iso ibunaga mini mende Idomo henego ogoni ibunaga aguanene ogodagua hama ibini. <sup>2</sup> Iso ibu Kenana wali dabu binigo mbirago Hidiiali Elono henego wane mini Ada bereago dabu bini. Wali mende agali Ana wane mini Oholibama berenego dabu bini. Ana ogoni ibu Hibiali Sibeono igini hene.☆ <sup>3</sup> Wali tebone Isimaele wane mini Basemada ibu Nebaiodo mbalini bereago dabu bini.☆ <sup>4</sup> Ani dabu bu howa Adahanda igiri Elibasa taba henene. Basemada ibugua nde igiri Luele taba henene. <sup>5</sup> Oholibama ibugua Yausu Yalama Kora imaru taba henene. Iso ibu Kenana dindiha hearia igiri uruni hono wigi bini.

<sup>6</sup> Mani howa Iso ibugua ibu hamene Yagaba helalu dindi kaundiaha hama pene. Pialu ibu one waneiginiru bibahendebi wali agali ibu baba haga hearubi ibunaga nogo sibi bulumaga bu hearubi haru hai halu mbirale bibahende Kenana dindiha wu hene wiarubi mo yai halu pene. <sup>7</sup> Iso ibugua Yagaba helalu penedagoni irane libunaga nogo tara tara hebigi dindi mbiraore ogoriani hinu hai habe nahe dewaore halu tolayagola Iso ibu pene. <sup>8</sup> Iso ibu pialu Sia dindi barebare wiagoha pu hene.

<sup>9</sup> Iso ibu Idomo hameigini Sia dindi barebare wiagoha palearunaga mamali hene. Iso ibu igini aguanene ogodagua hene. <sup>10</sup> Iso one Ada ibu igini mbira mini Elibasa hene.

\* **35:18:** Mini Benoni ogoni Hiburu bi lalu, Ina tandaga timbuniore narugonaga igini laga. Beniyamini mini ogoni Hiburu bi lalu, Iginigoni ibu mini lene holebira, lalu lene. † **35:20:** Áyu wiaabo ka ledagoni áyu ina kamangi ndo ala agali bi te ogoni gili binidago ibu heangi mitangi bialu gili bini. ☆ **35:22:** Pig 49.4 ☆ **35:27:** Pig 13.18 ☆ **36:2:** Pig 26.34 ☆ **36:3:** Pig 28.9



Wali mende Basemada berenego ibu igini Luele hene. <sup>11</sup> Elibasa igini uru mbira Temana mende Oma tebone Sebo mane Gadama dauni Kenasa imaru hene. <sup>12</sup> Iso igini Elibasa ibu one mende mini Timina berenego ibugua igiri mbira mini Amalege taba henene. Iso one Ada ibugua taba hanayagome ibu aguane hama penego uruni.

<sup>13</sup> Iso one mende mini Basemada ibu igini mbira Luele taba henenegro ogoni ibu igini maria henego uru Nahadabi Serabi Samabi Misabi uruni hene. Igiri uruni ti Iso one Basemada aguane hene.

<sup>14</sup> Iso one tebone Oholibama bereago ibu igini tebirali Yausu Yalama Kora imaru hene. Oholibama ogoni ibu Sibeono igini Ana wane berene.

<sup>15-16</sup> Iso aguane maru agali haguane haga binigo mini uru. Iso igini wahene Elibasa ibu igini Temanabi Omabi Sebobi Kenasabi Korabi Gadamabi Amalegebi uruni tigua Idomo dindiha agali haguane howa dindi mbira mbira wiagoria haru haga bini. Uruni ti Iso one Ada aguane bu hene.

<sup>17</sup> Iso igini mende Luele ibu Idomo dindiha igini ogodagua hene. Nahadabi Serabi Samabi Misabi tibi nde agali haguane dege howa Idomo dindi maruha haru hene. Uruni ti Iso one Basemada aguane bu hene.

<sup>18</sup> Ana wane Oholibama ibu Iso one bereagome ibu igini ogodagua hene. Yausubi Yalamabi Korabi tibi nde Idomo dindiha agali haguane dege howa haru hene. <sup>19</sup> Iso iginirume hono winigo ibu aguane uruni hene. Ani howa tininaga hameigini headagua haru haga haga biaga agali haguane hama ibini.

*Sia igini aguaneneru henego ogo*

<sup>20</sup> Sia ibu iginiru ogodagua hene. Sia ibu Hoali howa ibuni Idomo dindiha dege haga hene. Sia ibu igini Lodanabi Sobalabi Sibeonobi Anabi <sup>21</sup> Disonobi Esebi Disanabi henego tibi Sia igini agali haguane dege howa Idomo dindiha Hoali hearu haru haga hene.

<sup>22</sup> Lodana ibu Hori Hemanala hameigininaga mamali hene. Lodana ibu mbalini mbira Timina berene.

<sup>23</sup> Ani bialu Sobala ibu Alabanabi Manahadabi Ebalabi Sebobi Onamabi hameigininaga mamali hene.

<sup>24</sup> Sibeono ibu igini kira Aia Anala hene. Agali mbira dindi ko wali agali nahaga wiagoha ibu aba Sibeononaga nogo dongi haru hearia iba pobohe mbira duguadaga halu ibiyaria handa walia heneyagoni agali Ana ogoni ibugua hendene. <sup>25-26</sup> Ana ogoni ibu igini Disono ibu wane Oholibamala hene. Ai Oholibama ibu Ana wane berene. Disono ibu Hemedanabi Esebanabi Idiranabi Keranabi hameigini uruninaga mamali hene.

<sup>27</sup> Ese ibu nde Bilihanabi Sabanabi Aganabi hameigini tebira uruni tinaga mamali hene.

<sup>28</sup> Disana ibu Usu Aranala hameigini kira ogoninaga mamali hene.

<sup>29-30</sup> Hoali hameigini hearume Idomo dindiha agali haguane howa haru haga uru hene. Lodanabi Sobalabi Sibeonobi Anabi Disonobi Esebi Disanabi uruni ti Hoali howa Idomo dindiha agali haguane haga bini.

*Idomo dindiha agali kini haga binigo ogo*

<sup>31</sup> Isaraele wali agalinaga kini mbira naheangi Idomo dindiha agali uru ti kini ala hene. <sup>32</sup> Bero igini Bela ibugua kini howa Dinihaba tano wiagoria haru hene. <sup>33</sup> Ani howa Bela homayagola Bosora tanoali Sera igini Yobaba ibu kini ha aribia hene. <sup>34</sup> Yobaba homayagola nde Temanali dindi wiagoha agali Husama henego ibu kini ha aribia howa haru hene.

<sup>35</sup> Ani howa Husama homayagola nde Bedada igini Hadada henego ibu kini ha aribia hene. Hadada ibugua Moaba dindiha puwa Midianali hearu baba wai bialu ti bo poda hana hene. Hadada ibu kini howa Abidi tanoha hene. <sup>36</sup> Hadada halu

homayagola Masarega tanoali mbira Samala henego ibu kini ha aribia hene. <sup>37</sup> Samala halu homayagola iba Yuberedisi pedago kawareha Lehobodo tanoali Saulu mbira henego ibugua kini ha aribia hene. <sup>38</sup> Saulu halu homayagola Agabo igini Balahanana mbira henego ibu kini ha aribia hene. <sup>39</sup> Ani halu Balahanana homayagola Hadada mbira henego ibu kini ha aribia howa Pau tano wiagoria haru hene. Hadada ibu one Maderede wane Mesahaba aguane Mehedabele berene.

<sup>40-43</sup> Iso ibu Idomoali haga binidarunaga mamali henego ti mini uru. Timina Alaba Yadede Oholibama Ela Pinono Kenasa Temana Mibisa Magadieles Irama imaru hene. Agali uruni ti Idomo dindiha hameigini mbira mbiranaga agali haguane haga bini. Idomo ogoni Isonaga mini mende winigo nde ibu agali haguane uruninaga mamali hene. Agali haguane uruni mbira mbira headagua tinaga dindi wigiwigi bialu tini hameigini headagua haru haga agali haguane haga bini.

## 37

### *Yosebe hamenerume ibu handabe mangaho henego ogo*

<sup>1</sup> Yagaba ibu Kenana dindi ala ibu aba Aisaga hene wiagoria hene. <sup>2</sup> Yagababi ibu iginirubi ti bialu henegonaga bi te ogo.

Yosebe ibu igiri hagua dehe mali pira mbirani karia (17) hayagola ibu aba one Bili Silibalanaga igini ibu hamene biaruru baba nogo sibi memeru haru haga hene. Ani haru howa ibu hamenerume ko mbira birago hondowa abale puwa ibu abahondo lamiaga hene.

<sup>3</sup> Yagaba ibu mini mende Isaraele ibugua wahe howa ibu igini Yosebe hono winigonaga igini maru gubalini emene nira lowa Yosebe gubalini timbuni haga hene. Ani bu howa ibugua aga bayale dagarenaga gi lu biagimbu biaga mbira wabuwa ibu igini Yosebe mini. <sup>4</sup> Yagaba igini maru hearume handalu hearia ti abahanda Yosebe gubalini timbuni halu ti emene mangaho heago hondowa tigua Yosebehondo keba timbuniore howa ibuhondo bi bayale nalaga hene.

<sup>5</sup> Mbiraga mbirungi Yosebe ibugua emaga mbira handayago ibu hameneru lamini. Lamiyagola tigua hale howa keba timbuni hene. <sup>6</sup> Yosebehanda ti lamialu lalu, Ina emaga mbira handarugo loliya hale hadaba. <sup>7</sup> Ina bibahende mabuha hai howa widiore kabu bigibigi bialu hemaria ai kabuni inaga biago ibu tigabi heyu heagola tinaga biaruru bibahendeoreme inaga heyu heagoha ho mabu buwa bulu paliai hearia handaru, lene.

<sup>8</sup> Ani layagola ibu hamene biarume lalu, Ai í inanaga handame haga kini haregola ina bibahende ina haru holebedabe, lowa ti bibahendeme handabe manga hai hene.\*

<sup>9</sup> Yosebehanda ibu hameneruhondo emaga halu mende hondowa tihondo lamialu lalu, Ina emaga handalu hewaria nibi egebi yakundi beriarubi bibahende inaga wanakuihayagi ibuwa ma podalu bulu paliai hayaria handaru, lalu lamini.

<sup>10</sup> Emaga ogoni handayago ibugua ibu ababi lamini. Lamiyagola ibu abahanda lalu, Ogoni agile emagadabe. Ina manda beregola ibi í aiyabi í hamene karubi ina bibahende í kegoria ibuwa inaga wanakuihayagi ma podalu ge duli hanga holeberamadabe, lene.

<sup>11</sup> Ibu hamene biarume keba timbuniore ho heagola ibu aba ibunime emaga ogoni agoale handayadabe lowa mitangi tangi bialu berene.\*

### *Yosebe Iyibi dindiha minu yalu penego ogo*

<sup>12</sup> Horo mbirungi Yosebe hamene biaruru ti Segeme dindi wiagoria ti abanaga nogo sibi haru hole pene. <sup>13</sup> Ti ani peagola Yagaba ibugua Yosebehondo lalu, Í hameneru Segeme dindini nogo sibi haru kago hondo pu, lene.

Ani layagola Yosebe ibugua ladai bialu lalu, Ina hondo porogo, lene.

\* 37:8: Pig 41.41-43, 41.55, 42.6, 50.18    \* 37:11: Ab 7.9

<sup>14</sup> Ani layagola ibu abahanda lalu, Áyu ína puwa í hameneru tibi nogo sibirubi agua kabe handabe. Handalu ti agua hea lalu abale langule dai bibe, lene. Ogoningi Isaraele hameigini ti Heberonoha dindi ulini wiagoria hene.

Yosebe ibu abale Segeme dindi wiagoria anda pialu <sup>15</sup> abale ibaga bialu hearia agali mbirame hondowa lalu, Í agile tai berebe, lene.

<sup>16</sup> Ani layagola Yosebe ibugua lalu, I hameneru tai berogo ína ti mbirani nogo sibi haru hearia handaribe, lene.

<sup>17</sup> Ani layagola agali biagome ladai bialu lalu, Ti oali nahe Dodana dindi piya, lene. Ani laya handala Yosebe ibu hameneru piyiyadagua abale pialu Dodana dindi anda puwa ti handa walia hene.

<sup>18</sup> Yosebe ibu kaundia ibalu heago de hondowa ibu hamene biarume Yosebe homelo bo wahamiya lowa lo manda bialu berene. <sup>19</sup> Tini degedege ladene bialu lalu, Handa naberego emaga handaga biago amu ibiragoni. <sup>20</sup> Ai homelo bowa ibunaga tingini iba biraga uli nai ngaruniha bape hamiya. Iname ibu nogo gabuame bo nayiya lamiya. Ani beramagola ibugua emaga handaraligo agua birabe handamiya, lene.

<sup>21</sup> Tigua ogonidagua larimigo hale howa Lubene ibugua Yosebe bo waholene hame nale howa lalu, Ibu homelo nabamiya. <sup>22</sup> Inanenaga giha howa homelo bolene nakarulapego. Ibu dindi wali agali nahaga ogoha iba biraga uli yobi o ngagoha minu bape hamiya, lene. Ani lenedagoni tene ibugua Yosebe ibu aba karia haru dai bule manda buwa lene. <sup>23</sup> Yosebe ti bereagoria ibiyagola tigua abaleore minuwa ibunaga aga ibu abahanda mini baya biagimbu biaga biago minu golene. <sup>24</sup> Golo ngelalu Yosebe minu yalu puwa iba biraga uli mbira iba nabere yobi wiagoha bape hene.

<sup>25</sup> Ani bialu ti daibu biruwa tomo nalu beramiore dege Isimale hameigini maru Gileada dindi howa tinaga nogo kameleni dabudabu bayaleore ira lini ibaneme wabini marasinirubi weli ngabiorebi muni dewaoreme yolo biagago uruni Iyibi dindiha muni tagu pole ibiyaria hendene. <sup>26</sup> Ani ibiyagola Yudahanda ibu hameneruhondo lalu, Ina hamene inaneme ogoha bo do holene nakarulapedago <sup>27</sup> ibu wali agalinaga biabe bia haga helo muni miagadagua áyu agali urunime muni ngi lowa Yosebe muni taguimiya. Ina hamene darama mbiraorego nde inaneme bo waholene nakarulapedago, layagola ti bibahendeme ogoni karulapego ani bimiya lowa berene. <sup>28</sup> Igiri biaru ti bi ogoni lalu berearia agali Midiana howa maru nde tinaga dabudabu maru muni tagu pole harigani pialu howa handalu hearia Yosebe uliha berearia hondowa dugu yamini. Ani biyagola Yosebe hamene biaru tigua Isimale aria biaruha muni taguini. Isimale aria biarume muni kuni siliba pira kira (20) Yosebe hamenehondo mialu Yosebe Iyibi dindi haru pene.✧ <sup>29</sup> Mani Lubene ibu iba uli biagoha Yosebe berelayago hondo dai bialu hearia Yosebe nabereyane hondowa ibu dara timbuniore howa ibuninaga aga lerelene. <sup>30</sup> Ani bialu ibu hameneru hearia dai buwa lalu, Yosebe iba uli biagoha nabereyago. Aiore agua buabe, lene.

<sup>31</sup> Ani layagola tigua nogo meme mbira bowa Yosebenaga aga biagoria darama wai hene. <sup>32</sup> Ani bialu tigua aga darama bagabi biago ti aba berearia yalu dai buwa lalu, Aga ogo namugoha winiyago ogoni í igininaga mbauledago de handa bia, lene.

<sup>33</sup> Ani layagola ti abahanda aga biago hondowa lalu, Ogoni i iginini Yosebenaga agaoredago. Ai ibu nogo gabua mbirame balu naore biyadagoni, lene. <sup>34</sup> Ani lowa Yagabahanda ibu iginiore dara timbuniore halu ibunaga aga lerelalu dara howa aga biagane ale bu berene. Horo dewaore ibu igininaga dara howa dugu bialu biraabo hene.

<sup>35</sup> Ani bialu bereagola ibu waneigini maru hearume ti abanaga bu mini mo palia hole lowa bi layagolabi nahondoleore biruwa lalu, Ina dugu bialu kone dege inibi homalu homene dindiha puwa ibuni iya haru lola halu waholebero, lene. Ani lowa Yagaba ibu dugu dege bialu bira ho wiaabo hene.

✧ 37:28: Ab 7.9

<sup>36</sup>Midianali biaru tigua Yosebe Iyibi dindiha haru halu puwa muni taguini. Iyibi dindi kini kagonaga wai biaga ami agali karu haru haga mbira ibu mini Podiba hene. Podiba ogoni ibunaga biabe bia haga Yosebe helo Midianali biaru ti muni mialu Yosebe ibu andaga haru pene.

## 38

### *Wali mini Tamahanda Yuda mo hondo henego ogo*

<sup>1</sup>Horo uruningi Yuda ibugua ibu hameneru helo wahalu Adulama tanoha agali mbira mini Hira henego ibula hama pene. <sup>2</sup>Ani pu howa Kenanali mbira mini Sua heago wane mbira berearia hendene. Ani hondowa ibugua wandari ogoni ibu dabu bialu libu dindi ogoniha hene. <sup>3</sup>Mani wali o biagome igiri mbira taba hono bereagola Yuda ibugua igiri gali ogoni mini Ere wini. <sup>4</sup>Emene howa nde wali biagome igiri mende taba hanayagola ibu mini Onana wini. <sup>5</sup>Wali biagome igiri tebonebi taba hanayagola ibu mini Sela wini. Yuda ibu Kesibi dindi wiagoria heangi walime igiri Sela ogoni taba henene.

<sup>6</sup>Maniore howa igiri uruni andaho hai heagola Yudahanda ibu igini wahene Erenaga wali mbira mini Tama bereago dabu bia hene. <sup>7</sup>Ere ibugua Anduane Homogonaga deni howa mana ko bialu hearia Anduane Homogohanda ibu bo wahene. <sup>8</sup>Ani homaya handala Yudahanda ibu igini mende Onanahondo lamialu lalu, Inanaga mana ngamagome í hamene waneigini mbira nahonowi kaore ibu one dalo berelalu homayagua nde hamene mende kago ibula bira aribia holene nga. Ani biruwa ibu hamene homayagonaga waneigini ibuni henegoria ha aribia helonaga hamene kagome hono wia holene nga lo wini ngago ai wali dalo Tama bedago íla biralibu, lene. Ani biruwa ibugua waneigini í hamene homayagonaga hono wia helo, lene. <sup>9</sup>Ani layagola Onana ibugua waneigini ibuninaga helo ndoyagola ibu anidagua bulene turu nahe hene. Ani howa ibugua wali dalo ogonila mandagi padabira ibu hamenenaga waneigini holilono Onana ibu ohaga hene. <sup>10</sup>Onana ibugua anidagua bialu henedagoni Anduane Homogonaga deni howa mana ko wiago biyagola Anduane Homogohanda Onanahondo keba halu Onanabi bo wahene. <sup>11</sup>Ani biyagola mani Yuda ibugua ibu aruni Tamahondo lamialu lalu, Ainde í agalini homayagonidago mani í igini Sela anda halu wali dabu bibehe kagola ogonila dabu bilibulo áyu ibu anda helo tagi í aba andagaha birule pu, lene. Yuda ibugua bi o layadagoni henene ndo ohowa ibu igini kiralí biagolabo homayadagua Selabi homolilono ani lene. Ani pu laya handala Tama ibu nde ibu aba andaga pu berene.

<sup>12</sup>Luore ho wahowa Yuda one Sua wane biago homene. Ani homayagola hora howa duguandaru hai halu horo mbirungi agali marume Timina dindi wiagoria ibunaga nogo sibi irini podalu heagola ogoni handama Yuda ibu pole pene. Pialu ibu nenege Adulama tanoali Hira libu haru mandagi pene. <sup>13</sup>Ani pole pialu heagola agali mbirame Tamahondo lalu, Í aruni biago Timina dindiha ibunaga nogo sibi irini podole ibira, lalu lamini. <sup>14</sup>Tama ibugua lo mitangi bialu ai Sela wahe karulape kagoyu libu dabu bulene mo tiga nabi hearia hendene. Ani hondowa ibugua dalo nu hono bereago dugu ngelene. Ngelowa aga bu aribia halu aga emene mbirame ibunaga dengui buyi halu Enaimi dindi mbira Timina dindi polene hariga kaware wiagoria handatagiho berene.

<sup>15</sup>Ani berearia Yuda ibu ibuwa handalu hearia wali biago ibu labolabo emene mbirame dengui buyiho bereago hondowa wali ogoni bayanda wali bedabe toba hene.

<sup>16</sup>Ani hondowa Yuda ibugua wali hariga gibuni wiagoria bereago ibu aruni biago bereago nahende wali tara bedabe toba howa ibugua wali biagohondo lalu, Iya kayu bibiya hameledogo kayu biba, lene. Ani layagola wali biagome ibuhondo lalu, Ani bibiya dege ína í agile nguleberebe, lene.

<sup>17</sup>Ani layagola Yudahanda lalu, I nogo meme bu kogo igini mbirago ínaga ibilolebero, lene. Ani layagola wali biago ibugua lalu, Ogoni bayale larigo ína bi laregoni heneneore

buleyagua walia halu áyu mbirale mbira i giha yu biruliya ngerene. Mani nogo meme igini ogoni haru eberegola íni ngiadai buliya ngi, lene.

<sup>18</sup> Ani layagola Yuda ibugua hale halu lalu, Bi larogoni henene bulebero lalu mbira agile nguliya hameledebe, lene.

Ani hale hayagola wali biago ibugua lalu, Mbirale ínaga magibi ogoni hende howa pu mani ngegobi ngialu ínaga halimbu yidegonibi ngi, lene. Ani layagola mbirale ngi layaruni mialu Yuda ibu wali biagola palene. Ani biyagola wali biago mani ibu gali bere berene. <sup>19</sup> Tama ibu andaga dai buwa aga emene ibunaga dengui buyi hayago golo ngelalu ibu agalini homene dara howa dalo nu hanaga dugu wini biago lone hono berene.

<sup>20</sup> Mani howa Yuda ibugua Hirahondo lalu, Nogo meme igini mbira haru halu puwa wali biago mialu ínaga mbirale wali biagome mo yu birayago yu dai bule pu, laya handala Hira ibu pene. Pialu hearia wali biago handa walia nahe taya bu wahene. <sup>21</sup> Ani taya bu wahowa Hira ibugua agali maru dindi ogoniha haga hearuhondo lalu, Bayanda wali mbira Enaimi harigani biragayago agoha bedabe, lene.

Ani layagola tigua ladai bialu lalu, Bayanda wali mbira ogoha nabiraga, lene.

<sup>22</sup> Ani laya handala Hira ibu Yuda hearia dai buwa lalu, Wali biagoni nabere tayabu waharu. Agali dindi ogoniha haga hearumebi bayanda wali mbira dindi ogoniha nabiraga laya, lene.

<sup>23</sup> Ani layagola Yudahanda lalu, Wahalu taya nabi mbirale uruni wali ogoni ibu yu berelo waha. Inaga bi larugo la hondo naholenaga nogo meme ogoni haru pu larugo ai wali agali bu karume iya hondo oba holigo nde ína ibu handa walia naharidago wahalu waha, lene.

<sup>24</sup> Ani lalu ege tebira agima peagola maru hearume Yudahondo lamialu lalu, Í aruni Tama ibugua agali kayu bialu bereneyago ai áyu ibu gali bere beda, lalu lamini. Anidagua lamiyago hale howa Yudahanda hongo howa lalu, Wali ogoni balu irani delole pudaba, lene.

<sup>25</sup> Ani layagola tigua Tama irani bo delole haru pialu hearia Tama ibugua Yudanaga mbirale biaruni yalu pudaba lalu bi ogodagua lawia hene. I mbirale uruni ngiaga agali kagonaga gali bere bedogo ai mbira ibuninaga magibi ogoninaga pu hende howa mani wiagabi halimbu ogonibi ainagadabe dabo handabe, lalu wia hene.

<sup>26</sup> Ani layiyago hale howa Yuda ibugua mbirale biaruni hondowa lalu, Mana ko ogoni wali ogonime bini ndo ina birudagoni. Ani birudago ainde wali ogoni i igini Sela ibu dabu bilonaga mo tiga nabi dege harudago ai dabu bilo, lene. Ani lalu Yuda ibu wali ogonila mani lone napale wahene.

<sup>27</sup> Tama ibu gali taba honolene tu bereagola handalu hearia ibu tombeha gali labo laboli bereyane hendene. <sup>28</sup> Anigo ibugua gali taba honole biyagola mbira gi ala pani hayagonaga tidawali Tama biamogo bialu bereagome pu daramabi mbira gini pongo bia hene. Ani pongobia howa ibugua lalu, Gali ogoni ibu ala pani haya, lene. <sup>29</sup> Ani lo berearia gini pu helayago yamialu dai biyagola ibu hamene mendego ala taba henene. Ani biyagola wali biago ibugua lalu, Í mani taba honolene winigo ai íni hongome í ala ibirida, lene. Ani lowa ibu mini Perese wini. <sup>30</sup> Mani ibu hamene pu daramabi gini pongo bia hayago taba henene. Taba hanayagola ibu mini Sera wini.

## 39

### *Yosebe ibu Podiba andagani henego ogo*

<sup>1</sup> Isimaleali biaru tigua Yosebe Iyibi dindini haru pu heleagola Podibahanda agali biaru muni mialu Yosebe haru pene. Podiba ogoni ibu kini mamage haga ami agali hearunaga hondo haga haguane howa ibuni Iyibiali dindi tene hene. <sup>2</sup> Anduane Homogohanda Yosebe baya hangu handaya ho heagola ibugua Podiba andagani howa



biyago bibahende bayale hangu hai hene.✧ <sup>3</sup> Podibahanda handalu hearia Yosebe ibuha Anduane Homogo ibula haru howa ibugua biyago bibahende bayale dege hayago hendene. <sup>4</sup> Ani biyago hondowa ibugua Yosebehondo lalu, I andagaha bibahende ngoruni handameho habe, lene. <sup>5</sup> Ogonidagua biyagola Podiba ibu andagaha wiaru bibahende bayale hai hene. Anduane Homogohanda Yosebe handaya ho heagola ani bini. Ibunaga mabu andabi maruale wiarubi ani dege bini. <sup>6</sup> Aniore biyagola Podiba ibunaga mbirale wiaruni Yosebenaga giha ya hai lalu ibu tomo noleneo hangu mitangi biaga hene.

Yosebe ibunibi nde baya henene baya mbira lalu hongo pururuleore heneya. <sup>7</sup> Ani heagola Podiba one ibu Yosebe dimagoli ho biruwa lalu, Iya palibiya ibu, lene. <sup>8</sup> Ani layagola Yosebehanda ladai bialu lalu, Inaga agali haguane ibugua ibu andagaha ngaru bibahende ina hondo holiya ngiai hayago tene iha ko mbira bulubada manda nabi howa ani biyagoni. <sup>9</sup> Ayu ibunaga mbirale ngaru bibahende ibuni handaya ho holenedagua ina kogoni. Ibugua ihondo ogo bibe nabibe lalubi mbira nale. Bibahende ina hondo hai kogoni. Ai i dege ibuni hangu one bedego. Ibugua ihondo ila palilibu lalu mbira nalego. Ngode Datagaliwabenaga deni howa ina mana ko ngubi ogoni bulene nawiore, lene. <sup>10</sup> Horo bibahendengi howa wali ogoni ibugua Yosebehondo kayu yaba lalu laho wiyagola Yosebe ibu walila mandagi napale ohalu haabo hene.

<sup>11</sup> Horo mbirungi Yosebe ibu andaga tamuha biabe mbira bulene wiyagola anda pene. Ogoningi agali biabe biaga mbira nahe ibuni hangu hene. <sup>12</sup> Yosebe ibu tamuha anda pu heagola Podiba one biagome aga biagoria minu yani howa lalu, Ai palibiya ibuore bia, lene. Ani lalu hea handala Yosebe ibunaga aga biago wali ogoninaga giha golo ya helalu ibuni ibida tagira pene. <sup>13</sup> Wali biagome handalu hearia Yosebenaga aga yu wahalu tagira piyagola <sup>14</sup> ibugua agali biabe bia haga maru hearu olowa lalu, Uru-oi handadaba. I agalini ibugua Hiburuuli haru ibiyagome ina mo taga hole o bialu hayadago handadaba. Ibugua i tamu paliagaha anda ibuwa mandagi paliba layagola ina hongo howa koaba larugoni. <sup>15</sup> Ina hongo howa koaba larugola ibunaga aga i tamuni wia handala gerai lalu ibida piya, lene.

<sup>16</sup> Ani lowa ibugua Yosebenaga aga biago ibu agalini andaga ibiragola walia hole lalu yu biraabo hene. <sup>17</sup> Ibu agalini andaga ibiyagola bi ala layadagua dege lone lalu, Hiburu igiri biabe bia haga ina haru ibirigonime i tamuha anda ibuwa i minulebiya. <sup>18</sup> Ani biyagola ina hongo howa koaba laru handala ibunaga aga i tamuha ibira lalu gerai ibida piya, lene.

<sup>19</sup> Yosebenaga agali haguane biagome bi uruni layago hale howa ibu keba gibiore hene. <sup>20</sup> Ani howa ibugua ami agali hearuhondo lalu, Yosebe minu yalu puwa kininaga garabaya anda wiagoha garabaya helo heladaba, layagola tigua haru puwa helene. <sup>21</sup> Anigo Anduane Homogo ibu Yosebela haabo howa Yosebehanda biyago mo bayale haga bialu hene. Ani bialu Anduane Homogohanda agali garabaya haru haga heagome Yosebe mitangi bialu hame lelo biamogo bigi bialu hene.✧ <sup>22</sup> Agali ogoni ibugua Yosebehanda garabaya hearu bibahende handameho helo dabo helene. Ani biyagola Yosebehanda garabaya andaha biabe bulene wiaru bibahende ibugua dege hondo hai helene. <sup>23</sup> Anduane Homogohanda Yosebe bayuwaore haru heagome biabe ibugua biyaruni aria mbira lone agali haguane biago ibuni handa dai bibe nahe hene.

## 40

### *Emaga hendenegonaga irane Yosebehanda latagi henego ogo*

<sup>1</sup> Yosebe ibu lu dege heagola kininaga waini iba hambu miaga heneyagobi kininaga mberedi anda hondo haga heneyagobi libugua mana kinihanda hame naleadagua

mbira biribiya. <sup>2</sup> Iyibi dindi kini heagome keba timbuniore howa <sup>3</sup> agali kirali biago labo garabaya haru haga haguane mbira andagaha Yosebe garabaya hayagoha dege helene. <sup>4</sup> Garabaya haru haga haguane biagome agali kirali ogoni labobi Yosebehanda haruha dege bibe layagola libu garabaya andaha luore hene.

<sup>5</sup> Horo mbirungi agali kininaga waini iba hambu miaga biagobi kininaga mberedi anda hondo haga biagobi libu harume emaga mbira hendene. Libunaga emaga ogoni labo mbiraore ale ndo tara tara handaribiya. <sup>6</sup> Egerebagi Yosebe ibu hondo ibalu hearia libugua genda timbuniore ho bereria hendene. <sup>7</sup> Ani hondowa Yosebehanda libuhondo hale halu lalu, Libu handalu koría genda yu berene mbauledago agua biyabe, lene.

<sup>8</sup> Ani layagola libugua Yosebehondo ladai bialu lalu, Iyame emaga mbira hendenego. Ai mbiralime irane ogoaleda lalu langulene nahedagola mini burugulo bedabagoni, lene.

Ani layago hale howa Yosebehanda libuhondo ogodagua lamini. Ngode Datagali-wabehanda hangu agalime manda nabibehe ngaru manda biaihe kago. Ai libugua emaga handaribidago langidaba, lene.

<sup>9</sup> Ani layagola kininaga waini iba hambu miaga biago ibugua ogodagua lene. Ina pu lini daga mini gerebi mbira hearia handaru. <sup>10</sup> Pu ogoninaga magane tebira hea. Ai abaleore yuni anda halu pabua baya. Pabua balu lini abale do girigere laya. Ani dowá abale ibiri ndigi ndugu laya. <sup>11</sup> Ai ina Iyibi kini kagonaga gabo be yu howa lini deago daga bialu ibane gabo be yarugoniha pingido baanda howa kini ibuni nelo migi bialu haruya, lene.

<sup>12</sup> Ani layagola Yosebehanda lalu, Ira magane tebira handarigo ogoni horo tebira ale. <sup>13</sup> Horo tebira howa kinihanda í haru dai buwa ínínaga biabe biaga wiyadagoha bialu helolebira. Ani biragola íni abale biagadagua kininaga waini iba hambu mialu holebere. <sup>14</sup> Ani hambu mialu howa í mitangi bialu dara habe. Luore garabaya ogoha haho wirugo. Ai nde í golope halu tagira pu lelo kiniore lamia habe. <sup>15</sup> Bambaore í Hiburú dindiha hewaria í hamenerume agali tara ndelo miyagola minu yalu ibinigo. Ai oali Iyibi dindini kagua mbira nabi hewaria tigua bameore ogoha garabaya helene kogni, lene.

<sup>16</sup> Agali mende kininaga mberedi anda hondo haga biago ibugua agali kininaga waini iba hambu miaga biagonaga emaga handayago baya hangu latagi hayago hondowa ibunagabi nde Yosebe ogodagua lamini. Ibi nde emaga handalu hewaria mbasigedi nu tebira mberedi hono tolego haguani yaruya. <sup>17</sup> Mbasigedi nu daligaore yarudagoha mberedi mbisigedibi kini ibuore gubalini haga ale dege yiwaria egame ibuwa nalu hearia handaru, lene.

<sup>18</sup> Ani layagola Yosebehanda lalu, Emaga ogoni irane ogodagua. Mbasigedi tebira ogoni irane horo tebira. <sup>19</sup> Horo tebira ogoni howa kinihanda í garabaya golalu haru tagira polebira. Ani puwa ibunaga ami agali karume ínaga ma puguadaba lolebira. Ani lowa ínaga tingini ira mbira wa howa ogoriani mo pagaho ngeledagola egarume buduyu togolowa nalu holebira, lene.

<sup>20</sup> Horo tebira layago hai howa kini taba henene horo mitangi bialu ibunaga biabe biaga agali haguane hearunaga tomo timbuni dawene. Ani buwa agali kirali biago labo haru ibuwa agali haguane biarunaga deni íbu helene. <sup>21</sup> Ani íbu heagola kini ibugua lalu, Waini iba hambu miaga biago ibu biabe ala biagadagoha bule pelo, lene. <sup>22</sup> Ani lowa kinihanda lalu, Agali mberedi anda hondo haga biago irani bo derela hole pudaba, lene. O biyadaruni Yosebehanda ogonidaguaore bulebira lalu libugua emaga handaribingi layago lola hene. <sup>23</sup> Agali kininaga waini iba hambu miaga biago ibugua Yosebehanda kini lamibe layago embedaho waore hene.

## 41

### *Yosebehanda kininaga emaga handayago irane garealo minigo ogo*

<sup>1</sup> Mali kira piyagola Iyibinaga kini ibugua emaga mbira hendene. Ibuni iba Naili angeni howa handalu hearia <sup>2</sup> nogo bulumaga kariaore bayale habanehe timbuni dege degeru ibaha howa tagira ibalu iba angeni tani bayale heago nalu hearia hendene. <sup>3</sup> Ani hondowa handalu hearia nogo bulumaga karia mende tingini ko hongo nahe kuni hanguhe ibaha howa tagira ibiyaria hendene. <sup>4</sup> Nogo ko urunime nogo bayale karia ala ibu hayaru bo hengeda howa nai hayaria hendene. Ani hondowa dege kini ibuni dengala halu heyini.

<sup>5</sup> Lone palia dai buwa kini ibugua emaga halu mende handalu hearia ladi ale mini widi irane mbira hangume lini karia dearia hendene. Widi o dayadaruni timbuni bayale dowo nolene dewa pale dearia hendene. <sup>6</sup> Mani widi iraneni lini karia mende dearia hendene. Ogoni bayale ndo dindi ko ni daho wiaga wiagoaha howa puyabu poboyogobi ibiyagome do yogobu wahene howa lini deago emene ko habane napale hadogoe ale de hendene. <sup>7</sup> Widi lini ko girali de biarume widi bayale ala dayaru bo nalu mbedogo biai hayaria hendene. Kini ibu heyuwa emaga handaruyane hendene. <sup>8</sup> Ani hondowa kini ibugua mini burugulo biruwa agali mandabi dewa hearubi agali mini bogabi mbirale wiado kago handa walia haga hearubi bibahende olo ngoai hene. Ibai hayagola ibunaga emaga handayago lamiyagola mbiralime ogoni irane ogo aleda lalu lamibe nahe hene.\*

<sup>9</sup> Ani biyagola mani agali kininaga waini iba hambu miaga biagome kinihondo lalu, Áyuore mana tiga nabi mbira bu harudago latagi haro. <sup>10</sup> Ala halu mbiru kini ina agali inaga mberedi anda handaya ho haga biago iya inaga garabaya haru haga haguane ini mamage haga biago andagaha garabaya helarigoni. <sup>11</sup> Ani birigola garabaya andaha howa iya harume emaga mbira hendenego ogoni kirabali galone tagira piya. <sup>12</sup> Hiburu igiri mbira inaga garabaya haru haga haguane kago ibunaga biabe bia haga heneyago ina haru mandagi garabaya henego ogoni hondo lamiriba. <sup>13</sup> Ani lamiribagola ibugua langiyago henene layadaguaore biai hayagoni. I biabe bialu haga wirugoria bule dai bialu agali mberedi anda handaya ho haga biago tigua bo derela harimigoni, lene.

<sup>14</sup> Iyibi dindi kini biagome bi ogonidagua layago hale howa Yosebe garabaya andaha hearia hondo pudaba layagola tigua abale garabaya andaha Yosebe hearia puwa lamini. Ani lamiyagola Yosebe ibu angari mialu aga bayale karula bigi biyagola agali ibiyaru tigua kini andaga abale haru pene. <sup>15</sup> Haru piyagola kini ibugua Yosebehondo lalu, Ina emaga mbira hendenego agali bu hearume ogoaleda lalu mbira nalangiyagola howa agali marume lalu, Ina emaga hendenego ogoaleda lalu bulebiragoore tiga tiga latagi harili laya, lene. <sup>16</sup> Ani layagola Yosebehanda kini biagohondo lalu, Inime latagi habe nahe kogo. Ngode Datagaliwabehanda emaga ogoni irane ogoaleda lalu latagi haragola ina hale howa turu holebere, lene.\*

<sup>17</sup> Ani layagola kinihanda lalu, Ai ina emagaha iba Naili angeni pu haruya. <sup>18</sup> Ogoriani howa handalu hewaria nogo bulumaga timbuni hongoheni habanehe dege dege karia ibaha howa tagira ibuwa iba angeni tani nalu hearia handaru. <sup>19</sup> Mani nogo bulumaga karia ko tingini hongo nahe kuni hanguhe kooreru Iyibi dindini nogo urunibi mbira hearia handa nabinigo ibaha howa tagira ibiyaria handaru. <sup>20</sup> Ani bialu nogo ko urunime nogo bayale ala hayaru bo nai haya. <sup>21</sup> Tigua nogo bayale biaru bo nai hearia tinaga tingini nogo biaru bo nene mbaule bayale ndo koore dege hearia handaru. Ogoni handalu dengala haru. <sup>22</sup> Mani palia dai bialu hewaria emaga halu mende handaru. Ogoni ina ogodagua handaru. Widi irane mbirani lini karia dearia handaru. Ogoriani widi bayaleore dowo nolene dewa palu tolaiheni do nole tu dearia handaru. <sup>23</sup> Ogoni

\* 41:8: Dan 2.2    \* 41:16: Dan 2.30

hondo hewaria dege widi mende bayale ndo dindi ko ni dege daho wiaga wiagohayagi howa puyabu poboyogobi ibiyagome do yogobu wahene howa lini habane napale hadogoe ale dearu handaru. <sup>24</sup> Ai widi ko yogobi habane napale dayadagonime widi bayale lini timbuni de heago bo nalu mbedogo biai hayaria handaru. Ani hondowa agali mandabi dewa hearubi agali maru mini bogabi mbirale marume handabe nahe ngaru handa walia haga hearubi bibahende íbu ngoai hadaba lowa tihondo lamialu hewaria mbiralime ogoaleda lalu handa walia nahaya, lene.

<sup>25</sup> Ani lai hayagola Yosebehanda Iyibi dindi kinihondo lalu, Emaga ogoni kirabali galone mbiraore hangunaga. Ngode Datagaliwabehanda mbirale mani bule ngagonaga mo walia hayadago. <sup>26</sup> Nogo bulumaga karia handaridagobi widi lini karia handaridagobi uruni mali karia ale. Uruni manane mbiraore ale dege walia haya. <sup>27</sup> Ani bialu nogo bulumaga karia ko ibiyadarubi widi ko habane napale puyabu poboyogobime do yongo bini dayadarubi uruni bibahende mali kariani hina gari timbuni polebiragonaga walia haya. <sup>28</sup> Uruni mani ogodagua bulebira lalu Ngode Datagaliwabehanda íni walia hayada lalu langerogoni. <sup>29</sup> Ai mali kariani Iyibi dindi bibahende tomo timbuni bu payabu wulebira. <sup>30</sup> Ani buwa mani mali karia mendeni hina gari timbuniore polebira. Ogoningi Iyibi wali agalime tomo dewa payabu wiyaruni mitangi bu dai bibe nahe mo ko howa homolebira. <sup>31</sup> Iyibi wali agalime mali dewani tomo bayale dewa bu payabu nalu hayaru mitangi bu dai bibe naheore mo ko holebira. <sup>32</sup> Ai áyu ogoni mani Ngode Datagaliwabehanda ogodagua bulebero lalu í manda bibelonaga emaga kira ogoniha howa walia hayago. Áyu ína nde gibi ogoni mani tagira ibulubada lowa mandaore buwa holene nga.

<sup>33</sup> Ai áyu ína agali manda timbunibi howa bogabi mbira Iyibi dindi bibahendeni biabe bialu helo dabo helolene nga. <sup>34</sup> Ani helowa agali marubi dabo helolene nga. Agali uruni tigua mali kariani tomo bayale anda haragoha tomo uruni dau halu tale buwa daunigo gabumanehondo dagisi mulene nga. <sup>35</sup> Tomo dagisi mini uruni agali dabo helene biaru tigua mo ngoai halu tano mbira mbirani tomo mo ngoaiho wulene anda buwa uruniha mo ngelolene nga. <sup>36</sup> Ani biragola mali kariani hina gari ibirangi Iyibi wali agali ti hina tomo agali haguane uruni tigua mo ngoai howa tomo andaha wiyaru karulape nalu howa ti nahomolebirago, lalu Yosebehanda kinihondo ani lamini.

*Yosebe ibu Iyibi dindi handame howa henego ogo*

<sup>37</sup> Iyibi dindi kinibiibunaga agali haguane hearubi tigua Yosebehanda bi layagoni karulape laya manda buwa ani bimíya lai hene. <sup>38</sup> Ani lowa Iyibinaga kini ibugua lalu, Ngode Datagaliwabenaga Dinini agali ogo ibuha kago. Ai iname agali mende biabe ogoni bilo abiale taya bimíyabe, lene. <sup>39</sup> Ani lowa kini ibugua Yosebehondo lalu, Ngode Datagaliwabe ibunime íhondo mbira ogoni walia hayagoni. Ai iname agali maru manda timbunibibi boga timbunibirubi lone abiale dabolomayabe. <sup>40</sup> Áyu ína biabe ogoni hondo habelobi Iyibi dindi bibahende handaya ho habelobi ína í gabumane haguane habelo dabo helolebero. Kini ínime dege bolangua ho holiya. Maru bibahende ínaga andaneha hai helo, lene.✧

<sup>41</sup> Ani lowa kinihanda Yosebehondo lalu, Ai hale habe. Áyu ína Iyibi dindi bibahende handame ho habelo gabumane haguane í dabo helarogoni, lene. <sup>42</sup> Ani lowa kini ibunaga gi hondoneni wiaga magi wiago Yosebenaga gi hondoneni golo karula halu aga bayaleore wiagobi Yosebe karula howa pu seni ngolome wabini mbira Yosebe mani wia halu bini.✧ <sup>43</sup> Ani buwa kininaga garo ale mini karisi nogo hosime gili laga dewa winigo mbira kini ibuninaga mende wiyadagoria Yosebe berelowa harigani agali biabe biaga hearume bamba halu lalu, Wali agali karunaga haguane ibirago habagi hadaba, laga bima pene.

✧ 41:40: Iba 105.21-22, Ab 7.10 ✧ 41:42: Dan 5.29

<sup>44</sup> Ani lowa kini ibugua Yosebehondo lalu, Ai ina bi ogodagua larogoni. Iyibi dindini karu ti bibahende í hale nahe howa tini hangume mbirale mbira nabulebiraore. Tigua íhondo hale ala holene wulebira, lene. <sup>45</sup> Ani lowa kinihanda Yosebenaga mini aribia halu ibu mini Sabanada Panea wini. Ani bialu loma binigo mo miaga agali mbira Heliobolisi dindi wiagoria henego mini Podibera ogoni ibu wane mbira Asenada berenego Yosebe ibu dabu bilo mialu bini. Ani bigi biya handala Yosebe ibu Iyibi dindi bibahende de handama ibaga biai hole pene.

<sup>46</sup> Yosebe ibuni mali pira tebira (30) hayagola Iyibi dindini kini kagonaga biabe ogoni bilo dabo helene. Ani biya handala Yosebe ibu Iyibi dindi bibahendeore handai hole kini ibu helalu pene. <sup>47</sup> Mali kariani tomo bayale Iyibi dindini anda hai hene. <sup>48</sup> Ani anda hayagola Yosebehanda dindi tano mbira mbirani tomo anda timbuni heagoha widi mo mogobu wialu hene. <sup>49</sup> Tomo mo mogo binidaruni daga aulolebe tobahe. Daga labe nahe ibamu ale mo mogobu wini.

<sup>50</sup> Mali hina gari timbuni polene wiyago tagira naibi dege howa Yosebe one Ase-nadahanda igiri kira taba henene. <sup>51</sup> Ani taba hanayagola Yosebehanda lalu, Ngode Datagaliwabehanda í biamogo biyagola ina inaga aba aiya damenerubi ini tandaga timbuni handalu harugobi bibahende embeda harugoni, lowa ibu igini mbiragonaga mini Manase wini.\* <sup>52</sup> Ani lowa lalu, Ai Ngode Datagaliwabehanda dindi ogoha genda yu hewagola í biamogo bialu waneigini ngiyadago, lowa ibu igini mendego mini Eberaimi wini.† <sup>53</sup> Ani lowa hearia mali bayale debengi karia biago piai hene. <sup>54</sup> Ani bialu ko hina garingi tagira ibulene abale Yosebehanda lo wiyago tagira ibini. Dindi bibahende dege hina gari timbuni tagira piyago Iyibi dindi dege hina gari nahe tomo dewa ngelo hene.☆ <sup>55</sup> Maniore hayagola Iyibi dindi bibahende dege hina gari timbuni tagira piyagola kinihondo ti tomo ngi lowa dugu bialu hene. Ani biyagola kinihanda lalu, Yosebe ibugua bidaba laradagua bule ibuni karia pudaba, lene.☆ <sup>56-57</sup> Iyibi dindiore bibahendeni hina gari timbuni pialu mo luluya hayagola Yosebehanda tomo anda timbuni biagoha wali agali ti ibalu widi do wiyaru munime yolo bini. Ani binigo nde hina gari tagira piyadagoni Iyibi dindi hangu ndo dindi bibahendeni hina gari timbuni tagira piai hayagola wali agali dindi bibahende dege howa Yosebe hearia muni yalu tomo yolo bule ibugu bini.

## 42

### *Yosebe hamenerume ti Iyibi dindiha tomo yolobu penego ogo*

<sup>1</sup> Yagaba ibugua Iyibi dindiha widi dewa nga layago hale howa ibu iginiruhondo lalu, Tí ogoria darabini ale howa ogoria bame biru ngamigo agi. <sup>2</sup> Iyibi dindiha widi dewa bu nga layago ai ina hina garime homoligo maru yolo bule pudaba, lene.☆ <sup>3</sup> Ani laya handala Yosebe hamene pirali biaru ti Kenana dindi wahalu Iyibi dindiha tomo widi bu nga layago yolo bule pene. <sup>4</sup> Yosebe hamene Beniyamini libu aiya mbiraorego manda buwa ibubi bolilono Yagabahanda ti haru mandagi pelo yupe nahe ibu andaga helene.

<sup>5</sup> Kenana dindiha gaea bialu hina gari timbuni biyagola agali maru Iyibi dindiha tomo yolo bu piyadagua Yagaba igini biaru tibi nde tomo yolo bule pene. <sup>6</sup> Horo ogoningi Yosebe ibu gabumane haru haga haguane heagola agali dindi tara taraha howa Iyibi dindi widi yolo bule pialu ti Yosebe hearia ibiyadagua ibu hamene biaru tibi widi yolo bule ibalu ibu heagoria ge duli hanga howa wanakuime dindi ela halu Yosebenaga geha bulu paliai hene.☆ <sup>7</sup> Ani bulu paliai heagola Yosebehanda ibu hamene biaruoreyane hendene. Ani hondowa ibu agali tara hetingi howa tihondo bi hongo howa lalu, Tí dindi ani ali íbu kamibe, lene.

\* **41:51:** Manase inanaga bi lalu Mo Embedaya. † **41:52:** Eberaimi inanaga bi lalu Waneigini Ngiya. ☆ **41:54:** Ab 7.11 ☆ **41:55:** Yo 2.5 ☆ **42:2:** Ab 7.12 ☆ **42:6:** Pig 37.8-10, 41.41-43, 41.55, 50.18



Ani layagola tigua ladai bialu lalu, Ina Kenana dindiha howa tomo widi yolo bule íbu kama, lene.

<sup>8</sup> Ani lowa Yosebe ibugua ibu hamene biaruniore kagonida manda biai henego ibu hameneru tigua dege Yosebeda manda nabi hene. <sup>9</sup> Ani howa Yosebe ibugua emaga mbira ala hendene biago mitangi bu dai bialu hearia ibu hamene biarume ibunaga geha bulu paliai hene biaru mitangi bu dai bini. Ani manda buwa ibugua tihondo lalu, Tí dindi diri mbira agohayagi ngabe hondo wule ibirimida. Inanaga dindi ogo gibuni lene mbirahayagi henge mbira au ngabe hondole ibirimida, lene.✧

<sup>10</sup> Ani layagola tigua ladai bialu lalu, Agali haguane-o anidagua mitangi nabioire. Ina inaga biabe bia haga agaliru howa tomo henene yolo bu ibirima lalu tiga tigaore laramagoni. <sup>11</sup> Ina bibahende agali mbiraore ibu hangu igini kamago agali hondo wule ibini ndo ina agali heneneore íbu kama, lene.

<sup>12</sup> Ani layagola Yosebehanda hongo howa tihondo lalu, Ndoore tí inanaga dindi ogonaga gibuni lene mbirahayagi anda ibulene henge mbira agoha ngabe hondo wule ibirimidane hendedogoni, lene.

<sup>13</sup> Ani layagola tigua ibuhondo ladai bialu lalu, Agali haguane-o ina homberiali (12) hamenema agali mbiraoreali igini Kenana dindiha henego. Ai ina hamene heyogonego ibu abala andaga ka. Ina hamene mbirago pu ereba henego homaya bada, lene.

<sup>14</sup> Ani layagola Yosebehanda tihondo lone lalu, Ina tí ke howa dindi hondo wule ibirimida larugoni ndobe. <sup>15</sup> Anigo ina tí ba hondolene hariga mbira manda bidogo. Áyu Iyibi kini kagonaga minini howa heneneore bulego laro. Tí hamene heyogone ogoni inaga deni íbu ha nabiyagua tí bibahende tíni dalu dai nabuleberemi. <sup>16</sup> Áyu kamiruni aria mbiragome tí hamene heyogone andaga haruago haru halu ibule pu ladaba. Ai maru tinaga bi larimigo tiga tiga larimidabe be ke harimidabe daba hondolomaya tíni garabaya andaha halimulo helolebero. Mani handalu kamaria tigua bi larimigo henene ndoyagua nde Iyibinaga kini kagonaga minini howa heneneore larogo tí ohowa dindi ogo hondo wule ibirimida lolebero, lene. <sup>17</sup> Yosebe ibugua bi lai howa agali uruni ti horo tebiru garabaya andaha helene.

<sup>18</sup> Ani helowa horo tebonengi Yosebe ibugua tihondo lamialu lalu, Ainde i Ngode Datagaliwabenaga andaneha haabo haga henego kogo tigua inaga bi larogo talialu birimiyagua nde tí bayale holeberemi. <sup>19</sup> Anigo tí agali bi heneneore laga kamiyagua nde agali mbiraoreali dege garabaya anda tí harimidagoha heladaba. Ani bialu tí marume tinaga wali waneiginiru hina garime homoligo widiru yolobu hanalu pole pudaba. <sup>20</sup> Anigo tinaga bi larimigo heneneore larimida lo manda buliyanaga tí hamene heyogone andaga haruagoni haru halu dai bilimu. Tigua bi o larodagua birimiyagua nde tí homa nabi holeberemi, lene.

Ani lamiyago hale howa tigua bi ogoni karulapeda lo manda bini. <sup>21</sup> Yosebe hamene biaru ti Yosebe ibu heba mandagi howa tinime bi lagalaga bialu howa lalu, Heneneore ina hamenehondo koore timbuni birimagonime ai inane pani nolene áyu wiragonida. Ibugua ga lalu dugu bialubi ibu biamogo bidaba layago hale nahe tingi harimagoni. Anidagua birimagonime pani ngiadai binigo áyu namiyaore kamagoni ndobe, lalu hene.

<sup>22</sup> Ani lowa Lubenehanda ibu hamenemahondo lalu, Áyu pani nolene íbu ngagoni irane ala tigua inaga bi larugoni hale howa nahe tingi halu ina mbira nabuleore lalu hewago helowa igiri emene biago homayagonaga pani nalu kamagoni, lene,✧ <sup>23</sup> Yosebe hamene biaru tigua tinaga bi layago hale nahe bedabe toba howa ti Hiburu bi lowa lalu berenego Yosebe ibunime hale howa dege nahalehe tingiho hene. Ani binigo pigane ti Yosebe baba bi layangi Yosebe ibugua Iyibi bi lalu lamiyagola bi lo beregedaga mbira heagome Yosebe hameneruhondo Hiburu bi lalu lamiyagola tigua bi lalu bereago hale

naholobadalo manda buwa ani lalu berene. <sup>24</sup> Tigua bi urunidagua lalu bereago Yosebe ibu hale howa dara halu mini tigilaya handala ha do howa dugu bule pene. Yosebe ibu dugu biai halu ti baba bi lone lole dai bini. Dai bu howa ibunaga biabe bia haga agali mbira heagohondo lamialu lalu, Simiono minu yania ha, lene. Minu yania howa ibu hamene biaru tini handayaho heore dege pu hongohe wiagome minu kabu bigi bini.

*Yosebe hameneru Kenana dindi dai binigo ogo*

<sup>25</sup> Mani howa Yosebehanda ibunaga biabe biaga agali hearuhondo lalu, Tomo tale buwa tininaga nuha hana hagahaga bialu tinaga munibi tini nuha hanadai bilimu. Ani buwa harigani ti tomo nelobi milimu, lalu lamini. Ani lamiyago hale howa Yosebenaga biabe biaga agali bu hearume bibe layadagua biai hene. <sup>26</sup> Ani miai haya handala Yosebe hamene biaru tigua tomo nu heba hono wiaruni nogo dongi erekunini mo paga halu andaga pole pene. <sup>27</sup> Pialu hariga obeneni handa palue lowa balai anda bia howa hamene mbiragome ibunaga nogo dongi tomo nelo mule lowa ibugua nuha tomo taguini. Tagualu hearia ibunaga muni nu poneni henearia hendene. <sup>28</sup> Ani hondowa ibu hamene biaruhondo lalu, Ai handadaba inaga muni mirugo ngiadai biyadago ininaga nuha henede, lene. Hamene maru biarume bi ani layago hale howa ti mogo lowa gi hai hene. Ani gi hai howa tini dege dege laedene bialu howa lalu, Ngode Datagaliwabehanda agilego o biyadagonida, lene.

<sup>29</sup> Ani lalu Kenana dindi anda pu howa ti aba Yagabahondo mbirale biyaruni bibahende lamiai hene. <sup>30</sup> Tigua lalu, Iyibinaga gabumane agali haguane heagome inahondo bi hongoheore laede halu lalu, Tí dindi diri handaga mbira ibirimida, laya. <sup>31</sup> Ani layagola iname ibuhondo ladai bialu, Ina agali dindi diri hondole ndo ina bi henene laga ibu kama. <sup>32</sup> Ina agali mbiraore igini hombearia hamenema henego ai mbira pu ereba henego mendego heyogone igiri emenego ogoni ibu abala andaga Kenana dindiha ka, larima. <sup>33</sup> Ani larimagola gabumane agali haguane biagome inahondo lone lalu, Tí agali bi henene lagadalo hondoliya mbiraligo i baba halu tí marume widiru hanalu tí damene garibilo holebirago andaga pudaba. <sup>34</sup> Ani pialu tí hamene heyogone haruagoni i koría haru halu dai bilimu. Anidagua birimiyagua tí dindi diri handaga ndo agali bi tiga tiga laga ibirimida lolebero. Ani bialu tí hamenebi golope halu tí Iyibi dindiha tínime hoa biragoha ta nabi halimulo helo waholebero laya, lene.

<sup>35</sup> Ani lalu mani widi nuha hanayaru tagualu hemiria tinaga muni biaruni bibahendeore hanai hearia hendene. Ani hondowa tinibi ti ababi bibahende gi howa mogo lalu mini burugulo hene. <sup>36</sup> Ani bu howa Yagaba ibugua tihondo lamialu lalu, Tígua dege binime ai i igini kira ereba hayada. Bamba Yosebebi ereba hayago ai áyu Simionobi ereba dege hayada. Ani biyago ai áyu Beniyaminibi nde haru halu kaundiaha pole degebe. Inaga genda uruni angi ereba holobadabe, lene.

<sup>37</sup> Ani layagola Lubenehanda ibu aba lamialu lalu, Aba-o ina Beniyamini ini keria haru halu dai nabiruyagua nde i igini kirali o kagoni labo bo wahabelo. Ai ina baya hangu handayaho halu ini keria haru dai bule polomaya waha, lene.

<sup>38</sup> Ani layago hale howa dege Yagaba ibugua lalu, I igini ogoni ibu tí baba napolebira larugoni ndoyabe. Ai ibu hamene biago homayagola ibuni hanguore kagoni ndobe. Ibu harigani pialu kamiria ibuha mo ko holene mbira wuligo napoleorebira. Áyu i agali waheore bedogonidago ai tigua haru pialu kamiria harigani mo ko holene mbira lola hayiyagua nde tigua dara holene timbuniore i mo ngeramigola uruni yalu nde homenerunaga dindiha hama polebero, lene.

## 43

*Yosebe hamene biarume Beniyamini Iyibi haru penego ogo*

<sup>1</sup> Kenana dindiha gaea bialu hina gari timbuniore pene. <sup>2</sup> Ani biyagola Yagaba ibu mini mende Isaraele winigo ibu damene biaru tigua tomo Iyibi howa mo henene biago nai hene. Nai howa Yagaba ibugua ibu igini biaruhondo lamialu lalu, Tígua lone Iyibi dai bialu inanaga tomo yolo bule pudaba, lene. <sup>3</sup> Ani layagola Yudahanda ibu abahondo lalu, Aba-o Iyibi gabumane agali haguane heagome inahondo bi hongoheore langiya lalu larimagoni. Ibugua ina hamene naharuhe pirimayagua inanaga dengui nahondoleore laya. <sup>4</sup> Ina hamene haru halu pudaba lariyagua nde iname ínaga tomoru yolobu poleberema. <sup>5</sup> Anigo ínaga ina hamene napole lariyagua nde inabi napoleberama. Iyibinaga agali haguane biagome lalu, Tínaga hamene haru naibirimiyagua nde tínaga dengui nahondoleorebero laya, lene.

<sup>6</sup> Ani layagola Yagaba ibugua lalu, Tígua agali haguane ogoni tí hamene mbira ka lalu agua bulenaga lamirimibe. Tígua ogonidagua larimidagonime ĩ genda timbuniore mo ngirimida, lene.

<sup>7</sup> Ani layagola tigua ibuhondo lalu, Agali ogonime inahondo bi dewa hale haga biya. Ibugua ina dameneru aguaore kabe lalubi baya hanguore hale haga biya. Ibugua lalu, Tí aba kabe homayabe, laga biya. Tí hamene mbira kabe nahebe, lalu hale haya. Ani hale hayagola inamebi nde tiga tiga lamiai harima. Ina hamene ogoni haru ibalimu lolenaga layago nahende howa lamirimaya, lene.

<sup>8</sup> Ani lowa Yudahanda ibu aba Yagabahondo lamialu lalu, Beniyamini ibu ilaore poleberebago ibilo yupe hariyagua nde poleberema. Ani poramagola ĩbi inanaga waneigini bu karubi ina bibahende hina garime nahome bayale holeberema. <sup>9</sup> Ina ibu baya hanguore handayaho holebero. Ina ĩni keria haru dai nabiruyagua ko timbuni ogoni ĩha wiaabo holebira. <sup>10</sup> Ai ina napole nale abale polomaya wahenedale nde lalu ki agima pialu dai bidamaleda, lene.

<sup>11</sup> Ani layagola Isaraele ibugua tihondo lalu, Tígua bulene hariga mende nawiyagua nde ogonidagua bidaba. Tomo bayale maru ina dindini ngaru nuha mo hanalu puwa gabumane agali haguane o haruagoni mo turu halu bame mule hanadaba. Tomo bayale uru mone ibanebi marasini ngabi ira ibaneme wabini tara tara bu ngarubi ira lini dendebe anga ale tara mini pitasio dedaru ariabi anga mende amono ngarubi hanalu pialu bidaba. <sup>12</sup> Muni abale hanalu pirimigo heba marubi mo tago howa hanalu pudaba. Muni abale tínaga nuha hanadai biyiyarubi tigua embeda howa ani bini badago urunibi heba hanalu pilimu. <sup>13</sup> Ai tí hamene haru halu agali haguane ogoni karia áyu ogoni abale gerai lalu pudaba. <sup>14</sup> Agali haguane ogoni ibugua tí dara halu biamogo bilonaga ina Ngode Datagaliwabe Hongo Haiheore kagohondo bi lalu kogo tí pudaba. Agali haguane ogonime tí hamene minu yu haruagobi Beniyaminibi libu haru mandagi ĩni koría haru dai bidaba lelonaga bi lalu ko. Anigo Ngode Datagaliwabeibunime ĩ igini bibahende ereba hai helo hamelo heagua nde bibahende ereba hai helo, lene.

<sup>15</sup> Isaraele ibugua ani laya handala tigua tomo tara tara biarubi ira lini ibane ngabi tara tara biarubi manda mandabu hanalu muni ala nuha hanadai biyiyarubi tomo yolo bulenebi hanaga bigi bialu pene. Tigua Beniyaminibi haru halu Iyibi anda puwa Yosebe hondole abale pene. <sup>16</sup> Yosebe ibugua handalu hearia tigua Beniyamini haru ibiyago hondowaibunaga biabe biaga agali mbira heagohondo lamialu, Agali uruni ĩ andaga haru puwa nogo bulumaga mbira balu dawalimu. Agali uruni ti áyu horombenaga tomo ĩni heba mandagi nolomaya ani manda manda bilimu, lene. <sup>17</sup> Yosebenaga biabe biaga agali biagome Yosebehanda lamiyadagua bialu agali biaru Yosebe andaga haru pene.

<sup>18</sup> Anigo Yosebe hamene biaru tigua Yosebe andaga polene gi howa tini dege dege lalu, Tigua ala ibirimangi muni inanaga nuha hana hayiyagonaga lara bada. Tigua ina anda ogoha haru anda puwa minu yania holebira bada. Ina minu yania howa tinaga garabaya biabe ale bialu helonaga helolebira bada. Ani bialu inanaga nogo dongi haru kamarunibi ti dege holebira bada, lene. <sup>19</sup> Ani lalu howa tigua Yosebenaga biabe bia

haga agali biago Yosebenaga anda harabani heago hondowa ibuhondo lamialu, <sup>20</sup> Agali haguane-o bi laramago hale habe. Ala halu mbira iname tomo yolo bu ibirimangi <sup>21</sup> tomo yolo bu ibinigo hanalu puwa ha obeneni palue balai anda bialu howa handalu hemaria ina bibahendenaga muni mbira mbira tomo yolo birimarubi bibahende henearia handarima. Ani handalu muni uruni bibahende hanalu dai birimago. <sup>22</sup> Muni ogoni aiwa henelenedabe ina manda nabi kamago ai tomo yolo bule muni marubi henedema, lene.

<sup>23</sup> Ani layagola biabe biaga agali biagome hale howa ladai bialu lalu, Tígua gi halu mini dege dindiho nahalimu. Tíngabi tí abanagabi Ngode Datagaliwabe ibunime muni uruni tíngaga nuha hanadai biyabe tobaheda. Ai muni abale tígua tomo yolo birimiruni i mo yarugoni ndobe, lene. Ani lalu ibugua Simiono damu pialu ti hearia haru ibini.

<sup>24</sup> Ani bialu mani agali biago ibugua Yosebe hamene biaru Yosebe andagaha haru anda pene. Haru anda puwa tinaga ge wayawaya bilo iba hambu mialu tinaga nogo dongibi tomo nelo mini. <sup>25</sup> Ani biyagola Yosebe hamene biaru tigua hale halu hearia Yosebe ibu horombe ti heba tomo mandagi nole ibulebira layago hale howa mbirale Yosebe mo turu halu mule hanalu ibiyaruni tagu manda mandabu ngelo berene. <sup>26</sup> Yosebe ibu anda ibiyagola tigua mbirale biaruni Yosebe ibu mo turu halu mini. Ani mialu howa tigua Yosebenaga wanakuihayagi ge duli hanga howa bulu palialu tinaga wanakuime dindi elaore hene. <sup>27</sup> Ani biyagola Yosebe ibugua tihondo, Ibirimidago turuba. Tí aba agali wahe beda lalu abale i langirimigo ai ibu karulape bedabe, lalu hale hene.

<sup>28</sup> Ani hale hayagola tigua ladai bialu lalu, Agali haguane-o ina aba bayale beda, lene. Ani lalu tigua Yosebe deni howa lone bulu palene.

<sup>29</sup> Yosebe ibu Beniyamini hondowa libu aija mbiraore igini haribada lo mitangi bialu ibugua lalu, Igiri daliahe ogoni abale tí hamene andaga ka lalu langirimigoni mbauleda, lene. Ani lowa ibugua ibu hamene Beniyaminihondo lalu, Igini-o Ngode Datagaliwabehanda i biamogo bilo laro, lene. <sup>30</sup> Ani lalu Yosebe ibu hamene heyogone biago handalu dara timbuniore howa ibuni dugu bule manda bialu hene. Ani biyagola ti helalu ibu abale tamuha anda puwa dugu bialu hene. <sup>31</sup> Dugu bu wahalu de iba domalu tagira ibuwa biabe bia haga agali hearuhondo lalu, Tomo dugu tale bialu tomo dagiani ngeladaba, lene. <sup>32</sup> Ani layagola tigua Yosebenaga tomo dagia mbirani manda mandabu ngelalu ibu hamenerunaga mendeni wia hene. Ani bialu Iyibiali bu hearu ti nde Hiburualiru baba tomo mandagi nanaga howa tibi nde dagia tebone wiagoria biruwa nalu berene. Tigua tomo mandagi nanagadagoni irane Iyibiali ti daligaore kama manda buwa nanaga hene. <sup>33</sup> Yosebe ibunime ibu hamene biarunaga biragane dagia tini taba henededagua wakeneni howa birama pialu heyogoneni bira maro bilo ibunaga biabe biaga agali hearunihondo lalu, Mo manda manda bia halimu, lalu lamini. Hamene biaru tigua o biyadagoni hondowa tini mogo lalu mini dege dindiho biruwa tini handaya hagahaga bialu berene. <sup>34</sup> Ani bialu bereagola biabe biaga agali hearume Yosebe hamene biarunaga tomo Yosebenaga dagiani wiago mo yalu ibuwa talebu tahaga bini. Ti tomo karulapeore nelo talebu migi bini. Anigo Beniyamini dege dewaore agali durialimebi nolene karulape talebu mini. Ani miyagola tigua Yosebe baba tomobi ibabi nalu biruwa turu timbuni howa nalu berene.

## 44

### *Yosebenaga gabo be ereba henego ogo*

<sup>1</sup> Ti tomo nai heagola Yosebehanda ibunaga biabe biaga agali bu hearuhondo lamialu lalu, Ai tomo dewaore tinaga nuha hono tolatagi helo talebu hana halimu. Ani hono tolai howa tinaga munibi tininaga nu poneni hana halimu. <sup>2</sup> Ani bialu inaga gabo be silibame wabini ngogobi ti hamene heyogone biagonaga nuha ibunaga widi yolo bule

muni yu ibiyagobi hanaramigoha dege hana halimu, lene. Ani layagola biabe biaga agali hearume Yosebehanda ogonidagua bilimu lalu lamiyadagua biai hene. <sup>3</sup> Ani biai howa horo mendengi gao layagola biabe biaga agali biarume Yosebe hamene biarunaga nogo dongi heba pelo biamogo bialu pudaba lene. <sup>4</sup> Pu lu nabi wene pialu heaore dege Yosebe ibugua ibunaga biabe biaga agali anda mamage haga heagohondo lalu, Agali o piyaru haruru talima puwa tihondo ogodagua labe. Iname tihondo mana bayale dege birimagola tigua inahondo mana ko wiago birimiyago irane aginaga birimibe. <sup>5</sup> Inaga agali haguane biagonaga gabo be mbira mo hanarimiya. Ani bialu ibugua mbirale manda bulene wiado hene ngarunaga gabo be ogoniha howa galone handa walia hagago ai tigua mana ko liaheore bialu mo hanarimiya labe, lene.

<sup>6</sup> Ani laya handala Yosebenaga biabe biaga agali biagome Yosebe hamene biaru piyadagua talima pene. Ibugua pialu ti tali minuwa Yosebehanda bi labe layarunidagua lamini. <sup>7</sup> Ani layagola tigua ladai bialu lalu, Agali haguane-o ina inahondo bi uruni ale aginaga larebe. Iname mbirale ina lareruni mbira bibe nahe kamagoni ndobe. <sup>8</sup> Iname abale tomo yolobu ibirimangi muni inanaga nu poneni hana heneyago Kenana dindiha howa halu mende dai bialu howa hanalu dai birimagoni í manda bide. Ai áyu inaga agali haguane andagaha wini ngolo silibaru iname agua bialu mo page biyada lo manda bidebe. <sup>9</sup> Agali haguane-o ina o kamaruni aria mbiralime gabo be ogoni mo heneagua ogoni ibuni homelo bo wahabe. Ani beregola ina bibahende inaga garabaya biabe ale bia haga holomaya, lene.

<sup>10</sup> Ani layago hale howa Yosebenaga biabe biaga agali biago ibugua ladai bialu lalu, Tigua bi tiga tiga dege larimigo gabo be ogoni mbiralinaga nuha henedaria handa walia haruyagua agali ogoni ibu hangu inaga garabaya biabe ale bia haga holebira. Tí bibahende andaga piái holeberami, lene. <sup>11</sup> Ani layagola tigua Yosebenaga biabe biaga biagome tinaga nu handai helo dindini dugu ibira hai hene. <sup>12</sup> Ani biyagola Yosebenaga biabe biaga agali biago ibugua Yosebe hamene wahrenenaga nuha ala hondowa mani tini taba hanayagola hama ibinidagua handama pialu heyogone biagonaga nu handa maro bini. Ani handalu hearia gabo be biago Beniyamininaga nuha henearia handa walia hene. <sup>13</sup> Yosebe hamene biaru ti gabo be biago Beniyamininaga nuha heneyago hondowa tigua daraore ho kama lowa walia halu tinaga aga bu hearu minu lerelene. Ani lerelowa tinaga nu lone nogo dongi erekunini mo paga halu Yosebe hearia dai bini.

<sup>14</sup> Yuda ibu hamene biarubi tigua Yosebe andaga lone dai buwa handalu hemiria Yosebe ibu mbiraha nape ibuni andagaha bereneyane hendene. Ani hondowa ti gi timbuniore halu tigua Yosebenaga wanakuihayagi dindini bulu paliai hene. <sup>15</sup> Ani biyagola Yosebehanda tihondo lamialu lalu, Mana agialego o birimidagonibe. Ina oholene mbirale wiado hene ngaru handa walia nahaga kabe toba harimibe, lene.

<sup>16</sup> Ani layagola Yudahanda ladai bialu lalu, Agali haguane-o iname ihondo bi ladai bulene mbira nayi kamagoni ndobe. Iname ko nabi kama labe nahe kamagoni. Ai Ngode Datagaliwabehanda inanaga ko wu hemago mo pani hayago. Áyu agali inaga gabo be mo page biyago hangu ndo ina bibahende inaga garabaya biabe ale bia haga hai holeberema, lene.

<sup>17</sup> Ani layagola Yosebehanda lalu, Ani ndo ina tí bibahende hai hadaba nalolebero. Agali mbiraore inaga gabo be mo hanalu piyadago ibu hangu inaga garabaya biabe ale bialu helo helolebero. Tí bibahende miniha genda nahe tí aba karia andaga dai bidaba. I tí baba bi lolene nawigo áyu ogoni pudaba, lene.

*Beniyamini garabaya holene winigo Yuda ibugua ha aribia hole manda binigo ogo*

<sup>18</sup> Yuda ibugua Yosebe heagoria kaware puwa ibuhondo lalu, Agali haguane-o inaga bi larogo nde hale harene. Í agali timbuni Iyibinaga kini kagobi dege kegonigo ainde harugo inaga biore hale halu ihondo keba nahabe. <sup>19</sup> Ai abale biago ina inahondo



hale halu tí aba hamenebi mbira kabe nahebe lalu hale harigoni. <sup>20</sup> Ani hale harigola iname lalu, E ina aba agali waheore beda. Ina hamene heyogonebi aba ibu agali wahe dagaheore howa hono winigo andaga ka larima. Wali mbiragome igiri kira hono winigo mende homayagola mendego hangu ka. Anigo ibu abahanda ibu igini mbiraore ogoni hangu gubalini ho haga ka lalu abale langirimagoni. <sup>21</sup> Ai agali haguane-o ínime lalu ina hamene heyogone ogoniore i hondoliya haru ibule pudaba lari. <sup>22</sup> Ani larigola igiri ogonime ibu aba helalu naibulebirago nde helalu ibiyagua ina aba homolebira larimagoni. <sup>23</sup> Anidagua larimagola ina bi mbira ogodagua lari. Tí hamene heyogone ogoni helo wahalu inaga deni halu mende naibuleberemio, lalu abale biago langirigoni ndobe.

<sup>24</sup> Ai agali haguane-o iname inaga bi uruni hale hai halu puwa ina abahondo bi uruni bibahende lamiai harima. <sup>25</sup> Ani larimagola ina abahanda lalu, Tomo lone yolo bule pudaba, laya. <sup>26</sup> Ani layagola iname lalu, Ina hamene heyogone kago naharu pirimayagua Iyibinaga agali haguane kagome inanaga dengui lone nahondoleore layagodago ina napoleberama, larima. <sup>27</sup> Ani larimagola aba ibugua inahondo lalu, I one Leselo ibugua igiri kira hangu hono wiyagoni tí manda bu kamigoni. <sup>28</sup> Igiri mbirago ereba hayagola i nahende waore harugoni. Ogoni ibu laiono gabuame balu nedabe be agua biyabe tobara. <sup>29</sup> Anigo áyu tigua i helalu i igini mende ogobi dindi kaundiaha haru pole kamigoni. Ai tí heba harigani pialu kamiria mo ko holene mbira ibuha anda ibiyagua nde iha dara holene timbuniore wiragome i bo homelaramigola homenerunaga dindiha hama polebero, lalu laya.

<sup>30-31</sup> Ainde agali haguane-o i aba ibu igiri ogoniibuninaga gubaliniore hagago i aba karia ibu haru dai nabiruyagua nde ibu homolebira. Ina aba agali waheore bedago ai igiri ogoni haru dai nabirimayagua nde iname ibuha genda timbuniore mo mialu dara holene timbuni dege yalu homolobada. <sup>32</sup> I abahondo bi mbira buleore lalu hongohe ogodagua lamiru. Ina igiri ogo ibuni karia haru dai nabiruyagua nde ina abahondo bia ko timbuniore harogola ogoninaga genda inihawiaabo holebira lalu lamiru. <sup>33</sup> Ani larugo ai ina igiri ogonaga henge mialu inaga garabaya biabe ale bialu holiya ibu hameneru baba ibu aba karia andaga dai biaore la. <sup>34</sup> Igiri ogo naharuhe ina i aba karia andaga dai nabulebero. I aba ibugua genda timbuni holobadago i hondole hame nale kogo andaga napolebero, lalu Yudahanda lene.

## 45

### *Yosebehanda ibu hameneruhondo, I Yosebe kogoni, lenego ogo*

<sup>1</sup> Yosebe ibugua dara timbuniore howa dugu bua biyagolaibunaga biabe biaga agali hearuhondo lalu, Tí tagira piyai hadaba, lene. Piai hayagola ibu hamene biarubaba tini hangu hene. Ani howa ibugua tihondo lamialu lalu, I Yosebe tí hamene biago kogoni, lene. <sup>2</sup> Ani lowa Yosebe ibugua dugu hongo howa biayuago Iyibi wali agali tagira hearume hale halu tigua agali kini andagaha haga hearu lamule pene. <sup>3</sup> Yosebehanda ibu hamene biaruhondo lamialu lalu, I Yosebeore kogonigo i aba bayale kabe, lene. Ani layagola ibu hamene biarume mogo timbuniore lowa bi mbira ladai bibe nahe hene. <sup>4</sup> Ani hemigola Yosebe ibugua laabo halu lalu, Tí gi nahe i kogoria kaware ibidaba, lene. Ani layagola ti kaware hapara ho heagola ibugua tihondo lamialu lalu, I tí hamene Yosebe kogoni. Bamba tigua biyinaya biabe biaga agali hearume yolo bilo i minu mirimigola tigua i Iyibi dindiha minu yalu ibiya. <sup>5</sup> Anigo áyu tigua mana ko ogoni birimigonaga tí bu miniha genda howa holene nawigo wahalimu. Ngode Datagaliwabeibunime tí homoligonaga ina ala manda manda bialu holiya i dindi ogoha ibilaya. <sup>6</sup> Ai gaea timbuni bialu hina gari pialu heane mali kira hangu piyagoni. Mali duria wene hole ngago nde agalime tini mabuha tawe tomo mbira bialu nanolebiraore.

<sup>7</sup> Gaea hangu bialu hina gari timbuni nahendene ale áyu o tagira poragoningi Ngode Datagaliwabehanda ĭha howa tí biamogo bulenaga ĭ ala ogoha íbu helaya. <sup>8</sup> Ani biyago tígua ĭ ibilarimi ndo Ngode Datagaliwabe ibunime minu ibilayagola ibirugoni. Ani íbu hewagola Ngode Datagaliwabe ibunime ĭ Iyibi kini kagonaga aba haradagua haguane daligaore helaya. Ani helayagola ĭna kini andagaha wali agali bibahende bu karu handayaho halu Iyibi dindi bibahendenaga agali haguanebi ĭ dege kogoni.

<sup>9</sup> Ai áyu ogoni abale ĭna aba karia dai bialu ibuhondo bi ogodagua lamilimu. Í ĭgini Yosebe ĭna bi ogo lawia harogo. Ngode Datagaliwabehanda ĭ Iyibi dindi bibahende ha handameho holiya agali haguane helene kogo ai ĭna emene hondo ha nabi abaleore ibabe laro. <sup>10</sup> Ibalu ĭni kogoria Gosene dindi kaware ngagoriani habelo. ĭnibi ĭ waneiginirubi ĭ aguanerubi ĭnaga nogo sibirubi memerubi bulumagarubi ĭnaga mbirale wiridarubi uruni bibahendeore Gosene dindi ngagoria hole ibaiore halimu. <sup>11</sup> Í Gosene dindini íbu bedegola ĭna handayaho holebero. Ai gaea timbuni bialu hina gari timbuni áyu poragoni biaho ngane dege mali duria polene ngago. Mali duria ogoniha ĭnibi ĭ waneigini aguanerubi ĭnaga nogo tara tara bu karubi bibahende garibilo halimulo ĭ hame nalego abale ibalimu laya lalimu, lalu Yosebe ibugua lene.

<sup>12</sup> Ani lowa Yosebe ibugua ibu hamene biaruhondo lamialu lalu, Tígua ĭ baya hangu manda bialu áyu bi lalu kogoni tara ndo. ĭ tí hamene Yosebe biagoniore kogoni. Beniyamini ĭ nde ĭni hamene heyogoneore biago ĭna ĭ manda bibehe dege kogoni. <sup>13</sup> Ai tígua ĭ aba bedaria dai bialu ĭ Iyibi dindiha agali mini lene timbuni mbira hea lalu lamilimu. Ani lamialu tígua mbirale handarimigo damene bibahende lamiai halimu. Ibu haru ibule áyu ogoni gerai lalu abale pudaba, lene.

<sup>14</sup> Yosebe ibu bi uruni lai halu ibu hamene Beniyamini yu hubi lalu dugu biyagola Beniyamini ibubi nde dugu dege bini. <sup>15</sup> Ani bialu Yosebe ibugua ibu hameneru bibahende yu hubi laga bialu nunubi lalu dugu bia dege bini. Ani biyagola ibu hamene biaru tigua Yosebe baba bi lole manda bini.

<sup>16</sup> Ani biyagola Iyibinaga kinibi ibunaga agali haguane bu hearubi tigua hale halu hearia Yosebe ibu hameneru ibuni heba íbu ka layago hale howa ti turu ho hene. <sup>17</sup> Ani hale howa kini ibugua Yosebehondo lalu, Í hameneru ti nogo dongiru mo manda manda bialu Kenana dindi abale dai bidaba labe. <sup>18</sup> Dai bialu ti ababi ti one waneiginirubi bibahende haru halu dindi ogoriani abale dai bilimu labe. Ani bialu haru halu ibiragola ĭnime Iyibi dindiha dindi bayaleore ngago ti ogoriani helo tu wu mulebero. Ani merogola dindi ogoniha tomo baya tara tara hangararu damene bibahende anda hai holebirago ti karulapeore nalu holebira. <sup>19</sup> Ai ti pialu Iyibinaga garo ale mini karisi ngaruni ti one waneiginiru bialu tini heba mandagi ibule mo yalu pilimu. Ti ababi haru halu íbu dege bilimu. <sup>20</sup> Tinaga mbirale Kenana dindiha howa ngelo henedaru yu wahalu ibuleda lo manda nabilimu. Mbirale baya tara tara Iyibi dindiha wini ngaru ti wu helo talebu miai holeberogo ibalimu labe, lalu kini biagome Yosebehondo lamini.

<sup>21</sup> Yagaba ĭgini biaru tigua kini ibugua bilimu lalu lawia hayadagua bini. Yosebe-handabi nde kini ibugua bibe lalu lamiyadagua karisi wiaruni aria maru mo mini. Mo mialu ti harigani pialu howa tomo nelobi maru mo wia halu bini. <sup>22</sup> Yosebehanda aga mbira dege dege ibu hamene biaru tahalu Beniyamini dege duria mini. Ani mialu muni siliba handari tebirabi (300) Beniyamini mialu bini. <sup>23</sup> Ani mialu Yosebe ibugua mbirale bayale damene Iyibi dindiha wini wiaru aria dewaore nogo dongi wangabe piranaga erekunini mo paga howa ibu abanaga yalu pudaba lene. Ani bialu widiru mberedirubi tomo tara tara maru wiarubi bibahende ibu aba harigani ibalu howa nelonaga biamogo bialu nogo dongi angibuni piranaga erekunini mo paga halu yalu pudaba lalu bini. <sup>24</sup> Yosebe ibugua ibu hameneru pelo lowa ibugua tihondo lamialu lalu, Tí harigani pialu howa tíni dege dege keba nahe laibi nale baya hangu pilimu, lalu lamini.

✧ 45:9: Ab 7.14

<sup>25</sup> Ani laya handala Yosebe hamene biaru ti pialu ti aba Yagaba hearia Kenana dindi anda pene. <sup>26</sup> Anda puwa ti abahondo lamialu lalu, Aba-o Yosebe ibu nahome heneyago ai ibugua Iyibi dindi bibahende handameho hea, lene. Yagaba ibu bi o layadagoni hale halu ibu mini naibi dege howa bi ogoni mo henene nahe hene.

<sup>27</sup> Ani heagola tigua Yosebehanda bi lawia hayaruni bibahende lamiai hene. Ani bialu Yosebehanda ibu aba Yagaba Iyibi ibilonaga karisi mo wia hayiyago hondowa ibunaga miniha wálo dege berene. <sup>28</sup> Ani wálo biruwa Yagaba ibugua lalu, Heneneore ÿ igini Yosebe homa nabi harua lo manda bido. Ai ÿ Yosebe nahende koore homoligo ina abale Iyibi ma, lene.

## 46

### *Yagaba ibunaga damene bibahende Iyibi dindi penego ogo*

<sup>1</sup> Yagaba ibunaga mbirale wiarubi waneigini aguanene hearubi bibahende mo ngoai halu Iyibi dindi pole hariga peadagua pialu hene. Ani pialu howa dindi mbira mini Beseba wiagoria anda puwa Yagaba ibugua ibu aba Aisaganaga Ngode Datagaliwabhondo mbirale bo loma bu mini. <sup>2</sup> Ani buwa mbiraga Yagaba ibu paluwa de gandeba handalu hearia Ngode Datagaliwabe ibu ibuwa lalu, Yagaba-o Yagaba-o, lalu olene. Ani layagola Yagabahanda lalu, Ya ÿ o kogoni, lene.

<sup>3</sup> Ani layagola Ngode Datagaliwabhanda lalu, Í aba Aisaganaga Ngode Datagaliwabe kogonigo ai ínaga waneigini aguaneneru mo dewaore heloleberogo ina Iyibi dindi gi nahe pobe. <sup>4</sup> Ina í heba Iyibi dindi pialu mani Kenana dindi lone haru dai bulebero. Í homaregola ínaga tingini Yosebe ibunime hora holebira, lene.

<sup>5</sup> Egabi layagola Yagaba ibu igini biarume ti aba Yagaba tinaga one waneiginiru baba garo ale nogo hosime gili laga kini ibugua Iyibi howa ti yalu dai bilo ibilene biagoria berelowa yalu pene. <sup>6</sup> Yagaba ibunaga yári dabudabu wiaruni bibahendeore tinaga nogo bulumagarubi mbirale bibahende Kenana dindi yu hene wiaruni yaiore halu Iyibi dindi pene. <sup>7</sup> Yagaba waneiginirubi aguanerubi bibahendeore Iyibi dindi pole Yagaba ibuni heba piaiore hene.

<sup>8</sup> Yagaba damene bibahendeore Iyibi dindiha ibu heba mandagi penerunaga mini uru. Yagaba igini wahene Lubene ibubi <sup>9</sup> Lubene iginiru Hanogobi Palubi Hesperonobi Kami imaru ti pene. <sup>10</sup> Simiono ibu iginiru nde Yamuelebi Yaminibi Ohadabi Yaginibi Sohabi Saulubi uruni ti pene. Saulu ibu aïya Kenana wali mbira berene. <sup>11</sup> Libai ibu iginiru nde Gesonobi Kohadabi Merari imaru pene. <sup>12</sup> Yuda ibu iginiru nde Selabi Peresebi Sera imaru pene. Yuda igini maru Ere Onanala kirabali Kenana dindi hemingi homene. Perese ibu igini Hesperono Hamulula pene. <sup>13</sup> Isaga ibu igini Tolabi Puabi Yasububi Simirono imaru pene. <sup>14</sup> Ani bialu Sebulunu ibu igini nde Serede Elono Yalele imaru pene. <sup>15</sup> Yagaba one Lia ibu igini uruni bu hene. Lia ibugua igiri uruni Mesobodemia dindini hemingi taba hanaga bini. Liahanda wandari mbiraore hangu mini Daina taba henene ogoni berene. Yagabanaga waneigini aguanerubi Liaha howa henego aria pira tebirani huniane tebira (33) ti bibahende Iyibi dindi pene.

<sup>16</sup> Yagaba igini Gada ibu igini nde Sebonobi Hagibi Sunibi Esebonobi Eribi Arodobi Areli imaru henego tibi pene. <sup>17</sup> Ase iginiru nde Iminabi Isibabi Isibibi Beria imaru halu ibu wane Sera berenogobi uruni pene. Ani pialu Beria igini nde Hebe Malagielela libubi pene. <sup>18</sup> Wali agali uruni bibahende ti wali mbira mini Siliba ibu Lianaga biabe bia haga berelo Labanahanda ibu wane Lia minigo o biago Yagabala libu waneigini hene. Ti bibahende daga lamaga halu pira mbirani waragaria (16) pene.

<sup>19</sup> Yagaba one mende Leselo ibugua Yagaba igini Yosebe Beniyaminila taba henene. <sup>20</sup> Anigo Yosebe ibu Iyibi dindiha heangi loma binigo mo miaga agali mbira mini

✧ 46:6: Ab 7.15

Podibera ibu Heliobolisi tanoha henego ibu wane Asenada bereago ibu Yosebe one biruwa ibugua igiri kira Manase Eberaimila taba henene.✧ <sup>21</sup> Beniyamini igini nde Belabi Begebi Asabelebi Gerabi Namanabi Ehibi Losobi Mubimibi Hubimibi Ada imaru hene. <sup>22</sup> Agali uruni pira mbirani maria (14) ti Yagaba Leselola libu aguaneru ti bibahende Iyibi dindi pene.

<sup>23</sup> Dana ibu igini mbiraore hangu mini Husimi hene. <sup>24</sup> Nabadali ibu iginibi nde Yaselebi Gunibi Yasebi Sileme imaru hene. <sup>25</sup> Agali karia uruni bibahende Yagaba Bilihala libu waneigini aguaneru bu hene. Wali Biliha ogoni Labanahanda ibu wane Leselonaga biabe bia haga berelo minigo berene.

<sup>26</sup> Yagaba ibu aruniru daga nale howa ibuni waneigini hangu Iyibi dindi pole peneru daga pira waragariani waragaria (66) pene. <sup>27</sup> Anigo Yosebe oneme igiri kira Iyibi dindini taba hanayago heba lamaga halu Yagaba ibu damene pira karia (70) Iyibi dindi pu hene.✧

*Yagaba damene Iyibi dindini pu henego ogo*

<sup>28</sup> Yagabahanda Yuda abale bamba halu Yosebe Gosene dindini ngola hole ibilo, Lamima pu, lene. Ani bialu Yagaba dameneru Gosene dindini anda ibu heagola <sup>29</sup> Yosebehanda ibunaga agali biabe bia haga hearuhondo lalu, Gosene dindini i aba lola hole poliya inaga garo ale mini karisi mo manda manda bidaba, lene. Ani bialu Yosebe ibu puwa ibu aba wanakuioire handalu dugu timbuni luore biaho wini. <sup>30</sup> Ani biyagola Yagabahanda Yosebehondo lalu, Ayu iore homaribe toba harugo ndo henedago ayu hendedogo ai homaruyagua karulape kogoni, lene.

<sup>31</sup> Ani layagola Yosebehanda ibu hameneru ibu aba waneigini bu hearuhondo lalu, Ai ayu ogoni kinihondo i aba hameneru tinaga dindi andaru Kenana dindi ngelo wahalul oali anda ibu ka lalu lamule porogo. <sup>32</sup> Agali uruni ti nogo sibi hinaga howa ai tinaga mbirale wu hearu bibahende yalu ibai haya. Tinaga nogo bulumaga sibirubi bibahende haru ibiya lolebero. <sup>33</sup> Ani larogola kini ibugua tihondo, Biabe agi dege biaga kamibe, lalu hale hayagua <sup>34</sup> tigua ibuhondo ogodagua ladai bilimu, Agali haguane-o inanaga biabe nogo sibi bulumagaru hinaga kamagoni. Inanaga aba mamarume biagadagua inabi nde igiri emeneni howa biabe ogoni biaga kamagoni, lalimu. Tigua ani larimiyagua ibugua, Ti dindi Gosene ogoria halimu, lalu dindi ogo ti ngulebirago ani lalimu, lene. Yosebehanda ibu hameneruhondo ani lalimu layago irane Iyibi wali agali tigua agali nogo sibi hinaga karu handabe manga hagago manda buwa ani lene.

**47**

<sup>1</sup> Ani lalu Yosebe ibugua ibu hamene duriali kini hearia haru puwa kinihondo lalu, I aba hameneru tinaga nogo tara tararu haru hai halu Kenana yu wahalul ibuwa ai Gosene dindini ibu ka, lene. <sup>2</sup> Ani lowa Yosebe ibugua ibu hameneruhondo, Kininaga wanakuini ibu hadaba, lene. <sup>3</sup> Ani ibu heagola kini ibugua tihondo hale halu, Ti biabe agile dege biaga kamibe, lene.

Ani layagola igiri biarume ladai bialu lalu, Inanaga agali haguane-o inanaga aba mamarume biagadagua inamebi nogo sibiru hinaramali. <sup>4</sup> Ai ina dalu Kenanaha hina gari timbuni biyagome ina habe naheyagola oali ibu kamago. Inanaga sibiru tibi nde tani nolene nahe degego. Ai hina gari piai kagola inane dalu dai bulego ina karulape lariyagua nde ina dindi Gosene ogoriani holene hame ledama, lene.

<sup>5</sup> Ani layagola kini ibugua Yosebehondo lalu, Ai i hameneru ini haru mandagi hole ibiyadagonigo <sup>6</sup> inime Iyibi dindi bibahendeha manda beregola ti holene karulape mbira wiagua dindi ogoriani ti hole pudaba labe. Ti Gosene dindini berelo hame lariyaguabi nde ogoni karulape dege. Ani bialu agali uruni mbirago ibu nogo bulumaga

✧ 46:20: Pig 41.50-52 ✧ 46:27: Ab 7.14

hinaga mandabi heagua nde ogoni ibugua inaga nogo bulumagaru hinalu helo hame ledogoni, lene.

<sup>7</sup> Ani layagola Yosebehanda ibu aba kini hearia haru ibiyagola Yagabahanda kini mo bila hene. <sup>8</sup> Ani biyagola kini ibugua Yagabahondo hale howa, í áyu mali agira hene kegonibe, lene.

<sup>9</sup> Ani layagola Yagabahanda ladai bialu lalu, I dindi ogoria hewane dege mali handari mbirani pira tebira (130) hangu piyago. Ogoni mali lu ndo howa genda dewaore yidogoni. Inaga mamaliru tigua i bolangua halu ti mali dewore hene, lene. <sup>10</sup> Ani lalu te lai halu Yagaba ibugua kinihondo lalu, Hondo birabe, lalu ibu tagira pene.

<sup>11</sup> Mani Yosebe ibu kinihanda layadagua bialu ibu aba hameneru Iyibi dindi helo mo tiga biai hene. Ti Lamese tano dindi mbira Gosene dindiha winigo ogoniha nogo hinulene bayale dataniru dewa buhe Iyibi dindi maruha wiarubi ndo dindi ogoni bayaleore wiago hondowa ti ogoriani helo walía hene. <sup>12</sup> Ani ibu heagola Yosebehanda ibu ababi ibu hamenerubi tinaga one waneiginiru ti tomo nelo karulapeore mialu baya hanguore handaya ho hene.

*Hina garime Iyibi wali agaliore mo ko henego ogo*

<sup>13</sup> Hina gari timbuniore piyagola dindi bibahende ha tomo nolene emeneorebi mbira nawi hene. Hina gari ogonime Kenana wali agalibi Iyibi wali agalibi kirabali mo ko hene. <sup>14</sup> Ani biyagola Iyibi wali agali hearubi Kenana wali agali hearubi tigua tinaga muni emene wiago tomo anda Yosebehanda hondo hayagoha yalu ibalu tomo yolo bigi biyagola tinaga muni bibahende biba hene. Muni uruni Yosebe ibugua mo yuwa kini andagaha ngelaga bini. <sup>15</sup> Ani bialu Iyibi wali agalibi Kenana wali agalibi tinaga muni bibahende bibaore hayagola Iyibi wali agali tigua Yosebe hearia puwa lalu, Ai nde ina ina tomo hangu bame ngibelo ibirima. Inanaga muni bibahendeore tomo yolo biai harimagola ai nawiore kamago. Ina tomo nolomaya nangiriyagua nde inaga deni ina homai haramagoni, lene.

<sup>16</sup> Ani larimigola Yosebehanda tihondo lalu, Tinaga muni biba hayagua nde tinaga nogo tara tara hinu kamirume tomo yolo bule haru ibalimu, lene. <sup>17</sup> Ani layagola wali agali tinaga nogo hosi sibiru memeru bulumagaru dongiru bibahende haru halu Yosebe hearia puwa tomo yolo bu naga bialu hemiria dege mali mbira pene. <sup>18</sup> Mali mbira piai hayagola tigua Yosebe hearia lone ibuwa lalu, Agali haguane-o ina genda timbuniore yu kamagoni. Inanaga muni bibahende bi inanaga nogo tara tara bibahende bi í ngiai harimago ai nde mbirale yu wahene mbira ihondo ngulene nayiore kamagoni. Inanaga dindibi inane wali agalirubi uruni hangu yuwa kamagonidago <sup>19</sup> ai ina wali agali homolomaya wahariyagua nde inanaga dindi mo koore holobadago. Ai wahalu inane kini ibunime tomo ngialu handaya ho helonaga ina bibahende ibunaga biabe bia haga holeberama. Inanaga dindibi kini ibu hai helo. Anigo aiore ina tomo nolene egene heba ngiaore bia. Ina tomo egene ngeregola inane homa nabi howa inanaga dindi ogobi mo ko naholebira, lene.

<sup>20</sup> Horo hina gari piyadagoningi howa Yosebehanda Iyibi wali agalinaga dindi wiaru bibahendeore yolo biai howa kininaga mo ngelai hene. <sup>21</sup> Ani buwa Yosebehanda wali agali bibahende kininaga garabaya biabe ale bia haga helo helai hene. <sup>22</sup> Anigo loma binigo mo miaga hearunaga dindi dege yolo nabi muni kinihanda bame migi biyagola ti tomo ogonime yolo bu naga bialu hene. <sup>23</sup> Ani buwa Yosebehanda wali agalihondo lalu, Hale hadaba. Áyu tinibi tinaga dindi ngamirubi bibahende munime yolo biai harugoni. Ai áyu tí wali agali kininaga biabe bia haga kamigonigo tomo egene o ngaru mo yalu mabuha hongole pudaba. <sup>24</sup> Tomo hangaramigo boga biragola buyu mogobu ngelowa dau halu tale bilimu. Tale buwa daunigo kini mialu maria tíni howa lini maru mani hongole egene ngelalu maru tí one waneigini heba tíni nole ngelalimu, lene.



<sup>25</sup> Ani layagola wali agali tigua lalu, Agali haguane-o ina inahondo biamogo timbunioire buwa ina homa nabi helaregonagabi ina kininaga biabe bia haga holomaya henge ngeledogonagabi ihondo kajore laramagoni, lene. <sup>26</sup> Ani buwa Yosebehanda mana mbira ogobi wabu wini. Wali agali bibahende ti mabuha tomo boga bialu nolene tu haragola buyu ngoai howa dau halu tale buwa daunigo kini mulene nga, lalu lo winigo áyu wiaabo ka. Loma binigo mo miaga agali biarunaga dindi dege yolo nabi tini helo wahene.

*Yosebehanda, Kenana dindiniore Yagaba hora hole, lenego ogo*

<sup>27</sup> Isaraele wali agali biarume ti dindi Goseneha mialu ogoniha hene. Ani howa waneigini dewaore hono wialu ti ho damebi dewaore hene. <sup>28</sup> Yagaba ibu mali pira mbirani karia (17) Iyibi dindi pu hene. Ibunaga mali lamaga halu handari mbira pira mariani karia (147) hene. <sup>29</sup> Ani howa ibu homolene tu kaware harudalo manda bialu ibu igini Yosebe ibu lowa bi ogodagua lamini. Ina ihondo gubalini howa keyagua nde inaga gi inaga ge dulini yaniho biruwa ihondo mana bayale ogonidagua bule lalu bi mbira hongohé i Iyibi dindini hora nahole lalu áyu lo wia.\* <sup>30</sup> Ai inaga de mugulalu inaga mamaliru heba mandagi hole porogola inaga tingini Iyibi dindi wahalu ini aba mamaru hora haga wiyagoria hora hole yalu dai bibe, lene.

Ani layagola Yosebe ibugua, Nde ina aniore biagua, lalu ladai bini. <sup>31</sup> Yagabahanda lone lalu, Ina heneneore ani bule lalu bi heneneore la, lene. Yosebehanda, Heneneore larogoni lalu aniore bulebero, layagola Yagaba ibugua Yosebehondo, Turuore ko, lowa walia halu ibu dagiani biruwa ma podalu bulu palene.

## 48

*Yagabahanda Eberaimi Manasela mo bayale helonaga bi lenego ogo*

<sup>1</sup> Yosebe ibu emene howa hale halu hearia ibu aba warago bo nga layago hale hene. Ani laya handala ibu igini kirali Manase Eberaimila haru halu ibu aba Yagaba hondole pene. <sup>2</sup> Piyagola agali maru hearume Yagabahondo lalu, I igini Yosebe ibu i warago bo ngego hondole ibiragoni, lene. Ani layago hale howa Yagaba ibu heyulene hongo emene hayagola ibuni heyuwa dagiani berene. <sup>3</sup> Yagaba ibugua ani heyu biruwa Yosebehondo lalu, Ngode Datagaliwabe Hongo Haiheore ibuni i Kenana dindiha tano emene Lusi ngagoria hewaria ibuwa bi galone mbira langialu lalu, I biamogo bialu mo bayale holebero, layagoni.\* <sup>4</sup> Ibugua ogodagua laya, Ina waneigini dewaore ngulebero. Ani berogola i aguanene dewaore daga labe nahe holebira. Dindi ogo tihondo merogola tinaga dindi ogoniore wiaabo holebira, laya lene.

<sup>5</sup> Yagaba ibugua laho wialu lalu, I Iyibi dindi naibi hewaha i one ibugua igiri kira taba hanayadago. Ai ogoni labo i iginiore haradagua holebira. Eberaimi Manasela ini iginiore Lubene Simionola baba ogobi dege dege holebira. <sup>6</sup> Anigo i waneigini mani holebiraru ti ininaga holebira. Ani howa mani tini hameiginiru dege dege dindi tu wa ta holene wiragola waneigini maru ti Eberaimi Manasela libu dagalalu tale biragola tigua tinaga hamene wahene Eberaimi Manaselanaga erembiraha holebira. <sup>7</sup> Ina áyu bi larogoni i aiya Leselooore mitangi bialu dara ho haabo kogonaga laro. I Mesobodemia wahalu Kenana dindi ibu dai bule harigani ibalu hemaria homaya. Ina dindi emene mbira Eberada winigo anda ibule dege ibalu hemaria homayagola dindi Eberada ogoni kawareni dege hora kama, lalu lene. Áyu dindi Bedeleheme ngagoni abale Eberada laga wini.\*

<sup>8</sup> Ani lowa Yagaba ibugua handalu hearia igiri emene kirali Yosebe igini biagolabo hondowa lalu, Igiri emene ogolabo ai iginibe, lalu Yosebehondo hale hene.

\* 47:29: Pig 49.29-32, 50.6    \* 48:3: Pig 28.13-14    \* 48:7: Pig 35.16-19

<sup>9</sup> Ani hale hayagola Yosebehanda ladai bialu lalu, Ogonilabo i igini. Iyibi dindiha hewaria Ngode Datagaliwabehanda ngiya, lene.

Ani layagola Yagabahanda lalu, Ina Ngode Datagaliwabehondo libuore biamogo bialu mo bayale habe lalu bi laholiya i bedogoria kaware haru ibu, lene. <sup>10</sup> Yagaba ibuni nde waheore biruwa ibugua mbirale deme baya hangu handabe nahe berene. Ani bereagola Yosebehanda ibu igini biagolabo Yagaba bereagoria kaware haru ibini. Haru ibu heleagola Yagaba ibugua igiri biagolabo yania howa nunu lalu howa <sup>11</sup> Yosebehondo lalu, Abale howa ina i wanakui nahondoleda mandabu henego. Ai ayu inibi i igini kirali ogolabobi handaore buliya Ngode Datagaliwabehanda henge ngiyada, lene. <sup>12</sup> Ani leagola Yosebehanda igiri emene biagolabo Yagabanaga bani berenego minu yamialu dindini helene. Helowa Yosebe ibu abanaga mini yaraga halu ibu ma podalu dindini bulu palene.

<sup>13</sup> Yosebe ibugua ani bialu ibu igini Manase Yagabanaga gi tigahayagi helalu Eberaimi gi lehayagi helo Yagaba bereagoria kaware helene. <sup>14</sup> Ani biyagoyu Yagabahanda ibunaga gi wia iriari buwa gi tiga heyogone Eberaiminaga hagianeni wialu gi le wahene Manasenaga hagianeni wia aribia hene. <sup>15</sup> Ani buwa Yagaba ibugua Yosebe-naga damene Ngode Datagaliwabehanda mo bayale helo bi lahalu howa lalu, Ngode Datagaliwabe-o i mama Abarahamandabi i aba Aisagahandabi libu harume i andanehaore hayagoni. Ai ibi nde i aiyahanda taba hanayangi howa ina baya hanguore handaya ho hama ibirigoni. <sup>16</sup> Ina dahuliyali ibiradagua bialu i ko gendabi wiagoha pu hewaria haru dai birigonigo ayu igiri ogolabo libunaga waneigini aguaneneru dewaore helo libu mo bayale habe. Mani holebirarume Abarahama Aisagalanaga minibi ininaga minibi ereba nahe manda biaabo helonaga aniore bibe, lalu Yagabahanda lene.

<sup>17</sup> Yosebe ibu handalu hearia Yagabahanda ibunaga gi tiga Eberaiminaga hagianeni wialu gi le Manasenaga hagianeni wiyagola ogoni nakarulapeda manda buwa ibu abanaga gi tiga yamuwa Manasenaga hagianeni wialu howa <sup>18</sup> ibu abahondo lalu, Aba-o ogonidagua ndo. Igiri ogo ibu wahenego inaga gi tiga ibunaga hagianeni wulene karulape, lene.

<sup>19</sup> Ani layagola ibu abahanda ogonidagua bulene hame nale biruwa Yosebehondo lalu, Iginio ogoni i manda bidogoni. Mani howa Manase ibu waneigini dewa dege holebiragoyu ibu hamene heyogone ogo ibunaga waneigini aguanene dewaore howa Manase waneigini ho bolangua holebira. Ani howa wali agali dewaore dindi maru ngaruha karubi dege holebira, lalu Yagabahanda lene.

<sup>20</sup> Yagaba ibugua igiri biagolabo Ngode Datagaliwabehanda libu mo bayale helonaga bi lalu howa lalu, Isaraele wali agalirume Ngode Datagaliwabehondo ti mo bayale helonaga bi lalu howa libunaga minini lalu ogodagua lolebira. Ngode Datagaliwabe-o ina bamba Eberaimi Manasela mo bayale harigodagua ayu urubi nde ani dege bibe lolebira, lene. Yagabahanda anidagua lalu howa Eberaimi mo bamba halu wahene Manase mo maha helene.✧

<sup>21</sup> Ani buwa mani Yagabahanda Yosebehondo lalu, Hale ha. Ai i ayu dege homole bedogoni. Anigo Ngode Datagaliwabe ibugua ti biamogo bialu ti baba mandagi haabo halu tininaga dindi haru dai bulebirago laro. <sup>22</sup> Dindi baya gibiore Segeme tanoha ngago ina abale Amoroaliru baba ayu tibu danda timurume wai buwa dindi ogoni i karulenege ai dindi bayale ogoni i hamene maru karu wahalu i hangu ngerogoni, lene.

## 49

*Yagaba ibu iginiru ti mani ogobi holeberemi lalu bi lenego ogo*

<sup>1</sup> Yagabahanda ibu iginiru olalu ibidaba lowa tihondo bi ogodagua lene. Tí ogobiore holeberemi lalu languliya í bedogoria kaware íbu hapara hadaba. <sup>2</sup> Ai Yagaba iginiru-o tígua tí aba Isaraele ína bi áyu larogoore baya hangu hale hadaba, lene.

<sup>3</sup> Ai Lubene íore ini huliya igrini hono wini wahene howa í agali timbuni gibi halu í igrini maru hongohe karubi ndo ína ti bolangua halu hongo gibiorehe kegoni. <sup>4</sup> Mana ína berego hongohe agali mendealime hapai habe nahe iba li ale holebere. Anigo í waheneme holene henge ngagoria naholebere. Mana ína í aba one haru paliriyagome í kogoha mana tiga nabi taga holene mo yu anda ibiriyago lehe biriyagoni.

<sup>5</sup> Simiono Libaila libu hamenela kabigoni. Libugua danda timu abale gilila mialu mendeali kago balu wai bule abale tungu laga. <sup>6</sup> Libugua ogonidagua bule bialu kagola ínime libu heba mini mbiraore nahe halu ogoni karulape bidabida nalolebero. Ani larogoni tene libugua keba ho kabingi agali abale homelo balu turu ho kabingi nogo bulumaganaga ge minu libulaki hagayago. <sup>7</sup> Libuha keba holene daligaore wialu tandaga harabigome libuni bo waholene wulebira. Ani bilodago ína libu Isaraele dindini wali agali karuha hopebe bu helo helarogoni.

<sup>8</sup> Ai Yuda-o í nde í hamene karume ínaga mini yaraga holebira. Ínaga waitigi bu karu mani minuwa balu kegola í hamene maru karume ibuwa ini deni tinaga ma podalu bulu paligi bialu holebira. mini <sup>9</sup> Yuda ibu pudi gabua laiono hungubalua ale kagoni. Ibugua nogo tara tara balu nowa hongo howa hagadagua kagoni. Ibu emaru nabi laionome biragadagua hendore damboya bedagola agali mbirame ibunaga deni howa mine naholebiraore. ✧ <sup>10</sup> Ibugua handame haga kini manda bialu yaga halimbu ngago yu biruwa ibu kini haabo holebira. Ibu agali mini lene dege haho wialu Silo dindi anda puwa wali agali bibahende handame ho holebira. ✧ <sup>11</sup> Ibugua ibunaga pu mini gerebi lini dagane dewaore howa ibunaga nogo dongi dariba hole howa ira ogoni bayaleni dariba holebira. Iibunaga waini iba dewaore hambu bila kagola agalime nai habe nahe bu payabu wulebira. Ani wiragola ibugua ibuninaga agaru waini ibaneha wayawaya bulebira. <sup>12</sup> Ibu waini iba dewaore naga kalo mandabi ibunaga de daramabi halu nogo bulumaga andu ibane dewa naga kalo mandabi ibunaga ne peleore holebira, lene.

<sup>13</sup> Sebulunu ibu iba solowara timbuni bedago angeni iba sibiru anda ibulene henge bayale wialu bidagoha holebira. Ani bialu ibula dindi tubaria amuraore puabo halu Saidono tanoni wulebira.

<sup>14</sup> Isaga ibu nogo dongi hongohe ale howa ibuni nu dabudabu ngaru dombeneha yamo palima ibagabu holebira. <sup>15</sup> Ani howa mani handalu karia ibunaga dindini mbirale anda habe nahedane hondowa tomo hongole biabe hongo howaore bialu holebirago. Ani bialu howa mani agali mendenaga garabaya biabe ale erekuibi ndelaheore bia halu holebira, lene.

<sup>16</sup> Dana ibugua ibunaga wali agali baya hangu handaya ho kagola ti Isaraele wali agali maru karubi dege holebira. <sup>17</sup> Ani howa ibu nogombi ko ale howa hariga gibunini bedaria agali nogo hosini bialu ibiragola harigani yu berenego abale porabu tagi howa nogo hosinaga ge ayundeni hayulebira. Hayaragola hosi mogo laragome agali nogo hosini bialu ibiyago mo para holebira.

<sup>18</sup> Anduane Homogo-o ína í biamogo bialu gini ngibelo kogoni. ✧

<sup>19</sup> Gada í baba pageali karume wai bule ibalu karia ína wai hongo howa bialu ti bo talu pelolebere.

<sup>20</sup> Ase í daluha dindi bayaleni tomo dewa anda holebira. Anda haragola ína tomo bayale ngabiore handame haga kinime gubalini hagagobiore dawa wigi bulebere.

<sup>21</sup> Nabadali í nogo meme ale mini dia gabua ibunime hoa hagadagua hopebe bu howa igrini baya dege degeru honoyu hagadagua holebere.

<sup>22</sup> Yosebe ibu pu mbira gerebi lini dagane iba angeni dindi bayale ngagoria howa lini dewa do hagagobi holebira. Ani howa gene maganerume yuluyu pialu gana paberu dambi holebira. <sup>23</sup> Agali danda timu yuwa wai biaga karume hongo howa Yosebela wai bialu mo koore halu holebira. <sup>24</sup> Ani holebiragoyu Yosebeibunaga danda hibuni gede nahe hongo haho wiaabo holebira. Yagabanaga Ngode Datagaliwabe Hongo Gibihe kagome ibu mo hongo haragola Yosebenaga gi hongo emeneorebi ibira naholebira. Ngode Datagaliwabe ogoni ibu Isaraele wali agali tinaga bira do hagane anda wia do hene ale ngelo kagola ibugua ti handaya ho haga ka. <sup>25</sup> Í abanaga Ngode Datagaliwabe ogoni ibu howa ibu Hongo Haiheore kago ibugua hangu í biamogo bialu mo bayale halu mbirale bayale dege ngaru ngiaga kagoni. Ibugua dege hariha howa iba dalu ibilalu dindiha howa iba dewa dugua dagadaga bilaga kagoni. Ibugua ínaga aguanenerume waneigini dewaore taba henelo ngulebira. <sup>26</sup> Ai Yosebe-o ìni ì abahandaore larogo. Áyu í biamogo bialu bayale habelonaga bi larogo heneneore mbirale bayale ngaru bibahende mibelonaga larogoni. Ína dewa aulolebe tobehe dewa dege lalu abale ínaga mamalirume yu henegobi ndo dewaore hari wedaru bolangua howa yu habelo hame ledó. Ai Yosebe ìni hamene karunaga agali haguane mini lene ìni kegonidago. Bi áyu laruruni heneneore ìna mo yai habelo larugoni.

<sup>27</sup> Beniyamini ibu biango dudu timbuni ale mbira howa tia nogo egaru bo ngelowa egerebagi nalu birulebira. Ani buwa alendo ibugua mo yiniru talebu migi bialu holebira, lalu Yagabahanda lai hene.

<sup>28</sup> Isaraele hameigini homberia (12) biaruruni. Ti aba Yagaba ibuni kaware dege homole biruwa ibu iginiruhondo bi lolene winigo ti hangu hanguhondo lamigi bini.

### *Yagaba homayagola hora henego ogo*

<sup>29</sup> Yagabahanda ibu iginiruhondo mani bulebirarunaga bi lai howa lalu, Tí lone ibidaba, lalu, Ai nde ì damene ala homayaru heba áyu dege tigi mbira hangu biralu mandagi hama pole bedogoni. Ani pedogola ínaga tingini uyu Hidi hameigini Eberononaga dindini egeanda mbira ngago ogoniha ì dameneru hora hene biagoha yalu puwa ogoniha dege hora halimu. <sup>30</sup> Egeanda ogoni Kenana dindiha dindi emene Mamere mbira ngago kaware ngelowa dege dindi emene mbira Magabela ngagoria egeanda kagoha homali ogoniha nga. Abarahamanda ala egeanda ogoni ibuninaga homali ngelonaga yolo binigo nga. ✧ <sup>31</sup> Homali ogoniha Abarahama hora halu ibu one Sarabi hora ka. Ani bialu Aisagabi ibu one Lebegabi ogoniha dege hora halu Liabi nde homayagola ìna homali ogoniha dege ibu hora ko. ✧ <sup>32</sup> Dindi ogoni Abarahama ibugua Hidi hameigini hearunaga wiaria yolo bini ngago ogoniha tígua ìbi hora halimu, lalu Yagabahanda ani lene. <sup>33</sup> Yagaba ibu bi urunidagua ibu iginiruhondo lai howa ibunaga ge dagiahayagi paulo yamialu homene. Homalu ibu damene ala homene biarubaba mandagi hora hole pene. ✧

## 50

<sup>1</sup> Yosebe ibugua handalu hearia ibu aba homaore biyiyagola ibuni Yagaba tongolomu wiagoria palia paga howa ibu aba nunu lalu dugu bialu hene. <sup>2</sup> Ani bialu mani Yosebe ibunaga anogoda hearume ibu abanaga tingini togo nabilo marasini tara ale wiaru hai hadaba layagola tigua hai howa ngelene. <sup>3</sup> Agali homenenaga tingini bayale wiaabo helonaga marasini horo pira mariani (40) hai halu hagadagua Yagabanaga tinginibi nde anogoda biarume horo pira mariani (40) hai halu howa biai hene. Iyibi wali agali hearu tigua horo pira kariani (70) Yagaba dara howa dugu bialu hene.

<sup>4</sup> Dara howa dugu bialu duguandaruhai howa Yosebehandakininaga agali haguane hearuhondo lalu, Aiore nde agaliru-o tígua kini bedaria puwa bi ogo lamule pudaba.

Kinihondo agua lamilimu. <sup>5</sup> Ai kini-o i aba ibuni nahome biruwa ihondo ibunaga tingini Kenana dindi homali ibuni wabu ngagoria hora hole yalu dai buleore lalu bi heneneore la layagola ina e aniore bule larugo. Ai i aba hora halu dai bule poabe laya lalimu, lene. ✧

<sup>6</sup> Kini ibugua Yosebenaga bi ogoni hale howa lalu, Karulapego ani bule i abahondo bi lo wiridadagua bialu ibunaga tingini hora hole yalu pobe, lene.

<sup>7</sup> Ani laya handala Iyibi dindi howa agali haguane bibahendebi agali ami haru haga timbuni hearubi ti bibahende Yosebe heba Yagaba hora hole pene. <sup>8</sup> Yosebe hamenerubi ti one waneiginirubi bibahendeore piai hene. Ti pialu howa tinaga nogo sibiru memeru bulumagaru dege waneigini emene galiru baba Gosene dindini helalu pene. <sup>9</sup> Nogo hosime gili laga garo ale mini karisibi nogo hosi erekuninibi agali biralu wali agali dewaliore Yosebe heba pole pialu hene.

<sup>10</sup> Pialu dindi mbira Adada amu iba Yodana angeha ni tagira ibiragohayagi widi iraneru lini hondo ibira ibira bilo dagia mbira winiyagoria anda puwa dugu timbuniore agali homene dara howa dugu biagadaguaore bialu hene. Yosebe ibuni nde daraore howa horo karu dugu biaga wiadagua bialu hene. <sup>11</sup> Kenana wali agali hearume handalu hearia Adada dindini wali agali bu hearu dara howa dugu bialu heago hondowa tigua lalu, Iyibi wali agalirume dara timbuni howa dugu bialu kagonida, lene. Ani lowa tigua dindi ogoni mini Abele Misiraimi wini. \*

<sup>12</sup> Yagaba igini biaru tigua ti abahanda layagoore talialu bilimu lenegodagua bialu <sup>13</sup> Abarahama ibugua egeanda mbira ibuninaga homali helo dindi emene mbira mini Magabela Mamere dindi kaware ngelowa Kenana dindini winigo. Egeanda ogoni agali Eberono Hidi hameigini heneyagonaga winigo ogoni yolobu ngelenego. ✧ <sup>14</sup> Ai Yosebehanda ibu aba egeanda ogoniha hora halu ibu hamenerubi wali agali ibu heba ibini biarubi ti bibahende Iyibi dindi dai bini.

*Yosebehanda ibu hameneru ko biyago embeda ho kogoni lenego ogo*

<sup>15</sup> Ti aba homayagola Yosebe hamene biaru tigua bi ogodagua lalu hene. Abale iname Yosebehondo mana kagua dewa birimaruni áyu ibugua mo wiaho howa inaha biadai bule manda buligo agua bimabe, lalu hene. <sup>16</sup> Ani lowa tigua Yosebe ibuni hearia bi mbira ogobi loyalu pelene. Tigua lalu, Ina aba ibuni nahome biruwa bi mbira inahondo langinigo yu kama. <sup>17</sup> Ibugua bi ogodagua laya. Aiore Yosebe inaga hamenerume ihondo koore timbuni biyaruni ina la nabi embeda halu pani biadai nabibe laro, laya. Ibugua ani layadagua áyu ina abanaga Ngode Datagaliwabenaga biabe biaga agali kamagonigo iname ihondo ko timbuni birimago la nabi embeda halu wahabelo hamelo kama, lene. Ani larimiyago Yosebe ibuni hale howa dugu bialu berene.

<sup>18</sup> Ani berearia ibu hamene biaru ti Yosebe bereagoria ibuwa ibunaga geha bulu palialu howa lalu, Ina bibahende inaga biabe bia haga haradagua bule ibirima, lene.

<sup>19</sup> Ani layagola Yosebehanda ladai bialu lalu, Tigua ihondo gi holeneore nawi. Tigua beramigo dabagane Ngode Datagaliwabe i ndo kogoni. <sup>20</sup> Henene tigua mini mo mbiraore howa i mo ko hole bia ani birimigo nde mani wali agali bu karu homa nabilonaga Ngode Datagaliwabehanda henemane bero lalu tíha howa binigo ai ogo ale binida lalu tínime hendedamigoni. ✧ <sup>21</sup> Anigo tigua gi holene nawi. Tínaga one waneiginirubi tñibi heba ina baya hanguore handaya ho holebero, lene. Ani laga bialu Yosebe ibugua ibu hameneru giho holigonaga ti gi nahe embedaho helo ibugua tinaga bu mini mo palia haga bialu hene.

*Yosebe homenego ogo*

<sup>22</sup> Yosebe ibu hameneru heba Iyibi dindini howa ibu aiyahanda taba hanayangi mali hama ibinigo ibunaga mali handari mbirani pira mbira (110) howa ibu homene. <sup>23</sup> Ani

✧ 50:5: Pig 47.29-31 \* 50:11: Abele Misiraimi mini ogoni inanaga bi lalu Iyibi wali agali bibahendeme dugu biame hara, lalu wini. ✧ 50:13: Ab 7.16 ✧ 50:20: Pig 37.26-27, 45.5-7



nahome biruwa ibu igini Eberaimi igini aguanenerubi hendene. Ani bialu Manase igini Magia ibu iginirubi Yosebe berearia haru ibiyagola ibugua ibunaga pani berelaga bialu ibu aguaneneru hendene. <sup>24</sup> Yosebehanda nahome howa ibu hameneruhondo lalu, Ainde i áyu dege homole bedogonidago tí nde Ngode Datagaliwabehanda dindi ogoha kamigoni wahalu tínaga dindi bamba Abarahama Aisagalahondobi Yagabahondobi ngulebero lalu habo nalolene bi lo wiyagoria haru dai bulebira, lene. <sup>25</sup> Ani lowa Yosebehanda Isaraele igini aguanene biaru ibidaba lowa tihondo lalu, Ai Ngode Datagaliwabehanda tí tíninaga dindi haru dai birangi inaga kuniru tíni heba yalu dai bule lalu bi heneneore hongohe ladaba, lene.✧ <sup>26</sup> Ani lalu Yosebe ibuni mali handari mbirani pira mbira (110) howa homene. Homayagola tingini togo nabilo marasini tara tararu hai howa mbogoyi mbiraha Iyibi dindini ngelo hene.

---

✧ 50:25: Har 13.19, Yos 24.32, Hi 11.22

## Haru Tagira Penego

### Mbuga ogoha gilibu ngarunaga nemandi ogo

Mbuga ogoni mini Haru Tagira Penego laga irane Isaraele wali agali Iyibi dindiha howa garabaya biabe ale bialu henego golope halu haru tagira pialu Kenana dindi pole penego manda buwa laga.

Mbuga ogoniha bi dunini halu tebo gilibu nga.

Mbira

Be 1-18 Isaraele wali agalirume Iyibinaga garabaya biabe ale bia haga henego Anduane Homogohanda Moseseha howa golope halu haru puwa dindi yobini pialu Hari Sainai anda penego te gilibu nga.

Mende

Be 19-24 Hari Sainai heagoria Anduane Homogo ibugua Habo Nalolene Bi lo wialu mana bulenebi nabulenebi Isaraele wali agali mo tiga bialu tigua mana bayale bilo tihondo lamigi binigonaga te gilibu nga.

Tebone

Be 25-40 Anduane Homogo ibu ti heba ka manda bilonaga Balai Anda wabu helolenebi loma binigo mo miaga agali dabo helolenebi wali agalime Anduane Homogo mitangi bialu mo dunini howa lotu lolenebi mana uruni lowigi bialu gilibu nga.

Isaraele wali agali Iyibi dindi howa haru tagira pelobi Kenana dindiha puabo helobi Anduane Homogohanda Moseseha ibu ti haru haga helo dabo helene.

Anduane Homogohanda ibunaga wali agali garabaya howa golope halu ti ibu mini yaraga helobi ti mini mo hongo helobi mini dunubia helobi biamogo bialu golope henego te duniniore ogoni gilibu nga.

#### **Bulu бага бува кuni gilibu ngago**

1.1-15.21

Isaraele wali agaliru Iyibi dindi howa golope henego

1.1-22

Iyibi dindiha howa garabaya biabe ale bia halu henego

2.1-4.31

Moseseha taba henegobi ibugua bialu henegobi

5.1-11.10

Moseseha Aronola Iyibinaga kini heago deni puwa bi lenego

12.1-15.21

Bolangua Halu Penegonaga tomo nalu Iyibi dindi yu wahalu penego 15.22-18.27

Iba solowara mini Daramabi domalu Hari Sainai penego 19.1-24.18

Bi Pira gilibu minigobi Habo nalolene Bi lo winigobi lo ngago 25.1-40.38

Habo Nalolene bi lenegonaga Balai Andabi Anduane Homogo mitangi bialu mo dunini howa lotu lolenebi te gilibu nga

#### *Iyibi wali agali hearume Isaraele wali agali mo ko henego ogo*

<sup>1</sup> Yagaba iginiru ti one waneigini heba Iyibi dindi pole Yagaba heba peneru uru.✧

<sup>2</sup> Lubene Simiono Libai Yuda <sup>3</sup> Isaga Sebulunu Beniyamini <sup>4</sup> Dana Nabadali Gada Ase imaru pene. <sup>5</sup> Wali agali o penedaruni Yagaba ibunioreha howa tagira penego pira karia (70) pene. Ibu iginu Yosebe ibu Iyibi dindi abale pu heaha ti mani pene. <sup>6</sup> Ani pu howa Yosebe ibu hamenerubi wali agali dabane ogoni aria ti mandagi henerubi homai hene.

<sup>7</sup> Tini homalu tigua hono wiyagome Isaraele hameigini palene. Isaraele hameiginime hono tawe hama piyagola dewaore hapaya bialu Iyibi dindi ti dege ho namulene.✧

<sup>8</sup> Ani bialu heagola agali gahenge mbira Yosebe manda nabinime Iyibi wali agalinaga kini ho aribia hene.✧ <sup>9</sup> Ani howa ibugua ibunaga Iyibi wali agalihondo lalu, Isaraele wali agali o íbu karuni ti hongo gibihe ina dindi wirimagoni ti dege dindi halu hapaya bidagome ina babehe hiriribi kama. <sup>10</sup> Ina agali baba wai beramangi tigua ina napele ngulebira. Ti wai mendegoha anda puwa ina badai bialu dindi wahalu pole o íbu karuni. Ani bule kago manda buwa o karuni ti ho timbu halu ho dame nabilonaga iname mbira agi bibehedabe handamiya, lene.✧

<sup>11</sup> Ani lowa Iyibi wali agalime agali ko handabe mangabi wali agali garabaya biabe ale bilo mo miaga hearu dabowa urunime haru helo helene. Biabe wiarunime Isaraele wali agalinaga mini tinginibi bo gangu lelonaga biabe erekuibiore mo mini. Ani mo miyagola Isaraele wali agalime anda dewa buhe tano timbuni kira Pidomo Lamesela kini biago ibu dabudabu wilonaga bia hene. <sup>12</sup> Iyibi wali agalime Isaraele wali agali hangedalu mo emene hole biyagola Isaraele wali agali ti ho dame biaho wialu Iyibi dindi wiagoriani ti dege ho yu lama pene. Ani biyagola hondowa Iyibi wali agali ti Isaraele wali agali handalu gi howa <sup>13-14</sup> Isaraele wali agali mo genda halu hangedapeore holenaga garabaya biabe ale koore mangabiru mo bia hene. Iyibi wali agali tinaga ege timeni andaru biaha mabu biaberu biaha bigi bilalu dara naheore garabaya biabe ale gibiru mo migi bini.

<sup>15</sup> Ani bialu howa Iyibinaga kini biagome wali kira Pua Sibarala libu Isaraele wali waneigini gali taba henelo biamogo biaga berenego ogonilabo lamialu lalu, <sup>16</sup> Isaraele wali gali taba henelo biamogo bigi berabingi igiri taba hanayagua bo wahaga bialu wandariyagua berelalibu lene. <sup>17</sup> Ani lamiyagoyu wali biago libu Anduane Homogohondo giho biraga berenegome kini biagome layadagua nabi igiri taba hanaga biyago nabe wahene.✧ <sup>18</sup> Ani bira layago hale howa kini biagome wali biago labo hondo pudaba lowa ibiyagola libuhondo lalu, Igiri taba hanarago bo wahaga bilibu larugo nabe wahalu helaga biribiyago aginagabe, lene.

<sup>19</sup> Ani layagola libugua ladai bialu lalu, Hiburu waliru ti Iyibi wali ale ndo beda. Ti waneigini baya hanguore mbira mo ko nahe taba hanaga biaga. Iyame biamogo bule lowa pialu kabaria abale tini taba hono bedaria pugu berabali. <sup>20-21</sup> Wali gali biamogo biaga biagolabo libu Ngode Datagaliwabe ibuhondo gi howa mana tigabi bialu bereago hondowa Ngode Datagaliwabehanda libuhondo bayale bialu libuni nde waneigini helo biamogo bini. Ani bialu Isaraele wali agali ti timbuni halu hongohe hene. <sup>22</sup> Aniore biyago hondowa kini biagome ibunaga wali agali bibahendehondo, O larogodaguaore bilimu, lowa lalu, Hiburu walime wandari taba hanarago berelowa igiri taba hanarago bibahende abale minuwa iba Nailiha bape halimu, lene.✧

## 2

### *Mosese taba henene go*

<sup>1</sup> Odangi Libai hameigini aria agali mbirame Libai wali dege wali tagini mbira dabu bini. <sup>2</sup> Dabu biyagola agalidagonaga igiri mbira taba henene. Taba honowa handalu hearia hulu igiri baya gibioyegola taba hono do howa ege tebira berene.✧ <sup>3</sup> Ani biruwa handalu hearia taba hono doho biraabo habe naheyagola mbasigedi nu mbira dambe aleme bini wiago muwa iba anda polilono golodame hirame howa ndibu lene. Ani buwa igiri gali biago nu o biagoniha mo pale lowa dunduyame bu heagoha mo ngelene. <sup>4</sup> Ani ngelowa igiri gali biago mbalini mbirame agi birabe hondole madia hondo hene.

<sup>5</sup> Ani madia hondo hearia kini wane mbira ibaha wayawaya bule ibini. Wandari maru ibunaga biabe biagaru ti iba angeange ibagabu hene. Kini wane biago ibu wayawaya bule lowa handalu hearia mbasigedi nu mbira ibu heagoha wiaria hondowa

ibunaga biabe biaga wandari mbirahondo, Mo pu, lene. <sup>6</sup> Mo yu ibiyagola panga duguwa handalu hearia igiri emene gali mbira dugu bialu wiago hondowa dara hene. Dara howa lalu, Igiri gali ogo Hiburu wali mbiragonagada, lene.

<sup>7</sup> Ani layagola igiri gali mbalini mbira madiahondo hayagome lalu, Ina igiri gali ogoni mondo bia helo Hiburu wali mbira hondo poabe, lene.

<sup>8</sup> Ani layagola kini wane biagome ladai bialu, E aniore bia, lene. Ani layagola wandari biagome puwa igiri gali biago ibuninaga aya haru ibini. <sup>9</sup> Ibiyagola kini wane biagome wali biago lamialu lalu, Ina igiri gali ogo inaga mondo bia habe. Ani beregonaga i yolo nguliya, lene. Ani layagola wali biagome ibu igini biago ibuni andu mialu mondo bini. <sup>10</sup> Ani bialu howa mani igiri emene biago boga bialu wahe hayagola ibu aiyahanda kini wane biago berearia haru pene. Haru piyagola kini wane biagome ibuni iginiore mondo biradagua bini. Ani bialu howa manda bialu hearia igiri ogo ibaha wiaria gililo mirugodago ibu mini gililo mini lalu Mosese wibeheda manda buwa mini Mosese wini.\*✧

*Mosese ibu Midiana dindi ibida penego ogo.*

<sup>11</sup> Horo mbiru Mosese ibu igiri wahe heangi ibu aria Isaraele wali agali hearia nenege pene. Puwa handalu hearia ibunaga wali agaliru biabe erekuibi ndelaheore mo bia halu harayago hendene. Ani bialu Iyibiali mbirame Isaraeleali Mosese ibuni aria mbirago bo wahalu hearia de hendene.\*✧ <sup>12</sup> Ogoni biyago hondowa Mosese ibu ala handadele bialu hearia mbirali naheyagola Iyibi agali biago bowa iba muha bo hora hene. <sup>13</sup> Ogoni bialu puwa horo mendengi lone dai bialu hearia Isaraeleali labolabo kira gungu bialu hearia hendene. Hondowa agali mende kagua biniyagohondo lalu, Ina aria ogo nde dara nahe aginaga minu barebe, lene.

<sup>14</sup> Ani layagola agali biagome ladai bialu lalu, Ina ogoria de hondo howa dabaki bule ibabe layadago aiwa. Abe Iyibiali biago bo waharigo ai ayu i bo wahole ibu kebe, lene. Bi ogonidagua ladai biyago hale howa Mosese ibu gi howa ibuni minime lo manda bialu ai ina birugo wali agalime handa walia hayadago lo manda bini. <sup>15-16</sup> Mosesehanda ogonidagua biya layago hale howa Iyibinaga handame haga kini biagome Mosese bo wahole manda bini. Ani bialu heago hondowa Mosese ibu Midiana dindiha ibida pene. Pu howa horo mbiru Mosese ibu iba uli mbira wiagoria berearia Midiana dindinaga loma binigo mo miaga agali Yadero henego ogoni wane kariali berenego uruni ti iba nolenebi ti abanaga nogo sibi memerunagabi hambu yule lowa hambu ibini.\*✧ <sup>17</sup> Ibalu hearia nogo sibi haru haga agali tara maru hearume wandari biaru tali pelene. Tali pelalu hearia Mosesehanda heyuwa lalu, Ogoni nabidababe, lowa wandari biaru biamogo bialu tinaga nogo haru hearubi iba nelo ibugua dege hambu mini. <sup>18</sup> Ani biya handala wandari biarume ti aba hearia dai bialu hemiria ti abahanda lalu, Ti eberamilidagua ndo ayunde abaleore ibirimidago agua birimibe, lene.

<sup>19</sup> Ani layagola tigua ladai bialu lalu, Nogo sibi haru haga hearume ina talima ibalu hearia Iyibiali mbirame ina biamogo biya. Ina biamogo bialu inanaga ibabi ibugua hambu ngialu inanaga nogo sibi memeru ibabi ibugua dege hambu ngiya, lene.

<sup>20</sup> Ani layagola Yaderohanda ibu wane biaruhondo lalu, Be-e ayu agalidago ibuni abiyabe. Agi bule helalu ibirimi. Tomo ina haru namiya agalidago hondo pudaba, lene.

<sup>21</sup> Ani layagola tigua Mosese hondo puwa tomo ti haru mandagi nene. Tomo nalu Mosese ibu pu nabi o biagoria hearia dungu leneni Yaderola hadali hene. Hadali halu libu howa Yaderohanda ibu wane Sibora Mosese ibu dabu bilo mini. <sup>22</sup> Miyagola wali biagome Mosesenaga igiri taba henene. Taba hanayagola Mosese ibuni manda bialu

\* **2:10:** Mosese inanaga bi lalu, Ibaha howa yamini. ✧ **2:10:** Ab 7.21 ✧ **2:11:** Hi 11.24 ✧ **2:11:** Ab 7.23-28  
✧ **2:15-16:** Ab 7.29, Hi 11.27

hearia ibu dindi tarali bame igiri yango íbu harugoda lo manda buwa ibu igini mini Gesomo wini.†

<sup>23</sup> Mosese ibu uruni bialu heaha ege pu mali pu bigi biyagola Iyibi dindini kini hayago homene. Isaraele wali agali ulu lalu garabaya biabe ale bialu genda hayagoni haabo howa Ngode Datagaliwabehondo biamogo bia lalu hene. Gendaho howa bi layago Ngode Datagaliwabe ibu hale hene. <sup>24</sup> Hale howa ibugua Abarahama Aisaga Yagaba imaruhondo habo nalolene bi lo wigi biniru mitangi bini.✱ <sup>25</sup> Ani mitangi bialu Isaraele wali agali garabaya biabe ale darabi bialu heago hondowa ibugua ti mitangi bialu mandabu hene.

### 3

#### *Ngode Datagaliwabehanda Mosese olenego ogo*

<sup>1</sup> Horo mbirungi Mosesehanda ibu imane Yaderonaga nogo sibi memeru haru halu dindi ko wali agali nahe wiagoria haru bolangua halu pialu Hari Sainai heagoria haru anda pene. Hari Sainai odago Ngode Datagaliwabenaga lowa loma bini hene. Ibu imane Yadero ibu Midiana dindinaga loma binigo mo miaga agali henego ogoninaga nogo sibi haru hene. <sup>2</sup> Odagoriani haru hearia Anduane Homogonaga dahuliyalime ira emene heagonaga yuni maganeruha howa ira hungu datagi helene. Ani biyagola Mosese ibu hearia ira emene dombedene biagoha howa hungu biatagi hayagoyu ira denego hondole ndo dalu hearia de hendene.✱ <sup>3</sup> De ogoni nde abu tobahedago agua binidabe. Ira dombeneha ogoni do mina nabi dalu kagoni aube tobahedago kaware hapara howa hondoliya lo manda bini.

<sup>4</sup> Ani manda buwa kaware hapara hole ibiyago hondowa Ngode Datagaliwabehanda ira hungu biagoha howa olalu, Mosese-o Mosese-o, lalu olene. Ani layagola Mosesehanda ladai bialu lalu, Yao i o ko, lene.

<sup>5</sup> Ani layagola Ngode Datagaliwabehanda lalu, Kaware hapara nahe ogoriani hondoha. I dindi kegoriani Anduane Homogonaga loma bini kegonigo i ge su hadalu wibe. <sup>6</sup> I i mamali Abarahama Aisaga Yagaba imarunaga Ngode Datagaliwabe kogoni, lene. Ani layago hale howa Mosese ibu Ngode Datagaliwabe de handaya helenego gi howa ibunaga dengui yi hene.

<sup>7</sup> Yi hayagola Anduane Homogohanda lalu, Inaga wali agali Iyibi dindini garabaya biabe ale bilo mo miagane karume handabe manga halu mo ko howa kagoni hendedo. Mo ko howa haru haruagoni nahelo gi mia lalu dugu biayuago hale haru. Ti tandaga nalu kagoni ogobiore nara i manda bido. <sup>8</sup> Ani manda buwa ina ti gi mule Iyibi wali agali andaneha kago nahelo gi mialu Iyibi dindi wahalu haru tagira pialu polenaga i dalipe ho ko. Haru tagira puwa dindi henge timbuniwi mbira tomo bayale anda holenenaga dindi homogoore dindi ogoni áyu Kenanali Hidiali Amoroali Pereseali Hibiali Yabusuali imaru hameigini uruni ti kagoria haru pu helolebero, lene. <sup>9</sup> Inaga wali agalinaga dugu biyago hale haore bialu Iyibi wali agalime minu hengeda mbaralo wahalu kago i hondo ko. <sup>10</sup> Ani hendedogo ai Mosese ina Isaraele wali agali Iyibi dindi howa haru tagira pole i áyu polebere, lene.

<sup>11</sup> Ani layagola Mosesehanda Ngode Datagaliwabehondo lalu, I agali mbira abogo ka nalene kogo i alegome kini kagoria puwa Isaraele wali agali Iyibi dindi howa haru tagira ibule au poledabe, lene.

<sup>12</sup> Ani layagola Ngode Datagaliwabehanda ladai bialu lalu, Ina i heba holebero. Isaraele wali agali Iyibi dindi howa haru tagira ibuwa hari o kagoria tigua i mitangi bialu mo dunini howa lotu loleberami. Nde ogonidagua buleberamigo bialu howa ina heneneore biamogo bulenaga pu leneda lalu ogoningi manda bulebere, lene.

† 2:22: Gesomo inanaga bi lalu Tarali. ✱ 2:24: Pig 15.13-14 ✱ 3:2: Ab 7.30-34



<sup>13</sup> Ani layagola Mosesehanda ladai bialu lalu, Ina Isaraele wali agali kagoria puwa tihondo, Tí mamalinaga Ngode Datagaliwabe bamba heneyagome ĭ tí kamiria pu laya handala ibiru, larogola tigua odagoni ibu mini aibe lolebirago ani laragola ai laguadabe, lene.✧

<sup>14</sup> Ani layagola Ngode Datagaliwabehanda lalu, ĭ ĭni Haluhe Henego Haabo Hole Kogoni. Mbiralini ĭ ĭ Haluhe Kogo ibugua ti kamiria pu laya handala ibiru lamibe, lene.✧ <sup>15</sup> Isaraele wali agali lamialu au labe. Tí naga mamali Abarahama Aisaga Yagaba imaru heneyarunaga Anduane Homogo Ngode Datagaliwabehanda ĭ tí kamiria pu laya handala ibiru labe. ĭ mini wiaĭ ai bulebirago o langirugoni. Wali agali dabane mani hararumebi ĭ mini ogoni dege lalu lolebira. <sup>16</sup> Ani lolebirago ĭ pialu Isaraele wali agalinaga haru haga haguane karu mo ngoai howa ti mamali Abarahama Aisaga Yagaba imarunaga Anduane Homogo Ngode Datagaliwabe ĭ hewaria hapani haya lalu lamibe. Ibu ti hemiria ibalu Iyibi wali agalime tihondo bialu kagoni ĭ handaru laya lamibe. <sup>17</sup> Ani hondowa Iyibi dindini howa mo tandaga gibi haragola tandaga naabo halu kamigo nanalimulo haru tagira pole manda biru laya lalu lamibe. Dindi Kenanali Hidiāli Amoroali Pereseali Hibiali Yabusuali urunaga dindi ngagoria haru tagira polebero laya, labe.

<sup>18</sup> Inaga wali agalime ina tihondo bi larego hale holebirago lamibe. Wali agalihondo ani lamialu Isaraelenaga agali haguane hangu haru halu Iyibi dindinaga kini bedagoria puwa ibuhondo agua lamilimu. Anduane Homogo Hiburu wali agalinaga Ngode Datagaliwabe kagome ibuni inahondo hapani haya handala eberama. Ani beramago ina dindi ko wali agali nahaga ngagoria puwa inanaga Anduane Homogo Ngode Datagaliwabehondo mbirale bo delo mulumaya horo tebiru henge ngerebe lalimu, lene. <sup>19</sup> Iyibinaga kini kagome tigua ani laramigo hale halu mo henene halu haru pudaba nalolebiralo manda bidogo menaga hangu hale halimu. <sup>20</sup> Ani nale mini giambe harago hondowa ina inaga hongome mbirale hiriribiru bialu Iyibi wali agali pani merogo hondowa tí pudaba lolebira.

<sup>21</sup> Ani bialu Iyibi wali agali tigua Isaraele wali agali mo yo handabe nahedane hondolebira. Ani biragola inaga wali agali ti giha mbirale mbira nayiore natagira polebira.✧ <sup>22</sup> Ani nabi howa Isaraele wali hangu hangume Iyibi wali anda be mendeha padaruhondo ainde porogo agabi ngolobi silibabi mbira ngia naberego lalu hale holebira. Ani laragola Iyibi wali agalime bu hombedo miragola Isaraele wali agali ti mbirale uruni ti waneiginibi hombedo yalu Iyibinaga dabudabu bibahende ti hombedo yai halu polebira.

## 4

*Mosesehanda manane tara agalime nabigane ale bilo Ngode Datagaliwabehanda hongo minigo ogo.*

<sup>1</sup> Ani layagola Mosesehanda Anduane Homogohondo ladai bialu lalu, Ogoni karu-lapego Isaraele wali agalime ina bi lamerogo hale halu henene lara lowa yu tiga nabi bi lamerogobi hale hoa naholebira. Ani howa Anduane Homogo ĭ heria hapani haya laregoni ke harego waha layagua ina agua laguadabe, lene.

<sup>2</sup> Ani layagola Anduane Homogohanda ibuhondo lalu, ĭ giha o yidegoni agilebe, lene. Ina gewa halimbu yido, ladai bini.

<sup>3</sup> Ani layagola Anduane Homogohanda lalu, Gewa halimbu ogoni dindini ibiraha, lene. Dindini ibira hayagola mo nogombi hene. Nogombi hayagola Mosese ibu gi howa ibida pene. <sup>4</sup> Ibida piyagola Anduane Homogohanda Mosesehondo lalu, Bulu paluwa ereneni minuwa yamia, lene. Ani layadagua ereneni minayagola lone mo gewa halimbu hodai bini. <sup>5</sup> Ani biyagola Anduane Homogohanda Mosesehondo lalu,

Isaraele wali agalime Anduane Homogo ti mamali Abarahamabi Aisagabi Yagababi tinaga Ngode Datagaliwabe kago ibu í heria hapani haya larego henene ani biyadalo hendelo manane ogoni walia habe, lalu lamini.

<sup>6</sup> Ani lowa Anduane Homogohanda Mosesehondo lone lalu, Ínaga gi aga bidegoni pogediha gambira, lene. Mosese ibu hale halu layadagua gi pogediha gambirini. Gambiruwa yamialu hearia gi hamuabi ale pewele hari beraliba ale yamini. <sup>7</sup> Ani biyagola Anduane Homogohanda Mosesehondo lalu, Ai ínaga gi lone pogedi biago ha gambira, lene. Ani layagola gambiruwa yamialu hearia gi hamua ale biniyago nabi bayale tingini maru heagobi dege yamini.

<sup>8</sup> Ani biyagola Anduane Homogohanda Mosesehondo lalu, Isaraele wali agali tigua ína bi lamerego hale halu yu tiga nabiyaguabi nahendene ale hiriribi pigane biago berego hondowa miniha hiri nalayagua nahendene ale mende ogoni berego hondowa henene larida manda bulebira. <sup>9</sup> Ai manane kira ogonilabo berego hondowabi ti miniha hiri nalole bi lameregobi hale habe manga dege hayagua o iba Naili porago hambu yuwa ti de hendelo dindini odope habe. Odope haregola iba ogoni mo darama holebira, lene.

<sup>10</sup> Ani layagola Mosesehanda lalu, Anduane Homogo-o í ndogo pu nalabe. Í wali agali deni howa bi bayuwa nalene ko. Bi uruniale mbira ína lole kogoni lo mandabu henebi ndo ko. Bi bayuwa hege bebenabu nalaruli loa naloalo howa hendore laga biruli, lene. ✧

<sup>11</sup> Ani layagola Anduane Homogohanda Mosesehondo lalu, Wali agalinaga ne hambu wabu heledagoni aiwabe. Wali agalinaga hale mo tuluha bi mo ndibula bigi biaganego aiwabe. Wali agalinaga de mo angalaha mo ndibula bigi biaganego aiwabe. Anduane Homogo ína ani biaga ndoyabe. <sup>12</sup> Ani biruligo í áyu ogoni pu. Bi ogo la lalubi ína dege langulebero, lene.

<sup>13</sup> Ani layagola Mosesehanda bi ladai bialu lalu, Anduane Homogo í ndogo mbirali pu labe, lene.

<sup>14</sup> Ani ladai biyagola Anduane Homogohanda Mosesela keba howa lalu, Aniyagua í hamene Arono Libaiali biago abiyabe, lene. Ibugua bi bayuwa lolebira lo manda bidogo. Arono ibuni í keria ibule áyu ogoni harigani ibalu kago ibugua í hondowa turu holebira, lene. <sup>15</sup> Ína Aronohondo bi ogoale labiya kaba lalu ibuhondo lamibe. Ína libu harume bi lalibulonaga biamogo bialu ogoale bidaba lalubi libu haru biamogo bulebero, lene. <sup>16</sup> Ína bi endeho meregola Arono ibugua wali agali deni howa ína lolenegodagua lolebira. Ína Ngode Datagaliwabehanda lolenedagua ibuhondo ogoale labe lalu bi endeho migi berego yuwa ibugua lamigi bulebira. <sup>17</sup> Ani buleberabigo gewa halimbu ogo yalu pobe ogonime agalime nabiagane ale hiriribi bigi buleberegogo giha ogoni yalu pobe, lene.

### *Mosese ibu Iyibi dindi dai binigo ogo*

<sup>18</sup> Anduane Homogohanda ani lamiya handala Mosese ibuni ibu imane Yadero hearia dai buwa lalu, Imane-o ainde í hameigini biaru Iyibi dindini bu hayago uruni kabe handama pole manda bidogo poabe, lene. Ani layagola Yaderoanda lalu, Nde abini mbiru handa degego pobe, lene.

<sup>19</sup> Mosese pole lo dege Midiana dindini hearia Anduane Homogohanda ibuhondo lalu, Agali í bo wahole lowa tai bialu hayaruni bibahende homai hayago áyu í Iyibi dindi dai bia, lene. <sup>20</sup> Ani laya handala Mosesehanda ibu onebi ibu igini kira biago labobi nogo dongini berelalu ibuni giha Ngode Datagaliwabehanda halimbu yabe layago yalu Iyibi dindi pole pene.

<sup>21</sup> Pole piyagola Anduane Homogohanda Mosesehondo lone lalu, Iyibi dindi anda puwa kini kagonaga deni howa manane walia habelo hongo ngrugo yuwa manane

biaruni bihende biai habe. Uruni berego hondowabi ibu miniha mogo lalu hiri nalelo ibunaga bu mini ina mo giambe holebero. Bu mini mo giambeore harogola inaga wali agali yupe halu pudaba nalolebira. <sup>22</sup> Ani biragola ina kini ogonihondo lamialu, Anduane Homogohanda lalu, Isaraele ibu inaga igini wahene ale ndoyabe, laya labe. <sup>23</sup> Anigo i igini ibuni i mitangi bialu mo dunini howa lotu lelo tagira pialu pela larugo napelolebero larigoni. Ani birigodago ina nde i igini wahenego áyu barogoni laya, lalu lamibe.✧

<sup>24</sup> Ani laya handala hale halu Mosese ibu Iyibi pole pialu hariga handa paliagani palearia Anduane Homogo ibu puwa Mosese bo wahole bini. <sup>25</sup> Ani biyagola Mosese ibuni one Siborahanda are ne gadele mbira muwa ibu igininaga dongone podowa Mosesenaga ge mbarianeni ela hene. <sup>26</sup> Ela halu lalu, Darama ogonime iya mo bimaga kagola i i agalini kegoni, lene. Ani layagola Anduane Homogohanda Mosese ba nabi wahene.

<sup>27</sup> Ogoni bialu heaha Anduane Homogohanda Aronohondo lamialu, Mosese ibirago lola hole dindi ko wali agali nahe ngagoria pobe, lene. Ani layagola dindi ko wali agali nahe biagoria Arono ibu Mosese lola hole Ngode Datagaliwabenaga hari loma bini heagoria pialu hearia Mosese ibiyagola lola howa yu nunu lene. <sup>28</sup> Ani buwa Mosese ibugua Aronohondo bi bibahende Anduane Homogohanda ibuhondo Iyibi dindi dai bia lalu lamiyago lamiai hene. Ani bialu Anduane Homogohanda manane maru Mosese ibugua bibe layagobi lamiai dege hene. <sup>29</sup> Ani bialu Mosese Arono libu haru Iyibi dindi puwa Isaraele wali agalinaga agali haguane hearu mo ngoai hene. <sup>30</sup> Mo ngoaiho helowa Arono ibugua Anduane Homogohanda Mosesehondo bi laminiyago bibahende agali biaruhondo lamiai hene. Lamialu howa Mosese ibugua wali agali bu hearu deni howa agalime nabigane ale manane bibe laya ale bibahende biai hene. <sup>31</sup> Uruni biyago hondowa wali agali biarume heneneda lowa mini mbiraore wiai hene. Wialu Anduane Homogo ibu ti hearia ibalu Iyibi wali agalime ti handabe mangaore howa haru kagoni de handaru laya lalu lamiyagola hale hene. Aniore layago hale howa ti bulu palialu Anduane Homogo mitangi bialu ibu mo dunini howa lotu lalu hene.

## 5

### *Mosese Aronola Iyibinaga kini heago deni pu henego ogo*

<sup>1</sup> Ani bialu halu Mosese Aronola libu Iyibinaga kini hearia puwa ibuhondo au lene. Anduane Homogo Isaraele wali agalinaga Ngode Datagaliwabe kagome lalu, Inaga wali agalime dindi ko wali agali nahaga ngagoria puwa inaga mini yaraga helo áyu ogoni pudaba la, lene.

<sup>2</sup> Ani layagola kini biagome ladai bialu lalu, Anduane Homogo haruagoni aibe. Ina ibunaga bi hale halu Isaraele wali agali pudaba larodago aginagabe. Anduane Homogo o haruadagoni i manda nabidogo Isaraele wali agali pudaba nalolebero, lene.

<sup>3</sup> Ani layagola Mosese Aronolame ladai bialu lalu, Hiburu wali agalinaga Ngode Datagaliwabe ibuni iya hebaria hapani haya. Ani biyago inanaga Anduane Homogo Ngode Datagaliwabe kagohondo mbirale bo delo mule dindi ko wali agali nahaga ngagoria polomaya horo tebiraore henge ngi. Iname anidagua nabirimayagua ibugua agali wai waragorume ina bo home lolebirago, lene.

<sup>4</sup> Ani layagola kini biagome Mosese Aronolahondo lalu, Ogoni wali agalime biabe birago hado wahelonaga hawa larabidago bi nale pudaba. Wali agali garabaya biabe ale bia haga o kamiruni biabe bule áyu ogoni pudaba. <sup>5</sup> Iyibi wali agali kagobi ndo dindi o ngagoniha tí hangu paliame kamigo agua. Ani kamigo howa ai áyu biabe biari holenaga larimidago be, lene.

✧ 4:23: Har 12.29

<sup>6</sup> Ani lowa horo odangiore kini biagome garabaya biabe ale hondo haga Iyibiali hearubi biabe haru haga Isaraele agali hearubihondo lamialu au lene. <sup>7</sup> Ibugua lalu, Isaraele wali agali ege timeni wabilonaga tani yobi meramilidagua yawi namilimu. Tini mbirani taya bima pialu mo yu ibilo nami wahalimu, lene. <sup>8</sup> Ai biabenaga mbira gadia dai buwa ndo ege timeni o wabiralidaguaore bilo bidaba lalimu. Áyu tinaga Ngode Datagaliwabe kagoria puwa mbirale bo delo mule polomaya henge ngi lalu ihondo hale haabo halu kagoni irane biabe mo mirugo emene hameleyane ai maru mo tagoha layadago mo tago harogoni. <sup>9</sup> Agali karuni biabe erekuibiore bilo mo mialu mbirali bame holani. Agalime dugu tindule lama ibuwa o lalu kago hale haganego biabeniore helai halimu, lene.

<sup>10</sup> Ani layagola garabaya biabe ale hondo hagabi Isaraelenaga haru hagabi tigua puwa Isaraele wali agalihondo lalu, Kini ibugua tí ege timeni wabilimulonaga tani yobi ngirulidagua ai nangulebero laya. Nanguleberogo ti ege timeninaga mbira gadu wanahe waberamilidaguaore wabuleberami laya. <sup>11</sup> Ani bulenaga tani biagoni ale tínime tai bima ibaga bialu mo yalu ibuwa bulene ngago ege timeni mbira gadu wanahe daga ngirudaguaore wabuleberami laya, lene. <sup>12</sup> Ani laya handala Isaraele wali agali biaruru Iyibi dindiha pume halu tani yobi biago taya bima pugu pugu bini. <sup>13</sup> Ani bialu Iyibiali garabaya biabe ale hondo haga biarume biabe gendabiore mo bia halu tani yobi kini biagome miyagola wabiyadagua dege tani yobi tinime taya bialu ogonidagua dege wabilo mo bia haabo halu hene. <sup>14</sup> Ani bialu Iyibi garabaya biabe ale hondo haga hearume Isaraeleali tini aria haru helo maru dabo helayaru minu baga bini. Minu baga bialu howa lalu, Tínaga wali agalime ege timeni ala wabiralidagua ndo áyu mani emene wabiragoni agua binidabe tigua langi handadaba, laga bialu baga bini.

<sup>15</sup> Ani bigi biya handala Isaraeleali tini yangone de hondo helo dabo helene biarume kini heagoria puwa genda heagobi agua lamini. Inanaga kini daligaore í kego inahondo tandagabi o bialu kegoni aginaga berebe, lene. <sup>16</sup> Ina tani yobi biago nangi inaneme taya bialu bilimu lariyago lalu ege timeni mbira gadia dai nabi howa waberamilidaguaore bilimu lalu kago ogonidagua karulapedabe. Ogonidagua wa nabirimida lowa ina minu baga bialu kagoni mana liahe kini ínaga agalime inahondo bialu kagoni, lene.

<sup>17</sup> Ani layagola kini biagome ladai bialu lalu, Ogoni ke ti mangani biabe nabulenaga bi larimidago. Tínaga Anduane Homogohondo mbirale bo delo mule poramabe lowa hale harimigo tindule biabe manganiore larimida mandabu kogoni, lene. <sup>18</sup> Bayuwa birimidago áyu ogoni biabe bule dai bidaba. Tani yobi ngirudagua nanguleberogoyu ege timeni waberamilidaguaore wabulene nga, lene. <sup>19</sup> Ani layago hale howa Isaraeleali haru haga biarume ai hiriribioreni harimada lo manda bini. Horo bibahendengi ege timeni mbira gadu wanahe waberamilidaguaore wabilimu layago hale howa ai hiriribini harimada lo manda bima pene.

<sup>20</sup> Pole pialu hearia Mosese Aronola ti ibilonaga hondo hearia pene. <sup>21</sup> Libu hearia puwa tigua libuhondo lalu, Libugua bi o lama ibiribigonime hawa ina belonaga kinibi ibunaga biabe biaga karumebi ina belonaga minu miradagua biribiyago. Libugua o biribigoni Anduane Homogo ibugua hendedago ibugua libu pani ngulebira. Ibugua ina irane agini boabe tabaho hayago ai irane libugua mo miribigoriani geho howa ina bo waholebira, lene.

### *Mosesehanda Ngode Datagaliwabehondo lai lenego ogo*

<sup>22</sup> Ani layagola Mosesehanda Ngode Datagaliwabehondo lalu, Ínaga wali agali mo genda haregoni agonaga berebe. Ína í wali agali uru hearia pu larigoni aginaga laribe. <sup>23</sup> Kini biago hearia puwa ína langiridagua lamule pirungi howa ibugua wali agaliruhondo handabe manga howa kebabi dege biaabo haya. Ani biyago hondowa ína ti mbira biamogo bule manda nabi í handayaho kegoni, lene.

## 6

<sup>1</sup> Ani layagola Anduane Homogohanda Mosesehondo lalu, Ai ina kini ogonihondo bigi berogo hondolebere. Inaga wali agali tagira pialu pelo ininaga hongome helatagi halu pudaba lolebero. Iyibi dindi wahalu pudaba lelonaga ininaga hongome mo bia holebero, lene.

*Ngode Datagaliwabehanda Mosese lone olenego ogo*

<sup>2</sup> Ani lowa Ngode Datagaliwabehanda Mosese lamialu lalu, I Anduane Homogo kogoni. <sup>3</sup> Abarahamabi Aisagabi Yagababi hearia hapani haga birugoni. Ani bialu harugoni i Ngode Datagaliwabe Hongo Haiheore Ko, lalu hapani haga birugoni. Ai ininaga mini baya burugule Anduane Homogo kogoni ti manda bilo mo walia nahene ko. <sup>4</sup> Ina ti baba habo nalolene bi lowialu Kenana dindi ti bai nale haluni hameigini tara dindini kamigoni ti dindi teneore ogoni buhinu halimulo ngulebero lowini ngo, lene. <sup>5</sup> Ai áyu Isaraele wali agaliru Iyibiali tigua tinaga garabaya biabe ale biahe layago bialu howa tandaga howa ulu lalu haabo hayuago i hale haru. Hale howa habo nalolene bi ala lo wirudagoni mitangi biru. <sup>6</sup> Ani mitangi bu kogo ai áyu Isaraeleali lamialu ina au laya lamibe. I Anduane Homogo kogo. Ina ti gi mialu Iyibialinaga garabaya biabe ale bialu kamigoni nahalimulo golope halu pudaba lolebero. Ina ininaga gi hongohe kogo yaraga halu Iyibi wali agali pani hiriribiore mialu ti pele ngulebero, laya labe. <sup>7</sup> Ani bialu ina ti mo inaga wali agali bu hinalu i nde tinaga Ngode Datagaliwabe holebero. Ti Iyibi dindini garabaya biabe ale bialu kamigo nahalimulo golope harogola tagira poramingi i Anduane Homogo tinaga Ngode Datagaliwabe heneda manda buleberami, laya lamibe. <sup>8</sup> Ina ti haru tagira pialu bamba ina Abarahama Aisaga Yagaba imaruhondo dindi ogoni ngulebero lo winidagoriani haru puwa helolebero. Ani bialu dindi odagoni tini dindioreni bu hinu halimulo ngulebero. I Anduane Homogohanda ani laya lamibe, lene. <sup>9</sup> Ani laya handala puwa Mosese ibugua Anduane Homogohanda labe layadagua Isaraele wali agali lamini. Lamiyagoyu Isaraele wali agali biaru biabe erekuibi biaabo hayagome mini dininila bo gangu leagola bi layaruni hale nahene.

<sup>10</sup> Ani bu heagola Anduane Homogohanda Mosesehondo lalu, <sup>11</sup> Áyu ogoni Iyibinaga kini kagoria puwa ibuhondo lalu, Isaraele wali agali Iyibi dindi wahalu pudaba labe laya, lalu lamule pu, lene.

<sup>12</sup> Ani layago lelowa dege Mosesehanda ladai bialu lalu, Isaraele wali agalime ina bi lamirugo hale nahayagoria kini agalidagome ina bi lamerogo hale holebadalo manda nabido. I bi uruniale bayuwa nalagane ko, lene.

<sup>13</sup> Ani layagola Anduane Homogohanda Mosese Aronolahondo lalu, Libugua bi olarogo bilibu, lowa lalu, Áyu ogoni Isaraele wali agalihondobi Iyibinaga kini kagohondobi lamialu, Anduane Homogohanda iyame Isaraele wali agali Iyibi dindi howa haru tagira pialu pilibu laya, lalu lamilibu, lene.

*Mosese Arono libuha howa ho dame bima tagira penego uru*

<sup>14</sup> Yagaba igini wahene Lubene ibugua igini maria hene. Uruni ti mini Hanogo Palu Hesorono Kami imaru hene. Mariali uruni hono winidaruni áyu hameigini mini urunile palu ngagoni. <sup>15</sup> Yagaba igini mende Simionohanda igiri waragaria hono winigo odaruni mini Yamuele Yamini Ohada Yagini Soha imaru hene. Mbira Solo henego ibu Kenana wali igini hene. Ani binigo uruni tigua hono winime hameigini áyu mini urunile palu ngagoni. <sup>16</sup> Yagaba igini tebone Libai ibugua igini tebira Gesono Kohada Merari imaru hene. Igiri tebira uruni tigua hono winime áyu hameigini mini urunile palu ngaruni. Libai ibuni mali handari mbirani pira tebirani karia (137) halu homene. <sup>17</sup> Gesono ibu igini kira mini Libini Simaila henego libugua hono winigome dewaore hoyu lene. <sup>18</sup> Kohada igini maria hene. Amarama Isa Heberono Usile imaru



hene. Kohada ibuni mali handari mbirani pira tebirani tebira (133) halu homene. <sup>19</sup>Merari igini kirali Mali Musila hene. Ani binigo agali uruni bibahende tiha howa Libai hameigini tagira penego ka.

<sup>20</sup> Amaramahanda ibu aba mbalini Yogobede dabu bini. Yogobedehanda igiri kira Mosese Aronola hono wini. Amarama ibuni mali handari mbirani pira tebirani karia (137) halu homene. <sup>21</sup> Isa ibu igini tebira hene. Kora Nebege Sigiri imaru hene. <sup>22</sup> Usile ibubi igiri tebira dege hene. Misaele Elisabana Sidiri imaru hene.

<sup>23</sup> Arono ibu Aminadaba wane Nasono mbalini Eliseba dabu bini. Dabu biyagola wali ogonime Arononaga igiri Nadaba Abihu Eleasa Idama imaru hono wini. <sup>24</sup> Korahanda igiri tebira hono wini. Asiri Elegana Abiasa imaru hene. Igiri tebira urunime hono winime áyu Kora hameigini tu wigi buwa palu ngagoni. <sup>25</sup> Arono igini Eleasa ibugua Pudile wane mbirago dabu bini. Wali odagome Piniasa hono wini. Agali uruni Libai hameigininaga agali haguane haga bini.

<sup>26</sup> Ani binigo agali marudaru helowa Mosese Aronolahondo Ngode Datagaliwabehanda lalu, Isaraele wali agali Iyibi howa haru tagira pudaba, lene. <sup>27</sup> Agali ogonilabo libugua Iyibinaga kinihondo, Isaraele wali agali golope halu pela, lene.

### *Anduane Homogohanda Mosese Aronolahondo bi laminigo ogo*

<sup>28</sup> Anduane Homogohanda Mosese ibu Iyibi dindini hearia bi lamiyangi lalu, <sup>29</sup> I Anduane Homogo kogoni. Iyibinaga kini kagohondo bi ina langirugo damene bibahende lamiai habe, lene.

<sup>30</sup> Ani layagola Mosesehanda ladai bialu lalu, I bi bayuwa nalagaore bi uruni ale laroria liaheore kogoni í manda bidegoni. Kini biago ibugua i aleme bi larogo hale au holobadabe, lene.

## 7

<sup>1</sup> Ani layagola Anduane Homogohanda Mosesehondo lalu, Ina í kininaga deni mo Ngode Datagaliwabe ale bu hini lalu í hamene Arono ibu inaga bi mana latagi haga ale helolebero. Ani berogola Arono ibugua mbiwia hagane lamiradagua kinihondo lamulebira. <sup>2</sup> Ani buleberogo mbirale o bibe langerogo damene bibahende Arono lamiai habe. Arono ibugua kini biagoni lamialu Isaraele wali agali Iyibi dindi wahalu pela lalu lamulebirago. <sup>3</sup> Ani lamiragola kome miniwi tingi howa giambe helo ina kini ogoninaga mini mo giambe helarogola ibugua libunaga bi hale naholebira. ✧ <sup>4</sup> Ina Iyibi dindini mbirale hiriribi dewa bigi berogo hondowabi ibu miniha hiri nalolebira. Ani haabo kagola ina Iyibi wali agalibi kini ogonihondobi pani hiriribiore mialu inaga wali agali damenego bibahendeore dindi ogoni wahalu haru tagira polebero. <sup>5</sup> Ina ininaga gi yaraga howa Iyibi wali agali ti inaga gime balu Isaraele wali agali haru tagira polebero. Ani berongi Iyibi wali agalime i Anduane Homogo henedalo ogonongi manda bulebira, lene. <sup>6</sup> Ani laya handala Mosese Aronolame Anduane Homogohanda bilibu layadagua bialu kini biago hearia puwa bi lalibu layadagua lamini. <sup>7</sup> Ogongingi Mosese ibu mali pira halira (80) Arono ibu mali pira halirani tebira (83) lowa hebingi lamialu hene.

### *Arono ibunaga halimbu yinigo ogo*

<sup>8</sup> Anduane Homogohanda Mosese Aronolahondo lalu, <sup>9</sup> Kini agali ogonime libuhondo lalu, Libugua bi o larabigoni henededa loliyayagua agalime nabiagane ale manane mbira bidaba layagua manane walia holenaga Arono ibunaga halimbu biago libu pialu howa mo ya labe. Halimbu ogoni kini bedagoria pialu ibu deni howa ibira haragola halimbu ogoni mo nogombi bu hinulebira, lene. <sup>10</sup> Ani laya handala Mosese Aronola libu kini biago hearia puwa Anduane Homogohanda bilibu layadagua bini. Arono ibugua ibunaga halimbu biago kini biagobi ibunaga biabe biaga hearubi tinaga deni yu ibira hayagola halimbu biago mo nogombi bu hinini. <sup>11</sup> Ani biyago hondowa kini

✧ 7:3: Ab 7.36

biagome ibunaga agali miniwi gamugamu biaganeru ti nde tininaga halimbu yiniyago ibira hayagola ogolabome biyadagua dege bini. <sup>12</sup> Ti nde tininaga halimbu yiniyaru dindini ibira hayagola bibahende mo nogombi hai hene. Ani biyagoyu Arononaga halimbu nogombi biagome nogombi marunaga biago bo mbedogo biai hene. <sup>13</sup> Ani biyagola hondowa dege kini biago ibu dogo howa Anduane Homogo ibugua Mosese Aronola libugua bi lamerabigo hale naholebira layadagua dogo tagiho hene.

### *Tandaga bulene tara tarame Iyibi bopaya binigo ogo*

<sup>14</sup> Ani bu heagola Anduane Homogohanda Mosesehondo lalu, Kini biagonime mine gibiore halu Isaraele wali agali yupe halu pudaba nalole kagoni. <sup>15</sup> Ani bu kago yawi egerebagi kini ogoni uyu iba Naili poragoria dalipe halu polebirago lola hole pobe. Halimbu mo nogombi hene biago yalu puwa ibu maha ibilo í ala puwa unu iba angeni pu habe. <sup>16</sup> Pu keria ibiragola au labe. Anduane Homogo Hiburu wali agalinaga Ngode Datagaliwabe kagome lalu ibunaga wali agalime ibu mitangi bialu mo dunini howa lotu lole dindi ko wali agali nahegoria pelo pudaba labe layagoni. Ani layago hale howa pudaba nalole hahowine dege áyu haabo kegoni. <sup>17</sup> Mosese ibugua lalu, Ai Agali Haguane-o Anduane Homogohanda lalu, Ina bigi berogoria hondowa ibu ogo heneda hondole hondo habe, laya. Ina halimbu yidogome iba o poragoni barogola iba ogoni darama bulebira. ✧ <sup>18</sup> Wena bibahende homai halu iba ngu timbuniore biragola Iyibi wali agali ti iba nabe nahe holebira, lalu Mosesehanda lene.

<sup>19</sup> Anduane Homogohanda Mosesehondo lalu, Arono lamialu ibugua halimbu biago mo yalu puwa Iyibi dindini iba porarubi iba ganaha bedarubi iba birape hene bedarubi iba lenego bibahendeore halimbu ogonime ya angua hai habe. Ani ya angua haragola iba bibahende darama bia halu dindi bibahendeni darama biame howa iba nole beha hambu ngarubi ira guabiniha hambu ngarubi bibahende darama biai holebira, lene.

<sup>20</sup> Ani layagola Mosese Aronolame Anduane Homogohanda bilibu layadagua bini. Libugua kini agali biagobi ibunaga biabe biaga biarubi deni howa Arono ibugua ibunaga halimbu biago yaraga howa iba Naili bene. Ani biyagola iba Nailibi iba maru berearubi bibahende darama biai hene. <sup>21</sup> Ani darama biyagome wena ibaha bereago bibahende homa hai hene. Ani biyagola wena ngu timbuniore biame hayagome iba nabe naheyagola wahene. Ani bialu Iyibi dindi bibahendeni iba berearu darama biame hene. <sup>22</sup> Ani biyagola kini biagonaga gamugamu biaga hearumebi Aronohanda biyadagua dege tininaga gamugamume ani bini. Ani biyagola kini biago ibu bu mini giambeho hayagobi dege haabo hene. Anduane Homogohanda ani bulebira layadagua kini biagome Arono Moseselame layago hale holene hame nalene. <sup>23</sup> Ani nale howa bu mini giambeore halu ogolabome bi layago hale nahole lalu erembira mialu ibu andaga dai bini. <sup>24</sup> Ani bialu bibahende darama biai hayagome iba nolene nabereyagola Iyibi wali agalime iba Naili biago angeange iba berelo uli wama ibaga bini.

<sup>25</sup> Ani bialu iba Naili iba marudarunibi darama dege bu wiaabo heane horo karu pene.

## 8

### *Yago ibilenego ogo*

<sup>1</sup> Ani buwa Anduane Homogohanda Mosesehondo lalu, Kini biago karia puwa Anduane Homogohanda ibunaga wali agalime ibu mitangi bialu mo dunini howa lotu lelo tagira pialu pelabe laya lamibe. <sup>2</sup> Olarogo hale halu nabirayagua ina í pani ngialu í dindi ogoni yago degeme dungume helolebero laya lamibe. <sup>3</sup> Iba Nailiha yago biru toore lalu birulene henge nawidagola í andagani ibalu í paliagahabi í tamunibi birame halu ínaga biabe biaga karunaga andaganibi ínaga wali agali bibahendenaga andaganibi yago birame halu tomo dawaganehabi tomo dawa wiagane behabi biru tolotagi holebira

✧ 7:17: Mo 16.4

laya lalu lamibe. <sup>4</sup> Ani bialu porabu daga daga buwa ini birame hama pialu inaga wali agalini birame halu inaga biabe biaga karu bibahendeni birame hai holebira laya lamibe, Anduane Homogohanda lene.

<sup>5</sup> Ani lowa Anduane Homogo ibugua Mosesehondo lalu, Arono lamialu ibunaga gi dogo lowa halimbu biagome iba porarubi iba ganaha bedarubi iba goreyane timbuni bedarubi iba bibahende bedago ya angua hai ha labe. Ani biragola yago bibahende tagira ibalu Iyibi dindi bibahende yago birame holebirago helo ani bia labe, lene. <sup>6</sup> Ani layadagua Aronohanda ibunaga halimbu biagome iba bereago bibahende ya angua hai hayagola yago dewaore tagira ibalu Iyibi dindi bibahendeni yago birame hene. <sup>7</sup> Ani biyagola kini biagonaga gamugamu biaga biarume nde tininaga gamugamu yiniyago biyagola lone yago ibaha berearu dindini haru ibu berelene.

<sup>8</sup> Ani biyagola kini biagome Mosese Aronola ibilo oladaba lowa ibiyagola ogolabohondo lalu, Anduane Homogohondo bi lalu yago o biru ngago mo erebaha lalibu. Mo ereba haribiyagua libunaga wali agalime Anduane Homogohondo mbirale bo delo milo ti pudaba lolebero laya lamilibu, lene.

<sup>9</sup> Ani layagola Mosesehanda ladai bialu lalu, Ogoni bayale Anduane Homogohondo inaga bi laholene turuhu kogo la holebero. Ani buliyago ogoni inagabi inaga biabe biaga karunagabi inaga wali agali bihendenagabi Anduane Homogohondo bi laholeberogo horo ogongi lahabe lalu pongo dege ngi. Ani laharogola Anduane Homogohanda yago o bedaruni bibahende mo ereba haragola mbira nabere iba Nailiha dege birulebira, lene.

<sup>10</sup> Ani layagola kini biagome ladai bialu lalu, Yawi bi ogoninaga lahabe, lene.

Ani layagola Mosesehanda ladai bialu lalu, Ina bibe laregonidagua buleberogo Anduane Homogo ibugua hale halu birago handaregola inanaga Anduane Homogo Ngode Datagaliwabe ale mendeali nahedane hondolebere. <sup>11</sup> Ani buleberogo ayu ibi inaga biabe biaga karubi inaga wali agali bibahende karubi yago o biru ngaruni yamiragola mbira nabere iba Nailiha dege birulebira, lene. <sup>12</sup> Ani lalu Mosese Arono libu kini biago berelalu puwa Mosese ibugua Anduane Homogohanda yago ibu berelearu yamilonaga ibuhondo bi lene. <sup>13</sup> Ani lamiyagola Anduane Homogohanda hale halu Mosesehanda layadagua bialu yago anda tamuha berearubi pabe tamuha berearubi mabuha berearubi bibahande homai helene. <sup>14</sup> Homa payapayabu wiago Iyibi wali agali tinime hilu mo mogo buwa alugumu ngelaga bima piyaru togo biyagola ngu hiriribiore biame hene. <sup>15</sup> Ani biyagola kini biagome handalu hearia yago bereago bibahende homahi layiyago hondowa ibu bu mini lone giambe hodai bini. Anduane Homogohanda Mosese Aronola lamialu bu mini giambe howa libunaga bi hale naholebira layadagua ani bini.

### *Hinabibi ale ibilenego ogo*

<sup>16</sup> Ani biyagola Anduane Homogohanda Mosesehondo lalu, Arono lamialu ibunaga halimbu biagome dindini ba labe. Ani baragola Iyibi dindi bibahende ha abalu wima pedago mo hinabibi bu hinulebirago, lene. <sup>17</sup> Ani layadagua lamiyagola Aronohanda ibunaga halimbu biagome dindini bene. Bayagola Iyibi dindi bibahendeni abalu wiame heago bibahende mo hinabibi bu hinayagola nogo wali agalila bibahendeore hinabibime mbulope howa dugu neme hondole ndo hayume hene. <sup>18</sup> Ani biyagola kininaga gamugamu biaga biaruru tiguabi tinaga gamugamume hinabibi tagira ibu berelole bialu hearia ani nabibeheore hene. Ani buwa hinabibi birame howa nogo wali agalila hinabibime yalu hanalu bini. <sup>19</sup> Ani biyagola kininaga gamugamuyi biarume kinihondo lalu, O biradagoni hinabibi o biru ngaruni Ngode Datagaliwabehanda ibuoreme ibilayadago, lene. Ani layagola kini biago ibu bu mini giambeore halu abale Anduane Homogohanda Mosese Arono libunaga bi hale naholebira layadagua hale nahe mini giambe hatagiho hene.✧

### *Bunguna ibilenego ogo*

<sup>20</sup> Ani heagola Anduane Homogohanda Mosesehondo lalu, Yawi egerebagiore kini biago unu iba biagoha polebirago lola hole pobe. Lola howa Anduane Homogohanda au laya lamibe. Inaga wali agalime i mitangi bialu mo dunini howa lotu lelo golope halu pelabe laya lamibe. <sup>21</sup> Ani napelolebero lariyagua áyu langerogo ina í pani lone ngialu bunguna í kegoriabi inaga biabe biaga biaru kagoriabi inaga wali agali kagoriabi ibilolebero. Iyibi wali agalinaga anda bibahendeha bunguna birame halu Iyibi dindi bibahende bunguname birame helolebero laya lamibe. <sup>22</sup> Ti pani ani ngialu ai inaga wali agali kagoria Gosene dindini bunguna mbira birulani hondolebero. Ina ogonidagua buleberogo irane Anduane Homogo ina dindi ogoriani biabe bialu kagonidalo handalimulonaga ani bulebero. <sup>23</sup> Ani buleberogo ina inaga wali agalila inaga wali agalila mo tale buwa tu ngelolebero. Bi olarogonidagua yawi buleberogo handabe laya lamibe, lene. <sup>24</sup> Ani layagola kini biagome bu mini giambeho haabo hayagola Anduane Homogohanda bunguna gibiore mberane tidu yalu ibuwa kini biago andaga heagoha haeala anda hene. Kini biagonaga biabe biaga hearu andagahabi ogonidagua dege bini. Ani bialu Iyibi dindi lenego bibahendeoreha bunguname mo ngubia hene.

<sup>25</sup> Ani biyagola kini biagome Mosese Aronola ibilo olowa ibiyagola ibugua libuhondo lalu, Tígua Iyibi dindini dege mbirani puwa tínaga Ngode Datagaliwabhondo mbirale bo loma bu delole pudaba, lene.

<sup>26</sup> Ani layagola Mosesehanda ladai bialu lalu, Ogonidagua bulene emene karula napolebirago irane ina Isaraele wali agalime nogo tara tararu Anduane Homogo inanaga Ngode Datagaliwabhondo bo delo meramagome Iyibi wali agali ti mo genda holebira. Iname ti de hendedaore nogo tara uruni delarimayagua tigua ina handabe manga howa ina toleme bo home lolebira. <sup>27</sup> Ani bulebirago ina horo tebiruni dindi ko wali agali nahegoria puwa Anduane Homogo inanaga Ngode Datagaliwabhondo mbirale bo lomabu delo muleberama. Ibunime inahondo ani bilimu lenedagua buleberama, lene.

<sup>28</sup> Ani layagola kini biagome lalu, Karulapego tígua Anduane Homogo tínaga Ngode Datagaliwabhondo mbirale bo lomabu delo mule dindi ko wali agali nahegoria pudaba loleberogoyu kaundiaore napilimu. Ani bialu tíguabi Anduane Homogohondo inaga bi lahalimu, lene.

<sup>29</sup> Ani layagola Mosesehanda ladai bialu lalu, Áyu o kabago halu puwa ina Anduane Homogohondo bi lalu, Yawi bunguna o biru ngaruni yamiai habe laguago. Ani bia buleberogo áyu ina ina lone mo guya halu inanaga Anduane Homogohondo mbirale bo lomabu delo mule napudababe lone naloleberegoni, lene.

<sup>30</sup> Ani lalu bialu Mosese ibu kini biago helalu puwa Anduane Homogohondo bi lene. <sup>31</sup> Mosesehanda bi ani layagola Anduane Homogohanda bi layago hale halu bunguna bibahende kini andagani birayarubi ibunaga biabe biaga biarunaga andagani birayarubi ibunaga wali agali biarunagabi mbira yu wanahe ereba haiore hene. <sup>32</sup> Ani biyagola kini ibu mini giambe halu Isaraele wali agali wahalu pudaba, nalene.

## 9

### *Nogo tara tararu homai henego ogo*

<sup>1</sup> Ani mini giambe ho wiaabo hayagola Anduane Homogohanda lalu, Áyu kini biago karia puwa ibuhondo ogodagua lalu, Anduane Homogo Hiburu wali agalinaga Ngode Datagaliwabehanda ibunaga wali agalime ibu mitangi bialu mo dunini howa lotu lole pelo pudaba labe laya, lole pu. <sup>2</sup> Áyu ogonibi lone mini giambeho wiaabo dege hariyagua <sup>3</sup> ina í pani ngialu inaga nogo tara tara hinideruni bibahendeni warago hiriribi tara mbira ibilolebero. Ani ibilarogola nogo hosibi dongibi kamelebi bulumagabi sibibi

memebi nogo lenego bibahende warago ogonime bo homo lai holebira laya, lamibe. <sup>4</sup>Inime dabalu Isaraele wali agalinaga nogo ogoda Iyibi wali agalinaga nogo ogoda lowa mo tale bialu Isaraele wali agalinaga nogogo mbira homolani hondolebero. <sup>5</sup>Anduane Homogo inime horo yawi biabe ogoniore bule ngo laya labe, lene.

<sup>6</sup>Mosesehanda ani lamiyagolabi kini biago ibu mini giambeore hene. Ani biyagola egerebalene Anduane Homogohanda bulebero layadagua bialu Iyibinaga nogo bibahende homai helene. Isaraele wali agalinaga nogo mbiraorebi heba nahomene. <sup>7</sup>Ani biyagola kini biagome maru hearuhondo hale halu Isaraele wali agalinaga nogo homayiyabe nahomeyabe lowa hale halu hearia tigua lalu, Mbiraorebi nahomeoreya, lada bini. Ani biyiyago hondowabi kini biago ibu bu mini giambeoreho haabo hene.

### *Moge Bilenego ogo*

<sup>8</sup>Ani biyagola Anduane Homogohanda Mosese Aronolahondo lalu, Libugua anda mbira ege timeni hirule ira delaradagoha puwa be abalu ogoriani bu wulebirago libu gi tahe labolabo dugu yalibu. Dugu yalu puwa kini biagonaga deni pu howa Mosese ina be abalu ogoni uyu hariha haealo baraga habe. <sup>9</sup>Baraga haregola be abalu ogoni Iyibi dindi bibahendeha pu yulume halu abale ti taulome henego yalu yaga laradagua bulebira. Ani buwa be abalu ogoni nogo wali agalila bu kagoria ibira ibira bialu tinginini ela haragola moge buwa mani togodalumu mo tiwa howa nogo wali agalilanaga tinginini nalu guabima anda polebira, lene. <sup>10</sup>Anduane Homogohanda ani lamiya handala puwa libugua be abalu wiago dugu yalu puwa kini biagonaga deni pu hene. Pu howa Mosesehanda be abalu dugu yayago uyu hariha baraga hene. Baraga hayago ibira halu nogo wali agalilanaga tinginini ela hayagola moge buwa mani togodalumu tiwa biame hene. <sup>11</sup>Ani biyagola kini biagonaga gamugamuyi biarubi Mosese hearia ibabe nahe mogeme bogopai layagola andaga wiaabo hene. <sup>12</sup>Ani biyagolabi Anduane Homogohanda kini biagonaga bu mini mo giambeore hayagola Anduane Homogohanda Mosese Aronolahondo lalu kini ogonime libugua bi larabigo hale naholebira layadagua hale nahene.

### *Dalu dindiguni ibilenego ogo*

<sup>13</sup>Ani biyagola Anduane Homogohanda Mosesehondo lalu, Yawi egerebagiore kini biago karia puwa Anduane Homogo Hiburu wali agalinaga Ngode Datagaliwabe kagome lalu, Inaga wali agalime i mitangi bialu mo dunini howa lotu lelo pelabe laya, lamibe. <sup>14</sup>Ai mini giambeo halu napelole lalu hariyagua ayu inaga biabe biaga karubi inaga wali agali karubi hangu pani mule ndo ina inibi heba pani ngulebero. Dindi bibahendeni mbirali i ale nahedane handabelo walia holebero laya, lamibe. <sup>15</sup>Ina ininaga gi yaraga howa warago mbira ibiledole ibi inaga wali agalibi bibahende warago ogonime bo paya biragola bibahende homaiore kamile. <sup>16</sup>Ani nabi inaga hongo ihondo walia harogola dindi bibahende ngaruha bu karume i hongohe ogoni ka lowa inaga mini loyogo lelonaga i ba nabi habelo waharugoni. <sup>17</sup>Ani birugo bilowa i mine halu dogatagi howa inaga wali agali napelolebero lalu kegoni. <sup>18</sup>Ani bialu kegonigo ai hale habe. Yawi ogodaguaore haragola dalu dindiguni gibiore ala Iyibi dindini naibinidagua yawi ibilolebero. <sup>19</sup>Ani buleberogo nogo walila minu kabu bialu tamuni hangu payanda habe. Mbirale mbirale tagirani ngelama pedamigo bibahende tamuha mo baanda hai halimu. Nogo tara tarabi wali agalibi tagirani tuha ndo kago dalu damuyu karia dindiguni ogonime bo baya biragola homai holebira laya, lamibe lene.

<sup>20</sup>Mosesehanda puwa anidagua lamiyagola kini biagonaga biabe biaga biarume Anduane Homogohanda anidagua layiyago hale howa ti gi hene. Gi howa ti tinaga garabaya biabe ale bia haganebi nogobi anda tamuha haru anda piai hene. <sup>21</sup>Ani



biyagola maru ti Anduane Homogohanda o bulebero layadagoni ani bila lowa hada hole bialu tinaga garabaya biabe ale bia hagabi nogobi tagirani helowa ti embedaho hene.

<sup>22</sup> Ani bu hearia Anduane Homogohanda Mosesehondo lalu, Inaga gi uyu hariha yaraga habe. Ani beregola dalu dindiguni Iyibi dindi bibahendeni ibume halu wali agalibi nogobi tomo mbirale mbirale mabuni karubi bibahende damiai holebirago, lene. ✧ <sup>23</sup> Ani bulebira layagola Mosesehanda ibunaga halimbu biago uyu hariha yaraga hene. Yaraga hayagola Anduane Homogohanda hariha howa dalu dindigunibi hari dababi gibiore dindi tawa balu ibilene. <sup>24</sup> Anduane Homogohanda dalu dindiguni heba ibilalu harini kulu mege lalu hari dabaru tulade lalu gibiore buyu pu ibu daibu bilene. Iyibi dindini ala hama ibinidagoriani dalu dindigunibi naibinidaguaore odangi ibilene. ✧ <sup>25</sup> Ibalu dalu dindiguni heba biagome Iyibi dindi bibahende wali agalibi nogobi tagirani haga biarubi dindigunime bo mbala pialu damia dege bialu damu tongolomi lene. Mabuni tomo hengearu bibahende dindi heba bapara helalu ira hearu bibahendeore podai helene. <sup>26</sup> Iyibi dindini ani bialu heagola Gosene dindi Isaraele wali agali ti heagohayagi dege dalu dindigunibi mbira hondole ndo howa hada payabu hene.

<sup>27</sup> Ani bialu heagola kini biagome, Ai Mosese Aronola hondo pudaba, lene. Ogolabo ibiyagola ibugua lalu, Ai koore bialu harudane hendedogo Anduane Homogo ibugua mana bayale bialu heagola ibi inaga wali agalirubi iname ko bialu harimadane áyu hendedogoni. <sup>28</sup> Ani birimadago ai dalu dindiguni hari dabala gibi biagome ina bowa kago ainde harula lalu Anduane Homogohondo bi lamilibu. Ina heneneore buledagua larogo dalu ogoni tohayagua ti inaga dindi ogoria holene nawigo pudaba lolebero, lene.

<sup>29</sup> Ani layagola Mosesehanda ladai bialu lalu, I anda dewa buhe ogo yu wahalu tagira pialu ina inaga gi yaraga howa Anduane Homogohondo bi lolebero. Ani berogola dalu o ibiragoni naibi tohalu dindiguni hari dabala o biragonibi nabulebira. Dindi timbuni ogo bibahende Anduane Homogo ibunagada lo manda bibelonaga ani bulebira, lene. <sup>30</sup> Ani bia bulebiragoyu ibi inaga biabe biaga kamirubi tigua Anduane Homogo Ngode Datagaliwabe hondowa gi nahe dege kamigoni manda bido, lene.

<sup>31</sup> Dalu dindiguni gibi ibiyagome ira emene dewa bu henego dambialu ogoni aga wabiaga pu mini palagasi bu henego urunibi ladi ale mini bali dewa hongo winigo urunibi bibahende mo koore hene. Balidaru bogabi dolenengi ai palagasi ira emene dambialu aga wabiaga hongone anda halu heaorego uruni bibahende dindigunime dindi heba bapara helene. <sup>32</sup> Widi tomo nagane do wiaru dege mani boga biaganegome widi mo ko nahene.

<sup>33</sup> Mosese ibu kini biago helalu anda dewa buhe biagoha howa tagira pialu pene. Puwa ibunaga gi hariha yaraga howa Anduane Homogohondo bi lene. Ani layagola dalubi dindigunibi hari dababi bibahende biyago abale nimulo mini. <sup>34</sup> Ani biyago handayagola kini biagome lone ko bini. Ibuguabi ibunaga biabe biaga hearumebi bu mini giambe halu dogatagiho ala haralidagua hene. <sup>35</sup> Anduane Homogohanda Mosese Aronolahondo ala lamialu kini biago bu mini giambe howa Isaraele wali agali pudaba nalolebira abale layadagua nalene.

## 10

### *Pagaya ale ibilenego ogo*

<sup>1</sup> Kini biagome ibu mini ani giambeho heagola Anduane Homogohanda Mosesehondo lalu, Ai kini biago hondo pobe. Ina kinibi ibunaga biabe biaga karubi bihendenaga mini mo giambe halu helarugo. Uruni ti de hendelo ina agalime nabibehe bigi bulenaga ani mo giambe haru, lene. <sup>2</sup> Ani bialu tiguabi tinaga waneiginirubi aguanerubi tigua hono wima poraruhondo ladalidali bialu Anduane Homogohanda Iyibi wali agali agua bialu

mo luluya halu mo taga haya lalu lamigi buleberami. Tí bibahendemebi i Anduane Homogoore kagoni lo manda buleberami, lene.

<sup>3</sup> Ani laya handala Mosese Aronola kini biago hearia puwa ibuhondo lalu, Anduane Homogo Hiburu wali agalinaga Ngode Datagaliwabe kagome lalu, Ina inaga bi mo wa dege howa doge dege halu kene lu agua hole kebe. Inaga wali agalime ini mitangi bialu mo dunini howa lotu lelo ti tagira pialu pelabe, laya. <sup>4</sup> Ani nabi napelole lalu haabo hariyagua o yawi inaga dindini pagaya ale birame helo ibilolebero, laya. <sup>5</sup> Pagaya aleme dindini biru dungume kagola dindi de handabe nahe holebere, laya. Ani bialu pagaya ale urunime tani irabi dalu dindiguni biagome ba nabi yu wahayaru namaro bulebira, laya. <sup>6</sup> Birama ibalu kini i andaga tamuhabi birame halu inaga biabe biaga karu andagahabi birame halu Iyibi wali agali bibahende andagahabi ani dege biru tolome holebira. Ala tinaga mamali hama ibiyarumebi áyu tinimebi nahendenegobi koorene ko ogoni hondoleberami laya, lene. Ani lalu bialu Mosese ibu beregedalu kini biago erembira mialu tagira pene.

<sup>7</sup> Ani tagira piyagola kininaga biabe biaga biarume kini biagohondo lalu, Agali ogonime ina genda hangu mo ngialu kagoni. Ani ngialu haabo helole ke agini. Harugo Isaraele agali hangume Anduane Homogo tinaga Ngode Datagaliwabe mitangi bialu ibu mo dunini howa lotu lole pelo agali hangu pudaba la. Áyu Iyibi mo koore haro lalu o kagoni i nahendedebe, lene.

<sup>8</sup> Ani layagola nde kini biagome Mosese Aronola hondo pudaba lowa ibiyagola ibugua libuhondo lalu, Tigua Anduane Homogo tinaga Ngode Datagaliwabe mitangi bialu ibu mo dunini howa lotu lole polene karulapego poleberami. Pu pole dege polebirago ibuni ai polebirabe, lene.

<sup>9</sup> Ani layagola Mosesehanda ladai bialu lalu, Ina bibahende poleberama. Inanaga waneiginibi wali agali wahebi heba poleberama. Inanaga waneiginibi haru halu nogo sibibi memebi bulumagabi haru hai holeberama nde inanaga Anduane Homogohondo mbirale bo lomabu delo mialu ibu mitangi bialu mo dunini howa lotu loledago ani buleberama, lene.

<sup>10</sup> Aniore layagola kini biagome lalu, Be-e o Anduane Homogo mini lalu larogo tinaga one waneiginiru haru pudaba naloleberoore. Ai tindule ti hameigini paluenaga ina bodai bule o harimidane hendedogoni. <sup>11</sup> Ani birimidago napolego ti agali hangume pialu Anduane Homogo mitangi bialu ibu mo dunini howa lotu lole wirimidadagua lole pudaba, lene. Ani lowa kini biagome ibunaga biabe biaga biaruhondo lalu, Mosese Aronola i deni naholego tagira bo batagi hadaba, layagola tagira bo batagi hene.

<sup>12</sup> Ani biyagola Anduane Homogohanda Mosesehondo lalu, Inaga gi dogolo amu halu Iyibi dindi ya anguaha. Ani beregola pagaya ale ibulebirago ibilo. Pagaya urunime ibalu mbirale bibahende andaho kago damene no mundu lalu dalu dindiguni biagome ba nabi yu wahene karu tigua namaro bulebira, lene. <sup>13</sup> Ani layagola Mosesehanda ibunaga halimbu biago yaraga hene. Yaraga hayagola Anduane Homogohanda puyabu ni ibiragohayagi howa puloyu tagira ibilowa pu lame dege halu heane alendo halu mbiragabi pu lame dege halu gao lene. Gao lopaya biyagola pagaya ibu birume hearia hendene. <sup>14</sup> Pagaya uruni ti tidu yalu ibuwa haealo paya bialu Iyibi dindi bibahendeni birame hene. Pagaya ale wabuni tidu yalu ibuwa ibira haga binidadagua ala nabinigo manibi ogonidagua nabulebiraore.\* <sup>15</sup> Tidu yalu ibalu mberabu pehaga bialu dindi bibahende biru dungume hayagola pagayame dindi bibahende mindi bu gimbu bini. Bira gimbu buwa nagimbu biahini pearia dindigunime yu wahearuru tigua namaro bialu irani ira lini dearubi heba do nai hene. Mbirale ira yuni tani bolange yunibi mbira yu waholedago naholeore. Iyibi dindini anda haga heago damenagonaga yuni ti dondolo naiore hene.

\* 10:14: Mo 9.2-3

<sup>16</sup> Ani biyago hondowa kini biagome abaleore Mosese Aronola ibilo hondo pudaba lowa ibiyagola ogolabohondo lalu, Ai ina Anduane Homogo libunaga Ngode Datagaliwabehondobi libuhondobi koore birugoni. <sup>17</sup> Ai harugo halu mbira áyu ogo dege inaga ko ogoni domalu Anduane Homogo libunaga Ngode Datagaliwabehondo bi lalu ina balu home lolenaga pani hiriribi o ngidagoni mo yu erebaha lamilibu, lene. <sup>18</sup> Ani laya handala Mosese Aronola libu puwa Anduane Homogohondo bi lene. <sup>19</sup> Ani layagola Anduane Homogohanda puyabu biago mo aribia halu namu ni paliagahayagi howa pulo dai bilene. Ani pulo dai biyagome pagaya ale biru wiaruni minu yalu yaga lalu Iba Daramabi bereagoha yalu anda pelene. Ani biyagola pagaya o biru wiyaruni aria mbira mbiraorebi heba Iyibi dindini yu wanahene. <sup>20</sup> Ani biyago bilowa dege Anduane Homogohanda kini biagonaga bu mini mo giambe hayagola ibugua Isaraele wali agali pudaba nalene.

### *Aruma helenego ogo*

<sup>21</sup> Ani buwa Anduane Homogohanda Mosesehondo lalu, Inaga gi uyu hariha yaraga habe. Ani beregola aruma dumbilihinu ngane Iyibi dindi bibahendeni aruma hodambi holebira, lene. ✧ <sup>22</sup> Ani layagola Mosesehandaibunaga gi hariha yaraga hayagola aruma dumbilinime timulope hayagola Iyibi dindi bibahendeni aruma ndibulope ho wiane horo tebiru pene. ✧ <sup>23</sup> Iyibi wali agalime tini handaya haga bibe nahe wini. Aniyagola mbirali tagira nape bibahendeore tini andagani birai hene. Isaraele wali agali ti heagoha dege wáni hene.

<sup>24</sup> Ani biyagola kini biagome Mosese hondo pudaba lowa ibiyagola lalu, Ai tí tínaga Anduane Homogo mitangi bialu ibu mo dunini howa lotu lole polene karulapego pudaba. Tínaga one waneiginibi tını heba piai halu ai tínaga nogo sibiru memeru bulumagaru dege helalu pudaba, lene.

<sup>25</sup> Ani layagola Mosesehanda ladai bialu lalu, Aniyagua ina Anduane Homogo inanaga Ngode Datagaliwabehondo nogo bo lomabu delo mulumayanaga ina bo ngulebedagoni. <sup>26</sup> Ndo ina inanaga nogo lenego bibahendeore haru hai holeberama. Homane mbiraorebi mbira hadai nabiloleberama ndobe. Inanaga nogo inaneme dabalulu inanaga Anduane Homogohondo bo mibehe ogoda lowa muleberama. Nogo ogoalego bo mule wiyada uyuna Anduane Homogo mitangi bialu ibu mo dunini howa lotu laramagoria pu howa hondolene wulebira, lalu lamini.

<sup>27</sup> Ani lamiyagolabi Anduane Homogohanda kini biagonaga bu mini mo ndibu layagola giambeho tagiho howa Isaraele wali agali pudaba nalene. <sup>28</sup> Bu mini giambeho howa ibugua Mosesehondo lalu, Í ì deni nahe pu. Mani o ì kogoria bilingi bolanguabu holeni. Inaga denguiore mani nahondolego wahalu pobe. Inaga dengui lone handaruyagua handarongiore yania howa bo waholiya habe, lene.

<sup>29</sup> Ani layagola Mosesehanda ladai bialu lalu, Ogoni tiga tiga larigo. Ina inaga dengui lone nahondolebereore ndobe, lene.

## 11

### *Igiri wahene dege dege homama polebira, lenego ogo*

<sup>1</sup> Ani lalu bialu pu heagola Anduane Homogohanda Mosesehondo lalu, Ina Iyibinaga kini biagohondobiibunaga wali agalihondobi pani halu mbiraore hangu miamaro bulebero. Ani berogola ibugua ai ti wahalu pudaba lalu ti mo hibilabala howa ibu dindini naholego abale tagira pialu pudaba lowa ti bo batagi holebira. <sup>2</sup> Ani bulebirago ai áyu Isaraele wali agali bibahende lamialu, Iyibi wali agali tí baba mandagi handa ai nai paliaga karuhondo ai poramago muni ngolobi silibabi mbira ngidaba lalimu, labe. <sup>3</sup> Anduane Homogohanda Isaraele wali agali mo yaragaho helayagola Iyibi wali

✧ 10:21: Man 28.29 ✧ 10:22: Iba 105.28, Mo 16.10

agalime Isaraele wali agali mo yo handabe nahe hene. Ani bialu kininaga biabe biaga hearumebi wali agali bibahendemebi Mosese agali gibiore kagoni lowa ibuha handadagaho hene.

<sup>4</sup> Ani bu henego Mosesehanda kini biagohondo lalu, Anduane Homogohanda lalu, Áyu mbiraga mbi hanuni haragola i Iyibi dindini ibagabu holebero. Ibaga bialu howa Iyibialinaga igini wahene damenego bibahende homai helolebero, laya. <sup>5</sup> Kininaga igini wahene kagome ibu abanaga dagia ibugua mule kago ogoni ala homalu Iyibi wali agalinaga igini wahene damenego bibahende homahi lalu wali garabaya biabe ale biaga widi dambialu bedarunaga igini wahene damenerume homa maro bulebira, laya. Nogo bulumaga igini ala wini karubi homai dege holebira, laya. <sup>6</sup> Iyibi dindini wali agalime genda gibiore howa dugu gibiore biame halu dugu ala nabinidaguabi mani nabulebiragodaguabi áyu mbiraga howa bulebira. <sup>7</sup> Ai Isaraele wali agali ti kagoriabi tinaga nogo kagoriabi biangomebi heba duabi mbira naloleorebira. Ani birago handaregola Anduane Homogo ina Iyibi wali agalila Isaraele wali agalilani tu henemane ngelenedane hondolebere, lalu Anduane Homogohanda laya, lene. <sup>8</sup> Ani lowa Mosesehanda lamaro bialu lalu, Ani birago hondowa kini inaga biabe biaga karu bibahendeme i kogoria ibuwa i deni bulu paluwa ihondo ladeborebo bialu inaga wali agali haru halu áyu ogoni pu lolebira. O bulebira laruruni bibahende biai kagola i Iyibi dindi wahalu tagira polebero, lene. Ani lalu bialu Mosese ibu keba gibiore halu kini andaga biagoha howa tagira pene.

<sup>9</sup> Ani lamiyagolabi Anduane Homogohanda Mosesehondo lalu, Kini ogonime bu mini giambeho dege karia inaga hongo lone walia holebero, lamini wiadagua tagira pene. Hongo lone walia holene tawe heariane ibu giambe haabo hene. <sup>10</sup> Mosese Arono libugua kini biago deni howa manane tara tara uruni biyagoyu Anduane Homogohanda kini biagonaga bu mini mo giambe heagome o biragoni ogoale bira lole ndo howa Isaraele wali agali Iyibi dindi yu wahalu pudaba nalole hene.

## 12

*Ngode Datagaliwabehanda Isaraele wali agali bayuwa helalu Bolangua Halu Penego mitangi bialu Tomo Nenego ogo*

<sup>1</sup> Mosese Arono libu Iyibi dindini heaore Anduane Homogohanda libuhondo bi agua lamini. <sup>2</sup> Isaraele wali agali tinaga pongo yulenege mali mbiranaga ege pigane áyu kago holebira. <sup>3</sup> Ani bulebira Isaraele wali agali lenego bibahendeore mo ngoai howa tihondo bi ogo lamibe. Ege áyu kagonaga horo pini haragola agali bibahendeme nogo sibi iginiyaguabi nogo meme iginiyaguabi mbira ibu one waneigini baba nama lole dabo bagiho helalimu, lalu lamilibu. <sup>4</sup> Ti hangu hangume ani bima poragola agali mbirago ibugua nogo bo ngago ibu one waneigini baba tini hangume nai habe nahe nogo timbuni halu wali agali ndia hayagua o anda be mende handa ai nai padabigola libu haru mandagi nabiya ibu lowa lolene nga. Nogo puguni dagala wali agali dagala buwa baya hangu nai helo manda buwa bulene nga. <sup>5</sup> Nogo sibi yaguabi memeyaguabi ngoalia hara alego bolene nga. Nogo igini ogoni wangabe bayago hondowa ko kumburayu mbira para naheore mali mbirani hininigo bolene nga. <sup>6</sup> Nogo ogonibigo dabo helowa ege áyu kagonaga horo daga dene (14) haragola alendoore nelenini nogo uruni bama polene nga. <sup>7</sup> Bowa nogo ogoninaga darama hambuwa anda nogo ogoni nalu birulenegoria panga harabanibi anda gene lene labolabonibi hirulene nga. <sup>8</sup> Ani buwa nogo ibuni irani hiri polowa mberedi yidi nahego mo peha palena aleru kaubigo dugupeha buwa ogoni heba nolene nga. <sup>9</sup> Nogo ogoni aria gahenge podo mialu nanalimu todobeneha dawabi nabilimu. Homa hende irani hiri polowa

✧ 11:5: Iba 78.51, 105.36, 136.10 ✧ 12:1: LBM 23.5, Dag 9.1-5, 28.16, Man 16.1-2

nalimu. Haguanebi gi gebi tini garinibi irani hirahira hangu nalimu. <sup>10</sup> Egerebagi nole lowa mbira podo wia nabilimu. Mbira ibira hayagua na nabi wahalu irani hangu delai halimu. <sup>11</sup> Ogoni nole howa ala agua bilimu. Aga baya hangu ndibulo bialu ge gamu mo karulalu giha halimbu mo yu howa nolene nga. Hariga lu pole howa narolo manda buwa ala naga bulene nga. Ala naga bulene ngago irane tomo naramigoni Anduane Homogohanda ina nabe bolangua halu pene lalu inaga mini yaraga holenaga noleberami, lalu Anduane Homogohanda lene.

<sup>12</sup> Anduane Homogo ibugua Mosese Aronolahondo laabo halu lalu, Mbiraga o laronongi ina Iyibi dindi bibahendeha pume halu Iyibi wali agalinaga igini wahene bibahende bo wahai halu tinaga nogo igini ala winibi bowa dege holebero. Ani bialu Anduane Homogo mbiraore i hangu kogo de hendelo walia halu tinaga dama tara tara hayadaruni bibahende bo haeala bagabu waholebero. <sup>13</sup> Ani bima poleberogo ti anda ogoha ina padama lalu walia halu darama harabani hiridemigome walia holeberami. Ina mbiraga Iyibialirunaga igini wahene balu wali agali pani merongi ti andagani darama hiridamigo hondowa tihondo mbira bia nabi ina ti bolangua halu polebero. <sup>14</sup> Ani buleberogo Anduane Homogo ina ti nabe bolangua halu porogoni mitangi biaho wiaabo helonaga horo ogoni baya hangu pongo yuwa ogoningi i mitangi bialu mo dunini howa lotu lalu halimu. Tinaga waneigini maha hama poraruhondobi mana lamialu tibi mugubali helo ogoniore embeda holemini horo ogoni tagira ibirangi biaabo halu ina tihondo berogo mitangi biaabo halimu, lalu lamini.\*

#### *Mberedi Yidi Nahe Hirini Nolenenaga Horo winigo ogo*

<sup>15</sup> Ani lowa Anduane Homogohanda lone ladege bialu lalu, Horo karuni ti mberedi yidi nahe hirinigo nolene nga. Mberedi yidi heba hirinigo mbira nolemeni, lene. Ani bialu horo mbirani ti andagani yidi wigi bidamigo bibahende mo wahai halimu. Ai bi o langerogo donge howa mbiralime horo karia uruni andaneha howa mberedi yidihe hirinigo mbira nayagua ogoni narago ibu inaga wali agali ndo holebira. Bi mo wahaga ogoni ti heba holemini bo batagi halimu. <sup>16</sup> Horo mbira piganegoriabi horo kanegoriabi ti mo ngoai howa i mitangi bialu mo dunini howa lotu lalimu. Horo kiru ogoningiore biabe bulene damenego mbira nabi bame halimu. Tini tomo nolene dege manda manda bilimu. <sup>17</sup> Horo karia uruninaga horo piganegoria ina ti Isaraele hameigini bibahende Iyibi dindi howa haru tagira pirugoni. Ogoni birugo mitangi bialu mali bibahendengi horo timbuni mbira Mberedi Yidi Nahe Hirinigo Nalu Holene Horo ogoni mitangi biaabo halu halimu. Tinaga waneigini mani hararu tiguabi ogonidagua dege bia ai helo tihondobi mana lamilimu. <sup>18</sup> Ani bialu ege piganegonaga horo dene haragola alendo nelenini howa hama pialu horo pira kirani mbiragonaga alendo nelenini howa horo dombene niguniha howa mberedi yidihe hirinigo mbira nanalimu. <sup>19</sup> Horo karu ogoniha ti andagani yidi mbira wulene nawiore. <sup>20</sup> Tini aria mbiragomebi ndo dindi tarali mbira ti baba igiri yango ibu henemebi mberedi yidihe hirinigo mbira nalu karia handarimiyagua ogoni ibu inaga wali agali kago aria ndo holebira, lalu Anduane Homogohanda ani lene.

#### *Bolangua Halu Penegonaga Horo mitangi bialu tomo pigane nenego ogo*

<sup>21</sup> Ani buwa Mosesehanda Isaraele wali agali haru haga hearu olo ngoai howa tihondo lalu, Ti bibahende hangu hangume nogo sibi iginiyaguabi nogo meme iginiyaguabi ngoalia hara ale mbira bowa ti one waneigini baba biruwa Ngode Datagaliwabehanda Isaraele wali agali ti nabe Bolangua Halu Polebiragonaga Horo ogoni mitangi halu tomo nole nogo ogoni balimu, lene. <sup>22</sup> Nogo igini ogoni bowa darama ndisiha oda berelalimu. Oda berelowa ira hisobo magane podaga buwa gi mbira agima yuwa nogo darama hambu wirimigoha ibira haga bialu darama nai anda haraba gene labolabonibi

\* 12:14: Har 23.15, 34.18, LBM 23.6-8, Dag 28.17-25, Man 16.3-8



uyu harabanibi hiralimu. Tí hangu hangume tí andagani ogonidagua hirama puwa tí mbiraligo mbira andaga yu wahalu tagira polemini nape tamuha biru ngamiore dege gao lelalimu. <sup>23</sup> Ani buwa Anduane Homogohanda Iyibiali igini wahene bo wahole Iyibi dindini pume harangi tí andagani darama anda genenibi harabanibi hiridamigo hondowa Anduane Homogohanda ibunaga Homelo Bagane dahuliyalime tí andagaha anda naibi bolangua halu pelolebira.✧ <sup>24</sup> Ani bulebirago bi o bilimulo langirugoni damenego baya hanguore bulene horo harangi biaabo halu tí waneigini mani hama porarumebi mana ogoni mo tene howa bima pelo mana milimu. <sup>25</sup> Anduane Homogohanda tihondo dindi mbira tí halimulo ngulebero layago dindi ogoriani pu howabi mana ogoni dege bigi bilimu. <sup>26</sup> Tí waneiginime tihondo mana ogoni aginaga beramabe laga biyagua <sup>27</sup> tigua ladai agua bilimu. Horo ogoni mini Bolangua Halu Penegonaga mitangi bialu ina Anduane Homogo mo dunini howa lotu lalu tomo ogoni naramagoni. Ibugua Iyibialinaga igini wahene damenego bo wahama piyangi ina Isaraele wali agali andaga bolangua halu pialu inanaga igini wahene nabayagonaga mitangi bialu beramagoni lalimu, lene.

Mosesehanda ani lamiyagola Isaraele wali agali hale howa ge duli hangaho biruwa Ngode Datagaliwabe mitangi bialu lotu lene. <sup>28</sup> Ani bialu heyalu puwa Anduane Homogohanda Mosese laminigo tihondo lamiyaria hale hayadagua bini.

### *Iyibialinaga igini wahenego bibahende bai henego ogo*

<sup>29</sup> Mbiraga mbi hanuni hayagola Anduane Homogohanda Iyibialinaga igini wahenego bibahende bo wahai hene. Iyibi kininaga igini wahene ibu abanaga dagia mule heago ala bo wahene. Ani buwa agali hearunaga igini wahenego bo wahama pialu garabaya andaha garabaya hearunaga igini waheneni bairi halu igini wahene damene bibahende bo hilene. Nogo igini ala wini hearu damenebi bibahende bo wahai hene.✧ <sup>30</sup> Mbiraga odagoningi kini agali biagobi ibunaga biabe biaga hearubi Iyibiali bibahende heyai howa handalu hearia tinaga igini wahene bo wiaria hendene. Hondowa Iyibi wali agali bibahendeme dugu emene ndoore ya yi lalu gibiore bigibigi bini. Nde mbirago igini mbira yu wahenedanego mbirali dugu nabi holebe. <sup>31</sup> Ogonidagua biyago hondowa mbiraga odagoningi dege kini biagome Mosese Aronola ibilo hondo pudaba lowa ibiyagola libuhondo lalu, Áyu ogoni libubi tí Isaraele wali agali bibahendebi áyu ogoniore piai hadaba. Tí bibahende inaga dindini inaga wali agali heba naholego áyu ogoniore pialu tinaga Anduane Homogo mitangi bialu ibu mo dunini howa lotu lole porama larimidagua lole pudaba. <sup>32</sup> Tinaga nogo sibirubi memerubi bulumagarubi haru hai halu pole pudaba. Pialu howa Anduane Homogohanda ihondo bayale bilonaga inagabi bi lahalimu, lene.

<sup>33</sup> Ani bialu Iyibi wali agali tinimebi Isaraele wali agali Iyibi tinaga dindi yu wahalu abale pelonaga mo daila hene. Mo daila halu howa lalu, Tí áyu ogoni napirimiyagua ina bibahende áyu bo wahai haragonidago tí áyu ogoni pudaba, lene. <sup>34</sup> Ani layagola Isaraele wali agalime abaleore tinaga balawa yidi heba wa nabi wiaru ndisi beha mo gambiruwa agame mo huba buwa payani yagayaga bialu pene. <sup>35</sup> Pialu howa Isaraele wali agali biarume Iyibi wali agalihondo lalu, Ainde poramago muni ngolo silibabi agabi mbira ngia naberami, lene. Ani lalimu lalu Mosesehanda ala layadagua lene.✧ <sup>36</sup> Anduane Homogohanda Iyibi wali agalinaga deni Isaraele wali agali mo yaraga hayagola Iyibi wali agalime Isaraele wali agalihondo mbirale mbirale ngidaba laya ale bu hombedo mini. Anidagua biyagola Iyibi wali agalinaga mbirale mbirale wiaru Isaraele wali agali ti mo hombedo yalu piyagola Iyibi wali agali bo tabuanda helene.

### *Isaraele wali agali Iyibi dindi yu wahalu penego ogo*

<sup>37</sup> Ani bialu Isaraele wali agali ti Lamese tano mo mogo bu halu Sugodo pole pene. Penedagoni agali hangu daga daosini handari waragara (600,000) pene. Wali wandari igiri emene daga nale wahowa agali hangu daga ogonidagua pene. <sup>38</sup> Ani bialu wali agali dindi tarali marubi dewaore Isaraele wali agali heba yamaga halu pialu nogo sibibi memebi bulumagabi dewaore haru pene. <sup>39</sup> Pialu Sugodo anda puwa balawa yidi nahe Iyibi dindi howa yarimiru hiruwa nene. Iyibiali biarume hibilaba lalu áyu ogoni pudaba lowa de duguyu mo daila hayagola balawa baya hangu wa nabi piyago ai Sugodo anda puwa bayuwa wabialu hiruwa nene.

<sup>40</sup> Isaraele wali agali ti Iyibi dindini mali handari mariani pira tebira (430) ogonidagua hene. <sup>41</sup> Mali handari mariani pira tebira (430) ogonidaguaore ngau layagola Anduane Homogonaga wali agali wabuni ogoni Iyibi yu wahalu tagira pene. <sup>42</sup> Puwa horo odagoningi mbiraga Anduane Homogohanda Isaraele wali agali baya hangu mamage halu Iyibi dindi howa haru tagira pene. Ani binigo mitangi bialu Isaraele wali agali ti mani hama pialu howa mbiraga Anduane Homogohanda mamage henedagoni horo tagira ibigi biragola mbiraga ogoni Anduane Homogohondo lomabia ho ngelalu ibu mitangi bialu lotu lalu haga wini.

### *Bolangua Halu Penegonaga Tomo Nolenengi bulene mana winigo ogo*

<sup>43</sup> Anduane Homogohanda Mosese Aronolahondo lamialu lalu, Ai ina bi larogo hale hadaba. Ina Isaraele wali agali nabe bolangua halu haru tagira pirugo mitangi bu dai bialu tomo nolene mana ngago baya hangu hale hadaba. Wali agali dindi tara taraha howa ibugu bini tí baba karu tigua Bolangua Halu Penegonaga Tomo ogoni nanolebira.

<sup>44</sup> Anigo agali maru tínaga munime yolo binigo ti tínaga garabaya biabe ale bialu haga howa tinaga dongone podo mabu bu wahene heagua nde tomo ogoni nolene karulape.

<sup>45</sup> Wali agali tara tara tí baba tigimandi hangu ibu heneyaguabi ti muni biabe bialu heneyaguabi bibahende tomo ogoni aria nolene nawi.

<sup>46</sup> Wali agali tigua nogo sibi bo dawale anda manda manda biyadagoria howa dege nolene nga. Nogo sibi ogoni aria podene maru ibira hayagua yu tagira nape anda ogorianiore howa nai holene nga. Ani bialu nogo sibi boleberemigonaga kunibi mbira napodoleore beremi. <sup>47</sup> Ani bialu Isaraele hameigini bibahendeoreme nogo sibi balu tomo ogoni dawa nai holene nga. <sup>48</sup> Anigo agali maru tinaga dongone podo mabu nabi heagua nde tigua tomo ogoni nolene nawi. Agali tara maru tinaga dindi tene wiyadago wahalu ibuwa tí baba hene karu tibi nde ina Isaraele wali agali tí golope hene halimulo haru tagira pirugo mitangi bialu Bolangua Halu Penegonaga Tomo ogoni nolene mana bulene hamelo heagua nde agali ogoniibunaga dongonebi igiri ibu andagaha haga karunaga dongonebi podo mabu bulene nga. Ani podai howa nde tomo ogoni nolene wulebira. Anidagua bialu karu tí ariaore holebira. <sup>49</sup> Isaraeleali tínagabi agali dindi taraha howa ibini uruni tinagabi mana mbiraore ogoni dege nga, lene. <sup>50</sup> Ani layagola Isaraelealiru tigua Anduane Homogohanda Mosese Aronolahondo bilimu lalu lamiyadagua biai hene. <sup>51</sup> Horo ogoningiore Anduane Homogohanda Isaraele wali agali Iyibi dindi howa haru tagira pene.

## 13

### *Isaraelealime ti igini wahene Anduane Homogohondo loma biaho helolene winigo ogo*

<sup>1</sup> Anduane Homogohanda Mosese lamialu lalu, <sup>2</sup> Tí igini wahene karu bibahende inihondo lomabu ngiai halimu. Isaraeleali tínaga igini wahene damene bibahende bi tínaga nogo bulumaga karume igini pigane wialu wangabe wiyagua uruni bibahende bi ininagaore holebira, lene. <sup>3</sup>

### *Mberedi Yidi Nahe Hirini Nolene winigo ogo*

✧ 12:40: Pig 15.13, Ga 3.17 ✧ 12:46: Dag 9.12, Yo 19.36 ✧ 13:2: Dag 3.13, Lg 2.23

<sup>3</sup> Mosesehanda wali agaliru lamialu lalu, Tígua Iyibi dindiha garabaya biabe ale bialu haabo ho hemiria Anduane Homogohanda ibuninaga hongo timbuniore kagome tí Iyibi dindiha howa haru tagira piyagoni. Ani biyago mitangi bialu tígua horo ogoniore embeda naholenaga mberedi yidi nahe hirini hangu ngago nalu halimu. <sup>4</sup> Ai tígua ege piganego mini Abibi horo áyu kagoningi Iyibi dindi yu wahalu tagira porami.\* <sup>5</sup> Anduane Homogohanda tí mamali hearuhondo bi lowialu Kenana dindiha Hidialibi Amoralibi Hibialibi Yabusualibi uruni karuha dindi ngaru bibahende tí mo ngiai holebero lo wiyagoni. Dindi uruniha dindi benebere ngago tomo bayale anda hai holene bayaleore nga. Ani ngago ai Anduane Homogohanda tí dindi ogoniha haru halu pu heledagola howa tígua Mberedi Yidi Nahe Hirini Nolene ogoni mali bibahendengi ege áyu kamago aleni mitangi biaabo halu halimu. <sup>6</sup> Tígua Mberedi Yidi Nahe Hirini Nolene ngaru ege áyu kamago aleni horo karuni nalu halimu. Ani howa horo kanego ogoningi tígua Anduane Homogo ibunihondo mitangi bialu lotu lalimu. <sup>7</sup> Horo karu uruningi wali agali bibahendeme mberedi yidi howa hirini nolene nawiore. Horo uruningi tínaga dindi ngamiruha yidibi mberedi yidi howa hirinibi mbira ngela nabi wahai halimu. <sup>8</sup> Horo timbuni ogoni tagira ibirangi tí igini karuhondo bi ogodagua lamilimu. Iname mbirale o bialu kamagoni irane ala Anduane Homogohanda ina Iyibi dindiha howa mbirale tara taraore dewa bialu haru tagira pialu ina dindi ogoha haru ibinigo mitangi bialu ani beremali, lalu lamilimu. <sup>9</sup> Lotu ogoni ale lolenego mana tínaga gi habenibi wanakuinibi gilibu ngelowa haradagua bu halimu. Ani bu howa Anduane Homogonaga mana lo ngago mo mitangi bia haragola tígua ogoni lalu holeberemi. Irane Anduane Homogohanda ibuninaga hongo timbunioreme tí Iyibi dindiha howa haru tagira puwa dindi ogoria haru ibinigo mitangi bialu ani bulene nga. <sup>10</sup> Ainde mali bibahendengi horo ogoni tagira ibiragola tígua tomo ogoni hiru nalu haabo halimu, lalu Mosesehanda lene.

*Igiri wahene bibahende loma bulene nga lenego ogo*

<sup>11</sup> Mosesehanda lalu, Anduane Homogohanda tí Kenana dindi ngagoha haru polebira. Ani pialu ibugua dindi ogoni bamba tínaga mamali hearuhondobi tínihondobi ngulebero lalu lo wiyadagua ngulebira. <sup>12</sup> Ibugua dindi ogoni tí ngiragola tígua tínaga igini wahene damenego Anduane Homogo ibunihondo lomabu milimu. Ani bialu tínaga nogo hinidamirume igini pigane wiragola wangabe wiyaguabi bibahende Anduane Homogohondo milimu.\* <sup>13</sup> Anigo nogo dongi igini pigane wirago nahomelonaga nogo sibi iginime bo lomabu aribia halimu. Ai tínaga dongi ogoni nogo sibime bo loma budai bibe naheyagua nde wahalu nogo dongi igini wangabe pigane wini biago ma pugualu bo waholene nga. Ani bialu tínaga igini wahene loma biaho helaramigo lone tinime yolo biadai bulene nga.† <sup>14</sup> Ani beramigola tí igini urunime mana ogoni irane aginaga bialu kamibe lalu tínihondo hale hayagua nde tígua ogodagua ladai bilimu. Bamba ina Iyibi dindiha garabaya biabe bialu hemaria Anduane Homogohanda ibuninaga hongo timbunioreme ina haru tagira pialu ogoria haru ibini kamagoni. <sup>15</sup> Pigane howa Iyibi dindini kini heagome mine halu ina yupe holene manga hayagola Anduane Homogohanda Iyibiali bu hearu bibahendenaga igini wahene hearubi nogo damenenaga igini pigane winigo wangabe hearubi bibahende bo wahai hene. Ani binigonaga ai iname nde nogo damene bu karunaga igini pigane wini wangabe bibahende Anduane Homogohondo loma buwa bo meremali. Ani buwa iname inane igini wahene haragobi

\* **13:4:** Ege mini Abibi ogoni Isaraele tinaga mini laga. Áyu inanaga ege kago ege Masi Aiborolo tebone manela hengeneha labehe nga. ✨ **13:12:** Har 34.19-20, Lg 2.23 † **13:13:** Isaraealirume dindi tara ngaruha pole pialu howa tinaga dabudabu ngaru nogo dongi erekunini mo paga howa haru piaga hene. Anigo nogo dongime biabe galoneore ogoni biaabo helonaga nogo sibi iginime bo aribia haga wini. Isaraealinaga igini wahene hearubi Anduane Homogohondo lomabu mialu bo home lolene nawini. Tí igini Anduane Homogonaga helo loma bia ho helalu tigua nogo sibi igini bo mialu yolo biadai biaga hene. Pig 22.12, Dag 3.39-51, Lm 12.1

lomabu mialu mani inane yolo biadai beremali. <sup>16</sup> Anidagua beremalidagoni irane Anduane Homogohanda ibuninaga hongo timbuniore kagome ina Iyibi dindiha howa haru tagira ibinigo mitangi bialu ani beremali. O binidagoni embeda nahole manane inanenaga gi habenibi wanakuinibi gilibu wiradagua bialu mana ogonidagua beremali, lalu lamilimu, lalu Mosesehanda lene.

*Anduane Homogo ibu hari beralibahabi ira hunguhabi howa Isaraele wali agali haru penego ogo*

<sup>17</sup> Iyibinaga kini biagome Isaraele wali agali pudaba layagola howa Ngode Datagali-wabehanda Isaraele wali agali haru halu hariga nemandi tongo lalu iba angeange pialu Pilidia dindi tagira pole polene wiago manda buwa dege ibugua hariga ogonidagua naharu pole manda bini. Ibugua manda bialu hearia ogonidagua haru piruyagua Isaraele tinaga waitigi hariga obeneni karia lola howa ogonila wai bule haruda manda buwa wahalu Iyibi dindi ibida dai bule manda bulebira lo manda bini. <sup>18</sup> Inaga wali agalime mini ogonidagua nawilo manda buwa Anduane Homogo ibugua hariga nemandi ogoni wahalu hariga mende dindi ko wali agali nahaga wiagodagua haru pu mabu bialu iba solowara mini Iba Daramabi bereagoria haru tagira pene. Isaraele agali ti wai bulene danda timu ayagubi giha yalu yalu pene.

<sup>19</sup> Ani bialu tinaga mamali Yosebenaga kunibi dugu yadege pialu pene. Yosebenaga kuni dugu yinidagoni irane ala ibu nahome howa ibugua Isaraele wali agali lamialu bi ogodagua lene. Awe Ngode Datagaliwabehanda tí gi mialu Iyibi dindi howa haru tagira polebirago ani birangi inaga kuniore Iyibi dindini nawulego dugu yalimulo hame ledogo dugu yuleberama ladaba, layagola ina, E dugu yaore buleberama, lenedagua o dugu yinidagoni. Ani bialu Yosebenaga kunidagoni duguwa Mosese ibugua yalu ti pene.✧

<sup>20</sup> Pialu Isaraele wali agali biarume Sugodo yu wahalu Edama dindi anda pialu dindi ko wali agali nahaga wiagoria leneha anda puwa haanda palene. <sup>21</sup> Anduane Homogohanda ibunaga wali agalihondo hariga walia hole horombeni hariha howa beraliba mberane tigabi timbuni mbira wiadali halu ibuni ogoniha howa hariga bamba hama pialu hene. Ani bialu mbiraganaga hariga walia hole Anduane Homogo ibuni ira hungu mberane timbuni tigabi mbiraha howa ibu bamba halu walia hama pene. Anidagua binigome Isaraele wali agali ti mbiraga horombebi hariga pobehe hene.✧ <sup>22</sup> Beraliba mberane tigabi timbuni biagome horombeni hariga bamba halu pugu bialu ira hungu mberane tigabi timbuni biagome mbiraganaga wá hadali hama hariga bamba hama pialu hene.

## 14

*Isaraele wali agalime iba solowara mini Iba Daramabi domalu penego ogo*

<sup>1</sup> Ani buwa Anduane Homogohanda Mosesehondo lalu, <sup>2</sup> Ina Isaraele wali agalihondo ogodagua lamialu, Tí ibirimidagua dai bialu haanda paluene anda yuwa unu iba solowara ange Pihahirodini bilimu, lalu lamibe. Dindi o mini larogoni Migido tanola Iba Daramabi bedagola dombeneha Balasebono dindi kaware nga. <sup>3</sup> Ti dindi ogoriani anda yagimbu bu palu kamigo hondowa Iyibinaga kini biagome manda bialu karia Isaraele wali agali pu piyago ai agohayagi poabe toba howa dindi ko wali agali nahaga wiagoria tagira puwa nai pu luluyaho kagodalo manda bulebira. <sup>4</sup> Ani biragola ina kini biagonaga bu mini mo giambe halu ndibulo helolebero. Ibunaga bu mini giambe howa ibugua tí gerai talima ibulebira. Tí minuyu dai bule lowa talima ibalu karia ina kini ogoni ibunibi ibunaga ami agalirubi bibahende bope halu i wayali holebero. Ani wayali harogome wali agali biaruru tigua inaga mini mo yaraga holebira. Ani bialu Iyibi wali

✧ 13:19: Pig 50.25, Yos 24.32 ✧ 13:21: Har 14.19, 14.24, 33.9, Iba 78.14, 105.39



agali tigua i Anduane Homogo heneneore henedane hondolebira, lene. Ani layagola Isaraele wali agali biarume bilimu layadagua bialu ti dai bini.

<sup>5</sup> Ani biyagola agali marume kini biago lamialu lalu, Isaraele wali agali bibahende pu yola haya, lalu lamini. Ani lamiyago hale howa kini biagomebi ibunaga biabe biaga hearumebi lone mini wiadai bialu lalu, Ai o biagoni agua birimayabe. Isaraele wali agali bibahende pelai harimago ai inanaga garabaya biabe ale bia haga wiyagoni lone budai bule ndo ogonida, lene. <sup>6</sup> Ani lowa kini biagome ibunaga wai biagane garo ale mini karisi nogo hosime gili lagabi nogo hosi agali berelowa piaga hearubi ibunaga ami agalirubi ho manda bilene. <sup>7</sup> Ani ho manda buwa kini ibunibi ibunaga wai bigane karisi biago bibahendebi ogoni heba handari waragariago (600) pari wayali gibi hangugo tinaga wai hanaga agali haguane heba ho manda bialu Isaraele wali agali piyiyadagua haruru pene. <sup>8</sup> Isaraele wali agali ti Iyibinaga hongo bolangua halu poramagoni lo mitangi bialu miniha turu timbuniore hama pene. Ani pialu heagola Anduane Homogohanda kini biagonaga bu mini mo giambeho tagi helayagola kini biagome abaleore Isaraele wali agali piyiyadagua haruru pene. <sup>9</sup> Iyibinaga ami maru ti nogo hosime gili lelo karisi biagoha halu maru ti nogo hosini bialu maru ti geni pialu Isaraele wali agali talima gerai pene. Gerai talima pialu Isaraele wali agali haanda paleagoria Iba Daramabi bereago ange Pihahirodi dindila Balasebono dindila kaware ngelowa pu palearia tali minini.

<sup>10</sup> Isaraele wali agalime kini biagobi ibunaga ami biarubi tidu yalu kaware ti heagoria ibiyago hondowa ti gi timbuniore hene. Ani biyagola ti biamogo bilonaga Anduane Homogo olene. <sup>11</sup> Ani buwa tigua Mosesehondo lalu, Namuali Iyibi dindini ina hora holenego homali naheyagola dindi ko wali agali nahaga ngagoria homolomaya haru ibiribe. Ina Iyibi dindini harimadagua howa homolomaya waha nabi ibirimagome ogoria hamaramagonida, lene. <sup>12</sup> Ina Iyibi dindi howa tagira ibalu ibu nabi hemangi áyu o biradaguaore bulebira langirimagoni ndoyagoda. Aniore bulebira manda buwa ina harugo Iyibi wali agalinaga garabaya biabe ale bialu kamagonidagua bialu haabo holego i wahalu pu larimagoni ndoyabe. Oali dindi ko wali agali nahagagoria homolenego wahowa namuali Iyibi garabaya biabe ale bialu harimago kamale bayale kamaleda, lene.

<sup>13</sup> Tigua ani layagola Mosesehanda ladai bialu lalu, Tí gi nahalimu. Tí bu mini dungulo daibu hadaba. Ani bidamigola Anduane Homogo ibugua tí pele ngulebirago áyu hondoleberami. Iyibi agali o tidu yalu ibirane hendedamigoni mani lone nahondoleberami. <sup>14</sup> Tí naga wai Anduane Homogo ibugua bia holebirago tínime mbira bulene nawigo tí ema nabi holene dege nga, lene.✧

<sup>15</sup> Ani leagola Anduane Homogohanda Mosesehondo lalu, Biamogo bia lowa i olalu kamigoni aginagabe. Isaraele wali agali ogodagua lamialu, Gi nahe heyalu pudaba, labe. <sup>16</sup> Mosese inaga halimbu biago yaraga howa Iba Daramabi bedagoha dogola angua habe. Ani beregola iba o bedagoni bira li ni bulebhirago. Ani biragola dombeni hariga ngagola Isaraele wali agali ti dindi yobini hariga uba ede halu pobehe holebira. <sup>17</sup> Ani birago hondowa Iyibi ami ti bu mini mo giambe harogola ti mina tagotago porabupe halu ti talima gerai ibalu karia bibahende ibame nai helolebero. Ani bialu ina kini agali biagobi ibunaga ami agalirubi ibunaga garo ale mini karisi nogo hosime gili laga ngarubi agali karisi ogoriani heyu piaga karubi bibahende bope halu i wayali holebero. <sup>18</sup> Ina ti bope halu i wayali harogo hondowa Iyibi wali agalime i Anduane Homogo henedane hondolebira.

<sup>19</sup> Ngode Datagaliwabenaga dahuliyali mbira Isaraelenaga ami erembiraha helowa ibu ala wai deni pu halu hariga bamba haga henego ogoni ibu dai buwa Isaraele wali agali erembirahayagi hene. Ani biyagola hari beraliba mberane hariga bamba halu

✧ 14:14: Har 15.3, Man 1.30, 3.22, Ais 30.15



piaga biago ibubi hadai buwa erembirahayagi dege hene. <sup>20</sup> Ani bialu Isaraele wali agalibi Iyibi ami agalirubi ti hengeneha ogonilabo libu hene. Hari beraliba mberane biagome Iyibiali ibiyagohayagi arumaho mialu Isaraele wali agali heagohayagi wáho mini. Ani biagola mbiraga odangi Isaraelenaga amirubi Iyibinaga amirubi libu handaya halu ngola habe nahe hene.

<sup>21</sup> Ani bu howa Mosesehanda ibunaga gime halimbu biago yaraga halu iba biagoha dogola angua hayagola Anduane Homogohanda puyabu hongohe ni tagira ibiragohayagi ibilowa pu dege lalu heaore gao lene. <sup>22</sup> Ani biyagola iba biago bira li ni biyagola dombeni yobi wiaria Isaraele wali agali ti uba ede hole pene. ✧ <sup>23</sup> Ibani hariga wiagoria pole pialu hearia Iyibi ami biarume haruru nogo hosini bira nogo hosime gili laga karisi biagoria ha bigi bialu Isaraele wali agali piyadagua haruru pene. <sup>24</sup> Talima pialu hearia Anduane Homogo ibu ira hungu mberane biagohabi hari beraliba biagohabi howa egabi lolebiyahayagi handadali halu Iyibinaga ami tidu yalu piyago hondowa ami biarunaga mini mo luluya hene. <sup>25</sup> Karisi hosime gili laga biarunaga ge dindi wiagoha bahora helayagola abale dugu mialu pobe nahe ndelahe handalu hene. Ani biyago hondowa Iyibiali biaru tinime lalu, Anduane Homogo ibu wai Isaraelehayagi anda pu howa ina o baragonidago ibida ma nalarimigo. Áyu ogoni ma, lene.

<sup>26</sup> Ani lalu heaha Anduane Homogohanda Mosesehondo lalu, Iba bedagoha ínaga gi dogola ede ha. Ani beregola iba o biru migimigi bidagoni lone bira gimbu buwa Iyibiali o tiduyu ibiraruni biranamu lalu iba nai holebirago helo ani bia, lene.

<sup>27</sup> Ani layagola Mosesehanda ibunaga gi dogo lowa iba biago ya angua hene. Ani buwa egerebagi gao layagola iba biagoni labo biraga biadagua biru gimbu bini. Ani biyagola Iyibiali biaru ibida pole bialu hearia Anduane Homogohanda ibunaga hongome bibahende ibaha mo para howa bai hene. <sup>28</sup> Iba biagolabo lone bira gimbu buwa karisi biarubi agali karisi ogoni yagarubi Iyibinaga ami bibahende Isaraele wali agali haruru talima ibini biarubi mbira yu wanahe bibahende iba nai helene. <sup>29</sup> Ani biya handala Isaraele wali agali ti dindi yobini iba lene labolabo bira migimigi bilowa dombeneha pialu angeni uba edede bini.

<sup>30</sup> Horo odangi Anduane Homogohanda Isaraele wali agali Iyibialime balu hearia mo wialu Iyibiali o beadagoni. Ani bialu Isaraele wali agalime handalu hearia Iyibiali biaru homo payapaya buwa ede iba angeni wiaria hendene. <sup>31</sup> Anduane Homogohanda ibunaga hongo gibime Iyibiali biaru bibahende bo wai hayago handayagola Isaraele wali agalime tinaga bi nawiyagola ti gi dege dindi howa Anduane Homogo geha handa daga daga bu hene. Ani bialu tigua Anduane Homogohondobi ibunaga biabe biaga Mosesehondobi mini mbiraore wini.

## 15

### *Mosesehanda turu howa iba gana lenego ogo*

<sup>1</sup> Ani biyago hondowa Mosese Isaraele wali agali hearumebi turu howa wai bi lalu iba gana ogo Anduane Homogohondo lo mini. ✧

Áyu Anduane Homogohanda wai bialu wayali taraore hayagonaga  
 ina Anduane Homogohondo iba gana lo mulebero.

Anduane Homogohanda Iyibinaga nogo hosibi nogo hosini agali berearubi  
 ibaha minu bope hayagoni.

<sup>2</sup> Anduane Homogo ibugua i mo hongo haga kago ✧  
 ina ibunaga mini yaraga halu iba gana lolebero.

Ibugua i pele ngiaga kago

ina ibunaga mini mo yaraga halu iba gana lolebero.

- Ibu ina Ngode Datagaliwabe kago  
ina ibunaga mini mo yaraga holebero.  
 Ibu bamba i abanaga Ngode Datagaliwabe hene kago  
ina ibunaga mini lene daligaore wini ngago  
 mo yaraga halu iba gana lolebero.
- <sup>3</sup> Anduane Homogo ibu wai biaga kago  
 ibunaga mini Anduane Homogo ka.
- <sup>4</sup> Ibugua Iyibi amirubi nogo hosirubi nogo hosirume gili laga karisirubi karisi yaga agali  
 hearubi  
 bibahende iba solowaraha bopebe biai haya.  
 Iba solowara mini Iba Daramabiha bopebe biyagola  
 Iyibi ami haru haga haguane hearu ibame nai haya.
- <sup>5</sup> Bopebe biyagola bibahende ibaha ege tole ibira haradagua bialu  
 unura yupebe bialu ibame nai hayagoni.
- <sup>6</sup> Anduane Homogo-o ina gi tigagoore hongo gibioirea.  
Inaga waitigi hearu bame gi mbiraoreme bo gingirulo paya bialu barigoni handarima.
- <sup>7</sup> Hongo gibihegonime inaga waitigi bibahende bope harigoni.  
Inaga keba holenego ira hungu kiaulo tagi haradagua bialu  
 gambe aea daradagua inaga waitigi karu bo ereba hareya.
- <sup>8</sup> Ina puyabu hongohe pu lelarigoni.  
 Puyabu hongohe puloyu ibiyagome  
 iba biago daliga biruyu iraga helaya.  
 Iba biago halu ki bira migimigi buwa  
 gana wa mini haghaga biradagua biya.  
 Iba kuyamaore unu dindiha bereago giambe hodaga hayagola ege mbaulene.
- <sup>9</sup> Inanaga waitigirume lalu,  
 Ina talima ibalu tigua ina minu yani howa  
 inanaga mbirale bayale yidamaru gingilamu yuwa mo tale bimiya.  
 Ina hame lara alego mo ya dege bimiya.  
 Iname ayu tibu yidamarume balu inanenaga hongome Isaraele wali agaliore mo ko  
 howa bamiyago ma,  
 lalu hongoho yalu ibirimi.
- <sup>10</sup> Ani bu yalu ibiyago ndo Anduane Homogo ina inaga buhe halu mbira hangu latagi  
 harigome  
 Iyibiali biaru bibahende iba nai hayagoni.  
 Ibaha tole ibira haradagua  
 unuraore ti kuni duguale ndoni yupe hayagoni.
- <sup>11</sup> Anduane Homogo-o dama tara tarahondo bi pupu wiaga bu karuni aria mbirago  
 hongohe i aleore ai kabe.  
 Daligaorebi duninibi baya buruguleorebi ini dege kegoni.  
Ina hongo gibi howa agalime nabiagane ale tara tara bigi berego  
 wali agalime i hondowa gi timbuniho bu kagoni.
- <sup>12</sup> Ina inaga gi tiga biago dogola amu harigola  
 dindi wiagome ne halowa  
 inanaga waitigi hearu minu mbedogo biya.
- <sup>13</sup> Inime haru holebero lalu lo wiridagua  
 heneneore wali agali ini pele miriru baya hangu haru halu

íninaga hongome ina haru halu dindi mbira wali agali nahaga íni dege haga wiagoha haru ibirigo kamagoni.

<sup>14</sup> Wali agali dindi tara tarani hearume ína bigi biriru hale howa ti gi dege dindi howa duru ala lalu kagoni.

Pilidiali karubi gi timbuniore halu kagoni.

<sup>15</sup> Idomo dindinaga agali haguanerubi gi timbuniore ho ka.

Moaba dindinaga agali hongohe karubi gi howa duru ala lalu kagoni.

Kenana wali agalinagabi hongo bibahendeore pirilipe hai henego ka.

<sup>16</sup> Gi holenebi mogo lolenebi ti kagoha ibiraho nga.

Anduane Homogo-o tigua ínaga hongo timbuni kegoni hondowa ti gi dege dindi howa mbirale mbira bibe nahe ka.

Ti bame de pigi piagolo ira tili haradagua bu ka handala helalu ínaga wali agali Iyibi dindi garabaya hemaria golope hene kamaru íname ti bolangua halu pole kamagoni.

<sup>17</sup> Garabaya hemaria golope halu haru halu ibuwa

íninaga hari mbira íni ogoriani hole lowa dabo wini biagoria haru puwa berelo harili.

Anduane Homogo-o hari ogoriani ínime íninaga anda bulebere.

<sup>18</sup> Ai Anduane Homogo-o í handame haga kini haluhe haabobo haga kegoni, lalu iba gana lene.

### *Miriamuhanda iba gana lenego ogo*

<sup>19</sup> Iba solowara mini Iba Daramabi biago dombeneha hariga yobi wiyagoria Isaraele wali agali ti dindi ange mendeha howa ange mendeha uba ede hene. Ani uba edede biyaru hondowa Iyibinaga ami biarubi nogo hosini berearubi nogo hosirume gili laga karisini agali heyu hearubi bibahende Isaraele wali agali talima ibaha hariga wiadagua yupebe bialu hearia Anduane Homogohanda iba biago lone biragimbu bilayagola Iyibiali biaru bibahende ibame nai hene.

<sup>20</sup> Ani biyago hondowa Anduane Homogonaga mana latagi haga wali Arono mbalini Miriamuhanda ibunaga ngilingele laga irabitele ale mbira wiago mo yayagola Isaraele wali maru berearume nde tininaga ngilingele laga wiaru mo yagayaga bialu Miriamu piyadagua haruru pialu irabitele ale balu turu howa aea kaea bialu mali lima pialu hene. <sup>21</sup> Ani pialu howa Miriamuhanda tihondo iba gana mbira ogo lo mini.

Anduane Homogohanda wai bialu wayali taraore hayagonaga ibuhondo iba gana lo midaba.

Ibugua nogo hosibi nogo hosini agali berearubi bibahende mo parahó bagabu ibame bo nai helayagonaga Anduane Homogohondo iba gana lo midaba, lalu lama pene.

### *Iba kaubi berenego ogo*

<sup>22</sup> Uruni bialu Mosese ibugua Isaraele wali agali Iba Daramabi bere biagoria howa haru halu pialu dindi ko wali agali nahaga mini Sua wiagoria haru anda pene. Puwa horo tebiru dindi ko wali agali nahaga ogoriani pu dege bialu iba nolene mbira nabereoreyane hendene. <sup>23</sup> Ani bialu dindi mbira mini Mara wiagoria anda pialu hemiria iba mbira bereago hondowa iba biago nole birimiria nabenahe kau gibiore bini. Dindi ogoriani iba kaubi ogoni bereago hondowa dindi ogoni mini Mara inanaga bi lalu Kaubi wininagaya. <sup>24</sup> Wali agalime iba biago nalu hemiria kaubiyago hondowa tigua keba howa Mosesehondo gimigomo lalu lalu, Ina iba agi noledabe, lene. <sup>25</sup> Ani layagola Mosese ibu mini burugu lowa ibugua Anduane Homogohondo hongo howa bi lene. Bi layagola Anduane Homogo ibugua Mosesehondo ira gabini mbira wiago mo walia hayagola Mosesehanda ira gabini biagoni muwa ibaha mo bape hayagola iba biago kau biyago ereba halu dendebe hene.

Ani bialu dindi ogoriani Anduane Homogohanda Isaraele wali agalihondo ibunaga bi mana lamialu lalu, Langerodagua bilimu, lene. Ani bialu dindi ogoriani dege hearia ibugua ti ba handalu hene. <sup>26</sup> Ani bialu ibugua tihondo lalu, Tígua ina bi larogo damene bibahende hale halu biaiore halu ina mana bayale manda bidogo bilimu larodagua bialu mana maru ko manda bidogo nabilimu laruyagua nabilimu. Aniore birimiyagua ina Iyibi wali agalihondo warago tara tara mirugodagua tihondo nangulebero. I Anduane Homogo ina tí mo dabi haga biago kogoni, lene.

<sup>27</sup> Ani bialu Isaraele wali agali ti dindi ogoni yu wahalu dindi mende mini Elimi iba nairia duguaga duguaga bialu homberia (12) dugualuhe bibi ayage ale mini dedi dege panda pira karia (70) buhe wiagoria anda puwa ogoriani handa palene.

## 16

*Anduane Homogohanda Isaraele wali agali tomo nelo menabi ega deware alebi minigo ogo.*

<sup>1</sup> Isaraele wali agali lenego bibahendeore Elimi dindi yu wahalu pialu dindi ko wali agali nahaga mbira mini Sini wiagoria tagira pene. Dindi Sini ogoni Elimila Sainaila dombeneha wini. Isaraele wali agali ti Iyibi dindi yu wahalu tagira ibuwa heane ege mendegonaga horo nguini (15) Sini dindi anda pene. <sup>2</sup> Ani anda puwa Isaraele wali agali bibahende dindi ko wali agali nahaga wiagoriani howa Mosese Aronolahondo gomogomo lalu hene. <sup>3</sup> Tigua gomogomo laga bialu howa ogolabohondo lalu, Inaore Iyibi dindini hemaore Anduane Homogohanda bo wahai nahayada. Ne nalu homabe lene ngago ina Iyibi dindi henedale nogoru bame dawa paya buwa ne tara tara ngaru mo yu ngoai howa inane biru mabu buwa nolenegobiore nowa tolotagi halu homedamale karulape. Ai ani bule ndo libugua ina ogoria haru ibiribigome ne noa ha dege bialu noa halu homoleni lenego henene áyu ne noa halu homole o kamagonida, lene.

<sup>4</sup> Ani lalu heago hondowa Anduane Homogohanda Mosesehondo lalu, Ai áyu ina tí bibahende tomo nalimulonaga tomo hariha howa ibira ibira bulebero. Ani buleberogo wali agali ti horo bibahendengi tagira pugu bialu tomo horo mbiru odangi hangu naga bulenedagua migi bulene nga. Ina bi o lamerodaguaore birabe be o larogoni mo waharabe hondoliya ani bidaba labe. Ti ogoriani ba hondoliya. <sup>5</sup> Horo bibahendengi horo mbira ogonaga dege nolenedagua migi bialu horo waraganeni o horo kirunaga nolene mo yu wilimu laya lalu lamibe, lene.

<sup>6</sup> Ani laya handala puwa Mosese Aronolame Isaraele wali agali bibahendehondo lamialu lalu, Uru-o alendoore tí Iyibi dindini hemira haru tagira ibiyagoni Anduane Homogohanda ani binida lowa manda buleberami. <sup>7</sup> Yawi egerebagi tigua Anduane Homogo ibuni tí heba ko lalu walia halu wá holene taraore de mborerebime ina kamagoria hadali holebirago hondoleberami. Tigua ibuhondo gomogomo laga birimiruni ibu hale hai haya. Nde gomogomo larimiruni mbiralihondo larima lolebe ibuhondoore larimigoni ndobe. Arono iyame bame ibugua ogoale bia ogoale ladaba laga biyago bia la bialu kabagoni ndobe, lene. <sup>8</sup> Ani lowa Mosesehanda lalu, Ani bigi birimigo áyu Anduane Homogohanda tí tomo nalimulo ngulebira. Tí tomo noa biragobiore alendo nalimulonaga ega deware ale ngulebira egerebagi nalimulonaga mena ngulebira. Tigua ibuhondo gomogomo laga birimiruni aguaore larimi ibu manda biaiho kago ibugua tí tomo noa harimidadagua nalimulo ngiaore bulebira. Tigua Arono iyahondo gomogomo lama hariha bi la bigi birimiyagua ogoni iyahondo ndo tí Anduane Homogohondo larami, lene.\*

<sup>9</sup> Ani lowa Mosesehanda Aronohondo lalu, Isaraele wali agali bibahende lamialu tigua gomogomo larimigoni Anduane Homogo ibu hale hayago áyu Anduane Homogo

✧ 16:4: Yo 6.31 \* 16:8: Mena gilibu ngago inanaga bi lalu, Ogo agibe.

ibu deni tí heyu hole ogoria ibai halimu, laya lamibe. <sup>10</sup> Ani layagola Arono ibugua puwa Isaraele wali agali lamiyagola haleho howa Isaraele wali agali ti de amu dindi ko wali agali nahaga wiagohayagi handa amu halu hearia au tobane buwa Anduane Homogonaga wá holene taraore de mborerebiga hari beralibani tagira ibiyaria hendene. <sup>11</sup> Ani hondo hearia Anduane Homogohanda Mosesehondo lalu, <sup>12</sup> Isaraele wali agalirume gomogomo lalu hearuni ĭ hale haru. Ani hale harugo Isaraele wali agalihondo ogodagua lamibe. Áyu alendoore nelenini ega deware ale bo dawa nalimulo ngulebero. Ani bialu yawi egerebagi mberedi tí noa biragobiore nalu nama mangaore halimulo ngulebero. Ani ngerogo no howa tigua ĭ Anduane Homogo tinaga Ngode Datagaliwabeore ĭni henedane hondoleberami, lene.

<sup>13</sup> Ani layadagua alendo nelenini hayagola ega deware ale wabuni yagalo yalu ibuwa Isaraele wali agali anda bu palu heagoria biru haealome howa dindi namulai hene. Ani bialu egerebalene tani anda hane hane headagua pibira birame hene. <sup>14</sup> Pibira biago yo biyagola mbirale emene adadabi mbira ira yuniru gingirulo bigi bini mbaulego o biagoriani haealo payabu wiame hearia hendene. <sup>15</sup> Hondowa Isaraele wali agali ti o bu payabu wiagoni agigo wiyabe toba howa tinihondo hale haga haga bialu o bu payabu ngaruni agiledabe lalu hene.✧

Ani lalu hearia Mosesehanda tihondo lalu, Anduane Homogohanda tí tomo nalimulo ngulebero layagoni tihondo o ngidagoni. <sup>16</sup> Ani ngialu howa Anduane Homogohanda au laya. Tí hangu hangume tinibi tí one waneiginibi nolenedagua mo mogobu wilimu, laya. Tí andagaha paliaru daga lowa homane mbiraligo ibunaga todobene be emene mbirago mo tolo ba ai ho wigi bilimu laya, lene.

<sup>17</sup> Isaraele wali agalime Mosesehanda lamiyadagua bia binigoyu marume bi layago pugualu dewaore mo bolangua howa ilu mogobu wialu marume emene dege ilu mogobu wialu bini. <sup>18</sup> Ani bia binigo nde andagani mo yu puwa magi handalu hemiria minime dewaore bolanguaho mule mandabu mia miyago magini Mosesehanda layago bolangua nahene. Ibugua layagoria ha iri hene. Ai emeneore mo yini hearubi andagani puwa dege magi handalu hearia emene yidamabe toba hearia emene ndo Mosesehanda magi layagoore karulape yarimayane hendene. Ani bialu ti bibahende tini nolenedagua karulapeore mo yagayaga birimayane hendene.✧ <sup>19</sup> Ani bialu Mosesehanda tihondo lalu, Tomo ogoni bibahende áyu hangu nai halimu. Yawi nole mbira nangelalimu, lene. <sup>20</sup> Ani lamiyago hale howa dege maru ti Mosesehanda bi layago mo wahalu tomo biago maru egerebagi nole lowa mo wini. Mo wiaria tomo mo wiyago bibahende togo buwa himi dibidabu lalu ngu hiriribi biame hene. Ani biyago hondowa Mosese ibu wali agalidaru baba keba gibi hene. <sup>21</sup> Ani bigi bialu egerebagi bibahendengi wali agali hangu hangume tagira pugu bialu tini nolenedagua mo wigiwigi bini. Ani mialu peha ni dalu tandaga biyagola tagirani mialu ibira hene bu payabu wigi biaru nime do egege lalu ereba haga bini.

<sup>22</sup> Ani bigi bialu horo warageneni ti hangu hangume tomo mo mogo bigi biyadagua dege haluki horo kiru nolene mo mogo bialu todobene be emene mbira tolotagi howa mo yagayaga bini. Ani biyago hondowa Isaraele wali agali haru haga agali haguane hearume aguani biyago hondowa tigua wali agalime agua bira lalu Mosese lamule pene. <sup>23</sup> Lama pialu hearia Mosesehanda tihondo lalu, Anduane Homogohanda yawi halo holene horo loma bini wulebira laya. Yawi Sabada horo tara Anduane Homogo ibu hangu mitangi bialu holene wulebira laya. Ani layago ai tomo irani hirule ngamiru áyu howa hirule manda bu wu palialu dawale ngamirubi áyu howa dege dawa mandabu paluene nga. Hira dawa bialu ibira harago yawinaga mo bagiho ngelalimu, lene.✧ <sup>24</sup> Ani lamiyagola Isaraele wali agali tigua Mosesehanda lamiyadagua hale halu bialu tomo hira dawa bialu ibira hayago egerebaginaga mo ngelene. Egerebanaga mo wiyaruni



egerebagi handalu hearia ngu bialu himi dibidabu nale bayale wiaria hendene. <sup>25</sup> Ani handalu Mosesehanda wali agalihondo lalu, Horo áyu Sabada horo biabe nabi haḷo howa Anduane Homogonaga mini yaraga halu hamiya kamagoni. Ani hamiya kamago horo áyu mbirali tomo taya bima putagi halu napoleberami. Mbirali napoleorego ti tomo noa biyagua abe howa áyunaga lalu bagiho wirimigoni noleberami. <sup>26</sup> Tí horo waragaruni tomo mo wigi bialu horo kanegoria haḷo holenengigo horo ogoningi tomo mbira dindini ibiraho nawulebira, lene.

<sup>27</sup> Ani layago lelowa wali agali maru ti horo kanengi tomo nawulebirago mo tagira napilimu layago hale howa dege donge halu tomo ngalono mo tagira pialu hearia nawiaria hendene. <sup>28</sup> Ani biyago hondowa Anduane Homogohanda Mosesehondo lalu, Wali agali tigua inaga bi tí langialu ogoale bilimu laga berogo bule ndo tí dogaho howa mine halu tini hame ledamidagua bialu kamigoni. Ainde angiore inaga bi hale halu bule kamibe. <sup>29</sup> Horo áyu Anduane Homogo ina howa tí i mitangi bialu haḷo halimu langirugoni ndobe. Ani bialu halimulonaga horo waraganengi ina tí tomo horo kiru nalimulonaga manda buwa ngiaabo holebero. Ani buleberogo horo kanengi wali agali bibahende mbiraligo mbira tagira pialu nape andagani hai holeberami, lene. <sup>30</sup> Anduane Homogohanda ani lamiyagola Isaraele wali agali ti horo kane ogoningi biabe nabi haḷo haga hene.

<sup>31</sup> Ani henego Isaraele wali agalime Anduane Homogohanda miyadagoni mini mena lene. Mena ogoni ibuni pele emene ladi alego dendenaga mone ibane nalehe nelu mini.✧

<sup>32</sup> Ani minigo Mosesehanda Isaraele wali agalihondo lalu, Anduane Homogohanda iname be emene mbira dindime wabinigo muwa be ogoniha mena mo gambiru tolotagiho ngelalimu, laya. Ani mo gambiru ngelalimu layago irane awe inanaga waneigini aguaneru mani holebirarume tinaga mamaliru Anduane Homogohanda Iyibi dindi howa haru tagira puwa tomo miniyago ogoniore nelu minidalo hendelonaga mo gambiru ngelalimu laya, lene. <sup>33</sup> Ani lowa Mosesehanda Aronohondo lalu, Be mbira muwa mena ogoniha mo tolo yalu puwa Anduane Homogonaga deni ngelabe. Inanaga waneigini aguane mani holebirarume de handalu manda bilo ani ngelabe, lene.✧ <sup>34</sup> Anduane Homogohanda Mosesehondo ani bibe leneyadagua Mosese ibugua Aronohondo bia layagola Arono ibugua hale halu beha mena mo tolotagihe biago yalu puwa Habo Nalolene Bi lo winigonaga Mbogoyi wiago buha wiaabo holene ni wini. <sup>35</sup> Ani bialu Isaraele wali agali ti tomo mena ogoni nalu heane mali pira maria (40) pene. Ani nalu howa dege Kenana dindi anda puwa tini tomo hengenego nalu wahene.✧ <sup>36</sup> Horo odaruningi mbirale magi hondolenenaga todobene be emene ale karulape handaga wialu magi mende timbuni todobene emene ogonibi pira biamaga howa handabehe wialu bini.

## 17

### *Iba ege toleha howa tagira ibinigo ogo (Dagalene 20.1-13)*

<sup>1</sup> Isaraele wali agali lenego bibahendeore Anduane Homogohanda lamiyadagua bialu dindi ko wali agali nahaga mini Sini biago yu wahalu pene. Ti pialu dindi mbira mini Lebidimi wiagoria anda puwa ogoriani haanda palu hene. Ogoriani palu howa handalu hearia iba nolene nabereoreyane hendene. <sup>2</sup> Ani hondowa tigua Mosesehondo keba howa lalu, Ai iba nolomaya ngia nabere, lene.

Ani layagola Mosesehanda ladai bialu lalu, Tí aginaga keba howa gomogomo lalu kamibe. Tigua aginaga Anduane Homogo ba handalu kamibe, lene.

<sup>3</sup> Mosesehanda ani layago lelowa dege wali agali biaru ti iba noa howa hége lebola hayagola Mosesehondo keba howa gomogomo dege lalu hene. Tigua Mosesehondo

lalu, Ina ina Iyibi dindi hemaria haru tagira ibirigoni irane aginaga haru tagira ibiribe. Inanabi ina waneiginirubi inanaga nogorubi iba noa ha dege bialu tongolo mulumayanaga hawa haru tagira ibiru nalarego, lene.

<sup>4</sup> Tigua ani layago hale howa Mosesehanda Anduane Homogohondo deremola howaore bi lalu, Wali agali o bu karume áyu dege i toleme bo waharagonidago aiore nde agua buadabe, lene.

<sup>5</sup> Ani layagola Anduane Homogohanda Mosesehondo lalu, Isaraele wali agali haru haga agali haguane maru karu haru halu tí ala bamba halu pudaba. Pialu howa inaga halimbu iba Naili baga yu hariligoni giha yalu pobe. <sup>6</sup> Ina uyu Hari Sainaini puwa ege tole mbirani inaga de tiga tiga heyu holebero. Ani buleberogo ina o larudagua bialu puwa ege tole o larogoni inaga halimbume babe. Baregola wali agaliru ti iba nelo ege tole ogoniha howa tagira ibulebira, lene. Ani layadagua puwa Mosesehanda Isaraele wali agalinaga haru haga agali biaru handayaho helowa Anduane Homogohanda bibe layadagua bini.

<sup>7</sup> Ani bialu Isaraele wali agalime Anduane Homogohondo keba howa gomogomo laabo halu lalu, Anduane Homogo biagoni ina heba kabe be pebe tobaneya, layagonaga dindi odagoni mini Masa Meribala wini.\*

### *Amalege agali baba wai binigo ogo*

<sup>8</sup> Ani binigo Isaraele wali agali Lebidimi dindini hearia Amalege agalirume bo anda ibini. <sup>9</sup> Tigua Isaraele wali agali bo ibulebira layago hale howa Mosesehanda Yosuahondo lalu, Yawi Amalege agaliru baba wai bu pelonaga ina Isaraele agali maru wai bibehago hondowa erelomigi buwa dabo helabe. Agali o dabareruni tigua Amalege agaliru baba wai biragola ina bare hambene biagoria heyu howa inaga halimbu Ngode Datagaliwabehanda giha yabe layago yu holeberogo, lene. <sup>10</sup> Ani lamiyagola Yosua ibugua Mosesehanda lamiyadagua bialu Isaraele agali maru bulumigi buwa haru halu Amalege agaliru baba wai bu pene. Ani piya handala Mosesebi Aronobi Huabi tigua hari biago neneni pu hene. <sup>11</sup> Ani pu howa Mosesehandaibunaga gi kirabali hariha yaragaho haga biagola Isaraele tigua Amalege bo podama anda pugu bini. Ani bialu Moseseibunaga gi yu ibira haga biyagola Amalege tigua Isaraele bo podama dai bigi bini. <sup>12</sup> Ani bigi bialu Moseseibunaga gi hi halu yu ibira habehe haga biyagola Arono Hua libugua tole mbira Mosese berelo mo yalu ibuwa Mosese ibu ogoriani bereagola libugua lene labolabo howa Mosesenaga gi yaragaho hene. Ti wai biyago de handape ho biruwa libugua Mosesenaga gi baya hangu ema nabi yaraga howa haabo dege heane ni palene. <sup>13</sup> Ani dege bialu Yosuahanda haru howa Isaraele agalirume Amalege agaliru mo ko howaore bo paya paya biai hene.

<sup>14</sup> Ani buwa Anduane Homogohanda Mosesehondo lalu, Ai áyu Amalege agaliru baba wai bialu bo hana harimigoninaga te mbirani gili bu wibe. Tí mani hama poramiha áyu wai bialu pari wayali harimigoni embeda nahe mitangi biaabo holenaga ani gilibu wibe. Ani bialu ina Yosua lamialu, Ina Amalege agaliruore mbira yu wanahe bibahendeore bo mburi lolebero, laya lamibe, lene.✧ <sup>15</sup> Ani layadagua lamuwa Mosesehanda Ngode Datagaliwabena lomabu delolene dabu mbira buwa dabu odagoni mini Anduane Homogo ibu inaga Humbi ka wini. <sup>16</sup> Ani wuwa ibugua lalu, Anduane Homogonaga waibi, daliga ladaga howa ladaba. Anduane Homogohanda Amalegeali baba wai bialu haho wiaaboore holebira, lene.

## 18

### *Yadero ibu Mosese hearia nenege penego ogo*

\* **17:7:** Masa inanaga bi lalu Ba Hondolene. Meriba inanaga bi lalu Gomogomo Lolene. ✧ **17:14:** Man 25.17-19, 1 Sml 15.2-9

<sup>1</sup> Mosese imane ibu Midianalinaga loma binigo mo miaga biago Yadero ibugua Ngode Datagaliwabehanda Isaraele wali agali Iyibi dindi howa haru tagira ibalu Moseseha howa biabe agua biya Isaraele wali agali agua biamogo biya lalubi te laga biyago haleho hene. <sup>2</sup> Ani hale howa Yadero ibugua Mosese one Sibora namu Midiana dindi berea handala penego Mosese ibuni hearia haru ibalu<sup>☆</sup> <sup>3</sup> libunaga igini kira Gesomo Elieselabi heba haru ibini. Mosese ibuni manda bialu ibu dindi tarali mendeali dindini bame igiri yango ibu harugo manda buwa ibu igini mbirago mini Gesomo wini.<sup>☆</sup> <sup>4</sup> Ani bialu ibu bamba Iyibi dindinaga kini heagome bo wa kalego ibu abanaga Ngode Datagaliwabehanda ibu biamogo bialu mo wiya manda buwa ibu igini mendego mini Eliese wini. <sup>5</sup> Ani binigo Yaderoanda Mosese onebi Mosese igini kira biago labobi haru halu dindi ko wali agali nahaga hari loma biaho wini biagoria Mosese ogoriani hearia haru ibini. <sup>6</sup> Yadero ibugua Mosese one iginiru haru ibalu howa ani haru ebero lalu bi ala lo pelene. <sup>7</sup> Ani ibira layago hale howa Mosese ibu lolaho pene. Mosese ibugua ibu imane lola howa ibu bulu paluwa ibu imane yu hurubale bini. Ani buwa libuni waragoru mbira balu henedabe nabe henedabe hondole hale haga haga buwa Mosese-naga balai andaha haru pene. <sup>8</sup> Ani pu biruwa Mosesehanda ibu imane Yaderohondo Anduane Homogohanda Isaraele wali agali golope halu haru tagira polenaga Iyibinaga kini biagohondobi Iyibi wali agali bibahendehondobi biyaru damenego lamiai hene. Ani lamialu Isaraele wali agali ti haru tagira ibinigo ibalu hariabi harigani gendabi ndelahe tara tara handaga bialu hearia Anduane Homogohanda biamogo biyarunaga bi tebi lamia dege bini. <sup>9</sup> Mosesehanda te laga bigi biyagola Yadero hale howa ibu turu timbuniore hene. <sup>10</sup> Turuore howa ibugua Mosesehondo lalu, Iyibi wali agalimebi Iyibinaga kini heagomebi í bolene winigo Anduane Homogohanda mo wiyadagonaga Anduane Homogonaga mini yaraga hamiya. Anduane Homogohanda ibuninaga wali agali garabaya biabe ale bialu hearia golalu gi miyadagonaga Anduane Homogonaga mini yaraga hama nalaramigo. <sup>11</sup> Aiore Anduane Homogo ibu mbirale tara tarahondo bi pupu wiaga ngaru bibahende bope hai howa ibu daligaore haruane hendedo. Iyibi wali agalime Isaraele wali agali handabe manga gibi howa haru hayadagoni haru tagira pole o biyadago handarogola gibiore haruane hendedo, lene. <sup>12</sup> Ani lowa Yaderohanda nogo tara mbira homa hende Ngode Datagaliwabehondo loma bialu bo delo mule haru ibalu mbirale marubi heba delole yalu ibini. Ani biyagola Isaraelenaga haru haga hearu bibahende Arono heba puwa nogobi tomobi loma binigo yu ibu wiyadagoni Ngode Datagaliwabe mitangi bialu ibu mo dunini howa lotu lolenaga nole pene.

*Bi dabaga agali maru dabenegro ogo  
(Mana Loyane 1.9-18)*

<sup>13</sup> Horo mendengi Mosese ibu wali agali tini degedege lai lalu hearu mo tiga bialu hene. Egerebagi howa wali agalinaga genda wiaruni mo tiga bialu heaore dege mbiraga hene. <sup>14</sup> Mosese ibugua dege biabe bulene emene ndoore bu payabu wiaru hondowa Yaderohanda Mosesehondo lalu, Ína wali agalinaga genda ngaruni mo tiga bialu kegoni agua berebe. Wali agali ho mabubu helowa homane íni hangume erekuibi lo tiga bialu kegoni nde íni hanguoreme lolene ngadagua lo tabalu bedede agini. Wali agali egerebagi ho wahalu alendo haga bialu o bu karuni nde í baba dege bi loledago manda bideni, lene.

<sup>15</sup> Ani layagola Mosesehanda ladai bialu lalu, Wali agali tinime í koria ibugu bialu gendabi ngaru langigi biragola ina tihondo Ngode Datagaliwabehanda bilo hame ledago ogodagua bulene ngago agua bilimu lalu lamigi biruli. <sup>16</sup> Kirali libu lai lalu mini iriari biyagua ina lo tiga buliya í koria ibugu biragoni. Ani ibugu biragola ina hale halu tale buwa ogome larago tigabi lara lalu lamialu Ngode Datagaliwabenaga bi lo ngagome ogo ale bibe nabibe lalu ledagobi lamia dege bialu kogoni, lene.

<sup>17</sup> Ani layagola Yaderohanda ladai bialu lalu, Ogoni tigabi ndo bialu kegoni. <sup>18</sup> Ogonidagua biaabo hariyagua ínibi wali agali bu karubi binigo ale bia dege bialu kalukalu bialu ngoe ngoe lalu hongo pirilipe hai holeberami. Biabe gendabi ogonibigo homane ínini hangume nabibehe kegoni. <sup>19</sup> Anidane hendedogodago ai ogodagua bulene nga lalu bi maru langerogo hale habe. O langerodagua bibelo Ngode Datagaliwabe ibunime í heba howa biamogo bulebira. Anigo ína wali agali tini degedege lai lalu mini iriari bialu karu Ngode Datagaliwabehondo lamialu kegoni karulape bialu ke. <sup>20</sup> Ína wali agalihondo Ngode Datagaliwabehanda bilimu nabilimu ledagobi lawai halu ti mana ogodagua bialu halimu lalubi ha ogodagua halimu lalubi lamuleneore ngadagua lamialu kegoni. <sup>21</sup> Ani bialu kegonigo áyu ogoni bialu howa dege í biamogo bilonaga agali maru wali agali haru holene mugube karu dabowa uruni tigua wali agali haru helo dabolene nga. Haru haga marume wali agali daosini (1,000) haruha marume handarini (100) haruha marume pira duriani (50) haruha marume pirani howa haru haga haga bigi bialu wali agali wabuni dewaore mo ta howa haru helo haru haga agali urunidagua dabo helolene nga. Agali Ngode Datagaliwabe hondowa giho hagaru mbirale ibugua bulebira lowa hanaho habeherubi ndelalu dange hana habe naherubi hondowa urunibime wali agali haru helo dabolene nga. <sup>22</sup> Wali agalinaga godi larago hale halu dabagane agali uruni helolene nga. Ti biabe ogoniale biaga ka lene howa biaabo helo dabo helolene nga. Genda emene ale ngaru tigua lo tiga bigi bialu bi timbuni gendabi tigua hangu lai habe nahe ngaru í keria yalu ibugu bulene nga. Anidagua mo tale birimiyagua í genda yu kegoni maru tigua yamu yu kagola í yabiabi holebere. <sup>23</sup> Anigo áyu o langerogoni Ngode Datagaliwabehanda labe ledadagua langerolo manda bidogo o larogonidagua biriyagua í kalukalu bialu ngoe ngoe lowa hongo pirilipe naholebira. Ani bialu wali agali o bu karu tibi nde tinaga genda abale mo tiga berami handala andaga polebira, lalu Yaderohanda lai hene.

<sup>24</sup> Mosesehanda manda bialu hearia Yaderohanda bi layagoni heneneore layada manda bialu lamiyadagua bule manda bini. <sup>25</sup> Ani manda buwa ibugua Isaraele agali hearu bibahende bi libele lo handama pialu agali maru wali agali haru habehe mugubeyi hearu dabo helene. Agali uruni marume wali agali daosinini (1,000) handaya ho hela marume handarini (100) handaya ho hela marume pira duriani (50) handaya ho hela marume pirani handaya ho haga haga bigi bilo dabo helene. <sup>26</sup> Ani biyagola agali uruni tigua wali agalime bi laga biyaru hale halu lo tabaga bialu mo tiga bigi bini. Bi tigua hangu lo tababe nahe gendabi ale wiaru Mosese hearia yu pugu bialu emene yabiabi ale tigua labehe wiaru tigua lo tabalu hene. Ti biabe ogoni bia li hole bialu hene.

<sup>27</sup> Yaderohanda Mosesehondo agua bia lalu lamiyadagua Mosese ibugua hale halu biyago handalu howa nde Yadero ibu ibuni dindi, Dai bero, layagola Mosesehanda, Nde pobe, lene.

## 19

### *Isaraele wali agali Hari Sainai heagoria henego ogo*

<sup>1-2</sup> Isaraele wali agali ti Lebidimi dindi wahalu pene. Iyibi dindi howa tagira ibuwa ege tebonegonaga horo mbira pigane ngabu layagola Sainai dindi ko wali agali nahaga wiagoria anda ibini. Anda ibuwa Hari Sainai heago teneha palu hole balai anda ya gimbu bu hene. <sup>3</sup> Wali agali biaru ti ani bu hea handala Mosese ibu hari biagoha iraga halu Ngode Datagaliwabela heba bi lole pene.

Ani pu hearia Anduane Homogohanda hari biagoha howa bi lamialu Yagabanaga aguanene Isaraele wali agali hearuhondo bi lamilonaga Mosese lamini. <sup>4</sup> Mosesehondo Isaraele wali agali lamilo agua lene. Isaraele wali agali tí biamogo bule lowa Anduane Homogo ína Iyibi wali agalihondo birugo tí de handarimigoni. Ega bodo hariawe ale ibu igini ibuninaga babaganeni berelowa yalu yaga lagadagua ína tí ínaga payani au yalu



ibalu o kamigoriani yupeho heledogoni tí manda bidamigoni. <sup>5</sup> Ani birugonigo áyu tígua ina bi larodaguaore hale halu bialu ina habo nalolene bi lo ngoruni napuguiore harimiyagua tí ininaga wali agaliore holeberemi. Dindini mbirale bibahende ngarubi wali agali bibabende karubi inaga degego ai tíore inaga wali agali dabeneore holeberemi. ✠✠  
<sup>6</sup> Inaga hanguore hole lowa loma bini tí inaga loma binigo mo miagame biabe biradagua bia haga holeberemi laya, lalu lamibe, lene. ✠ <sup>7</sup> Ani laya handala hale halu Mosese ibu hari biagoha howa dalipe halu puwa Isaraele wali agali haru haga hearu íbu ngoai hadaba lowa Anduane Homogohanda labe layaru bibahende o biaruhondo lamiai hene. <sup>8</sup> Ani lamiyago wali agali bibahendeme hale howa tigua ladai bialu lalu, Anduane Homogohanda layadaru damene iname bibahendeore hale halu biai holeberema, lene. Tigua anidagua ladai biyagola wali agalime agua laya lalu Mosese ibugua Anduane Homogo lamini.

<sup>9</sup> Ani lamiyagola Anduane Homogohanda Mosesehondo lalu, Áyu howa ina beraliba timbuni mberane biagoha howa tí kamigoria ibuwa bi laga bulebero. Ina ihondo bi laga berogo hale howa wali agalime ina bi laga berego hale halu ti yu tiga bulebira, lene.

Isaraele wali agalirume agua laya lalu Mosese ibugua Anduane Homogohondo lamini. <sup>10</sup> Ani lamiyagola Anduane Homogohanda Mosese lamialu lalu, Áyu wali agali kagoria puwa lamialu áyu yawila tíha kobi dodobi para karu domo wahalu halimu laya, labe. Wali agali tí ko dodo bagabi howa i mitangi bialu mo dunini howa lotu lole i kogoria ibabe nahe holebira laya, labe. Tinaga aga baya hangu wayawaya bialu <sup>11</sup> yawi howa luma i mitangi bialu ihondo lotu lole halimu laya lamibe. Ina horo ogoningi wali agali bibahende i de handai helo Hari Sainaini dalipe holebero laya, lamibe. <sup>12</sup> Ani lamialu wali agali ti hari ogo iraga holemeni hari ogoha ibu haparabi heba holamini laya, lamibe. Ani bialu hari ogo tene tene wali agali ti baba i baba tigi dibu yu mabu bibe. Tigi dibanda kegoha i kohayagi mbirali anda ibulani bibahende tagirayagi hadaba labe. Ani larogoni pugualu mbirali i kogohayagi tigi dibanda kegoha ge yaanda hayagua dogahé ogoni bo tongolomioire lolene nga. ✠ <sup>13</sup> Toleme bo tongolo milalimu. Danda timume bogarimiyaguabi karulapego timu heba bogopeho ngagola mbiralime elaore holamini. Nogo agali bogarimiyaguabi mana mbiraore ogoni hangugo timu heba wu gae lalu tongolo milo ela nahe ngelalimu laya, lalu lamibe. Ai mbelo pu larane hale harimiyagua wali agali bibahende hari ogo iraga iraga bialu ibai halimu, laya, lalu lamibe, lene.

<sup>14</sup> Anduane Homogohanda ani lamigi biya handala hale halu Mosese ibu hari biagoha howa dalipe halu ibuwa wali agali lamialu lalu, Ai Anduane Homogo mitangi bialu ibu mo dunini howa lotu lamiyago manda manda bidaba, lene. Ani layagola wali agali tinaga aga bibahende bayuwa wayawaya biai hene. <sup>15</sup> Ani bu heagola Mosesehanda tihondo lalu, Áyu yawibi bayuwa manda manda bialu howa luma lotu lamiyago dombene nigonihá howa onene agalinila mandagi napale hangu haga haga bilimu, lene.

<sup>16</sup> Ai horo tebone biangi egerebagiore hayagola hari daba bialu hari kulu lalu beraliba mberane tohe timbunigo li hari biago neneni pu banga biyagola mbelo hongo howaore halu mbira tolade lene. Ani bigi biyago hondowa wali agali bibahendeme gi hai howa duru ala lalu hene. ✠✠ <sup>17</sup> Ani bialu heagola Mosesehanda wali agali bibahende Ngode Datagaliwabe lola helo lowa haru tagira puwa hari biago teneha hope ho helene. <sup>18</sup> Ani bu hearia Anduane Homogohanda hagua hungula ala bima bima tagira ibiyagola Hari Sainai emene mbira pana hole ndo ali haguame ndibulo wahene. Hagua timbuni anda dene hagua mbaulego paṽ lalu iraga iraga biyago hondowa wali agali biaruru mogo lowa duru emene agima ndo gangawalu ibani lene. <sup>19</sup> Ani bialu mbelo tolade layagobi lama

✠ 19:5: Man 4.20, 7.6, 14.2, 26.18, Ta 2.14 ✠ 19:5: 1 Pi 2.9 ✠ 19:6: Mo 1.6, 5.10 ✠ 19:12: Hi 12.18-20  
 ✠ 19:16: Mo 4.5 ✠ 19:16: Man 4.11-12



iralu lo hongore hene. Mosese ibugua bi ibuni lalu Ngode Datagaliwabehondo layagola Ngode Datagaliwabehanda hari kulu lalu howa ladai bini. <sup>20</sup> Ani bialu Anduane Homogo ibu Hari Sainai neneoreni dalipeho howa, Mosese í hari neneore ogoriani iraga halu íbu, lene. Mosese ibu hari nene biagoriani pu heagola <sup>21</sup> Anduane Homogohanda ibuhondo lalu, í áyu ogoni dalialu wali agali lamialu ti í de hondole manda buwa ti baba í baba tu wirimago bolangua halu í kohayagi naibalimu. Tu wirimago bolangua halu ibirimiyagua ti dewali homa mburi loleberemi laya, lalu lamibe. <sup>22</sup> Loma binigo mo miaga karubi heba í kohayagi kaware íbu hapara haramiru tibi dodo bibahende bayuwa mbililo wahene howa íbalimu. Ani nabi dodo bagabigo iraga harimiyagua nde bibahende pani mulebero laya labe, lalu lamini.

<sup>23</sup> Ani layagola Mosesehanda Anduane Homogohondo lalu, Hari ogoni wali agali ge nahagago ti baba í baba tu tigi dibuyu mabu bibe larigo manda buwa wali agali ti hari ogo iraga halu ibulene gi holebira, lene.

<sup>24</sup> Ani layagola Anduane Homogohanda Mosesehondo ladai bialu lalu, í áyu ogoni dalialu Arono damu pialu libu haru íbalibu. Ai wali agali bibahendebi loma binigo mo miagarubi ti bibahende baba ina tu wirimagoni ti tini kamiha hamilimu. Tu biago boladaga halu í koha kaware ibirimiyagua dogae ogoni pani mulebero laya labe, lalu lamini. <sup>25</sup> Ani laya handala Mosese ibu dalialu puwa Anduane Homogohanda layadagua wali agali biaru lamini.

## 20

### *Bi Mana Pira lenego ogo (Mana Loyane 5.1-21)*

<sup>1</sup> Ngode Datagaliwabehanda ibuninaga bi lenego ogo. <sup>2</sup> I Anduane Homogo tínaga Ngode Datagaliwabe ina tí Iyibi dindini garabaya biabe ale biaga hemiria haru tagira ibirugoni í kogoni, lene.

<sup>3</sup> Tígua dama tara tarahondo bi pupu wiaga karu mitangi nabi í hangu mitangi bialu mo dunini howa lotu lalu halimu, lene.

<sup>4</sup> Mbirale mbira hari daligaha winibi dindini winibi ibaha winibi humbirini andagaha winibi uruni mbiragoha winigo Ngode Datagaliwabe handaradagua bule lowa gime wa nabilimu, lene.\* <sup>5</sup> Mbirale gime wabini mbira mo ngelowa ogonihondo tíni bulu palialu bi pupu nawilimu. Ani nawilimu larogo irane tínaga Anduane Homogo Ngode Datagaliwabe ini kogola mbiralime ogonidagua bilo henge namiaga kogoni. I handabe manga halu erembira ngiaga kago pani mialu ogoninaga waneigini mani hama porarubi daba tebone mane daba haragoriabi pani miaho dege ngoria hondolebira.\* <sup>6</sup> Ai í gubalini halu ina larodaguabi inaga mana lo wirugo ngodaguabi hale halu biaga karu ina ti gubalini halu maha ti waneigini dabane hama poraru gubalini hahoa wiaabo haga kogoni, lene.

<sup>7</sup> Mana ohowa tara tara bulenenaga í mini lalu labi biabi nabilimu. I tínaga Anduane Homogo Ngode Datagaliwabe kogo mbiralime inaga mini mo nagalone haga kago pani miaore bulebero, lene.\*

<sup>8</sup> Sabada horo ininaga loma biaho ngeledogo í mitangi bialu halimu.\* <sup>9</sup> Tí horo waragaru tinninaga biabe bulene horo o ngarunigo\* <sup>10</sup> ai horo kanego í mitangi bialu halo halimulonaga nga. Horo kane ogoningi biabe bulene nawiore. Tíni tí waneiginirubi tínaga biabe biaga karubi dindi tarali maru tí heba mandagi kamirubi tínaga nogorubi tí bibahendeme biabeore mbira nabi halimu. <sup>11</sup> Horo waragaruni í Anduane Homogo ina dindi bibahendebi hari daligabi ibabi mbirale bibahende uruniha ngarubi karubi

\* **20:4:** Har 34.17, LBM 19.4, 26.1, Man 4.15-18, 27.15    \* **20:5:** Har 34.6-7, Dag 14.18, Man 7.9-10    \* **20:7:** LBM 19.12    \* **20:8:** Har 16.23-30, 31.12-14    \* **20:9:** Har 23.12, 31.15, 34.21, 35.2, LBM 23.3

wabiai harugoni. Ai horo kanengi i halo hene ko. Anduane Homogo ina ani bini kogome Sabada horo ogoni mo bayale halu loma bini ngeledo, lene.✧

12 Tigua aba aiyala mo yo handa nabi laradagua hale halu bilimu. Anigo tí dindi ina ngerogoni lu haabo holeberemi.✧

13 Wali agali homelo nabalimu.✧

14 Wali agali kayu nayalimu.✧

15 Mbirale page nabilimu.✧

16 Ke howa dibade nahalimu.✧

17 Agali mendeibunaga anda kago hondowa tí hame nalalimu. Ibu one bedago hondowabi tí dimagoli nahalimu. Iibunaga biabe biaga wali agali karubi ibunaga nogo hinidarubi ibunaga nogo dongi karubi ibunaga mbirale maru ngaru bibahendebi tí hame lalu dimagoli nahalimu, lalu lai hene.✧

*Wali agali gi henego ogo  
(Mana Loyane 5.22-33)*

18 Hari kulu layuagobi mbelo biguli layuagobi kirabalime tolade layuago wali agali tigua hale howa handalu hearia hari daba gibi biayuagobi Hari Sainai biagoha hagua paū lalu tagira ibiyagobi hondowa ti gi timbuniore hene. Gi timbuni howa ibida pugu pugu bialu duru lalu haga haga bini.✧ 19 Ani gi howa tigua Mosesehondo lalu, Ina inahondo bi lariyagua iname hale holeberamagoyu ai Ngode Datagaliwabehanda inahondo bi langiyagua ina áyu ogoni homolomada manda buwa giho kamagoni, lene.

20 Tigua ani layagola Mosesehanda ladai bialu lalu, Tí gi nahalimu. Ngode Datagaliwabehanda áyu tí ba handalu ibugua laradagua hale halu bialu mana ko nabilimulonaga o bigi biyaruni de handalimulo ibunaga hongo walia haya, lene. 21 Mosesehanda ani laya hondobi wali agali ti gi howa de pigipiagolo kaundia namu hayagoriani haho wiaabo hene. Ti ani biagola Mosese ibuni dege hari beraliba mberane arumahe wiagoha Ngode Datagaliwabe heagohayagi kaware pu hapara hene.

*Lomabu delaga dabu wabulene mana lowinigo ogo*

22 Anduane Homogohanda Mosesehondo lalu, Isaraele wali agaliruhondo bi ogo lamibe lowa lalu, I Dahuliya andagaha howa tí baba bi lalu harugoni manda bu kamigoni. 23 Ani manda bu howa tigua bi pupu wulenaga mbirale mbira ngolo silibarumebi wabu ngelowa urunihondo bi pupu wulene nawiore. Tigua ini hanguhondo mitangi bialu lotu lalu halimu. 24 Tigua dindime lomabu delaga dabu wabu helowa ogoriani nogo bulumaga sibiru bo loma bialu irani dai helo delalu Anduane Homogoinila ho gimbu bulenaga lomabi bo delalimu. Tigua inihondo mitangi bialu lotu lalimulonaga ina dindi dabo ngelarugo bibahendeha inime wali agali mo turu halu bayale helonaga ibu holebero. 25 Tigua lomabu delaga dabu ege toleme bulene manda birimiyagua nde ege tole agalime podo wini ngagome nabilimu. Ani larogoni irane ege tole biabe biaga aeane ngagome podowa dabu birimiyagua nde ogonidagua binime inaga dabu bulene tiga nabi nga.✧ 26 Ani bialu lomabu delaga dabu daligaore egegeria bima iraga halu bo delole nabilimu. Tigua loma delolenaga iraga howa bo delalu karia wali agali dindiha bu karu we lai holigo daligaore nabilimu laya, lalu lamibe, Anduane Homogohanda Mosesehondo lene.

✧ 20:11: Pig 2.1-3, Har 31.17 ✧ 20:12: Man 27.16, Md 15.4, 19.19, Mg 7.10, 10.19, Lg 18.20, Eb 6.2-3 ✧ 20:13: Pig 9.6, LBM 24.17, Md 5.21, 19.18, Mg 10.19, Lg 18.20, Lm 13.9, Ya 2.11 ✧ 20:14: LBM 20.10, Md 5.27, 19.18, Mg 10.19, Lg 18.20, Lm 13.9, Ya 2.11 ✧ 20:15: LBM 19.11, Md 19.18, Mg 10.19, Lg 18.20, Lm 13.9 ✧ 20:16: Har 23.1, Md 19.18, Mg 10.19, Lg 18.20 ✧ 20:17: Lm 7.7, 13.9 ✧ 20:18: Hi 12.18-19 ✧ 20:25: Man 27.5-7, Yos 8.31

## 21

### *Wali agali garabaya biabe ale biaga karu handayaho holene mana ogo (Mana Loyane 15.12-18)*

<sup>1</sup> Anduane Homogohanda bi laabo halu lalu, Isaraele wali agalihondo bi mana ogo lamibe. <sup>2</sup> Isaraele wali agali bu karu aria degeme t́inaga garabaya biabe ale biaga helo yolo mialu helarimiyagua mali waragariani hangu biabe bialu helalimu. Ani bialu mali kane haragola ti pelo golope halimu. Ti pole howa muni mbira ibu anduane kagohondo mia nabi pelo wahalimu. ✧ <sup>3</sup> Ibugua t́inaga garabaya biabe ale bule ibiyangi ibu wali dabu nabi heneyagua nde ibuni hangu polene nga. Abale ibu wali dabubi howa ibu one heba garabaya biabe ale bialu heneyagua nde ibu one heba pelo pudaba lolene nga. <sup>4</sup> Anigo ai anduanedago ibugua ibunaga biabe biaga ogoni wali mbira miragola walime waneigini taba hanayagua nde waneiginirubi walibi anduane ibuninaga helo wahalu garabaya biabe ale biaga agali biago ibuni hangu polene nga. <sup>5</sup> Ani buwa garabaya biabe ale biaga agali biago ibugua lalu, Inaga agali anduane kagobi i one waneiginirubi yu wahalu napole layagua <sup>6</sup> nde agali anduane kago ibugua ibunaga garabaya biabe ale biaga agali ogoni Anduane Homogo andagaha haru polene nga. Ani bialu garabaya biabe ale biaga ogoni anda panga harabani helowayaguabi anda haneni helowayaguabi anduane kago ibunime agali ogoninaga hale diri bolo wulene nga. Ani bolo ngagola agali biago ibu anduane biagonaga garabaya biabe ale bialu haabo halu homalu waholebira.

<sup>7</sup> Agali mbirame ibu wane garabaya biabe ale bilo lowa yolo biragola miyagua wandari ogoni ibugua garabaya biabe ale bialu mali karia howa agali garabaya biabe ale bialu hene golope halu pu laga ngadagua wandari biago golope halu pu nalolebira. <sup>8</sup> Agali mbirame wandari ogoni yolo bialu howa mani ibuni dabu bulene manda bialu yolo buwa dege ibugua wandari biago dabu bule manga hayagua nde wandari aba ibunime ibu wane lone yolo biadai bulene nga. Agali anduane biagome mana bayale bulene ngadagua ndo biyago ai ibugua agali dindi taraha howa ibiragohondo yolo bidaba lalu muni tagulene nawi. <sup>9</sup> Agali mbirame wandari mbira ibu iginime dabu bilo yolo biyagua nde agali ogoni ibugua ibuni waneore handayaho hagadagua handayaho holene nga. <sup>10</sup> Agali wali biago anduane kago ibugua wali mende dabu biyagua wali ala dabu biyago baya hangu handayaho holene nga. Ibugua wali mende biago dabu nabi howa mana ala biaga wiyadagua wali ala dabu binigonaga tomo agabi mialu ala hagadagua holene nga. <sup>11</sup> Agali biago ibugua ogonidagua nabiyagua nde wali ala dabu bini biagohondo ibunaga muni ngiadai bia nale wahalu ibuni andaga pu lolene nga, lalu Anduane Homogohanda lene.

### *Gungunaga mana ngago ogo*

<sup>12</sup> Anduane Homogohanda laabo halu lalu, Kirali gungu bialu karia mendealime mendealigo bo homelayagua nde бага biago ibuni homelo bo waholene nga. ✧ <sup>13</sup> Anigo agali ogoni ibugua mendeali biago baro lalu ndo bame gungu bialu kabiria mememe bo homayagua nde bagago ibuni tano maru agali mememe bene ogoni ale ibida pialu ha do helo dabo ngeloleberogoha howa hada payabu hole polene nga. ✧ <sup>14</sup> Anigo agali kirali gungu bialu kabira mendego keba howa homelo henemane bo wahayagua nde бага biago ibunibi nde bo waholene nga. Agali biagome mendealigo bo wahalu ibugua nahomole lowa inaga lomabu delolene dabu wabu wiagoha ibida piyagua ibu minalu haru pubagi howa ibuni homelo bo waholene dege nga.

<sup>15</sup> Mbiralime ibu aba aiyabi bayagua ibuni nde homelo bo waholene nga.

<sup>16</sup> Mbiralime wali agali mende kago minu page buwa yolo ngilo lowa mendealihondo minu miyaguabi ibuninaga garabaya biabe ale bialu helo minu helayaguabi ogonidagua biaga kago ibuni nde homelo bo waholene nga. ✧

<sup>17</sup> Mbirali ibu aba aiyalahondo keba howa ha halu Anduane Homogohanda pani milo layagua ibuni homelo bo waholene nga.✧

<sup>18</sup> Kirali gungu bialu mendego kangomebi gimebi ege tolemebi benego homa nabiyagua бага hayago ibuni pani mulene nawi. Benedago ibu ibuni andagaha dagiani wuwa <sup>19</sup> mani lone heyalu halimbu yalu tagira poragola agali бага biago ibunime bene warago wiyagonaga muni mbira mulene nga. Muni biabe bulene winigo bayagome ibuni yolo biabe bibe nahedagola buru paluebira manda bialu dabi helo ngatagi yolo miagadagua mialu holene nga.

<sup>20</sup> Garabaya biabe ale biaganaga anduane mbirame ibunaga garabaya biabe ale biaga wali agaliyaguabi mbirago kangome baragola ogoningiore abale tongolo miyagua nde anduane ogoni ibuni pani nelu milimu. <sup>21</sup> Anigo mbirali biabe bia haga bayagua abale barangiore homa ndo horo kiru tebirubi wuwa homayagua nde ogoni anduanedago ibuninaga munime yolo bialu ibunime hameleda ale bulenaga ani yolo bu helenego ai mani ibuni hame handa walia holebira. Hame handa walia holebiragome pani ogoni karulapego tigua pani lone namilimu.

<sup>22</sup> Kirali gungu bialu karia wali nuyi mbira bedagoha gungu buya howa wali ogoni hingedaragola gali tombeha bedago mo ko haragola yu wahalu wali ibuni mo ko nahe bayale bereagua nde wali hingedene biago agalini kagome hingedayagohondo yolo bia laradagua bulene nga. Anigo tinaga mana dabaki haga karume karulape ogodagua mibeheda laradagua wali agalini biago ibu mo yulene nga. <sup>23</sup> Ai wali biago hingedayagome mo ko hayagua nde hingedayago ibuni pani ogodagua mulene nga. Wali biago homayagua nde agali hingedayago ibunibi homelo bo waholene nga. <sup>24</sup> Ani bialu de bo hundia hayagua nde ibuninaga debi bo hundia halu ne bo hondayagua ibuninaga ne bo hondalu gi bo podayagua nde ibuninaga gi bo podalu ge bo podayagua nde ibuninaga ge bo podalu bulene nga.✧ <sup>25</sup> Ani bialu wali irame heda hayaguabi tingini maruha mo ko haragola tingini dere timbuni biyaguabi gewame bo baulo wahayaguabi uruni biyadagua agali ogoni ibunihondo biadai biai holene nga.

<sup>26</sup> Agali mbirame wali agali ibunaga garabaya biabe ale biaga karu aria mbiragonaga de bo hundia halu mo ko hayagua nde anidagua biyagome ibu garabaya biabe ale biyagonaga yolo biadai biradagua ibu bame golope halu andaga pu lolene nga. <sup>27</sup> Wali agali garabaya biabe ale bialu haga karu aria mbirago anduane kagome baragola ibunaga ne bo hondayagua nde ibunaga anduane kagome ne bo hondayagonaga yolo biradagua ibu bame golope halu ibuni andaga pu lolene nga, lalu Anduane Homogohanda Mosesehondo, Isaraele wali agaliruhondo lamibe, lalu lene.

### *Nogo bulumagame mbirali mo ko hayagua bulene ngago ogo*

<sup>28</sup> Anduane Homogohanda laabo halu ogodagua laya. Bulumaga mbirame ibunaga hagianeni ne gayane kagome wali agali balu homelayagua nde tigua bulumaga ogoni homelo bo waholene nga. Ani bialu nogo bulumaga ogoni nanalimu. Bulumaga aba kagohondo abi bia lalubi nalalimu. <sup>29</sup> Ai nogo bulumaga ogonime ala keba haabo halu wali agali bama ibaga biaabo haga kago hondowa wali agalime bulumaga anduane kagohondo bi hongo howa lamiaabo haragola ibugua bi hale nahe tingi halu ibunaga bulumaga pabeha hela nabiyaguabi nde ogodagua bilimu. Nogo bulumaga biagome waliyaguabi agaliyaguabi bo wahayagua nde ibunibi nogo aba kagobi kirabali homelo ege toleme bo wahalimu. <sup>30</sup> Bulumaga aba biagome ibuni nahomolenaga muni yolo mule manda biyagua nde muni yolo ogodagua bulene nga larago laradaguaore yolo biyagua nde karulape ogoni. Ani biragome ibu homa nabi helolebira. <sup>31</sup> Bulumagame wandari igiribi mbira bayaguabi nde mana mbiraore ogonidagua dege bulene nga.

✧ 21:17: LBM 20.9, Md 15.4, Mg 7.10 ✧ 21:24: LBM 24.19-20, Man 19.21, Md 5.38

<sup>32</sup> Bulumaga mbirame wali agali garabaya biabe ale biaga karu aria mbirago balu home-layagua nde bulumaga aba kagome wali agali homayagonaga anduane kagohondo muni kina handari tebira ale (300) mialu nogo bulumaga biago ibuni homelo wali agali tigua ege toleme bo waholene nga.

<sup>33</sup> Agali mbirame gundu uli bu yi hene ngago mo wabia howa duguaho ngelayaguabi gundu uli gahenge timbuni tombowa bu yi nahe ngagoha nogo bulumaga dongiru mbira pilalu <sup>34</sup> homayagua nde agali o biagome nogo homayago anduane kago yolo bialu nogo homene biago ibuni dawa nolene nga. <sup>35</sup> Ai mbiralinaga bulumaga hinidago mendealinaga bulumaga kagome balu homelayagua nde nogo hayaga kago anduanebi homene ngago anduane kagobi libu haru nogo hayaga kago muni taguialu muni libuni talebu ki halu nogo homene ngagobi libuni bo daga bulene nga. <sup>36</sup> Ai nogo bulumaga hayaga biagome ogonidagua biaabo haganego manda buwa anduane kagome bulumaga ogoni pabeha hela nabiyagua nde bulumaga homene anduane kago nogo mbira hada aribia halu nogo homene ngago ibuni dawa nolene nga, lalu Anduane Homogohanda lene.

## 22

### *Ko biragonaga mo tiga bulene mana lo ngago ogo*

<sup>1</sup> Agali mbiralime mendealinaga bulumaga mbirayaguabi nogo sibi mbirayaguabi page bialu bayagua haru halu puwa muni miyaguabi nde nogo anduane kago hado aribia holene nga. Bulumaga mbiranaga bulumaga duria hado aribia holene nga. Nogo sibi mbiranaga sibi maria hado aribia holene nga. <sup>2-4</sup> Mbirale page biragonaga miadai bulene nga. Pageali kago ibugua miadai bulene mbira nawi heayagua nde ibuni nogo mbirale page biyadago anduane kagonaga garabaya biabe ale biaga holene nga. Ai nogo bulumaga dongi sibiayaguabi mbira page binidagoni balu nane ibu daluha heagua nde pageali kago ibugua nogo kira miadai bulene nga.

Mbiraga pagealime mbiralinaga anda gialalu anda pialu karia anda anduaneme hondowa pageali ogoni homelo bo tongolo milayagua nde anda anduane biago ibuha ko nawi. Anigo horombe bayagua anda anduane biago ibuhabi nde bia ko hene dege wulebira.

<sup>5</sup> Mbiralime ibunaga nogo bulumagaru yupe howa ibuni daluhayagibi ibunaga pu mbira mini gerebi lini dagane mabuhabi nalu heledagola bulumaga biarume agali mende daluhabi mendealinaga gerebi mabuhabi anda puwa nayagua nde nogo anduane kagome gerebi linibi tomo bayaleore ibuni mabu tawe bialu mabu anduane kago yolo bulene nga.

<sup>6</sup> Mbiralime ibuni dalu dangi teha bo delalu karia datimbu howa mendeali dalu ngagohayagi dama pialu tomo hangedarubi widi lini gandulo ngarubi dalu biyagua nde bo delaga kago ibugua tomo dayadago damene bibahende bu aribia holene nga.

<sup>7</sup> Agali mbirame ibunaga muni dabudaburu agali mende ibu nenege kagome ngelo handayaho habe lalu mialu pedagola pagealime mo pagebu yalu pialu karia handa walia hayagua pageali ogoni ibugua mbirale mo page binigo aleore kira kira mo aribia holene nga. <sup>8</sup> Anigo pageali biago handa walia nahayagua nde agali mbirale uruni handayaho hagadago ibuni wali agali ngoai howa lotu laga ngagoria haru pu helolene nga. Ani haru pu heledemigola agali mbirale handayaho haga kago ibu ininaga deni howa ibugua lalu, Heneneore larogo ina mbirale uruni mo page nabiore, lalu latagi holene nga.

<sup>9</sup> Anidagua dege mbiralime nogo bulumagayaguabi dongiyaguabi sibiayaguabi agabi yari tara tarabi mbirago ibunaga nenege mende kagola inaga inaga lowa garere bialu hebiyagua nde kirabali inaga deni wali agali ngoai howa lotu laga ngagoria haru polene nga. Ogoriani howa daba handalu kamiria mendealime ke howa laya lalu ina dababagi



harogo ibugua mende henene laga kago mbira mbira uruninaga haluki dege dege miadai bulene nga.

<sup>10</sup> Mbiralime nogo bulumagayaguabi dongiyaguabi sibiyaguabi mbirago ibu nenege mbira kagome hinu habe lalu pedaria nogo uruni mbirago homayaguabi mo ko hayaguabi wai tigrume wai anda ibuwa haru halu piyaguabi mbiralime handa nabiyagua <sup>11</sup> nde libu haru ininaga deni wali agali mo ngoai howa lotu laga ngagoria puwa Anduane Homogo ininaga minini howa bi heneneorego latagi holene ngago ogo. Heneneore larogo inaga nogo ogoni ina bo pagebi hado pagebi nabiore kogoni, lolene nga. Anidagua laragola nogo aba hayadago ibugua mememe ereba hayadago hado aribia nahe wahabe lolene nga. <sup>12</sup> Anigo mbiralime hado page biniyagua nde nogo hinu hayadagome nogo anduanedago nogo hado aribia holene nga. <sup>13</sup> Nogo ogoni nogo gabuame balu nayagua nde naya lalu anduane kago ibuni mo walia hole nalu ibira henedago mo yalu anduane karia polene nga. Ani bialu nogo gabuame nogo bo nayadagonaga miadai bulene nawi.

<sup>14</sup> Agali mbirame ibu agali nenege kagonaga nogo bulumagame biabe bulenaga haru pialu karia mo koha homa biyagua nogo anduane ibuni nahende heagua nde agali o biagome ibu nogo anduane kagohondo yolo mulene nga. <sup>15</sup> Anigo ai bulumaga anduane libu haru mandagi kabiria homayagua nde mememe biyada lalu waholene nga. Ai nogome biabe bilo haru polenaga nogo aba biago muni marume yolo bialu haru peneyagua nde mo koha homa bidagola yolo miadai bulene nawi. Yolo ala biyadagoni karulape, lene.

### *Mana lowinigo maru ogo*

<sup>16</sup> Anduane Homogohanda laabo lalu, Agali mbirame wandari mbira ibu agalila nahene biruwa mbirame dabu bule lo berelenebi ndo mbira bedago kayu biyagua nde agali ogoni ibugua wandari aba ala yolo bialu wariabu hende holene nga. Ani bialu ibu dabu bulene nga. <sup>17</sup> Anigo wandari aba biagome ibu wane agali ogonime dabu nabule layaguabi nde karulape. Ani layagua agali ogoni ibugua wandari hibaria berene yolo biagadagua wandari aba biago nogo tawa bo mulene nga.

<sup>18</sup> Wali mbirame wali agali maru tomia biyagua ogoni ibu homelo bo waholene nga. <sup>19</sup> Wali agalime nogo biango karu baba kayu biaga heagua ogonidagua biaga kago homelo bo waholene nga, lene. <sup>20</sup>

<sup>19</sup> Wali agalime nogo biango karu baba kayu biaga heagua ogonidagua biaga kago homelo bo waholene nga, lene. <sup>20</sup>

### *Mana maru ngago ogo*

<sup>20</sup> Wali agalime mbirale loma bialu Anduane Homogo ihondo hangu ngulene nga. Anidagua nabi howa mbirale dama mitangi bialu gime wabini ngaruhondo lomabu miaga mbira heagua ogoni ibu homelo bo wahalimu. <sup>21</sup>

<sup>21</sup> Wali agali dindi tara tara ngaruha howa ibu hene karuhondo mo ko halubi genda mo mialubi mbira nabiore halimu. Ani larogoni irane tinibi nde bamba Iyibi dindiha anidagua dege harimigo mitangi bialu halimu. <sup>22</sup> Wali dalo ti agalini homene bedarubi waneigini ti aba aiyala homene bu karubi uruni mo ko nahalimu. <sup>23</sup> Tigua uruni mo ko harimiyagua nde tigua biamogo bia lalu ihondo bi laragola Anduane Homogo ina tinaga bi larago hale lalu biamogo bulebero. <sup>24</sup> Ani bialu tinondo keba timbuni howa tinaga waitigi bu karume ti baba wai bialu ti mo ko howa bo hilo wahelo ibilolebero. Anidagua berogola ti one bedaru agalini nahe dalo bialu tinaga waneigini bu karu aba nahe hono wahene lalu bulebira.

<sup>25</sup> Inaga wali agali bu karu aria mbiraligo ibu muni nawi yagibano howa agali ogonibi kagome tinaga muni mo dano hayagua nde ti biyinaya biagame muni bolangua howa bo yudai bule lowa mendealiha wia hagadagua nabilimu. Tinaga dano harimigo tiga

✧ 22:16: Man 22.28-29 ✧ 22:18: Man 18.10-11 ✧ 22:19: LBM 18.23, 20.15-16, Man 27.21 ✧ 22:20: Man 17.2-7 ✧ 22:21: Har 23.9, LBM 19.33-34, Man 24.17-18, 27.19

tiga ngiadai birangi bolangua howa ngi lolene nawiorego nalalimu. ✧ <sup>26</sup> Mbiralime t́naga dano harimigo hongoleore lalu manane ibunaga dagare bulilono biaga aga tohe ngago t́hondo ngiyagua nde horo ogonngi dege mbiraga ni palia nabidaore abale yu daibu milimu. ✧ <sup>27</sup> Ani larogoni irane mbiraga dagare biragola tongobu paluene aga mende nawi howa mbiraore ogoni hangu wuwa dagare holebiragonaga laro. Ibunaga aga tohe dagarenaga biaga ogoni t́ mo yu haabo harimiyagua nde ibuni mbiraga dagare biragola aga agome tongobu paluebadabe. Anidagua beramigola yagibano uruni tigua ihondo bi laragola ina wali agali tanabi dara hai haga kogome tinaga bi larago hale halu biamogo bulebero.

<sup>28</sup> Ngode Datagaliwabe iniore kogohondo bi ko nalalimu. Ani bialu t́naga agali haguane kago ha halu ibu karia mo ko holene wilo lalu nalalimu. ✧

<sup>29</sup> T́naga mabuha widi linirubi gerebi lini ibanerubi olibe lini ibanerubi pigane boga birago inihondo lomabu ngulene manga nahalimu.

T́ igini wahene taba hanaragobi inihondo lomabu ngilimu. <sup>30</sup> Ani bialu t́naga nogo bulumaga sibirume igini pigane wiragola horo karu angibuni baba helo wahowa horo halini haragola inihondo bo lomabu ngilimu.

<sup>31</sup> T́iore ininaga wali agali kamigo manda bialu nogo tara tara bu karu aria mbira gabua karume bo wahene irabuha wiagua ogoni nolene nawiorego manda bialu nanalimu. Wahalu biango karume nelo mo milimu, lalu Anduane Homogohanda lene. ✧

## 23

### *Isaraele wali agalime mana bayale bulene winigo ogo*

<sup>1</sup> Anduane Homogonaga bi mana Mosesehanda latagi halu lalu, T́gua hale halu kamiria ogoale mbira biyada lowa diburibu mbira lalu kane hale howa henene ndoyagua bi te ogoninaga latimbu nahalimu. Mbiralime mana pugualu nabulene nga lowini mbira biyane deme handarimiyagua nde godi deni ke howa biamogo bialu la nahe tigatiga latagi halimu. ✧ <sup>2</sup> Agali dewalime mana ko ngago bialu hai heagua nde ko biaga uruni talialu mana ko biradagua t́gua nabilimu. Agali dewalime godi deni howa godi larago la ko helonaga bi mo lingilungu biyagua mana ogoni biradagua nabilimu. <sup>3</sup> Mbiralime agali ko yagibano kago godini haru íbu helayagua nde ko ogoninaga bi lahalu mo wulenaga godi ke howa bi nalalimu. ✧

<sup>4</sup> T́naga waitigi kagonaga nogo dongi bulumagayaguabi mbirago pora bialu t́ daluha íbu heagua nde nogo anduane ibu karia haru dai bilimu. ✧ <sup>5</sup> Ani bialu waitigi kagonaga nogo dongi mbiragonaga erekunini dabudabu yu kaore harigani pilo wiagua nde t́naga waitigi hayadago biamogo bialu nogo pilo ngago mo heya halimu. Ibu harigani pilo ngelalu napilimu.

<sup>6</sup> Agali yagibano mbira godi lola lowa lalu karia t́gua bime bope halu mo hondo howa mo luluya nahalimu. ✧ <sup>7</sup> Agali mende kago baba ke howa noa taini godi nalalimu. Agali ko nabi mbira kago bameore godi deni íbu helarimiyagua ibu helowa homelo bo wa nahalimu. Mana ko ogonidagua birago ibu ina dabaki harogola ke howa godi laga kago ibu ke hayagonaga pani nolebira. <sup>8</sup> Mbiralime ke godi lolenaga ke halu bi lahabe lowa muni ngiyagua muni ogoni mo yulene nawi. Mana ko ogonibi biragome agali ko mbira nabi kago bi degeme mo luluya halu godi lolene ngago ndo la ko helaga ka.

<sup>9</sup> Wali agali dindi tara taraha howa t́ daluha íbu hene maru heagua nde urunihondo mana ko nabi bayuwa helo halimu. Anidagua bulene ngago irane t́nibi nde Iyibi dindiha hemiria Iyibialime t́hondo biyago mitangi bialu ani nabilimu. ✧

✧ 22:25: LBM 25.35-38, Man 15.7-11, 23.19-20 ✧ 22:26: Man 24.10-13 ✧ 22:28: Ab 23.5 ✧ 22:31: LBM 17.15  
 ✧ 23:1: Har 20.16, LBM 19.11-12, Man 5.20 ✧ 23:3: LBM 19.15 ✧ 23:4: Man 22.1-4 ✧ 23:6: LBM 19.15, Man 16.19 ✧ 23:9: Har 22.21, LBM 19.33-34, Man 24.17-18, 27.19

*Mali kanengi howa bulenebi horo kaneni howa bulenebi mana lo ngago ogo*

<sup>10</sup> Tíngaga mabu ngamiruha mali waragaruni tomo hangarimigo bialu tíni nolenaga ngelaga bilimu. <sup>11</sup> Anigo mali kane haragola dindi ibu emene ngelo wahowa mabuha tomo minana andaho karu nabilimu. Mabuha hangabi nabule dege. Dindi ibu emene bame ngelo wahalimu. Pu mbira lini daga mini gerebi mabu ngamiruhabi olibe mabu ngamiruhabi ani dege bilimu. Anidagua bidamigola wali agali yagibano karu ti tomo uruni bu nalu helo. Ti bu nalu howa ibira harago nogo ega biru karu ti nalu helo yupe halimu.

<sup>12</sup> Sarere bibahendeangi horo waragaru biabe bialu halimu. Anigo horo kaneni biabe damenego bibahende nabi halo hai halimu. Tíngaga wali agali biabe bia haga bu karubi hongo mialu horo ogoningi halo helo. Wali agali dindi taraha howa íbu hene karubi bibahende halo haga bilo helalimu. Horo ogoningi tíngaga nogo dongi bulumagarubi biabe nabi dege halo helo helalimu. <sup>13</sup>

Anduane Homogo inime bi o larogo baya hangu hale howa taluwa bialu halimu. Mbirale dama mitangi bialu bi pupu wule gime wabini ngaruhondo bi pupu nawi halimu. Mbirale uruninaga minibi naloleore lalu hongo howa larogoni, lalu Anduane Homogohanda Moseseha howa latagi hene.

*Anduane Homogo mitangi bialu lotu lolene timbuniore mali mbira andaneha halu tebo wubagi helenego ogo*

*(Haru Penego 34.18-26, Mana Loyane 16.1-17)*

<sup>14</sup> Anduane Homogohanda lalu, Mali mbira mbiranaga andaneha horo timbuniore ihondo mitangi bialu lotu lolenaga halu tebira daba bagiho ngelalimu. <sup>15</sup> Horo timbuni mbirago Mberedi Yidi Nahe Hirini Nolenengi tíni mo mogobu howa inihondo mitangi bialu lotu lalu holene nga. Ege Abibi haragola ina bilimu lalu langirudagua tí mo mogobu howa horo karu mberedi yidi nahe hiru nalu halimu. Bi ani larogoni irane ege ogongiore inime tí iyibi dindiha howa haru tagira ibirugoni. Tígua i mitangi bialu lotu lole eberemingi mbirale ihondo ngulenaga lomabu wirimigo mo yalu ibugu bilimu. <sup>16</sup>

Horo timbuni mendego tíngaga mabuha tomo hangedemigo liniru pigane darami-angi horo uruni mini Mabuha Widi Lini Bogabi Gandulo Winigonaga Horo lalu uruningi i mitangi bialu lotu lalu holene nga. <sup>17</sup>

I Anduane Homogo tíngaga Ngode Datagaliwabe kogo ina mali mbira mbirago andaneha horo timbuniore halu tebira uruni ihondo mitangi bialu lotu lalu halimulo daba bagiho ngelarogo uruningi Isaraele agali bibahendeore i mitangi bialu lotu lole íbu ngoai ho halimu.

<sup>18</sup> Tígua ihondo nogo mbira bo lomabu ngialu howa mberedi yidihe hirini nangilimu. Mbirale bo lomabu delaramigonaga abene habaneru horo mendengi nangelalimu. Ogongiore delai halimu.

<sup>19</sup> Tíngaga tomo hangedemiru ariame lini pigane bogabi bayaleore daramirunaga maru Anduane Homogo tíngaga Ngode Datagaliwabe inihondo lomabu ngule inaga anda yalu ibalimu. <sup>20</sup>

Tígua nogo meme igini sibi iginiyaguabi mbirago ibu angibuni andu ibane beha hambu yu delaramigoha delamaga nahalimu, lene.

*Anduane Homogohanda buleore lalubi bi galonebi laga binigo ogo*

<sup>10</sup> 23:10: LBM 25.1-7    <sup>11</sup> 23:12: Har 20.9-11, 31.15, 34.21, 35.2, LBM 23.3, Man 5.13-14    <sup>12</sup> 23:15: Har 12.14-20, LBM 23.6-8, Dag 28.17-25    <sup>13</sup> 23:16: LBM 23.15-21, 23.39-43, Dag 28.26-31    <sup>14</sup> 23:19: Har 34.26, Man 14.21, 26.2

<sup>20</sup> Anduane Homogohanda laabo halu lalu, Bi o larogo hale halimu. Tí poleberemigoha inaga dahuliyali tí mamage helonaga ala mo bamba halu pelolebero. Ani bialu tí dindi mbira ina ngulenaga manda mandabu ngeledo larugoha haru polebira. <sup>21</sup> Tígua ibunaga bi larago hale howa talialu bilimu. Inimeore ibu tí heba helo ibilarugo ai inibi ibu heba mandagi kogo wali agalime ibunaga bi mo wahalu mana ko birago hondowa ibugua ko ogoni wa naholebira. <sup>22</sup> Anigo tígua ibunaga bi hale halu ina bilimu ledodagua biai halu harimiyagua nde ina tínaga waitigi bu karu baba wai bialu bope holebero. <sup>23</sup> Inaga dahuliyali kago ibugua tí haru halu Amoro dindibi Hidi dindibi Perese dindibi Kenana dindibi Hibi dindibi Yabusu dindibi dindi uruniha pialu biragola ina wali agali uruniha karu bibahende bo amo lolebero. <sup>24</sup> Tígua dindi uruniha puwa mbirale dama mitangi bialu gime wabini ngaruhondo ge duli hanga howa bi pupu nawilimu larogoni. Tígua bi pupu wialu howa biagane mana ngarubi nabuleore larogoni. Tí puwa tinaga bi pupu wiaga anda bu heledaru bo giallo wahai halu mbirale bi pupu wulenaga wabu ngeledaru bibahende dambu gingirulobaga bu wahai halimu. <sup>25</sup> In Anduane Homogo tínaga Ngode Datagaliwabe kogo nde tígua i mitangi bialu ihondo hangu lotu lalu halimu. Anidagua bialu harimiyagua nde ina tí mo bayale halu tomo ibabi nalu halimulo ngialu tínaga warago tara tara ngaru mo wahai holebero. <sup>26</sup> Tí dindiha wali tí one bedarume waneigini nataba hene berelo mbira ina mo wa naholebero. Bibahendeme waneigini gali taba hanaiore holebira. Tí nibi nde dindini luore howa hodagua halu homoleberemi.

<sup>27</sup> Inime tí poleberemigoha pu bamba halu puwa wali agali tara tara bu karu ihondo gi helo mo gi holebero. Tínaga waitigi bu karu tibi tihondo gi helo mo gihaga bialu mo luluya ho helolebero. Ani berogola tí handalu ibida piai helolebero. <sup>28</sup> Dindi tí poleberemigoha wali agali hayaga aleru bamba halu pelolebero. Anidagua pelarogola wali agali hayaga ale urunime Hibialibi Kenanalibi Hidialibi bibahende wara pelai holebero. <sup>29</sup> Anigo wali agali uruni mali mbira hanguni waratagi hai naholebero. Ani waratagi hai haruyagua nde nogo gabuabi ega tara tarabi dewa bedarume dindi ti karulai halu tí mo ko holobadago <sup>30</sup> ina ti hendore waratagi haga bulebero. Ani buwa tí ho dewa halu dindi emene karula dindi aba emene bo taliatagi ha bigi bialu dindi tí karulo halimulo mo ngiai holebero. <sup>31</sup> Tí halimulonaga dindi tubari iba solowara mini Iba Daramabi laga bedago angeha Agaba dindi ngagoria howa pialu iba solowara timbuni Meditereniana bedagoria tagira polebira. Ani bialu tubari uyurayaginaga iba timbuni mini Yuberedisi poragoria howa daliape halu dindi abene unurayagi dindi ko wali agali nahaga ege kelekele ngagoria tagira polebira. Dindi uruniha agali dindi aba bu karu baba wai bilimulo hongo karulapeore ngerogola tígua dindi ogoniha anda puwa wali agali uruniha karu bo taliatagi hai holeberemi. <sup>32</sup> Ani anda puwa tígua wali agali dindi ogoniha hene karu bababi tinaga bi pupu wiaga gime wabini ngaru bababi habo nalolene bi mbira buleore lalu lo wia nabilimu. <sup>33</sup> Ani bialu wali agali ogoniha hene karu tínaga dindi ogoriani helo nahelalimu. Helarimiyagua wali agali urunime tí mo hondo harago nahende henene larabe toba howa tígua inihondo ko buligonaga laro. Tígua tinaga bi pupu wulenaga gime wabini ngaruhondo bi pupu wialu harimiyagua tí mo ko halu piloleberemi, lalu Anduane Homogohanda Moseseha howa bi ogoni latagi hene.

## 24

### *Habo Nalolene Bi lowinigo mo hongo henego ogo*

<sup>1</sup> Ani biyagola Anduane Homogohanda Mosesehondo lalu, Mosese-o hari ogoni iraga halu i kogoria ibu. Í ibalu Aronobi Nadababi Abihubi tígua Isaraele wali agali haru haga agali pira karia (70) biarubi tí haru ma lalu ibalimu. Ani bule ai áyu ibalu howa tí o kaundia kamigoriani howa bulu paluwa i mitangi bialu mo dunini howa lotu

lalimu. <sup>2</sup> Maru o mini laruruni mbira i kogoria hapara hole ndogo homane í hanguore i kogoria kaware ibabe. Ai wali agali bibahende hari ogoha mbira ge haraga halu ibulani handabe, lene.

<sup>3</sup> Ani laya handala Mosesehanda wali agali hearia puwa Anduane Homogohanda bilimu lalu bi layagobi ogo nabilimu lalu mana lamiyagobi bibahende Isaraele wali agali lamiai hene. Ani lamiyago hale howa wali agali bibahendeme ladai bialu lalu, Iname Anduane Homogohanda layadadagua bibahendeore hale halu biai holeberama, lai hene. <sup>4</sup> Anduane Homogohanda bilimu lalu bi layago Mosese ibugua bibahendeore gilibu wiai hene. Ani bialu horo mendengi egerebagiore ibugua lomabu delagane dabu mbira hari biago teneha bu helene. Ani buwa ibugua tole homberia (12) Isaraele hameigini homberia (12) hayago ta howa ibugua hongo mabu bini. <sup>5</sup> Ani buwa ibugua igiri daliahe hearume nogo bulumagaru Anduane Homogola ho gimbu bulenaga bo delo mule pudaba, lene. <sup>6</sup> Ani bialu Mosese ibugua nogo biaru darama hanuni yabu lowa halu mende ibu beha hambu ngelowa halu mendego dabu biagoha odo bade hene. <sup>7</sup> Ani buwa ibugua habo nalolene bi lowini mbuga Anduane Homogohanda bi lenego gilibu wini biago muwa bi dalimu lowa wali agali hale hai helo dagalope hene. Dagalope hai heagola hale howa wali agalime Mosesehondo lalu, Iname Anduane Homogohanda bi olayadagoni damenego bibahendeore hale halu biai holeberama, lai hene.

<sup>8</sup> Ani layagola Mosesehanda nogo darama beha hambu wiyago muwa wali agali bu hearuni tandala ba hene. Tandala ba halu howa lalu, Anduane Homogohanda tí baba ibu baba ie lalu habo nalolene bi lowinigo lo yu tiga birimigonaga mo hongo hagane darama ogoni, lene.✧

<sup>9</sup> Ani lalu bialu Mosesebi Aronobi Nadababi Abihubi tigua Isaraele wali agali haru haga agali pira karia (70) biaru ti hari biagoha iraga halu pene. <sup>10</sup> Ani puwa tigua Isaraele wali agalinaga Ngode Datagaliwabe biago hearia de hendene. Ngode Datagaliwabe ibunaga ge habe yaraga howa nira buguni hari damindinigobi ku tagalitaya ale domodomobi wuyu pearia hendene. <sup>11</sup> Isaraelenaga agali haguane uruni ti Ngode Datagaliwabe de handayagonaga ibugua ti mbira mo ko nahene. Ti ibu de hondowa agali biaru tini mandagi biruwa tomobi ibabi mandagi nene.

### *Mosese Hari Sainaini henego ogo*

<sup>12</sup> Ani buwa Anduane Homogohanda Mosesehondo lalu, Hari ogoni iraga halu i kogoria ibabe. Í ogoria íbu kegola ina ege tole mbalape kirani inaga mana lo wirugo Isaraele wali agalime bilonaga gilibu ngogo ogoni nguliya, lene. <sup>13</sup> Ani layagola Mosesebi ibunaga biamogo biaga Yosubi libu harume Mosese ibu hari loma bini biagoha iraga halu pelonaga manda manda bini. Manda manda biai howa Mosese ibu hari biagoha iraga halu pialu hene. <sup>14</sup> Pialu howa Mosese ibugua Isaraele wali agali haru haga biaruhondo lalu, Iyame pialu dai bulubago tigua anda birimaru o karunigo uruniha palu halimu. Arono Huala libu tí heba o haramigonigo bi lo tabolene mbira wigi birangi ogolabo karia pugu bilimu, lene.

<sup>15</sup> Ani lalu bialu Mosese ibu Hari Sainai iraga halu pialu hearia beralibame hari biago dambi ho hene. <sup>16-17</sup> Anduane Homogo ibuni íbu howa ibunaga wá holene de mborerebi hiriribigo hari biagoria hope hene. Wá hope hayadagoni Isaraele wali agali tigua handalu hearia hari biago neneni ira daradagua biyaria hendene. Ani bialu horo waragaru hari beraliba biagome hari biago dambi ho wiaabo hene. Ani buwa horo kanegoria Anduane Homogohanda beraliba biagoha howa Mosese olene. <sup>18</sup> Ani olayagola Mosese ibu hari biagoha iraga halu piaho wialu beraliba biagoha anda pene. Anda puwa o biagoniha horo mbi heba pira maria (40) ho haabo hene.✧



## 25

### *Anduane Homogonaga Balai Anda bulenaga mbirale mulene nga lenego ogo (Haru Penego 35.4-9)*

<sup>1</sup> Anduane Homogohanda Mosesehondo lamialu lalu, <sup>2</sup> Isaraele wali agali bu karuhondo lamialu, Tígua mbirale ihondo loma bialu ngulene manda bu kamiru tanabi loma bialu ngilimu, labe. Tigua ngiraru ale bibahende mo ya dege bibe. <sup>3</sup> Lomabu ngiraru ngolobi silibabi boronosibi uruni lomabu ngulene nga. <sup>4</sup> Ani bialu nogo sibi irinime pu wabini mindibi hari mindini handalehebi tagalitayabi mo daramabi hene ngarubi aga baya taraore ngarubi nogo meme irinime wabini labolabo baya taraore ngarubi uruni lomabu ngulene nga. <sup>5</sup> Ani bialu nogo sibi wangabenaga dongone mo daramabi hene ngarubi wena timbuni iba tia alenaga dongone bayale ngarubi ira bayale mini agasia laga kagonaga gabini bayale ngarubi loma bulene nga. <sup>6</sup> Ani bialu lamu hale delolenaga olibe lini ibanebi mbirale ininaga wiabagi hene ngelonaga padua ngabi tara tara ngaru heba biamaga hene ngarubi ira hagua ngabilo delaga inisenesi ngarubi lomabu ngulene nga. <sup>7</sup> Ani bialu ege tole muni dewaoreme yolo miaga tara tara ngarubi loma binigo mo miaga agali haguane timbuninaga aga mini ebodi mo yáribia halu labolabo galuhombeni karulaga ngagobi mo yári bia holenaga migi bulene nga.\* <sup>8</sup> Ani bialu ini tí heba mandagi holiya inaga Balai Anda mbira tínaga balai anda bu kamiru dombeneha bia halimu, lalu wali agali lamibe. <sup>9</sup> Ai inaga anda ogoni ogobi helo lalu andanaga magi manda ina ihondo mo walia harodagua bilimu, lene.

### *Habo Nalolene Bi lo winigonaga Mbogoyi wabulene nga lenego ogo (Haru Penego 37.1-9)*

<sup>10</sup> Anduane Homogohanda laabo halu lalu, Wali agali tígua Mbogoyi mbira ira agasia dibu pelowa mbaraleore ngagome wabilimu. Mbogoyi ogoni luninaga magi sendimida emene handari mbirani pira mbira (110) arane timbuninaga magi sendimida emene pira waragariani waragaria (66) manda bima iraga halu magi sendimida emene pira waragariani waragaria (66) helo wabilimu. <sup>11</sup> Ani bialu ngolo bayaleore irani do taulo wahene ngarume Mbogoyi ogoni tagira tamuhabi baya hangu paraho dambi halu bu gimbu bini nene pugu bidadagua ngolo baya uruni ariame mo homane howa paraho mabu bilimu. <sup>12</sup> Ani bialu Mbogoyi ogoni iraho yulenenaga gi pagida ale holene gimbuni maria ngadagua mabubi maria ngolome dege wabuwa gene maria dindiha karu ta howa wabu helalimu. Gene mende mendehabi kira labolabo helalimu. <sup>13</sup> Ani biai howa Mbogoyi iraho yulenenaga ira agasiame ira kira wabu ngelalimu. Ani ngelowa ira ogoni labobi ngolome para hadambi dege halimu. <sup>14</sup> Ogoni biai howa ira ogoni labo Mbogoyinaga gene dindiha mbirale mabubi gi pagida ale ngolome wabu helarimigoha Mbogoyi iraho yalu polenedagua abe tale buwa mo karulalimu. <sup>15</sup> Ira kira Mbogoyi iraho yulene ogoni labo golo wia nabi Mbogoyi heba kaore ani wiaabo helo helalimu. <sup>16</sup> Mani ege tole mbalape kirani inaga bi mana wabu nguleberogo Mbogoyi ogoniha wilimu.

<sup>17</sup> Ani bialu mbogoyi ogoninaga panga ngolo bayaleore ngagome wabuwa luninaga magi sendimida emene handari mbirani pira mbira (110) wialu arane timbuninaga sendimida emene pira waragariani waragaria (66) ngelo wabu helalimu. Ogoriani howa wali agalime mana ko biniru domo waholene wulebira.\* <sup>18</sup> Ani buwa tígua dahuliyali handalehe kira ngolo bayaleorerume baya hangu hamame bo dambu tiga bigi buwa wabilimu. <sup>19</sup> Ani wabuwa Mbogoyinaga daligani mendego gi tigaha mendego gi lehayagi lowa talebu helalimu. Tígua ngolome Mbogoyinaga pangabi

\* **25:7:** Aga mini ebodi emene tubagi labolabo baya gibioreme wabu winigo ogoni loma binigo mo miaga agali haguane timbunime karulaga hene. Ebodi ogoni buhayagi daligani labolabo emene mende galu hambeni karulagane biagonaga pogedi ale lebu ngagoha ege tole emene kira mini Urimu Tumimubi wiaga. Be 28.30 handabe.

☆ **25:17:** Hi 9.5

dahuliyali handalehe ogonilabobi wabilimu. Mbirale uruni ti hangu hangu wabia ndo Mbogoyi pangabi dahuliyali handalehebi bibahende mbiraoreha wabu gimbu bini ngelo wabilimu. <sup>20</sup> Dahuliyali handalehe kira ogonilabo libuni handa edene buwa Mbogoyinaga panga daligani wali agalinaga ko domaga laga ngagoria helalimu. Libunaga babaganeme Mbogoyinaga panga yula dambi hai helo helalimu. <sup>21</sup> Ani biai kamigola ege tole mbalape kirani inaga bi mana gilibuwi nguleberogo Mbogoyi biagoha ogonilabo mo ngelowa panga payalimu. <sup>22</sup> Ani bu ngeledemigola ini ibalu ila Mbogoyi panga wali agalinaga ko domaga ngagoria lola holebero. Ini dahuliyali handalehe kira handa edene bu heledamigoria hanuni ibu howa ina ihondo inaga bi mana latagi halu holebero. Anigo bi mana uruni Isaraele wali agalime taluwa bialu helo ina tihondo lamulene nga, lalu Anduane Homogo ibugua Mosesehondo lamini.

*Anduane Homogohondo mberedi lomabu minigo mo wulenenaga dagia wabulene nga lenego ogo*

*(Haru Penego 37.10-16)*

<sup>23</sup> Anduane Homogohanda ogodagua laya. Tebolo dagia mbira ira agasia dibu pelowa ogonime wabilimu. Tebolo dagia ogoni luninaga magi sendimida emene pira halirani halira (88) aranenaga sendimida emene pira mariani maria (44) wialu daliganaga sendimida emene pira waragariani waragaria (66) helo wabilimu. <sup>24</sup> Ani wabu ngelowa ngolo bayaleme paraho dambi halu tebolonaga gibuni nene ngadagua ngolo mo homane howa paraho dambi halimu. <sup>25</sup> Ani buwa tebolo nenenen ngolome paraho mabu bulenego tohenaga magi sendimida emene halira helowa ogonime tebolo nenenen ngolome para hayago lone paraho dambi halu tebolo nene bibahendeni paraho mabu bupe halimu. <sup>26</sup> Ani buwa tebolo biago iraho yulenenaga ngolome wabini mabubi maria gi pagida ale wabuwa gene maria kagoha ta howa wabu helolene nga. <sup>27</sup> Ani bialu tebolo iraho yulenenaga mabubi uruni gi pagida ale ogoni tebolo gene maria kago tiga tiga nene ngolome paraho dambi hayago andaneha dege haparaho helolene nga. <sup>28</sup> Ani buwa ira agasiame tebolo iraho yulene kira manda mandabu ngelowa ngolome paraho dambi halimu. <sup>29</sup> Ani bialu waini iba loma binigo odo delolene ndisibe mbira wabialu beledibi be marubi wabia dege bilimu. Be uruni bibahende ngolo bayale hangume wabiai halimu. <sup>30</sup> Ani bialu tigua mberedi ihondo lomabu ngeremigo bibahende ininaga deni tebolo dagia ngagoria yu puwa ngelalimu, lalu Anduane Homogohanda lene.\*

*Lamu hale wiagane irane mbiraoreni gebagene kariahe wabulene nga lenego ogo*

*(Haru Penego 37.17-24)*

<sup>31</sup> Anduane Homogohanda laabo halu lalu, Tigua ngolo bayaleorerume lamu hale wiagane irane wabu helalimu. Hamame ngolo baya hangu dambu tiga bigi buwa lamu hale gene helolene tene baya hangu ngelowa irane ogoriani mo karulo helalimu. Ani buwa lamu halenaga gene kagoria ginigene helowa wabu halimu. Ani buwa ngolome dege balawaya wabuwa lamu hale gene ogoniha wabu gimbu bigi bilimu. <sup>32</sup> Lamu halenaga irane ogoriani ginigene waragaria wabuwa abene mendeha tebira mendehabi tebira dege dege wabu helalimu. <sup>33</sup> Lamu hale gebagene biarunaga mbira mbirani balawaya ira amononaga lini ale tebira dege dege wabu helalimu. <sup>34</sup> Lamu halenaga iraneni balawaya bayale ira amononaga lini dedaligobi mitangi bialu maria wabu helalimu. <sup>35</sup> Ani biai howa lamu hale gebagene biaruni andanehayagi balawaya yuni ale mbira mbira wabuwa helaga bilimu. <sup>36</sup> Ani bu ngelowa hamame bo ndibulaga bialu mo mbiraore howa wabu gimbu biai halimu. <sup>37</sup> Ani biai howa lamu halenaga dolene karia wabuwa irane manda mandabu wirimigoria berelaga bilimu. Ani buwa lamu hale wa haragome inaga Balai Anda kagoha daanda helonaga baya hangu mo dabadaba howa mo tiga bu ngelalimu. <sup>38</sup> Ani buwa ira dedago tabolene pero mbira

ngolo bayaleoreme wabialu beledi marubi wabilimu. <sup>39</sup> Lamu hale wabulenenaga gene biagobi bibahende wabulenenagabi ngolo genda magi kilogarama pira tebirani duria (35) mo ngelowa bulene nga. <sup>40</sup> Tígua mbirale uruni wabule howa ina ogobiore bilimu lalu hari nene biagoria howa walia harugoni manda buwa langirudagua bilimu, lalu Anduane Homogohanda Mosesehondo lamini.✧

## 26

### *Anduane Homogonaga Balai Anda bulene ngago ogo (Haru Penego 36.8-38)*

<sup>1</sup> Anduane Homogohanda laabo halu lalu, Tígua inaga Balai Anda bule anda dangi labolabo pu payini bayaleore mindibi hari mindini handalehe ngarumebi tagalitaya handalehe ngarumebi daramabi ngarumebi wabini ogobi dege dege labolabo pirame bulene nga. Ani bialu aga lebiaga pume dahuliyali handalehe labolaboni lebiama halimu. <sup>2</sup> Labolabo pira bibahendego ogobi dege dege wabu ngelalimu. Luninaga magi mida homberia (12) yangalenaga mida kira lowa wabu ngelalimu. <sup>3</sup> Ani buwa duria halu mbira lebumaga halu duria mendego halu mende lebumaga halimu. <sup>4</sup> Ani buwa labolabo ogonilabo mo gimbu bulenaga aga mindibime mabubi gi pagida ale wabuwa lene leneha mo gimbu bulenedagua helaga bilimu. <sup>5</sup> Gi pagida ale uruni labolabo ogoni kirabalinaga arane mende mendehayagi dege pira duria (50) labolaboni helaga bilimu. <sup>6</sup> Ani bu helowa ai labolabo timbuni biagolabo kirabali mo gimbu bulenaga ngolome wangobi pira duria (50) wabilimu.

<sup>7</sup> Ani biai howa mani Balai Anda dangi timbuni mbira wabuwa inaga Balai Anda ogoni bu dangila dambi hai halimu. Anda dangi ogoni aga nogo meme irinime wabini bearia (11) bibahendeme bulene nga. <sup>8</sup> Uruni bibahende ogobi dege dege helo wabilimu. Luninaga ge magi manda bialunaga mida haleria (13) helo. Arane yangalenaga mida kirame bulene nga. <sup>9</sup> Ani buwa labolabo duria halu mbira lebu gimbu bialu labolabo waragaria halu mende lebu gimbu beramigola labolabo timbuni luni kira holebira. Ani bialu labolabo halu mende waragaria lebu gimbu bini biagonaga waraganego pau ladai buwa balai anda biagonaga harabahayagi dambi helalimu. <sup>10</sup> Ani buwa mbirale gi pagida ale pira duria (50) anda dangi mendegonaga gibuniha wabu helalu pira duria (50) anda dangi mendegonaga gibuniha wabu helalimu. <sup>11</sup> Ani biai howa boronosime mbirale yania helolene wangobi pira duria (50) wabuwa Balai Anda dangi timbuni kira biago laboha wabu helaramigoha yaniaho helaga beramigola labolabo biago lebumaga hene mbiraore mbaule wulebira. <sup>12</sup> Ani buwa anda dangi lalu kamiria luni bolangua holebirago ogoni inaga Balai Anda ogoninaga anda tibihayagi paulope howa luni helo wahalimu. <sup>13</sup> Ani bialu anda manda mende mendehayagibi luni bolangua ho kagome anda ibiduba helo gulatagi ho helo wahalimu. Anidagua biragome Balai Anda dangilo yi hai hene holebira.

<sup>14</sup> Ani buwa Balai Anda dambi holenenaga kirabi wia dege bida. Mbirago nogo sibi wangabenaga dongone mo daramabi ho ngarume wabuwa mendego wena timbuni iba tia alenaga dongone ngagome wabulene nga.

<sup>15</sup> Anda háinaga ira generu gimbu gimbu bulene ira mini agasiame bilimu. <sup>16</sup> Anda ira uruni luninaga ge magi manda bialu mida maria mbalapenaga sendimida emene pira waragariani waragaria (66) helo helalimu. <sup>17</sup> Ira anda háinaga gene uruni maru dindihayagi gimbu bilo manda bialu luniale tigi halimu. Ira bibahende luni tubagi lolani hondowa ogobi dege degeore tigi haga bilimu. <sup>18</sup> Anda háinaga ira kira kira dege dege daba hamagamaga buwa daga lamaga halu pira kira (20) mende mende lowa abene unurayaginaga wabilimu. <sup>19</sup> Ani buwa silibame mbogoyi emene dege dege pira maria (40) anda gene biar berelaga bule wabilimu. Ai anda gene kira mbogoyi

mbiraha helaga bilimu. Ani beramigome mbogoyi mo hongo holebira. <sup>20-21</sup> Anda gene maru anda manda uyurayagi karubi nde ani dege bulene nga. Ani bialu anda gene pira kira (20) wabu manda mandabu ngelalu anda gene berelolene mbogoyi pira maria (40) silibame wabu ngelalimu. Silibame wabini mbogoyi kira kirani anda gene berelolene nga. <sup>22</sup> Ani buwa anda gene ni paliragohayagi waragaria helalu <sup>23</sup> anda gene kira mende manda tibila gimbu biragoha helolene nga. <sup>24</sup> Anda háinaga gene manda tibila gimbu biragoha kira ogonilabo ho pagu pagubi lowa gimbu bima iraga helolene nga. Manda tibila gimbu birago bibahendehe ani dege bulene nga. <sup>25</sup> Ani biragola anda tibihayagi anda gene halira halu siliba mbogoyi pira mbirani waragaria (16) anda gene dindiha mo hongo holene wialu mbogoyi kirame anda gene mbira mo hongo holene wulebira.

<sup>26</sup> Ani buwa anda hái libu banga bulenaga ira mini agasia dibalu lunioneru pelo mbaralowa wilimu. <sup>27</sup> Ira luni mbalape uruni aria duria anda hái manda abene unurayagi libu para halu duria mende uyurahayagi libu para halu duria tebone ni paliragohayagi libu para halu bulenaga ani dibu pelo manda bilimu. <sup>28</sup> Anda hái libu para holenaga ira dibu pelaramigo lunaga anda magi manda buwa anda ibuniore karulape puguwa pelalimu. <sup>29</sup> Ani buwa anda genebi anda ira karubi ngolome paraho dambi halimu. Ani buwa mandaha hái para haramigo yaniaho helonaga ngolome yania holene mabubi gi pagida ale maru wabuwa ira hái libu para kamigo yaniho helaga bilimu. Anda hái para holene ogoni ngolome paraho dambi halimu. <sup>30</sup> Urunidagua biai howa Balai Anda ogoni ina ogobiore bilimu lalu hari nene biagoria howa walia harugoni manda buwa langirudagua bu helalimu.

<sup>31</sup> Uruni biai howa aga labolabo baya taraore mbira anda tamuha hobaki holene wabilimu. Aga timbuni ogoni pu tara tarame mo yári biahaga bialu howa nogo sibi irinime payini mo mindibi howa hari mindini handalehe ngarumebi mo tagalitaya ale hene ngarumebi mo daramabi ho ngarumebi mo yári bia halimu. Ani buwa dahuliyali handaleheru labolabo ogoriani lebialu yári bia halimu. <sup>32</sup> Ani buwa ira agasia mbira dibuwa anda gene ale maria wabuwa ngolome para hadambi halimu. Anidagua buwa silibame mbogoyi maria wabilimu. Ani wabuwa ira gene biago mbogoyi ogoriani helalimu. Ani helowa ira ogoriani aga yani helonaga wangobi mbira ngolome wabuwa ira maria ogoriani ta howa helaga bilimu. <sup>33</sup> Ani buwa labolabo biago ogoriani mo gerela halimu. Mo gerela kamigola anda biago hobaki bulebira. Ani hobaki bu kagola Habo Nalolene Bi lo winigonaga Mbogoyi biago hobane tamuhayagi mo yalu puwa ogoniha ngelalimu. Labolabo biagome anda biago mo hobaki kagola Hobane mbirago Loma Bia Hene halu Hobane mendego Loma Bia Heneore holebira. <sup>34</sup> Ani kagola Habo Nalolenenaga Bi ege tole kirani gilibu winigonaga Mbogoyi biago tamu Hobane Loma Bia Heneore laga ngagoha mo wilimu. Ani buwa panga ngolome wabu wini biagome payalimu. Panga ogoriani ko binigo domo waholene wulebira. <sup>35</sup> Ani bialu tebolo dagia biago anda Hobane Loma Bia Heneore hayago tagirahayagi mo wilimu. Anda hái abene uyurahayagi kagoria wiapara howa ngelalimu. Anda manda abene unurahayagi lamu hale manda mandabu wini biago mo ngelalimu.

<sup>36</sup> Ani biai howa labolabo timbuni mbira anda ogoninaga panga helole wabilimu. Panganaga labolabo ogoni pu tara tarame mo yári biahaga bialu nogo sibi irinime payini mo mindibi howa hari mindini handalehe ngarumebi mo tagalitaya ale hene ngarumebi mo daramabi ho ngarumebi labolabo wabini ngaruni yári bia halimu. <sup>37</sup> Ira agasia mbira dibuwa gene duria wabuwa ngolome paraho dambi halimu. Boronosime mbogoyi duria anda gene uruni helole wabu ngelalimu. Ani buwa mbogoyi duria uruniha ira gene duria biaruru hanga howa labolabo gerela holene wangobi maru ira ogoriani helalu buwa labolabo biago ogoriani mo gerela halimu, lalu Anduane Homogohanda lene.

✧ 26:33: Hi 6.19, 9.3-5



## 27

### *Lomabu delaga dabu wabulene nga lenego ogo (Haru Penego 38.1-7)*

<sup>1</sup> Anduane Homogohanda laabo halu lalu, Tígua ira agasia dibuwa lomabu delaga dabu mbira wabilimu. Gibuni gibuni bibahendehe ge magi manda bialu mandanaga ogobi dege dege mida kirani sendimida emene pira kira (20) helo. Daliganaga mida mbirani sendimida emene pira tebira (30) halu bilo wabilimu. <sup>2</sup> Ani buwa nogo bulumaganaga ne gayane ale maria ira agasia biagome dege wabuwa gimbuni mariani helalimu. Ani buwa mbirale bulumaganaga ne gayane ale biarubi lomabu delaga dabu ogonibi bibahende boronosime paraho dambi hai halimu. <sup>3</sup> Ani buwa ndisibe marubi ira pungaru hilo yulenaga wabilimu. Ani bialu nama tabuli ale emene marubi nama dege mende genehe mini pogobi beledibi bibahende ira punga hilo waholene ale uruni boronosime dege wabiai halimu. <sup>4</sup> Ani buwa mbirale ira delagane dagia diri dewawi dabu ogoninaga gene maria kagoria helole boronosime dege wabilimu. Ani buwa dabu ogoni iraho yulenaga mabubi mbira gi pagida ale dabu iraho yulenenaga ira helolene maria gene maria kagotha tahowa wabu helalimu. <sup>5</sup> Ani buwa ira delolene dagia biago dabunaga gene obeneni bapara howa hama pialu lina obeneni dege hairi helalimu. <sup>6</sup> Ani buwa mbirale mabubi gi pagida ale maria iraho yulenaga ira nguni pelolene biago nira dindihayagi gene maria biagoria bu gimbu buwa helalimu. Ira agasia pelowa kirago boronosime paraho dambi halimu. <sup>7</sup> Lomabu delaga dabu biago yalu pole howa ira kira ogonilabo mabubi gi pagida ale yulene dindiha manda bu helarimidagua mo karulalu yu pilimu. <sup>8</sup> Tígua lomabu delaga dabu ogoni ira pelene mbalapeme mbogoyi ale dege wabilimu. Ani buwa dindiha henge ngelo wahalimu. Abale ogodagua bilimu lalu amu hari nene wiagoria howa langirudagua bilimu, lene.

### *Anduane Homogonaga Balai Anda biago pabe bu mabu bulene nga lenego ogo (Haru Penego 38.9-20)*

<sup>9</sup> Anduane Homogohanda laabo halu lalu, Tígua labolabo bayaleoreru wabuwa inaga Balai Anda kagotha pabe bu yanda holenaga bilimu. Labolabo ogoni unurahayagi aranenaga ge magi manda bialunaga mida pira mariani maria (44) wabilimu. <sup>10</sup> Ani buwa gene pira kira (20) boronosime wabu wialu gene uruni helolenenaga mbogoyibi pira kira (20) dege boronosime wabu ngelalimu. Ani bialu bubigi homane luni banga bulene silibame wabuwa gene wiaru bibahende daba ho gimbu gimbu bigi bilimu. Ani buwa labolabo bubigi homane luni banga bini biaruni gerela holenaga ta howa silibame wangobi wabu helalimu. <sup>11</sup> Anda manda abene uyurahayagibi ogonidagua dege wabu helalimu. <sup>12</sup> Ai ni paliragohayaginaga pabe labolabo aranenaga ge magi manda bialunaga mida pira kirani kira (22) wabuwa gene boronosime pira wabialu mbogoyibi pira dege gene uruni helolenenaga diriwi wabu helalimu. <sup>13</sup> Ani bialu anda panga haraba abene ni tagira ibiragohayagi ngagotha helolenenaga labolabo aranenaga ge magi manda bialunaga mida pira kirani kira (22) dege wabialu helalimu. <sup>14-15</sup> Labolabome pabe bu yanda ho helolenego aranenaga ge magi manda bialunaga mida waragariani sendimida emene pira waragaria (60) lowa panga haraba anda pu íbu bulenegeria lene labolaboni tale bu helalimu. Boronosime mbogoyi wabu nge-layagoria gene manda manda bu wiyago mendehayagi tebira mendehabi tebira dege lowa helalimu. <sup>16</sup> Pabe buyu mabu bulenenaga labolabo bibahende baya taraoreme wabu helalimu. Labolabo ogoni ge magi manda bialunaga mida dira wabialu pu bayale nogo sibi irinime payini mindibiha guyini hari mindini handalehe ngarumebi tagalitaya aleha guyini ngarumebi daramabiha guyini ngarumebi yári bia halimu. Ani buwa boronosime mbogoyi maria diriwi wabuwa gene mariabi wabia dege buwa diri ogoniha mo karula ho helowa labolabo ogoni ira gene ogoriani mo gerelape halimu.



<sup>17</sup> Gene helama pedamigo bibahende daligahayagi bubigi homane luni banga bulene silibame wabuwa bu gimbu gimbu bigi bu helalimu. Gene uruni ta howa silibame wangobi wabu helaga bilimu. Gene uruninaga helolene mbogoyi boronosi degeme wabu helaga bilimu. <sup>18</sup> Pabe ogoni luninaga ge magi manda bialunaga mida pira mariani maria (44) aranenaga ge magi manda bialunaga pira kirani kira (22) daliganaga ge magi manda bialunaga mida kirani sendimida emene pira kira (20) helo bilimu. Labolabo ogoriani gerela holene pu bayaore ngarume wabilimu. <sup>19</sup> Balai Anda ogoni bulenego bibahende boronosime hangu biai halimu. Ani bialu tigua Balai Anda dangini paulape kagoha mo hongo halu dariba holenaga dindiha gelo helama polene karubi bibahende boronosi hangume wabiai halimu. Labolabome pabe bidago mo hongo halu daba holenebi nde boronosime dege wabilimu, lalu Anduane Homogohanda lene.

*Lamu hale karia wiagane irane mbiraoreni delagaru handayaho holenenaga mana lowinigo ogo*

*(Loma Binigo 24.1-4)*

<sup>20</sup> Anduane Homogohanda Mosesehondo lamialu lalu, Ina Isaraele wali agali lamialu Anduane Homogonaga Balai Anda kagoha lamu hale karia wiagane irane mbiraoreni daho wiaabo helonaga weli bayaleore olibe linime wabiniru yalu ibalimu labe. <sup>21</sup> Arono halu ibu igini karu tigua lamu hale uruni mo yalu puwa inaga Balai Anda biago labolabome hobaki hene biagonaga tamu hobane Habo Nalolene Bi lo winigonaga Mbogoyi wiyagoha ndo hobane mende tagirani hayagonaga ngelelo. Horo pigane eberamiangi weli yalu ibuwa lamu haleha berelalu lamu hale hungubia howa tamuha ngelalu horo bibahendeni ne laragola howa gao lelo ani daho wiaabo helo ngelalimu. Horo bibahendengi weli berelaabo halu lamu hale biaruru ogonidagua daho wiaabo heloleberemi. Ani bialu howa tina waneigini aguanene mani holobadarumebi mana ogonidagua bialu haabo holene nga.

## 28

*Loma binigo mo miaga agalinaga aga labolabo wabulene nga lenego ogo*

*(Haru Penego 39.1-7)*

<sup>1</sup> Anduane Homogohanda laabo halu lalu, Mosese-o i andaga dai bialu i hamene Arono halu ibu igini Nadababi Abihubi Eleasabi Idamabi bibahende ibai hadaba labe. Ani ibu hai kagola Isaraele wali agali bu karu aria lenego ai ti inaga loma binigo mo miaga agaliru helo dabo helabe. <sup>2</sup> Ani helowa wali agali tigua ibunaga aga bayale tara mo yari bia howa Arono milimu. Ani meremigola ibu mo karulo ho helo. Ani howa ibu maru karu aria ndo ibu dabo helene howa mini lene mbira holebira. <sup>3</sup> Agali maru tigua aga bayale tara tara wabigi bilonaga manda tara tara ina talebu migi biruruni ti ibilo olabe. Ibu ngoaiho kagola Arono ibu loma binigo mo miaga howa inaga biabe bulene ngaru bialu howa mo karulo helo aga loma binigo mo miaga agalime biaga lene ngelo maru wabilimu. <sup>4</sup> Ani buwa labolabo emene mbira yari tara tarabi galuhombeni mo karulelo wabia halimu. Ani buwa labolabo mbira mo yaribia howa mini ebodi wabialu mbira luni biagimbu bilo wabialu mbira giha bulene yari biahe wabialu mbira emboneni bobu mabu bilo wabialu mbirago mandibu wilo wabilimu labe. Loma binigo mo miaga agalinaga aga uruni Aronobi ibu igini karubi tigua mo karula howa inaga biabe bia halu helo ani bilimu labe.\* <sup>5</sup> Aga wabiaga agali tigua aga uruni wabulenaga pu nogo sibi irinime payini ngaru mialu maru mindibiha guyini hari mindini handalehe ngarumebi maru tagalitaya aleha guyini ngarumebi maru daramabiha guyini ngarumebi maru pu ngolo handaleheme payini ngarumebi

\* 28:4: Aga mini ebodi Be 25.7 de handabe.

labolabo bayale tara tara ngarumebi loma binigo mo miaga agalinaga aga labolabo uruni wabilimu.

<sup>6</sup> Ani bialu aga mini ebodi pu sibi irinime payini ngago mialu maru mindibiha guyini hari mindini handalehe ngarumebi maru tagalitaya aleha guyini ngarumebi maru daramabiha guyini ngarumebi pu maru tarame payini ngolo handalehe ngarumebi loma binigo mo miaga agalinaga labolabo ogoni mo yáribia haga bulene nga. <sup>7</sup> Ani buwa aga payani erembiraha buhabi paulape kago yania helonaga pu nogo sibi irinime payini ngagome nu ene ale mabu bo bidagoria lebumaga halimu. <sup>8</sup> Ani bialu pu nogo sibi irinime payini ngago mialu maru mindibiha guyini hari mindini handalehe ngarumebi pu maru tagalitaya aleha guyini ngarumebi pu maru daramabiha guyini ngarumebi aga mini ebodi ngagoria mo yáribia howa labolabo karulayagoria dege lebu para halimu. <sup>9</sup> Ani buwa ege tole kira mini kaneliana ngagoria Isaraele hameigini homberia (12) karunaga mini gilibu wilimu. <sup>10</sup> Mini gili bule howa Yagaba igini waheneni howa mini gilibu wima pialu heyogone henegonaga mini gilibu maro bilimu. Ege toleni mini gili bialu howa ai ege tole mbirani mini waragaria gili bialu ege tole mendeni mini waragaria mende gili bigi bilimu. <sup>11</sup> Ina agali mbira ege toleni mini gili biaga mandabi kagome Yagaba igini homberia (12) biarunaga mini ege tole kira ogoni laboni gilibu wiai helo biabe ogoni agali mbira kagohondo mo mibe. Ege tole kira ogoni yania helonaga ngolome parahodambi haga bialu mo yáribia halimu. <sup>12</sup> Anidagua biai howa ege toleni mini gilibuwi biago pume hende howa aga mbira mini ebodi nu ene ale payani mo paulaki howa lebumaga halu erembirahabi ani dege bini biagonaga tombehayagi ege tole Isaraele hameiginirunaga manane biago pongobia halimu. Ani buwa Aronohanda Isaraele hameiginirunaga miniibunaga payani pongobia kagola hondowa Anduane Homogo ina inaga Isaraele wali agali mitangi bu haabo holebero. <sup>13</sup> Tigua ngolome mo yáribia hene kirabi <sup>14</sup> seni pu ngolo bayaleme wabini kirabi mo lu howa pu payaradagua buwa ngolome yári biahe biagoria pongobia halimu, lalu Anduane Homogohanda Mosesehondo lamini.

*Labolabo emene loma binigo mo miaga agali haguane galuhombeni karulelonaga wabulene nga lenego ogo (Haru Penego 39.8-21)*

<sup>15</sup> Anduane Homogohanda laabo halu lalu, Loma binigo mo miaga agali haguane timbuni kago ibugua aga mbira galuhombeni karula dambi helonaga wabulene nga. Aga ogoni Ngode Datagaliwabenaga hame ngago hondolenaga karulagane. Aga mini ebodi emene mbira ala wabirimigo mendebi ogonibi dege wabulene nga. <sup>16</sup> Aga ogoni luninaga magi sendimida emene pira mariani maria (44) wabialu yangalenaga magi sendimida emene pira kirani kira (22) wabilimu. Ani wabuwa hau hanuniore mo paulaki beregola nguni ogobi labolabo helo ani bilimu. <sup>17</sup> Ani buwa ege tole muni dewaoreme yolo miaga ngaru ariame duguni maria helalimu. Duguni mbirago ibu ege tole mini lubibi tobasabi ganedebi uruni helalimu. <sup>18</sup> Duguni mendegoria ege tole mini emeralabi sabaiabi daimonobi uruni helalimu. <sup>19</sup> Ani bialu duguni tebonego ege tole mini tegoisibi agedebi amedisibi helalimu. <sup>20</sup> Ani bialu duguni manenaga ege tole mini berilibi kanelianabi yasababi helaga bilimu. Ege tole uruni ngolome mo yáribia haga buwa mani pongobilo pu helo ngelalimu. <sup>21</sup> Ege tole homberia (12) uruni mbira mbirani Isaraele hameigini mbira mbira karu mitangi bialu Yagaba igini homberia (12) biarunaga mini gili biai halimu. <sup>22</sup> Ani buwa ngolo bayaleme seni pu kira wabuwa ogonime labolabo galuhombeni karulolenenaga hende howa pongobia hole wabilimu. <sup>23</sup> Labolabo galuhombeni karulagane biagola mo barobia holenenaga ngolome mabubi kira wabuwa ogoriani helalimu. <sup>24</sup> Ani buwa seni pu ngolome wabini biagolabo mabubi kira ngolome wabini ngagoria mo pongobia bia halimu. <sup>25</sup> Ani buwa seni pu kira biagolabo nguni mende ege tole kira Isaraele hameigini mini gilibuwi

biagolabo aga mini ebodinaga nu ene ale payani lebu winigoria pongo bia halimu. <sup>26</sup> Anigo ngolome mabubi gi pagida ale kira lone wabuwa labolabo galuhombeni karulaga biagonaga dindihayagi nguni kira kagoria pongo bia halimu. <sup>27</sup> Ngolome mabubi gi pagida ale kirabi lone wabuwa aga mini ebodinaga nu ene ale dindiha lebumaga halimu. <sup>28</sup> Ani buwa pu mindibiha guyini hari mindini handaleheme mabubi kira biagolabo galuhombeni karulaga biago hayagoriani pongobia howa aga mini ebodi biagonaga mabubi hayagoria pongo bumaga halimu. Anidagua beremigome labolabo galuhombeni karulagane ogoni hado ibira habe nahe mandibu hongohe ndibule bidagola barobia hene hadabe nahe hongohe holebira.

<sup>29</sup> Ani bialu Arono ibu Balai Anda biagonaga Hobane Loma Bia Hene biagoha anda pole howa aga galuhombeni karulaganego Isaraele hameigini homberia (12) biarunaga mini gilibuwi biago karulalu anda polene wulebira. Anidagua bu kagola de hondowa Anduane Homogo inime inaga Isaraele wali agaliru mitangi biaabo holebero. <sup>30</sup> Ani bialu Arono ibu Anduane Homogo inaga anda Hobane Loma Bia Hene biagoha ini kogoria anda ibule howa ege tole kira mini Urimu Tumimula aga galuhombeni karulagane biago ibuninaga mani paulaki bini biagoha yalu anda polene wulebira. Ani bulene ngago irane Anduane Homogo ina tigua bialu helo hamelo kogo lamulenaga ani bulebira, lalu Anduane Homogohanda Mosesehondo lamini.†☆

*Loma binigo mo miaga agali biarunaga aga maru wabinigo ogo  
(Haru Penego 39.22-31)*

<sup>31</sup> Anduane Homogohanda laabo halu lalu, Aga luni biagimbubi aga mini ebodi dindiha karulaga biago ogoninaga wabulene pu nogo sibi irinime payini ngago mindibiha guyini hari mindini handalehe hene ngagome wabilimu. <sup>32</sup> Wabuwa loma binigo mo miaga agali kago ibunaga haguane anda pelolenedagua manda buwa hanuni wabu ngelalimu. Ani wabu ngelowa aga lerela timbu holigonaga aga podene mbirame ngunidago paula dai buwa aga lebiagadagua lebulene nga. <sup>33-34</sup> Ani buwa aga ogoni nguni dindihayagi pu nogo sibi irinime payini mindibiha guyini hari mindini handalehe ngarumebi tagalitaya aleha guyini ngarumebi daramabiha guyini ngarumebi mo yari bia halu ira pomegarade lini aleru wabu helaga bilimu. Ani buwa ira pomegarade lini ale yari bu ngagoria dombeni mbelo emene emeneru ngolome wabuwa nguni ogoriani dege pongo bia haga bima pilimu. <sup>35</sup> Anidagua buwa Arono ibugua loma binigo mo miaga biabe bialu howa aga ogoni mo karulo howa bulene nga. Anda Hobane Loma Bia Hene biagoha ini kogoria anda tamuha ibu howa tagira pugu biragola wali agali bu karume mbelo aga biagoria pongo bia hayaru ngilingele laga laga birago hale holebira. Arono ibugua anidagua biyagua nde ibuni homolene nawulebira.

<sup>36</sup> Ani buwa ngolo bayale mbirame mani magagua wulenedagua mo mbalapuwa bi mbira Anduane Homogonaga Loma Biahonaga lalu gilibuwi wabilimu. <sup>37</sup> Ani wabuwa mendebi pu mindibiha guyini hari mindini handalehe ngarume pongobia howa loma binigo mo miaga agali haguane biagonaga wanakuini dombo heda wiradagua wia halimu. <sup>38</sup> Horo bibahendengi Arono ibugua aga manda ogoriani dombo heda ale wanakuini karulo haabo holebira. Ani biragola Anduane Homogo ina Isaraele wali agalime inihondo lomabu ngiraru yamulebero. Anigo tigua mbira bulene ngaru bia ko harimiyagua nde ogoninaga genda Arono ibugua yu howa ibunaga wanakuini karulo kago hondowa tigua ihondo ngirimiru ina yamule dege kogoni.

<sup>39</sup> Ani buwa Arononaga aga mbira giha bulene pu bayale mbirame wabilimu. Ani bialu Arononaga aga manda mbira labolabo bayaleoreme wabilimu. Ani buwa ogoni

† **28:30:** Ege tole emene kira mini Urimu Tumimu biagolabo loma binigo mo miaga agalirume tinaga aga galuhombeni karulaganego mani paulaki binigoria pogedi aleha wiagane. Tigua Ngode Datagaliwabenaga hame manda bulenaga ege tole emene kira ogoni labome mo walia haga wini. Ti agua bialu mo walia hagabe ina manda nabi kama. ☆ **28:30:** Dag 27.21, Man 33.8, Esr 2.63, Neh 7.65

bobu dambi holenenaga aga yáribi bayale degeme wabuwa mandibu wiradagua karula habe.

<sup>40</sup> Ani buwa Arono igini bu karunaga aga giha karulolenebi mandibu biradagua aga luni bo bia dambi holenebi hagianeni karulaga tangi labolabome wabinibi uruni bibahende Arono igini karunaga wabiai halimu. Ani beramigola nde tigua aga uruni karulo kagola wali agali maru bu karunaga deni howa ti agali loma bia heneore mbira henedane hondowa wali agalime ti mini leneore holebira. <sup>41</sup> Anidagua buwa Mosese ína í hamene Aronobi ibu iginirubi agali uruninaga agabi yárirubi bibahende mo karula howa ti loma binigo mo miaga agaliore howa inaga biabe bialu helonaga loma bialu weli bayale olibe linime wabini ngago tinaga hagianeni odo wiahalu bibe. <sup>42</sup> Tigua biabe bulene ngaru bialu karia wali agali wé loligo tinaga darasibi wabu milimu. <sup>43</sup> Arono halu ibu igini ti inaga Balai Anda ini kogoha ibiragolabi Hobane Loma Bia Hene ngagoha loma binigo mo miaga biabe bule lomabu delaga dabu ngagoria pialu howabi darasi ogoni bialu polene nga. Anidagua nabiyagua tini ko ogoni biragonaga homolene wulebira. Arono ibunaga igini aguanene maniore hama polobadarumebi mana ogoni dege talialu haabo holebira, lene.

## 29

### *Loma binigo mo miaga agali dabo helolenenaga mana ngago ogo (Loma Binigo 8.1-36)*

<sup>1</sup> Anduane Homogohanda laabo halu lalu, Arono halu ibu igini bu karu ti inaga loma binigo mo miaga agali helo dabo helabelonaga mana maru bibelogo languliya. Nogo bulumaga wangabe mbirabi sibi wangabe kirabi uruni dere durubi mbira nabioore kago hondowa haru ibabe. <sup>2</sup> Ani buwa balawa widi dambini bayaleore ngagobi mo yalu ibabe. Balawa uruni yidi nahe howa mberedi maru olibe lininaga weli odo biamaga howa wabialu mberedi maru olibe lininaga weli naberele howa wabibe. Balawa marume mbisigediru wabialu olibe lininaga welime hai habe. <sup>3</sup> Ani buwa nogo bulumaga wangabe mbira sibi wangabe kira lowa haru halu ihondo loma bialu bo delalu howa mberedi mbisigedibi wabiriru mbasigedi nu mbiraha honowa inihondo lomabu ngibe.

<sup>4</sup> Arono halu ibu igini biaru i kogoha inaga Balai Anda haneni haru halu ibuwa ilili bialu wayawaya bia halimu. <sup>5</sup> Ani biai howa loma binigo mo miaganaga aga biaru Arononi mo karula habe. Aga giha biagabi aga luni biagimbu biagabi aga mini ebodi biagobi labolabo emene galuhombeni karulaga biagobi mandibu biagobi bibahende mo karula hai habe.\* <sup>6</sup> Ani buwa labolabo emboneni bobu mabu bilo karulaga biago karulalu ogoriani mbirale ngolome wabinigo ogo Anduane Homogonaga Loma Biahonaga lalu gilibuwi biago wanakuini heda wiradagua bilo mialu bibe. <sup>7</sup> Ani buwa dabene helonaga weli emboneni odo wiaga ngagome ibu loma binigo mo miaga helo ibunaga emboneni weli odo wia halu dabo helabe.

<sup>8</sup> Arono ibuni loma binigo mo miaga helo dabo helowa ibu igini biaru aga giha biaga biaru mo karula halu <sup>9</sup> labolabo bo bia dambi holene mandibu wiyago ale mo karula halu tinaga emboneni tangi labolabome wabinigo karulaga wiyago mo karula halu bibe. Arono ibunibi ibu iginirubi ti bibahende loma binigo mo miaga agali helonaga dabaluni bibe. Anidagua beregome tinibi ti igini aguane mani hama polobadarubi bibahendeore loma binigo mo miaga howa inaga biabe ogoni bialu haabo holebira.

<sup>10</sup> Ani buwa nogo bulumaga mbira i kogoha Balai Anda biagonaga haneni haru íbu helabe. Ani helowa ína Arono halu ibu igini biaruhondo lalu, Tigua nogo bulumaga ogoninaga hagianeni gi wilimu, labe. <sup>11</sup> Ani bidagola nogo ogoni ininaga deni howa Balai Anda haraba ngagoria bope habe. <sup>12</sup> Ani buwa nogo bulumaga ogoninaga darama

\* 29:5: Aga mini ebodi Be 25.7 handabe.

maru hambu yuwa lomabu delaga dabu ngagonaga gibuni maria ngagoria nogo bulumaganaga ne gayane ale maria karu ininaga gi hondoneme hai habe. Ani bialu darama maru ibira ho ngago mo yalu puwa dabu ogoninaga dindiha odo paya biai habe. <sup>13</sup> Ani biai howa nogo abenebi habane damenebi kabanaha hene bu karubi gubalini bunibi luhabene lilini kirabi maru podaga buwa ihondo loma bialu lomabu delaga dabu biagoriani delabe. <sup>14</sup> Ani bialu mbirinibi dongonebi tini damenebi bibahende yu tagira puwa tinaga balai anda karu tagirahayagi delabe. Anidagua bulenego irane loma binigo mo miaga agali biarume ko biyagonaga domo wahelo loma ogonigo tagirani delabe.

<sup>15</sup> Ani bialu nogo sibi wangabe mbirago haru anda ibabe. Ani haru ibuwa ina Arono halu ibu iginiruhondo lalu, Tigua nogo sibi ogoni hagianeni gi wiai hadaba, labe. <sup>16</sup> Ani biragola sibi biago balu darama hambu yalu puwa lomabu delaga dabu biagonaga gibuni maria ngagoha tala ba amu nana bibe. <sup>17</sup> Ani buwa nogo sibi ogoni podo бага buwa gebi tinirubi wayawaya bialu sibi hagianebi mbirini podene maru ngarubi heba mo paga howa ngelabe. <sup>18</sup> Ani bialu lomabu delaga dabu ngagoria irani lomabu delai habe. Ani beregola i Anduane Homogo kogo ina loma ogoni irani dai heledegonaga ngabirago hondowa turu timbuni holebero.✧

<sup>19</sup> Ani buwa nogo sibi wangabe mende mbirale lomabu mulenaga biagobi haru anda ibuwa ina Arono halu ibu igini biaruhondo lalu, Tigua nogo sibi ogoninaga hagianeni gi wiai hadaba, labe. <sup>20</sup> Ani bialu nogo bowa darama emene hambu yuwa Arononaga hale tigahayagi teneha darama ogonime hai habe. Ani bialu ibu igini bu karunagabi hale teneha ani dege biai habe. Ani buwa tinaga gi hondone angibiyane ge hondone angibiyanebi tigahayagi hai habe. Ani bialu darama maru ngagome lomabu delaga dabu ngagonaga gibuni maria ngagoha tala ba amu nana bibe. <sup>21</sup> Mani darama maru lomabu delaga dabuni bedago mialu loma binigo mo miaga agali dabo helole hagianeni odo wiaga weli biagobi mialu Aronobiibunaga aga biarubi Arono igini biarubi tinaga agabi bibahende darama ogonime tandala ba habe. Anidagua beregome Arono ibunibi ibu igini karubi tinaga aga bidarubi bibahende ininaga loma bia hene dege wiai holebira.

<sup>22</sup> Ani bialu loma binigo mo miaga agali helonaga nogo sibi loma bini biago podabaga bialu habane abene damene kagobi erene tohe kagobi buni dara buwa darakibi luhabane lilini kirabi ge tigahayagi mbirini tohe kagobi podo wiai halimu. <sup>23</sup> Ani bialu mbasigedi nuha mberedi tara tara ihondo lomabu ngini wabu hanarigo aria mbira mbira yamigi bialu olibe lininaga weli heba biamaga howa wabini biago mbirabi mberedi mende olibe lininaga weli bere nale howa wabini biago mbirabi mbsigedi biaru aria mbirabi mo yabe. <sup>24</sup> Ani buwa nogo sibi ogonibi mberedi biarubi Arono halu ibu igini biaru mo mibe. Tigua mo yuwa i deni howa gi dogolalu wigiwaga lalu yu helo mibe. <sup>25</sup> Ani buwa mberedi uruni tigua yu hayaruni bibahende yamialu lomabu delaga dabu ngagoria irame dai helo delabe. Ani biragola i Anduane Homogo ina loma ogoni irani dai heledegonaga nga birago hondowa ina turu timbuni holebero.

<sup>26</sup> Ani bialu nogo sibi mende mani bene biagonaga galukuni yuwa i deni howa gi dogolalu ihondo yu wigiwaga lowa ogoni inagago i nabe.

<sup>27</sup> Agali mbira loma binigo mo miaga helo gahenge dabo helole howa nogo sabinaga galukunibi ge tigahayaginaga modawane mbirinibi lomabu yuwa i deni howa wigiwaga lalu loma binigo mo miaga agali dabo helolebere. Ani biai howa nogo sibi mbirini odagoni loma binigo mo miaga agali karu ti nelo mo milimu. <sup>28</sup> Inaga Isaraele wali agali tigua Anduane Homogo ila ho gimbu bulenaga tomo nolenengi nogo mbirale bo lomabu mialu howa nogo ogoninaga galukunibi ge tigahayaginaga modawane mbirinibi loma binigo mo miaga agali karu miaabo holene nga. Isaraeleali tigua Anduane Homogo ini kogohondo loma urunidagua bu ngiaabo holebira.

✧ 29:18: Eb 5.2, Pb 4.18



<sup>29</sup> Mani Arono homaragola ibunaga loma binigo mo miaga agalinaga aga damene bibahende ibu igini karuhondo mulebira. Arono igini mbirali ibu loma binigo mo miaga helo dabo helarangi ibugua aga uruni mo karulo holebira. <sup>30</sup> Arono igini mbirame loma binigo mo miaga agali haguane ha aribia howa *ĩ* kogoha *ĩ*naga Balai Anda Hobane Loma Bia Hene biagoha biabe bule ibalu howa ibugua aga uruni horo karu karulo haabo holene nga.

<sup>31</sup> Aronobi ibu igini biarubi ti loma binigo mo miaga helo dabo helarengi nogo sibi wangabe baregonaga mbirini ngaru Balai Anda pabe bu ya anda hene tamu ngagoria todobene behe dawabe. <sup>32</sup> Ani buwa loma binigo mo miaga agali tigua mberedi mbasegedi nuha henene maru ibira hayagobi nogo sibi mbirini urunibi *ĩ* kogoha *ĩ*naga Balai Anda haneni howa nolene nga. <sup>33</sup> Ti loma binigo mo miaga agali helonaga dabalu nogo sibi biago bowa tinaga ko domo waholonaga loma bo delene biagonaga mbirini ngarubi heba nolebira. Ani buwa loma bini uruni wali agali bibahendeme nolene nawigo loma binigo mo miaga agali karu ti degeme nolene nga. <sup>34</sup> Ani buwa nogo sibibi mberedibi uruni ti karulape nalu maru ibira hayagua horo mendeni nole nangelalimu. Nogo sibibi mberedi uruni loma binigo horo ogoningi dege nolene nga. Wia dege biyagua nde wahalu irani dai helo delolene nga.

<sup>35</sup> *Ĩ*na Aronobi ibu iginirubi loma binigo mo miaga helo dabo helalu howa abale bibe lalu langirudagua bialu horo karu bialu habe. <sup>36</sup> Horo karu bibahendengi nogo bulumaga mbira tigua ko birimigo domo wahelonaga loma bialu bo ngilimu. Ani bialu loma ogonime dege *ĩ*ninaga lomabu delaga dabu kagobi ko mbira para nahe bayale dege wulebira. Ani buwa lomabu delaga dabu biago *ĩ*naga loma biahene wilo olibe lininaga weli odo ba habe. <sup>37</sup> Horo karu anidagua biaabo habe. Ani biai kegola lomabu delaga dabu ogoni *ĩ*ninaga loma biaho wubagi heneore wiaabo holebira. Agali mbirame lomabu delaga dabu ogoni ela hayaguabi maru ale ngarume karumebi ela hayaguabi ela harago ibuni loma bini aria bu hinalu wubagi hene dege bu hinulebira, lalu Anduane Homogohanda Mosesehondo lamini.

*Horo bibahendengi lomabu mulenenaga mana winigo ogo  
(Dagalene 28.1-8)*

<sup>38</sup> Anduane Homogohanda laabo halu lalu, Horo bibahendengi nogo sibi igini mali mbira pene kago kira bo loma buwa lomabu delaga dabu kagoria delaga biaabo halimu. <sup>39</sup> Nogo sibi igini ogonilabo mendego egerebagi bo lomabu delalu mendego alendo bo lomabu delalimu. <sup>40</sup> Nogo sibi igini mbira egerebaginaga ogoni heba balawa widime wabini genda magi kilogarama mbirabi olibe lininaga weli mbodoli be mbirabi odo biamaga howa bo lomabu delalimu. Ani bialu howa waini iba mbodoli be kira alebi loma bialu odo wilimu. <sup>41</sup> Ani bialu nogo sibi igini mendego alendo bo lomabu delalimu. Balawa widime wabinibi olibe lininaga welibi waini ibabi loma bialu egerebaginaga lomabu delaridagua dege delabe. Tigua tomo uruni loma bialu Anduane Homogo *ĩ*nihondo lomabu delaga dabu ngagoria deledemigola ngabirago hondowa *ĩ*na turu timbuni haruli. <sup>42</sup> Nogo sibi igini irani dai helo lomabu delolene ogoni horo bibahendengi delaho wiaabo halu *ĩ*naga Balai Anda haneni *ĩ* deni howa delaabo holene nga. Ani bule lowa hama ogoriani mo ngoai ho kamigola *ĩ*nime *ĩ*naga wali agali bu kamiruni *tĩ* heba mandagi howa *tĩ*hondo bi langigi bulebero. <sup>43</sup> Ogoningi *ĩ*na Isaraele wali agali heba mandagi howa *ĩ*naga wá taraore holeneme *ĩ*naga Balai Anda ogoniha daluwa kogola tamu ogoniha *ĩ*ninagaore wubagi helolebira. <sup>44</sup> *Ĩ*naga Balai Anda ogoni kagobi lomabu delaga dabu ngagobi kirabali *ĩ*ninagaore lomabia howa wubagi heneore ngelolebero. Ani ngelowa Arono halu ibu igini karubi tigua *ĩ*naga biabe bia halu loma binigo mo miaga helo dabo helolebero. <sup>45</sup> Ani bialu *ĩ*na Isaraele wali agali heba mandagi howa *tĩ*naga Ngode Datagaliwabeore holebero. <sup>46</sup> Ani kogola tigua *ĩ*niore Anduane Homogo

tínaga Ngode Datagaliwabe kogome tí heba mandagi haabo holenaga ina tí Iyibi dindiha howa haru tagira pialu ogoria haru ibirudane hondoleberami. Ini Anduane Homogo tínaga Ngode Datagaliwabeore kogoni, lalu Anduane Homogohanda lene.

## 30

### *Inisenesi lomabu delolene dabu bulene nga lenego ogo (Haru Penego 37.25-28)*

<sup>1</sup> Anduane Homogohanda laabo halu lalu, Ira agasia mbira dibu pelowa ira hagua ngabiaga mini inisenesi lomabu delolene dabu mbira bilimu. <sup>2</sup> Dabu ogoni luninaga magi sendimida emene pira mariani duria (45) wialu aranenaga sendimida emene pira mariani duria (45) dege wialu daliganaga magi sendimida emene pira dira (90) helo bu helalimu. Gibuni maria ngagoria nogo bulumaganaga ne gayane ale maria ta howa wabu helalimu. <sup>3</sup> Ani buwa gibuni maria bibahende ngolome para halu ngolome dege mo homabia howa dabunaga nene nene ngagoria ndibulo mabu bialu nogo bulumaganaga ne gayane handalehe maria kagobi ngolome dege paraho dambi halimu. <sup>4</sup> Ani buwa ngolome dege mabubi kira wabuwa abene kirabaliha tale buwa iraho yalu polene gibu kira manda mandabu helalimu. Mbirale mabubi ogoni ngolo homane paraho mabu birimigo andaneha kaware dege wabu para halimu. <sup>5</sup> Ani buwa ira agasia kira dabu ogoni iraho yule mo manda manda buwa ngolome paraho dambi howa ngelalimu. <sup>6</sup> Ani bialu ogoni mo yalu inaga Balai Anda tamuha puwa lomabu delolene dabu ogoni labolabo gerela kagome tu ngago tamuha inaga Habo Nalolene Bi lo winigonaga Mbogoyi biago ngagonaga tagirahayagi ngelalimu. Ani bialu ko binigo domaga mbogoyinaga daliga ngagoria ini ibalu tí heba holeberema.

<sup>7</sup> Horo bibahendengi egerebagi Arono ibugua lamu hale mo tiga bule ibalu ira hagua nga bilonaga mini inisenesiru lomabu delaga ngagoria delaga bulebira. <sup>8</sup> Alendobi Arono ibugua lamu hale ngago mo tiga bule ibalu howa nde ira hagua nga bilonaga inisenesiru lomabu delaga ngagoria delaga bulebira. Tígua inisenesiru Anduane Homogo inihondo lomabu delalu manibi ani delaabo halimu. <sup>9</sup> Dabu ogoriani inisenesi ngabi maru ale tara tara lomabu nadelalimu. Ani bialu nogo bo lomabu delolenebi widi lomabu delolenebi waini iba lomabu odo delolenebi uruni bibahende damenego dabu ogoriani nadeloleore larogoni. <sup>10</sup> Mali bibahendenaga horo mbiru mbirungi Arono ibugua inaga deni dabu ogoni ko nahe ngelonaga mo gini bulene nga.\*

Ani bialu howa ibugua ko binigo domolenenaga nogo bo lomabu delaramigonaga darama hambu yalu puwa dabu ngagonaga bulumaga ne gayane handalehe maria ngago hai haga bulebira. Mali bibahendengi ogonidagua biaabo halimu. Ani bialu dabu ogoni loma bia howa wiabagi heneore Anduane Homogo ininagaore wiaabo holebira, lalu Anduane Homogohanda Mosesehondo lene.

### *Anduane Homogonaga Balai Andaha biabe bilonaga dagisi muni mulene nga, lenego ogo*

<sup>11</sup> Mani Anduane Homogohanda Mosese lamialu lalu, <sup>12</sup> Isaraele wali agalinaga mini bibahende gili bialu daga laramingi ti dagalalu katambu homolenenaga warago ko mbira tiha anda naibilo ti bayale holenaga agali bibahende hangu hangume inihondo dagisi muni ngulene nga. <sup>13</sup> Agali mini gilibu ngaru bibahendeme muni dagisi kina duria ale dege dege inihondo lomabu ngulene nga. <sup>14</sup> Agali mali pira kira (20) bolangua hene karu bibahende mini gilibu wulene nga. Ani bialu agali uruni bibahendeme inihondo muni dagisi ogoni ngulene nga. <sup>15</sup> Muniwi karu tigua dewa mia tago halu mulene nawi. Ani bialu yagibano karu tiguabi nde emene wulene nawi dege. Tigua

\* **30:10:** Mali bibahendengi halu mbira layagoni Horo Timbuni Ngode Datagaliwabehanda wali agalinaga ko ngago Domo Wahai Holene Horo wini. Mbuga mini Loma Binigo Mo Miaganaga Biabe Be 16.34 handabe. ✧ **30:13:** Har 38.25-26, Md 17.24

kina duria ale dege dege tini holenenaga yolo muni biadai bulene nga. <sup>16</sup> Muni ogonime inaga Balai Anda kagotha biabe bulene ngaru handayaho helonaga ngulene nga. Ani ngiragola muni uruni handalu ina tinaga holene handayaho holebero, lene.

*Loma binigo mo miaga agalinaga gi geru waya bulene winigo ogo*

<sup>17</sup> Anduane Homogohanda Mosesehondo lamialu lalu, <sup>18</sup> Boronosime ndisi be mbira wabialu ndisi be ogoni wulene dagia boronosime dege wabilimu. Ani buwa lomabu delaga dabu ngagola Balai Anda kagola hengene ngagoriani mo ngelowa ndisi be ogoniha iba hambu berelalimu. <sup>19</sup> Ani bu ngagola Arono halu ibu igini karu tinaga gi geru waya bilonaga ani ngelalimu. <sup>20</sup> Tigua inaga Balai Anda kogoha anda poleyaguabi lomabu delaga dabu kategoria mbirale lomabu delole poleyaguabi ina ti bo wa naholiyanaga tinaga gi geru waya ala bialu polene nga. <sup>21</sup> Heneneore larogo tigua tininaga gi geru waya bialu piyagua nde ti homa nabulebira. Mana ogoni tinimebi tinaga aguaneneru mani hama polebirarumebi talialu bialu haabo holene nga, lene.

*Loma binigo mo miaga agali dabalu hagianeni weli odo wulene ogodagua wabu berelabe lenego ogo*

<sup>22</sup> Anduane Homogohanda Mosesehondo laabo halu lalu, <sup>23</sup> Mbirale tara tara bayaleore ngabiaga ngago damene bibahende miai habe. Pigane muwenaga ibane genda magi kilogarama waragara ngago mibe. Ani bialu mbirale ngabiaga ale dege mini sinamono genda magi kilogarama tebira ngago mibe. Ani mialu gambe hale handalehe nga bayale taraore biaga ngago genda magi kilogarama tebira dege ngago mibe. <sup>24</sup> Ani bialu padua maru ira kasia dongoneme wabini ngabi kilogarama waragara ngago mibe. Uruni mo mogo bu ngelowa olibe lininaga weli bedago aria mbodoli be maria odo mogo bibe. <sup>25</sup> Ani bialu mo beregeda beregeda buwa mo bimaga hai halu mbirale mbira dongoneni wai haga mini sanda ngago ale wabibe. Anidagua bialu weli baya tara ogonime mbirale uruni ininaga wiabagi hene wilo dabalu odo ba haga bulene ngelabe. <sup>26</sup> Ani buwa weli nga biagane ogonime inaga Balai Anda kagotha emene odo ba hama ibaga bialu Habo Nalolene Bi lo wini ngagonaga Mbogoyi ngagobi odo ba halu <sup>27</sup> dagia tebolo biago heba mbirale uruniha wiaga ngarubi lamu hale irane ngagobi odo ba habe. Ani bialu ira hagua ngabilo delaga mini inisenesi lomabu delaga dabu kagobi odo ba halu bibe. <sup>28</sup> Ani bialu mbirale irame dai helo lomabu delaga dabu kagobi dabu ogoriani biabe biaga dabudabu ngarubi gi geru waya biaga ndisi bebi ndisi be ogoni wiagane dagia ngagobi bibahendeore weli ogonime odo ba hai habe. <sup>29</sup> Mbirale mbirale uruni bibahende ininaga wiabagi heneore wialu wali agali mbiralime ela holene nawiore. Ela hayaguabi maru ale ngaru aria mbirame ela hayaguabi mbirale bibahende uruni wiabagi hene ngaru aria dege holebira. <sup>30</sup> Ani biai howa mani ina Arono halu ibu igini karu ti inaga biabe biaga helo loma binigo mo miaga agali dabo helalu weli ogonime ti odo wia habe. <sup>31</sup> Ani bialu Isaraele wali agali bu karuhondo bi ogodagua lamibe. Tiguabi tinaga waneigini aguanene mani hama polebirarumebi mbirale ininaga leneore wiabagi helo weli ogonime odo wia holene nga. <sup>32</sup> Agali kago ta nabi bame odo wia holene nawi. Weli ogoni ale tininaga ngelobi mbira wa nabilimu. Weli ogoni Anduane Homogo ininaga hangu ngelo tigua mbira wabu wulene nawiore laro. <sup>33</sup> Agali mbirame weli ogoni ale mbira wabiyaguabi agali loma binigo mo miaga ndo ta nabi karuni bame odo wiyaguabi agali ogoni ibu inaga wali agali karu baba mandagi nahe ibu tagira helo, lalu Anduane Homogohanda lene.

*Ira hagua ngabilo delaga inisenesi wabiaga mana winigo ogo*

<sup>34</sup> Anduane Homogo ibugua Mosesehondo laabo halu lalu, Tigua mbirale bayaleore ngabiaga ngaru mo yuwa ira hagua ngabilo delaga mini inisenesi wabilimu. Inisenesi ogoni wabulenaga padua urunaga genda magi ogobi dege degeme karulape holebira.

Padua uru mini muwebi tara ale mbirame wabini mini onigabi tara dege balawaya mbiranaga ibane mini galabanumubi inisenesi ibuni ngagobi mo wigi bilimu. <sup>35</sup> Ani buwa uruni bibahende mo biamaga haga buwa ira hagua nga bayale bilo delaga mini inisenesi wabilimu. Ani buwa inisenesi ogoni bayale loma bia heneore wiaabo helo ibi emene mbira ogoniha ibira haga bilimu. <sup>36</sup> Mbirale uruni be aleore helo baya hangu dambilimu. Ani buwa Balai Anda kagoha ininaga deniore ngelo yu puwa Habo Nalolene Bi lo winigonaga Mbogoyi biago ngagoria wanakuihayagi ngelabe. Hagua ngabilo delaga inisenesi ogoni nagalone ngaru ale ndo ogoni ininaga loma bia heneore wiaabo holebira. <sup>37</sup> Inisenesi ogoni tini hangunaga ogonidagua mbira wabulene nawiore larogoni. Ogonidagua wabimiru Anduane Homogo ininagaore loma bia heneore ngelo tininaga mbira wabu wulene nawiore laro. <sup>38</sup> Agali mbiragome padua ngabiaga mini sanda ngago wabulenaga mbirale biamaga haga buwa ogonidagua wabiyagua agali ogonidagua biagago ibu inaga wali agali baba mandagi nahelo tagira helolene nga, lalu Anduane Homogohanda lene.

## 31

### *Balai andaha wulene aleru wabilo agali maru dabeneogo (Haru Penego 35.30-36.1)*

<sup>1</sup> Anduane Homogohanda Mosese lamialu lalu, <sup>2</sup> Bi larogo hale habe. Ina agali mbira Yuda hameigini karu aria Hua aguane Uri igini Besalele dabo heledo. <sup>3-4</sup> Ani helalu ina inaga Dinini kagonaga hongo ibuha karula ko. Ani heledogo ibugua ngolo siliba boronosimebi mbirale bayale tara tara ngaru wabilonaga manda bulenebi mugubebi karulape mido. <sup>5</sup> Ibugua ege tole muni dewaoreme miaga alerume podaga bialu mbirale tara tara ngaru wabilobi ira ngaru podaga bialu bage tara tara ngaru podalu mbirale tara tara ngaru bulenebi ibugua bilo dabo heledo. <sup>6</sup> Ani bialu agali mende Dana hameigini aria Ahisamaga igini Oholiaba dabalulu ibugua Besalelela biabe mandagi bialu helonaga dabo heledo. Ani bialu agali marubi dabo hela dege bidogo uruni ti haru mandagi howa biabe bulene o langirugoni damenego biai helo dabo heledogoni. <sup>7</sup> Agali uruni tigua inaga Balai Andaha bulene langirugoni bibahende biai holebira. Balai Andabi Habo Nalolene Bi lo winigonaga Mbogoyi larugobi Mbogoyi ogoninaga panga ngagoria wali agalime ko binigo domaga laga biagobi bibahendeore Balai Anda biagonaga mbirale wabulene ngarubi biai holebira. <sup>8</sup> Tigua dagia tebolo wabialu ogoriani wulene damenego bibahendebe lamu hale irane ngolome wabulenebi mbirale mbirale lamu halenaga biabe bulene ngarubi wabulene nga. Ani bialu ira hagua ngabilo delolene mini inisenesi lomabu delolene dabubi wabulene nga. <sup>9</sup> Ani bialu nogo mbirale irani dai helo bo lomabu delolene dabubi wabialu ogoninaga biabe bulene damenego bibahendebe wabiai holebira. Ani bialu gi geru waya bulenenaga iba hambu wulene ndisi bebi ndisi be ogoni wiagane dagiabi tigua wabulene nga. <sup>10</sup> Tigua Arono halu ibu igini karume loma binigo mo miaga biabe bialu howa aga karulo helo wabulene nga. <sup>11</sup> Ani bialu mbirale mbirale ngaru ininaga wiabagi hene wilo olibe lininaga weli odo hai holene biago wabialu Hobane Loma Bia Hene ngagoha ira hagua ngabilo delolene mini inisenesi biagobi wabu wulebira. Ani buwa tigua mbirale uruni bibahende wabialu howa ina ogobi wabilimu lalu langirugonidagua biai halu wabilimu, lalu Anduane Homogohanda Mosesehondo lamini.

### *Sabada horongi halo holene ngago ogo*

<sup>12</sup> Anduane Homogohanda Mosese lamialu lalu, <sup>13</sup> Isaraele wali agaliruhondo au labe. Sabada horo inaga halo holene horo ngago ai Sabada horo bibahendengi halo haabo holene nga lalu lamibe. Sabada horo ogoni ayu kamingibi mani holebiragonagabi i baba ti baba manane mbira wiaabo helonaga ngelarogoni. Ani ngelarogome i Anduane

Homogo inime tí inaga wali agali dabeneore kami lalu mo walia holenaga ngelaro.✠  
 14 Horo ogoni Anduane Homogo ininaga ngogo mitangi bialu ogoningi tí halo halimu. Horo ogoningi mbiralime biabe biyagua ogoni ibugua inaga mana pugualu ka manda bialu ogoni ibu homelo bo wahalimu. 15 Sarere mbiranaga horo waragaru tininaga biabe bulene ngaru bialu halimu. Ani bialu horo kanego ininaga Sabada horo loma bia hene ngago manda bialu ogoningi halo holene nga. Wali agalime horo ogoningi biabe bialu hayagua uruni ti homelo bo waha halimu.✠ 16 Isaraele wali agali tí horo ogoningi halo holenego irane habo nalolene bi lowinigo mitangi bialu tigua talialu buleore lalu lowinigo ogoniha ngagoni. 17 Ani bialu ini Anduane Homogo kogome dindi haribi bibahende horo waragaruni wabialu howa horo kaneni ini halo berenego manda bialu ani bilimu. Ani birugonaga horo ogoni i baba tí baba manane mbirale wiaabo helonaga ngelarogoni, lene.✠

18 Ngode Datagaliwabe ibuni Mosesela Hari Sainaini howa bi lai halu ibugua ege tole kirani ibuninaga bi leneru ibunime gilibu winigo Mosesehondo mo mini.

## 32

### *Nogo bulumaga igini ale ngolome wabinigo ogo (Mana Loyane 9.6-29)*

1 Ani binigo Mosese ibu ogoni bialu heaha wali agalime handalu hearia Mosese ibu hari biagoha howa dalipe halu ibu nabi uyu hari biagoha haabo hayuane hendene. Ani hondowa tigua Arono hearia ibuwa Arono ho mabubupe howa ibuhondo lalu, Ina Iyibi dindi hemaria haru tagira ibinigo agali Mosese biago mbiraha pu tagalayadago mbira biya hendedeni. Ibu ani biyadagonigo ina haru helonaga Arono ina inanaga mbirale mbira bi pupu wulumaya wabu ngibe, lene.✠

2 Ani layagola Aronohanda wali agali biaruhondo lalu, Haleira ngamigo bibahende tí oneme ngagobi tí iginime ngagobi tí waneme ngagobi haleria ngolome wabinigo bibahende goloyu ngoai howa ihondo ngidaba, lene. 3 Aronohanda ani layago hale halu wali agali bibahendeme tinaga haleira goloyu ngoai howa Aronohondo mini. 4 Goloyu ngoai hayagola Arono ibugua haleira biaru irame do gedaore helowa dodo do gundulo wahalu ngolo ibuniore do ibira hayagola dindi uli wuwa odo berelowa ngolo ogonime nogo bulumaga igini ale mbira wabini.✠

Arono ibugua ani wabu heleagola wali agalime tini aria maruhondo lalu, Isaraele wali agaliru o inanaga dama ina Iyibi dindi hemaria haru tagira ibiyago o kagomego de handadaba, lene.

5 Ani buwa Arono ibugua bo lomabu miaga dabu mbira wabialu nogo bulumaga igini ale biago tiga tiga handadele bu helowa ibugua bi dalimu lowa lalu, Ai ina Anduane Homogonaga mini yaraga halu yawi nogo bamija, lene. 6 Ani layagola horo mendengi egerebagiore wali agalime nogo maru bo lomabu miaga dabuni emene podowa bo delalu maru tini Anduane Homogola ho gimbu bulenaga hiruwa mandagi nole berene. Ani nalu biruwa tigua lulu iba no erele muwa wali agali tini o biagoniha kayu yu wima pene.✠

7 Ani bialu heago hondowa Anduane Homogohanda Mosesehondo lalu, Inaga wali agali Iyibi dindini howa ina haru tagira ibirirume ai i erembira ngialu ko timbuni biyago í áyu ogoni dalialu unu wali agali karia pobe. 8 Ina ti agua bialu holeberami laga bialu inaga mana mirugo mo wahowa ti tinime hame ledadagua bialu kagoni. Tigua muni ngolo irame hiru gedaore howa nogo bulumaga igini ale mbira wabu helowa ogonihondo mbirale bo delalu ogoni mitangi bialu kagoni. Ti Iyibi dindi hemaria haru tagira ibiyagoni tinaga dama ogonioreme haru tagira ibiyagoni lalu ka. 9 Wali agali

✠ 31:13: Ese 20.12, 20.20 ✠ 31:15: Har 20.8-11, 23.12, 34.21, 35.2, LBM 23.3, Man 5.12-14 ✠ 31:17: Har 20.11

✠ 32:1: Ab 7.40 ✠ 32:4: 1 Kin 12.28, Ab 7.41 ✠ 32:6: 1 Ko 10.7



uruni mini dogahe kane hendedogo. <sup>10</sup> Ai áyu wali agali uruni baba keba emene ndoore kogo wali agali bu mini giambe damene uruni áyu ogo bo mburi lai holeberogo ani nabibe nalolebere. Wali agali ko damene ogoni bo hilu wahai howa Mosese íbi í aguane maha hararubi mo timbu halu hameigini timbuni paluyu lelebero, lalu Anduane Homogohanda lene.

<sup>11</sup> Ani layagola Mosesehanda Anduane Homogoibunaga Ngode Datagaliwabe la deborebo bialu Ngode Datagaliwabenaga mini mo hada hole bi lene. Mosese ibugua lalu, Ínaga wali agali uruni nde Iyibi dindini hearia gi mialu haru tagira ibirigodago ínaga hongo gibiru walia halu ani birigodago uruni baba keba gibiore kego nde aginagabe. ✧ <sup>12</sup> Ína henene halu ani bo mburi lariyagua Iyibi wali agali ti hale howa, Ae Anduane Homogohanda Isaraele wali agali haru tagira piyago hari wearu teneha howa bo hilu wahai holenaga haru penenagada, lolebira ndobe. Ani laga bulebirago keba haridagoni wahalu bu mini hadabe. Mini wiadai bialu ínaga wali agalihondo hiriribi o bule mandabu wiridagonidagua nabi wahabe. <sup>13</sup> Ínaga biabe bia haga Abarahama Aisaga Yagaba ima hayaru nde mitangi bibe. Agali urunihondo habo nalolene bi lo wialu tinaga waneigini ho dame bialu daga labe nahe yakundi li hariha bu kagobi holebira larigoni. Ani bialu tinaga waneigini ti dindi ina mulebero lo wirigoria anda pu howa ogoriani haho wiaabo holebira lalu bi urunibi lo wigi biriruni nde manda bibe, lene. ✧ <sup>14</sup> Mosesehanda bi aniore layagola nde Anduane Homogohanda bu mini hadalu keba howa ibunaga wali agalihondo pani mulebero layagoni nde pani nami wahalu wahene.

<sup>15</sup> Ani biya handala Mosese ibu ege tole mbalape kira bi mana leneru kirabalini gilibuwi biago yalu wali agali hearia dai bule hari biagoha howa dalini. <sup>16</sup> Tole mbalape kiradagoni Ngode Datagaliwabe ibunime ogonibi mo mbalape lenego odagolaboni bi mana leneru gilibu winidagoni.

<sup>17</sup> Yosua libu haru dalialu hebirago Yosuahanda wali agali bi ladagadagabu layuago hale howa ibugua Mosesehondo lalu, Wali agali ni andabu palu hayagoniha wai bialu puromo laruane hale ko, lene.

<sup>18</sup> Ani layagola Mosesehanda lalu, O laruagoni wai buwa agali bo hana halu pialu ali iwa mambolola laradagua ndo biarua agua. Wai anda ibuwa bo paya biragola ga kobala laradaguabi ndo dege biarua. Olaruagoni wali agalime iba ganaore laruagoni, lene.

<sup>19</sup> Ani lalu bialu libu hari biagoha howa dalialu Mosese ibu kaware wali agali heagoria íbu hapara howa handalu hearia nogo bulumaga igini ngolome wabini biago mo ngelowa tini luyu mabu bialu dawé halu heago hondowa Mosese ibu keba gibiore hene. Kebaore howa ege tole mbalape kira bi mana leneru gilibuwi yayago dindini ibira hayagola poda gingilu бага bini. <sup>20</sup> Ani bialu puwa ibugua nogo bulumaga igini ale gime wabini heyu heleago muwa irani hiru gedaore howa do iba heagola be abalu ale ti taulo wiagoha odope hene. Ani buwa iba o bagoniha odope howa mo bimaga hene. Ani bu ngelowa ogoni Isaraele wali agalihondo lalu, Ogoni tíni nole ibidaba, lowa mo nahalu ibuni handayaho hene. Ani biyagola wali agalime nde wahole ndoyagola o biagoni naore bini. <sup>21</sup> Ani buwa ibugua Aronohondo lalu, O biridago nde gibidago wali agalime íhondo agi biyagola ina wali agali o bu karume ko timbuniore hiriribi o biyadagoni bilo mo bia haribe, lene.

<sup>22</sup> Ani layagola Aronohanda ladai bialu lalu, Í íla keba nahabe. Wali agali o bu karuni tinime mana ko buleore lalu de daramabu kaligoni í manda bidegoni. <sup>23</sup> Tigua íhondo lalu, Agali Mosese mbaria ina Iyibi dindi hemaria haru tagira ibini ogoria hayagoni agoa piyabe tobane biyadago ina manda nabidamago ina haru hoari bia helonaga inanaga mbirale bi pupu wulenaga mbira wabu ngibe, laya. <sup>24</sup> Ani layagola ina tihondo tinaga haleria ngolome wabini ngamiru goloyu ngoai hadaba larugola wiarume golalu

ihondo ngigi biya. Ani ngiyagola ina haleria odaruni ira deagoha haealo baamu howa delarugola ira biagoha howa nogo bulumaga igini ale o ngagoni ibuni minalu tagira ibiya, lene.

<sup>25</sup> Mosese ibugua handalu hearia Aronohanda wali agali bame tini hame layadagua bu helo yupeho heleneyane hendene. Ani bialu tinaga waitigirume tinaga dongone handalu bame mo yobu wahabehe heleneyane hendene. <sup>26</sup> Ani biyiyago hondowa Mosese ibu wali agali ubanda tagi bulene panga paya dugua biaga wiagoria pu howa bi dalimu ga lowa lalu, Anduane Homogonaga kamigo bibahende o i kogoria ibai hadaba, lene. Ani layagola hale howa Libai aria hearu bibahende ibalu Mosese heagoha ho mabubu hene. <sup>27</sup> Ani ibu heagola ibugua Libai aria biaruhondo lalu, Isaraele wali agalinaga Anduane Homogohanda áyu tí hangu hanguhondo au laya. Tíngaga ayu tibu mo yagayaga bialu puwa tí hamenebi tí damenebi tí baba handa ai nai padamigobi homelo bo wahalimu layago bo wahama pole pigane o harabani howa bama pialu namu tibini palimaro bidagoria bairi hole áyu ogoni badaba, laya lene. <sup>28</sup> Ani layadagua Libai aria biarume nde hale halu bama pialu horo ogoningi Isaraele agali hangu daosini tebira (3,000) bibahende bo wahai hene. <sup>29</sup> Ani beagola Mosesehanda Libai aria biaruhondo lalu, Horo áyu tí tini dabo bagi hene halu maru karubi ndo tí tara halu tinaga iginibi tí hamenebi bo waharimigome Anduane Homogonaga biabe bulenehayagi tí loma binigo mo miaga hole kamigoni. Ani birimigonaga Anduane Homogohanda áyu tí biamogo bialu mo bayale holebira, lene.

<sup>30</sup> Ani bialu horo mendengi Mosesehanda wali agali biaruhondo lalu, Tígua ko hiriribiore ina bulile wiago birimigoni. Ani birimigonigo nde abule ina hari o kagoha lone iraga halu Anduane Homogo karia porogo. Anduane Homogo ibugua tígua ko birimigoni domo waharo loloba badago ina domarebe lalu haleho porogo, lene. <sup>31</sup> Ani lalu bialu Mosese ibuni lone hari biagoha iraga halu puwa Anduane Homogohondo lalu, Wali agali o biarume ko hiriribiore ina bulile wiago biya. Tigua muni ngolome nogo bulumaga igini ale mbira tini gime wabuwa tinaga dama ogoni lowa ogonihondo bi pupu wialu heneya. <sup>32</sup> Ani bialu heneyago ainde harugo agua bule ndodago tinaga ko o biyadagoni domo wahabe. Ai domo wa naholeyagua nde wahalu ininaga mini ebere inaga mbugani gilibu wirigoni nde inaga waneigini marunaga mini ngelalu inaga minigo wahalu domo wahabe laro, lene.\*

<sup>33</sup> Mosesehanda ani layagola Anduane Homogohanda ladai bialu lalu, Ihondo ko biyadarunaga minigo inaga mbugani nawilo domo waholebero. <sup>34</sup> Ani buleberogo ai í áyu ogoni pialu wali agali haru halu dindi mbaria nga lalu ina langirugoria haru pole áyu ogoni pu. Inaga dahuliyalime í biamogo bialu í mo tiga bule holebira. O larogoniore manda biaabo habe. Ai wali agalime ko biya ebere larigonaga ko biaga uruni tigua ko biyagonaga pani mulene horo ibirangi pani mulebero, lene.

<sup>35</sup> Ani layadagua wali agalime Aronohondo bia bia degeni nogo bulumaga igini ale biago wabilo mo bia hayagonaga Anduane Homogohanda wali agali biaru pani mialu warago tara mbira ti heagoria ibilene.

### 33

*Anduane Homogohanda, Isaraele wali agali tí Hari Sainai nahe wahalu pudaba, lenego ogo*

<sup>1</sup> Anduane Homogohanda Mosesehondo lalu, Wali agali Iyibi dindi hearia haru tagira ibirigoni o bu kagonigo uruni haru halu dindi o kamigoni wahalu pudaba. Pialu dindi mbira ina Abarahama Aisaga Yagaba imaruhondobi tinaga waneigini aguanene maha hama poraruhondobi karulelo mulebero lo wirugo dindi ogoriani haru pole pobe.\* <sup>2</sup> Dahuliyali mbira tí hariga walía hama mandagi pilimulonaga pu lagua.

\* 32:32: Iba 69.28, Mo 3.5    \* 33:1: Pig 12.7, 26.3, 28.13

Ani bialu Kenanaliru Amoroaliru Hidialiru Peresealiru Hibialiru Yabusualiru uruni bibahende ina bo batagi hai holeberogo dindi landaneha ngaria tí karuloleberami. <sup>3</sup> Ani buleberogo tí dindi ibane bere tomo anda holene bayaoreha hole poramigoni. Ai ina dege tí heba naibulebero irane tí inaga bi laga berogoni ogoale laralo manda bule ndo ora luluanda hope howa tí miniha ibira alego bia dege dindi halu hagayago. Ani bialu kamiria ina ti hariga obeneni howa bo wahai hoa biaganego i naibulebero laya lalu wali agali lamibe, lene. Mosesehanda puwa wali agali lamibe layadagua lamini.

<sup>4</sup> Aniore layago hale howa wali agali biarume mini burugu lalu gendaore ho hene. Genda ho howa ti tinginini yári biagane damene dongone ganuni wule bu heagoni bibahende golo ngelai howa tini dara howa mini hulula bu hene. <sup>5</sup> Mosesehanda Anduane Homogonaga bi agua laya lalu, Wali agali tí luluanda ina bi larogo ogoale lara lole ndo tini bua bira ale bupe haga bialu kamigoni. Ini tí heba ibiruyagua hariga lu pu lu nabi howa nai hariga obeneni dege howa tigua tinaga mana biagane egene wini biago bialu kamiria tí bibahendeore bo hilu wahai harogonidago i naibagua. Ani biaguago tinaga tinginini yári tara tara karu ledamigoni damenego bibahende golo ngelai halimu. Ani bidamigola ina tihondo agi bibehedabe hondoliya, Anduane Homogo ani lalu lamibe laya, lene. <sup>6</sup> Ani layagola nde Isaraele wali agalime Hari Sainai yu wahalu tagira pialu peadangi howa tinaga tinginini yári biagane damene bibahende nabi wahai hene.

#### *Anduane Homogo ti heba ka manda bulenaga Balai Anda bu helaga binigo ogo*

<sup>7</sup> Isaraele wali agalime dindi mbirani puwa palue anda bigi bialu howa Mosese ibugua nde Balai Anda mbira wali agali ta nabime anda napiaga mbira haluni amura bu helaga biaga wini. Dindi mbiragoha pole howa giallo yalu pialu anda pu paligi beramigoria anda ogoni ibu hangu haluni bu helaga biaga wini. Anda ogoni mini Anduane Homogo Ina Heba Ka manda bulenenaga anda laga wini. Ani biaga winigo wali agali ti mbiraligo ibu Anduane Homogonaga hame hale holebi mbirale ogo buabe nabuabe lalu Anduane Homogo hale hole manda biyagua Anda ogoniha howa haleho piaga hene. <sup>8</sup> Mosese ibu Balai Anda odagoniha pugu biragola wali agalime tinaga anda harabani howa Mosese porago baya hangu deme handayaho wialu anda odagoni tamuha anda pora handala wahaga biaga hene. <sup>9</sup> Ani bialu Mosese ibu Anda biago tamuha anda pu kagola hari beraliba timbuni mberane biago dalipe haga wini. Dalipe howa Balai Anda biago harabani gerelapeho ngagola Anduane Homogohanda hari beraliba timbuni mberane biagoniha howa Mosesehondo bi lamigi biaga wini. <sup>10</sup> Wali agalime handalu karia beraliba mberane ogoni Balai Andadago panga harabani wiape kago hondowa ti bulu paliaga wini. <sup>11</sup> Anda odagoniha howa Anduane Homogohanda Mosesela bi la dele bialu agali yangonela mini hana hagabu howa bi lo haralidagua lo haga biaga wini. Anduane Homogola bi ani lo halu Mosese ibu wali agali bu karia dai bigi biaga wini. Mosese ibugua bi lo pialu dai bigi bilo lowa igiri daliahe mbira Nunu igini Yosua hayago ibugua Mosese biamogo bule Mosese geha ibagabu howa Balai Anda biago tamuha haga hene.

#### *Anduane Homogohanda ibunaga wali agali heba holebero lowinigo ogo*

<sup>12</sup> Mosesehanda Anduane Homogohondo lalu, Ina ihondo wali agali o bu karuni haru halu dindi o biagoria haru anda pobe larigonigo ila polobayago mbirali ogola polebere nalarigoni. Ina i ogobiore ka lo manda bialu ihondo turuho ko larigoni. <sup>13</sup> Ani larigo ai ina henene halu ihondo turuho keyagua o Anduane Homogo ina bule manda bu wiaruago ogo ale bule manda bu ngo lalu i langi. Langerego hale howa ina i ani bule manda bu wiridago hangu bialu i mo turu haabo holiya langi, lene. Ani bialu hameigini ayu karu ininaga wali agaliore helo dabarigoni ini manda bibe, lene.

<sup>14</sup> Ani layagola Anduane Homogohanda ladai bialu lalu, Iní í heba ibalu ina waitigi karu baba wai bigi beregola wayali habelo biamogo bigi bulebero, lene. ✧ <sup>15</sup> Ani layagola Mosesehanda ladai bialu lalu, Í ina heba namaliyayagua o ina dindi o kamago wahalu nape ogoria holeberamago ina pudaba nalabe, lene. <sup>16</sup> Íni ina heba naibiriyagua wali agali bu karume manda bialu karia Anduane Homogo í wali agali ti bababi Moseselabi turuho ndo harua manda bulebira. Ani bialu íni ina heba ibagabu mandagi harimayagua ogonime ina wali agali maru karubi ndo ina mo tara holebira, lene. <sup>17</sup> Ani layagola Anduane Homogohanda Mosesehondo lalu, Ina í ogobiore ke lo manda bialu íhondo turuho kogodago ina o larigonidaguaore bulebero, lene.

<sup>18</sup> Ani layagola Mosesehanda Anduane Homogohondo hale halu lalu, Íni íbu ko lalu wá holene de mborerebiore handaya habe nahe walia hagayago wá holene de mborerebi o biagoni dege halu mbira hondoliya waliaha, lene. <sup>19</sup> Ani layagola Anduane Homogohanda ladai bialu lalu, Inaga wá holene í handabelo í deni pu bolangua helalu inaga mini wali agalime nalaga tua mbaria wia do hene ngogo áyu mini tua ogoni hale habelo í deni howa loliya, lene. Í Anduane Homogo kogo darabi gubalinibi hoa birago haga kogoni. ✧ <sup>20</sup> Ani buleberogo áyu ina inaga dengui handabelo walia naholebero. Irane mbirali inaga dengui handaya harago homaganego í walia haruyagua í homoleberogodago walia naholebero, lene. <sup>21</sup> Inaga dengui walia naholeberogo í heyu holene karulape mbira o í kogohayagi tołeni heyu holene ngago ogoriani hole íbabe. <sup>22</sup> Í ani heyu kegola inaga wá holene de mborerebi biago bolangua haragola ina í minu muwa ege ogoniha kaba mbira ngagoha í minu berelowa inaga gime í yi holebero. Í bolangua halu poleberogo í porogo í nahandabelonaga ani bulebero. ✧ <sup>23</sup> Ani buwa í bolangua halu puwa inaga gi yamerogola ina inaga dengui nahende erembira dege de hondolebere, lene.

## 34

### *Ege tołe mbalape kira lone mo aribia henego ogo (Mana Loyane 10.1-5)*

<sup>1</sup> Ani lowa Anduane Homogohanda Mosesehondo lalu, Ege tołe mbalape kira abale biagobi labolabo kambulo yalu íbabe. Kambulo yalu eberegola bi mana ala ina tołe mbalape kira biagoria gilibu wiwaria ina minu podarigoni ai lone gilibu aribia holiya tołe mbalape kira kambulo pobe. ✧ <sup>2</sup> Tołe mbalape kira ogoni manda mandabu yalu egerebagiore Hari Sainai iraga halu íbabe. Í hari neneoregoria haguago lola habiya egerebagiore íbabe larogoni. <sup>3</sup> Í kirali íbuleni íni hangu íbabe. Wali agali mbirali mbira hari ogoniha hapara howabi holani handabe. Nogo sibi bulumagabi mbira hari ogoni tenaha tani nalu holani wara peladaba labe, lene. <sup>4</sup> Ani laya handala Mosese íbuni hale halu puwa ege tołe mbalape kira kambulo manda mandabu ngelene. Horo mendengi egerebagiore tołe mbalape kira biagoni yalu Anduane Homogohanda íbabe layadagua Hari Sainai yalu iraga hene.

<sup>5</sup> Yalu iragaho heagola Anduane Homogo íbuni hari beralibaha howa dalialu Mosese heagoria mandagi libu haru hene. Howa íbugua íbunaga mini loma bini lalu, Anduane Homogo í Henego Hole Ko, lamini. <sup>6</sup> Ani lamuwa Anduane Homogo íbugua Mosese dengui bolangua halu puai howa bi ladaga howa lalu, Í Anduane Homogo dara holenebi biamogo bulenebi toło tagihe keba ala awane nahaga gubalini holenebi mini bilinahe holenebi deremolahebi gibi Ngode Datagaliwabe kogoni, lene. ✧ <sup>7</sup> Ina bule lo winiru heneneore bigi biruria hendene wali agali dabane daosini au lobebe tobaheme handaga bialu homaga bini nga. Ina bule lo wiruru lo beregeda nabi dabane dewa halu

✧ 33:14: Man 12.10, Ais 63.9 ✧ 33:19: Lm 9.15 ✧ 33:22: Ais 49.2, 51.16 ✧ 34:1: Har 31.18 ✧ 34:6: Har 20.5-6, Dag 14.18, Man 5.9-10, 7.9-10

homayaguabi lo ngogo biaore biaga kogoni. Ani bialu wali agali tigua mana ko haragobi hale ko tara tara bigi biragobi domaga i kogoni. Ani domalu dege ai aba aiyalame ko biragonaga pani ti waneiginibi aguanebi maha hama poraruhondo mialu daba tebone mane daba hama poraruhondobi pani mia dege bialu haga ko, lene.

<sup>8</sup> Ani layago hale howa Mosese ibu dindini bulu palialu Anduane Homogo mitangi bialu ibu mo dunini howa lotu lalu hene. <sup>9</sup> Anduane Homogo mitangi halu ibugua lalu, Anduane Homogo-o ina henemanenaga ihondo turuho keyagua o ina haruore maliya ibulebere larogoni. Isaraele wali agali uruni minila haru ndo luluanda haradagua hope howa larogoni ogo ale lara lole ndo kagoni i manda bidegoni. Nde abule harugo inaga wali agalime ko birimaru domo wahalu ini buha ina yamibe, lene.

*Habo Nalolene bi lo wiyago lone lodai buwa lowinigo ogo  
(Haru Penego 23.14-19, Mana Loyane 7.1-5, 16.1-17)*

<sup>10</sup> Ani layagola nde Anduane Homogohanda Mosesehondo lalu, Ainde áyu ina Isaraele wali agali baba habo nalolene bi lo wulebero. Ina tí bibahendenaga deni biabe taraoreru wali agali dindi bibahende ha karume de nahendene ale ina Isaraele wali agali tíore de hondole bigi bulebero. Wali agali bibahende ina mbirale gibioreru i Anduane Homogo ina tinaga bia haga beroru tí de handalu duru loleberami. <sup>11</sup> Ani buleberogo inaga mana áyu lo ngeroruni baya hangu handalu bi o ledorunidagua hale halu biai halimu. Ina hameigini Amoroaliru Kenanaliru Hidualiru Peresealiru Hibialiru Yabusualiru bibahende bo batagi halu balu puabo helarogola dindi bame landaneha ngaria tigua karulama hama anda pugu buleberami. <sup>12</sup> Ani bigi buleberamigo tí dindi gahenge mbira anda poramigoha wali agali uruniha karu baba nenege hinu ndi bu holene mbira manda bulamini. Uruni baba nenege hinu tí ndi bu harimiyagua ogoni gono bu hinaragola gundulo mialu pobe tobahe mbaria ogoniha do wuleberamigo ti baba haru hinu mandagi nahalimu.✧ <sup>13</sup> Mandagi nahe ti hobamu howa wali agali uruni tinaga mbirale gime wabirinuhondo mbirale bo delo miaga dabu bidaru gelo labailo bagabu wahalimu. Tinaga tole ira giambe waradagua berelama pedaruni ela nahaga lowa hogaralebu haga tole uruni bibahende podobagabu langu wahai halu mbira wulani handalimu. Ani bialu tinaga dama wali Asera dengui handaradagua bule lowa mbirale irame wabu wu hama pedaru bibahende ayume dibu gingirulo bagabu wahai halimu, lene.✧

<sup>14</sup> I Anduane Homogo tinaga kogonigo i hangu mitangi bialu mo dunini howa lotu lalimu. Ani bialu tigua mbirale gime wabini ngaru mbirago ogonihondo bu pupu nawilimu. Ani nawilimu larogo irane mbiralime ila i abi i abi laba lole manda birago bilo i nde handayaho nahaga ogoni birago bo ereba haga kogonaga laro. <sup>15</sup> Ani biaga kogo wali agali dindi uruniha karu baba ndi bu mbirale doborobo bu nahalimu. Ani nahalimu larogo irane tigua dama tara tarahondo bi pupu wialu nogo egaru loma bialu urunihondo bo minigo dawawa tí namiya ibidaba lolebira. Ani laragola nde tí wahalu pobe tobahe nolene kaware wulebirago ani nenege hinu nahalimu larogoni. <sup>16</sup> Ani nenege hinu harimiyagua tinaga iginime wandari dindi tara uruniha bedaru dabu bu karia wali urunime haru gili lenego pialu i erembira ngialu ti one urunime dama tara tarahondo bi pupu wiradadagua wima yupe holigo wali agali uruni heba mandagi huru hinu nahalimu larogoni, lene.

<sup>17</sup> Mbirale tara tara aeaneme wabuwa tinaga dama lowa urunihondo bi pupu nawilimu.✧

<sup>18</sup> Horo mbira Mberedi Yidi Nahe Hirinigo mo yu ngoai howa nagane horo biagoni embeda nahe horo ogoni tagira ibirangi naabo halimu. Ani nalimu lalu ina ala pongo bo ngirudagua ege mini Abibi haragola ege ogoninaga horo karuni mberedi yidi nahe



ogoni nalu halimu larugoni. Ani nalimu larugo irane tí Iyibi dindi howa ege ogoningsi tagira ibirimigo manda buwanaga nalimu larugoni.✧

<sup>19</sup> Tí igini wahene hono weramigo bibahende inaga dege dege holebira. Ani bialu tínaga nogo dameneru tanabi bibahendeme igini pigane wangabe wirago dameneru bibahende inaga dege dege holebira.✧ <sup>20</sup> Ani bulene wulebirago ai nogo dongi igini pigane winigo inaga heleneyagua nde nogo dongi ogoni wahalu íni holeyagua inaga nogo sibi igini mbira kango hela aribia holene nga. Ai kango nangibeheyagua wahalu nogo dongi ogoni ibuninaga ma minu taga lolene nga. Ani bialu igini wahene damenego aba aija tini holeyagua ihondo maru ale lomabu ngigi bulene nga.✧

Mbirali ihondo mbirale mbira ngule giha nayi bame ibirimiyagua i dengui bilingi bolanguabu holene nawi.

<sup>21</sup> Horo waragaru tíninaga biabe bilimulo wiyagoni. Ai horo kanegoria biabe mbira nabilimu. Tomo hongole dindi aluene ngangibi tomo bu wulene ngangibi nabilimuore larogoni.✧

<sup>22</sup> Tomo bu wialu howa widi lini hini dedagola Mabuha Widi Lini Pigane Denegonaga mana pigane wirimadagua bilimu. Ani bialu dagare bulene tu harangi Anda Nemandaha Palu Holene Hororu bu henego mitangi bialu mana pigane wirimigonidagua ira lini pigane hini dedago daramingi ani bilimu.✧

<sup>23</sup> Ani bialu Isaraele agali damenego bibahendeme mali mbira mbirani halu teboore Anduane Homogo iniore Isaraele wali agalinaga Ngode Datagaliwabe kogo i mitangi bialu mo dunini howa lotu lole ibugu bulene nga. <sup>24</sup> Ina tínaga waitigiru tí hariga polenegoha palipai haga bidaru bo batagi haga bialu balu pelarogola dindi dabulu ngaria tí karulalu ho yanga laga bima ibugu buleberami. Ani bigi berogola wali agali maru karume tí baba wai bialu tínaga dindi karulolene manda nabulebira. Tí bibahende tínaga mini tomo halu tebo nolene larimagoha puwa nalu kamigohabi mbirame tínaga dindi karulalu tí bo anda naibulebira.

<sup>25</sup> Tígua ihondo nogo mbira bo ngialu dela howa mberedi yidi heba mo biamaga henego ihondo nangilimu. Ani bialu Bolangua Halu Penego Horonaga Tomo mitangi buwa nogo bo dawenego aria mbira egerebagi nolenaga podo wia nabilimu.✧

<sup>26</sup> Ani bialu mali bibahendengi tí mabuni tomo hangaramigo hini damenego Anduane Homogonaga andaha bu yu íbu wilimu.✧

Tígua nogo sibi igini meme iginiyaguabi mbirago ibu angibuni andu ibane beha hambu yu delaramigoha delamaga nahalimu, lene.

<sup>27</sup> Ani lamigi buwa Anduane Homogohanda Mosesehondo lalu, Bi o laroruni baya hanguore bebani gilibu wibe. Irane bi o laga berogoriani mo tene howa Mosese ílabi Isaraele wali agali bibahende bababi ina habo nalolene bi lo wigi berogoni, lene. <sup>28</sup> Mosese ibu Anduane Homogohanda bi lamiyago hale halu tomobi ibabi mbira naneore uyu hari biagoniha Anduane Homogola heane dege horo pira maria mbi pira maria (40) lowa pene. Ani bialu Anduane Homogohanda ege tole mbalape kira biagoria Habo Nalolene Bi gilibu wini. Bi gilibu winidaruni Ngode Datagaliwabe Bi Mana Pira gilibu wini.

### *Mosese ibu Hari Sainai howa dalinigo ogo*

<sup>29</sup> Mosese ibu howa Bi Mana Pira biago gilibu yalu Hari Sainai biagoha howa daliyagola nde ibu Anduane Homogo heba bi lalu hene biagome ibunaga dengui biagoni wá haamehe huailo yalu dalini. Ibunaga dengui wá haame howa huailo yalu daliyadagoni ibuni de nahende manda nabi dalini.✧ <sup>30</sup> Mosese ibuni de nahende manda nabi ani hearia Arono halu Isaraele wali agali ti bibahendeme Mosese ibiyago handalu

✧ **34:18:** Har 12.14-20, LBM 23.6-8, Dag 28.16-25 ✧ **34:19:** Har 13.2 ✧ **34:20:** Har 13.13 ✧ **34:21:** Har 20.9-10, 23.12, 31.15, 35.2, LBM 23.3, Man 5.13-14 ✧ **34:22:** LBM 23.15-21, 23.39-43, Dag 28.26-31 ✧ **34:25:** Har 12.10 ✧ **34:26:** Man 14.21, 26.2 ✧ **34:29:** 2 Ko 3.7-16

hemiria ibunaga denguiha wá haameho huailo yalu ibiyago hondowa ti bibahendeme Mosese hegoria hapara holene giho hagahaga bini. <sup>31</sup> Ti ani bu hemiria Mosesehanda wali agali biaru olayagola Aronobi Isaraele wali agali haru haga biarubi ti bibahende Mosese ibu hearia ibiyagola ibugua ti baba bi lalu hene. <sup>32</sup> Agali uruni baba bi lalu hemiria Isaraele wali agali bibahende íbu ngoai howa Mosese ho mabubupe hene. Ani biyagola Mosese ibugua tihondo Anduane Homogohanda Hari Sainai howa mana damene ibuhondo lamiyaruni Isaraele wali agali biaruhondo lamiaiore hene. <sup>33</sup> Ani lamiai howa Mosese ibu ibunaga dengui agame buyi hene. <sup>34</sup> Ani bialu Mosese ibu Balai Anda Anduane Homogo Isaraele wali agali ti heba ka manda bule bu helene biagoha Anduane Homogo heba bi lole anda pugu bialu howa aga ibunaga dengui buyi hayagoni golo wigi bini. Ani buwa Anduane Homogo heba bi lalu howa tagira ibugu bialu Isaraele wali agalihondo Anduane Homogohanda lamibe layada ale bibahendeore lamiai haga bini.

<sup>35</sup> Ani bialu Isaraele wali agali tigua handaga bialu hearia Mosese ibu Anda biagoha howa Anduane Homogo heba bi lalu hene tagira ibugu biyagola ibunaga dengui biago wá haame howa huailo yu tagira ibugu buwa tihondo bi lamigi biyaria hendene. Mosesehanda wali agalihondo bi lamiai howa aga biagome ibunaga dengui lone yiho haga bini. Ibunaga dengui ani yiho haabo howa Anduane Homogola bi lole anda biagoha anda pugu bialu howa golo wigi biaga hene.

## 35

### *Sabada horongi mana bulene winigo ogo*

<sup>1</sup> Mosesehanda Isaraele wali agali bibahende íbu ngoai hadaba lowa tihondo lamialu lalu, Anduane Homogohanda bi mana tigua taluwa bialu halimu layago ogo, <sup>2</sup> Tigua horo waragaru biabe tara tara ngaru bialu halimu. Horo kanego Anduane Homogo i kotonaga horo loma bia hene ngago ogoningi biabe damene bibahende wahai howa halo holene nga. Wali agaliyaguabi mbiralime horo kaneni biabe mbira bialu kane handarimiyagua tigua ibu homelo bo wahalimu.\* <sup>3</sup> Biabe emene bame tininaga andagani ira hangubi bo delolenego ogoni biabe degego halo holene horo ogoningi biabe damenego nabuleore larogoni laya, lalu Mosesehanda lene.

### *Mbirale Anduane Homogohondo ogoale milimu lalu Mosesehanda wali agali laminigo ogo*

#### *(Haru Penego 25.1-9)*

<sup>4</sup> Mani Mosesehanda Isaraele wali agali bu hearuhondo lamialu lalu, Anduane Homogohanda tigua ogodagua bilimu laya. <sup>5</sup> Tigua loma maru yalu ibuwa ngilimu, laya. Wali agali bibahendeme lomabu mulene manda bu kamiyagua nde ngolobi silibabi boronosibi yalu ibuwa ibuhondo mialu <sup>6</sup> labolabo bayaleorebi pu sibi irinime payini mindibiha guyini hari mindini handalehe ngarubi tagalitaya aleha guyini ngarubi daramabiha guyini ngarubi labolabo meme irinime wabini ngarubi milimu. <sup>7</sup> Nogo sibi wangabenaga dongone daramabiha guyini ngarubi yalu ibalimu. Wena timbuni iba tia alenaga dongonebi ira agasia kambulene marubi yalu ibalu <sup>8</sup> lamu halenaga olibe lini welibi mbirale wiabagi holenaga odo haj holene weli wabulene padua alebi ira hagua ngabilo delaga inisenesi tarabi wabulene paduabi yalu ibugu bilimu. <sup>9</sup> Ege tole bayale kanelianaru tara tararubi loma binigo mo miaga agali haguane timbuni kagonaga aga mini ebodi hela dambi bulenebi aga emene galuhombeni karulaga biagoria helaga bulenebi mo yalu ibalimu, lene.\*

\* **35:2:** Har 20.8-11, 23.12, 31.15, 34.21, LBM 23.3, Man 5.12-14      \* **35:9:** Aga mini ebodi Har 25.7 handabe.

*Mosesehanda lalu, Anduane Homogonaga Balai Andaha wulene ngaru bilimu, lenego ogo*  
(Haru Penego 39.32-43)

<sup>10</sup> Mosesehanda laabo lalu, Agali bu kamiru aria maru biabe tara tara biaga mugubeyi kamiru Anduane Homogohanda bilimu lalu langiyago bibahende bule ibai halimu. <sup>11</sup> Balai Anda bialu daligani dambi holene biagobi wabilimu. Anda hongo helonaga daba haga bulene wangobi biarubi anda háinaga ira generubi anda hái libu banga bulenaga irabi generubi gene helolene mbogoyirubi wabialu helolene nga. <sup>12</sup> Tigua Habo Nalolene Bi lo winigonaga Mbogoyi biagobi wabialu Mbogoyi ogoni iraho yulenenaga ira kirabi dibu wabialu wali agalime ko binigo domo waholenenaga Mbogoyi ogoninaga panga ngolome wabulene nga. Tigua Habo Nalolene Bi lo winigonaga Mbogoyi biago mo ge holenaga labolabo gerela holene wabulene nga. <sup>13</sup> Ani bialu dagia tebolobi dagia ogoni iraho yulenenaga ira kirabi biabe ogoninaga bulene mbirale marubi wabulene nga. Ani bialu mberedi hiruwa Ngode Datagaliwabenaga deni dagia tebolo o biagoriani hiru wilimu. <sup>14</sup> Lamu halenaga wiagane irane helolenebi ogoninaga biabe bulene mbirale marubi wabulene nga. Lamu halerubi uruninaga welibi wabulene nga. <sup>15</sup> Ira hagua ngabilo delaga mini inisenesi lomabu delolene dabubi wabulene nga. Ani bialu dabu ogoni iraho yulene ira kirabi manda mandabu ngelolene nga. Tigua mbirale Anduane Homogonagaore wiabagi helonaga weli odo hai holenebi inisenesi bayaleore nga tarabi wabulene nga. Ani bialu Balai Anda biagonaga panga harabani labolabo gerela ho wule wabulene nga. <sup>16</sup> Mbirale bo lomabu delolenenaga dabu mbira bu helalu mbirale ira delolene dagia diri dewawi dabu ogoninaga gene maria kagoria helole boronosime dege wabilimu. Ani wabialu lomabu delaga dabu ogoriani biabe bulene alego damene wabu wiai holene nga. Ani bialu dabu ogoni iraho yule ira kira manda manda bu ngelalu bulene nga. Gi geru waya bulenenaga iba hambu wulene ndisi be mbira wabialu be ogoni wulene dagiabi bia holene nga. <sup>17</sup> Balai Anda kago pabe bu yanda hole labolabobi gerela holene wabialu ogoninaga generubi gene helolene mbogoyirubi pabe harabanaga panga labolabobi wabulene nga. <sup>18</sup> Balai Anda dangini yulupe kagonagabi Balai Anda pabe bu mabu bu kagonagabi dindini dariba holene pu hongohe heba gelo holene biarubi uruni bibahende wabulene nga. <sup>19</sup> Ani buwa Arono lalu ibu iginirunaga aga bayale tini Balai Anda biagonaga tamu Hobane Loma Bia Hene biago ha biabe bialu howa mo karulo helobi wabulene nga, lalu Mosesehanda Isaraele wali agaliruhondo lamini.

*Wali agalime Anduane Homogohondo mbirale lomabu mule yalu ibugu binigo ogo*

<sup>20</sup> Ani laya handala Isaraele wali agali ti Mosese helalu tini andaga pugu pugu bini. <sup>21</sup> Mosesehanda bi layagome wali agalinaga gubaliniha nogoba hayagola tigua ogonidagua bule lo manda bialu pugu pugu bini. Wali agali biabe bulene mugube tara tarayiru íbu ngoai hene. Ani bialu tigua Anduane Homogonaga mbirale tara tararu yalu ibunaga Balai Anda biago bilonaga mule yalu íbu ngoai haga bini. Tigua Anduane Homogo mitangi bialu lotu lolenenagabi Balai Anda bulenenagabi loma binigo mo miaga agalinaga aga wabulenebi mo yalu ibini. <sup>22</sup> Wali agali tinime yalu ibulene hame leadagua yári tara tara biniru haleiraru gi magibi ma gaguabi yári tara tara ngolome wabinirubi yalu íbu dege bini. Yalu ibalu uruni bibahende Anduane Homogohondo lomabu mule yalu ibugu bini. <sup>23</sup> Ani bialu wali agali marume labolabo bayale wiaru mo yu ibalu nogo sibi irinime pu payini mindibiha guyini hari mindini handalehe wiarubi tagalitaya aleha guyini wiarubi daramabiha guyini wiarubi bibahende wabiniru mo yalu ibugu bini. Ani bialu meme irinime labolabo wabinibi nogo sibi wangabenaga dongone daramabiha guyini wiarubi wena timbuni iba tia alenaga dongonebi bibahende mo yu ngoai hene. <sup>24</sup> Wali agali maru tigua siliba boronosiru wiago mo yalu ibugu bialu Anduane Homogohondo lomabu migi bini. Agali maru ira agasia wu hearu

tigua ira uruni Anduane Homogonaga Balai Anda biago bule mo yalu ibugu bini. <sup>25</sup> Wali pu payaga berearume pu payini bayale wiarubi nogo sibi irinime pu payini mindibiha guyini hari mindini handalehe wiarubi tagalitaya aleha guyini wiarubi daramabiha guyini wiarubi uruni bibahende mo yalu ibini. <sup>26</sup> Wali maru nogo meme irinime pu payaga mugube berearu tigua nogo meme irinime pu payiniru yalu ibini. <sup>27</sup> Ani bialu agali haguane hearu tigua ege tole mini kanelianabi maru baya tara tara wiaru uruni loma binigo mo miaga agali haguane timbuni heagonaga aga mini ebodibi aga emene mende galuhombeni karulaga biagoria pongobu helaga bulebi mo yalu ibugu bini. <sup>28</sup> Ani buwa tigua padua tara tarabi welibi urunime lamu biaruha berelolebi mbirale Anduane Homogonaga wiabagi holenaga weli wabulebi mbirale ngabi sanda ale ira hagua nga biaga inisenesi wabulebi mo yalu ibugu bini. <sup>29</sup> Isaraele wali agali tigua mbirale wiaru bibahende Anduane Homogohondo lomabu mule hame leadagua mo yalu Anduane Homogohanda ogoale bibe lalu Mosesehondo lamiyago bilo mo yu ibai hene.

*Agali biabe bilo Anduane Homogohanda dabo helaga biniru ogo  
(Haru Penego 31.1-11)*

<sup>30</sup> Mosesehanda Isaraele wali agali lamialu lalu, Anduane Homogohanda Uri igini Besalele ibu Yuda hameigini aria Hua aguane heago dabaya. <sup>31</sup> Ibugua biabe bayale tara tara ngaru biai holene mugubeyi Anduane Homogohanda ibunaga Dinini Besalele ibuha helalu biabe uruni bilonaga mini manda bogaru bulenebi ibuhondo miya. <sup>32</sup> Ibugua ngolomebi silibamebi boronosimebi giligili tara tara bulene mugube ibuhondo miya. <sup>33</sup> Ani bialu ege toleme mbirale ngaru bule bage tara tara podalu ira dibu pelowa bage tara tarabi bialu yari tara tara marubi bilo ibuhondo mugube miya. <sup>34</sup> Anduane Homogohanda manda tara tarabi agali Besalelebi Dana hameigini aria Ahisamaga igini Oholiababi libuhondo miya. Manda uruni yu howa libugua agali maru karubi biabe uruni bilo biawai holene mugube miya. <sup>35</sup> Anduane Homogohanda agali ogoni labohondo ege tole ngaru podalu yari tara tara bilobi giligili tara tara mo yaribia halu aga bayale tara tararu wabilobi nogo sibi irinime pu payini mindibiha guyini hari mindini handalehe ngarumebi tagalitaya aleha guyini ngarumebi daramabiha guyini ngarumebi labolaboni yari tara tara wabu helolenebi manda biai ka. Libugua giligili bulene tara tara libunime hameleda ale wabu helalu biabe uruni biai habeheore kagoni, lalu Mosesehanda lene.

## 36

<sup>1</sup> Mosese ibugua laabo halu lalu, Anduane Homogohanda Besalele Oholiabala libuhondobi agali maru hearuhondobi mandabi mugube bayale tara tarabi miyagome tigua biabe tara tara ngaru bulene manda biai howa Anduane Homogonaga Balai Anda biago bulene nga. Ani bibehe howa agali uruni tigua Anduane Homogo ibugua ogoale bilimu layadaguaore biai holene nga, lene.

*Wali agalime mbirale dewaore yalu ibinigo ogo*

<sup>2</sup> Mani howa Mosesehanda Besalelebi Oholiababi agali maru Anduane Homogohanda manda bulene mini biarubi olalu ibu ngoai hadaba lene. Ani layagola agali biabe buahe hearu ibu ngoai hayagola Mosesehanda tihondo lalu, Ai biabe bidaba, lene. <sup>3</sup> Balai Anda ogoni bilonaga Mosese ibugua Isaraele wali agalime mbirale yu ibiyaruni bibahende yu howa tigua biabe bilo tihondo mo mini. Ani bialu heagola egerebagi bibahendengi Isaraele wali agali tigua mbirale marubi Anduane Homogohondo lomabu mule hamelo hearu yalu ibugu biaabo hene. <sup>4</sup> Agali Balai Anda bialu hayaru tigua wali agalime mbirale dewaore yalu ibiyago hondowa tigua biabe bialu hayago bialaho ngelalu <sup>5</sup> Mosese hearia puwa tigua Mosesehondo lamialu lalu, Wali agalime mbirale dewaore yu ibaabo haragoni. Anduane Homogohanda biabe bilimu layago bulene

mbirale karulapeore wiatago ho ngamago ai maru dewaore bame bu paya bulubada, lene.

<sup>6</sup> Ani layagola Mosesehanda wali agali bibahende tinaga balai anda bu hearuha bi lo pelalu lalu, Ai wali agalime Anduane Homogonaga Balai Anda bulenenaga mbirale biaru lone yalu naibalimu, lalu lamiyagola tigua lone yalu naibi wahene. <sup>7</sup> Anduane Homogonaga Balai Anda bule wali agalime mbirale yalu ibiyaru dewaore anda bulene damenego bu karula pialu huniane maru ibira hene.

*Anduane Homogonaga Balai Anda binigo ogo  
(Haru Penego 26.1-37)*

<sup>8</sup> Agali biabe biaga mugubeyi hearu tigua Anduane Homogonaga Balai Anda bialu hene. Tigua labolabo bayaleore timbuniru pirame bialu hene. Tigua labolabo bayaleore uruni muwa pu nogo sibi irinime payini maru mindibiha guyini hari mindini handaleherubi maru tagalitaya aleha guyinirubi maru daramabiha guyinirubi urunime labolabo uruni yári bia haga bini. Pu payini urunime labolabo biagoria dahuliyali handaleheru pigiya ale wabu helaga bini. <sup>9</sup> Labolabo pira uruninaga luni ge magi manda bialu mida homberia (12) aranenaga ge magi manda bialu mida kira wigi buwa labolabo bibahende ogobi dege dege wini. <sup>10</sup> Ani bialu labolabo duria halu mbira lebumaga halu duria mende halu mende lebumaga halu bini. <sup>11</sup> Ani buwa labolabo mindibime kirabali mo gimbu buwa barobia haga bulenedagua haleira ale mabubi labolabo mbira mbirani wabu helaga bini. <sup>12</sup> Tigua mo gimbu bialu barobia holenedagoria haleira ale mabubi pira duria (50) labolabo pira duria (50) mbiranaga piganeni lebialu labolabo pira duria (50) mendenagabi labolabo maro biagoria haleira mabubi pira duria (50) dege helene. <sup>13</sup> Ani manda bu helowa mo yania helaga bulene wangobi pira duria (50) ngolome wabuwa urunime yania helaga biyagola labolabo biaru mo gimbu bialu timbuni mbiraore hene.

<sup>14</sup> Ani buwa labolabo timbuni mbira Balai Anda biago bu dangila dambi hole wabini. Labolabo ogoni nogo meme irinime wabinigo bibahende lamaga halu bearia (11) lebumaga howa wabini. <sup>15</sup> Labolabo bearia (11) uruninaga luni ge magi manda bialu mida haleria (13) wialu aranenaga ge magi manda bialu mida kira dege dege winigo bibahende ogobi dege dege wini. <sup>16</sup> Ani buwa labolabo duria uruni lebumaga howa luni timbuni mbiraore hene. Ani bialu labolabo halu mende waragaria wiyarubi anidagua dege bini. <sup>17</sup> Ani buwa labolabo luni ogoni labonaga lene leneha mo gimbu bialu barobia holenedagua mbirale haleira ale mabubi pira duria (50) labolabo maro biagoria helalu labolabo timbuni mendegonagabi ani dege helene. <sup>18</sup> Ani bu helowa ogoni barobia howa yaniaho helolene wangobi pira duria (50) boronosime wabu wini. Wabiai howa mo gimbubu wiagola labolabo timbuni mbiraore wini. <sup>19</sup> Ani biai howa mani nogo sibi wangabenaga dongone daramabiha guyinigome Balai Anda biago lone dambi dege holenaga mo wini. Ani buwa halu tebone wena timbuni iba tia alenaga dongenemebi dangila dambi dege hene.

<sup>20</sup> Anda háinaga ira generu gimbu gimbu bulene ira mini agasiame bini. <sup>21</sup> Anda ira uruni luninaga ge magi manda bialu mida maria mbalapenaga sendimida emene pira waragariani waragaria (66) helo helene. <sup>22</sup> Anda háinaga ira gene uruni maru dindihayagi gimbu bilo manda bialu emene luni ale tigi haga bini. Ira bibahende luni tubagi lolani hondowa ogobi dege degeore tigi haga bini. <sup>23</sup> Anda háinaga ira kira kira dege dege daba hamagamaga buwa daga lamaga halu pira kira (20) mende mende lowa abene unurayaginaga wabini. <sup>24</sup> Ani buwa silibame mbogoyi emene dege dege pira maria (40) anda gene biaru helaga bule wabini. Ani buwa anda gene mbira mbogoyi kiraha helaga buwa mbogoyi mo hongo ho helene. <sup>25</sup> Anda gene maru pira kira (20) anda manda uyurayagi hearubi nde ani dege bini. <sup>26</sup> Ani bialu anda gene pira kira (20) uruni wabu manda mandabu ngelalu anda gene helolene mbogoyi pira maria (40)



silibame wabuwa mbogoyi kiraha anda gene mbira helaga bini. <sup>27</sup> Ani buwa anda gene ni paliragohayagi waragaria helalu <sup>28</sup> anda gene kira mende manda tibila gimbu biragoaha helene. <sup>29</sup> Anda háinaga gene manda tibila gimbu biragoaha kira ogonilabo ho pagupagu bilowa gimbu bima iraga ho helene. Manda tibila gimbu birago bibahendea ani dege bini. <sup>30</sup> Ani biyagola anda tibihayagi gene halira halu siliba mbogoyi pira mbirani waragaria (16) anda gene dindiha mo wialu mbogoyi kirame anda gene mbira mo hongo ho helaga bini.

<sup>31</sup> Ani buwa anda hái libu banga bulenaga ira mini agasia pira mbirani duria (15) dibalu lunioreru pelo mbaralowa wini. Ira luni mbalape uruni aria duria anda hái manda abene unurayagi libu para halu <sup>32</sup> duria mende uyurahayagi libu para halu duria tebone ni paliragohayagi libu para halu bulenaga ani dibu pelo manda bini. <sup>33</sup> Anda hái libu para holenaga ira dibu pelenego dombeni para holenego lunaga anda magi manda buwa anda ibuniore karulape tigi howa pelene. <sup>34</sup> Ani buwa anda hái gene biaru ngolome paraho dambi hene. Mandaha hái para howa yaniaho helonaga ngolome yania holene gi pagida ale mabubi maru wabuwa ira hái libu para hayago yaniaho helaga bini. Anda hái para holene ogoni ngolome paraho dambi hene.

<sup>35</sup> Uruni biai howa labolabo baya taraore mbira anda tamuha hobaki holene wabini. Labolabo timbuni ogoni pu tara tarame mo yári biahaga bialu howa nogo sibi irinime pu payini mindibiha guyini hari mindini handalehe wiarumebi tagalitaya aleha guyini wiarumebi daramabiha guyini wiarumebi mo yári bia halu dahuliyali handaleheru pigiya labolabo ogoriani yári bia hene. <sup>36</sup> Ani buwa ira agasia mbira dibuwa anda gene maria wabuwa ngolome paraho dambi hene. Anidagua buwa silibame mbogoyi maria wabuwa ira gene biaru mbogoyi ogoriani helene. Ani helowa ira ogoriani labolabo yani helonaga wangobi ngolome wabuwa ira maria ogoriani ta howa helaga bini. <sup>37</sup> Ani biai howa labolabo timbuni mbira anda ogoninaga panga helole wabini. Panganaga labolabo ogoni pu tara tarame mo yári biahaga bialu nogo sibi irinime pu payini mindibiha guyini hari mindini handalehe wiarumebi tagalitaya aleha guyini wiarumebi daramabiha guyini wiarumebi labolabo wabini wiaruni yári bia hene. <sup>38</sup> Ira agasia mbira dibuwa gene duria wabuwa ngolome paraho dambi howa boronosime mbogoyi duria anda gene uruni helole wabu wini. Ani buwa mbogoyi duria uruniha ira gene duria biaru helowa labolabo gerela holene wangobi maru ira ogoriani helalu buwa labolabo biago ogoriani mo gerelape ho wini.

## 37

### *Habo Nalolene Bi lo winigonaga Mbogoyi wabinigo ogo (Haru Penego 25.10-22)*

<sup>1</sup> Besalelehanda Habo Nalolene Bi lo winigonaga Mbogoyi mbira ira agasia dibu pelowa mbaraleore winigome wabini. Mbogoyi ogoni luninaga magi sendimida emene handari mbirani pira mbira (110) wialu aranenaga magi sendimida emene pira waragariani waragaria (66) wialu daliganaga magi sendimida emene pira waragariani waragaria (66) dege wialu wabini. <sup>2</sup> Ani bialu ibugua ngolo bayaleore irani do taulo wahene ngarume Mbogoyi ogoni tagira tamuhabi baya hangu paraho dambi hene. Ani buwa bu gimbu bini nene pugu bidadagua ngolo baya uruni ariame mo homane howa paraho mabu bini. <sup>3</sup> Ibugua ani bialu Mbogoyi ogoni iraho yulenenaga gi pagida ale mabubi ira holene gimbuni maria wiadagua mabubi maria ngolome dege wabuwa gene maria dindiha hearu ta howa wabu helene. Gene mende mendehabi mabubi kira labolabo helene. <sup>4</sup> Ani biai howa Mbogoyi iraho yulenenaga ira agasiame ira kira wabu wialu ira ogoni labobi ngolome paraho dambi dege hene. <sup>5</sup> Ogoni biai howa Besalele ibugua ira ogoni labo Mbogoyinaga gene dindiha mbirale mabubi gi pagida ale ngolome wabu helayagoha Mbogoyi iraho yalu polenedagua abe tale buwa mo karulelene. <sup>6</sup> Ani

bialu Mbogoyi ogoninaga panga ngolo bayaleore wiagome wabuwa luninaga magi sendimida emene handari mbirani pira (110) wialu aranenaga magi sendimida emene pira waragariani waragaria (66) wilo wabu helene. Ogoriani howa wali agalime mana ko biniru domo waholene wini. <sup>7</sup> Ani buwa ibugua dahuliyali handalehe kira ngolo bayaleorerume baya hangu hamame bo dambu tiga bigi bialu wabini. <sup>8</sup> Ani wabuwa Mbogoyinaga pangani mbirago gi tigaha mendego gi lehayagi lowa talebu helene. Mbirale uruni ti hangu hangu wabia ndo Mbogoyi pangabi dahuliyali handalehebi bibahende mbiraoreha wabu gimbu bigi bini wilo wabini. <sup>9</sup> Dahuliyali handalehe kira ogonilabo libuni handa edene buwa Mbogoyinaga panga daligani wali agalinaga ko biniru domaga laga wiagoria helene. Libunaga babaganeme Mbogoyi biagonaga panga yula dambi hai helo helene.

*Mberedi lomabu minigo mo wulenenaga dagia tebolo wabinigo ogo*  
(Haru Penego 25.23-30)

<sup>10</sup> Besalele ibugua tebolo dagia mbira ira agasia dibu pelowa ogonime wabini. Dagia tebolo dagia ogoni luninaga magi sendimida emene pira halirani halira (88) aranenaga sendimida emene pira mariani maria (44) wialu daliganaga sendimida emene pira waragariani waragaria (66) helo wabini. <sup>11</sup> Ani wabu ngelowa ngolo bayaleme paraho dambi halu dagia tebolonaga nene gimbuni wiadagua ngolo mo homane howa paraho dambi hene. <sup>12</sup> Ani buwa dagia tebolo neneni ngolome paraho mabu bulenego tohenaga magi sendimida emene halira helowa ogonime dagia tebolo neneni ngolome para hayago lone paraho dambi halu nene bibahendeni paraho mabu bupe hai hene. <sup>13</sup> Ibugua ani buwa dagia tebolo biago iraho yulenenaga ngolome wabini mabubi gi pagida ale maria wabuwa gene maria kagoha ta howa wabu helene. <sup>14</sup> Ani bialu dagia tebolo iraho yulenenaga mabubi gi pagida ale uruni dagia tebolo gene maria kagoha tigatiga nene ngolome paraho dambi hayago andaneha dege hapara ho helaga bini. <sup>15</sup> Ani buwa ira agasiame ira kira dagia tebolo iraho yulenenaga manda mandabu ngelowa ngolome paraho dambi hene. <sup>16</sup> Ani bialu dagia tebolo ogoriani ngelolenenaga ndisi bebi beledibi iba bebi be marubi waini iba loma binigo odo mulenaga ndisi bebi uruni bibahende ngolome dege Besalelehanda wabiai hene.

*Lamu hale wiagane irane wabinigo ogo*  
(Haru Penego 25.31-40)

<sup>17</sup> Besalele ibugua lamu hale wiagane irane ngolo bayaleoreme wabu helene. Ibugua hamame ngolo baya hangu dambu tiga bigi buwa lamu hale wiagane tene baya hangu ngelowa irane ogoriani mo karulaga bini. Ani buwa lamu halenaga irane heagoria dege gebagane helowa lamu hale wabupe haga bini. Ani buwa ibugua ngolome dege balawaya lini dole pabua baradaguabi ale wabuwa lamu hale irane ogoriani wabu gimbu bigi bini. <sup>18</sup> Lamu halenaga irane ogoriani gebagane waragaria wabuwa abene mendeha tebira mendehabi tebira dege lowa wabu helaga bini. <sup>19</sup> Lamu hale gebagane waragaria biarunaga tebira mbira mbirani balawaya ira amononaga lini dole pabua baradaguabi ale ginigene wabu helaga bini. <sup>20</sup> Lamu halenaga iraneni balawaya bayale ira amononaga lini dedaligobi mitangi bialu maria wabu helene. <sup>21</sup> Ani biai howa lamu hale gebagane biaruni andanehayagi balawaya lini dole pabua baradaguabi ale mbira mbira wabuwa helaga bini. <sup>22</sup> Ani bu ngelowa gebaganebi balawayanaga lini dole pabua baradaguabi ale biaru hamame bo ndibulaga bialu mo mbiraore howa wabu gimbu biai hene. <sup>23</sup> Ani biai howa lamu hale iranenaga gebaganeni ira dolene karia wabuwa helaga bini. Ani buwa ira dedago tabolene pero mbira ngolo bayaleoreme wabialu beledi marubi wabini. <sup>24</sup> Ani wabuwa lamu hale iranenaga gebagane maru biaru bibahende wabulenenagabi ngolo genda magi kilogarama pira tebirani maria (34) winigome wabini.

*Inisenesi lomabu delaga dabu wabinigo ogo*  
(Haru Penego 30.1-5)

<sup>25</sup> Besalelehanda ira agasia mbira dibu pelowa ira hagua nga biaga mini inisenesi lomabu delolene dabu mbira wabini. Dabu ogoni luninaga magi sendimida emene pira mariani duria (45) wialu aranenaga magi sendimida emene pira mariani duria (45) dege wialu daliganaga magi sendimida emene pira dira (90) helo bu helene. Gibuni maria ngagoria nogo bulumaganaga ne gayane handalehe maria ta howa wabu helene. <sup>26</sup> Ani buwa gibuni maria bibahende ngolome para halu ngolome dege mo homane howa dabunaga nene nene wiagoria ndibulo mabu bialu nogo bulumaganaga ne gayane handalehe maria heagobi ngolome dege paraho dambi hai hene. <sup>27</sup> Ani buwa ngolome dege gi pagida ale mabubi kira kira wabuwa abene mende mende lowa tale buwa iraho yalu polenenaga gibu kira manda mandabu helene. Gi pagida ale mabubi ogonilabo ngolo homane paraho mabu biyago andaneha hapara helowa dege wabu para hene. <sup>28</sup> Ani buwa ibugua dabu ogoni iraho yulenaga ira agasiame ira kira mo manda manda buwa ngolome paraho dambi ho wini.

*Mbirale wiabagi holenaga welibi ira hagua ngabilo delaga inisenesibi wabinigo ogo*  
(Haru Penego 30.22-38)

<sup>29</sup> Besalele ibugua weli mbira baya taraore Anduane Homogo ibuninagaore wiabagi helo odope haga biago wabini. Ani buwa ira hagua ngabilo lomabu delaga inisenesi bayale taraore wabialu padua mbira ngabiore sanda ale wiarume mo biamaga howa dambiyagola ngabi baya taraore wabu wini.\*

## 38

*Lomabu delolene dabu wabinigo ogo*  
(Haru Penego 27.1-8)

<sup>1</sup> Besalele halu biabe biaga agali bu hearu tigua ira agasia mbira dibuwa lomabu delolene dabu mbira wabini. Dabu ogoni gibuni gibuni bibahendehe ge magi manda bialu ogobi dege dege mida kirani sendimida emene pira kira (20) manda bialu wabini. Daliganaga ge magi manda bialu mida mbirani sendimida emene pira tebira (30) halu bilo wabini. <sup>2</sup> Ani buwa nogo bulumaganaga ne gayane handalehe maria ira agasia biagome dege wabuwa gibuni mariani helene. Ani helowa mbirale bulumaganaga ne gayane handalehe biarubi lomabu delolene dabu urunibi bibahende boronosime paraho dambi hai hene. <sup>3</sup> Ani buwa ndisi be marubi ira pungaru hilo yulenaga wabini. Ani bialu nama tabuli ale emene marubi ndisi be marubi pogorubi belediru ira punga hiliyu waholenaga alebi uruni bibahende boronosi degeme wabiai hene. <sup>4</sup> Ani buwa mbirale ira delolene dagia diri dewawi dabu ogoninaga gene maria heagoria helole boronosime dege wabini. Ani buwa ira delolene dagia biago dabunaga gene obeneni bapara hama pialu lina obeneni dege hairi helene. <sup>5</sup> Ani buwa dabu ogoni iraho yulenaga gi pagida ale mabubi maria gene maria heagoha ta howa wabu helene. <sup>6</sup> Ani wabu helowa dabu ogoni iraho yulenenaga ira kira ira agasiame manda manda buwa boronosime paraho dambi howa ngelene. <sup>7</sup> Ani buwa mbirale gi pagida ale mabubi maria taho helayagoha ira biagolabo anda pelowa ngelene. Lomabu delolene dabu ogoni mbogoyi ale dege wabinigoyu tibiniha dege payadaga nahe ngelene.

*Gi geru waya bulenenaga ndisi be boronosime wabinigo ogo*  
(Haru Penego 30.18)

<sup>8</sup> Wali maru Anduane Homogonaga Balai Anda kago harabani biabe biaga berearume boronosi maru Besalele tagu mini. Boronosi uruni wali tinaga iba wayu ale wini. Biabe

\* 37:29: Har 30.22-38

biaga hearu tigua boronosi ogonime gi geru waya bulene ndisi be mbira wabialu ndisi be ogoninaga wiagane dagiabi boronosi degeme wabu wini.\*

*Anduane Homogonaga Balai Anda biago pabe bu mabu bulene nga lenego ogo  
(Haru Penego 27.9-19)*

<sup>9</sup> Tigua labolabo bayaleoreru wabuwa Anduane Homogonaga Balai Anda kago pabe bu yanda holenaga bini. Labolabo ogoni unurahayagi aranenaga ge magi manda bialu mida pira mariani maria (44) wabini. <sup>10</sup> Ani buwa gene pira kira (20) boronosime wabu wialu gene uruni helolenenaga mbogoyibi pira kira (20) dege boronosime wabu wini. Ani buwa bubigi homane luni silibame wabiniru gene mbira mbira helearuni bibahende dabaho gimbu bigi bini. Ani buwa labolabo luni banga bini biaruni gerela holenaga ta howa silibame wangobi wabu helaga bini. <sup>11</sup> Anda manda abene uyurahayagibi nde anidagua dege wabu helene. <sup>12</sup> Pabe ni paliragohayagi labolabome aranenaga ge magi manda bialu mida pira kirani kira (22) wialu gene boronosime wabini pira wabialu mbogoyibi pira dege wialu gene uruni helolenenaga diriwi wabu ngelene. Lu bubigi banga bini biarunibi wangobi biarubi silibame dege wabuwa labolabo gerela holenaga wangobi biaruni ta howa helaga bini. <sup>13</sup> Ani bialu anda panga haraba abene ni tagira ibiragohayagi wiagoha helolene labolabo aranenaga ge magi manda bialu mida pira kirani kira (22) dege wini. <sup>14-15</sup> Labolabome pabe bu yanda ho helolenego aranenaga ge magi manda bialu mida waragariani sendimida emene pira waragaria (60) lowa panga haraba anda pu ibu bulenegeria lene labolaboni tale bu helene. Boronosime mbogoyi wabu ngelayagoria gene manda mandabu wiyago mendehayagi tebira lowa mendehabi tebira dege lowa helene. <sup>16</sup> Pabe buyu mabu bulenaga labolabo bibahende baya taraoreme wabu helene. <sup>17</sup> Gene bibahende boronosime wabiniru helolene mbogoyi boronosi degeme wabini. Labolabo gerela holenaga wangobi wiarubi bubigi homane luni banga binirubi uruni bibahende silibame wabu helene. Gene bibahende nguni daligahayagi siliba degeme paraho dambi hai howa bubigi homane luni banga bulene silibame wabiniru gene mbira mbira helearuni bibahende dabaho gimbu bigi buwa helene. <sup>18</sup> Ani buwa anda panga haraba pu ibu bulenegeria labolabo baya tara tarama wabu helaga bini. Labolabo ogoni pu nogo sibi irinime payini maru mindibiha guyini hari mindini handalehe wiarumebi tagalitaya aleha guyini wiarumebi daramabiha guyini wiarumebi bayuwaore mo yári bia hene. Labolabo ogoni aranenaga ge magi manda bialu mida dira lowa lu daliganaga ge magi manda bialu mida kirani sendimida emene pira kira labolabo maru biarubi helayadagua dege helene. <sup>19</sup> Ani bialu labolabo yaniaho helolene gene mariabi gene helolene mbogoyi mariabi boronosime wabu helene. Ani helowa labolabo gerela holenaga wangobi helearubi bubigi homane luni banga binirubi uruni bibahendeore silibame wabini. Gene bibahende nguni daligahayaginaga silibame paraho dambi hene. <sup>20</sup> Balai Anda biago nguni pume dariba holenaga dindiha gelo holene wabuwa pabe gelo holenenagabi boronosime dege wabu wia dege bini.

*Anduane Homogonaga Balai Anda bulenaga ngolobi maru alerubi wigi binigo ogo*

<sup>21</sup> Tigua Anduane Homogonaga Balai Anda ege tole kiraniibunaga bi pira gilibuwi biagolabo wulenaga ala bini biagoha ngolo siliba boronosirubi uruni tigua mo yu ngoai henedaruni bibahende dagalai hene. Moseseibunime Libaiali hearuhondo lamialu lalu, Ngolobi mbirale uruni bibahende dagalai howa bebani gili bilimu, lene. Tigua dagaleagola loma binigo mo miaga agali Arono igini Idama ibugua hondo haga hene.

<sup>22</sup> Yuda hameigini aria Hua aguane Uri henego igini Besalele heago ibugua mbirale Anduane Homogohanda Mosesehondo bibe lalu laminiyago bibahende biaiore hene. <sup>23</sup> Agali mende ibula biabe mandagi biaga mbira Dana hameigini aria Ahisamaga igini

Oholiaba ibugua ege toleni bage ale podaradagua bialu bi gilibu wiaga howa biabe uruni manda mandabu haga hene. Ibugua agani pume yári tara tara bulenebi nogo sibi irinime pu payini mindibiha guyini hari mindi handalehe wiarubi tagalitaya aleha guyini wiarubi daramabiha guyini wiarubi yári tara tara lebiaga hene.

<sup>24</sup> Anduane Homogonaga Balai Anda biago bulenaga wali agalime ngolo yu ibiyaru lomabu wiabagi ho winiru bibahendenaga genda magi manda bialu kilogarama handari dirani pira dirani halira (998) yalu ibiniyane hendene. <sup>25-26</sup> Tigua siliba dagalo handalu hemiria genda magi manda bialu kilogarama daosini tebirani handari mariani pira tebira (3,430) mo mogo biniyane hendene. Muni siliba uruni agali mali pira kira (20) ho bolangua hene hearu tinaga mini bebani gilibu wigi biyarume muni kina duria ale yu ibugu biyago dagalalu hemiria agali daosini dege handari waragariani tebira handari duriani pira duria (603,550) bibahende ibiniyane hendene.✧ <sup>27</sup> Tigua siliba uruni marume Anduane Homogonaga Balai Anda biagonaga anda gene helolene mbogoyi handari mbira (100) wabini. Mbogoyi mbira mbiranaga siliba genda magi manda mialu kilogarama daosini tebirani handari maria (3,400) wabu wini. <sup>28</sup> Ani bialu siliba maru ibira hene genda magi manda bialu kilogarama pira tebira (30) wini. Ani wiagola ibira hene urunime labolabo yania holenenaga nguni kirabali wangobi helayarubi bubigi homane lu banga binirubi gene damene helearu daligahayagi daba hogimbu bigi bulenebi siliba urunime wabini. <sup>29</sup> Tigua Anduane Homogonaga boronosi wiabagi henego genda magi manda bialu kilogarama daosini kira handari mariani pira kirani duria (2,425) mini. <sup>30</sup> Boronosi urunime Anduane Homogonaga Balai Anda biago haraba pu ibu bulenegeria gene helolene mbogoyi wabini. Ani bialu lomabu delaga dabu biagonibi mbirale diri dewawi helenegobi mbirale tara tara lomabu delaga dabu biagonaga bibahendebi boronosime wabiai hene. <sup>31</sup> Ani bialu Balai Anda pabe bu mabu biyagonaga gene helolene mbogoyi biarubi pabe biago haraba pu ibu bulenegeria gene helolene mbogoyibi boronosime dege wabu helene. Balai Anda biago nguni pume dariba holenaga dindiha gelo boronosime wabuwa pabenaga gelobi boronosime dege wabu wia dege bini.

## 39

### *Loma binigo mo miaga agali biarunaga aga wabinigo ogo (Haru Penego 28.1-14)*

<sup>1</sup> Loma binigo mo miaga agali hearu ti Balai Anda Hobane Loma Bia hene heagoha biabe bialu howa aga karulelonaga wabini. Tigua pu tara tara bayaleoreru nogo sibi irinime payini mindibiha guyini hari mindini handalehe wiarumebi tagalitaya aleha guyini handalehe wiarumebi daramabiha guyini wiarumebi urunime baya hangu yári bia halu aga wabini. Arononaga aga Anduane Homogohanda ogobiore wabibe lalu Mosesehondo lamiyadagua wabini.

<sup>2</sup> Tigua loma binigo mo miaga agalinaga aga mini ebodi karulaga wabini. Ani wabuwa aga ogoni lebialu pu ngolo ale bayale wiagomebi nogo sibi irinime payini mindibiha guyini hari mindini handalehe wiarumebi tagalitaya aleha guyini wiarumebi daramabiha guyini wiarumebi wabini.\* <sup>3</sup> Tigua ngolo wiago hamame balu bo mbalape lowa beba ale ngelene. Ani buwa ngolo emeneore ogoni podaga bialu pu dini emeneme helowa pu maru mindibiha guyini wiarumebi tagalitaya aleha guyini wiarumebi daramabiha guyini wiarumebi uruni heba payamaga halu aga lebulene pu ale helowa agani yári maru lebu helaga bini. <sup>4</sup> Tigua aga mini ebodi pu dini lunime payani paulaki holenedagua kira wabuwa loma binigo mo miaga agalinaga aga karulaga biago baba ndibu lelonaga lebumaga hene. <sup>5</sup> Ani buwa labolabo bayale

✧ **38:25-26:** Har 30.11-16, Md 17.24 \* **39:2:** Aga mini ebodi HAR Be 25.7 handabe.



mbira pu bayaleorerume aga mini ebodi yári tara tara wabiyadagua bialu mo yári bia haga bialu lebigi bini. Labolabo ogoni loma binigo mo miaga agalinaga aga ebodi biago mandibu leneha lebu paraho mabu bini. Ani bialu abale Anduane Homogohanda Mosesehondo bibe lalu lamiyadagua bini. <sup>6</sup> Ani biai howa ege tole kira mini kaneliana wiago labo mo yuwa Yagaba igini homberia (12) biarunaga mini ege tole o biago laboni bage ale podaradagua bialu podo wigi bini. Ani buwa ege tole ogo laboni ngolome mo yári bia hene biagoriani mo wini. <sup>7</sup> Ani buwa aga mini ebodi biagoni pu dini emeneme payinigo payani paulaki hayagoriani Isaraele hameigini homberia (12) mitangi bulenaga ege tole kira biago labo paraho dambi hene. Anduane Homogohanda anidagua bibe lalu Mosesehondo lamiyadagua ani bini.

*Loma binigo mo miaga agalinaga aga emene galuhombeni karulelonaga wabinigo ogo (Haru Penego 28.15-30)*

<sup>8</sup> Tigua aga emene galuhombeni karulolene ogoni loma binigo mo miaga agali karunaga aga mini ebodi wabiyagobi dege wabini. Aga ogoni pu payini ngolo ale-mebi pu mindibiha guyini hari mindini handalehe wiarubi pu tagalitaya aleha guyini wiarubi pu daramabiha guyini wiarubi urunime yári bia haga bini. <sup>9</sup> Ani buwa aga biago hanuni paulaki biyagola luninaga magibi aranenaga magibi sendimida emene pira kirani kira (22) dege hene. <sup>10</sup> Ani buwa ege tole muni dewame miaga wiaru duguni maria aga ogoriani helaga bini. Duguni mbirago ege tole mini lubibi tobasabi ganedebe uruni mbira mbiraha dabaho helaga bini. <sup>11</sup> Ani bialu duguni mendegoria ege tole mini emeralabi sabaiabi daimonobi uruni mbira mbiraha dabaho helaga bini. <sup>12</sup> Duguni tebonego ege tole mini tegoisibi agadebi amedisibi uruni mbira mbiraha dabaho helaga bini. <sup>13</sup> Ani bialu duguni manego ege tole mini berilibi kanelianabi yasabebi mbira mbiraha dabaho helaga biai hene. Ege tole uruni mbira mbirago ala ngolome mo yári bia haga buwa mani aga biagoria helaga bini. <sup>14</sup> Ege tole homberia (12) uruni mbira mbirani Yagaba igini homberia (12) biarunaga mini bage ale podaradagua bialu podo wigi bini. Isaraele hameiginiru mitangi bialu ani bini. <sup>15</sup> Ani buwa aga ogoni galuhombeni mo karulolenaga ngolo pume hendehope helonaga seni pu aleme wabu helene. <sup>16</sup> Ani buwa ngolome wabini yáribi haleira ale mabubi kira kirabi wabu helene. Ani buwa tigua haleira ale mabubi kira ngolome wabini biagolabo aga galuhombeni biagonaga lene gimbuni kirabalini daligahayagi pongobia hene. <sup>17</sup> Ani buwa ngolome seni pu ale kira wabu helayagonaga ngunini haleira ale mabubi kira ngolome dege wabini ogoriani pongobu mini. <sup>18</sup> Ani bialu seni pu ngolome wabini biago labonaga nguni mende mendehayagi ngolome yári bia hene kira biagoha pongobia halu ngolome mo yári biahe ogoni aga mini ebodi biagonaga pu dini emeneme payinigo payani paulaki hene biagoha barobia hene. <sup>19</sup> Ani buwa tigua ngolome haleira ale mabubi kira mende wabuwa aga galuhombeni karulolene biagonaga lene gimbuni kirabalini dindihayagi aga mini ebodi biagoriani pongobia hene. <sup>20</sup> Ani bialu ogoniale dege haleira ale mabubi kira lone ngolome dege wabuwa nguni aga mini ebodi biago dindiha ndibulaga mandibu biagoria pongobia hene. <sup>21</sup> Ani biai howa pu mindibi hari mindini handalehe mbirame haleira ale mabubi ngolome wabini kira biagolabo aga emene galuhombeni karulolene biagoria pongobu hayagoria pongobia howa aga mini ebodi biagonaga haleira ale mabubi helayagola pongo bumaga haga bini. Ani biyadagome aga galuhombeni karulolene biago mandibu dariba haga biagola aga emene ogonila golo wahabe naheore bayale wiaabo hene. Anidagua bibe lalu Anduane Homogohanda Mosese laminidagua bini.

*Loma binigo mo miaga agalinaga aga marubi wabinigo ogo (Haru Penego 28.31-43)*

<sup>22</sup> Loma binigo mo miaga agali hearunaga aga mini ebodi biago dindiha karulolenenaga aga mende biagimbu bulene pu nogo sibi irinime payini mindibiha guyini hari mindini handalehe wiarume wabini. <sup>23</sup> Wabuwa loma binigo mo miaga agali kago ibunaga haguane anda pelolenedagua manda buwa hanuni wabuwa ngelene. Ani wabu ngelowa aga lerela timbu holigonaga aga podene mbirame ngunidago paula dai buwa lebini. <sup>24-26</sup> Ani buwa aga ogoni nguni dindihayagi pu nogo irinime payini mindibiha guyini hari mindini handalehe wiarumebi tagalitaya aleha guyini wiarumebi daramabiha guyini wiarumebi mo yári bia halu ira pomegaranade lini aleru wabu helaga wini. Ani buwa ira pomegaranade lini ale yári bu ngagoria dombeni mbelo emene emeneru ngolome wabiniru nguni ogoriani dege pongo biahaga bima pene. Anduane Homogohanda ani bilimu lalu Mosesehondo laminigodagua bini.

<sup>27-29</sup> Ani bialu Arono ibu igini biarubi tinaga aga giha karulolenebi labolabo emboneni bobu mabu bulene mandabi wabialu tangi hagianeni karulaganegobi wabialu darasi aga bayaleoreme wabuwa bobia dambi holene aga mandibu biradagua nogo sibi irinime pu payini mindibiha guyini hari mindini handalehe wiarumebi tagalitaya aleha guyini wiarumebi daramabiha guyini wiarumebi o biago mo yári bia halu wabini. Anidagua bilimu lalu Anduane Homogohanda Mosesehondo laminigodagua bini. <sup>30</sup> Ani bialu mbirale dombo heda wiradagua ngolome wabuwa ogoriani bi ogo Anduane Homogonaga Loma Biahene Ka lalu gilibu wini. <sup>31</sup> Ani buwa dombo heda bi gilibuwi biago pu payini mindibiha guyini hari mindini handalehe wiarume hende howa loma binigo mo miaga agali biagonaga aga emboneni bobu mabu bini biagoria pongobia hene. Anidagua bibe lalu Anduane Homogohanda Mosesehondo lamiyadagua ani biai hene.

*Biabe bibahendeore biai henego ogo  
(Haru Penego 35.10-19)*

<sup>32</sup> Anidagua bialu Balai Andanaga biabe bulene wiaru biai hene. Anduane Homogohanda bilimu lalu Mosesehondo lamiyadagua Isaraelealirume biaiore hene. <sup>33</sup> Ani buwa tigua mbirale uruni Mosese hearia mo yalu pene. Tigua Balai Anda bulene damene bibahendebi anda háinaga labolabo gerela ho wulenenaga wangobi biarubi anda háinaga ira generu gimbu gimbu bulenebi anda hái libu banga bulenagabi anda generubi gene helolene mbogoyirubi <sup>34</sup> Balai Anda dangini nogo sibi wangabe dongone daramabiha guyinime dangila dambi holene wabu wiyagobi wena timbuni iba tia ale biraganaga dongoneme dangila dambi holene wabu wiyagobi yalu ibini. Ani ya bialu labolabo timbuni anda Hobane Loma Bia Heneore hoba yanda hene biagoha gerela holene biagobi mo yalu ibini. <sup>35</sup> Ani bialu Habo Nalolene Bi lo winigonaga Mbogoyi biagobi ogoninaga panga daligani wali agalinaga ko domaga laga biagobi ege tole kirabi ira kira Mbogoyi ogoni iraho yulene biagolabobi mo yalu ibini. <sup>36</sup> Ani bialu dagia tebolo biagobi mbirale bibahende dagia ogoriani biabe bulene wiarubi mberedi Ngode Datagaliwabenaga deni dagia tebolo ogoriani wiaga biarubi mo yalu ibini. <sup>37</sup> Ani bialu lamu hale wiagane irane ngolome wabini biago heba lamu hale ogoriani helolene biarubi lamu halerume biabe bulene wiarubi uruniha weli berelolene wiarubi <sup>38</sup> inisenisi lomabu delolene dabu ngolome wabini biagobi mo yu ibini. Ani bialu mbirale Anduane Homogo ibuninagaore wiabagi helonaga odo haji holene weli baya taraore wiagobi ira hagua ngabilo delaga inisenisi biagobi Balai Anda panga harabani gerela haga labolabo wabini biagobi mo yalu íbu dege bini. <sup>39</sup> Ani bialu lomabu delolene dabu boronosime wabini biago heba ira delolene dagia diri dewawi boronosi degeme wabu wiagobi ogoni iraho yulene ira manda mandabu wiyagobi dabu ogoriani biabe bulene damene bibahendebi gi geru waya bulenaga iba hambu wulene ndisi be heba ndisi be wiagane dagia biagobi mo yu íbu dege bini. <sup>40</sup> Tigua Balai Anda biago pabe bu yanda howa gerela holenenaga labolabo lebu wiyagobi generubi gene

helolene mbogoyi biarubi pabe harabanaga pangani helolene labolabo wabu wiyagobi pu Balai Anda dangi yulupe kago dindini dariba holene gelo biarubi yalu ibugu bini. Balai Anda biagonaga biabe bulene damenego bibahendeore wabiai howa mo yalu ibini. <sup>41</sup> Loma binigo mo miaga agalime Anda Hobane Loma Biahene biagoha biabe bialu howa aga karulo helonaga wabiyarubi bibahende mo yalu ibini. Aga uruni Aronobi ibu igini biarubi ti mo karulelo lalu lomabu wiabagi ho wiyago mo yalu íbu dege bini. <sup>42</sup> Anidagua bialu Isaraealaihondo Anduane Homogohanda uruni bilimu lalu Mosesehondo bi lamiyadagua biaiore hene. <sup>43</sup> Ani yalu íbu wiai heagola Mosese ibugua baya hangu handalu hearia mbirale bibahende Anduane Homogohanda bibe lalu lamiyagobiore biai hayiyane hendene. Mbirale uruni de handai howa ibugua lalu, Anduane Homogohanda tí biamogo bilo hameledo, lalu Mosesehanda lene.

## 40

### *Balai Anda bu helowa Anduane Homogonaga loma biaho helenego ogo*

<sup>1</sup> Anduane Homogohanda Mosesehondo lamialu lalu, <sup>2</sup> Bi larogo hale habe. Ege pigane haragonaga horo mbira laragola tígua ñnaga Balai Anda bu helalimu. <sup>3</sup> Anda bu helowa Habo Nalolene Bi lo winigonaga Mbogoyi ege tole kirani Bi Pira gilibuwi yu wiaga biago anda ogoniha mo ngelowa labolabome tamuha hái bu yanda halu mo ge howa wilimu. <sup>4</sup> Ani bialu dagia tebolo mbira mo yu anda pu ngelowa mbirale tara tara dagia tebolo ogoriani wiagaru mo wigi bilimu. Ani bialu lamu hale wiagane irane ngagobi lamu hale ngarubi mo yu anda puwa mo tiga bialu wilimu. <sup>5</sup> Ani buwa ira hagua ngabilo inisenesi delolene lomabu delaga dabu ngolome wabu wini biago mo yalu anda puwa Habo Nalolene Bi lo winigonaga Mbogoyi biago ngagoria wanakuihayagi wialu labolabo lebu ngagome Balai Anda harabahayagi panga helo gerela peho wilimu. <sup>6</sup> Lomabu delolene dabu Balai Anda ogoninaga haneni ngelalimu. <sup>7</sup> Ani bialu lomabu delolene dabu kagola Balai Anda kagola hengeneha gi geru waya bulene ndisi be mo ngelalimu. Mo ngelowa ndisi be ogoniha iba hambu berelalimu. <sup>8</sup> Ani buwa Balai Anda kagoha pabe bu mabu buwa ogoninaga panga harabani labolabo timbuni biago gerela peho wilimu.

<sup>9</sup> Uruni biai howa mani Balai Anda ogonibi anda ogoniha mbirale ngarubi ñnaga loma bia heneore wilo weli tara mbirale wiabagi holenaga odo wiaga biago mo yalu puwa ogonime mbirale ngarunagabi andanibi bibahendeni odope hai haga bilimu. Anidagua beremigola mbirale uruni bibahende ñnaga lomabia heneore wulebira. <sup>10</sup> Ani buwa lomabu delolene dabu boronosime wabini ngagobi ogoriani biabe bulenaga wini ngarubi bibahende ñnagaore loma bia hene wilo weli ogoni degeme odope hai halimu. <sup>11</sup> Gi geru waya bulenaga iba hambu wiaga ndisi be biagobi be ogoni wiagane dagia biagobi ñnaga loma bia hene dege wilo anidagua bilimu.

<sup>12</sup> Ani biai howa mani Aronobi ibu iginirubi Balai Anda ogoninaga harabani haru ibuwa ti ilili bialu wayawaya bia holene nga. <sup>13</sup> Wayawaya biai howa Arono ibu loma binigo mo miaganaga aga karulaga ngago mo karula howa ibu ñnaga loma binigo mo miaga howa biabe ogoni bialu helo odo wiaga weli biagome ibunaga hagianeni odo wialu loma biaho helolene nga. <sup>14</sup> Ani bialu mani ibu iginiru kawareni haru halu ibuwa loma binigo mo miaga agalime aga giha bulene ngaru mo karula habe. <sup>15</sup> Ani karula halu igiri uruni ti aba lomabu helaridagua tibi ñnaga loma binigo mo miaga agali howa biabe ogoni bialu helo tinaga hagianeni weli biago odo wiai habe. Ína tinaga hagianeni weli odo wiai kegola ti loma binigo mo miagaore haabo holebira, lene.

<sup>16</sup> Anduane Homogohanda Mosesehondo bibe lalu lamiyadagua ibugua biaiore hene. <sup>17</sup> Ani binigo Balai Anda mbira Anduane Homogonaga anda biago bini. Anda ogoni binidagoni Isaraele wali agali tini Iyibi dindi howa tagira íbu heane mali mbira puwa mali mendegonaga ege pigane mbira ngabu layagola ege mbira ogoninaga horo mbira

dege pigane tehinayagola ani bini. <sup>18</sup> Mosesehanda anda ogoni bialu howa ala dindiha anda hái gene helolene mbogoyi ala wima pene. Ani buwa anda hái gene helowa hái libu banga bulene ira helalu ira gene helaga bini. <sup>19</sup> Ani biai howa Balai Anda ibuni muwa dangilo dambi hene. Ani dangilo dambi howa Balai Anda ogoni kabubu yaga andane winigome lone dangilo dambi hene. O binidagoni Anduane Homogohanda Mosesehondo ani bibe lenedagua bini. <sup>20</sup> Ani buwa ege tole mbalape kira Bi Mana Pira gilibuwi biago labo Habo Nalolene Mbogoyi biagoha mo wini. Ani buwa iraho yulene kira Mbogoyi biagoha gi pigida mabubi heagoha mo hana hene. Ani mo hana howa Habo Nalolene Mbogoyi biagonaga panga daligani bini. <sup>21</sup> Ani buwa Mbogoyi biago Balai Anda biyagoha mo ngelowa aga gerelape heagome dogolo ai nai buwa tamuha handabe nahe gehu ngelene. Aga dungu gimbu buwa gerela peho ngelenedagome Mbogoyi biago hoba muwa tamuha ngelene. Ani binidagoni Anduane Homogohanda Mosesehondo ani bibe lenedagua bini.

<sup>22</sup> Ani buwa dagia tebolo muwa Balai Anda biago tamuha uyurayagi aga gerelape hayago tagirahayagi mo ngelene. <sup>23</sup> Anduane Homogoibunime Mosesehondo ani bibe lenedagua dagia tebolo ogoriani mberedi ibunihondo loma bialu minigo mo wini. <sup>24</sup> Ani buwa lamu hale wiagane irane gimbu bini biago muwa Balai Anda tamuha mo yu anda puwa dagia tebolo biago unurayagi ngelowa lamu hale wiagane iranedagoni dagia tebolo biago handadaga howa ngelene. <sup>25</sup> Ani mo ngelowa Mosese ibugua Anduane Homogo deni odagoriani howa lamu hale dagane biaru delene. O delenedagoni Anduane Homogohanda ani delabe lenedagua delene. <sup>26</sup> Ani delowa ibugua inisenesi lomabu delolene dabu ngolome wabini biago Balai Anda tamuha mo yu anda puwa aga luni gerelape hayago tigatiga mo wini. <sup>27</sup> Ani mo ngelowa dabu biagoria ira hagua ngabilo delaga mini iniseneni o biagoria delene. O delenedagoni Anduane Homogohanda Mosesehondo ani delabe lenedagua delene. <sup>28</sup> Ani buwa aga luni biago Balai Anda ubanda tagi bulene panga harabani gerelape hene.

<sup>29</sup> Ani buwa aga o gerelape hayadagoniore tigatiga mbirale mbirale Anduane Homogohondo lomabu delolenenaga dabu ogoriani mo wini. Ani mo ngelowa ogoriani mbirale irame dai helo delolene winigobi widi lini do winigobi odagoriani mo delene. Anduane Homogohanda bibe lenedagua ani bini. <sup>30</sup> Ani buwa ibugua gi ge wayawaya bulene ndisi be Balai Anda biagola dabu biagola dombeneha mo ngelowa iba hambu tolotagiho ngelene. <sup>31</sup> Ani buwa Mosese ibubi Aronobi Arono iginirubi tinaga gi gebi ogoniha wayawaya biaga wini. <sup>32</sup> Agali uruni ti Balai Anda biago tamuha anda pole howabi lomabu delaga dabu biagoha pole howabi tinaga gi geru ala wayawaya bilimu lalu Anduane Homogohanda ani lenedagua bini. <sup>33</sup> Mosesehanda Balai Anda biagoni bu helowa anda o biagonibi lomabu delolene dabu wiagobi hobanda hole lowa manda manda pabe buyu mabu bini. Ani hobandaho ngelowa pabe ogoni ubanda tagi bulene harabani aga luni mbira gerelape hene. Ani bigi bialu Mosesehanda Balai Andaha biabe bulene winigo biaiore hene.

*Anduane Homogo, Ini tí heba ko, lalu hari beraliba Balai Anda biagoria wiadali henego ogo*

*(Dagalene 9.15-23)*

<sup>34</sup> Mosesehanda Balai Anda biagoni biaiore howa bu heleagola nde hari beralibame ibalu Balai Anda biagoni buyi hai hene. Ani biyagola Anduane Homogonaga wá holene de mborerebi agiore loabe tobahegome Balai Anda biagoni tolotagi hene.✧

<sup>35</sup> Ogonidagua biyago handayagola Mosese ibu Balai Anda biago tamuha ubanda halu pobe nahe gibioreyagola nape wahene. <sup>36</sup> Ani binigo Isaraele wali agali ti dindi o hemidagoriani haabo howa hari beraliba Balai Anda biagoria wiadali hayago iraga halu poragola dege tibi anda giallo yalu dindi mendeni anda bu hama pugu bialu hene.

✧ 40:34: 1 Kin 8.10-11, Ais 6.4, Ese 43.4-5, Mo 15.8

<sup>37</sup> Hari beraliba biago ibu ema nabi wiagola ti nde ema nabi odagoriani ho palu haga bini. <sup>38</sup> Ani bigi bialu henego Isaraele wali agali ti ibaga bialu anda geleyu palima ibagabu headangi Anduane Homogo ibuni ti heba ko lalu manane walia halu hari beraliba biago horongi Balai Anda biagoria wiape halu mbiraganaga Balai Anda biago yarali howa ogoni tiga tiga ira hungu bialu daho wiaabo halu hene. Ti ani dege bialu howa Anduane Homogohanda dindi tí nguliya lenegoria anda piyagola beraliba biago ereba hene.



## Loma Binigo Mo Miaganaga Biabe Mbuga ogoha gilibu ngarunaga nemandi ogo

Mbuga ogoniha bi lo ngago, Anduane Homogonaga mini agua yaraga halimu, lalu, Mbirale mbira mo ko haragola mo tiga bialu agua bilimu, lalu lamigi biniru te lo nga. Loma binigo mo miaga agali tigua ogodaguaore bilimu lalu mana laminiru te lo nga. Mbuga ogoninaga bi irane galone lo ngago uru lo nga. Anduane Homogo ibu mini baya burugule wáhe taraore ka. Ani howa ibunaga wali agalibi mini baya burugule wáhe taraore Anduane Homogo ibuni kagobi howa ibu heba mandagi habehe kami lo nga.

Mbuga ogoninaga dunini Yasuhanda mitangi bialu 19.18 lo ngagoria howa lalu, Mana duniniore mende ogo íni mitangi bialu gubalini ho harilidagua maru karu tanabi mitangi bialu gubalini ho habe, lene. Md 22.39, Mg 12.31 de handabe.

### **Bulu бага бува кuni gilibu ngago (1.1-7.38)**

Mbirale Anduane Homogo ibuhondo mulenebi tini ko domelo irani bo delolenebi mana agua bilimu lenego *8.1-10.20*

Aronobi ibunaga iginirubi heba ti loma binigo mo miaga howa biabe bilo lalu dabo helenego *11.1-15.33*

Anduane Homogonaga deni howa mana bayalebi kobi ogobi lo nga. Ani buwa ibu deni howa mana ko dodohego domelo agua bilimu lenego *16.1-34*

Ko domo waholene horo haragola agua bilimu lenego *17.1-27.34*

Anduane Homogo mitangi bialu mo dunini howa lotu lola agua bilimu lenego, Tíni bi ko mbira para nahe mini baya burugule wáhe taraore hole agua bilimu, lalu mana gilibu nga.

<sup>1</sup> Anduane Homogo ibuninaga Balai Anda biagoha howa ibugua Mosese olalu íbu lowa lalu, <sup>2</sup> Isaraele wali agaliruhondo ogodagua lamibe. Tí kamiru aria mbirago ibu Anduane Homogohondo nogo lomabu mule ibuleyagua nde ibunaga bulumagayaguabi sibiyaguabi memeyaguabi mbira hangu haru ibalimu, lene.

### *Irame dai helo bo lomabu delolene go*

<sup>3</sup> Mosese ibugua Anduane Homogohanda lamibe layadagua lalu, Agali mbirame nogo bulumaga mbira irame dai helo bo lomabu delole lowa haru halu ibiyagua nde bulumaga wangabe habatigiore tingini mo ko nahe dere durubi nabioire kago haru ibulene nga. Mbirali lomabu yalu ibirago ibuhondo Anduane Homogohanda turu helo hame ledayagua nde ibugua loma ogonidagua bu yalu ibulene nga. Ibugua Anduane Homogonaga Balai Anda kago haneni yu pialu <sup>4</sup> bulumaganaga hagianeni gi wialu biragola Anduane Homogohanda ibuhondo miniha dungulo howa ibunaga ko wiyadaru domo wahai holebira. <sup>5</sup> Ani bialu Anduane Homogonaga deni howa agali loma haru ibiyagoibunime bulumaga biago baragola Arono aria loma binigo mo miaga agali karu tigua bulumaga ogoninaga darama Anduane Homogohondo lomabu mulebira. Tigua darama hambu yalu lomabu delaga dabu Balai Anda kago haneni puwa dabu gibuni maria ngagoha odo baamu nana bulebira. <sup>6</sup> Ani bidagola agali ogoni ibugua bulumaga biagonaga dongone bo lagalalu mbirini podobaga bulebira. <sup>7-9</sup> Ani bialu nogo tini baya hangu halialu gi geru wayawaya biai holene nga. Ani biragola loma binigo mo miaga agali karu tigua lomabu delaga dabu biagoria ira dene hedo delolene nga. Ani delowa ira da timbu kagola bulumaga biagonaga hagianebi abenebi habanebi nogo bo podo paya biyago damene bibahende irani dai halu do ira punga helo delolene nga. Anidagua biragola Anduane Homogohanda loma ogoninaga tumutumu

nga bayaleore birago nga halu ibuni miniha turu timbuni howa dungulo holebirago ani bulene nga, lalu Mosesehanda lene.✧

<sup>10</sup> Mbiralime nogo sibi memeru mbirago loma bialu bo delole haru ibiyagua nde sibiaguabi memeyaguabi ogoni wangabego hondowa dere durubi nabi bayale kago hondowa haru ibulene nga. <sup>11</sup> Ani haru halu ibuwa ibugua sibibi memebi ogoni lomabu delaga dabu kagonaga abene uyurayagi howa ogoriani bolene nga. Ani bope kagola loma binigo mo miaga agali karu tigua sibibi memebi ogoninaga darama hambuwa lomabu delaga dabu kagonaga gibuni maria ngagoha odo baamu nana bulene nga. <sup>12-13</sup> Ani buwa agali ogoni ibugua sibi biago podowa tini baya hangu haluwa gi geru wayawaya bo wahai howa ngeledagola loma binigo mo miaga kagome lomabu delaga dabuni ira dedagoria sibi haguanebi abenebi habanebi bibahende delai holebira. Loma binigo mo miaga kagome irani dalu do ira punga helo lomabu delolebira. Anidagua biragola Anduane Homogohanda loma ogoninaga tumutumu bayaleore birago nga halu ibuni miniha turu timbuni howa dungulo holebirago ani bulene nga, lalu Mosesehanda lene.

<sup>14</sup> Mbiralime ega Anduane Homogohondo lomabu mule minu yalu ibiyagua nde ega malibu ale bedago minu yalu loma binigo mo miaga agali kagohondo mule yalu polene nga. <sup>15</sup> Ani miragola loma binigo mo miaga agali kago ibugua ega biago mani yuwa yu tinditanda laragola ega homolebira. Homaragola haguane pundulo muwa lomabu delaga dabuni ira dedagoha lomabu delolene nga. Ani bialu ibugua ega darama lomabu delaga dabunaga lenelene ngagoha odope hai holebira. <sup>16</sup> Ani buwa ega nema yaga magini kagobi dugualu lomabu delaga dabu ngago abene ni tagira ibiragohayagi be ira punga hilo wiaga ngagoha bape holene nga. <sup>17</sup> Ani bialu ega ibuni loma binigo mo miaga agali kago ibugua babaganeni gi talebu yuwa minu dogaki holene nga. Ani bialu irani dalu do ira punga helo lomabu delolebira. Mana ogonidagua biragola Anduane Homogohanda loma ogoninaga tumutumu bayaleore birago nga halu ibu miniha turu timbuni howa dungulo holebirago ani bulene nga, lalu Mosesehanda lene.

## 2

### *Widi lomabu delolenego ogo*

<sup>1</sup> Anduane Homogo ibugua Mosesehondo lamialu lalu, Isaraele wali agali karume ihondo widi lomabu ngule yalu ibiyagua nde tigua widi andane bu wahowa widi ibuni dambuwa balawa bayaleore ogoni yalu ibalu inihondo lomabu ngulene nga. Balawa ogoniha olibe lininaga weli maru odo wialu ira hagua nga bilo delaga ale inisenesibi maru ogoni biamaga howa <sup>2</sup> Arono aria loma binigo mo miaga agali karu ti karia yalu puwa mulene nga. Ani biragola loma binigo mo miaga agali kago aria mbiragome ibunaga gi balawa biagoha ibira halu balawa emene maru gime yamialu olibe lininaga welibi hagua nga bilo delaga mini inisenesibi heba lomabu delaga dabu ngagoria ira dedagoha delolebira. Balawa emene ogonime nuha dewa henedaruni delai holenedagua emene ogoni dege Anduane Homogohondo lomabu mulebira. Ani loma buwa delaragola Anduane Homogo ibugua widi lomabu deledagonaga tumutumu baya birago nga halu ibugua turu timbuni halu miniha dungulo holebira. <sup>3</sup> Ani buwa balawa maru wirago loma binigo mo miaga agali karu ti nolene nga. Balawa wali agalime Anduane Homogohondo lomabu yalu ibini ogoni wali agali ta nabi nai haga ndo loma binigo mo miaga agali karu tinaga hangu wulebira.

<sup>4</sup> Tigua mberedi abeneha hiralu howa ogoni aria maru Anduane Homogohondo lomabu mule lowa hirayagua nde mberedi ogoni yidi nahe howa hirulene nga. Balawa biago hanguha olibe lininaga weli ibira howa mberedi wabuwa ogoni yalu puwa lomabu mulene nga. Mberedi nawabuleyagua nde mbisigedi hangu hiruwa olibe

✧ 1:7-9: Ese 20.28, 20.41, 2 Ko 2.15, Eb 5.2

lininaga weli ngagome hai howa lomabu yalu polene nga. <sup>5</sup> Balawa lomabu yalu polenaga parabane ngagoria hirarimiyagua nde balawa bayaleore yidi nahe hiralimu. Balawa ogoni olibe lininaga weli ngago odo biamaga howa hiralimu. <sup>6</sup> Ani buwa balawa ogoni emene budabaga buwa olibe lininaga weli odo wialu Anduane Homogohondo lomabu milimu.

<sup>7</sup> Tigua mberedi lomabu mulenaga todobene be timbuni ngagoha hirarimiyagua nde balawa bayaleorebi olibe lininaga weli odo biamaga howa yidi nahe hiralimu. <sup>8</sup> Anidagua bialu hiru yalu Anduane Homogohondo lomabu mule loma binigo mo miaga agali kago mule yalu pilimu. Ani beramigola loma binigo mo miaga agali kago ibugua lomabu delaga dabu kagoria yalu polebira. <sup>9</sup> Ani buwa mani loma binigo mo miaga agali biagome mberedi mbisigediyaguabi ogoninaga budini mbira yalu puwa tomo dewa uruni miradagua mo loma bialu irani dai helo lomabu delaga dabu kagoria delolebira. Ani biragola nga bayaleore howa Anduane Homogohanda turu halu ibuni miniha dungulo holebira. <sup>10</sup> Ani buwa mberedi mbisigediyaguabi maru ngago loma binigo mo miaga agali karu tinaga wulebira. Tigua mberedi mbisigedibi Anduane Homogohondo mule lomabu yalu pirimigo ibira hayagua loma binigo mo miaga agali karu ti nolebira. Agali maru karu ti loma binigo mo miaga ndo heagua tomo ogoni aria mbira ti nolene nawi.

<sup>11</sup> Mberedi balawaru mbira Anduane Homogohondo lomabu mulene yalu polenaga hirarimiyagua nde yiduru mone tara mbiranaga ibaneru biamaga howa hirinigo Anduane Homogohondo lomabu delolene nawigo manda bilimu. <sup>12</sup> Uruni tigua widuru tinaga mabu henge demigoha pigane denegonaga Anduane Homogohondo lomabu mialu yalu eberemingi lomabu milimu. Anigo Anduane Homogo ibugua loma uruni irame dai haragola nga howa turu halu miniha dungulo helo manda buwa irani nadelalimu. <sup>13</sup> Widi lomabu delaramigo bibahendengi ibi howa delalimu. Ibi howa delaramigo irane Anduane Homogo heba habo nalolene bi lo wirimigo mo tene halu anidagua bilimu. Lomabu delalu howa bibahendengi widi heba ibi haabo halimu. Widi bali damenego bibahende ibi naheore howa nadelalimu.

<sup>14</sup> Tinaga mabuha widibi balibi pigane denegonaga gandulalu howa Anduane Homogohondo lomabu mule lini uruni maru hiruwa maru dambu gingirulo baga buwa emene halu balawa kagola Anduane Homogonaga yu pilimu. <sup>15</sup> Tigua widi irani dai helonaga ani lomabu delalu howa olibe lininaga weli biamaga halu ira hagua ngabilo delaga inisenesibi daligani wialu delalimu. <sup>16</sup> Tinaga loma ogoni lomabu delaradagua widi ogoni ariabi olibe lininaga welibi inisenesibi emene mbira yamigi bialu irani do dapelo loma binigo mo miaga agali kago ibugua lomabu delolebira. Ogoni tinaga widi gandulowa dambinigo loma bialu Anduane Homogohondo mirimigoni irani do ira punga helonaga ani lomabu delolebira, lene.

### 3

#### *Anduane Homogola hogimbu bulenaga lomabu delolenego ogo*

<sup>1</sup> Anduane Homogo ibugua Mosesehondo Isaraele wali agaliru lamilonaga bi lamialu lalu, Mbiralime Anduane Homogola ho gimbu bulenaga lomabu delolene manda biyagua nde ibunaga nogo bulumaga angibuni wangabeyaguabi mbirago dere durubi mbira nabi tingini bayale habatigi kago hondowa lomabu mulene nga. <sup>2</sup> Ibugua nogo bulumaga biagonaga hagianeni gi wialu Anduane Homogonaga Balai Anda kago haneni bolebira. Ani baragola nogo darama ngago Arono aria loma binigo mo miaga agali karu tigua hambu yalu puwa lomabu delaga dabu kagonaga gibuni maria ngagoha odo baamu nana bulebira. <sup>3</sup> Ani bialu agali o biago ibunime nogo ogoni podalu mbirini maru loma binigo mo miaga agali kago ibugua Anduane Homogohondo lomabu delelo mo mulene nga. Ibugua nogo ogoninaga tinibi habane abenerubi <sup>4</sup> luhabane lilini kira

abenebi heba bunibi mulene nga. <sup>5</sup> Ani miragola loma binigo mo miaga agali karu tigua mo yalu puwa lomabu delaragola Anduane Homogo ibugua nga bayaleore birago hondowa ibu turu halu bu miniha dungulo holebira.

<sup>6</sup> Agali mbirame nogo sibi memeru angibuni wangabeyaguabi Anduane Homogola ho gimbu bulenaga lomabu mulene manda biyagua nogo sibibi memebi ogoni ibu dere durubi mbira nabigo hondowa bo lomabu mulene nga. <sup>7</sup> Agali mbirame nogo sibi mbira Anduane Homogohondo lomabu mule manda bu heagua nde nogo sibi ogoni Anduane Homogo ibuninaga deni haru halu ibulene nga. <sup>8</sup> Haru ibu helowa ibugua nogo sibi ogoninaga hagianeni gi wialu Anduane Homogonaga Balai Anda kago haneni haru halu puwa bolene nga. Ani biragola loma binigo mo miaga agali kagome nogo sibi darama ngago hambu yalu puwa lomabu delaga dabu kagonaga gibuni maria ngagoha odo baamu nana bulebira. <sup>9</sup> Ani biai howa sibi podowa loma binigo mo miaga agali kagome Anduane Homogonaga lomabu delelo mulene nga. Ibugua sibi abene habanebi bayale damene bu karubi ereneha habane kagobi mulene nga. Erene mbolombolone unura modawenehayagi gaibu dali holene nga. Ani bialu abene gugunibi bu mulene nga. <sup>10</sup> Ani bialu nogo sibi luhabane lilini kirabali heba abene kagobi buni kagobi lomabu mulene nga. <sup>11</sup> Ogoni bibahende loma binigo mo miaga agali kagome mo yalu puwa lomabu delaga dabu kagoria delai holebira.

<sup>12</sup> Mbiralime nogo meme mbira lomabu mulene manda biyagua Anduane Homogonaga deni haru halu polene nga. <sup>13</sup> Haru puwa agali biago ibugua meme hagianeni ibunaga gi wialu Anduane Homogonaga Balai Anda kago haneni bolene nga. Bope kagola meme darama ngago loma binigo mo miaga agali kago ibugua hambu yalu puwa lomabu delaga dabu gibuni maria ngagoha odo baamu nana bulebira. <sup>14</sup> Ani bialu agali ogoni ibugua nogo podowa Anduane Homogohondo lomabu miragola loma binigo mo miaga agali kagome Anduane Homogonaga lomabu delaga dabu kagoria lomabu delolebira. Agali biago ibugua nogo <sup>15</sup> luhabane lilini kirabalibi abene habanebi bunibi bibahende lomabu delolene nga. <sup>16</sup> Loma binigo mo miaga agali kago ibugua nogo meme ogoni mo yalu puwa lomabu delaga dabu kagoria irame dai helo lomabu delaragola Anduane Homogohanda turu halu bu miniha dungulo holebira. Nogo meme habane abene damene bibahende Anduane Homogonaga dege nga. <sup>17</sup> Isaraele wali agali tigua nogo habane daramaru nolene nawigo nanalimu. Nanolenego nanalimuore laro. Tiguabi tinaga waneigini aguaneneru mani hama polobadarubi tinaga mana ogoni wia ai helonaga ani bilimu. Tigua dindi tara ngaruha pu howabi mana ogoni dege yu tiga biaabo halimu, lalu Anduane Homogohanda lene.

## 4

### *Ko biniru domo wahelonaga lomabu bo delolene winigo ogo*

<sup>1</sup> Anduane Homogo ibugua Mosesehondo lalu, <sup>2</sup> Isaraele wali agali bu karu ogodagua lamibe. Wali agali mbirame ibu minime ko bero mitangi nabi howa Anduane Homogonaga mana lowini ngago mbira puguayagua ogoni mana ko biyagoni. Anidagua biyadagonaga ibugua ibunaga ko ngago Anduane Homogohanda domo wahelo biagane mana ngago talialu mbirale lomabu mulene nga, lene.

### *Loma binigo mo miaga agali haguane timbuni ibunime ko birago domelonaga lomabu mulene winigo ogo*

<sup>3</sup> Mosesehanda laabo halu lalu, Loma binigo mo miaga agali haguane timbuni kago ibunime mana ko ngago biyagua ibugua hangu binime wali agali bibahende mo ko hai holebira. Anidagua biyadagonaga ibugua nogo bulumaga wangabe dalua mbira ibunaga tingini dere durubi nabi habatigiore kago haru halu puwa ibuninaga ko domo wahelo Anduane Homogohondo loma bialu bo delolene nga. <sup>4</sup> Ibugua bulumaga ogoni

haru halu Anduane Homogonaga Balai Anda kagonaga haneni pu helowa nogo biago hagianeniibunaga gi wialu Anduane Homogonaga deni howa nogo bolebiru. <sup>5</sup> Ani bowa loma binigo mo miaga agali haguane timbuni kago ibugua bulumaga biagonaga daruma hambu yalu Balai Anda kagoa anda polebiru. <sup>6</sup> Yalu puwa ibugua daruma biagoa ibunaga gi hondone mbirani wai howa Balai Anda tamuha Hobane Loma Bia Heneore helo hobaki bini labolabo timbu gerela kagoria darumame kahalu tandala ba haragola Anduane Homogo de hondolebiru. <sup>7</sup> Ani biai halu hagua nga bilo inisenesi lomabu delaga dabu Anduane Homogonaga deni kagoria polebiru. Puwa lomabu delaga dabu ogoninaga gibuni mariani nogo bulumaganaga ne gayane ale maria kago nogo daruma yayagome hai holebiru. Ani bialu nogo bulumaga bo wiyagonaga daruma maru ngaru mo yalu puwa lomabu delaga dabu li tagirani Balai Anda kagoa haneni yalu puwa lomabu delaga dabu kago dindiha odope hai holebiru. <sup>8</sup> Ani buwa ibugua nogo bulumaga ogoninaga habane abenebi tinibi <sup>9</sup> luhabane lilini kirabi bunibi bu yai holebiru. <sup>10</sup> Ani bialu loma binigo mo miaga agali kagome nogo uruni lomabu delaga dabu kagoria irame dalu do ira punga helo delolebiru. Anduane Homogola ho gimbu bulenaga loma bini irani dai helaga ngadagua dege dai helolebiru. <sup>11</sup> Anigo nogo ogoninaga dongonebi kuni mbirini ngarubi gi gebi hagianebi nogoni henege bibahende mo yalu <sup>12</sup> balai anda bu karu helalu tagira puwa ira punga hilo yu pu wahaga ngagoria dindi ogoni Anduane Homogonaga deni bayale ngago ogoriani ira bo delowa nogo podene uruni irame dalu do ira punga helo delolebiru, lene.

*Isaraele wali agali bibahendeme ko biraru domo wahelonaga lomabu delolene winigo ogo*

<sup>13</sup> Anduane Homogo ibugua Mosesehanda Isaraele wali agali lamilonaga ogodagua lene. Isaraele wali agalime ko bero mitangi nabi howa Anduane Homogonaga mana mbira puguayagua nde tigua mana ko dege biya. <sup>14</sup> Anigo mani howa tigua ko ogoni birimada lo manda biyagua nde nogo bulumaga wangabe dalua mbira haru halu puwa ko domo wahelonaga bo lomabu delolene nga. Tigua nogo ogoni Anduane Homogonaga Balai Anda kagoria haru halu ibulene nga. <sup>15</sup> Ani buwa Anduane Homogonaga deni Isaraele agali haguane karu tigua nogo bulumaga ogoninaga hagianeni gi wialu nogo bolene nga. <sup>16</sup> Ani bo ngagola loma binigo mo miaga agali haguane timbuni kago ibugua bulumaganaga daruma Anduane Homogonaga Balai Anda kagoa yalu anda polebiru. <sup>17</sup> Yalu puwa ibugua daruma biagoa ibunaga gi hondone mbirani wai howa Balai Anda tamuha Hobane Loma Bia Heneore helo hobaki bini labolabo timbu gerela kagoria darumame kahalu tandala ba haragola Anduane Homogo de hondolebiru. <sup>18</sup> Ani bialu bulumaganaga daruma gi hondoneme wai howa ira hagua ngabilo inisenesi lomabu delaga dabu Anduane Homogonaga deni kagonaga gibuni mariani nogo bulumaganaga ne gayane ale maria wabu helene kago hai holebiru. Ani bialu bulumaga biagonaga daruma maru ibira harago mo yalu puwa lomabu delaga dabu kago dindiha odope hai holebiru. <sup>19</sup> Ani bialu mani nogo ogoninaga habane abenebi kago damene lomabu delaga dabu kagoria lomabu delai holebiru. <sup>20</sup> Loma binigo mo miaga haguane kago ibugua bulumaga ogoni ibuninaga ko biyago domo wahelo lomabu bo delayadagua dege delolebiru. Anidagua bialu loma binigo mo miaga haguane timbuni kago ibugua wali agalime ko biyago domo wahelonaga loma bialu delolebiru. <sup>21</sup> Ani bialu mani nogoni hene damenego bibahende balai anda bu karu helalu mo yalu tagira puwa ibuninaga ko domo wahelo lomabu delaga wiyadagua dege ira bo delowa bulumaga biago irani dai helo lomabu delolebiru. Wali agalime bulumaga haru ibiyago tinaga ko ngago domo wahelonaga lomabu bo delole haru ibulebiru, lene.

*Agali hagianeme ko birago domo wahelonaga lomabu delolene winigo ogo*



<sup>22</sup> Anduane Homogo ibugua Mosesehanda Isaraele wali agali lamilonaga ogodagua lene. Agali haguane mbirame ibu ko bero mitangi nabi howa Anduane Homogonaga bi mana lowini ngago puguayagua nde ibugua mana ko biyagoni. <sup>23</sup> Mani howa ibugua mana ko biruda lo manda biyagua nde nogo meme wangabe mbira dere durubi nabi bayaleore kago lomabu bo delole haru halu ibulene nga. <sup>24</sup> Haru halu ibuwa Anduane Homogonaga deni howa nogo biagonaga hagianeni ibunaga gi wialu nogo bo lomabu delole bagane ngagoria haru halu ibuwa bolene nga. Nogo meme ogoni agali haguane biagome ko biyago domo wahelonaga loma binigo mo miaga agali kagome bo delelo anidagua bulene nga. <sup>25</sup> Ani bo ngagola loma binigo mo miaga agali kagome nogo meme darama ngagoha ibunaga gi hondone mbira hanguni wai howa lomabu delaga dabu kagonaga gibuni mariani nogo ne gayane ale kago daramame hai holene nga. Ani bialu darama maru ibira haragome lomabu delaga dabu ogoninaga dege dindiha odope hai holene nga. <sup>26</sup> Ani bialu nogo habane abene damene ngago lomabu delolebira. Ani bialu nogo maru Anduane Homogola ho gimbu bulenaga bo lomabu delaga mana wiyadagua dege lomabu delolene nga. Anidagua bialu loma binigo mo miaga kago ibugua agali haguane biagonaga ko biyago domo wahelo loma ogonidagua bu delaragola Anduane Homogohanda agali haguane biagonaga ko biyago domo waholebira, lene.

*Wali agalime ko biraru domo wahelonaga lomabu delolene winigo ogo*

<sup>27</sup> Anduane Homogohanda Mosesehondo wali agali lamilonaga bi lamialu lalu, Wali agali mbiragome ko bero mitangi nabi howa Anduane Homogonaga mana lo ngago mbira puguayagua ibuha ko wu holebira.\* <sup>28</sup> Mani howa ogoni mana ko biruda lo manda birangi ibunaga ko ogoni biyadago domo wahelo ibugua nogo meme angibuni mbira dere durubi nabi bayaleore kago haru halu bo lomabu mule haru ibulebira. <sup>29</sup> Haru ibuwa ko domo wahelo nogo loma bialu irame dai helo bo delagane ngagoria ibu helowa ibunaga gi nogo meme hagianeni wialu nogo ogoni bolebira. <sup>30</sup> Ani baragola loma binigo mo miaga agali kago ibugua meme darama gi hondone mbirame wai howa lomabu delaga dabu kagonaga gibuni mariani nogo bulumaganaga ne gayane ale maria wabu heledagoria hai holebira. Nogo meme darama maru ibira haragome lomabu delaga dabu kago dindiha odope hai holebira. <sup>31</sup> Ani bialu nogo meme ogoninaga habane abeneru lomabu delaga ngagoria lomabu delolebira. Loma binigo mo miaga agali kagome nogo maru ngago Anduane Homogola ho gimbu bulenaga lomabu delagadagua dege delolebira. Ibugua nogo habane abeneru dabuni lomabu delaragola Anduane Homogohanda nga bayaleore birago nga howa turu halu dungulo holebira. Anidagua bialu loma binigo mo miaga agali kago ibugua wali agalime ko biyagonaga loma bo delaragola ko binidagoni Anduane Homogohanda domo waholebira.

<sup>32</sup> Wali agali mbirame ibunaga ko domo wahelonaga nogo sibi mbira bo lomabu mulene manda biyagua nde ibugua nogo sibi angibuni mbira igini nawini dere durubi nabi kago haru ibulene nga. <sup>33</sup> Ani haru ibuwa ibugua sibi hagianeni ibunaga gi wialu irani dai helo bo lomabu delole бага ngagoria howa bolene nga. <sup>34</sup> Bo ngagola loma binigo mo miaga agali kago ibugua sibi darama gi hondone mbirani hai howa lomabu delaga dabu kagonaga gibuni mariani nogo bulumaganaga ne gayane ale kagoria hai holebira. Darama maru ibira haragome lomabu delaga dabu kagonaga dindihayagi odope hai holebira. <sup>35</sup> Ani bialu nogo habane abeneru lomabu delaga dabu ngagoria lomabu delolebira. Loma binigo mo miaga agali kago ibugua Anduane Homogola ho gimbu bulenaga lomabu delaga mana ngadagua bo delolebira. Ibugua habane abeneru lomabu delaga dabu kagoria loma marubi heba Anduane Homogohondo lomabu mialu irame dalu do ira punga helo lomabu delolene nga. Anidagua bialu loma binigo mo miaga agali kagome wali agali ogonime ko biyagonaga loma bo delaragola ibugua ko ogoni binidagoni Anduane Homogohanda domo waholebira, lene.

\* 4:27: Dag 15.27-28

## 5

*Ko maru biyaru domo wahelonaga mbirale bo lomabu delolene winigo ogo*

<sup>1</sup> Anduane Homogo ibugua Mosesehondo Isaraele wali agaliru lamilonaga bi lamialu lalu, Agali mbira kagohondo mendealime ko biyago hendeneiyaguabi bi layago hale heneyaguabi uruni godini latagi hole ibu laragola ibugua latagi hole napeyagua nde agali ogoni ibu mana puguayagome ibuha ko ngelo holebira.

<sup>2</sup> Agali mbiragome mini pu taraho howa mbirale ko nga lalu lowinigo ela hayagua nde ibubi Anduane Homogonaga deni ko henego ka. Mana ogonidagua bialu nogo tara tarabi ema bialu piaga bedarubi uruni aria mbirago Anduane Homogohanda ko dodohe lenego ogoni homo ngaria mbiralime de nahende ibalu hengeyayagua nde agali biago ibubi dodohe ho ka. Ibugua ogoni biyago mitangibu dai biyagua nde ibuha ko para hayadane hondolebira.

<sup>3</sup> Agali mbira ibu mitangi nabi howa wali agali mendenaga mbirale ko dodohe lene ngaru ela hayagua nde ibubi Anduane Homogonaga deni dodohe ka. Agali ogoni ibu mani mitangibu dai bialu karia nde mana ko birudane handa walua holebira.

<sup>4</sup> Mbiralime ibu mini baya hangu haru ha nabi howa bi bame abale latagi halu heneneore laro lalu gi do larogoni layagua nde ibugua Anduane Homogonaga deni koore biragoni. Mani howa o biagome mana ko biruda lo mitangi biyagua nde ibuha ko ngelo ka.✧

<sup>5</sup> Mbiralime ibuha ko ogonibi ngelo ko lo mitangi bu heagua nde ko ogoni ngelo dongeho ha nabi latagi hai holene nga. <sup>6</sup> Ani bialu ibugua ko ogoni biyagonaga nogo sibi memeyaguabi angibuni mbira loma bialu bo delole haru halu ibulene nga. Ani haru ibiragola loma binigo mo miaga agali kago ibugua agali o biagome ko biyago domo wahelonaga bo lomabu delaragola Anduane Homogohanda ko biyadagoni domo waholebira.

<sup>7</sup> Agali mbirago ibu nogo meme sibiru bo lomabu mulenaga muni nawiyagua nde ibu ega malibu ale bedaru aria kira minu yalu Anduane Homogohanda ibunaga ko biyago domo wahelo lomabu mule yalu ibulene nga. Anidagua biragola ega mendego ko domo wahelonaga loma bialu bo delalu mendegobi nde loma bialu irani dai helo delolene nga.

<sup>8</sup> Ani bialu ega kira ogonilabo yalu ibuwa loma binigo mo miaga kagohondo miragola ibugua ega mendego agali ogoni ibunaga ko ngago domo wahelo lomabu mulebira. Ani bulenaga loma binigo mo miaga kagome ega haguane pugulani hondowa dege ma minu ndelalu bolebira. <sup>9</sup> Ani bialu eganaga darama emene mbira lomabu delaga dabu ngatoria tandala bahalu maru dabu andaneha odope hai holebira. Ko binigo domo wahelonaga ega ogoni loma bialu bo mulebira. <sup>10</sup> Mani loma binigo mo miaga agali kago ibugua ega mende biagobi irani dai helonaga loma bialu bo delolebira. Ibugua manani bulene winigo ngadagua talialu bulebira. Ani bialu agali biagome ko biyago domo wahelonaga loma binigo mo miaga agali ibugua bo lomabu delaragola ko biyadagoni Anduane Homogohanda domo waholebira.

<sup>11</sup> Ainde agali mbira ibu ega yolo bulene muni nakarulapeyagua nde wahalu balawa widinaga dambini bayaleore ngago aria kilogarama mbira ale lomabu mule yalu ibulene nga. Balawa ogoni ko domo wahelonaga ngago widi lomabu delaga ale ndogo manda bialu tigua olibe lini welibi ira hagua nga bilo delaga inisenesibi mo biamaga nahe balawa dege lomabu yalu ibulene nga. <sup>12</sup> Ani yalu ibiragola loma binigo mo miaga agali kago ibugua balawa biago lomabu miradagua nuha henenege emene gi mbira yamialu delolebira. Ani bialu loma binigo mo miaga agali kago ibugua loma maru ngaru heba biamaga howa lomabu delolebira. Balawa ogoni ko domo wahelonaga lomabu delolebira. <sup>13</sup> Anidagua bialu loma binigo mo miaga agali kago ibugua ko domo wahelonaga lomabu delaga dabu ngatoria lomabu delaragola Anduane Homogohanda

✧ 5:4: Mg 6.23, Ab 23.12

agali biagome ko biyadagoni domo waholebira. Ani bialu balawa maru ibira harago loma binigo mo miaga agali karu tinaga wiagadagua dege wulebira, lene.

*Mana ko mitangi nabi howa birarunaga dano hangagadagua bialu lomabu delolene winigo ogo*

<sup>14</sup> Anduane Homogohanda Isaraele wali agaliru Mosesehanda lamilo bi ogodagua lamini. <sup>15</sup> Mbiralime Anduane Homogohondo lomabu mulene winigo mitangi nabi howa mo waho hayagua agali ogonidagua birago ibuha ko ngelo kagoni. Ani ngago mitangi bialu agali ogoni ibugua ibuha ko ngagonaga Anduane Homogohondo dano hangaradagua bialu ibuhondo lomabu mulene nga. Ibugua nogo sibi wangabe bayaleore mbira dere durubi nabi kago yolo ogodaguame bibehe ledago hondowa Anduane Homogohondo lomabu mule loma binigo mo miaga agali biago karia haru ibulene nga. <sup>16</sup> Ani bialu agali ogoni ibugua abale Anduane Homogohondo mule lowa lahondo hayagonaga marubi mo tago howa yu ibulene nga. Ibugua duria agima mulene winiyagua nde duria dano hayadago mialu waragane tago howa mulene nga. Ibugua mbirale uruni loma binigo mo miaga agali kagohondo mulene nga. Ani miragola loma binigo mo miaga agali kago ibugua yamialu nogo sibi ogoni agali biagome ko biyadagoni domo wahelonaga loma bialu bo delolebira. Ani biragola Anduane Homogohanda agali biagonaga ko ngago domo waholebira.

<sup>17</sup> Mbiralime ko bero mitangi nabi howa Anduane Homogonaga mana ngago puguayagua nde Anduane Homogonaga deni ibuha ko ngelo ka lolebira. <sup>18</sup> Ani manda bialu ibugua mbirale biako henedago mo tiga bialu ko ngago domo wahelo mbirale loma bialu bo mule loma binigo mo miaga agali kago karia yalu ibulene nga. Agali biago ibugua nogo sibi yaguabi memeyaguabi wangabe bayaleore habatigihe dere durubi mbira nabi kago ibu yolo ogodagua mibehe kagobi hondowa loma binigo mo miaga agali kago mule haru ibulene nga. Haru ibiragola loma binigo mo miaga agali biago ibugua nogo sibi haru ibirago hondowa agali ogoninaga ko domo wahelo loma bialu bo delolebira. Ani biragola Anduane Homogohanda agali biagome ko biyadagoni domo waholebira. <sup>19</sup> Nogo sibi ogoni agali biagome Anduane Homogonaga deni mana ko binigonaga loma bialu bo delolene nga, lene.

## 6

<sup>1</sup> Anduane Homogo ibugua Mosesehondo Isaraele wali agali lamilonaga lamialu lalu, <sup>2</sup> Agali mbirame ibunaga nenege mbiranaga mbirale mbira handayaho howa mani mbirale ogoninaga anduane biagohondo yadai nabiyagua nde ibuha ko wulebira. Mendevalinaga mbirale mo page biyaguabi mo hondo howa mbirale ibu mo yayaguabi <sup>3</sup> mbirale mbira ibira halu porago hondowa mani ibugua ke howa lalu, Heneneore larogoni i de nahendeore, layaguabi nde ibugua ogoni koore biragoni. <sup>4-5</sup> Mbirali mana ogonibi biaga kago ibu ko bira. Anidagua biyagua ibugua page biagadagua bialubi ke howa mo hondo halubi mo yayago ibugua anduane biago yadai bulene nga. Ibugua ko biyadago mo tiga bialu loma bialu bo delarangi mbirale mo page binidaru heba yadai biai holebira. Ibugua duria mo yiniyagua nde waragane tago howa yadai bulene nga. <sup>6</sup> Ibugua ko biyadago mo tiga bialu ibunaga ko domo wahelonaga nogo sibi memeyaguabi wangabe mbira Anduane Homogohondo loma bialu bo mule loma binigo mo miaga agali karia haru ibulene nga. Agali ogoni ibugua nogo sibi memeyaguabi dere durubi mbira nabi bayale kago ibu yolo ogodaguame bibehe ledago hondowa loma binigo mo miaga agali kagohondo mulene nga. <sup>7</sup> Ani miragola loma binigo mo miaga agali biago ibugua agali biagonaga ko domo wahelonaga nogo biago loma bialu bo delaragola Anduane Homogohanda agali biagome ko biyadagoni domo waholebira, lene.

☆ 6:1: Dag 5.5-8

*Irame dai helo bo lomabu delolene winigo ogo*

<sup>8</sup> Anduane Homogohanda Mosesehondo lamialu lalu, <sup>9</sup> Aronobi ibu igini karubi tihondo mbirale loma bialu irame dai helo loma bialu bo delolenenaga mana lamibe. Tigua loma ngaru lomabu delaga dabu ngagoria delaragola dalu kane dege mbiraga halu gao lolebira. Anidagua bilonaga ira hundia nabi dalu egabi lelolene nga. <sup>10</sup> Ani dai kagola mani loma binigo mo miaga agali ibugua ibunaga darasibi aga luni biagimbu bulenebi labolabo baya tara mbirame wabinigo mo karulalu puwa lomabu delayago dai kagola ira pungabi nogo bene dabuni ngarubi bibahende dabu kago andane dindiha hilope holebira. <sup>11</sup> Ani biai howa ibugua aga bu hayago golo ngelowa mende karula aribia halu ira pungu nogo bene biaru hilo yalu balai anda bu karu helalu tagira puwa dindi mbira mebia nahene inaga deni bayale ngagoria haealo ngelalimu. <sup>12</sup> Anigo ira lomabu delaga dabuni dedago ibu hundia nabilo daho wiaabo helolene nga. Gao laragola loma binigo mo miaga agali kago ibugua lomabu delaga dabu biagoria ira maru delalu egerebaginaga lomaru irame dai helo lomabu delolebira. Nogo habane abeneru Anduane Homogola ho gimbu bulenaga lomabu delolene nga. <sup>13</sup> Lomabu delaga dabu ngagoria ira dene dedago hundia nabilo daho wiaabo helalimu, laya lene.

*Widi lomabu delolene winigo ogo*

<sup>14</sup> Anduane Homogohanda Mosese lamialu lalu, Isaraele wali agalihondo ogodagua lamibe. Widi dambini balawa lomabu delolenenaga mana ogodagua bulene nga. Arono aria loma binigo mo miaga agali karume Anduane Homogo inihondo balawa lomabu delole howa lomabu delaga dabu ngagoria kawareni yalu ibulene nga. <sup>15</sup> Loma binigo mo miaga agali kago ibugua balawa gi mbirame yamialu welibi heba biamaga hene ngagobi ira hagua ngabilo delaga inisenesibi heba lomabu delaga dabu ngagoria lomabu delolebira. Balawa emene ani lomabu delolobadagoni inihondo lomabu ngule yalu ibirago bibahende delaradagua emene ogoni dege delolebira. Ani delaragola Anduane Homogo inime hondowa turu halu miniha dungulo holebero. <sup>16</sup> Balawa maru ibira hene ngaru loma binigo mo miaga agali karu ti nolebira. Tigua balawa ogoni yidi nahe hiruwa yalu tagira nape inaga Balai Anda kagoha howa dege nolene nga. <sup>17</sup> Tigua balawa lomabu yu ibini uruni yidi nahe hiruwa nolene nga. Balawa lomabu delalu ibira hene ogoni loma binigo mo miaga agali karu tininagaore ngeledo. Balawa yidi nahe hirulene ngago ininaga loma bia heneore ngagoni. Ogonibi dege ko binigo domo wahelonaga lomabi ko berolo mitangi nabi howa binigonaga lomabi ininaga dege loma bia heneore ngagoni. <sup>18</sup> Mani balawa yidi nahe ogoni ale hirarago Arono aguanene mani holebiraru tini hangumeore nolene wulebira. Isaraele wali agalirume ihondo mbirale lomabu yalu ibiraru aria loma binigo mo miaga karunagaore ngeledogo tigua naabo holene wulebira. Anigo wali agali karumebi mbirale ngarumebi mbirale loma bia hene ngago ela hayagua ogoni ibu loma bia henegonaga hongome bolebira, lene.

<sup>19</sup> Anduane Homogohanda Mosesehondo bi ogodagua lamialu lalu, <sup>20</sup> Loma binigo mo miaga agali Arono aria pigane dabo helarangi tigua inihondo loma mbira ala bu ngulene ngago ogo. Tigua widi lomabu delolenenaga balawa maru yuwa egerebagibi alendo ni paliragolabi inihondo lomabu delolene nga. <sup>21</sup> Balawa ogoni olibe lini weli biamaga howa parabane ngagoria hirulene nga. Ani hiruwa mani dedagola gaibubaga buwa Anduane Homogo inihondo lomabu ngulene nga. Ani ngiragola ina nga howa bayaleoredago hondowa turu halu inaga miniha dungulo holebero. <sup>22</sup> Maniorebi Arono ariarume loma binigo mo miaga agali Haguane Timbuni howa tigua inihondo loma ogonidagua dege bu ngiaabo holene wulebira. Ani lomabu ngialu irame dai helo delarago bibahende dalu do ira pungu helo delolene nga. <sup>23</sup> Loma binigo mo miaga agali tinime widi lomabu yalu ibirago aria tini nolene nawi. Irani dai helo lomabu delai holene nga, lene.

*Ko domo wahelonaga lomabu delolene winigo ogo*

<sup>24</sup> Anduane Homogohanda Mosese lamialu lalu, <sup>25</sup> Aronobi ibu igini loma binigo mo miaga agali karubi tihondo ko domo wahelonaga lomabu delolene mana ogodagua bulene nga, lalu lamibe. Ko domo wahelonaga nogo haru halu ibuwa inaga deni howa bolene nga. Nogo irame dai helo lomabu delolenaga bagane ngagoria dege bolene nga. Loma ogoni ininaga wiabagi heneore wulebira. <sup>26</sup> Loma binigo mo miaga agali loma ogoni bo delalu kago ibunime nogo ogoninaga mbirini ngago inaga Balai Anda pabe bu yaanda hene ngago tamuhayagi howa dege nai holebira. <sup>27</sup> Anigo agali mbira loma binigo mo miaga ndo kagobi mbirale tara ngaru ariabi mbiragome inaga loma wiabagi hene ogoni ela hayagua nde ogoni ibubi loma bia henegonaga hongome bolebira. Ai nogo ogoninaga darama emene mbira tinaga agani wai hayagua nde aga ogoni darama para hayadagoni inaga loma bia hene ngagoria ogoniha dege wayawaya bolene nga. <sup>28</sup> Loma binigo mo miaga kagome nogo ogoni aria maru todobene be dindime wabini ngagoha dawayagua nde mani be ogoni pambulo waholene nga. Ai todobene be boronosime wabini ngagoha dawayagua nde be ogoni ibame wayawaya baya hangu bulene nga. <sup>29</sup> Loma binigo mo miaga agali hameigini igiri agali hangume nogo ogoni nolene nga. Wali agali maru ta nabi nolene nawigo irane loma ogoni ininaga wiabagi heneore ngago marume nolene nawiore. <sup>30</sup> Anigo loma binigo mo miaga agali kago ibugua wali agalinaga ko domo wahelonaga nogo bowa ogoninaga darama maru hambu yalu inaga Balai Anda kagoha biabe bulene ngago bulenaga yalu ibiyagua nde loma binigo mo miaga agali karu tigua nogo ogoninaga mbirini nolene nawi. Tigua nogo ogoni irani lomabu delalu do ira punga helolene nga, lalu Anduane Homogohanda lene.

## 7

*Mbirame mana ko berolo mitangi nabi howa biniru mo tiga bialu lomabu delolene winigo ogo*

<sup>1</sup> Anduane Homogo ibugua Mosesehondo lamialu lalu, Isaraele wali agali karuhondo ogodagua lamibe. Wali agali mbirame ko berolo mitangi nabi howa binigo mo tiga bialu lomabu mulene ngagonaga wiabagi heneore nga. Loma ogoninaga mana ngago ogo. <sup>2</sup> Tigua nogo sibi loma bialu bo delole haru halu ibuwa sibi irame dai helo delole bagane ngagoria howa bolene nga. Tigua sibi ogoni balu darama lomabu delaga dabu ngagonaga gibuni maria ngagoha odo ba amunana bilimu. <sup>3</sup> Ani bialu sibi ogoninaga habane abene kago damene bibahende lomabu delaga dabuni lomabu wulene nga. Ani bialu ere gabone kagobi abene guguni nuni karubi bibahendeore podo lomabu wilimu. <sup>4</sup> Ani bialu luhabane lilini kirabali heba abene kagobi bunibi bibahende lomabu delole dugu yulene nga. <sup>5</sup> Yalu puwa loma binigo mo miaga agali kago ibugua lomabu delaga dabuni Anduane Homogohondo lomabu mialu delai holebira. Nogo sibi ogoni mbiralime mana ko berolo mitangi nabi howa biyagua dano hangaradagua bialu lomabu mulenenaga bo delolebira. <sup>6</sup> Loma binigo mo miaga karunaga hameigini igiri agalibi karu tigua dege nogo ogoni maru podalu nolene karulape. Nogo sibi ogoni Anduane Homogonagaore lomabu wiabagi hene winigo manda bialu tigua Balai Anda pabe bu yaanda hene ngago tamuhayagi howa nai holene wulebira.

<sup>7</sup> Ko binigo domo wahelonaga lomabu mulene manabi ko berolo mitangi nabi howa binigonaga mo tiga bialu lomabu mulene manabi kira ogoni labonaga mana mbiraore hangu nga. Ani ngagola loma binigo mo miaga agali biabe ogoni bialu kago ibunime nogo sibi ogoninaga mbirini maru podalu nolene karulape. <sup>8</sup> Ani bialu loma irani dai helonaga nogo bo delalu nogo dongone ibira hene ngago loma binigo mo miaga agali biabe bialu kago ibuninaga wulebira. <sup>9</sup> Anidagua dege widi dambininaga balawa parabaneni hiriniyaguabi abeneha todobene behabi hiriniyaguabi uruni aria ngago



loma binigo mo miaga agali biabe bialu kago ibuni degeme nolene karulape. <sup>10</sup> Ani bialu balawa hira nabinigo olibe lininaga weli heba mo biamaga henebi nahenebi lomabu mini ngago loma binigo mo miaga agali Arono aria karu ti bibahendeme nolene wulebira. Loma binigo mo miaga agali bibahende karu ti balawa uruni ogobi degedege talebu taho yulene nga, lalu Anduane Homogohanda Mosesehondo lene.

*Anduane Homogola ho gimbu bulenaga lomabu mulene winigo ogo*

<sup>11</sup> Anduane Homogohanda Mosesehondo lalu, Isaraele wali agalihondo ogodagua labe. Tí Anduane Homogola ho gimbu bulenaga ibuhondo loma ogodagua bu milimu. <sup>12</sup> Agali mbira ibu Anduane Homogohondo kai lalu ho gimbu bulenaga lomabu delole heagua nde nogo mbira mberedi yidi nahe hirinibi heba lomabu mulene nga. Ibugua balawa olibe lininaga weli heba biamaga howa mberedi hirini ngagobi mbisigedi maru hirini olibe lininaga welime hai hene ngagobi balawa olibe lininaga weli heba biamaga heneme mberedi emene milimolo wabu hirini ngarubi nde uruni yidi nahe dege lomabu mulene ngadagua mulene karulape. <sup>13</sup> Anduane Homogola ho gimbu bulenaga lomabu mialu howa mberedi yidihe marubi biamaga howa lomabu mulene nga. <sup>14</sup> Ani bialu ibugua mberedi uruni aria mbira mbira Anduane Homogohondo lomabu mulene nga. Mberedi uruni loma binigo mo miaga agali nogo darama lomabu delaga dabu ngagoria dindiha odope hai haga kagonaga wulebira. <sup>15</sup> Ibugua Anduane Homogola ho gimbu bulenaga nogo bo lomabu mirago maru ibira hene ngago horo ogoningiore nai holene nga. Horo mendengi nole podo wulene nawiore.

<sup>16</sup> Agali mbirame Anduane Homogohondo bi lo winidagua bialu ibula ho gimbu bulenaga nogo loma bialu bo delole heaguabi ibunime bo mua biragobiore bo mule heaguabi loma ogoni alenaga nogo bo delarangi mbirini maru nalu maru ibira harago horo mendengi nolenebi karulape dege. <sup>17</sup> Anigo ai horo kiru nalu howa horo tebonengibi wia dege biyagua wahalu irame dai helo iraha bape halu delalimu. <sup>18</sup> Horo tebonengibi nogo ogoni nalu ha dege biyagua nde Anduane Homogohanda agali ogoninaga loma ogoni nayamulebira. Ani nayami howa ibugua loma ogonidagua binigo ibunaga deni dodohe ko ngubiore nga manda bialu agali horo tebonengi nogo ogoni nalu kagohondo ibuha ko ngelo ka lolene wulebira. <sup>19</sup> Anduane Homogola ho gimbu bulenaga lomabu delole yalu ibiragonaga nogo mbirini aria mbirago Ngode Datagaliwabenaga deni ko ngagome ela hayagua nde tigua loma ogoni nolene nawigo nanalimu. Wahalu irame dai helo iraha bape halu delai halimu.

Wali agali Ngode Datagaliwabenaga deni tiha ko mbira para nahe kagome ibula ho gimbu bulenaga bo lomabu mini ogoninaga mbirini ngago ibuni dege nolene karulape nga. <sup>20</sup> Anigo mbirali ibu bayale ndo Ngode Datagaliwabe deni ko howa loma bini nogo ogoni nayagua nde ogoni ibu Ngode Datagaliwabenaga wali agali bu karu aria ndo ibu ko taraore helolebira. <sup>21</sup> Agali mbira ibugua mbirale Ngode Datagaliwabenaga deni ko hene ngaru ela heneyaguabi ema bialu piaga ko hene ngaru ela heneyaguabi wali agali ko bini karu ela heneyaguabi urunidagua bu howa ibugua loma ogoni Anduane Homogohondo bo minigonaga ngago nayagua nde ibu Anduane Homogonaga wali agali bu karu aria ndo ka, lalu Anduane Homogohanda lene.

*Isaraele wali agalime nogo darama habaneru nolene nawi lenego ogo*

<sup>22</sup> Anduane Homogohanda Mosesehondo bi ogo lamialu lalu, <sup>23</sup> Isaraele wali agali bu karuhondo ogodagua lamibe. Tigua nogo sibi bulumaga memebi bu karunaga habane damenego nolene nawiore. <sup>24</sup> Nogo gabua karume bulumaga mbira bo wahenebi minana homagadagua homayaguabi ogoninaga habane nolene nawigo nanalimu. Anigo habaneme biabe mende ale bulene ngago bule podo yarimiyagua nde karulape dege. <sup>25</sup> Agali mbirame nogo bulumaga mbira Anduane Homogohondo bo lomabu delenego aria habane mbirago nayagua agali ogoni ibu Ngode Datagaliwabenaga wali agali karu

aria ndogo ti heba mandagi holene nawi. <sup>26</sup> Isaraele wali agali lene kamiru tí dindi taraha pu hemiyaguabi nogo egaru darama heba nolene nawigo nanalimuore laro.✧  
<sup>27</sup> Mbiralime bi ogoni mo wahalu nogo egaru darama heba nayagua ogoni ibu Ngode Datagaliwabenaga wali agali bu karu aria ndo holebira, lalu Anduane Homogohanda lene.

*Loma binigo mo miaga agali karume nogo bo lomabu minigonaga mbirini maru nelu mulene winigo ogo*

<sup>28</sup> Anduane Homogohanda Mosesehondo lalu, <sup>29</sup> Isaraele wali agalihondo ogodagua lamibe. Mbiralime Anduane Homogola ho gimbu bulenaga nogo loma bialu bo delole haru halu ibiyagua nde ibugua Anduane Homogohondo nogo kuni ogo alenelaore mule lowa manda bu yalu ibulene nga. <sup>30</sup> Agali ogoni ibuni gime nogo ogo aleore mule lalu lo wiyago lomabu delole habane abenerubi galukuni mbirinibi lomabu yalu ibuwa mulene nga. Ani yalu ibiragola loma binigo mo miaga agali kago ibugua Anduane Homogohondo ogodagua lomabu mulebira. Nogo galukuninaga mbirini biago Anduane Homogonaga deni gi dogolowa wigiwaga lalu holebira. <sup>31</sup> Ani bialu habene abene yayaru lomabu delalu galukuni mbirini yayago loma binigo mo miaga agali Arono aria karu tini nolebira. <sup>32</sup> Anduane Homogola ho gimbu bulenaga nogo ogoninaga ge tighayagi loma binigo mo miaga agali kago ibu nelu burulo mulene nga. <sup>33</sup> Loma binigo mo miaga agali Arono igini kago ogoni ibugua nogo biagonaga habane abene daramaru lomabu delalu hayago nogo ge tighayagi ogoni ibunaga wulebira. <sup>34</sup> Anduane Homogo ibunime nogo biagonaga galukunibi ge tighayaginaga burulene biagobi ti Isaraele wali agalime mini biago yamialu loma binigo mo miaga agali Arono aria karu mo mulebira. Anidagua dege manibi wia *ai* halu nogo puguki ogonilabo loma binigo mo miaga agalinaga lene wiaabo holebira. <sup>35</sup> Wali agali tigua nogo galukunibi ge burulene biagobi ogonilabo lomabu mirimigo Anduane Homogo ibuninaga dege holebira. Anduane Homogo ibunime Aronobi ibu iginirubi loma binigo mo miaga helo dabo helayangi howa lalu nogo puguki ogonilabo tinaga wulebira lene wiyagoni. <sup>36</sup> Horo ogoningi howa Anduane Homogohanda Isaraele wali agaliruhondo lamialu nogo galukunibi ge burulene biagobi ogonilabo bo lomabu mialu loma binigo mo miaga agali kago milimu lenego nga. Ani bialu mana ogoni mani wia *ai* helo talialu bialu halimu, lene.

<sup>37</sup> Bi uruni loma biniru bibahendeore irani daiore helo lomabu delolenenaga mana ngagobi widi aria lomabu delolenenaga mana ngagobi ko domo wahelonaga lomabu delolene mana ngagobi mbirali ko bero lo mitangi nabi howa binigo dano hangaradagua bilo lomabu delolene mana ngagobinaga lo nga. Ani bialu loma binigo mo miaga agali helonaga loma biaho helolenenaga manabi Anduane Homogola ho gimbu bulenaga lomabu delolene manabi uruninaga lo nga. <sup>38</sup> Bi mana uruni Isaraele wali agali ti dindi ko wali agali nahagabi iba dalu naibagabi wiagoha heangi Anduane Homogohanda Hari Sainai nenenai howa Mosesehondo laminigo nga. Anduane Homogo ibunime Isaraele wali agali tigua ibuhondo loma uruniale bo mule heagola ibugua bi mana uruni lamigi bialu hene.

## 8

*Anduane Homogohanda loma binigo mo miaga agali helo dabenegro ogo*

<sup>1</sup> Anduane Homogo ibugua Mosesehondo lalu, <sup>2</sup> Aronobi ibu igini karubi inaga Balai Anda kago haneni haru ibuwa helabe. Loma binigo mo miaga agalime aga karulagane biarubi tigua biabe ogoni bialu helo dabo helaga weli biagobi mo yalu wali agalime ko binigo domo wahelonaga nogo bulumaga wangabe mbira loma bialu bo delole haru halu nogo sibi wangabe kirabi heba haru halu mberedi yidi nahe hirini mbasigedi nu

✧ 7:26: Pig 9.4, LBM 17.10-14, 19.26, Man 12.16, 12.23, 15.23

mbira heba uruni bibahende inaga Balai Anda kago haneni yalu ibalimu. <sup>3</sup> Ani bialu mani wali agali bibahende inaga Balai Anda haneni ibu ngoai hadaba lalu lamilimu, lene. <sup>4</sup> Anduane Homogohanda bi ogoni layago hale halu Mosese ibugua wali agali bibahende Balai Anda haneni mo ngoaiho hene.

<sup>5</sup> Ani ngoaiho heagola Mosese ibugua tihondo lamialu lalu, Mbirale ina áyu buleberogoni Anduane Homogo ibunime bibe lalu langiyadagua bulebero, lene. <sup>6</sup> Ani lalu Mosesehanda Aronobi ibu igini biarubi wali agalinaga deni haru ibu helowa ti ilili biagane mana winidagua bialu ibame wayawaya bia hene. <sup>7</sup> Ani biai howa ibugua Arononaga aga giha bulene biago ala mo karula halu aga mende luni biagimbu bulene biadambi helalu mandibu biradagua aga mbira bo bia dambi ho mabu bia hene. Ani bialu Mosesehanda aga tebone daligahayagi buha mbirahabi biadambi haga biago mini ebodi winigo Arono mo karula hene. Ani karula howa ebodinaga mandibu ale mo yaribia howa ngelenego obeneni mandibu wia howa aga biago mo ndibu lelene.\* <sup>8</sup> Ani bialu aga emene mbira Arononaga galuhombeni mo karula howa aga emene nu ale ogoni wiagoha ege tole kira mini Urimu Tumimula † Anduane Homogonaga hame hale haga biagolabo nu ale ogoniha hana hene. <sup>9</sup> Ani bialu labolabo emene luni mbira Arononaga emboneni bobu mabu bia hene. Ani buwa labolabo bo bu mabu bini biago wanakuini mbirale ngolome wabini dombo heda wiradagua mo wia halu agali ogoni ibu Anduane Homogonaga Loma Biahene ka lalu gilibu wini. Anduane Homogohanda bibe lalu lamiyadagua Mosesehanda biai hene.

<sup>10</sup> Ani biai halu mani Mosese ibugua mbirale Anduane Homogo ibunagaore wiabagi helo weli odo wiaga winigo mo yalu puwa Anduane Homogonaga Balai Anda heagobi mbirale anda ogoniha bibahende wiaru odoba hene. Anidagua biyadagonime Balai Andabi mbirale uruniha wiarubi bibahende Anduane Homogo ibuninaga wiabagi heneore wini. <sup>11</sup> Ani bialu lomabu delaga dabu wiagobi dabu ogoriani wiaga wiarubi waya bulenenaga iba hambu wiaga ndisi bebi ibunaga wiagane dagia wiagobi weli biagome kahaludege dege tandalaba haga bini. Anidagua biyadagome mbirale uruni Anduane Homogo ibuninaga loma bia howa wiabagi hai helene. <sup>12</sup> Ani biai howa weli biagome Arononaga emboneni emene mbira odo wia halu bini. Anidagua biyadagome Arono ibu Anduane Homogonaga loma binigo mo miaga agaliore hene. <sup>13</sup> Mani Mosesehanda Arono igini bu hearu haru ibuwa aga giha bulene wiaru ti mo karula hai halu labolabo luni mandibu biradagua bobu mabu bia hene. Ani bialu tinaga hagianeni tangi emene ale karula haga bini. Anduane Homogohanda anidagua bibe lalu Mosese lamiyadagua Mosesehanda hale halu bigi bini.

<sup>14</sup> Mosese ibugua uruni biai howa nogo bulumaga wangabe mbira wali agalime ko binigo domo wahelonaga loma bialu bo delole haru halu ibini. Haru ibu helowa Aronobi ibu igini biarubi tigua bulumaga hagianeni gi wiai hene. <sup>15</sup> Ani biai heagola Mosesehanda bulumaga biago balu darama maru hambu yalu puwa gi hondoneme daramaha wai howa lomabu delaga dabu wiagonaga gibuni mariani nogo bulumaganaga ne gayane ale hearu nogo darama biagome hai hene. Anidagua biyadagome lomabu delaga dabu ogoni Anduane Homogonaga deni ko mbira para nahe bayaleore ngelene. Mani darama maru wiagome lomabu delaga dabu biagonaga dindiha odope hai hene. Anidagua biyadagome dabu odagoni Anduane Homogonaga wiabagi heneore wini. <sup>16</sup> Ani bialu Mosese ibugua nogo bulumaga biagonaga habane abene buni heagobi luhabane lilini kirabalibi bibahende dabu biagoria lomabu delai hayagola dalu do ira punga halu do be hene. <sup>17</sup> Ani bialu nogo bulumaga biagonaga podo paya bini maru ibira hene dongonebi mbirinibi tini wiarubi bibahende balai anda bu hearu tagirahayagi yalu pene. Yalu tagira puwa tagirani ira bo delowa nogoni hene damene

\* 8:7: Aga mini ebodi HAR 25.7 handabe. † 8:8: Urimu Tumimula Haru Tagi Penego 28.30 handabe

wiago ogoriani delai hayagola do tauladaga halu ira punga hene. Anduane Homogo ibunime anidagua bibe lalu lamiyadagua bini.

<sup>18</sup> Ani biai halu mani Mosese ibu nogo sibi wangabe kira tigua haru ibu helayago aria mende heago haru ibini. Sibi ogoni loma bialu irani dai helo haru ibini. Ani haru ibalu Aronobi ibu igini biarubi tigua sibi biago hagianeni gi wiai hene. <sup>19</sup> Ani wiyagola Mosesehanda sibi biago bowa daramame lomabu delaga dabu wiagonaga gibuni maria wiago ha odo ba amu nana biai hene. <sup>20-21</sup> Ibugua sabinaga darama biago odo wahalu nogo podowa tinibi baya hangu halialu ge kirabi baya hangu wayawaya biai hene. Ani biai howa uruni bibahende lomabu delaga dabu biagoria lomabu delayagola dalu do ira punga halu do be hene. Anduane Homogohanda bibe lalu lamiyadagua ani bini. Sibi o loma bialu bo delayadagoni irani dai helayagonaga Anduane Homogohanda loma ogoninaga nga baya taraore biyago nga howa ibu turu halu miniha dungulo hene.

<sup>22</sup> Ani bialu Mosesehanda nogo sibi wangabe mende ala tigua haru ibu helayagobi haru ibini. Nogo sibi ogonime loma binigo mo miaga agali helo dabo helolenenaga loma bialu bo delole Aronobi ibu igini biarubi tigua sibi ogoninaga hagianeni gi wiai hene. <sup>23</sup> Ani biyagola Mosesehanda sibi biago bowa darama wiago emene mbira yamuwa Arononaga gi tigahayagi hale teneha hai halu gi tiganaga hondone angibiyane gobi hai halu ge tiganaga hondone angibiyane gobi hai dege hene. <sup>24</sup> Ani biai halu mani Arono igini biarunaga gi tigahayagi hale teneha gi tiga hondone angibiyane kagobi ge tigaha hondone angibiyane kagobi bibahende sibi darama biarume hai hene. Ani bialu darama maru ibira hene wiago lomabu delaga dabu wiagonaga gibuni maria wiago ha odo ba amu nana bini. <sup>25</sup> Ani biai halu mani Mosese ibugua sibi biagonaga habane abene damenego bibahende podo yai hene. Nogo sibi eregabone tohe heagobi tiniha nuni habane abene damene hearubi buni heagobi luhabane lilini heba abene hearubi ge tigahayaginaga burulenebi bibahende podo wiai hene. <sup>26</sup> Ani bialu Mosese ibugua mbasigedi nuha mberedi yidi nahe hirini Anduane Homogohondo lomabu mini heneago aria mbirabi balawa olibe lininaga weli heba biamaga howa hirini mberedi heneago aria mbirabi mbasigedi mbirabi uruni tagu yini. Uruni bibahende yalu sibi biagonaga habane abene damene hearubi ge burulene tigahayaginaga wiago uruni bibahende wiagoriani mberedi mbasigedi biarume wiadambi helene. <sup>27</sup> Ani bialu Mosese ibugua mbirale uruni bibahende Aronobi ibu iginirubi tinaga giha mo ya hayagola tigua tomo uruni mo yuwa Anduane Homogohondo gi dogolowa wigiwaga lalu mo loma bialu hene. <sup>28</sup> Ani bialu mani tomo yu hayaru Mosesehanda yamialu sibi maru wiyaruni heba lomabu delaga dabu biagoria loma irame dai holene winigo mo paga howa irame dalu do tauladaga halu ira punga hai helene. Loma binigo mo miaga agali dabo helalu loma ogoni delayagonaga nga bayale taraore biyago nga howa Anduane Homogo ibugua turu halu miniha dungulo hene. <sup>29</sup> Mosese ibugua sibi biagonaga galukuni biago gime yuwa Anduane Homogonaga deni gi dogolowa wigiwaga lalu hene. Sabinaga galukuni biago loma binigo mo miaga agali helonaga dabo helalu lomabu mini biagonaga Mosese ibuni sibi ogoni nolene karulape wini. Anduane Homogohanda bibe lalu lamiyadagua Mosesehanda biai hene.

<sup>30</sup> Ani buwa Mosesehanda loma binigo mo miaga agali helo dabo helaganaga weli biagobi nogo sibi biagonaga darama dabuni odo hai hene wiagobi mo yini. Mo yalu puwa ibugua Aronobi ibu igini biarubi tinaga agani tandala bahaga bini. Mosesehanda ogonidagua bialu Aronobi ibu igini biarubi Anduane Homogonaga loma biahene helalu tinaga aga biarubi bibahende Anduane Homogonaga wiabagi heneore wini.

<sup>31</sup> Ani biai howa Mosesehanda Aronobi ibu igini biarubi tihondo lamialu lalu, Ai sibi mbirini ngaru mo yalu Anduane Homogonaga Balai Anda hane ngagoria puwa todobene beha dawalimu. Ogoni dedagola mberedi mbasigedi nuha hono ngaru heba nalimu. Basigedi nu ogoniha mberedibi mbasigedibi loma binigo mo miaga agali



helonaga lomabu mini biagoha hono wini. <sup>32</sup> Tígua nogo sibi biagonaga mbirinibi mberedi mbisigedi uruni heba nalu nabe manga biyagua nde wahalu irani dai helo delalimu. <sup>33</sup> Ani bialu tígua horo karu Anduane Homogonaga Balai Anda hane kagoria haabo halimu. Horo karu hangu howa tí loma binigo mo miaga agali howa biabe bulenaga mana bulene ngaru biai howa tagira pole hondo halimu. <sup>34</sup> Anduane Homogoibunime tínaga ko birimiru domo wahelonaga ogonidagua bilimu layadagua ina áyu ogoni biai haramagoni. <sup>35</sup> Horombe mbiragabi Anduane Homogonaga Balai Anda harabani horo karu ogoni piai helo ani biraabo halimu. Ani bialu Anduane Homogobulunime tihondo bilimu lalu langiyaruni biai halimu. Anduane Homogohanda ihondo ogodagua laya, Tígua ibunaga bi larago mo waho kamiria tíni homolene wuligo de hondo halimu, laya lene. <sup>36</sup> Anduane Homogohanda bi uruni Moseseha howa Aronobi ibu igini biarubi tihondo bulene nga layaruni layadagua tigua hale halu biai hene.

## 9

### *Aronohanda nogo tara tara lomabu delenego ogo*

<sup>1</sup> Horo karu piai hayagola Aronobi ibu igini biarubi loma binigo mo miaga agali helonaga biabe bialu hayaruni biai hene. Ai horo halini hayagola Mosesehanda, Aronobi ibu igini biarubi Isaraele wali agalirubi bibahende ibu ngoai hadaba, lene. <sup>2</sup> Ti ibu ngoaiho hai heagola Mosesehanda Aronohondo lamialu lalu, Nogo bulumaga dalua wangabebi nogo sibi wangabebi mbira dere durubi nabi bayaleore kago handa handa buwa haru halu ibabe. Haru ibuwa Anduane Homogonaga deni ko binigo domo wahelonaga bulumaga bo lomabu delalu sibibi irani dai helo bo lomabu delolenaga haru ibabe. <sup>3</sup> Ani bialu ko binigo domo wahelonaga nogo meme wangabe mbira lomabu delole haru halu ibalimu lalu Isaraele wali agali lamibe. Ani bialu nogo bulumaga igini mali mbira hangu hene kagobi sibi igini mali mbira hangu hene kagobi haru halu loma buwa irani dai helo bo delole haru ibalimu lalu lamibe. Nogo uruni bayale dere durubi nabi kago hondowa haru halu ibalimu lalu lamibe. <sup>4</sup> Ani bialu wali agali tígua nogo bulumaga wangabebi sibi wangabebi Anduane Homogola ho gimbu bulenaga loma bialu bo delole haru halu ibalimu lalu lamibe. Tígua nogo kira ogoni heba widi dambininaga balawa olibe lininaga weli heba biamaga howa lomabu delole yalu ibalimu lalu lamibe. Ani bulene ngago áyu ogoningiore Anduane Homogo ibuni tí kamigoria tíninaga deni hapani holebirago tígua tínaga loma uruni lomabu delalu holene nga, lene.

<sup>5</sup> Ani laya handala Aronobi wali agali bu hearubi tigua Mosesehanda yalu ibalimu layaru mo puwa Anduane Homogo mitangi bialu lotu lole ibunaga Balai Anda heagoria ibu ngoai ho hene. <sup>6</sup> Ani ibu ngoai ho heagola Mosesehanda tihondo lamialu lalu, Anduane Homogonaga wá taraore tí kamigoria hadali holebirago tí de handalimulonaga Anduane Homogo ibugua ani ibu ngoai hadaba laya, lene. <sup>7</sup> Ani lowa Mosesehanda Aronohondo lamialu lalu, Ina lomabu delaga dabu ngagoria puwa ina ko biriru domo wahelonaga loma bialu bo delalu loma mende irani dai helo lomabu delagadagua bo delabe. Loma kira ogonibi mendego wali agalinaga ko biniru domo wahelonagabi loma bialu bo delolene nga. Ani bialu wali agali tigua lomabu mule yalu ibirarume Anduane Homogohanda layadagua tininaga ko biyadaru domo wahelo lomabu delabe, lene.\*

<sup>8</sup> Ani laya handala Arono ibuguaibunime ko biniru domo wahelonaga nogo bulumaga wangabe dalua biago lomabu delaga dabuni bope hene. <sup>9</sup> Ani bope hayagola ibu igini biarume bulumaga biagonaga darama hambu miyagola ibugua darama biago gi hondoneni wai howa lomabu delaga dabu heagonaga gibuni mariani bulumaganaga ne gayane ale heago hai hene. Ani bialu darama maru wiago mo yalu puwa lomabu delaga dabu biagonaga dindiha odope hai hene. <sup>10</sup> Ani bialu mani Aronohanda

\* 9:7: Hi 5.1-3, 7.27



nogo biagonaga habane abene hearubi luhabane lilini kirabalibi buni abenebi heba bibahende podo yalu puwa irame dalu do ira punga helo lomabu delaga dabuni lomabu delene. Anduane Homogo ibunime anidagua bibe lalu Mosesehondo lamiyadagua bini. <sup>11</sup> Ani bialu nogo podene maru wiarubi dongonebi bibahende balai anda bu hearu pabe tagirahayagi mo yalu puwa irame dai helo delene.

<sup>12</sup> Arono ibugua uruni biai halu ibuninaga sibi wangabe biago balu irani dai helo lomabu delole bene. Ani bayagola Arono igini biaru tigua nogo bayagonaga darama hambu miyagola ibugua yalu puwa lomabu delaga dabu biagonaga gibuni maria wiagoha odo ba amu nana bini. <sup>13</sup> Ani bialu ibu igini biarume nogo haguanebi podene bibahende biuhondo miai hayagola ibugua lomabu delaga dabuni irame dai helo delene. <sup>14</sup> Ani delowa ibugua nogo tini baya hangu halialu wayawaya bo wahai halu ge kirabi wayawaya bo wahai howa bibahende daligani mo dambi howa lomabu delaga dabuni delayagola irame dalu do ira punga halu do amolaiore hene.

<sup>15</sup> Ani biai howa mani Arono ibugua wali agali tinaga loma yu ibiyaru yamialu Anduane Homogohondo lomabu migi bini. Wali agalime ko biyago domo wahelonaga lomabu bo delole nogo meme haru ibiyago yamini. Ani yamialu Arono ibugua ala bulumaga wangabe ibuninaga ko biniru domo wahelonaga lomabu bo delayadagua dege meme ogoni wali agalinaga bo lomabu delene. <sup>16</sup> Ani buwa Arono ibugua loma irame dai helo delolene winidagua wali agalinaga loma yalu ibiyaru lomabu delene. <sup>17</sup> Ani delalu ibugua widi dambinigonaga balawa lomabu delole yalu ibiyaru lomabu delaga winidagua delaga bini. Mana winidagua loma mende egerebaginaga ala delenego delowa ibugua widinaga balawa emene mbira gime mo yuwa irame dai helo lomabu delaga bini. <sup>18</sup> Ani bialu mani Arono ibugua wali agalime nogo bulumaga sibi wangaberu Anduane Homogola ho gimbu bulenaga lomabu delole haru ibiyaru yamigi bialu bene. Ani bayagola ibu igini biaru tigua nogo kira ogoni labonaga darama wiago hambu miyagola ibugua mo yalu puwa lomabu delaga dabu heagonaga gibuni maria wiagoha odo ba amu nana bini. ✧ <sup>19</sup> Ani bialu Arono ibugua nogo biago labonaga eregabone tohe wiagobi abene guguni bunibi luhabane lilinibi podo wiai hene. <sup>20</sup> Mbirale uruni damene nogo kirabalinaga galukunini mo dambi hai howa lomabu delaga dabu wiagoria mo yalu pene. Ani bialu habane abene podo yayago damene bibahende lomabu delaga dabuni delai hene. <sup>21</sup> Ani buwa nogo bulumaga sibi biagobi kirabalinaga galukunila ge tigahayagi burulene mbirala podo yuwa Mosesehanda bibe lalu lamiyadagua Anduane Homogonaga deni gime yuwa wigiwaga lalu mini.

<sup>22</sup> Ani bialu Arono ibugua loma uruni bibahende Anduane Homogohondo lomabu miai howa lomabu delaga dabu biagoria howa ibunaga gi kirabali wali agali heagoha dogola amu halu lalu, Anduane Homogohanda tí mo bayale helo, lowa ibu lomabu delaga dabu biagoria howa dalipe hene. ✧ <sup>23</sup> Ani bialu Mosese Aronobi libu haru Anduane Homogonaga Balai Anda biagoha anda pene. Anda puwa tagira ibalu howa libugua wali agalihondo Anduane Homogohanda tí mo bayale helo lalu hebiore Anduane Homogonaga wá taraore hapani hayagola wali agali bibahende bu hearume de handai hene. <sup>24</sup> Ani bialu abaleore aube tobane buwa Anduane Homogohanda hari daligaha howa ira timbuni hungu bialu dalipe helowa lomabu delaga dabu biagoria mbirale lomabu wiago damene bibahendeore dai helene. Anidagua biyago wali agali bu hearume de hondowa tigua turu timbuni halu ku lowa bi dalimu lalu dindini bulu palene.

## 10

### *Nadaba Abihulame mana ko binigo ogo*

<sup>1</sup> Horo ogoningi Arono igini kirali Nadaba Abihulame ira hagua ngabilo lomabu delaga inisenesi wiago libuninaga parabane ale wiago mo yalu puwa ogoriani delaga bialu hene. Libugua ira denebi inisenesibi parabane aleni mo ngelowa Anduane Homogonaga lomabu yalu pugu bialu hene. Ani biyagola Anduane Homogo ibugua mana ogonidagua bilibu lalu mbira nalenego libugua biyago ibunaga ndoyane handalu ibu turu nahe hene. <sup>2</sup> Ani biyagola Anduane Homogohanda ibuha howa libu hearia ira abaleore bape hayagola ira biagome igiri biagolabo dalu Anduane Homogonaga deni howa do homelene. <sup>3</sup> Ani biyagola Mosesehanda Aronohondo lalu, Bamba Anduane Homogohanda ogodagua laya. Inaga biabe biaga howa ini kogoria kaware ibiraru tigua i habane nabulene ale ndo i Anduane Homogoore kogo manda bialu ibulene nga. Tigua anidagua biyagua nde ina ininaga hongo holene timbuni gibiore ngogobi wa taraore holene ngogobi wali agalihondo mo walia holebero, laya, lene. Ani layagola Arono ibugua hale howa bi mbira ladai nabi hene.✧

<sup>4</sup> Ani buwa Mosesehanda Arono aba hamene heyogone Usiele igini kirali Misaele Elesabanala heago ibilo olene. Ibiyagola Mosesehanda libuhondo lamialu lalu, Libu hamenenaga tingini o ngago mo ibalu Anduane Homogonaga Balai Anda kago yu wahalu wali agalinaga balai anda bu kago tagirahayagi yalu pilibu, lene. <sup>5</sup> Ani layago hale halu libugua agali biagolabonaga tingini mo puwa Mosesehanda bilibu lalu lamiyadagua balai anda bu hearu yu wahalu tagiraha yalu pene. Ani buwa libugua homene biago labonaga aga golo wa nahe aga karuleaore aga heba yalu pene.

<sup>6</sup> Ani biyagola Mosesehanda Aronobi ibu igini Eleasa Idamalabi tihondo lalu, Tigua agali kirali homayagonaga dara howa biaga ale nabi wahalu tinaga mandariru pere nabi ha ndo pere biaabo halu agaru minu lere nale dara ho nahalimu. Tigua dara ho howa biaga ngago mbira birimiyagua nde Anduane Homogohanda tihondo keba timbuni halu ti homalimulo bo wahalu ina Isaraele wali agali kamaru bibahendehondobi keba hai dege holebirago ani nabilimu. Isaraele wali agali tinaga damene maru karu tigua dege Anduane Homogo ibuni ira hedo bape halu agali kira bo heda hayagolabo dara halu helo. Tini dara nahalimu. <sup>7</sup> Ina ti Anduane Homogo ibunagaore habagi halimulonaga weli oda wiaga biagome tini odo wialu helarugo ai ibunagaore loma bini kamigoni. Anigo Balai Anda o kago wahalu tagira nape anda ogoha haabo halimu, lene. Tigua Mosesehanda bi ogoni layago hale howa ti tagira nape tamuha haabo hene.

*Loma binigo mo miaga agalime mana maru taluwa bialu holene winigo ogo*

<sup>8</sup> Anduane Homogohanda Arono lamialu lalu, <sup>9</sup> Inibi i igini karubi tigua waini ibabi mbiabi nalu inaga Balai Anda o kagoha anda polene nawigo napilimu. Anda pirimiyagua nde homoleberemigo manda bilimu. Tinaga igini aguanenebi mani hama polobadaru tiguabi nde mana ogoni dege talialu haabo holene wulebira. <sup>10</sup> Tigua inaga Balai Anda kagoha biabe bialu howa mbirale bibahende inaga ogoore ngagoni wali agalinaga ogoore ngagoni lalu minime mo tale buleberemi. Ani bialu inaga deni mbirale ngaru ko bayale lalu tale bulene nga. <sup>11</sup> Ani bialu inaga bi mana Mosesehondo lamirugo damene bibahende tigua Isaraele wali agali karu baya hangu lawai halimu, lene.

<sup>12</sup> Mosesehanda Aronobi ibu igini kirali Eleasa Idamalabi ti tebiralihondo lamialu lalu, Tigua widi dambini balawa Anduane Homogohondo lomabu minigo maru ibiraho ngaru mo yuwa mberedi yidi nahe wabilimu. Balawa ogoni Anduane Homogo ibuninagaore wiabagi ho ngagoni. Anigo ai tigua mberedi wabuwa lomabu delaga dabu ngagoria kaware biruwa nalimu.✧ <sup>13</sup> Ti Anduane Homogonaga Balai Anda kagoha pabe bu yaanda hene tamuhayagi howa nalimu. Wali agalime widi Anduane Homogohondo lomabu minigo ogoni tinibi ti iginibi tinaga leneore wiaai holebirago nalimu. Anidagua

bulene nga, lalu Anduane Homogohanda ihondo abale langiya. <sup>14</sup> Tíni tína waneiginirubi tigua nogo galukunibi ge tiganaga ge burulenebi Anduane Homogonaga deni howa gime yuwa wigiwaga lenego ogoni tína ngago nalimu. Anduane Homogonaga deni dindi mebia nahene daba bagi hene mbira ngane hendedemigoria nogo mbirini lomabu mini uruni yu puwa nalimu. Mbirini uruni Anduane Homogola ho gimbu bulenaga Isaraele wali agalime loma binigo mo miaga agali tí kamirubi tí waneiginirubi tí nalimulonaga talebu wini nga. ✧ <sup>15</sup> Anduane Homogohanda lenedagua wali agalime nogo bulumagaru sibirunaga galukunibi ge tigahayaginaga burulenebi habane abene guguni nuni karubi lomabu ngirago yamialu Anduane Homogonaga deni gime yuwa wigiwaga lalu halimu. Anidagua biai howa habane abene podo yarimigo irani lomabu delalu galukunibi ge burulene biagobi tíni nole mo yalimu. Anduane Homogo ibunime nogo puguni kira ogonilabo tíbi tí aguanene mani holobadarubi tína wiaai holebira lalu laya, lene.

<sup>16</sup> Mani howa Mosesehanda hale halu lalu, Nogo meme ko biniru domo wahelonaga bo lomabu delolene biago agua biyabe, layagola tigua ladai bialu lalu, Abale irani lomabu delai harima, lene. Ani ladai biyagola Mosese ibugua Eleasa Idamalahondo keba howa lalu, <sup>17</sup> Ai ko biniru domo wahelonaga nogo meme loma bialu bene biago tigua Anduane Homogonaga Balai Anda kagoha nolene ngago nanarimigo irane agibe. Loma ogoni Anduane Homogo ibunime wali agalinaga ko ngago domo wahelonaga loma bo delene biago tí mo ngiyagoni ndobe. ✧ <sup>18</sup> Nogo meme ogoninaga darama Balai Anda biagoha hobane loma biahene kagoha ina bialu halimu lalu langirudagua nabi nogo meme darama yalu anda nape howabi nolene tamu hobane ogoniha howa nolene ngagobi nane dege harimiyago irane agibe, lene.

<sup>19</sup> Ani layagola Aronohanda Mosesehondo ladai bialu lalu, Hale harene. Áyu ogoni wali agalime tína ko ngaru domo wahelonaga lomabi irani dai helonaga lomabi Anduane Homogohondo lomabu miyagoni. Ani birugoni bilowa gendabi ogoni iha anda ibiyago aginagadabe. Iname nogo áyu bo miyagonaga mbirini nedamale nde Anduane Homogohanda turu ho kaledabe, lene. <sup>20</sup> Aronohanda bi ani layago hale howa Mosese ibugua bi ogoni karulapeda lo manda bialu ibunaga miniha dungulo hene.

## 11

*Ema bialu piaga aleru Isaraele wali agali tigua nolene nanolenebi winigo ogo (Mana Loyane 14.3-21)*

<sup>1</sup> Anduane Homogohanda Mosese Aronola lamialu lalu, <sup>2-3</sup> Isaraele wali agali bu karuhondo ogodagua lamilibu. Ema bialu dindini piaga damene tí nolene ngago ogo. Nogo tína gi ge giba kira hanguhe tomo datani hangu naga nogo bulumaga aria kago balu nalimu. <sup>4-6</sup> Anigo ai nogo kamelebi huru ale mini labidibi pagana ale egeha paliaga bedarubi nolene nawi. Urunime datani naga degego tína gi ge giba kira ndo tara tara ka. Anigo inaga deni uruni ti bayale ndo dodohe kago manda bialu tigua nolene nawiore. <sup>7</sup> Nogo ibuniore kagobi tína ge bulumaga ale degegoyu ti tomo maginiha yuwa nanagayagodago uruni balu nolene nawi laro. Nogo ibuni inaga deni ko dodohe kagonida lo manda bilimu. <sup>8</sup> Ema bialu piaga uruni ti balu nolenebi nawi uruni ale mbirago homo ngagola ela holenebi nawiore irane ti inaga deni ko dodohe kagodane, laro.

<sup>9</sup> Ibaha iba wena bedaru damene bibahende dongone harenehe bedarubi babaganehe bedarubi iba emeneha bedarubi solowaraha bedarubi uruni ale bibahende nai holene karulapego balu nalimu. <sup>10</sup> Anigo wena marubi ema biaga alebi iba emenehabi solowarahabi bedaru tína dongoneni harene nahebi babagane nahebi bedaru bibahende ko beda lo manda bialu bo nolene nawi. <sup>11</sup> Anigo uruni ti inaga

deni ko dodohe manda bialu tígua balu nabi homene ngago elabi heba holene nawiore larogoni. <sup>12</sup> Baya hanguore lone hale hadaba. Ibaha wena bedaru aria maru harene nahe babaganebi nahe bedaru ko bedago nolene nawiore, larogoni.

<sup>13-19</sup> Ega tara tarabi nde tígua nanolene bedaru uru. Ega parambaguabi bodo hariawe tara tara emene timbuni bedaru bibahendebi ega umi damenego ale bibahendebi ega nene bedarubi ega yári timbuni tara karubi ega dindiha biraga bedarubi ibaha biraga ega habo ale tara tara bedarubi ega ge luhe ngui luhe gabiago ale tara tara bedarubi nolene nawi. Ani bialu dalagamiabi dumaniabi ti aria tara tara bedaru bibahende nolene nawiore laro.

<sup>20</sup> Ema bialu piaga maru gi ge waragariahe babaganehe bedaru nolene bayale ndogo nanalimu laro. <sup>21</sup> Anigo ai mbirale uruni aria maru geme pogolama piagayagua nde balu nolene karulape. <sup>22</sup> Uruni gonalia alebi pagaya damene bedago bibahende emene timbunibi nai holene karulape laro. <sup>23</sup> Ani bialu maru gi gebihe howa babaganebihe bedaru ko bedago nolene nawigo nanalimu.

<sup>24</sup> Ema bialu piaga tara maru bedarubi nde inaga deni tí mo dodo holigo nanalimu. Tígua mbirale ema bialu piaga ko urunialenaga tingini homene ngago ela harimiyaguabi <sup>25</sup> mbirale uruni mbirago mo yalu pirimiyaguabi nde ani biragome ibu inaga deni dodohe kane dege alendo halu ni anda polebira. Agali mbirame uruniale mbira homo ngaria mo yayagua ndeibunaga aga bu kago wayawaya bo waholene nga. Ani biragome ibu inaga deni dodohe kane dege alendo halu ni anda polebira.

<sup>26</sup> Ema bialu piaga damenego tinaga ge giba kirahe ndoyaguabi bulumagame datani maginiha yuwa nagadagua nanagayaguabi ogonialego koore nga lo manda bilimu. <sup>27</sup> Nogo tara tara ge giba kira nahe kago damene bibahende balu nolene nakarulapeore laro. Mbiralime mbirale homene uruni alegonaga tingini ela hayagua nde ti ko kamine dege alendo halu ni anda polebira. <sup>28</sup> Mbiralime ogoni ale mbira homenego mo yalu piyaguaibunaga aga wayawaya bolene nga. Ani wayawaya bayaguabi ibuni dodohe ko kane dege alendo halu ni anda polebira. Ema bialu piaga urunialeme tí mo dodo haga bedagoni.

<sup>29-30</sup> Ema bialu piaga ale marubi nde tia mali bedarubi huru bedarubi guruwalibi gau tara tara bedarubi nolenebi ela holenebi nawiore. <sup>31</sup> Tígua uruni ale mbira homo ngaria ela harimiyagua nde tí inaga deni dodohe kamine dege alendo halu ni anda polebira. <sup>32</sup> Ema bialu piaga dodohe uruni aria mbirago mbirale ngagoriani homo wiagua ogoni ela hayadago nde inaga deni dodohe dege wulebira. Ai mbirale irame wabini tara tara ngagoria homo wiaguabi labolaboni homo wiaguabi nogo bulumaga dongone lagalo wini ngagoria homo wiaguabi nuni homo wiaguabi uruni ale bibahende mbirago ibu biabe tara biaga wiaguabi bibahende homene ela hayadagome inaga deni ko dodohe wulebira. Anigo mbirale ela hayadago ibame wayawaya bo waharimiyaguabi inaga deni ibu dodohe wiaho ngane dege alendo halu ni anda polebira. <sup>33</sup> Uruni ale mbira todobene be dindime wabini ngamigoha anda puwa homo ibiraho wiagua nde todobene be ogoniha ngamigo damene inaga deni ko dodohe dege wulebirago todobene be ogoni pambulo wahalimu. <sup>34</sup> Tomo nolene ale mbira kaware ngagola iba todobene be ogoniha berenegome odoba hayagua nde tomo ogoni inaga deni ko dodohe hayagoni. Iba todobene be ogoniha bedagobi ko dodohe dege birulebira. <sup>35</sup> Mbirale bayale tara tara ngagoria ema bialu piaga uruni mbirago homo paga hayagua nde mbirale uruni inaga deni ko dodohe hayagoni. Ai ira delowa mberedi balawaru hiragane dindime wabini ngagoha homo wiyagua nde mberedi hiragane dindime wabini ogoni mo pambulo wahalimu. <sup>36</sup> Anigo ai ema bialu piaga inaga deni dodohe uruni aria mbira iba hambiaga uli iba bedagoha homo wiagua nde iba ogoni inaga deni mo dodo naholebira. Anigo maru tara ale ngaru ela hayagua nde ela harago inaga deni ko dodoheore wulebira laro. <sup>37</sup> Ai tomo egene wene nahenge ngamigoha mbirale biago

homo ibira hayagua nde egene ogoni inaga deni dodo nahe bayale wiaabo holebira. <sup>38</sup> Anigo ai tomo egene uruni ibaha ngaore dege ema bialu piaga mbira iba ogoniha homo wiagua nde tomo egene biago inaga deni ko dodohe wulebira.

<sup>39</sup> Ema bialu piaga maru ina tihondo nolene karulape larugo uruni aria mbirago bame homene ngaria wali agali mbirame ela hayagua o ela harago ibu inaga deni dodohe holebira. Ani dodohe dege kane alendo halu ni anda polebira. <sup>40</sup> Mbiralime homene biagonaga mbirini ngago podalu nayaguabi homo ngaria mo ya hangu biyaguabi nde o biyagonaga ibu aga karulo kago wayawaya bulene nga. Anigo ibuni inaga deni dodohe kane dege alendo halu ni anda polebira.

<sup>41</sup> Ema bialu dindini ibagabu biraga emene ko biru ngaru tigua uruni minalu nolene nawigo nanalimu. Uruni ti bayale ndo bedago nanalimu laro. Dereparia ale uruni ti inaga deni koore beda lo mitangi bilimu laro. <sup>42</sup> Tombeme piaga uruni ale bedarubi gi ge bibahendeme piaga bedarubi gi ge dewahe bedarubi bibahende ta nabi nanalimu laro. <sup>43</sup> Ainde ema bialu piaga uruni balu narimiyagua tigua inaga deni tini ko mo dodo holeberemigo nanalimu larogoni. <sup>44</sup> I Anduane Homogo tinaga Ngode Datagaliwabeore kogonigo ai tigua mana tiga nabi ngago yu wahalutini ihondo ngialu mana bayale ngago bialu howa inaga deni baya buruguleore halimu. Irane ini hangu baya burugule howa mana ina talialu biaga ngogo bayalebi tigabiorebi biaga kogo manda bialu mbirale tombeme piaga bedarubi nolene nawi laro. Tinaga deni ko dodohe holigo ani bilimu.✱

<sup>45</sup> I Anduane Homogo inime ti Iyibi dindiha hemiria ini tinaga Ngode Datagaliwabeore holenaga haru tagira ibirugoni ndobe. Anidagua birugo mitangi bialu tigua mana tigabi ngaru dege bialu haabo howa wali agali baya buruguleore hole halimu. Ani larogoni irane ini baya buruguleore howa mana inime berogo bayalebi tigabibi bialu kodagua tiguabi bialu halimu larogoni.

<sup>46</sup> Mana ayu dege langirugoni ema bialu piaga damene bibahende ega bedarubi ibaha wena tara tara biru ngarubi dindini ibaga bialu piaga bedarubi uruni bibahendenaga laro. <sup>47</sup> Ani larogo manda bialu tini bayale holenebi tini inaga deni ko dodohe holenebi ngago baya hangu manda bialu mo tale bialu halimu. Ani bialu mbirale ema bialu piaga uruni bibahende baya hanguore tigua nalu holenebi nanaga alebi mo tale bialu halimu, lalu Anduane Homogohanda lene.

## 12

*Walime gali taba hanarangi Anduane Homogonaga deni dodo nahe berelonaga bulene winigo ogo*

<sup>1</sup> Anduane Homogohanda Mosesehondo lamialu lalu, <sup>2</sup> Ina Isaraele wali agali lamialu wali mbirame yamu ko biruwa igiri mbira taba hanayagua ibu horo karu inaga deni dodohe wali ti horo kongi biragagobi beda. <sup>3</sup> Anidagua bialu horo halini haragola igiri gali biagonaga dongone podo mabu bulene nga.✱ <sup>4</sup> Wali igiri gali aiyadago ibuni horo pira tebirani tebira (33) bolangua haragola ibu ininaga deni dodo nahe birulebirago irane ibugua waneigini taba hanayangi darama dewaore piai hayagonaga anidagua bulebira. Ani biruwa mbirale ininaga mo loma biahene ngaru aria mbira ela naholebiraore. Ani buwa inaga Balai Anda kagoha anda nape biraabo halu ibunaga horodago bolangua haragola ininaga deni dodo nahe biruwa anda polebira.

<sup>5</sup> Walime wandari gali taba hanayagua nde ibu horo pira mbirani maria (14) inaga deni dodohe wali ti horo kongi biragagobi beda. Ani bialu ibugua darama dewaore wahayagonaga horo pira waragariani waragaria (66) bira dege bialu mani inaga deni dodo nahe birulebira.

<sup>6</sup> Horo uruni piai haragola waneigini aiya mo bayale holenaga wali ibugua nogo sibi bayale karu aria igini hungubalua mali mbira pene kagobi ega malibu ale mbirabi loma



bule yalu ibulene nga. Ani bialu nogo sibi igini ogoni irani dai helo lomabu bo delalu ega minu yayago ibu ko berenego mo tiga bilonaga loma bialu bo delolene nga. Anidagua bule loma kira ogonilabo yalu inaga Balai Anda kago haneni loma binigo mo miaga agali kategoria yalu ibulene nga. <sup>7</sup> Ani yalu ibiragola loma binigo mo miaga agali kago ibugua nogo ega biagolabo yamialu Anduane Homogo inihondo loma bialu bo delaragola wali biago ibu inaga deni dodo nahe bayale birulebira. Walime wandari taba hanayaguabi igiri taba hanayaguabi mana ogonidagua dege bulene nga.

<sup>8</sup> Anigo ai wali ogoni ibu nogo sibi igini mbira hende holenego muni nayi bereagua nde ibugua ega malibu ale bayale kira minu yalu ibulene nga. Ani biragola loma binigo mo miaga agali kago ibugua ega ogonilabo yamialu mendego irani dai helo loma bialu bo delalu mendego ko berenego mo tiga bilonaga loma bialu bo delolebira. Anidagua bo deledagola inaga deni wali biago ibu dodo nahe bayale birulebira, lalu Anduane Homogohanda lene.✧

## 13

### *Mbirali tinginini dere biyagua bulene mana lowinigo ogo*

<sup>1</sup> Anduane Homogohanda Mosese Aronolahondo lamialu lalu, <sup>2</sup> Wali agali mbirago ibu dere biyaguabi tinginini to halu moge biyaguabi tinginini ge hamua bulenaga pagaya tagira ibiyaguabi urunidagua birago ibu Arono kariayaguabi loma binigo mo miaga agali mbirago kariayaguabi abale haru polene nga. <sup>3</sup> Ani haru poramigola loma binigo mo miaga agali kago ibugua de handalu karia dere bidagoria irini kago pele halu dere tinginiha gua bima anda piyagua nde ogoni ge hamua ale bulenaga bidaria hondolebira. Ani hondowa loma binigo mo miaga biago ibugua de handalu karia mbira derebi kago hondowa ibu Anduane Homogo deni bayale ndo dodohe ka lolebira. <sup>4</sup> Anigo ai ge hamua ale biatagi nahe bulenaga pagaya bidago hondowabi derebi biago tinginini dere bidagoria irini karubi pele nabidaore tinginiha gua bima anda napedaore loma binigo mo miaga agali kago ibugua derebi biago anda mbira kagoha horo karu ibuni hangu ho palu helolebira. <sup>5</sup> Ani helowa loma binigo mo miaga agali biago ibugua horo kaneni lone handalu karia dere bia timbu nahe abale biyagobi dege bidaria handayagua nde horo karu mende hadai bilolebira. <sup>6</sup> Ani bilowa loma binigo mo miaga agali biago ibugua lone horo waragaru howa kanengi handalu karia dere biago bia timbu nahe bu emene hama dai bialu dabi habehe degeyagua nde bame dere damene bidagoni lo manda bulebira. Anidagua manda bialu ibugua mbirali derebi hayago lamialu, <sup>1</sup> Anduane Homogonaga deni dodo nahe bayale kegoni, lalu lamulebira. Anidagua lamiragola agali biago ibugua ibunaga aga wayawaya bialu ibu Anduane Homogonaga deni dodo nahe bayale holebira. <sup>7</sup> Anigo mani howa dere ogoni lone biyagua agali biago ibugua loma binigo mo miaga agali kagome lone hendelo ibu karia polene nga. <sup>8</sup> Ani poragola loma binigo mo miaga agali kago ibugua de handalu karia dere lone bia timbu hayadane handayagua nde ogoni ge hamua ale bida manda bulebira. Ani manda buwa loma binigo mo miaga agali kago ibugua lalu, Ogoni ge hamua ale biyadago ai <sup>1</sup> Anduane Homogonaga deni dodohe kegoni, lalu lamulebira.

<sup>9</sup> Mbirali ibu dere timbuni mbira bu heagua nde loma binigo mo miaga agali karia haru polene nga. <sup>10</sup> Ani haru poragola loma binigo mo miaga agali kago ibugua dere ogoni baya hangu hondolebira. Ani handalu karia dere bidago pele halu dere bidagoria irini kagobi pele dege howa dere ibuni angibu tugudatagi halu heagua <sup>11</sup> ogoni ge hamua aleore bu wiaabo heneyane manda bulebira. Ani manda buwa loma binigo mo miaga kago ibugua, <sup>1</sup> Anduane Homogonaga deni dodohe kegoni, lolebira. Loma

✧ 12:8: Lg 2.24

binigo mo miaga ibugua agali ogoni dodoheoredane handalu wali agali heba mandagi helolene nawi.\*

<sup>12</sup> Ani bialu emene howa dere ogoni bia timbu taraore halu agali biagonaga tingini bibahendehe biame hayagua nde <sup>13</sup> loma binigo mo miaga kagome agali ogoninaga tingini lone baya hangu hondolebira. Ani handalu agali biagonaga tingini bibahendehe pagaya biame heagua nde loma binigo mo miaga biago ibugua agali pagayabi biagohondo lamialu lalu, Í Anduane Homogonaga deni dodo nahe bayale ke, lolebira. Ani laragola agali ogoni ibu dodo nahe bayaleore holebira. <sup>14</sup> Ani lo karia mani howa agali biagonaga tinginiha howa dere timbuni tugudatagi hayagua nde agali ogoni ibu lone dodoheore holebira. <sup>15</sup> Loma binigo mo miaga ibugua lone handalu karia agali biagonaga dere biago bia timbu kane handayagua nde ibugua agali ogoni lamialu, Í Anduane Homogonaga deni dodoheore kegoni, lalu lamulebira. Mbiralali dere timbuni bialu tinginiha bidago dombeni tugudatagi heagua nde ogonidagua bidago ibu dodohe ka lolebira. Dere ogoni alego ko taraore mbira nga. <sup>16</sup> Mani howa agali dere bu hayago ibunaga dere biago dabi halu hununu bidagoria pagabua biyagua nde agali ogoni ibu loma binigo mo miaga biago karia lone dai bulene nga. <sup>17</sup> Ani dai biragola loma binigo mo miaga kagome de handalu karia dere bini hununu biagoria pagabua bialu dabi hayadane hondowa dodo nahe ka manda bulebira. Ani manda buwa loma binigo mo miaga ibugua agali biagohondo, Í Anduane Homogonaga deni dodo nahe bayale harida, lalu lamulebira.

<sup>18</sup> Agali mbiranaga tingini moge ala binigo dabi ho kayagua <sup>19</sup> nde mani howa dere hununu biagoriani tohyu tagira ibalu darama bialu pagabua biyagua agali o biago ibu nde loma binigo mo miaga mbira kagome hendelo ibu karia polene nga. <sup>20</sup> Ani poragola loma binigo mo miaga kago ibugua agua biyadabe hondole moge bini biagoria hondolebira. Ani handalu karia dere biago bia timbu howa kabanaha bima anda pialu dere bidagoria irini pele kago hondowa ibugua agali o biagohondo lalu, Í Anduane Homogonaga deni dodohe kegoni, lalu lamulebira. Moge binidagoria dere bia aribia hene ogoni koorene ko nga. <sup>21</sup> Anigo loma binigo mo miaga kago ibugua handalu karia dere biago emene karulapeni irini kago pela nabi howa dere bidago gua bima anda pobe nahe mani bayale habehedane handayagua nde agali ogoni ibuni hangu anda mbiraha horo karu helo helolebira. <sup>22</sup> Horo waragaru howa kanengi loma binigo mo miaga kagome lone handalu karia dere biago bia timbu hayadane handayagua nde ogoni koore bidago manda buwa ibugua lamialu lalu, Í Anduane Homogonaga deni ko dodohe kegoni, lalu lamulebira. <sup>23</sup> Anigoyu dere hununu biago timbu nahedane handayagua nde bame moge binigonaga motudu nga hondowa loma binigo mo miaga kagome ibuhondo lamialu lalu, Ai Í Anduane Homogonaga deni dodo nahe bayale kegoni, lalu lamulebira.

<sup>24</sup> Anigo mbiralinaga tingini irame denegoria tingini darama bialu pagabua biyaguabi <sup>25</sup> nde loma binigo mo miaga kagome baya hanguore hondolene nga. Ani handalu karia irame dene biagoria irini kago pelayaguabi dere bidago bima anda piyaguabi nde dere koore mbira bidaria hondolebira. Ani bidago hondowa loma binigo mo miaga kago ibugua lamialu lalu, Í Anduane Homogonaga deni bayale ndo ko dodohe kegoni, lolebira. <sup>26</sup> Anigo ai dere binigoria irini karu penale bayale halu derebi timbu naheyagua nde agali ogoni ibuni hangu anda mbiraha horo karu helo helolene nga. <sup>27</sup> Ani helowa horo waragaru howa kanengi loma binigo mo miaga ibugua dere lone agua biyadabe hondolene nga. Ani handalu karia dere bia timbu hayayagua nde dere ogoni koore bidago hondowa ibugua agali ogoni Anduane Homogonaga deni dodohe

\* **13:11:** Hibururu wali agali tigua ge hamua alebi dere duru tara tara bidarubi mini ge hamua dege laga hene. Bi ogoni áyu ina kamangi ge hamua hangu lalu ndo leda.

kagoni lolebira. <sup>28</sup> Ainde dere ogoni timbu nahe biyagobi bu haabo heagua nde agali irame dene hununu bidago handalu motudu dege ngago manda buwa loma binigo mo miaga ibugua lamialu lalu, Ai í Anduane Homogonaga deni dodo naheore bayale kegoni, lolebira.

<sup>29</sup> Wali agali mbiralinaga embonenibi yanga andanehabi duru dere biyagua <sup>30</sup> loma binigo mo miaga kagome baya hangu hondolebira. Ani handalu karia dere kabaneha bima anda pialu dere bidagoria irini kago emene hangu howa ambua biyagua nde ibugua dere ogoni kooredane manda bulebira. Ani manda buwa ibugua waliyaguabi agaliyaguabi lamialu lalu, í Anduane Homogonaga deni bayale ndo dodohe kegoni, lolebira. <sup>31</sup> Ai loma binigo mo miaga ibugua handalu karia dere ogoni kabaneha bima anda nape dere binidagoria irini bayale nahe dege heagua nde waliyaguabi agaliyaguabi ogoni ibu horo karu anda mbiraha ibuni hangu palu helolebira. <sup>32</sup> Horo waragaru howa kanengi loma binigo mo miaga ibugua dere bini biago agua biyadabe lone hondolebira. Ani handalu karia dere bia timbu halu bima andapu nabiyagua irini ambua nabi bayale heagua <sup>33</sup> nde o biago ibugua ibunaga mandari angariyaguabi kago podo wahai halu dere binidagoria dege poda nabi helolene nga. Ani bialu loma binigo mo miaga ibugua agali biago horo karu lone ibuni hangu helo helolene nga. <sup>34</sup> Ani bialu horo waragaru howa kanengi loma binigo mo miaga ibugua dere biyago lone handalu karia emene halu timbu bima anda napeyaguabi nde ibugua o biagohondo lamialu, Ai í Anduane Homogonaga deni dodo nahe bayale kegoni, lalu lamulebira. Ani laragola ibugua ibunaga aga bu hayago wayawaya bialu ibu bayale holebira. <sup>35</sup> Mani dere biago lone bia timbu hayiyagua <sup>36</sup> nde loma binigo mo miaga ibugua lone hondolene nga. Ani handalu karia dere biago biatimbu hayadane hondowa loma binigo mo miaga kagome waliyaguabi agaliyaguabi ogoni dere bidagoria irini kago lone ambua biyadabe hondolene nawi. Ibugua o biago ibu Anduane Homogonaga deni lone dodoheore hayada manda bulebira. <sup>37</sup> Ai loma binigo mo miaga ibugua hondowa walibi agalibi ibunaga dere emene biyagobi dege biaabo halu timbu nahebi dere bidagoria irini bayale ibiyagua nde dere ogoni dabi hayada lo manda bulebira. Ani manda buwa ibugua o biagohondo lamialu lalu, Ai í Anduane Homogonaga deni dodo nahe bayale kegoni, lalu lamulebira.

<sup>38</sup> Wali agali maru tinaga tinginini pagaya biyagua nde <sup>39</sup> loma binigo mo miaga ibugua agua biyadabe hondole baya hangu begelo hondolebira. Ani handalu karia pagayadago peleore ndoyagua nde bame dege binidane manda bulebira. Ani manda bialu karia walibi agalibi ibu dodo nahe bayaleda lolebira.

<sup>40-41</sup> Agali mbirago ibunaga mandari kago bame piai halu mandari nahe heagua ogoni ibu dodohe ndo bayale ka. Ani bialu agali ogoninaga mandari wanakuihayagi piai hayagua nde agali ogoni ibu dodohe ndo bayale ka. <sup>42</sup> Anigo agali ogoninaga hagianeni mandari nahe ngagoria dere biyago darاما bialu pelayagua nde dere ogoni koore biyada manda bulebira. <sup>43</sup> Ani manda bialu loma binigo mo miaga ibugua baya hangu begelo hondolene nga. Ani handalu karia ge hamua ale biagadagua dere darاما bialu peledago handayagua <sup>44</sup> nde dere emboneni bidago koorene ko binidane hondowa ibugua agali dere bu kagohondo, í Anduane Homogonaga deni bayale ndo dodohe kegoni, lalu lamulene nga.

<sup>45</sup> Wali agali mbira ibu dere ko ogoni ale bu heagua ibu aga ko budabagabi ngago mo karulo halu mandari pere nabi helalu ibunaga gime ne hariga pai howa ibugua hongo howa lalu, I ko ge hamuabi kogoni. I ko ge hamuabi kogoni, laga bialu holene nga. <sup>46</sup> Wali agali dere ogonibi bu karu bibahendeore Anduane Homogonaga deni ti bayale ndo dodohe dege haabo holebira. Ani biragola ibugua ibunaga damene bu karu ti tini haga balai anda bu kagoha helalu ibu tagiraha pubagi ho holebira, lalu Anduane Homogohanda lene.

*Aga labolabo ngaruni hagama haragola bulene mana lowinigo ogo*

<sup>47-48</sup> Anduane Homogohanda Mosese Aronolahondo laabo halu lalu, Aga labolabo mbirale ngamirubi nogo sibi irinime wabini ngarubi pu payini baya tara mbirame wabini ngarubi nogo bulumaga dongoneme wabini ngarubi nogo maru maru dongoneme wabini ngarubi uruni ale ngamiruha hagama ho ngane handarimiyagua <sup>49</sup> mbirale ogoni ira yuni dongomi hayaguabi daramabi hayaguabi uruni tigua loma binigo mo miaga karia mo yalu puwa walia holene nga. <sup>50</sup> Ani bialu loma binigo mo miaga ibugua aga ogoni yamialu horo karu anda mbiraha mo ngelolebira. <sup>51</sup> Ani ngelo howa horo waragaru howa kanengi lone handalu karia aga labolabonibi nogo dongone biagoriayaguabi hagama ha timbu hayane handayagua nde ogoni ko dodohe ngagonida manda bulebira. <sup>52</sup> Ani manda buwa loma binigo mo miaga ibugua mbirale uruni hagama hayadago hondowa ge hamua wai hole biagadagua biyadane hondowa wahalu irani dai helo delolebira.

<sup>53</sup> Loma binigo mo miaga agali kagome aga biago handalu karia ko timbu nahe ala wiyagobi dege ngane handayagua <sup>54</sup> nde aga mbirale uruni baya hangu wayawaya bo wahowa horo karu lone mo bagi howa ngelolene nga. <sup>55</sup> Ani ngelowa horo waragaru howa kanengi lone handalu karia aga biagoni buhayagibi mbirahayagibi hagama hayago ha timbu nahe ala wiyagobi dege wiagua ira yuni dongomi hayagobi daramabi hayagobi ereba nahe wiaabo hayagua nde ogoni bayale ndo dodohe dege ngagoni. Anigo loma binigo mo miaga ibugua aga uruni mialu iraha dai helo delolene nga. <sup>56</sup> Anigoyu ibugua horo waragaru howa horo kanengi lone handalu karia aga labolabobi nogo dongoneme wabini agayaguabi wayawaya bu wini biago hagama hayago ereba habehe wiane handayagua nde emene mo ko hayadago hangu podo waholene nga. <sup>57</sup> Ani biragola mani howa hagama ala hayagobi lone hadai biyagua nde wahalu mbirale ogoni anduane kago ibunime irani do tauladaga helo delolene nga. <sup>58</sup> Ai aga hagama hayago wayawaya buwa bayale hayiyagua nde halu mende lone wayawaya bialu aga labolaboyaguabi nogo dongoneme wabini agayaguabi ko nahe bayaleore wulebira.

<sup>59</sup> Mana ogoni aga mbiraleru nogo bulumaga dongoneme wabini ngarubi labolabo ngarubi pu nogo sibi irinime payini ngarubi bibahende mo ko haga biragola bulenego mana ogoni dege ngagoni. Mana ogoni Anduane Homogo inaga deni ogo dodoheda ogo dodo naheda lalu dabolene mana nga, lalu Anduane Homogohanda lene.

## 14

*Ge hamua ale bidago dabi haragola bayale holenaga bulene mana winigo ogo*

<sup>1</sup> Anduane Homogohanda Mosese lamialu lalu, <sup>2</sup> Mana o larodagua wali agali lamibe. Mbirali ibu ge hamua ale bu henego dabi haragola ininaga deni ibu ko dodohe ndo bayale kagoni lelo ibu loma binigo mo miaga agali kago walia hole ibu karia polene nga.✧ <sup>3</sup> Ani poragola loma binigo mo miaga ibugua tinaga balai anda bu karuha tagirahayagi haru pialu baya hangu begelo hondolebira. Ani hondowa ge hamua ale biyago ereba hayiyagua <sup>4</sup> nde ibugua ibuhondo uruale mo yalu ibule pobe lolebira. Uruni ega kira ininaga deni bayaleorebi ira tamia emene gabini mbirabi pu payini daramabi mbirabi ira hisobonaga magane mbirabi yalu ibalimu lolebira. <sup>5</sup> Ani bialu loma binigo mo miaga ibugua wali agali biaruhondo, Iba duguaraga haragoha howa iba hambu yalu dai bialu todobene be dindime wabini ngagoha berelabe, lolebira. Ani bialu mani ega biago darama todobene be biagoha anda pelo nene daligani ega mendego bolelira. Ani baragola darama todobene be biagoha anda polebira. <sup>6</sup> Ani buwa loma binigo mo miaga ibugua ega mende biagobi ira tamia gabini biagobi pu payini daramabi biagobi ira mini hisobonaga magane biagobi bibahende yamialu iba

✧ 14:2: Md 8.4, Mg 1.44, Lg 5.14, 17.14

ega darama birayagoha ibira holebira. <sup>7</sup> Ani buwa mani loma binigo mo miaga biagome agali ge hamua ale bu hene bayale helonaga ibiyago ega darama biagome kahalu tandala ba holebira. Ani biai howa loma binigo mo miaga biago ibugua agali biago lamialu lalu, Áyu í Anduane Homogonaga deni dodo mbira para nahe bayaleore kegoni, lolebira. Ani lowa ibugua ega mende biago yalu tagira puwa yagalo yalu pelo yupe holebira.

<sup>8</sup> Ani biragola wali agali ge hamua ale bu hene biago ibugua ibunaga aga wayawaya balu mandaribi angaribi podo wahai halu ibunibi wayawaya bulene nga. Anidagua biyagua nde o biago ibu ininaga deni dodo mbira para nahe holebira. Ani howa ibugua balai anda bu karuha dai buwa ibuninaga balai anda biagoha abale anda pu nabi horo karu tagirani holene nga. <sup>9</sup> Ani bialu horo waragaru howa kanengi ibunaga mandari angari de hambolene iribi ibu tingininaga iri bibahende podo wahai halu ibunaga agabi ibuni tinginibi wayawaya biai haragola ibu ininaga deni ko mbira para nahe bayale holebira.

<sup>10</sup> Ani bialu horo haliningi o biago ibugua nogo sibi igini wangabe kirabi nogo sibi angibuni mali mbira hangu hene kago mbirabi haru halu ibulene nga. Nogo sibi uruni dere durubi mbira nabi bayale tigabi kago hondowa haru halu ibulene nga. Ani bialu balawa bayaleoreru genda magi kilogarama tebira olibe lininaga weli heba odo biamaga hene ngagobi yalu olibe lininaga weli maru gabo be kiraha berelo yalu lomabu mule yu ibulene nga. <sup>11</sup> Ani yalu ibiragola loma binigo mo miaga kagome inaga deni dodo nahe bayale kego lowa ibugua ge hamua ale bu hene biago haru halu mbirale uruni bibahende lomabu mulenaga yalu ibiragobi mo yalu inaga Balai Anda kago haneni haru polebira. <sup>12</sup> Ani bialu loma binigo mo miaga ibugua nogo sibi igini wangabe mende biago yamialu olibe lininaga weli heba mana ko berolo mitangi nabi howa binigo mo tiga bulenaga loma delolebira. Lomabu delolene uruni bibahende yu howa inaga deni gime yuwa wigiwaga lalu holebira. <sup>13</sup> Ani bialu loma binigo mo miaga ibugua nogo maru ko binigo domo wahelonagabi nogo maru irame dai helonagabi loma bo delolene ngagoria nogo sibi igini wangabe biago haru halu puwa bolebira. Loma binigo mo miaga kagome anidagua bulebira irane mana ko binigo domo wahelonaga nogo sibi loma bialu bo delolene loma binigo mo miaga ibuni milo mirugonidagua mana ko berolo mitangi nabi howa binigo mo tiga bulenaga loma bo delolenebi loma uruni ibunaga dege ina wiabagi ho ngeledogoni. <sup>14</sup> Ani buwa loma binigo mo miaga biago ibugua nogo sibi daramame wali agali biago dodo nahe helonaga gi tighayagi hale teneha hai halu ge tighayagi ge angibiyane kago hai halu gi tiganaga gi angibiyane kagobi hai halu bulebira. <sup>15</sup> Ani bialu loma binigo mo miaga ibugua olibe lininaga weli emene mbira ibuninaga gi leha habeni odo wulebira. <sup>16</sup> Ani buwa gi tiganaga gi hondoneme weli biagoha ibira halu wai howa Anduane Homogo ininaga deni kahalu tandala ba holene nga. <sup>17</sup> Ani buwa ibugua olibe lininaga weli ibuninaga gi habeni wiyago mialu wali agali inaga deni dodo nahe bayale helo biagonaga gi tighayagi hale teneha nogo darama helayagoria hela dambi halu gi angibiyane tighabi ge angibiyane tighabi darama wai hayagoria weli biago hela dambi haga bulebira. <sup>18</sup> Ani buwa weli emene ibuninaga gi habeni odo wiyago ibiraho ngagome wali agali biagonaga hagianeni dege odo wulebira. Anidagua biragome o biago inaga deni ko mbira ibuha para nahe helonaga anidagua bulebira.

<sup>19</sup> Anidagua biai halu loma binigo mo miaga ibugua wali agali biagonaga ko binigo domo wahelonaga loma biago bo delaragola o biago ibu inaga deni ibuha ko mbira para nahe bayaleore holebira. Ani buwa mani loma binigo mo miaga ibugua irame dai helo loma bialu bo delolenenaga nogo sibi igini mende bo delolebira. <sup>20</sup> Ani bialu loma binigo mo miaga ibugua nogo sibi igini ogoni loma bo delowa widibi lomabu delaga dabu ngagoria loma bialu delolene nga. Ani bo delowa ibugua wali agali biagonaga ko



domo wahelo ogonidagua biragola inaga deni o biagoha ko mbira para nahe bayaleore holebira.

<sup>21</sup> Mbirali ibugua mana ko berolo mitangi nabi howa binigo mo tiga bulenaga loma bo delole munime mulenego muni nawi yagibano kayagua nde nogo sibi igini wangabe mbiraore hangu minu yalu ibulene nga. Wali agali o biagome ko binigo mo tiga bulenaga loma binigo mo miaga kagome nogo sibi igini ogoni podo yuwa ininaga deni gime wigiwaga lalu lomabu ngulebira. Ani bialu balawa bayaleoreru genda magi kilogarama mbira olibe lininaga weli heba odo biamaga hene ngagobi mo yalu olibe lininaga weli maru gabo be kiraha berelowa lomabu mule yalu ibulene nga. <sup>22</sup> Ani bialu ibugua ega malibu ale kira minu yalu ibalu lomabu mulene ngago irane ibu munime nogo sibi kira hende holenego muni ya nabi heagua ani bulene nga. Ega mbirago ko binigo domo wahelonaga loma bialu bo delalu mendego irame dai helo lomabu yalu ibulene nga.

<sup>23</sup> Horo halini ibuni mo bayale helolene ogoni tagira ibirangi ibugua loma uruni yalu loma binigo mo miaga biago Anduane Homogo inaga Balai Anda haneni ininaga deni yalu ibulene nga. <sup>24</sup> Ani yalu ibiragola loma binigo mo miaga ibugua nogo sibi biagobi olibe lininaga weli biagobi ibunaga giha mo yuwa Anduane Homogo ininaga deni wigiwaga lalu holebira. <sup>25</sup> Ani bialu loma binigo mo miaga kagome wali agali ge hamua ale bu hene biagome mana ko berolo mitangi nabi howa binigo mo tiga bulenaga nogo sibi igini lomabu mialu bolebira. Ani bowa loma binigo mo miaga ibugua nogo sibi darama ngago gime yu howa wali agali ibiyagonaga hale gi tigahayagi kagonaga teneha hai halu gi tiganaga angibiyane kago hai halu ge tiganaga angibiyane kagobi hai dege halu bulebira. <sup>26</sup> Ani buwa loma binigo mo miaga kago ibugua olibe lininaga weli biago emene mbira ibuninaga gi leha habeni odo wulebira. <sup>27</sup> Ani odo wialu Anduane Homogo ini deni howa ibugua gi tigahayaginaga gi hondone mbira hangume weli gi habeni odo wiyagoha ibira howa kahalulu tandala bahaga bulebira. <sup>28</sup> Anidagua biai howa loma binigo mo miaga ibugua olibe lininaga weli biagome wali agali biagonaga hale tenehabi gi angibiyanebi ge angibiyanebi bibahende gi tigaha dege dege abale nogo darama hai hayagoria welime hai hadambi holebira. <sup>29</sup> Ani biai howa ibugua weli gi habeni emene ibiraho ngagome wali agali ko domo wahelo ibiyagonaga hagianeni odo wulebira. Ani biragola wali agali ogonime ko binigo domo wahelonaga loma bialu bo delolebira. <sup>30</sup> Ani bulenaga loma binigo mo miaga ibugua wali agali ko binigo domo wahelo ibiyagome ega malibu ale kira lomabu mule minu yalu ibiyago mbirago yamulebira. <sup>31</sup> Ani yamuwa ega mbirago ko binigo domo wahelonaga loma bialu bo delalu mendego irame dai helo loma bialu bo delolebira. Ani bialu widi lomabu delolenegobi ega kira biago heba bo delolebira. Anidagua biragome inaga deni wali agali biagoha ko mbira para nahe bayaleore hole ibiyagonaga ko domo wahelo loma binigo mo miaga kagome lomabu delolebira.

<sup>32</sup> Mana ogoni mbirali ibu ge hamua ale binigo dabi halu inaga deni bayale holenaga lomabu delole yalu ibulene yolo mulene muni nawidagola ogonidagua bulene nga, lene.

*Anda tamuha hagamame mo ko ho wiago waholene mana winigo ogo*

<sup>33</sup> Anduane Homogohanda Mosese Aronolahondo lamialu lalu, <sup>34</sup> Mani tí Kenana dindi ina mo ngule ngogoria pu holeberemi. Dindi ogoni tinaga lene wiaabobo bu wulebira. Ai tí dindi ogoniha pu kamingi anda maru kago tamuha hagama holene mbira ibilaruyagua <sup>35</sup> tí de handalu anda ogoni anduane hayadago ibunime loma binigo mo miaga agali karia polene nga. Puwa ibuhondo lalu, I andagaha hagama mbira hatagi ho ngago ina de handarugoni, lalu lamulene nga. <sup>36</sup> Anidagua lamiragola loma binigo mo miaga kagome hale howa anda anduane biagohondo lamialu, Anda ogoni i de hondole ibulebero. I de hondo naibidoha inaga dabudabu wiridaruni mo yu tagira

piiai habe, lolebira. Ani larago hale halu bibahende mo yu tagira napeyagua loma binigo mo miaga ibugua lalu, Anda ogoniha dabudabu yalu tagiraha nape ngaru bibahende Anduane Homogonaga deni ko nga, lolebira. Ani lamialu loma binigo mo miaga biagome anda tamuha de hondole polebira. <sup>37</sup> Ibugua anda tamuha anda puwa mbirale anda háini hagamame hatagi halu mo ko hayadago de hondolebira. Ani de handalu mbirale ira yuni handalehebi daramabirumebi anda hái mo togo bia howa diri tombela andatagi bidago hondowa ogoni anda kabanaha bima anda peda lo manda biyagua nde <sup>38</sup> loma binigo mo miaga ibugua tagira puwa lalu, Horo karu wali agali anda ogoniha napale bameore ngelalimu, lolebira. <sup>39</sup> Ani lalu puwa horo waragaru howa kanengi loma binigo mo miaga ibugua lone dai bialu anda biago de hondolebira. Ani hondowa anda hái biago mo ko timbuni hayadane dehandayagua nde <sup>40</sup> ibugua tihondo lalu, Anda ogoninaga hái bini ege tole mo ko hayadago bo gialalu tano tagirahayagi mbirale Anduane Homogo ininaga deni ko ngaru mo yu wahaga ngagoha yu wahole pudaba, lolebira. <sup>41</sup> Ani bialu anda hái biadambi hene ege timeni anda háinaga ege tole wabu dambi halu bu mabu bini kago bo dodai holebira. Ani biai halu mo yalu puwa tanonaga tagiraha ko yu wahaga ngagoha mo wahai holebira. <sup>42</sup> Anidagua biai howa ege tolebi timenibi giallo wahayago gahengeme bia aribia holebira. Timeni gahengeme anda hái lone para hadambi halu bulene nga lolebira.

<sup>43</sup> Anda gialowa lone bia dai bidamigola ala mo ko hayadagua dege lone mo ko hayagua nde <sup>44</sup> loma binigo mo miaga biagome lone de hondole dai bulebira. Ani handalu karia anda biago mo ko habeheoredane handayagua nde ibugua lalu, Anda ogoni inaga deni ko kagoni, lolebira. <sup>45</sup> Ani kago manda bialu timenibi ege tolebi irabi bibahende anda ogoni bini damene kago mbira ibira nahelo mo yai halu amura tagiraha mbirale inaga deni ko ngaru yu wahaga ngagoha yalu pu waholene nga. <sup>46</sup> Anda ogoniha anda napole lalu panga payidaha mbirali anda piyagua ogoni ibubi inaga deni ko dege kane alendo holebira. <sup>47</sup> Mbirali anda ogoniha napole layago lelowa tomo nalu birayaguabi anda ogoniha paliyaguabi nde ibunaga aga wayawaya bulene nga.

<sup>48</sup> Anigo mani loma binigo mo miaga biagome anda ogoniha lone anda puwa handalu karia anda hái biago bayale halu hagama biago ha timbu nahedane handayagua nde ibugua lalu, Anda ogoniha hagama biago ereba hayadago ai Anduane Homogonaga deni bayale ka, lolebira. <sup>49</sup> Inaga deni anda biago mo bayale helonaga mana ogodagua bulene nga. Loma binigo mo miaga biagome ega kirabi ira tamia emene gabini mbirabi pu payini daramabi mbirabi ira hisobonaga magane mbirabi mo yulebira. <sup>50</sup> Ani bialu iba duguaraga haragoha howa iba hambialu yu dai bulebira. Ani hambu yudai bialu todobene be dindime wabini ngagoha berelowa ibugua ega mende biago todobene be iba bere biagoha darama anda pelo nene daligani bolebira. Ega ogoni baragola darama todobene be iba birayagoha ibira holebira. <sup>51</sup> Ani ibira ho bedagola loma binigo mo miaga ogonime ira tamia emene gabini biagobi ira hisobo magane biagobi pu payini daramabi biagobi ega mende ba nabini biagobi bibahende gime hila magamaga bu yuwa iba ega darama heba birayagoha abaleore ibira halu yamulebira. Ani buwa iba ega darama heba wai ho yayagome anda biagoha kahalulu tandala bahaga bulebira. <sup>52</sup> Loma binigo mo miaga biago ibugua anidagua biragome anda ogoni ko nahe inaga deni bayale holebira. <sup>53</sup> Ani bialu ega mende ba nabi dére minu yu hayago ibu tano yu wahalulu amura ibuni biraga dangi te ngagoha yagalalu pelo yupe holebira. Ogonidagua biyagome anda ko hayadago domo wahalulu inaga deni bayale helonaga bulene mana ogoni.

<sup>54-56</sup> Mana uruni wali agalinaga tinginini warago ale tara tara ngarubi ge hamua pagayabi karubi dere durubi karubi moge tiwabi karubi nahendene ale tinginini tagira ibu karubi mbiraleme agaru andaru hagama hagarubi uruni damenego tagira ibiragola

bulene wini. <sup>57</sup> Mana ogonime ininaga deni mbirale ko nga bayale nga lalu mo walia haga bulebira, lalu Anduane Homogohanda lene.

## 15

### *Tinginiha howa ko maru tagira piagonaga mana lowinigo ogo*

<sup>1</sup> Anduane Homogohanda Mosese Aronolahondo lalu, <sup>2</sup> Isaraele wali agali karu lamialu ogodagua lalibu. Agali mbirame warago tara balu ibunaga pinduha howa angibu tagira ibiyagua ogoni biragome agali ogoni inaga deni ko ka. <sup>3</sup> Angibu ogoni dewa iba poradagua piyaguabi angibu ogoni giambe howa pu tolenego hariga ndibu layaguabi agali ogonidagua bini kago ibu inaga deni ko ka. <sup>4</sup> Ibu paliagane dagia ngagoriani paliyaguabi biragane dagia ngagoriani birayaguabi bibahende ibugua mo ko hene dege nga. <sup>5-6</sup> Anigo mbiralime agali ogoninaga paliagane dagia ngago ela hayaguabi ibunaga biragane dagia ngagoriani birayaguabi o ani biyadagonaga ibunaga aga tinginibi abale wayawaya bulene nga. Anigo ibu ko kane dege alendo ni anda polebira. <sup>7</sup> Wali agali mbirame agali warago ogoniale bu kago ela hayagua nde tinaga agabi tinginibi wayawaya bo waholene nga. Ani bialu ti horo ogoningi dodo ogoni ha ho kane dege alendo ni anda polebira. <sup>8</sup> Agali waragowi biagome agali mbira ibu inaga deni ko nahe bayale kago hamiaga toloba hayagua nde ibubi inaga deni mo ko henego ka ai ibunaga aga wayawaya bialu ibunibi wayawaya bulene nga. Ani bialu ogoni ibu dodo ha ho kane dege alendo ni anda polebira. <sup>9</sup> Ani bialu agali warago tara ogoni barago ibu nogo dongi hosirunaga erekunini biragane nogo dongoneme wabini birayagua nde biragane ogonibi ko dodohe dege ho wulebira. <sup>10</sup> Agali ogoni ibu birayagoria mbiralime mbirale ngago ela hayagua nde agali ela haga kago ibubi ko dodohe dege kane alendo halu ni anda polebira. Agali mbirame mbirale agali waragowi abale birayago ogoni mo yalu piyagua nde agali ogoni ibubi ko dodohe dege holebira. Anigo ibugua ibunaga aga wayawaya bialu ibuni tinginibi wayawaya bulene nga. Ani bialu ibu ko dodohe kane dege alendo halu ni anda polebira. <sup>11</sup> Agali warago tara ogonibiwi kagome ibu gi wayawaya nabi howa agali mende bayale kago ela hayagua nde agali bayale ogoni ibugua ibunaga aga wayawaya balu ibunibi wayawaya bo polene nga. Ani bialu ibuni ko dege kane alendo halu ni anda polebira. <sup>12</sup> Agali warago ogonialewi kagome todobene be dindime wabini ngago ela hayagua nde be ogoni bo pambulo waholene nga. Ani bialu ndisi be irame wabini ngago ela hayagua nde ndisi be ogoni baya hangu ibame wayawaya bulene nga.

<sup>13</sup> Ani buwa agali ogonibi kagome warago tara ogoni dabi hayagua nde ibu horo karu howa mani ibu dodo nahe bayale holenaga mo tiga bulebira. Horo karu piai haragola ibunaga aga wayawaya bo wahalu ibuni tinginibi iba poragoha wayawaya bo poragola nde ibu Anduane Homogonaga deni dodo nahe bayale holebira. <sup>14</sup> Horo haliningi agali biago ibugua ega malibu ale kirayaguabi ega mendeale kirayaguabi minu yalu puwa Anduane Homogonaga Balai Anda kagoria yalu puwa anda haneni loma binigo mo miaga kagohondo mulene nga. <sup>15</sup> Ani miragola loma binigo mo miaga ibugua ega mbirago ko domo wahelonaga loma bialu bo delalu mendego irani dai helo loma bialu bo delai holebira. Anidagua biragome loma binigo mo miaga ibugua agali ogoni ibu warago dabi halu Anduane Homogo inaga deni dodo nahelonaga mana bulebira.

<sup>16</sup> Agali mbira ibu mbiraga u padaha emaga handalu karia ibunaga ibane bame tagira piyagua nde agali ogoni ibu dodohe kago manda bialu ibunaga tingini bibahende wayawaya bai holene nga. Ani bialu ibu dodohe dege kane alendo halu ni paliragola bayale holebira. <sup>17</sup> Ibunaga ibane ogoni aganiyaguabi mbirale maru ngaruniyaguabi mbirale nogo dongoneme wabini ngagoniyaguabi mbirani ibira hayagua nde mbirale uruni wayawaya biai holene nga. Ani biragola ogoni alendo halu dodohe dege kane ni paliragola bayale holebira. <sup>18</sup> Wali agali kirali mandagi padebira agalinaga ibane tagira

ibiyagua nde libu haru dodohe holebira. Ani biragola libu haru heyalu wayawaya bo polene nga. Ani bialu libu dodohe dege kane alendo halu ni paliragola bayale holebira.

<sup>19</sup> Wali mbira ibu ege habolo bedangi nde ibu horo karu dodohe biraabo holebira. Mbiralime wali ogoni ela hayagua nde ibubi dodohe dege halu ni paliragola bayale holebira. <sup>20</sup> Wali ogoni ibu bira palia biaga dagiabi bibahende dodohe dege wiai holebira. <sup>21-22</sup> Mbiralime wali biagonaga biraga paliaganebi dagia ngago ela hayagua nde ela haga biago ibu dodohe holebira. Ani holebirago ai ibunaga aga wayawaya balu ibunibi ibaha wayawaya bo polene nga. Ani bialu ibuni dodohe dege kane alendo halu ni paliragola ibu bayale holebira. <sup>23</sup> Aga paliaga hanguyaguabi marualebi wali ogoni ibu biraga ngagobi ela hayagua mbirali ogoni ela harago ibu dodohe howa ni paliragola bayale holebira.

<sup>24</sup> Agali mbira ibu wali ege habolo bedagola mandagi paliyagua nde agali ogoni ibu dodohe kane horo karu holebira. Ani bialu dagia ibu paliaga ngagobi nde dodohe dege horo karu holebira.

<sup>25</sup> Wali mbira ibu ege habolo biragadagua ndo mendengi handa aribia hayaguabi ibu horo lu dewa biraabo hayaguabi nde ibu dodohe dege horo lu bedane ereba harangi wahole ibu ege habolo biragadagua biraabo holebira. <sup>26</sup> Dagia ibu bira pali biaga ngagobi bibahende dodohe dege wiai holebira. <sup>27</sup> Mbiralime dagia uruni ela hayagua nde ibubi dodohe dege holebirago ibunaga agabi ibunibi ibame wayawaya bulene nga. Anigo ibu dodohe dege kane alendo halu ni paliragola bayale holebira.

<sup>28</sup> Wali ege habolo birayago horo bolangua haragola ibu horo karu biralu mani Anduane Homogonaga deni ibu dodo nahe bayale birulebira. <sup>29</sup> Horo halini haragola ega malibu ale kira minu yalu Anduane Homogonaga Balai Anda kago haneni puwa loma binigo mo miaga kagohondo mulene nga. <sup>30</sup> Ani miragola loma binigo mo miaga kagome ega mbirago ko domo waholenenaga loma bialu bo delalu mendego irani dai helo loma bialu bo delolene nga. Anidagua biragome wali biago ibu Anduane Homogonaga deni dodo nahe bayale berelo anidagua bulebira.

<sup>31</sup> Isaraele wali agalirume tini Anduane Homogonaga deni dodohe holigo lowa mo dodo hagane ngagoria polene nawi. Ani polene nawigo irane inaga Balai Anda ogoni tinaga balai anda bu kagoria dege dombeneha kago ti inaga deni dodohe kangi anda ogoniha piyagua tigua inaga Balai Anda kago mo mebia harimigonaga ti homelo bo waholene wulebira, Anduane Homogohanda Mosese Aronolahondo ani lene.

<sup>32</sup> Mana uruni agalinaga tinginiha howa angibu ale tagira ibiyaguabi agalinaga ibane bame padaha tagira piyaguabi ogonidagua biragome agali mo dodohe haga kago mana urunidagua bulene nga. <sup>33</sup> Ani bialu wali ibu ege habolo bedangibi wali agalibi tinaga tinginiha angibu ale tagira ibiyaguabi agali ibu wali ege habolo bedagola libu haru mandagi paliyaguabi uruningi tigua bayale holenenaga bulene mana uruni lo winigo nga.

## 16

### *Ko Domo Waholene Horo harangi bulene winigo ogo*

<sup>1</sup> Anduane Homogohanda Arono igini kira biago labome loma bu mulene winingi ndo mana puguwa mbirale loma bialu hearia bo homelene. Ani bu howa Anduane Homogohanda Mosesehondo lamialu lala, <sup>2</sup> Inaga hamene Arono lamialu Anduane Homogonaga Hobane Loma Bia Heneore labolabome tu wuwa hoba amu kagoha Habo Nalolene Bi lo winigonaga Mbogoyi ngagoria ibuni hameme poa biradagua polene nawi lamibe. Polene winingi ndo ibuni hameme ibiyiyagua homolebira. Homolebirago irane Habo Nalolene Bi lo winigonaga Mbogoyi ogoni wali agalinaga ko biniru domagane panga ogoriani ini hari beralibaha howa ha pani haruli. Anigo ina larogonidagua ibu

nabiyagua homolebira lamibe.✧ <sup>3</sup> Ibugua Hobane Loma Bia Heneore biagoha ibule harangi nogo bulumaga wangabe mbira ibunibi ibu one waneiginirubi tinaga ko ina domo waholiya bo yalu mende nogo meme wangabe mbira irani bo delai hole haru halu ibalu anda polene nga lalu lamibe, lene.✧

<sup>4</sup> Anduane Homogohanda bi ogodagua lalu, Arono ibugua Hobane Loma Bia Heneore biagoha anda pu nabi howa ibuni ala wayawaya bulene nga. Ani buwa ibugua loma binigo mo miaga biabe bulenaga darasi tubagibi aga bia gimbubi nogo dongonebi labolabo emboneni bobu mabu bialu karulolene nga.

<sup>5</sup> Isaraele wali agali tigua nogo meme wangabe kira tinaga ko ina domo waholiyanaga haru ibalu nogo sibi wangabe mbirabi irani bo delai helo haru ibuwa Aronohondo mulene nga. <sup>6</sup> Ibugua nogo bulumaga wangabe mbira ibuninagabi ibu one waneigininagabi ko domo waholiya bolene nga.✧ <sup>7</sup> Ani buwa ibugua nogo meme wangabe biagolabo haru halu Anduane Homogo lola holenaga Balai Anda haneni haru polene nga. <sup>8</sup> Anda hane ogoriani howa ibugua tole kira hame dabagane biago labome hame dabagane mana wiyadagua dabolene nga. Tole mbira Anduane Homogonaga dabile howa dabagane mana wiyadagua dabalul tole mende Asaselenaga dabile dabagane mana wiyadagua dabolene nga.\*

<sup>9</sup> Arono ibugua nogo meme wangabe mendego Anduane Homogonaga lowa tole mbira biagome dabene biago wali agalinaga ko ina domo waholiya bolene nga. <sup>10</sup> Nogo meme wangabe mende Asaselenaga lowa dabene biago dere kaore Anduane Homogo kagoria haru ibulene nga. Ani buwa ogoni haru halu pialu dindi ko wali agali nahaga mbira ngagohayagi puwa wara pelolene nga. Ani biragola wali agalinaga ko biyaru nogo meme wangabe biagome mo yalu puabo helo ani bulene nga.

<sup>11</sup> Arono ibuninagabi ibu one waneigininagabi ko domo wahelonaga ibugua nogo bulumaga wangabe biago loma bialu bo muwa <sup>12</sup> ibugua lomabu delaga dabu ira do wiaga ngagoria howa ira pungane dedaore duguwa ira hedo yagani tabo wulebira. Ani buwa ira hagua ngabi biaga mini inisenesinaga pauda gi kira yulene mo yulebira. Mo yalu Anduane Homogonaga Hobane Loma Bia Heneore labolabome tu hoba amu ho wiyagoha yalu Aronohanda anda polene nga. <sup>13</sup> Ani buwa ibugua Anduane Homogonaga deni hagua ngabilonaga inisenesi ira dedagoria ogoriani delolebira. Ani delaragola hagua ngabi biragome Habo Nalolene Bi lo winigonaga Mbogoyi wali agali ko biniru domagane panga ngagoria dinguame holebira. Anidagua biragome Arono ibu panga biago nahende howa ibu nahomolebira. <sup>14</sup> Arono ibugua nogo bulumaga wangabe bayagonaga darama maru yamuwa Habo Nalolene Bi lowinigo Mbogoyi ogoriani yalu puwa wali agalinaga ko biniru domagane pangani ibunaga gi hondoneme darama maru odo tindi tanda lolene nga. Ani buwa Mbogoyi biagoha hapara howa ibunaga gi hondoneme darama maru lone kahalul odo tindi tanda lolene nga.

<sup>15</sup> Ogoni biai howa wali agalinaga ko biniru domo wahelonaga ibugua nogo meme bole haru ibiyago bowa darama yamuwa Hobane Loma Bia Heneore labolabome tu hoba amuhu wiyagohayagi yalu puwa nogo bulumaga wangabe biagonaga daramame ala biyadagua tindi tanda lolene nga. Ibugua wali agalinaga ko biniru domagane panganibi Mbogoyi biago ngagoria hapara howabi ibunaga gi hondoneme darama halu mende tindi tanda lolene nga.✧ <sup>16</sup> Arono ibugua anidagua biragome Isaraele wali agalirume ko tara tara biyarubi Hobane Loma Bia Heneore biago tigua mebia hayagobi domolene wulebira. Balai Anda o biago wali agali tini kagoria kago mebia hayarunaga ko domalu mo baya holenaga ogonidagua dege bulene nga. <sup>17</sup> Horo ogoningi dege Arono ibu Anduane Homogonaga Hobane Loma Bia Heneore biagoha ko domole anda pu kaha wali agali mbirali Arono kagoria anda polene nawiore. Hobane Loma Bia

✧ **16:2:** Hi 6.19 ✧ **16:3:** Hi 9.7 ✧ **16:6:** LBM 9.7, Hi 5.1-3, 7.27-28, 9.7 \* **16:8:** Asasele gilibu ngago dama Heyolabenaga minibe be dama mendenaga minibe tobaho kama. ✧ **16:15:** Hi 9.12



Heneore ogoniha howa Arono ibuninagabi ibu one waneigininagabi Isaraele wali agali bibahendenagabi ko domo wahai helonaga mana ngadagua biai holene nga. <sup>18</sup> Ani biai halu tagira puwa ibugua bo lomabu delagane dabu ngagoria puwa Isaraele wali agalinaga ko binirume mo dodo hene ngago ogoni domole mana biagane wiyadagua bulene nga. Nogo bulumaga biagonaga daramabi meme mbira biagonaga daramabi yamuwa lomabu delaga dabu ngagonaga gibuni maria ngagoria bulumaga ne gayane ale maria karuni daramame hai holene nga. <sup>19</sup> Ibugua darama uruni gi hondoneni wai howa dabu tindi tanda la ai nai bialu kahalul hirulene nga. Ani biragome Isaraele wali agalinaga mana ko tara tara biyarume dabu biago mo dodo ho wiyagoni darama ogonime mo baya halu lomabu dai buwa ngelolebira.

*Meme mende dére hayagome wali agalinaga ko yalu pelaganego te ogo*

<sup>20</sup> Aronohanda Anduane Homogonaga Hobane Loma Bia Heneore biagonagabi Balai Anda biagonagabi lomabu delaga dabunagabi ko domai helonaga mana wiyadagua biai howa ibugua nogo meme mbira dére Asaselenaga dabo helayago Anduane Homogo deni haru ibulene nga. <sup>21</sup> Ani buwa Arono ibugua meme dére biagonaga hagianeni ibunaga gi kirabali wialu Isaraele wali agalime mana ko biyarubi bi mana mo wahayarubi lapani halu uruni bibahende meme biagonaga hagianeni lo ngelai helo. Ani buwa ibugua meme biago dindi ko wali agali nahaga ngagoha agali biabe ogoni bule dabo helenedagome haru halu puwa wara pelolene nga. <sup>22</sup> Meme biagome tinaga ko bibahende lo wiai hayaru mo yai halu dindi ko wali agali nahaga ngagoha dai nabule pu wahalul puabo holebira.

<sup>23</sup> Arono ibugua uruni biai halu Balai Anda biagoha lone anda puwa Anduane Homogonaga Hobane Loma Bia Heneore biagoha ala pole lowa loma binigo mo miaga agalime karulagane aga horo ogoningi biyago golo ngelolene nga. <sup>24</sup> Ani buwa ibuni dongone ogoningi dege wayawaya бага wiyagoria waya bialu dai buwa aga ibuni horombe bu haga wiyago bulene nga. Ani buwa ibuninagabi wali agali bibahendenagabi ko domo wahai helo bo mulene kira dabu wiyagoni irani dai helo delolene nga. <sup>25</sup> Ko biyarunaga nogo habane delaga wiyagobi lomabu mini delaga dabuni biagoria delolene nga. <sup>26</sup> Agali mbira meme wali agalinaga ko mo yalu porago haru halu puwa wara pelaga biago ibubi ibani puwa ibunaga agabi ibunibi wayaore biai halu wali agali kagoria dai bibehe holebira. <sup>27</sup> Bulumaga wangabe meme wangabe bo mini biagolabonaga darama Anduane Homogonaga Hobane Loma Bia Heneore biagoha wali agalinaga ko domo wahelonaga yalu anda ibiyago labo wali agali balai anda bu kagoria howa tagirahayagi yalu tagira polene nga. Ani buwa nogo biago labonaga dongonebi mbirini podo ibira ibira bini ngarubi nogo tinibi bibahende ira dalu do mundulo wahelolene nga. <sup>28</sup> Agali ogoni delaga kago ibunibi ibunaga agabi wayaore bayuwa balu howa wali agali kagoria dai bibehe holebira, lalu Anduane Homogohanda lene.

*Ko Domo Waholene Horo harangi mana bulene winigo ogo*

<sup>29</sup> Anduane Homogohanda, Mana ogodagua biaabo holene nga, lene. Ko domo wahelonaga mana bulene ogo galoneda lowa manda bu haabo halimu. Ege kanegonaga horo pinini Isaraele wali agalirubi dindi tara tara wali agali tí heba mandagi íbu kamirumebi horo ogoningi haragola tomo nane howa biabe nabi halimu. <sup>30</sup> Horo ogoningi wali agalime horo bibahendeni ko biyaru Anduane Homogohanda domo wahelonaga loma binigo mo miaga kagome bo lomabu mulene ngadagua miragola tí Anduane Homogo deni dodo nahe holeberemi. <sup>31</sup> Horo ogoni dabo bagi hene mbira wuwa ogoningi tomo mbira nane halu biabebi nabi holeberemi. Ani bialu mali bibahendeni horo ogoninaga ko domolene mana ngadagua biaabo holeberami. <sup>32</sup> Loma binigo mo miaga haguane timbuni ibu ha aribia holene tu haragola ibu igini dabalul ibu

☆ 16:23: Ese 44.19 ☆ 16:27: Hi 13.11 ☆ 16:29: LBM 23.26-32, Dag 29.7-11

aba henegoria ha aribia helo tígua dabo helalimu. Ani heledamigola ibugua wali agali bibahendenaga ko biyaru domo wahelonaga mana lowini ngadagua biai holene nga. Ani bule ibugua loma binigo mo miaganaga aga karulowa <sup>33</sup> Anduane Homogonaga Balai Anda Hobane Loma Bia Heneore biagohabi Balai Andaha bibahende ngarubi lomabu delaga dabu biagobi loma binigo mo miaga agali biarubi wali agali bibahende biarubi inaga deni dodo nahe hole biagane mana wiyadagua biai holene nga. <sup>34</sup> Mana o lo werogoni tígua bulene horo haragola pugu wanahe bayuwaore handayaho howa biaabo halimu. Loma Binigo Mo Miaga Haguane Timbuni ibugua mali mbira mbira haragola Isaraele wali agalinaga ko biyaru domo waholene mana biai holebira.

Anduane Homogohanda bi uruni Mosesehondo lamiyagola layadagua Mosese ibugua biai hene.

## 17

### *Lomabu mulene Anduane Homogonaga Balai Andaha hangu mo wilimu lenego ogo*

<sup>1</sup> Anduane Homogohanda Mosesehondo lalu, <sup>2</sup> Arono halu ibu iginirubi Isaraele wali agalirubi bibahendehondo bi ogo lamibe. Anduane Homogo ina inaga bi mana uru tihondo ngerogoni. <sup>3</sup> Isaraele wali agali tígua nogoru balu nole howa nogo bulumagayaguabi sibiyauguabi memeyaguabi tinaga balai anda bu kamigoha howabi tagiraha howabi bame nabalimu. Bame bope harimiyaguabi inaga mana puguarami. <sup>4</sup> Ininaga Balai Anda kagoha anda haneni ihondo ala lomabu ngule yalu naibirimiyagua nde tígua darama bame pelarimigoni. Ani birimiyagua tígua wali agali bo waharadagua beramigo ti inaga wali agali karu baba mandagi nahe ti tara ka lalu bo batagi holebero. <sup>5</sup> Mana ogoninaga irane ogo. Abale Isaraeleali tígua nogo mbiraleru tini tagira kamigoha howa loma beramili. Anigo áyu loma binigo mo miaga agali karia ininaga Balai Anda haneni yalu ibuwa Anduane Homogoinila ho gimbu bulenaga bo lomabu delaga bilimulo mana ogoni lo wero.

<sup>6</sup> Anidagua beramigola loma binigo mo miaga karu tigua nogo uruninaga darama hambu yuwa balai anda biagonaga anda harabani lomabu delaga dabu kagonaga lenelene odo ba haga bulebira. Ani bialu nogo abene habaneru lomabu delaga kagoria delaramigola loma uruninaga tumutumumu ngabi bayale birago nga howa Anduane Homogo ina miniha turu halu dungulo holebero. <sup>7</sup> Isaraele wali agali tígua i erembira ngialu nogo mbiraleru balu dama nogo meme handalehe kagohondo bo mulene nawiore. Ai bibahendengi tinaga damene mbirame loma bini mbira mbira yalu inaga Balai Anda kagoria yalu ibulene nga.✧

<sup>8-9</sup> Isaraele wali agaliyaguabi dindi tarali ti baba heneyaguabi tígua loma bini mbira irame dai helo bo delole yalu ibule heaguabi ihondo loma maru bu ngule heayaguabi tigua loma uruni inaga Balai Anda kagonaga harabani ala yu ibalu loma bulene nga. Anidagua nabiyaagua Anduane Homogo ini kogome ogoni ibu inaga wali agali bu karu aria ndo ibu tara ka lalu bo taliatagi holebero, lalu bi ogonidagua Anduane Homogohanda Mosesehondo lamini.

### *Daramame ko domo wahaga ngago nolene nawi lenego ogo*

<sup>10</sup> Tígua nogo balu howa nogo ma pugualu darama bibahende pelai helalimu. Ai Isaraele wali agali kamiru aria mbirameyaguabi dindi tarali wali agali karu aria mbirameyaguabi ibugua nogo mbirini darama bedaore nayagua i Anduane Homogo kogo ina wali agali uruni baba waitigi halu inaga wali agali karu baba mandagi nahelo bo taliatagi holebero.✧ <sup>11</sup> Daramame wali agalibi mbirale ema bialu piaga darama bere karubi ti holene miaga ngagonaga ina tihondo bi mbira langerogo. Loma binigo mo miaga agali karu tigua darama hambu yuwa loma biniru bo delaga dabu bidagoria wali

✧ 17:7: Man 31.16, 32.17, 2 Bit 11.15, Iba 106.37, 1 Ko 10.20 ✧ 17:10: Pig 9.4, LBM 7.26-27, 19.26, Man 12.16, 12.23, 15.23

agalinaga ko ngaru domo wahelo lomabu mulene nga.✠ <sup>12</sup> Ani bulene ngagonaga ina Isaraele wali agali tihondo larogo. Tiguabi dindi tara tara howa ti baba ibu hene karubi bibahendeme nogo darama bedaore nolene nawiore laro.

<sup>13</sup> Anigo Isaraele wali agali tiguabi wali agali dindi tarali ti baba ibu hene karumebi mbirale nogo memeru egarubi mbira ina ti nanalimu nalene bedaru gabua mbira tayandaha taya howa barimiyagua darama baya hangu piai helowa dindi dugu dambi halimu. <sup>14</sup> Ani larogoni irane daramame wali agalibi mbirale ema bialu piaga darama bere karubi tinaga holene miaga ngago darama nanalimu. Anidagua miaga ngagonaga ina Isaraele wali agali tihondo nogo egaru darama mbiriniha bedaore nolene nawiore larogoni. Mbirali nogo egaru darama bedaore nalu kago ibu inaga wali agali karu baba mandagi nahelo ina ibu bo taliatagi holebero.

<sup>15</sup> Ai nogo egaru minana homene ngarubi nogo gabuame bo wahene ngarubi mbira tiguabi dindi taraha howa ibini ti baba mandagi haga karumebi nayagua ogoni ibu inaga deni howa ko dodoheore holebira. Ani holebirago ai ibunaga agaru wayawaya bo wahai halu ibuni tinginibi wayawaya bulene nga. Ani buwa ibu inaga deni dodohe kane dege alendo halu ni paliragola ibu ko mbira ibuha para nahe bayale holebira. <sup>16</sup> Ibugua ibunaga agabi tinginibi wayawaya nabiyagua nde ibunime bia ko hayagonaga pani genda ngago yu holene wulebira, Anduane Homogohanda laya lalu Mosesehanda lene.

## 18

### *Wali agali tini damene darama mbiraore kayu bulene nawi lenego ogo*

<sup>1</sup> Anduane Homogohanda Mosesehondo <sup>2</sup> ibunaga bi Isaraele wali agali bu karuni lamibe lowa lalu, <sup>1</sup> Anduane Homogo tinaga Ngode Datagaliwabe kogoni. <sup>3</sup> Ti Iyibi dindiha hene ha kamigonigo Iyibialime mana biaga ngadagua tigua talialu bulene nawiore. Ani bialu ayu ti Kenana dindi haru poleberogo ogoniha howabi mana ti biaga ngagobi nabule dege laro. <sup>4</sup> Tigua mana inaga ngerogo dege taluwa bialu halu ogoale bilimu lalu inime langerogo dege bialu halimu. <sup>1</sup> Anduane Homogo tinaga Ngode Datagaliwabe kogo inaga bi tihondo langerogoni. <sup>5</sup> Tigua mana ina hameledogo bialu haabo halu bi mana ogoale bilimu lalu lo ngogo talialu halimu. Tigua ogonidagua bialu harimiyagua nde bayale holeberemi. Anduane Homogo iniore kogo ina ti ogonidaguaore bilimu larogoni, lene.✠

<sup>6</sup> Anduane Homogo ibugua mana ogodagua bilimu lalu langiya. Wali agali ti damene darama mbiraore bedago kayu bulene nawi. Deme handaya howa dimagoli ha kayu biabi bulene nawiore. <sup>7</sup> I aiyala mandagi kayu bu holene nawi. Anidagua biriyagua ina i aba mo taga holebere. Ani buleberegogo i aiya bedago ina ibu i aiyare beda manda buwa ko ogoni nabilimu. <sup>8</sup> I aba one mende bedago bababi nde kayu bulene nawi dege. Ina ogonidagua beregome i aba mo tagaore timbuni holebere.✠ <sup>9</sup> I mbalini bedago i aba ibu waneyaguabi aiya ibu waneyaguabi uruni alego baba kayu bulene nawiore. Aiyahanda i aba andagani taba henenyaguabi anda mendeha taba henenyaguabi ta nabi i mbalini degego ti baba kayu nabilimu.✠ <sup>10</sup> I igini ibu wanebi i wane ibu wanebi i aguane ogoni bedagola kayu nabibe. Mana ogonibi beregome ini mo taga holene wulebira. <sup>11</sup> I aba ibu yagini bedago baba kayu nabibe. Ogoni ibu i aba waneore biralu i mbalini bedago manda bibe. <sup>12</sup> I aba ibu mbalini bedago baba kayu nabibe. Ogoni ibu i abala darama yabulene beda.✠ <sup>13</sup> I aiya hagibuni bedago baba kayu nabibe. Ogoni ibu i aiyala darama yabulene beda. <sup>14</sup> I aba hamene onela kayu nabibe. Ogoni ibu i aiya ale beda. Wali ogoni alego haru paliriyagua nde i aba hamene kago ibuni taga timbuni

✠ 17:11: Hi 9.22 ✠ 18:5: Neh 9.29, Ese 18.9, 20.11-13, Lg 10.28, Lm 10.5, Ga 3.12 ✠ 18:8: LBM 20.11, Man 22.30, 27.20 ✠ 18:9: LBM 20.17, Man 27.22 ✠ 18:12: LBM 20.19-20

holebira. <sup>15</sup> Í igini ibu one bedagola kayu nabibe. Ibu í one ndo bedago ani nabibe.✧  
<sup>16</sup> Í hamene one í kiane bedagola kayu nabibe. Wali ogonila mandagi paliribiyagua í hamene kago ibu taga timbuni holebirago ani bulene nawiore.✧ <sup>17</sup> Wali mbira í dabu berego wane ogoni í yagini mbira bereagua ina ogoni í kayu bulene nawi. Ani bialu í one ibu igini kago wane bereagua ogonibi í kayu bulene nawi. Ogoni irane wali uruni í one ibu baba darاما mbiraore ibu waneigini hangu ka. Ina uruni baba page biriyagua nde ina mana ko tagabiore wali tagini holene ngago mo pe holebere.✧ <sup>18</sup> Í one berelowa ibu hagibuni bedago kayu bulene nawi. Ina libu mo keba holeberego mana ogoni bayale ndogo nabibe.

<sup>19</sup> Wali ege habolo bedagola kayu nabibe. Ogoningi ibu dodohe bedago nabibe.✧  
<sup>20</sup> Agali inaga nenege kago onela kayu nabibe. Anidagua biriyagua Anduane Homogonaga deni ini mo ko hene dodoheore holebere.✧ <sup>21</sup> Baya hanguore hale hadaba. Tigua mbirale dama mitangi bialu bi pupu wule gime wabini mini Molegehondo tinaga waneigini lomabu mialu irani bo delolene nawi. Ani birimiyagua Anduane Homogonaga tinaga Ngode Datagaliwabe kagonaga mini mo dindiha halu holigo ani bulene nawi.✧  
<sup>22</sup> Tí wali baba mandagi paliagadagua agali dege dege mana ko ngubi ngago bulene nawiore. Mana ogoni ko ngubiore ngago ina tí ogonidagua bilimulo hame naleore kogoni.✧ <sup>23</sup> Wali agalimebi nogo biango baba mana ko ngubi ngago bulene nawiore. Mana ogonibi bialu kamirume tini mo ko holeberemi. Mana ogoni ko ngubiore ngago birimiyagua Anduane Homogonaga deni tí dodoheore holeberemi.✧

<sup>24</sup> Mana ko urunialego mbira tigua bulene nawiore. Anidagua bialu harimiyagua tí Anduane Homogonaga deni tini mo ko hene dodoheore holeberemi. Wali agali Anduane Homogonaga mitangi nabiaga Kenana dindiha hene karu tigua mana ko ngubi urunidagua bialu hayagome tini mo ko halu Anduane Homogonaga deni dodohe ka. Ani kago áyu dindi ogoni tigua karulo halimulonaga Anduane Homogonaga ibugua wene taliatagi halu ka. <sup>25</sup> Tigua mana ko binigome dindi ogoni mo ko hene dodohe ngeleda. Ani ngeledago Anduane Homogonaga ibugua dindi ogoni pani nelo miragola wali agali mana ko biaga uruni dindi ogonime tí magu taguiatagi halu balu purogo lelelebira. <sup>26</sup> Anigo tigua mana bayale Anduane Homogohanda langiyaruni baya hangu taluwa bialu halimu. Isaraeleali tíguabi wali agali tara tí baba hene kamirubi tí bibahendeme mana ko ngubi urunibi nabilimuore. <sup>27</sup> Dindi ogoriani wali agali ala heneyaru tigua mana ko ngubi uruni dege bialu haga heneyago tí manda bilimu. Ani bialu henegome dindi ogo mo ko henego ngagoni. <sup>28</sup> Tigua ogonidagua mbira bialu holigonaga laro. Tigua mana ko uruniale bialu harimiyagua nde wali agali Anduane Homogonaga mitangi nahaga ogoriani heneru dindi ogonime tí magu taguiatagi henedagua tíbi nde anidagua dege bulebira. <sup>29</sup> Isaraele wali agali bu kamiru aria mbirame mana ko uruniale bialu harimiyagua Anduane Homogonaga wali agali bu karu baba nahelo bo batagi holebira, lalu Mosesehanda lene.

<sup>30</sup> Anduane Homogohanda ogodagua laya. Tigua inaga bi o langerogoni baya hanguore taluwa bialu haabo halimu. Tigua wali agali dindi ogoniha ala henerunaga mana ko ngubiore bini ngadagua bialu holemini de hondowa halimu. Ani bialu harimiyagua nde tinime inaga deni mo ko hene dodohe holigonaga nabilimu laro. Hale haramine. I Anduane Homogonaga tinaga Ngode Datagaliwabe kogome laya, lalu Mosesehanda lene.

## 19

### *Mana baya buruguleorebi tigabibi bulene lowinigo ogo*

✧ 18:15: LBM 20.12 ✧ 18:16: LBM 20.21 ✧ 18:17: LBM 20.14, Man 27.23 ✧ 18:19: LBM 20.18 ✧ 18:20: LBM 20.10 ✧ 18:21: LBM 20.1-5 ✧ 18:22: LBM 20.13 ✧ 18:23: Har 22.19, LBM 20.15-16, Man 27.21

<sup>1</sup> Anduane Homogo ibugua Mosesehondo lalu, <sup>2</sup> Isaraele wali agalihondo bi ogodagua labe, lene. Ibugua lalu, Anduane Homogo t́naga Ngode Datagaliwabe i mini baya burugule taraore kodagua t́bi mini baya burugule taraore halimu.✧ <sup>3</sup> T́i bibahende hangu hangume t́naga aba aiyabi yohanda nabi laradagua hale halu bilimu. Ani bialu Sabada horo tara ngago pugua nabi bilimu larudagua bialu halimu. I Anduane Homogo t́naga Ngode Datagaliwabe kogonigo ina laro.✧

<sup>4</sup> Mbirale gime wabini ngaru bi pupu wule i yu wahalu napilimu. Aeanemebi mbira bi pupu wule gime wanabilimu. I Anduane Homogo t́naga Ngode Datagaliwabe kogonigo ina laro.✧

<sup>5</sup> T́igua mbirale mbira Anduane Homogo ila ho gimbu bulenaga bo ngulene tu haragola mana langirugodaguaore beramigola ina turu howa ogoni mo yulebero. <sup>6</sup> Mbirale bo loma binigo horo ogoningi degeyaguabi horo mendengiyaguabi noleberami. Horo tebonengi maru nai nahe ibira hayagua ogoni nolene nawiorego irani delai holene nga. <sup>7</sup> Horo tebone pedagola loma binigonaga podo ibiraho winigo inaga deni dodohe ngago mbiralime nayagua ihondo lomabu ngiyago mebia hayada manda buwa nayulebero. <sup>8</sup> Mbiralime podo ibiraho wini ogoni nayagua ko timbuni bira. Anidagua biragome ko ibulebirago tene ibuniha nga. Tigua ihondo lomabu ngingo mebia hayagonaga ogoni ibu inaga wali agali karu aria ndo ka lolebero.

<sup>9</sup> T́igua t́naga mabuni tomo mbirale ngaru bialu howa mabu gibuni lenehayagi nabi helalimu. Ani buwa maru yu waharamigobi bu dai nabi ani helo wahalimu.✧ <sup>10</sup> Pu mbira mini gerebinaga lini mabuni yu wahenerubi dogolo ibira ibira binirubi mbira ilama dai bulemeni. Uruni wali agali yagibano karubi wali agali ti aria ndo karubi ti milo ngelalimu. I Anduane Homogo t́naga Ngode Datagaliwabe kogonigo ina laro.

<sup>11</sup> Mbirale page nabilimu. Menddealinaga yidago mule lalu ke howa nabilimu. Tindule nalalimu.✧ <sup>12</sup> Ina mbirale mbira nabule mitangi bialu henene buleore bero lalu Anduane Homogo inaga mini lalu nalo wilimu. Ani beramigome inaga mini mo ko holeberamigo nalalimu. I Anduane Homogo t́naga Ngode Datagaliwabe kogonigo ina laro.✧

<sup>13</sup> Ko ogobi hayago manda buwa mbiralinaga ngaru guru nole manda bialu pagebi nabilimu. Menddealime inaga biabe biaha lowa ibunaga yolo mulenengi ina yuha nabi yu paliabi buleni.✧ <sup>14</sup> Hale paihe karu hale nahaga ka manda buwa ha nahalimu. De kohe karu pilelo manda buwa mbirale mbira tinaga hariga pu ibu buleneni wiapai nahalimu. I Anduane Homogo t́naga Ngode Datagaliwabe kogonigo ihondo giho halimu.✧

<sup>15</sup> Godi hale halu howa mana henene tigatiga lolene ngadagua lalimu. Wali agali yagibano karu koda lowa godime ti bolangua helo manda nabilimu. Homogo mini lene karu hondowabi gi howa godi ti bolangua helo biamogobi nabilimu. Godi tigatiga gai bulene ngadagua gai bilimu.✧ <sup>16</sup> Menddealigo erembiraha howa ke halubi lo guralubi lama ibaga nabilimu. Mbirali holene homolenela tuni howa godi lalu kagola ina ibu biamogo bule bi baya mbira lolene yideyagua labe. I Anduane Homogo t́naga Ngode Datagaliwabe kogonigo ina laro.

<sup>17</sup> Inaga nenege mbirame ihondo ko biyagua inaga gubaliniha handabe manga ho haabo nahabe. Genda wiaruago libuni howa abale lo tiga biba labe. Nabiriyagua mana ko ibunaga wiyagome ibi minumaga habehe ke.✧ <sup>18</sup> Mana ko birago biadai nabilimu. Wali agali mbira handabe manga haho wiaabo nahe howa ini gubalini ho harilidagua maru karu ta nabi gubalini ho habe. I Anduane Homogo kogoni.✧

✧ 19:2: LBM 11.44-45, 1 Pi 1.16 ✧ 19:3: Har 20.8, 20.12, Man 5.12, 5.16 ✧ 19:4: Har 20.23, 34.17, LBM 26.1, Man 27.15 ✧ 19:9: LBM 23.22, Man 24.19-22 ✧ 19:11: Har 20.15-16, Man 5.19-20 ✧ 19:12: Har 20.7, Man 5.11, Md 5.33 ✧ 19:13: Man 24.14-15 ✧ 19:14: Man 27.18 ✧ 19:15: Har 23.6-8, Man 16.19 ✧ 19:17: Md 18.15 ✧ 19:18: Md 5.43, 19.19, 22.39, Mg 12.31, Lg 10.27, Lm 13.9, Ga 5.14, Ya 2.8



<sup>19</sup> Mana bilimu lalu langerogo biai halimu. Nogo tara tarabi biango tara tarabi budi tara tarabi igini mende ale hono wilo hendela tagotago nabilimu. Tomo mbira ale lini heba mende alegonaga lini heba mandagi hangamaga nahalimu. Aga nogo tara tara irinimebi mbirale tara pu tondo alemebi heba mandagi wabiniru karulolemini.\*

<sup>20</sup> Agali mbirame ibunaga garabaya biabe ale biahaga wandari mbira bedago ogoni agali mendehondo inaga garabaya biabe ale biahaga berelo nguliya lalu agali mendegome yolo nami howa yupe nahe. Yupe nahe karia agali anduane ala hayago ibunila onene agalini mana biagadagua bialu wandari biagola mandagi paliyayagua mana ngagome pani nelo ledadagua nelo mulene nga. Anigoyu agali ogonime wandari yupe nahego ibu andaga biraho winidagome homelo nabilebira. <sup>21</sup> Agali ogonime ko biyagonaga ina domoliya ibugua nogo sibi wangabe mbira dege inaga Balai Anda biago harabani haru ibulene nga. <sup>22</sup> Ani biragola nogo sibi wangabe ogoni loma binigo mo miaga kago ibugua agali ko biyagonaga dodo para hayago domolene mana ilili bialu bo loma bulebira. Ani biragola ibunaga ko biyago ina la nabi waholebero.

<sup>23</sup> Dindi ina ngule lo wirugoria anda puwa tigua ira tara tara hangaramigonaga lini daragola mali tebirani lini dedaru nanolene manda bilimu. <sup>24</sup> Mali manegoria ira lini daragola bibahende tigua Anduane Homogo i kogohondo turu halu lomabu ngiai halimu. <sup>25</sup> Anigo mali daunigoria ira lini dedaruni bibahende tini do nalimu. Larodagua biai harimiyagua tinaga ira hingedamigoria lini daho wiaabo holebira. I Anduane Homogo tinaga Ngode Datagaliwabe kogonigo ina laro.

<sup>26</sup> Nogo tara tarabi egarubi darama bedaore nolemeni. Damanaga gamugamu bibahende ngaruni bule lo manda bulemeni.\* <sup>27</sup> Mandari halehayagi dambu tigini kago podolemini. Angaribi gandu lalu mo tumagi nahalimu.\* <sup>28</sup> Mbirali homaragola dara howa tinaga tinginini gi pugulebi hale podolebi manda nabilimu. I Anduane Homogo kogoni.

<sup>29</sup> Wali agali tara tara karume damahondo bi pupu wialu howa tinaga wane mo ko hagadagua tinaga wane bedamiru mo ko halu agali page biaga bayanda wali berelolemini. Tigua i yu wahalu dama karu yu tiga birimiyagua tinaga dindini mana ko ngubiore tagira ibai holebira.\* <sup>30</sup> Tigua i mitangi bulene Sabada horo pongo bo wiruru pugua nabilimu. I mitangi bialu lotu lole lomabia hene anda kagobi mo yo nahandalimu. I Anduane Homogoore kogoni.\* <sup>31</sup> Mbirale maru hale hole homene dinini heba bi laga karu karia napilimu. Pirimiyagua ani beramigome ti inaga deni dodohe holeberami. I Anduane Homogo tinaga Ngode Datagaliwabe kogonigo ina laro.\*

<sup>32</sup> Wali agali wahe karuhondo mana bayale bialu ti mo yo nahandalimu. Ihondo giho halu ina bi larodagua bialu halimu. Anduane Homogo jore kogoni.

<sup>33</sup> Wali agali tara tara maru tinaga dindini ti heba mandagi ibu karuhondo mana bia ko halu nabilimu.\* <sup>34</sup> Tini Isaraele wali agalihondo beramilidagua tihondobi ogonidagua dege bilimu. Ani bialu tini gubalini haramilidagua dege tibi gubalini halimu. Tinibi Iyibi dindini hemingi ogoni ale dege harimigo mitangi bialu embeda nahalimu. I Anduane Homogo tinaga Ngode Datagaliwabe kogonigo ina laro.

<sup>35</sup> Mbirali mo hondo howa ibunaga mbirale ngago i mo hole lowa luninaga magi handaga ngagobi genda handaga ngagobi timbuni magi handaga ngagobi mbira ke halu nabilimu.\* <sup>36</sup> Anidagua nabi bayuwa tale bialu magi polene ngadagua pelowa dagabi bayuwa lolene ngadagua tigatigaore lalimu. I Anduane Homogo tinaga Ngode Datagaliwabe kogonigo ina ti Iyibi dindini hemiria haru tagira ibirugoni. <sup>37</sup> Inaga mana lo wirugo damenebi bi larurunibi bibahende ledogo biai halimu. I Anduane Homogoore kogoni.

\* 19:19: Man 22.9-11    \* 19:26: Pig 9.4, LBM 7.26-27, 17.10-14, Man 12.16, 12.23, 15.23, 18.10    \* 19:27: LBM 21.5, Man 14.1    \* 19:29: Man 23.17    \* 19:30: LBM 26.2    \* 19:31: Man 18.11, 1 Sml 28.3, 2 Kin 23.4, Ais 8.19  
\* 19:33: Har 22.21, Man 24.17-18, 27.19    \* 19:35: Man 25.13-16, Min 20.10, Ese 45.10

## 20

### *Anduane Homogo ibugua bi mo wahaga kago pani nelo mulebero lenego ogo*

<sup>1</sup> Anduane Homogohanda Mosese lamialu lalu, <sup>2</sup> Ina Isaraele wali agali bu karuhondo ogodagua lamibe. Isaraele wali agali tinimebi wali agali tara tí heba ibu hene kamirumebi tinaga waneigini mbira mbirale gime wabini mini Molege laga ngagohondo loma bialu bo miyagua wali agali ogonidagua birago homelo bo wahalimu. Wali agali bu kamiru bibahendeme ege tole dugualu ogoni birago homelo toleme бага бага bialu bo wahalimu. <sup>3</sup> Tí mbiralime ibu waneigini mbirago Molegehondo bo miyagua ibugua inaga Balai Anda mo mebia halu inaga mini timbuni lene kogoni bope halu mo nagalone haragoni. Anidagua biragola ina ogonidagua biaga kagola waitigi halu ibu inaga wali agali heba mandagi nahelo bo batagi holebero. <sup>4</sup> Anigo wali agali maru karume mana ogonidagua birago hondowa la nabi wahalu tigua agali ogoni birago balu home nalayagua <sup>5</sup> nde ina wali agali urunihondo waitigi halu ibu damene lenego bibahende baba waitigi hai ho holebero. Ani bialu wali agali inihondo erembira ngialu dama mitangi bialu gime wabini mini Molege ngagonaga bi pupu wialu karu tihondobi erembira mulebero. Ani bialu ti inaga wali agali baba mandagi nahelo bo batagi holebero.

<sup>6</sup> Mbiralime i wahalu wali agali dama mana biaga kagoha piyagua maru homene dinini baba bi ladobo biaga kagoha piyaguabi nde ogoni ibu wali agali i mitangi nabiaga karu ale dege holebira. Anidagua bialu kagola ina ibuhondo erembira mialu inaga wali agali baba mandagi nahelo bo batagi holebero. <sup>7</sup> Anidagua bule ngogo ai tigua mana bayale tigabi ina hameledogo bialu howa tini bayaleore ani hole halimu. I Anduane Homogo tinaga Ngode Datagaliwabe kogo ina bi o ledogoniore laro. <sup>8</sup> Anigo i Anduane Homogo kogo ina tí inaga wali agaliore halimulo dabo bagiho heledogo ai tigua inaga bi mana lo ngago baya hangu taluwa bialu halimu, lene.

<sup>9</sup> Anduane Homogo ibugua, Mana ogodagua bilimu, lene. Wali agali mbirame ibu abahondoyaguabi ibu aiyahondoyaguabi ha halu lalu, Ngode Datagaliwabehanda i mo ko helo, layagua wali agali bi ogonidagua laga kago homelo bo wahalimu. Wali agali bi ogonidagua larago ibuniha ko ngagonaga ibuni homolene karulapeore.\*

<sup>10</sup> Agali mbirame ibunaga nenege kago onela kayu biyagua nde wali agalibi kirabali homelo bo wahalimu.\* <sup>11</sup> Agali mbirame ibu aba onela mandagi paliyagua nde agali ogoni ibugua ibu aba mo taga halu yo handaragoni. Anidagua birago ai agali ogonibi wali biagobi kirabali homelo bo waholene nga. Libugua mana ko ogonidagua biyagonaga libuni homelo bolene nga.\* <sup>12</sup> Agali mbirame ibu igini one bedagola kayu bialu hayagua wali agalibi kirabali homelo bolene nga. Libugua mana ko biyagonaga libuni homolene ngago bo wahalimu.\* <sup>13</sup> Agali mbirame wali baba paliagadagua agali mendealila palialu mana ko ngubi ngago biyagua libugua mana koorene ko biyagonaga libu kirabali homelo bo wahalimu.\* <sup>14</sup> Agali mbira kagome wali mbira dabu bialu ibu imane wandari aiya bedagobi dabu bu palu biyagua nde ogoni mana ko leheore biragoni. Mana ogonidagua birago mana koorego tí kamigoha ogoniale mbira nawilo wali agali ogoni birago tebirabali ti haru homelo irani bo delalimu.\* <sup>15</sup> Agali mbirame nogo biangorula mana ko biyagua nde agali ogoni homelo bo wahalu nogo biangoyaguabi agali biagome yinidagobi homelo bo wahalimu.\* <sup>16</sup> Wali mbirame nogo biangorulu mbira kagoha puwa mana ko biyagua nde wali ogoni homelo bo wahalu nogo biangoyaguabi mbira wali ogoni yaga hayadagobi homelo bo waholene nga. Mana ko ogoni libunime biyagonaga homolene nga.

\* **20:9:** Har 21.17, Md 15.4, Mg 7.10    \* **20:10:** Har 20.14, LBM 18.20, Man 5.18    \* **20:11:** LBM 18.8, Man 22.30, 27.20    \* **20:12:** LBM 18.15    \* **20:13:** LBM 18.22    \* **20:14:** LBM 18.17, Man 27.23    \* **20:15:** Har 22.19, LBM 18.23, Man 27.21

<sup>17</sup> Agali mbirame ibu aba wane bedagoyaguabi ibu aiyá wane bedagoyaguabi ibu mbaliniore bedago dabu biyagua nde wali agali ogonidagua birago libu mana koore biya. Anidagua biaga kago tí baba mandagi nahelo tígua wali agali bibahendenaga deni wali agali ogonilabo waratagi holene nga. Agali ogonime ibuni mbalini nguniorela mana ko bero lalu mini wuwa biyagonaga genda yu holene wulebira. ✧ <sup>18</sup> Agali mbirame wali ege habolo bedangi mandagi yu paliribiyagua nde libugua Anduane Homogonaga deni mana ko dodoheore biya. Ani biyago ai wali agali ogonilabo libu haru Anduane Homogonaga wali agali karu heba mandagi nahelo bo talu pelalimu. ✧ <sup>19</sup> Agali mbirame ibu aiyá hagibunibi ibu aba mbalinibi kayu biyagua agali ogoni ibugua ibu dameneore yo handalu mana ko biyago ai libugua mana ko biribigonaga genda libuni yu holebira. ✧ <sup>20</sup> Agali mbirame ibu aba hamene one bedago kayu biyagua mana ogonibi biragome ibu aba hamene kago mo taga holebira. Anidagua biragome wali agali ogonilabo libunime mana ko biribigonaga genda yu holeberabi. Anigo agali ogoni ibugua wali ogoni dabu biyagua nde libunaga waneigini mbira nahonowi halu homolebira. <sup>21</sup> Agali mbirame ibu hamene one haru pubagi halu dabu biyagua nde ibugua Anduane Homogonaga deni mana koore bialu ibu hamene mo taga holebira. Ani biragome libunaga waneigini mbira nahe howa walibi agalibi homolebira. ✧

<sup>22</sup> Anduane Homogo ibugua lalu, Ina tí Kenana dindiha haru poleberogo dindi ogonime tí magu tagu wiatagi nahelo tígua inaga bi mana lo werogoni baya hangu manda biaabo halimu. <sup>23</sup> Tí Kenana wali agali Anduane Homogo mitangi nabiaaga karume mana ko biaga ngaru talialu nabilimu. Tigua mana ko uruni bialu heagola ina tihondo turu naheore henego kogoni. Ani howa ai ina tí dindi ogoni karulo halimulo Kenana wali agali karu wahalu pelo bo batagi holebero. <sup>24</sup> Dindi ogoni bayaleore dindi ibane bere wialu tomo bayale anda hai haga ngago tí karulo halimulo lalu abale ngulebero lo wirugoni. Ani lo wirugo ai dindi ogoni mo nguleberoore larogoni. I Anduane Homogo tinaga Ngode Datagaliwabe kogo ina tí wali agali tara tara dewaore heago dombeneha hemiria ina tí ininaga wali agaliore halimulonaga dabo bagi ho helene kamigoni. <sup>25</sup> Anigo ai ema bialu piaga ariabi ega bedaru ariabi bibahende tígua balu nolene biru ngaru bayale lene agodabe handa inaga deni ko dodohe agodabe baya hangu dabo handalu halimu. Egabi ema bialu piaga maru bedarubi pagaya tara tara bedarubi bibahende dodohe ogoale beda lalu langiai harugoni. Tigua balu nolene nawi lalu langirugo bi mo wahalu bo narimiyagua nde tíbi inaga deni ko dodohe holeberemi. <sup>26</sup> Ini Anduane Homogo kogo ina tí wali agali tara tara bu hearu dombeneha hemiria dabo bagi halu ininaga wali agaliore halimulo dabo helarugoni. Inaga mini tigabiorebi bayalebi howa baya buruguleore kogoni. Ai tíguabi nde mana tigabi bayaleore ngaru talialu bialu howa tíni baya buruguleore hole halimu.

<sup>27</sup> Wali agali mbirame homene dinini mo bila haga bialu dininime hame ngago hale halu heagua nde ogonidagua bialu kago ibuni homelo bo waholene nga. Wali agali mana ko ibunime bialu hayadagonaga pani ibuni homolene ngago ai wali agali bibahendeme ege tole dugualu bo homelalimu, lalu Anduane Homogohanda Mosesehondo lamini.

## 21

### *Loma binigo mo miaga hearume mana tigabi hangu taluwa bialu holene winigo ogo*

<sup>1</sup> Anduane Homogohanda Mosesehondo lalu, Loma binigo mo miaga agali Arono aria karuhondo bi ogodagua lamibe. Tinaga damene bu karu aria mbirago homayagua dara howa mana biaga ngadagua nabilimu laro. Mana ogonidagua beramigome inaga deni tí ko dodohe holeberemigo nabilimu. <sup>2</sup> Anigo í aba aiyáoreyaguabi waneiginiyaguabi

hameneoreyaguabi <sup>3</sup> mbaliniore mbira agali nape í andaga biragabi uruni homayagua nde dara howa biaga mana ngago ai harugo lowa tí mo ko holene wiaguabi wahalu mana ogoni bilimu. <sup>4</sup> Anigo loma binigo mo miaga kago ibu balibuni homayagua nde ibugua dara howa mana biaga ngago ibu mo dodo holigo bulene nawi laro.

<sup>5</sup> Loma minigo mo miaga kamigome dara holenaga mana biaga ngamigo bialu howa tínaga mandari lene maruha podowa hagadaguabi angari podo tubagi halubi tínaga tingini darama ibilo podolenebi mana uruni bulene nawiore laro.✧ <sup>6</sup> Ani larogoni irane loma binigo mo miaga kamiru tí inaga dabo bagiho heledogoni ndobe. Ai í tínaga Ngode Datagaliwabeore kogonigo tígua inaga mini bope halu mo nagalone nahalimu. Tígua wali agalime mbirale yalu ibiragola mo yalu ihondo loma buwa mo ngialu uruni inaga tomo bu ngiadaí biradagua biaga kamigoni. Ani kamigo tígua mana ko ngagoha erembira mialu tí inaga dabo bagiho helene kamigo manda bialu haabo halimu. <sup>7</sup> Loma binigo mo miaga kamigo damene tí ininaga agaliore kamigoni. Ani kamigo manda bialu tígua wali mbira agali kayu bima ibaga biaga bedagobi agali heba mandagi palene bedagobi wali ibu agalinime wahene bedagobi uruni ale biaga biraga bidago tígua dabu bulene nawi laro. <sup>8</sup> Wali agali bu karume tí inaga loma binigo mo miaga kami leneore kalo manda bilo halimu. Irane tí inaga tomo lomabu ngiagaore hene kamine de hendelo halimu. Í Anduane Homogoore kogoni. Ini mini baya buruguleore howa mana bayale tigabiore ngago biaga kogoni. Ani howa ininaga wali agaliore lene karu bibahende mo tara helowa mana bayale tigabi hangu bialu helonaga dabo bagi helaga kogoni. <sup>9</sup> Loma binigo mo miaga kamiru tí waneme agali kayu yama ibaga biaga bereagua mana ogonibi bialu bedagome ibu aba mo taga holebira. Anigo wandari ogonidagua birago ibu homelo wali agalime ira bo delowa irame do tauladaga helo irani delolene nga.

<sup>10</sup> Loma Binigo Mo Miaga Haguane Timbuni kago ibu biabe tara mbira yu kagoni. Ibunaga emboneni weli baya taraore odo wialu loma binigo mo miaganaga aga karulo kagoni. Ani howa ibu damene mbirago homaragola ibugua dara ho howa biagadagua ibunaga mandari bame helo wahowa manda pere nabi holene nawi. Ibugua mandari baya hangu pere bu holene nga. Ibunaga aga bu kago lerelo waholene nawi. <sup>11</sup> Loma Binigo Mo Miaga Haguane Timbuni biagome ibu damene homene tingini moaho ngagoha polene nawigo napolebira. Ibu aba aiyaoore homayaguabi inaga deni ibuni mo dodohe holigo ibu wali agali duguanda kagoha daraho yalu polene nawigo napolebira. <sup>12</sup> Ibugua inaga Balai Anda Hobane Loma Bia Hene helo wahalu duguanda piyagua nde inaga Balai Anda Hobane Loma Bia Hene kago mo mebia halu mo dodo holebira. Ibu Loma Binigo Mo Miaga Agali Haguane Timbuni helo tígua weli baya taraore ina ngirugome odo wialu dabo helarimigoni ka. Ani kago ai ibugua homene tingini ngagoha polene nawiore laro. Í Anduane Homogo kogoni.

<sup>13</sup> Loma Binigo Mo Miaga Haguane Timbuni ibugua wali mbira agalila napalene bedago dabu bulene nga. <sup>14</sup> Wali mbira ibu agalini homene dalo bedagobi agalinime wahene bedagobi agali kayu yama ibaga biaga bedagobi dabu bulene nawiore. Ibu damene loma binigo mo miaga kago wane mbira mabuage biruwa agalila napalene bedago dege dabu bulene nga. <sup>15</sup> Ina bi o larogo mo wahalu puwa ibugua wali dabu bulene nawi larogo dabu biyagua nde ibunaga waneigini harago damene inaga deni dodohe holebira. Í Anduane Homogo kogome agali ogoni ibu ininagaore helo dabo helalu Loma Binigo Mo Miaga Haguane Timbuni helo heledogoni, lene.

<sup>16</sup> Anduane Homogohanda Mosesehondo lone lamialu lalu, <sup>17</sup> Ína Aronohondo ogodagua lamibe. Í damene mbira áyu karu ariabi mani holebirarubi mbirago ibunaga tingini mo ko hene heagua ogoni ibugua tomo mbirale ihondo lomabu ngulene nawi. Mana ogonidagua wia ai holebira. <sup>18</sup> Agali maru tinaga tinginiha mo kohe damene kagome tinaga tomo ihondo lomabu ngulene nawiore. Agali o larogoni

✧ 21:5: LBM 19.27-28, Man 14.1



mbirali de kohebi ge kohebi dengui mo ko henebi ibu aiyahanda gi geru tubagi ndindele taba hanayaguabi nde tigua inaga lomabu delaga nabulebira. <sup>19</sup> Agali gi ge kuduguheyaguabi <sup>20</sup> erene koheyaguabi agali tubagi gayabogoliyaguabi deha dere biga heaguabi dongoneni derebi heaguabi agali tinginini haga alego mbira naheyaguabi urunibi damene kagome loma binigo mo miaga agali nahabehe holebira. <sup>21</sup> Agali Arono aguanene tí aria kago mbirago ibuha tingini mo ko hene urunibi mbira heagua tigua inaga loma binigo mo ngiaga nahelo laro. <sup>22</sup> Ani bialu tomo ihondo tigua lomabu ngini tíni nolene ngago aria ibubi nolebira. Anigo tomo inagaore lalu lomabu ngini ngago tí nalimulo ngerogo aria ibubi nolebira. <sup>23</sup> Agali mbirali tingini kohe ogonibigo ibugua Balai Anda biagonaga tamuha Hobane Loma Bia Heneore biagola hobaki hene labolabo timbuni gerelape ho ngagoria hapara naholebira. Ani bialu lomabu delaga dabu ngagoriabi hapara ho naholebira. Mbirale bayale inagaore wiabagi ho winigo ngagoria kaware ibiyagua ibugua uruni inaga deni mo ko holebirago polene nawiore larogoni. Ani larogoni irane ini Anduane Homogo kogoni howa mbirale uruni ininagaore ngelo dabo bagiho winigo ngeledo, lalu Anduane Homogohanda lene.

<sup>24</sup> Bi uruni anidagua laya, lalu Mosese ibugua bi uruni Aronohondobi Arono igini hearuhondobi Isaraele wali agali hearuhondobi lamiai hene.

## 22

### *Anduane Homogohondo mbirale lomabu miniru ibuninagaore winigo ogo*

<sup>1</sup> Anduane Homogohanda Mosesehondo lamialu lalu, <sup>2</sup> Arono halu ibu igini karuhondo ogodagua labe. Isaraelealirume mbirale lomabu yalu ibiraru ininagaore ngalo manda bilimu. Ani manda bialu loma bini uruni ininagaore nga lowa baya hangu handayaho halimu. Anidagua handayaho naharimiyagua nde tigua i mini lene timbuni kogo mo nagalone heloleberemi. Anduane Homogo iore kogoni. <sup>3</sup> Loma binigo mo miaga kamiru aria áyu karubi mani holebirarubi mbirago ibugua Isaraele wali agali bu karume mbirale ihondo lomabu yalu ibiragoria ibu inaga deni dodo kaore howa kaware hapara holene nawiore. Ibu kaware pu hayagua nde ina agali ogoni ibu loma binigo mo miaga nahelo bo talia tagi holebero. Mana ogoniore baya hangu talialu bialu haabo halimu. Anduane Homogo iore kogoni.

<sup>4-5</sup> Loma binigo mo miaga kamirubi mani holebirarubi tí aria mbirago ibu tinginini dere timbuni mbira bidago angibu tuguda tagitagi biyagua nde agali ogoni ibu inaga deni dodohe holebira. Ani holebirago ibugua inaga biabe biaga howa mbirale loma bini ngaru nolene nawi. Loma binigo mo miaga agalime mbirali homenagonaga mbirale dodohe ngaru ela hayaguabi ibunaga tinginiha ibane bame tagira ibiyaguabi ogoni inaga deni dodohe ka. Nogo tarabi ema bialu piagarubi inaga deni ko karu aria mbirago ela hayaguabi wali agali inaga deni dodohe karu aria mbirago ela hayaguabi uruni damenego bibahende ela hayagua nde ibugua inaga tomo loma bini ngago nanolebira. Ibugua bayale hole mana bulene winidagua biyagua nde ibu inaga deni dodo nahe howa tomo lomabu minigo mo miaga howa nolene ngaru ta nabi nalu holene karulape nga. <sup>6</sup> Loma binigo mo miaga kamiru aria mbirago ibugua mana mbira biragome ibu mo dodohe hayagua ibu dodohe dege kane alendo halu ni anda polebira. Ani bialu ibuni wayawaya biagane mana ngadagua buwa dodo nahe howa ihondo lomabu bo delole ngagonaga mbirini nolene ngadagua nolebira. Anigo ibu wayawaya biagane mana ngadagua nabi hayagua nde tomo ogoni nanolebira. <sup>7</sup> Ani howa ni paliragola nde ibu inaga deni dodo nahe karulape howa tomo ihondo loma bialu loma binigo mo miaga karume nelo winigo ibugua nolene karulape nga. <sup>8</sup> Ibugua nogo bame homene ngagobi nogo gabua maru karume bo wahene ngagobi nolene nawi. Uruni nayagua nde ibu inaga deni dodohe holebira. Anduane Homogo iore kogoni.



<sup>9</sup> Loma binigo mo miaga kamiru tígua bi mana ogoni langirugoni baya hangu taluwa bialu holene nga. Tígua bi ogoni mo nagalone halu waharimiyagua nde koore ogoni birimigome nde ina tí bo homelolebero. <sup>1</sup> Anduane Homogo ina tí inaga loma binigo mo miaga agali halimulo dabalul helarugo inime tíhondo bi ogonidagua laro.

<sup>10</sup> Loma binigo mo miaga kamiru tínibi tí damene karu hangumebi tomo wali agalime inihondo lomabu yalu íbu ngini ngaru noleberami. Wali agali marubi tínaga yolo biabe biaga karubi tí andagani nenege íbu hene karubi ti tomo ogoni aria nanolebira. <sup>11</sup> Anigo garabaya biabe ale bia haga agali waliyaguabi loma binigo mo miaga biago ibunaga munime yolo bini karu tibi tinaga waneigini karubi ti bibahendeme loma binigo mo miaga agalinaga tomo uruni aria nolene nga. <sup>12</sup> Loma binigo mo miaga kago ibu wane bedago loma binigo mo miaga ndo agali tara kagome dabu biyagua nde wali ogoni ibu tomo ihondo loma bini ngago nanolebira. <sup>13</sup> Anigo ibu wane wali ogoni agalini homaragola ibu hibaria bereaguabi ibu agalinime wahene biruwa waneigini nahe bereaguabi nde ibu aba andaga dai buwa loma binigo mo miaga karu ti miaga ngaru aria tomo ibu aba andagaha nolene nga. Anigo loma binigo mo miaga agali ibu damene dege karume tomo ogoni aria nolene nga.

<sup>14</sup> Mbirali ibu loma binigo mo miaga kago damene ndo howa ibu manda nabi howa tomo ihondo lomabu ngini ngago aria mbira nayagua nde tomo o nayadagonidagua loma binigo mo miaga kagohondo dano hongolebira. Ibugua tomo duria neneyagua nde ibugua waragane tago halu dano hongolene nga. <sup>15</sup> Anigo loma binigo mo miaga karu tigua ihondo tomo lomabu ngini ngaru mo mebia holigo wali agali ta nabi bu karume nanelo bayuwa mamage halu handayaho holene nga. <sup>16</sup> Loma binigo mo miaga kagome wali agali ta nabi mbirago tomo ogoni aria nelo miyagua nde o nayadagonime ibuha mo ko halu genda yu holene anda ibulebira. Ani ibiragola ibugua tomo ogoni nayagonaga dano hongolene wulebira. Ani larogoni irane tomo ogoni nayagonaga Anduane Homogo ina ininagaore mo wiabagi hene nga, lene.

<sup>17</sup> Anduane Homogohanda Moseshondo lamialu lalu, <sup>18</sup> Ina bi ogo larogoni Arono halu ibu igini bu karuhondobi Isaraele wali agali bu karuhondobi lamibe. Agali mbira Isaraeleali kamiru ariabi agali dindi tara howa tí heba íbu hene karubi tí bibahendeme nogo mbira ihondo loma bialu irani dai helonaga haru ibiyagua nde ogonidagua bulene nga. Loma ogoni agali biago ibugua ani bule lalu bi lowinigo lola helonaga haru ibiyaguabi ndo ibuni hameme lomabu delole haru ibiyaguabi nogo biago ko ndo dere durubi mbira nabioire bayaleore kago haru ibulene nga. <sup>19</sup> Loma ogoni ina turu howa mo yuliyana nogo uruni bulumagayaguabi sibiyauguabi memeyaguabi wangabe mbirago dere durubi mbira nabioire kago bo loma bule haru halu ibulene nga. <sup>20</sup> Baya hangu hale halimu. Tígua nogo ko derebi kago lomabu bo delole haru halu ibirimiyagua nde Anduane Homogo ina tínaga loma ogoni hondowa turu naholebero. <sup>21</sup> Agali mbirame Anduane Homogo inila ho gimbu bulenaga loma bo delole haru ibalu loma ogoni ibunime ngule lowa bi lowinigo lola helonaga haru ibiyaguabi ibuninaga hameme lomabu delole haru ibiyaguabi nde nogo ogoni ibu dere durubi nabi bayaleore kago hondowa haru halu ibulene nga. Tígua ogonidagua birimiyagua nde ina tínaga loma ogoni hondowa turu howa mo yulebero. <sup>22</sup> Tígua nogo de kohebi ge kohebi tingini mo kohebi dere timbunibibi kindubibi uruni ale mbirago ihondo lomabu delaga dabu ngatoria ogoni loma bialu bo de nalalimu. <sup>23</sup> Tíinaga hameme bo delole haru ibirimiyagua nde nogo gi ge banayaguabi gi geru bereabiyagua nde karulapego bo delalimu. Anigo tígua ala ihondo lomabu ngule lowa bi lowinigo lola helonaga loma bo delole haru ibirimiyagua nde nakarulapedago bo de nalalimu larogoni. <sup>24</sup> Nogo wangabe pindu mo waheneyaguabi mo ko heneyaguabi ani bini kago ihondo bo

lomabu nangilimu. Tí daluha nogo kagonaga mbirale ogonidagua mo ko holeneore nawigo nabilimu.

<sup>25</sup> Agali mbirame dindi taraha howa nogo haru halu ibuwa ngirago ihondo bo loma bialu ngulene nawiore larogoni. Nogo ogonibigo ininaga deni bayale ndo holebira. Ani birimiyagua ina loma ogoni alego hondowa turu naholebero larogoni, lene.

<sup>26</sup> Anduane Homogohanda Mosesehondo lamialu lalu, <sup>27</sup> Nogo bulumaga sibi memerume igini yu heagua nde igini ogoni horo karu ibu angibunila mandagi helo helalimu. Ani helowa mani ihondo lomabu delaga dabu ngagoria loma bialu bo delole haru halu ibuwa bo delarimiyagua nde ina loma ogoni hondowa turu howa mo yulebero. <sup>28</sup> Anigo nogo bulumagabi sibibi memebi uruni ale mbirago igini angibunila heba horo mbiru hanguni bo palu buwa loma bo delolene nawigo anidagua nabilimu. <sup>29</sup> Tigua Anduane Homogo inihondo kaj lolenenaga mbirale loma bialu bo delarimiyagua nde loma bo delaga mana ngadagua talialu bo delaramigola ina loma ogoni hondowa ihondo turu holebero. <sup>30</sup> Ani bialu loma ogoni bo delaramigonaga podo weramigo horo mendengi nole podo ngela nabi horo ogoningi dege nai halimu.

<sup>31</sup> Anduane Homogohanda lalu, I Anduane Homogoore kogonigo ina mana lo ngogo baya hanguore hale halu taluwa bilimu. <sup>32</sup> Inaga mini daligaore lene kogo mo yo hondolene nawiore. Isaraele wali agali tigua i mini tigabi baya buruguleore kogoni manda bilimu. Ini Anduane Homogoore kogo howa ina tí mo tiga bialu bayuwa dabobagi ho helaga kogoni.✧ <sup>33</sup> I tinaga Ngode Datagaliwabeore holenaga ina tí Iyibi dindiha hemiria haru tagira ibirugoni. I Anduane Homogo inime anidaguaore biru, lene.

## 23

### *Anduane Homogonaga mini yaraga holenaga horo taratara tuho winiru ogo*

<sup>1-2</sup> Anduane Homogohanda Mosesehondo lalu, Isaraele wali agalihondo bi uru lamibe. Horo taratara tuho werogo pugulani hondowa wali agali tigua horo uruni Anduane Homogonaga ngago i mitangi bialu lotu lole ngoai harangi bilo ogo. <sup>3</sup> Horo waragaru tininaga biabe biaga wirimigoni. Horo kane Sabada horo ogoningi halo holene ngago manda bilimu. Horo ogoningi biabe nabi wahowa inaga mini mitangi bialu lotu lole ngoai ho halimu. Dindi mendeha pu harimiyaguabi Sabada horo ogoni Anduane Homogonaga ngalo mandabu halimu.✧ <sup>4</sup> Bi langeroruni bayuwa loyogo lalu wali agali lamiai halu horo ogongi ogoale bilimu laruru mo ngoai howa bayuwa bilimu.

### *Bolangua Halu Penegonaga Horobi Mberedi Yidi Nahe Hirini Nolenenaga Horobi winigo ogo* (Dagalene 28.16-25)

<sup>5</sup> Bolangua Halu Penegonaga Horo Anduane Homogo mitangi howa turu haganenaga lotu ogoni ege mbiranaga horo deneni (14) alendo ni paliragola horo ogoni tenialu holene nga.✧ <sup>6</sup> Horo nguini (15) haragola Mberedi Yidi Nahe Hirini Nolenenaga Horo holebira. Ogoningi howa horo karu mberedi yidi nahe hirinigo hangu nolene nga.✧ <sup>7</sup> Horo karunaga horo mbira haruagola biabe beramilidagua nabi Anduane Homogo mitangi bialu lotu lole ngoai halimu. <sup>8</sup> Horo karuni tigua Anduane Homogo inihondo tomo lomabu ngule yalu ibalimu. Horo kanego haragola biabe beramilidagua nabi Anduane Homogo mitangi bialu lotu lole ngoai halimu, lalu Anduane Homogohanda Mosesehondo lamini.

### *Widi lini pigane hini denego Anduane Homogohondo lomabu miaga winigo ogo*

✧ 22:32: Har 6.7, LBM 11.45, Dag 15.41 ✧ 23:3: Har 20.8-10, 23.12, 31.15, 34.21, 35.2, Man 5.12-14 ✧ 23:5: Har 12.1-13, Man 16.1-2 ✧ 23:6: Har 12.14-20, 23.15, 34.18, Man 16.3-8

<sup>9-10</sup> Anduane Homogohanda laabo halu lalu, Ina dindi nguleberogoria anda puwa tígua widi hongowa lini pigane hini dedago huba mbira loma binigo mo miaga agali karia bu yalu ibalimu. <sup>11</sup> Ibugua ogoni gime yuwa Anduane Homogo inaga deni howa yu wigiwaga lalu loma bulebira. Ani biragola ina tihondo turu holebero. Loma binigo mo miaga ibugua widi lini ogoni Sabada horo bolangua kagola horo mendeni loma bulebira. <sup>12</sup> Horo widi lini ogoni lomabu meramingi nogo sibi igini wangabe mali mbira bolangua nahe ko dere durubi nabi mbira bo lomabu dabuni delai hole haru ibalimu. <sup>13</sup> Ogoni heba balawa magi kilogarama kira olibe lini ibane hamaga halu tomo loma ogonidagua bu delaramigola Anduane Homogo ina nga bayaledane hondowa turu holebero. Ngiyaruni ngiamaga halu waini ibabi magi mbodoli emene kira lita mbira hambu yalu ibuwa ngulene nga. <sup>14</sup> Widi lini pigane dedago ogoni gahengeyaguabi hiriniyaguabi daweneyaguabi tí nolene nawi. Ala ihondo lomabu nguwa tígua widi lini ogoni aria nalu holene nga. Mana ogoni tínaga aguanene mahaore holebirarumebi ogonidagua dege biaabo holene nga.

*Mabuha widi balila boga birangi gandulo wulenaga turu howa lotu lolene nga lenego ogo*

*(Dagalene 28.26-31)*

<sup>15</sup> Widi hubua mbira gandulo yalu Anduane Homogo i ngule eberamingi howa sarere karia daga lalimu.\* <sup>16</sup> Ani buwa sarere kane daga lamaro beramigonaga Sabada haragola sarere halinigonaga horo mbira (50) ogoningi widi lini pigane hini denego halu mende Anduane Homogohondo loma bule yalu ibalimu.\* <sup>17</sup> Isaraele agali mbira ibu one waneigini heba bibahendeme mberedi hirini kira degedege ihondo lomabu ngule yalu ibalimu. Mberedi ogoni labo balawa genda magi kilo kira muwa ogoni yidi heba minu magamaga bialu hirulene nga. Yalu ibalu loma binigo mo miaga agalihondo miragola ibugua gime yuwa Anduane Homogo inaga deni howa wigiwaga lolebira. <sup>18</sup> Isaraele wali agali tígua mberedi ogoni labo heba nogo sibi igini karia bibahende mali mbira bolangua naheru haru ibulene nga. Uruni heba nogo bulumaga wangabe mbirabi sibi wangabe kirabi uruni bibahende ko dere durubi mbira nabioire haru ibulene nga. Uruni bibahende Anduane Homogohondo bo lomabu delagane dabuni delai holene nga. Tígua uruni heba widi lini loma bini biarubi waini iba loma bini biarubi ngulene nga. Anduane Homogo ina uruninaga nga hondowa turu timbuni holebero. <sup>19</sup> Ani buwa ko birimiru ina domo waholiyanaga nogo meme wangabe mbira bo loma buwa dabuni delalimu. Ani bialu nogo sibi igini wangabe kira mali mbira bolangua nahego Anduane Homogo ila ho gimbu bimiyana bo lomabu delalimu. <sup>20</sup> Loma binigo mo miaga ibugua mberedi kira biago labo heba nogo sibi igini kira biago labobi Anduane Homogo inaga deni howa wigiwaga lolebira. Loma binigo ogoni inihondo loma bia henego ngulebadagoni taraorego loma binigo mo miaga agali karu ti nelo mo mulebero. <sup>21</sup> Horo ogoningi biabe beramilidagua nabi Anduane Homogo mitangi bialu lotu lole ngoai halimu. Tínaga waneigini maha holebirarume dindi mende pu hayaguabi mana o langerogo biaabo halu holene nga.

<sup>22</sup> Tígua tínaga mabuni tomo mbirale ngaru bialu howa mabu gibuni lenehayagi ngaru nabi helalimu. Ani buwa maru yu waharamigobi bu dai nabi ani helo wahalimu. Uruni wali agali yagibano karubi wali agali tí aria ndo dindi tarali karubi ti milo ngelalimu. Anduane Homogo tínaga Ngode Datagaliwabe iore kogoni, lene.\*

*Mali gahenge ibiragola turu halu mbelo biguli pu lolene winigo ogo*  
*(Dagalene 29.1-6)*

\* 23:15: Har 23.16, 34.22, Man 16.9-12 \* 23:16: Horo ogoni mini Pendigosi. Abosolo 2.1 de handabe. \* 23:22: LBM 19.9-10, Man 24.19-22

<sup>23-24</sup> Ege kanegonaga horo mbira haragola biabe damene bibahende wahai howa ogoningi horo tara lowa halo halimu. Ani bu howa mbelo biguli pu laragola Anduane Homogo i kogoni mitangi bialu lotu lele ngoai halimu. <sup>25</sup> Ogoningi biabe beramilidagua nabi howa tomo maru loma buwa dabuni delo ihondo ngulene nga, lalu Anduane Homogohanda lene.

*Ko Domo Waholene Horo haragola bulene winigo ogo  
(Dagalene 29.7-11)*

<sup>26-27</sup> Anduane Homogo ibugua Mosesehondo bi ogodagua lamialu lalu, Ege kanegonaga horo pini haragola wali agalime ko biyaru ina domo waholihanaga mana lo wirudagua biai holene nga. Horo ogoningi tomo mbira nane howa Anduane Homogo i mitangi bialu lotu lele ngoai howa ihondo tomo maru lomabu ngilimu. <sup>28</sup> Wali agalinaga ko biyaru domo waholene horo ogoni duniniorego ogoningi biabe mbira nabilimu. <sup>29</sup> Horo ogoningi mbirali ibu tomo mbira nayagua wali agali ogoni ibu Anduane Homogo inaga wali agali ka aria ndo ibu tara haluni ka manda bulebero. <sup>30</sup> Mbirali ibu biabe mbira horo ogoningi biyagua ogoni ibu Anduane Homogo inime bo homelolebero. <sup>31</sup> Mana ogoni tinaga waneigini mani holebiraru ti dindi tarani hayaguabi mana ogoni biaabo halu holene nga. <sup>32</sup> Ege kanegonaga horo dininaga alendo ni paliragola howa horo pininaga alendo ni paliragola dombeneha horo ogoni taraore lowa halo bialu tomobi mbira nane halimu, lalu Mosesehondo lamini.

*Anda Nemendaruha Palu Holene Horongi bulene winigo ogo  
(Dagalene 29.12-40)*

<sup>33-34</sup> Anduane Homogohanda Mosese ibuhondo lamialu lalu, Bi ogo Isaraele wali agalihondo lamibe. Ege kanegonaga horo nguini (15) haragola Anda Nemendaruha Palu Holene Horo ogoningi nemendaruha horo karu palu halimu. <sup>35</sup> Horo uruni holenaga horo pigane harangi biabe bibahende beramilidagua nabi Anduane Homogo i mitangi bialu lotu lele ngoai halimu. <sup>36</sup> Horo karu nigoniha ihondo tomo lomabu dabuni delowa ngiaabo halimu. Horo halini haragola tini lone ibu ngoai howa i mitangi bialu lotu lalu tomobi dabuni lomabu delowa ngilimu. Ani bialu biabe beramilidagua nabi horo ogoningi i mitangi bialu lotu lele ngoai halimu.

<sup>37</sup> Horo uruni inagago i mitangi bialu lotu lele ngoai howa tomo loma binirubi mbirale bo lomabu irani delai helo delolenerubi widi lini lomabu delolenerubi waini iba lomabu odo wulenerubi uruni horo bibahendeni lomabu ngulene wiyadaru ale ngiai halimu. <sup>38</sup> Horo o holeberamigonaga irane galone abale Anduane Homogonaga Sabada horo haragola haga wirimidaguaore halimu. Lomabu ngiai halu maru ngiaga wirimirubi ngiai halimu. Ani bialu loma bini maru tara ngule lo wirimiru heba bibahende ngiai halimu.

<sup>39</sup> Ege kanegonaga horo nguiningi (15) mabuni tomo mbirale hengene ngamiru bialu howa Anda Nemendaruha Palu Holene ogoni horo karuni Anduane Homogo mitangi halu holene wiyadagua bialu halimu. Horo piganego ogoni taraore lowa biabe nabi halo halimu. <sup>40</sup> Horo piganegoria ira lini bayaleore dedaru do yalu ayage ale yunibi ira marunaga magane yuni dewahebi bu yalu ibalimu. Uruni bu yu howa Anduane Homogo tinaga Ngode Datagaliwabe i mitangi bialu lotu lalu inaga mini yaraga halimu. <sup>41</sup> Anda Nemendaruha Palu howa horo karuni ani bialu halimu. Tinaga waneigini mani holebirarumebi mana uruni biaabo halu holene nga. <sup>42</sup> Isaraele wali agali bibahendeore horo ogoningi haragola anda nemendaruha hangu horo karu palu holene nga. <sup>43</sup> Anidagua beramigola tinaga waneigini mani holebirarume mitangi bialu Anduane Homogohanda Isaraele wali agali Iyibi dindini howa haru tagira piyagola

anda bame nemanda aleruni bu pale lama haru halu ibinidalo manda bilo ani bilimu. Anduane Homogo ĩ tınaga Ngode Datagaliwabe kogoni.

<sup>44</sup> Mosesehanda Isaraele wali agalihondo lamibe layadagua Anduane Homogonaga mini yaraga hole horo uruni agua bilimu lalu lamiai hene.

## 24

*Anduane Homogonaga Balai Andaha lamu hale wiaru de hondo holene mana winigo ogo*

*(Haru Penego 27.20-21)*

<sup>1</sup> Anduane Homogohanda Mosesehondo lamialu lalu, <sup>2</sup> Isaraele wali agalime olibe lininaga weli bayaleorego ĩnaga Balai Anda biagoha lamu hale ngaruha berelole yalu ibalimu lalu lamibe. Ani yalu ibiragola lamu hale wá haabo helo mbiraga bibahendengi delaho wiaabo hole loma binigo mo miaga karume de hondo haabo holebira. <sup>3</sup> Arono ibugua lamu hale uruni alendo dela haragola dalu kane dege gao lolebira. Lamu hale uruni Anduane Homogo ĩnaga deni howa Balai Anda Hobane Loma Bia Heneoreha ĩnaga Habo Nalolene Bi lo winigonaga Mbogoyi biago ngagola hobane mende Loma Bia Hene kagola tubari labolabo timbuni gerelaho wini biago tagirahayagi ngagoni. ĩnaga bi mana ogoni tihondobi tınaga waneigini aguanene mani hama polobadarumebi bialu haabo helo langerogoni. <sup>4</sup> Arono ibugua lamu hale wiagane irane ngolo bayaleme wabini ngagoni lamu hale biaru delaabo helo baya hangu handayaho haabo holebira. Lamu hale uruni mbiraga bibahendengi daho ngane de hondoliya hundulani hondowa handayaho haabo helolene nga, lalu lene.

*Mberedi Anduane Homogohondo lomabu mulene mana winigo ogo*

<sup>5</sup> Anduane Homogohanda Mosesehondo laabo halu lalu, ĩna balawa bayaleru genda magi kilogarama homberia (12) muwa ogonime mberedi homberia (12) wabibe. Genda magi kilogarama mbira mbirame mberedi mbira mbira wabigi bibe.✧ <sup>6</sup> Ani wabuwa dagia ira agasiamebi ngolo bayalemebi wabini ngago ĩninaga deni mberedi uruni mo dabadaba howa waragaria halu mbirago duguni mbira wialu waragaria halu mende duguni mende wibe. <sup>7</sup> Ani ngelowa mberedi waragaria duguni kira dagia ngagoriani ira hagua ngabilo delaga mini inisenesi heba mo ngelalu tigua mberedi ĩhondo ngiradagua inisenesi ngabi ogoni aribia halu delalimu. <sup>8</sup> Sabada horo bibahendengi loma binigo mo miaga karume mberedi ĩhondo loma bialu dagiani ĩni de hondoliya wiaabo holene nga. Habo nalolene bi mbira tí baba lo werogonigo Isaraele wali agalime mana ogoni bialu haabo holene nga. <sup>9</sup> Mberedi ogoni Arono halu ibu aria loma binigo mo miaga holebirarubi tigua nolene wulebira. Isaraele wali agali karume tomo ogoni ĩnihondo lomabu ngini ngago manda bialu loma binigo mo miaga karu tigua Anduane Homogonaga Balai Anda pabe tamuha howa nai holene nga. Tomo ogoni ĩninagaore ngago ĩna nde loma binigo mo miaga karu ti nelo mulebero, lalu Anduane Homogohanda Mosesehondo bi ogoni lamini.✧

*Mbiralime mana ko biragonaga pani nelo mulene winigo ogo*

<sup>10-11</sup> Agali mbira henego ibu aba Iyibiali howa ibu aĳya Isaraele wali berene. Ibu aĳya Dana hameigini aria agali Dibiri mbira henego wane mini Selomidi berene. Agali ogoni ibu balai anda bu harimidaruha ti haru mandagi howa horo mbirungi ibugua Isaraeleali mbira heagola keba howa gungu bini. Gungu bialu howa Selomidi igini ogoni ibugua Anduane Homogo mini lalu bi koore lene. Ani layagola wali agali bu hearume hale howa agali ogoni Mosese hearia haru halu pene. <sup>12</sup> Ani haru piyagola Mosese ibu Anduane Homogohanda ogodagua bibe lalu ladai bilonaga ibugua hale ala hole agali ogoni garabaya helo helene.

✧ 24:5: Har 25.30 ✧ 24:9: Md 12.4, Mg 2.26, Lg 6.4



<sup>13</sup> Ani heleagola Anduane Homogohanda Mosesehondo lamialu lalu, <sup>14</sup> Agali ogoni balai anda bu karu yu wahalu haru tagira pilimu. Ani buwa wali agali bibahende agali ogonime i mini lalu bi ko layane hale harimidaru tigua agali ogoninaga hagianeni gi wiai halimu. Agali ogoni ibugua bi ko layagonaga ibuniha pani nolene nga lowa wali agali maru bu karu de hendelonaga anidagua bilimu. Ani bialu wali agali bibahendeme ege tole dugualu бага бага bialu balu homelalimu. <sup>15</sup> Ani bialu mani Isaraele wali agali bu karu lamialu ti mbiralime i mini lalu bi ko mbira layagua nde ibu pani nolene wulebira. <sup>16</sup> Ibugua bi ko lalu howa inaga mini Anduane Homogo layagua nde ibuni homolene nga. Agali ogoni ibu Isaraelealiyaguabi agali dindi taraha howa ti heba ibu heneyaguabi ibugua inaga mini lalu bi ko layagua nde ibuni homoleneore nga. Agali ogoni homelo wali agali bibahendeme ege tole dugualu homelo bolene nga, lene.

<sup>17</sup> Anduane Homogohanda lalu, Mbiralime wali agali mende kago homelo bo wahayagua nde ibunibi homelo bo wahalimu.\* <sup>18</sup> Mbiralime mendealinaga nogo bulumaga sibirubi hinu kago bame homelo bo wahayagua nde nogo bayagonaga kango aribia holene nga. Mana ogoni ale mo tiga bulenego agali mbirame agali mendenaga nogo kago bo wahayagua ibuni bo wahayago aleme kango hongolene nga.

<sup>19</sup> Agali mbirame mendeali kago mo ko halu bayagua nde ibunibi o biyadagonidagua dege biadai bilimu. <sup>20</sup> Agali mbirago ibugua mendealinaga kuni mbira bo tagalayagua nde ibuninaga kuni mbirabi bo tagalalimu. Mendealinaga de bo halu wahayagua nde ibuninaga debi bo halu wahalimu. Mendealinaga ne bo hondayagua nde ibuninaga nebi bo hondo wahalimu. Agali mbirame mendeali kagohondo birago ale ibuniha biadai biai halimu.\* <sup>21</sup> Agali mbirame mendealinaga nogo kago bayagua nde nogo ogoni aleme dege kango hongolene nga. Anigo mbiralime agali mende kago homelo bo wahayagua nde ibunibi homelo bo waholene nga. <sup>22</sup> Ina mana ogoni Isaraele wali agali tinagabi wali agali dindi taraha howa ti baba mandagi ibu hene kamirubi ti bibahendenaga lo wero. I Anduane Homogo tinaga Ngode Datagaliwabe kogonigo aniore bilimu laro, lene.\*

<sup>23</sup> Anduane Homogohanda bi ogoni layadagua Mosese ibugua Isaraele wali agali bu hearuhondo lamiyagola tigua agali Anduane Homogo mini lalu bi ko laga biago minuwa balai anda bu hearu yu wahalu haru tagira pene. Haru tagira puwa wali agali hearume agali biago ege toleme homelo bo wahene. Ani bialu Isaraele wali agali tigua Anduane Homogohanda Mosesehondo laminigo hale howa talialu layadagua bini.

## 25

### *Mali kane haga biragola bulene mana lowinigo ogo (Mana Loyane 15.1-11)*

<sup>1</sup> Mosese ibu Hari Sainaini heagola dege Anduane Homogohanda ibuhondo lalu,\*  
<sup>2</sup> Bi o larogo Isaraele wali agali lamialu au labe. Tigua dindi ina ti nguleberogoria pu howa mali kane haga biragola mabuha tomo damenego nahenge dindi bame ngelo halimu. Tigua Sabada horongi halo hagadagua dindibi mali kane haragola halo ngelo wahalimu. Mali kane ogoni ani wiabagi howa ininaga nga lene ngelo wahalimu. <sup>3</sup> Mali waragaria haramigo andaneha howa tinaga mabu ngemiruha tomo tara tararu hangalu pu mbira mini gerebi lini dedaru do wialu magane lini bayale dabe nahe karu gandulo wahaga bigi bilimu. <sup>4</sup> Anidagua bialu howa mali kane haragola dindi bame ngelo wahalimu. Ani bialu mali ogoni ininaga wiabagi howa ngelalimu. Ani bialu tigua tomobi nahenge gerebi magane karubi gandulo wabia nahe ngelalimu laro. <sup>5</sup> Widi minana anda ho heagua nde gandu lowa tinaga tomo wiaga andaha mo wia nabilimu. Pu mbira mini gerebi magane gandu nale karunaga lini deagua nde tigua do pingidalu

\* 24:17: Har 21.12    \* 24:20: Har 21.23-25, Man 19.21, Md 5.38    \* 24:22: Dag 15.16    \* 25:1: Har 23.10-11

waini iba wabulene nawi. Mali ogoningi dindi bame ngelo wahalimu. <sup>6</sup> Mali ogoningi mabuha tomo minana anda harago bialu nalimu. Tomo wiaga andaha bu yalu puwa ngela nabilimu. Mbirale tomo tara tara wabigi bulene ngago ale wabulene nawi. Ai tñibi wali agali tñaga garabaya biabe ale biahaga karubi wali agali biabe maru biaga karubi wali agali tara tara tí heba mandagi íbu hene kamirubi tí bibahendeme tomo uruni bialu nolene karulape. <sup>7</sup> Ani bialu nogo hinini damene bibahende bulumagabi sibi bu karubi meme karubi ti nolenebi karulape wulebira. Gabua tara tara biru karu tibi na dege bulene karulape, lalu Anduane Homogohanda lene.

*Yadai Bulenenaga Mali tagira ibirangi bulene winigo ogo*

<sup>8</sup> Anduane Homogohanda laabo halu lalu, Tígua mali karia dege mbira mende laga bialu mali karia dege kahalu dagalamaga harimiyagua nde mali pira mariani dira (49) holebira. <sup>9</sup> Ani haragola mali ogoninaga ege kane halu horo pini laragola agali maru Isaraele dindi bibahendeha purogo lalu dindi gibuni lenelene ngaruha pialu tígua mbelo biguli pu lalimu. Horo ogoningi wali agalinaga Ko Domo Waholene Horo ngago Anduane Homogo ina wali agalinaga ko ngaru domo wahai holebero. <sup>10</sup> Mali pira daunigonaga (50) horo pigane haragola mbelo biguli pu laramingi mali ogoni Anduane Homogo ininagaore wiabagi hene wulebira. Mali ogoningi wali agali bibahende kamiru tñaga genda yu haramiru golope hai hayago ai tí turu howa miniha dungulo holene nga. Mali ogoningi tígua dindi mbira agali mendenaga yolo bu winiyagua nde dindi aba ibunihondobi ibunaga waneigini aguanene bu karuhondobi miadai bilimu. Wali agali maru tñaga garabaya biabe ale biahalu hagayagua uruni bibahende golope halu tini dameneru karia dai bilo pudaba lalimu. <sup>11</sup> Mali pira dauni (50) ogoningi wali agali bibahende bu miniha turu howa dungulo holene horo tagira ibulebira. Mali ogoningi tñaga mabu ngamigoha tomo damene hongolene nawi. Ani bialu mabuha widi minana anda halu lini dedago dowo tomo wiaga andaha ngelolenebi nawi dege. Pu karunaga gerebi lini dedaru dowo waini ibabi wabulene nawi. <sup>12</sup> Mali ogoni bibahende Anduane Homogo ininagaore ngago manda bialu halimu. Ani howa tñaga mabuha tomo minana andaho karu hangu bu nalu halimu.

<sup>13</sup> Tñaga dindi mbira agali mende ibu yolo binigo mali ogoningi dindi ogoni aba ibunihondo bame mia dai bilimu. <sup>14-15</sup> Anidagua bulene ngago ai tígua dindi yolo bilo mule howa agali dindi yolo birago ibu mali ogoniha tomo dabane agira halu hongolobadabe ala manda bialu dindi Yadai Bulenenaga Mali agira wiaruabe manda buwa dindi ogoni mendealime yolo bilo mulene nga. Ani beramigola dindi yolo birago ibuguabi nde dindi ogoni karulape ngadagua yolo bulene nga. <sup>16</sup> Yadai Bulenenaga Mali tagira ibilo mali dewaore wiagua nde yolo dewa bulene nga. Mali dewa ndo wiagua nde yolo emene dege bulene nga. Ibugua mali dagalowa dindi ogoniha tomo agira daba hangalu nolobadabe mitangi bialu yolo ogoni karulape mulene nga. <sup>17</sup> Wali agali tñi damene karu ke howa mo hondo nahalimu. Tígua Anduane Homogo inihondo dege gi howa mana bayale tigabi bulene ngago bialu halimu. Anduane Homogo tñaga Ngode Datagaliwabe kago ina bi o larogonidagua bialu halimu, lene.

*Mali kane haragola wali agalime tomo nolene winigo ogo*

<sup>18</sup> Anduane Homogohanda laabo halu lalu, Tígua ina bi áyu langerogobi inaga bi mana lowini ngagobi baya hanguore taluwa bialu halimu. Tígua anidagua bialu harimiyagua nde dindi inime tí nguleberogoria howa bayale haabo holeberemi. <sup>19</sup> Dindi ogoniha howa tomoru dewaore bayale anda haga biragola tígua nalu howa tñibi bayaleore haabo holeberemi.

<sup>20</sup> Ani anigo mali kane tagira ibiragola tígua lo manda bialu, Iname tomo hongowa bu mogo bialu andagaha nawirimagodago ai mali ogoningi ina tomo agotha wini nalu holeberamadabe, nalalimu. <sup>21</sup> Anduane Homogo inime mali waragane tagira ibirangi

tínaga dindi mo bayale harogola tomo dewaore mali tebirani nalu holene karulape bu wuleberemi. Anigo tí gi halu mogo nale halimu. <sup>22</sup> Tígua mali halini tagira ibirangi tomo lone hongo aribia halu howa tomo nolene mali waraganeni bu wirimigo naho wiaabo holeberemi. Ani nalu kamine dege tomo hangarimigo boga bulebira, lene.

*Dindi yolo binigo miadai bulene winigo ogo*

<sup>23</sup> Anduane Homogohanda laabo halu lalu, Agali mbirame tínaga dindi ngamiru yolo bialu ibunaga wiaabo helo yolo bulene nawi. Ani larogoni irane dindi ogoni tínaga ndo ngelo kami. Dindi ogoni Anduane Homogo ininaga ngogoria tí dindi taraha howa mendeali dindini íbu haradagua ibini kamigoni.

<sup>24</sup> Agali tíni aria kamirume tínaga dindi mbira yolo biyagua nde dindi ogoni ibuna-gaore lene wiaabo helo ndo laro. Agali dindi aba biago ibunime yolo biadai bulene manda biyagua nde ani bulene karulapeda manda bilimu. <sup>25</sup> Agali mbira kago ibu muni mbiralebi nawi howa ibunaga dindi ngago muni miyagua nde ibu damene darama mbiraore ibuni aria hangume biamogo bialu dindidago yolo biadai bulene nga.\*

<sup>26</sup> Agali dindi aba ogoni biamogo bulene ibu damene mbira naheyagua nde ibunime yolo biadai bulene mani karulape wulebira manda bialu muni dewaore yu kangi ogonime ibunaga dindi biago ibuni yolo biadai bule holene nga. <sup>27</sup> Ani bialu ibugua dindi ogoni ibuni yadai bulene manda biyagua Yadai Bulenenaga Mali biago tagira ibilonaga mali agira wiaruabe ala manda bu hondolene nga. Ani mandabu handalu mali uruniha howa mabu ogoniha tomo hongolenenaga muni agirame karulape bu-lubadabe handalu ai uruni biai holene muni karulape wiagua nde agalime ibunaga dindi ogoni yolo biyago ibuni yolo biadai bulene nga. <sup>28</sup> Anigo ai ibunaga munime dindi ogoni yolo biadai bulene nakarulapeyagua nde wahalu dindi mbiraleru Yadai Bulenenaga Mali biago dege ibilonaga hondo holene nga. Ani hondo howa mali biago tagira ibirangi dindi yolo bini biago ibugua dindi ogoni dindi aba kagohondo miadai bulebira.

<sup>29</sup> Agali mbira ibunaga anda tano pabe hongohe kago tamuha henego agali mendeme yolo binigo ai anda ogoni ibuni yolo biadai bule manda biyagua nde mali mbira ogoningi dege yolo biadai bibehe holebira. <sup>30</sup> Anda anduane biagome mali mbira ogoniha yolo biadai bibe naheyagua nde mani anda ogoni lone yolo biadai bibe nahe holebira. Mbirale anduane biagohondo Yadai Bulene Mali biago tagira ibiragola ibugua miadai bulenebi nawi dege wulebira. Anda yolo biyago ibunagaore haabo halu ibu waneigini mani hama polobadarunagabi wia ai holebira. <sup>31</sup> Anigo anda maru tanonaga tagirahayagi heneyagua nde anda uruni yolo biadai bulene karulape. Mabu ogoriani ngagome ibunaga mabu ibuni yolo biadai biagadagua dege anda ogoniha kagobi yolo biadai bulebira. Ani ngago manda bialu anda tano tagiraha hene uruni alego anduane ibunime yolo biadai bulenebi mali biago tagira ibiragola anduane kago ibuni yadai bulenebi karulape nga. <sup>32</sup> Anigo Libai hameigini tigua dege mana ogonidagua nabulebira. Tigua tinaga anda tano pabe tamuha henego muni muwa lone yolo biadai bulebi ta nabi ani bulebira. <sup>33</sup> Anigo agali Libai aria ogoni ibugua ibunaga anda mbira yolo binigo biadai bulene hame nale heagua nde mbirale Yadai Bulenenaga Mali biago tagira ibirangi ibunaga anda ogoni agali yolo biyagome Libai agali biagohondo miadai

\* **25:25:** Biabe ogoni ibuni aria kagome bulene ngago manda bialu dindi ibu damene kagome dindi aba kago biamogo bialu dindi yolo bulebira. Ani yolo bialu ibu damene hayadago miadai bulebira. Hiburu tinaga mana lo winigome lalu agali mbirago ibu genda yu heagua nde ibuni damene darama mbiraore kagome biamogo bialu holene nga lenego nga. Biabe timbuni mbira bulene ngago mbirali genda yu heagua ibu dameneore kagome ibu damenenaga dindi agali mendeme wu kago ibuni dameneorenaga ngelo mo yu dai bule yolo bulebira. Mbuga maruha ngago handaga bulene bayale uru nga. Ludi 3.12-13, 4.1-6, Yaremaia 32.6-12 uruni hondolene nga. Anduane Homogo ibunime ibunaga wali agali bu karunaga genda ngago manda biai howa biamogo bialu haga kagoni lalu Aisaia mbugaha 43.14, 44.6,24 uruni handabe.

bulene wulebira. Ani larogoni irane Isaraele hameigini tí bibahende dindi tu wuwa ta halu Libai aria ti tano hangu tu wuwa mirugodane laro. Anidagua birudagoni Libai hameigini karu tinaga anda tanoha heagua nde anda uruni tinaga leneore haabo holebira. <sup>34</sup> Ani bialu dindi emene tanonaga lenelene wigi bidaruni agali marume yolo bulene nawi. Dindi uruni Libai hameigini tinagaore wiaabo holebira, lalu Anduane Homogo ibugua lene.

*Yagibano hearu handayaho holenenaga mana winigo ogo*

<sup>35</sup> Anduane Homogohanda laabo halu lalu, Tí damene karu aria mbira ibu ala karulape henego mani muni mbirale nawiore yagibano heagua nde tígua agali dindi kaundiaha howa íbu kagola handayaho haga wirimidagua dege agali ogoni baya hangu handayaho holene nga. Ani beramigola tí damene ogoni ibu tíni baba howa bayale holebira. <sup>36-37</sup> Agali ogoni aleme tí baba muni danoho heneyagua tígua muni maru tago howa ngi nalalimu. Tíngaga tomo ngamiru aria maru agali biago ibugua yolo bule ibiragola tígua muni yolo mo yaraga howa ngi nalalimu. Tígua Ngode Datagaliwabe ibuni hanguhondo gi halu agali yagibano ogoni ale kago ibu helo wahalimu. <sup>38</sup> Bi ogoni j Anduane Homogo tíngaga Ngode Datagaliwabe kogoni howa ina ledogoniore. Iniore tíngaga Ngode Datagaliwabeore holenaga ina tí Iyibi dindiha hemiria haru tagira ibalu Kenana dindi ngago tí mo ngulenaga haru ibirugoni ndobe, lene.

*Garabaya biabe ale biahaga hearuhondo bulene winigo ogo*

<sup>39</sup> Anduane Homogohanda laabo halu lalu, Agali mbira tí aria kago ibu ala karulape henego mani yagibano howa tí kamiru mbiragonaga garabaya biabe ale biahole manda biyagua nde tígua agali ogoniale kagohondo biabe yolonaga ndo bame bia lalu hongo howa nalalimu. <sup>40</sup> Tígua ibu yolo biabe biaga haru haradagua bialu mbirale anduane biagohondo Yadai Bulenenaga Mali tagira ibirangi ibu pelo golope halimu. <sup>41</sup> Mali ogoningsi agali ogoni ibunibi ibu one waneiginirubi bibahende ti golope haramigola tini dalu dai bialu tinaga damene bu karu baba tininaga mamali dindi tene ngagoriani hole polebira. <sup>42</sup> Anidagua larogoni irane bamba tíni nde Iyibi dindiha garabaya biabe ale biahalu hemiria ina tí haru tagira ibirugola tígua Iyibi dindi yu wahalu ibirimigoni. Ani ibalu tí Anduane Homogo ininagaore garabaya biabe ale biahaga kamigo ai tígua wali agali tíni aria bu karume garabaya biabe ale biahalu helo hela nabilimu. Mana ogonidagua bulene nawiore laro. <sup>43</sup> Ani kago manda bialu tíngaga damene degeme biabe biaga karuhondo biabe mangabi hongohé ngaru bialu kagoha bi hongo howa lalu holene nawi. Tíngaga Ngode Datagaliwabe ini kogohondo dege gi halu agali ogonibi kago biamogo bialu halimu.

<sup>44</sup> Wali agali tíngaga garabaya biabe ale biahalu helo yolo bule lo manda birimiyagua nde wali agali dindi tara taraha howa tí kamigoha palia para para bidaru aria dege yolo milimu. <sup>45</sup> Ani bialu wali agali dindi taraha howa ibini karuni tinaga waneigini garabaya biabe ale biahaga helo minu helolene karulape. Wali agali uruni tíngaga dindini howa waneigini hono winiru tigua tíngaga garabaya biabe ale biahaga helo helolene karulape kagoni. <sup>46</sup> Ani kago minu helowa garabaya biabe ale biahaga kane dege tíni homaramigola tíngaga waneigini holebirarunaga garabaya biabe ale biahaga haabo holene karulape holebira. Anigo Isaraele wali agalibi tíni aria karu tininaga biabe biaga heagua nde uruni mo tandaga nahalimu. Hendore howa biabe bialu helo helalimu.

<sup>47</sup> Mbirali dindi taraha howa tí baba íbu hene kago ibu muni dewawi homogo hayagua tí aria karu mbirago ibu yagibano howa ibugua agali ogoninaga garabaya biabe ale biahaga helo yolo biyaguabi ibu damene karunaga helo yolo biyaguabi nde <sup>48</sup> tí Isaraeleali kamiru tí damene ogoni mani títime yolo biadai bulene wulebira.



Ibuni hameneyaguabi <sup>49</sup> ibu aba hameneyaguabi ibu aba mbalini iginiyaguabi ibu damene maru karuyaguabi mbirago ibugua yolo biadai bulene wulebira. Ibunime muni karulape yu heagua nde biabe ko ogoni yu wahalu pole manda buwa agali ibu yolo biaga haruagohondo muni mialu polene nga. <sup>50</sup> Agali garabaya biabe ale biahaga helo yolo bini biago ibugua ibunaga agali anduane hayagohondo bi baya hangu lalu mali áyu ogoni howa dagalalu mali agira howa mbirale yolo biniru anduane hayadagohondo Yadai Bulenenaga Mali biago agongi tagira ibulubadabe hondole dabo hondolene nga. Agali anduane biago ibugua agali biagome mali agira halu ibunaga biabe bialu holene wahalobadabe hondole daga lolene nga. Anigo yolo ogonidaguame karulape larago hondowa ibunimeyaguabi ibu damene karu aria marumeyaguabi muni ogonidagua karulapedago hondowa yolo biadai bulene nga. <sup>51</sup> Mali dewaore wiagua nde agali ogoni ibugua ibunaga anduane kago muni dewame yolo miadai bulene wulebira. <sup>52</sup> Mbirale anduane biago ibuni Yadai Bulenenaga Mali mbira biago tagira ibulene kaware ngelowayagua nde agali anduane biago muni emene degeme yolo biadai bulene nga. <sup>53</sup> Agali anduane kago ibugua nde agali ibunaga garabaya biabe ale biahaga kago yolo biabe mali mbira kiraru ale yolo biabe biahaga kaligobi dege bialu kagoni lo manda bialu ibunaga garabaya biabe ale biahaga kago mo tandaga holene nawi. Anduaneme ibu hendore helo helolene nga. <sup>54</sup> Agali garabaya biabe ale biahaga biago ibu damene bu karume ibalu ibu yolo ogonidagua biadai nabiyagua nde mbirale anduane kago ibuni Yadai Bulenenaga Mali biago tagira ibirangi ibunibi ibu one waneiginirubi bibahende ti pelo golope holene nga. <sup>55</sup> Isaraeleali tígua agali mendealinaga garabaya biabe ale lu bia haabo helolene nawiore. Anidagua larogoni irane i Anduane Homogo tínaga Ngode Datagaliwabeore howa tí Iyibi dindiha garabaya biabe ale bialu hemiria ina tí haru tagira ibalu dindi ogoha haru ibirugoni ndobe. Ani birugo ai tí inaga garabaya biabe ale biahaga kamigoni, lalu Anduane Homogohanda lene.

## 26

*Anduane Homogohanda ibunaga bi mana hale howa biagaruhondo bayale bulebero lenego ogo*

*(Mana Loyane 7.12-24, 28.1-14)*

<sup>1</sup> Anduane Homogohanda lalu, Tígua ira dibu pelowa ogonime pigiya mbira wabu helolenebi ege tole mbira muwa ona hanga holenebi ege tole timbuni ngagoria bage podagadagua podolenebi uruni alego tínaga dama mitangi bialu bi pupu wulenaga wabu helabi nabilimu. Ani nabi howa i Anduane Homogo tínaga Ngode Datagaliwabe kogo ini hangu mitangi bialu lotu lalu halimu. <sup>2</sup> Ina horo pongobo wini ngoru tígua pugua nabi i mitangi bialu halo halimu. Ani bialu inaga lotu anda lomabia hene bu kagobi mo yo nahandalimu. Anduane Homogo iore kogoni.

<sup>3</sup> Tígua inaga bi mana lo ngoru talialu mbirale ogo bilimu lalu langirugo bialu harimiyagua <sup>4</sup> nde tínaga mabuha tomo hingedemiru bayale anda hai helobi ira lini daga karume lini bayale daabo helonagabi ina iba dalu ibilolebero. <sup>5</sup> Ani berogola tínaga mabuha tomo hingedamiru dewaore bu paya bulebira. Tomo dewaore andaho kagola widi gandulo wialu ha dege bidamine pu mbira mini gerebi lini boga bialu dolene tu holebira. Ani bialu gerebi lini dedago dalu kamine dege widi lone hongo aribia holene tu holebira. Ani biragola tígua tomo dewa nalu tombeho howa tínaga dindi ogoniha bayaleore haabo holeberemi.

<sup>6</sup> Tínaga dindi nguleberogoria pu kamigola inaga mo palia holene tíha wia harogola tí mbiraga paluwa mbirale mbirahondo gi nahe embedaho palueberemi. Mbirale gabua tara tara dindi ogoniha bedaru bo taliatagi hai holebero. Ani bialu tínaga dindi ogoriani

✧ 26:1: Har 20.4, LBM 19.4, Man 5.8, 16.21-22, 27.1 ✧ 26:3: Man 11.13-15, 28.1-14



waitigi karume tí baba wai bule naibulebira. <sup>7</sup> Tígua waitigi baba wai bu puwa tí wayali halu waitigi karu mo ko howa boleberemi. <sup>8</sup> Tínaga ami agali duriali hangume waitigi handari mbira (100) baba wai birimiyagua bo waholeberami. Ani buwa tínaga ami agali handari mbira (100) hangume waitigi agali daosini pira (10,000) baba wai birimiyagua tígua waitigi mo ko howa bo poda hana haga buleberemi. <sup>9</sup> Ani bialu kamigola ina tí mo bayale howa waneigini mo dame bia halu dewaore ngigi bialu howa ina habo nalolene bi lo wirugodagua biaore bulebero. <sup>10</sup> Tínaga mabu ngamigoha tomo mali mbiranaga bu wirimigo mali mendegonagabi karulape nalu holene wiadege bulebira. Mali mendenaga tomo hengenego boga bidagola tomo bu wiaga andaha tomo ala bu winigo nai habe nahedagola wahalu tomo gahenge bu wia aribia holene wulebira. <sup>11</sup> Ani bialu kamigola inibi nde tí dege dombeneha inaga Balai Anda biagoha mandagi haabo holebero. Ina tí wahalu erembira ngialu napolebero. <sup>12</sup> Ani bialu i tínaga Ngode Datagaliwabe howa tí dege dombeneha ibaga bialu tí heba mandagi haabo holebero. Ani kogola tí nde inaga wali agali leneore holeberemi.✧ <sup>13</sup> Ini Anduane Homogo tínaga Ngode Datagaliwabeore kogoni. Bamba tí Iyibi dindiha garabaya biabe ale bialu hemiria ani nahalimulonaga ina tí golope halu haru tagira ibirugoni. Iyibi agali tí garabaya bu helaga hearunaga hongo wiago bope harugola tí garabaya golalu tagira pu howa turu tara ho kamigoni ndobe, lene.

*Anduane Homogohanda, Inaga bi mana mo wahaga karu pani mulebero, lenego ogo (Mana Loyane 28.15-68)*

<sup>14</sup> Anduane Homogohanda laabo halu lulu, Tígua mana o langiruruni talialu bia nabi harimiyagua nde tí pani noleberami. <sup>15</sup> Tígua inaga bi mana lo ngoru erembira ngialu inaga bi larogobi mo wahalu pirimiyaguabi habo nalolene bi lo wirugo mo habo larimiyaguabi <sup>16</sup> nde ina tí pani nalimulo ngulebero. Ina tí mo gi timbuni halu warago timbuni tara tara ngaru mo ibilalu berogola tínaga de ndibulai helalu tínaga tinginibi mo ko hai helalu bulebero. Tínaga mabuha tomo hangarami tiraga tomo bialu nanoleberemi. Tínaga waitigi karu ibalu tí mo ko halu tínaga mabuha tomo hangedemiru bialu nolebira. <sup>17</sup> Inabi nde tí baba waitigi halu ina tínaga waitigi karume tí baba wai bilimulo ibilolebero. Ani ibilarogola waitigime tí bo poda hana halu handayaho holebira. Ani bialu tihondo handabe manga ho karume tínaga haru haga holebira. Marume tí bama talima ibiragola ndo tígua bame gi timbuni halu ibida poleberemi.

<sup>18</sup> Ina ogonidagua bialu tí pani ngialu kogolabi tígua dogo howa mana ko ngaru bialu haabo harimiyagua nde ina tíha genda tandagaru timbuni kahalu mo tago howa ngulebero. <sup>19</sup> Ina anidagua bialu tínaga mine haga mana ngamiru bope holebero. Tínaga dindi ngamiruhabi dalu naibilo minu yania ho kogola dalu naibi wialu dindi giambe halu ege tole ale holebira. <sup>20</sup> Ani bidagola mabuha tomo hangedemirubi ira lini dagane hangedemirubi bibahende lini nadolebira. Ani hangalu kamiria tínaga biabe uruni erekui bini bame horo mo hole bini bialu holeberemi.

<sup>21</sup> Ani bialu genda uruni ibirago ibilowabi tígua inaga bi hale habe manga haabo harimiyagua nde tihondo genda timbuniore kahalu lone mo tago howa ibilolebero. <sup>22</sup> Nogo gabua tara tara karu tí kamigoha ina ibilolebero. Ani ibilarogola urunime tínaga waneigini bu karubi nogo bulumaga bu karubi bo wahaga bulebira. Ani bialu kagola tí daluha hariga ngaruni wali agali mbira bolangua haga bialu pialu kariabi nahondoleberami. Wali agalibi dewa ndo emene hangu holeberemi.

<sup>23</sup> Ani bialu ina genda urunibi ngaru tíha ibilaga berogola tígua mini beregeda nabi inaga bi mana hale habe manga dege halu ihondo mine haabo harimiyagua <sup>24</sup> nde ina tínaga ko ngamiru mitangi bialu genda timbuniore ala ibilarudagua ndo lone kahalu mo tago howa ibilolebero. <sup>25</sup> Tí baba habo nalolene bi lo wirugo mo habo larimigonaga ina nde tínaga waitigi karu tí baba wai hongo howa bilimulo ibilolebero. Ani ibilarogola

✧ 26:12: 2 Ko 6.16

tígua tano hongohe ege pabe bu mabubi ngagoha howa bayale kamabe toba ho kamiria ina warago ko timbuni dabi nahagane ngago ibilarogola wali agali dewaore warago ogonime balu homelolebira. Tí ani mo ko hene kamigola nde ina tí waitiginaga giha minu ya haga bulebero. <sup>26</sup> Ina tínaga tomo mo ndia helarogolabi tínaga wali bedarume irani tomo dawalene dewa nawulebira. Ani biragola ira mbiraore dege dedagoria wali pirame mberedi hirulebira. Ani hiruwa walime mberedi ogoni tale biragola tígua emene budini hangu naga bialu howa tombe nahe dege garibilo haabo holeberemi.

<sup>27</sup> Anidagua berogo bilowa tígua mine ha dege bialu inaga bi ledogo mo wahalu haabo harimiyagua nde <sup>28</sup> ina tihondo keba timbuniore ho howa tígua ko ogoni biaabo harimigonaga pani abale ngirugobi ndo timbu gibiore lone kahalulu mo tago howa ngulebero. <sup>29</sup> Ani ngerogola tí kamigoha hina gari timbuni tagira ibiragola tomo nalu holene nawidagola tínaga waneiginiore balu noleberemi. <sup>30</sup> Ina tí baba miniha gendaore timbuni yu howa tígua dama mitangi bialu bi pupu wulenaga mbirale gime wabini ngarunaga anda hari nene ngaruha bu helaga bidemiruni bibahende bo giallo wahai holebero. Ani bialu ira hagua ngabilo inisenesiru lomabu delaga dabu bu heledemiruni bo giallo wahai holebero. Ani bialu tínibi minu balu tínaga tingini bi pupu wulenaga dama wabu wirimigo giallo waharugoria wia dambi helolebero. <sup>31</sup> Tíinaga anda bu kamirubi i mitangi bialu lotu laga anda bu heledamirubi bibahende bo giallo wahai halu tígua mbirale ihondo lomabu yalu ibuwa ngeremigobi hondowa turu nahe handabe manga holebero. <sup>32</sup> Ani buwa tínaga dindi mo ko hai harogola wali agali tínaga waitigi dindi ogoni karulo karume dindi kodane mogolo hondowa ogoni agile dindidabe laga bulebira. <sup>33</sup> Ina tínaga waitigi bu karu baba wai bilimulo mo biahaga berogola waitigime tí bo garabaya bu yalu dindi tara tara ngaruha pugupugu bulebira. Anidagua biragola tínaga dindi ngamigoha wali agali mbira nahe dindi dabulu wulebira. Ani bialu tano ngarubi bo gialabaga bini wulebira. <sup>34-35</sup> Anidagua bialu tí dindi tara tínaga waitigiru daluha pu kamitambu tínaga dindi dabulu bameore wulebira. Bamba tígua dindi ogoniha howa mali kaneni tomo nahenge bame ngelalimu lalu ina langirugodagua nabi dege haabo harimigonaga anidagua bulebero. Dindi tomo nahenge ogonidagua ngelarogola dindi bayaleore hodai bulebira.

<sup>36-37</sup> Tínaga wali agali bibahende homaiore nahe emene yu waheneru tí dindi tara tara ngaruha garabaya bu yalu pene holeberami. Ani kamigola ina tí mo gi timbuni halu puyabu pulalu howa ira yuni giligele laga biraru hale howa waitigiru talima ibaruabe toba howa mogo lalu ibida hariga nawiha poleberemi. Waitigi naibi ngagoyu tínime gi howa ibida pugupugu bialu kamiria pu lulu yahalu tíninaga embone degedege mo tilitola lalu ona pilo odo wigiwigi buleberemi. Ani bialu howa tínaga waitigi karume ibalu tí wai bule ibiragola nde tí hongo halu wai bibenahe holeberemi. <sup>38</sup> Ani bialu tínaga waitigi karu daluha pu kamiria dindi ogoniha tí pu ereba halu homai holeberemi. <sup>39</sup> Anigo wali agali maru hangu waitigi daluha yu wahene kamiru tí nde hangu hangu mo ko haga biragome homo biba halu ereba hai holene kawareore wulebira. Anidagua bulubadagoni irane tínimebi tínaga mamalirumebi mana ko bialu hene ngarume pani nolene ogoni tíha wiaabo holebira.

<sup>40</sup> Ani bulebiragoyu mani tínaga aguanene holebirarume ko tiha wiyada lo manda bialu tigua tinaga ko uruni ihondo lapani haga bulebira. Tigua lalu, Inamebi inanaga mamalirumebi mana ko dege bialu harima. Ani buwa iname inaga bi mana lo wiago mo wahalu mine timbuni harimagoni, laga bialu lapani holebira. <sup>41</sup> Tígua mine tara halu hemigola pani nalimulo ina mo ngialu tínaga waitigi bu hearume ti daluha garabaya bu yalu pelarugoni ndobe. Anigo tínaga aguanene uruni tigua tini mo dindiha halu tigua ko biyarunaga pani tandagabi nolene ngaru nalu <sup>42</sup> haragola howa ina bamba habo nalolene bi Yagaba bababi Aisaga bababi Abarahama bababi tihondo lo wialu lalu, Kenana dindiore tínaga waneigini aguanene mani holebirarubi tinaga wilo mulebero,

lalu lo wirugo mitangi budai bulebero. <sup>43</sup> Anigo ala dindi ogoni wali agali nahe dabulu ngelo hondoha nabi tomo hangalu haabo harimigonaga dindi halu mbira embera ngelonaga tí dindi ogoni ngelalu tagira polene nga. Ani howa mana lowini ngagobi bi langirugobi bibahende mo wahai harimigonaga pani nalu genda yu haabo holene nga. <sup>44</sup> Tí dindi tara tínaga waitigi dindiha howa tandaga ani nalu kamigolabi ina tí yu wa naholebero. Tí yu waharuyagua nde habo nalolene bi lo wirugobi habo lolebira. Anigo i Anduane Homogo tínaga Ngode Datagaliwabeore kogodago anidagua nabulebero. <sup>45</sup> Ina tí mitangi bialu tínaga mamali inila habo nalolene bi lo wialu lenedarubi bibahende mitangi budai bulebero. Ani bialu tí wali agali dindi bibahendeha bi taratara lagalaga biaga palaru bibahendenaga deni ina tínaga mamali iyibi dindiha howa haru tagira ibalu ogoha haru ibirugola wali agali bibahendeme ininaga hongo timbuni wiwago ti handai haya. I Anduane Homogo howa tí Isaraele wali agalinaga Ngode Datagaliwabeore holenaga ina tí haru tagira ibalu ogoha haru ibirugoni, lalu Anduane Homogohanda lene.

<sup>46</sup> Mana uruni lamiyadagobi bi galone lamiyadagobi uruni bibahende Anduane Homogohanda Hari Sainaiha howa Mosesehondo lamini.

## 27

### *Wali agalime mbirale Anduane Homogohondo mulenenaga mana winigo ogo*

<sup>1</sup> Anduane Homogohanda Mosesehondo lalu, <sup>2</sup> Isaraele wali agali bu karuhondo ogodagua labe. Mbiralime ibuni ihondo lomabu ngulene hame lowa bi lo wu hene heaguabi wali agali mbirago ihondo lomabu ngule lowa bi lo wu heaguabi nde urunidagua lomabia ho henedaruni tinaga munime yolo biadai bulene nga. Muni ogoni wali agali mbirago yolo bulene muni karulapedago hondowa loma binigo mo miaga kagohondo muni mule lalu lo wiyago karulapelo mulene nga. <sup>3-7</sup> Wali agalime muni yolo biadai bulene magi ogodagua.

Agali mali pira kirala (20) pira waragariala (60) dombeneha hene karu ti muni kina dege handari duriame (500) yolo biadai bulene nga.

Wali mali ogonidagua dege bedaru tibi nde muni kina dege handari tebirame (300) yolo biadai bulene nga.

Igiri mali duriala pira kirala (20) dombeneha karu ti bibahende muni kina dege handari kirame (200) yolo biadai bulene nga.

Wandari mali ogonidagua dege pene bedaru tibi nde muni kina dege handari mbirame (100) yolo biadai bulene nga.

Igiri gali mali duria bolangua nahe karu ti muni kina pira duriame (50) yolo biadai bulene nga.

Wandari gali emene mali ogonidagua dege bedaru tibi nde muni kina pira tebirame (30) yolo biadai bulene nga.

Agali mali pira waragaria (60) bolangua hene karu ti nde muni kina handari mbirani pira duriame (150) yolo biadai bulene nga.

Walibi nde mali ogonidagua dege bedaru ti muni kina handari mbirame (100) yolo biadai bulene nga.

<sup>8</sup> Wali agali mbirago ibuni nde yolo ogoni biadai bulenego manda bu karia muni nakarulape tubagi hayagua nde o biago ibu loma binigo mo miaga kago hondo polene nga. Loma binigo mo miaga kago ibugua muni ogodagua karulapedago manda buwa yolo bialu ngiadai bule ina ogodagua yolo bibehedago bia laradagua bulene nga.

<sup>9</sup> Mbiralime Anduane Homogo ihondo mbirale lomabu ngule lalu lo winidagua áyu lomabu ngiyagua nde nogo egabi ogoaleore lomabu bo ngilimu lalu abale langirudagua bialu bo ngulene nga. Tígua nogo egabi lomabu ngeremigo damene bibahende

☆ 26:42: Pí 17.7-8, 26.3-4, 28.13-14

ininagaore wulebira. <sup>10</sup> Mbiralime ihondo nogo mbira loma bialu bo ngule lo wiyago nogo mende aribia hole manda biyaguabi nogo bayale ihondo bo ngule kago mo aribia howa nogo ko kago ihondo lomabu ngulene manda biyaguabi ogoni nakarulapeore. Ani biyagua nde bayale kago lomabu bo delolenaga ko kagome kango henedagobi kirabali Anduane Homogo ininaga dege holebira. <sup>11</sup> Mbiralime ihondo nogo egaru mbira loma bialu bo ngule karia ogoni inaga deni ko dodoheyagua nde wahalu loma binigo mo miaga agali karia yalu polene nga. <sup>12</sup> Ani yalu poragola loma binigo mo miaga kagome nogo egabi bayalebe kodabe hondowa muni ogodaguame yolo bibeheda lolebira. Anidagua laragola yolo ogoni gadia dali ha gadia daga ha bulenebi nawiore. <sup>13</sup> Nogo egabi anduane biago ibugua muni aribia halu lomabu mulene hamelayagua nde muni nogo yolo bulene karulape mialu marubi tago howa mulene nga. Loma binigo mo miaga kago ibugua kina duriame yolo bibe layagua nde anduane biagome kina mbira tago howa waragariame yolo biadai bulene nga. Kina pirame yolo bibeheda layagua nde kina kira tago howa homberiam (12) yolo biadai bulene nga.

<sup>14</sup> Mbiralime ibunaga anda ihondo lomabu ngule hamelo heagua loma binigo mo miaga kago ibugua anda ogoni kodabe bayaledabe ala hondolene nga. Ani hondowa ibugua anda ogoni muni yolo ogodaguame karulapeda lolebira. Ani laragola muni ledago gadia dali ha gadia daga ha bulene nawi. Muni daga miyadagua yolo bulene nga. <sup>15</sup> Ani bialu agali biagome Anduane Homogo inihondo anda lomabu ngiyago ibuni yolo biadai bulene manda biyagua nde agali anda anduane biagome anda biago muni karulapeme yolo bialu muni marubi tago howa mulene nga. Ibugua loma binigo mo miaga kagohondo muni mialu anda ibuninaga holebira.

<sup>16</sup> Agali mbirame ibunaga dindi mbira Anduane Homogo ihondo loma bialu tu wu ngiyagua nde dindi ogoniha widi ale dege mini bali lini egane agirame hongolene karulapedabe hondole loma binigo mo miaga kago ibugua hondo polene nga. Ani handalu karia bali lini egane genda magi kilogarama pira kirame (20) hongolene karulapeyagua nde mabu ogoni muni kina handari mbirame (100) yolo bulene karulape holebira. <sup>17</sup> Yadai Bulenenaga Mali biago tagira ayure ibini lowa mali mbira napedaore nde dindi anduanedago ibunime muni kina handari mbira (100) ogonidagua degeme Anduane Homogo ini ngiadai bulene nga. Muni gadia daliha gadia dagaha bulene nawi. <sup>18</sup> Anigo agali mbiragome dindi ihondo nguledago dindi anduane ibunihondo Yadai Bulenenaga Mali biago mende angi tagira ibulebadabe ala manda buwa loma binigo mo miaga kagome mali ngadagua nde muni ngi lolebira. <sup>19</sup> Agali mbirame dindi mbira ihondo tu wu ngiyago ibugua nde dindi ogoni ibuni yolo duguadai bulene hamelo heagua nde munime yolo duguadai bulebira. Loma binigo mo miaga kago ibugua muni kina handari mbirame (100) yolo duguadai bulene nga layagua nde agali mabu anduane ogoni ibugua muni kina handari mbirani pira kirame (120) yolo duguadai bulene nga. Ibugua muni ogoni loma binigo mo miaga agali biagohondo mialu dindi ibuni mo yu dai bulebira. <sup>20</sup> Agali ogoni ibugua ihondo yolo ngiadai nabi ngelowa agali mende kagohondo dindi biagonaga muni mo nayagua nde mani ibunaga dindi Yadai Bulenenaga Mali biago tagira ibirangi miadai nabibehe holebira. <sup>21</sup> Yadai Bulenenaga Mali biago mende tagira ibiragola nde agali dindi yolo biyago ibugua inihondo ngiadai bulebira. Ani ngiadai biragola dindi ogoni ininaga wiabagi hene wialu wali agali mbiralime ogoni karulolene nawulebira. Ani ngagola inime inaga loma binigo mo miaga karuhondo mo mulebero.

<sup>22</sup> Agali mbira ibu aba mamalirunaga dindi ndo agali mendenaga ngago yolo buwa Anduane Homogo ihondo lomabu ngiyagua <sup>23</sup> nde loma binigo mo miaga kago ibugua mali agira howa dindi ogoni Yadai Bulene Mali angi tagira ibulubadabe ala manda bu hondolene nga. Ani hondowa mabu ogoniha tomo mali uruniha bialu nalu holobadadagua muni yolo bibe lolebira. Ani laragola agali biago ibugua horo ogo-

ningiore muni loma binigo mo miaga kagohondo mulene nga. Ani miragola muni ogoni Anduane Homogo ininagaore wulebira. <sup>24</sup> Ani howa mani dindi andaru anduane kago ibunihondo Yadaí Bulenenaga Mali biago tagira ibirangi agali dindi ogoni yolo biyagome dindi anduane kago ibuni miadai bulene nga.

<sup>25</sup> Tígua uruniale damene bibahende yolo tiga tigaore bulene ngadagua latagi haga bilimu.

<sup>26</sup> Tígua ihondo nogo lomabu ngule howa nogo igini pigane wini kago bibahende ininaga hene kago lone ngibe nahego ai maha wini karu lomabu ngilimu. Nogo bulumaga sibiru mbirago hangu ndo nogo damene bibahendenaga igini pigane wini kago damene ininagaore ka. <sup>27</sup> Anigo nogo igini pigane wini kago aria mbirago inaga deni bayale ndo heagua nde tíni halu i muni aribia halimu. Muni ogoni loma binigo mo miaga agali kagome kina pira agimame mulene ngago layagua nde agali nogo anduanedago ibunime kina kira paga howa homberia (12) mulene nga. Agali ogoni ibu nogo ogoni yolo aribia nahayagua nde loma binigo mo miaga agali kago ibugua muni ogodaguame yolo bibe laradagua agali mendeme yolo bia aribia halu nogo ogoni ibu holebira.

<sup>28</sup> Agali mbirame ibunaga mbirale ngago mbira Anduane Homogo ininagaore lalu wiabagi ho ngelayagua nde ogonime biabe tara tara ngaru bulene nawi. Ani bialu agali mende kagome yolo bilo mulenebi nawi. Ibunimebi loma binigo mo miaga kagonaga giha howabi yolo biadai bulenebi nawi dege. Mbiralime wali agali lomabia heneyaguabi nogo lomabia heneyaguabi dindi ibu mamalinaga wia ai heneyaguabi uruni bibahende Anduane Homogo ininagaore loma bini wiaabo holebira. <sup>29</sup> Hale halimu. Tígua waliyaguabi agaliyaguabi mbira loma bia howa heleneyagua nde ininagaore lene haabo holebira. Anduane kago ibunime yolo biadai bulene nawiore. Wali agaliyaguabi ogoni ibu homelo bolene nga.

<sup>30</sup> Tí mabuha tomo hengedemiru boga biragola widiyaguabi ira lini dedaru alebi bibahendenaga pinipinigo Anduane Homogo ininagaorego inihondo talebu ngilimu. Pinigo tíni nolene nawigo nanalimu laro. Pinigo ininagaore nga. <sup>31</sup> Agali mbirame mbirale uruni ale ibuni yolo biadai buleyagua nde ani bulene karulape degego yolo biadai bulene nga. Mbirale uruni muni kina duriame yolo biadai bulene karulapeyagua nde ibugua muni kina waragane tago howa yolo biadai bialu muni loma binigo mo miaga kagohondo mulene nga. <sup>32</sup> Nogo bulumaga pira heaguabi sibi pira heaguabi pinipinigo inaga dege holebira. Nogo hinu kamiru damene mo mogobu helowa pira dege halu mbira helaga bialu pira mbiragonaga pini dege dege ini ngilimu. <sup>33</sup> Nogo ko bayaleyaguabi pini ininaga kago mbira mo iriari nabilimu. Mbira mo iriari birimiyagua nde mende aribia harimigobi kirabali ininaga dege holebira. Kirabali ininaga dege holebirago tíni yolo biadai bulene nawigo nabilimu, lalu Anduane Homogohanda lene.

<sup>34</sup> Bi mana uruni Isaraele wali agali hearume talialu biai helo Anduane Homogo ibugua Hari Sainaiha howa Mosesehondo lamiai hene.



## Dagalene

### Mbuga ogoha gilibu ngarunaga nemandi ogo

Bi Dagalene goha lo ngagoni Isaraele wali agali mali pira maria (40) agima Hari Sainai yu wahalu dindi ni ibiragohayagi Ngode Datagaliwabehanda ngulebero lo wiyagoha pole lowa pialu dindi ogoni tubariani anda pene lo nga.

Mbuga ogoni mini Dagalene lo ngagoni irane Isaraele wali agali bibahende hearu Hari Sainai howa Mosesehanda ti dagalene gonaga lowa mini nga. Ani bialu daba mbira agima peagola halu mende dagala dai bini. Iba Yodana poragoha dindi mbira ni ibiragohayagi mini Moaba wiagoria howa bini. Daga halu kira layadago hengeneha Isaraele tigua dindi Kenananaga unurahayagi mini Kadese Banea lo wiyagoha penego ogoriani howabi Kenana dindi anda pobehe winigo kobene lalu lo nga. Ani buwa mali dewaore dindi ogoniha buyu ibagabu howa iba Yodana poragohanaga ni ibiragohayagi pu hene. Ogoriani howa hameigini maru tigua iba Yodana domalu Kenana pole manda manda bini.

Dagalene gome lo ngaru Ngode Datagaliwabehanda wali agali dindi bayaleni haru pole piyagoyu kobi gibibi dewaore wiago hondowa gi timbuni halu gendabi timbuni halu hene. Tigua Ngode Datagaliwabenaga bi layaru mo wahalu Mosese ibu Ngode Datagaliwabe ti haru helo helayagohondobi gimigomo lalu mo genda henego gilibu nga.

Galone mbira manda bimiyago Isaraele wali agalime ho beregedaga bialu Ngode Datagaliwabenaga mini mo ko haabo haya. Tigua ani biyagoyu Ngode Datagaliwabe ibugua ti erembira nami howa wali agali biamogo timbuni dege biaga kagonaga te gilibu nga.

Galone mende manda bimiyago Mosese ibu Ngode Datagaliwabehanda dabenedalo manda buwabi wali agali ibugua haru hole haruda lowa manda bolangua howa wali agali gimigomo layarumebi ba hondolene tara tara ibiyarumebi bope nahabehe hongoheore henegonaga te lo nga.

#### **Bulu бага бува кuni gilibu ngago (1.1-9.23)**

Isaraele wali agali tigua Hari Sainai yu wahalu pole manda manda binigo

1.1-4.19

Wali agali mini piganengi dagalene go

5.1-8.26

Mbirale tara taranaga mana ogodagua bilimu lalu laminigo

9.1-23

Bolangua Halu Penego Horonaga Tomo halu mende nenego 10.1-21.35

Hari Sainai teneni howa Moaba dindi penego 22.1-32.42

Moaba dindi howa bigi biniru 33.1-49

Iyibi dindini howa Moaba dindi penegonaga gare lenego 33.50-36.13

Yodana domole howa ogodagua bilimu lalu te laminigo

#### *Isaraele agali haguane hearume wali agali bibahende daga lai henego ogo*

<sup>1</sup> Isaraele wali agali ti Iyibi dindi wahalu tagira penego mali mendegonaga ege mendeni horo mbira hayagola Sainai dindi ko yobi iba dalu naibaga wiagoria Anduane Homogohanda ibunaga Balai Anda heagoha howa Mosesela bi lene. <sup>2</sup> Anduane Homogohanda lalu, Í Aronola libugua Isaraele agali karu dagalalu tinaga mini gilibu wiai halibu. Mini gilibu wialu ti damene mbira mbira hayadagua hameigini hangu hangu dagalalu gilibu wiai halibu. <sup>3</sup> Agali maru ami agali habehe mali pira kira (20) bolangua hene karu dagalai halibu. <sup>4</sup> Ani bialu libuni biamogo bilonaga agali hameigini kadagua

☆ 1:2: Dag 26.1-51

agali haguane mbira mbira dabo helalibu, Anduane Homogohanda lene. <sup>5-16</sup> Ani lowa lalu agali haguane maru libu biamogo bilonaga dabo helenedaruni uru.

Lubene aria Sederu igini Elisu helene. Simiono aria Surisadai igini Selumiele helene. Yuda aria Aminadaba igini Nasono helene. Isaga aria Suara igini Nedanele helene. Sebulunu aria Helono igini Eliaba helene. Eberaimi aria Amihudu igini Elisama helene. Manase aria Pedasu igini Gamaliele helene. Beniyamini aria Gidioni igini Abidana helene. Dana aria Amisadai igini Ahiese helene. Ase aria Ogorana igini Pagiele helene. Gada aria Duele igini Eliasaba helene. Nabadali aria Enana igini Ahira helene.

<sup>17</sup> Ani lamiyagola hale howa Mosese ibugua Isaraele agali hameigini mbira mbi-ranaga agali haguane uruni ti ibilo olo ngoai hene. <sup>18</sup> Ibiyagola Mosese Aronobi agali haguane homberiali (12) dabo helayarubi tigua ege mendegonaga horo mbira hayagola Isaraele wali agali bibahende ibu ngoai hadaba layagola ti bibahende ibu ngoai hene. Ani ibiyagola agali haguane biaru tigua bibahendenaga mini tini hameigini hayadagua gilibu wigi wigi bini. Ani bialu agali mali pira kira (20) bolangua hene agira kabe hondole dagalalu tinaga mini gilibu wini. <sup>19</sup> Anduane Homogohanda ala Sainai dindi ko iba dalu naibaga wiagoria Mosesehondo lamiyadagua ani biai hene.

<sup>20-46</sup> Ani bialu agali mali pira kira (20) hayarubi maru pira kira bolangua hene hayarubi bibahende ami agali habehe biaru mini gilibu wialu dagalai hene. Tigua ani bule howa hameigini mbira mbira aba igini mbira mbira headagua agali ami habeheru Yagaba igini wahene Lubene hameigini howa ala dagalalu mini gilibu wini. Agali hameigini headagua tinaga mini ogodagua gilibu wini.

Lubene aria daosini dege pira mariani waragaraia halu handari duria (46,500) bibahende hene. Simiono aria daosini dege pira duriani dira halu handari tebira (59,300) bibahende hene. Gada aria daosini dege pira mariani duria halu handari waragaraia pira duria (45,650) bibahende hene. Yuda aria daosini dege pira kariani maria halu handari waragaraia (74,600) bibahende hene.

Isaga aria daosini dege pira duriani maria halu handari maria (54,400) bibahende hene. Sebulunu aria daosini dege pira duriani karia halu handari maria (57,400) hene. Eberaimi aria daosini dege pira mariani handari duria (40,500) bibahende hene. Manase aria daosini dege pira tebirani kira halu handari kira (32,200) bibahende hene. Beniyamini aria daosini dege pira tebirani duria halu handari maria (35,400) bibahende hene. Dana aria daosini dege pira waragariani kira halu handari karia (62,700) bibahende hene. Ase aria daosini dege pira mariani mbira halu handari duria (41,500) bibahende hene. Nabadali aria daosini dege pira duriani tebira halu handari maria (53,400) bibahende hene.

Anidagua haga binigo ai bibahende daga lamaga halu daosini dege handari waragariani huniane tebira halu handari duriani pira duria (603,550) bibahende hene.

<sup>47</sup> Tigua agali bibahendenaga mini dagalalu gilibu wiai hayangi hameigini mbiraore Libai ibu aria dege dagalalu nagilibu wini. <sup>48</sup> Anidagua binidagoni irane abale Anduane Homogohanda Mosesehondo lamialu lalu, <sup>49</sup> Ina ami agali habehe karu dagalalu mini gilibu wialu howa Libai hameigini ti dege mini gili bialu daga lamaga nahabe. <sup>50</sup> Ani bulene nawiore. Libai hameigini tigua inaga Balai Anda kagoha biabe bialu howa anda ogoni handayaho haga helo helabe. Ani helowa tininaga balai andabi inaga bu heledagoria dege mandagi helo lenelene bu mabu bidaba labe. <sup>51</sup> Tigua dindi mbirani balai anda bu harimigo giallo yalu dindi mendeha poramingi inaga Balai Anda kagobi mbirale i anda ogoniha wini ngarubi bibahende Libai agali karume mo yalu pugu bilo. Agali maru Libai hameigini aria ndo kamiru tigua inaga Balai Anda kagoria haparaho harimiyagua nde tini homolene nga. <sup>52</sup> Isaraeleali hameigini maru kamiru ti nde tininaga hameigini emene hagahaga birimidagua balai anda bu hagahaga buwa tini hameigininaga pelagi helagalaga bilimu. <sup>53</sup> Anigo Libai hameigini tigua dege tinaga

balai anda inaga Balai Anda kagoria buyu mabu buwa anda ogoni handayaho helo. Ai bi larugo mo wahalu mbirali inaga Balai Anda ogoni kagotha pialu karia inaga keba holene timbu halu Isaraele wali agali bo wahai holigo Libai aria tigua inaga Balai Anda mamage helo helolene nga, lene. <sup>54</sup> Ani layagola hale howa Mosese ibugua bi uruni Isaraele wali agaliruhondo lamiyagola tigua Anduane Homogohanda layadagua talialu biai hene.

## 2

### *Anduane Homogohanda Balai Anda ogodagua bu halimu lulu mana minigo ogo*

<sup>1</sup> Anduane Homogo ibugua Mosese Aronolahondo lamialu lulu, <sup>2</sup> Agali hameigini mbira mbira kamiru tinaga balai anda bule tininaga pelagi kagoria kaware ti hameigininaga pelagi kago kawarenibi balai anda biapara howa bilimu. Ani buwa inaga Balai Anda kagonaga lenelene bu mabu bilimu. Anigo tinaga balai anda inaga Balai Anda kago biapara howa kaware nabi emene kaundiani bilimu, lulu lamini. <sup>3-9</sup> Ani layadagua Isaraeleali tigua abene ni tagira ibiragohayagi hameigini tebira Yuda hameigininaga pelagi kago andaneha mo mogo buwa balai anda bialu tinaga agali haguane hearu andaneha hene.

Yuda aria Aminadaba igini Nasono daosini dege pira kariani maria halu handari waragaria (74,600) hene. Isaga aria Sua igini Nedanele agali dege daosini pira duriani maria halu handari maria (54,400) hene. Sebulunu aria Helono igini Eliaba daosini dege pira duriani karia halu handari maria (57,400) hene. Ani howa ti dagalamaga howa agali hameigini tebira uruni daosini dege handari mbirani pira halirani waragaria halu handari maria bibahende (186,400) hene. Ti balai anda bu hayaru giallo yalu dindi mendeha polene tu haragola Yudanaga pelagi kagotha hameigini tebira heneru ti ala mo bamba halu piaga hene.

<sup>10-16</sup> Dindi abene unurahayagi hameigini tebira Lubene hameigininaga pelagi kago andaneha mo mogo buwa balai anda bialu tinaga agali haguane hearu andaneha hene.

Lubene aria Sederu igini Elisua daosini dege pira mariani waragaria halu handari duria (46,500) hene. Simiono aria Surisadai igini Selumiele daosini dege pira duriani dira halu handari tebira (59,300) hene. Gada aria Duele igini Eliasaba daosini pira mariani duria halu handari waragariani pira duria (45,650) hene. Hameigini tebira bibahendenaga agali dagalamaga halu daosini dege handari mbirani pira duriani mbira halu handari mariani pira duria (151,450) hene. Dindi ti balai anda bu hayaru wahalu dindi mendeha pole pialu howa tigua hameigini tebira bamba halu piyaru talima mama pene.

<sup>17</sup> Tigua pole pialu howa Yuda hameigini tigua bamba halu piaga hene. Ani poragola hameigini maru porago erembiraha pumaga halu pugu biaga hene. Balai anda bu hayagoria mo tiga buwa harimidagua gi tigahayagi hayago tigua ala mo bamba haga bialu tinaga pelagi biago yalu poradagua pugu biaga hene. Ani poragola Libai hameigini tigua Anduane Homogonaga Balai Anda heago giallo yalu hameigini waragaria bamba helalu waragaria mende maha helalu buwa ti dombeneha piaga hene.

<sup>18-24</sup> Ni paliragohayagi hameigini tebirali mo mogo buwa Eberaimi hameigininaga pelagi heagoha dege hamaga haga biaga hene. Ani howa ti hameigininaga agali haguane mbira mbira haga biyaru andaneha hagahaga biaga hene. Eberaimi Amihudu igini Elisama daosini dege pira mariani handari duria (40,500) hene. Manase Pedasu igini Gamaliele daosini dege pira tebirani kira halu handari kira (32,200) hene. Beniyamini Gidioni igini Abidana daosini dege pira tebirani duria halu handari maria (35,400) hene. Agali hameigini uruni bibahende dagalamaga howa daosini dege handari mbirani halira halu handari mbira (108,100) hene. Balai anda bu hayaru wahalu dindi mendeha pole howa tigua hameigini tebira halu mende bamba halu piyaru talima mama pene.

<sup>25-31</sup> Dindi abene uyurahayagi Dana hameigini heagonaga pelagi heagoria kaware haparaho haga hearu ti nde tinaga agali haguane hearu andaneha haga hene.

Dana Amisadai igini Ahiese daosini dege pira waragariani kira halu handari karia (62,700) hene. Ase Ogorana igini Pagiele daosini dege pira mariani mbira halu handari duria (41,500) hene. Nabadali Enana igini Ahira daosini dege pira duriani tebira halu handari maria (53,400) hene. Hameigini uruni bibahende dagalamaga halu daosini dege handari mbirani pira duriani karia halu handari waragaria (157,600) hene. Tigua tinaga pelagi yalu ti maha pumaro biaga hene.

<sup>32</sup> Isaraele hameigini bibahende dagalamaga halu daosini dege handari waragariani tebira halu handari duriani pira duria (603,550) hene. <sup>33</sup> Tigua Anduane Homogohanda layadagua Libai hameigini ti Isaraele hameigini maru baba dagalamaga nahene.

<sup>34</sup> Anidagua bialu Isaraele wali agali tigua Anduane Homogohanda Mosesehondo bilimu lalu lamiyadagua bibahende biaiore hene. Hameigini mbira mbirame tininaga balai anda pelagi heagoria kawareni bu hayaru ti pole howa giallo yalu tini henedagua pugu biaga hene.

### 3

#### *Arono igini henerume binigo ogo*

<sup>1</sup> Anduane Homogo ibugua Mosesela Hari Sainai heagoria bi laribingi howa Mosese Aronola libu damene ogodagua hene. <sup>2</sup> Arono igini maria henego wahene Nadaba hene. Mende Abihu halu tebone Eleasa halu mane Idama hene.\* <sup>3</sup> Ani hemigola Mosesehanda tinaga hagianeni weli odo wialu ti agali loma binigo mo miaga helo dabo helene. <sup>4</sup> Anigo ti Sainai dindi ko yobi wiagoha hemingi howa Nadaba Abihulame ira hagua ngabiaga inisenesi lomabu delalibu lalu Anduane Homogohanda lamiyagola ndo libuni manda bialu lomabu delalu hene. Ani bialu hebiria Anduane Homogohanda libu homelo bo wahene. Anigo libunaga waneigini mbira nahe homene. Ani biyagola igiri kirali Eleasa Idamala libu aba Arono heangi loma binigo mo miaga agali howa biabe bialu hene.\*

#### *Libai hameiginiru loma binigo mo miaga helo dabo helaga binigo ogo*

<sup>5</sup> Anduane Homogohanda Mosesehondo lamialu lalu, <sup>6</sup> Libai hameigini karu haru ibuwa ti loma binigo mo miaga Arononaga biabe biaga helo dabo helabe. <sup>7</sup> Tigua inaga Balai Anda kagoa biabe bulene ngago bialu howa loma binigo mo miaga karunaga biabe birago biamogo bialu wali agali karubi biamogo bialu helo dabo helabe. <sup>8</sup> Ina Isaraele wali agali tihondo lamirudagua Libai hameigini tigua inaga Balai Andaha ngaru bibahende baya hangu handayaho holebira. <sup>9</sup> Libai hameigini karu tinaga biabe bulene mbiraore hangu nga. Tigua Aronobi ibu iginirubi loma binigo mo miaga karunaga biabe bialu haabo holebira. <sup>10</sup> Aronobi ibu iginirubi tigua dege loma binigo mo miaga howa tinaga biabe bulene alego bialu holebira. Anigo agali Arono aria ndo mbirame loma binigo mo miaganaga biabe ngago bialu heagua nde agali ogoni homelo bo wahalimu, lene.

<sup>11</sup> Ani lowa Anduane Homogohanda Mosese lamialu lalu, <sup>12-13</sup> Ayu Libai hameigini karu ti ininaga wali agaliore helo helarogoni. Bamba ina Iyibialirunaga igini wahene hearu damene bibahende bo wahi halu Isaraele wali agali ti igini wahene bibahende ininagaore helo dabalunaga nogo tara tara kamirunaga igini wangabe pigane wirago bibahendebi ininaga helo helalimu larugoni. Anigo ayu howa ai uruni bibahende tininaga helalu Libai hameigini ininagaore helarogoni. Tinaga igini wahene inihondo ngulenedaguabi tinaga nogo tara tara karume igini wangabe pigane wirago ihondo

\* 3:2: Dag 26.60 \* 3:4: LBM 10.1-2, Dag 26.61

ngulenedaguabi uruni bibahendenaga Libai hameigini ti ininagaore hai helarogoni. Anduane Homogo jore kogoni, lene.\*

*Libai hameiginirunaga mini gili binigo ogo*

<sup>14</sup> Dindi ko yobi Sainai wiagoria howa Anduane Homogohanda Mosesehondo lami-  
alu lalu, <sup>15</sup> Libai hameigini karu bibahende dagalai halu tinaga one waneiginirubi  
bibahende daga lalu mini gilibu wibe. Ani bialu igiri gali ege mbira bolangua hene  
taba yidarunaga minibi gilibu wiai halimu, lene. <sup>16</sup> Ani layagola Mosesehanda nde  
Anduane Homogohanda bibe lalu lamiyago bibahende biai hene. <sup>17</sup> Ani bialu Libai  
igini tebirali Gesonobi Kohadabi Merari imaru hene. <sup>18</sup> Gesono igini kira Libini Simeila  
hene. <sup>19</sup> Kohada igini nde maria Amaramabi Isihabi Heberonobi Usielebi uruni hene.  
<sup>20</sup> Merari igini nde kira Mali Musila hene. Libai aria tinaga aguanene mani henerume  
tinaga hameigini agali uruninaga mini dege laabo haga hene.

<sup>21</sup> Gesono ibu hameigini kira henego mbirago Libini ibu damene halu mendego  
Simei damene hene. <sup>22</sup> Ani howa tinaga igiri emene ege mbira pu bolangua henego  
dagalamaga halu daosini kariani handari duria (7,500) bibahende hene. <sup>23</sup> Agali  
uruni tinaga balai anda Anduane Homogonaga Balai Anda kagonaga erembiraha ni  
paliragohayagi biaga hene. <sup>24</sup> Ani bialu Gesono hameigini Laele igini Eliasaba ibu agali  
uruninaga haguane hene. <sup>25</sup> Agali uruni tinaga biabe Anduane Homogonaga Balai Anda  
heago handayaho howa Balai Anda dangini dambi haga wiagobi anda ogoninaga panga  
payaga labolabo wiagobi <sup>26</sup> labolabo mbira Balai Andala lomabu delaga dabula tu wiaki  
haga gerelape heagobi pabe panganaga labolabo heagobi handayaho haga wini. Tinaga  
biabe uruni damenego handayaho haga wini.

<sup>27</sup> Ani bialu Kohada ibu hameigini maria hene. Uruni mbirago Amarama ibu  
damenerubi mendego Isiha ibu damenerubi tebonego Heberono ibu damenerubi  
manego Usiele ibu damenerubi hene. <sup>28</sup> Ainde hameigini maria uruni tinaga igini  
gali ege mbira bolangua henego bibahende dagalamaga howa daosini halirani handari  
tebira (8,300) bibahende hene.\*

<sup>29</sup> Hameigini uruni tigua tinaga balai anda dindi abene unurahayagi bulene wini.  
<sup>30</sup> Ani bu heagola Usiele igini Elisabana ibu tinaga haguane hene. <sup>31</sup> Agali uruni  
tigua handayaho howa biabe bialu helogo Habo Nalolene Bi lo winigonaga Mbogoyi  
wiagobi dagia tebolo wiagobi lamu hale wiagane irane biagobi lomabu delaga dabu  
kira hayago labobi ndisi beru belediru loma binigo mo miaga biaru tigua Hobane Loma  
Bia Hene tamuhabi labolabo Hobane Loma Bia Heneore hobaanda hene biagobi uruni  
bibahendeore handayaho hai haga wini. Tinaga biabe mbirale uruni damenego baya  
hangu handayaho haga hene.

<sup>32</sup> Loma binigo mo miaga Arono igini Eleasa ibu Libai hameigini uruni bibahen-  
denaga agali haguane hene. Ibugua agali uruni Anduane Homogonaga Balai Anda  
heago ha biabe bulene wiago damene bilonaga haru haga hene.

<sup>33</sup> Merari aria hearu ti nde hameigini kira henego Mali ibu damenerubi Musi ibu  
damenerubi hene. <sup>34</sup> Tinaga igiri gali ege mbira bolangua henego damene dagalamaga  
halu daosini dege waragariani handari kira (6,200) bibahende hene. <sup>35</sup> Abihaili igini  
Suriele ibu agali uruninaga haguane hene. Uruni tinaga balai anda Anduane Homogo-  
naga Balai Anda henegonaga abene uyurayagi bini. <sup>36</sup> Ani bu howa tinaga biabe Balai

☆ **3:12-13:** Har 13.2      \* **3:28:** Hiburu bi lalu gilibu wini ngagoha howa daga daosini halirani handari waragaria (8,600) hene leda. Anigo bamba Girigi bi lo beregedo winidagoha agali marume Girigi bi lo beregedalu gili binidagoha daosini halirani handari tebira (8,300) hangu hene leda. Daga daosini halirani handari tebira ogoni tigabi nga lo manda bidamago irane hobane 39 howa dagalamaga halu daosini pira kirani kira (22,000) bibahende hene leda. Daga daosini halirani handari waragaria (8,600) ogoni ani ngelarimayagua nde daga bibahende lamaga halu daosini pira kirani kira halu handari tebira (22,300) bibahende holebirada.



Anda henegonaga anda gene heneru handayaho hene. Anda gene bibahende heneru hongo howa helonaga mbogoyi boronosime dindiha wabu berelaga biyarubi ira anda háinaga libu helayarubi anda gene uruni damenego handayaho hene. Tinaga biabe mbirale uruni handayaho haga hene. <sup>37</sup> Ani heagola Balai Anda hagira bu yaanda halu pabe bini heagonaga gene bu hearubi gene hongo howa yilo mbogoyi dindiha wabu bereledagobi labolabo anda háí heago hongo howa yu helo pu dariba holenaga ira gelo dindiha wearubi pabe ogoninaga labolabo daba heagobi uruni bibahende handayaho hai haga hene.

<sup>38</sup> Mosesebi Aronobi Arono igini bu hearubi tinaga balai anda ni tagira ibiragohayagi Anduane Homogonaga Balai Anda heago haraba wiagoria bialu haga wini. Ani bialu agali uruni ti hangume Balai Anda Hobane Loma Bia Hene heagoha anda puwa biabe bulene winiru bialu wali agalinaga lomabu yalu ibirago mo migi bialu hene. Agali hameigini mendeme biabe ogoni biyagua nde Isaraele wali agali bu hearume agali ogoni homelo bo wahaga wini. <sup>39</sup> Libai hameigini bibahende dagalamaga halu daosini dege pira kirani kira (22,000) hene. Agali daga lenego bibahendeore igiri gali ege mbira bolangua henegoria howa dagalama pialu agali waheni dagalairi henego ogoni. Mosese Aronola libugua Anduane Homogohanda daga lalibu lalu lamiyadagua ani dagalai hene.

*Isaraelealinaga igini wahene Anduane Homogohondo mulene winigo Libai hameigini ti ha aribia henego ogo*

<sup>40</sup> Anduane Homogohanda Mosesehondo lamialu lalu, Isaraele wali agalinaga igini wahene taba hanarago ininagaore holebira. Ani holebirago walime igini wahene taba hono bedago ege mbira poragola ibunaga mini gilibu wilimu. <sup>41</sup> Ani wialu igiri emene uruni ti wahalu helo. Anduane Homogo iore kogonigo ina Libai hameigini ti inagaore helo hela aribia holebero. Ani bialu Isaraelealinaga nogo bulumaga igini wangabe pigane wirago ininaga holebira larugoni wahalu Libai hameigini karunaga nogo igini wangabe pigane wirago ininaga ha aribia helo, lalu Anduane Homogohanda lene. <sup>42</sup> Ani layagola Anduane Homogohanda bibe layadagua bialu Mosesehanda igiri gali <sup>43</sup> ege mbira bolangua heneru damene bibahende mini gilibu wiai hene. Ani gili biai howa dagalalu hearia daosini dege pira kirani kira halu handari kirani pira kariani tebira (22,273) bibahende hene.

<sup>44</sup> Anduane Homogohanda Mosesehondo lone lamialu lalu, <sup>45</sup> Áyu Isaraele wali agali bibahendenaga igini wahene taba hanarago inihondo ngulene winigo wahalu Libai hameigini bibahende inihondo lomabu ngibe. Isaraele wali agalinaga nogo bulumagaru igini wangabe pigane wirago inihondo lomabu ngulene winigo wahalu Libai hameigini karunaga nogo bulumagaru ha aribia halu ininaga helo lomabu ngulene nga. <sup>46</sup> Isaraeleali igini wahene dewaore halu handari kirani pira kariani tebirame (273) Libai hameigini bolangua hayadago ai tinaga igiri uruni Isaraele wali agali tini yolo biadai bilimu. Igiri bolangua howa handari kirani pira kariani tebira (273) hayadago yolo biadai bilimu, lene. <sup>47</sup> Igiri mbira mbiranaga muni kina pira duria (50) dege degeme yolo biadai bulene nga. <sup>48</sup> Muni uruni yalu puwa Arono halu ibu igini karuhondo milimu, lene. <sup>49-51</sup> Mosese ibugua Anduane Homogohanda bibe layadagua bialu Isaraeleali igini wahene maru bolangua hayaru yolo biadai binigonaga muni mo mogo buwa kina dege daosini pira mbirani tebirani handari waragariani pira duria (K13,650) mialu Arono halu ibu igini biaruhondo mo mini.

## 4

*Anduane Homogohanda Kohada hameigini hearuhondo biabe mo minigo ogo*

<sup>1</sup> Anduane Homogo ibugua Mosese Aronolahondo lamialu lalu, <sup>2</sup> Libai hameigini emene Kohada karu arianaga agali bibahendenaga mini gili biai halibu. <sup>3</sup> Agali lenego

damene bibahende mali pira tebirala (30) pira duriala (50) dombeneha hene karu tigua inaga Balai Anda kagoha biabe bialu helo helalibu. <sup>4</sup> Inaga mbirale lomabu bagiho wini ngago agali tanabi karume ela nahaga ngagoha tigua biabe bialu helonaga dabo helalibu, lalu lamini.

<sup>5</sup> Anduane Homogohanda Mosesehondo bi ogodagua lamialu lalu, Ai Isaraele wali agali ti balai anda bu hayagoria wahalu dindi mendeha pole manda biyagua nde loma binigo mo miaga Arono halu ibu igini biaru tigua inaga Balai Anda biagoha anda puwa labolabo timbuni anda Hobane Loma Bia Heneore biagola hobaki hene heago hadowa Habo Nalolene Bi lo winigonaga Mbogoyi biago labolabo ogonime dambiho yulebira.

<sup>6</sup> Ani buwa labolabo ogoni daligani wena timbuni iba tia alenaga dongoneme dambi howa mani labolabo mindibi hari mindini handalehe bayaleore ngagome dambi dege halu payani iraho yulenaga ira magui holenaga ira manda manda bu wiyago mo karulo helolebira.

<sup>7</sup> Ani bialu aga mindibi hari mindini handalehe ngagome dagia tebolo inaga mberedi lomabu ngelaga ngago mo dambi halimu. Ani buwa ndisi bebi beledibi ira hagua ngabilo delaga mini inisenesi lomabu ngarubi loma maru bu wiaga beledi maru ngarubi mbodoli be waini iba lomabu odo mulenaga ngarubi bibahende dabuni aga mindibi mo paga hayagoria dege daligani mo dambi ho ngelalimu. Ani bialu mberedi dagia teboloni dambi hene ngagoria wiaabo halimu. <sup>8</sup> Ani ngelowa aga daramabi mbirame mo dambi halimu. Ani bialu wena timbuni iba tia alenaga dongoneme yi ho dambi howa iraho yulenenaga manda mandabu helarimigoha ira mo karulowa yalu polenedagua manda mandabu ngelalimu.

<sup>9</sup> Ani biai howa lamu hale wiagane irane ngago aga labolabo mindibi hari mindini handalehe ngagome mo dambia halimu. Lamu hale wiagane irane heba ngarubi beledi emene maru ira punga hiloyaga ngarubi lamu halenaga biabe biaga ngarubi olibe lini weli berelaga be ngarubi bibahende ogoniha dege kabu bumaga howa aga biagome dambi ho ngelalimu. <sup>10</sup> Ani bu wiai howa wena timbuni iba tia alenaga dongoneme daligani yi ho dambi howa yalu polenedagua manda mandabu ngelalimu.

<sup>11</sup> Ani biai howa mani lomabu delaga dabu ngolome wabini biago aga labolabo mindibi hari mindini handalehe ngagome dambi howa mani wena timbuni iba tia alenaga dongoneme dambi howa ira kirame dabu ogoni iraho yalu polenedagua manda mandabu wiyago mo karulowa yalu polenedagua manda mandabu ngelalimu. <sup>12</sup> Ani bialu ndisi be beledirubi loma binigo mo miaga karu ti Balai Anda Hobane Loma Bia Hene biagoha biabe biaga damene ngaru bibahende labolabo mindibi hari mindini handalehe biagome kabu buwa mani wena timbuni iba tia alenaga dongone biagome yi hadambi howa yalu polenedagua manda mandabu ngelalimu. <sup>13</sup> Mani bo lomabu delaga dabuni ira punga beru hilo wahowa labolabo tagalitaya aleme mo dambi halimu. <sup>14</sup> Ani bialu loma binigo mo miaga karu tinaga dabu ogoriani biabe biaga ira hedo wiaga ngarubi mbirale wangobi ngarubi be ira pungaru hilo yaga ngarubi ndisi be nogo darاما loma biniru hambu yaga ngarubi bibahende dabuni mo paga hai halimu. Ani mo paga hai howa wena timbuni iba tia alenaga dongone ngagome mo dambi howa iraho yule ngelarimigome mo karulalu yalu polenedagua manda mandabu ngelalimu. <sup>15</sup> Ani ngago manda bialu tigua Balai Anda kago yu wahalu pole howa Arono ibu igini loma binigo mo miagaru tigua mbirale uruni baya hangu kabu biaiore holene nga. Ani biaiore kagola Balai Anda giallo yalu pialu howa Kohada hameigini karu ibalu yalu polebira. Ani yalu pialu howa tigua mbirale uruni bibahende ela naholebira. Tigua ela hayagua tini homelo ina bo waholebero. Kohada hameiginiru tigua dege Anduane Homogonaga Balai Andabi anda ogoniha wiagarubi yalu polene wulebira.

<sup>16</sup> Loma binigo mo miaga Arono igini Eleasa ibugua Balai Anda biagobi lamu halenaga weli biagobi loma binigo mo miaga helonaga dabo helalu weli odo wiaga biagobi ira

hagua ngabilo delaga mini inisenesi biagobi widi loma bini biagobi mbirale inaga Balai Anda biagoha wiaga ngarubi bibahende ibugua handayaho hai holebira, lene.

<sup>17</sup> Ani lowa Anduane Homogohanda Mosese Aronolahondo lalu, <sup>18-19</sup> Agali Kohada aria ti inaga mbirale uruni ngagoha kaware ibuligo libugua baya hangu de handayaho halibu. Tigua ko mbira bialu karia ina ti homelo bo waholeberogo naboliyanaga ani bilibu laro. Kohada aria biarume mbirale uruni mo yalu pelonaga Arono halu ibu igini karu tigua ala anda puwa mo tahalu mo migi bilimu. <sup>20</sup> Anigo Kohada hameigini karu aria mbirago ibu abale inaga Balai Anda kagoha anda ibuwa loma binigo mo miaga karu tigua mbirale uruni mo kabu bialu mo manda manda bialu katambu anda ibiyagua ina agali ogoni homelo bo waholebero, lene.

*Anduane Homogohanda Gesono hameigini hearuhondo biabe mo minigo ogo*

<sup>21</sup> Anduane Homogohanda Mosesehondo lalu, <sup>22</sup> Libai hameigini Gesono ibu aria dege karu bibahende mini gilibu wiai habe. <sup>23</sup> Agali uruni mali pira tebirala (30) pira duriala (50) dombeneha hene karu inaga Balai Anda kagoha biabe bibehego hondowa dabo helabe. <sup>24</sup> Agali uruni tinaga biabe mbirale uruale yulebira. <sup>25</sup> Balai Andabi ogoninaga dangibi labolabo dambi hene kira ngago labobi wena timbuni iba tia alenaga dongone bayale wia dambi hagagobi Balai Anda ogoni panga payaga labolabo bayale wabu helene biagobi <sup>26</sup> pabeni labolabo helayagobi pu Balai Anda biagonaga pabe bu mabu bini biagobi lomabu delaga dabu biagobi pabenaga panga labolabo timbuni heagobi mbirale emene tara tara pabe ogoni bini ngaru bibahende Gesono hameigini karu tigua uruni mo tiga bialu yulene damenego tinaga biabe nga. <sup>27</sup> Arono halu ibu igini karu tigua Gesono aria karume mbirale uruni yilo mo tiga buwa mo tahaga bialu tinaga biabe ogoni bilo haru holebira. <sup>28</sup> Gesono aria karu tigua Balai Anda biagonaga biabe uruni bulebira. Ani bialu helonaga loma binigo mo miaga Arono igini Idama ibugua biabe uruni handayaho holebira.

*Merari hameigini hearume biabe bulene winigo ogo*

<sup>29</sup> Anduane Homogohanda Mosese lamialu lalu, Libai hameigini aria Merari ibu damene karunaga mini gili bibe. <sup>30</sup> Agali uruni tigua Anduane Homogonaga Balai Anda kagoha biabe bialu helo tinaga mali pira tebirala (30) pira duriala (50) dombeneha hene karu dege dabo helabe. <sup>31</sup> Tinaga biabe Balai Anda biagonaga gene karubi ira anda hai libu para hene biagobi anda gene hongohe helonaga mbogoyi wabu helene biagobi <sup>32</sup> Balai Anda pabe bu mabu bini biarunaga gene hene biarubi heba mbogoyi gene mo hongo helonaga dindiha wabu helene biarubi pabe daba hene pu ngarubi Balai Andanaga daba haga biaga pu ngarubi maru ale pabe ogoni bini emene emene tara tara ngarubi bibahende tigua mo yai holebira. Uruni mo yai helonaga loma binigo mo miaga kago ibugua agali uruni biabe bilo mo tahaga bulebira. <sup>33</sup> Merari aria karu tigua Balai Anda kagoha biabe uruni bulebira. Ani bialu kagola loma binigo mo miaga Arono igini Idama ibugua agali biaru handayaho howa haru holebira.

*Libai hameigini henerunaga daga ogo*

<sup>34-48</sup> Mosese Aronobi agali bu hearunaga agali haguane hearubi tigua Anduane Homogonaga bi layago talialu Libai hameigini aria agali tebirali Kohada damene hearubi Gesono damene hearubi Merari damene hearubi ti damene darama mbiraore hearu bibahendenaga mini gilibu wiai hene. Tigua agali mali pira tebirala (30) pira duriala (50) dombeneha heneru Anduane Homogonaga Balai Anda biagoha biabe bibehe hearu bibahende mini gilibu wiai hene. Agali uruni ti daga ogodagua hene.

Kohada aria daosini kirani handari kariani pira duria (2,750) hene. Gesono aria daosini kirani handari waragariani pira tebira (2,630) hene. Merari aria daosini tebiri handari kira (3,200) hene. Agali tebira uruni damene bibahende daga lamaga halu daosini halirani handari duriani pira halira (8,580) hene.

<sup>49</sup> Anduane Homogo ibunime ogodagua bibe lalu Mosesehondo lamiyagola tigua anidagua dege bini. Ani bialu Libai aria mbira mbira kagohondo biabe bilo mo ta hai habe lalu Anduane Homogohanda lamia dege bini. Ani howa tigua Balai Anda kagonaga biabe bulenenagabi Balai Anda giallo ya larangi yai helobi helene. Bi uruni bibahende Mosesehanda hale hai howa Anduane Homogohanda bibe lalu lamiyago bibahende biaiore hene.

## 5

### *Wali agali Anduane Homogonaga deni dodohe hearuhondo mana bulene winigo ogo*

<sup>1</sup> Anduane Homogo ibugua Mosesehondo lamialu lalu, <sup>2</sup> Isaraele wali agalihondo ogodagua lamibe. Wali agali ko ge hamuabi karubi dereni angibu tugudatagi halu karubi ibane daramayaguabi tinaga tinginiha howa tagira ibalu heaguabi mbiralime homene tingini ngago ela hayaguabi kuduguhe uruni ale kago bo talialu pelalimu. Wali agali uruni ale kago ti inaga deni bayale ndo ko dodohe kago ti wali agali baba mandagi balai anda bu kamigoha nahelo tagira pelo taliatagi halimu. <sup>3</sup>Ini ininaga wali agali baba Balai Anda bu kagoha haga kogodago ai wali agali ininaga deni ko dodohe uruni balai anda bu karuha wahalu tagira pelo pelalimu. Inaga deni wali agali ti haga balai anda bu karuni mo dodohe holigo ani pelalimu, lalu Anduane Homogohanda lene. <sup>4</sup> Anduane Homogohanda Mosesehondo bi lamiyiyagola hale halu Isaraele wali agali tigua wali agali ko urunibi hearu balai anda bu henedagoria howa tagira pelo waratagi haga bini.

### *Mbiralime ko biragola pani biadai bulene mana lowinigo ogo*

<sup>5</sup> Anduane Homogohanda Mosesehondo lalu,<sup>\*</sup> <sup>6</sup> Isaraele wali agali bu karuhondo bi ogodagua lamibe. Wali agali mbiralime Anduane Homogohondo erembira ngialu mende kagohondo ko biyagua nde <sup>7</sup> ibugua ko biyadago latagi halu mendeali kagohondo ko biyago mo tiga bialu yolo bulene nga. Iyunaga yolo karulape bulene ngadagua kina duria degedege bialu uruninaga kina waragane degedege paga howa mulene nga. <sup>8</sup> Ani miragola muni ogoni mo yulene agali ibuni homeneyagua ibu damenhondo mulene mbira naheyaguabi nde yalu ibuwa loma binigo mo miaga kagome mo yilo Anduane Homogohondo mulene nga. Ani bialu ibunaga ko domo wahelonaga nogo sibi wangabe mbira bo delolene nga. <sup>9</sup> Isaraele wali agali tigua mbirale bayale mbira Anduane Homogohondo lomabu mule yalu ibiragola uruni loma bini mo miaga kagome yamirago ibunaga holebira. <sup>10</sup> Wali agalime mbirale Anduane Homogohondo loma binigo yalu ibiragola loma binigo mo miaga karu aria mbira loma uruni yamirago ibu mo yalu ibunaga holebira, lalu Anduane Homogohanda lene.

### *Agali mbira ibugua ibu oneme mana ko biyadalo manda buwa mana bulene winigo ogo*

<sup>11</sup> Anduane Homogohanda Mosesehondo lamialu lalu, <sup>12-14</sup> Isaraele wali agalihondo ogodagua labe. Agali mbirame ibu one agali mendela kayu biyadalo manda buwa wali ogoni ibu inaga deni dodohe bedalo manda bialubi deme baya hangu handa nabi howa ani bini badalo manda buwabi agali ogoni ibugua ibu onehondo mini ko wuwabi hayagua <sup>15</sup> nde ibu one ogoni loma binigo mo miaga kago karia haru polene nga. Ani bialu agali ogoni ibugua balawa balime wabini genda magi kilogarama mbira yalu lomabu mule polene nga. Ani yalu pialu balawa ogoni weli odo ba nahebi ira hagua ngabilo delaga inisenesibi nayi polebira. Anidagua bulubadago irane agali ogoni ibu oneme mana ko binidabe nabitaba toba toba howa tigua dabo hendelonaga ibugua loma ogoni bu yalu polene nga.

<sup>16</sup> Ani biragola loma binigo mo miaga kagome wali ogoni haru ibuwa inaga deni lomabu delaga dabu kagoria kaware hapara howa helolebira. <sup>17</sup> Ani ibu kagola loma binigo mo miaga ibugua iba loma bini hambu ngago maru ndisi be dindime wabini

<sup>\*</sup> 5:5: LBM 6.1-7

ngagoha odo berelolebira. Ani bialu inaga Balai Anda tamuha anda puwa dindi wini ngago emene mo yalu ndisi be ogoniha ibira haragola iba mo kaubia helolebira. <sup>18</sup> Wali biago ibu inaga deni helowa dege loma binigo mo miaga kagome wali ogoninaga mandari pongobu kago hadape ho helolebira. Ani helowa agali biago ibu oneme ko biyada lowa balawa lomabu yalu ibiyago loma binigo mo miaga kago ibugua yamialu wali biago giha mo ya holebira. Ani bialu loma binigo mo miaga kago ibunaga giha iba kaubi beha berelo wiyago mo yu holebira. Walime mana ko henene biniyagua iba ogonime wali biago mo ko holebira. <sup>19</sup> Ai loma binigo mo miaga ibugua bi hongohe mbira ininaga deni howa lolebira. Ibugua wali biagohondo lamialu lalu, ina agali mbirala page nabi tigatiga bereneyagua nde wali mana ko binigo mo ko haga iba ogome i mo ko naholebira. <sup>20</sup> Anigo i agali mbirala kayu biriyagua nde i Anduane Homogonaga deni ko henego bedegoni. Ani bidagome i mo ko holebira, lalu lamulebira. <sup>21</sup> Ani lamialu loma binigo mo miaga agali kagome wali biago ha halu lalu, Anduane Homogohanda i wali agali maru karunaga deni ko ngubi nagaloneore mbira bede, lolebira. Ibugua inaga tingini hongo nahelo mo gedaore halu inaga tombegene mo timbu helolebira. <sup>22</sup> Ai wali mo ko hagane iba ogome inaga tiniha anda puwa tombegene mo timbuore halu inaga tingini hongo nahelo mo gedaore helo, lolebira. Anidagua laragola wali biago ibugua ladai bialu lalu, Ogoni karulapego Anduane Homogo ibunime aniore bilo laro, lolebira.

<sup>23</sup> Ani lalu loma binigo mo miaga biagome bi layago beba ira ongoba aleni gilibu wulebira. Ani gili biai howa gilibu wiyago iba kaubi hambu wiyagoha domo peholebira. <sup>24</sup> Ani bialu iba kaubi ogoni wali biago nelu miragola wali biagome iba nalu karia wali biagonaga tini mo ko holebira. <sup>25</sup> Anidagua bulebirago manda bialu iba biago walihondo nami howa ala pigane wali biagome balawa yu hayago loma binigo mo miaga biago ibu yamuwa gi mbira haeala yuwa Anduane Homogo ininaga deni yaraga halu loma bialu lomabu delaga dabu ngagoria yalu polebira. <sup>26</sup> Ani puwa balawa maru gime mo yalu lomabu delaga dabu ngagoria lomabu delolebira. Ani delalu puwa iba kaubi biago wali biago nelu mulebira. <sup>27</sup> Wali ogoni ibu agali kayu bini henene bereneyagua nde iba ogonime tandaga timbuni halu tombe timbu halu ibunaga tingini hongo nahe gedaore holebira. Wali agalime mendeali kagohondo ha halu howa lalu, Anduane Homogohanda wali ogoni mo ko hayadagua i mo ko helo, laga bulebira. <sup>28</sup> Anigo wali ogoni ibu ko nabi bereneyagua nde ibu inaga deni dodo nahe biruwa iba ogonime ibunaga tinginiha mo ko naholebira. Ibugua waneiginiru taba hanabehe biruwa waneigini taba honolebira.

<sup>29</sup> Agali mbira ibu oneme agali kayu bima ibaga bialu beda badalo manda buwa ibu mini ko wu heagua nde mana ogonidagua bilimu. <sup>30</sup> Agali mbira ibunaga mini ko hangume ibu one agali mendela kayu yarabe tobaho heaguabi nde mana mbiraore ogonibi dege bilimu. Agalime ogonidagua manda biyagua nde ibu one haru ibuwa inaga deni lomabu delaga dabu ngagoria kaware ibu helalimu. Ani ibu kagola loma binigo mo miaga ibugua mana biaga lo wiyadagua bulebira. <sup>31</sup> Anidagua biragome wali ogoni ibu agalinidagoha ko nawi. Anigo wali ibuha ko wiagua nde ko ibunime bialu hayadagonaga pani nalu genda ibuni dege yu birulebira, lalu Anduane Homogohanda lene.

## 6

### *Mbirali ibuni Anduane Homogoha lomabia holenenaga Nasa aria mana lowinigo ogo*

<sup>1</sup> Anduane Homogo ibugua Mosesehondo lamialu, <sup>2</sup> Bi ogo Isaraele wali agaliruhondo lamibe. Wali agali mbirame Nasa aria hole lalu bi hongohe lo wialu ibuni ihondo lomabu nguleore lalu lo wiyadagua ngiyagua <sup>3</sup> nde ibugua waini ibabi lulu iba marubi nolene nawiore. Ani bialu pu mbira lini daga mini gerebi lini ibanebi gerebi lini



bogabi ibire ngagobini dedagoria do gembe bini ngagobi bibahende nolene nawiore.✠  
 4 Horo bibahendengi ibugua ibuni ihondo lomabu ngulene mandabu haabo hayagua nde ibugua pu gerebi karunaga lini dedarubi lini ogonaga egenebi dongonebi nolene nawiore.

5 Horo bibahendengi ibu inaga heneore haabo howa ibunaga mandari angaribi napodolebira. Ibu ininagaore kogoni lene howa ibunaga mandari angaribi napode lu helo helolebira. 6-7 Angari mandaribi luni helolobadagoni manane ibuni ihondo lomabu nginiore howa ininagaore hene kogoni lalu mo walia hagane holebira. Ani bu howa ibu wali agali homene ngagoriabi kaware napolebira. Homenedago ibu aba ayaoreyaguabi ibu hamene mbalinioreyaguabi napolebira. Piyagua nde ibu inaga deni ko dodohe holebira. 8 Ibugua horo bibahendengi ihondo ibuni nguleore lalu lo wiyadagua haabo hayagua nde ibu Anduane Homogo ininagaore holebira.

9 Agali ogoni ibu kagoria mbirali abale homo ibira hayagua ogonime agali biago ibunaga mandari inagaore hene biago dodohe holebira. Anidagua biragola horo karu howa mandari podo waholene wulebira. Ani birangi ibu inaga deni dodo nahe holebira. 10 Ani bialu horo haliningi ega malibu ale kira minu yalu inaga Balai Anda kago haneni puwa loma binigo mo miaga agali kago mulene wulebira. 11 Ani miragola loma binigo mo miaga kago ibugua ega kira ogoni yamialu ega mendego ko domo wahelonaga loma buwa bo delalu mendego irani dai helo loma buwa bo delolebira. Agali ogoni ibu wali agali homenenaga tingini wiagoria kaware hayagome ibu mo dodohe henego ai ega kira biago lomabu bo delayagome ininaga deni ibu dodo nahe bayale holebira. Ani howa horo ogoningi dege agali ogoni ibunaga mandari inihondo lone lomabia holene nga. 12 Horo ogoningi dege howa inihondo loma biaho holene horo tenialu daga lolebira. Horo ala ihondo lomabia hene biaru ibunaga mandari mo dodo hayagome puguayagoni. Ani larogoni irane mandari inaga loma biaho helene biago mo dodo hayagome puguayagoni. Ani biyagome ibuni mo dodo hayago ai ibunaga ko biyadago domo wahelonaga loma bialu bo delole nogo sibi mbira mali mbira hangu penego kago haru halu ibulene nga.

13 Agali ogoni ibuni Nasa aria loma bia holene horo lo wiyago piai haragola inaga Balai Anda haneni pu holebira.✠ 14 Ani pu howa ibugua Anduane Homogo inihondo nogo tebira lomabu ngulene nga. Nogo sibi igini wangabe mali mbira hangu pene kago irani dai helonaga lomabu bo delole haru halu ibulene nga. Loma mendego nogo sibi igini dege angibuni mali mbira hangu pene kago ko domo wahelonaga lomabu delole haru ibulene nga. Ani bialu tebonego nogo sibi wangabe Anduane Homogola ho gimbu bulenaga loma bialu bo delole haru ibulene nga. Nogo sibi uruni bibahende dere durubi mbira nabi bayaleore kago hondowa haru ibulene nga. 15 Ani bialu mberedi yidi nahe hiriniru mbasigedi nu mbiraha hanalu ibuwa lomabu ngulene nga. Mbasigedi nu ogoniha balawa bayaleme mberedi timbuni olibe lini welibi heba biamaga heneme wabini ngarubi mbasigedi hiruwa olibe lini weli wai hene ngarubi heba hanalu ibulene nga. Ani hanalu ibuwa ibugua lomabu miaga mana ngago talialu widi lomabu delalu waini ibabi mberedibi ogoni heba odope halu lomabu delolene nga.

16 Ani buwa loma binigo mo miaga kago ibugua mbirale uruni yamialu ko domo wahelonagabi irani dai helonagabi Anduane Homogo inihondo lomabu delolene nga. 17 Ani bialu ibugua nogo sibi wangabe mbira heba mbasigedi nuha mberedi wabu hanayagobi heba Anduane Homogo inila ho gimbu bu holenaga lomabu delolene nga. Ani bialu widi lomabu delolenebi waini iba lomabu delolenebi bibahende lomabu delolene nga. 18 Agali biago ibugua bule lalu bi lo wiyago biai howa ibuni inaga Balai Anda haneni kaware ibu howa ibunaga mandari helo wahayago podolene nga. Podalu inila ho gimbu bu holenaga lomabu delaga dabu ngagoria irani delolene nga.

<sup>19</sup> Ani bialu mani nogo sibi wangabe loma bialu bo delole haru halu ibiyagonaga payane podowa todobene beha dawalebira. Ani dawawa dedagola loma binigo mo miaga kago ibugua nogo payane ogonibi mberedi mbsigedibi mbasigedi nuha hono wiyago mbira mbira tagu yalu nogo payane heba agali biagonaga giha mo ya holebira.

<sup>20</sup> Ani mo ya howa loma binigo mo miaga kago ibuni mo yu dai bialu ininaga deni yaraga howa wigiwaga lalu lomabu ihondo ngulebira. Loma ogoni ininagaore ngago loma binigo mo miaga karu ti mo yulebira. Ani bialu nogo sibi lomabu mini ogoninaga ge burulene ngagobi galukuni ngagobi payane heba loma binigo mo miaga kagonaga dege ngago tini mo yulebira. Loma binigo mo miaga karu tigua biabe uruni biai kagola Nasa aria biago ibu waini iba ta nabi nolene wulebira.

<sup>21</sup> Wali agali mbiralime ibuni ihondo Nasa aria lomabu nguleore lalu bi pongo bo wiyagua nde o layadagua bialu holene nga. Mbirali ogonime mbirale marubi ihondo nguleore lalu lo wiyadagua biaiore holene nga, lalu Anduane Homogohanda lene.

*Wali agali bayale helonaga loma binigo mo miaga tigua bi ogobi lamulene winigo ogo*

<sup>22</sup> Anduane Homogohanda Mosesehondo bi hongohi mbira lamialu lalu, <sup>23</sup> Aronobi ibunaga iginirubi Isaraele wali agali Ngode Datagaliwabehanda mo bayale helonaga bi ogobi lolene ngago lamibe, lene.

<sup>24</sup> Anduane Homogohanda tí mo bayale helobi bayuwa hondo helobi

<sup>25</sup> Anduane Homogohanda tíhondo dara halu mo bayale howa biamogo bilobi

<sup>26</sup> Anduane Homogohanda ibunaga biamogo buleneme hondo halu mo palia holene ngilobi halimu, lalu ani lalimu lamini.

<sup>27</sup> Anduane Homogohanda ani lowa lalu, Tigua inaga minini howa Isaraele wali agali mo bayale ho holene hame layagua ina ti mo bayale holebero, lene.

## 7

*Agali haguane hearume lomabu mulene winigo ogo*

<sup>1</sup> Mosese ibugua Anduane Homogonaga Balai Anda biago bu helene. Balai Anda ogoni biai hayadangi dege anda biagobi mbirale ogoniha wiarubi lomabu delaga dabu biagobi mbirale dabu ogoriani biabe biaga wiarubi bibahende Anduane Homogo ibunaga wiabagi heneore ngelonaga weli odo hai haga winiyago mo yuwa odo hai haga bini. <sup>2</sup> Ani biyagola Isaraele hameigini mbira mbiranaga agali haguane mbira mbira hayadagua tigua tinaga loma biniru Anduane Homogohondo mule yalu ibugu bini. Agali haguane uruni ti Isaraeleali agali henego dege ibini. Isaraele wali agalinaga mini gili bialu agali dagalayago biabe agali uruni tigua haru bamba howa handayaho hene. <sup>3</sup> Agali uruni tigua tinaga loma biniru Anduane Homogohondo mule yalu ibiyaru uru ale. Dabudabu yulene garo ale waragaria yalu ibalu nogo bulumaga homberia (12) haru ha bialu Anduane Homogonaga Balai Anda heagoria ibuwa ibunihondo mini. Dabudabu yulene garo mbirago agali kiralime lomabu mule yalu ibalu nogo bulumaga mbira dege dege agali haguane tini hangu hangu ta howa haru halu uruni bibahende Anduane Homogohondo lomabu mule ibini. <sup>4</sup> Tigua mbirale yalu ibai hayagola Anduane Homogohanda Mosesehondo lamialu lalu, <sup>5</sup> Tigua mbirale lomabu yalu ibiyaru yamuwa Mosese ina Libai hameigini karume Balai Andaha biabe bulene ngadagua bilo uruni bibahende tigua mo yulene wulebirago tihondo mo mibe, lene. <sup>6</sup> Ani lamiyagola Mosese ibugua dabudabu yulene garo biarubi nogo bulumaga biarubi Libai hameigini hearuhondo mini. <sup>7</sup> Ibugua dabudabu yulene garo kira mialu nogo bulumaga maria lowa Gesono aria hearu tinaga biabe bulene wiaru bilo mini. <sup>8</sup> Ani bialu Merari aria hearu tinaga biabe bulene wiago bilonaga dabudabu yulene garo maria mialu nogo bulumaga halira lowa mini. Ani mialu Arono igini Idama ibugua Merari aria hearunaga biabe bulene wiago haru howa biabe bilonaga handayaho hene.

<sup>9</sup> Anigo Kohada aria hearu tigua bulenego duniniore payani hangu yulene wiagola Mosesehanda nogo bulumaga dabudabu yulene garo mbira nami wahene.

<sup>10-83</sup> Lomabu delaga dabu biago Anduane Homogonagaore helo loma biaho ngelolene horoore hayagola Isaraeleali agali haguane hearu tigua loma biniru mo yalu ibini. Agali haguane uruni tigua loma ogobi dege dege yalu ibugu bini. Tigua ndisi be silibame wabini genda magi kilogarama mbira bolangahe dege dege yalu ibini. Ani bialu beledi mbira dege dege genda magi garama handari halira (800) silibame wabinigo yalu ibini. Ani yalu ibalu howa ndisi be ogonihabi beledi ogonihabi balawa bayaleoreru olibe lininaga weli wiago odo biamaga howa widi lomabu mule yalu ibugu ibugu bini. Ani bialu agali haguane mbira mbira biaruru tigua beledi ngolome wabini baya taraoreru genda magi garama handari mbirani pira (110) yalu ibugu ibugu bini. Beledi ngolome wabini ogoriani ira hagua ngabilo delaga inisenesiru wu tolowa ogobi dege dege yalu ibuwa migi bini.

Ani bialu agali haguane mbira mbira uruni tigua nogo bulumaga wangabe dalua mbirabi sibi wangabe dalua mbirabi sibi igini hongolo mali mbira hangu pene mbirabi bo loma buwa irani dai helole haru halu ibugu ibugu bini. Ani bialu nogo meme mbira ko domo wahelonaga lomabu bo delole haru halu ibugu ibugu bini. Ani bialu bulumaga wangabe kirabi sibi wangabe duriabi meme wangabe duriabi sibi igini mali mbira hangu pene duriabi uruni bibahende Anduane Homogola ho gimbu bulenaga loma bialu bo delole haru halu ibugu ibugu bini.

Tigua mbirale uruni lomabu delaga dabu wiagoria kaware yalu ibuwa mule biyagola Anduane Homogohanda Mosesehonda lalu, Agali haguane karu tigua inaga loma o yalu ibiyadaruni horo áyu dege bu ngiai nahe horo mbiru mbirungi agali mbira mbirame loma yu ibugu ibugu bialu loma bulene horo hombenengi (12) dela maro bialu wahole ani bilimu, lalu lamini.

Ani lamiyagola agali haguane mbira mbira uruni tigua mbirale Anduane Homogohondo mule wiyaru horo mbiru mbirungi yalu ibugu bialu migi bini. Horo mbirungi Yuda hameigini agali haguane Aminadaba igini Nasonohanda mule ibini. Horo mendengi Isaga hameigini agali haguane Sua igini Nedanelehanda mule ibini. Horo tebonengi Sebulunu hameigini agali haguane Helono igini Eliabahanda mule ibini. Horo manengi Lubene hameigini agali haguane Sederu igini Elisuhanda mule ibini. Horo dauningi Simeono hameigini agali haguane Surisadai igini Selumielehanda mule ibini. Horo waraganengi Gada hameigini agali haguane Duele igini Eliasabahanda mule ibini. Horo kanengi Eberaimi hameigini agali haguane Amihudu igini Elisamahanda mule ibini. Horo haliningi Manase hameigini agali haguane Pedasu igini Gamalielehanda mule ibini. Horo diningi Beniyamini hameigini agali haguane Gidioni igini Abidanahanda mule ibini. Horo piningi Dana hameigini agali haguane Amisadai igini Ahiesehanda mule ibini. Horo beanengi Ase hameigini agali haguane Ogorana igini Pagielehanda mule ibini. Horo hombenengi Nabadali hameigini agali haguane Enana igini Ahirahanda mule ibini.

<sup>84</sup> Ani biai heagola tigua agali haguane homberia (12) biarume mbirale bibahende lomabu mulebi lomabu delaga dabu biagobi Anduane Homogonagaore helo lomabia holebi mbirale yalu ibiyaru damenego daga ogodagua silibame wabini ndisi homberia beledi homberia dege dege lowa wini. <sup>85</sup> Ndisinaga genda magibi beledinaga genda magibi biamaga howa handalu hemiria kilogarama pira kirani halira (28) hene. <sup>86</sup> Beledi ngolome wabini homberia (12) biarunaga genda magi garama daosini mbirani handari tebirani pira kira (1,320) hayane hendene. Beledi uruni mbira mbira bibahendeni ira hagua ngabilo delaga mini inisenesi dewa berelowa yu ibinigobi wini. <sup>87</sup> Ani bialu nogo bulumaga wangabe homberia (12) sibi wangabe homberia (12) dege haru ibalu sibi igini hungubalua mali mbira hangu pene homberiabi (12) loma

irani dai helo lomabu bo delole haru ibu helene. Ani buwa widi lomabu delolenebi nogo uruni heba lomabu delamaga hole yu ibalu ngela dege bini. Ani bialu ko domo wahelonaga nogo meme lomabu bo delole homberiabi (12) haru ibu helene. <sup>88</sup> Ani bialu Anduane Homogola ho gimbu bulenaga loma buwa bo delole nogo bulumaga wangabe pira kirani mariabi (24) sibi wangabe dege pira waragariabi (60) meme wangabe pira waragariabi (60) haru ibu helalu sibi igini hongolo mali mbira hangu pene pira waragariabi (60) bibahende anidagua loma buwa bo delole haru halu ibugu ibini. Ani bialu tigua lomabu delagane dabu biago ala Anduane Homogo ibuninagaore helo mo loma biaho ngelene. Ani biai howa mbirale uruni bibahendeore Anduane Homogohondo mo lomabu miai hene.

<sup>89</sup> Mosese ibu Anduane Homogo heba bi lole Balai Anda heagoaha anda puwa Habo Nalolenenaga Bi lo winigonaga Mbogoyi panga ngagoria dahuliyali handalehe kira nguni mende mendelani handa a*ji* n*ai* bu heleago dombeneni wali agalinaga ko domaga ngagoria Mosese ibugua Anduane Homogo bi larago hale haga hene.

## 8

*Lamu hale wiagane irane mbiraoreni gebagane kariahe wabu mandabu wiagoria delolene mo karulaga binigo ogo*

<sup>1</sup> Anduane Homogo ibugua Mosesehondo lamialu lalu, <sup>2</sup> Arono ibugua inaga tamu Hobane Loma Bia Hene biagoha lamu hale wiagane irane mbiraore gebagane kariahe ngagoria mo berelaga bialu inaga tamu hobane ngago dombeneha wa hai helo lamu hale baya hangu mo tiga buwa ngelabe lalu lamibe, lene. <sup>3</sup> Ani layago hale halu Arono ibugua Anduane Homogohanda bibe layadagua bialu lamu hale wiagane irane wabu wini biagoria berelaga buwa delayagola anda tamu Hobane Loma Bia Hene biagonaga hanuni wa haame hene. <sup>4</sup> Lamu hale wiagane irane ogoni ala Anduane Homogohanda Mosesehondo bibe lalu walia hayadagua bialu tigua ngolo maru mo yuwa hamame bo dambu mbaralaga buwa lamu hale wiagane irane gebaganebi ogoninaga yari balawaya alebi bibahende wabu wini.

*Libai hameigini Anduane Homogonaga loma biniore helo dabo helenego ogo*

<sup>5</sup> Anduane Homogohanda Mosesehondo laabo halu lalu, <sup>6</sup> Ina Libai hameigini tini hangu olalu ibidaba lowa tini inaga deni dodo nahe bayale helo dabo helabe. <sup>7</sup> Ani bule howa ogodagua bibe. Inaga deni dodo nahe helonaga iba biagome Libai agali uruni tandala bahaga bibe. Ani bialu tinaga mandari angaribi bibahende dogo wahai halu tinaga agabi wayawaya bo wahai hadaba labe. Anidagua biragola ti dodo nahe bayale holebira. <sup>8</sup> Ani biai halu tigua nogo bulumaga wangabe hungubalua mbirabi balawa bayaleore olibe lininaga weli heba biamaga hene lomabu delole ngagobi nogo bulumaga biago heba lomabu mulene nga. Bulumaga wangabe mendebi ko domo wahelonaga loma buwa bo delole haru ibulene nga. <sup>9</sup> Ani bidagola Isaraele wali agali bibahende ibu ngoai howa Libai aria bibahendebi inaga Balai Anda kago haneni haru ibu helowa helabe. <sup>10</sup> Ani helowa horo ogoningi Libai ti inaga deni ibu kagola Isaraele wali agali tigua agali uruninaga emboneni gi wiaiore halimu lamibe. <sup>11</sup> Ani biai kamigola Arono ibugua Libai uruni ibunaga giha lomabu yuwa ngiradagua bialu inaga deni gi dogolowa wigiwaga lalu holebira. Anidagua biragome Isaraele wali agali tigua Libai hameigini uruni ininaga biabe biagaore helo loma biaho helolebira. <sup>12</sup> Ani buwa Libai hameigini tigua nogo bulumaga wangabe kira biago labonaga hagianeni gi wulebira. Ani wialu bulumaga mbirago tininaga ko domo wahelonaga loma buwa bo delalu mendego irame dai helo loma buwa bo delolebira. Loma kira ogonilabo Libai uruni ti inaga deni ko dodo nahe bayale helonaga loma ogoni.

✧ 8:1: Har 25.31-40, 37.17-24

13 *Ína Libai hameigini uruni ininagaore helo ihondo mbiraleore ngiradagua ngeregola Arono aria karu tigua Libai uruni handayaho holebira.* 14 Anidagua beregome Libai ti Isaraele hameigini maru karu aria ndo ti ininaga daba bagi hene tara holebira. 15 *Ína ti mo bayale halu inihondo loma biaho heledegola tigua inaga Balai Anda kagoha biabe bulene ngaru bialu holebira.* 16 Isaraele wali agalinaga igiri wahene taba hanarago inihondo ngulene winigo wahalu in Libai hameigini ininagaore helo dabo helarugo ti ini hangunagaore holebira. 17 Ai hale halimu. Isaraele wali agali tinaga igiri wahenebi nogo bulumaga sibirunaga igini wangabe pigane wiyaguabi inaga dege haga wiyagoni. Mana ogoni in Iyibi wali agalinaga igiri wahene bibahende bo wahai harungi howa ininagaore helarimi.✧ 18 Ani binigo ai áyu Isaraele wali agali tinaga igiri wahene wahalu Libai hameigini bibahende i ha aribia harogoni. 19 *Ína Isaraelealihondo inaga Balai Anda kagoha biabe ogo bulene nga lalu abale langirugo ai Libaiali uruni tigua bialu helo Arono halu ibu igini karu ti merogoni.* Isaraeleali tigua biaga winigo áyu Libai hameiginime bu aribia haragonigo ai ti nde inaga Balai Anda Hobane Loma Bia Hene kagoria kaware napoleberemi. Ti ogoriani kaware pu karia in ti mo ko holene wuligo napilimu lamibe larogoni, lene.

20 Ani layagola Mosese Aronobi Isaraele wali agali bibahendebi tigua Anduane Homogohanda Mosesehondo bi layadagua bialu Libai hameigini Anduane Homogonagaore lomabia hene helonaga loma biaho helene. 21 Ani loma biaho helayagola Libai hameigini tini dodo nahe holene mana biaga wiago bialu tinaga aga winirubi wayawaya biai hene. Ani biai heagola Aronohanda uruni ti Anduane Homogohondo lomabu mialuibunaga deni gi yaraga howa wigiwaga lalu Libai hameigini lomabia hene. Ani bialu ti dodo nahe bayale helonaga loma bo delalu bini. 22 Isaraele wali agali tigua Anduane Homogohanda Mosesehondo lamiyadagua bialu Libai hameiginiru dabo bagiho helene. Ani biyagola Libai aria tigua Anduane Homogonaga Balai Andaha biabe bulene wiaru bialu helo Arono halu ibu iginirume ti haru haga hene.

23 Anduane Homogohanda Mosesehondo lamialu lalu, 24 Libai hameigini agaliibunaga mali pira kirani duria (25) bolangua hene kagome inaga Balai Anda kagoha biabe bialu holebira. 25 Ani bialu kane dege tinaga mali pira duria (50) bolangua haragola biabe nabi waholebira. 26 Mali ogonidagua haragola uruni tini hangu howa Balai Andaha biabe bulene wiaru bulene nawulebira. Tigua ti aria karu biamogo bialu inaga Balai Anda kagoha biabe biamogo bulene ngaru biamogo mogo bialu holebira, lalu Anduane Homogohanda Mosesehondo lamini.

## 9

### *Marume Bolangua Halu Penegonaga Horo mitangi bialu tomo nenego ogo*

1 Isaraele wali agali ti Iyibi dindi wahalu tagira pu heane mali mendegonaga ege mbira hayagola ti Sainai dindi ko iba dalu naibaga wiagoria hene. Ani heagola Anduane Homogohanda Mosese lamialu lalu,✧ 2-3 Ege áyu kamagonaga horo dene (14) laragola alendohayagi Isaraele wali agali bibahendeme nogo sibi igini loma bialu bo dawalimu. Ani bialu horo in a tí mo wialu pelarugo mitangi bialu tomo naga mana wiyadagua bialu bo dawalu nalimu. Tomo ogoni horo ogoningiore nolene nga. Tigua tomo ogoni nalu howa mana biaga wiyarunidagua bialu nalimu, lene. 4 Ani layagola Mosese ibugua Isaraele wali agali lamialu, Bolangua Halu Penegonaga Horo mitangi bialu tomo nagane winigo namiya, lalu lamini. 5 Ani lowa ege mbiranaga horo dene (14) ogoningi alendo hayagola Isaraele wali agali tigua Sainai dindi ko iba dalu naibaga wiagoria howa tomo ogoni dawa nene. Ani bialu howa Isaraele wali agali tigua Anduane Homogohanda Mosesehondo ogodagua bilimu lalu lamiyago biai hene.

✧ 8:17: Har 13.2 ✧ 9:1: Har 12.1-13



<sup>6</sup> Anigo agali marume wali agali homene tingini wiaru ela haga hearu ti Ngode Datagaliwabenaga deni bayale ndo dodohe hene. Ani howa uruni tigua Bolangua Halu Penegonaga Horo mitangi bialu tomo ogoni nabe nahe hene. Aniyagola tigua Mosese Aronola hearia puwa <sup>7</sup> libuhondo lamialu lalu, Iname homenerunaga tingini ela howa ina Ngode Datagaliwabenaga deni bayale ndo dodoheore kama. Ani kamago ai ina wali agali maru karu baba mandagi mo mogobu biruwa Anduane Homogohondo loma ogoni bo mibe nahedago irane aginagabe, lalu hale hene.

<sup>8</sup> Ani hale hayagola Mosese ibugua ladai bialu lalu, Ina Anduane Homogo ala hale holiya emene hondo hadaba, lene.

<sup>9</sup> Ani layagola Anduane Homogo ibugua Mosesehondo lalu, <sup>10</sup> Ina Isaraele wali agaliru bi ogodagua lamibe. Ti kamiruni ariamebi tinaga aguanene holebirarumebi ti bibahende homa ela howa inaga deni bayale ndo dodohe kamiyaguabi dindi taraha ibaga bialu pirimiyaguabi urunidagua buwa Bolangua Halu Penegonaga Horo mitangi bialu tomo nolene wiyaru noa biyagua nde nolene nga. <sup>11</sup> Tigua tomo nolene ogoni ege mendegonaga horo dene (14) ogoningi alendo haragola dawalu nolene nga. Tigua nogo sibi igini bo dawa nalu mberedi yidi nahe hirini ngago nalu palena ale kaubigo dugu peha buwa ogoni heba nolene nga.✧ <sup>12</sup> Bolangua Halu Penegonaga tomo ogoni dawa nalu biruwa mana biaga wiyaru biaiore holene nga. Nogo sibi balu naramigo aria podo ibira hene iriria maru yawi nole nawilimu. Nogo podalu howa kuni podolani napodalimu. <sup>13</sup> Anigo agali maru ti inaga deni ko mbira nawi bayale howabi dindi mendeha ibaga bima tagira nape howabi tigua ege áyu ogonaga Bolangua Halu Penegonaga tomo dawalu nolene ngago nane hayagua ti inaga wali agali bu karuni aria ndo ti tara kago inaga wali agali baba mandagi nahelo bo taliatagi halimu. Anidagua larogoni irane tigua ihondo lomabu ngulene horo wiyangi ngulenego nangi manga haragoninaga ani bilimu. Anidagua bo batagi haramigola mana ko tini biyagonaga genda tinime yu helo anidagua bilimu.

<sup>14</sup> Ainde wali agali dindi tara howa ibini ti baba mandagi kayagua tiguabi tomo ti naramidagua noa biyagua nde nalu mana biaga wiyaru dege talialu biai holene nga, lene.

*Beralibame Anduane Homogonaga Balai Anda biago yi henego ogo  
(Haru Penego 40.34-38)*

<sup>15-16</sup> Anduane Homogonaga Balai Anda biago biai hayadangi beraliba mbirame ibuwa anda biago yi hene. Mbiraga hayagola beraliba biagoni ira dene ngaralo wiradagua bini. <sup>17</sup> Beraliba biagome Balai Anda biago helalu piyagola Isaraele wali agali tinaga andabi giallo hubua bialu puwa beraliba biago dalu wiyagoria tinaga anda bu hene. <sup>18</sup> Anduane Homogohanda, Pilimu, layadaguabi, Halimu, layadaguabi tigua anda giallo yalu pialu anda bu haga bini. Beraliba biagome Anduane Homogonaga Balai Andani wiaabo hayagua wali agali tibi hama ogoriani haabo hene. <sup>19</sup> Beraliba biagome Balai Anda biago helalu pu ai nahe haabo hayagua tigua Anduane Homogonaga bi hale halu pu ai nai nabiaga ogoriani haabo hene. <sup>20</sup> Marungi horo dewa nahaga biradagoni bibahende anda gialalu piyaguabi nape hondo hayaguabi Anduane Homogonaga bi hale howa layadagua hangu biaga hene. <sup>21</sup> Horo marungi alendo hangu ibalu egerebagi hayagola heyalu piaga. Beraliba biago ema bialu piyagola wali agali tibi nde piaga hene. <sup>22</sup> Horo kiru hayaguabi ege mbira hayaguabi mali mbira hayaguabi ndo mali dewa hayaguabi hayadagoni beraliba biagome Balai Anda biago yiho wiagola ogoriani haho wialu beraliba biagome ema bialu piyagola wali agali tibi piaga hene. <sup>23</sup> Anduane Homogohanda anda bidaba lalubi giallo yalu pudaba lalubi Mosesehondo bi lamiyagola wali agali tigua hale halu biaga hene.

✧ 9:11: Har 12.46, Yo 19.36

## 10

### *Mbelo biguli kira ege tole silibame wabinigo ogo*

<sup>1</sup> Anduane Homogohanda Mosesehondo lamialu lalu, <sup>2</sup> Tigua siliba ngaru muwa hamame dambu mbara lowa mbelo lolenenaga biguli kira wabilimu. Ani wabuwa biguli ogonilabo wali agali ibu ngoai helonaga olalubi dindi ti kamigo yu wahalu tagira pole mbirale manda manda bilonagabi pu lolene wulebira. <sup>3</sup> Biguli ogonilabome lu pulalu haabo kagola wali agali abale ibalu inaga Balai Anda kagoria haneni ibu ngoai hole manda bulebira. <sup>4</sup> Biguli mbiraore hangu pulayagua Isaraele wali agalinaga haru haga karu ti hangu ibu ngoai holebira. <sup>5</sup> Ai biguli tigi mbira hangu pulaga biyagua agali ni tagira ibiragohayagi balai andaha bu karu ti dege ala polene wulebira. <sup>6</sup> Ani bialu biguli emene ogonidagua dege halu mende pulayagua nde balai anda abene unurahayagi bu karu ti heyalu polene wulebira. Ogonidagua tigua tininaga balai anda bu kamigo yu wahalu polenaga manda manda bilo lowa biguli emene tigi mbira hangu pulolebira. <sup>7</sup> Anigo wali agali bibahende ibu ngoai hadaba lalunaga biguli lu laho wulebira. <sup>8</sup> Arono igini loma binigo mo miaga karu tinaga biabe ogoni bialu biguli pulolene wulebira.

Tiguabi tinaga waneigini aguanene mani holobadarumebi mana ogonidagua dege bialu haabo holene nga. <sup>9</sup> Ti waitigi karume ti baba wai bule ti daluha anda ibiragola wai bu pole agali ibu ngoai helonaga biguli ala pulalimu. Tigua anidagua birimiyagua nde Anduane Homogo tinaga Ngode Datagaliwabe ini kogome ti mitangi bialu mo werogola ti waitigi ibirarume ti bopeore naholebira. <sup>10</sup> Ani bialu horo timbuni lotu lolenaga Ege Mbira Ngabulo haragolabi horo timbuni marubi loma biniru irame dai helo lomabu delolene horo harangibi Anduane Homogo ila ho gimbu bulenaga lomabu delolene harangibi tigua mbelo biguli pulalimu. Ani beramigola ina ti mitangi halu biamogo bulebero. I Anduane Homogo tinaga Ngode Datagaliwabe kogoni, lene.

### *Isaraele wali agali Hari Sainai ti balai andaruha hearia wahalu penego ogo*

<sup>11</sup> Isaraele wali agali ti Iyibi dindi yu wahalu tagira penego mali mende egebi mendenaga dege horo pira mende (20) hayagola hari beraliba biagome Anduane Homogonaga Balai Anda biago helalu pene. <sup>12</sup> Ani piyago handalu Sainai dindi ko wali agali nahaga wiagoha henego wali agaliru ti wahalu pene. Hari beraliba biago pialu Parana dindiha dindi ko wali agali nahaga iba dalu naibaga wiagoriani puwa hondo hene.

<sup>13</sup> Anduane Homogohanda Mosesehondo bi ala lamiyagola Mosese ibugua wali agali lamialu, Ai ina heyalu ma, layagola ti heyalu pene. <sup>14</sup> Pialu howa Yuda hameiginibi Isaga hameiginibi Sebulunu hameiginibi tigua bamba halu pene. Tinaga hameigini emene emene headagua tininaga pelagi yagayaga bialu pene. Aminadaba igini Nasono ibu hameigini tebira uruninaga agali haru haga henegobi ti haru dege pene. <sup>15</sup> Ani bialu Sua igini Nedanele ibu Isaga hameigini hearunaga agali haru haga hene. <sup>16</sup> Helono igini Eliaba ibu Sebulunu hameigini hearunaga agali haru haga henegome ti haru pene.

<sup>17</sup> Ani piyagola Libai aria Gesono damene hearubi Merari aria hearubi tigua hameigini tebira biaru piyadagua erembiraha talima pene. Uruni tigua Anduane Homogonaga Balai Anda biago ogoniha wiaga wiarubi yalu pene.

<sup>18</sup> Hameigini uruni tinaga erembiraha hameigini tebira Lubene ariabi Simiono ariabi Gada ariabi tini hameigini emene hayadadagua pugu bialu tininaga pelagi hangu hangu wiyadagua yagayaga bialu pene. Sederu igini Elisu ibu hameigini tebira uruninaga agali haru haga howa ti haru pene. <sup>19</sup> Ai Surisadai igini Selumiele ibu Simiono hameigini hearunaga haru haga hene. <sup>20</sup> Ani bialu Duele igini Eliasaba ibu Gada hameigini hearunaga agali haru haga henegome ti haru pene.

<sup>21</sup> Ani piyagola Libai aria Kohada hameigini hearu tigua Balai Anda biagonaga Hobane Loma Bia Henebi Loma Bia Heneore biago laboha biabe biaga wiaru damene

bibahende mo yai halu tigua maru piyarudagua mama talitali dege pene. Ani pialu hearia anda piyagola Libai hameigini maru ti abale piyarume Balai Anda bu hearia Kohada hameigini anda pene. Ani puwa Kohada hameigini tigua Balai Andanaga mbirale maru yalu piyaru Balai Anda loma binigo mo miaga hearu tigua Balai Anda biagoha mo wilo tihondo mini.

<sup>22</sup> Mani Eberaimi hameiginibi Manase hameiginibi Beniyamini hameigini hearubi ti bibahende tini hameigini emene headagua tininaga pelagi yagayaga bigi bialu pene. Amihudu igini Elisama ibu hameigini tebira uruninaga agali haguane howa ti haru pene. <sup>23</sup> Ani bialu Pedasu igini Gamaliele ibu Manase hameigininaga agali haru haga hene. <sup>24</sup> Gidioni igini Abidana ibu Beniyamini hameigini hearunaga agali haru haga hene.

<sup>25</sup> Uruni ti peha erembira maniore Dana hameiginibi Ase hameiginibi Nabadali hameiginibi tini bibahende hameigini emene headagua tinaga pelagi yagayaga bialu pene. Amisadai igini Ahiese ibu hameigini tebira uruninaga agali haru haga henegome ti haru pene. <sup>26</sup> Ogorana igini Pagiele ibu Ase hameigininaga agali haru haga hene. <sup>27</sup> Enana igini Ahira ibu Nabadali hameigininaga agali haru haga hene. <sup>28</sup> Isaraeleali ti dindi mendehe pole pialu howa tigua maha bambaha bigi bialu piagago ho iriari bule ndo henedadagua pugu biaga hene.

<sup>29</sup> Ti heyalu pole howa Mosesehanda ibu imane dindi Midianali Yadoro igini ibu balibuni Hobabahondo lalu, Áyu ina dindi bamba ina mamaliruhondo ngulebero lalu Anduane Homogo ibugua lowini ngagoha pole poromago ai ogoniha howa ina bayaleore holeberema. Anigo íbi nde ina heba mbirale bayale ngaru mandagi tale bigi bimija ma, lene.

<sup>30</sup> Ani layagola Hobabahanda lalu, Anidagua bulene bayale degego nde wahalu ñi daluha hama dai berogo, lene.

<sup>31</sup> Ani layagola Mosesehanda lalu, Ainde balibu dara kogoni. Ína ina yu wahalu dai bibelo hame nalego dindi ko wali agali nahaga ngagoha balai anda ogoria bibeheda lalu ina harigabi ína dege walia habehe kegoni. <sup>32</sup> Í ina haru pirimayagua nde Anduane Homogohanda mbirale bayale damene inahondo ngulebirago maru í talebu nguleberamago ma, lene.

### *Isaraele wali agali tigua Hari Sainai yu wahalu penego ogo*

<sup>33</sup> Wali agali biarume Anduane Homogoibuninaga Hari Sainai loma bia henego yu wahalu pialu hemiria hangu horo tebira pene. Anduane Homogonaga Habo Nalolene Bi lo winigonaga Mbogoyi biago ala yu bamba haga bialu ti halo holenegro agoriadabe handaga bima pene. <sup>34</sup> Horo bibahendengi tinaga balai anda gialalu pirimigola Anduane Homogonaga hari beraliba biagome dambi hayagola ogoninaga andaneha piaga hene.

<sup>35</sup> Habo Nalolenenaga Mbogoyi biago yalu pole piyagola Mosesehanda bi ogodagua laga. Anduane Homogo-o ína bamba halu puwa í waitigi karu bo purogo lalu wali agali í handabe manga haga karubi bo pelabe, laga hene. ✧ <sup>36</sup> Ani lalu puwa halo holoria heagola ibugua lalu, Anduane Homogo-o Isaraele damene mbira mbira daosini au loabe tobahe kagoria daibu habe, laga hene.

## 11

### *Dindi irame dene ngagoria binigo ogo*

<sup>1</sup> Wali agali biarume tiniha genda tagira ibiyaru hondowa Anduane Homogohondo gimigomo dewa lalu hene. Anidagua layago hale howa Anduane Homogohanda keba howa wali agali heagoria ira hedo ibira hene. Ira biagome da dege dindi hayagola

✧ 10:35: Iba 68.1

wali agalinaga balai anda bu hearu lene mbirahayagi do mundulo wahene. <sup>2</sup> Ani biyagola wali agali biarume Mosese hearia biamogo bia lama pene. Ani layagola Mosesehanda Anduane Homogohondo bi lamia hayagola ira biago hundini. <sup>3</sup> Anduane Homogohanda irame delenedago manda buwa dindi ogoni mini Irame Delene laga wini.

*Mosesehanda agali pira karia (70) haru hagane helo dabenego ogo*

<sup>4</sup> Isaraele wali agali hangu ndo wali agali dindi tara tara howabi Isaraele wali agali heba bimaga halu pene. Dindi tara wali agali urunime nogo tara tara nogo bulumagabi nogo memebi noabira lalu gimigomo lene. Isaraele wali agali biarumebi tini dege dege gimigomo lalu howa lalu, Nogoore mbira narimayagua baya gibidago agoha taya bulebadabe. <sup>5</sup> Ina Iyibi dindini howa wena mialu ndo inane noabiradagua nalu haramali. Bambo naramali biaruru manda bidaba. Iname melono bambogini ale naramalirubi aniani tara tara naramalirubi manda bidaba. <sup>6</sup> Uruni ale naramaligo áyu nane kamagome inanaga hongo piai hayada handadaba. Mena ogo hangu horo bibahendengi naho wiaabo holene wiaruago tomo nolene bayale mbira nawida, lalu hene.

<sup>7</sup> Mena odagoni ira lini egene ale ambuabini pele emene mbira parahagabi wini.✧  
<sup>8</sup> Mbiragaha balai anda bu heagoria ginu ti ibira haradagua menabi mandagi ibira ho wiaga wini. <sup>9</sup> Egerebagi hayagola wali agali biarume ilmu buwa budabaga biaga alerume budubagabi ndoyagua nde ege toleme dambigi buwa balawa ale haeal-abagabu ngelaga. Ani bu ngelowa todobeneni dawawa mbisegedi ale ho wiaga. Nalu karia dende mberedi olibe lini ibane heba biamaga howa wabini nene mbau laga wini.

<sup>10</sup> Wali agali biarume tininaga balai anda harabani wabuni hagahaga bu howa giga lalu gimigomo dewaore layuane Mosese ibu hale hene. Ani hale howa Mosesehanda Anduane Homogo ibugua tihondo keba hayago hondowa ibu genda timbuni ho hene.

<sup>11</sup> Genda howa ibugua Anduane Homogohondo lalu, Ina i mo genda haregoni irane aginaga berebe. Ila turu nahe kegoni aginagabe. Wali agali o bu karunaga biabe bia holene ogoni ina ihondo abule ngiribe. <sup>12</sup> Ti wabinibi hono winibi mbira i ndoya hendedeni. Gali taba yaradagua dindi tinaga mamaliruhondo ngulebero lo winiyagoria pole ogoni agida. <sup>13</sup> Wali agali o karu bibahende nelo mule nogo egaru mbira agohayagi tai buadabe. Lawanana bialu howa nogo egaru ngi laho wiaabo kagoni. <sup>14</sup> Wali agali bibahende karunaga biabe bialu handaya ho holene genda ho ko. Biabe ogoni i hangume bulene gendabioiredago nabibehe kogoni. <sup>15</sup> Ina ihondo ogonidagua buleyagua genda timbuni o ngereru nahondoliya ina i dara halu bo home lolene karulapeda, lene.

<sup>16</sup> Ani layagola Anduane Homogohanda Mosesehondo lalu, Agali pira karia (70) wali agalime galone bibehe mini lene kalo mandabiru dabowa inaga Balai Anda ini ibu hagagoria mo ngoai howa i kegoria mandagi halimu. <sup>17</sup> Ina ibuwa i heba bi lalu inaga Dinini mugube ala iha helaruru maru agali uruni tihondo muliya. Ani berogola gendabi ngaru maru agali uruni tigua i biamogo bia haragola ti haru mandagi buleberami.

<sup>18</sup> Ayu wali agali lamialu nogo egaru mbira yawi noleberami. Ani nole howa Ngode Datagaliwabe deni tini mo tiga bialu manda manda bayuwa bilimu lalu, lamibe. Tigua lawanana bialu lalu nogo egaru mbira nane kama. Iyibi dindini howa ina baya gibiore harima larimigo Anduane Homogo hale haya. Anduane Homogo ina yawi nogo egaru maru nalimulo ngulebero. Ani ngerogola tigua nogo egaru nguleberoru noleberami.

<sup>19</sup> Noleberamidagoni bame horo mbiru kiru agima bidaru piru agimabi ndo horo pira kira agimabi ndo dege. <sup>20</sup> Nalu kamine hangu ngui harigaha bidi bede lalu tagira pialu magu tagualu bilimulo ege mbira naho wiaabo halu holeberami. Anduane Homogo

✧ 11:7: Har 16.13-15, 16.31

ina tí heba mandagi ogoria henego tígua wara ai halu gimigomo lalu howa lalu Iyibi dindiore yu wahabe nahego yu waharima larimigonaga ani bulebero laya lamibe, lene.

<sup>21</sup> Mosesehanda Anduane Homogohondo lalu, Wali agali o haru kogo daosini hangu handari waragariadago (600,000) ina nogo egaru ege mbira no karulapelo ngule larigo wali agali o karubigo nelo agiha ngaria muleberebe, lalu hale hene. <sup>22</sup> Wali agali bibahendeme nai helo nogo bulumaga sibibi bibahende bai harimayagua no karulo polobadabe. Iba solowaraha wena bedaru bibahende bayaguabi ti ogoni no karulo polobadabe, lene.

<sup>23</sup> Anduane Homogohanda ladai bialu lalu, I hongo nakarulape kalo mitangi bu kebe. Ina larudaguaore abale buleberogo í hondolebere, lene.✧

<sup>24</sup> Anduane Homogohanda layadagua Mosese ibu tagira puwa ibugua wali agali hearuhondo lamini. Ani lamialu ibugua agali haru hagane pira karia (70) biaruni haru puwa Balai Anda biagoha ho mabu bu helene. <sup>25</sup> Ani bu heagola Anduane Homogo beralibaha daluwa Mosesehondo bi lene. Ibugua Dinininaga mugube Moseseha helene-yaru maru yamuwa haru haga pira karia (70) biaruhondo mini. Dinininaga mugube agali biaruha íbu heagola tigua Anduane Homogonaga mana latagi hagarume ga lalu bi lagadagua lenegoyu ti emene tigi mbira dege ani lene.

<sup>26</sup> Agali pira karia (70) dabayaru aria kirali Eledada Medadala libu Balai Anda biagoha nape libuni balai andaha bereria libuhabi Anduane Homogo Dinininaga mugube ibini. Libuha ibiyagola libuguabi Anduane Homogonaga mana latagi haga agalirume ga lalu bi lagadagua dege lalu lene. <sup>27</sup> Ani layagola igiri mbirame Mosese hearia puwa Eledada Medadalame ogobi bialu ka lalu lamini.

<sup>28</sup> Ani layago hale howa Nunu igini Yosua ibu Mosese biamogo biaga heago ibugua Mosesehondo lalu, Haru haga-o libu wahadaba larene, lene.

<sup>29</sup> Libu ani layagola Mosesehanda ladai bialu lalu, Ina biabe berogoni ina minime bolangua kebe. Anduane Homogohandaibunaga wali agali o karu bibahende ibu Dinininaga mugube bayale miragola tigua Anduane Homogonaga mana latagi hagarume ga lalu lagadagua lelo hame ledó, lene. <sup>30</sup> Ani biai halu Mosesebi haru haga pira karia (70) biarubi heba wali agali bibahendenaga balai anda bu heagoria dai bini.

### *Anduane Homogohanda ega ibira helene go*

<sup>31</sup> Abale aube tobaneore buwa Anduane Homogohanda puyabu iba solowarahayagi howa ibilayagome ega deware dindiha pulo yalu ibuwa balai anda bu heagoria bira dege dindi halu biruyu mabu bialu biruyu peagola hendedamibe nahe de handa wiahe íbu berene. <sup>32</sup> Anidagua biyagola wali agali biarume ega deware berearu minalu hearia hangu horo mbira halu mbiraga hene. Ani buwa egerebagi gao layagolabi minaho wini. Wali agali homane mbira mbirame minayagoni nu pira kira agimaore hanabe nahe dege degeru hono ngelaga bini. Ani buwa ega biaru nime do giambe helo anda bibahendeni yo bia haame hene. <sup>33</sup> Ani lalu ega deware biaru wene nole nalu heagola Anduane Homogohanda wali agali biaru baba keba howa warago mbira ti heagoria ibilene. <sup>34</sup> Dindi odagoriani nogo egaru mbira noa kama layaru hora henego manda buwa dindi mini Noa Habuabinaga Homali wini.

<sup>35</sup> Wali agali biarume odagoriani howa Haserodo pialu balai anda bu ho hene.

## 12

### *Miriama pani minigo go*

<sup>1</sup> Mosese ibu Idiobia dindi wali dabu bini. Ani biyago hondowa Arono Miriamala libugua Mosese guralu la hirini. <sup>2</sup> Libugua lalu, Anduane Homogohanda Moseseha howa hangu bi lagayabe iyaha howa bi laraligoni ndobe, lene. Ani layago Anduane

✧ 11:23: Ais 50.2, Ese 12.25



Homogohanda hale hene. <sup>3</sup> Mosese ibuniore mo dindiha haganego ibu ogonibi agali mende dindi áyu ogoria mbira nahe.

<sup>4</sup> Anduane Homogohanda Mosesebi Aronobi Miriamabi abaleore tihondo lalu, Tí tebirabali inaga Balai Anda i kogoria ibidaba, lene. Ani layagola ti tebirabali pene.

<sup>5</sup> Ani pu heagola Anduane Homogo ibuni beralibaha howa ibagadagua ibuwa Balai Anda biagonaga harabani íbu howa ibugua Arono Miriamalahondo, Ibidaba, lene.

Ani layagola libugua pu hapara hene. <sup>6</sup> Libu pu heagola Anduane Homogo ibugua libuhondo lalu, Ina bi larogo bayuwa hale halibu. Inaga bi mana latagi hagaru tí heba mandagi kayagua ina de gandebaha howa ini ti mo walia halu emagaha howabi ini tihondo bi laruli. <sup>7</sup> Anigo ina inaga biabe biahaga Mosese ibu uruni ale ndo ka. Mosesela bi lalu ina mana mende ale biruli. Ibugua Isaraele wali agali haru helo heledo.✧

<sup>8</sup> Anigo ina ibuhondo nenegela bi laradagua biruli. Bi yobage lalu Mosesela nalaruli. Mosese ibugua i henedena. Anidago inaga biabe biahaga Mosese agali ogonibi heagola libugua agi bulenaga guralu lahiraribibe, lene.

<sup>9</sup> Anduane Homogohanda libu baba keba timbuni howa o biagoria hea handala piyagola <sup>10</sup> hari beraliba biagobi Balai Anda biago yu wahalu pene. Ani piyagola Miriama ibu ge hamuabi bialu dongone bibahende abaleore pagayu biame hene. Aronohanda ogonibi biyago hondowa <sup>11</sup> Mosesehondo lamialu lalu, Agali timbuni-o iyame ihondo koore timbuni laribalo manda bidabago warago ogoni iya heba nahelo iya dara halu biamogo bibe. <sup>12</sup> Wali mbirame gali taba hanaragola ogonibi hono wini mbaule dagane mbirahayagi togobi o kagobi ibu nahelabe, lene

<sup>13</sup> Ani layagola Mosese ibugua Anduane Homogohondo lalu, Ngode Datagaliwabe-o ibu biamogo bialu mo dabi habe, lene.

<sup>14</sup> Anduane Homogohanda ladai bialu lalu, Miriama ibu abahanda hamiaga wanakuini toloba henedale horo karu taga ho bedale. Ogonidagua dege horo karu ibuni hangu balai anda bu kagoria howa tagira birulene nga. Horo karia ogoni piai kagola ibuni andaga haru dai bulene nga, lene.✧ <sup>15</sup> Ani layagola Miriama ibu horo karu tagirahayagi waratagi howa berelene. Anidagua berelowa Isaraele wali agali biaru ti pu nabi Miriamanaga horo karu biago piai helo hondo hene. <sup>16</sup> Horo karu biago piai heagola Isaraele wali agali tigua Haserodo dindi yu wahalu puwa dindi ko wali agali nahaga mbira mini Parana wiagoria balai anda bu hene.

## 13

### *Kenana dindi hondo wule penego ogo (Mana Loyane 1.19-33)*

<sup>1</sup> Anduane Homogohanda Mosesehondo lamialu lalu, <sup>2</sup> Kenana dindi Isaraele wali agali tihondo nguleberogo í manda bide. Ani buleberogo áyu ina agali hameigini homberia (12) biaru aria bogabi mbira mbira dabalulu Kenana dindi hondo wule pudaba labe, lene. <sup>3-15</sup> Mosese ibugua Anduane Homogonaga bi layago hale halu Parana dindi ko iba dalu naibaga wiagoria howa agali haguane maruhondo, Kenana dindi hondo wule pudaba, lene. Agali o piyadaruni tinaga mini uru - Lubene aria Saguru igini Samua pialu Simiono aria Hori igini Sabada pialu Yuda aria Yabune igini Kalebe pialu Isaga aria Yosebe igini Igala pialu Eberaimi aria Nunu igini Hosia pialu Beniyamini aria Labu igini Palidi pialu Sebulunu aria Sodi igini Gadiele pialu Manase aria Susi igini Gadi pialu Dana aria Gemali igini Amiele pialu Ase aria Migaele igini Seduru pialu Nabadali aria Bobisi igini Nabi pialu Gada aria Magi igini Guele pialu bini.

<sup>16</sup> Agali uruni tigua pialu Mosese ibugua Kenana dindi bibahendeha hondo wima ibaga bialu dai bule pudaba laya handala ti pene. Ani bialu Mosese ibugua Nunu igini Hosianaga mini wia aribia halu ibu mini Yosua wini.

<sup>17</sup> Mosese ibugua agali uruni pelonaga ibugua tihondo lamialu lalu, Tígua uyuraha pialu dindi emene mbira Negebe ngago anda pialu yu wahalu hari barebare ngagoha iraga halu pilimu. <sup>18</sup> Pialu dindi ogoni agi ale ngabe handaiore halimu. Ani handalu dindi ogoniha wali agali agira kabe handalu ti hongohedabe nahedabe handaiore halimu. <sup>19</sup> Dindi bayaledabe be kodabe handalu wali agali ti tano pabe hongohe bu mabubiha kabe be tano pabe nabi bame winiha kabe handalimu. <sup>20</sup> Ani handalu dindi ogoni ibane bere tomo anda habehe wialu uruniha irabu ngabe nawidabe handalu bilimu. Ani handalu kamiria dindi ogoniha ira lini dedaru maru do yalu dai bilimu. Mbira do ya nabioire dai bulamini, lene. Mosese ibugua bi laminidagoni pu mbira mini gerebi lini boga bulenengi howa maru ala deneru boga bialu heaore dege lene.

<sup>21</sup> Ani lamiya handala agali pudaba layaru tigua puwa Sini dindi ko iba dalu naibaga unurahayagi wiagoria howa ala handama pialu abene uyurahayagi Hamada tanoha anda polene harigani Lehobo tano wiagoria anda pene. <sup>22</sup> Ti puwa Negebe dindi ala anda pialu Heberono tano wiagoha pene. Dindi ogoniha henedaruni agali hameigini mini Anagimu laga agali timbuni luore bamba heneru aguanene Ahimanabi Sesaibi Talamaibi uruni hearia hendene. Heberono tano ogoni agali hameigini maru hearume bu helearia mani Iyibiha tigua Soana tano bu aribia howa mali karia ogoriani hene wini. <sup>23</sup> Agali haguane piyaru ti pialu dindi bayale ulini panda panda mbira mini Esegolo laga wiagoria anda pene. Dindi ogoniha gerebi lini dewaore do mbule timbuni mbira dearu do yini. Gerebi lini mbiraore ogoni agali mbiraoreli hangume yabe naheyagola agali kiralime iraho yalu dai bini. Ani bialu ira maru poge ale linibi pomegaranate linibi nendabu dewaore do yalu dai bini. <sup>24</sup> Mani Isaraele tigua dindi uluni panda panda ogoni mini Esegolo winigo irane agali haguane piyaru tigua gerebi ene mbiraoreme lini timbuni deneyago manda buwa lene.

*Agali homberialiru (12) dindi hondo wialu dai binigo ogo*

<sup>25</sup> Agali biaruni tigua dindi handama ibaga bialu heane horo pira maria (40) pene. <sup>26</sup> Ani peagola tigua Mosesebi Aronobi Isaraele wali agali bibahendebi Parana dindi ko Kadese biagoria hemiria dai bini. Tigua dindi biago ogobiya lalu te lamialu ira lini do yiniyaru walua hene. <sup>27</sup> Tigua Mosesehondo lamialu lalu, Dindi biago bibahende handama ibaga bialu howa handalu hemaria dindi ibane bere tomo mbirale anda hagaya. Dindi ogoriani ira lini dene o do yidamagoni handa. <sup>28</sup> Anigoyu wali agali dindi ogoriani hearuni hongohe gibioireya. Tinaga tano timbuni wiarubi ege pabe hongohe wa mabu biarubi diri nawi hongoheore hea. Ani bigi biagola gibioire handarimago agali luni timbu gibi mbira ala halu homeayaru aguanene ogoriani hearia handarima. <sup>29</sup> Amalegeali unurahayagi palea Hidialibi Yabusualibi Amoroalibi ede hambene hambeneha palea Kenanaliru iba solowara Medidereniana ange ange palea maru iba Yodana ange ange palea, lene.

<sup>30</sup> Kalebehanda Mosese bereagoria ho mabu buwa hearu bi nale hadaba lowa lalu, Tígua gi dege dindi howa laramigoni agi laramibe. Ina hongohe karulape kamagoni wai bialu dindi ogoni mibehe kama, lene.✧

<sup>31</sup> Ani layagola agali maru Kalebe heba mandagi penayarume lalu, Iname wai bialu tinaga dindi nakarulabehe kama. Wali agali o handarimadaruni hongo gibioire ina baba nakarulape heane handarima, lene. <sup>32</sup> Ani lowa tigua ke halu Isaraele wali agali mo gi howa bogo para halu tindule lama ibaga bialu howa lalu, Dindi ogoriani tomo dewa nawiya. Wali agali ogoriani hearuni tomo noa howa hangu hea. Wali agali handarimadaru bibahende lu daligani timbuni hangu heane handarima. <sup>33</sup> Agali lu timbuni damene Anage aguanene marubi ogoriani hea. Ti heago baba manda bialu hemaria ina dereparia ale bu hinaya. Tigua inabi anidagua hendeda holebira, lene.✧

## 14

### *Isaraele wali agalime gimigomo lenego ogo*

<sup>1</sup> Ogonibi layago hale halu mbiraga howa wali agali biarume gigi lalu dugu bialu hangu heane gao lene. <sup>2</sup> Tigua dugu bialu howa Mosese Aronolahondo lalu, Iyibi dindiniyaguabi dindi ko wali agali nahaga ogorianiyaguabi homedemale karulapedale. <sup>3</sup> Anduane Homogohanda dindi ogoniha agibule haru piaruabe. Tigua ina bo wahai halu inanaga one waneiginiru ti haru holebada. Ogoria howa Iyibi dindi dai bulenebi ko ndo dege, lene. <sup>4</sup> Ani lowa tini dege dege lamigimigi bialu howa lalu, Iyibi dai bimiya haru bamba holene agali mbirali dabama, lene.

<sup>5</sup> Ani laga biyagola Mosese Aronolame wali agali biaru wanakuini bulu palu ibira hene. <sup>6</sup> Ani biyagola agali dindi hondo wule piyago aria kirali Nunu igini Yosuala Yabune igini Kalebelame genda timbuni howa libuninaga aga budaki haga haga bini. <sup>7</sup> Ani buwa libugua wali agali hearuhondo lalu, Dindi iname handarimadagoni baya gibiore handarima. <sup>8</sup> Anduane Homogo ibugua ina heba turu kayagua dindi bayale ibane bere ogoni ina ngulebira. <sup>9</sup> Anduane Homogohondo mine howa yu wa nahadababe wali agali odaruni hondowa gibi nahadababe bame balu dindi karuloleberamago. Anduane Homogo ibugua ina heba howa ti dama lowa mbirale irame wabiniruhondo bi pupu wialu hearuni balu ina wayali holeberamago gi nahadababe, lene.✧ <sup>10</sup> Ani layagola wali agali bibahende hearume Yosua Kalebela toleme balu homelole hongo howa hene. Ani bule bialu hemira Anduane Homogonaga wa holene timbuni Balai Anda biagoria ibu hayago hondowa ogolabo ba nabi wahene.

### *Mosesehanda Anduane Homogohondo Isaraele wali agalinaga bi lahenego ogo*

<sup>11</sup> Anduane Homogohanda Mosesehondo lalu, Wali agali urume inaga bi agira halu mo waholebirabe. Ina nahendene ale dewaore birugolabi hondowa tigua ihondo mini mbiraore nawi kago agibe. <sup>12</sup> Ani biragonaga warago ko mbira ti kagoria ibilowa bo wahai halu i dege wali agali maha holebirarunaga aguanene heloliya. Wali agali odaruni ayu karubi ndo hongohe dewaore helolebero, lene.

<sup>13</sup> Ani layagoyu Mosesehanda Anduane Homogohondo lalu, Ininaga hongome wali agali uruni Iyibi dindi howa haru halu tagira ibirigoni. Iyibi wali agalirume ininaga wali agali biaruhondo ogodagua biriya larago hale howa tigua wali agali ogoria padaruhondo lamulebira.✧ <sup>14</sup> Wali agali ogoria karume Anduane Homogo i ina heba ke lo mandabu ka. Iniore ibuwa hari beralibaha howa ha pani haga kelo manda bida. Ani buwa horombengi hari beralibaha ibu halu mbiraga ira hunguha ibu howa ina halu bamba haga kelo manda bida. <sup>15</sup> Ayu ina wali agali uru bibahende bo wahai hariyagua wali agali dindi bibahendeni howa ina dewa biriru hale hayarume ogodagua lolebada. <sup>16</sup> Tinaga Anduane Homogohanda ibunaga wali agali haru halu ibiyaruibunime dindi mulebero lo wiyagoria haru polene hongo nakarulapeyagola bibahende dindi ko wali agali nahe ogoha bo wahai hayada lolebada.

<sup>17</sup> Ani lolebadago Anduane Homogo-o inaga hongo biago ayu walia halu bulebero lalu lo wirigodagua bibelo hameledo. <sup>18</sup> Ina bi ogodagua larigoni Anduane Homogo i emene mbirame abale mo lembo nahaga ko. Ina gubalini holeneorebi mini bilinahebi kagua bialu i baba wai birarubi biadai nabiruli. Ani anigo tinaga waneigini mani hararu daba tebone mane dabanibi ti aba aiyarume ko biragonaga tandaga naho wiaabo holebira, larigoni.✧ <sup>19</sup> Anigo Anduane Homogo-o inaga gubalini holene beregeda nabiaga luniore wirigome wali agali Iyibi yu wahalu ibalu howa ko biragola domarilidagua ayu birarubi domabe laro, lalu Mosesehanda lene.

<sup>20</sup> Anduane Homogo ibugua ladai bialu lalu, Ína bia laridagua tigua ko biyaru domo waharu. <sup>21</sup> Ani buleberogoyu bi henene buleberodagua mbira lo wero. Ininaga haabo holenebi wá holenebi hongo holenebi dindi bibahendeha wiame kagome bule ledogo biaore bulebero.✧ <sup>22</sup> Wali agali mine haga uruni damenego bibahende dindi ngulebero larugoria anda napolebira. Inaga wá holenebi nahendene ale Iyibini howa birurubi dindi ko wali agali nahe ogoria howa birugobi handaya. Ani hondowa dege inaga bi larugo hale naholene halu i ba hondolene pi halu bialu i mo genda haya. <sup>23</sup> Tinaga mamaliruhondo dindi ngulebero lo wirugoria anda napolebira. I yo handaga biaru damene bibahende anda napolebira. <sup>24</sup> Anigoyu inaga biabe biahaga Kalebe ibunaga mana bayale biyagonagabi ibugua i yu wanahe ila haabo hayagonagabi dindi biago hendelo ibu haru anda polebero. Haru anda pialu dindi ibugua hondo wima ibaga biyago ibunibi ibunaga aguanenerubi ti helo mulebero.✧ <sup>25</sup> Dindi ogoriani Amalegealiru Kenanalirubi ti áyu padagoni. Ai yawi beregedalu wali agali nahe biahayagi dai bilimu. Ani buwa iba solowara Daramabi bedagotha Agabahayagi pilimu, lene.

*Anduane Homogohanda wali agali gimigomo layaru pani minigo ogo*

<sup>26</sup> Anduane Homogohanda Mosese Aronolahondo lalu, <sup>27</sup> Wali agali ko urunime ihondo gimigomo lalu karuni angi lairi holobadabe. Tinaga gimigomo ogoni haruore hale ko. <sup>28</sup> Ai Anduane Homogo i heneneore haabo haga kogome larodagua libugua lamidaba. Tigua ihondo hale harimiru dege tihondo ina bulebero. I Anduane Homogo ina bi o ledogoniore. <sup>29</sup> Homaramigola tinaga tingini hangu dindi ko wali agali nahe ngagoria homopaya bima polebira. Ihondo gimigomo larimigo yasianaga daga layangi bibahende mali pira kira (20) bolangua hene kamigo dindi ngulebero larugoria anda napoleberami.✧✧ <sup>30</sup> Tí dindi ogoriani halimulo ngulebero lalu lo wirugo napoleberami. Kalebe Yosuala libu hangu anda polebira. <sup>31</sup> Tigua lalu tinaga waneigini wai tigitalime karulai holebira lalu dindi ogonibi tí manga larimigoyu ina tinaga waneigini karulelo haru halu anda polebero. Ani berogola tigua tinaga dindi henene ogoniha turuhu holebira. <sup>32</sup> Tí kamiru nde dindi ko wali agali nahe ogotha homai holeberami. <sup>33</sup> Tigua mini mbiraore nawirimigonaga tinaga waneiginirume pani nalu mali pira maria (40) dindi ko wali agali nahaga ogotha ibaga hangu bialu tí wahe kamiru bibahendeore homamaro bilimulo ibaga bialu haabo holebira.✧ <sup>34</sup> Dindi biago de hondo wule pialu hemiria horo pira maria (40) piyagonaga mali mbira horo mbira biagonaga dagalo ngido. Kagua birimigonaga mali pira maria (40) pani naabo halu holeberami. Mali ogonibi ngerogonime tí heba ina keba ogobi kada lo manda bilimulonaga bido. <sup>35</sup> Ina heneneore larogo wali agalime kagua bule mini mbira ho karu ina dindi ko wali agali nahe o ngaruha homamaro bilolebero. I Anduane Homogo ina bi o ledogoniore, lalu lene.

<sup>36-37</sup> Mosesehanda ala agali maru dindi hondo wule pudaba layarume handalu dai buwa wali agali hearu mo hondo howa lalu, Dindi ogoni kooreya layarume wali agali bu hearu Anduane Homogohondo mo gimigomo la hene. Anigo mo hondo hagadaruni Anduane Homogohanda abaleore waragome bo homelai hene. <sup>38</sup> Agali dindi hondo wule pene biaru aria homai halu Yosua Kalebela hangu yupe howa helene.

*Isaraeleali tigua Kenana dindi mule wai pigane bia hendene ogo  
(Mana Loyane 1.41-46)*

<sup>39</sup> Mosese ibugua Anduane Homogohanda layadagua lamiyagola Isaraele wali agali biarume dugu ndoore gibi bini. <sup>40</sup> Ani buwa tigua lalu, Ai dugu timbuniore birimagoni ko birima lalu mo walia harimagoni lowa egerebagi hayagola tigua wali agali hariha palearu baba wai bule pene.

<sup>41</sup> Ani pole piyagola Mosese ibugua tihondo lalu, Anduane Homogonaga bi mo wahalu poramigo agibe. O beramigonime wayali naholeberami. <sup>42</sup> Anduane Homogo tí heba nahego napudababe tínaga waitigi <sup>43</sup> Amelegeali Kenanaliru baba wai beramigola homoleberami. Tígua Anduane Homogohanda bia layadagua nabi waharimigome ibu tí heba naholebira, lene.✧

<sup>44</sup> Ani layagola helalu Mosesebi Anduane Homogonaga Habo Nalolene Bi lo winigonaga Mbogoyi biagobi anda bu harimigoria ngelalu napobe layagoyu tini ti hongo timbuniore halu pene. <sup>45</sup> Ani pialu hearia Amelegeali Kenanalibi paleneyarume bama talima puabo halu Homa tanoha bo porabia hene.

## 15

### *Lomabu mulenenaga mana tara tara winigo ogo*

<sup>1</sup> Anduane Homogohanda Mosese lamialu, <sup>2</sup> Ina Isaraele wali agali bu karuhondo bi ogo lamibe. Dindi ina tí nguleberogoha pu howabi dindi ogoniha pialu baya hangu ho dungulo howabi <sup>3</sup> tígua inihondo mbirale lomabu ngule manda bialu nogo bulumagayaguabi sibiyauguabi memeyaguabi t́ni nogoore henedago loma bialu bo ngilimu. Ani bialu loma uruni irani dai helo bo deloleyaguabi t́nime lomabu ngule lalu lo winidagua lomabu nguleyauguabi lotu lolene horo timbuni tagira ibiragola nguleyauguabi t́ni hameme lomabu nguleyauguabi t́ni manda bidamidagua ngigi bilimu. Tígua loma bayale uruni bu ngigi beremigonaga nga bayale birago hondowa ina turu ho haruli. <sup>4</sup> Agali mbirame nogo sibi memeyaguabi mbirago ihondo loma bialu irani dai helo bo delole yalu ibiyagua nde balawa bayaleore genda magi kilogarama mbirago olibe lininaga weli be mbira agima balawaha odo biamaga howa lomabu delole yalu ibulene nga. <sup>5</sup> Ani bialu waini iba be mbira agimabi nogo sibi memeyaguabi mbirago heba lomabu bo delalu delamaga holene nga. <sup>6</sup> Tígua nogo sibi wangabe lomabu bo deloleyagua nde balawa genda magi kilogarama kira olibe lininaga weli be mbirani mende gombedene heba odo biamaga howa lomabu delolene nga. <sup>7</sup> Ani bialu waini iba be mbirani mende gombedene heba nogo sibi wangabe biagobi lomabu delolene nga. Anduane Homogo ina loma baya ogonibi bu delaragonaga nga bayale birago hondowa turu ho haruli. <sup>8</sup> Agali mbirame nogo bulumaga wangabe mbira irani dai helo lomabu bo deloleyaguabi ibugua lomabu delole lalu lowinigonaga deloleyaguabi Anduane Homogo inila ho gimbu bulenenaga lomabu deloleyaguabi <sup>9</sup> nde ibugua balawa genda magi kilogarama tebira olibe lininaga weli be kira odo biamaga hene biagobi heba loma bialu ngulene nga. <sup>10</sup> Ani bialu waini ibabi be kira hambu yu ibalu nogo bulumaga wangabe biago heba lomabu ngulene nga. I Anduane Homogo kogo ina loma bayale urunime tumutumu birago nga halu turu haruli.

<sup>11</sup> Tígua balawabi olibe lininaga welibi gerebi lininaga ibane wainibi ihondo lomabu ngeremigo heba nogo bulumaga wangabeyaguabi sibi wangabeyaguabi sibi iginiyauguabi meme iginiyauguabi manda bidamidagua inihondo lomabu ngulene nga. <sup>12</sup> Tígua nogo bulumaga kira tebirayaguabi loma bialu delarimiyagua nde balawabi olibe lininaga welibi waini ibabi nogo mbira mbira heba delolene karulape ngadagua loma bialu delalimu. <sup>13</sup> Isaraeleali tígua loma bayale ngabi Anduane Homogo inime hame laruligobi ngulene hamelo kamiyagua nde balawaha olibe lininaga welibi waini ibabi biamaga howa uruni bibahende lomabu ngilimu. <sup>14</sup> Agali mbira dindi taraha howa tí baba tigi mbira hangu ibu heneyaguabi tí baba mandagi haabo heneyaguabi ibugua Anduane Homogo ina hame laruligobi lomabu ngule hamelo heagua nde karulapego ani ngulene nga. Anigo ibugua bame bupebe ndo lomabu delaga mana talialu Isaraele wali agalime biaga ngadagua bulene nga. <sup>15</sup> Ani bulene ngago irane lomabu ngulenenaga mana mbiraore hangu Isaraeleme lomabu delolenebi wali agali



tara tí baba mandagi íbu hene kamirubi bibahendeme loma bulene mana mbiraore dege nga. Mana ogoni mbirago iriari nabuleore ani wiaabo halu tínaga waneigini aguanene mani hama polebirarumebi talialu bialu haaboore holebira. Ani larogoni irane í Anduane Homogo ina handalu hewaria tí Isaraele wali agalibi dindi tara wali agali bu karubi tí bibahende ogobi dege dege hemiria handaru. <sup>16</sup> Isaraele wali agali tíguabi wali agali dindi taraha howa ibini karubi tí bibahendeme lomabu delolene mana mbiraore ogonidagua talialu bialu haabo halimu, lalu Anduane Homogohanda lene.✧

<sup>17</sup> Anduane Homogohanda Mosese lamialu lalu, <sup>18</sup> Ina bi ogo Isaraele wali agalihondo lamibe. Dindi mbira ina tihondo ngule lalu lo wirugoria haru porogola bi ogo larodagua tí bibahendeme bialu holene nga. <sup>19</sup> Anigo tí dindi ogoriani pu howa tínaga maburuha tomo hangalu boga biragola bialu nalu holeberemi. Tígua tomo uruni nalu howa maru ininaga lomabu ngigi bilimu. <sup>20</sup> Tí mabuha widi pigane gandu laramigo dambuwa balawa ogoninaga mberedi pigane waberemigonaga mbira ininagaore lomabu ngilimu. Tígua widi dambiaga ngamigoha howa widi gahenge dambialu kamigo aria maru mo yalu ibuwa lomabu ngilimu. <sup>21</sup> Tíguabi tínaga waneigini aguanene mani hama polobadarubi mana ogoni wiaai helo widi pigane gandu lenegonaga balawame mberedi pigane wabini ngamigo inihondo lomabu ngilimu.

<sup>22-23</sup> Tígua mana Mosesehanda langiyagola hale harimigoni mani tínaga aguanene hama polobadaru tiguabi bulene nga. Anigo marume mana ko berolo mitangi nabi howa mana pugualu holebira. <sup>24</sup> Isaraele wali agali bibahendeme mana ko berolo mitangi nabi howa mana langiyago puguarimiyagua nde tígua nogo bulumaga wangabe mbira irani dai helo loma bialu bo delolene nga. Ani bialu widibi waini ibabi nogo bulumaga biago heba lomabu delolene nga. Ani bialu ina ko domo waholiyanaga nogo meme wangabe mbira loma bialu bo delolene nga. Ani deledagola ina loma ogoninaga nga birago hondowa turu holebero. <sup>25</sup> Ani bialu loma binigo mo ngiaga kagome wali agali bibahendenaga ko ina domo waholiyanaga loma ogoni bu delolebira. Ani bu delaragola Anduane Homogo ina tinaga ko wiyadago domo waholebero. Ani buleberogo irane tigua mana ko berolo mitangi nabi howa inaga mana puguaya. Ani biyadagonaga ko birimada lalu ina tinaga ko domo waholiyanaga ihondo lomabu yalu ibiyagoni. <sup>26</sup> Ina Isaraele wali agali bibahendenaga ko ngago domo wahalu wali agali dindi tarali tí heba íbu hene karu tigua nde inaga mana pugua dege biyagobi bibahende domo wahai holebero.

<sup>27</sup> Wali agali mbiralime mana ko berolo mitangi nabi howa biyagua nde ibugua meme angibuni mali mbira hangu hene kago ina ko domo waholiyanaga loma bialu bo delolene nga.✧ <sup>28</sup> Anduane Homogo ininaga deni loma binigo mo ngiaga kago ibugua agali biagonaga ko domo waholiya lomabu delolebira. Loma binigo mo ngiaga kago ibugua anidagua biragola agali ogoni ibu inaga deni dodo nahe holebira. Ani biragola ibunaga ko ngago inimeore domo waholebero. <sup>29</sup> Tígua mana ko berolo mitangi nabi howa birimiyagua nde mana ogoni dege talialu tını Isaraele wali agaliyaguabi wali agali dindi tarali tí baba mandagi heneyaguabi bibahende mana mbiraore ogoni dege taluwa bilimu.

<sup>30</sup> Anigo wali agalime ihondo mine halu mana ko bialu hayagua ogonidagua biragome Anduane Homogo ini yo handarogoni. Anidagua bialu kago ibu Isaraele wali agaliyaguabi dindi tara wali agaliyaguabi ta nabi homelo bo wahalimu. <sup>31</sup> Ani bilimu larogoni irane wali agalime mana puguarago ibuni ihondo mine halu hame ledadagua bialu inaga bi mana puguaro lalu puguarogoni. Ani biragome ibuni homelo bo waholene nga, lalu Anduane Homogohanda lene.

*Agali mbirame Sabada horongi mana puguinigo ogo*

<sup>32</sup> Isaraele wali agali ti dindi ko iba dalu naibaga wiagoha howa Sabada horongi agali mbirame ira bo yu hearia hendene. <sup>33</sup> Ani handa walia howa tigua agali ogoni Mosese Aronolabi Isaraele wali agali bibahende hearu hearia haru pene. <sup>34</sup> Ani biyagola tigua ibuhondo ogoale buleda lo manda nabi howa ibu garabaya helo helene. <sup>35</sup> Ani heleagola Anduane Homogohanda Mosesehondo lamialu lalu, Agali ogoni homelo bo wahalimu. Ibu balai anda bu karu tagirahayagi haru puwa wali agali bibahendeme ege tole dugualu bai halu bo homelalimu, lene. <sup>36</sup> Ani layagola wali agali bibahendeme Anduane Homogohanda bilimu lalu lamiyadagua agali biago balai anda bu hearu tagirahayagi haru puwa ege toleme balu homelene.

### *Agani pu pongobia halimu lenego ogo*

<sup>37</sup> Anduane Homogohanda Mosese lamialu lalu, Isaraele wali agali bu karuhondo ogodagua lamibe. <sup>38</sup> Tigua pu tubagi emene emeneme kabu bigi buwa tininaga aga bu kamigonaga nguni mariani pongobia haga bilimu. Kabuni mbira mbiranaga pu mindibi hari mindini handalehe ngagome pongo bigi bilimu. Tinimebi tinaga waneigini aguanene mani holobadarumebi anidagua biaabo holene nga. <sup>39</sup> Ani pongo bia howa horo bibahendengi tigua mbirale ogoni handalu inaga bi mana lowinigo bibahendeore manda bilimu. Ani bialu mana ogonidagua bialu halimu. Anidagua birimiyagua nde tigua ogoni de handalu i yu wahalu puwa mana ko tini hameledemidagua bialu naholeberemi. <sup>40</sup> Pu ogonime inaga bi mana lowini ngago mo mitangi biaabo haragola tigua inaga mana ogoni taluwa bialu haabo howa ti ininaga wali agali heneneore hene holeberemi. <sup>41</sup> Ini Anduane Homogoore howa tinaga Ngode Datagaliwabe kogoni. Ina ti iyibi dindiha howa haru tagira ibirugo ini tinaga Ngode Datagaliwabeore holenaga ani birugoni. Ai iore Anduane Homogo kogoni, lalu Mosesehondo lamini.

## 16

### *Kora Dadana Abirama imaru tigua Mosesehondo mine henego ogo*

<sup>1-2</sup> Libai hameigini Kohada aria mbira Isara igini Kora ibugua mine halu Mosesehanda ti haru kagonaga manga ho hene. Ani ho hearia Lubene hameigini aria agali tebirali tiguabi Kora heba hogimbu bu hene. Agali tebirali uruni ti Eliaba igini mini Dadanabi Abiramabi Pelede igini Onobi ti Kora heba mini mbiraore ho hene. Ani howa agali mariali uruni tigua Isaraele agali haru bamba haga heneru handari kirani pira duria (250) haru halu pu tara howa ti haru mandagi mine hamaga hene. Isaraele wali agali tinime agali uruni tinaga haru haga helo dabaluhelaga buwa ti agali mini lene ka lene hene. <sup>3</sup> Ani howa tigua Mosese Aronola heagoria ibu ngoaiho howa ogolabohondo lamialu lalu, Ai hale hadaba. Ina bibahende Anduane Homogonaga wali agali dege bu kamagoni. Libu hangu ndo kabi. Anduane Homogo ibu ina bibahende ha hai ka. Ani kamagodago ai irane agome libugua libuninaga mini mo yaraga halu ina handame ho howa haru kabibe. Mana libugua bialu kabiruni bayale ndo bialu kabigoni, lene.

<sup>4</sup> Tigua bi urunibi layago hale howa Mosese ibugua dindini palia pehalu Anduane Homogohondo bi lene. <sup>5</sup> Ani lowa mani heyalu ibugua Kora halu ibu aria hearuhondo lamialu lalu, Ti hale hadaba. Yawi egerebagiore Anduane Homogo ibunime ogo ibunaga heneore lalu ai walia harabe handamiya. Agali ibunagaore helo dabenege ibu hangu ibuninaga lomabu delaga dabu kagoria kaware polebira. <sup>6</sup> Ai Kora i halu agali i aria bu harimidarunibi tigua ogodagua bilimu. Yawi egerebagiore tigua ira hagua ngabilo delaga beledi be mo yalu <sup>7</sup> ira hagua ngabilo delolene inisenesibi maru mo ya ira pungane hoaille beledi be ogoriani hedo ya bialu ibalimu. Yalu ibuwa Anduane Homogonaga loma bu delaga dabu kagoria Anduane Homogonaga deni pu halimu. Ani

pu kamigola Anduane Homogoibunimeibunaga biabe bilo dabene agali ogo ibu ka lalu waliala holebira. Libai hameigini kamiru tigua dege mana lehe bialu kami, lene.

<sup>8</sup> Ani lowa Mosese ibugua Korahondo laabo halu lalu, Libai aria kamiru tigua bi ogo hale halimu. <sup>9</sup> Isaraele wali agalinaga Ngode Datagaliwabe ibugua ina Isaraele hameigini maru hemaru helowa tí hangumeibunaga biabe bialu halimulo daba bagiho helaya. Tí hangume Anduane Homogonaga Balai Anda kagoha puwa biabe bialu howa wali agali bu karunaga deni heyu howa ti biamogo bialu halimulonaga dabo helayagoni ogoni galoneore ndobe. <sup>10</sup> Ai ínabi Libai aria maru kamirumebi biabe ogoni tigua bialu halimulo Ngode Datagaliwabeibunime dabo helaya. Tí biabe ogoni biaga mini leneore mbira hene kami. Ani hene kamigodago ai agua biya. Tigua manda bu handalu hemiria biabe ogoni nagaloneyabe. Anidago tibi nde loma binigo mo miagabi hoa kamibe. <sup>11</sup> Ai Arono ibu agali abidane tigua ibuhondo keba ho kamibe. Ibu nde agali damene bu kamiruni ale dege kagoni ndobe. Ani kago ai ínabi agali í aria bu kamirumebi tigua keba ho kamiruni Aronohondo ndo Anduane Homogoibunihondo keba ho kami, lene.

<sup>12</sup> Ani lalu Mosese ibugua Dadana Abiramala libu ibilo agali mbirahondo, Damu pu, lene. Ani layagola libugua bi lawia halu lalu, Iya naibuleberaba. <sup>13</sup> Ína ina dindi bayale Iyibini hemaria haru tagira ibalu dindi ko iba dalu naibaga ogoha ina homolomaya bo wahole haru ibirida. Ani birigo ínime manda bu handalu keria ogoni bamedalo manda bidebe. Ani manda bialu áyubi nde ina ina handape howa haru hoa ho kebe. <sup>14</sup> Ina dindi bayale mbiraha inane mabu wigiwigi bialu pu mbira mini gerebi mabu wigiwigi bulumaya haru pu nabi dege kegoni ndobe. Ína manda bu handalu keria ina mini nawi luludaria mo hondo hole manda bidebe. Ína inahondo anidagua bibe naheore ndobe. Anigo áyu iya naibuleberaba, lene.

<sup>15</sup> Bi uruni layago hale howa Mosesehanda keba timbuni halu Anduane Homogohondo bi ogodagua lamialu, Agali uruni tigua íhondo mbirale lomabu yalu ibuwa ngirago nayamibe. Tigua ina ti bayuwa haru nahaga layagoni. Ani layago ai ina tinaga nogo dongibi marualebi mbira mo page nabioire henego ko, lene.

<sup>16</sup> Ani lowa Mosese ibugua Korahondo lamialu lalu, Yawi ínibi ínaga agali í aria handari kirani pira duria (250) biarubi tí bibahende Anduane Homogonaga Balai Anda kagoria íbu ngoai halimu. Arono ibubi nde íbu holebira. <sup>17</sup> Tí bibahendeme ira hagua ngabilo inisenesi delaga beledi be biago yagayaga bialu ira pungane hoalebi hedo yalu Anduane Homogonaga deni howa lomabu delole ibalimu, lene. <sup>18</sup> Ani layago hale halu egerebagi agali biaru tigua inisenesi ira hagua ngabilo delole beledi beni ira pungane hoale hedo yagayaga bialu íbu ngoai hene. Ani ngoai howa tigua beledi beni ira yayago inisenesi delolenaga ibira halu abale delo manda manda bini. Ani bialu Mosese Aronobi ti haru mandagi Anduane Homogonaga Balai Anda biago haneni pu hene.

<sup>19</sup> Ani pu hearia Kora ibugua wali agali bibahende mo mogo bialu Balai Anda biago haneni pu howa Mosese Aronolanaga deni handayaho hene. Ani heagola Anduane Homogohandaibunaga wá hongohe taraore helayagola Isaraele wali agali bibahendeme de handai hene. <sup>20</sup> Ani handai heagola Anduane Homogohanda Mosese Aronolahondo lamialu lalu, <sup>21</sup> Libu habagi halu pudaba. Wali agali o karuni áyu bo wahai holeberogo ti ani helo wahalu libu pudaba, lene.

<sup>22</sup> Ani layago lelowa Mosese Aronolame dindini bulu palialu palia pehowa Anduane Homogohondo lamialu lalu, Ngode Datagaliwabe-o wali agali ínioireme wabiriruni o bu karuni. Ai agali mbira hangume mana ko biyagua ina ti maru karu bibahendehondo keba hai holeberebe, lene.

<sup>23</sup> Ani layagola Anduane Homogohanda Mosesehondo lamialu lalu, <sup>24</sup> Wali agali bibahendeore bu karuhondo lamialu, Kora Dadana Abirama imaru tinaga balai anda kagoria kaware nahe wahalu kaundiani pu halimu labe, lene.

<sup>25</sup> Ani laya handala Mosese halu Isaraeleali agali haguane biaru ti Dadana Abiramala hearia pene. <sup>26</sup> Puwa Mosesehanda wali agali bibahende lamialu lalu, Agali mana ko biaga o karunaga anda kagoria tí hapara nahe kaundiaha haga haga bilimu. Tinaga mana ko ngagome tíbi heba yamaga haragola homoligo tinaga mbirale ngarubi heba ela nahe pilimu, lene. <sup>27</sup> Ani layagola hale halu wali agali ti agali tebira Kora Dadana Abirama imarunaga balai anda heagoria kaware nahe kaundiani pu hene.

Ani biyagola Dadana Abiramala libu one waneiginibi ti haru mandagi libuninaga balai anda haneni tagira pu hene. <sup>28</sup> Ani heagola Mosese ibugua wali agali bu hearuhondo lalu, Áyu mbirale mbira bulebirago tígua de hondoleberami. Hondowa tígua Anduane Homogo ibunime i dabalu ibunaga biabe bialu howa ina tí handayaho holiya dabo helene kogoni manda buleberemi. Ininaga hameme ndo bialu harudane tígua hondoleberami. <sup>29</sup> Ai agali uru ti áyu homai holebira. Ngode Datagaliwabehanda agali uruni pani mialu ndo bame homayagua nde Anduane Homogohanda ina biabe ogoni buliya dabene ndo i ininaga hameme biabe uruni bialu henedalo henene manda buleberami. <sup>30</sup> Anigo Anduane Homogohanda nahendene ale mbira bialu dindi mo gai buki halu ha edene bilowa gundu uli timbuni ngagoha agali uruni tinibi tinaga mbirale ngarubi bibahende uli ogoniha haealape halu tini homa nabi dére kaore homenerunaga dindiha pu helayagua nde agali uruni tigua Anduane Homogo erembira mialu hayadalo manda buleberami, lene.

<sup>31</sup> Mosesehanda bi ogoni lalu heaore dege aube tobane buwa Dadana Abiramala heagoria dindi mo gai buki hayagola gundu uli timbuni mbira o biagoria wini. <sup>32</sup> Ani wiagola Dadanabi Abiramabi libu one waneiginirubi Koranaga aria hearubi tinaga dabudabu wiarubi bibahende gundu uli o biagoha haealape hai hene. Haealape hai heagola dindi biago ibuni aube tobane buwa wiyadagua wu karulo dai bini. <sup>33</sup> Anidagua bialu ti bibahende homa nabi dére heaore tinaga mbirale wiaru heba homene dindiha piai hene. Peagola dindi ala wiyadagua lone wia karulalu wali agali biarunibi mogobu dambi hai hene. Anidagua biyagola wali agali maru hearume tinaga dengui lone nahondoleore wahene. <sup>34</sup> Wali agali uruni uli biagoha haealape hayagola ga timbuni lama yupe hayagola Isaraele wali agali kaware bu hearu tigua lalu, Inabi nde anidagua dege buligo abale ibida ma nalarami, lene. Ani lalu ti abaleore ibida piai hene.

<sup>35</sup> Ani biyagola agali handari kirani pira duria (250) biarume ira hagua ngabilonaga inisenesi lomabu delaga dabuni delaga biarubi nde Anduane Homogohanda ira hedo bape halu bo heda hai hene.

*Lomabu delaga dabu biago boronosime para hodambi henego ogo*

<sup>36</sup> Mani Anduane Homogohanda Mosesehondo lamialu lalu, <sup>37</sup> Loma binigo mo ngiaga Arono ibu igini Eleasahondo agali irame dai hayarunaga beledi be boronosime wabini biaru í keria mo yalu ibule pu labe. Mo yalu ibiragola kaundiani yu pubagi howa be abalu beledini para karu taulo wahabe. Ani larogoni irane beledi uruni ininaga wiabagi hene ilili biagaore ngelonaga laro. <sup>38</sup> Beledi uruni agali homayaru tigua inisenesiru Anduane Homogo ininaga lomabu delaga dabu heagoria lomabu delole mo yalu ibiyangi inagaore wiabagi hene wini. Ani winigo ai agali tinime mana ko bialu homayarunaga beledi uruni mo yalu ibuwa uruni bo tiga bigi bialu mo mbalape lowa gaba ale helalu ogonime lomabu delaga dabu ngago para hadambi hadaba labe. Ani para hadambi kagola Isaraele wali agali tigua de handalu agali o biarume mana ko biyadagua nabule lelo ani bilimu, lene. <sup>39</sup> Ani layagola Mosese ibugua loma binigo mo miaga Eleasahondo beledi uruni mo yalu ibabe lalu lamiyagola Eleasa ibugua mo yalu ibini. Mo yalu ibiyagola agali marume beledi uruni bo tiga bigi buwa mbalape gaba podene ale heagola ogonime lomabu delaga dabu biago para hadambi helene. <sup>40</sup> Ani para hadambi henedagoni Isaraele wali agali tigua tinaga miniha mitangi biaabo helonaga ani bini. Arononaga aguanene holebiraru ti hangume lomabu delaga dabu



ngagoria Anduane Homogonaga inisenesi lomabu delolene ngago manda bu haabo helonaga ani bini. Anigo mbiralime lomabu delaga dabu ngagoria puwa Anduane Homogohondo ira hagua ngabiaga ale inisenesi lomabu delayagua ogoni ibu Anduane Homogohanda Kora halu ibu dameneru pani mialu bo delayadagua dege bo delolebira. O biyaruni Anduane Homogohanda Moseseha howa, Eleasa ina anidagua bibe, lalu lamiyadagua biai hene.

### *Aronohanda wali agali biamogo binigo ogo*

<sup>41</sup> Horo mendengi wali agali bu hearume Mosese Aronolahondo keba howa lai lowa lalu, Libugua Anduane Homogonaga wali agali maru bo homelai haribigoni, lene. <sup>42</sup> Ti bibahendeme Mosese Aronolahondo lai lole ibu ngoai halu Anduane Homogonaga Balai Anda biagoha handa amu ho hene. Ani handalu hemiria Balai Anda biago heagoria hari beralibame ibu dambi halu Anduane Homogonaga wa hongoheore hapani hayaria hendene. <sup>43</sup> Ani biyagola Mosese Aronola libu Anduane Homogonaga Balai Anda haneni pu hene. <sup>44</sup> Ani pu hebigola Anduane Homogohanda Mosesehondo lamialu lalu, <sup>45</sup> Ina wali agali o karuni bo wahai holeberogo libu ti kagoria nahe habagi halu kaundiani hole pudaba, lene.

Ani layago hale howa libu dindini bulupalu ibira hene. <sup>46</sup> Ani buwa Mosesehanda Arono lamialu lalu, Inaga beledi be ira hagua ngabilo inisenesi lomabu delaga biago mo yalu puwa ira punga hoale lomabu delaga dabuni deda aria mbira hedowa beledini tabo ngelabe. Ani bialu hagua ngabilo delaga inisenesi ogoriani haealape howa delabe. Ani mo yalu puwa wali agalirume mana ko bialu hayadago domo wahelo Ngode Datagaliwabhondo loma bialu delabe. Tigua Anduane Homogonaga deni howa mana ko biyagome ibu mo keba timbuni hayagonaga warago timbuni mbira ibilayago ai ogoninaga abale lomabu delabe, lene. <sup>47</sup> Ani laya handala Arono ibugua Mosesehanda bia lalu lamiyadagua bini. Ani bialu ibugua lomabu delolene inisenesibi beledibi mo yalu wali agali mo ngoaiho heagoha abale pene. Puwa wali agali dewaore warago koore balu heane hendene. Ani hondowa ibugua inisenesi beledini haealape halu lomabu delene. <sup>48</sup> Ani bu delayagola warago koore timbuni bayago ba nabi ereba hai hene. Ani biyagola Arono ibugua wali agali homo tongolo mini wiarubi dere hene hearubi dombeni hengene wiagoria howa inisenesi lomabu delene. <sup>49</sup> Wali agali daosini deriani handari karia (14,700) warago ko ogonime bo homai helene. Agali maru Kora aria homayaru heba daga lamaga nahe warago ko balu homayaru hangu dagalene ogoni. <sup>50</sup> Warago timbuni bayago ereba hai haya handala Arono ibu Mosese hearia dai bialu Anduane Homogonaga Balai Anda haneni pu hene.

## 17

### *Anduane Homogo ibunime Arono dabo heledo lalu mo walia henego ogo*

<sup>1</sup> Anduane Homogohanda Mosese lamialu lalu, <sup>2</sup> Isaraeleali karuhondo halimbu homberia (12) ngidaba lalu lamibe. Halimbu uruni hameigini homberiarunaga agali haru haga mbira mbira headagua yalu ibiragola tinaga mini hangu hangu halimbu ogoriani gili bibe. <sup>3</sup> Libai hameigini karu tinaga halimbu ngagoria Arononaga mini gili bibe. <sup>4</sup> Ani bialu mani halimbu biaruni bibahende inaga Balai Anda tamuha Hobane Loma Bia Heneore kago inaga Habo Nalolene Bi lo winigonaga Mbogoyi ngagoria ini ti baba bi laga kogoria kawareni mo ngelabe. <sup>5</sup> Ani mo ngeledegola mbira inime dabarudago ibunaga halimbu ngagoria yuni doai lalu gahenge anda holebira. Ani andaho ngagola ti bibahendeme manda bialu agali halimbu ogoni anduane kago ibu inaga loma binigo mo ngiaga agali helo dabarudane hondolebira. Anidagua biragola Isaraeleali tigua ihondo keba howa lai lalu karuni nale waholebira, lalu Mosese lamini.



<sup>6</sup> Anduane Homogohanda ogonidagua lamiyagola Mosesehanda Isaraele hameigini hearunaga agali haru haga mbira mbira headagua tinaga halimbu homberia (12) yalu ibidaba layagola yalu ibai howa Mosesehondo mo mini. Ani yu íbu wiagoha Arononaga mini gilibuwi halimbu wiagobi heba mandagi mo ngelene. <sup>7</sup> Ani wiagola Mosesehanda halimbu uruni mo yalu puwa Anduane Homogonaga Balai Anda tamuha Habo Nalolene Bi lo winigonaga Mbogoyi wiago kawareni mo ngelene. <sup>8</sup> Ani ngelowa ai horo mendengi Mosese ibugua Anduane Homogonaga Balai Anda biagoha anda pene. Anda puwa handalu hearia Arononaga mini gilibuwi halimbu wiago handalu hearia ogoriani yuni doai lalu anda howa lini dalu ira amono lini bogabi ogoriani dearia hendene. Halimbu ogoni Libai hameigininaga winigo ani biaria hendene.✧ <sup>9</sup> Ani biago hondowa Mosesehanda halimbu biaru bibahende yalu tagira puwa Isaraeleali bu hearu mo walia hene. Ogonidagua biago hondowa Isaraele wali agalinaga haru haga biaru tininaga halimbu mo yu dai bigi bini. <sup>10</sup> Ani biyagola Anduane Homogohanda Mosesehondo lamialu lalu, Halimbu Arononaga mini gilibuwi biago mo yu dai buwa Habo Nalolene Bi lo winigonaga Mbogoyi ngatoria kawareni wiapara ho ngelabe. Mana ogonidagua beregome agali mine haga karu ti mini dewa wialubi keba halu lai nalelobi ne hariga ndibu helarogola tigua íhondo lone keba naholebira. Ani beregola ína ti homelo bo waholene henge nawulebira, lene. <sup>11</sup> Anduane Homogohanda anidagua layagola Mosesehondo ogoale bibe lalu lamiyadagua Mosese ibugua biai hene.

<sup>12</sup> Mosese ibugua mbirale uruni biai heagola Isaraele wali agali tigua ibuhondo lamialu lalu, Agaliore-o áyu ína mo ko holene wiaruago homai holeberamadago agua buleda. <sup>13</sup> Ina mbirali Anduane Homogonaga Balai Anda katoria kaware poragola ibu bo waholobada. Ani bialu ína bibahende homai holeberemada, lene.

## 18

*Libai hameigini maru ti loma binigo mo miaga biabe bilobi maru ti biamogo bilobi dabo helenego ogo*

<sup>1</sup> Anduane Homogohanda Aronohondo lamialu lalu, Ínibi í igini bu karubi í aria Libaiali bu karubi tigua ínaga Balai Anda kagoha biabe tiga tiga bulene ngadagua ndo kagua bialu harimiyagua nde mo ko holene tınıha anda ibiragola ko tını bibahendeme bimidagonaga genda yu holeberemi. Ai ínibi í igini bu karubi tigua loma binigo mo miaganaga biabe bialu haga ngagoha mo ko hene wiagua nde genda tını hangume yu holene wulebira. <sup>2</sup> Ínibi í igini bu karubi tigua ínaga biabe bialu kamigola ínaga mamali Libai aguane íni aria bu karu tigua í biamogo bialu Balai Andanaga biabe ngaru mandagi bialu halimu. <sup>3</sup> Tigua biabe ína mo meregobi bialu tininaga biabe Balai Anda kagoha bialu haga wiyarubi bialu holebira. Anigo uruni tigua biabe bialu howa mbirale tamu Hobane Loma Bia Hene kagoha ngarubi lomabu delaga dabu ngagobi mbirago ela holene nawi. Tigua uruni mbirago ela hayagua nde ínibi ti heba homolene wulebira. <sup>4</sup> Libai hameigini tí bibahendeme í baba biabe bialu howa Balai Andaha biabe bulene damene ngaru biai holebira. Anigo agali maru ína ti biabe ogoniha bialu habe naledogo ibu nabulebira. <sup>5</sup> Ínibi í igini karu tibi nde Balai Anda Hobane Loma Bia Hene biagohabi lomabu delaga dabu ngagorianibi tını hangume biabe bialu holene wulebira. Ani beremigola ína Isaraele wali agalihondo lone keba halu ti mo ko naholebero. <sup>6</sup> Haleha. Isaraele hameigini maru hearuni helowa ínimeore í aria Libaiali hearu dabarugo íbi í igini karubi tihondo mugube ngialu biabe duniniore ogoni bialu halimulo dabarugoni. Agali uruni ti íninagaore howa ínaga Balai Anda kagoha biabe bialu holebira. <sup>7</sup> Anigo ínibi í igini karubi tí hangume anda tamu Hobane Loma Bia Heneore kagohabi lomabu delaga dabu ngagoriabi biabe bulene ngaru bialu holeberemi. Tí loma binigo mo ngiaga agali howa biabe duniniore ogoni bialu halimulo ínimeore tınıhondo mo ngirugoni. Ani

✧ 17:8: Hi 9.4

birugo ainde agali mbira ina ibu biabe ogoni bilo dabo hela nabinigo ibuwa biabe bialu hayagua nde ibu homelo bo wahalimu, lalu Anduane Homogohanda Aronohondo lamini.

*Loma binigo mo miaga hearu tomo talebu mulene nga lenego ogo*

<sup>8</sup> Anduane Homogohanda Aronohondo lone lamialu lalu, Hale ha. Wali agali tigua nogo irani dai helo delararu aria ndo loma maru bo ngirarunaga mbirini ngaru tí nalu holene wulebira. <sup>9</sup> Ibi inaga waneigini aguanene mani hama polobadarubi tí nalu holene wiaabo holebira. <sup>9</sup> Ininagaore loma biaho wiabagi hene lomabu delaga dabu ngatoria lomabu dai helonaga ndo ngaru damene tí mo yulene urubi. Loma bini tí mo yuleberamidago widi loma bini ngagobi ko domo wahelonaga lomabu yalu ibu ngiragobi mbirale mbira yolo biadai bialu ngiragobi bibahendeore wali agalime inaga lomabu yalu ibiraru damene tihondo mo ngiaore holebero. Inibi inaga igini aguanene mani holobadarubi tí nalimulo ngulebero. <sup>10</sup> Tigua nogo loma binirubi mbirale maru loma bini ngarubi uruni bibahende de hondowa ininagaore lomabu wiabagi heneore ngalo manda bulene nga. Anidagua bini ngago manda bialu agali igiribi tini hangume inaga Balai Anda tamuha howa tomo uruni nai holene nga.

<sup>11</sup> Ani bialu loma maru Isaraele wali agali bu karume lomabu yalu ibirarubi tigua yamialu loma binigo mo ngiaga karu tinaga gime yuwa yaraga halu ihondo wigiwaga lalu mo loma biaga ale yalu ibirarubi inaga waneigini maha holobadaruhondobi ngerogo tinagaore wiaai holebira. I damene inaga deni dodo nahe karu tigua tomo ogoni ta nabi nolene wulebira.

<sup>12</sup> Isaraele wali agali tigua ihondo lomabu ngule mbirale bayaleore pigane dararu olibe lininaga welibi waini iba ngarubi widi lini bayale ngarubi mali bibahendengi yalu ibiraru bibahende tihondo mo ngiaabo holebero. <sup>13</sup> Tomo bayale loma bini uruni tí one waneiginiru inaga deni dodo nahe karu tigua ta nabi nolene wulebira.

<sup>14</sup> Mbirale bibahende Isaraele wali agali tigua ihondo lomabu ngini ngaru tinime yolo biadai nabule larugo uruni bibahende tinaga dege wiai holebira.✧

<sup>15</sup> Isaraele wali agali tinaga igiri wahene taba hanaragobi nogo igini wangabe pigane hono wiragobi bibahende ininaga lalu lomabu yalu ibugu biraru bibahende tininaga ngelarogoni. Anigo mani Isaraele wali agali tinime tinaga waneiginibi nogo inaga deni dodohe kagobi yolo biadai bule layagua nde ani bilo hondo halimu. <sup>16</sup> Isaraele tinaga igiri gali ege mbira hangu penego muni kina pira duria (50) hangume yolo biadai bulene nga. <sup>17</sup> Anigo nogo bulumaga meme sibiru pigane wini karu ti yolo biadai bulene nawi. Ogoni loma bialu ininaga bo deloleneore nga. Tigua nogo uruni balu darama lomabu delaga dabu ngagoha odoba halu habane damene kago loma bialu dabu ngagoriani delalimu. Anidagua deledemigola nga baya tara birago ina nga halu turu holeberogo ani bilimu. <sup>18</sup> Ani bialu loma urunibi tinaga dege nogo bo delaragonaga galukunibi ge tigahayaginaga burulene ngarubi tigua gime yaraga howa inihondo wigiwaga lalu ngiaga biagobi tí mo nolene nga.

<sup>19</sup> Ina Isaraele wali agalirume inihondo mbirale lomabu ngiraru bibahende tihondobi mo ngialu tinaga waneigini aguanene mani holobadaruhondobi miaabo holebero. Anidagua larogoni habo nalolene bi tí bababi tinaga waneigini aguanene mani holobadaru bababi wiaabo helonaga lo wero, lene.

<sup>20</sup> Anduane Homogohanda Aronohondo laabo halu lalu, Tigua Isaraele wali agalinaga dindi ngaru aria mbirago mani tí waneigini bu holebiraru tinaga mo wia holonaga na mo wilimu. Tí mbirale burupale kamiru tinaga Anduane Homogo ini kogome karulape ngialu haabo holebero, lene.

*Anduane Homogohanda Libai hameiginiru mbirale migi binigo ogo*

✧ 18:14: LBM 27.28

<sup>21</sup> Anduane Homogohanda laabo halu lalu, Isaraele wali agali tigua tinaga tomo bibahende tale buwa pini damenego ihondo yu ibalu ngiragola ina tomo ihondo ngirago Libaiali karu hangu mo mulebero. Tomo mbirale o ngulubadaruni tigua inaga Balai Anda kago ha biabe bialu handayaho kagonaga yolo ogoni holebira. <sup>22</sup> Maniore howa horo bibahendengi Isaraele wali agali bu karu aria mbira inaga Balai Anda kago kaware polene nawiorego napolebira. Mbirali ibu dogu halu Balai Anda kago kawareni piyagua nde tiha pani nolene wulebirago ina ogoni ibu homelo bo waholebero. <sup>23</sup> Ayu ogoni howa Libai hameigini karu ti hangume inaga Balai Anda handayaho howa biabe bialu holebira. Tigua biabe ogoni baya hangu bulene ngago nabi hayagua nde tinime bia ko hayadagonaga pani nolene wulebira. Mana ogoni wiaai halu tinaga waneigini aguanene mani holobadarume yu haabo holebira. Libai aria karu tinaga dindi lenego mbira Isaraeleali maru ti ngadagua nawi kagoni <sup>24</sup> irane wali agalime tinaga tomo mbirale ngaru pinigo inaga lomabu yalu ibirago ogoni Libaiali tininaga mo miruli. Anidagua bulenaga ai ti Isaraele dindiha Libai hameigini karu ti dindi tu wa mia nabilimu laru, lalu Anduane Homogohanda lene.

*Libai aria tigua wali agalime pini pini yalu ibiyago mo wigi binigo ogo*

<sup>25</sup> Anduane Homogohanda Mosese lamialu, <sup>26</sup> Libai hameigini karuhondo bi ogodagua labe. Isaraele wali agali maru karu tigua tinaga pini pini Anduane Homogo mule yalu ibiraru ibugua Libai hameigini ti mo ngulebira. Ani biragola tigua nde mbirale uruninaga pini pini damenego Anduane Homogo ibunihondo lomabu milimu. <sup>27</sup> Ani beramigola loma uruni widi bayale gahenge lomabu miagago alebi waini iba bayale gahenge lomabu miagago alebi tigua lomabu meramigo Anduane Homogo ibuni hondolebira. <sup>28</sup> Isaraele wali agali tigua tinaga pini pini lomabu minigo aria ngiraru yu howa nde ogoninaga pini pinigo tale bialu Anduane Homogohondo mulene wini ngago manda bialu loma binigo mo miaga Aronohondo milimu. <sup>29</sup> Tigua tomoru baya hangu tale bigi bialu bayaleorego Anduane Homogonaga mo bagiho ngelowa ibuni mo milimu. <sup>30</sup> Ani bialu tigua tomo bayale uruni Anduane Homogohondo mo miai howa ibira harago Libai aria kamiru ti mo yalimu. Tomo hangaga agali kagome ibunaga tomo pini pini lomabu mialu ibira harago mo yagadagua ani mo yulene nga. <sup>31</sup> Tomo uruni Anduane Homogonaga Balai Anda kago ha biabe bialu kamigonaga yolo ogonigo ti one waneigini baba ibira hene ngago ti nolene nga. <sup>32</sup> Tigua tomo bayale damenego lomabu mialu ibira hene ngago tini narimiyagua nde tiha mo ko hene mbira nawulebira. Anigo Isaraele wali agalinaga lomabu yalu ibiyaruni lomabu mia nabi tini ala nalu harimiyagua nde tigua mo ko hai haramigome ai tiha mo ko hene wialu pani nolene wulebira. Ani ngagola Anduane Homogohanda ti balu homelolebira, lalu Mosesehanda lene.

## 19

*Bulumaga angibuni honenaga mana winigo ogo*

<sup>1</sup> Anduane Homogohanda Mosese Aronolahondo lamialu lalu, <sup>2</sup> Isaraele wali agali-hondo bi ogodagua lamilibu. Isaraele wali agali tigua bulumaga angibuni honenaga tingini dere durubi mbira nabi kagobi agalime biabe bilo mo bia nahene kagobi libu kabiria haru halu ibalimu lalibu. <sup>3</sup> Ani haru ibiragola bulumaga ogoni loma binigo mo miaga Eleasa mo milibu. Ani merebigola agali marume nogo ogoni balai anda bu karu yu wahalu haru tagira puwa Eleasahanda ti handaya haragola nogo bulumaga ogoni bolene nga. <sup>4</sup> Ani baragola Eleasa ibugua nogo darama biago maru hambu yalu puwa gi hondone mbira hangume darama biagoha wai howa inaga Balai Anda kago ha kahalulandala bahaga bulebira. <sup>5</sup> Ani bialu loma binigo mo miaga kago ibu de

☆ 18:21: LBM 27.30-33, Man 14.22-29

hendedaore nogo ogoni irani bo delolebira. Tigua nogo ogoninaga dongonebi mbirinibi daramabi nuni tini ayuni luhabane damene bibahende irani dai helo delolebira. <sup>6</sup> Ani deledagola loma binigo mo miaga kagome ira tamianaga gabini marubi ira mini hisobonaga magane emene mbirabi pu payini daramabi dege dene mbirabi uruni bibahende nogo biago dedagoha bape halu delolebira. <sup>7</sup> Ani bialu loma binigo mo miaga kago ibugua ibunaga aga bu hayago wayawaya bialu ibuni tinginibi iba odo bahalu bulebira. Loma binigo mo miaga kago ibugua ogoni biai halu balai anda bu karuha anda polebira. Anigo ibu horo ogoningi Anduane Homogonaga deni dodohe kane dege halu alendo holebira. <sup>8</sup> Ani bialu agali nogo bo delalu hayago ibunaga aga bu hayago wayawaya bialu ibuni tinginibi iba odo bahalu bulebira. Ani bialu ibunibi Anduane Homogonaga deni dodohe kane dege halu alendo holebira. <sup>9</sup> Anidagua bidagola agali mbira ibu Anduane Homogonaga deni dodo nahe kagome ira punga nogo biago lomabu bo delayagoria ngago hilo yalu puwa balai anda bu karu tagirani dindi henge mbira Anduane Homogonaga deni dodo nahe ngagoria ngelolebira. Ani ngelowa Isaraele wali agali tinaga tingini wayawaya bulene iba bedagoha maru mo pehalu mbirale Anduane Homogonaga deni dodohe ngarubi ogonime wayawaya bulene wulebira. Tininaga ko ngago domo wahelonaga wayawayabi iba ogonime dege bolene nga. <sup>10</sup> Ani buwa agali ira punga hilo yalu tagira piyago ibunaga aga wayawaya bulene nga. Anigo horo ogoningi ibuni dodohe kane halu alendo holebira. Mana ogoni maniorebi wiaho wiaabo holebira. Ani wiaabo ho ngagola Isaraele wali agali tinibi wali agali dindi taraha howa tí baba íbu hene karubi bibahendeme mana ogoni talialu bialu haabo holeberemi labe, lalu Anduane Homogohanda lene.

*Wali agali Anduane Homogonaga deni dodo nahelonaga mana bulene winigo ogo*

<sup>11</sup> Anduane Homogohanda laabo halu ogodagua lamibe lalu, Mbiralime homenenaga tingini ngago ela hayagua nde ibu horo karu Anduane Homogonaga deni dodohe holebira. <sup>12</sup> Ani howa horo tebonengibi horo kanengibi ibugua dodo nahe bayale holebira. Anigo horo tebonengibi horo kanengibi ibugua anidagua nabi heneyagua nde ibu bayale ndo dodohe haabo holebira. <sup>13</sup> Mbiralime homene tingini ngago ela hayagua ibugua Anduane Homogonaga deni dodo nahe holenaga iba biagome doma nabi kayagua nde ibu dodohe haabo holebira. Mana ogonidagua biragome Anduane Homogonaga Balai Anda kagobi ibunaga deni ko dodohe holebira. Anidagua bulebirago agali ogoni ibu Ngode Datagaliwabenaga wali agali tí kamigoha mandagi holene nawi.

<sup>14</sup> Balai anda kamigoha howa mbirali homayagua nde maru anda ogoniha mandagi bedarubi Anduane Homogonaga deni dodohe halu maru anda ogoniha anda poragobi dodohe dege holebira. Ani dodohe kane dege horo karu haabo holebira. <sup>15</sup> Ani bialu ndisi todobene be poya nabi anda ogoniha winidarubi dodohe dege wulebira. <sup>16</sup> Mbiralí ibu bolange dangi ngaruha ibaga bialu kariayaguabi irabu ngaruha pialu kariayaguabi wali agali bo wahene ngago ela hayagua bame homene ngago ela hayaguabi mbirali homene kuni ngago ela hayaguabi homali mbira kago handa nabi puwa hingedayaguabi urunidagua birago ibubi Anduane Homogonaga deni dodohe kane dege horo karu haabo holebira.

<sup>17</sup> Mbiraligo ibu homene tingini ngago ela howa dodohe hayagua bulene mana ngago ogo. Wali agalinaga ko domo wahelonaga bulumaga angibuní hone bo delene biagonaga ira punga wiyago maru muwa todobene be dindime wabini ngagoha ibira holene nga. Ani ibira halu iba bayale hambu yalu puwa todobene be ogoniha dege berelolene nga. <sup>18</sup> Ani buwa agali mbira Anduane Homogonaga deni dodo nahe kago ibugua ira mini hisobonaga magane emene yunihe mbira podo yuwa iba biagoha

✧ 19:9: Hi 9.13

ibira holebira. Ani ibira howa iba ogonime balai anda agali homene wiyagoha wali agali berene biaru tandala bahalu mbirale anda ogoniha ngarubi anda biagobi tandala bahaga bulebira. Ani buwa wali agali homene kunibi homene tinginibi homalibi uruni ela hayago agali mbira dodo nahe kago ibugua iba ogonime dege o biagoni tandala bahaga bulene nga. <sup>19</sup> Ani bialu horo tebonengibi kanengibi agali Anduane Homogonaga deni dodo nahe biago ibugua wali agali maru dodohe biaru iba ogonime dege lone tandala bahaga bulebira. Ani biai howa wali agali dodohe mo bayale hayaru tinaga aga wayawaya bialu tini tinginibi iba odo bahalu bulebira. Ani biai halu horo kanengi alendo ni paliragola wali agali uruni ti dodo nahe bayaleore holebira.

<sup>20</sup> Mbirali ibu Anduane Homogonaga deni dodohe howa ibugua dodo nahe holenaga mana biaga ngago nabi hado waho heagua nde ogoni ibu dodohe kagoni. Ani dodohe kago irane dodo domo wahelonaga mbiralime iba odo bahaga mana winigo odo ba nahe kagome ibu dodohe haabo ka. Ani biragome Anduane Homogonaga Balai Anda kago ibugua mo dodo harago ibu Ngode Datagaliwabenaga wali agali bu karu heba mandagi holene nawi. <sup>21</sup> Anigo Isaraele wali agali tigua mana ogoni talialu biaabo holene nga. Agali mbira kago ibugua mendeali kagonaga dodo domo wahalu bayale helonaga iba tandala bahayagua nde ibuninaga aga bu kago wayawaya bulene nga. Mbiralime wali agalinaga ko domaga iba ogoniha gi ibira hayagua nde ibubi Anduane Homogonaga deni dodohe kane dege alendo halu ni paluebira. <sup>22</sup> Mbirali ibu dodohe howa mbirale bayale ngaru mbirago ela hayagua mbirale ogonibi dodohe dege wulebira. Mbirale dodohe ogoni mbiralime ela hayagua nde ibubi Anduane Homogonaga deni dodohe kane dege alendo halu ni paluebira, lalu Mosese ibugua Anduane Homogohanda bi ogodagua labe layadagua lene.

## 20

### *Iba ege toleha howa dugutagi henego ogo*

<sup>1</sup> Ege mbira layagola Isaraele wali agali biaru bibahende dindi ko wali agali nahaga mini Sini wiagoria anda pene. Anda puwa tigua dindi emene mbira mini Kadese wiagoria pu howa ogoriani hemiria Mosese Aronolanaga mbalini Miriama homayagola hora hene.\*

<sup>2</sup> Ogoriani iba nabere henene wiago hondowa Isaraele wali agali biaru ti mo mbiraore halu Mosese Aronola keba howa gomogomo lalu hene. <sup>3</sup> Tigua ani bialu howa Mosese Aronolahondo lalu, Inaore ina hamene maru Anduane Homogonaga Balai Anda biago harabani homayadagua homai kamale galone kaleda. <sup>4</sup> Libugua ina dindi ko wali agali nahaga ogoha agibule haru ibiribibe. Inanaga nogobi inanebi heba dindi ko ogoria homolomaya haru ibiribida. <sup>5</sup> Ina Iyibi dindiha hemaria tingagali dindi mbirale henene anda naholene ogoha agibule haru halu ibiribibe. Widirubi pogerubi pu mbira mini gerebi linirubi ira lini mini pomegaranaderubi uruni bibahende nawida. Ai iba nolene henenebi nawio reda, lalu hongo howa lene. <sup>6</sup> Ani lalu hea handala Mosese Aronola libu Anduane Homogonaga Balai Anda biagoria puwa harabani hene. Ani pu hearia libugua libuninaga wanakui dindiha bulupalu wini. Ani wibigola Anduane Homogonaga wa holene hongohe biago libu bulupalu wibigoria ibu hene.

<sup>7</sup> Ani buwa Anduane Homogohanda Mosesehondo lalu, <sup>8</sup> Ina gewa halimbu Habo Nalolene Bi lo winigo Mbogoyi biago wanakuihayagi wiyago mo yabe. Mo yalu Arono libu harume wali agali bibahende biaru mo ngoai hadaba. Ani buwa bibahendeme handaya hai kagola ege tole nai kagohondo bi labe. Ani laregola iba ogoniha bedago pugulo tagitagi holebira. Ina ogonidagua bialu wali agalibi tinaga nogo bibahende karubi iba karulape nelo ege tole ogoniha howa tagira ibulebira, lene. <sup>9</sup> Ani layadagua Mosesehanda gewa halimbu Anduane Homogo heagoria wiago mo yini.

\* 20:1: Har 16.2-3, Dag 11.4-6, 14.1-3, 21.4-5



<sup>10</sup> Ani buwa Mosese Aronola libugua wali agali biaru bibahende ege tole biago heagoria hapara howa mo ngoai ho howa Mosesehanda tihondo lalu, Mana lo ngago baba wai biaga o kamiru hale hadaba. Iyame iba ti nalimulo ege tole ogoha howa pugulo tagi helolene wiaruabe, lene. <sup>11</sup> Ani lowa Mosesehanda halimbu yayagome tole biago halu ki bayagola iba timbuni pugulo tagi hene. Ani pugulo tagi hayagola wali agali biarubi tinaga nogo haru hayaru heba naiore hene.

<sup>12</sup> Ani biyagoniyu Anduane Homogohanda Mosese Aronolahondo lalu, Libugua Isaraele wali agalinaga deni howa inaga hongo holene tigabi walia naharibida. Anigo wali agali uruni dindi muleberogoria libugua ti haru anda napoleberebi, lene.

<sup>13</sup> O binidagoni Meriba dindini howa bini. Ogoriani Isaraele wali agalime Anduane Homogo baba keba halu gomogomo layagola ibugua ibu hongohe tigabiore kagoni walia hene.\*

*Idomoalinaga kini heagome ti dindini Isaraele wali agali pelo henge namule lenego ogo*

<sup>14</sup> Mosesehanda agali marume Kadese dindi howa Idomonaga kinihondo bi yalu pudaba lowa lalu, I aria inaga hamene Isaraelealime bi ogodagua laya. Inani gendabi timbuni ibiyagoni i manda bide. <sup>15</sup> Inanaga mamali Iyibi dindini puwa mali dewa ogoniha harimagoni. Iyibi dindini hemaria Iyibiali hearume inanaga mamalirubi inabi mo ko howa handayaho haya. <sup>16</sup> Ani biyagola iname Anduane Homogohondo dugu bialu biamogo bia larimagola ibugua hale howa dahuliyali mbira ibilayagome Iyibi dindi yu wahalu ina haru tagira ibiya. Ai ina ayu Kadese tano mbira i baba tubariha kama. <sup>17</sup> Inaga dindini ina polomaya henge ngibelo hame ledema. Inamebi inanaga nogo bulumagabi hariga pu ai nai nabuleberama. Tinaga mabuhabi pu lini daga gerebi mabu gama ngamiruha pu ai naibi iba uli ngamiruhabi no pu aibi heba naholeberema. Iname kininaga hariga tene haiweni hangu pialu pu tagi holene manda bidama.

<sup>18</sup> Ani layagola Idomoali tigua ladai bialu lalu, Ti inanaga dindini ogoha hariga pilimulo iname henge nanguleberema. Tigua harugo lowa pole manda bialu ibirimiyagua wai bule tagira ibuleberema, lene.

<sup>19</sup> Ani layagola Isaraele wali agali biarume lalu, Iname kininaga harigani polenaga hangu larama. Inanaga wali agalimebi nogo bulumaga haru kamarumebi tinaga iba uli ngamirubi nayagua iname yolo nguleberema. Hariga hangu polomaya henge ngidaba larama, lene.

<sup>20</sup> Idomoali biarume hongo howaore halu mende lalu, Ti pilimulo henge nanguleberema. Ani lowa tigua tinaga ami agali gibiore heneyarume Isaraele wali agali biaru bole tagira ibini. <sup>21</sup> Idomoali biarume tinaga dindini henge namule layagola Isaraele wali agali tigua hariga mendehayagi wandialu pene.

*Arono homenego ogo*

<sup>22</sup> Isaraele wali agali hearume Kadese yu wahalu puwa Hari Ho heagoria anda pu hene. <sup>23</sup> Idomoali baba tu Hari Ho heagoria anda pu hemiria Anduane Homogohanda Mosese Aronolahondo lamialu lalu, <sup>24</sup> Arono ibu dindi Isaraele wali agalihondo mulebero lo wirugoria anda napolebira. Libugua inaga bi larugo Meriba dindini howa mo waharibigonaga Arono ibu ogoria homolebira. <sup>25</sup> Ani bulebirago Aronobi ibu igini Eleasabi haru halu Hari Honi pobe. <sup>26</sup> Puwa Arononaga aga loma binigo mo miaganaga biabe biaga bidaru golowa Eleasani karula habe. Arono ibu mamali homayadagua ibu ogoriani homolebira, lalu lamini. <sup>27</sup> Mosese ibugua Anduane Homogohanda lamiyadagua bini. Isaraele wali agali bibahende handayaho hea handala ti Hari Ho pole irigi halu pene. <sup>28</sup> Puwa Mosese ibugua Arononaga aga loma binigo mo miagame biaga biago golo muwa Eleasani mo karula hene. Arono ibuni hari biago neneni homaya

\* 20:13: Meriba inanaga bi lalu, Gomogomo lene. ☆ 20:25: Har 29.29, Dag 33.38, Man 10.6

handala Mosese Eleasala libu dalialu dai bini. <sup>29</sup> Isaraele wali agali biarume Arono homayadalo manda bialu tigua horo pira tebiru (30) dugu bu hene.

## 21

### *Kenanaliru baba wai buwa Isaraelali ti wayali henego ogo*

<sup>1</sup> Arada tanonaga kini ibu Kenana aria unugohayagi heneyago ibugua hale halu hearia Isaraele wali agali biaru Adarimi harigani ibira layago hale howa ibugua Isaraele wali agali biaru baba wai bialu maru minu yalu pene.\* <sup>2</sup> Ani biyagola Isaraelali tigua Anduane Homogohondo ogo buleore lalu bi mbira hongoheore lowialu lalu, Anduane Homogo-o ina wali agali uruni inanaga giha ya hariyagua iname tibi tinaga tano timbuni ngarunibi bo gialo haealabagabu wahalu ihondo lomabu ngiai holeberama, lene. <sup>3</sup> Isaraele wali agalime bi ogoni layago Anduane Homogohanda hale howa Kenanali biaruni tinaga giha ya hene. Ani ya hayagola tigua tanobi wali agali hearubi bo gialo haealabagabu wahai hene. Ani bialu dindi ogoni mini Homa wini.\*

### *Nogombi ale mbira ege tole boronosime wabinigo ogo*

<sup>4</sup> Tigua Idomoalinaga dindi wandialu pole Hari Ho yu wahalu iba solowara Daramabi bereagoria pialu Agabahayagi pene. Ani pialu howa wali agali biarume hariga biago hondowa keba timbuni howa gomogomo lama pene.\* <sup>5</sup> Tigua Anduane Homogohondobi Mosesehondobi keba howa lalu, Ina Iyibi dindi ngelalu dindi ko wali agali nahe iba hinabi henene nawi ogoria homolomaya agibule haru ibiribibe. Tomo ko ngubi uru nabe manga kama, lene.\*

<sup>6</sup> Ani layagola Anduane Homogohanda nogombi mbira wali agali haniragola homagane ale ti heagoria dewa ibilene. Ani ibilayagola nogombi biarume wali agali dewaore haniyagola homene. <sup>7</sup> Wali agali hearume Mosese hearia ibuwa lalu, Iname Anduane Homogohondobi ihondobi keba halu bi larimago kagua larimayago ina Anduane Homogohondo nogombi uruni mo yu ereba ha lalu lamibe, lene. Ani layagola Mosesehanda wali agali biarunaga Anduane Homogohondo bi lahene.

<sup>8</sup> Ani layagola Anduane Homogohanda Mosesehondo lamialu, Nogombi mbira ege tole boronosime wabuwa ira mbira dibuwa howa nogombi ogoni ogoriani derela ho wibe. Ani bu ngegola nogombime haniyaru tigua nogombi boronosime wabini ogoni handaya haragola ti nahome dabi holebira, lene. <sup>9</sup> Ani layadagua Mosesehanda nogombi mbira boronosime wabuwa ira dibuwa howa ogoriani derela ho wini. Wali agali nogombime haniyiyagua ogoni ibu nogombi boronosime wabini irani derelaho wiyago handaya haragola dabi helo lowa ani bini.\*

### *Hari Honi howa Moabalinaga dindi ulini wiagoha penego ogo*

<sup>10</sup> Isaraele wali agali dindi dindi ogoria Obodi dindini anda puwa balai anda bu hene. <sup>11</sup> Ogoriani halu puwa wali agali nahe anda bambaore hene wiagoria Abarimini Moabaliru dindi ni ibiragohayagi handa amu halu puwa balai anda bu hene. <sup>12</sup> Ani bialu puwa Seredinaga dindi ulini wiagoha anda bu hene. <sup>13</sup> Ogoriani howa pialu iba Anono porago domalu puwa angeni anda bu hene. Dindi ogoni wali agali nahe hangu wima puabo halu Amoroali dindiha wima puabo ka. Amoroali Moabalilanaga dindi tu Iba Anono handa nga. <sup>14</sup> Irane Anduane Homogonaga Wai Biagane Bite Mbugani howa lo wialu lalu, Waheba tano Subahayagibi dindi ulini wiaruhabi iba Anonohabi <sup>15</sup> dindi ulini wiarunaga barebare wiaruniha howa pialu Ara tanoni pia ho wini. Ani pialu Moabali baba tuhayagi pene, lalu gilibu wini.

\* 21:1: Dag 33.40 \* 21:3: Homa inanaga bi lalu, Bo haealabaga bini. \* 21:4: Man 2.1 \* 21:5: 1 Ko 10.9  
\* 21:9: 2 Kin 18.4, Yo 3.14

<sup>16</sup> Ogoriani howa pialu tigua dindi ogoni mini Iba Biragane Uli laga wiagoria pene. Ogoriani howa Anduane Homogohanda ala lalu, Iba muliya wali agali bibahende haru ngoai hadaba, lene. <sup>17</sup> Ogoningi Isaraele wali agalime iba gana ogodagua lene.

Iba Biragane uliru-o iba biru to ladaba.  
Iname de handalu turu howa iba gana loleberema.

<sup>18</sup> Iba Biragane Uli kini iginirume wene.

Wali agali haru hagarumebi wene.

Kininaga gewame wene.

Tininaga halimburume wene,

lalu iba gana lene.

Ani lalu tigua wali agali nahe biagoria howa Madanahayagi pene. <sup>19</sup> Madanani howa Nahaliele pene. Nahaliele howa Bamodo pene. <sup>20</sup> Bamodo howa dindi ulini Moaba wiagoha pene. Ogoni Hari Pisiga andanaha winigo ogoriani howa dindi ko wali agali nahe wiago handa amu howa wini.

*Kini Sihono Kini Ogala balu wayali henego ogo*

<sup>21</sup> Isaraeleali biaru tigua bi yalu piaga marume bi Amoroalinaga Kini Sihono hearia yalu pudaba lowa lalu, <sup>22</sup> Ina tí daluni pu bolangua holomaya henge ngi. Inamebi inanaga nogo bulumaga haru kamarumebi hariga tene yu wahalu tinaga mabu ngemiruhabi gerebi gama ngemiruhabi pu ai nai nabuleberema. Tinaga iba naga uli ngamirubi nanoleberema. Kini hariga tene haiweni hangu piaho wialu tinaga dindiha henge ngeremidagua polomaya, lene. <sup>23</sup> Tigua ani hale hayagola Sihonohanda, Dindi henge nangule, lene. Ibugua ibunaga ami mo mogo bialu wali agali nahe dindi Yahase wiagoria tagira puwa Isaraeleali biaru baba wai bule ibini. <sup>24</sup> Wai bule ibiyaruni Isaraeleali biarume dewaore balu dindi Iba Anono howa uyurahayagi Iba Yabogo Amonoali baba tubaria wiago ti karulai hene. Amonoali ti ami agali hongohe howa tinaga dindi tubaria bayuwa mamage haga hene. <sup>25</sup> Isaraeleali biarume Amoroali biarunaga tano timbuni wiaru bibahende karulai hene. Hesebonobi tano emene emene uruniha wiapara para biaruni bibahende bi karulai hene. <sup>26</sup> Amoroalirunaga Kini Sihono ibunaga tano timbuni Hesebono winiya. Kini Sihono ibugua Moabalirunaga kini ala heneyago baba wai bialu dindi wiago damene bibahende karulama pialu Iba Anono bereagoria karulairi ho wini.

<sup>27</sup> Ani binidagonaga Moabalinaga bi bulene mbira iba gana laga hearume lalu,

Tí Kini Sihononaga tano Hesebononi ibidaba.

Gialabaga bu ngaru hongohe helo lone biadai birane hondole hamelo kama.

<sup>28</sup> Bamba Hesebono tano ogoriani howa✧

Sihononaga amime wai gibi irame bo daradagua bialu

Moaba dindini Ara tano bo haealabaga bini.

Iba Anono manehayagi harini palearu bo gamu haradagua bini.

<sup>29</sup> Moaba wali agali tíha mo ko holene wulebiragonaga daraho kama.

Irane tigua dama Kemoso bi pupu wirimigome tíni mo ko harimi.

Tinaga dama biagome agaliru dindi taraha pora bialu purogo lelene.

Wali dameneru Amoroalinaga kini kagome ti minuwa ibunaga garabaya biabe ale bilo berelene.

<sup>30</sup> Anigo áyu tinaga aguanenebi nde bo haealabaga biyada.

Hesebononi howa bama pialu Dibono bo perelatagi hayada.

Nasimu howa bama pialu Medeba hapara howa Nobani bo haeala tagi haya, lalu iba gana lene.

✧ 21:28: Yar 48.45-46

<sup>31</sup> Ani bialu Isaraele wali agali biarume Amoroalinaga dindi karulo hene. <sup>32</sup> Ani howa Mosesehanda agali marume tano timbuni Yasere agua puwa babehedabe hondo wule wai taya pudaba, lene. Ani buwa Isaraeleali biarume Amoroali ogoriani paleneyaru bo purogo lalu tano maru ogoriani mandagi wia pagu biniyarubi bo purogo lene.

<sup>33</sup> Ani bialu Isaraeleali biarume hariga mende Basana dindihayagi pole peagoria pene. Ani piyagola Basananaga Kini Ogahanda ibunaga ami haru halu Isaraele baba wai bule tagira pialu Ederini pene. <sup>34</sup> Anigo Anduane Homogohanda Mosesehondo lamialu lalu, Ína Kini Oga hondowa gi nahabe. Ína bai habelo hongo ngialu ínaga giha wara ya harogo ibunaga dindibi wali agali bibahende bai holebere Amoroalinaga kini Hesebononi hearia birigodagua dege bulebere, lamini. <sup>35</sup> Isaraeleali biarume Kini Oga balu ibu iginirubi ibunaga wali agalirubi bibahende bo wahai halu mbiraliore yu wanahene. Ani bialu dindi winiyarubi ti karulai hene.

## 22

### *Moabalinaga kinime, Balama damu pudaba, lenego ogo*

<sup>1</sup> Isaraeleali biaru tigua puwa Moabanaga yu dindi mbira wiagoria iba Yodana peagoriani howa ni ibiragohayagi Yarigo iba Yodana ange mendehayagi ngela buwa anda bu hene.

<sup>2</sup> Moabalinaga kini Sibon igini Balaga ibugua Isaraeleali biarume Amoroali biaruhondo ogodagua biya layago hale halu <sup>3</sup> Isaraele wali agali dagalabe nahe ka layagobi hale howa ibunibi ibunaga wali agali hearubi gi gibiore ho hene. <sup>4</sup> Moabali biarume Midiananaga haru haga hearuhondo lalu, Wali agali daga labe nahe nininamu lo karume wali agalibi dindibi mbirale o ngaru nogo bulumagame tani nai haradagua bialu bo haealabaga bulubada, lene. <sup>5</sup> Ani manda buwa Moabalinaga Kini Balagahanda, Bero igini Balama Amawali dindi Iba Yuberedisi hapara howa ibuni dalu Pedoroni kagohondo marume bi yalu pudaba, lalu bi ogodagua lene. Balama ínaga bi ogo manda bibelo langero. Wali agali maru Iyibi dindi howa tagira ibiniru áyu ti dindi bibahende haame halu inanaga dindi bibahende karulole ho manda manda bira. <sup>6</sup> Ti ina kamagobi ndo dewaore kago ínaga ti ha hole ibabelo hamelo ko. Ína ani beregola ti inanaga dindini nahelo bo peloleberema bada. Ína biriligo ínaga manda bido. Wali agali ha halu mo ko helo larego mo ko haga. Wali agali bayale helo lalu bi bayale larego bayale haraligoni, lene.

<sup>7</sup> Moabali Midinialibi haru haga biarume Balagahanda bi lawia hayago mo yalu ha helonaga yolo mulene biarubi mo ya bialu Balama hearia puwa bi biago lamini.

<sup>8</sup> Balama ibugua agali biaruhondo ladai bialu lalu, Áyu mbiraga ogoria palidaba. Yawi haragola Anduane Homogohanda langirago agua lara lalu languliya, lene. Ani layagola Moabalinaga haru haga biaru tigua mbiraga Balama heba palu hene.

<sup>9</sup> Ani palu heagola Ngode Datagaliwabehanda Balama hearia ibuwa lalu, Agali í heba o karuni aniali íbu kabe, lene.

<sup>10</sup> Ani layagola Balama ibugua ladai bialu lalu, Moabalinaga Kini Balaga ibugua í hewaria <sup>11</sup> wali agali maru Iyibi dindi howa ibuwa dindi o wiaru bibahende haame harago lalu lama pu leneyago ibinida. Ina ha habe layayagoni ha harogome ibugua wali agali biaru bibahende balu bo waratagi hole lowa bi uruni yalu pu leneyago íbu ka, lene.

<sup>12</sup> Ngode Datagaliwabehanda Balama lamialu lalu, Agali uru heba í napobe. Isaraele wali agali ti ínaga mo baya holene heba kago ínaga ha nahabe, lene.

<sup>13</sup> Egerebagi hayagola Balamahanda Balaganaga bi yalu ibaga biaruhondo lamialu lalu, Anduane Homogohanda í tí heba napobe layago tí andaga dai bidaba, lene. <sup>14</sup> Ani layagola bi yalu ibiyago biaru tigua dai buwa Balaga lamialu lalu, Balama ibu naibule laya, lene.

<sup>15</sup> Ani layagola Balagahanda halu mende agali dewa o ibiyaru ale ndo agali haru haga mini leneore hearuhondo lalu, Balama hearia bi yalu pudaba, lene. <sup>16</sup> Tigua Balama hearia bi ogobi yalu pudaba lowa lalu, Balama o mbirale mbirame mo baragola hadai buleni i koría abaleore ibabe. <sup>17</sup> Íore homogo holenerume yolo bialu bia lareru buleberogo wali agali uruni ha hole ibabe, lene.

<sup>18</sup> Anidagua layago hale howa Balama ibugua ladai bialu lalu, Balaga ibugua muni ngolo silibaru ibu andagaha ngaruni bibahende ngiai hayaguabi Anduane Homogo inaga Ngode Datagaliwabehanda ledago emeneoreyaguabi mo wa naholebero. ✧

<sup>19</sup> Anigo áyu tí ala maru ibalu piyadagua egerebagi pole palidaba. Áyu mbiraga Anduane Homogohanda bi mende agi langirabe hale holiya palidaba, lene.

<sup>20</sup> Mbiraga ogoníngi Ngode Datagaliwabe ibuwa Balamahondo lamialu lalu, Agali urunime í ma layagua pole manda manda bibe. Anigo puwa inime langerodagua hangu biai habe, lene. <sup>21</sup> Egerebagi hayagola Balamahanda ibunaga nogo dongini biralu Moabali haru haga biaru heba pene.

*Balamahanda ibunaga nogo dongila keba henego ogo*

<sup>22</sup> Balama pole piyagonaga Ngode Datagaliwabehanda ibuhondo keba hene. Iibunaga nogo dongini biralu biabe biahaga kirali heba pole piyagola Anduane Homogonaga dahuliyalime hariga pole biyagoria hapai helene. <sup>23</sup> Nogo dongi biagome dahuliyali mbira wai biagane ayu tibu yuwa harigani heago hondowa hariga ngelalu leneha pubagi pene. Ani biyagola Balamahanda nogo dongi biago balu hariga teneni haru dai bini. ✧ <sup>24</sup> Ani biyagola mani dahuliyali biago ibu gerebi mabu kira wiagolabonaga dombeneha ege toleme pabe ange kirabaliha buwa hariga dorogoneore winiyagoria pu hene. <sup>25</sup> Nogo dongi biagome o heago hondowa angeha pubagi halu hearia Balamana ge pabe biagola nogo dongi biagola gingidamaga howa dambini. Ani biyagola Balamahanda nogo dongi biago o bayadagua dege lone bene. <sup>26</sup> Dahuliyali biago ibu puwa hariga dorogoneore balalu polene nawi wiagoria hapai hene. <sup>27</sup> Nogo dongi biagome dahuliyali biago hapai heago hondowa hariga biagoriani palupe hene. Ani biyagola Balamahanda keba timbuni howa nogo dongi biago kango yiniyagome bene. <sup>28</sup> Ani biyagola Anduane Homogohanda nogo dongi biagohondo bi lolene wia hayagola ibugua Balamahondo lalu, Ina ihondo agi birugonaga ina i halu tebo baribe, lene.

<sup>29</sup> Ani hale hayagola Balamahanda ladai bialu lalu, Ina i agali lulu ale helarigonaga ina wai biagane ayu tibu yinidale nde í áyu bo home ledole, lene.

<sup>30</sup> Nogo dongi biagome ladai bialu lalu, Í mali dewa inaga erekunini biraabo hariligo ogonidagua mbira birulibe, lene. Balamahanda ladai bialu lalu, Ogonidagua mbira nabiriligoni, lene.

<sup>31</sup> Ani layagola Anduane Homogohanda Balamana de mo ngala hayagola dahuliyali mbira biago wai biagane ayu tibu yu heago hendene. Ani biyagola Balamahanda ibunaga wanakui dindihayagi yadindi howa bulu palu odo ibira hene. ✧ <sup>32</sup> Ani biyagola dahuliyali biagome Balamahondo hale halu lalu, Ina inaga nogo dongi halu tebo barigo aginaga baribe. Í hariga porego napoleneha poregonaga hapai hole ibiru. <sup>33</sup> Ani birugola inaga nogo dongi biagome i handalu hariga halu tebo pu tara haga biyagoni. Ibugua ani nabinidale í balu inaga nogo dongi peledole, lene.

<sup>34</sup> Balamahanda ladai bialu lalu, Ina ko birugoni. Hariga porogo napobe lole ina hariga hapaihego manda nabi ibiruya. Ina hariga gonihá napobehedalo manda bideyagua wahalu andaga dai buliya, lene.

<sup>35</sup> Ani layagola dahuliyali biagome lalu, Agali uruni heba pobe. Ani puwa bi ina langerogo hangu latagi habe, lene. Ani laya handala Balama ibu agali biaru heba pene.

✧ **22:18:** Dag 24.13, 1 Kin 22.14, 2 Bit 18.13 ✧ **22:23:** 2 Kin 6.17, Dan 10.7, Ab 22.9, 2 Pi 2.16 ✧ **22:31:** Fig 21.19, 2 Kin 6.17, Lg 24.16, 24.31



*Balagahanda Balama ibiyagola turu henego ogo*

<sup>36</sup> Balama ibira layago hale howa Balaga ibugua Moabaliru baba tuni Iba Anono piyagoria Ara tanoni lola hole pene. <sup>37</sup> Lola howa Balagahanda Balamahondo lalu, Ina pigane ihondo ibu laruyangi naibiriyago aginagabe. Ina ihondo yolo timbuni ndo emene hangu ngulebira manda biribe, lene.

<sup>38</sup> Balama ibugua ladai bialu lalu, Ayu ibirudagoni hendedebe. Iniha hongo agi yu kobe. Ngode Datagaliwabehanda la larago hangu labehe kogoni, lene. <sup>39</sup> Ani lalu Balaga ibu Balama haru halu Husodo tano puwa <sup>40</sup> Balagahanda nogo bulumaga sibiru bo podowa maru Balamabi agali haguane maru ibu heba ibiniyarubi ti mini.

*Balamahanda mbiwia pigane henego ogo*

<sup>41</sup> Egerebagi hayagola Balaga ibugua Balama haru halu Bamodo Bala dindini howa Israele wali agali maru hearu hendelo lowa haru halu irigi hene.

## 23

<sup>1</sup> Balama ibugua Balagahondo lalu, Bo lomabu delaga dabu karia biaha. Biai howa nogo bulumaga wangabe kariabi nogo sibi wangabe kariabi haru ibalu bia, lene.

<sup>2</sup> Balamahanda bia layadagua biai hene. Ani buwa Balama Balagala libu harume nogo bulumaga wangabebi nogo sibi wangabebi dabu mbira mbira biagoria ta howa bo lomabu delene. <sup>3</sup> Ani buwa Balama ibugua Balagahondo lalu, Ina Anduane Homogo lola harabe hondole poro tagi ina inaga mbirale bo lomabu delarigoriani hondo habe. Ibugua mo walia harago damene bibahende langiai holebero, lene. Ani lalu ibugua hari hombene mbira wiagoria ibuni hangu pene. <sup>4</sup> Ogoriani pu hearia Ngode Datagaliwabe ibalu Balama lola hene. Ani lola hayagola Balama ibugua Ngode Datagaliwabehondo lalu, Lomabu delaga dabu karia biarunaga nogo bulumaga wangabebi nogo sibi wangabebi mbira dege dege karia bo delaru, lene.

<sup>5</sup> Anduane Homogohanda ogodagua labe laya handala Balama ibu Balaga hearia lamule dai bini. <sup>6</sup> Dai buwa handalu hearia Balaga ibu mbirale bo delayagoria Moabali haguane biaru heba habe layagoria hearia hendene.

<sup>7</sup> Balama ibugua mbiwia halu bi ogodagua lalu,

Moabalinaga Kini Balaga ibugua i haru ibini ko.

I Siria dindini ni ibiragohayagi harini hewaria haru ibuwa lalu,

Inaga bi lahole ibu, lene.

Israele wali agali ha habe laya, lene.

<sup>8</sup> Ngode Datagaliwabe ibugua ha nahe ngagoha ina ha agua holiyabe.

Anduane Homogohanda mo ko nahe ngagobi ina agua mo ko holiyabe.

<sup>9</sup> Ege tole daliga wiagoria howa ina ti de hendedo.

Hari nene wiagoria howabi ti de hendedo.

Wali agali hameigini ti habagi haga ka.

Ti wali agali tara tara kagobi ndo ti mo bayaleore henego mandabi ka.

<sup>10</sup> Israaelenaga aguanene abalu ngaligobi nga.

Israele wali agali dewaliore ti dagala mibe nahe ka.

Ngode Datagaliwabenaga wali agali horo hamaro biagadagua i hoa ho ko.

Mini tigabi karume mo palia holeneyi homaradagua i homolene hamelo ko,

lalu, Balamahanda mbiwia halu lene.

<sup>11</sup> Ani layagola Balagahanda Balamahondo lalu, Ina ihondo agi biribe. I ogoria haru halu ibirugo inaga waitigi agali karu ha habelonaga haru ibirugo ina ani nabi howa ti baya helo mo bayale holene bi hangu larigoni, lene.

<sup>12</sup> Ani layagola Balama ibugua ladai bialu lalu, Ina Anduane Homogo ibuninaga bi la larago hangu labehe kogoni, lene.

*Balama ibugua mbiwia halu mende henego ogo*

<sup>13</sup> Balagahanda Balamahondo lalu, Isaraele wali agali dindi mendehayagi maru hangu karu handabeheni mbaliya ibu. Ogoriani howa ha habelo, lene. <sup>14</sup> Ani lowa ibugua Balama haru halu Sobimunaga dindi hari hambene Pisiga wiagoria haru pene. Ogorianibi bo lomabu delaga dabu karia buwa nogo bulumaga wangabebi nogo sibi wangabebi mbira mbira dege dege dabu biaru ta howa karia bo delene.

<sup>15</sup> Balama ibugua Balagahondo lalu, Mbirale bo lomabu delarigoria hondo habe. Ina Ngode Datagaliwabe lola hole naina porogo, lene.

<sup>16</sup> Anduane Homogohanda Balama lola howa, Bi ogodagua labe, lalu, Ai Balaga karia lama dai bia, lene. <sup>17</sup> Balama ibu dai bialu hearia Balaga ibu mbirale bo lomabu delene biagoria Moabali haru haga maru heba hayagoriani ngadagua heneyane hendene. Balama daibiyagola Balaga ibugua, Anduane Homogohanda agua layabe, lalu hale hene. <sup>18</sup> Ani layagola Balamahanda mbiwia halu lalu, Sibogini Balaga-o hale hole ibu. Ina bi larogo hale hole ibu.

<sup>19</sup> Ngode Datagaliwabe ibu ke haga agali ale ndo ka.✧

Ibu mini iriari biaga wali agali ale ndo kagoni.  
Ibugua mbirale mbira bule lo winigo biagaore.  
Ibugua bime laragola binidane handaga ka.

<sup>20</sup> Ti bayale helo bi bayale labe ihondo laya.

Ngode Datagaliwabe ibugua mo bayale henego ina mo beregedabe nahe.

<sup>21</sup> Ina de gandeba hondowa hondo bolangua halu koria

Isaraele ti mani holebiragoria ko mbira nahondolebira.

Anduane Homogo tinaga Ngode Datagaliwabe ibu ti heba ka.

Tigua lalu, Ibu inanaga Kini ka, lalu latagi haga.

<sup>22</sup> Ngode Datagaliwabe ibugua ti Iyibi dindi howa haru tagira ibini.

Ibugua nogo bulumaga gabuame hongo hagadagua Isaraelenaga wai bia hole hongo haga ka.

<sup>23</sup> Isaraele baba wai bulenaga hubibi bulenebi dama ndilalu bolenebi nakarulapeore holebira.

Wali agali tarame Isaraele hondowa lalu,

Ngode Datagaliwabehanda bia hayada handadaba, lolebira.

<sup>24</sup> Isaraele wali agali gabua laiono ale hongo gibihe ka.

Laiono ibu abale halo nabiraga ka.

Ibugua dere ale mbira balu lerelabaga buwa

bayagonaga mbirini darama heba nai haluore halo biraga ka,

lalu Balamahanda mbiwia hene.

<sup>25</sup> Ani layagola Balagahanda Balamahondo lalu, Ha nahole larigonigo ti mo bayale holeneayagi nalabe, lene. <sup>26</sup> Balama ibugua ladai bialu, Anduane Homogohanda bia larago ale biai hole larugo piganengi nalangiruyabe, lene.

*Balama ibugua mbiwia halu tebone henego ogo*

<sup>27</sup> Ani layagola Balagahanda Balamahondo lamialu lalu, Dindi teboneni howa agi larabe hondole mba ibu. Ngode Datagaliwabehanda ina dindi ogoriani howa ha haregola hale holebira badago, lene. <sup>28</sup> Ani lalu ibugua Balama haru halu Hari Peronaga neneneni howa dindi ko iba dalu naibaga wiago handa gimbu bulene wiagoria haru pene.

<sup>29</sup> Balama ibugua Balagahondo lalu, Bo lomabu delagane dabu karia biaha. Ani buwa nogo bulumaga wangabe karia nogo sibi wangabe karia lowa ogoria haru halu ibabe, lene. <sup>30</sup> Ani layagola Balaga ibugua Balamahanda layadagua bo lomabu delagane dabu karia biyagoria ta hai howa bo lomabu delene.

✧ 23:19: 1 Sml 15.29, Mal 3.6, Lm 11.29, Ta 1.2

## 24

<sup>1</sup> Odagoningi Balama ibu manda bialu hearia Anduane Homogohanda Isaraele wali agali bayaleore helo mo baya hole heago ibu manda buwa ibugua halaga abale biyadagua lone bule nape. Ibugua dindi ko iba dalu naibaga wiagohayagi wanakui handa amu howa <sup>2</sup> Isaraele wali agali hameigini hangu hangu headagua anda bu haga haga bu hearu hendene. Ani handa amu ho hearia Ngode Datagaliwabenaga Dinini ibuha daliyagola <sup>3</sup> ogodagua mbiwia hene.

I Bero igini Balamahanda mbiwia harogo  
 Ina ngagobi deme bayuwa ngoalia howa hondowa

<sup>4</sup> Ngode Datagaliwabehanda bi larago hale halu  
 Ngode Datagaliwabe Hongo Haiheore kagome  
 de gandeba mo walia haragola

i de handaya ho wiaabo halu latagi haro.

<sup>5</sup> Yagaba-o inaga balai anda baya gibioedane hendedo.  
 Isaraele-o i holeneore baya gibioedane hendedo.

<sup>6</sup> Balai anda biaru duguni ayage ale mini dedi ho dugu haradagua hoyu pedane hendedo.

Iba poraru angeni mabu wuyu poradagua bidane hendedo.  
 Anduane Homogohanda ira mini aloru mabu ogoriani hengene mbauleda.  
 Ira tamia iba ange ange hoyu poradagua bia.

<sup>7</sup> Isaraele tinaga dindini dalu iba ho wiaabo holebira.

Tigua dindi mo hini haragola tomo hongolebira.

Isaraele tinaga kini ibu Agaga ale ndo ibu hongohe mini lene daligaore holebira.  
 Iibunaga handame howa haru holene timbuni yangale daliga wulebira.

<sup>8</sup> Ngode Datagaliwabehanda ti Iyibi dindi howa haru tagira ibiya.

Ibugua bulumaga gabuame hongo hagadagua bialu tinaga wai bia hole hongo haga ka.  
 Tinaga waitigirubi bo ibira hai halu

Kuni gingiru lalu timubi bulubaga biaga.

<sup>9</sup> Isaraeali uruni gabua laiono hongo gibiorehe ale ka.✧

Ogoni ibu padaria mbiralime barila hole ai kabe.

Mbiralime Isaraele bayale helo mo bayale hayagua ibubi bayale holebira.

Mbiralime Isaraele ko helo ha hayagua ibubi ko helo ha hene holebira,

lalu Balamahanda mbiwia hene.

<sup>10</sup> Balagahanda bi ogoni mbiwia hayagola Balama ibugua keba timbuniore howa ibunaga gi kirabali tanda lowa Balamahondo lalu, Ina i olarugo wali agali uruni ha habelo olaru. Anigo ina bi halu tebo larigoni bibahende bayale hangu lari. <sup>11</sup> Ai i manga ho kogo wahu dai bia. Ina i yolo buliya larugoni Anduane Homogohanda yolo biagoni namibelo mo wahayada, lene.

<sup>12</sup> Ani layagola Balama ibugua ladai bialu lalu, Inaga agaliru i hewaria bi yalu pu lariyaru hongo ogodagua larugoni ndobe. <sup>13</sup> Ina kini andagaha muni siliba ngolobi ngeru bibahende ngiai hariyaguabi Anduane Homogohanda langirago mo wahu ini hame ledodagua nabulebero. Anduane Homogohanda la larago hangu labehe ko lalu tihondo lamirugoni, lene.

### *Balamahanda mbiwia ma halu henego ogo*

<sup>14</sup> Balamahanda Balagahondo lalu, Ayu i ininaga wali agali karia dai bulebero. Isaraele wali agali o karunime mani inaga wali agalihondo ogodagua bulebira lalu i manda bu habelo mo walia haro. <sup>15</sup> Ani lowa ibugua mbiwia ogodagua lene.

✧ 24:9: Pige 12.3, 49.9

I Bero igini Balamahanda mbiwia harogo  
 Ina ngagobi deme bayuwa ngoalia howa hondowa  
<sup>16</sup> Ngode Datagaliwabehanda bi larago hale halu  
 Mbirali Daligaorene Daliga Kagome manda mo wia hene ko.  
 Ngode Datagaliwabe Hongo Haiheore kagome  
 de gandebaha mo walia haragola  
 i de handaya ho wiaabo halu latagi haro.

<sup>17</sup> Mbirali hendedogo mani holebiragonaga de hondo ko.  
 Ina Isaraele hameigini de hendedo.  
 Kini mbira yakundi ale hameigini uruniha howa tagira ibulebira.  
 Ibunaga halimbu Isaraeleha howa tagira ibulebira.  
 Kini ogoni ibugua Moabalinaga haguane tuguda hole bialu  
 Sede hameiginiru mo ko hai holebira.  
<sup>18</sup> Ibugua ibu waitigi Idomo bo waholebira.  
 Tinaga dindi karulowaibunaga wulebira.  
 Isaraelenaga hongo anda halu ha ho wiaabo holebira.  
<sup>19</sup> Isaraele hameiginirume bibahende karu bo hengeda hai holebira.  
 Tano timbuni ogoriani yu wahene karu bo hilu wahai holebira.

*Balamahanda mbiwia halu hamaro binigo ogo*

<sup>20</sup> Balama ibugua de gandeba handalu hearia Amalegealiru paleago hondowa mbiwia halu lalu,

Ala Amalegeali ti hameigini bibahendenaga hongo bolangua hene.  
 Mani ti bo ereba hai holebira.

<sup>21</sup> Ani lowa Balama ibugua de gandeba dege handalu Kenialiru paleago hondowa mbiwia ogodagua hene.

Kenialiru ti holeneore pabeme bu mabu bupeheda.

Inaga anda hari nene ngaru obeneni ega hariaweme biradagua bu kamigonida.

<sup>22</sup> Anigoyu Asiria tigua ti garabaya haru haragola ti bo haealabagabu waholebira.

<sup>23</sup> Ani lowa Balama ibugua mbiwia halu bi ogo lalu,  
 Ngode Datagaliwabehanda ogonidagua biragola bayale ai ibu habehebe.

<sup>24</sup> Saibarasi agalirume iba taluni ibalu

Asiriabi Eberebi bope hai holebira.

Ani bulebirago mani tinibi ereba hai holebira,  
 lene.

<sup>25</sup> Ani lai howa Balama ibu heyalu ibuni andaga dai biya handala Balaga ibubi nde ibuni andaga pene.

## 25

*Isaraealirume dama mini Balahondo bi pupu wialu henego ogo*

<sup>1</sup> Isaraele wali agali ti pialu dindi ulini tigabi mbira mini Sidimi wiagoha balai anda bu hene. Ani howa Isaraele agali hearume Moaba wali ogoniha berearu baba kayu yu palima ibaga bialu hene. <sup>2</sup> Ani bialu heagola wali uruni tigua Moaba wali agalime dama mitangi bialu bi pupu wulenaga gime wabini mini Bala lomabu miaga wiagoha Isaraealihondo ibalimu laga bini. Ani layagola tigua Balahondo bi pupu wialu tomo lomabu mini wiaru nalu hene. <sup>3</sup> Anidagua bialu Isaraeali tigua Pero dindini bi pupu wiaga mini Balahondo bi pupu wialu haga hene. Ani bialu hemiria hondowa Anduane Homogo ibugua tihondo keba hene. <sup>4</sup> Ani keba howa Anduane Homogohanda Moseshondo lamialu lalu, Wali agali maru karume de hendelo agali haguane mbira mbira karu lamialu agali ko biaga uruni homelo irani bo gerela halimu. Tigua ogonidagua

birimiyagua ina wali agali bibahendehondo keba naholebero, lene. <sup>5</sup> Ani layago hale howa Mosesehanda Isaraeleali agali haguane mbira mbira hearuhondo lamialu lalu, Tíname tínaga agali mana ko ngubi bialu Pero dindini mbirale bi pupu wulenaga gime wabini mini Bala ngagohondo bi pupu wiaga karu bibahende homelo bo wahai halimu, lene.

<sup>6</sup> Mosese heba wali agali maru Anduane Homogonaga Balai Anda haneni dugu bialu berene. Ani biruwa handalu hemiria Isaraele agali mbirame Midiana wali mbira ibuninaga balai anda heagoha haru anda piyaria de hendene. <sup>7</sup> Loma binigo mo miaga Arono aguane Eleasa igini Piniasa ibugua wali agali ogonilabo ibiyago handa walia hene. Ani handalu wali agali berelalu ibunaga yandare winigo abale mo pene. <sup>8-9</sup> Mo yalu ibuwa wali agali biagolabo anda piyagoha haruru anda puwa libu homelo bo wahene. Ala Anduane Homogohanda Isaraele wali agali hearuha warago timbuni mbira ibilayagola wali agali daosini dege pira kirani maria (24,000) homai hene. Ani biyagola Piniashanda wali agali biagolabo homelo bo wahayagola warago ko ogoni ereba hene.

<sup>10</sup> Anduane Homogohanda Mosesehondo lamialu lalu, <sup>11</sup> Piniashanda wali agali biagolabo homelo bo wahayagome inaga Isaraele wali agaliru baba keba nahe kogoni. Ani bayadagoni irane Isaraele wali agali tígua mbirale gime wabini ngagohondo bi pupu nawilimulonaga bayagoni. Ina tí bialu halimulo hamelo kodagua ibuguabi Isaraele wali agali bu kamiru tígua ini hanguhondo mitangi bialu lotu lalu halimulonaga ani biya. Anidagua biyagome ina wali agali bibahende bo wahai nahe waharugoni. <sup>12</sup> Áyu ina ibuhondo lamialu ina ibula habo nalolene bi mbira lo wialu ini ibunaga nenege-ore haabo holebero laya labe. <sup>13</sup> Ibugua anidagua biyagome ibunibi ibu waneigini aguanenerume inaga biabe bialu loma binigo mo ngiaga haabo holebira. Ani larogoni irane Piniasa ibugua Isaraele wali agali karume ini yu wahalu puwa mbirale dama mitangi bialu gime wabini ngagohondo bi pupu wima pelo hame nale hayagonaga ani bulebira. Ani bialu ina wali agali uruninaga ko ngago domo waholiyanaga galone mbira biyane hondowa ani bulebero, lalu lamini.

<sup>14</sup> Agali mbira Midiana wali biagola hearia bo wahayago ibu mini Simiri henego ogoni Piniashanda bo wahene. Simiri ogoni ibu Simiono hameigini aria howa ibu agali haguane mbira mini Sulu henego igini hene. <sup>15</sup> Midiana walidago mini Kosobi berenego ogoni bene. Kosobi ibu Midiana dindinaga agali haguane mbira mini Sua henego wane berene.

<sup>16</sup> Mani howa Anduane Homogohanda Mosesehondo lamialu lalu, <sup>17</sup> Tígua Midiana hameigini karu baba wai bialu mo ko halu bo wahalimu. <sup>18</sup> Ani larogoni irane tigua tí Pero dindini hemiria mo hondo halu ko timbuniore biyagobi wali Kosobi biago ibugua mana ko biyagonagabi tígua Midiana hameigini baba wai bilimu. Wali Kosobi ogoni tí Pero dindini warago timbuni balu hemiangi ibugua ko biyagonaga bo wahaya.

## 26

### *Isaraele agali halu mende dagalenego ogo*

<sup>1</sup> Warago timbuni tagira ibiyago ereba hayagola Anduane Homogohanda Mosesela Arono igini Eleasalahondo lamialu lalu, <sup>2</sup> Áyu libugua Isaraeleali lenego bibahende ami agali habeheru mali pira kira (20) henebi pira kira (20) bolangua hene karubi bibahendenaga mini gili biai halibu. <sup>3-4</sup> Ani layago hale howa Mosese Eleasalame Anduane Homogonaga bi layadagua talialu bini. Libugua agali mali pira kirabi (20) pira kira bolangua hene hearubi bibahende mini gilibu wule ibai hadaba layagola bibahende hale halu ibu ngoai ho hene. Ti Iba Yodana angeha Moaba dindi ulini tigabi wiagoria Yarigo tano kaware dege ibu ngoai hene.



Tigua agali Iyibi dindi wahalu ibiyaru dagala handalu hemiria daga ogodagua tagira pene.

<sup>5</sup> Yagaba igini wahene Lubene howa ibu damene ogodagua hene. Hanogobi Palubi <sup>6</sup> Heseronobi Kamibi uruni hene. <sup>7</sup> Agali mariali uruni tinaga aguanene heneru dagalamaga halu daosini dege pira mariani tebira halu handari kariani pira tebira (43,730) bibahende hene. <sup>8</sup> Palu ibu igini Eliaba hene. <sup>9</sup> Eliaba igini ogodagua hene. Nemuelebi Dadanabi Abiramabi henego ai wali agalime Abiramala Dadanala libu haru tinaga agali haguane dabo helearia libugua Mosese Aronolahondo mine halu libu Kora aria hearu baba hatago hene. Ani hatagoho howa ti bibahendeme Anduane Homogonaga bi doga haga hene.\* <sup>10</sup> Ani bialu hemiria dindi gaibuki bialu gundu uli timbuni mbira wiyagola agali mine hagane uruni bibahende dindi uli ogoniha haealape hai halu dindi lone gegebu dai buwa agali biaru dindime yi hai ho wahene. Agali uruni ti bibahende Kora halu ibu aria handari kirani pira duria (250) biaru irame dai hayangi dege ani homene. Anduane Homogohanda ibunaga wali agali bu hearu mini hongoheore wilo mo wiahalu tigua mana ko ogonidagua nabule lelonaga ani bini. <sup>11</sup> Anigo Kora igini hearu ti horo ogoningi nahome hene.

<sup>12</sup> Simiono ibu hameigini ogodagua hene. Nemuelebi Yaminibi Yaginibi <sup>13</sup> Serabi Saulubi hene. <sup>14</sup> Agali duriali uruninaga aguanene daosini dege pira kirani kira halu handari kira (22,200) bibahende hene.

<sup>15</sup> Gada hameigini ogodagua hene. Sebonobi Hagibi Sunibi <sup>16</sup> Osonibi Eribi <sup>17</sup> Arodobi Arelibi uruni hene. <sup>18</sup> Agali karia uruninaga igini aguaneneru bibahende daosini dege pira mariani handari duria (40,500) bibahende hene.

<sup>19-21</sup> Yuda hameigini ti henego ogodagua. Selabi Peresebi Serabi Heseronobi Hamulubi uruni hene. Perese ibu Heseronobi Hamulula libu aba hene. Bamba Yuda igini kirali Erebi Onanabi Kenana dindiha howa homene. <sup>22</sup> Agali duriali uruni ti aguaneneru dagalamaga howa daosini dege pira kariani waragara halu handari duria (76,500) bibahende hene.

<sup>23-24</sup> Isaga hameigini ogodagua hene. Tolabi Pubabi Yasububi Simironobi hene. Puba hameigini tinime tini mini Punu laga hene. <sup>25</sup> Agali mariali uruni tinaga agali bibahende dagalamaga halu daosini dege pira waragariani maria halu handari tebira (64,300) bibahende hene.

<sup>26</sup> Sebulunu hameigini ogodagua hene. Seredebe Elonobi Yalebebi tebirali hene. <sup>27</sup> Hameigini tebirali uruni tinaga aguaneneru bibahende daosini dege pira waragariani handari duria (60,500) bibahende hene.

<sup>28</sup> Yosebe ibu igini kirali hangu Manase Eberaimila hene. <sup>29-30</sup> Manase hameigini ogodagua hene. Magiri ibu Manase igini howa ibuni Gileada aba hene. Gileada ibu damene ogodagua hene. Iesebi Helegebi <sup>31</sup> Asarielebi Segemebi <sup>32</sup> Semidabi Hebebi <sup>33</sup> Hebe igini Selobehada ibu igini mbira nahe wandari dege aba hene. Ibu wane mini Malabi Noabi Hogolabi Miligabi Tirisabi uruni berene. <sup>34</sup> Hameigini waragara uruninaga agali daosini dege pira duriani kira halu handari karia (52,700) bibahende hene.

<sup>35</sup> Eberaimi hameigini ogodagua hene. Sudelabi Begebi Tahanabi hene. <sup>36</sup> Ani henego Sudela ibu Erana damene henerunaga mamali hene. <sup>37</sup> Hameigini uruni tinaga agali daosini dege pira tebirani kira halu handari duria (32,500) bibahende hene. Eberaimi hameigini Manase hameiginila libunaga mamali mbiraore Yosebe hene.

<sup>38</sup> Beniyamini hameigini uru hene. Belabi Asabelebi Ahiramabi <sup>39</sup> Sehubamabi Hubamabi hene. <sup>40</sup> Ani howa Bela ibu Ada hameigini Namana hameiginila mamali hene. <sup>41</sup> Hameigini duria uruni ti aria agali daosini dege pira mariani duria halu handari waragara (45,600) bibahende hene.

\* 26:9: Dag 16.1-35

<sup>42</sup> Dana ibu hameigini mbiraore Husimi hangu hene. <sup>43</sup> Hameigini ogoni ibunaga agali daosini dege pira waragariani maria halu handari maria (64,400) bibahende hene.

<sup>44</sup> Ase hameigini ogodagua hene. Iminabi Isibibi Beriabi hene. <sup>45</sup> Ani henego ai Beria ibu aguanene kira Hebela Malagielela hene. <sup>46</sup> Ase ibu wane mbira mini Sera berene.

<sup>47</sup> Hameigini tebira uruni tinaga agali daosini dege pira duriani tebira halu handari maria (53,400) bibahende hene.

<sup>48</sup> Nabadali aria ti hameigini ogodagua hene. Yaselebi Gunibi <sup>49</sup> Yasebi Silemebi hameigini maria uruni hene. <sup>50</sup> Ani henego tinaga agali bibahende dagalamaga halu daosini dege pira mariani duria halu handari maria (45,400) bibahende hene.

<sup>51</sup> Isaraele hameigini bibahende agali dege dagalamaga hai halu daosini dege handari waragariani mbira halu handari kariani pira tebira (601,730) bibahende hene.

<sup>52</sup> Mani howa Anduane Homogohanda Mosesehondo lamialu lalu, <sup>53</sup> Ai Isaraeleali hameigini mbira mbira ti wali agali kago manda bialu dindi ti karulape holobadago manda bialu tu wa tahabe. <sup>54-56</sup> Dindi tu wa taholenaga pigane á harabe hondole ala ege tole wiaru emeneni mini gili buwa baraga halu dindi podene mbira mbira ngago wali agali dewaliore harago ti dindi timbuni tu wa mialu wali agali daga emene harago ti dindi emene tu wa migi bibe, lalu Anduane Homogohanda lene.

<sup>57</sup> Libai ti hameigini tebira Gesonobi Kohadabi Meraribi uruni hene. <sup>58</sup> Gesonobi Kohadabi Meraribi tinaga aguanene hameigini emeneru ogodagua hene. Libinibi Heberonobi Malibi Musibi Korabi hene. Kohada ibu Amarama aba hene. <sup>59</sup> Amarama ibu wali mbira Libai wane Yogebede berenego dabu bini. Yogebede ibu Iyibi dindini hemingi howa taba henene berene. Yogebedehanda igiri kira taba henene mbirago Arono mendego Mosesela taba henene. Ani bialu ibugua wandari mbiraore hangu Miriama taba henene. <sup>60</sup> Mani Arono ibu wali dabu bialu ibu oneme igiri maria mini Nadababi Abihubi Eleasabi Idamabi taba henene. <sup>61</sup> Nadaba Abihu libugua Anduane Homogohondo ira hagua ngabilo inisenesi lomabu delaga winidagua ndo delalu heberia libu homene. <sup>62</sup> Libai hameigini igiri gali ege mbira bolangua henegoria howa agali damene bibahende dagalairi halu daosini dege pira kirani tebira (23,000) bibahende hene. Isaraele hameigini maru heba dagalamaga nahe Libai hameigini tini hangu dagalene. Anidagua binidagoni irane Isaraele hameigini maru biaruhondo dindi tu wa miyadagua ti dindi tu wa namiyagonaga ani bini.

<sup>63</sup> Mosesebi Eleasabi Isaraele agali bibahende Yarigo tano abene uyurahayagi Iba Yodana ange dindi ulini tigabi Moaba dindi wiagoria howa libugua mini uruni gili bialu dagalene. <sup>64</sup> Abale pigane Mosese Aronolame dindi ko iba dalu naibaga Sainai dindi wiagoria howa Isaraele agali bibahende dagalai hene. Daga halu mende ogoni layangi agali Mosesehanda ala mini gili bini uruni aria mbira naheneore. <sup>65</sup> Bamba Anduane Homogohanda Mosesehondo lamialu lalu, Agali uruni ti dindi ko iba dalu naibaga ngagoha howa homai holebira, lalu lamini. Ani lenego lola halu agali ala hene uruni bibahende homai hene. Anigo agali kirali Yabune igini Kalebela Nunu igini Yosuala dege nahome haabo hene. <sup>\*</sup>

## 27

### *Selobehada wane berearu dindi tu wa minigo ogo*

<sup>1</sup> Selobehada ibu Hebe igini hene. Ani bialu Hebe ibu Gileada igini hene. Gileada ibu Magiri igini hene. Ani bialu Magiri ibu Manase igini halu Manase ibu Yosebe igini hene. Selobehada ibu wali dabu bialu ibu oneme wandari duria taba henene. Wandari uruni mini Mala Noa Hogola Miliga Tirisa imaru uruni berene. <sup>2</sup> Wandari uruni tigua puwa Anduane Homogonaga Balai Anda heago haneni pu howa Mosesebi

<sup>\*</sup> 26:52: Dag 34.13, Yos 14.1-2   <sup>\*</sup> 26:60: Dag 3.2   <sup>\*</sup> 26:61: LBM 10.1-2, Dag 3.4   <sup>\*</sup> 26:65: Dag 14.26-35

loma binigo mo miaga Eleasabi Isaraele wali agali bu hearubi tinaga deni pu hene. Ani pu howa wandari uruni tigua lalu, <sup>3</sup> Ina aba dindi ko iba dalu naibaga wiagoha homayagoni. Ibu agali mine halu Anduane Homogo kagohondo erembira miaga Kora aria ndo hene. Ibumime ko tara binigome ibu igini mbira nahonowi halu homayagoni. <sup>4</sup> Ibunaga mini ereba nahe wiaabo helo ibu igini mbira nahedago ai ina Isaraele hameigini kamaruni aria mbirago homo amolelo waholene karulapedabe. Anidagua bulene nakarulapedago ina abanaga dindi podo wini ngago inane mo ngilimulo hamelo kamagoni, lalu lamini.

<sup>5</sup> Ani layagola Mosesehanda tinaga bi layago hale howa Anduane Homogohondo bi la halu hene. <sup>6</sup> Ani la hayagola Anduane Homogohanda ladai bialu lalu, <sup>7</sup> Selobehada wane urunime tinaga bi layadagoni tigabioiredago ti aba damenerunaga dindi ngago tini helo mo milimu.\* <sup>8</sup> Isaraele hameigini karuhondo ogodagua labe. Agali mbira ibu igiri nahonowi wandari hangu aba heneyagua nde wandari uruni ti abanaga dindi tini helo mulene nga. <sup>9</sup> Ibu wanebi mbira nahonowi dege homayagua ibu hamene karume karulolene wulebira. <sup>10</sup> Ibu hamene naheyagua nde ibu aba hamene karume karulolene nga. <sup>11</sup> Ai ibu hamene nahe aba hamenebi naheyagua nde ibu hameigini kagome karulolene nga. Isaraele wali agalirume I Anduane Homogo ina bi áyu langerogodagua baya hangu talialu bulene nga, lalu Anduane Homogohanda lene.

*Anduane Homogohanda Yosua dabene go go*  
(*Mana Loyane 31.1-8*)

<sup>12</sup> Anduane Homogohanda Mosese lamialu lalu, Hari Abarimini irigi howa dindi Isaraele wali agalihondo muleberogo amu ngagonigo handa amuha hole pu.\* <sup>13</sup> Hondowa í hamene Arono homayadagua íbi homoleberego irane <sup>14</sup> Sini dindi ko wali agali nahaga Meribani howa wali agali hearume gomogomo dewa lene. Ani layangi libu kirabalime inaga bi larugo mo wahowa inaga hongo holene tigabi ogobi lalu mo walia naharibigonaga í homolebere, lene. Iba Meriba ogoni dindi ko wali agali nahaga Sini dindiha dindi emene mbira Kadese ngagoria dugualu pora.

<sup>15</sup> Mosesehanda Anduane Homogohondo bi ogodagua lalu. <sup>16-17</sup> Anduane Homogo Ngode Datagaliwabe-o wali agali bibahendenaga holene tene í kegoni. Inaga wali agali nogo sibi haru haga nahe mbaule holigo agali mbira dababelo. Agali ogoni ibugua wali agali haru helobi wai birangi haru bamba helobi ani dababelo hameledo, lene.\*

<sup>18</sup> Ani layagola Anduane Homogohanda Mosesehondo lalu, Nunu igini Yosua ibu miniwi kago ibunaga hagianeni gi wibe.\* <sup>19</sup> Loma binigo mo miaga Eleasa halu wali agali bibahende kagoria Yosua helowa ina biabe bibahende biriligo ibugua bia aribia helo lalu bibahendenaga deni latagi habe. <sup>20</sup> Isaraele wali agali bibahendeme ibunaga bi larago hale halu bilo inaga hongo maru ibuhondo mibe. <sup>21</sup> Anigo Yosua ibugua inaga hame hondole lowa loma binigo mo miaga Eleasa karia puwa ibunaga deni holebira. Eleasa ibugua ege tole kira manane handagane mbira mini Urimu mende mini Tumimu ogonilabome inaga hame mo walia holebira. \* Ani walia haragola hondowa Eleasa ibugua Yosuahondobi Isaraele wali agali bibahendehondobi ogo ale bidaba lalu lamulebira, lene.\*

<sup>22</sup> Mosesehanda Anduane Homogohanda layadagua bibahende biai hene. Ibugua Yosua haru puwa loma binigo mo miaga Eleasabi Isaraele wali agali bibahende bi heagoria haru íbu helene. <sup>23</sup> Anduane Homogo ibugua bibe layadagua Mosese ibugua Yosuanaga hagianeni gi wialu, Ina biabe biagane bibahende ngaru ina bialu habelo,

\* 27:7: Dag 36.2    \* 27:12: Man 3.23-27, 32.48-52    \* 27:16-17: 1 Kin 22.17, Ese 34.5, Md 9.36, Mg 6.34    \* 27:18: Har 24.13    \* 27:21: Urimu Tumimu bi ogolabo irane mbuga Haru Tagira Penego 28.30 handabe.    \* 27:21: Har 28.30, 1 Sml 14.41, 28.6

lalu lene. Ani layagola Yosua ibugua Isaraele wali agalinaga haru hagane ha aribia hene.✠

## 28

### *Horo bibahendengi loma bialu mulene winigo ogo*

*(Haru Penego 29.38-46)*

<sup>1</sup> Anduane Homogohanda Mosese lamialu, <sup>2</sup> Bi ogo Isaraele wali agalihondo lamibe. Isaraele wali agali tígua lomabu delaga dabu ngagoria tomo bibahende bu delalu kamiru nga bayale bilo bu delaga bilimu. Ina loma ogoaleru hame laruli. Loma uruni inime horo ogoningi bilimu lalu langirugo tagira ibirangi biaabo halimu.

<sup>3</sup> Mosese-o Isaraele wali agali bu karuhondo bi ogodagua lamibe. Tígua Anduane Homogohondo loma uruale bu mulene nga. Horo bibahendengi nogo sibi igini wangabe kira dere durubi nabi mali mbira hangu hene hungubalua kago loma bialu bo delaga bilimu. Nogo sibi ogonilabo irani dai helo loma bialu bo delalimu. <sup>4</sup> Sibi kira ogonilabo mendego egerebagi bo delalu mendego alendo bo delalimu. <sup>5</sup> Egerebagi bo delolenaga nogo sibi mbira biago heba widi bayaleore dambinigo balawa genda magi kilogarama mbira olibe lininaga weli bayaleore odo biamaga hene ngago heba delalimu. <sup>6</sup> Horo bibahendengi loma ogonidagua buwa irani dalu do ira punga helo delalimu. Bamba tígua Hari Sainaiha hemingi nogo ogonibiore pigane loma bialu bo delaga birimigola Anduane Homogohanda loma uruni nga bayale biyagolaibunaga bu miniha turu howa dungulo haga hene. <sup>7</sup> Loma uruni bu delalu howa waini iba be mbira nogo sibi igini mbira egerebagi loma bialu bo delarago heba delalu waini iba maru lomabu delaga dabu ngago lenelene odo pehaga bulene nga. <sup>8</sup> Anidagua bialu alendo nogo sibi igini mendego loma bialu bo delalu balawabi waini ibabi egerebagi lomabu delarimidagua dege delolene nga. Loma ogoni irame dai helo egerebagi delarimidagua dege delaramigola Anduane Homogohanda nga baya biragola turu haluibunaga bu miniha dungulo helo ani delalimu, lalu lamini.

### *Sabada horongi lomabu delolene winigo ogo*

<sup>9</sup> Anduane Homogohanda Mosese ibugua Isaraele wali agali bu hearu lamilonaga ibuhondo lamialu lalu, Sabada horongi nogo sibi igini wangabe kirago mali mbira hene dere durubi nabi kago hondowa loma bialu bo delalimu. Ogoni heba widi bayaleore dambinigo balawa genda magi kilogarama kira olibe lininaga weli heba odo biamaga henebi waini ibabi nogo sibi kira ogolabo heba lomabu delalimu. <sup>10</sup> Sabada horo bibahendengi loma irani dai helo ogonidagua lomabu delaabo halimu. Ani bialu loma irani dai helobi waini iba odo delalu lomabu delolenebi horo bibahendengi egerebagi alendobi delaga wirimidagua delaabo halimu, lalu lamini.

### *Ege pigane ngabulo kagola lomabu delolenenaga mana winigo ogo*

<sup>11</sup> Anduane Homogohanda Mosesehondo lamiaabo halu lalu, Ege bibahende pigane ngabulo kagola ogoningi Anduane Homogohondo loma irani dai helo bu delaabo haga bilimu. Tígua irani lomabu delolene horo tagira ibugu biragola nogo bulumaga wangabe kirabi sibi wangabe mbirabi sibi igini wangabe mali mbira hene kariabi tinaga tingini dere durubi nabi bayale kago loma bialu bo delalimu. <sup>12</sup> Tígua lomabu delalu howa widi loma bini heba delalimu. Bulumaga mbira mbira lomabu delaga beremigo bialu howa widi bayaleore dambinigo aria balawa genda magi kilogarama tebira olibe lininaga weli odo biamaga hene ngaru heba lomabu delalimu. Sibi wangabe biago bo lomabu delalu howa balawa bayale genda magi kilogarama kiraha olibe lininaga weli heba odo biamaga halu lomabu delalimu. <sup>13</sup> Ani bialu sibi igini mbira mbira loma bialu bo delalu howa balawa bayale genda magi kilogarama mbira dege

dege sibi igini biaru heba lomabu delalimu. Nogo uruni irani dai helo bo delolene nga. Loma uruninaga nga baya birago nga howa Anduane Homogo ibugua turu halu miniha dungulo holebira. <sup>14</sup> Bulumaga wangabe mbira mbira bo delaramigo heba waini iba be kira odo lomabu delalu sibi mbira heba waini iba be mbirani mende gombedene odo delaga bulene nga. Nogo sibi igini biaru mbira mbirani waini iba be mbira mbira odo lomabu delaga bulene nga. Mali bibahendengi ege bibahende ngabulo kagola horo pigane haragola tígua loma ogonidagua biaabo holene nga. <sup>15</sup> Ani bialu horo bibahendengi nogo irani dai helonaga loma waini iba heba delaramiligo ogoni heba nogo meme wangabe mbira bo loma bialu tínaga ko ngago domo wahelonaga delamaga holene nga. Ege bibahendengi horo pigane tagira ibiragonaga lomabu delolenego uruni, lalu lamini.

*Mberedi Yidi Nahe Hirini Nalu Holene Horongi lomabu mulene winigo ogo  
(Loma Binigo 23.5-14)*

<sup>16</sup> Anduane Homogohanda Mosesehondo laabo halu lalu, Mali gahengenaga ege pigane horo dene (14) haragola horo ogoni Bolangua Halu Penegonaga Horo mitangi bu holene wulebira. Horo ogoningi Anduane Homogohanda Isaraele wali agali nabe bolangua halu penego mitangi bialu ibunaga mini mo yaraga halu holene nga. ✧ <sup>17</sup> Ani bialu horo nguini (15) haragola lotu lalu holene horo pigane ogoningi howa horo karu ani biaabo holene wulebirago manda bialu mberedi yidi nahe hirinigo dege nolene nga. ✧ <sup>18</sup> Horo pigane ogoni timbuni mbira ngago wali agalime biabe maru bulene nawi Anduane Homogo mitangi bialu lotu lele horo pigane ogoningi íbu ngoai holene nga. <sup>19</sup> Horo ogoningi Anduane Homogohondo lomabu migi bialu halimu. Nogo bulumaga wangabe kirabi sibi wangabe mbirabi sibi igini hungubalua karia mali mbira hangu hene karubi nogo uruni bibahende dere durubi nabi karu bo loma bialu irani dai helo delolene nga. <sup>20</sup> Nogo uruni heba widi bayale dambinigonaga balawa lomabu miaga ngagobi milimu. Balawa ogoni olibe lininaga weli heba odo biamaga howa lomabu milimu. Bulumaga mbira heba balawa genda magi kilogarama tebirabi sibi wangabe mbira biago heba balawa kilogarama kirabi <sup>21</sup> nogo sibi igini karia biaru heba balawa kilogarama mbira mbira lomabu mulene nga. <sup>22</sup> Ani bialu meme wangabe mbira ko domo wahelonaga loma bialu bo delolene nga. Loma ogoni bo delalu howa wali agali bibahende inaga deni dodo nahe bayale helonaga mana bulene nga. <sup>23</sup> Tígua horo bibahendengi egerebagi loma bialu bo delaramilidagua loma uruni heba delamaga halimu. <sup>24</sup> Loma urunidagua bu migi bialu horo karu bibahendengi ani bialu haabo kamigola Anduane Homogohanda nga baya biragola ibu turu howa miniha dungulo holebira. Ani bialu irani dai helo lomabu delolenebi waini iba odo lomabu mulenebi tígua horo bibahendengi biaabo haga wiyadagua bulene nga. <sup>25</sup> Ani bialu horo kanengi lone íbu ngoai howa i mitangi bialu lotu lalimu. Ani bialu horo ogoningi biabe maru ngago bulene nawigo nabilimu, lalu Anduane Homogohanda lene.

*Mabuha Widi Lini Denego Gandu Lolene Horongi lomabu mulene winigo ogo  
(Loma Binigo 23.15-22)*

<sup>26</sup> Anduane Homogohanda Mosesehondo lamialu lalu, Mabuha Widi Lini Denego Gandu Lolene Horo tagira ibiragola ogoningi tígua turu howa Anduane Homogohondo widi gandu laramigo lomabu milimu. Ani bialu t́ni mo mogobu howa Anduane Homogo mitangi bialu lotu lalimu. Horo ogoningi biabe tara ngaru bulene nawi. ✧ <sup>27</sup> Bulumaga wangabe kirabi sibi wangabe mbirabi sibi igini mali mbira hangu hene kariabi uruni bibahende dere durubi nabi karu haru ibalimu. Nogo uruni haru ibuwa loma bialu irani dai helo bo delalimu. Loma ogoni alego nga bayale biragola Anduane Homogohanda nga howa turu halu ibunaga bu miniha dungulo holebira. <sup>28</sup> Lomabu

✧ **28:16:** Har 12.1-13, Man 16.1-2   ✧ **28:17:** Har 12.14-20, 23.15, 34.18, Man 16.3-8   ✧ **28:26:** Har 23.16, 34.22, Man 16.9-12



mulenenaga widi dambuwa balawa bayaleme olibe lininaga weli odo biamaga hene ngago heba lomabu milimu. Ani bialu nogo bulumaga wangabe mbira mbirabi balawa genda magi kilogarama tebira heba lomabu miai howa sibi wangabe biago heba balawa kilogarama kira lomabu milimu. <sup>29</sup> Nogo sibi igini wangabe karia biaru mbira mbira heba balawa kilogarama mbira dege dege lomabu milimu. <sup>30</sup> Ani bialu nogo meme wangabe mbira ko domo wahalu wali agali Anduane Homogonaga deni dodo nahe helonaga lomabu bo delalimu. <sup>31</sup> Tígua loma uruni bo delole howa nogo uruninaga tinginini dere durubi nabi bayale kago hondowa lomabu bo delalimu. Ani buwa waini iba odo lomabu delolenebi irani dai helo lomaru bu delolenebi widi lomabu delolenebi horo bibahendengi delaga winidagua delaga bilimu, lalu Anduane Homogohanda lene.

## 29

### *Mbelo Biguli Pu Lolene Horongi lomabu mulene winigo ogo (Loma Binigo 23.23-25)*

<sup>1</sup> Anduane Homogohanda Mosese ibugua wali agali lamilo bi lamialu lalu, Ege kanenaga horo mbira haragola tígua biabe ngaru nabi wahalu lotu lole íbu ngoai halimu. Horo timbuni ogoningsi Mbelo Biguliru Pu Lolene ngagoni. <sup>2</sup> Ani íbu ngoaiho howa Anduane Homogonaga loma binigo irani dai helo delalimu. Loma ogoni alenaga nga baya biragola Anduane Homogo íbu nga howa turu haga ka. Ai tígua bulumaga wangabe mbirabi sibi wangabe mbirabi sibi igini wangabe karia mali mbira hangu hene karubi uruni bibahende tinginini dere durubi mbira nabi karu hondowa loma bialu bo delalimu. <sup>3</sup> Loma ogoni bo delalu howa widinaga balawa heba lomabu delalimu. Balawa bayaleore olibe lininaga welibi heba odo biamaga hene ngago lomabu delalimu. Balawa genda magi kilogarama tebira bulumaga wangabe biago heba lomabu delalu sibi wangabe biago heba balawa genda magi kilogarama kira heba lomabu delalimu. <sup>4</sup> Ani bialu sibi igini karia biaru mbira mbira heba balawa bayale biaru aria kilogarama mbira dege dege delalimu. <sup>5</sup> Ani bialu nogo meme wangabe mbira wali agali tinaga ko domo wahelonaga lomabu bo delalimu. Anidagua beremigome wali agali ti inaga deni dodo nahe bayaleore holebira. <sup>6</sup> Tígua uruni lomabu delalu howa loma irani dai helobi widi lomabi ege mbira mbiranaga horo mbira haragola delaga wirimidagua bu delalimu. Ani bialu horo bibahendengi loma irani dai helo lomabu delalu widi lomabu delalu waini iba odo loma bialu delo tago haga bialu delalimu. Anduane Homogohanda loma uruni nga howa turu halu ibunaga bu miniha dungulo holebira, lene.

### *Ko Domo Waholene Horo Timbuni tagira ibiragola lomabu mulene winigo ogo (Loma Binigo 23.26-32)*

<sup>7</sup> Anduane Homogohanda Mosesehondo bi lamialu lalu, Ege kanegonaga horo pini haragola tígua íbu ngoai howa i mitangi bialu lotu lalimu. Horo ogoningsi tígua tomo nane howa biabe bulene ngarubi nabi dege halimu. <sup>8</sup> Ani bialu nogo bulumaga wangabe mbirabi sibi wangabe mbirabi sibi igini hungubalua karia mali mbira hangu hene karubi uruni bibahende dere durubi mbira nabi lomabu milimu. Uruni Anduane Homogohondo lomabu mialu irani dai helo delalimu. Ani bo deledemigola Anduane Homogohanda loma uruninaga nga bayale birago nga howa turu timbuni holebira. <sup>9</sup> Ani bialu widi lomabu delolenebi loma irani dai helolenebi bu delaga bilimu. Widi bayalenaga balawa olibe lininaga weli heba odo biamaga hene ngago lomabu delalimu. Bulumaga mbirago heba balawa kilogarama tebira lomabu delalu sibi wangabe mbira biagobi balawa kilogarama kira heba lomabu delalimu. <sup>10</sup> Nogo sibi igini hungubalua karia biaru mbira mbira biaru heba balawa kilogarama mbira dege dege lomabu delaga bilimu. <sup>11</sup> Ani bialu nogo meme wangabe mbira wali agalinaga ko ngaru domo wahai helonaga loma bialu bo delalimu. Anidagua biragome wali agali ti Anduane

Homogonaga deni dodo nahe bayale holenaga loma uruni bu delaga dege bulene nga. Loma horo bibahendenaga lomabu delaga ngago irani dai holene lomabi widi lomabu delolenebi waini iba odo lomabu delolenebi bibahende uruni beramilidagua lomabu miai halimu, lene.

*Anda Nemandaha Palu Holene Horongi lomabu mulene winigo ogo  
(Loma Binigo 23.33-44)*

<sup>12</sup> Anduane Homogohanda Mosesehondo bi lamiaabo halu lalu, Ege kanenaga horo nguini (15) haragola tí mo ngoai howa Anduane Homogo mitangi bialu lotu lalimu. Tígua lotu lolene ogoni horo timbuni karia ngagoha mo ngoaiho howa ani lalu halimu. Horo uruningi biabe damenego bibahende nabi halimu. <sup>13</sup> Horo karu uruninaga horo pigane haragola Anduane Homogohondo loma urualeme lomabu mialu nga bayale biragola ibugua nga howa ibu miniha turu holebira. Tígua loma uruni nogo bulumaga wangabe daluaru haleria (13) bo lomabu mialu sibi wangabe dalua kira bo lomabu mialu sibi igini wangabe hongolo deria (14) mali mbira hangu heneru lomabu mialu bo delalimu. Nogo uruni bibahende dere durubi nabi bayale karu hondowa haru halu ibugu bilimu. <sup>14</sup> Ani bialu widinaga balawa bayale ngarume olibe lininaga weli heba biamaga hene ngago aria lomabu milimu. Bulumaga mbira mbira heba balawa kilogarama tebira dege degebi sibi wangabe mbira heba balawa kilogarama kirabi <sup>15</sup> nogo sibi igini hongolo biaru mbira mbira heba balawa genda magi kilogarama mbira dege dege lomabu mialu waini ibabi odo loma bialu delo tago halimu. <sup>16</sup> Ani mialu meme wangabe mbira ko domo wahelonaga loma bialu bo delalimu. Horo bibahendengi lomabu delaga ngagobi heba delamaga halimu. Loma uruni irame dai helo lomabu delolenebi widi lomabu mulenebi waini iba odo mulenebi uruni biai halimu.

<sup>17</sup> Horo karia biarunaga horo mende haragola nogo bulumaga wangabe dalua homberia (12) biarubi sibi wangabe kirabi sibi igini wangabe deria (14) mali mbira hangu hene biarubi uruni bibahende dere durubi mbira nabi bayale karu loma bialu bo milimu. <sup>18-19</sup> Loma urunibi heba horo piganengi lomabu mini biaru muleberamidagua mia dege bilimu.

<sup>20</sup> Ani bialu horo tebonengi bulumaga wangabe bearabi (11) sibi wangabe kirabi sibi igini wangabe deria (14) mali mbira hangu heneru uruni bibahende dere durubi mbira nabi kago hondowa lomabu milimu. <sup>21-22</sup> Loma urunibi heba horo piganengi lomabu mini biaru muleberamidagua mia dege bilimu.

<sup>23</sup> Horo manengi bulumaga wangabe pirabi sibi kirabi sibi igini hungubalua deria (14) mali mbira hangu hene karubi uruni bibahende dere durubi mbira nabi kago loma bialu bo delalimu. <sup>24-25</sup> Loma urunibi heba horo piganengi lomabu mini biaru meramilidagua mia dege bilimu.

<sup>26</sup> Ani bialu horo dauningi bulumaga wangabe dirabi sibi wangabe kirabi sibi igini wangabe deria (14) mali mbira hangu hene karubi uruni bibahende dere durubi mbira nabi karu loma bialu bo milimu. <sup>27-28</sup> Loma urunibi heba horo piganengi lomabu mini biaru meramilidagua mia dege bilimu.

<sup>29</sup> Horo waraganengi tigua bulumaga wangabe halirabi sibi wangabe kirabi sibi igini hungubalua deria (14) mali mbira hangu hene karubi uruni bibahende dere durubi mbira nabi karu loma bialu bo milimu. <sup>30-31</sup> Loma urunibi heba horo piganengi lomabu mini biaru meramilidagua mia dege bilimu.

<sup>32</sup> Ani bialu horo kanengi bulumaga wangabe kariabi sibi wangabe kirabi sibi igini wangabe deria (14) mali mbira hangu hene karubi uruni bibahende dere durubi mbira nabioire karu hondowa loma bialu bo mulene nga. <sup>33-34</sup> Loma urunibi heba horo piganengi lomabu mini biaru meramilidagua mia dege bilimu.

✧ 29:12: Har 23.16, 34.22, Man 16.13-15

<sup>35</sup> Ani bialu horo halini haragola biabe maru ngaru nabi wahalu Anduane Homogo mitangi bialu lotu lole ibu ngoai halimu. <sup>36</sup> Ani ngoai howa tigua Anduane Homogonaga tomo lomaru bu milimu. Loma uruninaga nga bayaleore biragola Anduane Homogo ibu nga howa turu timbuniho holebira. Anigo tigua bulumaga wangabe mbirabi sibi wangabe mbirabi sibi igini wangabe dege karia mali mbira hangu hene karubi uruni bibahende irani dai helo loma bialu bo delalimu. Nogo loma uruni bibahendeore dere durubi mbira nabi karu loma bialu bo mulene nga. <sup>37-38</sup> Loma urunibi heba horo piganengi lomabu mini biaru meramilidagua mia dege bilimu.

<sup>39</sup> Anduane Homogonaga horo timbuni maru ibu mitangi bialu ibunihondo lotu lolene tagira ibirangi lomabu mulenenaga mana ogoni talialu bilimu. Irani dai helo lomabu mulenebi widi lomabu mulenebi waini iba odo loma bulenebi Anduane Homogola ho gimbu bulenaga lomabu mulenebi uruni bibahende horo timbuni ibunaga dabobagiho wini nganghi anidagua bialu halimu. Loma uruni bu mialu kamingi dege ibuhondo mule lalu lowini ngarubi tininaga hameme lomabu mulene winiyaguabi uruni bibahende lomabu migi bilimu, lene.

<sup>40</sup> Bi uruni bibahende Anduane Homogo ibugua Mosesehondo lamiyagola Mosesehanda hale hai howa Isaraele wali agali bu hearuhondo lamiai hene.

## 30

### *Wali agalime buleore lalu mana lowinigo ogo*

<sup>1</sup> Mosesehanda Anduane Homogonaga bi uru agali haguane bu hearuhondo lamini.

<sup>2</sup> Ibugua lalu, Mbiralime ibunaga mbirale ngaru ale mbira Anduane Homogo muleore lalu lo winiyaguabi mbirale mbira nabuleore lalu bi hongohe lo winiyaguabi nde ibugua bule lalu lowiyago habo nale buleneore nga.✧

<sup>3</sup> Wandari mabuage mbira ibu aiya aba andaga biraga biruwa ibugua mbirale mbira Anduane Homogo muleore lalu bi lo wiyaguabi mbirale mbira nabuleore lalu lowiyaguabi ogoni bayaleore mbira bulebira. <sup>4</sup> Wandari ogoni ibugua mbirale mbira bule lalu lo wiyadagua bulene nga. Ani bulene ngagoyu ibu abahanda wandari biagonaga bi lowiyago hale howa ani bulene nawi manda biya. <sup>5</sup> Ani manda buwa ibu abahanda wandari biagohondo, Buleore lalu lowirigo nabibe, layagua nde wandari biagome lowiyago waholene karulape nga. Ibugua ogo bule lalu bi lowiyago ibuni wahayago ndo ibu abahanda mo wahaya. Anidagua biyagome wandari ogoni biyagonaga Anduane Homogohanda domo waholebira.

<sup>6-7</sup> Wandari mbira agali nape hibaria biruwa ibunaga minime ogoaleore berogoni lo mitangi bialu mbirale mbira nabuleore lalu bi lo wialubi bame dege lope howa buleore lalu lowiyaguabi layadagua bulene nga. Mani ibu agali piyagua ibu agalinime ibunaga bi lowiyadago hale howa nakarulapego manda buwa <sup>8</sup> ibu agalini haragome wali ogoni ibunaga bi lowirago nabi wahabe layagua nde waholene karulape. Ani wahayagonaga ko ngago Anduane Homogohanda domo waholebira.

<sup>9</sup> Wali mbira ibu agalini homene dalo bereneyaguabi ibu agalinime wahene bereneyaguabi ibugua mbirale mbira buleore lalu bi lowiyaguabi mbirale mbira nabuleore lalu lowiyaguabi lo wiyadagua biai holebira.

<sup>10</sup> Wali mbira ibu agali one biruwa ibugua mbirale mbira buleore lalu bi lowiyagua nde ogoni bayaleore. <sup>11</sup> Ibugua bi lowiyadagua biaiore holene nga. Ani lo wiyago hale howa ibu agalini ibugua wali ogonime lowiyago bayale ndo manda buwa <sup>12</sup> ibugua bi lowirangiore mo wahalu nabibe layagua nde wali biagome bule lalu lowiyago nabi waholebira. Anidagua biragonaga ko ngago ibunime ndo ibu agalinime mo wahayagome Anduane Homogohanda domo waholebira. <sup>13</sup> Wali ogoni ibugua bi lowiyago nabilo lalu ibu agalinime dege lolebira. <sup>14</sup> Anigo ibu agalinime wali biagohondo bi lowiyago

✧ 30:2: Man 23.21-23, Md 5.33

waha nale hayagua nde horo mendengi wali biago ibugua bule lalu lowiyago layadagua bulebira. Ani bialu kagola nde ibu agalini biagome bi mbira nale hayago mitangi bialu ibu oneme bule lalu lowiyaruni talialu biaiore helonaga ibu one mo hongo haradagua bulebira. <sup>15</sup> Anigo wali biago ibu bule lalu bi lowiyago bialu karia ibu agalinime nabule lalu layagua nde wali biago ibu bule layago waharagome ko bini nga. Ko ogoni wali biago ibunime bero lalu bini ndo agali biago ibugua mo bia hene ngagome ibuni pani nolene wulebira, lene.

<sup>16</sup> Mbirale mbira bule lalu lowinigo bulenenaga mana ogoni Anduane Homogohanda Mosesehondo bi lamini. Bi ogoale buleore lalu wali agali one bedarumebi wali hibaria berene bedarumebi wandari mabuage ibu aiya aba andaga berene bedarumebi lo wulenenaga mana ogoni.

## 31

### *Isaraealime Midianali baba wai binigo ogo*

<sup>1</sup> Anduane Homogo ibugua Mosese lamialu lalu, <sup>2</sup> Midiana hameigini padagome Isaraele wali agali tihondo mana ko biyagonaga pani mulene nga. Tigua Midianali karu baba wai bialu ti wayali holeberami. Ani biai halu dai beramigola Mosese i homolebere.

<sup>3</sup> Ani layagola Mosesehanda Isaraele wali agali lamialu lalu, Wai biagane ale mo yalu Midianali bu karu baba wai bule pudaba. Midianali karume mana ko biyagonaga pani mialu tigua Anduane Homogohanda ani bo wahai hole pilimu layadagua pudaba.

<sup>4</sup> Isaraele hameigini mbira mbira haga bidamidagua agali wai bule pelo daosini mbira (1,000) dege dege dabalul pelalimu, lene.

<sup>5</sup> Ani layagola Isaraele hameigini mbira mbira hayadagua agali daosini homberia (12,000) bibahende wai bule pelo mo manda manda bu helene. <sup>6</sup> Ani manda manda bialu Mosesehanda loma binigo mo miaga Eleasa ibu igini Piniasa ibugua agali uruni haru helo ti haru pudaba lene. Piniasa ibugua Balai Andaha wiaru bibahende mo yuwa handayaho halu agali wai bule pelobi wai bialu dai bilobi ololenaga mbelo biguli pulagane wiago mo yalu ibini. <sup>7</sup> Ani bialu Anduane Homogo ibugua Mosesehondo bilimu lalu lamiyadagua tigua puwa Midianali hearu baba wai bialu agali biahende bo wahai hene. <sup>8</sup> Bo wahai halu Midiana dindiha kini duria henego mini uru Ebi Legeme Sua Hua Leba imaru henego uruni bibahende homelo bo wahalu dai bini. Tigua Bero igini Balamabi homelo bo wahalu bini.

<sup>9</sup> Isaraele ami agali biarume Midiana agali bo wahayarunaga wali waneigini biru wiaru ti bibahende haru ibini. Ani bialu nogo bulumagabi sibi bu hearubi haru halu dabudabu bayale wiarubi bibahende mo yalu piyai hene. <sup>10</sup> Ani biai halu Midiana wali agalinaga tanobi balai anda bu hearubi bibahende bo heda hai hene. <sup>11</sup> Ani bialu mani Midiana wali waneiginirubi bulumaga sibi bu hearubi haru halu dabudabu wiarubi <sup>12</sup> mo yai halu balai anda bu henegoria Mosese Eleasalabi wali agali marubi ti hearia dai bini. Dindi ogoni Moaba wali agalinaga dindi iba Yodana angha Yarigo tano kaware winigoria daibu hene.

### *Ami agaliru ti dai binigo ogo*

<sup>13</sup> Mosese Eleasalabi Isaraele wali agalinaga agali haguane hearubi ti bibahende ami agali wai bialu dai biyaru lola hole pene. <sup>14</sup> Tigua ami agali haru bamba haga agali haguane ami agali daosini mbira (1,000) haru haga hearubi handari mbira (100) haru bamba haga hearubi wai howa dai biyaru harigani lola howa Mosese ibugua ti bibahendehondo keba howa lai lene. <sup>15</sup> Ibugua tihondo keba howa hale halu lalu, Wali haru kamiruni homelo bo wa nahe aginaga haru ibirimibe. <sup>16</sup> Ina Pero dindini hemangi walime Balamanaga bi layago hale hayagome inanaga wali agali bu hearu tigua Anduane Homogohondo erembira miyagoni. Anidagua biyagome Anduane

Homogonaga wali agali hearu warago ko ibiyagome ti bo wahai hayagoni ndobe. ✧ <sup>17</sup> Ani biyago tigua agali baba mandagi paliaga wali bedarubi igiri emene karubi bibahende homelo bo wahai hadaba. <sup>18</sup> Ani bialu wandari emenebi wandari wahe agali baba mandagi napalene bedarubi bibahende bo wa nahe tini dabu bule haru hadaba. <sup>19</sup> Ani bialu ami agali kamiru tigua agali homene tingini ngago ela hene kamiyaguabi agali wai bialu homelo bo wahene kamiyaguabi uruni ale bini kamiru ti balai anda bu karuha anda nape horo karu tagira ho halimu. Ani howa horo tebonengibi kanengibi tinibi wali haru harimidarubi ti bibahende Anduane Homogonaga deni dodo nahe holenaga mana biaga ngadagua bialu howa bayale holeberami. <sup>20</sup> Ani bialu tinaga aga ngamirubi bulumaga dongoneme mbirale wabini ngamirubi nogo meme irinime mbirale wabu ngamirubi mbirale irame wabini ngamirubi bibahende Anduane Homogonaga deni dodo nahe wilonaga mana biaga ngadagua bialu halimu, lalu Mosesehanda lene.

<sup>21</sup> Loma binigo mo miaga Eleasahanda agali wai bu pene dai biyaruhondo lamialu lalu, Anduane Homogohandaibunaga bi Mosesehondo lamiyadaruni baya hangu hale halu bilimu. <sup>22-23</sup> Mbirale irame dalu do ereba naholeneru ngolobi silibabi aeanebi gababi boronosibi bibahende dodo para kago irame dalu bayale helo delalimu. Ani bialu mbirale maru irame dalu ereba holene damenego bibahende dodo nahe bayale wilo ibame wayawaya bo wahai halimu. <sup>24</sup> Horo kanengi tininaga agabi wayawaya biai halu Anduane Homogonaga deni dodo mbira nahe howa tinaga balai anda karuha dai bilimu, lene.

*Isaraealirume mbirale wai bialu howa mo yu ibiyaru talebu ta henego ogo*

<sup>25</sup> Anduane Homogohanda Mosese lamialu lalu, <sup>26</sup> Inibi Eleasabi Isaraele agali haguane bu karubi tigua ami agali biarume wai bialu howa wali waneiginibi nogobi dabudabubi bibahende mo ya haru ha biyaruni dagalabe. <sup>27</sup> Ani dagalalu bibahende mo tale buki buwa halu mbirago ami agali uruni tini mialu halu mendego wali agali andaga hayadaru tihondo mibe. <sup>28</sup> Ani bialu mbirale ami agali bu karu mulebereru aria maru Anduane Homogo inihondo dagisi ngulene nga. Wali agali garabaya helo haru ibirimiru handari duria (500) dege dege haragola mbirago ini ngulene nga. Ani bialu bulumagabi sibi karubi meme karubi bibahendenaga handari duria (500) dege dege kagola uruni aria mbira mbirago ini ngibe. <sup>29</sup> Ai mbirale uruni inihondo ngulebereru loma binigo mo miaga Eleasa mibe. <sup>30</sup> Ani bialu mbirale dabudabubi wali agali garabaya helo haru ibirimirubi bulumagabi sibibi memebi uruni wali agali andaga hayadarunaga talebu miriru bibahende pira duria (50) dege degenaga mbira mbira yamialu Anduane Homogo ininaga dagisi ngialu agali inaga Balai Anda handayaho haga Libai hameigini karu tihondo mulene nga, lene. <sup>31</sup> Anidagua lamiyagola Mosese Eleasala libugua Anduane Homogohanda ogodagua bilibu lalu Mosese lamiyadagua biai hene.

<sup>32-35</sup> Ami agali biarume wai bialu mbirale mo yalu ibiyadaruni aria nogo sibi daosini dege handari waragariani pira kariani duria (675,000) bibahende haru halu ibini. Bulumaga daosini dege pira kariani kira (72,000) bibahende haru halu ibini. Ani bialu nogo dongi daosini dege pira waragariani mbira (61,000) haru ibalu wandari mabUAGE agali baba mandagi nahene daosini dege pira tebirani kira (32,000) bibahende haru halu ibini. Ani bialu tinaga waitigi bo wahaga biyarunaga dabudabu yaribi bayale damene wiaru mo yalu ibalu bini. <sup>36-40</sup> Ami agali biaru tigua nogo sibi daosini dege handari tebirani pira tebirani karia halu handari duria (337,500) bibahende haru hai henego uruni mo tale bialu handari waragariani pira kariani duria (675) bibahende Anduane Homogohondo dagisi mini. Tigua bulumaga daosini dege pira tebirani waragaria (36,000) bibahende haru ibiyaru tale bialu pira kariani kira (72) Anduane Homogohondo dagisi mini. Ani bialu nogo dongi daosini dege pira tebirani



handari duria (30,500) bibahende haru ibiyaru tale bialu pira waragariani mbira (61) Anduane Homogohondo dagisi mini. Ani bialu wandari mabuage agali baba nahene daosini dege pira mbirani waragaria (16,000) bibahende haru halu ibiyaru tale bialu pira tebirani kira (32) Anduane Homogohondo dagisi mini. <sup>41</sup> Mosesehanda uruni bibahende Anduane Homogo ibunime bibe lalu lamiyadagua bialu mbirale dagisi mini uruni bibahende Eleasa mo miai hene.

<sup>42-46</sup> Mosese ibugua uruni bibahende ami agali biaru talebu ta hayadagua dege wali agalirubi ani mo talebia haga bialu migi bini. Wali agali ti nogo sibi daosini dege handari tebirani pira tebirani karia lalu handari duria (337,500) bibahende mialu bulumaga daosini dege pira tebirani waragaria (36,000) mo mialu nogo dongi daosini dege pira tebirani handari duria (30,500) bibahende mini. Ani bialu wandari daosini dege pira mbirani waragaria (16,000) bibahende mini. <sup>47</sup> Ani bialu Mosese ibugua uruni bibahende tale bigi bialu wali agali garabaya hayaru pira duria (50) hayago mbira yamialu nogo sibi bu hearubi bulumaga hearubi dongi hearubi bibahende pira duria (50) haga biyago mbira yamigi bialu Libai aria Anduane Homogonaga Balai Andaha biabe bialu haga hearu mo mini. Anduane Homogohanda lamialu bibe layadagua bini.

<sup>48</sup> Ani biai heagola agali maru ami agali daosini mbira (1,000) haru bamba haga hearubi handari mbira (100) haru bamba haga hearubi tigua Mosese hearia puwa <sup>49</sup> lalu, Agali haguane-o iname agali haru harimaru daga lamaga bialu hemaria mbi-raligo bo ereba nahe bibahende haiore kama, lalu lamini. <sup>50</sup> Áyu iname gi pagida ngolome wabimirubi ma gaguabi haleirabi yári tara tarabi bibahende ina hangu hangu mo yaga birimadaru yalu eberemagoni. Inanaga waitigi giha hemaria Anduane Homogohanda ina mo wiyagonaga turu howa ibuhondo mialu ibugua ina handayaho haabo helonaga ibuhondo mule yalu eberema, lene. <sup>51</sup> Ani lalu miyagola Mosese Eleasala libugua ngolome wabini yári uruni yamini. <sup>52</sup> Ngolo uruninaga genda magi kilogarama handari kira (200) mini. <sup>53</sup> Anigo ami agali haru haga ndo bu hearu tigua mbirale mo yinidaru yalu íbu nabi tini mo yu hene. <sup>54</sup> Ani mo yalu ibiyaru bibahende Mosese Eleasalame mo yalu puwa Anduane Homogonaga Balai Anda heagoha mo wini. Anduane Homogohanda Isaraele wali agali mitangi bialu handayaho helonaga ani mo ngelene.

## 32

*Isaraele hameigini maru iba Yodana ange ederahayagi ni tagira ibiragoha heneru ogo (Mana Loyane 3.12-22)*

<sup>1</sup> Lubene hameiginibi Gada hameiginibi tinaga nogo bulumaga dewaore hinu hene. Ani hinu howa tigua handalu hemiria dindi bayale datani anda haga kira Yasere Gileadala wiaria hendene. <sup>2</sup> Ani hondowa tigua Mosese Eleasabi Isaraelenaga agali haguane bu hearubi hearia pene. Tigua puwa lalu, <sup>3-4</sup> Anduane Homogohanda ina biamogo biyagola wai bialu dindi karularimago bayaleore mbira ngagoni. Dindi ogoniha Adarodo tanobi Dibono tanobi Yasere tanobi Nimira tanobi Hesebono tanobi Eleale tanobi Sibima tanobi Nebo tanobi Beono tanobi wiai ka. Dindi o ngago ina nogo bulumaga dewa hinu howa dindi bayale ogoniha datani bayaleru anda haga wiaria hondo kama. <sup>5</sup> Ani kamago ai dindi ogoni ina tu wa ngilimulo hamelo kama. Ina iba Yodana domaede lalu edegohayagi hole pudaba lalimulo hame nale kama, lene.

<sup>6</sup> Ani layagola Mosesehanda Lubene hameigini Gada hameiginilahondo bi hongo howa ladai bialu lalu, Irane aginaga tí hameigini maru karu wai bu poragola tí ogoria hole manda birimibe. <sup>7</sup> Tigua Isaraele hameigini maru karunaga mini mo ko holene aginaga manda birimibe. Tí iba Yodana domalu dindi Anduane Homogohanda ngule-bero layagoha pole hame nale kamibe. Tigua anidagua bule harimidago aginagabe. <sup>8</sup> Abale ina tí aba biaru Kadese Banea dindi wiagoria howa diri hondole pudaba larungi

tiguabi nde anidagua dege biyagoni.✧ <sup>9</sup> Abale tigua pialu dindi bugubugu Esegolo wiagoha hangu pialu dindi hondo porama layagoha piai nahe wahalu dai biya. Ani dai buwa tigua Isaraeleali bu hearu mo gi hayagola inanaga dindi Anduane Homogohanda ngule lalu lowiyago waharimagoni. <sup>10</sup> Horo ogoningi Anduane Homogohanda bi mbira hongohe lowialu lalu,✧ <sup>11</sup> Agali mali pira kira (20) hene hearubi agali marubi Iyibi dindiha howa ibini hearu tigua ihondo mini mbiraore nawi howa ini talima naibiya. Ani biyagonaga ina heneneore larogo agali uruni aria karu mbira dindi Abarahamabi Aisagabi Yagababi tihondo mule lalu lowinigoha naanda polebiraore, laya. <sup>12</sup> Dindi ogoniha anda polebirago agali kira Kenasa hameigini aria Yabune igini Kalebebi Nunu igini Yosubi libugua Anduane Homogohondo mini mbiraore hongohe wu howa ibu talima ibalu haabo haga henego libu hangu dindi ogoniha anda polebira laya, lalu Mosese ibugua lamini.

<sup>13</sup> Mosesehanda laabo halu lalu, Anduane Homogo ibugua keba timbuni ho howa wali agali ko biaga uruni homai helonaga mali pira mariani (40) dindi ko yobi wali agali nahaga heagoha ibaga hangu bialu haabo helene. <sup>14</sup> Ani bialu henego ai áyu tíguabi nde tí abahanda mana ko bialu henedadagua dege bule bialu harimida. Ani bulenaga bialu harimidagome tigua Anduane Homogo mo keba haramigola ina Isaraele wali agali baba keba helo mo keba harimida. <sup>15</sup> Áyu Lubene hameiginibi Gada hameigini bu kamirubi tigua Anduane Homogonaga bi ledago mo wahalu ibu talima napirimiyagua nde Anduane Homogo lone mo keba haramigola ina dindi ko yobi wali agali nahaga ngagoha haru ibaga bialu mo ko holobada. Anidagua biyagua tigua biako heneme ani bulubada, lene.

<sup>16</sup> Bi ogoni layago hale halu tigua Mosese hearia puwa lalu, Iname nogo sibi helonaga pabe bia halu tanoha wali waneiginiru bayale berelo ege pabe ala bia holomaya bule pudaba la. <sup>17</sup> Anidagua biai halu mani iname wai haru bamba halu puwa ina hamene karu heba pialu wai bialu ina damene uruni holene ngagoria helo iname waitigi uruni bope hole polomaya karulapebe. Ina wali waneiginiru ti tano bayale ege pabe bu mabubiha helalu pirimiyagua nde waitigi agali dindi ogoniha karume anda ibuwa mo ko naholebira. <sup>18</sup> Inanaga damene bu karu tinaga dindi mo wialu uruniha karulape kagola inabi dai bialu inanenaga dindini bayale holeberema. <sup>19</sup> Inanaga dindi iba Yodana doma orayagi ni tagira ibiragoha ngamagoni karulape. Ina damenenaga dindi iba doma ederayagi ngago iname mulene nawi, lene.

<sup>20</sup> Ani layagola Mosesehanda ladai bialu lalu, Tigua bi ogoni heneneore larimiyagua nde tinaga ami agali hayadaru ho manda bialu tí wai bu pole Anduane Homogonaga deni ho manda bilimu. <sup>21</sup> Tinaga ami agali bu karu ti bibahende Anduane Homogo andaneha hai howa iba Yodana domaede halu puwa wai bialu Anduane Homogohanda tinaga waitigi bope halu <sup>22</sup> tinaga dindi karulole wai bilimu. Ani biai halu tigua dai buleberemigo irane Anduane Homogohanda tí biamogo biragome tinaga hameigini biaru dindi mo wia halu dai buleberemi. Anidagua birimiyagua nde Anduane Homogohanda tí dindi iba Yodana doma orayagi ni tagira ibiragoha ngago tí holene karulape lelebira. <sup>23</sup> Áyu ina tihondo hongo howaore larogo tigua bi lowirimigo mo habo larimiyagua nde Anduane Homogohondo ko tigua bini wulebira. Anidagua birimiyagua Anduane Homogohanda tinaga ko birimigo mitangi bialu tí pani ngialu mo ko holene wulebirago manda bilimu.✧ <sup>24</sup> Ai karulapego tigua dai bialu tinaga nogo wali waneiginiru berelonaga pabe bialu tanorunagabi ege pabe bule pudaba. Uruni biai halu tinime bule lalu bi lowirimigo bialu wai pole áyu pudaba, lene.

<sup>25</sup> Ani layagola Lubene hameigini Gada hameiginibi tigua Mosesehondo lalu, Agali haguane-o iname ina langeregonidagua buleberema. <sup>26</sup> Inanaga one waneiginirubi

nogo bulumaga sibi karubi bibahende Gileada dindinaga tano uruniha bereloleberema. <sup>27</sup> Ai ina bibahende Anduane Homogohanda haru kagola iname wai bule poleberema. Iname iba Yodana domaede halu ina laridagua wai bule poleberema, lene.

<sup>28</sup> Ani layagola howa Mosesehanda loma binigo mo miaga Eleasabi Yosubi agali haguane hearubi tihondo bi maru lamigi bini. <sup>29</sup> Mosesehanda lalu, Agali Gada hameiginirubi Lubene hameiginirubi tigua Anduane Homogonaga bi layago hale halu ti heba mandagi iba Yodana domaede halu tinaga waitigi karu baba wai bule pirimiyagua nde karulape holebira. Tigua wai bialu tinaga waitigi bope halu dindi ogoni karularimiyagua Gileada dindi ogoni Gada hameiginibi Lubene hameiginibi ti dindi ogoniha haabo helo mo milimu. <sup>30</sup> Anigo tigua iba Yodana domaede halu ti haru mandagi wai bule napirimiyagua ti dindi ogoniha nahe ti haru mandagi Kenana dindiha hole poleberemi, lene.

<sup>31</sup> Ani layagola Gada hameiginibi Lubene hameiginibi tigua ladai bialu lalu, Ogonidagua karulapego Anduane Homogohanda layadagua buleberema. <sup>32</sup> Anduane Homogoibunime ina haru helowa iname iba Yodana domaede halu wai bu poleberema. Ani bialu dai buwa mani inanaga dindi iba Yodana doma orayagi ni tagira ibiragoha holeberema, lene.

<sup>33</sup> Ani lalu Mosesehanda dindi Amora wali agalinaga Kini Sihononaga wiagobi Basana wali agalirunaga Kini Ogonaga dindi wiagobi heba tano uruniha wiarubi dindi emene wiarubi uruni bibahende Gada hameigini hearubi Lubene hameigini hearubi Manase hameigini halu mende hearubi tinaga wilo mo wiabagi ho ngelene. <sup>34</sup> Gada hameigini tigua tano ege pabe hongohe ala gialapaya bu wini wiaru mo tiga bialu bini. Tigua Dibono tanobi Adarodo tanobi Aroe tanobi <sup>35</sup> Adodosobana tanobi Yasere tanobi Yogobeha tanobi <sup>36</sup> Bedenimira tanobi Bedeharana tanobi bibahende biadai bigi bialu hene. <sup>37</sup> Ani bialu Lubene hameigini bu hearu tigua Hesebono tanobi Eleale tanobi Kiriadaimi tanobi <sup>38</sup> Nebo tanobi Balameono tanobi biadai bigi bialu hene. Tigua Balameono tano mini mo aribia halu mini mende wini. Ani bialu tigua Sibima tano lone biadai bialu hene. Anidagua bigi bialu tano bibahende tigua biatiga bigi bialu mini mende wia aribia haga bini.

<sup>39</sup> Ani bialu Manase igini Magiri aria hearu tigua Amoroali baba wai bini. Wai bialu howa tigua Amoroali biaru bo batagi halu tinaga dindi karulene. <sup>40</sup> Ani biyagola Mosesehanda dindi Gileada ogoni Magiri hameigini hayadaru mo miyagola tinaga wali agali dindi ogoniha hene. <sup>41</sup> Ani biyagola Manase hameigini Yairi aria tigua dindi maru wiaruha pialu wai buwa dindi maru karulaga bialu dindi uruni mini Yairi Dalu laga wini. <sup>42</sup> Ani bialu agali Noba mbira henego ibugua ibunaga agali bu hearu haru halu puwa Kenada tano wiagoha wai bialu tanobi dindi emene wiapara para bu wiarubi bibahende karulai hene. Ani karulai howa dindi uruni mini Noba ibuninaga mini wia aribia haga bini.

### 33

#### *Isaraele ti pugu biniru dindi mini wigi bidaru ogo*

<sup>1</sup> Mosese Aronola libugua Isaraele wali agali haru halu ti Iyibi dindi yu wahalu tagira puwa balai anda bu haga bima pugu bini. <sup>2</sup> Anduane Homogohanda Mosesehondo bibe lalu lamiyadagua dindi ti balai anda bu haga binidaru mini gilibu wigi bini. Dindi ti haga binidaruni ogodagua.

<sup>3</sup> Isaraele wali agali ti ege mbiranaga horo nguini (15) hayagola horo ogoni Anduane Homogohanda ti nabe Bolangua Halu Penegonaga lalu horo mendengi ti Iyibi dindi yu wahalu tagira pene. Anduane Homogohanda ti baya hangu haru heagola tigua dindi mini Lamesese yu wahalu tagira pene. Ani piyago Iyibi wali agali ti de hendeaore tagira

✧ 32:28: Yos 1.12-15

pene. <sup>4</sup> Horo ogoningi Iyibi wali agali ti tinaga igini wahene Anduane Homogohanda bo wahayago hora halu hea handala pene. Anduane Homogohanda Iyibinaga dama bi pupu wiaga wiaru bope haga howa ibuni Anduane Homogooore kogoni lalu ibunaga hongo tihondo mo walia halu anidagua bini.

<sup>5</sup> Isaraele wali agali ti Lamesese dindi wahalu Sugodo tano wiagoria tagira pialu balai anda bu hene. <sup>6</sup> Ani buwa ogoriani halu puwa dindi ko yobi iba dalu naibaga wiagoria dindi mini Edama wiagoria puwa balai anda bu hene. <sup>7</sup> Ani bialu tigua Edama wahalu pialu dindi mini Pihahirodo anda pene. Pihahirodo dindi ogoni Balasebono ni tagira ibiragohayagi wini. Ogoria anda pialu Migidolo tano kaware wiagoria tagira puwa balai anda bu hene. <sup>8</sup> Ogoriani howa Pihahirodo dindi ogoni wahalu iba Solowara Daramabi laga bereago domalu Sua dindi ko yobi iba dalu naibaga wiagoha tagira pene. Ani bialu tigua horo tebiri pu dege bialu dindi mini Mara wiagoria tagira pialu ogoriani balai anda bu hene. <sup>9</sup> Mani Mara wahalu pialu Elimi dindi wiagoria tagira puwa tinaga balai anda bini. Elimi ogoriani iba hambiaga uli homberia (12) wialu ira mini dedi pira karia (70) halu biagoria hene.

<sup>10</sup> Mani tigua Elimi yu wahalu puwa iba timbuni Solowara Daramabi bereagoria tagira puwa ogoriani balai anda bu hene. <sup>11</sup> Ani bialu iba Solowara Daramabi bereago yu wahalu dindi ko yobi iba dalu naibaga mini Sene wiagoria anda puwa ogoriani balai anda bu hene. <sup>12</sup> Ani buwa Sene ogoni wahalu puwa dindi mini Doboga wiagoria tagira puwa ogoriani balai anda bu hene. <sup>13</sup> Ani bialu nde Doboga wahalu puwa Alusu wiagoria tagira pialu ogoriani balai anda bu hene. <sup>14</sup> Mani ti Alusu wahalu puwa Lebidimi wiagoria tagira puwa balai anda bu hene. Dindi Lebidimi ogoriani iba nolene mbira nabereore wiagoria pu hene.

<sup>15-37</sup> Mani Lebidimi ogoni wahalu puwa balai anda bu haga binidaru dindi ko yobi iba dalu naibaga Sainai wiagoriabi Kibirodohadababi Haserodobi Lidimabi Limonobere-sebi Libinabi Lisabi Keheladabi Hari Sebe heagohabi Harada dindibi Magahelodo wiagohabi Tahada wiagoriabi Tera wiagoriabi Midiga dindi wiagoriabi ani bialu Hasamonabi Moserodobi Beneyaganabi Hohagidigada wiagoriabi Yodobada wiagoriabi Abarona wiagoriabi Esiongebe tano wiagoriabi pialu ani bialu Sene dindi ko yobi iba dalu naibaga wiagoriabi pene. Sene ogoni Kedese wiagoha wini. Maniore Hari Ho heagoha Edomo dindi gibuni wiagoria tagira puwa balai anda bini.

<sup>38-39</sup> Dindi ogoriani heangi ti Iyibi dindi wahalu ibinigo mali pira maria (40) hayagola ege dauninaga horo mbirangi loma binigo mo miaga Arono ibugua Anduane Homogohanda bibe lalu lamiyadagua bialu ibu Hari Ho heagoha irigi howa homene. Ibu aiyahanda taba hanayangi howa hama ibinigo mali handari mbirani pira kirani tebira (123) halu homene.✧

<sup>40</sup> Dindi ogoriani pu hemigola Kenana dindinaga abene unurahayagi dindi mini Arada wiagonaga kini heago ibugua Isaraele wali agali ibira layago hale hene.✧

<sup>41-49</sup> Isaraele wali agali ti Hari Ho heago helalu puwa balai anda bigi bima pugu binigo dindi mini Salamona Punono Obodo Abarimibi dindi uruniha pene. Abarimi ogoni Moaba dindiha tano mbira giallo payabu winigoria pene. Ani bialu Dibonogada tanobi Alamono Dibiladaimi dindibi Hari Nebo heagoria kawareni Abarimi hari hearuhabi pene. Ani bialu Yarigo wiagoria kaware iba Yodana peago doma ederahayagi tano kira mini Bedeyasimodobi Sidimi hengene wiagoha dindi uli uli bayale wuyu peagoha pugu bini. Ani bialu dindi ulini bayale wuyu peago bibahendehe balai anda bu haga bima pugu dege bini.

*Anduane Homogohanda dindi tale bulene mana laminigo ogo*



<sup>50</sup> Ti puwa Yarigo tano kawareha iba Yodana peago abene ederayagi Moaba dindi ulini wuyu peagoria hemiria Anduane Homogohanda Mosesehondo bi maru <sup>51</sup> Isaraele wali agali lamilonaga ibu lamini. Anduane Homogohanda lalu, Tígua iba Yodana porago domalu Kenana dindi anda pialu howa <sup>52</sup> wali agali dindi ogoniha hene karu bibahende bo pelai halimu. Ani bialu ti dama mitangi bialu bi pupu wulenaga mbirale ege toleme wabini ngarubi aeaneme wabini ngarubi bibahende bo dambiai halu tinaga bi pupu wiagane anda karubi giallo wahai halimu. <sup>53</sup> Dindi ogoni ina tí ngerogo karulole pu halimu. <sup>54</sup> Tígua dindi tini hameigini mbira mbira kamidagua tu wa tahole tadu ale ege tole tinaga mini gilibu wini biago badaga halu handalimu. Ani hondowa hameigini wali agali dewa karu dindi timbuni tu wa mialu wali agali emene karu dindi emene migi bilimu.✧ <sup>55</sup> Anigo wali agali dindi ogoniha hene bu karu ala bo batagi nahe ani helo harimiyagua nde wali agali urunime tí tandaga mo ngulebira. Tigua biragome tinaga denibi gubalinhabi igibu anime nogoba haradagua bialu holebira. Ani bialu dindi tí pu holeberemigoha wai bialu haabo holeberemi.✧ <sup>56</sup> Tígua wali agali dindi ogoniha haga karu bo batagi naharimiyagua nde ina wali agali uruni mo ko hole manda birudagua tí mo ko holebero, lalu Anduane Homogohanda lene.

## 34

### *Isaraelenaga dindi tubari wigi biniru ogo*

<sup>1</sup> Anduane Homogohanda bi ogo Mosese lamialu, <sup>2</sup> Ina Isaraele wali agali tigua bilonaga bi ogodagua lamibe. Tígua Kenana dindi ina tí nguleberogoria anda pialu dindi ogoni bibahendeore karulo hai holeberemi. <sup>3</sup> Dindi ogoninaga abene unurahayagi tubari dindi ko wali agali nahaga mini Sini laga ngagoha howa pialu Edomo dindi baba tubariha puabo ka. Ani bialu tubari ni tagira ibiragohayagi iba kuyama mini Homene Iba bedagoria howa puamu ka. <sup>4</sup> Ani bialu tubari ogoriani howa pu ai halu dindi abene unurayagi daliape halu Hari Agarabimi nene ngagoha iraga halu piaga hariga pedagoria dindi ulini hari labo hengene ngagoha pupe halu Sini dindi ko wali agali nahaga ngagoha pialu Kadese Banea wiagoria tagira peda. Ai ogoriani howa dindi mini Hasarada ngagoha puabo halu Asamono tagira peda. <sup>5</sup> Ani pialu ogoriani howa pu dai bialu iba pedadagua Iyibila tubari nga. Ani bialu puabo halu iba solowara Medidereniana bedagoriani tagira peda.

<sup>6</sup> Dindi ti baba tubari ngago iba solowara Medidereniana bedago wulebira. Ni paliragohayagi tubari ogoni holebira.

<sup>7</sup> Dindi abene uyurahayagi tubari iba solowara Medidereniana bedagoria howa pu banga bialu Hari Ho kagoria tagira pialu <sup>8</sup> ogoniha howa puabo halu Hamada dindi ulini ngagoha pupe ka. Ani bialu dindi mini Sedada bolangua halu <sup>9</sup> Siborono dindi tagira pialu Hasarenana dindi ngagoria tagira peda.

<sup>10</sup> Ni tagira ibiragohayagi Hasarenana dindi ngagoria howa pialu amuraore Sebama dindi ngagoria tagira polebira. <sup>11</sup> Ani bialu Sebama dindi howa pialu abene unurahayagi pupe halu Libila dindi ngagonaga abene ni tagira ibiragohayagi bolangua halu Aini dindi tagira pialu puabo halu Galili iba kuyama bedago angeha hari emene mbira wedagoha tagira polebira. Ogoni Galili iba kuyama bedagonaga abene ni tagira ibiragohayagi tagira polebira. <sup>12</sup> Ani bialu tubari ubadali halu unurayaginaga iba Yodana tubari pialu iba kuyama mini Homene Iba bedagoria tagira peda. Ai tinaga dindi tubari maria uruni holebira, lalu Anduane Homogohanda Mosese lamini.

<sup>13</sup> Mosesehanda Isaraele wali agalihondo lamialu lalu, Anduane Homogohanda Isaraele hameigini dira kamirubi Manase hameigini halu mende karubi tinaga dindi tubari o langeroru wulebira. Ai tígua dindi hobane mbira mbirago ainaga holobadabe

✧ 33:54: Dag 26.54-56 ✧ 33:55: Yos 23.13, Hgn 2.3, Iba 106.34-36, Ese 28.24



hondole tadu ale ege tole emene badaga halimu. ✨ ✨ 14 Ai Lubene hameiginibi Gada hameiginibi Manase hameigini halu mende karubi ti dindi abale mo wialu ta hene. 15 Ti dindi Yarigo kawareni iba Yodana porago doma ederayagi ni tagira ibiragoha wiago karulo hayagoni, lene.

*Dindi tu wa taholenaga agali haguane tigua haru howa tale binigo ogo*

16 Anduane Homogohanda Mosese lamialu lalu, 17 Loma binigo mo miaga Eleasabi Nunu igini Yosubi libugua Isaraele hameigini dindi ogoni tu wa taholebira. 18 Eleasa Yosuala biamogo bilonaga agali haguane tini hameigini mbira mbira kadagua dabo helabe, lene.

19-28 Agali mini uru Yuda hameigini Yabune igini Kalebe. Simiono hameigini Amihudu igini Selumiele. Beniyamini hameigini Kisilono igini Elidada. Dana hameigini Yogoli igini Bugi. Manase hameigini Ebodo igini Haniele. Eberaimi hameigini Sibidana igini Kemuele. Sebulunu hameigini Panaga igini Elisabana. Isaga hameigini Asana igini Paladie. Ase hameigini Selomi igini Ahihudu. Nabadali hameigini Amihudu igini Pedahale.

29 Agali haguane urunime Yosua Eleasala biamogo bialu Isaraele hameigini headagua dindi tu wa tahaga bilonaga Anduane Homogohanda dabo helabe layadagua helaga bini.

## 35

*Anduane Homogohanda Libai hameigini hearu tano mo minigo ogo*

1 Isaraele wali agali ti iba Yodana doma ederhayagi Yarigo kaware wiagoria Moaba hameigini dindi uli uli Yodana angeha wuyu peagoha heningi Anduane Homogohanda bi ogodagua Mosese lamini. ✨ 2 Ina Isaraele wali agaliruhondo bi ogodagua lamibe. Tigua tina dindi podene ngagoha tano maru Libai hameigini karulelo migi bilimu. Tinaga bulumaga karu tani nalu helonaga tano uruniha tani bayale anda haga ngaru milimu. 3 Libai hameigini ti tano urunibi ngago milimu. Tano kawareni datani bayale anda haga ngaru Libai hameigini ti bulumagaru sibiru hinalu helo milimu. 4 Dindi ti holene uruni datani bayale gibuni gibuni andaho mabubi wialu tanonaga pabe kagoria howa wima tagira pialu lunaga mita magi handari mariani pira duria (450) wialu bidago milimu. 5 Ani bialu tano ibu dombeneha ngelo gibu gibu dindi bayale datani andaho mabubi ngago milimu. Dindi gibuni mbirahayagi howa mendehayagi polenenaga mita magi handari dira (900) karulape milimu. 6 Ani bialu agali ibida pialu ha do holene tano waragaria Libai hameiginiru tihondo milimu. Agali mbirame agali mende baba waitigi nahe karia mememe balu homelayagua agali bagadago ibuni tano uruni mbiragoha ibida pialu ha do holebira. Ani ha do kagola homene andua kagome ibu talima pialu tano ogoniha karia nababehe holebira. Ani bialu tano pira mariani kirabi (42) Libai hameigini karu mia dege bilimu. 7 Dindi bayale datani anda holene tano urunibi ngago ti mulene karulape wialu tinaga tano pira mariani halira (48) bibahende wulene nga. 8 Tigua Libai hameigini Isaraeleali karu tano tale bialu mule howa dewali karu timbuni mo mialu hameigini emene karu emene mo mulene nga. Ti hameigini kago ala manda bu hondowa tini kagobi karulape talebu mulene nga, lene.

*Ha do holene tano winigo ogo*

*(Mana Loyane 19.1-13, Yosua 20.1-9)*

9 Anduane Homogohanda Mosese lamialu, 10 Isaraele wali agaliru bi ogodagua lamibe. Tigua iba Yodana domalu Kenana dindi anda pole howa 11 ibida pialu ha do holene tano maru dabo ngelalimu. Agali mbirame agali mende kago baba waitigi howa ndo mememe ba bowa bo homelayagua nde bagadago ibuni tano uruni mbiragoha

ibida pialu hadapaya bu holebira. <sup>12</sup> Tano uruni agali baro lalu ndo mememe ba bowa homara handala бага biago ibuni ibida pialu tano ogoniha kagola homayago damene bu karume haruru talima pialu babe nahe holebira. Agali bagadago ibu ibida pialu tano ogoniha kane dege godi lalu dabaki haragola ibuni homelo bo wahabehe wiagua nde homelo bolene nga. <sup>13</sup> Anidagua pialu ha do holene tano waragaria hangu wiabagi halimu. <sup>14</sup> Iba Yodana doma edera ni tagira ibiragohayagi tano tebira mo wialu Kenana dindiha nde tano tebira dege wilimu. <sup>15</sup> Tano uruni Isaraeali tñibi wali agali dindi taraha howa tí baba íbu halu pole heneyaguabi haabo hole hene heaguabi tí bibahendenaga ha do holene uruni wulebira. Agali mbirame ibunaga damene kago homelo baro lalu ndo mememe balu homelayagua nde бага kago ibuni tano uruni aria mbiragoha pialu ha do holene wulebira.

<sup>16-18</sup> Anigo agali бага kagome ibu damenedago homelo mbirale aeanemebi ege tolemebi iramebi homelo бага ngagome henemane baro lalu beneyagua nde ibunibi homelo bo wahalimu. Ibunime bero lalu bayagonaga pani ogoni. <sup>19</sup> Agali homayago ibu damene darama mbiraore kago ibugua бага hayadago homelo bolene nga. Anigo damene ogoni ibugua bagadago lola hayagua ibuni homelo bolebira.

<sup>20-21</sup> Agali mbirame agali mende kago handabe manga halu hongo howa hela pelaragola homayaguabi toleme baragola homayaguabi gi bo tagalalu baragola homayaguabi nde ibugua biako haragome ibuni pani nelu mulene ngago ainde ibunibi homelo balimu. Agali ibuni dameneore baragola pani bole henedago ibunime agali ogoni homelo bolene nga. Agalidago deme handa ala hondowa homelo bolene nga.\*

<sup>22</sup> Anigo agali mbirame ibu damene kago handabe manga howa ndo bame hongo howa hela pelaragola homayaguabi mbirale mbira ibu kagoha ba pelaragola ogonime bila halu homayaguabi <sup>23</sup> ibu de handa nabi howa ege tole mbira bape halu karia ogonime bila halu homayaguabi nde urunidagua bole manda nabi howa mememe birago ogodagua bilimu. <sup>24</sup> Tigua mana ogonidagua biragola agali бага kago abale homelo nabe manani dabo handalu mo tale ala bulene nga. Homayago aria kagome ibunibi homelo abale bo waholene nawi. <sup>25</sup> Tigua ibu mo wialu haru dai beremigola homayago damene kagome bolene nawi. Ani helowa ha do haga tano biagoha ha do helo haru dai bilimu. Ani haru daibu kane dege Loma Binigo Mo Miaga Haguane Timbuni kago homalu mende gahenge haribia ho kagola ibu tagira polene wulebira. <sup>26-27</sup> Anigo Loma Binigo Mo Miaga Haguane Timbuni tano ogoniha henedago nahome howa agali ha do hene biago tagira pu ledaria homene aria biagome lola halu bo wahayagua nde godi lolene nawulebira. <sup>28</sup> Irane agali ha do hene biago ibu Loma Binigo Mo Miaga Haguane Timbuni kago homaragola tagira polene wiyago wahalu abale tagira piyagua ibunime biako hayagome homayagua nde karulape dege. Loma Binigo Mo Miaga Haguane Timbuni kago homaragola agali biago ibu andaga dai bialu ibu dameneru baba hayagua nde ibu gi nahe hadapayabu holebira. <sup>29</sup> Tí ta nabi kamigoha howa tñaga waneigini aguaneneru mani hama polobadarume mana mbiraore ogoni hangu talialu buleberemi.

<sup>30</sup> Agali maru karume agali mbira kago ibu waitigi howa mendeali heago homelo bo wahaya laya lalu kirali tebiralime bi lo mbira hayagua nde tigua agali mendego homelo bo wahaga kago ibunibi nde homelo bo wahalimu. Anigo mbiraoreli hangume hendeneyagua nde nabalimu.

<sup>31</sup> Agali mbira ibu aria kago baba waitigi howa homelo bo wahayagua nde ogoni ibunibi homelo bo wahalimu. Agali ogoni ibuni nogo abi bulene henge nawiore ibu homolene hangu wulebira. <sup>32</sup> Agali mbirame ibu mendeali homelo bo wahalu ha do haga tano biagoha ibida pu howa Loma Binigo Mo Miaga Haguane Timbuni kago homa nabi kaore munime yolo bialu tagira polene nawulebira. Anidagua bulene

\* 35:20-21: Man 17.6, 19.15

nakarulapego nabilimu. <sup>33</sup> Tígua agali ogonialego yupe halu pelarimiyagua nde inaga deni tínaga dindi bibahende mo dodohe holeberemi. Agali homelo bo wahaganeme tínaga dindi bibahende mo dodo holebira. Anidagua biragola tínaga dindi inaga deni dodo nahe ngelonaga bulene mbiraore hangu nga. Bulene mbiraore hangu ogoni agali baga kago ibuni homelo bo waholene nga. <sup>34</sup> Tínaga dindi kamigoria mo dodo holene nawi. Irane iniore Anduane Homogo kogoni. I Isaraele wali agaliru tí heba mandagi haabo kogoni, laya lalu Mosesehanda lene.

## 36

### *Wali agali pene bedago ibu aba homaragola dindi ibu mulene winigo ogo*

<sup>1</sup> Yosebe igini Manase Manase igini Magiri Magiri igini Gileada hene. Ani howa horo mbirungi Gileada aria hearu tigua Mosesehalu Isaraele <sup>2</sup> agali hagianeru hearia puwa lalu, Anduane Homogohanda ina Isaraele hameigini dindi tu wa taholenaga tadu ale ege tole biago badaga halu dindi hameigini ogonaga lalu mo tale bia haga bilimu lene. Ani bialu dindi tu wialu inanaga damene Selobehada henego ogoni wane berearubi ti dindi tu wa milimu lene. <sup>3</sup> Anigo wali agali hameigini mende kagome dabu biyagua nde dindi ogoni hameigini mende kago ha mo yu polobada. Anidagua biragola dindi ina tu wa ngirimigo emene hangu holobada. <sup>4</sup> Anigo mbirale Yadaí Bulene Mali biago tagira ibirangi ina damene Selobehada wane bedarume tinaga dindi ti agalini kago ha mo yu polobada. Ani bialu agali ogoni ibunaga dindi ngagoha mo wiatago holobada. Anidagua biragola dindi ogoni inanaga lene ndo wulubada, lene.

<sup>5</sup> Ani layagola Mosesehanda Anduane Homogonaga bi ogo Isaraele wali agali bu hearu hale helo latagi halu lalu, Manase hameigini karume bi layago tigabiore laya. <sup>6</sup> Ani layagonaga Anduane Homogohanda, Wandari Selobehada wane bedaru ti agali tini hameme polene karulapegoyu agali tini aria karu hangu polene karulape lo nga, laya. <sup>7</sup> Anidagua beremigola Isaraele wali agali tínaga hameigini dindi mbira mbira ngagodagua wiaabo holebira. Ani ngagola hameigini tarame uba ai nai bulene nawulebira. <sup>8</sup> Wandari mbirame ibu aba homaragola dindi paluni wiagua ibu agali ibuni aria dege hameigini mbiraore kago polene nga. Tígua ogonidagua bialu harimiyagua nde dindi t́ni wiaabo halu t́naga mamalirume wini ngaru wu haga haga buleberemi. <sup>9</sup> Ani manda bialu t́naga dindi uruni hameigini mende kagohondo mulene nawulebira. T́ni hameigini mbira mbira kamidagua t́naga dindi wu haabo holeberami, lene.

<sup>10-11</sup> Ani layago hale halu wandari Selobehada waneru Mala Tirisa Hogola Miliga Noa imaru tigua Anduane Homogohanda layadagua bialu agali tini aria hameigini mbiraore hearu pugu bini. <sup>12</sup> Tigua Yosebe igini Manase aguane hearu pugu bini. Anidagua biyagome ti abanaga dindi hameigini mende ha podo yalu nape ti aba damenenaga wiaabo hene.

<sup>13</sup> Bi mana uruni Anduane Homogohanda Isaraele wali agaliruhondo Moseseha howa iba Yodana ange Yarigo kawareni Moabalirunaga dindi ulini tigabi wiagoria hemiria lamini.

## **Mana Lowinigo Loyane**

### **Mbuga ogoha gilibu ngarunaga nemandi ogo.**

Mbuga ogoha howa Isaraele wali agali tinaga bu mini mo hongo helonaga Mosesehanda bi mana lalu halu mende lamini. Ti ogoningi Moaba dindi wiagoria howa iba Yodana domalu Kenana dindi ubaede hole manda manda bu hearia lene. Horo ogoningi Mosese ibu ti haru pobe nahe howa ibugua ibunaga paluni bi tihondo lamini. Mosese ibugua bi irane maria Isaraele wali agaliruhondo laminigo uruni ogodagua laga bini.

**Mbira**

Anduane Homogo ibunime ti hariga lu ibiyagoha howa biabe hongohe timbuniru bialu ti bayale haru ibiyago mo mitangi bia hene. Ibugua ibunaga hongomeore ti biamogo bialu mo wiyada manda bialu tigua ibunaga andaneha haabo helonaga manda buwa lamini.

**Mende**

Mosese ibugua Bi Pira biaru lone latagi lalu mana maru Isaraele wali agali tigua manda bilonaga irane lo wála haga bini. Isaraele wali agaliru tigua bi mbira galoneore talialu bilonaga mo dunubiaore howa lo ngago ogo

Be 6.4-6 Anduane Homogo tínaga Ngode Datagaliwabe kogo tigua tínaga gubalinimebi minimebi hongomebi i mitangi bialu gubalini ho halimu, lenego gilibu nga. Ibugua tinaga bu mini mo hongo lalu ti Anduane Homogohanda dindi gahenge ngulebiragoria pu biruwa ibunaga mana baya hangu talialu bialu halimu lalu mo hongo hene.

**Tebone**

Mosese ibugua tihondo lamialu, Tí hari nene ngaruha dama mitangi bialu bi pupu wiaga ngaruha napilimu, lalu lamini. Dama mitangi biaga karume mana ko biaga ngaru tigua nabilimu, lalu lamini. Anduane Homogo ibunihondo wali agalime lotu lole íbu ngoai helonaga dindi tigabi mbiraore hanguni lotu laga mo ngelalimu, lalu lamini. Anduane Homogo ibugua Isaraele wali agaliru baba habo nalolene bi ala lowiyago miniha hongo helonaga mo hongo lalu lalu, Anduane Homogo ibunimeore ibunaga habo nalolene bi ala lowiyago talima ibinigo áyu kamagonigo ibu andaneha ho halimu, lenego lo nga.

**Mane**

Mosese ibu homolene kaware heangi ibugua agali mbira mini Yosua ibu ha aribia lalu Isaraele wali agali haru helo dabo helene. Ani buwa Anduane Homogohanda ti biamogo biyagonaga iba gana lalu Isaraele hameigini hangu hanguhondo bi lalu Mosese homene.

Mbuga ogonaga bi galone lo wiaabo ho ngago ogo. Anduane Homogohanda ibunaga wali agali gubalini howa pele mialu mo turu lalu haabo hayagonaga tigua ogoni mitangi biaabo lalu ibugua bi layadagua bialu haabo helonaga gilibu nga.

#### **Bulu бага бува кuni gilibu ngago (1.1-4.49)**

Mosesehanda mana lalu mbira latagi henego 5.1-26.19

Mosesehanda mana lalu mende latagi henego

5.1-10.22

Bi Piranaga mana lalu henego

11.1-26.19

Mana bulene nabulenebi ko tara tarabi gime wabinirumebi ti mo ko holigo dehondo holene nga lenego 27.1-28.68

Kenana dindi anda puwa bialu holene mana lo ngago 29.1-30.20

Habo Nalolene Bi lone lalu henego 31.1-33.29

Mosesehanda bi lamaro bialu lenego 34.1-12

## Mosese ibu homenego

### *Hari Sainai yu wahalu ibinigonaga Mosesehanda bite lenego ogo*

<sup>1</sup> Mbuga ogoha howa Mosese ibugua Isaraele wali agali hearu ti dindi ko wali agali nahaga ni tagira ibiragohayagi iba Yodana ange kaware dege ngelowa bu hearia tihondo bi leneru nga. Ti dindi buguni yu dindi mbira iba Yodana angeha Subu dindi wiago kaware dege pu hene. Parana tano mendehayagi wiagola Tobebe tanobi Labana tanobi Haserodo tanobi Disahaba tanobi nai mendehayagi ngela buwa ti dombeni pu hene. <sup>2</sup> Hari Sainai howa hariga pedadagua pialu Idomo dindini hari kagoria anda polene horo bearia (11) agima handa paligi bima pialu dindi mbira Kadese Banea ngagoria anda piaga wini. <sup>3</sup> Isaraele wali agali ti mali pira maria (40) Iyibi dindi yu wahalu tagira pene lowa ai mali ogoninaga ege beane (11) hayagola horo mbirani Mosese ibugua Anduane Homogohanda bi ibuhondo lamiyaru bibahende wali agalihondo lamiai hene. <sup>4</sup> Mosese ibugua bi lamiyago nalami heangi Anduane Homogohanda Hesebono tano handaya ho haga Amoroalinaga Kini Sihono bope hene. Ani bialu Anduane Homogohanda Asarodo tano Ederi tanola handaya ho haga Basanali Kini Ogabi bope hene.✧ <sup>5</sup> Isaraele wali agali ti iba Yodana ange ni tagira ibiragohayagi Moaba wali agalinaga dindini heangi dege Mosese ibugua Anduane Homogonaga bi mana lawai halu hene.

<sup>6</sup> Mosese ibugua lalu, Ina Hari Sainaini hemaria Anduane Homogo inanaga Ngode Datagaliwabe ibugua bi ogodagua langiya. Hari andane ogoha ti luore karulape harimigoni. <sup>7</sup> Ai dindi ogoni yu wahalu puwa Amoroaliru dalu amu hari nene ngaruhabi dindi maru kaware ogoniha ngaruhabi hole pudaba, layagoni. Dindi uruni iba Yodana angeha dindi buguni yu dindi wu yu pedarubi hari neneha wima pedarubi dindi tigabi wima pedarubi dindi ni tagira ibiragoha wima pedarubi dindi bayale iba solowara timbuni Medidereniana iba angeange wima pedaruhabi piyai halimu, laya. Ani piaho wialu Kenana dindi ngagohabi pialu Lebanonohayagi hari nene ngaruha puabo halu amuraore iba timbuni Yuberedisi poragoria puari halimu, laya. <sup>8</sup> Dindi uruni Anduane Homogo ini kogome ti ngulebero lalu bamba tinaga mamali Abarahama Aisaga Yagaba imaruhondobi uruni tinaga waneigini aguane hearuhondobi lo wirugoni. Ayu tigua pialu dindi uruni ti karulai hole pudaba, laya, lalu Mosesehanda lamini.✧

### *Mosesehanda agali haguane maru dabo helenego ogo (Haru Penego 18.13-27)*

<sup>9</sup> Mosesehanda wali agaliruhondo lamialu lalu, Bamba ina Hari Sainaini harimangi ina ti langialu wali agali dewaore bu kamigo i hangume ti haru holene erekuibioredago nahabehe ko larugoni. <sup>10</sup> Anduane Homogo inanaga Ngode Datagaliwabe ibugua ti dewaore harini yakundi bu karubi heledago. <sup>11</sup> Ai Anduane Homogo ina mamalirunaga Ngode Datagaliwabeibunime bamba bulebero lalu lo wiyadagua ti mo dewaore halu tinaga mbirale wu kamiruni mo bayaleore helo hame ledogoni. <sup>12</sup> Anigo i hangume tigua lai gungu bialu kamiru mo hadalu ti bayale halimulo mo tiga agua buliyadabe. Genda uruni i hangume yulene nakarulape kogoni. <sup>13</sup> Anidago ai tigua agali maru mini bogabi dingidangialebi wali agali maru haru habehe karu hondowa agali urunibi karu tigua wali agali haru helo dabadaba. Tinaga hameigini hangu hangu kamidagua dabaga bilimu. Ani dabo heledamigola ina agali uruni tigua wali agali ti haru helo heloliya larugoni. <sup>14</sup> Ani larugola tigua bi ogoni karulape lalu ani helarimigoni. <sup>15</sup> Ani birimigola ina agali mini dingidangiale biaruni hameigini mbira mbiraha howa haru ibirimigola ina agali uruni ti wali agali haru helo helarugoni. Agali haguane uruni ti marume wali agali daosini mbira (1,000) haru helo helalu marume handari mbira (100) haru helo

✧ 1:4: Dag 21.21-35 ✧ 1:8: Pig 26.3, Har 33.1, Dag 14.23, 32.11



helalu marume pira duria (50) haru helo helalu marume nde pirali hangu haru helo helaru. Ani bialu agali marubi dabalu ti nde wali agali tini hameigini headagua haru haga bilo dabo hela dege birugoni.

<sup>16</sup> Ani dabo helowa agali dabene uruni ina tihondo wali agalime lai gungu bialu ibirarunaga bi baya hanguore hale halimu larugoni. Í damenela keba heneyaguabi wali agali maru tara ti heba henedaru baba leneyaguabi <sup>17</sup> bi uruni baya hanguore hale halu mbiralinaga la nahe bi ogobi dege dege lo talebia halimu larugoni. Tigua wali agalinaga godi hale halu biruwa agali haguane timbuni heneyaguabi agali damene kali ale dege heneyaguabi mbirago mo wia nahe ogobi dege dege maname dabolene ngadagua dabalimu. Mbirali hondowa gi nahalimu. Godi hale holene ogoni tìnime ndo Ngode Datagaliwabe ibunime tihondo mini bayale godi hale halu kamingi ogobi bulene nga lalu mo mitangi bia holebira laru. Ai gendabi timbuniore tigua hangu mo tiga bibe naheyagua nde ina tinaga godi ogoni hale halu mo tiga buliya ini koria haru ibalimu larugoni. <sup>18</sup> Horo uruningi dege ina mana maru tigua ogodagua bialu halimu lalubi nde dewaore mo wála halu lawai hai harugoni, lene.

*Isaraeali maru dindi diri hondo wilo pelenego ogo  
(Dagalene 13.1-33)*

<sup>19</sup> Mosesehanda laabo halu lalu, Anduane Homogo inanaga Ngode Datagaliwabe handa inahondo bilimu lalu langiyago talialu birimagoni. Iname Hari Sainai helalu dindi koorene ko iba dalu naibaga ni daho wiaabo haga wiagoha ibaabo halu Amoro hameigini daluhayagi hari barebare wiagoria anda ibirima. Ani ibalu dindi Kadesebanea wiagoria anda ibu howa <sup>20</sup> ina tihondo lalu, Ai ina Amoro dindihayagi hari bare ngagoria anda ibu kamagoni. Dindi ogoni Anduane Homogo inanaga Ngode Datagaliwabe ibunime inahondo ngulebira. <sup>21</sup> Anduane Homogo tí mamalirunaga Ngode Datagaliwabe kago ibunime dindi ogo tí mo ngirago de handadaba. Anigo ibunime tihondo langiyadagua dindi ogoni tihondo ngiyadago abale karulole pilimu. Tí gi halu mini dege dindi howa nahalimu, larugoni.

<sup>22</sup> Ani larugoyu tigua i hewaria ibuwa lalu, Dindi diri hondo wialu dai bilo agali maru pelama. Tigua handalu dai buwa ina hariga bayale mo walia haradagua maliya. Ani bialu tanoru nde ogobi wigi bia lalu te lama dai bilo, lalu laga birimigoni.

<sup>23</sup> Anidagua larimigo hale halu ina Isaraele hameigini homberia (12) hemidagua agali mbira mbira lowa homberiali dabarugoni. <sup>24</sup> Ani dabarugola tigua pialu hari bare wiagoha puabo halu Esegolo dindi ulini panda panda bayale wiagoha puwa dindi baya hangu hondo wima ibaga bialu hene. <sup>25</sup> Ani bialu ira lini bayaleru do hanalu dai buwa ina ngiyagoni. Ani ngialu howa tigua lalu, Dindi áyu Anduane Homogo inanaga Ngode Datagaliwabe ibunime ina ngulebirago ogoni ibane bere bayaleoreya, laya.

<sup>26</sup> Tigua anidagua layagoyu tigua mine halu Anduane Homogo tìnaga Ngode Datagaliwabe handa bi layago mo wahalu dindi ogoniha poa nahe harimigoni. <sup>27</sup> Tigua tìninaga balai anda bu hemigoha biruwa bi gomogomo lagalaga bialu lalu, Anduane Homogohanda ina handabe manga ho kagoni. Ibugua ina Amoroalirunaga giha mo ya halu bo wahai holenaga Iyibi dindiha howa haru tagira ibiyada. <sup>28</sup> Ina gi timbuni biaruago dindi ogoniha agibule poledabe. Iname agali dindi diri hondole pudaba larimaru tigua handalu dai buwa wali agali dindi ogoniha bu hearu ti luni timbuni hongoharu bu hea lalu langiyagoni. Tinaga tanobi hongohe wai pabe egeme bu mabu bialu hari daliga elahe bini hama pea lalu langiai haya. Ani lalu agali timbuni gibioreru tano uruniha hama pearia handarima, laya, laga bialu harimigoni.

<sup>29</sup> Ani larimigola nde ina tihondo ogodagua laru. Wali agali o haruaruni hondowa gi nahalimu. <sup>30</sup> Anduane Homogo tìnaga Ngode Datagaliwabe ibunime tí poleberemigoha

✧ 1:26: Man 9.23, Hi 3.16

bamba halu polebirago tí gi holene nawi. Ibugua ala tí Iyibi dindini hemiria tínaga wai bia hayadagua bia holebira. <sup>31</sup> Dindi ko yobi iba dalu naibaga wiagoha howabi tí biamogo bialu hayadagua dege bialu holebira. Ibugua tí biamogo biyago handarimigoni handama ibaabo henego áyu ogoria íbu kamigoni ndobe. Waneigini abame tinaga waneigini taba yu hagadagua yu haga kagoni.✧ <sup>32</sup> Ina tihondo bi anidagua larugoyu hale naharimigoni. Ani bialu tígua Anduane Homogo kagohondobi mini mbiraore nawi harimigoni.✧ <sup>33</sup> Abale howa tí polene wiagoha ibugua mo bamba halu puwa tínaga balai anda bu holene wiagobi mo walia haga bialu hayagoni. Mbiraga ibuni ira hungu ale howa tí polebirimigoha bamba halu horombe beralibaha howa bamba hagane hayagoni, lene.

*Anduane Homogohanda Isaraele wali agali pani nelo minigo ogo  
(Dagalene 14.20-45)*

<sup>34</sup> Mosesehanda lalu, Tígua bi dewa lama ibaga bialu hemigo hale howa Anduane Homogo ibugua tihondo keba haya. Keba howa ibugua bi hongo howa latagi halu lalu,✧ <sup>35</sup> Wali agali mini kowi kamiruni tí dindi bayale mbira ngule lalu tínaga mamaliruhondo lo wirugoha napoleberemiore. <sup>36</sup> Yabune igini Kalebe ibu dege dindi ogoniha pu holebira. Ibugua dege inaga bi mana baya hangu taluwa bialu haya. Ani bialu hayagonaga ina dindi ibuni hondo wiyagoni ibubi ibunaga aguanene mani holebirarubi tihondo mulebero. <sup>37</sup> Tígua mana ko bialu harimigonaga Anduane Homogohanda ihondobi keba howa í langialu lalu, Mosese íbi nde dindi ogoniha napolebere. <sup>38</sup> Anigo í biamogo biaga agali Nunu igini Yosua kago ibu dindi ogoniha pu holebira. Yosua ibugua Isaraele wali agali dindi ogoniha haru polebirago ani bilo ina ibunaga mini mo hongo habe, lalu langiya.

<sup>39</sup> Ani lowa mani Anduane Homogohanda ina bibahende kamaruhondo lalu, Tínaga waneigini áyu emene gali mbirale ko bayalela baya hangu manda nabi karu ti dege dindi ogoniha pu holebira. Tígua, Waneigini uruni waitigime bo waholebira, laramiligo uruni ti dege dindi ogoni merogoha pu holebira. <sup>40</sup> Ai wali agali wahebi daliahebi kamiruni tí beregedalu dindi ko yobi iba dalu naibaga ngagoha hole dai bidaba. Iba Solowara Daramabi bedagohayagi Agaba dindi pole piaga ngagoha pudaba, layagoni.

<sup>41</sup> Ani layagola mani tígua ihondo lalu, Mosese-o iname Anduane Homogonaga deni mana koore birimadago. Ai áyu Anduane Homogoibunime wai bilimu lalu layadagua iname wai bule poleberema, larimi. Ani lowa tígua agali hari barebareha paluyu pearu minime mo mogola halu bope holeberemabe toba howa tínaga wai pole yári wimiru mo karularimi.

<sup>42</sup> Ani bu hemigola Anduane Homogohanda ihondo langialu lalu, Ina tí biamogo bialu ha nabi yu waharogola waitigime tí bo wahai holebirago wai nape wahadaba lalu lamibe, laya.✧ <sup>43</sup> Ani layagola ina Anduane Homogonaga bi uruni tihondo langirugola tígua ibunaga bi hale naharimigoni. Tí abale heyalu agali hari barebare palearu baba wai bule pirimi. <sup>44</sup> Ani pialu hemiria Amoroali dewaore hari barebareha palearume abaleore mone mo emabia haragola abale porabu tagitagi bialu agali hayule tagira piagadagua bialu tí baba wai bule tagira ibiya. Ani tagira ibalu tí bama talima pu dege bialu Idomo dindiha hari dewa bu heagoria dindi mini Homa wiagoha bo talia hana hayagoni. <sup>45</sup> Anidagua biyagola tígua Anduane Homogo olalu ibuhondo ina biamogo bia lalu harimigoni. Anidagua lalu ha hemigola ibugua tínaga bi larimigo hale nahaya. <sup>46</sup> Irane ogonidagua biyagome ina Kadese dindi wiagoha lu haabo harimagoni, lalu Mosesehanda lene.

## 2

*Isaraeleali tigua Idomo dindi Moaba dindiruha anda pugu binigo ogo  
(Dagalene 14.39-45)*

<sup>1</sup> Mosesehanda lalu, Kadese dindiha lu haabo howa ina beregedalu hariga peadagua dindi ko yobi iba dalu naibaga wiagoha pialu amu iba Solowara Daramabi bereagohayagi puabo harima. Anduane Homogoibunime ogodagua bilimu lalu langiyadaguaore birimagoni. Ani bialu ina Idomoalirunaga dalu hari barebare wiagoha luore ibagabu haabo harimagoni ndobe.✧

<sup>2</sup> Ani hemagola mani Anduane Homogohanda Mosese ihondo lalu, <sup>3</sup> Tigua hari barebare dindi ko uruniha luore ibaga bialu haabo harimigo ainde dindi abene uyurahayagi pu uyu halimu, laya. <sup>4</sup> Ani lalu bi tí languliya ibugua ihondo langiyago ogo, Áyu Idomo dindi hari bare dege dombeneha poleberemigo dindi ogoni tí hameigini Iso aguanene bu karunaga ngagoni. Pialu kamiria tigua tí hondowa gi holebira. <sup>5</sup> Anigo tigua ti baba wai nabilimu. Irane tinaga dindi ngaruni aria emeneorebi mbira tí mo ngia nabuleberogo ai tigua wai nabilimu laro. Idomo dindi ogoni ina Iso aguaneneru tinagaore ngelo mirugo ngagoni.✧ <sup>6</sup> Ti dalu ngagoha tí bolangua halu pialu howa tinaga tomobi ibabi bibahende munime yolo bialu nalimu, laya.

<sup>7</sup> Tigua mbirale bibahende birimigo damene Anduane Homogo tinaga Ngode Datagaliwabehanda tí biamogo timbuniore biyagonaga embeda nahalimu. Ibugua tí dindi ko yobi iba dalu naibaga wiagoha ibagabu hemiria handayaho haabo hayagoni. Mali pira mariani (40) ibugua tí baya hangu handayaho haabo heagola tí mbirale mbira burupale nabi bayale haabo harimigoni.

<sup>8</sup> Ai dindi ogoni yu wahalu ina lone pialu hariga tano kira Elada Esiongebela howa tagira piaga wiadagua pu dege bialu iba timbuni Homene Iba laga bereagoha puabo harima. Ani bialu ogoriani howa lone beregedalu Moabalirunaga dindi ko iba dalu naibaga wiagoha yupe halu pirimagoni. <sup>9</sup> Ani pirimagola Anduane Homogohanda ihondo lalu, Moaba wali agali uruni Lode aguanene padago tigua hameigini ogoniha karuni mo ko nahalimu. Inime Ara tano ngago ti helo mirugo ti baba wai nabilimu. Tinaga dindiore lene ngago emene mbira hangubi tí mo ngia nabulebero laya, lene.✧

<sup>10</sup> Bamba dindi Ara ogoriani agali hameigini timbuni hongohe mbira mini Emimi hene. Agali hameigini timbuni uruni ti luni lina handadali dali damene Anagimi hameigini luore henegobi dege hene. <sup>11</sup> Hameigini lu timbuni kira ogonilabo mini mende Lebaimiali laga hene. Lebaimiali uruni Moabali hearu tigua ti mini Emimiali laga hene. <sup>12</sup> Bamba dindi Idomo ogoniha Ho hameigini ti haga winigo mani Iso aguanene hearume ti bo batagi howa karulo hene. Mani nde Isaraele hameigini hearu tigua dindi Anduane Homogohanda ngulebero lalu lowiyago karulalu howabi ani dege bini.

<sup>13</sup> Mosesehanda laabo halu lalu, Mani Anduane Homogohanda layadagua bialu iname Iba Serepeago domalu ubaede harimagoni. <sup>14</sup> Dindi Kadesebanea biago wahalu pialu Iba Serepeago domarimagola mali pira tebirani halira (38) piya. Ai dindi Kadesebanea ogoriani hemangi agali wai biaga hearu homai hayagoni. Anduane Homogohanda bi layago lola helo anidagua bini.✧ <sup>15</sup> Anduane Homogohanda ti baba keba ho haabo howa ibugua ti bibahende bo wahai helene.

<sup>16</sup> Mani agali wai biaga biaru homai heagola <sup>17</sup> Anduane Homogohanda inahondo lalu, <sup>18</sup> Áyu ogoni tigua heyalu Moaba dindiha pole Ara dindini hariga pedadagua pole pudaba. <sup>19</sup> Ani pialu Lode aguanene Amonoali karu dalu kaware ngagoria pu holeberami. Ani pialu tigua ti mo keba holebi wai bima lelobi mbira nabilimu.

Dindi ogoni ina ti helo miniore ngago tinaga dindi ogoni tí mo ngia nabuleberogo ani nabilimu, lene.✧

<sup>20</sup> Dindi ogoniha hameigini mbira Lebaimi ti hene wuwa dindi ogoni mini Lebaimi dalu laga wini. Anigo Amono hameigini hearu tigua hameigini ogoni mini Samasumimi laga wini. <sup>21</sup> Agali dindi aba ogoniha hearu tibi agali luni timbunibi Anagimi hameigini ale dege hene. Ti agali hongoheni dewaore henegoyu Anduane Homogohanda agali uruni bo amolalu dindi ogoni Amonoali ti karulo helo mini. <sup>22</sup> Iso aguanene Idomo dindi hari barebare wiaruha agali uruni hearia Anduane Homogohanda ti bo batagi halu Iso aguanene biaru mo miyadagua dege mo mini. Anduane Homogohanda Hoali hearu bo wahai hayagola tinaga dindi Idomoali hearu ti karulo henego ka. <sup>23</sup> Anidagua dege dindi mbira mini Kiridi iba dege dombeneha wupe heagoha haga hearume puwa Abimi hameigininaga dindi iba solowara timbuni Medidereniana bereagoria howa wima pialu unugohayagi dindi mini Gasa wiagoria wima tagira peago ti karulo hene.

<sup>24</sup> Mosesehanda laabo halu lalu, Ina Moaba wahalu ibirimagola Anduane Homogohanda inahondo langialu lalu, Áyu heyalu Iba Anono pedago domadaba. Anidagua beremigola ina Amoroali Hesebono dindinaga Kini Sihono kago tínaga giha minu ya halu ibunaga dindi ngagobi tí mo ngulebero. Ani buleberogo ai tigua wai bia dindi karula bima anda pilimu. <sup>25</sup> Áyu ogoni howa ina dindi tara tara wima pedagoha wali agali bu karume tí hondowa gi timbuni helo inime ti mo gi holebero. Anidagua berogola tigua tínaga minibi hale hayagua ti mogo lowa duru lagalaga bialu hai holebira laya, lene.

*Isaraeleali tigua Kini Sihono bope henego ogo  
(Dagalene 21.21-30)*

<sup>26</sup> Mosesehanda laabo halu lalu, Kedemodo dindi ko yobi iba dalu naibaga wiagoria howa ina agali maru Hesebono wali agalinaga Kini Sihono hearia bi bayale mo palia holenenaga lo yalu pudaba larugoni. <sup>27</sup> Agali uruni tigua bi lo yalu puwa ibuhondo hale halu lalu, Inaga dindiha hariga pedadagua bolangua halu polene karulapebe. <sup>28</sup> Ani bolangua halu pialu howa ina iba tomobi bame mialu nole ndo iname yolo bialu noleberema. Ina inaga dindi ngagoha hariga pedadagua dege bame bolangua halu poa kamagoni. <sup>29</sup> Ani pialu dindi bamba inanaga Anduane Homogohanda ngule lalu lowinigoha hama pole bolangua halu Iba Yodana domaede holomaya karulapedabe. Ainde Iso aguanene Idomo dindiha karubi Moabali Ara dindiha karubi tigua ina tinaga dindi ngagoha bolangua halu polomaya henge ngiyagoni, lalu lama pene.

<sup>30</sup> Ani hale harimagola Kini Sihonohanda ibunaga dindi wiagoha bolangua halu napole lowa hapai haya. Dindi áyu ina karulo kamago holomaya mo ngulenaga Anduane Homogo inanaga Ngode Datagaliwabehanda iname ibu baba wai buwa wayali halu dindi karulolomaya mo ngiya.

<sup>31</sup> Ani buwa Anduane Homogohanda ihondo langialu lalu, Hale hadaba. Áyu ina Kini Sihono ibunibi ibunaga dindi ogonibi tínaga giha mo yaharogo tí karulo halimu, layagoni. <sup>32</sup> Ani layagola Kini Sihono halu ibunaga agali henedaru haru halu ina baba wai bule Yahasa tano wiago kawareni tagira ibiyagoni. <sup>33</sup> Ani ibalu hearia inanaga Anduane Homogohanda ina biamogo biyagola iname ibunibi ibu igini hearubi ibunaga agali hearubi bibahende minalu bai harima. <sup>34</sup> Horo ogoingi dege ibunaga tano wiarubi bo gialahole bialu mo ko hai harimagoni. Ani bialu tinaga wali agali waneiginirubi bibahende bo homelai harima. Iname mbiraore hangubi mbira yu wanahe baiore harimagoni. <sup>35</sup> Ani bialu tinaga tano wiaru bibahendeha nogo sibi bulumaga hearubi dabudabu wiarubi bibahende karulai harimagoni. <sup>36</sup> Iname tano wiaru bibahendeore bo gialo wahai halu ina karulolomaya Anduane Homogo inanaga

Ngode Datagaliwabehanda ina biamogo biya. Ani biyagola iname tano bibahende iba Anono peago kawareni dindi Aroe ngagoria howa bama pialu iba angeni tano wiarubi bo gialabaga bima pialu Gileadaliru dalu wiagoha tagira pirima. Tano mbira pabe hongohe ina anda napobehe mbira naheya. <sup>37</sup> Anigo ai Anduane Homogo inanaga Ngode Datagaliwabehanda napilimu lalu langini wiaru Amonoali dindibi Iba Yabogo peagohabi hari bare wiaruha tano maru wiarubi uruniha nape waharimagoni lalu, Mosesehanda lene.

### 3

#### *Isaraealime Kini Oga bope henego ogo (Dagalene 21.31-35)*

<sup>1</sup> Mosesehanda te laabo halu lalu, Ani bialu mani ina dindi abene uyurahayagi Basana dindiha polene hariga wiagoria pialu hemaria Kini Ogahanda ibunaga agali hearu haru halu ibuwa ina baba wai bule Ederi tano wiago kawareni tagira ibiya. <sup>2</sup> Ani ibiyagola Anduane Homogohanda ihondo langialu, Ina ibu hondowa gi nahabe. Ina ibunibi ibunaga agali karubi ibunaga dindi ngarubi bibahende inaga giha mo ya holebero. Amoro wali agalinaga Kini Sihono ibu Hesebono dindini haru heangi ina ibuhondo biridagua Kini Ogahondobi ogonidagua dege bialu bibahende karulai holebere, lalu langini.

<sup>3</sup> Ani lowa Anduane Homogohanda Kini Oga halu ibunaga agali hearubi bibahende inanaga giha mo yahai hayagola iname bibahende bo wahai harimagoni. <sup>4</sup> Ani birimangi iname tinaga mbirale wiarubi mbira yu wanahe tano pira waragaria (60) bibahende karulai harimagoni. Kini Oga ibuni Basana tano wiagoria howa dindi Agobo bibahende handame ho haru haga wiarubi karulai hene. <sup>5</sup> Tano uruni bibahendenaga ege pabe hongohe daligaore bu mabubi howa tano panga hongohe helalu aeaneme panga bedena helaga wiaruni karulai halu tano emene maru pabe nabi hearubi karulai harima. <sup>6</sup> Iname tano bibahende bo giallo wahai halu wali agali waneigini bu hearubi bibahende bo wahai harimagoni. Hesebononaga Kini Sihononaga tano wiarubi bo giallo wahai harimadagua dege bibahende bo giallo wahai harimagoni. <sup>7</sup> Ani bialu nogo sibi bulumagarubi dabudabu tanoha wiarubi bibahende mo yaiore halu birima.

<sup>8</sup> Ani bialu horo ogoningi iname Amoro wali agalinaga Kini Sihonobi Ogabi libunaga dindi ina karulai harima. Dindi uruni Iba Yodana peago doma edera ni tagira ibiragohayagi Iba Anono peagoria howa pialu dindi abene unuraha pupe halu uyurahayagi Hari Hemono heagoria pu paga harima. <sup>9</sup> Anigo Saidono wali agali tigua Hari Hemono ogoni mini mende Siriono lalu Amoro wali agali tigua nde Hari Seniri laga hene. <sup>10</sup> Iname dindi tigabi yu dindi panda panda wuyu peagoha wiaruni karulai halu Gileada dindi wiagobi Basana dindi wiagobi ogonilaboha dindi wiaru bibahende karulai halu tano kira mini Salega Ederila wiagoria karulai harimagoni. Tano uruni bibahende Kini Oganaga dindiha wiarua bibahende iname karulai harima, lene.

<sup>11</sup> Kini Oga ibu Lebaimi wali agalinaga kini hamaro hene. Ibu homayagola hora holene mbogoyi ege toleme wabini. Mbogoyi ogoni lunaga ge magi manda bialu mita maria howa aranenaga mita kira wini. Homali odagoni Amonoali dindiha Laba tano ngagoria wiaabo ka.\*

#### *Hameigini maru iba Yodana doma ederayagi ni tagira ibiragoha pu henego ogo (Dagalene 32.1-42)*

\* **3:11:** Bi mbirago hobane ogoniha Hiburu bi ngagoha wa nale gilibu nga. Ani ngagola agali marume ogodagua lo beregedene. Iibunaga paliagane dagia aeaneme wabinigo ge magi manda bialu luninaga mita maria lene bada lalu lo manda bini. Bi mendegome mbogoyi ayu wiaabo ka lalu gilibu ngagoni ayu ina kamanginaga lalu ndo leda. Abale agali bi ogoni gili binidangi mitangi bialu lenegonaga lo nga.



<sup>12</sup> Mosesehanda laabo halu lalu, Iname tano uruni karulai harimangi howa Iba Anono poragoria Aroe tano ngagoria howa dindi ogoniha wuyu peago damene bibahende Lubene Gada hameigini libu mo miai harugoni. Ani bialu Gileada dindiha hari barebare ngaruha tano maru ngaru heba ti dege mo miru. <sup>13</sup> Ani bialu Gileada dindiha dindi maru wiarubi Basana dindi wiarubi bibahende Manase hameigini dabane halu mbira hene karubi ti miru. Basana ogoni ala Kini Ogahanda handayaho haga winigobi miru. Ai Manase hameigini ti dindi abale Agobo laga winigobi bibahende Manase hameigini halu mbira hayadaru ti mo miru lalu, Mosesehanda lene.

Abale Basana ogoni Lebaimi hameigini tinaga nga laga wini. <sup>14</sup> Mani howa Manase hameigini aria agali mbira mini Yairi henego ibugua dindi Agobo ogoni bibahende karulai howa mani dindi ogoni mini Basana wia aribia hene. Dindi ogoni wuyu pialu Gesua dindi Maga dindilanaga gibuni wiagoha wiari hene. Ani bialu dindi uruni bibahendeibuninaga mini lalu wia aribia hayagola wali agalime dindi uruni bibahende Yairi dindi laga wini.

<sup>15</sup> Mosesehanda laabo halu lalu, Magiri hameigini ti Gileada dindi karulelo ngeledogoni. Magiriali uruni ti Manase hameigini dege hene. <sup>16</sup> Ani bialu Lubene hameigini Gada hameiginila libu dindi Gileada ngagoria howa wuyu pialu Iba Anono poragoria tagira polebira. Dindi abene unurahayagi wima pialu iba ogoni poragoria tubari wulebira. Amura ni tagira ibiragohayagi howa wima ibalu Iba Yabogo poragoria tubari wulebira. Ani bialu Iba Yabogo ogoni Amono hameigini baba tubari wulebira. <sup>17</sup> Ani bialu orayaginaga ni paliragoha tubari Iba Yodana poragoria nga. Ani bialu uyurayaginaga tubari iba kuyama Galili bedagoria howa pupe halu unurahayagi Homene Iba laga bedagoria abene ni tagira ibiragohayagi Hari Pisiga hapara howa kagoria bolangua halu Homene Iba bedagoria tagira peda.

<sup>18</sup> Ogoningi dege tihondo ina bi ogodagua lamiru. Ai Anduane Homogo inanaga Ngode Datagaliwabehanda dindi Iba Yodana doma ederayagi ni tagira ibiragoha ngago ti halimulonaga nga. Ai tigua wai biaga ale wirimidaru mo yalu Iba Yodana domaede halu ti hamene Isaraele maru karunaga dindi mo mule tigua bamba halu pole pudaba.✧

<sup>19</sup> Ti one waneiginiru ti ina ti tano mo ngirugoha berelalu pilimu. Tinaga nogo bulumagaru dewa dege hinidemilo manda bidogo urunibi nde tano uruniha dege helalu pilimu. <sup>20</sup> Tigua ti hamene karunaga dindi Anduane Homogo inanaga Ngode Datagaliwabehanda Iba Yodana doma edera ni paliragohayagi ngaru ngulebero lalu lowiyago henene ngilo tigua wai bialu biamogo bilimu. Ai tigua wai biai howa abale dai nabi ti hamene biaru ti karulape ka handala dai bule ti heba mandagi ho halimu. Ani bialu mani tinaga dindi ina tu wa ngirugoha hole dai bilimu, lene.

<sup>21</sup> Mani ina Yosuahondo ogodagua laru. Anduane Homogo inanaga Ngode Datagaliwabehanda Kini Oga Kini Sihonolahondo biyagoni i de handarigoni. Ai tigua kini maru karu baba wai bialu tinaga dindi karularamigolabi nde anidagua dege bulebira.

<sup>22</sup> Anduane Homogo inanaga Ngode Datagaliwabehanda ti biamogo bulebirago tigua gi nahe halimu laru, lalu Mosesehanda lene.

### *Anduane Homogohanda Mosese Kenana dindi anda napobehe lenego ogo*

<sup>23</sup> Mosesehanda lalu, Horo ogoningi ina Anduane Homogohondo hongo howa ogodagua laru.✧ <sup>24</sup> Anduane Homogo Bibahende Haru Haame Ho Haga-o ina bule ngego damene bibahendenaga i emene hangu mbira mo walia harida. I birilidagua bulene mbirali dindiha harihabi naheore. <sup>25</sup> Ayu nde i dindi bayale ina ngini dindi benebere biagobi hari barebare bayale ngarubi Hari Lebanono wedagobi hondoliya Iba Yodana nde domalu poliya yupe habelo hameore ledi.

<sup>26</sup> Ani larugoyu tígua biako hene ngamigome Anduane Homogohanda keba halu inaga bi hale nahe handa tara haya. Ibugua ihondo lalu, Ne hariga bi lalu kegoni pai howa ema nabi harene. Bi ogonidagua lalu ihondo lone hale nahabe. <sup>27</sup> Áyu heyalu Hari Pisiga wedago nene ngagoria iragaho howa dindi abene uyurahayagi handa uyu ha abene unurahayagi handa unuha ni tagira ibiragohayagi handa daibia ni paliragohayagi handa amuha bigi bibe. Í Iba Yodana domalu ubaede naholeberegó hari nene ogoriani howa wá baya hanguore handa amu nana bibe. <sup>28</sup> Yosua baya hangu lawai halu ibunaga bu mini mo hongo habe. Ani larogoni Yosua ibugua wali agali haru halu Iba Yodana domaede halu ederayagi polebira. Ani pialu ti dindi áyu í handa amu halu handaregoniha pu holebira, Anduane Homogohanda laya.

<sup>29</sup> Anidagua layagola ina dindi ulini panda panda Bedepeo tanonaga abene amurayagi hondo harimagoni, lalu Mosesehandá lene.

## 4

### *Mosesehandá, Isaraele wali agali tí Anduane Homogo andaneha halimu, lenego ogo*

<sup>1</sup> Mosesehandá Isaraele wali agali lamialu lalu, Ina tihondo bi mana olangiruru baya hangu talialu bialu harimiyagua t́ni bayaleore holeberemi. Ani bialu Anduane Homogo ina mamalirunaga Ngode Datagaliwabe ibugua dindi t́ halimulo bamba ngini biagoria karulo holeberami. <sup>2</sup> Anduane Homogo inanaga Ngode Datagaliwabe ibugua bi mana lowini áyu langeroruniha tígua mana gahenge mbira t́nime wabu tago nahalimu. Mana uruni aria mbira mo wanahe o langeroruni bibahendeore baya hangu talialu biai halimu.✧ <sup>3</sup> Anduane Homogo ibunime Hari Peroni howa biyaruni t́ni handai harimi. Dewaliore dama mitangi bialu gime wabini Balahondo bi pupu wiaga bibahende hearuni ibugua ti mo ko hai hayago handarimigoni.✧ <sup>4</sup> Anigo wali agali Anduane Homogo inanaga Ngode Datagaliwabe kago ibugua bia larago hale halu biaga harimiru t́ dege haabo henego kamigoni.

<sup>5</sup> Anduane Homogo inanaga Ngode Datagaliwabe kago ibugua bi mana ihondo langiyaru ina tihondo bibahende langiai haru. Áyu tígua pialu dindi bayale ogoriani karulo hole poleberemigoha pu howa bi mana uruni talialu biaabo halu halimu. <sup>6</sup> Wali agali dindi tara tarani bu karume t́ manda timbuniwi mini gigabi taraoredane hendelo tígua mana uruni baya hangu talialu bialu halimu. Wali agali tara karume bi mana uruni hale howa tígua bi ogodagua lalu, Ayali-o wali agali urunaga mini mandala timbuni ina kamaru ale ndoya lolebira, lene.

<sup>7</sup> Ani lowa lalu, Wali agali tara tara karu tininaga hongo timbuniorehe heaguabi tígua bi pupu wulenaga dama heaguabi ti biamogo bialu mo wulene Anduane Homogo inanaga Ngode Datagaliwabe kadagua nahe. Anigo Anduane Homogo ibu inane haru mandagi haabo haga howa iname biamogo bia lalu ibuhondo olarimayagua ibugua hale halu abale biamogo biaga ka. <sup>8</sup> Wali agali tara tara karu tininaga hongo timbuniorehe heaguabi uruni tiha mana bayale tigabi áyu ina tihondo lawai harugoni ale bulene mbira nawiore ti bame haga ka. <sup>9</sup> Anigo t́ de hondowa mamage halu halimu. Horo bibahendengi t́ dindi ogoria kamingi howa mbirale t́ninaga deme handarimiruni embeda nahalimu. T́naga waneigini aguaneneru mani holebiraruhondobi lamiaabo halimu. <sup>10</sup> Hari Sainai heagoria howa Anduane Homogo inanaga Ngode Datagaliwabe deni kaware harimago mitangi bialu lamilimu. Horo ogoningi ibugua ihondo langialu lalu, Wali agali bibahendeore inaga bi mana larogoni hale helo ibu ngoai hadaba la, layagoni. Ti hale howa dindini kangi inaga bi mana ogoni tini ala talialu bialu howa tinaga waneiginirubi lamilo. Waneigini tiguabi nde inaga bi mana hale howa talialu bialu howa ini andaneha haabo helo, layagoni.

<sup>11</sup> Anduane Homogo ibugua bi lai hayagola tí hari tene kaware hapara howa dege hemigola ginu pobobi ira haguamebi hari nene biago bu yihalu ira hungu timbuni hari nene biagoha howa kiauulo daga hayane handarimigo te ogoni tí waneiginiru lamilimu.✧ <sup>12</sup> Ani buwa Anduane Homogo ibuni ira hagua ogoniha howa tíhondo bi layagola hale harimigoni. Anigo tígua Anduane Homogo ibuni kagobi deme nahende bi layaru dege hale harimigoni lamilimu. <sup>13</sup> Horo ogoningi ibugua tí baba habo nalolene bi lowialu ege tole kirani Bi Pira gilibu ngiyagoni. Ani ngialu howa lalu, Tígua habo nalolene bi lo werogoniore baya hangu talialu bialu halimu, layagoni.✧ <sup>14</sup> Ani lowa Anduane Homogohanda tígua dindi bayale anda pialu karulo holeberemigoha howa bialu halimulonaga bi mana bibahende baya hangu lawai habe lalu ihondo langiya, lene.✧

*Isaraele wali agali tigua gime wabiniru mo tene holene nawi lenego ogo*

<sup>15</sup> Mosesehanda laabo halu lalu, Anduane Homogo ibuni Hari Sainai nenení ira hungu biagoha howa tíhondo bi langiyangi tígua ibuore ogo ale handalehe lalu manda bibe nahe harimigoni. Ani birimigoni mitangi bialu tígua mamage howa de hondo halimu. <sup>16-18</sup> Tígua mbirale mbira gime wabu ngelowa inanaga anduaneore handalehe ogoni lolemini nalalimu. Ogonidagua bialu harimiyagua tígua mana ko timbuni bialu holeberemi. Tígua bigiya mbira wali mitangi bialubi agali mitangi bialubi nogo ega puya iba wenaru mitangi bialubi mbira gime wabu yu howa uruni tínaga anduaneore lalu mbirale uruni alehondo tígua bi pupu wulene nawiore.✧ <sup>19</sup> Tígua ni ege yakundiru hari daligaha bu karuhondobi nde bi pupu wulene nawi dege. Anduane Homogo inanaga Ngode Datagaliwabe ibunime wali agali tara maru karume urunihondo bi pupu wialu helo ani heleda. <sup>20</sup> Anigo tígua ani bulene nawiore. Tí Iyibi dindini ira timbuni daradagua biagoha dole hemiria Anduane Homogohanda tí yo pialu pilimulo mo wialu pelayagoni ndobe. Ani bialu ai tí ibuninaga wali agaliore halimulo lowa ibunime tí haru tagira ibiyagoni. Áyubi nde tí ibunaga kamigoni.✧ <sup>21</sup> Ai nde tíguaore biako harimigome Anduane Homogo inanaga Ngode Datagaliwabe ibugua ihondo keba hayagoni. Keba howa ibugua ihondo bi hongo howaore lalu, Íore dindi bayale tí ngule larugo ede ngagoha Iba Yodana doma ede halu napolebere, laya.✧ <sup>22</sup> Ai nde ina iba ogo domalu ubaede naholebero. I ogohayagi dege bialu homolebero. Tí dege dindi bayaleore benebere ede ngagoniha hole poleberami. <sup>23</sup> Ani pu howa tígua Anduane Homogo inanaga Ngode Datagaliwabe ibugua ina baba habo nalolene bi lowiyago yu wanahe baya hangu handayaho halimu. Tígua mbirale gime wabini ngaruhondo bi pupu nawi ibunaga bi manaore baya hangu hale halu bialu haabo halimu. <sup>24</sup> Tígua gime wabiniruhondo bi pupu nawilimu larogoni irane Anduane Homogo inanaga Ngode Datagaliwabe ibuniore kagoni. Ibugua tí mbirale gime wabini urunihondo bi pupu wialu halimulo yupe naholebira. Ibu ira hungu hongohe dalude ale kagome mbirale mbira ibu handalehe lowa tígua wabu helolene manda birimiyagua uruni daiore helolebira.✧

<sup>25</sup> Maniorebi tíni dindi ogoria haabo howa tínaga waneigini aguanerubi haragola mbirale bi pupu wulenaga gime nawabuleore larogoni. Tígua nabule larogo hale howa dege bialu harimiyagua mana ogoni Anduane Homogonaga deni ko ngubiorego ogonime ibu mo keba holeberemi. <sup>26</sup> Áyu ina bi hongohe olarogoni hari daligamebi dindimebi libugua hale hariba lolene wilonaga olarogo tí hale hadaba. Tígua Anduane Homogonaga bi áyu langerogo hale naharimiyagua nde Anduane Homogohanda tí dindi ogoriani nahalimulo bo batagi holebira. Ani bialu dindi bayale Iba Yodana ange ederayagi karulole kamigoriani lu haabo naholeberemi. Tí bibahendeore pu ereba

✧ 4:11: Har 19.16-18, Hi 12.18-19 ✧ 4:13: Har 31.18, 34.28, Man 9.10 ✧ 4:14: Har 21.1 ✧ 4:16-18: Har 20.4, LBM 26.1, Man 5.8, 27.15, Lm 1.23 ✧ 4:20: Har 19.5, Man 7.6, 14.2, 26.18, Ta 2.14, 1 Pi 2.9 ✧ 4:21: Dag 20.12 ✧ 4:24: Hi 12.29

hai holeberemi. <sup>27</sup> Anduane Homogohanda tí dindi tara tara ngaruha balu purogo lelaragola emene hangu mbira yu wahene holeberemi.✧ <sup>28</sup> Dindi tara tara uruniha purogolo howa tígua mbirale dama mitangi bialu wali agali tinime ege tole irarume wabini ngaruhondo bi pupu wuleberemi. Anigo mbirale gime wabini uruni aleme de nahandagabi hale nahagabi bi nalagabi tomo nanagabi mbirale nga nahagabi nga. <sup>29</sup> Ani handalu horo odagoningiore howa tígua mogolo handalu Anduane Homogo ibuni karia beregedalu dai bulene mitangi bu holeberemi. Ani buwa tinnaga hameoremehi miniooremehi hongo halu ibuni taya bulene hame larimiyagua nde ibalu ibuni karia handa walia holeberemi.✧ <sup>30</sup> Anigo ai tíha genda timbuni mbira ibu ngangibi mo ko holene mbira ibu ngangibi tínga bu mini beregedalu Anduane Homogo ibunaga bi mana lowini ngaru baya hangu talialu bialu holeberemi. <sup>31</sup> Ngode Datagaliwabe ibugua tí yu wahalu bo batagi halu mo ko nahaga tí daraore howa biamogo biaga kagoni. Ani howa ibugua bamba inanaga mamaliru baba habo nalolene bi lowinigo embeda naholebiraore.

<sup>32</sup> Ai ala bamba tí dindini nahemiha henedago mitangibu dai bidaba. Ani bialu Ngode Datagaliwabe ibunime wali agali piganeore wabinidago mitangibu dai bidaba. Tígua dindi tara tara ngaruha pu harimiyaguabi mbirale timbuni o binidaruni ale mbira bini dege ngane nahondoleberemi. Bi uruni ale mbira bamba agalime hale heneyabe. Ndoyago. <sup>33</sup> Anduane Homogo ibugua ira hungu timbuni deagoha howa bi layuago tígua hale harimigoni. Ai bamba mbirale gime wabinirume bi mbira ira hunguha howa ogonidagua layane hale howa homa nabi mbira ai heneyabe. Mbirali naheneore ndobe. <sup>34</sup> Anduane Homogo inanaga Ngode Datagaliwabe ibunime ina Iyibi dindiha howa haru tagira ibalu ina ibuninaga wali agaliore heledagoni. Ibugua tínga deoreni howa biabe hongohe tara tara wiaru dewaore biya. Ibugua Iyibiali hearu baba wai bialu warago timbuniru Iyibi dindiha ibilayagoni. Ani bialu nde ibugua Iyibi wali agali mo gi halu agalime nabigane ale dewaore biya. Anduane Homogo ibugua ani biyadagua biaga mendeali kabe. Mendeali naheoreyago. <sup>35</sup> Mbirale uruni biyaruni Anduane Homogo ibugua tíhondo mbirale hongohe urunidagua bibehe mendeali mbira naheore. Ibugua, Ini hangu kogoni, lalu tí mo walia hayagoni.✧ <sup>36</sup> Ibugua tí lawai holenaga ibunaga bi dahuliya andagaha howa ladali haya. Ani buwa ibugua dindini ira timbuni hongohe deagoha howa bi latagi hayane hale harimigoni. <sup>37</sup> Ai Anduane Homogo ibugua tínga mamaliru gubalini ho howa ibugua tí ibunaga wali agali halimulo dabaya. Ani dabaluru ibuninaga hongo timbuni wiagome tí Iyibi dindiha howa haru tagira ibiyagoni. <sup>38</sup> Tí ani haru tagira ibalu howa harigani wali agali timbuni hongo timbunihe tí baba hongo manda nakarulape hearuni ibugua bope haga biyagoni. Ani bima ibalu tí haru halu ibuwa agali uruninaga dindi anda wiaru tí karulo halimulo ngulenaga ani binigo ai dindi ogoni áyu tí karulo kamigoni. <sup>39</sup> Anidaguaore binigo áyu mitangi bialu tígua o binidaruni embeda nahalimu. Anduane Homogo ibu dindibi dahuliya andagabi bibahendenaga Ngode Datagaliwabe kagoni. Mendeali ibu kagobi naheore. <sup>40</sup> Anigo ibunaga bi mana áyu ina tíhondo langiruruni baya hangu talialu bialu halimu. Anidagua talialu bialu harimiyagua tíngi tínga waneiginirubi bayale hai holeberemi. Ani bialu tígua Anduane Homogo inanaga Ngode Datagaliwabe ibugua dindi áyu o ngiragoha haabo howa holeberemi. Ani bialu dindi ogoni tíngaore wiaabobo bu wulebira, lalu Mosesehanda lai hene.

*Mosesehanda agali ibida pialu ha do holene tano mo wigi binigo ogo*

<sup>41</sup> Mani Mosesehanda tano tebira Iba Yodana doma ederayagi ni tagira ibiragoha mo wini.✧

<sup>42</sup> Tano uruniha agali mbirame agali mende ibu waitigi ndo kago baro la nabi mememe balu homayagua ibida pialu ha do holene dabo ngelene. Agali urunidagua



birago ibu tano uruni mbiragoha ibida pialu ha do kagola homayago damene karume talima pialu bo wanaholebira. <sup>43</sup> Tanodaru mini uru wini. Mbirago dindi ko yobi wiagoria Bese winigo tano ogoni Lubene hameigini ti ha do helonaga mo wini. Tano mende Lamodo winigo ogoni Gileadahayagi wini. Gada hameigini ti ibida pialu ha do holene ogoni wini. Tano tebone Golana winigo ogoni Basana dindihayagi wini. Manase hameigini halu mende karu ti ibida pialu ha do holene ogoni wini.

*Isaraele dindi tu wuwa ta henegonaga te nemandi ogo*

<sup>44</sup> Mosesehanda Isaraele wali agalihondo Anduane Homogonaga bi mana maru lamini. <sup>45-46</sup> Ibugua bi mana uruni ti Iyibi dindi wahalu tagira ibalu mani ti Iba Yodana doma ederayagi ni tagira ibiragoha dindi ulini Bedebero tano wiago handape ho howa bi mana ogoni lamini. Dindi ogoni Amora wali agalinaga Kini Sihono ibu dindi ogoriani hene. Ala ibu Hesebono tano wiagoria biruwa ibugua dindi uruni handameho haga hene. Ani henego ai Mosese halu Isaraeleali tigua Iyibi wahalu tagira ibuwa ti baba wai bialu bope hene. <sup>47</sup> Ani bialu ibunaga dindi wiagoriabi Basana dindinaga Kini Oga dalu wiagobi Isaraelealime ti karulo hene. Amora wali agalirunaga kini mende ogoni Iba Yodana doma ederayagi ni tagira ibiragoha haga hene. <sup>48</sup> Isaraele hameigini tigua dindi karulo henedaru tubari Aroe tano Iba Anono pedago kawareni howa wuyu pialu hari mini Siriono laga mini mende Hari Hemono laga heagoria tagira pene. <sup>49</sup> Ani bialu Isaraeleali tigua dindi Iba Yodana ange mende ni tagira ibiragohayagi wiaru bibahende ti karulai halu iba kuyama mini Homene Iba laga bedagoria tagira pialu unura piaho wialu Hari Pisiga kagoria wima tagira pene.

## 5

*Bi Pira lenego ogo*

*(Haru Penego 20.1-17)*

<sup>1</sup> Mosesehanda Isaraele wali agaliru ibu ngoai hadaba lowa tihondo lalu, Isaraele wali agaliru-o ina tihondo bi mana áyu langerogo hale hadaba. Bi mana baya hanguore hale halu mo yai howa talialu bilimu. <sup>2</sup> Anduane Homogo inanaga Ngode Datagaliwabe ibugua Hari Sainai neneni howa ina baba habo nalolene bi lo wiyagoni. <sup>3</sup> Habo nalolene bi ogoni ina mamali heneru baba hangu ndo áyu ina kamaru bababi lowinigo nga. <sup>4</sup> Anduane Homogo ibugua ibuni hari biagoria ira hungu biyagoha howa ina dengui handalu bi layagoni. <sup>5</sup> Horo ogoningi i dombegua howa Anduane Homogo ibunaga bi layago lo yudai bialu tí langialu harugoni. Ira hungu timbuni biyago hondowa tínime hari biagoha polenego gi harimigola ina ani pu harugoni.

Anduane Homogohanda ogodagua laya. <sup>6</sup> I Anduane Homogo tínaga Ngode Datagaliwabe kogoni. Tí Iyibi dindiha garabaya hemiria ina tí haru tagira ibirugoni.

<sup>7</sup> Dama tara tarahondo bi pupu nawi i hangu mitangi bialu mo dunini howa lotu lalu halimu.

<sup>8</sup> Mbirale mbira hari daligaha winibi dindini winibi ibaha winibi dindi andaneha winibi uruni ale bi pupu wulenaga gime wa nabilimu. ✧ <sup>9</sup> Mbirale mbira gime wabini mbira ngelowa ogonihondo tíni bulu palialu bi pupu nawilimu. Ani nawilimu larogo irane Anduane Homogo tínaga Ngode Datagaliwabe iniore kogo mbiralime ogonidagua bilo henge namiaga kogoni. I handabe manga halu erembira ngiaga karu pani mialu uruninaga waneigini mani hama porarubi daba tebone mane daba haragoriabi pani miaho dege ngoria hondolebira. ✧ <sup>10</sup> Ai i gubalini halu ina larodagua bialu inaga mana lo ngodaguabi hale halu biaga karu ina uruni ti gubalini halu maha ti waneigini dabane daosini dewa hama porarubi gubalini haho wiaabo hole kogoni.

✧ 5:8: LBM 26.1, Man 4.15-18, 27.15 ✧ 5:9: Har 34.6-7, Dag 14.18, Man 7.9-10



<sup>11</sup> Mana ko tara tara bulenenaga i mini lalu labi biabi nabilimu. I Anduane Homogo t'naga Ngode Datagaliwabe kogo mbirali i'naga mini mo nagalone haga kago pani miaore bulebero.✧

<sup>12</sup> Anduane Homogo t'naga Ngode Datagaliwabe kogo i'na t'ihondo bilimu lalu langirudagua Sabada horo i'ninaga loma biaho ngeledogo ogoni mitangi bialu halimu.✧

<sup>13</sup> Tí horo waragaru t'ininaga biabe bulene horo o ngarunigo <sup>14</sup> ai horo kanego i mitangi bialu halo halimulonaga nga. Horo kane ogoningsi biabe bulene nawiore. Tí'ibi tí waneiginibi t'naga garabaya biabe ale biahaga karumebi t'naga nogomebi dindi tarali maru tí heba mandagi kamirumebi tí bibahendeme biabeore mbira nabi halimu. Wali agali t'naga garabaya biabe ale biahaga karu tibi nde t'ini halo kamidagua dege ti biabe nabi halo holene nga.✧ <sup>15</sup> Tí'ibi nde Iyibi dindiha garabaya biabe ale bialu hemiria i Anduane Homogo t'naga Ngode Datagaliwabe kogo i'na i'ninaga hongo timbuni gibiorehe kogome tí haru halu tagira ibirugoni. Ani birugonaga mitangi bialu t'igua nde bi mana o langerogo talialu Sabada horo ogoniore halo birulene horo wiabagi hene ngelalimu.

<sup>16</sup> Anduane Homogo t'naga Ngode Datagaliwabe i'na bilimu lalu langirudagua talialu t'naga aba aiyala mo yo handa nabi bi laradagua hale halu bilimu. Anidagua bialu harimiyagua t'igua mbirale bialu holeberamiru bibahende bayale dege hai halu dindi i'na ngerogoriani luore haabo holeberami.✧

<sup>17</sup> Wali agali homelo nabalimu.✧

<sup>18</sup> Wali agali kayu nayalimu.✧

<sup>19</sup> Mbirale page nabilimu.✧

<sup>20</sup> Ke howa dibade nahalimu.✧

<sup>21</sup> Agali mende ibu one bedago hondowa tí dimagoli nahalimu. Mendealinaga anda kago hondowabi tí dimagoli nahalimu. Mendealiibunaga dindi ngagobi ibunaga wali agali garabaya biabe ale biahaga bu karubi ibunaga nogo bulumaga hinidarubi nogo dongi karubi ibunaga mbirale maru ngaru bibahendebi tí hame lalu dimagoli nahalimu, laya lalu lene.✧

<sup>22</sup> Bi uruni Anduane Homogohanda amu Hari Sainai tenaha tí ngoai ho hemiria langiyagoni. Ogoningsi ibugua ira hungu ginu hagua mberane timbuni biagoha howa tí bibahendehondo bi uruniore baya hangu talialu bialu halimu lalu tí langiyagoni. Ibugua bi tara maru bilimu lalu mbira nalangi. Mani hayagola ibugua bi mana uruni bibahende ege tole mbalape kirani gili buwa i'hondo ngiyagoni, lalu Mosesehanda lene.✧

*Wali agalime gi henego ogo  
(Haru Penego 20.18-21)*

<sup>23</sup> Mosesehanda laabo halu lalu, Hari nene biago ira hungu hagonalame bu dambi hai heagola ge heagoha howa bi mbira layuago tí hale harimigoni. Ani hale halu t'naga agali haguane hearubi hameigini hangu hangu hemirunaga agali bamba hene hemirubi ti bibahende i hewaria ibuwa lalu, <sup>24</sup> Anduane Homogo inanaga Ngode Datagaliwabe ibugua ira hungu haguala timbuni datagi hayagoha howa bi latagi halu ibunaga hongo holene timbuni gibiore wiago inahondo mo walia hayagoni. Ayu ogoni Ngode Datagaliwabe ibunime agali mbirala lola howa bi layagua agali ogoni ibu homolene nawidane iname hendedamagoni. <sup>25</sup> Anigo Anduane Homogo inanaga Ngode Datagaliwabe ibugua ina baba bi lone layagua nde ina homolene wulubadago. Ira

✧ 5:11: LBM 19.12 ✧ 5:12: Har 16.23-30, 31.12-14 ✧ 5:14: Har 23.12, 31.15, 34.21, 35.2, LBM 23.3 ✧ 5:16: Man 27.16, Md 15.4, 19.19, Mg 7.10, 10.19, Lg 18.20, Eb 6.2-3 ✧ 5:17: Pig 9.6, LBM 24.17, Md 5.21, 19.18, Mg 10.19, Lg 18.20, Lm 13.9, Ya 2.11 ✧ 5:18: LBM 20.10, Md 5.27, 19.18, Mg 10.19, Lg 18.20, Lm 13.9, Ya 2.11 ✧ 5:19: LBM 19.11, Md 19.18, Mg 10.19, Lg 18.20, Lm 13.9 ✧ 5:20: Har 23.1, Md 19.18, Mg 10.19, Lg 18.20 ✧ 5:21: Lm 7.7, 13.9 ✧ 5:22: Hi 12.18-19

hungu haguála tara dayagonime ina mo ko howaore dolobada. Anigo áyu ina aginaga homolene ngabe. <sup>26</sup> Ngode Datagaliwabe haluhe kago ibunime ira hungu haguaru timbuni dedagoha howa bi larago hale howa wali agali kamaru aria mbirali nahome ai kabe. <sup>27</sup> Ai Mosese ina dai bialu Anduane Homogo inanaga Ngode Datagaliwabe ibugua inahondo bi lararu damene bibahende hale hole pu. Hale howa ina ibugua bi layaru ina langeregola iname hale halu talialu biai holeberemago ai hale hole pu, larimi.

<sup>28</sup> Ani larimigo hale howa Anduane Homogo ibugua ihondo langialu lalu, Ina wali agali tigua bi layaruni hale harugo bi uruni tigabiore layada. <sup>29</sup> Ai tigua mini ogo-nidagua dege wu haabo helo hamelo ko. Tigua inaga mini mo yaraga haabo helobi inaga bi mana lowinigo ngaru bibahende talialu bialu haabo helobi hameore lo kogoni. Tigua ogonidagua bialu hayagua nde tinibi tinaga waneigini aguaneru mani holebirarume bialu holebirarubi bibahende bayale dege haabo holebira. <sup>30</sup> Anidagua bulebirago ai tininaga balai anda bu henedagoha hole pugupugu bidaba lole pu. <sup>31</sup> Anigo Mosese ina inaga bi mana bibahende ihondo languliya í ogoriani habe. Wali agali tigua dindi ina tihondo ngulebero lalu lamirugoha pu howa inaga bi mana uruni talialu bialu helo ina ti lawai habe, laya lene.

<sup>32</sup> Ani lowa Mosesehanda tihondo lamialu lalu, Isaraele wali agaliru-o tigua baya hanguore de hondo howa Anduane Homogo inanaga Ngode Datagaliwabe ibuguabi langiyaruni baya hangu talialu bialu haabo halimu. Mana lo ngaruni aria mbiraore hangubi napugualimu. <sup>33</sup> Tigua bialu holeberemiru bibahende bayale hai helo mana lowini ngaruni baya hangu talialu biai halimu. Anidagua birimiyagua tí dindi bayale karulole kamigoria anda pu howa bayaleore haabo holeberami, lene.

## 6

### *Bi Mana duniniore mbira lo ngago ogo*

<sup>1</sup> Mosesehanda laabo halu lalu, Anduane Homogo inanaga Ngode Datagaliwabe ibugua ihondo bi mana uru tí lawai habe lalu langiya. Tigua dindi bayale ogoniha anda pole pialu kamigoria pu howa ibunaga bi mana uru baya hangu talialu bialu halimu. <sup>2</sup> Tíni dindini kamingi howabi tinaga waneigini aguane mani holebiraru ti howabi bibahendengi tigua Anduane Homogo inanaga Ngode Datagaliwabe andaneha haabo halimu. Anidaguaore bialu harimiyagua tí dindi ogoria luore halu hodagua holeberemi. <sup>3</sup> Isaraele wali agaliru-o bi uruni hale howa talialu bilimu. Anidagua bialu harimiyagua nde tigua bialu kamiru bayale hai halu tí hameiginibi hongohe mbira tagira pialu dindi bene bere bayale Anduane Homogo ina mamalirunaga Ngode Datagaliwabe ibunime tí ngulebero lalu bamba layadagua pu holeberemi.

<sup>4</sup> Isaraele wali agaliru-o Anduane Homogo ibuni hanguore inanaga Ngode Datagaliwabe kago manda bialuore halimu.✧ <sup>5</sup> Anduane Homogo tinaga Ngode Datagaliwabe kago tinaga gubalinimebi minimebi hongomebi ibu mitangi bialu gubalini ho halimu.✧ <sup>6</sup> Bi mana ina áyu o langerogoni embedaore nahalimu.✧ <sup>7</sup> Tinaga waneiginiruhondo lawai halu halimu. Tíni andagaha biruwabi harigani pialu howabi biabe bialu howabi halo biruwabi tí waneigini lawai haabo halu halimu. <sup>8</sup> Bi uruni embeda holigonaga bebani gili buwa tininaga gi habenibi wanakuinibi gilibu bapara howa halimu. Anidagua birimiyagua nde bi mana uruni embeda naholeberemi. <sup>9</sup> Bi mana uruni tíni andaga panga harabani gilibu wialu tanoha uba anda tagi biaga pabe panga kagoriabi gilibu wilimu, lalu Mosesehanda lene.

### *Isaraeleme bi mana talialu holene nga lenego ogo*

<sup>10</sup> Mosesehanda laabo halu lalu, Bamba Anduane Homogo tinaga Ngode Datagaliwabe ibugua bulebero lalu tinaga mamali Abarahama Aisaga Yagaba imaru tihondo

lowiyadagua dindi bayale mbira tano timbuni dewa buwi tígua erekui biabe bini ndo ngaruni ngulebira.✧ <sup>11</sup> Anda odaruniha dabudabu tara tara bayale degeru bu wulebirago tígua mo wini ndo wulebira. Iba hambiaga ulibi tombo wulebirago urunibi tígua tombene ndo dege wulebira. Dindi uruniha pu mbira gerebi lini daga maburu ira olibe maburu wulebirago tígua hengene ndo dege. Anduane Homogoibunime dindi bayale ogoniha tí haru halu puwa tígua meore karulo halimulo ngulebira. Ai tígua dindi ogoniha anda pu howa tomo bayale tara tara ngaru minana tínime noa bira ale naga bialu tombe ho howa <sup>12</sup> Anduane Homogoibunime embeda holigo de handaluore halimu. Iibunimeore tí iyibi dindiha garabaya biabe ale bialu harimigoria howa dindi ogoni yu wahalu haru tagira ibiyagoni. <sup>13</sup> Tígua Anduane Homogo inanaga Ngode Datagaliwabe ibu andaneha haabo halimu. Ani howa lotu ibuhondo hangu lalu ibunaga minini howa bi henene lalu halimu.✧ <sup>14</sup> Wali agali tí kamigoria kaware handa *ai nai* bu padarume dama mitangi bialu gime wabiniruhondo bi pupu wialu kadagua nahalimu. <sup>15</sup> Tígua mbirale gime wabini urunihondo bi pupu wirimiyagua Anduane Homogohanda tíhondo keba timbuni howa irame bo heda halu mbirale bibahende do mundulai hagdagua tí balu bo wahaiore holebira. Ani bulebirago irane Anduane Homogobuni inane haru mandagi haabo kagoni howa ibugua tí mbirale gime wabiniruhondo bi pupu wilimulo yupe naholebira.

<sup>16</sup> Tígua Masa dindini howa birimidagua mani Anduane Homogonaga hongo abidabe hondole bahanda nabilimu.✧ <sup>17</sup> Bi mana ogoni baya hangu talialu biai halimu lalu langiyago mbiraore yu wanahalimu. <sup>18</sup> Anduane Homogohanda bulene tigabi bayale lalu langiyaru talialu bialu harimiyagua bibahendeore tígua beremiru bayale hai holebira. Ani bialu bamba Anduane Homogohanda dindi bayale benebere ogoni tí ngulebero lalu tínaga mamaliruhondo laminigo heneneore tí halimulo ngulebira. <sup>19</sup> Ani bialu tígua waitigi dindi uruniha holebiraru bo batagi holeberemi layadagua heneneore uruni bo batagi holeberemi.

<sup>20</sup> Mani horo mbirungi tínaga waneiginirume tí hale halu lalu Anduane Homogoinanaga Ngode Datagaliwabe ibugua mana uruni iname taluwa bialu halimu layago irane aginagabe lolebira. <sup>21</sup> Ani hale haragola tígua ogodagua ladai bilimu. Ina bamba Iyibi dindini kini heagonaga garabaya biabe ale biahaga hemaria Anduane Homogohanda ibunaga hongome ina mo wialu haru dai binigo kama. <sup>22</sup> Heneneore Anduane Homogobugua agalime nabiagane alebi deme nahendene alebi hongohe tara tara tiha mo ko holene mo tandaga holenebi wiaru Iyibi wali agalihondobi Iyibinaga kini heagohondobi agali haguane haru haga hearuhondobi biyaru inanenaga demeore handarima lalimu. <sup>23</sup> Ani bialu ibugua ina Iyibi dindiha howa haru tagira ibalu bamba ina mamaliruhondo bi lowiyadagua heneneore dindi bayale ogoni ina ngulebero layagoni heneneore ngule haru ibiya. <sup>24</sup> Mani howa Anduane Homogoinanaga Ngode Datagaliwabe ibugua ina ibu andaneha howa ibunaga bi mana uruni talialu bialu halimu lene. Ani layadagua bialu haabo harimayagua ibugua inanaga dindi ogo handayaho haabo kagola bayale áyu ngagobi wiaabo holebira. <sup>25</sup> Anduane Homogobuniga bi mana inahondo langiyago baya hangu talialu bialu haabo harimayagua nde Anduane Homogoinanaga Ngode Datagaliwabe ibugua inahondo ibunaga gubaliniha turu halu dungulo howa ina wali agali tigabiore kami lolebira, lalu Mosesehanda lene.

## 7

*Isaraele wali agali ti Anduane Homogonaga heneneore henego ogo  
(Haru Penego 34.11-16)*

<sup>1</sup> Mosesehanda laabo halu lalu, Anduane Homogo inanaga Ngode Datagaliwabe ibugua tí dindi áyu pole kamigoriani haru pialu howa hameigini tara tara dindi ogoriani padaru bo waratagi hai holebira. Tí pialu dindi ogoriani anda poramigola agali tí ale ndo hameigini karia timbuni hongoheru dindi ogoniha padago bo batagi hai holebira. Hameigini hongohe uru Hidiru Gigasaru Amoraruru Kenanaru Pereseru Hibiru Yabusuru uruni paligi bida. ✧ <sup>2</sup> Anduane Homogo inanaga Ngode Datagaliwabe ibugua hameigini uruni bope halimulo henge ngirangi tígua hameigini o biaru homelo bo wahai halimu. Tígua hameigini uruni dara halu wai palimiya lalu bi mbira nalalimu. <sup>3</sup> Ani bialu hameigini uruni baba wali dabu bu pu íbu nabilimu. <sup>4</sup> Wali dabu bu pu íbu birimiyagua tigua tí waneiginiru dama mitangi bialu gime wabini ngaruhondo bi pupu wima pialu Anduane Homogo yu wahalu polebiragonaga laro. Nabilimu larogoni tínaga waneiginirume bialu hayagua nde Anduane Homogohanda tihondo keba timbuni halu abaleore tí mo ko hai holebira. <sup>5</sup> Ani buligo tígua wali agali uruni ti heba mandagi nahe howa tinaga bi pupu wiaga damene ngaruni bo haeala bagabu wahai halimu. Tinaga lomabu delaga dabu bu karu bo haeala бага bialu anda gene ege toleme wabu helene karu bo gindulobaga bialu gene irame wabu helene karu dibu gindulobaga bialu tinaga dama mitangi bialu gime wabini mini Asera laga wabu heledaru dambialu irani delalimu. ✧ <sup>6</sup> Tí Anduane Homogo inanaga Ngode Datagaliwabe ibunaga hanguore hene kamigo manda bialu anidagua bilimu. Dindi tara tara ngaruha hameigini bu karu helowa tí hanguore ibuninaga wali agali halimulo dabo heledagoni. ✧

<sup>7</sup> Tí wali agali dewaore hameigini maru karu bolanguahe hemiria ndo Anduane Homogo ibugua tí gubalini howa dabayagoni. Tí hameigini emene koore hemiria dabayagoni ndobe. <sup>8</sup> Anigo Anduane Homogo ibunime tíore gubalini timbuni howa bi abale ina mamaliruhondo bulebero lalu lowiniyago lola helonaga dabene. Ani buwa ibuninaga hongo timbuni kagome tí Iyibi dindiha garabaya biabe ale bialu hemiangi Iyibi kini kagonaga giha howa gingila mialu mo wiyagoni. <sup>9</sup> Ai nde tigua mbirale uruni mitangi bialu Anduane Homogo inanaga Ngode Datagaliwabe ibuni hanguore Ngode Datagaliwabe henene howa mini bilinahe kagoni. Horo bibahendengi ibunime bi ledago biai hagaore kago tihondo bulebero lalu bi bamba lowiyaruni henene biaiore holebira. Wali agali dewaore dindi bibahendeha karume ibu gubalini howa ibunaga bi mana hale halu biai hararuhondo ibunaga gubalini holene walia holebira. ✧ <sup>10</sup> Anigo ibugua wali agali marume ibu handabe manga haga karuhondo pani nelo abale mulebira. <sup>11</sup> Ani bulebirago tígua ibunaga bi mana lowini ngarubi ina áyu bi mana langirurunibi bibahende baya hangu mo tene howa bialu halimu, lalu Mosesehanda lene.

*Anduane Homogo ibugua wali agali ibunaga bi mana hale hararu mo bayale holebi-rago ogo*

<sup>12</sup> Mosese ibugua lalu, Tígua bi mana uruni hale howa ledadagua bialu harimiyagua Anduane Homogo inanaga Ngode Datagaliwabe ibuguabi nde bulebero lalu habo nalolene bi lowiyadagua bialu ibunaga gubalini holene tiha wiaabo helolebira. ✧ <sup>13</sup> Ibugua tí gubaliniore halu mo turu haragola tínaga waneigini dewaore halu damebi timbuniore holeberemi. Tínaga mabu ngamirubi mo bayale haragola tí mabuha widirubi waini iba timbuni berelo gerebi linirubi olibe linirubi dewaore holebira. Ibugua tínaga nogo sibiru bulumagaru karume igini dewaore wuyu helolebira. Bamba tínaga mamaliruhondo habo nalolene bi lowialu dindi ogoni tí ngulebero layagoha pu kamingi ibugua bayale uruni bibahende tí ngiaiore holebira. <sup>14</sup> Anduane Homogo ibugua tihondo mbirale uruni ngulubadadagua dindi maru ngaruha wali agali maru karuhondo mbira namulebira. Tínaga wali bedaru aria mbirabi dalo wali nabirulebirago tínaga nogo sibi

✧ 7:1: Ab 13.19 ✧ 7:5: Man 12.3 ✧ 7:6: Har 19.5, Man 4.20, 14.2, 26.18, Ta 2.14, 1 Pi 2.9 ✧ 7:9: Har 20.5-6, 34.6-7, Dag 14.18, Man 5.9-10 ✧ 7:12: Man 11.13-17



bulumagaru angibuni karuni aria mbirabi pudu naholebiraore. <sup>15</sup> Anduane Homogo ibunime ti baya hangu handayaho haabo kagola tíha warago tara tara ngaru naanda ibulebira. Ani bialu warago koore Iyibi dindini hondo hemiria ibilayadagua tíha nde naibilelalebira laro. Anigo tínaga waitigi bu karuha warago koore uruni ibilaga bulebira. <sup>16</sup> Tígua wali agali Anduane Homogo inanaga Ngode Datagaliwabe ibugua tínaga giha minu ya haga biraruni daraha dai nabi bibahendeore bo wahai halimu. Ani buwa tinaga dama mitangi bialu gime wabini ngaruhondo bi pupu nawilimu. Ani wialu harimiyagua tí homoleberemi.

<sup>17</sup> Tígua wali agali uruni timbu dewaore tí kamigobi ndodane handalu uruni bo batagi habe nahedalo mitangi nabilimu. <sup>18</sup> Tígua urunihondo gi nahe elahé howa Anduane Homogo ibugua Iyibinaga kini heago heba ibunaga wali agali hearuhondo ala biyagoni mitangibu dai bilimu. <sup>19</sup> Iyibi dindini warago ko tara tara tagira ibiyane tíni deme handarimiruni mitangibu dai bilimu. Anduane Homogo inanaga Ngode Datagaliwabe ibugua agalime nabiagane ale biyarubi mitangi budai bilimu. Anduane Homogohanda tí gi mialu haru dai bule biabe timbuni Iyibi dindini biyarubi mitangi budai bilimu. Áyu tígua wali agali hondowa gi halu kamirunibi ibugua o biyarunidagua dege ti mo ko howaore bolebira. <sup>20</sup> Ani barago handalu maru ibida puwa ha do hayagua Ngode Datagaliwabe ibugua ti ha do kagoha moneme ti hayilo pelaragola urunime hayalu home lolebira. <sup>21</sup> Ani bulebira tígua gi nahalimu. Irane Anduane Homogo ibuni tí baba mandagi haabo kamigoni. Ibunaga hongo holene timbuniore hondowa wali agali bibahendeme ibuhondo gi timbuni hai holene nga. <sup>22</sup> Tí hapara halu kawareore pugu beramigola Anduane Homogo ibunime wali agali uruni hendore hendore waratagi haga bulebira. Tígua wali agali uruni áyu dege abale bo haeala hole nabuleberemi. Abale pialu bo wahai harimiyagua nde gabua ema bialu piaga tara tara agali homene tingini ngaru nagane bedaru ti bira timbu halu urunime tí bo nolebira. <sup>23</sup> Anduane Homogo ibunime tínaga waitigiru baba wai bialu ti bope halimulo hongo karulape ngulebira. Ani bialu tínaga waitigiruha gi holene mo wia haragola ti giho kaore dege tígua pialu bo wahai halimulo helolebira. <sup>24</sup> Anidagua bialu uruni tinaga kini karu minu yalu ibalu tínaga giha minu ya holebira. Anidagua biragola tígua kini uruni homelo bo waharamigola mani holebirarume kini uruni abogo ogoria hene lolene nawulebira. Tígua uruni bialu kamigola nabibe lalu hapai holene mbirali naholebira. Tígua pialu bibahendeore bo wahai holeberemi. <sup>25</sup> Tinaga dama mitangi bialu gime wabini ngaru bibahendeore irani mo delai halimu. Mbirale dama mitangi bialu gime wabini uruni mo yári bia hene ngolo siliba ngaru minime dimagoli halu mo yabi nabilimu. Uruni mo ya nabilimu larogoni irane Anduane Homogohanda dama mitangi bialu gime wabini ngaru turu nahagaore kagoni. Ai tígua mbirale uruni mo yu kamiria tíni homoligonaga mo ya nabilimu lalu langero. <sup>26</sup> Mbirale dama mitangi bialu gime wabini uruni aria mbira tí andagaha mo yalu anda polene nawiore. Ngode Datagaliwabe ibugua lalu, Mbirale uruni mo ko hai holene nga, laya. Ai tígua mo yalu pirimiyagua nde ti heba mo ko holene wulebirago nayalu pilimu laro. Mbirale dama mitangi bialu gime wabini uruni ko ngubiore ngago manda bialu tígua uruni erembira mialu halimu, lalu Mosesehanda lene.

## 8

### *Isaraele wali agali tigua dindi bayale karulolebirago ogo*

<sup>1</sup> Bi mana ina tihondo langiruruni baya hangu hale howa talialu bialu halimu. Ani birimiyagua nde tíni bayale halu dewaore ho dame buleberemi. Ani howa Anduane Homogo ibugua tínaga mamaliruhondo dindi ngulebero lowiyago tihondo ngulebira. <sup>2</sup> Ina hariga luore ibirimagoha inanaga Anduane Homogo ibunime bamba halu hama ibiyago tígua baya hangu manda bilimu. Dindi ko wali agali nahaga wiagoha mali



pira mariani (40) ibagabu harimingi Anduane Homogo inanaga Ngode Datagaliwabe ibugua tí ibunaga mana baya hangu talialu buleberemidabe be nabuleberemidabe hondolenaga tí bahandalu genda maru tí hemigoha ibilaga biyagoni. <sup>3</sup> Ibugua tí tomo mo garibila ala howa mani tí mena nalu halimulo ngiya. Tomo ogoni t́nibi t́naga mamali henerumebi mbira abale nalu haga ale ndo. Ibugua anidagua biyagoni irane wali agalinaga holene tomo noleneme hangu miaga ndo. Iname Andunae Homogo ibunaga bi mana hale halu bialu harimayagua nde holene ogonime miaga lalu mo walia holenaga tomo ogoni ngiya.✧ <sup>4</sup> Mali pira maria (40) ogoniha howa t́naga aga bu hemiru mbira budabaga nabi harimi. T́naga ge habebi mbira to nahe bayale karulape dege harimigoni. <sup>5</sup> Ai nde t́gua manda bulene mbira ngago ogo t́naga abahanda ibu waneigini mana lalu mo tiga biagadagua Anduane Homogo inanaga Ngode Datagaliwabe kago ibugua mana lalu tí mo tiga bialu haga ka.✧

<sup>6</sup> Ani biaga kago mitangi buwa t́gua Anduane Homogo ibunime bilimu lalu langiyadagua bialu halimu. Ibugua mana lo ngaru talialu bialu howa ibuni andaneha haabo halimu. <sup>7</sup> Ai Anduane Homogo inanaga Ngode Datagaliwabe ibugua tí dindi bayale biagoha haru pole poragoni. Dindi ogoniha iba timbuniru pialu iba ulihabi iba biraga dewa ngaha poleberemi. Iba marubi dindiha howa duguadaga halu dindi ulini ngaruha howabi hari nene ngaruha howabi iba bayale duguadaga haga biaga nga. <sup>8</sup> Dindi ogoriani balawa wabiaga bali widiru anda hagabi pu mbira mini gerebi lini dagaruru ira lini maru pogeru oliberu pomegaranaderu anda haga bialu mone tara ibane dendebe mbira mini haniru wiaga ngagoni. <sup>9</sup> Ai nde dindi ogoniha pu howa tí tomo garibi nalebi mbirale mbira buru palia nabibi holeberemi. Dindi ogoniha ege tole ngaruha aeane pale ngagobi hari nene ngaruha ege tole mini goba taya bibehe holeberemi. <sup>10</sup> Tomo nolene taya beremiru bibahendeore wiai holebirago ai mbirale uruni bibahendebe dindi bayale benebere ngulebiragonagabi Anduane Homogo inanaga Ngode Datagaliwabe ibuhondo kaj lolene nga lalu, Mosesehanda lene.

*Isaraele wali agali tí Anduane Homogo embeda nahe halimu, lenego ogo*

<sup>11</sup> Mosesehanda laabo halu lalu, Anduane Homogo inanaga Ngode Datagaliwabe kago ibu embeda halu yu wanahalimu. Ibugua bi mana ina t́hondo áyu langialu kogobi embeda holemini nahalimu.✧ <sup>12</sup> T́gua anda bayaleni padamingibi tomo bayaleru dewa bu payabu ngagola nalu howabi <sup>13</sup> t́naga nogo bulumagaru sibiru dewa hinu howabi muni ngolo silibarubi yári tara tara dewa wu howabi <sup>14</sup> t́gua mine howa balagala halu Anduane Homogo inanaga Ngode Datagaliwabe ibuore mo embeda nahalimu. Ibugua tí Iyibi dindiha garabaya biabe ale bialu hemiria haru tagira ibiyago ibuniore kagoni. <sup>15</sup> Ani buwa tí haru halu dindi ko wali agali nahaga wiagoria ibalu hemiria nogombimebi alipiagomebi hayaragola homaga dindi wiagoha ibunime haru bamba halu tí baya hangu handayaho hayagoni. Dindi ko iba nabiraga dindi yobi wiagoriani hemiria ibugua iba nalimulo ege tole timbuni mbira wiagoha howa iba dugutagi helayagoni. Ani helayagola t́gua iba ogoni hambialu narimi. <sup>16</sup> Dindi ogoniha howa tomo nalimulo mena ibilene. Tomo ogoni bamba t́naga mamali henedarume mbira naga ale ndo nalu harimi. Ibugua tí bahondolenaga genda tara tara wiarubi ibilaga biya. Anidagua biyagoni irane mani tíha mbirale bayaleru dege ngulenaga ibilaya. <sup>17</sup> Ani binigo ai t́gua mbirale bayale mbira birimiyagua t́ninaga hongome birimalo mitangi nabilimu. <sup>18</sup> Ai uruni Anduane Homogo inanaga Ngode Datagaliwabe ibugua tí mbirale bayale mo yu halimulo hongo karulape ngiragome mo yu holeberemi. Mbirale uruni embeda nahe mitangi biaabo halimu. Ibugua anidagua bulebirago irane bamba inanaga mamaliruhondo ani bule lalu lowinigo ibu mini bilinahe howa habo nale henene tagira pelonaga bulebira.✧ <sup>19</sup> Anduane Homogo inanaga Ngode Datagaliwabe

ibuore embeda nahalimu. Mbirale dama mitangi bialu gime wabini ngaruhondo bi pupu wule uruni talima napilimu. Ani talima pirimiyagua ina tihondo hongo howa heneneore larogo tí bo homelaiore helolebira. <sup>20</sup> Anduane Homogoibunime dindi tí hariga bolangua holeberemiruha hapai haga biraru bo podama polebira. Anigo tigua ibunaga bi mana mo waharimiyagua tınıbi nde mo ko howa ogonidagua dege bolebira, lalu Mosesehanda lene.

## 9

### *Isaraele wali agalime Ngode Datagaliwabenaga bi mo wahenego ogo*

<sup>1</sup> Mosesehanda lalu, Isaraele wali agaliru tí hale hadaba. Áyu tigua Iba Yodana domalu ubaede haramigola wali agali tí kamirubi ndo hameigini hongo gibihe karunaga dindi tí karulole pole kamigoni. Dindi ogoniha tano dewaore ege pabe timbuni daligaore hari ela habehe bu mabu bigi bini wigi bida. <sup>2</sup> Wali agali dindi uruniha haruaruni luniore hongohebi kago tí ale baba wai bibe nahe ka lagago tí hale halu manda biai ho kamigoni. <sup>3</sup> Anigoyu mbira dege tigua manda bulene ngago ogo Anduane Homogo inanaga Ngode Datagaliwabe ibuni ira deneme mbirale bo dagadagua do mundula ai haga bima ibuni bamba holebira. Ani bialu tí anda poramigola ibunaga bi bamba lo winidagua henene tagira pelonaga tigua waitigi karu baba hongo howa wai bilimulo Anduane Homogo ibugua tihondo hongo ngulebira. Ani ngiragola tigua waitigi uruni tinaga dindi wiyadagoria hongo ho howa abale bo batagi hai holeberemi.

<sup>4</sup> Anduane Homogo inanaga Ngode Datagaliwabe kago ibugua waitigi uruni balu purogo lelaragola tigua tını hangu lo manda bialu lalu, Ina wali agali tigabi bayale hemaria hondowa dindi ogo inahondo ngiyada lo manda nabilimu. Mini ogonidagua wu holene nakarulape. Ai nde Anduane Homogo ibugua wali agali dindi uruniha bu hearu handalu hearia tigua mana ko timbuni bialu hearu hondowa ibu keba timbuniore halu ti bo batagi holebira. ✧ <sup>5</sup> Anidagua bulebirago irane tí wali agali bayale tigabi kamigo hondowa dindi ogoni tí karulo halimulo ngulebira ndo. Dindi ogoniha wali agali karu tigua mana ko ngubiore biaga kago hondowa uruni bo batagi holebira. Irane mende inanaga mamali Abarahama Aisaga Yagaba imaru baba habo nalolene bi lowiniyago lola helonaga ani bulebira. <sup>6</sup> Heneneore dindi ogoni dindi benebere bayaleore mbirago Anduane Homogohanda ngulebirago tigua mana bayale mbira bialu harimigonaga yolo ndogo tí manda bilimu. Tíbi nde mine haga dege kamigoni ndobe.

<sup>7</sup> Tí dindi ko wali agali nahaga wiagoria howa Anduane Homogo mo keba harimigo mitangibu dai bilimu. Iyibi dindi yu wahalu tagira ibirimingi howa Anduane Homogo mo keba hama ibalu henego kamigoni. <sup>8</sup> Amu Hari Sainai heagoria harimangi howabi Anduane Homogo mo keba harimigola ibugua keba timbuni howa tí bo wahi habeheore hayagoni. <sup>9</sup> Ina hari nene biagoha irigi halu ege tole mbalape kira mo pirugoni. Ege tole kira ogoriani Anduane Homogo ibugua tí baba habo nalolene bi lowinigo biago gilibu wiyagoni. Ina hari nene ogoniha horo pira mariani (40) mbiraga horombebi haabo howa hina ibabi mbira naneore harugoni. ✧ <sup>10</sup> Ani bu hewagola Anduane Homogo ibugua ege tole mbalape kira ogoni labo ihondo ngiya. Ege tole kira ogoni laboni ibuni gime ibunaga bi mana hari nene biagoha ira hungu datagi hayagoha howa latagi hayuane tí hari teneha howa tını hale harimiruni gilibu winigo nga. <sup>11</sup> Hari nene biagoha horo pira mariani (40) mbiraga horombebi harugoni. Ani hewagola Anduane Homogo ibunaga habo nalolene bi biago ege tole mbalape kira biago laboni gili buwa ihondo ngiyagoni.

<sup>12</sup> Ani nguwa ibugua ihondo lalu, Inaga wali agali Iyibi dindi howa haru tagira ibiniru tigua mana koore bialu kago ai abale dalipe halu pu. Tigua inaga bi mana biago

abaleore erembiraha mo bagi halu dama mitangi bialu gime mbira wabu ngelowa ogonihondo bi pupu wialu ka, lene.

<sup>13</sup> Anduane Homogohanda ihondo laabo halu lalu, Wali agali urunime mineore haabo halu kagoni manda bido. <sup>14</sup> Anidagua bialu kagonaga mani wali agali uruni ogoria hene lalu bi te mbira tinaga nawilo bo wahai holene hamelo kogoni. Mani ina wali agali uruni kagobi ndo ini damene hangu bayale ti dewaore damebi hongo gibihebi helalu tinaga mamali i holebere. Anigo ai ina wali agali ko biaga uruni bo wahai holiya nabibe lowa hapai nahabe, laya.

<sup>15</sup> Ani laya handala ina ege tole kirani habo nalolene bi gilibu wini biago labo mo yalu hari nene biagoha howa dalipe halu piru. Ani dalialu hewaria dege ira hungu timbuniore hari nene biagoha howa kikiaula amu nana biya. <sup>16</sup> Ina abale daluwa handalu hewaria heneneore tigua Anduane Homogo inanaga Ngode Datagaliwabe ibunaga bi mana erembira mu hemiria handaru. Tigua dama mitangi bialu bi pupu wulenaga nogo bulumaga igini handalehe mbira ngolome wabu helemiria handaru. Anidagua birimidagoni Anduane Homogo ibuhondo ko timbuniore birimi. <sup>17</sup> Ani bialu hemiria ina ibalu ege tole kira biago labo ti deni howa dindini bape harugola dodahole biya. <sup>18</sup> Ani bialu ina halu mende Anduane Homogo hearia lone pialu ibunaga wanakuihayagi bulu paluwa dindini horo pira mariani (40) mbiraga horombebi ani wiaho wiaabo haru. Anidagua biaabo howa iba hinabi mbira naneore wiru. Ina anidagua birudagoni irane tigua Anduane Homogohondo ko timbuniore buwa ibu mo keba harimiyane biru. <sup>19</sup> Anduane Homogo ibugua tihondo keba timbuni gibiore ho howa ti bo wahai hole manda bu hayago hondowa i gi timbuni haru. Ani gi ho hewaria Anduane Homogo ibugua inaga bi lalu harugo lone hale haya.\* <sup>20</sup> Anduane Homogohanda Aronohondobi keba timbuni howa ibu bo waholene manda biya. Ani manda bialu hearia ina Anduane Homogohondo tinagabi Arononagabi bibahendenaga bi laharu. <sup>21</sup> Ani lowa mbirale nogo bulumaga igini handalehe tigua wabuwa ko timbuniore bialu harimiyane hondowa ina mo yuwa ira deagoha delo mo bape harugoni. Ani delowa do ira punga hayagola dambialu be abalu heagola iba emene mbira hari ogoniha howa dalipe halu piyagoha bape haru.

<sup>22</sup> Ai tigua dindi mini Masani howabi Irame Delene wiagoria howabi dindi mini Noa Habuabinaga Homali laga wiagoria howabi Anduane Homogo inanaga Ngode Datagaliwabe mo keba halu harimigoni.\* <sup>23</sup> Mani Anduane Homogohanda ti dindi mini Kadesebanea wiagoria pu helowa ibugua dindi mbira tihondo ngule lalu lowini biagoria karulole pudaba layagola tigua ibu erembira mialu ibuhondo mini mbiraore nawi howa ibunaga bi mo waharimigoni.\* <sup>24</sup> I ti heba mandagi biabe bima hama ibirimagoha tigua Anduane Homogo erembira mialu haabo harimi.

<sup>25</sup> Ani bialu hemigo hondowa Anduane Homogohanda ti bo wahole biayuane hale howa ina horo pira mariani (40) mbiraga horombebi Anduane Homogo hearia puwa dindini iba hinabi mbira nane bulu palu wiaabo haru. <sup>26</sup> Ina ibuhondo lalu, Anduane Homogo Bibahendenaga Haru Haame Ho Haga-o inaga wali agali uruni bo wanahabe. Ininaga hongomeore Iyibi dindi howa haru tagira pialu haru ibirigoni. <sup>27</sup> Abarahamabi Aisagabi Yagababi inaga biabe biaga agali uruni mitangi bibe. Wali agali ayu o karunaga mine howa mana lehe bialu ko bialu o karuni mitangi nabibe. <sup>28</sup> Iyibi wali agalirume ina wali agali biaruni dindi mbira tihondo ngulebero lalu lowini biagoha haru pobe nahe wahayada loligo. Ina inaga wali agali uruni handabe manga howa ti dindi ko wali agali nahaga iba dalubi naibaga ko wiagoha bo wahole haru piyada loligo. <sup>29</sup> Aiore Anduane Homogo-o wali agali uruni ininagaore helo dabarigoni. Ani bialu ininaga hongo timbuniore kegome wali agali uruni Iyibi dindiha howa haru tagira ibalu dindi

\* 9:19: Hi 12.21    \* 9:22: Har 17.7, Dag 11.3, 11.34    \* 9:23: Dag 13.25-14.38, Man 1.21, 1.26, Hi 3.16

ogoha haru ibirigonigo ai ti mo ko nahabe, lalu Mosese ibugua Anduane Homogohondo bi ani lahalu hene.

## 10

### *Mosesehanda bi pira halu mende mo penego ogo (Haru Penego 34.1-10)*

<sup>1</sup> Mosesehanda lalu, Anduane Homogohanda ihondo ogodagua laya. Ege tole kira abale ina ngirugobi labo pelo mbaralo yalu ibabe. Irame mbogoyi mbira baya hangu pelo mbara laga buwa wabu wialu bibe. Ani bialu ege tole kira ogonilabo ini koria hari nene biagoha mo yalu ibabe. <sup>2</sup> Ani yalu eberegola inabi ala ege tole mbarale kira biagoria gilibu wirugoni lone gili budai bulebero. Ina gili biai kogola ina mbogoyi wabu wirigoha ege tole biagolabo mo wibelo ngulebero, laya.

<sup>3</sup> Ani layagola ina ira mini agasiame mbogoyi wabiru. Ani buwa ege tole mbalapebi kira ala pambulo waharugobi dege yalu hari nene biagoha piru. <sup>4</sup> Ani pu hewagola Anduane Homogohanda ege tole kira yalu pirugoria ibunaga bi mana pigane ala gilibu ngiyadagua lone gili biya. Bi mana uruni Bi Pira biagoni ibunime ira hunguha howa latagi hayago ti hari tene biagoha howa hale harimigoni. Ibugua ege tole kira biagoria gili biai howa i ngiya. <sup>5</sup> Ngiya handala ina mo yalu abale beregedalu hari nene biagoha howa dalialu ibirugoni. Mo yalu dai buwa Anduane Homogo ibunime wabibe lene mbogoyi wabu mandabu wirugoha ege tole Bi Pira gilibu wini biagolabo mo baanda howa wirugo ngagoni, lalu Mosesehanda lene.

<sup>6</sup> Mani hayagola Isaraele wali agali biaru tigua Yagana wali agalirunaga iba hambiaga iba uli wiaru wiagoria wahalu dindi Mosera mbira wiagoha anda pene. Dindi ogoniha pu hemigola Arono homayagola ogoriani hora hene. Ani homayagola ibu igini Eleasa ibugua ibu abanaga henge mialu loma binigo mo miaga ha aribia hene. <sup>7</sup> Ani buwa tigua dindi ogoni wahalu Gugoda pialu emene howa nde piaho wialu dindi mbira ibaru dewa bere Yobada wiagoria anda pene. <sup>8</sup> Bamba ti Hari Sainai teneni heangi howa Habo Nalolene Bi lo winigonaga Mbogoyi ogoni hameigini Libai ariame hangu handayaho helo lalu Anduane Homogo ibunime dabene. Libai hameigini agali uruni tinaga biabe loma binigo mo miaga howa tigua wali agaliru Anduane Homogo ibugua ti mo bayale helo laga biaga hene. Anigo tinaga biabe ogoni wiaabo hene. <sup>9</sup> Ani biaga howa Isaraele hameiginiru ti dindi tu wu tahayadagua Libai hameigini ti dindi mbira nawi hene. Ti bayale mbira yu henego Anduane Homogo inanaga Ngode Datagaliwabe ibugua bi lenedadagua tigua loma binigo mo miaganaga biabe bialu hene.

<sup>10</sup> Mosesehanda lalu, Ina iba hinabi naneore horo pira mariani (40) mbiraga horombebi uyu hari nene biagoha ala bulu palu wirudagua halu mendebi ani bulu palu wirugoni. Ani birugola Anduane Homogohanda ina tinaga bi la harugola hale howa ti nabolebero layagoni. <sup>11</sup> Ani lowa ibugua ihondo langialu lalu, Ai ina dalialu puwa wali agaliru haru halu dindi bamba tinaga mamaliruhondo ngulebero larugoni karulo helo haru pole pu, laya, lene.

### *Ngode Datagaliwabe ibugua wali agalime bialu helo hame ledago ogo*

<sup>12</sup> Mosesehanda laabo halu lalu, Isaraele wali agaliru-o Anduane Homogohanda tigua bialu halimulo hame ledago langerogo hale hadaba. Tigua Ngode Datagaliwabe andaneha howa ibuninaga bi mana lo ngago talialu bialu halimu. Ibunaga biabe bulene ngaru tigua bialu howa bu miniha turu halu gubaliniore howa bialu halimu. <sup>13</sup> Ani bialu howa ibunaga mana ayu langerogo bibahende baya hanguore taluwa bilimu. Ti bayale halimulonaga ina mana uruni langerogoni. <sup>14</sup> Hari daligaore ngago Anduane Homogo ibunaga wialu dindibi mbirale bibahende uruniha karubi ngarubi ibunaga



dege nga. <sup>15</sup> Ani howa Anduane Homogo ibugua hameigini maru hearu aria daba nabi t́naga mamaliruore gubalini halu t́iore ibuninaga wali agali halimulo dabayagoni. Ani dabayagome t́ ibunaga wali agaliore dabene kamigoni. <sup>16</sup> Anigo t́gua mine halu kamiru wahalu áyu ogoni howa ibunaga bi mana talialu bialu halimu. <sup>17</sup> Anduane Homogo inanaga Ngode Datagaliwabe ibu dama tara tara karubi mbirale hongohe ngarubi bibahende ibugua bolangua haihe kagoni. Ibu timbuniorebi hongo haiheorebi kago bibahendeoreme ibuhondo gi ho halu ibu andaneha holene nga. Ibugua ibunaga nenegeru mitangi halubi wali agalime ibunaga mini bamialu haru pu tara helo hame nalaga ka. ✧ <sup>18</sup> Ibugua wali dalo agalini homene bedarubi waneigini aba aiyaru homalu hono wahene biru ngarubi dara halu biamogo biaga ka. Wali agali dindi taraha howa ibalu ina baba hene karu gubalini howa ti aga bilobi tomo nelobi karulapeore miaga ka. <sup>19</sup> Ani biagago ai t́nibi nde Iyibi dindiha hemingi dindi taraha howa ibini ogoniale dege harimigoni mitangi bialu wali agali dindi taraha howa ibini t́ baba mandagi ho kamiruni mitangi halu gubalini howa halimu. <sup>20</sup> Anduane Homogo inanaga Ngode Datagaliwabe ibuni andaneha howa lotu ibunihondo hangu lalu halimu. T́gua ibuni hongo howa yaniho haabo howa bulenerubi henene hangu lalu lowialu ibunaga minini howa mo hongo haga bialu halimu. <sup>21</sup> Ibu inanaga Ngode Datagaliwabeore howa ibugua t́ biamogo bialu mbirale nahendene ale tara tara timbuni wiaruni bigi biyago t́ni deme handarimigoni manda bialu ibunaga mini mo yaraga halu halimu. <sup>22</sup> Bamba t́naga mamaliru ti Iyibi dindiha piyangi wali agali pira karia (70) hangu piyagoni ndobe. Ani binigo áyu Anduane Homogo inanaga Ngode Datagaliwabe ibugua t́ mo dewa halu daga labe nahe harini yakundi bu karubi heledagoni, lalu Mosesehanda lene. ✧

## 11

### *Anduane Homogo ibu mini lene daligaore kago ogo*

<sup>1</sup> Mosesehanda tihondo lamialu lalu, T́gua Anduane Homogo inanaga Ngode Datagaliwabe kago gubalini timbuni halu ibunaga bi mana ngago baya hangu talialu bialu halimu. <sup>2</sup> T́gua Anduane Homogohanda t́ lawai holenaga mbirale tara tara dewaore bialu hayago handarimigoni. T́naga waneigini bu karume handaya lole ndo t́nime de handarimigoni. Anduane Homogonaga hongo timbuniore wiago t́gua de handarimigoni. <sup>3</sup> Ani bialu Anduane Homogohanda agalime nabiagane ale biyarubi handarimi. Ibugua Iyibinaga kini heago heba ibunaga dindi wiagohabi biyagoni de handarimi. ✧ <sup>4</sup> Iyibinaga ami agali biarubi tinaga nogo hosirubi wai biaga garo ale mini karisibi uruni bibahende ina talima ibalu hearia Anduane Homogohanda bo amo lai hayagobi de handarimigoni. Ibugua iba Solowara Daramabi laga bereagome nai helayagoni. ✧ <sup>5</sup> T́ dindi áyu o kamigoria naibi wene dindi ko yobi iba dalu naibaga wiagoha ibalu hemingi Anduane Homogohanda t́ biamogo bialu dewaore biyago t́ manda bidami. <sup>6</sup> Agali Lubene hameigini aria kirali Eliaba igini Dadana Abiramala heago labohondo biyago manda bilimu. T́ bibahende hendedemiore agali kirali ogonilabo heba libu one waneiginibi libunaga balai andabi heba dindi gaibu dele bialu uruni bibahende dindiha ibira hai hayagola dindi wiyadagua wiadai bialu uruni bibahende dindiha dambi hai hayane t́ de handarimigoni. ✧ <sup>7</sup> Anduane Homogohanda mbirale timbuni uruni biyago t́ bibahendeme de handaiore harimi, lalu Mosesehanda lene.

### *Dindi bayale mbirale anda hai holene wiago Isaraeleali minigo ogo*

<sup>8</sup> Mosesehanda laabo halu lalu, Bi áyu ina t́hondo langerogoni baya hangu talialu bialu haabo halimu. Ani bialu howa dindi iba pedago domaede halu puwa karulo holeberemigoria pialu holeberemi. <sup>9</sup> Ani bialu t́ dindi ibane bere ogoniha pialu luore haabo

✧ 10:17: Ab 10.34, Lm 2.11, Ga 2.6, Eb 6.9, 1 Ti 6.15, Mo 17.14, 19.16 ✧ 10:22: Pig 15.5, 22.17, 46.27 ✧ 11:3: Har 7.8-12.13 ✧ 11:4: Har 14.28 ✧ 11:6: Dag 16.31-32



holeberemi. Ai dindi ogoni bamba Anduane Homogohanda t́naga mamaliruhondo t́bi t́naga waneigini aguaneneruhondobi ngulebero lalu lowini biago ngagoni. <sup>10</sup> Dindi áyu tí pu holeberemigoni ala tí Iyibi dindi harimigonibi ndo. Iyibi dindiha hemingi t́naga mabuha tomo anda helonaga iba erekuibi haru ibaga wiyagoni. <sup>11</sup> Anigo ai dindi áyu pialu karulole kamigoni bayale hari teneha dindi ulini wialu bidagoha iba dalu ibalu mabuha iba bayale ibaga nga. <sup>12</sup> Anduane Homogo inanaga Ngode Datagaliwabeibunime mali bibahendenaga ege bibahendengi dindi ogoni baya hangu handayaho haabo haga ka.

<sup>13</sup> Anidagua biaga kago manda bialu t́gua bi mana áyu langerogoni baya hangu bialu haabo halimu. T́gua Anduane Homogo inanaga Ngode Datagaliwabe kago gubalini timbuniore ho howaibunaga biabe bulene ngago bialu howa t́naga bu miniha turu holene tolai ho howa biabe bialu halimu.✧ <sup>14</sup> T́gua anidagua bialu harimiyagua nde Anduane Homogohanda t́naga mabuha iba dalu halu mbira ibirangibi halu mendengibi ibilaabo holebira. Anidagua biragola t́naga tomobi waini ibabi olibe lini welibi dewaorewu holeberemi. <sup>15</sup> Anidagua biragola tí tomo nolene tubagi nahe holeberemi. T́naga nogo bulumaga karu tibi nde tomo nalu holene tinaga dataniru karulape andaho holebira.

<sup>16</sup> Wali agali tara tara bu karume t́naga mini mo luluya helo nahalimu. T́gua tí Anduane Homogo yu wahalu pilimulo haru pu tara hayagua Anduane Homogo erembira mialu puwa mbirale bi pupu wulenaga gime wabini ngaruhondo bi pupu wima napilimu. <sup>17</sup> Anidagua birimiyagua nde Anduane Homogohanda t́hondo keba holebira. Anduane Homogohanda tí daluha iba dalu naibilo minu yu kagola t́naga mabuha tomo hingedemiru gaulai halu anda naholebira. Anidagua biragola tí dindi bayale Anduane Homogohanda ngiyagoria howa homoleberemi.

<sup>18</sup> Mana bayale urunime t́naga bu miniha tolatagi helo halimu. Bi mana uruni embeda holigo t́naga gini gi ndole wiradagua bialu t́naga wanakuinibi heda wiradagua bilimu.✧ <sup>19</sup> Ani bialu bi mana uruni t́naga waneigini bu karu baya hangu lawai halu halimu. T́ni daluha kamigo howabi harigani ibaga bialu howabi biabe bialu howabi biabe nabi halo howabi bibahendengi t́gua bi mana uruni dege te lalu halimu. <sup>20</sup> Bi mana uruni t́naga anda panga harabani ira kagoria gili bialu pabenaga panga kagoriabi gili bilimu. <sup>21</sup> T́gua ogonidagua bialu harimiyagua nde t́nibi t́naga waneigini aguanenerubi tí bibahende dindi Anduane Homogo inanaga Ngode Datagaliwabehanda ngule lalu inanaga mamaliruhondo laminigoria halu hodagua haga buleberemi. Hari daliga haabo haga kadagua t́bi haabo holeberemi.

<sup>22</sup> Ina bi langerogoni baya hangu taluwa biaabo halimu. T́gua Anduane Homogo inanaga Ngode Datagaliwabe kago gubalini haabo howaibunaga bi mana baya hangu talialu hongo howa yu haabo halimu. <sup>23</sup> Anidagua bialu harimiyagua nde t́naga waitigi dindi tí poleberemigoha kaware pialu kamigola wali agali dindi ogoniha hayadaruni ibugua bo batagi hai holebira. Anidagua biragola t́gua pialu wali agali timbuni dewaorebi hongo gibihe t́naga hongo bolanguahe karubi uruninaga dindi ngagoria pu howa karuloleberemi. <sup>24</sup> Dindi tí ge halu poleberemiru bibahende t́ninagaore wiai holebira. T́naga dindi tubari unurahayagi dindi ko yobi iba dalu naibaga ngagoria howa pialu uyurahayagi Hari Lebanono wedagoria tagira polebira. Ani bialu tubari ni tagira ibiragohayagi Iba Yuberedisi pedago wialu ni paliragohayagi iba solowara Medidereniana bedago wulebira.✧ <sup>25</sup> Anidagua nahalimulo hapai holene mbirali naholebira. Ani bialu dindi tí poleberemigo bibahendeha Anduane Homogo inanaga Ngode Datagaliwabehanda abale t́hondo langiyadagua bialu wali agali dindi uruniha karu t́gua tí de hondowa gi halu holebira.

✧ **11:13:** LBM 26.3-5, Man 7.12-16, 28.1-14 ✧ **11:18:** Man 6.6-9 ✧ **11:24:** Yos 1.3-5

<sup>26</sup> Hale hadaba. Ai ina tihondo hariga kira áyu mo walia harogoni. Mbira Anduane Homogo inanaga Ngode Datagaliwabehanda tihondo bayale bulene. Mendego Anduane Homogo inanaga Ngode Datagaliwabehanda tí mo ko holenegobi langerogoni. <sup>27</sup> Tígua Anduane Homogo inanaga Ngode Datagaliwabe kagonaga bi mana baya hangu taluwa bialu harimiyagua nde ibugua tí mo bayale ho helolebira. <sup>28</sup> Anigo tíguaibunaga bi mana lo ngago mo wahalu puwa mbirale bi pupu wule gime wabini bamba tígua urunihondo bi pupu nawiaga ngaruhondo bi pupu wima pirimiyagua nde Anduane Homogo inanaga Ngode Datagaliwabehanda tí mo ko holebira. <sup>29</sup> Dindi áyu tí pole kamigoha Anduane Homogohanda haru porangi tígua hari kira mini Gerisimibi Ebalabi kagoha pilimu. Pialu Hari Gerisimi ogoriani howa Anduane Homogo inanaga Ngode Datagaliwabehanda mbirale bayale damene tihondo ngiyaru lai halimu. Ani bialu Hari Ebalakagoria howa tígua mbirale ko Anduane Homogohanda tihondo bule ngaru damene lai halimu.\* <sup>30</sup> Hari kira ogonilabo dindi abene ni paliragohayagi Iba Yodana doma ederayagi iba angeange Kenana dindi ngagoria ka. Hari ogonilabo ni paliragohayagi Giligala tano ngagoria ira loma bini dindi mini More kawareni ngagoria ka. <sup>31</sup> Emene tigi mbira hangu howa dindi Anduane Homogo inanaga Ngode Datagaliwabehanda ngulebiragoha pu holeberemi. Tígua dindi ogoriani anda pu howa <sup>32</sup> ina tihondo bi mana áyu dege langerogobi bibahende taluwa bialu halimu, lalu Mosesehanda lene.

## 12

### *Dindi mbiraore hanguni lotu lolene nga, lenego ogo*

<sup>1</sup> Mosesehanda bi laabo halu lalu, Bi mana uru baya hangu hale hadaba. Anduane Homogo tí mamalirunaga Ngode Datagaliwabe ibugua dindi ngulebero layagoria pu howa bi mana uruni baya hangu hale howa talialu bialu halimu. <sup>2</sup> Tígua dindi ogoniha anda pialu wali agali uruniha henedaru tinaga bi pupu wiaga ngaru mo ko halu bo gialobaga bilimu. Tinaga bi pupu wiaga uruni hari emene timbunibi bibahendenaga nenenibi ira timbuni karu andane gumba karuhabi bibahende ngaru bo gialobaga biai halimu. <sup>3</sup> Ani bialu lomabu delaga dabu bu heledaru bo gialobagabu wahalu bi pupu wiaga anda gene ege toleme wabu helene karubi bibahende bo gaibu bagabu wahalimu. Dama wali beda mitangi bialu gime wabini mini Asera laga agalime ira dibu pelowa wabini ngaru ayume dibu gabu dangiala bagabu wahi halimu. Anidagua beramigola tigua bi pupu wiaga dindi uruniha dai bialu bi pupu lone nawilonaga anidagua bilimu.\*

<sup>4</sup> Wali agali tara karume mbirale gime wabini ruhondo bi pupu wule mana tara biagane ngadagua tígua Anduane Homogo mitangi bialu ani nabilimu. <sup>5</sup> Anduane Homogo mitangi bialu lotu lole ngoai halimulonaga ibugua tí hameigini bibahendenaga dindi ngaru hondowa dindi mbiraore hanguibunime dabo ngelolebira. <sup>6</sup> Dindi odagoria hanguni howa tígua loma tara tara irani dai helo delolenebi loma marubi bu migi bulene wulebira. Tinaga mbirale ngamiru pi halu tale buwa pini piniru Anduane Homogohondo lomabu mule howa dindi mbiraore lotu laga wiyagoria dege yu pugu buleberemi. Tígua mbirale maru Anduane Homogo mule lowabi ibuhondo lomabu mule yalu pialu howabi Anduane Homogohondo muleore lalu bi ala lowinidagua muleyaguabi tinime loma bame mule manda bu heneyaguabi nogo sibi bulumagarume igini pigane wiragola turu halu lomabu muleyaguabi uruni damene bibahende dindi mbiraore lotu lagadagoria hangu yu poleberemi. <sup>7</sup> Dindi bayale Anduane Homogo inanaga Ngode Datagaliwabe ibugua ngulebiragoha pu howaibunaga deni tinimebi tinaga waneiginirumebi tomo tara tararu hangalu halimulo hongo ngiyagola hangarimiru bu nalu howa mbirale mbirale bayale maru ngiyagobi mitangi bialu turu timbuni halu holeberemi.

\* 11:29: Man 27.11-14, Yos 8.33-35    \* 12:3: Man 7.5

<sup>8</sup> Dindi mbiraoreni lotu lolene horo ogoni tagira ibirangi áyu tíni hangu hangu howa lotu lagalaga bialu kamidagua nahalimu. <sup>9</sup> Áyu ogoni tíni miniha dungulo biruwa ema nabi awadaga halimulo dindi mbira ngule lalu lo wiyagoha anda nape wene kamitagi howa tí lotu ani lagalaga bialu kamigoni. <sup>10</sup> Tí Iba Yodana domalu ubaede haramingi Anduane Homogohanda dindi ogoni tí karulo halimulo yupe haragola tí dindi ogoriani pu holeberemi. Ibugua tí handayaho haabo kagola tínaga waitigiru tí kamigoria naibulebira. Ani biragola tínaga bu miniha dungulo holeberemi. <sup>11</sup> Wali agali tígua Anduane Homogo ibunihondo mitangi bialu lotu lole íbu ngoai halimulonaga dindi mbira ibunime mo wulebira. Dindi ogoriani lotu lole pialu howa mbirale uru ale yalu pilimu lalu áyu ina langiruruni mo yalu pugu bilimu. O yalu pilimu lalu laruruni loma tara tara irani dai helo delolenebi loma marubi bu migi bulene wulebira. Tínaga mbirale ngamiru pi halu tale buwa pini piniru Anduane Homogohondo lomabu mule howa hame ledemirubi mbira bayale maru Anduane Homogo mule lalu lowinidagua mialubi uruni bibahende dindi ogoniha yalu puwa mulene nga. <sup>12</sup> Ani bule howa tínaga waneiginirubi tínaga biabe biahaga wali agali karubi Libaiali tínaga tanoha haga karubi uruni bibahendeore ma lalu puwa tínaga Anduane Homogo kagoria puwa ibuhondo turu ho holene nga. Tígua Libai hameigini karu ti tininaga dindi podene mbira nawiore kago manda bilimu. <sup>13</sup> Tínime hame ledadagua tíni kamiruha haga haga buwa lomabu migimigi nabilimu. <sup>14</sup> Dindi mbiraore tíni hameigini kamigo aria mbiragonaga dindini Anduane Homogo ibugua mo wiragoria hangu lomabu mialu halimu. Dindi mbiraore ogoriani hangu howa loma irame dai helolenebi bo delalu maru bulene nga lalu langirugonibi biai halu halimu.

<sup>15</sup> Anigo dindi maru tíni kamiruha howa nogo egarubi balu nanolene nawi. Tanabi bo nalu halimu. Anduane Homogo ibugua tí tomo nalu halimulo ngiraru tanabi nalu halimu. Tíni Anduane Homogonaga deni ko howayaguabi bayale howayaguabi ibugua tí tomo nalu halimulo dindi tíni kamigoha howa gabua dia ale minana hene karu balu naramilidagua balu nalu halimu. <sup>16</sup> Anigo mbirale balu nole baramirunaga darama dege nolene nawiore. Ema bialu piaga baramirunaga darama pugu lalu dindini iba odo wahagadagua odo wahalimu.\* <sup>17</sup> Mbirale Anduane Homogohondo bo lomabu minigo ogoni tíni kamiruha howa nolene nawi. Loma uruni ogodagua. Widi lini pini pini Anduane Homogohondo lomabu minibi waini iba pini pinibi olibe lini ibane pini pinibi bulumaga igini sibi iginiru pigane wini karubi maru maru tínime Anduane Homogohondo lomabu mule lalu lo winidarubi tara tara mulene hamelo kamirubi uruni bibahendeore dindi tíni kamigoha howa nolene nawiore. <sup>18</sup> Mbirale uruni balu nole howa tínibi tínaga waneiginirubi tínaga biabe biahaga wali agali karubi Libai hameigini aria tínaga tanoha haga bu karubi tí haru mandagi howa balu naga bilimu. Tígua mbirale Anduane Homogohondo loma bialu bo nalu howa dindi tara taraha howa ndo dindi mbiraore Anduane Homogo ibunime ibuni mitangi bialu lotu lolene dindi henge mo wiyagoria howa loma bialu nalu halimu. Tígua loma bialu tomo uruni nalu howa mbirale bayale biabe erekuibi bialu harimigoha howa lini tagira ibiyagonaga turu halu nalimu. <sup>19</sup> Dindi ogoniha howa Libai hameigini karu biamogo biaabo holene ngago embeda nahalimu.

<sup>20</sup> Mani howa Anduane Homogo inanaga Ngode Datagaliwabe ibugua bamba lo wiyadagua bialu tínaga dindi mo timbuni helarangi tínime nogo tara tara noa biradaguaore nalu holeberemi. <sup>21</sup> Ani howa lotu lolenenaga dindi Anduane Homogohanda tu wu ngelayago tí polene kaundiaore hayagua nde ina ogodagua bilimu lalu bi langirudagua bialu halimu. Tínime nogo bulumaga sibirubi Anduane Homogo ibugua tí ngiyaru tanabi tíni dindi kamigoria howa bo dawa nalu halimu. Horo tanabi tínime balu noa birangi balu nalu halimu. <sup>22</sup> Mbirali ibu Anduane Homogonaga deni bayale

\* 12:16: Fig 9.4, LBM 7.26-27, 17.10-14, 19.26, Man 15.23

heaguabi bayale ndo heaguabi tanabi howa tigua nogo anidagua bo dawalu howa ibu nogo gabua karu balu nagadagua narolo manda bialu nolene nga. <sup>23</sup> Anigo ema bialu piaga uruni darama heba nolene nawiorego nanalimu. Ani larogoni irane bibahendena holene tene daramaha ngagodago ema bialu piagaru balu darama heba nanalimu laro. <sup>24</sup> Mbirale baramirunaga darama nane dindini iba odo wahagadagua pugulelo yupe halimu. <sup>25</sup> Tigua mana ogoni langerogo hale howa darama nane waharimiyagua nde Anduane Homogo ibugua tigua mana bayale beremigo hondowa tihondo gubalini haabo howa ti biamogo biragola bayale haabo holeberemi. Ani bialu tinaga waneigini aguane mani holebirarubi ogonibi dege holebira. <sup>26</sup> Anigo tinaga lomabu mule yu kamirubi mbirale tigua Anduane Homogohondo mule lo winidarubi bibahende lotu lalu lomabu mulene dindi Anduane Homogohanda podo wiyagoria yalu pu mulene nga. <sup>27</sup> Dindi ogoriani howa loma biniru irame dai helo deloleneru Anduane Homogonaga lomabu delaga dabu kagoria lomabu delolene nga. Loma maru nde Anduane Homogonaga lomabu delaga dabu kagoria darama hambu yidamiru dege odoba halu mbirini podo yidamiru tini nalu halimu. <sup>28</sup> Tigua bi mana ina langiruruni bibahende talialu bialu holene nga. Ani bialu harimiyagua nde Anduane Homogohanda ti bayale halimulonaga ti biamogo bialubi tinaga waneigini aguanene mani holebirarubi bayale helonaga biamogo bialu haabo holebira. Ani bulebirago irane tigua mbirale bialu holeberemiru bibahende Anduane Homogo turu helo hangu bialu harimiyagua nde ibugua anidagua bialu haabo holebira, lalu Mosesehanda lene.

*Anduane Homogohanda Isaraelehondo, Damahondo bi pupu nawilimu, lenego ogo*

<sup>29</sup> Mosesehanda laabo halu lalu, Anduane Homogo inanaga Ngode Datagaliwabe ibugua ti dindi mbiragoria anda pugu beremingi wali agali dindi anduane karu bo wahai holebira. Ani biragola dindi uruni tigua karulo haga buleberemi. <sup>30</sup> Anduane Homogohanda wali agali dindi uruniha karu bo wahai haragola tigua uruni tinaga damahondo bi pupu wiaga mana ngaru aria mbira talialu nabilimu. Ani bialu harimiyagua tini homolene wulebirago bayuwa mamage howa holene nga. Tigua wali agali uruni tinaga damahondo bi pupu wiaga mana biradago dabo honowa iname nde ogonidagua dege bimiya lolemini nalalimu. <sup>31</sup> Tigua Anduane Homogo inanaga Ngode Datagaliwabe ibu mitangi bialu lotu laramingi wali agali uruni karume bi pupu wiaga mana ngadagua nabilimu. Wali agali uruni tigua dama mitangi bialu bi pupu wiaga ngaru wialu howa mana ko ngubi koorene ko tara tara Anduane Homogohanda turu nahaga ngaru bialu haga ka. Tigua mana ko mbira ogobi biaga. Tinaga waneiginiru lomabu delaga dabu ngagoria loma bialu bo delaga ka.

<sup>32</sup> Anigo ina bi langiruruni baya hangu talialu biai halimu. Mana uruni aria tigua maru latagoha maru mo waha bulene nawiore laro. <sup>☆</sup>

## 13

<sup>1-2</sup> Agali mbiwia haga mbira kagomebi mbirali emaga hendenerunaga galone ogoale lalu latagi haga mbira kagomebi ti haru halu mbirale dama mitangi bialu gime wabini tinaga bi pupu wiaga ndo wirimigoha haru pubagi holenaga tigua mbirale turubi nahendene ale mbira bulebira lalu mbiwia halu lolebira. Ani layagua o larogoni henene tagira piyaguabi <sup>3</sup> bi uruni mo henene nahalimu. Mbirale uruni Anduane Homogo inanaga Ngode Datagaliwabe ibugua ti ibunaga wali agaliore ibuni gubalini howa henedabe be bame dege henedabe hondolenaga agali uruniibunime henemane ti ba hondolenaga ibilagago. <sup>4</sup> Ai tigua Anduane Homogonaga bi talialu ibu andaneha holene nga. Ibugua bi layaru baya hangu hale halu mana ngaru talialu bialu holene nga. Tigua ibuni hangu mitangi bialu lotu lalu ibu hongo howa yaniho haabo holene nga. <sup>5</sup> Anigo agali mbiwia haga karubi emaga hendenerunaga galone latagi haga karubi



tigua tíhondo lalu, Anduane Homogonaga bi doga halu mo waholene nga, layagua bibahende homelo bo wahaiore holene nga. Anduane Homogo ibugua tí Iyibi dindiha garabaya biabe ale bialu hemiria haru tagira ibiyago mitangi biaabo halimu. Agali mana urunibi biaga karu tini ko ngubi biaga howa urunibime tí kamiru maru hariga Anduane Homogohanda pialu halimu layaru yu wahalu hariga mendeha haru pubagi halu holebira. Anigo agali mana urunidagua biaga karu bo wahai halimu. Anidagua bo wahai haramigome tíni mana koha pubagi holene henge nawilo bibahende bo homelai haramigoni holebira.

<sup>6</sup> Mbirali í hamenemebi í waneiginimeyaguabi onene agalini íni gubalini ho hagameyaguabi í nenegemeyaguabi íhondo mbirale dama mitangi bialu gime wabini urunihondo bi pupu wiba lalu í mo biahalu la deborebo biyagua ibunaga bi uruni hale nahabe. Bamba tñibi tñaga mamali henerumebi mbirale uruni alehondo bi pupu mbira nawiniore henego kamigoni ndobe. <sup>7</sup> Ti marume tí mbiralihondo wali agali maru dindi kawarenibi kaundiahabi karu tigua tinaga mbirale damaru mitangi bialu gime wabiniruhondo ína bi pupu wibelo mo biaholani. <sup>8</sup> Mbirali ogonime í mbirale dama mitangi bialu gime wabini urunihondo bi pupu wibelo haru pu tara holene manda biyagua ína ibunaga bi la deborebo birago hale nahabe. Ai ína walimeyaguabi agalimeyaguabi ogoni biagago ibu dara halu biamogobi nabi habagi helabe. <sup>9</sup> Ibu homelo bo wahabe. Ína mbirali o biago homelo ege toleme bole howa ege tole dugualu ínime ala pigane bolene nga. Ani baregola mani wali agali maru karume ege tole dugualu o biago hangu bo ariari bulene nga. <sup>10</sup> Anduane Homogo inanaga Ngode Datagaliwabe ibugua ína Iyibi dindiha garabaya biabe ale bialu hemaria haru tagira ibini biago yu waholomayanaga la deborebo biaga uruni tigua tí haru pubagi hole bialu karu homeloore ege toleme bo wahai halimu. <sup>11</sup> Tigua wali agali mana urunidagua bule bialu karu bo wahai harimiyagua Isaraele wali agali maru karume hale hai howa tini gi hagahaga bialu tigua mana ko urunidagua lone nabule wahai holebira.

<sup>12</sup> Tigua Anduane Homogo inanaga Ngode Datagaliwabe ibugua tano tí ngulebiraruha pu howa tigua bi maru ogodagua larane hale holeberemi bada. <sup>13</sup> Tigua ogodagua lalu, Agali maru ko ngubi tñaga tanoha bu hearume tñaga mini mo batara hayagola dama mitangi bialu gime wabiniruhondo tigua bi pupu nawiaga winigo áyu nde wialu kamirunida, laragola hale holeberemi. <sup>14</sup> Tigua bi diburibu urunidagua mbira lalu kane hale harimiyagua bi tene baya hangu goaria handalimu. Handalu kamiria marume mana ko ogonidagua henene biniyagua <sup>15</sup> wali agalibi tinaga nogo bulumagabi tano ogoniha henedaru bibahende homelo bo wahai halimu. Ani buwa tano ogonibi bo haealo wahalimu. <sup>16</sup> Wali agali ko biaga uruninaga dabudabu ngaru bibahende mo yu ngoai howa tano ogoninaga hanuni ngagoria ngelalimu. Ani mo ngelowa mbirale uruni heba tano ogonibi bibahendeore Anduane Homogo inanaga Ngode Datagaliwabe ibuhondo loma bialu bo heda hai halimu. Ani bo heda hai henego mani lone biadai bulene nawiore. <sup>17</sup> Tigua mbirale tano ogoniha wini mbira tíni hole mo yulene nawiore. Irame daiore helo wahalimu. Anidagua beremigola Anduane Homogohanda ibunaga keba holene wahalu tí dara howa biamogo bulebira. Ani bialu ibugua bamba tñaga mamaliruhondo bi lowiyadagua tí wali agali dewaore palia timbu halimulo mo dewa holebira. <sup>18</sup> Áyu ibunaga bi mana o langerogo hale halu bialu howa ibugua hame ledaru talialu bialu harimiyagua ibugua nde tí ani biamogo bulebira, lalu Mosesehanda lene.

## 14

*Isaraeleali tigua mbirali homaragola tíni tingini mo ko holene nawi, lenego ogo*

<sup>1</sup> Mosesehanda laabo halu lalu, Tí Anduane Homogo inanaga Ngode Datagaliwabe ibuni waneigini kamigoni. Ani kamigo mitangi bialu tigua mbirali homaragola dugu bialu howa agali Anduane Homogo mitangi nabiga karume biagadagua tñaga tingini



darama ibilo podalu mandari angariru minu doga nabilimu.✧ <sup>2</sup> Tí Anduane Homogo inanaga Ngode Datagaliwabenaga wali agaliore halimulo wali agali maru hearu aria dege hemiria ti helalu ibunime tí kamiru daba bagi henego kamigoni, lene.✧

*Em a bialu piaga bibahende Anduane Homogonaga deni dodohe bayalela bedago ogo (Loma Binigo 11.1-47)*

<sup>3</sup> Mosesehanda laabo halu lalu, Ema bialu piaga maru Anduane Homogonaga deni dodohe bedago nolene nawi layaru damene bibahende nanalimu. <sup>4</sup> Nogo bulumaga sibi meme karunaga mbirini nolene karulapego nalu <sup>5</sup> nogo tara mini diabi sibi gabuabi meme gabuabi maru hari nene ngaruha biraga gabua biru karubi <sup>6</sup> tinaga gi giba ge gibaru luni kirahe biruwa datani bulumagame nagadagua naga bu karubi tinaga mbirini nolene karulapego nalimu. <sup>7</sup> Anigo nogo maru ti tomo bulumagame nagadagua datani karu nanaga howa tinaga gi giba ge gibabi luni kira naheyagua nolene nawiore larogoni. Nogo kamelebi budi ale mini labidibi tia mali ale ege ngaruha biraga bedarubi nanalimu. Ti tomo bulumagame nagadagua datani karu nagago damene tinaga gi gerunaga gibane luni kira nahe kagome uruni alego bibahende Anduane Homogonaga deni dodohe beda. <sup>8</sup> Nogo ibuni kago balu nolene nawi. Nogonaga gi gerunaga giba bulumaga ale dege kagonigo tinaga tomo bulumagame nagadagua datani ndo naga ka. Anigo ai uruni ale kago Anduane Homogonaga deni dodohe kalo manda bu halimu. Uruni ale bu karu damene nane halu homo ngagola tinaga tinginibi ela nahalimu.

<sup>9</sup> Iba wena dongone ligilagale bedarubi harenehe bedarubi nalimu. <sup>10</sup> Anigo ibaha biragane dongone ligilaga nalagabi harene nahebi uruni ale bedaru tígua nolene nawiorego nanalimu. Urunibi bedaru Anduane Homogonaga deni ko dodohe bedalo manda bialu halimu.

<sup>11</sup> Ega biru karu nde bayale Anduane Homogonaga deni ko dodo nahe bedaru balu nalimu. <sup>12-18</sup> Anigo ega bodo hariawebi nenebi bedaru emene timbuniyagua nolene nawigo nanalimu. Ega mbiraga biraga dagiya bedarubi halongau bedarubi umi bedarubi bibahende nanalimu. Ega yári karubi gabiago tara tara bedarubi habo tara tara ma luhe bedarubi dalagamia tara tara bedarubi nolene nawigo nanalimu.

<sup>19</sup> Mbirale emene babaganehe yagalalu piaga bedaruni damene bibahende Anduane Homogonaga deni ko dodohe bedago uruni ale tígua minalu nolene nawi. <sup>20</sup> Anigo uruni aria maru Anduane Homogo ibuninaga deni ko dodo nahe bedaru balu nalimu.

<sup>21</sup> Nogo egaru minalu homene ngago nanalimu. Wali agali tara tí baba íbu hene karu ti nelu mirimiyaguabi marume tí yolo biyaguabi ani bilo milimu. Ai Anduane Homogo inanaga Ngode Datagaliwabe kago tí ibunaga kamigoni. Tí ibunaga wali agali heneneore kamigoni.✧

Tígua nogo meme igini sibi iginiyaguabi mbirago ibu angibuni kagonaga andu ibane beha hambu yu delaramigoha delamaga nahalimu, Mosesehanda lene.

*Anduane Homogohondo wali agalime tinaga mbirale ngaru pini dege dege lomabu mulene ngago ogo*

<sup>22</sup> Mosesehanda lalu, Tí mabuha tomo mali mbira mbiranaga hengene bu ngamiru aria pi halu tale bialu pinigo mo bagiho ngelalimu.✧ <sup>23</sup> Ani mo bagiho wirimigo mo yalu wali agali ngoai howa lotu laga wiyagoria Anduane Homogo ibunaga daba bagiho ngelelo milimu. Ani ngagola Anduane Homogonaga deni howa títaga widi wirimirubi waini iba wirimirubi olibe lininaga weli wirimirubi bibahende títaga tomo pini pini yalu ibirimigo tale bialu nalimu. Ani bialu títaga nogo bulumaga sibiru igini pigane wini bayale hinidemiru horo ogoningi dindi ogoriani howa balu tale bialu nalimu. Anduane Homogo inanaga Ngode Datagaliwabe andaneha haabo kama lalu mo walia

✧ 14:1: LBM 19.28, 21.5 ✧ 14:2: Har 19.5-6, Man 4.20, 7.6, 26.18, Ta 2.14, 1 Pi 2.9 ✧ 14:21: Har 23.19, 34.26

✧ 14:22: LBM 27.30-33, Dag 18.21

halu ogonidagua bialu halimu. <sup>24</sup> Tí dindi kaundiaha howa Anduane Homogohanda tíhondo tomo ngiyaru aria yalu lotu lole wali agali ngoai haga ngagoria pobe nahe harimiyagua nde ogodagua bilimu. <sup>25</sup> Agali maru karume tínaga tomo ogoni yolo bilo milimu. Ani bidagola muni tomo yolo birago mani mo yalu lotu laga biagoria pilimu. <sup>26</sup> Yalu puwa lotu laga ogoriani howa tínaga muni biagome tomo damenego yolo bialu nogo bulumaga sibiru dawa ngaru yolo bialu waini ibarubi iba mbia alerubi tínaga muni mo yarimigome tomo tínime hameledemiru damene bibahende yolo biai halimu. Ani yolo biai howa Anduane Homogonaga deni lotu lole mo ngoai haga dindi biagoria biruwa tínibi tínaga one waneiginirubi bibahende turu hagabu mandagi biruwa tomo uruni nalimu.

<sup>27</sup> Anigo Libai hameigini tínaga tanoha karu biamogo bulene embeda nahalimu. Libai hameigini uruni tininaga mabu andabi nahe howa ti mbirale mbira nawiore kagoni tí manda bu kamigoni.

<sup>28</sup> Mali tebone piai kagola tígua tomo pini pinigo bibahende bu yalu ibuwa tanoha tomo wiaga anda timbuni kagoha ngelaga bilimu. <sup>29</sup> Tomo uruni maru Libai hameigini mabu andabi nahe kago tinaga wulebira. Ani bialu tomo maru wali agali dindi taraha howa ibini bu karubi waneigini aba aiyala homene karubi wali agalini homene dalo bedarubi bibahende tínaga tano uruniha bu karume ti tomo uruni nolene wulebira. Wali agali urunime ti ta nabi ibalu tomo uruni tinime hame ledadagua mo yagayaga bulebira. Tígua urunidagua bialu harimiyagua nde Anduane Homogo inanaga Ngode Datagaliwabehanda tínaga mini mo dungulo helalu bibahende mo bayale hai holebira, lalu Mosesehanda lene.

## 15

### *Dano henego mo waholenenaga mali pongo bo winigo ogo (Loma Binigo 25.1-7)*

<sup>1</sup> Mosesehanda laabo halu lalu, Mali kane piai kagola tí baba dano ho kamigo damene ngi nale wahalimu. <sup>2</sup> Tígua ogodagua bilimu. Agali mbira ibugua muni mbira ibu damene kagohondo dano helo miniyagua ngi nale waholene nga. Dano ho hayago manda bialu Anduane Homogo ibuguabi mibe nalolebira. <sup>3</sup> Agali dindi taraha howa tí baba ibu hene karu aria kagohondo dano ho heneyagua tínaga dano ngi lalimu. Anigo tínaga damene dege baba dano ho kago dano ngi nalalimu.

<sup>4</sup> Anduane Homogo inanaga Ngode Datagaliwabe ibugua dindi ngulebiragoha pu kamigolaibunime tí mini mo dungulo helalu mo bayale holebira. Tí kamiru aria mbirago ibu mbirale mbira tubagi nahe holeberemi. <sup>5</sup> Anigo tígua Anduane Homogonaga bi mana áyu ina langerogo baya hangu talialu harimiyagua nde tí buru pale nabi bayale holeberemi. <sup>6</sup> Anduane Homogo ibunime bulebero lalu langiyadagua ibugua tí mo bayale holebira. Ani bidagola wali agali tara tara karume tínaga mbirale ngamiru dano halu mo yulebirago tígua wali agali taranaga ngaru dano holene henge nawi holeberemi. Tígua hameigini tara dindi tara taraha karu handayaho howa haru holeberemi. Anigo ai hameigini tara tara karume tí haru naholebira.

<sup>7</sup> Anduane Homogohanda dindi tí ngule ngagoha tano mbira ngagoria tí damene mbirago ibu mbirale mbira tubagiho heagua tígua hondowa nahende tingi halu biamogo bulene ngago nabi ani helowa nahalimu.\* <sup>8</sup> Ani nabi ibu tubagiho howa burupale kago ale tínime mbuni nabi biamogo bialu milimu. <sup>9</sup> Tígua dano ho henego hilahole bialu waholene biago kaware ngagola ai ti ngiadaí bulene nawi howa hilahole bialu burupada manda bialu mulene nga. Mini ko ogonialego tíha mbira nawilo halimu. Tígua muni mbiraleru dano halu mo yilo namirimiyagua nde agali ogoni ibugua Anduane Homogohondo bi lamiragola hale halu Anduane Homogohanda tí ko

\* 15:7: LBM 25.35

birimi lolebirago tígua mbirali burupada hondowa nahende tingi ho nahalimu. <sup>10</sup> Tígua wali agali yagibano ogoni ibu tihondo hale harago damene turu howa miai halimu. Ani mirimiyagua Anduane Homogohanda tí biamogo bialu tínaga biabe bialu kamiru bibahende mo bayale hai holebira. <sup>11</sup> Inanaga damene bibahende Isaraele hameigini burupale mbira hadege bulebirago ai ina tihondo langerogo ogo. Tígua yagibano uruni dara halu ti bayale helo biamogo bialu halimu, lalu Mosesehanda lene.✧

*Garabaya biabe ale biahaga karu baba howa bialu holene mana winigo ogo  
(Haru Penego 21.1-11)*

<sup>12</sup> Mosesehanda laabo halu lalu, Ainde wali agali inane aria bu karu mbirago ibu tí kamiru mbiragonaga garabaya biabe ale bialu hole lalu ibunime ibuni tínaga giha ya hayagua nde mali waragaria hanguni tínaga biabe bialu helo. Ani bialu mali kane haragola tígua ibu garabaya golalu tagira pelalimu.✧ <sup>13</sup> Ibu garabaya golalu tagira porangi mbirale nayi bame ibu andaga daibia nalalimu. <sup>14</sup> Anduane Homogohanda nogo sibirubi widirubi waini ibarubi mbirale tihondo ngiyago ibu nde maru talebu mialu yalu pelo milimu. <sup>15</sup> Tí ala Iyibi dindiha garabaya biabe ale bialu hemiria Anduane Homogo inanaga Ngode Datagaliwabehanda tí haru tagira pialu golope hene kamigo mitangi bilimu. Irane ogoninaga ina bi mana ogoni langerogoni.

<sup>16</sup> Anigo garabaya biabe ale biahaga ogoni ibugua tíbi tí one waneiginirubi tí baba baya hangu gubalini ho haga howa ibugua lalu, Ina tí yu wahalu polene mangaba, layagua <sup>17</sup> nde tíni andaga haraba ngagoria haru halu pu helo ibunaga haleni diri bolo wulene nga. Ani bialu ibu tínaga garabaya biabe ale biahalu haabo halu homalu waholebira. Tínaga garabaya biabe ale biahaga wali bedarubi nde anidagua dege bilimu. <sup>18</sup> Wali agali tínaga garabaya biabe ale biahaga uruni mali waragaria biabe bialu hayago kaneni golalu poragola tígua miniha genda nahe halimu. Irane tigua mali waragariani tínaga biabe bialu howa yolo emeneore mialu hayagoni. Tígua ogonidagua beremigola Anduane Homogohanda tínaga mbirale ngamiru bibahende mo bayale halu tí mini mo dungulo helolebira, lalu Mosesehanda lene.

*Nogo bulumaga sibiru igini pigane wiragonaga mana winigo ogo*

<sup>19</sup> Mosesehanda laabo halu lalu, Tígua nogo bulumaga sibirume igini pigane wini wangabe harago Anduane Homogo inanaga Ngode Datagaliwabe ibunihondo loma biahalu milimu. Ani lomabu muwa bulumaga loma bini urunime agali karunaga biabe bulene nawi. Sibi karunaga irinibi podolene nawi dege.✧ <sup>20</sup> Mali mbira pugu biragola tínaga one waneiginiru heba nogo sibi bulumaga uruni haru halu lotu lole ngoai haga tano wubagi hene ngagoria puwa Anduane Homogonaga deni howa balu nalimu. <sup>21</sup> Anigo ai nogo bulumaga sibi uruninaga tingini mo kohe gi geru garayabi heaguabi de koheyaguabi mo ko hene tara maruyaguabi urunibi kago Anduane Homogo inanaga Ngode Datagaliwabe kagohondo loma bialu bo mulene nawi. <sup>22</sup> Nogo ko urunibi hayagua nde gabua dia ale minana hene karu balu naramilidagua tíni andagani bame balu nalimu. Wali agali tíni Anduane Homogonaga deni nakarulape ko howayaguabi bayale tigabi howayaguabi ta nabi balu nolene nga. <sup>23</sup> Anigo nogo uruninaga darama nolene nawigo nanalimu. Nogo uruninaga darama bedago dindini iba odo wahagadagua odo wahalimu, lene.✧

## 16

*Bolangua Halu Penegonaga Horo tomo nolene winigo ogo  
(Haru Penego 12.1-20)*

✧ 15:11: Md 26.11, Mg 14.7, Yo 12.8 ✧ 15:12: LBM 25.39-46 ✧ 15:19: Har 13.12 ✧ 15:23: Pig 9.4, LBM 7.26-27, 17.10-14, 19.26, Man 12.16, 12.23

<sup>1</sup> Mosesehanda laabo halu lalu, Ege mini Abibi tagira ibiragola mali bibahendengi horo mbirungi mbiraga Anduane Homogo inanaga Ngode Datagaliwabehanda tí Iyibi dindini helalu Bolangua Halu Penego mitangi bialu tomo nolene wulebira. Anidagua bulenedago irane ege Abibi ogoningi Anduane Homogohanda tí mo wialu Iyibi dindiha howa haru tagira ibiyago mitangi budai bialu ibunaga mini yaraga halu ani ngoai holene nga.\*✧

<sup>2</sup> Tígua dindi mbira Anduane Homogo inanaga Ngode Datagaliwabehanda mo wulebi-ragoria nogo bulumaga mbirayaguabi sibi mbirayaguabi ibunihondo lomabu milimu. Ani bialu Anduane Homogo inanaga Ngode Datagaliwabe mitangi bialu ibunaga mini yaraga halu ibugua Isaraele wali agali tí Bolangua Halu Penegonaga tomo nolene horo ogoningi balu nalimu. <sup>3</sup> Tomo uruni nalu howa tígua mberedi yidi howa hirini ngago nolene nawigo nanalimu. Horo karuni mberedi yidi nahe hirini ngago nalu halimu. Anidagua bulene ngago irane bamba tí Iyibi dindini hemiria genda tandagala nalu harimigo wahalu tagira pirimigi tígua mberedi baya hangu hiralu na ndo abale hibilaba lalu yidi nahe hiru nalu ibirimigo mitangi bialu anidagua bulene nga. Mbirale uruni mitangi biaabo halu tíni homalu wahalimu. <sup>4</sup> Mberedi yidi nahe nolene horo karu uruni tagira ibirangi tí andagaha yidi mbira wulene nawi. Horo piganengi nogo loma biniru bo dawalu ogoningi dege nai halimu. Horo mendengi nole nangelalimu. <sup>5</sup> Bolangua Halu Penegonaga Horo tomo nolene harangi tígua tomo nole mo ngoai howa dindi mendeni nogo uruni balu nolene nawi. <sup>6</sup> Tígua dindi mbiraore lotu lole mo ngoai haga ngagoria dege puwa ogoriani Anduane Homogohondo bo lomabu mialu nolene nga. Bamba tí Iyibi dindi howa alendo ni paliyagola yu wahalu tagira ibirimigo mitangi bialu ai nogo uruni alendo ni paliragola bolene nga. <sup>7</sup> Nogo uruni horo ogoningi dege dindi lotu lole ngoai haga ngagoriani howa bo dawalu howa nai halu horo mende egerebagi haragola tίνinaga balai anda kagoha dai bulene nga. <sup>8</sup> Horo waragaru hanguni mberedi yidi nahe hirinigo nalu halimu. Horo kane haragola Anduane Homogo inanaga Ngode Datagaliwabe mitangi bialu lotu lole mandagi ngoai halimu. Ani bialu horo kane lotu laramingi biabe tara tara ngago nabilimu, lalu Mosesehanda lene.

*Mabuha widi lini boga birangi gandulo wulenaga turu howa lotu lolene nga lenego ogo (Haru Penego 34.22, Loma Binigo 23.15-21)*

<sup>9</sup> Mosesehanda laabo halu lalu, Tí mabuha widi balila hingedemigo boga biai kagola pigane gandu lole howa horo daga laga bilimu.\* <sup>10</sup> Daga laga bialu sarere kanegonaga horo hamaro bialu howa horo ogoni Anduane Homogo inanaga Ngode Datagaliwabe mitangi bialu ibunaga mini yaraga halu tígua Mabuha Widi Lini Boga Birangi Gandulo Wulenaga turuho holene horo wulebira. Horo ogoningi Anduane Homogohanda tihondo widi balila bayale dewaore ngiyago mitangi bialu holene nga. Ani bialu tínaga tomo uruni aria maru tale bialu Anduane Homogohondo mua biradagua ta nabi tale bialu lomabu milimu. <sup>11</sup> Anduane Homogo mitangi bialu lotu lole mo ngoai haga ngagoria pialu ogoriani Anduane Homogonaga deni howa tígua ibuhondo turu timbuni holene nga. Tíni títí one waneiginirubi tínaga garabaya biabe ale biahaga wali agali karubi Libai aria karubi agali dindi tara taraha howa tí baba ibu hene karubi waneigini tí aba homene karubi wali dalo ti agalini homene bedarubi bibahende tínaga tanoha haga bu kamirubi turu timbuni hamaga holene nga. <sup>12</sup> Tíni Iyibi dindiha hemingi tí garabaya biabe ale bialu harimigo mitangi bilimu. Ani mitangi bialu tígua mana ogoni mbirago puguligo mitangi bialu baya hangu taluwa bialu halimu, lene.

\* **16:1:** Ege Abibi ogoni Isaraele wali agali tinaga ege pigane. Tínaga ege mbira ogoni inanaga ege tebone (Masi) ege manela (Aibolo) hengeneha tagira ibaga wini ege Abibi ogoninaga mini mende Nisana laga wini. ✧ **16:1:** LBM 23.5-8, Dag 28.16-25 ✧ **16:9:** Dag 28.26-31

*Anda Nemandaha Palu Holene Horo winigo ogo  
(Loma Binigo 23.33-43)*

<sup>13</sup> Mosesehanda laabo halu lalu, Tígua widi balila lini hondo ibira ibira bilo bo tale bialu howa pu mbira lini daga mini gerebi lini pingidalu waini iba hambu wiaiho howabi uruni biai howa Anda Nemandaha Palu Holene Horo tagira ibulebira. Ani ibirangi horo karu tí bibahende turu hagabu holene nga. <sup>14</sup> Tíni bí tí one waneiginirubi wali agali garabaya biabe ale biahaga karubi Libai hameigini karubi agali dindi tara taraha howa tí baba íbu hene karubi waneigini ti aba homene karubi wali dalo ti agalini homene bedarubi tínaga tanoha kamiru tí bibahende turu haga bu halimu. <sup>15</sup> Tí bibahende ani mo ngoai howa lotu lolene ogoni horo karu dindi mbira Anduane Homogo ibunime dabo ngeledagoria polene nga. Anduane Homogo inanaga Ngode Datagaliwabe ibunime tínaga dindi maburu mo bayale holebiragonaga tígua ibunaga mini yaraga halu lotu lalu turu timbuniho halimu.

<sup>16</sup> Ani bialu mali mbirani agali hangume mo ngoai haga dindi wiyagoria halu tebira mo ngoai haga bialu lotu lalu holene nga. Mali mbira ogoniha lotu halu tebira holobadagoni mbira Mberedi Yidi Nahe Hirini Nolene Horo wiyagobi mende Mabuha Widi Lini Boga Birangi Gandu Lenegonaga Horo wiyagobi tebone Anda Nemandaha Palu Holene Horo tagira ibirangibi lotu lolene horo uruni wulebira. Horo uruningi tí bibahende giha mbirale mbira nayi ibulene nawi. <sup>17</sup> Mbirale mbira Anduane Homogonaga yalu ibugu bilimu. Anduane Homogo inanaga Ngode Datagaliwabe ibunime tíhondo mbirale dewaore ngiyago manda bialu tígua bí nde tale bialu maru ibunihondo mule yalu ibalimu, lalu Mosesehanda lene.

*Godi lolenenaga mana winigo ogo*

<sup>18</sup> Mosesehanda laabo halu lalu, Anduane Homogo inanaga Ngode Datagaliwabe handa tano tíhondo ngigi bulebira goria pu howa tínaga tano hangu hangu ngamigoha howa tígua godi hale haga agali maru dabo helalu haru haga marubi dabo helaga bilimu. Ani dabo heledemigola agali uruni tigua bi baya hangu hale halu mana tigabi ngadagua mo tale bigi bilo ani dabo helalimu. <sup>19</sup> Agali godi hale haga karume godi larago mo tale bialu howa mendego mo hondo holenebí ke halu mo guya howa mendego hangu biamogo bulenebí nawiore. Agali mende kagome ibunaga bi lahelonaga mbirale mbira godi hale haga kago miragola ibugua mo yulene nawi. Irane agali tigabi kagome ke ha helonaga yolo miragome mendeali tigatiga lalu kago mo batara halu maname tigabi dabolene ngadagua ndo mo habo lolenaga yolo mo yulene nawiore. <sup>20</sup> Bibahendengi bi henenebí lalu mana tigatiga ngadagua taluwa bialu halimu. Anidagua bialu harimiyagua nde Anduane Homogo inanaga Ngode Datagaliwabe handa dindi ngulebiragoha howa lu haho wiaabo holeberemi.

<sup>21</sup> Tígua Anduane Homogo inanaga Ngode Datagaliwabenaga lomabu delaga dabu bu helalu howa mbirale bi pupu wulenebaga dama wali beda lo mitangi bialu irame wabu helaga mini Aseranaga pigiyabi dabu kagoria kawareni helolenebí nawiore. Mbirale urunihondo bi pupu wulene nawi. <sup>22</sup> Ege tole mbira mo helowa ogonihondo bi pupu wulenebí nawiore. Mbirale uruni Anduane Homogo ibunaga deni ko ngubiore ngago bu wulene nawiore. <sup>\*</sup>

## 17

*Mana tigabi dabolene ngago ogo*

<sup>1</sup> Tígua nogo bulumaga wangabebi sibirubi mbira ko tingini biakohe derebi karu Anduane Homogo inanaga Ngode Datagaliwabe ibuhondo loma bialu nabo milimu. Loma ogonibi bu mirago Anduane Homogo ibu hame nalagaore ka.



<sup>2</sup> Wali agali t́naga tano ogoniha karu aria mbirame Anduane Homogo kagonaga habo nalolene bi lowini ngaru pugualu <sup>3</sup> mbirale dama mitangi bialu gime wabini ngaruhondobi ni kagohondobi egehondobi yakundi karuhondobi bi pupu wialu Anduane Homogohanda bi lowinigo pugualu heagua ko timbuniore bialu ka.✧ <sup>4</sup> Wali agali mbirame mana urunidagua bialu ka lene hale harimiyagua nde irane aginaga biyadabe hondole baya hangu goaria handalimu. Isaraele dindiha mbiralime mana ko ogoni henene anidagua bialu heneyagua <sup>5</sup> ogoni birago ibuni tanonaga pabe tagirahayagi haru tagira puwa ege tole dugualu bo home lolene nga. <sup>6</sup> Ibugua mana ko ogonidagua binidago kirali tebiralirume hendene kayagua ani bo home lolene nga. Ai mbirali hangume hendene kayagua nde wali agali homelo bolene nawi.✧ <sup>7</sup> Mbiralime ko biya lalu handa walia hagadaru tinime ala ege tole dugualu ko biaga ogoni baragola maru karu tiguabi mani bolene nga. Anidagua bo wahai haramigome tini mana koha pubagi holene henge nawilo bibahende bo homelai haramigoni holebira.✧

<sup>8</sup> Horo marungi godi hale haga agali maru t́ninaga tanoha emene emene karume godi maru mo tiga bibe nahe timbuni gendabi wigi bulebira. Uruni mbiralime mendeali kago baragola tingini mo ko henerubi dindi andaru garere bialu bi layaguabi gungu bialu mende kago homelo benedabe be mememe bayagola homayadabe dabolenebi uruni ale tigua hale halu mo tiga bibe nahe holebirago. Timbuni uruni ale mbira wigi biragola mana hale haga agali biarume mo tiga nabibeheyagua Anduane Homogo inanaga Ngode Datagaliwabe ibugua iname ibuni mitangi bialu lotu lole íbu ngoai holene dindi mbira dabo ngelayagoria godi urunibi yu polene nga. <sup>9</sup> Yu puwa Libai hameigini loma binigo mo miaga karuhondobi godi hale halu mo tiga biaga horo ogoningi biabe bialu kago tigua mo tiga bialu manani howa dabaki helo ti lamulene nga. <sup>10</sup> T́gua hale hai howa manani ogo ale bibe lalu langiradagua bilimu. <sup>11</sup> T́gua bi langirago baya hangu hale howa bilimu laradagua biai halimu. <sup>12</sup> T́ mbiralime godi hale haga biagome bibe lalu lamirago hale howa nabiyaguabi loma binigo mo miaga agali howa Anduane Homogonaga deni biabe bialu haga biagome bibe laragobi bia nabi mo wahowa heagua ogonidagua biaga kago ibu homelo ege toleme bo homelalimu. Anidagua bo wahai haramigome tini mana koha pubagi holene henge nawilo bibahende bo homelai haramigoni holebira. <sup>13</sup> Anidagua beremigola ogo ale biya lalu te ogoni wali agalime haleho yogolowa mani mbiralime mine halu maname bibe lalu lamidago mo wahalu napolebirago anidagua bilimu, lene.

### *Kini dabo helolenenaga bi laminigo ogo*

<sup>14</sup> Mosesehanda bi laabo halu lalu, T́gua dindi mbira Anduane Homogo inanaga Ngode Datagaliwabe ibugua ngulebero lalu lo wiyagoria pu howa dindi tara tara ngaruha kinime haru kadagua t́bi nde kini mbirame haru helo hame loleberemi.✧ <sup>15</sup> Ani hame larimiyagua nde ogoningi t́ninaga hameme dabole ndo Anduane Homogo ibunime mbirali t́naga kini helo dabenego walia helo halimu. Ani bialu kini ogoni ibu dindi tarali ndo t́ni iginioreme helo helolene nga. <sup>16</sup> Kini ogonime ibunaga ami agaliru wai pole biralu pelonaga nogo hosiru dewaore helolene nawi. Ibunaga agali maru Iyibi dindiha nogo hosiru yolobu pudaba lolenebi nawi dege. Ani larogoni irane Anduane Homogohanda ibunaga wali agali lenego aria mbira Iyibi dindiha lone dai nabuleore lene.✧ <sup>17</sup> Kini ogonime wali dewa dabu bulene nawi. Ani larogoni irane wali dewa uruni tigua kinime Anduane Homogo yu wahalu pelonaga haru pubagi holebira. Ai ibugua muni ngolo silibarubi dewaore ilu wia dege bialu holenebi nawi.✧ <sup>18</sup> Ibu kini howa mbuga mbira Anduane Homogonaga bi mana gilibuwi ngago mo yu holene nga. Ibugua kini howa mana Libai hameigini karu tigua yu kadagua dege yu howa mana

✧ 17:3: Har 22.20 ✧ 17:6: Dag 35.30, Man 19.15, Md 18.16, 2 Ko 13.1, 1 Ti 5.19, Hi 10.28 ✧ 17:7: 1 Ko 5.13  
✧ 17:14: 1 Sml 8.5 ✧ 17:16: 1 Kin 10.28, 2 Bit 1.16, 9.28 ✧ 17:17: 1 Kin 10.14-22, 10.27, 11.1-8, 2 Bit 1.15, 9.27

uruni dege lone gili buyane bigi buwa yu holene nga. <sup>19</sup> Mbuga ogoni ibuni bedagoria kaware ngelo biruwa horo bibahendengi bi mana mbuga ogoniha gilibu wini ngaru aria mbira daga laga bialu holene nga. Ani biragome ibuni Anduane Homogo andaneha haabo howa bi mana lowini ngaru baya hangu talialu bialu haabo holebira. <sup>20</sup> Ani biragome ibugua ibuninaga mini hangu mo yaraga haabo halu Isaraele wali agali mo hangedope nahaga holebira. Ani howa ibugua Anduane Homogonaga bi mana lowini ngaruni aria mbira pugua nabiaga howa ibu luore kini haho wialu mali dewa pu ajai bulebira. Kini holebirarubi uruni ibu waneigini aguanerume dege hama pu ai holebira, lalu Mosesehanda lene.

## 18

### *Loma binigo mo miaga hearu tinaga loma winigo ogo*

<sup>1</sup> Mosesehanda laabo halu lalu, Libai hameigini karu ti ina Isaraele hameigini kamaru dindi tu wu ta haramago aria maru namulebira. Ti loma binigo mo miaga howa tomobi nogo sibirubi ina Isaraele wali agali maru kamarume Anduane Homogohondo lomabu meremaru tinaga wulebirago ogoni nalu holebira. <sup>2</sup> Isaraele hameigini maru karu tinaga dindi mbira mbira ngamidagua Libai hameigini tinaga nawulebira. Tigua mbirale bayale yu kago ogo. Anduane Homogoibunime bilimu lalu lo wiyadagua tigua Anduane Homogonaga biabe biaga howa loma binigo mo miaga helo dabo helene ka.✧

<sup>3</sup> Agali mbirame nogo bulumaga sibiru wangabe mbira Anduane Homogohondo bo lomabu miyagua nde nogo ogoninaga payane mbirinibi ne hangane mbirinibi tinibi podalu loma binigo mo miaga karu ti nelu mulebira. <sup>4</sup> Ani bialu widi bayale ngarubi waini ibabi olibe lini welibi nogo sibi irini bayale ngarubi bibahende loma binigo mo miaga karuhondo pigane migi bulene nga. <sup>5</sup> Anduane Homogohanda ibunaga biabe biahalu loma binigo mo miaga helo ibugua Isaraele hameigini maru karu aria ndo Libai hameigini karume tinaga aguanene mani holebirarumebi biabe ogoni bialu haabo helo dabaya.

<sup>6</sup> Libai hameigini karu aria mbirago ibu Isaraele dindiha ibunaga tano ngago wahalu dindi mbira lotu laga wubagi hene ngagoha poa biyagua nde ani polene nga. <sup>7</sup> Ani pialu howa loma binigo mo miaga maru dindi ogoria karu ti Libai hameigini dege howa tigua Anduane Homogonaga deni biabe bialu hagamogoria ibuguabi Anduane Homogo ibunaga Ngode Datagaliwabenaga biabe biahalu holene nga. <sup>8</sup> Loma binigo mo miaga karu tinaga tomo mbiraleru ibugua ogobi dege dege talebu migi bulebira. Ani bialu ibunaga damenerume talebu migi bini ngaru mo yu haga haga bulebira, lene.

### *Mana ko Kenana wali agali karume biaga winigodagua bulene nawi, lenego ogo*

<sup>9</sup> Mosesehanda laabo halu lalu, Ai dindi Anduane Homogo inanaga Ngode Datagaliwabahanda ngulebero layagoria pu howa mana ko ngubi dindi ogoniha wali agali hene karume biagadagua nabilimu. <sup>10-11</sup> Tigua wali agali dindi ogoniha karume biaga ngadagua tinaga waneiginiru loma bialu bo delaga dabu kagoria bo delolene nawi. Ani bialu ke howa halaga biaga mana ngago bulene nawiore. Damanaga toro manabi tomia manabi bulene nawi. Mbirali í keria ibilo ndole mulenebi uruni ale damenego bulene nawi dege. Homene dininihondobi mo bila nahalimu.✧ <sup>12</sup> Anduane Homogo inanaga Ngode Datagaliwabe kago ibugua wali agali mana ko urunibi biaga karu handabe manga haga kagoni. Wali agali dindi uruniha karu tigua mana ko urunibi bialu kagonaga Anduane Homogohanda tí dindi ogoniha anda polene kaware hapara halu pialu kamigola ibunime wali agali uruni bo batagi holebira. <sup>13</sup> Tigua mana beremigo bibahende Anduane Homogohanda hameledadagua taluwa bialu mini bilinahe ho halimu, lene.✧

*Anduane Homogohanda, Bi mana latagi haga mbira ibilolebero, lalu lowinigo ogo*

<sup>14</sup> Mosesehanda lalu, Dindi tí poleberemigoha wali agali bu karu tigua halaga biaga karunaga bi hale halu talima piagabi damanaga mana ngaru bialu hagabi ka. Anigo Anduane Homogo inanaga Ngode Datagaliwabe ibugua, Tí mana urunialeore nabilimu, leda.

<sup>15</sup> Anigo Anduane Homogo ibugua ibunaga bi mana latagi haga mbira ini kogobi tini hameigini karuni aria mbira dabo helolebira. Ani dabo heledagola tigua ibunaga bi larago hale howa talialu bialu halimu.✧

<sup>16</sup> Tí Hari Sainai hapara ho harimingi Anduane Homogo ibugua bi layagola tigua gi howa ibuhondo lalu, Bi lone nalabe, larimi. Ani bialu ira hungu timbuni Anduane Homogo ibuni heagoria howa kiau latagi haragonaga hondolenebi gi harimigoni. Ai tigua mitangi bialu lalu, Iname Anduane Homogonaga bi larago lone hale harimayaguabi ibuni de handarimayaguabi nde ina homoleberemada, larimi. <sup>17</sup> Ani larimigola Anduane Homogohanda ihondo langialu lalu, Isaraele wali agali tigua ihondo bi hale haga biraru bayaleore hale haga bira. <sup>18</sup> Ina tini hameigini karuni aria mbirago dabo helolebero larugo ibugua inaga bi mana wali agalihondo lamia larongi heyu howa latagi halu holebira. <sup>19</sup> Inaga minini howa agali ogoni ibugua inaga bi mana latagi halu kagola wali agalime bi ogoni mo wahaga kago ina ti mana lalu pani mulebero.✧ <sup>20</sup> Anigo bi mana latagi haga agali mbirame inaga minini howa bi inime latagi habe lene ndo ibuninaga bi hangu latagi halu heagua nde ibuni homolene wulebira. Ani bialu agali mbirali ibugua dama mbiranaga minini howa bi latagi hayagua nde ibubi homolene dege wulebira lalu Anduane Homogo ibugua ihondo langiya, lalu Mosesehanda lene.

<sup>21</sup> Anigo tigua bi mbira hale howa tini lo manda bialu bi ogoni Anduane Homogoha howa ibinidabe be mendeha howa ibinidabe lalu mo tale agua buleberemibe. <sup>22</sup> Ai bi ogodagua hondo manda bilimu. Bi mana latagi haga mbirame Anduane Homogonaga minini howa ibugua ogoale mbira bulebira lalu mbiwia haragola bulebira layago henene tagira naibiyagua nde ibugua bi layagoni Anduane Homogohanda lamini ndo holebira. Agali ogoni ibuni miniha howa tagira ibiyago latagi hene holebirago tigua ibuhondo gi nahalimu, lalu Mosesehanda lene.

## 19

*Ha do holenaga tano tebira dabo winigo ogo*  
(Dagalene 35.9-34, Yosua 20.1-9)

<sup>1</sup> Mosesehanda laabo halu lalu, Anduane Homogo inanaga Ngode Datagaliwabehanda dindi tí mo ngulebiragoha wali agali bu karu bo taliatagi hai halu tinaga dindi anda ngaru tí karulo halimulo ngulebira. Tí dindi bayale ogoniha pu howa✧<sup>2-3</sup> dindi ogoni halu tebo tu wupe halimu. Ani buwa dindi tu wini hobane mbira mbira uruniha tano mbira dege agali gerai lalu abale polene hana nahe ngagoria dabo helalimu. Ani ngagoria agali marume mbirali kago bo wahalu tini tano uruni mbiragoha abale ibida pialu ha do holene wulebira. <sup>4</sup> Agali mbirame mbiralila libu waitigi ndo howa mememe koba puwa bo wahayagua nde бага biago ibuni tano uruni aria mbiraha ibida pialu ha do howa bayale holebira. <sup>5</sup> Agali ibida pialu ha do holobadagoni ogodagua holebira. Agali kiralu irabuha puwa ira dibalu kabira ayu gola puwa agali mendego dibaragola homayagua nde agali ayu yaga hayadago ibu ibida pialu tano tebira uruni mbiragoha pu howa ibu gi nahe holebira. <sup>6</sup> Ha do holene tano ogoni aria mbiraore hangu wiagua nde agali бага biago ibu ibida polene kaundiaore ngagola tano ogoniha pole wene harigani pialu kaore homayago damene bu karume ibuni homelo bo wahayagua bame bo waharagoni. Ai ha do holene tano mbiraore hangu wulene nakarulape. Anigo agali ayu yaga biago darabi ibugua agali mende

✧ 18:15: Ab 3.22, 7.37 ✧ 18:19: Ab 3.23 ✧ 19:1: Man 4.41-43

biago baro lalu ndo mememe ayu gola puwa dibayagome homaya. <sup>7</sup> Irane ogonidagua bulebadagonaga tano tebira dabo ngelalimu larogoni.

<sup>8</sup> Mani Anduane Homogo inanaga Ngode Datagaliwabeanda bamba t́naga mamali biaruhondo dindi ngulebero lalu bi lo winigodagua ngialu t́naga dindi ogoni yangalalu mo timbu holebira. <sup>9</sup> Ibugua ani mo timbu haragola t́gua tano tebira mende dabo ngelalimu. Ai t́gua bi áyu langerogo bialubi Anduane Homogo inanaga Ngode Datagaliwabe kago gubalini timbuniho howa ibunaga bi larago baya hangu talialu bialu harimiyaguabi nde ibugua dindi uruni bibahende t́ mo ngiai holebira. <sup>10</sup> T́ dindi Anduane Homogohanda ngulebero lalu lo wiyagoha pu howa wali agali mememe koba puwa balu homayagua t́gua biako hene mbira nawilo tano tebira ogoniha helo ani dabo ngelalimu.

<sup>11</sup> Anigo ai agali mbirame ibunaga damene karu aria mbirago handabe manga howa homelo bo wahalu tano tebira uruni mbiragoha ha do hole pole manda biyagua nde <sup>12</sup> agali haguane ibuni daluha hene bu karu tigua agali tano ogoni ibu ha do hole piyadagoha haga karuhondo bi lo pelolebira. Ani puwa lalu, Agali baga ogoni yupe halu daibia lalimu, lolebira. Dai bu kagola agali haguane ibuni daluha hayadaru tigua agali balu piaga biago homayago andua karu giha minu ya haragola tigua ibu homelo bo waholebira.

<sup>13</sup> T́gua ibu dara holene nawiore. Ko ibunime bialu Israaeleali hearu aria bame homelo bo wahaganaga pani mialu dindi ogoniha nahelo bo waholene nga. Anidagua birimiyagua t́ bayale holeberemi, lalu Mosesehanda lene.

#### *Dindi tu bambaore wini ngagonaga ogo*

<sup>14</sup> Anduane Homogo inanaga Ngode Datagaliwabe ibugua dindi áyu ngulebirago karulalu howa t́gua t́naga damene mbiragonaga dindi hamelowa dindi tu ege toleme bambaore wini ngago dugu yaamu nahalimu.✧

#### *Mbiralime ko binigo kirali hendene kayagua godi lolene karulape, lenego ogo*

<sup>15</sup> Mosesehanda laabo halu lalu, Mbiralime ko biya lalu mbiraoreli hangume hon-dowa godi deni latagi hayagua mbiraorelime larago maname hale nahalimu. Ko binidago kirali tebiralirume hendeneyagua nde manani ko biagadago ibu helalimu.✧

<sup>16</sup> Ai mbiralime mendeali kago mo ko holenaga hariga taya bialu howa lalu, Agali ogoni ibu ko biya, layagua <sup>17</sup> libu haru pialu mo ngoai howa lotu laga mbira wiyagoria polene nga. Ani puwa Anduane Homogonaga deni henene lalu agali maru loma binigo mo miagabi ko biniru manani ngadagua tale biagabi horo ogoningi biabe bialu henedarume libunaga bi tale bilo polene nga. <sup>18</sup> Ani pu howa bi laragola agali mana hale halu tale biagadaru tigua hale halu karia biya laga biago ibu ke heneyagua nde <sup>19</sup> mendeali bame dibaede hayago pani mulene wiyadagua ke howa dibaede haga biago ibuni no aribia holene wulebira. Ani buleneore wulebirago ai t́ha ke halu nde lolene mbira ogonibi nawilo ani bulene nga. <sup>20</sup> Anidagua birimiyagua wali agali bibahendeme hale howa ti gi howa tigua ke halu mendeali bameore nde nalolebirago ani bilimu. <sup>21</sup> Mbiralime ke haga karuhondo t́gua dara holene nawiore. Mbiralime ibunaga nenege mbira ko nawi kago bame homelo manda biyagua nde ibuni homolene nga. Ke haga biago ibugua ibu damene biagonaga de hundiabi ne bo hondabi gi gebi mbirago bo tagalia bilobi hame layagua nde ke haga ogoni ibuniha bilo hame layago biadai bulene nga, lalu Mosesehanda lene.✧

## 20

### *Wai bulenenaga mana winigo ogo*

✧ 19:14: Man 27.17 ✧ 19:15: Dag 35.30, Man 17.6, Md 18.16, Yo 19.31, 2 Ko 13.1, 1 Ti 5.19, Hi 10.28 ✧ 19:21: Har 21.23-25, LBM 24.19-20, Md 5.38

<sup>1</sup> Mosesehanda laabo halu lalu, Tígua waitigi baba wai bule pialu kamiria waitiginaga wai biaga garo ale karisi dewabi nogo hosi dewabi ami agali dewabi howa ti dewaore halu tíninaga emene harimiyagua nde harugo tígua uruni hondowa gi nahalimu. Irane tí Iyibi dindiha hemiria haru halu tagira piaga Anduane Homogo inanaga Ngode Datagaliwabe ibuni kago ibugua tí mo hongo halu tí heba mandagi holebira. <sup>2</sup> Tígua wai bu pole howa tidiyu haga haga bu kamiru wanakuini loma binigo mo miaga mbiragome íbu howa ami agaliruhondo ogodagua lolebira. <sup>3</sup> Ibugua lalu, Isaraealeali kamiru tí bi o larogo hale hadaba. Áyu tígua wai bu pole kamigoni. Ani pole howa waitigi bu karu hondowa tígua gi halu tínaga hongo ibira holene nawi. Ti de hondowa mogobi nalalimu. <sup>4</sup> Anduane Homogo inanaga Ngode Datagaliwabe ibuni tí heba mandagi pialu tígua wai bilimulo ibugua tí mo hongo halu holebira. Ani biragola tígua wai bialu waitigi bo poda hana holeberemigo pilimu lalu, lamulebira lene.

<sup>5</sup> Ani laragola ami agali haru haga haguane karu tigua lalu, Agali áyu kamaru aria maru tí anda gahenge áyu dege bia howa Anduane Homogohondo, Anda ogoni mo bayale ha, nale ogoniha palia nabi ai kamibe. Mbirali ani heagua nde waiha bogaragola ibunaga anda gahenge biago mendealime karulo holene nakarulapedago wahalu andaga daibia, lalu lolebira.✧ <sup>6</sup> Agali áyu kamaru aria mbirali pu mbira mini gerebi mabu hingedagoha howa gerebi lini dalu waini iba wabu nane mbirali ai kabe. Mbirali heagua nde ibu waiha bogaragola ibunaga gerebi hingedago mbirali ibu aribia halu do nolene wuligo wahalu dai bulene nga. <sup>7</sup> Agali kamaru aria mbirali wali wene dabu biaho berelowa ai kamibe. Mbirali ani bu heagua nde tini waiha bogaragola wali gahenge dabubu berelarimigo mendeali kago ibu aribia holigo wahalu daibia, lalu lolebira.

<sup>8</sup> Ani lowa ami agali haru haga haguane biarume laabo halu lalu, Agali maru wai polene gi howa duru lalu kamiyagua nde tí gi heneme agali maru karubi mo gi holigo wahalu andaga hole dai bilimu, lalu lolebira. <sup>9</sup> Ami agali haru haga haguane biarume bi lai howa tigua agali marume ami mo tale bigi bialu tidi mbira mbiranaga haru holene dabo helaga bulebira.

<sup>10</sup> Tí tano mbira wai pabe honghe ege pabe buyu mabubi ngagoria anda pialu howa tígua wali agali tano ogoniha karuhondo ogodagua lalimu. Tígua ina baba wai nabi wahalu tínaga tano ogoni ina ngidaba lalimu. <sup>11</sup> Anidagua laramigola hale halu tigua wai nabi wahalu tanonaga panga timbuni kago dugupe hayagua nde dindi aba hayadago ti tí andaneha howa tínaga garabaya biabe ale bialu holene wulebira. <sup>12</sup> Anidagua nabi howa agali tanoha karume tí baba wai bule hongo hayagua nde tínaga ami agali biarume tano ogoni baya hangu ho hagira bilimu. <sup>13</sup> Ani beremigola Anduane Homogo inanaga Ngode Datagaliwabehanda tano ogoni karulalimulo tí giha mo ya holebira. Ani biragola tígua tano ogoni karulowa agali tano ogoniha karu bibahendeore bo wahai halimu.

<sup>14</sup> Anigo wali waneigini bedarubi nogo bulumaga karubi dabudabu tara tara ngarubi bibahende tano ogoniha wini ngaru mo yai halimu. Ani bialu waitigi biarunaga mbirale mo yaramiru bibahende Anduane Homogo ibugua tí mo ngiyago tını hai halimu. <sup>15</sup> Tínaga dindi holeberemigo yu wahalu tano maru kaundiani ngaru wai bialu howabi nde anidagua dege bilimu.

<sup>16</sup> Anigo dindi Anduane Homogo inanaga Ngode Datagaliwabehanda tí ngulebi-ragoha tano ngaru wai bialu howa wali agalirubi waneiginirubi bibahende ogoniha haga karu homelo bo wahai halimu. <sup>17</sup> Anduane Homogohanda bilimu lalu tihondo langiyadagua bialu Hidialibi Amoralibi Kenanalibi Peresealibi Hibialibi Yabusualibi wali agali bibahendeore homelo bo wahai halimu. <sup>18</sup> Wali agali uruni tigua dama mitangi bialu gime wabini ngaruhondo bi pupu wialu mana ko ngubi ti bialu haga

✧ 20:5: Lg 14.18-20



ngaru tíhondo biawai nahelo bibahende bo hilo wahai halimu. Wali agali tara urunime tigua Anduane Homogohondo mana ko bilimulo mo bia holigo anidagua bilimu.

<sup>19</sup> Tígua tano mbira ngago karulolenaga horo bibahendengi ho hagirabu haabo howa tano tagiraha irabu karu dibule haramiyagua nde ira lini tomo nagane ale daga karu dibu wanahe helalimu. Ira lini dedaru lini nagane ale dedago do nalu halimu. Irane ira uruni tínaga waitigi ndo kago diba nabi helo wahalimu. <sup>20</sup> Anigo tígua ira maru lini nagane ale nadaga kago hondowa tí wai beremigonaga irame bulene mbira wiagua nde ira kago damene bibahende dibai halimu, lalu Mosesehanda lene.

## 21

### *Mbirali bame homelo bo wahenegonaga dabaki bulene winigo ogo*

<sup>1</sup> Mosesehanda laabo halu lalu, Dindi Anduane Homogo inanaga Ngode Datagali-wabehanda ngulebiragoha pu kamingi agali mbira dindi ogoniha bo wahene ngane hondowa aiwa bayabe manda nabiyagua nde ogodagua bilimu. <sup>2</sup> Tínaga agali haguane karubi godi hale halu dabaki biaga karubi tigua dindi agali tingini ngagola tano agola kaware wiyadabe hondole hondo manda bulene nga. <sup>3</sup> Ai tano mbira agali tingini wiyadago kaware ngagoha haga agali haguane karu tigua nogo bulumaga angibuni dalua mbira wali agalinaga biabe nabini kago dabo helolebira. <sup>4</sup> Ani bialu nogo bulumaga ogoni haru halu iba hundia nabiaga mbira pedagoha haru polene nga. Ani bialu iba ogoni kawareni dindi mbira mbiralime mabu e hanga nabini ngagoria bulumaga ogoni homelo ma minu ndelalu bolene nga. <sup>5</sup> Ani bialu Libai hameigini loma binigo mo miaga karu Anduane Homogo inanaga Ngode Datagaliwabe ibugua tiibunaga biabe bialu haga helobi ibunaga mini latagi halu wali agali biamogo bialu Anduane Homogohanda tí mo bayale helo lalu helobi dabo helene ka. Ani helayago tigua kirali keba halu gungu binigo mo dabaki biaga kago manda bialu tibi nde iba ogoni pedagoha haru mandagi polene nga. <sup>6</sup> Ai agali bo wahene biago ngagoria tano kaware henedaru agali haguane tibi nogo biago haru halu piyadagua pialu tigua iba pedagoria tinaga gi wayawaya bulumaga biagoria bope holene nga. <sup>7</sup> Ani buwa tigua lalu, Iname agali ogoni bo wanaheorego aiwa bo wahayabe tobaho kama. <sup>8</sup> Ai Anduane Homogo-ina Isaraele wali agali ínime Iyibi dindiha howa haru tagira ibirigo bu kamarunaga ko ngago domo wahabe. Agali ogo ibuha ko mbira nawi heago bame homelo bo wahayada. Anidagua biyadagonaga inaha biako hene ngalo manda nabibe, lolebira. <sup>9</sup> Ani lalu tígua mana tigabi bulene ngadagua beremigola Anduane Homogohanda tíhondo agali bo wahene ngagonaga biako hene mbira tíha nawida lolebira, lalu Mosesehanda lene.

### *Isaraealime wai bialu waitigi wali haru dai buwa bulenego ogo*

<sup>10</sup> Mosesehanda laabo halu lalu, Tígua wai pialu kamiria Anduane Homogo inanaga Ngode Datagaliwabehanda tí mo hongo haragola tígua wai bialu waitigi maru garabaya haru poleberemi. <sup>11</sup> Ani haru puwa garabaya uruni aria mbirago wali baya mbira bedane handalu í one berelo hame lariyagua dabu bule haru polene karulape. <sup>12</sup> Ani manda buwa ina wali biago í andaga haru polene nga. Haru puwa wali ogoni ibunaga mandari podo wahai halu gi gibabi podai holene nga. <sup>13</sup> Ani buwa garabaya howa aga bu hayago golo wahalu gahenge karula aribia holene nga. Ani bialu wali ibu agali biago andagaha biruwa ege mbirani ibu dameneru aba aiyaru waiha howa homayagonaga dara howa dugu bialu birulebira. Ani biruwa ege mbira ogoni piai kagola libu dabu bulene nga. <sup>14</sup> Ani bialu mani howa agali biagome wali ogoni hame nalayagua nde wali wahalu pu lolene nga. Wali ogoni bame haru halu puwa paliribigo manda bialu ibu agali biagonaga garabaya biabe ale biaga berelowa muni tagu nolene nawiore, lalu Mosesehanda lene.

### *Aba paluni igini wahene kagome karulolene winigo ogo*

<sup>15</sup> Mosesehanda laabo halu lalu, Agali mbirame wali kira dabubu howa ibugua wali mbirago gubalini ho howa wali mendego handabe mangaho haga. Ani howa ibugua wali handabe manga hene biagome igiri wahene taba hanalu wali mende ibuni gubalini haga biagomebi igiri dege mani taba hanaga. <sup>16</sup> Ani bidagola mani agali biagome ibunaga mbirale ngaru paluni tale bule howa wali ibu handabe manga haga bedago igini wahene taba henenegonaga paluni winigo wali ibuni gubalini haga biago igini mani taba henene kagohondo mulene nawi. <sup>17</sup> Ibugua paluni tale bialu howa ibu igini wahene wali berene igini kagohondo mbirale wiyadaru tale bialu halu kira igini wahene kago miaga ngadagua mulene nga. Agali ogoni ibu one berenedago ibu gubalini nahagagoyu harugo biaga ngadagua ibu igini pigane hono wini wahene biago mulene nga lalu, Mosesehanda lene.

*Igini kagome aba aiyanaga bi mo waharagola bulene winigo ogo*

<sup>18</sup> Mosesehanda laabo halu lalu, Agali mbira ibu iginime mine howa aba aiyanaga bi mo wahaga kagonaga ibu aba aiyalame tibume minu baragola ogonibi dogo halu bi hale nahaga ka. <sup>19</sup> Anidagua bialu haabo hayagua nde wahalu libu iginidago tininaga tano panga haraba ngagoha agali haguane karia haru halu puwa godini helolene nga. <sup>20</sup> Ani helowa ibu aba aiya biagolabome agali haguane karu lamialu lalu, Iya igini ogonime iyanaga bi mo wahalu mine gibi haga. Ibugua iyanaga bi larabago hale nahaga. Ibugua lulu iba nalu lulu yu haabo haga howa iyanaga muni ngabago mohole biaga kagoni, lalu lamulene nga. <sup>21</sup> Ani laragola agali haguane tano ogoniha haga hayadarume ege tole dugualu bagabaga bialu igiri ogoni balu bo homelolene nga. Mana ko ogonibi tí kamigoha nawilo anidagua bialu mo waholene nga. Anidagua beremigola Isaraele wali agali bibahende hale halu mogolo hondowa gi hai holebira, lalu Mosesehanda lene.

*Mana maru winigo ogo*

<sup>22</sup> Mosesehanda laabo halu lalu, Agali mbirame mana ko timbuniore bidagola ogo-ninaga tígua ibu homelo balu ibunaga tingini ira dibini tilinini mo paga harimiyagua <sup>23</sup> nde horo mbiru wialu egabi nalelalimu. Ani larogoni irane agali tingini derelaho wirago Ngode Datagaliwabehanda tandaga nama pobe lolene wulebira. Ani ngago manda bialu horo ogoningi dege hora halimu. Anidagua nabirimiyagua tínaga dindi Anduane Homogo inanaga Ngode Datagaliwabehanda ngulebirago ibuninaga deni howa mo koore heloleberemigo ani nabilimu lalu, Mosesehanda lene.\*

## 22

<sup>1</sup> Tígua handalu kamiria tí aria bu karunaga nogo bulumaga sibiru mbira tini haga biago yu wahalu tagira ibagabu kane de handarimiyagua ani helo hondo donge nahalimu. Nogo anduane biago ibuni karia haru dai bilimu.\* <sup>2</sup> Anigo nogo anduane ogoni ibuni kaundiaha heaguabi nogo anduane aibe toba harimiyaguabi nde wahalu tí andaga haru pilimu. Ani haru pu kamiria nogo anduane ogoni ibuni taya bima ibiyagua nde ibuni haru halu pelo milimu. <sup>3</sup> Ani bialu tí damene bu karu aria mbiragonaga nogo dongi tagira pu heneyaguabi aga dabudabu marubi bame harigani waheneyaguabi anduane ibuni karia mo yalu dai bilimu.

<sup>4</sup> Isaraele aria karu mbiragonaga nogo dongibi bulumagayaguabi mbirago harigani pilopeho ngane handarimiyagua nde ogoni ngelo wahalu napilimu. Tí damenenaga nogo ogoni biamogo bialu mo heya halimu.

<sup>5</sup> Agalime aga biagane ale ngago walime karulo holene nawi. Walime aga biagane ngagobi agalime karulo holene nawi dege. Anduane Homogo inanaga Ngode Datagaliwabehanda mana urunibi birago hondowa turu nahaga ka.

\* 21:23: Yos 10.26-27, Yo 19.31, Ga 3.13    \* 22:1: Har 23.4-5

<sup>6</sup> Tígua ega anda mbira ira geha ngane handarimiyagua dindihayagi ngane handarimiyaguabi ega angibunime habane dambiho padaria hondowa igini yu bedariabi de hondowa ega angibuni bedago ibuni naminalimu. <sup>7</sup> Ega igini bedago minalu angibuni pelo yupe halimu. Anidagua birimiyagua tí dindi ogoria lu haabo howa Anduane Homogohanda mbirale dewaore tihondo ngulebira.

<sup>8</sup> Tígua anda beremigo bialu howa dangini daligahayagi pabe emene mbira bu mabu bilimu. Ani nabi ngeledemigola wali agali anda dangini irigi howa ibagabu karia pilope halu homayagua nde tígua biako hene wuligo ani bilimu.

<sup>9</sup> Pu mbira lini daga mini gerebi mabu ngamigoha tomo tara ale maru hangamaga nahalimu. Tomo tara maru heba hangamaga harimiyagua nde gerebi lini dedarubi tomo tara karubi nolene nawigo nanalimu.✧

<sup>10</sup> Nogo bulumaga dongila mandagi mabuni dindi alialu helonaga aeaneme mani dariba hamagamaga nabi halimu.

<sup>11</sup> Tígua pu nogo sibi irinimebi pu baya gedaore taramebi mandagi paya magamaga buwa aga wabini ngago nabilimu.

<sup>12</sup> Tínaga aga ngamirunaga gibuni mariani yári bayale luni uruni lebu para haga bilimu lalu, Mosesehanda lene.✧

*Wali agalime mana bayale ngaru bialu holene nga lenego ogo*

<sup>13</sup> Mosesehanda laabo halu lalu, Agali mbira ibu wali dabu buwa ibu onela andaga palu howa mani ibu one ogoni manga howa <sup>14</sup> ibugua ke halu ndelowa lalu, Wali ogoni ibu agali mendela heneyane handaru, lolebira.

<sup>15</sup> Agali biago ibugua bi ogonidagua layagua wandari aba aiyalame wandari ogoni ibu mana ko ogonidagua nabiagaore lalu mo walia hagane labolabo mbira winigo mo yalu polebira. Ani mo yalu tanonaga pabe haraba wali agali ngoaiho howa godi laga ngagoria puwa tanonaga agali haguane miniwi bu karuhondo labolabo biago mo walia holebira. <sup>16</sup> Mo walia halu wandari aba biagome agali haguane biaruhondo lamialu lalu, I wane agali ogo ibu dabu binigo ai áyu ibugua wali ogo manga haya. <sup>17</sup> Manga howa ibugua ke howa bi lalu, Wali ogo i dabu buwa mani handalu hewaria ibu agali mendela kayu ala biniyane handaru laya, lalu lamulebira. Ani lamialu ibugua labolabo yalu piyago agali haguane biarunaga wanakuihayagi dindini dungua holene nga. <sup>18</sup> Ani biragola agali haguane biarume agali ke haga biago tibume bo mberaho waholene nga. <sup>19</sup> Ani bialu agali ogoni ibugua muni kina ale daosini mbirame (1,000) wandari aba biago yolo bulene nga. Irane agali ogoni ibugua Isaraele wali bayale berene bereago mo yobia halu mo taga hayagonaga ani bulene nga. Anidagua bialu wali biago ibu agali ogoni one biraabo halu homalu waholebira. Agali ogoni ibugua wali wahalu pu lolene nawiore.

<sup>20</sup> Anigo ai wali ogoni ibu henene agali mendela kayu bini biruwa tigua nabi tingi heneyane handa walia hayagua nde <sup>21</sup> tanonaga agali haguane biaru tigua wandari biago ibu aba anda haneni haru tagira pu helowa tigua ege tole dugualu toleme balu homolene nga. Anidagua bulubadagoni irane wandari ogoni ibugua ibu aba andaga bereangi mana ko tagabi wiago inanaga wali agali bu karunaga deni bialu ibu agali nape biruwa agali kayu yalu birayadagonaga ibuni homolene nga. Anidagua birimiyagua mana ko mbira ogoni alego tí kamigoha nawilonaga mo wahai holeberemi.

<sup>22</sup> Agali mbirame mendeali one bedago kayu bialu karia handa walia harimiyagua nde mana ko ogoni ale tí daluha nawilonaga hada bialu wali agalibi kirabali homelo bo wahalimu.

<sup>23</sup> Agali mbirame wandari mbira ibu dabu bule lowa haru bedaria agali mendeme kayu bialu karia handarimiyagua <sup>24</sup> wali agalibi kirabali tanonaga pabe tagirahayagi haru tagira puwa homelo ege toleme bo wahalimu. Walidago ibu ogodagua bira lalu

koaba layagua tanoha agali maru karume hale holene winigo ai ibugua koaba nale donge howa bialu hayagonaga ibuni homolene nga. Agalidago ibubi nde ibuni aria dege mende heago ibu dabu buleore lowa haru bereago kayu bialu hayadagonaga ibubi homolene dege nga. Anidagua bialu mana ko ogoni alego biba halu ereba helalimu.

<sup>25</sup> Ai wandari mbira agali mbirame ibu dabu bule lowa haru berenego wali ogoni ibu tanoha howa tagira puwa ibuni hangu pialu karia agali mbirame handa walia howa minade halu ibu kayu biyagua nde agali ogoni ibuni hangu homelo bo waholene nga.

<sup>26</sup> Anigo tigua waligohondo mbirale mbira bulene nawiore. Ibugua mana ko bini mbira ibu homabehe nawi. Agali mana ko ogoni biyagome agali mbirame mendeali kago homelo bame bo wahagagobi nga. <sup>27</sup> Agali biago ibugua wali ogoni tano tagirahayagi howa kayu biyagola walidago ibugua koaba layagoyu ibu biamogo bulene mbira nahe wini.

<sup>28</sup> Wandari mbira agalime dabu bule haru berene ndo bedagome agali baba kayu bialu karia handa walia harimiyagua<sup>☆</sup> <sup>29</sup> nde agalidago ibugua wariabu hende howa wandari aba mialu ibu dabu bulene nga. Irane agali biago ibugua wali biago minade halu kayu biyagonaga ani bulebira. Ani bialu wali biago ibu agali ogoni one biralu waholene nawi biraabo halu homolebira.

<sup>30</sup> Agalime tí aba one bedago baba kayu bulene nawiore. Tí aba mo taga holene wulebirago ani bulene nawiore, lalu Mosesehanda lene.<sup>☆</sup>

## 23

*Anduane Homogonaga wali agaliore kagoha wali agali tara karu hatago holene nawigo ogo*

<sup>1</sup> Mosesehanda laabo halu lalu, Agali mbira ibu pindu mo wahene heaguabi wi podo wahai heneyaguabi ogonidagua bini kago ibu Anduane Homogonaga wali agali kagoha hatago howa mandagi holene nawi.

<sup>2</sup> Agali mbira ibu wali kayu binime waneigini taba hanayagua nde waneigini ogoni ibu Anduane Homogonaga wali agali kagoha hatago halu ti baba mandagi holene nawi. Ani haabo halu ibu waneigini aguanene mani hama polobadarubi pini daba hama piyaguabi mandagi holene nawiore.

<sup>3</sup> Amonoali karubi Moabali karubi tinaga waneigini aguanene pi daba mani hama polobadarubi bibahende tigua Anduane Homogonaga wali agali bu karu heba mandagi holene nawiore.<sup>☆</sup> <sup>4</sup> Anidagua bulenego irane ina Iyibi dindiha howa tagira ibalu hemaria tigua inahondo iba tomobi nangi haya. Ani howa tigua Ngode Datagali-wabehanda ina mo ko helonaga bi la helo agali mini Balama heago yolo bulene manda biya. Balama ogoni ibu Beo igini howa Mesobodemia dindiha Pedoro tano wiagoali hene.<sup>☆</sup> <sup>5</sup> Anigo Anduane Homogo inanaga Ngode Datagaliwabe ibugua Balamahanda bi layago hale nahe hene. Ani howa ibugua Balamahanda bi ko lole biyago mo beregedalu bi bayale ina biamogo bulene bi lelo mo la hene. Anduane Homogo inanaga Ngode Datagaliwabehanda inahondo gubalini timbuni ho howa anidagua bini.<sup>☆</sup> <sup>6</sup> Anidagua biyago mitangi bialu tigua hameigini ogoni ti bayale helonaga biamogo bulene nawi.

<sup>7</sup> Iyibi wali agali marubi Idomo wali agali marubi tí heba holebirago ai Idomo wali agali uruni ti baba darama mbiraore gaibini howa tí damene ka. Ani bialu tigua Iyibi wali agali karuhondo mini ko nawi halimu. Irane tíni Iyibi dindiha hene kamigo manda bialu ani halimu. <sup>8</sup> Wali agali uruni tinaga waneigini aguaneneru daba tebo agima haragola nde tí baba ho mbira hole anda ibalu Anduane Homogonaga wali agali kamiru aria hatago hayagua karulape dege, lalu Mosesehanda lene.

*Ami agali haga ngagoha Anduane Homogonaga deni ko wulene nawigo ogo*

☆ 22:28: Har 22.16-17 ☆ 22:30: LBM 18.8, 20.11, Man 27.20 ☆ 23:3: Neh 13.1-2 ☆ 23:4: Dag 22.1-6 ☆ 23:5: Dag 23.7-24.9

<sup>9</sup> Mosesehanda laabo halu lalu, Tígua wai bu pialu wai hamaha howa mbirale Anduane Homogo inanaga Ngode Datagaliwabenaga deni ko damene bu ngaruha nape wanduwa hogorale bialu halimu. <sup>10</sup> Agali mbira ibu mbiraga paluwa emaga handalu kariaibunaga tinginiha howa ibane tagira piyagua nde paliaga balai anda wahalu tagira pu holene nga. <sup>11</sup> Alendo haragola ibu tingini wayawaya balu ni paliragola balai anda bu hayagoha lone dai bulene nga.

<sup>12</sup> Ami agali kamiru tí wai pu howa ti uli mbiraoreha hangu polene nga. To payapaya bulene nawi. <sup>13</sup> Ami agali ti kanogo emene mbira giha yu haga haga bulene nga. Tí kagoha howa ti tolene haragola uli tombolenaga ani yulene nga. Tai halu uli baya hangu mogo bulene nga. <sup>14</sup> Anduane Homogo inanaga Ngode Datagaliwabe ibu tí wai beremigo biamogo bialu mo hongo hole balai anda bu kamigoha tí heba mandagi haabo holebira. Ani holebirago mitangi bialu tínaga balai anda bu kamigoha mo ko nahe wabu ngelo halimu. Anduane Homogohanda tí erembira ngialu poligo tíguaibunaga deni howa mana ko mbira nabilimu, lalu Mosesehanda lene.

*Mana maru wia dege bidago ogo*

<sup>15</sup> Mosesehanda laabo halu lalu, Agali garabaya biabe ale biahaga mbira ibuguaibunaga anduane kago helalu pora bialu tí kamiria ibalu tígua ibu biamogo bidaba lama ibiyagua nde tígua ibu anduane karia dai bia nalalimu. <sup>16</sup> Tígua ibu mo kobi nahalimu. Ibu tínaga tano ngamiru mbiragoha holene hame layagua nde ogoniha helo wahalimu.

<sup>17</sup> Isaraeleali tí wali agali maru mbirale dama mitangi bialu bi pupu wialu wali agali kayu yu palue piaga ngagoha puwa kayu bialu bayanda wali agali hole napilimu.✧

<sup>18</sup> Ani bialu Anduane Homogohondo mbirale mbira bule lo wirimidago bule muni wali agali kayu binigonaga minigo mo yalu ibalu Anduane Homogohondo mulene nawi. Anduane Homogo inanaga Ngode Datagaliwabe ibugua mana urunidagua birago hondowa handabe manga haga ka.

<sup>19</sup> Tíni aria bu karu mbirame muni dano henego ngiadai bialu bolangua howa ngi nalalimu. Tínaga nenege karu baba tomo mbiraleru dano henego ngiadai bialu bolangua howa ngi nalalimu.✧ <sup>20</sup> Wali agali maru tara karu baba dano harimiyagua nde bolangua howa ngi lolene karulape. Tí damene karuhondo ngi lolene nawiore. Tí dindi gahenge Anduane Homogo inanaga Ngode Datagaliwabehanda ngulebiragoria pu kamigola ibugua tí mo bayale helonaga tígua mana uruni baya hangu taluwa bialu haabo halimu.

<sup>21</sup> Tígua Anduane Homogo inanaga Ngode Datagaliwabehondo ogoale mbira buleore lalu bi lowirimiyagua nde lowirimidago abaleore bulene nga. Anduane Homogo ibugua bi lowinigo embeda nahaga kagome tígua bule lalu lowirimigo embeda harimiyagua ndeibunaga deni tígua biako hene wulebira.✧ <sup>22</sup> Tígua Anduane Homogohondo ogoale mbira bule lalu lowulene hame nalarimiyagua ogoni ko ndo karulapedagoni. <sup>23</sup> Anigo bi uruni tíni hameme bule lalu lowiniyagua nde abale bule larigo bulene nga.

<sup>24</sup> Tí damene kagonaga pu mbira gerebi lini daga mabu ngadagua bolangua halu pirimiyagua nde gerebi lini dedago tíni hameme nolenedagua do nalu pilimu. Anigo tíni nuha do hanalu polenaga nado hanalimu. <sup>25</sup> Tí damenenaga widi mabuha bolangua halu pialu howa widi lini dedaru gime daramigo do nalimu. Anigo widi gandu lagane ayu tibu garayabi ngago yalu puwa gandu lolene nawi, lalu Mosesehanda lene.

## 24

*Wali berene wahalu pu lalu mende dabu bulene mana ogo*

<sup>1</sup> Mosesehanda mana maru latago halu lalu, Agalime wali mbira dabu bu howa mani wali biagome mana lehe bialu kago hondowa agalinime ibu one handabe manga howa

✧ 23:17: LBM 19.29 ✧ 23:19: Har 22.25, LBM 25.36-37, Man 15.7-11 ✧ 23:21: Dag 30.1-16, Md 5.33



wahalu pu lolene manda biyagua nde agali ogoni ibugua beba mbirani gilibu mialu wali ogoni ibu one ndo lalu tagira pu laga.✧ <sup>2</sup> Ani pu laragola wali ibu agali mende pu biruwa <sup>3</sup> agali mende ogoni ibuguabi mangabago waharo lalu beba ogonidagua dege gilibu mialu wahalu pu layaguabi wali biago ibu agali mende andaga wahalu polebira. Agali mende piyago o biago homayagua nde <sup>4</sup> ala agalini biago ibuni wali haru dai bialu dabu bulene henge nawi. Ala agalini biagome wali ogoni ibunaga deni koore bedagoni manda bialu lone haru dai bulene nawiore. Ala agalini biagome wali ogoni lone haru dai bialu dabu biyagua Anduane Homogohanda mana ogonidagua birago turu naheore holebira. Anigo ai tigua dindi bayale Anduane Homogo inanaga Ngode Datagaliwabe ibugua ngule kagoria anda pu howa mana koorene ko urunidagua nabilimu, lene.

### *Mana maru lo ngago ogo*

<sup>5</sup> Mosesehanda laabo halu lalu, Agali mbira ibu wali wene áyu dege dabu bu hayagua ogoni ibu ami wai bulenebi gabumanenaga biabe timbuni maru ngaru bilobi nahe-labehe. Ibu wahalu ibuni andagaha mali mbira agima ibu onela bu miniru mo palia haga bialu helo helalimu.

<sup>6</sup> Mbiralime tí baba dano mbira ho kagola ai ibugua mani dano hongoliya lowa manane mbirale mbira ala ngiaha lowa mo yarimiyagua nde ibunaga widi dambiaga ege tole ngago namo yalimu. Widi dambiaga ege tole biago tí mo yalu pirimiyagua ibunaga tomo manda manda bulene mbira nawi howa ibubi ibu one waneiginirubi garibilo holebirago namo yalimu.

<sup>7</sup> Mbiralime ibuni damene Isaraele karu aria mbirago minu yania howa ibunaga garabaya biabe ale bialu haga helo helayaguabi nde ibugua agali mendenaga garabaya biabe ale bialu haga helonaga muni taguiyaguabi agali mana ko ogonidagua birago homelo bo wahalimu. Anidagua beramigola mana ko bulene ogonibi tí daluha mani nawilonaga ani bilimu.✧

<sup>8</sup> Tínaga tinginini dere ko tara tara ngaru biyagua nde Libai hameigini aria loma binigo mo miaga karu tigua bidaba laradagua bialu halimu. Mana ogodagua bilimu lalu ina tihondo lamirudaruni baya hangu taluwa bialu halimu.✧ <sup>9</sup> Bamba Iyibi dindi yu wahalu tagira ibirimingi Anduane Homogo inanaga Ngode Datagaliwabe ibugua wali Miriamahondo biyago mitangi budai bilimu.✧

<sup>10</sup> Tínaga damene baba mbirale dano harimiru andaga puwa dano hongole lalu manane ogo ala ngialuha lowa tínime danoali andaga mbirale mo anda napilimu.✧

<sup>11</sup> Ibuni handalu yalu ibuwa ngilo tagirani hondo halimu. <sup>12</sup> Agali danoali ogoni ibu yagibano howa ibuninaga aga tongo biaga mbiraore ngago mani dano hongoleore lalu manane ogoni ala ngialu hayagua ibunaga aga ogoni horo mende yu ho bolangua nahelalimu. <sup>13</sup> Mbiraga ibuni tongobu palelo alendo ni paliragola abale yalu daibu milimu. Anidagua beramigola agali danoali biago ibugua ihondo kai laragome Anduane Homogo inanaga Ngode Datagaliwabe ibugua tí mana bayale beremigo hondowa tihondo turu holebirago ani bilimu.

<sup>14</sup> Tínaga biabe biahaga karuni mbirale mbira nawi yagibano kago mo hondo nahalimu. Uruni Isaraelealiyaguabi dindi tarali tínaga tano ogoniha íbu hene heaguabi tihondo kagua nabilimu.✧ <sup>15</sup> Biabe biahaga uruni tigua tínaga biabe horo mbira bia hayagonaga yolo karulape alendo ni napale howa milimu. Biabe biahaga ibu muni nawiore howa ina mibelo maliaho holebira. Tigua muni namirimiyagua nde uruni tigua Anduane Homogohondo ogodagua biya lalu dugu biragola Anduane Homogonaga deni tíha ko timbuni ngelo holeberemi.

✧ 24:1: Md 5.31, 19.7, Mg 10.4 ✧ 24:7: Har 21.16 ✧ 24:8: LBM 13.1-14.54 ✧ 24:9: Dag 12.10 ✧ 24:10: Har 22.26-27 ✧ 24:14: LBM 19.13

<sup>16</sup> Mbiralime ko biyagua ogoni pani ibu aba aiyalaha mo baede halu aba aiyala bolene nawi. Mana ogonidagua dege aba aiyalame ko biyagua waneiginiha mo baede halu pani waneigini bo waholene nawi. Ko biyago kago ibuniore bo wahalimu.✧

<sup>17</sup> Mbirali dindi mendeha howa ibu hene karunagabi waneigini aba aiyaha homene hono wahene karunagabi mbirale mbira tinaga giha yu karu gingila mule manda nabilimu. Wali dalo agalini homene bedaru ti baba dano mbira heneyagua dano ogoni mani hongole lalu manane tinaga aga biaga ngaru ngi lowa namo yalimu.✧ <sup>18</sup> Tinibi nde Iyibi dindiha garabaya biabe ale bialu hemiria Anduane Homogo inanaga Ngode Datagaliwabe ibunime ti golope halu haru tagira ibiyago manda bilimu. Anigo ayu ti ko ogonibiore bulemine lalu ina mana ogoni tihondo langero.

<sup>19-21</sup> Tigua widi mabu ngamiruha widi gandu lalu howa maru ibira hararu lone ilu dai nabilimu. Ira olibe linibi pu mbira mini gerebi linibi boga bidagola halu mbira pigane bogabi dedaru do yu pialu halu mende lone boga nabiyane delo waharimigo do dai nabilimu. Widi gandulo mogo bialu kamiria ibira hararubi ira olibe gerebiru lini delo helarimirubi uruni bibahende wali agali dindi taraha howa ibu hene karubi waneigini aba aiyala homalu hono wahene biru ngarubi wali dalo agalini homene bedarubi ti mo nelu wahalimu. Anidagua birimiyagua Anduane Homogo inanaga Ngode Datagaliwabe ibugua ti biamogo bialu tigua bibahende beremigo damene bayale dege holebira.✧ <sup>22</sup> Tinibi Iyibi dindini abale ko darabi urunibi dege howa garabaya biabe ale bialu harimigo embeda holigonaga ina mana ogoni bialu halimulo langero.

## 25

<sup>1</sup> Mbirungi Isaraeleali kirali godime libunaga genda mo tiga bilo godi lole pialu kabiria godi dabaga karume daba handalu karia mendealigo ko biya larago mendealigoha ko nawidane hondolebira. <sup>2</sup> Ani buwa godi hale haga kagome ko biya larago ibu tibume badaba lalu layagua agali ko biyago ibu dagiani handa dindi ho pale lowa ko biyadagonaga karulape tibume badaba lolene nga. <sup>3</sup> Tigua tibume pira maria (40) hangu bolene nga. Wali agali maru bu karunaga deni taga holigo bo bolangua halu nabilimu.✧

<sup>4</sup> Widi gandulo winirunaga lini hondo ibira ibira bilo nogo bulumaga geme hangedama pelo haru howa bulumaganaga ne hangane hubua bulene nawi.✧

### *Agali homeneru one bedago baya hangu handayaho holene ngago ogo*

<sup>5</sup> Mosesehanda laabo halu lalu, Libu hamenela dindi mbiraoreha mandagi kabiria mendeali ibu igini mbira nahe kaore ogoni ibu homayagua ibu one dalo bedago ibu agali mende tanabi karu polene nawi. Homayadago ibu hameneme dabu bulene nga.✧

<sup>6</sup> Ani dabu bu kagola wali dalo biago ibugua igiri mbira taba hanayagua nde igiri ogoni agali homayagonaga iginida lolebira. Anidagua biragome ina Isaraele hameigini kamaru aria mbirago ereba nahelo ani bilimu. <sup>7</sup> Ai agali homaragonaga hameneoreme ibu hamene one dalo bedago ibuni dabu bulene manga hayagua nde wali dalo ogoni ibu godi hamani agali haguane karu karia polene nga. Ani puwa wali biagome lalu, I kianeme mana lowini ngadagua talia nabi ibu hamene homayago ina Isaraele hameigini kama aria ereba nahelonaga ina igiri mbira taba hana holiya biraba nalaya, lolene nga.✧ <sup>8</sup> Anidagua laragola agali haguane tanoha godi hale hagadarume homene hameneme one wali manga hagadago ibabe lowa ibuni heba bi lo tiga bulene nga. Tigua handalu karia wali dalo ogoni dabu bulene hame nale dege heagua <sup>9</sup> wali dalo biago ibuni agali haguane biaruru tanoni bu kategoria tagira ibuwa ibu kianenaga ge su mende golalu ibunaga denguiha hamiaga tolo bahalu howa ogodagua lolebira. Mbirali

✧ 24:16: 2 Kin 14.6, 2 Bit 25.4, Ese 18.20 ✧ 24:17: Har 23.9, LBM 19.33-34, Man 27.19 ✧ 24:19-21: LBM 19.9-10, 23.22 ✧ 25:3: 2 Ko 11.24 ✧ 25:4: 1 Ko 9.9, 1 Ti 5.18 ✧ 25:5: Md 22.24, Mg 12.19, Lg 20.28 ✧ 25:7: Lud 4.7-8

ibu hamene henegoria ho aribia halu dewa palia dame bilo hame nalaga kagohondo mana ogonidagua biaga nga, lolebira. <sup>10</sup> Mani howa Isaraele wali agali maru karu bibahendeme agali ogoni ibu waneigini karu hondowa lalu ti ge su golene waneigini ka lene holebira, lalu lene.

*Mana maru wia dege bidago ogo*

<sup>11</sup> Mosese ibugua laabo halu lalu, Agali kirali gungu bialu kabiria agali mendego ibu oneme ibu agalini pele mialu mendegonaga pindu minu duguayagua <sup>12</sup> wali ogoni biyadago tigua dara holene nawi. Ibunaga gi ogoni pugu waholene nga.

<sup>13-14</sup> Wali agali marume tinaga mbirale mbira ngaru muni mule yalu ibiragola tigua genda magi handalu ke howa mo hondo nahalimu. ✧ <sup>15</sup> Ti mana tigabi hangu bulene ngadagua bialu harimiyagua nde dindi mbira Anduane Homogo inanaga Ngode Datagaliwabe ibugua ti ngulebero lo wiyagoria pu howa luore halu hodagua holeberemi. <sup>16</sup> Ai Anduane Homogo ibugua mbirale ke haga ogoni alego turu nahe handabe manga haga ka.

*Amalege hameigini karu bo wahai halimu lenego ogo*

<sup>17</sup> Mosese ibugua laabo halu lalu, Ti Iyibi dindi yu wahalu tagira ibalu ibirimingi Amalegeali hearume tihondo mana lehe biyaru manda bilimu. ✧ <sup>18</sup> Ogoningi tigua Ngode Datagaliwabehondo gi nahe howa ti halalu gehi bialu hongo nahe hemingi erembiraha talima ibalu ti baba wai biyagoni. Ani buwa maru hongo nahe wene mani ibalu hearuni bo wahai hayagoni. <sup>19</sup> Anidagua biyagonaga mani tinaga dindi Anduane Homogo inanaga Ngode Datagaliwabe ibugua ngulebero layagoria pu howa tano uruni wai paberume hagirabu yaanda hai ho ngelalimu. Ani ngelai howa tinaga waitigi kaware bu karume gialanda halu ibuwa babe nahe howa tigua Amalegeali uruni bibahendeore bo wahai halimu. Bo wahai haramigola mani holebirarume Amalegeali abogo ogoria hene lalu bi te nalelo ani bilimu. Ina bi o larogo embedaore nahe aniore bilimu, lalu Mosesehanda lene.

## 26

*Mabuha tomo pigane boga biraru lomabu mulene nga, lenego ogo*

<sup>1</sup> Mosesehanda laabo halu lalu, Mani Anduane Homogo inanaga Ngode Datagaliwabe ibugua dindi ngulebero lalu lowini biagoria pu howa <sup>2</sup> tigua dindi ogoha tomo pigane hengene beremiru aria nu mbira dege dege bu hanalimu. Ani honowa Anduane Homogo mitangi bialu lotu lole dindi mbira ibunime dabo wiyagoha hanalu pilimu. ✧ <sup>3</sup> Hanalu puwa mbirali loma binigo mo miaga ogoniha kagohondo ti hangu hangume mialu howa lalu, Anduane Homogo inaga Ngode Datagaliwabe ibugua bulebero lalu bi lowinigo heneneore layada laro. Ibugua bamba inanaga mamaliruhondo laminidagua bialu i dindi ngule lene biagoha haru ibu helayadane manda bidogoni, lalu loleberemi.

<sup>4</sup> Ani laramigola loma binigo mo miaga kagome tomoru nuha bu hono kamigo yamuwa Anduane Homogo inanaga Ngode Datagaliwabe ibunaga lomabu delaga dabu kaware kagoria mo pagaho ngelolebira. <sup>5</sup> Ani biragola tigua nde Anduane Homogonaga wanakuini howa bi ogodagua lalimu, Inaga mamali ibu Aramiali pu howa dindi yu wahalu ibaga ibaga bialu haabo haga hene. Ani haabo haga henego mani ibugua ibu hameiginiru haru halu Iyibi dindiha hama pene. Pigane Iyibi dindi pialu howa ti daga emene hangu penego mani howa ti dewaore halu hodame buwa hongoheore hene. <sup>6</sup> Ani pu heagola Iyibi dindi agali haguane hearume ina mo ko halu iname tinaga garabaya biabe ale bialu holomaya helaya. <sup>7</sup> Ani bialu howa iname Anduane Homogo ina mamalirunaga Ngode Datagaliwabe ibugua ina pele ngilo olarima. Iname ani olarimagola ibugua hale howa ina biabe ndelaheore bialu genda tandagabi yu hemaria

de hendene. <sup>8</sup> Ani hondowa ibugua ina Iyibi dindiha howa haru tagira polenaga biabe timbuni hongoheore bigi biya. Ibugua agalime nabiaganebi nahendene alebi tara tara dewaore bialu ko tandagabi tara tara Iyibi wali agali hearuha ibilaga biya. <sup>9</sup> Ani buwa ibugua ina haru ibalu dindi bayale benebere ogoha holomaya ngiyagoni. <sup>10</sup> Anigo Anduane Homogo ibugua urunidagua biyagonaga ina tomo pigane dindi ibunime ngiyagoria hangarugo bu yalu eberogoni, lalimu.

Bi ani lai howa tigua tomo bu hanarimiruni Anduane Homogonaga wanakuihayagi ngelowa dindi ogoriani ibu mitangi bialu lotu lalu halimu. <sup>11</sup> Ani bialu tigua Anduane Homogohanda tihondobi ti waneiginiruhondobi mbirale bibahende bayale damene ngiyarunaga kaj lalimu. Ani lalu howa Libai hameiginirubi wali agali dindi taraha howa ibini kamirubi ti heba turu hamaga halimu.

<sup>12</sup> Ani bialu mali tebira haga biragola bibahendengi ti mabuha tomo hengedamiru pi halu tale bilimu. Tale buwa pini damenego bibahende Libai hameigini karubi wali agali dindi tara howa ti baba ibu hene karubi waneigini aba aya homene hono wahene karubi wali dalo agalini homene bedarubi talebu migi bilimu. Tigua ogonidagua bialu harimiyagua wali agali uruni ti tomo nalu holene karulape wulebira. Tigua biabe urunidagua biai howa <sup>13</sup> Anduane Homogohondo bi ogodagua lalimu. Mbirale ina ihondo nguliya hame lariruni bibahende tale biai haru. Ai i andagaha mbirale yu wahene mbira nawiore kogoni. Libai hameigini karuhondobi wali agali dindi tara taraha howa ina baba ibu hene karubi waneigini aya aba homene hono wahene karubi wali dalo agalini homene bedarubi ti bibahendehondo tale bialu miai haru. Ai ina bi larigo hale halu inaga mbirale winiru pi halu tale biai harudagoni. Ina ihondo bibe lariruni aria ina mbira embedahabi mo wahalu waho habi mbira nabio. <sup>14</sup> Homa dugu andaha dugu bialu howa inaga tomo uruni aria mbira nane haru. Ini ko dodohe hewangi tomo uruni aria mbira i andaga howa mo yalu tagira nape. Maru mo yalu puwa homene dinini hearuhondo lomabu nami. Ai inaga Anduane Homogo-o ina tomo uruni tale bialu pi halu mulene ogodagua mibe lalu langirigodagua ina biaiore harugoni. <sup>15</sup> Ai ini dalu dahuliya andaga baya taraore ngegoria howa ina Isaraele wali agali kamaruha de handadali howa handalu ina mo bayale habe. Ani bialu inanaga dindi bayale benebere ogoni inime bamba inanaga mamaliruhondo ngule lalu lowiridagua inahondo ngirigobi mo bayale bia habe, lalimu, lalu Mosesehanda lene.

### *Isaraele ti Anduane Homogonaga wali agaliore henego ogo*

<sup>16</sup> Mosesehanda la dege bialu lalu, Ayu ogoni Anduane Homogo inanaga Ngode Datagaliwabe ibugua lalu, Inaga bi manaore baya hangu talialu halimu, laya. Ani layadagua tigua bi mana uruni gubaliniore ho howa mitangi biaabo lalu bialu halimu. <sup>17</sup> Ayu Anduane Homogo ibu tinaga Ngode Datagaliwabe kago larimigoni. Iname ibunaga bi mana hale howa bibahende bilimu layaru talialu biai holeberemaore lalu bi lo wirimigoni. <sup>18</sup> Ani larimigome ayu Anduane Homogohanda ti ibunaga wali agaliore halimulo yamulebero lalu abale bi lowinigo tagira pelo ti yamiyagoni. Ai ibunaga mana ngaru bibahendeore talialu biai halimu laya. <sup>19</sup> Ani lowa ibugua hameigini tara tara dindi tarani helo wabiniru emene dege lowa ti dewaore halimulo mo dewa holebira. Ani heledagola tigua mana bayale tigabi bialu kamiru hondowa wali agali maru bu karume turu halu Anduane Homogonaga mini yaraga helonaga mo manda bia holeberemi. Ani bialu tini nde abale bulebero lalu lo wiyadagua heneneore Anduane Homogo ibuninaga dameneore ti holeberemi, lalu Mosesehanda lene.

## 27

### *Ngode Datagaliwabenaga bi mana ege toleni gilibu wulene nga lenego ogo*

☆ 26:12: Man 14.28-29 ☆ 26:18: Har 19.5, Man 4.20, 7.6, 14.2, Ta 2.14, 1 Pi 2.9

<sup>1</sup> Mosese ibugua agali haguane hearu heba howa Isaraele wali agalihondo lamialu lalu, Bi mana áyu ina tihondo langerogo baya hangu talialu bialu halimu. <sup>2</sup> Tí Iba Yodana domalu dindi Anduane Homogo inanaga Ngode Datagaliwabehanda ngiragohayagi ubaede halu pu howa horo ogoningsi dege tigua ege tole timbuni ngaru duguwa timeni wabu dambi halimu. ✧ <sup>3</sup> Ani buwa bi mana áyu langeroruni bibahende ege tole ogoriani gilibu wiai halimu. Anduane Homogo ina mamalirunaga Ngode Datagaliwabehanda dindi bayale benebere ogoni inahondo nguleore lalu bi lowinigeria anda pu howa <sup>4</sup> Iba Yodana doma edeyagi ege tole uruni Hari Ebala kagoriani hangalimu. Ani hongowa áyu bilimu lalu langerodagua timenime wabu dambi halimu. <sup>5</sup> Ani buwa lomabu delaga dabu mbira wabu helole tigua ege tole maru duguwa ege tole uruni mbirale aeaneme wabini ngagome bo tiga nabi duguarimigo ogonibioreme dabu wabu helalimu. ✧ <sup>6</sup> Ani bulene ngago irane Anduane Homogo inanaga Ngode Datagaliwabenaga lomabu delaga dabu bialu ege tole poda nabini ngarume wabulene nga. Ani wabu helowa dabu ogoriani dege loma irani dai helonaga delalimu. <sup>7</sup> Anduane Homogola ho gimbu bulene lomarubi bu delaga bialu halimu. Ani bialu nogo loma bo delaramigonaga mbiriniru nalu howa Anduane Homogo inanaga Ngode Datagaliwabenaga deni turu timbuni ho halimu. <sup>8</sup> Ani bialu ege tole timenime wabu dambi howa hangarimigeria Ngode Datagaliwabenaga bi mana baya hangu wále wali agalime handabehe gilibu wiai halimu, lene.

<sup>9</sup> Ani lowa Mosese ibu Libai hameigini loma binigo mo miaga bu hearu heba mandagi howa ibugua Isaraele wali agali hearu lamialu lalu, Isaraele wali agaliru-o ina bi ogo tí langerogo bayuwa hale hai halimu. Áyu ogoni tí bibahende Anduane Homogo inanaga Ngode Datagaliwabenaga wali agaliore ho kamigoni. <sup>10</sup> Anigo tigua ibunaga bi mana ina áyu latagi harogo bayuwa hale howa talialu bialu halimu, lene.

*Wali agali Anduane Homogonaga bi mana ngago mo wahararu tiha mo ko holene wulebira lenego ogo*

<sup>11</sup> Mosesehanda Isaraele wali agalihondo bi lone lamialu lalu, <sup>12</sup> Mani tí Iba Yodana domaede halu pu howa Anduane Homogohanda tí mo bayale helonaga bi larago mo yule lowa wali agali tını hameigini aria karu Hari Gerisimi kagoria irigiho halimu. Hameigini uruni Simionobi Libaibi Yudabi Isagabi Yosebebi Beniyaminibi uruni aria tí pu halimu. ✧ <sup>13</sup> Ani bialu Anduane Homogohanda mo ko holenaga bi larago hale holene harangi wali agali hameigini maru karu Hari Ebala kagoa irigi holene nga. Hameigini Lubenebi Gadabi Asebi Sebulunubi Danabi Nabadalibi uruni aria tí pu halimu. <sup>14</sup> Ani pu kagola Libai hameigini karume bi hongo howa latagi halu lolene ngago ogo.

<sup>15</sup> Tigua lalu, Mbirale dama mitangi bialu bi pupu wulenaga ege tolemebi iramebi aeanemebi wabu ngago hondowa Anduane Homogo ibugua mana ogoni hame naleore kagoni. Anigo mbiralime uruni alehondo ohowa bi pupu wialu heagua nde Ngode Datagaliwabenaga mo ko holene ogoni ibuha wulebira, lolebira. ✧

Ani laragola wali agali bibahendeme ladai bialu lalu, Heneneore Ngode Datagaliwabehanda aniore bilo, lolebira.

<sup>16</sup> Mbiralime ibu aba aiyalanaga mini mo ko halu mege bialu heagua nde Ngode Datagaliwabenaga mo ko holene ogoni ibuha wulebira, lolebira. ✧

Ani laragola wali agali bibahendeme ladai bialu lalu, Heneneore Ngode Datagaliwabehanda aniore bilo, lolebira.

<sup>17</sup> Agali mbirame dindi tu ege toleme winigo dugu yaamu howa dindi ibu hayagua nde Ngode Datagaliwabenaga mo ko holene ogoni ibuha wulebira, lolebira. ✧

✧ 27:2: Yos 8.30-32 ✧ 27:5: Har 20.25 ✧ 27:12: Man 11.29, Yos 8.33-35 ✧ 27:15: Har 20.4, 34.17, LBM 19.4, 26.1, Man 4.15-18, 5.8 ✧ 27:16: Har 20.12, Man 5.16 ✧ 27:17: Man 19.14



Ani laragola wali agali bibahendeme ladai bialu lalu, Heneneore Ngode Datagali-wabehanda aniore bilo, lolebira.

<sup>18</sup> Mbiralime wali agali de kohe mbira pialu karia hariga piagagoha ndo mendeha pu tara helo mo hondo hayagua nde Ngode Datagaliwabenaga mo ko holene ogoni ibuha wulebira, lolebira.✧

Ani laragola wali agali bibahendeme ladai bialu lalu, Heneneore Ngode Datagali-wabehanda aniore bilo, lolebira.

<sup>19</sup> Mbiralime wali agali dindi taraha howa ibu hene karuhondobi waneigini aija abala homene karuhondobi agalini homene wali dalo bedaruhondobi biamogo bulene ngadagua nabi tihondo mana ko ngago bialu heagua nde Ngode Datagaliwabenaga mo ko holene ogoni ibuha wulebira, lolebira.✧

Ani laragola wali agali bibahendeme ladai bialu lalu, Heneneore Ngode Datagali-wabehanda aniore bilo, lolebira.

<sup>20</sup> Mbiralime ibu aba one kayu biyagua ibu aba mo tagaore hayagonaga nde Ngode Datagaliwabenaga mo ko holene ogoni ibuha wulebira, lolebira.✧

Ani laragola wali agali bibahendeme ladai bialu lalu, Heneneore Ngode Datagali-wabehanda aniore bilo, lolebira.

<sup>21</sup> Mbiralime wali agalila hagadagua nogo biangoru kayu biyagua nde Ngode Data-galiwabenaga mo ko holene ogoni ibuha wulebira, lolebira.✧

Ani laragola wali agali bibahendeme ladai bialu lalu, Heneneore Ngode Datagali-wabehanda aniore bilo, lolebira.

<sup>22</sup> Mbiralime ibu mbalinila kayu biyagua nde Ngode Datagaliwabenaga mo ko holene ogoni ibuha wulebira, lolebira.✧

Ani laragola wali agali bibahendeme ladai bialu lalu, Heneneore Ngode Datagali-wabehanda aniore bilo, lolebira.

<sup>23</sup> Agali mbirame ibu imane bedago kayu biyagua nde Ngode Datagaliwabenaga mo ko holene ogoni ibuha wulebira, lolebira.✧

Ani laragola wali agali bibahendeme ladai bialu lalu, Heneneore Ngode Datagali-wabehanda aniore bilo, lolebira.

<sup>24</sup> Mbiralime ohowa wali agali mende kago homelo bo wahayagua nde Ngode Data-galiwabenaga mo ko holene ogoni ibuha wulebira, lolebira.

Ani laragola wali agali bibahendeme ladai bialu lalu, Heneneore Ngode Datagali-wabehanda aniore bilo, lolebira.

<sup>25</sup> Mbiralime wali agali ko mbira nabi kago homelo bo waholenaga ndelalu muni hana hayagua Ngode Datagaliwabenaga mo ko holene ogoni ibuha wulebira, lolebira.

Ani laragola wali agali bibahendeme ladai bialu lalu, Heneneore Ngode Datagali-wabehanda aniore bilo, lolebira.

<sup>26</sup> Wali agali mbirame Ngode Datagaliwabe kagonaga bi mana lo ngago mo wa-hayagua nde Ngode Datagaliwabenaga mo ko holene ogoni ibuha wulebira, lolebira.✧

Ani laragola wali agali bibahendeme ladai bialu lalu, Heneneore Ngode Datagali-wabehanda aniore bilo, lolebira.

Ani lolene nga lalu Mosese ibugua Isaraele wali agalihondo lamini.

## 28

*Anduane Homogohanda wali agaliibunaga bi mana talialu biaga karuhondo bayale bulebira lenego ogo*

*(Loma Binigo 26.3-13, Mana Loyane 7.12-24)*

✧ 27:18: LBM 19.14 ✧ 27:19: Har 22.21, 23.9, LBM 19.33-34, Man 24.17-18 ✧ 27:20: LBM 18.8, 20.11, Man 22.30 ✧ 27:21: Har 22.19, LBM 18.23, 20.15 ✧ 27:22: LBM 18.9, 20.17 ✧ 27:23: LBM 18.17, 20.14 ✧ 27:26: Ga 3.10

<sup>1</sup> Mosesehanda laabo halu lalu, Tígua Anduane Homogo inanaga Ngode Datagaliwabe kagonaga bi mana ina tihondo áyu o langerogo talialu bialu harimiyagua nde ibugua tí mini leneore mbira helalu wali agali dindi tara tarani bu karu bibahende bolangua hai hene halimulo helolebira. ✧ <sup>2</sup> Anduane Homogo inanaga Ngode Datagaliwabe kagonaga bi mana lo ngago hale howa bialu haabo harimiyagua nde ibugua tihondo bayale holene ngulebirago urubi nga.

<sup>3</sup> Anduane Homogohanda tínaga tanobi mabu ngamirubi mo bayale hai holebira.

<sup>4</sup> Anduane Homogohanda waneigini dewaore tihondo ngialu tínaga mabuha tomo dewabi mo anda halu nogo bulumaga sibiru dewaore ngialu bulebira.

<sup>5</sup> Anduane Homogohanda tínaga widi mabu ngamirubi mo bayale halu tomo nolene ale widi urunime balawa hiraramilirubi mo bayale hai holebira.

<sup>6</sup> Anduane Homogohanda tínaga biabe beramigo damene bibahende bayale helo mo bayale hai holebira.

<sup>7</sup> Anduane Homogo ibugua tínaga waitigiru baba wai beramingi tí wayali halimulo biamogo bulebira. Waitigiru tigua wai bule hariga mbiraoreha ibulebiragoyu ti ibida pole hariga dewa ngaruha pugupugu bulebira.

<sup>8</sup> Anduane Homogo inanaga Ngode Datagaliwabehanda tínaga biabe bialu kamigo damene bibahende mo bayale hai halu tínaga mabuha widi hingedamigobi bibahende bayale mo anda hai halu tomo bu wiaga anda bu heledemigoha wu tolatagi hai holebira. Ani bialu dindi gahenge ngulebiragoha pu kamigola ibugua tí biamogo biaabo holebira.

<sup>9</sup> Anduane Homogo inanaga Ngode Datagaliwabehanda bi larago hale halu ibugua bilimu lalu langiyago tigua bialu harimiyagua nde ibugua, Tí inaga wali agaliore helolebero, lalu bamba lo wiyadagua helolebira. <sup>10</sup> Ani heledagola wali agali dindi tara tara ngaruha bu karume de hondowa Anduane Homogoibunime tíibunaga wali agali helo dabo henedalo manda buwa tihondo gi holebira. <sup>11</sup> Ani biragola Anduane Homogohanda dindi bamba inanaga mamaliruhondo ngulebero lo wiyadagua tihondo ngiragola tí dindi ogoniha pu kamigola ibugua waneiginibi nogo bulumagarubi dewaore ngialu mabuha tomobi mo dewa holebira. <sup>12</sup> Anduane Homogo ibuni iba dalu ibilaga anduaneore kagome iba dalu ibilolene horo ngangiore ibilaga bulebira. Ani bialu tigua biabe bialu holeberemigo mo bayale hai helolebira. Anidagua biragola tínaga mbirale ngamiru wali agali tara bu karume dano helo muleberemigoyu mbirale tinaga ngago tigua dano naholeberemi. <sup>13</sup> Anduane Homogo inanaga Ngode Datagaliwabe ibugua wali agali maru dindi tarali karume tí haru helo ndo tigua dindi tarali karu haru haga haguane halimulo dabo helolebira. Anduane Homogonaga bi mana áyu o langerogo talialu bialu harimiyagua nde tíha mbirale mbira tubagi nahe howa mbirale bu payapayabu ngelo hai holeberemi. <sup>14</sup> Anigo tigua ibunaga bi mana ngago mo wahalu pu nabi baya hangu talialu biai halimu. Tígua mbirale dama mitangi bialu gime wabini ngaruhondo bi pupu nawilimu. Uruni nabilimuore, lene.

*Anduane Homogonaga mana puguagago tiha ko anda ibulebirago ogo  
(Loma Binigo 26.14-46)*

<sup>15</sup> Mosesehanda laabo halu lalu, Tígua Anduane Homogo inanaga Ngode Datagaliwabenaga bi lo ngaru ina áyu tihondo o langerogo hale howa talialu biaabo naharimiyagua nde mo ko holene tíha anda ibulebirago damene áyu langero.

<sup>16</sup> Anduane Homogohanda tínaga tano ngamiru mo ko halu tí mabuha tomo hingedemirubi bibahende mo ko hai holebira.

<sup>17</sup> Anduane Homogohanda tínaga widi mabu ngamirubi tomo nolene ale widi urunime balawa hiraramilirubi bibahende mo ko hai holebira.

✧ 28:1: Man 11.13-17

<sup>18</sup> Anduane Homogohanda tí mo ko halu waneigini mbiraore hangu ngigi bulebira. Tínaga mabu ngamiru ko hai halu tomo dewa anda naholebira. Nogo sibi bulumagaru ko halu dewa naholebira.

<sup>19</sup> Anduane Homogohanda tígua mbirale bibahende beremiru damene mo ko hai holebira.

<sup>20</sup> Tígua Anduane Homogohondo erembira mialu mana ko ngaru bialu harimiyagua nde ibugua tíha ko tara tara ibilaga bulebira. Ibugua tí mo luluya halu tígua beremigo damene bibahende mo libilaba lalu mo ko helolebira. Ani biragome tí mo koore hai holebira. <sup>21</sup> Dindi ibugua ngini áyu pole kamigoria pu kamigola warago ko tara tara ngaru tíha ibilaga bialu tí bo biba haiore holebira. <sup>22</sup> Ani bialu Anduane Homogohanda tí warago ko tara tara wai haga ngagome abale tínaga tinginini tohatagi helalu poboyogo bilalu bulebira. Ani buwa ibugua ni dedago mo poboyogo timbuniore bilalu puyabu poboyogobi timbuni ibilalu mabuha tomo hingedemiru bibahende gabu hai holebira. Mbirale mo ko holene uruni tí baba haho ngamine dege tí bibahende homai holeberemi.

<sup>23</sup> Tínaga dindiha iba dalu naibi ngane dege dindi ngago giambe halu hongohe polabe nahe tole ale wulebira. <sup>24</sup> Anduane Homogohanda iba dalu ibilagadagua puyabu hongohe ibila aribia holebiragome tí dindiha be abalu heba iba mubi puloyu íbu ngelalu tí bibahende mo ko hai holebira.

<sup>25</sup> Ani bialu Anduane Homogo ibugua waitigi ibilaragome tí bo wai holebira. Tígua wai bule howa wai hanalu hariga mbiraoreha mandagi puwa mani waitigi hondowa tí ibida pialu hariga dewa ngaruha pugupugu buleberemi. Wali agali dindi bibahendeha karume tí anidagua mo ko harago de hondowa ti mogo timbuni lo holebira. <sup>26</sup> Tí homaramigola tínaga tingini ega bodo hariawe bedarumebi nogo biango gabua bu karumebi nalu holebira. Ani nalu kagola talu pelolene mbirali naholebira. <sup>27</sup> Ani bialu Anduane Homogohanda Iyibi wali agaliha biyadagua tínaga tinginini moge timbuni bilolebira. Tínaga tinginini dere durubi timbuni tagira ibilaragola duru kilau lalu holeberemi. Anidagua bialu kamigola mo dabi holene hariga mbira ngane handa walia naholeberemi. <sup>28</sup> Anduane Homogohanda tínaga miniha mo talola halu tínaga de bo ndibu lalu biragola tí luluyu ibagabu holeberemi. <sup>29</sup> Wá kangi tí de handabe nahe howa luluyu ibaga bialu wali agali de koheme hariga taya biagadagua taya bialu howa hariga handa walia naholeberemi. Ani howa tígua mbirale beremiru damene bibahende bayale tigabi bulene ngadagua nabuleberemiore. Waitigi bu karume tí bope haabo halu tínaga mbirale ngamiru mo page bigi biragola tí biamogo bialu mo wulene mbirali naholebira.

<sup>30</sup> Tígua wandari mbira igiri mbirago ibu dabu bilonaga dabo berelarimiyagua agali mende kago ibu dabu bia aribia holebira. Tínaga anda gahenge bia buleberemigoyu tíni anda ogoniha paluha nabuleberemi. Tígua pu mbira lini daga mini gerebi hanga hongoleberemigoyu lini do na nabuleberemi. <sup>31</sup> Waitigirume ibalu tínaga nogo bulumaga hinidemiru tíni deni bo podalu holebiragoyu ogoninaga mbirini budiniru mbira nanoleberemi. Tínaga nogo dongi helo kamirubi tíni hendedemiore haru polebirago mani haru dai nabuleberami. Nogo sibi hinu kamirubi page haru puwa tínaga waitigiruhondo mulebira. Ani miragola tí biamogo bialu haru dai bulene mbirali naholebira. <sup>32</sup> Tíni de handayaho kamiore dege tínaga waneigini bu karu agali dindi tara tara ngaruha karunaga garabaya biabe ale bialu helo minu yalu polebira. Ani minu yalu poragola lone dai birabe hondole lowa tígua horo bibahendengi hariga piyagoha de dege handalu bu wiaabo holeberemi.

<sup>33</sup> Agali maru tí manda nabini dindi tara mbira ngagoha howa ibalu tí mabuha tomo erekuibi hangalu hene hingedemiru ti bu hanalu polebira. Horo bibahendengi anidagua biaabo haragola tí tandaga haabo holeberemi. <sup>34</sup> Tíha ko uruni anda ibalu haabo kagola de hondowa tígua tínaga miniha luluyu halu mini naibi ona holeberemi.

<sup>35</sup> Ani bialu kamigola Anduane Homogohanda tínaga geni dere timbuni bilalu tínaga

tingini bibahende ha moge tuguda tagitagi biame heledagola mo dabi holene mbira ngaria handa walia naholeberemiore.

<sup>36</sup> Ani bialu Anduane Homogohanda tíbi tínaga kinibi dindi tara tíguabi tínaga malmirumebi handa mandabi nabini ngagoha haru halu polebira. Ani haru halu pu heledagola tígua dindi ogoniha howa dama mitangi bialu mbirale iramebi ege tolemebi wabu wini ngaruhondo bi pupu wialu holeberemi. <sup>37</sup> Anduane Homogohanda tí dindi tara taraha bo taliatogo laragola wali agali bu karume mo ko holene taraore tíha ibilarago de hondowa ti mogolo holebira. Ani mogolowa tigua tí mege bialu hondo oba halu holebira.

<sup>38</sup> Tínaga mabuha tomo dewaore hangaramigola pagaya aleme nalu no ereba hai helolebira. Ani biragola tomo emene dege bu nalu holeberemi. <sup>39</sup> Pu mbira lini daga mini gerebi baya hangu hongowa handayaho ha holeberemigoyu timamu bedarume gerebi irane uruni nai haragola tígua lini uruni dedaria do pingidalu waini iba wabialu nalu ha nabuleberemi. <sup>40</sup> Dindi ogoniha ira olibe dewa anda haame holebiragoyu lini darangi boga nabidaore abale dogolope haragola tígua olibe lini ibaneme weli wabibe nahe holeberemi. <sup>41</sup> Tínaga waneiginiru ha holebiragoyu tíni heba mandagi haabo naholeberemi. Waitigi karume ibalu waneigini uruni tí dindiha garabaya bu yalu piai holebira. <sup>42</sup> Tínaga mabuha ira lini dagane ale karubi mabuha tomo andaho karubi pagaya ale dewame naiore holebira.

<sup>43</sup> Wali agali dindi tara taraha howa tínaga dindiha íbu holebiraru ti hongoheore halu tínaga hongo ibira holebira. <sup>44</sup> Tinaga muniru dewawi hongohe kagola tígua agali uruninaga mbirale ngaru dano hole mo yuleberemigoyu tigua tí baba dano naholebira. Ani howa tigua tí mo dindiha howa bope halu tí agali uruni andaneha holeberemi.

<sup>45</sup> Genda tandaga uruni tíha ibaabo haragola tí damene lenego bibahende ereba hai helolebira. Anidagua bulubadago irane tígua Anduane Homogo inanaga Ngode Datagaliwabehanda bi layago mo wahalu ibunaga bi mana tíhondo langiyago bibahende talialu bia nabi mo wahaabo harimigome genda tandaga uruni tíha tagira ibulebira.

<sup>46</sup> Genda tandaga uruni tíhabi tínaga waneigini aguaneneruhabi wiaabobo bu wiragola Ngode Datagaliwabe ibunime tíhondo keba howa miniha tandaga ho hayada lalu wali agali marume de hondolebira. <sup>47</sup> Anduane Homogo inanaga Ngode Datagaliwabe ibugua tíhondo mbirale bayale damene bibahende ngiai hayagoyu tígua uruni mo yu howa turu halu bu miniha dungulo howa ibunaga biabe bialu ha nabi holeberemi.

<sup>48</sup> Anigo Anduane Homogohanda waitigi tí dindiha ibilaragola tígua waitigi uruninaga andaneha howa biabe bia halu holeberemi. Ani bialu howa tí tomo garibilo haabo halu iba noaho halubi aga bulene mbira nawiore halubi dabudabu tara tarabi mbira nawiore bibahende burupale dege hai holeberemi. Ani kamigola tínaga waitigirume tí bo hingedape halu bo wahi holebira. <sup>49</sup> Ani biragola Anduane Homogohanda hameigini tara mbira tí uruninaga bi hale nahenebi manda nabinibi dindi kaundiaha kago haru halu ibulebira. Uruni tigua abaleore aube tobane ibuwa ega bodo hariaweme ega emene bedago minule yulope hagadagua bialu ibulebira. <sup>50</sup> Ani ibuwa tigua tínaga wali agali waneigini galioreyaguabi wali agali waheoreyaguabi dara howa biamogo nabi mo tandaga dege holebira. <sup>51</sup> Tínaga nogo bulumaga sibi hinidemirubi bibahende tigua bo nai halu mabuha tomo hingedemirubi widi hingedemirubi waini iba wabu ngemirubi olibe lini weli hambu ngemirubi naiore holebira. Ani nai haragola tíni tomo nolene mbira nawioledagola tomo noa halu homai holeberemi. <sup>52</sup> Tínaga dindi Anduane Homogo inanaga Ngode Datagaliwabehanda ngulebiragoha tano wulebiraru bibahende wai bialu bo gialo wahi holebira. Wai pabe hongoheore tíni ha do holenaga ege toleme bu mabu bide miru bibahende bo gialapaya biai holebira.

<sup>53</sup> Waitigirume ibalu tínaga tano ngamiruha ho hagirabu yaanda ho kagola tíni tomo nolene nawioledagola tínaga waneigini Anduane Homogo inanaga Ngode Datagali-

wabehanda ngiyaru bo nalu holeberemi. <sup>54-55</sup> Horo ogoningi agali mini lene bayale bu karumebi tomo mbirale nolene nawioiredagola tininaga waneiginiru balu nolebira. Ani bo nalu howa maru tini hamene karubi ti one bedarubi tini waneigini maru bedarubi mbira nelo podo mia nabulebira. <sup>56-57</sup> Ani bialu wali homogo mini lene muni dewawi dagiani berelowa leberani iraho yu ibaga biaga bedaru tiguabi ani dege bulebira. Waitigirume tano ho hagirabu yaandaho kangi wali urunibi bedarume tini waneigini gali taba hanararu horo ogoningi dege bira do howa gali nu heba nalu birulebira. Ani nalu biruwa ti agalini tini gubalini haga kagobi ibu waneigini maru bu karubi ti mbira nelo podo mia nabulebira.✧

<sup>58</sup> Tígua Ngode Datagaliwabenaga bi mana mbuga ogoha ngago baya hangu talialu bia nabi harimiyaguabi Anduane Homogo inanaga Ngode Datagaliwabenaga mini timbuni gibi baya buruguleore ngago mitangi bialu mo yaraga naharimiyaguabi nde <sup>59</sup> ibugua warago ko taraore ereba naholene mbira tínihabi tínaga waneigini aguanene mani holebiraruhabi ibilolebira. <sup>60</sup> Warago ko tara tara tí Iyibi dindini hemiria ibiyane de handarimigobi dege tíha ibilaragola tí dabi naholeberemi. <sup>61</sup> Ani bialu warago ko tara tara uruni mini ogoale lalu Ngode Datagaliwabenaga bi mana mbuga ogoha nagilibuwi. Anigo warago ko taraore uruni tíha ibilaragola tí dabi nahe homaiore holeberemi. <sup>62</sup> Tí dewaore harini yakundi bu karubi heneyaguabi bibahende homai halu tí aria mbira mbira hangu yu waholebira. Anidagua bulebira irane tígua Anduane Homogo inanaga Ngode Datagaliwabenaga bi mana lowini ngago mo waharimigome ani bulebira. <sup>63</sup> Bamba piganengi howa Anduane Homogohanda tíore gubalini timbuni ho howa tí dewaore halimulo mo dame bia hole hame timbuni layadagua ibugua tí ereba hai halimulobi bo biba hai hole hame timbuni lolebira. Dindi mbira ibugua ngule layagoria hole anda pu kamigola ibugua tí bo taliatagi holebira.

<sup>64</sup> Anduane Homogohanda tí dindi tara tara ngaruha pu haame halimulo purogo lelelebira. Dindi uruniha pu howa tígua dama mitangi bialu mbirale iramebi ege tolemebi wabu wini ngaruhondo bi pupu wialu holeberemi. Bamba tínimebi tínaga mamalirumebi mbirale uruni alegohondo bi pupu nawiaga harimi. <sup>65</sup> Tí dindi tara uruniha howa bayale holene mbira ngaria handa walia naholeberemi. Dindi tíninaga lenego mbira nawulebiraore. Anduane Homogo ibugua tíha genda yu holenebi mini burugu lolenebi wia haragola ai ina yu waheneore mbira harimadago aginagadabe lo manda bialu holeberemi. <sup>66</sup> Horo bibahendengi tíha mo ko holene mbirago anda ibulilono gi ho haabo holeberemi. Mbiraga horombebi t́ni homolenenaga dege gi howa mini burugulo haabo holeberemi. <sup>67</sup> Mbirale bibahende tí de handaramigo dameneme tí mo gi timbuni haabo holebira. Ani biragola tígua horo abaleore bolangua haga bilo hamelo holeberemi. Ani howa tígua egerebagi howa lalu alendo abale ha loleberemi. Ani bialu alendo howa tígua mbiraga abale ha lalu mbiraga howa gao lelo abaleore hame loleberemi. <sup>68</sup> Anduane Homogohanda tíore Iyibi dindi lone dai nabuleberemi la layagoyu ibugua tí lone iba sibini biralu Iyibi dindi daibilolebira mandabu holeberami. Anidagua biragola Iyibi dindiha pu howa tígua waitigi karunaga garabaya biabe ale biahaga hole t́ni yolo mbiralime bilo hameledemiria mbiralime tí yolo nabulebira, lalu Mosesehanda lene.

## 29

*Anduane Homogohanda Moaba dindini howa Isaraele wali agali baba habo nalolene bi lowinigo ogo*

<sup>1</sup> Anduane Homogohanda Moaba dindini howa Isaraele wali agali baba habo nalolene bi mbira lowialu Mosesehondo laminigo ogo. Anduane Homogohanda habo nalolene bi mende ogoni Hari Sainai heagoria howa lowiyago aria dege latago hene.



<sup>2</sup> Mosesehanda Isaraele wali agali bibahendeore olalu mo mogo buwa tihondo lamialu lalu, Anduane Homogo ibugua Iyibi wali agalinaga kini heagohondobi ibunaga agali haguane hearuhondobi wali agali bu hearuhondobi Iyibi dindiha biyago damene bibahendeore tí de handai harimi. <sup>3</sup> Warago ko tara tara ibilayarubi agalime nabiagane ale dewa biyarubi Anduane Homogohanda mbirale timbuni tara tara nahendene ale biyarubi tí de handaiore harimi. <sup>4</sup> Anigo Anduane Homogohanda tígua uruni biyarunaga irane mandabu halimulonaga mitangibi handalimulonaga debi bayuwa hale halimulonaga halebi tíhondo nangini kamigoni. <sup>5</sup> Anduane Homogohanda ogodagua laya. Mali pira mariani (40) ina tí dindi ko ege kekelele iba dalu naibaga wiagoha haru hewangi tínaga agabi ge subi mbirago budabaga nabi bayale karulo haabo halimulo handayaho harugoni ndobe.✧ <sup>6</sup> Dindi ogoniha hemingi tí tomo nolene mberedibi waini ibabi iba mbiabi mbira nawi hemigola ini Anduane Homogo tínaga Ngode Datagaliwabeore henedalo manda bilimulo inime tí mbira burupale hemiria baya hangu handayaho harugoni ndobe, laya lene.

<sup>7</sup> Mosesehanda laabo halu lalu, Ina dindi ogoniha anda íbu hemagola Hesebononaga Kini Sihono heagomebi Basana dindinaga Kini Ogabi libugua ibalu ina baba wai biyagoni. Anidagua biyago bilowa iname ti bope halu wayali harima.✧ <sup>8</sup> Iname tinaga dindi karulalu hameigini Lubenebi Gadabi Manase hameigini halu mende hearubi tí karulo helo tu wa tahaga birimagoni.✧ <sup>9</sup> Tígua bialu holeberemigo damene bibahende bayale hai helonaga habo nalolene bi lowirimigo ogoni bibahende taluwa bialu halimu.

<sup>10</sup> Áyu ogoni tí Anduane Homogo inanaga Ngode Datagaliwabenaga deni kamigoni ndobe. Tí agali haguane kamirubi ami agali haru haga kamirubi agali maru kamirubi <sup>11</sup> tínaga one waneigini bu kamirubi wali agali dindi tarali tí heba mandagi íbu howa tínaga ira gabia iba hambu pu biaga karubi tí íbu hai kamigoni. <sup>12</sup> Tí bibahende ogoria bu kamirume habo nalolene bi Anduane Homogo inanaga Ngode Datagaliwabeanda lowirago hale halu mo yule kami. Hale howa habo nalolene bi ogoni talialu hole lalu bi lowuleberemi. <sup>13</sup> Anidagua beremigola Anduane Homogohanda tí mo ibunaga wali agaliore helalu tínihondobi tínaga mamali Abarahama Aisaga Yagaba imaruhondobi tínaga Ngode Datagaliwabe iniore holebero lalu bi lo winigodagua loyane biragoni.

<sup>14</sup> Anduane Homogohanda habo nalolene bi ogoni ina áyu o kamaru baba hangu bulenaga lowirago ndo. <sup>15</sup> Ibugua ina áyu ngoai ho kamarubi mani inanaga waneigini aguanene holobadarubi lamaga halu ina bibahende baba lowiragoni. Ani manda bialu ina bibahendeme aniore bule lalu bi lowimiya.

<sup>16</sup> Tí abale Iyibi dindiha harimingi abi harimadabe mitangi biadai bilimu. Ani bialu hameigini tara taranaga dindi wiagoria ibaga bialu harimingi bigi biyarubi mitangi biadai bilimu. <sup>17</sup> Tígua hameigini tara tara uruniha hearume dama mitangi bialu mbirale bi pupu wulenaga ko ngubiore iramebi ege tolemebi ngolo silibarumebi wabiniru dindi uruniha wiaria de handarimi. <sup>18</sup> Tí aria lenegoore agaliyaguabi waliyaguabi onene agalini waneiginiru hebayaguabi hameigini mbirayaguabi áyu o kamiru aria mbirame Anduane Homogo inanaga Ngode Datagaliwabe kago erembira mialu puwa dindi tara wali agalinaga mbirale ko ngubi gime wabini ngagohondo bi pupu wuligo de hondo halimu. Tígua bi áyu hale haramigo mo wahalu puwa mbirale uruni alehondo bi pupu wialu harimiyagua nde mbirale kau biaga alenaga pini kago hangaramigola mani ogoni ibu wialu anda howa wali agali dewaliore mo ko holene wulebira.✧ <sup>19</sup> Wali agali marume bi hongohe o larogo hale ho howa mo nagalone halu puwa mitangi bialu ina bi uruni hale howa nabi haruyagua nde karulape. Ani berogome nde i bayale dege holebero lo mitangi buligo handalimu. Anigo mbiralime mana ogoni pugualu bi mo wahayagua nde ogonidagua biragome wali agali ko biagabi bayale

biagabi bibahendeha mo ko holene anda ibai holene wulebira. <sup>20</sup> Mbiralime mana ko urunibi biaga kagonaga ko ngago Anduane Homogohanda domo wa naholebira. Anigo Anduane Homogo ibugua keba timbuni howa ibunaga bu miniha ira hungu ale biragola mbirale mo ko holene damene mbuga ogome ledaru bibahende agali ogoni ibuha ibalu kane dege ibunaga dindini holene wini ngago hamaro birangi waholebira. <sup>21</sup> Anduane Homogohanda mbirali ogonidagua biagago ibu minalu Isaraele hameigini bibahendeme de hendelo ibuha tandaga nolene ibunagaore wini ngago nalu kane dege hamaro bilolebira. Anduane Homogo ibugua aniore bule lalu mana lowinigo loyane ogoha lo ngadagua mbirale mo ko holene damene ngarume ibuha ibu wiai holebira. Anduane Homogohanda habo nalolene bi tí baba lowiyago mbiralime mo habo layagua anidaguaore bulebira.

<sup>22</sup> Mani howa tínaga aguanene holobadarumebi wali agali dindi tara taraha howa ibu holebirarumebi Anduane Homogohanda tínaga dindiha genda timbuniore ibilenedane hondolebira. <sup>23</sup> Mabu ngemiru bibahende mo ko hai hene wulebira. Tínaga dindi ko kui halu ege tole ale ambuabi mini saloba dege ngagoha mabu e hangabe nahe wulebira. Dindi ogoniha datanibi mbira anda habe nahe wulebira. Ani bialu tínaga dindi ogoni mo ko hai hene tano maria Sodom Gomora Adama Seboimi imaru winigobi wulebira. Tano uruni bamba Anduane Homogohanda ibu miniha keba timbuniore howa mo ko hai hene. <sup>24</sup> Wali agali dindi bibahende ngaruha bu holebirarume tinihondo hale haga haga bialu lalu, Anduane Homogohanda Isaraele wali agalinaga dindi ogoni irane aginaga mo ko hayadabe. Ibugua irane aginaga tihondo keba timbuni hayadabe, lalu holebira. <sup>25</sup> Ani hale haragola tinime dege ladai bialu lalu, O biyadagoni irane Anduane Homogonaga wali agali bu hearu tigua tinaga mamalirunaga Ngode Datagaliwabe ti Iyibi dindiha howa haru tagira pialu dindi ogoha haru ibini biagola habo nalolene bi lowirimigo tinime mo habo lalu piyagola mo ko hene nga, lolebira. <sup>26</sup> Isaraele wali agali tigua dama mitangi bialu mbirale gime wabini wiaruhondo bi pupu wialu heneya. Mbiralime uruni alehondo tigua abale bi pupu nawiagabi Anduane Homogohanda ogoni alehondo bi pupu nawilimu lalubi laminigo mo wahayagola biniya. <sup>27</sup> Ani biyagola Anduane Homogohanda ibunaga wali agalihondo keba timbuniore howa mo ko holene tara tara ibulebira lalu mbuga ogome ledaru tiha tagira ibiyagola ti ani mo ko hai henego ngagoni. <sup>28</sup> Ani buwa Anduane Homogohanda keba timbuniore halu wali agali uruni tini daluha howa ho dugualu dindi tara taraha bo purogo lelenego nga. Anidagua binigo áyu ti nde dindi tara uruniha haabo kagoni, lalu ladai bulebira, lene.

<sup>29</sup> Mosesehanda laabo halu lalu, Bi maru inanaga Anduane Homogohanda latagi nahe mo do howa wiaabo helenego áyu nga. Anigo ibunaga bi mana lowinigo latagi hene áyu ngago ogoni inamebi inanaga aguanene mani holebirarumebi talialu bialu holomaya ngiyago mana ogoni taluwa bialu haabo hamija, lene.

## 30

### *Anduane Homogoha daibu holenebi bayale holenebi ngago ogo*

<sup>1</sup> Mosesehanda laabo halu lalu, Áyu tigua tale bialu poa biragoha talialu pilimulo hariga kira mo walia haragoni. Hariga mbiragoha Anduane Homogo ibugua mo bayale holene wialu hariga mendegoha mo ko holene wulebira. Tigua bialu holene bayale agodabe handalu tinime dabalimu. Anduane Homogo inanaga Ngode Datagaliwabe ibugua tí hameigini tara tara bu karu baba halimulo pelenego pu kamiria mana bialu harimidagonaga lini tiniha mo ko holene anda ibiragola ina bi kira dabolene o langirugoni mitangibu dai buleberemi. <sup>2</sup> Ai tiguabi tínaga waneigini aguane mani holebirarumebi mini beregedalu Anduane Homogo ibuni kagoha daibu howa ibugua bilimu layaru bu miniha hongo howa bialu haabo harimiyagua nde <sup>3</sup> Anduane Homogo

inanaga Ngode Datagaliwabe ibugua tí dara halu biamogo bulebira. Ibumime tí dindi tara taraha haru pu helayagoria howa lone tíni dindi ala hene wirimigoria haru daibu helolebira. Ani helowa ibugua tínaga mbirale ngamiru mo bayale hai holebira. <sup>4</sup> Tí kaundiaore dindi wia maro bidaruha haru pu helaga biniyaguabi Anduane Homogo ibunime tí mandagiore halimulo bibahendeore mo mogo bialu haru dai biai holebira. <sup>5</sup> Ani haru dai biragola dindi abale tínaga mamaliru hene biagoria daibu hai holeberemi. Ani daibu kamigola Anduane Homogo inanaga Ngode Datagaliwabe ibugua tí mo dewaore halu tínaga mbirale yu holeberemirubi tínaga mamalirume yu henegobi ndo bolangua howa dewaore yu holeberemi. <sup>6</sup> Ibugua tínibi tí waneigini aguane mani holebirarubi tínaga mini mo beregedalu gahengeore helalu biragola tígua ibunaga bi mana ngaru baya hangu hale halu bialu ibu gubalinioore howa holeberemi. Ani bialu tí dindi ogoriani haabo holeberemi. <sup>7</sup> Mo ko holene wulebirago lalu áyu ina tihondo langiruruni Anduane Homogohanda wali agali tínaga waitigi handabe manga haga heneru tí mo ko holene uruni ti karuha pelolebira. <sup>8</sup> Anigo ina ibunaga bi mana áyu o langerogo tígua baya hangu talialu bialu holeberemi. <sup>9</sup> Ani beremigola tígua bialu holeberemiru bibahende Anduane Homogohanda mo bayale hai holebira. Ani mo bayale hai haragola tínaga waneiginiru dewaore halu nogo sibi bulumagarubi dewa dege holebira. Tínaga maburuha tomoru bayale dewaore anda holebira. Anduane Homogohanda mbirale dewaore abale tínaga mamaliru mialu henedagua tihondobi nde dewaore turu halu ngulebira. <sup>10</sup> Anigo tíguaore Anduane Homogonaga bi hale halu bialu bi mana mbuga ogoha gilibu ngaruni baya hangu taluwa biai halu holene nga. Ibuni karia dai bialu tíninaga bu gubalinime minimebi ibunihondo gubalini ho haabo holene nga.

<sup>11</sup> Bi mana áyu langerogo tígua mo yuwa bialu holene gendabi ndo langero. <sup>12</sup> Bi mana uruni uyura hari damindiniha wiaruagola ai iname hale howa talialu bulumaya mbirali aiwa irigi halu puwa mo yalu dai bulubadabe naloleberemi.\* <sup>13</sup> Iba solowara timbuni bedarunaga ange mende amurahayagi wiaruagola ai nde iname bi mana uruni hale howa talialu bulumaya aiwa mo yu dai bule polobadabe lalubi nalabeheore kami ndobe. <sup>14</sup> Ani nalabeheore kamigoni. Bi mana uruni kaware tíni kamigoria tínaga ne harigaha halu tínaga bu minihabi kagoni. Ani bidago tíni bi mana ogoni manda bu howa latagi habehe kamigo ai tínime talialu bialu haabo halimu.

<sup>15</sup> Ai nde hariga kira holene homolenela ogoni labo tígua dabalimulo ina tihondo mo walia harogo. Tígua hariga mbira nga larogoria pialu harimiyagua nde tí holene bayale handa walia halu bayale haabo holeberemi. Hariga mende larogoria pialu harimiyagua nde tí mo ko halu homolenehayagi holeberemi. <sup>16</sup> Áyu ina tíore langerogo tígua Anduane Homogo inanaga Ngode Datagaliwabe gubalini ho howa ibunaga bi mana lo ngaru bibahende hale halu talialu bialu halimu. Ani bialu howa ibunaga hame ngaru talialu harimiyagua tí wali agali damebi dewaore paluwi bayaleore haabo holeberemi. Anduane Homogo inanaga Ngode Datagaliwabe ibugua dindi áyu karulole poramigoriani pu kamigola tí bayale holeberemi laro. <sup>17</sup> Ai nde tígua bi mana uruni hale habe manga howa mo bagi halu dindi tara wali agali bu karume ti haru pubagi haragoha pialu mbirale dama mitangi bialu gime wabini ngaruhondo bi pupu wilimulo haru piyagua nde <sup>18</sup> tíha mo ko holene timbunioore wulebirago de hondo halimu laro. Bi o langerogo mo waharimiyagua nde tígua Iba Yodana porago domaede halu dindi ede ngagoha hole kamigoriani haabo naholeberemi. <sup>19</sup> Ainde bayale holenebi homolenebi hariga kira ngago tí mendego hangu dabalimulo ngagoni. Hariga mbiragoria Ngode Datagaliwabe ibugua tí bayale halimulo biamogo bialu holebira. Hariga mendegoria tíniha mo ko holene taya buleberemigo. Ai ina dindi o ngagomebi hari li kagomebi áyu tígua dabaramigo libu de hendelo lamerogoni. Anigo áyu tígua pialu hariga agoria

\* 30:12: Lm 10.6-8

holeberemibe dabalu bayale holene ngagoria hole dabalimu laro. <sup>20</sup> Tígua Anduane Homogo inanaga Ngode Datagaliwabe kagohondo gubalini halu ibunaga bi mana bu miniha baya hangu mo hongo halimu. Anidagua bialu howa tίνibi tίνaga waneigini aguane mani holebirarubi tígua dindi bamba tίνaga mamali Abarahama Aisaga Yagaba imaruhondo ngulebero lalu Anduane Homogohanda bi lo wiyagoria pialu luore haabo holeberemi, lalu Mosesehanda lene.✧

## 31

### *Yosua ibu Mosese henegoria ho aribia henego ogo*

<sup>1</sup> Mosesehanda Isaraele wali agaliruhondo laabo halu lalu, <sup>2</sup> I áyu agali daguaheore kogoni. I mali handari mbirani pira kira (120) piyadago ai ina tίνaga haguane habe naheore kogoni. Anigo nde bi mende Anduane Homogohanda ihondo lalu, I Iba Yodana domaede halu napolebere, lalu langiya.✧ <sup>3</sup> Anduane Homogo inanaga Ngode Datagaliwabe ibugua tí dara halu ibunime bamba halu puwa wali agali edegoniha bu karuni bo hilo wahai holebira. Ani biragola tinaga dindi ogoni tígua karulo holeberemi. Anduane Homogo ibunime layadagua Yosua ibu tίνaga haru hagane holebira. <sup>4</sup> Anduane Homogohanda ala Amoroalinaga kini kiralí Sihono Ogalanaga dindiha anda bo heda hayadagua dindi edego bo haealabaga bulebira.✧ <sup>5</sup> Anduane Homogohanda tí biamogo biragola tígua wali agali uruniha holebiraru bope halu tίνi wayali holeberemi. Ani bialu howa ina ogodaguaore tihondo bilimu lalu abale langirudagua biaiore halimu. <sup>6</sup> Tígua uruni handalu gi nahe miniha hongo ho halimu. Tínaga Ngode Datagaliwabe Anduane Homogo ibunioire tí heba mandagi haabo holebira. Ibugua tí mo embeda halu tίνi hangu halimulo yu wahalu napolebira, lalu Mosesehanda lene.

<sup>7</sup> Ani lowa Mosesehanda Yosua olalu ibu lowa wali agali bu hearunaga deni helalu Yosuahondo lamialu lalu, I gi nahe miniha hongo ho habe. Abale Anduane Homogohanda ina mamaliruhondo dindi edegoni ngulebero lalu lowiyagoni mialu karulole ina wali agali o bu karu haru halu bamba halu pobe. <sup>8</sup> Anduane Homogo ibu i heba howa ibunime bamba halu haru polebira. I mo ko howa bara handala ibugua i yu wahalu napolebira. Ani bulebirago ai ina mogo lalu gi nahabe, lalu lene.✧

### *Mali karia pugu bidagola Bi Mana lowinigo lone dagaloyane bigi bulene nga lenego ogo*

<sup>9</sup> Mosesehanda Ngode Datagaliwabenaga Bi Mana lowinigo gili bialu Libai hameigini loma binigo mo miaga hearuhondobi Isaraeleali agali haguane hearuhondobi migi bini. Libai hameigini uruni tigua Habo Nalolene Bi lo winigonaga Mbogoyi biago handayaho haga hene. <sup>10</sup> Ani heagola Mosesehanda tihondo lamialu lalu, Ai mali karia piai halu lotu lolenaga horo timbuni Anda Nemandaha Palu Holene tomo nole ngoai haramingi tigua bi mana ogoni wali agaliruhondo dagalo migi bilimu. Mali kane pu bolangua haga biragola ogoningi dano heneru wahaga biaga nga.✧ <sup>11</sup> Isaraele wali agaliru tigua Anduane Homogo inanaga Ngode Datagaliwabe ibugua dindi mbira tí ibu mitangi bialu lotu lolene mo wiragoria ibu ngoai haragola tigua bi mana o gilibu ngiruruni hale helo dagalo tagi haga bilimu. <sup>12</sup> Bi mana uruni hale hai helo dagalole howa wali agali waneiginirubi wali agali dindi taraha howa tí baba tanoha mandagi hole ibu hene karubi bibahendeoreme bi mana uruni hale halu manda biai helo lope halimu. Ani bialu ti bibahendeme bi mana uruni hale howa Anduane Homogo inanaga Ngode Datagaliwabe andaneha hai helo ani lope halimu. <sup>13</sup> Tigua anidagua hale helo dagalatagi haramigome tinaga waneigini aguane maha andaho aribia hararu ti Anduane Homogo inanaga Ngode Datagaliwabenaga mana lowinigo ogoni ala hale nahene tibi hale holebira. Anidagua beremigola tigua bi mana uruni hale howa Iba

✧ 30:20: Pig 12.7, 26.3, 28.13 ✧ 31:2: Dag 20.12 ✧ 31:4: Dag 21.21-35 ✧ 31:8: Yos 1.5, Hi 13.5 ✧ 31:10: Man 15.1, 16.13-15



Yodana domalu dindi ede ngagoha pu howa Anduane Homogo andaneha haabo helo ani bilimu, lalu Mosesehanda lene.

*Anduane Homogohanda Mosesehondo bi lamaro binigo ogo*

<sup>14</sup> Anduane Homogohanda Mosesehondo lamialu lalu, Ai ínaga homolene kaware ngagonidago nde ínaga biabe bulene ngaru Yosua mo walia holiya ibu olalu ínaga Balai Anda kagoha haru ibabe, lene. Anidagua laya handala Mosese Yosuala Balai Anda biagoha anda pene. <sup>15</sup> Libu ani anda piyagola Anduane Homogo ibuni Balai Anda biago haneni beraliba mberane biagoha kaware íbu hene.

<sup>16</sup> Ani íbu howa Anduane Homogohanda Mosese lamialu lalu, Áyu í homolene kaware kegoni. Ani homaregola wali agali tigua í yu wahalu ti baba habo nalolene bi lowirugobi pugulobada. Ani bialu tigua í erembira ngialu puwa dindi áyu poleberemigoha wali agali karunaga dama mitangi bialu gime wabini ngaruhondo bi pupu wialu holobada.

<sup>17</sup> Tigua anidagua biragola ina tihondo keba timbuniore holebero. Ani howa ina ti yu wahalu erembira merogola tiha mo ko halu tandaga nolene timbuniore wulebira. Ani nalu howa tigua ogodagua lolebira. Ngode Datagaliwabe ibu ina heba mandagi nahe ngagome genda inaha anda ibiragonida, lolebira. <sup>18</sup> Ani lalu kagola ina ti biamogo nabuleberogo irane tigua í erembira ngialu puwa ko timbuniore bialu dama mitangi bialu gime wabini ngaruhondo bi pupu wima piyagonaga ani bulebero.

<sup>19</sup> Áyu ina iba gana mbira langerogo bebani gili buwa Isaraele wali agaliru lawai habe. Iba gana ogonime mani tini dabaki holene wulebirago ani bilonaga gili bibe. <sup>20</sup> Ai dindi bayaleore benebere ogoniha haru halu polebero lalu bamba tinaga mamaliruhondo lowirudagua bialu ti haru anda polebero. Dindi ogoniha ti tomo dewaore bu payabu ngelowa karulapeore nalu holebira. Ani holebiragoyu tigua í erembira ngialu puwa dama mitangi bialu mbirale gime wabini ngaruhondo bi pupu wialu holebira. Ina yu wahalu ti baba habo nalolene bi lowirugo pugu waholebira. <sup>21</sup> Ani biragola mani howa mo ko holene tara tara ti kagoria íbu wulebira. Horo mo ko holene uruni íbu wigi bidagola howa Isaraele wali agali tigua iba gana ogo lalu haabo holebira. Iba gana ogonime tinaga mana ko bialu hayaruni mo mitangi bia haga bulebira. Inime ti dindi ogoniha haru polebero lalu lowirugoria haru anda nape wene kamagonigo ai mani ogoale bulebira lalu tinaga bu miniha ngelo kago ina áyu hondo bolangua hai ho kogoni, lalu Anduane Homogohanda Mosesehondo lamini.

<sup>22</sup> Horo ogoningi dege Mosesehanda iba gana ogoni gili bialu Isaraele wali agaliruhondo lawai hene.

<sup>23</sup> Ani biyagola howa Anduane Homogohanda Nunu igini Yosuahondo lalu, Ina mbirale mbira hondowa gi nahe miniha hongo ho habe. Isaraele wali agaliru inime tihondo dindi ogoni ngulebero lalu abale lowirugoria haru pobe. Ani haru poregola ini í heba mandagi haabo holebero, lene.✧

<sup>24</sup> Ani layagola Mosesehanda Ngode Datagaliwabeibunaga mana lowinigo aria mbira yu wanahe bibahendeore mbuga mbiraha gilibu wiai hene. <sup>25</sup> Ibugua bi uruni gili biai howa Anduane Homogonaga Habo Nalolene Bi lowinigonaga Mbogoyi handayaho haga Libai hameigini aria lomabu minigo mo miaga hearuhondo bi mbira lamini. Ibugua lalu, <sup>26</sup> Mbuga ogoni Ngode Datagaliwabenaga bi mana lowinigo gilibu nga. Ogoni Anduane Homogo inanaga Ngode Datagaliwabeibunaga Habo Nalolene Bi lowinigonaga Mbogoyi ngagoria kaware mo ngelalimu. Ani ngeledemigoria wiaabo howa mbuga ogonime tí Anduane Homogonaga wali agali kamiru manani tale bialu haabo helo wiaabo holebira. <sup>27</sup> Wali agali ti mine hagabi bi mo wahagabi kago í manda bu kogoni. Áyu í koangi tigua mine howa Anduane Homogonaga bi mo wahaluibunaga mana lo ngaru pugualu hayagoni. Ai mani howa í homedogolabi tigua mine timbuni

✧ 31:23: Dag 27.23, Yos 1.6



halu anidagua dege bialu holebiralu manda bido. <sup>28</sup> Ai áyu agali haru haga bu karubi agali haguane bu karubi bibahendehondo ina bi laruruni ti lamuliya íbu ngoai hadaba lole pudaba. Ina dindi ngagomebi hari li kagomebi libugua ina bi áyu ogoni wali agali tihondo lamerogo hale hene lelonaga ololiya. <sup>29</sup> I homedogola wali agali mani mo ko heneore halu ina tihondo bi áyu lamirugoni hale halu talialu ha nabulebiralu manda bido. Tigua mana ko dewa bulebira Anduane Homogo mo kebaore halu biragola ibugua mo ko holene ngaru ti kagoha ibilolebira, lalu Mosesehanda lene.

*Mosesehanda iba gana lenego ogo*

<sup>30</sup> Mosesehanda iba gana gilibu wiyadagoni Isaraele wali agaliru ti hale helo tihondo lominigo ogo,

**32**

<sup>1</sup> Hari mindini dindila-o inaga bi hale hadaba.

Ina bi larogo bayuwa hale hadaba.

<sup>2</sup> Inaga bi lawai harogome dalu ibilagadagua ibilalu

datani bayale anda helo dindini dadimba ale mo mindibia hagadagua tí bayale halimulo mo bayale holebira.

Inaga bi dalu ibira hagadagua ibalu

dalume mbirale dindini anda ho karunaga mane bayale helo mo tiga biagadagua bulebira.

<sup>3</sup> Ina Anduane Homogonaga mini yaraga holebero.

Tígua ibu mini leneore ka loleberemi.

<sup>4</sup> Anduane Homogo ibu haabo hagaore ka.

Ibu ege tole timbuni mo ema bibe nahe wiraligobi ka.

Ibunaga mana baya buruguleore tigabi dege nga.

Tínaga Ngode Datagaliwabe ibugua bi leneru mbira mbiralime mo iriari bibe nahe bibahende ibuninaga bi lowiyago ke hole nalaga.

Ibugua mana tigabi bayale bulene ngadaguaore biaga ka.

<sup>5</sup> Tí ogonibi ndo kamigoni.

Wali agali ke haga howa tígua buleore lalu lowirimiru wahalu piaga kami.

Wali agali mana ko hangu bialu haga kamigome

tí Anduane Homogonaga wali agali habe nahe kamigoni.

<sup>6</sup> Anduane Homogo ibu tínaga aba howa tí bibahende Wabiaga ka.

Ibugua tí damene timbuni hodame bileda.

Anidagua binidago manda bialu tígua ibuhondo mana ko uruni irane aginaga bialu kamibe.

Tí wali agali lulu howa mini nawiore kamigoni.

<sup>7</sup> Tígua abaleore howa biniru mitangibu dai bidaba.

Tí abaruhondo agua binibe lalu hale hadaba.

Agali dagahe ala hene karuhondo agua dege binibe lalu hale hadaba.

<sup>8</sup> Daligaorene Daliga kago ibunimeore wali agali tara tarahondo dindi tu wu tahene.

Tahalu ti ogoriaore halimu lalu lamigi bini.

Ibugua Isaraele wali agali hameigini headagua dindi karulapeore tu wini.

Wali agali tara hearu ti helobi tu wu ngelaga bini.\*☆

<sup>9</sup> Ibugua Yagaba aguaneru ibunime handayaho hole dabo helayagoni.

\* **32:8:** Hiburu bi lowa ogoni wá nale. Bamba Girigi bi lowa gili binidaru tigua ogodagua gili biya. Bi ogoni dahuliyali mbira mbirame dindi hobane mbira mbira handayaho helonaga lene bada laya. ☆ **32:8:** Ab 17.26

- 10 Isaraele wali agaliru luluyu yalu dindi ko yobi pupe hayagoni.  
Dindi koore puyabu hongohe pu laga wiagoha pupe ho hayagoni.  
Anduane Homogohanda ibuni handayaho hagadagua  
ti handaya halu biamogo biya.
- 11 Ega bodo hariawe bedarume tinaga iginiru yaga lalu pelo  
yupe howa mo ko halu ibira hole tiga biragola  
ibunime dindiha pialu babagane yangalalu iginiru mo yaraga hagadagua  
Anduane Homogohanda Isaraele wali agaliru tiha mo ko holene mbira anda ibuligo  
baya hangu handayaho hene.
- 12 Dindi taranaga dama karume haru hamaga nahe  
Anduane Homogo ibuni hanguoreme Isaraele wali agaliru haru halu hariga mo  
walia hene.
- 13 Anduane Homogohanda ti dindi hari barebare wiaruni handaya ho helalu  
tiga mabuni tomo andaho hearu bialu naya.  
Ege tole timbuni hearuha mone ibane wiaru mo nalu  
ege tole dindini wiaruha tinaga ira oliberu bayale taraore anda haya.
- 14 Tinaga bulumaga memeru hearunaga andu ibane tini nolene karulape hambiya.  
Tiga bulumagaru sibiru memeru bayale habanehe hinaya.  
Tinaga widiru bayale anda halu  
waini iba bayale berelo gerebi liniru bayale ibiralu do ndigindugu laya.
- 15 Anduane Homogonaga wali agali heneru ti mbirale dewaore wu howa  
tinime ibu erembira mialu mine haga hene.  
Tigua tomo dewa naabo howa tini timbuni pudu ho hene.  
Tigua Ngode Datagaliwabe ti wabinigo yu wahowa  
tinaga pele miaga timbuni kagohondo erembira mialu hene.✧
- 16 Tigua dama mitangi bialu gime wabini wiaruhondo bi pupu wiyagome  
Anduane Homogo mo tandaga hene.  
Tigua ko ogoni biyagome ibu mo keba hene.
- 17 Tigua Ngode Datagaliwabehondo ndo dama tara tarahondo mbirale bo lomabu miaga  
hene.  
Dama uruni bamba tinaga mamalirume manda nabini.  
Isaraele wali agali bamba henerume dama uruninaga andaneha nahene.✧
- 18 Tinaga Ngode Datagaliwabe ibu hongo gibihe tini pele miaga timbuni henego embeda  
ho hene.  
Tihondo bayale holene tene miaga kago ti embeda hai ho wahene.
- 19 Tigua mana ko uruni biyago hondowa  
Anduane Homogohanda tihondo keba timbuni hene.  
Keba ogonibi howa ibugua ibuni waneigini biaru erembira mini.
- 20 Ibugua lalu, Ina wali agali uruni biamogo nabulebero.  
Tiha genda tara tara anda ibiyaguabi ibilo wahalu biamogo nabulebero, lene.  
Ti mine gibi hagabi ihondo mini mbiraore nawi hagabi ka.
- 21 Tigua Ngode Datagaliwabe ndo nagalone wiaru talima pialu kagoni.  
Anidagua biyagome inaga bu mini mo tandaga halu tihondo keba haru.  
Ko uruni biyagonaga ina hameigini mbira mini lene ndo tara karume ti mo keba helo  
helalu  
wali agali hameigini tara mini nawi karu urunime Isaraele wali agali mo tandaga  
helo helolebero.✧

- 22 Horo ogoningi inaga keba holeneme timbuniore ira hungu ale daradagua bialu dindi bibahendeni karu ngarubi bo dai holebira.  
Irame humbirini dindiha pialu dindi hari pini karubi daiore holebira.
- 23 Agalime timu dewa gime yu howa waitigiru bagadagua balu ina tiha mo ko holene dewaore ibilolebero.
- 24 Ina ti tomo nolene mo garibila halu tiha warago tara tara mo wia halu ti mo homa haga bulebero.  
Ina mbirale tara tara gabua karunime ti hayilobi nogombi ko ngarumebi ti hayule pudaba laga bulebero.
- 25 Wai timbuni bialu kagola waitigirume ti harigani howa homelo bolebira. Tini andagaha bira do kamiria gi timbuni holeneme tini ibira holebira. Tinaga waitigirume ibalu wandari igiri daliahe bu karubi bo homelalu waneigini galibi wali agali wahe bu karubi yu wanahe bibahende bo wahaiore holebira.
- 26 Mbiralime ti mitangi bialu abogo ogoria hene nalelo ina ti mbira yu wa nahe bo wahai hole manda biru.
- 27 Ani manda birugoyu ina ti bo wahai kole nde waitigi bu karume mine halu lalu, Iname Ngode Datagaliwabenaga wali agali biaruni bope harimagoni ndobe, lalu kalego.  
Ani nalelo ina inaga hongoore holeneme ti bope harugoni ndobe.  
Anigo ina waitigi bu karume bi ogonidagua loligo inime ti bo wahai nahene, lene.
- 28 Isaraele wali agali mini nawiore kagoni tinaga mini gigabi nawi emene tubagiore ka.
- 29 Ti wali agali miniwi henedale nde tiha mo ko holene anda ibiyago agilemedabe handalu manda bidale.
- 30 Isaraeleali daosini mbira (1,000) hearu waitigi mbiraore hangu baba wai bialu dari hayago agibe.  
Isaraeleali daosini pira (10,000) waitigi kirali hangu baba wai bialu dari hayagona irane agibe.  
Anidagua biyagoni irane ogo.  
Anduane Homogo tinaga Ngode Datagaliwabe ibugua ti yu wahalu ti handabe manga timbuniore howa hongo haihe kagome ti erembira mini.
- 31 Waitigi karume tininaga dama gime wabini bu karunaga hongo naheoreyane handaya.  
Isaraele wali agalirunaga Ngode Datagaliwabe kagonaga hongo ege tole timbuni ema bibe nahe ngaligobi hongo timbuniore ka.
- 32 Isaraelenaga waitigi bu karu tinaga mana ko ngubiore biagago Sodomo Gomorala wali agalirume binigobi biaga ka.  
Tinaga waitigi biaru ti pu mbira lini daga mini gerebi kome lini kaubiore dagagobi ka.
- 33 Tinaga mana koorene ko waini iba puya ko homaganaga ibaneme wabini ale ka.
- 34 Anduane Homogo ibugua Isaraelerunaga waitigi bu hearume biyago manda biaiho ka.  
Ibugua ti ko biyagonaga pani mulene henge mbira tagira ibilo hondo ka.
- 35 Horo ogoni tagira ibiragola ibugua ti ko biyagonaga badai bialu pani mialu howa bo wahai holebira.

Tigua ko biyagonaga mo dindiha helolene íbu nga.  
Ti mo ko holene horo kaware hapara haragoni.✠

<sup>36</sup> Anduane Homogohanda ibunaga wali agaliru hongo biba halu kago handalu  
ibugua ti pele mulebira.

Ibugua ibunaga biabe biahaga uruni tini hangu howa mbira mbira yu wahene handalu  
ibugua ti dara halu biamogo bulebira.✠

<sup>37</sup> Anduane Homogohanda ibunaga wali agaliruhondo ogodagua hale halu,  
Abale tigua dama mitangi bialu gime wabini hongohe urunime tí biamogo bulebira  
manda bialu pirimigo  
ai odaruni agoha kabe, lolebira.

<sup>38</sup> Tigua urunihondo nogo habanerubi waini ibanerubi ti nelo lomabu mirimigo.  
Ai odarunime áyu tí biamogo bule ibilo.

Tigua tí ko ngatoria howa haru dai bilo.

<sup>39</sup> Ini mbiraore hangu Ngode Datagaliwabeore kogoni manda bilimu.

I ale mendeali mbira naheore.

Holene ngiagabi bo wahagabi ini hanguore kogoni.

Ina mbirali mo tandaga holenebi mbirali mo dabi holenebi ini hangu kogoni.

Ina buleberogo mbiralime hapai habe nahe.

<sup>40</sup> Heneneore Ngode Datagaliwabe ini hanguore haluhe henego kogoni.

Ani kogonigo ina buleore lalu mbira ogobi lo wiruli.

<sup>41-42</sup> Mana tigua bialu karu baya hangu tale bulebero.

Ina inaga wai biaga ayu tibu ne halu mo ngiringara lelolebero.

Inaga ayu tibu ogonime maru inaga waitigi karu bo wahai halu

maru i handabe manga haga karu mo ko holebero.

Maru i baba wai bule karu ina tini homelo bo wahai holebero.

Tinaga darama timu togo togo pora bialu holebira.

Agali maru wai hamaha nahomayagua nde inime ti bo wahai holebero, lene.

<sup>43</sup> Dindi tara tara wali agali kamiru-o

tigua Anduane Homogo ibuninaga wali agali bu karunaga mini yaraga holene nga.

Ibunaga wali agaliru bo wahaga karu ibunime tinibi mo ko haga ka.

Ibugua waitigirume ko birago biadai biaga ka.

Ibunaga wali agalirume ko biyaru ibugua domo wahaga ka,

lalu Mosesehanda lai hene.✠

<sup>44</sup> Mosesela Nunu igini Yosualame iba gana lalu bi ogoniha gilibu wiaruni Isaraele  
wali agali bu hearume hale hai helo daga latagi halu hene.

*Ngode Datagaliwabenaga bi maname bayale holene mo wia haga te ngago ogo*

<sup>45</sup> Mosese ibugua Ngode Datagaliwabenaga bi mana wali agali bu hearuhondo lawai  
hai howa <sup>46</sup> mani ibugua tihondo lamialu lalu, Ina bi mana áyu o langiruruni baya  
hangu de handalu talialu bialu halimu. Tínga waneiginiru tiguabi nde Ngode Datagali-  
wabenaga bi mana ogoni talialu horo bibahendengi bialu helo lamilimu. <sup>47</sup> Ibunaga  
bi mana lawai holene uruni bi damene ndo uruni bi kuniore tíni bayale holenenaga  
ngagoni. Bi mana uruni bibahendeore mo dunubia howa hale halu bialu halimu.  
Anidagua bialu harimiyagua áyu tí Iba Yodana doma ede halu pole kamigoria pu howa  
dindi edegoriani luore haho wuleberemigo ani bilimu, lene.

*Mosese ibu Kenana dindiha anda nape, Homolebere lenego, ogo*

<sup>48</sup> Horo ogoningi dege Anduane Homogo ibugua Mosesehondo lalu, <sup>49</sup> Moaba dindiha hari mini Abariminaga Hari karuha pobe. Hari uruni Iba Yodana angeha halu Yarigo tano ederayagi ngelowa ngago. Hari uruni bibahende bolangua hai howa Hari Nebo nene kagoria irigi howa Kenana dindi ina Isaraele wali agali tihondo nguleberogoni ederayagi ngago handaede habe. <sup>50</sup> Í hamene Arono ibu Hari Ho nene wiagoha ala homayadagua íbi nde Hari Nebo nene ogoniha howa homolebere. Inaga dinini í damene homayarunaga dinini pu karu heba mandagi hole pobe. <sup>51</sup> Ala Arono homayadagua íbi nde homolebere larogoni irane libugua inaga bi larugo mo wahowa Kadese tano kaware dege ngelowa dindi ko iba dalu naibaga Meriba wiagoria howa Isaraele wali agali bu hearunaga deni inaga mini mo dindiha haribigonaga ibu homayadagua íbi homolebere laro. <sup>52</sup> Ani birigodago ai ina dindi ogoni ngagoria kaware hapara halu napoleberogo handa amu hangu hole pu. Dindi ogoni ina Isaraele wali agaliruhondo muleberogoha í napolebere, lene.✠

### 33

#### *Isaraele hameiginiru mo bayale helonaga Mosesehanda bi lahenego ogo*

<sup>1</sup> Ngode Datagaliwabenaga bi mana latagi haga Mosese ibuni homolene horo kaware dege ngelo howa ibugua Isaraele wali agaliru mo bayale helonaga bi lahalu hene.

<sup>2</sup> Ibugua lalu,

Anduane Homogo ibu Hari Sainai howa ibini.

Ibugua ni tagira ibiradagua ibalu Idomo dindini ani ibini.

Hari Parana heagoria howa ni darali haradagua bialu ibugua ibunaga wali agali bu hearuni daba hai haya.

Dahuliyali daosini daga labenahe dewaore ibuni heba mandagi howa ibunaga gi tigahayagi ira hungu ale datagi haya.

<sup>3</sup> Anduane Homogo ibugua ibunaga wali agaliru gubalini ho haga ka.

Ibugua wali agali ibunaga karu mamage halu biamogo biaga.

Ani biagago iname ibu geha bulu paluwa

ibugua bia laradagua hale howa bialu holene nga.

<sup>4</sup> Anduane Homogonaga Mana lowinigo Mosese ina tí langirugoni iname hale howa talialu bialu holene nga.

Bi Mana ogoni galoneorego inanaga dindiha duniniore nga.

<sup>5</sup> Isaraele hameigini mbira mbira bibahendebi tinaga agali haguane hearubi ti íbu ngoaiho heangi

Anduane Homogo ibu Isaraele wali agalinaga kini ho hene, lalu lene.

<sup>6</sup> Mosese ibugua Lubene hameigini hearu mitangi bialu lalu,

Lubene hameigini emene hangu ha kagonigo

ti biba halu homaiore nahelo hameledo,

lalu lene.

<sup>7</sup> Ibugua Yuda hameigini hearu mitangi bialu lalu,

Anduane Homogo-o Yuda hameigini bu karume ina biamogo bia lowa í olalu kagola ina tinaga bi larago hale halu biamogo bibe.

Ina ti hameigini maru karu baba lone mandagi helo mo mogobu helabe.

Tinaga waitigiru baba wai bialu kagola

Anduane Homogo-o inime ti hongo mialu biamogo bibe,

lalu lene.

✠ 32:52: Dag 27.12-14, Man 3.23-27



<sup>8</sup> Ibugua Libai hameigini hearu mitangi bialu lalu, ☆  
Anduane Homogo-o ínaga hame ledego ege tole kira mini Urimu Tumimula ogoni  
labome mo walia habe. \*

Ínaga biabe biahaga agali bayale Libaiali karuha howa mo walia habe.

Masa dindini hearia ína ti ba handalu

iba Meriba bereagoriabi tigua nde mana tigabiore birabe hondole ínime ti ba handarigoni.

<sup>9</sup> Ína tihondo bia larodagua bialu halimu larigoni bialu

ínaga Habo Nalolene Bi lo wirigobi talialu bialu hayagoni.

Uruni tigua ti aba aiyarubi damenerubi waneiginirubi tinaga bi hale holene nira ale lowa

Anduane Homogo ínaga bi hangu hale howa talialu bialu haga ka.

<sup>10</sup> Tigua ínaga Isaraele wali agalirume ínaga Mana lowinigo talialu bialu helo biawai holebira.

Tigua ínaga lomabu delaga dabu kagoria loma biniru bo delaga bulebira.

<sup>11</sup> Anduane Homogo-o ínime Libai hameigini uruni hongo halu anda hama irigi helo mo hongo haabo habe.

Tigua biabe bialu karu hondowa turu ho habe.

Uruni tinaga waitigi bu karu bibahendeore bo hingedaga bibe.

Ti lone heyabe naheore helo bo hingedaga bibe, lalu lene.

<sup>12</sup> Mosese ibugua Beniyamini hameigini hearu mitangi bialu lalu,  
Anduane Homogoibunime Beniyamini hameiginioire ti gubalini howa handayaho haabo haga.

Ibugua horo bibahendengi ti mamage haabo haga.

Ibugua horo mbirubi yu wanahe ti baba mandagi haaboore haga kagoni, lalu lene.

<sup>13</sup> Ibugua Yosebe hameigini hearu mitangi bialu lalu,  
Anduane Homogo ibugua Yosebe hameiginirunaga dindi mo gumbila halu iba dalu bayale ibilaabo helo.

Dindiha howabi iba bayale duguaraga halu berelo hameledo.

<sup>14</sup> Tinaga mabu hingedaruha mo gumbila halu ni daragome ira lini ibiralu do ndigin-dugu lalu

tinaga tomo uruni bibahende bayaleore boga biaiore helobi hameledo.

<sup>15</sup> Dindi bare hombene ala wini ngaruha tinaga tomo hangararu bayaleore anda hai helo hameledo.

<sup>16</sup> Tinaga dindiha Anduane Homogohanda mo gumbila halu

tomo bayale damene anda hai helo hameledo.

Anduane Homogo abale ira hungu deagoha howa ihondo bi lenego ogoni ibugua ani bilo hameledo.

Bayale holene uruni Yosebe hameigininaga íbu wilo.

Yosebe ibu ibuni hamenerunaga haguane hayagome bayale turubi ani wilo.

<sup>17</sup> Yosebe hameiginiru ti nogo bulumaga wangabe hongohe kagobi ka.

Bulumaga gabua hagianeni ne gayane kirahe kaligobi ka.

Ibunaga ne gayane mendego Manase hamewaneigini daosini dewaore karubi ka.

Mendego Eberaimi hamewaneigini aria daosini dewaore karubi ka.

Ne gayane kira ogoni labome dindi tara tarani hameigini palima pedaru bo hela amu haga biaga.

☆ 33:8: Har 17.7, 28.30, Dag 20.13 \* 33:8: Urimu Tumimu bi ogolabo irane mbuga Haru Tagira Penego 28.30 handabe.

Ti dindi gibuni ngaruha bope laga bima piaga ka,  
lalu lene.

<sup>18</sup> Mosese ibugua Sebulunu Isagala hameigini hearu mitangi bialu lalu,  
Sebulunu hameigini tigua solowara domalu dindi tara taraha pialu biyinaya bialu karia  
bayale helo.

Isaga hameigini tigua tini dindini howa biyina bialu karia bayale halu timbu dege  
helo hameledo.

<sup>19</sup> Hameigini kira ogoni labome libuni dalu hari nene ngaruha wali agali tara tara karu  
bibahende ibu ngoai hadaba laga.

Mo ngoai howa loma biniru damene bibahende bayale tigabiore bulene ngadagua bialu  
bo miaga ka.

Tigua wali agali tara tara karu baba biyinaya bialu  
iba solowaraha winiru mialubi  
iba angeni ibamu bu ngaruha wini ngaru mialubi  
urunime mbirale mo yu anda ibirarume tini homogo gibiore haga ka,  
lalu lene.

<sup>20</sup> Mosesehanda Gada hameigini hearu mitangi bialu lalu,  
Ngode Datagaliwabe ibugua tinaga dindi henge timbuni mo yangala hayagonaga ibu  
mini yaraga holene nga.

Gada hameiginiore laiono hongohe kaligobi howa mbirale bo nole nendebu biruwa  
gi ge bo dogalu hagianeni iri karu abale dogaralidagua ani biaga ka.

<sup>21</sup> Israele hameigini dindi tu wu tahole ibu ngoai hayangi

Gada hameigini ti dindi bayale wiago tu wu mini.  
Dindi ogoni agali hagianerume habehe wiago ti hene.

Israele agali hagianeru mandagi ibu ngoai howa  
tigua Anduane Homogonaga mana lowini ngarubi hale halu talialu bialu hene,  
lalu lene.

<sup>22</sup> Ibugua Dana hameigini hearu mitangi bialu lalu,  
Dana hameiginiru ti laiono hungubalua ale howa  
Basana dindiha howa abaleore porabu tagi halu ibinigo ka,  
lalu lene.

<sup>23</sup> Mosesehanda Nabadali hameigini hearu mitangi bialu lalu,  
Anduane Homogohanda mbirale bibahende bayale damenego Nabadali hameiginiru  
mialu  
ti homogo gibiore ho ka.

Tinaga dindi tubaria Galili iba kuyama bedago bolangua halu unura puabo ka,  
lalu lene.

<sup>24</sup> Ibugua Ase hameigini hearu mitangi bialu lalu,  
Anduane Homogohanda hameigini maru karu mo turu hayadagua ndo  
Ase hameigini tiore bolangua howa mo turu hene ka.

Israele hameigini maru bu karume Ase hameiginiru baba howa tini miniha turu  
hagabu helo.

Ti daluha ira olibe dewaore anda haga biragola tinaga olibe lininaga ibane timbuni biru  
wilo hameledo.

<sup>25</sup> Tinaga tanoruha wai pabe hongoheore egeme bianda howa pabe pangaru aeaneme  
wabu helelo.

Waitigiru tano ogoniha anda naibabeheda lowa ti gi nahe embedaho helo hameledo,  
lalu lene.

<sup>26</sup> Ani lowa Mosesehanda ti bibahendehondo lamialu lalu, Isaraele wali agaliru-o inanaga Ngode Datagaliwabe kagobi mende naheore. Ibugua hari daligani wá holene heba ibalu hari beralibaha howa ina biamogo bule ibaga kagoni.

<sup>27</sup> Ngode Datagaliwabe haluhe kago ibu inanaga ha do hagane andaore henego haabo ka.

Ibu andaneha howa ibunaga gini ina maliaho haabo kamagoni. Tínaga dindi biago karulole anda pialu pirimingi ibugua bamba halu tínaga waitigi bu hearuni bo batagi lalu uruni tínime bo wahai hadaba lalu langiyagoni.

<sup>28</sup> Ani binigo nde Yagaba aguaneneru tí hado payabu karia mbiralime wai bima lole mbira naibaga.

Hari daligaha howa dalu emene ibaabo haga ngagome dindi mo gomba haga. Dindi ogoniha tomo widirubi waini ibabi dewaore wirago tigua turu howa baya hangu mo wialu haga ka.

<sup>29</sup> Isaraeleru-o tí turu timbuniore holene nga.

Anduane Homogohanda tí biamogo bialu haru dai binioREGO kami.

Hameigini mende mbira ani binigo nahe.

Anduane Homogo ibuniore tínaga wai humbibí ayu tibu nene gadele alebi kagoni.

Ibugua tí ho pabebu howa wai beramingi ibunime tí mo wayali helaga ka.

Tínaga waitigi bu karume tí kamiria ibuwa dugu bialu ina dara howa biamogo bidaba lolebira.

Tígua waitigi uruni bope lalu hangedoleberemi, lalu Mosesehanda lamaro bini.

## 34

### *Mosese homenego ogo*

<sup>1</sup> Mosese ibu Moaba dindi tigabi yu dindi wiagoria pialu Hari Nebo nene wiagoha irigi lalu pene. Ani pialu Hari Pisiga neneore wiagoria Yarigo tanonaga abene ni tagira ibiragohayagi pene. Mosese ibu ogoriani pu hearia Anduane Homogohanda dindi bibahende Isaraealiru mule wiyago ibuhondo mo walia hai hene. Anduane Homogohanda Gileada dindi wiagoria howa mo walia hama pialu Dana hameiginirunaga dindi uyurahayagi wiarubi mo walia hene. <sup>2</sup> Ani bialu Nabadali hameigini hearunaga dindibi Eberaimi hameiginirunaga dindibi Manase hameiginirunaga dindibi Yuda hameiginirunaga dindibi mo walia hama pialu uyuraore ni paliragohayagi iba solowara timbuni Medidereniana bedagobi mo walia haiore hene. <sup>3</sup> Ani bialu Anduane Homogo ibugua Mosesehondo Yuda hameiginirunaga dindi maru abene unurahayagi wiarubi dindi bayale yu dindi dege piaho wialu Yarigo tanoha ayage ale mini dedi dewa buhe wiagobi yadai bialu piaho wialu unuraore Soa dindi wiagoria walia hairi hene. <sup>4</sup> Ani walia hai howa Anduane Homogohanda Mosesehondo lamialu lalu, Abale ina Abarahama Aisaga Yagaba imaruhondo bi lalu, Ina dindi uruni bibahende tínaga waneigini aguaneneruhondo mulebero, lalu lowirugoni. Ai dindi ogoni áyu ini deme dege handabelo mo walia harogonigoyu ini dege dindi edegoniha anda pobelo yupe lalu pu nalolebero, lene.\*

<sup>5</sup> Ani layagola howa nde Anduane Homogonaga biabe biahaga agali Mosese ibu Anduane Homogohanda bi lamiyadagua Moabaliru dalu wiagoha howa homene. <sup>6</sup> Ani homayagola ibunaga tingini Anduane Homogo ibunime Moaba dindiha dindi ulini Bedebero tano handa dele wiagoha hora hene. Dindi ulini ogoniha Mosesenaga homali agoriaore ngabe manda nabioRE henego áyubi haabo kamagoni. <sup>7</sup> Mosese ibu aiyahanda taba hanayangi howa ibunaga mali hama ibinigo handari mbirani pira kira (120)

\* 34:4: Pig 12.7, 26.3, 28.13

hayagola homene. Ibunaga tingini hongohobi debi bayale dege howa homene. <sup>8</sup> Mosese homayagola Isaraele wali agaliru tini nde Moaba dindi tigabi yu dindi wiagoria horo pira tebira (30) ogoriani ibunaga dugu bialu duguanda biraabo hene.

<sup>9</sup> Ani hai halu Anduane Homogohanda Nunu igini Yosuahondo mini gigabiwi holene ibuha wia hene. Ani binidagoni irane Mosesehanda ibuni henegoria Yosua ibuha aribia howa Isaraele wali agali haru helonaga dabo helene. Ani helayagola Isaraele wali agali hearume Yosuanaga bi layago hale halu Anduane Homogohanda abale Moseseha howa bia layadagua tigua biai halu hene.

<sup>10</sup> Isaraele dindiha Anduane Homogonaga bi mana latagi haga Mosese ale mbira naheore winigo wiaabo kagoni. Anduane Homogo ibuni Mosesela bi laedene bialu agali kirali bi laradagua biaga hene. ✧ <sup>11</sup> Anduane Homogohanda Mosese dabaluliyibi dindini agalime nabiagane alebi nahendene alebi dewaore Iyibi dindinaga kini heagobi ibunaga ami haru haga hearubi Iyibi dindini wiarubi bibahende mo ko hai hole ibugua Mosese ina ani bule pu lene. Anduane Homogonaga bi mana latagi haga maru tigua agalime nabiagane ale Mosesehanda binidaruni ale nabini. <sup>12</sup> Mosesehanda Isaraele wali agali bibahenderunaga deni howa biabe timbuni gibi biniru ale bi latagi haga maru henerume urunidagua mbira nabibeheore hene.

## Yosua

### Mbuga ogoha gilibu ngarunaga nemandi ogo

Yosuanaga mbugani lo ngagoni Isaraele wali agalime Kenana dindi ti karulalu wali agali ogoriani hene hearu bo pelenegonaga gilibu nga. Uruni binidaruni Mosese homayagola ha aribia hene Yosua ibugua haru halu heangi ani bini. Galone maru manda bayuwa bibehe lowigi bidaru uru -

Iba Yodana domeneru Yarigo dindi karuleneru Ai dindini wai biniru Habo Nalolene Bi Ngode Datagaliwabe ibu wali agali heba lowiniru loyane bialu mo hongo henegonaga lo nga.

Bi irane dunini mbira Yosuahanda lowinigo galone nga lo manda bibehego ogoria lo nga. Be 24.15 ... horo áyu ogoriani howa tini dabolene nga. Ibi inaga andagani karu hebabi iname Anduane Homogonaga mini mo dunini halu ibunaga biabe bialu holeberema, Yosuahanda lene.

#### **Bulu бага бува кuni gilibu ngago**

*1.1-12.24*

Wai bialu Kenana dindi karulenege *13.1-21.45*

Dindi tu howa taheneru ogodagua tu winigo

*13.1-33*

Iba Yodanani howa dindi ni ibiragohayagi winigo

*14.1-19.51*

Iba Yodanani howa dindi ni paliragohayagi winigo

*20.1-9*

Pora bialu puwa ha do holene tano winiru ogo

*21.1-45*

Libai hameiginirunaga tano winiru ogo *22.1-34*

Hameigini ni ibiragohayagi hole hayaru tini daluha dai binigo *23.1-16*

Yosua ibu homole howa paluni bi lenego *24.1-33*

Habo Nalolene Bi lowinigo dindi Segemeni loyane bialu mo gahenge hadai bialu mo hongo henego

*Ngode Datagaliwabehanda Yosuahondo lamialu, Kenana dindi karulabe, lenego ogo*

<sup>1</sup> Anduane Homogo ibunaga biabe biahaga Mosese homeagola ibugua Nunu igini Yosuahondo lalu, <sup>2</sup> Inaga biabe bia haga agali Mosese homayago. Ala ina dindi Isaraele wali agali tihondo ngulebero larugoria áyu ibi wali agali urunibi tigua Iba Yodana domalu anda pole manda manda bilimu. <sup>3</sup> Ina abale Mosesehondo lo winigodagua dindi tigua ge hai holeberemigo ina tí ngido.\* <sup>4</sup> Dindi tu au ngeledo. Dalu emene hangu ibagane wiagoha howa Hari Lebanononaga tu wulebira. Ni tagira ibiragoha iba timbuni mini Yuberedisi poragoria howa Hidialinaga dindibi ni paliragoria iba solowara Medidereniana tu wulebira. <sup>5</sup> Yosua-o í keangi agali bibahendeme í bope halu ti wayali nahabehe holebira. Ina Mosesela harudagua ilabi obiagonidagua dege holebero. Ina í yu wa naholebero.\* <sup>6</sup> Wali agali o karu ti mamaliruhondo dindi o ngago tí ngulebero lo wirugo iha howa mo mulebero. Wali agali dindi ogoniha karu bu helo ina haru halu í mini bilinahe howa miniha dungulo habe.\* <sup>7</sup> Ina mana lo wirugo inaga biabe biahaga Mosesehanda langiyagome lo wiadagua bibahende bialu maru pugulani hondowa habe. Ogoni hondowa nahende tingi howa gi tighayagibi gi lehayagibi handa ai nai buleni. Ani bialu kegola í kegohayagi bayale hangu hama polebere. Anigo ina mini bilinaheore howa miniha dungulo habe. <sup>8</sup> Mana lo wirugonaga mbuga ogoria lo ngagoniore mitangitangi bialu mbiragabi horombebi lo manda biaabo habe. Ani

\* **1:3:** Man 11.24-25    \* **1:5:** Man 31.6-8, Hi 13.5    \* **1:6:** Man 31.6-7, 31.23



buwa bibahende lo ngadagua biaiore hole bayuwa manda bibe. Anidagua biriyagua ina bule lowa mandabu keru biai halu bayaleore bima polebere.\* 9 Nalangiruyabe. I mini bilinahe howa miniha dungulo habe langirugo ndobe. Anduane Homogo inaga Ngode Datagaliwabe i kogo i poregoria i heba holeberogo gi nahe bu miniha au buledabe lo mandabi buleni, lalu lamini.

*Yosua ibugua au bimiya lalu wali agalibihondo te laminigo ogo*

10-11 Yosua ibugua wali agali haru haga haguane hearuhondo lamialu lalu, Wali agali kagoria purogo lowa lalu, Horo tebiru howa Anduane Homogo tinaga Ngode Datagaliwabe ibugua dindi ngule layago ngulebirago tigua Iba Yodana domole tomo manda manda buwa maliya, lamilimu, lene.

12 Ani lowa hameigini Lubenebi Gadabi hameigini Manase maru talebu howa ti-hondo Yosuahanda ogodagua lalu,\* 13 Ngode Datagaliwabenaga biabe biahaga agali Mosesehanda bi langiyago ogo, Dindi ogoni ti biralimulo Anduane Homogo tininaga Ngode Datagaliwabe ibugua ngiyadagoni, lenego bayuwa mitangi bilimu. 14 Ti onebi waneiginirubi bulumagarubi iba ange ni ibirahayagi ogoria heloleberemi. Tinaga wai biagane agali biarume ti hamene Isaraele hameigini o poraru biamogo bule tigua Iba Yodana ala domalu bamba holebira. 15 Tinaga Anduane Homogo Ngode Datagaliwabe ibugua ti dindi ni paliragohayagi biago mule layago milo. Mialu bayuwa ka handala tibi tini dindi Anduane Homogonaga biabe biahaga Mosese ibugua Iba Yodana ni tagira ibiragohayagi ngiyagoria hole dai bule, lalu Yosuahanda lene.

16 Ani layagola tigua Yosuahondo ladai bialu lalu, Iname ina bia larego bibahendeore biai holeberema. Ina pu laregohabi piyai holeberema. 17 Mosesenaga bi hale hari-madagua inaga bi laregobi hale holeberema. Anduane Homogo inaga Ngode Datagaliwabe ibugua Mosesela hayadagua ilabi ogonidagua helo. 18 Mbiralime i kalo manda nabiyaguabi inaga bi larego hale nahayaguabi bia larego nabiyaguabi ogonibigo ibu homelo bolebira. I mini bilinahe howa miniha dungulo habe, lalu lamini.

## 2

*Yosuahanda agali kira Yarigo dindi taya pudaba lenego ogo*

1 Nunu igini Yosuahanda Agasia howa agali kira dindi hondo wule pelo lowa lalu, Libugua Kenana dindi ohowa handama ibaga bule pialu dindi timbuni Yarigoore bayuwa hondowa bilibu, lene. Ani lamiyagola libugua pialu Yarigo tanoha pialu anda mbira heagoria anda pene. Anda ogoni bayanda wali mbira mini Lahaba ibunaga anda ogoriani libu anda pu palene.\* 2 Yarigo kini biago hale halu hearia Isaraele agali maru dindi hondo ibuwa mbiraga biago ibu ka layago hale hene. 3 Ani layago hale howa ibugua Lahaba berearia bi lawia halu lalu, Agali i andaga ebere biraruaru inanaga dindi bibahende hondo wule ibu kago haru halu ibabe, lalu lowia hene.

4-6 Lahabahanda agali kira biago labo bira do helowa lalu, Heneneore handarimida. Agali maru i andaga ogoria ibu ibinigo agoha howa ibiyabe i manda nabido. Alendo neha Yarigo tano pabe panga payulene tu hayagola tagira pialu piyago agohayagi piyabe i manda nabidogo. Ayu ogoore abale ge guariarimiyagua handa walia holeberemi, lene. Lahabahanda agali biagolabo anda daliga danginipayagi haru halu irigi howa aga wabiaga pu tondo ale mini palagasi gandulo winiyarume mo yihowa palia do helene. 7 Haibu ibiyago biarume agali biagolabo tali minule lowa abale Iba Yodana geme pahaga winiyago hendende abale pene. Pea tambu Yarigo tano panga payini.

8 Agali dindi taya bule ibiyago palia hondo nahe udu dangi biagoria berearia puwa Lahabahanda libuhondo lalu, 9 I manda bialu koria dindi ogo Anduane Homogohanda

\* 1:8: Iba 1.2-3 \* 1:12: Dag 32.28-32, Man 3.18-20, Yos 22.1-6 \* 2:1: Hi 11.31, Ya 2.25

tí ngingo. Wali agali bibahende dindi ogoria karume tí hondowa gi halu mogo timbuni lo ka. <sup>10</sup> Tígua Iyibi dindi yu wahalu ibirimigola Anduane Homogohanda solowara mini Iba Daramabi biago mo yo biyagola dindi hanguni ibirimiyarubi hale harima. Tígua Iba Yodana ni ibiragohayagi ibalu howa Amoroalinaga kini kira Sihonobi Ogabi bo waharimiyagobi hale harima.✧ <sup>11</sup> Hale howa inanaga gubaliniha gi halu mogo timbuniore lo kamagoni. Ani biyiyago Anduane Homogo inanaga Ngode Datagaliwabe biago dindihanagabi harihanagabi Ngode Datagaliwabe ibuniore ka, lene. <sup>12</sup> Ibugua lala, Ani biniyago áyu libugua bi heneneore mbira Anduane Homogo deni howa lala, Ina libuhondo bayuwa birudagua libuguabi i hameiginiru biamogo bule lala ladaba. Ani lowa ogonaga manane mbira i hondoliya waliaore hadaba. <sup>13</sup> I ababi i aiyabi mbalinirubi hagibunirubi ti heba karubi bibahende dindi ogo meramiangi bo wanahe biamogo bule lala ladaba, lene.

<sup>14</sup> Ani layagola agali biago libugua ladai bialu lala, Larabadagua nabiribayagua Ngode Datagaliwabe ibugua iyanaga holeneo yamilo. O berabago ina mbirali lamia nabiriyagua iyame inaga bi laregoore mo yuwa Anduane Homogo ibugua dindi ogo ina ngirangi tihondo bayuwaore buluma, lala lene.

<sup>15</sup> Lahaba ibu anda tanonaga tole pabe timbunini biniyago ibugua windoha pulimu ibira howa agali biagolabo pulimu biagoria yani halu dalialu tagira pelene. <sup>16</sup> Pole piyagola ibugua libuhondo lala, Libu haibu ibiyarume handa walia holigo harihayagi puwa horo tebira bira do halibu. Agali biaru dai biragola libu andaga pole, lene.

<sup>17</sup> Ani layagola agali biagolabo libugua Lahabahondo lala, Ina iyahondo bilibu larigoore embeda naholobago, lene. <sup>18</sup> Ina bulene mbira ogo wai anda ibalu dindi ogo meramangi pu daramabi ogo windo iya minupe haregoria pongu bupe habe. Ani bialu i ababi aiyabi hagibunibi mbalinirubi i aba damene bibahende anda ogoria mo ngoai habe. <sup>19</sup> Mbirali ogoniangi anda ogoria nabere tagira puwa homayagua tene iya ndo ibuni holebira. Tamu ogoria bedago mbiralime gi wiyagua tene iya holeberaba. <sup>20</sup> Ani anigo ina iyame bialu kabago mbirali lamiriyagua o iya buleberaba laribaruni bame holebira, lene. <sup>21</sup> Ani layagola wali biagome e lala, Pudaba, lene. Libu peagola ibugua pu daramabi biago windo biagoria pongu bupe hene.

<sup>22</sup> Dindi taya piaga agali biagolabo libugua puwa hariha bira do hene. Kini heagonaga agali biarume dindi bibahende wiagoaha horo tebira hai bini. Hai biyago naheya handala tigua Yarigo dai bini. <sup>23</sup> Ani bialu peagola agali kirali biagolabo bira do hayagoaha howa dalialu Iba Yodana ubade halu puwa Yosua hearia dai bini. Dai buwa o biyarubi handayarubi lamiai hene. <sup>24</sup> Ani lamuwa lala, Iyame manda bidabago Anduane Homogohanda dindi o handaribagoni bibahende ina nginiya. Wali agali bibahende hearume ina hondowa gi timbuniore halu heago, lene.

### 3

#### *Isaraele wali agali Iba Yodana domenego ogo*

<sup>1</sup> Egerebagiore hayagola Isaraele wali agali bibahende Yosua heba heyalu dindi Agasia anda bu harimigo yu wahalu Iba Yodana anghayagi pene. Puwa iba domole lala ogoriani balai anda buwa hondo hene. <sup>2</sup> Horo tebira peagola Isaraele wali agali haru haga haguane hearume wali agali balai anda bu heagoria purogo lowa <sup>3</sup> bi lamialu lala, Loma binigo mo miagarume tinaga Anduane Homogo Ngode Datagaliwabenaga Habo Nalolene Bi lowinigonaga Mbogoyi biago payani yalu porago hondowa balai anda gialo paulalu ti poradagua talima pilimu, lene. <sup>4</sup> Ti hariga ogoaha nahendene kamigonaga tigua walia holebira. Ani pialu howa Mbogoyi biago baba ti baba henge ge handari pira (100) kilomida mbira agima ngeloleberemi. Haparaore holemini, lene.

✧ 2:10: Har 14.21, Dag 21.21-35

<sup>5</sup> Yosua ibugua wali agali biaruhondo lalu, Yawi Anduane Homogo ibugua tíha howa agalime nabiagane ale bulebirago tíni áyu Ngode Datagaliwabe deni dodo nahe bayale holenaga mana ngadagua bilimu, lene. <sup>6</sup> Ani lowa Yosua ibugua loma binigo mo miaga biaruhondo lalu, Mbogoyi biago mo yalu bamba hadaba, lalu lamini. Ani layagola tigua Yosuahanda layadagua bini.

<sup>7</sup> Ani biyagola Anduane Homogohanda Yosuahondo lalu, Horo áyu ogoriani wali agali bibahendeme handai helo ina inaga mini mo yaraga holebero. Ani berogola tigua i Mosesela harudagua ilabi kadalo manda bulebira, lene. <sup>8</sup> Ina loma binigo mo miaga Mbogoyi biago yaga biaruhondo au labe. Iba angeni haparaore howa ema nabi Iba Yodanani hope howa halimu labe, lene.

<sup>9</sup> Ani layagola Yosuahanda wali agali hearuhondo lalu, Anduane Homogo tinaga Ngode Datagaliwabe ibugua bi larago hale hole ibidaba, lene. <sup>10</sup> Ani lowa ibugua lalu, Ngode Datagaliwabe haluhe haabo kago tí heba mandagi kamalo mitangi bilimulo ibugua tí biamogo biragola tigua Kenanalibi Hidialibi Hibialibi Peresealibi Giagasialibi Amoroalibi Yabusualibi hi nahe bo hilo batagi hai holeberemi. <sup>11</sup> Ani bialu dindi bibahendenaga Anduane Homogoibunaga Mbogoyi biago Iba Yodana hanunini yu bamba haragola tí de hondoleberemi. <sup>12</sup> Áyu agali homberiali (12) Isaraele hameigini homberia (12) biagoria howa dabadaba. <sup>13</sup> Ani bialu loma binigo mo miaga biaru tigua ibani ge hade halu dindi bibahendenaga Anduane Homogoibunaga Mbogoyi biago yalu poragola Iba Yodana gandula udu nunu biragola ibalu hari waradagua bulebira, lene.\*

<sup>14-15</sup> Balawa wabiaga widi balila gandu lolene tu heangi Iba Yodana li timbuniore wiaga.

Ogoningi wali agali poledagua hoba migimigi bialu hea tambu loma binigo mo miaga biaru tigua Mbogoyi biago yalu bamba hene. Ani bu wiago loma binigo mo miaga biarume Mbogoyi biago yuwa ge Iba Yodanani hayagola <sup>16</sup> iba o ibiyagoni pu nabi hundiape hene. Udura irigi howa dindi mini Adama wiagoria Saredana dindi hapara howa ogoriani iba biago biru haealadaga hene. Erenhayagi iba mini Homene Iba pole piyago yoabu wahayagola wali agali biaru ti Yarigo handa ai howa dege ubadede bini. <sup>17</sup> Wali agali biaru ibalu piyago piai helo lowa loma binigo mo miaga biaru tigua Mbogoyi biago yuwa Iba Yodana hanunini iba yoabu wahowa dindi hangu wiagoria hondo hene.

## 4

### *Mo mitangi bia ho wiaabo holene ege tole mo winigo ogo*

<sup>1</sup> Wali agali Isaraele hameigini biaru bibahende Iba Yodana domai hayagola Anduane Homogohanda Yosuahondo lalu, <sup>2</sup> Agali homberiali (12) hameigini homberia (12) biagoha howa dababe. <sup>3</sup> Dabowa au bidaba labe. Loma binigo mo miaga biaru hene muguni biagoria howa ege tole homberia (12) payani mo yalimu. Yalu puwa áyu mbiraga paleremigoria ngelalimu labe, lalu lene.

<sup>4</sup> Ani layagola agali homberiali (12) Yosua ibugua biabe ogoni bilo dabo helene biaru, Ibidaba, <sup>5</sup> lowa tihondo lalu, Anduane Homogo inanaga Ngode Datagaliwabenaga Habo Nalolene Bi lowinigonaga Mbogoyi yu kagoria emene puamu howa ege tole homane mbira mbira tí Isaraele hameigini ta howa dugu payani yalimu, lene. <sup>6</sup> Ege tole urunime tigua mani Anduane Homogo ibugua biyago mo mitangi bia helo. Mani tí waneiginirume, Ege tole uruni aginaga winibe, laragola\* <sup>7</sup> tigua ladai bialu lalu, Anduane Homogonaga Mbogoyi biago yalu Iba Yodana domayagola iba biago bira migimigi binigonaga lamilimu. Ege tole uruni ogoria wiaabo howa Isaraele wali agali mani hararu mo mitangi bia ho wiaabo helo wulebira, loleberemi, lene.

\* 3:13: Har 14.22, 14.29, 15.8    \* 4:6: Har 12.26, Man 6.20, Iba 44.1

<sup>8</sup> Agali biarume Yosuahanda layadagua bini. Anduane Homogo ibugua Yosuahondo bi lamiyadagua bialu tigua tole homberia (12) Iba Yodana hanuni wiaru Isaraele hameigini tara tara hayadagua hangu hangu ta howa dugualu payani yalu puwa tini balai anda bu paliyagoriani ngelene. <sup>9</sup> Yosuahanda tole homberia (12) mende yalu puwa iba hanunini loma binigo mo miaga biarume Mbogoyi biago yu hayagoria ngelene. Ege tole odaruni áyu ogoriani wia ho wiaabo ka. <sup>10</sup> Anduane Homogohanda wali agalime bilonaga Yosuahondo lamiyadagua biai helo lowa loma binigo mo miaga biaru tigua Iba Yodana hanunini haho wiaabo hene. Mosese ibugua ala anidagua bilimu lalu lowinigo layadagua bini.

Wali agali biaru tigua Iba Yodana abale ubade haga bini. <sup>11</sup> Wali agali bibahende dindi edeyagi piai heagola loma binigo mo miaga biarume Anduane Homogonaga Mbogoyi biago yalu ti bamba halu pene. <sup>12</sup> Lubene hameiginirubi Gada hameiginirubi Manase hameiginiru hanuni talebu ki bini biaru mendegome Mosesehanda bilimu layadagua wai biagane ale taba yalu tigua ala bamba halu pene. <sup>13</sup> Agali daosini pira maria (40,000) agima wai biagane wiyaru ale taba yalu Anduane Homogonaga deni Iba Yodana domalu Yarigo tano yu palepale wiagoria kululape hene. <sup>14</sup> Horo ogoniangi Anduane Homogohanda galone o binidarume Yosuanaga mini Isaraele wali agali hearu deni mo yaraga hene. Ani bialu Mosesenaga mini yaraga haabo hayadagua Isaraele wali agalime Yosua heangiibunaga mini yaraga haabo hene.

<sup>15-16</sup> Ani buwa Anduane Homogohanda Yosuahondo lamialu lalu, Loma binigo mo miaga biaruhondo Mbogoyi biago Iba Yodana hanuni howa yalu irigi hadaba la, lalu lamini. <sup>17</sup> Ani layadagua Yosuahanda ani lamini. <sup>18</sup> Ani lamiya handala loma binigo mo miaga tigua irigi halu ibiyagola iba li timbuni abale piyadagua lone pene.

<sup>19</sup> Ege mbiranaga horo pini layagola Isaraele wali agali biarume Iba Yodana domene. Domalu puwa tigua dindi mini Giligalani Yarigo kaware howa ni ibiragohayagi balai anda bu hene. <sup>20</sup> Ogoriani Yosuahanda tole homberia (12) Iba Yodana howa duguayayaru mo mogo buwa wima irigi hene. <sup>21</sup> Ibugua Isaraele wali agalihondo lamialu lalu, Mani tí waneiginirume ogo aginaga bu ngamibe layagua <sup>22</sup> tigua Isaraele wali agalime Iba Yodana yoabu wahowa dindi dege wiagola ubade halu penegonaga te lalimu, lalu lamini. <sup>23</sup> Lamialu lalu, Anduane Homogo tinaga Ngode Datagaliwabehanda Iba Yodana yoabu wa helowa tí bibahende iba domai hemigola pene biadagua piyaru te lalimu. Ibugua solowara mini Iba Daramabi ina ibirimagola biyadagua bini lalimu. <sup>24</sup> Ani biyago hale howa wali agali dindi bibahendeni karume Anduane Homogonaga hongo timbuniore ogobida lowa manda biai holebira. Ani biragola tiguabi Anduane Homogonaga mini mo yaraga halu haho wiaabo holeberami, lalu lamini.

## 5

<sup>1</sup> Amoroalinaga kini Iba Yodana ni paliragohayagi henerubi Kenanalinaga kini iba solowara mini Medidereniana hapara ho henerubi tigua Anduane Homogohanda Isaraele wali agali Iba Yodana domalu pelonaga iba biago mo hundia haya layago hale howabi Isaraele wali agali hondowabi tinaga gubaliniha gi timbuni halu mogo lowa durulalu hene.

### *Giligala dindini dongone podo mabu biagane mana binigo ogo*

<sup>2</sup> Ogoningi Anduane Homogohanda Yosuahondo lalu, Ina are neheme Isaraele agalinaga dongone podo mabu bule manda bibe, lene. <sup>3</sup> Ani layagola Yosuahanda are neheme Isaraele agali bibahende dongone podo mabu bini. Hari odago mini Hari Dongone Podene lalu wini. <sup>4-6</sup> Yosua ibugua agali biarunaga dongone podo mabu binidaruni irane manda ogobi buwa bini. Iyibi dindi yu wahalu ibiyaru agali igiribi bibahende dongone podo mabu biai hene. Ani binigo mani Isaraele wali agali biaru ti dalu emene hangu ibagane wiagoria ibaga bu hearia mali pira maria (40) henego

ogoningi igiri hono wiyaru bibahende dongone podo mabu nabi hene. Mali uruni piai heangi agali wai bibehe hayaru Anduane Homogohanda layadagua nabiyagola homai hene. Anduane Homogo ibugua bi ala lowinigo ogo, Tí dindi bayaore gibi ngulebero larugo nahendedemiore homoleberemi, lo winidagua ani bini.✧ <sup>7</sup> Anigo agali homayaru igini ho aribia hayaruni ti dongone podo mabu nabiyagola bi lo winidagua hendelo lowa igini o biaru podo mabu bini.

<sup>8</sup> Isaraele hameigini biaru dongone podo mabu biai howa helayaru dere biyaru dabi helo lowa balai anda bu hayagoria hadai bialu hondo hene. <sup>9</sup> Ani biaria Anduane Homogohanda Yosuahondo lalu, Tí Iyibi dindi howa garabaya biabe ale bia halu howa tagaho harimigo horo áyu ogoni ina mo waharogoni, lalu lene. Dindi o binidagoni mini Giligala wini. Mini ogoni áyubi wiaabo ka.

<sup>10</sup> Isaraele wali agali Giligala dindi palepale wiagoria balai anda bu hayagoni Yarigo dindi hapara hearia Bolangua Halu Penego Horo mitangi bialu ogonaga tomo ege o biagoninaga horo denengi (14) nelayagola howa nene.✧ <sup>11</sup> Egerebalene tigua tomo Kenana dindini wini pigane ogoningi ladi ale mini widi hirinibi mberedi yidi nahe howa hirinibi nene. <sup>12</sup> Horo ogoningi howa tomo mini mena hariha howa ala ibira haabo hayago ibira nahe Isaraele wali agali tigua tomo Kenana dindini wiaru nene.✧

### *Yosuabi agali mbira wai biagane ayu tibu yu henegobi ngola henego ogo*

<sup>13</sup> Yosua ibugua Yarigo hapara howa handalu hearia agali mbira wai biagane ayu tibu gime yu howa ibu denguni ha daga hearia de hendene. Ani hondowa Yosua ibugua agali biago hearia hapara howa lalu, Í inanaga wai biaga amiali biaru aria mbira kebe be waitigi agali kebe, lene.✧

<sup>14</sup> Ani layagola agali biago ibugua ladai bialu lalu, Hale harigoni kirabali ndo labo-labo. Anduane Homogonaga ami karunaga haru bamba hagane agali í ko, lene.

Ani layago hale howa Yosua ibugua dindini bulu palu ibira howa agali biagohondo lotu lalu howa lalu, Anduane-o í ínaga biabe bia hagane agali kogo ina agi buliya hameledebe, lene.

<sup>15</sup> Ani layagola Anduane Homogonaga ami karunaga haru hagane biago ibugua Yosuahondo lalu, Dindi o kegoni Anduane Homogo ibunaga dindi loma bia ho winini kego ge su golo ngela, lene. Ani layagola Yosua ibugua layadagua bini.

## 6

### *Yarigo tano podo haealo bagabu ibira henego ogo*

<sup>1</sup> Isaraele wali agali biaru wara tagi hole lowa Yarigo tano pabe bu mabu bu wiagoria pabe panga paya tagi howa mamage ho hene. Ani biyagola Yarigo tanohayagi howa wali agalime anda pubi tagira íbubi bibe nahe wini. <sup>2</sup> Ani bu wiagola Anduane Homogohanda Yosuahondo lalu, Ina Yarigo wali agalinaga kini heba wai biagane agali gi nahe elaha karu bibahende ínaga gini ya harogoni, lene. <sup>3</sup> Ínaga wai biagane karu heba íni heba tigua Yarigo tano horo mbiru tidiyu mabu bilimu. Ogonidagua horo waragaru dege bilimu. <sup>4</sup> Loma binigo mo miaga kariali mbelo biguli pu lagane nogo sibi wangabenaga ne gayane biaru yagayaga bialu tigua Habo Nalolene Bi lo winigonaga Mbogoyi biago yalu poragoria bamba halu pelo ani pudaba labe. Horo kanengi íbi ínaga wai biagane ami hayarubi heba loma binigo mo miaga biaru tigua tinaga mbelo biguli pu lagane biaru pu lama ka halu mabu bilo ani bidaba labe. <sup>5</sup> Ani bidagola mbelo biguli pu lagane biaru tigua ne hambu lo mbiraore howa halu mbiraore hangu luore pu la ho wiaabo helo. Ani biragola hale howa agalime ga timbuni hongo howa lagimbu bidaba labe. Ani beramigola Yarigonaga pabe bu mabu bu ngagoni podo haealo bagabu ibira holebira.

✧ 5:4-6: Dag 14.28-35 ✧ 5:10: Har 12.1-13 ✧ 5:12: Har 16.35 ✧ 5:13: Pig 18.2, Har 3.5, 23.23, Ab 1.10, 7.33



Ani birangi wai biaga amiali bibahende biaru tígua anda piai holebermi, lalu Ngode Datagaliwabehanda Yosuahondo lamini.

<sup>6</sup> Ani layagola Yosua ibugua loma binigo mo miaga biaru ibidaba lowa lalu, Tígua Anduane Homogonaga Mbogoyi biago payani yalu tí karialime mbelo biguli pu lagane biaru mo yalu bolangua halu bamba halimu, lene. <sup>7</sup> Ani lowa ibugua wali agali hearuhondo lalu, Tí bibahende Yarigo tano pabeha pu mabu bule pudaba. Wai biaga ami agali maru tígua ala Anduane Homogonaga Mbogoyi biago yidago bamba halu pudaba, lalu lene.

<sup>8-9</sup> Yosuahanda, Bilimu, layadagua bialu ami agali maru biaru tigua ala bamba halu pene. Ani buwa loma binigo mo miaga mbelo biguli pu lagane biaru tigua dombeneni pialu loma binigo mo miaga maru Mbogoyi biago yalu uruni peagola erembirani amiali maru biaru ti haruru pene. O piyadagoni pialu howa mbelo biguli pu lama pene. <sup>10</sup> Yosua ibugua o piyadaruni ti ala lamialu lalu, Wai mambolo bulamini bibi lolemini. Ina bi lalu ladaba larongi dege lole, ani lalu lamini. <sup>11</sup> Ani lowa ibugua loma binigo mo miaga agali wabuni biaruhondo lalu, Anduane Homogonaga Mbogoyi biago yalu tano pabeha halu mbira pu mabu bidaba, lalu lamini. Ani layadagua buwa tigua wali agali bibahende paleagoria palue dai bini.

<sup>12-13</sup> Egerebagiore hayagola Yosua ibu heyalu loma binigo mo miaga biarubi wai biaga ami agali maru biarubi horo piganengi biyadagua dege pu mabu bialu dai bini. Ani peagola ala wai biaga agali ti bamba halu pialu loma binigo mo miaga kariali mbelo biguli pu lagane biaru ti mbelo pu lama pialu loma binigo mo miaga marume Anduane Homogonaga Mbogoyi biago mo yalu uruni ti bamba halu peagola ere mbirani wai biaga ami agali maru biaru tigua mama haruru pene. Ti bibahende ani pu mabu bialu hearia mbelo biguli biaru pu laabo halu pene. <sup>14</sup> Horo mendengi halu mbira hangu pu mabu bialu dai bini. Horo waragaru ogonidagua biaabo hene.

<sup>15</sup> Horo kane hayagola tigua muna biyagola heyini. Ani buwa tigua pu mabu ala biyadagua horo ogoningi dege ka halu pu mabu bini. <sup>16</sup> Ani piai howa kane haluore pu maro bialu loma binigo mo miaga kariali biarume mbelo biguli leagola Yosuahanda agali hearuhondo lamialu lalu, Anduane Homogo ibugua dindi timbuni ogo tí nginigo wai mambolo balu bi dalimuore ladaba. <sup>17</sup> Dindi ogoniha ngagoni damenego Anduane Homogo ibuhondo loma bia haradagua beremago bibahende bo hilu wahai hamiya. Lahaba ibugua inanaga agali kira taya piyago labo ibu andaga bira do helayiyagonaga ibubi ibu damenerubi ti hangu nabamiya. <sup>18</sup> Bo hilu бага bu wahabehe ngago mbira mo yulamini. Mo yarimiyagua Isaraele wali agali kagoria ko mo yu anda ibalu mo ko holene wulebira. <sup>19</sup> Anigo silibamebi ngolomebi boronosimebi aeanemebi wabiniru bibahende Anduane Homogo ibunaga lowa mo bagi ho wilimu. O biaruni ibunaga muni wiaga wiagoha mo wulene nga, lalu lene.

<sup>20</sup> Ani lai heagola loma binigo mo miaga mbelo biguli pu laga biarume biguli pu lalu hene. Mbelo biguli pu layuago hale howa agali wai mambolo hongo howaore balu bi dalimu layagola tole pabe timbuni biagoni podo haealo bagabu ibira hene. Ani biyagola wai biaga ami biarume handayago hondo yalu dindi anda puwa bareni irigi halu tigua Yarigo tano karulene. <sup>21</sup> Karulalu howa tigua wai biaga ayu tibume bibahende hearu bo wahai hene. Wali agali wahebi daliahebi nogo bulumagabi sibibi dongibi bibahende bo hilo wahai hene.

<sup>22</sup> Ani biyagola Yosuahanda agali kira ala taya piyago labohondo lalu, Bayanda wali biago andaga puwa ibunibi ibunaga damene anda ogoriani bedarubi bibahende buleberaba laribidagua haru halu tagira ibule pudaba, lalu lamini. <sup>23</sup> Ani layagola agali kira biagolabo libugua Lahaba andaga puwa ibubi ibu ababi aiyabi mbalinibi ibunaga damenebi biabe bia hagabi ti bibahende haru halu tagira puwa Isaraele wali

☆ 6:20: Hi 11.30

agali balai anda bu paleagoha ha para howa haru íbu helene. <sup>24</sup> Ani buwa tigua dindi timbuni o biagoni ira hedope howa do gindulo wahene. Mbirale ngolomebi silibamebi boronosimebi aeanemebi wabiniru dege dabo yuwa Anduane Homogoibuninaga muni wiaga wiagoha ngelene. <sup>25</sup> Bayanda wali Lahaba ibugua ala agali kira Yosuahanda, Yarigo dindi taya pudaba, layago labo ibu andaga bira do helayagonaga Yosuahanda ibubi ibu damenerubi bibahende biamogo bialu nabe helene. Ani biyagola howa Lahabanaga aguaneneru ti Isaraele dindini áyu ogoingi haabo ka.✧

<sup>26</sup> Horo ogoingi Yosua ibugua bi hongohe mbira lo wialu lalu, Wali agali mbiralime Yarigo tano timbuni ogo lone bia dai bule manda biyagua ogoni ibu Ngode Datagaliwabenaga ha holene heba holebira, lowa lalu,✧

Mbiralime anda gene pigane tenialu kago

ibu igini wahene homolebira.

Mbiralime dindi pabe ogonaga panga bia dai birago

ibu igini heyogone homolebira,

lalu lene.

<sup>27</sup> Ani binigo Anduane Homogo ibugua Yosuala haabo halu ibunaga mini dindi bibahende wiagoniha loyogo lene.

## 7

### *Aganahanda Anduane Homogonaga bi mo wahenego ogo*

<sup>1</sup> Anduane Homogohanda Isaraele wali agalihondo Yarigo dindini mbirale mbira mo yulamini lalu mana lamiyago puguini. Agali mbira mini Agana ibugua mbirale mo yulamini layaru mo yayagome Anduane Homogonaga lembo holene Isaraele wali agali heba helene. Agana ibu aba Kami ibu aguane Sabadi hene. Yuda hameigini mbira Seraha heneru ti ibu hameigini hene.

<sup>2</sup> Yosua ibugua agali maru Yarigo howa tano mbira mini Ai pudaba lene. Ai tano ogoni Bedele tano howa ni ibiragohayagi Bedabene tano wiago kaware ha para ho wini. Anigo Yosua ibugua, Tano ogoni abidabe hondole taya pudaba, lene. Ani layadagua <sup>3</sup> tigua pialu dai buwa lalu, Ai tano timbuniore ndogo bibahendeme polene nakarulapego agali daosini kirabi (2,000) tebirabi (3,000) dege pela, lalu Yosuahondo lamini. <sup>4</sup> Ani layagola agali daosini tebira (3,000) agimame hangu Ai wali agali bole pene. Pu piyagoyu babe naheya handala pora bialu dai biai hene. <sup>5</sup> Ani biyagola Ai agali biarume dindi pabe weagoria howa Isaraele agali bama talima pialu dindi anda bule ege tole duguagaha bama puabo hene. Ani puwa tigua Isaraele agali bare mbirani dalialu hearia pira tebirani waragaria (36) agima bo wahene. Ani biyagome Isaraele agalinaga turu holene biba howa ti gi timbuni ho hene.

<sup>6</sup> Yosua halu hameigini hangu hangu haru hagane haguane biarume miniha genda timbuni howa aga bu hemiruni budubaga bialu danga duguwa haguane hirai hene. Ani buwa tigua wanakui dindiha yadindi howa bulu paluwa Anduane Homogonaga Mbogoyi biago wiagoria bialu nelene. <sup>7</sup> Ani buwa Yosuahanda lalu, Anduane Homogo Bibahende Haru Haame Ho Haga kego-o ína ina Iba Yodana domalu dindi ogoria aginaga haru halu ibiribe. Ína Amoroali karume ina bo wahelonaga haru halu ibiribe. Ina kamaru karulape Yodana iba ange edeyagi harimago ína helowa naharigo aginagabe. <sup>8</sup> Anduane Homogo-o Isaraele agali biarume ala nabinidagua mbira áyu gi howa pora bialu dai biyadagola bi agobi loabe toba halu tai bidogo. <sup>9</sup> Kenanalibi hameigini maru karubi ti bibahendeoreme ogobi biya lalu hale hai holebira. Hale howa tigua ina bibahende ho mabu bupe howa bo hilo wahai howa inanaga mini dindi ogoria nawulubada. Ani bulubadagonigo ína Ngode Datagaliwabe hongo ogobi ko lalu walia

✧ 6:25: Hi 11.31 ✧ 6:26: 1 Kin 16.34

harigo hondowa dege bulubadago inaga mini hongohwe wiaabo helo agua buleberebe, lene.\*

<sup>10</sup> Ani layagola Anduane Homogohanda Yosuahondo hongo howa lalu, I ogoria aginaga dindini bulu palu ngebe. Heya. <sup>11</sup> Isaraele wali agalime koore biyagoni. Ina ti ko bulumini larugo birimida. Bibahende ngago bo hilubaga bilimu larugodagua ndo tigua page bialu ke halu mbirale biaru maru muwa tininaga baba mandagi wia tago howa nga. <sup>12</sup> Ogonibi biyagome Isaraele wali agali tigua tinaga waitigi baba wai nabibehe hayagoni. Tigua waitigi biaru hondowa pora bialu dai biyagoni irane ti tini bo hilubagabu waholene ale ka. Mbirale bibahende bo hilubagabu wahalimu larugo mo ngamigo odaruni muwa haeala bagabu wanaharimiyagua inabi ti baba mandagi naholebero, lene. <sup>13</sup> Ibugua hongo howa lalu, Heya. Wali agali bibahende ko ngaru mo wahalu yawi i deni holenaga manda manda bilimu. Anduane Homogo Isaraelenaga Ngode Datagaliwabe ina ti bibahendehondo bi ogobi lolenaga o larodagua lamiai habe. Tihondo ina bi ogobi lalu, Ti marume mbirale tara tara bo hilubagabu wahalimu larugo mo yu ibu ngamigoni. Anigo mbirale uruni mo wanaharimiyagua waitigi baba wai bialu ti hongo nahe howa wayali nahabehe holeberemi. <sup>14</sup> Egerebagi haragola hameigini hangu hangu haru ibugu bilimu. Ani bialu ina hameigini ogoha ko nga larogo ibu hameigini emene ogoniha hayadagua ibugu bilo. Ani biragola ina hameigini emene ogoniha ko nga larogo ibu aba aiyaba baba libunaga waneigini baba hangu hangu ibugu bilo. Ani biragola ina aba aiyabi waneiginibi uruni tiha ko nga larogo ibu agali hangu hangu ibugu bilo. <sup>15</sup> Agali ogoha ko nga lalu handa walia harago agali ogoni ibugua mbirale namo yalimu larugo ale maru ibu mo yalu ibu wiyagome inaga Habo Nalolene Bi ti baba lo wirugo habo layadagonaga ibu irani bo delolene nga. Ibugua mana ogonibi biyagome Isaraele wali agali heagoria taga bini ale mbira yu anda ibiyada, laya lalu lamiai habe, lalu Anduane Homogohanda ani lene.

<sup>16</sup> Egerebagi hayagola Yosuahanda Isaraele wali agali hameigini biaru bibahende hangu hangu haru ibugu bini. Ani buwa Yuda hameiginiha ko nga lalu Yuda hameigini daba ai hene. <sup>17</sup> Ani buwa Yuda hameiginiha howaibunaga hameigini emene bibahende hangu hangu haru ibugu bini. Ani buwa hameigini emene Seraha ko nga lalu daba ai hene. Sera hameigini daba ai hayagola Yosua ibugua hameigini ogoni aria biaru ababi aiyabi waneiginibi hangu hangu haru ibugu bini. Ani haru ibugu biyagoria Sabadi ababi aiyabi waneiginibi daba ai hene. <sup>18</sup> Ani daba ai hayagola ibugua Sabadi ababi aiyabi waneiginibi hangu hangu haru ibugu bini. Ani haru ibugu biyagola Kami igini Sabadi aguane Agana daba bagi hene. <sup>19</sup> Ani biyagola Yosuahanda Aganahondo lalu, I igini-o Anduane Homogo Isaraelenaga Ngode Datagaliwabe deni howa henene tigatiga biridadaguaore lapani ha. Maru ya do holeni biridadagua tigatiga langiai ha, lene.

<sup>20</sup> Ani layagola Aganahanda ladai bialu lalu, Heneneore larigoni. Ina Anduane Homogo Isaraelenaga Ngode Datagaliwabehanda bi layago hale howa mo waharu. Ina agua biru. <sup>21</sup> Bo hilubaga birimago bialu howa handalu hewaria aga baya de mborerebiore Babilono dindi tawe mbira wiaria handaru. Siliba genda magini kilogarama kira agima polene wiagobi ngolo maru genda magini emene gombdene hangu pobehe wiagobi handaru. Hondowa i hame timbuni layagola mo yaru. Odaruni ayu inaga balai anda tamuha hora ko. Siliba biago dindiha ngo, lalu lamini.

<sup>22</sup> Ani layagola Yosuahanda, Agali maru hondo pudaba, layagola uruni tigua gerai lalu puwa handalu hearia mbirale bo haealobaga bilimu layaru aria o layadagua siliba dindiha wiaria handa walia hene. <sup>23</sup> Handa walia howa tigua mo yalu Yosua heba Isaraele wali agali bibahende biaru heagoria yalu ibuwa Anduane Homogonaga deni ibira howa ngelene. <sup>24</sup> Ani biyagola Yosubi Isaraele wali agali biarubi bibahendeme

\* 7:9: Har 32.12, Man 9.28

Agana minini. Siliba biarubi aga bayale biarubi ngolo gaibu mini biarubi Agana waneiginirubi nogo bulumagarubi dongirubi sibirubi ibunaga balai andabi Agananaga wiaru damene bibahende tigua dindi mini Genda Biaga Guane wiagoria mo yi haruha bialu pene. <sup>25</sup> Dindi ogoriani odo howa Yosua ibugua hongo howa Aganahondo lalu, Ína ina hemagoria ko haru anda ibirigo Anduane Homogo ibuguabi íni ko haru anda ibulebira, lene. Ani layagola bu heago bibahendeme Agana toleme bene. Ibugua onene waneiginibi toleme balu dabudabu wiaru heba ibuni heba irani balu delai hene. <sup>26</sup> Ani buwa tigua tole dewa mo yu ngoai howa o biaru bibahende yi hene. Toledaruni dindi odagoria áyu ogoningi wia ho wiaabobo nga. Irane o binidagome dindi ogoni mini Genda Biaga Guane wini.

Ani biai hayagola Anduane Homogohanda lembo ala hayago hadene.

## 8

### *Ai tano wiago bole wai henego ogo*

<sup>1</sup> Anduane Homogohanda Yosuahondo lamialu lalu, Ína gi nahe gendabi nahabe. Ai dindinaga kini kagobi ibunaga wali agali karubi dindi timbuni wiagobi uruni bibahende tínaga holebira. Ina áyu tí mo wayali heloleberogo tínaga wai biaga ami agaliru heba Ai irigi halu pilimu. <sup>2</sup> Ala Yarigobi Yarigonaga kini henegobi barimidagua dege Ai boleberami. Anigo Ai bo waharimingi dabudabu ngaru tíninaga hole mo yalimu. Tinaga nogo bulumagabi nogo tara tarabi ogoriani karu bibahende tínaga hole haru halimu. Tigua erembirahayagi mo mogola howa bole manda manda bu halimu, lalu lamini.

<sup>3</sup> Ani layagola Yosua ibugua Aiali bole ibunaga wai biaga ami agali bibahende hearu haru halu bo pole lo manda manda bini. Ibugua wai biaga moneheru dununiru hondowa daosini pira tebira (30,000) daba bagiho helowa mbiraga, <sup>4</sup> Pudaba, lowa wai hono mialu, Dindi timbuni ogoninaga abene ede ni paliragohayagi puwa bira do halimu. Kaundia puabo holemini porabu anda halu bole manda manda bu halimu. <sup>5</sup> Agali j heba eberamaru iname Aialime hendelo manda buwa hapara holeberema. Ani beremagola Aiali biaru tigua ina hondowa bole tagira ibulebira. Ibiragola iname gihe tingi howa ala pora bialu pirimadagua pora bialu poloma. <sup>6</sup> Tigua manda bialu karia ina ala pora bialu pirimadagua pora lowa bole talima ibulebira. Iname tini tano yu wahalu tagira ibilo manda buwa ale haru halu polomago <sup>7</sup> tigua tano ogoni mialu karulole ibalimu. Anduane Homogo tínaga Ngode Datagaliwabe ibugua tano tí karulalimulo ngulebira. <sup>8</sup> Tigua tano ogoni bibahendeore miai howa Anduane Homogohanda layadagua bo heda halimu. Tigua ogonidagua bilimulo o larogoni, Yosuahanda lai hene. <sup>9</sup> Ibugua ani layagola agali biaru tigua Ainaga erembiraha ni paliragohayagi Bedelela Aila hengebanegoha bira do hole pene. Yosua ibu mbiraga hayagola Isaraele wali agali baba mandagi palu hene.

<sup>10</sup> Egerebagiha Yosuahanda heyalu ami agali biaru olo ngoai halu ha hendene. Ani buwa Yosua Isaraele hameigini haru haga haguane biaru heba tigua ami agali biaru haru halu Ai pole pene. <sup>11</sup> Tigua Ai dindi anda pole peagoriani puwa tigua Ai dindinaga uyurahayagi pu hene. Ani buwa ti baba dombeneni dindi buguni yu dindi wu yalu pelowa hene. <sup>12</sup> Yosuahanda agali biaru aria daosini duria (5,000) tale buwa Ainaga ni paliragohayagi Bedelela hengebanegoha bira do helene. <sup>13</sup> Wai biaga ami agali biaru dewa bayuwa mo tiga bu wahowa Ai dindinaga uyurahayagi berelene. Ani buwa agali maru ni paliragohayagi berelene. Yosua ibuni dindi buguni biagoha palima dai bini. <sup>14</sup> Ainaga kini biagome Yosuanaga agali hearu hondowa ibuguabi ibunaga agalirubi abaleore tagira pialu Yodana dindi buguni puamu halu wai bule tagira pene. Dindi ogoni wai abale bialu Isaraele agali hayagoria dege wai bule penego ibugua Yosuahanda agali erembiraha howa belo wai hono bereleago nahende pene. <sup>15</sup> Yosua

halu Isaraele agali biaru ke howa pora bialu petingi howa dindi ko wali agali nahagaha pene. <sup>16</sup> Aialinaga haru haga hearume tinaga wai biaga agali biaru olo ngoai halu Isaraele agali biaru piyadagua bama talima, Maliya ibidaba, lene. Isaraele agali biaru tigua Aiali biaru haru halu tininaga tano biago yu wahalu Isaraele agali biarume haru halu pu wahene. <sup>17</sup> Ai agali hearu bibahende Isaraele agali biaru talima peagola Ai tano biagonaga panga dugu paya buwa wiagola mamage holene agali mbira naheore wini.

<sup>18</sup> Ani bu wiagola Anduane Homogohanda Yosuahondo lalu, Inaga yandare yidegoni Ai dindihayagi nguni yadeha. Tano ogoni áyu í ngero, lene. Ani layagola Yosua ibugua bia layadagua bini. <sup>19</sup> Ibugua yandare biago yaraga hayagola agali bira do hayarume abale tagira ibalu Ai tano wiagoniha anda puwa karulalu delene. <sup>20</sup> Aiali wai biaga biaru handadai bialu hearia hagua timbuni mbira udu harini irigi hayane hendene. Isaraeleali tigua pora bialu petingi hayarume Aiali biaru baba wai bule handadai biyagola tigua pora bialu polene hariga nawiyane hendene. <sup>21</sup> Yosubi agali ibu heba hearubi tigua Ai tano biago agali bira do helayarume delayago hondowa tiguabi pora bialu pole tingi howa piyarume beregeda dai biyagola Aiali wai biaga o ibiyaru bo wahai hole bene. <sup>22</sup> Isaraeleali ala Ai tano delalu hayarume dalipe howa agali Yosua heba hayaru baba Aiali biaru homabu bupe howa bibahende bo wahai hene. <sup>23</sup> Ai tanonaga kini biago hangu gime minuwa Yosua hearia minu yalu pene.

<sup>24</sup> Isaraeleali biarume dindi ko wali agali nahaga wiagoria Aiali pora bialu pu hearu bibahende bo wahai hene. Ani bialu tigua Ai tano biagoria dai buwa wali agali dindi ogoriani hearu bibahende bo wahai hene. <sup>25-26</sup> Yosuahanda yandare biago yupe nahe dindi ogoriani hearu bibahende bo wahai hene. Horo ogoningi wali agali daosini homberia (12,000) bibahende bai hene. <sup>27</sup> Isaraeleali biaru tigua Anduane Homogo ibugua layadagua nogo bulumagabi nogo tara tarabi dabudabubi ti hole mo yalimu layadagua mo yini. <sup>28</sup> Yosubi ibunaga agali biarubi tigua Ai bo heda hene. Bo heda henedagoni muguni áyubi wiaabo ka. <sup>29</sup> Yosua ibugua Aialinaga kini biago irani mo eanogo da howa wialu nelene. Ni paliyagola Yosuahanda layadagua tigua ibunaga tingini irani mo eanogo da ho ngelayago mo yu daluwa Ai hariga anda pugu bulene biagoria yalu puwa ngelene. Ani buwa tigua tole timbuni dewa wiaru duguwa yi hene. Tole winidaruni áyubi wiaho nga.

### *Hari Ebalani Anduane Homogonaga Mana lowinigo daga loyane binigo ogo*

<sup>30</sup> Ani buwa Yosua ibugua mbirale bo lomabu delaga dabu mbira Anduane Homogo Isaraele wali agalinaga Ngode Datagaliwabhendo bini. ✧ <sup>31</sup> Ala Anduane Homogonaga biabe bia haga Mosese ibugua Isaraele wali agalihondo bilimu lalu lo winiyadagua Yosuahanda ani bini. Mosesehanda Mana lowinigo ogo, Mbirale bo lomabu delaga dabu mbira ege toleme wabilimu. Tole uruni aeaneme podenego ndo homane mbira mbirame wabilimu, lowinigo wiadagua bini. Ani buwa Isaraele wali agalime dabu o biagoriani Anduane Homogohondo mbirale bo loma bialu irani delai ho mialu Anduane Homogola ho gimbu bulenaga lomabi ibuhondo delalu mini. ✧ <sup>32</sup> O biagoningi wali agali biaru handaya ho helowa Bi Mana Mosesehanda ala gilibu winigo Yosua ibugua ege toleni Bi Mana ogoni gili bini. <sup>33</sup> Ani biyagola Isaraeleali biarubi tinaga haru haga biarubi wai haru bamba haga biarubi godi hale howa dabagane heneyarubi wali agali tara ti baba heneyarubi ti bibahendeoreme duguduguni kira howa dombeni Anduane Homogonaga Mbogoyi biago loma binigo mo miaga biarume yu heagohayagi wanakui muwa duguduguni mendegome Hari Gerisimihayagi erembira muwa mendegome Hari Ebalahayagi erembira muwa hene. Anduane Homogonaga biabe bia haga Mosesehanda lalu, Ti mo turu halu bayale helonaga anidagua bilimu, lalu lowini. ✧ <sup>34</sup> Yosua ibugua Anduane Homogohanda Mana lowinigonaga mbuga yamuwa tihondo

✧ 8:30: Man 27.2-8 ✧ 8:31: Har 20.25 ✧ 8:33: Man 11.29, 27.11-14



hongo howa daga lai hene. Mana lowiniyaru mo turu halu bayale holenebi ha halu pani nolenebi bibahende lowinidagua daga lai hene. <sup>35</sup> Mosese heneyangi Mana lo wiadagoni bibahende wali agalibi waneiginibi Isaraeali dege ndo wali agali tara tara ti heba heneyarubi bibahende ngoai ho hearu hale hai helo Yosuahanda daga lai hene.

## 9

### *Gibionoali hearume Yosua mo hondo henego ogo*

<sup>1</sup> Iba Yodana ni paliragohayagi howa wali agalinaga kini bibahende hearume Isaraealime wai bialu agali bo bibahara layago hale hai hene. Hari bare barehayagi hearumebi hari biaru tene teneha hearumebi iba solowara Medidereniana bereagohayagi hearumebi uyura Lebanonohayagi howabi hale hai hene. Kini o hale henedaruni Hidialibi Amoroalibi Kenanalibi Peresealibi Hibialibi Yabusualibi ti bibahende hearume hale hai hene. <sup>2</sup> Hale hai howa uruni ti bibahendeme ibu ngoai halu mo mbiraore howa Yosua halu Isaraeali baba wai bule manda bini.

<sup>3</sup> Ani biyago Hibiali biaru ti hameigini mbira Gibionoali hene. Tigua Yosua halu Isaraele hameigini biarume Yarigo tano timbuni biagobi Ai tanobi bo wahaya layago hale howa <sup>4</sup> Yosua halu Isaraele wali agali biaru mo hondo hole manda bini. Ani manda buwa tigua tomo maru muwa nu ala tawe togobi waini iba be nogo dongoneme wabinigo budubaga bini wiaru lebudai buwa bibahende nogo dongini mo yini. <sup>5</sup> Tigua aga ala tawe ko lerelabagabi wiaru bialu ge su urubi ko lerelene lebini wiarubi bini. Tigua mberedibi bamba hirini ko hagamahe wiaru mo henene. <sup>6</sup> Uruni mo hanalu tigua Yosua halu Isaraele wali agali Giligala dindini hearia puwa lalu, Iname ibirimadagoni dindi kaundiaoreha howa ibirima. Tigua ina baba habo nalolene bi mbira lo wimiya ibirima, lene.

<sup>7</sup> Ani layagola Isaraele agali biarume lalu, Ti hapara ho paluwa ke haganego iname ti baba habo nalolene bi ogoni lo wulene hame naledama, lene.\*

<sup>8</sup> Ani layagola tigua Yosuahondo lalu, I hame lareale bibelo ina i andaneha kamagoni, lene.

Ani layagola Yosuahanda tihondo hale halu lalu, Ti ibini aibe. Ti dindi ani howa ibirimibe, lene.

<sup>9</sup> Ani layagola tigua Yosuahondo bi ogobi lamini. Haru haga-o iname Anduane Homogo tinaga Ngode Datagaliwabe mini hale howa dindi kaundia onadege ndooreni howa ibirima. Iyibi dindini howa tinaga Ngode Datagaliwabe kagome biya layago hale harima. <sup>10</sup> Ibugua Amoroali Iba Yodana ni ibiragohayagi Hesebono dindinaga Kini Sihonobi Basana dindinaga Kini Oga ibu Asarodo dindini heagobi o biago labohondo biya layago hale harima.\* <sup>11</sup> Inanaga haru hagane hearumebi wali agali bibahende hearumebi lalu, Tomo nolene maru manda manda bialu ti baba habo nalolene bi ogoni lo wule ti karia puwa tinaga hameme bilimulo tinaga andaneha birule lalu lamule pudaba, lalu inahondo laya. <sup>12</sup> Mberedi o henedamaru de handaramine. Pigane ibule ibirimaria pobohe ngabi bayale noabi henenego ibalu hangu hemaria o bidagoni handadaba. Togo bialu hagama hayada. <sup>13</sup> Waini iba be nogo dongoneme wabinigo ogoni gahengeha waini iba odo berelarima. Ai ayu togo bialu lerelabaga biyadagoni handadaba. Inanenaga agabi ge su urubi hariga lu kaundiaoreni howa ibalu hemaria budubaga bidagoni handadaba, lalu lamini.

<sup>14</sup> Isaraeali biaru tigua Gibionoali biarume tomo maru heneyaru yamuwa nalu howa lalu, Mini mbiraore harama, lene. Tigua Anduane Homogohanda bi agi larabe hondole hale nahe howa ani bini.\* <sup>15</sup> Yosuahanda habo nalolene bi lalu nenege hamiya lowa ti Gibionoali baba wai nabule tini henedagoria helo lalu lowini. Isaraele wali agali biaru haru haga hearume, Bi lo werama hada nabimiya, lalu lene.

\* 9:7: Har 23.32, 34.12, Man 7.2    \* 9:10: Dag 21.21-35    \* 9:14: Dag 27.21, 1 Sml 22.10, Ais 30.1-2

<sup>16</sup> Habo nalolene bi biago lalu purogo lowa horo tebiru peagola Isaraeleali biarume mani hale halu hearia agali o ibiyaru ti kaware hapara howa heneyane hale hene. <sup>17</sup> Ani hale howa Isaraeleali biaru tigua talima horo tebiru puwa handalu hearia agali o ibiyaruni dindi timbuni Gibionobi Kebirabi Berodibi Kiriadi Yarimubi dindi uru-nialiyane hendene. <sup>18</sup> Isaraelealime bo waholene henge nawiyane hendene. Isaraele wali agalinaga haru haga biarume habo nalolene bi Anduane Homogo Isaraelealinaga Ngode Datagaliwabe minini lo winigome pugulene nawi manda buwa Isaraele wali agali bibahende hearume ogoni kagua biyada lalu haru haga biaruhondo bi hongo howa lene. <sup>19</sup> Ani layagola haru haga biaru tigua ladai bialu lalu, Ina habo nalolene bi lo wialu nabule larimago Isaraelealinaga Anduane Homogo Ngode Datagaliwabe minini howa larima. Anigo iname ti babe nahe kama. <sup>20</sup> Bi lo wirimagome ti ba nabi helo wahama. Barimayagua Ngode Datagaliwabeanda ina pani ngulebira. <sup>21</sup> Ti bo wanahe howa tigua inanaga ira ba halu iba uru hambia holene heloleberema, lalu Isaraeleali haru haga biarume ani lene.

<sup>22</sup> Yosuahanda Gibionoali biaru olalu ibidaba lowa hale halu lalu, Tigua kaware hapara howa ina kaundia howa ibirima lalu ina mo hondo harimigo tene aginaga birimibe. <sup>23</sup> Tigua ogonibi birimigonaga Ngode Datagaliwabe ibugua tí kagua birimi ledagoni. Ani lowa lalu, Gibiono wali agali tí bibahende garabaya biabe ale bia haho wiaabo holeberemi. Inanaga Ngode Datagaliwabe kagonaga anda biabe bialu ira baha iba hambiaha bulene holeberemi, lalu lamini.

<sup>24</sup> Ani layagola Gibionoali biaru tigua ladai bialu lalu, Haru haga-o ina hale halu hemaria Anduane Homogo tinaga Ngode Datagaliwabe ibugua Mosese lamialu lalu, Dindi ogo bibahende ina tí nguleberogo meramiangi wali agali ogoriani karu bibahende bo hilubaga bu wahai habe, layayago hale harima. Hale howa inane homolene gi howa o birimadagoni. <sup>25</sup> Ayu ina í andaneha bedamagonigo í hame lededagua berogo tigabida lowa manda bidedagua dege bibe, lene. <sup>26</sup> Ani layagola Yosuahanda Isaraelealihondo, Gibiono agali biaru bo wa nahadababe, lowa ibugua bime mo humbi hene. <sup>27</sup> Ani buwa ibugua Gibiono wali agali biaruni garabaya biabe ale bia helo helene. Gibionoali biaru tinaga biabe bulene ogobi Isaraele wali agalinagabi Anduane Homogo mbirale bo lomabu delaga dabunaga ira bahalu iba hambia halu bulene helene. Ogoniangi howa áyubi ti biabe ogoni Anduane Homogonaga mini mitangi bialu lotu lolenaga anda kagoria ira bo yu pu iba hambu yu pu biaabo haga ka.

## 10

### *Amoroali hearu bope henego ogo*

<sup>1</sup> Yarusalemena Kini Adoni Sedege ibu howa hale halu hearia Yosuahanda Yarigo tanobi tinaga kinibi bo wahayadagua Ai tanobi tinaga kinibi baiore haya layane hale hene. Gibionoali hearumebi Isaraeleali baba wai nabule lowa habo nalolenebi mbira lo wuwa mandagi ka layane hale hene. <sup>2</sup> Uruni hale howa Yarusalemeali hearume mogo lowa gi timbuni ho hene. Tigua gi timbuni hayadagoni irane au manda buwa Gibionoali uruni ti gibi hongohe wali agalibi dewahe tano timbuni maru wiarunibi dege kinibi hene. Ai tano emene lowa Gibiono tano timbuniore wialu tinaga agalirumebi wai bu debe haga ka manda biyagome gi hene. <sup>3</sup> Ogonibi biyiyagola Adoni Sedegehanda Heberononaga Kini Hohama heariabi Yamudinaga Kini Piramu heariabi Lagisinaga Kini Yabia heariabi Egelononaga Kini Debiri heariabi bi ogobi lo yalu pelene. <sup>4</sup> Ibugua lalu, Gibionoalime habo nalolene bi lalu Isaraeleali baba wai nabule lo wuwa kagonaga ina Gibiono dindi ogoni barogo biamogo bule ibai hadaba, lalu bi pelene. <sup>5</sup> Yarusalemena kinibi Heberononaga kinibi Yamudinaga kinibi Lagisinaga kinibi Egelononaga kinibi kini duria uruni ti Amoro hameigini hangu howa hogimbu buwa Gibionoali bole pene.

<sup>6</sup> Ani bole piyagola Gibionoali biarume Yosua Giligala dindini hearia bi pelalu au lene. Haru haga-o ina embeda nahe biamogo bule abaleore ibalimu. Amoroali hameigini hari gibuha hayaru bibahendeme gimbu buwa ina barago, lalu bi pelene.

<sup>7</sup> Bi ogoni hale howa Yosuahanda ibunaga wai biaga agali bibahende biaru wai baya gibi bulene maru dabobagi howa heleneyaru heba haru halu Giligala howa wai bule pene. <sup>8</sup> Pole howa hearia Anduane Homogohanda Yosuahondo lalu, Agali odaruni hondowa gi holeni. Ina í gini ngiai kogo bope hai holebere, lene. <sup>9</sup> Yosua halu Giligala howa Isaraelenaga wai biaga ami biarume mbiraga pialu hangu heneyago Gibiono anda puwa Amoroali biarume ti handa nabi hearia bo dalime hene. <sup>10</sup> Anduane Homogohanda Isaraeleali biaru handalu Amoroali biaru mo mogola howa bigibagi bi lene. Ani biyagola Isaraeleali biarume Amoroali biaru Gibiono dindini bo wahalu hari winiyagoha bama talima dalialu Bede Horono tano bolangua halu bama Asega tagira pialu Magedahayagi bama puabo hene. <sup>11</sup> Amoroali biaru bare hariga mbira winiyagoha dalialu heagola Anduane Homogohanda dalu dindiguni timbuni tole ale ibilayagome bama dege puabo halu Asega anda pene. Isaraele agali biarume emene mbira beagola dindiguni tole ale biagomeore dewa homelo bene.

<sup>12</sup> Anduane Homogohanda Isaraeleali biaru wayali helo biamogo biyago horo ogoingi Yosuahanda Isaraeleali biaru deni howa Anduane Homogohondo lalu, Ni Gibiononi da dali howa ema nabi hela. Ege Ayalono buguni hondo helabe, lalu lene.

<sup>13</sup> Ani layagola Isaraeleali biarume tinaga waitigi biaru bai helo nibi egebi libu hondo hagahaga bini. Anda pu nabi hegoria haho wiane hangu horo mbira pene. Ogonibi bini lalu bi ogoni Yasanaga mbugani lo nga. <sup>14</sup> Horo mbiru Anduane Homogohanda agali mbiranaga bi hale howa binidadagua abaleorebi áyuorebi nabi ogoingi dege ani bini. Anduane Homogohanda Isaraeleali timbuniore pele mini.✧

<sup>15</sup> Ani biyagola howa Yosua ibu Isaraele wai biaga ami agali biaru haru halu tini aria maru Giligala dindini hegoria dai bini.

*Yosuahanda Amoroalinaga kini duriali bo wahenego ogo*

<sup>16</sup> Amoroali hameigini duria henerunaga kini duria biaru ti wai bialu hea tambu pora bialu puwa Mageda dindi egeandaha bira do hene. <sup>17</sup> Ogoniha bira do ho berearia marume handa walía howa Yosua lamini. <sup>18</sup> Ani lamiyagola Yosuahanda lalu, Egeanda ogoninaga harabani ege tole timbuni maru pendegelo pai halimu. Ani buwa haraba ogoriani handaya howa agali marume mamage helalimu. <sup>19</sup> Títime ogoniha hondo holemini waitigi piyadagua talima puabo halimu. Waitigi tininaga tanohayagi anda polani handalimu. Anduane Homogo tínaga Ngode Datagaliwabehanda agali uruni bo ibira hai halimulonaga hongo ngida, lene. <sup>20</sup> Yosua halu Isaraele agali biarume Amoroali waitigi biaru bibahendeore bo wahai hene. Waitigi maru mbira mbira pora bialu puwa tini pabeha porabu anda hayaru ti dege ba nabi helene. <sup>21</sup> Ani bialu Isaraeleali biaru tini mbira ba nabi bibahende Mageda dindini Yosua balai anda bu hegoria dai biai hene.

Wali agali dindi ogoriani hearume Isaraele wali agali ko ka lalu mbira lolene gi timbuni ho hene.

<sup>22</sup> Yosuahanda lalu, Egeanda harabaha ege tole pendegelo pai harimigo pendegelo bagi howa kini duria biaru ogoria haru ibidaba, lene. <sup>23</sup> Ani layagola tigua egeanda biagonaga ege panga biago pendege la ai howa Yarusalemenaga kinibi Heberononaga kinibi Yamudinaga kinibi Lagisinaga kinibi Egelononaga kinibi kini duria o biaru haru tagira ibuwa <sup>24</sup> Yosua berearia haru ibini. Ibu heagola Yosuahanda Isaraele agali bibahende ibu bereagoria olo ngoai hene. Ani buwa agali haguane ibula haru pene biaruhondo lalu, Tígua tínaga ge kini duria biarunaga mani widaba, lene. Yosuahanda

✧ 10:14: Yos 10.42, 2 Kin 20.8-11, Ais 38.8

layadagua agali haguane biaru tigua ani bini. <sup>25</sup> Ani bu heagola Yosuahanda ibunaga haguane biaruhondo lalu, Gi nahe halimu. Mini bilinahe howabi miniha dungu lowabi halimu. Anduane Homogo ibugua tinaga waitigi o biaruhondo biyadagua waitigi bibahendeorehondo mani ani bulebira, lalu lamini. <sup>26</sup> Ani lai howa Yosuahanda kini duria biaru bibahende bo homelene. Bowa tinaga tingini ira duriani bo derela howa wialu nelene. <sup>27</sup> Ni paliyagola Yosuahanda kini duria biaru irani bo derela ho wiyago, Mo ibira hadaba, lene. Ani layagola agali haguane hearume kini biarunaga tingini yalu puwa egeanda tini bira do hene biagoha mo baanda hene. Toḷe timbuni wiaru haraba biagoria pendegelo pai hene. Toḷe odaruni áyu ogoni ani wiaabo ho nga.

*Yosuahanda Amoroali hameigininaga dindi marubi mia dege binigo ogo*

<sup>28</sup> Horo ogoningi Yosua halu Isaraeleali biarume Amoroalinaga tano mbira mini Magedabi karulalu tinaga kinibi minini. Dindi ogoriani hearu mbira hela nabi bibahende bo wahai hene. Yarigonaga kinihondo biyadagua Magedanaga kini biagohondo ani bini.

<sup>29</sup> Mageda balu Yosubi ibunaga wai biaga ami biarubi tigua Libina puwa agali tano timbuni ogoriani hearu baba wai bini. <sup>30</sup> Anduane Homogohanda biaga biadagua dege Libina tano timbuni biagoni bope halu kinibi Isaraelealinaga gini ya hene. Hearuni bibahendeore bo wahai halu mbirali pora bialu pe nalene. Yarigonaga kinihondo biyadagua dege Libinanaga kini biagohondo ani bini.

<sup>31</sup> Libina bai halu Lagisi pene. Ani buwa Lagisi ho mabu bupe howa bene. <sup>32</sup> Wai bialu hemira horo mende hayagola Isaraeleali biarume Lagisi dindi bo ibira helo Anduane Homogohanda mo wayali hene. Libinani biyadagua mbirali pora bialu pe nale bibahendeore bo wahai hene. <sup>33</sup> Gesenaga Kini Horamahanda Lagisiali biaru biamogo bule ibalu hearia Yosua halu ibunaga wai biaga ami agali biarume bope hai halu ibunibi ibunaga ami ibiniyarubi bibahende bo homelai halu mbirali pora bialu pe nalene.

<sup>34</sup> Yosua ibu wai biaga ami biaru heba Lagisi bai halu bialu Egelono puwa mabu bupe halu bene. <sup>35</sup> Tigua horo ogoniangi dege Lagisi ala bayadagua balu bibahendeore Egelononi hearu homelo bai hene.

<sup>36</sup> Ani buwa Egelono balu Yosua halu Isaraele wai biaga ami biaru baba tigua hari hombene wiagohayagi iraga halu Heberono puwa bene. <sup>37</sup> Balu dindi timbuni ogoni karulowa tinaga kinibi wali agali heneyarubi tano maru haparapara bu heneyarubi bibahende bo wahai hene. Yosuahanda dindi ogoni bo mebia halu bo hilubagabu Egelono biyadagua bini. Dindi ogoriani hene mbirali pora bialu nape homaiore hene.

<sup>38</sup> Ani buwa Yosubi ibunaga ami biarubi tigua beregedalu Debiri dai buwa bene. <sup>39</sup> Dindi ogoriani henerunaga kinibi tano maru haparapara bu heneyarubi karulai hene. Karulai howa wali agali bibahende heneru bo wahai hene. Yosuahanda Heberono Libinalahondobi tinaga kinihondobi biyadagua Debiribi wali agali heneyarubi tinaga kinibi urunihondo anidagua dege bini.

<sup>40</sup> Yosuahanda dindi wiaruni bibahende karulaiore hene. Ibugua tano hari barehayagi wiarubi dindi bare emene heyolepeheni ni ibiragohayagi wiarubi ni pali-ragohayagi wiarubi dindi dalu emene hangu ibagane unurahayagi wiarubi tinaga kini hearubi heba bibahendeore bo hai halu karulai hene. Wali agali dindi urunini heneyarubi mbira hela nabi bo wahai hene. Isaraele wali agalinaga Anduane Homogo Ngode Datagaliwabehanda ani bilimu layadagua bini. <sup>41</sup> Yosuahanda dindi uruni mialu wai binidagoni dindi Kadese Baneani howa unurahayagi puabo halu iba solowara hapara howa Gasahayagibi Gosenehayagibi uyurahayagi Gibionobi heba karulaiore hene. <sup>42</sup> Yosuahanda kini odaruni baba tinaga dindini heneru heba wai halu mbira

hangu biyagome minidagoni irane Isaraele wali agalinaga Ngode Datagaliwabe Anduane Homogo ibugua Isaraelenaga wai bia hayagome mini. <sup>43</sup>Uruni biai howa Yosubi ibunaga wai biaga ami agali biarubi tini balai anda bu heagoria Giligalani dai bini.

## 11

*Kini Yabinibi kini maru ibuhayagi hearubi Yosuahanda bope hai henego ogo*

<sup>1</sup> Isaraele agali biarume agali palearu baba wai bialu bo pebe bima ibira layago hale howa Hasoali Kini Yabini ibugua Madonoalinaga Kini Yobaba heagoriabi Simironoalinaga kiniru heagoriabi Agasabalinaga kiniru heagoriabi <sup>2</sup> uyurayagi howa hari barebare wiarunaga kiniru heagoriabi iba kuyuma Galili berene unurayagi Iba Yodana angeangeha kiniru heagoriabi hari teneha kiniru heagoriabi iba solowara kaware tano mini Do wiagohayagi kiniru heagoriabi kini uruni bibahende heagoria bi yalu pene. <sup>3</sup> Kenanali Iba Yodana angelabo palearuhabi Amoroali heariabi Hidiali heariabi Pereseali heariabi Yabusuali hariha haga hearu heariabi Hibiali Misiba dindini Hari Hemono weagoria hearu heariabi bi yalu pela dege bini. <sup>4</sup> Tigua tinaga wai biaga ami agali hangu hangu hene biaruni mo mandagi hene. Tidiyu heayagi iba angeni mu wiago ale daga labenahedadagua agali dewaore ibu hene. Tinaga wai biaga garo ale mini karisi aeaneme wabinigo ge kirahe nogo hosime gili lagabi dewaore wini. <sup>5</sup> Kini dindi uruniha hearu bibahende hogimbu buwa tigua Isaraeleali baba wai bule iba Meromo duguayagoria mo ngoai halu balai anda bu hene.

<sup>6</sup> Anduane Homogohanda Yosuahondo lalu, Uruni ti hondowa gi holeni. Horo áyu ogodagua yawi haragola ina agali uruni Isaraelenaga ba halu bo wahai holebero. Tigua tinaga nogo hosi ge gungubuni gandulape halu wai biaga garo ale karisi heda halu buleberemi, lene. <sup>7</sup> Ani layagola Yosua halu Isaraeleali biarume iba Meromo duguayagoha ti nahende hearia bo dalime hene. <sup>8</sup> Anduane Homogohanda Isaraeleali mo wayali helaya. Ani biyagola tigua agali biaru bama uyurahayagi talima puabo halu Misirebodo Maimi bolangua halu Saidono bolangua halu pene. Pora bialu piyago bama talima ni ibiragohayagi Misiba puabo hene. Wai biagoni biaho wiane waitigi agali biaru bibahende homai heagola wahene. <sup>9</sup> Yosua ibugua Anduane Homogohanda bia layadagua nogo hosi biarunaga ge gungubuni gandulalu wai biaga garo ale karisi heda halu bini.

<sup>10</sup> Yosua dai bialu ibugua Haso dindi karulalu tinaga kinibi bo wahene. Agali hameigini o hene larimaruni hongo nira lowa hongo gibihe Haso hene. <sup>11</sup> Dindi ogoriani hearu mbira hela nabi bibahende bo wahai halu tano timbuni biagobi heda hai hene. <sup>12</sup> Anduane Homogonaga biabe bia haga Mosesehanda bibe layadagua Yosua ibugua tano timbuni urunini wali agali hearubi kini hearubi bibahende bo hilubaga bu wahai halu dindi bibahende karulai hene. <sup>13</sup> Ani binigo Yosua halu Isaraeleali biaru tigua tano hombeneni wiaru bo gialobaga nabi helene. Dindi mbiraore Haso hangu bo gialobaga bialu Yosua ibugua ogoni dege heda hene. <sup>14</sup> Isaraele wali agalime dabudabu wiarubi nogo bulumagabi nogo tara tarabi tano ogoriani hearubi ti karulai hene. Wali agali hearu bibahendeore mbirali he nale bo wahai hene. <sup>15</sup> Anduane Homogo ibugua anidagua bibe lalu ibunaga biabe bia haga Mosesehondo lamini. Mosese ibugua nde Yosuahondo lamini. Mosesehanda Yosuahondo biabe bia lenedaguaore hale halu Yosuahanda biai hene. Ibugua Anduane Homogohanda Mosesehondo bibe layadaguaore hale halu biai hene.

*Yosua ibugua dindi bibahende karulai henego ogo*

<sup>16</sup> Hari barebarehayagi wiarubi hari biaru teneha wiarubi uyurahayagibi Gosene dindi bibahende bi ogoninaga dindi dalu emene hangu ibagane unurahayagi wiarubi Yodananaga ulini buguni wiarubi heba karulai hene. <sup>17-18</sup> Dindi karulenedaruni tu Hari Halaga unurahayagi Idomo hapara howa pialu Balagada uyurahayagi Lebanono



ulini buguni Hari Hemono hapara howa karulene. Yosuahanda dindi uruninaga kini headaru baba wai luore bialu hene. Ani bialu henegoyu Yosua ibugua odaruni balu bo wahai halu dindi winiyaruni ibu karulai hene. <sup>19</sup> Tano mbiraore Gibiono wiago Hibiali maru heagoria ogoniha hameigini hearu ti degeme Isaraele baba wai nabule lalu habo nalolene bi lowini. Dindi maru winiyaruni bibahende Isaraelealime karulai hene. <sup>20</sup> Anduane Homogohanda waitigi biaru tigua bu miniha Isaraele baba wai hongo howa buleore manda bilo mo manda bia ho helene. Ani binidagoni irane Isaraelealime waitigi mbira hela nabi bibahende bo wahaiore helo ani bini. Ala Anduane Homogohanda Mosesehondo ogonidagua bo wahabe lene.\*

<sup>21</sup> Ogoningi dege Yosuahanda agali timbu gibi gurulu dege damene hameigini mini Anagimu dindi Heberonobi Debiribi Anababi uruni hari barehayagi paleneyaru bo hilubaga bu wahene. Tinaga hameigini maru Yuda dindibi Isaraele dindibi hari barehayagi palearu tinaga tanobi bo hilubaga bu wahai hene. <sup>22</sup> Anagimu hameigini uruni aria damenego Isaraele dindini mbira hela nabi bibahendeore bo wahai hene. Ani binigoyu emene mbira mbira dege dindi Gasanibi Gedenibi Asadodonibi helo yu wahene.

<sup>23</sup> Anduane Homogohanda Mosesehondo lamialu bibe layadagua Yosuahanda dindi wiaruni bibahende karulai hene. Ani karulowa ibugua Isaraele wali agali hameigini biaru hangu hangu helo dindi wiaru tu ho tahalu mini. Ani bialu Anduane Homogohanda layadagua biai howa ti wai nabi bayale hene.

## 12

### *Mosesehanda kini kira baba wai bialu wayali haga binigo ogo*

<sup>1</sup> Isaraelealirume wai bialu dindi Iba Yodana doma edera ni tagira ibiragohayagi wiaru bo podama pialu karulai hene. Dindi timbuniore tubari Iba Anono peagoha dindi ulini wiagoha howa pialu Iba Yodana angeange dindi uliuli wuyu peagoha puabo hene. Ani pialu amuraore Hari Hemono heagoriani tagira pene. Piganeore Isaraelealirume agali kini kirali Sihonola Ogala baba wai bialu bo podo hana halu ti wayali hene.\* <sup>2</sup> Kini Sihono ibu Amoro wali agalinaga kini howa Hesebono tanoni haru haga hene. Ibunaga dindi tubari Aroe dindi ulini biagonaga hanuni puabo halu Iba Yabogo peagoria tagira pene. Amono dindi Anono dindila tubari Iba Yabogo ogoni pene. Dindi ogoni Gileada dindi ngagonaga emene mbira dege wini. <sup>3</sup> Ani bialu tubari Iba Yodananaga abene ni tagira ibiragohayagi dindi ulini wuyu peagodagua pialu pu maro bini. Ogoriani howa pialu Galili iba kuyama bereagoria tagira pene. Ani bialu Bele Yasimodo wiagoria bolangua halu iba solowara mini Homene Iba laga bereagoriani tagira pene. Ogoriani howa lone pialu dindi abene unurayagi Hari Pisiga heago andaneha bolangua hene.

<sup>4</sup> Isaraelealirume Basana dindinaga Kini Oga heago baba wai bialu bo podalu ti wayali hene. Kini ogoni ibu Lebaimi hameigini aria mbira hene. Abale hameigini ogoni timbuni dege mbira palenego mani emene hangu hene. Kini Oga ibu nde tano kira Asarodo Ederilani hondo haga hene. <sup>5</sup> Ani howa ibugua dindi dewa dege Hari Hemono heagoha dindi wiagobi Salega tanobi Basana dindi bibahende bi handayaho howa Gesua hameigini baba tubari wialu Maga hameigini bababi wini. Ani howa mendehayagi Gileada dindi maru haru halu Kini Sihono dindila tubari wuwa haru haga hene.

<sup>6</sup> Ani hearia Mosese halu Isaraeleali biarume kini kira ogonilabo baba wai bialu bo podo hana halu ti wayali hene. Ani buwa Anduane Homogonaga biabe bia haga Mosesehanda dindi ogoni tu wigi bialu Lubene ariabi Gada ariabi mialu Manase hameigini aria marubi emene mbira podo mia dege bini.\*

\* 11:20: Man 7.16    \* 12:1: Dag 21.21-35, Man 2.26-3.11    \* 12:6: Dag 32.33, Man 3.12

*Kinirubi tanorubi Yosuahanda bo podo hana haga binigo ogo*

<sup>7-8</sup> Yosua halu Isaraealirume wai bialu kini dewaore bo podama pialu tigua Iba Yodananaga abene ni paliragohayagi dindi wima pearuni bo podaga bima pene. Lebanononi dindi ulini Balagada tano wiagoha howa ala bo podaga bima pialu Idomo dindi kawareha Hari Halaga heago teneni tagira pene. Ani bialu dindi dewaore hari barebare wiarubi ni paliragohayagi hari nene emene hama pearubi Iba Yodana ange ange dindi ulini wima pearubi karulai dege hene. Ani bialu dindi ko wali agali nahaga gaea dege biaho wiaga dindi abene unurayagi Negebe dindi wiagobi karulene. Bamba dindi urunihayagi hameigini tara tara Hidi hameiginiru Amoro hameiginiru Kenana hameiginiru Perese hameiginiru Hibi hameiginiru Yabusu hameiginiru uruni ti paligi binigo wini. Ani winigo ai mani Yosuahanda dindi uruni Isaraele wali agaliru mo miyagola Isaraele tinaga dindiore bu hinu wini. <sup>9-24</sup> Isaraealeali tigua wai bialu kini bo podo hana haga binidaruni tinaga tano mini uru.

Yarigo tanobi Ai tano ogoni Bedele dindi kawareni dege winigobi Yarusalemebi Heberonobi Yamudubi Lagisi tanobi Egelonobi Gesebi Debiribi Gedere tanobi Homa tanobi Aradabi Libinabi Adulamabi Magedabi Bedelebi Tabua tanobi Hebebi Abege tanobi Lasaronobi Madono tanobi Hasobi Simirono Merono tanobi Agasababi Tanagabi Megido tanobi Kedesebi Yogoneama tano ogoni Kamelo dindini winigobi Do tano ogoni iba solowara angeni winigobi Goimi tano ogoni Galili dindi kawareni winigobi Tisa tanobi tano uruni bibahendenaga kini baba wai buwa Isaraealeali tigua uruninaga kini heneru lamaga halu pira tebirani mbira (31) bope hai howa tinaga tano wiaru bibahende ti karulai haga bini.

## 13

*Anduane Homogohanda dindi tu wa ta haga biniru Isaraealime mia nabi winigonaga bi lenego ogo*

<sup>1</sup> Yosua ibu waheore hayagola Anduane Homogohanda ibuhondo lamialu lalu, Áyu í waheore haridago ai Isaraele hameigini tigua dindi maru karulai nahe kami. <sup>2</sup> Tigua Pilidialirunaga dindibi Gesualirunaga dindibi bibahende ngaruni karu nale dege kamigoni. <sup>3</sup> Dindi unurahayagi Abimi hameiginiru haga ngarubi karu nale kamigoni, lene. Pilidialirunaga kini durialime Gasabi Asadodobi Asagelonobi Gedebi Egeronobi tano uruni bibahende handame haga hene. Dindi hobane mbiraha iba mini Sihoro peagoria howa pialu Iyibi dindila tubari howa pialu abene uyurahayagi Egerono dindi wiagoria tubari bamba Kenana wali agali ti haga biago hene. <sup>4</sup> Anduane Homogohanda la dege bialu lalu, Kenanalirunaga dindi bibahende Meara tano Saidono wali agalirunaga ngagobi karu nale dege kami. Dindi ogoni wima pialu amuraore Amoro hameiginiru baba tubari Abege tano ngagoriani tagira peda. <sup>5</sup> Tigua Gebala hameigininaga dindi ngarubi Lebanono dindi ni tagira ibiragohayagi Hari Hemono kago teneha Balagada tano ngagoria pialu amuraore Hamada tano pole hariga tagira piaga ngagoriabi tigua karu nale dege kamigoni ndobe, lene. <sup>6</sup> Ibugua laabo lalu, Tigua dindi maru Lebanono dindiha hari labo hengene ngagoha Saidono wali agali bu karu ti haga dindi mini Misirebodo Maimi ngago ogonibi karu nale kami. Isaraele wali agali tigua dindi uruni karulole poramigola ina wali agali dindi uruniha karu waratagi hai holebero. Ani berogola ina bibe lalu ihondo ala langirudagua bialu dindi uruni Isaraele wali agaliru tininaga dindiore ngelo talebu tahaga bibe.\* <sup>7</sup> Ani buwa dindi ogoni ina hameigini maru dirali karuhondo tu wa ta halu Manase hameigini halu mende karu ariabi podo tahaga bibe. Ani bialu tigua tininaga dindi heneneore ogoni wu helo ani bibe, lalu Anduane Homogohanda Yosuahondo lamini.

*Iba Yodana ni tagira ibiragohayagi dindi wiaru talebu minigo ogo*

\* 13:6: Dag 33.54

<sup>8</sup> Lubene hameiginibi Gada hameiginibi Manase hameiginiru aria marubi ti dindi Iba Yodana ange mendeha abene ni tagira ibiragohayagi winigo Anduane Homogonaga biabe bia haga Mosesehanda talebu mini.\* <sup>9</sup> Tinaga dindi tubari Aroe tano Iba Anono peago angeha dindi bayale wuyu peagohayagi wima pialu tano ogoniha dindi dombeni wiagobi karulai halu Medeba dindi bayale tigabi wiarubi Dibono dindibi ti dege karulai hene. <sup>10</sup> Ani bialu Amono dindi tu Kini Sihononaga tano wiaruni bibahende ti karulai hene. Ala Kini Sihono ibugua Hesebono tano wiagoria howa tano dewa wiaru bibahende handame ho howa Amono dindila tubari wiagoria handairi haga hene. <sup>11</sup> Tigua Gileada wali agalinaga dindi wiarubi karulalu Gesua dindi timbuni wiagobi Maga dindibi karulaga bima pialu Hari Hemono heago andaneha dindi wima pearu bibahende karulai halu bini. Ani bialu Basana dindi wiago karulama pialu Salega tano wiago karulalu bini. <sup>12</sup> Ani bialu Kini Oga ibu hayadangi ibugua Asadarodo tanobi Ederi tanobi handaya ho haga henego dindi ogonibi Isaraele ti karulai hene. Oga ibu Lebaimi hameigini howa tinaga kini hamaro bini. Ala Mosesehanda Lebaimi hameiginiru baba wai bialu ti bo batagi hai hene. <sup>13</sup> Anigo Isaraeleali tigua hameigini kira Gesua Magadala dege bo batagi nahe hene. Uruni ti Isaraele heba hamaga howa mandagi hene.

<sup>14</sup> Ani binigo Mosese ibugua Libai hameigini hearu ti dege dindi mbira tu wa nami hene. Ala Anduane Homogohanda Mosesehondo bilimu lalu laminigodagua bialu mbirale wali agali bu hearume Isaraelenaga Anduane Homogohondo loma biniru mo yalu ibugu biragola irani delagane aria maru Libai hameigini ti talebu miaga wini.\*

#### *Dindi maru Lubene hameiginiruhondo minigo ogo*

<sup>15</sup> Mosesehanda dindi tu wigi buwa maru Lubene hameiginiru tinaga dindiore wilo mini. <sup>16</sup> Tinaga dindi tubari Aroe tano Iba Anono peago angeha dindi bayale wuyu peagohayagi wima pialu tano ogoniha Medeba dindi bayale tigabi dombeni wiagobi ti karulai hene. <sup>17</sup> Ani bialu Hesebono tano wiago karulalu ogoniha dindi bayale tigabiore wia gimbu biarubi karulai hene. Ani bialu ogoniha tano dewa Dibonobi Bamodobalabi Bede Balameonobi karulalu <sup>18</sup> Yahasabi Kedemodobi Mebadabi karulalu <sup>19</sup> Kiriadaimibi Sibimabi karulalu Seredesaha tano ogoni hari emene wiagoria wiagobi karulai dege hene. <sup>20</sup> Ani bialu Bedebeobi Hari Pisiga heagonaga andaneha dindi bayale wiarubi Bede Yasimodo dindibi karulai hene. <sup>21</sup> Anidagua bialu dindi bayale ogoniha wiaru karulai hene. Abale Kini Sihono ibugua Hesebono tano wiagoria howa tano uruni bibahende handame ho haga hene. Ani karulo hearia Mosese ibugua wai bialu Midianahabi Ebihabi Legemehabi Suruhabi Huruhabi Lebahabi agali haguane bu hearu bibahende bope halu dindi karulai hene. Agali haguane uruni bibahende Kini Sihono ibugua ti tininaga dindi emene wiadagua haru haga haga bilo dabo helaga bini henego uruni bibahende Mosesehanda bo podo hana hai halu tinaga dindibi karulai hene. <sup>22</sup> Mani bulebiragonaga mbiwia haga agali Beo igini Balama dindi ogoniha heago Isaraeleali biarume ibubi homelo bo wahene. <sup>23</sup> Lubene hameigini baba maru bababi tubari Iba Yodana peago wialu iba doma ederayagi Lubene hameigini tinaga wini. Tano mbira mbirabi dindi emene mbira mbirabi Lubene hameigini tigua wai bialu karulayaru bibahende tininaga dindiore uruni mo wigi bini.

#### *Dindi maru Gada hameiginiruhondo minigo ogo*

<sup>24</sup> Mosese ibugua dindi tu wigi buwa maru Gada hameigini aria hearu bibahende-hondo talebu miyagola tinaga dindi ogoniore wini. <sup>25</sup> Gada hameigini tinaga dindi winigo uru. Yasere dindibi Gileada dindiha tano wiaru bibahende bi mo mialu Amono hameigini hearunaga dindiha Aroe tano ni ibiragohayagi Laba tano kawareni wiagobi mo mialu bini. <sup>26</sup> Dindi uruni Hesebono tano wiagoria howa pialu Lamadamisibebi Bedonimi tanobi wiagoria tagira pene. Ani bialu Mahanaimi tano wiagoha howa

\* 13:8: Dag 32.33, Man 3.12    \* 13:14: Man 18.1

pialu Lodeba tano wiagoria tagira pugu bini. <sup>27</sup> Iba Yodana ange edeyagi dindi panda panda bayale wiagoha Gada hameigini tigua Bedeharama tanobi Bedenimara tanobi Sugodo tanobi Sabono tanobi Hesebono dindiha Kini Sihononaga dindi wiarubi ti dege karulaga bini. Gada hameigininaga dindi tubari Iba Yodana peago doma ederayagi ni tagira ibiragoha howa pialu uyurahayagi Galili iba kuyama bereagoria tagira pene. <sup>28</sup> Ani buwa Gada hameigini tigua wai bialu dindibi tanobi karulenedaruni tininaga dindiore wigi bini.

*Manase hameigini maru ni tagira ibiragohayagi heneru dindi tu wa minigo ogo*

<sup>29</sup> Mosesehanda dindi tu wigi buwa Manase hameigini maru hearu podo migi biyagola tininaga dindiore wini. <sup>30</sup> Tinaga dindi tubari abale Kini Oga ibugua handaya ho hene wiaru Mahanaimi tano wiagoria howa uyurahayagi pialu Basana dindi bibahende wiarubi karulene. Ani bialu Manase hameigini maru biarume tano emene emene pira waragaria (60) Yairi hameigininaga ala wai buwa Basana dindi karulaga bini winiru urunibi ti dege karulai hene. <sup>31</sup> Dindi uruni Gileada dindi hobane mendehayagi wiagobi Asarodo tanobi Ederi tanobi karula dege bini. Tano uruni bibahende Kini Oga ibunaga winigo karulai hene. Mosesehanda dindi uruni Manase igini Magirinaga aguane maru hearuhondo tu wa tahaga bini.

<sup>32</sup> Anidagua bialu Mosese ibugua Moaba hameiginiru daluha dindi bayale tigabi yu dindi wiagoha hearia Yarigo tanoha tagira ibiragohayagi dindi wiagobi Iba Yodana peago angeha dindi bayale wiarubi tu wa tahaga biai hene. <sup>33</sup> Anigo Mosesehanda dindi tu wa tahalu howa Libai hameigini bu hearu ti dege dindi mbira tu wa mia nabi wahene. Ibugua lalu, Tíhondo dindi tu wa nguleneo nakarulape. Tigua Isaraele wali agalirume Anduane Homogo tínaga Ngode Datagaliwabe kagohondo mbirale miniru tale bialu tíhondo galoneore ogoni ngirago yu holeberemi, lene.✧

## 14

*Isaraele wali agalime dindi hobane mbirago áí harabe hondole ege tole emene wiarume mini gili buwa baraga henego ogo*

<sup>1-3</sup> Bi uruniha lo ngaruni Isaraele hameigini hayadagua Kenana dindiha dindi hobane ogohayagi hameigini abogo ibu haya lalu mo walia haga bida. Isaraeleali ti ni tagira ibiragoha Iba Yodana doma ederahayagi heangi howa Mosese ibugua Kenana dindiha dindi hobane mbirago hameigini kiralibi ti damene maru hearubi tu wiahaga bini. Anigo Mosesehanda dindi tale bialu howa Libai hameiginiru mbira nami hene. Isaraele wali agali abale Kenana dindiha anda ibalu Iba Yodana peago ange ni paliragohayagi pu bolangua hene. Ani bialu loma binigo mo miaga Eleasabi Nunu igini Yosubi Isaraele hameigini mbira mbiranaga agali haguane hearubi bibahendeme Anduane Homogohanda ibunaga biabe bia haga Moseseha howa bi lamiyago talialu dindi ogoni Isaraele hameigini diralihondo tu wa tahalu ti damene maru hearubi tu wa mialu bini.\*✧

<sup>4</sup> Tigua dindi tu wa tahalu howa Yosebe igini Manase ibu hameigini mbira dagalalu Eberaimi ibubi anidagua dege dagalalu libu hameigini kira dagalene. Ani bialu Mosese ibugua Libai hameigini hearu dege dindi mbira tu wa mia nabini.† Libai hameigini ti

✧ **13:33:** Dag 18.20, Man 18.2 \* **14:1-3:** Ngode Datagaliwabehanda agi hame larabe hondole loma binigo mo miaga agalime ege tole emeneruni mini gilibu wini biago ogoni yuwa baraga halu dindini ibira howa mini gili bini biago yaraga haragola hondowa ogoni ibunaga laga biaga. ✧ **14:1-3:** Dag 26.52-56, 32.33, 34.13-15, Man 3.12-17

† **14:4:** Yagaba ibu igini homberia (12) henego ai uruni tinaga waneigini aguaneru mani hameigini homberia (12) hene. Ani howa Yosebe igini kira henego ogonilabo daga lamaga howa Isaraele hameigini haleria (13) hene. Anigo tigua dindi tu wa tahalu howa homberia hangu tale bini. Libai hameigini ti dindi mbira nami howa dindi homberia dege tu wini. Anduane Homogo ibunaga biabe Libai hameigini tigua biahalu helo minigo ogoni baya tara mbira yu helo mo mini. Yosua 13.33 handabe.



tano maru hangu wu howa tinaga dindi emene ti mbira mbira tinaga nogo bulumaga sibiru hinu helonaga mini. <sup>5</sup> Isaraele hameigini tigua Anduane Homogohanda ibunaga biabe biahaga Mosesehondo bilimu lalu lamiyadagua bialu Kenana dindi tini headagua mbira mbira tu wa ta haga bini.

*Heberono tano Kalebe minigo ogo*

<sup>6</sup> Yosua ibu Giligala dindiha hearia Yudali maru ibu hearia ibini. Ani ibuwa Kenisi hameigini aria Yabune mbira henego igini Kalebe ibugua Yosuahondo lamialu lalu, Ina amu Kadese Banea dindini hemangi howa Anduane Homogohanda *ibi ibi* iya ibunaga biabe bia haga agali Mosesehondo bi lamiyago *í* manda bu kegoni. <sup>7</sup> Horo ogoningi *í* mali pira maria (40) hewagola Anduane Homogonaga biabe bia haga Mosese ibugua *í* Kadese Banea dindi wahalu dindi ogoriani diri hondo wule pu laya. Ani laya handala *ina* pialu dindi ogoniha wiane de handarugo damene bibahende Mosese berearia handalu dai buwa tigatiga lamiai haru. *Ina* ibuhondo *ke* halu mo ha howa mbira nalami. <sup>8</sup> Agali maru *í* heba mandagi pialu dai birimarume *ke* halu bi tara tara dewa layagola wali agali bu hearu ti gi hai hene. Anigo *ina* bi heneneore Anduane Homogo *inaga* Ngode Datagaliwabenaga bi wiagoria talialu haru. <sup>9</sup> Ani birugola Mosesehanda *ihondo* buleore lalu bi mbira ogodagua lo wiya. *Ina* Anduane Homogo inanaga Ngode Datagaliwabenaga bi baya hanguore talialu haridago. Anidagua biridagonaga dindi *ínime* de hondo wima piridaruni *ínibi í* waneigini aguanerubi *tíni* ogonihaore holeberemi laya, lene. <sup>10</sup> Ani lowa Kalebe ibugua laabo halu lalu, Bi ogo hale ha. Isaraele wali agali dindi ko iba dalu naibaga wiagoria heagola Anduane Homogohanda mbirale uruninaga bi lamiya. Ai *áyu* mali pira mariani duria (45) piyadago Anduane Homogo ibunime *í* biamogo biyagola ko. *Áyu ina í* de handa. *Inaga* mali bibahende pira halirani duria (85) kogoni. <sup>11</sup> Anigo *inaga* hongo biba nahe dege bamba Mosese ibugua *í* dindi hondo wule pu layangi henegobi dege *áyu* haabo ko. *Ina* wai bu polenebi mbirale maru ngaru bulenebi hongo karulape haabo ko. <sup>12</sup> Ani kogo ai bamba dindi diri hondo wialu handarugo damene bibahende Mosesehondo lamiai harugola Anduane Homogo ibunime dindi hari barebare ngaru *í* ngulebero lalu layadagua *áyu* dindi ogoni *ini* ngibelo hamelo ko. Horo ogoningi *ina* lalu dindi ogoniha agali luni timbuni Anaga hameigini palialu tinaga tanoruha ege pabe hongohe bu mabu bu yaanda hene wiagoha hea lalu langirugoni. Anigo Anduane Homogo ibunime *í* heba howa biamogo biyagua nde *ina* agali timbuni uruni baba wai bialu tinaga tano uruniha howa Anduane Homogohanda bulebere layadagua *ina* agali uruni ti bo taliatagi hai holebero laro, lene.

<sup>13</sup> Bi uruni layago hale howa Yosua ibugua Anduane Homogohondo Kalebe mo bayale habe lalu bi lene. Ani lalu Yosuahanda Heberono tano Kalebenaga helo podo mini. <sup>14</sup> Kalebe ibugua Anduane Homogo Isaraele wali agalirunaga Ngode Datagaliwabe kago bi mana hale howa talialu bialu haga hene. Ani heagola nde Heberono tano ogoni Kenisi hameigini aria Yabune igini Kalebe ibu waneigini aguanerunaga dindiore wiaabo henego nga. <sup>15</sup> Bamba Heberono dindi ogoninaga mini Kiriada Araba wini. Araba ogoni agali timbuni Anagimi damene henerunaga haguane mbira hene. Kalebe ibu dindi ogoni karulo howa wai lone nabi wahowa bayale hene.

## 15

*Yuda hameiginiru dindi podo minigo ogo*

<sup>1</sup> Yuda hameiginiru ti dindi ogodagua tu wa mini. Tinaga dindi tubari unurayagi Idomo dindi baba tubari wialu unura puabo halu dindi ko wali agali nahaga wiagoria mini Sini wini. <sup>2</sup> Dindi tubari ogoni Homene Iba bereagoria unurayagi pialu <sup>3</sup> hariga mbira Hari Agarabimi pole piaga wiagoria pu bolangua halu dindi ko wali agali nahaga



mini Sini wiagoria tagira pene. Ani bialu unurayagi pialu Kadese Banea wiagoria pene. Ani bialu Hesperono tano bolangua halu tubari Ada tanoni tagira pene. Ogoriani howa beregedalu Kaga tano wiagoria tubari bolangua halu <sup>4</sup> pialu Asamono tanoni tubari tagira pene. Ani bialu ogoriani howa iba emene dalipe kago tigida Iyibila tubari piaho wialu iba solowara timbuni mini Medidereniana bereagoria tagira pene. Yudanaga dindi tubari unurayagi wia maro ogoni.

<sup>5</sup> Tinaga dindi ni tagira ibiragohayagi tubari unu Homene Iba bereagoria howa pialu Iba Yodana tagira peagoria bolangua hene. Ani bialu Homene Iba bereagoria haguane iba Yodana tagira peagoria howa uyurayagi pialu <sup>6</sup> Bedehogola tano tagira pene. Ani bialu puabo halu uyurayagi Bedaraba wiagoria pialu Lubene igini Bohananaga ege tole timbuni wiagoria tagira pene. <sup>7</sup> Ani bialu Ago dindi abene uyurayagi tinaga tubari dindi ulini wupe hene wiagoria tagira pene. Ani bialu dindi Debiri wiagoria bolangua halu mani uyurayagi howa pu beregedalu Giligala hondo yalu puwa hene. Giligala howa handa amu halu dindi ulini wupe hene unurayagi biagoha howa dindi mini Adumimi pole piaga hariga biago hari neneni iraga halu piaga ngago handaga. Ogoriani howa tubari pialu iba duguaraga bereago mini Enesemese bolangua halu pialu Enerogele dindi tagira pene. <sup>8</sup> Ani pialu hari emene Yabusualinaga tano Yarusaleme wiagoria unurayagi pialu dindi ulini panda panda mini Hinomo igini laga wiagoha tubari pene. Tubari piaho wialu hari nene wiago iraga halu piaga Hinomo dindi ulini wiago ni paliragohayagi howa hari wayu peagoria tagira pene. Tagira pialu Lebaimi dindi ulini dondole wiagoria uyurayagi tagira pene. <sup>9</sup> Tubari ogoni pialu iba mini Nebedoa duguaraga halu peagoria bolangua halu tano maru Hari Eberono weagoria wia para para bidagoha tagira pene. Ogoriani howa lone beregedalu Bala tano mini mende Kiriada Yarimi laga wiagohayagi pene. <sup>10</sup> Bala howa tubari lone pu mabu bialu ni paliragohayagi pialu Hari Seri pupe halu Hari Yarimi mini mende Kesalono heagonaga abene uyurayagi tagira pene. Ani bialu tubari Bedesemese tano wiagoria pialu Timina tano bolangua halu pupe hene. <sup>11</sup> Ani bialu tubari Egerono tanonaga abene uyurayagi hari nene mbira wiagoha bolangua hene. Ani bialu Sigerono tanohayagi ibu dai bialu Hari Bala weago yu wahalu Yamania tano wiagoria tagira pene. Ani pialu tubari ogoni iba solowara timbuni mini Medidereniana bereagoha pu maro bini. <sup>12</sup> Yuda dindinaga tubari ni paliragohayagi iba solowara timbuni Medidereniana bereago wini.

Yuda hameigini hearu ti nde tinaga one waneiginibi heba mandagi dindi ogoniha hene.

*Heberono tano Debiri tanola Kalebe ibu henego ogo  
(Haguane Heneru 1.11-15)*

<sup>13</sup> Bamba Anduane Homogohanda Yosuahondo lamialu lalu, Dindi mbira Yuda dindi ngami aria Yabune igini Kalebe tu wa mulene nga, lalu lowini. Anigo Yosuahanda bi ogoni mitangi bu howa Anduane Homogo ibugua bibe layadagua bini. Ibugua Heberono tano mini mende Kiriada Araba laga winigo ogoni Kalebe mini. Araba ogoni ibu Anaga hameigini henegonaga mamali hene.\* <sup>14</sup> Kalebe ibugua Anaga aguane-nenaga tano ogoniha Sesai hameiginiru Ahimana hameiginiru Talamai hameiginiru palearia bibahende balu bo taliatagi hene. <sup>15</sup> Ani bialu maha Kalebe ibugua tano ogoni ngelalu hameigini mbira Debiri tanoha palearu baba wai bule pene. Debiri tano ogoni bamba Kiriada Sebe laga winigo ogoniha pene. <sup>16</sup> Ani puwa Kalebe ibugua lalu, Agali mbira Kiriada Sebe tano anda puwa wai bialu dindi karularago ibu i wane Agasa dabu bilo mulebero, lene. <sup>17</sup> Ani layagola Kalebe hamene Kenasa igini Odoniele henegome Kiriada Sebe tano anda puwa bo podalu karulayagola Kalebehanda ibu wane Agasa ibu miyagola dabu bu hene. <sup>18</sup> Ani bialu Odoniele ibugua Agasa ibuni andaga haru

\* 15:13: Hgn 1.20

pialu howa ibuhondo hongo howa lalu, Í aba Kalebehondo dindi mbira i tu wa ngi labe, layagola Agasa ibugua Kalebe hondo pene. Puwa Agasa ibu nogo dongini biralu penego dalipe hayagola Kalebehanda hale halu lalu, Í agi hamelalu ibiribe, lene. <sup>19</sup> Ani layagola Agasa ibugua ibu abahondo lalu, I mo turu halu mbirale mbira ngibelo hameledo. Ína dindi mbira unugohayagi wini ngirigoni dindi ko ibaru nabere dindi lebolaheyago ai dindi iba bere mbira ngibelo hameledo, lene. Ani hale hayagola ibu abahanda dindi iba duguaga lirayagi wiagobi nirayagi wiagobi kirabali ibuhondo mini.

*Yuda hameigininaga tano uru wigi bini*

<sup>20</sup> Yuda hameigini ti tinaga one waneigini heba dindi ta howa haga bini. <sup>21-32</sup> Ti tano haga binidaruni abene unurayagi Idomo dindila tubari wiagoria howa migi binidagoni ndisirigi mbiragonaga tano ogodagua. Kabaselebi Edebi Yagubi Kinabi Dimonabi Adadabi Kedesebi Hasobi Idinanabi Sibibi Telemebi Bealodobi Hasohadadabi Keriodobi Heseroni mini mende Hasobi Amamabi Semabi Moladabi Hasagadabi Hesemonobi Bedebeledebi Hasasualabi Beasebabi Bisiodiabi Balabi Imibi Esemebi Eledoladabi Kesilibi Homabi Sigilagabi Madamanabi Sanasanabi Lebaodobi Silihimibi Ainibi Limonobi uruni tano timbuni lamaga halu pira kirani dira (29) wialu tano maru emene wia para para dewa dege wigiwigi bini.

<sup>33-34</sup> Ndisirigi mendego hari emene barebare wiaruha wigi biniru tano mini uru wini. Eседаolobi Sorabi Asanabi wialu Sanoabi Enganimibi Tabuabi Enamabi wini. <sup>35</sup> Ani bialu Yaramudubi Adulamabi Sogobi wialu Asegabi wini. <sup>36</sup> Ani wialu Saraimibi Adidaimibi Gederabi Gederodaimibi wigi bini. Tano timbuni uruni lamaga halu deria (14) bibahende wialu tano maru emene dewa dege wia para para bu wigi bini.

<sup>37</sup> Ndisirigi tebonegonaga tano winidaru mini uru. Senanabi Hadasabi Migidalagada tanobi wini. <sup>38</sup> Ani bialu Dileanabi Misibabi Yogodelebi wini. <sup>39</sup> Ani bialu Lagisibi Bosogadabi Egelono tanobi wini. <sup>40</sup> Ani wialu Kabonobi Lamamabi Kidilisi tanobi wialu <sup>41</sup> Gederodobi Bededagonobi Namabi wialu Mageda tanobi wigi bini. Tano timbuni uruni lamaga halu nguirani mbira (16) wialu tano maru emene emenerubi uruniha dewa wia para para bu wigi bini.

<sup>42</sup> Ndisirigi manegonaga tano urudagua wini. Uruni Libina tanobi Edere tanobi Asana tanobi wialu <sup>43</sup> Ibida Asana Nesibi tano uruni wigi bini. <sup>44</sup> Keila tano Agasibi tano Maresa tanobi wigi bini. Tano timbuni uruni dira wialu tano maru emene emenebi uruniha wia para para bu wigi bini.

<sup>45</sup> Ndisirigi daunigonaga tano wigi biniru uru. Egeronohayagi tano marubi dindi emene emene wia para para bu maru wigi bini. <sup>46</sup> Ani wigi binidagoni Asadodo tano wiagoria kaware wima pialu Egerono howa tano dewa wigi bialu iba solowara timbuni Medidereniana bereagoria wiatagi hene.

<sup>47</sup> Ani bialu Asadodola Gasala ogoni labonaga tanobi dindi emene emene unurayagi dewa wigi bima pialu Iyibi dindiha tubari wiagoria iba emene mbira peagoria tubari wialu ni paliragohayagi iba solowara Medidereniana bereagoria wiari hene.

<sup>48</sup> Ndisirigi waraganegonaga tano maru hari bare bare wiaruha wigi binigo uru. Samiribi Yadiribi Sogobi tano uruni wini. <sup>49</sup> Ani wialu Danabi Kiriada Sebe tano mini mende Debiribi wialu <sup>50</sup> Anababi Esedemoabi Animi tanobi wini. <sup>51</sup> Ani bialu Gosenebi Holonobi Gilobi tano uruni wigi bini. Tano timbuni uruni lamaga halu bearia (11) bibahende wialu tano maru emene emene dewa tano uruniha kaware wia para para bu wigi bini.

<sup>52</sup> Ndisirigi kanegonaga tano maru wigi binigo uru. Araba tanobi Duma tanobi wialu Esana tanobi wialu bini. <sup>53</sup> Ani bialu Yanimibi Bede Tabuabi wialu Abegabi tano uruni wini. <sup>54</sup> Tano marubi winigo Humudabi Kiriada Araba tano mini mende Heberono winigobi Siobi uruni wini. Tano timbuni uruni dira wialu tano maru emenebi dewa tano uruniha wia para para bima pene.

<sup>55</sup> Ndisirigi halinigonaga tano maru wigi binirunaga mini Maonobi Kamelobi Sibi tanobi wialu tano mbira mini Yudabi wini. <sup>56</sup> Ani bialu Yaserilibi Yogodeamabi Sanoabi tano uruni wini. <sup>57</sup> Ani bialu Kaini tanobi Gibeab tanobi Timina tanobi uruni wialu tano timbuni dege lamaga halu pira wialu tano maru emenebi wia para para bigi bini.

<sup>58</sup> Ndisirigi dinigonaga tano wigi binigo uru. Halahulu tanobi Bedesuru tanobi Gedo tanobi wialu bini. <sup>59</sup> Ani bialu tano maru Maradabi Bedanodobi Eledegonobi tano timbuni uruni waragara wialu tano uruniha tano maru emenebi wia para para bini.

<sup>60</sup> Ndisirigi pinigonaga tano urudagua wini. Kiriada Bala tanonaga mini mende Kiriada Yarimu laga winigobi Laba tanobi wini. Tano timbuni kira ogoni wialu ogonilaboha tano maru emenebi wia para para bini.

<sup>61</sup> Ndisirigi beanegonaga (11) tano maru dindi ko iba dalu naibaga wiagohayagi winiru urudagua wigi bini. Bedearaba tanobi Midini tanobi wialu Segaga tanobi wini. <sup>62</sup> Ani bialu Nibisana tanobi Ibi tano laga wiagobi Engedi tanobi wini. Tano timbuni uruni waragara wialu uruniha tano maru emenebi wia para para bu wigi bini.

<sup>63</sup> Ani winigo nde Yuda hameigini tigua Yabusuali Yarusaleme tanoha haga hearu bo taliatagi habe nahe hene. Ani heagola nde Yabusu hameigini uruni ti Yudaliru baba mandagi Yarusaleme tanoha haabo hene.✧

## 16

*Eberaimi hameiginibi Manase hameigini ni paliragohayagi henerubi tinaga dindi tu wa minigo ogo*

<sup>1</sup> Yosebe aguaneneru tinaga dindi tu wa minigo unurayagi tubari Iba Yodana peagoria Yarigo tano kaware wiagoria iba duguaraga halu piaga wiagoria ani tagira ibiragohayagi howa pialu dindi ko dalu naibaga wiagoria anda pene. Yarigo tano howa hari bare bare wiagoria bolangua halu Bedele tano wiagoria tagira pene. <sup>2</sup> Bedeleni howa pialu Lusu tano wiagoria bolangua halu Adarodo Ada tano bamba Aga hameigini hene wiagoria bolangua hene. <sup>3</sup> Ani bialu lone ni paliragoha tubari Yabaledeni bolangua halu Bedehorono tano wiagoria unura tagira pene. Ogoriani howa Gesere tanoni bolangua halu iba solowara timbuni Medidereniana bereagoria tagira pene.

<sup>4</sup> Yosebe aguaneneru ti hameigini kira Eberaimi hameiginibi Manase hameigini halu mende ni paliragohayagi henerubi tigua dindi ogoni karulene.

<sup>5</sup> Eberaimi hameigininaga dindi ogodagua wini. Tinaga dindi tubari Adarodo Ada tano wiagoria howa ni tagira ibiragohayagi pialu Bedehorono tano uyura wiagoria pialu <sup>6</sup> iba solowara timbuni Medidereniana bereagoria tagira pene. Dindi mbira Migimedada wiago tinaga dindi dege gibuni uyurahayagi wini. Tinaga dindi ogoria howa ni tagira ibiragohayagi tubari pu dai bialu Tanadasilo dindi wiagoria bolangua howa ni tagira ibiragohayagi pialu amuraore Yanoa tano wiagoria tagira pene. <sup>7</sup> Ani bialu Yanoa tanoni howa uba dali halu Adarodo tanobi Nara tanobi wiagoria pene. Ogoriani howa puabo halu Yarigo tano bolangua halu Iba Yodana peagoria tagira pene. <sup>8-9</sup> Tabua tano wiagoria howa tubari ni paliragohayagi pialu Kana iba peagoria bolangua halu iba solowara timbuni Medidereniana bereagoria tagira pene. Dindi ogonibi tano ogoniha wiarubi dindi bayale ti heagoria kaware wia parapara bu wiarubi bibahende Eberaimi hameiginiru ti helo miai hene. Eberaimi hameigini aria maru ti Manase hameigininaga dindiha tanobi dindi marubi wiagoha tihondo miyagoriani hene. <sup>10</sup> Ani heagola tigua Kenanali maru Gesere tanoha hearu bo pela nabi helo waho hene. Ani heleagola Kenanali ti Eberaimi hameigini baba mandagi howa tigua Eberaimi hameigininaga garabaya biabe ale biahaga ho helene.✧

## 17

### *Manase hameigini halu mende ni paliragohayagi heneru dindi tu wa minigo ogo*

<sup>1</sup> Yosebe igini wahene Manase henego ogoni ibunaga hameigini aguanene hearu tinaga dindi Iba Yodana peagoha ni paliragohayagi tu wa mini. Manase igini wahene Magiri henego ogoni ibu Gileada aba howa wai biaga mugube hongohe hene. Ani heagola tigua dindi hobane mbira Iba Yodana ni ibiragohayagi Gileada tano wiagobi Basana tano wiagobi Magiri aguaneneru ti helo tu wa mini. <sup>2</sup> Manase igini aguaneneru ogodagua hama ibini. Abiesebi Helegebi Asarielebi Segemebi Hebebi Semidabi haga bini. Isaraeleali tigua dindi tu wialu howa dindi abene Iba Yodana peagoha ni paliragohayagi Yosebe igini Manase aguanene uruni ti helo tu wa mini. <sup>3</sup> Selobehada ibu Hebe igini Hebe ibu Gileada igini Gileada ibu Magiri igini Magiri ibu Manase igini hene. Anigo Selobehada ibu igini mbira nahe howa ibu wandari dege taribu hene. Ibu wanedaruni tinaga mini uru berene. Malabi Noabi Hogolabi Miligabi Tirisabi uruni biraga bini. <sup>4</sup> Ani berenego wandari uruni tigua loma binigo mo miaga Eleasabi Nunu igini Yosubi agali haguane maru bu hearubi ti hearia puwa lalu, Ala Anduane Homogohanda Mosesehondo bi lalu, Selobehada igini mbira nahedago ibu wane bedaruhondo dindi mbira tu wa mibe leneya, lalu lamini. Ani layagola tigua wandari urunibi Manase hameigini bu hearubi dindi Anduane Homogohanda tu wa ta habe layadagua bialu migi bini. ✧ <sup>5-6</sup> Isaraele hameigini hearume dindi maru Selobehada wane biaru tinaga waneigini aguaneneru tu wa mini wiago heba biamaga howa Manase hameigini ti dindi timbuniore hameigini pira holene ti hai hene. Ani wu howa Manase hameigini ti degeme Iba Yodana doma ederayagi dindi timbuni Gileada wiagobi Basana wiagobi ti hai hene.

<sup>7</sup> Manase hameigini tinaga dindi tubari Ase dindi wiagoria howa Segeme tano ni tagira ibiragohayagi howa Migimedada dindiha tagira pene. Ani bialu unurayagi wima pialu Enedabua wali agali heagoria tubari wini. <sup>8</sup> Tabua dindiha dindi wu mabu bu wiago bibahende Manase hameigininaga wini. Tabua tano ogoni Manase Eberaimila tubarini winigo ogoni Eberaimi aguanenerunaga wini. <sup>9</sup> Ani bialu dindi tubari iba emene mbira mini Kana peadagua dalipe hene. Tano maru iba ogoni tene unurayagi winiru bibahende Manasenaga dindiha winigoyu Eberaimi hameigini tinaga dege wini. Anigo Manase hameigini tinaga dindi iba Kana ogoni tubari uyu-rayagi pialu iba solowara timbuni Medidereniana bereagoria tagira pene. <sup>10</sup> Dindi emene mbira iba Kana ogoniha abene unurahayagi wiago Eberaimi hameigini tinaga wialu abene uyurahayagi wiago Manase hameigini tinaga wini. Ni paliragohayagi iba solowara timbuni Medidereniana bereago tubari wini. Ani bialu abene uyurahayagi Manase hameigini ti baba tubari Ase hameiginirunaga dindi winigoria bolangua halu ni paliragohayagi uyurayagila dombeneha pupe halu Isaga hameigini dindi ni tagira ibiragohayagi uyurayagila dombeneha hene. <sup>11</sup> Isaga dindihabi Ase dindihabi tano wiaru Manase hameigini ti karulaga binigo ogo. Bedesana tanobi Ibileama tanobi ogonilaboha tano maru emene emene wiarubi ti karulo hene. Tano maru Dobi Endobi karulalu Tanagabi Megidobi karulalu tano timbuni uruniha tano emene maru wia parapara bima pearubi bibahende karulai hene. <sup>12</sup> Anigo Manase hameigini tigua dindi uruniha Kenanali bu hearu balu taliatagi habe nahe howa Kenana wali agali uruni ti heba mandagi haabo hene. ✧ <sup>13</sup> Mani Isaraele ti dewali hongohe howa Kenana wali agali bu hayadaru bo taliatagi nahabeheyagola tigua tinaga garabaya biabe ale biahaga helo helaga bini.

<sup>14</sup> Mani howa Yosebe aguanene hearume Yosua hearia puwa lalu, Inahondo dindi mbiraore hangu ngirigo aginagabe. Anduane Homogohanda ina mo dewaoreho heledagome dindi ogoni ina bibahende holene nakarulapeda, lene.



<sup>15</sup> Ani layagola Yosuahanda ladai bialu lalu, Ai tí dewaliore halu Eberaimi dindiha hari barebare ngarubi nakarulape degeyagua nde Perese dindi ngagohabi Lebaimi dindi ngagohabi pialu tí ogoniha hole irabu ngaru e ima dibalu hongole pudaba, lene.

<sup>16</sup> Ani layagola Yosebe aguanene biaru tigua ladai bialu lalu, Hari barebare ogoniha ina holene nakarulape kamagoni. Anigo iname dindi ulini bayale ngago karulole manda birimayagua nde Kenanali dewaore Bedesana tano ngagohabi dindi emene emene tanoha wia parapara bidaruhabi dewaore ka. Ani bialu Yaserili tano ngagoria wai biaga garo ale nogo hosime gililaga mini karisi aeaneme wabini dewaore nga, lene.

<sup>17</sup> Ani layagola Yosuahanda Eberaimi hameigini Manase hameiginilahondo lamialu lalu, Ina tíhondo heneneore larogo tí dewaliore howa hongoheore kamigoni. Tí dindi mbiraore hanguni holene nakarulapedago dindi marubi wiatago hole tigua dindi taya bulene karulape kamigoni. <sup>18</sup> Tigua dindi hari barebare ngaru karuloleberemi. Ai tigua pialu irabu tegi ko ngaru e ima dibalu hongowa tínaga dindi ogoni holeberemi. Kenanali karu ti nde wai biaga karisi aeaneme wabini wu howa hongohebi kagoyu tigua bo batagi holeberemi, lene.

## 18

### *Isaraeleali marume dindi tu wa migi binigo ogo*

<sup>1</sup> Isaraeleali tigua wai bialu dindi bibahendeha hameigini palearu bo poda hana hai halu tini Silo tano wiagoria ibu ngoai ho hene. Ani buwa tigua Anduane Homogo mitangi bialu lotu lolenaga Balai Anda ogoriani bu helene. <sup>2</sup> Anigo ti aria hameigini karialihondo ti dindi mbira talebu mia nabi dege hene. <sup>3</sup> Ani heagola Yosuahanda Isaraele wali agali hearuhondo lamialu lalu, Anduane Homogo tínaga mamali henerunaga Ngode Datagaliwabehanda dindi ogo tíhondo ngiyago ai tigua dindi ogoni karulai nahe aginaga hondo kamibe. <sup>4</sup> Tí hameigini mbira mbiranaga agali tebiralí dege dege dabo heladaba. Ani heledemigola ina ti dindi bibahendeha piai halu mani tinaga hameigini pialu holobadagoria hole tinime hondo wule pialu dai buwa i langilo ani dabalú pelolebero. <sup>5</sup> Tigua dindi ogoni kahalú tu wulebira. Yuda hameigini ti dindi abene unurahayagi kago haabo halu Yosebe hameigini ti uyurahayagi kagoniha ogoriani haabo helo. <sup>6</sup> Tigua dindi podene karia bibahendenaga ogobi nga lalu dindi uruninaga bi te bibahende bebani gili biai halu i koria yalu ibalimu. Yalu eberemigola ina Anduane Homogohondo hale halu dindi podene mbirago hameigini ái ibu holobadabe hondolenaga ege tole emene baraga halu gilibu ngagome mo walia haga birago ibu dindi ogoni holebira. <sup>7</sup> Anigo Libai hameigini ti dege dindi mbira tininaga lenego hameigini tí maru kamiru tu wa migi bidamidagua nabulebira. Ti Anduane Homogonaga loma binigo mo miaga holebira. Anigo Gada hameiginibi Lubene hameiginibi Manase hameigini marubi ti dindi Iba Yodana doma edeyagi karulo hai helo Anduane Homogonaga biabe bia haga Mosese ibugua tihondo dindi ogoni ala mini ngagoria kagoni, lene.

<sup>8</sup> Yosuahanda agali maru dindi podene karia hondo wule piyaruhondo lalu, Dindi ogobida lalu garealo wirimidaru mo yalu ibalimu. Ani yalu eberemigola ina ege tole emeneni gilibu ngagome baraga halu mo walia haga biragola Anduane Homogohanda áinaga layadabe hondoliya, lene. Ani laya handala agali biaru tigua Yosuahanda layago hale halu dindi garealalu bebani gili bulenaga dindi hondo wule podene karia biaruha purogo lene. <sup>9</sup> Tigua dindi podene biaru bibahendeha piai halu dindi ogobiya lalu handayago damene bibahende garealowa bebani gilibu wiai hene. Tigua dindi podene kariani ibaga biai halu dindi uruniha tano mbira mbiranaga mini gilibu wiai hene. Ani biai halu mani Yosua hearia Silo dindini tini balai anda bu henedagoria lone dai bini. <sup>10</sup> Ani daibu heagola Yosua ibugua dindi uruni mbira mbirago Anduane Homogohanda hameigini ái ibu mirabe hondole ege tole emene baraga hene. Ani bialu



mani Yosuahanda dindi tu wigi bialu Isaraele hameigini ala dindi nami hearuhondo talebu tahaga bigi bini.

*Dindi tu wialu Beniyamini hameigini minigo ogo*

<sup>11</sup> Beniyamini hameigini ti dindi Yuda Yosebe hameiginila hengeneha wiago mini. <sup>12</sup> Beniyamini hameigini tinaga tubari uyurahayagi pu uyu halu Iba Yodana peagoria howa pialu hari nene emene mbira wiagoria pialu Yarigo tano wiagoria tagira pene. Ogoriani howa ubaamu halu ni paliragohayagi hari emene barebare wiagoria bolangua halu Bedehabene dindi ko iba dalu naibaga wiago Beniyamini hameigini tinaga wini. <sup>13</sup> Ani buwa unurayagi daliape halu hari emene barebare wiagoria bolangua halu Lusu tano mini mende Bedele laga wiagoria tagira pene. Ani bialu tano Adarodo Adara wiagoria daliape halu dindi unurayagi wiago bolangua halu Bedehorono dindi wiagoria tagira pene. <sup>14</sup> Ogoriani howa tubari pubagi halu ni paliragohayagi hari bare wiagoria pupe halu unurayagi Kiriada Bala tano mini mende Kiriada Yarimi laga wiago ha pene. Tano ogoni Yuda hameigininaga wini. Beniyamini hameigini tinaga dindi tubari ni paliragohayagi tano ogoni wini. <sup>15</sup> Ani bialu tubari unurayagi uba amu holene Kiriada Yarimi wiago kaware lowa pialu Nebedoanaga iba duguaraga ho biraga wiagoria bolangua hene. <sup>16</sup> Ani bolangua halu ogoriani daliape halu dindi ulini Hinomo igininaga dindi laga wiago kaware ngelalu hari baba pu banga bini. Hari ogoni ibu dindi abene uyurayagi Lebaimi dindi ulini wiago gibuniha dege hene. Ani bialu dindi tubari unurahayagi dalipenaga Hinomoha dindi ulini ngago hanuni pu pugualu Yabusu hameigini dindiha hari bare emene wiagoria bolangua halu Enerogege dindiha iba duguaraga ho biraga wiago ha pupe hene. <sup>17</sup> Ani bialu ogoriani howa dindi abene uyurayagi dai bialu Enesemese bolangua halu Gelilodo wiagoria tagira pene. Gelilodo ogoriani howa dindi Adumimi handaede halu hariga hari nene weagoha iraga halu piaga wiagoria bolangua hene. Ani bialu tubari ege tole timbuni mbira mini Bohana winigoria bolangua hene. Mini Bohana ogoni Lubene iginini mbira hene. <sup>18</sup> Ani bialu ogoriani howa ubadali halu hari nene wiagoria uyurahayagi Yodana dindiha dindi ulini baya panda panda wuyu peagoria wa handa gimbu bialu <sup>19</sup> Bedehogola pialu mini Homene Iba bereago ogoniha yupe halu Iba Yodana mogo biragoria tagira pene. Beniyamini hameigininaga dindi tubari abene unurahayagi ogonidagua wini. <sup>20</sup> Ani wialu ni tagira ibiragohayagi Iba Yodana peago tubari wini. Dindi ogoni Beniyamini hameigini tinaga dindiore wilonaga tubari penegodagua ogoni.

<sup>21</sup> Beniyamini hameigini tinaga tano uru wini. Yarigobi Bedehogolabi Emege Kesesibi <sup>22</sup> Bedearababi Semaraimibi Bedelebi <sup>23</sup> Abimibi Parabi Oborabi <sup>24</sup> Kebaramonibi Obonibi Gebabi tano uruni daga lamaga halu homberia (12) wini. Tano emene marubi uruniha wia para para bu wini. <sup>25-28</sup> Beniyamini hameigini tinaga dindiha tano maru wigi binigo uru. Gibeonobi Lamabi Berodobi Misibabi Kebirabi Mosabi Legemebi Iribelebi Taralabi Selabi Halebebi Yabusu ibu mini mende Yarusalemebi Gibeabi Kiriada Yarimibi tano uruni bibahende daga lamaga halu pira mbirani maria (14) wialu tano uruniha tano maru emene emenebi wia parapara bu wigi bini. Ai dindi uruni bibahende Beniyamini hameigini tinaga wini.

## 19

*Simiono hameigininaga dindi tu wa minigo ogo*

<sup>1</sup> Ege tole halu mende baraga howa handalu hearia Simiono hameigini hearunaga mini wiaria hondowa ti dindi tu wa mini. Simiono hameigininaga dindi ogoni Yuda hameigininaga dindi wiago dombeneha tu wa mini. <sup>2-6</sup> Dindi ogoniha tano wigi binigo uru. Beasebabi Sebabi Moladabi Hasasualabi Balabi Esemebi Eledoladabi Bedulubi Homabi Sigilagabi Bedemagabodobi Hasasusabi Bedelebaodobi Saruhenebi tano uruni

daga lamaga halu pira mbirani tebira (13) wini. Tano timbuni uruni heba tano maru emene emenebi wia parapara bu wia dege bini.✧

<sup>7</sup> Ani bialu tano maru Ainibi Limonobi Ederebi Asanabi tano maria timbuni uruni heba tano maru emene wia parapara bu wiarubi tinaga wini. <sup>8</sup> Simiono hameigininaga tano timbuni uruniha tano maru emene emene wiarubi karulaga bima pialu Balad-abere tano mini mende Lama laga dindi abene unurahayagi wiagoria wima tagira pene. <sup>9</sup> Yuda hameiginirunaga dindi tu wa miyadago ti hangu holonego timbuniore hayagola lone tu wia dai bialu Simiono hameigini ti dombeneha helo tihondo mini.

*Sebulunu hameigini dindi tu wa minigo ogo*

<sup>10</sup> Ege tole halu tebone baraga howa handalu hearia Sebulunu hameiginiru tinaga mini wiaria hondowa ti dindi tu wa mini. Sebulunu hameigininaga dindi tubari pialu Saridi tano wiagoria tagira pene. <sup>11</sup> Ani bialu ogoriani howa tubari pu banga bialu ni paliragohayagi pialu Mareala tano wiago yadai bialu Dabesede tano kaware wiago bolangua halu Yogoneama tanonaga abene ni tagira ibiragohayagi iba emene peagoria tagira pene. <sup>12</sup> Saridi tanoha howa ni tagira ibiragohayagi tubari Kisilodo Tabo gibuni pialu Daberada tano wiagoha puabo howa Yabia tano wiagoria ubadaga halu pene. <sup>13</sup> Tubari ogoni puabo halu ni tagira ibiragohayagi Gedehebe tanobi Edegasini tanobi wiagoria bolangua hene. Ani bialu ogoriani howa beregedalu Nea dindi wiagoha bolangua halu Limono dindi polene hariga peagohayagi pene. <sup>14</sup> Ani puwa abene uyurayagi tubari pu banga bialu Hanadono tano wiagoria bolangua halu Ibidahale dindi ulini wiagoria tagira pene. <sup>15-16</sup> Sebulunu hameiginirunaga dindi winigoha tano maru winigo uru. Kadada tanobi Nahalala tanobi Simirono tanobi Idala tanobi Bedeleheme tanobi uruni daga lamaga halu homberia (12) wuwa tano maru emene emenerubi wia parapara bini.

*Isaga hameiginirunaga dindi tu wa minigo ogo*

<sup>17</sup> Ege tole mane halu baraga howa handalu hearia Isaga hameiginirunaga mini wiaria hondowa ti dindi tu wa mini. <sup>18</sup> Isaga hameigini tinaga dindiha tano winidaru uru. Yaserilibi Kesulodobi Sunemebi <sup>19</sup> Habaraimibi Sionobi Anaharadabi wini. <sup>20</sup> Ani wialu Labidibi Kisionobi Ebesebi <sup>21</sup> Lemedebi Enganimibi Enehadabi Bedebasesebi wini. <sup>22-23</sup> Ani wuwa Isaga hameiginirunaga dindi tubari tano maru wiagoria pialu ogodagua pene. Hari Tabo heagoria howa pialu Sahasuma tanobi bolangua halu Bedesemese tano wiagoria piaho wialu amura Iba Yodana peagoria tagira pene. Isaga hameiginiru tinaga tano timbuni uruni pira mbirani waragaria (16) wialu tano maru emene emenebi kaware wia parapara dege bini.

*Ase hameiginirunaga dindi tu wa minigo ogo*

<sup>24</sup> Ege tole dauni halu baraga howa handalu hearia Ase hameiginirunaga mini wiaria hondowa ti dindi tu wa mini. <sup>25-26</sup> Ase hameiginiru tinaga dindi ogoniha tano wigi binidarunaga mini uru. Helegada tanobi Hali tanobi Bedene tanobi Agasaba tanobi wialu Alamamelege tanobi Amada tanobi Misala tanobi wigi bini. Ase hameiginirunaga dindi tubari ni paliragohayagi Hari Kamelo heagoriabi Siholibinada tanobi wiago kaware dege pene. <sup>27</sup> Ani bialu tubari ni tagira ibiragoha pudai bialu Bededagono tano wiagoria pialu Sebulunu hameigininaga dindi tubari kaware dege bolangua halu Ibidahale dindi ulini wiagoha bolangua halu pene. Tubari ogoni dindi abene uyurahayagi pudai bialu Bedemege tanobi Naele tanobi wiagoha tagira pene. Ani pialu tubari uyurayagi puabo halu tano maru Kabulubi <sup>28</sup> Eberonobi Lehobobi Hamonobi Kanabi tano uruni bibahende wiagoria bolangua haga bialu tano timbuni Saidono wiagoria tagira pene. <sup>29</sup> Ani bialu ogoriani howa lone beregedalu tubari Lama tano wiagoria pialu Taia tano wai pabe hongohe ege toleme bu mabubi heagoria tagira

✧ 19:2-6: 1 Bit 4.28-33

pene. Ani puwa tubari ogoriani beregedalu Hosa tanohayagi pudai bialu iba solowara timbuni mini Medidereniana bereagoria pu maro bialu pene. Ani pialu tano maru Mahalababi Agasibibi <sup>30-31</sup> Umabi Abegebi Lehobobi tano uruni Ase hameigininaga dege wigi bini. Tano timbuni uruni daga lamaga halu pira kirani kira (22) wialu tano maru emene emene wia parapara wiarubi bibahende ti karulo hene.

### *Nabadali hameigininaga dindi tu wa minigo ogo*

<sup>32</sup> Ege tole waragane halu baraga howa handalu hearia Nabadali hameigini hearu tinaga mini wiaria hondowa ti dindi tu wa mini. <sup>33</sup> Tinaga dindi tubari Helebe tano wiagoria howa pialu dindi Sananimiha ira mini oga heagoria tagira pialu Adaminegebe tano wiagoria bolangua halu Yamania tano pialu amuraha Lagumu tano wiagoha puabo halu Iba Yodana angeni tagira pene. <sup>34</sup> Ani pialu tubari ni paliragohayagi pudai bulenaga Asanodo Taboro tano wiagoha pudai bialu Hugogo tano wiagoria pene. Ani pialu dindi abene unurahayagi Sebulunu hameigini dindi tubari wiago kaware pialu ni paliragohayagi Ase hameiginiru baba tubari wiagoria puabo halu ni tagira ibiragohayagi Iba Yodana peagoria pene. <sup>35</sup> Tinaga tano maru pabe ege toleme bu mabu bini hongohe haga binidaruni Sidimi tanobi Sere tanobi Hamada tanobi Lagada tanobi Kinerede tanobi <sup>36</sup> Adama tanobi Lama tanobi Haso tanobi <sup>37</sup> Kedese tanobi Ederei tanobi Enehaso tanobi wialu <sup>38-39</sup> Yirono tanobi Migidalele tanobi Horeme tanobi Bedanada tanobi Bedesemese tanobi wigi bini. Tano timbuni uruni daga lamaga halu pira mbirani dira (19) wiagoha tano maru emene emenebi wia parapara bu wiaru heba bibahende Nabadali hameiginirume karulo wini.

### *Dana hameiginiru dindi tu wa minigo ogo*

<sup>40</sup> Ege tole kane halu baraga howa handalu hearia Dana hameigini hearunaga mini wiaria hondowa ti dindi tu wa mini. <sup>41</sup> Dana hameigini tinaga tano wigi biniru mini uru. Sora tanobi Esedaolo tanobi Irisemese tanobi <sup>42</sup> Salabimi tanobi Ayalono tanobi Idila tanobi <sup>43</sup> Elono tanobi Timina tanobi Egerono tanobi <sup>44</sup> Eledege tanobi Gibedono tanobi Balada tanobi <sup>45</sup> Yahudu tanobi Beneberaga tanobi Gadarimono tanobi <sup>46</sup> Meyagono tanobi Lagono tanobi dindi emene emene Yoba tanoha wiarubi heba ti karulai hene. <sup>47</sup> Ani howa mani agali dindi aba ogoniha hene hearume Dana hameiginiru baba waitigi halu Dana hameigini bo batagi hene. Ani biya handala Dana hameigini ti tagira pialu Laisi hameigininaga dindi wiago karulole lowa Laisiali hearu baba wai bini. Wai bialu wali agali dewaore bo wahai halu Laisi tano Dana hameiginirume karulene. Karulowa mani dindi ogoni Dana hameigini tinaga lowa malu lalu karulo howa tano ogoni ala mini Laisi laga winigo mani tigua tinaga mamali mini Dana wia aribia hene. ✧ <sup>48</sup> Dindi ogoniha tano timbuni wiarubi tano maru emene wia parapara bu wiarubi bibahende Dana hameiginiru ti karulo hai hene.

### *Yosua dindi tu wa minigo ogo*

<sup>49</sup> Isaraele hameigini tini bibahende dindi tuwa ta hai howa dindi mbira Nunu igini Yosua tu wa mini. <sup>50</sup> Yosua ibugua ala Isaraele hameigini bu hearuhondo lalu, I dindi mbira Timinada Sera tano Eberaimi dindihayagi hari bare ngagoha wiago ngidaba, lene. Ani layagola nde Anduane Homogohanda bibe lenedagua tigua dindi ogoni Yosua mini. Miyagola Yosua ibugua tano biago mo tiga budai bialu ibuni tano ogoniha hene.

<sup>51</sup> Ani biai howa loma binigo mo miaga Eleasabi Nunu igini Yosubi Isaraeleali hameigini mbira mbiranaga agali haguane haga bini hearubi tigua Silo tanoha Anduane Homogonaga Balai Anda biagonaga panga haraba wiagoriani ngoai ho hene. Ani ngoai ho hearia tigua dindi Anduane Homogohanda Isaraele hameiginiruhondo minigo tu wa taholenaga hameigini mbiranaga dindi ago mibehedabe hondole ege tole emene

biaru Anduane Homogonaga deni baraga hayagola walia hayadagua dindi bibahende tu wa tahai halu maro bini.

## 20

*Tano mbira mbira wiaruha pora bialu puwa ha do holene ogo  
(Dagalene 35.9, Mana Loyane 19.1-13)*

<sup>1-2</sup> Anduane Homogohanda Yosuahondo Isaraele wali agali lamia lowa lalu, Tano mbiraha pora bialu puwa ha do holene maru dabalimu lalu ala Mosesehondo lamirugo áyu dabadaba.\* <sup>3</sup> Wali agali mbiralime mendeali mememe ko ba bowa bo home laragola homayagonaga damenemeibunibi bo wahole talirago ibu dindi ogoniha pora bialu pelo. <sup>4</sup> Ibumime dindi uruni mbiragoha pora bialu puwa tale biagane anda pugu bulene ngagoria howa agua bini lalu ogoni handaya ho haga karuhondo lamulene nga. Ani bidagola tigua dindi ogoniha anda íbu lowa ibu helo dindi tu wu mulebira. <sup>5</sup> Dameneme ibu nde bo wahole lowa talima anda ibiragola wali agali ogoniha karu tigua pora bialu ibiyago bo wahelo bo wahole ibiyagohondo minu namulebira. Wali agali ogoniha karu tigua agali ogoni bayuwa mamage howa handaya ho holebira. Agali homayagoni ibugua barolo manda buwa ndo ko ba puwa homaya. <sup>6</sup> Ibugua dindi ogoniha howa godi dabagame wali agali deni dabalumu mememe homelo baya lalu dabayagua agali biago ogoniha haho ngane Loma binigo mo miaga Haguane Timbuni ogoningi hene kago homaragola ibuninaga dindi andaga dai bulebira, lene.

<sup>7</sup> Anduane Homogohanda ani layagola Isaraele wali agali Iba Yodana ni paliragohayagi howa Galili uyurahayagi barebare Nabadali dindi tano mini Kedese tu wu wini. Dindi dombeni Eberaiminaga barebareha tano mini Segeme tu wu wini. Dindi unurahayagi Yudanaga barebareha tano mini Heberono tu wu wini. <sup>8</sup> Ani bialu Iba Yodana poragonaga Yarigo tano ni ibiragohayagi howa dindi dalu emene hangu ibaganeha hameigini Lubene daluha tano mini Bese tu wu ho wini. Hameigini Gada daluha Gileadani tano mini Lamodi tu wu wini. Hameigini Manase daluha Basanani tano mini Golana tu wu wini. <sup>9</sup> Yuda wali agalibi wali agali maru tara ti heba hole ibinirubi ti heba hama lama ibiniru dindi uruni mbiraha pora bialu puwa ha do helonaga ani wini. Wali agali mbira mememe ko ba bowa bo homelayagua ogoni ibu wali agali homayago dameneme ibuni nde bo wahole lowa taliragola ibu pora bialu puwa dindi ogoniha ha do holebira. Godi dabagame wali agali deni godi ala lo dabowa ibu bolene nga layagua bolebira.

## 21

*Libai hameiginiru dindi tu wa minigo ogo*

<sup>1</sup> Libai hameigini aria agali haguane hearume loma binigo mo miaga Eleasabi Nunu igini Yosubabi Isaraele hameigini mbira mbira hearunaga agali haguane rubi ti hearia pene. <sup>2</sup> Libai hameigini agali haguane biaru tigua Kenana dindiha Silo tano wiagoria Isaraele hameigini agali haguane maru mo ngoai howa tihondo lalu, Anduane Homogohanda ibunaga bi mana latagi haga Moseseha howa inahondo bi mbira langiyagoni. Ibugua lalu, Ina Libai hameigini bu kamaru nde tano timbuniha holomayabi dindi bayale dataniru anda haga ngago mbira inanaga nogo sibi bulumagaru hinalu holomayanagabi tu wa ngulene nga laya, lene.\* <sup>3</sup> Ani layagola Isaraele hameigini bu hearume Anduane Homogohanda layadagua bialu dindi marubi tano marubi tininaga winiru Libai hameigini helonaga tu wa mini.

<sup>4</sup> Ani bialu tigua dindi tu wa mulene pigane Anduane Homogo ibunime Kohada hameiginiru dindi agohayagi tu wa mibehedabe hondolenaga ege tole emene biaru baraga hene. Ani baraga howa handalu hearia loma binigo mo miaga Arono

\* 20:1-2: Dag 35.6-32, Man 4.41-43, 19.1-13    \* 21:2: Dag 35.1-8

aguaneneru Kohada hameigini hayadaruni ti Yuda dindihabi Simiono dindihabi Beniyamini dindihabi dindi uruniha howa tano pira mbirani tebira (13) bibahende mini. <sup>5</sup> Ani biyagola Kohada hameigini maru hayadaru tibi nde tano maru Eberaimi hameigini dindihabi Dana hameigini dindihabi Manase halu mende ni paliragohayagi henerunaga dindihabi dindi uruniha howa tano timbuni pira ti helonaga tu wa migi bini.

<sup>6</sup> Ani bialu Gesono hameigini hearu tibi nde tano pira mbirani tebira (13) tu wa mini. Tano timbuni uruni Isaga hameigininaga dindihabi Ase hameigininaga dindihabi Nabadali hameigininaga dindihabi Manase hameigini halu mende ni tagira ibiragohayagi henerunaga dindihabi dindi uruniha howa tu wa migi bini.

<sup>7</sup> Merari hameigini hearu tibi nde tano pira mbirani kira (12) tu wa mini. Tano timbuni uruni Lubene dindihabi Gada dindihabi Sebulunu dindihabi dindi uruniha howa tu wa miyagola ti uruniha hene.

<sup>8</sup> Isaraelealime Anduane Homogo ibugua Mosesaha howa bi latagi hayadagua talialu tigua ege tole emene biaru baraga halu Libai hameiginiru dindi ani tu wa migi bini. Tano uruniha dindi emene wigi biarubi Libai hameigini tinaga nogo sibi bulumagaru hinu helobi mini.

<sup>9-10</sup> Yuda hameiginibi Simiono hameiginibi tinaga dindiha howa tano timbuni Arono aguaneneru Kohada hameigini tu wa migi binirunaga mini uru gilibu wigi bida. Kohada hameigini ti Libai aguaneneru hene. Isaraelealiru tigua Arono aguanenerunaga dindi ala tu wabagi holenaga ege tole baraga hene.

<sup>11</sup> Tano timbuni mbira Araba mini mende Heberono ogoni winigo Yuda hameiginirunaga dindi hari bare wiagohayagi wini. Mini Araba ogoni Anaga aba hene. Yuda hameigini tigua dindi ogoni Arono aguanene ti helo mialu dindi bayale gibugibu wiarubi ti nogo sibi bulumagaru hinaga bialu helo mini. <sup>12</sup> Ani bialu Heberono tano timbuni ogoninaga dindi emene wiarubi tano emene wia para ho wiarubi ala Isaraele hameigini tigua Yabune igini Kalebehondo tu wa mialuibunaga dindi ogoniore ngelonaga mini.

<sup>13</sup> Tigua loma binigo mo miaga Arono aguanene hearuhondo Heberono tu wa minidagoni agalime ibida pialu ha do holene tano mbira winigo mini. Tano maru minidaruni Libina tanobi <sup>14</sup> Yadiabi Esedemoabi <sup>15</sup> Holonobi Debiribi <sup>16</sup> Ainibi Yutabi Bedesemese tanobi uruni wigi bini. Tano timbuni dira uruni Yuda hameigini Simiono hameiginilanaga dindiha winigobi ti tu wa mini. <sup>17</sup> Beniyamini hameiginime tinaga dindiha howa tano timbuni maria minidaruni Gibeonobi Gebabi <sup>18</sup> Anadodobi Alamonobi uruni tu wa mini. <sup>19</sup> Arono hameigini uruni ti loma binigo mo miaga howa tano timbuni miniru daga lamaga halu pira mbirani tebira (13) uruniha dindi emene wia parapara bu wiarubi heba ti nogo sibi bulumagaru hinaga bialu helo mini.

<sup>20</sup> Libai hameigini Kohada hearu aria maru ti Eberaimi hameigini dindiha tano marubi wigi bini. <sup>21</sup> Kohada hameigini uruni ti tano timbuni maria tu wa mini. Tano uruni mbirago Segeme tano hari bare wiagoha winigo ogoniha agali ibida pora bialu ha do holene tano biaru aria winigo ogonibi Gesere tanobi <sup>22</sup> Kibisaimi tanobi Bedehorono tano winigobi mia dege bini. <sup>23</sup> Dana hameigini tiguabi nde tano timbuni maria Eledege tanobi Gibedono tanobi <sup>24</sup> Ayalono tanobi Gadarimono tanobi tu wa mia dege bini. <sup>25</sup> Manase hameigini maru ni paliragohayagi heneru tigua nde tano timbuni kira Kohada hameiginiru mini. Tano ogonilabo Tanaga tanola Gadarimono mini mende Ibileama tanola tihondo mia dege bini. <sup>26</sup> Kohada hameigini uruni ti tano timbuni minidaru daga lamaga halu pira uruniha dindi emene tomo dataniru anda holene bayale wiagoha tinaga nogo sibi bulumagaru hinu haga winiru heba mia dege bini.

<sup>27</sup> Libai hameigini maru Gesonoali tihondo Manase hameigini maru ni ibiragohayagi henerunaga dindini tano timbuni kira Basana dindihayagi Golana tano winigo ogoni



agali ibida pora bialu ha do haga tano winigobi Besedera tano winigobi mia dege bini. <sup>28</sup> Isaga hameiginirume tinaga dindiha tano timbuni maria wiaru Gesono hameigini urunihondo minigo uruni Kisiono tanobi Daberada tanobi <sup>29</sup> Yamudu tanobi Enganimi tanobi mini. <sup>30</sup> Ase hameiginirunaga dindiha howa tano timbuni maria mini. Misala tanobi Abadono tanobi <sup>31</sup> Helegada tanobi Lehobo tanobi mini. <sup>32</sup> Nabadali hameiginirunaga dindiha tano timbuni tebira wiaru Gesono hameiginiru mini. Tano uruni Kedese tano Galilihayagi wiago ogoni agali ibida pora bialu ha do haga tano mbira wiagobi Hamododo tanobi Kadana tanobi mia dege bini. <sup>33</sup> Gesono hameigini mbira mbira hearu ti tano timbuni minidaruni daga lamaga halu pira mbirani tebira (13) bibahende minigo wu hene. Tano timbuni uruniha dindi emene tomo dataniru anda holene bayale wiarubi heba ti nogo sibi bulumagaru hinu helonaga miai hene.

<sup>34</sup> Libai hameigini maru Merari hameigini hearu tihondo Sebulunu dindiha tano wiaru maria mo mini. Tano timbuni uruni Yogoneama tanobi Kada tanobi <sup>35</sup> Dimina tanobi Nahalala tanobi winigo mini. <sup>36</sup> Lubene dindihayagi tano maria wiaru Merari hameigini hearuhondo mini. Tano timbuni uruni Besere tanobi Yahasa tanobi <sup>37</sup> Kedemodo tanobi Mebada tanobi mini. <sup>38</sup> Gada hameiginiru tinaga dindiha tano maria winirubi Merari hameigini hearu ti mini. Tano timbuni uruni Lamodo tano Gileada dindihayagi agali ibida pora bialu ha do haga tano biarua mbira winigobi Mahanaimi tano wiagobi <sup>39</sup> Hesebono tano wiagobi Yasere tano wiagobi mini. <sup>40</sup> Merari hameigini ti tano timbuni minidaru daga lamaga halu hombearia (12) mini. Tano timbuni uruniha dindi emene tomo dataniru anda holene bayale wiarubi heba ti nogo sibi bulumagaru hinilo mini.

<sup>41</sup> Isaraele wali agalime tinaga dindi bibahende ha howa tano timbuni pira mariani halira (48) bibahende Libai hameiginiru helo tu wa mini. <sup>42</sup> Tano uruniha dindi emene tomo dataniru anda holene bayale wiarubi heba ti nogo sibi bulumagaru hinaga bilo mini.

### *Anduane Homogohanda bulebero lalu lowinigo tagira piai helenego ogo*

<sup>43</sup> Anduane Homogohanda Isaraele hameiginiruhondo dindi minidaru bibahende ala tinaga mamaliruhondo lamialu, Ina dindi ogoni ti ngulebero, lalu lowinigodagua henene ani tagira pene. Ani miyagola Isaraele hameigini ti dindi ogoniha puwa bayale hene. <sup>44</sup> Bamba Anduane Homogohanda tinaga mamaliruhondo lamialu lalu, Tinaga miniha mo palia holene karulowa hada paya bu holeberemi, lenego bi ogoni henene lola halu ti ani hene. Ani heagola Anduane Homogohanda ti biamogo biyagome tigua tinaga waitigi bu hearu damene bibahende bope hai hene. Ani biyagola tinaga waitigi hearume ti bope holene hongo nahe hene. ✧ <sup>45</sup> Anduane Homogohanda bi bayale Isaraele wali agali ti baba lowini wiaru layadaguaore lola helo ani biai hene. ✧

## 22

### *Lubene hameiginibi Gada hameiginibi Manase hameigini marubi ti bibahende tini dindi ni ibiragohayagi dai binigo ogo*

<sup>1</sup> Isaraeleali dindi tu wa ta hai ho howa Yosuahanda Lubene hameiginirubi Gada hameiginirubi Manase hameigini maru ni ibiragohayagi henerubi olalu ti bibahende ibu ngoai hene. <sup>2</sup> Ibu ngoai ho hearia ibugua tihondo lalu, Tigua Anduane Homogonaga biabe biahaga Mosesehanda bilimu lalu langiyadagua bialu harimi. Ani bialu inaga bi langirugobi hale halu birimigoni. ✧ <sup>3</sup> Ani bialu howa horo bibahendengi tinaga damene Isaraele wali agali bu karu mbirago yu wa nahe biamogo bialu haabo harimi. Tigua Anduane Homogonaga Ngode Datagaliwabenaga bi layagobi hale halu bayuwa biaabo haga kamigoni. <sup>4</sup> Ai ayu Anduane Homogohanda bamba bulebero lalu lo

✧ 21:44: Yos 11.23, 22.4, Man 7.24 ✧ 21:45: Yos 23.14 ✧ 22:2: Dag 32.20-32, Yos 1.12-15

wiyadagua tínaga damene bu karuni tiha bayale dege holene mbirani heledagoni. Ani bidago ai tínaga dindi Anduane Homogonaga biabe biahaga Mosesehanda tu wa ngingigo Iba Yodana peago ange ni ibiragohayagi ngagoha hama dai bidaba. <sup>5</sup> Ani dai bu howa Anduane Homogohanda ibunaga biabe biahaga Moseseha howa bi mana tihondo bilimu lalu langiyaruni bayuwa taluwa bialu haabo halimu. Ani bialu howa tígua Anduane Homogo tínaga Ngode Datagaliwabhondo gubalini howa ibugua hame ledadagua bialu ibunaga bi langiyago taluwa biai halu mini bilinahe ho halimu. Ani howa tígua tínaga gubalinimebi mandamebi hongo howa ibunaga biabe bia halu halimu, lalu lamini. <sup>6</sup> Yosuahanda bi ogoni lai howa ibugua, Anduane Homogohanda tí biamogo biaabo helo, lalu bi la hene. Ogonidagua layagola tini daluha pole pene. <sup>7</sup> Bamba Mosesehanda Manase hameigini halu mende hearuhondo dindi podene Basana Iba Yodana peago domo ede ni ibiragohayagi wiaru mini. Ani minigo mani Yosuahanda dindi maru Iba Yodana peagonaga abene ni paliragohayagi wiaru Manase hameigini maru hearubi Isaraele hameigini maru hearubi tihondo mialu bini. Ani bialu agali uruni tini dindi Iba Yodana peagoha hama dai bilonaga Yosua ibugua Anduane Homogohanda ti mo turu halu biamogo bilonaga bi lalu howa <sup>8</sup> tihondo lamialu lalu, Áyu tígua dabudabu dewaore mo yalu nogo sibi bulumagarubi muni ngolo silibarubi boronosibi aeanerubi aga dewaorerubi yu kamiruni yalu t́ni dindi dai bidaba. Yalu dai buwa tígua wai bialu wai labuha howa mbirale mo yidamiruni aria maru t́naga damene andaga hayadaru talebu migi bilimu, lene.

<sup>9</sup> Ani lai haya handala Lubene hameigini biarubi Gada hameigini biarubi Manase hameigini maru biarubi ti bibahende tini dindi ni ibiragohayagi dai biai hene. Hameigini uruni ti tinaga hameigini Isaraele maru hearu aria Kenana dindini Silo tano wiagoria hemi handala ti tininaga dindi Gileada ala henegoha dai bini. Dindi ogoni Anduane Homogohanda Moseseha howa layadagua ti karulene winigo tinaga dindi ogoniha dai bini.

*Iba Yodana angeni manane walia hole dagia dabu mbira bu helenego ogo*

<sup>10</sup> Ani pialu Kenana dindihayagi yu wahalu piai nahe wene dege pialu iba Yodana peago angeni ni paliragohayagi hearia tigua dagia dabu timbuni mbira iba ange ogoriani bu helene. <sup>11</sup> Ani buwa Isaraele hameigini maru hearume tini aria bu hearu lamule puwa lalu, Hale hadaba. Lubene hameiginibi Gada hameiginibi Manase hameigini maru karubi tigua Anduane Homogonaga lomabu delaga dabu mbira Iba Yodana angeni ina daluhayagi abale bu heledago, lalu lamini. <sup>12</sup> Ani layago hale howa Isaraele hameigini maru bu hearu tigua abaleore Silo tano wiagoria hameigini tebira uruni baba wai bu pole manda manda bialu tidiyu hene.

<sup>13</sup> Ani manda manda bu howa tigua loma binigo mo miaga Eleasa igini Piniasa heago Lubene hameiginibi Gada hameiginibi Manase hameigini maru biarubi Gileada dindi ti karia í pole pu lene. <sup>14</sup> Ani layagola agali haguane pirali ti haru ma lalu Piniasa heba pene. Agali uruni ti bibahende Isaraeleali howa hameigini ni paliragohayagi hearu mbira mbiranaga agali haguane haga biniru ti pene. <sup>15</sup> Tigua Gileada dindi anda puwa Lubene hameigini bu hearubi Gada hameigini hearubi Manase hameigini maru biarubi tihondo lalu, <sup>16</sup> Anduane Homogonaga wali agali bibahende bu kamarume t́hondo bi mbira laramago hale halimu. Tígua irane aginaga Isaraele wali agali inanaga Anduane Homogohondo mana ko ogoni birimibe. Tígua Anduane Homogonaga bi mo wahalu t́ninaga dagia dabu mbira bu helarimida. Anduane Homogo talima nape waharimida. ✧ <sup>17</sup> Bamba iname Peo dindini howa mana ko bialu hemaria Anduane Homogohanda warago koore mbira Isaraele wali agali mo ko halu bo wahai holenaga ibilayago mitangi bilimu. Áyubi nde iname ko ogoni birimagonaga genda yu haabo kamagoni. Tígua

✧ 22:16: Man 12.13-14

manda bu handalu hemiria ko ala birimago nakarulape degeyagola ai mendebi biatago holene manda bu harimibe. ✧ <sup>18</sup> Áyu tígua, Iname Anduane Homogo talima napoleberama, laramigo irane agibe. Áyu howa tígua Anduane Homogo erembira mirimiyagua nde yawi ina Isaraele wali agali bibahendehondo ibugua keba hai holobada. <sup>19</sup> Anigo tígua manda bu handalu kamiria tíninaga dindiha Anduane Homogo mitangi bialu ibuhondo lotu lolene nakarulape lo manda birimiyagua nde dindi ogoni wahalu dai buwa ina kamagoha dege Anduane Homogo ibuni dindi ngagoriabi ibuninaga Balai Anda kagoriabi dindi dombeni mbira karulole dai nabirimida. Anduane Homogo inanaga Ngode Datagaliwabe ibunaga lomabu delolene dabu mbiraore Silo dindini bu helarimagoni. Anigo tígua dabu mende ogoni irane aginaga bu helarimibe. Tíguabi ani birimigome tí dege ndo ina bibahende Anduane Homogonaga bi ala lowinigo mo wahene kamagoni. <sup>20</sup> Ani bialu harimidago ai Sera igini Agana hayago mitangi bilimu. Abale Anduane Homogohanda Yarigoha wai bialu howa mbirale tano ogoniha winiru aria mbira nayalimu lene. Ani layago lelowa Agana ibugua bi mo wahalu mo yayagome Isaraele wali agali bibahendeha genda anda ibai hene. Ko ibugua biyagome genda ibuni hanguha anda ibini ndo wali agali maru hearuhabi mo ko holene anda ibai hene, lalu agali haguane biarume lamini. ✧ <sup>21</sup> Ani lamiyagola Lubene hameiginibi Gada hameiginibi Manase hameigini marubi tígua lo mbiraore howa Isaraele hameigini mbira mbiranaga agali haguane dindi ni paliragohayagi howa ibini biaruhondo ladai bialu lalu, <sup>22</sup> Mbirali Hongo Haiheore kago ibu Ngode Datagaliwabe ka. Ibuni hangu Anduane Homogo kagoni. Mbirali Hongo Haiheore kago ibu Ngode Datagaliwabe ka. Ibuni hangu Anduane Homogo kagoni. Iname o birimadagoni irane ogonaga biya lalu ibuni manda bu ka. Ai tíguabi nde irane manda bilimulo hamelo kamagoni. Iname Anduane Homogo erembira mialu ibuhondo mini mbiraore nawi ibunaga bi mo waharimayagua nde ani holene nawigo tígua ina homelo bo wahi halimulo. <sup>23</sup> Iname Anduane Homogonaga bi ledago mo wahalu inanenaga dagia dabu bu helowa loma biniru irame dai helo bo delolenebi widiru lomabu delolenebi Anduane Homogola ho gimbu bulenaga lomabu delolenebi manda buwa dabu ogoni bu helarimayagua nde Anduane Homogo ibunime ina pani ngialu bo waholene nga. <sup>24</sup> Anigo ogonidagua bini ndo. Tínaga aguanene mani holobadarume inanaga aguanene mani holebiraruhondo lalu, Irane aginaga ina Anduane Homogo Isaraelenaga Ngode Datagaliwabe kago mitangi bialu lotu lalu kamibe. <sup>25</sup> Anduane Homogohanda Iba Yodana poragoha tubari wialu ina Isaraele wali agali kamaru tí Lubene hameigini Gada hameiginiru baba mandagi naholenaga wini. Ani winidago hondowa tí Anduane Homogonaga ndo kamiruni lolobada. Anidagua lalu tínaga aguaneneru mani holebirarume inanaga aguaneneru mani holebiraru tí Anduane Homogo mitangi nabi erembira mu holobadagonaga anidagua lolobadago manda bialu ina gi ho harimagoni. <sup>26</sup> Ani giho howa iname dabu ogoni loma tara tara mbira bule ndo iname bame manane walia hole bu helarima. <sup>27</sup> Dabu ogoni bu heledamagome tínaga aguanenebi inanaga aguanenebi mani holobadaru ina bibahende mo walia halu Anduane Homogo mbiraore kago ibunaga Balai Anda kagoni hondowa ibu mitangi bialu ibuhondo lotu lalu loma biniru irani dai helonagabi Anduane Homogo ibunila ho gimbu bulenaga loma marubi delaga beremali hendelo helarima. Ani bialu mani tínaga aguanenerume inanaga aguaneneruhondo lalu, Tí ina aria ndo kamigoni lolobadago manda bialubi bu helarima. <sup>28</sup> Iname mitangi bialu tígua inahondo bi ogoni larimiyaguabi tínaga aguanenerume inanaga aguanene holobadaruhondo bi ogonidagua larimiyaguabi nde iname ogodagua loleberema. Ai de handadaba. Dabu ogoni ina mamalirume bu helene Anduane Homogonaga lomabu delaga dabu kagoni ale dege o bu kagoni. Dabu ogoriani loma biniru irani dai helo lomabu delolebi loma marubi bu delole ndo

✧ 22:17: Dag 25.1-9 ✧ 22:20: Yos 7.1-26

manane hangu tínaga wali agalirubi inanaga wali agalirubi hendelonaga bu heledema, loleberema. <sup>29</sup> Iname dagia dabu ogoriani loma irani dai helo delolebi widi lomabu delolebi loma bini marubi delole ndo bu heledema. Ani bule ndoore. Iname ani birimayagua nde Anduane Homogonaga bi mo wahalu ibu erembira mialu poleberema. Iname Anduane Homogo inanaga Ngode Datagaliwabeore kago ibuninaga lomabu delaga dabu ibunaga Balai Anda kagoria bu helene kagoni yu wahalu puwa mende bu aribia holene manda buwa ndo birima, lalu tihondo ladai bini.

<sup>30</sup> Ani ladai biyagola loma binigo mo miaga Piniasabi Isaraele hameigini aria ni paliragohayagi hearu mbira mbiranaga agali haguane biarubi tigua Lubenebi Gadabi Manase hameigini aria maru biarume bi ladai biyago hale howa ti turu hene. <sup>31</sup> Loma binigo mo miaga Eleasa igini Piniasahanda Lubene hameiginibi Gada hameiginibi Manase hameigini maru biaruhando lamialu lalu, Tígua Anduane Homogo erembira mialu ibunaga bi mo wahowa ndo bialu harimidagome áyu Anduane Homogo ibuni ina heba mandagi kama manda bu kogoni. Ai bialu harimigome nde Anduane Homogohanda inahondo keba nahelo laro, lalu Piniasahanda lene.

<sup>32</sup> Ani lai halu Piniasa heba agali haguane biaruhando ti Lubenebi Gadabi Manase hameigini aria maru biarubi ti Gileada dindini hemi handala tigua Isaraele hameigini Kenana dindiha hearuhondo ogoale bialu heneya laga bima ti hearia dai bini. <sup>33</sup> Ani dai buwa Isaraeleali hearu lamiyagola tigua te uruni hale howa turu timbuni ho hene. Ani howa tigua Lubene hameiginibi Gada hameiginibi Manase hameigini aria maru bababai wai bialu tinaga dindi andaru bo gialopaya bialu mo ko hole abale manda bu henego embeda halu ai te biago hale howa tigua turu halu Anduane Homogonaga mini yaraga ho hene.

<sup>34</sup> Anigo nde Lubene hameiginibi Gada hameiginibi Manase hameigini aria maru hearubi tigua lalu, Dagia dabu ogoni Anduane Homogo ibuni hangu Ngode Datagaliwabe ka lalu ina bibahende mo walia holenaga manane o bu heledagoni, lene. Ani lenedagoni dagia dabu ogoni mini Tigatiga Latagi Haga laga wini.

## 23

### *Yosuahanda homole howa paluni bi lenego ogo*

<sup>1</sup> Mali dewa peagola Anduane Homogohanda Isaraele wali agali bayale helo helene. Ani howa tigua tinaga waitigi bu hearu baba wai nabi haabo hene. Ani ho heangi Yosua ibu agali waheore berene. <sup>2</sup> Ani biruwa ibugua Isaraeleali bibahende olalu agali haguane bu hearubi agali ala hene miniwi hearubi godi hale halu dabaga hearubi wali agali biamogo biaga hearubi bibahende íbu ngoai hadaba lowa ibugua tihondo lamialu lalu, Ainde ÿ waheore harudagoni. <sup>3</sup> Anduane Homogo inanaga Ngode Datagaliwabehanda ina biamogo bulenaga waitigi bu hearuhondo bigi biyagoni tí de handai harimigoni. Anduane Homogo inanaga Ngode Datagaliwabe ibugua tí biamogo bialu wai bia hayagoni. <sup>4</sup> Ani binigo ai bi ogo baya hangu hale halimu. Hameigini tara taranaga dindi maru iname nakarule ngaru tí karulalimulo tehiru wirugo bibahende ina wai bialu karulaga birudagua tínime wai bialu karulai halimu. Tínaga dindi tubari Iba Yodana ni tagira ibiragohayagi pedagoria howa wima pialu iba solowara Medidereniana bedagoria ni paliragohayagi tagira pedagoni. <sup>5</sup> Anduane Homogo inanaga Ngode Datagaliwabe ibugua tínaga waitigi bu karu tí hondowa gi halu ibida piai helonaga mo gi haga bulebera. Ani biragola Ngode Datagaliwabehanda bulebero lalu lo wiyadagua tigua dindi bibahende karulai holeberami. <sup>6</sup> Ani bialu tigua Mosesehandu bi mana lowinigo mbugaha gilibu wini ngago baya hanguore hale howa talialu tínime handayaho gagahaga bilimu. Tígua ibunaga bi lo ngaru emene hangubi mbira mo wa nahalimu. <sup>7</sup> Ani bialu wali agali tara tí kamigoha yu wahene karu baba mandagi naholeore lalu tigua tinaga bi pupu wiaga ngagobi minibi heba nalalimuore



laro. Ina heneneore larogoni lowa tígua bi mo hongo holenaga mbira bi pupu wiago uruni minibi nalalimuore laro. Ani bialu mbirale urunihondo ge duli hanga halu bi pupu nawilimuore. <sup>8</sup>Tígua bialu haga wirimidagua biaabo halu Anduane Homogo ibuni kagoha haabo halu ibunihondo mini bilinaho haabo halimu. <sup>9</sup>Anduane Homogohanda tínaga waitigi timbuni hongohebi hayaruni bibahende bo batagi hai hayagoni. Ai tí bope holene hongohe mbira naholebira. <sup>10</sup>Anduane Homogoibunime bulebero lalu bi lo wiyadagua bialu tí aria agali mbira hangume tínaga waitigi daosini mbira (1,000) mo gi haga beremigola ti ibida piái holebira. <sup>11</sup>Anigo áyu tínime mbirale bialu kamigo damene bibahende mamage howaore bialu halimu. Tígua Anduane Homogo tínaga Ngode Datagaliwabe kago gubaliniore ho halimu. <sup>12</sup>Ani bialu tígua Anduane Homogo inanaga Ngode Datagaliwabe kago erembira mialu puwa wali agali tara ti baba mandagi hamagamaga bialu ta nabi ha wali tara bedaru dabu bigibigi bialu harimiyagua <sup>13</sup>nde Anduane Homogo tínaga Ngode Datagaliwabeanda hameigini tara tara karu baba wai bule poramigola ti bo batagi naholebirago t́ni manda bu halimu. Ani howa tí baba waitigi taraore holebira. Wali agali tara uruni ti uli pilolene gabua uli ngaligobi holebira. Tigua t́naga erekunini gewa tibume baradagua bialubi igibu anime deni ka haradagua bialubi tí mo tandaga halu haabo holebira. Ani bialu kamine dege Anduane Homogo t́naga Ngode Datagaliwabeanda dindi bayale ngiyagoria halu homoleberami, lalu Yosuahanda lene.

<sup>14</sup>Yosua ibugua laabo halu lalu, Ainde tí helalu j polene kaware ngelo bedogoni. Anduane Homogo inanaga Ngode Datagaliwabeanda mbirale bibahende nguleore lalu bi lo wiyaruni bibahende ngiaiore haya manda bu kamigoni. Buleore lalu lo wiyaru mbira mo habo nale biaiore hayagoni. <sup>15-16</sup>Heneneore larogo Anduane Homogo inanaga Ngode Datagaliwabeanda bule lalu lo winiru biaiore haya. Ani biyago nde ibugua bilimu lalu habo nalolene bi ti baba lo wiyago tígua mo habo lalu puwa mbirale bi pupu wule gime wabini ngaruhondo ge duli hanga ho biruwa bi pupu wialu harimiyagua Anduane Homogohanda t́hondo keba howa pani ngulebira. Ani pani ngialu kagola tí halimulo dindi bayale ibunime ti ngiyagoria ho lu nabi abale homoleberemi, lalu Yosuahanda Isaraele wali agali bibahende hearuhondo lamiai hene.

## 24

### *Yosuahanda Isaraele wali agali Segeme dindini mo ngoai howa bi lamaro binigo ogo*

<sup>1</sup>Yosua ibugua Isaraele wali agali hameigini hangu hangu hearu Segemeni olo ngoai hene. Ibugua agali ala hene miniwi hearubi haru hagane hearubi godi hale howa dabagane hearubi haru hagane maru hearubi ti bibahende Ngode Datagaliwabenaga deni olo ngoai hene. <sup>2</sup>Yosuahanda wali agali biaru bibahende olo ngoai howa lalu, Anduane Homogo Isaraelenaga Ngode Datagaliwabeanda bi ogobi larago hale had-aba. Bamba t́naga mamali ti iba Yuberedisi ange edeyagi heneyangi tigua bi pupu wule dama tara tara gime wabiniya. O heneda aria mbira Abarahama Nahola libu aba Tera heneyagoni. <sup>3</sup>T́naga mamali Abarahama dindi ogoriani hearia howa Kenana dindi bibahendeni haru ibaga biai halu ina ibuhondo aguanene dewaore mirugoni. Ibu igini Aisagabi ina mirugoni. <sup>4</sup>Ina Aisagahondo igini kira Yagaba Isola miru. Ina Isohondo dindi Idomo harihayagi tu ho miru. Anigo t́naga mamali Yagaba ibu waneigini heba Iyibiha daliape halu piyagoni. <sup>5</sup>Mani hayagola ina Mosese Aronola ti hearia pudaba lowa Iyibi wali agali mo tandaga halu nahendene ale gibi bialu tí haru halu tagira pirugoni. <sup>6</sup>Ina t́naga mamali Iyibi dindini hearia haru halu tagira pialu hewaria Iyibialime tinaga wai biagane garo ale karisi ge kirahe nogo hosime gililaga wiarumebi

☆ 23:10: Man 3.22, 32.30 ☆ 24:2: Pig 11.27 ☆ 24:3: Pig 12.1-9, 21.1-3 ☆ 24:4: Pig 25.24-26, 36.8, 46.1-7, Man 2.5 ☆ 24:5: Har 3.1-12.42



wai biaga agali nogo hosini biralu piagarumebi talima pene. Ani biyagola t́naga mamali biarume solowara mini Iba Daramabi bereagoria howa✧ 7 ihondo biamogo bia lalu dugu biya. Ani biyagola ina ti baba Iyibiali biaru baba hengeneha aruma ngelaru. Iyibiali biaru iba solowara biagome dunga dambi helalu mo iba nai helaru. Iyibiali biaruhondo ogo ale biya tí manda bidamigoni.

Dindi ko wali agali nahe biagoria mali lu dewaore harimi. 8 Ani hemiria ina tí Amoroali dindi Iba Yodana ni ibiragohayagi haru halu anda ibirugoni. Tí baba wai bialu hearia ina tí mo wayali ha harugoni. Ina ti bope harugola tinaga dindi wiaru t́gua karulama aribia harimigoni.✧ 9 Ani bialu Moabalinaga Kini Balaga ibu Sibó igini howa ibugua tí baba wai biyagoni. Ibugua Beo igini Balama hearia bi pelalu tí ha habe laya.✧ 10 Ibugua ha hole biyaria ina tí mo baya helo lowa ibuha howa ina mo turu halu tí ha nahe mo bayale haru. Ani binigo Balaga ibugua ko bule manda manda bu wiago nabilo tí gi mirugoni. 11 Tí Iba Yodana domalu Yarigo anda ibirimigola Yarigo agali hearume tí baba wai biyagoni. Amoroalibi Peresealibi Kenanalibi Hidialibi Giagiasialibi Hibialibi Yabusualibi uruni ti bibahendeme tí baba wai dege biyagoni. Ani biyagonigo ina tí wayali halimulo bibahende baba wai birimingi wayali helaga birugoni.✧ 12 T́gua ti heagoria hapara harimigola ina ti mo mogola harugoni. Amoroalinaga kini kira biagolabo warape lolenaga biru. Tinaga wai biagane ayu tibu ale yimigomebi danda yimigomebi bini ndo inime birugoni.✧ 13 Dindibi tí gime biabe bialu mo tiga bini ndo ngiru. Tano timbuni ngirurubi t́ni gime bini ndo ngiru. Áyu dindi ogoriani kami. Ani bialu pu mbira lini daga mini gerebi nalu kamiruni t́ni hengene ndo narami. Olibe lini ira ebere karubi t́ni gime hengene ndo nalu kami lalu Anduane Homogohanda bi ogoni t́hondo larago laro, lalu Yosuahanda lamini.✧

14 Yosua ibugua lala ho wiyagoria howa lamialu lalu, Anigo áyu Anduane Homogonaga mini mo dunini halu ibugua laradagua mini bilinahe howa henemane bilimu. Tí mamaliru t́gua dama tara tara ebere Mesobodemia dindini heneyaru bi pupu wiyarubi Iyibialinaga dama tara tarabi pupu wiyarubi bibahende yu wahai halimu. Ani buwa Anduane Homogonaga mini hangu mo dunini halimu. 15 Ogonidagua bule manda nabi kamiyagua mini mbiraore ogohondo wule lalu horo áyu ogoriani howa t́ni dabolene nga. Mesobodemiani tí mamalinaga dama ka layaruyaguabi ndo dindi o kamigoriani Amoroalinaga dama ogoriani karuhondoyaguabi bi pupu wialu ogonaga hole lalu t́nime dabalimu. Ibi inaga andagani karu hebabi iname Anduane Homogonaga mini mo dunini haluibunaga biabe bia halu holeberema, lene.✧

16 Ani layagola wali agali biarume ladai bialu lalu, Iname Anduane Homogo yu wahalu dama tara tara bi pupu wule napoleore berama. 17 Anduane Homogo inanaga Ngode Datagaliwabe ibugua inabi ina abarubi Iyibi dindi garabaya hearia golope halu haru halu ibini. Ibugua agalime nabiagane ale maru biyarubi de handarima. Dindi tara tarani bibahende bolangua halu pirimagolabi ibugua ina handaya ho haya. 18 Dindi ogo mule anda ibirimagolabi Anduane Homogohanda Amoroali ogoria paleneyaru bo purogo lelaya. Ani binigo inamebi Anduane Homogo mitangi bialu ibunaga biabe biahalu holeberema, lene.

19 Ani layagola Yosuahanda wali agali biaruhondo lalu, Ani laramigo t́gua Anduane Homogonaga biabe bia naholigo Ngode Datagaliwabe ogoni agali ale ndo ibu tigabi taraore kago t́gua ko birimiyagua ibu domo wanaholebira. Ibugua mbirali mende tara ibu kagobi kalo manda bilo hame nalaga ka. 20 Ani bialu t́gua ibu erembira mialu wali agali tara taranaga damaru bi pupu wialu harimiyagua ibugua tí erembira ngialu

✧ 24:6: Har 14.1-31 ✧ 24:8: Dag 21.21-35 ✧ 24:9: Dag 22.1-24.25 ✧ 24:11: Yos 3.14-17, 6.1-21 ✧ 24:12: Har 23.28, Man 7.20 ✧ 24:13: Man 6.10-11 ✧ 24:15: Lud 1.15, 1 Kin 18.21, Ese 20.39, Yo 6.67

pani ko ngulebira. Ala ibugua tihondo bayale bialu hayagoni dege mani tigua kagua birimiyagua ti bo haealobaga bulebira, lalu Yosuahanda lene.

<sup>21</sup> Wali agali biarume Yosuahondo hongo howa lalu, Ndoore iname Anduane Homogonaga biabe biaore halu holeberema, lene.

<sup>22</sup> Ani layagola Yosuahanda ladai bialu lalu, Anduane Homogonaga biabe bia holeberema larimigoninaga au larima lolenebi tini dege kamigoni.

Ani layagola wali agali biarume lalu, E au larima lolenebi inane dege harama, lene.

<sup>23</sup> Bi ogonibi layagola Yosua ibugua bi hongohe tihondo lamialu lalu, Dindi tara tara wali agalinaga dama ebere bu payabu wimiru mo wahai hadaba. Ani bialu Anduane Homogo mbiraore Isaraelenaga Ngode Datagaliwabe ka lalu ogoni heba hangu hole lalu walia hadaba, lene.

<sup>24</sup> Wali agali biarume Yosuahondo ladai bialu lalu, Anduane Homogo inanaga Ngode Datagaliwabe mini hangu mo dunini haluibunaga biabe bialu holeberema. Iname ibugua laradaguaore hale halu buleberema, lene.

<sup>25</sup> Ani layago hale howa Yosuahanda wali agali biaru heba howa habo nalolene bi maru tigua hale halu bilo lowa lowini. O binidaruni dindi mini Segemeni howa hangu bini. <sup>26</sup> Habo nalolene bi lo winidaruni Yosuahanda muwa Ngode Datagaliwabenaga mana mbugani lowinigo wiagoni gilibu ngelene. Ani buwa ibugua ege tole timbuni mbira dugu yamuwa ira mini oga mbira Anduane Homogonaga anda biagoha hapara howa heneyago andaneha hengene. <sup>27</sup> Yosuahanda wali agali biaruhondo lamialu lalu, Ege tole ogonime horo ogoningi agua birima lalu mo mitangi bia helo hangaramagoni. Ege tole ogonime Anduane Homogohanda bi inahondo langiyago hale hai haya. Ogoni tigua Ngode Datagaliwabe erembira mialu yu wahalu pirimiyagua ege tole ogonime bi lo wirimigo mo mitangi bia holebira, lalu Yosuahanda lene. <sup>28</sup> Uruni biai halu Yosuahanda wali agali biaru tini andaga dai bidaba layagola tini dindi andaga hayadagua dai bigibigi bini.

### *Yosua homenego ogo*

<sup>29</sup> Uruni bupe howa hearia Anduane Homogonaga biabe biahaga Nunu igini Yosua ibu mali handari mbirani pira (110) howa homene. ✧ <sup>30</sup> Homayagola tiguaibunaga dindi Timina Serani hora hene. Dindi Timina Sera ogoni Eberaiminaga hari bare Hari Gasa uyurayagi hora hene. ✧

<sup>31</sup> Yosua ibu heangi Isaraele wali agali hearume Anduane Homogonaga mini mo dunini haluibunaga biabe bia haho wiaabo hene. Tinaga haru hagane Anduane Homogohanda Isaraelenaga nahendene ale bigi biyaru hendene biarume heangibi Isaraele wali agali tigua Anduane Homogonaga biabe dege bia ho wiaabo hene.

<sup>32</sup> Yosebenaga kuni Iyibi howa yalu ibiniyago Segeme dindi emene mbira wiago bamba Yagabahanda Hamo iginirunaga yolo bu winiyagoria hora hene. Hamo ibu igini mbira Segeme hene. Dindi ogoni siliba muni handari mbirame (100) yolo bini. Ani binigo dindi ogoriani Yosebenaga aguaneneru tini hene. ✧

<sup>33</sup> Arono igini Eleasabi homayagola dindi Eberaiminaga hari gibuhayagi Gibea dindini hora hene. Dindi ogoni ala Eleasa igini Piniasahondo mini.

## Haguane Heneru

### Mbuga ogoha gilibu ngarunaga nemandi ogo

Mbuga ogoha howa bi te dewa Isaraealeali tigua Kenana dindini anda ibalu dindi karulai hene ngagonaga te latagi halu ti hama pialu tininaga kini pigane hene ngagoria lairi ka. Agali haguane henedarunaga te dewa gilibu nga. Agali haguane uruni ti bibahende godi hale hagabi bi mo tiga biagabi ndo hene. Ti wai hanaga ale ho hene. Tinaga waitigirume ti mo genda ha mo ko ha bigi birangi agali urunime haru howa wai bilonaga Ngode Datagaliwabeibunime agali haguane uruni dabaluhelene. Agali haguane uruni tinaga mini uru. Odonielebi Ehudubi Samagabi Baragabi Gidionobi Abimelegebi Tolabi Yairibi Yabedabi Ibisanabi Elonobi Abadonobi Samasonobi wali mbira Deborabi uruni haga bini. Tigua binirunaga te Isaraele wali agalime wai bialu henego tebi gilibu nga.

Galone timbuniore mbira Ngode Datagaliwabe handa mbuga ogoha howa lawai hene manda bu kago ogo. Isaraele wali agali ti bayale holenaga tigua Ngode Datagaliwabenaga bi mana lowini ngago baya hangu taluwa bialu holene wini. Tigua Ngode Datagaliwabe erembira mialu tini hame layadagua bialu heangi tiniha mo ko holene yu anda ibini. Anigo mana ogoni bolangua howa bulene mende nga. Tigua Ngode Datagaliwabenaga bi mo wahalu karia genda tandagaru anda ibagago ogoni anda ibirangi Ngode Datagaliwabeibunimeibunaga wali agali dara halu biamogo biaga ka. Tigua mana ko dewa biniru mitangi bialu mini beregedalu lone Ngode Datagaliwabe mo tene hadai biyagola ibugua ti dara howa pele minirunaga te gilibu nga. Anduane Homogonaga mbuga mbiranaga mini Mana Lo Winigo Loyane laga wini ngagoha Be 28 howa hariga mende ogoni dege tigatiga mo walia ho ngago de handabe.

#### **Bulubaga buwa kuni uru gilibu ngago (1.1-2.10)**

Yosua homa nabi howabi ibu homayangi howabi bialu henerunaga te gilibu nga. 2.11-16.31

Isaraealinaga haguane henerunaga te gilibu nga. 17.1-21.25

Mbirale tara tara bialu henerunaga te gilibu nga.

#### *Yuda hameigini Simiono hameiginilame Kini Adoni Besege minu yania henego ogo*

<sup>1</sup> Yosua homayagola Isaraele wali agali tigua Anduane Homogohondo hale halu lalu, Ai Kenanaliru baba wai bule ina hameigini aiwa bamba holobadabe, lene.

<sup>2</sup> Ani layagola Anduane Homogohanda ladai bialu lalu, Ina dindi ogoni Yuda hameiginiruhondo minigo nde tinime bamba holene nga, lene.

<sup>3</sup> Anidagua layagola Yuda hameigini tigua Simiono hameigini hearuhondo lamialu lalu, Ti ina baba ala maliya. Ani puwa dindi ina tu wa ngini biagoria Kenanali karu baba wai bialu hamiya. Ani bialu mani dindi ti tu wa ngini biagoha wai bule maliya, lene. Ani laya handala Simiono hameigini biaru tigua Yuda hameigini baba mandagi wai pole ma lalu pene. <sup>4</sup> Pialu Yuda tinime bamba howa wai biyagola Anduane Homogoibunime Kenanali hearubi Pereseali hearubi bibahende tinaga giha minu ya hayagola horo ogoningi dege Yudalime tinaga waitigi daosini pira (10,000) Besege tano wiagoria bo wahai hene. <sup>5</sup> Yudali tigua Kini Adoni Besege haluibunaga ami agaliru dindi ogoriani lola howa wai hongo howa bialu Yudali tigua bo poda hana hene. <sup>6</sup> Ani bialu howa Adoni Besege ibida pialu hearia Yudalirume talima pugupugu bialu ibu minu yania hene. Minu yania howa tiguaibunaga gi hondone angibiyane kirabali pugu wahalu ge hondone angibiyanebi kirabali pugu wa dege hene. <sup>7</sup> Ani biyagola Adoni Besege handa lalu, Bamba ina kini dege pira karianaga (70) gi hondone ge hondonebi angibiyane kirabali bibahende pugu waheneru ti inaga tomo nalu biraga

dagia andaneha tomo ibira ibira bidaru ilu nalu berelaga biruli. Ani biruligo áyu nde Ngode Datagaliwabehanda ina tihondo birulidagua inihondo biadai biyada, lene. Anidagua bialu Yudali tigua Adoni Besege Yarusalemeha haru puwa helenege haabo halu homene.

*Yudali tigua Yarusaleme Heberonobi wai bialu karulenege ogo*

<sup>8</sup>Yudali tigua Yarusaleme anda puwa wai bialu bo poda hana halu dindi ti karulene. Wali agali bu hearu bo hilo wahai halu tinaga dindi anda wiaruni bibahende bo heda hai hene. <sup>9</sup>Ani biai halu mani Kenanali hari barebareha hearu bababi ni paliragohayagi hari bare emene wima pearuha hearu baba wai bialu unurayagi Negebe dindi wiagoha hearu bababi wai bia dege bini. <sup>10</sup>Ani buwa mani Kenanali maru Heberono tano bamba Kiriada Araba laga winigoria hearu baba wai bule pene. Anidagua bialu Yudali tigua wai bialu Sesai hameiginibi Ahimana hameigini palearubi Talamai hameigini palearu baba wai bialu bo poda hana hai hene.

*Odonielehanda Debiri tano karulenege ogo  
(Yosua 15.13-19)*

<sup>11</sup>Yudali biarume Heberono biaru bo poda hana hai halu ai Debiri hameigini hearu baba wai bule pene. Bamba tano ogoni Kiriada Sebe tano laga wini. <sup>12</sup>Yudali mbira mini Kalebe ibugua lalu, Agali mbirame Kiriada Sebe tano bo poda hana hayagua agali ogoni i wane Agasa bedago ibu dabu bilo mulebero, lene. <sup>13</sup>Ani laya handala pialu agali mbira Kenasa igini Odoniele henegome tano ogoni bo poda hana haga bima anda pialu karulene. Kenasa ogoni ibu Kalebe hamene heyogone hene. Kalebehanda ibu wane Agasa Odoniele dabu bilo miyagola ibu dabu bu hene. <sup>14</sup>Agasa ibu Odoniele andaga ibiyagola Odonielehanda ibuhondo lalu, Ina i aba Kalebehondo dindi mbira tu wa ngi labe, lalu hongo howa lene. Ani layagola Agasa ibu Kalebe hearia puwa ibu nogo dongini biralu penego daliape hayagola Kalebehanda hale halu lalu, i agi hamelalu ibiribe, lene. <sup>15</sup>Ani hale hayagola Agasahanda ibu abahondo ladai bialu lalu, Ina mbirale mbira i ngibelo hameledo. Ina dindi mbira abene unurayagi tu wa ngirigoniha iba nabereyago ai iba hambiaga uliwi mbira ngibelo hameledo, lene. Ani layagola Kalebehanda dindi iba duguaga liyagi niyagi wiagobi kirabali ibu wane mini.

*Yuda Beniyamini hameiginilame wai bialu wayali henego ogo*

<sup>16</sup>Mosese imane Keniali mbira henego ibunaga aguaneneru tibi Yuda agalibi ti haru Yarigo tano mini mende Ira Dedi Tano laga wiago wahalu Yuda dindihayagi dindi ko iba dalu naibaga wiagohayagi pene. Dindi ogoni abene unurayagi Arada tano wiagoha pialu ti Amelegeali bu hearu baba ogoniha ho hene. <sup>17</sup>Ani bialu Yuda hameigini Simiono hameiginiru tigua Kenanali Sebada tanoha bu hearu baba wai bialu bo poda hana halu dindi andaru bo haeala бага biai hene. Ani buwa tigua tano ogoni mini gahenge wia aribia halu mini Homa wini. <sup>18</sup>Ani bialu maru Gasabi Asagelonobi Egeronobi tano uruni dindi emene maru tano uruniha wia parapara bu wima pearubi heba ti karulai hene.

<sup>19</sup>Anduane Homogohanda ti biamogo biyagola Yudali biarume dindi hari barebareha wiarubi heba karulai hene. Anigo waitigi maru iba angeha palearume tinaga wai biaga garo ale mini karisi aeaneme wabini wiago Yudalirume ti baba wai bialu ti bo podabe nahe hene. <sup>20</sup>Ani bialu Heberono tano ogoni bamba Mosesehanda lo winidagua Kalebe mini. Ani biyagola Kalebehanda Anaga aguanene hameigini tebira Heberono tanoha hearu bibahende bo batagi hai hene. <sup>21</sup>Anigo Beniyamini hameigini tigua Yabusu hameigini Yarusalemeha hearu bo batagi habe naheyagola Yabusu hameigini biaru ti Beniyamini hameigini baba mandagi Yarusalemeni haabo hene.✧

*Yosebe aguanene hearume Bedele tano karulo henego ogo*

<sup>22-23</sup> Ani howa Yosebe aguanene tigua Bedele tanoha hearu baba wai bule pene. Ogoningi tano ogoni mini Lusu laga wini. Tigua wai bu piyagola Anduane Homogohanda ti biamogo bialu hene. Ani bialu heagola Yosebe aguanene maru tigua tano ogoniha diri hondole pene. <sup>24</sup> Ani pialu hearia tigua agali mbira tano ogoniha howa tagira ibalu hearia hondowa ibuhondo lalu, Ina tinaga tanoha diri hondo ibulumaya haru anda piriagua iname í naboheberema, lene. <sup>25</sup> Ani laya handala agali biagome ti tanoha anda pelo hariga walia hene. Ani walia hayagola tigua tano biagoha anda puwa wali agali bu hearu dewaore homelo bo wahai halu agali hariga walia hayago ibu damene bu hearu dege bo wa nahe helo wahene. <sup>26</sup> Ani biya handala agali ogoni ibu Hidi dindi wiagoha puwa tano mbira mo wialu tano ogoni mini Lusu wini. Tano ogoni áyubi wiaabo ka.

*Isaraeleali hearume hameigini maru bo batagi nahe henego ogo*

<sup>27</sup> Manase hameigini bu hearume wali agali tara tara Bedesana tanohabi Tanaga tanohabi Do tanohabi Ibileama tanohabi Megido tanohabi tano uruniha tano emene wia parapara bu wiaruha hearu baba wai buwa Kenanali biaru wai hongo howa biyagola bo batagi nahe helo wahene. ✧ <sup>28</sup> Ani helowa Isaraeleali ti dewa hongohe howa tigua Kenana wali agali dindi anduane hearu tinaga garabaya biabe ale bialu helo helaga bini. Anigo Isaraeleali tigua Kenana wali agali uruni bo batagi hai nahe maru helene.

<sup>29</sup> Eberaimi hameigini tigua nde Kenana wali agali Gese tanoha hearubi bo batagi habe naheyagola Kenana wali agali uruni ti Isaraeleali hearu baba mandagi hene. ✧

<sup>30</sup> Sebulunu hameigini tiguabi nde Kenanali dindi anduane Kidirono tanoha hearubi Nahalala tanoha hearubi bo batagi hai nahe helo ha dege bini. Ani binigo Kenana wali agali uruni ti tano ogoniha mandagi hene. Ani helowa Sebulunu hameigini tigua Kenana wali agali uruni tinaga garabaya biabe ale biahelo helene.

<sup>31</sup> Ase hameigini tiguabi nde wali agali Ago tanohabi Saidono tanohabi Alaba tanohabi Agasibi tanohabi Heleba tanohabi Abege tanohabi Lehobo tanohabi dindi anduane bibahende bo batagi hai nahe helene. <sup>32</sup> Ani helowa Ase hameigini tigua Kenana wali agali uruni tini heba mandagi hamagamaga bu hene.

<sup>33</sup> Nabadali hameigini tibi nde dindi anduane Bedesemese tanoha hearubi Bedanada tanoha hearubi bo batagi hai nahe ti baba mandagi hene. Ani helowa Nabadali hameigini tigua Kenana wali agali urunime tinaga garabaya biabe ale bialu helo helene.

<sup>34</sup> Amoralí hearu ti hongohe howa tigua Dana hameigini hearu uyura hari barebare dindi emene wiaruha helo warabagi ho helene. Tigua Dana hameigini dindi bayale ulini wiagoha ibulilono handaya hene.

<sup>35-36</sup> Amoralí hearu ti Ayalono tanohabi Salabimi tanohabi biralu Hari Herese heagoha dindi wiaruhabi tini dege haabo halu bini. Tinaga dindi tubari Agarabimi polene hariga hari nene wiagoha iraga halu peagoria howa pialu dindi mini Sela wiagoria bolangua halu uyura puabo hene. Anigo Yosebe aguanene biaru tigua handayaho howa tinaga garabaya biabe ale bialu helo helaga bini.

## 2

*Anduane Homogonaga dahuliyalime Bogimi dindini howa binigo ogo*

<sup>1</sup> Anduane Homogoibunaga dahuliyali mbiralime Giligolo dindi howa Bogimi dindi puwa Isaraelealiruhondo lalu, Ina tí Iyibi dindi howa haru halu tagira pialu dindi bamba tinaga mamaliruhondo ngulebero lo wirugo o biagoria haru pirugoni. Ani bialu ina bi au lo wiru. Ina habo nalolene bi tí baba lo wirago napuguleore lo wiru. <sup>2</sup> Tigua wali agali dindi ogoria karu heba habo nalolene bi mbira nalowilimu. Tinaga mbirale



bo lomabu miaga dabu ngaru bo gialo waore halimu larugoni. Ina ani bilimu larugoni tí nabi howa ai nalewadagua bu aribia halu harimida.✧ 3 Ani bialu harimidago ai áyu ina larogo wali agali o karuni tígua ina bo batagi helo manda bu harimigoni bo batagi naholebero. Uruni tinaga waitigi ti halu tígua tinaga dama tara tararuhondo bi pupu wilimulo ti warape halu holebira, lene.✧ 4 Dahuliyalime tihondo ogonidagua lamiyagola Isaraele wali agali bibahendeoreme taga halu dugu timbuni bini. Irane ogoninaga 5 dindi ogoriani dugu bini lalu mini Bogimi wini. Dindi ogoriani tigua Anduane Homogohondo mbirale bo loma bialu mini.\*

### *Yosua homenego ogo*

6Yosuahanda Isaraele wali agali ti hariga pole piyagoria, Hangu hangu pugupugu bid-aba, lalu agali homane mbira hangu hangu ibuninaga dindi tale bialu karulolenedagua karulaga laga bilo pelene. 7Yosua heangi hama ibiyagoniha Isaraele wali agalime Anduane Homogonaga biabe bialu hene. Ani bialu mani ibu homehabi Anduane Homogonaga biabe biahó wini. Ogonidagua bialu henedagoni haru haga maru ti Anduane Homogohanda Isaraele wali agalihondo gibiore tara tara biyaru tinime hendene hai heore ani bialu hene. 8Anduane Homogonaga biabe biahaga Nunu igini Yosua ibu luha dege biane mali handari mbirani pira (110) peagola homene. 9Ibunaga tingini ibuni dindi gembone mbira mini Timina Sera hari bare Eberaimi dindi Hari Gasi weagoha hora hene.✧ 10 Wali agali dabane ogoningi henedaruni bibahendeore homai halu dabane mende maha ha aribia hayarume ti Anduane Homogo embeda halu ibugua Isaraele wali agalihondo bima ibiyarubi embeda hai hene.

### *Isaraele wali agalirume Anduane Homogo heba bi lolenego yu hado wahai henego ogo.*

11 Ani bialu Isaraele wali agali biarume Anduane Homogohondo mana ko ngubiore bialu tigua Kenana wali agalinaga bi pupu wule gime wabini Balaruhondo mitangi bialu mo tene ho hene. 12 Tigua Anduane Homogo ti mamali henedaruninaga Ngode Datagaliwabe ti Iyibi dindi howa haru tagira ibiyago ogoni ibu embeda halu lotu nale wahalu tigua dama tara tara wali agali ogoriani ho mabu biarunaga damahondo bi pupu wule lowa wialu hene. Tigua dama urunihondo bulu palialu bi pupu wiyagome Anduane Homogo mo keba hene. 13 Ani bialu tigua Anduane Homogo mitangi bialu lotu lolenego hado wahalu tigua gime wabini mini Balarubi mende mini Asedarerubi tinaga biabe bialu hene. 14 Ani biyago hondowa Anduane Homogohanda Isaraele wali agaliruhondo keba kaubiore howa uruni pageali harigani karume balu mbirale henedaru tagu page bilo henge mini. Ibugua tinaga waitigi hearu kaware ti heagoria ho mabu bilalu tinaga hongo daligaore ho bolangua helene. Ani biagola Isaraeleali biaru tininaga tingini mo do halu ha do habe nahe wini.✧ 15 Bibahendengi tigua wai bule tagira pugu biyagola Anduane Homogo ibu ti heba nahole lalu bi lo wiyadaguaore habagiho hene. Ani biyago hondowa tigua mini genda timbuniore halu hene.

16 Ani bu heagola Anduane Homogo ibugua Isaraelealiru pagealirume belo yupe hayaruni áyu pele milo haru haga maru dabo helene. 17 Ani biyagolabi Isaraeleali tigua tinaga haru haga helayarume bi layaruni bayuwa hale ho tiga nabioire hene. Isaraeleali uruni ti Anduane Homogohanda layadagua nabi howa tigua dama tara tararuhondo bi pupu wialu hene. Tinaga aba ala henerume Anduane Homogohanda bi layadaguaore bialu penego áyu dabane gahenge ha aribia hayagome ani nabi abale yu hado wahalu hene. 18 Anduane Homogohanda Isaraele wali agali haru helo haru haga mbira dabo mirangi Anduane Homogo ibugua haru haga ogoni biamogo biragola haru haga ogoni kangi ti waitigime nabelo pele miaga. Anduane Homogohanda tihondo dara henedagoni irane tigua mini burugu lowa tandaga nalu ulu lalu dugu bialu heago

✧ 2:2: Har 34.12-13, Man 7.2-5 ✧ 2:3: Har 34.12, Man 7.16, Yos 23.13, Iba 106.36 \* 2:5: Dindi mini Bogimi Huli bi lalu Dugu Biaga. ✧ 2:9: Yos 19.49-50 ✧ 2:14: Yos 7.12, 2 Kin 17.20, Iba 44.12, Ais 50.1

hondowa ani bini. <sup>19</sup> Ani bialu heagola dege haru haga biago homaga biyagola wali agali biaru ti ko ala bialu hene biagoria bule dai bigi bialu hene. Uruni tigua ko ala henedarume binidadagua ndo ko ngubiore bialu hene. Tigua dama tara tararu mitangi bialu urunihondo bi pupu wialu hene. Ani bialu tigua tininaga mana ko ngubiore biaga wiyaru yu wahole manga ho hene. <sup>20</sup> Ani biyagola Anduane Homogo ibugua Isaraele wali agalihondo keba taraore howa lalu, Dindi hameigini ogome habo nalolene bi ina ogoria tinaga mamaliruhondo puguaore nabi yu halimu lo wirugo puguarimida, lene. <sup>21</sup> Ogoniore irane tigua ina bi lo wirudagua nabiyagome ina dindi hameigini mbira Yosua homedaha dindi ogoriani haho wiaabo karu wara tagi naholebero, lene. <sup>22</sup> Ina Isaraele wali agali urunime tinaga mamalime inaga mana talialu binidagua áyu nde tigua birabe be nabirabe hondole haru holebero, lene. <sup>23</sup> Ani lowa Anduane Homogohanda dindi hameigini uruni dindi ogoniha helo henge mini. Ani bialu ibugua Yosuahanda hongo howa ti bope helo henge nami homehabi wara tagibi nahe dege helene.

### 3

#### *Anduane Homogohanda Isaraeleali wai bilo biawai henego ogo*

<sup>1</sup> Anduane Homogohanda agali tara maru Kenana dindi wiagoha Isaraele agaliru baba mandagi helo wahene. Ani binidagoni irane bamba Isaraeleali tigua Kenana dindi karulolenaga pigane wai biyangi igiri daliahe maru ti wai biyago nahendene heagola ti agali tara o henedaruni baba hongo manda bialu wai bilonaga ani helo wahene. <sup>2</sup> Anduane Homogo ibugua Isaraeleali igiri daliahe mbira mbirago wai biaga mana ti biawai holenaga ani bini. <sup>3</sup> Kenana dindini hameigini maru Anduane Homogohanda henemane helo wahenedaruni Pilidia tano duriani agali haguane bu hearubi Kenanali bibahendebi Saidonoalirubi Hibiali hameigini Lebanono hari hearuha palu yu pearubi Hari Balahemono heagoha howa palu yu puabo halu amura Hamada tanoha pole piaga hariga wiagoria hearubi uruni bibahende Kenana dindini helo wahene. <sup>4</sup> Ani helo wahayadaruni Anduane Homogo ibugua Isaraele wali agalimeibunaga bi mana talialu birabe be waharabe ba hondolenaga anidagua helo wahene. Iibunaga bi mana ogoni bamba Moseseha howa tinaga mamaliru mo mini biago wini. <sup>5</sup> Anidagua binigo Isaraele wali agali ti hameigini tara tara Kenanalibi Hidialibi Amoralibi Peresalibi Hibialibi Yabusualibi wali agali uruni heba mandagi hene. <sup>6</sup> Ani bu howa Isaraele wali agali ti uruni baba dabu bu iriari bini. Ani bialu howa tigua wali agali uruninaga dama mitangi bialu mbirale gime wabini wiaruhondo bi pupu wialu hene.

#### *Odoniele ibu agali haguane henego ogo*

<sup>7</sup> Isaraele wali agali tigua Anduane Homogonaga deni howa mana ko timbuniore bialu hene. Tigua Anduane Homogo tinaga Ngode Datagaliwabe erembira mialu dama mitangi bialu mbirale gime wabini mini Bala wiagohondobi dama wali beda mitangi bialu gime wabini mini Asera wiagohondobi bi pupu wialu hene. <sup>8</sup> Ani bialu heagola Anduane Homogohanda tihondo keba timbuni howa Mesobodemianaga Kini Kusana Lisadaimihanda ti bope helo ibilene. Ani ibilayagola Isaraele wali agali ti Kini Kusana Lisadaimi andaneha mali halira hene. <sup>9</sup> Ani hearia tigua Anduane Homogo mitangi bialu biamogo bia lalu olayagola Anduane Homogo ibugua tinaga bi hale howa agali mbira mini Odoniele henego ibugua ti kini ogoninaga giha howa haru dai bilo dabalu ibilene. Odoniele ogoni ibu Kalebe hamene heyogone Kenasa igini hene. <sup>10</sup> Anduane Homogonaga Dinini Odonieleha ibu heagola Odoniele ibu Isaraele wali agalinaga agali haguane hene. Ani howa ibugua Mesobodemianaga kini biagola wai bialu Anduane Homogohanda ibu hongo miyagola ibugua kini biagonaga hongo bope hene. <sup>11</sup> Wai o biyadagoni howa mani Isaraele dindini wai nabi mali pira maria (40) bayale hene. Ani halu Kenasa igini Odoniele homene.

*Agali haguane mbira mini Ehudu henego ogo*

<sup>12</sup> Isaraele wali agali tigua Anduane Homogonaga deni mana ko lone bialu hene. Ani bialu hemiria Anduane Homogohanda Moabanaga Kini Egelono mo hongo hayagola ibunaga hongo ogonime Isaraelealinaga hongo bope hene. <sup>13</sup> Egelonohanda Amonoalibi Amelegealibi mo mogo bialu Isaraeleali baba wai bule puwa Yarigo tano mini mende Ira Dedi Tano laga wiagoria bo poda hana halu karulene. <sup>14</sup> Ani biyagola Isaraele wali agali ti Egelono andaneha mali pira mbirani halira (18) garabaya biabe ale bialu hene.

<sup>15</sup> Ani bialu howa tigua Anduane Homogohondo biamogo bia lalu hongo howa olene. Ani olalu heagola Anduane Homogo ibugua ti biamogo bialu tinaga waitigi giha howa haru dai bilonaga agali mbira mini Ehudu henego dabalulu ibilene. Ehudu ibu Beniyamini hameigini Gera henego igini howa ibu gi leme бага hene. Ani henego horo mbirungi Isaraelealime Moabanaga Kini Egelono mo turu halu mbirale maru wia hole manda bialu uruni Ehudu ibugua mo yalu pole pene. <sup>16</sup> Ehudu ibugua wai biaga ayu tibu mbira nene kirabaliha ne gadele wabu wini. Wai biaga ayu tibu ogoni luninaga magi sendimida pira duria (50) wini. Ani bu winigo ibugua ayu tibu ogoni aga labolabo bu heagome dambi howa gi tigahayagi mandibuha da hene. <sup>17</sup> Kini Egelono ogoni ibu agali hado timbuni mbira hene. Ibu hearia Ehudu ibugua mbirale tara tara Kini Egelononaga wia hayaru mo yalu pene. <sup>18</sup> Puwa mbirale tara tara Kini Egelono mo turu halu mule agali marume yalu pirimiruni Ehudu ibugua kini biagohondo mialu ti andaga dai bini. <sup>19</sup> Dai bialu hearia Giligala dindi kawareni ege tole timbuni wiagoriani agalime bigiya kau wuwa wabu helaga biagoria tagira pene. Ani puwa ogoriani howa Ehudu ibu beregedalu Moabanaga Kini Egelono berearia dai bini. Dai bialu ibugua Kini Egelono bereago de hondowa ibuhondo lalu, Kini-o ina bi galone mbira ini hangu hale habelo langule yido, lene.

Ani layagola Kini Egelono ibugua agali maru biru wiaru bibahendehondo lalu, Iya hangu birulubaya ti tagira piai hadaba, lene. Ani laya handala agali biabe biahaga berearu bibahende tagira piai hayagola <sup>20</sup> kini ibuni hangu anda hobane daligani poboyogo nabiaga wiagoha dagiani berene.

Ani bereagola Ehuduhanda ibuhondo lamialu lalu, Ina Ngode Datagaliwabenaga bi mbira i langiyago ihondo langule yido, lene. Ani layago hale halu kini ibu heyini. <sup>21</sup> Heyayagola Ehudu ibugua ibunaga wai biaga ayu tibu mandibuha da hayago abale gilila muwa kini biagonaga tinini nogoba hene. <sup>22</sup> Ani nogoba hayagola ayu tibu biagonaga dene erembirahayagi tagira pene. Ani piyagola Ehudu ibugua ayu tibu kini biagonaga tinini nogoba hene biago dugua nabi helo waheagola ayu tibu dene endenebi abeneme namu lai hene. <sup>23</sup> Ani biyagola Ehudu ibu abale tagira pialu panga bibahende logo hai halu ibuni tagira pene.

<sup>24</sup> Ani bialu peha kininaga biabe biaga agali biaru ti dai buwa handalu hemiria panga bibahende payai hearia hondowa tigua manda bialu Kini ibu ti uliha piya bada manda bini. <sup>25</sup> Ani manda buwa kini ibirabe hondole luore haabo hemiria mbira ibalu panga dugua nabi dege wini. Ani biya handala tigua panga gi mo puwa panga dugualu anda puwa handalu hemiria tinaga kini homo wiaria de hendene.

<sup>26</sup> Biabe biahaga agali biaru ti panga payu wiago duguilonaga tagirani hea tambu Ehudu ibu abale pialu pu wahene. Abale pialu harigani ege toleni bigiya wabu helene wiago bolangua halu dindi mbira mini Seira wiagoha ibida pialu anda pene. <sup>27-28</sup> Ani anda puwa Isaraele dindihayagi Eberaimi hameiginirunaga dindiha hari barebare wiagoria howa Isaraelealiru wai tagira ibilonaga olalu mbelo biguli pulene. Ti ibu ngoai heagola Ehuduhanda tihondo lamialu lalu, Anduane Homogohanda tinaga waitigi Moabali bu karu tininaga giha ya hayago ai wai bule maliya i porodagua maibidaba, lene. Ani laya handala tigua hari bare wiagoria howa dalipe halu abale Moabaliru iba Yodana domaede halu ibida pora bialu polilono hariga wiagoha hapai hole pene. Ani bialu tigua

Moabaliru baba wai bialu mbira hangubi ibida pora bialu nape baiore hene. <sup>29</sup> Horo ogoningi Isaraealirume Moabali ami hongohe hearuni aria daosini dege pira (10,000) agima bo wahai hene. <sup>30</sup> Horo ogoningi mbiraore hangubi mbira yo pialu nape baiore hene. Wai o binidagoniore halu Isaraeali baba wai nabi dege heane mali pira halirani (80) ti bayale hene.

### *Samaga ibu agali haguane henego ogo*

<sup>31</sup> Ehudu ibu agali haguane henego mani agali mende Anada igini Samaga ibugua agali haguane ha aribia ho hene. Agali ogoni ibugua Pilidiali handari waragara (600) bibahende nogo bulumaga wara daila haga yandare ale mbirame balu homelai hene. Agali ogoni ibuguabi nde Isaraeali wali agaliru waitigiru giha hearia mo wialu ogonidagua bini.

## 4

### *Deborabi Baragabinaga te ogo*

<sup>1</sup> Mani Ehudu homeagola Isaraeali wali agalime Anduane Homogohondo mana ko ngubiore lone bini. <sup>2</sup> Ani bialu hearia Anduane Homogohonda ti Kenanali mbira Yabini henego ibu Hasora dindi timbuni wiago kini heangi ibugua Isaraealiru ti bo podelo henge mini. Yabini ibunaga ami haru haga haguane mini Sisera hene. Ibu Harosede Hagoimi dindi wiagoria ho hene. \* <sup>3</sup> Yabini ibu wai biaga garo mini karisi hongohe aeaneme wabinigo handari dira (900) ge kirahe nogo hosini pongo bia howa gili laga wini. Ani buwa ibugua Isaraeali wali agaliore mo ko howa mali pira kira (20) tandaga gibiore nelo mialu haru hene. Ani bialu heagola Isaraeali wali agalime tandaga nalu Anduane Homogohondo yilalu, Biamogo bia, lene.

<sup>4</sup> Ogoningi Labidodi one Debora ibu Ngode Datagaliwabe mana latagi haga mbira biruwa ibu Isaraealirunaga godi hale hagane ogoninaga biabe bia haga berene. <sup>5</sup> Ibu dindi mini Lamala Bedelela dombeni ira ayage ale mini dedi mbira heago andaneha biraga wini. O biraradagoni Eberaimi dindi hari bare wiagoria berene. Ogoriani Isaraeali wali agali ti ibu bedaria poragola ibugua tigua buleneru lamiagane wini. <sup>6</sup> Horo mbirungi Debora ibugua Abinoama igini Baraga Kedese dindi timbuni Nabadali wiagoria howa ibilo, Damu pu, lene. Ani buwa ibiyagola ibuhondo lalu, Anduane Homogo Isaraeali wali agalinaga Ngode Datagaliwabe ibugua bi ogo lowia haya. Ibugua lalu, Agali daosini pira (10,000) hameigini Nabadalila Sebulunulaha howa haru halu Hari Tabo wedagoria haru halu pobe. <sup>7</sup> Ina Yabini ami haru haga Sisera tí heba wai bilimulo iba Kisono poragoria haru ibaguago. Ibugua ibunaga wai biaga garo ale biagobi ami agaliru heba holebirago tigua wai wayali halimulo nguliya, laya lene.

<sup>8</sup> Ani layagola Baraga ibugua ladai bialu lalu, I iya haru mbaliyayagua polebero ani ndo i naibiriyagua i napoleberoore ndobe, lene.

<sup>9</sup> Ani layagola Deborahanda ladai bialu lalu, Karulapego i iya haru pu poleberebago ina mbirale mbira wai bu wayali haregonaga namulebere. Ogoni irane Anduane Homogohonda Sisera wali mbira gini ya helolebira, lene. Ogoninaga Debora ibu Baragala Kedese dindi pole pene. <sup>10</sup> Puwa Baraga ibugua Sebulunula Nabadalila hameigini kira ogoni olalu Kedese dindi ogoriani ami agali daosini pira (10,000) Baraga erembirani hene. Debora libu haru mandagi pene.

<sup>11</sup> Aguani pialu heagola Keniali mbira mini Hebe ibu puwa balai anda mbira Kedese dindi kaware handa dele ira mbira bai ale heagoria kaware Sananimu dindini bu hene. Hebe ibu Keniali Hobabanaga aguanene Mosese ibu balibuni hearu helalu pu bagi howa hene.

\* **4:2:** Dindi Harosede Hagoimi ogoni wiagoria Yuda wali agali nahe wali agali tara tara dege haga wini. Hobane 13,16 de handabe.

<sup>12</sup> Sisera ibugua Baraga ibu Hari Tabo pu ka layago hale howa <sup>13</sup> ibunaga wai biaga garo ale mini karisi aeaneme wabinigo handari dira (900) biarubi ami agali biarubi bibahende olalu Harosedede Hagoimi dindi wiagoria howa iba Kisono piyagoria pelene.

<sup>14</sup> Ani biyagola Deborahanda Baragahondo lalu, Anduane Homogohanda í haru bamba holebirago pu. Áyu ogoni Sisera ibu wayali nahelo í wayali habelo ibugua hongo ngulebira, lene. Ani laya handala Baraga ibu Hari Tabo weagoria howa ibunaga ami agali daosini pira (10,000) biaru heba dalipe halu pene. <sup>15</sup> Baragahanda ibunaga ami biaru hebame Sisera ibunaga ami heba minu balu heagola Anduane Homogohanda Siserabi ibunaga wai biaga garo ale biarubi ami agalibi bibahendeore mo lungulungu bia halu lulu yu helene. Ani bilayagola Sisera ibu wai biaga garo ale biagoria howa dalialu ibida gerai lalu pene. <sup>16</sup> Baragahanda waitiginaga garo ale biarubi ami agali biarubi bibahende abale Harosedede Hagoimi dindi biago wiagoria abale bo talini. Talialu Siseranaga ami agali mbiraorebi nayuwahe bo wahaiore hene.

<sup>17</sup> Ani biya handala Sisera ibuni Keniali mbira mini Hebe henego one Yalenaga balai anda bu paleagoha ibida anda pene. Ogoni irane Hasoro dindini Kini Yabini ibugua haru heangi ti wai nabi Hebe ibu one waneigini ti gi nahe heago hondowa Sisera ibu uruni andaga ubanda hene. <sup>18</sup> Yalehanda Sisera ibiyaria lola howa ibuhondo lalu, Agali ibalu haribe. I andaga tamuha ubandaha. Gi nahabe, lene. Ani laya handala ibu ubanda hayagola Yalehanda Sisera aga mbirame bu dambi helowa bira do helene.

<sup>19</sup> Siserahanda Yalehondo lalu, Ibaore mbira noa kogo mbira noliya hambu ngiore bia, lene. Ani layagola ibugua nogo bulumaga andu iba be nogo dongoneme wabini mbiraha berelo winiyago ogoni poyá duguwa nelo mini. Ani buwa lone bira do helene.

<sup>20</sup> Ani bu biruwa ibugua Yalehondo lalu, Balai anda panga harabani hapai kegola mbirali ibuwa ogoniha mbira ai bedabe layagua mbira nabere labe, lene.

<sup>21</sup> Sisera ibu erekui taraore howa u palue biyagola palia hondoore hene. Palia hondo hea tambu Yalehanda ira nduli бага mbira wiago mialu balai anda pu nguni ndibu laga ira dehe mende lowa mo yalu Sisera paleagoria hendore ubadaga hene. Ani buwa Siseranaga haguane ira dehe biagome dindila ba para helene. <sup>22</sup> Ai Baraga ibu Sisera tai bima ibalu hearia Yale ibu lola ho puwa lalu, Ína agali o tai beregoni ina walia holiya ogoria íbu, lene. Ani layagola puwa handalu hearia Sisera ira dehe balai anda pu ariba haga biagome haguane dindila ba para howa tongolo mu wiaria handa walia hene.

<sup>23</sup> Horo ogoningi Ngode Datagaliwabehanda Isaraele wali agalihondo Kenanalirunaga Kini Yabini bo wahelo hongo mini. <sup>24</sup> Ani biyagola tigua hongo howa bo podama pialu Yabini baore bialu wahene.

## 5

### *Debora Baragalame mambolo balu iba gana lenego ogo*

<sup>1</sup> Horo ogoningi Deboralá Abinoama igini Baragalame mambolo balu iba gana ogodagua lene.

<sup>2</sup> Haru haga hearume Isaraealirú haru bamba halu  
wai tini buleore lalu turu howa binidago  
Anduane Homogo mini yaraga hama.

<sup>3</sup> Kini kamiru hale hadaba  
Haru haga kamiru tí hale ho tiga bidaba.

Ína mambolo balu Ngode Datagaliwabe Isaraealirunaga Anduane Homogohondo iba  
gana lo merogo.

<sup>4</sup> Anduane Homogo í hari Sia yu wahalu  
Edomo dindi hobane wiagoha howa tagira ibiringi  
dalú hari daligani howa ibalu dindi dumbidumbi biyagoni.



E iba li ginurunaga howa porabupe hayuagoni.

<sup>5</sup> Anduane Homogo Hari Sainaini heagoria<sup>✧</sup>

Anduane Homogo Isaraelenaga Ngode Datagaliwabe deni hari li hearuni ema bu handayagoni.

<sup>6</sup> Anada igini Samaga heangibi

Yale bereangibi

harigani garo ale nogo hosini gili lalu wali agali biru yalu bolangua halu dindi ogoriani pobe nahe wini.

Ani bialu harigaliru ti hariga leneha pu bagi halu pene.

<sup>7</sup> Isaraele wali agaliru ema nabi hemigoria hope heagola

Debora ina mo heya halu

wali aiyali aiya ibagadagua Isaraele wali agaliruhondo ibirigoni.

<sup>8</sup> Ani biagola Isaraelealirume dama tara tara dabeneya.

Dabayagola howa dindi ogoniha wai tagira ibini.

Agali daosini hangu pira maria (40,000) Isaraeleni hayaru

mbiralime humbi yandarebi mbira yu ibaga bu heabe.

<sup>9</sup> Inaga bu mini Isaraele ami haru haga hebabi

Isaraele agali wai tinime bule turu halu biyaru hebabi heledogo.

Anduane Homogo mini yaraga hama.

<sup>10</sup> Ogoninaga ti nogo dongi pelerunaga biraga kamirubi

geme dindi dindi piaga kamirubime la handadaba.

<sup>11</sup> Hale hadaba. Wali agali dewaore iba hambigane uli wearuha ho mabu bu hagahaga buwa

bi anda halu Anduane Homogonaga hongome Isaraele wali agali mo wayali hayarunaga te lalu mambolo baruagoni.

Anduane Homogonaga wali agali tininaga dindi timbuni biagoria howa mambolo bama yupe hene.

<sup>12</sup> Haru bambaha Debora haru bambaha.

Haru bamba halu iba gana la.

Haru bambaha.

Abinoama igini Baraga inaga garabaya biabe ale bilo agali mininiru haru bambaha.

<sup>13</sup> Wali agali mini bilina helaradagua bialu haga hayaru

tinaga haru bamba haga hearu heagoria ubadali haya.

Anduane Homogonaga wali agali ibuni heagoria wai bule manda manda bialu ibiya.

<sup>14</sup> Ti Eberaimi howa ibalu

Beniyamini hameigini wali agali paleago ere mbirahayagi dindi guane mbirani ibu tagira pene.

Ami haru haga biaru Magia dindi howa ibu daliyagola

haru haga maru ti Sebulunu dindi howa dalini.

<sup>15</sup> Isaganaga haru haga hearu Debora heba ibiya.

E Isagabi ibalu Baraga ibubi ibu dege bialu

ti haru ibu talima ni guane wiagoniha yupe haya.

Ti ani bialu heagola Lubene hameigini ti hanuni talebuki buwa tidu yu haga haga bu howa dege

ti ibuabe be naibuabe toba howa mini kira wu hene.

<sup>16</sup> Ti nogo sibi heba maha hadai bu hayago aginagabe.

Nogo sibi haru hagarume nogo mbu lararu hale hole hadai biyadabe.

E Lubene hameigini ti hanuni talebuki buwa tidu yu haga haga bialu

✧ 5:5: Har 19.18

ti ibuabe be naibuabe toba howa mini kira wu hene.

<sup>17</sup> Gada hameigini ti iba Yodana ni tagira ibiragohayagi heagola

Dani hameigini ti iba sibi wiagoria haho wiya.

Ase hameigini ti iba solowara ange ange ha ai ai bima piya.

<sup>18</sup> Uruni ti ani bima peagola Sebulunu hameiginirubi Nabadali hameiginirubi  
ti tini homolene kaware wiagoria wai hamani hayada.

<sup>19</sup> Tanaga dindini iba Megido angeni kini biaru ibalu wai biyagoni.

Kenananaga kini biaru ibalu wai bia biyagoyu

tigua muni silibabi mbira namo yalupe.

<sup>20</sup> Yakundirume li hari daligani howa wai bialu

uba ai nai bialu wai li hari daligani wai bini.

Wai ogoni Siserala bu banga bialu hea.

<sup>21</sup> Iba Kisono li wiagome ti hilo yalu pu wahaya.

Iba Kisono ogoni hongoheore ndobe.

Ina ge mbarilo handarogo hongo howaore mbarilo handaro.

<sup>22</sup> Ani bialu nogo hosirume gerai lalu ibalu

tinaga ge habeme dindi biri lama gerai yu pepe biya.

<sup>23</sup> Meroso tanobi Merosi tanoni karubi homai helo lalu

Anduane Homogonaga dahuliyalime ha ho wia laragoni.

Tigua Anduane Homogo biamogo bule ndo ibiniya.

Ti ami ale howa ibunaga wai bia hole ndo ibiniya.

<sup>24</sup> Wali maru beda lowabi waliore Keniali Hebe one Yale ibu ngui duguahe bereneya.

Wali dewaore balai andaha bu bereneru wali mbira Yale hangu ngui duguahe  
bereneya.

<sup>25</sup> Sisera iba nole hale halu berearia Yale ibugua nogo bulumaga andu iba hambu miya.

Andu iba bayaleore be baya buruguleha hambu yu ibuwa miyagoni.

<sup>26</sup> Ibugua balai anda pu dariba haga ira dehe gi mendeha yalu

agalinaga ira nduli бага gi mendehabi yuwa

ibugua Siseranaga haguane kuni dambialu

ira dehe biagome haguane kuni bo bangalu бага bini.

<sup>27</sup> Ani biyagola Siseranaga ge duli podape halu birupe hene.

Pila podobaga buwa Yale geha ibira hene.

Ibunaga geha ge duli podobagaore bialu dindini ibira hene.

Ibira howa tongolo miya.

<sup>28</sup> Sisera aiya ibu anda windoha handa tagiho biru wiya.

Ibu anda tamuha howa windo diriha handa tagiho wiaabo hene.

I igininaga wai biaga garo ale biago naibi wiaabo haruagoni irane agidabe, laya.

Ibunaga nogo hosi biarume maniore íbu dai bule haruagoni irane agidabe, lalu  
berene.

<sup>29</sup> Ani lalu berearia wali mini gigabiwiore berearume ibuhondo ladai bialu bereagola

ibugua ibuni layago ale dege lone laga bialu laho wiaabo halu berene.

<sup>30</sup> Tigua lalu, Uruni ti mbirale hangu tai bialu kago handa walia halu tale bule bialu ka.

Ami agali mbirago ibu wandari mbiraha kiraha bigi bialu

Siseranaga homogome biaga aga wiago ti mo halu

ma gagua tongolo бага bialu maru maru wiago kuini walinaga mani wilo migi bialu ka,  
lene.

<sup>31</sup> Anduane Homogo-o ínaga waitigiru ogonidagua bialu homelogo

ínaga dameneru dege ngiri ngarale wá hama egerebagi ni tagira ibiradagua bilo helabe,  
lalu lai hene.

Ani bialu wai paluwa dindi ogoriani hemine mali pira maria (40) pene.

## 6

### *Gidiono te ogo*

<sup>1</sup> Isaraele wali agalime mana ko ngubiore lone Anduane Homogohondo biyagola ibugua wali agali uruni Midianalime mali kariani haru helo helene. <sup>2</sup> Midianali uruni ti hongoheore lowa Isaraealiru hongo emene nira hene. Ani heago hondowa Isaraele wali agali ti ha do hole lowa egeandahabi maruha ha do holene hari bare bareni karulape wiane hondowa ogoriani hene. <sup>3</sup> Isaraealirume mbirale egene mbira polayagola howa Midianalirubi Amalegealirubi hameigini maru dindi ko dalu naibaga wiagoha hearubi tigua Isaraealeali bole ibaga hene. <sup>4</sup> Ibalu ti dindi ogoriani anda biade ho howa Isaraealirunaga mbirale tomo damene hangedaru dugu pudubaga bima piaga hene. Gasa tano lene lenehabi dindi ogoriani hengearu bibahende dugu garalibu wahaga hene. Ani bialu tigua nogo sibibi bulumagabi dongibi nogo damene bibahendeore mbira Isaraealiru nalu helo yu wa nahe haru halu tagira piai haga hene. <sup>5</sup> Uruni tigua ibalu nogo hinulene tara tararu anda bu palu holene balai andaru gibi nu bagini hanaga hanaga bialu tidini uburili mindibi mberabupe hama ibiradagua ibugu bini. Tinibi tinaga nogo kamelerubi dewa gibiore daga labe nahe ibugu bini. Tigua ibuwa dindi ogoni mo koore halu dugu payabu wahaga biaga hene. <sup>6</sup> Ani biyagola Isaraele wali agali biarume mbira biadai bibe naheore hene.

<sup>7</sup> Ani bibe nahe howa Isaraele wali agali uruni tigua Anduane Homogohondo yi lalu, Midianalime o biragoni ína ina biamogo bia nabere, lene. <sup>8</sup> Ani layagola Anduane Homogo Isaraele wali agalinaga Ngode Datagaliwabehanda mana latagi haga mbira ti hearia dabo pelowa lalu, ína tí Iyibi dindi garabaya hemira haru halu tagira ibirugoni. <sup>9</sup> Ani bialu ína tí Iyibialirunaga garabaya biabe bia halu hemira gini mirugoni. Ani bialu dindi ogoria wali agali hearu hebabi wai bialu hemira tí biamogo birugoni, lene. ína wali agali ogoriani hearuni bo haealo batagi halu tinaga dindi tí karulalimulo mo ngirugoni, lene. <sup>10</sup> ína tíhondo, í Anduane Homogo tínaga Ngode Datagaliwabe kogo tígua Amoralidindi tí áyu kamirunaga damaruhondo bi pupu nawilimu, lalu langirugoni. Ani larugoyu tí hale naharimi, lene.

<sup>11</sup> Ani biyagola Anduane Homogonaga dahuliyali mbira ibuwa Obara dindini ira bai ale mbira Yoasanaga heago teneha berene. Yoasa ogoni ibu Abise hameigini hene. Yoasa igini Gidiono ibu Midianalirume de hondoligo lowa ibuni hangu ha do howa gerebi ira lini pingidaga wiagoha widi iraneru lini hondo ibira ibira bilo biabe bialu hene. <sup>12</sup> Ani bialu hearia Anduane Homogonaga dahuliyali ibu hapani howa ibuhondo lalu, Anduane Homogo ibu í heba kago agali wai biaga hongohe gi nahaga kegoni, lene.

<sup>13</sup> Ani layagola Gidionohanda ibuhondo lalu, Agali timbuni-o ína mbira íhondo hale habehedabe, lowa lalu, Anduane Homogo ibu ina heba kayagua nde inahondo o bidaruni irane aginagabe. Anduane Homogohanda baya burugule ogodagua biaga lalubi Iyibi dindi howa ogodagua haru tagira ibini lalubi ina abarume langiyagoni aguadabe. Ai Anduane Homogohanda ina yu wahalu Midianalirunaga giha ya heneda, lene.

<sup>14</sup> Ani layagola Anduane Homogohanda Gidionohondo lalu, Áyu ína hongo timbuniore howa Isaraele wali agali Midianani karu gi mule pu. í inime í pu larogoni, lene.

<sup>15</sup> Ani layagola Gidionohanda ladai bialu lalu, Ani bia larego ína agua bialu Isaraele wali agali gini muabe. í aria hameigini Manase karu gedaoreore halu ínibi mini lene ndo dindiha uruni aria ko, lene.

16 Ani layagola Anduane Homogohanda ladai bialu lalu, Ína bibehe larogoni irane ina í biamogo bulebero. Ina Midianali uruni agali homane mbiraoreali baradagua bialu bo podo waore holebere, lene.✧

17 Gidionohanda ladai bialu lalu, Ina ihondo turu keyagua í heneneore Anduane Homogo heneda loliya ina manane maru ihondo walia ha, lene. 18 Ani lowa lalu, Í pu nabi ina ala tomo mbira í ngule mo porogo ogoria hondo habe, lene.

Ani layagola ibugua lalu, E í dai bibelo haore bidogoni, lene.

19 Ani laya handala Gidiono ibuni andaga ubanda howa nogo meme igini hungubalua mbira nai heagoni bo dawene. Ani bialu balawa nu mbira ale mberedi yidi nahe hirini. Ani bialu nogo mbirini nu mbiraha hanalu nogo mbirini dawenagonaga subu beha odo berelowa Anduane Homogonaga dahuliyali biago ira bai ale teneha berearia yalu ibuwa mini. 20 Ani miyagola dahuliyali biagome ogodagua bia lalu, Nogo mbirini mberedi biagobi ege tole ogoriani wialu nogo mbirini dawenagonaga subu beha yayarume odo wia, lene. Gidiono ibugua o bia layadagua bini. 21 Ani biagola Anduane Homogonaga dahuliyali biagome ibunaga gi dogolo amu halu halimbu yu hayagome nogo mbirini mberedila biago nguini mendehayagi ela hene. Ani biyagola ira hungu ege tole biagoha howa tagira ibalu nogo mbirini biagobi mberedi biagobi dai hene. Ani biya handala dahuliyali biago pu ereba hene.

22 Ani pu ereba heagola Gidiono ibugua manda bialu hearia o biagoni Anduane Homogonaga dahuliyaliore handaruda lowa gi taraore hene. Ani bu howa lalu, Anduane Homogo Bibahende Haru Haame Ho Haga kego-o inaga dahuliyaliorela dengui handaya haga bu hariba, lene.

23 Ani layagola Anduane Homogohanda ibuhondo lalu, Gi nahe bu mini palelo habe. Í homa nabuleberegogo, lene. 24 Ani layagola Gidionohanda Anduane Homogonaga lomabu mulenenaga dabu mbira o biagoria bini. Dabu ogoni mini Anduane Homogo ibu Mo Palia haga ka wini. Lomabu mulene dabu ogoni Abise damenerunagayago amu Obara dindini wiaabo hea.

25 Mbiraga ogonongi Anduane Homogohanda Gidionohondo lamialu lalu, Í abanaga nogo bulumaga wangabe kagobi nogo bulumaga wangabe mende mali karia pene kagobi haru halu puwa í abanaga bi pupu wiaga mini Bala dabu ngago gialope habe, laya. Ani bialu dama wali beda mitangi bialu bi pupu wiaga mini Asera irame wabu hapara heledagonibi dibupe habe.

26 Ani dibu podobaga bu ibiraho ngagoriani Anduane Homogo inaga Ngode Data-galiwabenaga bo lomabu mulene dabu mbira bayuwaore ogoriani bia dambi halu bia aribia ho helabe. Ani bialu Asera ibu dama lowa wabu helene dibupe harigo ira dene delowa nogo bulumaga wangabe mendego homa hende bo lomabia halu delabe, lene. 27 Ani layagola Gidionohanda ibunaga biabe bia haga pirali haru puwa Anduane Homogohanda layadaguaore bini. O biyadagoni Gidiono ibu aria damenerubi wali agali maru dindi timbuni ogoriani hearubi deni gi howa horombe bialu kamaria ti de hondoligo lowa tigua mbi ge howa bini.

28 Wali agali dindi ogoriani palaru egerebagiore heyuwa handalu hearia Balanaga dabubi Asera gime wabini biagobi nahe dibu ibira ho wiaria hendene. O biagoriani lomabu mulene dabu mbira gahenge bia dambi howa nogo bulumaga wangabe mende biago homa hende bo delearia handa walia hene. 29 Tini hale hagahaga bialu o biyadagoni aiwadabe lagalaga bini. Tigua aiwa binidabe hondole guaru handalu hearia Yoasa igini Gidiono ibugua biniyane handa walia hene. 30 Ani handa walia howa tigua Yoasahondo lalu, Í igini ogoria haru tagira ibu. Ani beregola iname ibu homelo

✧ 6:16: Har 3.12, Yos 1.5

bolomaya. Balanaga dabu gialo bagabu ibira heledagobi Asera wabu helene biago dibupe hayadagobi ogoni ibuguaore binida, lene.

<sup>31</sup> Ani lalu peagola Yoasahanda ibunaga wanakuini handaya ho wiaruhondo lalu, Balanagaore heyuwa bi lahalu kamibe. Ogoninagaore hapai haramigonibe, lalu tihondo hale hene. Mbirali Balanaga heyuwa bi lahalu kago yawi egabi naledaore balu home lolebira. Bala ogoni ibu hongohe kayagua ibu ibunime bilo. Bo lomabu mulene dabu gialo bagabu ibira helayadagoni ibunagaore ndobe, lene. <sup>32</sup> Ogoningi howa Gidiono mini mende aribia halu Yarubala wini. Ogonidagua mini wiyadagoni irane Yoasahanda lalu, Bala ibu hongohe kayagua ibunaga bo lomabu mulene dabu gialope hayadagonaga ibu ibunime bilo tí wahadaba, lene.

<sup>33</sup> Ai Midianali bibahendebi Amalegeali bibahendebi maru dindi ko dalu naibaga wiagoha howabi bibahende íbu ngoai howa Iba Yodana domowa Yaserili dindi guane wiape heagoria anda buwa hene. <sup>34</sup> Ani buwa heagola Anduane Homogonaga Dinini ibu Gidiono haru heagola ibugua mbelo biguli pu layagome Abise hameigini bibahende ibu talima ibilo mo ngoai hene. <sup>35</sup> Ani ngoai ho hearia Gidiono ibugua bi maru lo yalu Manase dindi abene mendeha mendehabi purogo lalu, Ína larodagua bimiya lole pudaba, lene. Ani bialu bi maru yalu Asera hameiginibi Sebulunu hameiginibi Nabadali hameiginibi uruni ti bibahendeore ibalu, Í heba ho gimbu bimiya lole pudaba, lene. Ani layagola tibi ibalu ibu heba hogimbu bini.

<sup>36</sup> Ani buwa Gidionohanda Ngode Datagaliwabehondo lalu, Ína íha howa Isaraele wali agaliru gi mulebero larigoda. <sup>37</sup> Aniyagua ína nogo sibi iri mbira dindi amu widi iraneru lini hondo ibira ibira bilo beramaligoria wiaguago. Werogola egerebagiore dadimba dindini nawi nogo sibi iri biagoria hangu winiyagua nde Isaraele wali agali ína gini mibelo haru holiya larigoni aniore bulebedalo manda bu hagua, lene. <sup>38</sup> Ogoni layadaguaore biniya. Gidiono horo mendengi ibu egerebagiore heyalu puwa nogo sibi iri biago yamialu hearia iba dadimba bereneyago pingidayagola be mbira tolo tagi hene. <sup>39</sup> Ani biyagola Gidionohanda Ngode Datagaliwabehondo lalu, Ína íhondo kebaore nahabe. Bi halu mbira hangu lone loa kogo halu mbira hanguorego laro. Ai nde halu mbira hanguore nogo sibi iri ogonime bahondoliya. Ai áyu nogo sibi iri yobu wialu dindini dadimba berelo, lene. <sup>40</sup> Ogoningi mbiraga Ngode Datagaliwabehanda bi o layagonidagua bilene. Egerebagi hayagola nogo sibi iri biago yobu wialu dindi biago dadimba ibira howa ibahe wiaria hendene.

## 7

### *Gidionohanda Midiana agali baba wai bialu bo poda hana henego ogo*

<sup>1</sup> Horo mbirungi Gidionobi ibunaga agali bibahendebi egerebagiore heyalu puwa iba Harodo duguayagoria hapara howa ubanda ho hene. Ani biagola Midiana agali ti nde dindi ogoninaga dege hari bare mini More weagoria dindi guane wiagoria balai anda bu hene.

<sup>2</sup> Ani biagola Anduane Homogohanda Gidionohondo lalu, Agali ína haru keruni Midianaliru baba wai bialu bo poda hana habelo ína ngule ngodagua ndo dewaoreda. Agali uruni ti bibahende piai howa wai bialu tigua bogo hana haragola ína ti biamogo nabi tini hangu hongome birima manda buligo. <sup>3</sup> Ani bulebirago ína agali wai polene gi ho karu ti áyubidaore andaga dai bulene nga lalu lope habe, lene. Ani layagola daosini pira kirani kira (22,000) tidi yalu andaga dai biyagola daosini pira mbira (10,000) hangu Hari Gileada tenaha tidi yu hadai bini.✧

<sup>4</sup> Ani bu heagola Anduane Homogohanda Gidionohondo lalu, Agali uruni dewa degedago, lowa, Ai ína dabo talebuki bu nguliya unu iba poragoria angeni haru dalia, lene. Ani buwa ogoriani agali ogo ibu íla pelo larogo ibu pelo agali ogo ibu íla napelo

✧ 7:3: Man 20.8



larogo ibu napelo lalu daboliya, lene. <sup>5</sup> Ani layagola Gidionohanda agali biaru iba piyagoria haru halu dalini. Ani biagola Anduane Homogohanda ibuhondo lalu, Agali iba heyu howa gi habeni talo mialu nararu baba bulu paluwa ge duli hanga howa nararu baba mo talebuki habe, lene. <sup>6</sup> Ai agali iba gi habeni talo mialu nayaran handari tebira (300) hangu halu dewaore agali iba ge duli hanga halu bulu paluwa nayaran hene. <sup>7</sup> Ani biyagola Anduane Homogohanda Gidionohondo lalu, Áyu Midianaliru baba wai bule agali handari tebira (300) iba heyu howa gime talo migi bialu nayaran heba hangu puwa wai bialu bo poda hana halimulo ina í hongo ngialu biamogo bulebero, lene. Ani bialu agali maru ti bibahende tini andaga ibiyadadagua dai biai helabe, lene. <sup>8</sup> Ani buwa Gidionohanda Isaraealiru bibahende andaga dai bilalu handari tebira (300) biaru ti hangu tomo noleneru mbelo biguli buleneru hangu wua hadai bini. Midianaliru ti nde ni guane wiagoria balai anda buwa hene.

<sup>9</sup> Ogoningi mbiraga Anduane Homogohanda Gidionohondo, Ogodagua bia, lalu, Ina Midianaliru inaga giha ya holeberogo áyu heyalu puwa wai bule pudaba. <sup>10</sup> Ani ndo. Ina bo anda polenego gi biyagua inaga biabe bia haga agali Pura ibula wai taya puwa handa ala bidaba. <sup>11</sup> Porabigola tigua bi mbira laragola hale holeberabigo hale howa miniha hongo anda ibira handala polebere, lene. Ani laya handala Gidiono ibunaga biabe bia haga Purala haru abale dalipe howa unu waitigi biaru anda mandaha abale bira para howa berene. <sup>12</sup> Ani buwa handalu hearia Midianalirubi Amalegealirubi dindi ko dalu naibaga wiagoha howa agali ibini hearubi nai tidiyu ibaga bu haame hearia nde daga labe nahego nai uburili mindibi mberabupe hama poradagua bialu naina tidiyu li ni leago hendene. Ani bialu tinaga nogo kameleru nde au lolebe labe naheore iba solowara angeni iba mu wima poradagua biago hendene.

<sup>13</sup> Gidiono ibu puwa hale halu hearia agali mbirame ibu nenege mbirala biruwa ibugua emaga mbira hendenege te lalu birayuane hale hene. Ibugua emaga ogodagua handaru layua, Ai ina emaga handalu hewaria mberedi ladi ale balime wabini mbira homa hende pendo pendo inanaga anda bu kamagoria ibuwa balai anda mbirago baya, layua. Balai anda ogoni bayagola podobaga bialu dindini mbala pialu paliya, layua.

<sup>14</sup> Ani layagola ibunaga nenege biago ibugua ladai bialu au layua, Ogoni Isaraealirunaga wai biagane ayu tibu nene gadele ngaru handalu Yoasa igini Gidiono handaridago, layua. Mbirale mbira ndo ogoniore holebirago Ngode Datagaliwabehanda Midiana bo podalu inanaga ami agaliru bibahendeore bo haealo wahelo hongo mulubadago, lalu layuagola Gidiono ibu hale hene.

<sup>15</sup> Gidionohanda agali ogonime emaga hendene ogonibi galone ogo ale lalu layuagobi hale hai howa ibu ge duli hanga howa Anduane Homogo kaore lalu ibunaga mini mo yaraga hene. Ani buwa ibugua Isaraealiru balai anda bu hayagoria ibu dai buwa lalu, Ai heyadaba. Anduane Homogo ibugua Midianalirunaga ami áyu iname balu bo hana holomaya hongo ngidagoni, lene. <sup>16</sup> Ani lowa Gidionohanda Isaraeale agali handari tebira (300) hangu hayagoni hanuni talebu tebo buwa agali mbira mbira giha mbelo biguli pu lolenebi be mbira hale dolene tamuhahebi yagayaga bilowa tidi yu haghaga bilene. <sup>17</sup> Ani buwa ibugua tihondo lamialu lalu, Ina balai anda bu karunaga kaware hapara ho kogola tigua í de handaya halu ina berogo ale dege bilimu, lamini. <sup>18</sup> Ani bialu wabuni í halu tidiyu kogome mbelo biguli pu laramagola tinaga mbelo bigulibi bibahendeore pu lai damene halu anda bu karunaga bo mabu bupe halu Anduane Homogonaga minibi Gidiononaga minibi ladaga daga bialu wai huario lalimu, lene.

<sup>19</sup> Aguaní lowa Gidiono ibu agali handari mbira (100) hayaru heba emene howa mbi hanuni hole lowa dege wiaria tigua balai anda bu hearunaga gembone wiagoria haparaho hene. Ogoriani mamageali maru áyu dege halu peha ti aribia hene. Ani bu howa tigua mbelo biguli yagayaga birimiru pu lalu Gidiono heba wabuni piyago be yarimirubi pambu lalu bini. <sup>20</sup> Ani biyagola tidi ki hayarumebi o biyarudagua

dege biai hene. Tigua ira hale gi lehayagi yagayaga bialu mbelo biguli gi tigaha yuwa huaro ladaga daga bialu lalu, Wai biagane ayu tibu nehe ogoni Anduane Homogonagabi Gidiononagabi, lalu wai huaro lene. <sup>21</sup> Agali mbira mbira anda bu hearunaga hama pialu ho mabu bupe heagola waitigi ami agali biaru bibahendeore yiya lalu ibida gerai lalu pene. <sup>22</sup> Gidiono ibu agali biarume mbelo biguli pu lalu heaore Anduane Homogohanda waitigi ami agali biaru pialu tininaga wai biagane ayu tibu nene gadele yarimigome tini dibaga dibaga bima pelene. Ani bialu tini Saredani dindihayagi gerailo yu pialu kaundiaore Bedesida dindibi yu wahalu amuraore Aibele Mehola tano mbira Tabada dindi handadele wiagoriaore ibida puabo hene.

<sup>23</sup> Ani biagola hameigini Nabadali Asela hameigini Manase dindi abene mendeha mendehabi paliaga paliaga biaru olalu, Tigua Midianaliru bole talidaba, lene. <sup>24</sup> Gidiono ibugua maru abale waio Eberaimi dindi barebare wiaru bibahendeni pu banga bialu, Midianaliru baba wai bule dalidaba, lama pelene. Daluwa Iba Yodana poragobi iba maru emene porarunagabi Midianaliru domade halu pora bialu poligo lowa tigua iba uruni ange yani ho hama pialu amuraore Bedebarani hama puabo halimu, lene. Ani lowa Eberaimi agaliru olalu, Ibu ngoai hadaba, layagola tigua Iba Yodanabi iba maru emene piyarubi yaniho hama pialu amura Bedebarani hairi hene. <sup>25</sup> Ani bu howa tigua Midianali haguane kira mini Orebela Sebela minalu bogene. Tigua Orebe bogayagoria Orebe dinini helalu tole mini Orebenaga Tole lene. Sebe bogayagoria Sebe dinini helalu ogoria mini Sebenaga Gerebi Ira Lini Pingidaga lene. Ani bialu tigua Midianali biaru bama talima piaho wialu Orebela Sebelanaga haguane puguwa yalu Gidiono ibu Iba Yodana piyagoha uyu ni tagira ibiragohayagi hearia yalu puwa mini.

## 8

### *Midianaliru balu bo poda maro binigo ogo*

<sup>1</sup> Ani biagola Eberaimi agalirume Gidionohondo lalu, Ina Midianaliru baba wai bule pole pialu howa ina o nalarigoni irane aginagabe. Ina inahondo ogonidaguaore biriyagoni irane aginaga biribe, lene. Tigua ani lalu kebaore howa lai lalu hene.

<sup>2</sup> Ani lalu heagola Gidionohanda lalu, Ina bialu harudago tigua bialu harimidagola mo manda bu handabe naheore bido. Ti Eberaimi agalirume emene mbira birimiruni inaga hameigini bibahende heba iname bidamago dindiha lowa tigua bolangua howa daligaore bidami, lene. <sup>3</sup> Ai bia dege bialu howa maniore Ngode Datagaliwabenaga hongome tigua Midiana agali haguane kira Orebe Sebela minalu barimigoni. Ogoni birimigo ina agi birugola mo manda bu hondoledabe, lene. Gidionohanda ogonidagua layagola tigua kebaore gibi howa lalu hayago nimulope hene.

<sup>4</sup> Ogoningi Gidiono ibu ibunaga agali handari tebira (300) biaru heba Iba Yodana piyagoria dalialu ange mendehayagi domalu ubade hene. Ti pu dege bialu halowa homabehe hayago helowa dege harugo lowa tigua waitigi biaru talima piaho wini. <sup>5</sup> Ani bialu ti Sugada tano anda ibu howa Gidionohanda agali tano ogoriani hearuhondo lalu, Mberedi maru hira ngamiyagua inaga agaliru halalu hina garibilo tongo ledago miaore bidaba, lene. Ani bialu ibugua, Sebala Salamunala Midianalirunaga kini ogoni labo talima pialu kogoni, lene.

<sup>6</sup> Ani layagola Sugadaliru haru haga hearume lalu, Inaga ami agali uruni iname tomo mbira nelu mulene irane aginagabe. Tigua Seba Salamunala minalu ba nabi dege kamigonida, lene.

<sup>7</sup> Ogonidagua layagola Gidionohanda lalu, Ogoni karulapego Anduane Homogohanda Seba Salamunala minalu ihondo ngirangi ina ti agubandu aniheme dindi ko dalu naibaga ngagoha howa yu ibalu tandaga nalimulo dambuliya hondo halimu, lene.

<sup>8</sup> Ani lalu Gidiono ibu piaho wialu Penuele dindi anda pu howabi wali agali ogoriani

hearuhondo bi ogonidagua dege hale hene. Ani hale hayagola uruni tiguabi Sugada agalime ladai biyadagua dege ladai bini. <sup>9</sup> Ani layagola Gidionohanda tihondo lalu, Ina áyu pialu bayale dai buleberogo. Dai berongi ina tínaga wai pabeanda luni bima iri iri bidamiruni bo gialope holebero, lene.

<sup>10</sup> Ani lowa pialu hearia Seba Salamunala kini biagolabo libunaga ami agaliru heba Kagori dindini heneya. Ami agali dindi ko dalu naibaga wiagoha howa ibiyaru daosini nguira (15,000) hangu nabe yu wahalu ami agali daosini handari mbirani pira kira (120,000) bibahendeore minalu bogai hayiya. <sup>11</sup> Ani biyiyagola Gidiono ibu dindi ko dalu naibaga wiagoha hariga mbira peadagua puabo halu pene. Ani bialu Noba Yogobeha dindi wiagoria ubanda howa ami agali biaru ogoriani hearia mo mogola halu minu bene. <sup>12</sup> Ani biya handala Midiana agali kini kira Seba Salamunala biago labo ibida pora bialu pene. Ani bialu hearia Gidionohanda talialu minuwa libunaga ami agali hearu bibahendeore mo talolaho helai helene.

<sup>13-14</sup> Ani bialu Gidiono ibu Herese Hariga wiagoria dai bialu hearia Sugada agali daliha mbira minuwa ibuhondo bi mbira hale hene. Hale hayagola agali biagome Sugada agali haru haga pira kariani karia (77) hearunaga mini Gidionoibunaga gili biaha layagola gili bini. <sup>15</sup> Ani biya handala Gidiono ibu Sugada agali biaru hearia pene. Puwa ibugua lalu, Tígua i mbaria mbiru biamogo nabule larimigoni manda bidamibe, lene. Tígua inaga ami agaliru hina garibi lalu halowa tongolo miyaruni irane agali kira Seba Salamunala namini degedago lowa hina tomo nelu mulene manga harimigoni. Ai o biagoni labo o kagodago handadaba, lene. <sup>16</sup> Ani lowa ibugua agubandu tibu aniheme dindi ko dalu naibaga wiagoha howa mo yalu ibuwa Sugada haru haga agali haguane hearu tandaga nelu dambini. <sup>17</sup> Ani bialu Penuele tano wai pabenda luni bima iri iri biaruni bo gialope halu agali ogoriani hearuni minalu homelo bo wahai hene.

<sup>18</sup> Ani buwa Gidionohanda Seba Salamunalahondo hale halu agua lene, Agali uyu Taboni homelo bogarimigoni ai imaruyabe, lene.

Ani layagola libugua ladai bialu lalu, Odaruni í handalehe hanguya. Bibahendeore kini agali mbirago igini mbaule hanguya, lene.

<sup>19</sup> Ani layagola Gidionohanda lalu, Uruni ti i hamene ini aiya iginiruore. Ina heneneore larogo tígua uruni nabe wa kamile nde ina libu homelo nabedole, lene. <sup>20</sup> Ani lowa Gidionohanda ibu igini wahene Yadehondo lalu, Ogoni labo bolenego ba, lene. Ani layagola igiri biagome wai biagane ayu tibu ne gadele yayago yamialu ba nabi hene. Ibu irane igiri emene heariane ba nabi handaya ho hene.

<sup>21</sup> Ani biaria Seba Salamunalame Gidionohondo lalu, Inime iya abale barene. Agali homane mbira hangumeibunaga biabe bulene mbira ibira haragola biaore biaga ndobe, lene. Ani layagola Gidionohanda o biagoni labo kirabali bo palu bialu libu nogo kamelenaga ma gagua wia hearu ibu golo yu pene.

<sup>22</sup> Aguani biagola mani Isaraealirume Gidionohondo lalu, Inabi inaga mamali mani hararumebi ina haru helo. Ina Midianialirume bo wahai kalego ai ina pele ngiaore birigoni, lene.

<sup>23</sup> Ani layagola Gidionohanda tihondo ladai bialu lalu, Ibi inaga iginiru mani holebirarumebi iname tí naharu holeberemago Anduane Homogo ibugua tí haru helo, lene.✧

<sup>24</sup> Ani lowa dege lalu, Bi mbiraore hangu tihondo hale haro, lene. Tí bibahendeoreme hale ira o golo yarimiruni ihondo mo ngiai hadaba, lene. Wali agali uruni Midianalirumebi dindi ko dalu naibaga wiagoha howa ibini biarumebi tini hale ira ngolome wabini do haga hene.

<sup>25</sup> Aguani hale hayagola wali agali tigua ladai bialu lalu, Iname turu halu ihondo ngiai holeberema, lene. Ani lowa tigua aga mbira dunga howa ogoriani tini hangu hangu howa hale ira mo yarimidagua tagu pebe bini. <sup>26</sup> Hale ira ngolome wabini biaru Gidiono

✧ 8:23: 1 Sml 8.7, 10.19, 12.12

ibugua minidagoni genda magi kilogarama pira kira (20) agima labehe mini. Ani bialu ibugua mbirale maru miniru daga nalego uruni mbirale damene wiaru mani wini ma gaguaru aga ngiringarale Midiananaga kinirume bini golo yayarubi dewaore mo yini. Ani bialu marubi nogo kamelenaga mani bobu mabu biaga wiaru heba mo yini. <sup>27</sup> Ani buwa Gidionohanda ngolo mo mogo biyagome mbirale mbira bi pupu wule wabuwa ibuninaga dindi Obara tanoni wabu helene. Ani biagola Isaraealeali biarume tinaga Ngode Datagaliwabe hado wahalu tigua gime wabini biagohondo bi pupu wule piaga hene. Ani biyagome Gidionobi ibunaga one waneiginirubi minulene gono bu hinini.

<sup>28</sup> Anigo Isaraealirume Midianali balu bo podaore biyagoni ai gi holene nawi hene. Dindi ogoriani mali pira maria (40) wai nabi ega bibilo wiane dege Gidiono homene.

### *Gidiono homenego ogo*

<sup>29</sup> Gidiono ibuni dalu andagani dai buwa hene. <sup>30</sup> Ibu wali dewaore dabu binigome igiri dewa pira karia (70) hono wini. <sup>31</sup> Ani bialu wali halu mende bereneru aria mbira Segeme dindini berenegomebi igiri mbira ibunaga hono winigo ogoni Gidiono ibugua mini Abimelege wini. <sup>32</sup> Yoasa igini Gidiono haho wiadege biane waheore homolene tuni homene. Homayagola ibu aba hora hayagoria dege hora hene. Egeanda Obara tano Abise hameigininaga dindi winigoria hora hene.

<sup>33</sup> Mani Gidiono ibu homeha Isaraele wali agali hayarume Ngode Datagaliwabehondo mini mbiraore wu hayago lone yu wahalu tigua Balaberidinaga andaha puwa gime wabini Balaruhondo bi pupu wialu hene. <sup>34</sup> Tigua Anduane Homogo tinaga Ngode Datagaliwabe ibugua tinaga waitigirume ho mabu bupe hearia pele mialu ti haru halu tagira piyagonaga biabeore nabuleberema, lalu tigua Balanaga biabeore bialu hole lalu lowini. <sup>35</sup> Ani bialu tigua Gidiono waneigini dameneruhondo Isaraele wali agalinaga ibugua baya hangu dewaore bima piyagonaga turuore halu kai gibi lo kama lalu walia habehegyu naheore hene.

## 9

### *Abimelege ibu agali haguane henego ogo*

<sup>1</sup> Gidiono igini Abimelege ibu Segeme tano ibu aija damene heagoria pene. <sup>2</sup> Puwa ibugua ibu aija damene hearuhondo lalu, Tigua Gidiono igini pira karia (70) bibahendeme haru helo hamelo kamibe be agali homane mbiraore hangume haru helo hame ledamibe lalu Segeme agali tihondo hale halimu, lene. Ani lowa Abimelege ibugua lalu, Tininaga darama gai bini ti hono wini mbira hayagoni ida manda bilimu, lene. <sup>3</sup> Ani layagola ibu aija damene biarume ibugua layadagua Segeme agaliruhondo lamule pu hene. Ogonidagua lamiyagola Segeme agali biarume Abimelege tini aria biagome layadago lowa ibugua laradagua bule manda bini. <sup>4</sup> Ani manda buwa tigua siliba muni pira karia (70) Balaberidinaga anda wiyagoha howa ilumogo buwa Abimelege mo mini. Ani biyagola muni ogonime ibugua agali ko anda anda biaga page bibi hearu yolo bialu ibu heba maibidaba lalu pene. <sup>5</sup> Abimelege ibugua ibu abanaga andaga Obarani pu howa Gidiono igini pira karia (70) ibuni hamene biaru tole hambene mbirani mo mogo bu helowa bo home lai helene. Ani biyagola dege Gidiono igini emene heyogone Yodama ibu hangu bira do heneyagome nabe yu wahaiya. <sup>6</sup> Ani buwa agali Segemela Bedemilolani hearu bibahendeore mo mogo bialu ira mbira bai ale hada bia heneyago Segemeni heagoria ogoriani Abimelege kini helo lalu helayiya.

<sup>7</sup> Yodamahanda ogoni biya layago hale howa ibu Hari Gerisimini iragaho howa tihondo gala amu halu lalu, Segeme agaliru-o ina bi mbira larogo hale hadaba. Hale haramiyagua Ngode Datagaliwabehanda tigua laramigo nde hale holene wulebira, lene. <sup>8</sup> Ani lowa lalu, Horo mbirungiore hayagola ira damenego bibahendeoreme tininaga kini mbira dabole lowa mo ngoai hene. Ani howa tigua ira olibe heagohondo



lalu, Í inanaga kini ha, lene. <sup>9</sup> Ani layagola ira olibeme ladai bialu lalu, Ina tí haru hole biruyagua inaga ibaneme damarubi agalirubinaga mini yaraga helo ibilaruligo naibiloloboda, lene. <sup>10</sup> Ani layagola ira biarume poge irahondo lalu, Ina inanaga kini hole íbu, lene. <sup>11</sup> Ani layagola poge irame ladai bialu lalu, Ina tí haru hole biruyagua inaga ibiri baya dendebe biaru nadoloboda, lene. <sup>12</sup> Ani dege laya handala ira biarume pu mbira lini daga mini gerebi heagohondo lalu, Ina inanaga kini hole íbu, lene. <sup>13</sup> Ani layagola pu mbira biagome ladai bialu lalu, Ina tí haru hole biruyagua waini iba damarubi agalirubi mo turu helo daga biruligo nadoloboda, lene. <sup>14</sup> Ani laya handala ira biaru bibahendeme irabu ani degehe wiagohondo lalu, Ina inanaga kini hole íbu, lene. <sup>15</sup> Ani layagola irabu ani degehe biagome ladai bialu lalu, Tígua ì tínaga kiniore holiya hamelo kamiyagua nde inaga andane gumbaha ubanda howa hole ibidaba, lene. Ani nabirimiyagua ira magane anihe karuha howa hungu kiaulo tagi halu ira tamia Lebanono dindini karuni dowaoire holebira, lene.

<sup>16</sup> Yodama ibugua laho wialu lalu, Áyu ogoninaga tígua Abimelege kini helo helarimigoni heneneore tiga tiga birimibe. Tígua Gidiono ibugua bima piyaru mitangiore buwa ibu one waneiginiruhondo baya hangu bialu harimibe, lene. <sup>17</sup> Ì abahanda tínaga wai bia halu ibuni homolene gi nahe Midianalime tí balu hearia ibugua tí mo wialu haru ibiyagoni, lene. <sup>18</sup> Ibugua ani bini wiagoria tígua áyu heyalu ì aba one waneiginiru bole harimida, lene. Tígua ibu igini agali pira karia (70) biaru tole hambene biagoria bo homelarimigoni. Ani birimigoni irane tígua Abimelege ibu ì abanaga biabe bia haga wali tíninaga damene biago iginiyane t́ni dabalu Segemenaga kini ibu helama lalu helarimigoni. <sup>19</sup> Ani birimigonigo áyu tígua Gidionobi ibu one waneiginirubi tihondo birimigo bayale tigabiore birimiyagua nde Abimelegehondo turu halimu. Ibugua nde t́hondo turu helo. <sup>20</sup> Ani tigabi nabirimiyagua ira hungu Abimelegeha howa kiaulo tagi halu Segeme Bedemilola agaliru do wahelo, lene. Ani bialu Segeme Bedemilo agaliruha howabi ira hungu kiaulo tagi halu Abimelege do wahelo, lene. <sup>21</sup> Ani lowa Yodama ibugua ibu hamene Abimelegehondo gi howa ibuni ibida puwa Bea dindini pu hene.

<sup>22</sup> Ani biagola Abimelege ibugua mali tebirani Isaraele wali agali haru hene.

<sup>23</sup> Mani howa Ngode Datagaliwabehanda Abimelege ibu Segeme tanoali hearu baba keba haga haga bilo mo keba ha halu hene. Ani biyagola Segemeali bu hearume Abimelegehondo mine gibiore haga bialu hene. <sup>24</sup> Anidagua biyadagoni irane Abimelege halu Segemeali uruni tigua Abimelege hamene pira karia (70) Gidiono mini mende Yarubala igini hearu bameore bo wahai helo mo hongo hayagonaga anidagua bini. <sup>25</sup> Ani bialu Segemeali maru hari nene wiagoria Abimelege bo wahole mamage hole pene. Ani pu howa agali uruni tigua wali agali hariga ogonidagua pu íbu biyaru minu balu tinaga dabudabu yalu piyaru mo page bini. Ani bialu ka layago hale howa agali maru hearume Abimelege lamini.

<sup>26</sup> Anigo Ebede igini Gala halu ibu hameneru ti Segeme dindi anda ibini. Ani ibiyagola Segemeali bu hearume agali uruni hondowa ti bia layadagua bialu hene. <sup>27</sup> Tigua tinaga pu mbira lini daga mini gerebi mabu winigoha pialu gerebi lini bogabi dearu dowo pingidalu mo waini iba howa tomo timbuni dawa nalu hene. Ani bialu tinaga mbirale bi pupu wulenaga gime wabinigo anda heagoha anda pu biruwa Abimelege mege bialu berene. <sup>28</sup> Ani bialu bereagola Gala ibugua lalu, Abimelege ibugua agi biagagonaga ina Segemeali ibu andaneha kamabe. Ibu ai iginibe. Ibu Gidiono igini howa ibunaga bi larago bamba howa bialu haga Sebulu hayagoni ndobe. Anigo ina Segeme aba Hamo hameigini bu karu andaneha holene nga. Ani bulene ngago wahowa Abimelege andaneha haabo kamago aginagadabe. <sup>29</sup> Agali o kamaruni bibahende ì andaneha hai hayagua nde ina Abimelege helatagi holebero. Ani buwa ina ibuhondo, Inaga ami agali bu karu haru halu ina baba wai bule tagira ibabe lolebero, lene.



<sup>30</sup> Ani leagola tano ogoninaga agali haguane mini Sebulu ibugua Ebede igini Galahanda bi layago hale howa keba timbuni hene. <sup>31</sup> Ibugua keba howa Abimelege hearia agali maru ohalu bi lo yalu pudaba lowa lalu, Bi o larogo baya hanguore hale habe. Ebede igini Galahanda ibu hameneru haru halu Segeme dindiha ibu howa ibugua agali bu hearunaga mini mo heya halu íla wai bule manda bialu ka. <sup>32</sup> Ani bidago ai ínaga agali hayadaru haru halu mbiraga ohalu puwa Segeme dindiha dangi timbuni kagoha ha do halimu. <sup>33</sup> Ani bialu gao laragola abale heyalu tanoha anda puwa wai bilimu. Gala halu ibunaga agalirume wai bule ibalu karia tigua abale minalu tihondo bua biradagua bilimu, lalu lawia hene.

<sup>34</sup> Ani layiyago hale howa Abimelegehanda ibunaga agali biaru haru halu puwa agali ma halu tale buwa Segeme tano pabe heagoha pu haga haga bini. <sup>35</sup> Gao layagola Gala ibunaga agali biaru heba tagira pialu tanonaga pabe heagoha pu hearia Abimelege halu ibunaga agali biaru ha do hayagoha howa tagira ibini. <sup>36</sup> Ani tagira ibalu hearia hondowa Gala ibugua Sebuluhondo lalu, Agali hari nenení dalipe halu amu ibirago de handa, lene. Ani layagola Sebuluhanda ladai bialu lalu, Ogoni agali ndo hari nenenaga munini hayago hondowa agali handarube toba harida, lene.

<sup>37</sup> Ani layagola Galahanda lone lalu, Ani ndo agaliore hari nene ngadagua daliape halu ibiragoni. Tidi mende agali halaga biagarunaga ira bai ale kagohayagi howa harigani ibiragoni, lene.

<sup>38</sup> Ani layagola Sebuluhanda Galahondo lamialu lalu, Abimelege ogoni ibu aidane ina ibu andaneha kamabe larigo ai áyu ínì hongohe harigoni o kegonibe. Agali ínà mege bialu harigoni amu ibiraruní ndobe. Ai uruni baba wai bule pu nabere, lene. <sup>39</sup> Ani layagola Galahanda Segemeali hearu haru halu ibuni bamba halu puwa Abimelegenaga agali biaru baba wai bule pene. <sup>40</sup> Ani pialu hearia Abimelege halu ibunaga agali biarume bama talima piyagola Gala halu ibunaga agali biaru ibida piai hene. Abimelege halu ibunaga agali biarume Gala aria biaru bo wahai hayagola tinaga tingini dewaore tanoha howa wima pialu tano pabe tagirayagi wima tagira pene. <sup>41</sup> Ani bialu Abimelege ibu dai buwa dindi Aruma tanoha hene. Ani heagola Sebuluhanda Gala halu ibu hameneru ti Segeme tanoha nahelo bo taliatagi hene.

<sup>42</sup> Horo mendengi Segeme wali agali hearume tano wahalu tini mabuha pugu pugu bini. Ani puwa agali marume Abimelegehondo bi lamini. <sup>43</sup> Ani lamiya handala Abimelegehanda ibunaga agali biaru halu tebo tale bialu dangi timbuni heagoha bira do howa agali ibilo yu berene. Ani biruwa Abimelege ibugua wali agali tanoha howa mabu pole tagira ibiyagola ibunaga agali biarume abale tagira puwa homelo bai hene. <sup>44</sup> Ani bialu Abimelege halu ibunaga agali biaru abale pialu tanoha ubaanda tagi biaga wiagoria mamage hole pu hene. Ani pu heagola ibunaga agali tidi ki biaru tigua wali agali mabuha tagira pu hayaru baba wai bialu bibahende bo wahai hene. <sup>45</sup> Abimelege halu agali maru tanoha anda puwa wai bialu heane dege alendo hene. Ibugua wali agali tanoha hearu bo wahai halu tano ogoni karulene. Ani bialu ibunaga agali biaruhondo bidaba layadagua tigua tanoha andabi wai pabebi bo gialahole bialu tano ogoni madane bialu ibi ale taulopaya bini.

<sup>46</sup> Wali agali maru Segeme tanoha ami agalinaga wai pabe hongohe heagoha ha do hene. Tigua wai bira layago hale halu ibida puwa dama mitangi bialu bi pupu wiaga gime wabini mini Balaberidi laga wiagonaga anda hongohe heagoha anda puwa bira do hai hene. <sup>47</sup> Ani heagola wali agali anda ogoniha ngoaiho ka layago Abimelege ibu hale hene. <sup>48</sup> Ani hale howa Abimelege halu ibunaga agali biaru haru halu Hari Salamono heagoha iraga halu pene. Puwa ayume ira magane gabuni hearu dandowa payani yini. Ani yu howa ibugua ibunaga agali biaruhondo lamialu lalu, Ina o berogo de hendedemibe. Tíguabi nde abale ani dege bidaba, lene. <sup>49</sup> Ani layagola tigua Abimelegehanda biyadagua ira magane bo yaga yaga bialu puwa anda biago tagirani

wu mabu bini. Ani buwa tigua anda biago heda hayagola wali agali daosini mbira (1,000) ale Segeme tanoha anda hongohe ogoni heba dai helayagola homai hene.

<sup>50</sup> Ani bialu mani Abimelege halu ibunaga agali biaru tigua wai bule Tebese tano ho hagira bialu anda puwa karulene. <sup>51</sup> Anigo mamageali ti wa handa amu nana bu haga anda bu gimbu bima iraga hene hongohe mbira tano ogoniha hanuni hene. Ogoni heagoha wali agali bibahende ubaanda anda bialu bira do hai hene. Ti anda ogoniha ibida anda piaai howa panga payai halu tini daliga biagoha iragaho birai hene. <sup>52</sup> Ani biyagola Abimelege ibuwa tanonaga anda hongohe ogoni karulole wai bialu hene. Ibugua anda biago heda hole lowa hapara hene. <sup>53</sup> Ani bialu hearia wali mbirame anda daliga biagoha howa ege tole mbalape mbira balawa wabule widi dambiaga timbuni wiago bape halu Abimelegenaga embone taulene. <sup>54</sup> Ani bayagola Abimelegehandu igiri mbira ibuninaga wai biagane ya haga heago olalu abale ibiyagola ibuhondo lalū, Inaga wai biaga ayu tibu yidegonime i homoliya gubaliniha nogoba ha. Marume lalū, Wali mbirame i baya lelo hame naledogo abale ba, lene. Ani laya handala igiri biagome Abimelege nogoba hayagola ibu tongolo mini. <sup>55</sup> Isaraeleali biarume Abimelege homayago handalu tini dindiha dai bigibigi bini.

<sup>56</sup> Ani binidaruni Anduane Homogo ibunime Abimelege ibu abahondo ko bialu ibuni hamene pira karia (70) irane nawini bo wahayagonaga pani nelu mialu ibuni homelo bo wahene. <sup>57</sup> Anduane Homogo ibugua Segeme agalime ko dewa biyagonagabi pani mialu ani bini. Bamba Gidiono igini Yodamahanda Segeme tano ha halu mo ko holebira layadagua ogoni heneneore lola hene.

## 10

### *Agali haguane mbira mini Tola henego ogo*

<sup>1</sup> Abimelege homayagola Isaga hameigini aria mbira mini Tola ibu Pua igini howa Dodo aguane hene. Tola ibugua Isaraeleali bu hearu ti waitiginaga giha hearia biamogo bule ibini. Ibu Eberaimi hameigini daluha hari barebare wiagoha Samia tano wiagoria haga hene. <sup>2</sup> Tola ibugua mali pira kirani tebira (23) agali haguane howa Isaraele wali agali haru hene. Ani howa homayagola tigua ibunaga tingini Samia tanoha hora hene.

### *Yairi ibu agali haguane henego ogo*

<sup>3</sup> Tola homayagola mani Gileadali Yairi ibu agali haguane ha aribia hene. Ibugua mali pira kirani kira (22) agali haguane howa Isaraele wali agali haru hene. <sup>4</sup> Ibu igini pira tebira (30) henego tigua nogo dongi pira tebirani (30) taho bialu harigani pu ibu bialu haga hene. Gileada dindiha tinaga tano dege pira tebira (30) wini. Tano uruni mini Yairi dindi laga winigo ayubi ani dege laga nga. <sup>5</sup> Mani Yairi homayagola ibunaga tingini tigua Kamono tanoha hora hene.

### *Amonoali hearume Isaraele wali agali mo genda halu henego ogo*

<sup>6</sup> Isaraele wali agali tigua Anduane Homogonaga deni howa mana ko lone bialu hene. Tigua mana ko bialu mbirale dama mitangi bialu gime wabini mini Balaru dama wali beda mitangi bialu gime wabini mini Asedareru uruni Siria wali agalinaga damabi Saidono wali agalinagabi Moaba wali agalinagabi Amono wali agalinagabi Pilidia wali agalirunagabi uruni tinaga bi pupu wiaga wiaruhondo bi pupu wialu dege hene. Isaraele wali agali tigua mbirale urunihondo bi pupu wialu Anduane Homogohondo mitangi bialu lotu nale yu wahene. <sup>7</sup> Ani bialu hemigo hondowa Anduane Homogo ibugua keba timbuni howa Pilidialiru Amonoalirume Isaraele baba wai bule ibilayagola tigua Isaraele bope halu ti wayali hene. <sup>8</sup> Wai biyadagoningi tigua Isaraele wali agali mo ko halu bope hene. Pilidiali Amonoaliru tigua Isaraele wali agali mali pira mbirani halira (18) anidagua dege biaabo halu hene. Tigua Isaraele wali agali

Iba Yodana doma edeyagi Amoroalinaga dindi Gileadaha bu hearu mo genda haabo halu hene. <sup>9</sup> Ani bialu howa Amonoali uruni tigua Iba Yodana domalu ibuwa Yuda hameiginiru Beniyamini hameiginiru Eberaimi hameiginiru ti bababi wai bule ibini. Anidagua bialu heagola Isaraele wali agali ti mo ko hayagola ti genda timbuniore ho hene.

<sup>10</sup> Ani bialu heagola Isaraele wali agalime ti pele ngi lalú Anduane Homogo olalu hene. Tigua lalú, Iname íhondo ko timbuniore bialu harima. Inanaga Ngode Datagaliwabe íniore erembira ngialu puwa mbirale gime wabini mini Bala wiaruhondo bi pupu wialu harimago mana ko timbuniore bialu harimada, lene.\*

<sup>11</sup> Ani layagola Anduane Homogohanda Isaraele wali agaliruhondo ladai bialu lalú, Bamba Iyibialirumebi Amoroalirumebi Amonoalirumebi Pilidialirumebi <sup>12</sup> Saidonoalirumebi Amalegealirumebi Maonoalirumebi tí bope howa mo ko timbuniore halu hayagoni. Ani bialu heagola tigua biamogo bia lalú i olarimigola ina hale halu uruninaga giha hemiria tí haru daibirugoni ndobe. <sup>13</sup> Ani birugoyu tigua i yu wahalu puwa mbirale dama mitangi bialu gime wabini wiaruhondo bi pupu wialu harimi. Anidagua birimigodago ai áyu ina tí lone biamogo nabulebero.\* <sup>14</sup> Tí genda yu kamingi biamogo bilonaga tínime dabowa bi pupu wialu haga harimigome ti biamogo bulebirago pudaba, lene.

<sup>15</sup> Ani layago lelowa dege Isaraele wali agali tigua lone Anduane Homogohondo lamialu lalú, Iname mana koore birimago ai ina inahondo bule hamelo kego biai habe. Anigo áyu hanguore ina biamogo bibelo hameledema, lene. <sup>16</sup> Ani lowa Isaraele wali agali tigua bi pupu wiagane wiaru wahai halu Anduane Homogo lone mitangi bialu lotu lalú hene. Ani lalú heagola Anduane Homogo ibugua nde tinaga genda yu haabo heago hondowa ti nakarulape ka lo mitangi bialu tihondo dara timbuniore ho hene.

<sup>17</sup> Ani bu hemigola Amonoali ami hearu mani wai bule manda manda bialu mo mogo buwa Gileada dindi wiagoria balai anda bu hene. Ani biyagola Isaraeleali ami hearu tibi nde mo mogo buwa Gileada dindiha Misiba tano wiagoria balai anda bu hene. <sup>18</sup> Balai anda bu heagola Isaraeleali bu hearubi Isaraele hameigini agali haguane hene bu hearubi ti bibahende tini degedege lagalaga bialu lalú, Ina Amonoaliru baba wai bule aiwa haru bamba halu holobadabe. Agali mbira ina haru halu wai bule bamba harago ibu Gileada dindi bibahendenaga agali haguane helo helamiya, lene.

## 11

### *Yabeda ibu agali haguane henego ogo*

<sup>1</sup> Dindi Gileada wiagoha agali mbira mini Yabeda henego ibu wai biaga agali hongohe hene. Agali ogoni ibu aya bayanda wali berenego ibu aba mini Gileada hene. <sup>2</sup> Ani bialu Gileada one berenegome igiri maru taba henene. Igiri uruni ti anda hai howa tigua Yabeda bo taliatagi halu howa lalú, í ina abanaga paluni ngaru aria mbira nayuleberegó í wali mende igini kego pu, lene. <sup>3</sup> Ani laya handala Yabeda ibugua ibu hamene hearu helo wahalu tagira ibida pialu Tobo dindi wiagoha pene. Ogoniha pu howa ibugua agali ko bu hearunaga bu mini bamigi bialu heagola tigua ibu talima ibaga bini.

<sup>4</sup> Mani howa Amonoali hearume Isaraeleali baba wai bule pene. <sup>5</sup> Wai bu pole howa Gileada agali haguane hearume Tobo dindiha Yabeda hearia damu pene. <sup>6</sup> Tigua puwa ibuhondo lamialu lalú, Iname Amonoaliru baba wai bu maliya ina ina haru bamba hole íbu, lene.

<sup>7</sup> Ani layagola Yabeda ibugua agali haguane biaruhondo lamialu lalú, Tigua i handabe manga halu i aba andagaha howa bo taliatagi harimigodago ai tíha genda anda ibiyagola i hondo ibirimidagoni aginagabe, lene.

\* 10:10: 1 Sml 12.10    \* 10:13: Man 32.15, Yar 2.13

<sup>8</sup> Ani layagola Gileada agali haguane biarume ibuhondo lalu, Bi otoni tiga tigaore larigo áyu iname í ina Amonoaliru baba wai bu maliya hondo ibirima. Í Gileada wali agalinaga agali haguane howa haru habelo lowa hale hole í keria ibirima, lene.

<sup>9</sup> Tigua anidagua layagola Yabeda ibugua Gileadanaga agali haguane biaruhondo lalu, Tígua í haru dai beremigola ina tí haru howa Amonoaliru baba wai berogola Anduane Homogohanda í biamogo bialu ina wayali harimayagua nde ina Gileada wali agali tínaga agali haguane holiya, lene.

<sup>10</sup> Ani layagola agali haguane biarume lalu, Anduane Homogonaga deni howa iname heneneore laramago ina bia lalu inahondo langerego bibahende biai holeberema, lene.

<sup>11</sup> Ani laya handala Yabeda ibu agali haguane biaru heba pialu Gileada agaliru bu hearia piyagola tigua Yabeda ibu tinaga agali haguane helo dabo helene. Ani dabo helayagola Misiba dindi ogoriani hearia Yabeda ibu Anduane Homogonaga deni howa ibugua agali biaruhondo hongo howa lalu, Í tínaga haguane haruyagua ina bia larogo hale halu buleberemi laro, lene.

<sup>12</sup> Mani howa Yabeda ibugua agali maru Amononaga kini hearia bi mbira lo yalu pudaba layagola tigua puwa kinihondo hale halu lalu, Inahondo irane aginaga ina keba howa ina baba wai bule kebe, lene.

<sup>13</sup> Ani layagola hale howa Amononaga kini biagome Yabedanaga bi yalu ibiyaruhondo ladai bialu lalu, Bamba Isaraele ti Iyibi dindiha howa tagira pialu ibuwa tigua inanaga dindi Iba Anono poragoria howa karulama pialu amuraore Iba Yabogo poragoria puabo halu Iba Yodana poragoria tagira piya. Anidagua biyagonaga keba ho kogo ai tígua inanaga dindi uruni ngiadai biyagua nde karulape. Ngiadai naberemiyagua nde wai bimíya, lene.

<sup>14</sup> Anidagua layiyago hale howa Yabeda ibugua agali maru Amononaga kini biago hearia lone, Bi yalu pudaba, lene. <sup>15</sup> Ani laya handala tigua pialu kininaga bi layago lamialu lalu, Yabeda ibugua bi ogodagua laya lalu, Isaraele wali agali uruni tigua Moaba wali agalinaga dindibi Amono wali agalinaga dindibi mbira ina karu naleore kama. <sup>16</sup> Isaraele ti Iyibi dindi howa tagira ibiyangi ti hariga dindi ko iba dalu naibaga wiadagua pialu iba mini Solowara Daramabi laga bereagoria tagira ibalu mani Kadese tano wiagoria anda íbu hene. <sup>17</sup> Ani íbu howa Isaraelealime agali maru Idomonaga kini heagohondo bi hale hole pudaba lowa lalu, Ina hariga ínaga dindiha bolangua halu polene henge nguleberebe be nanguleberebe, hale hene. Ani hale hayagola Idomonaga kini heagome, Nangulebero, layagola Isaraelealiru tigua Moabanaga kini heago hale hole pene. Ani hale hayagola ibuguabi nde, Nangule, dege lene. Ani layagola ai Isaraele wali agali ti Kadeseha haabo hene.✧

<sup>18</sup> Ani bialu mani ti dindi ko iba dalu naibaga wiagoha pialu howa Idomo dindi yu wahalu pialu Moaba dindibi bolangua halu pu dege bini. Pialu Moaba dindinaga abene ni tagira ibiragoha Iba Anono pedagohayagi bolangua halu pene. Tigua ogoriani pu howa Iba Anono doma ede halu polenego Moabala tubariyagola ti iba doma ede nahe ogoriani balai anda bu hene.✧

<sup>19</sup> Ani bu howa Amoroalinaga Kini Sihono ibu Hesebono dindiha haru haga hearia Isaraeleali marume ibu hale hole pudaba, lene. Puwa ibuhondo hale halu lalu, Íni í dalu o ngagoha pu bolangua halu inane dalu pole polomaya karulapebe, lalu hale hene.✧

<sup>20</sup> Ani hale hayagola kini ibugua Isaraeleali ibunaga dindini bolangua halu pelo manga hene. Ani manga howa ibugua ibunaga ami agali bu hearu haru puwa Isaraeleali baba wai bule lowa Yahasa tano wiagoria puwa wai bialu hene. <sup>21</sup> Ani bialu heagola Anduane Homogohanda Isaraele wali agali biamogo biyagola tigua Kini Sihonobi ibunaga ami agali hearubi bibahende bope hai hene. Ani buwa tigua Amoroalirunaga dindi otoniha wiaru karulai hene.

<sup>22</sup> Tigua Amoro wali agalinaga dindi bibahendeore unurayagi Iba Anono pedagoria howa karulama pialu uyurayagi Iba Yabogo pedagogiabi karula dege bini. Ani bialu ogoriani howa ni tagira ibiragohayagi dindi ko iba dalu naibaga wiagoria howa pialu Iba Yodananaga abene ni paliragohayagi wiarubi karulaga bima puabo hene. <sup>23</sup> Ani binigo dindi uruni Anduane Homogo Isaraele wali agalirunaga Ngode Datagaliwabe ibunime Amoroali bo taliatagi howa dindi ogoni Isaraele ibuninaga wali agali mo mini. <sup>24</sup> Ani mo minigo áyu ína dindi ogoni mo yu dai buleberebe. Í mbirale bibahende íni bi pupu wiaga mini Kemoso ibugua ngiraru yu holebere. Ina nde Anduane Homogo inanaga Ngode Datagaliwabe ibunime inanenaga wilimu lalu ngini ngagoore yu holeberema.

<sup>25</sup> Anigo ína manda bu handalu keria í hongo timbuniore howa Moabali Siboro igini Kini Balaga henegonaga hongo bolanguahe kebe. Ibugua inahondo ibunaga dindi maru ngiadaid bidaba lalu bi mbira nale wahenego agua. Ina baba waibi nabi wahene. ✧ <sup>26</sup> Ani biyagola Isaraele wali agali tigua Hesebono tanohabi Aroe tanohabi tano uruniha dindi emene maru wia para para bini ngarubi Iba Anono angeha tano wuyu pedaruhabi Isaraele wali agali ti mali handari tebirani (300) haru haabo hene ngago. Ai água biyagola dindi uruni abale ogoningi í mo yu dai nabi henebe. <sup>27</sup> Ina íhondo mana ko mbira biaede nahe ína dege íhondo mana ko bialu í hewagoha wai biaede hole kegoni. Ani kego ainde Anduane Homogo ibugua mana bayale bialu kagobi mana ko bialu kagobi lalu mo tale biaga ka. Ai ibugua ína bialu kegoni ína bialu kogobi mo tale bilo laro, Yabedahanda layago lalu lamini. <sup>28</sup> Ani layago lelowa Amononaga kini heagome Yabedahanda bi lawia hayago hale howa donge hene.

<sup>29</sup> Ani biya handala Anduane Homogonaga Dinini Yabedaha mo karula hayagola ibugua ami agaliru haru halu Gileada dindibi Manase dindibi Gileada dindiha Misiba tano wiagoria bolangua halu pene. Ani bialu Misiba yu wahalu puabo halu Amono dindihayagi anda pene. <sup>30</sup> Ani puwa Yabeda ibugua buleore lalu bi mbira Anduane Homogohondo lo wialu lalu, ína í biamogo bialu Amonoali bope halu wayali haruyagua nde <sup>31</sup> ína wai bialu dai buwa mbirale í andagaha howa pigane tagira ibirago Anduane Homogo íninaga loma bialu irame dai helo bo delolebero, lene.

<sup>32</sup> Ani lowa Yabeda halu ibunaga ami agali biaru tigua iba domaede halu wai bule Amonoali dindihayagi ubaede halu pene. Puwa Anduane Homogohanda Yabeda biamogo biyagola tigua wai bialu wayali hene. <sup>33</sup> Tigua wai bialu howa Amonoali dewaore bo wahai hene. Tigua Aroe tano howa bama pialu wali agali tano pira kira (20) palearu bibahende bo wahai halu Minidi tano wiagoria pialu iba Abele Keramimi peagoria tagira pene. Yabeda halu ibunaga ami agali biarume Amono agali dewaore bo wahaiore hene.

### *Yabedahanda buleore lalu bi lowinigo biai henego ogo*

<sup>34</sup> Yabeda ibu Misiba tano dai bialu hearia ibu andagaha howa ibu wane abale gerai lalu ibu aba lola hole ibini. Ibugua turu howa irabitele kelengele lalu iba gana lama ibini. Yabeda ibu waneigini maru nahe ibu wane mbira ogoni hanguore berene. <sup>35</sup> Yabeda ibu wane mbiraore biago ibiyago hondowa ibu mogo timbuni lowa ibunaga aga bu heago mini lerelowa lalu, Wane-o ínaga gubaliniore mo ko haruagonidago daraba. Irane aginaga ínaga gubalini mo ko holeore í ibiribe. Ina buleore lalu Anduane Homogohondo bi lo wirugo mo habo nalabehe kogoni, lene. ✧

<sup>36</sup> Ani layagola ibu wane biagome lalu, Aba-o ína Anduane Homogohondo mbira bule lalu lo winiyagua nde ibugua í biamogo biyagola ína Amonoali waitigi biaru bo wahai halu wayali harigodago. Ainde ínime bi lo wiridadagua ani bibe. <sup>37</sup> Anigo ína mbira hangu ala buliya ína henge emene mbira ngibelo hameledo. Inaga nenege bedaru baba



hari barebare ngaruha ibaga bialu i agali nape biralu homole berogonaga dara howa duguru bialu ege kira biruliya henge ngi, lene.

<sup>38</sup> Ani hale hayagola ibu abahanda nde karulapego ani bule pu, lene. Ani lalu Yabedahanda ibu wane ege kirani ibagabu berelo henge mini. Ani berelo waheagola wandari biago ibu nde ibunaga nenege berearu haru howa ibu agali nape bedaore homolobadagonaga dara howa tigua dugu bialu tini dara haga haga bialu ege kira berene. <sup>39</sup> Ege kira ani berenego andaga ibu aba hearia dai biyagola ibu abahanda bule lalu Anduane Homogohondo bi lo wiyadagua bini. Wandari ogoni ibu agali nape wandari biraabo howa homene.

Anidagua binigonaga Isaraele tinaga mana mbira ogodagua wini. <sup>40</sup> Isaraele wandari mabuage berearume ti andaga wahalu hari barebare wiaruha pu biruwa Gileadali Yabeda wanenaga dara howa dugu bialu biraga wini. Tigua mali bibahendengi horo mariani ani biaga wini.

## 12

### *Eberaimi hameigini hearume Gileada hameigini hearu baba wai binigo ogo*

<sup>1</sup> Eberaimi hameigini hearume ibu ngoai howa mbirale wai biagaru mo yalu wai bu pole tidi yalu Iba Yodana doma ede halu puwa Sabono tano wiagoria anda pene. Puwa tigua Yabedahondo lalu, Tigua iba domalu Amonoaliru baba wai bu pole ina ma lalu langia nabi pirimiyago irane aginaga birimibe. Ai hale habe. Ayu iname inibi inaga andabi heba bo heda holeberema, lene.

<sup>2</sup> Ani layagola Yabedahanda ladai bialu lalu, Inibi inaga wali agalibi ina bibahendeme Amono wali agali baba keba timbuniore harima. Ani howa ina tigua ina biamogo bialu wai bule maliya ibalimu lalu lawia harugo ti naibirimiya. <sup>3</sup> Ani buwa ina handalu hewaria tigua ina biamogo bule naibirimiya handala wahalu Amonoalirume i bo wahayagua nde ani bo wahelo. Ini wai bule harugo lowa polene manda biru. Ani bialu iba doma ede halu wai bule piru. Ani pirugola Anduane Homogo ibunime i biamogo biyagola ina Amonoaliru bo wahai halu wayali harugoni. Ayu irane aginaga tigua i baba wai bule hamelo kamibe, lene.

<sup>4</sup> Ani lowa Yabeda ibugua Gileada agali bibahende hearu mo ngoai howa Eberaimiali biaru baba wai bialu Yabeda halu hayadaru tigua Eberaimi hameigini hearu bope halu wayali hene. Ani binidagoni irane Eberaimi hameigini tigua ala lalu, Gileadali ti Eberaimi hameigini Manase hameiginila hengeneha howa tigua ina yu wahalu ibida pi-aga kami, layagome ani bini. <sup>5</sup> Eberaimiali uruni ti pora bialu tini dalu pole Iba Yodana domalu ibida polilono Gileadalirume iba domaga wiagoria harigani yu hai hene. Ani hearia Eberaimiali mbira wai hamani howa ibida pora bialu puwa iba domaga wiagoria ibuwa lalu, I iba domaro, lalu hale hayagua nde Gileadali biarume ibuhondo lalu, I Eberaimialibe taralibe, lalu hale haga biyagola ibugua lalu, I Eberaimiali ndo, layagua Gileadalirume ibuhondo lalu, <sup>6</sup> Ina mini Sihibolede lahanda bia, lalu laga laga bini. Ani layagola o biagome Sibolede layagua agali ogoni ibu la ko hayagome ibu Eberaimialida lo manda bialu tigua minu yania howa balu homelaga bini.\*

Gileadali tigua ani laga bialu howa iba doma edene biaga wiagoria Eberaimiali daosini dege pira mariani kira (42,000) bibahende bo wahai hene.

<sup>7</sup> Anigo Yabeda ibu agali haguane howa Isaraele wali agaliru mali waragaria haru halu homene. Homayagola tigua ibunaga tingini Gileada dindiha hora hene.

### *Ibisana ibu agali haguane henego ogo*

\* **12:6:** Hiburu bi lalu Sihibolede Sibolede ogonibi lalu ogoni kirabali mini mbiraorenaga dege nga. Huli bi lalu mini ogoni iba li. Anigo Gileadali tigua Sihibolede laganego Eberaimialime Sibolede laga hene. Ainde Gileadali tigua lagadagua Sihibolede nalayagua, Ti Eberaimialida, lalu minalu bo wahaga bini.

<sup>8</sup> Yabeda homayagola Bedeleheme tanoali Ibisana ibu agali haguane ha aribia howa Isaraele wali agali haru halu hene. <sup>9</sup> Agali ogoni ibu igini pira tebira (30) halu ibu wanebi nde pira tebira (30) dege berene. Ani berenego ai wandari uruni agali hameigini maru hearume dabu bilo migi bini. Ani bialu ibu igini pira tebira biarume dindi tara wali berearu dabu bu haga bini. Ibisana ibu mali kariani Isaraele dindiha agali haguane howa ibugua Isaraeleali hearu haru haga hene. <sup>10</sup> Ani halu homayagola tigua ibunaga tingini Bedelehemeha hora hene.

*Elono ibu agali haguane ha aribia henego ogo*

<sup>11</sup> Anigo nde Ibisana homayagola Sebulunuali mini Elono ibugua Isaraele wali agalinaga haguane ha aribia howa ibugua ti mali pirani haru halu hene. <sup>12</sup> Ibu homayagola tigua ibunaga tingini Sebulunu dindini Ayalono tanoha hora hene.

*Abadono ibu agali haguane henego ogo*

<sup>13</sup> Elono homayagola Piradono tanoali Hilele igini Abadono ibu agali haguane ha aribia howa ibugua Isaraele wali agali haru halu hene. <sup>14</sup> Ibu igini pira maria (40) halu ibu aguaneru pira tebira (30) bibahende hene. Ani howa tigua Abadononaga nogo dongi pira karia (70) hearuni bialu pu ibu bialu haga hene. Abadono ibu mali halira Isaraele wali agalinaga haguane howa ibugua ti haru haga hene. <sup>15</sup> Ani howa ibu homayagola tigua ibunaga tingini Eberaimi dindini Piradono wiagoha hora hene. Dindi ogoni hari barebare Amalege dindihayagi winigo ogoniha hora hene.

## 13

*Samasono ibu agali haguane henego ogo*

<sup>1</sup> Isaraeleali biarume lone Anduane Homogohondo mana ko ngubiore biyagola ibugua ti Pilidia agali haru haga hearume mali pira mariani (40) haru helo helene.

<sup>2</sup> Ogoningi agali mbira mini Manoa ibu Sora tano mbira winigoria hene. Ibu hameigini mbira Dana henego aria hene. Ibu oneme waneigini mbira nahonowi biraabo bu berene. <sup>3</sup> Ani biaria Anduane Homogonaga dahuliyali mbira ibu berearia ibu hapani howa lalu, í waneigini hono wibe naheyagola berenedago áyu ogoni mbira tombeha bialu igiri mbira holebira, lene. <sup>4</sup> Ani bulebirago bayuwa hondo halu ogoni waini ibabi tomo maru nanabe lene ngarubi nane birabe, lene. <sup>5</sup> Ani bialu mani í igini ogoni taba honowa ina ibunaga mandariore napodolebere, lene. Ogoni irane horo ibu taba hanarangi howa ibu Nasa aria Ngode Datagaliwabe lomabia halu ibunaga biabe bia haga mbira ilili bu holebira, lene. Ibugua tehinalu Isaraele wali agaliru Pilidialirunaga giha howa gini mialu haru tagira pole manda bulebira, lene.\*

<sup>6</sup> Ani laya handala wali biagome ibu agalini hearia puwa lalu, Ngode Datagaliwabenaga agali mbira í berewaria ibiyago ibu dengui gibi hondowa gi haru. Ngode Datagaliwabenaga dahuliyali handaleheya. Ina ibu ani howa ibiribe nale. Ibuguabi ibunaga mini í nalangi, lene. <sup>7</sup> Anigo ibugua í gali tombeha bialu igiri mbira holebira lalu langiya, lene. Ibugua ina waini ibabi iba mbiabi tomo maru nanolene lo ngarubi nanabe lalu langiya, lene. Ogoni irane igiri ibu Nasa aria Ngode Datagaliwabenaga biabe biaga mbira ilili bu haho wiaabo helo lalu lomabia holene wulebira laya, lene.

<sup>8</sup> Ani layagola Manoahanda Anduane Homogohondo hale halu bi lamialu howa lalu, Anduane Homogo-o ina Ngode Datagaliwabenaga agali o ibilariyagoni lone iya kabaria daibilabe, lene. Igiri ogoni taba hanaragola iyame ibuhondo bulenego ogo ale lalu ibugua langilo, lene.

<sup>9</sup> Manoahanda aguani hale hayagola Ngode Datagaliwabehanda hale halu ibunaga dahuliyali biago wali biago mabuni berearia lone ibu daibilene. <sup>10</sup> Ani biyagola wali biago ibu agalini heba ndo ibuni hangu bereariyago abale heyalu gerai ibu agalini

\* 13:5: Dag 6.1-5, 1 Sml 1.11

hondo pene. Ani puwa ibuhondo lalu. Hale ha. Agali mbira *i* berewaria abale mbiru ibiya larugoni áyu lone *i* hewaria íbu hapani ho kago hondo mbaíbu, lene.

<sup>11</sup> Ani layagola Manoa heyalu ibu one piyadagua mama talima pene. Puwa ibugua agali biagohondo hale halu lalu, *Í* agali mbaria mbiru *i* one bi lamialu hariyagoni kebe, lene.

Ani layagola ibugua, *E* *i* kogoni, lene.

<sup>12</sup> Manoahanda hale halu lalu, Aniyagua *ina* bi lariru henene lola harangi igiri ogoni ibugua agi bulene ngabe. Ani bialu ibugua mana agi alego bialu holene ngabe, lene.

<sup>13</sup> Ani layagola Anduane Homogonaga dahuliyali biagome ladai bialu lalu, *Í* one ibugua bulene damene bibahende ibuhondo lamiai harugo ibugua manda biai holebira, lene. <sup>14</sup> *Í* one ibu pu mbira lini daga mini gerebi mbirale mbira gerebi lini urunime wabinibi nanoleorebira, lene. Ani bialu waini ibabi iba mbiabi tomo maru nanolene lo ngarubi mbira nolene nawiore, lene. Ibugua bilo lalu lamirugo bibahendeore biai holene nga, lene.

<sup>15-16</sup> Manoa ibu ogoni Anduane Homogonaga dahuliyalida manda nabi howa ibugua ibuhondo lalu, *Iyame* nogo meme igini hungubalua o karu mbira bo dawa manda manda berabago *ina* pu nabi hondohaore bibe, lene.

Ani layagola dahuliyali biagome lalu, *Ina* hadai bu haruyagua libunaga tomo ogoni *i* nanolebero, lene. Anigo manda manda bule hamelo kabiyagua nde Anduane Homogohondo bo loma bialu delo milibu, lene.

<sup>17</sup> Ani layagola Manoahanda ladai bialu lalu, *Ínaga* mini iyahondo langi. Ani beregola *ina* bi lariru henene tagira porangi iyame *Í* heneneore laga ka lalu mini yaraga holobaya, lene.

<sup>18</sup> Dahuliyali biagome hale howa lalu, Libugua *inaga* mini agi bulenaga manda bulubaya langi larabibe. *I* mini baya buruguleorego, lene.\*

<sup>19</sup> Ani layagola Manoahanda nogo meme igini hungubalua biago minuwa widi linila haru yalu puwa ege *tole* dagia wiagoria Anduane Homogo baya burugule biaga kagohondo bo lomabu delene. <sup>20-21</sup> Ira hungu dabu biagoria biadaga halu wiagola Manoa ibu onela libugua Anduane Homogonaga dahuliyali biago ira hungu hegeneni dahuliya andaga iraga halu pole piyaria de hendene. Ai Manoa ibugua manda bu handalu hearia agali biagoni Anduane Homogonaga dahuliyaliore ibu henedago lo manda bini. Ani manda buwa ibu one libu haru dindini bulu palu ibira haribi. Ani buwa handalu hebira dahuliyali biago lone libu de hendelo hapani nahene.

<sup>22</sup> Ani biyagola Monoahanda ibu onehondo lalu, Ai iyame irane Ngode Datagaliwabe de handaribagome iya homaore bibiyada, lene.

<sup>23</sup> Ani layagola ibu one biagome ladai bialu lalu, Anduane Homogo ibugua iya homolobaya bole hamelo henedale nde ibugua iyanaga mbirale delo miribaru nadedale. Ani bialu ibuni iyahondo walia halu ho pana hayagobi mbirale maru ogodagua bulebira lalu áyu langiyarubi nadedale, lene.

<sup>24</sup> Mani wali biagome igiri mbira hono wialu ibu mini Samasono wini. Igiri emene biago anda halu Anduane Homogohanda biamogo bini. <sup>25</sup> Ani biyagola Anduane Homogonaga hongo holeneme ibu Sora Esedalola dindi hengeneni Dana hameigini balai anda bu heagoria hearia mo hongo hene.

## 14

### *Samasono ibu Timuna wali dabu binigo ogo*

<sup>1</sup> Horo mbirungi Samasono ibu Timuna dindi yupe halu hearia Pilidia wandari mbira de hondo wini. <sup>2</sup> De hondo wialu ibu aija abala lamule andaga dai bini. Dai buwa

\* 13:18: Pig 32.29

ibu aiyá abalahondo lalu, Pilidia wandari mbira Timuna dindini berearia hondo wialu ebero, lene. Ogoni dabu bulene hamelo kogo damu pu hadaba, lene.

<sup>3</sup> Ani layagola ibu aba aiyalame ibuhondo mbira hale halu lalu, Ína Pilidialiru Ngode Datagaliwabe mitangi nabiaga hearunaga wali damialu í one hole hame laridago irane agibe. Ína wandari inane wali agali hameigini kamagoria bedaru aria handalu nadamibehedabe, lene.

Ani layagola Samasonohanda ibu abahondo ladai bialu lalu, Ína ñnaga wali damia habelo hame ledogo ogonirego ogoni damia habe, lene.

<sup>4</sup> Ogonidagua layadagoni Anduane Homogo ibugua Samasonohanda Pilidiali heba wai bilo haru pole henge tai binigonaga Samasono aba aiyalame manda nabi hene. Ogoningi Isaraele wali agali Pilidialirume haru hene.

<sup>5</sup> Ani binigo Samasono ibu aiyá abala heba Timuna dindi dalipe halu pene. Ogoniha pole pialu hemiria pu mbira mini gerebinaga lini dendebe daga mabu wiagoria budi gabua ale timbuni mini laiono daula mbira ngororo layuago ibu hale hene. <sup>6</sup> Abale hale hayaore Anduane Homogonaga hongo holeneme Samasono mo hongo hene. Ani biagola ibugua laiono biagoni ibunaga gi hangume nogo meme daula mbirago minu dogokihe laradagua bilene. Ani binigo ogoni ogodagua biru lalu ibugua biyagoni ibu aiyá abala nalamini.

<sup>7</sup> Ani bialu ibu puwa wandari biago hame lowa mo bila hene. <sup>8</sup> Horo kira agima howa mani Samasono ibu lone dai buwa wandari biago dabu bule pene. Ani bule harigani pialu howa Samasono ibu hariga tene yu wahalu pu bagi howa laiono abale bo wialu piyago hondo pene. Puwa handalu hearia laiono biagoniha mone tara gibi tidiyu halu mone ibane dewaore laiono homene biago kabaneha dearia mogolo hendene. <sup>9</sup> Hondowa ibunaga gime mone ibane biago kedo mialu nama nama pene. Ani bialu ibu aba aiyála hearia pialu libubi maru kedo yalu puwa nelu mini. Ani biyagola libugua nenego Samasonohanda mone tara ibane ogoni laiono homene mbira kabaneha deneyago kedo yinigo lalu libuhondo nalamini.

<sup>10</sup> Ani bialu Samasono aba ibu wandari biago andaga piyagola Samasonohanda tomo ogoniha daweneyago dewalime nene. Ogoni agali daliaheru tinaga mana mbira biaga winidagua bini. <sup>11</sup> Ibugua aguani bialu heago Pilidia agalirume de hondowa tigua agali daliahe pira tebira (30) ibu heba helo ibilene. <sup>12-13</sup> Ani biyagola Samasonohanda agali daliahe biaruhondo lalu, Ina bi yobage mbira tigua dabalú galone ladai bilimulo lolene ngago larogo, lene. Ani lowa tigua galone ogoni langeramigola tí hangu hanguhondo ngule lowa labolabo bayaleore mbira mbirabi aga biagimbu bulene marubi bayaleru dabo wia ko, lene. Tigua nalangibehe harimiyagua wali dabu bialu horo karu tomo dawaganego kane bolangua nakaore aga labolaboru bulene bayale ogoni aribia halu tigua ñ ngulene wulebira, lene.

Ani layagola tigua lalu, Ínaga bi yobage ogoni iname hale hole kamago langia berene, lene.

<sup>14</sup> Ani layagola ibugua lalu,  
Naganeha howa mbirale nolene ale tagira ibini.  
Hongoheha howa mbirale dende bulene tagira ibini.  
Ai ogoninaga galone langilimu, lene.

Ogoninaga galone ogo aleda lalu mbira dabalú ladai nabi dege hemine horo tebira bibahende piai hene.

<sup>15</sup> Horo manegoria tigua Samasono onehondo lalu, Ína í agalini mo hondo halu galone ogoni inahondo langule ogo ale lalu langi labe. Ína ogonidagua nalangiriyagua iname í abanaga anda heda halu í heba daanda heloleberema. Libu kirabalime ina ibalimu laribigoni inanaga mbirale mo page bule oharibibe, lene.

<sup>16</sup> Ani layagola Samasono one dugu bima ibu hearia puwa lalu, *Ína i* gubalini nahe *ihondo* handabe mangaho kegonida. *Ína i* dameneruhondo bi yobage lowa lamirigoni galone ogo ale lalu *ihondo* nalangirigo, lene.

Ani layagola ibugua lalu, *Ini* aba aiyala mbira nalami ngogodago *ina ihondo* langulenego irane aginagabe, lene. <sup>17</sup> Ogonidagua layagola horo karu dabu bialu tomo dawalu hayadagoniha dugu dege bialu berene. Ani dege bialu bereagola howa nde bi dugula haru biaho wiaabo ogoni mangabidago lowa ai horo kanengiore galone biago lamini. Lamiyagola ibugua Pilidiali biaruhondo lamini. <sup>18</sup> Lamiyagola Pilidia agali biaru horo kane ogoningi Samasono ibuni tamuha palue pole biyaria tigua ibuhondo lalu,

Monenaga dendego dindiha lowa dendebiore agibe.

Laiononaga hongogo dindiha lowa hongo daligaheore agibe, lene.

Ani layagola Samasonohanda ladai bialu lalu, *Tí inaga* nogo bulumaga daluame dindi nagodongidale nde galone áyu ogoni manda nabi kamile,

lalu lene. <sup>19</sup> Abale ani layaore Anduane Homogonaga hongome Samasono ibu mo hongo hene. Ani biya handala ibu Asagelono dindi daliape howa ogoriani agali pira tebiranaga aga bu hearu minu golalu homelo bo wahai hene. Ani bialu tinaga aga bayaore biaruni golalu agali maru tigua bi yobage biago ogo ale lalu lamiyaruhondo golo migi bini. Aguani buwa o biyarunaga keba gibiore ho yalu ibuni andaga dai bini. <sup>20</sup> Ani buwa ibu one biago agali ibu nenege mbira ibu wali dabu biyangi libu haru mandagi ho palu biribigo ibu hado mini.

## 15

### *Pilidialime Samasono onebi imanebi bo palu binigo ogo*

<sup>1</sup> Emene howa mani widi lini dolene tu hayagola Samasono ibu one biago berearia nenege pole pialu howa nogo meme igini daula mbira minu hana halu pene. Ani buwa ibu one biago abahondo lalu, *Ina i* one tamu paliaganeha anda poabago, layagola ibugua anda pelo henge namini.

<sup>2</sup> Ibugua Samasonohondo lalu, *Ina* mitangi berogola *ina* wali ogonihondo handabe mangaore harida lo manda buwa *ina* ibu *i* nenege biagohondo hado mirugoni. Ibu hagibuni heyogone bayaore bedago *i* ogoni ho aribia harene, lene.

<sup>3</sup> Ani layagola Samasonohanda lalu, *I* Pilidialiruhondo birulidagua *ina* áyu nabulene wulebira, lene. <sup>4</sup> Ani lowa ibugua biango dudu ale handari tebira (300) minini. Ani buwa kira kira erene pongo pongo bima puwa pongonegoha ira hale hedo pongobi lama pene. <sup>5</sup> Ani buwa biango dudu ale biaru ira hale deaore Pilidialinaga widi lini daga mabu wiagoha golope helene. Ibugua ogonidagua biyagome widi lini bogabi do wiarubi maru wene mabuni dearubi irame daiore halu olibe ira lini daga hearu heba daiore helene. <sup>6</sup> Ani biaria Pilidiali biarume, O bidagoni aiwa binidabe, lene. Ani lowa tigua manda bialu hearia, Samasono ibuguaore biniyane hendene. Ogoni irane ibu imane Timuna agali biagome Samasono one biago ibu nenege biago hado miyagonaga biniya. Ani biniyagola Pilidiali biarume puwa wali biago homelo bo delalu ibu aba damenemabi anda heba delo bo heda halu bini.

<sup>7</sup> Ani biyagola Samasonohanda tihondo lalu, *Tigua* biaganedagua o bidamigonibe. Ogoniyagua *ina* lo werodaguaore bulego. *Ina* naholego tihondo paipai biaore bialu waholebero laro, lene. <sup>8</sup> Ani lowa ibu kebaore gibi howa Pilidiali dewaore minalu bo homelai helene. Ani bialu ibuni ibida puwa Edama hari bare weagoha egeandaha pu hene.

### *Samasonohanda Pilidialiru bo podalu wayali henego ogo*



<sup>9</sup> Pilidialiru ibuwa Yuda dindini anda pialu wali agali Lehi tanoni hearu minalu bene. <sup>10</sup> Ani biyagola Yuda agali hearume tihondo lalu, Tígua irane aginaga ina minu balu kamibe, lene.

Tigua ladai bialu lalu, Ina Samasono minu ibalu ibugua inahondo bialu hayadagua iname nde ibuhondo bialu hole lowa ibirima, lene. <sup>11</sup> Ani laya handala Yuda agali daosini tebira (3,000) Edama hari bare egeanda biagoria Samasono berearia pene. Puwa Samasonohondo lalu, Pilidiali biaru ibuwa tigua ina haru hagane kago í manda nabi kebe, lene. Ina inahondo agi bialu pu kebe, lene.

Ani layagola ibugua tihondo ladai bialu lalu, Tígua ihondo biyadagua ina nde tihondo bialu pu ko, lene.

<sup>12</sup> Ani layagola tigua ibuhondo lalu, Iname ogoria ibirimadagoni í minu daba howa tinaga giha ya hole lowa ibirima, lene.

Ani layagola Samasonohanda tihondo lalu, Tígua í heneneore Pilidialirunaga giha ya hole tinime naboleberema lalu bi heneneo ladaba, lene.

<sup>13</sup> Ani layagola tigua lalu, Ogoni karulapego iname í minu daba hangu howa tinaga giha ya holeberema. Iname í homabelo naboleberema, lene. Ani lowa tigua ibu pulimu gahenge hongohi kirame hari bare biagoha howa minu daba ho yalu ibuwa Pilidialiruhondo mini.

<sup>14</sup> Samasono ibu Lehi tanoni ibu heagola Pilidiali biaru gerai lalu ibu heagoha bi hongo howa ladaga daga bima ibini. Ibiyagola Anduane Homogonaga hongo holeneme Samasono abaleore mo hongo hene. Ani biyagola ibugua pulimu gahenge hongohi ibunaga gini daba heago tongoloki halu irame pu payini do ganduloki haradagua bilene. <sup>15</sup> Ani biagola ibugua nogo dongi mbira ayure dege homeneyago ogoninaga ne hengene kuni mbira wiaria handa walia hene. Ibugua o biagoni mo yuwa ogonime agali daosini mbira (1,000) homelo bai hene. <sup>16</sup> Ani buwa Samasonohanda wai bi lalu agua lene.

Nogo dongi ne hengene kuni mbiraore hangume  
ina agali daosini mbira (1,000) balu home larugo.

Nogo dongi ne hengene kuni mbira hangume  
ina bo auya haga bigi buwa wima iri iri bu ngelarugoni,  
lene.

<sup>17</sup> Aguani biai howa mani ibugua nogo dongi ne hengene kuni biago mo wahene. Dindi o bialu hayadagoni mini Lamadi Lehi.\*

<sup>18</sup> Ani bialu hearia Samasono ibugua iba noaore timbuni howa ibu Anduane Homogo olene. Olowa lalu, Ina ihondo wayali holene gibi ogoni ngirigo áyu í iba noa howa homo ngoria Pilidiali Ngode Datagaliwabe mitangi nabiaga o karunime minilo birida, lene. <sup>19</sup> Ani layagola Ngode Datagaliwabehanda Lehi tanoni dindi uli mbiraha howa iba dugua tagi helene. Ani biyagola Samasonohanda iba biagoni nayagola mini wá lalu ai dungulo daiore bini. Ani biyagola iba o dugui layagoni mini Hagore winigo áyu Lehini dugua ho wiaabo ka.†

<sup>20</sup> Pilidialime dindi ogoni de hondo heago helowa Samasonohanda Isaraele wali agali mali pira kira (20) haru haho wini.

## 16

### *Samasonohanda Gasa dindini binigo ogo*

<sup>1</sup> Horo mbirungi Samasono Pilidia dindi timbuni Gasa wiagoria pene. Ogoriani pialu hearia bayanda wali mbira agali kayu yama ibaga bialu ibiyaria lola howa ibu ogonila yu palu hene. <sup>2</sup> Ani biaria Gasa wali agalime Samasono ogoniha hearia handa walia

\* **15:17:** Dindi mini Lamadi Lehi inanaga bi lalu, Nogo ne hengenewi, wini. † **15:19:** Iba dugua tagi helayagoni mini Hagore inanaga bi lalu, Olenegonaga iba, wini.

howa tigua ibu heagoria ho mabu bupe hene. Ogoni ibu tagira ibilo lowa tano timbuni ogoriani anda polene pabe haraba wiagoriani halu ho egabi lene. Tigua mbi lu ogoni bi mbira nale haho wialu iname egabi ledagola bamiyago lo mitangi bu haga haga bini. <sup>3</sup> Ani bilowa Samasono ibu mbiraga tigi mbira hangu palialu mbi hanuni hayagola heyalu pene. Heyalu pialu howa tano timbuni ogoriani pabe hariga ubanda tagi biaga payago yani howa pangaru ira dunini wearubi gi logo hearubi bibahendeore gialo yai hene. Ibugua uruni ibunaga payani mo wiai howa bibahendeore yalu piaho wialu hari bare mbaria Heberono handa amu howa wiagoria yalu iraga hene.

*Samasono ibu wali mini Delaila lola henego ogo*

<sup>4</sup> Ani buwa mani Samasono ibu wali mbira mini Delaila Sorege dindi guane wiagoria biraga bereagohondo gubaliniho hene. <sup>5</sup> Ani buwa heagola Pilidialinaga kini duralime Delaila berearia puwa lalu, *Ína* Samasono mo hondo howa ibuhondo, *ínaga* hongo hiriribidago ogoni irane agime birabe langi, labe. Iname ibu minu daba halu hongo naheore helo ibunaga hongo ogoni agua minupe habehedabe hondolomaya hale habe, lene. Ani beregola *ína* hangu hangume siliba muni handari bearia (1,100) dege dege ilu mogo buwa nguleberema, lene.

<sup>6</sup> Ani layagola Delaila ibugua Samasonohondo lalu, Ai *ína* hongo hiriribi ho kegoni ogoaleme mo hongo haga lalu *í* langiore bibe. Mbiralime *í* minu daba halu hongo nahabehe helole hamelo kayagua ibugua agua bibehebe, lene.

<sup>7</sup> Ani layagola Samasonohanda ladai bialu lalu, Tigua *í* danda hibu ale hongohe pu karia áyu dege tawe gahengego hondowa ogonime *í* minu dabaho ngelayayagua *í* hongo nahe maru karubi dege holebero, lene.

<sup>8</sup> Ani layago hale howa Pilidialinaga kini biarume danda hibu ale hongohe pu karia áyu dege tawe gahengego hondowa Delaila berearia yalu ibiyagola ibugua Samasono minu daba ho ngelene. <sup>9</sup> Ani buwa ibugua agali maru anda hobane mendehayagi hondo helene. Ani buwa ibugua hongoore howa Samasono olowa lalu, Pilidialiru o ibiragoni, lene. Ani leagola ibu danda hibu ale hongohe pume dabaho ngelayagoni abale pu payini irame do moloki haradagua bialu tongoloki bilene. Ani biyagola tigua ibunaga hongo holene ogoninaga o heago tene handa walia nahe dege hene.

<sup>10</sup> Ani biyagola Delailahanda Samasonohondo lalu, *Ína* ihondo henene nalangirigoni *í* mini nawi luludane mo guya hene mbau laruago hendedebe, lene. Áyu mbiralime minu dabaho ngelolenego aguaore bulene nga lalu *í* langiaore bia, lene.

<sup>11</sup> Ani layagola ibugua ladai bialu lalu, Tigua pulimu ale gahengeore áyu dege tidu mialugome *í* minu daba harimiyagua *í* hongo nahe gedaore maru karubi dege holebero, lene.

<sup>12</sup> Ani layagola Delailahanda pulimu ale gahenge tiduwa ogonime Samasono minu daba ho ngelene. Ani bu ngelowa hongo howa ladaga halu Samasono olowa, Pilidialiru ibiragoni, lene. Agali uruni anda hobane mendehayagi ibuwa hondo heneya. Delaila ani olayagola ibugua pulimume ibu gini daba ho ngeleagoni abaleore pu payini tongoloki haradagua bilene.

<sup>13</sup> Ani biyagola Delailahanda Samasonohondo lalu, *Ína* o biagoni ihondo henene nalangi *í* mo guya dege haho nge hendedeni, lene. Ai áyu *í* mbiralime minu daba ho ngelolenego aguaore bulene nga lalu langiaore bia, lene. Ani layagola ibugua ladai bialu lalu, *Ína* *ínaga* mandari girali karia kogoni labolabo wabiaga masini ngagoha mo dariba howa ira milime bo yani helariyagua *í* hongo naheore gedaore maru karubi dege holebero, lene.

<sup>14</sup> Ani layagola Delailahanda Samasono ma palia howa paleagola ibunaga mandari girali karia biago labolabo wabiaga masini wiyagoha mo dariba howa ira milime hongo howaore bo yani helene. Ani helowa wali biagome ladaga halu Samasono olowa,

Pilidialiru ibiragoni, lene. Ani layagola ibu abale heyuwa ibunaga mandari masini biagoha mo dariba howa ira milime hongo howaore bo yaniho ngelayagoni hadabaga bu wahene.

<sup>15</sup> Ani biyagola wali biagome ibuhondo lalu, Ai ína íhondo gubaliniore nahe howa ko agua labehebe, lene. Áyu ína í halu tebo ke halu mo guya howa ínaga hongo gibi kegoni ogo aleme mo hongo haga lalu nalangi dege haabo ke, lene. <sup>16</sup> Ani lalu wali biagome yu wahole ndo yani howa horo bibahendengi hale haho wiaabo hene. Aguani biaabo hayago Samasono ibu hale dege halu manga halu erekui howa <sup>17</sup> ai nde ogoni mangabidago lowa maniore henene do hayago ibu lamini. Ibugua lalu, Inaga mandari bamba napodenego haabo kogoni. I aiyahanda í taba hanayangi howa í Nasa aria Ngode Datagaliwabenaga biabe bia haga mbira ilili bu holiya lomabia howa helene kogoni. Inaga mandari ogoni podayagua inaga hongo ereba halu í hongo naheore maru karubi holebero, lene.

<sup>18</sup> Áyu Delaila ibugua manda bu handalu hearia ibugua o layagoni henene laya manda buwa Pilidialinaga kini biaru hearia bi abale lo pelene. Ibugua lalu, Ai halu mbira hanguore lone dai bilimu, lowa, Áyu ibugua íhondo heneneore langiyago, lene. Ani layagola tigua ibalu howa muni yalu ibini. <sup>19</sup> Delaila ibugua Samasono ma palia howa ibunaga bani palia hondo helowa agali mbira olayagola ibugua ibuwa mandari girali karia biaruni minu podo wahene. Ani buwa ibugua Samasono hongo ereba heago hondowa mo tandaga hole tehinini. <sup>20</sup> Ani buwa ibugua hongo howa Samasono olowa lalu, Pilidialiru o ibiragoni, lene. Ani layagola ibugua heyuwa mitangi bu hondowa ai ibugua bibahendengi golope halu, Pirulidagua poleberoda, lene. Anduane Homogohanda ibu yu wahalu peago ibu manda nabi hene. <sup>21</sup> Ani biaria Pilidiali biarume ibuwa ibunaga de habane kirabali dugu piagalo mu wahene. Ani buwa tigua ibu minu yalu Gasa dindini puwa aeane ale mini boronosi seni pu hongoheme minu hende howa garabaya andaha widi lini dambiaga mbira wiagoha biabe bialu helene. <sup>22</sup> Ani bialu heatambu ibunaga mandari biagoni lone íbu ho karulene.

### *Samasono homenego ogo*

<sup>23</sup> Pilidialinaga kini biaru mo mogo buwa mandagi tinaga dama Dagonohondo turu halu mbirale mbira bo delo mule manda bini. Tigua iba gana lalu, Inanaga dama ibugua waitigi Samasononaga hongo podalu wayali holomaya hongo ngiyada, lene. <sup>24-25</sup> Ti tini dege dege turu haga bialu biruwa tigua lalu, Samasono olalu iname ibu mo taga halu hondo oba hamiya, lene. Ani lowa tigua Samasono garabaya anda hearia haru halu ibuwa tigua mo tagaha hondo obaha bigi bule lowa anda gene kira weagoria hengeneni haru íbu helene. Wali agali tigua ibu heago hondowa iba gana lalu tinaga Dagono mini yaraga halu lalu, Inanaga dama ibugua ina waitigi inanaga dindi embera ngelalu ina dewaore bo biba hayagoore iname balu wayali holomaya hongo ngirida, lene. <sup>26</sup> Ani layagola Samasonohanda igiri emene ibu gini yalu haru ibiyagohondo lalu, Anda gene anda yaragaho kagoore í mo ela hela, lene. Ani buwa í ogoriani malia ho holiya, lene. <sup>27</sup> Anda ogoniha wali agali au lolebe dewaore biru gengeda tago bu berene. Ani bialu Pilidialinaga kini duriali biarubi wali agali daosini tebira (3,000) bibahende heba Samasono mo taga halu hondo oba hayaru hondole anda ogoniha hangu li daligani biru yu pene.

<sup>28</sup> Ani biaria Samasonohanda Anduane Homogohondo bi lowa lalu, Anduane Homogo Bibahende Haru Haame Ho Haga í kegoni. Iore mitangi bibe. Ngode Datagaliwabeore-o hongo biagoni halu mbira hanguore ngia dai berene, lene. Ani beregola halu mbira ogoni hangume hongo ha handarogola Pilidiali tigua inaga de kira duguayagonaga minaruyagua nde haru, lene. <sup>29</sup> Ani lowa Samasonohanda anda gene kira anda yaraga ho heleago laboni dombeni gi tale buwa hongo howaore yadele bini. <sup>30</sup> Ani buwa bi hongo howa ladaga halu lalu, Pilidialiru heba homoliya homela, lene.

Ani lowa ibugua ibunaga hongho holene bibahendeme anda gene biagoni labo yadele biyagola anda biagoni kini agali duria biarubi wali agali maru birayaruni mbiraligo yo nape bibahendeoreni podo бага bu ibira helene. Ai Samasonohanda wali agali ibuni abale hayago howa bo home lama piyaru emene dindiha lowa áyu ibuni heba homa maga helo benedagoni dewaore bolangua howa homene.

<sup>31</sup> Ani biaria ibunaga hamenerubi ibu damenerubi bibahende tini ibuwa tigua ibunaga tingini mo ibini. Ani bialu tigua ibunaga tingini mo yalu dai buwa Sorala Esedalola dindi hengene ibu aba Manoa hora hene egeanda wiagoria ibubi hora hene. Ibugua Isaraele wali agali haru heane mali pira kira (20) haru hene.

## 17

### *Maiga ibugua bi pupu wulenaga mbirale gime wabu helenego ogo*

<sup>1</sup> Eberaimi hameiginiru dalu hari barebare wiagoha agali mbira mini Maiga hene.

<sup>2</sup> Ibugua ibu aiyahondo lalu, Mbiralime inaga muni siliba daosini mbirani handari mbira (1,100) mo page biyangi ina ha halu Anduane Homogo ibugua pageali ogoni bo homelelo lalu larigola ina bi ogoni hale harugoni. Ai muni ogoni ina mirugo o yu kogonigo de handa, lene.

Ani layagola ibu aiyahanda lalu, I igini-o Anduane Homogohanda i mo bayale helo laro, lene. <sup>3</sup> Ani layagola Maigahanda ibu aiyana muni siliba biaru miadai bini. Miadai biyagola ibu aiyahanda lamialu lalu, Ina ha halu bi larugome i iginini ibira nahelo muni ogo Anduane Homogo ibuninagaore lalu loma bialu ibunihondo mero. Ani berogo ai ina muni ogo mbirale bi pupu wulenaga wabiaga mbira kagome wabilo muni ogoni ibuhondo mulebero. Ibugua mbirale mbira irame wabuwa mbirale ogoni silibame para hadambi helo. Ani bialu mende siliba degeme bilo mulebero, lene.

<sup>4</sup> Ani lowa Maiga aiyahanda muni siliba Maiga ibugua miadai biyaru aria handari kira (200) agali mbirale silibame wabiaga heagohondo mini. Agali ogoni ibugua bi pupu wiaga mbira irame wabuwa silibame parahodambi hene. Ani bialu mendego siliba degemeore wabini. Ani wabuwa tigua bi pupu wiaga ogonilabo Maiga andagaha mo ngelene.

<sup>5</sup> Maiga ibuni daluha bi pupu wiaga anda mbira bu helene. Ani bu helowa loma binigo mo miaga agalinaga aga mini ebodi mbira wabu wialu mbirale marubi pupu wulenaga wabuwa bi pupu wiaga anda ogoniha ngelene. Ani bialu ibuni igini mbira bi pupu wiaga anda ogoniha ibunaga loma binigo mo miaga helo dabo helene. \*

<sup>6</sup> Ogoningi Isaraele dindiha kini mbira nahe wini. Wali agali bibahende hearume tini hame leadagua bigibigi bialu haga hene.✧

<sup>7</sup> Ogoningi igiri daliahe mbira Libai aria Yuda dindiha Bedeleheme tano wiagoha hene. <sup>8</sup> Ani howa ibu Bedeleheme wahalu ibu holene dindi gahenge mbira taya bima pene. Pialu Eberaimi hameigini dalu hari barebare wiagoha pialu Maiga anda heagoria tagira pene. <sup>9</sup> Ani pu hearia Maigahanda ibuhondo hale halu lalu, I agoha howa ibiribe, lene. Ani layagola Libaiali biago ibugua ladai bialu lalu, I Libaiali Yuda dindiha Bedeleheme tano howa ibu kogoni. I dindi gahenge mbira ini holene taya bero, lene.

<sup>10</sup> Ani layagola Maigahanda ibuhondo lamialu lalu, I ila oali habiya. I inaga mini mandaru talebu ngiaga mbira howa inaga loma binigo mo miaga agali habelo hameledo. Ina mali mbirani biabe ogoni beregonaga yolo muni siliba pira (10) ngialu aga tomobi ina ngialu buliya, lene. <sup>11</sup> Ani laya handala igiri ogoni ibu Maigahanda bi layagoni karulape lowa ibu Maigala mandagi hene. Ani howa ibu Maiga iginioore haradagua bini. <sup>12</sup> Maigahanda igiri daliahe ogoni ibunaga loma binigo mo miaga helene. Ani helayagola ibu Maiga andaga hene. <sup>13</sup> Ani heagola Maigahanda lalu, Ai Libaiali mbira

\* 17:5: Aga mini ebodi Haru Tagira Penego 25.7 de handabe. ✧ 17:6: Man 12.8, Hgn 21.25

ogoni inaga loma binigo mo miaga ila kabagome Anduane Homogohanda i dalu mo bayale hai holobada lo manda bidogoni, lene.

## 18

### *Dana hameigini ti tano gahenge minigo ogo*

<sup>1</sup> Horo uruningi Isaraele wali agalinaga kini mbira nahe hene. Ani biangi Dana hameigini hearu tigua dindi bayale mbira tini holene taya bialu hene. Isaraele hameigini maru hearu tinaga dindi mo wigi biyagola Dana hameigini ti mbira mo wia nabi howa taya bialu hene. <sup>2</sup> Ani bialu howa Danali tigua tinaga hameigini duria hearunaga agali hongohe durialime Sora tano Esedaolo tanolani howa dabalul dindi bu wiaruha ibaga biai halu dindi hondo wule pudaba lene. Tigua agali urunihondo lamialu lalu, Tigua dindi bibahendeha ibaga biai halu dindi baya hanguore hondo wiai halimu, lene.

Ani laya handala tigua pialu Eberaimi hameigini dindihayagi hari barebare wiagoria puwa Maiga anda heane hondowa ti Maiga heba ogoniha ho palene. <sup>3</sup> Ti Maiga andagaha puwa igiri daliahe Libaiali ogoninaga bi layago hale howa ibu Yudalida lo manda bini. Ani manda buwa tigua ibuhondo hale halu lalu, I ogoha agi bialu kebe. I aiwa haru ibini kebe, lene. <sup>4</sup> Ani hale hayagola ibugua ladai bialu lalu, Maigahanda i haba layagola henego ko. I ibunaga loma binigo mo miaga haruligo ibugua i yolo bigi biaga, lene.

<sup>5</sup> Ani layagola Dana hameigini biaru tigua loma binigo mo miaga biagohondo lalu, Ayu ina hariga poramago karulape holobadabe be nakarulape holobadabe lalu Anduane Homogohondo hale habelo hameledema, lene.

<sup>6</sup> Ani hale hayagola loma binigo mo miaga biagome tihondo ladai bialu lalu, Ti ibaga bialu poramigoha Anduane Homogo ibunime handayaho holebirago ti gi nahalimu, lene.

<sup>7</sup> Ani laya handala agali duriali biaru ti heyalu puwa Laisi tano anda pene. Ani puwa handalu hemiria Laisi tanoha wali agali bu hearume mbirale mbira mitangi nabi Saidono wali agali bayale bu headagua dege hearia hendene. Tigua wali agali mende baba keba nahaga deme handaga bu ema nabi hearia hendene. Tigua wai bulenebi mitangi nabi hearia hendene. Tinaga dindibi bayale dege wialu mbirale mbira burupalebi nabi hene. Ani howa tigua wali agali hameigini tara tara baba yolo mia yolo bia bialu doborobo nabiaga ti hanguore hearia hendene. Anigo tinaga dalu Saidono wali agali heagoha kaware ndo emene kaundiaha wiaria hendene.

<sup>8</sup> Ani handai halu Danali duria biaru ti tini dalu Sora Esedaolola dai bialu hemiria tinaga hamene hearume tihondo hale halu lalu, Tigua mbirale agile dege handarimibe, lene.

<sup>9</sup> Ani layagola agali duriali biaru tigua ladai bialu lalu, Iname wali agali tano mbirani hearia handarimago uruni baba wai bu maliya abale ibu ngoai hadaba. Iname tinaga dindi baya taraore wiaria de handarima. Anigo tigua bira nabi abale heyalu dindi ogoriani puwa wai bialu karulamiya ma. <sup>10</sup> Tigua puwa handalu kamiria wali agali uruni ti wai bulene manda nabi bame biru ngaria hondoleberemi. Tinaga dindi timbuni wialu tinaga tano ogoniha mbirale mbira tubagi nahaga karia hondoleberemi. Ai dindi ogoni Anduane Homogo ibunime inahondo ngiyago abale ma, lene.

<sup>11</sup> Ani laya handala Dana hameigini biaru agali handari waragaria (600) bibahendeme tinaga wai biaganealeru mo yai halu tini dindi Sora Esedaolola yu wahalu pene.

<sup>12</sup> Tigua ani pu howa Yuda dindiha Kiriada Yarimi tano wiagoria balai anda bini. Ani binidago Kiriada Yariminaga tano abene ni paliragohayagi winigo tigua dindi ogoni mitangi bialu Dananaga Balai Anda Bini lalu mini winigo nga. <sup>13</sup> Ani buwa tigua dindi



ogoni yu wahalu puwa Eberaimi hameigininaga dindi hambene barebare wiadagua pialu Maiga andaga pene.

<sup>14</sup> Puwa agali duriali dindi diri hondo wule Laisi dindiha ibaga bu hene biarume tini hamene hearuhondo lamialu lalu, Dindi ogoriani anda bu karu mbiraha mbirale mbira bi pupu wulenaga irame wabuwa silibame para hadambi ho winibi mbirale mendebi bi pupu wulenaga silibaibunime hangu wabini wiaria handarima. Ani bialu loma binigo mo miaganaga aga mini ebodi mbira wialu biaria hendene. Ani wialu dama mitangi bialu mbirale tara tara maru gime wabu wiaria hendene. Ani wiaria handarimago ai iname aqua bulene ngabe, lene. \* <sup>15</sup> Ani lowa hariga peago yu wahalu pu bagi howa tigua Maiga andagaha pialu igiri daliahe Libaiali biagohondo lalu, Hambi-o horombe, lene. <sup>16</sup> Ti ani lalu heane Dana hameigini handari waragaria (600) biaru ti mbirale wai biaganeale biaru yalu Maiga daluha anda polene pabe haraba wiagoria hondo hene. <sup>17</sup> Ani heagola loma binigo mo miaga biago ibu ami agali handari waragaria (600) biaru baba pabe harabani hondo hea tambu agali duriali dindi diri hondo wule pene biaru tigua bi pupu wiaga andaha anda pene. Anda puwa tigua mbirale irame wabuwa silibame paraha dambi hene wiagobi loma binigo mo miaganaga aga mini ebodi wiagobi dama mitangi bialu bi pupu wule gime wabini maru wiarubi mbirale siliba degeme bi pupu wulenaga wiagobi uruni bibahende mo yule anda pene. †

<sup>18</sup> Ani anda piyagola loma binigo mo miaga biago ibu handalu hearia agali duriali biaru tigua Maiganaga bi pupu wiaga andaha puwa mbirale bi pupu wule wabini wiarubi loma binigo mo miaganaga aga wiagobi bibahende mo yalu tagira ibiyane hondowa ibugua tihondo hale halu lalu, Tigua ogoni agile beremibe, lene.

<sup>19</sup> Ani layagola tigua ibuhondo ladai bialu lalu, Í bi nale waha. Í inanaga loma binigo mo miaga halu ina mini bogaru talebu ngiaga habelo ina haru maliya. Be í agali mbiraoreli hangunaga loma binigo mo miaga holebe. Ani ndo í Isaraele hameigini ina kamarunaga loma binigo mo miaga holene bayale ndobe, lene. <sup>20</sup> Ani laya handala loma binigo mo miaga biago ibu turu halu anda biagoha mbirale bi pupu wiaga wiaru bibahende mo yai halu ibu ti heba pole pene.

<sup>21</sup> Ani buwa ti beregedalu pole pialu howa tinaga waneiginirubi nogo sibi bulumagarubi haru halu dabudabu wiarubi bibahende mo yai halu ti bamba halu pene.

<sup>22</sup> Danali biaru ti kaundiani pialu heagola Maigahanda agali maru ibu aria kaware hearu Danali baba waibu ma lalu olo ngoai hene. Ani bialu tigua talima pugu pugu bialu Danali biaru pialu hearia tali minini. <sup>23</sup> Agali Maiga aria biarume Danali biaruhondo bi hongo howa olayagola Danali biarume beregedalu handa dai buwa tigua lalu, Maiga-o aqua biyabe. Ina inaga agali dewaliore ina baba wai bule haru halu eberego agibe, lene.

<sup>24</sup> Ani layagola Maiga ibugua ladai bialu lalu, Tigua inaga loma binigo mo miaga agali haru halu inaga dama mitangi bialu bi pupu wiaga gime wabini wirugobi mo yalu ibida pirimida. Inaga mbirale marubi mo yai harimida. Ani birimidago buwa ihondo aqua biyabe lalu hale haramigo aqua laramibe, lene.

<sup>25</sup> Ani layagola Danali biaru tigua ladai bialu lalu, Agali o karume keba halu inibi í one waneiginibi bo wahi holigo inahondo bi dewaore nale waha, lene. <sup>26</sup> Ani lalu Danali biaru ti pole piyagoha pene. Piyagola Maiga ibugua handalu hearia agali uruni baba wai bima labe nahe ti hongoheore gibiyane wahalu beregedalu ibuni dalu dai bini.

<sup>27</sup> Danali biaru tigua Maiganaga mbirale bi pupu wulenaga wiaru mo yalu ibunaga loma bu minigo mo miaga agali biagobi haruha bialu Laisi tano pole pene. Ani pu hemigola Laisi tanoha wali agali bu hearume ti baba wai bulene mitangi nabi hendore hene. Ani heagola Danali biaruni tigua wali agali bo wahi halu tinaga tano wiagobi bo heda hai hene. <sup>28</sup> Laisi wali agali uruni ti dindi kaundiaha howa dindi maru ngaru baba

\* **18:14:** Aga mini ebodi Haru Tagira Penego 25.7 de handabe † **18:17:** Aga mini ebodi Haru Tagira Penego 25.7 de handabe.

ti mbirale yolobu pu íbu nabiaga. Saidono dindi polene kaundia wiagola mbiralime ti biamogo bule naibaga hene. Laisi tano ogoni dindi ulini panda panda Bederehobo tano wiago kawareni dege wini.

Ani binigo Danali tigua tano biago lone bia tiga buwa tini ogoriani hene. <sup>29</sup> Ani karulo howa tigua tano ogoni mini Dana wini. Abale tano ogoni mini Laisi winigo ai tinaga mamali Yagaba igini henego mini embeda holilono tano ogoni mini Dana wia aribia hene. <sup>30</sup> Ani howa Danali biaru tigua mbirale bi pupu wulenaga gime wabini biaru mo yalu ibirimigo ogoniha ngelowa mbirale urunihondo bi pupu wialu hene. Mosese hameigini aria Gesomo igini Yonadana ibu Dana wali agalirunaga loma binigo mo miaga hene. Ani howa Dana hameiginirunaga loma binigo mo miaga Yonadana aguanenerume dege haabo howa Danali uruni dindi mende ha garabaya piyangi wahene.† <sup>31</sup> Anduane Homogonaga Balai Anda Silo dindiha bu heangi Dana hameigini hearu tigua Maigahanda bi pupu wulenaga gime wabini biaruhondo bi pupu wialu haabo haga hene.

## 19

### *Libaiali ibu one wabuni mende bereleago libuha genda mbira anda ibinigo ogo*

<sup>1</sup> Horo uruningi Isaraele dindiha kini mbira nahe dege wiangi Libaiali dindiha Bedeleheme tano wiagoria wandari mbira berenego ibu one wabuni mende berelo dabu bu hene. <sup>2</sup> Anigo wali ogoni ibugua Libaiali biagola keba howa ibu aba andaga Bedeleheme tanoha puwa ege maria berene. <sup>3</sup> Ani berenego ibu agalinime wandari biago haru dai bule manda bialu ibunaga nogo dongi kira haru halu biabe biaga agali mbirala haru pene. Ani piyagola wandari biagome agali biago lola howa ibu aba andaga haru pene. Haru ibiyagola wandari biago abahanda agali biago hondowa ibu turu hene. <sup>4</sup> Turu howa wandari aba biagome ibu imane tini haru mandagi hamaore lene. Ani layagola tigua iba tomobi nagimbu bialu horo tebira ti haru mandagi hene.

<sup>5</sup> Horo maneni Libaiali biagome andaga dai bulenaga egerebagiore heyuwa mbirale wiyaru mo manda manda bini. Ani manda manda bialu hearia ibu imane biagome lalu, Pole dege hongo helo iya tomo ala nabiya. Nalu pilimulo, lene.

<sup>6</sup> Ani layagola libu haru tomo ibabi nalu biruwa wandari aba biagome lalu, Áyu mbiraga dege tomo ibabi nalu turu hagabu palima, lene. <sup>7</sup> Ani layagola Libaiali biago ibu pole heyiyagola ibu imane biagome hongo halu harugo palima lene. Ani layagola nde harugo lowa mbi mbira ogoni ho palene. <sup>8</sup> Horo daunini Libaiali biago poleore manda bini. Ani manda bialu hearia wandari aba ibu imane biagome lalu, Ainde alendo ni tabi laragola pole áyu tomoru nalu emene hondo birama, lene. Ani layagola libu haru tomo mandagi nalu berene.

<sup>9</sup> Ani biralu polene tu hayagola Libaiali biago ibu onebi ibunaga biabe biaga agali biagobi ti polene manda bialu hearia wandari aba biagome lalu, Ai ni abale anda pialu alendo haragonidago yawi pole áyu dege harugo turu hagabu ho palima. Yawi gao laragola eregebagi heyalu tini dalu puabo halu pilimulo, lene.

<sup>10</sup> Ani layagola Libaiali biago ibu lone paluene manga howa ibubi ibu onebi heyalu pene. Nogo dongi biago labonaga erekunini mbirale dungaho biraga wiago mo paga howa ogoriani biralu Yabusu tano mini mende Yarusaleme lagago pole pene. <sup>11</sup> Alendo halu ni paliyagola ti pialu Yabusu tano ogoriani anda pene. Anda puwa ibunaga biabe biaga agali biagome lalu, Ina puabo nahe Yabusualinaga tano ogoha paluene karulapeda, lene.

† **18:30:** Ala wai bialu Isaraele wali agali dindi abene uyurayagi palearu Asiriali hearume Asiria dindiha garabaya bu yalu penego bi ogoni lalu leda. <sup>2</sup> Kini 15.29 hondolene nga. Garabaya penedago Dana hameigini tigua Laisi tano karulo howa mali handari maria (400) agima peagola bini.

<sup>12</sup> Ani layagola Libaiali biagome lalu, Ani ndo ina Isaraele hameiginime agali tara karu dalu ngagoha paluene nakarulapego Gibea tanoha palimiya. <sup>13</sup> Gibea tanohayaguabi Lama tanohayaguabi mendeni palimiya abale ma, lene. <sup>14</sup> Ani lalu Yabusu tano yu wahalu ti emene pu dege bini. Ni anda pialu aruma hole biyagola Gibea tano Beniyamini hameiginiru dalu wiagoria anda pene. <sup>15</sup> Tigua hariga tene wahalu tanoha paluene anda taya bule anda pene. Ani puwa ti wali agali ngoai haga hama wiagoria pu berene. Ani berearia mbiralime ibu andaga palima ma lalu haru polene mbira naibini.

<sup>16</sup> Ti bira dege biaria agali wahe mbira ibini. Agali ogoni ibu Eberaimi hameigini dindi hari barebare wiagoha hagago ogoni wahalu Gibea tano wiagoha ibu hene. Gibea tano ogoni Beniyamini hameigininaga wini. Agali wahe biago ibu mabuha biabe bu penego ai andaga dai bini. <sup>17</sup> Ibu dai bialu hearia Libaiali biago ibu onebi ibunaga biabe biaga agali biagobi ti wali agali ngoai haga hama wiagoria berearia hendene. Ani hondowa ibugua tihondo hale halu lalu, Ti agoha howa ibini bedemibe. Ti ani polenaga bedemibe, lene.

<sup>18</sup> Ani layagola Libaiali biagome ladai bialu lalu, Ina Yuda dindi Bedeleheme tanoha howa ibirimago ai ina i dalu Eberaimi hameigini dindini hari barebare ngagoha pole bedema. Ina Anduane Homogonaga anda kagoha pole bedemago ai mbirali ina ibu andaga ayu mbiraga hangunaga haru polene naheda. <sup>19</sup> Ina mbirale bibahende yai kama. Nogo dongi kira kago labonaga tani nolenebi ibi i onebi inaga biabe biaga agali kagobi iname tomo nolene mberedi waini ibabi mbirale mbira buru palia nabi bibahende yai kama, lene.

<sup>20</sup> Ani layagola agali wahe biagome lalu, Bayaledago i andaga palimiya. Ina mbirale bibahende handayaho hai holeberogo ai ma. Ti wali agali ngoai haga hama ogoria mbiraga birulene nakarulapego maibidaba, lene. <sup>21</sup> Ani lalu ibu andaga haru pene. Haru puwa nogo dongi biagolabo tomo nelo mialu wali agali biarunaga ge wayawaya ba halu tomo ibabi nelo mialu bini.

<sup>22</sup> Ani bialu ti turu hagabu beremiria agali ko biaga maru tano ogoniha haga hearume ibalu anda ti bereago ho mabubu howa anda panga hongo howa bene. Agali uruni ti mana ko ngubi tara tara dewa biaga henego tigua agali wahe biagohondo lalu, Agali i andaga ibu bedagoni ina yulumaya tagira ibila, lene.✧

<sup>23</sup> Anidagua layagola agali wahe biagome tagira puwa lalu, Ani nabuleore. Agali inaga nenege i andaga ibinigo ina haru padogoni. Tigua mana ko ogoni bulene nawi. <sup>24</sup> Ai i wanebi agali ibiyago ibu one biagobi libu bedago ina libu haru tagira ibalu tigua libuhondo bulene hamelaramidagua nde bilimulo. Anigo agali ibiyagohondo mana ko ngubi ogoni nabilimu laro, lalu hongo howa lene.

<sup>25</sup> Ani layago lelowa agali biarume agali wahe biagonaga bi layago hale nahene. Ani biyagola Libaiali biagome ibu one agali biaru mini. Ani miyagola agali biaru tigua wali biago haru puwa ti haru paligi bialu mana ko ngubi tara tara biaabo halu heane gao lene. Ani bialu yu wahalu pu lene. <sup>26</sup> Muna biyagola wali biago agali wahe biagonaga anda haneni ibu agalini paliyagoria odo ibiraho wini. Ani odo ibiraho wuwa paleane dege ni tagira ibini.

<sup>27</sup> Egerebagi hayagola wali ogoni agalini ibu andaga polenaga panga dugualu tagira pene. Ibugua panga duguwa handalu hearia ibu one haneni palearia hendene. Wali biagome panga dugualu hearia duguabe naheyagola haneni ibiraho wini. <sup>28</sup> Ani palearia Libaiali biagome lalu, Ai heyalu ma, lene. Ani layagola wali biagome bi ladai nabi wiaabo hene. Ani biyagola Libaiali biagome wali biago tingini nogo dongi erekunini mo wialu ibuni daluha yalu pene.

<sup>29</sup> Ibuni andagani anda puwa ibugua nabi mbira abale mo pene. Mo yu tagira ibuwa wali biago tingini hombe (12) pugu podo wini. Ani buwa ibugua Isaraele

✧ 19:22: Pig 19.5-8

hameigini homberia (12) hayadagua pugu mbira pelaga bini.✧ 30 Ani biyagola agali bibahendeme wali biago tingini podalu puguni pelaga biniyago hondowa tigua lalu, Mbiralime ogonidagua mbira ala biyane nahendeore harimagoni. Bamba Iyibi dindiha halu tagira ibirimangi howa mbiralime ogonidagua biyane nahendeneore kamagoni ndobe. Ai iname ogoni biyadagonaga mbira bimija. Agi bimija manda bu kamibe, laga bini.

## 20

### *Isaraelealirume wai bule manda manda bu henego ogo*

<sup>1</sup> Isaraeleali bibahendeme mana ko Gibealirume ogonidagua biya layago hale halu ti mini mbiraore howa agali wabuni mbiraore hangu ibalu ti bibahende Anduane Homogonaga deni Misiba tano wiagoria ibu ngoai ho hene. Ti Isaraele dindi bibahende abene uyurayaginaga Dana hameigini paleagoria howa hama ibalu unurayaginaga Beaseba tano wiagoria howa ibalu ibai hene. Ani ibalu Gileada dindi ni tagira ibiragohayagi hearubi ibai hene. <sup>2</sup> Isaraele hameigini bibahendenaga agali haguane hearubi Ngode Datagaliwabenaga wali agali mo mogobu hayadagua dege tibi ibu mogobu hene. Horo ogoningi ami agali wai biaga ayu tibu ne gadeleore yu hearu ti daosini dege handari maria (400,000) ibu ngoai hene. <sup>3</sup> Ani ibu ngoai ho heagola Beniyamini hameigini hearu ti hale halu hemiria Isaraeleali bibahende Misiba tanoni ibu ngoaiho ka layane hale hene.

Ani howa Isaraeleali biarume Libaiali biagohondo hale halu lalu, Mana ko o biyadagoni agua bialu biyabe. Te ogoni ina hale holomaya langi, lene. <sup>4</sup> Ani layagola Libaiali wali bo wahayago agalini biago ibugua lalu, I one iya Beniyamini hameigini dindi Gibealirume mbi layagola palue anda piriba. <sup>5</sup> Ani anda pu berebagola mbiraga Gibeali hearume i bole waraanda haya. Tigua ibalu anda i palue berewagoha ho mabu bu haya. Ani buwa tigua i nabe wahalu i one berewago ti haru tagira puwa wali biago kayu yalu gao lowa homelaya. <sup>6</sup> Ani homelayagola inaibunaga tingini andaga mo yalu dai buwa Isaraele hameigini bibahende hangu hangu hondo podo ta howa wia hai haru. Anidagua birudagoni irane agali uruni tigua ina Isaraeleali kamaru dombenegoha mana ko ngubiore biyagola ani biru. <sup>7</sup> Ai Isaraelealiru-o ti bibahendeme mitangi bayuwaore buwa bi lalimu. Mana ko o biyadagoni iname pani agobi bialu biadai bimijabe, lene.

<sup>8</sup> Ani layagola agali bibahendeme bi lo mbira halu, Ina ibu kamaru mbiraligo inanaga balai anda kagohabi anda ibuni kagohabi dai bulene nawiore larama. <sup>9</sup> Gibealiru tigua mana ko ogonidagua ina Isaraelealihondo biyadagonaga ina bibahendeme wai bu poleberema. Ani bulene ngago agali ai ibu polebadabe hondolenaga iname ege tole baraga howa agalinaga mini ngagoria handaramago uruni dabamija. <sup>10</sup> Isaraele hameigini agali handari mbiranaga (100) agali pira mbira dababagi halu daosini mbiranaga (1,000) agali handari mbira dababagi halu daosini pira mbiranaga (10,000) agali daosini mbira (1,000) dababagi halu bimija. Agali dababagi heneru tigua ami agali Gibealirume hameigini baba wai bule porarunaga tomo hanalu Gibealirume tano ngagoria pu helo. Ami agali ti Beniyamini hameigininaga dindi Gibealirume tano ngagoria anda puwa tigua Gibealirume agali mana ko ngubi o biyaruni tihondo pani ko biadai bilo, lene. <sup>11</sup> Ani lowa Isaraeleali bibahendeme tini mini mbiraore howa Gibealirume tanoha karu baba wai bu polenaga mo mbiraore ho ngoai hene.

<sup>12</sup> Ani howa Isaraeleali tigua agali marume Beniyamini hameigini Gibealirume tanoha palearuhondo bi lo yalu pelo lawia halu lalu, Mana ko ngubi mbira ti kamigoha howa tagira piyadago agi birimibe. <sup>13</sup> Ai tigua agali ko ogoni biyadaruni Gibealirume tanoha haruaruni iname bo wahai halu mana ko ngubi ina Isaraele dindiha tagira ibiyadago biba

helalu mo ereba helolomaya haru ibalimu, lene. Ani layagola Beniyamini hameigini biarume Isaraele hameigini maru hayadaruninaga bi layago mo wahalu ti agali uruni haru tagira nape dongeho hene. <sup>14</sup> Ani howa Beniyamini hameigini uruni tigua Isaraele hameigini maru hayadaru baba wai bule lowa tininaga tano wiyadaru wahalu Gibea tanoni ibu ngoai ho hene. <sup>15</sup> Horo ogoningi Beniyamini hameiginirume ami agali tano bibahendeha howa ibu ngoai halu daosini dege pira kirani waragaria (26,000) bibahende ayu tibume wai biagaru ti mo mogobu hene. Ani heagola agali maru Gibea tanoali tini nde handari karia (700) wai biagaru ona tidiyu handa edene bu hene. <sup>16</sup> Agali handari karia (700) uruni ti gi leme wai biaga howa tigua ege tole pume yuwa wai bialu nde koba nabiaga bila haga hangu hene.

<sup>17</sup> Anidagua heagola Isaraele hameigini maru ti nde daosini dege handari maria (400,000) ayu tibume wai biagaru naina tidiyu hene. Beniyamini hameigini baba dagalamaga nahe tini hangu ogonidagua hene.

*Isaraeleali tigua Beniyamini hameigini baba wai binigo ogo*

<sup>18</sup> Isaraeleali ti Anduane Homogo mitangi bialu lotu lole Bedele tano wiagoria puwa tigua Anduane Homogohondo hale halu lalu, Ina hameigini kamaru aria mbira aiwa wai haru bamba halu Beniyamini baba wai bule polomabe, lalu hale hene. Ani hale hayagola Anduane Homogohanda ladai bialu, Yuda hameigini tigua wai haru bamba holene nga, lene.

<sup>19</sup> Ani laya handala Isaraeleali biaru tigua egerebagiore heyalu puwa Gibea tano kawareni wai bule manda manda buwa tidiyu hene. <sup>20</sup> Tigua Beniyamini hameigini hearu baba wai bulenedagua manda manda bialu ona tidiyu haga haga bini. <sup>21</sup> Ani heagola Beniyamini hameigini biaru tibi nde Gibea tanoha howa tagira ibalu wai bini. Wai bialu Beniyamini hameigini biarume Isaraeleali daosini dege pira kirani kira (22,000) bo wahai hene. <sup>22-23</sup> Ani bo wahaya handala Isaraeleali biaru dai buwa Anduane Homogo mitangi bialu lotu laga wiagoria halu mende puwa Anduane Homogonaga deni bulu paluwa dugu bialu wiane dege alendo hene. Ani bulu paluwa tigua Anduane Homogo hale halu lalu, Ainde Beniyamini hameigini ina hamene karu baba wai lone bu poramabe be waharamabe, lene.

Ani hale hayagola Anduane Homogohanda ladai bialu lalu, Wai lone bule dai bidaba, lene.

Ani laya handala horo mendengi Isaraeleali biarume lone hongo halu dai buwa wai hama biagoria wai bule abale tidiyu haga haga bu harimigoria ibu hene.

<sup>24</sup> Ani howa tigua Beniyamini hameigini baba wai halu mende bule pene. <sup>25</sup> Ani pu heagola Beniyamini hameigini biarume Gibea tanoha howa tidiyu tagira ibalu Isaraelealiru baba horo mende ogoningi wai bialu tigua Isaraeleali ami wai biaga ayu tibu yu hearu aria daosini mbirani pira halira (18,000) bibahende balu homelai hene. <sup>26</sup> Ani baya handala Isaraeleali biaru ti Bedele tanoni lone dai bialu puwa Anduane Homogonaga deni howa dugu timbuni bialu berene. Tigua tomo ibabi nane bialu alendo hene. Ani bialu tigua mbirale loma biniru irani dai helo bo delalu mbirale Anduane Homogola ho gimbu bulenagabi lomabu delalu bini. <sup>27-28</sup> Anduane Homogonaga Habo Nalolene Bi lo winigonaga Mbogoyi biago horo ogoningi Bedele tanoha ngelowa Eleasa igini Arono aguane Piniasahanda handayaho hene. Ani heagola Isaraeleali tigua Anduane Homogohondo lone hale halu lalu, Iname Beniyamini hameigini ina hamene karu baba lone wai bu poramabe be waharamabe, lene.

Ani hale hayagola Anduane Homogohanda ladai bialu lalu, Yawi ina ti biamogo buleberogo tigua wai bialu bo poda hana hai holeberemigo pilimu, lene.

<sup>29</sup> Ani laya handala Isaraeleali ami tidi mbira biarume ohalu puwa Gibea tano wiagonaga pabe heagoha ho mabu buwa bira do hene. <sup>30</sup> Horo tebone layagola Isaraeleali ami agali biaru Beniyamini hameigini biaru baba wai bule lone pene. Puwa



abale biaga wiyadagua tinaga ami agali mo tahalu wai bulenedagua tidiyu haga haga bilene. <sup>31</sup> Beniyamini hameigini biarume wai bule tagira ibiyagola Isaraeleali tinaga ami agali hayadaru tigua tanoni hapara nahe emene haru gililo mialu puamu hene. Ani buwa Beniyamini hameigini tigua abale biyadagua dege Isaraele hearu haruru talima puwa Bedele polene hariga wiagoria bo waha maru Gibe a polene hariga peagoria bo waha maru wai hama wiagoria bo paya paya bialu Isaraeleali pira tebira (30) agima bo wahene. <sup>32</sup> Ani bo wahowa Beniyamini hameigini biaru tigua lalu, Iname abale barimadagua dege bai harimago haruore, lalu hene.

Ani lalu heaore Isaraeleali tigua nde wai tara hono howa lalu, Iname tano yu wahalukaundiaha puwa wai haru halu hariga tene pedaruha pugu pugu bimiya, lalu lo wini. <sup>33-34</sup> Ani lo winidagua bialu Isaraeleali ti lone dai buwa dindi mini Baladama laga wiagoria mo mogobu hene. Ti aria maru Gibe a tanoha bira do howa tano abene ni paliragohayagi hene. Ani bira do heneru ti abale tagira ibalu wai hongo howaore bialu hene. Isaraeleali wai bayale biaga hongohe pari wayali daosini pira (10,000) daba bagiho berelayarume uruni abale tagira ibalu wai pora biai hene. Anigo Beniyamini hameigini biaru darabi mo ko howaore balu bo amo lolene wai hanalu tagira ibiyago manda nabi dege hene. <sup>35</sup> Anigo ogoningsi nde Anduane Homogohanda ti biamogo biyagola tigua Beniyamini hameigini hearu balu bo poda hana hai hene. Horo ogoningsi Isaraelealiru tigua Beniyamini hameigini biaru daosini dege pira kirani duriani handari mbira (25,100) bibahende bo wahai hene. <sup>36</sup> Ani biyagola Beniyamini hameigini tini mitangi bialu wai bibe nahe ti bai holobada lo manda bini.

### *Isaraeleali tigua Beniyamini hameigini bai henego ogo*

Isaraeleali maru Gibe a tano kaware wiagohayagi o howa bira do halimu layaru helalu maru tigua Beniyamini hameigini hearu mo hondo howa ti ibida petingi halu Beniyamini hameigini uru haru gililo mialu tano yu wahalukaundiaha pene. <sup>37</sup> Ani biyagola agali bira do hayarume heyalu Gibe a tanoha abale anda puwa wali agali bu hearu bibahendeore bo hilo wahai hene. <sup>38</sup> Agali bira do hayadarume agali ibida petingi howa hayadaruhondo lamialu lalu, Iname Gibe a tanoha anda puwa wai bialu anda heda haramagola hagua birane hondowa <sup>39</sup> ti beregedalu abaleore dai bilimu, lalu bi ala lowini. Anigo wai bialu howa Beniyamini hameigini tigua Isaraeleali hearu aria pira tebira (30) bowa tini lo mitangi bialu, Abale barimadagua dege barimada, lo mitangi bini. <sup>40</sup> Anigo tano biagoha ira hagua iraga hayago hondowa Beniyamini hameigini biarume lo manda bialu Gibe a tano bo heda hayagola do wahayada lo manda bini. <sup>41</sup> Ani biyagola Isaraeleali ibida petingi haga biarume wai hongohe bialu ibu dai bini. Ani biyagola Beniyamini hameigini biarume handalu hearia Isaraeleali biaru lone dai biyago hondowa gi howa mogo lalu tinaga hongo pirilipe hai hene. Tiha mo ko halu homai holene áyu ogoni anda ibiyada lo manda biai hene. <sup>42</sup> Ani manda buwa ti ibida pialu dindi ko iba dalu naibaga wiagohayagi piai ho hene. Ani pole piyago ti ogoniha polene henge nawiore hene. Pialu hearia Isaraeleali halu mende tanoha anda pu hene biaru tagira ibiyagola mo dombeni howa Beniyamini hameigini biaru mbira pora bialu nape baiore hene. <sup>43</sup> Isaraeleali tigua Beniyamini hameigini bama talima pialu dindi mbira mini Menua wiagoha pialu bama talima pu dege bialu Gibe a tanonaga abene ni tagira ibiragohayagi puabo hene. <sup>44</sup> Ani bialu horo ogoningsi dege Beniyamini hameigini wai biaga hongohe hangu daosini pira mbirani halira (18,000) bibahende bai hene. <sup>45</sup> Beniyamini hameigini uruni aria maru dindi ko iba dalu naibaga wiagoha ibida pialu Limono egeanda wiagoha bira do hole pene. Ani ibida pialu hearia Isaraeleali biarume haruru talima pugu pugu bialu daosini duria (5,000) harigani bo wahai hene. Ani bialu Isaraeleali tigua talima pugu pugu biaho wialu dindi mini Gidomo wiagoria puabo halu ogoniha daosini kirabi (2,000) lone ba dege bini.

<sup>46</sup> Horo ogoningi Isaraealirume Beniyamini agali daosini pira kirani duria (25,000) bai hene. Agali homayadaruni wai biaga pari wayali haga binigo bibahende bai hene.

<sup>47</sup> Ani bai haya handala Beniyamini hameigini handari waragaria (600) dege ibida pialu Limono egeanda wiagoha bira do hene. Ani bialu ti ege maria ogoniha biraabo hene. <sup>48</sup> Isaraealeali biaru tigua lone Beniyamini hameigini dindi ibu dai buwa wali agali bu hearubi nogo tara tara bu hearubi bibahendeore tinaga deni ngoalia hayago damene bibahende bo hilo wahai hene. Ani bialu Beniyamini hameigini tinaga tano wiago damene bibahende bo heda halu bo gialabagabu wahai haga bini.

## 21

### *Isaraealirume Beniyamini hameiginirunaga wali dabu bilo taya bia henego ogo*

<sup>1</sup> Isaraele wali agali hearu Misiba tanoha ngoai ho heangi tigua Anduane Homogohondo habo nalolene bi mbira hongo howa lowialu lalu, Inanaga wane bedaru aria mbira Beniyamini hameigini karu aria mbirame dabu bilo namimiya, lalu lowini.

<sup>2</sup> Ani lo howa wai biai halu Isaraele wali agali ti Bedele tano wiagoria puwa Ngode Datagaliwabenaga deni biralu alendo hene. Ani biralu ti bi laraga halu dugu bialu berene. <sup>3</sup> Ani biruwa tigua lalu, Anduane Homogo inanaga Ngode Datagaliwabe-ombirale o bidagoni irane aginaga tagira ibidabe. Ina hameigini mbira ibu damene lenego bibahende ereba hai holobadago irane aginagabe, lene.

<sup>4</sup> Ani lalu biruwa horo mendengi egerebagiore hayagola wali agalime lomabu delaga dabu mbira dindi ogoriani bu helene. Ani buwa tigua mbirale loma bialu irani dai helo bo delalu Anduane Homogola ho gimbu bulenenaga lomabi bo dela dege bini.

<sup>5</sup> Ani bialu howa tigua lalu, Ina Isaraele hameigini mbira Anduane Homogonaga deni naibuhe aidabe, lene. Tigua ani hale hayadagoni irane tigua ala habo nalolene bi mbira lo wialu, Hameigini mbira Anduane Homogonaga deni Misiba tanoni naibiyagua hameigini ogoni homelo bolene wulebira, lalu lowinigonaga ani hale hene.

<sup>6</sup> Ani lowa ti hameigini mbirago ereba hai hayadago lalu tinaga hameigini Beniyaminioire dara timbuni ho hene. <sup>7</sup> Anigo tigua lalu, Ai iname Beniyamini hameigini yu wahene maru karunaga wali agua taya bia hamiyadabe. Iname inane wane bedaru Beniyamini aria karume dabu bilo namimiya lalu Anduane Homogohondo habo nalolene bi hongohe lo wirimagodago ai agua buledabe, lene.

<sup>8</sup> Ani lowiyago manda buwa tini dege dege hale haga haga bialu lalu, Inanaga hameigini kamaru aria mbirali Misiba tano ngagoria Anduane Homogonaga deni ngoai nahe ai kabe, lene. Ani lowa tigua dabo handalu hemiria Gileada dindi wiagohayagi Yabese tanoha howa mbirali naibiyago manda bini. <sup>9</sup> Ani manda bialu ti mo ngoaiho henedangi Isaraele hameigini mbira ago ibu naibidabe hondolenaga mini olaga bini. Ogoningi Gileada dindini Yabese tano wiagoha howa mbirali dege naibiyane hendenego manda bini.

<sup>10-11</sup> Ani manda bu dai bialu agali ngoaiho hayadago tigua ami agali hongoheru daosini homberia (12,000) Yabese tanoha pudaba lene. Ani pudaba lowa tigua bi hongohe mbira agali urunihondo lamialu lalu, Tigua Yabese tanoha pialu agali bibahende bi wali agali one bedarubi waneigini bu karubi bibahende bo wahai halu wandari mabuage dege berelalimu, lene. <sup>12</sup> Agali biaru tigua puwa ogonidagua biyagola wandari mabuage agalila nahene ti handari maria (400) berearia hendene. Ani berearia agali biaru tigua wandari uruni bibahende Kenana dindiha Silo tanoni tininaga balai anda bu hayagoria haru dai bini.

<sup>13</sup> Ani buwa Isaraealeali biaru tigua Beniyamini hameigini ti wali agali nahaga wiagoha egeanda mbira mini Limono heagoha bira do hayago ibalimu lalu bi lawia hene. Tigua lalu, Iname ti baba wai bua nahe kamago ibalimu, lene. <sup>14</sup> Anidagua laya handala Beniyamini hameigini biaru ti bira do hayago wahalu dai bini. Dai biyagola

Isaraeleali biarume wandari mabuage haru íbu berelayaru Beniyamini hameigini biaru ti dabu bilo mini. Wandari uruni ti Gileada dindi Yabese tano wiagoha wai biyagola yu wahene berearu haru íbu berelenego uruni mini. Ani miyagola wandari ndia halu agali dewaore hene.

<sup>15</sup> Isaraeleali maru hearume mitangibu handalu hearia Anduane Homogohanda tinaga hamene mbira waratagi hayada manda bialu tigua Beniyamini hameigini dara hene. <sup>16</sup> Ani biyagola Isaraeleali agali haguane hearume lalu, Ai Beniyamini hameigini tini daluha wali dabu bulene naberedago agali maru karu tinaga wali agua taya bimiyadabe. <sup>17</sup> Ina Isaraele hameigini aria mbirago ereba holigo ai tinaga hameigini biba halu ereba nahelonaga ti wali dabu bulene nga. <sup>18</sup> Anigo agali urunime ina wane bedaru mbira dabu bulene nakarulapeore. Iname ala Anduane Homogohondo habo nalolene bi mbira lowialu, Agali ina kamaru aria mbirago ibu wane Beniyamini hameigini karume dabu bilo miyagua nde agali wandari abadago ibuha mo ko holene wulebira, lalu lo wirimagoni, lene.

<sup>19</sup> Anidagua lowa agali haguane biaru tigua lalu, Anduane Homogo mitangi bulenenaga tomo dawalu nolene horo mali mbira poragola biagago horo ogoni tagira ibulene kaware hapara haragoni. Ai tomo ogoni dawa nalu holene Silo tano ngagoria tagira ibulebira, lene. Silo tano ogoni Bedele tano wiagonaga abene uyurayagi wialu dindi abene unurahayagi Lebona tano wiago kawareni wini. Ani bialu Segeme tano Bedele tanola wiago dombeneha hariga timbuni bolangua heagonaga abene ni tagira ibiragohayagi wini. <sup>20</sup> Ani winigo agali haguane biaru tigua Beniyamini hameigini biaruhondo lamialu lalu, Ai tí puwa gerebi mabu ngagoha bira do howa hondo halimu. <sup>21</sup> Tomo timbuni dawa nolene tu haragola Silo tanoha wandari bedaru iba gana lalu mali lule tagira ibulebira. Ibiragola tigua abale porabu tagi halu wandari mbira mbira tí dabu bule minu yalu tini daluha haru halu puabo halimu. <sup>22</sup> Ani bidamigola wandari aba mbalinirume, Nakarulape beremi, lalu bi layagua nde iname tihondo ladai bialu, Iname wai timbuni birimagome biyagola tigua ina wane bedaru dabu bulene nawi hayagola biyadago, lolomaya. Ainde Beniyamini hameigini uruni dara halu wahadaba. Heneneore tinaga wandari bedaru tigua dabu biyadagonigo ai tigua henemane mero lalu mia ndo tinime minu yalu piyagome habo nalolene bi lowirimago pugua ndo birimigo wahadaba, loleberemago ani bilimu, lene.

<sup>23</sup> Ani layagola Beniyamini hameigini biaru tigua agali haguane biarume layadagua bialu wandari iba gana lalu mali lule ibiyaruni ti taho minu yai halu tini dalu pene. Tini daluha dai buwa tano bo gialabaga bini biago lone bia aribia halu hene. <sup>24</sup> Ani binidangi Isaraeleali biaru tibi nde tini one waneiginirubi tinaga damene hearu Isaraele dindi bibahendehe howa ibinidagua dai bigibigi bini.

<sup>25</sup> Horo uruningi Isaraele wali agalinaga kini mbira nahe howa tigua tinime hame ledagoale bigibigi bialu haga hene.✧

## Ludi

### Mbuga ogoha gilibu ngarunaga nemandi ogo

Ludi ibu Moaba wali biruwa agali Isaraeleali pene. Ibunaga agalini biago homayagola Ludihanda ibu aruni biago wahalu polene wini aleni nape biraho wini. Ani bialu Anduane Homogo Isaraelealinaga Ngode Datagaliwabehondobi mini mbiraore wini. Mani ibugua ibu agalini homayago damene mbira baba puwa Isaraelealinaga handame haga kini hongohe Debidi heneyagonaga aguanene berene.

Isaraeleali Haguane Heneru mbugani Isaraele wali agalime Ngode Datagaliwabe erembira miyagola ko timbuni ti hegoria ibilene. Ludinaga mbugani wali haluni mbira ibu Isaraelenaga Ngode Datagaliwabehondo mini mbiraore wiyagola Ngode Datagaliwabe ibugua Isaraele wali agali hea aria helene.

#### **Bulu бага бува кuni gilibu ngago**

*1.1-22*

Naiomi ibugua Ludila haru Bedeleheme dai bini. *2.1-3.18*

Ludi ibu Boasa lola hene. *4.1-22*

Boasa ibugua Ludi dabu bini.

#### *Elimelege ibu onebi igini kirabi Moaba penego ogo*

<sup>1</sup> Isaraele wali agali handame haga kini nahe howa haguane henerume handaya ho heangi Yuda dindi ogoriani gaea timbuni bialu tomo gari timbuniore pene. Ani biyagola Yuda dindiha Bedeleheme tanoni agali mbira heneyagome ibu onebi igini kira heneyagobi ibuni heba dindi mendehayagi mali maruni hole manda buwa pene. Dindi o penedagoni mini Moaba. <sup>2</sup> Agali o penedagoni ibu mini Elimelege ibu one Naiomi berene. Libu igini biago labo mini Malono Kilionola hene. Tinaga hameigini Eberadali Bedelehemeha hene. Moaba dindi ogoniha pu hearia <sup>3</sup> Elimelege ibu one wali dalo berelalu igini biago labo hangu helalu homene. <sup>4</sup> Igin biago labome Moaba wali kira dabu bini. Wandari ogoni labo mini Oba Ludila. Ani dabu bu hearia mali pira agima pene. <sup>5</sup> Peagola Malono Kilionola kirabali homene. Homayagola Naiomi o biagoria ibu agalinibi iginibi nahe ibuni hangu berene.

#### *Naiomi piyadagua Ludi ibubi talima Bedeleheme dai binigo ogo*

<sup>6</sup> Naiomi ibuni Moaba dindi biruwa hale halu berearia Anduane Homogohanda ibunaga wali agali mo turu halu gaea timbuni ala binigo mo bereba halu tomo bayale bu payabu nga layane hale hene. Ani hale howa ibugua ibunaga aruni kira biago labo haru halu Moaba wahalu pole manda manda bini. <sup>7</sup> Yuda dindi dai bule tini haru mandagi tagira pialu pole pene. Pu puwani dege hariga obeneni howa <sup>8</sup> Naiomihanda ibunaga aruni biago labohondo lalu, Libu aiya baba birule andaga dai bidaba. Libugua ihondobi homayaruhondobi mana bayale biribigodagua Anduane Homogo ibuguabi bayale libuhondo bulebira. <sup>9</sup> Ani bialu agali mende andaga pilibulobi Anduane Homogo ibugua bayale haru helo laro, lene.

Ani lame halu Naiomihanda kirabali yu nunu lalu, Hondo halibu, lene. Ani layagoyu wandari biago labome dugu bialu howa <sup>10</sup> Naiomihondo hongo howa lalu, Dai nabuleberaba iya í hameigini karia í poredagua maliya, lene.

<sup>11</sup> Ani layagola Naiomi ibugua ladai bialu lalu, I wane labo libuguaore andaga dai bilibulo hame ledó. I heba agimo maliya. Libu dabu bilo waneiginibi hono wibehedane hendedabibe. <sup>12</sup> Beregedalu andaga dai bidaba. Agali pobebi nahe waheore bedogodago ani buwabi agali polene ngalo manda buwa áyu mbiraga dege agali puwabi igiri kira taba hanaruyaguabi <sup>13</sup> libugua igiri kira ogoni labome anda halu libu dabu bilo lowa biruleberabibe. Ani bialubi agali mende polene ngago mo hole nabiaruabe.

I wane labo-o nabibeheore o ngago hendedabini. Anduane Homogohanda i erembira ngiyago libuhondobi o biyagonaga daraore timbuni harogo, lene.

<sup>14</sup> Ogonidagua layago hale howa libugua dugu halu mende bini. Dugu bialu howa Obahanda ibu aruni biago yu nunu lalu pamibe lame halu ibuni dindi andaga dai bini. Ludihanda ibu aruni yani halu, Nadaibuleore, lene. <sup>15</sup> Ani layagola Naiomihanda ibuhondo lalu, I hagalene biago ibu ibuni hameiginibi ti mamalirunaga damabi karia dai biyago inabi andaga o piyadagua dai bia, lene.

<sup>16</sup> Ani layagola Ludi ibugua ladai bialu lalu, Ina i wahalu dai bia nalabe. I ila mba la. I poredagua i polebero. I biraregoria i birulebero. Inaga hameigini haruagoni inaga hameigini holebira. Inaga Ngode Datagaliwabebi inaga Ngode Datagaliwabe holebira.

✧ <sup>17</sup> I homaregoria i homolebero. Homarogoria hora helo. Homame hangu iya mo hangu hangu holebira. Inaga hameme pubagi haruyagua Anduane Homogo ibunaga lembo holene hongheore ngagome i belo, lene.

<sup>18</sup> Ani layagola Naiomi ibugua handalu hearia Ludi ibula mbaliya lowa hongoore hayago hondowa bi nale wahene.

<sup>19</sup> Ani bialu wali biago labome pialu Bedelehemeni anda pene. Anda piyagola Bedeleheme wali agali bu hearume iae lo hondo ngoai hene. Hondo ngoai howa walirume lalu, Ogoni wali Naiomi biagoni ogonibe, lalu hale hene.

<sup>20</sup> Ani layagola Naiomi ibugua ladai bialu lalu, I mini Naiomi naladababe. I mini Mara oladaba. Anduane Homogo bibahendenaga hongo haihe kagome ihondo kaubi dewa bialu inibi mo kaubia haya.\* <sup>21</sup> I oali howa pirungi homogo wali pirugo ayu Anduane Homogohanda o biaru mbiraore nayi yagibano bameore haru dai biya. Anduane Homogo bibahendenaga hongo haihe kagome genda ogonibi ngiyagodago i mini Naiomi irane aginaga ololebe, lene.

<sup>22</sup> Naiomi ibu aruni Moaba wali Ludi libu haru Moaba dindi howa dai binigo te ogoni. Libu Bedeleheme anda ibiyangi ladi ale mini bali ala hengeneyago tenialu gandu lalu heariaore anda ibini.

## 2

### *Ludi ibu Boasanaga mabuni biabe bialu henego ogo*

<sup>1</sup> Agali homogo mini lene mbira ibu mini Boasa Naiomi ibu manda bini heneya. Boasala Naiomi agalini Elimelege homayagola libu hameigini mbiraoreha howa hamenela ale hene. <sup>2</sup> Horo mbirungi Ludihanda Naiomihondo lalu, Ina ladi ale mini bali mabuni puwa bali gandu lagame gandu lalu biabe biragoria gandulo ibira ibira bu ngaru ilule porogo. Mbiralime ibunaga erembira mbira ilama ibabe lolene holebirago lo manda bidogo, lene.\*

Ani layagola Naiomi ibugua ladai bialu lalu, I wane-o ina ani bia, lene.

<sup>3</sup> Ani laya handala Ludi ibugua puwa biabe biaga biaru erembira mbira bali lini ibira ibira bu wiaru mo yama pene. Bali mabu o wiyadagoni Elimelege damene Boasanaga winiya.

<sup>4</sup> Emene howa Boasa ibuni Bedeleheme howa anda ibini. Ibugua anda ibalu howa biabe bialu hearuhondo lalu, Anduane Homogo ibu ti heba helo, lene.

Ani layagola biabe biaga agali biaru tigua ladai bialu lalu, Anduane Homogohanda ibi biamogo bilo, lene.

<sup>5</sup> Boasa ibunaga biabe haru haga heneyagohondo hale halu howa lalu, Wandari nai kagoni aibe, lene.

✧ **1:16:** Lud 2.11-12, 2 Kin 2.2-6 \* **1:20:** Naiomi inanaga bi lalu Turume. Mara inanaga bi lalu Kaume. ✧ **2:2:** LBM 19.9-10, Man 24.19



<sup>6</sup> Ani layagola biabe haru haga biago ibugua ladai bialu lalu, Wandari ogoni Moaba dindi howa Naiomila oali ibiniya, lene. <sup>7</sup> Ibugua ihondo hale halu, Biabe biaga agali uruni erembira mbira bali lini ibira ibira bu ngaru mima ibuabe, laya. Ibugua egerebagiore howa biabe biaabo howa ayu ogoni ibu ira andaneha nai halo bedagoni, lene.

<sup>8</sup> Ani layagola Boasa ibugua Ludi bereagoria puwa lalu, Wandari-o mabu maruha puai nai buleni. Wali ogoria biabe biagaru baba bali ogoniha ilabe. <sup>9</sup> Agali tigua biabe agoria birabe hondowa waliru heba mandagiore biabe bima hama ibaga bibe. Agali ogoria karuhondo ihondo ko mbira bulemeni ledogo. Iba noa biyagua iba tigua hambu wulebirago nabe, lene. <sup>10</sup> Boasahanda ogonibi layagola Ludi ibugua ibunaga wanakui dindiha bulu paluwa Boasahondo lalu, Ina ihondo mana bayale o berego irane aginaga berebe. Ina urunidaguabi mbira biahabe nahe dindi kaundiaore wali birarugo, lene.

<sup>11</sup> Ani layagola Boasa ibugua ladai bialu lalu, I agalini homayiyangi howa mana bayale i arunihondo biriyago hale haru. Ina i aiya ababi ini dindibi wahalu wali agali ini handabi mandabi heba nabiniru baba hole ibiriyago hale haru. <sup>12</sup> Mana bayale biriyagobi Anduane Homogohanda ihondobi ogonidagua dege bilo. Anduane Homogo ibu hearia hado hole ibiridagonaga emena timbuniore ngilo, lene.

<sup>13</sup> Ludi ibugua ladai bialu lalu, Agali timbuni-o inaga biabe biaga bedaru baba ogobi dege dege ndo birarugo ina bi bayale ila larigome i mo hongo hari. Ani bialu ina mana bayale ihondo bere, lene.

<sup>14</sup> Tomo nolene tu hayagola Boasahanda Ludihondo lalu, Mberedi o ngaru maru gerebi lini ibane howa nole ogoria birule ibu, lene. Ani layagola Ludi ibu biabe biaga biaru baba bereagola Boasa ibugua bali lini hiriniyaru aria maru nelo mo mini.

Miyagola Ludi ibugua ibuni tombe karulape nene. Nalu karula piyadagua maru ibira howa ngelene. <sup>15</sup> Ludi ibuni tomo biaru name halu bali lini ilala hayaru ilule pene. Peagola Boasahanda ibunaga igiri biaruhondo lamialu lalu, Ludi ibugua erembira mbira hangu ndo tigua gandu lo ngamigo maru mima ibulebirago tigua agua berebe lalubi mbira lolemini. <sup>16</sup> Huba bu weramigoria maru ibu mo yilo bame gandulo ngelalimu. Mbiralime ibuhondo bi hongophe mbira lolemini, lene.

<sup>17</sup> Ludi ibugua biabe bialu heaore dege alendo hene. Alendo hayagola gandulo winiyaru hengedo yabu lagayadagua yabu lalu hearia nu mbira agima genda magi pira (10) kiloyane hendene. <sup>18</sup> Ibugua o biyadaruni bu hanalu andaga dai buwa ibu aruni biago berearia walia hene. Tomo horombe no ibira howa hanayarubi mini. <sup>19</sup> Ogonidagua biyagola Naiomihanda Ludihondo hale halu howa lalu, Bali mabu arahayagi ilaribe. Bali ai mabuhayagi biabe biribe. Agali o ihondo bayale biyadagohondo Ngode Datagaliwabe ibuguabi ibunaga mo turu holeneme mo turu helo laro, lene.

Ani layagola Ludi ibugua, Agali mbira mini Boasa heneyagonaga bali mabuni biabe bialu haru, lene.

<sup>20</sup> Ludi ibugua anidagua lamiyagola Naiomihanda lalu, Homayaru bababi karu bababi bulebero lo winigo habo nalaga Anduane Homogo kagome Boasa ibu nde mo turu helo laro, lene. Ibugua la dege bialu lalu, Boasa ibu iya hameiginiore kago iya hondo holene mana winigo bulene ibunaga nga, lene.\*

<sup>21</sup> Ani layagola Ludi ibugua lalu, O biyadarunibi buwa dege i ibunaga biabe biaga biaru baba mandagi bali lini biaru ilumogo bialu howa ti biai halu poradagua i nde ilimaro bialu pobe laya, lene.

<sup>22</sup> Naiomi ibugua Ludihondo lalu, Wane-o o layadadaguaore Boasa ibunaga biabe biaga wali karu baba mandagi ibunaga bali mabuni biabe bialu habe. Menddealinaga bali mabuha pogolamu keria i mo ko holene tene wulebira, lene. <sup>23</sup> Ludi ibugua Boasanaga biabe biaga biaru baba bali gandulalu lini ilmu bialu hayadagua halu biai

halu piyadagua ilimaro bialu pene. Anda paluennenaga ibuni aruni biagola palu ha ho wini.

### 3

#### *Ludi ibu agali penego ogo*

<sup>1</sup> Horo mbiru hayagola Naiomi ibugua Ludihondo lalu, Dindini bayuwa walime agali heba biragadagua birabelo agali mbira tai bulene horo hayada. <sup>2</sup> Agali Boasa biago ibunaga bali mabuni ibunaga biabe biaga waliru baba biabe bialu harigo agali o biago inanaga damenego manda bideni. Ina bi mbira languleberogo bayuwa hale habe, lene. Ayu mbiraga haragola ibuni bali iraneru lini hondo ibira ibira bilo bo taulalu holebirago <sup>3</sup> ini tingini wayawaya babe. Wayawaya bowa weli ngabi hai habe. Ani buwa aga debenebi bayuwa bibe. Ani bialu bal iraneru lini hondo ibira ibira bilo bo taulalu kagoha puwa í kalo manda nabilo ha do howa habe. Ibugua biai howa hina ibaru nelu henge mu habe. <sup>4</sup> Nai halu palirago agoha yagidabe bayuwa handabe. Ibu padagoha puwa ibunaga balangiya geha yagi miale howa ogoniha palibe. Ani beregolaibunime au bibe lalu mani langulebirago, lene.

<sup>5</sup> Ludi ibugua ladai bialu lalu, Ina laregodaguaore biagua, lene.

<sup>6</sup> Ani lowa Ludi ibu arunime bibe layadagua biai halu bali bo taulalu hearia pene. <sup>7</sup> Boasa ibugua hina ibaru nayagola howa hongo halu dungu lene. Hongo halu dungu leagola bali halu hengedo wiaru yaai nai buwa palene. Ani biagola Ludi ibu hendeore ge hogorale bialu puwa Boasanaga balangiya yi heago miale howa paleagoha hendeore gehayagi palene. <sup>8</sup> Mbi hanuni agima Boasa palu beregedalu howa handalu hearia waliore ibu geha yagi íbu paleneyane mogolo hendene. <sup>9</sup> Hondowa ibugua hale halu lalu, O padago aibe, lene.

Ani hale hayagola Ludi ibugua ladai bialu lalu, Inaga biabe bia haga í Ludi padogoni. Inaga dameneru hondo haga í kegonigo í dabu bibelo hame ledó, lene.

<sup>10</sup> Ani layagola Boasa ibugua lalu, Anduane Homogo ibugua í mo turuore helo. Ina í arunihondo birigobi ndo áyu ihondo ina mana debeneore bulene manda birida. Homogoyaguabi yagibanoyaguabi igiri ale hondolene waharida. <sup>11</sup> Ludi-o í mini dege dindi holeni. Bibahende ogoria karume íore wali bayaore ledago. Ina ina bia laregoore biai holebero. <sup>12</sup> Ina í damene hondo holeneha kogonigo agali mbira í handaya ho holene mbira kago ogonihondo henge ala mibehego<sup>☆</sup> <sup>13</sup> áyu mbiraga eberegoniha palibe. Egerebagi haragola damene biagome bulene ngadagua bero larabe be au larabe hondoliya. Ibugua í hondo holiya layagua nde baya gibiore lelebira. Nabule layagua nde Anduane Homogonaga minini howa larogo dameneme hondo holene mana ngadagua bulene inaga ngago bulebero. Ayu ogoniha gao lelo palibe, lene.

<sup>14</sup> Ani layagola Ludi ibugua Boasanaga ge wiagohayagi palenego egerebagiore Boasahanda layadagua wali agalime de nahendelo manda buwa ohalu abale heyabe layadagua abale pole heyini. Boasa ibugua wali agalime Ludi ibu paleagoha íbu palialu piyadalo manda nabilo ani lene. <sup>15</sup> Heyayagola Boasa ibugua lalu, Ina aga ogoriani dungu ha. Ludi ibugua ani biyagola Boasahanda bali lini biaru nu kira (20) kilo agima ale mo ya hene. Ludi henelo ibugua mo yaraga haya handala hanalu Bedeleheme tano dai bini. <sup>16</sup> Dai biyagola ibu aruni Naiomi ibugua, I wane-o, lowa, Bia agua biyabe, lalu hale hene.

Ani layagola Ludi ibugua Boasahanda layarubi biyarubi bibahende lamiai hene. <sup>17</sup> Ibugua lamaro bialu lalu, Boasa ibugua í bederia bame gi walambo nadaibi lole lowa bali lini hilu hombedo ngiyadaruni, lene.

☆ 3:12: Lud 2.20

<sup>18</sup> Naiomi ibugua Ludihondo lalu, Ai mini dege dindi nahe ema nabi hendeore birabe. O biragoni bialu au biatagi harabe hondole. Boasa ibugua mo tiga au bibehedabe hondole hariga hai bialu hangu kane.

Hariga mbira handa walia haradagua ibu haḷo holebira, lene.

## 4

### *Boasa ibugua Ludi dabu binigo ogo*

<sup>1</sup> Wali agali mo ngoai howa te laga Bedeleheme anda pugu bulene harabani winiyago Boasa ibu o biagoriani pu berene. Pu berearia Elimelege damene dege ala Boasahanda mana lo winidago buleneibunaga nga lalu agali ka layago ibini. Ibiyagola Boasa ibugua ibu olowa lalu, Hambi-o ogoria birule ibu, lene. Ani layagola agali biago ibu ibuwa berene. <sup>2</sup> Ani bereagola Boasa ibugua dindi ogoriani agali haru haga pirali hearu hondowa ibu biradaba, lene. Ti ibu bereagola <sup>3</sup> Boasa ibugua agali ibu damene biagohondo lalu, Naiomi Moaba dindi howa dai buwa iya damene Elimelegenaga dindi biago yolo mialu nolene manda birago <sup>4</sup> i manda bibelo langibeheyane langero, lene. Ani lowa, Ina mulene manda bideyagua agali haru haga pirali o bedaru deni howa mia. Namuleyagua namule la. Elimelegenaga paluni mulene ala i harigoni i howa i harugoni, lene.

Ani layagola agali biagome lalu, Ina dindi ogoni ibu yolo bialu i muliya, lene.

<sup>5</sup> Ani layagola Boasa ibugua lalu, Dindi ogoni Naiomihondo ina yolo biriyagua nde Ludi Moaba wali dalo biago dabu bulenebi inaga nga. Ani buwa dindi i meregoni agali homayagonaga minini wia ho wiaabo helo, lene.

<sup>6</sup> Ogonibi layagola agali biago ibugua lalu, Ogonidagua bulene ngayagua ina mibeheme waharo. Ina miruyagua mani i waneiginime karu lolene tinaga ndo wulebirago i namulebero, lene.

<sup>7</sup> Horo uruningi Isaraele wali agali tinaga maname mbirale mbira mbiralinaga yolo buleyaguabi mbirale mbira ariari buleyaguabi walia agua haga wini. Yolo mo nole kago ibugua ge su golo muwa yolo biaga kagohondo yade haga. Ogonidagua bidagola maname mbirale biagoni yolo biyago ibunaga lolebira.\*

<sup>8</sup> Anigo agali biago ibugua Boasahondo lalu, I yolo bialu mia, lowa lame halu ibunaga ge su golowa Boasahondo mini. <sup>9</sup> Ani biyagola Boasahanda agali haru haga pirali biarubi agali maru hondo ibu berearuhondobi lamialu lalu, O bedamiru ti bibahendenaga deni handai hene yolo berogoni. Naiomi ibugua Elimelegenaga dindibi mbirale wiyadarubi igini kira biago labo Kiliono Malonolanaga mbirale wiyadaruni heba ina miai harogoni. <sup>10</sup> Ani bialu Moaba wali Ludi ibu Malono homayagonaga one dalo biagobi i one bu hinarogoni. Ani berogome dindibi walibi waneiginibi Malono ibuninaga minini wia ho wiaabo helo lalu ayu merogoni. Agali bedamiru ti de hendedamigoni, lene.

<sup>11</sup> Ani biyagola agali haru haga pirali biarubi agali maru dehondo ibu hearubi tigua lalu, E ina bibahendeme handarimagoni. Anduane Homogo ibugua wali o ibiragoni waneigini dewa hono wiaga Yaigaba one Laiselola Liala ale berelelo. I Eberada hameigini homogo howa Bedelehemeni wali agali karume i manda biaiheore habelo. \* <sup>12</sup> Anduane Homogo ibugua wandari ogoniha waneigini ngiragome Yuda Tamalame hono wini inanaga aguanene Perese ale helo, lene.\*

### *Boasabi ibu aguanenebi henego ogo*

<sup>13</sup> Horo odangi howa Ludi ibu Boasa onene berene. Berearia Anduane Homogo ibugua Ludi mo turu halu igiri gali mbira mini. <sup>14</sup> Wali berearume Naiomihondo lalu, Anduane Homogonaga mini yaraga hama, lowa lalu, Ibugua i hangu berelo wanahe

\* 4:7: Man 25.9    \* 4:11: Pig 29.31    \* 4:12: Pig 38.27-30

aguane mbira í hondo helo ngiyada. Igiri ogoni ibunaga mini Isaraele wali agalime embeda nahe manda bia ho wiaabo helo. <sup>15</sup> Í aruni biagome íore gubalini howa karia hamenemame bulenedagua ndo ibugua dewaore bu bolangua hayada. Í wahe bederia hongo ngilobi mamage helobi ibugua igiri aguane ogoni ngiyada, lene. <sup>16</sup> Naiomi ibugua igiri gali biago yamuwa ibuni buha yuhubi lene. Ani bialu ibugua gali biagoni ibuni hondo haabo hene.

<sup>17</sup> Wali kaware berearume igiri biagoni mini Obede wini. Ani wuwa tigua loyogo lalu, Naiominaga igini mbira hono miyada, lene.

Mani Obede ibugua Yasi hono wini. Yasi ibu Debidi aba hene.

<sup>18-22</sup> Debidi ibu aguanene Perese howa ibuni ibule ibinidagua malu ogo. Tinaga aguanene Perese. Perese ibu igini Heserono. Heserono ibu igini Lama. Lama ibu igini Aminadaba. Aminadaba ibu igini Nasono. Nasono ibu igini Salamono. Salamono ibu igini Boasa. Boasa ibu igini Obede. Obede ibu igini Yasi. Yasi ibu igini Debidi uruni hama ibini.

## 1 Samuele

### Mbuga ogoha gilibu ngarunaga nemandi ogo

Ala agali Haguane Henerume binigo te gilibu wini ngago howa lama ibalu Samuele mbuga ogoniha Isaraele wali agalinaga kini pigane dabo helene te gilibu nga. Agali tebira henerume bialu henegonaga uruni.

Mbira

Samuele ibu haguane howa bialu henego.

Mende

Solo ibu Isaraele wali agalinaga kini pigane dabo helene.

Tebone

Debidi ibu kini nahe heangi binigobi te gilibu nga.

Mbuga ogoniha galone bi dewa gilibu ngaru duniniore mbiraore ogo. Ngode Datagaliwabehondo mini mbiraore wialu ibu andaneha haabo haga karume bayale holene yu anda ibulebira. Ngode Datagaliwabehondo erembira mialu karume ko holene yu anda ibulebira. Ngode Datagaliwabenaga bi latagi haga mbiralime Elihondo bi laminigo ogo. Anduane Homogo Isaraele wali agalinaga Ngode Datagaliwabehanda lalu, Ina marume inaga mini mo yaraga hararuhondo tinaga mini mo yaraga halu marume inaga mini mo dindiha hararuhondo tinaga mini nde mo dindiha helolebero, lene. Be 2.30 handabe.

Te ogo gilibu ngagome howa Isaraele wali agalime ti kini helolene ngabe be nawibe mitangi kira bini. Ngode Datagaliwabe ibu Isaraelenaga Kini henene ka. Anigo Isaraele wali agali tinime hame lowa mbirali kini helo harugo heloleberema layagola Ngode Datagaliwabehanda tini aria mbirago dabene. (Be 8.6-8) Ani anigo ina bibahendenaga Handame Haga Kini Anduane Homogo ibuni hangu kagoni.

#### **Bulu бага бува кuni gilibu ngago (1.1-7.17)**

Samuele Isaraele wali agalinaga haguane hene 8.1-10.27

Solo ibu kini helo dabo helene 11.1-15.35

Solo ibu kini howa mali pigane tehinalu bialu hene 16.1-30.31

Debidibi Solobi bialu henego te 31.1-13

Solo ibubi ibu iginirubi wai bialu homene

#### *Eleganabi ibu one waneiginibi Silo dindini henego ogo*

<sup>1</sup> Agali mbira mini Elegana ibu Eberaimi hameigini heago aria Lama tano mbira Eberaimi dindi hari bare wiagoriani hene. Ibu Yarohama igini howa Elihu aguane halu agali mini Tohu henego ibu aria hameigini emene laga bialu Subu aria hene. <sup>2</sup> Elegana ibu onene kira Hana Peninala berene. Penina ibu waneigini honowi bereagola Hana ibu nahonowi berene. <sup>3</sup> Mali mbira mbirani Elegana ibu Lama tano howa Anduane Homogo Hongo Haiheore kagohondo mbirale bo loma biaho miaga Silo dindi dunini wiagoria pene. Ogoriani Eli igini kira Piniasa Hobinila Anduane Homogonaga loma binigo mo miaga hene. <sup>4</sup> Horo bibahendeni Elegana ibugua mbirale bo loma biaho mialu howa mbirini maru podalu tale buwa Penina mialu ibu waneiginirubi hangu hangu podo tahalu miaga hene. <sup>5</sup> Ani bialu ibugua Hanaore ibunaga gubalini haga berenego ibuhondo nogo podalu emene kiralime nolenedagua hangu tale bialu miaga. Ogoni ibu Anduane Homogohanda ibu waneigini nahonowi henemane berelene. <sup>6</sup> Anigo Anduane Homogohanda Hana ibu waneigini hono wulene tombe payiyagola beda manda buwa Peninahanda Hana mo kebaha mo tagaha bigi biaga berene. <sup>7</sup> Ani bu bereane mali dewa pu ajaj bialu Anduane Homogonaga andaha poramingi Peninahanda Hana mo keba haabo haragola Hanahanda dugu biaabo halu tomo kau howa nane biraga. <sup>8</sup> Ani bereagola ibu agalini Eleganahanda Hanahondo lalu, Ina dugu mbira berego ne



tomo mende nane wahalu horo bibahendengi ina gendaho biraabo hariligo ogoni irane aginaga birilibe. Ina igiri pira hono ngele urunihondo gubalini ho bedelego dindiha lowa ihondo gubalini ho bamba ho bede lo manda bido, lene.

### *Hanala Elila bi lenego ogo*

<sup>9-10</sup> Horo mbirungi tigua Anduane Homogonaga anda Siloni tomo ibabi naiho biruwa mani Hana ibu heyini. Heyuwa ibunaga bu habaneha genda timbuniore ho biruwa ibugua dugu gibiore bialu Anduane Homogohondo bi lene. Ani bialu heagola loma binigo mo miaga Eli ibu ibuni biragane Anduane Homogonaga anda panga harabani berene. <sup>11</sup> Ani biagola Hanahanda bi lahondo nahole lalu mbira lo wialu agua lene. Anduane Homogo Hongo Haiheore kego inaga biabe biahaga i handaya ha. Inaga genda ngoru handalu i embeda nahe mitangiore bibe. Ina igiri mbira ihondo ngiriyagua ina ihondo bi lahondo nahole lalu lo wirudagua igiri ogoni ihondo lomabia halu ibu inaga biabe biagaore helo ibunaga mandaribi podo tubagi naholeore, lalu lowini.\*

<sup>12</sup> Hanahanda Anduane Homogohondo bi ogonidagua lalu laho wiyagola Eli ibu ne hambuni handayaho wini. <sup>13</sup> Hana ibu minime ne hambu ema bialu bi ladaga nahe lalu berene. <sup>14</sup> Ani bialu heago Eli ibu hondowa ogoni lulu iba nowa lalu kabe toba howa ibuhondo lalu, Lulu iba no ko lalu ini walia halu kegoni nahe waha. Mani mini ibu howa lole daibule wahalu pu, lene.

<sup>15</sup> Ani layagola Hanahanda ladai bialu lalu, Agali haguane-o i lulu iba nowa ndo ko hendedeni. I lulu iba nalu hene ndo i wali inaga bu habaneha genda timbuni ho berenego Anduane Homogohondo haealo mialu ibula bi lalu haru. <sup>16</sup> Ina manda bialu keria i wali ko habane napaleme laralo manda bidebe. I mini burugu timbuni lo biruwa ina bi ogonidagua lalu berene bedogoni, lene.

<sup>17</sup> Ani layagola Elihanda lalu, Isaraele wali agalinaga Ngode Datagaliwabehanda ibuhondo ina hale harida ale ihondo ngulebirago ai turu hama pu, lene.

<sup>18</sup> Ani layagola Hanahanda ladai bialu lalu, Ina i horo bibahendengi dara halu mitangi bibe, lene. Ani lalu ibu pialu tomo nalu miniha gendaho birayaru ereba hai hayagola berene.

### *Samuele hono wialu lomabia henego ogo*

<sup>19</sup> Horo mendengi egerebagi hayagola Elegana ibu one waneigini heba heyini. Heyalu Anduane Homogo mo dunini halu lotu lalu mani tini andaga Lama dai bini. Dai buwa Elegana ibu one Hanala palu heagola Anduane Homogohanda Hanahanda bi layagoni hale halu bini. <sup>20</sup> O binidagoni Hana ibu wali gali tombeha bialu igiri mbira hono wini. Ibugua igiri ogoni mini Samuele wialu lalu, Mini ogoni irane ina Anduane Homogohondo hale halu ngi larugola ngini, lene.

<sup>21</sup> Elegana ibu one waneiginibi ti Anduane Homogohondo mali bibahendeni mbirale bo delolenebi mende lomabia halu galonengi mule lo wiyagobi mule lowa horo ogoni tagira ibiyagola Silo tano biagoria pene. <sup>22</sup> Ani binigo ogoningi Hana ibu ti heba nape berene. Ibu agalinihondo lamialu lalu, Igiri ogoni andu nope howa ai hina tomo nole manda biragola ina Anduane Homogo andagani haru halu porogola ibu ogoriani haho wilo, lene.

<sup>23</sup> Ani layagola Eleganahanda ladai buwa lalu, Ogoni karulapego ina bayale bule manda birida ale bule ibu anda helonaga andagani birabe. Ani bialu Anduane Homogohondo bi lahondo nahole lo wirigo henene lola helo, lene. Ani laya handala Hana ibu igini biago andu mialu andaga berene.

<sup>24</sup> Mani igiri biago andu no wahalu hina nabehe haya handala Hanahanda Silo tano biagoriani haru halu pene. Pialu howa nogo bulumaga wangabe tebira haru halu balawa mbege mbira genda magi kilogarama pira agima mo yalu waini iba be

\* 1:11: Dag 6.5

nogo meme dongeneme wabini mbira tolowa ya bigi bialu pene. Ibugua Samuele emene hungubalua ogonibi heaore Anduane Homogo andaga Silo tanoni haru halu pene. <sup>25</sup> Ani pu howa nogo bulumaga wangabe haru halu piyago mbira ala bene. Ani buwa mani igiri hungubalua biagoni Eli hearia haru halu pene. <sup>26</sup> Puwa Hanahanda ibuhondo lalu, Agali haguane o ka aibe. Ina i ogo kalo manda bu wiaabo kebe. I wali mbira ogoriani heyu howa Anduane Homogohondo bi lamialu hewaria handarigoni ibu kogoni. <sup>27</sup> Ina igiri ogoni ngi lalu ibuhondo hale harugola ibugua hale halu ihondo ngiyadagoni. <sup>28</sup> Ani biyagonaga ina áyu Anduane Homogo ibunihondo lomabia ho helole daibu kogoni. Ibu kangi howa Anduane Homogo ibunaga helo merogoni, lene. Ani lowa tigua Anduane Homogo mini mo dunini halu ogoriani lotu lalu hene.

## 2

### *Hanahanda Ngode Datagaliwabhondo turu howa bi lenego ogo*

- <sup>1</sup> Hanahanda Ngode Datagaliwabe mini yaraga halu agua lene.✧  
Anduane Homogohanda inaga bu habaneha turu holeneme tolai heledagome i turu taraore ho bedogo irane ibugua biyagome.  
Ngode Datagaliwabhanda i biamogo biyagonaga turu ogobiore ho ko lalu inaga waitigi karu hondowa i oba halu kogoni.
- <sup>2</sup> Mbirali ibu Anduane Homogo mini baya gibiore kagobi nahe ibu ale mbiraorebi naheore.  
Ngode Datagaliwabe inanaga tigi pabe bu haga kagobi mbira naheore.
- <sup>3</sup> Ogoni Anduane Homogo ibu Ngode Datagaliwabe howa ibu manda biaihe mbira kagoni.  
Ibugua wali agali karume birago damene bibahende dabo handai haga ka.  
Anigo mine howa hongo halu bi nalabe.  
Mine bi mbira i ne hariga howa tagira ibulani handabe.
- <sup>4</sup> Ami agali hongohe karunaga danda yidaru podene bame yu kagoyu hongo nahe karunaga hongo mo anda holebira.
- <sup>5</sup> Wali agali ala tomo nabe manga ho haabo hayarume áyu tomo nolenaga biabe bia halu ka.  
Wali agali maru tomo garibilo hayaru áyu karulape nelo Ngode Datagaliwabhanda biamogo bialu ka.  
Wali waneigini mbira nahonowi bereagome waneigini karia hono wiya.  
Waneigini dewa aiya berenego ibuni hangu berelo yu wahene beda holebira.
- <sup>6</sup> Anduane Homogohanda mbira bo homelowa mo dére hodai biaga ka.  
Ibugua wali agali homene karu dindi humbirini andaga pelowa ibuni lone haru dai biaga ka.
- <sup>7</sup> Ibugua wali agali maru mo yagibano halu maru mo homogo helaga ka.  
Maru mo dindiha halu maru mo yaraga howa daliga helaga ka.
- <sup>8</sup> Ibugua yagibano karu himuni ngaria mo yaraga haga.  
Wali agali buru pale mini burugulo karu mo heya haga ka.  
Ibugua o biaru kini karunaga igini heba mandagi helalu ti daliga ogobi dege dege helolebira.  
Dindi o kamarunaga tiaga holene Anduane Homogo ibuni kago ogoriani ibugua dindi bibahende wabu heleda.
- <sup>9</sup> Ibunaga wali agali mini bilinahe karunaga holene ibugua ho tigi pabe bidagola ka.  
Ko biaga karu arumaha pu ereba halu kagoni.

Agali mbira ibunaga hongo hangume mbirale mbira buwa wayali nahaga ka.

<sup>10</sup> Anduane Homogonaga waitigi karu mo koore halu gurabaga bi lalu tihondo keba ho ko lalu bi dahuliya andaga howa hari kulu lalu ladali holebira.

Anduane Homogohanda dindi bibahendeni karu tihondo ko birimida bayale birimida laga bialu dabo hondolebira.

Ibugua ibunaga kini kagohondo hongo mialu ibunaga kini ibuni dabene ogoni ibu mo wayali helolebira, lalu Hanahanda bi ogoni lene.

<sup>11</sup> Ai Elegana ibuni dindi Lama dai biya handala igiri Samuele ibu Silo dindini hondo halu ibugua loma binigo mo miaga agali Eli heagoria Anduane Homogonaga biabe bia halu hene.

*Eli igini habane nabulene maru henego ogo*

<sup>12</sup> Eli igini kira Piniasa Hobinila libu agali ko habane nabulene hene. Libugua Anduane Homogonaga bi hale halu bia nabiaga hene. <sup>13</sup> Ani bialu libugua loma binigo mo miagalirume wali agali bibahende karuhondo uru ale bilimu lalu lo ngaruni hale halu bia nabiaga. Ani biradagua loma binigo mo miaga agalirume tinaga mana biaga winidagua ndo libugua agali mbira ibunaga mbirale mbira bo lomabia howa delalu haga. Ani bialu karia loma binigo mo miaganaga biabe biahaga biago kanogo dene tebirahe yalu ibaga. <sup>14</sup> Ibuwa nogo tara bo delayagonaga mbirini wene dalu kaore dege ibugua kanogo biagome todobene biagoha nogoba ha dali haragola kanogoni dugubu yamirago o loma binigo mo miaga agali ibunaga laga wini. Isaraele wali agali bibahenderu Siloni mbirale bo lomabia halu delole ibiragola mana ko ogonidagua dege biaga hene. <sup>15</sup> Ani biaga henego mbirabi agua biaga. Nogo habane damenego podo dawale bialu karia loma binigo mo miaga agalinaga biabe biahaga biago ibaga. Ibuwa ibugua agali nogo podo delalu kagohondo lalu, Nogo mbirini maru loma binigo mo miaganaga hirilo podo ngidaba, laga. Loma binigo mo miaga ibu nogo mbirini todobeneha dawene meramigo nanolebirago gahenge hangu podo ngidaba, laga hene.

<sup>16</sup> Ani laragola agalime ladai bialu agua lalu, Iname tigabi bulene ngadagua bialu nogo habane uruni ala delama mani ini hame lededagua mo yule, layagua loma binigo mo miaganaga biabe biahaga biagome lalu, Ani ndo áyu ogoni ngi. Nangiriyagua inime gingilo muliya, laga.

<sup>17</sup> Eli igini biago labo libugua mana ko ogoni bialu hayagome Anduane Homogohondo nogo tara tara bo lomabia ho miaga wiaru mo nagalone bu hinalu Anduane Homogonaga deni kagua gibiore biaga hene.

*Samuele ibu Silo dindini henego ogo*

<sup>18</sup> Ani bialu heagola igiri emene Samuele ibu Anduane Homogonaga biabe biaho wialu ibu aga lomabia heneme biaga winigo karulo hene. <sup>19</sup> Mali bibahendeni ibu aiyahanda aga emene wabu hanalu ibu agalinila haru mali mbiranaga nogo bo lomabia ho mule piagane winidagua pialu howa ibuhondo aga gahenge yalu puwa miaga.

<sup>20</sup> Ani biagago Eli ibugua Eleganabi ibu onebi mo turu howa Eleganhondo lalu, Anduane Homogohanda igiri mbira ibuhondo loma biaho miribigonaga wali ogohondo waneigini maru aribia halu ngilo, laya. Ani laya handala libuni andaga dai bini. <sup>21</sup> Bi ani layagoni heneneore Anduane Homogohanda Hana biamogo biyagola ibugua igiri tebira wandari kira lowa taba henene. Igiri Samuele ibu Anduane Homogonaga biabe bialu bu anda hene.

*Elibi ibu igini kira biago labobi bialu henego ogo*

<sup>22</sup> Eli ibu ai waheore hene. Ibu igini biago labome Isaraelealiruhondo mana ko damene bibahende libugua bialu ka layaru ibu hale haiho hene. Ani bialu libugua

Anduane Homogonaga wanakuini wali maru Balai Anda harabani biabe bialu biraga berearu heba ho palu ka layarubi Eli ibu hale dege hene. <sup>23</sup> Ani layago hale howa Eli-handa ibu igini biago labohondo lalu, Libugua ko urunidagua bialu kabi layaruni irane aginagabe. Libugua ko ngubi ogobi bialu kabi lalu bibahende hearume i langiai hayago. <sup>24</sup> Ai inaga igini labo-o ogonidagua nabi waore halibu. Anduane Homogonaga wali agali bu karume libugua ogonidagua bialu kabigo ko ngubi ngaru bialu kabi lalu kagoni. <sup>25</sup> Agali mbirame agali mendehondo kagua mbira biyagua Ngode Datagaliwabehanda dombeni howa la holebiragoyu agalime Anduane Homogohondo kagua mbira biyagua dombeni howa aiwa la holebirabe, lene.

Anigo ogolabo libu Anduane Homogohanda bo wahole manda bu henegome libu abanaga bi hale howa nahalehe tingi hene.

<sup>26</sup> Libu ani bialu heatambu igiri Samuele ibu anda ho heagola Anduane Homogo ibugua bi wali agali hearumebi Samuelehanda bialu henego hondowa turu hai hene. ✧

*Anduane Homogonaga mana latagi haga heagome Eli damenenaga mbiwia ho henego ogo*

<sup>27</sup> Ngode Datagaliwabena bi mana latagi haga mbirame Anduane Homogonaga bi ogo yalu Eli hearia ibini. Ibuwa ibuhondo lalu, Ala bambaore inaga mamali Aronobi ibunaga damenerubi ti iyibi dindi kini heagonaga garabaya biabe ale bialu heagola i Anduane Homogo ini kogoni lalu Aronohondo mo walia harugoni. <sup>28</sup> Ani bialu Isaraele hameigini bibahende hearu helowa ina Arononaga dameneru tigua inaga loma binigo mo miaga helobi nogo tara tara inaga bo lomabu delolene dabuni biabe biaga helobi hagua ngabiaga inisenesi delolenaga helobi helene. Ani bialu aga tara mini ebodi loma bia heneme buwa ihondo bi langule howa bu erekunila dambi helo mani pongo bilobi ina ti dabo helene. Ani bialu ina tihondo dabuni bo loma bialu delene wiaru bibahende tale bialu ti mo yulene karulape lamiru.\* ✧ <sup>29</sup> Ani larugo lelowa inaga wali agalime nogo tara tara bo lomabia ho yalu ibaga ngarunaga i hangu timbuni noa ho ngegoni irane agibe. Eli ina inaga wali agali karume nogo tara tara bo lomabia halu ihondo delararunaga bayale damenego i igini kago labo libu no haba halu helowa ina ihondo mo galone hariligo emene lowa libugua biyago mo galone timbuni harigo irane agibe. <sup>30</sup> I Isaraele wali agalinaga Anduane Homogo Ngode Datagaliwabe kogoni howa ina bi mbira bamba Aronohanda buleore lalu agua lo wiru. Inaga dameneru tigua loma binigo mo miaga howa inaga biabe biaho wilo laru. Ani larugonigo ayu bi mende lo aribia haro ogo. Marume inaga mini mo yaraga hararuhondo tinaga mini mo yaraga halu marume inaga mini mo dindiha hararuhondo tinaga mini nde mo dindiha helolebero. <sup>31</sup> Ai hale hadaba. Inaga igini damene agali daliahe karu mbira haho wiaabo nahelo abale halu homelai holene horo biagoni ha para hayada. <sup>32</sup> Ani biyadago ina Isaraele wali agali maru karu mo turu halu ti mo bayale harogola inaga miniha henge lolene tagira ibulebira. Ani bialu inaga igini damene karu mbirago lone mani ho lu bu naholebiraore. <sup>33</sup> Anigo ina inaga aguanene karu mbirago hadai bilarogola ibugua inaga loma binigo mo miaga howa biabe bulene ngadagua bialu holebira. Ani bialu kagoyu ibunaga dengali bialu mbirale bibahende nahandabehe halu bidagola inaga aguanene maru karuni hiriribi homo yu lo waholebira. <sup>34</sup> Ani bialu inaga igini kira Piniasa Hobinila kirabali horo mbirani hangu homo palu birangi mbirale bibahende ina langirugoni damenego heneneore layida labelo walia halu ani bulebira. ✧ <sup>35</sup> Ani biragola ina inaga loma binigo mo miaga mbira ina larodagua bialu mini bilinahe helo dabarogola ibugua ina bilo hameledoru bibahende biai holebira. Ani bialu ina ibuhondo aguaneneru merogola tigua horo bibahendengi inaga kini dabene kagonaga wanakuini biabe bialu haabo helo. <sup>36</sup> Inaga aguanene homa nabi haho ngaru ti loma

✧ 2:26: Lg 2.52 \* 2:28: Aga mini ebodi Haru Tagira Penego 25.7 handabe. ✧ 2:28: Har 28.1-4, LBM 7.35-36

✧ 2:34: 1 Sml 4.11

binigo mo miaga ogoni karia puwa muni tomo nolenebi ngi lalu hale holene wulebira. Ani bialu loma binigo mo miaga karuhondo tomo nolenenaga biabe mbira ti biamogo bialu bulene ngabe lalu hale holene wulebira, lalu Anduane Homogo ibugua ibunaga bi mana latagi haga biagoha howa bi ogoni mbiwia hene.

### 3

#### *Anduane Homogohanda Samuelehondo bi lenego ogo*

<sup>1</sup> Horo uruningi igiri Samuele ibugua Eli andaneha howa Anduane Homogonaga biabe bialu heagola Anduane Homogonaga mana lamulenebi de gandeba ale hondolenebi emene ale wini. <sup>2</sup> Mbiraga mbirungi Eli ibunaga de au halu ngaliore biai holebiyagola ibuninaga tamu paliaganeha palene. <sup>3</sup> Samuele ibu Balai Anda tamu hobane Habo Nalolene Bi lo winigonaga Mbogoyi hangu mo wiaga wiagoha palene. Ani biaria egabi lole dege wene lamu hale daho wiagola <sup>4</sup> Anduane Homogohanda Samuele olene. Olayagola ibugua ladai bialu, Agali-o ya laro, lene. <sup>5</sup> Ani lowa ibu abale heyalu Eli palearia puwa lalu, *Ína ĭ olarigoni o íbu kogoni, lene.*

Ani layagola Elihanda ladai bialu lalu, *Ína í onalego palue dai bia, lene.* Ani laya handala Samuele ibu paliyagoha palue dai bini.

<sup>6-7</sup> Anduane Homogohanda Samuele lone halu mende olene. Igiri Samuele ibu Anduane Homogohanda olarada manda nabi henego irane ala ibuhondo bi halu mbira nalenegome ani bini. Ani buwa ibu heyalu Eli palearia puwa lalu, *Ína ĭ olarigoni o íbu kogoni, lene.*

Ani layagola Eli ibugua ladai bialu lalu, *I igini-o ina í onalego íni paliridagoha palue dai bia, lene.*

<sup>8</sup> Anduane Homogohanda Samuele lone halu tebone olene. Olaya handala heyalu Eli palearia puwa lalu, *Ína ĭ olarigoni o íbu kogoni, lene.*

Ani layagola Elihanda manda bialu hearia ogoni Anduane Homogohanda igiri Samueleore olayada manda bini. <sup>9</sup> Ani manda buwa ibugua Samuelehondo lalu, Palirigoha palue dai bia. Ani beregola ibugua *í* lone olayagua *ína* agua labe. Anduane Homogo-o *ínaga* biabe biahaga *ĭ* hale ho kogo bi langi labe, lene. Ani laya handala Samuele ibuni paliyagoha palue dai bini. <sup>10</sup> Ani biaria Anduane Homogo o biagoria ibuwa ibugua abale olayadagua, Samuele-o Samuele-o lalu, olene.

Ani olayagola Samuelehanda ladai bialu lalu, *Ínaga* biabe biahaga *ĭ* hale ho kogonigo bi langi, lene.

<sup>11</sup> Ani layagola Anduane Homogohanda ibuhondo lalu, Horo mbirungi *ina* mbirale mbira Isaraele wali agalihondo buleberogo ogoni hiriribiorego bibahendeme ogoni hale howa mogo lowa duru lolebira. <sup>12</sup> Horo ogoningsi *ina* Eli damenehondo bule lalu ala lo wirugoriani howa bibahende bialu bu maro bulebero. <sup>13</sup> *Ina* ibu dameneru ti pani miaho wule lalu Elihondo abale lamirugoni. Ogoni irane ibu igini biagolabo libugua *ĭ* mege bialu ko taraore *ihondo* biyago Eli ibu manda biai ho howa dege ibugua nabitababe lalu lamia nabiagome ani bulebero. <sup>14</sup> Ani buleberogo *ina* bi ogo honghe Eli damenehondo lalu mbirale *ihondo* ngiragomebi bo delararumebi ko ogoni biyaru nadomoleorebira lamirugoni, lalu lene.

<sup>15</sup> Olayadaruni Samuele ibu tamuha paliaho wiane dege egabi laya handala heyalu puwa Anduane Homogonaga anda panga duguini. Duguwa de gandeba handayago ogodagua handaru lalu Elihondo puwa lamulenebu gi hene. <sup>16</sup> Ani bu hearia Elihanda ibu olowa, *Inaga* igini Samuele-o, lene.

Ani layagola Samuelehanda ladai bialu, Agali-o ya ebero, lene.



<sup>17</sup> Ani ladai biyagola Elihanda hale halu lalu, Anduane Homogohanda ihondo bi agi langiyabe. O langiyadaruni mbira ihondo ya do nahabe. Ibugua ihondo langiyaru damene bibahendeore ihondo nalangiriyagua Ngode Datagaliwabehanda í pani gibiore ngulebira, lene. <sup>18</sup> Ani layagola Samuelehanda ibuhondo lamiyagoni mbira ibuni hangunaga ya do nahe bibahendeore lamiai hene. Ani biagola Elihanda lalu, Ibu Anduane Homogo kago ibunime bayale bulene ngaru bulebira, lene.

<sup>19</sup> Samuele ibu Anduane Homogola ho anda hadaga halu ibugua mbirale bibahende bulebira lalu lamiyaruni henene laya walia halu Anduane Homogohanda mo lola hai hene. <sup>20</sup> Ani biyago hondowa Isaraele wali agali dindi gimbuni mbirahayagi howabi mendehayagi howabi bibahende henedarume Samuele ibu Anduane Homogonaga mana latagi haga mbira ka manda biaiore ho hene. <sup>21</sup> Anduane Homogo ibu Silo dindini Samuele hearia ibu ala ho pani halu bi lamiyagoriani ibuni mo walia halu haabo hene. Samuelehanda bi mbira Isaraele wali agali lamiyagola ti bibahendeme hale hai hene.

## 4

### *Pilidialirume Habo Nalolene Bi lo winigonaga Mbogoyi mo yinigo ogo*

<sup>1</sup> Horo ogonongi Pilidialiru mo ngoai howa Isaraelealiru baba wai bima lele tidiyu ho manda bini. Ani biyago hondowa Isaraelialirume nde wai bima lalu wai hagira bini. Ani buwa Isaraelealiru ti Ebenese tanohayagi embera wiagoriani balai anda bu heagola Pilidiali ti nde Abege tanohayagi embera wiagoriani balai anda buwa hene. <sup>2</sup> Ani buwa Pilidiali ami agali aulolebe tobahe tidiyalu daba daba halu ibuwa Isaraelealiru baba wai bini. Wai gibiore bialu tigua Isaraeleali ami bo podalu agali daosini maria (4,000) agima wai hamani minalu bo homelai hene. <sup>3</sup> Maru yu wahene biaru unu ala balai anda buwa palirimigoria íbu dai bialu hemiria Isaraelealinaga haru haga biarume lalu, Áyu Anduane Homogohanda Pilidialime ina bo poda hana halu bai heledagoni irane agidabe. Ani biyadago áyu iname Anduane Homogonaga Habo Nalolene Bi lo winigonaga Mbogoyi uyu Siloni wiyago mo yalu ibamiya ma. Ani beremagola ibugua ina heba pialu inanaga waitigime bole bialu karia ibugua ina pele ngulebirago, lene. <sup>4</sup> Agali haru haga biaru tigua bi lai howa agali marume Silo dindi pelo, Anduane Homogo kagonaga Habo Nalolene bi lo winigonaga Mbogoyi mo pudaba, lene. Mbogoyi biagoni daligahayagi ngolome dahuliyali mitangi bialu wabini babaganehe kirali handa dele bedagoria dombeni Anduane Homogo Hongo Haiheore kagonaga handame hagane biragane dagia laga winigo ogoni mo pudaba, lene. Ani biyagola Eli igini kirabali Piniasa Hobinila heba Mbogoyi biago mo yalu ibiyadagua ti haru mandagi ibini.✧

<sup>5</sup> Mbogoyi biago mo yalu anda ibiyagola Isaraeleali biarume turu taraore howa bi mambolo balu bi hongohe ladagadaga biyagome dindi birilene. <sup>6</sup> Ani biayuago hale howa Pilidiali biarume lalu, Hiburualiru balai anda bu hayagoha bi gibi ladagadaga bialu haruago nde hale hama. Ogoni agi lalu laruabe, lene. Ani lowa tigua handalu hearia Anduane Homogonaga Mbogoyi biago Hiburuali biarunaga balai anda bu hayagoria yalu anda íbu ngeleago hendene. <sup>7</sup> Ogoni hondowa ti gi howa lalu, Mbirali tara bi pupu wulenaga tininaga balai anda bu heagoria íbu haruago. Ai ina yu wahene harimadagoni. Gibi o birago ale mbira ala ina hemaria biyane nahandarimagoni. <sup>8</sup> Ai tara hongo gibihe urunime ina nabelo aiwa pele ngulebiradabe. Urunime Iyibialiru dindi ko wali agali nahaga wiagoria homelo bo wahi hayagoni. <sup>9</sup> Pilidialiru-o ai gi nahe agalime wai hongohore bimiya. Ani nabirimayagua ina Hiburualinaga garabaya biabe ale bihaga ala ti inanaga bia halu hayadagua holeberema. Ani nabimiyana agaliore howa wai hongoheore bimiya, lene.

✧ 4:4: Har 25.22

<sup>10</sup> Ani lowa Pilidiali biarume wai hongo howaore bialu Isaraeleali biaru bo purogo laya handala tininaga dindi gerai lo yalu pugupugu bini. Ani buwa aulolebe tobahe bo paya bialu Isaraelealinaga ami agali daosini pira tebira (30,000) minalu bogo homa hai hene. <sup>11</sup> Ani bialu Ngode Datagaliwabenaga Mbogoyi biagoni mialu Eli igini Piniasa Hobinila kirabali minalu bogo homelalu bini.

### *Eli homenego ogo*

<sup>12</sup> Ani biya handala agali mbira Beniyamini hameigini hearu aria amu wai hama biagoria howa gerai lo yu pialu horo ogoningi dege Siloni anda pene. Puwa ibu dara ogobiore ho ko walia halu ibuninaga aga budaki bialu dindi himu ibuninaga hagianeni dugu hiralu bini. <sup>13</sup> Eli ibu nde Mbogoyi biago mo yalu piyago agua biradabe lo mitangi tangi bialu hariga tene biraganeni berearia agali biago ibini. Ibuwa agali biagome agua biya lalu bi bibi yayago bibahende hearume ogoni hale hai howa <sup>14</sup> Elihanda, Bi o anda ho laruagoni agidabe, lalu hale hene. Hale hayagola agali biagome abale puwa bi bibi bibahende yayagoni Elihondo lamiai hene. <sup>15</sup> Ogoningi Eli ibu aiyahanda hono winingi howa hama ibinidagoni mali pira dirani halira (98) halu ibunaga de kohe mbirale bayuwa nahandabehe hene. <sup>16</sup> Aguanibigo berearia agali biagome ibuwa lalu, I wai bialu henego ibida porabu tara halu gerai lo yu ibaabo henego áyu anda eberogoni, laya.

Ani layagola Elihanda ibuhondo hale halu lalu, I igini-o agua biya handala ibiru laribe, laya.

<sup>17</sup> Ani layagola agali bi bibi yalu ibaga biagome ladai bialu howa lalu, Isaraeleali ti Pilidiali hondowa ti gibi bo podaore biyagola ibida piai haya. Ani bialu í igini Piniasa Hobinila kirabali bogo homelalu Ngode Datagaliwabenaga Mbogoyi biagobi Pilidialirume mo yalu piya, lalu lamini.

<sup>18</sup> Agali biagome Mbogoyi biago mo yalu piya lalu te layagola Eli ibu pabe haraba birayagoriani pilo daga ho ibira hene. Ibu agali waheore howa tingini gendabiyago pilo handa dagaho ibira hayagome ma podayagola homo tongolo mini. Eli ibu Isaraele wali agali haru haga mbira howa ibugua mali pira maria (40) haru hene.

### *Piniasa one wali dalo biruwa homenego ogo*

<sup>19</sup> Elinaga aruni Piniasa one ibu tombeha gali bere berenego ai ibu gali ogoni taba honolene horo kaware hapara hayagola berene. Ani biruwa hale halu hearia Ngode Datagaliwabenaga Mbogoyi biago mo yalu piyiya layago hale halu ibu agalinibi arunibi homai dege haya layagobi hale howa ibu mogo lowa gali abale taba honole pene. <sup>20</sup> Ibu tandaga nalu tongolo wiagola wali mbira ibu biamogo biyagome ibuhondo lalu, Gi nahabe igiri mbira taba hanaridago, lene. Anidagua layagoni ibu hale halu ladai nabi wini. <sup>21</sup> Ibugua igiri ogoni mini Igabodi winigo ogoni Ngode Datagaliwabenaga wá holeneme Isaraele wali agali yu wahalu piyada lalu wini. Ogoni Ngode Datagaliwabenaga Mbogoyi biagobi mia ibu agalinibi arunibi bibahendeore homai ha bigi biyaru mitangi bido lalu mini ogoni wini. <sup>22</sup> Ibugua lalu, Ngode Datagaliwabenaga wá holeneme Isaraele wali agali yu wahalu pedagogoni irane Ngode Datagaliwabenaga Mbogoyi biago mo yalu piyagooremeda, lene.

## 5

### *Habo Nalolene Bi lo winigonaga Mbogoyi biago Pilidiali ti mo ngelo henego ogo*

<sup>1</sup> Pilidiali biarume Ngode Datagaliwabenaga Mbogoyi biago Ebenese tano howa tininaga dindi timbuni Asadodo mo yalu pene. <sup>2</sup> Mo yalu puwa tininaga gime wabini dama mini Dagononaga bi pupu wiaga anda buwa heleagoria wia para howa ngelene. <sup>3</sup> Horo mendeni egerebagiore Asadodo wali agalime handalu hearia tinaga dama Dagono wabu helayago dindini bulu palu ibira howa Anduane Homogonaga Mbogoyi

biago wiagoria wanakuini ibiraho wiaria hendene. Ani biaria hondowa tigua mo yaraga howa ibuni hene biagoria helo mo yaraga howa helene. <sup>4</sup> Horo mendengi egerebagi tigua lone handalu hemiria dama gime wabini agali helayago biago lone pilo ibira howa abale biyadagua dege Mbogoyi biago wiagoria wanakuini dege pilo podo бага bu ibira ho wiaria de hendene. Ai pilo ibira hayadagoriani ma ibu hangu gi kirabali libu nde hangu lowa podo бага buwa amu panga haraba ubanda tagi buleneni wialu tingini ibuni hangu ibira howa wiaria hendene. <sup>5</sup> Irane aguani binigonaga áyubi Dagono gime wabininaga loma binigo mo miaga karubi ogoninaga bi pupu wule piaga karubi ti dindi o binidagoriani pialu howa ge ogoriani dindi ela holani hondowa porabu angua haga bialu pialu haga.

<sup>6</sup> Anduane Homogohanda Asadodo wali agali pani gibiore nelu mialu ti mo giore helene. Ibugua ti pani nelu mialu wali agali dindi ogoriani ha parapara biaru dere moge ale tara kabaneha howa darama ibalu bilene. <sup>7</sup> Ani biyago hondowa tigua lalu, Isaraealinaga Ngode Datagaliwabehanda inabi inanaga dama Dagonobi pani ngiyada. Ani biyadago ai Mbogoyi o ngagoni iname lu ogoria wuwa habe naheda, lene. <sup>8</sup> Ani lowa tigua Pilidialinaga kini duriali biaru marume hondo pialu haru ibalimu lowa uruni ibiyagola tihondo hale halu lalu, Isaraele wali agalinaga Ngode Datagaliwabe kago ibunaga Mbogoyi biago agua bimabe, larimi.

Ani layagola kini biarume ladai bialu howa lalu, Gede dindini mo yalu pudaba, lamini. Ani laya handala tigua Pilidialinaga dindi timbuni Gede winigoria mo yalu pene. <sup>9</sup> Ani buwa ogoriani ngelo hearia Anduane Homogohanda dindi timbuni ogoriani hearubi mo gibiaore timbuni haame helalu pani nai helene. Ani bialu Anduane Homogo ibugua wali agalibi wandari igiribi bibahendeore emene wahebi ta nabi dere moge ale kabaneha howa darama ibalu pani nelu mini. <sup>10</sup> Ani biyagola hondowa tigua Mbogoyi biagoni Pilidialinaga dindi timbuni mbira Egerono winigoria mo yalu pelene. Ani bialu ogoriani yalu anda puwa wiaria wali agali ogoriani hearu tigua gi howa dugu bialu lalu, Ina belo madane bialu Isaraele wali agalinaga Ngode Datagaliwabe kagonaga Mbogoyi biago ogoria yalu ibirimida, lene. <sup>11</sup> Ani layagola tigua lone Pilidialinaga kini biaru haru ibuwa lalu, Isaraele wali agalinaga Mbogoyi biago tininaga dindini wilo mo yalu dai bidaba. Ani beremigola inanebi inanaga one waneiginibi homolomaya nabelo, lene. Dindi ogoriani hearuni Ngode Datagaliwabehanda pani gibiore nelu miyagola ti gi timbuniore halu durulai halu hene. <sup>12</sup> Wali agali maru nahome hearubi heba dere moge ale kabaneha howa darama ibalu heagola tigua tini hangunaga damahondo ti biamogo bia lalu olagalaga bialu hene.

## 6

### *Habo Nalolene Bi lo winigonaga Mbogoyi Biago yadai binigo ogo*

<sup>1</sup> Anduane Homogonaga Mbogoyi biago Pilidia dindini mo yalu ibu ngelo heagola ege karia pene. <sup>2</sup> Mani wali agalime tinaga loma binigo mo miaga hearubi gamugamu biaga hearubi olo ngoai howa lalu, Anduane Homogonaga Mbogoyi biago o ngagoni agua bimabe. Ibuni winidagoha ngelo dai birimayagua nde mbirale agi heba mandagi yalu polene ngabe, larimi.

<sup>3</sup> Ani layagola tinaga loma binigo mo miaga biarubi gamugamu biaga biarubi tigua ladai bialu lalu, Tigua Isaraele wali agalinaga Ngode Datagaliwabe kagonaga Mbogoyi biago mo yalu dai birimiyagua buleneore mbira ngago ogo. Mbirale mbira tigua mana ko birimigonaga emena bame Ngode Datagaliwabenaga ogoni heba mandagi yalu pelalimu. Mbogoyi biago bame ibuni hangu mbirale mbira paga nahe nadaibi loleberemiore. Ogonidagua buwa handalu kamiria ti mo bayale halu ibugua ti pani nalimulo ngiaabo halu kagonaga irane handa walua holeberemi, lene.

<sup>4</sup> Ogoninaga irane ibuhondo mbirale mbira bame agi ale yalu pelamabe, lalu wali agalime hale hene.

Hale hayagola tigua ladai bialu lalu, Ngolome wabini moge ale duriali mende ngolome wabini huru ale duria lowa Pilidialinaga kini karu ta howa mbira mbira degedege wabu yalu pelalimu, lene. Homolene tara tara ogonime dege tí bibahen-dehondobi kini duriali karuhondobi ibilayagoni. <sup>5</sup> Ani biyagonaga tigua moge alebi huru alebi maru wabialu ogoni urunime tínaga dindi mo koore hayagonaga tigua Isaraealinaga Ngode Datagaliwabhondo giho halimu. Ani beremigola ibugua tinibi tínaga mbirale gime wabini ngarubi dindibi pani ngialu kago nangi hondo holebira badago. <sup>6</sup> Ai tigua bu mini giambe hatagi howa Iyibi wali agaliru hayadaguabi tinaga kini hayadaguabi holenego irane agibe. Wali agali uruni Ngode Datagaliwabhenda mo luluya halu haabo heagola tigua mani Isaraele wali agali yupe halu tagira pelayagola wahenego ogoni embeda nahalimu. <sup>7</sup> Ogoni manda buwa garo ale ge mariahe mbira gahenge mo manda manda bialu nogo bulumaga angibuni kira mani dariba ham-agamaga nabinigo hondowa garo ale ge mariahe biagoria gili lalu libuninaga igini biagolabo ogoriani gililo yalu puwa nogo anda henegoha haru dai buwa helo dariba halimu. <sup>8</sup> Anduane Homogonaga Mbogoyi biago garo ale ge mariahe ogoriani mo yalu puwa ngelaramigoria mbirale ngolome wabini biaru tínaga mana ko birimigonaga emena yalu pelaramigo mbogoyi emene mendehe wuwa wia palu palubu ngelowa yalu pelalimu. Ani bialu garo ogoriani mo ngelowa ibuni yalu pelo pelalimu. <sup>9</sup> Ani pelowa porago de handaya ho halimu. Pialu nguini Bedesemese tanoha bamba halu piyagua ogoni warago dere tara gibiore inani bima piyaruni Isaraealinaga Ngode Datagaliwabhenda ibileneda manda bimīya. Ani napeyagua nde tandagabi ibiyaruni ibugua ibilene ndo bame ibulene wiangi ibinida manda bimīya, lalu lamini.

<sup>10</sup> Tigua bilimu layadagua tigua nogo bulumaga angibuni kira haru puwa garo ale biagoriani dariba hamagamaga bialu libunaga igini biagolabo anda biagoha waranda howa dariba hene. <sup>11</sup> Ani bialu Mbogoyi biagoni garo biagoha mo banda howa emene huru alebi dere moge alebi ngolome wabiniru mbogoyi emene mendehe yu wiyaru heba mandagi wia para hene. <sup>12</sup> Nogo bulumaga biago labome hariga uba ai nai nabi tigatiga pialu Bedesemese tano puabo hene. Libugua harigani pialu howa gu lamalama pene. Pilidialinaga kini duriali biaru ti talima mama piaho wialu amuraore Bedesemese dindi tuni handa amu ho hene. <sup>13</sup> Bedesemese wali agali ti nde ladi ale mini widi gandu lolene tu hayagola widi gandu lowa huba bialu howa lina handa daga halu hemiria Mbogoyi biago hondowa mogolo hendene. Tigua ogoni hondowa turu emene ndo timbuniore harimi. <sup>14</sup> Nogo bulumaga labome garo biagoni gili lalu agali mbira mini Yosua Bedesemese dindini henegonaga mabuni ibu wini. Ibuwa ege tole timbuni mbira henegoria kaware hondo hapara hene. Ani biaria wali agali biarume garo biagoni irame wabiniyago tigua o biagoni dibu gingirulo бага bialu nogo bulumaga kira biagoni labo kirabali bo palu buwa Anduane Homogonaga bo loma buwa delene. <sup>15</sup> Ani bialu Libai aria tigua Anduane Homogonaga Mbogoyi biagobi ngolome wabiniru mbogoyi emene mendehe wiyarubi gime mo yaraga howa tole timbuni biagoriani mo wini. Ani bialu Bedesemese wali agali tigua Anduane Homogohondo bo lomabu delaga ale delalu mbirale marubi lomabia ho mini. <sup>16</sup> Ani biyagola Pilidialinaga kini duriali biaru ti o biyadaruni tigua de handai halu ai tini dindi Egerono horo ogoningi dege ibu dai bini.

<sup>17</sup> Ani buwa Pilidiali tigua dere moge ale ngolome wabini duria Anduane Homogonaga tigua mana ko biyarunaga emena dindi timbuni Asadodobi Gasabi Asagelonobi Gedebi Egerononagabi mbira mbira lowa yalu pelene. <sup>18</sup> Ani bialu huru ale emene ngolome wabini biarubi heba dindi timbuni Pilidiali kini duriali biarume haru hearunaga tano pabe bu mabubi hearubi nabi hearuhondobi mbira mbira lowa yalu

pelene. Toḷe timbuni ogoni Yosuanaga mabuni Bedesemese tanoni Anduane Homogonaga Mbogoyi biago tigua ogoriani mo winigo áyu toḷe ogoni ani bini lole ogoriani wiaabo ho nga.

<sup>19</sup> Anduane Homogo ibugua Bedesemese agali pira karia (70) homelo benego ogoni irane tigua Mbogoyi biago tamuha de handa anda ho hearia ani bini. Ani biyagola wali agalime dugu gomogomo lalu binigo ogoni irane wali agali dewaore bo paya bialu homayaruni Anduane Homogohanda binida lowa ani bini.

*Anduane Homogonaga Habo Nalolene Bi lo winigonaga Mbogoyi Kiriada Yarimi tanoni winigo ogo*

<sup>20</sup> Bedesemese agalime lalu, Anduane Homogo Ngode Datagaliwabe baya burugule-ore kago ogoni ibunaga wanakuini heyu habehe ai kabe. Ibu ina kamagoria nahelo aniha pelo pelamabe, lene. <sup>21</sup> Ani lowa tigua bi bibi yalu maru Kiriada Yarimi tanonaga wali agali karia puwa agua lalimu lalu, Pilidiali tigua Anduane Homogonaga Mbogoyi biago mo yalu daibuwa wiago mo ibalimu lalimu, lene.

## 7

<sup>1</sup> Ani laya handala Kiriada Yarimi wali agalime Anduane Homogonaga Mbogoyi biago mo yalu puwa agali mbira mini Abinadabanaga andaga hari bareni bu henegoria wini. Ani buwa tigua ibu igini Eleasa ogoriani heago ibugua Mbogoyi biago de hondo helo lomabia halu dabo helene.✧

*Samuelehanda Isaraele wali agali haru henego ogo*

<sup>2</sup> Anduane Homogonaga Mbogoyi biagoni Kiriada Yarimi tanoni luore wiaho wiaabo halu mali pira kira (20) agima pene. Ogoningi Isaraeleali bibahendeoreme dara howa Anduane Homogohondo ti biamogo bibe lalu laabo halu hene.

<sup>3</sup> Samuelehanda Isaraele wali agalihondo lalu, Tigua Anduane Homogohondo hene-neore tínaga bu gubalinioreme mini beregedole manda birimiyagua nde tigua dindi taralinaga dama gime wabiniru tininaga hameme wabinigo dama wali ale mini Asedarebi yu wahaiore halimu. Ani bialu t́ni Anduane Homogohondo lomabu miai halu ibu hangu mitangi bialu lotu lalu halimu. Ani birimiyagua ibugua tí Pilidialime hongo howa yaniho kagoha howa gi mulebira, lalu lamini. <sup>4</sup> Ani laya handala Isaraele wali agalime dama bi pupu wule gime wabini Balabi Asedarebi yu wahalu Anduane Homogonaga mini hangu mitangi bialu lotu lalu hene.

<sup>5</sup> Ani biagola Samuelehanda Isaraelealiru bibahendeore Misiba tanoni ngoai hole pudaba lowa lalu, T́i ogoriani pu kamigola ina Anduane Homogohondo t́naga bi laholiya, lene. <sup>6</sup> Ani layagola ti bibahendeore Misibani mo ngoai howa hene. Tigua iba mbira hambuwa Anduane Homogohondo odo lomabu mialu hina tomobi mbira nane horo mbira ogoni hai hene. Ani bu howa tigua lalu, Iname mana ko ngubi birimaru Anduane Homogohondo bialu harimada, lalu lapani hene. Samuelehanda Isaraelealirunaga godi genda damene Misibani wiaruni mo palia halu hagane wini.

<sup>7</sup> Pilidialiru ti hale halu hearia Isaraeleali biaru Misibani mo ngoai ho ka layago hale hene. Hale howa Pilidialinaga kini duriali biaru tinaga ami agali biaru haru howa wai hanalu bo podole pene. Ani bule ibira layago Isaraelealiru ti bi ogoni hale howa gi hene.

<sup>8</sup> Gi howa tigua Samuelehondo lalu, Pilidialime ina nabelo Anduane Homogo inanaga Ngode Datagaliwabehanda ina pele ngilo ina ibuhondo bi laho wiaabo habe, larimi.

<sup>9</sup> Samuelehanda nogo sibi igini mbira homa hende Anduane Homogohondo lomabia halu bo delene. Ani buwa ibugua Anduane Homogohondo lalu, Isaraele wali agali biamogo bibe, layagola Anduane Homogohanda hale halu biamogo bini. <sup>10</sup> Samuele ibu sibi igini biago bo lomabu mialu heagola Pilidiali biaru wai bialu bo podole ibalu heaore abale Anduane Homogohanda hari daligaha howa hari kulu lelene. Ani layuago hale



howa ti mo luluyaore halu durulo yu pugupugu bilene. <sup>11</sup> Ani biyagola Isaraealiru ti ge mbarilama Misiba howa tagira pialu Pilidiali biaru bama talima amuraore Bedegani puabo halu maru hariga obeneni minalu bo homelene.

<sup>12</sup> Ani bima pirimigoria Samuelehanda ege tole mbira muwa Misibala Senila tuni walu howa lalu, Anduane Homogohanda biamogo bima ibaabo hayagoni, lalu ibugua tole biago mini Biamogo Biaganaga Tole wini. <sup>13</sup> Ani buwa Pilidiali biaru bo podalu ti Isaraealeali karuhayagi naibilo Anduane Homogo ibugua Samuele heangi ho hangaiho wiaabo hene. <sup>14</sup> Dindi timbuni bibahende Pilidialime bo karulaga bima Egerono Gedela hengeneha mo wima piyaruni Isaraealeali tini karulo dai bini. Ani bialu Isaraealeali tinaga dindi bibahendeore tini karulo dai biai hene. Ani bialu Isaraealeali ti Kenanali baba wai nabi bayale hene.

<sup>15</sup> Samuele heangi ibugua Isaraele wali agali haru haho wiaabo hene. <sup>16</sup> Mali bibahendeni ibu Bedele dindibi Giligala dindibi Misiba dindibi uruni bibahendeni pumabu bialu howa maru mo palia halu dabolene ngaru dabalulu mo tiga biaga hene. <sup>17</sup> Ani bialu ibu ibuni dindi Lama dai buwabi ibugua dabalulu mo tiga bulenenaga biabe bialu hene. Ani bialu ibugua Lamani Anduane Homogonaga bo lomabu mulenenaga dabu mbira bu helene.

## 8

### *Wali agalime handame haga kini mbira ngi lalu hale henego ogo*

<sup>1</sup> Samuele ibuni agali waheore haruda manda buwa ibu igini kiralu libu Isaraealirunaga mana dabalulu mo tiga biaga helo helene. <sup>2</sup> Ibu igini wahenego mini Yoele wialu heyogonego Abaya wialu libugua Beaseba tanoni mana dabalulu mo tiga biaga helo helene. <sup>3</sup> Ani binigo libugua bilo libu abahanda biawai hayadagua talialu nabi libu muni hangu dewa mulene nga manda bini. Ani buwa libugua marume godi lahelonaga muni miyaru mo yalu godi lolene wiadagua ndo ke howa mo hondo halu laga hene.

<sup>4</sup> Anidagua bialu heago hondowa Isaraealeali haru hagaru bibahende mo ngoai howa bi lo manda bini. Ani bialu ti Samuele hearia Lama dindi pene. <sup>5</sup> Puwa ibuhondo lalu, *I* wahe kego manda buwa *ina* igini biago labome bilo *ina* biawai haridagua ndo bialu ka. Ani bidago *ina* kini mbira *ina* haru helo dabo hela. Ani beregola dindi maru ti kini helowa kadagua *inabi* kini mbira helowa *hamiya*, lene. <sup>6</sup> Tigua kini ogoni dabo ngi lalu Samuele ibuhondo hale hayadagoni ibu turu nahe howa ibugua Anduane Homogohondo bi lene. <sup>7</sup> Ani layagola Anduane Homogohanda lalu, Wali agalime *ihondo* bi larago bibahende hale hai habe. Tigua handabe manga hayago ogoni *ihondo* ndogo *i* tinaga kini kogonaga handabe manga hara. <sup>8</sup> *Ina* bamba *Iyibi* dindi howa haru tagira *ibirungi* howa *tigua* *i* wahalu puwa dama maruhondo bi pupu wialu henego ka. Ai *ayu* *tigua* *ihondo* horo bibahendengi bialu hayagonidagua *ihondo* dege bialu ka. <sup>9</sup> Ani bidago *tigua* larago hale ha howa dege tinaga kini dabo helararume haru howa tihondo bulebirago damene agua bulebira lalu tihondo lamiai habe, lalu Anduane Homogohanda Samuelehondo lamini.

<sup>10</sup> Samuelehanda wali agali tinaga haru haga kini helo dabo ngi lalu hale hayaruhondo Anduane Homogohanda ibuhondo lamiyaru bibahende ti lamiai hene. <sup>11</sup> Samuelehanda tihondo lalu, *Tinaga* kini dabo helaramigome agua bigi bulebira, lalu ti bayuwa lamiai hene. Ibugua lamialu lalu, *Tinaga* iginiru ami helo helalu marume ibunaga wai biaga garo ale mini karisi nogo hosi gili lolene biabe bilo helalu marume nogo hosi erekunini bama polene biabe bialu marume nogo hosime garo ale biago gili lama mama ibilo *tigua* ala gerai lalu bamba helo helolebira. <sup>12</sup> Ibugua *ti* igini marubi agali daosini mbira (1,000) haru haga helalu marume agali pira duria (50) haru haga

✧ 8:5: Man 17.14, 1 Sml 8.19-20 ✧ 8:7: 1 Sml 10.19, 12.17-19, Hos 13.10-11

helalu bulebira. Ani bialu tínaga iginirume ibunaga mabu dindi aliaga helalu ibunaga tomo bogabiru miaga helolebira. Ani bialu marume ibunaga wai biagane alerubi ibunaga wai biaga garo ale nogo hosini gili laganaga mbirale marubi wabilo helolebira. <sup>13</sup> Tínaga wane bedarume ibunaga mbirale weli ngabi ngaru wabiagabi tomo dawalu mberedibi wabiaga berelo berelolebira. <sup>14</sup> Ibugua tínaga mabu bayaleore ngamirubi pu mbira lini daga mini gerebi mabu ngamirubi olibe lini daga bu karubi uruni bibahende ibunaga haru haga haguane biaru ti karulelo mo mulebira. <sup>15</sup> Tínaga ladi ale mini widibi pu mbira mini gerebi linibi pini dege dege yamuwa ibunaga agali haguane karubi haru haga maru karuhondobi mo mulebira. <sup>16</sup> Ibugua tínaga biabe bia haga karubi nogo bulumaga wangabe karubi nogo dongi karubi bayale damenego ibu haru halu puwa ibunaga biabe bilo mo bia holebira. <sup>17</sup> Ani bialu ibugua tínaga nogo sibi karu pini degedege ibu haru polebira. Ani bialu tínibi ibunaga garabaya biabe ale biahaga holeberemi. <sup>18</sup> Horo ogonidagua bulene tagira ibiragola tígua tandaga nalu howa yi lalu dugu gibi bialu holeberemigo ogoni irane tínime tínaga haru haga kini dabarimigome birago Anduane Homogo ibugua tínaga dugu yi lalu bialu kamigola hale halu ladai nabulebira, lalu Samuelehanda lamini.✧

<sup>19-20</sup> Ani lamiyago lamilowa tigua lalu, Ina Samuelenaga bi hale naholeore. Ina kini mbira dindi hameigini tara tara ti haru helo heledadagua inabi nde ani helole hame ledama. Inanenaga kini ibugua ina haru helobi wai bulumaya haru bamba helobi heloleberema, lene. <sup>21</sup> Anidagua lalu tigua layaruni bibahendeore Samuele ibugua hale hai halu Anduane Homogo lamule pene. <sup>22</sup> Anduane Homogohanda ibuhondo ladai bialu lalu, Tigua hame laradagua bialu kini mbira dabole pu, lamiya. Ani lamiyagola Samuelehanda Isaraealiruhondo lalu, Mani olarongi daibule áyu bibahendeore tını andaga purogo ladaba, lene.

## 9

### *Solo ibu Samuele lola henego ogo*

<sup>1</sup> Agali homogo mini lene mbira Beniyamini hameigini aria henego ibu mini Kisi hene. Kisi ibu Abile igini hene. Abile ibu Sero igini hene. Sero ibu Begorada igini hene. Begorada ibu Abia igini hene. <sup>2</sup> Kisi ibu igini Solo hene. Solo ibu agali baya taraore dombaraleni ibu Isaraeali hearu bibahende waradai biai halu ibu agali luni hongoheore hene.

<sup>3</sup> Horo mbiru Kisinaga nogo dongi maru pu ereba hene. Ani biyagola ibugua Solohondo lalu, Biabe biahaga mbira haru halu libugua nogo dongi uruni tai bu pudaba, lene. <sup>4</sup> Ani laya handala libugua tai bima Eberaimi dindi barebare pu banga bialu Salisa dindi puajı halu hebirabi mbira handa walia nahe dege hene. Handa walia nahe howa libu tai bima puabo halu dindi hobane mende Salimu dindihabi tai bima pu banga bialu hebirabi nogo dongi uruni naheoreyane taibu wahene. Ai naheoreya handala libu Beniyamini daluha tai bima bolangua halu hebira ogorianibi handa walia nahe dege hene. <sup>5</sup> Ai buruguledago lowa libu Subu dindi hobane wiagoria tagira pu howa Solohanda ibunaga biabe bia haga biagohondo lalu, I abahanda nogo dongi pu ereba hayarunaga ndo iya agua biyabe toba howa mini dege dindi ho holigo ai andaga dai biba nalarego, lene.

<sup>6</sup> Ani layagola ibunaga biabe biahaga biagome ladai bialu lalu, Hondoha. Tano o kabagoriani agali mbira Ngode Datagaliwabenaga mana baya gibi latagi halu mbiwia hagago wali agali bibahendeme ibu kalo manda biaihe dindi Subu ogoria kago ibugua larago bibahendeore lola hai haga ka. Ani biaga kago ogoni ibugua nogo dongi uruni ogoria kago handa walia holeberabi lalu langulebira badago ai ibu karia mba, lene.

✧ 8:18: Ais 1.15, Mai 3.4

<sup>7</sup> Ani layagola Solohanda ibuhondo hale halu lalu, Iyame ibu karia piribayagua ibuhondo mbirale mbira agi yalu mbaliyabe. Iyanaga nuha tomobi ibuhondo mulenego mbira nahenedago iyame agi mibiyadabe, lene.

<sup>8</sup> Ani layagola biabe biahaga biago ibugua ladai bialu lalu, Ina muni kuni siliba emene mbira hangu yidogo ogoni merogola ibugua nogo dongi uruni ogoria ka lalu langilo, lene.

<sup>9-11</sup> Ani layagola Solo ibugua biabe biahaga biagohondo ladai bialu lalu, Ogoni baya gibi larigo ai mba, lene. Ani lowa libu tano Ngode Datagaliwabenaga agali biago heagoriani pene. Tano ogoniha pole hari bare wiagoria iraga halu pialu hebira wandari maru iba hambu pole tagira ibalu hemira lola hene. Lola howa libugua wandari biaruhondo hale halu lalu, Mani bulebiragonaga de gandeba handaga mbira tano ogoriani kabe, lene.

Ogoningi Ngode Datagaliwabe mana latagi haga mbira kago ibu mini de gandeba handaga ka laga. Ani laganego mbirali ibu Ngode Datagaliwabehondo mbirale mbira hale holene wirangi ibugua de gandeba handaga karia ma, laga wini.

<sup>12-13</sup> Libugua wandari biaruhondo ani layagola tigua libuhondo ladai bialu lalu, E kago ibu áyu ogoni poragonigo libugua gerai lalu piribiyagua abale tali minuleberabi. Ani bialu tanoha ubanda harabigola abaleore ibu ogoriani karia handa walia holeberabi. Ibu áyu dege tano ogoriani anda ibiyago ogoni irane wali agali tigua nai hari baregotha mbirale mbira bo lomabia howa dabuni mulebiragonaga ai ibu ka. Ani bidago wali agali tomo namiya ibalimu lene ibu bedaru tigua ibu naibidaha tomo ala nanolebira. Ibuni anda ibiragola ibugua ala bo lomabia hole wiyaru biamogo bia habe lalu mo turu kagola tigua tomo nole birulebira. Libu áyu ogoni abale piribiyagua ibu tomo nole hari bare iraga nakaore handa walia holeberabi, lene. <sup>14</sup> Ani lamiya handala Solobiibunaga biabe biahaga biagobi libu tano biagoria pole ubanda halu hebira Samuele ibu nde Ngode Datagaliwabe mitangi bialu lotu lole andaha pole ibalu hearia de hendene.

<sup>15</sup> Abaleore Anduane Homogohanda Samuelehondo ogodagua lamini. Lamialu lalu, <sup>16</sup> Yawi horo ogodaguaore haragola ina agali mbira Beniyamini hameigini karu aria ibilaguago inaga Isaraele wali agalinaga kini helo weli haguani odo wia habe. Agali ogoni ibugua ti Pilidialirume nabelo gini mulebira. Ina inaga wali agali tandaga nalu hearu de handaru. Tigua ihondo biamogo bia lalu dugu biayuago hale haru, lalu lamini.

<sup>17</sup> Samuele ibu Solo ibiyago de hendeagola Anduane Homogohanda ibuhondo lalu, Agali ina larugoni ogonigo ibugua inaga wali agali haru holebira, lene. <sup>18</sup> Ani leagola Solo ibu Samuele pabe harabani heagola puamu howa lalu, De gandeba handaga agotha hagabe i langi, lene.

<sup>19</sup> Ani layagola Samuelehanda ladai bialu, De gandeba handaga i kogoni. Áyu ina lotu laga anda kagoria maliya libugua ala pialu hadaba. Ani bialu áyu libu kirabali i baba tomo namiya. Yawi egerebagi libugua ihondo hale harabiru bibahendeore ladai biai halu pole ibiribidagoha pilibulo. <sup>20</sup> Ai nogo dongi pu ereba ho heane horo tebira piyagonaga mini dege dindi nahe uruni bamba abale biago handa walia hayago. Ani bidago Isaraele wali agalime hame timbuniore lalu kago aibe. Ogoni ibi i aba waneiginibi ti ndobe, lene.

<sup>21</sup> Ani layagola Solohanda ladai bialu lalu, I Beniyamini hameigini aria kogoni. Hameigini ogoni Isaraele hameigini emene mbira i aba aiya dameneru hameigini ogoninaga mini lene timbuni ndo emene dindiha karu aria ko. Ani bidogo ina ihondo bi ogonidagua lalu langirigoni irane agua lalu laribe, lene.

<sup>22</sup> Ani layagola Samuelehanda Solobiibunaga biabe bia haga biagobi haru halu puwa anda tamu hobane timbuni wiagoria dagiani pira tebira (30) ale tomo nole ibalimu lene berearu berelowa libu bamba ho berelene. <sup>23</sup> Ani buwa Samuelehanda tomo dawaga

heagohondo lalu, Bulumaga mbirini ina podowa mo bagi ho wibe lalu ngirugo mo yalu ibu, lene. <sup>24</sup> Ani layagola tomo dawaga biagome bulumaga ge dolo wiyago mo yalu ibuwa Solo bereagoriani mo wini. Ani biyagola Samuelehanda lalu, Bulumaga ogoni inagaore podo wia henego de handa. Ina áyu agali mo ngoaiho bedadagua bedagola nabelo inaga ogoni mo bagiho ngelenego ai na, lene.

Ani biniyago horo ogoningi Solo ibu Samuele heba tomo nalu berene. <sup>25</sup> Biruwa mani ogoriani lotu laga anda heneyagoria dalipe howa tigua anda mbira anda pialu anda dangi tigabi wiagoriani Solo ibu palelo tamu mo tigabia hene. <sup>26</sup> Ani biyagola Solo ibu ogoriani puwa palene.

### *Samuelehanda Solo ibu kini helo weli odo wia henego ogo*

Ai egerabagiore egabi layagola Samuelehanda Solo uyu anda dangi tigabi wiagoria palearia puwa lalu, Ai pole birigoria pobelo ngua holiya heya nabere, lene. Ani layagola Solo ibu heyalu Samuele libu haru hariga peagoria mandagi pialu hene. <sup>27</sup> Ani bialu libu tano biagonaga gibuni wiagoria anda ibu howa Samuelehanda Solohondo lalu, Agali biabe biahaga ogoni ibu ala bamba halu pialu ha la, lene. Ani laya handala biabe biahaga biago ibu libu yu wahalu piyagola Samuele ibu bi layago laabo halu lalu, í emene hondo hadai bu ha. Ina Ngode Datagaliwabehanda layadagua languliya, lene.

## 10

<sup>1</sup> Ani lowa Samuelehanda ira olibe lininaga weli be heba yamuwa Solonaga haguani odo wia howa ibu nunu lowa lalu, Anduane Homogohanda ibunaga Isaraele wali agali haru habelo haguani odo wia haragoni. Ina ibunaga wali agali bayuwa haru halu tinaga waitigi karu bibahendeme boligo ina ha pai holebere. Ani layadagoni Anduane Homogohanda ibunaga wali agali haru habelo í dabo helayadagoni lowa manane ogoni handabe. <sup>2</sup> Ina áyu ogoria í yu wahalu pialu keria Selesa dindini Beniyamini daluni Leselonaga homali kaware kagoria agali kirali ibalu karia lola holebere. Libugua í nogo dongi tai bialu harigoni handa walia haya lalu langulebira. Ani bialu í abahanda nogo dongi ereba hayarunaga mini dege dindi nahe inaga agua biyabe toba howa mini dege dindi ho howa ibugua í iginioire agua buledabe lalu ka lolebira, lene.\*

<sup>3</sup> Samuelehanda laabo halu lalu, Ani bialu holebirago ina ogoriani howa piaho wialu Tabo dindini ira mbira hada bia hene heagoria tagira ibalu keria agali tebira Ngode Datagaliwabehondo mbirale bo lomabia ho mulenaga Bedele dindi pole pialu karia ina lola holebere. Lola halu mbirago ibugua nogo meme igini tebira haru halu pialu mendego ibugua mberedi tebira yalu pialu tebonego ibugua nogo dongoneme be wabini mbirani waini iba hambu tolai howa hanalu karia hondolebere. <sup>4</sup> Ani bialu tigua í mo bila halu mberedi kirago í nabelo ngulebirago yamialu nolebere. <sup>5</sup> Ani bialu í Ngode Datagaliwabenaga hari bare Gibeani Pilidia amialirunaga balai anda dewa bu kagoria polebere. Tano ogoriani ubanda tagi bu haga ngagoria Ngode Datagaliwabe mana latagi haga maru bo lomabu mulene dabu hari bare ogoriani tigua dalialu howa gawabi tabagebi gulupobebi hiliyulabi lama ibalu karia lola holebere. Tigua mali lima bi hongo howa ladagadaga bima ibulebira. <sup>6</sup> Ani lama ibalu kagola íbi Anduane Homogonaga Dinini ibugua íha anda ibalu mo hongo holebira. Ani bidagola tigua bialu kagoha ina ho gimbu buwa tinaga Ngode Datagaliwabenaga mini yaraga holene mana biaga ngagodagua bi ladagadaga bialu tama bialu mali luyu ibaga bialu kegola ogonime í agali mende ale holebere, lene. <sup>7</sup> Ani lowa lalu, Urunidagua biragola Ngode Datagaliwabe ibugua hariga walia halu bia lara alego bibe. <sup>8</sup> Ani bialu í ko handala ina ala pu bamba halu Giligala tanoni puwa í maha í lola hole ibuliya horo karu ogoriani hondo habe. Ibuwa ina mbirale bo loma bialu delai howabi mbirale ina Ngode

\* 10:2: Pig 35.19

Datagaliwabela ho gimbu bulumayanaga bo lomabu muwabi ina ogoale bulene ngago langulebero, lalu lamini.

<sup>9</sup> Ani lowa Solo ibu Samuele yu wahalu pole piyagola Ngode Datagaliwabehanda Solo ibuhondo mini gahenge wulene mini. Ani miyagola Samuelehanda, Ogoale bulebira, lalu ibuhondo lamiyaru bibahendeore horo ogoningi biai hene. <sup>10</sup> Ani buwa Solobi ibunaga biabe biahaga biagobi libu Gibea tanoni anda pialu hebira Ngode Datagaliwabe mana latagi haga maru heneyaru ti ogoriani lola hene. Lola halu abale ibiyaore Ngode Datagaliwabe Dinini ibugua Solo haru howa bia layadagua bialu tigua mali lialu bi hongo howa ladagadaga bialu hene. <sup>11</sup> Ani bialu heago hondowa wali agali ibu hendene hearume tini hale ha *ai nai* bialu howa lalu, Ogoni Kisi igini biagodago agua binidabe. Solo ibu Ngode Datagaliwabe mana latagi haga mbira hole ho beregedenedabe, larimi. <sup>12</sup> Ani larimigola agali mbira ogoriani hene heagome hale howa lalu, Ngode Datagaliwabe mana latagi haga maru o karuni tibi ani alidabe. Tinaga aba urudalo tigua manda bidamibe, lene. Ani biyago hondowa mbira ogodagua laga, Solo ibubi Ngode Datagaliwabe mana latagi haga mbira ho aribia kabe, laga wini. <sup>13</sup> Ai Solo ibu bia maro bialu ibu puwa bo lomabu mulene dabu hari bare wiagoriani pene.

<sup>14</sup> Ani pu hebira Solo aba hameneme Solola ibunaga biabe biahaga libu haru hearia hondowa lalu, Libu ani penego eberabibe, lalu hale hene.

Solohanda ladai bialu lalu, Iya nogo dongiru maru ereba hayagola tai bialu hariba. Ani bialu henego handa walia nahabeheyagola Samuele hondo piriba, lene.

<sup>15</sup> Ani laribigola Solo aba hamene biagome libuhondo hale halu lalu, Samuele ibugua libuhondo agi langiyabe, lene.

<sup>16</sup> Solohanda ibuhondo ladai bialu lalu, Nogo dongi uruni handa walia henego ka lalu langiya, lalu lamini. Anigo Samuelehanda Solo ibu kini holebere lalu layago nalamini.

*Solo ibu Kiniore kagoni lalu mo yaraga henego ogo*

<sup>17</sup> Samuelehanda Ngode Datagaliwabenaga deni wali agali bibahende hearu olowa Misiba tanoni mo ngoai hene. <sup>18</sup> Ani bu howa tihondo lalu, Anduane Homogo Isarae-lealinaga Ngode Datagaliwabehanda ti Iyibi dindi howa haru halu tagira ibiyagola Iyibialirumebi wali agali maru hearumebi ti mo tandaga halu heagola ibugua gini mialu haru tagira ibiyagoni. <sup>19</sup> Ai tinaga Ngode Datagaliwabe ti genda yuwa hariga tai bialu hemigola pele mialu gini miaga biago kagoni. O biagoni heago helowa ayu tigua ibu manga howa ai kini mbira ngi lalu ihondo hale harimida. Ai anigo tini hameiginibi damenebi harimidagua Anduane Homogonaga deni mo mogo bu hadaba, lalu Samuelehanda lamini.

<sup>20</sup> Ani lowa Samuele ibugua hameigini hangu hangu hayadagua bamba halu ibu haga haga biyagola Anduane Homogohanda Beniyamini hameigini hangu dabene. <sup>21</sup> Ani bialu Samuelehanda Beniyamini hameigini lone emene dabaga bialu Madiri aria hearu dabo tagi ho helene. Ani biyagola Madiri aria ogoniha howa Kisi igini Solo dabene. <sup>22</sup> Tigua Solo tai bialu henego handa walia nahe howa Anduane Homogohondo hale halu lalu, Mbirali ogoriani karu aria mbira kane hendedebe, lene.

Ani layagola Anduane Homogohanda ladai bialu lalu, Solo ibu ede mbirale ngarunaga erembirahayagi bira do kagoni, lene.

<sup>23</sup> Ani laya handala tigua gerai puwa Solo wali agali bu heagoria haru halu tagira ibini. Ani biyagola tigua handalu hearia agali hearu bibahende tubagi dege lowa Solo ibu luniore hearia hendene. <sup>24</sup> Ani hondowa Samuelehanda wali agali hearuhondo lalu, Agali Anduane Homogohanda dabeneo o kagoni. Ina kamaru aria mbira ibu ale nahe ibu kagobi ndo mbira ina kamagoni naheoreda, lene.

Ani layagola wali agali bu hayaru bibahendeoreme bi hongo howa ladagadaga bialu lalu, Ibu kini mali dewaore helo, lalu lene.

✧ 10:12: 1 Sml 19.23-24



<sup>25</sup> Ani layagola Samuelehanda wali agali bu hearuhondo kinime biabe bulenebi wali agalime kininaga biabe bia holenebi uru ale nga lalu tihondo lo wála howa lamini. Ani lamuwa mani ibugua mbuga mbirani gili buwa anda mbira Anduane Homogonaga lomabia hene heagoha wia do helene. Ani buwa ibugua wali agali bibahendeore, Tíni andaga purogo ladaba, lene. <sup>26</sup> Solo ibubi agali hongohe marubi Ngode Datagaliwabehanda tinaga bu gubalinini ela haga biyaru Solo heba pumaga halu ibuni andaga Gibeai bini. <sup>27</sup> Anigo agali habane nabulene maru hearume lalu, Agali ogobime ina agua pele mulubadabe, lene. Ani lowa tigua Solo yo hondowa ibuhondo mbirale maru turu halu mulene winigo nami wahene.

## 11

### *Solohanda Amonoali bo podalu wayali henego ogo*

<sup>1</sup> Ani binigo mani ege mbira ale peagola Amonoalinaga Kini Nahasahanda Yabese tanoni hearu baba wai bule lowa ibunaga ami agali hearu haru tagira pialu Gileada dindihayagi puwa ho mabu bupe hene. Ani biyagola Yabese agalime Nahasahondo lalu, Ina mbira ina heba bulenego lo wia. Ani bregola iname í inanaga haru hagaore ke lo manda bulumaya, lene.

<sup>2</sup> Nahasa ibugua ladai bialu lalu, Ina tí heba bimiyago bi galone mbira lo wuleberogo ina tí bibahendenaga de habane tigahayagi bibahende dugu wahai holebero. Ani berogome Isaraele wali agali bibahendeore mo taga halu mo dindiha holene yu anda ibilonaga ani bulene wulebira, lene.

<sup>3</sup> Ani layagola Yabese wali agali haru haga biarume lalu, Bi ogoni Isaraele dindiha hale hoyogole lolomaya ina horo karu henge ngibe. Ani beremagola ina pele mulene mbira naheyagua nde inane í keria hatagi holomaya, lene.

<sup>4</sup> Ani lowa bi yalu piyaru Gibeai dindi Solo henegoria anda ibini. Anda ibuwa bi biago tihondo ogodagua laya lalu lamiyagola wali agali hearume gi howa dugu bini. <sup>5</sup> Ani bialu hemiria Solo ibu nde áyu dege ibuni mabuha howa ibu nogo bulumaga wangayaru heba ibini. Ibuwa ibugua lalu, Agi biyadabe. Wali agali bibahende dugu biai halu kagoni aginagabe, lene. Ani layagola tigua ibuhondo Yabese dindi howa bi yalu ibuwa lamiyaruni ogodagua laya lalu Solo lamini. <sup>6</sup> Solo ibu bi biago hale hayagola Ngode Datagaliwabe Dinini ibalu ibuha karula hene. Ani biyagola Solo ibu keba timbuni hene. <sup>7</sup> Ani howa ibugua nogo bulumaga wangabe kira bo poda бага buwa bi yalu piaga hearume mo yalu Isaraele dindi bibahendeni, Bi ogo heba yalu purogo ladaba, lene. Bi ogoni mbirali Solo Samuelela wai bule poleberabago talima naibirago ibunaga nogo bulumaga wangabe karu ogonidagua bialu bo poda бага bule bira, laya lalu lamilimu, lene.

Ani layagola Isaraele wali agali hearume Anduane Homogohanda agi bulebiradabe lowa gi timbuni ho hene. Ani howa ti bibahendeore mo ngoai ho hene. <sup>8</sup> Ani biaria Solohanda ti bibahende Besege dindini mo mogo bu helene. Ogoriani daosini dege handari tebira (300,000) Isaraele howa íbu halu daosini pira tebira (30,000) Yuda howabi íbu halu bini. <sup>9</sup> Ani bu howa tigua bi yalu ibaga Yabese howa ibini biaruhondo lalu, Yawi horombe hanuni nakaore ti gini mulebirago lalu tinaga wali agalihondo lamule pudaba, lene. Yabese wali agalime bi ogoni hale howa tigua turu timbuniore hene. <sup>10</sup> Ani buwa tigua Nahasahondo lalu, Yawi inane tagira ibuluma. Ani bidamagola ina inahondo bule manda bu wirida ale bibelo, lene.

<sup>11</sup> Ogoningi mbiraga Solohanda ibunaga agali halu tebo tale buwa wabuni tebira tidiyu haga haga bilene. Ani buwa egerebagi egabi lole muna biyagola abale ti waitigi biarunaga balai anda bu paleagoria porabu anda anda buwa Amonoali palearu minalu bene. Horombe hanuni hayagola tigua aulolebe tobahe bo payapaya bini. Ani biyagola

yu wahene hearu agali homane mbira ibuni hangu pugupugu bialu gerai ibida purogo lene.

<sup>12</sup> Ani biyagola Isaraele wali agalime Samuelehondo lalu, Wali agali maru tigua Solo tinaga kini nahelo layaru agoha kabe. Uruni ina kamaria minu yalu ibidaba. Ani beremigola iname ti bo waholomaya, lene. <sup>13</sup> Ani layagola Solohanda lalu, Horo áyu Anduane Homogohanda Isaraele wali agali pele ngiyadago mbirali homelo bolene nawi, lene. <sup>14</sup> Ani layagola Samuelehanda tihondo lalu, Ina bibahende Giligala dindi hangu piai howa ogoriani halu mbira lone Solo ibu inanaga kiniore ka lalu ladaga hamiya ma, lene. <sup>15</sup> Ani lowa ti bibahendeore Giligala dindi piai hene. Puwa Anduane Homogonaga deni howa tigua, Solo inanaga kini ka, lalu ladaga hene. Ani bialu tigua ti Anduane Homogola ho gimbu bulenenaga mbirale bo lomabia ho mialu Solobi Isaraele wali agali bibahende biarubi ti haru horo ogoningi tomo nalu turu ho hene.

## 12

### *Samuelehanda wali agalihondo bi lamaro bialu lenego ogo*

<sup>1</sup> Ani buwa Samuelehanda Isaraele wali agali biaruhondo lalu, Tigua ina buli ya hale harimigoni birugoni. Ina kini mbira tí haru helo ngirugoni. <sup>2</sup> Áyu ibugua tí haru bamba hole kagoni. Ai i nde wahe halu dagua hayadago inaga iginiru tí heba kagoni. Ina tí bamba igiri hagua deheni howa haru hama ibaabo halu áyu hamaro berogonida, lene. <sup>3</sup> Ai i o kogonigo ina haru harugoni howa ko mbira bidoyagua Anduane Homogonaga denibi ibugua kini dabene o kagonaga denibi áyu ina kagua biri lalu tigua langidaba. Ina mbiralinaga nogo bulumagabi nogo dongibi mbira page haru piruyabe. Ina mo hondo howa mbiralinaga guru na mo tandaga ha bigi biruyabe. Ina mbiralinaga mbirale mbira dindiha ohowa mo naruyabe. Ina uruni mbira bidoyagua birudadagua yadai biai holiya langidaba, lene.

<sup>4</sup> Ani layagola wali agalime ladai bialu lalu, Ani nabioire ina inanaga guru nabi mo tandagabi naheore hari. Ani bialu mbirale mbira mbiralinagabi mo yalu napeore hari, lene.

<sup>5</sup> Ani layagola Samuelehanda ladai bialu lalu, Anduane Homogobi kini ibugua dabo helayagobi libugua áyu tigua i tigabioire harigo manda bidama larimigo de hendeda, lene.

Ani layagola tigua ladai bialu lalu, Anduane Homogo ibugua henene laralo manda bida, lene.

<sup>6</sup> Ani layagola Samuele ibugua layadagua laho wiaabo halu lalu, Anduane Homogo ibu Mosese Aronola dabalú tínaga mamali heneru Iyibi dindi howa haru halu íbu tagira pene biagoni ka, lene.✧ <sup>7</sup> Ani binigo áyu tí o kamigoriani hondo hadaba. Ani bidamigola Anduane Homogohanda tíbi tínaga mamali henerubi pele mule hongo henego bibahende agua hene lalu Anduane Homogonaga deni howa manda bilimulonaga tíha lo hana holiya, lene. <sup>8</sup> Ogoni Yagababiibunaga one waneiginibi ti Iyibi dindi piyagola Iyibiali hearume ti mo tandaga hayagola tínaga mamali urunime Anduane Homogohondo biamogo bia lalu dugu bini. Ani biyagola ibugua Mosese Aronola ibilayagola libugua uruni ti Iyibi dindi howa haru halu tagira puwa dindi ogoriani helo helene.✧ <sup>9</sup> Ani biyago bilowa wali agali biarume Anduane Homogo inanaga Ngode Datagaliwabe embeda hene. Ani bialu hemiria Anduane Homogohanda Pilidialibi Moabanaga kinibi Haso dindi timbuni wiagonaga ami haru haga haguane Siserabi tigua tínaga mamali uruni balu podelonaga ibugua uruninaga giha yahene.✧ <sup>10</sup> Ani biyagola tigua Anduane Homogohondo dugu bu mialu howa lalu, Iname í erembira ngialu gime wabini Balahondobi Asedarehondobi bi pupu wialu harimagomedago mana koore birimagoni. Anduane Homogo-o ina biamogo bia halu ina áyu inanaga

✧ 12:6: Har 6.26 ✧ 12:8: Har 2.23 ✧ 12:9: Hgn 3.12, 4.2, 13.1

waitigi bibahende karume boligo pele ngiore bibe. Ani beregola iname í mitangi bialu lotu lalu holomaya, lene.✠ <sup>11</sup> Tigua ani layagola Anduane Homogohanda hale halu Gidionobi Baragabi Yabedabi ibilalu maniore Samuele í ibilayagoni. Ani biyagola ina bibahendeme tínaga waitigi heagoha howa pele ngirimagola tí bayale ho harimi.✠ <sup>12</sup> Ani bu howa dege tígua handalu hemiria Kini Nahasa Amonoali biagome tí minalu bolene kaware wiago hondowa Anduane Homogo tínaga kini helarimigohondo manga harimi. Ani buwa tígua ihondo lalu, Ina haru helo kini mbira hamelo kama, larimi, lene.✠

<sup>13</sup> Ani larimigoni áyu kini tını dabarimigo o kagonigo tígua ibu helo dabo ngi lalu hale harimigo áyu Anduane Homogohanda tihondo ngiyadagoni. <sup>14</sup> Ani bidago tígua Anduane Homogo tínaga Ngode Datagaliwabenaga mini yaraga halu harimiyaguabi ibunaga biabe bialu ibugua bi larago hale halu ibunaga bi lo ngadaguaore biai halu tiguabi tínaga kini kagomebi Ngode Datagaliwabe talima pialu harimiyaguabi tígua mbirale bibahende damene beramigo bayale hangu hai holebira. <sup>15</sup> Ani nabi howa Anduane Homogohanda bi larago hale nahe ibugua bi lo ngaru mo wahalu harimiyagua ibugua tí bababi tínaga kini bababi turu nahe waitigi ho holebira. <sup>16</sup> Ani bulebirago o kamigoriani haho widaba. Ani howa handalu kamiria Anduane Homogohanda gibi daliga ngaru bulebirago áyu ogoni de hondoleberemi. <sup>17</sup> Áyu gaeangi harimagobe ani ndo harimabe. Aniyagua ina Ngode Datagaliwabehondo bi loleberogo ani larogola Anduane Homogohanda dalu hari dabala haru ibilelo. Ogonidagua birago hondowa tígua Anduane Homogohondo kini mbira tínaga haru haga helo dabo ngi lalu ibuhondo hale harimigo ogoni mana ko timbuni bialu harimadalo manda buleberemi, lene.

<sup>18</sup> Ani lowa Samuelehanda Ngode Datagaliwabehondo bi layagola horo ogoningsi dege Anduane Homogohanda dalu hari dabala haru ibilene. Ani biyago hondowa wali agali bibahende hearume Anduane Homogobi Samuelebi hondowa gi tara hene. <sup>19</sup> Ani bu howa tigua Samuelehondo lalu, Agali haguane-o ina nahomolomaya Anduane Homogo inaga Ngode Datagaliwabehondo inanaga bi lahabe, lene. Ani lowa tigua lalu howa, Iname áyu manda bialu mana ko bibahende maru birimaru bu tago halu mana ko mbira kini mbira ngi lalu hale harimagonida, lene.

<sup>20</sup> Ani larimigola Samuelehanda ladai bialu howa lalu, Gi nahalimu. Tígua ko ngubiore mbira bia birimigonigo Anduane Homogo dege yu wahalu handa tara nahe howa ibunaga biabe gubaliniore howa bialu halimu.✠ <sup>21</sup> Ani bialu dama mbirale gime wabiniuru talima napilimu. Uruni ti henene ndo gime wabini kagome tí biamogobi pele miabi heba nabulebira. <sup>22</sup> Ani bidago Anduane Homogohanda habo nalolene bi lo ngagome lalu, Ina tí yu wanaholebero, leda. Ogoni irane tí ibuninaga wali agaliore halimulo manda bu wini ngago tí wa naholebiraore. <sup>23</sup> Ani bidago ina Ngode Datagaliwabehondo tínaga bi la naharuyagua Anduane Homogohanda ihondo ko bere lolebira. Ina tihondo bayale ogogo bilimu ko ogogo nabilimu lalu dabalimulo dege lawai holiya, lene.✠ <sup>24</sup> Anduane Homogohanda bilimulo lo ngadagua bialu ibunaga biabe mini bilina howa gubaliniore halu bilimu. Ibugua gibi wiaru tínaga bia hama piyaru bayuwa manda buwa halimu. <sup>25</sup> Anigo tígua mana ko bialu harimidagua biaho wiaabo harimiyagua tíbi tínaga kinibi bo hilo wahai holebira, lalu Samuelehanda lai hene.

## 13

### *Pilidiali baba wai binigo ogo*

<sup>1</sup> Solo ibu kini helo dabenedagoni ibu agali mini dingi dangialeni ibu aiyahanda hono wiyangi howa hama ibalu henego mali pira tebira (30) pene heagola dabene. Ibugua kini howa Isaraele wali agali mali pira mariani kira (42) haru hene.

✠ 12:10: Hgn 10.10-15 ✠ 12:11: Hgn 4.6, 7.1, 11.29, 1 Sml 3.20 ✠ 12:12: 1 Sml 8.19 ✠ 12:20: Man 11.16  
✠ 12:23: 1 Kin 8.36, Min 4.11, Kl 1.9, 2 Ti 1.3

<sup>2</sup> Ogoningi Solohanda Isaraele agali daosini tebira (3,000) wai pole tidiyu hene. Daosini kirago (2,000) ibuni heba Migimasa tano Bedele dindi hari bare dege dindiha wiagoriani hadai bilene. Ani bialu daosini tebonego (1,000) Solo ibu igini Yonadana heba Gibeaa dindi Beniyamini hameigini daluhayagi tidiyalu pelene. Ani bialu Solohanda, Agali maru tîni andaga dai bidaba, lene.

<sup>3</sup> Yonadanahanda Pilidia ami agali Geba dindini hearu minalu bo wahene. Ani biyago hale howa Pilidiali bibahendeme keba haiho hene. Ani buwa heagola Solohanda agali marume bi yalu pialu Hiburuali hearu olo pehalu wai bule mbelo biguli dindi bibahendeni pulame helo, Hondo pudaba, lene. <sup>4</sup> Solohanda Pilidia ami bo wahayagola Pilidialiru keba ho ka layago Isaraeleali ti hale howa hene. Ani bu howa agali bibahendeme Solohanda Giligalani mo ngoai hadaba lalu olayagola tigua hale halu ibalu ibu heba hogimbu bini.

<sup>5</sup> Ani buwa heagola Pilidialiru ti nde Isaraelealiru baba wai bule mo ngoai ho hene. Ani bialu tigua wai biaga garo ale mini karisi nogo hosini gili lagane daosini pira tebira (3,000) wialu agali nogo hosini biruwa gerai lalu wai bulene daosini waragaria (6,000) halu ami agali aulolebe nalabehe iba angeni iba mu ale tidiyu halu bini. Ani buwa tigua tidiyalu Migimasa tano Bedabeneha ni tagira ibiragohayagi puwa ogoriani balai anda bu hene. <sup>6</sup> Ani buwa tigua Isaraeleali biaru bole lowa hongo gibi halu uruni mo ko howa badai bibe tobahe minalu bene. Ani biyagola Isaraeleali maru egeandaha puwa bira do halu maru gundu uli wiaruhabi dindi hau iba uli ege tole wiaruha ibida puwa bira do hagahaga bini. <sup>7</sup> Maru Iba Yodana domalu ange edeyagi hameigini Gada Gileadala daluhayagi ubade halu pene.✠

Solo ibu Giligalani haho winigo agali ibu baba hayarume gi howa duru dege dindi halu hene. <sup>8</sup> Solo ibu Samuelehanda ogoriani lola habiya layago ibilo lowa horo karu Giligalani hondo ho wini. Ani biaria Samuele ibu Giligalani naibi wiaabo hene. Ani biyagola agali biarume Solo helalu ti purogo lolebini. <sup>9</sup> Ani biyagola ibugua tihondo lalu, Mbirale bo lomabia howa delolenebi mbirale ina Anduane Homogola ho gimbu bulenaga bo lomabia ho mulenebi i koria yalu ibidaba, lene. Ani layagola tigua yalu ibuwa ibuhondo miyagola ibugua bo lomabia ho delene. <sup>10</sup> Ani buwa áyu dege delomaro bialu heaore Samuele ibu anda ibini. Ani ibiyagola Solo ibu Samuelehondo turu halu lola hole pene. <sup>11</sup> Ani biaria dege Samuelehanda lalu, Ína agi bialu haribe, lene.

Ani layagola Solohanda ladai bialu lalu, Agalime i hangu helalu pialu ínabi ibule laridagua naibirigoni. Ani bialu Pilidialiru Migimasani mo ngoai howa ha bigi biyagola biru, lene. <sup>12</sup> Ani biyagola ina manda birugola Pilidia ami agalirume i áyu Giligalani koria bole íbu daliragonida laru. Anduane Homogo ibugua agua bule manda bu kabe ibunaga hame nahende koore ibiragonida manda biru. Minime aguani manda buwa ina mbirale mbira bo lomabia howa mulene ibira haya, lene.

<sup>13</sup> Ogonidagua layagola Samuelehanda ladai bialu lalu, Ogonidagua bialu haridagoni mini nawi howa bialu harida, lene. Ína Anduane Homogo ínaga Ngode Datagali-wabehanda bibelo ngiyago mo wahowa bialu harida. Ína ibugua bibe layadagua bialu henedale nde ibugua ínaga aguanene mani hararume Isaraele wali agali haru halu haho wiaabo helo henge ngidale. <sup>14</sup> Ai irane ina ibugua bibelo lo wiyadagua nabirigome ina haru haga harigoni áyu hamaro bulebere, lene. Ani bialu Anduane Homogo ibugua agali ibu hame ledagobi mbira ibunaga wali agali haru helo dabo aribia howa helolebira, lene.✠

<sup>15</sup> Ani lamialu Samuele ibu Giligala tano yu wahalu Beniyamini dalu Gibeaa pene. Ani piyagola Solohanda ibunaga ami agali ibu heba hearu dagalo handalu hearia handari waragaria (600) ale heneya. <sup>16</sup> Ai Solobi ibu igini Yonadanabi libunaga agali biarubi

✠ 13:7: 1 Sml 10.8 ✠ 13:14: 1 Sml 15.28, Iba 89.20, Ab 13.22

balai anda buwa Beniyamini dalu Geba tanoni hene. Ani biagola Pilidialiru ti nde Migimasa tanoni balai anda buwa hene. <sup>17</sup> Howa Pilidiali ami tidi tebo wai taya pole anda bu paliyagoha howa ibu tagira pene. Tidi mbirago Obara tano wiago tigatiga Suala daluhayagi pene. <sup>18</sup> Tidi mendego Bedehorono tano tigatiga piyagola tidi tebonego Seboimu dindi guane wiagola dindi ko yobila tuni pu amu hene.

<sup>19</sup> Ogoningi Isaraeleali hearu aria mbirame aeane timu yandarebi wabiaga mbira nahe hene. Nahenedago irane Hiburualeali hearume wai biaga ayu tibu ne kirobahebi yandarebi mbira wabulilono Pilidialime mamage bayuwa haga hene. <sup>20</sup> Ani biaganego Isaraeleali tinaga mabu dindi aliaganebi ayu bigibi ayu pelebabi aeane nene garayabi ngarubi uruni bibahende mo tiga bilobi ne helobi Pilidiali ti karia hangu yalu piaga wini. <sup>21</sup> Ogoni biragonaga yolo ayu ne haragonagabi nogo bulumaga waraga ira homane luni mbira mo tiga biragonagabi yolo muni emene mbira miaga wini. Ani bialu muni kira mabu dindi aliaga aeanebi ayu bigi ne haragonagabi miaga wini. <sup>22</sup> Ani biaga wini biagoria wai bulene horo hayangi Isaraeleali biaru mbira giha ayu yandarebi mbira nayiore libu kirali Solola ibu igini Yonadanala libu hangu yandarebi ayu tibu ne kirobahe yu hene.

<sup>23</sup> Ani biagola Pilidiali biarume, Ami agali tidi mbira Migimasa hariga dorogoneni hapai ho hole pudaba, lene.

## 14

### *Yonadanahanda wayali howa binigo ogo*

<sup>1</sup> Horo mbirungi Yonadanahanda agali daliahe mbira Yonadanahanda wai biagane aleru yu heagohondo lalu, Iyame Pilidiali balai anda bu kagoriani ubade harabane, lene. Ani bule manda biribidagoni Yonadana ibu aba Solo nalamini. <sup>2</sup> Solo ibu Migirono dindini ira mini pomegaranade mbira heago andanehaibunaga ami agali handari waragaria (600) agima biaru heba Gibe tano kaware ngelowa ogoriani balai anda bu hene. <sup>3</sup> Ogoningi loma binigo mo miaga Ahaya ibu Ngode Datagaliwabela bi lole howa aga mini ebodi karulaga winigo karulowa berene. Ibu Igabodi hamene Ahidubu igini hene. Ahidubu ibu Piniasa igini hene. Piniasa ibu Eli igini hene. Eli ibu Anduane Homogonaga loma binigo mo miaga Siloni halu bini. Ani binigo ogoningsi agali harimirume Yonadanahanda ti yu wahalu penego ti manda nabi hene.\*

<sup>4</sup> Migimasa pole hariga dorogone winigoria Yonadana ibu Pilidialiru balai anda bu heagoria ubade halu pole pene. Hariga dorogone ogoriani ege tole dene biagle kira handa dele buwa hariga abene tale buwa wene. Mbirago mini Bosese mendego mini Sene laga wini. <sup>5</sup> Mbirago ibu Migimasa handa amu howa hariga dorogone ogoriani gibunini wene. Mendego ibu gibuni mendehe Geba handa amu howa wene.

<sup>6</sup> Ani biagoria howa Yonadanahanda agali daliahe biagohondo lalu, Pilidiali Ngode Datagaliwabe mitangi nabiaga ede balai anda bu kagoria ubade mba nalare. Anduane Homogohanda iya biamogo bulebira badago. Ibugua biamogo biyagua nde iya agali kirali hangu haribayaguabiibunaga wayali holene iyahondo ngule binigo mbirale mbira agime ho hangai holebirabe, lene.\* <sup>7</sup> Ani layagola agali daliahe biagome ladai bialu lalu, Ina bule hame ledego ale bibiya i iya haru kabagoni, lene.

<sup>8</sup> Ani layagola Yonadanahanda lalu, Ogoni karulape. Iyame edegoriani pu banga bialu kabaria Pilidialiru tigua iya de hendelo. <sup>9</sup> De hondowa tigua iya kabagoria ibulumaya ogoriani hondo hadaba layagua o kabagoriani hope habiya. <sup>10</sup> Ani ndo iyame ti kagoria ibidaba layagua ogoni Anduane Homogohanda wayali holene hongo ngidogoni lalu manane walia haragonigo iyame mbaliya, lene.

\* **14:3:** Aga mini ebodi Haru Tagira Penego 25.7 handabe. ☆ **14:6:** Hgn 7.4, 7.7, 2 Bit 14.11



<sup>11</sup> Ani lowa libuni Pilidialiru hendelo hapani haribi. Ani hebiria Pilidiali biarume libu hondowa lalu, Hiburuwari maru gundu uliha bira do hayago ede tagira ibirago de handadaba, lene. <sup>12</sup> Ani lowa tigua Yonadanala agali daliahe biagola olade halu, Ogoria iname mbirale mbira langule yidamago langulumaya ibidaba, lene.

Ani layagola Yonadanahanda agali daliahe biagohondo lalu, Ina berodagua bibe. Anduane Homogohanda Isaraeali wayali holene ngiyadago, lene. <sup>13</sup> Ani lowa Yonadanahanda hariga dorogone biagoriani gi ge hama iraga halu piyagola agali daliahe biagome piyadagua talima mama pene. Puwa Yonadanahanda Pilidiali biaru ho ibira hama piyagola agali wai biagane aleru yi biagome bo home lama aribia hene. <sup>14</sup> Yonadanala agali wai biagane aleru yi biago labome halu mbira pigane mabu tu mbiraoreni hangu minalu baribigoni agali pira kira (20) ale bo home laribiya. <sup>15</sup> Ani biya layago hale howa Pilidiali bibahende dindi leneha hama pearu gi gibi howa hene. Wai taya piaga biarubi ami agali biarubi balai anda bu hayaruni dindi bi lalu ema biyagola gi howa luluyu hai hene.

### *Isaraealirume Pilidialiru bo podenego ogo*

<sup>16</sup> Ani biyagola Solonaga ami agali biaru ti Beniyamini dalu Gibeani howa handalu hearia Pilidiali biaru luluyu yalu gerai ibida pugupugu biyaria de hendene. <sup>17</sup> Hondowa Solohanda ibunaga agali ibu heba hayaruhondo lalu, Ami agali biaru mbira bereba ai hayadabe hondole dagalo handadaba, lene. Tigua ani layadagua dagalo handalu hemiria Yonadanala agali daliahe wai biagane aleru yu hayagola naheyane hendene. <sup>18</sup> Solohanda loma binigo mo miaga Ahayahondo lalu, Ngode Datagaliwabenaga Habo Nalolene Bi lo winigonaga Mbogoyi biago ogoria mo yalu ibu, lene. Horo ogoningi Ahaya ibu aga ebodi ogoni karulowa Isaraele wali agalinaga wanakuini pu bamba halu pene. <sup>19</sup> Solo ibu loma binigo mo miaga biagohondo bi lalu heagola Pilidialiru balai anda bu heagoha mo luluya hayago mo timbuniore hene. Solohanda loma binigo mo miaga biagohondo lalu, Anduane Homogo hale holene horo henge nawida, lene. <sup>20</sup> Ani lowa ibunibi ibunaga ami agali biarubi ti haru tidiyu pialu Pilidiali baba wai bule pene. Pialu hearia Pilidialiru tini degedege lulu timbuniore yuwa tini yimi aleme bagabaga bialu badene bialu hearia hendene. <sup>21</sup> Hiburuwari maru Pilidialihayagi henego ai ho beregedalu Solola Yonadanala heba hogimbu bialu Isaraealihayagi hole daibini. <sup>22</sup> Isaraeali maru Eberaimi hari bare wiaruha bira do hene biaru biruwa hale halu hearia Pilidiali biaru ibida gerai lalu pora layago hale howa tibi tagira ibalu Isaraeali ti heba hogimbu buwa Pilidiali biaru minalu bama pene. <sup>23</sup> Ani bialu amuraore Bedabeneha ba amu halu bo pelene. Horo ogoningi Anduane Homogohanda Isaraealiru biamogo timbuniore bini.

### *Wai buwa mani maru bima penego ogo*

<sup>24</sup> Isaraeali biaru horo ogoningi tomo garibi lowa hongo nahe hene. Ogoni irane Solohanda bi mbira hongohe nabule lalu lowinigo ogoni agua lene. Mbiralí áyu tomo mbira inaga waitigi agali pani bole ngogo badai nabidoore nalu hayagua ogoni ibu ha henego holebira, lene. Ani layagola horo ogoningi mbiralime mbirale mbira naneore hene. <sup>25</sup> Ani bu howa ti bibahende irabu wiagoria pialu hemira mone ibane aulolebe tobahe dewa do wiaria hendene. <sup>26</sup> Ira hama pearunaga mone ibaneme tolo tagi howa do wima pearia hondowa mbirame do na nabinigo ogoni irane ti bibahendeme Solohanda ha ho wiyago gi howa mbiralime mbira nadoneore hene. <sup>27</sup> Ani lo wiago Yonadana ibu abahanda agali mo gi halu ha hayadagoni ibu nahalehe hene. Ani bu howa ibugua ira kanogo mbira ibuni yu henego yamuwa mone ibane dendebe palu tolo tagi ho wiagoha pelowa maru dugu nene. Abale nayaore ibu mini dungu lalu tombe hene. <sup>28</sup> Ani buwa heagola ami agali hayaru aria mbiragome lalu, Ina tomo nane howa

hongo nahe kamagoni í abahanda ina mo gi halu lalu, Mbirali ibu tomo mbira áyu nayagua ogoni ibu ha ho wero lo nga, lene.

<sup>29</sup> Ani layagola Yonadanahanda ladai bialu lalu, I abahanda ogoni inanaga agali mo genda hole gibi mbira bialu heneda. I kogo handadaba dungulo tombe howa kogoni irane ina mone ibane dendebe maru nowa ko. <sup>30</sup> Ai áyu inanaga agali karu tinaga waitigi hearu bo podalu tomo mo yalu ibirimaru nenedale nde tombe howa dungulo hama pedaleda. Ai nde tomo nowa hongo kagola tigua Pilidialiru auore lolebe tobahe bo bila kaledago manda bia handadaba, lene.

<sup>31</sup> Horo ogoningi Isaraealime Pilidialiru balu bo podama pu gimbu binigo Migimasa howa bama pialu Ayalononi bairi hene. Bairi hayagoria howa Isaraeali biaru ai tomo nane hene biago ndobe garibi timbuni lowa hongo nahe hene. <sup>32</sup> Ani bu howa ai tini wai bialu howa nogo sibibi bulumagabi haru íbu helarimigoria gerai abale pene. Puwa nogo sibibi bulumagabi haru íbu helarimigoria yani howa abale balu bo podo бага buwa mbirini wiaru abale darama heaore dawa nalu hene. <sup>33</sup> Ani bialu heago ti maru hearume Solo lamialu lalu, Agali o karume Anduane Homogohondo mana koore bialu nogo mbirini wiaru darama kaore nalu kago de handa, lene.\*

Ani layagola Solohanda ga ladaga halu lalu, Tí Ngode Datagaliwabenaga mana pugualu ko biaga kamagoni. Ege tole timbuni mbira duguwa i kogoria pendo pendo ibiladaba, lene. <sup>34</sup> Ani lowa bi mende lalu, Agali karuha puwa tinaga nogo sibibi bulumagabi haru halu bibahende ogoria ibidaba lole pudaba. Tigua nogo uruni ogoria balu podo бага buwa dawa nai helo. Tigua Anduane Homogohondo mana koore bialu nogo mbirini darama heaore nayadagua nolene nawiore, lene. Ani layagola mbiraga ogoningi ti bibahendeme tinaga bulumaga biaru haru halu ibuwa ogoriani bo podo бага bini. <sup>35</sup> Ani biyagola Solohanda Anduane Homogohondo bo lomabu mulene dabu mbira pigane ogoningi bu helene.

<sup>36</sup> Ani buwa Solohanda agali ibu heba hayaruhondo lalu, Ai áyu mbiraga Pilidialiru karia daluwa minalu bo hingedai halu mbira yu wanahelogo bibahendeore bo yulo waore halu kamaria egabile lamija ma nalaramigo, lene.

Ani layagola tigua ladai bialu lalu, Ina bulene bayaledane hendedego ale biai habe, lene.

Ani leagola dege loma binigo mo miaga heagome lalu, Iname Ngode Datagaliwabe ala hale hamiya, lene.

<sup>37</sup> Ani layagola Solohanda Ngode Datagaliwabehondo hale halu lalu, Ina Pilidialiru minalu bolenego karulapedabe. Iname wayali holomaya hongo ngulebe, lalu hale hene. Ogonidagua lalu hale hayadagoni hale helowa Ngode Datagaliwabe ibugua horo ogoningi dege ladai nabi hene. <sup>38</sup> Ani biagola Solohanda agali haru haga haguane hearuhondo lalu, Ogoria ibuwa mana ko mbira áyu agi binidabe dabo handamija, lene. <sup>39</sup> Ani lowa ibugua buleorego lalu, Mbira Anduane Homogo haluhe kago ibugua Isaraealiru wayali helo pele miaga kagonaga minini mbirali ibu mana ko ogoni bu kayaguabi ini igini Yonadanayaguabi homelo bolene wulebira lowini, lalu lene. Anidagua layagola mbiralime mbira nale bi hundu wini. <sup>40</sup> Ani bu wiagola Solohanda tihondo lalu, Tí bibahende edegoria heyu hadaba. I igini Yonadana iya nde ogohayagi heyu harabago, lene.

Ani layagola tigua ladai bialu lalu, Ina bulene bayaledane hendedego ale biai habe, lene.

<sup>41</sup> Solohanda Anduane Homogo Isarealinaga Ngode Datagaliwabehondo lalu, Anduane Homogo-o ina ihondo áyu ladai nabi kego irane agibe. Anduane Homogo Isaraealinaga Ngode Datagaliwabe-o inaga ege tole mini Urimu Tumimula lomabia hene ngagoriani howa ihondo ladai bibe. Mana ko ogoni ina biniyaguabi Yonadanahanda

\* 14:33: LBM 7.26-27, 17.10-14, 19.26, Man 12.16, 12.23, 15.23

biniyaguabi ogome biya lalu ege tole mini Urimu lalu ladai bibe. Ndo inaga Isaraele agalime ko biniyagua ege tole mini Tumimu lalu ladai bibe, lene. Ladai biyagola handalu hearia mana ko biagoni Yonadanala Solola libugua biniyane handalu agali ti ndoyane hendene.†✳ 42 Aniyagola hondowa Solohanda lalu, I igini Yonadanala ila iyane manda bu hondolobaya, lene. Ani lowa handalu hebira Yonadana ibuyane handa walia hene. 43 Aniyagola Solohanda Yonadanahondo hale halu lalu, Ina mbira agi bu kebe, lene.

Ani layagola Yonadanahanda ladai bialu lalu, Ina mone ibane emene hangu mbira ira kanogo yu harugome duguwa naru. Ai i o kogonigo ini homole manda bu ko, lene.

44 Ani layagola Solohanda ibuhondo lalu, I bo home nalayagua nde Ngode Datagali-wabehanda i bo home lolobada, lene.

45 Ani layago lelowa agali hearume Solohondo lalu, Yonadana ibugua Isaraele agali wai bialu wayali helo hongo howa haru hayago bo home lolebira laribe. Ndoyago. In-ame Anduane Homogo haluhe kagonaga minini howa bilogoore lo weramago ibunaga hagianeni howa mandari gunguni mbiraorebi heba ereba naholebira larama. Ibugua áyu biyago Ngode Datagaliwabehanda biamogo biyagola biya, lalu lene. Ani layagola Yonadana homolene winigo agali biarume mo wialu pelene.

46 Ani biya handala mani Solo ibu Pilidialiru bo talima puabo nahe ti tini daluhayagi ibu dai biai hene.

### *Solo ibugua haru henegobi ibu one waneigini henerubi ogo*

47 Solo ibu Isaraele wali agali kini howa ibugua ibunaga waitigi bibahende hearu baba wai biame halu hene. Ibugua wai bialu henedaruni uru baba bini. Moabalibi Amonoalibi Idomoalibi Sobanaga kini hearubi Pilidiali hearubi wai biame halu bu wayali halu hene. Wai uruni bibahende baba bialu hayadagoni ibugua wai bialu wayali hangu hene. 48 Ani bialu ibugua wai yo hende elahe howa Amalege wali agali hearubi heba balu bo podalu wayali hene. Isaraelealiru bai hole biyaruni bibahende ibugua mo wiai hene.

49 Ogoningi Solo ibu igini Yonadana Isibi Malagisua imaru hene. Ani bialu ibu wane wahene mini Meraba bialu heyogoneore mini Migala berene. 50 Ibu one mini Ahinoama agali Ahimasa mbira henegonaga wane berene. Ani bialu ibunaga ami agali haru haga haguane henego mini Abane ibu Solo aba hamene mini Nere mbira henego igini hene. 51 Ani bialu Solo ibu aba Kisi hene Nere ibu aba Abane hene libu haru aba agali mini Abile mbira henegonaga igini hene.

52 Ani binigo Solo ibuni heangi Pilidiali baba wai gibi hongo howaore bialu hene. Ani bialu howa agali hongohebi elahebi mbira hearia handa walia hayago ibunaga wai biagane ami heba helo helatago bigi bini.

## 15

### *Amalegeali baba wai binigo ogo*

1 Samuelehanda Solohondo lalu, I Anduane Homogo ibugua ina ibunaga Isaraele wali agali haru habelo weli ngabi tara hagianeni odo wia hole pu layago i kogoni. Ani birugo áyu Anduane Homogo Hongo Haiheore kagome bi larago ina hale habe.✳

2 Áyu ibugua Amalege wali agali karunaga mamali hearume Isaraelealiru Iyibi dindi yu wahalu tagira ibiyagola tigua waitigi halu handabe manga hayagonaga ti tandaga nelo mulebira.✳ 3 Ai i áyu pialu Amalegealiru bibahendeore bo hilo wahaiore halu tinaga mbirale ngaru bibahendeore mo ko haiore hole pu. Ani bialu mbiraorebi mbira yu wa naholego wali agalibi wandari igiribi waneigini emene gali damene bibahendebe nogo

† 14:41: Urimu Tumimula Haru Tagira Penego 28.30 handabe ✳ 14:41: Dag 27.21, 1 Sml 28.6 ✳ 15:1: 1 Sml 10.1 ✳ 15:2: Har 17.8-14, Man 25.17-19

kamelebi dongibi sibibi bulumagabi nogo uruni damene bibahendeore mbirago helo yu wa naholego homelo bo hilo wahai habe laya, lalu Samuelehanda Solo lamini.

<sup>4</sup> Ani layagola Solohanda ibunaga ami agali biaru bibahende olowa Teleme tanoni dabo hendene. Handalu hearia ami agali Isaraele howa daosini handari kira (200,000) íbu halu Yuda howa daosini pira (10,000) íbu halu biaria hendene. <sup>5</sup> Hondowa Solohanda ibunaga ami agali heba Amalege tano timbuni wiagoria puwa iba piaga dindi yobi wiagoria bira do howa yu berene. <sup>6</sup> Ani bu howa ibugua Kenialiruhondo bi mbira agua lo pelene. Wali agali kamiru tínaga mamali henedarume Isaraele wali agaliru iyibi dindi howa tagira ibiyangi tigua urunihondo turu halu bayale binigo aria kamiyagua Amalegealiru heba mandagi nahe wahalu abale tagira pilimu. Ani birimiyagua tí Amalegealiru baba bamaga halu naboliya, lalu lamini. Ani laya handala Kenialí ti tagira pialu pene.

<sup>7</sup> Ani peagola Solohanda Amalegealiru bo pehalu wayali hene. Wai bialu bama pu gimbu binigo ona ndo amuraore Habila howa Sua uyu ni tagira ibiragohayagi Iyibi dindi wiago tigatiga bama puabo hene. <sup>8</sup> Ani bialu Solohanda Amalegealinaga kini mini Agaga gime minu yalu wali agali bibahende bo homelai helene. <sup>9</sup> Ani bialu Solobi ibunaga ami agali biarubi tigua Kini Agaga bo home nale mo wini. Ani bialu nogo sibi bayale damenebi nogo sibi igini hungubalua damenebi bulumaga bayale damenebi bulumaga igini hungubalua damenebi bo hilo payabu wanahe helene. Ani bialu mbirale maru bayale damene wiaru mo ko nahe ngelalu ko habane nabulene damenego hangu dabalú mo ko hai hene.

*Anduane Homogohanda Solo ibu kini helo hame nalenego ogo*

<sup>10</sup> Anduane Homogohanda Samuelehondo lalu, <sup>11</sup> Ina Solo ibu haru haga kini helo hela larugo áyu í genda ho ko. Ogoni ibugua í erembira ngialu ina ibugua bilo lo wirudagua nabiyada, lene. Ani layagola Samuele ibu genda ho howa dugu bialu Anduane Homogohondo bi la ho wialu egabi lelene. <sup>12</sup> Ogoningi egerabagiore egabi layagola ibugua heyalu Solo tai bule pene. Puwa hale halu hearia Solo ibu Kamelo tano mbira winigoria ibuni mitangi bilonaga dabu mbira ibunime ogoriani buwa helalu Giligala dindi puabo halu piya layaria hale hene. <sup>13</sup> Puwa hearia Samuele ibu ogoriani pene. Pialu hearia Solohanda Samuele lola howa lalu, Samuele-o Anduane Homogo íbugua íhondo turu halu biamogo bilo. Ina Anduane Homogohanda bi lo wiadagua bialu ho kogoni, lene.

<sup>14</sup> Ani layagola Samuelehanda hale halu lalu, Aniyagua nogo bulumagarume gu lalu nogo sibirume gigaé laruane hale kogo irane agidabe, lene.

<sup>15</sup> Ani layagola Solohanda ladai bialu lalu, Inaga agali hearume Amalegealirunaga haru hayada. Tigua nogo sibi bayale dameneru nogo bulumaga bayale dameneru inaga Anduane Homogo Ngode Datagaliwabe kagohondo bo lomabu mule lowa bo wahai nahe hela daibilalu maru bibahendeore bo wahaiore harima, lalu lamini.

<sup>16</sup> Ani lamiyagola Samuelehanda lalu, Bi waha. Anduane Homogohanda áyu mbiraga mbira íhondo langiyago í languliya hale ha, lene.

Ani layagola Solohanda lalu, I hale kogo o langi, lene.

<sup>17</sup> Samuelehanda ladai bialu lalu, Ina manda bu handaregola í agali mini lene ndo harudalo manda buwa keyaguabi í Isaraele hameigini tara tara karunaga kiniore kolo manda bibe. Ani bialu Anduane Homogo ibugua ina Isaraealinalaga kiniore habe lalu weli ngabime hagianeni odo wia howa helayagoni ke. <sup>18</sup> Ani bialu ibugua Amalegeali mana ko biaga karuni bo hilo wahaiore hole pobe lene biagoni ke. Ibugua íhondo lalu wai bialu wali agali ogoriani karu bibahendeore bo hilo wahai halu wahabe layago kegoni. <sup>19</sup> Ani layago lelawa ogonidagua nabirigo irane agibe. Ani bialu mbirale

☆ 15:11: Pig 6.6-7, 1 Kin 9.6-7

damene mo ko halu bo haealo wahabe layago abale de hondo yalu gerai puwa kaguga pudadede bialu Anduane Homogo ibugua hame naleadagua birigo irane agibe, lene.

<sup>20</sup> Ani layagola Solohanda ladai bialu lalu, Ina Anduane Homogohanda bibe layadagua birudagoni. Ibugua, Pu, layadagua bialu Kini Agaga haru halu dai bialu Amalegeali bibahende bo hilo wahaiore harugoni. <sup>21</sup> Ani anigo inaga agaliru tigua nogo sibi bayale dameneru nogo bulumaga wangabe bayale dameneru tigua bo hilo wahai nahe haru halu pene. Baradagua tigua inaga Anduane Homogo Ngode Datagaliwabe kagohondo bo lomabu mule lowa Giligala tanoni haru halu ibiyadagoni, lene.

<sup>22</sup> Ani layagola Samuelehanda lalu, Anduane Homogo ibugua hame ago ledabe. Ibugua ledadaguaore bulenegobe be mbirale bo lomabia halu mulene ngarube. Bayale bulene ngagoore ogo ibugua bibe laradaguaore bulenego hangu dunini. Mbirale nogo sibi bayalego ibuhondo bo mulenego dindiha. <sup>23</sup> Ani bialu ibuhondo dogo ho holenegro ko gamugamu biaga ale dege wialu tingini mine howa balagala holenegro mana ko ngubiore dama gime wabinigohondo bi pupu wiaga ale nga. Ani bialu irane ina Anduane Homogohanda, Bibe, layadagua bule hame nalarigome ibugua i kini habelo hame naleadagoni, lene.

<sup>24</sup> Ani layagola Solohanda ladai bialu lalu, E ina mana ko ngubiore buwa haruda. Ai ina Anduane Homogohanda ina buliya lo wiago mo wahalu ani bialu ina ihondo, Ogodagua bibe, lalu langiriru nabiruda. Ani nabirudagoni irane inaga ami agali hearu hondowa gi halu tigua hame leadagua hangu biru. <sup>25</sup> Ani bialu harugo ayu ina inaga mana ko birudaruni la nabi embeda halu ai ina Anduane Homogo mitangi bialu lotu loliyanaga iya haru dai bibiya, lene.

<sup>26</sup> Ani layagola Samuelehanda ladai bialu lalu, I ila haru mandagi dai nabulebero. Ina Anduane Homogonaga bi lo wiago manga harigola ibugua nde i Isaraele wali agalinaga kini haabo habelo hame naleadagoni, lene.

<sup>27</sup> Ani lalu bialu Samuele ibu beregedalu dai bule biyagola Solohandaibunaga agani yaniho wiagola aga biagoni budini. <sup>28</sup> Ani biyagola Samuelehanda Solohondo lalu, Anduane Homogohanda Isaraele wali agali ina kini howa haru holenegro ayu budu yalu puwa agali mbira tigabi i ale ndo mbira heagohondo mo miya. <sup>29</sup> Isaraelealinaga Ngode Datagaliwabe Daliga taraore kago ibugua ke nahagabi mini beregeda nabiagabi ka. Ani bialu ibu agali ale ndo howaibunaga mini beregeda nabiaga kagoni, lene.

<sup>30</sup> Ani layagola Solohanda ladai bialu lalu, Ina mana ko ngubiore bialu haruda. Ani lowa dege halu mbira hangu inaga wali agali haru haga haguane hama pedarunagabi Isaraeleali bibahende karu wanakuinibi i yo hondo nahe inaga mini mo yaraga habe. Ani bialu ina Anduane Homogo inaga Ngode Datagaliwabe mitangi bialu lotu loliyanaga iya haru dai bibiya, lene. <sup>31</sup> Ani layagola Samuele ibu Solola haru dai buwa Solo ibugua Anduane Homogo mitangi bialu lotu lalu hene.

<sup>32</sup> Ani bialu heagola Samuelehanda lalu, Kini Agaga i koria haru halu ibu, lene. Ani layagola Agaga gi howa duru lama ibu hearia pene. Pialu howa homoleneore gibidagolo ibuni hangu mitangitangi bima pene. <sup>33</sup> Ani biagola Samuelehanda lalu, Inaga wai biagane ayu tibu ne kiobahe biagome aya dewa waneigini nahe berelo berelarigo ai ayu i aiyabi waneigini nahe birulebira, lene. Ani lowa ibugua Agaga Giligala tanoni bo lomabu delagane dabu biagoriani buhayagi howa bo podobaga bini.

<sup>34</sup> Ani bialu Samuele ibu Lama dindi pialu Kini Solo ibuni andaga Gibeapole pialu hene. <sup>35</sup> Ani bialu Samuele ibu hahowiangi kini biago ibu lone de nahendeibunaga dara dege ho wia halu hene. Ogoni Anduane Homogo ibuguabi Solo Isaraele wali agalinaga kini helo mo helarugo darabi bialu haruda manda bini.

☆ 15:22: Iba 40.6, 51.16-17, Ais 1.11-15, Yar 7.22-23, Mg 12.33 ☆ 15:23: Man 18.9-14 ☆ 15:27: 1 Sml 28.17, 1 Kin 11.30-31 ☆ 15:29: Ese 24.14



## 16

### *Samuelehanda Debidi ibu kini helo helenego ogo*

<sup>1</sup> Anduane Homogohanda Samuelehondo lalu, Ína Solonaga dara howa mitangi bu kene dege lu agua ale ho holeberebe. Ina ibu Isaraele wali agalinaga kini helo hame nale hondo waharugo ka. Ani bidogo áyu ína ira olibe lininaga weli maru hambu yalu Bedelehemeni puwa agali mbira mini Yasi kago karia pobe. Poregola ina ibu igini mbirago kini helo dabedogo holebira, lene.

<sup>2</sup> Ani layagola Samuelehanda ibuhondo haleho dai bialu lalu, Ina ogonidagua agua bialu buliyadabe. Solo ibu ogoni hale hayagua ibugua ì bolobadago, lene.

Ani layagola Anduane Homogohanda ibuhondo ladai bialu lalu, Nogo bulumaga igini hungubalua kago mbira haru halu pobe. Puwa agua labe, Ì ogoria íbu kogoni Anduane Homogohondo mbirale mbira bo lomabu mule ko, labe. <sup>3</sup> Ani lowa Yasi ína mbirale bo loma bialu kegoria ibilo, Íbu, labe. Ibu kagola ína mbira bulene ngago ogodagua bia lalu languliya. Ina agali mbira kini helo ogo lalu mini larogo ína ira olibe lininaga ibane hagianeni odo wia habe, lalu Anduane Homogohanda Samuele lamini.

<sup>4</sup> Samuele ibugua Anduane Homogohanda bibe layadagua bialu Bedeleheme pene. Dindi timbuni ogoriani wiagonaga haru haga haguane hearume Samuele ibiyagola ti lola hole gi howa durulo yalu ibuwa ibuhondo hale halu lalu, De gandeba handaga-o ína ogoria ibiridagoni mo palia hole ibiribe, lene.

<sup>5</sup> Ani layagola Samuelehanda ladai bialu lalu, È ìna ibirudagoni Anduane Homogohondo mbira bo lomabia ho mule íbu ko. Ani bule íbu kogonigo tíni Anduane Homogonaga deni dodo nahe bayale helonaga mana bialu howa ì porodagua maliya ibidaba, lene. Ani lalu ibugua, Yasi íbi ì iginiru tíbi tígua Anduane Homogonaga deni dodo nahe bayale helonaga mana bialu mbirale bo lomabia harogoria ibidaba, lene.

<sup>6</sup> Uruni tigua ogoriani anda íbu heagola Samuele ibugua Yasi igini Eliaba de hondowa ibuni dege mitangi bialu, Agali o Anduane Homogonaga wanakuini heyu kagoni heneneore ibugua dabene biago ogonida, lo mitangi bini. <sup>7</sup> Ani mitangi bu heago hondowa Anduane Homogohanda Samuelehondo lalu, Agali luni baya dombaraleda lalu tiga nahandabe. Ina ibu hame nale kogo irane ina agalime dabagadagua ndo dabaruli. Agalime dongone tagirahayagi hangu de handaga kago ina bu habanaha de handaruli, lene.✧

<sup>8</sup> Ani layagola Yasihanda ibu igini Abinadaba olowa Samuele hearia haru halu ibini. Ani biago bilowa Samuelehanda lalu, Ibu ndo. Anduane Homogo ibugua ogoni ibubi nadabeda, lene. <sup>9</sup> Ani layagola Yasihanda Sama haru halu ibini. Haru ibiyagola Samuelehanda lalu, Ogonibi ndo dege Anduane Homogohanda ibubi nadabe, lene. <sup>10</sup> Aguani dege bima pialu Yasihanda ibu igini karia biaru bibahende Samuele hearia haru halu ibai hene. Ani biyagola Samuelehanda Yasihondo lalu, Ndo. Anduane Homogohanda uruni bibahende nadabene hanguda, lalu lamini. <sup>11</sup> Lamuwa Samuelehanda Yasihondo hale halu lalu, Í igini maru kabe, lene.

Ani layagola Yasihanda ibuhondo ladai bialu lalu, Mbiraore heyogone dege ha kago ibu tagirani nogo sibi haru harua, lene. Ani layagola Samuelehanda lalu, Ogoria ibabe lalu lamibe. Mbirale bo lomabia hole birimagoni nabi howa ibu ibiragola bimíya, lene. <sup>12</sup> Ani lowa heagola Yasihanda igiri heyogone biago Samuele hearia ibilo, Mbiralime damu pu, lene. Ai igiri biago ibiyagola handalu heariaibunaga tingini baya dombarale igiri daliaheniibunaga de wále bayaore hearia hendene. Handalu hearia Anduane Homogohanda Samuelehondo lalu, O biagoni kagonigoibunaga hagianeni olibe lininaga weli odo wiaha, lene. <sup>13</sup> Ani layagola Samuelehanda Debidi hamene

✧ 16:7: Iba 147.10-11, Ais 55.8, 2 Ko 10.7

hearunaga wanakuini haru bambaho helowa olibe lininaga weli biago yamuwa Debidinaga hagianeni odo wini. Ani biyaore Anduane Homogonaga Dinini ibugua Debidi haru halu ogoningi howa ibu heba halu haho wini. Ani biya handala Samuele ibuni Lama tano dai bini.

*Debidi ibu Solonaga biraga wiagoha henego ogo*

<sup>14</sup> Anduane Homogonaga Dinini ibu Solo yu wahalu piyagola dama mbira Anduane Homogohanda ibula helo ibilo henge miyagola ibuwa Solo ibu mo lulu yu hene.

<sup>15</sup> Ani buwa heagola ibunaga biabe biahaga hearume ibuhondo lalu, Ngode Datagaliwabehanda dama ibilo henge miyagome í mo lulu ya halu kagoda lowa ina manda bu harima. <sup>16</sup> Ani biyadago agali haguane-o ogoni agua bialu mo tiga bulene nga lalu langibe. Langeregola iname agali mbira gawā timbuni ale laga mbira ai kabe handalu tai bulumaya. Dama ini ibu kagoni agali ogoni ibugua gawā laragola í lone karulape holebere, laya.

<sup>17</sup> Ani layagola Solohanda agua bidaba laya, Agali mbira gawā bayaleore laga kago tai bialu í koría haru halu ibalimu, laya.

<sup>18</sup> Ani layagola Solo ibugua bi layago hale ho hayaru aria mbirame lalu, Bedeleheme tanoni agali Yasi kagonaga igini mbira kago ogoni ibugua gawā ladebe haga mbira ka, lalu lamini. Igiri ogoni ibu gi nahaga elaheni agali tingini baya dombarale mbira ka. Ani bialu ibu ami agali baya howa bi bayale lolene mbira ka. Ani bialu Anduane Homogonde ibu heba ka, lene.

<sup>19</sup> Ani biyagola Solohanda marume ibunaga bi yalu Yasi karia pelo tihondo lalu, Agua lalimu. Í igini Debidi nogo sibi haru haga biago í koría ibilabe lalu lamilimu, lene.

<sup>20</sup> Ani layagola Yasihanda Debidi nogo meme igini hungubalua mbira heba nogo dongi erembirani mberedi hirini wiaru heba iba be nogo dongoneme wabini wiaruha waini iba heba hambu tolo yalu Solo hearia pelo, Pu, lene. <sup>21</sup> Ani biyagola Debidi ibu Solo hearia puwa ibunaga biabe biahaga hene. Ani heagola Solohanda Debidi gubalini timbuni howa ibunaga wai biagane aleru yuha haga agali helo dabo helene. <sup>22</sup> Ani helowa Solohanda Debidiore gubaliniho ko lalu Yasihondo bi mbira lo pelene. Ani bialu Debidi ibu Solo heagoha helo ogoriani hela lene. <sup>23</sup> Ogoningi howa dama Ngode Datagaliwabehanda Solo ibu karia ibilo henge midangi Debidi ibunaga gawā yamuwa laga hene. Ani biragola dama Solo ibuha hayago wahalu tagira pialu poragola Solo mini ibalu bayale ibuni abale hayagobi hodai biaga hene.

## 17

*Golaidihanda Isaraeleali baba wai bia hendenegro ogo*

<sup>1</sup> Pilidialiru wai bule lowa Sogo tano mbira Yuda dindini winigoria mo mogo buwa hene. Tigua dindi Sogo Asegala hengeneni dindi mbira mini Ebesedamimu winigoria balai anda bu hene. <sup>2</sup> Ani biagola Solobi Isaraeleali biarubi ti nde tidiyuwa Ela dindi uluni wiagoria balai anda buwa Pilidiali baba wai bule manda manda bu hene. <sup>3</sup> Ani buwa heagola Pilidialiru tidiyu hari bare mbirani ho dabadaba heagola Isaraeleali ti bare mendeni tidiyu dabadaba howa dindi uluni wiape heagome mo tu wia heagola hahaga bini.

<sup>4</sup> Agali mbira mini Golaidi ibu tano Gede wiagoha howa Pilidiali balai anda bu heagoha howa tagira ibalu Isaraele baba wai bia hondole ibini. Ibu agali lu gibiore ge magi mida tebira ale hene. <sup>5</sup> Ani bialu wai biagane aleru ege tole mini boronosime wabinigo aga karulagadagua ibunaga tinginini hagianenibi ogoni genda timbuniore howa karulo hene. <sup>6</sup> Ibunaga ge dulinibi ege tole boronosime wabini wiagome karulo dambi ho hene. Ani bialu yandare mende ale yabiabi kaundia polene boronosime wabini mbira yandare hanagaha honowa payani henene. <sup>7</sup> Ani bialu ibunaga yandare mende ale nguni de bjaoleni toheore yu halu ibunaga aeane manda dehe gendabiore

karulo halu bini. Ani buwa heagola ami agali mbiraibunaga wai humbi yahagame bamba halu pene. <sup>8</sup> Golaidihanda heyu howa Isaraealiru olade howa lalu, Ede tidiyu kamiru wai bule ibini ndobe. Solonaga garabaya biabe biahaga agaliru-o i Pilidialiore ko. Agali tini kamiruni aria mbira ila wai bulubaya abale dabalubala ibiladaba. <sup>9</sup> Ani beremigola iyame wai bialu howa ibugua i bo home layagua nde iname tinaga garabaya biabe biahaga holomaya. Ina ibu bo home laruyagua nde ti inanaga garabaya biabe biahaga halimulo. <sup>10</sup> Hale hadaba. Ina ayu Isaraealeali baba hongo manda bia hondoliya. Ti mbirali ila wai bulubaya dabo ibiladaba, lalu lade hene. <sup>11</sup> Ogonidagua layago hale howa Solobiibunaga wai biaga agali biarubi ti mogo lalu gi timbuni hene.

*Debidi ibu Solonaga balai anda bu heagoha pu henego ogo*

<sup>12</sup> Debidi ibu hameigini agua hene. Ibu aba Yasi Ebarada dindi teneali howa Bedeleheme tano Yuda dindini wiagoha howa ibini hene. Yasi ibu igini halira hene. Solo ibu kini heangi Yasi ibuni agali waheore hene. <sup>13</sup> Ibu igini wahe tebirali ti Solo heba wai pole pene. Wahene Eliaba halu ibula palu bini Abinadaba halu ogoni ibula palu bini Sama halu ti pene. <sup>14</sup> Debidi ibu heyogoneore hene. Ani binigo igini wahene tebira biarubi ti Solo heba ho hea handala <sup>15</sup> Debidi ibu Bedelehemeni ibu abanaga nogo sibiru de hondo hole ibu dai bigi biaga hene.

<sup>16</sup> Egerebagi alendo Golaidihanda Isaraealeali hearuhondo wai bimija ibidaba lalu heane horo pira maria (40) pene.

<sup>17</sup> Horo mbirungi Yasihanda Debidihondo lalu, Ina widi lini irani hirinigo ogoni nu mbira ale yalu mberedi homane pira mbira urubi mo yalu i hameneru balai anda bu kagoria abale pu. <sup>18</sup> Ani bialu nogo bulumaga andu ibaneme wabini mini sisi pira wiarubi ami agali haru haga haguane kagohondo mibe. Ani bialu i hamene uruni agua bialu kabe bayuwa hondowa ti bayale hearia de handaru lalu waliala hole mbirale mbira mo yalu dai bibe. <sup>19</sup> Kini Solobi inaga hamenerubi Isaraealeali ami bibahende heba Ela dindi ulini wiagoria haame howa Pilidiali baba wai bialu ka, lalu lamini.

<sup>20</sup> Egerebagi hayagola Debidi ibu abale heyaluibunaga nogo sibi biarubi mbiralime haru habe lalu tomo wiaru mo yalu Yasihanda pu layadagua pene. Ibu puwa balai anda bu heagoria anda pialu hearia Isaraeale ayu dege tininaga wai hamani tagira pole wai huaro lama pialu hearia anda pene. <sup>21</sup> Pialu hearia Pilidiali amibi Isaraealeali amibi wai hamani dindi mo wigiwigi buwa wai bule handa dele buwa haghaga bini. <sup>22</sup> Ani biagola Debidihanda tomo yalu piyago mbirale wu haga heagohondo mialu ibu abale gerai lalu wai bule hodugu bu heagoria puwa ibu hamene biaruhondo, Ti agua kamibe, lalu hale hene. <sup>23</sup> Ibugua hameneru heba bi lalu hearia Golaidi ibuwa Isaraealeali biaruhondo wai bimija ibidaba lalu laga biadagua dege lalu heago Debidi ibu hale hene. <sup>24</sup> Isaraealeali ti Golaidi hondowa gi timbuni howa gerai lalu ibida pene. <sup>25</sup> Isaraealeali tini degedege lagalaga bialu, Ni ibu kago de handadaba, lalu tini ladele bialu hene. Ibugua ina yo handalu wai bi lalu kago hale hadaba. Kini Solo ibugua agali mbirame Golaidi balu homelaragohondo emena timbuniore mule laya. Iibunaga wanebi agali ogonihondo mule lalu dabu bilo lalu lowini. Ani bialu agali o biyagoni ibu hameiginiru ti muni dagiyibi nawilo lalu lowia dege bini, lalu tini lagalaga bialu hene.

<sup>26</sup> Debidihanda agaliibunaga wanakuini hearuhondo hale lalu, Mbiralime Pilidiali ogoni bo homelalu Isaraealealihondo ko ngubi tagabi biragoni golope helayagua agali ogoni ibuhondo emena agi mulebira larimibe. Ani biyaguabi Pilidiali Ngode Datagaliwabe manda nabi ogonibime Ngode Datagaliwabe haluhe kagonaga ami agali o kagobi au bope holebe, lene. <sup>27</sup> Ani layagola tigua ibuhondo Golaidi bo homelarago ibuhondo agua bulebira lalu lamini.

<sup>28</sup> Debidi hamene wahene Eliaba ibugua Debidi ibu agali uruni heba bi lalu hearia hale lalu ibu keba timbuni howa Debidihondo lalu, I ogoria agi bialu kebe. Inaga nogo

sibi wali agali nahagaruha hayaru aiwa haru kabe. Í igiri emenedago ina mbira agi bule ibiribe. Í bame wai birago hangu hondole ibirida, lene.

<sup>29</sup> Ani layagola Debidihanda hale halu lalu, Ai ina agi birudabe. Ina mbirale mbira halebi heba naholene wiaruabe, lene. <sup>30</sup> Ani lalu ibugua agali mende heagohondo ho beregedalu howabi bi ogonidagua dege hale hayagola ladai abale biyagola hale hayago dege hale hene.

<sup>31</sup> Agali maru hearume Debidihanda bi layago hale howa Solo lamiyagola Solo ibugua lalu, Debidi ibilo damu pudaba, lene. <sup>32</sup> Ibu howa Debidihanda Solohondo lalu, Kini-o Pilidiali ogoni hondowa mbiralime gi holene nawigo ina áyu ibula wai bule polebero, lene.

<sup>33</sup> Ani layagola Solohanda ladai bialu lalu, Í aleme ibula wai agua bulebe nabule. Í igiri emenedago ami agali bamba igiri emeneni howa hama ibini agali gibi ibu alela íla wai agua bulebe, lene.

<sup>34</sup> Ani layagola Debidihanda lalu, Kini-o ina i abanaga nogo sibi haru haruli. Haru koria budi ale gabua timbuni mini laionomebi biango dudu ale timbuni mini beamebi ibalu nogo sibi mbirago bo yalu piyagua <sup>35</sup> ina talima puwa minu balu nogo sibi biago mo wialu pelaruli. Ani bialu koria biango dudumebi budi laionomebi i porabu para howa hayule bialu karia ina gime mani minuwa balu homelaruli. <sup>36</sup> Ina budi ale laionorubi biango dudu ale bearubi baruligo ogonidagua Pilidiali Ngode Datagaliwabe manda nabiagame Ngode Datagaliwabe haluhe kagonaga ami agali mo tandaga halu kagoni ina ogonidagua dege boliya. <sup>37</sup> Anduane Homogohanda i budi ale laionoru biango duduale bearumebi bo nolene winigo ibugua pele ngiyadagua Pilidiali ogonime i nabelo pele ngulebirago manda bido, lene.

Ani layagola Solohanda ladai bialu lalu, Karulapego pu. Anduane Homogo í heba holebirago, lene. <sup>38</sup> Ani lowa Solohanda ibuninaga wai bule karulagane winiyaru Debidi karulelo mialu hagianeni karulagane boronosime wabini wiyago Debidinaga hagianeni karula halu wai bule tinginini karulaga ale mbira heba karula hene. <sup>39</sup> Ani biyagola Debidi ibu Solonaga wai biaga ayu tibu winiyago mo mialu tinginini wai bule karulayago heba karulo yalu pole manda bialu hearia ogoni ale mbira bu yu ibaga nabinigome bu yalu napobeheyane hendene. Ibugua Solohondo lalu, Uruni bu yalu wai bule pobe naheda. I uruni ale mbira buwa hene ndo kogo, lowa o bu hayaruni bibahende golo wiai hene. <sup>40</sup> Ani buwa ibugua ibuninaga nogo sibi waraga gewa kango yu haga yiniyago yalu ege tole molomolo peyobigo hondowa duria iba emene piyayagoria howa ibuninaga nuha dugu hanalu bialu pene. Puwa aga aleme tole pale lole manda manda bu yalu ibugua Golaidi lola hole pene.

### *Debidihanda Golaidi balu wayali henego ogo*

<sup>41</sup> Golaidi ibugua Debidi ibiyago hondowa ibu lola hole pene. Ani biyagola agali mbira Golaidinaga wai humbi yahaga biago ibu bamba halu pene. Puwa kawareore hapara howa <sup>42</sup> Debidi handalu hearia ibu igiri emene heago hondowa hondo mege bini. <sup>43</sup> Ibugua Debidihondo lalu, Gewa kango o yidegoni agi bule yidebe. Ina manda bu handaregola i biango ka manda bidebe, lene. Ani lowa Pilidiali biagome ibunaga dama olalu Debidi ha hene. <sup>44</sup> Ani buwa ibugua Debidihondo lalu, Iyame bia handabiya ibu handa. Ani bialu ina tingini ina nogo egarume nelo bo muliya, lene.

<sup>45</sup> Ani layagola Debidihanda ladai bialu lalu, Ina íla wai bule wai biagane ayu tibubi yandare kirabi yalu eberego ina íla wai bule Anduane Homogo Hongo Haiheore Isarae-leali aminaga Ngode Datagaliwabe ogoni ina mege birigoninaga minini ebero. <sup>46</sup> Horo áyu ogoningiore Anduane Homogohanda í inaga giha ya holebira. Ani biragola ina í bo wahalu inaga ma pugu peholebero. Pilidia ami agali karubi homelo bai halu tinaga

✧ 17:45: 2 Sml 22.33-35, Iba 124.8, Hi 11.33-34

tingini ina nogo egarume nelo mulebero. Ani berogola wali agali dindi bibahendeni karume Isaraealealinaga Ngode Datagaliwabe heneda manda biai holebira. <sup>47</sup> Ani bialu bibahende ogoriani karume Anduane Homogoibunaga wali agali wai biaga ayu tibu yandarebi uruni aleme pele mulene nawidane hendelo walia holebira. Anduane Homogoibu wayaliore kago ibugua tí bibahendeore inanaga andaneha helolebira, lalu Debidihanda lene.

<sup>48</sup> Ani layagola Golaidi ibu lone Debidi heagoha pu amu hene. Ani biyagola Debidi ibu nde abale gerai lalu Pilidiali wai tidiyu heagoha ibula wai bule pene. <sup>49</sup> Puwaibunaga nuha gi ibira howa ege tole hanayago mbira tagu yamuwa ogonime Golaidinaga embone tigatiga pelene. Ani biyagola ogonime puwaibunaga wanakui tombe layagola haguane kuni bangu lalu Golaidi dindini ngui bidilo бага buwa ibira hene. <sup>50</sup> Golaidi bayago ogoni wai biaga ayu tibume ndo Debidihanda ege tole emene mbira biago degeme aga aleha tole pale lowa bope hene. <sup>51</sup> Bope howa ibu abale gerai lalu Golaidi wiagoria pene. Puwa Golaidinaga wai biaga ayu tibu yiagoni yamuwa Golaidiibuninaga ma pugu pehene. Ai Pilidiali biaru tinaga wayali biago bo homelayago hondowa tini ibida pora bialu pugupugu bini. <sup>52</sup> Ani biyagola Isaraele agalibi Yuda agalibi galalu gerai lalu talima bama piaho wialu amura Gede dindi Egerono pabeni taliari hene. Ani biyagola Pilidiali uruni ibida pialu hearia maru hariga obeneni mo ko howa bo ibira ibira bima Saraimu pole hariga peagodagua piaho wialu amuraore Gedela Egeronolani bama puabo halu pene. <sup>53</sup> Isaraealeali biaru ti dai buwa Pilidialinaga balai anda bu hea handala piyagoha dabudabu wia handala piyiyaru mo yalu pene. <sup>54</sup> Ani bialu Debidi ibu Golaidinaga haguane mo yalu puwa Yarusaleme wali agali walia hole pene. Ani binigo Golaidinaga wai biagane aleru mo yayago dege Debidiibuninaga balai andaha mo ngelalu pene.

### *Debidi ibu Solo hearia penego ogo*

<sup>55</sup> Debidi ibu Golaidila wai bule lowa tagira piyago Solo ibu hondowa ami agali haru haga mini Abane heagohondo hale halu lalu, Abane-o igiri ogoni ibu ai iginidabe, lene. Ani layagola Abanehanda ladai bialu lalu, Kini-o ina manda nabialu nabido, lene.

<sup>56</sup> Ani ladai biyagola Solohanda lalu, Aniyagua aidabe hondole pu, lene.

<sup>57</sup> Debidi ibu Golaidi balu balai anda bu heagoria dai bialu hearia Abane ibugua Solo hearia haru halu pene. Debidi ibu Golaidinaga haguane gime yuwa dege hene.

<sup>58</sup> Solohanda ibuhondo hale halu lalu, Igiri-o í ai igini kebe, lene.

Ani layagola Debidihanda ladai bialu lalu, I inaga biabe bia haga Yasi igini Bedeleheme howa ibini kogoni, lene.

## 18

<sup>1</sup> Solo Debidila libu bi lalu haribigoni lamaro bini. Ani buwa mani Solo igini Yonadana ibu Debidila mini mbiraore hayago hondowa ibugua Debidihondo gubalini taraore howa ibuni gubalini hagadagua hene. <sup>2</sup> Solo ibugua Debidi horo ogoningi howa ibuni andaga daibi nale ibu haru haho wiaabo hene. <sup>3</sup> Ani biyagola Yonadanahanda Debidi nenegeore haho wule lalu bi mbira lowini. Bi ogoni irane Yonadana ibu Debidioireni mini gubalinila paga howa ani lene. <sup>4</sup> Ani buwa Yonadanahandaibunaga aga luni tara biagoni Debidi ibu golo mialuibunaga wai biaga humbibu ayu tibubi danda timurubi nogo dongonebi uruni bibahende ibuhondo miai hene. <sup>5</sup> Ani biyagola Debidihanda wai hama bibahendeni wai bilo Solohanda pu layagoniha puwa ibugua wai budebe hai hene. Ani biyago hondowa Solohanda Debidiibunaga ami agali haru haga mbira helo helene. Ogonidagua biyagola Solonaga ami agali hearubi haru haga hearubi ti turu howa hene.

### *Solohanda Debidihondo henge lolene tagira ibinigo ogo*

✧ 17:50: 2 Sml 21.19



<sup>6</sup> Debidi ibu Golaidi bo homelalu ami agali biaru heba andaga íbu dai bialu hemiria tano bibahende Isaraele dindi wiaruni hangu hangu howa wali berearume Kini Solo lola hole ibini. Tigua turu taraore howa mali lialu irabetele kilingeḷe laga alebi gawa ale marubi yuwa tigua iba gana turubiru lalu hene. <sup>7</sup> Ti mo ngoai howa harimidagoni howa walime iba gana lalu howa lalu, Solohanda agali daosini dewa dege bayagoyu Debidihanda daosini dewa bolanguaore howa bayagoni, lene.✠ <sup>8</sup> Solo ibu o layadagoni hale howa hame naleore howa ibuha keba holene tagira ibini. Ani biyagola ibugua lalu, Tigua Debidihanda daosini auore lolebe tobahe balu ina daosini hangu baya larimibe. Aniyagua tigua ibu mani kini helo helole beremida, lene. <sup>9</sup> Ogoninaga Solo ibu nakarulape harudabe lowa ibugua Debidi horo ogoningi howa henge lalu agua homelabehedabe hondole de hondo hene.

<sup>10</sup> Ani bialu hearia horo mendengi dama mbira Solo ibula haru ibaga bu helo Ngode Datagaliwabehanda henge mini. Ani biyagola ibuninaga anda tamuha biruwa agali lulume bi laradagua bialu bi lagimbu bialu berene. Debidi ibu nde horo bibahendeni gawa ale timbuni lalu biraga biadagua bereagola Solo ibu yandare mbira gime yu berene. <sup>11</sup> Ani bu biruwa Solo ibuni hangu bi lalu howa lalu, Ina Debidi yandare ogome anda hails balu bo bolomogo buliya hondoha, lene. Ani lowa ibugua yandare yayagome haluki baamu halu hearia Debidi ibu abale igilo miyagola kirabali ko ba labolabo bini.

<sup>12</sup> Ani biyagola Solo ibu Debidi hondowa gi timbuni hene. Ogoni irane Anduane Homogo ibu Solo yu wahalu peneyane ai Debidi heba kago hendene. <sup>13</sup> Anigo Solo ibugua Debidi ami agali daosini mbira (1,000) haru halu pubagi halu pelo pelene. Ani biyagola Debidihanda ibunaga ami agali biaruni wai bilo haru bamba halu pene. <sup>14</sup> Ani biyagola Anduane Homogo ibu heba heagome ibugua biyago bibahende budebe hai hene. <sup>15</sup> Solo ibu Debidihanda wai biyago budebeore hayago hondowa Debidihondo gi hayago ho timbuore hene. <sup>16</sup> Debidi ibu wai budebe helo haru haga baya mbira heago hondowa Isaraele wali agalibi Yuda wali agalibi bibahende hearume ibu gubalini timbuni ho hene.

### *Debidi ibu Solo wane dabu binigo ogo*

<sup>17</sup> Ani bialu Solohanda Debidihondo lalu, I wane wahene Meraba o bedagoni í one berelo hado nguliya ina inaga wai bia haga ami agali elahe mbira halu Anduane Homogonaga wai bibe, lene. Solo ibu ani manda bialu ogonidagua berogola Pilidialime Debidi belo ibunime nabole manda buwa ani lene.

<sup>18</sup> Ani layagola Debidihanda ladai bialu lalu, I ai kobe. I kini imane holene i aba aya ago aria howa holiyabe, lene. <sup>19</sup> Ani lowa hearia Meraba Debidi hado mulene horo biago tagira ibiyagola Debidi hado nami agali mbira Mehola howa ibini heago mini Aderele hado aribia halu mini.

<sup>20</sup> Ani biyagola Solo wane Migala ibu Debidi hamelo aribia hene. Solo ibu ani bida layago hale howa turu ho hene. <sup>21</sup> Ani bu howa ibuni hangu bibi lalu howa lalu, Ina Migala Debidi hado muliya. Ani bidogola ibu Pilidialime belo i wane ogoriani gono wuliya, lene. Ani lowa Solohanda halu mendengi Debidihondo lalu, I i imane holebere, lalu lamini. <sup>22</sup> Ani lowa ibunaga haru haga haguane hearuhondo, Debidi ibuni hangu karia puwa bi lamule pudaba. Puwa kinibi ibunaga haru haga karumebi ti bibahende i hamelo hai kamago ibu wane ogoni dabu bulene horo henge áyu ngagoni, lene.

<sup>23</sup> Tigua Debidihondo ogonidagua lalu lamiyagola ibugua ladai bialu lalu, Kininaga imane holene giba daliga mini lene ogonibigo emene yagibano i aleme agua holedabe, lene.

<sup>24</sup> Ani layagola haru haga biarume Debidihanda layagodagua Solohondo lo yalu ibuwa lamini. <sup>25</sup> Ani biyagola Solohanda tigua Debidihondo agua lole pudaba lalu lamini. Ibugua lalu, Kini ibugua hame ledago ogonigo wali wariabu maru ale nabulego

✠ 18:7: 1 Sml 21.11, 29.5

biradagua Pilidiali waitigi agali handari mbira (100) pani bo homelowa tinaga dongone podo mabu bialu yalu ibabe, lene. Ogoni Solohanda Debidi Pilidialime belo nde lowa ogonidagua bialu manda manda bini. <sup>26</sup> Solonaga haru haga biarume Solohanda ogodagua laya lalu Debidi hearia loyu pene. Ani biyagola Debidi ibu kininaga imane holeyagola turu tara howa hene. Dabu bulene horo kaware ngelowa <sup>27</sup> Debidi ibunaga ami agali heba puwa Pilidiali handari kira (200) bo homelene. Ani buwa Pilidiali agali bo homelayarunaga dongone bibahendenaga podo mabu bialu yalu kini hearia puwa dagalo miai hene. Ibugua ogonidagua biruyagua kininaga imane holebero bada lowa ani bini. Ani biyagola Solohanda ibu wane Migala Debidi dabu bilo mini.

<sup>28</sup> Solo ibu bayuwa manda bialu hearia Anduane Homogo ibu Debidi heba ka manda bialu ibu wane Migalahandabi Debidi hamelo bereago manda bialu bini. <sup>29</sup> Ogoninaga Solo ibu Debidi hondowa gi timbuni howa ibu headangi howa libu waitigi haho wini.

<sup>30</sup> Pilidiali ami dewaore ibalu wai bia dege biagago wai bibahendeni Debidi ibu wayali haabo halu ibugua wai budebe hai hayagola Solonaga ami agali biaru ti wayali ogonibi ndo emene dindiha hene. Ani dege bialu heane Debidi ibu agali mini lene mbira tagira ibini.

## 19

### *Solohanda Debidi homelo bole mandabu henego ogo*

<sup>1</sup> Solohanda ibu igini Yonadanabi ibunaga haru haga agali bibahendebi tihondo lalu, Ina Debidi homelo bole manda bialu ko, lalu lamiai hene. Anigo Yonadana ibu Debidi hame lowa <sup>2</sup> ibugua Debidihondo lalu, I abahanda í homelo bole manda bialu kago yawi egerebagi bayuwa de handalu hogorale buwa dindi de nahandabehe mbirani puwa ogoniha ha do ho habe. <sup>3</sup> Ani bidegola ina í aba mabuni í bira do kegoriani holebirago ogoriani ibu kagoria puwa ibuhondo í lalu mbira laguago. Ani lowa ina mbirale mbira handa walia haro alego íhondo manda bibelo languliya, lalu lene. <sup>4</sup> Ani lowa Yonadanahanda Solohondo Debidinaga mini yaraga halu lalu, Aba-o ínaga biabe bia haga Debidihondo mana liahe mbira nabibe. Ibugua íhondo mana liahe mbira bini nawiore howa ibugua biyaru damene bibahende í biamogo bialu timbuni daliga mbira biyagoni. <sup>5</sup> Ibuni homoleneoreni howa ibugua Golaidi balu home layagoni. Ani biyagola Anduane Homogohanda Isaraealeali wayali helo hongo daliga mini. Ogoningi í de hondowa turu ho harigoni. Ai áyu irane aginaga ina agali mbira ibu mana liahe mbira nabi kagoria iraneore mbira nawini tigua Debidi balu home loleberemibe, lene.

<sup>6</sup> Yonadanahanda bi ogonidagua layagome Solonaga bu mini mo palia hayagola ibugua Anduane Homogonaga minini bule lalu bi mbira lo wialu howa ibugua lalu, Debidiore homelo nabilebero, lene. <sup>7</sup> Ani lo wiyagola Yonadanahanda Debidi olowa ibuhondo mbirale bulenego bibahende lamiai halu ibuni Solo hearia haru halu pene. Ani biyagola Debidihanda Solonaga biabe abale bialu hene biadagua dege bini.

### *Solohanda Debidi bole manda binigo ogo*

<sup>8</sup> Ani bialu heagola Pilidiali baba wai lone hadalu bini. Ani biyagola Debidihanda wai lone wayali halu ibugua ti balu bo poda hanaore hayagola ti ibida piai hene. <sup>9</sup> Horo mbirungi hayagola dama mbira Solo ibu mo luluya halu haru helo Anduane Homogohanda henge mini. Solo ibu yandare mbira gime yuwa ibuni andaga tamuha berene. Ani biagola Debidi ibu nde gawá ale timbuni mbira lalu ogoriani berene. <sup>10</sup> Ani biaria Solohanda Debidi yandare yu birayagome anda haila bapara hole balu hearia Debidihanda igilayagola yandare biago pialu anda haini bilina hene. Ani biya handala Debidi ibu ibida pora bialu pu yola hene.

<sup>11</sup> Mbiraga ogoningi Solohanda agali maruhondo lalu, Debidi andagani puwa mage ho halu egerebagi egabi laragola balimu, lene. Debidi ibu one Migalahanda ibuhondo lalu, Í áyu mbiraga ibida pu yola halu napiriyagua yawi í homaore bule

kegoni, lene. ✧ <sup>12</sup> Ani lowa ibugua anda windo mbira heagoha pulimuni ibida yola halu pene. <sup>13</sup> Ani biagola Migalahanda mbirale bi pupu wulenaga gime wabini agali ale wiago muwa Debidi tamu paliaga dagiani nogo meme irinime wabini mbira haguanda helowa dambi haga mbirame bu dambi howa palelene. <sup>14</sup> Ani biaria Solonaga agali maru Debidi minule ibalu hearia Migala ibugua tihondo lalu, Ibu warago bo nga, lalu lamini. <sup>15</sup> Ani bida layago lelowa dege Solohanda lalu, Debidi tínime de hondo dai bidaba, lene. Ibugua tihondo lalu, Ina balu home loliyago ibuni tamu paliagane ogoniha howa minu yalu ibu tagira ibalimu, lene. <sup>16</sup> Ani layagola tigua anda puwa handalu hearia mbirale bi pupu wulenaga gime wabini mbira o tamu dagia ibu paliagane biagoria nogo meme irinime haguandaha howa pali aribia helearia hendene. <sup>17</sup> Hondowa Solohanda Migalahondo hale halu lalu, Ina i mo hondo halu inaga waitigi biagoni ibida pu yola heledegoni irane aginagabe, lene.

Ani layagola ibugua ladai bialu lalu, Ina ogonidagua bialu ibu biamogo bialu pu yola halu napelaruyagua í homelo bo waholiya layagola biru, lene.

<sup>18</sup> Ani biya handala Debidi ibu ibida pialu Samuele hearia Lama dindi puwa Solohanda ibuhondo biyaru bibahendeore ibu lamiai hene. Ani bialu mani ibu Samuelela Naiodi tano wiagoriani puwa libu haru ho hene. <sup>19</sup> Solo ibu howa hale halu hearia Debidi puwa Lama dindi Naiodi tano biagoria ka layago hale hene. <sup>20</sup> Hale howa ibugua agali maru hearuhondo lalu, Debidi minu yalu ibule pudaba, lene. Tigua puwa handalu hearia Ngode Datagaliwabe mana latagi haga maru hearume mali luyu ibaga bialu Samuele ibugua ti haru bamba howa bi hongo howa ladagadaga bialu hearia de hendene. Ani biyago de hondo hearia Ngode Datagaliwabe Dinini ibugua Solonaga agali biaru tibi mo tara heagola tiguabi mali luyu ibaga bialu bi hongo howaore ladagadaga bialu hene. <sup>21</sup> Solo ibu ti ogonidagua bialu ka layago hale howaibunaga agali maru bi lone yalu pudaba layagola puwa uruni tibi mali lialu heagoha liatago halu tigua lialu bi hongo howa ladagadaga bialu heagodagua ho gimbu bini. Ani biyagola ibugua lone halu tebone bi yalu pelalu hearia uruni tibi maru abale pelayarume biyadagua dege bini. <sup>22</sup> Ani biyiyagola mani Soloibunime Lama dindi pole pene. Puwa Segu tano mbira wiagoria iba bira hene bereagoria íbu howa Debidi Samuelela libu agoria kabe lalu ogoriani hearuhondo hale halu hearia libu Naiodi tanoni ka layagola hale hene. <sup>23</sup> Hale howa Solo ibu ogoniha pole pialu hearia Ngode Datagaliwabe Dinini ibugua ibu mo hongo halu haru heagola ibubi bi ladagadaga bialu mali lima piaho wialu Naiodi tanoni anda pene. <sup>24</sup> Ani bima pialu Samuele heagoria pu howaibuninaga aga golo wahowa mali lialu bi ladagadaga bima ibaga bialu howa aga emene hangu bu howa horo mbiru dindini palia ho wialu mbi mbira wialu egabi lene. Bi mbira ogodagua lagane winiya. Solo íbubi Ngode Datagaliwabe mana latagi haga dege mbira bu hininidabe laga winiya. ✧

## 20

### *Yonadanahanda Debidi biamogo binigo ogo*

<sup>1</sup> Solo ibu Naiodi tano ibiya handala Debidi ibu ibida pora bialu Yonadana hearia pene. Ibugua hale halu howa lalu, Ina agi bialu harudabe. Ina ko mbira agi bu harudabe. Ina ko mbira agi birugome í abahanda i belo kango tigi ho wirudabe, lene.

<sup>2</sup> Ani layagola Yonadanahanda ladai bialu lalu, Ngode Datagaliwabehanda í homabe nalenegro ke. I aba ibugua bulenegro bibahende galone nagaloneyaguabi mbira do nahe ihondo langiaiore haga. Ani biagoga henene ndo layada, lene.

<sup>3</sup> Debidihanda ladai bialu lalu, Ina i hame ogobiore lo kelo í aba ibu manda biaiore kagoni. Ani bidago ibugua bule manda bu ngagome í mo tandaga bulebirago manda

buwa í nalangulebira. Ina Anduane Homogo haluhe kagoria howa íhondo heneneore larogo í homolene lu ndo emene nemandi hangu ngelo kogoni, lene.

<sup>4</sup> Ani layagola Yonadanahanda lalu, Ina í hame larego ale biai holebero, lene.

<sup>5</sup> Ani layagola Debidihanda ladai bialu lalu, Yawi Ege Ngabulo Holene Horo holebiragonaga tomo nolene wulebira. Ani bulebirago í kini heba tomo nole birulene wini. Anigo ina bi o larogo ina manda bialu karulapeyagua nde ina unu mabuni horo áyu bira do ho ngone dege ne lalu horo tebonegonaga alendo helo. ✧ <sup>6</sup> Í abahanda handalu karia í dagiani nabereda layagua ina au labe, Ibuni andaga Bedeleheme ibu aya aba dameneru bibahendeore mo ngoai howa mali mbira mbirani bo lomabia howa mulene horo hayadago abale poro layagola pu laru, labe. <sup>7</sup> Ani laregola ibugua lalu, Karulape, layagua í karula polebira. Ani ndo ibu keba holene tagira ibiyagua ibugua í mo ko hole ka lo mandabu habe. <sup>8</sup> Ina inaga bulenego ogoni ina Ngode Datagaliwabe deni howa íhondo habo nalolene bi mbira biaore bule lalu lo yaribago yu haabo habe. Ani buwa handalu keria íha ko mbira ngane hondowa bo home lolene irane handariyagua inime í bo homelabe. Í abahanda belo haru halu polenego irane aginagabe, lalu Debidihanda ani lene.

<sup>9</sup> Ani lai hayagola Yonadanahanda ibuhondo ladai bialu lalu, Uruni ale mbira mitangi bialu haredagonidagua nahabe. Í abahanda í heneneore bole kane handaroyagua ina í langulebero, lene.

<sup>10</sup> Ani layagola Debidihanda hale howa lalu, Í abahanda keba halu bi ladai biya lalu í aiwa langulebirabe, lene.

<sup>11</sup> Ani layagola Yonadanahanda ladai bialu lalu, Mabu ngarunaga putagi halu porabane, lalu libu haru piribi. <sup>12</sup> Puwa Yonadanahanda Debidihondo lalu, Anduane Homogo Isaraele wali agalinaga Ngode Datagaliwabehanda ibu deni howa iya henene laga ka lelo horo áyu kabadagua yawibi lumabi í aba hale halu hagua. Hale ha handarogola íhondo mini bayale wuwa heagua ina bi mbira í keria lo ibilagua. <sup>13</sup> Ani bidogola í abahanda í bole lalu mbira lo manda bialu heneyagua nde ina í languliya. Ani ndo ina langiabi ibida pobelo biamogobi heba nabiruyagua nde Anduane Homogohanda í balu homelelo. Anduane Homogo ibu í aba heba ho hayadagua áyu í heba ho helo. <sup>14</sup> Ani bialu í homa nabi haruyagua ina Ngode Datagaliwabe deni howa habo nalole buleorego lalu bi lo wirigo yu hado wanahe yaniore ho habe. <sup>15</sup> Ani ndo í homaruyagua nde íhondo gubalini howa mini hana ho harilidagua inaga aba aya waneigini dameneruhondo walia halu haaboore habe. ✧ <sup>16</sup> Ani bialu Anduane Homogohanda inaga waitigi karu bo hilo wahaiore kago layaguabi iyanaga habo nalolene bi lo wigiwigi bu wiribagoniore poda nabi wiaaboore helo. Poda mbira bi lariyagua Anduane Homogohanda í tandaga nelolebira, Yonadanahanda ani lai hene.

<sup>17</sup> Halu mbira lone Yonadanahanda Debidihondo gubalini haabo hole lalu habo nalole lalu lowini. Yonadana ibuni gubalini ho henegobiore Debidihondo gubalini ho hene. <sup>18</sup> Ani buwa Yonadanahanda ibuhondo lalu, Yawi Ege Ngabulo Holene Horo holebiragonaga tomo naga wiyadago í dagiani tomo nalu nabereyagua nde ogoninaga piyada manda bulebira. <sup>19</sup> Horo yawi howa luma í piyadaore manda bulebirago ai puwa abale halu mbira pu bira do harigoha puwa ogoriani ege tole wima irigi kagoria mbirahayagi puwa bira do habe. <sup>20</sup> Ani bidegoria ina timu lu tebo kaboro baradagua bialu bi ibiloliya. <sup>21</sup> Ani buwa inaga biabe bia haghondo, Timu uruni dugule taibu pu, lolebero. Ani buwa ina ibuhondo, Timu uruni í kegoriani ngago mia, laruyagua ogoni galone í bolene nawidane hendedogo í tagira íbu lalu laro. Ina Anduane Homogo haluhe kagoria howa heneneore larogo lalu í bolene nawulebira lolebero. <sup>22</sup> Aguani nale howa, Timu uruni amura bolangua howa nga, laruyagua nde Anduane Homogohanda í pobelo

peledagoni. <sup>23</sup> Ai bi habo nalole bibiyago lo wigiwigi biribagoni Anduane Homogo ibugua mo habo nale wiaaboore helo ibugua de hondo holebira, lalu Yonadanahanda lai hene.

<sup>24</sup> Ani layagola Debidihanda mabuha puwa bira do hene. Ani biagola Ege Ngabulo Holene Horo holenaga tomo nolene tu hayagola Kini Solo ibu tomo no ibini. <sup>25</sup> Ibuwa anda haiha bira para howa ibuni horo bibahendengi ibalu biragane winigoria puwa berene. Ogoriani Abane ibu kini bereagoria biru palu biagola Yonadana ibu nde mendehayagi handade howa berene. Ani biagola Debidi ibu biraga dagia biagoria nabere wini. <sup>26</sup> Ani binigo Solohanda horo ogoningi bi mbira nale hene. Ogoni irane ibugua manda bialu hearia mbirale mbira Debidihanda buwa ibu ilili bu hayada mitangi bini. <sup>27</sup> Horo mendengi Ege Ngabulo Holene hayagonaga tomo nai howa handalu hearia Debidinaga dagia biraga biago henge wiaabo hearia hendene. Hondowa Solohanda Yonadanahondo hale halu lalu, Debidi ibu áyubi abebi tomo nole naibiyago irane aginagabe, lene.

<sup>28</sup> Ani layagola Yonadanahanda ladai bialu lalu, Ibugua ihondo hongo howaore hale halu lalu, I Bedeleheme puore buleberogo poliya pu la, laya. <sup>29</sup> Debidihanda au lalu, Ai puore buliyago ogoni irane inaga aba aiyá dameneru bibahendeore mo ngoai howa turu halu bo lomabia halu tomo nolebira. Ani bulebirago i hamenegome ogoriani ibu habe laya. Anio reda i inaga nenege keyagua inaga dameneru karia de hondo poliya pu labe, laya. Irane ani biyagola ibu inaga dagia ibuni biragane biagoriani nabere wiagoni, lalu Solo lamini.

<sup>30</sup> Ani biagola Solo ibu Yonadanala kebaore tara kaubi howa ibuhondo lalu, Bi mo waholene dogahé mini dunubia naholene i aiyá bereneya. Áyu ina manda berogola i Yasi igini biamogo bule hame lowa ke. Ogonidagua bialu kegome i agali ndo hene mbau lalu i bi i aiyabi libu haru taga pani noleberabi. <sup>31</sup> Áyu Debidi ibu homa nabi kaore ina dindi ogonaga kini naholeberegó ogoni manda bu kebe be nabi kebe. Áyu pialu Debidi ogoria haru halu ibule pu naberego ibu áyu homolene ngago, lalu Solohanda lene.

<sup>32</sup> Ani layagola Yonadanahanda ladai bialu lalu, Ibu homolene irane aginagabe. Ibugua mbira agi biyabe, lene.

<sup>33</sup> O layadangi Solohanda ibunaga yandare yamuwa Yonadana homelo bole bini. Ani biyagola Yonadanahanda manda bu handalu hearia ibu abahanda Debidi heneneore homelo bole manda bialu heneyane handa walia hene. <sup>34</sup> Yonadana ibu dagiani birayago heyalu ibu abala keba timbuni howa Ege Ngabulo henegonaga horo mendeni tomo nolene winigo ibu horo ogoningi mbira nane wahalu pene. Ogoni irane Solohanda Debidi lahirayagonaga Yonadana ibu gendaore timbuni Debidinaga ha howa hene. <sup>35</sup> Horo mendeni egerebagi hayagola Yonadana mabuni Debidila lola habiya lalu libuni abale lo mbiraore ho wiribigoriani lola hole pene. Ibu pialu howa igiri emene mbira haru halu penego ogoni ibuhondo lalu, <sup>36</sup> Ina timu kaboro bo pelarogo tai bialu dugu ngule gerai lalu pu, lene. Yonadanahanda timu biaru amuraore bo pelayagola igiri emene biagome tai bialu mule gerai lalu pene. <sup>37</sup> Ani bialu puwa igiri emene biago kaware timu pu ibira ho wiagoriaore pu hapara ho heagola Yonadanahanda olamu halu lalu, Timu amuraore pu wahaya. <sup>38</sup> Ogoriani ha nabibe abale pu, lene. Igiri emene biagome timu biaru mo mogo bu yalu ibu dai buwa ibunihondo mini. <sup>39</sup> Yonadanahanda o layadaruni igiri emene biago ibu galone ogo ale laralo manda nabi Yonadanala Debidila libuni hangu galone lo wiribidagua manda biribi. <sup>40</sup> Yonadanahanda ibunaga wai biagane ale yayaru igiri emene biagohondo mialu, Uyu tanoni mo yalu dai bibe, lalu lamini.

<sup>41</sup> Ani buwa mani igiri biago peagola Debidi unu tole wima irigi hene biagoha hayago heyalu ibuwa ge duli hanga howa birupe hene. Ani bialu ibunaga dengui haguane dindini halu tebo bulu palialu heyaga bini. Ani bialu Debidi Yonadanabi libu haru dugu



bigibigi bialu nunu lala bigi biribi. Ani bialu libu dara hagahaga buwa Debidihanda dara ho bolangua hene. <sup>42</sup> Ani buwa Yonadanahanda Debidihondo lalu, Ngode Datagaliwabe í heba holebira. Anduane Homogohanda íbi íbi ínaga aguanenerubi inagarubi hondo halu yu wahaga nabi helo lalu lo wiribadagua wiaho wiaaboore helo, lene. Ani lalu Debidí ibuni mbiraha pu bagi halu Yonadana ibu tanoni íbu dai bini.

## 21

### *Debidi ibu Solo hondowa ibida pora bialu penego ogo*

<sup>1</sup> Debidi ibu loma binigo mo miaga Ahimelege hearia Nobo tanoni pene. Pialu hearia Ahimelege ibu duru lamalama ibu lola hole ibuwa hale halu lalu, Íni hangu ibalu haridagoni irane agibe, lene.\*

<sup>2</sup> Ani hale hayagola Debidihanda ladai bialu lalu, Í kinime biabe mbira mo ngiyagola ogoni bule ibiru. Kini ibugua ihondo lalu, Í ogo ale bule pialu mbirali nalamibe, laya. Anigo ai ínaga ami agali karu ti dindi mbirani lola hamíya lalu lamido. <sup>3</sup> Ani bidogo ina tomo maru agi ngebe. Ina mberedi hirini duria ngeyaguabi tomo maru ngego ale í ngi, lene.

<sup>4</sup> Ani layagola loma binigo mo miaga biagome lalu, Ina mberedi ibuni mbira nawigo Ngode Datagaliwabhondo lomabu winigo dege ngago ínaga ami agaliru ti one heba áyu dege mbira ho palia nabi hene kayagua ogoni mulene karulape, lene.

<sup>5</sup> Ani layagola Debidihanda ladai bialu lalu, Ti wali heba palu naheore ndobe. Inaga ami agali uruni ti horo bibahendengi tini ilili buore hagane winigo áyu wai bule lalu galone ogoni bialu howa tininaga tingini bayuwa hogorale nabi au habehebe, lalu lamini.

<sup>6</sup> Ani biniyagola loma binigo mo miaga biagome Debidihondo mberedi Ngode Datagaliwabhondo loma bini biago mo mini. Ogoni irane mberedi maru nawi mbiraore loma bia ho winigo gahenge lomabu wiaga dagiani wia aribia howa ala tawe mo bagi ho winigo mo mini.\* <sup>7</sup> Solonaga nogo bulumaga haru haga agali karunaga haguane mini Doege Idomo dindi howa ibiniyago ibubi horo ogoningsi dege Ngode Datagaliwabhondo lomabia henego mulene tu hayagola íbu hene.

<sup>8</sup> Debidihanda Ahimelegehondo lalu, Ina wai biaga ayu tibu yandarebi mbira ngule ngebe. Kinihanda abale heyalu polene nga laya handala ínaga wai biaga ayu tibubi wai biagane ale marubi mulene henge mbira nawiya handala ibiru, lene.

<sup>9</sup> Ani layagola Ahimelegehanda ladai bialu lalu, Pilidiali Golaidi ina Ela dindi ulini biagoria hearia barigonaga dege wai biaga ayu tibu biago wu kogoni. Ogoni loma binigo mo miaganaga aga mini ebodi ngago erembirahayagi aga mbirame huba bu ngogo ogoni yuleyagua wai biagane ale ogoni hangu ngago mo yabelo, lene.\*

Ani layagola Debidihanda lalu, Wai biagane ale bayale ogonibiore maruha nawigo ogoni mo ngi, lene. <sup>10</sup> Debidi ibu Solohanda bole biyagola gi howa ibida pora bialu Gedenaga Kini Agisi hearia pene.\* <sup>11</sup> Kininaga biabe bia haga hearume Agisihondo lalu, Agali ogoni ibu ibuni dindinaga Kini Debidí ndodabe. Agali ogoninaga walime iba gana lalu howa lalu, Solohanda agali daosini dewa dege bayagoyu Debidihanda daosini dewa bolanguaore howa bayagoni, lalu hayago íbu ndo kabe, lene.\*

<sup>12</sup> Debidihanda tigua bi ogonidagua layuago hale howa ibu Kini Agisihanda boligo lowa gi timbuni hene.\* <sup>13</sup> Ani buwa ti deni howa Debidí ibu mini nawi luluyi tingi halu tano timbuni wiagonaga pabeni gilgili bialu hangau ibuninaga angarini pudupebe bilene.\* <sup>14</sup> Ani bigi biyagola Agisihanda ibunaga biabe biaga biaruhondo lalu, Agali ogo luludago de handadaba. Irane agi bulenaga í hewaria haru ibirimibe. <sup>15</sup> Agali lulu

\* **21:1:** Md 12.3-4, Mg 2.25-26, Lg 6.3    \* **21:6:** LBM 24.5-9    \* **21:9:** Aga mini ebodi Haru Tagira Penego 25.7 handabe.    \* **21:9:** 1 Sml 17.51    \* **21:10:** 1 Sml 21.13, Iba 34    \* **21:11:** 1 Sml 18.7, 29.5    \* **21:12:** Iba 56  
\* **21:13:** Iba 34

dewa hayaru naheyane handarimibe. Agi bulenaga lone mbira *ḡ* mo tandaga hole mini nawi lulu dege hearu *ḡ* andaganiore haru *ḡ*bu tago bu helarimibe. Wahalu peladaba, Agisihanda ani lene.

## 22

### *Solohanda loma binigo mo miaga hearu balu homelenego ogo*

<sup>1</sup> Debidi ibu Gede tano timbuni wiagoriani howa ibida pora bialu puwa egeanda mbira Adulamanaga tano wiagoria kawareni pene. Ani biariaibunaga hamenerubi aḡya aba dameneru ti bibahende hale halu hemiria ibu ogoriani *ḡ*bu ka layago hale howa tibi ibu heba mandagi hole pene. ✧ <sup>2</sup> Ani biaria agali maru genda tara tara yu hearubi agali maru dano ho hene hearubi agali maru mendeali heba keba ho hene hearubi ti bibahende handari maria (400) agima Debidi hearia puwa tigua ibu tinaga haru haga haguane helene. <sup>3</sup> Ogoriani howa Debidi ibu Moaba dindini Misiba tano wiagoria pene. Puwa Moabanaga kini heagohondo lalu, *ḡ*na Ngode Datagaliwabehanda *ḡ*hondo agi bia harabe hondole kotambu *ḡ*naga aba aḡyala *ḡ* heba halimulo henge mbira ngiaore bibelo hameledo, lene. <sup>4</sup> Ani lalu Debidi *ḡ*handa ibu aba aḡyala Moabanaga kini heba helo helalu puwa Debidi ibu egeandaha ha do heagola tibi ogoriani haho wini.

<sup>5</sup> Ani biaria Ngode Datagaliwabe mana latagi haga agali mini Gada ibu Debidi hearia ibuwa lalu, Ogoriani nahe *ḡ*yu ogoni Yuda dindini pobe, lene. Ani laya handala Debidi ibu dindi ogoni yu wahalu Herede dindinaga irabu wiagoha ubanda hene.

<sup>6</sup> Horo mbirungi Solo ibu Gibe dindini hari hambene mbira wiagoria ira mbira mini tamarisigi heago teneha yandare gime yuwa berene. Ani bereagolaibunaga biabe biagaru bibahendeme ibu homabu bupe ho hene. Ibu hale halu hearia Debidiibunaga agali biarubi handa walia henego ka layane hale hene. <sup>7</sup> Ani hale howa ibuguaibunaga biabe biaga biaruhondo lalu, Beniyamini agaliru-o hale hadaba. *ḡ*igua manda beremigola Debidi *ḡ*handa mabu dindiruru pu mbira lini daga mini gerebi maburu *ḡ* bibahendehondo ngialu *ḡ* ibunaga ami agali karunaga haru haga halimulo helolebirabe. <sup>8</sup> Irane ogoni manda buwa *ḡ*igua lo mbira howa *ḡ* bo wahole manda birimibe. *ḡ* mbiralime *ḡ* ini iginioreme *ḡ* bole Debidi *ḡ* gimbu bu ka lalu nalangirimigoni. *ḡ* mbiralime *ḡ* kada manda nabini haruda. Ani bialu mbirame Debidi *ḡ*naga agali mbira hayagome *ḡ*yu ogoni bole henge mbira au ngabe hondole *ḡ* ini igini biagome mo hongo haragola tai bialu ka nalarimi, lalu Solohanda lene.

<sup>9</sup> Doege ibu Solonaga biabe biaga biaru heba ogoriani heneyago ibugua lalu, Debidi ibu loma binigo mo miaga Ahidubu igini Ahimelege hearia Nobo tanoni heago de handaru. ✧ <sup>10</sup> Ahimelegehanda Debidi ibugua agi bulebirabe lalu Anduane Homogohondo hale haya. Ani buwa ibugua Debidi tomo maru mialu Pilidiali Golaidinaga wai biaga ayu tibu biagobi mo miya, lalu lamini.

<sup>11</sup> Ani biya layagola Solohanda loma binigo mo miaga Ahimelegeibunaga aria bibahende loma binigo mo miaga dege Nobo tanoni hearubi ibugua ibalimu layagola ti ibu hearia ibini. <sup>12</sup> Ibiyagola Solohanda ibuhondo lalu, Ahimelege-o bi larogo hale ha, lene.

Ani layagola Ahimelege ladai bialu lalu, Bia larego bule ko, lene.

<sup>13</sup> Solohanda ibuhondo hale halu lalu, *ḡ*la Debidi *ḡ* libugua *ḡ*hondo ohowa wai hanalu kabigoni irane agibe. *ḡ*na Debidi *ḡ*hondo tomo maru heba wai biaga ayu tibu mbira lowa mialu Ngode Datagaliwabehanda ibuhondo bi labe lalu *ḡ*na hale ha haridago irane agibe. Ani birigome ibugua *ḡ*yu *ḡ*la waitigi halu *ḡ* balu homelole henge mbira au ngabe hondole hariga tai bialu kagonida, lene.

<sup>14</sup> Ani layagola Ahimelegehanda ladai bialu lalu, Debidi ibu *ḡ*naga biabe biaga agali mini bilinaheni tigabi hayagoni ndobe. Ani bialu *ḡ* imane *ḡ*naga mamage haga karunaga

haguane ndobe. Ani bialu ibu ínaga andagani bibahende karume manda biaihe ibu agali tigabiore ka lalu ibunaga mini yaraga hene hayagoni ka. <sup>15</sup> Ína bi larigo ina ibunaga Ngode Datagaliwabehondo bi laharuyago ogoni áyu pigane ndoya hendedeni. Ina í bole ohowa Debidila wai hanalu ka lariyagoninaga laro. Agali haguane-o ogo-nidagua nabioREGO íbi ínaga damene karu aria mbirabi bame kedalu nalabe. Ína o larigoni í mbira manda nabioRE heneGO larida, lene.

<sup>16</sup> Ani layagola kini biagome lalu, Ahimelege-o íbi ínaga damenerubi homaiore hole-beremi, lene. <sup>17</sup> Ani lowa ibugua ibunaga mamageali ibu wanakuini heyu hearuhondo lalu, Anduane Homogonaga loma binigo mo miaga o karuni homelo bai hadaba. Ti Debidi heba hene kago tigua ibu ibida pora bialu piyago pelowa ihondo langule íbu nabi ti manda buwa dege ibida pelayago, lene. Ani layagola mamageali biarume Anduane Homogonaga loma binigo mo miaga biaru homelo bolene gi hene. <sup>18</sup> Ani biyagola Solohanda Doegehondo lalu, Ína ti homelo bai ha, layagola Doegehanda bibahende homelo bai hene. Horo ogoningi ibugua loma binigo mo miaga agalime tinaga aga mini ebodi karulaga hearu pira halirani duria (85) homelo bo wahi hene.\* <sup>19</sup> Ani bialu Solohanda ibunaga ami agali biaruhondo lamialu lalu, Nobo dindi timbuni loma binigo mo miaga agali henerunaga dindi ogoriani wali agali maru karubi homelo bo wahalú waneigini wahebi emene galibi nogo bulumagaru dongiru sibirubi uruni bibahendeore bo hilo wahi halimu, lene.

<sup>20</sup> Ani biya handala Ahimelege igini Abaiada ibu dege ibida yo pialu puwa Debidila hene. <sup>21</sup> Ibugua puwa Solohanda Anduane Homogonaga loma binigo mo miaga biaru homelo agua baya lalu Debidi lamiai hene. <sup>22</sup> Ani lamiyagola Debidihanda ibuhondo lalu, Horo Ahimelegela bi lalu harungi Doege ibu ogoriani heago ina manda birugola ibugua Solo lamulebiraló manda biru. Anigo ínaga damene bibahende homelo bo wahi hayadaruni tene ina birugomeda. <sup>23</sup> Ai í gi nahe í kogoria iya mandagi habiya. Solohanda iya kirabali bole tai bialu kagoyu iya mandagi haribayagua nabulebira, lalu lamini.

## 23

### *Debidihanda Kela agaliru pele minigo ogo*

<sup>1</sup> Debidi ibu hale halu hearia Pilidialime Kelanaga tano bo gialalu tinaga widi lini áyu dege domogo bu wiaru mo page bira layane hale hene. <sup>2</sup> Hale howa ibugua Anduane Homogohondo hale halu lalu, Ina Pilidiali uruni baba wai bule poabe, lalu hale hene.

Ani hale hayagola Anduane Homogohanda lalu, E Pilidiali balu Kela tano mo wule pu, lene. <sup>3</sup> Ani layagoyu Debidinaga agali biaru tigua ibuhondo lalu, Ina gi ho holene Yuda dindini bu ngago ngelalu Kela tanoni Pilidiali karu baba wai bu polenego gendabida, lene. <sup>4</sup> Ani layagola Debidihanda lone hale hayagola Anduane Homogohanda ibuhondo lalu, Ína Pilidialiru baba wai bu wayali habelo ina hongo nguleberogo Kelani puwa bo podoleberemi, lene. <sup>5</sup> Ani laya handala Debidi ibunaga agali heba Kela anda pialu Pilidiali bo podalu tigua agali au lolebe tobahe dewaore bo homelalu tinaga nogo bulumaga hearu ti haru halu dai bini. Ogonidagua bialu Debidihanda Kela tano mo wini.

<sup>6</sup> Ahimelege igini Abaiada ibu ibida pialu Debidila Kela tanoni hole piyangi ibugua loma binigo mo miaga agalime aga mini ebodi karulaga biago mo yalu pene. Aga ogoniha tole kira Anduane Homogonaga hame handaga biago labobi heba mandagi mo yalu pene.\*

<sup>7</sup> Solo ibu hale halu hearia Debidi ibu Kela tanoni pu ka layago hale howa lalu, Ai turuba Ngode Datagaliwabehanda ínaga giha ya hayadago Debidi ibu tano pabe bu

\* **22:18:** Aga mini ebodi Haru Tagira Penego 25.7 handabe.

\* **23:6:** Aga mini ebodi Haru Tagira Penego 25.7 handabe.

mabubi panga haraba hongoheme paya tagi heagoha yo pialu pobe nahe do wule ogoniha pu ka, lene. <sup>8</sup> Ani biagola Solohanda ibunaga ami agali biaru olalu Kela tanoni tidu yalu pialu Debidibi ibunaga agali biarubi heagoria puwa homabu bupe hole pene.

<sup>9</sup> Solohanda ani bulebira layago hale howa Debidihanda loma binigo mo miaga Abaiadahondo lalu, Aga ebodi biago ogoria mo yalu íbu, lene. <sup>10</sup> Ani lowa Debidihanda lalu, Anduane Homogo Isaralealinaga Ngode Datagaliwabe-o Solo ibu ínaga biabe bia haga ì ogoria kogo hondowa Kela tano bo gialo paya bu waho ibule wai hanalu kagoni. <sup>11</sup> Anigo agali Kela dindi tene ogoriani hene karume ì Solohondo minu batagi helolene karulapedabe. Solo ibu ibulebira layane ì hale harudagua henene ibulebirabe. Anduane Homogo Isaralealinaga Ngode Datagaliwabe-o ína ihondo ladaiore bibelonaga haya halu hale harogoni, lene.

Ani layagola Anduane Homogohanda ladai bialu lalu, Solo ibulebira, lalu lamini.

<sup>12</sup> Ani ladai biyagola Debidihanda lone hale halu lalu, Kela dindi teneali karume ìbi ìnaga agalirubi minalu Solonaga giha minu ya holobadabe, lene.

Ani layagola Anduane Homogohanda ladai bialu lalu, Tigua ani bulebira, lene.

<sup>13</sup> Ani laya handala Debidibi ibunaga agali handari waragaria (600) agima biaru heba Kela tano abale yu wahalu pene. Ani biagola Solo ibu hale halu hearia Debidibi Kela tanoni nahe pu yola halu piya layago hale howa bole wai hanalu ibiyago wahalu dai bini.

*Debidi ibu hari bareha pu ha do henego ogo*

<sup>14</sup> Debidi ibu puwa dindi hari bare wali agali nahagaha Siba tano handa dele wiagoriani ha do hene. Horo bibahendengi Solohanda Debidibi handa waliaore holego lalu tai bialu henego Ngode Datagaliwabehanda Debidibi minalu Solonaga giha ya nahene.

<sup>15</sup> Debidi ibugua Solohanda ibuore homelo bo wahole íbu hayuago manda buore hene.

Ani biyagola Debidibi ibu Horese dindi wali agali nahagaha Siba handa dele wiagoriani ha do hene. <sup>16</sup> Ani biaria Yonadana ibu Debidibi hearia pialu Ngode Datagaliwabehanda biamogo biya lalu mo hongo hole pene. <sup>17</sup> Ibugua Debidihondo lalu, Í gi nahabe. Ì aba Solo ibugua ì bolene henge nawigo. Í Isaraelialinaga kini hole tagira ibuleberego ibugua manda biaiore ho ka. Ani bialu ìbi ì hapara holiyago manda bu ka, lalu lamini. <sup>18</sup> Ani lowa libu kirabalime nenege haribigoni hado wahalu pugupugu nabule lalu bi mbira lo wiribi. Lo wialu Debidibi ibu Horese dindini hea handala Yonadana ibu andaga dai bini.✧

<sup>19</sup> Ani biagola agali maru Siba howa Gibeata tanoni Solo hearia puwa lalu, Debidibi ibu inanaga dalu Horese dindi Hari Hagila wedagoha Yudalinaga dindi wali agali nahaga ngagoha puwa ogoni ha do ka, lalu lamini.✧ <sup>20</sup> Ína agali ogoni minuleore bialu harigo ina manda bidama. Áyu ina daluni kago bayuwa minabelo iname ínaga giha minu ya holomaya ibabe, lene.

<sup>21</sup> Ani layagola Solohanda tihondo ladai bialu lalu, Tígua ì biamogo baya gibiore birimigonaga Anduane Homogohanda tí biamogo bilo, lene. <sup>22</sup> Áyu halu mbira lone puwa heneneore hayadagoria kabe be nahedabe hondole abale hearia handalu ibiyadago heba puwa hondole pudaba. Ina hale halu hewaria agali ogoni o gibiorehe layane hale harugo. <sup>23</sup> Tí bayuwa puwa ibu kago ogoriaore lo hondo wialu ì koria abaleore lama dai bilimu. Ani beremigola ina haru puwa ibu dindi hobane ogoni dege ho kayagua ina tai bima dalialu hameigini Yuda dindi ogoni bibahendeni tai bulene ngayaguabi taibume halu ibu minalu waholiya, Solohanda lene.

<sup>24</sup> Ani bialu Solo ibu nde tai bima mama ibiya handala ti bamba halu Siba dindi dai bini. Debidibi ibunaga agali biaru heba pialu Maono tayandaha wali agali nahaga dindi guane Yudalinaga tayanda wiagoria puwa hene. <sup>25</sup> Ani biaria Solo ibunaga ami agali biaru heba Debidibi tai bule pene. Debidibi ibu ogoni hale howa heyalu Maono ege tole

hari bare tayanda mbiraha puwa ogoniha hene. Solo ibu ani bida layago hale howa ibu Debidi heagoria pole pene. <sup>26</sup> Puwa Soloibunaga agali biaru heba ti hari hombene biago abene mendehayagi heagola Debidi ibu nde ibunaga agali biaru heba ti abene mendehayagi lowa tu wuwa hangu hangu hagahaga bini. Debidi ibunaga agali biaru heba ti abale pole pialu hemiria Solo ibunaga agali biaru heba tigua abale talima ibalu minule hapara hene. <sup>27</sup> Ani buleore biyaria agali mbira abale bi yalu Solo hearia ibuwa lalu, Áyu ogoniore abale íbu dai bibe. Pilidialirume ina daluhayagi bo gialama anda ibiyadago, lene. <sup>28</sup> Ani biniyagola Solo ibu Debidi talima piyago wahalu puwa Pilidiali baba wai bule pene. Irane ogoni biyagonaga mitangi bialu dindi ogoni mini Putale Bini Hombene lalu mini wini. <sup>29</sup> Debidi ibu puwa Engedi dindi hobane wiagoha ha do howa hene.

## 24

### *Debidihanda Solo ibu babehego nabe wahenego ogo*

<sup>1</sup> Solo ibu Pilidiali heba wai bialu henego íbu daibuwa hale halu hearia Debidi ibu Engedi handa deḷe tayanda wiagoria ka layago hale hene. <sup>2</sup> Hale howa Solohanda ami agali hongohe wayaliru Isaraeleni hearu tagalo migi buwa daosini tebira (3,000) haru halu Debidibi ibunaga agali biarubi tai bima ni tagira ibiragohayagi dindi ko mini Nogo Meme Gabua Haga Ege Toḷe laga wiagoha tai bima pene. <sup>3</sup> Ani bialu ibu nogo sibi pabe heagoria pialu egeanda mbira hariga teneni wiagoria ubanda howa ogoniha Debidi ibunaga agali biarubi anda puwa ha do heago nahende Solo ibu egeanda ogoniha dege ti to pene. Ogoriani abene mendehayagi Debidibi ibunaga agali biarubi ti egeanda habaneha anda puwa ogorianiore ha do howa hene.✧ <sup>4</sup> Debidi agali biarume Debidihondo lalu, Ai Anduane Homogohanda ínaga waitigi biago áyu ínaga giha dinini helo henge ngiyadago ínaga ibuhondo bule manda bu wirigo bia, layadagua ai berene. Ani layagola Debidi ibugua hendeore ge hogarale bialu puwa Solo nahende ti talu berearia Solonaga aga luni biago mbira podo yamini. <sup>5</sup> Ani biyagoyu Debidinaga bu miniha mitangi mbira tagira ibiyagome, Nakarulape biruda, manda bini. <sup>6</sup> Mini ogoni tagira ibiyagola ibugua ibunaga agali biaruhondo lalu, Inaga kini Anduane Homogohanda dabo helene kago ínaga mo tandaga naholiya Anduane Homogo ibugua í haru helo hameledo. Ina ibu mo ko hole mbira nabuleberogo ogoni irane ibu Anduane Homogohanda kini helo dabeneore ka, lene.✧ <sup>7</sup> Ani layago Debidihanda ibunaga agali biaruhondo bi ogonibi layagome Solo homelo nabole lalu bilene.

Solo ibu ti tai halu tagira pialu ibuni abale pole piyagoha pene. <sup>8</sup> Pialu heagola Debidi ibu nde talima tagira puwa ibuhondo olowa lalu, Kini-o, layagola Solohanda olayago hale howa ho beregedene. Ani buwa handalu hearia Debidi ibu Solo ibunaga agali timbuni daligaore ka lowa ge duli hanga ho bulu palearia hendene. <sup>9</sup> Ani bu howa Debidihanda Solohondo lalu, Wali agali marume ínaga í bole manda bialu ka lalu karunaga bi hale halu hariligo irane agibe. <sup>10</sup> Ai áyu ogoni egeanda ogoniha howa Anduane Homogohanda ínaga giha í mo ya haya. Inaga agali marume í homelo ba lalu langiyagoyu ínaga í daraore howa í homabelo nabole laru. Ogoni irane í Anduane Homogohanda kini habelo dabeneoyane ani laru. <sup>11</sup> Ai ínaga aba-o o yidogo de handa. Inaga aga budini mbira ogoni. Ina í boleneyagua nde abale bedoledagua ínaga aga emene budini ogoni hangu podo yamirudagoni handa. Ani birudagome íla keba howa heneda lowabi bole heneda lowabi mbira manda nabibehe kegoni. Ina íhondo ko mbira nabi kogoria ínaga dege í bo wahole taya bialu kegoni. <sup>12</sup> Anduane Homogohanda iya mendealigome ko ogo ibugua bialu ka lalu dabelo. Ibugua ínaga íhondo kagua bule manda bialu harigonaga pani tandaga ngilo. Ina íhondo tandaga mbira ngule manda nabiore haru. <sup>13</sup> Mbira ala agua lagane wiyago manda bidegoni. Ko ngubi ngaru agali



ko ngubi biagame hangu biaga nga. Anigo ina í nabilebero. <sup>14</sup> Isaraealinaga kini ina í talerego agibe. Ibugua mbira talima ibaga bialu kago agidabe handadaba. I biango homene alebi tede alebi í kogonidago. ✧ <sup>15</sup> Ani bialu iya mendealigome kagua bu kabago Anduane Homogohanda dabo hendelo. Ina í mo ko nahabelo ibugua í pele ngialu biamogo bia, lalu Debidihanda lene.

<sup>16</sup> Debidi ibugua bi ogoni lai heagola Solohanda lalu, I igini Debidi-o ogoni henene íore kebe, lene. Ani lowa ibu dugu bini. <sup>17</sup> Ani bialu howa ibugua Debidihondo lalu, Í agali bayale hegola kagua ina biruda. Ina kagua uruni íhondo bialu hewagola ina íhondo bayale birida. <sup>18</sup> Áyu ina íhondo í bayale ogobi ko lalu íhondo walia haridago ogoni irane Anduane Homogohanda í inaga gi hongohaha mo ya hayagola ina í bo home nale waharidagoni. <sup>19</sup> Mbiralime ibunaga waitigi minu yuwa ba nabi wahaga aibe. Ina íhondo áyu birigonaga Anduane Homogohanda í mo bayale helo. <sup>20</sup> Áyu ina manda berogola ina Isaraealinaga kini í kegola dindi bibahende ngaru inaga andaneha ngelowa haru haho wulebere. <sup>21</sup> Anigoyu Anduane Homogonaga minini howa ina inaga aguaneneru mo ko halu mbira nabulebero lalu bi áyu lo wia. Ani beregola inagabi í one waneigini damenerunagabi mini mo embeda nahe wiaabobo helo. <sup>22</sup> Ani layagola Debidihanda lalu, Henene aniore bulebero, lo wialu ladai bini.

Ani lowa Solo ibu ibuni andaga dai biyagola Debidibi ibunaga agalibi ti tininaga ha do hagane biagoniha ha do hole dai bini.

## 25

### *Samuele homenego ogo*

<sup>1</sup> Mani Samuele homayagola Isaraele wali agali bibahende íbu ngoai howa ibunaga dugu bialu hene. Ani bialu tigua ibuni dindi Lama ogoriani hora hene.

### *Abigelehanda Debidi biamogo binigo ogo*

Ani hora heaha mani Debidi ibu Parana dindi ko yobi wali agali nahaga wiagoha pene.

<sup>2-3</sup> Maono tanoali mbira mini Nabala hene. Agali ogoni ibu Kalebe hameigini aria howa ibunaga dindi podene mbira Kamelo tanoha wu hene. Ibu agali homogo gibi howa nogo sibi daosini tebira (3,000) hinalu meme daosini mbira (1,000) hinu hene. Agali ogoni ibu one wali bayale mini Abigele berenego ibunaga mini bogaru bayaleorewi berene. Anigo Nabala ibu agali mana bayale nabiaga koni kerahe mbira hene.

Horo mbirungi Nabala ibu dindi Kamelo ogoniha howa ibugua ibunaga nogo sibirunaga irini podalu hene. <sup>4</sup> Debidi ibu dindi ko yobi wali agali nahaga wiagoha howa hale halu hearia Nabala ibu biabe ogoni bialu ka layane hale hene. <sup>5</sup> Ani hale howa ibugua igiri daliahe pirali hearuhondo lalu, Tigua Kamelo tano puwa Nabala karia pialu inaga minini howa íbu harida lalu mo bila halimu. <sup>6</sup> Mo bila howa Nabalahondo ogodagua lalimu, Debidi ibugua au laya. Inibi í one waneigini damene bu kamirubi inaga mbirale wu haridarubi tí bayaleore áyu kamigodagua manibi wu haabo halimulo hameledo, laya. <sup>7</sup> Ai Debidi ibu inaga nogo sibi irini áyu podalu ke layago hale hene. Inaga nogo sibi haru haga agali bu hearu ina heba Kameloni harimangi iname ti mo ko nahe mandagi bayaleore harimagoni. Ti Kamelo dindini harimangi tinaga mbirale wiarubi iname mbira mo kayu nabi dege harima. <sup>8</sup> Inime tihondo hale hariyagua tiguabi nde bi mbiraore ogodagua dege ladai bulebira lalu lamibe, laya. Ai áyu í tomo timbuniore dawalu ke layago hale howa Debidi ibugua ina í keria pudaba laya handala ibirima. Ibugua lalu, Í igini Debidihondobi ina bibahende inaga biabe biahaga

✧ 24:14: 1 Sml 26.20

kamagonigo inahondobi ina dara halu tomo maru wiagua nde nguleberebe, laya lalu lamilimu, lene.

<sup>9</sup> Ani laya handala agali Debidihanda pu layaru ti pialu Debidinaga minini howa bi o layadagua Nabalahondo lamuwa agi birabe hondole hondo hene. <sup>10</sup> Ani hondo hearia Nabalahanda ladai bialu lalu, Agali Debidi Yasi igini larimigo ogoni ibu aigo kabe. I ibu manda nabioire kogo. Ayu howa garabaya biabe ale biahaga agali dewa ibida pora bialu penerume dindi ogoniha ho tolayada. I ubi nde garabaya biabe ale biahaga mbirada lo manda bido. <sup>11</sup> Ti agoha howa ibini kamibe i manda nabido. Anigo ai mberedibi ibabi nogo marubi agali inaga nogo sibi irini podalu karu ti tomo nelo wini ngaruni ti mo ngia nabulebero. Ina ani nabuleore ndobe, lene.

<sup>12</sup> Ani layagola agali Debidihanda pu lene biaru tigua Nabalahanda bi layaruni bibahende lo yalu dai buwa Debidi lamiai hene. <sup>13</sup> Ani layago hale howa Debidihanda lalu, Ai ti bibahendeore ayu tiburu yuwa wai bule manda manda bu halimu, lene. Agali biaru tigua Debidihanda layadagua manda manda bu hai heagola Debidi ibunibi ayu tibu abale mandibuha mo manda mandabu yini. Ani bialu ibunaga agali handari maria (400) haru pialu handari kirame (200) tinaga mbirale wiyadaru handayaho helo helene.

<sup>14</sup> Horo ogoningi dege Nabalanaga biabe biahaga agali mbira heagome Nabala one Abigele bereria puwa lalu, Debidi ibu dindi ko yobi wali agali nahaga wiagoha howa inanaga agali haguane kagohondo mo bila hole agali maru pudaba layiya. Anidagua biyagola ibugua tihondo bi ko ladai biya. <sup>15</sup> Anigo bi ko ladai bulenego agali uruni tigua inahondo mana ko mbira nabioire. Tigua inahondo bayale dege biaabo halu haya. Ina haru mandagi amu dangite wiagoha harimangi tigua inanaga mbirale wirimaru mbira mo page nabioire haya. <sup>16</sup> Ina nogo sibiru haru hemangi Debidinaga agali urunime ina horombe mbiragabi baya hanguore mamage hayagola harima. <sup>17</sup> Anigo ai Debidihanda ibunaga agaliru ayu ogoniore haru halu ibuwa inanaga agali haguanebi wali agali ibu heba karu bibahendebo bo wahai holobadago manda bia. Ani bulubadago nabidaore ina ayu bulenego mbira abale manda bia nabere. Ina i bederia ibirudagoni irane Nabala ibu mine halu agalime bi laramago hale nahaga hayago manda bialu ibirudagoni, lene.

<sup>18</sup> Abigele ibugua bi layago hale howa abaleore mberedi handari kirabi (200) iba be meme dongoneme wabini kiraha waini iba hambu tolowabi nogo sibi duria bo hirinibi widi hiru polene nu mbira alebi gerebi lini do gembe bini huba bigi bini handari mbirabi (100) poge lini ale do gembe bini hubane handari kirabi (200) tomo uruni bibahende nogo dongi marunaga erembirani mo paga hene. <sup>19</sup> Ani biai howa ibugua biabe biahaga agali hearuhondo lamialu lalu, Tigua nogo dongi uruni haru halu bamba hadaba. Ini ti poramidagua mani talima ibuliya, lene. Anigo mbirale o biyadaruni damene ibu agalinihondo ogoale mbira bero lalu nalami howa bialu hene.

<sup>20</sup> Ani bialu Abigele ibuni nogo dongi mbirani bialu harigani Debidi lola hole pene. Ani piyagola Debidi halu ibunaga agali biaru tibi nde hariga mbiraore ogoninaga dege ibalu hene. Ani ibiyagola Abigele ibu hariga hari bare mbira wiagoria balalu pialu hearia Debidi ibiyagola lola hene. <sup>21</sup> Ani lola nahe howa Debidi ibu harigani ibalu howa ibu miniha mitangi bialu, Aiore nde ina dindi ko wiagoha howa agali biagonaga mbirale wiaruni page nabilo handayaho howa baya hangu mamage harimago nde aginaga harimadabe. Iname ibunaga mbirale mbira mo page nabioire harimadago. Ani hemagola ibunaga mbirale bibahende bayale wiai hayagonaga ai ibugua ihondo mana ko biadai biyadagonida. I bunaga mana ogoni tiga nabioireda. <sup>22</sup> Anidago ina ibunaga agali bu karu bibahendeore ayu mbiraga bo wahai holiya. Ani nabiruyagua nde Ngode Datagaliwabehanda i bo wahelo laro, lo mitangi bialu pene.

<sup>23</sup> Abigele ibugua Debidi ibalu hearia hondowa ibu dongini bialu penego dindini porabupe hene. <sup>24</sup> Ani bialu Debidi heagoria pialu dindini bulu paluwa ibugua Debidihondo lamialu lalu, Agali haguane-o ina ila bi lolene hameledogo bi larogo hale

habe. Bi gendabi biaruni ina bia ko heneme bida. <sup>25</sup> Ai Nabala ibunaga mana biagago damene bibahende ko ngubioREGO ibunaga bi layadaruni mitangi nabibe. Ibu mini Nabala lenedagoni agali bayale tigabi ndo mini kowi lalu mini wini. Mana ibugua biaga ngarubi ko dege bialu haga ka. Agali haguane-o ina agali maru pu lariyaruni i nahende haru. <sup>26</sup> Ainde hale habe. Anduane Homogo ibunime nabule lalu mo wahayagola inaga waitigi hearuhondo pani badai bialu tibi homelo bo wa nahariya. Anduane Homogo haluhe kagonaga minini howa ina ihondo bi hongo howa ogodagua laro. Anduane Homogohanda Nabalahondo pani nelu mulebiradagua dege inaga waitigi bu karu pani miai helo. <sup>27</sup> Ai agali haguane-o ina tomo yalu ibirudaruni nde inaga agali haru haridaruni mo mibelo hameledo. <sup>28</sup> Ina inaga wanakuini mana liahe mbira bidoyagua nde inaga ko ogoni la nabi wahabelo hameledo. Anduane Homogohanda inaga waitigi mbiragola wai bule pu layagua nde bule piaga harigoni. Ina mana ko bulenego nabiaga kegoni i manda bido. Anigo ai Anduane Homogo ibunime i kini helolebira. Ani biragola mani Isaraele wali agalinaga kini inaga waneigini aguanenerume dege haabo holebira. <sup>29</sup> Mbiralime i baba wai bialu i bo wahole ibiyagua agalime tinaga mbirale galone ale bayale ngaru handayaho hagadagua Anduane Homogo inaga Ngode Datagaliwabehanda i handaya ho holebira. Anigo inaga waitigi uruni ti agalime timu tegelape haragola minabe nahe poralidagua Anduane Homogohanda ti bo talu pelolebira. <sup>30</sup> Ani buwa Anduane Homogo ibunime ihondo bulebero lalu lo wiyadaguaore bialu ina Isaraele wali agali kamarunaga kini i helolebira. <sup>31</sup> Ina mbirali homelo bame bo wanahaga howa mbiralihondo mana ko mbira nabi heagua Anduane Homogohanda i kini helarangi inaga bu miniha mo genda holenebi i taga holenebi mbira nawi holebere. Ani buleberegogo ai mo bayale ho helarangi i mitangi lalu biamogo bibe, lalu Abigelehanda Debidihondo ani lene.

<sup>32</sup> Ani layagola hale howa Debidi ibugua Abigelehondo lalu, Anduane Homogo ina Isaraelenaga Ngode Datagaliwabe kago ibugua i ogoria i lola hole ibilayadagonaga ina turu timbuniore lalu ibunaga mini mo yaraga harogoni. <sup>33</sup> Ina mini bayaleore wiridagonaga ina Ngode Datagaliwabehondo kaj larogo ai ibunime i biamogo bilo laro. Ani larogoni irane Nabala ibugua ihondo mana liahe biyagonaga ina Nabalana wali agali bu karu bibahende bo wahai hole birugo ina hapai haregonaga laro. <sup>34</sup> Ihondobi nde ina mo ko naholiya Anduane Homogohanda mo waharogoni. Anigo Anduane Homogo haluhe kagonaga minini howa ina heneneore bidolego laro. Ina i ibalu hewaria abaleore ibiridago naibinidale egerebagi Nabala ibunaga biabe biahaga agali biaruni aria mbiraore hangubi dere mbira kane nahendedamile, lene. <sup>35</sup> Ani lowa Debidi ibugua mbirale Abigelehanda yu ibiyaruni yamialu howa ibuhondo lamialu lalu, Ayu ina bi langirigonidagua bialu Nabala bo wa naholeberogo i andaga dai bialu embeda ho hole pamia, lene.

<sup>36</sup> Ani laya handala Abigele ibu Nabala hearia andaga dai bini. Ani dai buwa handalu hearia Nabala ibu tomo timbuni dawa paya bialu agali haguane timbuni mini lene karume biagadagua dewali ngoai howa tomo timbuni nalu ha dege biane hendene. Ani nalu howa Nabala ibuni lulu iba dewa neneyago ai luluyu bereane hondowa Abigele ibugua bi mbira lamia nabi biruwa horo mendengi lamule waho berene. <sup>37</sup> Egerebalene egabi layagola iba nowa luluyu hayago ereba heagola Abigele ibugua Nabalahondo o biyaruni bibahende lamiai hene. Nabala ibu bi uruni hale howa ibunaga buhe abale ereba lalu tingini hongo nahe pirilape lalu bini. Ani biyagola abale dindini odo ibira lalu ema nabi dindini ege tole wiradagua wiaho wini. <sup>38</sup> Ani wiane dege horo pira agima peagola Anduane Homogohanda Nabala bo homelene.

<sup>39</sup> Debidi ibu Nabala homaya layago hale howa ibugua lalu, Anduane Homogo ibunime Nabalahanda mana ko ihondo biyago hondowa ai pani mialu ibu homelo

bo wahayadagonaga ina turu halu ibunaga mini yaraga harogoni. Nabala ibunime mana ko biyagonaga Anduane Homogohanda mana bialu pani miyada. I ibunaga biabe biahaga kogome mana ko mbira nabuliya Anduane Homogo ibuni inaga hariga hapai hayada, lene.

Ani biyagola emene howa Debidihanda Abigele ibu dabu bule agali marume damu pudaba lene. <sup>40</sup> Ani laya handala biabe biaga agali biarume pialu Kamelo dindini anda puwa tigua Abigelehondo lalu, Debidihanda i dabu bule hamelo howa ibugua inahondo i damu pudaba laya handala ina i haru dai bule ibirimago ai maliyabe, lene.

<sup>41</sup> Abigelehanda bi uruni hale howa abale dindini ge duli hanga halu bulu paluwa lalu, I agali hagianenaga biabe biahaga bedogo ina ibunaga biabe biahaga agali karunaga gebi wayawaya bia hole biruliya, lene. <sup>42</sup> Ani lowa ibugua ibunaga nogo dongi heagoria abaleore irigiho berene. Ani biruwa ibunaga biabe biahaga wandari duriali bereneru haru halu Debidinaga biabe biahaga agali biaru heba Debidid hearia pole pene. Puwa Debidid hearia anda pialu Abigele ibu Debidid one berene.

<sup>43</sup> Abale howa Debidid ibugua Yaserili dindini wali mbira bereago mini Ahinoama dabu binigo ai wali mende Abigele dabu buwa wali kira ibu one berene. <sup>44</sup> Kini Solo wane Migala ibu ala Debidid one dege berenego mani ibu abahanda Galimi tano agali mini Laisi ibu igini Paladi henego ibu dabu bilo hado mini.✧

## 26

### *Debidihanda Solo bole halu mende hondo wahenego ogo*

<sup>1</sup> Agali maru Siba tano howa Gibea dindini Kini Solo hearia ibuwa ibuhondo lamialu lalu, Yuda dindiha dindi ko iba dalu naibaga Hari Hagila heagohayagi Debidid ibu ogoniha ha do hearia de handarima, lene.✧ <sup>2</sup> Ani layago hale halu abaleore Solo ibunaga Israaeleali ami agali bayaleru daosini tebira (3,000) haru halu dindi ko iba dalu naibaga Siba dindi wiagoha ti Debidid taya bima pene. <sup>3</sup> Puwa Solo ibugua hariga teneni Hari Hagila heagoria balai anda bu hene. Debidid ibu nde dindi ko ogoniha howa hale halu hearia Kini Solohanda ibu taya bima dindi ogoriani ibira layaria hale hene. <sup>4</sup> Ani hale howa ibugua agali maru Solo kabe hondole ohalu pudaba layagola hondo piyarume henene ibu ka layago hale hene. <sup>5</sup> Tigua ibu ka lama dai biyagola Debidid ibu heyalu Solo balai anda bu heagoha pole pene. Ani puwa Solobi ibunaga ami haru haga agali haguane Nere igini Abane henegobi libuore paleagoha puwa baya hanguore deme hendene. Ami maru hearu ti lenelene balai anda bu palelowa Solo ibuniore dombeneha balai anda bu palearia hendene.

<sup>6</sup> Ani hondowa Debidid ibugua Hidiali Ahimelegebi Seruia igini Yoaba hamene Abisailabi libuhondo lalu, Libu mendealigo ai inaore Solonaga balai anda bu kagoha mbaliya hameledebe, lene. Ani layagola Abisai ibugua, Iore polene hameledo, lene.

<sup>7</sup> Ani laya handala horo ogoningi mbiraga Debidid Abisaila libugua Solo halu ibunaga amiru balai anda bu heagoha hendeore ohalu anda pene. Anda puwa handalu hebiria ami maru ti lenelene paluyu pelowa Solo ibuni dombeni paluwa ibunaga yandare haguane wiagohayagi dindini wa hearia hendene. Ami haguane Abane halu maru ti paluyu mabu biaria hendene. <sup>8</sup> Ani hondowa Abisaihanda Debidihondo lamialu lalu, Ayu Ngode Datagaliwabe ibunime inaga waitigi biago ininaga giha mo ya hayadagoni. Ibininaga yandare ngagonime boliya waha. Halu mbira hangu nogoba harogola abale homolebirago baro. Halu mende nablebero, lene.

<sup>9</sup> Ani layagola Debidihanda lalu, Nababe waha. Agali Solo ogoni Anduane Homogo ibunime dabenege mbiralime Solo homelo bo wahayagua Anduane Homogo ibugua agali ogoni pani timbuni mulebirago nabe waha laro, lene. <sup>10</sup> Debidihanda laabo lalu, Anduane Homogo haluhe kagonaga minini howa heneneore larogo Anduane

Homogo ibunime Solo homelo bo wahayaguabi ndo ibuninaga homolene horo ibiragola homayaguabi wai bialu kagola ibu waitigi bu karume wai hamaha bayaguabi nde uruni mbirago bulebira. <sup>11</sup> Anduane Homogo ibugua agali ogoni kini helo ibunime dabo helayago ina ibu mo ko halu bo wa naholebero. Ai ibunaga iba be yandarela ngagoni dege mo yalu mba, lene. <sup>12</sup> Ani lalu Debidihanda yandarebi iba bebi Solonaga haguane wiagohayagi wiago mo yalu Abisai libu haru tagira pialu pene. Ani biyago mbiralime handa nabi. Ti mbiralime ogoale birada manda nabi dege palene. Ani bialu hebiria agali paliyaru aria mbiralime heya nabi dege wini. Irane Anduane Homogohanda ti mo paliahondo hai heagola ti paliahondo haiore hene.

<sup>13</sup> Ani bialu Debidi ibu dindi ulini hari labo hengene wiagoha pialu hari mende Solo paleago emene kaundia ale dege ngelowa irigiho hene. <sup>14</sup> Ani howa ibugua Abane halu Solonaga ami agali bu hearuhondo olaede howa lalu, Abane-o ina i olarogo hale kebe nahe kebe, lene.

Ani layagola hale howa Abanehandanda ladai bialu lalu, I agali aigo howa kini olarebe, lene.

<sup>15</sup> Ani layagola Debidihanda ladai bialu lalu, I Isaraele dindiha agali gibi pari wayaliore kebe. I ogoniore keyagua nde ina inaga agali haguane kini timbuni kago baya hangu handayaho ha nabi aginaga yu waho kebe. Ayu dege agali inaga haguane kini bo wahole ti balai anda bu hemigoha anda ibiyago. <sup>16</sup> Abane-o inaga biabe bulene wiago nabi hado waho haridagoni handa. Ami agali ti bibahendeme tinaga agali haguane Anduane Homogo ibunime ibu kini helo dabo helayago baya hangu mamage naharimida. Ani birimidagonaga i Anduane Homogo haluhe kagonaga minini howa heneneore larogo ti bibahende homai halimulo kinihanda ti bo wahaiore holene karulapeda. Ai handadaba. Kininaga yandare biago agoha ngabe. I bunaga iba be biagobi ibuni paliyagoria haguane wiagoria dege wiyagobi agoha ngabe, lene.

<sup>17</sup> Ani layagola Solo ibugua hale halu hearia bi layuago Debidioreyane hondowa ibugua Debidi olowa lalu, I igini Debidi-o ogoni iore kebe, lene. Ani layagola Debidihanda ladai bialu lalu, Kini-o iore kogoni. <sup>18</sup> Kini-o ina nde ihondo mana ko mbira agi birugonaga inaga biabe biahaga kogo talima ibaga bialu kebe. <sup>19</sup> Kini-o bi ina loleberogo baya hangu hale habe. Ainde Anduane Homogo ibunime i bo wahole pu lenego ibiriyagua nde ina ibunaga loma mbira i dara helonaga bo deloliya. Ani ndo agalime i bame ndelenego ibiriyagua nde Anduane Homogohanda ndelaga uruni tini pani miadai bilo hameledo. Ani biyadaruni irane i Anduane Homogo ibugua dindi Isaraele wali agali ina holomaya ngiyago yu wahalu mbirale dama mitangi bialu gime wabini ngaruhondo bi pupu wima dindi tara ngaruha hama poliya tigua i talu pelayada. Ani bialu dindi Anduane Homogohanda inaga winigo naholiyanaga biyada. <sup>20</sup> Ai Isaraealinaga Kini-o ina agalime tede bole taya biagadaguabi irabuha ega bedaru bole taya biagadaguabi i taya bima ibirigo aginagabe. Anigo i Anduane Homogo yu wahalu dindi mendeha koore homoligo nababe, lene.

<sup>21</sup> Solo ibu bi uruni hale howa ibugua Debidihondo lalu, Ai ina mana koore bialu harudago daraba. I igini Debidi-o aiore ini korio dai bibe. Ayu mbiraga ina i bo wahabehego nabaridago ai ina i bo waholene manda nabuleorego dai bibe. Mana ina bialu harugo damene ko hangu bialu haruda. Ko emene agima ndo iha ngelo haruda, lene.

<sup>22</sup> Ani layagola Debidi ibugua Solohondo lalu, Kini-o inaga yandare ayu i giha yu kogo inaga ami agali karuni mbiragome mo pu labelo hameledo. <sup>23</sup> Anduane Homogohanda ibunaga bi mana lowini ngaru mbiralime bayuwa talialu bialu haga karu ti baya hangu helo biamogo biaga ka. I ayu ibugua inaga giha mo ya hayagoyu ina i bo wanahe waharugo irane Anduane Homogo ibunime i kini habelo dabo helayago manda buwa



ani biru. <sup>24</sup> Inaga miniha manda bialu ina Solo mo ko naholeore. Ina ibu bayale helo wahole manda biru. Anidagua dege áyu Anduane Homogohanda inaga bu miniha genda timbuni ngelo koruni mo wahai halu i bayale holiya biamogo bilo hameledo, lene.

<sup>25</sup> Ani layagola Solohanda Debidihondo lalu, I igini Debidi-o Anduane Homogohanda í haru halu biamogo bilo. Ani biragola ina bulebereru damene bibahende bayale hai helo laro, lene.

Ani lai halu Debidi ibu hari uruni yu wahalu piyagola Solo ibubi ibuni dalu dai bini.

## 27

### *Debidi ibu Pilidialiru baba henego ogo*

<sup>1</sup> Mani howa Debidihanda manda bu handalu hearia, Emene howa Solohanda i bo waholobadago. Anigo Solo nahendedaha pora bialu Pilidia dindiha ha do hole poliya. Ani berogola Solo ibugua i Isaraele dindiha taya bia dege bialu manga halu wahelo ani buliya, lo manda bini.

<sup>2</sup> Ani lo manda bialu Debidibiibunaga agali handari waragaria (600) biarubi ti pialu Gede dindinaga kini mbira Maiogo igini Agisi heago hearia pene. <sup>3</sup> Ani pialu Debidiibunaga agali biarubi tinaga one waneiginirubi bibahende Gede dindiogoriani pu hene. Debidi one kira Yaserili wali Ahinoamabi mende Kamelo wali Nabala homayago one dalo Abigelebi ti haru pu berene. <sup>4</sup> Debidi ibu Gede dindini ibida pu ka layago hale howa Solo ibugua Debidi lone taya bima ibaga nabi wahene.

<sup>5</sup> Mani howa Debidihanda Agisihondo lamialu lalu, I inaga nenegeore keyagua nde inaga dindiha tano emene ngeruni hole poliya pu larene. Agali haguane-o i iya haru inaga tano ogoriani mandagi holene nakarulape ndodabe, lene. <sup>6</sup> Ani layago hale howa Agisi ibugua ibu daluha tano emene mbira mini Sigilaga wiago Debidi mini. Ani binigo Sigilaga tano ogoni Yudanaga kini hararunaga wia ai henego áyu wiaabo kagoni.\* <sup>7</sup> Debidi ibu mali mbirani ege maria Pilidia dindiha ho hene.

<sup>8</sup> Ani howa Debidi haluibunaga agaliru tigua Isaraeleali waitigi maru Gesua hameiginirubi Girisi hameiginirubi Amalege hameigini palearu bababi wai bu pugu bialu hene. Agali hameigini uruni ti Isaraeleali baba waitigiore henego ti abene unurayagi paliyu pialu Iyibi dindiha tubari dindi ko wali agali napaliaga mini Sua wiagoha paliari hene. Ti bambaore dindi ogonihaore haabo haga hene. <sup>9</sup> Ani hearia Debidi haluibunaga agali biaru tigua uruni baba wai bialu wali agalibi bibahendeore bo wahai halu tinaga nogo sibiru bulumagaru dongiru kamele hearu ti haru hai halu tinaga aga wiarubi heba mo yai hene. Tigua anidagua bialu ti Agisi hearia dai bigi biaga hene. <sup>10</sup> Ani dai biragola Agisi ibugua Debidihondo hale halu lalu, Áyu í wai bu pirigo dindi ani wai bu piribe, lalu hale haga biaga hene. Ani hale hayagola Debidi ibugua Agisihondo ke halu lalu, Áyu Yudali baba wai bu pene dai bero, lalubi, Yameleali baba wai bu pene dai bero, lalubi, Keniali baba wai bu pene dai bero, lalubi ibuni hameigini bu hearu baba wai bu pene laga bialu Agisihondo ke haga bialu hene. Agali Debidi hameigini uruni ti Yuda dindinaga abene unurayagi hene. <sup>11</sup> Debidi ibugua wai bialu howa wali agalibi tanabi bo wahai haga bini. Ani bigi binidagoni irane wali agali mbiragome Gede dai buwa tigua bialu kagoni lamulilono ani bini. Debidi ibu Pilidia dindiha heangi anidagua dege biaabo halu haga hene. <sup>12</sup> Ani bialu heagola Agisi ibugua mitangi bialu Debidihanda heneneore lara lo mitangi bialu howa ogodagua manda bini. Ibugua ibuni damene Isaraeleru babaore wai bialu kagome tigua ibu hame nalolebirago ai i biamogo bialu inaga biabe bialu haabo helo karulapeda lo manda bini.

\* 27:6: Áyu wiaabo ka ledagoni ina kamangi heba ndo agali bi ogoni gili binidangi manda bialu lenego nga.

## 28

<sup>1</sup> Mani emene howa Pilidiali ami biaru Isaraeleali baba wai bule lowa mo mogo bu hene. Ani bu howa Agisihanda Debidihondo lalu, Íbi ínaga agali karubi tí wai ìhayagi holeberemigo ogoni manda buwaore kegoni, lene.

<sup>2</sup> Ani layagola Debidihanda ladaí bialu lalu, E aniore bulebero ndobe. Ì ínaga biabe biahaga harugo ínime ina agua berobe hondole habe, lene.

Ani layagola Agisihanda lalu, Bayalego ina í ínaga tingini mamage haabo habelo heloliya, lene.

### *Solohanda wali damahe mbirala bi lalu henego ogo*

<sup>3</sup> Ala Samuele homayagola Isaraele wali agali bibahende mo ngoai howaibunaga dugu bialu hene. Ani bialu tigua ibuni dindi Lamani hora hene. Ala Solohanda wali agali maru gamugamu biagarubi halaga biagarubi homene dinini baba bi laga hearubi ti bibahendeore, Isaraele dindini naholego tagira piaiore hadaba, lene.\*

<sup>4</sup> Ani bu howa Pilidialiru ti ami mo ngoai howa Sunemu tano handa dele wiagoriani balai anda bu hene. Ani biagola Solo ibu nde Isaraelealiru ami mo ngoai howa Hari Giliboa wiagoria balai anda bu hene. <sup>5</sup> Solo ibugua Pilidiali ami hearu hondowa gi gibiore hene. <sup>6</sup> Ani bu howa ibugua Anduane Homogohondo agi buabe lalu hale hene. Hale hayagola Anduane Homogohanda ladaí nabi mbira emagahabi ege tole emene kira Urimu Tumimulamebi Ngode Datagaliwabe mana latagi halu mbiwia haga hearuha howabi mbira ladaí nabioire wini.\* <sup>7</sup> Ani biyagola Solohandaibunaga haru haga hearuhondo lamialu, Wali homene dinini baba bilaga mbira taibu pudaba. Ani beremigola ina ibu bedaria puwa bi lolobaya, lene.

Ani layagola tigua ladaí bialu lalu, Dindi Endoni mbira beda, laya.

<sup>8</sup> Ani layago hale howa Solo ibugua kininaga aga golo ngelalu aga tara mende karula aribia halu aruma hayagola agali kira haru halu wali biago berearia hondo pene. Puwa ibugua wali biagohondo lalu, Ina mani ogo ale tagira ibulebira lalu agali mbira ina mini loleberogonaga mini dinini olalu hale habe, lene.

<sup>9</sup> Ani layagola wali biagome ladaí bialu lalu, Tigua Kini Solohanda biyagoni manda biaiore kamigoni. Ibugua wali agali gamugamu biagarubi halaga biagarubi homene dinini baba bi laga hearubi ti bibahende Isaraele dindini nahelo lalu bo ba tagi hayagoni. Ani biyagodago irane aginaga tigua ohowa i belonaga ndelo wialu ibirimibe, lene.

<sup>10</sup> Ani layagola Solohanda habo nalole lalu bi honghe mbira lowini. Anduane Homogo haluhe kagonaga minini howa ina bi mbira habo nalole lalu, Ina ogoni langerogonaga tandagabi mbira í keria naibulebira, lene.

<sup>11</sup> Ani layagola wali biagome hale halu lalu, Ina ai mini lalu oloabe, lene.

Solohanda ladaí bialu lalu, Samuele mini ola, lene.

<sup>12</sup> Ani layagola wali biagome Samuele hearia hendene. Hondowa mogo lalu koaba lowa Solohondo lalu, Ì mo hondo halu haridago irane agibe. Í Kini Solooredago, lene.

<sup>13</sup> Kini biagome wali biagohondo lalu, Gi nahabe. Ina agi hendedebe, lene.

Ani layagola ibugua ladaí bialu lalu, Ina homa dinini dindiha howa tagira ibiraria hendedo, lene.

<sup>14</sup> Solohanda hale halu lalu, Ibu agi handalehedabe, lene.

Ani layagola wali biagome ladaí bialu lalu, Ibu agali wahe mbira iraga halu ibiragoni. Ibu aga luni bia gimbubi mbirada, lene.

Ani layago hale howa Solo ibu mitangi bu handalu hearia ogoni Samueleda manda buwa ibu ka manda bialu dindini bulu palu ibira hene.

\* 28:3: LBM 20.27, Man 18.10-11, 1 Sml 25.1  
Penego 28.30 de handabe

\* 28:6: Urimu Tumimu bi ogolabonaga irane mbuga Haru Tagira

☆ 28:6: Dag 27.21

<sup>15</sup> Ani biagola Samuelehanda Solohondo lalu, Irane agi bulenaga ina i barila halu mo heya haribe, lene.

Ani layagola Solohanda ibuhondo ladai bialu lalu, Ina genda timbuniore yu kogoni. Pilidialime wai i baba kaware haanda halu Ngode Datagaliwabehanda i yu wahalu piyagola ko. Ina ibu olarogola hale halu mbira emagahabiibunaga mana latagi haga agali karuha howabi ladai nabiaga. Ani biyagola ina i ogodagua bibe lalu langibelonaga olaru, lene.

<sup>16</sup> Samuelehanda lalu, Anduane Homogohanda i yu wahalu i waitigi haya. Irane aginaga i olaribe. <sup>17</sup> Anduane Homogohanda ihondo biyadagoni ibugua ani bule lalu inihondo iha howa langiyadagua biyada. Ibugua ina kini howa haru haga harigo mo wahalu Debidi ho aribia helolebira. <sup>18</sup> Ina Anduane Homogonaga bi mo wahalu Amalegeali bibahendeore bo hilo wahalu tinaga mbirale wiarubi mo hole bu waholene wiyago nabirigo. Irane ogoninaga Anduane Homogohanda ayu ihondo ogonidagua biragoni. <sup>19</sup> Ibugua ibi Isaraele wali agalibi minalu Pilidialiruhondo mulebira. Yawi ibi inaga iginirubi ti i heba mandagi hamiya. Ani bidamigola Anduane Homogohanda Israaelenaga ami agali karubi Pilidialihondo minu mulebira, lalu Samuelehanda lene.

<sup>20</sup> Samuelehanda bi ogonidagua Solohondo layagonaga Solo ibu mogo gibiore lowa dindini durulo ibiraho wini. Horo ogoningi tomo mbira nane heneyagome ibu hongo nahe heneya. <sup>21</sup> Ani biyagola wali biago ibu Solo wiagoria puwa handalu hearia ibu mogo gibi lo wiaria hendene. Hondowa ibugua ibuhondo lalu, Agali haguane-o ina bia larigodagua bialu hewaria i homoleneni pu kogo hendedeni. <sup>22</sup> Ai ayu ina inaga biabe buahagame bibe larodagua bibelo hameledo. Ina tomo maru nabelo dawa manda manda bia harogo. Ina tomo ogoni naore bulebere nalu hongooore kegola hariga polebiridago pobelo, lene.

<sup>23</sup> Solohanda tomo biagoni nolene manga howa lalu, Tomo mbira nanolebero, lene. Ani layagola agali kira ibu heba ibiyago labomebi wali biagomebi tigua ibuhondo lalu, Harugo naore bia, lene. Ani layagola ibu odo ibiraho wiyagoni heyuwa dagiani berene. <sup>24</sup> Ani bereagola wali biagome puwa nogo bulumaga igini hungubalua haba tigile mbira heneyago abale bo dawene. Ani bialu ibugua balawa wiago maru muwa mberedi yidi ibira nahene wabu hirini. <sup>25</sup> Wali ogoni ibugua tomo uruni Solobi ibunaga agali kira biago labobi nelo manda manda biagola ti nene. Nalu ti mbiraga ogoningi dege pene.

## 29

### *Pilidiali hearume Debidihanda ti biamogo nabilo hamelenego ogo*

<sup>1</sup> Pilidiali hearume tinaga ami agaliru haru halu Abege tano wiagoria tidiyu hene. Ani heagola Isaraealiru tibi nde tidiyalu ibuwa iba duguaga Yaserili dindi ulini wiagoria balai anda bu hene. <sup>2</sup> Ani heagola Pilidialinaga kini duriali hearu tigua tinaga ami agali hearu handari mbira (100) halu mbira tagalo helalu daosini mbira (1,000) halu mende ona tagalo helaga buwa wai bule wai hamaha haru pene. Pilidia amidaru ti bamba halu piyagola Debidi halu ibunaga agali biaru ti mani Kini Agisi heba ibini. <sup>3</sup> Ani ibiyagola Pilidia ami haru haga haguane hearuni tigua Debidi halu ibunaga agali biaru ibiyago de hondowa lalu, Hiburuali uruni ti ogoha aginaga ibu kabe, lene. Ani layagola Agisihanda tinaga bi layago ladai bialu lalu, Agali o kago ibu Debidi ka. Ala ibu Isaraele wali agalinaga Kini Solonaga ami haru haga agali haguane mbira henego ai ibu ibalu ila luore henego kagoni. Ila howa ibugua mana liahe mbira nabioire haabo hariba, lene. <sup>4</sup> Ani layago lelowa ami haru haga haguane uruni tigua Agisihondo keba halu lalu, Tano ibu helo miridagoria hole pelo ayu ogoni daibia larene. Debidi ibugua beregedalu ina Pilidiali kamaru baba wai biadai buwa boligo ina haru wai ma nalabe. Ibugua anidagua

biragola Kini Solohanda ibuhondo turu halu lone haru dai bulene wulebira. <sup>5</sup> Abale walirume agali ogoni Debidi ibuhondo turu howa mambolo balu mali lialu iba gana ogodagua lene.\*

Solohanda agali daosini dewa dege bayagoyu Debidihanda daosini dewa bolanguaore howa bayagoni, lenego agali ogoni ndobe, lene. <sup>6</sup> Ani layago hale howa Agisihanda Debidi olalu íbu lowa ibuhondo lalu, Anduane Homogo haluhe tí Isaraele wali agalinaga Ngode Datagaliwabe kagonaga minini howa ina ihondo bi heneneore laro. Í agali tigabiore kegonigo inime manda bialu ai í biamogo bialu wai bule mba larugoni. Ala í hewaria ibirigoni howa hama ibiribagoha ina mana ko liahe mbira nabioire harigo áyu kabagoni. Anigo ai kini maru karu tigua í ina baba mandagi wai polene turu nahe kagoni. <sup>7</sup> Ainde tigua anidagua laragonaga ina kini biaru ti mo keba holenaga mbirale mbira nabi í dai bialu hendore andaga hole pamia, lene.

<sup>8</sup> Ani layagola Debidihanda Agisihondo lamialu lalu, Anigo inaga agali haguane-o ina mana ko mbira agi birugonaga laramibe. Abale inaga biabe pigane bialu harugo howa hama ibinigo áyu kogoniha howa mbira agile birube. Inaga agali haguane Kini-o inila haru mandagi pialu inaga waitigi bu haruaruni baba wai bule polene nawidago aginagaorebe, lene.

<sup>9</sup> Ani layagola Agisi ibugua Debidihondo ladai bialu lalu, Inaga deni howa íha ko mbira nawiore Ngode Datagaliwabenaga dahuliyali aleore kegoni. Anigo agali haguane maru karu tigua í ina baba napole lalu bi lo wahayagoni. <sup>10</sup> Ai Debidi-o haleha. Yawi egabi naledaore íbi Solonaga biabe biahaga agali karubi tínaga mbirale wirimidaru kabu bialu tano mbira ina tí halimulo ngirugoriani hole abale pilimu. Ina í agali bayaleore kegoni manda bidogo ina íla miniha genda holeni nahabe, lene.

<sup>11</sup> Ani laya handala egabi layagola egerebagiore Debidi halu ibunaga agali biaru ti andaga tini haga Pilidia dindi biagoha hole dai biyagola Pilidia ami biaru ti Yaserili dindi pole pene.

## 30

### *Debidibi ibunaga agalirubi tigua Amalegealiru baba wai bule penego ogo*

<sup>1</sup> Debidi halu ibunaga agali biaru bibahende pialu horo tebonengi tini dalu Sigilaga tano anda pene. Anda puwa handalu hemiria Sigilaga tano bibahende bo gialabaga biai hayiyane hendene. Anigo Debidi ibu Pilidiali baba heangi Amalegeali bu hearume Yuda wali agali maru unurayagi palaru baba wai bialu hene. Ani bialu tigua Sigilaga tanoha wai bialu bo podaga bima anda puwa tano wiagobi bo heda hai hene. <sup>2</sup> Ani bo heda halu tano ogoniha wali waneigini bibahende bu hearu mbira bo wanahe ti haru piaiore hene. <sup>3</sup> Ani peaha mani Debidi halu ibunaga agaliru ti andaga dai buwa handalu hemiria Sigilaga tanoha anda hayaruni bo heda hai halu ti one waneiginibi bibahende minu yalu piaiore hayiyane hendene. <sup>4</sup> Ani biyiyago hondowa Debidi halu ibunaga agali biarume dugu bia dege bialu naina hongo bibaho wima pene. <sup>5</sup> Debidi one wali kirabali Ahinoama Abigelelabi haru halu piyiyane hendene.\*

<sup>6</sup> Ani haru halu piyiyago hondowa Debidinaga agali biaru tigua bu miniha genda howa keba halu Debidi ege toleme bole manda bini. Ani biyagola Anduane Homogo Debidinaga Ngode Datagaliwabehanda ibu biamogo bialu mini mo hongo hene. <sup>7</sup> Ani mo hongo heagola Debidi ibugua Ahimelege igini loma binigo mo miaga agali mini Abaiada lamialu lalu, Anduane Homogonaga hame hale habiya loma binigo mo miaganaga aga mini ebodi karulaga biago mo yalu íbu layagola ibugua aga ogoni mo yalu ibini.\*<sup>8</sup> Mo yalu ibiyagola Debidi ibugua Anduane Homogohondo hale halu lalu, Agali waitigi o piyadaruni talima poabe be nape wahoabe. Ainde talima piruyagua

\* 29:5: 1 Sml 18.7, 21.11    \* 30:5: 1 Sml 25.42-43    \* 30:7: Aga mini ebodi Haru Tagira Penego 25.7 handabe.

\* 30:7: 1 Sml 22.20-23

ina ti minuleberobe be naminuleberodabe, lalu hale hene. Ani hale hayagola Anduane Homogohanda ladai bialu lalu, Karulapego ina ti talima pole pu. Ani puwa tini balu tinaga wali waneigini uruni haru dai buleberemi, lene.

<sup>9</sup> Anidagua laya handala Debidi halu ibunaga agali handari waragaria (600) biaru tigua piyiyadagua talima pene. Pialu iba Beso peagoria tagira puwa agali maru ti ogoriani hondo hene. <sup>10</sup> Agali handari kira (200) uruni tinaga ge ibira halu pobe manga hayagola ogoriani helalu Debidi halu agali handari maria (400) hangu baba pialu Amalegeali piyiyaru talima pole pene. <sup>11</sup> Ani pialu hemiria Debidinaga agali biaru tigua Iyibiali igiri daliahe mbira hearia handa walía howa Debidi hearia haru ibini. Ani haru ibuwa ibu mberedibi ibabi nelo mialu <sup>12</sup> poge lini ale do gembebu yiagobi huba mbira nelo mialu gerebi lini do gembebu yini hubakibi nelo mia dege bini. Igiri ogoni ibu iba tomobi nane dege horo tebiru howa ai tongolo mibeheore hene. Ani homaluore heariago tomo biaruni nowa hongo hene. <sup>13</sup> Ani heagola Debidi ibugua ibuhondo hale halu lalu, Inaga agali haguane aibe. Í anialibe, lene. Ani hale hayagola igiri biagome ladai bialu lalu, I Iyibialigo ai Amalegeali mbiranaga garabaya biabe ale biahaga kogoni. I warago bayagola inaga agali haguane ogonime i ogoha habe lalu piyagola horo tebiru ini hangu haru. <sup>14</sup> Iname unugohayagi pialu Yuda dindiha wai bialu Kereddealiru bababi Kalebeali hearu bababi wai buwa tinaga mbirale wiaru bibahende mo yai harima. Ani bialu Sigilaga dindiha puwa iname tano wiago bo heda harima, lene.

<sup>15</sup> Anidagua layagola Debidihanda ibuhondo hale halu lalu, Ina ina Amalegeali uruni kagoria haru pu poleberebe, lene. Ani layagola ibugua lalu, Ina tí haru polene karulape degego ai ina Ngode Datagaliwabenaga minini howa i bo wa nahole lalu bi mendebi nde inaga agali haguane giha minu miadai nabule lalubi bi ogonidagua lalu henene lo wia, lene. Ani layagola Debidihanda nabuleore lalu bi ogoni heneneore lowini. <sup>16</sup> Ani lowiya handala Iyibiali igiri ogoni ibugua Debidi Amalegeali biaru hearia haru pene.

Amalegeali biaru ti nde Pilidia dindihabi Yuda dindiha howabi mbirale dewaore mo yinigo odaruninaga turu howa tigua tomo dewa nagimbu bialu dindi ogoriani ho payapayabu hene. <sup>17</sup> Ani hearia hondowa Debidi halu ibunaga agali biaru tigua gao lelo paluwa horo mendengi egerebagiore pialu Amalegeali uruni baba wai bialu alendo hene. Ani bialu tigua Amalegeali uruni dewaore bo wahai hene. Ani bayagola Amalegeali uruni aria handari maria (400) hangu nogo kameleni bialu ibida pene. Anigo Amalegeali dewaore Debidi halu ibunaga agali biarume bo wahai hene. <sup>18</sup> Ani bialu Debidi ibugua ibu one kira biagolabobi wali marubi waneigini biarubi mbirale Amalegeali urunime mo yalu pene biarubi bibahendeore mo yu dai biai hene. <sup>19</sup> Tinaga mbirale mbira ereba naheore bibahende mo yu dai biai hene. Debidinaga agali biaru tinaga waneiginiru mbira ereba nahe bibahendeore hai hearia mo wialu haru dai bini. <sup>20</sup> Ani bialu tigua nde Amalegeali biarunaga nogo sibi bulumagarubi haru hene. Debidinaga agali biarume sibi bulumaga biaruni haru bamba halu howa tigua huaro lalu wai bi lama pialu howa lalu, Nogo sibi bulumaga uruni bibahende Debidinaga hanguda, laga bima pene.

<sup>21</sup> Ani laga bima pialu agali handari kira (200) harigani ibalu howa hongo naheyagola amu iba Beso piyagoria helalu ibirimiru heagoria tagira pene. Ani pirimigola agali uruni tigua Debidi halu wali waneigini biaru ibiyago lola hole ibiyagola Debidi ibugua ti heagoria kaware puwa agua harimibe lalu ti mo bila hene. <sup>22</sup> Ani mo bila hayagola agali Debidi baba mandagi pene biaruni aria maru tinaga mini kowi howa tigua lalu, Agali uruni ti ina haru mandagi wai bule ma nalayago ai iname wai bialu mbirale mo yidamaruni aria maru ti natalebu muleberema. Ti nde tini one waneiginiru hangu haru pelo, lene.

<sup>23</sup> Ani layagola Debidi ibugua ladai bialu lalu, I hameneru-o mbirale uruni Anduane Homogo ibunime inahondo ngiyagodago ai tigua bi o larimidagua bulene nawi. Agali



inanaga tano bo gialabaga bialu mo ko haga biaruni iname bo podo hana holomaya Anduane Homogo ibunime ina handayaho halu biamogo biyagoni. <sup>24</sup> Ai tınaga bi o lalu kamiruni karulape aiwa lolebirabe. Tınaga bi uruni karulape larimi lolene agali mbira nahedago ai mbirale wai hamaha howa mo yarimaruni bibahende ina damene ogoria hayaru baba ogobi dege dege hanuni tale buleberema. Agali dabudabu handayaho hayaru ti nde wai piaga biaru ti yaradagua dege yilo talebu mimiya, lene.☆ <sup>25</sup> Ani lalu Debidi ibugua bi o layadagoni Isaraele dindiha mo mana henego tigua wai puwa mbirale mo yarago bibahende tale bialu ogobi dege dege yaga winigo wiaabo hene.

<sup>26</sup> Ani layagola howa Debidi halu ibunaga agali biaru ti Sigilaga dai buwa Debidi ibugua wai bialu mbirale mo yu dai biyaruni aria maru Yuda dindiha agali haguane hearunaga talebu wia haga bialu howa tihondo bi lawia haga bialu lalu, Mbirale uruni iname Anduane Homogonaga waitigi bu hearu baba wai bialu mo yarimago ainde maru tınaga wia haga bero, lene. <sup>27</sup> Debidi ibugua mbirale uruni pelaga binidaruni agali haguane maru Bedele tanoha hearuhondobi Yuda dindiha unurayagi Lama dindi wiagoha hearuhondobi Yadiiri dindiha hearuhondobi <sup>28</sup> Aroe dindiha hearuhondobi Sibimodo dindiha hearuhondobi Esedemoa dindiha hearuhondobi pelaga bini. <sup>29</sup> Ani bialu Lagala dindiha hearuhondobi talebu pelalu Yaramele dindiha hearuhondobi Keniali biaruhondobi maru wia haga bini. <sup>30</sup> Ani wia halu Homa dindihabi Borasana dindihabi Adaga dindihabi <sup>31</sup> Heberono dindihabi dindi uruniha hearuhondo talebu wia haga bini. Ani bialu bamba Debidi ibuni halu ibunaga agaliru ti pialu howa agali maru nenege haga bini dindi bibahendehe hearunaga dabudabu maru talebu wia haga bini.

## 31

### *Solo ibu iginiru heba homenego ogo*

<sup>1</sup> Pilidiali amime Isaraeleali baba wai Hari Giliboa heagoria biyagola Isaraeleali dewa homene. Maru Solo ibunaga iginu biaru heba ibida purogo lene. <sup>2</sup> Ani purogo layagola Pilidiali ami abale talima ibalu Solo iginu tebira biaru Yonadana Abinadaba Malagisua imaru minalu bai hene. <sup>3</sup> Ani bialu Solo heagoria wai hongoheore minama minama anda ibalu waitigi hearunaga timume Solo bila hene. <sup>4</sup> Ani biyagola ibugua igiri wai biaga humbi yandarerubi yu heagohondo lalu, Pilidiali Ngode Datagaliwabe mitangi nabiaga nai ibirarume i nabelo inaga ayu tibu yidegonime i homoliya abale ba, lene. Ani layagola igiri biagome ani bolenego gi timbuni howa nabe wahene. Ani biyagola Solo ibuninaga wai biaga ayu tibu biago yamuwa deneni ibunime pili paga halu homene. <sup>5</sup> Ani biyagola igiri ibula ibaga bu haribigo ibugua Solo homayago hondowa ibuninaga wai biaga ayu tibu yu hayago yamuwa deneni ibuni pilo paga halu Solo homayadagua dege homa palu bini. <sup>6</sup> Ani bialu Solo ibunibi ibunaga iginu tebirarubi ibunaga wai biaga humbi yandarerubi yu ibaga biaga biagobi Solonaga agali bibahendeore horo ogoningi hangu homai hene. <sup>7</sup> Ani biagola Isaraelealiru ti Yaserili dindi guagua wiagoria hene. Ani biagola ni tagira ibiragohayagi Iba Yodana piyagoha tigatiga howa Isaraeleali ami ibida purogo layagobi Solobi ibu iginirubi homaya layagobi hale halu hearia tigua nde tinaga dindi andabi wahalu ibida pene. Ani buwa ngelalu peagoria Pilidiali biaru ibalu ogoriani karulo hene. <sup>8</sup> Mani wai ogoni biai howa horo mbira peagola Pilidiali biaru puwa Isaraeleali balu homene biarunaga mbirale dabudabu yu wahalu pene wiaru ti mo yalu pene. Ani bialu howa handalu hearia Solobi ibunaga iginu tebira biarubi tinaga tingini uyu Hari Giliboa tene wiagoha bo paya bu wiaria handa walia hene. <sup>9</sup> Ani bu wiaria hondowa tigua Solonaga haguane pugualu ibunaga wai bulenaga aeane karuleago ti golowa agali maru hearuhondo mialu bi baya mbira yidama lalu Pilidialinaga mbirale bi pupu wule gime wabiniruhondobi wali agalihondo lamule

☆ **30:24:** Dag 31.27, Yos 22.8

pudaba lene. <sup>10</sup> Ani lowa tigua Solo ibuninaga wai biagane timu humbi yandare uruni mo yalu puwa mbirale dama mitangi bialu gime wabini Asedarenaga bi pupu wiaga anda heagoha mo yalu puwa ngelene. Ani bialu Solonaga tingini Bedesana tanonaga pabeni milime bapara howa ngelene.

<sup>11</sup> Yabese wali agalime Gileada dindini howa hale halu hearia Pilidiali biaru tigua Solohondo biyaru ogodagua biya lalu layago hale hene. <sup>12</sup> Ogoni hale howa agali pari wayali elahē hearume abale gerai lalu Bedesanani ibule ibalu heaore egabi lene. Ibuwa tigua Solobi ibu igini tebira biarunaga tingini biaru mo yalu Yabese dindini dai buwa irani delene. <sup>13</sup> Ani bialu kuni damene tigua mo yalu puwa ira mini tamarisigi mbira tanoni henego teneha hora halu tini dara howa horo karu tomo mbira nane duguanda ho hai hene.

## 2 Samuele

### Mbuga ogoha gilibu ngarunaga nemandi ogo

Mbuga ogome Samuelenaga mbuga mbira biagoha howa bi te lo wiaruni leaha mani binigo damene gilibu wini nga. Abale mbuga mbira biagobi Samuele mbuga mende ogobi mbiraore hangu winigo mani howa lone mo kira hene. Ani binidagoni irane mbuga mende ogo ibugua agali mbiraore Kini Debidi hangunaga te dewa gilibu nga.

Debidi ibuni kini heangi binirunaga bi te gilibu nga. Ngode Datagaliwabe ibu Kini Debidila mandagi haabo haga hene. Debidi ibuni kini hongoheore howa Ngode Datagaliwabe gubalini haluibunaga Isaraele wali agali bibahende gubalini hai haga hene. Ibugua Ngode Datagaliwabehondo mini bilinahe heagolaibunaga Isaraele wali agaliru bibahendeme ibu gubalini timbuni ho hene. Ani ha howa dege ibuni hangu mo turu holenenaga mana ko timbuni mbira biyagome ibuni pilene. Ani bu hearia Ngode Datagaliwabenaga bi mana latagi haga agali Nadanahanda ko biyago lamialu latagi hayagola Debidi ibuni ko biyago taga halu dara timbuni howa lapani halu lone mini beregedene.

Isaraele wali agalirunaga deni Debidi ibu agali mini lene timbuni mbira hene. Isaraele wali agali tiha genda mbira tagira ibirangi tinaga kini bayale Debidi henego mitangi bu dai biaga hene. Ani howa mani tinaga kini agali bayale Debidi ale mbira ibilo manda bu haga hene. Debidihanda yu tiga hongohe bialu bu mini beregedo henegoibunaga wali agalirume manda biaihe hene.

#### **Bulu бага бува кuni gilibu ngago (1.1–4.12)**

Yudalirume Debidi ibu tinaga kini helo dabo helenego 5.1-24.5

Isaraealirume Debidi ibu tinaga kini helo dabo helenego

5.1-10.19

Debidi ibu wai bialu wayali haga binigo

11.1-12.25

Debidi ibu Urianaga one mini Bedeseba kayu binigo

12.26-20.26

Debidi iginirume ibu mo genda henego

21.1-24.25

Debidi ibu wahe howa bialu henego

#### *Kini Solo homaya layago Debidi ibu hale henego ogo*

<sup>1</sup> Debidibiibunaga ami agalirubi ti Amalegealiru baba wai bialu henego dai buwa horo kiru Sigilaga tanoha pu hene. Ani pu heaha Kini Solo ibu halu nde wai halu mende Pilidialiru baba bialu hearia tigua Kini Solo waime bene homayago Debidi ibu hale nahe dege hene. <sup>2</sup> Ani hale nahe hearia horo tebonengi igiri daliahe Kini Solo heba wai bialu henego aria mbira Solo dara howaibunaga agaru budu bagabi bialu dongoma dindiruibunaga hagianeni dugu hiralu Sigilaga tano anda ibini. Ibalu Debidi heagoria ibuwa Debidi geha bulu palialu kininaga mini yaraga halu ani bini. <sup>3</sup> Ani biyagola Debidihanda igiri biagohondo lalu, *I* agoha howa eberebe, lene.

Ani layagola igiri daliahe biagome ladai bialu lalu, *I* Isaraeali ami hearu heba wai hama wiagoha henego ai pora bialu ibida ibiru, lene.

<sup>4</sup> Ani layagola Debidihanda ibuhondo hale halu lalu, Wai bialu harimidagonaga te bibi maru hale holene hame ledogo langi, lene.

Ani layagola igiri daliahe biago ibugua ladai bialu lalu, Isaraele ami agali heneru ibida piai hayagola dewaore Pilidiali hearume minalu bai haya. Kini Solobi ibu igini Yonadanabi kirabali bayagola homaya, lene.

<sup>5</sup> Ani layagola Debidihanda ibuhondo hale halu lalu, Libu homaya lowa agua manda bialu larebe, lene.

<sup>6</sup> Ani hale hayagola igiri daliahe biago ibugua ladai bialu lalu, I Hari Giliboa heagoria howa handalu hewaria Solo ibugua ibunaga wai biaga yandare yiago dindini hanga howa ogoriani maliaho hearia handaru. Ani handalu hewaria ibunaga waitigi agalirume nogo hosini biralubi hosime gili laga mini karisini heyu halubi abale hapara hayane handaru. <sup>7</sup> Hapara hayagola Solo ibugua beregedowa handa dai bialu hearia i erembirahayagi mama ibalu hewaria hondowa i olaya. Olayagola ina lalu, Ya agali haguane-o ladai biru. <sup>8</sup> Ani ladai birugola ibugua lalu, I agohayagi howabe, layagola ina ladai bialu lalu, I Amalegeali ko, laru. <sup>9</sup> Ani larugola ibugua ihondo lalu, Inaga waitigi biarume i bayago ai áyu dege homo tongolo mule ngogonigo abale ibalu ina i homoliya ba, laya. <sup>10</sup> Ani layagola ina abale ibu heagoria puwa homelo bo tongolo milaru. Ani birudagoni irane ina manda bialu hewaria ibu yandare biagoria maliaho hayadago yu wahalu dindini ibira hayagua ibu homabehe heago hondowa ani biru. Ibu homayagola kini ibunaga tangi karuleagobi gi pagida karuleagobi uruni bibahende agali haguane inaga golo yahalu ibirugo ao ini ngero, lene.

<sup>11</sup> Bi ogoni layago hale howa Debidihanda ibunaga bu miniha genda timbuniore howa ibuninaga aga bu heago minu lerelene. Ani biyadagua Debidinaga ami hearu tiguabi nde ani dege bini. <sup>12</sup> Solobi Yonadanabi Isaraele ami biarubi Anduane Homogonaga wali agali biarubi bibahendeorebi waime bai hayagola tigua dara howa dugu bia dara ha bialu tomoru nane wahowa horo mbiru halu alendo hene. Waime dewaore bai hayagola tigua anidagua bini.

<sup>13</sup> Ani buwa Debidihanda igiri daliahe bi yalu ibini biagohondo lalu, I dindi aniali kebe, layagola igiri daliahe biagome ladai bialu lalu, I Amalegealigo ai bamba i aba ibu inane dindi wahalu ibuwa Isaraele dindiha ho tene heneyago kogoni, lene.

<sup>14</sup> Ani layagola Debidihanda lone hale halu lalu, Anidago ina agali Anduane Homogo ibunime dabalul helene biagoni bolene gi nahe baridago agua biribe, lene. <sup>15</sup> Ani lowa Debidi ibunaga ami agali mbira heago ibu lowa lalu, Igiri ogo homelo ba, lene. Ani layagola ami biagome igiri daliahe biago ayu tibu wai biaga yu heagome dibayagola homene. <sup>16</sup> Igiri biagonaga tingini wiago hondowa Debidihanda lalu, Inime bia ko haridagonaga pani naregoni. Inime latagi halu agali Anduane Homogohanda dabalul helene biago baru larigome ini homedegoni, lene.

*Debidihanda Solo Yonadanalanaga dara howa dugu bialu iba gana lenego ogo*

<sup>17</sup> Debidihanda dara howa dugu bialu iba gana ogo Solo ibunibi ibu igini Yonadanabi mitangi bialu lene. <sup>18</sup> Ani lowa Debidihanda Yuda wali agali bibahendeme iba gana ogoni lo manda bilo, Lo manda biaiore halimu, lalu hongo howa lamini. Iba gana ogoni mini Waime Benegonaga Dugubi laganego mbuga mbira mini Agali Tigabirunaga Mbuga laga ngagoha gilibu nga.\*

Debidihanda iba gana ogoni ogodagua lene.

<sup>19</sup> Ina Isaraele wali agalirunaga agali haguane hayaru hari nene wiaruha homayada. Inanaga ami agali hongohe biarubi homai hayada.

<sup>20</sup> Gede tanohabi Asagelono tanoha hariga pedarunaga howabi bi te ogoni lalu mbira latagi nahalimu.

Pilidia wali bedarume bi ogoni hale howa ti turu holigo nalalimu.

☆ **1:6:** 1 Sml 31.1-6, 1 Bit 10.1-6 \* **1:18:** Agali mini bogabi manda timbuniwi hearume manda bu handalu hearia, Agali Tigabirunaga Mbuga ogoni bamba Isaraele wali agaliru tinaga wini bada laya. Áyu mbuga ogoni nawu. Mbuga ogoniha bi agi dege lo winibe tobene. Bi te mbira bamba Yosua ibugua Anduane Homogohondo bi layagola ni abale anda nape hayagoria luore haho wini mbira lo ngagobi bi ogoni mbuga ogoniha dege wini. Yosua 10.12-13 handabe.

Ngode Datagaliwabe mitangi nabiaga karunaga wane bedarume bi ogoni hale howa tinaga bu miniha dungulo holigo nalalimu.

<sup>21</sup> Ami agali hongohe biarunaga tinginibi tinaga wai biaga humbibi Hari Giliboa nene wiaruha bame wiaabo ka. Solonaga wai humbi biagobi welime baya hangu hai nahe ogoniha wiaabo ka. Ani bidagonaga iba dalubi mbiraga pibirabi hari nene ogoniha lone naibilo hameledo. Dindi ogoniha tomorubi bayale anda nahelo hameledo.

<sup>22</sup> Yonadanana dandame mbirale ko ba nabiaga gibiore wini. Solonaga wai biaga ayu tibu bame nawiaga. Wai bialu ami agali waitigi dewaore balu homelaga. Agalinaga darama dewaore ayu tibu ogoriani bu ka.

<sup>23</sup> Solo Yonadanala libu agali bayaleore haga hene. Libuni haru mandagi haabo haga henego libuni haru mandagi dege homaribida. Ega bodo hariaweme ibunaga tomo naga ale ngagola minule abale yagalalu piagago emene nira dege lowa libugua gerai hongo howa laga hene. Libunaga hongo laiono gabua ale ndo hongo timbuniore bolanguahe hene.

<sup>24</sup> Isaraele wali bedamiru-o Solohanda aga daramabi bayale tara wiago tí mo ngialu ngolome wabini yári tara tara wiarubi tí yári bilimulo mo ngiyagonaga ibu mitangi bialu dugu timbuniore bialu biralimu.

<sup>25</sup> Ami agali wai biaga hongohe biaru homai hayada. Ti wai hamani homai hayadagoni. Yonadanabi homa dege bialu ibunaga tingini uyu hari nene ogoniha wiarua.

<sup>26</sup> Inaga hamene Yonadana-o inaga dugu bia harogoni. Ina í gubalini haabo ho kogoni. Inabi nde í gubalini hagaore harigoni. Wandarime ihondo gubalini hagago dindiha lowa inaore í gubalini timbuni ho harigoni.

<sup>27</sup> Ami agali wai biaga hongohe biaru homai hayada. Tinaga wai biaga danda timu yandare yayarubi goba hai harua, lalu Debidihanda dugu bialu iba gana bi ogonidagua lene.

## 2

### *Yuda wali agalime Debidi ibu kini helenego ogo*

<sup>1</sup> Mani Solo Yonadanala homeaha Debidihanda Anduane Homogohondo hale lalu, Ina Yuda dindiha tano ngaruni mbiragoha hole polene karulapedabe be nakaru-lapedabe, lene. Ani layagola Anduane Homogohanda ladai bialu lalu, Karulapego mbirani hole pu, lene. Debidihanda lone hale lalu, Ina tano agoria hole poabe, layagola Anduane Homogo ibugua ladai bialu lalu, Heberono tanoha hole pu, lalu lamini.

<sup>2</sup> Ani laya handala Debidi ibu one Yaserili wali Ahinoamabi Kamelo tano wali Abigele berenegobi kirabali haru lalu Heberono tanoha hole pene. Bamba wali Abigele ogoni ibu Nabala homayagonaga one berenego mani daloni Debidi ibu dabu bini. <sup>3</sup> Agali

✧ 2:2: 1 Sml 25.42-43



Debidi heba mandagi ibagabu haga hearubi uruni ti onerubi ti bibahende piai howa Heberono tanohabi dindi Heberono tano kaware wiaruhabi pu hai hene. <sup>4</sup> Ani pu heagola Yudali hearu ibuwa tigua Debidi tinaga kini helo dabalú ira olibe lininaga weli Debidinaga haguani odo wini.\*

Ani biyagola Debidi ibu áyu dege kini howa hale halu hearia Yabese wali agali Gileada tanoha hearume Solo hora haya layago hale hene. <sup>5</sup> Ani hale howa Debidihanda Yabese wali agalihondo bi mbira lo pelalu howa lalu, Tigua mana bayaleore walia halu tínaga Kini Solo horo harimidagonaga Anduane Homogohanda tí mo turu halu mo bayale helo hameledo laro. <sup>6</sup> Áyubi nde Anduane Homogo ibuni tí heba biamogo bialu mandagi haabo helo hameledo laro. Inabi nde tigua Solohondo mana bayale bu walia harimidagonaga tihondobi bayale dege bulebero. <sup>7</sup> Heneneore tínaga Kini Solo ibu homayagonigo áyu Yudali hearume i tínaga kini holiya dabo helaya. Ani biyago ai tíha gi holene mbira nawi howa hongo ho haabo halimu, lalu Debidihanda lene.

*Isaraeleali hearume Isibosedé tinaga kini helo dabo helenego ogo*

<sup>8</sup> Pilidiali hearume Solo bayangi howa Solonaga ami hearu haru haga haguane Nere igini Abane ibugua Solo igini Isibosedé haru halu pene. Haru halu iba Yodana doma ede halu ederayagi Mahanaimi tano wiagoria anda pene. <sup>9</sup> Tano Mahanaimi ogoniha anda pu howa Abane ibugua Isibosedé ibu dindi Gileadabi Asebi Yaserilibi Eberaiminagabi Beniyamininagabi Isaraele dindi bibahendehabi uruni bibahendenaga kini helo dabo helene. <sup>10</sup> Solo igini Isibosedé ibu mali pira maria (40) hayagola tigua ibu Isaraele wali agalinaga kini helo dabo helayagola mali kirani hangu haru hene.

Ani henegoyu Yuda wali agali tigua Kini Debidi baba haabo heagola <sup>11</sup> ibugua Heberono dindini howa mali kariani ege waragaria haru hene.

*Isaraeleme Yuda baba wai binigo ogo*

<sup>12</sup> Abanebi Isibosedénaga ami agali biarubi ti bibahende Mahanaimi tano wahalu Gibeono tano pialu anda pene. <sup>13</sup> Ani anda ibu heagola Yoababi Debidinaga ami hearubi ti ibalu Gibeononi iba gorene mbira bereagoria kaware lola hene. Iba biagonaga ange mendehayagi Isibosedénaga ami agali biarubi ti bereagola mendehayagi Debidinaga ami agali biarubi heba wali mbira mini Seruia berenego igini Yoaba halu berene. <sup>14</sup> Ani bereagola Abanehanda Yoabahondo hale halu lalu, Inane hangu wai halu mbira bia handamabe. Inaga igiri daliahe o karu aria maru tale bialu ibilarogo inaga igiri daliahe maru tale bialu wai bilo ibila, lene. Ani layagola Yoabahanda ladai bialu lalu, Karulapego ani bimiya, lene. <sup>15</sup> Ani lalu Beniyamini hameigini aria homberiali (12) Isibosedénaga ami heneru tigua Debidinaga ami agali homberiali (12) biarubi baba wai bule tagira ibini. Ibu howa Debidinaga ami agali mbira mbirame Isibosedénaga ami agali mbira mbira baba wai bialu bagabaga bini. <sup>16</sup> Ani wai bialu hongo manda bigibigi bialu howa ami agali mbira mbirame mendeali mandani yuwa ayu tibume habianeha nogoba haga bini. Ani bialu agali pira kirani mariali (24) biarubi bibahende dindini ibira halu homai hene. Ani binigo manda buwa Gibeono dindi ogoni mini Ayu Tibu Dindi laga winigo nga.

<sup>17</sup> Horo ogoningi hameigini kira ogoni labome wai timbuni hiriribiore buwa Debidi aria hearume Isaraeleali Abane aria hearuni bo podahana halu ti wayali hene. <sup>18</sup> Wayali hayadangi Seruia igini tebira Yoababi Abisaibi Asahelebi henego uruni tini haru wai bialu hene. Asahele ibu agalime tali minalu babe nahe gerai purunulope halu nogo dea gabuame piagagobi polene mbira hene. <sup>19</sup> Ani howa ibu Abane piyadaguaore gerai lalu haruru pene. <sup>20</sup> Haruru ibiyagola Abanehanda handadai bialu hearia Asahelehanda ibu talima mama ibiyane hondowa ibugua lalu, Asahele ogoni íore eberebe, lene. Ani layagola Asahelehanda ladai bialu lalu, E i eberogoni, lene.

\* 2:4: 1 Sml 31.11-13

<sup>21</sup> Ani layagola Abane ibugua lalu, I talima naibi wahalu ami agali dalihae poraruni aria mbirago talima pialu ibunaga mbirale yidaru gingilo mo yalu dai bule pu, lene. Ani lamiyago lelowa Abaneore talima puabo hene. <sup>22</sup> Talima pialu hearia Abanehanda lone ibuhondo lalu, I porogoha talima naibi waha larugodago ai í bo waholiyanaga pebera harebe. Ina í homabelo bo waharuyagua nde í hamene Yoabala wanakui lola agua holiyadabe, lene. <sup>23</sup> Ani layagola Asahele ibugua donge halu talima pene. Pialu hearia Abane ibunaga yandare deneme Asahele talima ibiyagoha nogoba hadai biyagola yandareme ibunaga tinini nogoba hayagola yandare dene erembiraha bolatagi hene. Ani biyangiore Asahele ibu abale dindini ibira halu homo tongolo mini. Ami agali maru mani ibiyarume Asahele tongolo mini wiago hondowa ti o biagoria halope howa handayaho hene.

<sup>24</sup> Ani helalu Yoaba Abisaila libuni Abane piyadagua talima puabo halu alendo ne layagola ni tagira ibagagohayagi hari Ama nene wiagoria pene. Dindi ogoni Gibeono dindiha iba dalu naibaga mbira wiagoha polene hariga peagoria dindi Gia mbira winigoria anda pene. <sup>25</sup> Ani pialu hebigola agali Beniyamini hameigini hearume Abane heagoria dai bialu hari bare hambene wiagoria wai bule tidiyu hene. <sup>26</sup> Ani tidiyu howa Abane ibugua Yoabahondo oladai bialu lalu, Wai bialu haabo hamiyana talima ibiribe. Mana ogonidagua beramagola inaha genda timbuniore anda ibulebirago manda nabi kebe. Ina damene degedege howa darama mbiraore hangu yabulene kamagonidago ai inaga agali uruni wai wahadaba lalu angi lamuleberebe, lene.

<sup>27</sup> Bi ogoni hale howa Yoabahanda ladai bialu lalu, Ngode Datagaliwabe haluhe kagonaga minini howa ina ihondo heneneore larogo. Ina bi o laregoni naledele inaga ami agali haru korunime tí talima ibalu kane dege yawi gao ledale ndobe, lene. <sup>28</sup> Ani lowa Yoaba ibugua ibunaga ami agalirume Isaraele amiru lone talima napelonaga mbelo biguli pu lene. Ani pu layagola tigua wai wahene.

<sup>29</sup> Wai wahalu Abane halu ibunaga ami agali biaru tidi yalu Yodana dindi ulini tigabi wiadagua pene. Mbiraga hariga ogonidagua piaho wialu Iba Yodana domade hene. Domade howa pu dege bialu heane horombe hanuni Mahanaimi tano anda pene. <sup>30</sup> Abane halu ibunaga ami agali biaru ti peagola Yoabahanda ibunaga ami agali biaru mo mogo buwa dagalene. Dagalowa handalu hearia ami agali pira mbirani dira (19) bo wahai hayiyane hendene. Ani bialu Asahelebi homayiyane hendene. <sup>31</sup> Ani bialu Debidinaga ami agali uruni tiguabi nde Abane ibuhayagi hene Beniyamini hameigini biaru aria handari tebirani pira waragaria (360) bai hene. <sup>32</sup> Ani biyagola Yoaba halu ibunaga ami agali biaru tigua Asahelenaga tingini mo yalu Bedeleheme tanoha dai buwa ibu aba hora hene homali wiagoha dege hora hene. Hora halu tigua mbiraga piaho wialu gao layagola Heberono tano dai bialu anda pene.

### 3

<sup>1</sup> Ogoningi howa ami agali Debidaha henela Kini Solohayagi henelame wai luore biaabo halu hene. Ani bialu howa Debidi aria hearu tinaga hongo hama iri iri bialu Solo aria hearu tinaga hongo ibira hama dalidali bini.

#### *Debidinaga igini waragaria heneru ogo*

<sup>2</sup> Debidi ibugua Heberono tanoha howa igiri waragaria hono wini. Igini mbira wahenego mini Amanono hene. Amanono ibu aiyá Yaserili tano wali mini Ahinoama berenego ogoni igini hene. <sup>3</sup> Debidi igini mende mini Kileaba hene. Kileaba ibu aiyá Nabala mbira homenego one dalo Kamelo tano wali mini Abigele berenego igini hene. Debidi igini tebone Abasolomo henego ibu aiyá Gesua dindi Kini Talamai mbira henego wane mini Maga berenego igini hene. <sup>4</sup> Ibu igini mane Adoniya hene. Adoniya ibu aiyá mini Hagidi berenego igini hene. Ibu igini dauni mini Sebadia hene. Sebadia ibu aiyá mini Abidala berenego igini hene. <sup>5</sup> Debidi igini waragane mini Idereama hene.

Idereama ibu ajiya mini Egela mbira berenego igini hene. Debidi igini uruni bibahende Heberono tanoha howa taba henene.

*Abane ibu Debidila ho mbiraore ho henego ogo*

<sup>6</sup> Ami agali Debidi aria baba Kini Solo aria baba wai bialu haabo hene. Ogoningi Solo ariahayagi Abane ibu agali mini lene timbuni howa bolangua ho hene.

<sup>7</sup> Ani heagola horo mbirungi Isibosedehanda lalu, Abane ina i aba Solo one dalo Aia wane Lisiba bereago i haridago aginaga haribe, lalu bi laede hene. <sup>8</sup> Ani laede hayagola Abane ibu keba timbuniore howa ibuhondo ladai bialu lalu, Ina manda bu handalu keria i inaga biangodane hendedebe. Be ina manda bialu ina Yudali karu biamogo bialu ko lo manda bu kebe. Ani ndoyago ina i aba Solo kini pigane hayangi howa ibubi ibu hamene damene bu kamirubi tinaga andaneha haabo harugo ayu kogoni. Ani howa Debidihanda i minalu bo waholilono ina baya hangu handayaho haabo harugoyu ayu ina wali bereagoha ihondo bi bame aginaga laba haribe. Ai bi ogoni bamedago. <sup>9-10</sup> Anduane Homogohanda Debidihondo bi mbira buleore lalu lowialu, I aba Solo bo dugu wahalu i dameneru mani Isaraelenaga kini naholebira, laya. Ai Debidi ibu kini ha aribia howa ibugua Isaraele dindihabi Yuda dindihabi bibahende handame ho holebira. Ani holebirago ai ina Anduane Homogohanda layadadagua Debidi ibu kini helonaga mo hongo halu biamogo nabi haruyagua ina heneneore larogo Ngode Datagaliwabe ibunime i homoliya bo wahelo laro, lene. <sup>11</sup> Ani layagola Isibosedede ibu Abanehondo gi timbuni howa ibugua bi mende labe nahe hene. <sup>12</sup> Horo ogoningi Debidi ibu Heberono tanoha heagola Abanehanda ibuhondo bi mbira lawia halu lalu, Dindi ogoria aiwa handayaho holebirabe laro. Ina ila habo nalolene bi mbira buleore lalu lo wibelo hamelo kogoni. Ani lo weregola Isaraele wali agali bibahende i andaneha hai helo ina biamogo buliya lalu lawia haro, lene.

<sup>13</sup> Anidagua layiyago hale howa Debidi ibugua Abanehondo ladai bialu lalu, Ina bi o laridagoni bayaledago. Ainde mbirale uruni buleore lalu habo nalolene bi ogoni mani lo wuliyana ayu ina bulene mbira ngago ala bibelo hamelo kogoni ogo. Solo wane Migala ala ini korio haru dai bibelo hameledo. Ina o bibe larogoni nabiriyagua i inaga wanakui nahondoleberoore laro, lene. <sup>14</sup> Ani lalu Debidihanda Isibosedehondobi bi lawia halu lalu, Ina Migala ibu i one berelo ibu wariabu agali handari mbira (100) wai bialu Pilidiali bo wahai harurunaga dongone podo mabu binigome hende hene i oneore birayagodago ibu haru dai bibe laro, lalu lawia hene. <sup>15</sup> Bi ogonidagua lawia hayiyago hale halu Isibosedede ibugua agali marume Migala ibu Laisi igini Paladile one berearia damu pudaba lene. <sup>16</sup> Ani layagola agali biarume Migala Debidi andaga haru pole piyagola Paladile ibu dugu bima ibu one Migala piyadagua talima pialu Bahurimi tano wiagoria anda pene. Ani piyagola Abanehanda ibuhondo lalu, Ayu ogoni andaga dai bia, lene. Ani laya handala bi hale halu ibu andaga dai bini.

<sup>17</sup> Ani biyagola howa Abane ibugua Isaraele dindiha agali haguane hearu hearia puwa tihondo lalu, Bambaore howa tigua Debidi tinaga kini helolene hamelo harimigoni. <sup>18</sup> Ai ayu tigua ibu kini helolene henge o ngagoni. Bamba Anduane Homogohanda bi mbira lo wialu lalu, Inime inaga biabe biahaga agali Debidinaga hongoni howa inaga Isaraele wali agali tinaga waitigi Pilidialirunaga giha howabi waitigi maru karunaga giha howabi gingila mialu haru dai bulebero, lenego. Bi ani lenedagoni mitangi bialu Debidi ibu kini helo ayu dabo helolene nga, lene. <sup>19</sup> Ani lowa Abane ibugua Beniyamini hameigini bu hearuhondo bi ogonidagua dege lamule pene. Bi lamiai halu Heberono puwa ibugua Beniyamini hameiginirubi Isaraele wali agalirubi tigua ogoale bule manda bu ka lalu Debidi lamule pene.

<sup>20</sup> Abane halu agali pira kira (20) bibahende bi yalu Debidi hearia Heberono tano anda ibiyagola Debidihanda ti mo turu halu tomo nelo dawa hene. <sup>21</sup> Emene biruwa Abanehanda Debidi lamialu lalu, Isaraele wali agali bibahende í andaneha hai hole lalu habo nalolene bi lo wilo damu poro. Ani lo wiragola ínime kini howa bulene hame laridagua Isaraele dindi bibahende handameho habelo, lene. Ani leagola Debidihanda ibunaga agali bu hearuhondo lamialu lalu, Abaneore mbira mo ko holamini nahalimu, lene. Ani layagola Abane ibu andaga dai bini.

### *Yoabahanda Abane bo wahenego ogo*

<sup>22</sup> Debidihanda Abanebi agali ibiyarubi andaga pudaba lo heagola Yoaba halu Debidinaga ami agali maru hearume ogonungi dege waitigi mende hearu baba wai bialu howa dabudabu dewaore mo hilo yalu Heberono tanoha anda ibini. <sup>23</sup> Anda ibuwa Yoaba ibu hale halu hearia Abane ibu Kini Debidi hondo ibiniya layane hale hene. Kini Debidihanda Abane bolomini nabalimu laya layago hale howa <sup>24</sup> Yoaba ibu Kini Debidi hondole puwa ibuhondo lamialu lalu, Abane ibu í heria ibiyagola ína ibuhondo mbira bia nabi bame dai bia lariyago aginagabe. Ína mana ogonidagua biridago bayale ndo lehe birida. <sup>25</sup> Abanehanda bule ibiyago heneneore í manda bidegoni. Ibugua í biamogo bule hetingi howa ína bule manda bu wiridaru handa í ibagabu hagaru hondo wia bule ibiyago manda nabi harida. Ogoni íni manda bibeheore kegoni, lene.

<sup>26</sup> Yoaba ibu Debidila bi lai halu tagira pene. Puwa ibugua agali maruhondo, Abane harigani pialu karia haru dai bule pudaba, lene. Ani laya handala pialu Abane ibu iba hambiga uli wene mini Sira wiagoria pialu hearia tali minalu haru dai bini. Ani haru dai biyago Kini Debidi ibu hale nahe hene. <sup>27</sup> Abane ibu Heberono dai biyagola Yoabahanda Abanela ndi lole haru pubagi hetingi howa tanonaga pabe panga heagoria haru pene. Ani haru pubagi howa Yoabahanda wai biaga ayu tibu emeneme Abane tinini nogoba hayagola homene. Abale Abane ibugua Yoaba hamene Asahele bayagonaga pani Yoabahanda Abane ibuni homelo bene. <sup>28</sup> Abane bo wahaya layago hale howa Debidi ibugua lalu, Abane homayadagoni ína ndo bidogo Anduane Homogo ibu manda bu ka. Ko ogoni ínaga wali agali bu karu tihabi para nahe. Ko ogoni Yoaba ibuni hanguha nga. <sup>29</sup> Ani ngago Anduane Homogo ibunime Yoaba ibunibi ibu one waneigini damenerubi ibu aguane mani holebirarubi bibahendehondo pani milo. Agali Yoaba ogoni ibu damene karu aria mbira mbira bibahendengi ge hamua bilobi dere hongohe dabi nahaga ale bilobi walime biabe biaga ngaru hangu bialu helobi tinaga waitigirume bo wahaga bilobi tomo noa noa lo haabo helobi Anduane Homogohanda Yoaba dameneru dabane mbira mbiranaga genda uruni mo migi bilo hameledo, lalu Debidihanda Yoaba damene ha halu ani lene. <sup>30</sup> Yoaba Abisailame libu hamene Asahele Abanehanda amu Gibeono iba bereagoria wai birimigoria bo wahenegonaga pani libugua Abane bo wahene.

### *Abane hora henego ogo*

<sup>31</sup> Kini Debidihanda lalu, Yoaba damene bu kamiru bibahende Yoaba ibuni heba tígua Abane dara ho kama lowa walia halu tínaga aga bayale bidamiruni minu lerelo wahalu daraho howa aga biaga ngaru karulo halimu. Ani karulo howa Abanenaga dugu bia halimu, lene. Ani lalu Abane hora hole ibunaga tingini homaliha mo yalu piyadagua Debidi ibuni mama talima pialu hene. <sup>32</sup> Ani pialu tigua Heberono tanoha Abane hora halu kini ibuni ogoriani howa dugu hongohe biyagola wali agali bu hearu tibi nde dugu bia dege bini. <sup>33</sup> Ani bialu howa Kini Debidi ibugua Abanenaga dara howa dugu bialu ogodagua lene.

Abane agali mini nawi lulu ale mbira homaradagua biyadagoni irane agomedabe.

<sup>34</sup> Ibunaga gi mbira minu daba nahe.

Ibunaga gebi minu paulalu daba nahe dege.

Agali pagebibime bamuore bo waharadagua biyada, lalu Debidihanda dara howa dugu bialu bi ani lene.

Ani biyago hondowa wali agali bu hearume dara howa dugu lone bialu hene.

<sup>35</sup> Horo ogoningi howa Debidi ibu tomo mbira naneore heagola wali agali bu hearume ibuhondo, Tomo mbira narene, lalu hene. Ani layagola Debidihanda lalu, Ina tomo lenego mbira nane kone alendo haragola nolebero. Ani nabiruyagua Anduane Homogohanda ini bo wahelo, lalu bi hongohe lowini. <sup>36</sup> Kinihanda bi ogonidagua layadago hale howa wali agaliru tinaga bu miniha turu halu dungulo hai hene. Kini ibugua o biyadagoninaga hangu ndo ibugua biagago bibahende bayale dege bialu heagola wali agali ti turu howa bu miniha dungulo haga hene. <sup>37</sup> Anigo Isaraele wali agali hearumebi Kini Debidi ibunaga wali agali bu hearumebi ti bibahendeme Kini Debidihanda biyadagoni hondowa Abane homelo bo wahayadagoni ibula haru mini mbiraore howa bene ndoyane hendene. <sup>38</sup> Kini ibugua ibunaga agali haguane hearuhondo lamialu lalu, Uru-o hale hadaba. Horo áyu ina Isaraele wali agalinaga agali haguane hongohe mbira biago homayagoni. <sup>39</sup> Ainde heneneore Ngode Datagaliwabe ibunime i kini holiya dabo helene kogonigoyu inime Seruia igini kirali ogoni labo libu agali hongo gibihe kago hondowa ina libu pani babe nahe kogoni. Libugua mana ko biyadagona pani Anduane Homogo ibunime miadai bilo laro, lalu Debidihanda lene.

## 4

### *Isibosede bo wahenego ogo*

<sup>1</sup> Isibosede ibu hale halu hearia Abane Heberono tanoha bo wahaya layago hale howa ibu gi timbuni ho hene. Isaraele wali agali bibahendebi mogolai ho hene.

<sup>2</sup> Isibosedenaga ami agali kirali libu wai bu poragoha haguane howa agali maru haru haga hene. Libu mini Bana Legabala Berodo tanoali Limono mbira henego igini hene. Agali ogolabo libu Beniyamini hameigini aria haradagua binidagoni irane Berodo tano ogoni Beniyamini hameigini dindihayagi mo tago hene wiagola ani hene. <sup>3</sup> Wali agali ala bamba Berodo ogoniha dindi aba henedaru tini ibida pialu Gidaimi tano pu henego ka.

<sup>4</sup> Kini Solo igini Yonadana biago ibu igini mbira mini Mebibosede henego ogoni ibu igiri emene mali duria hangu heangi ibu aguane Solobi ibu aba Yonadanabi kirabali bo wahene. Ani biyago hale howa agali Yaserili tanoha haga hearume Yonadana one waneiginiru berearia bi lawia halu lalu, Waitigime Yonadana bo wahaya, lene. Ani layiyago hale halu Yonadana damene wali mbira ibu Mebibosede handayaho biraga bereagome Mebibosede minu yalu ibida gerai pialu hearia pilowa Mebibosedenaga ge kuni habolene. Ani biyagola mani Mebibosede ibu wahe halu ge dugupehe haabo hene.✧

<sup>5</sup> Horo mbirungi horombe Isibosede ibuni andagaha erekui dogolo palearia Legabala ibu hamene Banala libu ibu andaga pene. <sup>6-7</sup> Libu anda ogoniha widiru yolo bule piaga wiagoha widi yolo bule petingi howa anda tamuha anda pene. Ani anda puwa handalu hebiria Isibosede ibu ibuni andaga tamuha dagiani palearia hendene. Ani hondowa libugua hendeore puwa wai biaga ayu tibu tubagi yini yiagome Isibosedenaga tinini nogoba hayagola homene. Homayagola libugua ibunaga haguane pugu hanalu wali agali nahendeore ohalu tagira pene. Tagira puwa libu dindi tigabi Yodana dindi ulini wiagoria iba peadagua mbiraga hanguni puabo hene. <sup>8</sup> Ani pialu horo mendengi Heberono tano anda puwa libugua Isibosedenaga haguane pugu hanaribigo Kini Debidi berearia hanalu puwa mo walia hene. Mo walia halu lalu, Kini-o ogo de handa. Agali inaga waitigi i bo wahole taya bialu haga Kini Solo igini Isibosedenaga haguane pugu yidagoni. Abale Solohanda i bo wahole taya bialu hayago ai Anduane

✧ 4:4: 2 Sml 9.3



Homogohanda Solo ibugua mana ko biyagonaga pani mialu ibu damene lenego bo wahai haya, lene.

<sup>9</sup> Ani layagola Debidihanda ladai bialu lalu, Anduane Homogo ibu haluhe kago ibugua i mo ko holene mbirale dewaore ngagoria howa i haru dai biaga ka. Ibu ogonibi biaga kago ina ibunaga minini howa libuhondo bi heneneore ogodagua laro. <sup>10</sup> I Sigilaga dindi wiagoria hewangi agali mbirame ibuwa ihondo Solo homaya lalu langini. Ibugua bi o layadagonime i turu holobabe toba howa langialu hearia i turu nahe haru. Turu nahe howa ina ami agali bu hearuhondo lamialu agali ogoni minu yania halu homelo bo wahadaba laru. Agali ogoni ibugua bi te ko i hewaria hale holiya lo yu ibiyadagonaga yolo ogoni miru. <sup>11</sup> Anigo áyu agali mbira ibuha ko nawi mbira ibuni andagaha bame paleago homelo bo waharibida. Áyu libu agali koorene ko kabigoni. Libugua mandabu handalu kabiria ina libu yo pialu pelolobadalo manda bidabibe. Yo pialu napoleberabigo ndobe. Ina libugua mana koore biribidagonaga pani ngialu libu dindi ogoria nahalibulo biba helolebero, lene. <sup>12</sup> Ani lai halu Debidihanda ibunaga ami agali bu hearuhondo lalu, Legaba Banala homelo bo wahole haru pudaba, lene. Ani laya handala ami agali biaru tigua puwa ogolabonaga gi geru dibu gandulo wahaga buwa Heberonoha iba gorene bereagonaga angeni libunaga tingini mo derelaho ngelene. Ani bialu ami agali biaru tigua Isibosedenaga haguane biago Heberono tanoha Abane hora hene homali heagoha dege mo hora hene.

## 5

### *Debidi ibu Yudali Isaraealibi tinaga kini henego ogo (1 Bi Te 11.1-9, 14.1-7)*

<sup>1</sup> Mani Isaraealeali hearume Kini Debidi Heberono tanoha hearia hondo ibini. Ibuwa tigua Debidihondo lalu, Ina wali agali bibahende inaga damene hangu darama mbi-raore kama. <sup>2</sup> Abale Solo ibu kini heangibi ibu ani helalu dege ina inanaga ami agaliru haru halu wai bule piaga harigoni. Ani birigola Anduane Homogohanda bi lo wialu, Ina inaga wali agaliru haru habelo helarogola i Isaraele wali agalirunaga kini helolebero layagoni, lene. <sup>3</sup> Ani lowa Isaraele wali agalirunaga agali haguane hearu bibahende Heberono tanoni Kini Debidi heagoria ibu ngoai hene. Ibu ngoai heagola ibugua Anduane Homogonaga deni howa bi hongohe mbira lowini. Ani lo wiyagola tigua Debidinaga haganeni ira olibe lininaga weli odo wuwa ibu Isaraele wali agalinaga kini helene. <sup>4-5</sup> Debidi ibuni mali pira tebira (30) heangi ibu kini pigane hene. Ibu kini howa Heberono dindini mali kariani ege waragaria Yuda dindinaga kini hene. Ani bialu Yarusalemeni mali pira tebirani tebira (33) Yuda wali agalirubi Isaraele wali agalirubi bibahende handame howa haru hene. Lamaga howa ibugua mali pira mariani (40) kini howa haru hene. <sup>6</sup>

<sup>6</sup> Horo mbirungi Debidibi ibunaga ami agali hearubi tigua Yarusalemeha hearu baba wai bule pene. Yarusaleme Yabusuali hameiginirunaga dindi winigo ani wu howa Yabusuali hearume Kini Debidihanda tinaga tano nakarulolebira manda buwa tongoyungu bi lalu hene. Tigua lalu, Tí aleme inanaga dindi ngamagoha anda ibalu nakaruloleberemi. Agali de kohe karumebi kuduguhe karumebi urunibi hangume tí anda naibalimulo harigani hapai holebira, lene. <sup>7</sup> Tigua bi anidagua layagoyu mani Debidihanda ibunaga ami biaru haru pialu wai buwa bo podalu tano hongohe biagoni miyagola Yabusuali biarume bi layadagoni habo lene. Tano ogoni mini Saiono winigo mani Debidihanda wai bialu karulayagola dindi ogoni mini Debidinaga Tano laga wini.

<sup>8</sup> Debidihanda tano ogoni karulenedangi anda pole howa ibunaga ami agali biaruhondo lalu, Tí kamirume ina Yabusualihondo handabe manga kodagua ho

✧ 4:10: 2 Sml 1.1-16 ✧ 5:4-5: 1 Kin 2.11, 1 Bit 3.4, 29.27 ✧ 5:6: Yos 15.63, Hgn 1.21

kamiyagua iname Yabusualirunaga tano ogoniore karulamiya. Ani karulamiya lo manda birimiyagua ai tını iba hambu puibu biaga dindi guabuwa hariga gonene wia do hene ngagoha anda puwa tanoha wali agali de kohebi kuduguhebi karu layiyago bibahende baba wai bialu bai hamiya, lene. Debidinaga bi layaruni manda buwa bi ogo, Anduane Homogonaga andaha de kohebi kuduguhebi karu anda polene nawi, lagane wini.

<sup>9</sup> Mani Debidihanda bo podalu tanoha anda puwa ibugua Saiono tano ogoni mini Debidinaga Tano wini. Ani wialu Debidid ibuni tano ogoniha hene. Ani howa Debidihanda ibunaga agali biaruhondo tano ogoninaga lene leneni anda bu mabu bidaba layagola tigua dindi ulini mbira winigoria dindi duguwa mogo bialu mo dondelene wiagoria anda pigane bialu hene. <sup>10</sup> Anduane Homogo Hongo Haiheore Ngode Datagaliwabe kago ibugua horo bibahendengi Debidila haru mandagi hayagome Debidid ibu kininaga hongo holene mia tago haabo hama iraga halu hene.

<sup>11</sup> Taianaga Kini Hiramahanda ibunaga agali maru Debidid hearia ibilene. Ani ibilowa ibugua ira tamia bayale dibu yalu agali anda biaga mandabi maru ege tole podaga mandabi marubi, Tigua Kini Debidinaga anda timbuni mbira bule pudaba, lene. <sup>12</sup> Urunidagua biyago hondowa Kini Debidid ibugua manda bialu hearia Anduane Homogohanda i heneneore Isaraele wali agalinaga kini helenego kogoni lo manda bini. Ani manda buwa Debidid ibugua Anduane Homogohanda ibunaga Isaraele wali agalirubi biamogo bulenaga biabe hongohe timbuni ogoni biyadalo manda bia dege bini. <sup>13</sup> Debidid ibu Heberono tano wahalu Yarusaleme hole piyangi howa ibugua wali maru dabu bialu waneigini dewa halu bini. Ibu one maru ala dabu biniru ti bira dege buwa uruni ti haru bibahende Yarusaleme mandagi pu berene. Ani pu biruwa ibu one urunime Yarusalemeni waneigini dewa dege taba henene. <sup>14</sup> Debidid igini Yarusalemeni taba henedaruni tinaga mini uru Samua Sobaba Nadana Solomono <sup>15</sup> Ibahara Elisua Nebege Yabia <sup>16</sup> Elisama Eliada Elibelede imaru hene.

*Debidihanda Pilidiali bo podahana halu wayali henego ogo*

*(1 Bi Te 14.8-17)*

<sup>17</sup> Pilidia wali agali hearume hale halu hearia Isaraele wali agalime Debidid tinaga kini heleda layago hale hene. Ani hale howa tigua tinaga ami agali hearume wai bialu Debidid minule pene. Ibu minule ibira layago hale howa Debidid ibu dalipe halu wai pabe hongohe heagoha hole abale anda pene. <sup>18</sup> Pilidia ami biaru abale ibalu Lebaimi dindi ulini wiagoria abale anda ibuwa mbirale bibahende wiaruni ti mo yai hene. <sup>19</sup> Ani anda ibu heagola Debidihanda Anduane Homogohondo hale halu lalu, Ina Pilidia uruni baba wai bule poabe. Wai bule piruyagua ina ti bai halu wayali holiya ina i biamogo buleberebe, lalu hale hene.

Ani hale hayagola Anduane Homogohanda ladai bialu lalu, Karulapego ina i wayali habelo waitigi uruni inaga giha mo ya holeberogo wai bule pu, lene. <sup>20</sup> Ani laya handala Debidid ibu Bala Perasimi dindini puwa Pilidiali biaru baba wai bialu wayali hene. Wayali howa Debidihanda lalu, Anduane Homogohanda iba li hongohe poradagua bialu i waitigi hearu hanuni bo gialo yaga bima yupe hayagoni, lene. Anidagua binidagonaga dindi ogoni mini Anduanehanda Bo Gialo Yama Hanuni Yupe Haga laga wini. <sup>21</sup> Pilidia ami biaru ti ibida pialu tinaga dama mitangi bialu gime wabini yu heneyaru yu wahalu piyiyagola Debidid halu ibunaga ami biaru tigua mo yu dai bini.

<sup>22</sup> Ani bialu pu heagola Pilidia ami biaru lone dai buwa Lebaimi dindi ulini biagoria hene. <sup>23</sup> Ani heagola Debidid ibugua Anduane Homogohondo hale halu lalu, Ina agua buabe, lene. Ani layagola Anduane Homogohanda lalu, Tigua wai bule pudaba. Pialu howa ti kagoha abale pogolape halu napilimu. Ohalu tinaga erembira ngagohayagi puwa amu ira mini balasama bu karuha wai bule manda manda bu halimu. <sup>24</sup> Ani howa hale halu kamiria agali maru uyu ira biaru mane maneha tidiyu howa wai dagia

balu haruane hale holeberemi. Ani balu haruane hale harimiyagua Pilidialiru baba wai bule ini ala bamba halu piarua lo manda bialu tigua wai bule gerai pialu wai bilimu, lene.\* 25 Ani laya handala Debidi ibu Anduane Homogohanda layadagua bialu puwa Isaraealeali ami biarume Pilidiali ami biaru mo ko howa balu bo podama pialu Geba tano bo podahana halu piaho wialu amuraore Gese tano puabo hene.

## 6

*Habo Nalolene Bi lo winigonaga Mbogoyi Yarusaleme mo yalu ibinigo ogo  
(1 Bi Te 13.1-14, 15.25-16.6,43)*

<sup>1</sup> Debidihanda wai biaga agali hongohe wai mandabi Isaraele dindiha hearu dabowa lone ibidaba lowa mo ngoai hene. Ami uruni daosini pira tebira (30,000) bibahende ibini. <sup>2</sup> Ani ibu heagola Debidihanda uruni bibahende haru halu Yuda dindinaga Bala tano wiagoria Anduane Homogonaga Habo Nalolene Bi lowinigo Mbogoyi biago mo yu dai bule pene. Mbogoyi ogoni Anduane Homogo Hongo Haiheore kagonaga mini laga wini. Mbogoyi ogoninaga daligahayagi dahuliyali handalehe kira wabu helowa ogoni Anduane Homogo ibuni handame ho howa biragane dagia ogoni laga wini.\* <sup>3</sup> Anigo Debidibi ibunaga ami biarubi ti Bala tanoha anda pialu Abinadaba andaga hari hombeneni heagoria pialu Anduane Homogonaga Mbogoyi biago wiaria pene. Puwa tigua Mbogoyi biago nogo bulumaga kirame dabudabu yaga karisi gahenge mbira wiagoria gili lalu yalu pole mo paga hene. Mo paga halu harigani yalu pialu howa Abinadaba igini kirali Usa Ahiola libugua dabudabu yaga karisi biago tigatiga yalu pelo mo tiga bigi bima pene.\* <sup>4</sup> Ahio ibu bamba halu karisi biago mani ibilo pene. <sup>5</sup> Debidibi Isaraele wali agali bibahende bi turu howa ngida balu iba gana lama karisi biago heba mandagi pialu Anduane Homogonaga mini yaraga hama pialu hene. Tigua pialu howa tabaga balu ngidabi balu ngilingele laga bilonaga mbirale tara tara wiarubi mo emabia haga bima pialu hene.

<sup>6</sup> Ani bima pialu widi iraneru lini hondo ibira ibira halu aeane puyabume yu pelonaga bo taulaga agali mbira Nagono henego ibu andaga wiagoria tagira pene. Dindi ogoriani nogo bulumaga biago labome Anduane Homogonaga Mbogoyi biago mo ema biyagola ibira habehe hene. Ani ibira hole biyagola Usahanda Mbogoyi biago abale yani hene. <sup>7</sup> Usahanda Anduane Homogonaga Habo Nalolene Bi lo winigonaga Mbogoyi biago bame mo yo hondowa yani hayagonaga Anduane Homogohanda keba howa Usa bayagola kaware ogoriani homene. <sup>8</sup> Ani biyagola Debidi ibugua Anduane Homogohanda ogoni biyago hondowa keba hene. Keba hayagola horo ogoningi howa dindi ogoni mini Perese Usa winigo nga.\*

<sup>9</sup> Debidi ibugua ogoningi Anduane Homogohondo gi howa lalu, Anduane Homogonaga Mbogoyi ogo ina ngelo hole aguaore bialu mo yalu poliyadabe, lene. <sup>10</sup> Ani lowa Debidi ibugua Anduane Homogonaga Mbogoyi biago ibunaga tano Yarusaleme nayupe wahalu hariga mendeha yu pubagi halu pene. Puwa tano mbira mini Gede winigo ogoniali mbira mini Obededomo henego ogoni ibunaga andaga ngelene. <sup>11</sup> Agali Obededomo biagonaga andagaha ngelo heane ege tebira pene. Ani ngelo heagola Anduane Homogohanda Obededomobi ibunaga waneigini damenerubi bibahende mo bayale hai hene.\*

<sup>12</sup> Mani howa Debidi ibu hale halu hearia Anduane Homogonaga Habo Nalolene Bi lo winigonaga Mbogoyi biago Obededomo andagaha ngelayagome ibu damene bibahende mo bayale hai haya layane hale hene. Ani hale halu Debidi ibu Obededomo andaga puwa Anduane Homogonaga Mbogoyi biago mo pialu Yarusalemeni yu dai bule pene. Anidagua yalu ibiyagola wali agalime turu timbuniore hene. <sup>13</sup> Turu

\* 5:24: 2 Kin 7.6    \* 6:2: Har 25.22    \* 6:3: 1 Sml 7.1-2    \* 6:8: Perese Usa mini ogoni Huli bi lalu, Usanaga Pani Mini.    \* 6:11: 1 Bit 26.4-5

timbuniore howa wali agalime Mbogoyi biago mo yalu pole pene. Mo yalu pole lowa ge waragara hangu ha amu halu ti pialu hearia Debidihanda, Emene hondo hadaba, lowa bulumaga wangabe mbirala bulumaga dalua haba tigi mendela Anduane Homogohondo loma binigo bo delene. <sup>14</sup> Debidi ibuni aga pele taraore mbira loma binigo mo miaga hearunaga wiago ibu mo bo buwa turu halu Anduane Homogonaga mini yaraga halu mali lialu tama bima pene. <sup>15</sup> Tigua ogonidagua bialu Anduane Homogonaga Habo Nalolene Bi lo winigonaga Mbogoyi biago Debidibi Isaraele wali agalibi tigua Yarusaleme mo yalu pene. Tigua turu timbuni howa galalu pilipe ale biguli lama pene.

<sup>16</sup> Tigua Mbogoyi biago Debidinaga tano biagoria yu anda ibiyagola Solo wane Migala ibu andaga windoha handatagi halu hearia ibu agalini Kini Debidi ibu pogola daga haga bialu tama buwa mali lima ibalu hearia hendene. Debidihanda anidagua biyago hondowa Migala ibugua turu nahe howa Debidihondo keba ho berene.

<sup>17</sup> Yalu puwa Debidihanda balai anda mbira ala bu manda mandabu helenego ogoniha Anduane Homogonaga Mbogoyi biago mo yalu puwa ngelene. Ani ngelowa tigua loma biniru irame dai helo bo delalu Anduane Homogola ho gimbu bulenaga loma biniru bo mialu bini. <sup>18</sup> Loma biniru delai howa Debidihanda wali agali bu hayaruhondo lalu, Anduane Homogo Hongo Haiheore kago ibugua tí mo bayale helo, lene. <sup>19</sup> Ani lalu wali agali uruni tomo nelu Debidi ibugua mberedi mbira mbira ta lalu nogo bo dawarimigonaga mbirinibi gerebi lini maru do gembeho winirubi wali agali hearu mbira mbira ta lalu nai helo miyagola ti nalu tini andaga pugu pugu bini.✧

<sup>20</sup> Ani bialu Debidi ibu ibuni andaga puwa ibu one waneiginiru Anduane Homogohanda ti mo bayale helo lowa bi lole anda pialu hearia ibu one Migala tagira ibuwa Debidihondo keba howa lai lade hene. Ibugua Debidi mege bialu lalu, Ainde Isaraele wali agalinaga kinime ibuni mini lene timbuni kogo lowa walia halu porabu daga daga bialu tama bima ibalu hea. Ani bialu ibunaga haru haga agali haguane hearunaga biabe biahaga wandari berearume kininaga tingini hendelonaga porabu daga hama ibalu hea. Agali lulu mini nawime biagadagua ina ani bialu hegoni, lene. <sup>21</sup> Ani layagola Debidihanda ladai bialu lalu, Anduane Homogohanda í abanaga henge wiago í mia aribia howa Isaraele wali agali bibahende haru holiya helayagonaga ina turu halu ibunaga mini yaraga hama ibiru. Ina ibunaga mini yaraga halu ibu deni mali lone lialu tama bulebero. <sup>22</sup> Ininaga deni inaga mini mo nagalone halu mo dindiha haabo holebero. Anigo ina wandari áyu lareruni tigua inaga mini daliga yaragaore holebira, lene.

<sup>23</sup> Kini Solo wane Debidi one Migala ogoni ibu waneigini mbira taba hana nabi biraabo halu homene.

## 7

*Anduane Homogonaga bi mana latagi haga Nadanahanda Debidihondo bi laminigo ogo*

*(1 Bi Te 17.1-15)*

<sup>1</sup> Isaraele wali agalirunaga waitigi hearume ti baba wai nabilo Anduane Homogohanda baya hangu handayaho heagola Debidi ibu nde ibuni andagaha bayale berene.

<sup>2</sup> Ani biruwa ibugua Anduane Homogonaga bi mana latagi haga Nadanahondo lalu, I andaga bayaleore ira tamia bayale binigoha bedogola Ngode Datagaliwabenaga Habo Nalolene Bi lo winigonaga Mbogoyi biago dege balai anda biagoha wiaruago ogoni tiga nabida, lene.

<sup>3</sup> Ani layagola Nadanahanda ladai bialu lalu, Anduane Homogo ibu íla mandagi haabo kago ina mbirale mbira bule manda bidedagua nde bibe laro, lene.

✧ 6:19: 1 Bit 16.43

<sup>4</sup> Ani layagoyu horo ogoningi mbiraga Anduane Homogohanda Nadanahondo lalu, <sup>5</sup> Inaga biabe biahaga Debidi karia puwa inaga bi ogo ibuhondo lamibe. Debidi-o ina agali inaga anda i holiyanaga bia holene dabo heledogo i ndo ke. <sup>6</sup> I anda timbuniha nahaga kogoni. Bamba Isaraele wali agali Iyibi dindiha howa haru tagira pirugongi howabi maruha puibu bialubi i balai andaha dege haga biaga harugoni ko. <sup>7</sup> Ini Isaraele wali agali ti haru mandagi dindi dewani ibagabu haabo harimago howa tinaga agali haguane ina dabalu helarurunihondo lalu, Ira tamia bayale karume inaga anda mbira bia nahe kamigo agibe, lalu hale naharuligoni, lene.

<sup>8</sup> Anduane Homogohanda Nadanahondo laabo halu lalu, Inaga biabe biahaga Debidi-hondo au labe, Anduane Homogo Hongo Haiheore kago ibugua bi ogodagua ihondo larago hale habe. I bamba nogo sibi haru haga heria inime i dabalu ina Isaraele wali agali haru habelo agali haguane dabo helarugoni ke. <sup>9</sup> Dindi bibahende i ibaga bialu piriruniha ini iya haru mandagi ibagabu haabo haribagoni. Ani howa inime dege i waitigi ibiyaru wai bialu bo poda hana haga birugola i wayali harigoni. Ai inime i agali mini lene timbuni dindi maruha karubi dege habelo ina i mo yaraga holebero, laya labe. <sup>10-11</sup> Inaga Isaraele wali agali ti bayaleore halimulonaga dindi hobane bayale mbira tinaga mo wia ko. Bambaore agali ko bu hearume ti mo ko haabo hayadagua mani ti mo ko naholebira. Tinaga mamalirume dindi ogo pigane karulayangi howa bialu henego bima ibalu ina tinaga agali haguanceru dabo helaga birugolabi tinaga waitigime ti mo ko haabo haya, laya labe. Ani biyago ayu ina uruni ti mo batara harogola urunidagua nabi tinaga dindi ogobi lone mo ko naholebira. Ani kamigola ina i dameneru baya hanguore hai helarogola tigua inaga aguaneru dewaore helo hono wigi bulebira, laya lamibe, lalu Anduane Homogohanda Nadanahondo bi ogoni Debidihondo lamilo lamini.

<sup>12</sup> Anduane Homogo ibugua laabo halu lalu, Debidi-o i homaregola inaga mamaliru hora henegoha dege hora kangi i igini mbira kini ha aribia helo dabo helolebero. Ani berogola ibu kini hongoheore mbiralime ibu bope halu handape habe nahe holebira. ✧ <sup>13</sup> Kini ogoni ibugua wali agali ini koria kaware ibilonaga inaga anda bulebira. Ani biragola ina maninaga ibu igini aguanerume dege kini haabo helolebero. <sup>14</sup> Ani helowa ibu aba ini kogola ibu i igini holebira. Ani howa ibugua mana lehe mbira biyagua abame ibu igini mana lagadagua ina ibu mana lalu bolebero. ✧ <sup>15</sup> Ala Solohanda mana lehe biyagola ina ibuhondo erembira mialu ibunaga henge wiago ina i mo ngirudagua mani i iginihondo ani nabi gubalini haho wiaabo helolebero.

<sup>16</sup> Ani helowa inaga waneigini aguaneru halu ereba nahe kini ha aribia haga bima puabo helolebero, laya lalu Debidi lamibe, lalu Anduane Homogohanda Nadanahondo lai hene. ✧

<sup>17</sup> Bi ogonidagua Anduane Homogohanda bi lamiyaruni Nadana ibugua hale howa Debidi lamiai hene.

### *Debidihanda Anduane Homogohondo bi lenego ogo*

<sup>18</sup> Nadanahanda, Anduane Homogo ibugua bi anidagua laya, lalu lamiyagola Debidi ibugua hale halu Balai Anda Anduane Homogo ibuni heagoha pu biruwa lalu, Anduane Homogo Bibahende Haru Haame Ho Haga-o ina ihondo bayale dewaore birida. Ani bialu inibi inaga waneigini damene bu karubi ina bayale ndo hemaria anidagua biridagoni. <sup>19</sup> Anduane Homogo Bibahende Haru Haame Ho Haga-o ina ihondo bialu hariruni bibahende bayale dege biaabo harigo ai uruni emene degeyane mbirale bayale ayu uruni lone ngiatago harida. Anduane Homogo-o ina i dameneru mani ibu holebirarubi mo bayale holebero larigo ai i agali nagaloneore kogoni ndobe. Ani ha holiya dege ina ihondo mbirale bayale timbuni ihondo bule ngeru walia harida.



<sup>20</sup> Anduane Homogo Bibahende Haru Haame Ho Haga-o urunidagua biridagonaga ina ihondo bi agua loabe. I inaga biabe biahaga agali kogoni ini manda bide. <sup>21</sup> Ani manda buwa ina bi lo wirigonagabi inime bule hame ledegonagabi ayu ihondo inaga mana bayale biaga ngego i mo walia ho kegoni.

<sup>22</sup> Anduane Homogo Bibahende Haru Haame Ho Haga-o i duniniore kegoni. I ale mende naheore lowa Ngode Datagaliwabe i hangu kegoni lalu ina mamalirume langigi biyane hale harima. <sup>23</sup> Ina iyibi dindiha garabaya hemaria ina Isaraele wali agali bibahende garabaya golalu haru tagira ibuwa ininaga wali agali holomaya helarigoni. Ani helowa wali agali maru inaga wali agali ina kamarubi naheore. Ina dindini ayu kamagoria ibulumaya ina mbirale bayale tara tara nahendene ale wiarubi biai harigola ina inanaga dindi ogoria ibinigo kamagoni. Wali agali dindi ogoriani ala hene hearu ina bo batagi hai halu tinaga dama mitangi bialu gime wabini wiaruni bo giallo wahai harigola dindi dabulu wiago ina mo ngirigola ibalu karulo harimago kamagoni. Anidagua birigome wali agali dindi bibahende ha karume i mini lene taraore ke lowa inaga mini yaraga halu ka. <sup>24</sup> Anduane Homogo-o ina Isaraele wali agali kamaru ininagaore holomaya dabo helowa ina ani haabo holomaya helarigoni. Inibi nde inanaga Ngode Datagaliwabe haabo ho kegoni.

<sup>25</sup> Anduane Homogo Ngode Datagaliwabe-o ayu ina inaga dameneruhondobi inaga biabe biahaga inihondobi buleore lalu bi lo wiriruni biaaboore habelo hameledo. Ina bulebero lo wiridagua bibe laro. <sup>26</sup> Wali agali bu karume ina inahondo anidagua berego hondowa tigua inaga mini yaraga helo ani bibe laro. Ani hondowa tigua lalu, Anduane Homogo Hongo Haiheore kago ibu Isaraele wali agalinaga Ngode Datagaliwabe kagoni, lalu inaga mini yaraga holebira. Ani lalu kagola ina agali inaga aguane holebiraruha howa dege kini helo dabaga bialu haabo holebira. <sup>27</sup> Anduane Homogo i Hongo Haiheore howa ina Isaraele wali agalinaga Ngode Datagaliwabe-o ina inaga biabe biahaga ihondo lalu, Inaga aguaneru bayale helonaga mo hongo holebero, lalu langirigonaga inaga biabe biahaga ini kogome ihondo gi nahe howa bi langerogoni.

<sup>28</sup> Anduane Homogo Bibahende Haru Haame Ho Haga-o ini hanguore Ngode Datagaliwabe kegoni. Ina mbirale mbira bule lalu lo werego biaore biaga kegoni. Ani biagaore kegome ayu howa ihondo heneneore mbirale mbira bule lalu bi lo wirigoni. <sup>29</sup> Ani bule lalu lo wiridagua bialu inaga dameneru ini andaneha howa bayale haabo helo helabe laro. Anduane Homogo Bibahende Haru Haame Ho Haga-o ina bi ogoni heneneore lo wirigome inaga turu howa biamogo buleneru inaga aguaneneruha wiaabo holebira, lalu Debidihanda Anduane Homogohondo bi anidagua lene.

## 8

### *Debidi halu ibunaga amirume wai bialu wayali henego ogo (1 Bi Te 18.1-17)*

<sup>1</sup> Emene howa mani Debidi halu ibunaga ami agalirume Pilidialiru baba wai bini. Ani buwa tigua Pilidialiru bo poda hana hayagola Pilidialirume Isaraele dindi handayaho haga winigo wahalu pene. <sup>2</sup> Ani piyagola Debidi halu ibunaga ami agali biarume Moabaliru baba wai bialu urunibi bo poda hana hene. Bo poda hana howa Moabali uruni minu garabaya buwa ti bibahende dindini mo pale lene. Ani mo pale lowa tebira dege dege pale laga binidaru kira bo wahaga bialu tebonego helo yupe haga bini. Ani bialu Moabali yupe henedaruni ti Debidi andaneha howa ibu dagisi migi bialu helo helene.

<sup>3</sup> Ani helalu mani Debidi halu ibunaga ami agaliru tigua Siriaha dindi mbira mini Soba wiagoha kini mbira Lehobo igini mini Hadadese heagola wai bule pene. Ogoningi

Hadadese ibuibunaga amiru haru halu ibunaga dindi mbira Iba Yuberedisi poragohayagi waitigime karulo henego ogoni mo yu dai bule wai bu pene. Ani pu heagola Debidi halu ibunaga ami agali biaru harigani lola howa<sup>4</sup> ti wai bialu Debidi ibu wayali hene. Ani buwa Debidi ibugua Hadadesenaga ami agali dindi dindi piaga daosini dege pira kira (20,000) minu wialu nogo hosini biruwa wai biaga agali daosini mbirani handari karia (1,700) minu wini. Ani bialu nogo hosime gili laga karisi handari mbira (100) mo wini. Ani buwa Debidi ibugua karisi uruni gili lalu pelonaga nogo hosi handari mbira (100) dege helalu hosi marunaga ge bo polaga biyagola ge hongo halu bayale pobe nahe hene.

<sup>5</sup> Ogoningi Siriali maru Damasagasa dindiha hearu tigua Kini Hadadese biamogo bialu wai bule pene. Ani piyagola Debidi halu ibunaga ami agali biarume wai bialu Sirianaga ami agali daosini dege pira kirani kira (22,000) bo wahai hene. <sup>6</sup> Ani bo wahai howa Debidihanda ibunaga ami agali maru Sirialime lone heyalu wai nabilo Siria dindi wiyadagoha mamage hai helene. Ani heleagola Siria wali agali ti Debidi andaneha howa tinibi ibu dagisi migi bialu hene. Dindi mbira mbiraha Debidi wai bule pugu biyagola Anduane Homogohanda ibu biamogo biyagola ibunaga waitigi bope halu ibuni wayali haabo hene. <sup>7</sup> Wai bialu howa Debidihanda Kini Hadadesenaga ami agali haguane hearume humbi ngolome wabini yu haga biniyaru mialu Yarusaleme yu pudaba laga bini. <sup>8</sup> Ani bialu Debidi ibugua ege tole boronosi dewaore Hadadesenaga tano kira Beda tanola Berodai tanolaha wiaria mo yini.

<sup>9</sup> Ani bialu heagola Hamada dindinaga Kini Toi ibu hale halu hearia Debidihanda Kini Hadadesenaga ami agali bu hearu bibahende bope haya layago hale hene. <sup>10</sup> Ani hale howa Kini Toi ibugua Debidihanda o biyadagoni turu howa ibu igini Yorama Debidi hearia puwa í bayuwaore birida lama pu lene. Kini Hadadesehanda Kini Toi ibu bibahendengi bope haabo haga henego ai Debidihanda Hadadese bope hayadagonaga turu howa ani lene. Ani pu laya handala Yorama ibugua yári tara tara ngolomebi silibamebi boronosimebi wabini wiaru mo yaga binigo uruni Debidi mo turu halu bame migi bini. <sup>11</sup> Debidi ibugua mbirale uruni yamialu Anduane Homogonaga mo loma biaho wigi bini. Debidi ibugua dindi maruha wai bialu ngolo silibaru mo yalu dai bigi bini wiarubi loma biaho ngelaga dege bini. <sup>12</sup> Debidi ibugua ngolo siliba uruni minidaru Idomo dindiha howabi Moaba dindiha howabi Amono dindiha howabi Pilidia dindiha howabi Amalege dindiha howabi mo yu ibugu bini. Ani bialu Soba dindinaga Kini Hadadesenaga wiarubi mo ya dege bini.

<sup>13</sup> Ani bialu henego ai Debidi halu ibunaga ami agaliru tigua Idomoali hearu baba wai bule dindi mbira mini Dindi Ulini Ibi Wiaga laga wiagoria pene. Ani puwa tigua Idomoali ami dege daosini pira mbirani halira (18,000) bo wahai halu dai biyagola ogoningsi Debidi ibu mini lene timbuniore ka laga hene.✧ <sup>14</sup> Debidi ibugua ibunaga ami agali maru dabaluru Idomo dindiha handayaho helo helene. Ani heleagola Idomo wali agali ti Debidi andaneha hene. Dindi bibahendeha Debidi ibu baba wai bialu heagola Anduane Homogohanda Debidi ibugua ibunaga waitigi bo podahana haga bilo biamogo biaabo halu hene.

<sup>15</sup> Debidi ibugua Isaraele dindi bibahende handame ho howa ibunaga wali agaliru baba mana bayale tigabi bulene wiadagua dege bialu haga hene. <sup>16</sup> Ani bialu howa ibunaga ami agaliru haru bamba haga agali haguane wali mbira mini Seruia berenego igini Yoaba hene. Ahiludu igini Yahosabada ibu beba gili bia dagala biaga howa ibugua gabumanenaga mbugaru handayaho haga haguane mbira hene. <sup>17</sup> Ahidubu igini Sadogola Abaiada igini Ahimelegela libu Anduane Homogonaga loma binigo mo miaga agali hene. Seraia ibugua kininaga beba gili bia dagala biaga hene. <sup>18</sup> Ani bialu Yahoiada igini Benaia ibu nde ami agali maru Kini Debidi ibuni mamage haga Kerediali

Peledealiru bu heago haru helo dabo helene. Debidi iginiru ti loma binigo mo miaga agali hene.

## 9

### *Debidihanda Mebibosedehondo bayale binigo ogo*

<sup>1</sup> Horo mbirungi Debidihanda agali bu hearuhondo hale halu lalu, Kini Solo aria waneiginibi mbira yu wahene kabe nahebe. Mbiralu yu wahene heagua Yonadana ibugua ihondo mana bayale bialu hayagonaga pani ina ibuhondo mana bayale biadai bulebero, lene.✧

<sup>2</sup> Odagoningi Solo damenenaga biabe biahaga agali mbira mini Siba henego maru hearume ibu lamialu, Kini hondole pu, lene. Ani laya handala ibu kini hearia ibiyagola kini ibugua ibuhondo lalu, I Siba ibu kebe, lene. Ani layagola Sibahanda ladai bialu lalu, E agali haguane-o i agali ogoniore ibu kogoni, lene.

<sup>3</sup> Ani layagola kini ibugua Sibahondo lone hale halu lalu, Solo aria maru yu wahene áyu mbira kabe nahebe. Yu wahene mbira heagua ina ibuhondo mana bayale buliya hameledo. Bamba ina Ngode Datagaliwabhondo ogodaguaore bule lalu bi lo wiru-godagua biaore bulebero, lene.✧

Ani layagola Sibahanda Debidihondo ladai bialu lalu, Yonadana igini mbira hangu kago ibu ge kohe ka, lene.

<sup>4</sup> Ani layagola kini ibugua hale halu lalu, Ibu agoha kabe, lene. Ani layagola Sibahanda kinihondo lalu, Ibu Lodeba tano wiagoria Amiele igini Magia andagaha ka, lalu lamini. <sup>5</sup> Ani layago hale howa kini ibugua lalu, Agali marume Yonadana igini ogoni haru ibule damu pudaba, lene.

<sup>6</sup> Agali ogoni mini Mebibosede ibu Yonadana igini Kini Solo aguane henego ibu Debidi bereagoria ibuwa ibugua Debidinaga mini yaraga halu ibu ge duli hanga howa bulu palialu denguime dindi ela hene. Ani biyagola Debidihanda ibuhondo lalu, Mebibosede-o horombe laro, lene. Ani layagola Mebibosedehanda ladai bialu lalu, Kini-o i inaga biabe biahaga agali kogoni, lene.

<sup>7</sup> Ani layagola Debidihanda ibuhondo lalu, Gi nahabe. Ina i aba Yonadana mitangi bialu ihondo mana bayale bule hame ledogo. Ai i mama Solonaga dindi ina wu heneru inihondo ngiadai biai holebero. Ani bialu inibi tomo i andagaha mandagi nalu habiya, lene.

<sup>8</sup> Ani layagola Mebibosedehanda ibunaga ma podowa dengui dindini lone ela howa Debidinaga mini yaraga halu lalu, Kini-o agali nagaloneore i kogonidago irane aginaga mbirale bayale uruni ihondo buleberebe. I ko biango homo wahene ale ndobe, lene.

<sup>9</sup> Mebibosede tagira piyagola kini ibugua Siba olalu anda ibu lowa ibuhondo lalu, Inaga agali haguane Solo ibunaga dindi winiru bibahendebi ibu damenerunaga winirubi bibahendeore Solo ibuninaga aguane Mebibosede ibunihondo miadai bulebero. <sup>10</sup> Ani buleberogo ai inibi inaga igini bu karubi inaga biabe biahaga karubi tigua Solonaga dindi wiyadagoria tomo hangalimu. Hongowa boga bidagola Solo damenerunaga bu hanalu ibugu bilimu. Ani beregome Solo dameneru ti tomo nolene buru palia nabi karulape holebira. Ai Mebibosede ibuni dege tomo ini andagaha mandagi nalu haabo holeberaba, lene. Siba ibu iginiru nguira (15) halu ibunaga agali biabe biahagaru pira kira (20) hene.

<sup>11</sup> Ani layagola Sibahanda Debidihondo lalu, Kini-o ina bia lareruni bibahende biai holebero, lene. Mani howa Mebibosede ibu kini igini haradagua bialu horo bibahendengi ibu tomo kini andagaha nalu haabo haga hene. <sup>12</sup> Mebibosede ibu igiri mbira henego ogoni ibu mini Miga hene. Ogoningi howa Siba ibu dameneru wali agalibi bibahende Mebibosede daluha biabe bialu hene. <sup>13</sup> Ani bialu heagola Mebibosede ibu

ge kirabali ko kuduguhe howa ibuni tomo Kini Debidi andagaha mandagi nalu ibu Yarusalemeni haabo haga hene.

## 10

### *Debidihanda Amonoali Sirialila bo poda hana henego ogo (1 Bi Te 19.1-19)*

<sup>1</sup> Amononaga Kini Nahasa homayagola ibu igini Hanunuhanda ibu abanaga henge mialu Amono dindini kini ha aribia hene. <sup>2</sup> Ani heagola Debidihanda lalu, Hanunu aba Nahasa ibugua ihondo mana bayale bialu hagamaga inabi nde Hanunuhondo bayale dege bialu holebero, lene. Ani lowa Debidihanda agali maruhondo lalu, Hanunu karia puwa ibu aba homayadagonaga duguanda pialu daraba lole pudaba, lene.

Ani laya handala ti pialu Amono dindiha anda piyagola <sup>3</sup> Amonoali agali haguane bu hearume Hanunuhondo lamialu lalu, Ina mandabu handalu keria Debidihanda agali o pu layadaruni heneneore í aba dara haluibunaga mini yaraga hole pudaba lene ibiyadalo manda bidebe. Anidagua ndooreyago. Maniibunaga ami agaliru haru halu ibuwa ina baba wai bulenaga áyu agali urunime inanaga dindi ngamago abidabe diri hondo wule pudaba lenego ibu ka, lene.

<sup>4</sup> Ani layago hale howa Kini Hanunu ibugua agali Debidihanda bi yalu pudaba lene biaru minu yania howa tinaga angari hearu mendehayagi podo wahalu mendeha helene. Ani bialu agali uruninaga aga luni biagimbu biaruni poda tubagi howa here panahe heagola tini dalu dai bilene. <sup>5</sup> Anigo agali biaru ti nde taga timbuni howa tini dalu dai bibe nahe hene. Anidagua biya layago Debidi ibu hale howa ibugua agali biaruhondo bi lo pelalu lalu, Tigua tihondo o biyadagoninaga Yarusaleme dai bulenego taga nahalimu. Abale ibalu Yarigo tanoha tinaga angari lone ibilonaga emene hondo halimu. Mani tinaga angari bayale ibidagola nde Yarusaleme dai bilimu, lalu Debidihanda lawia hene.

<sup>6</sup> Ani binigo Amonoali biaru tigua mandabu handalu hemiria tigua mana lehe o birimagonime Debidihanda ti baba keba helonaga mo tandaga harimadalo manda bu hene. Ani manda bialu tigua agali maru Siria dindiha Bederehobo tanoha bu hearu bababi agali maru Soba tanoha hearu bababi bi pongo bo wule pene. Tano uruniha hearu tigua ami agali daosini dege pira kira (20,000) Amonoaliru biamogo bialu wai bule ibilelonaga bi yalu pelene. Ani bialu tigua Amonoali uruni tigua Tobo tanoha ami agali daosini homberia (12,000) haru anda pene. Ani bialu Amonoali tigua dege Maga dindiha kini heago baba bi pongo bo wialu ami agali daosini mbira (1,000) wai bialu ti biamogo bilonaga haru anda ibini. <sup>7</sup> Ogonidagua wai bule agali mialu ka layago Debidi ibu hale howa ibugua ami haru bamba haga agali haguane Yoaba halu Isaraelenaga ami agali bibahende wai bule pudaba lene. <sup>8</sup> Ani piyagola Amonoali ami biaru tibi nde Laba tano wiagonaga pabe kawareni handayaho hene. Ani heagola Sirialirubi Toboalirubi Magalirubi ti nde ibuwa naina dangi wiagoria tidiyu hene. Tigua Isaraele ami agaliru baba dege wai bulenaga ona tidiyu haga haga bini.

<sup>9</sup> Yoaba ibugua handalu hearia Isaraele baba wai bule ami agali tidiyu haga haga biago hondowa wai hama kirani talebuki howa wai bibeheyane hendene. Ani hondowa ibugua Isaraeleali hongohuru maru tale bialu Sirialiru amu dangi wiagoria tidiyu heago baba wai bule handayaho helowaibunime haru hene. <sup>10</sup> Ibu hamene Abisaihandabi nde Isaraele ami agali hearu halu mende haru howa ibugua nde Amonoali hearu baba wai bule tidiyu naina handayaho hene. <sup>11</sup> Ani howa Yoaba ibugua Abisaihondo lalu, Wai bialu howa handalu keria Sirialirume ina bope habeheyane handarimiyagua nde tigua ina mo hongo halu wai bule abale ibalimu. Iname handalu kamaria Amonoalirume ti bope habehe biyagua nde inamebi abale ibalu ti biamogo buleberema. <sup>12</sup> Ani bimiyago tigua wai bialu howa gi nahe hongo ho halimu. Iname wai bialu howa inanaga wali

agali waneigini andaga bu karubi inanaga tano Anduane Homogohanda ina ngini ngamarubi mitangi bialu wai hongo howaore bimija. Anduane Homogohanda nde ibunime hame ledadagua bilo laro, lene.

<sup>13</sup> Ani lalu Yoaba halu ibunaga ami biaru tigua Siriali bu hearu baba wai bule hapara halu piyagola Sirialiru ti ibida pene. <sup>14</sup> Amonoali biaru tigua handalu hearia Siriali biaru ti ibida piyago hondowa Amonoali tibi nde Abisai halu ami agali biaru ibiya handala ibida pialu tanonaga wai pabe tamuha ha do hai hene. Ani biya handala Yoaba ibugua Amonoali uruni ani helo wahalu ibunaga ami agali biaru haru halu Yarusaleme dai bini.

<sup>15</sup> Siriali biaru tigua handalu hemiria Isaraele agalirume ti bope hayiyane handalu tinaga ami agali hearu mo mogo bini. <sup>16</sup> Ani buwa Kini Hadadesehandu agali maruhondo, Siria ami agali maru Iba Yuberedisi angeha wai bialu hearu lone damu pudaba, layagola damu pialu bibahende haru daibu howa tidiyu hene. Ti bibahende dindi Helama mbira wiagoria ibu ngoaiho heagola Hadadesenaga ami agaliru haru haga agali haguane mbira mini Sobaga heagome ami agali uruni haru hene. <sup>17</sup> Siriali biaru ti Helama dindini tidiyu ibu ka layago hale howa Debidi ibugua ibunaga Isaraele ami agali bu hearu abale olo ngoai hene. Ibu ngoai heagola Iba Yodana abale doma ede halu Helama dindini wai bule pene. Ani piyagola Siriali biaru tigua ho dugu bialu Isaraele baba wai bini. <sup>18</sup> Ani biyagola Isaraele ami agali hearume wai hongo howaore bialu Siriali bo heladai bini. Horo ogoningi Debidi halu ibunaga ami agalidarume Siria ami agali karisini heyu howa wai biaga hearu handari karia (700) bo wahalu nogo hosini biruwa wai biaga daosini dege pira maria (40,000) bo wahene. Ani bialu Sirianaga ami agaliru haru haga agali haguane Sobagabi wai hamani bope hayangiore tongolo mini. <sup>19</sup> Abale kini maru Sirianaga Kini Hadadese andaneha haga henerume handalu hearia Isaraeleali ti hongoheore howa Siriali bope hayago hondowa tigua Isaraeleali baba gi tigani bialu tini Isaraelenaga andaneha hene. Ani hayagola Siriali biaru tigua Isaraelealiru hondowa gi timbuni halu tigua Amonoaliru lone biamogo bulene manda nabi wahalu wahene.

## 11

### *Kini Debidi ibu Uria one Badasebala mana ko binigo ogo*

<sup>1</sup> Mali bibahendengi dindi uruniha kini hearume dagare biaga horo winigo piai haragola tinaga ami agaliru haru halu puwa tinaga waitigiru baba wai biaga wini. Debidihandu Sirianaga ami agali biaru baba wai biai howa mali mbira howa dagare biaga horo winigo piai hayagola ibugua ami haru haga agali haguane Yoababi ibunaga haru haga agali hearubi Isaraeleali agali haguane maru hearubi ti bibahende Amonoali ami agali hearu baba wai bule pudaba lene. Tigua puwa wai bialu bo podama piaho wialu uyura Laba tanoni podahana hene. Anigo ogoningi Debidi ibuni wai nape Yarusaleme tanoni hondo hene.\*

<sup>2</sup> Ani hondo hearia horo mbirungi Debidi ibu palenego ai alendoore hayagola heyalu tagira pene. Ibuni anda ogoninaga daligaha wa handape hagabu biraga mbira wini. Ani wiagoria Debidi ibu iraga halu puwa ogoriani ibagabu hene. Ani ibagabu howa wa handa amunana bialu hearia wali baya mangabiore mbira amuna wayawaya balu hearia hendene. <sup>3</sup> Ani hondowa Debidihandu agali mbirahondo lalu, Wali ogoni aidabe hondole baya hangu goaru hondole pu, lene. Ani laya handala agali biagome puwa goaru handalu hearia wali biago ibu Eliama wane mini Badaseba Hidiali ami agali Uria mbira henego one bereneyane hondowa Debidi lamini. <sup>4</sup> Ani lamiyagola Debidi ibugua agali maruhondo lalu, Wali ogoni ibu i koria haru ibule pudaba, lene. Horo ogoningi Badaseba ibunaga ege bolangua halu bayale dodo mbira para nahe birule lowa tinaga mana winidagua bialu berearia damu pene. Haru halu ibiyagola Debidi ibu

\* 11:1: 1 Bit 20.1



haru palialu mani Badaseba ibu nde andaga dai bini. <sup>5</sup> Emene biruwa Badaseba ibugua handalu hearia ibuni ege habo lalu waneigini gali tombeha bere biraruyane hondowa Kini Debidi hearia bi lawia hene.

<sup>6</sup> Ani biniyane handalu Debidihanda ami haguane Yoabahondo bi lawia lalu, Hidiali Uria biago i korja abale pu labe, lene. Ani layago hale lalu Yoabahanda Uria Debidi hearia dai bia lene. <sup>7</sup> Uria ibu Debidi hearia abale ibiyagola Debidihanda ibuhondo hale lalu, Yoaba lalu ibunaga ami biaru bayale kabe. Wai agua bialu kabe. Iname bo podahana habehebe be agua bialu kabe, lene. Ani layagola Uriahanda bibahende wai hamaha biyaru Debidi lamiai hene. <sup>8</sup> Ani lamiai hayagola Debidihanda Uriahondo lalu, Ai te bayale hale harugonigo áyu ini andaga puabo lalu wayawaya balu emene halo hole pu, lene. Ani laya handala Uria ibu kini berea handala tagira pialu pene. Emene biruwa Debidihanda Uria mo turu hole mbirale bayale wiaru maru agali mbirame yalu pu lene. <sup>9</sup> Anigo Uria ibu andaga nape kininaga mamage haga agali maru kini andaga harabani palearu heba mandagi palu hene. <sup>10</sup> Agali marume Kini Debidi lamialu lalu, Uria ibu andaga nape ka, lene. Ani laya handala Debidihanda Uria hearia puwa lalu, Bambaore i andaga yu wahalu tagira pu harigodago ai áyu andaga nape aginaga haribe, lene.

<sup>11</sup> Ani layagola Uriahanda ladai bialu lalu, Isaraelenaga amirubi Yudanaga amirubi bibahende amu wai hamaha hai lalu Anduane Homogonaga Habo Nalolene Bi lo winigonaga Mbogoyi biagobi ti heba wai hamaha yu ka. Inanaga ami haru haga agali haguane Yoababi agali haguane marubi ti bibahende wai hamaha hai kago ti ani helowa i tomo ibabi nalu i one heba mandagi palialu ani bulene nakarulape manda bido. Heneneore larogo anidagua nabuleore, lene. <sup>12</sup> Ani layagola Debidihanda lalu, Karulapego áyu ona lalu paliabe. Yawi wai hama dai biloliya, lene. Ani laya handala Uria ibu Yarusalemeni ho paluwa horo mendengi alendo <sup>13</sup> Debidihanda Uria ibu andaga ibu lowa tomo ibabi nalu biruwa lulu iba Uria dewa nelo miyagola nowa luluyu helene. Ani biyagola Uria ibu ibuni andaga palima pu nabi ibuninaga balangiya henenyagome yi howa ami agali maru kini mamage howa paliaga palearu heba mandagi palene.

<sup>14</sup> Palialu egerebalene Debidihanda beba mbira Yoabanaga gilibu wia lalu Uria ibugua mo yalu wai hamaha dai bialu beba ogoni Yoaba mibe lene. <sup>15</sup> Beba ogoniha Debidihanda bi ogodagua gilibu wini. Ibugua lalu, Uria ibu ami agali maru heba wai hongohe biragoria timu deneni minu bamba habe. Ani pu kagola Uria waitigime belo ami agali maru ti emene hadai bilimu, lene. <sup>16</sup> Yoaba lalu ibunaga ami agali biaru Laba tano bo podama anda pialu tano ti karulole wai bialu hene. Ani howa Yoaba ibu Debidihanda beba gilibu wia hayiyago mialu hondowa Uria Amonoalirume wai hongo howa bialu heagoha minu bamba helene. <sup>17</sup> Ani minu bamba ho heleagola Amonoali ami hearume tano pabe yu wahalu tagira ibuwa Yoabanaga ami agali biaru baba wai bini. Wai ogoni biyadangi Debidinaga ami agali maru balu Uriabi nde bayagola ti haru homai hene.

<sup>18</sup> Mani howa Yoabahanda wai biyarunaga te Debidi hearia lope hole <sup>19</sup> ibu agali mbira heagome te ogoni lamima pelo ibuhondo lamini. Ani lamialu lalu, Ina kini hearia puwa ibuhondo wai ogodagua birima lalu birimadagua bibahende lamiai habe. <sup>20</sup> Ani lameregola kini ibugua keba lalu bi ogodagua lolebira. Tigua wai pabe anda heagoria wai kaware aguanaga anda pirimibe. Kaundiani howa wai bialu ha nabirimidago waitigi hayadarume wai pabe neneni howa timume badali lalu ti bolebirago manda bidamigo buwa dege pirimida, lolebira. <sup>21</sup> Bamba Abimelege benegonaga te ti manda nabi henebe. Gideon igini Abimelege ibu Tebese tano wiagoria wai pabe kaware howa wai bialu hearia wali mbirame ege tole balawa wabule widi dambiaga mbalape timbuni

wiagome pabe neneni howa bape halu Abimelege bene. Ai te ogoni manda buwa agua bule wai kaware anda pirimibe, lalu layagua nde Uria heba bo wahaya lamibe, lene.✧

<sup>22</sup> Ani laya handala agali te yalu abale piyago ibugua Debidi hearia puwa te lamini. <sup>23</sup> Ibugua lalu, Waitigi biarume tano tamuha howa wai hongo howa bima tagira ibalu hama dombe wiagoria hongo howa wai birima. Ani bialu howa inamebi nde wai hongo howa bialu ti tano pabe anda haraba wiagoha tali dai birima. <sup>24</sup> Ani bialu hearia Amonoali maru wai pabe neneni handape ho howa timu badali hayarume inanaga ami agali maru baya. Ami agali homayadaruni aria mbira Uria halu homaya, lalu kini lamini.

<sup>25</sup> Ani layagola Debidihanda agali bi bibi yalu ibiyagohondo lalu, Ina Yoaba karia dai buwa ibu wai bilo mo hongo halu bi ogodagua labe. Agali abogo ibuore homolebira lowa ndo wai biaga. Agali maru homayagonaga ina miniha genda nahabe. Ina wai hongo howa bialu Amonoalirunaga tano ogoni bo podama anda pialu tano ogoniore emene nawuleore bo giala holebu wahai habe, lene. <sup>26</sup> Mani Badaseba ibu agalini Uria waime baya layago hale howa dara timbuni halu dugu bialu berene. <sup>27</sup> Duguanda hai howa dara embeda heagola Debidihanda, Badaseba ibu i andaga haru ibule pudaba, lene. Haru ibiyagola Debidi ibu dabu buwa Badasebahanda Debidinaga igini mbira taba hono berene. Anigo Debidihanda mana ogonidagua biyagonaga Anduane Homogo ibu turu nahe hene.✧

## 12

### *Debidihanda ko biyago Nadana ibugua lapani henego ogo*

<sup>1</sup> Anduane Homogohandaibunaga bi mana latagi haga Nadana Debidi karia pu layagola ibugua puwa ogodagua lamini. Ibugua lalu, Tano mbirani agali kirali heneya. Agali mendego ibu muni mbiraleru dewawi homogo timbuniore halu mendego ibu ko yagibano mbirale emene hangu wu heneya.✧ <sup>2</sup> Agali homogo ogoniibunaga nogo bulumaga sibiru dewaore hinu heneya. <sup>3</sup> Anigo yagibano biago ibu nde nogo sibi angibuni mbiraore hangu hinu heneya. Agali biago ibugua sibi ogoni munime yolo biniyagoibunaga waneigini heba mandagi halu ho anda heneya. Agali ogoni ibugua tomo naluibunaga sibibi ibuni nayago ale nala ho mialu iba agali biago ibuni gabo beha howa nelo miaga heneya. U palelo ibuni buha palelo palelaga heneya. Ogonidagua biagagome sibi ogoni ibu waneore haradagua biaga heneya.

<sup>4</sup> Anigo horo mbirungi agali mbira agali homogo biago andaga nenege ibiniya. Ani ibiyagola homogo biago ibugua ibu nenege ibiyagonaga ibuni sibi hayaruni aria mbira bo dawa nahe helo wahowa agali yagibano biagonaga sibi mbiraore hangu hene biago bo puwa ibu nenege biagonaga nelo bo dawa heneya, lene.

<sup>5</sup> Nadanahanda bi ogoni layago Debidi ibu hale howa agali homogo biagohondo keba timbuniore ho wia halu lalu, Anduane Homogo haluhe kagonaga minini howa heneneore larogo agali mana ko ogonidagua biagago ibu homelo bo waholene nga. <sup>6</sup> Agali homogo ogoni ibuha mendeali kago mitangi halu dara holene nawi howa bialu hayadagonaga ibugua ibuninaga sibi mariame dano hongolene nga, lalu Debidihanda ladai bini.

<sup>7</sup> Ani layagola Nadanahanda Debidihondo lalu, Agali haguane ogoni ini o kegoni ndobe. Anduane Homogo Isaraele wali agalinaga Ngode Datagaliwabe kago ibugua ihondo bi mbira ogodagua lara. Ina i Isaraele wali agalirunaga kini habelo dabo helaru. Ani helowa ina i biamogo bialu hewagola Solohanda i ba nabi bayale hari. <sup>8</sup> Ogonidagua helowa Solo andagabi ibu one berearubiibunaga mbirale wiarubi bibahende ihondo ngiai harugo. Ani bialu ina Isaraelenagabi Yudanagabi kini i hangu helarugoni. Uruni birugo bibahende nakarulapedale nde dewa dege ngiatago halu bidole. <sup>9</sup> Ani birugo

irane aginaga ina inaga bi mo wahalu inaga deni mana ko ogoni biribe. Ina Amonoali waitigi biarume Uria bo wahelo tinaga giha minu ya halu ibu one i aribia hariyago. <sup>10</sup> Ai baya hangu hale ha. Ina i mo yo hondowa Hidiali Uria ibu one i halu ibuni homelo bo wahariyago. Anidagua biriyagome maniore i waneigini aguaneru mbira homelo bo waholene wiaabo holebira, lalu Anduane Homogo ibugua bi ogoni ihondo lara, lalu Nadanahanda Debidi lamini.

<sup>11</sup> Nadanahanda Debidihondo lone lalu, Anduane Homogo kagome ihondo bi ogodagua larago hale habe. Ina ini igini bu karuni mbiragome genda timbuni yu anda ibilolebero. Ani bialu i one bedaru agali mende hado merogo ina de hondolebere. Ani berogola ibugua wali uruni hama dombeni kayu yalu holebira. <sup>12</sup> Mana ko ina bialu haridago ohowa bialu harigoni. Ina mana ko ogoni biridagonaga pani ina biadai buleberogo Isaraele wali agali karu bibahendenaga deni howa horombe hama dombeni mo bia holebero, laya lene.

<sup>13</sup> Nadanahanda bi ogoni layago hale howa Debidi ibugua Nadanahondo lalu, Ina Anduane Homogonaga deni howa ibuhondo mana koore biru, lene.

Ani layagola Nadanahanda ibuhondo ladai bialu lalu, Anduane Homogohanda ina mana ko birigo domo wahayago i nahomolebere. <sup>14</sup> Ai ina ani birigome Anduane Homogonaga waitigi karume ibunihondo mine helonaga birida. Ani birigonaga inaga igini Badasebahanda taba honolebirago ibu homolebira, lene.

<sup>15</sup> Nadana ibugua Debidihondo bi uruni lai halu ibu andaga pene.

### *Debidi igini homenego ogo*

Mani Debidi igini Uria one ibu kayu bini Badasebahanda taba hanayago Anduane Homogohanda warago ko timbuni ibuha anda ibilene. <sup>16</sup> Igiri dabi helo Debidi ibugua igiri mo dabi helonaga Ngode Datagaliwabehondo bi la haabo halu hene. Ani lalu howa ibu iba hinaru nane wahalu aga balangiyaru mbira dunga nabi tamuni bame paliaga bini. <sup>17</sup> Ibunaga agali biabe biahaga ala hene wahe hearume Debidi palearia puwa mo heya hole bialu hearia nabibehe ibu mangaore hene. Agali uruni baba mandagi biruwa tomo nolenebi manga dege hene. <sup>18</sup> Ani howa sarere mbira peagola igiri gali biago homayagola agali biarume igiri homaya lalu Debidi lamulene giho hene. Tigua lo manda bialu lalu, Abale igiri warago hangu bo wiagola iname ibu mo bila agua hoabe tobahe wiagodago. Ai ayu igiri homaya aguaore lamimabe. Ibuni mo ko holene mbira buligo agua bimabe, lene.

<sup>19</sup> Debidi ibunime handalu hearia tigua bi ohowa tini hangu la la bialu hemigo hondowa ibugua manda bialu ai igiri biago homayadalo manda bini. Ani manda buwa ibugua tihondo lalu, Igiri homayabe, lalu hale hene. Ani layagola tigua ladai bialu lalu, E ibu homaya, lene.

<sup>20</sup> Debidi ibu tamu dindi wiagoria bame palenego ai igiri homaya layago hale howa abale heyalu ibaha wayawaya bole pene. Bo puwa manda kumu bialu weli ngabi mini sanda wiago ibuni tinginini haj halu aga bayale wiaru mo karulene. Ani bialu Debidi ibu Anduane Homogonaga andaha lotu lole pene. Lotu lalu dai buwa ibunaga tomo dawaga igiri hearuhondo tomo noliya dugu talebu ngidaba lowa tomo dugu miyagola nene. <sup>21</sup> Debidinaga biabe biahaga agali hearume ibugua ogonidagua biyago hondowa ibuhondo lalu, Mana agigo ina beregonibe. Igiri homa nabi ngelowa ina ibunaga dugu biaabo halu tomo nane harigo. Ayu ibu homayagola ina heyalu tomo nalu kegoni mana agigo o beregonibe, lene.

<sup>22</sup> Ani layagola Debidihanda tihondo ladai bialu lalu, I igini nahomeha ina dugu bialu tomo nane harugoni irane Anduane Homogohanda i dara howa i igini mo dabi helonaga biru. <sup>23</sup> Ai ayu ibu homayadago tomo nane waholene aginaga. Tomo waharogola i igini

✧ 12:11: 2 Sml 16:22

lone heyulebirabe. Ani ndoyago. Inibi nde mani ibu piyagoha dege pole kogoni ndobe. Anigo ibugua dege ini kororia dai nabulebira, lene.

*Badasebahanda Solomonu taba henene go*

<sup>24</sup> Debidihanda ibu one Badaseba miniha gendaho biruligonaga mo palia halu bi bayale laga bialu hene. Mani Debiti ibu one heba mandagi palu howa Badasebahanda Debiti igini mbira taba henene. Debiti ibugua igiri gali ogoni mini Solomonu wini. Anduane Homogohanda igiri gali ogoni gubalini timbuni ho hene. <sup>25</sup> Ani howa Anduane Homogohanda ibunaga bi mana latagi haga agali Nadanahondo lulu, Debiti karia puwa igiri gali ogoni mini Yadihia wibe lulu lamibe, lene.\*

*Debidihanda wai bialu Laba tano karulene go*

*(1 Bi Te 20.1-3)*

<sup>26</sup> Horo ogoningi ami haru haga agali haguane Yoabahanda ami haru howa Amonoalirunaga tano timbuni Laba wiagoria wai hongo howa bialu hene. Ani bialu howa lene mbirahayagi bo podama anda pialu karulene. <sup>27</sup> Anidagua bialu howa ibugua Debidihondo bi lo pelalu lulu, Ina Labaliru baba wai hongo howa bialu tinaga iba hambiaga wiago karularu. <sup>28</sup> Ani birugo ai ina ami maru andaga Isaraele dindiha yu wahayaru mo mogo bialu haru halu abale ibalimu. Wai bialu Laba tano anda pialu karulai hamiyago abaleore ibalimu. Ami agali ina haru kogome hangu anda pialu karularimayagua nde wali agalime tano ogoni mini wialu inaga mini lulu wulebira, lene.

<sup>29</sup> Bi ogonidagua lama ibiyago Debiti ibu hale howa ibunaga ami agali mo mogo bialu haru halu puwa Laba tanoha wai bialu podama pialu anda puwa tano karulene. <sup>30</sup> Ani anda puwa Amonoali kini heagonaga manda ngolome wabini karulo bereago Debiti ibunioreme anda pialu golene. Kininaga manda ogoni ngolome wabini ibunaga genda magi manda pira tebirani duria agima (35) kilogarama wini. Manda ogoni tole baya tara tara muni dewaoreme yolo biaga wiarume mo yaribia heneyago Isaraeleali ami agali biarume Debidinaga hagianeni mo karula hene. Ani bialu Debiti ibugua tano ogoniha muni mbiraleru dewaore winiru mo yalu pene. <sup>31</sup> Ani buwa ibugua wali agali Laba tano ogoniha heneyaru bibahende minalu biabe tara tara dindi aluenerubi ayume bulene wiarubi some podolene wiarubi biai helo mo ta hai hene. Marume anda bulenaga ege timeni ale mbirigi wabilo helene. Amono dindiha tano wiaru bibahendeni wali agali bu hearu anidagua dege biai hene. Ani biai halu mani emene howa Debiti halu ibunaga ami agali biaru ti Yarusaleme dai bini.

## 13

*Amanono Tamalanaga te go*

<sup>1</sup> Debiti igini Amanono henego ibugua Debiti igini mende Abasalomo mbalini baya taraore mbira mini Tama bereago ibu dimagoli ho haga hene. <sup>2</sup> Anigo Tama ibu agali mbirali baba mandagi palia nabini berene. Ani bereagola Amanono ibugua Tama berearia puwa ibu minu yania holene henge nawiyagola hame lowa ibunaga miniha mini burugu lulu dimagoli warago bo wini.

<sup>3</sup> Anigo Amanono ibu nenege mbira Debiti hamene Sama igini Yonadaba ibu mini ohewi henego ogoni ibugua biabe ohowa bulene hariga tara tara taya biaga hene. <sup>4</sup> Ani biaga henego horo mbirungi Yonadaba ibugua Amanonohondo lulu, Kini igini-o horo bibahendengi i mini burugu lowa gendaho dege heria handarugo agua biyadabe, lene.

Ani hale hayagola Amanonohanda ladai bialu lulu, Iore i hamene Abasalomo mbalini Tamaore hame timbuni lo kogoni, lene.

\* 12:25: Mini Yadihia ogoni inanaga bi lulu, Anduane Homogohanda ibu gubalini timbuni ho ka, laga.

<sup>5</sup> Ani layagola Yonadabahanda lalu, Ai í ke howa warago bo wini tingi halu dagiaha palue pu. Ani paderia í abahanda hondo ibiyagua ibuhondo au labe. I mbalini Tama ogoria tomo dawale ibilo hameledo. Ani bialu inaga deni howaibunime dawalu ibunaga gime yu ibalu i noliya ngilo hameledo lalu lamibe. Ina kinihondo ke howa bi ogonidagua lamiriyagua ibugua Tama í bederia pu lolebirago ani labe, lene.

<sup>6</sup> Ani layagola Amanono ibugua Yonadabahanda o layadagua bialu ibu warago bo ngo lalu ibuni dagiaha palene. Ani paleagola Kini Debidi ibu igini Amanono warago bo nga layago hale howa ibu Amanono andaga hondo pene. Ani piyagola Amanonohanda lalu, I warago bo ngogo ai i mbalini Tama inaga tomo kegiru mbira hira haluibunime yu ibalu ngilo i andaga pu labe, lene.

<sup>7</sup> Ani layagola Kini Debidi ibugua Tama andaga berearia bi lawia halu lalu, I mbalini Amanono andaga puwa ibunaga tomoru dawa hole pobelo hameledogo pobe, lene.

<sup>8</sup> Ani layagola hale halu Tama ibu mbalini Amanono andaga puwa Amonono ibuni dagiani palearia hendene. Ani paleagola Tamahanda balawa maru wabuwa parabane wiagoria hiralu berearia Amanono ibu handayaho berene. <sup>9</sup> Ani hirai howa Amanono ibuninaga beledi wiagoria dugu miyagola ibu nabe manga hene. Manga howa ibugua lalu, Agali tamuha hearu bibahende tagira piai hadaba, lene. Agali tamuha hearu bibahende bi ogoni hale halu tagira piai hene.

<sup>10</sup> Tagira piai heagola Amanonohanda Tamahondo lalu, Kegi uruni noliya inime i paliaga tamu ogoria mo yalu ibu, lene. Ani laya handala Tamahanda kegi biaru ibuni palearia yalu anda pene. <sup>11</sup> Ani yalu anda piyagola Amanonohanda minu yania howa lalu, Mbalini-o dagiani palibiya ibu, lene.

<sup>12</sup> Ani layagola Tama ibugua turu nahe howa hongo howa lalu, I mbalini-o ani nabuleore ina ihondo mana ko ogonidagua biba lolene nawi. Ina Isaraele wali agalime mana ko ogoniale nabiaga ngagoni. <sup>13</sup> Ina mana ko ogoni biriyagua iha taga timbuni halu wali agali bu karunaga deni ibagabu habe nahe holeberogo nabuleore. Ibi nde Isaraele wali agali bu karume í mo ko halu mo ngubia holebirago nabule. Ayu bulene nawigo ina kinihondo ala hale holene nga. Ani hale haregola ina i nadabubibe nalolebirago hale holene nga, lene. <sup>14</sup> Ani layago lelowa Amanono ibugua Tamahanda bi layago hale nahe tingi howa ibu hongo timbunihe heagome Tama minupe halu kayu yini.

<sup>15</sup> Amanono ibugua ogonidagua biai howa mani Tama handabe manga hene. Abale howa ibugua Tama hame timbuni lo hayago ayu ibu hame nale howa handabe manga timbuniore ho hene. Ani manga howa ibugua bi hongo howa Tamahondo lalu, I abale ogoria nabere heyalu tagira pu, lene.

<sup>16</sup> Ani layagola Tamahanda ladai bialu lalu, Ani ndo. Ina ihondo ayu birigo emene ale lowa i pu lariyagua mana ko ogoni ko timbuniore bulebere, lene. Ani layagoyu Amanono ibugua Tamanaga bi uruni hale habe manga hene. <sup>17</sup> Ani howa ibugua ibunaga biabe biahaga agali heago olalu ibu lowa lalu, Wali o bedago abaleore minu batagi ha. I ibuore nahondolego minu batagi howa panga payatagi habe, lene. <sup>18</sup> Ani layagola biabe biahaga agali biagome Tama minu batagi halu panga payatagi hene. Kini wanerunaga mana ti agali nape biruwa aga baya tara mbira gi lu biagimbu biaga winigo karulo haga wini. Ainde Tama ibu Amanono andaga pole howa aga ogoniale buyalu pene. <sup>19</sup> Anigo Amanono ibu andagaha howa minu batagi hayagola Tama ibu dara timbuniore ho berenego walia halu ibunaga aga bayale biago minu budalu ibunaga hagianeni bebi dugu wialu bini. Ani bialu ibunaga gi haguani paga howa dugu hongo howa bima pene. <sup>20</sup> Ani dugu bima pialu hearia hondowa Abasalomohanda ibu mbalini Tamahondo hale halu lalu, Dugu bima eberego agi. I mbalini Amanonohanda ihondo mana ko biyabe. Ani biyagua í genda nahe ibu i mbalini ndoyabe. Anigo ogoale biya lalu



wali agali maru karu hale holani handabe, lene. Ani laya handala Tama ibu Abasalomo andaga puwa ogoniha berene. Ani biruwaibunaga miniha genda yu biraabo hene.

<sup>21</sup> Debidi ibugua Amanonohanda mana ko ogoni biya layago hale howa ibu keba timbuni hene. <sup>22</sup> Amanonohanda Abasalomo mbalini Tamahondo mana ko biyiyagola Abasalomo ibugua keba timbuniore howa ibu Amanonohondo bi bayalebi kobi mbira naleore hene.

*Abasalomo ibugua Amanono bo wahole hariga taya binigo ogo*

<sup>23</sup> Mali kira piyagola Abasalomonaga biabe biahaga agaliru Balahaso dindi wiagoria nogo sibi irini podalu hene. Dindi Balahaso ogoni Eberaimi tano kawareni dege wini. Ani podalu howa Abasalomohanda kini iginiru bibahende ibai halimu lene.

<sup>24</sup> Abasalomo ibugua Kini Debidi hearia puwa lalu, Kini-o inaga biabe biahaga agali karume inaga nogo sibi irini podalu kago ainde ina tomo timbuni dawale manda bido. Anigo inaga agali haguane bu karu tomo namiya ini heba ibulene karulapebe, lene.

<sup>25</sup> Ani layagola kini ibugua ladai bialu lalu, I iginio ina bibahende dewalidago ibai harimayagua iname i mo genda holigo naibuleberema, lene. Anidagua layago lelowa Abasalomo ibugua harugo ibalimu lalu hongo howa laabo hayagolabi kini ibugua nde naibuleberema la dege bialu hene. Ani lowa lalu, Abasalomo-o i turu halu pamia, lene.

<sup>26</sup> Ani layagola Abasalomohanda lalu, Aniyagua nde i hamene Amanono ibu dege ibilo wahabe, lene. Anidagua layagola kini ibugua lalu, Ibu hangu aginaga ibilobe, lene.

<sup>27</sup> Ani layagola Abasalomohanda bi hongo halu ibiloore layagola nde kini ibugua Amanono halu kini iginio maru hearubi pudaba lene.

<sup>28</sup> Ani laya handala Abasalomo ibu Debidi helalu Balahaso dai buwaibunaga biabe biahaga agali bu hearuhondo lalu, Tomo nalu bedamangi tigua Amanono baya hanguore mamage ho halimu. Ani howa ibu lulu iba dewa no bedago hondowa ina badaba laruyagua abale balimu. Tigua ibu bolene gi nahe howa balimu. Inime balimu lalu langerogoni ndobe. Ani manda bialu ibu bolene mogo nale hongo ho howa balu home lalimu, lene. <sup>29</sup> Abasalomohanda ani bilimu lamiyadagua agali biabe biahaga hearu ti tomo nalu Amanono ma yu biruwa Amanono ibu lulu iba dewa nalu luluyu bereago hondowa tigua gi nahe howa ibu homelo bo wahene. Ani biya handala kini iginio maru biru hearu tigua tininaga nogo dongi heagoria iragaho biralu ibida pugu bini.

<sup>30</sup> Kini iginio biaru ti wene harigani ibalu heaore dege agali maru kini hearia abale puwa ibuhondo lalu, Abasalomohanda i iginio biaruni bibahende mbiraoreli hangubi mbira pora bialu nape bibahendeore homelo bo wahai haya, lalu lamini. <sup>31</sup> Bi uruni layago hale howa kini ibugua mogo timbuni laluibunaga aga biago minu lerelaki bialu dindini paliape hene. Ani biyagolaibunaga biabe biahaga bu hearu tigua nde tinaga aga bu hearuni minu lerelai hene.

<sup>32</sup> Ani heagola Debidi hamene Sama iginio Yonadaba ibugua Debidihondo lalu, Inaga haguane-o ina bi o layagoni mo henene nahabe. Tigua i iginio bibahende bai nahe mbiraore Amanono hangu baya. Amanono hangu bo wahayadagoni irane bamba ibugua Abasalomo mbalini Tama kayu biyagonaga keba ho haabo henego ani howa ayu bayadagoni. Abasalomoibunaga denguini aruma howa keba ho haga biane hondowa ibugua ogoniore bule kalo manda binigobi ayu Amanono bo wahaya. <sup>33</sup> Ai kini-o bi o layaruni bame layalaya hangu layago henene layabe toba holeni. I iginio bibahende hai ka. Amanono hangu homaya, lene.

<sup>34</sup> Ani lalu heatambu Abasalomo ibu ibida pu hene.

Yonadaba ibu Debidila bi lalu heagola ami agali wai pabeha mamage haga heago amu Horonaimi tanohayagi handa amu halu hearia agali dewaore hari nene wiagoria daliapebe biyane hendene. Ani handalu ibugua kini berearia abale puwa lalu, Agali dewaore amu Horonaimi hariga wiadagua hari nene wiagoria daliapebe bialu ibiragoni, lene.

<sup>35</sup> Ani layagola Yonadabahanda Debidi lamialu lalu, O ibaruagoore ina langirugonidagua heneneore í igini biaruni o ibaruagoni, lene.

<sup>36</sup> Yonadabahanda bi ogoni lai hayagola Debidi igini biaru abale anda ibalu yiya lalu dugu bigibigi bini. Debidi halu agali ibunaga biabe biahaga bu hearu tiguabi nde dugu biamaga hene.

<sup>37-38</sup> Abasalomohanda Amanono bo wahalu Gesua dindiha ibida puwa Amihudu igini Talamai hearia pu hene. Talamai ogoni ibu Gesuanaga kini heagola Abasalomo ibu ogoniha Talamai baba mali tebira hene. Kini Debidi ibu nde horo dewaore ibu igini Amanono homayagonaga dara ho haabo hene. <sup>39</sup> Mani Debidi ibu Amanononaga dara embeda howa ibu igini Abasalomobi nde dai bilo hamelo hene.

## 14

### *Abasalomo ibu Yarusaleme dai binigo ogo*

<sup>1</sup> Seruia igini Yoaba ibugua manda bu handalu hearia Kini Debidihanda ibu igini Abasalomo hondoa howa bereago hendene. <sup>2</sup> Ani hondowa ibugua mbiralihondo, Dindi emene mbira Tegoa wiagoha wali mbira maru bedali ale ndo mini ohewi bogabi bereago haru ibule pu, lene. Ani laya handala ibugua puwa haru dai biyagola Yoabahanda wali ogonihondo lalu, í bu miniha dara hetingi halu mbirali homedagola genda yu biragadagua birabelo hameledo. Ani biruwa dara ho ko lowa walia halu aga karulaga ale karulalu mandari kumu nabibe. Mbirali homenegonaga dara howa horo dewa halu berene biragadagua birabe. <sup>3</sup> Ani bialu kini bedaria puwa bi ina ogodagua labe lalu langerogo labe, lene. Ani lowa Yoaba ibugua wali biagome kinihondo bi lamiloru ogodagua labe lalu lamiai hene.

<sup>4</sup> Wali biago ibugua Yoabahanda bibe lalu lamiyaru bialu ibu kini berearia pene. Puwa ibugua kininaga mini yaraga halu dindini kininaga wanakuihayagi bulu paluwa lalu, Kini-o ina i biamogo bibelonaga ibu bedogoni, lene.

<sup>5</sup> Ani layagola kini ibugua wali biagohondo hale lalu lalu, íha genda agi ngabe, lene. Ani layagola wali biagome ladai bialu lalu, Kini-o i agalini homayagola i hanguore dalo bedogoni. <sup>6</sup> I igini kirali henego ainde horo mbirungi libu mabuha howa libuni keba haga buwa gungu biribiya. Ani bialu hebigola mbirali libu mo hadaki bia holene naheyagola mendeali hongo bolangua hayagome ibu hamene biago bo tongolo milayiya. <sup>7</sup> Ani binigo ainde áyu i agalini damene bu karume ihondo keba timbuni lalu lalu, Inanaga mana biaga wini ngadagua bialu í igini ibu hamene bo wahayago ogoni ibunibi homelo bo waholomaya ibilabe, lalu ka. Ani larago ina tinaga bi hale lalu igiri ogoni pelaruyagua nde i biamogo bialu handayaho holene igiri mbira naholobada. Inaga ira dene emene dedago bo hundiaore holobada. Tigua ogonidagua biyagua nde i agalini ibu damenego biba halu amolope holobada, lene.

<sup>8</sup> Anidagua layago hale howa kini ibugua wali biago lamialu lalu, Emene ogoninaga mini burugu nale inaga genda ogoni ina mo tiga buliyya dai bule áyu andaga pu, lene.

<sup>9</sup> Anidagua layago lelowa wali biago ibugua lalu, Anigo inaga agali haguane kini-o inaga genda ngogo mo tiga bule hariga tara maru taya bulenego wahalu ina buleberegona pani nolene uruni inibi i dameneruhabi anda ibilo waha. Anigo inibi i one waneiginiruhabi genda nawi habelo, lene.

<sup>10</sup> Ani layagola kini ibugua wali biagohondo lalu, Mbiralime i mo ko holene bi mbira layagua nde ogoni ibuni i koria haru ibabe. Haru ibiriyagua nde íha mo genda holene mani nawulebira, lene.

<sup>11</sup> Ani layago hale howa wali biago ibugua laabo lalu lalu, Kini-o Anduane Homogo inaga Ngode Datagaliwabenaga minini howa ina bi henene larogoni lalu i igini mende ogoni nabelonaga lahabe. Mana lowini ngagome agali ibuni hamene bo wahenego ibu

dameneme ogoni ibuni bo wahaga ngagonigoyu harugo lowa í iginiore bo wanahelo laro, lene.

Ani layagola Debidihanda wali biagohondo lalu, Ina heneneore Anduane Homogo haluhe kagonaga minini howa í langerogo tigua í iginihondo mbirale mbira nabulebiraore, lene.

<sup>12</sup> Ani layagola wali biago ibugua lalu, Inaga agali haguane kini-o ina ínaga biabe bihaga bedogome íhondo bi mbiraore hangu loabe, lene. Ani layagola Kini Debidihanda ladai bialu lalu, Karulapego ladege bia, lene.

<sup>13</sup> Ani layagola wali biagome Debidihondo bi tigatiga lamialu lalu, Ina Ngode Datagaliwabenaga wali agali bu karuhondo mana ogonidagua biriyago agua biyane biribe. Ina í iginiore biago waratagi halu talu pelowa haru dai nabi dege kegoni. Anidagua bu kegome bi ina áyu íhondo langirigoni podene íniha o dai biragoni ndobe. <sup>14</sup> Iba hambu yinigo dindini odope hayagua lone mo yu dai bibe nahe wiralidagua ina homarimayagua lone heyabe nahe holeberemago mandabu kamagoni ndobe. Ai Ngode Datagaliwabenaga ina wali agalinaga holene bame mo wanahaga ka. Wali agali mbirago kaundiaha heagua ibugua uruni ibuni kagona kaware haru halu dai bulene hame laga ka.

<sup>15</sup> Anigo inaga agali haguane kini-o wali agali bu hearu tigua í mo ko holeberema layagola gi halu í heria ibiru. Inime mandabu handalu hewaria íhondo hale harogola ina hariga taya bialu í biamogo bulebere lo manda bialu ibiru. <sup>16</sup> Ina manda birugola íhondo hale haruyagua agali larugome í igini iya mo ko naholobada lo manda bialu ibiru. Ibugua iya mo ko hayagua nde dindi Ngode Datagaliwabenaga ina ibunaga wali agali kamaruhondo ngini o ngagona naholeberabada lo manda bido.

<sup>17</sup> Ani manda buwa ina ínaga biabe bihaga bedogo bayale holiya biamogo bule lalu bi hongohe lolebere lo manda bialuore ibiru. Inaga agali haguane kini-o í Ngode Datagaliwabenaga dahuliyali ale kego ina mana bayale tigabi ogoore nga mana lehe ogoore nga lowa tale bialu baya hangu manda biai ho kegoni. Anduane Homogo inaga Ngode Datagaliwabe ibu í heba mandagi haabo helo laro, lene.✧

<sup>18</sup> Wali biagome bi layaruni hale howa kini ibugua lalu, Bayale larigo ainde ina íhondo bi mbira hale harogo tigatigaore ladai bibe, lene. Ani layagola wali biagome lalu, Inaga agali haguane kini-o karulapego íhondo bi hale harene, lene.

<sup>19</sup> Ani layagola Debidihanda ibugua hale halu lalu, Ina bi áyu o lareruni Yoabahanda ani lole pu laya handala lole ibiribe, lene.

Ani hale hayagola wali biago ibugua ladai bialu lalu, Inaga agali haguane kini-o ina heneneore gi dolalu larogo ina íhondo hale haregoni habo naleorego ina ogoni ndo lalu mo kebi naholebero. Ina bi larigoni heneneore. Inaga ami agaliru haru haga haguane Yoabahanda anidagua lole pu laya. Ibunime bi ogodaguaore labe lalu bibahendeore endeho ngiya handala íhondo langule ibinigo larugoni. <sup>20</sup> Anigo inaga ami haru haga Yoaba ibugua bi ogoni bame ndo Abasalomonaga genda ngago mo waholenaga laya. Anigo inaga agali haguane-o í Ngode Datagaliwabenaga dahuliyali ale mini mandala bogabiore howa ina dindini bialu karu ogoale bira lalu manda biaihe kegoni, lalu wali biagome lai lene.

### *Debidihanda Abasalomo andaga dai bilo karulape lenego ogo*

<sup>21</sup> Mani wali biago ibu tagira peaha Debidihanda Yoaba ibu lowa lalu, Ina manda biridagoni karulape laro. Ai Abasalomo damu pialu haru daibule pu, lene.

<sup>22</sup> Ani layagola Yoabahanda kini wanakuini bulu palialu dengume dindi ela halu kininaga mini yaraga halu lalu, Inaga agali haguane kini-o Ngode Datagaliwabenaga í

✧ 14:17: 2 Sml 19.27

mo bayale helo hameledo. Ina ihondo bi hale harugo e laridago nde inaga biabe biahaga i kogohondo turu ho kedalo manda bido, lene.

<sup>23</sup> Ani lalu Yoaba ibu heyalu abale Gesua tano puwa Abasalomo haru halu Yarusaleme dai bini. <sup>24</sup> Ani haru dai biyagola kini ibugua lalu, Abasalomo ibu kini andaga naibilo ibuni andaga hayadagoha holene nga, lene. Ani layagola nde Abasalomo ibu kininaga dengui hondole ibu heagoha nape ibuni andaga haabo hene.

*Debidi ibugua Abasalomohanda ko biyago la nabi henego ogo*

<sup>25</sup> Abasalomo ibu huliya igiri baya dege lalu do mbaraleni ibuha dere motudubi mbira nawi hene. Isaraele dindiha huliya igiri baya ibu ale mende naheyagola Isaraele wali agali tigua Abasalomo hondole turu timbuni haga hene. <sup>26</sup> Ibugua mandari lu timbuni palango toheore hene. Mali mbira poragola ibunaga mandari ogoni podaganego genda magi handalu karia kilogarama kira ale wiaga. <sup>27</sup> Abasalomo ibu wali dabu binigo ibu igini tebira wane mbira berenego wanedago ogoni mini Tama berene. Wandari ogoni agali wanela tabetabe nabi baya taraore berene.

<sup>28</sup> Abasalomo ibu dai buwa mali kira Yarusalemeni daibu howa ibu kininaga dengui nahende haabo hene. <sup>29</sup> Ani howa ibugua Yoabahanda kini hondole pelonaga ibu andaga ibabe lalu lawia hayagola Yoaba ibu naibi haabo hene. Ani biyagola Abasalomo ibugua Yoaba ibabe lalu bi halu mende lawia hayagobi Yoaba ibu naibi dege hene. <sup>30</sup> Naibu dege biyagola Abasalomo ibugua keba timbuniore howa ibunaga biabe biahaga agali hearuhondo, Yoabanaga balawa wabiaga mini bali mabu mbira ibuni mabu wiagoria dege mandagi handa ai nai winigo ogoni delo bo heda hole pudaba, lene. Ani layagola agali biabe biahaga hearume hale halu Yoaba mabuha bali heago delo bo heda hene.

<sup>31</sup> Anidagua biya layago hale halu Yoaba ibu Abasalomo andaga puwa lalu, inaga biabe biahaga agali hearume i mabuha bame bali hengewago dai helayadago irane aginagabe, lene.

<sup>32</sup> Ani layagola Abasalomohanda ladai bialu lalu, Ina i ibabelo hondo pudaba larugola i naibiriyago ai inaga bi ogo kini bedaria yalu pobelo hameledo. Pialu howa i Gesua dindiha pu hewago haru dai birimigo agi bulenaga Yarusaleme haru dai birimibe. I Gesua dindiha henedale nde bayale kolego ayu ogoni kini abale hondole pu. Ibugua handalu karia iha ko mbira ngane hondo heagua nde i homoliya bo wahelo laro, lene.

<sup>33</sup> Ani laya handala Yoaba ibugua kini berearia abale puwa Abasalomohanda bi layaruni bibahende kinihondo lamiai hene. Ani lamiai hayagola kini ibugua agali bu hearuhondo, Abasalomo haru ibule pudaba, lene. Tigua haru ibiyagola Abasalomohanda kininaga mini yaraga halu kininaga wanakuihayagi bulu palialu dindini palipe hene. Ani biyagola kini ibugua ibu nunu lene.

## 15

*Abasalomohanda Kini Debidi bo batagi hole manda binigo ogo*

<sup>1</sup> Anigo mani howa Abasalomohanda nogo hosime gili laga garo ale karisi mbirabi nogo hosi marubi agali pira duria (50) agima karisidago mani ibilo tigua ala bamba halu hariga ibu polebiragoha pelobi mo manda manda biai hene. <sup>2</sup> Horo bibahendengi egerebagiore Abasalomo ibu heyalu puwa tano anda ibaga panga haraba timbuni wiagoria pu haga bini. Ani kagola agali mbira ibu damene baba keba howa kinime mo tiga bilo kini bedaria pole ibiyagua Abasalomohanda agali ogoni ibu lowa lalu, i dindi agoha howa eberebe, lalu hale haga bini. Ani hale haragola agali ibiragome ibu ladai bialu lalu, I Isaraele dindiha howa Isaraeleali hameigini ogo aria ko, lalu lamigi biaga. <sup>3</sup> Lamiragola Abasalomo ibugua agali ibiragohondo hale haga bialu lalu, Genda agile wiyagola ibiribe, laga bialu howa lalu, Ai hale habe. Inaga bi laregoni heneneoredago

kini ibugua agali inaga bi ogoni hale howa tale bilo mbirali dabo hela nabira, laga bialu hene. <sup>4</sup> Ani laga bialu howa Abasalomo ibugua agali ibiragohondo laabo halu lalu, Inimeore bi ogoniale hale howa tigabi dabolene ngadagua dabaga bialu holene hamelo ko. I ani haruyagua nde agali genda ogoni ale yalu ibiragola abale baya hanguore mo tiga bulebero, laga bialu hene.

<sup>5</sup> Agali mbiralime ibunaga mini yaraga halu ibuha ge duli hanga hole ibiyagua Abasalomo ibugua agali ogoni gini mialu abale mo heya howa nunu laga bini. <sup>6</sup> Isaraeleali bibahende kini hearia tinaga godi hale helo ibiyaruni tihondo anidagua dege biai halu hene. Abasalomo ibugua mana ogonibi bialu hayagome Isaraeleali dewaore hearunaga bu mini bamiai hayagola tigua Abasalomo gubalini timbuni ho hene.

<sup>7</sup> Mali maria peagola Abasalomohanda kini berearia puwa Kini Debidihondo lalu, Ina bamba Anduane Homogohondo bi mbira buleore lalu lo wirugo bua kogo i Heberono poabe. <sup>8</sup> Inaga biabe biahaga kogo ina bamba Siria dindiha Gesua tano wiagoria hewangi howa Anduane Homogohondo bi mbira ogodagua lowialu laru. Anduane Homogohanda i Yarusaleme haru dai biyagua nde ina Heberono puwa Anduane Homogo mitangi bialu ibunaga mini yaraga halu lotu lolebero lalu lo wirugonaga poa ko, lene.

<sup>9</sup> Ani layagola kini ibugua Abasalomohondo lalu, Karulapego mo palia holene i heba kago pamia, lene. Ani laya handala Abasalomo ibu Yarusaleme wahalu Heberono pole pene.

<sup>10</sup> Anigo ibu pole howa ibugua agali maruhondo lalu, Ti Isaraele hameigini palearu bibahendeha ndilalu bi lama purogo lalu bi ogodagua lalimu, Tigua biguli pu laruane hale harimiyagua hongo howa ga ladaga haga haga bialu lalu, Abasalomo ibu Heberono tanoha howa kini ka, lalu hoaro ladaga halimu lalu lamiai hole pudaba, lene. <sup>11</sup> Ani pudaba lalu Abasalomo ibu Heberono tano pialu howa agali handari kira (200) Yarusaleme yu wahalu ibu heba ma laga buwa haru halu pene. Anigo agali ibu heba pole ma laga biyadaruni ti irane aginaga ma larabe manda nabi Abasalomo ibunaga mini wiagobi manda nabi howa bame pupe halu pene.

<sup>12</sup> Ti Heberono anda pu howa Abasalomohanda Anduane Homogohondo nogo mbi-rale loma binigo bo delalu howa ibugua Kini Debidinaga mini mandaru talebu miaga agali mbira mini Ahidobehe ibu Gilo tanoha haga henego ibilo agali marume damu pudaba lene. Ani layagola tigua agali biago Gilo tano yu wahalu Abasalomo hearia haru ibini. Agali mbira mbira ibugu bialu dewaore ibu tago hayagola Abasalomo heba agali dewa halu hongoheore tagira ibu hene.

### *Debidi ibu Yarusaleme yu wahalu ibida penego ogo*

<sup>13</sup> Agali mbirame Debidi hearia gerai ibuwa ibuhondo lalu, Isaraeleali bibahende Abasalomohayagi anda ibu hai haya, lene. <sup>14</sup> Bi ogoni layagola hale howa Debidihanda agali haguane Yarusalemeha hearu olo mogo buwa lalu, Abasalomohanda ibalu ina bibahende bai holigo Yarusaleme yu wahalu ayu ogoni ibida ma. Abale napirimayagua Abasalomo halu ibunaga agali haru haruarume ibalu ina wali agali bibahende tano ogoha kamaruni bo wahi holebirago ina ayu ogoniore abale ma, lene.

<sup>15</sup> Ani layagola Debidinaga agali haguane biarume ibunihondo lalu, Inanaga Kini Timbuni-o inaga biabe biahaga kamaru iname mbira bidabalo hameledego bibahende biai hole kama, lene.

<sup>16</sup> Ani laya handala kinibi ibunaga agali haguane biarubi ibu one waneiginirubi ti Yarusaleme yu wahalu piai hene. Ani pialu howa kini ibu one wabuni halu mende berearu aria piralime ti dege kini andaga handaya howa mamage berelo berelalu pene.

<sup>17</sup> Ani berelalu ibida pole pialu howa kini ibu dameneru ti bibahende Yarusaleme yu wahalu puwa emene kaware tano gibuniha anda mbira heagoria hondo hene.

<sup>18</sup> Ani hondo howa handalu hearia kini ibugua ibunaga agali haguane biaru tidi yalu



bamba hayagola ami agali kini mamage haga hearubi mani tidi yalu piyadagua pu dege bialu hearia de hendene. Ami agali uruni ti Kerede howabi Peledde howabi ami agali handari waragaria (600) abale Gede tano howa Kini Debidi heba ibu hene hearu tibi nde mandagi o piyaruni heba bamba halu pumaga halu pu dege bini.

<sup>19</sup> Ani piyagola Kini Debidihanda ami agali Gede tano howa ibini biarunaga agali haguane Idai ibuhondo hale halu lalu, Tí ina haruru agibule eberemibe. Tí naga kini gahenge Abasalomo heba hole dai bidaba. Tí dindi tara kaundiaha howa ibirimigo nde lone aginaga ina haru mandagi ibagabu hamiyabe, lene. <sup>20</sup> Tí dindi ogoha lu ndo harimidago ai ina tí horo lu haru ibagabu holene hame naledogoni. Ina dindi anda mbirani baya hangu birule ndo bibahendengi ibaga dege bialu haabo holeberemago. Inaga amiru í dameneru haru halu tını andaga dai birimiyagua karulapedalo manda bido. Ani dai bialu kamigola Anduane Homogohanda tí biamogo bialu baya hangu handayaho haabo helo hameledo, lene.

<sup>21</sup> Ani layago lelo howa Idaihanda Debidihondo lalu, Inaga Kini timbuni-o í kedagua Anduane Homogo haluhe kagonaga minini howa ina heneneore larogo í baba haabo hole kogoni. Ani howa í dindi mbiraha piriyauguabi mbiralime í bo wahayaguabi nde ibi iya haru bo wahelo laro, lene.

<sup>22</sup> Ani layagola Debidihanda lalu, Karulapedago ina haru maibidaba, lene. Ani layagola Idaibi ibunaga ami agali biarubi ti one waneiginirubi bibahende maru piyadagua ti haru pole pene.

<sup>23</sup> Debidibi ibu one waneiginirubi ibunaga agali haguane biarubi ti Yarusaleme tano yu wahalu pialu hemiria hondowa wali agali maru hearume dara howa dugu timbuniore bialu hene. Ani dugu bialu hea handala kinibi ibunaga wali agali biarubi ti iba mbira mini Kidirono peago domalu ederayagi dindi ko wali agali nahaga wiagoha be abalu titaule wiagoria pialu hene.

<sup>24</sup> Ani pialu howa Debidi ibugua wali agali piyaru deme hondo hearia loma binigo mo miaga agali Sadogobi Abiadabi Libaiali bibahendebi piyaria hendene. Libaiali uruni tigua Habo Nalolene Bi lowini biagonaga Mbogoyi biago mo yalu ibuwa naina dindini mo ngelene. Ani ngelowa Abaiada ibugua loma o biagoria howa bo delalu heaore dege wali agali bibahende tano wahalu tagira ibai hene.

<sup>25</sup> Ani tagira ibai heagola kini ibugua Sadogohondo lamialu lalu, Habo Nalolenenaga Mbogoyi ogoni tanoha ngelole lone yu dai bidaba. Anduane Homogohanda ihondo turuho heneyagua nde mani ini lone tanoha haru dai bialu ibunaga Habo Nalolene Bi lo winigonaga Mbogoyi ogoni tanoha ibunaga Balai Anda biagoha wiraligo ngaria de hondoliya haru dai bulebirago yu dai bidaba. <sup>26</sup> Anigoyu Anduane Homogohanda ihondo turu nahe heagua nde ihondo ibunime bule hame layadago ale biai helo, lene.

<sup>27</sup> Debidihanda Sadogohondo laabo halu lalu, Ina ihondo bi larugoni miniha wá layabe be wá nale dege kebe. Ina bi ogodagua larogo inibi í igini Ahimasabi Abaiada igini Yonadanabi tí bibahende Anduane Homogonaga mo palia holene heba tanoha dai bilimu. <sup>28</sup> Ina dindi ko yobi wali agali nahaga ogo yu wahalu puwa amu iba domade haga biagoria holebero. Tigua Yarusaleme tanoha ogoale mbira bira lalu bi lo yalu dai beramigola hale hole iba doma edeyagi hondo hole porogo, lene. <sup>29</sup> Ani laya handala Sadogo Abaiadalame Habo Nalolene Bi lo winigonaga Mbogoyi biago yu dai bialu tini Yarusalemeni hene.

<sup>30</sup> Kini Debidi ibunaga bu miniha genda timbuni howa ibunaga ge su nabi ibunaga haguane dambi ho yalu pialu dugu bima Hari Olibe heago iraga halu hariga peadagua pialu Yodana iba peagoha ubadali halu pene. Wali agali ibu heba piyarume ibugua biyadagua dege tinaga haguane dambi ho yalu dugu bima pialu hene. <sup>31</sup> Ti ani bima pialu howa Debidi ibugua hale halu hearia agali mbira mini Ahidobehe henego ibu Abasalomo halu ibunaga agali haru hayadaru biamogo bule piya layane hale hene.

Ani piya layago hale howa Debidihanda Anduane Homogohondo bi ogodagua lene. Anduane Homogo-o Ahidobelehanda bi larago damene bibahende la ko hai helo ina ibunaga bi lolebirago mo nagalone hai helabe, lene.

<sup>32</sup> Ani lalu puwa hari nene wiagoha iraga halu Anduane Homogo mitangi bialu lotu laga mbira winigoria tagira pene. Ogoriani pu heagola Debidinaga nenege agali mbira mini Husai ibu dindi mini Aga tano howa Debididi hearia lola hole ibini. Ibu Debididi dara timbuni ho ko lowa walia halu ibunaga aga biaru minu lerelalu yayai dindi dugu hira bialu ibini. <sup>33</sup> Debidihanda agali biago hondowa lalu, í ina poramadagua ibulene manda biriyagua ina mo genda timbuni holebere. Iname í handayaho habe nahe holeberema. <sup>34</sup> Anigo ina i biamogo bule hamelo keyagua Yarusaleme tanoha dai buwa Abasalomo biamogo bialu howa bi ogodagua labe. Kini-o abale howa ina í aba mini manda bayale ngaru talebu mialu ibu biamogo biaga harugonigo ai áyu i inaga biabe biahaga mbira holebero, labe. Ina ogonidagua biriyagua Ahidobelehanda mini ko ngaru talebu migi bialu karia ina mo habo laga bulebere. <sup>35</sup> Agali kirali loma binigo mo miaga Sadogola Abaiadalabi nde Yarusaleme tanoha holebirago ina kini andagaha howa bi hale hareruni ogoale laya lalu agali kirali ogonilabohondo lamigi bibe. <sup>36</sup> Igiri kirali Sadogo igini Ahimasabi Abaiada igini Yonadanabi libu aba heba mandagi holebirago ina bi hale harego damene bibahende libuhondo lameregola libugua ini koría abaleore langule ibilo, lene.

<sup>37</sup> Debidihanda bi layago hale halu ibunaga nenege Husai ibu lone Yarusaleme dai bialu pialu hearia Abasalomobi nde Yarusaleme tanoha anda ibini.

## 16

### *Siba ibu Debididi harigani lola henego ogo*

<sup>1</sup> Debididi ibu Husaila bi lalu henego lai halu ibu hari nene wiago yu wahalu emene daliape halu ulini mbira wiagoria pialu hene. Ani pialu hearia Mebibosedenaga biabe biaga agali mbira Siba henego ibu Debididi lola hole ibini. Sibahanda beredi handari kirabi (200) gerebi lini do gembe bini kabu bigi buwa kabuni dege handari mbirabi (100) poge lini anidagua dege do gembebu winigo kabu buwa kabuni handari mbirabi (100) nogo meme dongoneme be wabini mbiraha waini iba hambu tolo berelo ya bialu nogo dongi kiranaga erekunini mo paga howa Debidinaga ya halu ibini.✧

<sup>2</sup> Ani ya halu ibiyagola Debidihanda ibuhondo hale halu lalu, Mbirale uruni i hewaria aginaga yalu ibiribe, layagola Sibahanda bi ladai bialu lalu, Nogo dongi kira ogonilabo í one waneiginiru biralu pelonaga haru ibiru. Tomobi ira linibi yidoruni inaga agaliru ti nelonaga yidogoni. Waini iba hambu berelo yidogobi inaga agaliru ti dindi ko wali agali nahaga ngagoria pialu kamigola ti kembobe lebola halu tingini ngoe laragola nelo hambu berelo yido, lene.

<sup>3</sup> Ani layagola kini ibugua lalu, Bayaleore biridago ai inaga agali haguane Solo aguane Mebibosede ibu agua kabe manda bule hame ledogo áyu ibu agoha kabe, lene.✧

Ani layagola Siba ibugua kinihondo ladai bialu lalu, Ibu Yarusaleme tanoni ka. Abale ibu aguane Solo kini hayadagua Isaraele wali agalirume ibu tinaga kini helaragola ibugua Isaraele wali agali haru hole manda buwa ka, lene.

<sup>4</sup> Sibahanda anidagua layagola hale howa kini ibugua lalu, Henenebe. Anidagua biyadagonaga ina Mebibosedenaga mbirale wiyadaruni bibahende í mo ngerogoni, lene.

Ani layagola Sibahanda Kini Debidihondo lalu, Inaga Kini timbuni-o i agali nagalonneore kogonigo mbira ina ihondo bererume ina ihondo turu habelonaga dege biaabo holebero, lene.

### *Simaihanda Debidihondo bi ko lenego ogo*

<sup>5</sup> Debidi ibu Sibala bi layago lai halu Debidibi ibunaga wali agali biarubi ti pialu dindi mbira Bahurimi wiagoria anda pene. Ogoriani anda pirimigola Solo aria agali mbira heneyago ibu tagira ibalu Debidi lola hole ibini. Agali ogoni ibu Gera igini Simai henego ibugua Debidihondo handabe manga howa bi ko lama tagira ibini. <sup>6</sup> Ani lalu lama ibalu howa ibugua ege toleme Debidibi ibunaga ami agali biarubi bama ibini. Debidi bole biyagola ibunaga ami agali hearumebi ibuninaga tingini mamage haga hearumebi hapai halu helowa ibugua nde hibu lowa bama ibuore bini. <sup>7</sup> Simaihanda mege bialu bi ko hongo howa laabo halu lalu, Debidi í agali ko ngubiore agali homelo bama ibaga biaga koore o porego í puaboore habe. <sup>8</sup> Í agali koore howa ina Solo bo batagi halu ibunaga henge wiago karulalu ini kini ho aribia harigoni. Ani bialu Solonaga agali nenege bu hearubi bamuore homelo bo wahai harigoni mana bayale biribe. Anidagua birigonaga Anduane Homogohanda í pani áyu ngiragoni ndobe. Ibugua í bo batagi halu í igini Abasalomo ibu kini ho aribia howa Isaraele wali agali handame ho kagoni ndobe. Ina agali homelo bo wahariligonaga í koorene ko kegoni, lalu lene.

<sup>9</sup> Ani layago hale howa Seruia igini Abisai ibugua Debidihondo lalu, Inaga Kini timbuni-o irane aginaga agali ko biango ale ogome ihondo bi ko ngubi uruni lalu helowa kebe. Ina ibunaga ma pugu wahole porogo, lene.

<sup>10</sup> Ani layagola kini ibugua Abisaihondobi ibu hamene Yoabahondobi bi lamialu lalu, Ogoni libunaga biabe ndogo ani lalu helo wahadaba. Anduane Homogo ibugua agali ogonihondo bi ani lolene nga layagua nde agali mendeme bi ogoni ago larebe lalu hale holene nawigo waha, lene.

<sup>11</sup> Ani lowa Debidi ibugua Abisaibi ibunaga agali haguane hearu bibahendehondo lalu, Hale hadaba. Ini igini biagomeore ini bo wahole kagonidago agali mende tara Beniyamini hameigini ogonime bame bi ko lalu kago hondowa iname mogolo handabe nahedago wahadaba, lene. Anduane Homogo ibunime ihondo bi ko uruni lole pu lenedago keba howa bi ko uruni ani lalu helo waha. <sup>12</sup> Anduane Homogohanda inaga ko ngaru bibahende manda biai ho kago ai ibugua bi ko ihondo áyu lalu kagoni mo beregedalu ihondo mana bayale bua biyagua nde anidagua bulebira, lene. <sup>13</sup> Debidi ibugua bi ogoni lai halu ibu damene biaru heba ti heyalu pole piyagoha pene. Hariga ti pialu henedagoni hari kaware hapara howa pialu hemigola Simai ibugua emene uyura bare bareni pialu howa bi ko lama Debidi piyagoha ege tole bape haga bima pialu dindi himu wiarubi dugu pelama ti piyadagua haruru pene. <sup>14</sup> Anigo kinibi ibu agali biarubi ti pialu tini pole piyagoria anda pene. Ti piyago pu dege bialu erekui biyagola dindi ogoriani halo berene.

### *Abasalomo ibu Yarusaleme anda ibinigo ogo*

<sup>15</sup> Abasalomobi Isaraeleali maru biarubi ti Yarusaleme anda ibalu Ahidobebebi ti haru ibini. <sup>16</sup> Ani buwa maha Debidi ibunaga nenege Husai Abasalomo lola hole piyago anda ibuwa ibugua Abasalomohondo bi ladaga halu lalu, Kini-o íore lu haho wialu hodagua habelo, lene.

<sup>17</sup> Abasalomo ibugua Husaihanda bi layago hale howa ladai bialu lalu, Agali-o í Debidinaga nenege heneneore mbira harigodago ibu heba pu nabi hadai biridago agua biribe. Agali í nenege heneneore henegonaga mana ogonidagua biaga ngabe, lene.

<sup>18</sup> Ani layagola Husai ibugua Abasalomohondo lalu, Ani ndogo Anduane Homogo-handabi Isaraele wali agalimebi wali agali áyu o mo ngoaiho karubi bibahendeme tinaga kini gahenge mbira dabayagua nde í kini ogoni ibula halu ibunaga andanaha holene nga. <sup>19</sup> Í inaga biabe biahaga naharuyagua nde agali mende ai kagonaga biabe biahaga hole haleho poliyadabe. Abale í abanaga biabe biahaga harugo áyu ibu igini ininaga biabe biahaga hole kogoni ndobe, lene.

<sup>20</sup> Ani layagola Abasalomohanda beregedalu Ahidobelehondo lalu, Áyu ogoale bulene nga lalu ina buliyago langi, lene.

<sup>21</sup> Ani hale hayagola Ahidobele ibugua ladai bialu lalu, Í abahanda ibu one wabuni halu mende kini andaga handayaho berelonaga berelo wahalu piyadaruni ini haru paliai hole pu. Ina ogonidagua biriyagua Isaraele wali agali bibahendeme í aba inila libu mo waitigi haridane handai holebira. Ani handai howa wali agali áyu íhayagi bu karuni tiguabi í hangu talima ibule hongo ho holebira, lene. <sup>22</sup> Ahidobele ibugua bi ogoni lai hayagola agali marume kini anda heagonaga dangini wiagoria balai anda mbira bia hene. Anda bia heagola wali agali bibahende bu hearunaga deni howa ti de hendeaore Abasalomo ibu balai anda daliga bia hayagoha anda pene. Anda pu bereagola tigua ibu aba one wabuni halu mende kini andaga handayaho berelo berelene biaru Abasalomo berearia mbira haru ibugu biyagola Abasalomo ibu haru paligi bini.✧

<sup>23</sup> Horo ogoningi agali maru hearume Ahidobele ibugua bi layaruni Ngode Data-galiwabehanda la lene bi henene layabe toba howa ibugua bidaba layaru bibahende talialu biaiore hene. Abale Debidi ibu Ahidobelenaga bi larago bibahende talialu biai hagadagua áyu Abasalomo ibuguabi nde Ahidobelenaga bi laradagua talialu biai holene nga manda bini.

## 17

### *Husaihanda Abasalomo mo hondo henego ogo*

<sup>1</sup> Mani howa Ahidobele ibugua Abasalomo lamialu lalu, Ina agali daosini homberia (12,000) haru halu áyu mbiraga Debidi piyadadagua haruru talima poliya pu la. <sup>2</sup> Áyu Debidibi ibunaga agalirubi ti hariga dege pialu henego mini burugu lalu ngoe lalu mbirani paluebira. Padaria puwa ina wai berogola ti mogolalu ibunaga ami padaru bibahende ibida piai holebirago. Ani biragola ina kini ibuni hangu minalu bo waholiya. <sup>3</sup> Bo wahalu wali agali maru karu bibahende wandari mbirago áyu dege agali penego ibu agalinila manga halu ibida pu puwa nde lone ibu agalini karia dai biagadagua ina ibunaga wali agali uruni ini keria haru dai buliya. Wali agali bibahende ini keria dai bilo agali mbiraore hangu bolene hame ledegoni ndobe. Aniyagua wali agali maru ini keria dai biai helo Debidi dege homelo bo waharegola maru ti bayale karulape hai holebira, lene. <sup>4</sup> Abasalomo halu Israaelenaga agali haguane hearume mandabu handalu hearia bi ogoni bayale tigabioreyane manda bini.

<sup>5</sup> Ani manda buwa Abasalomo ibugua lalu, Aga tanoali Husai ibugua nde agua larabe hale hamiya ibu ibilo oladaba, lene. Ani layagola tigua Husai olowa íbu lene. <sup>6</sup> Husai anda íbu bereagola Ahidobelehanda bi layaruni bibahende Abasalomo ibugua Husaihondo lamiai hene. Abasalomo ibugua bi uruni lai howa Husaihondo hale halu lalu, Iname ogonidagua bulene karulapedabe be nakarulapedabe. Ina mandabu handalu keria nakarulapeyagua nde iname bimiyago ina manda biridago ogo bulene nga lalu latagi ha, lene.

<sup>7</sup> Husai ibugua Abasalomohondo ladai bialu lalu, Áyu ogoningi Ahidobelehanda ogobi bibeheda lalu mo walia hayadagoni tigabi ndodane hendedo. <sup>8</sup> Í aba Debidi ibunaga ami agalirubi ti pari wayali agali wai biaga hongohe hayago ini manda bide. Áyu ogoni ibu keba timbuni howa biango dudu ale timbuni mini beame ibu igini agalime page minu yalu piai kagola keba howa tandaga timbuni ho hagadagua ka. Í aba ibu wai biaga mana manda timbunibi kago ibu mbiraga wali agali heba mandagi napaliaga ka. <sup>9</sup> Áyu ibu egeanda ngaruhabi dindi tara ngarunaga lene mbirahayagibi puwa ha do ka. Áyu iname puwa wai bule pialu kamaria inanaga ami agali karu aria maru ibugua

bayagua wali agali bu karume hale howa lalu, Abasalomo aria biaru mo ko howa baya lolebiarua. <sup>10</sup> Ani biyagua inaga ami agali maru karume bi ogoni hale howa nde tigua gi timbuni holobada. Tigua hongo taraore howa wai bule laiono hagadagua hagayaguabi áyu gi holebira. Isaraele wali agali bibahendeme í aba ibu ami agali wai biaga haguane haluibunaga ami biaruni ti wai biaga pari wayali hayagoni manda biai ka.

<sup>11</sup> Áyu ina ogodagua bulene hameledo. Ina Isaraele dindi Dana howa olama pialu Beaseba anda pialu dindi uruni bibahendeha agali bu karu bibahendeore olomogo buwa agali dewaore ibamu ale daga labe nahe ala helolene nga. Ani ibu mogobu kagola bibahende tidu yalu waibu pole inime bamba howa agali mo yalu Debidi baba wai bule polene nga. <sup>12</sup> Ani puwa Debidi taya bima pialu kamaria mbirani lola hayaguaibunaga wali agali karu mo ko howa bamiya. Anidagua beremagola iba dalu mbiraga ibiraligobi ibalu agalime hapai habe nahe pialu Debidibiibunaga wali agali bu karubi bibahendeore bo wahai holeberemago ani bimiya.

<sup>13</sup> Ani beremagola ti tano mbiraha ibida anda piyagua Isaraeleali inanaga ami dewa karunime bu yalu puwa wai pabe hongohe kago pume hende howa dindi ulini ngagohayagi gialo yameremagola tano ogoni giala hole bialu mo ko hai hene wulebira. Ani beremagola tano ogoninaga ege pabe henedago aria emene gindu lenebi mbira ibira naholebiraore, lalu Husaihanda Abasalomo lamini.

<sup>14</sup> Husai ibugua bi ogoni lai hayagola Abasalomo halu Isaraeleali hearu bibahendeme lalu, Bi abale Ahidobele ibugua layago bagi hene lowa bi galone áyu Husaihanda laragoni, lalu hene. Anduane Homogoibunime Abasalomo bo wahole manda bu howa ti Husaihanda bi layago talialu bilo mo hongo hene. Ahidobele ibugua bi layago nde bayale degegyoyu Anduane Homogohanda tigua bi ogoni talialu bilo hame nalene.

*Debidi ibu Iba Yodana doma edeyagi penego ogo*

<sup>15</sup> Emene howa Husai ibugua Abasalomo haluibunaga agali haguane biaruhondo bi lamiyago ogodagua larima lalu loma binigo mo miaga Sadogo Abaiadala libu hearia lamule pene. Ani lamialu ibugua Ahidobele ibu bi lene biagobi nde libuhondo lamia dege bini. <sup>16</sup> Ani lamialu lalu, Bi ogoni mbiralime Debidi ibuni karia abale lama pu lalibu. Bi ogodagua lawia halibu. Kini-o áyu ogoni Iba Yodana doma deḡe biaga ngagoria napalibe. Tigua ibalu inibi inaga wali agali bibahendebi bo wahai holigo abale pobe laro, lalu lawia hene.

<sup>17</sup> Yonadana Ahimasala libu Yarusaleme tano tagirahayagi iba Enerogele peagoria hondo hene. Libu loma binigo mo miaga igini howa wali agalime libu tanoha anda porago hondolino ohowa ani ha do howa hene. Libu ani heagola biabe biahaga wandari mbirame tanoha ogoale bira lalu libu ohalu ibuwa mbirale bialu karunaga te lamiragola libugua Kini Debidi karia abale lamule polene wini. <sup>18</sup> Ani biaga henegoyu horo ogonongi igiri mbirame libu handa walia howa ibugua Abasalomo lamule pene. Ogonidagua biya handala igiri kirali biagolabo abale ibida pialu Bahurimi dindi agali mbira andaga heagoha pene. Anda mbira ogoniha anda piribidagoria iba biraga uli tombo wini mbira winiyagoha Yonadana Ahimasala libu ogoniha anda puwa bira do hene. <sup>19</sup> Libu anda puwa bira do heagola agali anda anduanedago one bereneyagome labolabo yalu ibalu iba uli biago bu yi hene. Ani buwa labolabo biagoria widi lini wiaru haeala payabu ngelene. Anidagua biagola agali ibirarume libu ogoniha bira do harualo manda bibe nahe hene.

<sup>20</sup> Mani howa Abasalomonaga agali maru libu talima ibiniru wali biago berearia ibuwa ibuhondo lalu, Yonadana Ahimasala agoha piyabe, lene.

Ani layagola wali biago ibugua ladai bialu lalu, Libu abale iba domade halu piya, lene. Ani laya handala agali biaru tigua Yonadana Ahimasala taya bialu hemiria handa walia nahole degeyagola wahalu Yarusaleme dai bini. <sup>21</sup> Ami agali biaru ti dai biyagola Yonadana Ahimasala iba biraga uli biagoha howa tagira ibalu Debidi hearia puabo



hene. Puwa libugua Debidihondo lamialu lalu, Í dindi ogoria habe naheorego ínibi ínaga wali agali bu karubi bibahende iba abale domade halu ederayagi piai hadaba, lene. Ani lowa libugua Ahidobelehanda Debidi mo ko halu bolene bi lalu heneyaru bibahende Debidi lamiai hene. <sup>22</sup> Debidi ibugua bi uruni hale howa ibunaga wali agali biaru haru halu Iba Yodana domade hene. Gao layagola agali mbiraorebi mbira yu wanahe bibahendeore iba domade halu mendehayagi pu hai hene.

<sup>23</sup> Ahidobele ibunaga bi layago Abasalomohanda talialu bia nabi mo wahayago hondowa ibuninaga nogo dongi heagoria biralu ibuninaga tanoha dai bini. Dai bialu ibunaga mbirale wiaru bibahende mo tigabu ngelai howa ibuni eanogo dalu homene. Homayagola ibu damenerume ibunaga tingini mo yalu puwa ibu aba hora hene homali wiagoha dege hora hene.✧

<sup>24</sup> Abasalomo halu ibunaga ami Isaraeleali biarume heyalu abale pialu Iba Yodana doma edeyagi peagola Debidi ibu ibunaga wali agali biaru heba ti pialu Mahanaimi tano abale anda pene. <sup>25</sup> Abasalomo ibugua agali Amasa ibu ami haru haga haguane henegoria Yoaba ho aribia howa ami haru helo dabo helene. Amasa ibu Isimaeleali Yade igini hene. Yade ibugua Nahasa wane Abigele berenego ogoni dabu bini. Abigele ibu hagibuni Nahasa wane mende Seruia berenego ogoni ibu igini Yoaba hene. <sup>26</sup> Abasalomo halu ibunaga Isaraele ami agali biaru ti Iba Yodana doma edeyagi piyagola howa ti Gileada anda puwa balai anda bu hene.

<sup>27</sup> Debidi ibu Mahanaimi anda pu heagola Amono dindi Laba tano wiagoha haga Nahasa igini Sobi ibubi Lodeba tano wiagoha howa Amiele igini Magiribi Gileada dindi Logelimi tanoha howa ibini Basilaibi ti tebirali uruni Debidi lola hole ibini. <sup>28-29</sup> Tigua todobene beru belediru dindime wabini wiarubi dagia paliaga wiarubi uruni Debidi halu ibunaga agali biaru ti mule yalu ibini. Ani bialu tomo maru widiru baliru balawaru widi irani hiriniru mule yalu ibini. Ani bialu paboro tara tara ale kiranagabi mone ibanebi bulumaga andu ibabi bulumaga andu ibame wabini mini sisibi yalu ibalu nogo sibirubi haru halu Debidi mule haru ibini. Tigua Debidi halu ibunaga wali agaliru hariga dindi ko lebolahe wali agali nahaga iba dalu naibaga wiagoha lu ibiyagola ti iba noa howa kembobe lebola halu tomo garime homabeheore howa hongo erebahai halu gamaea bu nga manda bialu ani bini. Tomo uruni nowa Debidi halu ibunaga wali agali ibuni heba piyadaruni hongoheore holobada manda buwa tomo uruni yalu íbu mini.

## 18

### *Abasalomo baba wai bialu Yoabahanda Abasalomo benego ogo*

<sup>1</sup> Debidihanda ibunaga ami agali hearu daosini mbira (1,000) naina tidiyu hela handari mbira (100) ona tidiyu hela bigi bialu tinaga haru haga agali haguane dabo helaga bini. <sup>2</sup> Dabo helalu ibugua agali hearuni wabuni timbuniore halu tebira tidiyu helene. Ani helowa ibugua ami agali tidi mbirago Yoaba ibugua haru helo helalu tidi mendego Yoaba hamene Abisai ibugua haru helo helalu tidi tebonego Gedeali Idai ibugua haru helo helene. Ani helowa Debidihanda ibunaga ami biaruhondo lamialu lalu, Inibi nde ina haru wai bimíya ma, lene.

<sup>3</sup> Ani layagola tigua ibuhondo lalu, Ani ndo ina baba nape í wahalu hondo habe. Ina wai bialu howa ibida piai harimayaguabi tigua ina maru bo wahayaguabi uruni mo dunubia naholebira. Uruni bame nagalone dege holebira. Anigo í ina haru mandagi wai pialu kamaria í bayagua nde tigua ami agali daosini pira (10,000) bene ale holebirago í wahalu tano ogoha hondo habe. Ani hondo howa inaha agali tubagi hayaguabi maru ale tubagi hayaguabi nde ina inahondo tubagi hara alego ina mo hongo helo ibilabe, lene.

✧ 17:23: 2 Sml 15.12, 2 Kin 20.1, Md 27.5

<sup>4</sup> Ani layagola kini ibugua ladai bialu lalu, Karulapedago tígua laramidagua bialu ina wahalu hondo kogo tí karulapego pudaba, lene.

Ani lalu Debidi ibu wai pabe timbuni tano bu mabu bini ege pabe heagonaga panga haraba wiagoria handa tagiho heagolaibunaga ami biaru wai bu pole tidi yalu tagira piyaru hondo hene. Ami uruni tini hayadagua pugu bialu daosini mbira (1,000) pialu handari mbira (100) pialu buwa tini henedagua pugu bini. <sup>5</sup> Ani pugu biyagola Debidihanda Yoaba Abisai Idai imaruhondo lamialu lalu, Tígua ini mitangi bialu igiri daliahe Abasalomo nde dara halimu, lene. Debidihandaibunaga ami agali haguane biaruhondo bi ogonidagua lamiyago ami agali hearu maru ti bibahende hale hene.

<sup>6</sup> Ani biyagola howa Debidinaga ami biarume Isaraeleali Abasalomonaga ami biaru baba wai bule puwa Eberaimi dindini irabu timbuni wiagoha wai bialu hene. <sup>7-8</sup> Tigua wai biaho wialu Debidinaga ami biarume Isaraele ami hearu dewaore bai hene. Wai bia timbu halu dindi hobane ogoni bibahendeha wai biame hene. Ami agali maru irabu timbuni wiagoha pu luluya halu homai hene. Anidagua biyagola agali maru waime bene homayaru emene degego irabuha pu luluya halu dewaore homene. Horo wai biyadagoningi ami agali daosini dege pira kira (20,000) homene.

<sup>9</sup> Abasalomo ibu pialu heagola ibugua Debidinaga ami agali maru biaru ibalu hearia hondowa tigua ibu babeheyagolaibunaga nogo dongini biralu gerai lalu ibida pole pene. Ani pialu hearia nogo dongi biagome ira mbira timbuni heneyago andaneha genge lalu pole pialu hearia Abasalomonaga mandari lu timbuni heago ira biagonaga magane gebaga biagoha hana hene. Ani hanaho wia handala nogo dongi biago ibu gerai lalu pu wahene.

<sup>10</sup> Debidinaga ami agali mbirame Abasalomo ani hana howa iraha do wiago hondowa ibu ami haru haga haguane Yoaba lamule pene. Ani puwa ibugua Yoabahondo lalu, Áyu ogoniore Abasalomo ibu ira timbuni heagonaga magane mbiraha hana howa do wiaria handalu eberogoni, lene.

<sup>11</sup> Ani layagola Yoaba ibugua ladai bialu lalu, Ina heneneore de handaribe. Ani hondowa agi bule ibu bo wanaharibe. Ina ibu homelo bo wakele nde ina muni kina handari mbira (100) ngialu nogo dongone mandibu bayaleore wai bialu wayali kagonaga mbira ngialu bidoleda, lene.

<sup>12</sup> Ani layagola agali biagome Yoabahondo lalu, Ina muni siliba daosini kina pira (10,000) inaga ngela kelesi ina kini iginihondo mbirale mbira nabidoleore. Ani larogoni irane kini ibugua ihondobi Abisai Idaila libuhondobi bi langiyagoni ina bibahendeme hale hai harimagoni ndobe. Ibugua ogodagua laya. Tígua i mitangi bialu igiri daliahe Abasalomo dara halimu, laya. <sup>13</sup> Anigo inaibunaga bi ogoni mo wahalu Abasalomo bedole nde kiniibunime te bibahende hale hai hagago ina ogonidagua biya lene hale howa kini ibugua i manani heledale. Ina nde ogoni hondowa i biamogo nabideledalo manda bido, lene.

<sup>14</sup> Ani layagola Yoabahanda lalu, Ina ila bi dewa labe mangabago waha, lene. Ani lalu Yoaba ibugua yandare lu tebira mo yalu Abasalomo do wiagoria puwa homa nabi dege winiyago yandare tebira yiarume Abasalomonaga gubalinini nogoba hene.

<sup>15</sup> Ani biyagola ami agali pitali Yoabanaga danda timu yandareru wai bilonaga yahaga heneyago uruni tigua ibalu Abasalomo lone ba dege bialu bo tongolo milene.

<sup>16</sup> Abasalomo homeagola Yoabahanda ami agali mbira heagohondo, Debidinaga ami wai bialu hayaru wahalu ibai helo biguli pula, lene. Ani pulayagola Debidinaga ami biaru ti hale halu Isaraele ami biaru talia nabi wahalu abale ibu ngoai hene. <sup>17</sup> Tigua Abasalomonaga tingini mo yalu puwa irabuha gundu uli timbuni mbira wiagoha bape hene. Ani buwa ege tole dewa dugualu gundu uli biagoha wua tolene. Ani bialu Isaraele ami biaru ti ibida purogo laya handala Debidinaga ami biaru ti tini andaga pugu pugu bini.

<sup>18</sup> Abale Abasalomo ibu homa nabi howa dindi tigabi bayale mbira mini Kininaga Dindi laga winigoria ege tole luni mbira ibuninaga mini mo wule dindi ogoriani mo hengene. Ani hongowa lalu, Isaraele wali agalirume ini mitangi biaabo holene go nde i igini mbira ini pani ho aribia holene nahonowi harudago, lene. Ani lowa Abasalomohanda ege tole ogoni ibuninaga mini Abasalomo wini. Ege tole ogoni wali agalime Abasalomonaga Ege Tole laga winigo áyu wiaabo ka.\*

*Debidihanda Abasalomo homayagonaga dara henego ogo*

<sup>19</sup> Mani Abasalomo homeagola Sadogo igini Ahimasahanda Yoabahondo lalu, Anduane Homogohanda Kini Debidi ibunaga waitigi biarunaga hongo bo podaya lalu bi galone bayale ogoni ibuni lamule porogo, lene.

<sup>20</sup> Ani layagola Yoabahanda lalu, O ndo áyu ogoni ina kini karia bi galone bayale lo yalu napoleberego waha. Mani mbirungi lama piriyaagua karulape. Ibu igini biagoore homayagodago áyu napole laro, lene.

<sup>21</sup> Ani lowa Sudanali mbira ona hearia Yoabahanda ibuhondo lalu, Áyu ogoni gerai lalu kini karia puwa mbirale bibahende ini handaridaruni kinihondo lamiai hole pu, lene. Ani laya handala Sudana agali biago ibugua bulu paluwa Yoabanaga mini yaraga halu kini lamule gerai lalu pene.

<sup>22</sup> Ani piyago pelowa Sadogo igini Ahimasahanda hongo howa Yoabahondo lalu, Harugo kini ibugua ihondo bua birago ale bilo ibi kini hale helo bi ogoni lamule Sudanali ogoni piyadagua poro, lene.

Ani layagola Yoabahanda lalu, Iginio aguanaga ina pole hame ledebe. Ina bi lamule poregonaga mbirale bayale ihondo mbira nangulebira ndobe, lene.

<sup>23</sup> Ahimasahanda ladai bialu lalu, Iha bulubadaruni waha i polebero, lene. Ani layagola Yoaba ibugua lalu, Aniyagua nde pu, lene. Pu laya handala Ahimasa ibugua gerai lalu Yodana ibahayagi yu dindi tigabi wiagoha pialu Sudanali biago naibi wiaore dege ibu ala anda pene.

<sup>24</sup> Horo ogoningi Debidi ibu tanonaga ege pabe biagonaga uba andatagi biaga panga haraba wiagoria handatagiho berene. Ani bereagola agali tano mamage haga mbira heagome ege pabe biagonaga nene wiagoria iraga howa handa amu halu hearia agali mbiraore hangu gerai lalu ibiyaria hendene. <sup>25</sup> Ani ibiyaria hondowa ibugua kini olowa lalu, Agali mbira ibuni hangu gerai lalu ibira, lene.

Ani layagola kini ibugua lalu. Agali mbiraoreli hangu ibiyagua ibu bi bayale galone yalu ibulebira, lene. Tano mamage haga biagome handalu hearia agali biago tanoha kaware dege ibiyane hendene.

<sup>26</sup> Agali mamage haga biago ibugua lone handa amu halu hearia agali mendebi gerai lalu ibiyaria hondowa pabe panga handayaho haga heagohondo lalu, Agali mendebi ibuni hangu dege maha gerai lalu ibira, lene. Ani layago hale howa kini ibugua lalu, Agali mendebi ibugua bi galone bayale dege yalu ibulebira, lene.

<sup>27</sup> Tano mamage haga biago ibugua lone lalu, Agali bamba halu ibirago Sadogo igini Ahimasahanda gerai lalu ibagadagua ibirago ogoni ibunibe be mendealibe tobaneda, lene. Ani layagola kini ibugua lalu, Ahimasa ibu agali bayaleorego ibugua bi galone bayale mbira yalu ibaruabe tobaneda, lene.

<sup>28</sup> Ani lalu heaore Ahimasa ibu kaware ibuwa kinihondo bi laamu halu lalu, Ina bayale holeberema, lene. Ani lalu ibuwa dindini bulu palialu kininaga mini yaraga hene. Ibugua lalu, Inaga agali haguane kini-o áyu ogoni Anduane Homogo inaga Ngode Datagaliwabehanda i baba hongo howa wai bule hayaruni inanaga giha minu

\* **18:18:** Ege tole áyu wiaabo ka layadagoni ina áyu kamangi manda bialu ndo abale agali mbuga ogo pigane gili biyangani manda bialu lene.

ya hayagonaga iname ibunaga mini yaraga hamiya. Ibugua ani biyagome ina wayali harima, lene.

<sup>29</sup> Ani layagola kini ibugua Ahimasahondo hale halu lalu, I igini Abasalomo ibuni karulape kabe be agua biyabe, lene. Ani hale hayagola Ahimasahanda ladai bialu lalu, Kini-o Yoabahanda agali inaga biabe biahaga amu ibirago iyame i keria bi ogoni yalu pu layadangi agali dewalime bi hongo howa pu dagadaga biayuago hale harugo agua bidabe tobara, lene.

<sup>30</sup> Ani layagola kini ibugua lalu, I amugoria habagi ha, layagola Ahimasa ibu habagiho hene. <sup>31</sup> Ani habagiho hayaore dege Sudanali biago ibu abaleore anda ibuwa ibugua kinihondo lalu, Inaga agali haguane kini-o ina bi bayale mbira langule yalu ibirugo i hale habe. Agali i bo batagi hole hongo halu hayaruni ai ayu dege Anduane Homogohanda i biamogo biyagola tigua i lone bo batagi holene henge nawulebira, lalu lamini.

<sup>32</sup> Bi ogoni lamiyagola kini ibu hale howa lalu, I igini Abasalomo ibu bayale kabe be agua biyabe, lene. Sudanali biagome ladai bialu lalu, Kini-o agali inaga waitigi hayaruni bibahende igiri ogonihondo biyadagua tihondobi ani biai kale nde ina karulapedale manda bido, lene.

<sup>33</sup> Bi ogoni hale howa kini ibunaga miniha genda timbuni howa pabe heagoha anda hobane mbira daligahayagi heagoha iraga halu puwa dugu bialu hene. Ibugua dugu timbuniore bialu howa lalu, I igini Abasalomo-o Abasalomo-o i homaridago wahalu ini homedole nde karulapedale. I igini Abasalomo-o i igini-o, laga bialu dugu timbuniore bialu hene.

## 19

### *Yoabahanda Debidihondo bi hongo howa lenego ogo*

<sup>1</sup> Agali marume Yoabahondo lalu, Debidi ibu igini Abasalomo dara howa dugu timbuni bialu ka, lalu lamini. <sup>2</sup> Ani lamiyago hale howa Debidinaga ami agali bu hearu bibahendeme tigua wai bialu wayali harimago bayale ndo birimadalo manda buwa tini turu nahe miniha genda haiho hene. <sup>3</sup> Ani howa ami agali biaru tanoha dai bialu howa tigua tinaga waitigirume ti mo ko howa baragola ibida purogo lenego andaga dai bialu taga hama dai biagadagua ti taga hama dai bini. <sup>4</sup> Odagoningi kini ibugua ibunaga de ngui bu yi howa dugu timbuni bialu, Ae i igini Abasalomo-o i igini-o, lalu dugu bia dege bialu hene.

<sup>5</sup> Ani dugu bialu heagola Yoaba ibugua kini andaga puwa ibuhondo lalu, Bi larogo hale harene. Inaga ami agali biarume horo ayu dege howa i timbuniore pelengidagola inime ti mo taga halu kegoni. Inibi i one waneiginirubi i one wabuni halu mende bedarubi ti bibahendeore homai kamile ndobe. <sup>6</sup> Anigo agali maru i handabe manga hagaru ina tihondo gubalini halu ihondo gubaliniho hagaru handabe manga haga kegonida. Mana ina bialu kegonime inaga ami agali bu karubi ami agali haguane bu kamarubi bibahende mo nagalone harida. Abasalomo ibu nahome halu ina bibahende homai heneyagua ogonime i mo turu kaledabe. <sup>7</sup> Ai hale habe. Ayu ogoni inime pialu inaga ami agali bu karunaga mini mo palia hole pu nabere. Ina Anduane Homogonaga minini howa heneneore larogo. Ina anidagua nabiriyagua ayu mbiraga i yu wahalu ibida piai haragola ini genda timbuniore yu holebere. Genda abale ini igiri emeneni howa yu hama ibalu genda yu haridaruni goyane lowa ayu genda timbuniore yu holebere, lene.

<sup>8</sup> Yoaba ibugua bi uruni lai heagola kini ibuni abale heyalu puwa tanonaga ege pabe panga haraba ubaanda tagi biaga wiagoria birule pene. Ami agali biaru ti kini tagira ibuwa tanonaga panga haraba biagoria beda layago hale halu ti ibuwa ibu heba mandagi hene.

### *Debidi ibu Yarusaleme dai binigo ogo*

Odagoningi dege Isaraele agali biaru ti ibida pugu pugu bialu tini andaga dai bigi bigi bialu purogo lene. <sup>9</sup> Dindi bibahendeha Isaraele wali agali hearu tini degedege lai lagalaga bialu hene. Ani lalu howa marume lalu, Kini Debidihanda ina biamogo biyagome Pilidialibi inanaga waitigi maru hearubi tigua ina bolene winigo mo wahene. Áyu ibuni Abasalomo handalu ibunaga dindi andaru yu wahalu ibida piyada. <sup>10</sup> Iname Abasalomo ibunaga hagianeni weli odo wialu inanaga kini helarimago ai waime bayagola homaya. Anigo agali marume Kini Debidi lone haru dai nabibehedabe, lene.

<sup>11</sup> Agali marume bi ogodagua laya lama Kini Debidi hearia lo yalu ibini. Ani layagola Debidi ibugua hale howa loma binigo mo miaga Sadogobi Abaiadabi libu haru puwa lalu, Libugua Yudali hagianeru karia inaga bi ogo yalu puwa ogodagua laya lalibu. I oali howa hale halu hewaria Isaraele wali agali hearume ogodagua layuane hale harugo ai Yuda wali agali tigua i abale dai bia labehegoyu dai bia nale hemigola Isaraele wali agali tigua ala latagi halu i ini andagani birule daibia lelo kamigo irane agibe. <sup>12</sup> Ina nde darama mbiraore yabuleneore harimagodago tigua lolenedagua mendeali kagome lelo kamigo agibe, lene. <sup>13</sup> Ani lowa Debidihanda loma binigo mo miaga agali kirali biago labohondo lalu, Amasahondo ogodagua lalibu. Iyaore darama mbiraore yabulene haribagonidago ina heneneore larogo. Yoaba ibu ami agali karu haru haga hayadagua ina ho aribia habelo heloliya laro. Henene ogonidagua nabiruyagua Ngode Datagaliwabe ibunime i bo wahelo laro laya lalu lamibe, lene.

<sup>14</sup> Debidinaga bi lama pudaba layagome Yudali hearunaga bu miniha kika hayagola tigua Debidihondo bi yalu dai bilo ogodagua ladai bini. Tigua lalu, Inibi i one waneiginirubi i damenerubi bibahende Yarusaleme dai bilimu larama, lalu lawia hene. <sup>15</sup> Ani layiyago hale howa Debidi ibu damene biaru heba ti Yarusaleme dai bule pialu Iba Yodana angeni pialu hene.

Yudaliru tigua Debidi halu ibu dameneru Iba Yodana domaragola lola hole lowa ti pialu Yodana iba kaware dege Giligala tanoni pu hene. <sup>16</sup> Ani pu howa Gera igini Simai ibu Beniyamini hameigini howa dindi emene Bahurimiali henego ibugua Yudaliru halu Kini Debidi lola hole abale ibini. <sup>17</sup> Ibu heba Beniyamini hameigini daosini mbira (1,000) tibi Solonaga biabe biahaga agali mbira Siba henego ibubi nde ibu igini nguira (15) henerubi ibunaga biabe biahaga agali pira kira (20) henerubi ti haru abale Kini Debidi ibu Iba Yodana heaore dege hondo pene. <sup>18</sup> Ani ibu howa tigua kini damenerubi kini one waneiginirubi bibahende ibani gi yalu haru doma ede halubi kini ibugua bidaba lalu hame layadaguabi biai halu hene.

### *Debidihanda Simaihondo bayale binigo ogo*

Kini ibu iba domalu ubaede hole pialu hearia agali mbira mini Simai henegome kininaga wanakuihayagi ibalu dindini bulu palu ibira hene. <sup>19</sup> Ani buwa Simaihanda kinihondo lalu, Inaga agali haguane timbuni-o i Yarusaleme wahalu tagira ibiringi ina ihondo mana bayale ndo birugonaga mo wiaho ha nabi ini dara halu o birudagoni mo embeda habe. Iha anidagua bini lalu miniha manda bu wiaabo nahabe. <sup>20</sup> Kini-o inaga biabe biahaga i kogo ina ko timbuniore birudane manda bialu wali agali hameigini i aria uyurayagi padarunaga agali mbiraoreali ina ala bamba halu inaga kini i ala lola hole ibirudagoni, lene.

<sup>21</sup> Ani layagola Seruia igini Abisaihanda ladaga halu lalu, Anduane Homogo ibunime kini helo mbirali dabalulu helene biagohondo bi ko lagayago agali ogoni ibuni homelo bolene ngago ai Simai ibugua ani biyagonaga ibuni homelo, lene.

☆ 19:16: 2 Sml 16.5-13



<sup>22</sup> Ani layagola Debidi ibugua Abisaibi ibu hamene Yoabahondobi lamialu lalu, Seruia igini-o mbirale uruni libunaga biabe ndogo libugua irane aginaga ĩla mo waitigi hara-bibe. Áyu ĩ hangu Isaraele wali agalinaga kini kogonigo agali ogoni ibu áyu mbiralime ela halu bolene nawi, lene. <sup>23</sup> Ani lowa ibugua Simaihondo lamialu lalu, Inaore bi larogonigo mbiralime ĩ homabelo bo wa naholebiraore laro, lene.

### *Debidihanda Mebibosedehondo bayale binigo ogo*

<sup>24</sup> Ogoningi dege Solo aguane Mebibosedede ibu Kini Debidi lola hole ibini. Mebibosedede ibugua Kini Debidi Yarusaleme wahalu tagira piyangi howa ibunaga gebi agabi way-awaya nabe haho wialu angaribi nami dege haho winiyago ai ibu Debidi lola hole ibini.✧

<sup>25</sup> Mebibosedede ibu Yarusaleme yu wahalu kini heagoria anda ibiyagola kini ibugua ibuhondo hale halu lalu, Mebibosedede-o iya haru ibida mba nalarigo aginaga biribe, lene.

<sup>26</sup> Ani layagola Mebibosedehanda ladai bialu lalu, Inaga agali haguane kini-o ĩnaga biabe biahaga kogo ĩ agali ge kohe harugoni ĩ manda bide. Horo ĩ tagira piringi ĩna ĩnaga biabe biahaga agali Siba heagohondo ĩbi ti poradagua kini heba poliya ĩnaga nogo dongini bialu polenaga mo manda manda bia habe larugo lelalu ibugua ĩ mo hondo halu piyiya. <sup>27</sup> Ani pialu ibu ĩ hearia ibuwa ke halu ĩnaga mini mo ko howa bi dewa langiyiya. Anigo ĩnaga agali haguane kini-o ĩ handalu koría ĩ Anduane Homogonaga dahuliyali ale kegoni. Anigo ĩhondo mbirale mbira bule hame lededagua biai habe.

<sup>28</sup> ĩna ĩ aba waneigini dameneru ina bibahende bai holene winigo ai ĩna ĩ dara howa ĩ andagaha tomo mandagi nabiyá ibu larigola nalu haruligoni. Ani biruligo manda bialu áyu ĩhondo lone mbirale mbira ngi lolene nawi manda bido, lene.

<sup>29</sup> Ani layagola kini ibugua ladai bialu lalu, Solonaga dindi andaru mbirale ngelalu homene paluniru Siba libu mo talebia holene manda bidogo ĩna bi mbira lolene nawigo waha, lene.

<sup>30</sup> Ani layagola Mebibosedehanda lalu, Mbirale uruni Siba ibu hai helo waha. Inaga kiniore homa nabi bayale halu dai biridagoninaga karulape ogoni, lene.

### *Debidihanda Basilaihonda kaj lenego ogo*

<sup>31</sup> Gileada dindiha howa agali mbira mini Basilai henego ibu Logelimi tano howa dalipe halu kini Iba Yodana domade hayagola ibu kini heba mandagi iba domade hole ibini.✧ <sup>32</sup> Basilai ogoni ibu agali bambaore hene ibunaga mali pira halira (80) heneyago ibini. Agali ogoni ibu mbirale dewawi howa muniru dewawi halu Kini Debidi ibida puwa Mahanaimi pu heagola ibugua Debidi halu ibunaga damene piyaru ti tomo dewaore nelo mialu ti baya hangu handayaho hene. <sup>33</sup> Basilai ogoni ibiyagola hondowa kini ibugua ibuhondo lalu, Ina ĩ baya hangu handayaho holiya Yarusaleme ina haru ma, lene.

<sup>34</sup> Ani layagola Basilaihanda ladai bialu lalu, Kini-o ĩ mali lu halu homole ndodago ina haru mandagi Yarusaleme hama polene nakarulapedago wahalu waharo. <sup>35</sup> Bi larogo hale habe. ĩ hama ibinigo mali áyu pira halira (80) kogonigo ani howa ai ĩna mbirale ngaru kobi bayalebi lalu mbira minime tale bibe nahe ko. Tomo ibabi bayale ngaru nalu howabi nde dendevida magubida lalubi dababe nahe dege ko. Wali agalirume iba gana lalu karu bayale larabe be ko larabe baya hangu hale holene hale tuluhe ko. Ainde ogonibigome ĩnaga agali haguane kini-o ĩna ĩ erekuibi mo ngule agi bule mbaliyadabe.

<sup>36</sup> Kini-o irane agonaga ĩna ĩhondo mana bayale urunidagua buleberebe. Ani nabibe. Iyane haru Iba Yodana domalu emeneore tigimandi hangu pialu nde ti porami handala ĩ andaga dai bulebero. <sup>37</sup> Ani buwa ĩni andaga dai bialu emene hangu howa homalu nde ĩninaga homali ĩ aba mamaru hora hene ngagoha mandagi hora helo dai buliya waha.

✧ 19:24: 2 Sml 9.1-13, 16.1-4 ✧ 19:31: 2 Sml 17.27-29

I igini Kimihama o kago ibu dege inaga agali haguane kini íla hole pilibulo laro. Ína ibu biamogo bule hame lederu bibahende biai habe, lene.

<sup>38</sup> Ani layagola kini ibugua ibuhondo ladai bialu lalu, Bayale larigo Kimihama ibu ina haru puwa ína ibuhondo buliya hame lederu bibahende biai holiya. Ina ínihondo buliya hame lederubi biai holebero, lene.

<sup>39</sup> Uruni lai howa Debidibi wali agali biarubi bibahende Iba Yodana doma ede hai hene. Ani buwa Debidi ibu Basilai nunu lalu ibu mo bayale helonaga bi la halu biya handala Basilai ibu ibuni andaga dai bini.

### *Yudali Isaraelealila bi wai binigo ogo*

<sup>40</sup> Kini Debidi ibu Yudali bibahendebi Isaraeleali marubi ti haru Iba Yodana domalu pialu agali Kimihama mbira henegobi ti heba puwa Giligala dindi pene. <sup>41</sup> Debidi ibu Giligala dindi anda pu heagola Isaraeleali bibahende ibu hearia ibuwa tigua ibuhondo lalu, Agali haguane-o irane aginaga ina hamene Yuda tigua kini haru eberema lalu ina nde hale holomaya langia nabi ohowa íbi í one waneiginirubi inaga ami agalirubi haru halu abale Iba Yodana domalu ibiyabe, lalu hale hene.

<sup>42</sup> Ani hale hayagola Yudali hearume ladai bialu lalu, Kini ibu ina Yudali kago manda bialu iname henemane haru ibirimago ai tí inahondo irane agome tandaga halu kamibe. Ani birinagola kini ibugua inanaga tomo yolo bialubi mbirale marubi mbira inahondo ngia nabi ka, lene.

<sup>43</sup> Ani layagola Isaraeleali biarume lalu, Agali mbira kini hayagua nde ogoni ibu ina dindinaga ka. Ina Isaraele hameigini pira dindi mbiraoreha kamagola tí Yuda mbiraore hangu kamigoni. Heneneore Debidi ibu Yudalime kini kagoyu ibu ina bibahendenaga kini ka. Ina Isaraele hameigini pira howa ina wali agali dewaore bolanguahe kamago ai irane aginaga tigua ina Isaraele hameigini mo nagalone harimibe. Kini ibu dai bilonaga te ala ina Isaraeleali kamagome lene manda bulene nga, lalu hene.

Ani layago lalu helowa Yudali biarume hongooore howa Isaraeleali biaru bime bo hangedalu hene.

## 20

### *Sebahanda Kini Debidi bope hole manda binigo ogo*

<sup>1</sup> Horo ogoninaga Isaraele dindiha agali ko mbira mini Seba hene. Ibu Beniyamini hameigini howa agali Bigiri henego igini hene. Seba ibugua pilipe ale biguli pu lalu hongo howa galalu ogodagua lalu, Debidi ogoni nahelo waha. Ina Debidi talima napole kama. Ina agali Yasi igini Debidi ibu aria ndo kama. Ina Isaraele wali agali kamaruni Debidi ogoni wahalu inane daluha dai bima, lene.✧

<sup>2</sup> Ani layago hale halu Isaraele wali agali tigua Debidi yu wahalu Bigiri igini Seba talima pialu tini daluha dai bini. Ani piya handala Yudaliru tini Debidi andaneha howa tigua Debidi ibiyadagua talima ibalu Yodana angeha howa hariga wiadagua ibalu Yarusaleme anda ibini.

<sup>3</sup> Ti Yarusaleme tano anda ibalu Debidi ibu ibuni kini andaga biagoha anda pialu ibu one pira wabuni mende berene biaru ti kini andaga mamage berelalu piyaru haru dai buwa anda mbiraha berelowa agali marume ti mamage helo helene. Ani bialu ti tomo nelu mialu mamage helo helowa kini ibuni wali uruni baba abale paliaga winidagua napale ti bame ani biralu homelo berelene. Ani bereleagola ti agalini homene wali dalo biragadagua berene.✧

<sup>4</sup> Mani kini ibugua Amasahondo lamialu lalu, Ína puwa Yudali bibahende olo mogo bialu yawi lumayaguabi íbi ti heba í koría ibule lamule pobe, lene. <sup>5</sup> Ani laya handala Amasa ibugua pialu agali olo mogo buwa horo ibabe layangi dai nabi hene.

<sup>6</sup> Amasa ibu abale dai nabiyagola kini ibugua Abisaihondo lalu, Abasalomohanda ina genda timbuni mo ngiyago goyane lowa Bigiri igini Sebahanda ina genda tara timbuniore mo ngulubadago. Ina inaga ami agali bu karuni haru halu puwa minu yania halimu. Ibunaga agali haru hayadago haru halu puwa tano pabe hongohe kagoha hayagua iname ibu minabe nahe holebirago abale minule pudaba, lene. <sup>7</sup> Ani laya handala Abisai ibugua Yoabanaga ami agali hearubi ami maru kini ibu mamage haga Kerediali Pelediali hearubi ami agali maru wai hongo howa biaga hearubi bibahende Yarusaleme tano yu wahalu Seba minule taya bima pole pene.

<sup>8</sup> Tigua pialu Gibeononi ege tole timbuni wiagoria tagira pialu hemigola Amasa ibalu hearia lola hene. Yoaba ibu wai bule aga karulaga wiago karulo howa wai biaga ayu tibu nogo dongone mandibuha dahene. Ayu tibu ogoni andaneha yuwa mandibuha dahenego Yoaba ibu Amasa lola hole uba amu hayagola ayu tibu biago golowa ibira hene.

<sup>9</sup> Ani biyagola Yoaba ibugua Amasahondo lalu, Hamene-o í karulape kebe, lene. Ani lowa ibugua Amasa nunu lole biatingi howa angarini gi tigame yania hene. <sup>10</sup> Ani yania howa Yoaba ibugua ayu tibu nene gadele tubagi mbira gi lehayagi yiago Amasa ibu nahende hene. Ani heagola Yoabahanda Amasanaga tombeneni nogoba hayagola Amasanaga tini dindini haeala paya bialu ogoningiore halu mende nogoba naheaore abale tongolo mini. Tongolo miyago hondowa Yoababi ibu hamene Abisaibi libugua Bigiri igini Seba taya bima pole piyagoha pene.

<sup>11</sup> Ani piyagola Yoabanaga ami agali mbiragome Amasa tingini harigani ibiraho wiagoria howa ibugua bi ladaga halu lalu, Agali Yoaba Debidilahondo turuho kamiru ti Yoaba poradagua pudaba, lene. <sup>12</sup> Anigo daramame Amasanaga tingini gobahego harigani wiaabo hene. Ani wiagola ami agali maha ibiyaru ti ogoni handalu ogoriani hondo hene. Ani hondo heago hondowa Yoabanaga ami agali biagome Amasa tingini harigani wiago gililo yalu pubagi howa tani heagoria wialu agame bu dambi ho ngelene. <sup>13</sup> Amasanaga tingini harigani howa mo bagi heagola ami agali bibahende biaru ti Yoaba piyadagua talima pialu Bigiri igini Seba taya bima pole pene.

<sup>14</sup> Seba ibu nde Isaraele hameigini dindi wiaruha piai halu Abele Bedemaga tano kaware ngelowa dindi lene wiagohayagi anda pene. Ani piyagola Beri hameigini hearume ibu piyadagua ti haruru pialu tanoha anda pene. <sup>15</sup> Ti anda pu heagola Yoaba halu ibunaga ami agali hearu ti hale halu hearia Seba ibu tano ogoniha ka layane hale hene. Ani ka layago hale howa tigua tano ogoni ho hagira bialu tanonaga ege pabe heago iraga holenaga dindi dugu hanama iraga hene. Ani bialu marume ege pabe heago podo ibira helonaga dindiha tombe lalu hene. <sup>16</sup> Ani bialu heagola wali mini bayalewi mbira tano ogoniha bereneyagome ege pabe biagoria handapeho howa lalu, Uru-o hale hadaba laro. Ina Yoabahondo bi mbira lamuleberogo ibu ogoria ibilo lamidaba, lene.

<sup>17</sup> Ani layagola Yoaba ibu wali biago heagoria kaware pu heagola wali biagome lalu, í Yoababe, lene. Ani layagola Yoabahanda ladai bialu, E í Yoaba kogoni, layagola wali biagome Yoabahondo lalu, Agali haguane-o ina bi lole yidoru loleberogo baya hangu hale habe, lene. Ani layagola Yoaba ibugua lalu, Karulape. Inaga bi uruni ina hale holiya la, lene.

<sup>18</sup> Ani layagola wali biagome Yoabahondo lamialu lalu, Bamba bi mbira laganego ogo lalu, í mini tumutumu ho keyagua Abele tano ngagoha pobe, laga. Ani laragola pialu karia wali agali Abele tanoha bu karume tinaga mini mo wala halu mo tiga bia haga. <sup>19</sup> Ai bi larogo hale habe. Inanaga tano ogo Isaraele dindiha tano mini lene mbira wiyagoni nga. Inanaga tano ogoha keba ha wai bia gungu biaru mbira nabiagaore tano mini lene bayale mbira o ngamagoni. Iname inanaga kini kago hangu talima piaga henego kama. Ani hene kamagoyu ayu ina inanaga tano bo gialo wahole bialu kegoni. Mbirale Anduane Homogo ibunaga ngago irane aginaga bo gialo waharebe, lene.

<sup>20</sup> Ani layagola Yoaba ibugua ladai bialu lalu, Ina tano ogo bo gialo bagabu waholene hame nale ko. <sup>21</sup> Anigo iname agali mbiraoreli hangu Bigiri igini Seba hangu taya berema. Ibu Eberaimi hameigini dindiha amu hari bare wiagoha howa ibini kago. Agali ogoni ibugua agali maru hearume Kini Debidi bo wahelo ndelalu hayiyago ai Seba ogoni minu ngilimulo hame ledama. Ani minu ngeremigola iname t́naga tano ngelo wahalu poleberema, lene.

Ani layagola wali biagome lalu, Heneneore buleberemago larogo hale habe. Iname agali ogoni balu ibunaga haguane tano pabeha howa batagi haramagola t́ hondoleberemi, lene. <sup>22</sup> Anidagua lalu wali biago tanoha puwa ibugua wali agali tanoha bu hearuhondo ibunaga mini wiago tihondo lamiai hene. Ani lamiai hayagola tigua ibunaga mini wiago talialu Seba bole pene. Balu tigua Sebanaga haguane pugu yalu ibuwa Yoaba halu ibunaga ami agaliru bu hearia batagi hene. Anidagua biya handala Yoaba ibugua pilipe biguli pu layagola ami agali biaru ti tano ogoni wahalu tini dalu dai bini. Yoaba ibu nde Kini Debidi hearia Yarusaleme dai bini.

*Debidi ibunaga agali haguane helenedarume biabe bialu henego ogo*

<sup>23</sup> Isaraelenaga ami agaliru handame howa haru haga haguane Yoaba ibu hene. Yahoiaida igini Benaia ibugua ami agali kini ibuni mamage haga Kerediali Pelediali biaru haru haga hene. <sup>24</sup> Adonirama ibugua agali maru kini ibunime ibunaga biabe bia helo dabo helaga birago haru haga hene. Ahiludu igini Yahosabada ibugua mbirale bibahendeore Debidihanda birago damene gilibu wiai haga hene. <sup>25</sup> Ani bialu Seheba ibu kininaga beba gili bia dagala biaga hene. Sadogola Abaiadala libu loma binigo mo miaga agali hene. <sup>26</sup> Ani bialu Yairi hameigini agali mbira mini Ira henego ibubi nde Debidinaga loma binigo mo miaga helo dabo helalu bini.

## 21

*Gibeonoalirume Kini Solohanda tihondo ko biyagonaga pani biadai binigo ogo*

<sup>1</sup> Debidi ibu kini heangi gaea timbuni biyagola Isaraele wali agalibi Yuda wali agalibi ti mali tebirani tomo garilo hene. Ani biyagola irane aginaga tomo gari ogoni tagira porabe lalu Debidi ibugua Anduane Homogohondo hale hene. Hale hayagola Anduane Homogo ibugua ladai bialu lalu, Tomo gari timbuni o poragoni irane bamba Kini Solohanda Gibeono wali agali bo wahayagonaga pani áyu ibu waneigini bu karume nalu kagoni ndobe, lene. <sup>2</sup> Ani layago hale howa Debidihanda, Gibeono wali agali olalu ibidaba, lene. Gibeono wali agali uruni ti Isaraele wali agali ndo ti Amono wali agali hene. Amono wali agali maru ereba hai halu yu wahene emene uruni ti hangu hene. Bamba Isaraele wali agali tigua Amono wali agalihondo, T́ mo ko naholeore, lalu habo nalolene bi hongoheore lowini. Ani lowini wiago mo wahalu Solohanda Gibeono dindiha Isaraele wali agali Yuda wali agaliru hangu hai helo lowa ibugua Gibeono wali agali bibahende bo mburi lai hole biyagola emene mbira ti hangu yo pialu pene. <sup>3</sup> Gibeono wali agali olayagola uruni ti Kini Debidi berearia ibiyagola ibugua tihondo lamialu lalu, Ina Anduane Homogo ibunaga wali agali bu kamaru biamogo bilo t́gua ibuhondo inanaga bi la halimulo áyu iname mana ko mbira t́hondo bini ngago mo tiga buleberema. Ani buleberemago ai iname mana ko birimadago mo tiga bialu agileore bulumaya hamelo kamibe, lene. <sup>4</sup> Ani layagola Gibeonoali biarume Debidihondo ladai bialu lalu, Ina muni ngolo silibaru inahondo ngia ngiriyaguabi urunime Solobi ibu damene bu karubi ti baba ina baba genda wu kamaruni mo ereba naholebira. Iname t́hondo Isaraele wali agali bu karu aria maru homelo bo wahabi naloleberema, lene. Ani layagola Debidihanda lalu, Aniyagua nde ina t́hondo agile buliya hamelo kamibe, lene.

<sup>5</sup> Ani hale hayagola tigua ibuhondo lalu, Bamba Solohanda ina aria lenego mbira Isaraele dindini naholomaya bibahendeore bo wahai holene hamelo hene. <sup>6</sup> Ibugua

ani binigo manda bialu ina ibu igini aguaneru aria kariali ina ngibelo hamelo kama. Ani ngeregola iname Gibeata tano haru poleberema. Gibeata tano haru poledagoni irane agali kini helo Anduane Homogohanda Gibeali Solo dabo helene manda bialu ani haru poleberema. Ani haru pialu tano ogoriani Anduane Homogo ibuninaga deni agali uruni homelo irani bo derela holeberema, lene.

Ani layagola Debidihanda lalu, Karulapego ina agali kariali uruni ti nguliya, lene.

<sup>7</sup> Anduane Homogonaga minini howa Debidi ibugua Solo igini Yonadanala habo nalolene bi mbira lowinigo ogoni lone mitangi bu dai bini. Ani mitangi bialu ibugua Solo aguane Yonadana igini Mebibosede ibu Gibeonoali biaru minu mia nabi wahene.

<sup>8</sup> Ibugua Solo igini Amonila Mebibosede mendela libu Aia wane Lisibahanda taba henene henego minu mialu bini. Lisiba ogoni ibu Solo one wali wabuni halu mende berearu aria berene. Solo wane mini Meraba mbira berenego ibu igini duria henego minu mialu bini. Meraba ibu Meholali Basilai mbira henego igini Adarielela pu biruwa igiri duria uruni hono winigo minu mini.<sup>\*</sup> <sup>9</sup> Debidihanda agali karia uruni Gibeonoali biaru minu miya handala tigua agali uruni haru halu puwa hari nene wiagoria Anduane Homogonaga deni howa agali biaruni ira dibu hongowa bo derela hayagola bibahendeore homai hene. O biyadagoni mabuha bali lini boga biyagola wali agali hearume lini do wulenengi hayagola ani bini.

<sup>10</sup> Ainde agali homayadaruni aria igini kiraligo aiya mini Lisiba berenego ibugua aga labolabo ko haragaya wiaru mo yalu agali bo derela hene hari nene biagoha irigi halu pene. Puwa ibugua aga ko biarunime pingi pongo buwa balai anda emene mbira ege tole wiagoria bia howa ibuni ogoniha berene. Ani bialu ibuni agali bo derela heago mamage biraabo heane ege dewa dege peagola iba dalu ibalu agali kariali bo derela hayarunaga kuni wiago damini. Lisiba ibugua agali kuni uruni ega biango nogo gabuarume nolino mbiraga horombebi mamage baya hangu haabo haga hene.

<sup>11</sup> Mani howa Aia wane Lisiba ibu mamage ani beda layago hale howa <sup>12</sup> Debidi ibu Yabese tano wali agaliru Gileada dindini bu hearia puwa Solonaga kunibi Solo igini Yonadanana kunibi mo pene. Abale ogolabo Pilidialirume Hari Giliboa wiagoha bo wahalu libunaga tingini Bedesana tano wiagoha mo yalu puwa wali agali mo ngoai haga hama wiagoria mo paga ho ngelene. Ani wiagola Yabeseali marume Bedesana tano puwa ogolabonaga kuni mo page yalu pene.

<sup>13</sup> Ani bini winigo ai Debidihanda agali biabe biaga hearuhondo lalu, Libunaga kunibi mo yu pialu agali kariali Gibeonoalirume bo derela hayarunaga kunibi mo yu pu dege bilimu. <sup>14</sup> Ani bialu Beniyamini hameigini daluha Sela tano ngagoria Solo aba Kisinaga homali kagoha Solo Yonadanalanaga kunibi ogoniha hora halimu, lene. Agali biaru tigua puwa Debidihanda bilimu lalu lamiyadagua biai hene. Ani biai howa tigua Ngode Datagaliwabhondo tinaga dindi mo bayaleha lalu bi layagola Ngode Datagaliwabe ibugua tinaga bi hale halu biamogo bialu hene.

*Isaraealime Pilidiali lu timbuni hearu baba wai binigo ogo*

<sup>15</sup> Mani Pilidiali Isaraealila wai lone bialu howa Debidi halu ibunaga ami agaliru Pilidialiru baba wai bule tidiyu pene. Ti wai bialu ha dege binigo Debidi ibu tingini hongo ereba halu gamaea biyagola wai bibe nahe hene. <sup>16</sup> Ani biyagola Pilidiali lu timbuni mbira mini Isibibenobo henegome Debidi bole ibini. Isibibenobo ogoni ibu Pilidiali agali lu timbuni dege dege hayadaruni aria mbirago ibu hene. Ibugua yandare yiagonaga dene boronosime wabini. Boronosi ogoninaga genda magi kilogarama tebira howa bolanguahe yu hene. Ani buwa Isibibenobo ibunaga wai biaga ayu tibu gahengeore andane ho yu hene. <sup>17</sup> Anigo Seruia igini Abisai ibugua agali ogoni ibiyago handalu Debidi mo wule ibini. Ani ibuwa Abisai ibugua Pilidiali timbuni ogonila wai bialu bo homelene. Ani biyagola Debidinaga ami agali biarume ibuwa Debidihondo

<sup>\*</sup> 21:8: 1 Sml 18.19



hongo howa lalu, Ina wai bule poramagoha í lone naibabe. Í ina Isaraele wali agalinaga wá hagane hale ale kego ai í bayagua inanaga hale ogoni mo hundia haradagua bulubadago naibabe, lene.✠

<sup>18</sup> Mani Isaraeleali tigua Pilidialiru baba wai lone bini. Horo ogoningi dindi mbira mini Gobo wiagoria wai bialu hene. Ani bialu howa ogoningi Isaraele dindi mbira Husa wiagoha howa ibini agali mbira mini Sibegai henegome Pilidiali agali timbuni biaru aria mbira mini Saba heago bene.

<sup>19</sup> Halu mendengi Isaraelealiru tigua Pilidialiru baba Gobo dindini wai bialu hene. Ani bialu howa Bedelehemeali Yairi igini Elehanana ibugua Pilidia ami agali mbira Gede tanoali mini Golaidi heago balu homelene. Golaidi ibunaga yandare endene timbuniore kuluba ale mbira yu henego agali ogoni bene.\*

<sup>20</sup> Gede tanoaha dege wai mendebi bialu hene. Horo ogoningi agali timbuni gibi mbira luoreni ibunaga gi hondone waragaria labolabo halu ge hondonebi waragaria degehe hene. Gi hondonebi ge hondonebi lamaga halu pira kirani mariahe (24) hene.

<sup>21</sup> Agali ogoni ibugua Isaraele wali agali mege bialu heagola Debidi hamene Sama igini Yonadanahanda agali ogoni balu homelene.

<sup>22</sup> Agali timbuni mariali uruni Pilidiali Gede dindiha abale bamba heneru aria hearia Debidi halu ibunaga agali uruni tigua bo wahene.

## 22

### *Debidi ibu Anduane Homogohanda biamogo biyagonaga iba gana lenego ogo*

#### *(Iba Gana 18)*

<sup>1</sup> Debidi ibu Solohanda bo waholene wiyangibi ibunaga waitigi maru hearume bo waholene wiyangibi Anduane Homogohanda mo wahaga biyagonaga turu howa ibugua Anduane Homogohondo iba gana ogodagua lene.

<sup>2</sup> Anduane Homogo ibuni inaga wai pabe hongheore kagoni.

Ibu ege tole ale howa i ho gehalu  
waitigirunaga giha howa i mo wiaga ka.

<sup>3</sup> Inaga Ngode Datagaliwabe ibu inaga ha do haga.

Ibu hari nene ngaligobi kagoaha i pialu ibuha ha do haruli.  
Anduane Homogo ibu inaga humbi howa i hapai haga ka.

Ibugua i mo wialu handayaho holene hongo karulapeore kagoni.

Ibu inaga wai pabebi inaga ha do andabi ibuni hangu ka.

Inaga waitigirume i minalu bolebiragola  
i biamogo bialu mo wiaga ibuniore kagoni.

<sup>4</sup> Anduane Homogonaga mini yaraga hamiya.

Ina ibu olalu haruli.

Ibugua hale halu i biamogo bialu  
inaga waitigirunaga giha howa i mo wiaga kagonaga  
iname ibunaga mini yaraga holene nga.

<sup>5</sup> Iba solowarame yaribu timbuni tanguialu titala amu nana biagadagua bialu✠  
homolene pume dariba haradagua i dariba hayagoni.

<sup>6</sup> Homolene dameneme i mabu bupe howa pume dariba haradagua biyagoni.  
Homalime i minule mandabu hayagoni.

<sup>7</sup> Inaga miniha genda ho howa Anduane Homogo olalu harugoni.  
Inaga Ngode Datagaliwabehondo i biamogo bia lalu harugoni.

Ibuni andaga howa inaga bi hale haya.  
Ibuhondo i biamogo bia larugo hale hayagoni.

✠ 21:17: 1 Kin 11.36, Iba 132.17 \* 21:19: 1 Bi Te 20.5 de handabe. ✠ 22:5: Yna 2.5-7

- 8 Ngode Datagaliwabe ibugua keba timbuni howa  
dindi mo dumbirumbi bilaya.  
Dindi hari timbuni wearu mo ema bia hayagola ema bia gimbu biya.
- 9 Anduane Homogonaga ngui harigaha howa ira hagua tagira ibalu  
ne harigaha howa ira hungu datagitagi biyagome  
mbirale wiaru bibahende do mundu laya.
- 10 Ibugua hari daliga buda edene bialu daliape haya.  
Daliape hayagola hari beraliba mindibi ibu ge ha hai haya.
- 11 Ibunaga dahuliyali mbiranaga erekunini biralu yagalalu dalipe haya.  
Puyabu ega babagane aleheme ibu yalu abaleore daliape haya.
- 12 Aruma holeneme ibu dambi hai haya.  
Hari beraliba mindibigome ibuni ho ge hayagoni.
- 13 Ibuha howa wá timbuni wá hatagi halu  
hari daba ira hungu dalu heaore ba tagitagi biya.
- 14 Anduane Homogo ibuni hari daligaha howa bi hongo howa hari kilikulu laradagua  
biayua.  
Ngode Datagaliwabe Hongo Haiheore kagome bi layuago hale hene.
- 15 Ibugua ibunaga timu edalu ba amunana biyagome waitigi purogo laya.  
Hari dabame bayagola ti ibida bilibulu piai haya.
- 16 Anduane Homogohanda ibunaga waitigi hearuhondo keba hayagome  
puyabu hongohe ale howa ti puloyu purogo laradagua biya.  
Iba solowara timbuni bereago hundiai hayagola  
dindi andaneha gene wiyago bame ha pana ho haya.
- 17 Anduane Homogo ibu daligaha howa gi yupe halu i minu yania haya.  
Iba solowara timbuni bereagome i dambi hearia ibugua i gini miya.
- 18 Inaga waitigi hongoheore hearunaga giha hewaria ibugua ibuninaga gime i mo wiya.  
Agali marume i handabe manga ho hearu ina ti bo podabe nahe hewariabi  
ibugua i mo wialu haru dai biya.
- 19 Bamba iha genda ngelo hewangi tigua ila wai bule ibiya.  
Ani ibiyagoyu Anduane Homogohanda i handayaho haabo hayagoni.
- 20 I homolene wiagoha kaware hewaria ibugua i biamogo biya.  
Ibugua i gubaliniore ho kagome i gini minigo ko.
- 21 Ina mana bayale tigabi wiaru talialu bialu hewago hondowa  
Anduane Homogohanda ihondo bayaleore biaga.  
Ina mana ko mbira nabi hewago hondowa ibugua ihondo mana bayale biaabo haga ka.
- 22 Anduane Homogonaga mana tigabi ngaru ina taluwa bialu harugoni.  
Ina inaga Ngode Datagaliwabe erembira mialu mana ko wiaru nabi harugoni.
- 23 Ibunaga bi mana lo ngaru ina baya hangu talialu bialu haru.  
Ibugua bia layadagua ina mo wa nahe biaabo haruli.
- 24 Ina ibu deni howa ko mbira nabiorego ibu manda bu ka.  
Ina mana ko mbira buli lowa ini ibagabu harugoha mamage haluore haruli.
- 25 Ibugua ina mana bayale tigabi wiaru talialu bialu hewago hondowa  
ina mana ko mbira nabi hewago hondowabi  
Anduane Homogohanda ihondo bayaleore biaga.
- 26 Anduane Homogo-o mbiralime i wahalu nape talima ibalu heagua  
inabi nde ogoni ibu yu wahalu napiaga ke.  
Mbiralime ko mbira nabiaga howa ibuha ko nawi heagua nde

- ínabi ogoni ibuhondo mana bayale biadai biaga kegoni.  
 27 Mbiralime mana tigabi dege biaga heagua  
 ínabi nde ogoni ibuhondo mana tigabi dege biadai biaga ke.  
 Anigo mbiralime mana ko biaabo haga heagua ína ibuhondo handabe manga haga kegoni.
- 28 Wali agali tini mo dindiha haga karu  
 ína ti biamogo bialu haru dai biaga ke.  
 Wali agali maru tini mo dunini howa mine haga karu  
 ína ti mo dindiha haga kegoni.
- 29 Anduane Homogo ínaga wá hagane haleore í kegoni.  
 Í arumaha kogola ína aruma holene mo wahaga kegoni.
- 30 Ína waitigi bu karu bope halu wayali holiya ína í hongo ngiaga ke.  
 Ína waitiginaga tano ngaruha ege pabe hongohe timbuni karu pogola anda poliya  
 ína í hongo timbuniore ngiaga kegoni.
- 31 Ngode Datagaliwabe ogoniibunaga mana baya buruguleore biai haga ka.  
 Ibugua bi laragobi heneneore dege laga ka.  
 Ibunime wali agali waitigi handalu ibida porarunaga humbi kago  
 ti bibahende ibuha ha ge hai haga ka.
- 32 Anduane Homogo ibuni hangu Ngode Datagaliwabeore kagoni.  
 Inanaga ha do holene anda ege tole ale hongohe Ngode Datagaliwabe ibuni  
 hanguore ka.
- 33 Ibugua ínaga ha do anda hongoheore kagonigo  
 í ibaga bu koria ibugua hariga bayale mo tiga biaga ka.
- 34 Ibugua í nogo gabua mini dia ibagabu poralidagua pialu holiya í handayaho haga ka.✠  
 Hari nene ngaruha pialu koria ibugua handayaho kagome í pi nalaga ko.
- 35 Ibugua í wai bulene biawai haragome  
 danda boronosime wabini hongoheore hibuhe ngago  
 ína edalu babehe kogoni.
- 36 Anduane Homogo-o ínaga waitigi hearunaga giha hewaria  
 ínaga humbi ihondo ngirigola í wayali harugoni.  
 Ína í biamogo birigome í wali agali karunaga deni agali mini leneore kogoni.
- 37 Ína hariga bayale mo wirigome  
 í porogoha ínaga ge gondo lalu pi nale bayale kogoni.
- 38 Ína waitigi hearu talima pialu minu yania hai haruli.  
 Ína ti talima pugu pugu bialu ti baiore hole wahalu dai nabi haruligoni.
- 39 Ína ti bogaiore hewagola homo ibira hai haga.  
 Ibira halu ínaga geha wiai howa lone heyabe nahe wiaga.
- 40 Ína waitigi baba wai buliya ínime hongo ngirigoni.  
 Ína í biamogo birigome ínaga waitigi hearu ína ti bo podahana hai harugoni.
- 41 Í waitigi biaru í handalu ibida purogo lelo ína mo bia hari.  
 Ína í handabe manga haga hayaru bo wahai harugoni.
- 42 Uruni ti mbiralime pele milo agali maru taya biyagoyu ti biamogo bulene mbira  
 handa walia naheya.  
 Tigua ti biamogo bilo Anduane Homogo olayagoyu  
 ibugua tinaga bi hale nahaya.
- 43 Ína ti bo tagadabaga biwagola ti be abalu ale howa dindini wini.

✠ 22:34: Hi 3.19

Ba dege bialu bo hengeda halu hariga teneni waru wiraligobi haya.

- 44 Wali agali ko hearume i bo waholilono ina abale ibalu i biamogo biri.  
Ina wali agali hameigini tara tara bu hearu handayaho holiya ina i dabo helarida.  
Wali agali tara tara ina nahendene hearu áyu i andaneha íbu hai ka.
- 45 Wali agali dindi taraha íbu hene karume inaga wanakuiha ibalu ge duli hanga haga ka.  
Tigua ina bi larugola abale hale halu i talima ibaga.
- 46 Tinaga hongo ibira howa  
tigua tano wai pabe hongohe hearu wahalu  
tini duru lagalaga bima i hewaria ibaga.
- 47 Anduane Homogo ibu haluheore kagoni.  
Ibu inaga ege tole ale hongohe kago  
ibunaga mini yaraga hamiya.  
Ngode Datagaliwabe hongoheore ogoni ibu i pele ngiaga kagonigo  
ibunaga mini timbuni yaraga haabo hamiya.
- 48 Ibugua i biamogo bialu waitigi hearu bope halu i mo wayali haga ka.  
Wali agali hameigini dindi tara tarani hearu i andaneha helai haga ka.
- 49 Ibugua inaga waitigiru giha hewaria  
i biamogo bialu i mo wiaga ka.

Anduane Homogo-o ina i pele ngialu inaga waitigiru mo dindiha helalu  
i mo wayali helarigoni.

Ina agali bo wahaga bu hearume i bo wahole biyaria i biamogo birigoni.

- 50 Anidagua birigonaga ina wali agali hameigini tara tara karunaga deni howa  
inaga mini yaraga holebero.\*  
Ina inaga mini yaraga halu iba gana lolebero.
- 51 Anduane Homogohanda Debidi i kini dabo helayago  
inaga waitigiru bope holiya i mo wayali helaga ka.  
Ibugua iniore kini dabo helene kogohondo gubaliniore haabo haga kagoni.  
Inaga waneigini aguanene mani holebiraru tihondobi ibugua gubalini ho haabo  
holebira,  
lalu Kini Debidihanda iba gana ogoni lene.

## 23

### *Debidihanda paluni bi lamaro binigo ogo*

<sup>1</sup> Debidi ibugua bi lamaro bialu lalu, I Yasi igini Debidi kogome bi ogo laro. Anduane Homogo Daligaorene Daliga kago ibugua wali agali dewa bu hearunaga deni howa i mini lene helaya. Yagabanaga Ngode Datagaliwabehanda i kini holiya dabo helayago kogo. Ina Isaraeleali howa iba gana dewa laga kogoni. <sup>2</sup> Anduane Homogonaga Dinini ibugua inaga ne harigaha howa bi latagi haya. Ibugua bi uruni tí languliya ihondo langiaga ka. <sup>3</sup> Isaraele wali agalinaga Ngode Datagaliwabe ibugua ihondo bi laya. Ibugua inanaga ha do haga ege tole pabe ale kagome ihondo ogodagua laya. Kini kagome Ngode Datagaliwabe andaneha howa ibunaga wali agali haru halu mana tigabi bialu baya hangu handayaho hayagua <sup>4</sup> egerebagi ginu haguame ni ge nahe ni baya taraore daraligobi kini ibugua biabe birago wali agalinaga deni wále bayale biragola tigua turu hai hene bulebira. Iba dalu ibalu henego bo daragola ni daba haragome dataniru ngiringara lalu bayale haraligobi ibu holebira.

\* 22:50: Lm 15.9

<sup>5</sup> Ogonidagua Ngode Datagaliwabe ibugua inaga waneigini aguaneneru mo hongo holebero lalu habo nalolene bi mbira hongohe ıla lo winigo nga. Ibugua bi lo winidagoni mo habo lalubi mo iriaribi nabulebiraore. Bi lo winidagoni wiaaboore holebira. Mbirale iha tubagiho koru Ngode Datagaliwabe ibugua ngilo hamelo kogoni. Ani ngiragola i wayali haabo howa bolangua hene holebero. <sup>6</sup> Wali agali maru Ngode Datagaliwabe mitangi nabiaga karu uruni ti pu anihe ale kagola bo batagi haga biaga winigo nga. Pu ani ngaru wali agalime giha nayuhaga ndobe. <sup>7</sup> Wali agalime anihe ngaru mo wahole manda biyagua tigua gime ndo kanogo hongohe ngarume mo ilu mogobiaga. Mbirani ngelowa irame dai helo delolebira, lalu Debidihanda lamaro binigo ogoni.

*Debidinaga ami agali hongohe mini lenebi henegonaga mini uru  
(1 Bi Te 11.10-41)*

<sup>8</sup> Debidinaga ami agali hongohe mini lene heneru mini uru hene. Mbirago Tagemono hameigini Yosebe Basebede ibu ami agali hongohe mini lene tebira henego aria mbira haguane ibu hene. Horo mbirungi Yosebe Basebede ibugua yandare hangume agali handari halira (800) baba wai bialu agali uruni bibahende bo wahai halu wayali hene.

<sup>9</sup> Agali Ahohi hameigini Dodo igini Eleasa ibu agali mini lene tebira henedaruni aria haguane mendego ibu hene. Horo mbirungi ibu Debidi heba Isaraealirubi ti hemiria Pilidialirume wai bule amuna tidiyu hearia hendene. Ani hearia hondowa Isaraealeali uruni tigua wai bule tingi howa de buyu howa bi lalu henego ai Pilidialirume wai hapara haya handala Isaraealeali ti gi halu ibida piai hene. <sup>10</sup> Maru ibida piyagola Eleasa ibu hangu hongo ho howa ibugua Pilidiali dewaore bo wahai hene. Ani ba dege bialu henego ibunaga gi amburi bialu hiribula hayagola wai bialu hene ayu tibu yu hayago yupe habe nahe hayagola giha yaho hene. Horo ogoningi Anduane Homogohanda Pilidiali hearunaga hongo bopeore hene. Ani biyagola Isaraealeali biaru tigua Eleasa hearia lone dai buwa handalu hemiria Eleasahanda Pilidiali biaru balu bai hayiyane handalu tinaga biabe bulene mbira dege wiaria hendene. Tinaga biabe bulene ogoni Pilidiali bo paya biarunaga wai pole karulaga agaru dabudabu damene karulearuni ti golo yai hene.

<sup>11</sup> Agali hongohe tebira uruni aria tebonego Hara dindiha howa ibinigo Age igini mini Sama hene. Horo mbirungi Pilidialiru ti ibuwa dindi mini Lehi mbira wiagoria agali mbiranaga paboro gama wiagoria tidiyu hene. Ani tidiyu ibu heago handalu Isaraealeali hearu ti ibida piai hene. <sup>12</sup> Ani piai hayagola Sama ibu gi nahe Pilidiali urunime tinaga dindi karu nalelo mabu dombeni howa wai hongoore howa bialu hene. Wai bialu ibugua Pilidiali uruni bibahendeore balu homelai hene. Anidagua biyadagonime Anduane Homogohanda Pilidiali waitigiru bope haiore howa wayaliore hene.

<sup>13</sup> Debidinaga ami agaliru haru haga ami agali hongohe pira tebira (30) laga hene. Horo mbirungi Debidi ibu Adulama dindiha egeanda mbira heagoha hearia ami agali hongohe pira tebira (30) uruni aria tebiralime Debidi hondo pene. Horo ogoni mabuha tomo hengearu boga biyagola bu wulene tu hene. Ogoningi dege Pilidialirume Lebaimi dindi ulini wiagoha ibu howa balai anda bu hene. <sup>14</sup> Tigua Debidi minabe nahe wiagoha ha do heagola Pilidiali uruni tigua Bedeleheme tano bo podama anda ibalu ti karulo hene. <sup>15</sup> Ani karulo heagola Debidi ibugua Bedelehemeha iba bayale nagane winiru mitangibu dai buwa lalu, Daraore nde biaruago ainde Bedeleheme tanonaga uba andatagi biaga harabani iba hambiaga uli biagoha iba bayale biago hambu nedole nde i turuho koleda, lene. <sup>16</sup> Ani layagola hale howa ami agali hongohe hearu aria tebirali biaru ti heyalu pene. Pialu ti Bedeleheme anda puwa Pilidiali iba hambiaga biagoria bu hearuni helowa Debidi ibu iba noaba layagohaore bereago hambu yalu dai bialu Debidi nelo mini. Ani miyagola ibugua iba ogoni nane wahalu Anduane Homogohondo lomabu mialu dindini odo wahene. <sup>17</sup> Ani buwa ibugua lalu, Anduane Homogo-o ina



iba ogoni nanolebero. Ani larogoni irane agali o karu ti iba ogo hambu piyagola bo wa kaleda. Ani bo wa kagola ina tinaga darama porago naradagua buledago nane waharogoni, lene. Ani lalu Debidi ibugua iba ogoni nane waore hene. Ami agali tebirali uruni tigua gibi bibe nahe mbira o binidagoni.

<sup>18</sup> Abisai ibu ami agali hongohe pira tebira (30) henedarunaga haru haga haguane hene. Ibu Yoaba hamene howa libu aiya Seruia mbira berene. Horo mbirungi Abisai ibugua yandare hangume waitigi agali handari tebira (300) bo homelai hene. <sup>19</sup> Ani henego maniale ibu mini leneore timbuni pudaga halu ibugua agali mini lene hongohe tebirali uruninaga haru haga haguane hene. Anigo ibu agali tebirali dabene mini lene aria mbira ndo howa ti mini lene henegobi dege hene.

<sup>20</sup> Kabasele tanoali Yahoiada igini Benaia mbira henego ibubi nde ami agali hongohe uruni aria dege mbirago hene. Ibugua wai biraha wai hongo howa taraore mbira biaga howa ibugua horo mbirungi Moabali ami agali hongohe kira bo palu bini. Horo mbirungi nde Benaia ibugua dege Isaraele dindiha dindi guni ibira halu dagare biaga wiangi egeandaha gundu uli mbira wiagoha anda puwa gabua mbira budi ale timbuni mini laiono hearia handa walia halu bo wahene. <sup>21</sup> Horo mbirungi nde ibugua dege Iyibiali timbuni mbira balu homelene. Iyibiali ogoni ibu yandare timbuni mbira yu heagola Benaia ibu kango hangu yu henego ogoni yalu hapara howa libu bagabaga bialu howa ogoni Benaia ibugua agali biago ibuninaga yandare yiago gingila muwa ibuni yandare ogonime nogoba hayagola homene. <sup>22</sup> Benaia ibugua nabibehe maru urunidagua bigi binigome ibubi nde agali hongohe mini lene tebirali hearu aria ale dege hene. <sup>23</sup> Ani howa ibu pudaga dege halu ai ami agali hongohe mini lene pira tebira (30) hayarunibi yu wahalu ibu bolanguahe hene. Anigo ibu agali tebirali hongoheore mini lene gibi biarubi aria ndo howa dege hene. Ani heagola Debidihanda Benaia ibugua ami agali kini mamage haga hearu haru haga helo dabo helene.

<sup>24</sup> Ami agali hongohe henedaruni tinaga mini uru hene. Asahele Yoaba hamene biago halu Dodo igini Elehanana Bedeleheme tanoali biago hene. <sup>25</sup> Ani bialu Harodo dindiha howa ibini Sama Eligala halu <sup>26</sup> Pelede tanoaha howa ibini Helese halu Tegoa tano howa ibini Igeese igini Ira imaru hene. <sup>27</sup> Anadodo tanoali Abiesebe Husa dindiha howa ibini Mebunaibi <sup>28</sup> Aho hameigini aria mbira Salamonobi Maharai <sup>29</sup> Helebela libu Nedoba tanoaha howa ibinigo libubi hene. Helebe ogoni ibu Bana igini hene. Ani bialu Beniyamini hameiginiru daluha Gibeaa tano wiagoha howa ibini Libai igini Idaibi <sup>30</sup> Piradono tanoali Benaia hari Gasa wiagoha kaware dege dindi ulini mbira wiagoha howa ibini Hidai imarubi hene. <sup>31</sup> Ani bialu Araba tanoali Abialabonobi Bahurimi dindiha howa ibini Asamabedebi <sup>32</sup> Salabono tanoali Eliababi Yasenela Yonadanala igini hearubi <sup>33</sup> Hara dindiha howa ibini Samabi Sara igini Ahiamabi hene. <sup>34</sup> Ani bialu Maga dindiha howa ibini Ahasabai igini Elibelededi Gilo howa ibini Ahidopele igini Eliamabi <sup>35</sup> Kamelo tanoali Hesperobi Araba howa ibini Parai imarubi haga bini. <sup>36</sup> Soba tanoali nde Nadana igini Igala halu Gada hameigini ariabi nde Bani hene. <sup>37</sup> Amonoali dindihayagi howa ibini mbira nde Selege mbira henegobi Berodo tanoali Yoabanaga yandare timuru yahaga Naharai mbira henegobi <sup>38</sup> Yadori hameigini aria kirali Irala Garebela henego labobi hene. <sup>39</sup> Hidiiali mbira Uraia henegobi uruni bibahende ami agali hongohe mini lene hene. Ami agali hongohe mini lene uruni bibahende dagalamaga halu pira tebirani karia (37) bibahende hene.

## 24

*Debidihanda Isaraele wali agali bibahende dagalai henego ogo  
(1 Bi Te 21.1-27)*

<sup>1</sup> Anduane Homogohanda Isaraele wali agaliru baba lone keba howa ibugua Debidihanda ti genda mo milonaga mo mini wia hene. Ibugua Debidihondo lalu, Isaraele wali

agalibi Yuda wali agalibi bibahende dagalai hole pu, lene. <sup>2</sup> Ani layagola Debidi ibugua agali mbira ibunaga ami haru hagane agali haguane Yoabahondo lamialu lalu, Ina ami agali haguane maru hayaruni lamialu tigua inanaga Isaraele wali agaliore bibahende dagalai hole pudaba. Pigane dindi gibuni uyurayagi Dana tano howa dagalama pialu dindi gibuni unurayagi Beaseba tanoni dagala iri halimu. Wali agali agira agima palirimadabe hondolego anidagua bilimu lalu, lamini.

<sup>3</sup> Ani layagola Yoabahanda Debidihondo ladai bialu lalu, Kini-o ai Anduane Homogo inaga Ngode Datagaliwabe ibugua inanaga wali agali mo dewaore helo. Anidagua birago ini keore dege handabelo hameledo. Anigo iname wali agali daga lolene ogoni inanaga biabe ndo ngagoria ina irane aginaga daga lolene hamelo kebe, lene. <sup>4</sup> Ani layagoyu kini ibugua Yoaba halu ami agali haguane maru biaruhondo bi hongo howa lamialu, Ina o bule pudaba larudaguaore bilimu, lene. Ani layago hale halu ami haru haga biaru tigua kini helalu Isaraele wali agali bibahendeore hearu dagalai hole pene.

<sup>5</sup> Ti Iba Yodana domalu puwa Gada hameigini dindini Aroe tano dindi tigabi yuyu bayale wiagoria puwa tano abene unurayagi balai anda bu hene. Ani bialu mani puwa Yase tano mbira Aroe tano abene uyurayagi wiagoria anda pene. <sup>6</sup> Mani tigua Yase tano yu wahalu Gileada dindihayagi pialu Hidiali dindi puabo halu Kadese anda pene. Ani pialu mani Dana pu mabu bialu nairia ni paliragohayagi Saidono anda pene. <sup>7</sup> Ani pialu mani dai buwa unurayagi Taia tano ege pabe bu yu mabu bini tano hongohe biagoha anda ibini. Ogoniha howa pialu wali agali Hibi hameigini palearuhabi Kenana hameiginiru tinaga tano wiaruhabi piai hene. Maniore Yuda dindi gibuni unurayagi dindi mbira Beaseba wiagoria anda pene. <sup>8</sup> Tigua Yuda dindi bibahendeha ibaga biai halu Yarusaleme dai bini. Ege dirani horo pira kira (20) bibahendeni biabe ogoni bini. <sup>9</sup> Ti dai buwa Yoaba ibugua bialu henedaru bibahende ogodagua birima lalu kini hale helo lamialu lalu, Isaraeleali agali ami habeheru daosini dege handari halira (800,000) halu Yudali daosini dege handari duria (500,000) hearia daga larima, lene.

<sup>10</sup> Ogoni biai howa mbirale ogoni biyagonaga Debidi ibuni bu miniha genda timbuni yu howa ibugua Anduane Homogohondo bi lalu howa lalu, Ina mini nawiale howa agali daga larudagome ina mana ko timbuniore bu haruda. Ani birudago ai Anduane Homogo-o ina ko birudago mo wahabe, lene.✧

<sup>11-12</sup> Anigo horo ogoningi dege Anduane Homogohanda agali ibunaga bi mana latagi halu mbiwia haga Gadahondo lalu, Ina Deibidihondo bi ogodagua lole pobe. I Anduane Homogo inaore laro. Ina hariga tebira mo ngerogo inime mbirago ogo karulape lalu dababe. Inime ogo bia lalu ihondo langerego ina ihondo buliya langibe, lene. Anduane Homogohanda bi ogoni layago <sup>13</sup> Gada ibugua hale halu egerebagi Debidi ibu heyu bereria Anduane Homogohanda ogodagua laya lalu lamule pene. Ibugua puwa Debidihondo lamialu lalu, Anduane Homogohanda ina bi tebira uru mbirago bilonaga e labelo hameledago. Ai mali kariani tomo gari timbuniore Isaraele dindini tagira pelo hameledebe be tinaga wai tigrume wai bima lole ibiragola ege tebirani ti ibida pialu ha do holene hameledebe be horo tebirani inaga dindi bibahendeha warago timbuni tagira ibilo hame ledebe. Bi uruniore baya hangu mandaore buwa mbirago ogo bilo larego Anduane Homogo ibunihondo lamule poliya langibe, lene.✧

<sup>14</sup> Ani layagola Debidi ibugua Gadahondo lamialu lalu, Ina bi ayu langiriruni hale howa genda timbuniore yu bedogoni. Ani bidogo ainde Anduane Homogo ibunime ogoale bule lalu ibugua bule hameledadagua o inahondo bilo waha. Irane ibunime ina dara hai haga kagodago. Anigo agalime ina mo ko halu belo hame naledo, lene.✧ <sup>15</sup> Ani layagola Anduane Homogohanda warago ko timbuniore horo ogoningi howa Isaraele dindi bibahendeha ibilalu maro bulebira layangiore ereba hene. Warago timbuni

ogonime Isaraele dindiha wali agali daosini dege pira karia (70,000) bibahende Isaraele dindinaga abene uyurayagi Dana tano howa homama pialu abene unura Beaseba tanoni homa iri hene. <sup>16</sup> Ani bialu Anduane Homogonaga dahuliyali mbira wali agali bo wahama ibiyadagoni Yarusaleme tanoha wali agali bo wahole anda ibini. Ani ibalu hearia Anduane Homogohanda wali agali mo ko holene bu hearu hondowa uruniha hearu dara howa dahuliyali biagohondo lalu, Ai karulapego waha, lene. Ani laya handala dahuliyali biago ibu wahowa widi iraneru lini hondo ibira ibira halu aeane puyabume yu pelonaga bo taulalu tale biaga wiagoria ibu hene. Dindi ogoni Yabusu hameigini aria agali Arauna mbira henegonaga wini.

<sup>17</sup> Debidi ibugua dahuliyali ogoni hondowa Anduane Homogohondo lalu, Ina mana koore birugome ai áyu pani nolene ngagonida. Anigo wali agali darabi uruni tigua ko mbira agi biyagonaga ti pani nelu miribe. Inibi i one waneiginiru inanhondo pani ngia nabiridago, lene.

<sup>18</sup> Ani lalu hearia Anduane Homogonaga bi mana latagi haga Gada ibugua Debidi hearia puwa ibuhondo lamialu lalu, Áyu ogoni Yabusuali Araunanaga widi bo taulalu lini aeanela mo tale biaga biagoria puwa Anduane Homogonaga loma biniru bo delaga dabu mbira bia hole pobe, lalu lamini. <sup>19</sup> Ani laya handala Debidi ibu heyalu Anduane Homogohanda bibe laya lalu Gadahanda lamiyadagua bule dindi hobane mbira widi lini do ngelowa lini aeanela mo tale biaga wiagoha pole pene. <sup>20</sup> Arauna ibu nde biabe bialu haga wiagoria howa handape halu hearia kini halu ibunaga ami haru haga agali haguanerubi heba ibiyane de hendene. Ani ibiyaria handalu ibu ti lola hole abale puwa ibu ge duli hanga halu kininaga mini yaraga halu ma podope hene. <sup>21</sup> Ani buwa ibugua lalu, Inaga agali haguane-o inaga biabe biahaga agali i hewaria aginaga ibiribe, lene.

Ani layagola Debidi ibugua ladai bialu lalu, Ina inaga dindi podene mbira widi biabe biaga o ngegoni yolo bule ibiru. Wali agali warago hongoheore áyu balu karuni bibahende Anduane Homogohanda mo wahelonaga ina ibunaga loma biniru bo delaga dabu mbira dindi ogoria bu wulene hameledo, lene.

<sup>22</sup> Ani layagola Araunahanda Debidihondo lalu, Kini-o dindi ogoni yolo bibelo hame naledogo bame i habelo ngero. Mbirale mbira lomabu mule hameledogo alebi bo delabe. Nogo bulumaga kagobi lomabu mule irani dai helo bo delabe. Ani bialu ira widi bo taulaga ngagobi ira nogo bulumaga dariba ha magamaga biaga ngagobi bibahende gabuwa lomabu mule ira ogonime delo delabe. <sup>23</sup> Kini-o ina mbirale uruni bibahende ihondo ngiai harogoni, lene. Ani lowa Arauna ibugua laabo halu lalu, Anduane Homogo inaga Ngode Datagaliwabehanda loma ogoni ina bo merego turu timbuni helo hameledo, lene.

<sup>24</sup> Ani layagola kinihanda ibuhondo lamialu lalu, Ina mbirale inime erekui biabe bialu mini ndo ngago Anduane Homogohondo lomabu mia nabulebero. Ani buleneore hameledogodago ai inaga mbirale uruni ina yolo buleorebero, lene. Anidagua lalu Debidi ibugua Araunanaga dindibi nogo bulumagabi bibahende muni siliba kina handari duria (500) aleme yolo bini. <sup>25</sup> Ani buwa Debidi ibugua Anduane Homogonaga loma biniru bo delaga dabu mbira dindi ogoriani bia howa loma biniru irani dai helonaga bo delalu Anduane Homogola ho gimbu bulenaga bo delalu bini. Ani biyagola mani Anduane Homogohanda wali agali biarume tinaga dindi mo bayale habe lalu bi layago hale howa ibugua Isaraele wali agali tinaga dindiha warago ko timbuni ibu wiago mo wahai hene.

## 1 Kini

### Kini henerunaga mbuga mbira

### Mbuga ogoha gilibu ngarunaga nemandi ogo

Mbuga ogo ibu Samuelenaga mbuga mendegome ala lala ho wiyagoria lo gililo mida. Mbuga ogo ibu Debidi henegonaga bi te lamaro bida. Ani bialu Kini Solomonohanda bialu heneru lama pialu mani Isaraele Yudala dindi tu wuki howa libunaga kini haga haga binirunaga bi te leda. Uruningi Anduane Homogonaga mana latagi haga maru henego tigua tinaga kinirumebi wali agali maru henerumebi hariga bayale polene ngagoria pialu helo Anduane Homogonaga bi mana lamialu hene. Ogoningi Anduane Homogonaga mana latagi haga henedaru aria mbirago Elaya hene. Mbuga ogo Samuele mbuga mbira mendela ngagobi dege nga. Mbuga ogo bi te bame lo nga ndo kini henedaru tigua mana ogodagua bialu hene lalu garea leda. Kini maru Anduane Homogo andaneha heneru tigua mini lene howa Isaraele wali agali baya hangu haru heagola wali agali kini bayale uruni andaneha bayale dege hene.

Anigo kini maru mine halu Ngode Datagaliwabenaga bi mo yo handaga hearu ti koore kagoni lene hene. Kini ko uruni tigua wali agali haru heangi ko genda dewa Isaraele dindiha ibugu biaga wini. Kini ko urunime mana ko timbuni mbira bialu henego tigua Ngode Datagaliwabe ibuni helo wahalu hari nene wiaruha dama mitangi bialu gime wabini wiaruhondo bi pupu wiaga wiagoria puwa uruninaga lotu lalu bi pupu wiaga hene. Tigua mana urunibi bialu hayarume Ngode Datagaliwabe mo tandaga halu hene.

#### **Bulu бага бува кuni gilibu ngago (1.1-2.12)**

Debidi ibu kini howa hamaro henego 2.13-46

Solomono ibu kini pigane henego 3.1-11.43

Solomono ibu kini howa bialu henego

3.1-4.34

Ibugua Anduane Homogonaga andaneha howa bialu henego

5.1-8.66

Anduane Homogonaga andaga binigo

9.1-11.43

Solomono ibu kini haabo howa hamaro binigo 12.1-22.53

Isaraele hameigini talebuki binigo

12.1-14.20

Hameigini piralirume Lehoboama helalu wahalu penego

14.21-16.34

Yudanaga kinibi Isaraelenaga kinibi heneru

17.1-19.21

Anduane Homogonaga mana latagi haga Elaya henego

20.1-22.40

Kini Ahaba Isaraele wali agali haru henego

22.41-53

Yudanaga Kini Yihosabadabi Isaraelenaga Kini Ahasaiabi bialu henego

#### *Kini Debidi waheore henego ogo*

<sup>1</sup> Kini Debidi ibu waheore hayagola ibu tingini dagare haabo halu hene. Tigua ibunaga tingini balangiyarume baya hangu mo tongo biya tiraga ibu dagare dege haabo hene. <sup>2</sup> Ani bialu heagola ibunaga agali haguane biarume Debidihondo lalu, Kini-o í baya hangu handayaho berelonaga wandari mbira taya bia holene hamelo kamago. Ibu libu haru mandagi padabigola ibugua inaga tingini mo poboyogo bia helo, lene. <sup>3</sup> Ani lowa tigua wandari bayale mbira agoha bedabe hondole Isaraele dindi bibahende

taya biame hene. Ani taya bima pialu hemiria dindi emene mbira Suneme winiyagoha wandari baya taya bialu hayagobi mbira ibu mini Abisaga berearia handa walia howa haru ibini. <sup>4</sup> Wandari baya Abisaga ogoni ibugua kini baya hangu handayaho bereagola kini ibugua wandari ogonila waneigini hono wulene manda nabi ibu tigatiga waneigini haru paliradagua haru paliaga hene.

*Adoniyahanda kini holene manda binigo ogo*

<sup>5-6</sup> Adoniya ibu Debidi Hagidila igini hene. Abasalomo aiyahanda Abasalomo taba hanayangi dege Hagidihanda Adoniya taba henene. Adoniya ibu huliya igiri baya mangabiore henego ibu igiri emeneni hama ibinidangi howa ibu abahanda mbirale bia ko hara lalu mbira mo tiga nabiaga hene. Ani bini howa áyu ibuniore kini hole lowa miniha hongo timbuni ho hene. Ani howa ai ibu mbiraha tagira pale lowa ibugua garo ale mini karisi wiaru mo manda manda bialu nogo hosi hearubi agali pira duria (50) ibu poledagoha ibira laga bima bamba helo dabo helalu bini. <sup>7</sup> Ani bialu ibugua ogoale bero lama wali mini Seruia igini Yoaba hearia puwa bi lamialu agali loma binigo mo miaga mbira Abaiada lamialu biyagola libugua karulapeda lowa mini mbiraore hene. <sup>8</sup> Anigo loma binigo mo miaga Sadogobi Yahoiaada igini Benaiabi Ngode Datagaliwabenaga bi mana latagi haga Nadanabi Simaibi Laibi ami agali Debidi ibuni mamage haga hearubi lamiai hayagola tigua Adoniya heba mini mbiraore nahe hene.

<sup>9</sup> Horo mbirungi Adoniya ibugua loma biniru bo delole lowa dindi mbira Enerogegele iba peagoha Nogombi Toḷe laga winigoria pene. Puwa nogo sibiru bulumaga wangaberu bulumaga igini hungubalua haba tigrubi Ngode Datagaliwabehondo loma biniru bo delole pene. Ani pu howa ibugua Debidi igini hearu ibai halimu lalu Yudali kininaga ami hene hearu bibahendebi ibugua lalu, Tomo timbuni ogoni bo loma bialu dawedogo namiya ibalimu, lalu lawia haga bini. <sup>10</sup> Anigo agali maru Ngode Datagaliwabenaga bi mana latagi haga Nadanabi Benaiabi ami agali kini mamage haga biarubi ibu hamene Solomonobi urunihondo dege ibalimu nalene.

*Solomono ibu kini henego ogo*

<sup>11</sup> Ngode Datagaliwabenaga bi mana latagi haga Nadana ibugua Solomono aiyá Badaseba berearia puwa lalu, Hagidi igini Adoniya ibunime kini haya layago Kini Debidi hale nahe haruago í hale haribe be nahalehe bedebe. <sup>12</sup> Ai ínibi í igini Solomonobi bo wahelo hame nale bereyagua ina bia larogodagua bulebere. <sup>13</sup> Áyu ogoni Kini Debidi bedaria puwa ogodagua labe. Abale ihondo bi heneneore lalu í igini Solomono kini í henegoria ho aribia holebira lalu lo wirigodago áyu Adoniya ibu agua bialu kini haruabe lalu hale habe. <sup>14</sup> Libu wene lalu bedabiria bi ogoni mo hongo hole í abale anda ibagua, lalu Nadanahanda lene.

<sup>15</sup> Ani laya handala Badaseba ibugua kini ibuni tamuha palearia hondo pene. Kini ibu waheore wiagola Suneme wandari Abisaga ibugua handayaho berearia pene. <sup>16</sup> Ani puwa Badaseba ibugua kini paleagoria puwa bulu paluwa Kini Debidihanda hale halu lalu, Í agi hamelo kebe, lene.

<sup>17</sup> Ani layagola Badasebahanda lalu, Inaga kini-o abale ina Anduane Homogo inaga Ngode Datagaliwabenaga deni howa buleore lalu bi mbira lo wirigoni. Ina lalu í igini Solomonoore í homaregola ibugua kini howa í biraga kininaga dagia ngagoria ibu mialu bira aribia helo larigo. <sup>18</sup> Ai áyu Adoniya ibu kini hayadago hale nahe bedegoni. <sup>19</sup> Áyu ibugua bulumaga dewaru sibi dewaru bulumaga hungubalua habahe dewaru loma biniru bo dawalu ka laya. Ibugua loma binigo mo miaga Abaiadabi ami agali haru haga haguane Yoababi ibugua tomo dawaruagoni dugu namiya ibalimu laya handala pirimiya. Í waneiginirubi bibahende piái hayiyago Solomono dege ibabe nalayiya.



<sup>20</sup> Inaga kini-o hale ha. Isaraele wali agali bibahendeore í kini henegoria abogo ibuore ha aribia helarogoni lalu latagi harego hale holomaya lowa hondo hama pedago. <sup>21</sup> Ai ina tihondo hale helo latagi nahe biralu homariyagua nde tigua ibi í igini Solomonobi iya haru wali agali mana ko biaga mbira o kagoni lowa iya bo waholobada, lene.

<sup>22</sup> Badasebahanda bi ogoni wene lalu bereaore dege Nadana ibu kini andaga ibini.

<sup>23</sup> Ani ibiyagola agali kininaga biabe bia haga heagome kini berearia anda ibuwa lalu, Ngode Datagaliwabenaga bi mana latagi haga Nadana ibu í hondole íbu ka, lene. Kinihanda Nadana anda ibilo karulape laya handala Nadana ibugua tamuha anda ibuwa kininaga mini yaraga halu dindini bulu palu ibira hene. <sup>24</sup> Ani buwa ibugua Kini Debidihondo lalu, Inaga kini-o Adoniya ibu kini howa inaga henge ibu mialu kininaga dagia biraga ngagoria berelo karulape laribe. <sup>25</sup> Ani larogo irane áyu dege Adoniya ibu dindi mbiraha puwa bulumaga wangabe dewabi sibi dewabi bulumaga igini hungubalua habahe dewabi Ngode Datagaliwabhondo loma buwa bo dawalu ka layane hale haru. Tomo uruni nole í igini bibahendebe inaga ami haru haga haguane Yoaba ibubi loma binigo mo miaga Abaiadabi uruni bibahende piai haya layane hale haru. Ai áyu ogoni tigua turu howa tomo nalu bi hongo howa ladagadaga bialu Adoniyahondo lalu, Adoniyaore kini kane dege luore haabo halu hodagua helo, lalu hayuane hale haru. <sup>26</sup> Anigo tomo namiya ibalimu lalu ihondobi loma binigo mo miaga Sadogobi Benaiabi Solomonobi inahondo nalangi. <sup>27</sup> Ai kini-o ogoni aguadabe. Mana ogonidagua biyadago ina karulapedalo manda bidebe. Ani manda bu heneyagua nde Adoniya ibugua kini halu inaga henge mulebira lalu inaga agali haguane hearu lamia nabiriya, lene.

<sup>28</sup> Ani layago hale howa Kini Debidi ibuguaibunaga biabe bia haga agali heagohondo lamialu, Badaseba lone daibilo oladaba, lene. Ani layagola Badaseba ibalu kini bereagoria kaware íbu hene. <sup>29</sup> Ani íbu heagola kini ibugua Badasebahondo lalu, Anduane Homogo Haluhe kagome í genda tandaga tara tara wiarunaga hewagola ibugua í haru dai biaabo haga kagoni. <sup>30</sup> Ina ihondo heneneore larogo horo áyu ogoniore ina biaore bule lalu Anduane Homogo Isaraele wali agalirunaga Ngode Datagaliwabe kagonaga minini howa lo wirugo bulebero. Ina abale ihondo lalu í igini Solomonobi ibugua inaga henge mialu kini ha aribia howa kininaga dagiani birulebira larugoni ndobe, lene. <sup>31</sup> Ani layago hale howa Badasebahanda kininaga geha duli hanga ho biruwa dindini bulu palialu howa lalu, Kini-o íore inaga agali haguane kegonigo í luore haabo habelo, lene.

<sup>32</sup> Kini Debidihandaibunaga biabe bia haga agali hearuhondo lamialu lalu, Benaiabi loma binigo mo miaga Sadogobi Ngode Datagaliwabenaga bi mana latagi haga Nadanabi ini bedoria ibilo lamule pudaba, lene. <sup>33</sup> Odaruni ibiyagola kini ibugua tihondo lamialu lalu, Tigua puwa í igini Solomonobi ininaga nogo dongini berelalu ami agali ini mamage haga karubi ti haru mandagi unu Gihono iba duguaragotha pilimu. <sup>34</sup> Ani puwa loma binigo mo miaga Sadogola Ngode Datagaliwabenaga bi mana latagi haga Nadanala libugua Solomonobi ibu Isaraele wali agali bibahendenaga kini helo ira olibe lininaga weli ibunaga haguane odo wia halimu, lene. Tigua urunidagua biai howa pilipe ale biguli pu lalu hongo howa ladaga howa lalu, Solomonobi ibu kini luore haabo helo lowa huaru lalimu. <sup>35</sup> Tigua ani lama ibu ibiradagua haruru ibalu ibugua ini biragane kininaga dagia ngagoria birulebira. Ina ibu kini helo dabarugo ai ibugua inaga henge mialu Isaraele Yudala wali agalirunaga kini í henegoria ha aribia holebira, lalu Debidihanda lene.

<sup>36</sup> Benaiahanda ladai bialu lalu, Anidagua bayaleoredago Anduane Homogo inaga Ngode Datagaliwabe ibugua ina laregonidagua biaiore helo. <sup>37</sup> Ani bialu Anduane Homogo ibuni inila haru howa í biamogo bialu haga wiyadagua dege Solomonolabi

anidagua mandagi howa biamogo bilo. Ani bialu kagola Solomono ibu Ngode Datagaliwabehanda mo hongo halu abale ini mini lene timbuni harigo bolangua howa helo, lene.

<sup>38</sup> Ani lalu Sadogobi Nadanabi Benaiabi kininaga mamage haga ami agali haga hearubi bibahendeme Kini Debidinaga nogo dongi heagoria Solomono berelalu Gihono iba duguaragoha haru halu pole pene. <sup>39</sup> Sadogo ibugua Anduane Homogonaga Balai Anda heagoha olibe lininaga weli hambu berelo wini wiago mo puwa yalu pene. Mo yalu Gihono iba puwa tigua Solomono ibu kini helo loma bia haluibunaga haguani odo wini. Ani buwa tigua pilipe ale biguli pu layagola wali agali dewaore ibuwa lalu, Solomono ibu kini luore haabo helo, lene. <sup>40</sup> Wali agali ti Solomono haruru Yarusaleme dai bialu turu howa biguli pu lalu hongo howaore ga lalu huario lamalama piyagome dindi biri lalu ema bini.

### *Adoniyahanda Kini Solomono gi henego ogo*

<sup>41</sup> Adoniya haluibunaga agali biaru ti tomo dawayaru nai ho howa hale halu hearia ga lalu huario timbuni ladagadaga biayuago hale hene. Bigulirume pipe layuago Yoaba ibu abale hale howa lalu, Yarusalemeha bi timbuni pudagadaga biaruago agile biaruadabe, lene. <sup>42</sup> Yoabahanda bi ogonidagua lalu heaore dege loma binigo mo miaga Abaiada igini Yonadana ti heagoria ibini. Ibiyagola Adoniyahanda ibuhondo lalu, Abale ibu. Aiore i agali bayaleore kegonigo ina bi te bayale galone ina hemaria lo yalu ibiribe tobanedago, lene.

<sup>43</sup> Ani layagola Yonadanahanda ibuhondo ladai bialu lalu, Darabago ina bi te bayale ndo lo yalu ibiru. Inanaga agali haguane Kini Debidihanda Solomono ibu kini helo helaya. <sup>44</sup> Debidihanda loma binigo mo miaga Sadogobi Ngode Datagaliwabenaga bi mana latagi haga Nadanabi Benaiabi ami agali kini ibuni mamage haga bu hearubi ti bibahende Solomono heba pirimiya. Ti pole howa Solomono ibu Kini Debidinaga nogo dongi erekunini bialu pirimiya. <sup>45</sup> Pialu Gihono iba piyagoria anda puwa Sadogo Nadanalame olibe lininaga weli Solomononaga haguani odo wialu ibu kini helaya. Ani biai halu tigua turu howa huario lalu ga lama Yarusaleme dai birimigola wali agali Yarusalemeha hearumebi turu howa bi hongo howa ladagadaga bialu haruagoni. Ayu laruane hale haramigoni ogoni lalu ka. <sup>46</sup> Ai ayu ogoni Solomono ibu kininaga haru howa biragane dagia wiagoria beda. <sup>47</sup> Kini Debidinaga agali haguane hearume Debidi ibuni berearia ibalu turu harimiya. Tigua turu howa lalu, Ngode Datagaliwabehanda Solomono ibu mo hongo howa ibu kini bayale hongoheore helobi ini mini lene timbuni harigo nira lowa ibu timbuni mini lene bolanguahe helobi hameledama, laya. Ani layagola Kini Debidi ibuninaga dagiani howa ibugua bulu palialu Ngode Datagaliwabenaga mini yaraga halu lotu lalu ibuhondo bi lalu, <sup>48</sup> Ayu Anduane Homogo Isaraele wali agalirunaga Ngode Datagaliwabe kagonaga mini yaraga hama. Ibugua ini kini harugoria ha aribia helo i igini mbira ini hendedoore dege dabaluhuledagonidago. Ibugua iniore hondoliya anidagua biyadagonaga Ngode Datagaliwabehondo turu timbuni hama laya, lalu Yonadanahanda Adoniya lamini.

<sup>49</sup> Ani layagola agali maru Adoniya heba tomo nalu birayarume Yonadanahanda bi ogoni layago hale howa gi timbuni hene. Ani howa tigua Adoniya helalu ti bibahende mbira puyola haga bialu ibida purogo lene. <sup>50</sup> Adoniya ibunibi Solomonohondo gi timbuni howa ibu abale Anduane Homogonaga Balai Anda heagoha lomabu delaga dabu heagoria nguni mariani mbirale bulumaganaga ne gayane ale winiru hongo howa yaniaho berene.\* <sup>51</sup> Anidagua biagola agali marume Solomono hale helo lamialu

\* **1:50:** Isaraealiruru tigua manda bialu karia mbiralime ti homelo bo waholene wiagua ti abale Anduane Homogonaga Balai andaha anda pialu lomabu delaga dabu heagoria nguni mariani mbirale bulumaganaga ne gayane ale wini ngaru tini bayale holenaga yaniho haga wini. Haru Tagira Pene 21.13-14 de handabe.

howa lalu, Adoniya ibu ihondo gi howa ibu bayale holenaga Anduane Homogonaga Balai Anda biagoha puwa lomabu delaga dabu biagonaga nguni maria wiago mbirani yaniho ka. Ani yaniho howa ogodagua lalu, I ogo yu wahalu pu nabi kone dege Kini Solomonohanda Anduane Homogonaga minini howa heneneore i bo wanahole lara handala yupe halu pole laya, lene.

<sup>52</sup> Ani layago hale howa Solomonu ibugua ladai bialu lalu, Ibugua mana tigabi hangu bialu hayagua ina ibu bo wanaholebero. Ai ibugua mana ko biyagua ibu homelo bo waholebero, lene. <sup>53</sup> Ani lowa Solomonohanda agali maru hearu lamialu, Adoniya namu Anduane Homogonaga Balai Anda biagoha lomabu delaga dabu wiagoria yaniho holebirago haru halu ibule pudaba, lene. Ani laya handala pialu tigua Adoniya haru halu ibiyagola Adoniyahanda Kini Solomononaga deni ibu ge duli hanga hene. Ani biyagola Kini Solomonohanda ibuhondo lamialu lalu, Ini andaga pamia, lene.

## 2

### *Debidihanda Solomonohondo paluni bi lamaro binigo ogo*

<sup>1</sup> Debidi ibuni homolene horo kaware dege biraruyane handalu ibugua ibu igini Solomonu olowa ibuhondo bi ogo lamini. <sup>2</sup> Ibugua lalu, Ayu i kaware homole bedogonidago. Ainde ina hongo halu agaliore howa ininaga biabe bulene ngagoore bialu habe. <sup>3</sup> Ani howa Anduane Homogo inaga Ngode Datagaliwabe ibugua bia lalu langirago biai halu habe. Ibugua hariga bayale ina polomaya mo walia haragoria pialu ibunaga bi mana bayale Moseseha howa langiyaruni mbirago pugua nabi howa baya hangu talialu biai halu habe. Ani bialu hariyagua nde mana ina berego bibahende bayale hangu bialu haabo holebere. <sup>4</sup> Anduane Homogohanda ihondo buleberoore lalu bi hongohe mbira lo wialu lalu, Debidi-o i waneiginiru tigua bibahendengi hongo howa i talima ibalu haabo halu ininaga deni tigabi ibaga bialu haabo hayagua nde inime i igini aguaneru aria hangume Isaraele wali agalinaga kini helo dabaluhelaabo holebero lalu, Anduane Homogohanda ani layago. Ai Solomonu-o Anduane Homogo ibugua layadagua ina bialu hariyagua nde ihondo bulebero langiyadagua bulebiraore, lalu lamini.

<sup>5</sup> Bi marubi wia dege bidago laro. Solomonu-o hale habe. Ai Seruia igini Yoaba biago ibugua mana lehe bialu Isaraeleali ami kirali bo wahayagoni i manda bideni. Ibugua ami agali dege kirali Nere igini Abanela Yade igini Amasala bo wahaya. Ti wai hamani wai bialu howa ndo bame hearia bo wahayagonaga pani nolene ibuniha ngelo ka. <sup>6</sup> Ani bidago ai ibu lu haludagua helo ndo inime bulene ngago bialu pani abale mibe.

<sup>7</sup> Ani bialu agali mbira Gileada dindi howa Basilai igini biaruhondo dege mana bayale bialu ti tomo i dameneru baba mandagi nalu hamiya ibidaba labe. Agali uruni tigua i hamene Abasalomohanda i bole biyangi ibida pu hewagola tigua i baya hangu handayaho henegonaga ani bibe laro.

<sup>8</sup> Agali mendebi Beniyamini hameigini Bahurimi tano howa ibini Gera igini Simaibi nde kagoni. Ibugua i Mahanaimi dindi ibida pirudangi howa ihondo ha halu bi ko lowa lai lenego. Ani binigoyu mani ibu ila Iba Yodana lola haribangi inime ibu homelo bo wa naholebero lalu Anduane Homogonaga minini howa bi henene lo wirugodago ina babe nahego. <sup>9</sup> Ai ina agali ogoni ibu pani mbira nami yo pialu napelabe. Ibu homelo dindini lu nakaore abale babe. Ibu bolene hariga ogoda lalu tale bulene iha ngago minime ibu homelo bolene ngagoria babe, lalu Debidihanda Solomonohondo paluni bi ani lamaro bini.

### *Debidi homenego ogo*

☆ 2:2: Yos 23.14 ☆ 2:3: Yos 1.7, 1 Bit 22.12-13 ☆ 2:4: 2 Sml 7.12-13, 7.25, 2 Kin 20.3 ☆ 2:5: 2 Sml 3.27, 20.10  
 ☆ 2:7: 2 Sml 17.27-29 ☆ 2:8: 2 Sml 16.5-13, 19.16-23

<sup>10</sup> Mani howa Debidi homayagola tigua ibunaga tingini Yarusaleme ogoni Debidinaga tano laga wiagoha hora hene. <sup>11</sup> Kini Debidi ibu mali pira maria (40) kini howa Isaraele wali agali haru hene. Mali kariani Heberono tanoni howa haru halu mali pira tebirani tebira (33) Yarusalemeni howa haru hene.✧ <sup>12</sup> Debidi ibuni homayagola ibu igini Solomono ibugua ibu aba henegoria kini ha aribia hene. Ani howa Solomono ibu kini hongoheore mbirale mbirame ibu bope halu mo pila habe nahe hene.✧

*Adoniya homelo benego ogo*

<sup>13</sup> Horo mbirungi Hagidi igini Adoniya ibu Solomono aiya Badaseba berearia ibini. Ani ibiyagola Badaseba ibugua hale halu lalu, Í bi bayale mbira lole yalu ibiribe, lene. Ani hale hayagola Adoniya ibugua ladai bialu lalu, E ina bi bayale dege lolenaga ibu kogoni, lene. <sup>14</sup> Ani lowa Adoniya ibugua lalu, Ina bi emene mbira hangu hale harogo, lene. Ani layagola Badasebahanda ibuhondo lamialu lalu, Karulapego ihondo langerene, lene.

<sup>15</sup> Ani layagola Adoniya ibugua ladai bialu lalu, Abale nde Isaraele wali agali bibahendeme i tinaga kini holobada lo manda bu hai hayagoni i manda bide. Ainde i kini ani ha kole degego ai Anduane Homogo ibunaga hame leagome i hamene Solomono ibugua kini hayagola i nahe waharugoni. <sup>16</sup> Anigo áyu ina bi mbiraore hale hole ibirugo ai ina bi ogoni ina karulape labelo hameledo, lene. Ani layagola Badasebahanda lalu, Ina bi ogoni i hale holiya langi, lene.

<sup>17</sup> Ani layagola Adoniyahanda lalu, Suneme wali Abisaga bedago i dabu buliya kini ibugua e lelonaga ina Kini Solomono lamule pobelo hameledo. Kini ibugua inaga bi larego mo wa naholebiralu manda bidogo lamule puore bia, lene.✧ <sup>18</sup> Ani layagola Badasebahanda Adoniya lamialu lalu, Karulapego ina ibuhondo hale hole poliya, lene.

<sup>19</sup> Ani laya handala Badaseba ibugua Kini Solomono berearia puwa Abisaga Adoniya dabu bilo mia lalu hale hole pene. Piyagola kinihanda Badaseba ibiyago hondowa ibu abale heyalu ibu aiyanaga mini yaraga halu ge duli hanga howa bulu palene. Ani bialu heyalu puwa kini biragane dagia wiagoria pu biruwa agali biabe biaga hearuhondo lamialu dagia mbira mo yalu ibuwa ibu aiya berelo kininaga gi tigahayagi mo ngeladaba layagola Badaseba ibu ogoriani berene.

<sup>20</sup> Ani biruwa Badasebahanda lalu, Ina ihondo bi emene bame mbira dege hale holeberogo ogoni ina e labelo hameledo, lene. Ani layagola Solomonohanda ladai bialu lalu, Aiya-o ina ihondo hale harego ina ndo naloleberogo. Ina hale hole hame laridago la, lene. <sup>21</sup> Ani layagola Badasebahanda lalu, Wali Abisaga i hamene Adoniya ibu dabu bilo hameledo, lene.

<sup>22</sup> Bi ogonidagua layago kini ibugua hale howa ibu keba timbuni halu lalu, Irane aginaga ina ihondo Abisaga i hamene Adoniya ibu dabu bilo lalu hale haribe. Ani bulene ngayagua nde ibu i hamene wahene kagodago i kini kogo wahalu ibugua kini ha aribia helo inihondo tigatiga waha lalu langerene.\*

Ani bialu ogoni hangu ndo loma binigo mo miaga agali Abaiadanagabi Seruia igini Yoabanagabi heba hale hamaga harene, lene. <sup>23</sup> Ani lai howa Kini Solomono ibugua Anduane Homogonaga minini howa bi hongohe latagi halu lalu, Adoniya ibugua bi ogoni latagi hayadagome ibuha ko timbuni nga. Ani ngagome ibu homelo bo waholebero. Ibu bo wa naharuyagua nde Ngode Datagaliwabe ibunime ini homoliya bo wahelo laro. <sup>24</sup> Anidagua larogoni irane Anduane Homogo ibunime i biamogo bialu mo hongo haya. Ani biyagola i aba Debidinaga henge ini mialu ainde ini kini ho aribia howa kogoni. Ani kogoni bamba Anduane Homogo ibunime ihondo lalu i kini halu inaga damenerume ha aribia holebira lalu ini langini. Ani langinigo ai Anduane Homogo

✧ 2:11: 2 Sml 5.4-5, 1 Bit 3.4 ✧ 2:12: 1 Bit 29.23 ✧ 2:17: 1 Kin 1.3-4 \* 2:22: Agali mbirame kini one ibu dabu biyagua ogoni ibu kini ha aribia holenaga biaga wini. 2 Sam 3.6-11, 16.21-22

haluhe kagonaga minini howa ina heneneore bulego larogo Adoniya ibu áyu ogoni homolebira, lene.

<sup>25</sup> Ani lowa Kini Solomono ibugua bia layagola Benaia ibugua Adoniya homelo bo wahole pene.

*Solomonhanda loma binigo mo miaga Abaiada biabe bo duguinigo ogo*

<sup>26</sup> Solomono ibugua loma binigo mo miaga agali Abaiadahondo lalu, Ininaga dindi Anadodo tanoha wiyadagoria hole pobe. Iha ko mbira ngagome ina í homabelo bo waholene ngagonigo nde wahalu waharogo pobe, lene. Ani larogoni irane bamba í aba Debidi heba howa ina Ngode Datagaliwabenaga Habo Nalolene Bi lo winigonaga Mbogoyi biago yu ibaga biaga harigoni. Ani bialu í aba Debidinaga genda wiaru inimebi ya dege birigonigo mitangi bialu ina í ba nabi waharo, lene.\* <sup>27</sup> Ani lalu Solomono ibugua Anduane Homogonaga loma binigo mo miaga agali Abaiada ibu biabe ogoni mani nabilo duguini. Anidagua binidagoni bamba Anduane Homogo ibugua Silo dindini loma binigo mo miaga agali Eli dameneruhondo bi mbira lowinigo lola hene.

*Yoaba homelo bo wahenego ogo*

<sup>28</sup> Abale Yoaba ibugua Abasalomola nahaga henegoyu ai ibugua Adoniya biamogo bialu hene. Ani howa hale halu hearia Adoniya Abaiadalahondo mbirale biya layago hale howa ibu gi timbuni hene. Gi howa ibu ibida pialu Anduane Homogonaga Balai Anda heagoha anda puwa lomabu delaga dabu heago nguni mariani nogo bulumaganaga ne gayane ale heagoria yaniho berene. <sup>29</sup> Ani bereagola agali marume puwa Kini Solomonohondo lalu, Yoaba ibu ibida gerai lalu Anduane Homogonaga Balai Anda heagoha puwa lomabu delaga dabu heagoria yaniho beda, lene. Ani layago hale howa Solomonhanda Benaiahondo Yoaba homelo bo wahole pu, lene. <sup>30</sup> Ani laya handala Benaia ibugua Anduane Homogonaga Balai Anda biagoha Yoaba berearia puwa ibuhondo lamialu lalu, Kini ibugua í Balai Anda ogoniha bedego wahalu tagira pobe laya, lene. Ani layagola Yoaba ibugua ladai bialu lalu, Ndo í tagira napolego ogoria bedore ba, lene. Ani laya handala Benaia ibugua kini berearia dai buwa Yoabahanda layadagua lamini.

<sup>31</sup> Ani lamiyagola Solomonhanda ladai bialu lalu, Karulapego ibuninaga hame ngago talialu ogoriani howa bo wahole pu. Balu ibunaga tingini mo yalu puwa hora halimu. Yoabahanda agali bolene irane nawini agali ko nawi hearu bame homelo bo wahaya. Ani biyagome ogoninaga inihabi í aba one waneigini bu karuhabi pani nolene para kagoni. Ani bidago ai ko ibugua binidagoni inaha para ho wiaabo nahelo ibuniha pani mialu bo wahole pu. <sup>32</sup> Ai Yoaba ibugua mana ko uruni bialu hayadagonaga pani nelu Anduane Homogo ibunime miragoni. Yoaba ibugua Nere igini Abane bameore bo wahalu Yade igini Amasabi bame bo wahaya. Abane ibu Israaelenaga ami agali haru haga agali haguane mbira halu Amasa ibu Yudanaga ami agali haru haga agali haguane henego. Agali ogonilabo libugua mana ko mbira nabiagaore howa libu tigabiore hene. Mana bayale libugua biagago Yoabahanda biaga wiagobi ndo biaga hene. Ani henego ai Yoaba ibugua í aba Dedidi ala hale nahe howa ibuninaga hameme bo wahene. <sup>33</sup> Ainde Anduane Homogo ibunime Yoabahanda mana ko binidagoni mitangi biaabo halu mo wiaho howa Yoaba ibunibi ibu aguane mani holobadaruhabi pani mialu haabo helo laro. Anigo Anduane Homogo ibunime Debidinaga waneigini aguane hama polebiraru ti bayale hangu helo biamogo bialu Debidi aguanerume kini holebiraru biamogo bialu haabo helo laro, lene.

<sup>34</sup> Benaia ibugua bi uruni hale hai halu Anduane Homogonaga Balai Anda biagoha dai buwa Yoaba homelo bo wahene. Ani biyagola tigua Yoabanaga tingini ibuni dalu dindi ko iba dalubi naibaga wiagoha yalu puwa ibuni andaga kawareni hora hene. <sup>35</sup> Ani

\* 2:26: 1 Sml 22.20-23, 2 Sml 15.24



biyagola kini ibugua Benaia ami agaliru haru haga haguane Yoaba hayagoria ho aribia helo dabo helene. Benaia ibu Yahoiada igini henego ogoni dabo helene. Ani helowa loma binigo mo miaga agali Abaiada hayadagua Sadogo ha aribia helo kini ibugua dabo helene.

### *Simai homelo bo wahenego ogo*

<sup>36</sup> Yoaba homeagola kini ibugua Simai olalu íbu lowa ibuhondo lamialu lalu, ína Yarusaleme ogoriani anda mbira buwa holene nga. Ani buwa í Yarusaleme yu wahalu tagira ibaga bialu polene nawiore. <sup>37</sup> Ina ani larogo lelowa ína Yarusaleme wahalu tagira puwa Kidirono iba domalu mbira piriyaagua nde í homabelo bo waholebero. Bi o larogo mo wahalu poregome íni homolebere, lene.

<sup>38</sup> Ani layagola Simaihandanda ladai bialu lalu, Kini-o ína bi bayale o laregonidagua buliya, lene. Ani lowa Simai ibu Yarusalemeha luore haabo hene.

<sup>39</sup> Ani heane dege mali tebira piyagola Simainaga garabaya biabe ale biahaga agali kirali ibida pialu Gede tanoha Maga igini Kini Agisila pu hene. Ani pu heagola agali marume Simai lamialu lalu, Agali kirali ínaga garabaya biabe ale biahaga biagolabo Gede tanoha pu hea, lalu lamini. <sup>40</sup> Ani layago hale halu Simai ibugua nogo dongini bialu ibunaga agali garabaya biabe ale biahaga ogonilabo taya bima Kini Agisi hearia abaleore Gede tano pole pene. Puwa agali ogonilabo kirabali hearia handa walía howa haru halu Yarusaleme dai bini. <sup>41</sup> Ani binigo Kini Solomonu ibu hale halu hearia Simai Yarusaleme wahalu tagira puwa Gede tanoha peneyago Yarusalemeni lone daibu ka layane hale hene. <sup>42</sup> Ani layago hale howa ibugua Simai olalu íbu lowa ibuhondo lamialu lalu, Ala ína íhondo Yarusaleme tano wahalu tagira napole lalu Anduane Homogonaga minini howa bi hongohe lo wia halu bi hongo howaore langiru. Ina íhondo bi hongo howaore lalu, í tano wahalu tagira piriyaagua abale ogoningiore bo waholebero lalu langirugoni. Anidagua larugola ína ladai bialu karulape ína ínaga bi langeregonidagua bulebero lari. <sup>43</sup> Ani larigo nde ína Anduane Homogo ibunaga minini howa buleore lalu bi lowirigo habo lalu ínaga bi larugobi irane aginaga mo waharibe. <sup>44</sup> Ainde í aba Debidihondo mana ko ína bialu heneyarubi íni manda bide. Ai áyu Anduane Homogo ibunime ína mana ko bialu haridaruninaga pani ngulebira. <sup>45</sup> Anigo Anduane Homogo ibugua íhondo bayale hangu biaabo halu Debidi aguanerume hangu kini haabo helo helaga bulebira, lene.

<sup>46</sup> Ani lowa Simai piyagola kini ibugua Benaiahondo Simai homelo bole pu lene. Ani laya handala Benaia ibugua tagira pialu Simai homelo bo wahene. Anigo Kini Solomonu agali mendeme hangedape habe nahe hongohe gibi tara mbira hene.

## 3

### *Anduane Homogohondo mini gigabi wulene ngibe lalu Solomonohanda bi lenego ogo (2 Bi Te 1.3-12)*

<sup>1</sup> Solomonohanda Iyibi wali agali baba wai nabi nenege hole lalu Iyibinaga kini heago wane mbira Kini Solomonu ibu dabu buwa wandari ogoni ibu one berelo Yarusaleme Kini Debidinaga tano biagoha haru ibini. Wali ogoni ibu bereagola Solomonu ibugua Yarusalemeha ibuni andaga bialu Anduane Homogonaga andabi bialu tano ogoni ibuni ege pabe hongohe bu mabu bupe howa bu yaanda hene. <sup>2</sup> Abale howa Anduane Homogonaga anda mbira nahe howa Isaraele wali agali tigua lotu lalu loma binigo bo mulene harangi hari nene ngaruha puwa uruniha howa lotu lalu loma biniru bo delaga hene. <sup>3</sup> Solomonu ibugua Anduane Homogo gubalini timbuni howa ibu aba Debidihandanda biagadagua dege ibuguabi mana bayale tigabi wiaru talialu bialu habe lalu lamiyadagua bialu hene. Ani henegoyu ibuguabi nde lotu laga wiaruha Anduane

Homogohondo nogo tara tara loma biniru bo delaga dabu mbira mbira wiagoria lomabu mialu haga hene.

<sup>4</sup> Tinaga lotu laga dindi dunini mbira Gibeono winigoha Anduane Homogohondo bulumagarubi sibirubi bo delaga dabu wiagoria horo mbirungi Solomono ibu dindi ogoniha bulumagaru sibirubi loma biniru bo delole pene. Ibugua ala bulumaga handari dewaore aulole Anduane Homogohondo loma biniru mialu delaga dabu heagoria bo delai hene. <sup>5</sup> Ani bialu horo ogoningi mbiraga Solomono ibu palearia Anduane Homogohanda emagaha Solomonohondo lalu, Ina ihondo mbirale mbira ngi lalu hale harego nguliya agile ngi loleberebe, lene.\*

<sup>6</sup> Ani layagola Solomonohanda lalu, I aba Debidi iniore baya hangu talima ibaga bialu howa ibugua mana bayale tigabi hangu bialu hayago. Ani biyagome ina bibahendengi ibu gubalini halu mbirale bayale hangu biaabo haga kegoni. Ayu nde ina mana bayale ogonidagua dege bialu ini ibu iginioremeibunaga henge mialu kini holiya dabo helarigoni. <sup>7</sup> Inaga Anduane Homogo Ngode Datagaliwabe-o inime i abanaga henge ini mialu i kini ha aribia holiya dabaluhelarida. Anigo ainde i igiri daliahe mbirale manda biai nahe hewangi inaga wali agali baya hangu agua haru holebe tobaho kogoni. <sup>8</sup> Ayu i inaga wali agali inime dabo helene biaru heba hatago ho hewaria ainde ti daga labe nahe dewaore bu kagoni. <sup>9</sup> Ai inaga wali agali uruni ina baya hangu haru holiya iha mini manda gigabiwi holiya mo tale bulene bayale ngibelo hameledo. Ani ngeregola ina mana ogo tigabi ogo tiga nabi lalu baya hangu talebu ki holene karulape holebero. Nangiriyagua ina nde inaga wali agali dewaore labe nahe o bu karuni agua haru holiyadabe, lene.\*

<sup>10</sup> Solomonohanda bi layadagoni hale howa Anduane Homogo ibugua bayaleore laya manda bialu ibunaga bu miniha dungulo hene. <sup>11</sup> Ani howa ibugua Solomonohondo lalu, Ina au lalu, Ina Isaraele wali agali baya hangu haru holiya mini mandabi gigabi wu holene ngi larigo, bayuwa lari. Ina dindini luore holiya biamogo bibe lalubi ndo muni mbirale bu ngaru dewa ngi lalubi ndo inaga waitigi bu karuni bo wahabe lalubi ndo hale harigo bayuwaore larigoni. <sup>12</sup> Ogoni heneneore larigo ina mbirale ihondo ngi lalu hale harigoni nguliya. Ayu ogoni howa iha mini mandala timbuniore gigabi wu holene yu habelo ngulebero. Abale agali mbira manda timbuniwi mbira ha nabini. Manibi nde agali mini mandala timbuni gigabiwi i ale mende naholebiraore.\* <sup>13</sup> Ina ihondo mini lene holenebi muni mbiraleru yu holiya ngi lalu ndo larigo inime mbirale uruni bibahende ngiai harogola mo yu holebere. Ani yu kegola kini mini lene maru karubi ndo i bolangua howa mini lene daligaore holebere. <sup>14</sup> Ani howa i aba Debidihanda bialu henedagua inabi hariga tigabi ngarunaga pialu howa mana bayale ngogoria halu inaga bi hale haabo hariyagua nde ina i dindi ogoria luore halu hodagua habelo helolebero, lalu Anduane Homogohanda Solomonohondo lene.\*

<sup>15</sup> Anduane Homogohanda bi ogoni lai hayagola Solomono ibu heyuwa handalu hearia emaga handaruyane hendene. Ani handalu mani Solomono ibu Yarusaleme dai buwa Anduane Homogonaga Balai Anda biagoha Habo Nalolene Bi Lo winigonaga Mbogoyi wiagoria kaware puwa ibugua Anduane Homogohondo bulumagarubi sibirubi loma biniru bo delaga dabuni dai helo delalu Anduane Homogola ho gimbu bulenaga lomabu mini. Anidagua biai howa Solomono ibunaga agali haguane hearubi ibunaga ami haru haga hearubi bibahende mo turu halu tomo timbuni nelo dawa hene.

### *Bi erekuibi Solomonohanda mo tiga binigo ogo*

<sup>16</sup> Horo mbirungi bayanda wali kayu bima ibaga biaga kirali libunaga genda kinihanda mo tiga bilo ibu hearia ibini. <sup>17</sup> Wali mbirago ibugua lalu, Inaga kini-o hale

\* **3:5:** 1 Kin 9.2, 2 Bit 1.7, Md 2.13, 2.19    \* **3:9:** 2 Bit 1.10, Min 2.3-9, Hi 5.14, Ya 1.5    \* **3:12:** 1 Kin 4.29-31, Aga 1.16, 1 Yo 5.14-15    \* **3:14:** 1 Kin 15.5, Iba 91.16, Min 3.2

ha. Wali ogo iya anda mbiraoreha paliagago ani palu howa ai ina igiri gali mbira taba hanaru. <sup>18</sup> Ani taba hono biruwa wali ogo iya haru dege birariba. Ani biruwa horo kiru peagola ibubi nde igiri gali mbira taba hanaya. Ani taba honowa horo ogoningi anda ogoniha wali agali maru napale iyane hanguore paliriba. <sup>19</sup> Mbiragaore hayagola wali o kago ibu palia hondo howa palu beregedayagola ibu igiri gali biago palia dambi hayiya. <sup>20</sup> I palia hondo hewaha wali ogome ibalu i igini biago ibu dagiaha mo pale lalu ibu igini homene biago mo yalu ibuwa i buha mo aribia ho paleleneya. <sup>21</sup> Gao layagola i igini andu mule handalu hewaria homene wiaria handaru. Ani wiagola ina handa tiga bialu hewaria i igini inimeore taba henene biago ndoyane handaru, lene.

<sup>22</sup> Wali ogoni ibugua bi lai hayagola wali mende biago ibugua lalu, Ani ago. Igiri homene ogoni inagaore i igini nahome ogoyago, lene. Ani layagola wali pigane layagome laabo halu lalu, Ndoore igiri homenego inagaore larogoni nahomego inaga, lene.

Wali mbiragome, Inaga, layagola mendegomebi nde, Inaga, dege layagola libugua kininaga deni lai lalu hene.

<sup>23</sup> Ani lalu hebigola kini ibugua lalu, Ai nde libugua igiri nahome bedago inaga lowa igiri homenedago inaga lowa bi ngirini ngerene lalu haaabo kabigoni, lene. <sup>24</sup> Ani lowa ibugua, Ayu tibu mbira mo yalu ibidaba, lene. Ani layagola tigua mo pialu kini berearia ayu tibu mo yalu ibini. <sup>25</sup> Mo yalu ibiyagola ibugua lalu, Waneigini nahome ogoni ayu tibu ogonime hanuni dagabuki howa dagane wali mbirago mialu mende ha wali mendego midaba, lene.

<sup>26</sup> Ani layagola igiri ayaoredagome ibu igini dara timbuni howa kinihanda bo wahelo turu nahe biruwa ibugua kinihondo lalu, Kini-o igiri ogoni homelo nabe wahalu wali ogoni ibu helo mia, lene.✧

Ani layagola wali mende biago ibugua lalu, Ndoore ibubi namulego ibi nangulego wahalu hanuni daga biaha. Ibu mende helo i dagane mende holiya anidagua bia, lene.

<sup>27</sup> Ani layagola kini ibugua lalu, Igiri homelo nababe layago ogoni ibuni igiri aya berenedago ai igiri wali ogoni ibuni mo midaba. Ibu igini ogoni ayaore bedago ibu igini bo dagabia nahadababe, lene.

<sup>28</sup> Mani Isaraele wali agali bu hearume hale halu hemiria Kini Solomononaga ibugua wali kirali mo tiga agua buabe tobahe gibi ogoni mo tiga biya layago hale howa ibunaga manda baya tara winiyago hondowa mogo lai hene. Mini mandala bayale ogonime wali agaliha gendaru ibiragola godi lalu kini ibugua manani ngadagua baya hangu mo tale bigi bilonaga Ngode Datagaliwabe ibunime mini gigabiwi mo wia hayadalo manda manda bini.

## 4

### *Kini Solomononaga agali haguane haga biniru uru*

<sup>1</sup> Kini Solomonohanda Isaraele dindi bibahende handame howa haru hene. <sup>2</sup> Iibunaga agali haguane uru haga bini. Sadogo igini Asaria ibu loma binigo mo miaga agali hene. <sup>3</sup> Sisa igini kirali Elihorebe Ahiyala libugua kininaga beba gilibia dagala biaga hene. Ahiludu igini Yahosabada ibugua kinime birarunaga te bibahende gilibu wiaga hene. <sup>4</sup> Yahoiada igini Benaia ibu ami agali bu hearu haru haga haguane hene. Sadogo Abaiadala libu loma binigo mo miaga hene. <sup>5</sup> Nadana igini Asaraia ibu biabe biaga agali bu hearu haru haga hene. Loma binigo mo miaga Nadana igini Sabudu heago ibugua mini bogaru kini talebu miaga hene. <sup>6</sup> Ahisa ibugua kini andagaha agali biabe biaga hearu handayaho haga hene. Abada igini Adonirama ibugua agali maru kininaga biabe bilo minu helarago handayaho haga hene. <sup>7</sup> Kini Solomononaga ibugua agali haguane homberiali (12) Isaraele dindiha dindi podene hobane homberia (12)

✧ 3:26: Ais 49.15, Yar 31.20

ngagoha handayaho helo dabo helaga bini. Agali uruni tinaga biabe tini dindi podene hobane haru hayadagoha howa tomo bu mogo bialu kini halu wali agali Yarusalemeha hearunaga mali bibahendengi ege mbira mbira bibahendeni bu pelaga biaga hene. <sup>8</sup>Agali haguane uruni tinaga mini uru hene. Benehu ibugua Eberaimi hameigini daluha dindi ege bare bare wu yu peagoha haru haga hene. <sup>9</sup>Bendege ibugua Magasa tanobi Salabimi tanobi Besemese tanobi Elono tanobi Bedehanana tanobi uruni haru haga hene. <sup>10</sup>Benehesede ibugua Arubodo tanobi Sogo tanobi dindi bibahende Hebe tanoha wiarubi uruni haru haga hene. <sup>11</sup>Benabinadaba ibugua Doro dindiha hari bare wiaru haru haga howa ibu Solomonu wane Tabada agalini hene. <sup>12</sup>Ahiludu igini Bana ibugua Tanaga tanobi Megido tanobi Bedesana dindi wiaru bibahendebi Saredana tanoha dindi kaware kaware wiarubi uruni Yaserili tano abene unurahayagi winigo uruni haru hene. Dindi uruninaga tubari amuraore ni tagira ibiragohayagi Abelemehola tano ngagoria howa pialu unura ni paliragohayagi Yogomeama tano ngagoria wiairi haga bida.

<sup>13</sup>Manase hameigini aria Bengebe mbira heago ibugua Gileada dindiha Lamodo tano wiagobi Yairi hameigininaga dindi bu wiarubi handayaho hene. Dindi urunibi nde Gileada dindiha dege wigi bini. Ani bialu Basana dindiha Agobo mbira wiagobi handayaho ha dege bini. Dindi ogoniha tano timbuniru pira waragaria (60) wini. Tano uruniha ege pabe hongohe bu mabu bialu wai pabe panga hongohe helowa tamuha howa panga payatagi holenenaga bengena ege tole boronosime wabini hongoheme payaga hene. <sup>14</sup>Ido igini Ahinadaba ibugua Mahanaimi tano haru haga hene. <sup>15</sup>Ahimasa ibu Solomonu wane mende Basemada dabu bu howa ibugua Nabadali hameiginirunaga dindi haru hene. <sup>16</sup>Ani heagola Husai igini Bana ibugua Ase hameigini hearu handayaho halu Bealodo tanobi handayaho ha dege bini. <sup>17</sup>Parua igini Yahosabada ibugua Isaga hameiginirunaga dindi wiaru handayaho hene. <sup>18</sup>Ela igini Simai ibugua Beniyamini hameigini hearunaga dindi wiaru handayaho hene. <sup>19</sup>Uri igini Gebe ibugua nde Gileada dindi handayaho hene. Bamba Gileada dindi ogoni Amoronaga Kini Sihono ibunaga wialu Basana dindinaga Kini Oga ibunaga wialu binigo ai Gebe ibugua handayaho hene. Agali haguane homberia (12) uruni dindi ani haru haga biagola agali haguane timbuni mbirame dindi uruni bibahende handayaho hai hene.

*Solomono kini heangi Isaraele dindi bayaleore winigo ogo*

<sup>20</sup>Yuda wali agali Isaraele wali agalibi dagala mibe nahe dewaore iba angeni iba mu wiraligobi hene. Ti bayaleore halu tinaga tomo nolene iba nolenebi bibahende wiai heagola ti turu haga bu hene. <sup>21</sup>Ani henego Kini Solomonu ibugua Isaraele dindi bibahendeha handayaho hene. Tubari ni tagira ibiragohayagi Iba Yuberedisi poragoria howa pialu mendeha ni paliragohayagi Pilidialiru baba tubari wiagoria wiairi hene. Unurayagi Iyibila dindi tubari wini. Wali agali dindi uruniha haga hearu tigua Solomonohondo dagisi mialu haabo haga howa mani Solomonu homayagola wahene.\*

<sup>22</sup>Horo bibahendengi Solomonu ibu tomo mo wiagago balawa kilo daosini waragaria (6,000) mo wialu balawa bayaleru kilo daosini tebira (3,000) mo wialu biaga wini. <sup>23</sup>Nogo bulumaga pira kira (20) haru ibu helalu bulumaga habatigi baya hangu hinu heneru pira mbira haru ibu helaga bini. Ani bialu nogo sibi handari mbira (100) haru ibu helalu nogo tara tara mini dia gabua bu hearubi ega gogorogo habatigirubi yalu ibalu migi biaga wini.

<sup>24</sup>Solomono ibugua dindi dewaore Isaraele dindiha howa pialu amuraore Iba Yuberedisi poragoha tubari ngagoria handaya howa haru hene. Ani bialu ibugua handaya howa haru haga tubari Iba Yuberedisi angeni Tibisa tano ngagoria howa pialu ni

\* 4:21: Pig 15.18, 2 Bit 9.26

paliragohayagi Gasa tano ngagoria tubari wini. Dindi tara uruniha wiapara para wiarunaga kini bu hearume Solomono baba waitigi nahaga hene. <sup>25</sup> Solomono ibu kini heangi Yuda wali agali bibahendebi Isaraele wali agali bibahendebi ti tininaga mabu anda wiyadagoha halu tinaga pu mbira mini gerebi mabu wiarubi poge ira hearubi uruni teha ganini handaga bialu mbirale mbira gi holene nawi howa hada payabu hene.

<sup>26</sup> Solomononaga wai biaga garo mini karisi wiaru gili laga nogo hosiru palelo anda dewa bu helene. Nogo hosi uruni paliaga anda hobane haihe hene. Anda uruniha nogo hosi daosini dege pira maria (40,000) palelaga hene. Ani bialu Solomono ibunaga ami agali nogo hosini biruwa wai biaga hosi daosini homberia (12,000) hene. <sup>27</sup> Agali haguane homberiali (12) dindi homberiani (12) handayaho howa haru haga biaru tigua tomo mbiraleru ege mbiranaga Solomonohanda ogongi yalu ibalimu lenedangi tigua mo yalu ibaga hene. Tomo uruni kini ibuni halu maru ibu andagaha tomo nalu hagadaru ti nalu helo mo yalu ibugu biaga hene. Agali haguane uruni tigua tinaga biabe bayaleore bialu henegome kini ibu andagaha tomo emene hangubi mbira ndia nahaga wini.

<sup>28</sup> Ege ogongi yalu ibalimu lalu kini ibugua larangi tigua nogo hosi wai biaga karisi gili laga hearubi hosi maru hearubi ti nelonaga balawa wabiaga mini bali linibi tanibi gandulo yalu ibugu biaga wini. Datani uruni tano mbira mbirani nogo hosi haga binidagoha yalu pugu biaga wini.

<sup>29</sup> Ani biagago Ngode Datagaliwabehanda Solomonohondo mini giga bulene taraorebi marume nahandabehego hondolenebi manda bulene timbuniore magi manda bibenaheorebi miai hene. <sup>30</sup> Solomononaga mini giga bulenego timbuniore agali maru mini gigabi ni tagira ibiragohayagi hearubi Iyibi dindiha hearu ariabi ibu ale mbira nahe ibugua bibahende bolangua haihe hene. <sup>31</sup> Solomononaga manda timbuniore dindi bibahendeha agali manda timbunibi hearu bolangua haihe hene. Ibunaga manda timbuniore agali manda timbunibi maru Esera aria Edana halu Maholo igini Hemana Kalagolo Dada imaru halu tinaga manda timbunibi heneru Solomono ibugua bolanguahe hene. Ani heagola wali agali dewaore Isaraele dindi kawareha hearume ibu mini lene ani ka layago hale hai ho hene. <sup>32</sup> Ainde Solomono ibugua bi bayaleru tubagi mini gigabu wulenenaga bi tagala pugu buwa daosini dege tebira (3,000) gilibu wialu iba gana daosini mbira (1,000) bolangua howa gilibu wini. <sup>33</sup> Ibunaga bi urunime bibahende lo dambi hai halu Lebanono dindiha ira tamia karu garea lalu ira emene ko mbira mini hisobo pabeni anda ho haga karu garea laga bialu gilibu nga. Ani bialu nde ema bialu piagane damene ega bedarubi tombeme piaga tara tara bedarubi iba wena bedarubi ogo ale beda lalu garea lowa gilibu nga. <sup>34</sup> Ani binigo dindi tara tara bu wiarunaga kini bu hearume hale halu hearia Solomononaga mini giga bulenebi manda bulenebi timbuniorebi ka layago hale howa tigua tinaga agali haguane maru Kini Solomono hearia ibugua bi bayale larago hale helo ibilaga bini.

## 5

### *Solomonohanda Anduane Homogonaga anda bule mo manda manda binigo ogo (2 Bi Te 2.1-18)*

<sup>1</sup> Taia dindinaga kini mbira mini Hirma henege ibu abale Debidi kini heangi Debidi inaga nenege henege ai Debidi homayagola ibu igini Solomono kini ibu aba henegoria ha aribia howa ka layagola hale hene. Ani hale howa Hirma ibugua agali haguane ibunaga biabe biaga hearu Kini Solomono hondole pudaba lene. <sup>2</sup> Ani ibileneyago hondowa Solomono ibugua Kini Hiramahondo bi ogodagua lo pelene. <sup>3</sup> I aba Debidi ibu kini heangi ibunaga waitigi bu hearume ibalu wai biaabo halu heagola Anduane Homogo ibunaga Ngode Datagaliwabehanda anda mbira bibe naheore henege i manda

☆ 4:26: 1 Kin 10.26, 2 Bit 1.14, 9.25 ☆ 4:31: Iba 89.1-18 ☆ 4:32: Min 1.1, 10.1, 25.1, Sol 1.1



bu kegoni. Ani bialu howa ainde Anduane Homogohanda wai uruni mo palia haragola anda ogoni buliya lo manda bu hene. <sup>4</sup> Anigo áyu Anduane Homogo inaga Ngode Datagaliwabe ibugua wali agali dindi bibahendehe bu hearu waitigi holene manda nabi mini mo mbiraore hai howa ina baba mandagi bimagaho heleda. Wali agali tara tara urunime ina baba waitigi holene manda nabi kagome inaha mo ko holene mbira anda naibulebira. <sup>5</sup> Ani ngane hondowa ina áyu Anduane Homogo inaga Ngode Datagaliwabenaga anda mbira bulene hameledo. Bamba Anduane Homogohanda i abahondo bi mbira lo wialu lalu, Ina í igini mbira ini henegoria ho aribia howa kini helolebero. Ani helarogola ibugua inaga wali agaliru i mitangi bialu lotu lole kaware ibai holenaga inaga anda mbira bulebira, lalu ani lenego. Ai áyu ina ibunaga anda ogoni bulebero.✧ <sup>6</sup> Ani buleberogo ina agali biabe biaga maru Saidonoali biaru Lebanono irabuha ira hongohi tamia anda ogoni buliyanaga dibu pu helo hameledo. Inaga biabe biaga agali karu tigua Saidonoali uruni biamogo bialu biabe bilo. Saidonoali uruni inime ti yolo bibe lo manda bidegobi yolo buliya laro. Ai inaga agali biabe biaga karu ti inaga agali ira dibalu biabe biaga mandabi karu ale ndo ti manda nabioire kagoni ibi handalu manda bide, lalu bi ogoni lawia hene.

<sup>7</sup> Hirama ibugua Solomonohanda bi ogoni yalu pu layiyago hale howa ibunaga bu miniha dungulo howa turu timbuni hene. Ibugua lalu, Isaraele dindi timbuni ngago haru helonaga Anduane Homogohanda Debidihondo igiri bayale mbira ibuni henegoria ho aribia helo miyadagonaga ina Anduane Homogonaga mini yaraga holene nga. Debidi igini ogoniore mini mandar bayale gigabiwiore kagoni, lene. <sup>8</sup> Ani lowa Hirama ibugua Solomonohanda bi lama pudaba lowa lalu, Ina bi lariyago hale howa ina ogoni karulape laru. Ira tamiaru guraya aleru dibu yalu pudaba lolebero. <sup>9</sup> Ira inaga biabe biaga agali karume Lebanono irabuha dibalu iba solowara bedagoria yu tagira pu ngelolebira. Yu wiai howa tigua pume dewa daba homaga maga buwa ibani ibilalu inime yu ibabe lariyagoria mo yu ibulebira. Yu anda ibiragola agali inaga biabe biagaru tinaga pu hado yaragola ininaga biabe biaga agali hayaru tinime mo yulebira. Ina mbira hangu bibelo hame ledogo dege laro. Inaga agali uruni heba ina tomo nalu holomaya maru wia habe, lalu bi lawia hene.

<sup>10</sup> Ani lowa Hirama ibugua ira tamia guraya alerubi dibu ngibe layadagua dibu wia hene. <sup>11</sup> Solomonohanda ibuguabi nde agali biabe bialu howa tomo nelu widi mali mbira mbirani nalu howa biabe bilo genda magi daosini kira (2,000) wia halu olibe lininaga welibi ani dege lida magi daosini maria (4,000) nalu helo wia hene.

<sup>12</sup> Anduane Homogohanda mini mandala gigabi wulene bayale Solomonohonda ngulebero layadagua miyagola ibugua Hiramala habo nalolene bi mbira lo wialu libuore nenege haabo habiya lalu lowini.

<sup>13</sup> Solomonohanda ibugua agali daosini dege pira tebira (30,000) Isaraele dindiha hearu minalu biabe ogoni bilo minu helene. <sup>14</sup> Ani buwa ibugua agali uruni halu tebo tale buwa daosini pira (10,000) dege dege helene. Wabuni mbirago ibu ege mbira Lebanono dindiha biabe bu pialu ege mendeni dai biragola wabuni mendego ibu biabe bu aribia hole pugu biaga wini. Wabuni tebira uruni tigua biabe bu iriari biaga hene. Ani biyagome ege mbira hangu biabe bialu ege kira andaga halo haga wini. Ani bialu heagola agali mbira mini Adonirama henego ibugua biabe ogoni handayaho helo helene.✧ <sup>15</sup> Ani bialu agali daosini pira halira (80,000) ege tole podelo dabo helayagola uruni ti hari bare wiagoha puwa ege tole ira podaga so aleme tole podalu hene. Agali maru daosini pira karia (70,000) tigua ege tole podo winiru mo yu tone bilo dabo helene. <sup>16</sup> Ani bialu agali daosini tebirani handari tebira (3,300) ege tole biabe ogoni bialu karu haru helo dabo helene. <sup>17</sup> Agali uruni tigua Solomonohanda bi layago hale halu hari bare ege tole bayale heagoha puwa ege tole timbu dege dege podo paya bini. Ege tole

bayaleore uruni Yarusaleme mo yalu puwa mo daba daba howa Anduane Homogonaga anda bule wiyagoria yu pu ngelaga bini. <sup>18</sup> Agali biabe ogoni biyaru ti Hirama ariabi Solomono ariabi maru Bibiloso tanoni haga ariabi ti mandagi biabe bialu Anduane Homogonaga anda ogoni bule howa irabi ege tolebi uruni baya hangu manda manda bu wiai hene.

## 6

### *Solomonohanda Anduane Homogonaga anda binigo ogo*

<sup>1</sup> Pigane Isaraele wali agali Iyibi dindi wahalu tagira ibiyangi howa hama ibinigo áyu ogoningi mali handari mariani pira halira (480) hene. Horo ogoningi Solomono ibu Isaraele wali agalinaga kini hama ibinigo mali maneni howa ogoninaga ege mende layagola Solomonohanda Anduane Homogonaga anda ogoni tehinalu bini. <sup>2</sup> Anduane Homogonaga anda tamuha hobane loma bia hene ogodagua helaga bini. Tamu hobene lunaga manda mida pira kirani karia (27) halu arane yangalenaga manda mida dira wialu daliga handadaga halu manda mida haleria (13) howa bolanguahe wini. <sup>3</sup> Anda hobene mbira anda harabahayagi helenego ogoninaga arane timbuni manda ogodagua manda mida dira abale hobene loma bia hene biagonaga wiyagobi dege howa luninaga manda mida mariani bolanguahe helene. <sup>4</sup> Anda mandahayagi windo tamuha timbuni tagiraha emene lowa helama pene. Windo uruni diri emene emene winidagoha wá holene anda tamuha anda ibilonaga ani bini. <sup>5</sup> Ani bialu Anduane Homogonaga anda biagoha manda labolabo kira bialu tibihayagi tebone biamini. Anda ogoni ibuha halu tebo bu gimbu bima irigi hene. Anda bima irigi henedagoha hobene dewa helene. <sup>6</sup> Tigua anda ogoni bialu howa dagia dabira duninidaru Anduane Homogonaga anda biagoria paga howa bu gimbu nabule lo manda bini. Ani manda buwa anda be mende daliga bu gimbu bima iraga hole biyadagonaga dagia dabiradago helole howa anda mandadagoha emene mbira lone gene helolenedagua bima anda pene. Ani biyagola dagia dabira wulene karulape hene. Anda be tebone daliga bu gimbu bule howabi anidagua dege bini. Anidagua biyagome anda be dindiha biago arane yangalenaga manda mida kira emeneore bolanguahe hene. Anda be mende daligago ibunaga arane yangalenaga manda mida kira emene timbuni bolangua halu anda be daligaore tebonego ibunaga arane yangalenaga manda mida tebira emene bolangua halu hene.

<sup>7</sup> Agali ege tole podaga biaru tigua tole podalu howa baya hanguore hari biagoha howa podo bebena bialu mo tigabu ngelaga bini. Ani tigabu ngeleagola mani Anduane Homogonaga anda ogoni bule mo yalu ibugu bini. Ani binigo irane anda bialu heagola nde hamaru ayuru biabe biaga ale maru aeaneme wabini wiaru pigipoga ngili ngilau naleore howa biabe bigibigi bialu helonaga ani bini.\*

<sup>8</sup> Anda ogoninaga panga haraba unurahayagi ubanda tagi biaga winigo ogoni anda piaga wini. Haraba mbiraore ogoniha anda pialu anda be kira daligaha henego labonaga pangabi ogoniha dege anda pialu egageria mbira ogoni ale degeni howa iraga halu piaga wini. <sup>9</sup> Kini Solomononaga biabe biaga hearume anda biago dindiha bulenenaga biai hene. Anda be mbirago biai howa anda be mendego biadambi holenaga dabira ira tamia timbuni wiarume ala gililo pelowa ira tamia dege peleneme dungini. <sup>10</sup> Anda ogoni tagirahayagi bu mabu bupe henego ai bima iraga howa be tebo bu helene. Anda be tebo bu gimbu bima iraga henedaruni bibahende mbiraoregobi dege dege hene. Anda uruni bule dangini howa anda bima irigi holenaga pigane dagia mbiragonaga dungule howa ira tamia timbuni gililo wiyarume dagia dabira Anduane Homogo ibunaga anda loma bia hene biagonaga mandaha gimbu biade haga bini.

<sup>11</sup> Mani Anduane Homogohanda Solomono lamialu lalu, <sup>12</sup> Áyu ina inaga anda bia halu kegonaga bi mbira langero. Ina inaga bi mana hale halu baya hangu talialu bialu

\* 6:7: Har 20.25, Man 27.5, Yos 8.31

hariyagua ina bamba í aba Debidihondo buleore lalu lo wirugo lola helo í biamogo bialu haabo holebero. <sup>13</sup>Ani bialu ina anda ogoni ina beregoha howa inaga Isaraele wali agali tí bababi haabo holebero. Ani howa ina tí yuwa naholeberoore, lene.

<sup>14</sup>Anidagua bialu Solomono ibugua Anduane Homogonaga anda biago biai hene.

*Anduane Homogonaga anda biago hobene biaruha yári binigo ogo  
(2 Bi Te 3.8-14)*

<sup>15</sup>Anda biaga biarume ira tamia pelo mbaralo wini wiarume anda ogoni tamuha hái dindini howa ala para howa para hama iralu anda dabiraha paradaga halu ege tole bibahende para hodambi hai hene. Ani bialu ira guraya ale pelo mbaralo wiyarume tamu dindiha dungu mbaralo wahene. <sup>16-17</sup>Ani buwa tamu hobane timbuni wiago hanunini hobaki hene. Tamu habaneoreha hobane kago Loma Bia Heneore Hobane laga hene. Hobane ogoniha tamu yangale dege magi manda bialu mida dira hene. Hobane Loma Bia Hene dege mendego ibu timbuniore hene. Ogoni ibu yangale magi manda bialu mida pirani halira (18) hene. Tamu ogoni hobaki henedagoni ira tamia pelene biaru ariame dege dindini howa para hama iralu daligaha para homaro bini. ✧ <sup>18</sup>Ira tamia pelene biarunime anda hái para hayagome ege tole biaru dambi ho waheagola ege tole mbira pana kane handabe nahe hene. Ani para hai howa tigua ira pelene mbalape ogoriani mo yári bialu mbaguali alebi palawaya ale tara tararubi wabu helaga bini.

<sup>19</sup>Anda ogoninaga hobane tamu habaneha heago Loma Bia Heneore lagago ogoniha Anduane Homogonaga Mbogoyi biago ngelole bu helene. <sup>20</sup>Tamu hobane Loma Bia Hene ogoninaga arane yangalebi lunaga mandabi handadagabi mbiraore ogobi dege dege hene. Mida magi manda bialu dira dege dege bu helene. Anda hái ira peleneme bini heago bibahende ngolo bayale marume para hodambi hene. Hobane ogoninaga panga haraba kaware wiagoria bo lomabu delaga dabu mbira ira tamia pelene baya tara wiarume bu helowa ogonibi nde ngolo bayale wiagome ira dambi hai helene. <sup>21</sup>Hobane Loma Bia Hene ogoninaga anda hái hearu bibahendeore ngolome budambi hai helene. Ani buwa ngolome seni pu maru wabuwa tamu hobane Loma Bia Heneore laga biagonaga pangani gerela haga bini. Ani buwa anda hái bibahende ngolome biadambi hai heagola <sup>22</sup>ai tamu hobane Loma Bia Heneore ogonihabi bo lomabu delaga dabu heagobi bibahendeore tamu ogoniha wiaru ngolome dambi hai hene wini. ✧

<sup>23-26</sup>Ani buwa tigua dahuliyali handalehe kira babaganehe ira olibeme dibu mbara lowa tamu hobane Loma Bia Heneore ogoniha ngelole wabialu hene. Dahuliyali handalehe wabini ogoni labo libu ogobi labolabo howa luninaga magi manda bialu mida maria howa emene bolanguahe wini. Libunaga babagane yanga lowa tiga tiga haragahe helene. Babagane lunaga magi manda bialu mida kira howa bolanguahe hene. Babagane nguni mendeha howa mendehayagi luninaga manda bialu mida maria wini. ✧ <sup>27</sup>Tigua ogonibi wabiai howa Anduane Homogonaga hobane Loma Bia Heneore biagoha mo yanda howa helene. Dahuliyali handalehe wabini biagolabo tamu hobane hanuni ogoniha heleagola libunaga babagane mende mendeme anda hái ela howa wialu mendego labome tamu hanuni libuni ela hagabu helene. <sup>28</sup>Ani wabu helowa tigua dahuliyali handalehe biagolabo ngolome para hodambi hai hene.

<sup>29</sup>Ani bialu tamu hobane kira mbirago Loma Bia Hene laga mendego Loma Bia Heneore lagago ogoni labonaga anda háini dahuliyali handalehe wabini dewaoremebi ira ayage ale mini dedi manda bialu wabini dewaoremebi palawaya ale manda bialu wabini dewaoremebi mo yári biaho ngelene. <sup>30</sup>Ani buwa tamu hobane kira ogoni labonaga dindiha ge holene wiagoria bibahendeore ngolome para hodambi hai hene.

<sup>31</sup> Hobane Loma Bia Heneore ogoninaga panga ira olibe dibu pelo mbaralene wiagome wabini. Wabuwa panga haraba biagoria manda biaho ngelene. Tigua panga kira wabuwa mende mendehabi kirabali helenego payaragola kirabalime ibalu paya ndibu laga biaga wini. Panga ogoninaga gembone duria hene. <sup>32</sup> Panga kira ogoni labobi nde mbirale dahuliyali handalehe ira ayage ale manda bialubi palawaya ale manda bialubi dewa dege wabu helowa ngolome panga biagobi mbirale biarubi hadambi hai helene. <sup>33</sup> Ani bialu tamu hobane Loma Bia Hene tagiraha mende hayagonaga pangabi ira olibe pelene mbaraleme dege wabuwa helene. Panga ogoni ibunaga gembone maria hene. <sup>34</sup> Ani wabu helowa ira guraya ale pelowa panga kira wabini. Panga ogoni mende mendehabi kira helo wabini. Wabuwa abale tamu hobane Loma Bia Heneore laga biagonaga wabu helayadagua dege wabu helene. <sup>35</sup> Ani helowa panga biagoria tigua dahuliyali handalehe ira ayage ale mini dedi mitangi bialubi palawaya alebi ala wabu helayadagua dege wabu helaga bini. Ani biai howa ira panga biago ngolome para hodambi hai hene.

<sup>36</sup> Ani biai howa tigua ege tole baya hangu podaga buwa bogo tigabu wigi binigome muwa anda ibulene haraba wiagoria pabe bialu howa ege tole uruni duguni tebira mbirago wiadambi haga bima irigi halu tebira wiai hene. Wiai howa ira tamia pelo wiyarume mbaralalu tiga bilo wiadambi haga bini. Ani dege ege tole halu tebira wialu ira wia bima iralu anda pabedago biaiore hene.

<sup>37</sup> Pigane Solomonu ibu kini henegoria howa hama ibalu mali manegonaga ege mende layagola tigua Anduane Homogonaga anda ogoni bini. Isaraeleali tigua ege ogoni mini Sibi laga hene. Ege ogoningi Anduane Homogonaga anda bulenedagoria ege tole mbalapeme dindini pigane dunga hama pene. <sup>38</sup> Agali anda biaga uruni tigua anda ogoni bialu heagola mali karia pene. Ai Solomonu ibu kini heagola mali beane (11) ogoninaga ege halini layagola anda bibahendeore bumaro biai hene. Agali biabe biaga biarume anda baya hanguore biyagola anda bayaleore Kini Solomonu ibunime ogodaguaore bilimu lalu lamiyadagua biaiore hene.

## 7

### *Kini Solomononaga anda timbuni mbira binigo ogo*

<sup>1</sup> Solomonohanda ibuninaga anda timbuni mbira ibuni henedagoria bu helene. Anda ogoni ibunaga biabe bia hagarume bialu heane mali haleria (13) pene. <sup>2</sup> Ani bialu Solomononaga biabe biahaga agali hearume anda timbuni ogoni binigo mini Lebanono Irabu Anda laga hene. Anda ogoni lunaga mida magi pira mariani maria (44) halu arane timbuninaga mida magi pira kirani kira (22) halu bima iraganaga mida magi haleria (13) bolanguahe hene. Anda gene ira tamiame duguni maria hengene. Ani buwa ira tamia luorerume gene wa hayagoria togoriane pale lama pene. <sup>3</sup> Ani bialu ira uruni aria degeme harua halu tebira lone ala helayago dambi halu ubaedene bilene. Ani bialu ira tamia biarunaga kambu laga bini wiarume holalu wini. <sup>4-5</sup> Ani bialu anda ogoninaga manda mende mendehabi windo tebira helene. Manda mendenaga windo heago ho iriari nabi mendeyagi heagobi dege helaga bini. Anda ogoninaga haraba maria ogobi dege dege helene.

<sup>6</sup> Ani bialu tigua anda timbuni ogoniha anda mende damuwa anda ogoni mini Anda Gene Timbuniru laga hene. Anda ogoni lunaga mida magi pira kirani kira (22) wialu aranenaga mida magi haleria (13) hene. Anda ogoni ibu gene daligani bu helene.

<sup>7</sup> Ani bialu anda damini mendebi mini Kininaga Biragane Dagia Anda lalu mini mende Godi Hale Hagane Anda laga helo bini. Anda ogoniha Solomonu ibugua wali agali godi hale hole ibiraru hale haga hene. Anda ogoninaga hai bibahende ira tamia pelene mbarale wiarume para haga bima iraga halu dindiha howa daligahayagi para ho maro bini.

<sup>8</sup> Ani bialu Solomono ibuni andaga dindi hobane anda maru bu helayagoniha dege godi anda heago erembirahayagi bu helene. Ogonibi nde anda maru biyagobi dege bu helene. Solomono one Iyibi dindinaga kini heago wane berenego ogoni ibunaga andabi ogonibi dege bu helene.\*

<sup>9</sup> Anda uruni mo yáribia halu ege tole baya tara tara muni dewame miaga wiarume dindiha howa bima iraga halu danginiha mo yáribia halu pabe timbuni mbirabi dindi hobane wali agali ngoai haga wiago bu mabu bini. Pabe ogoni bulenaga ege tole baya hangu some podalu lene lene baya hangu podo tiga bialu bini. <sup>10</sup> Tigua ege tole timbu damene dewa podalu dindiha anda bulenedagoria dugu wima pene. Ege tole uruni maru timbuniore lunaga magi mida tebira maru mida mariaru wigi bini. <sup>11</sup> Dindiha dugu wima puwa tigua ege tole bayale damene wiyagomebi ira tamia manda manda bu wiyagomebi anda bini. <sup>12</sup> Ani bialu dindi hobane anda hayagoha ege pabe bu mabu bini. Pabe ogodagua bini. Tigua ege tole bayaleore podo tiga bini wiyagome duguni halu tebira dunga hene. Ani buwa ira tamia podo wiyagome wiadambi hama pene. Tigua anidagua dege bialu pabe bu maro bini. Tigua pabe ogoni ala wali agali ngoai haga anda Anduane Homogonaga anda harabani heagobibi mende anda hobane Anduane Homogonaga anda heagobi dege bu helene.

### *Hurama ibu Kini Solomononaga biabe bule ibinigo ogo*

<sup>13-14</sup> Agali mbira ibu mini Hurama henego ibu Taia tanoha haga hene. Agali ogoni ibu ege tole boronosime mbirale tara tara ngaru wabiaga mugubeyi hene. Hurama ibu aba Taiali dege howa homenego ibuguabi nde boronosime mbirale tara tara anidagua wabiaga mugubeyi dege hene. Hurama ibu aiyá Nabadali hameigini aria berene. Anigo Solomonohanda Hurama ibabe lalu lawia hayagola ibini. Ibu howa ege tole boronosime mbirale tara tara ogoale wabibe lalu Solomono ibugua lamiyadagua bialu hene.

### *Huramahanda boronosime anda gene luni kira wabu helene ogo*

#### *(2 Bi Te 3.15-17)*

<sup>15</sup> Hurama ibugua boronosime anda gene luni kira ogobi labolabo wabu helene. Luninaga magi mida halira halu timbuninaga mida duriani maru bolangua hene wabu helene. <sup>16</sup> Ani wabuwa anda gene kira ogoni labonaga nguni daligahayagi hela dambi holenebi wabu wini. Daliga wiadambi holene ogoni luninaga magi mida kirani bolanguahe wini. <sup>17</sup> Ani buwa mbirale nu ale mbira boronosime wabuwa anda gene biagonaga nguni daligahayagi mabu buwa mo yáribia halu gerelapebe bu helene. Anda gene kirabalinaga nu ogoniale karia labolabo girigerelo helene. <sup>18</sup> Ani bu helowa ibugua boronosime ira mbira mini pomegaranade lini ale dewaore wabuwa uruni nu ale wabu helayagoria gerelapebe bialu anda gene biagolabo mo yári bia hene. Gene biago labo kirabalinaga ira lini ale ogoni duguni kira labolabo wabu helene. <sup>19</sup> Anda gene uruninaga nguni daligahayagi palawaya ale lini yanga nale wene bayale hondoabi mbira daraligobi handalehe helalu palawaya ale irane handalehe ogoninaga luni magi mida mbirani bolanguahe helene. <sup>20</sup> Anda genedago labonaga nguni daligayagi dege nguni mabubu helowa Huramahanda nu ale wabu wiyago odagoriani wiadambi hene. Ani ngelowa ibugua ira pomegaranadenaga lini ale wabu wiyago nu ale ogoriani duguni kirani pongobia haga bini. Anda gene mbira mbiranaga pomegaranade lini handalehe ogoni ale handari kira (200) labolabo helaga bini. <sup>21</sup> Hurama ibugua anda gene kira ogonilabo wabiai hayagola tigua mo yalu puwa Anduane Homogonaga anda haneni talebu helene. Anda gene helenedagoni mendego mini Yagini lalu anda haraba abene unurayagi wiagoria helene. Anda gene mende mini Boasa lenedagoni abene uyurayagi helene.\* <sup>22</sup> Ani helowa anda gene biago labonaga nguni daligahayagi

\* 7:8: 1 Kin 3.1 \* 7:21: Hiburu bi lalu mini Yagini ogoni ogodagua lalu, Ngode Datagaliwabehanda Biya, lalu bi mende mini Boasa ogoni Ngode Datagaliwabenaga Hongome laga.



mbirale palawaya handalehe biago heaore helene. Ani bialu anda gene ogoni labonaga biabe bulene winigo bu maro bini.

*Huramahanda iba dange timbuniore boronosime wabinigo ogo*  
(2 Bi Te 4.2-5)

<sup>23</sup> Hurama ibugua ege tole boronosime iba dange mbira wagororobi wabini. Be ogoni ibunaga daligahayagi manda bialu mida kirani bolanguahe halu aranenaga mida mariani bolanguahe dege wialu timbuninaga mida haleria (13) bolangua hene wini. <sup>24</sup> Ani bialu iba dange ogoninaga neneni mbirale mbira geromi lini handalehe wabuwa duguni kira mabubupe helene. Ani bialu dombeneha mida mbira mbira yu wahaga buwa bigiya pira pigane iba dange wabialu howa wabumaga henego uruni mo helene. <sup>25</sup> Hurama ibugua nogo bulumaga wangabe handalehe homberia (12) wabu winigoria erembirani iba dange biago mo wini. Ani mo wiagola bulumaga uruninaga herenehayagi iba dange biago tibinime dambi helalu wanakui handa tagitagibu helaga bini. Mbirale bulumaga handalehe uruni aria tebira ni tagira ibiragohayagi handa amuhu helalu tebira mende ni paliragohayagi handa daibu helalu tebira dege tebone uyurahayagi handa uyuhu helalu tebira dege mane unurahayagi handa unuhu helene. <sup>26</sup> Iba dange biagonaga tamuhayagi howa tagirahayagi tohenaga magi sendimida halira gi hondone dunuyanego ale wini. Ani wiagola iba dange biagonaga poneni palawaya ale lini yanga nale wene dedaligobi wini. Iba dange ogoniha iba timbuniore lida magi daosini pira maria (40,000) birulene wabu wini.

*Huramahanda wilibaro ale boronosime wabinigo ogo*

<sup>27</sup> Hurama ibugua wilibaro ale pira iba dange emene wiaru yulenaga wabu wini. Wilibaro uruninaga arane bibahendehe ogobi dege dege magi manda bialu mida mbirani bolangua hene halu daliganaga mida mbirani bolangua hene dege dege wabu wini. <sup>28-29</sup> Pigane ogodagua wabini. Pigane wilibaro irane ala wabuwa mani howa boronosime bigiya budi gabua timbuni laiono handalehebi nogo bulumaga wangabe handalehebi dahuliyali mitangi bialubi uruni ale wabu wigi binigo ai uruni wilibaro biagonaga hai bialu para haga bini. Ani buwa wilibaro iranedago para hadambi hai nahe dege wini. Wilibaro uruninaga iranedagoria henge mbira mbalo ale yarinaga ngelaga bini. Mbalo ale henge ngelaga binidagoni laiono bulumagala heago andaneha ngelaga bini. Ani bialu mbalo aleni yari biagoria laiono bulumagala heagonaga daligahayagibi andanehabi ngela dege bini. <sup>30</sup> Wilibaro ale uruninaga gene maria ege tole boronosime dege wabuwa ge polenenaga wabu helene. Wilibaro ale uruninaga gibuni mariani iba dange biaru yani helonaga boronosime wabuwa helaga bini. Uruni bibahendenaga gilililipi maru mbalo ale wabu helaga bini. <sup>31</sup> Ani bialu boronosime wabini wagororobi mbira wabuwa gene boronosime dege wabuwa ogoriani mo pagaho ngelene. Ani ngelowa iba dange biago ogoriani mo pagaho ngelene. Ani buwa wilibaro ale biagoria howa iraga halu iba dange biago berelolenenaga mbirale wagororobi wabu wiyagonaga tibinihayagi howa magi manda bialu sendimida pira mariani duria (45) wini. Anigo ai wilibaro ale biagoria howa manda bialu uyura iba dange biraga mabubi biagonaga daligahayagi daliganaga magi manda bialu sendimida pira waragariani huniane karia (67) wini. Mbirale iba dange wiaga mabubi ogoninaga windonaga bigiya hai helowa windodagoha bigiya tara tara buhe wini.

<sup>32</sup> Wilibaro ale uruninaga ge mbira mbirago timbuninaga sendimida pira waragariani huniane karia (67) wini. Ani bialu ge mbira mbira helaga biaga boronosime wabini homane uruni Hurama ibugua tara wabialu yapara halu helene ndo wilibaro ibuni wabialu howa wabumaga hene wini. Ge uruni ti laiono handalehe wabu helayago andaneha wabu helene. <sup>33</sup> Ge uruni ti wai bu polenenaga garo ale mini karisinaga ge heagobi dege wabu helaga bini. Ani bialu mbirale marubi wilibaro ge uruni hongo

helonaga yania haga bulene ale bibahende boronosime hangu wabuwa helai hene. <sup>34-35</sup> Ainde Hurama ibugua mbirale wagororobi iba dange berelolene biagobi mbirale homane iba dange yani holene biagobi bibahende hangu hangu wabuwa wilibaro ale biagoria bapara hene ndo bibahende mbiraore hangu wilibaro ale wabiyangi wabumaga hene. Iba dange wulene wagororobi biagonaga magi iraganaga sendimida pira kirani kira (22) wini. <sup>36</sup> Iba dange yania haga biagoria windo ale hama piyagoria bigiya tara tara dahuliyali manda bialubi laionobi ira ayage ale mini dedibi iba dangenaga gene heagoriabi Hurama ibugua uruni ale wabu helaga bini. Bigiya wabibehe henge wigi biagoria Hurama ibugua mbirale uruni ale wabu helaga bini. Ani wabu helowa mbirale wagororobi mbalo handalehe biagoria bigiya odaruni wabu mabu bini. <sup>37</sup> Hurama ibugua wilibaro ale pira uruni ogobi dege dege wabu ngelowa bigiya wabu helalu yári tara tara helaga biyarubi nde mbiraore ale dege helai helene.

<sup>38</sup> Hurama ibugua iba dange pira wilibaro ale pirani ta howa ngelolenaga wabu wini. Iba dange uruni aranenaga magi mida mbirani bolanguahe wabu wini. Ani bialu iba dange uruni mbira mbiraha iba timbuniore berelolenaga magi lida handari halira (800) hambu yabehe wabu wini. <sup>39</sup> Hurama ibugua mbirale uruni wabiai howa wilibaro ale duria Anduane Homogonaga anda hái abene unurahayagi heagoria wini. Ani bialu duria mende anda hái abene uyurahayaginaga heago kawareni wiapara howa ngelene. Ani ngelowa iba biraga dange timbuni biago anda tagira abene unurahayaginaga gibuni wiagoria mo ngelene.

*Huramahanda Anduane Homogonaga andaha ngelonaga wabiniru ogo*  
(2 Bi Te 4.11-5.1)

<sup>40</sup> Hurama ibugua wayawaya bulene ndisibi nama tabulirubi ndisi emenerubi bibahende wabiai hene. Ani bialu Hurama ibugua Anduane Homogonaga andaha biabe uruni bibe lalu Kini Solomonohanda mo miyaruni bibahende biai hene. <sup>41</sup> Hurama ibugua wabinidaruni bibahende lamaga halu uru ale. Anda gene luni boronosime wabini kira wabialu ogoni labonaga nguni daligahayagi dambi holene manda ale kirabi nu ale nguni daliga dambi hayago mo yári bia holene biarubi wabini.

<sup>42</sup> Ani buwa ira mini pomegaranade lininaga bigiya handari maria (400) nu ale wabu helayagoria mo yári bia halu pongo bia haga bulenerubi anda gene mbira mbiranaga lini biagonaga bigiya duguni kira labolabo wabu helalu bini.

<sup>43</sup> Ani bialu wilibaro ale pira wabialu iba dangebi nde wilibaro ogoriani pira dege wabu wini.

<sup>44</sup> Ani bialu iba dange timbuni biagobi nogo bulumaga ale homberia (12) iba dange ogoni yu heleagobi wabini.

<sup>45</sup> Ani bialu ndisirubi nama tabulirubi ndisi emenerubi wabiai hene. Hurama ibugua Solomonohanda anidagua bibe layagola Anduane Homogonaga andaha wulene ale uruni bibahende wabu wiai hene.

Mbirale uruni boronosime wabu wiai howa mo bayale helonaga mbirale hai hagame baya hanguore hai howa domo mbaralo wahai ho ngelene. <sup>46</sup> Kini Solomonohanda ibugua Huramahando mbirale wabia layagoni dindi ulini panda panda mbira Iba Yodana angeha Sugodo tanoha Saredana tanola hengene wiagoha howa wabialu hene. Dindi abene orahayagi mbirale uruni wabialu holene karulapeyane hondowa ani bini. <sup>47</sup> Ani buwa Hurama ibugua mbirale boronosime wabinidaruni dewaore wabu wini. Ani biyagola Solomonohanda ibugua agali maru hearuhondo mbirale wabiyadaruninaga boronosi genda magi agiradabe hondole genda magi daga ladaba nale wahene. Uruninaga genda magi ogodagua lalu agali mbiramebi mbira manda nabi hene.

*Anduane Homogonaga andaha ngelole tigua ngolome mbirale tara tara wabinigo ogo*

☆ 7:38: Har 30.17-21

<sup>48</sup> Solomonu ibugua agali biabe biaga hearuhondo Anduane Homogonaga andaha ngelole ngolome mbirale maru wabidaba lene. Ani layagola agali biabe biaga hearume lomabu delaga dabubi wali agalime mberedi Anduane Homogohondo minigo mo wiagane dagiabi ngolome wabu helene.\* <sup>49</sup> Ani bialu ngolo bayaleore wiarume lamu hale irane pira helowa Anduane Homogo Andanaga Hobane Loma Bia Heneore laga heagonaga anda háini lamu delo wigi bulenaga wabu wini. Lamu hale uruni duria gi tighayagi paga halu duria mende gi lehayagi paga hene. Ani bialu ngolome dege palawaya ale wabialu lamu wabialu ira tabolene perobi wabu wia dege bini.\* <sup>50</sup> Ani bialu ngolo bayale wiarume nogo darama loma bini hambu yulenenaga gabo bebi ndisi marubi mbirale mbira lamu mo hundia haga alebi ira hagua ngabiaga inisenesi delolene beledi bebi ira dene hedo yulene beledibi wabigi bini. Ani buwa anda Hobane Loma Bia Heneore laga heagonaga panga wabiaga alebi hobane mende Loma Bia Hene laga heagonaga panga wabiaga alebi bibahende ngolome dege wabu helaga bini.

<sup>51</sup> Kini Solomonu haluibunaga biabe biaga agali hearubi tigua Anduane Homogonaga andaha biabe bulene wiago biai hene. Biai howa Solomonu ibugua silibabi ngolobi ndisibi mbirale bibahende ibu aba Debidihanda Anduane Homogonaga loma biaho wini wiaru uruni ale Anduane Homogonaga anda hobane tamu heagoaha mo yu puwa ngelaga bini.\*

## 8

*Habo Nalolenenaga Mbogoyi biago tigua Anduane Homogonaga andaha mo yalu ibinigo ogo*

*(2 Bi Te 5.2-6.2)*

<sup>1</sup> Kini Solomonohanda Isaraele hameigini bibahende hearunaga agali haguane hearuhondobi hameigini emene emenenaga agali haguane hearuhondobi uruni ti bibahendeore ibuni koria Yarusaleme ibai halimu lama pudaba lene. Uruni tigua Debidinaga tano Saiononi Anduane Homogonaga Habo Nalolene Bi lo winigonaga Mbogoyi biago Anduane Homogonaga anda Yarusalemeni ngelo mo yalu ibule pudaba lolenaga ani lamule bi yalu purogo ladaba lene.\* <sup>2</sup> Ani laya handala lamima purogo layagola bi ogoni hale halu agali uruni tigua mali ogoninaga ege kane layagola Isaraele wali agali ti Anda Nemendaruha Palu Holene Horo winigo ogoingi ti bibahende ibu ngoai hene.\* <sup>3</sup> Agali haguane biaru ibu ngoai heagola loma binigo mo miaga hearu tigua Mbogoyi biago mo yalu <sup>4</sup> Anduane Homogonaga anda heagoria yalu pene. Ani buwa loma binigo mo miaga biarubi Libai agali hearubi tigua Anduane Homogonaga Balai Anda heago gialo yalu Balai Anda ogoniha wiaga wiaru bibahende mo yai halu Anduane Homogonaga anda heagoria kaware pene. <sup>5</sup> Ani mo yalu ibiyagola Solomonobi Isaraele wali agali bibahendebi Mbogoyi biago mo yalu ibiyagoria kaware mo ngoai ho hene. Ani mo ngoai howa tigua nogo sibirubi bulumaga wangaberubi dewaore daga labenahe Anduane Homogohondo loma biniru bo delalu hene. <sup>6</sup> Ani bo delai halu loma binigo mo miaga biaru tigua Mbogoyi biago Anduane Homogonaga anda biagoaha tamu Hobane Loma Bia Heneore biagoaha mo yalu anda puwa dahuliyali handalehe wabini biago labonaga babagane andaneha ngelene. <sup>7</sup> Babagane yabulalu haradaguabi wabu helayagome Mbogoyi biagobi iraho yaga ira luni kira biagolabobi bibahende babagane kira biagolabome dambi hai helene. <sup>8</sup> Ira kira Mbogoyi iraho yaga ogoni labo lunioreyagola anda tamu Hobane Loma Bia Hene laga mende tagirahayagi heagoria howa ira ogoni labonaga nguni panigi handabehe wini. Anigo tagirahayagi howa handabe nahe wini. Ira ogoni labo anidagua wiaho wiaabo haga wini. <sup>9</sup> Mbogoyi ogoniha ege tole kira Anduane Homogonaga bi mana gilibu wini biagolabo dege wini.

\* 7:48: Har 25.23-30, 30.1-3    \* 7:49: Har 25.31-40    \* 7:51: 2 Sml 8.11, 1 Bit 18.11    \* 8:1: 2 Sml 6.12-16, 1 Bit 15.25-29    \* 8:2: LBM 23.34

Bamba Isaraele wali agali Iyibi dindi wahalu Hari Sainai heagoria íbu heangi Anduane Homogohanda ti heba Habo Nalolene Bi mbira lowinigo ogoni ege tole kirani gili buwa Mosesehanda Mbogoyi ogoniha yu ngelene.✠

<sup>10</sup> Ani bialu loma binigo mo miaga agali biaru tigua Mbogoyi biago tamuha mo ngelalu tini tagira ibiyagola beraliba aleme Anduane Homogonaga anda biagoha íbu tolai hene.\* <sup>11</sup> Anduane Homogo ibunaga wá taraore holeneme beraliba biagoha howa wá timbuni demborerebi hatagi hene. Ani hayagome loma binigo mo miaga biarume tinaga biabe bulene wiaru bule dai bibe nahe hene. <sup>12</sup> Ani biyagola Solomono ibugua Anduane Homogohondo bi ogodagua lalu, Anduane Homogo-o ínime lalu, I beraliba hari mindini ngaruha holebero, larigoni.✠ <sup>13</sup> Anigo ai áyu ina ínaga anda baya taraore bia kogonigo ini ogoniha haaboboore habelo kagoni, lene.

*Solomonohanda wali agalihondo bi lenego ogo*  
(2 Bi Te 6.3-11)

<sup>14</sup> Kini Solomono ibugua Anduane Homogohondo bi lai howa wali agali bu hearuha handa amu howa Ngode Datagaliwabehanda ti mo bayale helo lowa bi lahene. <sup>15-18</sup> Ibugua lalu, Anduane Homogo ina Isaraele wali agali kamarunaga Ngode Datagaliwabe kago ibunaga mini mo yaraga hama. Ibugua bamba i aba Debidihondo mbira buleberogo lo winigo áyu biyada. Debidi ibugua Isaraele wali agaliru ti Anduane Homogo inanaga Ngode Datagaliwabe mitangi bialu ibuhondo lotu lalu ibuni kagoha kaware hole ibilonaga anda mbira bule manda bialu hene. Ani bule biyagola Anduane Homogohanda ibuhondo lalu, Ina ínaga wali agaliru Iyibi dindi howa haru tagira ibirungi hama ibinigo ibalu áyu ogoni howa tigua íbu ngoai howa inihondo mitangi bialu lotu lalu holene anda mbira Isaraele dindiha tano wiyaru mbirani bilimu lalu nalami haru. Debidi ina ínaga wali agaliru haru habelo dabo helaro. Ina ínaga anda timbuni mbira bia hole manda birigoni bayale dege.✠ <sup>19</sup> Anigo mani howa í igini mbirame wali agali ini koría ibalu i mitangi bialu lotu lelonaga anda ogoni bilo áyu ínime ínaga anda nabulebere, lalu Anduane Homogo ibugua Debidihondo lamiyago, lalu Solomonohanda lene.✠

<sup>20</sup> Ibugua laho wialu lalu, Anduane Homogohanda bi ogonidagua lowinigo áyu hene-neore lola hai helayada. Ai ina bibahende ibuni kagoria kaware pialu lotu lamíyanaga ina Anduane Homogo Isaraele wali agalinaga Ngode Datagaliwabenaga anda mbira bidogoni. <sup>21</sup> Anda ogoniha Anduane Homogonaga Habo Nalolene Bi lo winigonaga Mbogoyi biago tamuha mo yu íbu ngeledogoni. Mbogoyi ogoniha bamba inanaga mamali Iyibi dindiha howa haru tagira ibiyangi ege tole kirani Anduane Homogohanda ina baba Habo Nalolene Bi gilibu wini biagolabo ogoniha nga, lalu Solomonohanda ani lene.

*Solomono ibugua Ngode Datagaliwabehondo bi lenego ogo*  
(2 Bi Te 6.12-42)

<sup>22</sup> Ani lai howa Solomono ibugua Isaraele wali agali bibahendenaga deni lomabu delaga dabu wiagoria pu howa ibunaga gi yaraga halu lalu, <sup>23</sup> Anduane Homogo ina Isaraele wali agali bibahendenaga Ngode Datagaliwabe-o dahuliya andagahabi dindihabi mbira í kegobi mende naheore. Ani kegobi howa iname mana beremaru ínínaga deni bayale hangu bialu howa mana ko ngaru mitangi nabi kamagola ina ínínaga Isaraele wali agali baba habo nalolene bi lo wirigo mitangi bialu ina gubalini haabo haga ke. <sup>24</sup> Ina bamba ínaga biabe bia haga i aba Debidihondo bulebero lalu

✠ 8:9: Man 10.5 \* 8:10: Anduane Homogo ibuni Isaraele wali agali ti baba kogoni lowa walia halu ibuni beralibaha howa ibaga. Beraliba ogonime ti Iyibi wahalu tagira ibiyangi dindi ko wali agali nahaga wiagoria ibuni haru bamba hene. Haru Tagira Penego Be 13-21 handabe. ✠ 8:12: Iba 18.11, 97.2 ✠ 8:15-18: 2 Sml 7.1-11, 1 Bit 17.1-10 ✠ 8:19: 2 Sml 7.12-13, 1 Bit 17.11-12

bi mbira lo wirigo mitangi bialu áyu bi ogoni heneneore lola helarida. <sup>25</sup> Ai Anduane Homogo ina Isaraele wali agalinaga Ngode Datagaliwabe-o áyu ina ihondo bi mbira hale harogo. Bamba i aba Debidihondo mbira bulebero lalu bi mende lo wiriyago manda bibe. Ina ibuhondo lalu, Debidi-o i igini aguaneru tigua ini baya hangu talima ibaabo halubi inaga deni ibagabu halu ina bialu haga wiridagua biyagua nde inaga aguane uruni ariame hangu Isaraele wali agalinaga kini haabo holebira, lariyago.\* <sup>26</sup> Ai ina Isaraele wali agalinaga Ngode Datagaliwabe-o ina i aba Debidi inaga biabe biahaga biagohondo ani buleore lalu bi ogonidagua lo wiriyagobi heneneore lola helonaga ani bibe lalu langero.

<sup>27</sup> Anigo Anduane Homogo-o heneneore dindi o ngagoha i holene karulapedabe. Dahuliya andaga timbuniore howa ogoniha i holene nakarulape ngegodago ai ina anda emeneore áyu o bu hela kogo i holene karulape agua holedabe.\* <sup>28</sup> Ai Anduane Homogo inaga Ngode Datagaliwabe-o inaga biabe biahaga kogonigo áyu inaga bi ogoale bibe larogo hale habe. Ina ihondo hale halu bibe lalu langerogo bibe. <sup>29</sup> Inime inaga anda ogonigo wali agaliru ti anda ogoniha anda ibalu ini kegoria kaware ibilo dabarigoni. Aniyagua horo bibahendengi anda ogoniha de handape haga bibe. Ina horo bibahendengi anda ogoniha handa amuho howa ihondo biamogo bibe larogola ina inaga bi hale halu bibe.\* <sup>30</sup> Anduane Homogo-o inibi inaga Isaraele wali agali bu kamarubi iname inaga anda ogoniha handa amu howa inihondo bi mbira laramagola ina dahuliya andagaha kegoriani howa inanaga bi laramago hale halu iname ko birimadaru domo wahaga bibe, lene.

<sup>31</sup> Solomonohanda laabo halu lalu, Mbirali ibu damene mendeali kagome ibuhondo i kagua mbira biri laragola ogoni ibugua anda ogoha anda ibuwa inaga lomabu delaga dabu ngagoria kaware ibalu ibu bi heneneore laro lalu i kagua nabi layagua nde <sup>32</sup> Anduane Homogo-o i dahuliya andaga howa mbirali ibunaga bi ogoni larago hale halu ina mana tigabi ngadagua bialu mo tiga bibe. Agali mana kagua biaga hayadago ibugua biyadagonaga pani mibe. Wali agali bu karunaga deni agali biagome ko mbira nawi kago ibuha ko para nahe kagoni lowa walia halu ibuhondo bayale bibe.\*

<sup>33</sup> Inaga Isaraele wali agali kamarume inanaga waitigi baba wai bialu kamaria iname ihondo mana ko birimagome inanaga waitigime ina balu wayali helaregola iname ko birimadarunaga mini beregedalu ini keria anda ogoha ibuwa ihondo bi lalu, Inanaga ko birimaru domo wahabe larimayagua\* <sup>34</sup> Anduane Homogo-o i dahuliya andaga howa inaga wali agali bu kamarunaga bi hale halu ko birimago domo wahabe. Ani bialu inanaga waitigi karume ina dindi tara mendeha haru piyago inime dindi bamba ina mamaliruhondo minigo ina dindiore ogoria lone haru dai bibe.

<sup>35</sup> Ina wali agali inaga bu kamarume ihondo mana ko mbira bialu kamaria ina pani ngialu inanaga dindi ogoria iba dalu naibilo gaea hangu biaho ngelaregola mani ina mini beregedalu anda o kagoha ini keria handa amu howa bi larimayagua <sup>36</sup> Anduane Homogo-o i dahuliya andaga howa inaga Isaraele wali agali bu kamaru dara halu inamebi kini kagomebi ko birimadaru domo wahabe. Ani bialu iname mana tigabi bayale ngaru hangu talialu bialu holomaya lawai habe. Ani bialu dindi ogo inanaga dindi ogoniore ngelo ina bamba inanaga mamaliruhondo mini wirigoria iba dalu ibilabe.

<sup>37</sup> Solomonohanda laabo halu lalu, Inanaga dindi ogoria hina gariangi timbuni piyaguabi warago hongohe tara tagira ibiyaguabi puyabu poboyogobi hongohe tara mbira ibalu inanaga mabuha tomo hengene andaho karu mo ko hayaguabi pagaya ale dewaore ibalu mabuha tomo andaho karu nai hayaguabi inanaga waitigirume ibalu inanaga tanoruha kamaria ina bole ho hagirabu yanda hayaguabi warago tara tara

\* 8:25: 1 Kin 2.4    \* 8:27: 2 Bit 2.6, Ais 66.1, Ab 7.49, 17.24    \* 8:29: Man 12.11    \* 8:32: Man 25.1    \* 8:33: 2 Bit 7.12-20



ngaru inaha anda ibalu ina mo ko hayaguabi <sup>38</sup> ihondo bi laramagola hale habe. Inaga Isaraele wali agali ina kamaru aria mbirame ihondo ko biyagonaga mitangi bialu bu miniha genda howa dara halu anda ogo kagotha í keria handa amu howa gi dogolalu ihondo bi layagua <sup>39</sup> Anduane Homogo-o í ini dahuliya andaga howa tinaga ko biyago domo wahalu tigua bi larago hale habe. Inime hangu wali agali bibahendenaga bu miniha mitangi bu kagobi manda biai ho ke. Ani manda biai ho kegome wali agali tigua mana koyaguabi bayaleyaguabi biyadagua dabaluru pani miadai bibe. <sup>40</sup> Ai inaga wali agali kamaru ina dindi ogoni inanaga mamaliruhondo mirigo ogoriani howa ina bayale tigabi bialu ini andaneha haabo holomaya ononidagua bibe.

<sup>41-42</sup> Dindi tara tara ngaruha howa wali agali bu karume inaga mini timbuni daliga mini lene ngago hale halubi biabe timbuni inaga wali agali bu kamaru biamogo biridago hale halubi mbiralime ibunaga dindi yu wahalu í mitangi bialu lotu lole lowa anda ogotha ibuwa inihondo lotu lalu bi layagua <sup>43</sup> Anduane Homogo-o í dahuliya andaga howa o biagome ihondo bia lalu hale harago ale bibe. Inaga Isaraele wali agalirume í andaneha kamadagua wali agali dindi tara taraha karume í manda biai lalu í andaneha ibalu hai helo ani bibe. Ani bialu howa ina anda o bidogo inaga andaore kagonidalo manda bialu wali agali bibahende anda o kagotha ibalu ini mitangi bialu lotu lolene ngago manda biai holebira. <sup>44</sup>

Ina inahondo, Dindi mendeha tinaga waitigi karu baba wai bule pudaba, laregola bialu howa ina dindi tara ta nabi kamagotha howa ina anda ogo Anduane Homogo inaga helo binigobi tano ogoni ina dabo ngelarigobi ogoniha handa dai bu howa ina ihondo bi larimayagua nde <sup>45</sup> Anduane Homogo-o ina dahuliya andaga howa inanaga bi laramaru hale howa ina dara halu inanaga waitigiru balu wayali holomaya ina pele ngibe.

<sup>46</sup> Wali agali bibahendeme ko biai haga kamago ai inaga wali agali iname ihondo ko bialu kamaria ina inahondo keba howa inanaga waitigi karume ibalu ina baba wai buwa ina bo garabaya bu yalu dindi tara kaundia kawarehayagibi minu yalu piyagua inaga wali agali bu kamarume ihondo bi laramago hale habe. <sup>47-48</sup> Mani inanaga waitigi dalu dindi tara uruniha howa inanaga ko birimaruni mitangi bu dai bialu inane mini beregedarimayagua nde Anduane Homogo-o ina inanaga bi laramago hale habe. Heneneore inanaga waitigi dindi ngaruha pu howa inihondo hongo howa mini mbiraore wuwa í hangu mitangi biaabo lalu inane mini beregedai howabi ainde bamba ina dindi ina mamaliruhondo mini biagohabi ininaga tano dabo helarigohabi ina inaga anda wali agaliru ti ogoniha ibalu ini keria ibilo bia harugohabi handa daibu howa ihondo bi lalu, Iname mana ko bulene wiaruha pu pebe bialu howa ko dewaore bialu harimago, lapani lalu langirimayagua <sup>49</sup> í dahuliya andaga howa iname bi laramagola hale lalu ina dara lalu biamogo bibe. <sup>50</sup> Ani bialu nde inaga wali agali bu kamarume mine lalu mana ko bialu harimaru bibahende ina domo wahai lalu inanaga waitigi karume ina dara lalu biamogo bilo inime mo manda bia habe. <sup>51</sup> Anidagua bulenego irane ina inaga Isaraele wali agaliore kamagoni ndobe. Ina Iyibi dindiha ira hongohe daraligobiha kuni duguabe naheore wiagoha hemaria inime ina dugu ede lalu haru tagira ibirigoni.

<sup>52</sup> Anduane Homogo Bibahende Haru Haame Ho Haga Kego-o inaga wali agali bu kamarume ihondo bi lalu kamarubi inanaga kini kagome ihondo bi lalu kagobi iname ihondo ina biamogo bia lowa bi lalu kamago bibahende handalu dara howa hale habe. <sup>53</sup> Irane wali agali maru hearuni helowa ina Isaraele wali agali dege dabowa ininaga wali agaliore daba bagiho helowa inime ani bule lalu lo wirigonidagua bibelo. Ininaga biabe biahaga Mosesehondo inanaga mamaliru bamba Iyibi dindi howa haru

tagira ibiringi buleore lalu lo wirigodago anidaguaore bibelo laro, lalu Solomonohanda Anduane Homogohondo bi ogoni lene.

*Solomono ibugua Ngode Datagaliwabehondo bi lamaro binigo ogo*

<sup>54</sup> Solomono ibu ge duli hangaho biruwa ibunaga gi kirabali dogoladaga howa lomabu delaga dabu wiagoria Anduane Homogohondo bi lalu berenego lai lalu heyuwa <sup>55</sup> ibugua Ngode Datagaliwabehanda Isaraele wali agali bibahende mo bayale helonaga bi wali agali bibahendeme hale hai helo hongo howa ladaga lalu hene. <sup>56</sup> Ibugua lalu, Anduane Homogonaga mini yaraga hama. Ibugua buleore lalu bamba lo winidagua mo palia holenebi gi nahe hada payabu holenebi ibunaga Isaraele wali agali ina kamaruhondo ngiyada. Buleore lalu bamba ibunaga biabe biahaga Moseseha howa lo winiru mbira wanahe biaiore hayada. <sup>57</sup> Anduane Homogo inanaga Ngode Datagaliwabe ibu bamba inanaga mamaliru baba mandagi hama ibinidagua áyubi nde ibugua ina yu wanahe ina baba mandagi haabobo helo. <sup>58</sup> Iname ibu mitangi biaabo lalu ibu gubalini holomaya mo manda biaabo haragola iname ibunaga hariga bayale mo wia kagoria pialu howa ibunaga bi mana bamba inanaga mamaliruhondo lamini ngaru baya hangu taluwa bialu holomayanaga hameledo. <sup>59</sup> Ai horo bibahendengi Anduane Homogo inanaga Ngode Datagaliwabe ibunime ina ibuhondo bi áyu laruruni mitangi biaabo helo laro. Ani buwa ina ibunaga Isaraele wali agali kamarubi inanaga kinibi horo mbiru buru padamadagua ibugua ina dara howa biamogo biaabo helo. <sup>60</sup> Ani bialu kago hondowa dindi tara tarani wali agali hameigini bu karume hondowa Ngode Datagaliwabe tara mende nahe Anduane Homogo ibuni hangu heneneore henedane hondolebira. <sup>61</sup> Ai ibunaga wali agali kamiru tigua horo bibahendengi Anduane Homogo inanaga Ngode Datagaliwabe ibuni kago mitangi biaabo lalu ibu andaneha hangu hai halimulo hameledo. Áyu howa ibunaga mana lowini ngaru baya hangu taluwa bialu kamidagua mani ani biaabo lalu halimulo hameledo laro, lalu Solomonohanda lai lene.

*Anduane Homogonaga andaore helo lomabu helenego ogo  
(2 Bi Te 7.4-10)*

<sup>62</sup> Kini Solomono lalu ibunaga wali agalirume Anduane Homogohondo nogo tara tara lomabu miniru bo delene. <sup>63</sup> Ibugua bulumaga daosini pira kirani kira (22,000) bo delalu nogo sibi daosini dege handari mbirani pira kira (120,000) Anduane Homogola ho gimbu bulenaga lomabu miniru bo delene. Kini biagobi wali agali bibahende hearubi tigua ogonidagua bialu anda biago Anduane Homogonagaore helo loma bia ho helene. <sup>64</sup> Horo ogoningi dege dindi henge timbuni mbira Anduane Homogonaga anda ogoni heagoria winigo ogonibi ibunaga ngelo lowa ibuni loma bia howa ngelene. Ani binigo ai dindi odagoria Solomono ibugua nogo maru irani delai holene loma wiarubi widi lomabu mulene wiarubi nogo o biarunaga habane Anduane Homogola ho gimbu bulenaga lomabu delolene wiarubi ogoriani delai hene. Dindi odagoria lomabu miniru bo delenedagoni irane lomabu mialu bo delaga dabu boronosime wabini henedago emene lalu lomabu miniru delai habe naheyagola anidagua bini.

<sup>65</sup> Horo ogoningi Isaraele wali agalinaga Anda Nemandaruha Palu Holene Horo hayagola Solomonobi Isaraele wali agali bibahendebi mo ngoai howa Yarusalemeni hene. Ti horo karu ala mo ngoai ho howa horo karu lalu mende ngoai lalu biyagola horo deru (14) bibahende ibu ngoaiho hene. Wali agali Isaraele dindi bibahendeha howa ibu ngoai hene. Uyurayagi dindi gibuni Hamada tano polene hariga tagira pedagoria howa pialu unurayagi Iyibi dindiha tubaria ngagoria howa hilalu ibaiore howa ibu hene. <sup>66</sup> Horo timbuni uruni hai lalu Solomono ibugua wali agali uruni tini dalu dai bidaba lene. Ani biyagola nde wali agali tigua Solomono ibugua biyarunaga

✧ 8:56: Man 12.10, Yos 21.44-45, 23.14, 1 Kin 2.4

kai lalu Anduane Homogohanda Solomonono mo bayale helonaga bi lahalu pene. Ti andaga pugu pugu bialu howa Anduane Homogohanda ibunaga biabe biahaga Debidi lamialu buleore lalu lo winiyago ibunaga Isaraele wali agali biamogo bialu biaore biyadagonaga turu haga bima tini dalu dai bigi bini.

## 9

### *Solomono hearia Ngode Datagaliwabe lone hapani henego ogo* (2 Bi Te 7.11-22)

<sup>1</sup> Solomonono ibugua Anduane Homogonaga andabi kininaga andabi anda maru bule manda binirubi bibahendeore biai hene. <sup>2</sup> Ani biai howa heagola Anduane Homogo ibu bamba Gibeono tanoni Solomonono ibuni hearia hapani henedagua lone hapani hene.\* <sup>3</sup> Ani buwa Anduane Homogohanda ibuhondo lalu, Ina bi larigo abale hale harugo ai ina anda bia haridagoni inaga anda ogoni lomabu heledo. Wali agali ti anda ogoniha anda ibalu ini mitangi bialu lotu lolebira. Inabi handa dali halu horo bibahendengi anda ogoni handaya howa mitangi biaabo holebero. <sup>4</sup> Anigo inime i hangu mitangi biaabo halu inaga mana tigabi dege talialu bialu bamba i aba Debidihanda bialu haabo henedagua bialu hariyagua\* <sup>5</sup> ina buleore lalu bamba i aba Debidihondo lamialu Isaraele wali agalirunaga kini inaga igini aguanerume haabo helo dabolebero larudaguaore dabo helaabo holebero.\*

<sup>6</sup> Anigo Solomonono-o ibi inaga igini aguane mani hama polebirarubi tigua inibi inaga bi mana tigabi bayale ngarubi yu wahalu puwa dama karu mitangi bialu uruni mo tene hama pirimiyagua <sup>7</sup> nde ina Isaraele wali agali bibahende dindi ina tihondo ngini ayu kamigoriani nahalimulo bo batagi holebero. Ina anda ininagaore helo lowa loma biaho helarugoni yu wahalu handa tara holebero. Anidagua berogola wali agali dindi tara tarani bu karu tigua handalu ti mo ngubia halu mege tara bialu holebira. <sup>8</sup> Ayu anda ogo timbuni mini lene ha ani kagonigo mani bo giallo haealabagabu ngagola wali agali hariga ogonidagua pole bolangua hararume de hondowa mogo lalu gi timbuni holebira. Tigua ani hondowa lalu, Irane aginaga Anduane Homogohanda dindibi anda bayale ogobi mo ko hayadabe, lolebira.\* <sup>9</sup> Ani laga biragola wali agali marume ladai bialu lalu, O bidaruni irane Isaraele wali agali tigua Anduane Homogo tinaga Ngode Datagaliwabe yu wahalu piyagola bida. Bamba tinaga mamaliru Iyibi dindiha hearia ibugua ti dindi ogoria helo haru ibinigo ai ayu tigua Ngode Datagaliwabe yu wahalu puwa dama mitangi bialu bi pupu wiaga wiaruha puwa urunihondo bi pupu wialu hemiria hondowa Anduane Homogo ibugua mbirale mo ko holene ogoni Isaraele wali agali tiha ibilayiya lolebira, lene.

### *Solomonohanda Kini Hiramama mo turu halu mbirale bame minigo ogo* (2 Bi Te 8.1-2)

<sup>10</sup> Solomonobi ibunaga biabe biaga agali hearumebi Anduane Homogonaga anda biago biai halu ibuninaga anda bialu hene. Mali pira kirani (20) biabe uruni damenego bialu hene. <sup>11</sup> Taianaga Kini Hiramahanda Solomonono ibu anda uruni bilonaga ira tamiabi guraya alebi dewaore dibu mialu ngolobi dewa dege anda ogoni bilonaga migi bini. Ani binigo mitangi bialu Solomonono ibugua tano pira kira (20) Galilihayagi wiaru bame Hiramama tu wa mini. <sup>12</sup> Ani miyagola Hiramama ibugua Taia tano howa Galilihayagi tano o miyadaruni hondo ibuwa ibu tano uruni hame nale hene. <sup>13</sup> Ani howa ibugua Solomonohondo lamialu lalu, Tano agi alego i ngeregonibe, lene. Anidagua lenego mitangi bialu wali agalime dindi ogoni mini Kabulu laga winigo nga.\* <sup>14</sup> Hiramama ibugua

\* 9:2: 1 Kin 3.5, 2 Bit 1.7    \* 9:4: 1 Kin 3.14, 11.4-6    \* 9:5: 1 Kin 2.4    \* 9:8: 2 Kin 25.9, 2 Bit 36.19    \* 9:13: Dindi mini Kabulu gilibu ngago mini ogoni Hiburu bi lalu Dindi Ko lagane.

ngolo Solomonu miniru dewaore genda magi timbuni tono mariani maru bolanguahe mini.

*Solomono ibugua maru bigi binigo ogo*  
(2 Bi Te 8.3-18)

<sup>15</sup> Kini Solomonu ibugua agali dewaore minuwa ti ibunaga biabe hongohe bialu helo helene. Ibugua agali uruni marume Anduane Homogonaga andabi ibuninaga andabi biabe ogoni bialu helo marume Yarusaleme tanonaga pabe biago bu mabu bialu helobi minu helene. Ani bialu marume dindi dugu yuwa Yarusaleme tanoha dindi ulini wupe heyago bo dondo lalu mo tiga bilo minalu bidaba lene. Ani bialu Haso tanobi Megido tanobi Gesa tanobi mo tiga bialu bidaba layago bialu hene. <sup>16</sup> Bamba Gesa tano ogoni Kenanalinaga winigo ai Iyibi kini heagome ibalu wai buwa wali agali bo wahai halu tano ogoni bo heda hene wini. Ani winigo Kini Solomonu ibugua Iyibinaga kini biagonaga wane dabu biyangi Iyibi kini biagome Gesa tano ogoni holali ale ibu wane mo turu halu bame mini. <sup>17</sup> Mani howa Solomonu ibugua Gesa tano ogoni mo tiga bialu bu aribia haga bialu hene. Ani bialu Bedehorono tano unuyagi laga wiagobi <sup>18</sup> Balada tano wiagobi arema bialu Tama tanobi arema bialu lone biadai bigi bialu hene. Balada Tama tanola Yuda dindihayagi dindi ko iba dalu naibaga wiagohayagi wini. <sup>19</sup> Tano maru wai biaganaga dabudabu mo mogo bu wiagarubi wai biagane garo ale hosime gili laga karisi mo mogobu wiaga tanobi wai biaga nogo hosi helaga tanobi bu helalu bibahende ale Yarusalemehabi Lebanonohabi dindi bibahende ibugua handayaho henegoha bule lo manda bu winiru biaiore hene. <sup>20</sup> Wali agali maru dindi tara tagiraha howa Isaraele dindini ibu hene. Wali agali uruni Amoroalirubi Hidialirubi Peresealirubi Hibialirubi Yabusualirubi ibu haga bini. <sup>21</sup> Bamba Isaraele wali agalime hameigini uruni aria bo wahai henego ai uruni aria yu wahene maru haga bini. Ani heagola Solomonu ibugua wali agali yu waheneru ti aguanene uruni garabaya biabe ale bialu helo minu helai henego ayubi ani bialu haabo ka.† <sup>22</sup> Anigo Solomonu ibugua Isaraele wali agali garabaya biabe ale bialu helo hela nabini. Ami agali holenebi gabumane agali haguane holenebi ami agaliru haru haga agali haguanebi uruni bibahende Isaraele tinime howa birago bialu helo lowa ani helo wahene. Marume ami agali karisini heyu howa wai biaga hearu handayaho halu marume nogo hosini biruwa wai biaga hearu handaya ho halu bini.

<sup>23</sup> Solomonu ibunaga biabe biagaru bibahende handaya ho haga agali haguane handari duriani pira duria (550) hene. <sup>24</sup> Solomonu one ibu Debidinaga Tano biago wahalu Solomonohanda anda gahenge biyagoha pu berene. Wali ogoni ibu Iyibinaga kini heago wane berene. Emene howa Solomonu ibugua agali bu hearuhondo Yarusaleme tanonaga lene mbirahayagi dindi ulini wiago dindi dugu yuwa bo dondo ladaba layagola ani bialu hene.

<sup>25</sup> Solomonu ibugua Anduane Homogonaga lomabu delaga dabu ibunime bu helene-goria mali mbiranaga loma halu tebira bo lomabu delaga biaga hene. Ibugua loma uruni irame dai helobi Anduane Homogola ho gimbu bulenaga lomabi bowa delaga biaga hene. Ibugua Anduane Homogohondo mbirale ngabilo mini inisenesibi lomabu delaga bialu lotu lalu holenagabi Solomonu ibugua ani bu helene. Ani bu helene-manda manda bialu ai ibugua loma pigane bo delalu howa anda ogoni bialu howa ogo ale bule lo manda bu winigobi tagira piai helene.✧

<sup>26</sup> Kini Solomonu ibugua iba sibi dewaore Esiongebe tanoni wabu wini. Esiongebe tano ogoni Idomo dindiha Elada tano kaware ngelowa iba solowara mini Daramabi laga bereago angeni Agaba dindi wiagoria wabialu hene. <sup>27</sup> Ani bialu heagola Kini Hiramahanda ibunaga agali iba sibiha biabe mugubeyi maru hearu Kini Solomononaga

† 9:21: Áyu kamangi mitangi bulene ndo agali beba gili biyadago ibu henedangi mitangi bialu lene. ✧ 9:25: Har 23.17, 34.23, Man 16.16

iba sibiha biabe biaga hearu baba sibi uruniha biabe mandagi bialu helo ibilene. <sup>28</sup> Ani bialu iba sibi uruni dindi mende tara Obiri pialu ngolo wiaru mo yalu Solomono hearia yu dai bigi biaga wini. Ngolo dewaore genda magi timbuni tono pirani maria (14) mo yu ibugu biaga wini.

## 10

### *Seba dindinaga kuini walime Solomono hondo ibinigo ogo (2 Bi Te 9.1-12)*

<sup>1</sup> Seba dindinaga kuini wali berenegome hale halu hearia Anduane Homogohanda Solomono mo bayale hayagola ibu mini lene timbuni ka layane hale hene. Ani layago hale howa kuini wali ogoni ibugua Solomononaga manda wiaru ba handalu ibugua bi ladaï bibe naheru maru Solomono hale hole ibini.\* <sup>2</sup> Kuini wali ogonime ibunaga biabe biahaga agali dewaliore haru halu nogo kamelerubi dewaore haru ha bialu Yarusaleme anda ibini. Nogo kamelenaga erekunini ngolo dewaorebi mbirale tara pauda ale nga bayale tara tara biaga wiarubi ege tole bayale yolo timbunime miaga wiaru alebi mo paga howa yalu ibini. Anda ibalu ibugua Kini Solomono lola howa bi maru Solomonohanda ladaï bibe nahe manda manda bu yalu hale hole ibinidaru hale hene. <sup>3</sup> Ani hale hayagola Solomono ibugua mbirale hale hayaruni bibahende tiga tigaore wiadagua ladaï biaï hene. Bi hale hayadaruni Solomono ibugua ladaï bibe nahe mbira nawi bibahende karulape ladaï biaï hene. <sup>4</sup> Ani lai hayagola kuini wali ibugua Solomononaga manda timbuni mini gigabi wiagobi kininaga anda timbuni biniyarubi bibahende handai hene. <sup>5</sup> Ani handalu kuini wali biagome Solomono ibugua horo bibahendengi tomo bayale dege naabo halu haga wiagobi ibunaga agali hagianeru ti haga bayale wiagobi bibahendeore hendene. Kini ibunaga biabe biahaga agali hearubi tinaga aga bayale tara tara biaga wiarubi agali waini iba odo tale biaga hearubi hendene. Uruni hondowa Solomonohanda nogoru Anduane Homogonaga andaha loma biniru bo delaga dabu wiarubi hendene. Mbirale uruni biaga wiaru handai howa mogo lalu ibugua bi mbira labe naheore hene.

<sup>6</sup> Ani howa ibugua Solomono lamialu lalu, Ini dindiha howa hale harugola inaga mini mandaru bayale timbuni wu howa ina mbirale bayale bereyarubi bibahende hale hai harugo áyu bi layadaruni heneneoredane handa walia ko. <sup>7</sup> Abale ina bi hale harudaruni mo henene nahe henego áyu ibuwa inime handalu ai heneneoredane hendedo. Heneneore abale bi hangu hale harugo goyane lowa ini deme taraoredane hendedogoni. Inaga mini mandala gigabi ngerubi inaga muni ngerubi bibahende dewa timbuni gibiooredane hendedo. <sup>8</sup> Ai inaga agali bu karuni ti turu hagabu haabo halu inaga agali haru haga haguane karuni tibi nde inaga mini mandala bayale ngegome ti haru kegola ini heba turu ho haradane hendedo. <sup>9</sup> Anduane Homogo inaga Ngode Datagaliwabe ibugua ihondo ibunaga miniha howa turu halu Isaraele wali agalirunaga kini habelo dabo helayadagonaga ina ibunaga mini yaraga harogoni. Isaraele wali agali tiha ibunaga gubalini holene timbuniore horo mbiruorebi ereba naholene wiaabo howa ina manda timbuni bidegomebi mini tigabi bayale ngegomebi manani tigatiga tale bialu ti haru habelo i kini helayada, lalu kuini walime lai hene.

<sup>10</sup> Ani lowa Seba dindinaga kuini wali biagome ngolo dewa daga labe naheore genda magi timbuni tono maria Solomono mini. Ege tole tara tara yolo timbunime miaga wiarubi pauda ale mo ngabia haga ale tara tara dewabi mia dege bini. Mbirale mo ngabia haga uruni ale Isaraele dindiha ala yalu naibagadaguabi mani nayalu ibulebiradaguabi kuini wali biagome timbuniore yalu ibini. <sup>11</sup> Kini Hiranana iba sibi wiaru Obiri dindiha pialu ogoniha howa ngolo dewaorebi ira bayale tara mbiranaga podene dewabi ege tole tara yolo timbunime miaga wiarubi dewaore Isaraele dindiha

\* 10:1: Md 12.42, Lg 11.31



mo yalu ibini. <sup>12</sup> Ani mo yalu ibiyagola Solomonohanda agali ibunaga biabe biahaga hearuhondo lalu, Ira bayale urunime Anduane Homogonaga andabi ini andagabi mo yari bia hadaba, lene. Ira bayale uruni aria maru agalime iba gana lalu ngida ale belo wabidaba, lalu lamini. Uruni biai halu Isaraele dindiha ira bayale urunibi mbira mani nayalu anda ibini.

<sup>13</sup> Kini Solomonohanda Seba dindinaga kuini wali biago nde mbirale tara tara dewaore ibuni hame lalu ngi layaru damene miai halu marubi wali agali dindi tara howa ibagaruhondo miagadagua ibugua mia tago halu mini. Ani miya handala mani kuini wali biagobi ibunaga biabe biahaga ibinidarubi bibahende tini dindi dai bini.

*Kini Solomonu homogo henego ogo*

*(2 Bi Te 9.13-29)*

<sup>14</sup> Mali bibahendengi Solomonu ibugua ngolo dewaore genda magi timbuni tono pira kirani tebira (23) mo yu anda ibugu bialu hene. <sup>15</sup> Muni marubi nde agali biyinaya biaga hearume dagisi bu miraru mo yu anda ibaga hene. Arebia dindiha kini hearumebi Isaraele dindiha dindi dunini mbira mbira handayaho haga hearumebi muni yu ibalu ibu miaga hene.

<sup>16</sup> Solomonu ibugua agali biabe biahaga hearuhondo lalu, Ira pelene mbalapayabi wiarume wai humbi timbuni wabidaba, layagola tigua humbi handari kira (200) wabini. Wabu ngelowa ngolome paraho dambi hai hene. Ngolo para hayadaruninaga genda magi kilogarama karia ale humbi mbira mbirani para hene. <sup>17</sup> Ani bialu humbi maru emene hangu handari tebira (300) wabuwa ngolome paraho dambi hene. Ngolo paraho dambi hayadaruninaga genda magi kilogarama kira hene. Ani biai heagola Solomonohanda agali ibunaga biabe biahaga biaruhondo lalu, Humbi uruni anda hobane mbira mini Lebanono Irabu Anda laga henegoha mo yaanda howa ngeladaba, lene.\*

<sup>18</sup> Ani bialu Solomonohanda kini biraga dagia mbira wabidaba layagola wabini. Ani buwa kini biragane dagia ogoni ngoloru nogo elebeninaga ne gayane garayabirume mo yari bia howa ngelene. <sup>19-20</sup> Kini biragane dagia ogoni daliga ngelowa ogoriani birule iraga holenaga ge holene egageria waragara wini. Ge halu iraga holene mbira mbiranaga lene laboha laiono handalehe mbira mbira talebu helama pene. Daga lamaga halu laiono handalehe homberia (12) wabu helene. Biragane dagiadagonaga erembirahayagi mabu bupehe wialu ogoriani biruwa gi paga holenebihe wini. Gi paga holene kirabaliha laiono handalehe mbira mbira lowa kira wabu helene. Kini dindi tara maruha hearu bibahendenaga kini biragane dagia baya gibiore ogonibi mbira nawi mbiraore ogoni hangu wini.

<sup>21</sup> Solomononaga gabo berubi bibahende ngolome wabu wini. Anda hobane mini Lebanono Irabu Anda laga biagoha sibunirubi naibirubi ngolo hangume wabuwa wiai hene. Kini Solomonu henedangi siliba nagalonedalo manda buwa mbirale mbirale uruni ale ngolo hangume wabiai hene. <sup>22</sup> Solomononaga iba sibi dewa iba solowara timbuniha piaga winiru Kini Hiramana iba sibi wiaru heba mandagi dindi bibahendeha ibaga biai haga wini. Iba sibi urunime iba solowarani dindi tara taraha piai halu mali tebirani dai nabi tagira dege ibagabu howa ngolobi silibarubi dewaore mo yalu nogo elebeninaga ne gayane garayabi dewa mo yalu mbirale biango handalehe mini mongi tara tararu minu yalu Isaraele dindi dai bigi biaga wini.

<sup>23</sup> Kini Solomonu ibugua munimebi mbirale tara tara maru ale wiarumebi ibunaga mini bayale gigabi wiagomebi kini maru hearu bibahende bolangua haihe hene.

<sup>24</sup> Agali haguane dindi bibahendeha hearume Anduane Homogohanda mini bayale gigabi Solomonu minidago ti hale hene. Hale howa tigua Solomonohanda bi larago

\* **10:17:** Hobane Lebanono Irabu Anda laga wiago ogoni mo ngoai hagane hobane timbuniore Solomononaga andaha winigo ogoniha mo ngelene.

hale hoa howa ibu hearia ibugu biaabo haga hene. <sup>25</sup> Mali bibahendengi agali dindi tara tarani howa ibalu mbirale mbirale maru Solomonu mule yalu ibugu biaga wini. Tigua ibugu bialu howa mbirale ngolome wabini silibame wabimirubi aga bayalerubi wai biaga yandarerubi mbirale pauda ale mo ngabia haga ale tara tararubi nogo hosiru dongirubi Kini Solomonu mule yalu ibugu biaabo haga wini.

<sup>26</sup> Solomonu ibugua bibahendengi wai biagane garo ale karisirubi ibunaga ami agalirunaga nogo hosirubi dewaore yolo bu hela ngela bigi bini. Ani buwa ibugua karisirubi hosirubi tale bialu maru dindi ibugua handayaho haga maru wiyadaruha tale bu pelalu maru Yarusalemeni ngelo hene. Wai biagane karisi daosini mbirani handari maria (1,400) wialu wai biaga ami agalirunaga hosi daosini homberia (12,000) hene. ✧ <sup>27</sup> Solomonu kini henedangi muni siliba dewaore daga labenahe ege tole dugu paya biradagua bialu Yarusaleme yu anda ibugu biaga wini. Ira tamiabi aulolebe tobahe bame Isaraele dindi hari bare wiaruha howa ira hearu damene bibahendore dibu yu ibai hene wiradagua bini. ✧ <sup>28</sup> Solomonu ibugua agali biyinaya biaga hearuhondo ibunaga hosiru Silisia dindiha howabi Musiri dindiha howabi yolo bule pudaba laga hene. ✧ <sup>29</sup> Ani lara handala biyinaya biaga agalidarume Musiri dindi puwa wai biaga karisirubi hosirubi yolo mule piaga hene. Karisi mbira mbira hangunaga yolo muni siliba kina ale daosini waragaria (6,000) aleme miaga. Hosi mbira hangunaga yolo muni siliba kina ale daosini mbirani handari duria (1,500) aleme yolo miaga hene. Yolo ani mialu agali uruni tigua hosiru haru ha karisiru mo ya bialu Hidiiali kini karia pialu Siriali kini kariabi pu bigi biragola ogoni labo libugua mbirale yalu piagadaruni munime yolo bigi biaga hene.

## 11

### *Solomonhanda Anduane Homogo erembira minigo ogo*

<sup>1</sup> Solomonu ibugua dindi tara tara wali berearu dewa hame lalu hene. Ibugua Iyibi dindi kini heago wane mbira dabu ala binigo mani ibugua Moaba walibi Amonu walibi Idomo walibi Saidono walibi Hidi walibi dindi tara tara uruni bibahendeha wali berearu dabu biai hene. ✧ <sup>2</sup> Anigo wali uruni ti Anduane Homogo kago mitangi nabiaga bereagola abale howa Anduane Homogohanda Isaraele wali agalihondo lamialu lalu, Tigua wali agali dindi mende tara karu nadabu bilimu, lalu lamini. Ibugua lamialu, Isaraele wali agali tigua wali agali Anduane Homogo mitangi nabiaga karu uruni dabu bialu harimiyagua nde tigua i yu wahalu pilimulo haru halu pu tara holebirago heneneore langero. Ani haru halu poragola tigua wali agali uruninaga mbirale dama mitangi bialu gime wabini ngaru talima pialu ini helo waholeberemi, lene. Anduane Homogohanda bi urunibi lo wini wiago ngelowa Solomonu ibugua dindi tara tara wali berearu hame lowa wali uruni dabu bigi bini. ✧ <sup>3</sup> Solomonu ibu one wali handari karia (700) berelalu wali wabuni mende bereneru handari tebira (300) berene. Wali urunime Solomonu mo luluya halu ibunaga mini mo batara hayagola ibugua Anduane Homogo erembira mialu yu wahene. <sup>4</sup> Ani bialu ibu agali wahe halu hama dai biyaha wali urunime ibunaga mini mo ba taraore halu mbirale dama mitangi bialu gime wabini wiaruhondo bi pupu wialu hene. Ani biyadagome ibu aba Debidinaga mana bayale wiago mo wahalu ibugua Anduane Homogo ibunaga Ngode Datagaliwabe talia nabi yu wahalu bini. <sup>5</sup> Ani howa ibugua Saidono wali agalinaga dama wali beda mitangi bialu gime wabini mini Asadare laga wiagobi Amonu wali agalinaga dama mitangi bialu gime wabini ko ngubiore mini Molege laga wiagobi urunihondo bi pupu wialu hene. <sup>6</sup> Mana ko ogonidagua bialu hayadagome Solomonu ibugua Anduane Homogonaga deni mana ko bini. Ibugua Debidihanda Anduane Homogo baya hangu talima pialu hagadagua nape yu wahene.

✧ 10:26: 1 Kin 4.26 ✧ 10:27: Man 17.17 ✧ 10:28: Man 17.16 ✧ 11:1: Man 17.17 ✧ 11:2: Har 34.16, Man 7.3-4

<sup>7</sup> Ibugua Moaba wali agalinaga dama mitangi bialu gime wabini ko ngubiore mini Kemoso wiagonaga bi pupu wiaga henge mbira mo wia hene. Dindi ogoni ibu Yarusaleme tanonaga abene amu ni tagira ibiragohayagi hari nene wiagoha mo wini. Ani bialu Amono wali agalinaga dama mitangi bialu gime wabini ko ngubi mini Molege laga wiagonaga bi pupu wule dindi henge mendebi mo wialu bini. <sup>8</sup> Ani buwa ibu one Anduane Homogo mitangi nabiaga berearunaga dama mitangi bialu gime wabini tigua urunihondo bi pupu wialu ira hagua nga biaga mini inisenesi delalu lomaru bo delaga bilonaga dindi maru tu wu ngelalu bini.

<sup>9-10</sup> Ala Anduane Homogo Isaraele wali agalinaga Ngode Datagaliwabe ibuni Solomonono hearia halu kira hapani howa ibuhondo lalu, Mbirale urunihondo bi pupu nawibe, lene. Ani layago lelowa Solomonono ibugua Anduane Homogo erebira mialu hene. Ani biyagola Anduane Homogohanda Solomonohondo keba howa <sup>11</sup> ibuhondo lamialu lalu, Hale habe. *Ína íninaga hame ledego hangu talialu howa ínaga habo nalolene bi lo wirugo mo habo lalu ínaga bi mo waharidago. Anidagua biridagonaga ína í dindi ogoria kini nahabelo mo waholene manda bido. Ani bialu ínaga haru haga agali haguane mbirame kini í henegoria ha aribia helolebero.* <sup>12</sup> Anigo ína mbirale uruni áyu dege biai naholebero. *Í aba Debidi mitangi bialu í homedehe í igini mbirame kini ha aribia ho kagola anidagua bulebero.* <sup>13</sup> Anigo ína ínaga biabe biahaga Debidi mitangi bialubi Yarusaleme tano íninaga loma bia hene ngago mitangi bialubi ínaga iginime ibu kini kagola ibu haru holene mo wahaiore nahe Isaraele hameigini mbiraore hangu haru helo helolebero, lene.

*Agali kiralime Solomonola waitigi henego ogo*

<sup>14</sup> Anduane Homogohanda Idomo agali mbira mini Hadada ibu Solomononaga mo waitigi helene. <sup>15</sup> Abale Kini Debidi ibugua Idomoaliru baba wai bini. Isaraelerunaga ami agali haru haga Yoabahanda wai o binidagoniha agali Idomo dindini homene wiaru mo hora hene. <sup>16</sup> Ani bialu Yoaba halu ibunaga ami agali hearu heba Idomo dindiha ege waragaru wai bialu howa agali Idomo dindini hearu bo wahai hene. <sup>17</sup> Horo ogoningi Hadada ibu igiri emene heangi agali bo wahai haya handala ibu abanaga biabe biahaga agali hearu baba ibida pora bialu pene. Ti Iyibi dindiha ibida pole <sup>18</sup> pialu howa Midiana dindi yu wahalu pialu dindi ko iba dalu naibaga dindi mini Parana wiagoria pialu hene. Ani pialu tigua agali maru Parana ogoniha hearu heba haru hamaga halu Iyibi dindi pene. Ti Iyibi anda piyagola Iyibinaga kini heagome dindi mbira Hadada tu wu mialu andabi mialu tomo nolenebi mialu baya hangu handayaho hene.

<sup>19</sup> Iyibinaga kini heagome Hadadahondo turu timbuni howa wali mbira kini ibu one kuini mini Tabenese bereago hagibuni bereago dabu bilo mini. <sup>20</sup> Ani dabu bu heagola Hadada oneme igiri mbira taba hanayagola igiri mini Genubada wini. Anigo Kuini Tabenese ibugua igiri emene Genubada ogoni ibuni andaga haru puwa ibu igini maru hearu heba mandagi kini andagaha haga hene.

<sup>21</sup> Hadada ibugua Iyibi howa hale halu hearia Kini Debidibi Isaraelenaga ami haru haga agali haguane Yoababi homaya layane hale hene. Ani hale howa ibugua Iyibinaga kini biago hearia puwa lalu, Ainde íni dalu dai bulene hame ledogo pu larene poabago, lene.

<sup>22</sup> Ani layagola kinihanda ibuhondo hale halu lalu, Irane aginaga í dalu dai bulene hame ledebe. Iya haru oali kabaria í mbirale mbira burupale kebe, lene.

Ani layagola Hadada ibugua ladai bialu lalu, *I* mbirale mbira buru palia nabi kogonigo nde íni daluore dai bia labelo hameledo, lene.

<sup>23</sup> Ngode Datagaliwabehanda agali mendebi Eliada igini Lesono ibu nde Solomononaga mo waitigi helene. Agali Lesono ogoni ibu abale Soba dindi puwa agali wai biagabi page biagabi hearu uruninaga haru bamba haga agali haguane ibu hene. <sup>24</sup> Debidihanda wai bialu Hadadesenaga ami agali hearu bibahende balu

bo biba hai hayagola Lesono ibuibunaga dameneru baba ibida pialu Damasagasa tanoha pu hene. Ani pu hearia ibu damenerume ibu biamogo bialu Sira dindiha kini helo mo helene. <sup>25</sup> Ani howa Lesono ibugua Hadadahanda Isaraeleru baba waitigi halu hagadagua ibuguabi waitigi halu hene. Lesono ibu Sirianaga kini howa ibugua Isaraele wali agaliru handabe manga halu turu nahe hene.

*Anduane Homogohanda Yaroboamahondo mbira bulebero lalu lowinigo ogo*

<sup>26</sup> Solomono ibunaga agali haguane mbira henegome Solomono ibuni erembira mialu ibula waitigi hene. Agali ogoni ibu mini Yaroboama henego ibu aba mini Nebada ibu aija mini Serua layaru hene. Anigo ibu aba Nebada homene howa Yaroboama ibuni Eberaimi hameigini dindini Sereda tano wiagoria haga hene. <sup>27</sup> Yaroboama ibugua Kini Solomono bope hoa halu henedagoni irane ogo.

Solomono ibugua Yarusaleme tanonaga lene mbiraha dindi ulini laga ni tagira ibiragohayagi wiago dindime bomogo bialu hene. Debidinaga tano ege pabe heagobi baya hangu bu tiga bule bialu heagola ogonigi <sup>28</sup> Yaroboama ibugua biabe bayale hongo howa bialu haga hene. Ani bialu heago hondowa Solomono ibugua Yaroboama ibu agali Manase hameiginibi Eberaimi hameiginibi kinihanda tí minuwa biabe ogo bidaba lalu mo mini bialu hearu handayaho helo dabo helene.

<sup>29</sup> Ani helayagola howa horo mbirungi Yaroboama ibu Yarusaleme howa hariga wiagoria pialu hearia Ngode Datagaliwabenaga bi mana latagi haga mbira Siloali mini Ahiya lola hene. Ogonigi agali mende tara mbira nahe libuni hanguore harigani hene.

<sup>30</sup> Lola hayagola Ahiya ibugua ibunaga aga gahenge bayale mbira bu heneyago ogoni golowa naina homberia (12) podobagabu ngelene. <sup>31</sup> Ani buwa ibugua Yaroboamahondo mbiwia halu lalu, Aga budini biaru inaga pira ogo mo ya. Ogoni irane Anduane Homogo Isaraele wali agalirunaga Ngode Datagaliwabehanda i langialu ogodagua laya. Ina Solomono kini nahelo dugu wahole manda bu ko. Isaraele hameigini pira uruni ina haru habelo hamelo ko, laya. <sup>32</sup> Anigo inaga biabe biaga agali Debidi mitangi budai bialubi inaga loma bia hene Yarusalemebi nde dindi maruha tano maru ngelowa Yarusalemeore ininaga loma bia hene ngelarugodane Solomono ibugua hameigini mbiraore handayaho helo helolebero. <sup>33</sup> Isaraele wali agalihondo ogonidagua buleberodagoni irane tigua ini erembira ngialu puwa Saidono wali agalinaga dama wali beda mitangi bialu gime wabini mini Asadarehondobi Moaba wali agalinaga dama mitangi bialu gime wabini mini Kemosohondobi Amono wali agalinaga dama mitangi bialu gime wabini mini Molegehondobi uruni bibahendehondo mitangi bialu bi pupu wiaga ka. Tigua mana bayale talialu bialu helo helarugo mo wahowa mana mirurubi bi lamirurubi bibahende mo wahai haya. Tigua Debidihanda mana bayale biaga wiaruni mo wahalu ina tigua bilo hamelo kogobi nabi wahai haya.

<sup>34</sup> Anigo Solomono ibuni kini kago bo dugu wanaholebero. Kini Debidi ibu agali ininaga biabe biagaore helo lowa dabo helarugo ibugua inaga bi hale howa inaga mana baya hangu taluwa bialu hayago mitangi bulebero. Ani manda bialu Solomono ibu kini kane dege homalu waholebira. <sup>35</sup> Mani Solomono homaragola ibu igini kini ha aribia holebira. Ani birangi ina Isaraele hameigini pira ibunaga giha howa gingilo mialu inaga giha mo ya holebero. <sup>36</sup> Anigo Solomono igini mbira kini helowa ibugua Isaraele hameigini mbira hangu handayaho helolebero. Ani berogome inaga biabe biahaga Debidinaga wa holene hale dedago nahundulebira. Debidi aguanene hangume inaga tano Yarusaleme wali agalirume i mitangi bialu lotu lole ibilonaga anda inime loma biaho helarugo handayaho helo kini mbira dabaluhelaabo holebero. <sup>37</sup> Yaroboama ina Isaraele dindi inime handayaho hole hamelo keruni handayaho howa Isaraele wali agalinaga kini habelo helolebero. <sup>38</sup> Ai ina Debidihanda bialu henedagua dege inaga mana ngaru talialu inaga bi hale howa hariga tigabi inime pobe ledogoria pialu mana tigabi ina hame ledogo bialu haabo hariyagua nde ina i baba mandagi haabo holebero.

Ai í Isaraele wali agalinaga kini habelo dabo helolebero. Ani bialu Debidi aguanene hangume kini helo larudagua ina mana uruni talialu biriyagua mani inaga aguanene hangume Isaraele wali agalirunaga kini helo dabaluhelaabo holebero.<sup>39</sup> Ai Solomonu ibugua mana ko biyagonaga ina ti mana bialu Debidi aguanene mani holebiraru ti pani muleberogo mialu haabo naholebero laya, lalu Ahiyahanda Yaroboamahondo lamini.

<sup>40</sup> Mani Solomonu ibugua Yaroboama bo wahole manda bu hene. Ani manda bu heago hondowa Yaroboama ibu abale ibida pialu Iyibi dindiha puwa Iyibinaga Kini Sisaga hearia pene. Ani puwa Solomonu homelotagi ibu Iyibi dindiha haabo hene.

*Solomonu homenego ogo*  
(2 Bi Te 9.29-31)

<sup>41</sup> Mbirale tara tara Solomonu ibugua binirubi ibunaga mini mandala bayale wiarubi bibahende mbuga mbira mini Solomononaga Te laga ngagoha gilibu nga.<sup>42</sup> Solomonu ibu mali pira maria (40) Yarusalemeha kini howa Isaraele wali agali handaya ho hene.<sup>43</sup> Ani halu homayagola tigua ibunaga tingini Yarusaleme Debidinaga tano laga wiagoha hora hene. Homayagola Solomonu ibuni igini Lehoboama ibugua ibu abanaga henge ibuni mialu kini ha aribia hene.

## 12

*Isaraele hameigini uyurahayagi plearu ti hoba mialu tini hangu henego ogo*  
(2 Bi Te 10.1-19)

<sup>1</sup> Lehoboama ibu Isaraele wali agali bibahendeme ibu tinaga kini helole lowa Segeme tanoha ibu ngoai ho heagoria pene.<sup>2</sup> Ala Nebada igini Yaroboama ibugua Kini Solomonu ibu bole heago hondowa ohalu Iyibi dindi pu henego. Ai Isaraele wali agali tigua Lehoboama tinaga kini helo dabo helara layago hale howa ibu Iyibi dindi wahalu ibuni dindi dai bu hene.<sup>3</sup> Yaroboama dai bialu anda ibiyagola ibuni halu Isaraele wali agali bibahendebi Lehoboama hearia puwa tigua ibuhondo lamialu lalu,<sup>4</sup> í aba Solomonu ibugua ina biabe ndelahe wiaru mo ngiyagola iname biabe erekuibi mangabiore bialu harima. Ai áyu ina inahondo mbirale bayale hendore bulene ngadagua bialu gendabi ndelahe ngaru mo wahabelo hamelo kama. Ina ogonidagua biriyagua ina haru habelo í andaneha holeberema, lene.

<sup>5</sup> Ani layago hale howa Lehoboama ibugua tihondo lalu, Horo tebiru andaga halu inaga mini ngogo tí languliya dai bule áyu andaga pudaba, lene. Ani laya handala ibu helalu ti andaga pugupugu bini.

<sup>6</sup> Ani piya handala Lehoboama ibu andaga puwa agali haguane ala hene mini bogabi maru abale ibu aba Solomonu mini bayaleru talebu miaga heneru hearia puwa lalu, Wali agali o biarunihondo bi agua ladai buliya hamelo kamibe, lene.

<sup>7</sup> Ani hale hayagola tigua ibuhondo lalu, í wali agali uruninaga biabe biaga bayale halu ti biamogo bulene hamelo keyagua nde áyu tihondo bi bayale lolene nga. Ina ogonidagua biriyagua ti í andaneha holebira, lalu lamini.

<sup>8</sup> Ani layago hale howa bia nabi mo wahalu Lehoboama ibugua agali ibuni mini bayale talebu miaga igiri haguane daliahe mini bogabi ndo ibunila haru mandagi andaho hene hearu hearia pene.<sup>9</sup> Puwa ibugua tihondo lalu, Wali agali biarunime tiha genda maru bamba í abahanda mo ya hene wiaru mo waholiya hamelo ka. Anigo áyu ina tihondo agua ladai buliya hamelo kamibe, lene.

<sup>10</sup> Ani hale hayagola igiri haguane daliahe biaru tigua ibuhondo lalu, Ina bamba í aba ibugua wali agali uruniha genda mo ya henedaru mo wahole manda buwa tihondo bi ladai bule hamelo keyagua tihondo bi ogodagua lolene nga. I abahanda tí genda mo ngiyalo manda bu kamiyagua ogoni genda nabi emene hangu. Inaga gi hondone mbiraore hangunaga hongo kagome í abanaga hongo ogoni bolangua hene ka.<sup>11</sup> I aba



ibugua tí heneneore genda mo ngiyagonigo ina tí genda timbuniore ngulebero. I aba ibugua tí tibu emeneme bayago ina tí tibu timbunime hongo howaore bolebero lalu lamibe, lene.

<sup>12</sup> Ani layagola horo tebira hai halu Yaroboamabi Isaraele wali agali biarubi bibahende Lehoboama ibugua horo tebira halu ibalimu layadagua ibu hearia ibuni hondole ibini. <sup>13-14</sup> Ani íbu heagola kini ibugua agali haguane ala hene mini bogabi hearume labe layadagua nale wahu igiri haguane daliahe ibuni ale hearume labe layadagua wali agali biaruhondo bi hongohe lamini. Ibugua tihondo lamialu lalu, Henenore i abahanda tihondo genda mo ngiyagonibi ndo ina tí genda timbuniore mo ngulebero. I abahanda tibu emene hangume tí bayago ai ina tibu timbunioreme tí minu bolebero, lene. <sup>15</sup> Anduane Homogoibunime bilo hame lenedagua lola helonaga Lehoboama ibugua wali agali biarunaga bu miniha hame ngelo hearu talia nabi mo wahene. Anduane Homogoibunime agali mbiraibunaga bi mana latagi haga Silo dindini haga mini Ahiyaha howa Nebada igini Yaroboamahondo ogo bulebira lalu mbiwia ho wiyago lola helonaga anidagua bini.\*

<sup>16</sup> Ani layagola wali agali biaru tigua manda bu handalu hemiria kini ibugua tinaga bi layago hale habe naheyane tigua bi hongo howa ladaga halu lalu, Ina Debidi damenerunaga andaneha holene manga ho kama. Ina Debidi ariabi ndo ibu igini áyu o kago ibu ariabi ndo dege kamagonigo Lehoboama ibuni hondo holene nde ibunaga biabedago áyu ina Isaraele wali agali kamaru inane daluha pugupugu bima, lalu pene.\*

Tigua Lehoboama erembira mialu tini daluha pene. <sup>17</sup> Ani piyagola Isaraeleali maru Yuda dindihayagi Yuda hameigini hearu uruni ti dege Kini Lehoboama andaneha haabo hene.

<sup>18</sup> Mani howa Kini Lehoboama ibugua agali mbira Adonirama ibu kininaga biabe biaga agali hearu handayaho haga henego ogoni ibu Isaraele wali agaliru hearia pu lene. Adonirama ibu Isaraele wali agali biaru hearia piyagola tigua ibu ege toleme bo homelene. Ani biya layago hale howa Kini Lehoboama ibu ibunaga wai biagane garo ale mini karisini iraga halu abale Yarusaleme ibida dai bini. <sup>19</sup> Horo ogoningihowa Isaraele wali agali uyurahayagi hama ibiniru tigua mine halu Debidi aguaneneru mbiragome kini hayagua urunime ti haru helo hame naleore haga hene.

<sup>20</sup> Horo mbirungi Yaroboama ibu Iyibi dindi wahu andaga ibiya layago hale howa Isaraele wali agali ti mo ngoai howa Yaroboamahondo, Ina kamaria ibabe, lalu lawia hene. Bi ogoni lawia hayagola Yaroboama ibu ti hearia anda ibiyagola tigua ibu Isaraele wali agali bibahendenaga kini helo dabo helene. Yuda hameigini hearu ti dege Debidi aguanene kini hearume ti handayaho helo helene.

*Ngode Datagaliwabenaga bi mana latagi haga Semaiahanda bi latagi henego ogo  
(2 Bi Te 11.1-4)*

<sup>21</sup> Lehoboama ibu Yarusaleme anda puwa ibugua ami agali hongohe Yuda hameiginibi Beniyamini hameiginibi hearu bibahende olomogo bini. Agali ogoningibu ngoai henedaru dagalalu daosini handari mbirani pira halira (180,000) íbu hene. Lehoboama ibugua ami agali urunime Isaraele wali agali uyurahayagi palaru baba wai bialu wali agali uruni ibuni andaneha helo lone haru dai bule pelo manda buwa ani bule pudaba lene. <sup>22</sup> Anigo Ngode Datagaliwabehanda ibunaga bi mana latagi haga Semaiahondo lamialu lalu, <sup>23</sup> Ina áyu ogoni puwa Kini Lehoboamabi wali agali Yuda hameiginibi Beniyamini hameiginibi ti bibahende karia puwa tihondo bi ogodagua lamibe. <sup>24</sup> Anduane Homogoina larogo tí hameneore Isaraele karu baba wai nabibe. Áyu tí bibahende andaga piyai hadaba. Inime hame lewadagua Isaraele wali agali tigua tí yu wahu tini hanguhatara hayagoni. Anidagua biyagoni inime biru, lene. Ani laya

\* 12:15: 1 Kin 11.29-39    \* 12:16: 2 Sml 20.1

handala Semaia ibugua pialu Anduane Homogonaga bi urunidagua latagi hayagola ti wahalu tini andaga pugupugu bini.

*Yaroboamahanda Anduane Homogo erembira mialu penego ogo*

<sup>25</sup> Kini Yaroboama ibugua Segeme tano Eberaimi hameigini dindiha hari bare nene wiaruha ege pabe biaru hongo helo mo tiga bialu hene. Ani bialu howa ibu tano ogoniha horo maru haga bini. Ani biai halu tano ogoni wahalu tano mende Penuele puwa ogoninaga ege pabe bu mabu bini wiarubi hongo helo mo tiga bialu hene.

<sup>26-27</sup> Yaroboama ibugua manda bialu inaga wali agalime áyu ti Anduane Homogonaga anda Yarusaleme dai buwa ibuhondo loma biniru bo delalu kadagua mani nde tinaga mini beregedalu i yu wahalu puwa tinaga agali haguane Yudali Kini Lehoboama kago andaneha hole i homoliya bo wahalu ibu karia dai bulubada lo manda bini.

<sup>28</sup> Yaroboama ibu minime uruni manda bu bolangua howa ibugua bulumaga ale wangabe kira ona ngolome wabu ngelene. Ani wabu ngelo howa ibugua wali agaliruhondo lamialu lalu, Tígua Yarusaleme lotu lole puabo harimigo ai áyu lone polene irane nawulebira. De handadaba. Ai Isaraele wali agali tinaga bi pupu wiagane o kagoni. Iyibi dindiha howa ti haru tagira ibini tinaga bi pupu wiagane o kagonigo ti bibahendeme ogolabohondo bi pupu wilimu, lalu lamini.✧ <sup>29</sup> Ani lowa ibugua bulumaga ale ngolome wabini mbirago Bedele tanoha ngelalu mende Dana tanoha wini. <sup>30</sup> Ani wiagola wali agaliru tigua bulumaga ale ngolome wabini kira ogonilabohondo bi pupu wule Dana tanohabi Bedele tanohabi puabo haga hene. Mana ogonidagua biyagome mana ko timbuniore bialu hene. <sup>31</sup> Ani bialu Yaroboama ibugua bi pupu wulenenaga dindi maru hari nene wiaruha mo wigi bini. Ani buwa agali maru loma binigo mo miaga helo dindi uruniha dabo helaga bini. Agali odaruni hameigini Libai aria ndo agali ta nabi minu helaga bini.

*Anduane Homogohanda bi pupu wiaga Bedele dindini winigo mo ko holebero lenego ogo*

<sup>32</sup> Yaroboamahanda ege halininaga horo pirani duria (15) layagola lotu lolene horo mbira mo wini. Horo ogoningi Yuda wali agali tinaga lotu laga horo timbuni mbira winigodagua Yaroboama ibugua ina wero lowa mo wini. Ani buwa ibugua bulumaga ale kira wabu ngelayagonaga lomabu bo delaga dabu wiagoria nogo mbirale bo loma buwa delene. Ibugua ogoni binidagoni Bedele dindini bini. Ani bialu howa agali maruibunime loma binigo mo miaga helo dabo helayaru bibahendehondo bi lo pelalu, Tí Bedeleni tinaga biabe uruni bule ibalimu, lalu lawia hene.✧ <sup>33</sup> Ai ege halinigonaga horo pirani duria (15) layagola horo ogoni Isaraele wali agali tinaga lotu lolene horo timbuni ogoni lalu lo wiyangi Yaroboama ibuni Bedele tanoha lomabu bo delaga dabu bia hayagoria puwaibunime nogo loma biniru bo delene.

## 13

<sup>1</sup> Yaroboama ibu bo lomabu delaga dabu bu heleagoria heyu howa bo lomabu delalu hearia Anduane Homogonaga bi mana latagi haga agali mbira Yaroboama hearia ibini. Agali ogoni ibu Yuda dindiha haga hearia Anduane Homogohanda ibu Yuda dindi yu wahalu Bedele pu laya handala ibini. <sup>2</sup> Anduane Homogonaga bi mana latagi haga agali biagome bo lomabu delaga dabu heagohondo mbiwia halu lalu, Bo lomabu delaga dabu-o Anduane Homogohanda la layadagua ina ihondo bi mbira larogo. Agali mbira mini Yosaia ibu Debidi aguanene holebirago ibu kini harangi ibugua loma binigo mo miaga agali ini bo lomabu delaga holebiraru ti bibahende bo paga hai holebira. Agali uruninaga kuni ini delalu i mo ko halu i ko ngubiore holebere, lene.✧ <sup>3</sup> Ani lowa Anduane Homogonaga bi mana latagi haga ogoni ibugua bi maru mbiwia halu lalu, Áyu

ina ihondo bi langirugoni Anduane Homogo ibuninaga biore iha howa layago manda bibelo manane mbira Anduane Homogo ibuni bulebirago larogo. Bo lomabu delaga dabu ogoni gialo hole biragola loma bo delene be ira pungaru dabu daligani ngaruni dindini haealapaya bu wulebira, lene.

<sup>4</sup> Yaroboama ibu bo lomabu delaga dabu biagoria heyu howa dege bi ogoni hale hene. Ani hale howa ibugua agali Anduane Homogonaga bi mana latagi haga biago gi dola howa lalu, Agali ogoni minu yamia hadaba, lene. Ani layangiore Yaroboamanaga gi dogo layago lone pau labe nahe hongohe hene. <sup>5</sup> Ani bialu Anduane Homogonaga bi mana latagi haga agali biagome Anduane Homogonaga minini howa mbiwia hayadagua bo lomabu delaga dabu biago gialo ibira halu ira punga beru dabuni wiago haealabaga bialu dindini ibira hai hene.

<sup>6</sup> Anidagua biyagola Kini Yaroboama ibugua agali biagohondo lamialu lalu, Ina Anduane Homogo inaga Ngode Datagaliwabehanda i biamogo bialu inaga gi lone mo bayale helo ibuhondo inaga bi laha, lene.

Ani layagola agali biago ibugua Anduane Homogohondo kininaga gi mo bayale ha lalu bi lamiyagola kininaga gi mo bayale hayagola gi karulape paulene. <sup>7</sup> Ani biyagola howa kinihanda ibuhondo lalu, Ayu i andaga ibalu iya haru mandagi tomo nalu birabiya hameledo. Ani bialu mbirale mbira i mo turu halu ngulebero, lene. <sup>8</sup> Ani layagola Anduane Homogonaga bi mana latagi haga agali biagome ibuhondo ladai bialu lalu, Anigo inaga muni ngeruni hanuni yabulaki howa mende i ngero lariyaguabi fla haru i andaga napolebero. Ani bialu Bedele dindi ogoria howa i iba tomobi nane holebero. <sup>9</sup> Ani larogoni irane Anduane Homogohanda ihondo dindi ogoha howa mbirale mbira nanabe lalu ini dai bule howa hariga ibirudagoha ndo hariga mendeha dai bibe laya, lene. <sup>10</sup> Ani lai halu agali ogoni ibu hariga ibiyadagua dai nabi hariga mendeni dai bialu ibuni andaga pole pene.

### *Bedeleha bi mana latagi haga agali wahe mbira heagome binigo ogo*

<sup>11</sup> Horo ogoningi bi mana latagi haga agali wahe mbira Bedele dindiha haga hene. Ani hearia agali ogoni ibu igini hearume horo ogoningi Bedele dindini Anduane Homogonaga bi mana latagi haga agali Yuda dindiha howa ibini biagome Kini Yaroboamahondo bi layarubi maru biyarubi bibahende lamiai hene. <sup>12</sup> Ani layagola agali wahe ogoni ibugua ibu iginiruhondo hale halu lalu, Anduane Homogonaga bi mana latagi haga agali ogoni ibu hariga agoha dai biyabe, lene. Anidagua hale hayagola ibu igini biaru tigua agali ogoni ibu dai biyago hondo henego ai ogodagua piya lalu ti aba walia hene. <sup>13</sup> Ani layagola ibugua tihondo lamialu lalu, Ai inaga nogo dongini biragane biago mo paga hole pudaba, lene. Tigua anidagua biya handala ibuibunaga nogo dongini biralu pene. <sup>14</sup> Ibugua Anduane Homogonaga bi mana latagi haga Yudali biago talima pialu hearia hariga obeneni ira bai ale mbira heago andaneha berearia hendene. Ani hondowa ibugua lalu, I Anduane Homogonaga bi mana latagi haga agali Yuda dindiha howa ibiriyagonibe, lene.

Ani layagola ibugua ladai bialu lalu, E i ogoni bedogoni, lene.

<sup>15</sup> Ani layagola agali wahe biagome ibuhondo lamialu lalu, Ai i andaga pialu tomo nole mbaliya hameledo, lene.

<sup>16</sup> Anigo Anduane Homogonaga bi mana latagi haga Yudali biagome ibuhondo lalu, Ina i andaga lone dai biba nalolebero. Ina dindi ogoha howa tomo ibabi mbira nanolebero. <sup>17</sup> Ani larogoni irane Anduane Homogohanda i langialu lalu, Iba tomobi nanabe lalu ai harigabi mendeni dai bialu andaga pobe layago ogonidagua bialu ai hariga mendeni dai bialu andaga porogo, lene.

<sup>18</sup> Ani layagola bi mana latagi haga agali wahe biagome laabo halu lalu, Ibi nde Anduane Homogonaga bi mana latagi haga i kegoni ale dege kogoni. Ai Anduane

Homogohanda í tomo ibaru nelo mule í andaga haru pobe lalu ibunaga dahuliyali mbirame bi yalu pu leneyago ibalu langiya handala í damu ibiru, lene. Anigo agali wahe ogoni ibugua bi o layadagoni henene ndo ke howa lamini.

<sup>19</sup> Anduane Homogonaga bi mana latagi haga biago ibugua mitangi bialu hearia agali wahe biagome bi layadagoni hale howa agali ogoni andaga dai buwa tomo ibabi nalu berene. <sup>20</sup> Libu tomo nalu bereria bi mana latagi haga agali wahe biagohondo Anduane Homogohanda bi mbira lamini. <sup>21</sup> Ani lamiyagola ibugua Anduane Homogonaga bi mana latagi haga agali Yuda dindiha howa ibini biagohondo bi hongo howa lalu, Anduane Homogohanda lalu, Ína ibugua bi layadagua nabi ibunaga bi mo waharida, laya. <sup>22</sup> Ai lone dai buwa dindi ibugua tomo ibabi nanabe layagoria biruwa narida. Anidagua biridagome í homolebere. Ani homaregola ínaga tingini íni dalu ínaga damenerunaga homali henedagoha mandagi horo naholebira, laya lene.

<sup>23</sup> Anduane Homogonaga bi mana latagi haga Yudali biago ibu tomo nai heagola agali wahe biago ibugua ibuninaga nogo dongi biago mo manda manda bialu Yudali biago bialu pelo mini. <sup>24</sup> Pialu hearia gabua mbirame budi ale mini laiono harigani lola howa ogonime agali biago bo wahene. Harigani bo wiagoria nogo dongi biago handayaho hene. Laiono biago ibubi nde handayaho ha dege bini. ✧ <sup>25</sup> Mani agali maru hariga ogonidagua ibalu hearia agali homene tingini wiagoria laiono handayaho hearia handalu anidagua biane handarima lalu Bedele puwa wali agali bu hearu lamini.

<sup>26</sup> Agali wahe bi mana latagi haga biagome te ogoni hale halu lalu, Ogoni Anduane Homogonaga bi mana latagi haga agali biagooredago. Ibugua Anduane Homogonaga bi mo wahayagonaga Anduane Homogohanda bulebero layadagua laionome lola howa bo wahelayada, lene.

<sup>27</sup> Ani lowa ibu igini biaruhondo lalu, I nogo dongini biragane biago mo paga hadaba, lene. Ani layago tigua ibu layadagua bini. <sup>28</sup> Ani biyagola ibu nogo dongini bialu hariga peadagua puwa handalu hearia agali biagonaga tingini harigani wiaria hendene. Nogo dongi biagobi laionobi kaware handayaho hearia hendene. Laiono biagome agali tingini wiago nane halu nogo dongi biagohondobi mbirale nabiore heane hendene. <sup>29</sup> Ai bi mana latagi haga agali wahe o biago ibugua agali homene tingini wiago ibunaga nogo dongini mo wialu Bedele dindini duguru bialu baya hangu homaliha hora holenenaga mo yalu dai bini. <sup>30</sup> Mo yu dai buwa bi mana latagi haga agali wahe biago ibunaga homali wabu wini wiagoha aribia halu hora hene. Ani hora halu howa ibu igini biarubi ti harume dugu bialu, Inaga hamene ínaga hameneore, laga bialu nde hora hene.

<sup>31</sup> Tigua agali hora hai howa ibugua ibu iginiruhondo lamialu lalu, I homarongi tigua ínaga tingini Anduane Homogonaga bi mana latagi haga agali o hora harimagoha dege mandagi hora halimu. ✧ <sup>32</sup> Anduane Homogohanda bulebero lalu ibunaga bi mana latagi haga agali biagonaga ne harigaha howa latagi hayaruni bibahende ogonidaguaore biai holebira laro. Bo lomabu delaga dabu Bedeleha karubi Samaria tanoha bi pupu wiaga ngaru bibahendebi Anduane Homogohanda bo gialo wahai holebiraore, lene.

### *Yaroboamahanda mana ko biaabo halu henego ogo*

<sup>33</sup> Yaroboama ibugua mbirale bulebira layaruni bia hayane handa hondowa dege ibugua mana ko bialu haga wiyaruni yu wanahe bialu haabo hene. Ibugua agali maru loma binigo mo miaga dabo helalu dindi tara tara bi pupu wiaga ibunime dabo wigi biyagoria biabe bialu helo helaga bini. Agali ta nabi loma binigo mo miaga hoa hayaru ibugua biabe uruni bialu helo dabo helaga bini. <sup>34</sup> Yaroboama halu ibu dameneru tigua mana ko uruni bialu hayagome ko timbuni tiha ngelo hene. Anidagua biyagonaga Anduane Homogohanda Yaroboama damene bibahende mo ko halu bo wahaiore hene.

✧ 13:24: 1 Kin 20.36 ✧ 13:31: 2 Kin 23.17-18

## 14

### *Yaroboama igini homenego ogo*

<sup>1</sup> Odagoningi Kini Yaroboama igini Abaya warago timbuni bo ibira hene. <sup>2</sup> Ani biyagola Yaroboamahanda ibu onehondo lamialu lalu, Wali agali marume í í onedalo manda nabilo aga yári tara ngaru bialu Silo tano pole pu. Dindi ogoniha ala í Isaraele wali agalinaga kini holebere mbiwia halu lalu langini Anduane Homogonaga bi mana latagi haga agali Ahiya biago ibu ogoniha kagoni. <sup>3</sup> Ína pialu mberedi pirabi mbisigedi marubi mone ibane dendebe be mbirabi mo yalu puwa ibuhondo mibe. Mialu ibuhondo iyanaga igini homo ngago ogodagua bulebira lalu ibugua langiai holebirago aguaore bulebirabe lalu ibuhondo hale habe, lene.

<sup>4</sup> Anidagua laya handala Yaroboama one ibu abale pialu Ahiya andaga Silo anda pene. Ogoningi Ahiya ibu agali waheore halu deru baya hangu handabe nahe berene. <sup>5</sup> Ani berearia Anduane Homogohanda wali biago anda naibi wene harigani ibalu heagola Ahiyahondo lamialu lalu, Yaroboama igini warago timbuniore bo ngelalu Yaroboama one ibugua ibu igini homolebirabe be dabi holebirabe lalu íhondo hale hole harigani ibalu kago ibulebira, lene. Ani lowa Ahiya ibugua wali ogoni ibuhondo bi ogodagua lamibe lalu Anduane Homogohanda Ahiyaha bi lamu helene.

Wali ogoni wali tara tingi halu ibini. <sup>6</sup> Yaroboama one ibu wene Ahiya andaga anda ibule harabani kau lama ibayuago hale howa ibugua lalu, Yaroboama one-o tamuha anda íbu, lene. Ani lowa lalu, Í Yaroboama onedane hendedogo. Wali tara tingi halu eberego agibe. Ínaga bi te hale halu ína íhondo bi gendabi hale habelo mbira langulebero. <sup>7</sup> Bi ogoni Yaroboama hale helo lamule dai bia. Anduane Homogo Isaraele wali agalirunaga Ngode Datagaliwabehanda Yaroboama ibuhondo lalu, Ína í Isaraele wali agali maru hearu aria dege heria ai ínaga Isaraele wali agalinaga kini habelo dabo helaru. <sup>8</sup> Ína Kini Debidi damene lenego haru nahelonaga mo wahalu íni haru habelo dabo helaru. Ani birugo ainde ínaga biabe biahaga agali bayale Debidihanda biyadagua ína nabi kegoni. Debidi ibugua ínaga bi mana baya hanguore hongo howa talialu mana tigabi ínaga deni howa bulene ngaru bialu haabo haga hene. <sup>9</sup> Anigo ína mana ko kini ala henerume bialu henedaru emene dege lowa ko timbuniore bialu kegoni. Ína í erembira ngialu puwa ege toleme dama mitangi bialu gime wabini ngaruhondo bi pupu wialu kegoni. Ína mana ogonibi bialu kegome í mo keba timbuni halu kegoni ndobe.

<sup>10</sup> Anidagua birigonaga heneneore ínaga damene lenego bibahende mo ko halu bo wahai holebero. Yaroboama í damene igiri daliaheyaguabi agali waheyaguabi bibahende Isaraele dindini kago bo wahai holebero. Wali agalime ti to wini mbira emeneorebi mbira ibira holani handalu hilo wahagadagua í damene lenego bo hilo wahaiore holebero. <sup>11</sup> Í damene maru tano pabe tamuha homo ngagola tinaga tingini biangome nalu tano pabe tagirahayagi homo ngaru ega bodo hariawe timbuni bedarume nolebira. Í Anduane Homogo ína bi o ledogoniore, laya lene.

<sup>12</sup> Ani lowa Ahiyahanda Yaroboama onehondo laabo halu lalu, Áyu pialu í andaga anda pialu kegola í igini ibu homolebira. <sup>13</sup> Ani homaragola Isaraele wali agalirume dugu bialu nde hora holeberemi. Yaroboama damene bu kamiruha howa igiri mbi-raore ogoni ibu hangu mana bayale tigabi bialu kagola Anduane Homogo Isaraele wali agalirunaga Ngode Datagaliwabehanda ibu hondowa turu haga hene. Anigo ibuni hangu bayale hora holene ngadagua hora holeberemi.

<sup>14</sup> Anduane Homogohanda Isaraeleali mbira aribia howa kini helolebirago ogoni ibugua Yaroboama damene lenego mbira yu wa nahole bibahendeore bo wahai holebira. Áyu ogoni anidagua bulebira laro. <sup>15</sup> Isaraele wali agali tígua dama wali beda mitangi bialu gime wabini mini Aserahondo bi pupu wialu kamigome Anduane

✧ 14:10: 1 Kin 15.29



Homogohanda tínihondo tandaga helonaga tínime tandaga mo ha harimigo. Ani birimigome Anduane Homogohanda tí mo gi timbuni haragola tígua gi timbuniore howa iba angeni gambe karu ibame mo ema bia haragola duru lalu ema ema bialu haralidagua tigua duru timbuni lalu holeberemi. Ani kamigola Anduane Homogohanda Isaraele wali agali ti dindi bayale tínaga mamaliruhondo mini biagoria nahalimulo balu purogo lelelebira. Ibugua tí Iba Yuberedisi porago yu wahalu amurahayagi mo giligalale lelebira. <sup>16</sup> Yaroboama ibunime mana ko wiaru bialu howa ibugua Isaraele wali agali maru hearu ko bilo mo bia halu hayago. Ani biyagonaga Anduane Homogohanda tigua mana ko binidaru mitangi bialu Isaraele wali agaliore erembira mialu yu waholebira, lalu Ahiyahanda wali biago lamini.

<sup>17</sup> Yaroboama one ibu bi uruni layago hale hai halu Tisa tano dai bini. Dai bialu ibuni andaga anda polene kaware pialu heaore ibu igini warago bo wiyago tongolo mini. <sup>18</sup> Ibu tongolo miyagola Isaraele wali agali bu hearume duguanda ibu ngoai howa dugu bu halu nde hora hene. Anduane Homogonaga bi mana latagi haga agali Ahiyaha howa Anduane Homogo ibunime bi mbiwia hayago heneneore lola hene.

### *Yaroboama homenego ogo*

<sup>19</sup> Bi te maru Kini Yaroboama ibugua bialu henedaru mbuga mbira mini Isaraele Kini Henerunaga Bi Te laga ngagoha gilibu winigo nga. Mbuga ogonime kini ibugua waitigiru baba wai binirubi Isaraele dindi handayaho howa bialu henedarubi garealo nga. <sup>20</sup> Yaroboama ibugua mali pira kirani kira (22) Isaraele dindiha kini hene. Mani ibu igini Nadabahanda Isaraele dindini kini ho aribia hene.

### *Lehoboama ibu Yuda dindiha kini henego ogo*

#### *(2 Bi Te 11.5-12.15)*

<sup>21</sup> Kini Solomono igini Lehoboama agali daliahe ibu taba henenegoria howa hama ibinigo mali pira mariani mbira (41) layagola kini hene. Anduane Homogohanda Isaraele dindi bibahende wiaru aria mbiragome Isaraele wali agali tigua ibuni kagoria kaware ibalu lotu lelonaga dabalua loma biaho ngelene Yarusaleme wiagoria Lehoboama ibugua mali pira mbirani karia (17) kini howa haru hene. Lehoboama ibu aiya Amono wali mini Nama berene.

<sup>22</sup> Ibu kini heangi Yuda wali agalime mana ko dewaore bialu hene. Tigua ani biyagome Anduane Homogohanda tihondo keba hayagonaga irane tinime mo keba hene. Abale tinaga mamalirume mana ko bialu ha henego tigua wali agali áyu urunime Anduane Homogo mo keba halu hayadagua ndo timbuniore bialu hene. <sup>23</sup> Ogoningi Yuda wali agalirume tinaga bi pupu wiaga hari nene wiaruhabi ira timbuni hearu teneha gumbahe wiaruhabi mo wiai hene. Ani buwa tigua ira tigrini mbira ona gombedo hongowabi mbirale dama wali beda mitangi bialu gime wabini mini Asera lagago ogoni alebi ona ngelowa urunihondo bi pupu wialu hene. <sup>24</sup> Ani bialu mana ko ngubi mbira ogoningi bialu hene. Mana ko ngubi ogoni wali agali maru bi pupu wiaga ogoniha tinaga biabe wali agali kayu yu paligi bilonaga mo wini. Yuda wali agalime mana ko ngubiore wali agali abale dindi ogoriani henedarume bialu haga wiadagua dege bialu hene. Wali agali abale dindi ogoriani henedaruni Anduane Homogohanda bo taliatagi halu dindi Isaraele wali agali ti karulo helo mope hene. <sup>25</sup>

<sup>25</sup> Lehoboama mali daunini hangu kini howa hearia Iyibinaga Kini Sisagahanda ibunaga amiru haru halu Yarusalemeni wai bule ibini. <sup>26</sup> Ani ibalu tigua Yarusaleme bo podalu anda puwa Anduane Homogonaga andaha kini andagahabi mbirale bayale wiago damene bibahende mo yai hene. Wai humbi Solomonohanda wabuwa ngolome parahoa dambi hene wiarubi mo yai halu Iyibi dindiha yalu pene. <sup>27</sup> Ani mo yalu peagola mani Kini Lehoboamahanda agali ibunaga biabe biahaga hearuhondo wai

humbi Iyibiali biarume mo yalu piyadago aribia holenenaga maru ege tole boronosime wabidaba lowiagola ami agali maru kini andaga harabani mamage haga hearume handayaho helo mini. <sup>28</sup> Ai kini ibu Anduane Homogonaga anda loma biahene biagoha pole porangi ami mamage haga uruni ti heba humbi yu pialu dai birangi ti haru dege yalu dai bialu anda hobane ibuni wiagadagoha ngelaga biaga hene.

<sup>29</sup> Bi te maru Kini Lehoboama ibugua bialu henedaru mbuga mbira mini Yuda Kini Henerunaga Bi Te laga ngagoha gilibu winigo nga. <sup>30</sup> Lehoboama Yaroboamala kini hebingi libu wai bialu haabo haga hene. <sup>31</sup> Ani bialu mani Lehoboama ibu homayagola ibu tingini ibu mamaliru homali Debidinaga Tano biagoha winigo ogoniha hora hene. Homayagola ibu igini Abiyahanda ibu aba henegoria ho aribia howa kini hene. Ai Lehoboama ibu aija Amono wali Nama berene.

## 15

### *Abiya Yuda dindinaga kini henego ogo* (2 Bi Te 13.1-14.1)

<sup>1</sup> Yaroboama ibu mali pira mbirani karia Isaraele dindiha kini henego howa halini (18) hayagola Abiya ibu mini mende Abiyama henego ibu nde Yuda dindiha kini pigane mali ogoningi hene. <sup>2</sup> Ani howa ibugua mali tebirani kini howa Yarusalemeni haru hene. Abiya ibu Abasalomo wane Maga berenagonaga igini hene. <sup>3</sup> Abiya ibugua mana ko tara tara dewaore ibu abahanda biaga wiadagua bialu haga hene. Ibugua bamba ibu mamali Debidihanda bialu haga wiadagua nabiagabi ibunaga Anduane Homogo ibunaga Ngode Datagaliwabela mini mbiraore nahagabi hene. <sup>4</sup> Anigo Anduane Homogo ibunaga Ngode Datagaliwabehanda ibunaga biabe biahaga agali Debididitangi bialu Abiyahondo igiri mbira Abiya ibu henegoria ha aribia howa kini helonaga mini. Debidinaga hale hundu tegelape nahelonaga ani mini. Ani bialu Anduane Homogo ibunime Yarusaleme bayale ngelonaga anidagua bini. <sup>5</sup> Anduane Homogohanda Debididitangi biaabo haradagoni irane Debididitangi ibugua mana bayale tigabi dege Anduane Homogonaga deni howa biaabo haga heago hondowa ani bini. Ani bialu Debidihanda Anduane Homogonaga bi ledago bibahendeore talialu bialu haga hene. Anigo halu mbiru dege Debididitangi ibugua Hidiali Uriahondo mana ko bini. <sup>6</sup> Abiya Yaroboamala libu kini hebingi wai biaabo halu haga hene. <sup>7</sup> Mbirale bibahende Kini Abiya ibugua bialu henedaru mbuga mbira mini Yuda Kini Henerunaga Bi Te laga ngagoha gilibu winigo nga. <sup>8</sup> Mani Abiya homayagola tigua ibunaga tingini Debidinaga tano wiagoha hora hene.

### *Asa Yuda dindinaga kini henego ogo* (2 Bi Te 15.16-16.6)

<sup>9</sup> Yaroboama ibu Isaraele dindiha kini mali pira mbirani dira (19) henego ai pira kira (20) hayagola Asa ibu Yuda dindinaga kini pigane hene. <sup>10</sup> Asa ibugua kini howa mali pira mariani mbira (41) Yarusalemeni haru hene. Asa ibu aija Abasalomo wane Maga biago aguane berene. <sup>11</sup> Asahanda mana bayale tigabiru bamba ibu mamali Debidihanda biaga wiadagua talialu biaga hene. <sup>12</sup> Ibugua dama mitangi bialu gime wabirinunaga bi pupu wialu wali agali kayu yu palue ibu ngoai haga anda hearuni bibahende bo gialo wahai hene. Ani bialu ibuninaga mamalirume bi pupu wulenaga dama mitangi bialu mbirale gime wabini wiaruni bibahende mo wahai hene. <sup>13</sup> Asahanda ibu ayanaga aija Maga biago ibunaga biabe bo dugualu ibu mini lene kini aija beda lene birayago wahalu wali maru bedaru ale dege berelo bope halu bini. Ani biyadagoni irane wali Maga ogoni ibu mbirale dama wali beda mitangi bialu gime wabini mini Asera wabu wiaria ani bini. Asahanda agali bu hearuhondo lalu, Mbirale gime wabini

ko ngubi ogoni dibalu gabu dangiala hole bialu yalu tagira puwa unu Kidorono iba dindi ulini ngagoha delole yalu pudaba, lene. <sup>14</sup>Asa ibugua mbirale dama mitangi bialu gime wabini ngarunaga bi pupu wule ngoai haga anda bu hearuni bo giallo wahai nahe dege henegoyu ibugua Anduane Homogo gubalini timbuniore halu Anduane Homogo andaneha haabo haga hene. <sup>15</sup>Ani bu howa Asa ibugua mbirale ibu abahanda Anduane Homogonaga lalu mo bagiho wini wiarubi ibunime Anduane Homogonaga lalu wia bagiho wini wiarubi bibahende mo yalu puwa Anduane Homogonaga andaha wini. Mbirale o mo winidaruni ngolo silibarubi ndisi be tara tararubi mo wiai hene.

<sup>16</sup>Ogoningi Basa ibu nde Isaraele dindinaga kini hene. Asa Basala libu kini hebingibi nde Isaraeleali Yudalila wai bialu haabo haga hene. <sup>17</sup>Ani howa horo mbirungi Basa ibugua ami agaliru haru halu Yudaliru baba wai bule pene. Puwa tigua Lama tano karulo howa ai wali agali tano ogoniha howa Yuda dindiha puibu nabilonaga hapai halu tanonaga ege pabe heago baya hangu arema butiga bialu hene. <sup>18</sup>Ani bialu heagola Kini Asa ibugua muni siliba ngoloru Anduane Homogonaga andaha wiarubi kini andagaha wiarubi maru yamini. Ani yamialu muni uruni ibunaga agali haguane hearuhondo mo mialu Sirianaga Kini Benehadada Damasagasani hearia mule yalu pelo mini. Benehadada ibu Tabirimono igini howa Hesiono aguane hene. Ani heagola Kini Asa ibugua ibunaga agali haguane biarume Benehadada lamilo lawia halu lalu, <sup>19</sup>Bamba iya aba libu nenegealiore heneyagodagua áyu iyabi nde nenege dege habiya hameledo. Ani habiya lowa áyu ina muni siliba ngolo uru inaga bame wia haro. Ani berogo ai ina Isaraelenaga Kini Basala nenegeore habiya lalu bi hongohe lo wiribigoni wahalu wahabe. Ani beregola ibunaga ami agaliru haru halu inaga dindi yupe halu tagira pelo ani bibe, lene.

<sup>20</sup>Kini Benehadada ibugua Kini Asahanda bi lawia hayiyago hale howa bi ogoni karulape lene. Karulape lowa ibugua ami agali haru hagane haguane hearuhondo lalu, Tí naga ami agali hayadaru haru halu puwa Isaraelenaga tano ngaruha wai bule pudaba, lene. Ani laya handala tigua puwa wai bialu Iyono tano bo poda hana halu Dana tanobi Abele Bedemaga tanobi bo poda hana hai hene. Ani bialu dindi maru Galili iba kuyama bedagoha wiaru karulai halu Nabadali hameigininaga dindi wiarubi karulai hene. <sup>21</sup>Ani binigo Kini Basa ibu hale halu hearia Srialime anda ibalu Isaraelenaga tano wiaruha wai bialu ka layago hale hene. Ani hale howa Kini Basa ibugua Lama tano wahalu Tisa tanoha hole ibida pene.

<sup>22</sup>Ani biyago manda buwa Kini Asahanda ibunaga agali haguane Yuda dindiha bu hearuhondo lamialu, Tí bibahende Lama tano piai halimu, lene. Ani layagola tigua Lama tano pialu ege tolebi pabe bulene ira bibahendebi Kini Basahanda Lama tano mo hongo halu wai paberu bule ira ege toleru yu wiaruni mo yalu ibini. Asa ibugua Misiba tanonaga wai pabebi Beniyamini hameiginiru dalu Geba tanonaga wai pabebi uruniha arema bulene ngaru bilonaga mo yu ibini. <sup>23</sup>Te maru Kini Asahanda bialu henedaru bibahende mbuga mbira mini Yuda Kini Henerunaga Bi Te laga ngagoha gilibu winigo nga. Mbuga ogoniha howa ibugua biabe hongohe bialu henerubi biabe maru tano wiarunaga wai pabe hongohe bu helaga bialu henerubi gilibu wigi bida. Anigo Asa ibu agali waheore hayagola ibunaga ge kuduguhe hene. <sup>24</sup>Ani henego mani homayagola tigua ibunaga tingini ibu mamaliru hora haga Debidinaga tano laga wiagoha hora hene. Hora halu ibu igini Yahosabadahanda ibu abanaga dagia mialu kini ha aribia hene.

### *Nadaba ibu Isaraelenaga kini henego ogo*

<sup>25</sup>Asa ibu Yuda dindinaga kini mali mbira henego mali mende hayagola Yaroboama igini Nadaba ibu Isaraelenaga kini pigane hene. Nadaba ibu mali kirani hangu Isaraelenaga kini hene. <sup>26</sup>Ani howa ibu abahanda mana ko bialu haga wiaru bialu hene. Ibugua Anduane Homogonaga deni howa mana ko dewa bialu howa Isaraele wali agali bu hearumebi bilo mo bia halu hene.

<sup>27</sup> Ani bialu heagola Isaga hameigini Ahiya igini Basahanda Nadaba bo wahole hariga taya bialu hene. Ani taya bialu henego ai horo mbirungi Nadababi ibunaga ami agali ti Pilidialiru baba wai bule pene. Ani puwa Gibedono tano wiago ho hagira biai ho heagola Basa ibugua Nadaba hearia puwa Nadaba balu homelene. <sup>28</sup> Ani bo wahalu puwa ibuni Isaraelenaga kini ha aribia hene. Asa ibu Yudanaga kini henego mali tebone hayagola bo wahene. <sup>29</sup> Ani bo wahalu Basa ibugua Yaroboama damene hearu bibahende homelo bo wahai hene. Mbiraoreali hangubi pora bialu nape bai hene. Anidagua binidagoni bamba Anduane Homogohanda ibunaga bi mana latagi haga agali Ahiyahanda Silo tanoni howa mbiwia henego henene lola hene.\* <sup>30</sup> Yaroboama ibu dameneha genda tagira ibinidagoni irane ogo. Abale Yaroboama ibunime Anduane Homogo Isaraele wali agalinaga Ngode Datagaliwabe ibu deni howa mana ko bialu hayaruni Isaraele wali agali bu hearume bilo mo bia haga hene. Yaroboamahanda mana ko bialu hayadagonime Anduane Homogo mo tandaga hayagola Anduane Homogohanda nde Yaroboama damene lenego bibahende bo wahai hene.

<sup>31</sup> Te maru Kini Nadaba ibugua bialu henedaru bibahende mbuga mbira mini Isaraele Kini Henerunaga Bi Te laga ngagoha gilibu winigo nga. <sup>32</sup> Asa ibubi Basa ibubi libu kini heangi Yudali Isaraelealila wai biaabo haga hene.

### *Basa Isaraelenaga kini henego ogo*

<sup>33</sup> Asa ibu Yudanaga kini henego mali tebone hayagola Ahiya igini Basa ibu nde Isaraelenaga kini pigane hene. Ani howa ibugua mali pira kirani maria (24) Tisa tanoni howa haru hene. <sup>34</sup> Yaroboamahanda mana ko bialu haga wiaru nde Basa ibuguabi talialu bialu haga hene. Anduane Homogonaga deni ibunime mana ko bialu howa Isaraele wali agali bu hearumebi nde mana ko dege bilo mo bia haga hene.

## 16

### *(2 Bi Te 28.1-27)*

<sup>1</sup> Horo mbirungi agali mbira Anduane Homogonaga bi mana latagi haga Hanani igini Yihu heagohondo Anduane Homogohanda bi ogodagua Kini Basahondo mbiwia halu lamule pu lalu lamini. <sup>2</sup> Ibugua bi ogodagua lamialu, Basa ina bi ogo baya hangu hale ha. Abale i agali damene bu hearu ale dege mbirago heria inime i dabalul inaga Isaraele wali agali haru habelo kini helarugoni. Anigo ai ina mana koore Yaroboamahanda bialu haga wiagobi dege bialu howa wali agali bu karumebi nde mana ko dege bilo mo bia haga kegoni. Ainde tinaga mana ko uruni bialu hagahaga bidarume i mo tandaga timbuniore halu ka. <sup>3</sup> Ani bialu kamigonaga ina Yaroboama damene bo biba halu amo lelarudagua inibi i damene lenego bibahendebi bo amo lolebero. <sup>4</sup> Ani berogola i damene maru tano tamuha homayagua tinaga tingini biango bu karume nolebira. Tano tagiraha homayagua tinaga tingini ega bodo hariawe bedarume nalu holebira, lalu lamini.

<sup>5</sup> Te maru Kini Basahanda bialu henedaru bibahende mbuga mbira mini Isaraele Kini Henerunaga Bi Te laga ngagoha gilibu winigo nga. Mbuga ogoniha ibugua biabe hongohe bialu henerubi gilibu nga. <sup>6</sup> Mani Kini Basa homayagola tigua ibu tingini Tisa tanoha hora hene. Ani hora howa ibu igini mbira mini Ela henegome kini ha aribia hene.

<sup>7</sup> Basa ibugua Anduane Homogonaga deni howa mana ko bamba Kini Yaroboamahanda bialu hagadagua dege bialu hene. Basa ibugua mana ko ogoni bialu henedagonime Anduane Homogo mo tandaga timbuni halu hene. Ani heagola Basahanda Yaroboama damene bu hearuni bibahendeore bo wahaiore hayagolabi Anduane Homogohanda ibunaga bi mana latagi haga agali Yihu Basa hearia pu lalu, Anduane

\* 15:29: 1 Kin 14.10, 14.14

Homogohanda í mo ko halu bo waholebira. Í damene lene bu karubi bibahende bo wahai holebira, lalu lamule pu, lene.

### *Ela Isaraelenaga kini henego ogo*

<sup>8</sup> Asa ibu Yudanaga kini heane dege mali pira kirani duria howa waragane (26) hayagola Basa igini Ela ibubi nde Isaraelenaga kini pigane hene. Ani howa ibugua Tisa tanoni howa mali kira hanguni haru halu hene. <sup>9</sup> Ani haru heagola Ela ibunaga agali haguane mbira mini Simiri henegome Ela ibuni bo wahole hariga taya bialu hene. Simiri ibugua kininaga wai biagane garo ale nogo hosime gili laga mini karisi maru ibugua handayaho haga hene. Horo mbirungi Kini Ela ibu agali mbira kini andaga handaya ho haga mini Arasa heago andaga pene. Puwa ogoniha kini ibu lulu iba dewaore nowa lulu yu wini. <sup>10</sup> Ani lulu yu wiaria Simiri ibugua anda ogoniha anda puwa Ela balu homelene. Ani balu homelowa Simiri ibuni kini ha aribia hene. Asa ibu Yudanaga kini heane dege mali pira kirani waragaria howa kane (27) heangi Simiri ibugua Kini Ela ogoni homelo bo wahene.

<sup>11</sup> Simiri ibu kini halu abaleore ibugua Basa damene hearu bibahende bo wahai hene. Ani bialu Basa nenege hearubi ibu aria hearubi bibahende bo wahaiore hene. Basa damene lenego mbiraore hangubi mbira yu wanahe bo wahaiore hene. <sup>12</sup> Simirihanda Basa damene bibahende bo amo lene. Anidagua biyadagoni Anduane Homogonaga bi mana latagi haga agali Yihuha howa mbiwia halu latagi hayago henene lola hene. <sup>13</sup> Basa ibu dameneha mo ko holene tagira ibiyadagoni irane Basabi ibu igini Ela heagobi libugua Anduane Homogo Isaraele wali agalinaga Ngode Datagaliwabenaga deni howa mana ko bialu mbirale dama mitangi bialu gime wabini wiaruhondo bi pupu wialu hene. Ani bialu howa Isaraele wali agali bu hearumebi mana ko bilo mo bia halu haga hene. Libugua mana ko bialu hayadarunime Anduane Homogo mo tandaga hene. Ani mo tandaga hayagola Anduane Homogohanda Basa damene lenego bibahende bo wahai hene. <sup>14</sup> Te maru Kini Ela ibugua bialu henedaru bibahende mbuga mbira Isaraele Kini Henerunaga Bi Te laga ngagoha gilibu winigo nga.

### *Simiri Isaraelenaga kini henego ogo*

<sup>15</sup> Yudanaga Kini Asa ibu kini heane mali pira kirani waragaria henego ai kane (27) heagola Simiri ibu Isaraelenaga kini pigane hene. Ani howa ibu Tisa tanoni horo karu hangu kini howa haru halu hene. Ogoningi Isaraelenaga ami bu hearume Pilidia dindiha Gibedono tano wiago ho hagira buwa tano ogoni karulolenaga wai bialu hene. <sup>16</sup> Tigua ani bialu howa hale halu hearia Simirihanda mana ko lehe timbuniore bialu kini bo wahaya layago hale hene. Ani hale howa ai Isaraele ami agali biarume ami haru haga agali haguane mbira mini Omiri heago Isaraelenaga kini dabo helene.

<sup>17</sup> Ani helalu Omiri halu ibunaga ami agali bibahende Gibedono wahalu dai buwa Tisa tano mo yu dai bulenaga tano ogoni ho hagira buwa wai bialu hene. <sup>18</sup> Ogoningi Simiri ibu Tisa tanoha henego Omiri halu ibunaga ami agali biarume hongo howa wai bialu hene. Ani bialu heagola ibunaga agali hearuni bo podalu tano karulaya handala ibuni kini andagaha wai pabe hongohe mbira henegoha anda puwa kini andaga bu heagoni heda hene. Ani bialu ibunibi anda heba damaga hene. <sup>19</sup> Simiri ibuha genda timbuni ogoni tagira ibiyadagoni irane ibugua mana ko Kini Yaroboamahanda biaga wiaru taluwa bialu hearia ani bini. Ibunime Anduane Homogonaga deni howa mana ko bialu Isaraele wali agalibi nde mana ko uruni bilo mo bia halu hene. <sup>20</sup> Te maru Kini Simiri ibugua bialu henedaru bibahende mbuga mbira mini Isaraele Kini Henerunaga Bi Te laga ngagoha gilibu winigo nga. Ibugua Kini Ela bope henegobi lalu gilibu winigo nga.

### *Omiri Isaraelenaga kini henego ogo*



<sup>21</sup> Kini Simiri homayagola Isaraele wali agali talebuki hene. Talebuki howa mende-gome agali mbira Ginada henego igini Tibini heago tinaga kini helo hamelo hene. Tale buwa mende hearume tinaga kini Omiri helo hamelo hene. <sup>22</sup> Ani lalu howa mani Omirihayagi hene hearu tigua Tibini aria hearu bope halu wayali hene. Tibini homayagola Omiri ibu Isaraelenaga kini hene. <sup>23</sup> Asa ibu Yuda dindiha mali pira tebirani kini henego ai huniane mbira (31) hayagola Omiri ibu nde Isaraelenaga kini pigane hene. Ani howa Omiri ibu mali homberia (12) Isaraelenaga kini howa haru hene. Pigane Tisa tanoha mali waragariani howa haru hene. <sup>24</sup> Ani bialu Omiri ibugua mani dindi podene mbira hambene badagahe wiago yolo buwa ogoniha ege pabe hongohe bu mabu buwa tano ogoni mo wini. Dindi ogoni agali mbira mini Seme henegonaga wiaria Kini Omiri ibugua muni siliba dege daosini waragariame (6,000) dindi ogoni yolo bini. Ani yolo buwa Kini Omiri ibugua agali Seme ogoni mitangi bialu tano ogoni mini Samaria wini.

<sup>25</sup> Anduane Homogonaga deni Omiri ibugua mana ko dewaore bialu hene. Mana ko ibugua bialu henedaru kini ala henedarume bini ngago emene dege lowa ibu dewaore bialu hene. <sup>26</sup> Ibugua mana ko Kini Yaroboamahanda bialu henedaguaore bini. Anduane Homogo Isaraele wali agalinaga Ngode Datagaliwabenaga deni howa ibugua mana ko dege bialu haabo hene. Ani bialu howa ibugua Isaraele wali agaliru haru pu tara howa dama mitangi bialu gime wabini mbirale wiaruhondo bi pupu wule mana ko timbuni ogoni biawai hene. Anidagua bialu ibugua biyagome wali agaliru biyagomebi tigua Ngode Datagaliwabe mo tandaga halu ibugua tihondo keba ho hene. <sup>27</sup> Te maru Kini Omiri ibugua bialu henedaru bibahende mbuga mbira mini Isaraele Kini Henerunaga Bi Te laga ngagoha gilibu winigo nga. Mbuga ogoniha ibugua biabe hongohe bialu henegonaga ogodagua bini lalu garealo nga. <sup>28</sup> Mani Omiri homayagola tigua ibu tingini Samaria tanoha hora hene. Hora howa ibu igini Ahabahanda ibu abanaga dagia mialu kini ha aribia hene.

*Ahaba ibu Isaraele wali agalinaga kini henego ogo*

<sup>29</sup> Asa ibu Yuda wali agalinaga kini mali pira tebirani halira (38) heagola Omiri igini Ahaba ibu Isaraele dindiha kini hene. Ibugua kini howa Samariani mali pira kirani kira (22) Isaraele wali agali haru halu hene. <sup>30</sup> Ani haru howa Kini Ahaba ibugua Anduane Homogonaga deni howa mana koore wiaru dewaore biaabo halu hene. Kini abale halu homayarume mana ko bialu hayaru emene nira dege lowa ibugua ko ngubiore bialu hene. <sup>31</sup> Ko ibugua binidaruni Yaroboamahanda bialu henedagua dege biyagoyu ibunime manda bialu hearia uruni bame degebe tobaho hene. Ani bialu howa ai wali mbira mini Yasebele Saidononaga Kini Edabala henego wane bereago Ahaba ibu dabu bini. Ani dabu bu howa ibugua Saidono wali agalinaga dama mitangi bialu gime wabini mini Balahondo bi pupu wiagane wiagoha bi pupu wialu hene. <sup>32</sup> Ani wialu howa Ahaba ibugua Balanaga bi pupu wiagane anda mbira Samaria tanoha buwa anda ogoniha Balahondo loma biniru bo delaga dabu mbira bu helalu bini. <sup>33</sup> Ibugua gime wabini dama wali beda mitangi bialu bi pupu wiaga mini Aserabi wabu ngelene. Ahaba ibugua mana koorene ko o binidarunime Anduane Homogo Isaraele wali agalinaga Ngode Datagaliwabe mo keba timbuni hene. Urunidagua biyagome mana ko kini abale hayarume binidaru emene dege lowa ibugua biyadaru ko timbuniore bini. <sup>34</sup> Ahaba ibu kini heagola Bedele tanoali mbira mini Hile henego ibugua Yarigo tano mo tiga bialu lone biadai bialu hene. Hile ibugua tano ogoni wene bule lowa bialu heaore ibu igini wahene Abirama heago homene. Ani biai howa ai tano pabenaga panga haraba dunini wiaru wabialu heagola Hile ibu igini heyogone Segubu heago homene. Ogonidagua binidagoni bamba Anduane Homogohanda Nunu igini Yosuaaha howa bi mbira mbiwia henego lola hene.

✧ 16:25: 1 Kin 14.9, 16.30-33, Mai 6.16

## 17

### *Elayahanda Isaraele dindiha iba dalu naibulebira lalu mbiwia henego ogo*

<sup>1</sup> Gileada dindiha Tisibe tano wiagoha howa Anduane Homogonaga bi mana latagi haga agali mbira mini Elaya hene. Ani henego nde horo mbirungi ibugua Kini Ahaba berearia puwa ibuhondo lamialu mbiwia halu lalu, <sup>1</sup> Anduane Homogo Isaraele wali agalinaga Ngode Datagaliwabe kagonaga biabe biaga agali kogoni. Ngode Datagaliwabe ibu haluhe haabo haga kagonaga minini howa ina ihondo heneneore langerogo. Dindi ogoria iba dalu naibule ngane dege mali kira tebirabi polebira. Naibi ngane dege ina dalu ibu larogola ibulebira, lalu mbiwia hene.✧

<sup>2</sup> Mani Anduane Homogohanda Elayahondo bi ogodagua lamini. <sup>3</sup> <sup>1</sup> áyu ogoni howa ibida pialu Iba Yodana porogoria ni tagira ibiragohayagi puwa iba emene mbira mini Keridi bedagoha ha do habe. <sup>4</sup> <sup>1</sup> iba ogoni naga bialu birabe. Inaga tomo nolene ina ega bedaruhondo yalu pilimu lalu lamiru, lene.

<sup>5</sup> Ani laya handala Elaya ibu abale heyalu Anduane Homogohanda layadagua amu Iba Yodana peagoria ni tagira ibiragohayagi pialu iba Keridi bereagoria puwa ha do ho hene. <sup>6</sup> Ani pu heagola horo bibahendengi egerebagibi mbiragabi ega berearume mberedirubi nogo egarubi mo yalu ibaga biyagola ibugua uruni nalu iba o bereagoni naga bialu hene. <sup>7</sup> Ai nde Isaraele dindiha iba dalu naibi wiaabo hayagola emene howa iba o nalu hayadagoni hundiaiore hene.

### *Elaya ibugua wali dalo mbira ibu iginila biamogo binigo ogo*

<sup>8</sup> Iba Keridi hundiai hayagola Anduane Homogohanda Elayahondo lalu, <sup>9</sup> <sup>1</sup> heyalu pialu Saidono dindiha Sarebada tano ngagoha hole pu. Tano ogoniha wali dalo mbira ibu agalini homene bedago ogoni ibugua <sup>1</sup> tomo nolenebi ibabi ngilo ina dabo bereledo, lene.✧ <sup>10</sup> Ani lamiya handala Elaya ibu heyalu Sarebada tano pole pene. Pialu tano pabenaga panga harabaha ubanda tagi bulene wiagoria howa handalu hearia wali mbira ira delolene ilu ngoai halu hearia hendene. Elaya ibugua manda bialu wali ogoni ibu agalini homene wali dalo o kagonida lo manda bini. Ani hondowa ibugua wali biago olowa lalu, <sup>1</sup> iba noabago maru inaga iba beha <sup>1</sup> noliya hambu ngerebe, lene. <sup>11</sup> Ani layagola wali biagome hale halu iba hambu pole pialu hearia Elaya ibugua lalu, Mberedi emene mbirabi <sup>1</sup> noliya mo yabe, lene.

<sup>12</sup> Ani layagola wali biagome ladai bialu lalu, Anduane Homogo inaga Ngode Datagaliwabe haluhe kagonaga minini howa heneneore larogo. <sup>1</sup> mberedi mbira nawiore bedo. Balawa emene mbira ndisi beha wialu olibe lininaga weli emene mbira iba beha berelo wialu bido ai ogoni hirulenaga ira o ilu yalu porogoni. <sup>1</sup> iginini iya tomo nalu holene mbira nawiore. Emene ogoniore winigo áyu namaro bialu tomo nolene mende nawidagola nde iya homoleberaba, lene.

<sup>13</sup> Ani layagola Elayahanda wali biagohondo lalu, Ina tomo emene hangu wiruda manda bialu gi nahabe. Áyu puwa tomo hirule poro larigonidagua hirule pu. Anigo balawa ogoni ariabi olibe lininaga weli emene mbira tale bu hiruwa mberedi emene mbira <sup>1</sup> noliyanaga ala yalu ibule pu. Ani bialu mani <sup>1</sup> iginini libuni nolene hirabe. <sup>14</sup> Irane ogoninaga Anduane Homogo Isaraele wali agalinaga Ngode Datagaliwabe kago ibugua lalu, Balawa emene hangu ndisi beha ngegobi olibe lininaga weli emene hangu iba beha biraruagobi kirabali biba naholebira. Ogoni karulape nalu kabine dege Anduane Homogo ina iba dalu lone ibilolebero laya, lene.

<sup>15</sup> Ani laya handala wali dalo biagome Elayahanda lamiyadagua bule pene. Ani bialu mani Elayabi wali biagobi ibu iginibi ti tomo horo dewaru nalu holene karulapeore

wiaabo hene. <sup>16</sup> Anduane Homogo ibunime Elayaha howa latagi hayadagua heneneore balawabi olibe lininaga welibi biba nahe dewa degeme wiaho wini.

<sup>17</sup> Ani howa mani wali dalo ogoni igini biago warago timbuni bo wialu warago ba timbu halu igiri ogoni tongolo mini. <sup>18</sup> Ani biyagola wali biagome Elayahondo lalu, Anduane Homogonaga agali-o ina áyu ihondo mana ogonidagua aginaga berebe. Í ogoha ibiridagome inaga mana ko binidaru Anduane Homogohondo mo mitangi bia harigome i igini ogo homayada, lene.

<sup>19</sup> Ani layagola Elayahanda lalu, Igiri biago ihondo ngi, lene. Ani lowa ibugua igiri homene tingini ibu aya giha yiago yamuwa mo yalu anda hobane daliga Elaya ibuni paliaga heagoha irigi howa ibu dagiani mo ngelene. <sup>20</sup> Ani ngelowa ibugua Anduane Homogohondo bi hongo howa lamialu lalu, Inaga Anduane Homogo-o wali ogo ibugua iore baya hangu handayaho hagago ai nde irane aginaga ina ibu mo genda halu igiri ogo homelaribe, lene. <sup>21</sup> Ani lalu Elaya ibugua igiri homene biagonaga tingini wiagoria halu tebira palia dambi haga bialu howa lalu, Anduane Homogo inaga Ngode Datagaliwabe-o ai nde igiri ogo ibunaga holene miadai bibe, lalu hene. ✧ <sup>22</sup> Ani layagola bi layago hale halu igiri biagonaga holene lone miadai biyagola ibu heyini. ✧

<sup>23</sup> Ani heyyagola Elaya ibugua igiri ibu aya berearia haru daliape howa ibu aiyahondo mini. Ani mialu howa Elayahanda igiri biago aiyahondo lamialu howa lalu, Inaga igini ogoni ibu dabi halu bayale kago de handa, lene.

<sup>24</sup> Ani layagola igiri aya biagome lalu, Henemanere i Ngode Datagaliwabenaga biabe biaga agali mbira henedane hendedogoni. Heneneore Anduane Homogo ibugua iha howaore bi latagi hagadane hendedo, lene. ✧

## 18

### *Elayabi gime wabini mini Balanaga bi mana latagi haga henerubi tigua binigo ogo*

<sup>1</sup> Gaea timbuni ogoni biaho ngelowa dege mali tebone hayagola Anduane Homogo ibugua Elayahondo lamialu lalu, Ini Kini Ahabahanda hendelo ha pani hole pu. Ani poregola ina iba dalu ibiloleberogo, lene. <sup>2</sup> Ani laya handala Elaya ibu heyalu kini hearia pole pene. Ogoningi dege Samaria dindihabi hina gari timbuni piyagola <sup>3</sup> Kini Ahaba ibugua agali mini Obadaia olalu, I koría ibabe, lalu lawia hene. Obadaia ogoni ibugua kini andagaha mbirale wiaru handaya howa mamage haga hene. Ani howa ibu horo bibahendengi Anduane Homogo andaneha haabo howa ibu mitangi bialu lotu laga hene. <sup>4</sup> Ani howa horo mbiru kuini wali Yasebelehanda agali Anduane Homogonaga bi mana latagi haga heneru bo wahai hole heangi Obadaia ogoni ibugua Anduane Homogonaga agali uruni aria handari mbira (100) bibahende egeanda hearuha minu do hai hene. Ibugua pira duria (50) egeanda mbiraha minu do halu pira duria (50) egeanda mendeha minu do hai howa tomo ibaru nelo migi bialu baya hangu handayaho hene. <sup>5</sup> Obadaia ibu Kini Ahaba berearia ibiyagola Kini Ahaba ibugua Obadaiahondo lalu, Ayu iyame dindi bibahendeha ibaga biai halu iba berene uliru iba emene emene abale piaga winiru bibahende taya biame habiya. Nogo hosi dongiru ti tani nolene maru uruniha anda holoba badago. Uruniha datani kane handa walía haribayagua nde iyanaga nogo uruni bo wahai naholeberaba, lene. <sup>6</sup> Ani lowa libuni bi lo mbiraore halu dindi maruha Ahaba ibugua taya bima piyagola dindi lene maruha Obadaia ibugua taya bima pole lowa libu mo tale bialu libuni polene wiyagoha pugupugu bini.

<sup>7</sup> Ani pialu Obadaia ibu abale lola habiya lo wiribigoria pialu hearia ibu Elaya harigani ibalu hearia lola hene. Ani lola howa Obadaia ibugua Elayaoreyane hondowa ibu dindini bulu palu ibira halu Elayahondo hale halu lalu, Í inaga agali haguane Elayaore kebe, lene.

✧ 17:21: 2 Kin 4.34-35 ✧ 17:22: Hi 11.35 ✧ 17:24: Yo 3.2, 16.30

<sup>8</sup> Ani layagola Elaya ibugua ladai bialu lalu, E i Elaya kogo ina áyu ogoni dai bialu Kini Ahabahondo Elaya íbu ka lalu lamule pu, lene.

<sup>9</sup> Ani layagola Obadaiahanda ibuhondo lalu, Agali haguane-o ina ko mbira agi birugonaga Kini Ahabahanda i bo wahelonaga bi ogoni laribe. <sup>10</sup> Anduane Homogo ínaga Ngode Datagaliwabe haluhe kagonaga minini howa ina heneneore larogo. Kini Ahaba ibugua i hondoleore lowa dindi bibahendeha taya biame halu ka. Dindi mbiranaga agali haguane mbirame i dindi ogoniha nahe layagua kini ibugua agali haguane o biagohondo, Hongo howa heneneore i nahe la, lowa hongo halu bi laga. <sup>11</sup> Anigo áyu ina i kini karia dai buwa i ka lalu lama poliyabe. I napoleore ndobe. <sup>12</sup> Ina i helo wahalu pialu koria Anduane Homogonaga dininime i mo yalu dindi i manda nabiniha pu tara hayagua Kini Ahaba ibu i ogoria ka lalu lamerogoria hondole ibalu karia i nahedane hondowa keba halu i bo waholobadago áyu ina i ibu karia pu nalabe. Horo bibahendengi i Anduane Homogo andaneha haabo haga kogo ina i dara holene nga. I bambaore igiri emeneni howa bialu henego áyu kogoni howa ibu andaneha haabo halu ibu hangu mitangi bialu lotu lalu haruli. <sup>13</sup> Halu mbira kuini wali Yasebelehanda Anduane Homogonaga bi mana latagi haga agali bu hearu bo wahai hole heangi ina uruni aria handari mbira (100) egeandaha minu do haru. Pira duria (50) egeanda mbiraha minu do halu pira duria (50) egeanda mendeha minu do halu biru. Ani bialu inime ti tomo ibaru nelu migi bialu handayaho haru. Ina biabe bayale uruni bialu harudaruni i manda bide. <sup>14</sup> Anigo áyu ina kini karia pialu i daibu ka lama poliya hame larida. Áyu ina pu laregonidagua puwa lamerogola kini ibu ibuwa handalu karia i naheyagua i bo waholobada, lalu Obadaiahanda Elayahondo lamini.

<sup>15</sup> Ani layago lelowa Elaya ibugua ladai bialu lalu, I gi nahabe. I Anduane Homogo Hongo Haiheore howa haluhe kagonaga biabe biaga kogo ibunaga minini howa heneneore laro. Ahaba ibu ibalu horo áyu i ogoria koria hondolebira, lene.

<sup>16</sup> Ani layagola Obadaia ibugua dai buwa Kini Ahabahondo Elaya ka lalu lamiya handala kini ibu Elaya hearia pene. <sup>17</sup> Ahaba ibugua Elaya hearia pialu ibu lola howa lalu, Áyu Isaraele dindiha genda timbuni mo yu anda ibaga biagoni i o kegonida, lene.

<sup>18</sup> Ani layagola Elaya ibugua Ahabahondo ladai bialu lalu, I ndo inibi i abahandabi Anduane Homogonaga bi mana lowini wiaru yu wahalu puwa dama mitangi bialu gime wabini Bala wiagohondo bi pupu wima tagira pirimigome genda ogoni mo yu anda ibirimi. <sup>19</sup> Áyu Isaraele wali agali bu karu bibahende inime olalu haru halu amu Hari Kamelo kagoria i lola hole íbu ngoai halimu lalu lamibe. Ibalu howa Balanaga bi mana latagi haga agali handari mariani pira duria (450) biarubi dama wali beda mitangi bialu gime wabini mini Aseranaga bi mana latagi haga agali handari maria (400) kuini wali Yasebele ibugua biamogo bialu ti tomoru nelu mialu biraga biarubi bibahende haru halu ibai halimu, lene.

<sup>20</sup> Ani laya handala Ahaba ibugua Isaraele wali agali bibahendeore mo mogo bialu amu Hari Kamelo kagoria ibalimu layagola ti bibahendeore íbu ngoai ho hene. Balanaga bi mana latagi haga biarubi Aseranaga bi latagi haga biarubi ti haru íbu ngoai ho hene. <sup>21</sup> Ani íbu ngoai ho heagola Elaya ibugua wali agali hearia irigi halu puwa lalu, Wali agali tombene hondo kihe kamiruni mini mbiraore angi wuleberemibe. Anduane Homogo ibu Ngode Datagaliwabeore heagua nde ibunihondo hangu lotu lalu halimu. Bala ibu Ngode Datagaliwabeore heagua nde ibunihondo hangu lotu laramine, lene. Ani layagola wali agali bu hearume ibuhondo bi mbira ladai nabi hene. <sup>22</sup> Bi ladai nabiyagola Elayahanda lalu, Anduane Homogonaga bi mana latagi haga yu wahene mbiraore hangu i kogoni. Ai Balanaga agali handari mariani pira duria (450) bibahende o kamirunida. <sup>23</sup> Ai bulumaga kira haru ibidaba. Mende Balanaga bi latagi haga o karu

✧ 18:21: Yos 24.15, Md 6.24

tigua balu podobaga bialu lomabu delolene ira gabu ngelowa ogoriani delole paga howa ngelalimu. Ani buwa ira dene nadelalimu. Bulumaga mendegobi ina ogonidagua dege buliya. <sup>24</sup> Ani bu mandabu ngelowa Balanaga bi mana latagi haga agali karuni tigua tinaga Balahondo bi pupu wilo. Inabi nde Anduane Homogohondo bi lolebero. Ani laramagola mendealinaga loma manda mandabu ngago ira minana dalipe halu loma binigo ogoni darago hondowa o biago ibuni Ngode Datagaliwabe heneneore henego ka lamiya, lene.✧

Ani layago wali agali biaru tigua hale howa, Ogoni karulapeoredago ani bima, lai hene. <sup>25</sup> Ani layagola Elaya ibugua Balanaga bi mana latagi haga hearuhondo lalu, Tí dewalidago tigua ala bulumaga mbira balu podobaga buwa loma binigo delole ira gabu winidagoria pagaho ngeladaba. Ani ngelowa ira hedape nahe howa tinação Bala hayadagome loma bini ogoni ira minana hedape halu delelo ibuhondo dela lalu bi pupu wilimu, lene.

<sup>26</sup> Ani leagola agali Balanaga bi mana latagi haga biaru tigua wali agalime bulumaga mbira haru ibiyago balu podobaga buwa loma binigo bo delole manda manda bu wini. Ani mandabu ngelowa tigua tinaga dama mitangi bialu gime wabini Bala biagohondo ira hedape halu loma bini ogoni dela lowa bi hongo howa bi pupu egerebagi howa lalu heane dege horombe hanuni hene. Tigua hongo howa lalu, Bala-o ina inanaga bi laramago hale ha, laabo halu galalu tigua loma binigo delole dabu bia hene biago leneleneha pogola dagadaga bialu mali luyu ibaga biyagolabi hale halu mbirale mbira bia nabi wiyagobi dege wini.

<sup>27</sup> Ai horombe hayagola Elayahanda ti mege buwa tongoyungu bi lalu, Bi hongo howa galalu ladaba. Ibu heneneore ka larimigo ndobe. Bi hongo howaore ladaba. Ibu mbirale tara mbira mitangi bialu biruwa tinação bi nahale haruabe be mbiraha manga biyagola ibaga bialu tagira piyabe tobaheda. Ani ndoyagua ibu dindi kaundiaha tagira pialu piyabe be u palia hondo haruabe tobahedago bi hongo howa lalu barila hadaba, lene. <sup>28</sup> Elaya ibugua ani layagola Balanaga bi latagi haga agali biarume hongoore howa bi lalu galalu dabarume tinaga tingini minu podalu hene. Ani bialu wai biaga ayu tibu nene gadele emene tubagi yiarume tininaga tingini Balanaga bi pupu wialu mana biaga winidagua bialu darama ibilo podaga bialu hene. Ani bialu hemigola darama timbuni tinaga tinginini pigipugu lalu hene. <sup>29</sup> Uruni biyago bilowa harugo lowa hibu laga bialu lalu ha dege biane ai alendo halu bi emeneorebi nale mbira ladai nabi wiane dege alendonaga loma binigo delagane tu hene.

<sup>30</sup> Ani biyagola Elaya ibugua wali agali hearuhondo lalu, Ai i kogoria kaware ibidaba, layagola ti bibahende ibu heagoria ibu ngoai ho hene. Ani ibu heagola Elaya ibugua Anduane Homogonaga loma biniru bo delaga dabu abale tigua bu giallo wahene wiago lone mo tiga buwa biadai bini. <sup>31</sup> Ani buwa ibugua ege tole homberia (12) Yagaba igini homberiali (12) biaru manda bialu mo yini. Yagaba ibu bamba Anduane Homogohanda mini gahenge wia aribia halu ibu mini Isaraele wialu mani wali agali tigua inaga mini Isaraele lolebira lenego.✧ <sup>32</sup> Ai Elaya ibugua ege tole urunime Anduane Homogohondo mitangi bialu lotu lolenaga loma biniru bo delolene dabu bule mo yini. Ibugua dabu bia howa iba ganarua dabu ange wiadagua iba gorene timbuni iba mbagedi be karia agima tolabehe birulene bini. <sup>33</sup> Ani buwa Elaya ibugua ira gabuwa loma biniru bo delolene dabu biagoriani manda mandabu ngelowa bulumaga biago balu podobaga buwa ira manda mandabu wiyagoriani mo paga hai hene. Ani buwa ibugua wali agali biaruhondo lamialu mbagedi be mariani iba hambu yalu ibuwa bulumaga loma binigo bo delole manda mandabu ngagoriabi ira gabini bulumaga delo dindiha ngarubi bibahendeni odoha hai hadaba layagola tigua anidagua biai hene. <sup>34</sup> Ani biyagola ibugua tihondo lalu, Lone hambu odoha hadaba, layagola tigua ani bini. Ibugua lone



lalu, Halu mbira lone hambu odoba hadaba, layagola tigua lone dege hambialu odoba hene. <sup>35</sup> Anidagua biyagola loma binigo delole dabu manda mandabu wiyagoria howa iba pugu lalu piyagome ganarua lenelene bu wiyagoria iba timbuni biruyu mabu bini.

<sup>36</sup> Alendonaga loma biniru delolenengi hayagola Elaya ibugua loma biniru bo delaga dabu bu helayagoria kaware pu howa lalu, Anduane Homogo-o Abarahamanagabi Aisaganagabi Yagabanagabi Ngode Datagaliwabeore ini kegoni. I hanguore Isarae-naga Ngode Datagaliwabe kegonibi inaga biabe biahaga agali mbiraore iore henedalo hendelobi mbirale uru inime bia lalu kedagua bialu harudane hendelobi ti mo walia ha. ✧ <sup>37</sup> Anduane Homogo-o inaga bi larogo hale lalu ina bia lalu kogo bibe. Ani beregola wali agali o karu tigua Anduane Homogo ini hanguore Ngode Datagaliwabe henene henedane hendelo. Ani beregome wali agali urunaga bu mini mo beregedalu ini keria haru dai buleberego manda bilo ani bia, lene.

<sup>38</sup> Ani layagola Anduane Homogohanda ira dene ibira hayagola loma binigo wiyago dai lalu ira wiarubi ege toleme dabu biyarubi dalu dindi angeni wiarubi bibahende do tauladaga hene. Iba ganarua bini biagoha biruyu mabu biyaruni heba dalu do yobiai hene. <sup>39</sup> Wali agali bu hearume anidagua biyago hondowa tini dindini palipe hai howa bi ladaga lalu, Anduane Homogo ibuni Ngode Datagaliwabeore kagoni. Anduane Homogo ibuni Ngode Datagaliwabeore kagoni, lalu lene.

<sup>40</sup> Ani leagola Elayahanda lalu, Balanaga bi mana latagi haga agali o karuni mbirali pora bialu napelo bibahendeore minai hadaba, lene. Ani layagola tigua agali uruni bibahendeore minai hene. Ani biyagola Elaya ibugua agali uruni haru lalu Kisono ange wiagoria dalipe howa bibahendeore bo wahai hene.

### *Isaraele dindiha iba dalu lone ibinigo ogo*

<sup>41</sup> Ani buwa Elayahanda Ahabahondo lamialu lalu, Ai iba dalu timbuniore ue lalu ibaruane hale kogo ayu ogoni abale andaga pialu tomo nole gerai lalu pu, lene. <sup>42</sup> Ahaba ibu tomo nole abale andaga piya handala Elaya ibunaga biabe biahaga agali mbira heba Hari Kamelo nene wiagoria iraga howa dindini bulu paluwa ibunaga wanakui ge duli labo hengeneha paga howa berene. ✧ <sup>43</sup> Ani biruwa ibugua agali ibunaga biabe biahaga biagohondo lalu, Ina puwa iba solowara bedagoha handa amu hole pu, lene.

Ani laya handala agali biago ibu puwa handa amu lalu, Mbirale mbira biyaria nahende, lene. Ani layagola Elayahanda lalu, Lone hondole pu, laya handala agali biabe biahaga biagome lone hondole pene. Anidagua dege bialu ka lalu pu ibu bialu hene. <sup>44</sup> Ai nde kanegoria agali biago ibugua dai bialu howa lalu, Ina amu iba solowara bereagoria hari beraliba mbira emene dege agalinaga gi ale amura ibiyane handaru, lene. Ani layagola Elayahanda agali ibunaga biabe biahaga biagohondo lamialu lalu, Ayu ogoni abaleore Kini Ahaba karia puwa inaga garo ale karisi nogo hosime gililaga biagoria bialu iba dalu naibidaore andaga abale pu lalu lamule pu, lene.

<sup>45</sup> Emeneore howa ginu mindibirume iba dalu ibule abaleore aruma hai hene. Ani bialu puyabu hongohe pulalu iba dalu abaleore ibira hene. Ani biya handala Ahaba ibu abale karisi biagoria iragaho bialu andaga pole Yaserili tano polene hariga wiadagua pene. <sup>46</sup> Ani pialu heagola nde Elaya ibuha Anduane Homogonaga hongo mo karula hayagola ibunaga aga luni bu heago gambalibu tubagi lalu andaga pole Ahabanaga nogo hosi baba gerai lowa ibu mo bamba lalu puwa libu haru mandagi Yaserili tanoha anda pene.

## 19

### *Elaya ibu ibida pialu Hari Sainai heagoha ha do henego ogo*

<sup>1</sup> Kini Ahaba ibu andaga Yaserili dai buwa ibu one kuini wali Yasebelehondo Elayahanda biyaruni bibahende lamiai halu dama Balanaga bi mana latagi haga agali bo wahai hayarubi bibahendeore lamiai hene. <sup>2</sup> Ani layago hale howa Yasebele ibugua Elayahondo bi lawia halu lalu, Ina íbi nde agali uruni homayadadagua homabelo yawi bo waholiya. Ina í yawi nabaruyagua nde dama maru bu karunime ini bo wahelo laro, lene. <sup>3</sup> Ani layago hale howa Elaya ibu gi halu agali ibunaga biabe biahaga biago libu haru ibida pialu Yuda dindihayagi dindi emene mbira Beaseba wiagoha anda pene.

Anda pialu ibunaga biabe biahaga biago ogoniha helalu <sup>4</sup> ibuni dindi ko iba dalu naibaga wiagoha horo mbiru hangu pialu anda pene. Pu dege bialu ira mbira heneyago andane gumba heagoha anda íbu biruwa bi ogodagua lene. Anduane Homogo-o genda dewaore íha áyu ibirarunigo ai karulape í homolene hangu hamelo bedogoni. Áyu í agali bayale ndo agali ko bamba í mamali henerubi dege ko kogodago, lene.\*

<sup>5</sup> Ibugua bi lai halu de umu layagola ira tene gumba heagoha emene palene. Ani palearia dahuliyali mbirame abale ibuwa ibu ela halu barila howa lalu, Heyalu tomo na, lene. <sup>6</sup> Elaya ibu heyuwa handa ainai bialu hearia mberedi mbira ege tole poboheme hirini ibu haguanda wiyagohayagi wialu iba be mbiraha iba hambu wialu biaria hendene. Ibugua mberedi ibabi nalu lone paliadai bini. <sup>7</sup> Palearia Anduane Homogonaga dahuliyali biago lone ibalu ibu barila howa lalu, í hariga polene lu dege wuligo ai pole heyalu tomo na naberego, lene. <sup>8</sup> Ani layagola Elaya ibu lone heyuwa tomo ibabi nene. Tomo ogoni nowa hongo heagola ibugua horo pira mariani (40) mbiraga horombebi heba pialu Ngode Datagaliwabenaga hari loma bia hene Sainai mini mende Horebe laga hegoria anda pene. <sup>9</sup> Ani pialu mbi layagola Elaya ibu egeanda mbira heneyagoha anda puwa palene.

Ibu ani palearia Anduane Homogohanda hale halu lalu, Elaya-o í ogoha agi bialu kebe, lene.

<sup>10</sup> Ani layagola Elayahanda ladai bialu lalu, Anduane Homogo Hongo Haiheore Ngode Datagaliwabe-o í ininagaore biabe biahaga henego kogoni. Ina Isaraele wali agali bibahendeme inaga bi mana hale halu bilo mo walia haga henego ai tigua í erembira ngialu habo nalolene bi bamba lo wirigo puguaya. Tigua inaga loma biniru bo delaga dabu wiaru gialabagabu wahalu inaga biabe biahaga agali hearuni bibahende bo wahai haya. I hangu yu wahene hewagola ai íbi nde bo wahole ka, lene.\*

<sup>11</sup> Ani layagola Anduane Homogohanda lalu, í tagira pialu li hari nene inaga wanakui ngogoria pu ha. Ogoriani keria ina ibalu ini pu bolangua holeberogo, lene. Ani pu heagola puyabu hongoheore timbuni mbira ibalu harini ege tole wiaruni kambulu бага bini. Anigo Anduane Homogo ibuni puyabu ogoniha nahe wini. Mani howa puyabu piyai heagola dindi dumbirumbi timbuni bini. Ani biyagola Anduane Homogo ibu dindi dumbirumbi ogonihabi nahe wini. <sup>12</sup> Mani howa ira hungu ibinigo ai Anduane Homogo ibu ira hungu ogonihabi nahe dege wini. Mani uruni biai heagola bi emeneore hale habe nahe hagarere bi layuane hale hene.

<sup>13</sup> Bi ogoni layuago hale halu Elaya ibu ibuninaga aga luni biagome dengui bu yihalu egeanda biagoha hayago yu wahalu emene harabani ale tagira pene. Ani tagira piyagola bi mbira layuagome lalu, Elaya-o í ogoria agi bialu kebe, lene.

<sup>14</sup> Ani layuago hale howa Elaya ibugua ladai bialu lalu, Anduane Homogo Ngode Datagaliwabe Hongo Haiheore-o í hangu inaga biabe biahaga howa Isaraele wali agali bibahende inaga bi mana hale halu bilo mo walia haga henego ai tigua í erembira ngialu habo nalolene bi bamba lo wirigo puguaya. Tigua inaga loma biniru bo delaga dabu wiaru gialo bagabu wahai halu inaga bi mana latagi haga agali hearuni bibahende bo wahai haya. I hangu yu wahene hewagola ai íbi nde bo wahole ka, lene.\*

<sup>15</sup> Ani layagola Anduane Homogohanda lalu, Áyu ogoniore íni ibiridagua dai bialu tano Damasagasanaga dindi lene mbira wali agali napale ngagoha pobe. Ani pu howa mani tano ngagoha anda pialu agali mbira mini Hasaele holebirago ogoni karia puwa ibu Siria dindiha kini helo ibunaga hagianeni weli odo wia habe.\* <sup>16</sup> Ani bialu agali mende Nimisi hameigini aria Yihu holebirago ogoni ibu Isaraele wali agalinaga kini helo ibunaga hagianeni weli odo wia habe. Ani buwa Sabada igini Elaisa ibu Abele Mehola tano howa ibini kago ogoni ibu íni henegoria ho aribia howa inaga bi mana latagi haga helo dabo helabe.\* <sup>17</sup> Ai Hasaele ibu kini harangi ibugua wali agali dewaore bo waholebira. Maru ibida pora bialu piyagua Yihu ibugua bo waholebira. Maru Yihuhanda bara handala ibida pora bialu poraru Elaisa ibugua bo waholebira. <sup>18</sup> Anigo Isaraele dindini wali agali daosini karia (7,000) hangu dama mitangi bialu gime wabini Balanaga mini yaraga halu ge duli hanga nahagabi tinaga ne hambume Bala nunu nalaga karubi ti hangu helo yupe holebero, lene.\*

### *Elaisa dabo helenego ogo*

<sup>19</sup> Elaya ibugua Anduane Homogohanda bi layago hale halu ibu Hari Sainai wahalu Isaraele dindiha dai bini. Ani dai buwa handalu hearia Sabada igini Elaisa ibu agali beriali (11) haru howa mabuha biabe bialu bulumagame mbirale tara dindi aliaga aleme dindi alilo bulumagame mbirale uruni gililo yu ibaga bilonaga mo tiga bigi bialu hemiria hendene. Agali beriali (11) uruni ti tinaga bulumagame biabe bilo mo tiga bima bamba halu piyai hayagola Elaisa ibu dege ibunaga bulumaga kira heba biabe bilo mo tiga bima mani ibini. Ani ibiyagola Elayahanda ibunaga aga luni biagimbu biaga mbira biago golowa Elaisa mo karula hene. <sup>20</sup> Anidagua bialu Elaya ibu piyagola Elaisa ibu biabe bialu hayago wahalu gerai lalu Elaya piyago haruru puwa ibuhondo lalu, Mbaliya dege í aba aiyaru karia ala dai buwa í porogo tí hondo halimu lole poliya ani bia larene, lene.\*

Ogonidagua hale hayagola Elayahanda ibuhondo lalu, E karulape ina í napobe naloleberogo pu, lene.

<sup>21</sup> Elaisa ibu abale andaga dai buwa ibunaga bulumaga kira bene. Ani buwa mbirale dindi aliaga irame wabini bulumagani dariba hamaga kagola dindi aliaga ogoni biago gabuwa bulumaga bayagonaga mbirini wiaru ogonime hiruwa wali agali biru hearu nelu migi biyagola ti nene. Anidagua biai halu ibuni Elaya piyadagua talima pialu Elayanaga biabe biahaga hene.

## 20

### *Sirialime Isaraeleali baba wai binigo ogo*

<sup>1</sup> Sirianaga Kini Benehadada ibugua Isaraelealiru baba wai bu pole howa ibunaga ami agali bu hearu mo manda manda bu helene. Ani heagola kini dege pira tebirani kira (32) heba tinaga wai biaga garo ale karisirubi nogo hosirubi Benehadada biamogo bulenaga haru halu íbu mogo bu hene. Ani bialu puwa tigua Samaria tano ho hagira buwa wai bialu hene. <sup>2</sup> Benehadada ibugua agali maru Kini Ahaba ibu Samaria tanoha hearia bi lamule yalu pudaba lowa lalu, Kini Benehadadahanda íhondo bi ogodagua lara. <sup>3</sup> Ínaga muni siliba ngolobi ínaga wali bedarubi ínaga waneigini hongohe karubi bibahende í ngiai habe, laya lalu lole pudaba, lene.

<sup>4</sup> Anidagua layiyago hale howa Kini Ahaba ibugua Benehadadahondo ladai bialu lalu, Inaga agali haguane Kini Benehadada-o ina íhondo o bibe laridagoni biai holebero inibi inaga mbirale ngoru bibahende bi uruni ínaga dege wiai kagoni, lene.

<sup>5</sup> Mani agali bi yalu piagarume bi lama dai biyagola Kini Benehadadahanda agali urunihondo lone lama dai bidaba lowa bi lawia halu lalu, Abale hale harugo ínaga muni

siliba ngolorubi inaga wali biru ngarubi ini waneigini hongohé karubi ngibe laru. <sup>6</sup> Ani larugo ai áyu inaga agali haguane karu tinime í andagahabi inaga agali haguane ti andagahabi tinime anda ibalu mbirale inime hamelaga wiridaru tinime mo yai helo. Yawi ni áyu ogonidagua haragola anda ibulebira, lene.

<sup>7</sup> Bi ogoni layiyago hale howa Kini Ahabahanda ibunaga agali bu hearu ibidaba lowa tihondo hale halu, Ala agali ogo ibugua inaga wali biru ngarubi inaga waneigini hongohé karubi inaga muni siliba ngolobi bibahende ngiai habe laya. Ani layagola ina bi uruni karulape aleda lo manda bialu e larugo ai áyu bi lone lo beregedayada. Ani biyadagome ibugua ina mo ko halu bolene manda biyada, lene. <sup>8</sup> Ani layagola agali haguane hearumebi wali agali maru hearumebi Ahabahondo lamialu lalu, Ibunaga bi o layadagoni hale halu talia nabi waha. Ina mana ogonidagua bulene nawigo wahalu waha, lene.

<sup>9</sup> Ani layago hale howa Ahaba ibugua Benehadadanaga agali ibiyaruhondo lamialu lalu, Tigua Kini Benehadada karia pialu ogodagua lalimu. Ina bi pigane lariyago karulape degeda lo manda birugo ai áyu bi mende laridagoni ina e nalolebero ndoore laro, lene. Ani laya handala agali biaru tigua puwa Ahabahanda layadagua Benehadada lamini. <sup>10</sup> Bi ogoni layago lelowa Benehadada ibugua agali biaru Ahaba hearia bi lone lo yalu dai bidaba lowa lalu, Áyu ina ami agali dewaore haru halu ibuwa inaga tano ogoni bo gialabaga bialu bole eberogoni. Tigua inaga tano ogoni bo gialabaga bialu haealabagabu waholebira. Ina anidagua nabiruyagua inaga bi pupu wiaga dama karu tinime i bo wahelo laro, lene.

<sup>11</sup> Ani layagola Ahaba ibugua agali bi yalu ibiyaruhondo lalu, Tigua Benehadadahondo ogodagua lalimu. Agali mbira ibu ami agali henene howa ibunaga wai biaga ayu tibu andaneha yuwa yári maru maru karulalu howabi balagala howabi wai bi ladaga halu haga ndo. Ibugua wai biai howa bo poda hana howa turu halu wai bi laga, lene.

<sup>12</sup> Kini Benehadada halu kini marubi ti Sugodo tano wiagoria lulu iba nalu berene. Ani biru hemiria agali Ahabanaga bi layaru lamule yalu anda pene. Ani layago hale halu puwa ibunaga ami agali hearuhondo Samaria tanoha wai bule pudaba lene. Ani laya handala tigua Sugodo tano wahalu wai bule pene. <sup>13</sup> Puwa horo ogoningi Anduane Homogonaga bi mana latagi haga agali mbira Ahaba hearia pialu ibuhondo lamialu lalu, Anduane Homogohanda ogodagua laya. Benehadadanaga ami agali dewaliore ibiragoni de handa. Áyu ina uruni bo poda hana helolebero. Ani berogola ina i Anduane Homogo iniore ogoni henedane hondolebere laya, lene. <sup>14</sup> Ani layagola Ahaba ibugua Anduane Homogonaga bi mana latagi haga agali biagohondo hale halu lalu, Aiwa wai bu pialu bo poda hana holobadabe, lene. Ani hale hayagola agali biago ibugua kinihondo lalu, Anduane Homogohanda bi ogodagua laya. Ndisigiri mbira mbirani haru haga hearume igiri daliahe haru howa tigua bo poda hana holebira laya, lene. Ani layagola kini ibugua lone hale halu lalu, Tí wai bule pudaba lalu aiwa wai hono miragola bule polobadabe, lene. Ani hale hayagola Anduane Homogonaga bi mana latagi haga biagome lalu, Ina wai hono mulebere, lene.

<sup>15</sup> Ani layagola kini ibugua igiri daliahe biaru olalu íbu ngoai hadaba lene. Igiri daliahe uruni ti handari kirani pira tebirani kira (232) hene. Ani heagola mani Isaraele ami agali bibahende íbu ngoai hadaba lene. Ami agali uruni bibahende daosini karia (7,000) hene. <sup>16</sup> Horombe hanuni hayagola Kini Benehadada halu agali kini maru pira tebirani kira (32) biaru ti nde Sugodo tanoni lulu iba nalu henego ai ti iba biagome mo luluya heaore dege Isaraeleali tigua wai bule anda ibini. <sup>17</sup> Benehadadahanda ibunaga ami agali marume Isaraelealiru mamage hole pudaba layagola tigua puwa handalu hemiria Isaraelenaga agaliru ti heagoha ibule ibiyaria hendene. Ani handalu dai buwa tigua Kini Benehadadahondo lamialu lalu, Agali maru Samaria howa tagira ibalu

ibira, lene. <sup>18</sup> Ani layago hale howa Benehadadahanda ibunaga ami agali biaruhondo lamialu lalu, Tígua pialu minu yania hole pudaba. Tigua ina baba wai bule ibiniyaguabi wai nabule lama ibiniyaguabi tanabi minu yania halimu. Anigo tígua mbirali homelo nabalimu, lene.

<sup>19</sup> Isaraelenaga ami igiri daliahe biaru tigua bamba halu piyagola ami agali marume mama talima pialu tigua Siriali biaru baba wai bule pene. <sup>20</sup> Puwa Isaraele ami agali biaru tigua wai hongoheore bialu howa agali ti baba ba edene bialu wai biyaru bibahende balu home laiore hene. Ani biyagola Siriali biaru ibida piai hayagola Isaraele ami tigua haruru talima pene. Anigo Kini Benehadada ibu nogo hosini bialu agali maru nogo hosini biruwa wai biaga hearu baba mandagi ibida piai hene. <sup>21</sup> Ani piyagola Kini Ahaba halu ibunaga ami agaliru tigua Siriali karisini howa wai biagabi nogo hosini biruwa wai biaga biarubi ti baba wai bule pene. Puwa tigua Siriali dewaore bo wahai halu ti wayali hene.

<sup>22</sup> Ani bu heagola mani agali Anduane Homogonaga bi mana latagi haga biagome Kini Ahaba hearia puwa ibuhondo lone lamialu lalu, Áyu ogoni dai buwa ínaga ami agaliru mo hongo hole pu. Ani bialu howa Siriali uruni baba wai ogodaguaore bule lowa wai hanalu hole pu. Anidagua larogoni irane Sirianaga kini kagome mali edegonaga íla wai bule lone dai bulebirago o larugonidagua bule pu, lene.

### *Siriali biarume Isaraele baba wai lone binigo ogo*

<sup>23</sup> Wai halu mbira ogoni bu howa Kini Benehadada ibunaga agali haguane biarume ibunihondo lamialu lalu, Isaraele wali agali tinaga mbirale bi pupu wiaga dama hearu ti dindi hari bare bare wiagoha haga wiagome ina hari bare bare wiagoha wai bialu hemaria urunime ti biamogo biyagola ina balu bo poda hana haya. Ai iname yu dindi ngagoria ti baba wai birimayagua ina ti bo podalu wayali holeberema ndobe. <sup>24</sup> Ani bialu ínaga kini agali biaru tigua ami haru helo hela nabibe. Wahalu ínaga ami agali haru haga haguane karuni tinime ami agali haru bamba helo helabe. <sup>25</sup> Helowa ami agali ala haraligobi ho karulelo agali maru minu tago holene nga. Ani bialu nogo hosibi nogo hosime gili laga garo ale karisibi bo gialo wahai hayaruni mo aribia halu abale wiagadagua ngelo yolo bulene nga. Ani biai halu iname dindi tigabi yu dindi ngagoria pialu Isaraealiru baba wai birimayagua iname ti bo podalu ina wayali holeberama, lene. Agali haguane biarume ani bulene nga lalu lamiyadagua Kini Benehadadahanda biai hene.

<sup>26</sup> Ani bialu mali mende hayagola Kini Benehadadahanda ibunaga ami agaliru haru halu Isaraealiru baba wai bule Abege tano wiagoria anda pene. <sup>27</sup> Anda ibiyago handalu Isaraelenaga Kini Ahabahanda ibunaga ami agali hearu olo ngoai howa wai biagane ale damenego mo manda manda bu hene. Ani biai halu ti amu Siriali biaru baba wai bule ti heagoha kaware pu hene. Pu howa tibi nde balai anda halu ki bini. Isaraele ami agaliru emene hanguore nogo meme wabuni haradagua bini. Anigo Siria ami ti dewaore dagalabe nahe dindi wiagoria bibahendeha ho paya paya biame hene.

<sup>28</sup> Ani heagola Anduane Homogonaga bi mana latagi haga agali mbira ibugua Kini Ahaba hearia puwa ibuhondo lamialu lalu, Anduane Homogohanda bi ogodagua laya. Siriali bu karume í hari nene ngarunaga hangu Ngode Datagaliwabe ka í dindi tigabinaga Ngode Datagaliwabe ndo ka lalu kago. Ai tí Isaraele wali agali bu kamirume ini Anduane Homogoore henedalo manda bilimulonaga Siriali ami timbuni dewa bu karuni bo podalu wayali halimulo ina tí biamogo bulebero laya, lene.

<sup>29</sup> Siriali Isaraealibi tininaga balai anda bu hayadagoria horo waragaru ho haga-haga bu henego ai horo kane hayagola tigua wai pigane pora bialu wai bini. Wai bialu howa horo ogonongi dege Isaraealeali biarume Siriali ami biaru daosini dege handari mbira (100,000) bo wahai hene. <sup>30</sup> Bo wahai hayagola Sirianaga ami agali maru pora



bialu ibida Abege tanoha anda piai hene. Anda pialu hearia tano pabe timbuni heago podo ibira howa daosini dege pira kirani karia (27,000) lone batago halu bai hene.

Benehadada ibunibi nde ibida pialu tano biagoaha anda mbira heagonaga hobane mbiraha bira do hene. <sup>31</sup> Ani bereagola ibunaga agali haguane hearume hondo puwa ibuhondo lamialu lalu, Iname bi mbira hale harimago ai Isaraelenaga kini karu tigua agali dara holene irane nawini tigua dara haga ka layane hale harima, lene. Ani layago ai iname wai mbira hono ngama. Iname dara kama lalu mana walia hole aga biaga ale karulalu pume inanaga mani hendeho labelabe bialu Isaraelenaga kini karia polene manda bu kama. Anidagua polene hamelo kamago ina pudaba loleberebe be napole loleberebe. Iname ogonidagua birimayagua Kini Ahaba ibugua í dara halu bo wanaholebira, lene. <sup>32</sup> Benahadada ibugua karulapego anidagua bidaba layagola tigua dara ho howa aga karulaga ale karulalu pume tininaga mani hendeho labelabe bini. Ani bialu tigua Kini Ahaba hearia puwa lalu, Ínaga biabe biahaga agali Benehadada ibu dara halu bo wanahabelo hamelo beda, lene. Ani layagola Ahabahanda tihondo hale halu lalu, Ibu homa nabi kabe. Kayagua nde bayale ibu í hameneore ale kagoni, lene.

<sup>33</sup> Benehadadanaga agali haguane ohe biaru tigua Ahaba ibunaga bi layago baya hanguore hale ho hearia ibu í hameneore layagola tigua manda bialu mbirale birimago bayale mbira hariga wini birimadago ai karulape holobada lo manda bu hene. Ani manda buwa tigua Ahabanaga bi layago abale yamuwa tigua ibuhondo lalu, Heneneore Benehadada ibu í hameneore ka, lene.

Ani layagola Ahabahanda tihondo lalu, Ibu ini koria haru halu ibule pudaba, lene. Ani laya handala tigua Benehadada lamule piyagola Benehadada ibu Ahaba hearia pene. Piyagola Ahabahanda Benehadada ibunaga garo ale karisi biagoria iraga ha, lene. <sup>34</sup> Ani layagola Benehadada ibugua Ahabahondo lamialu lalu, Bamba iya aba libu wai bialu howa ínaga tano maru karulo hene ngamaru ínihondo ngiadai biai holiya. Ani bialu bamba í aba ibugua Samariani bialu henedagua ína Damasagasa tanoha tanabi howa biyinayaru bialu habelo, lene.

Ani layagola Ahaba ibugua ibuhondo lamialu lalu, Ína henene o laregoni buleyagua nde ína í pobelo yupe holebero, lene. Ani lalu Ahaba Benehadadala libugua habo nalolene bi lo wialu Benehadada pelo wahene.

*Anduane Homogonaga bi mana latagi haga mbirame Ahaba mo ko holebira lenego ogo*

<sup>35</sup> Benehadada ibu peagola Anduane Homogohanda ibunaga bi mana latagi haga agali heagohondo bi galone mbira mo walia hayagola ibugua agali ibunaga biabe mandagi biaga mbira heagohondo lamialu lalu, Ína í babelo hameledogo ba, lene. Ani layagola Anduane Homogonaga bi mana latagi haga agali mende biagome, Nabole, lalu ibu nabe wahene. <sup>36</sup> Wahayagola ba laga biago ibugua agali mende nabole laga biagohondo lamialu lalu, Bi ína langerogoni Anduane Homogo ibuninaga bi langero. Ani langirugo ína ínaga bi larugo mo waharigo ai ína í wahalu pole pialu keria harigani budi ale gabua timbuni laionome í bolebira, lene. Ani laya handala Anduane Homogonaga bi mana latagi haga agali biago ibu andaga pole harigani pialu hearia laionome bo wahene.\*

<sup>37</sup> Mani Anduane Homogonaga bi mana latagi haga agali biagome agali mende hearia puwa lalu, Í babelo hameledogo ba, lene. Ani layagola agali ogonime hongo howa Anduane Homogonaga bi mana latagi haga agali biago mo ko howaore bene. <sup>38</sup> Ani bayagola ibugua agali marume ibu Anduane Homogonaga bi mana latagi haga agalida lo manda nabilo ibunaga dengui aga budinime bu dambiho yalu pene. Puwa ibu hariga tene wiagoria Kini Ahaba ibilo hondo hene. <sup>39</sup> Kini ibiyagola Anduane Homogonaga bi mana latagi haga agali biago ibugua bi hongo howa ladaga halu lalu, Kini-o bi larogo

\* 20:36: 1 Kin 13.24

hale ha. I wai pu hewagola inanaga ami agali mbirame inanaga waitigi agali mbira haru halu ibuwa ihondo langialu lalu, Ina agali ogo baya hanguore handayaho habe, laya. Agali ogoni ibida pelo hariyagua ina i homabelo bo waholebero. I homabelo bo wanaharuyagua nde muni siliba daosini tebira (3,000) ngulebere, laya. Ami agali ogoni ibugua ihondo bi ogonidagua langialu ibuni piya. <sup>40</sup> Ai kini-o ina agali ogoni baya hangu handayaho nahe biabe maru bialu kaundiani dege hewaria ibu pora bialu ibida piyiya, lene. Ani layagola kini biagome lalu, Inimeore mana ko bu howa latagi harigoni. Anidagua latagi harigome ai iniha ogo ale ibulubada lo manda bu kegoni, lene.

<sup>41</sup> Anidagua layagola Anduane Homogonaga bi mana latagi haga agali biago ibunaga dengui agame bu yi heago mo wahayagola kini biagome Anduane Homogonaga bi mana latagi haga agali biago ibu heneyane handa waliala hene. <sup>42</sup> Anduane Homogonaga bi mana latagi haga agali biagome kinihondo lalu, Anduane Homogohanda ogodagua laya. I Anduane Homogo ina lalu, Tigua wai bialu howa tinaga waitigi bibahende bo wahai halimu lalu langirugo. Ai anidagua nabi ina Kini Benehadada minu yuwa yupe halu ibunaga ami agali bu hearubi ibida piai helariya. Anidagua biriyagonaga pani Benehadada ibu homolene winidagua ini homalu ibunaga ami agali ibida piyaru homolenedaguabi inaga ami agali bu karu tigua homa aribia holebira, lene.

<sup>43</sup> Kini ibugua bi o layadaruni hale howa ibunaga bu miniha genda howa keba hama ibuni dalu Samaria dai bini.

## 21

### *Kini Ahabahanda Nabodonaga gerebi mabu dimagoli henego ogo*

<sup>1</sup> Yaserili tanoha Kini Ahaba andaga timbuni heago kawareni Yaseriliali mbira mini Nabodo henegonaga gerebi mabu mbira wini. Wai timbuni Sorialiru baba biyago biai howa <sup>2</sup> Kini Ahaba ibugua Nabodohondo lalu, I mabu ogoni i anda mandahadago ainde i nemaru hongole gama wuliya ngi. Ina gerebi mabu ogobi ndo bayaleore mbira i nguliya. Ai mabu ndo muni nguliya hame lariyaguabi nde muni karulapeore yolo buliya, lene.

<sup>3</sup> Ani layagola Nabodo ibugua ladai bialu lalu, Mabu ogoni bamba i aba mama mamaliru tinagaore wialu tini hondo hama ibini ngogo. Ayu ina Anduane Homogonaga minini howa heneneore larogo mabu ogoni i nangulebero, lene.

<sup>4</sup> Ahaba ibugua Nabodohanda bi ogonidagua ladai biyago hale howa ibunaga bu miniha tandaga timbuniore howa keba hama pene. Ibuni andaga Samaria dai buwa ibuni dagiani pialu palene. Ani paluwa ibu tomobi nane tagiraha de handatagi ho palene. <sup>5</sup> Ani palearia ibu one Yasebele ibu kini paleagoha puwa lalu, I bu miniha genda yuwa tomo nane wa kego irane agibe, lene.

<sup>6</sup> Ani hale hayagola ibugua Yasebelehondo lalu, Yaseriliali Nabodo ibunaga gerebi mabu wiago ina mabu mende aribia holiya ngi larugolabi ibu muni karulapeore nguliya ngi larugolabi ibugua nanguleore laya, lene.

<sup>7</sup> Ani layagola Yasebele ibugua ibuhondo lalu, Isaraele dindiha kini mendeali mbira kabe be i kegoni. Ayu genda nahe waha. Heyalu tomo na. Nabodonaga gerebi mabu ogoni ina i mo ngulebero, lene.

<sup>8</sup> Ani lalu Yasebele ibugua beba mbira Ahabanaga minini gili buwa kininaga magi helalu buwa agali haguenerubi agali haguane dabo helenerubi Yaserili tano Nabodo haga wiagoha hearuhondo pelene. <sup>9</sup> Beba uruniha bi uru gilibu wia hene. Tigua tomo nane holene horo mbira pongo bo ngelowa horo ogoningi Yaserili wali agali bibahende ibu ngoai halimu lalu lamilimu. Ani ibu ngoaiho kagola Nabodo ibu dagia dunini bambaho ngagoria berelalimu. <sup>10</sup> Ani berelowa agali ko ke haga dogahе kirali ibu heba mandagi berelalimu. Agali ko kirali ogoni libugua ke howa Nabodohondo

lalu, Nabodo ina Ngode Datagaliwabehondobi kinihondobi bi ko larigoni, lelo dabo berelalimu. Ani ledagola tigua Nabodo tano tagirahayagi haru tagira puwa ege toleme balu homelelalimu, lalu gilibu wia hene.

<sup>11</sup> Ani layagola hale howa Yaserili tanoha agali haguanebi dabo helene hearubi tigua Yasebele ibugua bilimu lalu layadagua bialu <sup>12</sup> horo mbirungi tomo nane hamiya lalu horo pongo bo wini. Horo pongo bo wiyadangi wali agali bibahende ibu ngoai halimu lene. Horo ogoningi wali agali ibu ngoai ho heagola tigua dagia dunini bamba howa Nabodo berelene. <sup>13</sup> Ani berelowa agali ke haga dogae kiral Nabodo bereagoria kaware ibu berelene. Ani biruwa libugua wali agali ibu ngoaiho hearunaga deni ke howa Nabodohanda bi ko laya lowa libugua lalu, Nabodohanda Ngode Datagaliwabehondobi kinihondobi bi ko laya, lene. Ani layago hale howa wali agali bu hearu bibahendeme Nabodo tanoha howa haru tagira puwa ege tole dugualu bo homelayagola Nabodo homene. <sup>14</sup> Homeagola tigua Yasebele berearia bi ogodagua lama pudaba lowa lalu, Iname Nabodo ege toleme barimagola homaya, lalu lawia hene.

<sup>15</sup> Nabodo homaya lalu lawia hayiyago Yasebele ibu hale halu abale Ahaba bereria puwa lalu, Nabodo ibu ayu nahe homayago ai gerebi mabu yolo berogo ngi larigola nangule layiyago mabu ogoni bame ngago abale karulole pu, lene. <sup>16</sup> Ani lamiyago hale halu Ahaba ibu abale heyalu gerebi mabu ogoni karulole pene.

<sup>17</sup> Horo ogoningi Anduane Homogohanda ibunaga bi mana latagi haga Elaya ibuni dalu Tisibe tanoha hearia lamialu lalu, <sup>18</sup> Isaraele wali agalinaga Kini Ahaba karia abale pu. Ibu ayu ogoni Samaria tano howa pialu Nabodonaga gerebi mabu wiagoha karulole manda bialu pu karia handa walia holebere. <sup>19</sup> Ani handa walia howa ibuhondo bi ogodagua labe. Anduane Homogo inioreme larogo lalu, Ina Nabodo homelo bo waharigo ai ayu ibunaga gerebi mabu paluni ngagobi i karulole dege kebe. Ani biridago nde ina heneneore mbiwia halu langerogo dindi ogoriani biangome Nabodonaga darama pende biyagoria dege inaga daramabi pende bulebira labe, lene.

<sup>20</sup> Anduane Homogohanda anidagua lamiya handala Elaya ibu hale halu ibu Ahaba hearia abale pole pene. Ahabahanda Elaya ibiyago hondowa ibugua lalu, Inaga waitigi biago i hewaria lone dai biribe, lene.

Ani layagola Elaya ibugua ladai bialu lalu, E ina i hondo ibirudagoni irane inaga bu mini hame ngerunime Anduane Homogonaga deni mana ko ngaru hangu bule hongo halu haabo kegonaga i hondole ibiru. <sup>21</sup> Ai Anduane Homogo ibugua ihondo bi ogodagua laya, I Anduane Homogo kogome i pani ngulebero. I damene agali mini lenerubi agali miniwi karubi agali daliahe karubi igiri emene karubi i damene bibahendeore bo wahai holebero. <sup>22</sup> Ina wali agali bibahendeore mana ko wiaru bilo mo bia harigome i mo keba harida. Ani biridagonaga ina i pani mialu i one waneiginirubi bibahende ala Nebada igini Kini Yaroboamahondo birudagua bialu Ahiya igini Kini Basahondo birudagua ihondobi mana mbiraore ogonidagua dege bulebero, laya. <sup>23</sup> Yasebelehondobi nde Anduane Homogohanda bi ogodagua laya, Ai Yasebele homarangi Yaserili tanonaga pabe tagirahayagi ibunaga tingini biangorume nalu holebira, laya. <sup>24</sup> Ahaba-o i damene maru tanoha homayagua biango bu karume tinaga tingini nolebira. Maru tano pabe tagirahayagi homayagua nde ega nene ale biru karume tinaga tingini nolebira, lalu Anduane Homogohanda laya, lalu Elayahanda Ahabahondo anidagua lamini.

<sup>25</sup> Ahaba ibu kini heangi ibunaga bu minimebi hamemebi hongoore halu Anduane Homogonaga deni howa mana ko wiaruni hangu mo tene howa bialu hene. Ibugua mana ko bialu henedarunibi abale henedarume mbira nabiaga wini. Ibu one Yasebele ibuore mana ko uruni bilo mo biahaga berene. <sup>26</sup> Ahaba ibugua Amoro wali agali bamba dindi ogoriani henedarume biagadagua dama mitangi bialu gime wabini wiaruhondo bi pupu wialu mana ko ngubi wiaru hangu bialu hene. Anduane

Homogohanda bamba Amoro wali agali uruni bo batagi halu dindi ogoni Isaraele wali agaliru ti berelo mope hene.

<sup>27</sup> Elayahanda ani layago Ahaba ibu hale howa ibunaga bu miniha genda timbuniore howa ibunaga aga biniyaru bibahende lerelabaga bini. Ani bialu dara ho howa walia halu aga tara biaga wiago mo karulowa tomoru nane hene. Horo bibahendengi aga ko bidaore palialu ibunaga dengui ibira halu mine nahe genda timbuni ho hene.

<sup>28</sup> Ani heagola Anduane Homogohanda ibunaga bi mana latagi haga Elayahondo lalu, <sup>29</sup> Áyu Ahaba ibugua inaga deni ibuni mo dindiha ho kago í hendedebe nahende kebe. Ainde ibugua mana ogonidagua biragome ina ibu áyu mo ko nahe waharogo. Mani ibu iginime kini ha aribia harangi ina ibu dameneore holebiraru tihondo pani mulebero, Anduane Homogohanda lene.

## 22

*Anduane Homogonaga bi mana latagi haga Migaia ibugua, Ahaba í homolebere, lenego ogo*

*(2 Bi Te 18.2-27)*

<sup>1</sup> Siria Isaraeleru tini wai bialu heneru wahalu mali kirani wai paluwa ema nabi hene. <sup>2</sup> Ani howa mali tebone hayagola Yudanaga Kini Yahosabada ibugua Isaraelenaga Kini Ahaba hearia nenege pole pene. <sup>3</sup> Ahaba ibugua ami haru haga agali haguane hearuhondo lalu, Gileada dindiha Lamodo tano ngago bamba inanagaore winigo ai Siria ti karulo kagoni. Anigo iname tano ogoni inane karulole Sirianaga kini kagonaga giha howa mo yu dai bibe nahe kamago nde aginagadabe, lene. <sup>4</sup> Ani lowa Ahaba ibugua Yahosabada lamialu lalu, í Lamodo tano ogoni mo yu dai bulenaga wai bu polene hamelo kogonigo ina í biamogo buleberebe nabuleberebe, lene.

Ani layagola Yahosabada ibugua ladai bialu lalu, ina hame lederu ale talialu bulene karulape dege manda bu ko. í biamogo bulene inaga wai biaga ami agalirubi nogo hosirubi bibahende manda mandabu hai ka. <sup>5</sup> Anigo iname mbirale uruni bule howa Anduane Homogo ibunaga hame ngago ala hale holene nga, lene.

<sup>6</sup> Ani layagola Ahaba ibugua mbiwia haga agali hearu ibu ngoai hadaba lene. Mbiwia haga agali uruni handari maria (400) bibahende ibu ngoai hayagola ibugua tihondo hale halu lalu, ina Lamodo tano mo yu dai bule wai bu polene karulapebe be nakarulapebe, lene.

Ani hale hayagola tigua ibuhondo ladai bialu lalu, Karulapego wai bule pu. Anduane Homogohanda í biamogo biragola ina wai buwa wayali holebere, lene.

<sup>7</sup> Ani layago lelowa Yahosabadahanda Ahabahondo hale halu lalu, Anduane Homogonaga bi mana latagi halu mbiwia haga mbira kabe nahebe. Mbira heagua nde iname Anduane Homogo ibuninaga hame ala handamiya, lene.

<sup>8</sup> Ani layagola Ahabahanda ladai bialu lalu, Agali mbira Imila iginini Migaia ibu Anduane Homogonaga bi mana latagi halu mbiwia haga ka. Anigo agali ogoni ibugua ihondo mbiwia halu bi bayale ndo langigi biagago ina ibuhondo turu naheore haruli. Ibugua mbiwia halu mo ko holene tagira ibulebira lalu í langiaabo haga ka, lene.

Ani layagola Yahosabada ibugua lalu, ina bi ogonidagua lolene nawi, lene.

<sup>9</sup> Ani layago hale howa Ahabahanda ibunaga haru haga agali haguane mbira heago ibu lowa lalu, ina áyu ogoni gerai lalu puwa Imila iginini Migaia abale haru ibule pu, lene.

<sup>10</sup> Kini Ahaba Yahosabadala libu haru kininaga aga biaga mo karulai howa kininaga biragane dagia Samaria tanonaga tagirahayagi hama tigabi widi iraneru lini hondo ibira ibira bilo bo taulalu aeane puyabume yu pelonaga dindi wiagoria mo yalu pu ngelowa libuni ogoriani berene. Mbiwia haga agali hearume libu bereagoria haparaho howa mbiwia halu bi dewa lalu hene. <sup>11</sup> Mbiwia haga agali handari maria (400) henedaruni aria mbira Kenana iginini Sedegaia hene. Ani howa ibugua aeane homane

mbira wiago mo paulaki howa bulumaganaga haguane ne gayane heagobi wabuwa ibuninaga emboneni mo pagaho yalu Ahaba berearia ibuwa lalu, Ina wai buwa Siria ami karu bope halu í wayali holebere. Í bulumaganaga ne gayane ogonibi howa bama pialu mbiraorebi mbira yu wanahe bibahende bai halu bo maro bulebere, lalu Anduane Homogohanda laya, lene. <sup>12</sup> Ani layagola mbiwia haga agali maru hearumebi nde bi lo mbira howa lalu, Heneneore Anduane Homogohanda í biamogo biragola ina wai bialu Lamodo tano mo yu dai bulebereg wai bule pu, lene.

<sup>13</sup> Ani lalu beremiria haru haga haguane mbira abale Ahabahanda Migaia hondo pu layago ibugua Migaia haru ibini. Libu wene harigani ibule ibalu howa agali haguane biago ibugua Migaiahondo lalu, Mbiwia haga agali maru karume lalu, Kini ibugua wai bialu wayali holebira, lai hayago inabi nde kinihondo bi bayale ogonibi dege lamibe, lene.

<sup>14</sup> Ani layago lelowa Migaia ibugua haru haga agali haguane biagohondo lalu, Anduane Homogo Haluhe kagonaga minini howa ina ihondo heneneore larogo Anduane Homogo ibugua ihondo bi ogo la lalu langirago dege latagi holebero, lene.✧

<sup>15</sup> Migaia ibu Kini Ahaba bereagoria anda ibiyagola kini ibugua Migaia hale halu lalu, Iname Lamodo tano mo karulole wai bu poramabe be waharamabe, lene.

Ani layagola ibugua kinihondo lalu, Karulape ina tano ogoni mo karulelo wai bule pu. Ina wai bialu wayali habelo Anduane Homogohanda biamogo bulebirago pu, lene. <sup>16</sup> Ani layagola Ahabahanda ibuhondo lalu, Ke halu mbira nalabe. Ina Anduane Homogonaga minini howa heneneore labe lalu abale howa langiaabo haruligoni í manda bu kegodago ai inaga bi ogoni angi hale holeberebe, lene.

<sup>17</sup> Ani layagola Migaia ibugua Ahabahondo lamialu lalu, Ina handalu hewaria Isaraele ami biaru nogo sibi haru haga nahe haradagua hari nene wiaruha ho giligala lo hearia handaru. Ani hondo hewagola Anduane Homogohanda bi mbira ogobi layua, Agali uruni tinaga haru haga agali haguane mbira nahe kago ai ti wai paluenaga wai wahalu tini andaga dai bialu pugupugu bulene nga layuane hale haru, lene.✧

<sup>18</sup> Ani layago hale howa Kini Ahaba ibugua Kini Yahosabada lamialu lalu, Ina í abale langirugoni ogoniyago. Anduane Homogonaga bi mana latagi haga agali ogoni ibugua ihondo mbiwia halu bi bayale mbira nalangiaga. Ibugua i mo ko holene hangu laabo haga larugoni, lene.

<sup>19</sup> Migaia ibugua bi laabo halu lalu, Ayu Anduane Homogohanda mo walia hayago languliya baya hangu hale mia howa hale ha. Ina handalu hewaria Anduane Homogo ibuni dahuliya andagani haru howa biragane dagia wiagoria bereagola dahuliyali bibahendeme ibu bereagoria ho mabu bupe hearia handaru.✧ <sup>20</sup> Ani heagola Anduane Homogohanda tihondo hale halu lalu, Ahaba ibu Lamodo tanoha bo wahelonaga ohowa ndelalu karulapego pu lolene mbirali ai kebe, laya. Ani hale hayagola dahuliyali mbira mbira tininaga bi Anduane Homogohondo ladai bigibigi biya. <sup>21</sup> Tigua ani ladai bigibigi bialu heagola dinini mbira ibu Anduane Homogo bereagoria kaware puwa lalu, Ina ibu mo hondo hole polebero, laya. <sup>22</sup> Ani layagola Anduane Homogohanda ibuhondo hale halu lalu, Ina Ahaba mo hondo agua holeberebe, layagola dinini biago ibugua Anduane Homogohondo ladai bialu lalu, Ina puwa Ahaba ibunaga mbiwia haga agali karume bi henene ndo ke howa lamilo mo la holebero, laya. Ani layagola Anduane Homogohanda dinini ogonihondo lamialu lalu, Ina pialu inaga bi henene larebe toba howa mo heneneho helonaga ibu mo hondo hole pu laya, lene.✧

<sup>23</sup> Ani lowa Migaia ibugua Ahabahondo bi tiga tiga lamialu lalu, Anduane Homogohanda í homabelo hamelo howa ai dinini ogoni ibugua inaga mbiwia haga agali

✧ 22:14: Dag 22.18, 24.13, 1 Kin 18.10 ✧ 22:17: Dag 27.17, Md 9.36, Mg 6.34 ✧ 22:19: Yob 1.6, Ais 6.1 ✧ 22:22: Hgn 9.23, 1 Sml 16.14, 18.10



biarume ihondo bi henene ndo í mo hondo halu bi langilonaga ibilayadagome í mo hondo hayada, lalu lamini.

<sup>24</sup> Ani lamiyagola mbiwia haga Sedegaia henegome Migaiahanda bi layago hale howa ibuguaibunaga gi habeme Migaiatõ balu howa lalu, Anduane Homogonaga dinini í agua yu wahalupuwa bi ogoni ihondo langiyabe, lene.

<sup>25</sup> Ani layagola Migaiia ibugua Sedegaiahondo ladai bialu lalu, Ina ihondo heneneore larogo mani waitigime ibalu ina Isaraele bo podaragola í ibida puwa anda hobane mbiraha bira do holebere. Horo ogoni ibirangi heneneore Anduane Homogohanda bi ogoni ihondo langiyago ina latagi henedane hondolebere, lene.

<sup>26</sup> Ani layagola Kini Ahaba ibugua ami haru haga agali haguane heagohondo lalu, Mbiwia haga agali Migaiia o kago minu yalu agali haguane Amonola í igini Yoasala karia haru pudaba. <sup>27</sup> Ani haru puwa libuhondo lamialu, Agali ogo ini wai bialu dai buliya libugua garabaya andaha tomo emene hangumigi bialu handayaho halibu laya lalimu, lene.

<sup>28</sup> Migaiahanda Ahabahondo lone lamialu lalu, Í waiha homa nabi bayale dai biriyagua nde Anduane Homogohanda iha howa bi lene ndodalo manda bibe, lene. Migaiia ibugua laabo halu lalu, Wali agali bibahende kamiru tigua bi larogoni hale hai hadaba, lene.

*Kini Ahaba waime bayagola homenego ogo  
(2 Bi Te 18.28-34)*

<sup>29</sup> Ani bialu Isaraelenaga Kini Ahaba Yudanaga Kini Yahosabadala libu haru mandagi libunaga ami agali hearu haru halu Gileada dindiha Lamodo tanoni Siriali waitigi anda ibu hearu baba wai bule pene. <sup>30</sup> Wai bule wene dege howa Ahaba ibugua Yahosabadahondo lamialu lalu, Wai hamani tagira pole howa waitigime í kinidalo manda nabilo kininaga aga bidogo golo iriari bialu ami agali mbira pene tingi holiya. Í harugo kininaga aga bidegoni biaabo habe, lene. Ani lalu Kini Ahaba ibu aga tara wiaru bialu wai bule pene.

<sup>31</sup> Wai anda piyagola Sirianaga kini heagome ibunaga ami agali wai biaga garo ale mini karisini howa pira tebirani huniane kira (32) hearu olalu ibidaba lowa lalu, Tigua wai bialu hongo howa Isaraeleali kini kago baba hanguwai bilimu. Agali maru ibinidaru baba nabilimu, lene. <sup>32</sup> Ani laya handala puwa tigua Yudanaga Kini Yahosabada biago Isaraelenaga Kini Ahababe toba howa wai hongo howa bialu hearia Yahosabada ibunime howa wai huarogahongo howa ladaga hayagome mo walia hayagola <sup>33</sup> ti manda bialu ogoni ibu Isaraelenaga kini ndoyane hondowa bialu tigua ibula wai hongo howa nabi yupe hene. <sup>34</sup> Tigua wai hongoheore ua laga bialu howa Siriali ami mbirame timu mbira Isaraeleru heagoha bo ibilayagome Kini Ahabanaga tingini mbiraha aga wai pole biaga aleme bia dambi nahe wiagoria bila hene. Ani bila hayagola Ahabahanda agali ibunaga nogo hosime karisi gililo yu ibaga bilo handayaho haga agali heagohondo lalu, Ai timu hombeniore ho kogo karisi abale beregedalu wai hama yu wahalutagira mba, lene.

<sup>35</sup> Ani layagoyu ami mende mendehabi wai hongoheore biribigola Ahaba wai hama yu wahalutagira pobe nahe wini. Ani biyagola ibunaga garo ale karisi biagoria ibunaga ami agali biarume gini mo maliaho heleagola amu Siriali biaru wai ibiyagoha handa amu ho hene. Ani heagola darama timbuni Ahabaha howa pora bialu ibunaga karisi ibuni heyu heago daramame goba hai hene. Ani heane dege alendo hayagola Ahaba homene. <sup>36</sup> Ani homayagola howa ni paliyagola Isaraele ami hearubi Yuda ami hearubi bibahendeme huarowala howa lalu, Ayu ogoni inane dindiha dai bialu inane dalu wigi birimagoha purogo lamia ma, lai hene.

<sup>37</sup> Kini Ahaba homayagola tigua ibu tingini Samaria tanoha yalu dai buwa homaliha hora hene. <sup>38</sup> Ani hora howa ibunaga karisi biago Samariaha iba gorene bereagoha

wayawaya bu wahene. Ani biyagola biango bu hearume ibunaga darama bu payabu wiaru pende bini. Ani bialu bayanda wali berearu tibi nde ibalu iba ogoniha dege wayawaya bini. O biyadaruni Anduane Homogohanda ogodagua bulebira lalu lo wiyago lola hene.

<sup>39</sup> Kini Ahaba ibugua biniru bibahende mbuga mbira mini Isaraele Kini Henerunaga Bi te laga ngagoha gilibu nga. Mbuga ogoniha howa ibugua anda mbira buwa nogo elebeninaga ne gayanerume mo yári bia henego bi te lo wialu maru ibugua tano maru wiarunaga ege pabe mo hongo howa bia tiga binirunaga bi teru lo wialu bida. <sup>40</sup> Ahaba ibuni homayagola hora howa ibu igini Ahasaia ibugua ibu abanaga tamu henge ibuni mialu kini ha aribia hene.

*Yahosabada ibu Yudanaga kini henego ogo*  
(2 Bi Te 20.31-21.1)

<sup>41</sup> Mali mariani Ahaba ibu Isaraele dindiha kini hene lowa Asa igini Yahosabada ibu nde Yuda dindiha kini hene. <sup>42</sup> Ibu taba henenegoria howa mali pira tebirani duria (35) hayagola ibugua Yarusalemeni mali pira kirani duria (25) kini howa haru hene. Yahosabada ibu ajiya agali mini Sili wane Asuba berene. <sup>43</sup> Yahosabada ibugua ibu aba Asahanda biaga wiadagua bialu Anduane Homogonaga deni howa mana tigabi bayale hangu talialu bialu haga hene. Ani bialu ha howa dege ibugua mbira wiago nabi henego dama mitangi bialu bi pupu wiaga anda bu hearu dege bo gialo wanahe helo wahene. Ani helo waheagola wali agali tigua anda uruniha mbirale ira hagua nga bilo delaga mini inisenesi wiaru mbirale maru loma binirubi bo delalu haabo hene. <sup>44</sup> Yahosabada ibu kini heangi Isaraele hameigini Yuda hameiginila wai nabi bayale haabo hene. Yahosabada ibugua Isaraelenaga kini heagola gi tigani bialu ti baya hangu hene.

<sup>45</sup> Kini Yahosabada ibugua biniru bibahende mbuga mbira mini Yuda Kini Henerunaga Bi te laga ngagoha gilibu nga. Mbuga ogoniha howa ibugua biabe hongohe binirubi dindi tara tara hearu baba wai binirubi bibahende gilibu wigi bida. <sup>46</sup> Bamba Yahosabada aba Asa ibugua dama mitangi bialu gime wabini wiaru anda heagoha wali agalirume bi pupu wialu howa tini uruniha kayu yu palu ngoai haga hearu bibahende bo gialo wahai henego ai maru yu wahene hearu Yahosabada ibugua bo giala maro bini.

<sup>47</sup> Horo ogonongi hameigini tara Idomo plearu tinaga kini mbira nahe wiagola Yudanaga kini ibugua dege agali haguane mbira dabalú Idomo wali agali haru helo helene.

<sup>48</sup> Kini Yahosabada ibugua agali biabe biaga hearuhondo dindi kaundia Obiri ngolo taya bima polenaga iba sibi wabidaba layagola wabini. Ani wabu yalu tagira pole tano Esiongebe wiagoria pialu hearia puyabu hongohe ibiyagome iba sibi biaru kambulobaga biyagola ibani yu tagira napene. <sup>49</sup> Ani biya layago Isaraelenaga Kini Ahasaia ibu hale howa ibugua Yahosabadahondo lawia halu lalu, Ína iba sibi lone pelo manda bideyagua nde agali iba sibiha biabe biaga ina talebu nguliya. Inaga agali ti haru mandagi biabe bilo, lene. Ani layagola Yahosabada ibugua ogonidagua bulene manga hene.

<sup>50</sup> Mani howa Yahosabada homayagola tigua ibunaga tingini ibu aba mamaliru hora haga homali Debidinaga tano wiagoha hora hene. Ani homayagola ibu igini Yahorama ibu kini ha aribia halu ibu abanaga henge ibuni mini.

*Ahasaia ibu Isaraele dindiha kini henego ogo*

<sup>51</sup> Yahosabada ibu Yuda dindiha mali pira mbirani karia (17) kini hene heagola Ahasaia ibubi nde Isaraele dindiha kini hene. Ibu mali kira hangu Samaria tanoni Kini howa wali agali haru halu hene. <sup>52</sup> Ibugua ani haru howa mana ko ngubi ibu aba Ahaba ibu ajiya Yasebele ogolabome biaga wiadagua bialu bamba Nebada igini Kini

Yaroboama Isaraele wali agali haru halu mana kohayagi pubagi henedaguabi bialu hene. Ahasaia ibugua Anduane Homogonaga deni mana ko bialu <sup>53</sup>dama mitangi bialu gime wabini Balahondo bi pupu wialu hene. Ibugua mana ko ogoni biyagome abale ibu aba Ahabahanda Anduane Homogo Isaraele wali agalinaga Ngode Datagaliwabe kago mo keba hayadagua ibuguabi mo keba hene.

## 2 Kini

### Kini Henerunaga Mbuga Mende

### Mbuga ogoha gilibu ngarunaga nemandi ogo

Kini henerunaga mbuga mende ogome mbirale binirunaga bite kini mbuga mbira layagoria howa lo gililo mida. Kini Henerunaga mbuga mendegome Isaraele dindiha dindi tu wiaki howa wali agali dindi uyurayagi palearu Isaraele wali agali lalu un-urayagi palearu ti Yuda wali agali lalu gilibu nga. Ti ani howa bialu henedarunaga bite lama pialu hameigini kirabali libunaga waitigi hearume anda ibuwa wai bialu tinaga dindi andabi bibahende bo gialabaga bu wahalu wali agali tini bibahende garabaya bu yalu penegoria lairi ka. Isaraele wali agali uyurayagi palearu Asirialirume ti ala anda ibuwa bo hilo yalu pene. Hameigini mende nirayagi palearubi mani agali kini mbira mini Nebugadanesa Babilonoali henegome ibuwa balu dindi andaru bo gialabaga bialu wali agali garabaya bu yalu pene. Mbuga mende ogome mbuga mbira biagome te ledadagua dege lowa mana kini tigua bialu heneru ogodagua bini lalu garealo nga.

Tigua Ngode Datagaliwabe andaneha haga henebe be nahaga henebe. Galone timbuniore mbira mbuga ogome mo walia holebirago ogo. Isaraele wali agalinaga kini heagomebi Yudanaga kini heagomebi libunaga wali agali bu hearumebi tigua mine howa Ngode Datagaliwabenaga bi mo wahalu ibunaga mana lo wiaru pugalu hene. Ogonidagua biyagome tiniha genda mo yu anda ibini. Wali agali tigua miniha ogodagua manda bini. Duniniore mbira Yarusalemebi Anduane Homogonaga anda loma bini hene biago kagomebi ina mo bayale holebira. Inaha mo ko holene mbira tagira naibulebira lo manda biaga hene. Anigo mbuga ogome lalu, Yarusalemeore bo giala hole bialu waitigi uruni tigua Ngode Datagaliwabenaga anda biagobi bo gialobaga biai hene, leda. Anidagua biyagome Isaraele wali agalirunaga mini mo ko hai hene. Ani biyagola mani howa tinaga lotu laga manabi ibaga biaga wiarubi bibahende iriari biai hene leda.

#### **Bulu бага бува кuni gilibu ngago (1.1-17.41)**

Isaraeleali Yudalila talebuki howa bialu henego

1.1-8.15

Elaisa ibu agalime nabiagane ale tara tara binigo

8.16-17.4

Isaraele Yudalanaga hangu hangu henego

17.5-41

Asirialirume Samaria bo podalu dindi karulenego 18.1-25.30

Yudalinaga kiniru ha aribia halu henego

18.1-21.26

Hesegaiabi Manasebi Amonobi Yosaiabi kini ha aribia henego

22.1-23.30

Kini Yosaiya ibu mana bayale bialu henego

23.31-24.20

Kini maru ha aribia henego

25.1-30

Babilonoalirume Yarusaleme mo ko halu bo gialabaga binigo

*Elaya ibugua Kini Ahasia homolebira lenego ogo*

<sup>1</sup> Mani Isaraelenaga Kini Ahaba homayagola Moaba hameigini tigua Isaraele hameigini hearume ti haru helo hame nale hene. Ani howa tigua wai bialu Isaraele bo talia tagi hene. <sup>2</sup> Horo mbirungi Isaraele wali agalinaga Kini Ahasia ibu ibuni andaga daligaha wa hondo haga wiagoria hene. Kini ibu ani hearia anda daligaha howa pilalu mo

paraho dindini ibira howa ibu tingini mo ko ho hene. Ani biyagola ibugua agali maru bi abale Pilidia dindiha Egerono tano wiagoha lo pelalu, Dindi ogoniha Pilidia wali agali tigua dama mitangi bialu bi pupu wiaga gime wabini mini Balasebubu laga wiagoha i dabi holobadabe be homolobadabe lalu halaga bilo lamule pudaba, layagola pene. <sup>3</sup> Anigo Anduane Homogonaga dahuliyali mbirame Tisibeali Anduane Homogonaga bi mana latagi haga Elayahondo lalu, Áyu ogoni abaleore pialu agali maru Samarianaga kini kagome Egerono dindi pudaba layagola harigani pialu karu lola hole puwa tihondo ogodagua labe. Irane aginaga tigua Egerono wali agalinaga dama mitangi bialu gime wabini Balasebubuhondo bi halaga bule pialu kamibe. Tíni dalu Isaraele dindiha Ngode Datagaliwabe ibuni nahedane taya bima poramibe. <sup>4</sup> Ani bule poramiyagua nde ina bi langerogo hale hadaba. Anduane Homogohanda Kini Ahasiahondo bi ogodagua laya. Í dabi halu heyalu napolebere. Ani paliaho ngene dege homolebere, laya lalu lamule pu, lene.

Ani lamiyago hale halu Elaya ibugua puwa agali biaruhondo bi ogoni labe layadagua lalu lamini. <sup>5</sup> Elayahanda bi ogonidagua lamiyago hale halu agali biaru ti abale kini berearia íbu dai biyagola kinihanda tihondo hale halu lalu, Tí agua biyagola abale dai birimibe, lene.

<sup>6</sup> Ani hale hayagola tigua ladai bialu lalu, Harigani agali mbira lola harimago ibugua Anduane Homogonaga bi íhondo lamule yalu dai bidaba, laya. Ai bi ogoni ogodagua laya. Irane aginaga ina agali maru Egerono wali agalinaga dama mitangi bialu gime wabini Balasebubuhondo bi halaga bule pudaba laribe. Tíni dalu Isaraele dindiha Ngode Datagaliwabe ibuni nahedane taya bima poramibe, laya. Heneneore í lone dabi naholebere. Í anidagua paliaho wiaabo howa homolebere laya, lalu lamini.

<sup>7</sup> Anidagua lamiyago kini hale howa ibugua tihondo lalu, Agali tíhondo bi ogonidagua langiyadagoni ibuni agali ago biyabe, lene.

<sup>8</sup> Ani layagola tigua kini lamialu lalu, Agali ogoni ibu nogo dongoneme aga bialu mandibu nogo dongoneme degewi heneya, lene.✧

Ani layago hale howa kini ibugua lalu, Agali ogoni Anduane Homogonaga bi mana latagi haga Elayadago, lene.

<sup>9</sup> Ani lalu kini ibugua ami haru haga agali haguane mbira heago heba ami agali pira duria (50) hearume Elaya minu yalu ibule pudaba laya handala pene. Tigua pialu Elaya heagoria puwa ami haru haga agali haguane biago ibugua handalu hearia Elaya ibu hari nene emene mbira heagoria berearia hendene. Ani hondowa ibugua Elayahondo lalu, Agali Ngode Datagaliwabenaga bi mana latagi haga kegoni í áyu ogoni dalialu kini ibu hondole ibabe layago pole íbu, lene.

<sup>10</sup> Ani layagola Elayahanda ladai bialu lalu, Heneneore i Ngode Datagaliwabenaga bi mana latagi haga koyagua áyu ogoni dahuliya andagaha howa ira dene dalipe halu íbi ínaga ami agali pira duria (50) haru haridarunibi bibahende bo heda hai helo laro, lene. Ani layaore ira abaleore aube tobane ibalu dahuliya andaga howa dalipe halu ami haru haga agali haguane biagobi ibu heba ibini ami agali pira duria (50) biarubi bibahende irame dai hayagola homai hene.✧

<sup>11</sup> Mani kini ibugua ami haru haga agali haguane mende heago ami agali pira duria (50) heba Elaya hearia pudaba layagola puwa ami haguane biago ibugua Elayahondo lalu, Agali Ngode Datagaliwabenaga bi mana latagi haga-o áyu ogoni kinihanda abale ibabe layago pole íbu, lene.

<sup>12</sup> Ani layagola Elayahanda ladai bialu lalu, Heneneore i Ngode Datagaliwabenaga bi mana latagi haga koyagua áyu ogoni dahuliya andagaha howa ira dene dalipe halu ínibi ínaga ami agali pira duria (50) haru haridarunibi bibahende bo heda hai helo laro, lene.



Ani layaore Ngode Datagaliwabenaga ira dene dalipe halu ami agali haguane biagobi ibunaga ami agali pira duria (50) biarubi bibahende irame dai hayagola homai hene.

<sup>13</sup> Ani biyiyagola kini ibugua ami agali haguane mbira heago heba agali pira duria (50) halu tebone lone dege Elaya hearia pudaba, lene. Ani laya handala tigua puwa ai ami haru haga agali haguane biago ibu puwa Elayanaga wanakuihayagi ge duli hangaho biruwa ibuhondo lalu, Agali Ngode Datagaliwabenaga bi mana latagi haga-o inibi inaga ami agali haru korunibi bibahende dara halu ina ina mo ko nahabe. <sup>14</sup> Dahuliya andaga howa ira dalipe halu agali ami haru haga haguane kirali biagobi libunaga ami agali hayarubi bibahende irame dai hayago manda bidogoni. Ainde ina iore dara halu i mo ko nahabe, lene.

<sup>15</sup> Ami haru haga agali haguane biago ibugua bi ogoni lai hayagola Anduane Homogonaga dahuliyali mbirame Elaya lamialu lalu, Ina gi nahe ami haguane ogoni ibu karia dalipe halu pu, lene. Ani lamiya handala Elaya ibu dalipe halu ti haru mandagi kini hearia pole pene. <sup>16</sup> Ani pialu Elaya ibugua kini berearia puwa lalu, Anduane Homogohanda ogodagua laya, Ina mandabu handalu heria Isaraele dindiha Ngode Datagaliwabe naheyagola Egerono wali agalirunaga dama mitangi bialu gime wabini Balasebubuhondo halaga bule agali maru pudaba laribe. Anidagua biridagome i lone dabi naholebere. Anidagua paliaho wia dege bialu homolebere laya, lalu lamini.

<sup>17</sup> Mani howa Ahasia homayagola Anduane Homogonaga bi Elayaha howa latagi hayago heneneore lola hene. Ahasia ibu igini mbira naheyagola ibu hamene Yoramahaanda Ahasianaga henge mialu Isaraele wali agalinaga kini ho aribia hene. Yahosabada igini Yahorama ibugua Yuda dindiha mali kira haru heagola Yorama ibugua Isaraele wali agalinaga kini hene.

<sup>18</sup> Kini Ahasia ibugua binirunaga bi te mbuga mbira mini Isaraelenaga Kini Henerunaga Bi te laga ngagoha gilibu nga.

## 2

### *Anduane Homogohanda Elaya dahuliya andagaha mo yalu penego ogo*

<sup>1</sup> Anduane Homogo ibugua humbirini wai hongohe mbirame Elaya dahuliya andagaha mo yalu pole manda bu heagola Elaya ibu Elaisa haru Giligala dindi wahalu pene.

<sup>2</sup> Pialu howa Elaya ibugua Elaisahondo lalu, I Anduane Homogohanda Bedele ibabe layadago porogo ina ogoria hondo habe, lene.

Ani layagola Elaisa ibugua ladai bialu lalu, Anduane Homogo haluhe kagonaga minini howa ina heneneore larogo ina yu wanahe i poregoha iya haru poleberaba, lene. Ani laya handala libu haru Bedele pole pene.

<sup>3</sup> Pialu hebiria Anduane Homogonaga bi mana latagi haga agali maru Bedeleha heneyaru ogolabo lola hole tagira ibu howa Elaisahondo lamialu lalu, Anduane Homogohanda inaga agali haguane ayu haru polebirago manda bu kebe, lene.

Ani layagola Elaisa ibugua ladai bialu, E i manda bidogo tigua bi ogoninaga lone nalalimu, lene.

<sup>4</sup> Ani lalu libu Bedeleni howa Elaya ibugua Elaisahondo lalu, Anduane Homogohanda i Yarigoha ibabe layadago porogo i ogoria hondo habe, lene.

Ani layago lelowa Elaisa ibugua lalu, Anduane Homogo haluhe kagonaga minini howa heneneore larogo ina i poregoha talima ibulebero, lene. Ani laya handala libu haru Yarigo tano pole pene.

<sup>5</sup> Yarigo tanoha Anduane Homogonaga bi mana latagi haga agali maru heneyaru ti Elaisa lola hole ibuwa lalu, Ayu Anduane Homogohanda inaga agali haguane haru halu polebirago. Ai ina manda bu kebe be namandabi kebe, lene. Ani lamiyagola Elaisa ibugua ihondo ladai bialu lalu, I manda bu kogo tigua bi ogoninaga lone nalalimu, lene.

<sup>6</sup> Libu Yarigo tanoha howa dege Elaya ibugua Elaisahondo lamialu lalu, Anduane Homogohanda i Iba Yodana ibabe layadago porogo ina ogoria hondo habe, lene.

Ani layago lelowa Elaisa ibugua Elayahondo lalu, Anduane Homogo haluhe kagonaga minini howa ina i poregoha talima ibulebero, lene. Ani laya handala libu haru pene. <sup>7</sup> Libu pole piribidagua Anduane Homogonaga bi mana latagi haga agali hayadaruni aria pira duria (50) libu piyadagua ti haruru pialu hene. Ti pialu Iba Yodana angeni tagira pialu libuni hangu iba angeni hebigola agali maru biaru ti emene kaundiani ale hene. <sup>8</sup> Ani pu howa Elaya ibugua aga luni bia gimbu biago golowa minu ndelalu mo homabia ho yuwa ogonime Iba Yodana bene. Ani bayagola iba peago bira migimigi bialu hanuni dindi yobi pana hene. Ani biyagola libu bolangua halu iba ange mende-hayagi ubaede halu pene. <sup>9</sup> Libu ederayagi pu howa Elaya ibugua Elaisahondo lamialu lalu, Anduane Homogohanda i haru polene kawareore ngelo kabagonigo ai áyu ina i biamogo bialu mbirale mbira agile buliya hamelo kebe, lene.✧

Ani hale hayagola Elaisa ibugua ladai bialu lalu, Ina Anduane Homogonaga hongo karulo howaibunaga biabe bialu harigoni ndobe. Ainde agalimeibunaga mbirale ngaruni bibahende ibu igini wahenehondo miai hagadagua hongo ogoni ina yu harigoni i ngibelo hamelo ko. Ina hongo ogoni yu howa bi mana latagi hagane agali mbira i ho aribia holiya ngi, lene.

<sup>10</sup> Ani layagola Elaya ibugua lalu, Áyu ina ihondo ngi lalu hale harigoni ina i abale mo ngulene ale ndogo. Anduane Homogohanda i haru porane handariyagua ngi larigoni mo yu holebere. I haru porago nahandariyagua namo yulebere, lene.

<sup>11</sup> Libu bi lama pialu hebiria libuni hengene wiagoria ira hungu timbuni kikiau lene. Ira hungu biago dombeneha garo ale karisi mbira nogo hosime gililo yalu piyagoria humbirini wai hongoheme Elaya dahuliya andaga mo yalu iraga hene. <sup>12</sup> Ani biyagola Elaisa ibugua Elaya piyago hondowa hongo howa ga ladaga halu lalu, Aba-o inaga aba-o i Isaraele wali agali biamogo bule bambaore haga hongohe nogo hosi karisiru ale mbira harigo ai áyu poregoni, lene. Ani lalu ai Elaya piyagola Elaisa ibu lone handabe nahe hene.✧

Ani howa ibu miniha dara timbuni howa ibu dara heago walia halu ibuninaga aga lu biagimbu bu heago hanuni lerelaki hene. <sup>13</sup> Elaya ibu piyagolaibunaga aga luni bia gimbu biago dindini golo ibira hene. Elaisa ibu aga ogoni mo yalu dai buwa Iba Yodana angeni pu hene. <sup>14</sup> Ani pu howa iba biago Elayanaga aga yayagome abale Elayahanda bayadagua dege balu howa lalu, Anduane Homogo Elayanaga Ngode Datagaliwabe agoha haruabe, lene. Ani layangiore iba biago abale bira migimigi biyagola Elaisa ibu ange mende-hayagi uba dai bini.✧ <sup>15</sup> Agali pira duria (50) Anduane Homogonaga bi mana latagi haga Yarigo howa ibini biaru ti iba ange mende-hayagi hayagoria hondo howa Elaisa ibugua o biyadagoni handai hene. Hondo howa tigua lalu, Anduane Homogohanda hongo abale Elaya miyago áyu Elaisa ibugua yu aribia kagoni, lene. Ani lalu ti abale Elaisa lola hole kaware ibuwa ti dindini bulu pialu Elaisanaga mini yaraga hene. <sup>16</sup> Ani buwa tigua Elaisahondo lalu, Ina aria agali hongoheru pira duria (50) kamago Anduane Homogonaga dininime inaga agali haguane mo yalu puwa hari nene ngaruhabi dindi uli ngaruhabi yu waholigo tayabu maliya, lene.

Ani layagola Elaisa ibugua ladai bialu lalu, Wahadaba. Ibu taya bule napilimu, lene.

<sup>17</sup> Ani layago hale howa dege agali biarume hongo haabo hayagola Elaisa ibugua lalu, Karulapego tigua laramidagua taya bule pudaba, lene. Ani laya handala agali pira duria (50) biarume horo tebirani taya bialu howa handa walia nahe tayabu wahene. <sup>18</sup> Agali uruni tigua taya bialu dai bilonaga Elaisa ibu Yarigoni hondo hene. Tigua tayabu

wahalu dai biyagola Elaisa ibugua tihondo hale halu lalu, Ina bi agua larune tígua inaga bi larugo nahale harimibe, lene.

*Elaisa ibugua iba mo bayale henego ogo*

<sup>19</sup> Elaisa ibu Yarigo tanoha heagola wali agali tano ogoniha heneyarume ibuwa lalu, Agali haguane-o tano bayale o ngago de handa. Anigo iba dege ko burupale kamagoni. Wali gali tombeha bere biruwa iba uruni hambu nayagua waneigini gali tombeha bedaru taba honolene tu ndo timbu nahe ngaore abale taba hanaga biaga. Anidagua biragola waneigini homaga biaga, lalu lamini.

<sup>20</sup> Ani layagola Elaisa ibugua lalu, Áyu ogoni puwa ndisi be gahenge mbirani ibi maru haealo ngelowa i koría yalu ibule pudaba, lene. Ani lamiyagola tigua layadagua yalu ibini. <sup>21</sup> Ani yalu ibiyagola Elaisa ibugua ibi ndisi beni berelo yalu ibiyago iba hambiaaga uli iba bereagoha haealape halu lalu, Anduane Homogohanda ogodagua lara, Anduane Homogo ina iba ogo mo bayale harogo. Iba ogome wali agali homelaga winidagobi waneigini taba honolene tu ndo taba hanaragola homagadagobi lone nahomolebira, larua, lene. <sup>22</sup> Ai Elaisa ibugua bi o layadangi howa iba mo bayale henedagome áyubi bayale wiaabo ka.

<sup>23</sup> Mani nde Elaisa ibu Yarigo howa Bedele pole pene. Pole pialu hearia igiri daliha dewaore tanonaga pabe tagirahayagi biru heneyarume Elaisa ibiyago hondowa tigua ibu mege bialu lalu, Agali ko mandari nahe dogadogabi nai porago. Ina dalu ogoria nahe áyu ogoni pu, lalu hene.

<sup>24</sup> Anidagua layagola Elaisa ibugua handa dai bialu de tandagabime ti handayaho howa ha halu lalu, Ina tihondo heneneore bulebirago langero. Anduane Homogohanda ti mo ko helo laro, lene. Ani layaore biango ale gabua mini bea timbuni kira irabuha howa gerai tagira ibuwa igiri bi lalu hayaru aria pira mariani kira (42) bibahende hayai halu no buda hole bini.

<sup>25</sup> Ani biya handala Elaisa ibu pialu Hari Kamelo nene wiagoha hama puabo hene. Ogoni halu nde mani Hari Kamelo wahalu Samaria dai bini.

### 3

*Isaraealime Moaba baba wai binigo ogo*

<sup>1</sup> Yahosabada ibu Yuda dindiha kini heane mali pira mbirani halira (18) peagola Ahaba igini Yorama ibu Isaraele dindiha kini howa ibugua Samaria tanoni mali homberia (12) haru halu hene. <sup>2</sup> Yorama ibugua Anduane Homogonaga deni howa mana ko dewa bialu ha henegoyu ibu ababi ibu ajiya Yasebelebi libugua mana koorene ko bialu henedagua ndo dege bini. Ibugua bamba ibu abahanda dama mitangi bialu bi pupu wulenaga mbirale mbira gime wabu wini mini Bala wiago mo wahene. <sup>3</sup> Ani binigo ai Yorama ibugua mana ko maru abale Nebada igini Kini Yaroboamahanda bialu hagadagua bialu hene. Yaroboama ibugua mana ko uruni ale Isaraele wali agalirume bialu helo biawai haga hene. Ani biyadagua Yorama ibugua ko urunibi bialu yu wahole ndo bialu haabo hene.

<sup>4</sup> Moaba wali agalinaga Kini Mesa ibugua nogo sibi dewaore hinu hene. Ani hinu howa ibugua mali bibahendeni nogo sibi igini hungubaluaru daosini dege handari mbira (100,000) dagisi ale Isaraelenaga kini heagohondo miaga hene. Ani bialu howa nogo sibi wangabe daosini dege handari mbira (100,000) Isaraele kini biagonaga naina dagala bagiho helowa uruninaga irini podalu Isaraelenaga kini karia dagisi ale dege mialu podo pelaga biaga hene. <sup>5</sup> Ani bialu haga henego mani Isaraelenaga Kini Ahaba homayagola Mesa ibugua Isaraelenaga kini gahenge ha aribia hene heagohondo mine halu dagisi nami wahene. <sup>6</sup> Ani biyago hondowa Isaraelenaga Kini Yorama ibugua Samaria tano yu wahalu puwaibunaga ami agali bu hearu abale mo mogo bini. <sup>7</sup> Ani mo mogo bialu howa Yorama ibugua Yudanaga Kini Yahosabadahondo bi lo pelalu lalu,

Moabanaga kini biagome ihondo mine hayagola ina wai bule porogo ina iya haru wai bu mbaliya ibuleberebe be mangabe, lalu hale hene.

Ani hale hayagola Yahosabada ibugua ladai bialu lalu, Iya haru mbaliya ina inaga hame ngego talialu bule manda manda bu ko. Inaga ami agalirubi inaga wai biaga nogo hosi karubi ti bibahende í biamogo bule manda manda bu ka. <sup>8</sup> Anigo ina hariga agodagua pialu maliyabe, lene. Ani layagola Yoramahanda ladai bialu lalu, Ina hariga Idomo dindiha iba dalu naibaga ko ege kekeleke dindi ngadagua pialu maliya, lene.

<sup>9</sup> Kini Yoramabi Yudanaga kinibi Idomonaga kini heagobi ti haru mandagi tinaga ami agaliru haru halu pene. Ti piyagoha hariga luoreni pialu horo kariani handa paligi bima pialu heagola tinaga iba hambu yinidaru biba hene. Ani biyagola tinaga ami hearubi tinaga nogome dabudabu yalu pelonaga erekunini mo paga haga hearubi ti bibahende iba nolene nawioreni pene. <sup>10</sup> Ani biyago hondowa Kini Yoramahanda lalu, Ai agoda Anduane Homogohanda ina kini tebirali harimago bibahende mo mogo bialu Moabali kini kagonaga giha mo ya hayadago mogolo kogoni, lene.

<sup>11</sup> Ani layagola Kini Yahosabada ibugua Kini Yoramahondo ladai bialu lalu, Anduane Homogonaga bi mana latagi haga ogoriani mbira kabe. Agali ogoni heagua nde ina agua beramabe lalu ibugua Anduane Homogohondo hale helonaga lamimiya, lene. Ani layagola Yoramahanda ami haru haga agali haguane mbira heagome abale ladai bialu lalu, Sabada igini Elaisa ibu abale Anduane Homogonaga bi mana latagi haga Elaya biamogo biaga henego ka, lene. <sup>12</sup> Ani layago Yahosabada ibugua hale howa lalu, Elaisa ogoni ibu Anduane Homogonaga bi mana latagi haga heneneore ka, lene. Ani laya handala kini tebirali biaru Elaisa hearia pole pene.

<sup>13</sup> Ani pialu hemiria Elaisa ibugua Isaraelenaga kini biagohondo lalu. Abale í aba mamarume mbiwia haga agali maru hearuhondo halaga bilo piagadagua pu nabi í hewaria agibule ibiribe, lene. Ani layagola Kini Yoramahanda ladai bialu lalu, Ani ndo Anduane Homogo ibunime ina kini tebiraligo bibahende mo mogo buwa Moabalinaga giha mo ya hole biniyane handalu ai í bereria ibirima, lene. <sup>14</sup> Ani layagola Elaisahanda Yoramahondo lamialu lalu, I Anduane Homogo Hongo Haiheore haluhe kagonaga biabe biahaga bedogoni. Ina ibunaga minini howa heneneore langerogo ai Yahosabada ibu í heba mandagi naibinidale ina inaga dengui nahendedole. Ila bibi naledolego ai Yahosabada ibu agali tigabi dege kagodago nde ina inaga bi laregoni hale haro. <sup>15</sup> Ayu ogoni abale pialu agali ngida бага mbira haru ibule pudaba, lene. Ani layagola tigua agali ngida бага mbira heago haru ibiyagola ibugua ngida bene.

Ani balu bereagola Anduane Homogonaga hongo Elaisaha mo karula hene. <sup>16</sup> Ani mo karula heagola Elaisa ibugua tihondo mbiwia halu lalu, Anduane Homogohanda bi ogodagua larago, Dindi mbira abale iba piagago hundini dindi yobi lebolahe ngagoria iba uli dewaore walimu. <sup>17</sup> Tigua ani waramigola iba dalu puyabubi mbira ibirane nahondoleberamigoyu iba ibu minana iba uli warimigoha tolatagi kane hondoleberemi. Ani hondowa tinibi tinaga nogo bulumagabi dongibi bibahendeore iba nai holene karulape birulebirago ani bilimu laya, lene. <sup>18</sup> Ani lowa Elaisahanda laabo halu lalu, Tí iba nalimulo ngulenego Anduane Homogohanda bulene ogoni taibi ndo emene hangudane hendeda. Anidane handalu ibugua tihondo timbuni mbira bule ngeleda. Tí Moabaliru baba wai beremingi tigua bama podama anda pialu <sup>19</sup> tinaga tano ege pabe hongoheme bu mabu bini ngaru karulalimulo ngulebira. Ani biragola tinaga ira bayale hengedaru dibai halu iba hambiaga uli ngaru bibahende mogo biai holeberemi. Tinaga tomo hangaga mabu ngaruha ege tole dugu payapaya bidamigola mani tini tomo hangabe nahe wulebira, laya lalu Elaisahanda lene. Elaisahanda bi uruni lai haya handala kini tebirali biarume ibu helalu pene.

<sup>20</sup> Horo mendengi egerebagiore gao lalu wá hayagola horo ogoni egerebaginaga loma binigo bo delolene tu hayagola Idomo dindihayagi howa iba ibalu dindi wiago biru tólai heneyane hendene.

<sup>21</sup> Moaba wali agali biaru ti hale halu hemiria kini tebirame ti baba wai bule ibira layane hale halu agali maru ami howa wai bibehe damene wahebi igiri daliahebi bibahende hearu olo ngoai hene. Ani íbu ngoai heagola bibahendeore tidiyalu pialu amu Moaba Idomola dindi tubaria wiagoria wai bule manda manda bu hene. <sup>22</sup> Horo ogoningi Anduane Homogohanda Isaraeali biaru heagoha iba ibilayangi dege Moabali biaru ti egerebagiore gao layagola heyini. Ani heyuwa handa amu halu hemiria ni tagira ibiyagome iba biagoria daba hayagola iba biago daramabi agali darama ale wiago Moabali biaru ti kaundiaha howa hendene. <sup>23</sup> Ani hondowa tigua ga lowa lalu, De handadaba-o ogoni daramaoredago waitigi tebiralime tini бага бага bialu agali dewaore bo homelayagola uruninaga darama wiaruabe tobanedago. Ai gerai lalu tinaga balai anda bu kagoha dabudabu ngelo waholebirago abale mo ma nalarami, lene.

<sup>24</sup> Ani lalu puwa anda pialu hemiria Isaraele ami biarume wai hongo howa bialu Moaba tininaga dindiha bo podama pialu Moabali dewaore bo hana haga bialu <sup>25</sup> tinaga tano wiaruni bo giala hole bialu mo wai labu helene. Ani bialu ai Isaraele ami agali biaru tigua Moaba dindi wiaruni bibahendeha pialu piai hene. Puwa mabu bayale mbira ngane handa walía hayagua ami agali bibahendeme ege tólē dugualu mabuha ba anda halu mabu lone hangabe nahe ege tólēme wua tóladaga helaga bima pene. Ani bialu ira lini daga bayale hearuni dibai halu iba hambiaga uli wiarunibi dindi alumogo bigi bima pene. Tigua ani bima pialu tano bibahende bo giallo wahai hene. Moabalinaga tano timbuni mbiraore mini Kiheresi winigo dege mo ko nahe bayale wiaabo hene. Ani wiagola ami agali marume ege tólē pume yuwa bo pelalu wai biaga mugube hearume tano ogoninaga ege pabe neneni biruwa ege tólē puni yuwa tanoha ba anda haga bini.

<sup>26</sup> Ani biyago hondowa Moabanaga kini biago ibugua manda bu handalu hearia wai bibe nahe tigua ibu bo poda hana habeheyane hendene. Ani handalu ai ibunaga ami agali hongo howa ayu tibume wai biagaru handari karia (700) bibahende haru halu Idomonaga kini biago heagoha tininaga tano yu wahalu ibida pole manda bialu hariabi nakarulapeyane hendene. <sup>27</sup> Ani hondowa Moabanaga kini biago ibugua ibu igini wahene mani ibuni homaragola kini ho aribia holene mbira heago kini ibunime bene. Bowa Moaba wali agalinaga dama mitangi bialu gime wabini wiagohondo bo loma buwa irani dai helo tanonaga ege pabe nene heagoria bo delene. Anidagua biyago hondowa Isaraeali hearu ti gi hai howa wai nabi wahalu tini dalu dai biai hene.

## 4

### *Elaisahanda wali dalo mbira biamogo binigo ogo*

<sup>1</sup> Horo mbirungi Anduane Homogonaga bi mana latagi haga agali mbira homenego ibu one dalo Elaisa hearia ibini. Ibuwa ibugua Elaisahondo lamialu lalu, Agali haguane-o í agalini homaya. Ibu Anduane Homogo andaneha haabo haga hayagoni í manda bu kego. Ai ibu agali mbirala dano ho howa heneyago nde ina agali ogoni ibunaga dano ho halu homayadagoni hongolene muni nawiore bedogoni. Ani berewagola agali ogoni ibunaga dano henedagonaga í igini kirali kago ogoni labo ibunaga garabaya biabe ale bia halu helo dano hangalu ogoni labo minu ngi laya, lene.

<sup>2</sup> Ani layago hale howa Elaisa ibugua wali biagohondo lalu, Ina í agua biamogo buliyadabe. Í andagaha mbirale agi dege ngebe, lalu hale hene. Ani hale hayagola wali biagome ladai bialu lalu, I andagaha mbirale mbira nawiore. Be emene mbiraha olibe lininaga weli emene dege mbira berelo ngeledo, lene.



<sup>3</sup> Ani layago hale howa Elaisahanda wali biagohondo lalu, Áyu ogoni pialu ínaga nenege bu karuhondo iba be timbunibi emenebi ta nabi dewaore ngadagua ngi laga bule pu. Ngigi biragola ína iba be uruni mo mogo bialu íni andaga tamuha mo yalu pu ngelabe. <sup>4</sup> Ani bialu íbi í iginí labobi tí anda tamuha pialu panga payatagi habe. Ani buwa ínibi í iginíbi tí haru biruwa olibe lini weli emene wiaruagoni iba be uruniha odo berelaga bilimu. Iba be mbiragoha tolaragola mendegoha odo berelaga bialu be bibahendeha berelaiore halimu, lene.

<sup>5</sup> Bi ogonidagua layago hale howa wali biago ibu pialuibunaga nenege kaware bu hearuhondo iba be ngidaba laga buwa ibuni andagaha mo yalu pene. Mo yu pialu ibu iginí biago labo heba anda tamuha mandagi anda puwa panga payatagi hene. Payatagiho biruwa iginí biago labome iba be mo yu ibugu biyagola libu aiyahanda iba be ala wini biagoha howa olibe lini weli be maruha odo berelaga bialu be wiaru bibahende biru tolai helene. <sup>6</sup> Ai odo tolai howa wali biagome lalu, Be mende mo yalu íbu, lene. Ani layagola iginí biago labome ladai bialu lalu, Aiyá-o be mende nawi bibahendeore tolai hayagoni ndobe, lene. Ani layaore olibe lini weli be biagoha bereago iba be maruha lone hambulene nakarulape emene ala birayago hangu berene. <sup>7</sup> Ani hambu tolai ho ngelalu wali biago ibugua Anduane Homogonaga bi mana latagi haga Elaisa hearia puwa ibuhondo hale halu lalu, Ai olibe lini weli beha odo yobu wiai ko, lalu Elaisa lamini. Ani lamiyagola Elaisahanda wali biagohondo lalu, Ai dai buwa olibe lini weli uruni yalu puwa muni mibe. Muni mialu í agalininaga dano henedagoni hangalu muni maru ibira holebirago íbi í iginí biago labobi tíni tomo mulene ngelalimu, lene.

*Suneme tano wali mbirame Elaisa handaya ho henego ogo*

<sup>8</sup> Horo mbirungi hayagola Elaisa ibu Suneme tano pene. Homogo wali mbira muni mbiraleru dewawi Suneme tano ogoniha berene. Wali ogoni ibugua Elaisa ibu andaga tomo namiya íbu lene. Ani bigi biaga henego horo bibahendengi Elaisa ibu Suneme tano pialu ibu tomo wali ogoni andaga nole pugu biaga hene. <sup>9</sup> Horo mbirungi wali ogonime íbu agalini lamialu lalu, Agali ina andaga tomo nole ibiraligoni ibu agali loma bini mbira howa ibu Ngode Datagaliwabenaga bi mana latagi haga heneneore heneyane handaru. <sup>10</sup> Ai ibu ani ibugu bialu palelo ibunaga tamu hobane mbira daligaha bu manda mandabu helamiya. Ani bialu tamu ogoniha paluene dagiabi birulene dagiabi dagia tebolobi mo ngelowa lamu halebi mo ngelamiya hameledo. Agali ogoni ibu ibirangi tamu hobane ogoniha ibalu bira palia bilo, lene. Ani lowa tigua tamu hobane ogoni manda mandabu helene.

<sup>11</sup> Horo mbirungi Elaisa ibu Suneme dindi ibalu ibunaga anda hobane manda mandabu helene biagoha erekui dogolalu dagia bia heagoria emene palene. <sup>12</sup> Ibu ani paluwa ibunaga biabe biaga agali mbira mini Gehasi henego ibuhondo lalu, Unu dindiha dalialu puwa wali ínaga anda tamu bia halu hayadago ína íbu layago pu lole pu, lene. Ani laya handala Gehasi ibugua pialu wali biago lamibe layadagua lamiyagola wali biago ibu abale ibuwa harabani handa andaho hene. <sup>13</sup> Ani íbu heagola Elaisa ibugua Gehasihondo lalu, Ína wali ogoni karia puwa ogodagua labe. Ína biabe ndelahe bialu iyanaga anda hobane mbira manda mandabu helaridagonaga emena Elaisa ibugua kini lamilo hame ledebe be ami haru haga haguane kagohondo mbirale bayale mbira ínaga bia habe lalu lamilo hame ledebe. Be agiore bulubaya hame ledebe lalu hale hole pu, lene.

Ani laya handala Gehasi ibugua pialu lamibe layadagua lamiyagola wali biago ibugua ladai bialu lalu, I damene dewaorehe biruwa íha mbirale mbira buru palia nabi bedogoni, lene.

<sup>14</sup> O ladai binidaruni Gehasi ibugua Elaisa lamiai hayagola Elaisa ibugua Gehasihondo hale halu lalu, Anidago nde ibugua iyahondo mana bayale biyagonaga agi bibehedabe, lene.

Ani hale hayagola Gehasi ibugua ladai bialu lalu, Ibu waneigini mbira nahe biruwa ibu agalini agali waheore hayiya, lene.

<sup>15</sup> Ani layagola Elaisa ibugua Gehasihondo lalu, Wali biago ibilo lamule pu layagola Gehasi ibugua wali biago hondo pialu haru ibiyagola li harabani ibu hene. <sup>16</sup> Ani ibu heagola Elaisahanda ibuhondo lamialu lalu, Mali edegonaga ege áyu kamago aleni ina igiri mbira taba honowa ininaga gini tabayu birulebere, lene.✧

Ani layagola wali biago ibugua ladai bialu lalu, Ai inaga agali haguaneore-o í Ngode Datagaliwabenaga agali heneneore kegonigo ihondo keore holeni nahabe, lene.

<sup>17</sup> Anigo mani emene howa wali biago ibu tombeha gali bere berene. Ani biruwa mali mendegonaga horo Elaisahanda ogongiore lalu wali biago ibugua igiri mbira taba yu birulebere layadagua heneneore taba yu berene.

<sup>18</sup> Ainde igiri biago ibu emene anda halu wahe ale howa horo mbirungi ibu aba mabuha hearia hondo pene. Horo ogoni widi gandulo wulenengigo ai ibu aba mabuha ibunaga biabe biahaga agali hearu baba hene. <sup>19</sup> Ai igiri emene biago ibu agali biabe bialu hearu handayaho henego abaleore ibu aba olowa lalu, Aba-o inaga haguane tandaga timbuniore bida. Inaga haguane tandaga timbuniore bida, laabo hene.

Ani layago hale howa igiri aba biagome agali mbira ibunaga biabe biaga ona heagohondo lamialu lalu, Igiri ogo ibu aiya bedaria minu yalu pu, lene. <sup>20</sup> Ani laya handala igiri ibu aiya berearia minu yalu dai biyagola ibu aiya bani paliaho wiaabo halu horombe hanuniore hayagola igiri emene biagoni homene. <sup>21</sup> Homayagola ibu aiyahanda homene tingini tamu hobane daligaha yu irigi howa Elaisanaga dagia wiagoria mo ngelene. Ani ngelowa panga payaanda halu aiya ibu tagira pene. <sup>22</sup> Puwa ibu agalini olalu ibu lowa lalu, Biabe biaga karuni aria mbirame nogo dongi í koría áyu ogoni haru pu lolo pu. Ina Anduane Homogonaga bi mana latagi haga agali biago hondo pialu abale dai bule poleberogo, lene.

<sup>23</sup> Ani layagola ibu agalini biagome lalu, Irane aginaga áyu dege abale polebere. Sabada horonagabi horo timbu mbira Ege Ngabulo holebiragonaga tomo nolenebi tagira ibirago áyu ndogo hondo pole larigo irane aginagabe, lene. Ani layagola wali biago ibugua ladai bialu lalu, Uruni waha. I áyuore poleberogo í hendore harene, lene.

<sup>24</sup> Ani leagola biabe biaga agali biagome nogo dongini biragane ale mo paga hayagola wali biago ibu dongini iragaho biruwa biabe biaga agali biagohondo lalu, Iya hariga pialu howa dongi mo daila habe. Ina dongi hendore pelo manda biruyagua nde ihondo langulebero, lene. <sup>25</sup> Ani lalu wali biagobi biabe biahaga agali biagobi Hari Kamelo heagoha Anduane Homogonaga bi mana latagi haga Elaisa hearia pole pene.

Libu wene kaundiani ibalu hebiria Elaisa ibugua libu ala hondowa ibunaga biabe biaga agali Gehasihondo lalu, Suneme wali biago amu ibirago handa. <sup>26</sup> Ina abale gerai lalu lola hole puwa ibu agalinibi ibu iginibi bayale dege kama larabe hondole hale hole pu, lene. Ani laya handala Gehasi ibugua abale lola hole puwa wali biagohondo hale hayagola wali ibugua ladai bialu lalu, Ina bayale karulapeore kama, lene.

<sup>27</sup> Ani lalu ibuwa dege Hari Kamelo nenení Elaisa heagoria ibuwa Elaisanaga ge dulini yani howa yu bulu palene. Ani biyago Gehasi ibu hondowa ibugua wali biago hele pelole bialu hearia Elaisa ibugua ibuhondo lalu. Ibuha genda timbuniore mbira wiyagola biradalo manda bidogo ibu ani bilo waha. Anigo Anduane Homogohanda wali ogo ibuha genda ogoale mbira nga lalu í nalangigo, lene.

<sup>28</sup> Ani layagola wali biago ibugua lalu, Agali haguane-o ina ihondo mbirale mbira ngi lalu hale nahe. Ina bi larigome Ngode Datagaliwabehanda igiri ogoni ngiya. Anigo ihondo keore nahabe larugoni, lene.

<sup>29</sup> Ani layago Elaisa ibu hale howa ibugua Gehasihondo lalu, Inaga aga gambalibu tubagi halu áyu ogoni inaga halimbu o ngago mo yalu abale Suneme tano pole pu. Pialu

keria mbirali harigani lola hayagua uruni baba te nale puabo habe. Marume ihondo agali-o hondoha layaguabi ina tihondo ladai nabi pialu wali ogo andaga puabo habe. Ani pialu inaga halimbu ogo igiri emene biagonaga wanakuini dambi habe, lene.

<sup>30</sup> Ani layago hale howa igiri aija biago ibugua mandabu handalu hearia Elaisa napole biayuane manda buwa ibugua Elaisahondo lalu, Anduane Homogo haluhe kagonaga minini howa ina í yu wahalu napoleorebero, lene. Ani layago hale lalu Elaisa ibu heyalu Suneme wali biago heba pole pene. <sup>31</sup> Gehasi ibu abale bamba lalu piyago puwa Elaisahanda bibe layadagua halimbu biago igiri biagonaga wanakuiha wia dambi hayagola mbirale mbira bia nabi wiadagua wiaabo hene. Ani biya handala Gehasi ibu dai bini. Ani dai bialu hearia wali biago Elaisala ibalu hebiria lola howa ibugua libuhondo lalu, Igiri biago o bibe lalu langirigodagua birugola dabi lalu heya nabiya, lene.

<sup>32</sup> Elaisa ibu ibalu ibuninaga paliaga tamu hobane biagoha handa anda lalu hearia igiri biago tongolo miniyago ibu paliaga dagia biago wiaria hendene. <sup>33</sup> Ani wiago handalu tamu hobaneha anda puwa panga paya tagiho biruwa Anduane Homogohondo bi lene. <sup>34</sup> Bi lalu dagiani iraga howa igiri homene wiagoria ge duli hanga ho biruwa igiri wiagoria palia paga howa ibunaga denguibi nebi gibi igiri biagonaga denguibi nebi gibi wiagoria pali dambi hai hene. Elaisa ibugua anidagua biyagola igiri biagonaga tingini poboyogo emene bini. ✧ <sup>35</sup> Ani biya handala Elaisa ibu heyalu anda tamu biagoha emene ibagabu hene. Ani ibagabu lalu lone dai buwa igiri biagoria lone palia paga hene. Ani biyagola igiri homo tongolo mini biagome kiame kahalu balu de ngala hene. <sup>36</sup> Anidagua biyagola Elaisa ibugua Gehasi olalu ibu lowa lalu, Ina áyu ogoni puwa igiri ogo aija ibu lole pu, lene. Ani laya handala Gehasi ibugua pialu igiri aija lamiyagola wali biago ibu abale anda hobane daliga biagoha iraga lalu tamuha anda pene. Ani biyagola Elaisahanda ibuhondo lalu, Ai í igini minu yalu pu, lene. <sup>37</sup> Ani layagola wali biago ibugua kaware ibuwa Elaisanaga geha duli hanga ho biruwa bulu palialu Elaisanaga mini yaraga hene. Ani bialu ibu igini minu yalu pene.

### *Elaisahanda tomo mo bayale henego ogo*

<sup>38</sup> Horo mbiru Isaraele dindiha gaea timbuni bialu hina gari timbuni pene. Ogoningi Elaisa ibuni dalu dai buwa ibu Giligala tanoni hene. Ani howa ibugua igiri daliahe Anduane Homogonaga bi mana latagi haga maru lawai lalu hene. Ani lawai lalu howa ibugua ibunaga biabe biahaga agali mbira heagohondo lamialu lalu, Todobene timbuni ngagoha tomo subuore igiri uruni heba namiya dawabe, lene. <sup>39</sup> Ani lamiyagola Anduane Homogonaga bi mana latagi haga igiri biaru aria mbirame irabuha nema maru subu heba dawale tayabu pene. Ani pialu hearia bambo ale minana anda hene maru dearia handa walia howa ogoni tomo nolene bayalebe toba hene. Ani buwa ibugua bambo ale uruni aria dewaore nendebu dowa ibunaga labolabo tolowa do yini. Ani do yalu dai buwa podabaga buwa subu dawegoha dege mandagi biamaga howa dawene. <sup>40</sup> Subu dai heagola Anduane Homogonaga bi mana latagi haga igiri biaru nelu tinaga beledini dugu ta hene. Dugu ta hayagola igiri biaru tigua nalu hemiria kau biyagola tigua Elaisahondo lalu, Anduane Homogonaga bi mana latagi haga-o tomo subu ogo kaubi tomia aledago ina homoligo nanoleberema, lene. Ani lowa tigua tomo biago nolene manga hai hene. <sup>41</sup> Ani layagola Elaisahanda tihondo lalu, Balawa maru widime wabini wiagua mo yalu ibidaba, lene. Tigua mo yalu ibiyagola Elaisahanda todobene be subu bereagoha ibira hene. Ani ibira howa ibugua biabe biahaga agali biagohondo lalu, Ai Anduane Homogonaga bi mana latagi haga igiri biaru nelu beledini dugu ta habe, lene. Ani layadagua dugu ta hayagola nalu hemiria subu biago kau nabi bayale dendebiyagola nene.

✧ 4:34: 1 Kin 17.21

*Elaisahanda agali handari mbira (100) tomo karulape nelo minigo ogo*

<sup>42</sup> Horo mbirungi Balasalisa dindi howa agali mbira Elaisa hearia ibini. Horo ogonongi mabuha bali widiru boga biyagola gandulo wulenengi hene. Ani binigo ai agali Elaisa berearia ibiyadago ibugua bali pigane gandu layago mberedi emene m̄l̄m̄l̄l̄le hirini uruni pira kirabi (20) hanalu widi pigane gandu layadago aria marubi hanalu ibuwa Elaisahondo mini. Ani miyagola Elaisahanda ibunaga biabe biahaga biagohondo lalu, Tomo uruni Anduane Homogonaga bi mana latagi haga igiri o karuni nelo talebu mibe, lene. <sup>43</sup> Ani layagola biabe biahaga biagome lalu, Tomo ogoni emenekodago igiri daliha handari mbira (100) o karuni agua no karulo polobadabe, lene.

Ani layagola Elaisahanda ladai bialu lalu, Tale bialu mia dege bia. Irane Anduane Homogohanda lalu, Tí no karulape halu ibira hene maru wulebira layago mibe, lene. <sup>44</sup> Ani layagola biabe biahaga agali biago ibugua Anduane Homogonaga bi mana latagi haga biaru nelo mo miyagola ti nene. Nayagola Anduane Homogohanda bulebira layadagua ti nalu karula piyagola maru ibira hene.

## 5

*Naimana mo dabi henego ogo*

<sup>1</sup> Naimana ibu Sirianaga ami haru haga agali haguane hene. Anduane Homogohanda Naimana biamogo biyagola ibugua ami bu hearu haru halu bamba howa ibunaga waitigi hearu baba wai bialu ibugua bo hana haga biyagola Siria dindiha kini heagome ibu gubalini timbuni haga hene. Naimana ibu ami agali bayaleore henegoyu ibu tinginiha ge hamuabi hene. <sup>2</sup> Horo mbirungi Siriali tigua Isaraele dindiha wai bule puwa Isaraele wandari mbira berearia ti minu yu dai bini. Ani biyagola wandari ogoni ibu Naimana onenaga biabe bia haga berelene. <sup>3</sup> Mani howa Isaraele wandari ogoni ibugua Naimana onehondo lalu, Samaria dindini Anduane Homogonaga bi mana latagi haga agali mbira kago ogoni ibugua ge hamua bidagoni mo dabi holebirago í agalini ibu agali ogoni karia piyagua nde karulapeda, lene. <sup>4</sup> Naimana ibugua bi ogoni layago hale howa ibu kini berearia puwa Isaraele wandari biagome bi leneyago kinihondo lamini. <sup>5</sup> Bi ogoni lamiyago hale howa kini ibugua lalu, Ina Isaraelenaga kini kagonaga beba mbira gilibu wia holiya ina mo yalu puwa mibelo, lene. Ani lalu kini ibugua beba gili bialu Naimanahondo mini. Ani biyagola Naimana ibugua muni kina ale siliba daosini dege handari pira tebira (300,000) mo yalu muni ngolo genda magi kilogarama daosini pira waragaria (60,000) mo yalu aga baya tara tara wiaru aria pira mo ya bialu Samaria pole pene.

<sup>6</sup> Pialu Naimana ibugua Sirianaga kini biagome Isaraelenaga kini heagonaga bi bebani gilibu wia hayago yalu puwa ibunihondo mini. Beba gilibu wia henedagoni ibugua bi ogobi gilibu wini. Bi o gilibu wia harogo irane inaga ami haru haga agali haguane Naimana ogo ibuha ge hamua biyadago ina mo dabi habe lalu gilibu wia haro, lene.

<sup>7</sup> Ani layiyago Isaraelenaga kini biago ibu handalu ibunaga bu miniha mogo lalu genda yu kogoni lowa walia halu ibuninaga aga biaga bu heago hanuni lerelaki hene. Ani buwa ibugua lalu, Agali ibuni Sirianaga kini kagome irane aginaga ihondo ibunaga agali ogoha warago ngago mo dabi habe lalu lawia hayadabe. Ibugua mandabu handalu hearia í Ngode Datagaliwabe howa ina agali bayale helo mo bayale holene hongo yu halu maru home lolenenaga hongobi yu kabe toba hayadabe be agua layada. Ibugua bi o layadagoni ila wai biba lolenaga hariga hangu biyadane hendedo, lene.

<sup>8</sup> Ani biyagola Ngode Datagaliwabenaga bi mana latagi hagane agali Elaisa ibu hale halu hearia kini ibu bu miniha mogo lalu genda howa ibunaga aga biaru lerelo ngelowa beda layane hale hene. Ani hale howa Elaisa ibugua kinihondo lawia halu lalu, Irane

☆ 5:1: Lg 4.27

aginaga ina agaru minu budalu genda yu bedebe. Ina Ngode Datagaliwabenaga bi mana latagi haga agali mbiraore hangu Isaraele dindiha ka lalu ibu mo walia holiya i kororia abale pu labe, lalu lawia hene.

<sup>9</sup> Ani lawia hayago hale howa kini ibugua Naimana lamiyagola Naimana ibunaga garo ale karisi biagoria biralu pene. Nogo hosini garo ale karisi gililo yalu ti abale pialu Elaisa andaga haraba wiagoria pu hene. <sup>10</sup> Ani pu heagola Elaisa ibugua ibunaga biabe biahaga agali mbira heagohondo Naimana hearia lama pelo bi ogodagua lamini. Iba Yodanaha wayawaya kahalulu bole pu. Ani beregola inaga warago bayadago dabi halu tinginibi bayale holebira lamibe, laya handala agali biago ibugua puwa Naimana lamini. <sup>11</sup> Ani lamiyagola Naimana ibu hale howa ibugua keba timbuni howa Elaisa andaga yu wahalu pole tagira pialu howa lalu, Ainde Elaisa ibugua ihondo tagira ibuwa ibunaga Anduane Homogohondo inaga bi la halu ai inaga tingini mo ko haga bidarunaga gi gamuru bigi bialu i mo dabi holobadalo manda birugo. Ai anidagua bule ndoda. <sup>12</sup> Ibugua ihondo Yodana ibaha wayawaya bole pu laya. Anidago Damasagasaha iba Abana poragobi iba Paba poragobi iba ogoni labo Isaraele dindiha iba Yodana ale ndo iba gagahe baya taraore poragodago. Ibane i mo dabi holene wiagua nde ini dindiha howa iba bayale kira ogoni laboha inaga warago mo dabi helo wayawaya bialu holene wiago ibiruda, lene. Naimana ibugua bi ogonidagua lalu keba halu tandaga hama pene.

<sup>13</sup> Ani piyagola agali ibunaga biabe biahaga haru hayarume ibuni heagoria kaware hapara howa ibuhondo lalu, Agali haguane-o Ngode Datagaliwabenaga bi mana latagi haga biago ibugua ina biabe timbuni mbira bibelo mo ngidale nde harugo laga bialu biaore bideledalo manda bidama. Anigo ibugua i biabe timbuni mbira bibelo mo ngia ndo bame wayawaya hangulu bole pu layagoni ndobe. Ai ibugua bibe lalu langiyago bulene karulape, lene. <sup>14</sup> Tigua bi ogonidagua lamiyago hale halu harugo lowa ainde Yodanaha wayawaya kahalulu babe lalu Elaisa ibugua layadagua kahalulu bayagola ibunaga tingini ge hamua biago ereba hai halu dabi hene. Ani biyagola ibunaga tingini baya dege lalu waneigini galinaga tingini baya kaligobi hearia hendene. <sup>15</sup> Ani handalu ibunaga haru ibiyaru heba Ngode Datagaliwabenaga bi mana latagi haga Elaisa biago hearia lone dai bini. Dai buwa Naimana ibugua Elaisa lamialu lalu, Ngode Datagaliwabe mende mbira dindi bibahendehe naheoreyane hendedo. Isaraele wali agali tinaga Ngode Datagaliwabe kago ibu dege dindi bibahendenaga ibu hangulu henedane handa walia ko. Ani bidogo ai inaga agali haguane Elaisa i mbirale maru i mo turu halu ngulebero, lene.

<sup>16</sup> Ani layagola Elaisa ibugua ladai bialu lalu, Ndo. I Anduane Homogo haluhe kagonaga biabe biaga howa ibunaga minini howa heneneore larogo ina mbirale ngulebereru aria mbiraore hangubi mbira mo ya nabulebero, lene.

Ani layagola Naimana ibugua hongooore howa Elaisahondo mbirale uruni mo ya layagolabi Elaisa ibu ndo lowa nayuleore lalu wahene. <sup>17</sup> Ani biyagola Naimana ibugua lalu, Ina ihondo mbirale mo turu halu ngulebiruruni nayuleyagua nde waha. Anigo Isaraele dindiha dindi ngaru aria maru inaga nogo dongi kira karulape dugu yulene hame ledogo. Ainde ina karulape lariyagua dugu yuliya. Dindi ogoni i daluha dugu yu pu ngelowa Anduane Homogo kagonaga loma biniru bo delolene dabu mbira bia holebero. Ani bu helowa ina Anduane Homogo ibuni hangunagaore loma biniru bo delai halubi loma marubi bo mialu holebero. Dama mitangi bialu gime wabiniruhondo loma nabo deloleberogo. <sup>18</sup> Ai inaga genda yu henedaru ina manda biai haregola ina ko bialu harodaruni Anduane Homogohanda domo wahai helo lamulene hamelo kogoni. Inaga kini ibu dama mitangi bialu gime wabini mini Limonohondo bi pupu wule poragola i ibu heba mandagi holeneore nga. Iya haru mandagi andaha anda puwa kini ibugua inaga gini yaniaho yalu anda piaga. Anda pialu howa ibugua mbirale dama



mitangi bialu gime wabini Limono ogoninaga mini yaraga halu ge duli hanga haragola inabi nde ibugua birago talialu bamenaga ani dege bialu holebero. Ainde ina ogoni buleberodago Anduane Homogohanda domo wahelo laro, lene.

<sup>19</sup> Ani layagola Elaisahanda ibu lamialu lalu, í bu miniha genda nahe mo palia holene íha karulalu pamia, lene. Ani laya handala Elaisa helalu Naimana ibu ibuni dalu dai bini.

<sup>20</sup> Ani dai bialu kaundia nape wene dege pialu hearia Elaisanaga biabe biahaga agali Gehasi biago ibugua ibuni hangu lo mitangi bialu lalu, Inaga agali haguane ibugua mbirale Naimanahanda miyaru mbira mo ya nabi wahalu yu dai bilo wahayago aginagada. Anduane Homogo haluhe kagonaga minini howa ina henene buleorego laro. Ina áyu Naimana piyadagua talima pialu mbirale yiaru aria maru mo yu dai buliya, lene. <sup>21</sup> Ani lalu abaleore Naimana piyadagua talima pene. Naimana ibugua handa dai bialu hearia agali mbira gerai lalu ibu piyadagua talima ibiyane handalu nogo hosime gili laga karisi biagoria howa dalipe halu emene hondo hene. Ani hondo hearia Gehasi gerai lalu ibu heagoria ibini. Ani ibiyagola Naimanahanda ibuhondo lalu, Mbirale mbira agi biya handalu ibiribe, lene.

<sup>22</sup> Ani hale hayagola Gehasi ibugua ladai bialu lalu, Mbirale mbira nabi bayale kamago bi mbira dege inaga agali haguane ibugua au laya. Anduane Homogonaga bi mana latagi haga agali kirali ibu andaga íbu bedago. Agali kirali ogoni libu Ngode Datagaliwabenaga bi mana latagi haga maru Eberaimi dindiha hari nene wiaruha hearu aria ibiyagola ai siliba nu mbira aga kira lowa agali ogonilabo muliya ngibe laya, lene. <sup>23</sup> Ani layagola Naimana ibugua ladai bialu, Nu mbira hangume agua bule ndodago harugo nu kira mo ya, lene. Gehasihondo hongo howa mo ya lalu hongo hayagola nde Gehasi ibugua, Ogoni karulape, lene. Karulape layagola Naimana ibugua siliba nu kiraha muni kina ale daosini pira waragaria (60,000) talebu henela hene. Agabi nde baya taraore kira mialu buwa agali Naimana ibunaga biabe biahaga kiralime Gehasi ibu maha ibilo, Libu bamba halu Elaisa andaga yalu pole pudaba, lene. <sup>24</sup> Pialu ti Samaria dindiha hari nene wiagoria iraga halu Gehasi ibugua siliba nu kira biago labobi aga kira biago labobi yamialu Elaisa andaga mo yalu anda pene. Ani bialu agali biabe biahaga kirali biagolabo, Naimana hearia dai bidaba, lene. <sup>25</sup> Agali biago labo peaha Gehasi ibu lone andaga tamuha anda pialu hearia Elaisahanda ibuhondo hale halu lalu, Gehasi-o í agoha pialu eberebe, lene.

Ani layagola Gehasi ibugua ladai bialu lalu, Agali haguane-o í mbiraha nape heneko ko, lene.

<sup>26</sup> Ani layagola Elaisahanda ibuhondo lalu, í ke nahe waha. Ina manda beregola ina í nahende kobe toba kebe be. Inaga dinini ibu í heba mandagi haribigoni howa ibugua agali karisi biagoria berenego dalialu harigani í lola hole daliyagoni handarugo ndobe. Gehasi-o horo áyu muni mo yu kegonime aga yolo buleneru ira olibe gama ngaru yolo buleneru gerebi gama yolo buleneru nogo sibi bulumagaru yolo buleneru wandari igiri biabe biahaga helo yolo bulenerubi bibahende nakarulapeore kegoni ndobe. <sup>27</sup> Anigo áyu Naimananaga muni mbiraleru mo yu kegoni. Anidagua biridagome Naimanaha ge hamua biyagoni íha bulebira. Ani bialu inaga waneigini damene mani hama polebirarubi bibahende ha ge hamua biai halu biaabo holebira, lene.

Ani layagola Gehasi ibu Elaisa andaga yu wahalu tagira piyagola ibunaga tingini pagaya bialu pagabua bugimbu biai halu ge hamua bini.

## 6

### *Ayu golo wahenego Elaisa ibugua handa walia henego ogo*

<sup>1</sup> Horo mbirungi Anduane Homogonaga bi mana latagi haga agali maru Elaisa ibugua haru haga heneru tigua ibuhondo lalu, Anda ogoha ina bibahende paliai habe nahe

emeneoredago <sup>2</sup> ai ina bibahende paliai holene anda timbuni bimija ina Yodana iba angeha pialu ira dibule poramabe lalu, hale hene.

Ani layagola Elaisa ibugua tihondo lalu, Karulapego ani bule pudaba, lene. <sup>3</sup> Ani layagola agali mbirago ibugua Elaisahondo hale lalu, Inanaga agali haguane-o harugo ibi nde ina haru ma, lene. Elaisa ibugua ladai bialu, E ina haru ma, lene. <sup>4</sup> Ani lalu ti haru mandagi puwa Yodana iba ange wiagoha ira hearu dibalu hene. <sup>5</sup> Ti ira dibalu hemiria Anduane Homogonaga bi mana latagi haga agali mbira heagonaga ayu ibaha golo ibira hene. Agali ogoni ibunaga ayu mibe naheyagola ibugua lalu, Inaga agali haguane-o ayu ogoni inaga ndo agali mendealinaga mo yalu ibinigo ai ibaha golo wahayagoni, lene.

<sup>6</sup> Elaisahanda agali biagohondo hale lalu, Ayu agoria ibira hayabe, lene.

Ani hale hayagola ibugua, Ayu ogoriaore ibira haya, lalu Elaisa mo walia hene. Ogoriaore ibira haya lalu walia hayagoria Elaisa ibugua ira magane mbira podowa ayu ibira hayadagoria bape hene. Ani biyagola ayu biago ibame yaraga hene. <sup>7</sup> Ani biyagola Elaisa ibugua agali biagohondo lalu, Ina ayu biago yamialu mo ya, lene. Ani lamiyagola agali biago ibugua gi dogoladali lalu ayu biago yamini.

### *Elaisahanda Sirialiru mo hondo henego ogo*

<sup>8</sup> Sirianaga kini heagome ibunaga ami agaliru haru lalu Isaraeleali baba wai bule ibini. Ani ibalu howa kini ibugua ibunaga ami biaruhondo lalu, Balai anda ogoriaore bimija, lalu lamini. <sup>9</sup> Balai anda ogoriaore bulubada lalu Elaisa ibugua manda bu bamba howa Isaraelenaga kini heago ala lamialu lalu, Isaraele wali agali bu kamiru ti dindi ogoniha kaware napilimu. Pialu kamiria Siriali karume ti bo waholigo napilimu, lalu kini lamini. <sup>10</sup> Ani lamiyagola kini ibugua hale howa ibunaga ami agali hearuhondo lalu, Siriali ti anda bulenedagoria ti ala pudaba, lene. Siriali biaru ti ibuwa handalu hemiria Isaraele ami biaru ala ibu heagola ti anda bule manda biyago nabibeheyane handalu ti wahalu pene. Horo bibahendengi dindi ti balai anda bule manda biyagoria ani dege bini.

<sup>11</sup> Ani dege biyagola Sirianaga kini biago ibu mini dege dindiho hene. Ani howa ibunaga ami haru haga haguane hearu bibahende olalu ibidaba lowa tihondo hale lalu lalu, Ti kamiruni aria mbirali ai ina Isaraelenaga kini biamogo bialu kamibe, lene.

<sup>12</sup> Ani hale hayagola ami haru haga haguane mbira heagome ladai bialu lalu, Kini-o mbirale ogoni ina kamaru ariame ndo berema. Mbirale o bialu kagoni Isaraele dindini Anduane Homogonaga bi mana latagi haga Elaisa mbira kago ibugua hangu bialu ka. Mbirale iname bule parahoa ngamaruni ibugua ogoale bulebira lalu Isaraelenaga kini kago lamiaga ka. I paliaga tamu hobane ngagoha bira do howa lariyaguabi Elaisa ibu manda biai hagaore ka, lene.

<sup>13</sup> Bi ogonidagua layago kini ibu hale hai howa ibunaga ami haru haga agali haguane biaruhondo lalu, Tigua Elaisa taya bima pudaba. Mbiraha kane handa walia harimiyagua ami bu karu haru lalu ibu minule pilimulo, lene. Tigua goaria handalu hemiria Elaisa Dodana tanoha hearia hendene. <sup>14</sup> Ani handalu kini ibugua ami agali dewaore nogo hosini biralubi nogo hosime gililaga wai biagane karisini heyu howabi Dodana tano pudaba, lene. Tigua mbiraga puwa tano biago ho mabubupe hene.

<sup>15</sup> Egerebagi gao layagola Elaisanaga biabe biahaga agali mbira heago ibu tagira puwa handa tagi lalu hearia Siriali ami dewaore nogo hosini biralubi wai biagane karisini heyu howabi ibuwa tano biago ho mabubupe hearia hendene. Handalu abale andaga dai buwa Elaisa lamialu lalu, Agali haguane-o Sirialirume ibuwa ina ho mabubupe hayadago ai ina agua buledabe, lene. <sup>16</sup> Ani layagola Elaisa ibugua lalu, Gi holene nawi. Heneneore tinaga ami dewaore ibu ha ani kagonigo inanaga amiru dewaore ina mo wule ka, lene. <sup>17</sup> Ani lowa Elaisa ibugua Anduane Homogohondo bi lamialu lalu,

Anduane Homogo-o agali ogo ibugua bi áyu larugo handa walia helo ibunaga de mo ngala ha, lene. Ani layaore Anduane Homogohanda biabe biahaga agali biagonaga de mo ngala hayagola ibugua handalu hearia nogo hosibi wai biagane karisibi dewaore hari bareha Elaisa bereago ho karulape hearia hendene. Nogo hosi karisidaruni ira hungu bialuhe handalehe hearia hendene.

<sup>18</sup> Siriali biarume Elaisa minule anda ibiyagola ibugua Anduane Homogohondo lalu, Anduane Homogo-o agali o ibiraruni i nahendelo tinaga de mo aruma ha, lene. Ani layagola Anduane Homogohanda Siriali biarunaga de mo aruma hai helene. <sup>19</sup> Ani heagola Elaisa ibu heyalu Siriali biaru hearia puwa ibugua tihondo lalu, Agaliru-o tí tano pole pirimigoni ogo ndogo íbu luluya harimidago ai karulapego i porodagua maibidaba. Ina tí agali taya bima ibirimidagoni karia haru poliya, lene. Ani laya handala ti ibu piyadagua talima pialu Samaria tano haru anda pene.

<sup>20</sup> Ani haru anda pu helowa Elaisa ibugua Anduane Homogohondo, Tinaga de mo ngala ha, lalu bi layagola Siriali biarunaga dengala hai hene. Ani howa handalu hemiria ti Samaria tanoni anda pu harimayane hendene. <sup>21</sup> Israaelenaga kini biagome uruni íbu heago hondowa ibugua Elaisahondo lalu, Agali haguane-o agali uruni homelo bo wahai hoabe, lene. <sup>22</sup> Ani layagola Elaisa ibugua ladai bialu lalu, Ani nabulego ína wai hamani wai bialu howa waitigi agali minareru bo wa nahariligoni ndobe. Ani biaga harigonidago ai agali áyu o karuni naboego ína ti tomo nelu mialu tininaga kini karia daibilabe, lene. <sup>23</sup> Ani layagola Israaelenaga kini ibugua Siriali biarunaga tomo dewaore manda manda bia howa tomo ibabi karulape nelu mialu, Tininaga kini hearia Siria dai bidaba, lene. Ani binidagoni be nirayagi Sirialirume Israaele baba wai bule lone dai nabi wahene.

### *Sirialirume Samaria ho hagira biai henego ogo*

<sup>24</sup> Mali dewa peagola Sirianaga Kini Benehadada ibugua ibunaga ami hearu haru halu puwa Israaele baba wai bule Samaria tano ho hagira biai hene. <sup>25</sup> Ani biyagome Samaria tanoha tomo bu yalu anda ibabe naheyagola Samaria wali agali ti hina gari timbuni ho hene. Tomo biba halu tubagi hayagola ai nogo dongi haguane mbirago muni pira halira (80) agimame yolo bibehe wini. Agalime awa kauni ale minalu anda hagane kaubi karu genda magi emene emeneore muni siliba duriame yolo biaga hene.

<sup>26</sup> Horo mbirungi kini ibu tanonaga ege pabe biagonaga neneni ibaga bialu hearia wali mbira ibu hondowa ibugua kinihondo lalu, Inaga agali haguane-o i biamogo bia, lene. <sup>27</sup> Ani layagola ibugua ladai bialu lalu, Anduane Homogohanda i biamogo nabiyagua nde ína i água bialu biamogo buliyabe. Ina widi waini ibarubi ngelo kone i de hendedebe, lene. <sup>28</sup> Ani lowa ibugua wali biagohondo hale halu lalu, Íha genda agile wu biruwa larebe, lene. Ani layagola wali biagome ladai bialu lalu, Wali o bedago iyame bi lo mbira halu i waneigini ala bo naba ibu waneigini horo mendengi bo nabiya lariba. <sup>29</sup> Ani lowa i igini ala bo dawalu nariba. Ani nowa horo mendengi ibu igini bo dawaba lalu hewaria ibu igini mbiraha mo do hayaya, lene.\*

<sup>30</sup> Ani layago hale howa kini ibugua genda timbuni howa ibunaga aga bu heago budaki hene. Ani biyagola wali agali maru pabe gibugibu berearu ti de handalu hearia kini ibugua ibunaga aga biago andaneha aga mende dara ho howa biaga ale bia dambiho heane ti de hendene. <sup>31</sup> Ani howa kini ibugua lalu, Genda timbuni o ibiragoni tene Elaisa ibuorego ai agali ogoni homelo bo waholiya. Ibu homelo bo wanaharuyagua nde Anduane Homogohanda ini bo wahelo laro, lene. <sup>32</sup> Ani lalu ibugua, Agali mbirame Elaisa bo wahole pu, lene.

Horo ogoningi Elaisa ibu ibuni andagaha Samariali agali haguane heba berene. Agali mbira kinihanda Elaisa bo wahole pu layago ibu wene harigani ibalu heagola Elaisa ibugua agali haguane biaruhondo lamialu lalu, Inanaga kini ibu wali agali

\* 6:29: Man 28.57, Dug 4.10

homelo bo wahaga kagome áyu ibugua agali mbira inaga ma pugu wahole pu laya handala ibira. Agali ogoni ibiragola ibu tamuha naibilo panga hongo howa paya tagi ho halimu. Ani bu kamaria ibunaga kini ibuni abale ibalu erembiraha ibu kane hondoleberemi, lene. <sup>33</sup> Elaisa ibugua bi lai naheaore dege agali kinihanda pu lene biago ibalu kini ibunibi maha talima ibini. Ani ibuwa kini ibugua Elaisahondo lalu, Anduane Homogo ibunime inaha genda áyu ogoni ibilayadago. Ai ibugua ina biamogo bialu mbirale mbira bilo iname ibuha maliaho habe nahe kamagoni, lene.

## 7

<sup>1</sup> Ani layagola Elaisahanda ladai bialu lalu, Anduane Homogohanda heneneore bulebira lalu bi layago larogo hale habe. Yawi ni ogodaguaore harangi wali agalime tano pabe haraba ngagoria tagira puwa balawa bayaleore widime wabini nu mbira ale muni siliba kuni pira hangume yolo bialubi ladi ale mini bali nu kira ale muni siliba kuni pira hangume yolo bialubi mbirago bulebira, lene. <sup>2</sup> Kininaga mamage haga agali kini heba ibini heagome Elaisahanda bi layago hale howa lalu, Áyu o laregonidagua nabulebiraore. Anduane Homogo ibunime dahuliya andagaha howa tomo anda timbuni kagonaga panga dugupe halu tomo haealape hayaguabi iname muni emene ogonidaguame namuleberamaore, lene. Ani layagola Elaisa ibugua agali ogonihondo lalu, Íogoni birane handa hondoleberegoyu heneneore ina tomo uruni aria na nanolebere, lalu lamini.

### *Siria ami biaru ibida penego ogo*

<sup>3</sup> Horo ogoningi agali ge hamuabi mariali Samaria tanonaga ege pabe timbuni heagonaga panga haraba wiagoria tagirahayagi berene. Ani biruwa tini hangu laedene bialu lalu, Ina aginaga ogoria bame bialu homole birarimadabe. <sup>4</sup> Ai tomoru taya bima ma nalarami. Anigo ina Samaria tanoha tomo nawigo ogoniha anda pirimayagua ina tomo garime homaramagoni degedago. Ai harugo ina Siriali amiru balai anda bu kagoha polene karulapeda. Tigua ina bo wahayagua nde karulape dege. Anigo ina bo wanahayagua nde bayaleore, lalu hene. <sup>5</sup> Ani lalu ne layagola ti Siriali biaru balai anda bu heagoha pole pene. Puwa anda bu heagoria handalu hemiria mbirali mbira naheore <sup>6</sup> Siriali ami biaru bibahendeore ibida piai hayiyane hendene. O ibida piyadagoni irane Anduane Homogohanda alendoore hayagola Siriali biaru tigua hale helo nogo hosini agali bialu ibiragolabi hosime karisi gililo yalu ibini ale bialubi kilikulu timbuni lalu ami agali tinaga waitigi dewaore ibiradagua bilene. Ani biyago hale howa Siriali ami biarume lalu, Isaraelerume ina baba wai bilo lowa Hidinaga kinibi Iyibinaga kinibi yolo biyagola libugua libunaga ami haru halu ibiyada, lene. <sup>7</sup> Siria ami biaru tigua bi ogonidagua lalu ti abaleore ibida piai hene. Tinaga balai andabi nogo hosi dongibi bibahende ngelo wahalu tininaga mbirale mbira nayiore bibahende wia handala tini dege pora bialu ibida piai hene.

<sup>8</sup> Agali ge hamuabi mariali biaru ti balai anda mbira heagoha anda puwa handalu hemiria Siria ami biarunaga tomoru ibaru ona bu wiaria hondowa nendebu nene. Nalu ngolo silibarubi aga bayale wiarubi mo yalu puwa mbiraha mo do hene. Mo do halu dai buwa balai anda mendeha wiarubi ani dege mo yu puwa do hene. <sup>9</sup> Mani tini lo manda bialu lalu, Iname beremagoni bayale ndo beremadago. Iname áyu ogoni bayaleore mbira handa walia harimagoni wali agali lamimiya ma. Iname latagi nahe donge ho kamaria horo mende bolangua hayagua inaha ko holene wulebira. Áyu ogoni abale pialu ami haru haga agali haguane kago lamimiya ma, lene. <sup>10</sup> Ani lo manda bialu tigua mbiraga ogongiore abale Samaria tanoha dai buwa tanonaga wai pabe panga mamage haga hearu olowa tihondo lalu, Ina Siriali ami biarunaga balai anda bu hearuha puwa handalu hemaria mbirali mbira naheore. Bi mbira layuane halebi nahe dege. Siria amidaruni tini piai howa tinaga mbirale yinidaruni balai andaha wiai heane

handarima. Tinaga nogo hosi dongiru dariba haga binidaru hadape nahe bibahende dariba henedagoria handarima. Tomo damene bibahendeore balai andaha wiai hea, lene.

<sup>11</sup> Agali wai pabe mamage haga biaru tigua bi ogoni hale howa wali agali tanoha hearu ola amu howa lalu, Bi ogoni kini andaga lo yalu pudaba, lene. <sup>12</sup> Kini ibugua bi ogoni mbi dombeni hale howa ibunaga ami haru haga agali haguane heagohondo lamialu lalu, Siriali uruni tinaga miniore ina baya hanguore manda biai kogo. Ina daluha tomo nawi kamago manda bialu tigua ina tanoha howa tagira ibulebira manda bialu ani tagira eberamagola ina minalu inanaga tano karulole manda bialubi tinaga balai anda wahalu puwa dangite ngaruha bira do holebira, lene.

<sup>13</sup> Ani layagola ami haru haga haguane mbirame kinihondo lalu, Agali mbirame Siriali uruni ti agua biyadabe hondole pudaba labeheda. Ani hondole pudaba lamaru Siriali urunime bayagua nde karulape. Ina tamuha kamarubi ogonidagua dege homole kamagonidago. Agali marume hosi yu wahene karu aria duriani biralu pudaba lama, lene. <sup>14</sup> Ani layagola kini ibugua agali maru dabalulu wai biagane karisi kirani nogo hosi maru talebu mialu lalu, Siria ami uruni agua biyadabe hondole pudaba, lene. <sup>15</sup> Agali uruni ti puwa handalu hemiria Siriali ami biaru ibida piyiyane hendene. Tigua peneyadagua talima piaho wialu amuraore Yodana angeni howa handalu hemiria uruninaga agaru wai biaga ayu tibu yandareru yu wahalu piyiyane hendene. Ani biyiyago handalu dai buwa tigua ogodagua biyiya lalu kini lamiai hene. <sup>16</sup> Agali handalu dai biyarume bi layago hale howa wali agali tanoha hearume Sirialirunaga balai anda heagoha gerai lalu puwa mbirale yu wahalu pene wiaruni ti mo yai hene. Abale howa Anduane Homogohanda bulebira layadagua lola halu balawa bayale genda magi nu mbira alebi bali bayale genda magi nu kira alebi muni siliba kuni pira hangu mialu tigua migimigi bini.

<sup>17</sup> Kini ibugua ibuninaga mamage haga agali mbira biagome ami agali maru wai pabeni mamage haga hearu handayaho helo helene. Ani helayagola mamage haga agali ogoni ibugua wai pabe panga heagoria howa wali agali Siria ami biarume mbirale wahalu peneyane mo piyago handayaho hene. Ani hearia wali agali dewaore tanoha howa pabe haraba biagoha gengedatago bialu tagira pole piyarume mamage haga agali biago harabani handayaho hayago hela yahaga biyagome agali ogoni pilayagola wali agali bibahendeme hingedalu dege tagira piyagola agali o biagoni homo tongolo mini. Abale kini ibu Elaisa hondo piyangi Elaisa ibugua mbiwia halu ogonidagua bulebira layagoni heneneore lola hene. <sup>18</sup> Elaisa ibugua kinihondo lalu, Yawi ni áyu ogodagua haragola wali agali tigua tanonaga panga haraba ngagoria puwa balawa bayaleoreru genda magi nu mbira alebi bali genda magi nu kira alebi muni siliba kuni pira hangume yolo bulebira, laya. <sup>19</sup> Ani layagola kini ibuninaga mamage haga agali o biago homayadagoni ibugua Elaisahanda bi layago hale howa ladai bialu lalu, Anduane Homogohanda dahuliya andaga howa tomo anda timbuni kagonaga panga dugupe halu tomo haealape hayaguabi iname muni emene ogonidaguame namuleberamaore, lene. Ani layagola Elaisa ibugua agali ogonihondo lalu, Ina ogoni birane handa hondoleberegoyu heneneore í tomo uruni aria na nanolebere, layagoni. <sup>20</sup> Ani layago heneneore Elaisahanda bi layago lola hene. Kini ibuni mamage haga agali o biago ibu tanonaga pabe panga wiagoria handa tagiho hearia wali agali tanoha howa tagira piyarume hela yahayagola ibu pilo wiarua wali agali dewaore tagira piyarume hingedayagola homene.



<sup>1</sup> Horo mbirungi Elaisa ibu Suneme wali mbira bamba ibu igini homayagola Elaisa ibugua mo dabi hene biago ibu aiyahondo bi lamule pene. Ibugua wali ogonihondo lalu, Ina dindiha tomo gari timbuniore tagira ibiragola wali agali tomo nane gariho kane dege mali karia polebira lalu Anduane Homogohanda laya. Ani layago ai inaga waneigini dameneru haru halu mani tomo karulape ngagola dai bule áyu dindi taraha togoloyu pilimu, lene. <sup>2</sup> Ani laya handala wali ogoni ibu damene bibahende haru hai halu dindi mende Pilidia dindiha mali karia layadagua hole pene.

<sup>3</sup> Ani pu hai halu mali karia biago piai heagola ibu dameneru heba Isaraele dindiha dai bini. Dai bialu kini berearia abale puwa ibunaga dindi andaru abale ibuni haraligo ngi lole pene. <sup>4</sup> Wali biago ibu wene pole harigani pialu heagola kini ibu Elaisanaga biabe biahaga agali Gehasila bi lalu berene. Kini ibugua Gehasihondo hale halu lalu, Elaisa ibugua biabe nahendene ale timbuni maru bigi binidaru te langigi bibelo hamelo kogoni, lene. <sup>5</sup> Ani layagola Gehasi ibugua bite bamba Elaisahanda Suneme wali biago igini homo tongolo mini wiaria mo dabi hene biago kinihondo lamialu berene. Gehasi ibugua bite biago lai nahe dege wene lalu bereagola wali biago ibugua nde kinihondo ibunaga mabu anda biaru ibuni ngiadaí bia lole kini berearia ibini. Gehasi ibugua wali biago ibiyane hondowa ibugua kinihondo lalu, Kini-o handa. Te áyu langerogoni wali ogoni ibuni o ibiragoni. Ibu igini ala homayagola Elaisahanda mo heya henego o kagoni, lalu lamini. <sup>6</sup> Ani layago hale howa kinihanda wali biagohondo bi hale hayagola wali biago ibugua ogodagua biya lalu bi te binidaru bibahende kinihondo lamiai hene. Hale hai howa mani kinihanda ibunaga ami agali haguane mbira heago olalu ibu lowa lalu, Ina wali ogoni ibu mabu anda mbirale winidaru ibuni mo yu dai bilo biamogo bule pu. Ani bialu mali kariani ibu mbiraha pu heagola ibunaga mabudagoha tomo bu nalu harimaruni karulape muni mialu bibe, lalu kinihanda lene.

### *Sirianaga Kini Benehadada homenego ogo*

<sup>7</sup> Horo mbirungi Elaisa ibu Siria dindiha tano timbuni Damasagasa wiagoria pene. Horo ogoníngi Sirianaga Kini Benehadada ibu warago timbuniore bo wiangi dege pene. Elaisa ibu Damasagasa dindi anda ibiyagola wali agali hearume kinihondo lalu, Agali mbira mini Elaisa ibu Anduane Homogonaga bi mana latagi haga biago áyu ogoni Damasagasani ibu ka, lalu lamini. <sup>8</sup> Ani lamiyagola kinihanda ami haru haga haguane mbira mini Hasaele heagohondo lamialu lalu, Mbirale bayaleru agali ogoni ibu mo turu halu mule maru mo yalu ibu kagoria pobe. Puwa kini warago timbuniore bo ngago dabi holobadabe naholobadabe lalu Anduane Homogohondo bi hale ha labe, lene. <sup>9</sup> Ani lamiya handala Hasaele ibuni Damasagasa dindiha yári damene wiaru dewaore nogo kamele pira maria (40) uruninaga erekunini yulene karulapedagua mo paga howa yalu Damasagasa tanoha Elaisa hearia pole pene. Pialu Elaisa heagoria anda puwa ibuhondo lalu, Agali haguane-o inaga biabe biahaga Kini Benehadada henego ai ibugua ibunaga warago dabi holobadabe naholobadabe lalu ihondo hale hole pu laya handala hale hole ibiru, lene.

<sup>10</sup> Ani layagola Elaisahanda ladai bialu lalu, Anduane Homogohanda i walia halu kini ibu homolebira layagoyu ina dai bialu kininaga warago dabi holebira lalu lamule pu, lene. <sup>11</sup> Ani lai howa Elaisa ibugua Hasaele deme hongo howa handayaho wiaabo hayagola Hasaele ibu mini dege dindiho hene. Ani heagola Elaisa ibu dugu bini. <sup>12</sup> Dugu biyagola Hasaele ibugua Elaisahondo hale halu lalu, Agali haguane-o ina aginaga dugu berebe, lene.

Ani layagola Elaisahanda ibuhondo lamialu lalu, Ina áyu dugu berogoni ina mani mana ko timbuniore bialu Isaraele wali agali mo ko holobedane bero. Inaga ami agaliru haru halu ibuwa tano ege pabe hongohe bu mabu bidaru bo giala hole bulebeda. Ani bialu Isaraele dindiha igiri daliahe bu karuni bo wahai halu waneigini emene bu karu

dindini mo paraho waholeberemida. Tígua wali gali tombeha bere bedaru ayu tibume tombene dibu haealo waholeberemidago uruninaga dugu bero, lalu lamini.

<sup>13</sup> Hasaele ibugua bi uruni hale hai howa Elaisa lamialu lalu, ĩ agali habane nabulene ale dege kogonidago. Ina mbirale bulebere lalu áyu langiriruni agua bialu bulubodabe, lene. Ani layagola Elaisahanda lalu, ĩ Sirianaga kiniore holebere lalu Anduane Homogo ibunime ĩ mo walia haya, lalu lamini.✧

<sup>14</sup> Libu bi uruni lai halu Hasaele ibu Sirianaga Kini Benehadada hearia dai bini. Dai biyagola kini ibugua hale halu lalu, Elaisahanda bi agua layabe, lene. Hasaelehanda ladaí bialu lalu, Elaisa ibugua heneneore ínaga warago ogoni dabi holebira laya, lalu kini lamini. <sup>15</sup> Ani lowa horo mendengi Hasaelehanda kini bo wahole manda bini. Ani manda buwa ibugua balangiya mbira ibaha mo iba howa kini berearia mo yalu puwa ogonime kininaga dengui minu huba biai hene. Ani buwa kini bu he mulino ibugua balangiya biago hongo howa yu ndibulo heagola kini abale homo tongolo mini. Homayagola mani Hasaele ibuni Sirianaga kini ha aribia hene.

*Yahorama ibu Yuda dindiha kini henego ogo*  
(2 Bi Te 21.1-20)

<sup>16</sup> Ahaba igini Yorama ibu Isaraele dindiha kini heane dege mali dauni layagola Yahosabada igini Yahorama ibu nde ibu abanaga henge ibuni mialu Yuda dindiha kini ibu hene. <sup>17</sup> Ibu aiyahanda taba hanayangi howa hama ibinigo mali pira tebirani kira (32) hayagola ibu kini pigane hene. Ibugua kini howa Yarusalemeni mali halirani haru hene. <sup>18</sup> Ani howa ibu one Isaraelenaga Kini Ahaba wane mbira bereago dabu bini. Anidagua buwa ibugua mana ko Ahaba damenerumebi Isaraele wali agalirunaga kini henerumebi bialu haga wiago talialu Anduane Homogonaga deni mana ko dewaore bialu hene. <sup>19</sup> Ani bialu heago helowa Anduane Homogohanda Yuda dindi mo ko nahe dege hene. Ani binidagoni irane Anduane Homogohanda bamba ibunaga biabe biahaga agali Debidihondo habo nalolene bi mbira lo wialu lalu, Bibahendengi Debididi ibu damene hangume kini haabo holebira. Ani biragola Debidinaga hale lamu nahundilonaga ani bulebira, lalu lowini.✧

<sup>20</sup> Yahorama ibu Yuda dindiha kini heangi Idomo wali agali bu hearu tigua Yudanaga kini heago andaneha henego mani howa tini mine halu hene. Mine howa tigua tininaga kini mbira dabo helayagola kini ogonime Idomo wali agali haru hene.✧ <sup>21</sup> Ani biyago hondowa Kini Yahoramahanda ibunaga ami agali wayali karisini heyu howa wai biagane hearu haru halu Idomo dindiha dindi mbira mini Sairi wiagoria wai bule pene. Ani pu heagola Idomonaga ami agali bu hearume ti baba wai bule ho hagira biai hene. Ani bu heagola Yahorama halu ibunaga ami agali haguane karisi handayaho hearume Idomo baba wai timbuni mbiraga bialu tigua Idomoali hayadaruni bo hiladai bini. Ani bialu heago helalu ibunaga ami agali maru hearume ti wai wahalu tini andaga ibida dai bini. <sup>22</sup> Ani biyagome Yuda ami tigua Idomo bo poda hana habe nahe hene. Anidagua biyagome Idomo tigua tinaga dindi tinime haru henego áyu haabo ka. Ani binidagoningí dege Libina tanoha hearu tibi nde Yudanaga kini kagome handayaho nahelonaga tibi mine halu Yuda andaneha nahe tini hangu hene.

<sup>23</sup> Bi te maru Kini Yahorama ibugua bialu henedaruni mbuga mbira mini Yudali Kini Henerunaga Bi Te laga ngagoha gilibu nga. <sup>24</sup> Mani Kini Yahorama homayagola tigua ibunaga tingini ibu mamalirunaga homali Debidinaga tanoha winigo ogoniha dege hora hene. Hora halu ibu igini Ahasaia Yudanaga kini ha aribia hene.

*Ahasaia ibu Yudanaga kini henego ogo*  
(2 Bi Te 22.1-6)

<sup>25</sup> Ahaba igini Yorama ibu Isaraele dindiha kini mali homberia (12) hene heagola Yahorama igini Ahasaia ibu mali ogoningi Yuda dindiha kini pigane hene. <sup>26</sup> Ahasaia ibu dindini henegoibunaga mali pira kirani kira (22) hayagola kini henego ai ibugua kini howa Yarusalemeni mali mbira hanguni haru hene. Ahasaia ibu ajiya Isaraelenaga Kini Ahaba wane Adalia mbira berenego ibu Isaraelenaga Kini Omiri aguane berene. <sup>27</sup> Ahasaia ibu ajiya mana ko biaga Isaraelenaga Kini Ahaba aria bereagome Kini Ahasaia ibubi mana ogoni aria talialu Anduane Homogonaga deni ibugua mana ko dewaore Ahaba ariame bialu hagadagua bialu hene.

<sup>28</sup> Horo mbirungi Kini Ahasaia ibu Isaraelenaga Kini Yoramala haru Sirianaga Kini Hasaele wai bule mba lalu libu pene. Puwa Gileada dindiha Lamodo tano wiagoria wai bialu hemiria Siria ami mbirame Kini Yorama timume bayagola timu ho hene. <sup>29</sup> Timu ho yu puwa dabi harabe hondole Yaserili tanoni pu wini. Yaserili tanoha wiagola Kini Ahasaia ibu de hondo pole pene.

## 9

### *Yihu ibu Isaraelenaga kini dabo helenego ogo*

<sup>1</sup> Kini Yorama ibu Yaserili tanoni heangi Anduane Homogonaga bi mana latagi haga Elaisa ibugua igiri daliahe bi mana latagi haga mbira heago olalu ibu lowa ibuhondo lamialu, Inaga aga baya hangu paulo tubagi halu olibe lininaga weli be ogoha bedago mo ya. Ani mo yalu bialu Gileada dindiha Lamodo tano pole pu.

<sup>2</sup> Lamodo tano anda puwa Yahosabada igini Yihu ibu Nimisi aguane kago taya bibe. Taya bialu keria ibu nenegeru baba dewali bereagua ibuni hangu anda hobane mbiraha haru halu pubagi habe. <sup>3</sup> Ani haru pubagi howa olibe lininaga weli beha hambu yaregoni ibunaga hagianeni odo wialu howa ibuhondo lamialu ogodagua labe. Anduane Homogohanda i Isaraelenaga kini habelo dabo helarogoni laya, labe. Anidagua biai halu abaleore panga dugualu tagira pialu gerai lalu dai bibe, lalu lamini.

<sup>4</sup> Elaisahanda bi uruni lai haya handala Anduane Homogonaga bi mana latagi haga igiri daliahe biago ibu Lamodo dindi pole pene. <sup>5</sup> Ani puwa handalu hearia Yihu ibu ami haru haga agali haguane maru hearu baba bi te lalu biru hearia de hendene. Ani hondowa ibugua lalu, Ami haru haga agali haguane-o ina ihondo bi mbira lolebero, lene. Ani layagola Yihuhanda ibuhondo hale halu lalu, Ina bi aihondo loleberebe, lene. Ani ladai biyagola ibugua lalu, Ina bi ihondo lole laru, lene.

<sup>6</sup> Ani lalu libu haru anda hobane mbira heagoha anda puwa Anduane Homogonaga bi mana latagi haga biagome olibe lini weli hambu yayago Yihunaga hagianeni odo wialu howa ibuhondo lamialu lalu, Anduane Homogo ina Isaraele wali agalinaga Ngode Datagaliwabehanda lalu, Ayu ina i Isaraele wali agalinaga kini habelo dabo helarogonigo inaga wali agali uruni haru habelo helaro.\* <sup>7</sup> Ani bu howa Kini Ahaba abale i ibunaga biabe bialu ibunaga amiru haru haga agali haguane harigoni ibu damene bibahendeore homelo bo wahai habe. Anidagua bo wahai haregome kuini wali Yasebele ibugua mana ko dewa bialu hayagonaga pani nelo mialu ani bibe. Wali ogoni ibugua inaga biabe biahaga agali bu hearu bo wahai halu inaga agali maru bi mana latagi haga hearubi bo wahai henegonaga pani ogoni mibe. <sup>8</sup> Ahaba ibu damene lenego bibahendeore bo wahai holebero. Heneneore bulego laro. Ahaba ibu damene lenego yu wahenebi mbira Isaraele dindini naholebira. Agali Ahaba ibu aria karu igiri emenebi agali waheyaguabi bibahendeore bo wahai holebero. <sup>9</sup> Tihondo mana ina abale Kini Yaroboama Nebada igini biago ibu damene bibahendehondo birudaguabi Ahiya igini Kini Basa halu ibu dameneruhondo birudaguabi bialu bo hilo wahai holebero. <sup>10</sup> Yasebele ibu homolebira. Homaragola ibunaga tingini mbiralime

\* 9:6: 1 Kin 19.16

mo hora naholebiraore. Ibunaga tingini Yaserili tano kawareni dege biangome nalu holebira, lalu Anduane Homogohanda laya, lene. Anduane Homogonaga bi mana latagi haga biago ibugua bi uruni lai howa panga dugualu abale gerai lalu pu wahene.✧

<sup>11</sup> Ani piya handala Yihu ibu ami agali haguane maru biaru hearia dai biyagola tigua ibuhondo hale lalu, Mbirale mbira agi biyiya. Agali lulu biago ibu agi bule ibiniyabe, lalu hale hene. Ani layagola Yihuhanda ladai bialu lalu, Agali uruni aleme biagago ti manda bidami. Uruni aleme bi nagalone ngaru hangu laga ndobe, lene.✧

<sup>12</sup> Ani layagola tigua lalu, Inahondo bi tigatiga langi. Bi mo do howa ke nahabe, lene. Ani layagola Yihu ibugua ami haru haga agali haguane biaruhondo bi tigatiga lamialu lalu, Agali ogoni ibugua ihondo bi ogodagua langiya. Anduane Homogohanda lalu, Ina í Isaraele wali agalinaga kini habelo dabo helarogoni laya lalu, langiya, lene. <sup>13</sup> Ami haru haga agali haguane biarume bi ogoni layago hale howa abaleore tinaga aga amime biaga bu hearuni golalu anda harabani ge lalu ubandatagi biaga egageria wiagoria dunga howa Yihu ogoriani heyu helene. Ani heagola tigua pilipe biguli pu lalu hongo howa ladagadaga bialu lalu, Yihu ibu kini haya, lowa huario lalu hene.

### *Yihuhanda Isaraelenaga Kini Yorama bo wahenego ogo*

<sup>14-15</sup> Yihu ibu Lamodo tanoni howa ibunaga ami haru haga agali haguane biaru baba bi lo mbira lalu Kini Yorama homelo bo wahalu ibuni kini ha aribia holenaga bi pongo bo wini. Anigo odagoningi Kini Yorama ibu Yaserili tanoha haabo hene. Irane abale Sirianaga Kini Hasaele baba wai timbuni biyangi Kini Yorama ibu timu bo winigo ai dabi nahe wiaabo hene. Ani wiaabo heagola Yihuhanda ibunaga ami agali haguane biaruhondo lamialu lalu, Tigua inila mini mo mbiraore ho hemiyagua nde mbirali Lamodo tanoha howa Yaserili pialu iname mbirale bule ngamaruni lo yalu poligo polani hondo halimu, lene. <sup>16</sup> Ani lalu Yihu ibuni ibunaga wai biagane karisini irigi lalu ibunaga ami agali maru heba Yaserili pole Lamodo tano yu wahalu pene. Yaserili dindini Kini Yorama ibunaga timu bo wiyago dabi nahe dege wuwa ibuni dagiani palene. Horo ogoningi Yudanaga Kini Ahasaiabi nde Yorama timu wiago hondo ibinigo Yaserili tanoha libu haru berene.

<sup>17</sup> Agali mamageali mbira Yaserilinaga ege pabe heagonaga nenení mamage handa amu nana bu haga wiagoria howa handa amu lalu hearia Yihu lalu ibunaga agali biaru ibiyaria hendene. Hondowa agali tanoha hearuhondo oladali howa lalu, Agali dewaore tidi yalu ibira, lene. Agali biaru tigua puwa Yorama lamiyagola Yoramahanda tihondo lalu, Ami agali mbira kagohondo ibunaga nogo hosini biralu abale harigani lola ho pialu bibahende karulapebe lole pu ladaba, lene.

<sup>18</sup> Ani laya handala ami agali mbira heago ibu abale nogo hosini biralu harigani lola hole puwa Yihuhondo lalu, Kini ibugua mbirale bibahende bayale degebe lalu ibu manda bulenaga hale hole pu laya, lene. Ani layagola Yihuhanda ladai bialu lalu, Ogoni inaga biabe ndogo í ina poramadagua maliya ibu, lene.

Mamage handa amu nana bu haga tanonaga ege pabe nene wiagoria haga biago ibu handalu hearia ami agali kini ibugua pu laya handala piyago dai nabiyane hendene. Ani hondowa ibugua agali tanoha hearume kini bedaria bi lo yalu pelonaga ibugua lalu, Kini ina ami agali mbira lola hole pu lari handala piyago ibu ti ibiyago lola hayago dai nabi lalu kini lamule pudaba, lene. <sup>19</sup> Ani layagola kini ibugua ami agali mendeme lone lola hole pu lene. Pu laya handala pialu ibugua Yihuhondo hale lalu lalu, Kini ibu hale holenaga mbirale bibahende karulape ngabe laya, lene. Ani layagola Yihuhanda lalu, Ogoni inaga biabe ndo ngago í ina poramadagua talima ibu dege bia, lene.

<sup>20</sup> Mamage haga biago ibugua handalu hearia agali piyagobi dai nabi dege biyago hondowa ibugua kinihondo lawia lalu lalu, Ami agali mende mani pu larigobi dai nabi dege. Ai agali mbira wai biagane karisini heyu howa ibirago ibu handabe mangabi

agali lulume bulene ale bima ibirago ibu Nimisi hameigini Yihuhanda biagadagua bima ibira. Ibugua nogo hosi bo wara daila halu karisi gililo yalu ibira, lene.

<sup>21</sup> Ani layagola Yoramahanda lalu, Inaga karisi mo manda manda bidaba, lene. Ani manda manda bu ngeleagola ibuni karisini irigiho halu Yudanaga Kini Ahasaiabi karisi mendeni irigi ho ha bialubi libu haru Yihu lola hole pene. Pialu dindi hobane mbira Nabodonaga wiagoria lola hene. <sup>22</sup> Yorama ibugua Yihu lola howa ibuhondo hale halu lalu bibahende karulape degebe be agua biyabe lalu hale hene. Ani hale hayagola Yihu ibugua ladai bialu lalu, Í ajiya Yasebele ibugua mana ko damene ngaru bialu dama mitangi bialu gime wabini ngaru hangu mo tene halu tomia biaga mana ngago bialu biraabo heagua mbirale bibahende agua bialu bayale holeda. Í aijanaga mana ko ogoni pu timbu haragoni ndobe, lene.

<sup>23</sup> Ani ladai biyago hale halu Yorama ibunaga karisi biago beregedalu ibida pole pene. Pialu howa ibugua Ahasaia olowa lalu, Ahasaia-o agali ogome iya bope hole ibiyada, lene. <sup>24</sup> Ani layaore dege Yihuhanda timu abale tegelape halu Yoramanaga erembirani bene. Ani bayagola timume Yoramanaga gubalini lilini daga biyagola ibuninaga karisi biagoria ibira halu tongolo mini. <sup>25</sup> Tongolomu wiagola Yihu ibugua ami haru haga agali haguane mbira mini Bidiga heagohondo lalu, Ibunaga tingini Yaseriliali Nabodo dalu ngagoha bape hadaba. Bi mbira Anduane Homogohanda Yorama aba Kini Ahabahondo laminigo manda bidami. Ala iya karisini maha talima pialu hebaria Anduane Homogohanda Ahabahondo lamialu lalu, <sup>26</sup> Abe dege Anduane Homogo ini de hondo hewagola agali maru inaga hame ngeru taliaga hearume Nabodo halu ibu igini hearu bo wahai hayago. Ai Anduane Homogo inaore henene bulego larogo, Ina mana ko birigonaga pani dindi ogoria howa dege ngulebero layagoni, lene. Yihuhanda Bidigahondo laabo halu lalu, Anduane Homogohanda bi lo wiyago lola helo Yoramanaga tingini ngago Nabodo dalu ngagoha mo peha, lene.\*

#### *Yudanaga Kini Ahasaia bo wahenego ogo*

<sup>27</sup> Yudanaga Kini Ahasaia ibu nde Kini Yorama homaya handala abale ibunaga karisi biagoria heyu halu Bedehagana dindi wiagohayagi ibida pole pene. Ani piyagola Yihu halu ibunaga ami agali biarume haruru talima puwa Yihuhanda ibunaga ami agali hearuhondo lalu, Ibubi homelo dandame bogalimu, lene. Ani layagola tigua talima pialu Ibileama dindiha hari mini Guru nene wiagoria karisini pialu hearia tali minalu bogene. Bogaya handala Ahasaia ibu timu ho yalu ibida puabo halu mani Megido tano wiagoria tongolo mini. <sup>28</sup> Homayagola ibunaga tingini ami haru haga agali hearume karisini mo paga howa Yarusaleme yu dai bini. Ani buwa tigua ibunaga tingini ibu mamalirunaga homali Debidinaga tano winigo ogoniha hora hene.

<sup>29</sup> Isaraele dindiha Ahaba igini Yorama ibu mali bearia (11) agima hene heagola Ahasaia ibu Yudanaga kini hene.

#### *Kuini wali Yasebele bo wahenego ogo*

<sup>30</sup> Yihu halu ibunaga ami agali biaru tigua Ahasaia talu wahalu Yaserili lone dai bini. Kuini wali Yasebele ibubi nde dindi ogoniha dege bereangigo Yorama homaya layago ibu hale ho berene. Ani hale howa Yasebele ibunaga de mandariru mo yari bia howa kini andaganaga windoha unu harigahayagi handatagi ho hene. <sup>31</sup> Ani handatagi ho heagola Yihu anda ibiyane hondowa ibugua lai latagi halu lalu, Simiri-o inaga agali haguane bo wahaga ni eberego. Irane aginaga ibu kebe, lene.\*

<sup>32</sup> Yihu ibu bi layuago hale howa windo wiagoha handadagaho howa ladaga halu lalu, Maru i kogohayagi ibule kamiru aibe, lene. Yihuhanda bi ani layuago hale

\* 9:26: 1 Kin 21.19 \* 9:31: Mini Simiri ogoni agali mbira mini Simiri ami haru haga agali haguane henegome ibunaga kini bo wahenegodagua áyu Yihuhanda ibunaga kini bo wahayada manda buwa ibu Simiri ale hayada lalunaga mini Simiri lene. Bi te ogoninaga 1 Kini 16.8-20 handabe.



halu agali kininaga biabe biaga maru anda tamuha heneyaru abale ibalu windoha handatagi ho hene. <sup>33</sup> Ani handatagi ho heagola Yihuhanda tihondo lalu, Wali o kagoni windoha howa dindini minu bape hadaba, lene. Ani layagola agali biarume Yasebele dindiha minu bape hene. Ani bape hayagola wali biagonaga darama piago pialu daramame anda hai hearu goba halu Yihunaga nogo hosi biagobi goba hene. Ani wiagola Yihuhanda ibunaga nogo hosi karisilame Yasebelenaga tingini hengedo tagadabaga bilene. <sup>34</sup> Ani bialu Yihu ibuni kini andaga tamuha anda puwa tomo nene. Nai howa ibugua agali berearuhondo lamialu lalu, Wali ko ogoni ibu homoleneore nga, lalu Anduane Homogohanda laya. Anigo nde wali ogoni ibu agali kini mbirago ibu waneore birayagodago ibunaga tingini mo hora hole pudaba, lene. <sup>35</sup> Ani laya handala ibunaga tingini mo hora hole tagira pene. Ani puwa handalu hemiria ibunaga tingini mbira nawi haguane kuni gi ge kuniru hangu ona ibira hearia hendene. <sup>36</sup> Ani biyiyago handalu tigua dai buwa Yihu lamialu hemiria ibugua tihondo lalu, O biyadaruni bamba Anduane Homogohanda ibunaga biabe biaga Tisibe tanoali Elayaha howa latagi hayago lola hayada. Anduane Homogohanda bi ogoni ogodagua lene. Yasebele ibu homaragola ibunaga tingini Yaserili tanonaga dindi ngagoria dege biangorume nai holebira. ✧ <sup>37</sup> Ani biragola ibunaga tingini budini mbira mbira biango ti heba to wiai holebira. Anidagua bidagola agalime Yasebelenaga tinginida lalu dababe nahe holebira, lalu Anduane Homogohanda Elayaha howa mbiwia ho wini, lalu Yihuhanda lene.

## 10

### *Kini Ahaba waneigini aguaneru bo wahai henego ogo*

<sup>1</sup> Kini Ahaba ibu waneigini aguanerubi pira karia (70) bibahende Samaria tanoha hene. Tano ogoniha heagola Yihu ibugua beba maru gili buwa agali haguane dindi ogoniha haru haga hearuhondobi mana handayaho haga hearuhondobi Ahaba dameneru mamage haga hearuhondobi gilibu pelene. Beba ogoniha bi ogodagua gilibu wini. <sup>2</sup> Kini waneigini aguaneru tigua haru halu wai biagane karisirubi wialu nogo hosirubi halu danda timu yandarebi wialu tanoha ege pabe hongoheme bu mabu biniha kamigoni. Anigo ina bi o gilibu ibilarogo mialu tigua <sup>3</sup> Ahaba igini bu karu aria tigabi mbira dabalubulu kini helalimu. Ani helowa kini ibu bayale helonaga tinime wai bialu ibu biamogo bilimu, lene.

<sup>4</sup> Ani layiyago hale howa Samaria tanoha mana handayaho haga hearubi wali agali dindi ogoniha haga karu haru haga hearubi tigua Yihuhondo gi timbuni ho howa lalu, Yihu ibugua kini kirali biago labo bope hayagodago ai ina aleme Yihu agua bope hamiyadabe. Iname mbira bibe nahe kamagoni, lene. <sup>5</sup> Ani lowa agali kini andaga mamage haga heagobi tano handayaho haga agali haguane heagobi agali haguane maru hearubi agali haguane maru Ahaba waneiginiru mamage haga hearubi ti bibahendeme Yihuhondo bi ladai bialu lalu, Ina bibahende inaga biabe biaga howa inime bia larego biai hole kamagoni. Iname kini mbira dabo helolene manda nabi kamago inime karulapeda lo manda bidego bia dege bibe, lene.

<sup>6</sup> Ani ladai biyiyago hale howa Yihuhanda beba mende lone gilibu pelowa lalu, Tigua heneneore i andaneha holene manda bu hemiyagua Ahaba waneigini aguane karu bibahende bo wahai halimu. Ani bialu yawi egerebagi ni ayu ogodagua dege haragola tinaga haguane bibahende pugu yai halu Yaserilini ini koria ibalimu, lene.

Ahaba waneigini aguane pira karia (70) uruni ti Samaria tanonaga agali haguane hearu baba ho howa agali haguane uruni tigua mana tini manda bida ale biawai halu haga hene. <sup>7</sup> Ani henego ai tigua Yihunaga bi gilibu pelayago hale howa Ahaba waneigini aguane pira karia (70) uruni bibahende homelo bai hene. Balu homayagola uruninaga haguane puguwa mbasigedi nuha honowa Yihu hearia hanalu pene.

✧ 9:36: 1 Kin 21.23

<sup>8</sup> Wali agali Ahaba damene uruninaga haguane uruni hanalu ibira layago hale howa Yihu ibugua agali bu hearu lamialu lalu, Wali agali homenerunaga haguane uruni talebuki howa halu kirani unu tano pabe tagirahayagi wialu gao lelo ngeladaba, lene. <sup>9</sup> Gao layagola horo mendengi Yihu ibu abale heyalu tano pabenaga panga haraba wiagoria pialu wali agalinaga haguane pugu hono ibini biaruni wiaria hendene. Ani hondowa wali agali dewaore íbu ngoaiho hearia hondowa Yihu ibu heyu howa tihondo lamialu lalu, Inaga agali haguane Yoramaore inime bope hole lo manda bialu henego ai áyu ibu homelo bo waharu. Ai tígua agali mbira bo wanahe kamidalo manda bidogo ai áyu wali agali balu haguane o pugu yalu íbu ngaruni aiwa benedabe ina manda nabi kamagoni. <sup>10</sup> Anigo bi mbira Anduane Homogohanda bamba Ahaba dameneru ogodagua bulebira lalu lo wiyago áyu ogo heneneore lola harane hendedamagoni. Anduane Homogo ibunaga bi mana latagi haga Elayanaga ne harigaha howa layago áyu lola haragoni, lene. ✧ <sup>11</sup> Ani lalu mani Yihu ibugua Ahaba damenerubi nenegerubi ibunaga agali haguane helenerubi agali loma binigo mo miaga hearubi Yaserilini hene hearuni bibahende bo wahai hene. Mbiraore hangubi mbira yu wanahe bibahendeore bo wahai hene. ✧

*Kini Ahasaia damene hearu bo wahenego ogo*

<sup>12</sup> Yihu halu ibunaga ami agaliru Yaserili yu wahalu Samaria pole pene. Pialu dindi emene mbira mini Nogo Sibi Haru Hagaru Mo Ngoai Haga laga wiagoria anda pene. <sup>13</sup> Dindi ogoriani agali maru lola hayagola ibugua tihondo hale halu, Tí agohayagi howa ibirimibe, lene.

Ani layagola tigua nde ladai bialu lalu, Ina Kini Ahasaia aria eberama. Ina Yaserili dindiha Kini Yorama damenerubi kuini wali Yasebele damenerubi handama pole porama, lene. <sup>14</sup> Ani layago hale howa Yihuhanda ibunaga ami agali biaruhondo, Agali uruni minu yania hadaba, lene. Ani layagola ami agali biaru tigua agali biaruni minu yalu dindi ogoniha gundu uli timbuni mbira wiagoha minu yalu pene. Agali uruni pira mariani kira (42) mbiraore hangubi yu wanahe bibahendeore uli ogoriani howa bo wahai hene.

*Kini Ahaba damene yu wahene hearu bo wahai henego ogo*

<sup>15</sup> Yihu ibunaga ami agali biaru heba ti dindi o biago yu wahalu pialu hemiria harigani agali mbira Legaba igini Yonadaba henego lola hene. Lola howa Yihu ibugua agali ogonihondo ibiribe lowa lalu, Í hame ngelo kegoniore ina hame timbuni lo kogonigo ai ina nde agua wu kebe. Ina bialu kogoni hondowa turu ho kebe nahe kebe, lene. Ani hale hayagola Yonadaba ibugua Yihuhondo ladai bialu lalu, Ina bialu kegoninaga ina íla mini mbiraoreho kogoni, lene. Ani layagola Yihu ibugua lalu, Ai bayaledago. Ani heneyagua gi tigani bibiya gi ngi, lene. Gi miyagola Yihuhanda ibunaga karisi biagoria irigi helo Yonadaba gilila mini. <sup>16</sup> Ani buwa Yihuhanda ibuhondo lamialu lalu, Ina bialu koruni Anduane Homogo ibuni hanguore talima polenaga hongooore howa ani bialu henedalo ina handabelo i porodagua iya haru mba, lene. Yonadaba ibugua, Karulapego mba, laya handala libu haru karisi biagoria iraga ho halu puwa Samaria tanoni anda pene. <sup>17</sup> Samaria tanoha anda puwa Yihuhanda Kini Ahaba aria maru yu wahene damene hearu bibahendeore bo hilo wahai hene. O biyadagoni abale bi mbira Anduane Homogohanda ibunaga biabe biahaga agali Elayaha howa bulebira lalu lowinigo heneneore lola hene. ✧

*Balahondo bi pupu wiaga hearu Yihuhanda bo wahai henego ogo*

<sup>18</sup> Yihuhanda Samaria wali agali bu hearu bibahende olalu ibidaba lowa lalu, Ahabahanda dama mitangi bialu gime wabini Balanaga biabe bia holene ngago emene hangu biagago ai ina dewaore bu bolangua howa bulebero. <sup>19</sup> Ai agali Balanaga bi

mana latagi haga karubi ibuhondo bi pupu wiaga karubi ibunaga loma binigo mo miaga agali bu karubi bibahendeore ibu ngoai helo oladaba. Ina Balahondo loma timbuniore áyu loma bu deloleberogo mbiraligo mbira naibida lole ndo bibahende ibai halimu. Mbiral naibiyadago ibu homelo bo waholebero, lene. Yihuhanda ogonidagua lenedagoni ibugua wali agali Balahondo bi pupu wiaga karu bibahende bo wahi holenaga ohowa bi ogoni lene. <sup>20</sup> Ani lowa Yihuhanda laabo halu lalu, Ai iname Balahondo bi pupu timbuniore mbira wimiya horo mbira pongo bo wima, lene. Ani lalu tigua bi pupu ogongi wimiya lalu horo pongo bo wini. <sup>21</sup> Ani bialu Yihu ibugua Isaraele dindi bibahendehe bi lo yalu purogo ladaba layagola hale halu wali agali Balahondo bi pupu wiaga hearu mbiraorebi mbira yu wanahe bibahendeore ibu ngoai hene. Ibalu mbirale dama mitangi bialu gime wabini Balanaga bi pupu wiaga anda timbuni heagoha anda piai hayagola wali agali biru gengedatago bialu henge emene mbira nawi berene. <sup>22</sup> Bibahende tamuha birai heagola Yihu ibu puwa bi pupu wiaga haru haga heagohondo lalu, Ai bi pupu wule howa aga biaga wiridago bilo wali agali Balahondo bi pupu wule ibiyadaruhondo mo taha, lene. Ani layagola bi pupu wilo haru haga biago ibugua Yihuhanda bia lalu lamiyadagua bini. <sup>23</sup> Mahaore Yihu ibu Legaba igini Yonadaba libu haru bi pupu wiaga anda tamuha anda pene. Anda pu howa Yihuhanda wali agali biru hearuhondo lalu, Anduane Homogo mitangi bialu lotu laga mbira ina haru ogoha biramaga holigo dengui baya hangu handa amu nana bialu handai halimu. Ina wali agali Balahondo bi pupu wiaga hangu anda ogoha biramiya hameledo, lene. <sup>24</sup> Ibugua bi lai halu Yonadaba libu haru loma biniru bo delaga dabu wiaga tamu hobane wiagoha anda puwa loma biniru irame dai helo bo delolebi loma maru maru Balahondo bu mulebi anda pene. Egerebagi wali agali ibu ngoai nahe wiangi ibunaga ami agali pira halira (80) bibahende uyuna anda o biago haneni manda manda bu helene. Ani helowa tihondo lamialu lalu, Wali agali Balahondo bi pupu wiaga uruni bibahendeore homelo bo wahi halimu. Ami agali mbirame mbiraoreali hangu ibida pora bialu pelo wahayagua mani ami agali ogoni ibuni homolene wulebira, lalu lamiai hene.

<sup>25</sup> Yihu ibugua loma biniru irani dai helaga wiago mo delalu tagira puwa ibunaga ami haru haga agali hearuhondo bi lamialu lalu, Áyu ogoni abale anda pialu bibahendeore homelo bo wahi hole pudaba. Mbiraore hangubi mbira pora bialu poligo napelo bo wahaiore halimu, lalu lamini. Ani laya handala tigua anda puwa bibahendeore wai biagane ayu tibume dibalu bo wahi hene. Mani dibu payapaya bini wiaru tanoha howa yu tagira puwa tagiraha mo wahi hene. <sup>26</sup> Ani bialu bi pupu wiaga anda biagoha anda hobane hanuni ha puwa gene mbira loma binigo wali agalime bi pupu wiagane biagobi dugu yalu tano tagirahayagi yu puwa irani dai helene. <sup>27</sup> Ani bialu tigua dama mitangi bialu gime wabini Bala wiagobi ogoni ibunaga bi pupu wiaga anda timbuni heagobi bo gialo haealabaga bu wahene. Ani bialu tigua bi pupu wiaga anda ogoni mo ko halu ti uli anda helenego áyu ogoni wiaabo ka.\*

<sup>28</sup> Anidagua bialu Yihuhanda Balanaga bi pupu wiaga wiaruni bibahende bo gialo wahi hayagola Isaraele dindiha wali agalirume dama mitangi bialu gime wabini Balahondo bi pupu lone nawiaga hene. <sup>29-30</sup> Anduane Homogohanda Yihuhondo lalu, Í inaga hame lewagobi talialu Ahaba dameneruhondo birigoni mana bayaleore biridalo manda bido. Anidagua birigonaga í igini aguaneru tigua kini maninaga ma halu agima ha aribia helaga bulebero, lene. Ani bialu mani howa Yihu ibugua mana ko bamba Kini Yaroboamahanda biaga wiyadagua bialu hene. Kini Yaroboama ogoni ibugua mana ko uruni Isaraele wali agalime bilo biawai halu haga hene. Bamba Kini Yaroboama ibugua nogo bulumaga handalehe kira ngolome wabuwa mbirago Bedele

\* **10:27:** Áyu ogoni wiaabo ka ledagoni áyu ina kamangi ndo ala agali bite ogoni gili binidago ibu heangi mitangi bialu lene.

tanoha ngelalu mendego Dana tanoha wini. Ani wiagola Yihu ibuguabi Isaraele wali agali tiguabi ogoni labohondo bi pupu wialu helo ngelene.✧ 31 Ani bialu Yihu ibunibi nde Anduane Homogo Isaraele wali agalirunaga Ngode Datagaliwabenaga bi mana lowini wiaru baya hangu hongo howa yu ha nabi ibuni mini gedaore halu yu wahene. Ani bialu ibugua mana koore bamba Isaraele wali agali mana ko bilonaga haru pubagi haga Kini Yaroboamanaga biaga wiaru talialu bialu hene.

### *Kini Yihu homenego ogo*

32 Yihu ibu kini heangi Anduane Homogohanda dindi taraha hameigini tara tara paligi biarume Isaraele baba wai buwa bo podalu dindi lenelene wiaru maru ti karulaga bini. Sirianaga Kini Hasaele ibugua Isaraele dindi bibahendeore 33 amu Iba Yodana ni tagira ibiragohayagi ibu karulai hole manda buwa Isaraele baba wai bialu hene. Ani buwa Hasaele ibugua Isaraele dindi bibahendeore unurayagi Aroe tano Iba Anono peagoria howa bo poda hana haga bima anda ibalu uyurayagi Gileadabi Basanabi bo podaga bima pene. Dindi uruni Gada hameiginirunagabi Lubene hameiginirunagabi maru nde ni tagira ibiragohayagi Manase hameigini tinaga wialu binigo uruni bibahende bo poda hana halu karulai hene.

34 Bi te maru Kini Yihu ibugua biniru bibahende mbuga mbira mini Isaraele Kini Henerunaga Bi Te laga ngagoha gilibu wini nga. Mbuga ogonime kini ibugua biabe hongohe mani biniru hangu gilibu nga. 35 Kini Yihu ibuni homayagola ibu damenerume ibunaga tingini Samariaha hora hene. Ani buwa ibu igini Yahoahasahanda ibu abanaga henge mialu kini ha aribia hene. 36 Yihu ibugua Isaraele wali agalirunaga kini howa Samariani mali pira kirani halira (28) haru hene.

## 11

### *Adalia Yuda dindiha kuini berenego ogo*

*(2 Bi Te 22.10-23.15)*

1 Kini Ahasaia aija Adalia ibugua ibu igini Ahasaia bo wahaya layago hale howa ibugua abaleore ami agali bu hearu lamialu lalu, Yudanaga kini heneru aria agali bu karu damene bibahendeore bo wahai hole pudaba, lene. 2 Ani biyagoyu Kini Ahasaia igini Yoasa ibu dege bo wanahene. Irane Kini Ahasaianaga mbalini Kini Yahorama wane Yahosebahanda wandari mbira igiri Yoasa handayaho haga heba Anduane Homogonaga andaha paliaga hobane mbira heagoha bira do helegola ami agali uruni tigua Yoasa handa walia nahayagome ibu bo wanahene. 3 Ani biyagola Yahoseba ibugua Anduane Homogonaga andaha mali waragaria mo do ho haabo hene. Ani mo do ho heangi Adalia ibu Yuda dindiha kuini wali berene.

4 Anigo Adalia ibu Yuda dindiha kuini wali bereane mali kane hayagola loma binigo mo miaga agali Yahoiaada ibugua ami agali haguane kuini wali mamage haga hearubi kini andagaha mamage haga bu hearubi bibahende Anduane Homogonaga anda ibilo hondo pudaba lene. Tigua hondo piyaru haru ibiyagola Yahoiaada ibugua tihondo habo nalolene bi hongohe mbira lowini. Ibugua mbirale mbira buleore lalu agali o biaruhondo bi lo wiyagola tiguabi nde buleore lalu Anduane Homogonaga minini howa, Ina inahondo bia lalu langerego bibahende biaiore holeberama, lalu lowini. Ani lai heagola mani Yahoiaada ibugua Kini Ahasaia igini Yoasa tinaga deni haru tagira ibuwa tihondo mo walia hene. 5-8 Ani mo walia howa ibugua tihondo bi maru urudagua lamigi bini. Ibugua lalu, Ayu Yoasa kini dabo helamiya hame ledogo ai iname bulene maru ngago laro. Tí tidi tebirame biabe bialu howa Sabada horo haragola tidi mbirago ibu aribia haga bialu mbirago ibu halo haga biaga kamigoni. Halo kagola mendego ibu biabe bia aribia haga kamigoni. Anigo ai Sabada horo áyu holeberemagonaga

✧ 10:29-30: 1 Kin 12.28-30

tidi tebira harimigoni bibahende Anduane Homogonaga anda loma bia hene ogoha ibai halimulo hameledo. Agali maru Sabada horongi biabe bialu kini andaga mamage haga hayarubi maru panga haraba mbira mini Su laga biago mamage haga biarubi maru karunaga erembiraha panga haraba mamage haga hayarunibi bibahendeore ibai halu Kini Yoasa mamage hole Anduane Homogonaga anda ibai halimu. Ami agali bibahendeore wai biaga ayu tibu yai howa Anduane Homogonaga anda ibalu Kini Yoasa hangu bibahendehe mamage hai halimu. Ibu mbiraha polene hame layagua ami bibahendeme ibu poradagua mandagi pilimu. Ami bu kamiru tigua agali maru karu aria mbira ibu kagoria kaware ibulani handaluore halimu. Agali mbira ibu kagoha kaware ibiyagua agali ogoni ibu homelo bo wahalimu, lene.

<sup>9</sup> Sabada horongi ami agali haguane biarume loma binigo mo miaga Yahoiada ibugua tihondo bilimu layadagua bialu ami agali maru tinaga biabe biai howa horo odangi halo hole hearubi maru biabe bu aribia hole hearubi bibahendeore loma binigo mo miaga Yahoiada hearia Anduane Homogonaga andaha haru halu ibai hene. <sup>10</sup> Ibai hayagola Yahoiadahanda Kini Debidinaga yandarebi ibunaga wai biagane humbibi ogoningi Anduane Homogonaga andaha winigo ami agali haguane biaruhondo yilo mo migi bini. <sup>11</sup> Ani miya handala ami biaru tigua Anduane Homogonaga andaha ni tagira ibiragohayagi howa mamage hama pialu ni paliragohayagibi bibahendehe haame hene. Tigua bo lomabu delaga dabu heagoriabi anda heagoriabi mamage kawareore hai hene. <sup>12</sup> Ami agali biaru ti manda manda bialu mamage haiore heagola loma binigo mo miaga Yahoiadahanda Yoasa haru tagira ibuwa kini manda ibunaga hagianeni karula hene. Ani buwa mbuga mbira bi mana gilibuwi wiago Yoasa mo mialu mani Yoasanaga hagianeni kini helonaga dabo helalu olibe lininaga weli odo wia hene. Ani biai howa heagola wali agali bu hearume turu howa bi hongo howa ladagadaga bialu gi habe balu tigua Kini Yoasaore kini haabo halu luore howa hodagua helo lowa mambolo balu hene.

<sup>13</sup> Ami agali bu hearumebi wali agali maru hearumebi bi pu dagadaga buwa lalu hayuago kuini wali Adalia hale halu ibu andaga howa Anduane Homogonaga anda wali agali ibu ngoaiho heagoha abaleore pene. <sup>14</sup> Pialu tamuha anda puwa handalu hearia Anduane Homogonaga anda haneni anda gene mbira heagoria hapara howa kinime hagadagua kini gahenge mbira ona hearia hendene. Ani bialu ami haru haga agali hagianerubi agali maru pilipe ale biguli pu lagarubi ti kini heagoria kaware hapara ho hearia hendene. Wali agali bu hearume turu taraore halu hearia handalu marume biguliru pu lalu hearia hendene. Ani hondowa Adalia ibugua bu miniha tandaga timbuni howa ibunaga aga minu lerelene. Ani bialu howa ibugua lalu, Ti wali agali koore kamigoni howa tigua ihondo mana koore lehe bialu harimida, lene.\*

<sup>15</sup> Yahoiada ibugua Adalia Anduane Homogonaga andaha bo wahelo hame nale howa ibugua ami haru haga agali haguane biaruhondo lalu, Adalia minu yalu Anduane Homogonaga anda howa tagira pialu ami agali ho dugu bu karia dombeneha minu yalu pudaba. Agali mbira ibu poradagua talima piyagua agali ogoni homelo bo wahalimu, lene. <sup>16</sup> Ani laya handala tigua Adalia minu yalu pialu kini andagaha anda polene hariga mbira nogo hosi uba andatagi biaga hariga wiagoha minu yalu pene. Minu yalu pialu tano tagirahayagi yalu puwa homelo bo wahene.

*Yahoiadahanda wali agalime Anduane Homogo hangu talima pelo biamogo binigo ogo (2 Bi Te 23.16-21)*

<sup>17</sup> Loma binigo mo miaga Yahoiada ibugua Kini Yoasabi wali agali bu hearubi tihondo bi lalu, Anduane Homogola habo nalolene bi mbira tini ibunaga wali agaliore holeberema lalu lo widaba, lene. Ani lowa bi mende wali agali tinibi kini ibubi tihondo lalu, Tigua tini dege dege habo nalolene bi lo wialu bidaba, lene. <sup>18</sup> Ani laya handala

\* 11:14: 2 Kin 23.3



wali agali hearume dama mitangi bialu gime wabini mini Balanaga bi pupu wiaga anda heagoha puwa bo gialo wahai hene. Balanaga lomabu delaga dabu anda ogoniha heagobi dama mitangi bialu Balanaga mbirale wabu wiarubi bibahende nde bo gialo wahai hene. Ani buwa tigua agali mbira Balanaga loma binigo mo miaga heago mini Madana ibu lomabu delaga dabu heagoria kaware bo ngelene.

Ani biai heagola Yahoiahadanda ami agali maru Anduane Homogonaga anda mamage helo dabo helene. <sup>19</sup> Ani dabo helai halu Yahoiahadabi ami haru haga agali haguane hearubi ami agali maru kini mamage haga hearubi ami agali maru kini andaga mamage haga hearubi tigua Anduane Homogonaga andaha howa kini haru halu kini andaga pole pene. Tigua pole pialu heagola wali agali bibahende mama talima pialu hene. Ti kini andaga anda puwa Yoasa ibu panga haraba mbira mini Ami Agalinaga Mamage Haga Panga Haraba laga winigo ogonidagua pialu kini biragane dagia wiagoria pu berene. <sup>20</sup> Ami agali biarume kini andaga kaware heagoria howa Adalia bo wahayagola wali agali bibahende hearu ti turu howa bu miniha dungu lowa turu hagabu Yarusalemeni hene.

<sup>21</sup> Yoasa ibu aiyahanda taba hanayangi howa hama ibinigo mali kane hayagola ibu Yuda wali agalinaga kini pigane ogoningi hene.

## 12

### *Yoasa ibu Yuda dindiha kini henego ogo (2 Bi Te 24.1-16)*

<sup>1</sup> Yihu ibu Isaraele dindiha kini heangi mali kane hayagola Yoasa ibu nde Yuda dindiha kini pigane hene. Ani howa ibugua mali pira maria (40) Yarusalemeni kini howa haru hene. Ibu aiya Beaseba tano wali mini Sibia berene. <sup>2</sup> Yoasahanda ibu kini heangi mana bayaleore Anduane Homogonaga deni turu holene wiaru hangu bialu haabo henego irane loma binigo mo miaga agali mbira mini Yahoiahadabi ibugua ibunaga mini mandaru baya hangu mo tiga binigome ani biaga hene. <sup>3</sup> Ani bialu ha howa dege Kini Yoasa ibugua damahondo bi pupu wiaga anda hearu bo gialo wanahe helo waheagola wali agali tigua damahondo bi pupu wialu nogo bo lomabu mialu ira hagua ngabi mini inisenesirubi lomabu delaga bialu hene.

<sup>4</sup> Ani bialu howa Yoasa ibugua loma binigo mo miaga agali hearuhondo lamialu lalu, Wali agalime Anduane Homogonaga andaha dagisi muni mule yalu ibirarubi tigua Anduane Homogohondo turu halu mule lalu yalu ibirarubi bibahende mo mogo buwa baya hangu ngelalimu, lene. <sup>5</sup> Loma binigo mo miaga agali mbira mbira tinime wali agali hearume muni mule lalu yalu ibiraru baya hangu handaya ho haga hene. Muni yalu ibiyaru mo ngelo howa tigua Anduane Homogonaga anda loma bia hene biagoha mbira ko halu arema bulene wiagua muni urunime anda mo arema biaga agali karu yolo mulenaga mo wini.

<sup>6</sup> Ani mulene winigoyu Yoasa ibu kini heane mali pira kirani tebira (23) hayagola ibugua handalu hearia loma binigo mo miaga agali biarume Anduane Homogonaga anda biago mbira mo arema nabi dege hearia hendene. <sup>7</sup> Ani hondowa ibugua loma binigo mo miaga agali Yahoiahadabi maru hearubi olowa tihondo hale lalu, Irane aginaga Anduane Homogonaga anda kago mbirahayagi mo ko hene ngaru lone mo arema nabi dege kamibe. Muni mo wialu haabo harimiruni bame mo ngelowa holene nawigo ngelo harimidago ai agali biabe ogoni bulene karu tigua yu howa Anduane Homogonaga anda mo arema bulene ngaru bilo ngidaba, lene. <sup>8</sup> Ani layagola loma binigo mo miaga agali hearu tigua manda bialu kinihanda bi layadagoni karulapeda lo manda bialu lalu, Wali agalinaga muni lone mo wia nabimiya. Anduane Homogonaga anda kagoha mo arema bulene biabe ngarubi iname handaya ho nahamiya, lalu tini bi lo mbira hene.

<sup>9</sup> Emene howa Yahoiada ibugua mbogosi mbira mo yu puwa daliga panga heago-hayagi diri mbira tombelo wini. Ani buwa ibugua Anduane Homogonaga anda pole wali agali uba anda tagi biaga harabani lomabu delaga dabu heagoria kaware gi tigahayagi ngelene. Ani ngeleagola loma binigo mo miaga agali anda pangani handaya ho haga hearu tigua wali agalime muni migi biyaru mbogosi ogoniha mo baanda haga bini. <sup>10</sup> Loma binigo mo miaga agali mbogosi muni handaya ho haga uruni tigua handalu kamiria muni tolayadago handalu loma binigo mo miaga haguane heagobi kininaga beba gili bia dagala biaga heagobi lamiragola libugua nu yalu ibalu muni nuha haeala hanalu puwa daga laga biaga wini. <sup>11</sup> Ani daga lai howa libugua muni siliba uruni Anduane Homogonaga anda biagoha gobaha mo koha bigi bini wiaru arema bilo haru haga agali hearuhondo mo migi biaga wini. Ani miyagola haru haga agali biarume kabeanda biabe biaga hearubi <sup>12</sup> ege toleme anda biaga mugubeyi hearubi agali maru hari wiagoha howa ege tole anda bule podaga hearubi tihondo yolo miaga wini. Ani bialu ira pelene mbalapaya wiarubi ege tole marubi anda ogoni bulenaga yolo biaga wini. Biabe ogoni alego maru bulene wiyaguabi nde yolo bia dege biaga wini. <sup>13</sup> Tigua muni urunime Anduane Homogonaga andaha silibame wabini gaborubi ndisi berubi pilipe laga bigulirubi lamu hale delowa mo emeneha mo timbuniha bigi biaga wiarubi mbirale tara tara maru anda o biagoha ngelo lowa siliba ngolorume wabini wiarubi uruni wabulenaga muni mbira namiore. <sup>14</sup> Tigua muni uruni bibahendeore biabe biaga agali hearu yolo bialu mbirale biabe ogoni bulene wiaru hangu yolo biai hene. <sup>15</sup> Biabe biaga agali haru haga hearu ti nde muni page bulene manda nabi tigabioreme handaya ho heagola tigua muni agoha dege pelarimibe lalu hale nahaga hene. <sup>16</sup> Anigo muni maru wali agalirume tini ko biyagonaga mo tiga bialu loma wiyarubi tinaga ko wiaru domo wahelonaga loma wiyarubi uruni damenego Anduane Homogonaga andaha mbogosi wiagoha wia nabi loma binigo mo miaga agali hearu tinaga mo wigi bini. ✧

*Sirianaga kinime Yudali baba wai bule binigo ogo*

<sup>17</sup> Kini Yoasa ibugua Anduane Homogonaga anda biagoha biabe bilo agali maru dabo helaga bialu heaore dege Sirianaga Kini Hasaelehanda Isaraele dindiha wai bule anda ibini. Anda ibuwa Gede tano bo podalu karulowa wai bialu hene. Ani bialu howa uruni bo poda hana hai halu beregeda dai bialu Yarusalemeni wai bule pene. <sup>18</sup> Ani piyagola Yudanaga Kini Yoasa ibu Kini Hasaelela wai nabule lowa ibugua Hasaele mo palia holenaga muni yári tara tararubi dewaore Hasaele hearia yu pudaba lene. Mbirale dabudabu bamba Kini Yoasanaga mamali Yudali Kini Yahosabadahanda mo wini wiarubi Yahoramahanda mo wini wiarubi Ahasaiahanda mo wini wiarubi uruni bibahende tigua Anduane Homogonaga lalu daba bagiho wini wiarubi Yoasa ibugua mo wiai hene. Ani mo wiai howa Kini Yoasa ibunime mbirale bayale damenego Anduane Homogonaga lalu daba bagiho wini wiarubi heba mandagi wiamaga ho wini. Ani bialu ngolo muni damenego Anduane Homogonaga andaha wini wiarubi kini ibuninaga andagaha wini wiarubi bibahendeore Kini Hasaele mo palia hole lowa mo miai hene. Ani mo miai hayagola Kini Hasaele ibugua mbirale uruni mo yai halu wai nabi wahalu ibuni dalu dai bini.

<sup>19</sup> Biabe maru Kini Yoasahanda bialu heneru mbuga mbira mini Yuda Kini Henerunaga Te laga ngagoha gilibu winigo nga.

<sup>20-21</sup> Horo mbirungi Kini Yoasanaga haru haga agali haguane hearume kini bo wahole lo manda bialu hene. Agali uruni aria kirali Simeada igini Yosagabi Some igini Yahosabadabi libugua Kini Yoasa Sila dindiha pole piaga hariga wiagoria anda mbira heagoria bo wahene. Anda ogoni Yarusalemenaga leneha dindi ulini wiarua dindi dugu yalu ibuwa mogo bini winigoha henego ogoriani Yoasa bo wahene. Yoasa homayagola

ibunaga tingini ibu mamalirunaga homali Debidinaga tanoha hora haga wini wiagoha dege hora hene. Ani hora hayagola ibu igini Amasaiahanda ibu abanaga henge mialu kini ha aribia hene.

## 13

### *Yahoahasa ibu Isaraele dindiha kini henego ogo*

<sup>1</sup> Ahasaia igini Yoasa ibu Yuda dindiha kini heane mali pira kirani kira henego tebone (23) hayagola Yihu igini Yahoahasa ibu nde Isaraele dindiha kini pigane hene. Ibugua Samaria tanoha howa mali pira mbirani kariani (17) haru hene. <sup>2</sup> Ani haru howa ibugua Anduane Homogonaga deni howa mana ko timbuni Yaroboamahanda biaga wiadagua dege bialu hene. Ala bamba howa Yaroboama ibugua Isaraele wali agalime mana ko uruni ale bilo biawai henedagua dege Kini Yahoahasa ibuguabi nde mana ko uruni yu wanahe bialu hene. <sup>3</sup> Anidagua bialu heagola Anduane Homogohanda Isaraele wali agaliru baba keba timbuni hene. Keba timbuni howa ibugua Sirianaga Kini Hasaelehanda Isaraele baba wai bule dewa halu ibugu bilo henge migi bini. Mani Kini Hasaele homayagola ibu igini Benehadada kini ha aribia howa ibuguabi nde Isaraele baba wai bialu haabo hene.

<sup>4</sup> Ani bialu heagola Kini Yahoahasa ibugua Anduane Homogohondo bi lene. Bi layagola nde Siriali biarume Isaraele wali agali mo koore hayago hondowa Anduane Homogohanda Yahoahasanaga bi layago hale hene. <sup>5</sup> Ani hale howa Anduane Homogohanda agali mbira Isaraele wali agali biamogo bilo dabo helayagola agali ogoni ibugua Isaraele wali agali Sirialinaga giha howa gingilo mialu mo wini. Ani mo wiyagola Isaraele wali agali ti abale wai nabi bayale hagadagua hodai bialu tini dindini hene.

<sup>6</sup> Anigo tigua mana ko bamba Kini Yaroboamahanda biawai hayagola bialu hene wiaru yu wanahe bialu haabo hene. Tigua dama wali beda mitangi bialu mbirale gime wabini mini Asera laga Samaria dindiha wiago mo wanahe ngelo hene.

<sup>7</sup> Ogoningi Sirianaga kini heagome Isaraelenaga ami agali daliahe bu heneru bo wahaiore heagola Kini Yahoahasa ibunaga ami dewa nahe wini. Iibunaga ami agali hosini biruwa wai biaga pira duriabi (50) wai biaga karisi pira hangubi ami agali maru daosini dege pirabi (10,000) uruni hangu ona hene.

<sup>8</sup> Biabe maru Kini Yahoahasa ibugua bialu henedarunaga te mbuga mbira mini Isaraele Kini Henerunaga Te laga ngagoha gilibu winigo nga. <sup>9</sup> Kini Yahoahasa homayagola ibu tingini Samaria dindiha hora hene. Ani hora hayagola ibu igini Yahoasahanda ibu abanaga henge ibuni mialu kini ha aribia hene.

### *Yahoasa ibu Isaraele dindiha kini henego ogo*

<sup>10</sup> Yudanaga Kini Yoasa ibu Yuda dindiha kini heane dege mali pira tebirani waragaria henego kane (37) hayagola Yahoahasa igini Yahoasa ibu nde Isaraele dindiha kini pigane ogoningi hene. Ani haru howa ibugua Samariani mali pira mbirani waragaria (16) haru hene. <sup>11</sup> Yahoasa ibugua haru heangi Anduane Homogonaga deni howa mana ko Yaroboamahanda bamba bialu hagadagua dege bialu hene. Ala bamba howa Yaroboama ibugua Isaraele wali agalime mana ko wiaru bialu helo biawai halu haga hene. <sup>12</sup> Biabe maru Yahoasahanda bialu heneru mbuga mbira mini Isaraele Kini Henerunaga Te laga ngagoha gilibu winigo nga. Mbuga ogoniha Yahoasa ibugua Yudanaga Kini Amasaiala wai honghe napalueneore ua laga bialu henegonaga te gilibu nga. <sup>13</sup> Kini Yahoasa homayagola tigua ibunaga tingini Samaria tanoha kini maru hora haga wini wiagoha hora hene. Ani hora halu mani ibu igini Yaroboama mende henego ibugua ibu abanaga henge mialu Isaraelenaga kini ha aribia hene.

### *Elaisa homenego ogo*

<sup>14</sup> Yahoasa ibu kini heangi Elaisa warago timbuni bo wini. Ai homoleore wiagola Kini Yahoasa ibu hondo pole pene. Yahoasa ibugua Elaisa dara timbuni halu dugu bialu lalu,

Aba-o inaga aba-o íore Isaraele wali agali mo wiaga hongo tarahe howa nogo hosiru karisiru ale harigoni, lene.✧

<sup>15</sup> Ani layagola Elaisa ibugua kinihondo lamialu lalu, Danda timuru mo yalu ibule pu, laya handala Kini Yahoasa ibugua pialu mo yalu ibini. <sup>16</sup> Ani biyagola Elaisa ibugua ibuhondo lalu, Danda mo yuwa edaho ha, layagola kini ibugua Elaisahanda bia lalu lamiyadagua biyagola Elaisaibunaga gi kininaga gini dogolo paga hene. <sup>17</sup> Ani buwa mani Elaisa ibugua kinihondo lalu, Windo mbira amu ni tagira ibiragohayagi kago dugua hole pu, lene. Ani laya handala Yahoasa ibugua danda timu edaho hayagoni yupe halu windo layago dugule pene. Dugua heagola Elaisa ibugua lalu, Danda edalu timu batagiha, lene. Yahoasa ibugua timu biago tegelape halu batagi heagola Elaisahanda lalu, Sirialiru bope halu wayali holene Anduane Homogonaga timu inida. Ai ina Sirialiru baba Abege tanoha wai berengi ina ti baiore holebere, lene.

<sup>18</sup> Ani lowa Elaisa ibugua kinihondo lamialu lalu, Timu maru ngaruni mo yalu timu urunime dindi o ngagoni ba, lene. Ani layagola Kini Yahoasa ibugua timu biarume dindi halu tebira bene. <sup>19</sup> Kini Yahoasahanda o bayadagoni hondowa Elaisa ibu keba timbuni howa kinihondo lamialu lalu, Ina dau halu waraga halubi mbira babe naheyane biribe. Anidagua bidele nde ina Siria baba wai buwa ti bai halu i wayali kelego ai wahalu ina ti halu tebira hangu balu wayali holebere, lene.

<sup>20</sup> Ani biyagola howa mani Elaisa ibu homene. Homayagola tiguaibunaga tingini homali egeanda mbira wabu winiyagoha mo hora hene.

Mali bibahendengi Moabali hearume Isaraele dindiha anda pialu wali agali hearu mo ko halu haabo haga wini. <sup>21</sup> Horo mbirungi Isaraele wali agali ti homa mbira hora halu hemiria tigua Moabali maru ibiyaria hendene. Ani hondowa tigua agali homene biagonaga tingini Elaisa hora hene homali agali kuniru buwi wiagoha bape halu tini ibida pene. Ani bape halu ti piyagola agali tingini biago Elaisanaga kuni bu wiaruha wia dambi hayagola kuni uruni ela hayagome agali homene tingini biagoha buhe lolene lone karula hayagola ibu lone heyini.

### *Siria Isaraelela wai binigo ogo*

<sup>22</sup> Yahoasa aba Yahoahasa ibu Isaraele dindiha kini heangi Sirianaga Kini Hasaele ibugua Isaraele wali agali mo mini burugula halu wai bialu haabo hene. <sup>23</sup> Ani bialu heago helowa Anduane Homogohanda nde Isaraele wali agali mitangi halu dara haga hene. Ibugua bamba Abarahamalabi Aisagalabi Yagabalabi habo nalolene bi lo winigo mitangi bialu Isaraele mo ko naheloibunime ti biamogo bigi bialu hene. Isaraele wali agali uruni tiibunaga deni nahelo dindi kaundiaha bo talialu pe nale ti biamogo bini. <sup>24</sup> Mani howa Sirianaga Kini Hasaele homayagola ibu igini Benehadadahanda ibu abanaga henge ibuni mialu Sirianaga kini hene. <sup>25</sup> Ani heagola Isaraelenaga Kini Yahoasabiibunaga ami hearubi tigua Sirianaga Kini Benehadada haluibunaga ami agali hearu baba wai bini. Tigua wai timbuni halu tebirago ua laga bialu buwa Isaraele kini haluibunaga ami agali biaru tigua Siria bo poda hana hene. Ani bialu bamba Kini Hasaelehanda Isaraele baba wai bialu dindi maru Siria tigua karulo hene wiaru tini bo yu dai bini.✧

## 14

### *Amasaia ibu Yuda dindiha kini henego ogo* (2 Bi Te 25.1-24)

<sup>1</sup> Yahoahasa igini Yahoasa ibu Isaraele dindiha kini heane mali mbira henego mende hayagola Yoasa igini Amasaia ibu nde Yuda dindiha kini hene. <sup>2</sup> Amasaia ibu aija Yarusaleme tano wali mini Yoadini ibuni taba henenegoria howa hama ibinigo mali

pira kirani duria (25) hayagola Amasaia ibu kini pigane hene. Kini howa ibugua Yarusalemeni mali pira kirani dira (29) haru hene. <sup>3</sup> Amasaia ibugua Anduane Homogonaga deni mana bayale tigabiru bialu henegoyu ibu mamali Debidihanda biaga wiadagua nabini. Ibugua ibu aba Yoasahanda bialu hagadagua dege bialu hene. <sup>4</sup> Ibugua mbirale dama mitangi bialu gime wabinirunaga bi pupu wiaga anda hearu bo gialo wanahe helo wahene. Ani helo waheagola wali agali hearume anda uruniha puwa damanaga lomaru wialu mbirale ira hagua ngabilo delaga mini inisenesiru lomabu delaga bialu hene.

<sup>5</sup> Kini Amasaia ibu Yuda dindiha howa baya hangu hongo howa haru heangi ibugua agali bu hearuhondo bidaba layadagua bialu tigua agali haguane abale ibu aba Kini Yoasa bo wahayaru bibahende bo wahi hene. <sup>6</sup> Anigo agali haguane uruni ti waneigini bu hearu bo wanahe helo wahene. Ibugua anidagua binidagoni irane bamba Anduane Homogonaga bi mana Mosesehanda gilibu wini biagoha wiago talialu ani bini. Anduane Homogonaga bi mana uruni ogodagua gilibu nga. Waneiginime mana ko biyagua ogoninaga pani aba aiyalahondo mialu bo waholene nawi. Anidagua dege aba aiyalame mana ko biyagua ogoninaga pani waneigini mia aribia halu waneigini bo waholene nawi. Mana ko biyagome ibuni dege homelo bo waholene nga, lalu ogonidagua gilibu winigo nga.\*

<sup>7</sup> Horo mbirungi Kini Amasaia halu ibunaga ami agali heba dindi mbira mini Dindi Ulini Ibi Wiaga laga wiagoriani wai bialu howa tigua Idomonaga ami agali daosini dege pira (10,000) bo wahi howa Sela tano wiago ti karulene. Karulowa Kini Amasaia ibugua tano ogoni mini gahenge wia aribia halu Yogodele mo wini. Mini ogoni ayubi wiaabo ka.

<sup>8</sup> Mani Amasaia ibugua Isaraelenaga Kini Yahoasa hearia bi lo pelalu lalu, Ina baba wai bimiya ibidaba, lene. Yahoasa ogoni ibu Yahoahasa igini howa Yihu aguane hene. Agali bi yalu piyaru tigua Yahoasa hearia puwa Amasaiahanda bi layadagua lamini.\*

<sup>9</sup> Ani lamiyagola Kini Yahoasa ibugua Amasaianaga bi layiyago ladai bialu bi yobage mbira tihondo ogodagua lene. Bamba Lebanono dindi hariha ira emene ko anihe mbira heneyagome ira timbuni tamia heagohondo bi lo pelalu lalu, I wane bedago i igini kagome dabu bilo ngibelo hamelo ko, laya. Ani lo heagola nogo gabua timbuni mbira ibu hariga ira anihe ogoni heagoha bolangua halu piyaria ibunaga geme ira anihe ogoni hingedayagola gabu hayiya, lene. <sup>10</sup> Yahoasa ibugua bi yobage ogoni lai howa bi maru Amasaiahondo ladai bialu lalu, Amasaia-o ina Idomoali baba wai buwa wayali hari layane hale harugo ai inaga bu miniha turu timbuni halu kulo howa ininaga mini yaraga halu kedalo manda bu ko. Dindi ogoniha howa wai bialu wayali harigome i mini lene harigo ai ininaga dindi wiridagoria howa turu hagabu halu ini andagani hondo holene nga. Bameore ina baba wai bule ibalu keria ini mo ko halu Yuda wali agalibi heba mo ko hai holene yu anda ibuligo ema nabi hendore holene nga, lalu ladai bini.

<sup>11</sup> Ani layago lelowa Amasaia ibugua bi ogoni mo wahene. Ogonidagua biyiyago handalu Isaraelenaga Kini Yahoasa ibugua ibunaga ami agali hearu haru halu Yuda dindiha Bede Semese wiagoria puwa ibugua Amasaia halu ibunaga ami agali hearu baba wai bialu hene. <sup>12</sup> Wai biaho wialu Isaraele ami biarume Yuda ami hearu bo poda hanaore hayagola Yuda ami biaru tini dindiha pora bialu ibida piai hene. <sup>13</sup> Ani piai hayagola Yahoasahanda Amasaia minu yalu garabaya bu helene. Ani bialu Kini Yahoasa ibugua ibunaga ami agali biaru ti Bede Semese yu wahalu tidi yalu Yarusaleme tano anda pene. Anda pialu tigua tanonaga ege pabe timbuni wiagonaga panga haraba mbira mini Eberaiminaga Panga lagane henegoria howa bo gialama amuraore pialu pabe pau layagoria panga mende mini Pau lagane wiagoria gialairi hene. Wai pabe gialenedago lunaga magi manda mida handari kira (200) agima gialai hene. <sup>14</sup> Gialai

\* 14:6: Man 24.16    \* 14:8: 2 Kin 12.20-21



halu tanoha anda puwa Kini Yahoasa ibugua muni ngolo silibaru bibahende tanoha wiaru damene mo yai hene. Ani mo yai halu Anduane Homogonaga andaha anda puwa gabo bebi ndisi bebi bibahende wiaru mo yalu muni mbiraleru kini andagaha wiarubi mo yai dege hene. Ani bialu agali haguane maru Yuda dindiha hearu minu garabaya biai howa ibugua Amasaiahondo lalu, Amasaia-o ina ina Isaraele baba wai lone bule manda nabibe. Wai bulene manda biriyagua nde inaga agali haguane o garabaya haru halu poramaruni bibahende homelo bo wahai holebero, lene. Ibugua bi ogoni lai howa Yuda agali haguane biaru garabaya haru ha mbirale mo yayaruni ya bialu Samaria tano dai bini.

<sup>15</sup> Biabe maru Kini Yahoasa ibugua bialu henedarunaga te mbuga mbira mini Isaraele Kini Henerunaga Te laga ngagoha gilibu winigo nga. Mbuga ogoniha ibugua biabe hongohe bialu henegonagabi Yudanaga Kini Amasaia baba wai binidagonagabi te gilibu wigi bida. <sup>16</sup> Mani Kini Yahoasa homayagola tiguaibunaga tingini kini maru heneru hora haga homali Samaria tano wiagoha dege hora hene. Ani biyagola ibu igini Yaroboama mende henegome ibu abanaga henge mialu kini ha aribia hene.

*Kini Amasaia homenego ogo*

*(2 Bi Te 25.25-28)*

<sup>17</sup> Isaraelenaga Kini Yahoasa ibu homeagola Yudanaga Kini Amasaia ibu mali pira mbirani duria (15) halu homene. <sup>18</sup> Amasaiahanda biabe maru bialu henedarunaga te mbuga mbira mini Yuda Kini Henerunaga Te laga ngagoha gilibu winigo nga.

<sup>19</sup> Kini Amasaia ibu Yarusaleme tanoha heagola agali maru hearume ibu homelo bo wahole ndilalu hene. Tigua bi uruni lalu ka layago hale halu Amasaia ibu Yarusaleme yu wahalu Lagisi tano ibida pene. Ani pu heagolaibunaga waitigi hayadarunime agali maru hearuhondo lamialu, Kini ibu Lagisi tanoha holebirago bo wahole pudaba, laya handala puwa tigua Amasaia hearia pialu ibu bo wahene. <sup>20</sup> Ani bo wahayagola agali maru hearume Amasaianaga tingini hosinaga erekunini mo paga halu Yarusaleme mo yu dai bini. Mo yu dai buwa ibu mamalinaga homali Debidinaga tano wiagoha winigo ogoniha dege hora hene. <sup>21</sup> Hora hayagola Yudali bu hearume Amasaia igini Usia mini mende Asaraia henego ogoni ibu abanaga henge ibuni mialu Yuda dindiha kini ha aribia helo dabo helene. Usiaibunaga mali pira mbirani waragaria (16) heagola Yudanaga kini pigane hene. <sup>22</sup> Mani ibu kini ho howa ibugua wai timbuni mbira bialu tano mbira mini Elada winigo ogoni waitigirunaga giha howa ibuni mo yu dai bini. Ani bialu tano ogoniha maru giala hole bu wiaruni mo tiga bialu lone arema bialu hene.

*Yaroboama mende ibu Isaraele dindiha kini henego ogo*

<sup>23</sup> Yoasa igini Amasaia ibu Yuda dindiha kini heane mali pira mbirani maria henego dauni (15) hayagola Yahoasa igini Yaroboama mende ibu nde Isaraele dindiha kini pigane hene. Ibugua mali pira mariani huniane mbira (41) kini howa Samaria tanoni haru hene. <sup>24</sup> Ibugua Anduane Homogonaga deni mana ko timbuni bialu bamba Nabada igini Kini Yaroboama mbira henegome bialu hagadagua dege bialu hene. Kini Yaroboama mbira ala henegome ibu Isaraele wali agali haru pubagi halu Anduane Homogonaga deni mana ko bialu helo mo biahaga hene. <sup>25</sup> Kini Yaroboama mende ibu kini nahe heangi waitigi bu hearume Isaraele wali agalinaga dindi dewaore ti page bialu karulo hai hene. Ani heagola Kini Yaroboama mende ogoni ibugua wai bialu tinaga dindi karulo henedaruni Hamada tanoha polene hariga wiagoria howa wai bialu tini mo yu dai bigi bima pialu unurayagi iba kuyama mini Homene Iba laga bereagoria wai bialu dindi mo yu dai bigi bima pene. Ani binidagoni bamba Anduane Homogo Isaraelenaga Ngode Datagaliwabehandaibunaga biabe biahaga Amidai igini Yonaha howa bi mana latagi halu mbiwia henego henene lola hene. Bi mana latagi haga Yona ogoni ibu bamba Gada Hebe tanoali hene.✧

<sup>26</sup> Anduane Homogo ibu handa dali howa Isaraelenaga waitigi bu hearume ibalu Isaraele genda timbuni mo mialu wali agali dewaore bo wahai heagola yu wahene mbira mbira hangu hama pearia hendene. Ani handalu ibugua ti biamogo bulene agali bayale mbira nahe degeyane hendene. <sup>27</sup> Ani hondowa Anduane Homogo ibugua Isaraele wali agali bibahende bo wahaiore holene manda nabi hene. Ibugua Yahoasa igini Yaroboama mende biagoha howa ibunaga Isaraele wali agali biamogo bialu haru dai bilonaga kini ogoni dabo helene.

<sup>28</sup> Biabe maru Kini Yaroboama mende ibugua bialu henedarunaga te mbuga mbira mini Isaraele Kini Henerunaga Te ngagoha gilibu nga. Mbuga ogoniha Kini Yaroboama mende biago ibugua tano kira Damasagasa Hamadala mo yu dai bulenaga wai bialu henegobi biabe hongohe maru bialu henerunagabi gilibu wigi bida. <sup>29</sup> Yaroboama mende biago homayagola tigua ibunaga tingini kini maru heneru hora haga homali wiagoha dege hora hene. Ibu igini Segaraiahanda ibu abanaga henge mialu Isaraele-naga kini ha aribia hene.

## 15

### *Usia ibu Yuda dindiha kini henego ogo (2 Bi Te 26.1-23)*

<sup>1</sup> Yaroboama mende ibu Isaraele dindiha kini heane mali pira kirani waragaria henego kane hayagola (27) Amasaia igini Usia ibu nde Yuda dindiha kini pigane hene. Usia ogoni ibunaga mini mende Asaraia wini. <sup>2</sup> Ibu aiyahanda taba hanayangi howa hama ibinigo ibunaga mali pira mbirani huniane waragaria (16) hayagola ibu kini howa ibugua mali pira duriani huniane kira (52) Yarusaleme tanoha howa haru hene. Ibu aija Yarusaleme tano wali mini Yagolia berene. <sup>3</sup> Usia ibugua Anduane Homogo turu helo ibunaga deni howa mana bayale ibu aba Amasaiahanda bialu haga wiadagua taluwa bialu haga hene. <sup>4</sup> Ani bialu henegoyu mbirale dama mitangi bialu gime wabinirunaga bi pupu wiaga anda hearu dege bo gialo wanahe helo wahene. Ani helo waheagola wali agali hearume anda uruniha puwa damanaga lomaru wialu mbirale ira hagua ngabilo delaga mini inisenesiru lomabu delaga bialu hene. <sup>5</sup> Horo mbirungi Anduane Homogohanda Kini Usianaga tingini ge hamua ale bilene. Ge hamua ale ogoni dabi habe naheore bu haabo hene. Ani biya handala Usia ibu kini andaga yu wahalu ibuni hangu anda mendeha hene. Ani piyagola ibu igini Yodamahanda kininaga biabe bulene wiaru bialu kini andagabi Yuda dindi bibahendebi ibuni handaya ho hene.

<sup>6</sup> Biabe maru Kini Usiahanda bialu henedarunaga te mbuga mbira mini Yuda Kini Henerunaga Te laga ngagoha gilibu winigo nga. <sup>7</sup> Kini Usia homayagola tigua ibunaga tingini Debidinaga tanoni ibu mamaliru hora haga wini wiagoha dege hora hene. Ani hora halu ibu igini Yodamahanda ibu abanaga henge mialu Yuda dindiha kini ha aribia hene.✧

### *Segaraia ibu Isaraele dindiha kini henego ogo*

<sup>8</sup> Usia ibu Yuda dindiha kini heane mali pira tebirani karia henego huniane halini (38) hayagola Yaroboama mende biago igini Segaraia ibu Isaraele dindiha kini pigane hene. Ani howa ibugua ege waragaria hanguni kini howa Samaria tanoni haru hene. <sup>9</sup> Ani haru howa Segaraiahanda ibu mamalirume Anduane Homogonaga deni howa mana ko wiaru bialu hagadagua dege ibuguabi bialu hene. Bamba Nebada igini Yaroboama mbira ibugua Isaraele wali agalime Anduane Homogonaga deni howa mana ko uruni ale bialu helo haru pubagi howa mo biahaga henedagua Segaraia ibuguabi ani dege bialu hene. <sup>10</sup> Ani bialu heagola Yabese igini Salumu halu agali maru hearume Kini Segaraia homelo bo wahole hariga taya bialu hene. Mani howa Salumuhanda Ibileama

✧ 15:7: Ais 6.1

dindiha wali agali bu hearu bibahendenaga deni howa Kini Segaraia homelo bo wahalu ibuni kini ha aribia hene.

<sup>11</sup> Biabe maru Kini Segaraiahanda bialu henedarunaga te mbuga mbira mini Isaraele Kini Henerunaga Te laga ngagoha gilibu winigo nga.

<sup>12</sup> Bamba Anduane Homogohanda Kini Yihuhondo lamialu lalu, Inaga aguanenerume ma daba hanguni kini howa Isaraele wali agali haru holebira, lalu bi lowini. Bi ogoni lo winidagua heneneore lola hene.

### *Salumu ibu Isaraele dindiha kini henego ogo*

<sup>13</sup> Usia ibu Yuda dindiha kini heane mali pira tebirani halira henego dini (39) hayagola Yabese igini Salumu ibu Isaraele dindiha kini pigane howa ibugua Samaria tanoni ege mbira hanguni haru hene.

<sup>14</sup> Ogoningi dege Gadi igini Menaheme ibu Tisa tano howa Samaria tano ibalu ibugua Kini Salumu bo wahalu ibuni kini ha aribia hene.

<sup>15</sup> Biabe maru Kini Salumuhanda bialu henedarunaga te mbuga mbira mini Isaraele Kini Henerunaga Te laga ngagoha gilibu winigo nga. Mbuga ogoniha biabe maru Salumu halu agali marubi tigua Kini Segaraia homelo bo waholenaga bialu henedaru ogodagua bialu hene lalu te gilibu wigi bida. <sup>16</sup> Menaheme halu ibunaga agali haru halu Tisa tano yu wahalu Samaria tano pole Tibisa tano wiagoria anda pene. Ani pialu hearia Tibisali bu hearume tinaga tanoha anda naibule lene. Ani layagola Menaheme halu ibunaga agali ibinidarunime Tibisa tano ogoni mo ko halu bo gialahole bini. Ani bialu tigua wali agali Tibisa tano ogoniha haga hearubi maru tano kaware ngelo haga bu hearubi bibahende homelo bo wahai hene. Ani buwa tigua wali maru tombaha gali bere berearunaga tombene podo haealaga biyagola homaga bini.

### *Menaheme ibu Isaraele dindiha kini henego ogo*

<sup>17</sup> Usia ibu Yuda dindiha kini heane mali pira tebirani halira henego dini (39) hayagola Gadi igini Menaheme ibu nde Isaraele dindiha kini pigane howa ibugua mali pirani Samaria tanoni haru hene. <sup>18</sup> Ani haru howa ibu Anduane Homogonaga deni mana ko wiaru bamba Nebada igini Kini Yaroboama mbira henegome ibuni ko bialu wali agali hearumebi Anduane Homogonaga deni ko bialu helo mo biahagadagua dege Menaheme ibuguabi nde ani dege bialu hene. Ibugua mana ko ngubi urunidagua biaabo halu ibuni homolene ibilo hene. <sup>19</sup> Menaheme ibu kini heangi Asirianaga Kini Tigilada Pilese ibugua Isaraele baba wai bule ibini. Tigilada Pilese ibu mini mende Pulu hene. Wai bule ibiyagola Menaheme ibugua muni siliba kina ale milini tebira (K3,000,000) Tigilada Pilesehondo mini. Ani minigo irane Tigilada Pilese ibugua Kini Menaheme baba wai nabi wahelobi Menaheme ibuni Isaraele dindiha kini bayale hongohe holenaga biamogo bilobi yolo uruni ibugua Tigilada Pilesehondo mini. <sup>20</sup> Muni siliba uruni ilu mogo bulenaga Menaheme ibugua agali homogo muniwi hearuha dagisi ale ngidaba laga bini. Ibugua agali mbira mbirahondo muni siliba kina lalu pira duria (K50.00) ale dege dege ngidaba laga bialu miyagola Menahemehanda Kini Tigilada Pilesehondo mo migi bini. Ani mo miya handala Tigilada Pilese ibu Isaraele dindi yu wahalu ibuni dalu dai bini.

<sup>21</sup> Biabe maru Menahemehanda bialu henedarunaga te mbuga mbira mini Isaraele Kini Henerunaga Te laga ngagoha gilibu winigo nga. <sup>22</sup> Menaheme homayagola hora halu ibu igini mbira mini Pegahiahanda ibu abanaga henge mialu kini ha aribia hene.

### *Pegahia ibu Isaraele dindiha kini henego ogo*

<sup>23</sup> Usia ibu Yuda dindiha mali pira duriani (50) kini heagola Menaheme igini Pegahia ibu Isaraele dindiha kini pigane howa mali kira hangu Samaria tanoni haru hene. <sup>24</sup> Ani haru howa ibugua Anduane Homogonaga deni mana ko bialu bamba Nebada igini Kini Yaroboama mbira ibugua mana ko wiaru bialu wali agali hearumebi bialu helo mo

biahaga henedagua dege Pegahia ibuguabi ani bialu hene. <sup>25</sup> Anidagua bialu heagola ibunaga ami agali haguane mbira Lemalia igini Pega henego ibugua Gileada tanoali pira duria (50) hearu heba ndilalu Pegahia homelo bo wahamiya lene. Ani lalu pialu tigua Samaria tanoha kini andaga anda hongohe tigi pabe bu yaanda hene wiagoha Pegahia berearia anda puwa Pegahia homelo bo wahene. Ani bialu agali kirali Agobo Arialabi bo wahalumu Pega ibuni kini hole ibugua Pegahianaga henge mialu Isaraele dindiha kini ha aribia hene.

<sup>26</sup> Biabe maru Pegahiananda bialu henedarunaga te mbuga mbira mini Isaraele Kini Henerunaga Te laga ngagoha gilibu winigo nga.

*Pega ibu Isaraele dindiha kini henego ogo*

<sup>27</sup> Usia ibu Yuda dindiha kini heane mali pira duriani mbira henego mende (52) hayagola Lemalia igini Pega ibu kini pigane howa ibugua mali pira kirani (20) Samaria tanoni haru hene. <sup>28</sup> Ani haru howa ibugua Anduane Homogonaga deni howa mana ko bialu bamba Nebada igini Kini Yaroboama mbira ibugua mana ko wiaru bialu wali agali hearumebi bialu helo mo biahaga henedagua dege Pega ibuguabi ani bialu hene.

<sup>29</sup> Pega ibu Isaraelenaga kini heangi Asirianaga Kini Tigilada Pilese ibugua Isaraele baba wai bialu hene. Wai bialu ibugua Iyono tanobi Abele Bedemaga tanobi Yanoa tanobi Kedese tanobi Haso tanobi bo poda hana halu karulai hene. Ani bialu ibugua Gileada dindibi Galilihayagibi Nabadali hameigininaga dindi wiaru bibahendebi bo poda hana hai halu karulai hene. Ani karulai howa dindi uruniha wali agali bu hearu bibahende minalu Asiria dindiha garabaya bu yalu piai hene.

<sup>30</sup> Usia igini Yodama ibu Yuda dindiha mali pira kirani (20) kini heagola Ela igini Hosia halu agali maru heba ndilalu Kini Pega homelo bo wahamiya lene. Ani lalu puwa mani Hosia ibugua Kini Pega homelo bo wahalumu ibuni Isaraele dindiha kini ha aribia hene.

<sup>31</sup> Biabe maru Kini Pegahanda bialu henedarunaga te mbuga mbira mini Isaraele Kini Henerunaga Te laga ngagoha gilibu winigo nga.

*Yodama ibu Yuda dindiha kini henego ogo  
(2 Bi Te 27.1-9)*

<sup>32</sup> Pega ibu Isaraele dindiha kini heagola mali mendeni Usia igini Yodama ibu Yuda dindiha kini pigane hene. <sup>33</sup> Yodama ibu aiyahanda taba hanayangi howa hama ibalu ibunaga mali pira kirani huniane duria (25) hayagola ibu kini howa ibugua Yarusaleme tanoha mali pira mbirani waragaria (16) haru hene. Ibu aiyu mini Yarusu ibu agali mbira henego mini Sadogo wane berene. <sup>34</sup> Yodama ibugua kini howa ibu aba Usiahanda bialu henedagua Anduane Homogo turu helo ibu deni howa mana bayale tigabi wiaru bialu hene. <sup>35</sup> Ani bia bialu howa dege mbirale dama mitangi bialu gime wabinirunaga bi pupu wiaga anda hearu dege bo gialo wanahe helo wahene. Ani helo waheagola wali agali hearume anda uruniha puwa lomaru wialu mbirale ira hagua ngabilo delaga mini inisenesiru delaga bialu hene. Yodama ibugua ibunaga biabe biahaga hearuhondo bidaba layagola tigua Anduane Homogonaga anda biago daliga uyurahayagi heagonaga panga haraba mini Daliga Panga laga heago wabu helene.

<sup>36</sup> Biabe maru Yodamahanda bialu henedarunaga te mbuga mbira mini Yuda Kini Henerunaga Te laga ngagoha gilibu winigo nga. <sup>37</sup> Yodama ibu Yuda dindiha kini heangi Anduane Homogohanda Sirianaga Kini Lesinila Isaraelenaga Kini Pegalame libunaga ami agali bu hearu haru halu Yudali baba wai pigane bule tidi yalu pelene. <sup>38</sup> Mani Yodama homayagola tigua ibunaga tingini ibu mamalirunaga homali Debidi tanoni wini wiagoha hora hene. Hora hayagola ibu igini Ahasahanda ibu abanaga henge mialu kini ha aribia hene.

## 16

### *Ahasa ibu Yuda dindiha kini henego ogo (2 Bi Te 28.1-27)*

<sup>1</sup> Pega ibu Isaraele dindiha kini heane mali pira mbirani waragaria henego kane (17) hayagola Yodama igini Ahasa ibu Yuda dindiha kini pigane hene. <sup>2</sup> Ahasa ibu aiyahanda taba hanayanghi howa hama ibalu ibu mali pira kira (20) hayagola kini howa Yarusaleme tanoha mali pira mbirani waragaria (16) haru hene. Ani haru howa ibu mamali Kini Debidihanda mana bayale biagadagua nabi howa ibugua Anduane Homogo ibunaga Ngode Datagaliwabe turu helo ndo ibunaga deni mana bayale bulene wiaru nabi hene. <sup>3</sup> Ani nabi howa ibugua Isaraelenaga kini ala hene biarume ko bialu henedagua bialu haga hene. Ani bialu howa ibugua mana ko lehe dewa dege dindi ogoriani wali agali tara abale henerume biaga mana wiaru talialu bialu hene. Anduane Homogohanda wali agali ala bambaore dindi ogoniha henedaruni bo taliatagi halu Isaraele wali agaliru tihondo dindi ogoni mo mini. Ani binigo Kini Ahasa ibugua wali agali tara urunime mana ko abale bialu henedadagua dege bialu ibuni igini mbira henego damahondo loma buwa irani bo delene. <sup>4</sup> Ani bialu Ahasa ibu dama mitangi bialu mbirale gime wabinirunaga bi pupu wiaga anda hearuha piaga hene. Bi pupu wiaga anda uruni dindi hari nene wiaruha wialu ira timbuni hearunaga tene gumba heagohabi wiaga wini. Ani wiaga wiagoha howa Ahasa ibugua lomaru bo delalu ira hagua ngabilo delaga mini inisenesiru lomabu delaga bialu hene.

<sup>5</sup> Ani bialu heagola Sirianaga Kini Lesinila Isaraelenaga Kini Pegalame libunaga ami agali hearu haru halu ibuwa Yarusaleme tano ho hagira bini. Ani buwa tigua Yarusalemeni wai bialu hemiria Ahasa halu ibunaga ami agali hearu bo podabe nahe hongoheore hearia hendene. <sup>6</sup> Ti ani bialu hea tambu Idomonaga kini ibugua Elada tano mo yu dai bulenaga wai bule puwa Elada tanoha Yudali hearu bo taliatagi halu tano ogoni karulene. Ani bialu Idomo wali agali bu hearu Elada tano ogoniha hole pudaba lenego ti áyubi ogoriani haabo ka. <sup>7</sup> Kini Lesinila Kini Pegalame Yarusaleme ho hagira bu yaanda howa haabo hea handala Yudanaga Kini Ahasa ibugua Asirianaga Kini Tigilada Pilese hearia bi yalu pelo lawia halu lalu, <sup>1</sup> Kini Ahasa inaga biabe biahagabi <sup>1</sup> iginibi kogo. Áyu Sirianaga kinibi Isaraelenaga kinibi libu harume <sup>1</sup> baba wai bialu kamagoni. Ai libugua <sup>1</sup> baba wai nabilo ina bo wahai nahelobi ina wai bule ibabelo hamelo ko, lalu lawia hene. <sup>8</sup> Ani lalu Kini Ahasa ibugua muni siliba ngoloru Anduane Homogonaga andaha wini wiarubi kini andagaha wini wiarubi bibahende Asirianaga kini heago wai bule ibilonaga yolo ogoni wia halu yalu pudaba lene. <sup>9</sup> Ani layago hale howa Asirianaga Kini Tigilada Pilese ibugua ibunaga ami agali haru halu ibuwa Damasagasa tanoni wai bialu bo poda hana halu tano ogoni karulene. Ani karulowa ibugua Kini Lesini biago bo wahalú Damasagasa wali agali bu hearu bibahende Kia tanoha garabayabu yalu pene.

<sup>10</sup> Mani howa Kini Ahasa ibu Damasagasa tanoha Kini Tigilada Pilese hearia hondo pene. Ani pu howa tano ogoniha lomabu delaga dabu bia heago hendene. Ani hondowa ibugua ogobiore lalu wiagobiore bebani wabu yalu bimebi ogodagua bini wia lalu gilibu yini. Ani buwa ibugua beba ogoni agali mbira mini Uria ibu loma binigo mo miaga agali henego ibu Yarusalemeni hearia lomabu delaga dabu mbira ogonidagua wabu helabe lalu beba biago ibu hearia Yarusaleme pelene. <sup>11</sup> Ani pelayagola Uria ibugua lomabu delaga dabu gahenge Damasagasani henedagobi dege wabu helene. Kini Ahasa ibu Yarusaleme dai nabi heaore dege Uria ibugua dabu ogoni abale wabu helene. <sup>12</sup> Ahasa ibu Yarusaleme dai buwa handalu hearia dabu gahenge biago abale wabu helearia hendene. Ani hondowa ibugua dabu ogoriani mbirale bo lomabu delole

✧ 16:3: Man 12.31 ✧ 16:5: Ais 7.1 \* 16:6: Bi ogoni áyu ina kamangi manda bialu ndo abale agali mbuga ogo gili binidangi manda bialu lene.



lowa dabu heagoria pene. <sup>13</sup> Ani pu howa ibugua loma dai helo bo delalu widirubi lomabu delalu waini ibarubi odo delalu bini. Ani bialu ibugua Anduane Homogola ho gimbu bulenaga loma bo delenenaga darama hambu wiarume lomabu delaga dabu heagoria odo delaga bini. <sup>14</sup> Ahasahanda loma uruni bo delaga dabu gahenge biagoria bo delai howa lomabu delaga dabu ala hene ege tole boronosime wabini heago mo yalu pubagi halu yalu puwa dabu gahenge biagonaga lene mbira uyurahayagi mo wini. Abale lomabu delaga dabu boronosime wabini ogoni ibu dabu gahenge biagola Anduane Homogonaga anda haraba wiagola hengene wiagoria mo ngelene. <sup>15</sup> Ani mo ngelowa Kini Ahasahanda Uriahondo lalu, Ina loma biniru bo delarengi inaga dabu timbuni gahenge ogoriani dege bo delaabo habe. Egerebagi bibahendengi loma irani dai helo bo delalu alendo widiru lomabu delabe. Kininaga lalubi bo delalu wali agali bibahendenaga lalubi bo delalu bibe. Loma uruni irani dai helaga alebi widi lomabu delaga alebi bu delaga bibe. Ani bialu wali agali bibahendenaga waini iba odo dela halu biaga wiyadagua bibe laro. Nogo tara tara loma biniru bo delaregonaga darama damene bibahende hambuwa lomabu delaga dabu gahenge ogoriani dege odoba habe. Anigo dabu boronosime wabini ngago dege ininaga ngelabe laro. Ogoriani howa ina mbirale bule ngorunaga mini mo tiga bialu haru habe lalu ini hangu bi lolene ngelo ngelarogoni, lalu Kini Ahasahanda bi uruni lai hene. <sup>16</sup> Kinihanda bi uruni layago hale howa Uria ibugua horo bibahendengi bibe layadagua bialu haabo haga hene.

<sup>17</sup> Mani Kini Ahasahanda agali biabe biagaruhondo lamialu lalu, Anduane Homogonaga andaha anda puwa mbirale wilibaro ale ge kirahe bamba Kini Solomonohanda boronosime wabini ngaru giallo yalimu, layagola ani bini. Tigua iba berelaga ndisi be wilibaro ogoriani mo paga howa yaga wiagobi mo yini. Ani bialu iba be timbuni dange be ale bulumaga ale boronosime wabini homberia (12) uruninaga erekunini wiaru mo yuwa ege toleme dagia ale bu wiagoriani mo wini. <sup>18</sup> Ani biai howa mani Anduane Homogonaga anda kawareni dege anda biradagua emene mbira Sabada horongi nime hongo howa daba nahelonaga ni mo gehelo bu helene. Ani bu helene wali agalime kini dengui nahendelo mo beregedo helene. Ani bialu kini ibu Anduane Homogonaga andaha pu ibu biaga kininaga hariga wiagohayagi mbirale mbira yari bayale winigo ogonibi wali agali nahendelo mo beregedo helene. Asirianaga kini heagonaga hame wiaru talialu Kini Ahasahanda urunidagua bini.

<sup>19</sup> Biabe maru Kini Ahasahanda bialu henedarunaga te mbuga mbira mini Yuda Kini Henerunaga Te laga gilibu winigo nga. <sup>20</sup> Kini Ahasa homayagola tiguaibunaga tingini ibu mamalirunaga homali Debidinaga tano biagoha winigo ogoniha hora hene. Ani hora hayagola ibu igini Hesegaiahanda ibu abanaga henge mialu kini ha aribia hene. <sup>\*</sup>

## 17

### *Hosia Isaraelenaga kini henego ogo*

<sup>1</sup> Yuda dindiha Ahasa ibu kini heane dege mali hombeane (12) hayagola Ela igini Hosia ibu nde Isaraele dindiha kini howa Samaria tanoni mali dira haru hene. <sup>2</sup> Ani haru howa Kini Hosia ibugua mana ko maru Anduane Homogonaga deni howa bialu ha henego kini maru abale henedarume ko ngubiore dewa bialu henedagua ndo emene dege bini. <sup>3</sup> Ibu kini heangi Asirianaga Kini Salamanese ibugua ibalu Isaraele baba wai bini. Wai bialu Asiriame Isaraele bo poda hana hayagola Hosia ibugua Salamanese andaneha howa mali bibahendengi dagisi muni miaabo halu hene. <sup>4</sup> Anigo horo mbirungi Hosiahanda agali maruhondo lalu, Iyibinaga Kini So karia bi yalu lama pialu i biamogo bule ibabe laya lole pudaba, lene. Ani lo howa Hosia ibugua mali bibahendengi dagisi mialu haralidagua mali ogoninaga Salamanesenaga dagisi nami wahowa hene. Ani heagola Salamanese ibugua manda bu handalu hearia Hosiahanda

<sup>\*</sup> 16:14: Har 27.1-2, 2 Bit 4.1    <sup>\*</sup> 16:17: 2 Bit 4.2-6    <sup>\*</sup> 16:20: Ais 14.28

bi e lo wialu puguayiyane handalu ibugua ami agali hearuhondo lalu, Hosia minu garabaya bule pudaba, layagola tigua ani bini.

*Asirialirume Samaria bo podalu dindi ti karulenego ogo*

<sup>5</sup> Asiriali biarume Hosia minalu garabaya helowa Salamanese ibugua ibunaga ami agaliru haru halu Isaraele dindi bibahendeha wai biame hole pene. Tigua puwa Samaria tano anda pialu tano wiago ho mabubupe howa mali tebirani wai bialu hene.

<sup>6</sup> Ani bialu howa Hosia ibu mali dirani Isaraele dindiha kini hene heagola Asirianaga kini heagome wai buwa Samaria tano bo podalu ti karulo hene. Ani karulowa Isaraele wali agali hearu haru halu Asiria dindiha puwa wali agali maru Hala tanoha helalu maru Gosana dindini Habo Iba pedago angeni helalu marubi nde Media dindiha helalu bini.

<sup>7</sup> Isaraele wali agaliha genda timbuni uruni ibinidaruni irane tinime Anduane Homogo tinaga Ngode Datagaliwabe helo wahalu piyagome ani ibini. Tinaga mamaliru Iyibi dindiha garabaya biabe bialu hemiria Anduane Homogohanda ti Iyibinaga kini heagonaga giha howa mo wiyagoni manda nabi ti embedaho hene. Ani howa tigua mbirale dama mitangi bialu gime wabini wiaruhondo bi pupu wialu howa <sup>8</sup> mana koore tinaga kinirume biawai hayaru bialu hene. Ani bialu mana koore wali agali dindi ogoriani abale henedarume bialu henedadagua dege bu karulalu hene. Anduane Homogohanda wali agali dindi ogoni aba henedaru tini bo purogo lelalu dindi Isaraele wali agali tihondo mo mini. <sup>9</sup> Isaraele wali agalime ko tara tara Anduane Homogohanda hame nalearu ale dege bialu hene. Tigua mbirale dama mitangi bialu gime wabinirunaga bi pupu wiaga dindi bibahendehabi tano bibahende wiaruhabi mo wiai hene. <sup>10</sup> Ani bialu tigua hari neneruha iraga halubi ira timbuni hearu andanehabi ege tole mbira dindini hanga howabi mbirale dama wali beda mitangi bialu gime wabini mini Asera wiarubi uruni bibahendehondo bi pupu wialu hene. <sup>11</sup> Damahondo bi pupu wiaga mana wali agali tara abale dindi uruniha bamba henedarume biaga wiadagua bialubi tigua ira hagua ngabilo delaga ale mini inisenisirubi delaga bialu hene. Isaraele wali agalirume mana koorene ko o bialu henedarunime Anduane Homogo mo tandaga hene. <sup>12</sup> Abale Anduane Homogohanda tihondo lamialu lalu, Tigua mbirale dama mitangi bialu gime wabini ngaruhondo bi pupu nawilimu, lenego ai tigua bi ogoni mo wahalu mbirale urunihondo bi pupu wialu hene.

<sup>13</sup> Anduane Homogohanda Yuda dindiha Isaraele dindihabi ibunaga bi mana latagi haga agali maru pudaba lowa lalu, Tigua mana ko bialu kamiruni wahai howa bu mini beregedalu inaga bi mana ngaru bibahende taluwa bialu halimu. Inaga mana bamba tinaga mamaliruhondo laminigo wialu inaga bi mana latagi haga hearuha howa latagi heneru lo nga, lene. <sup>14</sup> Ani lenegoyu Isaraele wali agalime mine howa tinaga mamalirume bialu heneda ale dege bialu hene. Tinaga mamali uruni tiguabi nde Anduane Homogo tinaga Ngode Datagaliwabenaga bi mana hongo howa yu ha nabi wahene. <sup>15</sup> Isaraele wali agalime Anduane Homogonaga bi layago mo wahalu habo nalolene bi bamba tinaga mamaliru baba lowini biago habo lalu bini. Ani bialu bi hongohe maru lowini wiaru damene bibahendeore mo bagi hai hene. Tigua bi mo bagi haiore halu mbirale dama mitangi bialu gime wabini wiaruhondo bi pupu wiaga uruni galone nabulene wini. Anidagua biyagome wali agali tinibi nde galone nahe urunibi dege hai hene. Ala bamba Anduane Homogohanda tihondo lamialu, Tigua wali agali dindi ogoriani hene karunaga mana natalilimu, lalu laminigoyu Isaraele wali agali tigua donge howa wali agali dindi tara tarani bu henerunaga mana uruni talialu bialu hene. <sup>16</sup> Ani biyagome tigua Anduane Homogo tinaga Ngode Datagaliwabenaga mana lowiniru bibahendeore puguai hene. Tigua nogo bulumaga igini ale kira aeaneme wabuwa o biago labohondo bi pupu wialubi dama wali beda mitangi bialu gime

✧ 17:10: 1 Kin 14.23

wabini mini Asera wabu ngelowa ogonihondo bi pupu wialubi hene. Tigua yakundi bu karuhondobi bi pupu wialu dama mitangi bialu gime wabini mini Balahondobi bi pupu wialu ha dege bini. ✧ <sup>17</sup> Ani bialu howa tigua tinaga waneiginiru wali agali tara tara bu hearunaga dama mitangi bialu gime wabini urunihondo lomabu mialu irani bo delaga bialu hene. Ani bialu howa tigua wali agali de gandeba handaga hearu hearia pialubi wali agali homenerunaga dininihondo bi laga hearuha halaga bia helo hondo pugu bialu hene. Isaraele wali agali tigua mana ko bulene dameneru dewaore tinaga bu miniha hongo hene. Tigua urunidagua bialu heago hondowa Anduane Homogohanda tihondo keba timbuniore ho hene. ✧ <sup>18</sup> Uruni biyago hondowa Anduane Homogohanda Isaraele wali agali ti handabe manga timbuni howa ibugua Isaraele wali agali tininaga dindi yu wahalu dindi tara kaundia wiaruha balu purogo lelene. Ani biyagola Isaraele wali agali tininaga dindini mbiraore henenebi mbira naheore wini. Yuda wali agali dege tininaga dindini haabo hene.

<sup>19</sup> Anigo Yuda wali agali tibi nde Anduane Homogo tinaga Ngode Datagaliwabe kagonaga bi mana mo wahalu tigua Isaraele wali agalirume mana ko bialu henedagua dege bialu hene. <sup>20</sup> Isaraele wali agalirume ani bialu heagola Anduane Homogo ibugua ti bibahende erembira mini. Ibugua ti pani timbuniore nelu mialu tinaga waitigirume ibalu ti mo ko helo helene. Ani biyagolabi Isaraele wali agali tigua mana ko bialu haabo hayagola Anduane Homogo ibugua ti handabe manga howa tininaga dindi anda henene wiaru yu wahalu dindi tara wiaruha balu purogo lelene.

<sup>21</sup> Abale Isaraele wali agali Yuda wali agalibi bibahende Kini Debidi andaneha hai hene. Ani hai henego mani howa Anduane Homogohanda Isaraele wali agalirume Yuda wali agaliru yu wahalu ti hoba mialu haga haga bilene. Ani howa Isaraele wali agali tigua Nebada igini Yaroboama tinaga kini helo dabo helene. Ani dabo helegola Yaroboamahanda Isaraele wali agali Anduane Homogo yu wahalu mana ko wiaru bia timbuore helo mo bia halu hene. <sup>22</sup> Yaroboama ibugua mana ko biawai hayadagua bialu Isaraele wali agalime mana ko uruni wahole ndo bia timbuore hene. <sup>23</sup> Ani bialu heagola Anduane Homogohanda ibunaga bi mana latagi haga agali henerume mbiwia halu bulebero lenedagua ibunaga bi hale nahalu hearia tinaga dindi wahalu dindi kaundiaha bo purogo lelene. Asirialime ibalu Isaraele wali agali bibahendeore Asiria dindiha garabaya haru piyai henego ogoniha ka.\*

### *Hameigini tara tarame Isaraele dindi karulo henego ogo*

<sup>24</sup> Asirianaga kini heagome wali agali Babilono tano howabi Kuda tano howabi Iba tano howabi Hamada tano howabi Sebaimi tano howabi wali agali tano uruniha hearu bibahendeore Samaria dindiha Isaraele wali agalinaga tano wima pearuni bibahendeha karulo hai helene. Ani binigo ai wali agali tara uruni ti Isaraele dindini haabo hene. <sup>25</sup> Wali agali uruni ti Isaraele dindini pigane ibu heangi ti Anduane Homogo mitangi bialu lotu nalaga hearia Anduane Homogohanda budi ale gabua timbuni mini laiono dewa ibilalu laiono urunime wali agali maru bo wahaga bini. <sup>26</sup> Ani biyagola wali agali marume Asirianaga kini hearia puwa lalu, Wali agali ina Samaria dindiha helo haru puwa helariruni ti dindi ogoni wali agalime mbirale dama mitangi bialu bi pupu wiaga mana manda nabini obene pu heagola mbirale dama dindi ogoniha hene heagome laiono ibilalu wali agali bo wahalu ka, lalu lamini. <sup>27</sup> Ani layago hale howa kini ibugua ibunaga ami haru haga agali haguane mbira heagohondo lamialu lalu, Agali dindi ogoniha minu yalu ibirimago aria loma binigo mo miaga mbira heagua agali ogoni ibu Samaria dindi dai bialu ibugua dindi ogoninaga dama biagohondo bi pupu wiaga mana bialu haga winidadagua biawai helo damu pu labe, lene. <sup>28</sup> Ani laya

✧ **17:16:** 1 Kin 12.28 ✧ **17:17:** Man 18.10 \* **17:23:** Uruniha howa haabo ka áyubi ogonidagua dege bialu ka laga bidaruni áyu ina kamangi ndo. Abale agali bi ogoni pigane gili binidangi mitangi bialu lenego nga.

handala loma binigo mo miaga agali mbira Samaria howa ala minu yalu penego o biago ibu dai bia laya handala dai buwa Bedele dindini howa Anduane Homogonaga bi mana lawai halu ibunihondo mitangi bialu lotu lolene mana wiadagua mana lawai halu hene.

<sup>29</sup> Ani layagoyu wali agali tara tara uruni tigua mbirale dama mitangi bialu gime wabiniruhondo bi pupu wulenaga tinime wabini. Wabuwa tigua mbirale uruni Isaraele wali agalime Anduane Homogo mitangi bialu lotu lagane wabu wiaruha wiai hene. Dindi tara tara howa ibiyarume tininaga bi pupu wiaga wabu winidaru ale wabigi bigi biai hene. <sup>30</sup> Babilono wali agali hearu tigua tinaga dama mitangi bialu gime wabini mini Sugodobenodo wabini. Kuda wali agali tigua tinaga dama mini Negala wabialu Hamada wali agali hearume mbirale ogoni ale dege mini Asima wabini. <sup>31</sup> Iba wali agali tigua tinaga dama mini Nibasabi Tadagabi kira wabini. Sebabama wali agalirume tinaga dama mitangi bialu mbirale kira mini Adaramelege Anamelegela gime wabialu ogolabohondo tinaga waneiginiru balu loma bialu irani bo delo migi bialu hene. <sup>32</sup> Ani bialu ha howa wali agali urunime Anduane Homogo mitangi bialu ibuhondobi lotu lalu dege hene. Tigua tini aria agali maru ta nabi Anduane Homogonaga loma binigo mo miaga helo dabo helaga bini. Loma binigo mo miaga agali uruni tigua dama mitangi bialu bi pupu wiaga wiyadagoria howa wali agalime loma yalu ibiraru mo lomabu migi bialu hene. <sup>33</sup> Ogonidagua bialu tigua Anduane Homogo mitangi bialu ibuhondo lotu lalu ha howa dege mana tini daluha howa bialu haga wiaru yu wanahe mbirale dama mitangi bialu bi pupu wiaga wiaruhondobi bi pupu wialu ha dege bini.

<sup>34</sup> Áyubi nde tigua mana ogonidagua dege bialu ka. Tigua Anduane Homogo mitangi bialu ibuhondo lotu baya hangu nalalu hene. Ani bialu tigua Anduane Homogonaga bi layarubi mana Yagaba aguane bu hearuhondo bialu halimu lalu lowini wiarubi talialu bia nabi dege hene. Bamba Anduane Homogohanda Yagaba ogoni ibu mini Isaraele wia aribia heneyago ogoni ibu hene.✧ <sup>35</sup> Abale Anduane Homogohanda Isaraele wali agali baba habo nalolene bi mbira lowialu tihondo hongo howa bi ogodagua lamialu lalu, Tigua mbirale dama mitangi bialu gime wabini ngaruhondo bi pupu nawilimu. Dama uruni andaneha howa tinaga wanakuiha ge duli hanga halu bulu palia nabilimu. Tigua mbirale uruninaga biabe bia naholebi urunihondo lomabu namuleorebi larogoni. <sup>36</sup> Tigua ihondo mitangi bialu ina bia larodagua bialu ini andaneha haabo halimu. Anduane Homogo ininaga hongoreme tí iyibi dindiha hemigoria howa haru tagira ibirugoni. Ani birugo mitangi bialu tigua inihondo hangu ge duli hanga ho biruwa mbirale lomabu ngilimu, lene.✧ <sup>37</sup> Ibugua lalu, Inaga mana gilibu ngirugobi inaga bi langirugobi baya hangore talialu bialu halimu. Mbirale dama mitangi bialu gime wabini ngarunaga mana nabilimu. <sup>38</sup> Ina tí baba habo nalolene bi lowirugo embeda nahalimu. <sup>39</sup> Tigua Anduane Homogo tinaga Ngode Datagaliwabe ini kogonigo ina bi larodagua hale halu bialu haabo halimu. Tigua anidagua bialu harimiyagua ina tí baya hangu handayaho kogola tinaga waitigirume tí bo hilo wanaholebira, lene. <sup>40</sup> Anduane Homogohanda anidagua lenego uruni mo bagi howa wali agalime tininaga mana ala tawe biaga wiaru dege bialu haabo hene.

<sup>41</sup> Wali agali tara tara Samariani ibu henedarume Anduane Homogo mitangi bialu ibuhondo lotu lalu tininaga mbirale dama mitangi bialu gime wabini wiaruhondobi bi pupu wialu ha dege bini. Ani bialu áyubi nde tinaga aguanenerume mana ogoni taluwa anidagua dege bialu ka.

## 18

*Hesegaia ibu Yuda dindiha kini henego ogo  
(2 Bi Te 29.1-2, 31.1)*



<sup>1</sup> Ela igini Hosia ibu Isaraele dindiha kini heane mali kira henego tebone hayagola Ahasa igini Hesegaia ibu Yuda dindiha kini pigane hene. <sup>2</sup> Ibu aiyahanda taba hanayadangi howa hama ibinigo mali pira kirani duria (25) hayagola ibu kini pigane howa mali pira kirani huniane dira (29) Yarusalemeni haru hene. Ibu aiy mini Abiya ibu Segaraia wane berene. <sup>3</sup> Hesegaia ibugua ibunaga mamali Kini Debidihanda Anduane Homogo turu helo ibunaga deni mana bayale wiaru bamba bialu haga henedagua dege ibu ani bialu hene. <sup>4</sup> Hesegaiahanda damahondo bi pupu wiaga wiaruni bibahende bo gialo wahai hene. Mbirale dama mitangi bialu bi pupu wule ege toleme gene wawa wabu helene wiaru bo gindulo бага bialu dama wali beda mitangi bialu ira dibalu pelowa gime wabini mini Asera wabu helearuni dibu gabini. Ani bialu bamba Mosesehanda puya ale ege tole boronosime wabini mini Nehusadana laga wiagobi dambu gingirulo бага bini. Ogoningi Isaraele wali agali hearume damanaga bi pupu wialu howa puya ale ogonihondo ira hagua ngabilo delaga mini inisenesiru lomabu delaga hene.✧ <sup>5</sup> Hesegaia ibugua Anduane Homogo Israelenaga Ngode Datagaliwabeore kagohondo mini mbiraore hongohe wu hene. Yuda dindiha kini ala henerubi mani ha aribia ho henerubi Hesegaiahanda Anduane Homogohondo mini mbiraore hongoheorewi henedagua mende ibu ale nahene. Ibugua ti bibahende bolangua haihe hene. <sup>6</sup> Ibuore Anduane Homogohanda bi lowinigo mbira wanahe ibugua mini bilinahe howa ibuha hapara ho haabo haga hene. Ani howa bamba Anduane Homogohanda Mosesehondo bi lowini wiaru Hesegaia ibugua uruni bibahende baya hangu talialu bialu haga hene. <sup>7</sup> Anidagua bialu heagome Anduane Homogohanda ibu heba howa biamogo biyagola mbirale bibahende ibugua biyaru damene bayale dege bialu hene. Hesegaia ibugua Asirianaga kini heagome Yuda ti handaya ho helo ibu manga ho hene. <sup>8</sup> Ani howa Hesegaia ibugua ibunaga ami agaliru haru halu puwa tigua Pilidialiru baba wai bialu dindi tano emene timbunibi bibahendeha wiagoria wai biame halu hene. Ani bialu tigua Pilidialiru bo poda hana hama pialu amuraore Gasa tano wiago kaware palearubi bibahende bo podama pene.

### *Samaria giala hole bialu mo labu henego ogo*

<sup>9</sup> Hesegaia ibu Yuda dindiha kini heane mali mane hayagola ogoningsi dege Hosia ibubi Isaraele dindiha kini heane mali kane hene. Mali ogoningsi Asirianaga Kini Salamanese ibugua ibunaga amiru haru halu anda ibuwa Isaraele dindiha wai bini. Tigua Samaria tano ho hagirabu anda howa tano ti karulole wai bialu hene. <sup>10</sup> Mali tebirani tigua Samaria tano ho hagirabu ya andaho haabo howa mani wai bialu Asiria tigua Samaria tano karulene. Hesegaia ibu mali waragaria kini heagola Hosia ibu nde mali dira kini heagolabi Samaria tano ogoni ani karulene. <sup>11</sup> Ani bialu Asirianaga kini ogoni ibugua Isaraele wali agali garabayabu yalu puwa maru Hala tanoha helalu maru Habo Iba porago angeha dindi emene Gosana wiagoria helene. Maru haru puwa Media dindiha tano maru wiaruha helaga bini. <sup>12</sup> Isaraele wali agali tiha genda timbuni o anda ibinidagoni irane tinime Anduane Homogo tinaga Ngode Datagaliwabenaga bi mo wahowa ti heba habo nalolene bi lo wiyagobi puguvalu Anduane Homogonaga biabe biahaga Mosesehanda bi mana lowini biarubi mo hengedo wahalu bini. Tigua Anduane Homogonaga bi hale nahaga howa nabigaore henegome tiha genda tara anda ibini.

### *Asiriame Yarusaleme tano karulabehedabe hendene ogo*

*(2 Bi Te 32.1-19, Aisaia 36.1-22)*

<sup>13</sup> Hesegaia ibu mali deria (14) kini hene heagola Asirianaga Kini Senageribi ibugua ibunaga ami hearu haru ibalu Yuda hearu baba wai bialu Yuda dindiha tano wai pabe hongohe bini wiaru karulai hene. Anigo Yarusaleme dege karu nale wini. <sup>14</sup> Senageribi ibu Lagisi tanoni heagola Hesegaia ibugua bi au lo pelene. Ina ihondo

✧ 18:4: Dag 21.9



mine harugome ai áyu ini pani nolene wiaruago ina ila wai nabi wahalu i dindibi wahalu ini dalu dai bibe. Ina ogonidagua biriyagua ihondo mbirale ngi larego ale ngulebero, lalu lawia hene. Ani layiyago hale howa Senageribi ibugua Hesegaiahondo, Siliba genda magi kilogarama daosini pira (10,000) ngialu ngolo genda magi kilogarama daosini mbira (1,000) ngibe, lene. <sup>15</sup> Anidagua laya layago hale howa Kini Hesegaia ibugua Anduane Homogonaga andaha muni wiaru bibahendebi kininaga andaga muni wiagaha muni wiaru bibahendebi Kini Senageribi hearia mo pelai hene. <sup>16</sup> Ani buwa ngolome Anduane Homogonaga anda biagoaha anda panga paraho dambi hene hearubi anda gene panga kaware heago paraho dambi hearubi bibahende gialai hene. Uruni bibahende biabe biaga agali hearuhondo ibunime para hadaba layagola anda panga anda genebi paraho dambi henego ngolo uruni gialowa bibahende Kini Senageribinaga mo pelai hene. <sup>17</sup> Senageribi ibugua ngolo siliba uruni mo yuwa dege ibunaga ami haru haga haguane tebirani ami agali dewaore Lagisi tano howa, Yarusaleme pudaba, lene. Ami agali uruni ti Yarusaleme anda puwa tano ogoniha iba dadabu yu anda piaga wiagoria pu hene. Iba hariga ogoni abene aga wabiaga wiagoaha pole hariga pu ibu biaga peagohayagi wini.

<sup>18</sup> Asiria ami biaru ti ogoriani pu howa Kini Hesegaia ibilo lamule pudaba layagola Hesegaia ibugua ibunaga haru haga agali haguane tebiralime Asiriali uruni hondole pudaba lene. Ibugua pudaba lenedaru mbira Hiligaia igini kini ibuni andagaha mamage haga Eliagimubi kininaga bi gilibu wiaga Sebenabi Asaba igini kini ibugua biraru bibahende gilibu wiai haga Yoabi tigua Asiriali o ibu hayadaruni hondo pudaba lene. <sup>19</sup> Ti pialu Asiriali biaru hearia piyagola Asiriali ami haru haga haguane mbira heneyagome bi hongo howa tihondo lalu, Tigua dai bialu Asirianaga kini hongohe biagonaga bi ogo Hesegaia lamule pudaba. Ibugua ogodagua laya, Hesegaia inaga hongo abiale howa inaga andaneha holene hame nale kebe. <sup>20</sup> Bi bame lo payapaya beregome wai bialu agali bo wayali hagabe. Ina ihondo mine harigo. I biamogo bulene mbira ai ibulubada lo manda buwa ihondo mine halu kebe. <sup>21</sup> Iyibiali karume ibalu i biamogo bialu wai bule ibilo malia howa handayaho kegoni i manda bido. Anigo ina ihondo langerogo Iyibiali uruni bame gambe hale podalahe ngaligobi ka. Gambe hale ogonibigome halimbu yulene karulapebe toba howa mo yu kegola gambe hale ogoni tagala puwa ininaga gi kenda poralidagua bulebira. Iyibinaga kini kago ibugua mana biagago manane gambe hale ogonibi biaga ka. Ani kagome ibugua i pele ngialu wai bule naibulebira, lene.

<sup>22</sup> Asiriali haru hagane biagome laabo halu lalu, Anigo Isaraele wali agali tigua lalu, Tinaga Ngode Datagaliwabe kago tinaga Anduane Homogooore ka lalu yu tiga biagaore hemiyaguabi ibugua ti biamogo nabulebira. Irane Hesegaia inime Anduane Homogonaga lotu anda hearu bo gialalu lomabu delaga dabu hearu gialo wahai harigoni. Ani bialu ina Yuda wali agali bu hearu bibahende Yarusaleme hangu ibai halu lomabu delaga dabu mbiraore ogoni hanguni lotu lole ibai hadaba larigoni. <sup>23</sup> Inaga kini ibugua bi marubi la dege bialu lalu, Kini Hesegaia ina agali nogo hosini biruwa wai bulene ami agali daosini kira (2,000) karulape taya bibeheyagua nde hosi daosini kira (2,000) heba ngulebira laya. <sup>24</sup> Anigo ina manda bialu koria ina agali urunidagua naheore kegoni. Ani howa ina mandabu handalu keria Iyibime nogo hosirubi wai biagane karisirubi heba ibuwa i biamogo bialu wai bulebirabe tobaho kegoni. Anigo ti naibulebira ndobe. Ani bulebirago ai ini hangu kegoni howa ina ami emene hangu hemayaguabi ina ina bope habe naheore kamagoni ndobe. <sup>25</sup> I ibu kogoni ininaga minime i baba wai bialu ina dindi ngego bo labu hole ibu kobe toba kebe. Ani ndoyago. Anduane Homogo ibunime i langialu i baba wai bialu dindi anda o ngaruni bo gialabaga bialu mo labu habe lalu i langiya.

<sup>26</sup> Bi ogoni layago Eliagimubi Sebenabi Yoabi tigua hale howa Asiriali ami haru haga

haguane biaruhondo lalu, Tígua bi ogoni Siria bi lalu langidaba. Ina Siria bi hale haga kamagoni. Hiburu bi lowa wali agali maru uyu pabe neneni karu tigua bi laramigoni hale holigo nalabe, lene.

<sup>27</sup> Ani layagola bi laga ami agali haguane biagome ladai bialu lalu, Inaga kini kagome bi o larogoni tihondobi tínaga kinihondo hangubi lamule pu lene ndo laru. Maru uyu pabe neneni karuni tibi bi ogoni hale helo laro. Ani larogoni irane iname ibalu Yarusaleme wai bule ho hagirabu anda haramangi genda timbuni tí bibahende ha ibulubadane laro. Maru áyu pabeni handape ho karuni ti tomo nolene nawidagola tinaga ti to wuwa nalu iba noa biragola pu to nolebira. Tí kamirunibi ani dege buleberemi, lene.

<sup>28</sup> Asiriali ami haru haga agali haguane bi lalu hayago ibugua agali maru pabe neneni handa daliho hearuhondo Hiburu bi lalu bi hongo howa ladaga halu lalu, Agali kini hongohe Asirianaga kini biago ibugua bi layago languliya baya hangu hale mia howa hale hadaba. <sup>29</sup> Ibugua lalu Hesegaia ibugua tihondo ke halu mo hondo helo nahalimu. Tí bayale halimulo mo wialu Hesegaia ibugua i bope habe nahe ka. <sup>30</sup> Anduane Homogohanda tí biamogo biragola Asirialime tí mo ko halu tínaga tano Yarusaleme karu nalolebira layagua bi ogoni henene ndo larago mo henene nahalimu. <sup>31</sup> Tígua Hesegaianaga bi larago hale howa ila wai bulene manda nabilimu. Tí bayale howa tínaga iba hambiağa iba uli ngamiruha howa hambu nalu tínaga mabuha pu mbira mini gerebi lini dedarubi poge lini dedarubi do nalu bayale holene manda bu hemiyagua nde tínaga tano i karuloliya wahalimu, laya. <sup>32</sup> Ani kamiria ina ibalu tínaga tano karulalu tınıbi dindi mende baya gibiore tínaga dindi o kamigobi dege ngagoha haru pu heloliya laya. Dindi mende bayaleore ogoniha gerebi gama dewa wialu mberedi wabulenenaga nde widi maburu dewa dege nga. Uruni dege ndo dindi ogoniha ira olibe lini dagabi olibe lininaga welibi mone ibane dende bi tarabi dewaore wiai ka laya. Ibugua lalu, Tígua inaga bi larogo hale harimiyagua tí homa nabi bayale holeberemi. Hesegaia ibugua tihondo lalu Anduane Homogohanda tí biamogo biragola tígua ina bope holeberema layagua ibunaga bi ogoni mo henene nahalimu. <sup>33</sup> Tígua manda bialu hemiria dindi maru wiarume ina Asiria baba wai biyagola tinaga dama tara maru hearume ti biamogo biyane handarimibe. Nabiore ndobe. <sup>34</sup> Ina pialu Hamada tanohabi Abada tanohabi Seabaimi tanobi Henabi Ibabi uruni baba wai birimangi tinaga dama henedago agohayagi pu howa wali agali biamogo nabi yabe. Ani bialu iname Samaria anda puwa wai birimangi tinaga dama henedarume ti mo wialu ina bope hayane handarimibe. Nabiore ndobe. <sup>35</sup> Dindi dewaore tinaga dama henedaru helowa ina baba wai birimago. Anigo tinaga dindi bayale ngelo tinaga dama urunime ti biamogo bialu ina bope nahego. Ai Yarusaleme wali agali tígua aginaga tínaga Anduane Homogohanda biamogo biragola tígua ina bope holeberema manda bu kamibe laya, lene.

<sup>36</sup> Asirianaga ami haru haga agali haguane biago ibu bi lai hene. Ani lai heagola wali agali wai pabe neneni handape ho hayaru tigua bi mbira ladai nabi handayaho haabo hene. Ani hayadagoni irane Kini Hesegaia ibugua tihondo bi mbira Asiria urunihondo nalalimu lenego manda buwa ti bi nale hene. <sup>37</sup> Anigo Asiriali biago ibugua bi layagome Eliagimu Sebena Yoa imarunaga bu miniha genda timbuni ho hene. Ani howa tinaga aga minu budalu Kini Hesegaia bereria puwa Asiriali biagome bi layaruni bibahende kinihondo lamiai hene.

## 19

*Hesegaia ibunaga genda wiaru Aisaihondo laminigo ogo  
(Aisaia 37.1-7)*

<sup>1</sup> Hesegaia ibugua Asiriali biagome bi ogodagua laya lalu ibu lamiyago hale howa ibunaga bu miniha genda timbuniore yu howa ibunaga aga minu lerelaki hene. Ani buwa ibu daraho howa walia halu aga biaga wiago mo karulalu Anduane Homogonaga andaha anda pene. <sup>2</sup> Ani puwa Hesegaia ibugua kini andaga mamage haga agali Eliag-imubi kininaga beba gili biaga Sebenabi loma binigo mo miaga ala hene maru hearubi uruni bibahende olalu ibidaba lene. Ani lowa ibugua tihondo Emoso igini Anduane Homogonaga bi mana latagi haga Aisaia hondole pudaba lene. Agali uruni tibi nde dara ho howa walia halu aga karulaga wiago karulo hene. <sup>3</sup> Ani bialu Hesegaiahanda tihondo bi ogo Aisaiahondo lamilo lawia halu lalu, Horo áyu bu miniha genda yu holene wiyada. Asirialime ina mege timbuni biyagola taga timbuni ho kamagoni. Ai walime gali taba honolene tu biruwa ibu hongo nakarulape howa taba hanabe nahedagola genda timbuni ho biraga ale ina bedamagoni. <sup>4</sup> Asiria kini kagome ibunaga ami haru haga agali haguane heago ibu inanaga Ngode Datagaliwabe haluhe kagohondo bi ko lole pu layada. Ani layadagoni Anduane Homogohanda bi ko o layadaruni hale halu agali bi ko lagadago ibunime mana bilo. Ani bilonaga ina wali agali emene dagalene hangu yu wahene kamaru biamogo bilonaga ina Ngode Datagaliwabehondo bi lamibe, lalu Aisaiahondo lamule pudaba, lene.

<sup>5</sup> Aisaia ibugua Hesegaianaga bi layadago hale howa <sup>6</sup> ibugua agali bi yalu ibiyadaruhondo lamialu lalu, Tigua kini bedaria dai bialu Anduane Homogonaga bi ogo ibuhondo lamilimu. Anduane Homogohanda ogodagua laya. Ina bi o layadaruni miniha mo pehalu gi halu genda holeni. Ihondo bi ko o layadaruni Asiria kini kagonaga biabe biahaga agali damene bu hearume layadago wahabe. <sup>7</sup> Ani larogoni irane Anduane Homogo inime Asiria kini kagonaga mini mo luluya helolebero. Ani berogola ibugua bi mbira hale halu ibuni dalu dai bulebira. Dai buwa ibuni dalu Asiriani pu kagola ina agali mbirame ibu bo waha lolebero, laya lalu lamilimu lowa, Aisaiahanda lene.

*Asirialime Yarusaleme boleberema lalu bi halu mende lenego ogo  
(Aisaia 37.8-20)*

<sup>8</sup> Asiria ami haru haga agali haguane biago ibugua Kini Senageribi ibu Lagisi tano yu wahalu piya layane hale hene. Ani layane hale halu ami haru haga agali haguane ogoni ibu Yarusaleme yu wahalu dai buwa hale halu hearia kini ibu Libina dindiha wai bialu ka layago hale halu ibu hondole pene. <sup>9</sup> Asiria ti wai bialu hearia agali maru ibuwa Kini Senageribihondo lalu, Idiobia dindinaga Kini Tihagahanda ibunaga amiru haru halu íla wai bule ibira, lene. Ani layago hale howa Senageribi ibugua Yarusaleme karulole manda bu heaorego ai beba mbira abale gili bialu Hesegaia hearia yalu pelene. <sup>10</sup> Bi o gilibu wia henedagoniha bi ogodagua lalu gili bini. Tíngaga dama yu tigabu kamigoni ibugua lalu, Ina tí bope halu Yarusaleme karuloliya yupe naholebero layago. Bi ogoni ke haya henene ndo layago ibunaga bi ogoni mo dunubia nahabe. <sup>11</sup> Ina Asirianaga kini kamarume biaga mana wiyaruni íni manda biaiho kegoni. Iname dindi mbiraha wai bu puwa uruniha karu ngarubi bibahendeore bo haealabagabu waharamaligo í manda bide. Ina mitangibu handalu keria ina í daluha ogonidagua nabulubada lo manda bidebe. <sup>12</sup> Bamba inaga mamaliru tigua wai bialu Gosana tanobi Harana tanobi Lesebe tanobi bibahende bo haealabaga bialu hameigini mbira Bededene ti Telasa tanoha palearubi bo wai hene. Ani biyagola tinaga dama bu hearume ti bayale helonaga biamogo mbira nabio. <sup>13</sup> Hamada tanonaga kini henerubi Abada tanonaga kinirubi Sebaimi tanonaga kinirubi Hena tanonaga kinirubi Iba tanonaga kinirubi mbira áyu heabe. Naheore ndoyabe. Iname uruni bo wai harimagoni, lalu gilibu wia hene.

<sup>14</sup> Kini Senageribi ibugua bi gilibu wia henedagoni yalu pu lenedarume yu ibiyagola Kini Hesegaia yamini. Yamialu bi gilibu wiyadaruni daga lai howa beba ogoni Anduane Homogonaga andaha mo yu anda pene. Yu anda puwa ibugua beba ogoni Anduane

Homogonaga wanakuini mo tiga buwa angalaho ngelene. ✧ <sup>15</sup> Ani ngelowa Heseгаia ibugua Anduane Homogohondo lalu, Anduane Homogo-o ina Isaraelenaga Ngode Datagaliwabe howa dahuliyali bu karu bolangua hene í howa ininaga haru howa biragane ngegoria bedegoni. Í hangu Ngode Datagaliwabeore henene howa ina dindi bibahende ngaruniha handame ho haga kegoni. Dindibi hari daligabi inime wabiai hene. ✧ <sup>16</sup> Anduane Homogo-o inaga bi larogo baya hangu hale howa inaha mo ko holene o tagira ibiragoni inime de handabe. Senageribi ibugua bi ko Ngode Datagaliwabe haluhe í kegohondo layadarunibi hale habe. <sup>17</sup> Anduane Homogo-o Asirianaga kini hearume dindi maru wiaruha anda puwa wai bialu wali agali dewaore bo wahai halu mo ko hai hayaruni manda bu kama. <sup>18</sup> Ani bialu wali agali tinaga dama mitangi bialu gime wabini wiaru iraha mo delai haya. Dama mitangi bialu gime wabini uruni ti Ngode Datagaliwabe henene ndogome tini mo ko hai haya. Mbirale uruni agalime ira dibalu pelowabi ege tole poda tiga buwabi wabini wini. <sup>19</sup> Ai Anduane Homogo ininaga Ngode Datagaliwabe-o áyu ina biamogo bialu Kini Senageribinaga giha howa yamibelo hameledo. Wali agali dindi bibahendeni karume Anduane Homogo ini hanguore Ngode Datagaliwabe heneneore henedane hendelo aniore bibelo hamelo kogoni, lene.

*Aisaia ibugua Anduane Homogonaga bi mana Kini Heseгаia laminigo ogo  
(Aisaia 37.21-38)*

<sup>20</sup> Anduane Homogonaga bi mana latagi haga Aisaia ibugua Heseгаiahondo bi lawia halu lalu, Anduane Homogohanda inaga bi larigoni hale howa <sup>21</sup> ibugua lalu, Yarusalemeha karume Senageribi í mo ngubia howa mege bialu hondo oba haragoni. <sup>22</sup> Senageribi ina mege bialu bi ko lalu mine howa ininaga mini yaraga halu biriruni aihondo bero lalu biribe. Uruni bialu harigoni í Isaraele wali agalinaga Ngode Datagaliwabe mana bayale tigabi hangu biaabo haga kogohondo birigoni. <sup>23</sup> Ina ami haru haga agali haguane hearuhondo bi ogoni lole pu larigola tigua inaga mini yaraga halu ihondo mege biya. Senageribi ina inaga biabe biahaga agali biarunaga bime ihondo mine halu lalu, Ina inaga karisi wigoria heyu halu Lebanono dindi hari nene daligaore ngaru áyu dege iralu pirugoni, lalu lamule pudaba lalu lamiri. Ani lowa mine dege halu lalu, Ina Lebanono irabu timbuni ngago dombeneha anda pu howa ira mini lene bayale luni damene tamiabi guraya alebi hearu bibahende ini dibai harugoni ndobe, lari. <sup>24</sup> Dindi tara maruha piringi í iba noa nahe haru lari. Dindi yobi iba nabere wiagoha harugo lowa ina uli tombo wigoha iba birayagola inaga damene biaru ti iba karulape naiore howa Iyibi dindiha iba Naili timbuni pedaru inaga ami agali biarume domalu piyagola tinaga geme iba mo hundiai haya larigoni, lalu Anduane Homogohanda lene.

<sup>25</sup> Ibugua laabo halu lalu, Senageribi-o bambaore howa inime manda bialu ina o bialu keruni bibelo ina í dabenego manda nabi kegoni ndobe. Tano pabe hongohe bu mabubi hearuni ina bo gialabaga bibelo ina í hongo ngirugoni ndobe. Inaga mini wiwago hangu talialu tano biaruni bo gialabagabu waharigola áyu ege tole timbuni wiaruni gindulo payabu wialu nagalone bu hinu ngagoni. <sup>26</sup> Wali agali tano uruniha hearu ti gi timbuni hayagome tinaga mini ndibu lalu hongo biba haya. Ti hongo nahe amu ni tagira ibiragoha howa puyabu poboyogobi ibiragome datani puloba haragola gabu hagagobi halu datani anda dangini andaho karu hongo nahe karunibi hayagoni, lene.

<sup>27</sup> Anduane Homogo ibugua lalu, Anigo ina inaga mini manda bideru bibahende manda biai halu í mbira bialu kegobi ibaga bialu keribi bibahende handai haga kogoni. Ani bialu ina ihondo tandaga timbuni ho kegonibi manda bu ko. <sup>28</sup> Ina ihondo tandaga ho kegoni í manda bialu ina mine bi lalu ininaga mini yaraga hole bima ibaga bialu keruni í manda biaho kogoni. Ani howa áyu ihondo ina bi hongohe mbira langero.



Mbirale wena hugu aleme í nguiha walango bialu nogo hosinaga ne harigaha banga bia helaga ngagome inaga ne harigaha bangabia helolebero. Ani buwa ini abale ibirigoha dai bibelo gililo yalu haru dai bulebero, Anduane Homogohanda ani laya, lalu lene.

<sup>29</sup> Ani lowa Aisaia ibugua Kini Hesegaiahondo Anduane Homogohanda Senageribihondo bulebero layago heneneore layada manda bilonaga mo walia halu manane mbira hendelonaga bi ogo lamini. Aisaia ibugua lalu, Tigua mali áyu kamagonagabi mali edegonagabi tinaga mabuha tomo mbira hanga nabi kamigola mabuha widi minana andaho kagola do nalu holeberemi. Ai mali ederagonaga widi tinime widi hangalu do noleberemi. Pu mbira lini daga mini gerebi egenebi hongowa do noleberemi. <sup>30</sup> Ani howa Yuda wali agali waitigime bo wahai halu yu wahene emene dagalene hangu kamaruni mani ira lini daganaga pini dindihaore anda puwa lini bayale dewaore daga labe nahe ngalirubi holebira. <sup>31</sup> Yarusalemehabi Hari Saionohabi wali agali waitigirume nabe yu wahene haabo holebira. Ani haabo helo Anduane Homogohanda ogonidagua manda bu ka, lene.

<sup>32</sup> Anduane Homogo ibugua bi maru la dege bialu lalu, Asirianaga kini ibugua ibunaga ami karu haru halu Yarusalemeha lone naibulebira. Tinaga timu mbira hangubi tano ogoha baanda naholebira. Ami agali uruni tigua humbi yalu tano ogoria kaware naibulebira. Tanonaga wai pabe karu andaneha ami uruni ti heyu howa wai bule lowa dindi dugu hanama irigi naholebira. <sup>33</sup> Asirianaga kini ibu tano ogoha anda ibabe nahe howa beregedalu ibuni hariga ibiyadagoaha dai bulebira. I Anduane Homogo inime bi o ledogoniore. <sup>34</sup> Ina anidagua buleberogo irane agali inaga biabe biahaga Debidila buleore lalu lo wirugo mitangi bialu ininaga mini leneore kogoni mitangi bialu anidagua bulebero, lalu Anduane Homogohanda ani laya, lalu Aisaia ibugua lene.

<sup>35</sup> Horo ogoningiore mbiraga Anduane Homogonaga dahuliyali mbira Asiriali amiru paleagoha puwa ami agali daosini dege handari mbirani pira halirani duria (185,000) bibahende bai hayagola homai hene. Horo mendengi gao layagola Senageribi ibu heyuwa handalu hearia o homayadaruninaga tingini ona wima pearia hendene. <sup>36</sup> Ani biya handala ibugua ibunaga ami agali maru yu wahene hearu heba ibiyadagua beregedalu dai bialu Niniba tanoha pu hene. <sup>37</sup> Ani pu howa horo mbirungi ibuninaga dama mitangi bialu gime wabini Nisirogonaga bi pupu wiaga anda heagoha anda puwa ogonihondo bi pupu wialu berene. Ani berearia ibu igini kirali Adaramelegela Sareselame ayu tibu wai biaga wiagome ibu dibayagola homene. Dibalu libuni ibida puwa Ararada dindiha ha do hole hene. Ani biyagola mani ibu igini tebone mini Esaradono ibugua ibu abanaga henge mialu ibuni Asirianaga kini hene.

## 20

### *Kini Hesegaia warago bo wiaria Anduane Homogohanda biamogo binigo ogo (Aisaia 38.1-8,21-22, 2 Bi Te 32.24-26)*

<sup>1</sup> Asirialirume Yudali baba wai bialu mo ko halu heangi Kini Hesegaia ibu warago timbuniore bowa homabeheore wini. Ani homabehe wiaria Emoso igini Aisaia ibu Anduane Homogonaga bi mana latagi haga heagome kini warago wiago hondo puwa Hesegaiahondo lalu, Anduane Homogo ibugua ihondo bi ogodagua laragoni. Inaga warago ogoni dabi nahe ani bo wiaho wialu homolebere. Ani homoleberogo manda buwa ai wali agali í andagaha haga karuni lamialu tinaga biabe biaga wiyadagoni mo tiga biai hadaba lamibe laya, lalu lamini.

<sup>2</sup> Bi ogoni layago hale howa Kini Hesegaia ibu beregedalu dengui anda hai heagoha handa amuhu wialu ibugua Anduane Homogohondo bi lamialu lalu, <sup>3</sup> Anduane Homogo-o ina ini hanguore talima ibalu inaga biabe hangu biahalu harugoni. Inaga



hame wiru bibahende ina talialu biai harugoni manda bibe, lene. Ani lai howa ibugua dugu timbuni hongo howa bialu berene.

<sup>4</sup> Aisaia ibu nde kini andaga yu wahalu tagira pialu pene. Puwa ibu kini andaga pabe heago bolangua halu tagira nape dege wene pialu hearia Anduane Homogohanda ibuhondo lalu, <sup>5</sup> Ina áyu ogoni Hesegaia inaga wali agalirunaga kini biago hondo dai buwa ibuhondo bi ogodagua lamibe. I Anduane Homogo inaga mamali Debidinaga Ngode Datagaliwabe kogome inime bi larigobi hale halu dugu bialu de iba ibirigobi handarugoni. Ani birigonaga ina i mo dabi holebero. Ani berogola horo tebira howa ina i mitangi bialu lotu lole inaga anda lomabia hene biagoha polebere laro. <sup>6</sup> Ina i abale home nale mali pira mbirani duria (15) i helalu mani nde i homolebere. Ai Asirianaga kini kagomebi nde ibalu wai buwa i bope halu Yarusaleme nakarulolebira. Ani larogoni irane ininaga mini timbuni mini leneore kogo mitangi bialubi ala ina inaga biabe biahaga Debidila habo nalolene bi lo wirugo mitangi bialubi ani bulebero, laya lalu lamibe, Anduane Homogohanda Aisaiahondo ani lamini.

<sup>7</sup> Ani lai hayagola Aisaiahanda kinihondo bi lamibe layadagua lamiai howa ibugua kininaga biabe biahaga agali hearuhondo lamialu lalu, Tigua pogeli do gedaore hene maru mo yu ibule pudaba, lene. Tigua mo yu dai biyagola ibugua tihondo lalu, Hesegaianaga moge hongohe biagoria wai haramigola moge biago abale dabi holebira, lene. <sup>8</sup> Ani layagola Hesegaia ibugua Aisaiahondo hale halu lalu, Ai i dabi halu horo tebira howa Anduane Homogonaga anda poleberodago henene lalu manane mbira áyunaga ihondo agi ale walia holebiradabe, lene.

<sup>9</sup> Ani hale hayagola Aisaiahanda ladai bialu lalu, Anduane Homogohanda manane mbira i mo walia holebirago ogo. Egageria mbirani ni horombe ale ndoda lalu ni ogoria ka lalu mo walia haga amu ngago handa. Ai bi ogoni heneda lalu manda bibelonaga ni munini daga laga ngagoria howa abale pu bolangua haga bialu hobane pira gerai lalu bolangua helo lariyaguabi ndo hobane pira hama dai bilo loleyaguabi mbirago larene, lene.

<sup>10</sup> Ani layagola Hesegaiahanda lalu, Ni munini ogoria ka lalu manane handaga ngagoria abale bolangua haga bialu polene ngagohayagi pu holenegro taibi ndogo ina ni ibiyagohayagi hobane pira agima abale gerai lalu daibu helo hameledo, lene.

<sup>11</sup> Ani layagola Aisaiahanda Anduane Homogohondo bia lalu bi layagola egageria ni munini kagoria manane handaga biagoria abaleore ni manane hobane pirani dai biyaria hendene. Egageria ogoni bamba Kini Ahasa ibugua wabu wini.✧

*Babilono dindi howa bi yalu Yarusalemeni ibinigo ogo  
(Aisaia 39.1-8)*

<sup>12</sup> Babilononaga kini mbira Baladana igini Merodaga henegome hale halu hearia Hesegaia warago timbuni bo nga layane hale hene. Ani hale howa ibugua beba mbira gilibu wia halu yari tara tara bayale wiaru maru Kini Hesegaia mo turu halu mule Yarusaleme yalu pudaba layagola bi yalu piaga agali tigua mo yalu ibini. <sup>13</sup> Yalu ibiyagola Hesegaia ibugua agali ibiyarunaga bi hale hai howa agali uruni haru halu puwa ibunaga anda timbuni heagoha mbirale tara tara ale bibahende mo wiaga wiagoha haru pene. Haru puwa ibugua ibunaga muni silibaru ngoloru dewaore wiarubi ira hagua ngabilo delaga mini inisenesi wiarubi tingini hai hagane weli ngabiaga wiarubi mbira mbira padua ale mini sanda wiarubi uruni bibahende walia hai howa agali bi yalu ibiyarume de handaioire hene. Ani walia halu ibugua ibunaga danda timubi humbi yandarebi wai biagane ale bibahende wiaruni mo walia hai hene. Hesegaia ibugua mbira mbira wiago mo do nahe bibahende kini andagaha wiaruni mo walia hai halu Yuda dindi bibahende ha wiaruni bibahendeore agali biaruhondo mo walia hai hene. <sup>14</sup> Ani handai howa Babilonoali biaru ti dindi dai biahaore Anduane Homogonaga bi mana latagi

✧ 20:11: Yos 10.12-14

haga Aisaia ibu Kini Hesegaia hearia pialu ibugua hale halu lalu, Agali o ibiyaruni ti aniali ibiyabe. Ti bi agi dege layabe, lalu hale hene.

Ani hale hayagola Kini Hesegaiahanda ladai bialu lalu, Tini dindi kaundiaore uyura Babilono wiagoha howa ibiniya, lene.

<sup>15</sup> Ani layagola Aisaiahanda lalu, Tigua í andagaha agile dege handayabe, lene. Ani layagola Hesegaia ibugua ladai bialu lalu, Ina tinaga deni mbirale mbira mo do nahe inaga mbirale wiwaru ale bibahende tihondo mo walia hai haru, lene.

<sup>16</sup> Ani layagola Aisaiahanda mbiwia halu Hesegaiahondo lamialu lalu, Áyu Anduane Homogo Hongo Haiheore kagome bi layago languliya. <sup>17</sup> Anduane Homogo ibugua ogodagua lalu, Horo mbira tagira ibulebirago horo ogoningi mbirale bibahende kini andagaha wini ngarubi bamba í mamalirume mo wigi bini dabudabu anda timbuni kagoha wini ngarubi mo yai halu Babilono dindiha yalu polebira. Emeneorebi mbira ibira nahe bibahendeore Babilono dindiha mo yalu piai holebira. ✧ <sup>18</sup> Ani bialu igiri daliahe maru ini damene karunibi garabayabu yalu pu dege bulebira. Igiri uruni haru puwa tinaga pindu nogo pindu miradagua bialu mo wahowa Babilono dindi kini andagaha biabe biahaga helo helolebira, lalu Anduane Homogohanda bi ogoni laya, lalu lamini. ✧

<sup>19</sup> Hesegaia ibugua bi uruni hale howa Aisaiahondo lalu, Anduane Homogonaga bi áyu langiriruni bayaleore langiri, lene. Ani lenedagoni irane genda uruni ibuni kagolando mani ibulubayane hondowa lene. Ibugua lo manda bialu áyu j kongi mbirale mo ko holene uruni naibulebirago ina wairu nabi bayaleore holeberema lo manda bini.

*Kini Hesegaia ibu haru holene hamaro binigo ogo*

*(2 Bi Te 32.32-33)*

<sup>20</sup> Biabe maru Kini Hesegaiahanda bialu henedaru mbuga mbira mini Yuda Kini Henerunaga Te laga ngagoha gilibu winigo nga. Mbuga ogoniha howa ibugua biabe hongohe bialu heneru garea lalu biabe timbuni mbira ibugua Yarusaleme tanoha iba dadabu yalu haru anda ibulenaga gana timbuni tano pabe tagirahayagi howa dindi andanaha gana wayalu tamuha anda ibini. Ani bialu tanoha iba dadabu yalu anda ibinigonaga te gilibu wialu bida. Ani bialu tamuha iba berelonaga uli mbira ibugua wa winigobi te gilibu wia dege bida. ✧ <sup>21</sup> Mani Hesegaia homayagola ibu igini Manasehanda ibu abanaga henge mialu kini ha aribia howa Yuda dindiha haru hene.

## 21

*Manase ibu Yuda dindiha kini henego ogo*

*(2 Bi Te 33.1-20)*

<sup>1</sup> Manase ibu igiri emene dege mali homberia (12) hangu howa kini pigane hene. Ani howa ibu mali pira duriani huniane duria (55) kini howa Yuda dindiha haru hene. Ibu aija mini Hebesiba mbira berene. <sup>2</sup> Manase ibugua mana bayale wiaru nabiaga hene. Mana ko ngubi bamba wali agali henerume biyagola Anduane Homogohanda uruni ti dindi ogoriani howa bo taliatagi halu Isaraele wali agaliru tihondo mo minigo mana ko odaruni biaga wiadagua dege Manase ibugua bialu hene. Manase ibugua mana ko ngubi uruni bialu hayadagome Anduane Homogonaga deni howa ko timbuniore bini. ✧

<sup>3</sup> Manase ibugua mana ko maru ogodagua bialu hene. Bamba ibu aba Hesegaiahanda damahondo bi pupu wiaga wiaruni bo gialo wahai henego anda uruni ibugua lone mo tene howa biadai bigi bini. Mbirale dama mitangi bialu gime wabini mini Bala laga wiagonaga lomabu delaga daburubi bu hela hene. Ani buwa bamba Isaraelenaga Kini Ahabahanda dama mbira wali beda mitangi bialu gime wabini mini Asera wabu wialu bini. Urunidagua bialu howa ibugua yakundi li bu karunihondobi bi pupu wialu haga

hene. <sup>4</sup> Ani wialu howa ibugua dama mitangi bialu gime wabini uruninaga loma biniru bo delaga dabu Anduane Homogonaga anda heagoha bu helalu bini. Anigo bamba howa anda ogoninaga Anduane Homogohanda bi ogodagua lowini. Yarusalemeni anda timbuni o kagoni wali agalime ini hangu mitangi bialu lotu laga karu tinaga ka lowinigo nga. <sup>5</sup> Anigo Manase ibugua Anduane Homogonaga anda pabe tamuhayagi hama timbuni kira wiagoria yakundi bu hearuhondo bi pupu wule lowa lomabu delaga dabu bu helaga bini. <sup>6</sup> Ibugua loma biniru bo delagadagua ibu igini mbira dabu ogoriani bo delene. Ani buwa ibugua agali homenenaga dininime ibu biamogo bilo olalu agali de gandeba handaga hearuhondo ibu biamogo bilo olalubi gamu gamu tara tara wiarubi bialu hene. Manase ibugua Anduane Homogonaga deni howa mana koorene ko dewaore bialu haabo heagola ogonime Anduane Homogo mo tandaga halu mo keba hene.

<sup>7</sup> Anidagua bialu Manase ibugua dama wali beda mitangi bialu gime wabini mini Asera mo yu ibuwa Anduane Homogonaga anda biagoha mo wini. Anigo bamba Anduane Homogohanda Debidila ibu igini Solomonolahondo lamialu lalu, Ina Isaraele hameigini homberia (12) karunaga dindi handai howa Yarusaleme tanoha anda o kagoni ininagaore helo dombeneha loma biaho helarogoni. Horo bibahendengi Isaraele wali agali bu kamiruni tigua ibalu i mitangi bialu ini hanguhondo lotu lole lalu halimulonaga helaro. <sup>8</sup> Ai nde inaga wali agali bu kamirume inaga bi langerogo bia inaga biabe bihaga agali Mosese ibugua bi lowinigo talialu bialu ha birimiyagua nde ti dindi ogo ina bamba tinaga mamaliruhondo mo mirugo ogoni howa bo taliatagi nahe ogoriani haabo halimulo helolebero, lalu Anduane Homogohanda lene. <sup>9</sup> Anidagua lowini wiago ngelowa dege Yudali tigua bi uruni bayuwa talialu bia nabi hene. Manase ibugua wali agali haru pu tara halu mana ko wiaru mo bia timbu halu hene. Mana ko bamba wali agali tara henerume biyagola Anduane Homogohanda uruni ti dindi ogoriani howa bo taliatagi halu Isaraele wali agaliru tihondo mo mini. Ala hene urunime mana ko biaga winidaru nira dege lowa Yuda wali agali tigua ko timbuniore bialu hene.

<sup>10</sup> Kini Manasehanda mana ko urunidagua bialu heago hondowa Anduane Homogo ibugua ibunaga bi mana latagi haga bu hearuha howa bi lalu, <sup>11</sup> Kini Manasehanda mana ko timbuniore wiaru bialu kagoni bamba Amoro wali agalime bialu heneru nira dege lowa ibugua ko timbuniore bialu ka. Ibugua dama mitangi bialu gime wabu helowa urunihondo bi pupu wialu kagome Yuda wali agali bibahendeme ininaga deni mana ko ngaru bialu helo mo bia halu kagoni. <sup>12</sup> Anidagua bialu kagonaga Anduane Homogo Isaraele wali agalinaga Ngode Datagaliwabe kogo inaore mbira bulego laro. Ina Yarusaleme tanobi Yuda dindi bibahendebi mo ko hai halu mo ngubia holebero. Anidagua berogola wali agali dindi tara tarani bu karume ina birugonaga te hale hararume ogoni agua biyadabe lowa mogolalu mini dege dindi ho holebira. <sup>13</sup> Yarusalemeore yo pialu poro lolene nawi ina Kini Ahaba ibu dameneru heba Samaria tano bo haealabaga bialu mo ko harudagua Yarusaleme emene mbirahayagi bayale wero nawiore mo ko halu bo haealabaga biai holebero. Ani berogola Yarusaleme tano winigoria mbirale mbira nawi beledi dodo wayawaya bo wahene dodo nahe mo beregedalu wiraligobiore ngelolebero. <sup>14</sup> Ani bialu wali agali yu wahene maru dindi ogoriani heagua ina ti biamogo nabuleore bero. Ina tinaga waitigi agalinaga giha ti minu yahaga bulebero. Waitigi agali urunime tini mo ko halu tinaga mbirale yu holebiraru mo page biai helolebero. <sup>15</sup> Ina urunidagua bule ngeledogo irane inaga wali agali bu karuni tigua inaga deni howa mana ko ngubi wiaruni hangu mo tene howa bamba tinaga mamali Iyibi dindi yu wahalu tagira ibiyangi howa bima ibalu henego ayu karumebi bialu haabo ka. Tigua ogonidagua bialu kagome i mo tandaga timbuniore

halu kagoni, lalu Anduane Homogohanda ibunaga bi mana latagi haga hearuha howa mbiwia halu latagi hene.

<sup>16</sup> Manase ibugua Yuda wali agali bu hearu haru halu pubagi hayagola tigua Anduane Homogonaga deni howa ko dewa bialu hene. Anidagua bialu howa ibunaga wali agali hearubi nde tini dege dege mo waitigi helaga bialu hene. Ani buwa ibugua Yarusaleme tanoa wali agali ko nabiaga tigabi hearubi ko biaga heba homelo bo wahai hene. Ani biyagola Yarusaleme dindi bibahendeni homenerunaga darama wiame hene.

<sup>17</sup> Biabe maru Kini Manasehanda bialu henedaru mbuga mbira mini Yuda Kini Henerunaga Te laga ngagoha gilibu winigo nga. Mbuga ogoniha mana ko damene ibugua bialu henedaru ogodagua bini lalu garealo nga. <sup>18</sup> Manase ibu homayagola ibunaga tingini kini andaga pabe bu yaanda hene wiagoha dindi henge mbira Usanaga mabu lagane wiagoha hora hene. Ani hora hayagola ibu igini mbira mini Amono henege ibu abanaga henge mialu kini ha aribia hene.

*Amono ibu Yuda dindiha kini henego ogo*

*(2 Bi Te 33.21-25)*

<sup>19</sup> Amono ibu aiyahanda taba hanayangi howa hama ibinigo mali pira kirani kira (22) hayagola ibu kini pigane hene. Ibugua kini howa mali kira hanguni Yarusalemeni haru hene. Ibu aiyaya Yodoba tanoali Harusi mbira henegonaga wane Mesulemede berene.

<sup>20</sup> Amono ibugua mana ko timbuni ibu aba Manasehanda Anduane Homogonaga deni howa bialu hene wiadagua dege bialu hene. <sup>21</sup> Ibugua mana ko ngubi ibu abahanda biaga wiaruni talialu bialubi mbirale dama mitangi bialu gime wabini wiaruhondo ibu abahanda bi pupu wialu henedagua bialubi uruni biai hene. <sup>22</sup> Ibugua Anduane Homogo ibu mamalirunaga Ngode Datagaliwabe heago erembira mialu Anduane Homogonaga bi mana lowini wiarubi talialu bia nabi yu wahai hene.

<sup>23</sup> Horo mbirungi Amononaga agali haguane bu hearu tigua ndilalu Amono homelo bo wahamiya lalu henge hai bialu hene. Ani henge hai bialu howa mani Amono ibu kini andaga tamuha berearia anda puwa tigua homelo bo wahene. <sup>24</sup> Ani biyagola Yudali hearume agali haguane Amono homelo bo wahaya biaru bibahende minalu tinibi homelo bo wahai hene. Ani bialu tigua Amono igini Yosaiia ibu abanaga henge mialu Yuda wali agali tinaga kini helo dabo helene.

<sup>25</sup> Biabe maru Kini Amonohanda bialu henedaru mbuga mbira mini Yuda Kini Henerunaga Te laga ngagoha gilibu winigo nga. <sup>26</sup> Amono homayagola tigua ibunaga tingini homali mbira Usanaga mabu wiagoha winigo ogoniha hora hene. Hora hayagola ibu igini Yosaiia ibu abanaga henge ibuni mialu Yuda dindiha kini ha aribia hene.

## 22

*Yosaiia ibu Yuda dindiha kini henego ogo*

*(2 Bi Te 34.1-2)*

<sup>1</sup> Yosaiia ibu mali halira hayagola ibu Yudanaga kini pigane howa ibugua mali pira tebirani mbira (31) Yarusalemeni Yuda wali agali haru hene. Ibu aiyaya Bosogada tano wali Adaianaga wane Yadida berene. <sup>2</sup> Yosaiia ibugua Anduane Homogonaga deni mana bayale hangu biyagola Anduane Homogohanda ibuhondo turu ho hene. Ibugua mana bayale ibu mamali Kini Debidihanda bialu haga winidagua bialu howa Anduane Homogonaga bi mana hale halu hongo howa biaabo haga hene.

*Anduane Homogonaga bi mana mbugani gilibuwi mbira wiarua handa walia henego ogo*

*(2 Bi Te 34.8-28)*

<sup>3</sup> Yosaiia ibu kini heane mali pira mbirani halini (18) hayagola ibugua agali beba gili bia dagala biaga Sabana ibu Anduane Homogonaga andaha bi yalu pu lene. Sabana ibu

Mesulama aguane howa Asalia igini hene. Ani heagola Yosaihandanda ibuhondo lamialu lalu, <sup>4</sup>Ína loma binigo mo miaga Haguane Timbuni Hiligaia karia puwa loma binigo mo miaga maru Anduane Homogonaga anda panga mamage haga hearu tigua wali agalime muni migi bini mo winidaruni dagala lalu lamibe. <sup>5</sup>Daga lalu Anduane Homogonaga anda mo ko hene wiaru agali maru lone arema biraru yolo bilo agali biabe handayaho haga karu mo mibe, laya labe. <sup>6</sup>Tigua muni ogonime kabenda biabe biaga karubi ege toleme biabe biaga karubi ti yolo bialu irarubi ege tolerubi Anduane Homogonaga anda ogoni arema bilonaga yolo bibe. <sup>7</sup>Agali anda bilo haru haga karu ti mini tigabi dege ka manda bidogo ína tihondo muni ogonime agi bialu harimibe lalu hale nahabe laya labe, lalu Yosaihandanda lene.✧

<sup>8</sup>Ani laya handala Sabana ibugua puwa lamibe layadagua lamini. Ani lamiyago hale howa Hiligaia ibugua Sabanahondo lalu, Anduane Homogonaga anda biagoha mbuga mbira Anduane Homogonaga bi mana lowinigo gilibuwi wiaria handa walia haru, lene. Ani lowa ibugua mbuga ogoni Sabanahondo miyagola Sabana ibugua mbuga ogoni daga lene. <sup>9</sup>Ibugua dagalo handalu Kini Yosai hearia yalu puwa ibuhondo lalu, Ínaga biabe biaga agali biaru tigua Anduane Homogonaga andaha muni wiaruni bibahende agali anda áyu arema bialu karu handayaho haga hearu mo miai haya, lalu lamini. <sup>10</sup>Sabana ibugua laabo halu lalu, Kini-o loma binigo mo miaga Haguane Timbuni Hiligaia ibugua mbuga ogo ngiya, lowa ibugua kini hale helo mbuga ogoniha bi lo wiaru daga lene.

<sup>11</sup>Kini ibugua Anduane Homogonaga bi mana lowinigo mbuga ogoniha gilibu winiyago daga layago hale howa ibunaga bu miniha genda timbuni halu ibunaga aga bu heago mini lerelene. <sup>12</sup>Ani buwa loma binigo mo miaga Hiligaiabi Sabana igini Ahigamabi Migaia igini Agabobi kininaga beba gili bialu daga lalu biaga Sabanabi kininaga biabe biahaga Asaiabi olalu ibidaba lene. Íbu ngoaiho heagola ibugua tihondo lalu, <sup>13</sup>Mbuga áyu o mo yidogome Anduane Homogohanda mana iname bialu holene ogobi nga lalu lo winiyane handa walia kogoni. Anigo inanaga mamali heneyaru tigua mana uruni talialu bia nabi heneyagome Anduane Homogohanda miniha tandaga timbuni inahondo ho henego ka. Anigo áyu iname Anduane Homogonaga mbuga ogo handa walia harimago inabi Yuda wali agali bibahende bi iname agua bialu holomaya hamelo kebe lalu Anduane Homogo ibuhondo hale hole pudaba, lene.

<sup>14</sup>Agali biaru tigua kinihandanda bi layago hale halu abale tano gahenge Yarusaleme biagoha puwa Anduane Homogonaga bi mana latagi haga wali mbira mini Huluda berenego ogoni ibu berearia pene. Wali ogoni ibu agalini Salumu howa ibu Harasa aguane Tigiba igini hene. Ibugua loma binigo mo miaga hearunaga aga wiaga tamu hobane heago handayaho haga hene. Agali ibiyarume bi layaru hale howa Huluda ibugua <sup>15</sup>tihondo ladai bialu lalu, Tigua áyu ogoni kini tí pudaba layadago ibuni bedaria dai buwa Anduane Homogo ibugua bi ogodagua laya lalu, <sup>16</sup>Í Anduane Homogo kogome ínaga bi mana mbuga ogoniha gilibu wini kini ibugua daga layadagonidagua heneneore Yarusaleme bo gialabagabu waholebero. Wali agali uruniha kamirubi bibahende ko biyarunaga pani mulebero, laya. <sup>17</sup>Wali agali tigua í erembira ngialu puwa dama mitangi bialu gime wabini wiaruhondo bi pupu wialu mbirale tara tara lomabu mini. Tigua mana ogonibi biyagome ína tihondo keba holiya tinime í mo keba haya. Ína Yarusaleme wali agali tihondo tandagaore ho kogoni. Ínaga tandaga ogoni ereba naholebira. <sup>18</sup>Anduane Homogo í Isaraele wali agalinaga Ngode Datagaliwabe kogome tínaga kini biagohondo bi ogodagua laro. Tigua íhondo bi mbuga ogoniha gilibu wiaru dagalo ngiyago hale halu <sup>19</sup>ína Yarusaleme bo gialabagabu wahowa wali agali tano ogoniha karu tihondobi buleore manda bu ngogo laruyago hale howa í mini beregedalu ínaga deni íni mo dindiha hari. Ína dugu timbuni bialu ínaga aga lerelalu birigo í de



handaru. Ina Yarusaleme mo ko helarogola wali agali marume tinaga waitigiruhondo ha halu Yarusaleme mini lalu howa ogodagua lolebira. Yarusaleme mo ko hayadagua ti mo ko helo lolebira. Anigo kini-o ihondo larogo ina ihondo dugu birigoni hale harugo<sup>20</sup> ai í kengi Yarusaleme mo ko holene ogoni tagira naibi í bayale dege holebere. Anigo mani í homaregola tigua í hora kaha mo ko holene ogoni Yarusalemeha ibilolebero lalu Anduane Homogohanda ani laya, lalu wali biagome lene.

Anduane Homogonaga bi mana latagi haga wali Huluda ibugua mbiwia halu Anduane Homogonaga bi ogoni agali biaruru tihondo lamiya handala tigua kini hearia bi uruni lo yalu dai bini.

## 23

### *Yuda tigua Anduane Homogo andaneha holeberema lenego ogo (2 Bi Te 34.3-7,29-33)*

<sup>1</sup> Kini Yosaia ibugua agali haguane Yarusalemeha hearubi Yuda dindiha hearubi bibahende íbu ngoai hadaba lene. <sup>2</sup> Íbu ngoai hayagola kini ibugua Anduane Homogonaga bi mana latagi haga bu hearubi loma binigo mo miaga hearubi wali agali homogobi yagibanobi ti bibahendeore Anduane Homogonaga andani mo ngoai hene. Ani íbu heagola ibugua mbuga habo nalolene bi lowinigo Anduane Homogonaga andaha wiaria handa walia hene biago mo yuwa bi ogoniha gilibu wiaru wali agali ti hale hai helo daga latagi hene. <sup>3</sup> Ani daga latagi heagola kini íbu anda gene luni Anduane Homogonaga andaha heagoria heyu howa habo nalolene bi mbira Anduane Homogohondo lo wialu ibugua lalu, Inaga minimebi gubalinimebi Anduane Homogonaga mbuga ogoniha bi gilibu wini ngaruni talialu biaiore holebero, lene. Ani layagola wali agali tiguabi nde, Habo nalolene bi mbuga ogoniha gilibu ngaru talialu biaiore holeberema, lalu bi lowini.

<sup>4</sup> Ani lowialu Kini Yosaia ibugua lalu, Loma binigo mo miaga Haguane Timbuni Hiligaiabi loma binigo mo miaga maru íbu andaneha haga hearubi agali maru Anduane Homogonaga anda panga haraba mamage haga hearubi bibahende Anduane Homogonaga andaha anda puwa mbirale dama mitangi bialu gime wabini mini Balanaga bi pupu wiagane wiarubi dama wali beda mitangi bialu gime wabini mini Aseranaga bi pupu wiagane wiarubi yakundihondo bi pupu wiagane wiarubi bibahende mo yu tagira íbai halimu. Ani bialu tano pabe tagiraha yu tagira pialu Kidirono dindi ulini unu ngagoha irani delaiore halimu, lene. Ani delowa dai halu ira punga halu be kagola Bedele tano dugu yalu pilimu, lene. <sup>5</sup> Ani lowa dama mitangi bialu gime wabini wiarunaga loma binigo mo miaga agali bu hearu bibahende Kini Yosaia ibugua bo duguai hene. Agali uruni ti abale Yudali kini henedarume dama mitangi bialu gime wabini uruninaga bi pupu wiaga andaha lomaru mo mialu helo dabo helaga bini. Mbirale uruninaga bi pupu wiaga anda Yarusalemenibi Yuda dindiha tano wiaru bibahendenibi hai hene. Ibugua agali maru Balahondo bi pupu wiaga hearubi nihondobi egehondobi yakundihondobi urunialehondo bi pupu wiaga hearu bibahende bo duguai hene. <sup>6</sup> Mbirale dama wali beda mitangi bialu gime wabini mini Asera Anduane Homogonaga anda tamuha wiago mo yalu tagira pialu Kidirono dindi ulini íba peagoha yalu puwa irani delai hene. Ani dai halu ira punga wiagola baya hangu dambu gindu lowa mo be abaluore helene. Ani buwa be abaluore wiagola Yarusaleme wali agali daga nalene homonerunaga homali wiagoha taulo payabu wahene. <sup>7</sup> Ani biai howa Yosaia ibugua bidaba lalu layadagua Anduane Homogonaga andaha hobane mbira mbira wali agali kayu yu paliaga bu helearuni bibahende gialo wahaiore hene. Anda hobane uruni walirume dama wali beda mitangi bialu gime wabini mini Aserahondo bi pupu wulenaga aga karulagaru wabiaga wiagoria henego uruni bibahende bo gialo wahaiore hene.

✧ 23:4: 2 Kin 21.3, 2 Bit 33.3

<sup>8</sup> Yuda dindi bibahendeha Yosaia ibugua damarunaga lomabu delaga dabu bu helearu bibahende bo gialabaga bima uyurahayagi Geba tanoha howa delama pialu unurahayagi Beaseba tanoha delama tagira pene. Ani buwa dama mitangi bialu gime wabinirunaga bi pupu wiaga anda hearu bibahende mo koore hai hene. Ani biai halu dama mitangi bialu gime wabinirunaga loma binigo mo miaga dindi uruniha hearu bibahende Yarusaleme tano haru ibai hene. Lomabu delaga dabu mbira Yarusaleme tanoha panga mbiranaga harabani kaware dege bu helene go oni bo giallo wahai hene. Panga go oni Yosua ibu Yarusaleme tanonaga hondo haga agali heangi ibugua Yarusaleme tano uba andatagi biaga panga dunini timbuni heagonaga abene gi lehayagi wabu helene. <sup>9</sup> Loma binigo mo miaga biaru kinihanda Yarusaleme haru anda ibiyaru ti loma binigo mo miaga Yarusalemeni karu baba mandagi howa mberedi yidi nahe hirini nalu holene wini. Anigo Anduane Homogonaga andaha lomabu delaga dabu heagonaga lomabu delaga biabe tigua bulene nawi hene.

<sup>10</sup> Kini Yosaia ibugua dama mbira mini Tobede lagagonaga bi pupu wiaga Hinomo dindi uliha wali agalinaga deni mo ko halu mo ngubia hai haga wiago bo gialabaga bini. Ani biyagola wali agalirume tinaga waneigini dama mitangi bialu gime wabini mini Molegehondo loma bialu bo mibe nahe wini. <sup>11</sup> Ala howa Yudanaga kini hearume ni ibu dama mbira kagoni lowa tigua nihondo bi pupu wiaga hene. Tigua nogo hosiru karisuru maru ninaga loma bia howa Anduane Homogonaga anda heagonaga pabe tagirahayagi helene. Dindi tu wa bagi hene mbirale uruni helenedaruni kininaga biabe haru haga haguane Nadana Melege henego ibu dalu pabe tamuhayagi wini. Ani winigo Yosaiahanda nogo hosi biaruni talia tagi halu karisi wiaruni bibahende irani delai hene. <sup>12</sup> Kini Ahasa andaga daliga danginiha bamba Yudanaga kini henedarume lomabu delaga daburubi Kini Yosaiahanda gialabaga bini. Ala Kini Manase ibuguabi nde lomabu delaga dabu Anduane Homogonaga anda biagonaga tamuha wali agali mo ngoaiho haga henge timbuni wiagonaga bu helene go oni Yosaia ibugua bo gingirulobaga bu wahene. Bo gingirulobaga bu wahene wiaru baya hangu iluwa Kidirono dindi ulini iba peagoha yu wahene. <sup>13</sup> Ani bialu bamba Kini Solomonohanda lomabu delaga dabu dewaore Yarusaleme tanonaga abene unura Hari Olibe kagohayagi bu helene uruni Yosaiahanda giallo wahene. Dabu uruni Solomonohanda ibugua dama mitangi bialu gime wabiniru mbirago Saidono wali agalinaga dama wali beda mini Asadarebi mendego Moaba wali agalinaga dama mini Kemosobi tebonego Amono wali agalinaga dama mini Molegebi wabu helaga bini. Anigo uruni bibahende Anduane Homogonaga deni ko ngubiore wini. <sup>14</sup> Yosaia ibugua ege tole anda genenibi ira anda genenibi dama wali beda mitangi bialu mini Asera gime wabu helearu bibahende dibu giallo wahai hene. Ani buwa Yosaia ibugua homa kuni wiaru dindi otoniha mo yu paya payabu ngelalu dindi otoniha lone bi pupu wibe nahe wali agalinaga deni mo ngubia ho ngelene.

<sup>15</sup> Bamba Nebada igini Yaroboama heangi lotu laga dindi mbira Bedele tanoha mo ngelalu lomabu delaga dabu mbira bu helalu bini. Yaroboama otoni ibu kini heangi ibugua Isaraele wali agali Anduane Homogonaga deni howa mana ko wiaru bilo mo bia halu haga hene. Ani binigo Yosaia ibugua Bedele tano puwa lomabu delaga dabu wiago agali bu hearuhondo, Gialo wahadaba, lene. Gialo wiago irani delowa ira punga wiago dambu gingirulobaga buwa be abalu helene. Ani bialu dama wali beda mitangi bialu gime wabini mini Asera wabu heleagobi irani delene. <sup>16</sup> Ani buwa Yosaia ibuni uruni biyago handayaho henego beregedowa handa dai bialu hearia homali maru naina hari nene wiaruha hearia hendene. Ani hondowa biabe biaga agali hearuhondo, Homa kuni homali uruniha wiaru dugu pudaba, lene. Dugu puwa yalu dai biyagola Yaroboama ibugua lomabu delaga dabu ala bu helene biagonaga homa kuni biaru irani delene. Ani biyadagome wali agali bu hearunaga deni dabu otoni mo ngubiaore hene.

✧ 23:10: LBM 18.21, Yar 7.31, 19.1-6, 32.35 ✧ 23:12: 2 Kin 21.5, 2 Bit 33.5 ✧ 23:13: 1 Kin 11.7 ✧ 23:15: 1 Kin 12.33

O biyadaruni bamba Kini Yaroboama ibu lomabu delaga dabu biagoria hearia Anduane Homogonaga bi mana latagi haga mbira henegoha howa mbiwia henego henene lola hene. Yosaia ibugua homa kuni biaru irani delai howa lone handa dai bialu hearia homali mende hearia hendene. ✧ <sup>17</sup> Hondowa ibugua agali hearuhondo hale lalu, Homali ogoni ainagadabe, lene. ✧

Ani layagola Bedeleali hearu tigua ibuhondo ladai bialu lalu, Homali ogoni Yudali mbira Anduane Homogonaga bi mana latagi haga bamba henego ibugua áyu ina lomabu delaga dabu ogoni o beregonidagua bulebira lalu bamba mbiwiaho bolangua henegonaga homali ka, lalu lamini.

<sup>18</sup> Ani layagola Yosaia ibugua tihondo lalu, Tiguaibunaga homali ogoni mo ko holomini. Iibunaga homali baya hangu helalu ibunaga kuni ibuni homaliha ela nahe baya hangu ngelalimu, lene.

Ani laya handala tigua ibunaga kunibi Anduane Homogonaga bi mana latagi haga mende Samaria dindiha henegobi libunaga kuni mo dela nabi ngelo wahene.

<sup>19</sup> Bamba Isaraele wali agalinaga kini henerume dama mitangi bialu bi pupu wiaga tano bibahende wiaruha mo wiagola tigua mana ogonidagua binidagonime Anduane Homogo mo tandaga hene. Ani binigo Kini Yosaia ibugua Bedele tanoha biyadagua dege dama mitangi bialu bi pupu wiaga wiaru bibahende bo gialo wahai hene. <sup>20</sup> Ani buwa dama mitangi bialu bi pupu wiaga uruninaga loma binigo mo miaga hearu bibahende tininaga lomabu delaga dabu bu helaga biagoria tinibi bo delai hene. Ani bialu homa kuni wiarubi dabu odaruniha mo delaga bini. Ibugua biabe uruni biai lalu Yarusaleme dai bini.

*Bolangua Halu Penegonaga Horo mitangi bialu tomo nenego ogo*

*(2 Bi Te 35.1-19)*

<sup>21</sup> Kini Yosaia ibugua wali agali bibahende hearuhondo bi lo pelalu lalu, Bolangua Halu Penegonaga horo mitangi bialu tomo nolene habo nalolene bi mbuga ngagoha gilibu ngadagua bamba ina mamaliru Iyibi dindiha bayale helo helene mitangi bialu tomo nolene winingi namiya, lene. Ani layagola wali agali tigua kinihanda layadagua biai hene. <sup>22</sup> Bambaore agali haguane haru haga heangi howa hama ibalu Isaraele Yudanagabi kiniru heangi Bolangua Halu Penegonaga Horo tomo nolene ogoni mitangi bu haga winigo áyu ogonidagua nane lu haabo hene. <sup>23</sup> Anigo áyu mali pira mbirani halini (18) hayagola Yosaia ibu kini hene lowa tigua mbuga biagoha bi gilibu wiadagua talialu tomo ogoni Yarusalemeni dawa nene.

*Yosaia ibugua Yuda dindiha mana ko damene maru wiaru mo wahai henego ogo*

<sup>24</sup> Yosaia ibugua homene dininiha wali agalime halaga biaga wiarubi dama mitangi bialu gime wabini wali agali tini andagaha hangu hangu wu hearubi gime wabini maru wiarubi bibahende mo wahai hene. Yarusalemeni Yuda dindi bibahendehabi wali agali bibahendeme mana ko ngubi dama mitangi bulenaga mana tara tara biaga wiaru mo wahai hene. Ibugua ogonidagua binidaruni irane ibugua wali agalime Anduane Homogonaga mana mbuga loma binigo mo miaga Haguane Timbuni Hiligaiahanda Anduane Homogonaga andaha wiarua handa walua hene biagoha lo wiadagua talialu bilonaga ani bini. <sup>25</sup> Yosaia ibu kini bayaleore howa ibunaga bu minimebi mandamebi hamemebi mo mbiraore hangu howa Anduane Homogo hongo howa talialu bi mana Mosesehanda gilibu wini wiaru buleore hamelo hene. Bamba Kini Yosaia ale mbira nahene manibi nahe dege. Ibu hangu kini bayaleore hene.

<sup>26</sup> Yosaia ibugua mana bayale dewa bialu henegoyu Anduane Homogohanda Kini Manase ibugua mana ko dewaore bialu henego mitangi bialu ibunaga bu miniha Yuda wali agali baba tandaga ho howa embeda nahe haabo hene. <sup>27</sup> Ani embeda nahe howa Anduane Homogo ibugua lalu, Ina Isaraele wali agalihondo birugonidagua Yuda wali

agalihondobi ani dege bulebero. Ina ti handabe manga timbuni ho kogo ai ti dindi taraha hama pelo bo batagi holebero. Ininaga tano loma biahene Yarusaleme biago erembira mialu waholebero. Wali agali ini koría ibalu i mitangi bialu lotu laga anda ininaga loma bia hene biagobi wa dege holebero, lene.

*Yosaia homenego ogo*  
(2 Bi Te 35.20-36.1)

<sup>28</sup> Biabe maru Kini Yosaia ibugua bialu henedaru mbuga mbira mini Yuda dindiha Kini Henerunaga Bite laga ngagoha gilibu winigo nga. <sup>29</sup> Yosaia ibu kini heangi Iyibinaga Kini Nego ibugua ibunaga ami haru halu Asiria baba wai bule tidu yalu Iba Yuberedisi peagoria pu hene. Ani pu ka layago hale howa Kini Yosaia ibugua ibunaga ami agali hearu haru puwa Iyibiali biarú baba wai bule pene. Tigua pialu Megido tano wiagoria puwa wai bialu hemiria Iyibi ami agali biarume Kini Yosaia bene. <sup>30</sup> Ani benego homaya handala ibunaga ami agali haguane bu hearume ibu tingini wai biaga karisi wiagoria mo yalu Yarusaleme dai bini. Yalu dai buwa ibu Yudanaga kiniru hora haga homali heagoha hora hene.

Yudaliru tigua ani hora howa ibu igini Yoahasa dabalú kini helo ibunaga hagianeni weli odo wia hene.

*Yoahasa ibu Yuda dindiha kini henego ogo*  
(2 Bi Te 36.2-4)

<sup>31</sup> Yoahasa ibu mali pira kirani tebira (23) hayagola Yuda wali agalinaga kini pigane hene. Ani howa ibu Yarusalemeni ege tebira hangú haru hene. Ibu aija mini Hamudala ibu Libina tanoali Yaremaia henego wane berene. <sup>32</sup> Yoahasa ibugua ibu mamalirume mana ko wiaru bialu henedagua ibugua Anduane Homogonaga deni howa mana ko dewa bialu hene. <sup>33</sup> Ani bialu heagola Iyibinaga Kini Negohanda ibalu Yoahasa kini heago bo dugualu Hamada dindiha Libila tano wiagoha garabaya heleagola Yoahasa lone kini habe nahe hene. Ani helowa Kini Nego ibugua Yuda wali agalime dagisi muni siliba genda magi kilogarama daosini tebirani handari maria (3,400) ngialu ngolo genda magi kilogarama pira tebirani maria (34) ngi lalu hene. <sup>34</sup> Ani buwa Kini Nego ibugua Yosaia igini mende Eliagimi dabalú Yuda dindiha Yosaiánaga henge mialu kini helo helene. Ani heagola Kini Nego ibugua Eliagiminaga mini mende wia aribia halu Yahooigimi wini. Ani helalu Nego ibugua Yoahasa Iyibi haru halu puwa helenego ai Yoahasa Iyibi dindiha halu homene.✧

*Yahooigimi ibu Yuda dindiha kini henego ogo*  
(2 Bi Te 36.5-8)

<sup>35</sup> Kini Yahooigimi ibugua ibunaga wali agali bibahendehondo lalu, Ngolo silibaru Kini Nego dagisi mo mule tínime mulene karulape yidamidagua ngilimu, lene. Ani layagola muni dewawi hearu tigua wiadagua miyagola emenewi hearu tiguabi nde emene wiadagua mini. Ani mo mogo biyagola Yahooigimi ibugua muni uruni bibahende mo mogo bialu Nekonaga mo pelai hene.

<sup>36</sup> Yahooigimi ibu mali pira kirani duria (25) hayagola Yuda dindiha kini pigane howa ibugua mali beriani (11) Yarusalemeni haru hene. Ibu aija Luma tanoali Pedaiá mbira henego wane Sebida berene.✧ <sup>37</sup> Kini Yahooigimihanda bamba ibu mamalirume mana ko bialu henedagua dege ibugua Anduane Homogonaga deni mana ko ngubi wiaru bialu haabo haga hene.

## 24

<sup>1</sup> Yahooigimi ibu Yuda dindiha kini heangi Babilononaga Kini Nebugadenesa ibugua ibunaga ami hearu haru halu ibuwa Yuda dindiha wai bini. Ani buwa ibugua Yudali

hearu bope halu Kini Yahoiagimi ibu andaneha helo helene. Ani howa mali tebira peagola Kini Yahoiagimi ibu pubagi halu Nebugadenesa andaneha holene manga howa ibu hatara hene.\* <sup>2</sup> Ani biyadangi howa Anduane Homogohanda Kini Yahoiagimi baba wai bilonaga ami agali Babilono howabi Siria howabi Moaba howabi Amono howabi ibilaga bini. Tigua ibalu wai buwa Yuda wali agali balu dindi anda bo labu hai hene. Anidagua biyadagoni abale Anduane Homogo ibunaga bi mana latagi haga biabe biahaga agali maru heneruha howa bi latagi halu mbiwia henego heneneore lola hene. <sup>3</sup> Anduane Homogohanda anidagua binidagoni irane ibugua Yuda wali agaliru handabe manga howa ibunime waitigi agalidaru mo mini wia hayagola tigua wai bialu dindi bo labu halu wali agali dindi mendeha hama pelo bo batagi hene. Anduane Homogo ibugua Kini Manasehanda mana ko timbuni bialu heneru mitangi bu haabo hene. <sup>4</sup> Mendebi nde Manase ibugua dege wali agali tiha ko mbira nawini mana tigabi bialu Yarusalemeha hearu bame homelo bo wahaga biyagola Anduane Homogohanda Manasenaga ko urunibi mitangi bu haabo howa waitigi ani ibilene.

<sup>5</sup> Biabe maru Kini Yahoiagimihanda bialu henedaru mbuga mbira Yuda Kini Henerunaga Bite laga ngagoha gilibu winigo nga. <sup>6</sup> Kini Yahoiagimi homayagola ibu igini mbira Yahoiagini henego ibugua ibu abanaga henge mialu kini ha aribia hene.

<sup>7</sup> Horo odaruningi howa Babilononaga kini heagome dindi dewaore abale Iyibinaga kini heagome handa gimbubu heneru bibahendeore Iyibi baba dindi tubaria wiagoria howa pialu uyura Yuberedisi Iba angeni tubaria wuwa ibugua karulowa handameho hene. Ani handameho heagola Iyibinaga kini henedago ibugua dindi mendeha wai bule tagira piaga winidagua pobe nahe wiyagola ibu nape waho hene.

*Yahoiagini ibu Yuda dindiha kini henego ogo  
(2 Bi Te 36.9-10)*

<sup>8</sup> Yahoiagini ibu mali pira mbirani halira (18) hayagola Yarusalemeni kini pigane howa ege tebira hanguni ibu Yarusalemeha haru hene. Ibu aija Yarusalemeali Elinadana mbira henego wane mini Nehusa berene. <sup>9</sup> Yahoiagini ibugua ibu abahanda biagane mana wiadagua Anduane Homogonaga deni howa mana ko wiaru mo tene howa bialu haga hene.

<sup>10</sup> Yahoiagini ibu kini heangi Babilononaga Kini Nebugadenesanaga ami haru haga agali haguane hearume Babilononaga ami agali hearu haru halu ibuwa tigua Yarusaleme bibahendeore ho hagira bia anda howa tano karulole wai bule hene.

<sup>11</sup> Babilononaga ami biarume Yarusaleme ho hagirabu heagola Kini Nebugadenesa ibuni ibalu ti haru mandagi hene. <sup>12</sup> Nebugadenesa ani ibu heago handalu Kini Yahoiaginibi ibu aiyabi ibunaga ami haru haga agali haguane hearubi agali kini andaga mamage haga hearubi bibahende tano yu wahalu Babilononaga Kini Nebugadenesa hearia puwa ti wai bibe manga ho kama lole pene. Ani layagola Nebugadenesa ibugua Kini Yahoiagini minu garabaya bini. Nebugadenesa ibu Babilono dindiha kini howa mali halini heangi wai ogoni bini.\* <sup>13</sup> Ani bialu ibugua Anduane Homogonaga anda anda puwa mbirale maru bamba Kini Solomonohanda ngolome wabu wini wiaru mo yai hene. Anduane Homogonaga andaha ngolo wiarubi kini andagaha ngolo wiarubi bibahendeore Babilono mo yu piyai hene. Ani binidagonidagua bulebira lalu Anduane Homogohanda lowinigo lola hene. <sup>14</sup> Ani bialu Kini Nebugadenesa ibugua Yarusaleme wali agali bu hearubi ami haru haga hearubi ami agali hongohede daosini pira (10,000) bu hearubi bibahende haru tagira pene. Agali manda timbunibi hearubi agali maru biabe tara tara mugubeyi hearubi aeaneme biabe biaga mugubeyi hearubi haru pu dege bini. Uruni bibahende garabaya haru halu Babilono piyai hene. Wali agali maru burupale hayaru dege Yuda dindiha helo yu wahene.

\* 24:1: Yar 25.1-38, Dan 1.1-2    \* 24:12: Yar 22.24-30, 24.1-10, 29.1-2



<sup>15</sup> Kini Nebugadenesa ibugua Yahoiajinibi ibu aiyabi ibu one biru wiarubi ibunaga agali haguane hearubi bibahendeore Babilono dindiha garabayabu yalu piai hene.✧

<sup>16</sup> Nebugadenesa ibugua ami agali hongohe hearu daosini karia (7,000) haru pene. Agali maru manda timbunibi hearubi agali maru biabe tara tara mugubeyi hearubi mbirale aeaneme biabe biaga mugubeyi hearubi bibahende lamaga halu daosini mbira (1,000) Babilono haru halu pene. Agali uruni hongohe ami holene karulaperu dege pene.

<sup>17</sup> Nebugadenesahanda Yahoiajini aba hamene heyogone Madania henego ogoni ibu nde Yarusalemeni kini helo dabo helowa ibunaga mini Madania wiyago wahalu mini mende Sedegaia wia aribia hene.✧

*Babilono amime wai bialu Yarusaleme karulene go*

*(2 Bi Te 36.11-12, Yaremaia 52.1-3)*

<sup>18</sup> Sedegaia ibu mali pira kirani mbira (21) hayagola ibugua Yudanaga kini pigane howa mali bearia (11) hanguni Yarusalemeha haru hene. Ibu aiyu Libina tanoali Yaremaia mbira henego wane mini Hamudala berene.✧ <sup>19</sup> Ani howa Kini Sedegaia ibugua mana ko ngubi abale Kini Yahoiajimihanda bialu henedagua dege Anduane Homogonaga deni mana ko wiaru bialu haga hene. <sup>20</sup> Wali agali Yarusalemeni haga hearumebi Yuda dindiha haga hearumebi mana ko wiaru hangu mo tene halu biaabo hayagome Anduane Homogo mo tandaga timbuni halu hene. Ani biyagola Anduane Homogo ibugua ti handabe manga howa tininaga dindiore yu wahalu dindi tara kaundiaha hama pelo bo talia tagi hene.✧

## 25

*(2 Bi Te 36.13-21, Yaremaia 52.3-11)*

<sup>1</sup> Kini Sedegaia ibugua Babilononaga kini heagome ibu handayaho helo habe manga howa ibu habagi halu ibuni hangu hene. Ani heagola Sedegaia ibu kini henego mali dininaga ege pini hayangi ege ogoninaga horobi nde pini dege hayagola Babilononaga Kini Nebugadenesa ibunaga ami hearu bibahende haru halu ibalu Yarusaleme tano ho hagira buwa tano karulole wai bialu hene. Tigua ani ho mabu biai howa tini heyu howa wai bulene ege pabe daliga heagoha dindi dugu wima irigi hene.✧ <sup>2</sup> Mali mbirani ege waragaria agima Yarusaleme tano ho hagira bia andaho hene. Ani andaho howa mali beriani Sedegaia ibu kini hene lowa <sup>3</sup> mali ogoninaga ege manenaga horo dini hayagola Yarusaleme wali agali tanoha hayaru tomo nolene nawi biba hayagola tomo garime homalu hene. <sup>4</sup> Ani bu heagola Babilonoali biaru tigua tanonaga pabe heagonaga gibuni mbiraha bangu lalu Yarusaleme tanoha anda pene. Ani biyagola Kini Sedegaiaibi Yarusaleme tanoha haga ami hearubi bibahende ibida pora bialu polene manda buwa kininaga gama wiagohayagi pialu pabe kira bugimbu bini wiagoha panga mbira wia do henegoha tagira pole pene. Babilononaga ami hearume pabe gibugibu mamage tidiyu ibaga bialu heago helowa dege Yarusaleme ami biaru ti tidiyalu Yodana iba polene hariga peadagua pole pene.✧ <sup>5</sup> Ani piyagola Babilono ami hearume Kini Sedegaia piyadagua haruru pugupugu bialu Yarigohayagi dindi tigabi mbira wiagoria talima pialu minini. Ani minaya handala Sedegaianaga ami biaru tigua kini yu wahalu ibida pugupugu biai hene. <sup>6</sup> Babilono ami biarume Kini Sedegaia Babilononaga Kini Nebugadenesa Libila tanoni hearia minu yalu pene. Ani minu yalu pu heleagola Nebugadenesa ibugua Sedegaia hondowa lalu, Inime ko biridagonaga pani noleneore nga, lene. <sup>7</sup> Babilono ami biarume Sedegaia one waneigini bu hearubi heba Libila tano minu yalu ibini. Ani minu yalu ibiyagola Nebugadenesa ibugua ami biaruhondo bidaba lalu lamiyadagua tigua Sedegaia igini hearu bibahende ibuninaga deni howa bo homelai hene. Ani bo homelai heagola kini ibugua lalu, Sedegaianaga de kirabali dugu

✧ 24:15: Ese 17.12 ✧ 24:17: Yar 37.1, Ese 17.13 ✧ 24:18: Yar 27.1-22, 28.1-17 ✧ 24:20: Ese 17.15 ✧ 25:1: Yar 21.1-10, 34.1-5, Ese 24.2 ✧ 25:4: Ese 33.21

wahadaba, layagola tigua ani bini. Ani biai halu ibunaga gi gebi seni pume minu kabu buwa Babilono dindiha garabayabu yalu pole pene.✠

*Babilono amirume Yarusaleme mo ko halu bo gialabaga binigo ogo  
(Yaremaia 52.12-33)*

<sup>8</sup> Nebugadenesa ibu Babilono dindiha kini heane mali pira mbirani dira (19) hene. Mali ogoninaga ege dauninaga horo kane hayagola ami haru haga haguane mbira mini Nebusaradana mbira henego ibu Yarusaleme ibini. Nebusaradana ibugua ami agali maru kini mamage haga hearu haru haga hene. <sup>9</sup> Ibugua ibuwa Yarusalemeha Anduane Homogonaga anda heago delalu Yudanaga kini andagabi delalu agali haguane Yarusalemeha haga hearunaga andarubi bibahendeore bo heda halu delai hene.✠ <sup>10</sup> Ani biai howa Babilono ami Nebusaradana heba ibiyarume Yarusaleme tanoha ege pabe bu mabu bini hearuni bibahende bo giallo delaiore hene. <sup>11</sup> Ani giallo delai halu Nebusaradana ibugua Yarusalemeni wali agali maru yu wahene hearubi wali agali maru hearubi bibahendeore Babilono garabayabu yalu piai hene. Yuda wali agali maru wai biyangi Yarusaleme yu wahalu tagira puwa ami bu hearunaga balai anda heago pu hene hearubi bibahendeore garabaya biai halu Babilono dindiha haru piaiore hene. <sup>12</sup> Anigo Yuda wali agali maru mbirale yalu polene nawi yagibanoore hayaru Nebusaradana ibugua wali agali uruni ti gerebi maburu widi mabu wiaruha biabe bialu helo helene.

<sup>13</sup> Ani bialu Babilono ami biarume Anduane Homogonaga andaha anda puwa anda gene tole boronosime helene hearu giallo yalu mbirale iba dange be wiaga wilibaro ale timbuni boronosime wabini wiagobi giallo yini. Ani giallo yalu tigua iba dange be timbuni mbira boronosime wabu wini wiagobi bo pambu laga buwa yalu pene. Boronosi uruni bibahendeore Babilono mo yalu piai hene.✠ <sup>14</sup> Babilonoali biaru tigua dege todobene be aleru nama tabuli ale lomabu delaga dabuni ira punga beru ngago hilu wahaga wiarubi mbirale lamu hale delowa mo emeneha mo timbuniha bigi biaga wiagobi ira hagua ngabilo delaga mini inisenesinaga beledi wiarubi ndisi be mbirale bo lomabu delaga biarunaga daroma hambiaga wiarubi mbirale Anduane Homogonaga andaha biabe biaga boronosime wabini wiaru bibahendeore mo yai hene.✠ <sup>15</sup> Nebusaradana ibugua mbirale ngolome wabini silibame wabinirubi bibahendeore mo yai halu ira hedo yaga beledi ale wiagobi heba mo yini. <sup>16</sup> Bamba Kini Solomonohanda boronosime anda gene kira ogoni labo wabu helalu iba dange be timbuni ogoni wabu ngelalu mbirale iba dange be emene emeneru wilibaro aleni mo paga howa yaga ogoni wabu wialu bini. Ani biai howa Solomonohanda ibugua biabe biaga agali hearuhondo mbirale uruni Anduane Homogonaga andaha mo ngeladaba layagola mo winigo áyu Babilonoali biarume mbirale uruni bo bangulo baga bialu boronosi para hene heago damene bibahende mo yaiore hene. Boronosi uruninaga genda magi agalime manda bialu daga labe nahe dewaore mo yalu pene. <sup>17</sup> Biabe biaga agalirume anda gene boronosime wabu heleadagoni kirabali ogobi labolaboore wabu helene. Wabu helayadagoni luninaga ge magi manda mida halira hene. Gene ogoni labonaga nguni daligahayagi boronosime para howa mo timbu heagonaga daligahayagi timbuni hene. Daligahayagi boronosi hangume bia para haga bima iraga halu magi manda mida mbira howa bolanguahe hene. Ani wabu helowa tigua ogoni mo yaribia halu hanuni boronosime dege yári taraore bialu ira mbira mini pomegarandade lini aleru wabu helaga bini. Ani wabu helowa boronosime dege nu ale mbira wabuwa ogonime wu mabu bini. Anidagua buwa ogoni anda gene biago labonaga nguni daligahayagi wia dambi helenege ani hene.

✠ 25:7: Ese 12.13 ✠ 25:9: 1 Kin 9.8 ✠ 25:13: 1 Kin 7.15-26, 2 Bit 3.15-17, 4.2-5 ✠ 25:14: 1 Kin 7.45, 2 Bit 4.16

*Yuda wali agali Babilono dindiha garabayabu yalu penego ogo  
(Yaremaia 52.24-27)*

<sup>18</sup> Babilononaga amiru haru haga agali haguane Nebusaradana biago ibugua loma binigo mo miaga haguane Seraiabi ibu biamogo biaga agali Sebanaiabi agali Anduane Homogonaga anda panga mamage haga agali tebirali hearubi ti bibahende minu garabayabu yalu pene. <sup>19</sup> Ani bialu Yarusalemeha ami agali hearu haru haga agali haguane heago minu yini. Yudanaga kini mini bogaru talebu miaga duriali uruni ti Yarusalemeni hearia hondowa minu yini. Agali mbira ami haru haga haguane heagome agali maru ami holene dabaluni mini gili biaga heagobi minu garabayabu yini. Ani biai howa Yarusalemeni agali mini lene pira waragara (60) hearu hondowa urunibi minu garabayabu ya dege bini. <sup>20</sup> Ani bialu Nebusaradana ibugua uruni bibahende minu yai halu Babilononaga kini ibuni Libila tanoha hearia pole pene. <sup>21</sup> Dindi ogoni hameigini Hamada hearunaga wini. Dindi ogorani howa kini ibugua agali uruni homelo badaba layagola tigua o biaruni bibahendeore homelo bo wahai hene.

Ani biai halu mani howa Babilonoali biarume Yuda wali agali maru hearu Babilono dindiha garabayabu yalu pole pene.

*Gedalia ibugua Yuda dindi handayaho henego ogo  
(Yaremaia 40.7-9, 41.1-3)*

<sup>22</sup> Kini Nebugadenesahanda agali mbira mini Gedalia henego ogoni ibugua Yuda wali agali maru Yuda dindiha helo wahalu ibiyaru haru helo dabo helene. Gedalia ogoni ibu Sabana aguane howa Ahigama igini hene.\* <sup>23</sup> Ani helayagola howa Yudanaga ami haru haga agali haguane marubi ami agali marubi ala ibida puwa dindi gibuni maru wiaruha ha do haga bini. Tigua ha do ho hearia Babilononaga kini ibugua Gedalia ibu Yuda dindiha haru haga helo dabo heleda layago hale howa tigua Gedalia Misiba tanoni hearia hondole pene. Agali ami haru haga haguanelaruni tinaga mini uru hene. Nedania igini Isimaelebi Karea igini Yohananabi Nedoba dindiali Tanumede igini Seraiabi Maga dindi howa ibini Yasanaiaibi uruni ti pene. <sup>24</sup> Gedalia ibu ti ibiyago hondowa ibugua tihondo lalu, Heneneore langerogo ti Babilono kini kagohondo gi nahe tini dindi ogoria hendore halimu. Ani howa tigua Babilononaga kini kago andaneha howa tini bayale holeberemi, lalu lamini.

<sup>25</sup> Ani lamiyagola howa Elisama aguane Nedania igini Isimaele ibu Yudanaga kini henerunaga aria mbira henego mali ogoninaga dege ege kane hayagola ibugua agali pinali haru halu Misiba dindi anda ibuwa Gedalia homelo bo wahene. Ani bialu tigua Yudalibi Babilono ami maru Gedalia heba haga Misiba dindini hearubi bibahendeore homelo bo wahaiore hene.\* <sup>26</sup> Ani bayagola mani howa Yuda wali agali hearubi ami hearubi bibahende Babilono kini biagohondo gi halu ti Iyibi dindiha ibida piai hene.\*

*Babilononaga kini heagome Kini Yahoiaigini garabaya golene ogo  
(Yaremaia 52.31-34)*

<sup>27</sup> Kini Yahoiaigini ibu Babilonoha mali pira tebirani karia (37) garabaya dege haabo hene. Ani heagola mali ogonungi agali kini mbira mini Ebili Merodaga henego ogoni ibu Babilonoha kini ho aribia hene. Ani heane dege mali ogoninaga ege hombeanenaga horo pira kirani karia (27) hayagola Ebili Merodaga ibugua Yahoiaigini dara timbuniore ho howa ibu garabaya hayago golope hene. <sup>28</sup> Ebili Merodagahanda mana bayaleore bialu Yahoiaigini heba kini maru ti haru mandagi Babilono dindiha garabaya henerunaga deni ibu mo yaraga howa agali mini lene mbira helene. <sup>29</sup> Ani heleagola Yahoiaigini ibu garabayanaga aga biaga wiaru nabi aga maru bayale biaribia hene. Ani howa ibu Babilononaga kini heago andagaha tomo nalu haabo hene. <sup>30</sup> Mani Babilononaga kini ibugua Yahoiaigini ibu karulapeore mbirale mbira burupale nabi

\* 25:22: Yar 40.7-9    \* 25:25: Yar 41.1-3    \* 25:26: Yar 43.5-7

helonaga muni yáriru migi bilimu lalu wali agali bu hearuhondo lamigi biyagola tigua milimu laya aleru mialu haabo heane dege Yahoiajini homaya handala wahene.

## 1 Bi Te

### Mbuga ogoniha gilibu ngarunaga nemandi ogo

Kini henerunaga Bi Te mbuga mbiraha mendegohabi Samuelenaga mbuga mbiraha mendegohabi Kininaga mbuga mbiraha mendegohabi gilibu wiaruni dege tara marubi dewa wigi bida. Bi Te mbiraore degego mbuga ogo agali gili binidago ibugua irane tara mendenaga gili bini. Mbuga kira ogoni labome bi irane kira latagi ho nga.

Mbira

Isaraele wali agalirume Ngode Datagaliwabe erembira mialu pugu biyaru bilowa Ngode Datagaliwabehanda ti yu wa nahaga hene. Ani nabi howa ibugua Isaraele wali agali tinaga mamaliru baba bulebero lalu Ngode Datagaliwabeibunime bi lo winiru lola helonaga ti heba mandagi haga wini. Mini ogoni henene tigatiga mo walialu mbirale bayale damene mbuga ogoniha Kini Debedi ibugua binirubi Kini Solomonohanda binirubi Yahosabada ibugua bialu hene wiarubi Hesagaiahandabi Yosaihandabi tinaga gime mbirale bayale wigi biaru bialu heneru mbuga kira ogoni laboha howa waleore mo walialu gilibu nga.

Mende

Mbuga ogoni laboha howa tigua Ngode Datagaliwabenaga anda loma bia hene Yarusalemeni howa ibu mitangi buwa lotu bayaleore lalu henerunaga garealowi bida. Mbuga kira ogoni labome ledago damene irane ogodagua biyagome tagira ibiya lalu mo walialu ka. Ani lalu mendebi nde Libai hameigini loma biniru mo miaga hearu tinaga biabeore ogodagua bulene nga lalu mo walialu leda.

Mbuga mbiragoha howa Isaraele wali agalirunaga mamali ogodagua hama ibini lalu bambaore piganengi Adama henegoriaore howa goarialu lama ibaho wialu Kini Solo henegoria lairi ka. Ani bialu Kini Solo Debidila libugua ogodagua bialu hene lowa garealowi bida.

#### **Bulu бага бува кuni gilibu ngago (1.1-9.44)**

Malu tara tararu gilibu ngago 1.1-10.14

Kini Solo homenego 11.1-29.30

Debedi ibugua kini henego

11.1-22.1

Debedi ibu bialu henegonaga te gilibu ngago

22.2-29.30

Anduane Homogonaga anda bule manda manda binigo

<sup>1-4</sup> Adamani howa hama ibalu Abarahamani hairi henego uru. Adama igini Sede Sede igini Inoso Inoso igini Kenana Kenana igini Mahalalele Mahalalele igini Yarede Yarede igini Inogo Inogo igini Medusela Medusela igini Lamege Lamege igini Noa Noa igini tebira Seme Hama Yabede imaru hene.

<sup>5</sup> Yabede ibu igini ogodagua hene. Gome Magogo Madai imaru Yabana Tubala Mesege Tirasa imaru ti wali agali maha ha aribia hayarume tinaga mamali mini mo hameigini mini henego wiaabo ka. <sup>6</sup> Ani henego ai Gome ibunaga aguanene Asagenasali Libadali Togamali imaru ti dindi uruninaga wali agali hene. <sup>7</sup> Yabana ibunaga aguanene Elisali Sebenali Saibarasali Lodesealiru ti dindi uruni wali agali hene.

<sup>8</sup> Hama ibu igini henego uru. Kusuali Iyibiali Libiali Kenanali haga biniru ti wali agali maha ha aribia hayarume mini uruni tinaga mamali mo hameigini mini laga bima ibinigo nga. <sup>9</sup> Ai Kusu ibu aguanene Sebalu Habilali Sabadali Lamali Sabadegaliru hene. Lama ibu aguanene Seba hameiginibi Dedana hameiginibi howa tinaga dindi minibi ogoni labo dege wini. <sup>10</sup> Kusu igini mbira ha dege binigo ibu mini Nimirodo henego ibu dindi bibahendeha agali pari wayali haguane mbira nahe wiangi piganeore ibu hene.



<sup>11</sup> Iyibinaga aguanene Lidia hameiginirubi Anama hameiginirubi Lehaba hameiginirubi Nabadu hameiginirubi <sup>12</sup> Padarusu hameiginirubi Kasalu hameiginirubi Kiridi hameiginirubi hene. Pilidia wali agali ti Kiridi hameiginime hono winigo Kiridi aguanene hene. <sup>13</sup> Kenana igini wahene Saidono igini mende Hedebi libu wali agali maha ha aribia hayarume mini uruni tinaga mamali mo hameigini laga bima ibinigo nga. <sup>14</sup> Yabusu hameiginibi Amoro hameiginibi Giagisa hameiginibi <sup>15</sup> Hibi hameiginibi Aga hameiginibi Sini hameiginibi <sup>16</sup> Abada hameiginibi Semara hameiginibi Hamada hameiginibi ti bibahendenaga mamali Kenana ibu hene.

<sup>17</sup> Seme igini uru hene. Elama Asua Abagasada imaru Ludu Arama Usu imaru Hulu Gedere Mesege imaru ti nde wali agali maha ha aribia hayarume mini uruni tinaga mamali mo hameigini mini laga bima ibinigo nga. <sup>18</sup> Abagasada igini Sela Sela igini Ebe hene. <sup>19</sup> Ebe ibu igini kira henego mende mini Pelege hene. Pelege ibu heangi wali agali dindi bibahendehe hearu ti tini headagua hoba migimigi bialu haga haga bini. Ebe igini mendego mini Yogodana hene. <sup>20-23</sup> Yogodanahanda hono wini ibu aguanene urudagua hene. Alamodadalibi Selebealibi Hasamabedealibi Yaralibi Hadoramalibi Usalalibi Digilalibi Ebalalibi Abimaealibi Sebalibi Obialibi Habilalibi Yobabalibi uruni bibahendeore Yogodanahanda hono winiru howa ibu aguanene dege bu hene.

<sup>24-27</sup> Hameigini Semenaga aguanene hama ibinigo ti mini uru. Seme igini Abagasada Abagasada igini Sela Sela igini Ebere Ebere igini Pelege Pelege igini Leu Leu igini Serugu Serugu igini Naho Naho igini Tera Tera igini Abarama ibu mini mende Abarahama hene.

*Isimalenaga igini aguaneneru henego ogo*  
(Pigane Binigo 25.12-16)

<sup>28-31</sup> Abarahama ibu igini kira Aisaga Isimalela hene. Isimale igini mini uru. Nebaiodo Keda Adabele Mibisama Misima Duma Masa Hadada Tema Yadua Nabisi Kedema imaru hene. Agali homberia (12) uruni ti hameigini homberianaga haguane hene.

<sup>32</sup> Abarahama ibu wali tebone mani dabu binigo mini Kedura berenego ogoni ibu igini mini uru. Simirana Yogosana Medana Midiana Isibaga Sua imaru hene. Yogosana igini kira Seba Dedanala hene. <sup>33</sup> Midiana ibu igini duria Eba Ebe Hanogo Abida Eleda imaru hene.

*Isonaga igini aguaneneru henego ogo*  
(Pigane Binigo 36.1-19)

<sup>34-37</sup> Abarahama igini Aisaga henego ibu igini kira Iso Yagabala hene. Iso igini mini uru. Elibasa Leule Yausu Yalama Korabi imaru hene. Elibasa igini Temana Oma Sebi Gadama Kenasa Timina Amalege imaru hene. Leule igini Nahada Sera Sama Misa imaru haga bini.

*Sia igini aguaneneru henego ogo*  
(Pigane Binigo 36.20-30)

<sup>38</sup> Sia ibu igini ogodagua hene. Lodana Sobala Sibeono Ana Disono Ese Disana imaru hene. <sup>39</sup> Lodana ibu igini Hori Homamala hene. Lodana mbalini mbira mini Timina berene. <sup>40</sup> Sobala ibu igini ogodagua hene. Alabana Manahada Ebala Sebi Onama imaru hene. Sibeono ibu igini Aia Anala hene.

<sup>41</sup> Ana ibu igini Disono hene. Disono igini henedaruni Hamarana Esebana Idirana Kerana hene. <sup>42</sup> Ese ibu igini ogodagua. Bilihana Sabana Yagana hameigini tebira uruni hene. Disana ibu igini Usu Aranala hameigini kira hene.

*Idomo dindiha agali kini haga binigo ogo*  
(Pigane Binigo 36.31-43)

<sup>43</sup> Isaraele wali agalinaga kini mbira naheangi Idomo dindiha agali uru tigua kini ala hene. Bero igini Bela ibu kini howa Dinihaba tano wiagoria haru hene. <sup>44</sup> Ani howa Bero homayagola Bosara tanoali Sera igini Yobaba ibu kini ho aribia hene. <sup>45</sup> Ani howa Yobaba homayagola nde Temanali dindi wiagoha agali Husama henego ibu kini ha aribia hene. <sup>46</sup> Ani howa Husama homayagola nde Bedada igini Hadada henego ibu kini ha aribia hene. Hadada ibu Moaba dindiha puwa Midianali hearu baba wai bialu ti bo podahana hene. Hadada ibu kini howa Abidi tanoha hene. <sup>47</sup> Hadada halu homayagola Masarega tanoali Samala henego ibu kini ha aribia hene.

<sup>48</sup> Samala halu homayagola iba Yuberedisi pedago kawareha Lehobodo tanoali Saulu mbira henego ibugua kini ha aribia hene. <sup>49</sup> Saulu halu homayagola Agabo igini Balahanana mbira henego ibu kini ha aribia hene. <sup>50</sup> Ani halu Balahanana homayagola Hadada mbira henego ibu kini ha aribia howa Pau tano wiagoria hene. Hadada one mini Mehedebale ibu Maderede wane Mesehaba aguane berene.

<sup>51-54</sup> Hadada halu homayagola Idomo hameigini tale bialu haguane tara tara haru haga hene. Agali haguane haga biniru mini uru. Timina Alaba Yadede Oholibama Ela Pinono Kenasa Temana Mibisa Magadieles Irama imaru hene.

## 2

### *Isaraele igini henerunaga mini uru*

<sup>1-2</sup> Isaraele iginirunaga mini uru Lubene Simiono Libai Yuda Isaga Sebulunu Dana Yosebe Beniyamini Nabadali Gada Ase hene.

### *Yuda hameigini henerunaga mini uru*

<sup>3</sup> Yuda hameigini heneru ti mini Erebi Onanabi Selabi hene. Igiri tebirali uruni aija mini Badasua ibu Kenana wali berene. Yuda igini wahene mini Ere henego ibugua mana ko biyagola Anduane Homogohanda ibu homelo bo wahene. <sup>4</sup> Ani bialu Ere homayagola Yuda igini kirabi ha dege binigo mini Sera Peresela hene. Libu aija dalo berenego mini Tama ibu Yuda imane bereria mani Yuda ibugua dabu bia aribia hene. Ani buwa Yuda igini duria uruni hene.

<sup>5</sup> Agali Perese igini kira mini Heserono Hamulula hene. <sup>6</sup> Perese hamene Sera ibu igini duria henerunaga mini uru. Simiri Edana Hemana Kalagolo Dada imaru hene. <sup>7</sup> Agana ibu Kami igini henego ibu Sera aria dege. Ani howa ibugua mbirale Isaraele wali agalime Anduane Homogonaga lalu loma biaho wiaru mo page bini. Ibugua mana ogonidagua binigome Ngode Datagaliwabehanda Isaraele wali agali pani timbuniore nelu mialu mo ko hai hene.\*<sup>☆</sup>

<sup>8</sup> Edana igini mbiraore hangu henego mini Asaraia hene.

### *Kini Debidi mamali hama ibinirunaga te ogo*

<sup>9-12</sup> Heserono igini tebira hene. Ti mini Yaramele Lama Kalebe imaru hene. Lama igini Aminadaba Aminadaba igini Nasono henego ibu Yuda wali agalinaga agali haguane mbira hene. Ani bialu Nasono igini Salamono Salamono igini Boasa Boasa igini Obede Obede igini Yasi hene.

<sup>13</sup> Yasi ibu igini kariali hene. Ibu igini wahene Eliaba mende Abinadaba tebone Simea henego ibu mini mende Sama laga hene. <sup>14</sup> Yasi igini manego Nedanele dauni Ladai hene. <sup>15</sup> Waragane Oseme halu kanego Debidi hene. <sup>16</sup> Ani bialu Yasi ibu wanebi kira berenego mini Seruia Abigelela berene. Seruia ibu igini nde tebira henego mini Abisai Yoaba Asahele imaru haga bini.

\* **2:7:** Agali biago ibunaga mini tene Agana hene. Anigo agali mbuga ogoriani bi gili bialu ibugua mini Aga hangu gili biniyago irane Hiburu bi lalu mini Aga ogoni galone mo ko hagago manda bialu gili bini. <sup>☆</sup> **2:7:** Yos 7.1

<sup>17</sup> Agali mbira Isimaele aria mini Yade heagome Abigele dabu binigo ibu igini mbira hangu henego mini Amasa hene.

*Heserono igini aguanenerunaga mini uru*

<sup>18</sup> Heserono igini Kalebehanda wali Asuba bereago dabu bini. Ani biyagola Asubahanda wandari mbira mini Yariodo taba henene. Ani bialu Yariodo ibu igini tebira mini Yaserebi Sobababi Adonobi taba henene. <sup>19</sup> Asuba homayagola Kalebe ibu Eberada dabu bini. Mani biruwa Eberadahanda igini mbira mini Hua taba henene. <sup>20</sup> Ani biyagola mani Hua ibu igini Uri henego ibu Besalele aba hene.

<sup>21</sup> Heseronoibunaga mali pira waragaria (60) hayagola agali mbira Magiri henegonaga wane bereago dabu bini. Wali ogoni ibu agali mbira mini Gileada henego mbalini berene. Mani wali ogoni ibugua igiri mbira mini Segubu taba henene. <sup>22</sup> Segubu ibu Yairi aba hene. Mani Yairi ibugua Gileada dindiha tano pira kirani tebira (23) wiaru handaya ho haga hene. <sup>23</sup> Anigo Gesua hameigini hearubi Siriali bu hearubi tigua ibalu wai buwa Yairi ibugua tano handaya ho hearubi Kenada tanobi karulalu tano maru kawareni wiarubi karulalu tigua tano pira waragaria (60) uruni karulai haga bini. Tano uruni bibahende Gileada aba Magiri waneigini aguaneru tinaga winigo karulene. <sup>24</sup> Heserono ibu Kalebe Eberada tanoha homeagola ibu one Abiya ibu wali gali tombeha bere berene. Mani Abiyahanda gali taba hanalu igiri mini Asua wini. Mani Asuahanda Tegoa tano pigane mo wini.

*Yaramele igini henerunaga mini uru*

<sup>25</sup> Heserono igini wahene mini Yaramele henego ibu igini duria hene. Igin wahenego mini Lama maru mini Buna Orene Oseme Ahiya imaru hene. <sup>26-27</sup> Lama ibu igini tebira mini Masa Yamini Ege imaru hene. Agali Yaramele ibu one mende dabu binigo mini Adara berene. Adarahanda igiri mbira taba henenegro mini Onama hene. <sup>28</sup> Onama ibu iginigo labo mini Samai Yadala hene. Samai ibu igini kira dege henego mini Nada Abisuala hene.

<sup>29</sup> Abisua ibu wali mini Abihaili mbira berenego dabu bini. Ani biyagola Abihailihanda igiri kira Abana Molidila taba henene. <sup>30</sup> Abisua hamene Nadaba ibu igini kira henego mini Seledede Abaimila hene. Seledede ibu waneigini mbira nahe heaore homene. <sup>31</sup> Anigo ai Abaimi ibu igini mbira hangu mini Isi hene. Isi ibu igini mini Sesana hangu hene. Sesana ibu iginibi nde mbiraore dege mini Alai hene.

<sup>32</sup> Samai hamene Yada ibu igini kira henego mini Yadere Yonadanala hene. Ani henego ainde Yadere ibu waneigini mbira nahe heaore homene. <sup>33</sup> Anigo Yonadana ibu igini kira henego mini Peledede Sasala hene. Agali uruni ti Yaramele aguanene hene.

<sup>34</sup> Sesana ibu igini mbira nahe wandari dege aba hene. Ani bialu Iyibiali mbiraibunaga biabe biahaga henego ibu mini Yara hene. <sup>35</sup> Ani buwa Sesana wane mbira bereago Yarahanda dabu bini. Ani biyagola libu igini mbira mini Adai hene. <sup>36-41</sup> Adai ibu igini Nadana hene. Ani bialu Nadana igini Sabada Sabada igini Ebelala Ebelala igini Obede hene. Obede igini Yahu Yahu igini Asiraia Asiraia igini Helese Helese igini Eleasa hene. Ani buwa Eleasa igini Sisimai Sisimai igini Salumu Salumu igini Yagamaia Yagamaia igini Elisama hene.

*Kalebe igini aguane maru henego uru*

<sup>42</sup> Kalebe ibu Yaramele hamene howa ibu igini wahenego mini Mesa hene. Mesa igini Sibi Sibi igini Maresa Maresa igini Heberono hene. <sup>43</sup> Ainde Heberono ibu igini maria henego mini Kora Tabua Legeme Sema laga biyaru hene. <sup>44-45</sup> Sema igini Lahama Lahama igini Yogeama hene. Sema hamene Legeme ibu igini Samai Samai igini Maono Maono igini Bedesu hene.

<sup>46</sup> Kalebe ibu one halu mende bereneru aria mbirago mini Eba berene. Eba ibu igini tebira hene uru. Mbira Harana mende Mosa tebone Gasese hene. Ani bialu Harana ibu igini mbira mini Gasese dege hene.†

<sup>47</sup> Agali mbira mini Yadaï ibu igini waragara heneru ti mini Legeme Yodama Gesana Pelede Eba Saba imaru haga bini.

<sup>48</sup> Kalebe ibu one halu mende berenedaru aria mende mini Maga berene. Ai wali Maga ogoni ibu igini kira taba henene mini Sebe Tihanala hene. <sup>49</sup> Mani ibugua igiri kira taba henene mini Saba Sebala hene. Ani howa Sabahanda Madamana tano pigane mo wialu Seba ibugua nde Magabena tanobi Gibea tanobi pigane mo wini. Mani Kalebe wane mbira mini Agasa berene.

<sup>50-51</sup> Ani bialu Kalebe ibu waneigini marubi ha dege bini. Kalebe ibu one Eberadala libu igini mbira mini Hua hene. Hua ibu igini ogodagua hene. Mbira mini Sobala ibugua Kiriada Yarimi tano pigane mo wini. Mendego mini Salama ibugua Bedeleheme tano pigane mo wini. Tebone mini Harebe ibuguabi nde Bedegade tano mo wini.

<sup>52</sup> Sobala ibu Kiriada Yarimi tano mo wini biago ibu hameigini Haroebi Menuhodo hameigini marubi tinaga mamali hene. <sup>53</sup> Sobala aguanene maru Kiriada Yarimi tanoha heneru ti mini Idirabi Pudubi Sumadabi Misirabi uruni ti hene. Ani bialu wali agali Sora tanoha bu hearubi Esedaolo tanoha hearubi ti hameigini uruni aria dege hene.

<sup>54</sup> Ainde wali agali Bedeleheme tanoni hearubi Nedoba tanoha hearubi Adarodo Bedeyoaba dindiha hearubi Manahada hameigini hearu aria maru Soro hameigini laga hearubi ti bibahende Salama aguanene dege hene.

<sup>55</sup> Hameigini tara nde Yabese tanoha henene uruni ti beba gili biaga manda timbunibi hene. Ogoniha hameigini tebira mini Tira Simea Sugada imaru hene. Hameigini uruni ti Keneali howa tinaga mamali Hamada hene. Legaba hameigini tibi nde Hamada aguanene dege hene.

### 3

#### *Kini Debidi igini mini uru*

<sup>1</sup> Debidi ibu Heberono tanoha heangi ibu igini marubi henene tinaga mini uru. Igiri mbira Amanono hene. Amanono aïya Yaserili tano wali mini Ahinoama berene. Ibu igini mende Kamelo tano wali mini Abigele berene igini mini Daniele hene. <sup>2</sup> Ibu igini tebone mini Abasalomo hene. Abasalomo aïya ibu Gesu dindiha kini mini Talamai henene wane mini Maga berene. Debidi igini mane mini Adoniya hene. Adoniya aïya Hagida berene. <sup>3</sup> Debidi igini dauni Sebadaia hene. Ibu aïya Abidala berene. Debidi igini waragane mini Idireama hene. Ibu aïya Egela berene igini hene. <sup>4</sup> Debidi ibu Heberono tano mali kariani ege waragara haru heangi igiri waragara uruni taba henene.✧

Ani bialu Yarusalemeni mali pira tebirani tebira (33) haru howa <sup>5</sup> igiri dewa hono wigi bini.✧

Amiele wane Badaseba ibu Debidi one biruwa igiri maria taba henene tinaga mini Simea Sobaba Nadana Solomonu imaru hene.

<sup>6-8</sup> Ani heagola Debidi igini dira maha heneru tinaga mini Ibara Elisua Elebeledede Noga Nebege Yabia Elisama Eliada Elibeledede imaru haga bini. <sup>9</sup> Debidihanda igiri uruni hono wini. Ani bialu Debidi ibu one halu mende bereneru ariame igiri maru taba hana dege bini. Debidi ibu wane mbira mini Tama berene.

#### *Kini Solomonu igini aguane henerunaga mini uru*

† **2:46:** One halu mende bereneru aria lalu gilibu ngago irane ogo. Bamba agali henerume wali maru dabu nabi berene ti ibu one biragadagua biruwa agalinaga waneigini taba hanaga berene. ✧ **3:4:** 2 Sml 5.4-5, 1 Kin 2.11, 1 Bit 29.27 ✧ **3:5:** 2 Sml 11.3

10-14 Kini Solomonu igini aguane henerunaga mini uru. Solomonu igini Lehoboama Lehoboama igini Abiya Abiya igini Asa Asa igini Yahosabada Yahosabada igini Yahoma Yahoma igini Ahasaia Ahasaia igini Yoasa Yoasa igini Amasaia Amasaia igini Usia mini mende Asaria laga hene. Usia igini Yodama Yodama igini Ahasa Ahasa igini Hesegaia Hesegaia igini Manase Manase igini Amono Amono igini Yosaia hene. 15-16 Yosaia ibu igini maria henego tinaga mini uru. Yohanana Yahoiaigimi Sedegaia Salumu imaru hene. Salumu ibu mini mende Yoahasa laga hene. Yahoiaigimi ibu igini kira Yahoiaigini Sedegaiala hene. Yahoiaigini ibu mini mende Yagonia laga hene.

#### *Yahoiaigini igini aguaneru henego ogo*

17-18 Yahoiaigini ogoni ibu kini hearia waitigime dindi taraha garabaya bu yalu penego ogoni ibu igini karia uru hene. Seadeli Malagirama Pedaia Senasa Yagamaia Hosama Nedabaia imaru hene. 19 Pedaia ibu igini kira Serubabele Simaila hene. Ai Serubabele igini kira dege Mesulama Hananaiala ibu wane mbiraore mini Selomidi berene. 20 Maha Pedaia igini duria henego uru Hasuba Ohele Beregaia Hasadaia Yusabahesede imaru hene.

21 Hananaia ibu igini kira Peladaia Yasaiala hene. Yasaia ibu igini Lebaia Lebaia igini Anana Anana igini Obadaia Obadaia igini Seganaia. 22 Seganaia igini mbira Semaia hangu hene. Ai Semaia ibu igini duria ti mini Hadusu Igala Baraia Nearaia Sabada imaru hene. 23 Nearaia igini tebira Elioenai Hisigaia Asarigama imaru hene. 24 Ani howa Elioenai ibu igini karia hene mini Hodabaia Eliasibi Pelaia Agubu Yohanana Delaia Anani layaru hene.

## 4

#### *Yuda hameigini maru henerunaga mini uru*

1 Yuda aguanene maru henego uru. Perese Hesperono Kami Hua Sobala imaru hene. 2 Sobala igini Leaia Leaia igini Yahada Yahada igini kira Ahumai Lahadala hene. Agali uruni ti wali agali Sora tanoha bu henerunaga mamali hene.

3-4 Kalebe one Ebaradahanda ibu igini wahene mini Hua taba henene. Huahanda Bedeleheme tano pigane mo wini. Hua ibu igini tebira henego uru. Edama Penuele Esere imaru hene. Edama igini tebira Yaserili Isima Idibasa imaru hene. Igiri uruni ti mbalini mini Haseleboni berene. Ai Penuele ibugua Gedo tano pigane mo wini. Ani bialu Esere ibugua nde Husa tano pigane mo wini.

5 Agali Asu ibugua Tegoa tano pigane mo wiaga biago ibu one kira Hela Narala berene. 6 Narahanda igiri maria taba henene uru. Ahusama Hebe Temeni Hahadari layaru hene. 7 Ai Asu one mende Hela ibugua igiri tebira taba henene Serede Isiha Edenana layaru hene.

8 Koso igini kira Anubu Sobebala hene. Koso ibu Harumu igini Ahahele hameigini-naga mamali hene.

9 Agali mini Yabese henego ibugua mana bayaleore biyagome ibu hamenerume bay-ale biyaru bolangua haihe hene. Anidagua bialu heagola wali agali maru bu hearume ibunaga mini yaraga halu hene. Ibu aiyahanda taba hanayangi aiyu ibu tandaga timbuniore nalu taba henene lowa ibu mini Yabese wini.\* 10 Horo mbirungi Yabesehanda Israele wali agalinaga Ngode Datagaliwabhondo bi lalu, Ngode Datagaliwabe-o ina i biamogo bialu dindi dewaore ngibe. Ani bialu mbirale ko tara tara ngarume i mo tandaga nahelo ini i heba mandagi haabo halu handayaho habelo hameledo, lene. Ani layagola Ngode Datagaliwabhanda Yabese ibunaga bi layago hale halu ibunime bia layago ale biai hene.

#### *Hameigini maru uru hene*

\* 4:9: Hiburu bi lalu mini Yabese ogoni galone tandaga lalu laga.



<sup>11-12</sup> Suha hamene Kalebe ibu igini mbira Mehi hene. Mehi igini Esedono Esedono igini tebira henego mini Bederaba Pasea Tehina layaru hene. Tehina ibugua Nahasa tano pigane mo wini. Agali hameigini uruni ti dindi Lega winigonaga abene mbirahayagi hene.

<sup>13</sup> Kenasa ibu igini kira Odoniele Seraiala hene. Odoniele ibu nde igini kira Hadada Meonodaila hene. <sup>14</sup> Meonodai igini Obora hene. Seraia igini Yoaba henego ibu wali agali dindi ulini mbira mini Agali Biabe Biahaga Dindi Ulini laga wiagoha hearunaga mamali hene. Dindi ogoni mini winidago irane agali dindi ogoniha heago tigua mbirale tara tara wabiai haga mini lene gibiore henegonaga mini ogoni wini.

<sup>15</sup> Yabune igini Kalebe ibu igini tebira henego mini Iru Ela Nama layaru hene. Ani howa Ela igini Kenasa hene.

<sup>16</sup> Agali mini Yahalele ibu igini maria heneru ti mini Sibi Siba Tiria Asarele laga biyaru hene.

<sup>17-18</sup> Ai Esera igini maria henego uru. Yade Merede Ebe Yalono imaru hene. Merede ibu Iyibi kini heago wane mini Bidaia bereago dabu bini. Libu wane mini Miriama berene. Libu igini kira Samai Isibala hene. Isibahanda tano mini Esedemoa pigane mo wini. Ani bialu Merede ibu Yuda wali mbira dabu buwa libu igini tebira mini Yarede Hebe Yagudiele imaru hene. Yaredehanda Gedo tano mo wialu Hebehanda Sogo tano mo wialu Yagudielehanda Sanoa tano mo wialu tigua tano uruni pigane mo wigi bini.

<sup>19</sup> Hodaiahanda Nahama mbalini dabu bini. Libu aguaneneme Garama hameigini Keila tanoni tagira ibu hene. Mende Magada hameigini Esedemoa tanoni tagira ibu halu bini.

<sup>20</sup> Simono ibu igini maria henego mini Amanono Lina Benehanana Tilonu imaru hene. Agali mini Isi ibu igini kira Sohede Benesohedela hene.

### *Sela aguanene henego uru*

<sup>21-23</sup> Yuda igini heneru mbira mini Sela hene. Sela ibu igini uru hene. Mbira Ere henego ibugua Lega tano pigane mo wialu mende Lada ibugua Maresa tano pigane mo wini. Bedeasabea tanoha hameigini hearu ti labolabo bayaleore wabiaga henego ti Lada aguanene hene. Ani bialu igini tebone mini Yogimi mane Yoasa dauni Saraba layaru hene. Yoasa Sarabala libugua Moaba wali dabu buwa Bedeleheme dindini hene. Ani howa libugua Moaba dindibi Yasubilaheme dindibi handayaho hene. Wali agali Nedaimi tanoha hearubi Gedera tanoha hearubi tigua todobene be dindime wabiaga howa kininaga biabe bialu hene. Bi ogoni agalime bambaore gilibu winiya.

### *Simeono hameigini henego ogo*

<sup>24-27</sup> Simeono ibu igini duria henego mini uru. Nemuele Yamini Yaribi Sera Saulubi laga biyaru hene. Saulu igini Salumu Salumu igini Mibisama Mibisama igini Misima Misima igini Hamuele Hamuele igini Sagu Sagu igini Simai Simai ibu igini nguirani mbira (16) halu ibu wane waragara berene. Anigo ibu hameneru ti waneigini dewa nahonowi hene. Anidagua biyagome Simeono aria Yuda waneigini dewa headagua ndo hene.

<sup>28-31</sup> Simeono hameigini ti Beaseba tanohabi Molada tanohabi Hasasuala tanohabi Biliha tanohabi Esemé tanohabi Tolada tanohabi Beduele tanohabi Homa tanohabi Sigilaga tanohabi Bede Magabodo tanohabi Hasasusimi tanohabi Bedebiri tanohabi Saraimi tanohabi ti bibahende uruniha hai hene. Simeono hameigini uruni ti tano uruniha heane dege Debidi ibu kini hene. <sup>32</sup> Ani bialu ti tano duria uruhabi ha dege bini. Edama Aini Limono Togene Asana tano uruniha hene. <sup>33</sup> Ani bialu dindi emene tano uruniha wiapara para biaruhabi hama pialu Balada tano hama tagira pene. Tano uruniha Simeono ibu waneigini aguaneru dege hene. Ani bialu Simeono hameigini ti mamali hama ibinidagua malu gilibu wigi bini.

☆ 4:28-31: Yos 19.2-8

<sup>34-39</sup> Simeono hameiginiru aria agali haguane henerunaga mini uru. Mesobaba Yamalege Amasaia igini Yosa Yoele Yosibia igini Yahu uruni hene. Yosibia ibu Seraia igini halu Seraia ibu Asiele igini hene. Elioenai Yagoba Yasohaia Asaia Adiele Yasimiele Benaia Sibi igini Sisa imaru hene. Sibi ibu Alono igini halu Alono ibu mamali Yadaiaibi Simiribi Semaiaibi hene. Agali haguane uruni ti ho dame bialu dewaore hayagola ainde tinaga nogo bulumaga sibiru tani nelo bayale agoria kabe hondole taya bialu hene. Ani taya bialu tigua dindi ulini biagonaga abene ni tagira ibiragohayagi dindi mbira mini Gedo wiago kawareha taya bima pene. <sup>40</sup> Ani puwa handalu hearia tani bayale dindi ulini ogoniha andaho hearia hendene. Ani bialu dindi ulini bayale timbuni wuyu peago hendene. Ai ti dindi ogoniha pu heagola ti mo genda holene mbira nawi bayaleore mbira hene. Bamba Hama hameigini dindi ogoniha haga wini.

<sup>41</sup> Hesegaia ibu Yuda dindiha kini heangi Simeono hameigini agali haguane uruni tigua dindi bayale tani anda haga biaga wiaria handa walia hene. Ani hondowa tigua Hama hameigini bababi Meuni hameigini hearu bababi wai bule pene. Ani puwa tigua wali agali bo wahai halu tinaga balai anda bu hearu bo giallo wahai halu mbirale mbira yu wanahe Simeono hameigini tigua dindi ogoni karulo hene. <sup>42</sup> Ani anda pu howa Simeono hameigini agali handari duria (500) bibahende Idomo dindini Hari Sia hearuha pene. Agali haguane uruni Isi iginiru tigua haru bamba hene. Isi iginidaru ti mini Peladaia Nearaia Lebaia Usiele imaru hene. <sup>43</sup> Bamba wali agali Amalege hameigini emene maru hangu dindi ogoniha heneyaru ai Isaraele wali agali handalu Idomo dindi Hari Sia hearuha ibida piai hene. Ani pu hearia Isaraele tigua bo wahai halu dindi ti karulo hene.✧

## 5

### *Lubene aguaneneru henego ogo*

<sup>1</sup> Yagaba ibu mini mende Isaraele ibu igini wahene Lubene hene. Lubene ibu aba one halu mende berenego aria mbira page biyagome igiri wahreneme paluni holene winigo wahalu Yosebe ibu ha aribia hene.✧ <sup>2</sup> Ani binigoyu Yuda hameigini tigua hameigini maru bolanguahe halu ti bibahendenaga kini mbira tiha howa tagira ibini.✧ <sup>3</sup> Lubene ibu Yagaba igini wahene howa ibu igini maria henego mini Hanogo Palu Hesperono Kami imaru hene.

<sup>4-6</sup> Yoele ibu damenego ogodagua hama ibini. Yoele igini Semaia Semaia igini Gogo Gogo igini Simai Simai igini Maiga Maiga igini Leaia Leaia igini Bala Bala igini Bera hene. Bera ibu Lubene hameigininaga agali haguane mbira hearia Asirianaga Kini Tigilada Pilese ibugua ibalu Bera minu garabaya bu yalu Asiria dindi pene.✧

<sup>7-8</sup> Lubene ibu hameigininaga agali haguane henegonaga mini uru. Mbira Yaiele mende Segaraia tebone Bela hene. Bela ibu Asasa igini Asasa ibu Sema igini Sema ibu Yoele igini hene. Bela hameigini uruni ti Aroe tanoha palima pialu Aroe tano abene uyurahayagi Nebo tanobi Balameono tanohabi palima puabo hene. <sup>9</sup> Ti Gileada dindihayagi howa nogo bulumaga sibiru bayale dewa hinalu hene. Ani biyagola ti maru nde dindi abene ni tagira ibiragohayagi dindi ko iba dalu naibaga Iba Yuberedisi poragoha hapara howa hene.

<sup>10</sup> Solo ibu kini heangi Lubene hameigini uruni tigua Haga hameigini hearu baba wai bialu bo wahai halu dindi ti karulai hene. Dindi ogoni Lubene hameigini dindi wiagonaga abene ni tagira ibiragohayagi Gileada dindiha wini.

### *Gada aguaneneru henego ogo*

<sup>11</sup> Gada hameigini ti Lubene hameigininaga dindi abene uyurahayagi Basana dindi wiagoha hene. Tinaga dindi tubari ni tagira ibiragohayagi Salega tano wiagoria wiatagi

hene. <sup>12</sup> Gada hameigini maru ti nde Basana dindiha hene. Hameigini duninigonaga haguane Yoele ibu howa haguane mende Sabama hene. Yanai Sabadala libugua hameigini maru haru haga howa Basana dindiha dege hene.

<sup>13</sup> Ani heagola Gada hameigini maru ha dege binigo tinaga mini uru hene. Maigele Mesulama Seba Yorai Yagana Sia Ebere imaru hene. <sup>14</sup> Agali uruni ti Huri igini Abihaili henegonaga aguanene hene. Abihaili ibu Huri igini Huri ibu Yaroa igini Yaroa ibu Gileada igini Gileada ibu Maigele igini Maigele ibu Yasisai igini Yasisai ibu Yado igini Yado ibu Busu igini hene. <sup>15</sup> Ani heagola hameigini uruninaga agali haguane mini Ahi ibu Abadie igini howa Guni aguane hene. <sup>16</sup> Hameigini karia uruni ti Gileada dindini tano wiaruhabi Basana dindini tano wiaruhabi howa tinaga nogo bulumaga sibiru tani bayale Saron dindini heago nalu helene. <sup>17</sup> Gada hameigini ogodagua hene lalu malu gili binidagoni Yudanaga Kini Yodama ibu heangi Isaraelenaga Kini Yaroboama ibu heangibi gili bu wini.

*Hameigini tebira Lubene Gada Manase imarume wai bialu wayali henego ogo*

<sup>18</sup> Isaraele hameigini tebira Lubene Gada Manase imaru ti Iba Yodana abene ni tagira ibiragohayagi henego uruni tinaga wai biaga ami agali bayaleru daosini pira mariani maria handari kariani pira waragara (44,760) hene. Tigua wai pialu humbi yuwa ayu tibume agali dibalu danda timumebi agali бага wayali dege dege hene. <sup>19</sup> Ani howa tigua hameigini maria tara tara Haga hameiginibi Yadu hameiginibi Nabisi hameiginibi Nodaba hameiginirubi baba wai bule pene. <sup>20</sup> Wai bu pole howa Isaraele hameigini uruni tigua Ngode Datagaliwabe hana howa ibuhondo biamogo bibe lalu hene. Ani layagola nde Ngode Datagaliwabe hana ti biamogo biaore biyagola tigua waitigi uruni bope hai hene. <sup>21</sup> Ani bialu Isaraele tigua wayali howa waitiginaga nogo tara tara bu hearu bibahende haru hai hene. Nogo kamele daosini dege pira duria (50,000) haru halu sibi daosini dege handari kirani pira duria (250,000) haru halu nogo dongi daosini kira (2,000) haru hene. Ani bialu waitigi agali daosini dege handari mbira (100,000) minai hene. <sup>22</sup> Anigo Ngode Datagaliwabe ibunime wai ogoni bilo handaya ho heagome tinaga waitigi dewaore waiha homai hene. Ani bialu Isaraele tigua dindi ogoni ti karulo heane dege waitigi tara mende heago ibalu Isaraele wali agali dindi taraha garabaya bu yu piai hene.

*Manase hameigini halu mende henego ogo*

<sup>23</sup> Manase hameigini halu mende hayadago ti timbuniore hene. Tinaga dindi Basana wiagoria howa wima pialu dindi abene uyurahayagi pialu Balahemona wiagoria puabo halu Hari Seniri mini mende Hari Hemono heagoria tagira pene. <sup>24</sup> Ti hameigininaga agali haguane uru hene. Ebe Isi Eliele Asariele Yaremaia Hodabaia Yadie imaru hene. Agali haguane uruni agali bayale mini leneore howa wai biaga ami agali hongohe gibioreru hene.

*Hameigini Lubene Gada Manase imaru Asiria dindiha garabaya minu yu penego ogo*

<sup>25</sup> Hameigini Lubene Gada Manase hameigini halu mende hayadaru tigua mana koore bialu walime ti agalini helalu agali maru bu karu baba kayu bima ibaga bi-agadagua bialu tinaga mamalirunaga Ngode Datagaliwabe kagonaga bi mo wahalu mana ko bialu hene. Pigane Isaraele hameigini ti dindi ogoriani anda ibiyagola nde Ngode Datagaliwabe hana wali agali dindi ogoni anduane hearu bo taliatagi hai hene. Ani binigo ai Isaraele hameigini uruni tigua wali agali ala henegome mbirale dama mitangi bialu gime wabini wiaruhondo bi pupu wiagadagua wialu hene. <sup>26</sup> Anidagua bialu heagola Ngode Datagaliwabe hana Asirianaga Kini Pulu mini mende Tigilada Pilese heagonaga miniha mo heya hayagola Asiriali tigua Isaraele baba wai bule ibalu Isaraele bope halu ti wayali hene. Ani bialu Asiriali tigua Isaraele wali agali bibahende garabaya bu yalu puwa dindi maru mini Hala wiagohabi Habo wiagohabi Iba Gosana

peago kawarenibi hari mini Hara heago barebare dindi wuyu peagohabi helaga bini. Anidagua bigi binigo áyu haabo ka.\*✧

## 6

### *Libai hameigini maru loma binigo mo miaga henerunaga mini uru*

<sup>1</sup> Libai igini tebira henego mini uru. Gesono Kohada Merari laga biyaru hene.

<sup>2</sup> Kohada igini maria henego Amarama Isiha Heberono Usiele imaru hene.

<sup>3</sup> Amarama igini Arono Mosesela halu wane mbiraore Miriama berene.

Arono igini Nadaba Abihu Eleasa Idama laga biyaru hene.

<sup>4-10</sup> Eleasa igini Piniasa Piniasa igini Abisua Abisua igini Bugi Bugi igini Usi Usi igini Serahaia Serahaia igini Meraiodo Meraiodo igini Amaraia Amaraia igini Ahidubu Ahidubu igini Sadogo Sadogo igini Ahimasa Ahimasa igini Asaraia Asaraia igini Yohanana Yohanana igini Asaraia mende hene. Kini Solomonohanda Ngode Data-galiwabenaga anda Yarusalemeni bialu heangi Asaraia ogoni ibu loma binigo mo miaga haguane hene. <sup>11-14</sup> Asaraia ogoni ibu igini Amaraia Amaraia igini Ahidubu Ahidubu igini Sadogo Sadogo igini Salumu Salumu igini Hiligaia Hiligaia igini Asaraia Asaraia igini Seraia Seraia igini Yahosadaga hene. <sup>15</sup> Ani henego ainde horo mbirungi Anduane Homogohanda Kini Nebugadanesanaga mini mo heya hayagola Babilono agali hearume ibalu Yudalirubi Yarusalemealirubi garabaya bu yalu Babilono penego ogongi Yahosadagabi ti heba garabaya bu minu yalu pene.

### *Libai aguanene maru henego mini uru*

<sup>16-17</sup> Libai igini tebira Gesono Kohada Merari imaru hene. Uruni ti iginibi nde henego mini uru. Mbira Gesono ibu igini Libini Simeila hene.\* <sup>18</sup> Kohada ibu igini maria Amarama Isiha Heberono Usiele layaru hene. <sup>19</sup> Merari ibu igini Mali Musila hene. Agali uruni ti Libai igini aguaneru hene.

<sup>20-21</sup> Gesono igini aguaneru henego urudagua hama ibini. Gesono igini Libini Libini igini Yahada Yahada igini Sima Sima igini Yoa Yoa igini Ido Ido igini Sera Sera igini Yaderai laga biyaru hene.

<sup>22-24</sup> Kohada ibu damene hama ibinigo uru. Kohada igini Aminadaba Aminadaba igini Kora Kora igini Asiri Asiri igini Elegana Elegana igini Ebiasaba Ebiasaba igini Asiri mendego Asiri ogoni igini Tahada Tahada igini Uriele Uriele igini Usia Usia igini Saulu layaru hene.

<sup>25-27</sup> Elegana ibu igini kira Amasai Ahimodola hene. Ahimodo igini Elegana mendego Elegana ogoni igini Sobai Sobai igini Nahada Nahada igini Eliaba Eliaba igini Yarohama Yarohama igini Elegana tebonego Elegana ogoni igini Samuele hene.

<sup>28</sup> Samuele igini kira henego wahene Yoele heyogone Abiyala hene.

<sup>29-30</sup> Libai igini Merariibunaga igini aguaneru ogodagua hama ibini. Merari igini Mali Mali igini Libini Libini igini Simei Simei igini Usa Usa igini Simea Simea igini Hagia Hagia igini Asaia hene.

### *Anduane Homogonaga andaha iba gana lalu ngida aleru balu henerunaga mini uru*

<sup>31</sup> Agali maru Anduane Homogonaga andaha iba gana lalu ngida ale tara tararu balu helonaga Kini Debidi ibugua ti dabo helene. Kini Debidi ibugua Anduane Homogonaga Habo Nalolene Bi lo winigonaga Mbogoyi biago mo yalu Anduane Homogonaga Balai Anda Yarusalemeni bu helayagoha ngelole ibiyangi Debidi ibugua agali uruni dabo helene. <sup>32</sup> Kini Solomonu ibugua Yarusalemeni Anduane Homogonaga anda nabi howa Balai Anda hangu bu heangi agali uruni tigua tinaga biabe ogoni biaga hene. Wali agalirume Anduane Homogonaga Balai Anda bu heagoha ngoai hayangi agali uruni

\* **5:26:** Haabo ka ledago áyu ina kamangi lalu ndo ala agali bi ogo gili binidangi manda bialu lenegonaga leda.

✧ **5:26:** 2 Kin 15.19, 15.29, 17.6 ✧ **6:16-17:** Har 6.15-19

tigua ngidaru balu iba ganabi lalu haga hene. <sup>33-38</sup> Agali tebiralime ngida aleru balu iba gana lelonaga biabe ogoni haru haga helo ti dabo helene. Ani biyagola mani agali uruni ti igini aguanerumebi biabe ogoni dege bialu hene. Kohada hameigini agali haguane hayadago mini Hemana hene. Ibugua iba gana lolene mugube howa iba gana laga agali wabuni mbira heneru haru haga hene. Hemana ibu Yoele igini Yoele ibu Samuele igini Samuele ibu Elegana igini Elegana ibu Yarohama igini Yarohama ibu Eliele igini Eliele ibu Toa igini Toa ibu Subu igini Subu ibu Elegana igini Elegana ibu Mahada igini Mahada ibu Amasai igini Amasai ibu Elegana igini Elegana ibu Yoele igini Yoele ibu Asaraia igini Asaraia ibu Sebanaiia igini Sebanaiia ibu Tahada igini Tahada ibu Asiri igini Asiri ibu Ebiasaba igini Ebiasaba ibu Kora igini Kora ibu Isiha igini Isiha ibu Kohada igini Kohada ibu Libai igini Libai ibu nde Yagaba igini hene.

<sup>39-43</sup> Debidi ibugua Asaba ibu iba gana lagaru wabuni halu mende haru helo dabo helene. Ibu Hemanala libu biabe mandagi biaga hene. Iba gana lole ngida bolene harangi Asaba ibunaga agali urunime Hemana ibunaga agali biarume gi tighayagi heyu haga hene. Asaba ibu Beregaia igini Beregaia ibu Simea igini Simea ibu Maigele igini Maigele ibu Basea igini Basea ibu Malagiya igini Malagiya ibu Edeni igini Edeni ibu Sera igini Sera ibu Adaia igini Adaia ibu Edana igini Edana ibu Sima igini Sima ibu Simei igini Simei ibu Yahada igini Yahada ibu Gesono igini Gesono ibu Libai igini hene.

<sup>44-47</sup> Merari hameigini agali haguane mini Edana ibugua iba gana lagaru wabuni halu tebone heneru haru helo Debidihanda dabo helene. Agali uru tigua iba gana lalu ngidaru bole howa Hemana hameiginirunaga gi lehayagi heyu haga hene. Edana ibu Kisi igini Kisi ibu Abadi igini Abadi ibu Malugu igini Malugu ibu Hasabaia igini Hasabaia ibu Amasaia igini Amasaia ibu Hiligaia igini Hiligaia ibu Amasi igini Amasi ibu Bani igini Bani ibu Seme igini Seme ibu Mali igini Mali ibu Musi igini Musi ibu Merari igini Merari ibu Libai igini hene.

<sup>48</sup> Anduane Homogonaga andaha biabe maru bulene wiaru damene bialu helonaga Libai agali maru tigua dabo helaga bini.

#### *Arono aguanene henego mini uru*

<sup>49</sup> Arono halu ibu igini aguaneru tigua Anduane Homogonaga lomabu delaga dabu wiagoria ira hagua ngabilo inisenesibi nogo tara tara loma biniru dai helonagabi biabe bialu haga hene. Ani bialu anda tamu Hobane Loma Bia Heneore biagohabi Anduane Homogo mitangi bialu biabe bialu haga hene. Ani bialu tigua Isaraele wali agalime ko biyaru domo wahelonaga lomabu delaga hene. Tigua biabe uruni bialu howa Anduane Homogonaga biabe biaga Mosesehanda ogodagua bilimu lalu Aronohondo lamiyadagua bialu hene.

<sup>50-53</sup> Arono igini aguaneru uru hene. Arono igini Eleasa Eleasa igini Piniasa Piniasa igini Abisua Abisua igini Bugi Bugi igini Usi Usi igini Serahaia Serahaia igini Meraiodo Meraiodo igini Amaraia Amaraia igini Ahidubu Ahidubu igini Sadogo Sadogo igini Ahimasa hene.

#### *Libai hameiginiru tihondo tano tu wu migi binigo ogo*

<sup>54</sup> Isaraeleali tigua Arono aguanene Kohada hameiginihondo dindi tanobi tu wu minidaru mini uru gilibu nga. Isaraele tigua Libai hameigini dindi tu wu mulenaga hameigini emene haga biadagua ago ibu dindi ala mulubadabe hondolenaga ege tole emeneni mini gili buwa baraga halu hene. Anidagua biyagola Arono aria hearu ti dindi ala mulene wiarua hendene. <sup>55</sup> Ani hondowa tigua Heberono tano Yuda dindihayagi wiago ti helo mini. Ani bialu dindi emene Heberono tanobi dindi emene ogonihayagi wiapara hearubi heba Arono aria ti helo mia dege bini. Dindi uruniha tinaga nogo sibi bulumagaru tani nolene bayale andahohe wiaru mini. <sup>56</sup> Anigo Isaraele tigua Heberono tanoha mabu bayale wiapara hearuni Arono aria hearu nami Yabune igini Kalebe heagohondo mini. <sup>57-59</sup> Isaraeleali tigua Heberono tano Arono aria hearu mini.



Heberono tano ogoni Isaraele tigua agali bo waholilono ibu ibida pialu ha do helonaga tano dabo wini mbirago ogoni wini.\* Ani bialu tigua Arono aguane heneruhondo tano uru mia dege bini. Yadiribi Libinabi Esedemoabi Hilenebi Debiribi Asanabi Bedeseme-sebi tano uruni migi bini. Dindi emene maru tano uruniha wiapara hene wiaru tinaga nogo bulumaga sibiru tani nalu helo tani bayale anda haga wiaru heba migi bini. <sup>60</sup> Ani bialu Isaraeleali tigua tano maru Beniyamini hameigini dindi wiagohayagi wiarubi Libai hameiginiru mia dege bini. Tano uruni mini Gebabi Alemedebi Anadodobi wini. Ani bialu tano uruninaga dindi taniru bayale anda haga wiaru heba mia dege bini. Tigua tano haleria (13) bibahende Arono aria tu wu mini. <sup>61</sup> Ani bialu Isaraeleali tigua ege tole dindi walia helonaga lone baraga halu tano pira Kohada hameigini hearunaga tu wiabagi hene. Tano uruni Manase dindiha dindi abene ni paliragohayagi wiaru tu wu migi bini.

<sup>62</sup> Ani bialu tigua tano haleria (13) bibahende Gesono hameigini hearunaga tu wiabagi ho wini. Tano uruni hameigini Isaga dindihabi Ase dindihabi Nabadali dindihabi Manase hameigini halu mende Basana dindiha hearunaga dindihabi tu wu mini. <sup>63</sup> Ogonidagua tigua Merari hameigini hearuhondo tano hombearia (12) tu wu mini. Tano uruni Lubene dindiha howabi Gada dindiha howabi Sebulunu dindiha howabi tu wu migi bini. <sup>64</sup> Isaraele agali tigua anidagua bigi bialu Libai hameigini hearuhondo tanobi dindi maru tani bayaleru anda haga wiaru tinaga nogo bulumaga sibiru nelobi tu wu migi bini. <sup>65</sup> Tano uruni Yuda dindihabi Simeono dindihabi Beniyamini dindihabi howa tu wu migi binigonaga mini gilibu ngaruni tigua dindi walia helonaga ege tole emene baraga halu ogonime mo walia haga biyagola tano ogoni dabaga bini.

<sup>66</sup> Tano maru Kohada hameigini ti migi binidaru Eberaimi hameigini dindiha wini. <sup>67-69</sup> Segeme tano wiago Kohada hameigini tu wu miyadaruni Eberaimi dindi hari bareha wini. Tano ogoni Isaraele tigua agali bo waholilono ibida pialu ha do haga winigo Kohada hameigini mo mini. Tano maru Kohada hameigini minidaru Gesebi Yogomeamabi Bedehoronobi Aiyalonobi Gadarimonobi wigi bini. Tano uruni Kohada hameigini tu wu mialu howa dindi maru tani bayale anda haga nogo bulumaga sibiru nalu holene dindi tano kaware wiaru heba mia dege bini. <sup>70</sup> Kohada tinaga tano maru Manase hameigini halu mende hearu dindihabi wia dege biniru Ane Bileamabi wini. Tano uruni heba dindi bayale nogo bulumagabi sibirubi tani nolene anda haga wiaru nelonaga mia dege bini.

<sup>71</sup> Tano maru Isaraele tigua Gesono hameiginihondo minidaruni dindi bayale tani anda haga wiaru nogo bulumaga sibirubi nelonaga mini. Manase hameigini halu mende hearu daluhayagi tano wiaru tu wu mini. Basana dindiha tano kira Golana Asadarodola wiagobi mini.

<sup>72-73</sup> Isaga dindiha tano Gedese Daberada Lamodo Aneme winiru migi bini.

<sup>74-75</sup> Ase dindiha tano mini Masala Abadono Hugogo Lehobo winiru migi bini.

<sup>76</sup> Nabadali dindiha tano wiaru mini Kedese Galili dindihayagi wiagobi Hamono Kiriadaimila wiagobi mia dege bini.

<sup>77</sup> Libai aria dege Merari hameigini hearu tano minidaruni dindi tani bayale anda haga wiaru heba tu wu migi bini. Sebulunu dindiha tano Limono Tabola winigo mini.

<sup>78-79</sup> Lubene dindiha tano winidago mini Bese Iba Yodana doma edera ni tagira ibiragohayagi Yarigo tano kaware dege lowa dindi ko iba dalu naibaga wiago mini. Tano Yasa Kedemodo Mebadaru tu wu migi bini.

<sup>80-81</sup> Gada hameigini dindiha tano maru mini Lamodo Gileada dindiha wiagobi Mahanaimi Hesebono Yaseru wigi bini. Anidagua bialu Isaraele tigua tano maru ti helo mialu tano kawareni tinaga nogo bulumaga sibirume nelonaga dindi bayale tani anda haga wiaru heba Merari hameigini tu wu migi bini.

\* **6:57-59:** Bi ogoninaga irane Yosuanaga mbuga Be 20 gilibu ngago dagalabe.

## 7

*Isaga aguaneneru henego ogo*

<sup>1</sup> Isaga igini maria henego mini Tola Pua Yasubu Simirono laga biyaru hene. <sup>2</sup> Tola igini waragara henego mini Usi Lebaia Yariele Yamai Ibisama Semuele imaru hene. Agali uruni ti ami agali hongoheore howa ti Tola aria hearunaga agali haguane hene. Debidi ibu kini heangi Tola hameigini aguaneneru ti ami agali habehe dege daosini pira kirani kira handari waragara (22,600) hene.

<sup>3</sup> Usi ibu igini mbiraore dege henego mini Isirahaia hene. Ani howa Isirahaia ibu igini maria henego mini Maigele Obadaia Yoele Isaia laga biyaru hene. Agali uruni ti nde tini hameigininaga agali haguane hene. <sup>4</sup> Agali uruni ti wali dewa dabu bialu tinaga waneiginibi dewaore henego ti ami agali habeheru dege daosini pira tebirani waragara (36,000) hene.

<sup>5</sup> Isaga hameigini bibahende daga lamaga halu gilibu wiaru handalu hearia agali ami habeheru dege daosini pira halirani karia (87,000) gilibu wini.

*Beniyamini aguanene heneru ogo*

<sup>6</sup> Beniyamini ibu igini tebira henego mini Bela Bege Yadiaele layaru hene.

<sup>7</sup> Bela ibu igini duria henego mini Esebono Usi Usiele Yarimodo Iri imaru hene. Agali uruni ti hameigini hearunaga haguane dege howa ami agali hongohe mini lene hene. Hameigini uruni tinaga aguanene bibahende daga lamaga howa agali hongohe ami habeheru dege daosini pira kirani kira halu huniane pira tebirani maria (22,034) hene.

<sup>8</sup> Bege ibu igini dira henego mini Semira Yoasa Eliese Eleonai Omori Yaremodo Abiya Anadodo Alemede imaru hene. <sup>9</sup> Agali uruni ti aguanene heneru daga lamaga howa ami agali habeheru dege daosini pira kirani handari kira (20,200) hene.

<sup>10</sup> Yadiaele ibu igini mbiraore Bilihana hangu hene. Bilihana ibu igini karia henego mini Yausu Beniyamini Ehudu Kenana Sedana Tasisi Ahisaha imaru hene. <sup>11</sup> Agali uruni ti Yadiaele hameigininaga agali haguane howa ti ami agali hongohe mini leneru hene. Ai ti damene bibahende daga lamaga howa handalu hearia agali hongohe ami habeheru dege daosini pira mbirani kariani handari kira (17,200) hene. <sup>12</sup> Iri aguanene Subimi hameiginibi Hubimi hameiginibi hene. Ani bialu Ahe aguanene ti Husimi hameigini hene.\*

*Nabadali igini henego ogo*

<sup>13</sup> Nabadali igini maria henego mini Yasiele Guni Yase Salumu layaru hene. Ti wali mini Biliha berenego aguanene hene.†

*Manase igini aguaneru henego ogo*

<sup>14</sup> Manase igini kira Asariele Magiala hene. Libu aija Manase one halu mende bereneru aria mbira Aramea wali berene. Magia ibu igini Gileada hene. <sup>15</sup> Magia ibugua wali mbira Hubimi wali mende Subimi wali dabu bia hene. Magia mbalini mini Maga berene. Magia igini mende mini Selobehada henego ibu igini nahe wandari hangu aba hene.

<sup>16</sup> Ani bialu Magia one mini Maga dege berenego ogoni ibugua igiri kira taba henene. Ibu igini kira Perese Seresela hene. Serese igini kira Ulama Lagemela hene. <sup>17</sup> Ulama ibu igini mbiraore Bedana hangu hene. Wali agali uruni ti Gileada aguanene dege hene. Gileada ibu Magia igini halu Magia ibu Manase igini hene.

<sup>18</sup> Gileada mbalini Hamolegede berenego ibugua igiri tebira taba henene mini Isihodo Abiese Mala laga biyaru hene. <sup>19</sup> Semida igini heneru mini Ahiana Segeme Ligi Aniana imaru hene.

\* **7:12:** Agali mini Ahe lenego ogoni agali Dana manda bialu leda bada laya. † **7:13:** Biliha ibu Yagaba one halu mende bereneru aria mbira biruwa ibu Dana Nabadalila aija berene.

*Eberaimi aguanene heneru ogo*

<sup>20-21</sup> Eberaimi aguanene heneru mini uru. Eberaimi igini Sudela Sudela igini Berede Berede igini Tahada Tahada igini Eleada Eleada ogoni igini Tahada dege mende Tahada ogoni igini Sabada Sabada igini Sudela dege mende hene. Eberaimi igini kira mani henego mini Ese Eleadala hene. Ani henego ai horo mbiru libugua hameigini tara Gede hearunaga nogo sibi bo page bule Gede dalu wiagohayagi daliape halu pu hearia Gedeali hearume libu homelo bo wahene. <sup>22</sup> Ani homayagola libu aba Eberaimihanda dara timbuni howa dugu bialu biraabo heagola ibu damene maru hearu ibalu ibunaga bu miniha mo palia haga bialu hene. <sup>23</sup> Mani howa Eberaimi one ibu yamu ko biruwa ibugua igiri mbira taba henene. Ani taba hanayagola Eberaimihanda igiri ogoni mini Beraia wini.‡

<sup>24</sup> Eberaimi wane mbira mini Seraha berene. Ibuni heba ibu damenerume tano Bedehorono Daliga lagago pigane mo wialu tano mende Bedehorono Dindiha lagago mo wialu Useneseraha tanobi pigane mo wia dege bini.

<sup>25-27</sup> Eberaimi igini mbira mini Leba hene. Leba igini Lesebe Lesebe igini Tela Tela igini Tahana Tahana igini Ladana Ladana igini Amihudu Amihudu igini Elisama Elisama igini Nunu Nunu igini Yosua hene.

<sup>28</sup> Eberaimi tinaga dindiha Bedele tanobi dindi maru wiapara para bini wiarubi dindi bibahende Narana tano ni tagira ibiragohayagi howa wima pialu ni paliragohayagi Gese tano wiagoria wima tagira pialu dindi maru Gese kaware wiapara para bini wiaru bibahende tinaga dege wia. Ani bialu Segeme tano heba dindi maru wiapara para bini wiarubi Aya tano heba dindi emene wiapara para bini wiarubi tinaga dege wia. Ani bialu Aya tano heba dindi wiapara hene wiarubi tinaga dege wini.

<sup>29</sup> Manase aguaneneru tigua Bedesana tanobi Tanaga tanobi Megido tanobi Doro tanobi tano maru dindi emene wiapara hene wiarubi tinaga wini. Ani winigo Yagaba igini Yosebe aguaneneru ti nde dindi uruniha hai haga hene.

*Ase aguanene heneru ogo*

<sup>30</sup> Ase igini maria henego mini uru. Imina Isiba Isibi Beraia layaru hene. Ani bialu Ase wane mbira Sera berene. <sup>31</sup> Beraia igini kira Hebe Malagielela hene. Malagielele igini Bisaidi hene.

<sup>32</sup> Hebe igini Yabalede Some Hodama imaru halu ibu wane mbira Sua berene.

<sup>33</sup> Yabalede ibu igini tebira henego mini uru Pasaga Bimihala Asabada imaru hene.

<sup>34</sup> Yabalede hamene Some ibu igini tebira dege henego uru Loga Yahuba Arama layaru hene.

<sup>35</sup> Ibu hamene Hodama igini maria henego mini Soba Imina Selese Amala imaru hene.

<sup>36-37</sup> Soba igini uru hene. Sua Hanebe Suala Beri Imira Bese Hodo Sama Silisa Idirana Bera layaru hene.

<sup>38</sup> Yade igini uru hene. Yabune Pisiba Ara layaru hene. <sup>39</sup> Ula igini uru hene. Ara Haniele Lisia layaru hene.

<sup>40</sup> Agali uruni ti Ase aguaneneru howa tinaga hameigini mbira mbiranaga agali haguane howa ti ami agali hongohe bayaleore mini leneru hene. Ase hameigini bibahende daga lo winigo ami agali hongohuru dege daga lowa ti daosini pira kirani waragaria (26,000) hene.

**8***Beniyamini aguaneneru henego mini uru*

<sup>1-2</sup> Beniyamini ibu igini duria hene. Bela Asabele Ahara Noha Laba layaru hene.

‡ **7:23:** Mini Beraia ogoni Hiburu bi lalu Horo Ko lale howa dege laga. Irane mo ko holene ibu dameneha anda ibiyagonaga mini ogoni wini.

<sup>3-5</sup> Bela ibu igini mini uru. Ada Gera Abihudu Abisua Namana Ahoa Gera Sehubana Hurama layaru hene.

<sup>6-7</sup> Eहुdu igini aguaneru henego uru. Namana Ahiya Gera imaru hene. Agali uruni ti Geba tanoha howa hameigini emene bu hearunaga agali haguane hene. Ti ani heangi Gerahanda ibu hameneru ti waneigini damene heba bo taliatagi haya handala ti pialu Manahada tanoha pu hene. Gera ibu Usa Ahihudula aba hene.

<sup>8-10</sup> Saharaimi ibu Moaba dindiha howa ibu one kira Husimi Barala wahene. Ani buwa mani ibu wali Hodese dabu bu aribia howa ibu igini karia hene. Igiri uruni mini Yobaba Sibia Mesa Malagama Yausu Sagia Mirima imaru hene. Uruni ti tinaga hameigini hearunaga agali haguane hene.

<sup>11</sup> Ala Saharaimi one Husimihanda igiri kira taba henenegobi ha dege bini. Libu mini Abidubu Elebalala hene.

<sup>12</sup> Elebala ibu igini tebira henego uru. Ebe Misama Semede layaru hene. Semede halu ibu damene bu hearu tigua Ono tanobi Lodo tanobi pigane mo wialu dindi emene marubi mo wia dege bini.

<sup>13</sup> Beraia hameigini Sema hameiginibi ti Aiyalono tano wiagoria hene. Libu damene bu hearunaga agali haguane libuni howa Gede tanoha hearu baba wai bialu libugua wali agali ogoniha haga hearu bo batagi hai hene.

<sup>14-16</sup> Beraia igini uru hene. Ahio Sasaga Yaremodo Sebadaia Arada Ede Maigele Isiba Yoha imaru hene.

<sup>17-18</sup> Elebala igini mini uru Sebadaia Mesulama Hisigi Hebe Isimerai Isilia Yobaba layaru hene.

<sup>19-21</sup> Simai igini mini uru. Yagimi Sigiri Sabadi Elienai Siledai Eliele Adaia Beraia Simirada layaru hene.

<sup>22-25</sup> Sasaga igini mini uru. Isibana Ebe Eliele Abadono Sigiri Hanana Hananaia Elama Andodiya Ibidea Penuele imaru hene.

<sup>26-27</sup> Yarohama igini ogodagua hene. Samaserai Seharaia Adalia Yaresaia Elaya Sigiri layaru hene.

<sup>28</sup> Agali uruni Yarusalemeni heangi ti agali timbuni mini leneru howa ti hameigininaga agali haguane haga bini.

### *Kini Solo ibunaga aguaneneru mini gilibu winigo ogo*

<sup>29</sup> Yaiele ibugua Gibeono tano pigane mo wialu ibu one Magala libu Gibeono tanoni hene. <sup>30-32</sup> Ibu igini wahene mini Abadono hene. Ibu igini maru mini Sua Kisi Bala Nere Nadaba Gedo Ahio Segaraia Migilodo layaru hene. Ai Migilodo ibu Simea aba hene. Agali uruni ti Yarusaleme tano kawareni Beniyamini hameigini heagoria dege hene.

<sup>33</sup> Nere igini Kisi Kisi igini Kini Solo hene. Solo ibu igini maria hene. Yonadana Malagisua Abinadaba Esebala henego ibu mini mende Isibosedede hene. <sup>34</sup> Yonadana igini Meribala hene. Meribala ibu mini mende Mebibosedede henego ibu igini Maiga hene.

<sup>35-37</sup> Maiga ibu igini maria Pidono Melege Tarea Ahasa imaru hene. Ahasa igini Yahoadada Yahoadada igini tebira Alemede Asamabede Simiri imaru hene. Simiri igini Mosa Mosa igini Binea Binea igini Laba Laba igini Eleasa Eleasa igini Asele hene.

<sup>38</sup> Asele ibu igini waragara henego mini Asarigama Bogeru Isimaele Searaia Obadaia Hanana layaru hene. <sup>39</sup> Asele hamene Esege ibu igini tebira Ulama Yausu Elibelede imaru hene.

<sup>40</sup> Ulama igini ti wai biaga wayali howa danda yandarerume agali baga hene. Ulama igini aguaneru lamaga halu handari mbirani pira duria (150) hene. Agali mini o gilibu ngaru ti bibahende Beniyamini hameigini hene.

## 9

<sup>1</sup> Isaraele wali agali bibahende heneru ti hameigini mbira mbira mini lalu mbuga mbira mini Isaraelenaga Kini Henerunaga Bi Te laga ngagoha gilibu nga.

*Yuda wali agali Babilonoha garabaya biniru tini dindi dai binigo ogo*

Wali agali Yuda dindiha hearume mana ko wiaru bialu howa Anduane Homogo erembira mini. Anidagua biyagola Anduane Homogohanda Babilono ami agali ibilalu tigua wali agali uruni minu garabaya bu yalu ti Babilono dindiha piai hene. <sup>2</sup> Ani penego mani howa wali agali maru garabaya golalu tini dindi wiyagoria dai bini. Isaraele wali agali maru ala dai biyaruni heba loma binigo mo miaga hearu ariabi Libai aria hearubi wali agali Ngode Datagaliwabenaga andaha biabe bialu haga heneru ariabi dai bigi bini. <sup>3</sup> Wali agali Yuda hameigini ariabi Beniyamini ariabi Eberaimi ariabi Manase ariabi Yarusaleme tanoha daibu hai hene.

<sup>4-6</sup> Yuda hameigini aria handari waragariani pira dira (690) bibahende ibalu Yarusalemeni hene. Tinaga agali haguane mini Udai hene. Udai ibu Amihudu igini Amihudu ibu Omiri igini Omiri ibu Imiri igini Imiri ibu Bani igini hene. Wali agali uruni ti Yuda igini Perese aguaneneru hene. Agali haguane mende mini Asaia hene. Yuda igini wahene Sela aguanene hearunaga agali haguane Asaia hene. Yuda igini Sera henego ibu aguanene bu hearunaga agali haguane Yuele hene.

<sup>7-8</sup> Beniyamini hameigini Yarusalemeni henerunaga agali haguane mbira mini Salu hene. Salu ibu Mesulama igini Mesulama ibu Hodabaia igini Hodabaia ibu Hesenua igini hene. Beniyamini hameigininaga agali haguane mende mini Ibinea hene. Ibinea ibu Yarohama igini Yarohama ibu Ela igini Ela ibu Usi igini Usi ibu Migiri igini hene. Agali haguane tebone mini Mesulama dege mende hene. Mesulama ibu Sebadaia igini Sebadaia ibu Luele igini Luele ibu Ibiniya igini hene.

<sup>9</sup> Beniyamini hameigini bu heneru ti bibahende handari dirani pira duriani huniane waragaria (956) henerunaga agali haguane mini uruni.

*Loma binigo mo miaga agali Yarusalemeni heneru uru*

<sup>10-12</sup> Loma binigo mo miaga hearunaga agali haguane maru haga binigo mini uru. Yadaia Yahoiaribi Yagini Asaraia layaru hene. Asaraia ibu Ngode Datagaliwabenaga anda handayaho haga agali haguane mbira hene. Asaraia ibu Hiligaia igini Hiligaia ibu Mesulama igini Mesulama ibu Sadogo igini Sadogo ibu Meraiodo igini Meraiodo ibu Ahidubu igini hene. Agali haguane mini Adaaia henego ibu Yarohama igini Yarohama ibu Pasuru igini Pasuru ibu Malagiya igini hene. Agali haguane mini Masai henego ibu Adiele igini Adiele ibu Yasera igini Yasera ibu Mesulama igini Mesulama ibu Mesilemidi igini Mesilemidi ibu Ime igini hene.

<sup>13</sup> Loma binigo mo miaga daosini mbirani handari kariani pira waragaria (1,760) heneru ti hameigini emene haga haga biyarunaga agali haguane tini hene. Loma binigo mo miaga haguane uruni tigua Ngode Datagaliwabenaga andaha biabe tara tara bulene wiaru bibahende manda biaihe hene.

*Libai hameigininaga agali haguane haga binigo ogo*

<sup>14</sup> Libai agali marume Libai hameigini bu hearunaga agali haguane howa Yarusalemeni hene. Agali haguane mbira Hasubu igini Semaia hene. Hasubu ibu Asarigama igini Asagirama ibu Hasabaia igini hene. Agali uruni ti Merari hameigini dege agali haguane hene. <sup>15</sup> Agali haguane maru nde uru hene. Bagabaga Herese Galala Madanaia layaru hene. Madanaia ibu Miga igini Miga ibu Sigiri igini Sigiri ibu Asaba igini hene. <sup>16</sup> Agali haguane mbira mini Obadaia henego ibu Semaia igini Semaia ibu Galala igini Galala ibu Yadudunu igini hene. Agali haguane dege mini Beregaia ibu Elegana aguanene

☆ 9:2: Esr 2.27, Neh 7.73



howa Asa igini hene. Beregaia ibu dameneru ti Nedoba tano kawareni dindi emene wiagotha hene.

*Ngode Datagaliwabenaga anda mamage haga henego uru*

<sup>17</sup> Wali agali garabaya pu henego golalu dai buwa agali maru Ngode Datagaliwabenaga anda mamage haga heneru aria Yarusaleme dai bu hene. Agali uruni tinaga mini Salumu Agubu Talamono Ahimana imaru ti damene heba biabe mandagi biagaru dai bini. Salumu ibu agali uruninaga haguane hene. <sup>18</sup> Bamba Yarusaleme tano bo gialabaga nabi wiangi hameigini uruni tigua Ngode Datagaliwabenaga anda biagonaga panga ni tagira ibiragohayagi mini Kininaga Panga Haraba laga heago mamage haga hene. Bambaore howa Isaraele wali agali dindi ko dalu naibaga wiagotha heangi hameigini uruni tigua Libai hameigininaga balai anda bu hearu mamage haga hene.

<sup>19-20</sup> Horo ogoningi Kora hameigini hearu tigua Anduane Homogonaga Balai anda haraba wiagoria mamage haga hene. Eleasa igini Piniasa ibugua agali biabe uruni biaga hayadaru handayaho hayangi Anduane Homogo ibu heba hene. Ai Debidi ibu kini heangi Kora hameigini aria agali mbira mini Salumu mende heago heba ibu damenerume Anduane Homogonaga Balai Anda haraba panga heago mamage haga hene. Agali Salumu ogoni ibu Kore igini howa Ebiasaba aguane hene.

<sup>21</sup> Agali mbira Meselemaia igini Segaraia heago ibubi Anduane Homogonaga Balai Anda haraba wiago mamage haga hene.

<sup>22</sup> Agali handari kirani pira mbirani kira (212) hearu tigua Anduane Homogonaga Balai anda pabe haraba wiaru mamage howa biabe ogoni bialu helo dabo helene. Hameigini uruni aria ti dindi mbira mbirani headagua ti mini gilibu wuwa daga lamaga hene. Biabe uruni bilonaga Kini Debidibi agali Anduane Homogonaga bi mana latagi haga Samuelebi libugua biabe ogoni bilo mo mini. <sup>23</sup> Ani helayagola agali uruni tigua Anduane Homogonaga anda pabe panga harabani mamage haga hene. Mani howa tinaga igini aguanene hearume biabe ogoni dege bialu haga hene. <sup>24</sup> Agali uruni tigua pabe panga haraba maria uyurahayagi heagobi unurahayagi heagobi ni tagira ibiragohayagibi ni paliragohayagibi bibahende mamage haga hene. <sup>25</sup> Horo marungi nde ti hamenerume tini dalu wahalu ibalu biabe uruni biamogo bialu ha aribia haga hene. Agali ti hamene biabe biamogo bule ibalu ti horo karu hangu biabe bialu halu tini andaga dai bigi biaga hene. <sup>26</sup> Anigo Libai hameigini agali mariali henego tigua agali biabe biaga uruni handayaho haga hene. Tigua Anduane Homogonaga andaha hobane tara tara hearubi mbirale tara tara mo wiaga anda hobane hearubi handayaho haga hene. <sup>27</sup> Agali uruni tigua anda hobane uruni handayaho howa egerebagi gao laragola panga dugua holenaga ti Anduane Homogonaga anda kawareni anda maru hearuha paliaga hene.

*Libai hameigini marume biabe binigo ogo*

<sup>28</sup> Abale Yarusaleme bo gialabaga nabi wiangi Libai hameigini maru hearu tigua belediru ndisirubi Anduane Homogonaga andaha wiaru handayaho haga hene. Anduane Homogo mitangi bialu lotu larangi biabe bulene belediru ndisirubi mbirale uruni mo yu poragola yu dai biragolabi Libai agali o biaruni tigua uruni mbirago ereba nahelo baya hanguore daga lalu handayaho haabo haga hene. <sup>29</sup> Libai hameigini maru hearu tigua mbirale tara tara Anduane Homogonaga wiabagi ho wiarubi handayaho haga hene. Ani bialu agali uruni tigua balawa wiarubi waini iba hambu wiarubi olibe lininaga weli hambu wiarubi ira hagua nga bilo delagane mini inisenesi wiarubi pauda bayale tara tara wiarubi handayaho haga hene. <sup>30</sup> Anigo pauda tara tara wiaru biamaga halu mo mbiraore helonaga biabe loma binigo mo miaga hearu ti hangume biaga wini.

<sup>31</sup> Agali mbira mini Madidaia ibu Libai aria Kora hameigini henego ibugua balawa loma bulenaga hiraga biabe biaga hene. Madidaia ibu Salumu igini wahene hene.\*

<sup>32</sup> Agali Libai hameigini dege Kohada aria hearu tigua Sabada horo bibahendengi Anduane Homogonaga andaha ibuhondo mberedi lomabu mulenaga mo manda manda bu wiaga hene.†

<sup>33</sup> Libai hameigini aria maru tigua Anduane Homogonaga andaha ngida aleru balu iba gana lalu haru haga hene. Libai hameigini uruninaga agali haguane tigua horo bibahendengi mbiraga horombebi biabe biaabo haga howa ti Anduane Homogonaga anda heago kawareni anda maru hearuha paliaga hene. Tinaga biabe tara mende bulene nawi mbiraore ogoni dege biaga hene.

<sup>34</sup> Libai aria agali garabaya golalu dai binidaru maru ti hameigini headagua agali haguane howa Yarusalemeni hene.‡

*Kini Solo ibunaga aguaneneru mini gilibu winigo ogo  
(1 Bi Te 8.29-38)*

<sup>35</sup> Yaiele ibugua Gibeono tano pigane mo wialu ibu one Magala libu Gibeono tanoni hene. <sup>36-38</sup> Ibu igini wahene mini Abadono igini maru mini Sua Kisi Bala Nere Nadaba Gedo Ahio Segaraia Migilodo layaru hene. Ai Migilodo ibu Simea aba hene. Agali uruni ti Yarusaleme tano kawareni Beniyamini hameigini heagoria dege hene.

<sup>39</sup> Nere igini Kisi Kisi igini Solo hene. Solo ibu igini maria hene. Yonadana Malagisua Abinadaba Esebala henego ibu mini mende Isibosede hene. <sup>40</sup> Yonadana igini Meribala hene. Meribala ibu mini mende Mebibosede henego ibu igini Maiga hene.

<sup>41-43</sup> Maiga ibu igini maria Pidono Melege Tarea Ahasa imaru hene. Ahasa igini Yara Yara igini tebira Alemede Asamabede Simiri imaru hene. Simiri igini Mosa Mosa igini Binea Binea igini Lebaia Lebaia igini Eleasa Eleasa igini Asele hene.

<sup>44</sup> Asele ibu igini waragaria henego mini Asarigama Bogeru Isimaele Searaia Obadaia Hanana layaru hene.

## 10

*Solo ibu iginiru heba homenego ogo  
(1 Samuele 31.1-13)*

<sup>1</sup> Pilidiali amime Isaraeleali baba Hari Giliboa heagoria wai biyagola Isaraeleali dewa homene. Maru Solobi ibunaga igini biarubi heba ibida purogo lene. <sup>2</sup> Ani purogo layagola Pilidiali ami abale talima ibalu Solo igini tebira biaru Yonadana Abinadaba Malagisua imaru minalu bai hene. <sup>3</sup> Ani bialu Solo heagoria wai hongoheore minama minama anda ibalu waitigi hearunaga timume Solo bila hene. <sup>4</sup> Ani biyagola ibugua igiri wai biaga humbi yandarerubi yu heagohondo lalu, Pilidiali Ngode Datagaliwabe mitangi nabiaga nai ibirarume i boligo inaga ayu tibu yidegonime i homoliya abale ba, lene. Ani layagola igiri biagome ani bolene gi timbuni howa nabe wahene. Ani biyagola Solo ibuninaga wai biaga ayu tibu biago yamuwa deneni ibunime pili paga halu homene. <sup>5</sup> Ani biyagola igiri biago ibula ibaga bu haribigo ibu nde ibuninaga wai biaga ayu tibu yu hayago yamuwa deneni ibuni pili paga halu Solo homayadagua dege homa palu bini. <sup>6</sup> Ani bialu Solo ibunibi ibunaga igini tebirarubi homai hayagola mani ibunaga aguanene heneru mbiralime kini nahene. <sup>7</sup> Ani biyagola Isaraealiru ti Yaserili dindi guagua wiagoria hearume Isaraeleali ami ibida purogo layagobi Solobi

\* **9:31:** Balawa loma bulenaga ledago balawa olibe lininaga weli heba biamaga halu mbirale emene mbisigedi ale hiruwa Anduane Homogohondo lomabu miaga. Loma Binigo Mo Miaganaga Biabe mbugaha 2.4-6 handabe.

† **9:32:** Mberedi gilibu ngago Sabada horongi Anduane Homogonaga andaha dagia wiagoria mberedi hirini hombearia (12) wiaga hene. Mberedi uruni Anduane Homogohondo lomabu miaga wini. Loma Binigo Mo Miaganaga Biabe mbugaha 24.5-9 handabe.

‡ **9:34:** Hobane ogoria agali maru garabaya golalu dai binigo agali haguane ledago tinaga mini 9.14-17 ogoriani gilibu ngaruni.

ibu iginirubi homaya layagobi hale halu tinaga dindi andabi wahalu ibida pene. Ani biyagola Pilidiali biaru ibalu dindi karulene.

<sup>8</sup> Mani wai ogoni biai howa horo mbira peagola Pilidiali biaru puwa Isaraeleali balu homene biarunaga mbirale dabudabu yu wahalu pene wiaru ti mo yalu pene. Ani bialu howa handalu hearia Solobi ibunaga igini tebira biarubi tinaga tingini uyu Hari Giliboa wiagoha bo paya bu wiaria handa walia hene. <sup>9</sup> Ani bu wiaria hondowa tigua Solonaga haguane pugualu ibunaga wai bulenaga aeane karuleago ti golowa agali maru hearuhondo mialu bi baya mbira yidama lalu Pilidialinaga mbirale dama mitangi bialu bi pupu wule gime wabiniruhondobi wali agalihondobi lamule pudaba lene. <sup>10</sup> Ani lowa tigua Solo ibuninaga wai biagane timu humbi yandare uruni mo yalu puwa tinaga dama mitangi bialu mbirale gime wabini anda heagoha mo wialu Solonaga haguane biago tinaga dama mini Dagononaga bi pupu wiaga anda heago tamuha gerela ho wini. <sup>11</sup> Yabese wali agalime Gileada dindini howa hale halu hearia Pilidiali biaru tigua Solo ogodagua biya lalu layago hale hene. <sup>12</sup> Ogoni hale howa agali pari wayali elahe hearume abale gerai lalu puwa tigua Solobi ibu igini tebira biarunaga tinginiru mo yalu Yabese dindini dai buwa ira bai ale mbira heago teneha hora halu tini dara howa horo karu tomo mbira nane dugu bialu haabo hene.

<sup>13</sup> Solo ibu homayago irane ibu Anduane Homogo mo tene nahe wahalu homenenaga dinini mo bila hayagome ibuni homene.✧ <sup>14</sup> Ibugua Anduane Homogohondo ina agi buabe lalu hale naheyagola Anduane Homogo ibugua Solo bo wahalu Isaraele wali agalinaga kini helo Yasi igini Debidi dabo aribia ho helene.

## 11

### *Debidi ibu Yudanagabi Isaraelenagabi kini ibu hangu henego ogo (2 Samuele 5.1-10)*

<sup>1</sup> Mani Isaraeleali hearume Kini Debidi Heberono tanoha hearia hondo ibini. Ibuwa tigua Debidihondo lalu, Ina wali agali bibahende inaga damene hangu darama mbi-raore kama. <sup>2</sup> Abale Solo ibu kini heangibi ibu ani helalu dege ina inanaga ami agaliru haru halu wai bule piaga harigoni. Ani birigola Anduane Homogo inaga Ngode Datagaliwabehanda bi lo wialu ina ibunaga wali agaliru haru habelo helarogola í Isaraele wali agalirunaga kini helolebero layagoni, lene. <sup>3</sup> Ani lowa Isaraele wali agalirunaga agali haguane hearu bibahende Heberono tanoni Kini Debidi heagoria ibu ngoai hene. Ibu ngoai heagola ibugua Anduane Homogonaga deni howa bi hongohe mbira lowini. Ani lowiyagola tigua Debidinaga hagianeni ira olibe lininaga weli odo wuwa ibu Isaraele wali agalinaga kini helene. Ani biyagome ala Samueleha howa Anduane Homogohanda bi layadagua bini.

<sup>4</sup> Horo mbirungi Debidibi Isaraelealiru bibahendebi tigua Yarusalemeha hearu baba wai bule pene. Yarusaleme Yabusuali hameiginirunaga dindi winigo tano ogoninaga mini Yabusu wini.✧ <sup>5</sup> Ani wu howa Yabusuali hearume Kini Debidihanda tinaga tano nakarulolebira manda buwa tongoyungu bi lalu hene. Tigua bi anidagua layagoyu mani Debidihanda ibunaga ami biaru haru pialu wai buwa bo podalu tano hongohe biagoni karulene. Tano ogoni mini Saiono winigo mani Debidihanda wai bialu karulayagola dindi ogoni mini Debidinaga Tano laga wini. <sup>6</sup> Debidihanda ami agali biaruhondo lalu, Tí mbiralime Yabusuali pigane bo waharago ibu ami agali bibahendenaga haguane helolebero, lene. Ani layagola wali mini Seruia igini Yoaba ibugua bamba halu wai bialu wayali hayagola ami agali bibahendenaga haguane ibu hene. <sup>7</sup> Tano ogoriani Debidi ibu hole piyagola wali agalime tano mini Debidinaga Tano laga wini. <sup>8</sup> Debidihanda ibunaga agali biaruhondo tano ogoninaga lene leneni anda bu mabu bidaba layagola tigua dindi ulini mbira winigoria dindi duguwa mogo

✧ 10:13: LBM 19.31, 20.6, 1 Sml 13.8-14, 15.1-24, 28.7-8 ✧ 11:4: Yos 15.63, Hgn 1.21

bialu mo dondelene wiagoria anda pigane bialu hene. Ani bialu Yoaba ibugua tano ogoni mendehayagi mo tiga bialu hene. <sup>9</sup> Anduane Homogo Hongo Haiheore kago ibugua horo bibahendengi Debidila haru mandagi hayagome Debidi ibu kininaga hongo holene mia tago haabo hama iraga halu hene.

*Debidinaga ami agali hongohe mini lenebi henegonaga mini uru  
(2 Samuele 23.8-39)*

<sup>10</sup> Debidinaga ami agali hongohe mini lene heneru ti mini uru. Isaraele wali agalirumebi agali hongohe mini lene biarumebi ti bibahende Debidi biamogo biyagola Debidi ibu kini hongohe hene. Ani biyago Anduane Homogohanda bi layago lola hene.

<sup>11</sup> Agali mbirago Hagamono hameigini Yasobeama ibu ami agali hongohe mini lene tebira heneru aria mbira haguane ibu hene. Horo mbirungi ibugua yandare hangume agali handari tebira (300) baba wai bialu agali uruni bibahende bo wahai halu wayali hene. <sup>12</sup> Dodo igini Eleasa ibu Ahoho hameigini agali mini lene tebira henedaruni aria haguane mendego ibu hene. <sup>13</sup> Horo mbirungi Eleasa ibu Debidi heba Isaraealirubi ti Pasadamimi dindi hemiria Pilidialirume wai bule amuna tidiyu hearia hendene. Ani hondowa Isaraeali uruni tigua widi ale mini bali mabuha anda ibu hearia Pilidialirume wai hapara haya handala Isaraeali maru ti gi halu ibida piai hene. <sup>14</sup> Maru ani ibida piyagola Eleasa ibubi ibunaga agalirubi hangu mabuha hongo ho howa tigua Pilidiali dewaore bo wahai hene. Horo ogonongi Anduane Homogo ibugua biamogo timbuniore biyagola ti wayali hene.

<sup>15</sup> Debidinaga ami agaliru haru haga agali hongohe pira tebira (30) hene. Horo mbirungi Debidi ibu Adulama dindiha egeanda mbira heagoha hearia ami agali hongohe pira tebira (30) uruni aria tebiralime ibu hondo pene. Ogongingi dege Pilidialirume Lebaimi dindi ulini wiagoha ibu howa balai anda bu hene. <sup>16</sup> Tigua Debidi handalu minabe nahe wiagoha ha do heagola Pilidiali uruni tigua Bedeleheme tano bo podama anda ibalu ti karulo hene. <sup>17</sup> Ani karulo heagola Debidi ibugua Bedelehemeha iba bayale nagane winiru mitangibu dai buwa lalu, Daraore nde biaruago ainde Bedeleheme tanonaga ubaandatagi biaga harabani iba hambiaga uli biagoha iba bayale biago hambu nedole nde i turuho koleda, lene. <sup>18</sup> Ani layagola hale howa ami agali hongohe hearu aria tebirali biaru ti heyalu Bedeleheme anda puwa Pilidiali iba hambiaga uli biagoria bu hearuni helowa Debidi ibu iba noaba layagohaore bereago hambu yalu dai bialu Debidi nelo mini. Ani miyagola ibugua iba ogoni nane wahalu Anduane Homogohondo lomabu mialu dindini odo wahene. <sup>19</sup> Ani buwa ibugua lalu, Anduane Homogo-o ina iba ogoni nanolebero. Ani larogoni irane agali o karu ti iba ogo hambu piyagola bo wa kaleda. Ani bo wa kagola ina tinaga darama porago naradagua buledago nane waharogoni, lene. Ani lalu Debidi ibugua iba ogoni nane waore hene. Ami agali tebirali uruni tigua gibi bibe nahe mbira o binidagoni.

<sup>20</sup> Yoaba hamene Abisai ibu ami agali hongohe pira tebira (30) henedarunaga haru haga haguane hene. Horo mbirungi Abisai ibugua yandare hangume waitigi agali handari tebira (300) balu homelai hene. <sup>21</sup> Ani buwa ibubi nde ami agali hongohe mini lene pira tebira (30) biarunaga haguane ibu hene. Anigo ibu agali tebirali dabene mini lene daliga hayagobi ndo howa mini lene dege hene.

<sup>22</sup> Kabasele tanoali Yahoiada igini Benaia mbira henego ibubi nde ami agali hongohe uruni aria dege mbirago hene. Ibugua wai biraha wai hongo howa taraore mbira biaga howa ibugua horo mbirungi Moabali ami agali hongohe kira bo palu bini. Horo mbirungi nde Benaia ibugua dege Isaraele dindiha dindiguni ibira halu dagare biaga wiangi egeandaha gundu uli mbira wiagoha anda puwa gabua mbira budi ale timbuni mini laiono hearia handa walua halu bo wahene. <sup>23</sup> Horo mbirungi nde ibugua dege Iyibiali mbira timbuni luore magi mida kira heago balu homelene. Iyibiali ogoni ibu yandare timbuni mbira yu heagola Benaia ibu kango hangu yu henego yalu hapara

howa libu бага бага bialu howa Benaia ibugua agali biago ibuninaga yandare yiago gingila muwa ibuni yandare ogonime nogoba hayagola homene. <sup>24</sup> Benaia ibu Yahoiada igini howa ibugua nabibehe maru urunidagua bigi binigome ibubi nde agali hongohe mini lene tebiralı biarubi dege hene. <sup>25</sup> Ani howa ibu ami agali hongohe mini lene pira tebira (30) biaruni yu wahalu ibu bolanguahe hene. Anigo ibu agali tebiralı dabene mini lene daliga hayagobi ndo howa ibu mini lene dege hene. Ani heagola Debidihanda Benaia ibugua ami agali kini ibuni mamage haga hearu haru haga helo dabo helene.

<sup>26-47</sup> Ami agali hongohe henedaruni marunaga mini uru. Yoaba hamene Asahelebi Bedeleheme tanoali Dodo igini Elehananabi hene. Ani bialu Harodo dindiha howa ibini Samodo Pelede tanoaha howa ibini Helese Tegoa tano howa ibini Igese igini Ira imaru hene. Anadodo tanoali Abiesebi Husa dindiha howa ibini Sibegaibi Ahoho hameigini aria mbira Ilaibi Maharai Heledela libu Nedoba tanoaha howa ibinigo libubi hene. Helede ogoni ibu Bana igini hene. Ani bialu Beniyamini hameiginiru daluha Gibeaa tano wiagoha howa ibini Libai igini Idaibi Piradono tanoali Benaiabi hari Gasaha wiagoha kaware dege dindi ulini mbira wiagoha howa ibini Hurai imaru hene. Ani bialu Araba tanoali Abielebi Bahurumu dindiha howa ibini Asamabedebe Salabono tanoali Eliababi Gisono dindiha howa Hasemebi Hara dindiha howa ibini Sagi igini Yonadanabi Saga igini Ahiamabi hene. Ani bialu Uru igini Elibala ibini Megera dindiha howa Hebebi Pelono dindiha howa Ahiyabi Kamelo tanoali Hesperobi Esebai igini Narai imaru haga bini. Nadana hamene Yoelebi Hagari igini Mebihabi Amonoali dindihayagi howa ibini mbira nde Selege mbira henego ibubi Berodo tanoali Yoabanaga yandare timuru yahaga Naharai mbira henegobi Yadirı hameigini aria kirali Ira Garebela henego labobi hene. Hidiali mbira Uraiabi Ahalai igini Sabadabi Sisa igini Adinabi ibu Lubene hameigini howa amiali pira tebira (30) haru henegobi Maga igini Hananabi Midanali Yosabadabi Asaderali Usiabi Aroe tanoaha howa Hodama igini Sama Yaillela ibinirubi Simiri igini Yadielee Yohala Tisi tanoaha howa ibinirubi Mahaba dindiali Elielebi Elenama igini Yaribai Yosabiala libubi Moaba dindiali Idimabi Sobali Eliele Obede Yasiele tibi uruni bibahende ami agali hongohe mini lene hene.

## 12

### *Beniyamini hameigini maru Debidinaga ami agali henego ogo*

<sup>1</sup> Kisi igini Solohanda Debidi bo wahole talima ibaga bialu heangi Debidi ibu ibida puwa Sigilaga tanoaha ha do hene. Ani ha do hearia ami agali hongohe marume Debidinaga wai bia hole ibini. <sup>2</sup> Tigua danda timume bolenebi ege tole emene pume yuwa bolenebi gi tigame balu gi lemehi бага mugubeore heneya. Agali uruni ti Beniyamini hameigini Solo ibu aria dege heneya.

<sup>3-7</sup> Tinaga ami agali haru haga Ahiesebi ibu hamene Yoasabi libu kirabali Gibeaa tanoali Sema henego igini hene. Ami agali maru henedarunaga mini uru. Asamabede igini Yasiele Peledela libubi Anadodo tanoali Beraga Yahula libubi Gibeono tanoali Isimaiabi hene. Isimaia ibu Debidinaga ami agali hongoheore mini leneru pira tebira (30) hearunaga haru haga agali haguane hene. Beniyamini hameigini agali maru mini Yaremaia Yahasiele Yohanana Yosabada imaru uruni ti Gedera tanoali hene. Agali maru Elusai Yarimodo Bealaia Semaraia Sebadaia imaru ti Haribiali hene. Kora hameigini Elegana Isaia Asarele Yoese Yasobeama imaru hene. Yoelabi Sebadaia libu Gedo dindiali Yarohama igini hene.

### *Gada hameigini maru Debidinaga ami agali henego ogo*

<sup>8</sup> Debidi ibu dindi ko iba dalu naibaga wiagoha ha do hole pu hearia ami agali hongoheore Gada hameigini maru hearu Solo helalu ibini. Agali uruni ti ami agali hongohe gibiore howa ti humbi yandarebi yuwa wai biaga pari wayali hene. Tigua wai pora birangi tinaga dengui nogo gabua laiono ale hiriribi gibiore howa wai biaga. Ani



buwa gerai ledaha agali gerai ndo aube toba pialu biango dudu hari bareha hagame dai laradagua biaga hene.

<sup>9-13</sup> Agali uruni ti mini uru. Agali haguane mini mbira Ese mende Obadaia tebone Eliaba mane Misimana dauni Yaremaia waragane Adai kane Eliele halini Yohanana dini Elesabada pini Yaremaia mende beane Magabanai layaru hene.

<sup>14</sup> Gada hameigini agali uruni ti ami agali bayale dege hene. Ani howa ti maru wai biaga mandabi hearume wai bialu agali mbira hangume ami agali daosini mbira (1,000) haru haga hene. Maru wai bulene bayuwa manda nabi hearume ti ami agali handari mbira (100) haru haga howa wayali habehe dege hene. <sup>15</sup> Mali mbiranaga ege mbira layagola Iba Yodana li timbuni daligaore wiangi agali uruni tigua Iba Yodana domaede halu puwa wali agali iba doma edeyagi dindi ulini panda panda wiagoha abene ni tagira ibiragohayagibi ni paliragohayagibi hearu baba wai bialu bibahende bo taliatogo layagola ibida pugu pugu bini.

*Yuda hameiginibi Beniyamini hameiginibi maru Debidi heba hamaga henego ogo*

<sup>16</sup> Horo mbirungi Yuda hameigini marubi Beniyamini hameigini marubi ti Debidi ibu dindi ko dalu naibaga wiagoha ha do hearia ibini. <sup>17</sup> Debidihanda ti lola ho puwa tihondo lalu, Tí nenegeme ibagadagua ibalu í biamogo bule ibirimiyagua nde í tínaga nenege holene turuho kogoni. Ani ndo tígua í waitigi karuhondo mini mule ibirimiyagua nde bi ogo tihondo heneneore larogo hale halimu. Ina tí mo ko holene mbira nabioke kogola ihondo ko ogoni bule ibirimiyagua ina mamalirunaga Ngode Datagaliwabe kago ibugua manda bu howa tí ko beremi lowa pani ngulebira, lene.

<sup>18</sup> Ani layagola agali mbira mini Amasai heagoha Ngode Datagaliwabenaga dinini karula hayagola Amasaihanda Debidihondo lamialu lalu, Yasi igini Debidi-o ina í aria kamagoni. Inaga Ngode Datagaliwabehanda í biamogo bialu handayaho kagome agali í heba haga karu tígua wai bialu wayali haabo halimulo hameledo, lene. Ani layagola Debidihanda agali uruni ibunaga ami agali haguane helo helai hene. Mani howa Amasai ibu Debidinaga ami agali hongoheore pira tebira (30) hearunaga haguane helo dabo helene.

*Manase hameigini maru Debidinaga ami agali hole ibinigo ogo*

<sup>19</sup> Debidi ibu Pilidialiru heba Solo baba wai bule piyagola Solonaga ami agali Manase hameigini maru hearu Debidi baba hamaga halu pene. Anidagua layadago irane Debidi ibu abale Solonaga biabe biahaga hayago Pilidiali ti manda buwa Debidi ti heba Solo baba wai bule piyagua Debidihanda beregeda dai bialu Pilidiali ti baba wai bulubada lo manda bialu waha lene. Pilidiali kini hearu tigua bi dindiha ohowa lo mbira halu Debidi ibu Sigilaga dindini daibilene. <sup>20</sup> Debidi ibu Sigilaga dai bialu howa Manase hameigini ami agali biaru ti haru mandagi dai bini. Agali o piyadaruni mini Adana Yosabada Yadiege Maigele Yosabada mende Elihu Siledai imaru pene. Ami agali uruni Manase dindiha howa ti hangu hangume ami agali daosini mbira mbira (1,000) haru haga henego Debidi hearia ibugu bini. <sup>21</sup> Agali uruni ti ami agali bayale hongohe heago hondowa Debidihanda ti ibunaga ami agali haru haga helo helaga bini. Debidihanda agali pagebibi wai biaga hearu baba wai bule piyangi ami agali uruni tigua Debidi biamogo bialu wai bule pene. <sup>22</sup> Horo bibahendengi agali mbira mbira ibugu bialu Debidinaga ami agali hole ibaabo hene. Ani biyagola Debidinaga ami agali dewaore hene.

*Israaeleali bibahendeme Debidi kini helo biamogo bule manda binigo ogo*

<sup>23</sup> Debidi ibu Heberono tanoha hearia ami agali dewaore ibalu Anduane Homogohanda layadagua tigua Debidi Solo henegoria kini ha aribia helo dabo helole ibini. Ti ibalu wai biagane ale bibahende mo yai halu ibini. Ti ibinidaruni daga ogodagua.✧

<sup>24</sup> Yuda hameigini ami agali daosini dege waragariani handari halirame (6,800) wai humbi yandareru yalu ibini.

<sup>25</sup> Ani bialu Simeono hameigini ami agali daosini kariani handari mbira (7,100) ibini. Agali uruni ti ami agali hongo howa wai biagane mana baya hangu manda biaihe ibini.

<sup>26-27</sup> Libai hameigini daosini mariani handari waragaria (4,600) ami agali dege anda ibini. Ti heba Arono aria Yahoiada ibu agali haguane henego ibu aria ami agali daosini tebirani handari karia (3,700) ibini.

<sup>28</sup> Ani bialu igiri daliahe mbira mini Sadogo ibu Libai hameigini dege howa ami agali hongohe henego ibu heba ibu aria agali pira kirani kira (22) haru ibalu ti ami agali haru haga hongohuru dege ibini.

<sup>29</sup> Solo ibuni aria Beniyamini hameigini hearubi ami agali dege daosini tebira (3,000) anda ibini. Abale howa agali uruni ti Solo baba haganego wahalu Debidi hearia ibini.

<sup>30</sup> Eberaimi hameigini ami agali daosini dege pira kirani handari halira (20,800) anda ibini. Agali uruni tini dindiha howa ti dameneme ti agali hongoheore heago de hendene.

<sup>31</sup> Manase hameigini halu mende ni paliragohayagi hagaru ti daosini pira mbirani halira (18,000) ibini. Agali uruni ti dameneme dabalu Debidi kini helole Heberono pudaba laya handala ibini.

<sup>32</sup> Isaga hameigini handari kira (200) ti ami agali haru haga dege howa tinaga ami agali tini andaneha haga hearu bibahende haru ibini. Ami agali haru haga uruni mini gigabiwi howa tigua Isaraealime bilonaga hariga mo walia holene ti mandabi hene.

<sup>33</sup> Sebulunu hameigini ami agali daosini pira duria (50,000) ti hongoheore hangu ibini. Tigua wai biagane aleru bibahende mo yai halu mini mbiraore halu Debidi pele muleore eberemagoni lalu ibini.

<sup>34</sup> Nabadali hameigini ami agali haru haga haguane dege daosini mbira (1,000) ibalu tinaga ami agali daosini dege pira tebirani karia (37,000) haru ibini. Tigua wai humbi yandarerubi mo yai halu ibini.

<sup>35</sup> Dana hameigini ami agali daosini dege pira kirani halira handari waragaria (28,600) ibini. Agali uruni ti wai bule manda mandabu haabo haga hene.

<sup>36</sup> Ami agali Ase hameiginiru daosini pira maria (40,000) ibini. Agali uruni tibi nde wai bule manda manda bu hagago dege ibini.

<sup>37</sup> Lubene hameiginibi Gada hameiginibi Manase hameigini halu mende biarubi ti Iba Yodana ni tagira ibiragohayagi haga hearu bibahende wai biagane danda timu yandareru mo yai halu ami agali daosini dege handari mbirani pira kira (120,000) ibini.

<sup>38</sup> Ami agali uruni tigua wai biagaru ale mo yai halu Heberono tanoha ibu ngoai hene. Ti bibahendeme mini mbiraore howa Debidi ibu Isaraele wali agali bibahendenaga kini helolenego dege mandabu yalu ibini. Isaraele wali agali maru hearume nde ani dege manda biaiho hene. <sup>39</sup> Agali uruni ti Debidi heba horo tebiru Heberononi hene. Ani heagola tinaga wali agali bu hearume tomo dewa dawa manda manda biyagola tigua tomo uruni nalu hene. <sup>40</sup> Anidagua bialu heagola Isaraele wali agali bibahendeore hameigini uyura paliamaro bini Isaga dindiha hearubi Sebulunu dindiha hearubi amuraore Nabadali dindiha hearubi bibahendeoreme turu timbuni halu tigua tomo tara tara yalu Heberono tanoni ibu ngoai hene. Tigua balawa bayalerubi gerebi lini do gembe bu winirubi poge lini ale do gembe bu winirubi waini ibabi olibe lininaga welibi dewaore yalu ibugu bini. Tigua tomo uruni nogo dongi kamele bulumagarunaga

✧ 12:23: 2 Sml 5.1-3

erekunini mo pagaho ngelowa yalu ibugu bini. Ani bialu nogo sibi bulumagaru wali agali ti bo dawa nelo haru ibu dege bini.

## 13

### *Habo Nalolene Bi Lo winigonaga Mbogoyi Yarusaleme mo yalu ibinigo ogo* (2 Samuele 6.1-11)

<sup>1</sup> Debidihanda ami agali ti marume ami agali daosini mbira (1,000) haru haga hearubi handari mbira (100) haru haga hearubi bibahende mo ngoai hene. <sup>2</sup> Ani ibu heagola Debidihanda tihondo lalu, Ina bi larogo hale howa ti bibahendeme e laramiyaguabi Anduane Homogo inanaga Ngode Datagaliwabe ibugua hame layaguabi ina Isaraele wali agalihondobi loma binigo mo miagahondobi Libaiali tihondobi ti bibahende ina kamaria ibai helo bi lo pelamiya. <sup>3</sup> Ti ani ibai howa Ngode Datagaliwabenaga Habo Nalolene Bi lo winigonaga Mbogoyi Solo ibu kini heangi nagalonedo lowa harimago ogoni ai iname mo maliya, lene. <sup>4</sup> Ani layagola hale howa wali agali bibahendeme turu halu, Ani bimiya, lalu lai hene.

<sup>5</sup> Debidihanda Habo Nalolene Bi lo winigonaga Mbogoyi Kiriada Yarimi dindi wiaria Yarusaleme tanoni yalu ibilo ibugua Isaraele wali agali iba Siho peago Iyibi dindi tubari unugohayagi henerubi Hamada dindi uyugohayagi henerubi mo ngoai hene.\* <sup>6</sup> Ani ibu heagola Debidihanda wali agali uruni bibahende haru halu Yuda dindinaga Bala tano wiagoria Ngode Datagaliwabenaga Habo Nalolene Bi lo winigonaga Mbogoyi biago ogoniha wiagola mo yu dai bule pene. Mbogoyi ogoni Anduane Homogonaga laga wini. Mbogoyi ogoninaga daligahayagi dahuliyali handalehe kira wabu helowa ogoni Anduane Homogo ibuni handame ho howa biragane dagia ogoni laga wini.\* <sup>7</sup> Anigo ti Abinadaba anda heagoria pialu Anduane Homogonaga Mbogoyi biago wiaria hendene. Hondowa tigua Mbogoyi biago nogo bulumaga kirame gili laga garo ale mini karisi gahenge mbira wiagoria yalu pole mo paga hene. Mo paga halu harigani yalu pialu howa Abinadaba igini kirali Usa Ahiolame gili laga garo ale karisi biago haru halu pene. <sup>8</sup> Debidibi Isaraele wali agali bibahendebi turu howa mali lialu ngida ale balu tabagabi balu ngilingele laga bilonaga mbirale tara tara wiarubi mo ema bia halu mbelo biguli ale pulalu iba gana lama garo ale karisi biago heba mandagi pialu Anduane Homogonaga mini yaraga hama pialu hene.

<sup>9</sup> Ani bima pialu widi lini ibira halu aeane puyabume yu pelonaga bo taulaga agali mbira mini Kidononaga anda heagoria tagira pene. Dindi ogoriani nogo bulumaga biago labome Anduane Homogonaga Mbogoyi biago mo ema biyagola ibira habehe wini. Ani ibira hole biyagola Usahanda Mbogoyi biago abale yania hene. <sup>10</sup> Usahanda Anduane Homogonaga Habo Nalolene Bi lo winigonaga Mbogoyi biago bame mo yo hondowa yania hayagola Anduane Homogohanda keba timbuniore howa Usa bayagola abale ogoriani homo ibira hene. <sup>11</sup> Ani biyagola Debidibi ibugua Anduane Homogohanda ogoni biyago hondowa keba hene. Horo keba hayadangi howa dindi ogoni mini Perese Usa laga winigo nga.\*

<sup>12</sup> Debidibi ibugua ogoningi Anduane Homogohondo gi howa lalu, Anduane Homogonaga Habo Nalolene Bi lo winigonaga Mbogoyi ogo ina aguaore ngelo hole mo yalu poliyadabe, lene. <sup>13</sup> Ani lowa Debidibi ibugua Anduane Homogonaga Mbogoyi biago ibunaga tano Yarusaleme nayupe wahalu hariga mendehe yu pubagi halu pene. Puwa tano mbira mini Gede winigo ogoniala mbira mini Obededomo henego ogoni ibunaga anda mo ngelene. <sup>14</sup> Agali Obededomo biagonaga andaha ngelo heane ege tebira

\* 13:5: 1 Sml 7.1-2    \* 13:6: Har 25.22    \* 13:11: Dindi mini Perese Usa ogoni inanaga bi lalu, Anduane Homogohanda Usa Bo wahene, laga winigo nga. Mini ani wiyadagoni ayu ina kamangi manda bialu ndo abale agali mbuga ogo gili binidangi howa manda bialu leda.

pene. Ani ngelo heagola Anduane Homogohanda Obededomobiibunaga waneigini damenerubi bibahende mo bayale hai hene.✧

## 14

### *Kini Debidi ibu Yarusaleme howa bialu henego ogo (2 Samuele 5.11-16)*

<sup>1</sup> Taianaga Kini Hiramahandaibunaga agali maru Debidi hearia ibilene. Ani ibilowa ibugua ira tamia bayale dibu yalu agali anda biaga mandabi maru ege tole podaga mandabi marubi tihondo lalu, Tigua Kini Debidinaga anda timbuni mbira bule pudaba, lene. <sup>2</sup> Urunidagua biyago hondowa Kini Debidi ibugua manda bialu hearia Anduane Homogohanda i heneneore Isaraele wali agalinaga kini helenego kogoni lo manda bini. Ani manda buwa Debidi ibugua Anduane Homogohandaibunaga Isaraele wali agalirubi biamogo bulenaga biabe hongohe timbuni ogoni biyadalo manda bia dege bini. <sup>3</sup> Debidi ibu Heberono tano wahalu Yarusaleme hole piyangi howa ibugua wali maru dabu bialu waneigini dewa halu bini. Ibu one maru ala dabu biniru ti bira dege buwa uruni ti haru bibahende Yarusaleme mandagi pu berene. Ani pu biruwa ibu one urunime Yarusalemeni waneigini dewa dege taba henene. <sup>4-7</sup> Debidi igini Yarusalemeni taba henedaruni tinaga mini uru Samua Sobaba Nadana Solomonobihara Elisua Elebeledenoga Nebege Yabia Elisama Beliada Elibeledemaru hene.

### *Debidihanda Pilidiali bo podahana halu wayali henego ogo (2 Samuele 5.17-25)*

<sup>8</sup> Pilidia wali agali hearume hale halu hearia Isaraele wali agalime Debidi tinaga kini heleda layago hale hene. Ani hale howa tinaga ami agali hearume wai bialu Debidi minule pene. Ibu minule ibira layago hale howa Debidi ibu Pilidiali baba wai bule pene. <sup>9</sup> Pilidia ami biaru abale ibalu Lebaimi dindi ulini wiagoria anda ibuwa mbirale bibahende wiaruni ti mo yai hene. <sup>10</sup> Ani anda ibu heagola Debidihanda Anduane Homogohondo hale halu lalu, Ina Pilidiali uruni baba wai bule poabe. Wai bule piruyagua ina ti bai halu wayali holiya ina i biamogo buleberebe, lalu hale hene.

Ani hale hayagola Anduane Homogohanda ladai bialu lalu, Karulapego ina i wayali habelo waitigi uruni inaga giha minu ya holeberogo wai bule pu, lene. <sup>11</sup> Ani laya handala Debidi ibu Bala Perasimini dindi puwa Pilidiali biaru baba wai bialu wayali hene. Wayali howa Debidihanda lalu, Anduane Homogohanda iba li hongohe poradagua bialu i waitigi hearu bo gialo yaga bima yupe hayagoni, lene. Anidagua binidagonaga dindi ogoni mini Anduane Homogohanda Bo Gialo Wahene laga wini. <sup>12</sup> Pilidiali biaru ti ibida pialu tinaga dama mitangi bialu bi pupu wulenaga gime wabini yu heneyaru yu wahalu piyiyagola Debidi haluibunaga ami biaru tigua mo yuwa irani delai hene.

<sup>13</sup> Ani bialu pu heagola Pilidia ami biaru Lebaimi dindi ulini biagoria wai taya lone dai buwa mbirale wiaru mo yalu hene. <sup>14</sup> Ani heagola Debidi ibugua Anduane Homogohondo hale halu lalu, Ina agua buabe, lene. Ani layagola Anduane Homogohanda lalu, Tigua wai bule pudaba. Pialu howa waitigi kagoha abale pogolape halu napilimu. Ohalu ti erembira ngagohayagi puwa amu ira mini balasama kagoha wai bule manda manda bu halimu. <sup>15</sup> Ani howa hale halu kamiria agali maru uyu ira manemaneha tidiyu howa wai dagia ale balu haruane hale holeberemi. Anidagua balu haruane hale harimiyagua Pilidialiru baba wai bule ini ala bamba halu piarua lo manda bialu tigua wai bule gerai pialu wai bilimu, lene. <sup>16</sup> Ani laya handala Debidi ibu Anduane Homogohanda layadagua bialu puwa Isaraeleali ami biarume Pilidiali ami biaru mo ko howa bo podama pialu Gibeono tanoni bo podahana halu amuraore Gese tano puabo hene. <sup>17</sup> Dindi tara taraha hameigini tara hearume Debidihanda biyagoni hale hayagola Anduane Homogohanda ti mo gi hene.

✧ 13:14: 1 Bit 26.4-5

## 15

### *Habo Nalolene Bi lo winigonaga Mbogoyi Yarusalemene yalu ibule mo penego ogo*

<sup>1</sup> Debidihanda ibunaga anda dewa Yarusalemene binigo ai Yarusalemene Debidinaga tano laga wini. Ani bialu ibugua Ngode Datagaliwabenaga Habo Nalolene Bi lo winigonaga Mbogoyi biago wulene dindi henge mo manda manda buwa ogoriani balai anda bu helene. <sup>2</sup> Ani buwa Debidi ibugua lalu, Anduane Homogohanda Libai hameigini dabowa ti hangume Habo Nalolene Bi lo winigonaga Mbogoyi ogoni mo yulenebi tigua ibunaga biabe bialu haabo holenebi nga laya, lene. <sup>3</sup> Ani lowa Debidihanda Isaraele wali agali bibahende olo mogo buwa Habo Nalolene Bi lo winigonaga Mbogoyi ogoni ibugua henge mo manda manda bu wiyagoria ngelo mo yu pudaba lole olene. <sup>4</sup> Ani bialu ibugua loma binigo mo miaga Arono aria bu hearubi Libaiali hearubi mo ngoai hene. <sup>5</sup> Libaiali uruni tinaga mini uru. Kohada hameigini Uriele henego ibu haguane howa ibugua agali ibuni aria handari mbirani pira kira (120) haru haga hene. <sup>6</sup> Ani bialu Merari hameigini Asaia henego ibu haguane howa ibugua agali ibuni aria handari kirani pira kira (220) haru haga hene. <sup>7</sup> Gesono hameigini Yoele henego ibu haguane howa ibugua agali ibuni aria handari mbirani pira tebira (130) haru haga hene. <sup>8</sup> Elisabana hameigini Semaia henego ibu haguane howa agali ibuni aria handari kira (200) haru haga hene. <sup>9</sup> Heberono hameigini Eliele henego ibu haguane howa ibugua agali ibuni aria pira halira (80) haru haga hene. <sup>10</sup> Usiele hameigini Aminadaba henego ibu haguane howa ibugua agali ibuni aria handari mbirani hombearia (112) haru haga hene.

<sup>11</sup> Ani bialu Debidihanda loma binigo mo miaga Sadogobi Abaiadabi heba Libai hameigininaga agali haguane waragaria Uriele Asaia Yoele Semaia Eliele Aminadaba biaru bibahende ibilo olene. <sup>12</sup> Ibiyagola ibugua tihondo lamialu lalu, Libai hameigini agali haguane kamiru tini heba ti aria bu karuni bibahende Anduane Homogonaga deni tini dodo nahe hole biaga mana ngadagua bilimu. Anidagua biai howa Anduane Homogo Isaraelenaga Ngode Datagaliwabe kagonaga Habo Nalolene Bi lo winigonaga Mbogoyi biago Yarusalemene dindi ina mo manda manda bidogoria ngelo mo yalu ibalimu. <sup>13</sup> Ai iname pigane mo pirimangi ti baba mandagi mo pu nabirimagoni ndobe. Iname mo yu ibalu howa Anduane Homogo inanaga Ngode Datagaliwabhondo agua yalu ibuleberemabe lalu hale nahe howa mana tigabi bulene wiadagua nabi bame yu ibalu hemaria ibugua inahondo keba halu minu baya, lene.

<sup>14</sup> Ani layagola Libai hameigini hearumebi loma binigo mo miaga hearumebi Anduane Homogo Isaraele wali agalinaga Ngode Datagaliwabe ibunaga Habo Nalolene Bi lo winigo Mbogoyi biago mo yule howa tini Anduane Homogo deni dodo nahe holenaga mana biaga winigo bini. <sup>15</sup> Ani buwa Libai hameiginidarume Mbogoyi ogoni mo yalu ibule howa tigua bamba Anduane Homogohanda Mosesehondo lalu, Habo Nalolene Bi lo winigonaga Mbogoyi ogoni mo yule howa mana ogodagua bilimu, lalu lowinigo bialu mo yule pene. Tigua Mbogoyi ogoni iraho yulenaga ira helagago payani yalu pene. <sup>16</sup>

<sup>16</sup> Ani bialu Debidihanda agali Libai aria biaruhondo lamialu, Agali marume Habo Nalolene Bi lo winigonaga Mbogoyi mo yalu ibalu howa ngida aleru balu iba ganaru lama mo yalu ibalimu, lalu lamini. Tigua ngida aleru hongo howa balu pilipe hongo howa pulalu ngilingele lagane beledi boronosime wabini ngaru hongo howa balu ti turu timbuni kamigo walia halu lama ibalimu, lene. <sup>17-21</sup> Ai agali haguane biaru tigua agali mbira mini Yoele igini Hemana dabalulu ibu damene Beregaia igini Asababi Kusaia igini Edanabi ti dabene. Agali uruni tigua iba ganaru lalu beledi boronosime wabiniru ngilingele lagane belo dabene. Ani biyagola Libaiali marume agali tebirali uruni biamogo bialu tigua ngida ale tara bi daliga ladaga haga wiaru belo dabene. Agali ngida uruni ale бага biaru ti mini Segaraiabi Yasielebi Semiramodobi Yahielebi



Unibi Eliababi Maseabi Benaia dabo helene. Ani bialu agali marume ngida ale tara bi dindihaore ladali haga wiago belo dabene. Agali uruni ti mini Madidaiabi Elibelehubi Miginaiaibi Asasaiabi dabalu Obededomo Yaelela libu agali Anduane Homogonaga anda haraba wiago mamage haga biagobi dabene.

<sup>22</sup> Agali mbira mini Kenanaia heago ibu iba gana lolenebi ngida ale tara tara bolenebi manda biaihe henego ibugua Libaiali uruni bibahende biabe ogoni bayuwa bilo handayaho haabo helo dabo helene. <sup>23-24</sup> Ani dabalu agali mariali Beregaiabi Eleganabi Obededomobi Yahaiaibi tigua Habo Nalolene Bi lo winigonaga Mbogoyi handaya howa mamage helo dabo helene. Loma binigo mo miaga marume Mbogoyi yalu poragola ti bamba halu biguli pu lama pelo dabo heleneru ti mini uru. Sebanaia Yosabada Nedanele Amasai Segaraia Benaia Eliesa laga biyaru hene.

*Anduane Homogonaga Habo Nalolene Bi lo winigonaga Mbogoyi Yarusaleme yalu ibinigo ogo*

*(2 Samuele 6.12-22)*

<sup>25</sup> Mani howa Kini Debidi ibubi Isaraele agali haguaneerubi ami haru hagarubi ti bibahende Obededomo andaga puwa Anduane Homogonaga Mbogoyi biago Yarusalemeni mo yu dai bule pene. Anidagua yalu ibiyagola wali agalime turu timbuniore hene. <sup>26</sup> Ngode Datagaliwabeanda Libaiali Mbogoyi biago mo yalu piyaru biamogo biyagonaga tigua nogo bulumaga wangabe kariabi sibi dalua haba tigi kariabi ibuhondo loma bialu bo delene. <sup>27</sup> Debidi ibunibi Libaiali Mbogoyi biago yu hayarubi iba gana lalu hagarubi tinaga haru haga agali mini Kenanaia ibubi aga pele taraore mbira mbira karulaga bini. Debidi ibu aga mende loma binigo mo miaga agalinaga aga mini ebodi karulowa turu halu Anduane Homogonaga mini yaraga halu turu hama pene.\* <sup>28</sup> Ti ogonidagua bialu Anduane Homogonaga Habo Nalolene Bi lo winigonaga Mbogoyi biago Debidi Isaraele wali agalibi tigua Yarusaleme mo yalu pene. Tigua turu timbuni howa ga lalu ngida ale tara tara balu pilipe ale pulalu bigulibi pu lama pene.

<sup>29</sup> Tigua Mbogoyi biago Debidinaga tano biagoria yu anda ibiyagola Solo wane Migala ibu andaga windoha handatagi halu hearia ibu agalini Kini Debidi ibu turu howa mali lima pogoladaga haga bima ibalu hearia hendene. Anidagua biyago hondowa Migala ibugua turu nahe howa Debidihondo keba howa yo hondo berene.

## 16

<sup>1</sup> Tigua Mbogoyi biago yalu puwa Debidihanda balai anda mbira ala bu manda mandabu helenegoha mo ngelene. Ani ngelowa tigua loma biniru irame dai helo bo delalu Anduane Homogola ho gimbu bulenaga loma binirubi bo mialu bini. <sup>2</sup> Loma uruni delai howa Debidihanda wali agali bu hearuhondo lalu, Anduane Homogo kago ibugua ti mo bayale helo, lene. <sup>3</sup> Ani lowa Debidihanda wali agali uruni tomo nelu mini. Debidi ibugua tihondo mberedi mbira mbira ta halu nogo bo hiririmigonaga mbirinibi gerebi lini maru do gembe bu wiarubi wali agali hearu mbira mbira ta halu nai helo miyagola nalu tini andaga pugu pugu bini.

<sup>4</sup> Debidi ibu Libaiali maru ti Habo Nalolene Bi lo winigonaga Mbogoyi wiagohayagi puwa Anduane Homogo Isaraele wali agalinaga Ngode Datagaliwabe mini mo yaraga halu iba gana lelo dabo helene. <sup>5</sup> Asaba ibu haguane howa haru helobi Segaraia ibu biamogo bilobi dabo helalu agali maru Yaiele Semiramodo Yahiele Madidaia imaru Eliaba Benaia Obededomo Yaiele imaru ti nde ngida ale baga helobi Asaba ibu ngilingele lagane beledi boronosime wabini balu helobi dabo helaga bini. <sup>6</sup> Ani buwa Habo Nalolene Bi lo winigonaga Mbogoyi wiagohayagi puwa loma binigo mo miaga Benaia Yahasielela libu biguli pulalu helo Debidihanda dabo helene. <sup>7</sup> Debidi ibugua

\* 15:27: Aga mini ebodi Har 25.7 garea lo ngago handabe.

biabe uruni pigane Asababi Libaiali marubi ti Anduane Homogonaga mini yaraga haga bilo dabo helene.

*Anduane Homogo mini yaraga halu iba gana lenego ogo  
(Iba Gana 105.1-15, 96.1-13, 106.1,47-48)*

<sup>8</sup>Iname Anduane Homogohondo turu howa kai lalu  
ibu daliga gibiore ka lalu lamiai hamiya.

Wali agali hameigini dindi tara tarani paluyu pedaru ti bibahendehondo ibugua gibiore uruale biya laga bialu  
hale hai helo loyogo laga bimiya.

<sup>9</sup>Inameibunaga mini mo yaraga halu iba gana lalu hamiya.

Ibugua mbirale bayale bigi biyarunaga bibahende hale hai helo laraga halu lamiai hamiya.

<sup>10</sup>Anduane Homogo ibu mini tigabiore kago

inaibunaga kamago iname ibuhondo turu hamiya.

Wali agali Anduane Homogohanda hame ledadagua biaga kamaru ina turuhu holene nga.

<sup>11</sup>Anduane Homogohanda ina biamogo bilonaga ibu karia puabo hamiya.✧

Iname Anduane Homogo ibu kagoha kaware haparaho haabo hamiya.

<sup>12-13</sup>Anduane Homogonaga biabe bia hagane Abarahama aguanene kamirubi

Anduane Homogoibunime dabene Yagabanaga aguanene kamirubi

tigua Anduane Homogohanda manane tara tara agalime nabiagane ale bigi biyarubi

wali agali ko biaga hearuhondo pani migi biyarubi mitangiore biaabo halimu.

<sup>14</sup>Anduane Homogo ibu inanaga Ngode Datagaliwabe kagoni.

Ibunaga mana lo ngaruni wali agali dindi bibahende ha bu karume bilonaga lo nga.

<sup>15</sup>Ibugua habo nalolene bi lowinigo ngaruni wia aji ajiore bulebira.

Ibugua bi lo wialu ogoale bulebero laga bialu lo ngaruni

mani hama porarume handaga bialu karia wia aji ajiore bulebira.

<sup>16</sup>Ibugua Abarahamala habo nalolene bi lo wialu✧

Aisagahondo ogoale bulebero lenegobi heneneore bulebira.

<sup>17</sup>Anduane Homogo ibugua Isaraelehondo habo nalolene bi lowinigo✧

ogoni wali agalirume bialu haabo helonaga lowini.

<sup>18</sup>Anduane Homogo ibugua Isaraelehondo lalu,

Ina tihondo Kenana dindi karulalimulo ngulebero.

Dindi ogoni tibi tinaga waneigini mani holebilarubi

tininaga dindi ogoniore halimulo ngulebero, lene.

<sup>19</sup>Ala Ngode Datagaliwabenaga wali agali ti dewa ndo henedaruni

ti emene mbira hangu Kenana dindini hene.

Ti dindi tene ndo mendeali dindini bame igiri yango pu haradagua bini.

<sup>20</sup>Ti dindi mbirani baya hangu ho dambolo hene ndo.

Ti togolo yalu pialu dindi wiaruni bibahende ha ge hai haga hene.

Kini mbiragonaga dindiha puwa emene tigimandi dege halu lone hili yalu pialu

kini mende heagonaga dindiha pu halu ani bigi bialu hene.

<sup>21</sup>Ti ani bu ha heagolabi hameigini maru hongohe hearumeibunaga wali agali uruni  
hengedope holilono✧

Ngode Datagaliwabe ibugua ti mamage hene.

Mamage howa ibugua kini hearu talialu

ibunaga wali agali urunihondo kagua mbira bulumini lalu lamini.

<sup>22</sup>Ibugua lalu, Inaga biabe bihaga inime dabene karu mo ko holemini.✧

Inaga mana latagi haga karuore mbira ela nahalimu, lene.

23 Anduane Homogohondo iba gana gahenge lolene nga.

Ibugua ina haru dai bialu pele ngiyagoni lalu

horo bibahendengi wali agali bibahendeme hale hai helo lamiaaboore halimu.

24 Ibu daliga gibiore ka lalu hameigini bibahende paluyu pedaru hale hai helo lamilimu.

Ibugua biabe timbuni bayale bima piyarunaga wali agali lamiai halimu.

25 Anduane Homogo ibu daliga gibiore kagoni.

Iname ibunaga mini uyura mo yaraga haabo halu hamiya.

Mbirale wali agalime dama mitangi bialu gime wabini ngaru hondowa ina gi holene nawi.

Anduane Homogo ibu dege daliga gibi kago

iname ibu hondowa dege giho holene nga.

26 Wali agali hameigini tara tarame mbirale dama mitangi bialu tini gime

wabiniruhondo bi pupu wiagaru<sup>☆</sup>

uruni bibahende ke howa hangu bialu kagoni.

Inanaga Anduane Homogo ibugua hari daligabi

mbirale bibahende hariha karubi ngarubi wabinigo

ibuni hangu daliga gibiore kagoni.

27 Anduane Homogo ibu kini howa wa holenebi mini mo yaraga holenebi ibunaga

hangu ngagoni.

Ibunaga anda lomabu heleneni mbirale bu ngarume

Anduane Homogo ibuni hongohe howa ibuni baya buruguleore agi loabe tobahe kagobi

walia ho nga.

28 Wali agali dindini bu kamiru bibahendeme Anduane Homogonaga mini mo yaraga halimu.

Ibunaga wa holenebi hongo holenebi daliga gibiore nga lalu ibunaga miniore yaraga halimu.

29 Anduane Homogo ibunaga mini timbuni daligaore ngago mo yaraga halimu.

Anduane Homogohondo mbirale mbira lomabu migi bule yalu

ibunaga andaha anda ibugu bilimu.

Wali agali bibahende kamiru

Anduane Homogo ibu baya buruguleore kagoria ibalu

bulu palialu ibunaga lotu lalu halimu.

30 Ibu gibiore kago hondowa ti duru ala lalu halimu.

Dindi timbuni o ngagoni ibunime wabu winidagua

ema bialu girigurabi mbira nabuleore ngagoni.

31 Dindi timbuni ogo ibi hari li kego ibi libu nde turu halibu.

Wali agali tara tara bibahende bu hama pedaru lamialu,

Anduane Homogo ibu kini ka, lalimu.

32 Iba solowara i nde tigitugu lalu ininaga bi dalimu labe.

Mbirale iba solowaraha biru ngamiru ti nde bi ladagadaga bialu tininaga bi ladaba.

Mabu wima pedamirubi mbirale mabuni andaho hama pedamirubi ti bibahende turu timbuniore ho halimu.

33 Anduane Homogo ibuni dindi ogo bibahende handagimbu buwa haru hole ibulene

tu harangi

ira teha ira bu karume turu gibiore howa tininaga bi lalu bi dalimu lagalaga bulebira.

☆ 16:26: LBM 19.4

<sup>34</sup> Anduane Homogohanda mana bayale biaabo haga kagonagabi<sup>☆</sup>  
 ibunaga gubalini holene ha ho wiaabo haga kagonagabi  
 iname ibuhondo kaj lalu hamija.

<sup>35</sup> Iname Ngode Datagaliwabe inanaga Pele Ngiaga kagohondo bi ogodagua lamija.  
 Ina ina bibahende mo mogo bialu  
 waitigi karunaga giha howa yamialu  
 inanaga dindini lone holomaya haru dai bu helabe.  
 Iname ihondo turu halu kaj lalu  
 inaga mini baya buruguleore yaraga halu holomaya ina ani bibe larama.

<sup>36</sup> Anduane Homogo Isaraele wali agalinaga Ngode Datagaliwabe kago ibu mini yaraga hamija.

Áyubi maniore howabi ibunaga mini yaraga haaboore hamija.  
 Wali agali bibahendeme ani lowa tigua, Henene aniore bilo.  
 Anduane Homogonaga mini yaragaore hama, lalu hene.

*Yarusalemehabi Gibeonohabi Anduane Homogo mitangi bialu lotu lolene winigo ogo*

<sup>37</sup> Kini Debidi ibugua Anduane Homogonaga Habo Nalolene Bi lo winigonaga Mbogoyi wiaria agali mini Asababi Libaiali marubi ti lotu lolene haru haabo helo dabo helene. Horo bibahendengi ti biabe ogoni bulene ngadagua biaabo helo helene.

<sup>38</sup> Yadudunu igini Obededomobi ibu hameigini pira waragariani halirabi (68) tigua Asaba biamogo bilo Debidihanda ti dabo helene. Hosa Obededomola libugua panga haraba mamage haga hene.

<sup>39</sup> Debidihanda loma binigo mo miaga Sadogobi ibu ariabi tigua Gibeono tanoha Anduane Homogo mitangi bialu lotu lolenaga haru helo dabo helene. <sup>40</sup> Anduane Homogohanda mana lo wialu Isaraele wali agalihondo minigodagua tigua horo bibahendengi egerebagi alendobi nogo bulumaga sibiru lomabu delaga dabu heagoriani nogo bo delai haga wini. <sup>41</sup> Agali uruni heba Hemana Yadudunula agali maru hearubi ti nde ala Debidihanda Anduane Homogo gubalini haabo hagagonaga mitangi bialu ibu mini yaraga halu iba gana lalu helo dabeneru ti hene. <sup>42</sup> Hemana Yadudunula libugua biguli alebi ngilingele lagane beledede boronosime wabu wiarubi bi lagane marubi iba gana lalu Anduane Homogo mini yaraga halu howa бага heneru bibahende haru haga hene. Yadudunu hameigini hearume Anduane Homogonaga anda panga haraba wiagoriani mamage haga hene.

<sup>43</sup> Ani biaiore halu wali agali bibahende andaga pugupugu bini. Debidi ibubi nde ibu one waneiginiru Anduane Homogohanda ti mo bayale helo lowa ibuni andaga hama pene.<sup>☆</sup>

## 17

*Anduane Homogonaga bi mana latagi haga Nadanahanda Debidihondo bi laminigo ogo*

*(2 Samuele 7.1-17)*

<sup>1</sup> Debidi ibu ibuni andagaha howa mani ibugua Anduane Homogonaga bi mana latagi haga Nadanahondo lalu, Ini anda ira tamia bayalegome binigoha bedogodago Anduane Homogonaga Habo Nalolene Bi lo winigonaga Mbogoyi biago dege balai anda biagoha wiaruago tiga nabida, lene.

<sup>2</sup> Ani layagola Nadanahanda ladai bialu lalu, Anduane Homogo ibu ila mandagi haabo kagoni. Ina mbirale mbira bule manda bidedagua nde bibe laro, lene.

<sup>3</sup> Anigo horo ogoningi mbiraga Anduane Homogohanda Nadanahondo lalu, <sup>4</sup> Ina inaga biabe bihaga Debidi karia puwa ina bi o larogo ibuhondo lamibe. Debidi-o í agali

<sup>☆</sup> 16:34: 2 Bit 5.13, 7.3, Esr 3.11, Iba 100.5, 106.1, 107.1, 118.1, 136.1, Yar 33.11    <sup>☆</sup> 16:43: 2 Sml 6.19-20

anda i holiyanaga bia helo dabo heledogo ndo ke. <sup>5</sup> I anda timbuniha nahaga kogoni. Bamba Isaraele wali agali Iyibi dindiha howa haru tagira pirugongi howabi maruha pu ibu bialubi i balai andaha dege haga harugoni ko. <sup>6</sup> Ini Isaraele wali agali ti haru mandagi dindi dewani ibagabu haabo harimago howa tinaga agali haguane ina dabalu helarurunihondo lalu, Ira tamia bayale karume inaga anda mbira bia nahe kamigo agibe, lalu hale naharuligoni, lene.

<sup>7</sup> Anduane Homogohanda Nadanahondo laabo halu lalu, Inaga biabe biahaga Debidi-hondo au labe, Anduane Homogo Hongo Haiheore kago ibugua ihondo bi ogodagua layago hale habe. I bamba nogo sibi haru haga heria inime i dabalu ina Isaraele wali agali haru habelo agali haguane dabo helarugoni ke. <sup>8</sup> Dindi bibahende i ibaga bialu piriruniha ini iya haru mandagi ibagabu haabo haribagoni. Ani howa inime dege waitigi ibiyaru wai bialu bo podahana haga birugola i wayali harigoni. Ai inime i agali mini lene timbuni dindi maruha karubi dege habelo ina i mo yaraga holebero, laya. <sup>9-10</sup> Inaga Isaraele wali agali ti bayaleore halimulonaga dindi hobane bayale mbira tinaga mo wia ko. Bambaore agali ko bu hearume ti mo ko haabo hayadagua mani ti mo ko naholebira. Tinaga mamalirume dindi ogo pigane karulayangi howa bialu henego bima ibalu ina tinaga agali haguane dabo helaga birugolabi tinaga waitigime ti mo ko haabo haya, laya. Ani biyago ayu ina uruni ti mo batara harogola urunidagua nabi tinaga dindi ogobi lone mo ko naholebira. Ani kamigola ina i dameneru baya hanguore hai helarogola tigua inaga aguaneru dewaore helo hono wigi bulebira, laya. <sup>11</sup> I homaregola inaga mamaliru hora henegoha dege hora kang i igini mbira kini ha aribia helo dabo helolebero. Ani berogola ibu kini hongoheore mbiralime ibu bope habe nahe holebira. <sup>12</sup> Kini ogoni ibugua wali agali ini koria kaware ibilonaga inaga anda bulebira. Ani biragola ina maninaga ibu igini aguanerume dege kini haabo helolebero. <sup>13</sup> Ani helowa ibu aba ini kogola ibu i igini holebira. Ina ala Solonaga henge wiago ihondo ngule ibu erembira mirugodagua i iginihondo ani nabi gubalini haho wiaabo helolebero.\* <sup>14</sup> Ani helowaibunaga waneigini aguaneru halu ereba nahe kini ha aribia haga bima puabo helolebero, laya lalu Debidi lamibe, lalu Anduane Homogohanda Nadanahondo lene.

<sup>15</sup> Anduane Homogohanda bi ogonidagua lamiyaruni Nadana ibugua hale howa Debidi lamiai hene.

*Debidihanda Anduane Homogohondo bi lalu kai lenego ogo  
(2 Samuele 7.18-29)*

<sup>16</sup> Nadana ibugua Anduane Homogohanda bi anidagua laya lalu lamiyagola Debidi ibugua hale halu Balai Anda Anduane Homogo ibuni heagoha pu biruwa lalu, Anduane Homogo Bibahende Haru Haame Haga-o ina ihondo bayale dewaore birida. Ani bialu inibi inaga waneigini damene bu karubi ina bayale ndo hemaria anidagua biridagoni. <sup>17</sup> Anduane Homogo Bibahende Haru Haame Ho Haga-o ina ihondo bialu hariruni bibahende bayale dege biaabo harigo ai uruni emene degeyane mbirale bayale ayu uruni lone biatago harida. Anduane Homogo-o ina i damene mani holebirarubi mo bayale holebero larigo ai i agali nagaloneore kogoni ndobe. Ani ha holiya dege ina ihondo mbirale bayale timbuni ihondo bule ngeru walia harida. <sup>18</sup> Ina urunidagua biridagonaga ina ihondo bi agua loabe. Inaga biabe biahaga agali i kogoni ini manda bide. <sup>19</sup> Ani manda buwa ina bi lo wirigonagabi inime bule hame ledegonagabi ayu ihondo inaga mana bayale biaga ngego i mo walia kegoni. <sup>20</sup> Anduane Homogo-o i duniniore kegonigo i ale mende naheore. Ngode Datagaliwabe i hangu kegoni lalu ina mamalirume langigi biyane hale harima. <sup>21</sup> Ina Iyibi dindiha garabaya hemaria ina Isaraele wali agali bibahende garabaya golalu haru tagira ibuwa ininaga wali agali

\* 17:13: 2 Bit 6.18, Hi 1.5



holomaya helarigoni. Ani helowa wali agali maru ina kamarubi naheore. Ina dindi áyu kamagoria ibulumaya ina mbirale bayale tara tara nahendene ale wiarubi biai harigola inanaga dindi ogoria ibinigo kamagoni. Wali agali dindi ogoriani ala hene hearu ina bo batagi hai halu tinaga dama mitangi bialu gime wabini wiaruni bo giallo wahai harigola dindi dabulu wiaru mo ngirigola karulo kamagoni. Anidagua birigola wali agali dindi bibahendeha karume í mini lene taraore ke lowa inaga mini yaraga halu ka. <sup>22</sup> Anduane Homogo-o ina Isaraele wali agali kamaru ininagaore holomaya dabo helowa ina ani haabo holomaya helarigoni. Inibi nde inanaga Ngode Datagaliwabe haabo ho kegoni.

<sup>23</sup> Anduane Homogo-o áyu ina inaga dameneruhondobi inaga biabe biahaga inihondobi buleore lalu bi lo wiriruni biaaboore habelo hameledo. Ina bulebero lo wiridagua bibe laro. <sup>24</sup> Wali agali bu karume ina inahondo anidagua berego hondowa tigua inaga mini yaraga helo ani bibe laro. Ani beregola tigua lalu, Anduane Homogo Hongo Haiheore Kago ibu Isaraele wali agalinaga Ngode Datagaliwabe kagoni, lalu inaga mini yaraga holebira. Ani lalu kagola ina inaga aguane holebiraruha howa dege kini helo dabaga bialu haabo holebira. <sup>25</sup> Inaga Ngode Datagaliwabe-o inaga biabe biahaga ihondo lalu, Inaga aguaneneru bayale helonaga mo hongo holebero, lalu langirigonaga inaga biabe biahaga ini kogome ihondo gi nahe howa bi ogoni langerogoni. <sup>26</sup> Anduane Homogo ini hanguore Ngode Datagaliwabe kegoni. Ina mbirale mbira bule lalu lo werego biaore biaga kegoni. Ani biagaore kogome áyu howa ihondo heneneore mbirale mbira bule lalu bi lo wirigoni. <sup>27</sup> Ani bule lalu lo wiridagua bialu inaga damene mani holebirarubi ini andaneha howa bayale haabo helo helabe laro. Anduane Homogo-o ina bi ogoni heneneore lo wirigome turu howa biamogo buleneru inaga aguaneneruha wiaabo holebira manda bido, lalu Debidihanda Anduane Homogohondo bi anidagua lene.

## 18

### *Debidibi ibunaga amirubi ti wai bialu wayali henego ogo*

#### *(2 Samuele 8.1-18)*

<sup>1</sup> Mani emene howa Debidibi ibunaga ami agalirubi tigua Pilidialiru baba wai bini. Ani buwa tigua Pilidialiru bo poda hana hayagola Pilidialirume Gede tanobi tano emene maru kawareni wiarubi handayaho haga winiru wahalu pene. <sup>2</sup> Ani piyagola Debidibi ibunaga ami agali biarubi tigua Moabaliru baba wai bialu urunibi bo poda hana hene. Ani bialu Moabali uruni minu garabaya buwa ti ibu dagisi migi bialu helo helene.

<sup>3</sup> Ani helowa mani Debidibi ibunaga ami agalirubi tigua Siria dindi mbira mini Soba wiagoha Kini Hadadese heagola wai bule pene. Ogoningi Hadadesehanda ibunaga amiru haru halu dindi mbira iba Yuberedisi poragohayagi waitigime karulo henego ogoni mo yu dai bule wai bu pene. Ani pu heagola Debidibi ibunaga ami agali biarubi tigua harigani lola howa <sup>4</sup> ti wai bialu Debidibi ibu wayali hene. Ani buwa Debidibi ibugua Hadadesenaga ami agali dindi dindi piaga daosini dege pira kira (20,000) minu wialu nogo hosini biruwa wai biaga agali daosini mbirani handari karia (1,700) minu wini. Ani bialu nogo hosime gili laga karisi handari mbira (100) mo wini. Ani buwa Debidibi ibugua nogo hosi maru karisi handari mbira (100) gili lalu polenaga helalu marunaga ge bo polaga biyagola ge hongo halu pobe nahe hene.

<sup>5</sup> Ogoningi Siriali maru Damasaga dindiha hearu tigua Kini Hadadese biamogo bialu wai bule pene. Ani piyagola Debidibi ibunaga ami agali biarubi tigua wai bialu Sirianaga ami agali biarubi daosini dege pira kirani kira (22,000) bo wahai hene. <sup>6</sup> Ani bo wahai howa Debidihanda ibunaga ami agali maru Sirialime lone heyalu wai ibulilono Siria dindi wiyadagoha mamage hai helene. Ani heleagola Siria wali agali ti Debidibi andaneha howa tinibi ibu dagisi migi bialu hene. Dindi mbira mbiraha Debidibi wai bule pugu biyagola Anduane Homogohanda ibu biamogo biyagola ibugua waitigi bope halu

ibuni wayali haabo hene. <sup>7</sup> Wai bialu howa Debidihanda Kini Hadadesenaga ami agali haguane hearume humbi ngolome wabini yu haga biniyaru mialu Yarusalemeha yalu pudaba laga bini. <sup>8</sup> Ani bialu Debidi ibugua ege tole boronosi dewaore Hadadesenaga tano kira Tibihada Kunulaha wiaria mo yini. Mani Solomonohanda boronosi ogonime iba dangebi anda gene luni kirabi mbirale tara tara Anduane Homogonaga andaha wiagarubi wabini.✧

<sup>9</sup> Ani bialu heagola Hamada dindinaga Kini Toi ibu hale halu hearia Debidihanda Kini Hadadesenaga ami agali bu hearu bibahende bope haya layago hale hene. <sup>10</sup> Ani hale howa Kini Toi ibugua Debidihanda o biyadagoni turu howa ibu igini Yorama Debidi hearia puwa, Ina bayuwaore birida lole pu, lene. Kini Hadadesehandanda Kini Toi ibu bibahendengi bope haabo haga henego ai Debidihanda Hadadese bope hayadagonaga turu howa ani lene. Ani pu laya handala Yorama ibugua yari tara tara ngolomebi silibamebi boronosimebi wabini wiaru mo yaga binigo uruni Debidi mo turu halu bame migi bini. <sup>11</sup> Debidi ibugua mbirale uruni yamialu Anduane Homogonaga loma biaho wigi bini. Ibugua dindi maruha wai bialu ngolo silibaru mo yalu dai bigi bini wiarubi loma biaho ngelaga dege bini. Ani bialu ibugua ngolo siliba uruni minidaru Idomo Moaba Amono Pilidia Amalege dindi uruniha howa mo yu ibugu biyaruni loma dege bini.

<sup>12</sup> Ani bialu henego Abisai ibu aiya Seruia berenego ibu ami agaliru haru halu tigua Idomoali hearu baba wai bule dindi mbira mini Dindi Ulini Ibi Wiaga laga wiagoria pene. Ani puwa tigua Idomoali ami dege daosini pira mbirani halira (18,000) bo wahai hene.✧ <sup>13</sup> Debidi ibunaga ami agali maru dabalulu Idomo dindiha handayaho helo helene. Ani helegola Idomo wali agali ti Debidi andaneha hene. Dindi bibahendeha Debidi ibu baba wai bialu heagola Anduane Homogohanda Debidi ibugua wai buwa waitigi hearu bo podalu bai helo biamogo biaabo halu hene.

<sup>14</sup> Debidi ibugua Isaraele dindi bibahende handame ho howa ibunaga wali agaliru baba mana bayale tigabi bulene wiadagua dege bialu haga hene. <sup>15</sup> Ani bialu heangi agali mini Yoaba ibu aiya Seruia berenego igini ibugua ami agaliru haru bamba haga hene. Ahiludu igini Yahosabada ibu beba gili bia dagala biaga howa ibugua gabumanenaga mbugaru handayaho haga haguane mbira hene. <sup>16</sup> Ahidubu igini Sadogola Abaiada igini Ahimelegela libu Anduane Homogonaga loma binigo mo miaga hene. Seraia ibugua kininaga beba gili bia dagala biaga hene. <sup>17</sup> Ani bialu Yahoiaida igini Benaia ibu nde ami agali maru Kini Debidinaga mamage haga Kerediali Pelediali bu hearu haru helo dabo helene. Debidi giniru ti kininaga biabe hondo haga hene.

## 19

### *Debidihanda Amonoali Sirialila bo podenego ogo (2 Samuele 10.1-19)*

<sup>1</sup> Amonoalinaga Kini Nahasa homayagola ibu igini Hanunuhanda ibu aba henegoria Amono dindini kini ha aribia hene. <sup>2</sup> Ani heagola Debidi ibugua lalu, Hanunu aba Nahasahanda ihondo mana bayale bialu hagadagua inabi nde Hanunuhondo bayale dege bialu holebero, lene. Ani lowa Debidihanda agali maruhondo lalu, Hanunu karia puwa ibu aba homayadagonaga duguanda pialu daraba lole pudaba, lene.

Ani laya handala ti Amono dindiha anda pialu Hanunu hearia ibiyagola <sup>3</sup> Amonoali agali haguane bu hearume Hanunuhondo lamialu lalu, Ina mandabu handalu keria Debidihanda agali o pu layadaruni heneneore i aba dara halu ibunaga mini yaraga hole pudaba lene ibiyadalo manda bidebe. Ani ndoyago. Mani ibunaga ami agaliru haru halu ibuwa ina baba wai bulenaga ayu agali urunime inanaga dindi ngamago abidabe diri hondo wule pudaba lenego ibu ka, lene.

<sup>4</sup> Ani layago hale howa Kini Hanunu ibugua agali Debidihanda bi yalu pudaba lene biaru minu yania howa tinaga angari hearu podo wahene. Ani bialu agali uruninaga aga luni biagimbu biaruni podo tubagi howa here panahe heagola tini dalu dai bilene. <sup>5</sup> Anigo agali biaru ti nde taga timbuni howa tini dalu dai bibe nahe hene. Anidagua biya layago Debidu ibu hale howa ibugua agali biaruhondo bi lo pelalu lalu, Tigua o biyadagoninaga Yarusaleme dai bulenego taga nahalimu. Abale ibalu Yarigo tanoha tinaga angari lone ibilonaga emene hondo halimu. Mani tinaga angari bayale ibidagola nde Yarusaleme dai bilimu, lalu Debidihanda lawia hene.

<sup>6</sup> Ani binigo Kini Hanunubi Amonoali biarubi tigua mandabu handalu hemiria mana lehe o birimagonime Debidihanda ina baba keba helonaga mo tandaga harimadalo mandabu hene. Ani manda bialu tigua agali maru Siria dindiha hearu Mesobodemia dindiha bu hearu bababi agali maru Soba tanoha hearu bababi bi pongo bo wule pene. Dindi uruniha hearu tigua muni siliba kilogarama daosini dege pira tebirani duria (35,000) Mesobodemiali tihondobi Siriali tihondobi wia halu lalu wai biagane garo ale nogo hosime gili lagabi ami agalibi wai bule ibilelonaga bi yalu pelene. <sup>7</sup> Ani bialu tigua Amonoali uruni biamogo bialu wai biagane garo ale mini karisi daosini dege pira tebirani kirabi (32,000) Kini Maganaga amibi tigua Medeba tano kawareni ibuwa balai anda bu hene. Ani bialu Amonoali tiguabi tinaga ami agali haru halu wai bule anda ibini.

<sup>8</sup> Ogonidagua bialu wai bule agali mo mogo bialu ka layago hale howa Debidu ibugua ami haru bamba haga haguane Yoababi Isaraelenaga ami agali bibahendebi wai bule pudaba lene. <sup>9</sup> Ani piyagola Amonoali ami biaru tibi nde Laba tano wiagonaga pabe kawareni handayaho hene. Ani heagola tinaga kiniru wai mogo ibiyadaruni ti nde naina dangi wiagoria tidiyu hene. Ani buwa ti bibahendeme Isaraele ami agaliru baba wai bulenaga dege ona tidiyu haga haga bini.

<sup>10</sup> Yoaba ibugua handalu hearia Isaraele baba wai bule ami agali tidiyu haga haga biaru hondowa wai hama kirani talebu ki howa wai bibeheyane hendene. Ani hondowa ibugua Isaraeleali hongohuru maru tale bialu amu dangi wiagoria tidiyu hearu baba wai bule handayaho helowa ibunime haru hene. <sup>11</sup> Ibu hamene Abisaihandabi nde Isaraele ami agali hearu halu mende haru howa Amonoali hearu baba dege wai bule tidiyu naina handayaho hene. <sup>12</sup> Ani heagola Yoaba ibugua Abisaihondo lalu, Wai bialu howa handalu keria Sirialirume ina bope habeheyane handarimiyagua nde tigua ina mo hongo halu wai bule abale ibalimu. Iname handalu kamaria Amonoalirume ti bope habeheyagua nde inamebi abale ibalu ti biamogo buleberema. <sup>13</sup> Ani bimiyago tigua wai bialu howa gi nahe hongoho halimu. Iname wai bialu howa inanaga wali agali waneigini andaga bu karubi inanaga tano Anduane Homogohanda ina ngini ngamarubi mitangi bialu wai hongo howaore bimija. Anduane Homogohanda nde ibunime hame ledadagua bilo laro, lene.

<sup>14</sup> Ani lalu Yoababi ibunaga ami biarubi tigua Siriali bu hearu baba wai bule hapara halu piyagola Sirialiru ti ibida pene. <sup>15</sup> Amonoali biaru tigua handalu hearia Siriali biaru ibida piyago hondowa Amonoali tibi nde Abisaibi ami agali biarubi ibiya handala ti ibida piai halu tanonaga wai pabe tamuha ha do hai hene. Ani biya handala Yoaba ibugua Amonoali uruni ani helo wahalu ibunaga ami agali biaru haru halu Yarusaleme dai bini.

<sup>16</sup> Siriali biaru tigua handalu hemiria Isaraele agalirume ti bope hayiyane hondowa tinaga ami agali hearu mo mogo bini. Ani buwa tigua agali maruhondo, Siria ami agali maru iba Yuberedisi ange ni tagira ibiragohayagi wai biaga hearu damu pudaba, layagola damu pialu bibahende haru daibu howa tidiyu hene. Ti bibahende ibu ngoaiho heagola Kini Hadadesenaga ami haru haga agali haguane mbira mini Sobaga heagome ami agali uruni haru hene. <sup>17</sup> Siriali biaru ti ogonidagua tidiyu ibu ka layago hale howa

Debidi ibugua ibunaga Isaraele ami agali bu hearu abale olo ngoai hene. Ibu ngoai heagola Iba Yodana doma ede halu Helama dindini ti wai bule pene. Ani piyagola Siriali biaru tigua ho dugu bialu Isaraele baba wai bini. <sup>18</sup> Ani biyagola Isaraele ami biarume wai hongo howaore bialu Siriali bo badai bini. Horo ogoningi Debidibi ibunaga ami agalidarubi tigua Siria ami agali karisini heyu howa wai biaga hearu daosini karia (7,000) bo wahalu nogo hosini biruwa wai biaga daosini dege pira maria (40,000) bo wahene. Ani bialu Sirianaga ami haru haga agali haguane Sobagabi wai hamani bope hayaore abale tongolo mini. <sup>19</sup> Abale kini maru Sirianaga Kini Hadadese andaneha haga henerume handalu hearia Isaraeleali ti hongoheore howa Siriali bope hayago hondowa tigua Isaraeleali baba wai palialu ti Debidinaga andaneha hene.

Ani buwa Siriali biaru tigua Isaraealiru hondowa gi timbuni halu tigua Amonoaliru lone biamogo bulene manda nabi wahene.

## 20

### *Debidihanda wai bialu Laba tano karulenego ogo (2 Samuele 12.26-31, 21.15-22)*

<sup>1</sup> Mali bibahendengi dalu dagarebi ereba haragola ami agali wai bu piaga wini. Mali mbira howa ani bu piaga winingi dege ami haru haga agali haguane Yoabahanda ami haru howa Amonoalirunaga tano timbuni Laba wiagoria wai hongo howa bialu bo podama anda pialu karulene. Debidi ibu dege wai nabupe Yarusalemeni hondo hene. Ami biaru tigua ho mabu buwa wai bialu Laba tano bo haealabaga bini. <sup>2</sup> Ani anda puwa Amonoali kini heagonaga manda ngolome wabini karulo bereago Debidi ibunioreme golo yini. Manda ogoni ngolome wabinigo genda magi kilogarama pira tebirani duria (35) agima wini. Manda ogoni tole baya tara mbira muni dewaoreme yolo biaga wiagome yari bia heneyago Isaraeleali ami biarume Debidinaga hagianeni mo karula hene. Ani bialu Debidi ibugua tano ogoniha howa muni mbiraleru dewaore mo yalu pene. <sup>3</sup> Ani buwa ibugua wali agali Laba tano ogoniha heneyaru bibahende minalu biabe tara tara dindi aluenerubi ayume bulene wiarubi some podolene wiarubi biai helo mo ta hai hene. Amono dindiha tano wiaru bibahendeni wali agali bu hearume ogonidagua biai hene. Ani biai halu mani emene howa Debidibi ibunaga ami biarubi ti Yarusaleme dai bini.

### *Isaraealime Pilidiali lu timbuni hearu baba wai binigo ogo (2 Samuele 21.15-22)*

<sup>4</sup> Emene howa Pilidiali Isaraealila wai bialu howa Debidibi ibunaga ami agalirubi ti Pilidialiru baba wai bule tidiyu pene. Ti Gese tano kaware puwa Isaraele agali mbira mini Sibegai ibu Husa tanoali howa ibugua wai bialu Pilidiali lu timbuni ala henerunaga aguanene mbira mini Sibai heago bo wahene. Ani bo wahalu Isaraeleali ti wayali hene.

<sup>5</sup> Wai halu mende biyangi Isaraealiru tigua Pilidialiru baba wai bialu howa Bedelehemeali Yairi igini Elehanana ibugua Pilidiali mbira Gede tanoali mini Lami ibu Golaidi hamene heago bo wahene. Agali o biago ibunaga yandare endene timbuniore kuluba ale mbira yu haga henego bene. <sup>6</sup>

<sup>6</sup> Gede tanoha dege wai mende bialu hene. Horo ogoningi agali timbuni gibi mbira luoreni ibunaga gi hondone waragaria labolabo halu ge hondonebi waragaria degehe hene. Gi hondonebi ge hondonebi lamaga halu pira kirani mariahe (24) hene. Ibu agali lu timbuni ala henerunaga aguanene hene. <sup>7</sup> Agali ogoni ibugua Isaraele wali agali mege bialu heagola Debidi hamene Sama igini Yonadanahanda agali ogoni bene.

<sup>8</sup> Agali lu timbuni tebira uruni Pilidiali Gede dindiha bamba heneru aria hearia Debidibi ibunaga agali biarubi tigua bo wahene.

☆ 20:1: 2 Sml 11.1 ☆ 20:5: 1 Sml 17.4-7

## 21

### *Debidihanda Isaraele wali agali bibahende dagalai henego ogo (2 Samuele 24.1-25)*

<sup>1</sup> Isaraele wali agaliru mo ko holene hamelowa dama Heyolabeme Debidi mo manda bia halu Debidihanda Isaraele wali agalibi Yuda wali agalibi bibahende daga lolene manda bini. <sup>2</sup> Ani manda buwa Debidi ibugua ibunaga ami haru hagane agali haguane Yoabahondo lamialu lalu, Ina ami agali haguane maru hayaruni haru tigua Isaraele wali agaliore bibahende dagalai hole pudaba. Pigane dindi gibuni uyurayagi Dana tano howa dagalama pialu dindi gibuni unurayagi Beaseba tanoni daga lairi halimu. Wali agali agira palirimadabe hondoliya anidagua bilimu, lalu lamini.

<sup>3</sup> Ani layagola Yoabahanda Debidihondo ladai bialu lalu, Kini-o ai inanaga Anduane Homogo Ngode Datagaliwabe ibugua wali agali áyu kamarubi ndo mo dewaore helo. Wali agali uruni bibahendeore ti ininaga andaneha hai kagoni. Anigo iname wali agali daga lolene ogoni inanaga biabe ndo ngagoria ina irane aginaga daga lolene hamelo kebe, lene. <sup>4</sup> Ani layagola kini ibugua Yoababi ami agali haguane maru biarubi tihondo bi hongo howa lamialu, Ina o bule pudaba larudaguaore bilimu, lene. Ani layago hale halu ami haru haga biaru ti Isaraele dindiha puame halu wali agali bibahende hearu dagalai howa Yarusaleme dai bini.

<sup>5</sup> Tigua dai buwa Yoaba ibugua bialu henedaru bibahende ogodagua birima lalu kini hale helo lamialu lalu, Isaraeleali ami habeheru milyon mbirani daosini dege handari mbira (1,100,000) halu Yudali daosini dege handari mariani pira karia (470,000) hearia daga larima, lene. <sup>6</sup> Yoaba ibu Debidihanda wali agali dagalolenenaga te layago hame nale howa ibugua Libai hameiginibi Beniyamini hameiginibi daga nale hene.

<sup>7</sup> Ngode Datagaliwabehanda Debidi ibugua ko timbuniore biyago hondowa ibugua Isaraele wali agali pani mialu mo ko hene. <sup>8</sup> Ogonidagua biyagonaga Debidi ibuni bu miniha genda timbuni yu howa ibugua Anduane Homogohondo bi lalu howa lalu, Ina mini nawi ale howa agali daga larudagome ina mana ko timbuniore bu haruda. Ani birudago ai Anduane Homogo-o ina ko birudago mo wahabe, lene.

<sup>9</sup> Ani layagola horo ogoningi dege Anduane Homogohanda agali bi mana latagi halu mbiwia haga mini Gadahondo lalu, <sup>10</sup> Ina bi o larogo ina Debidi lamibelonaga langero. In Anduane Homogo inaore hariga tebira mo ngerogo inime mbira ogo karulape lalu dababe. Inime ogo bia lalu ihondo langerego ina ihondo buliya langibe, lene. <sup>11</sup> Anduane Homogohanda bi ogoni layago hale howa Gada ibugua egerebagi Debidi ibu heyu bereria Anduane Homogohanda ogodagua laya lalu lamule pene. Ibugua puwa Debidihondo lamialu lalu, Anduane Homogohanda ina bi tebira uru mbirago bilonaga e labelo hameledo laya. <sup>12</sup> Ai mali tebirani hina gari timbuniore Isaraele dindini tagira ibilo hameledebe be ti waitiginaga amirume wai bima lole ibiragola ege tebirani ti ibida pialu ha do holene hameledebe be horo tebiru Anduane Homogohanda ibunaga wai bulene ayu tibu aleme ti balu ibunaga dahuliyalime tinaga dindi bibahendehe warago timbuni tagira mo ibilelo hame ledebe. Ai bi ogoni bayuwa mandaore buwa mbira ogo bilo larego Anduane Homogo ibunihondo lamule poliya langi, lene.

<sup>13</sup> Ani layagola Debidi ibugua Gadahondo lalu, Ina bi áyu langiriruni hale howa genda timbuniore yu bedogoni. Ani bidogo ainde Anduane Homogo ibunime ogoale bule lalu ibugua bule hameledadagua o inahondo bilo waha. Irane ibunime ina dara hai haga kagodago agalime ina mo ko halu belo hame naledo, lene.

<sup>14</sup> Ani layagola Anduane Homogohanda warago ko timbuniore horo ogoningi howa Isaraele dindi bibahendehe ibilene. Ani ibilayagola warago timbuni ogonime Isaraele wali agali daosini dege pira karia (70,000) homai hene. <sup>15</sup> Ani bialu dahuliyali mbira wali agali bo wahama ibiyadagoni Yarusaleme tanoha wali agali bo wahole anda ibini.



Ani ibalu hearia Anduane Homogohanda wali agali mo ko hene bu hearu hondowa dara howa dahuliyali biagohondo lalu, Ai karulapego waha, lene. Ani laya handala dahuliyali biago ibu wahalu widi iranela bo taulalu lini aeanela tale biaga wiagoria hene. Dindi ogoni Yabusu hameigini agali Arauna mbira henegonaga wini.

<sup>16</sup> Dahuliyali ogoni ibu dindi harila dombeneha howa ibugua ayu tibu yagome Yarusaleme bolenaga gi dogolo hearia hondowa Debidibi Isaraeleali wahe miniwirubi tigua dara howa biagane aga wiaru bu howa dindini bulu palu ibira hene. <sup>17</sup> Ani bu wuwa Debidihanda Anduane Homogohondo lalu, Inime wali agali daga ladaba lalu mana koore ogoni birugome ai áyu pani nolomaya ngrigonida. Anigo wali agali darabi uruni tigua ko mbira agi biyagonaga ti pani nelu miribe. Ai tihondo pani merego wahalu ibi i one waneiginirubi inanehondo pani ngia nabiridago, lene.✧

<sup>18</sup> Ani lalu hearia Anduane Homogonaga dahuliyali biagome mana latagi haga Gadahondo lalu, Ina Debididi karia puwa ibuhondo ogodagua lamibe, Áyu ogoni Yabusuali Araunanaga widi gandulo ngelowa bo taulalu lini aeanela mo tale biaga ngagoria puwa Anduane Homogonaga lomabu delaga dabu mbira bia hole pobe, lalu lamibe, lene. <sup>19</sup> Ani laya handala Debididi ibu heyalu Anduane Homogohanda bibe laya lalu Gadahanda lamiyadagua bule dindi podene mbira widi lini do ngelowa lini aeanela mo tale biaga wiagoha pole pene. <sup>20</sup> Araunabi ibu igini maria biarubi biabe bialu haga wiagoria howa handape halu hearia dahuliyali mbira hearia hondowa mogo lalu ibu igini maria biaru ibida pialu bira do hene. <sup>21</sup> Araunahanda Kini Debididi ibiyago de hondowa ibu lola hole puwa ge duli hanga howa kininaga mini yaraga halu ma podope hene. <sup>22</sup> Ani buwa Debididi ibugua Araunahondo lalu, Ina inaga dindi podene mbira widi biabe biaga o ngegoni yolo bulebero. Wali agali warago hongheore áyu balu karuni bibahende Anduane Homogohanda mo wahelonaga ina ibunaga lomabu delaga dabu mbira dindi ogoriani bulene hameledo, lene.

<sup>23</sup> Ani layagola Araunahanda Debidihondo lalu, Kini-o dindi ogoni yolo bibelo hame naledogo bame i habelo ngero. Mbirale mbira lomabu mule hameledogo alebi nogo bulumaga o kagobi lomabu mialu irani dai helo bo delabe. Ani bialu ira widi lini bo tanda laga ngagobi ira nogo bulumaga dariba homagamaga biaga ngagobi bibahende gabuwa lomabu mialu ira ogonime delo delalu widi lini ngarubi Anduane Homogohondo miaiore habe. Kini-o ina mbirale uruni bibahende ihondo ngiai harogoni, lene.

<sup>24</sup> Ani layagola kini ibugua ibuhondo lalu, Ina mbirale inime erekui biabe bialu mini ndogo Anduane Homogohondo lomabu mia nabulebero. Ani buleneore hame naledogo ai inaga mbirale uruni ina yolo buleore bero, lene. <sup>25</sup> Anidagua lalu Debididi ibugua Araunanaga dindibi nogo bulumagabi bibahende muni siliba kina handari duria (500) aleme yolo bini. <sup>26</sup> Ani buwa Debididi ibugua lomabu delaga dabu mbira dindi ogoriani bia howa loma biniru irani dai helonaga bo delalu Anduane Homogola ho gimbu bulenenaga loma biniru bo delalu Anduane Homogohondo bi lalu hene. Ani biyagola Anduane Homogohanda loma uruni dai helo hariha howa ira hedope hene.

<sup>27</sup> Ani buwa Anduane Homogohanda dahuliyalihondo lalu, Inaga ayu tibu yaganeha yabe, lalu lamiyagola dahuliyalime hale howa ani yini. <sup>28</sup> Ani biyago hondowa Debididi ibugua Anduane Homogohondo ina bi larugo hale halu ladai biyadalo manda bini. Ani manda buwa Debidihanda Arauna dindini lomabu delaga dabu wabiyagoria ogonidagua nogo tara tara Anduane Homogohondo loma bialu bo migi bini.

<sup>29</sup> Ogoni biyangi Anduane Homogonaga Balai Andabi lomabu delaga dabubi Mosesehandanda dindi ko iba dalu naibagaha howa wabinigo yalu ibalu Gibeono tanoni mo ngelenego wiaabo hene. <sup>30</sup> Ani winigo Debididi ibu Anduane Homogonaga dahuliyalime ayu tibu yu hayago mitangi bialu gi timbuniore howa ibugua Gibeono dindini Anduane Homogo mitangi bialu lotu lolenaga pobe nahe hene.

## 22

<sup>1</sup> Ani bialu Debidi ibu Arauna dindini haabo howa ibugua lalu, Iname Anduane Homogo Ngode Datagaliwabenaga anda ogoria bimiya. Ani bialu lomaru delolene dabu ogoria dege bu helalu bimiya. Ani beremagola Isaraeleali tigua dindi ogoria ibalu lomaru bu delaga bilonaga ani bu helamiya, lene.

*Anduane Homogohanda, Solomonu ibugua inaga anda bulebira, lenego ogo*

<sup>2</sup> Agali tara tara Isaraele wali agali baba ibu haga heneru Debidihanda ti bibahendeore ibu ngoai howa ti biabe bilo mo mini. Marume ege tole some podelo dabu helowa tihondo lamialu lalu, Tiguaore Ngode Datagaliwabenaga anda biago bule ege tole baya hangu some podalu mo tigabu wigi bilimu, lene. <sup>3</sup> Ani bialu Debidihanda ege tole aeane dewaore mili wabulenebi panga irame wabiniru mo hongo holene aeane marubi mo manda mandabu wiai hene. Ani bialu ege tole boronosi dewaore agalime genda magi handabe naheore dewa mo manda manda bini. <sup>4</sup> Ani bialu Taia dindiha howabi Saidono dindiha howabi ira tamia anda ogoni bilonaga Debidi hearia dibu yalu ibinigo dewaore mbiralime daga labe naheore yalu ibini. <sup>5</sup> Debidi ibu nahome heangi Anduane Homogonaga anda bulene mbirale bibahende mo manda mandabu wiai hene. Ibugua lalu, I igini Solomonu ibu igiri daliahe howa biabe tara tara bulene ngago manda biai nahe dege ka. Anigo ainde Solomonu ibugua Anduane Homogonaga anda ogoni bayaleore biragola wali agali dindi tara tara ngaruha bu karume ibalu anda bayale ogoni de hondowa ti turu timbuni halu tigua ibunaga mini yaraga helo hameledo, lalu Debidihanda lene.

<sup>6</sup> Debidihanda ibu igini Solomonu ibu olowa ibugua ibuhondo lalu, Ina Anduane Homogo Isaraele wali agalinaga Ngode Datagaliwabe kagonaga anda ogoni bibe, lalu lamini. <sup>7</sup> Ibugua Solomonuhondo lalu, I igini-o ainde Isaraele wali agalime Anduane Homogo inaga Ngode Datagaliwabe mini yaraga helo ina ibunaga anda mbira bule hamelo harugoni.\* <sup>8</sup> Ani hame larugoyu Anduane Homogohanda ihondo lalu, Debidio ina wai biaabo halu agali dewa bo waharigo ai inaga anda ogoni ina bule mandabu kego nabibelo hameledo.\* <sup>9</sup> I igini mbira ibu kini harangi ibugua haru howa mbirale bayaleru wali agalihondo bialu kagola ina hameigini dindi tara taraha padarume ibu baba waitigi nahelolebero. I igini ogoni ngule larogo haragola ibu mini Solomonu wibe. Mini Solomonu larogo irane ibu kini kangi ina Isaraele wali agali bu miniha mo palia howa bayale holene ibiloleberogo manda bialu laro.\* <sup>10</sup> Wali agalime inaga mini yaraga hole ini koria kaware ibilonaga anda ogoni Solomonu ibugua bulebira. Ibu i igini kagola i nde ibu aba holebero. Ibu igini aguaneneru hangume kini helaabo holebero, lalu Anduane Homogohanda ani laya, lalu Debidihanda lene.

<sup>11</sup> Debidi ibugua Solomonuhondo laabo halu lalu, Ai i igini-o Anduane Homogo kago ibugua i heba haabo helo hameledo. Ibugua bi ogoni lenedadagua ibunime i biamogo bialu Anduane Homogo inaga Ngode Datagaliwabe kagonaga anda layago ina bayaleore mbira bulebere. <sup>12</sup> Anduane Homogo ibunime i kini helarangi ina ibunaga mana lo ngaru baya hangu taluwa bialu howa Isaraele wali agali tigatigaore haru habelo ihondo mini gigabi wulenebi manda timbuni bulenebi ngilo hameledo. <sup>13</sup> Solomonu-o Anduane Homogohanda mana bayale bibahende Isaraele wali agalime bilo Mosesehondo lamiyaru ina bayuwa talialu bialu hariyagua nde mbirale ina berego damene bibahende bayale hangu holebira. I gi nahe hongo ho haabo habe. Mbirale tara tara ngaru hondowa gi halu mogo nale habe.\* <sup>14</sup> Ina biabe erekuibiore bialu muni ngolo dewaore genda magi timbuni tono dege daosini tebirani handari duria (3,500) wialu muni siliba genda magi timbuni tono dege daosini pira tebirani duria

\* 22:7: 2 Sml 7.1-16, 1 Bit 17.1-14    \* 22:8: 1 Kin 5.3, 1 Bit 28.3    \* 22:9: Solomonu mini ogoni tene Hiburu bi mbira Salomo winigo inanaga bi lalu, Bu miniha mo palia howa bayale holene, laga.    \* 22:13: Yos 1.6-9

(35,000) ngogo ogonime Anduane Homogonaga anda ogoni bulenaga mo ngo. Ani bialu boronosibi aeanebi dewaore agalime genda magi manda bibe naheore mo ngo. Ani bialu irabi ege tolebi dewaore mo ngogo ainde maru inime mo tago holene wulebira. <sup>15</sup> Inaga agali biabe biaganebi dewa dege bu kagoni. Agali maru ege tole podagabi maru ege tolemebi iramebi anda biaga mandabi karubi marume biabe tara tara bulene ngago damene bibehe kagoni. <sup>16</sup> Agali uruni tigua ngolo silibarumebi boronosimebi aeanemebi biabe tara tara biaga mandabi kagoni. Anduane Homogo ibuni i heba mandagi haabo holebirago ai ina biabe ogoni bibe, lalu Debidihanda Solomonohondo lene.

<sup>17</sup> Debidihanda bi uruni lai howa mani Isaraele wali agali tigua Solomonu biamogo bilimu lalu lamini. <sup>18</sup> Ibugua tihondo lamialu lalu, Anduane Homogo tinaga Ngode Datagaliwabe ibu ti heba haabo kagoni. Ibugua wali agali tara dindi ogoniha haga heneru bope holiya yupe hayagola ina ti bope harugoni. Ani birugola wali agali uruni ti Anduane Homogo andanehabi ti andanehabi kagoni. Anidagua bialu tiha holene bayale mo ngiyagola waitigime ti baba wai bibe nahe kagoni ndobe. <sup>19</sup> Anidagua biyago manda bialu ayu tigua Anduane Homogo tinaga Ngode Datagaliwabe ibuni hameledago ti bu minimebi hongomebi bua timbuni halu baya hanguore bialu haabo halimu. Anidagua bule ai tigua Anduane Homogonaga anda ogoni ayu howa bidaba. Ani biai howa mani wali agali tigua anda ogoniha ibuni karia kaware ibalu ibu mitangi bialu lotu lelonaga Habo Nalolene Bi lo winigonaga Mbogoyi biagobi mbirale tara tara biabe ogoni bulenaga wiabagi ho ngaru mo yalu ibalu anda ogoniha ngelalimu, lalu Debidihanda lene.

## 23

<sup>1</sup> Debidi ibuni waheore heangi ibugua ibu igini Solomonu Isaraele wali agalinaga kini helo dabo helene.\*

### *Debidihanda Libaiali biabe bilo mo minigo ogo*

<sup>2</sup> Kini Debidihanda Isaraeleali agali haguane hearubi loma binigo mo miaga hearubi Libaiali hearubi bibahende mo mogo bini. <sup>3</sup> Ani buwa ibugua, Libai agali bu hearu bibahende daga ladaba, lene. Tigua Libaiali mali pira tebira (30) bolangua hene hearu bibahende daga lalu hearia ti daosini dege pira tebirani halira (38,000) hene. <sup>4</sup> Ani biyagola Debidihanda agali uruni aria daosini dege pira kirani maria (24,000) hearume Anduane Homogonaga anda biabe bulene wiago damene bibahende handayaho hai helo dabene. Daosini waragaria (6,000) hearume beba gili bia dagala bialu helobi godi hale haga helobi dabo helene. <sup>5</sup> Ani bialu Libaiali dege daosini maria (4,000) hearu tigua Anduane Homogonaga anda mamage helo dabo helalu daosini maria (4,000) halu mende hearume Anduane Homogonaga mini mo yaraga halu ngida aleru balu piliperu lalu iba gana laga helo dabo helene. Ani helowa Debidi ibugua tihondo ngida ale boleneru pilipe lolenerubi uruni bibahende ti ani bilonaga miai hene.

<sup>6</sup> Libaialiru ti hameigini tebira henego mini Gesonobi Kohadabi Meraribi uruni tigua biabe bilonaga Debidi ibugua mo ta haga bini.

<sup>7</sup> Ai Gesono ibu igini kira Ladana Simaila hene. <sup>8</sup> Ladana ibu igini tebira Yahiele Sedama Yoele laga biyaru hene. <sup>9</sup> Agali tebira uruni ti Ladana hameigini hayadarunaga agali haguane hene. Simai igini tebira henegonaga mini Selomodo Hasiele Harana layaru hene. <sup>10-11</sup> Simai igini maria henego tinaga mali hayadagua ti mini uru. Yahada Sina ibu mini mende Sisa Yausu Beria layaru hene. Yausu Beriala libu aguanene palia timbu nahe emene dege hayagola libunaga hameigini mo mbiraore ho hene.

<sup>12</sup> Kohada igini maria henegonaga mini uru Amarama Isiha Heberono Usiele layaru hene. <sup>13</sup> Wahene Amarama ibu igini Arono Mosesela hene. Anduane Homogohanda

\* 23:1: 1 Kin 1.1-40

Aronobi ibu igini aguanenerubi tigua mbirale tara tara Anduane Homogonaga lowa wiabagi ho winigo handayaho haabo howa biabe ogoni bialu helo dabo helene. Ani helayagola tigua Anduane Homogo mitangi bialu lotu lalu howa bibahendengi ira hagua nga bilo inisenesi lomabu delaga howa Anduane Homogonaga biabe bia haga hene. Ani bialu tigua Anduane Homogonaga minini howa wali agali bu hearu biamogo bilo lalu la haga hene.☆ 14-15 Anigo Ngode Datagaliwabenaga agali Mosese ibu igini kira henego Gesomo Eliesela libu Libaiali maru hearubi dege helene. 16 Gesomo igini wahene Sebuele hene. 17 Eliese ibu igini mbiraore hangu henego mini Lehabia hene. Lehabia ibu aguanene dewaore hene. 18 Kohada igini mende Isiha ibu igini Selomidi hene. Selomidi ibu agali haguane hene. 19 Kohada igini tebone Heberono henego ibu igini maria Yaraia Amaraia Yahasiele Yagameama layaru hene. 20 Ani bialu Kohada igini mane Usiele henego ibu igini kira Maiga Isaiala hene.

21 Merari ibu igini kira Mali Musila hene. Ai Mali igini kira dege Eleasa Kisila hene. 22 Eleasa ibu igini mbira nahe wandari dege aba halu homene. Ani buwa wandari uruni ti agali Kisi igini tini damene dege bu hearume dabu biai hene. 23 Merari igini mende Musi ibu igini tebira henego Mali Edere Yaremodo layaru hene.

24 Agali uruni ti bibahende Libai aguanene howa ti Libai hameigini emene emene headagua mbira mbiranaga agali haguane haga bini. Libaiali bu hearu agali mbira mbirago tini hama ibinidagugaore dabo wabia howa daga lalu mini gilibu wigi bini. Libaiali o biaruni ariago tinaga mali pira kira (20) bolangua henego ti Anduane Homogonaga andaha biabe bialu haga hene.

25 Debidi ibugua lalu, Anduane Homogo Isaraele wali agalinaga Ngode Datagaliwabe kago ibugua ibunaga wali agali holene bayaleni helowa ibuni Yarusalemeni haabobo bu holebira. 26 Anidagua buwa ainde Libaiali tigua Anduane Homogonaga Balai Andabi ibu mitangi bialu lotu lolenaga mbirale tara tara wiarubi ala mo yalu ibaganego áyu biabe ogoni bulene nawulebira, lene.☆ 27 Ani leagola mani Debidihanda layadagua tigua Libai agali bibahende daga lai halu mini gilibu wini. Walime igiri taba hanayaru tinaga mali pira kira (20) bolangua haga biyagola agali uruni ti Anduane Homogonaga andaha Libaialime biabe bulene wiago bialu helo dabo helaga bini. 28 Libaiali tinaga biabe bulene winigo ogo. Tigua Arono aguanene loma binigo mo miaga hearu biamogo bialu Anduane Homogonaga andaha biabe bulene winidagua bialu hene. Anda tamuha hobane haga haga bidarubi wali agali ngoaiho biraga pabe andaneha Anduane Homogonaga anda hegoria kaware wiagonibi handayaho haga hene. Mbirale tara tara Anduane Homogonagaore lowa wiabagi ho wiaru mbirago Anduane Homogo deni dodohe wiagua nde Libaiali uruni tigua mbirale uruni dodo nahe bayale ngelonaga bulene mana winidagua bialu mo bayale haga wini. Ani bialu Anduane Homogonaga andaha tinaga biabe bulene maru wia dege bini.☆ 29 Tinaga biabe maru mberedi Anduane Homogo lomabu mulene wiago handayaho halu balawa lomabu delolene wiagobi handayaho halu mbisigedi yidi nahe howa hirini wiaru loma bialu iraha delolene wiarubi balawa maru olibe lininaga weli odo biamaga hene wiarubi bibahende handayaho haga hene. Ani bialu mbirale Anduane Homogohondo lomabu mulene damenego bibahende mo tale bigi bialu genda magi hondo ngelaga bialu haga hene. 30 Ani bialu tinaga biabe buleneore horo bibahendenaga egerebagi alendobi tigua Anduane Homogonaga andaha pialu ibuhondo turu halu ibunaga mini yaraga haga bialu hene. 31 Ani bialu horo Sabadangibi horo timbuni maru ege pigane ngabulo kagolabi mbirale Anduane Homogohondo lomabu delolenebi horo maru lotu lolene ngangibi tigua mana ogonidagua dege bialu hene. Biabe uruni bulenego Libaiali bibahendeme horo mbira mbiranaga agali ogodaguame bilo lalu mana winidagua talialu biaga wini. Horo bibahendengi Libaiali tinaga biabe Anduane Homogo mitangi



bialu lotuore laabo haga wini. <sup>32</sup> Libaiali tinaga biabe Anduane Homogonaga Balai Anda heago handayaho holenebi Anduane Homogonaga anda heagobi handayaho haga wini. Ani bialu tigua tini damene Arono aguanene loma binigo mo miaga maru hearu biamogo bialu Anduane Homogonaga andaha biabe biaabo haga wini.

## 24

### *Loma binigo mo miaga biabe tara tara bilo tale bu helaga binigo ogo*

<sup>1</sup> Arono igini aguaneneru ogodagua talebu helene. Arono igini maria mini Nadaba Abihu Eleasa Idama layaru hene. <sup>2</sup> Anigo Nadaba Abihula libu aba Arono homa nabi heangi libu waneigini mbira nahe howa homene. Ani biyagola Arono igini Eleasa Idamala libu dege loma binigo mo miaga hene. <sup>3</sup> Ani henego ai Debidi ibu kini heangi ibugua loma binigo mo miaga hearu tinaga biabe bulene wiago bilonaga ti hangu hangu mo tahaga bini. Ani bialu Debidi ibugua Eleasa aguane Sadogobi Idama aguane Ahimelegebi libugua Debidi biamogo bilo dabo helene. <sup>4</sup> Tigua ani bialu hemiria Eleasa aguaneneru agali haguane dewa heago hondowa ti aria wabuni pira mbirani waragaria (16) helene. Ani buwa Idama aguanene agali haguane dewa naheyagola ti aria wabuni halira helene. <sup>5</sup> Eleasa aguanenerubi Idama aguanenerubi tinaga aria maru loma binigo mo miagarubi maru Anduane Homogonaga andaha biabe biagarubi hene. Ti ani heago hondowa Debidi ibugua biabe bulene winigo aiwa buledabe Anduane Homogonaga hame hale holenaga ege tole emeneni mini gili bialu badaga halu mini walua hayadagua dabo helaga bini. <sup>6</sup> Agali Eleasa aguanenerubi Idama aguanene biarubi ti bibahende agali dabo iriari bialu loma binigo mo miaga helo dabo helaga bini. Libaiali mbira Nedanele igini Semaia ibu beba gilibia dagala bialu haga henego ibugua agali mini wia pani hayaru bibahendenaga mini gilibu wini. Ani gilibu wialu hearia Kini Debidi ibubi ibunaga haru haga agali bu hearubi loma binigo mo miaga Sadogobi Abaiada igini Ahimelege heagobi Libai hameigini hearubi loma binigo mo miaga maru hearubi ti bibahende de hondo heaore Semaiahanda mini uruni gilibu wini.

<sup>7-18</sup> Tigua ege tole emene uruni mini gili bialu baraga howa handalu hearia Yahoaribi aria ala dabene. Ani bialu halu mende Yadaia aria hearu dabalulu tebone Harimi aria dabalulu mane Seorimi aria dabene. Ani bialu dauni Malagaia aria dabalulu waragane Miyamini aria dabalulu kane Hagoso aria dabalulu halini Abiya aria dabene. Ani bialu dini Yasua aria dabalulu pini Seganaia aria dabalulu pira mbirani mbira (11) Eliasibi aria dabalulu pira mbirani mende (12) Yagimi aria dabene. Ani bialu pira mbirani tebone (13) Huba aria dabalulu pira mbirani mane (14) Yasebeaba aria dabalulu pira mbirani dauni (15) Biliga aria dabalulu pira mbirani waragane (16) Ime aria dabene. Ani bialu pira mbirani kane (17) Hesiri aria dabalulu pira mbirani halini (18) Habisese aria dabalulu pira mbirani dini (19) Pedahia aria dabalulu pira mende (20) Yasegele aria dabalulu bini. Ani bialu pira kirani mbira (21) Yagini aria dabene. Pira kirani mende (22) Gamulu aria dabalulu pira kirani tebone (23) Delaia aria dabalulu pira kirani mane (24) Masia aria dabene.

<sup>19</sup> Loma binigo mo miaga uruni ti dabalulu tinaga mamali Aronohanda Anduane Homogonaga andaha biabe bialulu henedagua bialulu helo helene. Bamba Anduane Homogo Isaraele wali agalinaga Ngode Datagaliwabehanda Aronohondo ani bulene nga layadagua tigua ani bialulu hene.

### *Libai hameigini maru henego uru*

<sup>20</sup> Libai hameigini agali haguane maru henegonaga mini uru. Yadeaia ibu Amarama hameigini Sebuele ibu mini mende Subaele henego aguanene hene.

<sup>21</sup> Lehabaia aguanene Isihia hene.

<sup>22</sup> Yahada ibu Isara hameigini Selomidi henego aguanene hene.



<sup>23</sup> Ani bialu Heberono igini maria heneru Yaraia Amaraia Yahasiele Yagameama layaru ti agali haguane dege dege hene.

<sup>24</sup> Samiri ibu Usiele hameigini Maiga henego aguanene hene.

<sup>25</sup> Maiga hamene Segaraia ibu Usiele hameigini Isaia henego aguanene hene.

<sup>26-27</sup> Merari igini Mali Musila hene. Merari igini dege mbira Yasaia henego ibu igini maria Beno Sohama Saguru Ibiri layaru ti hene. <sup>28-29</sup> Mali igini kira Eleasa Kisila hene. Eleasa ibu igini mbira nahe hene. Kisi igini Yamele hene. <sup>30</sup> Musi igini tebira Mali Edere Yaremodo layaru hene. Uruni ti Libaiali dege hene.

<sup>31</sup> Libaiali agali haguane uruni hearubi ti hamene heyogone hearubi ti hameigini Arono aguaneneru loma binigo mo miaga biarume ti biabe agi bilodabe hondolenaga ege tole emeneni mini gili buwa baraga halu dabayadagua agali uruni tibi ani bini. Ani bialu hearia Kini Debidibi Sadogobi Ahimelegebi loma binigo mo miaga hearunaga agali haguane hearubi Libaiali agali haguane hearubi ti de handayaho hene.

## 25

*Libaiali marume Anduane Homogonaga andaha ngida aleru beledi aleru balu helo Debidihanda dabeneru ogo*

<sup>1</sup> Debidibi Libaiali agali haguane hearubi tigua Libai hameigini marume Anduane Homogonaga andaha lotu lolenaga biabe bulene damene wiaru handaya howa haru haga helo dabenegro uru. Asaba ariabi Hemanabi Yadudunubi hameigini emene uruni tigua biabe uruni bilo dabo helene. Tigua Anduane Homogonaga bi mana wali agalihondo lamialu helo dabo helalu ngida ale tara tara wiaru balubi ngilingele lagane beledi ale wiaru balubi helo ani dabo helene. Agali biabe biaga uruninaga minibi tinaga biabe ogoale biagabi gilibu wini.

<sup>2</sup> Asaba igini maria henego tinaga mini Sagu Yosebe Nedanaia Asarela layaru hene. Asaba ibunime ti haru howa kinihanda Anduane Homogonaga bi mana lamidaba laradagua lamiaga hene.

<sup>3</sup> Yadudunu igini waragara henego mini Gedalaia Seri Yasaia Simai Hasabaia Madidaia layaru hene. Ti aba Yadudunuhanda ti haru halu tigua Anduane Homogonaga mana latagi haga hene. Tigua ngida aleru balu howa Anduane Homogohondo kai lalubi ibunaga mini yaraga halubi iba gana laga hene.

<sup>4</sup> Hemana igini pira mbirani maria (14) henego mini Bugaia Madanaia Usiele Sebuele Yarimodo Hananaia Hanani Eliada Gidaladi Lomamadiese Yosobegasa Malodi Hodiri Mahasiodo layaru hene. <sup>5</sup> Hemana ibugua kinihondo Anduane Homogonaga bi mana latagi haga heagola Ngode Datagaliwabehanda Hemana biamogo bialu mo timbu halu ibuhondo bayale buleore lalu lo winidagua ibu igini pira mbirani maria (14) uruni mialu wandaribi tebira mini. <sup>6</sup> Hemana igini uruni bibahende tigua Anduane Homogonaga andaha Ngode Datagaliwabe mitangi bialu lotu larangi ngida ale tara tararu balu ngilingele lagane beledi aleru бага бага bialu iba gana laga hene. Ani bialu heagola ti abahanda handayaho howa haru haga hene. Debidihanda Asababi Yadudunubi Hemanabi urunihondo bidaba layadagua tigua ani bialu haga hene.

<sup>7</sup> Agali pira kirani maria (24) uruni ti manda timbunibi hene. Libaiali biaru tigua iba gana lolenebi ngida ale bolenebi uruni ale tara tara manda biaiorehe hene. Agali uruni daga lamaga halu ti handari kirani pira halirani halira (288) hene.

<sup>8</sup> Bibahende ani dabo helai howa biabe ala ai ibugua pigane bibehedabe hondolenaga ege tole emeneni mini gili bialu baraga hene. Agali uruni igiri daliahe heaguabi waheore heaguabi tinaga biabe iba gana lolenebi ngida ale bolenebi manda biaihe heaguabi manda biai nahe wene manda bialu heaguabi tanabiore ege tole baraga hayagola karulape lalu dabarago ibugua biabe pigane bilo helaga wini.

<sup>9</sup> Agali handari kirani pira halirani halira (288) uruni ti igini damenerubi tini headagua agali pira mbirani kira (12) dege dege dabo helalu ti wabuni bibahende agali pira kirani maria (24) hene. Tigua ege tole baraga hayago handalu hemiria Asaba igini Yosebe ibu igini damenerubi pigane dabene. Mende dabayago Gedalaia ibu iginiru damenerubi dabene. <sup>10</sup> Tebone dabayago Saguru halu ibu iginiru damenerubi dabene. <sup>11</sup> Mane dabayago Seri ibu mini mende Isiri halu ibu iginibi damenerubi dabene. <sup>12</sup> Dauni dabayago Nedanaia halu ibu igini damenerubi dabene. <sup>13</sup> Waragane dabayago Bugaia halu ibu igini damenerubi dabene. <sup>14</sup> Kane dabayago Asarela ibu mini mende Yasarela henego ibu igini dameneru dabene. <sup>15</sup> Halini dabayago Yasaia igini damenerubi dabene. <sup>16</sup> Dini dabayago Madanaia ibu igini damenerubi dabene. <sup>17</sup> Pini dabayago Simai igini damenerubi dabene. <sup>18</sup> Pira mbirani mbira (11) dabayago Usiele ibu mini mende Asarele henego igini damenerubi dabene. <sup>19</sup> Pira mbirani mende (12) dabayago Hasabaia igini damenerubi dabene. <sup>20</sup> Pira mbirani tebone (13) dabayago Sebuele ibu mini mende Subaele henego igini damenerubi dabene. <sup>21</sup> Pira mbirani mane (14) dabayago Madidaia igini damenerubi dabene. <sup>22</sup> Pira mbirani dauni (15) dabayago Yarimodo igini damenerubi dabene. <sup>23</sup> Pira mbirani waragane (16) dabayago Hananaia igini damenerubi dabene. <sup>24</sup> Pira mbirani kane (17) dabayago Yosobegasa igini damenerubi dabene. <sup>25</sup> Pira mbirani halini (18) dabayago Hanani igini damenerubi dabene. <sup>26</sup> Pira mbirani dini (19) dabayago Malodi igini damenerubi dabene. <sup>27</sup> Pira kira (20) Eliada igini damenerubi dabene. <sup>28</sup> Pira kirani mbira (21) dabayago Hodiri igini damenerubi dabene. <sup>29</sup> Pira kirani mende (22) dabayago Gidaladi igini damenerubi dabene. <sup>30</sup> Pira kirani tebone (23) dabayago Mahasiado igini damenerubi dabene. <sup>31</sup> Daba maro pira kirani mane (24) dabayago Lomamadiese igini damenerubi dabene.

## 26

### *Anduane Homogonaga anda mamage haga helenego ogo*

<sup>1</sup> Libaiali maru Anduane Homogonaga anda mamage haga helene. Agali maru ti Kora hameigini howa Kore igini Meselemaia henego ibu Asaba damene hene. <sup>2-3</sup> Meselemaia ibu igini karia henego mini uru. Segaraia Yadieles Sebadaia Yadaniele Elama Yahohanana Elioenai layaru hene.

<sup>4-5</sup> Agali mbira Obededomo henego Ngode Datagaliwabehanda ibu mo turu halu biamogo biyagola ibu igini halira henegonaga mini uru. Igiri wahene Semaia howa maru Yahosabada Yoa Saga Nedanele Amiele Isaga Peuledai layaru hene.\*

<sup>6</sup> Obededomo igini wahene Semaia ibu igini waragaraia henego ti bibahende agali bayale mandabi howa ti hameigini hearunaga agali haguane hene. <sup>7</sup> Agali uruninaga mini Odoni Labaele Obede Elesabada Elihu Semagaia layaru hene. Elihu Semagaiala libu mbirale tara tara buleneru mugube gibi yu hene.

<sup>8</sup> Obededomo ariaru daga lamaga howa pira waragariani kira (62) hearu tibi ti igini aguaneru damenerubi bibahende mamage holene biabe ogoni manda biaihe hene.

<sup>9</sup> Meselemaia damene ti agali pira mbirani halira (18) howa tigua biabe bulene wiago manda biaihe hene.

<sup>10</sup> Merari hameigini howa agali mini Hosa ibu igini maria henegonaga mini uru. Simiri henego ibu Hosa igini wahene ndogoyu ibu abahanda ibu agali haguane helo helene. <sup>11</sup> Hosa igini maru Hiligaia Tebalaia Segaraia imaru hene. Hosa ibu damene dege pira mbirani tebira (13) heneru ti bibahende Anduane Homogonaga anda mamage haga hene.

<sup>12</sup> Agali uruni ti Libaiali maru hearume Anduane Homogonaga andaha biabe bialu helo ti damene tale bialu wabuni mbira mbira headagua tigua Anduane Homogonaga

\* 26:4-5: 2 Sml 6.11, 1 Bit 13.14

anda mamage holene biabe bilo tibi tale bialu wabuni mbira mbira helalu biabe uruni bialu hene. <sup>13</sup> Agali uruni tigua Anduane Homogonaga anda panga haraba ago ai ibugua handayaho holobadabe hondolenaga ege tole baraga halu daba hendene. Ti damene mbira mbira headagua mbirago dewa heaguabi mbirago emene heaguabi harugo lowa biabe tinagaore talebu mini. <sup>14</sup> Tigua ege tole biaru baraga halu ai dameneme anda panga ni tagira ibiragoha heago handaya holobadabe handalu hemiria Selemaia ariame handayaho helo dabene. Mani Segaraiahanda panga abene uyurahayagi heago handayaho holene wiaria hendene. Segaraia ibu Selemaia igini howa ibugua mini manda bayaleru talebu miaga hene. <sup>15</sup> Ani bialu mani ege tole biaru baraga howa handalu hemiria Obededomohanda panga abene unurahayagi heago handayaho halu ibu iginiru tigua tamu hobane dabudabu wiaga heagoha handayaho helo dabayayane hendene. <sup>16</sup> Ani buwa mani Subimi Hosala libugua anda panga ni paliragohayagi heago handayaho halu panga mende mini Salegede laga heago handayaho helo dabo helene. Panga Salegede ogoni hariga irigi halu piaga wiago kaware dege hene. Agali uruni damene bibahende headagua biabe bulene mbira mbira dabo helalu ti iriari bialu maru tigua bu aribia halu panga uruni handayaho iriari biaga hene. <sup>17</sup> Horo bibahendengi Libaiali uruni waragarialime panga haraba ni tagira ibiragohayagi heago mamage haga hene. Agali mariame panga haraba abene uyurahayagi heago mamage halu maria mendeme panga abene unurahayagi heago mamage halu bini. Ani bialu maria dege teboneme anda tamu hobane dabudabu wiaga heago mamage hene. Anda tamu hobane mbira heago kirame mamage halu hoba mende heago agali kira mendeme mamage hene. <sup>18</sup> Ani bialu agali waragariame panga haraba ni paliragohayagi mamage halu kirame anda heago mamage heagola mariame hariga wiago mamage haga hene. <sup>19</sup> Libaiali uruni ti Kora hameiginibi Merari hameiginibi dege howa mamage holene biabe ogoni bialu hene.

*Libaiali Anduane Homogonaga andaha biabe maru bilo mo mia dege binigo ogo*

<sup>20</sup> Agali maru hearu Libaiali dege howa tigua Anduane Homogonaga andaha muni wiagane wiago handayaho howa dabudabu bayale wali agalime Ngode Datagaliwabenaga lomabu mini wiarubi handayaho haga hene. <sup>21-22</sup> Agali mbira mini Ladana henegonaga aguanene Gesono hameigini mini Yahiele henego ibu igini kira Sedama Yoelela heba uruni tinaga biabe Anduane Homogonaga andaha muni wiagane hobanebi dabudabu tara tara wiaga hobanebi heago handayaho haga hene.

<sup>23</sup> Ani bialu hameigini maru Amarama Isiha Heberono Usiele heneru ti aguanene hearume biabe bulene wia dege bini. <sup>24</sup> Agali mbira mini Sebuele ibu Mosese igini Gesomo hameigini mbira henego ibu Anduane Homogonaga andaha muni wiagane hobane heago handayaho haga agali haguane hene. <sup>25</sup> Sebuele ibu Gesomo hamene Eliese aguanene howa ibu Selomidi damene hene. Eliese igini Lehabaia Lehabaia igini Yasaia Yasaia igini Yorama Yorama igini Sigiri Sigiri igini Selomidi hene. <sup>26</sup> Selomidi ibu damene hearu tigua dabudabu mbirale bayale damene Ngode Datagaliwabenaga lomabia ho wiaru handayaho haga hene. Mbirale bayale uruni Kini Debidihandabi hameigini mbira mbiranaga agali haguane bu hearumebi ami haru haga agali haguane hearumebi tigua Anduane Homogonaga loma bialu wiabagiho wini. <sup>27</sup> Tigua wai bialu bo podama anda puwa tigua waitiginaga dabudabu bayale tara tara wiaru mo yalu dai bigi buwa mbirale bayale uruni Anduane Homogonaga lalu loma bia howa Anduane Homogonaga andaha biabe bulene wiago bilonaga mo wigi biaga hene. <sup>28</sup> Mbirale bayale uruni ale Anduane Homogonaga andaha wiaru bibahende Selomidibi ibu damene hearubi tigua handayaho haga hene. Abale howa Anduane Homogonaga bi mana latagi haga Samuelebi Kini Solobi Nere igini Abanebi Seruia igini Yoababi agali uruni tigua mbirale bayale uruni bibahende Ngode Datagaliwabenaga lowa lomabu minigo wini.

<sup>29</sup> Isiha aguanene bu hearu aria Kenanaiabi ibu igini bu hearubi tigua gabumane biabe bilo dabo helene. Uruni ti marume beba gili bia dagala biaga helalu marume Isaraele wali agalinaga godi hale haga hene.

<sup>30</sup> Heberono aguanene bu hearu Hasabaiabi ibu damene agali daosini mbirani handari karia (1,700) hearubi tigua Isaraele dindiha abene Iba Yodana ni paliragohayagi gabumane biabe bulene winigo handayaho haga hene. Agali uruni ti biabe bulene wiaru damene manda biaihe howa tigua kini heagonaga biabe bulene wiagobi Anduane Homogonaga biabe bulene wiagobi handayaho haga hene. <sup>31</sup> Heberono aguanene agali mbira mini Yaraia henego ibu tinaga agali haguane hene. Debidi ibu kini dege heane mali pira maria (40) pene lowa Heberono hameigini lenego bibahende hearu mandabi ai kabe hondole taya bialu hene. Ani taya bialu hemiria hameigini ogoni aria agali dewaore Gileada dindihayagi Yase tano wiagoha hearia handa walia hene. Agali uruni ti wai wayali haga hongoheore hene. <sup>32</sup> Ani heago hondowa Kini Debidi ibugua Yaraia aria agali haguane hearu daosini kirani handari karia (2,700) bibahende dabo helene. Ti agali bayale tigabiore howa ti Isaraele dindiha Lubene hameiginibi Gada hameiginibi Manase hameigini halu mende hearubi Iba Yodana ni tagira ibiragohayagi hearu tigua Ngode Datagaliwabenaga biabe bulene wiarubi kini heagonaga biabe bulene wiarubi bibahende handayaho helo helene.

## 27

*Ami haru haga haguanerubi wali agali hameigini hearunaga haguanerubi henegonaga mini uru*

<sup>1</sup> Agali mini ogoha gilibu ngaruni Isaraele wali agali bibahendenaga haguane henerunaga minibi hameigini mbira mbiranaga agali haguane minibi ami haru haga haguane henerunaga minibi gilibu nga. Agali uruni tigua biabe biaga agali tale buwa wabuni pira mbirani kira (12) dege dege helene. Agali wabuni mbira mbirani ti ege mbira mbirani biabe biaga hene. Wabuni mbira mbiraha agali biabe biaga daosini pira kirani maria (24,000) dege dege hene.

<sup>2</sup> Agali haguane o henedarunaga mini uru. Ege mbirani Sabadieie igini Yasobeama ibugua agali daosini pira kirani maria (24,000) biabe bilo haru hene. <sup>3</sup> Yasobeama ibu Yudali howa ibu Perese hameigini aria hene.

<sup>4</sup> Ege mendeni Ahohi aguanene aria Dodaihanda agali daosini pira kirani maria (24,000) halu mende hearu biabe bilo haru ha aribia howa handayho hene. Agali mbira mini Migilodo henego ibugua Dodai haru hamogo bialu biabe handayaho haga mende ibu hene.

<sup>5</sup> Ege teboneni agali loma binigo mo miaga Yahoiaada henego igini Benaia ibugua agali biabe biaga daosini pira kirani maria (24,000) halu tebone hearu haru hene. <sup>6</sup> Benaia ogoni ibu Debidinaga ami agali hongohe dege dege pira tebira (30) heneru aria mbira howa ibugua ami agali uruni haru haga hene. Anigo ibu igini Amisabada ibu agali biabe biaga halu tebone biaru ibugua haru ha aribia hene.

<sup>7</sup> Ege maneni Yoaba hamene Asahele ibugua agali biabe biaga daosini pira kirani maria (24,000) ma halu hearu haru hene. Mani howa ibu igini Sebadaiahanda ibu aba Asahelenaga henegoria ha aribia halu haru haga hene.

<sup>8</sup> Ege daunini Isiha aguanene Samahuduhanda agali biabe biaga daosini pira kirani maria (24,000) dau halu hearu haru hene.

<sup>9</sup> Ege waraganeni Tegoali Igese igini Ira ibugua agali biabe biaga daosini pira kirani maria (24,000) waraga halu hearu haru hene.

<sup>10</sup> Ege kaneni Eberaimi hameigini aria mbira Pelonoali Helese ibugua agali biabe biaga daosini pira kirani maria (24,000) ka halu hearu haru hene.

<sup>11</sup> Ege halinini Husa dindiali mini Sibegai ibugua agali biabe biaga daosini pira kirani maria (24,000) hali halu hearu haru hene. Sibegai ibu Yudali howa Sera hameigini aria hene.

<sup>12</sup> Ege dinini Anadodo tanoali Abiese ibugua agali biabe biaga daosini pira kirani maria (24,000) dini halu hearu haru hene. Abiese ibu Beniyamini hameigini aria hene.

<sup>13</sup> Ege pinini Nedoba tanoali Maharai ibugua agali biabe biaga daosini pira kirani maria (24,000) pini halu hearu haru hene. Maharai ibu Sera hameigini aria hene.

<sup>14</sup> Ege beaneni Piradono tanoali Benaia ibugua agali biabe biaga daosini pira kirani maria (24,000) beane halu hearu haru hene. Benaia ibu Beniyamini hameigini aria hene.

<sup>15</sup> Ege hombeaneni Nedoba tanoali Heledai ibugua agali biabe biaga daosini pira kirani maria (24,000) hombeane halu hearu haru hene. Heledai ibu Odoniele aguanene hene.

*Isaraele hameigini mbira mbira hearunaga agali haguane heneru uru*

<sup>16</sup> Isaraele hameigini mbira mbira henerunaga handayaho haga agali mini uru. Lubene hameigini hearu Sigiri igini Eliesehanda handaya ho haga hene. Simeono hameigini hearu Maga igini Sebadaia ibugua handayaho haga hene. <sup>17</sup> Libai hameigini hearu Kemuele igini Hasabaiahanda handayaho haga hene. Arono aria hearu Sadogohanda handayaho haga hene. <sup>18</sup> Yuda hameigini hearu Debidi hamene mbira mini Elihu henego ibugua ti handayaho haga hene. Isaga hameigini hearu Maigele igini Omirihanda handayaho haga hene. <sup>19</sup> Sebulunu hameigini hearu Obadaia igini Isimaia ibugua ti handayaho haga hene. Nabadali hameigini hearu Asariele igini Yaremodohanda handayaho haga hene. <sup>20</sup> Eberaimi hameigini hearu Asasaia igini Hosea ibugua ti handayaho haga hene. Manase hameigini halu mbira ni paliragohayagi hearu Pedaia igini Yoelehanda handayaho haga hene. <sup>21</sup> Manase hameigini halu mende ni tagira ibiragohayagi Gileada dindiha hearu Segaraia igini Ido ibugua handayaho haga hene. Beniyamini hameigini hearu Abane igini Yasielehanda handayaho haga hene. <sup>22</sup> Dana hameigini hearu Yarohama igini Asarele ibugua ti handayaho haga hene. Agali haguane urunime Isaraele hameigini bibahende handayaho haga hene.

<sup>23</sup> Anduane Homogohanda buleore lalu lo wialu Isaraele wali agali dewaore harini yakundi daga labe nahe bu karubi helo mo dewa holebero lalu lowinigo manda buwa Debidi ibugua agali mali pira kira (20) bolangua nahe hearu daga nalene. <sup>24</sup> Wali mbira mini Seruia berenego ibu igini Yoaba ibugua Isaraeleali bibahende daga lai hole bialu hearia daga lamaro nabini. Ngode Datagaliwabehanda Isaraeleali daga lelo hame nale heagola tigua daga lalu hemiria hondowa ibugua Isaraeleali bibahende pani nelu mini. Ani binigome mbuga mbira Kini Debidihanda bialu henegonaga te gilibu wini ngagoha agali daga lamaga henegonaga gilibu wiai nahe winigo nga.

*Kininaga dabudabu wiaru handayaho haga agali henerunaga mini uru*

<sup>25</sup> Adiele igini Asamabedehanda kininaga anda hobane hearuha tomo dabudabubi wiaru handayaho haga hene. Usia igini Yonadanahanda tomo mbirale tara tararu wiagane anda Isaraele dindi bibahende ha tanoni heagobi tagiraha dindi emeneha heagobi wai mamage haga anda lu hongohe bu heagoha mbirale wiarubi bibahende ibugua handayaho haame haga hene. <sup>26</sup> Kelubu igini Eseri ibugua agali mabuha biabe biaga hearu bibahende handameho haga hene. <sup>27</sup> Kininaga pu mbira lini daga mini gerebi mabu Lama tanoali Simai henego ibugua handayaho haga hene. Sebama tanoali mini Sabadi ibugua waini iba wabulenaga gerebi lini do wiarubi waini iba hambu berelo wiaganebi anda hobane heago handayaho haga hene. <sup>28</sup> Gedere tanoali Balahanana ibugua dindi abene ni paliragohayagi dindi hambene bare bare wiaruha



ira oliberu ira maru mini sigamo poge ale hearu handayaho haga hene. Yoasa ibugua olibe lininaga weli hambu wiaga anda hobane heago handayaho haga hene. <sup>29</sup> Saronu yu dindi wiagoria Saronuali Sidiraihanda nogo bulumaga bibahende dindi ogoniha bu hearu handayaho haga hene. Adalai igini Sabada ibugua dindi guagua wiaruha nogo bulumaga hearu handayaho haga hene. <sup>30</sup> Isimaele hameigini aria Obili ibugua kininaga nogo kamele hearu handayaho haga hene. Meronodoali Yadeaia ibugua kininaga nogo dongi hearu handayaho haga hene. Hagara hameigini hearu aria Yasisi ibugua kininaga nogo sibi memeru handayaho haga hene. <sup>31</sup> Agali uruni ti Kini Debidinaga mbirale tara tara wiarubi hearubi handayaho hagarunaga haguane hene.

*Debidi mini gigabi wulenebi manda bayale bulenebi talebu miaga agali henego uru*

<sup>32</sup> Debidi aba hamene Yonadana ibu mini gigabiwiore howa mbirale bayuwaore manda biaihe howabi ibugua mini manda bayaleru Kini Debidi talebu miaga hene. Yonadana ogoni ibula Hagamoni igini Yahielela libugua kini igini bu hearu mana tara tara wiaru lawai haga hene. <sup>33</sup> Ahidobele ibugua kini mini giga bulene manda bayaleru talebu miaga hene. Aga dindiali Husai ibu kininaga nenegeore howa ibugua ogo bulene bayaleda ogo bayale ndoda lalu Debidi lamiaga hene. <sup>34</sup> Mani Ahidobele homayagola Abaiadabi Benaia igini Yahoiadabi libu Ahidobele henegoria ha aribia hene. Ani bialu Yoaba ibu kininaga ami agali bu hearu bibahende haru haga haguane hene.

## 28

*Debidihanda Anduane Homogonaga anda ogodagua bilimu lalu lenego ogo*

<sup>1</sup> Kini Debidihanda Isaraeleali agali haguane bu hearu bibahendeore Yarusalemeni ngoai hadaba lene. Ani layago hale howa Isaraele wali agali hearunaga haru haga haguane bibahendebe kininaga biabe bulene wiaru handayaho haga bu hearubi hameigini mbira mbira hearunaga agali haguane bu hearubi kinibi ibu igini bu hearunaga dabudabu wiarubi nogo bulumaga sibi bu hearubi handayaho haga hearu tibi kini andaga mamage haga hearubi ami agali haru haga hearubi agali haguane mini lene hearubi bibahende Yarusalemeni ibu ngoai hene.

<sup>2</sup> Ani ibu ngoaiho hai heagola Debidihanda heyu howa tihondo lamialu lalu, I hamenerubi inaga wali agali bu kamirubi tihondo ina bi ayu larogo baya hangu hale halimu. Inanaga Anduane Homogo anda bayaleore mbira Habo Nalolene Bi lo winigonaga Mbogoyi biago ogoniha mo ngelolenaga bule ina mandabu haru. Mbogoyi ogoni inanaga Ngode Datagaliwabe kagonaga ge wilonaga wini. Ina anda ogoni bulenaga mbirale bibahende mo manda mandabu wiai haru. <sup>3</sup> Anidagua mandabu hewaria dege Anduane Homogohanda ihondo langialu lalu, Debidi-o inaga wali agali ini koria ibu ngoai holene anda ogoni bulene i ndo dabaru. Irane i ami agali howa ina agali dewaore homelo bo wahai halu darama pelarigoni ndobe, laya. <sup>4</sup> Anigo Anduane Homogo ina Isaraele wali agalinaga Ngode Datagaliwabe kago ibugua ibi i igini aguanene holebirarubi inane hangume Isaraele wali agali handayaho howa haru haabo holomaya dabaya. Pigane Yuda hameigini hangume Isaraele wali agalinaga haguane howa haru helo Anduane Homogohanda dabene. Ani binigo ai Yuda hameiginiha howa ibugua i ababi ibu damenerubi tigua haru helo dabaya. Ani bialu mani Anduane Homogo ibunime bulene hame leadagua bialu ibugua i hamene bu hearu ti dombeneha i hewaria dabalu Isaraele bibahendenaga kini holiya dabo helene kogoni. <sup>5</sup> Ani bialu ihondo igiri dewaore ngiyaru mbira Solomonu dabo helayago Anduane Homogonaga Isaraele wali agali ibuni handameho hagaha Solomonu ibugua haru helo dabo helaya.

✧ 28:2: 2 Sml 7.1-16, 1 Bit 17.1-14

<sup>6</sup> Ani buwa Anduane Homogohanda ihondo langialu lalu, í igini Solomono ibugua inaga anda ogoni bialu ege pabe hongoheme anda ogoni bu mabu bulebira. Anidagua bulebirago irane ibu í iginiore helo dabarugo ini nde ibu abaore holebero. <sup>7</sup> Ibugua áyu bialu kadagua inaga mana lowini ngogobi inaga bi larogobi hale howa talialu biaabo hayagua nde ibu igini aguaneneru hangume kini helo dabo helaabo holebero, lalu Anduane Homogohanda laya lene.

<sup>8</sup> Ani lowa Debidihanda laabo halu lalu, Ai Anduane Homogo deni howabi ibunaga Isaraele wali agali bu kamiru tínaga deni howabi tí bibahendeore kamiruhondo ina bi hongo howa laro. Inanaga Anduane Homogo ibugua bi mana bayaleore iname bialu halimu lalu langiyaru baya hangu taluwa bialu haabo halimu. Tígua anidagua bialu haabo harimiyagua nde tí dindi bayale o ngagoria haabo halu tínaga aguanene mani holebirarunagabi wiaabo holebira, lene.

<sup>9</sup> Ani lowa ibu igini Solomonohondo bi hongo howa ogodagua laya. I iginiore-o ina biabe bulenego mini ogoriani dunubia howa í abanaga Ngode Datagaliwabe kago ibu andaneha haabo hole manda bu habe. Ani bialu ibunaga hame ngago talialu haabo holenenaga biabe bulene ngago hongo howa bialu haabo habe. Anduane Homogohanda inanaga mini ngamarubi hame ngamarubi bibahende manda biaiho kagoni. Ibu ogonibi kago manda buwa ina ibunaga hame ngago buleore hongo haabo hariyagua nde ina ibuni bayaleore ogobi ka handa walia holebere. Anigo ina ibu erembira mialu piriyagua nde ibugua í taliatagi howa erembira ngialu haabo holebira.✧

<sup>10</sup> Ai áyu baya hangu hale habe. Anduane Homogohanda í dabalú wali agali íbu ngoai howa íbu mitangi bialu ibunihondo lotu lelonaga anda ibunaga loma biahene ogoni ina bibelo dabaya. Anidagua biyago ai ina biabe ogoni hongo howa bialu biai habe, lalu Debidihanda lene.

<sup>11</sup> Debidihanda bi ogoni lai halu Solomonohondo anda biagane mana damenego ogodagua bibe lowa mo walia hai halu mbirale maru tara tara bulene damenego bigiya mo walia hai halu bini. Ani bialu ogoale bibe lalu bi gilibu manda manda bu wiyadago Solomono mo mini. Anda haneni hobane helobi mbirale dabudabu wulenenaga anda hobane helaga bulenedarubi hobane emene emene maru daligahayagi helolenerubi hobane timbuni dindiha helolenedarubi Hobane Loma Bia Heneore ogoniha Habo Nalolene Bi lo winigonaga Mbogoyi biago mo wulenegobi bibahende bigiya wabu manda manda buwa gilibu winigo mo mini. Habo Nalolene Bi lo winigonaga Mbogoyi ogoriani howa Ngode Datagaliwabeanda wali agalinaga ko domo wahaga wini. <sup>12</sup> Ani bialu mbirale anda ogoniha ogoale bibe lalu Ngode Datagaliwabenaga Dinini ibugua Debidihondo mo walia halu wali agali ngoaiho holene hama Anduane Homogonaga anda kawareni ogobi wibe lalubi tamu hobane dewa wali agali ngoai haga ogoniha bu mabu bia holenebi ogodagua bibe lalu walia hene. Ani bialu Ngode Datagaliwabenaga andaha muni wulene tamu hobane helolenebi wali agalime mbirale bayale damene Anduane Homogonaga loma bialu wia bagiho ngelene wiaru mo wulene tamu hobanebi helabe lalu uruni bibahende gilibu wigi biniru mo walia hai hene. <sup>13</sup> Ani bialu Libaiali hearubi loma binigo mo miaga hearubi tinaga biabe ogoale bilo lalu bebani gilibu mandabu winidarubi Anduane Homogonaga andaha biabe ogodagua bulene lalu mana gilibu winidarubi mo walia dege hene. Ani bialu Anduane Homogonaga andaha mbirale tara tara biabe bulenaga wabulene mana mo walia hene. <sup>14</sup> Ani bialu gabo belediru wabulenaga ngolo silibaru ogodaguame karulape lalu mo walia ha dege bini. <sup>15-16</sup> Ani bialu lamu hale wabulenebi lamu hale mo wiagane bu helolenebi dagia silibame wabulenebi Anduane Homogonaga mberedi loma bia hene wiagane dagia ngolome wabu wulenebi lamiai hene. <sup>17</sup> Ani bialu ngolo bayale daga ogodaguame mbirale kanogo ale tomo dugulene dehe wabulenebi ndisi be wabulenebi gabo be

✧ 28:9: 1 Sml 16.7, Iba 139.2, Yar 9.24

wabulenebi ani bialu ngolo silibabi ogodaguame ndisi be maru wabulenebi mo walia halu lamini. <sup>18</sup> Daga gilibu wiyadagoha ngolo bayale ogodaguame ira hagua nga bilo delaga inisenesi lomabu delolene dabu wabulenebi lamialu ngolo ogodaguame dahuliyali handalehe kira wabuwa libunaga babaganeme Anduane Homogonaga Habo Nalolene Bi lo winigonaga Mbogoyi biago yabula dambiho helole wabilonaga ngolo dagabi lamini. Dahuliyali handalehe ogonilabo libu Anduane Homogo ibuninaga karisi laga wabu wini.

<sup>19</sup> Ani lamiai howa Kini Debidihanda lalu, Bigiya beba ogoniha wabu wirudaruni Anduane Homogo ibunime ĭ mo walia hayadagua bibahende wabu wiai haru, lene. <sup>20</sup> Ani lowa ibugua ibu igini Solomonu lamialu lalu, ĩnaga Anduane Homogo Ngode Datagaliwabe kago ibugua ĩ heba mandagi haabo holebirago ĩna biabe uruni bulene gendame ĩ bope haragola mini dege dindi holeni gi nahe hongo howa bialu habe. ĩna Anduane Homogonaga anda ogoni biamaro bibelo ibugua ĩ wahalu nape biamogo bialu haabo holebira. <sup>21</sup> Iname loma binigo mo miaga karubi Libaiali karubi tigua Anduane Homogonaga andaha biabe tara tara bigibigi bialu helo dabo helaiore kamagoni. Biabe tara tara ngago damene bigibigi bulene agali mugubeyi dewaore ĩ biamogo bulene manda mandabu hai heledema. Ani bialu hameigini mbira mbiranaga agali haguane karubi wali agali bibahende ĩnaga bi larego hale halu buleore manda mandabu hai kagoni, lalu Debidihanda Solomonohondo lamiai hene.

## 29

*Anduane Homogonaga anda bilonaga wali agalime mbirale mbirale bame migi binigo ogo*

<sup>1</sup> Kini Debidihanda wali agali bibahende bu hearu lamialu lalu, Ngode Datagaliwabehanda ibunaga anda bilonaga ĩ igini Solomonu dabenege ai Solomonu ibugua anda ogoni bulenaga manda dewa nabi wene dege kagoni. Anduane Homogo Ngode Datagaliwabenaga anda ogoni bulenego bame agalime kininaga anda biagadagua bule ndo biabe erekuibi ndelaheore bialu bulene ngagoni. <sup>2</sup> Ani bulene ngago ai ĩna ngolo silibabi boronosi aeanebi ira bayalerubi bibahende Anduane Homogonaga anda ogoni bule ala mo manda manda bu harugoni. Ani buwa ege toĭ bayale tara tara muni dewaoreme yolo miaga ngarubi mo wia dege birugoni. <sup>3</sup> Uruni mo tago halu ĩna ngolo siliba maru ngorunibi ngia dege biru. Ani birudagoni irane ĩna Anduane Homogonaga anda bu helo hame timbuniore lowa anidagua bule lowa manda manda birugoni. <sup>4</sup> Ngolo bayale ĩna wirudarunaga genda magi timbuni kilogarama daosini handari mbira (100,000) silibabi genda magi timbuni dege kilogarama daosini handari kirani pira maria (240,000) ngogo ogonime Anduane Homogonaga anda ogoni tamuha anda hái yári bule ngo. <sup>5</sup> Ani bialu anda biaga agali mandabi karume anda ogoni bigiya wabu ngarunaga silibame mo yári bia holene ngarubi ngolome mo yári bia holene ngarubi bulene ngadagua bigi bilonaga ngogoni. Ai uruni bulenaga turu halu Anduane Homogohondo loma bialu mbirale bame migi bule ái dege kamibe.

<sup>6</sup> Kini Debidihanda bi ogoni layago hale howa Israele hameigini mbira mbiranaga agali haguane hearubi ami agali daosini agima haru haga agali haguane hearubi ami agali handari agima haru haga agali haguane hearubi kininaga mbirale wiaru handayaho haga hearubi bibahendeoreme anda ogoni bulenaga mbirale bame mule turu timbuni howa tinaga bu miniha dunguloore hene. <sup>7</sup> Ani howa tigua ngolo dewaore genda magi kilogarama daosini dege handari mbirani pira karia (170,000) bolangua howa wialu siliba kilogarama daosini dege handari tebirani pira maria (340,000) bolangua howa wini. Ani wialu boronosibi nde kilogarama daosini dege handari waragariani pira kira (620,000) wialu aeanenaga genda magi timbuniore kilogarama

✧ 29:1: 1 Bit 22.5

milini tebirani daosini dege handari maria (3,400,000) wini. <sup>8</sup> Ani buwa wali agali bu hearume ege tole tara tara muni timbunime yolo bialu miaga wigi biniru Anduane Homogonaga anda muni wiaga wiagoha ngelo mo migi bini. Gesono hameigini agali mbira mini Yahiele henego ogoni ibugua anda hobaneha muni wiaga ogoni handayaho haga hene. <sup>9</sup> Wali agali tigua handalu hemiria tinaga agali haguane bu hearume uruni damenego wule turu howa wialu heago de hondowa tibi nde turu timbuni ho hene. Kini Debididi ibunibi nde uruni hondowa turu timbuniore ho hene.✧

*Debidihanda Anduane Homogonaga mini yaraga henego ogo*

<sup>10</sup> Wali agali bibahende ibu ngoai ho hearunaga deni howa Debididi ibugua Anduane Homogonaga mini mo yaraga halu lalu, Anduane Homogo-o iore ina mamali Yagabanaga Ngode Datagaliwabe kego wali agali bibahende bu kamarume inaga mini yaraga haabobo halu holene nga. <sup>11</sup> I bibahendenaga hongo haihebi wa holenebi baya buruguleorebi mini lene daliga timbuniorebi kegoni. Mbirale dindini ngarubi karubi dahuliya andagaha ngarubi karubi bibahende inaga hangu hai kegoni. Ai mbirale uruni bibahendenaga kini dunini timbuniore howa ini handame ho kegoni.✧ <sup>12</sup> Ini hangume bibahende bayale ngaru inahondo ngiai howa inime bibahende haru hai ho kegoni. I hanguore bibahendenaga hongo bolangua haihe howa inime dindini wali agali bu karu mo hongo ho helowa mini leneore helaga kegoni. <sup>13</sup> Inanaga Ngode Datagaliwabe-o iname i bayaleore lalu inaga mini yaraga halu kaj larama.

<sup>14</sup> Inaga wali agali bu karumebi inimebi mbirale bibahende ayu ihondo ngere-marunaga anduane inane howa ngerema labe naheore kama. Inaha galone mbira nahe howa mbirale uruni inanenaga labe naheore kamagoni. Mbirale uruni bibahende ininaga hangu wiaiore ka. Ala mbirale uruni inime inahondo ngiriruni ayu iname inihondo lone ngiadai berema. <sup>15</sup> Anduane Homogo-o ayu wali agali dindini bu kamaruni bibahende ina dindi mbirani baya hangu ho dungulo haga ndo inanaga mamali heneru ti bamba dindi mbira mbirani palia edede dege bima ibaga bialu hagadagua haga kamago i manda bu kegoni. Ani howa inanenaga holene minu yania habe naheore howa balawaya dowa daabo nahe abale do gilopebe biraligobi kama. <sup>16</sup> Anduane Homogo inanaga Ngode Datagaliwabe-o iname mbirale bibahende ayu ngelo bedamaruni inaga mini timbuniore lene kegoni lalu anda bulenaga mo mogo buwa ngelo kamagoni. Anigo mbirale uruni bibahendeore iniha howa ibini ininaga hangu wiai ka. <sup>17</sup> Ina wali agali bu karu bibahendenaga bu miniha agi winidabe hondole bahandai halu mbirali ibu mana tigabi bialu kago hondowa inaga bu miniha turuho haga kegoni. Ina uruni mitangi bialubi mende i mini leneore kego mitangi bialubi inaga miniha mbirale mbirale uruni ihondo ngua timbuniore howa ngero. Ai ayu anidagua dege inaga wali agali bu karu tiguabi nde mbirale uruni ihondo turu halu nguaore howa ngiragoni. Tigua ani ngirago hondowa inaga bu miniha turu timbuni ho kogoni. <sup>18</sup> Ai Anduane Homogo-o i ina mamali Abarahama Aisaga Yagaba imarunagabi inanagabi Ngode Datagaliwabeore kego inime inaga wali agali bu kamarume biabe urunidagua bulumaya inanaga bu miniha mo hongo haabo habe. Ani bialu wali agali uruninaga bu mini iniha hana ho haabo helo helabe. <sup>19</sup> I igini Solomono ibugua inaga bi laregobi mana lowini ngagobi talialu anda ogoni bilo mini mandaru bayale bulene talebu mibe, lalu Debidihanda Anduane Homogohondo lene.

<sup>20</sup> Ani lowa Debidihanda wali agali bu hearuhondo lamialu lalu, Anduane Homogo tinaga Ngode Datagaliwabe mini yaraga hai hadaba, lene. Ani layago hale howa wali agali bu hearume ge duli hanga howa dindini bulu paluwa Anduane Homogo tinaga mamali ala hama ibinirunaga Ngode Datagaliwabenaga mini yaraga halu Debidinaga minibi yaraga halu bini. <sup>21</sup> Ani bialu horo mendengi wali agali tigua nogo bulumaga

wangabe daosini mbira (1,000) sibi wangabe daosini mbira (1,000) sibi igini hungubalua nde daosini mbira (1,000) dege lowa uruni bibahende Anduane Homogohondo loma buwa irani bo delai hene. Ani buwa waini ibabi loma bialu odo dela dege bini. Ani bialu Isaraele wali agali bibahendenaga loma marubi bo dela dege bini. <sup>22</sup> Horo ogoningi wali agali ti tomo ibabi loma binidaruni nalu tinaga bu miniha Anduane Homogonaga deni ti turu timbuni ho hene.

Anidagua bialu howa horo ogoningi dege tigua Anduane Homogonaga deni howa Solomonu ibu tinaga kini helo halu mende lowa ibunaga hagianeni weli odo wini. Ani bialu agali mbira mini Sadogo heagobi loma binigo mo miaga helo dabo helalu bini. <sup>23</sup> Ani bialu Solomonu ibu kini halu ibu aba Debidi kini henegoria ha aribia howa kininaga biragane Anduane Homogohanda helenegoria biruwa ibugua wali agali bu hearu handame ho hene. Ani howa ibugua biabe biyaru bayale dege biyagola Isaraele wali agali bu hearu bibahendeme ibunaga bi hale halu ibu andaneha hai hene.\*

<sup>24</sup> Ani howa kininaga biabe biaga agali haguane bu hearubi ami agali haguane hongohe bu hearubi heba Debidi igini maru bu hearubi ti bibahendeme Kini Solomonu andaneha hai hole lalu bi hongohe lo wiai hene. <sup>25</sup> Anduane Homogohanda Isaraele wali agali bu hearunaga deni Solomononaga mini yaraga halu mo duniniore ho helene. Ani bialu Solomonu ibu kini mini leneore howa Isaraele dindiha kini ala henedaru bolanguahe timbuniore hene.

### *Debidi homenego ogo*

<sup>26</sup> Yasi igini Debidi ibu Isaraele dindi bibahendenaga kini howa <sup>27</sup> ibugua mali pira mariani (40) haru hene. Ibugua Heberono dindini mali kariani kini halu Yarusalemeni howa mali pira tebirani tebira (33) haru hene.\* <sup>28</sup> Ibu wali agali bibahendenaga deni mini lene timbuniore halu ibunaga munirubi dabudabu tara tarabi dewaorewi hene. Ani wi howa ibu waheore biru wialu homene. Homayagola ibu igini Solomonu ibunime ibu aba hayadagua kini ha aribia hene. <sup>29</sup> Debidi ibu kini pigane henedangi howa bima ibalu homayangi maro binigonaga te Samuelenaga mbuga ngagohabi mbuga mende Anduane Homogonaga bi mana latagi haga Nadananaga mbugahabi gilibu wialu Gadanaga mbugahabi gilibu wigi bida.\* <sup>30</sup> Mbuga uruniha howa Debidihanda biabe hongoheore wiaru bialu henegobi ibuni kiniore kagonida lo manda bialu Isaraele dindi baya hanguore handayaho henegobi te uruninaga gilibu wigi bida. Ani bialu nde mana ibugua bialu hene maru wiarubi Isaraele wali agali baba biabe bialu hene wiarubi dindi maru Isaraele dindiha wia mabu bialu wia parapara biaru baba biabe bialu hene wiarunaga te lo wigi bida.

---

\* **29:23:** 1 Kin 2.12    \* **29:27:** 2 Sml 5.4-5, 1 Bit 3.4    \* **29:29:** Mbuga tebira uruni bamba Anduane Homogonaga bi mana latagi haga agali hearume gilibu winiyago ai áyu iname handa nabi kamagoni irane mbuga uruni bamba ereba heneya.



## 2 Bi Te

### Mbuga ogoniha gilibu ngarunaga nemandi ogo

Bi Te mbuga mende ogoni Bi Te mbuga mbira biago aria dege nga. Anigo bi lo ngarunaga irane handa waliala hole Bi Te mbuga mbira biagonaga bi nemandi gilibu ngagoha howa bi ledagome mo waliala kago hondolene nga.

Kini henerunaga mbuga mbiragome Kini Solomono henedangi howa binirunaga te lama ibalu Isaraele wali agali talebuki howa dindibi tu wiaki halu hameigini paligi paligi binirunaga leda. Libu haru ani hebira wai tigime anda ibuwa dindi bo gialahole bialu mo wai labu hai henegonaga leda. Anigo mbuga ogonime Isaraeleali uyurayagi henedarume binidarunaga te dewa nale dindi unurayagi Yuda dindiha binidarunagabi Yarusaleme tanoha binidarunagabi bi te dewa gilibu nga.

#### **Bulu бага бува кuni gilibu ngago (1.1-9.31)**

Solomono ibu kini howa bialu henego

1.1-17

Ibugua Anduane Homogonaga andaneha howa bialu henego

2.1-7.10

Anduane Homogonaga anda binigo

7.11-9.31

Solomono ibu kini haabo howa hamaro binigo 10.1-19

Isaraele hameigini talebu ki howa hangu hangu henego 11.1-36.12

Yuda dindi handame haga kinirunaga te gilibu ngago 36.13-23

Yarusaleme tano bo gialabaga bialu mo wai labu henego

*Solomonhanda Anduane Homogohondo mini gigabi wulene ngibe lalu bi lenego ogo (1 Kini 3.1-15)*

<sup>1</sup> Anduane Homogo Kini Debidi igini Solomononaga Ngode Datagaliwabeanda Solomononaga biamogo timbuniore biyagola ibu kini hongoheore hene.

<sup>2</sup> Kini Solomonhanda ami agali daosini mbira (1,000) haru haga hearubi handari mbira (100) haru haga hearubi ibunaga gabumane haru haga hearubi hameigini haru haga haguane hearubi Isaraele wali agali bibahendeore mo ngoai hene. <sup>3</sup> Mo ngoai heagola ibugua tihondo lalu, Anduane Homogo mitangi bialu inanaga lotu laga dindi dunini mbira Gibeono ngagoha maliya, lene. Dindi ogoriani Anduane Homogo lola holenaga Balai Anda ala Mosese ibugua dindi koha bu helene. <sup>4</sup> Ani helayagoyu Anduane Homogonaga Habo Nalolene Bi lo winigonaga Mbogoyi dindi ogoriani nawini. Ala Kini Debidihanda Mbogoyi biago Kiriada Yarimi tanoha howa yalu ibalu Yarusalemeni balai anda mendehe ngelene. <sup>5</sup> Gibeono dindiha lomabu delaga dabu mbira Uri igini Besalele ibu Hua aguanene henego ibugua dabu ogoni boronosime wabinigo Anduane Homogonaga Balai Anda haneni bu helenegoria Solomononaga ibubi wali agali bibahendebe Anduane Homogo mitangi bialu lotu lalu hene. <sup>6</sup> Ani bialu howa Solomononaga ibugua dabu boronosime wabini heagoha bulumaga sibirubi daosini mbira (1,000) loma bialu bo delai hene.

<sup>7</sup> Ani bialu horo ogoningsi mbiraga Solomononaga ibu palearia Anduane Homogohanda emagaha howa lalu, Ina ihondo mbirale mbira ngi lalu hale harego nguliya agile ngi loleberebe, lene.

<sup>8</sup> Ani layagola Solomonhanda lalu, I aba Debidi inioreme ibu gubalini halu mbirale bayale hangu biaabo haga kegoni. Ayubi nde ina ibu kini henegoria i ha aribia holiya dabo helarigoni. <sup>9</sup> Anigo inaga Anduane Homogo Ngode Datagaliwabe-o i igiri emene

✧ 1:4: 2 Sml 6.1-17, 1 Bit 13.5-14, 15.25-16.1 ✧ 1:5: Har 38.1-7

mana manda biai nahe kogo ínaga wali agali baya hangu agua haru holedabe tobaho kogoni. Áyu í ínaga wali agali ínime dabo helene biaru heba mandagi hewaria ainde ti daga labe nahe dewaore bu kago ai ínime í abahondo buleore lalu bi lo wirigo\* 10 ínaga wali agali uruni ina baya hangu haru holiyanaga ina mini gigabi wulenebi manda bayale bulenebi ngibelo hame ledó. Ani ngeregola ina mana ogo tigabi ogo tiga nabi lalu baya hangu tale bulene karulape holebero. Nangiriyagua nde ínaga wali agali dewaore labe nahe o bu karuni ina agua haru holiyadabe, lene.

11 Solomonohanda bi layadagoni hale howa Anduane Homogo ibugua bayaleore laya manda bialu ibunaga bu miniha dungulo hene. Ani howa ibugua Solomonohondo lalu, Ina Isaraele wali agali baya hangu haru holiya mini gigabi wulenebi manda bayale bulenebi ngi larigo bayuwa lari. Ina dindini luore holiya biamogo bibe lalubi ndo muni mbiraleru dewa ngi lalubi ndo ínaga waitigi bu karuni bo wahabe lalubi ndo hale harigo bayuwaore larigoni. 12 Ogoni heneneore larigo ina mbirale ihondo ngi lalu hale harigoni ina ngulebero. Áyu ogoni howa íha mini mandala timbuniore gigabiwi habelo ngulebero. Abale agali mbira manda timbuni ogonibi mbira ha nabini. Manibi nde agali mini mandala timbuni gigabiwi í ale mende naholebiraore. Ina ihondo mini lene holenebi muni mbiraleru yu holiya ngi lalu ndo larigo ínime mbirale uruni bibahende ngiai harogola yu holebere. Ani yu kegola kini mini lene maru karubi ndo í mini lene daligaore holebere, lalu Anduane Homogohanda Solomonohondo lamini.\*

*Kini Solomonu ibu homogo henego ogo  
(1 Kini 10.26-29)*

13 Mani Solomonu ibu Gibeono dindini Anduane Homogo mitangi bialu Balai Anda heagoha lotu laga winigo ngelalu Yarusaleme dai buwa ibugua Isaraele wali agali haru haga hene. 14 Solomonu ibugua wai biagane garo ale karisirubi ibu ami agalirunaga nogo hosirubi dewaore yolo bu hela ngela bigi bini. Ani buwa ibugua karisirubi hosirubi tale bialu maru dindi ibugua handayaho haga wiyadaruha talebu pelalu maru Yarusalemeni ngelo hene. Wai biagane karisi daosini mbirani handari maria (1,400) wialu wai biagane ami agalirunaga hosi daosini mbirani hombearia (12,000) hene.\* 15 Solomonu ibu kini henedangi muni ngolo silibaru dewaore daga labe nahe ege tole dugu paya biradagua bialu Yarusalemeni yu anda ibugu biaga wini. Ira tamiabi aulolebe tobahe bame Isaraele dindi hari bare wiaruha howa ira hearu damene bibahendeore dibu yu ibai hene wiradagua bini. 16 Solomonu ibugua biyinaya biaga agali hearuhondo ibunaga hosiru Silisia dindiha howabi Musiri dindiha howabi yolo bule pudaba laga hene.\* 17 Ani lara handala biyinaya biaga agalidarume Musiri dindiha puwa wai biaga karisirubi hosirubi yolo mule piaga hene. Karisi mbira mbiranaga yolo muni siliba kina dege daosini waragaria (6,000) aleme mialu hosi mbira hangunaga yolo muni siliba kina daosini mbirani handari duria (1,500) aleme yolo miaga hene. Yolo ani mialu agali uruni tigua hosiru haru ha karisiru mo ya bialu Hidiali kini karia pialu Siriali kini kariabi pu bigi biragola ogonilabo libugua mbirale yalu piagadaruni munime yolo bigi biaga hene.

## 2

*Solomonohanda Anduane Homogonaga anda bule manda manda binigo ogo  
(1 Kini 5.1-18)*

1 Kini Solomonohanda anda mbira Anduane Homogo mitangi bialu lotu lolebi anda mende ibuninagabi bule manda bini. 2 Ani manda buwa hari bareha tole poda tiga bilo ibugua agali daosini pira halirame (80,000) bilimu lalu agali daosini pira kariame

\* 1:9: Pig 13.16, 28.14    \* 1:12: 1 Bit 29.25, 2 Bit 9.22    \* 1:14: 1 Kin 4.26    \* 1:16: Man 17.16

(70,000) tole irabi yu tono bigi bilo dabo helene. Biabe biraru handayaho helo ibugua agali daosini tebirani handari waragaria (3,600) dabo helene.

<sup>3</sup> Solomonohanda Taianaga kini mbira mini Hirama heagohondo bi lo pelowa lalu, Abale i aba Kini Debidi heangi ina ibu biamogo bialu ibuni anda bayaleore bilo ira tamia dewa dibu miridagua ai ibi nde biamogo bialu ira dibu ngibelo hame ledogoni.

<sup>4</sup> Anigo ina Anduane Homogo inaga Ngode Datagaliwabe kago ibunaga mini yaraga helo anda timbuniore bialu kogoni. Anda ogoni loma biahene tara halu ibi inaga wali agali karubi iname Anduane Homogo mitangi bialu lotu lole hagua nga bilo inisenesi delalu mberedi loma bia howa ibu de hendelo migi bulene wulebira. Ani bialu egerebagi alendobi Sabada horongibi horo timbuni Ege Mbira Ngabulo harangibi horo marunagabi bibahendengi nogo loma bialu bo delaga bulene wulebira. Anduane Homogo ibugua ogodagua lalu, Isaraele wali agali tigua ani biaabo holene nga, lene.

<sup>5</sup> Anda timbuni taraore buleberogo irane Ngode Datagaliwabe ibuni hangu daligaore mini lene kago ibu ale mende naheore kagonaga. <sup>6</sup> Anigo Ngode Datagaliwabe ibu helo anda mbira aiwa bibebe kabe. Ibuni holene hari daliga bibahendeha nakarulape degego ina anda emeneore ayu bule kogo ibu agua holobadabe. Anda berogo nga biagane inisenesime ibuhondo delolene hangu holebira.\*

<sup>7</sup> Ai agali mbira ibu giligili bulene mugubeyi ngolo silibamebi ege tole boronosimebi aeanemebi mbirale mbirale wabulene mugubeyibi labolabo hari mindini handalehebi tagalitayabi daramabibi wabulene mugubeyibi kago i kogoria ibilabe. Ala i aba Debidihanda Yudalibi Yarusalemealibi mugubeyi hearu hondowa dabeneru ibu ti heba biabe bilo.

<sup>8</sup> Ani bulebirago ina inaga agali ira dibaga mugubeyi kane hendedogo maru Lebanono irabuha ira tamiabi guraya alebi yuluba alebi dibalu ibilaga bibe. Inaga biabe biaga agali karu inaga biabe biaga agali biamogo bilo pudaba lolene manda bu kogoni. <sup>9</sup> Anda ogoni berogo timbuni taraore buleberogo ira dewa manda manda bu wulene holebira. <sup>10</sup> Inaga biabe biaga agali karu tigua tomo nelu ina widibi balibi genda magi tono daosini kira (2,000) dege degebi waini iba lida magi daosini handari mariabi (400,000) olibe lininaga weli lida magi daosini handari mariabi (400,000) ibilolebero, lalu bebani gilibu wia hene.

<sup>11</sup> Hirama ibugua Solomonohanda beba ogoni gilibu wia hayago muwa beba gilibu dai bialu lalu, Anduane Homogo ibugua Isaraele wali agali gubalini timbuniore howa i tinaga kini helo dabo helayiya. <sup>12</sup> Anduane Homogo Isaraele wali agalinaga Ngode Datagaliwabe ibugua haribi dindibi wabiai henego kago ibunaga mini yaraga hai holene nga. Ibugua Kini Debidi igini mbira mini bayale gigabiwi manda timbunibi holene miyiya. Ibu igini ogoni i kego ina Anduane Homogonaga andabi ininaga andabi bule manda manda bu ke, lene. <sup>13-14</sup> Ani lowa Hiramahanda lalu, Agali mbira mini Hurama kago ibu aija Dana hameigini berenego ibu aba Taia tanoali hene. Agali ogoni ibugua mbirale tara tara ngolo silibameru boronosimeru aeanemeru ege tolemeru irameru wabiaga mugubeyi kago ibugua labolabo tara tara hari mindini handalehebi tagalitayabi daramabibi wabulene mana mandabi kago ibu i keria ibilo pu larugoni. Ibugua giligili baya gibi biaga kago bigiya wabu ngadagua bibehereore kagoni. Ibugua inaga biabe ogonibi bulene mandabi karubi biabe biaga maru i aba Kini Debidinaga heneru tibi bibahende mandagi howa inaga biabe bilo bilabe. <sup>15</sup> Anigo ai ina widi balibi waini iba olibe lininaga welibi ngulebero larigo abale wia habe. <sup>16</sup> Ina Lebanono hari irabuha puwa inaga biabe biaga agali karume ira tamia i hamelededagua dibalu iba solowara bedagoria yu tagira pu ngelolebira. Tigua ani yu ibu wiai howa pume daba homagamaga buwa ibani ibilalu inime Yoba tanoni yu ibabe lariyagoria mo

\* 2:6: 1 Kin 8.27, 2 Bit 6.18

yalu ibulebira. Ani yu íbu ngelaragola íninaga biabe biaga agali karu tinime mo yalu Yarusaleme polene nga, lalu Kini Hiramahanda beba ogoni Solomonohondo ibilene.

*Solomonohanda Anduane Homogonaga anda pigane binigo ogo*  
(1 Kini 6.1-38)

<sup>17</sup> Solomonohanda Anduane Homogonaga anda lunaga mida magi pira kirani karia (27) halu arane yangalenaga mida magi dira manda bini. <sup>4</sup> Anda hobane mbira harabahayaagi helenego ogoninaga arane timbuni mida magi dira dege howa daliganaga mida magi pira duriani maria (54) hene. Tamu hobane ogoni ngolo bayale wiagome ira hela dambi hai hene.

### 3

<sup>1</sup> Solomonohanda Anduane Homogonaga anda Yarusalemeha hari mini Moraiani anda ogoni tenialu bini. Ala dindi ogoriani Yabusuali Araunanaga widi iraneru lini hondo ibira ibira halu lini aeanela mo tale biaga wiagoria Anduane Homogo ibu Debidi hearia hapani hayangi Debidihanda ogoriani Anduane Homogonaga anda bulene nga manda bu hene.\* <sup>2</sup> Solomonohanda Anduane Homogonaga anda lunaga mida magi pira kirani karia (27) halu arane yangalenaga mida magi dira manda bini. <sup>4</sup> Anda hobane mbira harabahayaagi helenego ogoninaga arane timbuni mida magi dira dege howa daliganaga mida magi pira duriani maria (54) hene. Tamu hobane ogoni ngolo bayale wiagome ira hela dambi hai hene.

<sup>3</sup> Solomonohanda Anduane Homogonaga anda lunaga mida magi pira kirani karia (27) halu arane yangalenaga mida magi dira manda bini. <sup>4</sup> Anda hobane mbira harabahayaagi helenego ogoninaga arane timbuni mida magi dira dege howa daliganaga mida magi pira duriani maria (54) hene. Tamu hobane ogoni ngolo bayale wiagome ira hela dambi hai hene.

<sup>5</sup> Hobane Loma Bia Hene tamuhayagi Solomonohanda ira guraya ale pelowa anda háini bapara howa ngolo bayalegome ira paraho dambi hai hene. Ani buwa ngolo ogoriani bigiya dewa ayage alebi pu seni alebi gilgili bini. <sup>6</sup> Kini ibu ngolo ogoni dindi mini Parabaimiha howa minigomebi ege tole tara tara muni dewaore miagagomebi Anduane Homogonaga anda biago yári tara tara helaga bini. <sup>7</sup> Anda ogoni tamuha anda daligahabi háibi harababi pangabi bibahende ngolo bayaleme hela dambi hai hayagola biabe biaga mugubeyi biarume anda háini dahuliyali handalehenaga bigiya dewa wabigi bini.

<sup>8</sup> Anda biagonaga yangale magi winidagua Hobane Loma Bia Heneorenaga arane yangale mida magi dira wialu lunaga mida magi dira dege wini. Hobane Loma Bia Heneorenaga hái hela dambi helo ngolo genda magi tono pira kirame (20) helene.\*

<sup>9</sup> Milinaga haguane dambi helo ngolo genda magi garama handari waragaria (600) mialu anda tamu hobane daliganaga háiha ngolo degeme dambi hai hene.

<sup>10</sup> Solomonohanda ibunaga biabe biahaga agali biarume mbirale dahuliyali handalehe kira babaganehe wabu ngelowa ngolome para hodambi hai halimu lene. Tigua ogonidagua biai howa Anduane Homogonaga anda Hobane Loma Bia Heneore biagoha mo yanda howa ngelene.\* <sup>11-13</sup> Dahuliyali handalehe wabini biagolabo tamu hobane hanuni ogoniha mandagi heleagola libu tamu hobane biagonaga pangaha handade ho ngelene. Libu babagane kira kirahe howa libunaga babagane yanga lowa haragaho helowa babagane lunaga mida magi kira bolanguahe hene. Dahuliyali handalehe biago labonaga babagane mende mendeme anda hái ela howa mendego labome tamu hanuni libuni ela hagabu helene. Babagane maria biaru yangalai howa mida magi dira ale hene.

<sup>14</sup> Anda Hobane Loma Bia Henebi Hobane Loma Bia Heneorebi hobaki hole labolabo baya taraore timbuni mbira wabini. Labolabo timbuni ogoni pu tara tarame biamaga

howa kala mindibime guyini hari mindini handalehe wiarumebi tagalitayame guyini wiarumebi daramabime guyini wiarumebi mo yári bia hene. Ani buwa dahuliyali handaleheru labolabo ogoriani yári bia ho helaga bini.\*

*Ege tole boronosime anda gene luni kira wabu helenego ogo*

*(1 Kini 7.15-22)*

<sup>15</sup> Solomonohandaibunaga biabe biahaga agalirume ege tole boronosime anda gene luni kira wabuwa Anduane Homogonaga anda haneni helalimu lene. Gene biago labonaga luni mida magi duriani maru bolangua halu ogoni labonaga nguni daligahayagi hela dambi holene wabu wiyago luni mida magi kirani bolanguahe wini. <sup>16</sup> Daligahayagi dege yári pu seni ale boronosime wabigi bialu ira mbira lini mini pomegaranade lini handalehe handari mbira (100) pu senini helaga bini. <sup>17</sup> Anda gene kira ogoni labo wabiai howa anda haneni talebu helene. Anda gene mende mini Yagini lalu anda haraba unurayagi wiagoria helene. Anda gene mende mini Boasa lenego abene uyurayagi helene.\*

## 4

*Anduane Homogonaga andaha mbirale tara tara wilo wabinigo ogo*

*(1 Kini 7.23-51)*

<sup>1</sup> Kini Solomonohanda lomabu delaga dabu timbuni wabinigo luninaga magibi yangalenaga magibi mbiraore mida dira bolanguahe dege dege wialu daliganaga magi mida maria bolanguahe wini.\* <sup>2</sup> Iba dange mbira wagarorobi boronosime wabialu daliganaga mida magi kirani bolanguahe halu aranenaga mida magi mariani bolanguahe dege wabu wini. Ani bialu timbuni mabubinaga mida magi pira mbirani tebira (13) bolanguahe wini. <sup>3</sup> Iba dange ogoninaga neneni mbirale mbira nogo bulumaga wangabe handalehe wabuwa duguni kira mabubupe helene. Ani buwa dombeneha mida mbira mbira yu wahaga buwa bigiya pira pigane iba dange wabialu howa wabumaga henego uruni mo helene. <sup>4</sup> Nogo bulumaga wangabe handalehe pira mbirani kira (12) wabu winigoria erekunini iba dange biago mo wini. Ani mo wiagola bulumaga uruninaga herenehayagi iba dange biago tibinime dambi helalu wanakui handa tagitagibu helaga bini. Mbirale bulumaga handalehe uruni aria tebira ni tagira ibiragohayagi handa amuhohelalu tebira mende ni paliragohayagi handa daibu helalu tebira dege tebone uyurahayagi handa uyu howa helalu tebira dege mane unurahayagi handa unuhohelene. <sup>5</sup> Iba dange biagonaga tamuhayagi howa tagirahayagi tohenaga magi sendimida halira gi hondone dunuyanego ale wini. Ani wiagola dange biagonaga poneni balawaya ale lini yanga nale wene dedaligobi wini. Iba dange ogoniha iba timbuniore lida magi daosini dege pira waragaria (60,000) birulene wabu wini. <sup>6</sup> Tigua iba dange emene pira wabu wini. Uruni wabiai howa duria Anduane Homogonaga anda manda abene unurahayaginaga heagoria wialu duria mende anda manda abene uyurahayaginaga heagoria wini. Iba dange pira biaru nogo podene ngago irame dai helonaga dange uruniha wayawaya ala biaga hene. Iba dange timbuni biago loma binigo mo miaga ti wayawaya bilo wini.\*

<sup>7-8</sup> Tigua lamu hale delaho ngelolenaga irane pira ngolome wabulene winidagua wabialu dagia pirabi ngolome anidagua wabuwa bibahende Anduane Homogonaga anda tamu Hobane Loma Bia Henegoha duria dege dege uyurahayagibi duria dege dege unurahayagibi ngelaga bini. Ndisi be handari mbira (100) ngolome wabigi bini.\*

<sup>9</sup> Ani biai howa tigua loma binigo mo miaga ngoai haga hama emene godo wialu wali agalibi ngoai helonaga hama timbuni godo wini. Ani buwa ege tole pabe kira hama

\* **3:14:** Har 26.31 \* **3:17:** Mini Yagini ogoni Hiburu bi lalu Ngode Datagaliwabehanda wabu wini lale ka. Mini Boasa ogoni Hiburu bi lalu Ngode Datagaliwabehanda hongome bini lale ka. \* **4:1:** Har 27.1-2 \* **4:6:** Har 30.17-21 \* **4:7-8:** Har 25.23-40



hangu hangu wilo wamabu bini. Ege tole pabe kiranaga panga boronosime paraho dambi hai hene. <sup>10</sup> Iba dange timbuni biago Anduane Homogonaga anda tagiraha abene unurahayaginaga gibuni wiagoria mo ngelene.

<sup>11</sup> Huramahanda wayawaya bulene ndisibi nama tabulirubi ndisi emenerubi bibahende wabiai hene. Ani bialu Hurama ibugua Anduane Homogonaga andaha biabe uruni bibe lalu Kini Solomonohanda mo miyaruni bibahende biai hene. Huramahanda wabinidaruni bibahende lamaga halu uru ale dege. <sup>12</sup> Anda gene luni boronosime kira wabuwa ogoni labonaga nguni daligahayagi dambi holene manda ale kira wabuwa nu ale nguni daliga dambi hayago mo yári bia holenebi wabini. <sup>13</sup> Ira mini pomegaranade lini handalehe bigiya handari maria (400) nu ale wabu helayagoria mo yári bia halu pongo bia haga bulenerubi anda gene mbira mbirani pomegaranade lini handalehe biagonaga bigiya duguni kira labolabo wabu helalu bini. <sup>14</sup> Ani bialu wilibaro ale pira wabialu iba dangebi wilibaro ogoriani pira dege wabu berelaga bini. <sup>15</sup> Ani bialu iba dange timbuni biagobi nogo bulumaga handalehe pira mbirani kira (12) iba dange ogoni yu heleagobi dege wabini. <sup>16</sup> Ndisirubi nama tabulirubi kanogo deherubi ndisi emene emenerubi wabiai hene. Hurama ibugua Solomonohanda anidagua bibe layagola mbirale uruni boronosime wabu wiai howa ngiringara lelo mbirale hai hagame baya hanguore hai howa domo mbaralo wahowa Anduane Homogonaga andaha wulene ale uruni bibahende wabu wiai hene.

<sup>17</sup> Kini Solomonu ibugua Huramahondo mbirale wabia layagoni dindi ulini mbira iba Yodana anghayagi Sugodo Seredaha tanola hengene wiagoha howa wabialu hene. <sup>18</sup> Ani buwa Hurama ibugua mbirale boronosime wabinidaruni dewaore wabu wini. Ani biyagola Solomonohanda agali maru hearuhondo boronosime mbirale wabiyadaruninaga genda magi agiradabe hondole daga ladaba nale wahene. Uruni-naga genda magi ogodagua lalu agali mbiramebi manda nabi hene.

<sup>19</sup> Solomonu ibugua agali biabe biaga hearuhondo Anduane Homogonaga andaha ngelole ngolome mbirale maru wabidaba lene. Ani layagola biabe biaga agali hearume lomabu delaga dabubi wali agalime mberedi Anduane Homogohondo minigo mo wulene dagiabi ngolome wabu helene. <sup>20</sup> Ani bialu ngolo bayaleore wiarume lamu hale iraneru wabu helowa Anduane Homogonaga anda Hobane Loma Bia Heneore laga heagonaga anda hái tagirahayagi lamu hale delo wigi bulenaga manda manda bialu lo wiyadagua wabu wini. <sup>21</sup> Ani bialu ngolome dege balawaya handalehe wabialu lamu hale wabialu ira tabolene perobi wabu wigi dege bialu <sup>22</sup> nogo darama loma binirunaga darama hambu yule gabo bebi ndisi marubi mbirale mbira lamu hale mo hundia haga alebi ira hagua ngabiaga inisenesi delolene beledibi ira dene hedo yulene beledibi uruni bibahende ngolo bayaleme wabigi bini. Anduane Homogonaga anda panga tagirahayagibi tamuha Hobane Loma Bia Heneoreha anda polene pangabi ngolome dege paraho dambi hai hene.

## 5

<sup>1</sup> Kini Solomonobi ibunaga biabe biaga hearubi tigua Anduane Homogonaga andaha biabe bulene winigo biai hene. Biai hayagola Solomonu ibugua ngolo silibabi mbirale tara tarabi ibu aba Debidihanda Anduane Homogonaga loma biaho winiru bibahende anda hobane uruni ale wiagane heagoha mo yu puwa ngelaga bini.✧

*Habo Nalolenenaga Mbogoyi Anduane Homogonaga andaha mo yalu ibinigo ogo*  
(1 Kini 8.1-9)

<sup>2</sup> Kini Solomonohanda, Isaraele hameigini hearunaga agali haguane bibahende hearubi hameigini emene emenenaga agali haguane hearubi ti bibahendeore ini koria Yarusaleme ibai halimu lalu lama pudaba, lene. Uruni tigua Debidinaga tano Saiononi

Anduane Homogonaga Habo Nalolene Bi lo winigonaga Mbogoyi biago ibunaga anda Yarusalemene ngelole mo yalu ibule pudaba lolenaga ani lamule bi yalu purogo ladaba lene.\* <sup>3</sup> Ani laya handala bi ogoni hale halu agali uruni tigua mali ogoninaga ege kane layagola Isaraele wali agali ti ege ogoningsi Horo Timbuni Anda Nemendaruha Palu Holene winigo ti bibahende íbu ngoai hene. <sup>4</sup> Agali haguane biaru íbu ngoai heagola Libaiali hearu tigua Mbogoyi biago mo yalu <sup>5</sup> Anduane Homogonaga anda heagoria yalu pene. Ani buwa loma binigo mo miagarubi Libai agali hearubi tigua Anduane Homogonaga Balai Anda heago giallo yalu Balai Anda ogoniha wiaga wiaru bibahende mo yai halu Anduane Homogonaga anda heagoria kawareni pene. <sup>6</sup> Ani mo yalu ibiyagola Solomonobi Isaraele wali agali bibahende bi Mbogoyi biago mo yalu ibiyagoria mo ngoai ho hene. Ani mo ngoai howa tigua nogo sibi bulumaga wangaberubi dewaore daga labenahe Anduane Homogohondo loma biniru bo delalu hene. <sup>7</sup> Ani bo delai halu loma binigo mo miaga biaru tigua Mbogoyi biago Anduane Homogonaga anda biago tamu Hobane Loma Bia Heneore biagoha mo yalu anda puwa dahuliyali handalehe wabini biagolabonaga babagane andaneha ngelene. <sup>8</sup> Babagane yabulalu haradaguabi wabu helayagome Mbogoyi biagobi iraho yaga ira luni kira biagolabobi bibahende babagane kira biagolabome dambi hai helene.\* <sup>9</sup> Ira kira Mbogoyi iraho yaga ogonilabo lunioreyagola anda tamu Hobane Loma Bia Hene laga mende tagirahayagi heagoria howa ira ogonilabonaga nguni panigi handabehe wini. Ani binigo tagirahayagi howa handabe nahe wini. Ira ogonilabo ogoriani wiaabo haga wini. <sup>10</sup> Mbogoyi ogoniha ege tole kira Anduane Homogonaga bi mana gilibu wini biagolabo dege wini. Bamba Isaraele wali agali Iyibi dindi wahalu Hari Sainai heagoria íbu heangi Anduane Homogohanda ti heba Habo Nalolene Bi mbira lowinigo ogoni ege tole kirani gili buwa Mosesehanda Mbogoyi ogoniha yu ngelene.\*

*Anduane Homogonaga wá taraore holene demborerebi hatagi henego ogo*

<sup>11-14</sup> Ani ngelowa loma binigo mo miaga biaru ti Hobane Loma Bia Hene heagoha howa tagira ibini. Ani ibuwa loma binigo mo miaga tanabi bibahende hearu tini Anduane Homogonaga deni dodo nahelonaga mana bulene winigo biai hene. Libaiali iba gana lagaru ngida ale tara tara bagaru Asaba Hemana Yahudunu imaru ti igini damenerubi labolabo bayale tara karulowa ni tagira ibiragohayagi lomabu delaga dabu wiagoria heyu hene. Tigua heyu howa ngida ale tara tararu ngilingele lagane beledi ale boronosime wabiniru yalu ti heba loma binigo mo miaga handari mbirani pira kira (120) hearume bigulibi yuwa mandagi hene. Iba gana laga hearume ti iba gana lalu howa marume biguli aleru pulalu marume ngilingele lagane belediru balu ti bibahende mandagi howa Anduane Homogonaga mini yaraga halu lalu,\*

Anduane Homogohanda bayale biaga kagonaga iname ibuhondo kai timbuni lamija. Ibugua ina gubalini haho wiaaboore haga kagoni, lalu hene.

Ani bialu loma binigo mo miaga biaru tigua Mbogoyi biago tamuha mo ngelalu tini tagira ibiyagola beraliba aleme Anduane Homogonaga anda biagoha tolai hene. Anduane Homogonaga wá taraore holeneme beraliba biagoha howa wá timbuni demborerebi hatagi hene. Ani biyagome loma binigo mo miaga biarume tinaga biabe bulene wiaru bule dai bibe nahe hene.\*

\* 5:2: 2 Sml 6.12-15, 1 Bit 15.25-28    \* 5:8: 2 Bit 3.10-13    \* 5:10: Man 10.5    \* 5:11-14: 1 Bit 16.34, 2 Bit 7.3, Esr 3.11, Iba 100.5, 106.1, 107.1, 116.1, 136.1, Yar 33.11    \* 5:11-14: Har 40.34-35    \* 5:11-14: Anduane Homogo jini Isaraele wali agali baba kogoni lalu walia halu ibuni beralibaha howa ibaga. Beraliba ogonime ti Iyibi wahalu tagira ibiyangi dindi ko wali agali nahaga wiagoria ibuni haru bamba hene. Haru Penego Be 13-21 handabe.

## 6

*Solomonohanda wali agalihondo bi lenego ogo*  
(1 Kini 8.12-21)

<sup>1</sup> Ani biyagola Solomonu ibugua Anduane Homogohondo bi ogodagua lene.

Anduane Homogo-o ínime lalu, I hari beraliba mindini ngaruha holebero, larigoni.

<sup>2</sup> Anigo ai áyu ina inaga anda baya taraore bia kogonigo ini ogoniha haaboore habelo, lene.

<sup>3</sup> Kini Solomonu ibugua Anduane Homogohondo bi lai howa wali agali bu hearuha handa amu howa Ngode Datagaliwabehanda tí mo bayale helo lowa bi la hene. <sup>4</sup> Ibugua lalu, Anduane Homogo ina Isaraele wali agali kamarunaga Ngode Datagaliwabe kago ibunaga mini mo yaraga hama. Ibugua bamba i aba Debidihondo mbira bulebero lo winigo áyu biyada.\* <sup>5</sup> Anduane Homogohanda Debidihondo ogodagua layagoni. Ina inaga wali agaliru Iyibi dindi howa haru tagira ibirungi hama ibinigo ibalu áyu ogoni howa tigua íbu ngoai halu ini mitangi bialu lotu lalu holene anda mbira Isaraele dindiha tano wiyaru mbirani bilimu lalu nalami haru. Inaga wali agaliru haru habelo agali mbirabi dabo nabi dege. <sup>6</sup> Anigo mani howa ina wali agali ini koria ibalu i mitangi bialu lotu lolene dindi Yarusaleme dabalú Debidí íbubi Isaraele wali agali haru haga helo dabalú birugoni, lalu Anduane Homogo ibugua Debidihondo lamini lalu, Solomonohanda lene.

<sup>7</sup> Ibugua laho wialu lalu, Bamba i aba Debidí ibugua wali agalime Anduane Homogo Isaraelealinaga Ngode Datagaliwabe mitangi bialu íbuhondo lotu lelo íbunaga anda mbira bule manda bialu hene. <sup>8</sup> Ani bule biyagola Anduane Homogohanda íbuhondo lalu, Ina inaga anda mbira bia hole manda birigoni bayale degego <sup>9</sup> anda ogoni ina nabulebere. I íginiore mbira kago ibugua inaga anda ogoni bia holebira, lene.

<sup>10</sup> Ani lamiyadagua Anduane Homogo ibugua bi lo winigo áyu heneneore lola hai helayada. Ai ina bibahende íbuni kagoria kaware pialu lotu lamíyanaga ina Anduane Homogo Isaraelealinaga Ngode Datagaliwabe kagonaga anda mbira bidogoni. <sup>11</sup> Anda ogoniha Anduane Homogonaga Habo Nalolene Bi lo winigonaga Mbogoyi biago tamuha mo yu íbu ngeledogoni. Mbogoyi ogoniha bamba inanaga mamali Iyibi dindiha howa haru tagira íbiyangi ege tole kirani ina baba Habo Nalolene Bi gilibu wini biagolabo ogoniha nga, lalu Solomonohanda lene.

*Solomono ibugua Ngode Datagaliwabehondo bi lenego ogo*  
(1 Kini 8.22-53)

<sup>12</sup> Ani lai howa Solomonu íbu Isaraele wali agali bibahendenaga deni howa lomabu delaga dabu heagoria pu howa ibugua gi yaraga halu Ngode Datagaliwabehondo bi lalu hene. <sup>13</sup> Solomonu ibugua dagia mbira boronosime wabu helayago lunaga magi aranenaga magibi mbiraore mida kira bolangua halu dege daliga magi mida mbira bolanguahe ogoni iraga hene. Iraga howa wali agali bibahende ngoaiho hearume íbu handaíore helo íbugua ge duli hangaho biruwa gi kirabali yaraga halu lalu, <sup>14</sup> Anduane Homogo ina Isaraele wali agali bibahendenaga Ngode Datagaliwabe-o dahuliya andagahabi dindihabi i kegobi mende naheore. Ani kego howa iname mana beremaru ininaga deni bayale hangu bialu howa mana ko ngaru mitangi nabi kamagola ina ininaga Isaraele wali agali baba habo nalolene bi lo wirigo mitangi bialu ina gubalini haabo haga ke. <sup>15</sup> Ina bamba inaga biabe biahaga i aba Debidihondo bulebero lalu bi mbira lo wirigo mitangi bialu áyu bi ogoni heneneore lola helarida. <sup>16</sup> Ai Anduane Homogo Isaraelealinaga Ngode Datagaliwabe-o áyu ina íhondo bi mbira hale harogo. Bamba i aba Debidihondo mbira bulebero lalu bi mende lo wiriyagobi manda bibe. Ina íbuhondo lalu, Debidí-o i ígini aguaneru tigua ini baya hangu talima íbaabo halubi

\* 6:4: 2 Sml 7.1-13, 1 Bit 17.1-12

ínaga deni ti tigatiga ibagabu halubi ínaga bialu haga wiridagua biyagua nde ínaga aguanene uruni aria hangume Isaraele wali agalinaga kini haabo holebira, lariyagoni.✧  
 17 Ai ina Isaraele wali agalinaga Ngode Datagaliwabe-o ñ aba Debidi ínaga biabe biahaga biagohondo ani buleore lalu bi ogonidagua lo wiriyagobi heneneore lola helonaga ani bibe lalu langero.

18 Anigo Anduane Homogo-o ñ dindi ogoria ina wali agali kamaru heba mandagi habehe kebe. Dahuliya andaga timbuniore ngagoha ñ holene nakarulape kegodago ai anda emeneore ínaga áyu o bu hela kogoha ñ agua holebe.✧ 19 Ai Anduane Homogo ínaga Ngode Datagaliwabe-o áyu ínaga bi ogoale bibe lalu íhondo hale harogo ínaga biabe biahaga ñ kogonigo ínaga bibe lalu langerogo bibe. 20 Inime lalu ínaga anda ogonigo wali agaliru ti anda ogoniha anda ibalu ínaga kegoria kaware ibilo dabarigoni. Ani birigo horombe mbiragabi bibahendengi anda ogoha de handape haga bibe. Ani beregola ínaga horo bibahendengi anda ogoha handa amuho howa íhondo biamogo bibe larogola ínaga ínaga bi hale halu bibe.✧ 21 Anduane Homogo-o ínaga dahuliya andagaha kegonigo ínaga ínaga Isaraele wali agali bu kamarubi iname ñ anda ogoha handa amu howa ínihondo bi mbira laramagola inanaga bi laramago hale halu iname ko birimadaru domo wahaga bibe, lene.

22 Solomonohanda laabo halu lalu, Mbirali ibu damene mendeali kagome ñ kagua mbira biri laragola ogoni ibugua anda ogoha anda ibuwa ínaga lomabu delaga dabu kagoria kaware ibalu ogoni ibu bi heneneore laro lalu ñ kagua nabi layagua 23 nde Anduane Homogo-o ñ dahuliya andaga howa mbirali ibunaga bi ogoni larago hale halu ínaga mana tigabi ngadagua bialu mo tiga bibe. Mbirali mana ko birago ibuni biyadagobi pani mibe. Wali agali bu karunaga deni ko mbira para nahe kago ibu tigabi ka lalu pelabe.

24 Ínaga Isaraele wali agali kamarume ina waitigi baba wai bialu kamaria iname íhondo mana ko birimagome waitigime ina balu ti wayali helaregola iname ko birimadaru mini beregedalu ínaga keria anda ogoha ibuwa íhondo bi lalu, Inanaga ko birimaru domo wahabe larimayagua 25 ínaga dahuliya andaga howa ínaga wali agali bu kamarunaga bi hale halu ko birimago domo wahabe. Ani bialu waitigi karume ina dindi tara mendeha haru piyagua ínime dindi bamba ina mamaliruhondo miriyago dindi ogoria ina lone haru dai bibe.

26 Ina wali agali ínaga bu kamarume íhondo mana ko mbira bialu kamaria ina pani ngialu inanaga dindi ogoria iba dalu naibilo gaea hangu biaho ngelaregola mani ina mini beregedalu anda o kagoha ínaga keria handa amu howa bi larimayagua✧ 27 Anduane Homogo-o ñ dahuliya andaga howa ínaga Isaraele wali agali bu kamaru dara halu iname ko birimadaru domo wahabe. Ani bialu iname mana tigabi bayale ngaru hangu talialu bialu holomaya lawai habe. Ani bialu ai Anduane Homogo-o dindi ogo inanaga dindi ogoniore ngelo ínaga bamba inanaga mamaliruhondo mini wirigoria iba dalu ibilabe.

28 Solomonohanda laabo halu lalu, Inanaga dindi ogoria hina gari timbuni piyaguabi warago hongohe tara tagira ibiyaguabi puyabu poboyogobi hongohe tara mbira ibalu inanaga mabuha tomo andaho karu mo ko hayaguabi pagaya ale dewaore ibalu mabuha tomo karu nai hayaguabi ina waitigirume ibalu inanaga tanoruha kamaria ina bole ho mabu bupe hayaguabi warago tara tara ngaru inaha anda ibalu ina mo ko hayaguabi 29 íhondo bi laramagola hale habe. Ínaga Isaraele wali agali ina kamaru aria mbirame íhondo ko biyagonaga mitangi bialu bu miniha genda howa dara halu anda o kagoha ñ keria handa amu howa gi dogolalu íhondo bi layagua 30 ínaga dahuliya andaga howa tinaga ko biyadago domo wahalu tigua bi larago hale habe. Ínime hangu wali agali bibahendenaga bu miniha mitangi bu kagobi manda biai ho

kegoni. Ani bu kegame wali agali tigua mana koyaguabi bayaleyaguabi biyadadagua dabaluni miadai bibe. <sup>31</sup> Ai inaga wali agali kamaru ina dindi ogoni inanaga mamaliruhondo miriyago ogoriani howa ina bayale tigabi bialu ini andaneha haabo holomaya ogonidagua bibe.

<sup>32</sup> Dindi tara tara ngaruha howa wali agali bu karume inaga mini timbuni daliga mini lene kego hale halubi biabe timbuni inaga wali agali bu kamaru biamogo biridago hale halubi mbiralime ibunaga dindi yu wahalu i mitangi bialu lotu lole anda ogoha ibuwa inihondo bi layagua <sup>33</sup> ina dahuliya andaga howa ibugua ihondo bia lalu hale harago ale bibe. Inaga Isaraele wali agalirume i andaneha kamadagua wali agali dindi tara taraha karume i manda biai halu i andaneha ibalu hai helo ani bibe. Ani bialu howa ina anda o bidogo i andaore kagonidalo manda bialu wali agali bibahendeme anda o kagotha ibalu ini mitangi bialu lotu lolene ogotha ngalo manda biai holebira.

<sup>34</sup> Ina inahondo, Dindi mendeha waitigi karu baba wai bule pudaba, laregola bialu howa ina dindi tara tanabi kamagotha howa anda ogo Anduane Homogo inaga helo binigobi tano ogoni ina dabo ngelarigobi ogoniha handa dai bu howa bi larimayagua nde <sup>35</sup> ina dahuliya andaga howa inanaga bi lamaru hale howa dara halu ina waitigiru balu wayali holomaya pele ngibe.

<sup>36</sup> Wali agali bibahendeme ko biai haga kamago ai inaga wali agalime ihondo ko bialu kamaria ina inahondo keba howa ina waitigi karume ibuwa ina bo garabaya bu yalu dindi tara kaundia kawarehayaguabi minu yalu piyagua inaga wali agali bu kamarume ihondo bi laramago hale habe. <sup>37</sup> Mani ina waitigi dindi tara uruniha howa inanaga ko birimaruni mitangi bu dai bialu inane mini beregedarimayagua nde Anduane Homogo-o ina inanaga bi laramago hale habe. <sup>38</sup> Heneneore ina waitigi dindi ngaruha pu howa inihondo mini mbiraore wuwa i hangu mitangi biaabo halu inane mini beregedai howabi bamba ina dindi ina mamaliruhondo mini biagohabi ininaga tano dabo wirigohabi ina inaga anda wali agaliru ti ogoniha ibalu ini keria ibilo bia harugohabi handa daibu howa ihondo bi lalu, Iname mana ko dewaore bialu harimago, lapani halu langirimayagua <sup>39</sup> ina dahuliya andaga howa iname bi laramagola hale howa dara halu biamogo bialu ko birimarubi domo wahabe.

<sup>40</sup> Ai inaga Ngode Datagaliwabe-o ina iname anda ogoriani kamaria de handalu ihondo bi laramago hale habe. <sup>41</sup> Anduane Homogo Ngode Datagaliwabe-o ini inaga Mbogoyi biago heba anda ogoriani haabo hole ibabe. Mbogoyi ogonime Anduane Homogo i hongo gibehe kego walia ho ngagoni. Inaga loma binigo mo miaga karu tigua mana tigabi bilo biamogo bibe. Ani bialu inaga wali agali bu karume ina tihondo bayaleore birigonaga mitangi bialu turu timbuniore helo hamelo kogoni. <sup>42</sup> Anduane Homogo Ngode Datagaliwabe-o inaga biabe biahaga Debidi gubalini timbuniore ho harigoni mitangi bialu Kini inime dabo helene kogoni handa tara halu erembira nguleni, lalu Solomonohanda Anduane Homogohondo bi ogoni lai hene.

## 7

### *Solomonohanda Anduane Homogonaga anda mo loma bia ho helenego ogo (1 Kini 8.62-66)*

<sup>1</sup> Solomonohanda Anduane Homogohondo bi layago lai heagola dahuliya andagaha howa ira hedope halu loma bini wiaru irani dai helo loma bini maru wiarubi bibahende irame dai helene. Ani bialu Anduane Homogonaga wa holene hongoheore anda biagoha anda ibalu tolatagi helene. <sup>2</sup> Anduane Homogonaga wa holene hongo taraore ogonime anda biagoha tolatagi heagola loma binigo mo miaga agali bu hearu tigua anda ogoni tamuha anda pobe nahe hene. <sup>3</sup> Isaraele wali agali bu hearu tigua dahuliya



andagaha howa ira minalu hungu bialu heaore ibira hayago hondowabi Anduane Homogonaga wá holene hongohore anda biagoha tolatagi hayago hondowabi ti anda haneni ege tole mo dabadaba ho wini wiagoria howa ge duli hanga halu dindini bulu palene. Ani buwa tigua Anduane Homogohondo lotu laluibunaga mini yaraga halu lalu,✧

Anduane Homogo ibu bayaleore biaga kagoni. Horo bibahendengi ibugua inahondo gubalini ho haabo haga kagoni, lalu lene. <sup>4</sup> Ani lowa Solomono haluibunaga wali agali bu hearume Anduane Homogohondo loma bini maru tara tarabi irani delelo mia dege bini. <sup>5</sup> Solomonohanda Anduane Homogola ho gimbu bulenaga loma bule bulumaga wangabe daosini dege pira kirani kirabi (22,000) sibi daosini dege handari mbirani pira kirabi (120,000) haru ibalu bo lomabu mini. Kini Solomonobiibunaga wali agali bibahendebi tigua anda biagoni Anduane Homogonaga andaore ka lene helo habagi howa tigua mo loma biaho helene. <sup>6</sup> Loma binigo mo miaga biaru ti mendehayagi ho dabadaba bu heagola Libai agali hearu tibi nde ngida ale tara tara baga wabu wiaru yuwa mendehayagi ho dabadaba bu hene. Abale Kini Debidihanda Anduane Homogonaga mini yaraga halu bi laga biyagola Libai agali uruni tigua ngida uruni baga bialu Anduane Homogohondo kaj laluibunaga mini yaraga halu iba gana laga bini. Tigua iba gana mbira laga winigo ogo.

Anduane Homogonaga gubalini holene wiaabobo ka, laga wini. Ani laga winigo wali agali ti heyu heagola Libai agali biaru tigua iba gana ogoni lalu hearia handa dele bialu hearia loma binigo mo miaga biaru tigua pilipe ale mini biguli pu laanda halu hene.

<sup>7</sup> Horo ogoningsolomonohanda Anduane Homogonaga anda haneni dindi podene mbira wali agali mo ngoai ho haga wiago hanuni Anduane Homogoibuninaga tu wabagi ho ngelene. Ani ngelowa dindi podene ogoriani Solomono ibugua loma biniru irani dai helo delagane alerubi widirubi delalu nogo abeneru Anduane Homogola ho gimbu bulenenaga loma binirubi bu delaga bini. Tigua lomabu delaga dabu anda haraba boronosime bu helayagoria loma biniru dewa ogonidaguago delai habe naheyagola tigua tagirani lomabu mini biagoria loma bini uruni delai hene.

<sup>8</sup> Isaraele wali agali Yarusalemeni ngoai heneru ti dindi uyurahayagi Hamada polene hariga peagoria howabi ibalu unurahayagi Iyibi dindila tubari wiagoria howabi bibahendeore hilalu ibai hene. Ani ngoai howa horo karu Solomono halu anda biagoni Anduane Homogonaga andaore ka lole ngoai hene. <sup>9</sup> Horo karu uruni ha maro buwa tigua Ngode Datagaliwabenaga loma biniru delaga dabu biagoibunaga wiabagi heneore ngelonaga mo loma bia hene. Ani buwa horo karu mende Solomono heba Isaraele wali agali bibahendeore Horo Timbuni Anda Nemandaha Palu Holene mana laga winigo tigua bilonaga Yarusalemeni lone hadai bini. Ti horo deria bibahende hai howa lone dege halu mbira dewaliore mo ngoaiho hene.\* <sup>10</sup> Ogoni hai halu ege kanenaga horo pira kirani tebira (23) hayagola Solomonohanda Isaraele wali agali bu hayaru bibahende tini daluha pugu pugu bialu andaga dai bidaba lene. Ani laya handala tigua turu timbuni hama andaga pugu pugu binigo irane Anduane Homogohanda Debidihondo bayale dege biaabo hayagonagabi Solomonohondo biyagonagabi Isaraele wali agali bibahendehondo biyagonagabi tigua turu timbuni hama tini andaga pugu pugu bini.

*Solomono hearia Anduane Homogo lone hapani henego ogo*

*(1 Kini 9.1-9)*

<sup>11</sup> Kini Solomonohanda Anduane Homogonaga anda bu helalu ibuni andabi bu helene. Anda kira ogoni laboha bulene manda bu heneru bibahende biaiore hene. <sup>12</sup> Biai ho heagola mani Anduane Homogo ibuni mbiraga Solomono hearia hapani howa lalu, Inaga bi ihondo larigoni hale harugo ai anda ogoni wali agalime inihondo

✧ 7:3: 1 Bit 16.34, 2 Bit 5.13, Esr 3.11, Iba 100.5, 106.1, 107.1, 118.1, 136.1, Yar 33.11

\* 7:9: 2 Bit 5.3 ngago handa dai bibe.

loma biniru yalu ibalu delaga bigi bilonaga helarogoni. <sup>13</sup> Anigo tígua mine halu mana ko biaabo harimiyagua ina dalu naibilo mo waharogolabi tinaga mabuha tomo henedemiruni pagaya aleme nai helo ibilarogolabi inaga wali agali bu kamiruniha warago ko mbirame ti belarogolabi irane tígua ko birimigonaga. ✧ <sup>14</sup> Horo ogoningi inaga wali agali ina dabo helene ti kamirume ko bialu harimirunaga tini mo dindiha howa mini beregedarimiyaguabi ihondo bi henene larimiyaguabi nde ina dahuliya andaga howa tinaga bi laramigo hale halu tinaga ko wu harimidagobi domo wahai halu tinaga dindibi lone mo gumbila helolebero. <sup>15</sup> Horo bibahendengi ina anda ogoniha handaya ho holebero. Tígua anda ogoniha anda ibalu inihondo bi laramigo bibahende ini kaware ti heba ibu howa hale hai holebero. <sup>16</sup> Ani larogoni irane ina anda ogoni ininaga miniore yaraga haabo helonaga dabo helarugoni. Ani birugo ai wali agalime inihondo mitangi bialu bi lole ini kogoria anda ogoniha ibaabo helo. Inaga anda ogoniha horo bibahendengi handa dali howa handaya ho haabo halu mitangi biaabo holebero. <sup>17</sup> Anigo Solomono ina ininaga deni howa tigatiga ibagabu haabo habe. Ani bialu i aba Debidihanda inaga bi mana lowini ngago bibahende baya hangu taluwa bialu henedagua ina ihondo bi langerogoni bayuwa taluwa bialu habe. <sup>18</sup> Ina urunidagua bialu hariyagua nde ina buleore lalu i aba Debidila habo nalolene bi lo wirudagua biai holebero. Ibhondo bi ogodagua lamirugo, Debidi i igini aguaneneru degeme kini ha aribia haabo helo helaga bulebero, lalu lamirudagua bulebero. ✧ <sup>19</sup> Anigo Isaraele wali agali tígua i yu wahalu puwa inaga bi mana tihondo langirugo talialu bialu ha nabi howa mbirale dama mitangi bialu gime wabini ngaruhondo bi pupu wima pirimiyagua nde <sup>20</sup> dindi ina ti ngirugoriani kamiria bo batagi holebero. Ani bialu ina anda ininagaore helo lowa loma bia ho helarugoni yu wahalu handa tara holebero. Ani berogola wali agali dindi tara tarani bu karume ibuwa anda ogoni mo ko heago de hondowa mege bulebira, lalu Anduane Homogohanda lene.

<sup>21</sup> Anduane Homogohanda laabo halu lalu, Áyu anda ogoni mini lene kagonigo ai tígua ini yu wahalu pirimiyagua anda ogoni mo ko holebira. Wali agali hariga anda henedagoria bolangua halu pugu birarume ko hene ngago hondowa mogo timbuni lolebira. Mogo lowa tigua lalu, Anduane Homogohanda dindi ogobi anda bayale ogobi mo ko hayadago aginaga biyadabe, lolebira. <sup>22</sup> Anidagua laragola wali agali marume ladai bialu lalu, O biyadagoni irane Isaraele wali agali tigua Anduane Homogo tinaga mamalirunaga Ngode Datagaliwabe bamba ti Iyibi dindiha garabaya hemiria golalu haru tagira ibalu dindi ogoha helo haru ibini. Ani haru ibu heleagola tigua ibuni yu wahalu puwa mbirale dama mitangi bialu gime wabini wiaruhondo bi pupu wialu uruni talima piyagola Anduane Homogo ibunime mo ko hene nga, lalu lamigi bulebira, lalu Anduane Homogohanda lene.

## 8

### *Solomono ibugua mbirale marubi bigi binigo ogo* (1 Kini 9.10-28)

<sup>1</sup> Solomonobiibunaga biabe biaga agali hearumebi mali pira kira (20) biabe biaabo halu Anduane Homogonaga anda biagobi ibuninaga andabi biai hene. <sup>2</sup> Biai halu mani ibugua tano maru Kini Hiramahanda ibuhondo miniru mo tiga bialu bu aribia haga biai howa Isaraele wali agali maru tano uruniha helaga bini. <sup>3</sup> Solomonohanda wai bule puwa Hamada dindibi Soba dindibi bo podai halu ibu karulai hene. <sup>4</sup> Ibugua dindi ko dalu naibagaha tano mbira mini Tadamoro mo tiga buwa bu aribia halu Hamadaha tano marubi wai biagane alerubi tomorubi do holene anda hearu mo tiga bialu hene. <sup>5</sup> Ani bialu ibugua Bedehorono tano hari barehayagi wiagobi Bedehorono tano dindihayagi wiagobi mo tiga bialu ege toleme wai pabe wamabu bialu wai pabe pangaru

hongohe helo tamuha howa panga payatagi holenenaga bengena aeaneme wabinigo payaga hene. <sup>6</sup> Balada tano wiagobi tano maruha wai biaga aleru tomorubi do hagane anda hearubi mo tiga bialu tano maruha ibunaga wai biaga garo ale mini karisibi nogo hosibi helaga bilo tano uruni mo tiga bialu hene. Solomonohanda anda dewaore bialu Yarusalemehabi Lebanono dindihabi dindi bibahende ibugua handayaho henegoha bule lo mandabu winiru biaiore hene. <sup>7-8</sup> Wali agali Isaraele dindiha hene Kenana aguanene Amoroaliru Hidualiru Peresealiru Hibialiru Yabusualiru ti haga bini. Bamba Isaraele wali agalime hameigini uruni bo wahai henego aria yu wahene maru haga bini. Ani heagola Solomonu ibugua wali agali yu wahene uruni garabaya biabe ale bialu helo minu helai henego áyubi ani bialu haabo ka.\*

<sup>9</sup> Anigo Solomonohanda Isaraele wali agali garabaya biabe bialu helo hela nabini. Ami agalibi ami haru haga agali haguanebi marume karisini heyu howa wai biaga hearu handayaho halu marume nogo hosini biruwa wai biaga hearu handayaho halu bini. <sup>10</sup> Solomonu ibunaga biabe biagaru bibahende handayaho haga agali haguane handari kirani pira duria (250) bibahende hene.

<sup>11</sup> Ainde Solomonu one Iyibi kininaga wane berenego ibu Debidinaga Tano biago wahalu Solomonohanda anda gahenge biyagoha pu berene. Ibugua lala, I one biago ibu Israaenaga Kini Debidi andagaha habe nahego irane ala Habo Nalolene Bi lo winigonaga Mbogoyi ogoriani wini. Ani winigoria bibahende loma biaho wini nga, lo mitangi bialu ani lene.

<sup>12</sup> Solomonu ibugua lomabu delaga dabu Anduane Homogonaga anda haneha ibunime bu helenegoria nogo bulumaga sibiru loma bialu bo delaga bini. <sup>13</sup> Ibugua Mosese heangi mana lo winidagua Sabada horongibi Ege Ngabulo harangibi mali mbira mbirani Horo timbuni tebira uru Mberedi Yidi Nahe Hirinigo Nolenengibi Mabuha Widi Lini Denego Gandu Lolenengibi Anda Nemandaruha Palu Holene Horongibi Solomonohanda horo uruni bibahendengi nogo bulumaga sibiru bo lomabu mialu delaga bini.☆ <sup>14</sup> Ibu aba Debidihanda mana bulene lo winidagua Solomonu ibugua loma binigo mo miaga biaru horo bibahendengi tinaga biabe bulene winidagua bilo ti haru halu Libaiali maru ti loma binigo mo miaga biamogo bilobi iba gana lolene lamogo bilobi ibu haru halu biabe mo talebu tahaga hene. Solomonu ibugua Libaiali marume Anduane Homogonaga andaha horo bibahendengi mamage helo tibi nde haru howa biabe mo talebu tahaga hene. Ibugua bibahende biyago Ngode Datagaliwabenaga agali Debidihanda lo winidagua bialu halimu layadagua <sup>15</sup> loma binigo mo miagarubi Libaialirubi tigua biabe bayuwaore bialu mbirale mbirale mo do hagane andabi muni andabi mamage halu hene.

<sup>16</sup> Solomonohanda biabe bulene bibahende manda manda bu wiyadagua biai hene. Anduane Homogonaga anda gene pigane wayangibi howa bumaro biningibi bibahende bayaleore bialu hene.

<sup>17</sup> Mani Solomonu ibu Idomo dindiha pialu Esiongebe tanobi Elada tanobi wiagoria pene. Tano ogonilabo iba solowara mini Daramabi bereagoria Agabahayagi iba biraanda hene wiagoria wini. <sup>18</sup> Ani pu heagola Kini Hiramahanda ibunaga iba sibirubi agali iba sibiruha biabe biaga hearubi Solomononaga biabe biaga agali hearu baba biabe mandagi bialu helo ibilene. Ani bialu iba sibi uruni Obiri dindiha pialu ngolo wiaru mo yalu Solomonu hearia yu dai bigi biaga wini. Ngolo dewa genda magi timbuni tonu pira mbirani waragaria (16) mo yu ibugu biaga wini.

\* **8:7-8:** Áyubi ani bialu haabo ka layadagoni ina áyu kamangi ndo abale agali mbuga ogo pigane gili biyadangi manda bialu lene. ☆ **8:13:** Har 23.14-17, 34.22-23, Dag 28.9-15, 28.16-29.39, Man 16.16

## 9

*Seba dindinaga kuini walime Solomonu hondo ibinigo ogo  
(1 Kini 10.1-13)*

<sup>1</sup> Seba dindinaga kuini wali berenegome hale halu hearia Solomonu ibu mini lene timbuni ka layane hale hene. Ani layago hale howa kuini wali ogoni ibugua Solomononaga manda biaru ba handalu ibugua bi ladau bibe naheru maru Solomonu hale hole ibini. Kuini wali ogonime ibunaga biabe biahaga agali dewaore haru halu nogo kamelerubi dewaore haru ha bialu Yarusaleme anda ibini. Tigua ngolo dewaorebi mbirale tara tara pauda ale tomo mo dende bia haga wiarubi ege tole bayale yolo timbunime miaga wiaru alebi nogo kamelenaga erekunini mo paga howa yalu ibini. Ani yalu anda ibalu ibugua Kini Solomonu lola howa bi maru Solomonohanda ladau bibe nahe manda manda bu yalu ibinidaru hale hene. <sup>2</sup> Solomonu ibugua mbirale hale hayaruni bibahende tiga tigaore wiadagua ladau biai hene. Bi hale hayadaruni Solomonu ibugua ladau bibe nahe mbira nawi bibahende ladau biai hene. <sup>3</sup> Ani lai hayagola kuini wali biagome Solomononaga manda timbuni mini gigabi wiagobi kininaga anda timbuni biniyarubi bibahende handai hene. <sup>4</sup> Ani hondowa kuini wali biagome Solomonu ibugua horo bibahendengi tomo bayale dege naabo haga wiagobi ibunaga agali hagianeru ti haga wiarubi bibahendeore hendene. Kini ibunaga biabe bia haga agali hearubi tinaga aga bayale tara tara biaga wiarubi agali waini iba odo tale biaga hearubi hendene. Uruni hondowa Solomonohanda Anduane Homogonaga andaha nogo tara tara loma biniru bo delaga dabu wiarubi hendene. Mbirale uruni biaga wiaru handai howa mogo lalu ibugua bi mbira labe naheore hene.

<sup>5</sup> Ani howa ibugua Solomonu lamialu lalu, Ini dindiha howa hale harugola inaga mini mandaru bayale timbuniwi ke layane bibahende hale hai harugo ayu bi layadaruni heneneoredane handa walia ko. <sup>6</sup> Abale ina bi hale harudaruni mo henene nahe henego ayu inime handalu hewaria ai heneneoredane hendedo. Heneneore abale bi hangu hale harugo goyane lowa ini deme taraoredane hendedogoni. Inaga mini mandala gigabi ngeru layane hale dege harugo emene nira lowa inaga mini gigabi bayale timbuniore ngego hendedo. <sup>7</sup> Ai inaga biabe biahaga agali bu karuni ti turu hagabu haabo kagoni. Agali haguane haru haga karuni tibi nde inaga mini mandala bayale ngegome ti haru kegola ini heba turu ho haradane hendedo. <sup>8</sup> Anduane Homogo inaga Ngode Datagaliwabe ibugua ihondo ibunaga miniha howa turu halu Isaraele wali agalirunaga kini habelo dabo helayadagonaga ina ibunaga mini yaraga harogoni. Ibugua Isaraele wali agali tiha ibunaga gubalini holene timbuniore horo mbiruorebi ereba naholene wiaabo howa ina manda timbuni bidegomebi mini tigabi bayale ngegomebi manani tigatiga tale bialu ti haru habelo i kini helayada, lalu kuini wali biagome lai hene.

<sup>9</sup> Ani lowa Seba dindinaga kuini wali biagome ngolo dewa daga labe naheore genda magi timbuni manda bialunaga tonu maria Solomonu mini. Ege tole tara tara yolo timbunime miaga wiarubi padua ale tomo mo dende bia haga tara tara wiarubi mia dege bini. Mo dende bia hagane uruni ale Isaraele dindiha ala nayalu ibinidagua kuini wali biagome timbuniore yalu ibu mini. <sup>10</sup> Kini HIRAMANAGA iba sibini biabe biaga hearume Obiri dindiha pialu ogoniha howa ngolo dewaorebi ira bayale mbiranaga podenerubi ege tole tara tara yolo timbunime miaga dewaore wiarubi Isaraele dindiha mo yalu ibini. <sup>11</sup> Ani mo yalu ibiyagola Solomonohanda agali ibunaga biabe biahaga hearuhondo lalu, Ira bayale urunime Anduane Homogonaga andabi ini andanagabi egageria bia hadaba, lene. Ira bayale uruni aria marume iba gana lalu ngida aleru belo wabidaba, lalu lamini. Uruni ale Yuda dindini ala nawini.

<sup>12</sup> Seba dindinaga kuini wali biagome mbirale Solomonohondo miyadarubi ndo Kini Solomonu ibugua mbirale tara tara dewaore kuini wali biago ibuni hame lalu ngi layaru

✧ 9:1: Md 12.42, Lg 11.31

damene miai halu marubi wali agali dindi tara howa ibiraruhondo miagadagua mia tago halu mini. Ani miya handala kuini wali biagobi ibunaga biabe bia haga ibu heba ibinidarubi bibahende tini dindi dai bini.

*Kini Solomonu homogo henego ogo*

*(1 Kini 10.14-25)*

<sup>13</sup> Mali bibahendengi Solomonu ibugua ngolo dewaore genda magi timbuni tono pira kirani tebira (23) dindi tara taraha howa mo yu anda ibugu bialu hene. <sup>14</sup> Muni marubi nde agali biyinaya biaga hearume dagisi bu mirarubi mo yu anda ibaga hene. Arebia dindiha kini hearumebi Isaraele dindiha dindi dunini mbira mbira handayaho haga hearumebi ngolo silibabi yalu ibu migi biaga hene.

<sup>15</sup> Solomonu ibugua agali biabe bia haga hearuhondo lalu, Ira pelene wiarume wai humbi timbuni wabidaba, layagola tigua humbi timbuni dewa handari kira (200) wabini. Wabu ngelowa ngolome paraho dambi hai hene. Ngolo para hayadaruninaga genda magi kilogarama karia ale humbi mbira mbirani para hene. <sup>16</sup> Ani bialu humbi maru emene handari tebira (300) wabuwa ngolome paraho dambi hene. Ngolo paraho dambi hayadaruninaga genda magi kilogarama kira dege dege hene. Ani biai heagola Solomonohanda agali ibunaga biabe bia haga biaruhondo lalu, Humbi uruni anda hobene mbira mini Lebanono Irabu Anda laga henegoha mo yaanda howa ngeladaba, lene.

<sup>17</sup> Ani bialu Solomonohanda kini biragane dagia mbira wabidaba layagola wabini. Ani buwa kini biragane dagia ogoni ngoloru nogo elebeninaga ne gayaneme mo yari bia howa ngelene. <sup>18-19</sup> Kini biragane dagia ogoni daliga ngelowa ogoriani birule iraga holenaga ge holene egageria waragara wialu ge dogolo wiaganebi ngolome wabini dege wini. Ge halu iraga holene lene laboha laiono handalehe mbira mbira wabuwa talebu helama pene. Laiono handalehe bu helearu daga lamaga halu homberia (12) wabu helene. Biragane dagiadagonaga gi paga holene wini. Gi paga holene kirabaliha laiono handalehe lene laboha wabu helene. Dindi tara maruha kini hearu bibahendenaga biragane dagia baya gibiore ogonibi mbira nawi mbiraore ogoni hangu wini.

<sup>20</sup> Solomononaga gabo berubi bibahende ngolome wabu wini. Anda hobene mini Lebanono Irabu Anda laga biagoha peledi alerubi ngolo hangume wabu wiai hene. Kini Solomonu henedangi siliba nagalonedalo manda buwa mbirale mbirale uruni ale ngolo hangume wabiai hene. <sup>21</sup> Solomononaga iba sibi dewa solowara timbuniha piaga winiru Kini Hiranana iba sibi wiaru heba mandagi dindi bibahendeha yalu piyai haga wini. Iba sibi urunime solowarani dindi tara taraha piyai halu mali tebirani dai nabi tagira dege ibagabu howa ngolo silibarubi dewaore mo yalu nogo elebeninaga ne gayane dewa mo yalu nogo mongi tara tararu minu yalu Isaraele dindi dai bigi biaga wini.

<sup>22</sup> Kini Solomonu ibugua munimebi mbirale tara tara maru ale wiarumebi ibunaga mini bayale gigabi wiagomebi kini maru hearu bibahende bolangua haihe hene. <sup>23</sup> Agali haguane dindi bibahendeha hearume Anduane Homogohanda mini bayale gigabi Solomonu miniyago ti hale hene. Tigua Solomonohanda bi larago hale hoa howa ibu hearia ibaabo haga hene. <sup>24</sup> Mali bibahendengi agali dindi tara tarani howa ibalu mbirale mbirale maru Solomonu mule yalu ibugu biaga wini. Tigua ibugu bialu howa mbirale ngolo silibarume wabindirubi aga bayalerubi wai biaga yandarerubi tomo mo dende bia haga pauda ale tara tararubi nogo hosiru dongirubi Kini Solomonu mule yalu ibugu biaabo haga wini.

<sup>25</sup> Solomonu ibugua wai biagane garo ale mini karisirubi ibunaga ami agalirunaga nogo hosirubi dewaore yolo buwa hela ngela bigi bialu daosini maria (4,000) andaha helo anda dewa bini. Ani buwa ibugua karisirubi hosirubi tale bialu maru dindi ibugua handayaho haga wiaruha talebu pelalu maru Yarusalemeni hela ngela bialu



wai biaga ami agalirunaga hosi daosini homberia (12,000) hene. ✧ <sup>26</sup> Ani howa Isaraele dindi bibahende ha tubari ni tagira ibiragohayagi Iba Yuberedisi poragoria howa pialu mendeha ni paliragohayagi Pilidialiru baba tubari wiari halu unurayagi Iyibila dindi tubari wiagoria Solomono ibugua handame ho hene. ✧ <sup>27</sup> Solomono ibu kini henedangi muni siliba dewaore daga labenahe ege tole dugu paya biradagua bialu Yarusaleme yu anda ibugu biaga wini. Ira tamiabi aulolebe tobahe Isaraele dindi hari bare wiaruha howa ira damene bibahendeore dibu wiradagua bini. <sup>28</sup> Solomono ibugua agali biyinaya biaga hearuhondo hosiru Iyibi dindiha howabi dindi bibahende ha howabi yolo bialu haru ibule pudaba laga hene. ✧

*Solomono homenego ogo*

*(1 Kini 11.41-43)*

<sup>29</sup> Mbirale tara tara Solomono ibugua biniru bibahende mbuga mbira mini Mana Latagi Haga Nadananaga Bi Te laga ngagohabi mbuga mende mini Mbiwia Haga Siloali Ahiyanaga Bi Te laga ngagohabi mbuga tebone mini Mana Latagi Haga Ido Ibugua De Gandeba Hendenegonaga Bi Te laga ngagohabi gilibu nga. Mbuga tebira uruniha Nebada igini Yaroboama ibugua binigo tebi gilibu nga. <sup>30</sup> Solomono ibu mali pira maria (40) Yarusalemeha kini howa Isaraele wali agali handame ho hene. <sup>31</sup> Ani halu ibu homayagola tigua ibu Yarusalemeni Debidinaga tano laga wiagoha hora hene. Homeagola Solomono igini Lehoboama ibugua ibu aba henegoria kini ha aribia hene.

## 10

*Isaraele hameigini uyurahayagi palearu ti hoba mialu tini hangu henego ogo*

*(1 Kini 12.1-20)*

<sup>1</sup> Lehoboama ibu Isaraele wali agali bibahendeme ibu tinaga kini helole lowa Segeme tanoha ibu ngoai ho heagoria pene. <sup>2</sup> Ala Nebada igini Yaroboama ibugua Kini Solomonohanda ibu bole heago hondowa ohalu Iyibi dindi pu henego ai Isaraele wali agali tigua Lehoboama tinaga kini helo dabo helara layago hale howa ibu Iyibi dindi wahalu ibuni dalu dai bu hene. <sup>3</sup> Ani manda bu heagola Isaraele wali agalirume Yaroboama dai bilo agali marume, Lama pudaba, lene. Yaroboama anda ibiyagola ibubi Isaraele wali agali bibahendebi Lehoboama hearia puwa tigua ibuhondo lamialu lalu, <sup>4</sup> Í aba Solomono ibugua ina biabe ndelahe wiaru mo ngiyagola iname biabe erekuibi mangabiore bialu harima. Ai áyu ina inahondo mbirale bayale hendore bulene ngadagua bialu gendabi ndelahe ngaru mo wahabelo hamelo kama. Ina ogonidagua biriyagua ina haru habelo í andaneha holeberama, lene.

<sup>5</sup> Ani layago hale howa Lehoboama ibugua tihondo lalu, Horo tebiru andaga halu inaga mini ngogo tí mani languliya dai bule áyu andaga pudaba, lene. Ani laya handala ibu helalu ti andaga pugupugu bini.

<sup>6</sup> Ani piya handala Lehoboama ibu andaga puwa agali haguane ala hene miniwi ti ibu aba Solomono mini bayale talebu miaga heneru hearia puwa lalu, Wali agali o biarunihondo bi agua ladai buliya hamelo kamibe, lene.

<sup>7</sup> Ani hale hayagola tigua ibuhondo lalu, Ina wali agali uruni dara halu ti biamogo bulene hamelo keyagua nde áyu tihondo bi bayale lolene nga. Ina ogonidagua biriyagua ti í andaneha holebira, lalu lamini.

<sup>8</sup> Ani layago hale howa bia nabi mo wahalu Lehoboama ibugua igiri daliahe haguane mini bogabi ndo ibunila haru mandagi andaho hene hearume ibuni mini bayale talebu milo hearia pene. <sup>9</sup> Puwa ibugua tihondo lalu, Wali agali biarunime tiha genda maru bamba í abahanda mo ya hene wiaru mo waholiya hamelo kago ai áyu ina tihondo agua ladai buliya hamelo kamibe, lene.

<sup>10</sup> Ani hale hayagola igiri haguane daliahe biaru tigua ibuhondo lalu, Ina bamba í aba ibugua wali agali uruniha genda mo ya henedaru mo wahole manda buwa tihondo bi ladai bule hamelo keyagua tihondo bi ogodagua lolene nga. I abahanda tí genda mo ngiyalo manda bu kamiyagua ogoni timbuni ndo emene dege ngiya. Inaga gi hondone mbiraore hangunaga hongo kagome i abanaga hongo ogoni bolangua ka. <sup>11</sup> I aba ibugua tí heneneore genda mo ngiyagonigo ina tí genda timbuniore ngulebero. I aba ibugua tí tibu emeneme bayago ina tí tibu timbunime hongo howaore bolebero lalu lamibe, lene.

<sup>12</sup> Ani layagola horo tebiru hai halu Yaroboamabi Isaraele wali agali biarubi bibahende Lehoboama ibugua dai bilimu layadangi ibuni hearia dai bini. <sup>13-14</sup> Ani íbu heagola kini ibugua agali haguane ala hene miniwi hearume labe layadagua nale wahalu igiri daliahe haguane ibuni ale hearume labe layadagua wali agali biaruhondo bi hongohe lamini. Ibugua tihondo lamialu lalu, Heneneore i abahanda tíhondo genda mo ngiyagonibi ndo ina tí genda timbuniore mo ngulebero. I abahanda tibu emeneme tí bayago ai ina tibu timbunioreme tí minu bolebero, lene. <sup>15</sup> Anduane Homogo ibunime bilo hame lenedagua lola helonaga Lehoboama ibugua wali agali biarunaga bu miniha hamelo hearu talia nabi mo wahene. Anduane Homogo ibunime agali mbira ibunaga bi mana latagi haga Silo dindini haga mini Ahiya ibuha howa Nebada igini Yaroboamahondo agua bulebira lalu ala mbiwia ho wiyago lola helonaga anidagua bini.✧

<sup>16</sup> Ani layagola wali agali biaru tigua manda bu handalu hemiria kini ibugua tinaga bi layago hale habe naheyane tigua bi hongo howa ladaga halu lalu, Ina Debidi damenerunaga andaneha holene manga ho kama. Ina Debidi ariabi ndo ibu igini áyu o kago ibu ariabi ndo dege kamagonigo Lehoboama ibuni hondo holene nde ibunaga biabedago áyu ina Isaraele wali agali kamaru inane daluha pugupugu bima, lene.✧

Ani lowa tigua Lehoboama helalu tini daluha pene. <sup>17</sup> Ani piyagola Isaraeleali maru Yuda hameigini heba Yuda dindihayagi hayaruni ti dege Kini Lehoboama andaneha haabo hene.

<sup>18</sup> Mani howa Kini Lehoboama ibugua agali mbira Adonirama ibu kininaga biabe bia haga agali hearu handayaho haga henego ogoni ibu Isaraele wali agali wahalu pene biaru hearia pelo pu lene. Adonirama ibu Isaraele wali agali biaru hearia piyagola tigua ibu ege toleme bo homelene. Ani biya layago hale howa Kini Lehoboama ibuninaga wai biagane garo ale mini karisini iraga halu abale Yarusaleme ibida pene. <sup>19</sup> Horo ogoningi howa Isaraele wali agali uyurahayagi hama piyaru tigua dogala halu Debidi aguaneneru mbiragome kini hayagua urunime ti haru helo hame naleore haga hene.

## 11

### *Ngode Datagaliwabenaga bi mana latagi haga Semaiahanda bi latagi henego ogo (1 Kini 12.21-24)*

<sup>1</sup> Lehoboama ibu Yarusaleme anda puwa ibugua ami agali hongohe Yuda hameigini hearubi Beniyamini hameigini hearubi ti bibahende olayagola íbu ngoai hene. Ogoningi agali íbu ngoai ho henedaru dagalalu daosini dege handari mbirani pira halira (180,000) íbu hene. Lehoboama ibugua ami agali urunime Isaraele wali agali uyurahayagi palearu baba wai bialu wali agali uruni ibuni andaneha helo haru dai bule manda buwa ani bule pudaba lene. <sup>2</sup> Anigo Anduane Homogohanda bi mana latagi haga Semaiahondo lamialu lalu, <sup>3</sup> Ina áyu ogoni puwa Kini Lehoboamabi Yuda hameiginibi Beniyamini hameiginibi wali agali dindi ogoniha karubi ti bibahende karia puwa ogodagua lamibe. <sup>4</sup> Anduane Homogo ina larogo tí hameneore Isaraele karu baba wai nabilimu. Áyu tí bibahende andaga dai bidaba. Inime hame lewadagua Isaraele wali agali tigua tí yu wahalu tini hangu hatara hayagoni. Anidagua biyagoni inime biru,

lene. Ani laya handala Semaia ibugua pialu Anduane Homogonaga bi ogonidagua latagi hayagola hale howa ti bibahende Yaroboama baba wai bule nape tini andaga pugupugu bini.

*Lehoboamahanda tano maruha wai pabe hongohe bia dai binigo ogo*

<sup>5</sup> Lehoboama ibu Yarusalemeni howa agali biabe biaga hearuhondo lamialu, Yuda dindiha tano wiarunaga wai pabe bu mabubu wiaru hongo helo mo tiga bidaba, lene. <sup>6</sup> Ani layagola tigua Bedeleheme tanobi Edama tanobi Tegoa tanobi <sup>7</sup> Bedesu tanobi Sogo tanobi Adulama tanobi <sup>8</sup> Gede tanobi Maresa tanobi Sibi tanobi <sup>9</sup> Adoraimi tanobi Lagisi tanobi Asega tanobi <sup>10</sup> Sora tanobi Aiyalono tanobi Heberono tanobi uruni bibahendeni wai pabe baya hangu hongohe helo bia dai bini. Tano uruni bibahende hameigini Yuda Beniyaminila libu dindiha dege wini. <sup>11</sup> Tigua tano uruninaga wai pabe hongohe helo bialu hene. Ani biai hayagola Kini Lehoboama ibugua tano uruni bibahendeha ami agali marume tidi mbira agima howa handayaho helo agali haguane mbira tano mbira mbirani helaga bini. Ani bialu tomo tara tara dewaorebi olibe lininaga welibi waini ibabi <sup>12</sup> humbi yandare dewabi mo manda mandabu wini. Anidagua buwa ibugua tano uruni mo hongo halu Yuda hameiginibi Beniyamini hameiginibi haru hai hene.

*Loma binigo mo miaga hearubi Libaiali hearubi Yarusaleme ibinigo ogo*

<sup>13</sup> Loma binigo mo miaga hearubi Libaiali hearubi ti bibahendeme Yuda dindi bibahendeha howa tini dalu wahalu Lehoboama baba hole ibini. <sup>14</sup> Ti ani ibinidagoni irane Isaraele wali agalinaga Kini Yaroboamabi kini maru maha ha aribia henedarubi tigua loma binigo mo miaga biarubi Libaiali biarubi ti Anduane Homogonaga biabe biaga wiago bo dugualu purogo lelowa haga haga bini. Ani biyagola tigua tinaga dindi andaru wahai halu Yarusalemenibi Yuda dindi wiaruhabi hole ibini. <sup>15</sup> Yaroboamahanda loma binigo mo miaga uruni bo taliatagi hai howa ibugua Libaiali ndo agali tara ibuni aria hearu minalu mbirale dama mitangi bialu bi pupu wule gime wabini wiarunaga loma binigo mo miaga helo dabo helaga bini. Ani biyagola loma binigo mo miaga ha aribia heleneru uruni tigua dama tara tarabi Yaroboama ibugua nogo bulumaga wangabe handalehe wabu wiaruhondobi bi pupu wialu haga hene.\*<sup>✧</sup> <sup>16</sup> Isaraele hameigini bibahende hearume Anduane Homogo tinaga Ngode Datagaliwabhondo mitangi bialu lotu henene lole hamelo heneru tigua loma binigo mo miagabi Libaiali biarubi heba Anduane Homogo ti mamalirunaga Ngode Datagaliwabhondo lotu lole Yarusaleme piyadagua talima pene. <sup>17</sup> Wali agali uruni ti Yuda wali agali baba howa tigua mo hongo halu hene. Ani bialu mali tebirani tigua Solomonu igini Lehoboama heba mandagi howa Kini Debidi Kini Solomonolame bialu henedagua bialu hene. Anidagua biyagome Kini Lehoboama ibu hongoheore helene.

*Lehoboamahanda wali dewa dabu buwa waneigini dewaore henego ogo*

<sup>18</sup> Lehoboama ibu wali mbira Yarimodo wane mini Mahalada dabu bini. Yarimodo ibu Kini Debidi aguane hene. Mahalada aija ibu Yasi igini Eliaba wane Abihaili berene. <sup>19</sup> Mahalada ibugua igiri tebira Yausu Semaria Sahama layaru taba hanaga bini. <sup>20</sup> Mani howa Lehoboamahanda wali mende Abasalomo wane Maga dabu buwa libu igini maria henego mini Abiya Adai Sisa Selomidi layaru hene. <sup>21</sup> Ani heagola Lehoboama ibu wali pira mbirani halira (18) dabu bialu ibu one henene berene. Ibu wali halu mende bereneru aria pira waragaria (60) bialu bini. Ani biruwa wali uruni tigua igiri pira kirani halira (28) taba hanalu wandari pira waragaria (60) taba henene. Lehoboama ibu wali dewaore dabu binigoyu ibugua Magaore gubalini timbuni ho haga hene. <sup>22</sup> Ani howa Lehoboama ibugua lalu, *I* homarogola *i* one wali Maga igini Abiyahanda *i* henegoria kini ho aribia helo, lowa dabo helene. Ani helowa ibugua Abiyaore ibu hamene bu hearunaga deni mo duniniore howa helene. <sup>23</sup> Ani

\* **11:15:** Dama lalu gilibu ngagoni nogo meme handalehe wabu helene. ✧ **11:15:** 1 Kin 12.31

buwa Lehoboama ibu miniwi howa ibugua tanonaga wai pabe hongohe helonaga bu tiga buwa ibu igini bu hearume Yuda dindihabi Beniyamini dindihabi tano wiaru handayaho howa haru helo dabo helaga bini. Ani helowa ibugua tano uruniha tomo dewaore mo wialu ibu iginirubi wali dabu bilo dabo migi bini.

## 12

*Yuda wali agalirume ko biyagola Anduane Homogo ibugua mo tiga binigo ogo  
(1 Kini 14.25-28)*

<sup>1</sup> Lehoboama ibu haru haga hongoheore heangi ibugua Anduane Homogonaga bi mana yu wahayagola Yuda wali agali tiguabi ani dege bini. <sup>2</sup> Tigua ani biyagola Lehoboama ibu mali duria hangu kini hearia Anduane Homogohanda tihondo pani mialu Iyibialinaga Kini Sisaga ibunaga amiru haru halu ti Yarusalemeni wai bule ibilene. <sup>3</sup> Kini Sisaganaga ami uruni tinaga garo ale mini karisi daosini mbirani handari kira (1,200) heba ami agali nogo hosini biralu piaga ti daosini dege pira waragara (60,000) uruni heba ami agali maru Libialibi Sugialibi Sudanalibi ti daga labe nahe dewalioreme wai bule pene. <sup>4</sup> Iyibialinaga kini ogoni ibu ami agali biaruni heba pialu Yuda tano wai pabe hongohe bu hearu karulama pialu Yarusaleme anda polene kaware hene.

<sup>5</sup> Ani biyagola Anduane Homogonaga mana latagi haga agali mini Semaia ibugua Kini Lehoboamabi Yudalinaga agali haguane hearubi ti Sisaga ibulilono Yarusalemeha ibida pialu ngoai ho hearia anda pene. Anda puwa ibugua tihondo lalu, Anduane Homogohanda bi ogo langiyago ti langero, Tigua i erembira ngialu wahalu pirimigo ai ina ti wahalu Sisaganaga giha mo ya helo helaro, laya lalu lamini.

<sup>6</sup> Ani lamiyagola Kini Lehoboamabi agali haguane biarubi tigua ko biyago lapani lalu tini mo dindi howa lalu, Anduane Homogo ibugua inahondo mana tigabi biragoni, lene.

<sup>7</sup> Tigua ani layagola hale howa Anduane Homogo ibugua bi halu mende Semaiahondo lalu, Yudali karu tigua ko biyagonaga lapani hayago ina ti bo wahai naholebero. Sisaga ibu ami agali heba wai bule ibuwa tigua Yudali bo wa nahelo ina ti baba keba haho wiaabo naholebero. <sup>8</sup> Anigoyu Sisaga ibugua ti ibu andaneha helaragola tigua i andaneha holenego bayaledane handalu dindi agali haguane andaneha holenego erekuibi ndelahedane hondolebira, lalu lene.

<sup>9</sup> Kini Sisaga ibu Yarusaleme anda puwa ibugua Anduane Homogonaga andahabi kininaga andahabi mbirale bayale wiaru damene bibahende mo yai hene. Wai humbi Solomonohanda wabuwa ngolome paraho dambi hene wiarubi mo yai lalu Iyibi dindiha yalu pene. <sup>10</sup> Ani mo yalu peagola mani Kini Lehoboamahanda agali ibunaga biabe biahaga hearuhondo wai humbi Iyibiali biarume mo yalu piyadago aribia holenenaga maru ege tole boronosime wabidaba layaru wabu wiagola ami agali maru kini andaga harabani mamage haga hearume handaya ho helo mini. <sup>11</sup> Kini ibu Anduane Homogonaga anda loma biahene biagoha pole porangi ami mamage haga uruni ti heba humbi yalu pialu dai bialu anda hobane humbi uruni wiagadagoha ngelaga biaga hene. <sup>12</sup> Lehoboamahanda Anduane Homogonaga andaneha lone ho dai biyagola Anduane Homogonaga keba holeneme ibu bo wanahe helalu Yuda wali agali tibi bayale helene.

*Kini Lehoboama ibu bialu henegonagabi homenegonagabi te ogo  
(1 Kini 14.21-22,29-31)*

<sup>13</sup> Lehoboamahanda Yarusaleme tanoni kini heangi ibunaga haru holene hongo timbunihe hene. Ibu aiyahanda taba henenegroia howa hama ibinigo mali pira mariani mbira (41) layagola kini pigane hene. Anduane Homogohanda Isaraele dindi bibahende wiaru aria mbirago Isaraele wali agali tigua ibuni kagoria kaware ibalu

lotu lelonaga Yarusaleme loma biaho ngelalu Lehoboama ibu Yarusaleme ogoriani kini howa mali pira mbirani karia (17) haru hene. Ibu ajiya Amono wali mini Nama berene. <sup>14</sup>Lehoboama ibugua Anduane Homogonaga hame wiago hai nabi howa mana ko timbuni biaabo halu hene.

<sup>15</sup>Lehoboamahanda pigane howa bialu hama ibiniru tebiibunaga malubi Anduane Homogonaga mana latagi haga mini Semaia Idola libugua bialu henegonaga mbugaha gilimumaga ho nga. Lehoboama Yaroboamala libu kini hebingi wai bialu haabo haga hene. <sup>16</sup>Lehoboama ibu homayagola tingini ibunaga mamali maru kini halu homenerunaga homali Debidinaga Tano winigoha hora hene. Homayagola ibu igini Abiyahanda ibu aba henegoria ho aribia howa kini hene.

## 13

### *Abiya Yaroboamala wai binigo ogo (1 Kini 15.1-8)*

<sup>1</sup>Yaroboama ibu mali pira mbirani karia (17) Isaraele dindiha kini henego mali pira mbirani halini (18) hayagola ogoningi Abiya ibu Yuda dindini kini pigane hene. <sup>2</sup>Ibugua mali tebirani kini howa Yarusalemeni haru hene. Ibu ajiya mini Migaiya ibu Gibeatanoali Uriele wane berene.

Abiya Yaroboamala libu waitigi howa wai bialu hene. <sup>3</sup>Abiyahanda ami daosini dege handari maria (400,000) ho mandamanda bialu Yaroboama ibugua ami daosini dege handari halira (800,000) ho mandamanda bialu waitigi howa wai bialu hene.

<sup>4</sup>Ami agali uruni ti Eberaimi dindi hari hegoria ngoai ho hearia Abiya ibugua Hari Semaraimiha irigi howa Yaroboamabi Isaraealirubi olamu halu lalu, Ina bi o larogo tí hale hadaba, lene. <sup>5</sup>Anduane Homogo Isaraele wali agalinaga Ngode Datagaliwabe ibugua Debidila habo nalolene bi lo wialu lalu, Debidibi ibunaga aguanenerubi ti Isaraele wali agalinaga kini haabo holebira, lalu lowinigo tí manda nabi kamibe, lene. <sup>6</sup>Abiyahanda laabo halu lalu, Nebada igini Yaroboama ibugua Kini Solomononaga bi mo wahaga hene. <sup>7</sup>Solomono igini Lehoboama ibu igiri mini boga nabi howa Yuda wali agali haru habe nahe hene. Ani howa agali mana ko biaga ibu heba hayaru tigua ko bima laragola ibugua i nabule labe nahe hene. <sup>8</sup>Ai áyu tigua Anduane Homogohanda habo nalolene bi lo wialu Debidinaga aguanenehondo haru holene hongo minigo baba wai bule kamigo agibe. Tíngaga ami agali timbuni dewaore helalu nogo bulumaga wangabe ale dama mitangi bialu bi pupu wulenaga Yaroboamahanda ngolome wabiniru yu kamigoni. <sup>9</sup>Tigua Arono aguanene Anduane Homogonaga loma binigo mo miagarubi Libaialirubi ti bo batagi harimi. Ani buwa uruni henegoria tigua hameigini tara dindi tarani karume tini dabaluloma binigo mo miaga helagadagua helaramili. Mbirali ta nabi kagome nogo bulumaga wangabe haru ibalu nogo sibi kariaru haru ibiyagua o biago ibu tíngaga mbirale dama mitangi bialu bi pupu wulenaga wabu ngaruhondo loma binigo mo miaga helaramili, Abiyahanda lalu hene.

<sup>10</sup>Abiya ibugua laabo halu lalu, Tigua ani bialu haramiligoyu iname nde Anduane Homogo inanaga Ngode Datagaliwabe wahalu pu nabi ibunaga biabe bialu haabo kamagoni. Agali maru Arononaga aguanene karume Anduane Homogonaga loma binigo mo miaganaga biabe bialu Libaialirubi ti heba biabe mandagi biaga ka. <sup>11</sup>Horo bibahendengi egerebagi alendobi tigua Anduane Homogohondo mbirale ngabilo delaga mini inisenesi lomabu delalu nogo sibi memeru bo loma bialu poda nabi howa bibahende lomabu delaga dabuni delai haga ka. Tigua mberedi loma bialu tebolo dagia dodo nahe ngagoriani mo wialu alendo haragola hale lamu irane ngolome wabu ngagoriani hale lamu ngaru delalu biaga kagoni. Iname Anduane Homogohanda bulene nga lowinigo ngadagua bialu kamagoyu tigua ibu wahalu pirimigoni. <sup>12</sup>Inanaga haguane timbuni Ngode Datagaliwabe ibuni kagoni. Iibunaga loma binigo mo miaga



ina heba karume tí baba wai bulenaga mbelo biguli yu karu pu lole kagoni. Anigo Isaraealiru-o tígua Anduane Homogo tí mamalirunaga Ngode Datagaliwabe baba wai nabilimu. Tí wayali habe nahe kamigoni, lalu Abiyahanda lene.

<sup>13</sup> Abiya ibu ani lalu heatambu Yaroboama ibugua Isaraele ami maru Yudali ho heaore marume Yudali erembirahayagi wai bule ohalu pelene. <sup>14</sup> Yudali hearume beregedowa Isaraele ami biaru ti ho mabu bu hearia de hendene. De hondowa mogo lalu tigua Anduane Homogo olalu, Ina biamogo bia, lalu loma binigo mo miaga biarume tinaga mbelo buguli dalimuore pu lalu hene. <sup>15</sup> Ani bialu tigua bi dalimuore lalu Abiya ibugua ti haru halu Isaraele ami biaru baba wai bialu hene. Ngode Datagaliwabe ibugua ti biamogo biyagome tigua Isaraele ami agalinaga hongo bolangua hene. <sup>16</sup> Ani biyagola Isaraele ami biaru gerai ibida pialu hearia Ngode Datagaliwabe handa Yuda ami agaliru wayali helo biamogo bini. <sup>17</sup> Abiyabi ibunaga ami agalirubi tigua hongo timbuni lalu wayali howa Isaraele ami agali wai hongo howa biaga mugube hearu bo wahalu daosini dege handari duria (500,000) homai hene. <sup>18</sup> Ani biyagola Yudalirume Isaraealiru baba wai bialu wayali hayago irane tigua Anduane Homogo ti mamalirunaga Ngode Datagaliwabe mitangi bialu hanaho henegome ani bini.

<sup>19</sup> Abiyahanda ibunaga ami agali heba Yaroboama baba wai bima talima pialu tano timbuni Bedelebi Yasanabi Eberonobi tano maru emene emene wia parapara bu wiarubi karulai hene. <sup>20</sup> Yaroboama ibugua Yudalinaga kini Abiya heangi lone haru holenenaga hongo nahe hearia Anduane Homogohanda ibu bayagola homene.

<sup>21</sup> Ani biyagoyu Abiya ibu hongo timbuni howa haru haabo hene. Ibugua wali pira mbirani maria (14) dabu bialu ibunaga igini pira kirani kira (22) lalu ibunaga wane pira mbirani waragaria (16) berene.

<sup>22</sup> Abiya ibu Yudalinaga kini heangi bialu henedarubi bi lenedarubi mbuga mbira mini Mana Latagi Haga Idonaga Bi Te laga ngagoha gilibumaga ho nga.

## 14

### *Asa ibu Yudanaga kini henego ogo*

<sup>1</sup> Kini Abiya homayagola tigua ibunaga tingini Debidinaga tano wiagoha hora hene. Hora howa ibu igini Asahanda ibu aba henegoria kini ha aribia hene. Asa ibu kini howa Yuda dindini haru heangi Yuda dindi wai mbira nabi dege mali pirani bayale hene. <sup>2</sup> Asa ibugua Anduane Homogo ibunaga Ngode Datagaliwabenaga deni howa mana bayale tigabi wiaru hangu bialu haga hene. <sup>3</sup> Asahanda Yuda dindiha mbirale wali agali dindi tara hearunaga dama mitangi bialu bi pupu wulenaga lomabu mulene dabu wabu helearu bo gialabagabu wahai hene. Ani bialu mbirale dama mitangi bialu bi pupu wiaga ege toleme anda gene ale wabu helegobi bo pambulo wahalu dama wali beda mitangi bialu bi pupu wiaga mbirale ira mbira dibuwa dindini wene mini Asera laga helearubi dibu gabu wahai lalu bini. <sup>4</sup> Ani buwa ibugua Yuda wali agalihondo lamialu lalu, Tígua Anduane Homogo tí mamalirunaga Ngode Datagaliwabe kagonaga hameledago baya hangu bialu halimu. Ani bialu howa ibunaga bi laragobi ibunaga mana lowini ngagobi taluwa bialu halimu, lalu lamini. <sup>5</sup> Ani lamuwa ibugua Yuda dindiha tano wiaru bibahendeni mbirale dama mitangi bialu bi pupu wule gime wabini wiarunaga anda bu helene hearu bibahende bo giallo wahai lalu ira hagua ngabilo delaga mini inisenesi dabu bu helegobi bo giallo wahai hene. Ani buwa ibugua Yuda dindini wali agali baya hangu haru heagola wai mbira nabi bayaleore hene. <sup>6-7</sup> Asa ibugua Yuda wali agali bu hearuhondo lalu, Ai tano maru maru ngarunaga ege pabe hongohe bu mabu bialu mamageali handa delebu holenaga anda bima irigi lalu bu helaga bimija. Ani bialu tanonaga panga hongohe wabialu ndibulo payulenaga panga bengena aeaneme wabu helaga bimija. Ayu ina dindini bayale kamagoni irane iname Anduane Homogo inanaga Ngode Datagaliwabenaga hame ngago baya hangu taluwa

bialu kamagome bida. Ani bialu Ngode Datagaliwabe ibunime inanaga dindi baya hangu handayaho kagome inaha genda mbira naibi bayale kamagoni, Asahanda lene. Ani lalu Asa ibugua agali biabe biaga hearume Yuda dindiha tano wiaru bibahende ege pabe bu mabu bule pudaba lene. Tigua biabe uruni bialu heangi wai mbira nabi ti bayale dege henego irane Anduane Homogohanda tinaga waitigi mbira anda ibuligo lowa handayaho haabo heagome anidagua bini. Ani howa Yudali biaru tigua biabe bigi biyaru bayaleore bialu hene. <sup>8</sup> Ani bialu henego Kini Asanaga ami agali Yuda hameigini hearu ti daosini dege handari tebira (300,000) howa tigua wai biaga yandare yalu humbi timbunibi yu haga hene. Beniyamini hameigini ti daosini dege handari kirani pira halira (280,000) howa tiguabi humbi emene yuwa danda timubi yaga hene. Ami agali uruni ti hongo timbunihe howa wai biaga mana mandabi bayaleore hene.

*Anduane Homogohanda Sudanali bope halu Asa wayali helenego ogo*

<sup>9</sup> Asa ibu Yuda dindini kini heangi Sudana dindinaga agali haguane Serahanda ami agali dewaore haru halu Yudaliru baba wai bule ibini. Sera ibunaga ami agali milini mbira (1,000,000) haru halu wai biaga garo ale mini karisi dege handari tebira (300) nogo hosime gili lama ibuwa Maresa tano wiagoria anda ibini. <sup>10</sup> Ani ibu heagola Kini Asa ibugua nde ibunaga ami agaliru haru halu wai bule pene. Yuda ami uruni ti Maresa tano kaware ngelowa dindi ulini buguni buguni mini Sebada laga wiagoria Seranaga amidaru lola hole pene. Anda puwa ami agali kirabalime wai bule mo manda manda buwa tidiyu haga haga bu hene. <sup>11</sup> Ani bu heagola Asahanda Anduane Homogo ibunaga Ngode Datagaliwabe olowa lalu, Anduane Homogo-o inaga ami agali hongo nahe howa dewa ndo o kamagonigo Sera ibunaga ami agali dewaore kagoni í manda bide. Anigo ami hongohe kagome bope habehegoyu ai ina hongo nahe kamagome bope holomaya biamogo birilidagua áyu ina biamogo bibe larama. Iname íni hanaho howa í minini ami agali hongo gibihe o kagoni baba wai bule eberemagoni. Anduane Homogo-o inanaga Ngode Datagaliwabe íore kego mendealime í bo wahowa wayali habe nahe ka manda bidamagoni, lene.✧

<sup>12</sup> Asa ibugua Anduane Homogohondo bi lai halu ibunibi Yuda ami biaru heba Sudana ami biaru baba wai bule pene. Ani wai biyagola Anduane Homogohanda Sudana ami biaru bope hayagola ti ibida piai hene. <sup>13</sup> Ani ibida piyagola Asa halu ibunaga ami agali biarume talima haruru pialu Gera tano anda puwa ami agali dewaore minalu bogai hene. Ani bo wahi hayagola Sudana ami biaru ti dewa nahe howa wai biadai bibe nahe hene. Anduane Homogohanda ibunaga ami biaru biamogo biyagola tigua Sudana ami agali biaru bo podahana halu uruninaga dabudabu dewaore wiaru Yuda ami ti mo yai hene. <sup>14</sup> Ani bialu Anduane Homogohanda Gera tanoha wali agali bu hearu tiha gi holene mo wia hayagola ti gi ho heaore dege Kini Asanaga ami agali biarume tano ogoni hi nahe karulene. Tano ogoniha dabudabu bayale tara tararu winigo Asanaga ami agali biarume mo yalu piai hene. <sup>15</sup> Ani bialu puwa Asanaga ami agali urunime dindi ogoniha nogo sibi hinaga agali hearu baba wai bialu uruninaga nogo sibi kameleru bibahende ti haru hai halu Yarusaleme dai bini.

## 15

*Kini Asahanda Yudalirume mana ko biaga winiru mo tiga bidaba lenego ogo*  
(1 Kini 15.13-15)

<sup>1</sup> Horo mbirungi Ngode Datagaliwabenaga Dinini ibu Odede igini Asaraiaha mo hongo hole ibini. <sup>2</sup> Ani mo hongo haya handala Asaraia ibu Kini Asa lola hole puwa ibugua olamu halu lalu, Kini Asabi Yuda hameiginibi Beniyamini hameiginibi tí bibahende bi o larogo hale hadaba. Tí Anduane Homogoha haparaho harimiyagua nde ibu tí heba mandagi holebira. Tígua ibu taya bialu harimiyagua nde ibu tí kamigoha

✧ 14:11: 2 Bit 13.14, 13.18

kaware holebira. Anigo tígua ibu erembira mialu harimiyagua nde ibugua tí wahalu polebira.\* <sup>3</sup> Bambaore howa Isaraele wali agali ti heba Ngode Datagaliwabe ibuniore mandagi nahe winigo irane tinime ibu erembira miyagola ani bini. Ani bialu hearia Ngode Datagaliwabenaga loma binigo mo miaga nahe howa bi mana lawai holenebi nahe dege ibunaga mana lo winigobi nawiore hene. <sup>4</sup> Ti ogonibi hearia genda tandaga tara tara Isaraele wali agaliha anda ibiragola tigua Anduane Homogo ina Isaraele wali agalinaga Ngode Datagaliwabe mitangi bialu ibu karia abale dai biaga hene. Tigua ibu taya bialu ti ibuni karia dai bilo yupe haga hene.\* <sup>5</sup> Horo uruningi Isaraele wali agali hearu tigua mana ko tara tara tagira ibiyagome wali agali dindi tara taraha bu hearu bibahende mo ko hai haga wini. Ani wiagago mbirali ibu ibuni dindi wahalu dindi mendeha togo lalu ibida pole harigani pialu karia agali ko karume mo ko halu minu бага hene. <sup>6</sup> Horo uruningi dindi mbirahayagi hearume dindi mendeha hearu baba wai buwa mendego bope halu tano mbirahayagi hearume tano mendeha hearu baba wai bialu mendego bope haga hene. Ani henego irane Ngode Datagaliwabe ibunime wali agali bibahende genda mo mulenaga uruni bibahende ibilaga hene. <sup>7</sup> Anigo ai áyu tígua bayale bule hongoho haabo halimu. Anduane Homogohanda tí bayale bule hongoho kamigo de hondowa tínaga bayale holene wulebirago mitangi bialu anidagua bialu halimu, lalu lamini.

<sup>8</sup> Odede igini Asaraiahanda bi ogoni lamiyagola hale howa Kini Asa ibu ibunaga miniha hongoho hene. Ani biyagola ibugua mbirale bi pupu wulenaga dama mitangi bialu gime wabini Yuda hameigini dindihabi Beniyamini hameigini dindihabi wiaru bibahende bo gialo wahai hene. Ani bialu Eberaimi dindi bare bare wiaruhabi dindi maru ibugua wai bialu karulene wiaruhabi pialu dama mitangi bialu bi pupu wiaga uruni ale bibahende bo gialo wahai hene. Mbirale bi pupu wule gime wabini uruni Ngode Datagaliwabe deni ko ngubiore wini. Ani bialu Asa ibugua bidaba layagola tigua lomabu delaga dabu mbira Anduane Homogonaga anda haneni heago baya hangu mo tiga bialu arema bidaba layagola tigua ani bini.

<sup>9</sup> Anidagua biyagola Eberaimi hameiginibi Manase hameiginibi Simeono hameiginibi tigua handalu hemiria Anduane Homogo ibu Asa heba heago hondowa tini dindi Isaraele wahalu Yuda dindiha dindi abene unurahayagi anda ibalu Kini Asa baba Yuda dindiha hene. Ani ibu heagola Asa ibugua wali agali o ibiyadarunibi Yuda hameiginibi Beniyamini hameiginibi bibahende ibu ngoai hadaba lene.

<sup>10</sup> Asa ibu kini heane mali pira mbirani dauninaga (15) ege tebone layagola wali agali bibahende Yarusalemeni ibu ngoai hene. <sup>11</sup> Horo ti ibu ngoai hayadangi nogo bulumaga handari karia (700) nogo sibi daosini kariabi (7,000) bibahende haru ibu ngoai hene. Nogo uruni aria maru wai bialu waitiginaga nogo hearu haru henego uruni bibahende tigua Anduane Homogohondo loma bialu bo miai hene. <sup>12</sup> Ani buwa tigua Anduane Homogo ti mamalirunaga Ngode Datagaliwabe mitangi bialu tinaga minimebi mandamebi hongomebi ibugua laradagua biaabo hole lalu bi hongohe lowini. <sup>13</sup> Ani buwa tigua lalu, Mbiralime bi uruni talialu nabiyagua ogoni ibu wandari igiri daliaheyaguabi wali agali waheyaguabi ta nabi homelo bo wahamiya. <sup>14</sup> Aniore bule lalu tigua Anduane Homogonaga deni bi hongohe lowini. Ani lalu tigua hoaro ladagadaga bialu pilipe ale biguli hongo howa pu lagalaga bialu hene. <sup>15</sup> Ani lalu tinaga bu miniha turu timbuni howa Yuda wali agali tigua Anduane Homogo talima pole hongo ho hene. Tigua Anduane Homogo talima polene hame timbuni lo hemigola nde Anduane Homogohanda ibuni karia ibilo yupe hene. Ani bialu ti daluha genda anda naibilo ibunime baya hangu handayaho hene.

<sup>16</sup> Asa aguabuni Maga bereago ibugua mbirale dama wali beda mitangi bialu bi pupu wulenaga mini Asera gime wabu wiaria hondowa Asa ibugua biabe ogoni nabilo bo

\* 15:2: 2 Bit 24.20, Yar 29.13, Md 7.7, Ya 4.8    \* 15:4: Man 4.29

duguini. Ani bo duguayagola wali ogoni ibu kini aiya mini lene birayago mo wahene. Asahanda agali bu hearuhondo lalu, Mbirale gime wabini ko ngubiore ogoni dibalu gabu dangiala hole bialu yalu tagira puwa unu Kidirono iba dindi ulini wiagoha irani delole yalu pudaba, lene. <sup>17</sup> Anidagua bialu Asahanda mbirale dama mitangi bialu gime wabini wiarunaga bi pupu wule ngoai haga anda bu hearuni bo giallo wahai nahe dege henegoyu ibugua Anduane Homogo gubalini timbuniore halu Anduane Homogo andaneha haabo haga hene. <sup>18</sup> Ani bu howa Asa ibugua mbirale ibu aba Abiyahanda Anduane Homogonaga lalu mo bagiho wini wiarubi ngolobi silibabi ndisi be tara taraibunime Anduane Homogonaga mo bagiho wini wiarubi bibahende Anduane Homogonaga andaha mo wiai hene.

<sup>19</sup> Horo ogoningi howa hama pialu Asa ibu Yuda dindiha kini heangi mali pira tebirani duria (35) wai nabi ti bayale hene.

## 16

*(1 Kini 15.17-22)*

<sup>1</sup> Asa ibu Yudanaga kini heane dege mali pira tebirani duria howa waragane (36) hayagola Isaraelenaga Kini Basahanda ami agaliru haru halu Yudaliru baba wai bule pene. Tigua puwa Lama tano karulalu wali agali tano ogoniha howa Yuda dindiha pu ibu nabilonaga hariga hangai halu tanonaga ege pabe heago baya hangu arema bu tiga bialu hene. <sup>2</sup> Ani bialu heagola Kini Asa ibugua muni ngolo silibaru Anduane Homogonaga andaha wiarubi kini andagaha wiarubi maru yamini. Ani yamialu muni uruniibunaga biabe biaga agali hearuhondo mo mialu Sirianaga Kini Benehadada Damasagasani haru ho hearia mule yalu pelo mini. <sup>3</sup> Ani mialu howa ibuguaibunaga agali biarume Benehadada lamilo lawia halu lalu, Bamba iya aba libu nenegeore heneyadagua áyu iyabi nde nenege dege habiya hameledo. Ani habiya lowa áyu muni ngolo silibaru bame ínaga wia haro. Ani berogo ai ina Isaraelenaga Kini Basala nenegeore habiya lalu bi hongohe lo wiribigoni wahabe. Ani beregola ibuguaibunaga amiru haru halu ínaga dindi yupe halu tagira pelo ani bibe, lalu lamini.

<sup>4</sup> Kini Benehadada ibugua Kini Asahanda bi lawia hayiyago hale howa bi ogoni karulape lene. Karulape lowa ibuguaibunaga ami agali haru hagane haguane hearuhondo lalu, Inanaga ami agali hayadaru haru halu puwa Isaraelenaga tano ngaruha wai bule pudaba, lene. Ani laya handala tigua puwa wai bialu Iyono tano bo poda hana halu Dana tanobi Abele Bedemaga tanobi Nabadali dindiha tano maru wai biagane danda timurubi tomorubi do haganeru karulai hene. <sup>5</sup> Ani biya layago hale howa Kini Basa ibugua Lama tano mo tiga bialu hayago biabe biala halu wahalulape. <sup>6</sup> Ani biyago manda buwa Kini Asahandaibunaga biabe biaga agali Yuda dindiha howa haru ibai hene. Ani haru ibalu tigua Lama tano pialu ege tolebi pabe bulene ira bibahendebi Kini Basahanda Lama tano mo hongo halu wai paberu bule ira ege toleru yu ibu wiaruni mo yalu ibini. Asa ibugua Geba tanobi Misiba tanobi wai pabe podo winigo arema bialu mo hongo haga bini.

*Anduane Homogonaga mana latagi haga Hananaihandabi lenego ogo*

<sup>7</sup> Horo uruningi mana latagi haga agali mbira mini Hananai ibugua Kini Asa hearia puwa ibuhondo lalu, Ina Anduane Homogo ínaga Ngode Datagaliwabe mo tene nahe howa Sirialinaga kini kago mo tene harigo ai Isaraele wali agalirunaga kiniibunaga ami ina balu minabe nahe ti ibida piyagoni.✧ <sup>8</sup> Idiobialirubi Libialirubi tinaga ami agalibi garo ale mini karisibi nogo hosini biralu piaga ami agalibi ti dewaore daga labe nahe hene ndobe. Ani henegoyu ti baba wai bu pirimingi ina Anduane Homogo mo tene harigonaga ibugua tí mo hongo hayagola wayali harimigoni. <sup>9</sup> Anduane Homogo ibugua wali agali ibuhondo mini mbiraorewi karu ti mo hongo holenaga ibu dindi

✧ 16:7: Ais 31.1, Yar 17.5

bibahendeore handa amunana bu haabo kagoni. Ina mini nawi howa birigome áyu ogoni howa waitigiru í baba wai bule ibaabo holebira, lalu lamini. <sup>10</sup> Hananaihanda bi ogoni lamiyago hale howa Asa ibugua keba timbuniore howa ibunaga biabe bia haga agali hearuhondo lalu, Tigua agali o kago minalu seni pume dariba hadaba, lalu lamini. Ogoningi dege Asahanda ibunaga wali agali hearu mo tandaga haabo hayagola ti genda timbuni ho hene.

*Kini Asa homenego ogo*  
(1 Kini 15.23-24)

<sup>11</sup> Te maru Kini Asahanda pigane howa bialu henedaru bibahende mbuga mbira mini Yuda Kinibi Isaraele Kinibi Henerunaga Bi Te laga ngagoha gilimumaga ho winigo nga. <sup>12</sup> Asa ibu kini howa mali pira tebirani dini (39) hayagola ibunaga ge ko halu warago timbuni bo wini. Warago timbuni ogoni bayagola Asa ibu Anduane Homogohondo biamogo bia nale anogoda hangu mitangi bini. <sup>13</sup> Ani henego ibu mali pira mariani mbira (41) haru haabo howa homayagola <sup>14</sup> tigua ibu tingini ibu mamaliru hora haga Debidinaga tano laga ege anda ibuni guabu winigo wiagoha hora hene. Tigua pauda ale nga biagane tara tarabi weli mbagua ale ngabi ibunaga tinginini hai halu ibu homayagonaga dugu bilo tigua ira timbuniore delayagoria dugu bialu hene.

## 17

*Yahosabada ibu Yudanaga kini henego ogo*

<sup>1</sup> Yahosabada ibugua ibu aba Asa henegoria Yuda dindiha kini ho aribia hene. Ani howa ibugua Yuda dindiha Isaraelealime wai anda ibulilono ami agali mo hongo halu dewaore helene. <sup>2</sup> Ibunaga ami agaliru Yuda dindiha tano wai pabe hongohe bu mabubi hearuha helalu Yuda dindi bibahendehabi helai dege hene. Ani bialu ibugua ami agali maru ibu aba Asahanda Eberaimi dindiha wai bialu dindi karulowa tano bu wiaruha helaga bini. <sup>3</sup> Kini Yahosabada ibugua kini howa mana bayale ibu abahanda kini pigane heangi bayale bialu hagadagua bialu hene. Ani bialu Yahosabada ibu mbirale dama mitangi bialu gime wabini mini Bala wiagohondo bi pupu nawiaga hene. Ani bialu heagola Anduane Homogo ibu heba mandagi howa biamogo bigi bialu hene. <sup>4</sup> Yahosabada ibugua ibu abanaga Ngode Datagaliwabe talima pialu Anduane Homogonaga bi mana bayale lowini wiaru taluwa bialu howa ibugua Isaraelenaga kini bu hearume mana ko tara tara bialu hagadagua nabiaga hene. <sup>5</sup> Ani heagola Anduane Homogohanda Yahosabada mo hongo halu kini hongoheore heleagola ibu Yuda dindiha kini hongohe howa handayaho hene. Wali agali bibahendeme ibu mo turu halu mbirale tara tara bame mule yalu ibugu biyagome muni mbiralebi dewa wu howa Yuda wali agalinaga deni ibu timbuni mini lene mbira hene. <sup>6</sup> Yahosabada ibugua hongo howaore Anduane Homogo talima pialu howa ibu Yuda dindi bibahendeha ibaga biai halu dama mitangi bialu mbirale gime wabini wiaruhondo bi pupu wiaga andabi wali dama beda mitangi bialu gime wabini mini Asera wiarubi bibahende bo giallo wahai hene.

<sup>7-9</sup> Yahosabada ibu kini howa mali tebonengi ibugua agali haguane marubi Libaiali diralibi maru loma binigo mo miaga kiralibi heba Yuda dindinaga tano bibahendeha piai hadaba lene. Ani layagola agali uruni tigua Anduane Homogonaga bi mana gilibu winigo mo yalu Yuda dindiha tano bibahendeni wali agali bu hearu lawai hole pene. Agali haguane piyaru mini uru Benehaili Obadaia Segaraia Nedanele Migaia imaru pene. Libaiali piyaru mini uru Semaia Nedanaia Sebadaia Asahele Semiramodo Yahonadana Adoniya Tobia Tobadoniya imaru pene. Agali loma binigo mo miaga kiralibi Elisama Yahoramalabi ti haru Yuda dindiha ibaga biai halu Anduane Homogonaga bi mana gilibu wini wiago lawai hole pudaba layagola yalu pene.



*Yahosabada ibu kini hongoheore mbira henego ogo*

<sup>10</sup> Yahosabada ibu kini heangi dindi tara taraha hameigini dewaore Yuda dindiha hapara para bu hearu bibahendenaga kini hearubi agali haguane hearubi bibahendeore Anduane Homogohanda mo gi hai heagola tigua gi halu Yuda baba wai nabi hene.✧ <sup>11</sup> Pilidiali bu hearume siliba maru Yahosabadanaga dagisi muni yu ibugu bialu dabudabu marubi ibu bame mule yalu ibugu dege bini. Ani bialu Arebiali bu hearu tiguabi nde nogo sibi wangabe daosini kariani handari karia (7,700) haru ibalu nogo meme wangabe daosini kariani handari karia dege (7,700) Kini Yahosabadahondo mulenaga haru ibini.

<sup>12</sup> Ani biyagola Kini Yahosabada ibu hongo emene haga bima irigi halu hongo gibihe hene. Ani howa ibugua agali maru Yuda dindini tano bu wiaruha purogo lelaya handala tigua puwa tomoru wai biagane aleru do holenaga anda dewa tano uruniha bu helaga bini. Ani bialu tigua wai tigriru anda ibulilono ami agalime mamage ho helonaga pabe hongohe bu helaga bini. <sup>13</sup> Ani bu helowa Yahosabada ibugua ami agalirunaga dabudabu dewaore anda uruniha mo wiai hene. Ani mo wiai howa Yahosabada ibugua ami agali hongohe maru hearu Yarusaleme tanoha helene. <sup>14</sup> Ami agali uruni ti one waneigini heba mandagi howa agali haguane haru haga mbira mbirame ami agali daosini mbira (1,000) dege dege haru haga bini. Yuda tinaga ami agali haguane haru haga mini Adana ibugua ami agali hongoheru daosini dege handari tebira (300,000) handayaho howa haru haga hene. <sup>15</sup> Agali haguane dege mende ibu Adana andaneha howa haru haga henego mini Yahohanana hene. Ibugua ami agali hongoheru daosini dege handari kirani pira halira (280,000) handayaho howa haru haga hene. <sup>16</sup> Ami agali haguane dege tebone Sigiri igini Amasaia hene. Agali ogoni ibugua Anduane Homogonaga biabe biahole lalu ibuni lomabia halu ami agali hongoheru daosini dege handari kira (200,000) handayaho howa haru haga hene. <sup>17</sup> Beniyamini hameigini tinaga ami agali haguane haru haga henego mini Eliada ibuore ami agali hongo gibihe mbirago howa ibugua ami agali hongohe maru humbi danda timuru yuwa wai biaga daosini dege handari kira (200,000) handayaho howa haru haga hene. <sup>18</sup> Ami agali haguane dege Eliada erembiraha howa biamogo biaga mende mini Yahosabadi henego ibugua ami agali daosini dege handari mbirani pira halira (180,000) handayaho howa haru haga hene. Horo bibahendengi ami agali uruni ti wai bule manda manda bu haabo haga hene. <sup>19</sup> Ami agali uruni ti Yarusalemeni howa kininaga biabe bialu haabo haga hene. Ani bialu kini ibunaga ami agali marubi Yuda dindi bibahendeha tano wai pabe hongohe bu hearuha hai helene.

## 18

*Mbiwia haga agalime Ahaba homolebere lenego ogo*  
(1 Kini 22.1-28)

<sup>1</sup> Yahosabada homogo mini lene timbuniore howa ibugua Isaraealinaga Kini Ahabala mini mbiraore holenaga ibu iginime Ahaba wane dabu bilo manda bu howa ani bini. <sup>2</sup> Mali maru howa Yahosabada ibugua Samaria tano Isaraealinaga Kini Ahaba hearia nenege pole pene. Ani piyagola Ahabahanda nogo bulumaga sibirubi dewaore Yahosabada halu ibu ariarubi ti nelo bo dawene. Ani binigo irane Ahabahanda ibu Gileada dindiha Lamodo tano karulolenaga Yahosabada ibula wai biamogo bilo mo turu hene. Ani buwa ibugua Yahosabada mo bila halu lalu, <sup>3</sup> Ina i pele ngialu Gileada dindiha wai bialu Lamodo tano karulole mandagi maliyabe, lene.

Ani layagola Yahosabada ibugua ladai bialu lalu, Ina hamelederu ale talialu bulene karulape dege manda bu ko. I biamogo bulene inaga wai biagane ami agalirubi nogo

✧ 17:10: Pig 35.5, 2 Bit 14.14

hosirubi bibahende manda mandabu hai ka. <sup>4</sup> Anigo iname mbirale uruni bule howa Anduane Homogo ibunaga hame ngago ala hale habiya, lene.✧

<sup>5</sup> Ani layagola Ahaba ibugua mbiwia haga agali hearu íbu ngoai hadaba lene. Mbiwia haga agali uruni handari maria (400) agima íbu ngoai hayagola ibugua tihondo hale halu lalu, Ina Lamodo tano karulole wai bu polene karulapebe be nakarulapedabe, lene.

Ani hale hayagola tigua ibuhondo ladai bialu lalu, Karulapego wai bule pu. Anduane Homogohanda í biamogo bialu ina wai wayali holebere, lene.

<sup>6</sup> Ani layago lelowa Yahosabadahanda Ahabahondo hale halu lalu, Anduane Homogonaga bi mana latagi halu mbiwia haga mbira kabe nahebe. Mbira heagua nde iname Anduane Homogo ibuninaga hame ala hale hamiya, lene.

<sup>7</sup> Ani layagola Ahabahanda ladai bialu lalu, Agali mbira Imila igini Migaia ibu Anduane Homogonaga bi mana latagi halu mbiwia haga ka. Anigo agali ogoni ibugua ihondo mbiwia halu bi bayale ndo langigi biagago ina ibuhondo turu naheore haruli. Ibugua mbiwia halu mo ko holene tagira ibulebira lalu i langiaabo haga ka, lene.

Ani layagola Yahosabada ibugua lalu, Ina bi ogonidagua lolene nawigo nalabe, lene.

<sup>8</sup> Ani layago hale howa Ahabahanda ibunaga haru haga agali mbira heago íbu lowa lalu, Ina áyu ogoni gerai lalu puwa Imila igini Migaia abale haru dai bule pu, lene.

<sup>9</sup> Kini Ahaba Yahosabadala libu haru kininaga aga biaga biago mo karulai howa kini biragane dagia Samaria tanonaga tagirahayagi hama tigabi widi iraneru lini hondo ibira ibira bilo bo taulalu aeane puyabume yu pelonaga dindi wiagoria mo yalu pu ngelowa libuni ogoriani berene. Libu bereagoria mbiwia haga agali hearume haparaho howa mbiwia halu bi dewa lalu hene. <sup>10</sup> Mbiwia haga agali henedaruni aria mbira Kenana igini Sedegaia heago ibugua aeane homane mbira wiago mo paulaki howa bulumaganaga hagianeni ne gayane heagobi wabini. Ani wabuwa ibugua ibuninaga emboneni mo paga howa lalu, Ina bulumaganaga ne gayane ogonibime wai buwa Siria ami agali karu bama pialu mbiraorebi mbira yu wanahe bibahende bo wahai halu bo maro bulebere lalu Anduane Homogohanda laya, lene. <sup>11</sup> Ani layadagua dege mbiwia haga agali maru hearumebi nde bi lo mbira howa lalu, Heneneore Anduane Homogohanda í biamogo biragola ina wai bialu Lamodo tano karuloleberego wai bule pobe, lene.

<sup>12</sup> Ti ani lalu beremiria haru haga agali mbira abale Ahabahanda Migaia haru daibule pu layago haru ibini. Libu wene harigani ibalu howa haru haga agali biago ibugua Migaiahondo lalu, Mbiwia haga agali maru karume lalu, Kini ibugua wai bialu wayali holebira, lalu mbiwia hayago inabi nde kinihondo bi bayale ogonibi dege lamibe, lene.

<sup>13</sup> Ani layago lelowa Migaia ibugua haru haga agali biagohondo lalu, Anduane Homogo haluhe kagonaga minini howa ina ihondo heneneore larogo Anduane Homogo ibugua ihondo bi ogo la lalu langiradagua dege latagi holebero, lene.

<sup>14</sup> Migaia ibu Kini Ahaba bereagoria anda ibiyagola kini ibugua Migaia hale halu lalu, Migaia-o iname Lamodo tano karulole wai bu poramabe be waharamabe, lene.

Ani layagola Migaia ibugua kinihondo yageyage paluwa lalu, Karulape ina tano ogoni karuloleberego wai bule pu. Ina wai bialu wayali habelo Anduane Homogohanda biamogo bulebirago pobe, lene.

<sup>15</sup> Ani layagola Ahabahanda ibuhondo lalu, Ke halu mbira nalabe. Ina Anduane Homogonaga minini howa heneneore labe lalu abale howa langiaabo haruligoni í manda bu kegodago ai inaga bi ogoni angi hale holeberebe, lene.

<sup>16</sup> Ani layagola Migaia ibugua Ahabahondo lamialu lalu, Ina handalu hewaria Isaraele ami biaruru nogo sibi haru haga nahe haradagua hari bare bare wiaruha ho

✧ 18:4: 1 Sml 23.2-4, 23.9, 2 Sml 2.1

giligala lo hearia handaru. Ani hondo hewagola Anduane Homogohanda bi mbira ogobi layua, Agali uruni tinaga haru haga agali haguane mbira nahe kago ai ti wai paluenaga wahalu tini andaga dai bialu pugu pugu bulene nga, layuane hale haru, lene.✧

<sup>17</sup> Ani layago hale howa Kini Ahaba ibugua Kini Yahosabada lamialu lalu, Ina í abale langirugoni ogoniyago. Anduane Homogonaga bi mana latagi haga agali ogoni ibugua mbiwia halu ihondo bi bayale mbira nalangiaga. Ibugua í mo ko holene hangu laabo haga larugoni, lene.

<sup>18</sup> Migaia ibugua bi laabo halu lalu, Áyu Anduane Homogohanda ihondo mo walia hayago languliya baya hangu hale mia howa hale ha. Ina handalu hewaria Anduane Homogo ibuni dahuliya andagani haru howa biragane dagia wiagoria bereagola ibunaga dahuliyali bibahendeme ibu bereagoria ho mabu bupe hearia handaru. <sup>19</sup> Ani heagola Anduane Homogohanda tihondo hale halu lalu, Ahaba ibu Lamodo tanoha bo wahelonaga ohowa ndelalu karulapego pu lolene mbirali ai kebe, laya. Ani hale hayagola dahuliyali mbira mbira tininaga bi Anduane Homogohondo ladai bigibigi biya. <sup>20</sup> Tigua ani ladai bigibigi bialu heagola dinini mbira ibu Anduane Homogo bereagoria kaware puwa lalu, Ina ibu mo hondo hole polebero, laya. Ani layagola Anduane Homogohanda ibuhondo hale halu lalu, Ina Ahaba mo hondo agua holeberebe, layagola <sup>21</sup> dinini biago ibugua Anduane Homogohondo ladai bialu lalu, Ina puwa Ahabanaga mbiwia haga agali karume bi henene ndo ke howa lamilo mo la holebero, laya. Ani layagola Anduane Homogohanda dinini ogonihondo lamialu lalu, Ina pialu inaga bi henene larebe toba howa mo henene ho helonaga ibu mo hondo hole pu laya, lene.

<sup>22</sup> Ani lowa Migaia ibugua Ahabahondo bi tiga tiga lamialu lalu, Anduane Homogohanda í homabelo hamelowa dinini ogoni ibugua inaga mbiwia haga agali biarume ihondo bi henene ndo mo hondo halu bi langilonaga ibilayadagome í mo hondo hayada, lalu lamini.

<sup>23</sup> Ani lamiyagola mbiwia haga Sedegaia henegome Migaiahanda bi layago hale howa ibugua ibunaga gi habeme Migaia toa balu howa lalu, Anduane Homogonaga dinini í agua yu wahalu puwa bi ogoni ihondo langiyabe, lene.

<sup>24</sup> Ani layagola Migaiahanda Sedegaiahondo ladai bialu lalu, Mani waitigime ibalu ina Israaeleali bo podaragola í ibida puwa anda hobane mbiraha bira do holebere. Ani bira do keria Anduane Homogohanda bi ogoni heneneore ihondo langiyago ina latagi henedane hondolebere, lene.

<sup>25</sup> Ani layagola Kini Ahaba ibugua ami haru haga agali haguane heagohondo lalu, Migaia o kago minu yalu tanonaga agali haguane Amonola í igini Yoasala karia haru pudaba. <sup>26</sup> Ani haru puwa libuhondo lamialu, Agali ogo ini wai bialu dai buliya libugua ibu garabaya andaha tomo emene migi bialu handayaho halibu laya, lene.

<sup>27</sup> Migaiahanda Ahabahondo lone lamialu lalu, Í waiha homa nabi dai biriyagua nde Anduane Homogohanda iha howa bi lene ndodalo manda bibe, lene. Migaia ibugua laabo halu lalu, Wali agali bibahende kamiru tigua bi larogoni hale hai hadaba, lene.✧

*Kini Ahaba waime bayagola homenego ogo*  
(1 Kini 22.29-36)

<sup>28</sup> Ani bialu Israaelenaga Kini Ahaba Yudanaga Kini Yahosabadala libu haru mandagi libunaga ami agali hearu haru halu Gileada dindiha Lamodo tanoni Siriali hearu baba wai bule pene. <sup>29</sup> Wai nape howa Ahaba ibugua Yahosabadahondo lamialu lalu, Wai hamani tagira pole howa wai tigime í kinidalo manda nabilo kininaga aga bidogo golo

iriari bialu ami agali mbira pene tingi holiya. Í nde harugo kininaga aga bidegoni biaabo habe, lene. Ani lalu Kini Ahaba ibu aga tara wiaru bialu wai bule pene.

<sup>30</sup> Wai anda piyagola Sirianaga kini heagome ibunaga ami agali wai biaga garo ale mini karisini hearu olalu ibidaba lowa lalu, Tigua Isaraeleali kini kago baba hangu wai hongo howa bilimu. Agali maru ibinidaru baba nabilimu, lene. <sup>31</sup> Ani laya handala puwa tigua Yudanaga Kini Yahosabada biago Isaraelenaga Kini Ahaba be toba howa wai hongo howa bialu hearia Yahosabada ibunime howa ga hongo howa ladaga hayagome mo walia hayagola<sup>☆</sup> <sup>32</sup> ti manda bialu ogoni ibu Isaraelenaga kini ndoyane hondowa tigua ibula wai hongo howa nabi wahene. <sup>33</sup> Tigua wai hongoheore ua laga bialu howa Siriali ami mbirame timu mbira Isaraeleru heagoha bo ibilayagome Kini Ahabanaga tingini mbiraha aga wai pole biaga aleme bia dambi nahe wiagoria bila hene. Ani bila hayagola Ahabahanda agali ibunaga nogo hosime karisi gililo yu ibaga bilo handayaho haga heagohondo lalu, Ai timu hombeni ho kogo karisi abale beregedalu wai hama yu wahalu tagira mba, lene. <sup>34</sup> Ani layagoyu ami mende mendehabi wai hongoheore biribigola Ahaba wai hama yu wahalu tagira pobe nahe wini. Ani biyagola ibunaga garo ale karisi biagoria ibunaga ami agali biarume gini mo maliaho heleagola Siriali biaruru wai ibiyagohayagi handa amu ho hene. Ani heane dege alendo ni paluene tu hayagola Ahaba homene.

## 19

*Anduane Homogonaga bi mana latagi haga agali Yihuhanda Yahosabada dago binigo ogo*

<sup>1</sup> Yudanaga Kini Yahosabada ibu mo ko nahe wai hamani howa ibuni andaga Yarusaleme dai bini. <sup>2</sup> Horo ogonongi agali Anduane Homogonaga bi mana latagi haga Hananai igini Yihu ibu Yahosabada lola hole puwa ibugua kinihondo lamialu lalu, Ína mandabu handalu keria agali ko biaga karu biamogo bialu Ngode Datagaliwabehondo gubalini nahaga karu baba mandagi holene go karulapeda lo mandabu kebe. Ína mana ogonidagua bialu harigonaga Anduane Homogohanda íhondo turu naheore kago ndobe. <sup>3</sup> Ani bia bialu kegoyu ína mana bayale ngagobi nde bia dege birili. Ína mbirale dama wali beda lowa bi pupu wule gime wabini mini Asera í dalu Yuda dindi bibahende ha wiaru bo giallo wahai harigoni. Ani bialu Ngode Datagaliwabenaga hame wiago baya hangu talialu hole hongoho harigoni, lene.<sup>☆</sup>

*Agali marume godi larago hale howa mo tale biaga helo dabo helenego ogo*

<sup>4</sup> Kini Yahosabada ibu Yarusalemeni howa halu mbiru nde ibunaga wali agaliru de handama Yuda dindi bibahende ha ibaga biai halu dindi abene unurahayagi mini Beaseba tano wiagoria piai halu abene uyurahayagi Eberaimi hameigini dindi ege barebare wuyu peagoria piai haga hene. Ani puwa ibunaga wali agalihondo Anduane Homogo ti mamalirunaga Ngode Datagaliwabe ibuni karia dai bidaba laga bima piaga hene. <sup>5</sup> Ani bialu ibugua agali maru godi hale halu mo tale biaga helo dabaga bialu Yuda dindi bibahende ha tano wai pabe hongohe bu mabubi wiaruha howa godi hale halu helo helaga bini. <sup>6</sup> Ani heagola ibugua agali urunihondo lamialu lalu, Tigua biabe ogoni buleberemigo ai godi hale halu mo tale beremingi tiga tiga lolene ngadaguaore lalimu. Biabe ogoni agalinaga ndo Anduane Homogonaga biabeorego ibuni hongoni beremadalo manda buwa bialu halimu. Tigua godi lo tiga bialu kamingi Anduane Homogo ibuni ti heba mandagi haga ka.<sup>☆</sup> <sup>7</sup> Anduane Homogo inanaga Ngode Datagaliwabe ibugua agali mendeali kago ke halu mo guya howa godi laga kagobi tinaga damenego mo wialu biamogo buwa godi laga kagobi nogo muniru yolo bialu ngiragola ke howa godi la haga kagobi mana uruni aleru ibu turu naheore ka. Ani biaga kago ai agali godi

☆ 18:31: 2 Bit 13.14-15 ☆ 19:3: 2 Bit 17.4-6, 30.19 ☆ 19:6: Man 1.17, Iba 82.1

hale haga kamiru tí Anduane Homogo ibuni andaneha haabo howa mana tígua bialu kamiru baya hangu mamage halu de hondo halimu, lalu lamigi bini.✧

<sup>8</sup> Yahosabada ibu ani ibaga bialu howa Yarusalemehabi ibugua Libai agaliru loma binigo mo miagaru hameigini emene haga binidadagua agali haguane mbira mbira bu hearubi tigua Yarusalemeni howa wali agalime Anduane Homogonaga mana puguarago godini hale helobi wali agali Yarusaleme tanoha bu hearunaga bi lai lalu keba hene wiaru mo tiga bialu helo dabo helene. <sup>9</sup> Ani dabo helowa Yahosabada ibugua agali godi hale haga biaruhondo lamialu lalu, Tígua biabe uruni bialu howa tíni Anduane Homogo andaneha howa ibunaga bi mana lowini ngago bayuwa talialu bialu halimu. Ani bialu biabe ogoni mini bilina howa baya hangu biaabo halu halimu.✧ <sup>10</sup> Godi hale haga tíni aria bu karume tí biamogo bialu godi hale hole ibidaba layagua nde tígua agali uruni bayuwa biamogo bialu godini tiga tiga hale holene ngadagua hale halu mbiralime agali homelo bo waheneyaguabi mana tara maru ngaru puguiniyaguabi tanabi mo tiga bulene ngadagua bialu halimu. Tiha bia ko hene mbira Anduane Homogo deni nawi howa manani ngadagua hale howa mo tale bialu halimu. Ani nabirimiyagua nde tíbi tí hameiginirubi Anduane Homogonaga keba holene tíha biba helolebira. Tígua tiga tiga bulene ngadagua birimiyagua nde tíni ko mbira para naholebira. <sup>11</sup> Agali kirali tínaga haguane howa godi larago damene baya hangu haru hai helo helalimu. Wali agalirume Anduane Homogonaga mana puguarago hale halu mo tale bulene agali mbira Loma Binigo Mo Miaga Haguane Timbuni mini Amaraia ibu holebira. Agali mende Isimale igini Sebadaia ibu Yuda dindiha gabumane haguane kago ibugua wali agalirume gabumanenaga mana puguarago hale halu mo tale bule ibu holebira. Libai agali tigua godinaga biabe bulene ngago biaiore helo Anduane Homogo ibuni mbirali mana bayale biaga kago baba haabo haga kago manda bialu tígua hongo ho howa mana bayale ngago bialu haabo halimu, lene.

## 20

### *Waitigirume Yuda baba wai bule anda ibinigo ogo*

<sup>1</sup> Mani howa Moabalibi Amonoalibi agali hameigini maru Amono dindiha hene bu hearubi ti bibahende Yuda baba wai bule mo mogo buwa tidi yalu anda ibini. <sup>2</sup> Marume Kini Yahosabada hearia ibuwa ibuhondo lamialu lalu, Siria ami agali dewa iba mini Homene Iba laga bedagoria ina baba wai bule anda ibiragoni ndobe. Ani bialu ti Hasasono Tama tano ngagoria áyu ogoni anda ibu ka, lene. Hasasono Tama tano ogoni Engedi tano ngagonaga mini mende ogoni wini. <sup>3</sup> Bi ogoni layagola hale howa Kini Yahosabada ibu gi timbuniore ho hene. Ani gi ho howa dege ibugua Anduane Homogonaga hame ngago ala hale holene hame lowa ibugua wali agali Yuda dindi bibahende bu biaruhondo bi lo pelalu, Tomo nane howa Anduane Homogohondo bi hongo howa lalu holene nga, lene. <sup>4</sup> Ani laya handala Yuda wali agali bibahende tini dindi wahai halu Anduane Homogohanda ti biamogo bilo ibuhondo biamogo bia lalu bi lole Yarusaleme piai hene. <sup>5</sup> Ti Yarusaleme pialu wali agali bu hearu heba wali agali íbu ngoai ho haga hama gahenge mbira Anduane Homogonaga anda hane winigoriani ti mandagi ngoai ho hene. Ani ngoai ho hearia Kini Yahosabada ibugua wali agali hearu dombeneha pu howa <sup>6</sup> Anduane Homogohondo bi lalu, Anduane Homogo ina mamalirunaga Ngode Datagaliwabe-o ína dahuliya andaga howa wali agali bibahendeore handayaho hai haga kegoni. Ina mbiralime íla wai bialu bope habe naheore kamago í hongo gibihe ke. <sup>7</sup> Íore inanaga Ngode Datagaliwabe kegoni. Ina Isaraele wali agali bibahende dindi ogoriani anda ibirimagola ína wali agali ogoria abale henedaru bo taliatagi howa dindi ogo inanaga wiaabo helo ína mamali Abarahama ibu ínaga nenege

✧ 19:7: Man 10.17, Ab 10.34, Lm 9.14, 1 Pi 1.17 ✧ 19:9: 2 Sml 23.3



agali henego ibuhondo dindi ogo miriya.✠<sup>8</sup> Ani mirigola ina dindi ogoria luore harima. Wali agalime í mitangi bialu íni keria kaware ibalu lotu lalu helonaga bamba inanaga damene bu henerume anda timbuni ogo biniya. Tigua anda ogoni biai howa íhondo bi ogodagua laya. <sup>9</sup> Anduane Homogo-o mo ko holene mbira inaha anda ibiyaguabi waitigirume ina baba wai bule ibiyaguabi inaha warago ko tara ngaru ibiyaguabi hina gari timbuni tagira ibiyaguabi uruni damene bibahende mbirago tagira ibiyagua nde ina íni wanakuihayagi anda ogoni haneni íbu holomayanaga anda ogoni bini. Ani íbu howa inaha genda ngago mitangi bigi bialu genda ogoni mo waha lalu ínihondo bi loleberema. Anidagua laramagola nde ina inanaga bi laramago hale halu biamogo bulebere, lene.

<sup>10</sup> Yahosabadahanda Anduane Homogohondo bi laabo halu lalu, Anduane Homogo-o Amono hameiginibi Moaba hameiginibi Idomo hameiginibi bibahende mo mogo bialu ina baba wai bule ibirago í de hendedegoni. Bamba ina mamaliru ti Iyibi wahalu dindi ogoha ibule ibalu howa tigua hameigini uruninaga dindini wai bule anda pelo hame nale harigo manda buwa dindi urunihayagi anda nape wandialu peneya.✠ <sup>11</sup> Anigo ainde tigua inanaga mamalirume tihondo mana bayale biyago mitangi nabiyada. Ani manda nabi howa tigua mana ko bialu ina baba wai bule ibiragonida. Dindi ina holomaya ina ngirigoria kamaria bo batagi hole ibiragoni ndobe. <sup>12</sup> Inanaga Ngode Datagaliwabe-o ami agali uruni ti dewaoreme ina baba wai bule ibiragonida. Ai nde iname ti baba wai bulene hongo naheore kamago ina waitigi uruni minu bai habe. Ani bialu iname mbirale mbira beregedalu bibe naheorego ina ina biamogo bibelo í dege malia howa handayaho kamagoni, lene.✠

<sup>13</sup> Yuda agali bibahende ti one waneigini heba mandagi Anduane Homogo wanakuiha ibuni anda haneni íbu ngoaiho hene. <sup>14</sup> Ani ngoai ho hearia Libaiali mbira mini Yahasiele heago ibu nde wali agali bu hearu dombeneha hene. Yahasiele ibu Segaraia igini hene. Segaraia ibu Benaia igini hene. Benaia ibu Yahiele igini halu Yaiele ibu Madania igini hene. Agali uruni ti Asaba aguanene halu Asaba ibu Libaiali dege mbira hene. Yahasiele ibu hearia Anduane Homogonaga Dinini ibalu Yahasieleha karula halu mo hongo hayagola <sup>15</sup> ibugua lalu, Kini Yahosabadabi Yarusaleme wali agali kamiru tíbi Yuda wali agali bibahendebi tigua bi o larogo baya hangu hale hadaba. Anduane Homogohanda lalu, Tigua ami agali dewaore o ibiragoni hondowa mogo lalu gi nahe halimu. Wai bulene ogoni tínaga biabe ndogo Ngode Datagaliwabe ibunaga ngago tigua gi halu miniha mogo nale halimu.✠✠ <sup>16</sup> Yawi waitigi agali uruni tí baba wai bule Hari Sisi wedagoha hariga ibidadagua ibulebira. Ani ibulebirago ai tigua abale pialu dindi ulini panda panda ni tagira ibiragohayagi dindi ko iba dalu naibaga mini Yaruale ngagoria lola holeberemigo pilimu. <sup>17</sup> Ani puwa wai dege tínime ndo buleberemi. Tigua wai hamani tagira puwa bame handayaho kamigola Anduane Homogohanda tí mo wialu wai buwa ibugua wayali halu waitigi agali bo hilo wahai harane de hondoleberemi. Yarusaleme wali agali kamirubi Yuda wali agali bibahendebi tigua gi howa miniha genda nahalimu. Yawi tigua wai bu poramigola Anduane Homogo ibuni tí heba mandagi poleberemi, lene.✠

<sup>18</sup> Ani layago hale howa Kini Yahosabadabi wali agali bu hearubi tigua dindini ge duli hanga howa bulu palu biruwa Anduane Homogonaga mini yaraga halu lotu lalu hene. <sup>19</sup> Ani lalu howa Libaiali Kohada aguanene hearubi Kora aguanene bu hearubi tigua heyuwa bi hongo howaore ladaga halu Anduane Homogo Isaraele wali agalinaga Ngode Datagaliwabenaga mini mo yaraga halu hene.

<sup>20</sup> Ani bialu heane gao layagola horo mendengi tigua heyalu dindi ko iba dalu naibaga Tegoa tano kaware wiagoha pole manda manda bini. Ti Yarusaleme tanoha tagira

✠ 20:7: Ais 41.8, Ya 2.23 ✠ 20:10: Man 2.4-19 ✠ 20:12: Iba 25.15, 121.1-2 ✠ 20:15: Har 14.13, Man 1.29-30, 2 Bit 32.7 ✠ 20:15: Man 20.1-4 ✠ 20:17: Har 14.13-14, Dag 14.9, 2 Bit 15.2

nape wene pole dege howa Kini Yahosabada ibugua tihondo lamialu lalu, Yudalibi Yarusalemealibi tí bi o larogo baya hangu hale halimu. Tígua Anduane Homogo inanaga Ngode Datagaliwabe kagoha hanaho harimiyagua nde tí bayale hongohe haho wuleberemi. Tígua Ngode Datagaliwabenaga bi mana latagi haga bu karume bi larago hale harimiyagua nde tígua waitigi karu bope halu wayali holeberemi, lene. <sup>21</sup> Ani bialu Kini Yahosabada ibugua wali agali tinaga hame hale howa mani Libai agali maru dabalu tigua Anduane Homogonaga mana bayale tigabiore ngagonaga lalu aga loma binigo karulowa ami agaliru mama ibilalu ti bamba halu iba gana ogodagua lama pene. Tigua lalu, Anduane Homogo ibugua ina gubalini haabo ho haga kagonaga iname ibunaga mini yaraga halu kaj larama, lama pene.

<sup>22</sup> Kini Yahosabada halu ibunaga ami agaliru piyagola agali iba gana lagane biaru tigua Anduane Homogonaga mini yaraga halu iba gana lama pialu heaore Anduane Homogohanda Amono ami hearubi Moaba ami hearubi Idomo ami agalibi bibahende tini dege dege mo lulu ya halu mo wai bia hene. <sup>23</sup> Pigane Amono amibi Moaba amibi tigua Idomo ami bo wahi hene. Ani bialu mani Amono Moabala libuni wai bialu dewaore timu ho wiai hene. <sup>24</sup> Ani bialu heagola Yuda ami agali biaru ti pialu dindi ko wali agali nahaga iba dalu naibaga wiagoria ami agali mamage haga anda mbira heagoria tagira pene. Puwa tigua anda ogoriani irigi howa handa amu nana hemiria waitiginaga tingini bo wahene bame dindini wima pearia mogolo hendene. Mbiraore hangubi nahome mbira wiaria nahene bibahende homene hangu wiai hearia hendene.

<sup>25</sup> Ani wiagola Kini Yahosabada halu ami agali biaru tigua homene tingini wiagoha handama pialu hemiria dabudabu dewaore heba wiaria hendene. Ani hondowa nogo bulumaga dewaore hearubi tomo wiarubi aga bayale wiarubi dabudabu bayale tara tara wiarubi bibahende mo yai hene. Dabudabu dewaore wiagola tigua horo tebiru mialu hene. <sup>26</sup> Ani mialu howa horo manengi tigua dindi ulini mbira panda panda wiagoria puwa tihondo mbirale Anduane Homogohanda biyadagonaga kaj lalu ibunaga mini mo yaraga hene. Irane ti anidagua biamogo biyagonaga tigua dindi ogoni mini Anduane Homogonaga Mini Yaraga Hagane lalu wini. <sup>27</sup> Ani buwa Yahosabada halu ibunaga ami agali biaru bibahende ti Anduane Homogo ibugua ti biamogo bialu waitigi bo wahi hayagonaga turu timbuni hama Yarusaleme dai bini. <sup>28</sup> Ti Yarusaleme anda pialu howa ngida balu pilipe biguli pu lalu Anduane Homogonaga andaha puabo halu ibunaga mini yaraga hene. <sup>29</sup> Kinirubi agali hagianerubi dindi tara tara haga haga biaru bibahende Anduane Homogohanda Isaraele biamogo bialu tinaga waitigi bo homelai haya layane hale hayaru ti gi hai hene. <sup>30</sup> Ani bialu Yahosabada ibu kini heangi Isaraele dindiha wai mbira nabi wiaabo henego irane Ngode Datagaliwabehanda Isaraele dindi handayaho haabo heagome ani wini.

*Kini Yahosabada homenego ogo*  
(1 Kini 22.41-50)

<sup>31</sup> Yahosabada ibu mali pira tebirani duria (35) hayagola ibu Yuda wali agalinaga kini pigane hene. Ibu kini howa mali pira kirani duria (25) Yarusaleme dindini haru haga hene. Kini Yahosabada aija ibu agali Silihi wane mini Asuba berene. <sup>32</sup> Yahosabada ibugua ibu aba Asahanda biaga wiadagua bialu Anduane Homogonaga deni howa mana tigabi bayale talialu bialu haga hene. <sup>33</sup> Ani bialu ha howa dege ibugua bulene mbira wiago nabi henego dama mitangi bialu bi pupu wiaga anda bu hearu bo gialo wahi nahe helene. Ani bialu mendebi nde wali agalime ti mamalinaga Ngode Datagaliwabe kago mitangi bialu ibu talima polenego manda nabi hene.✧

<sup>34</sup> Yahosabada ibu kini pigane henedangi howa bialu heneru bibahendenaga te mbuga mbira mini Hananai igini Yihunaga Bi Te laga wini ngagoha gilibu wiai henego

✧ 20:33: 2 Bit 17.6, 19.3

nga. Ani binigo ai te ogoni mbuga timbuni mbira mini Isaraele Kini Henerunaga Bi Te laga ngagoha gili bumaga ho nga.

<sup>35</sup> Horo mbirungi Yuda wali agalinaga Kini Yahosabada ibugua Isaraelenaga kini ko tara tara wiaru biai haga mini Ahasaia heago baba biabe mandagi bulene hamelo hene.

<sup>36</sup> Ani bialu howa libugua iba sibi timbuniru Tasisi dindiha dabudabu yu pu ibu bilonaga wabini. Iba sibi ogoni wabiaga agali hearume Esiongebe tanoni howa wabialu hene.

<sup>37</sup> Ani bialu hemiria Maresa tanoali Dodabahu igini Eliesehanda Yahosabadahondo bi hongo howa lalu, Ina kini ko Ahasaiala mandagi howa biabe bialu haridagonaga Anduane Homogohanda libunaga iba sibi uruni bibahende mo ko halu bo giallo wahai holebira, lene. Ani layadagua nde iba sibi uruni bibahende ko hai hayagola tigua Tasisi dindiha pole manda biyago napene.

## 21

<sup>1</sup> Mani howa Yahosabada homayagola tigua ibu mamaliru hora haga homali Debidinaga tano wiagoha hora hene. Ani homayagola ibu igini Yahorama ibu aba henegoria kini ha aribia hene.

*Yahorama ibu Yuda dindiha kini henego ogo  
(2 Kini 8.17-24)*

<sup>2</sup> Yahosabada igini Yahorama ibu hamene waragaria heneru Asaraia Yahiele Segaraia Asariahu Migaele Sebadaia imaru hene. <sup>3</sup> Ti abahanda ngolo silibabi dabudabu tara tara dewaorebi tihondo mialu Yudanaga tano wai pabe ho mabu biniru ti haru helo hangu hangu mini. Ani buwa Yahosabada ibugua ibu igini wahene Yahorama ibu kini ha aribia helo dabo helene. <sup>4</sup> Mani Yahorama ibu kini hongoheore heangi ibugua ibunaga hamenerubi Isaraele haru haga maru hearubi homelo bo wahene.

<sup>5</sup> Yahorama ibu hama ibinigo mali pira tebirani kira (32) hayagola ibu kini pigane hene. Ibu Yarusalemeni kini heane mali halira hene. <sup>6</sup> Ani howa ibu one Isaraelenaga Kini Ahaba wane mbira dabu bini. Anidagua buwa ibugua mana ko Ahaba damenerumebi Isaraele wali agalirumebi bialu haga wiago talialu Anduane Homogo deni mana ko dewaore bialu hene. <sup>7</sup> Ani bialu heago helowa Anduane Homogohanda Yuda dindi mo ko nahe dege hene. Ani binidagoni irane Anduane Homogo ibugua bamba ibunaga biabe biahaga Debidihondo habo nalolene bi mbira lo wialu lalu, Bibahendengi Debidinaga damene hangume kini haabo holebira. Ani haragola Debidinaga hale lamu nahundilonaga ani bulebira, lalu lowini.✧

<sup>8</sup> Ala Yahorama ibu Yuda dindiha kini heangi Idomo wali agali bu hearu tigua Yudanaga kini andaneha henego mani howa ti doga halu hene. Doga howa tigua tininaga kini mbira dabo helayagola kini ogonime Idomo wali agali haru hene.✧ <sup>9</sup> Ani biyago hondowa Kini Yahoramahanda ibunaga ami agali karisini heyu howa wai biaga hearu haru halu Idomo dindiha wai bule anda pene. Ani pu heagola Idomonaga ami agali bu hearume ti baba wai bule ho hagira biai hene. Ani biyagola Yahoramabi ibunaga ami agali haguane karisi handayaho hearubi tigua Idomo baba wai timbuni mbiraga bialu Idomoali hayadaruni bo hiladai bialu ibida pene. <sup>10</sup> Ani biyagome Yuda ami tigua Idomo bo poda hana habe nahe hene. Anidagua biyagome Idomo tigua tinaga dindi tini henego áyu haabo ka. O binidagoningi dege Libina tanoha hearu tibi nde Yudanaga kinime handayaho nahelonaga tibi mine halu doga howa Yuda andaneha nahe tini hangu hene. Ani binigo irane Yahorama ibugua Anduane Homogo ibu mamalirunaga Ngode Datagaliwabe erembira mialu wahalu penegome ani bini. <sup>11</sup> Anigo ibugua dama mitangi bialu bi pupu wulenaga anda dewa hariruha biyagome Yuda wali agalirubi Yarusaleme wali agalirubi tigua Anduane Homogonaga mana wahai helo mo bia hene.

<sup>12</sup> Anduane Homogonaga mana latagi haga Elayahanda beba mbira gili buwa Yahoramanaga wia hene. Ibugua lalu, Anduane Homogo í mamali Debidinaga Ngode Datagaliwabe ibugua au laya, Ína í aba Kini Yahosabadabi ibu aba Kini Asabi libugua bialu henedagua ndo bialu harigoni. <sup>13</sup> Isaraelenaga kini henerume Isaraele wali agaliru tigua Anduane Homogo erembira mialu helo mo bia hagadagua ína Yuda wali agaliru Yarusaleme wali agalirubi ani bilo mo bia halu kegoni. Kini Ahababi ibu ariabi tigua Isaraele wali agali Anduane Homogonaga mana wahelo mo bia haganego ína nde bialu kegoni. Ínaga hameneru í kegobi ndo ti agali bayaleore hearia ína ti bibahende bo wahai harigoni. <sup>14</sup> Ani birigonaga Anduane Homogohanda ínaga wali agalirubi ínaga waneiginirubi ínaga onerubi tihondo pani mialu ínaga dabudabubi bibahende mo ko hai holebira. <sup>15</sup> Ínibi warago balu ínaga tini mo ko halu horo bibahendengi warago ogoni ko timbuni bama anda poragola ínaga tinibi dugu tagi holebira, laya lene.

<sup>16</sup> Horo uruningi dege Anduane Homogohanda Pilidiali Arebialibi ti Sudana dindi solowara angeha haga biaru mo keba hayagola tigua Yahorama baba wai bule ibini. <sup>17</sup> Wai bialu tigua Yahorama andaga puwaibunaga dabudaburu mo yalu one iginirubi bibahende minalu haru piai hene. Yahorama igini heyogoneore Ahasaia ibu dege helalu pene.

<sup>18</sup> Ani binigo Anduane Homogohanda Yahoramanaga tiniha warago timbuni ibilene. <sup>19</sup> Mali kirani warago timbuni ba ho wialuibunaga tini tagira pialu tandaga tara nalu homene. Yahorama mamali ala homayarunaga dara howa ira timbuni delagadagua Yahorama homayagonaga Yuda wali agalirume ira dela nabi wahene.

<sup>20</sup> Yahoramaibunaga mali pira tebirani kira (32) hayagola ibu kini pigane hene. Kini howa ibu Yarusalemeni mali halira hangu haru halu homene. Ibu homayagola wali agalirume dara nahe hene. Tigua ibu kini maru hora henegoria ndo Debidinaga tano ogoniha dege hora hene.✧

## 22

### *Ahasaia ibu Yuda dindiha kini henego ogo (2 Kini 8.25-29, 9.21-28)*

<sup>1</sup> Ala Yahorama ibu kini henedangi Arebialime wai bule ibuwa tigua Yahorama igini maru homelo bo wahalu heyogone mini Ahasaia ibu dege nabe helene. Ani binigo Yarusaleme wali agalirume Ahasaia ibu aba henegoria kini ha aribia helene. <sup>2</sup> Ahasaia ibu mali pira kirani kira (22) hayagola kini pigane hene. Ibu kini howa Yarusalemeni mali mbira hangu haru hene. Ahasaia aïya ibu Isaraelenaga Kini Ahaba wane Adalia berenego ibu Isaraelenaga Kini Omiri aguane berene. <sup>3</sup> Ahasaia aïya ibu mana ko biaga Isaraelenaga Kini Ahaba aria bereagome Kini Ahasaia ibubi mana ogoni ale dege mo bia halu hene. <sup>4</sup> Ibugua Anduane Homogonaga deni mana ko dewaore Kini Ahaba ariame bia layadagua bialu hene. <sup>5</sup> Tigua bia layadagua bialu horo mbirungi Kini Ahasaia ibu Isaraelenaga Kini Yorama haru halu Sirianaga Kini Hasaele baba wai bule mba lene. Puwa Gileada dindiha Lamodo tano wiagoria wai bialu hemiria Siria ami mbirame Kini Yorama timume bayagola timu ho hene. <sup>6</sup> Timu ho yu puwa dabi harabe hondole Yaserili tanoni pu wini. Yaserili tanoha wiagola Kini Ahasaia ibu de hondo pole pene.

<sup>7</sup> Ahasaia ibu Yorama hondole Yaserili tanoni anda pu heagola Ngode Datagaliwabehanda agali marume Ahasaia belo henge mini. Ahasaia Yoramala libu haru pialu hebira Nimisi igini Yihu lola hene. Yihu ogoni ibugua Ahaba damene igiri agaliru bibahende bo wahai helo Anduane Homogohanda abale manda manda bu helene. <sup>8</sup> Yihuhanda Ahaba aria ani homelo balu hearia ibu Yudalinaga haru haga agali marubi Ahasaia hamene iginirubi Ahasaia heba ibiyaria lola hene. Lola howa

✧ 21:20: 2 Bit 24.25, 28.27, Yar 22.18, 22.28

Yihu ibugua ti bibahende bo wahai hene. <sup>9</sup> Ani bai howa Yihunaga amialirume Ahasaia haibu pialu hemira Samaria tanoni ha do hearia handa walia hene. Tigua handa walia howa Yihu hearia minu yalu piyagola Yihuhanda Ahasaia abale homelo bene. Ahasaia homayagola ibuni dameneme ibu Yarusaleme yalu puwa hora hene. Ani binigo irane Ahasaianaga mamali Yahosabada ibu Anduane Homogonaga mana bayale talialu henego mitangi bialu ani bini. Ahasaia damene hongo nahe howa ti mbiralime Yudanaga kini habe nahe hene.

*Adalia ibu Yuda dindiha kuini berenego ogo*  
(2 Kini 11.1-3)

<sup>10</sup> Kini Ahasaia aija Adalia ibugua ibu igini Ahasaia bo wahaya layago hale howa ibugua abaleore ami agali bu hearu lamialu lalu, Yudanaga kini heneru aria agali bu karu damene bibahendeore bo wahai hole pudaba, lene. <sup>11</sup> Ani layagola Kini Ahasaia igini Yoasa ibu dege bo wanahe hene. Irane Kini Ahasaianaga mbalini Yahoseba ibu loma binigo mo miaga agali mini Yahoiada one berenego ibugua Ahasaia igini mbira Yoasa ibu damene maru heba bo waholigo lowa haru pene. Haru pialu wandari mbira ibu handayaho haga heba Anduane Homogonaga andaha paliaga hobane mbira heagoha ha do heleagola Adalia ibugua Yoasa handa walia nahayagome ibu bo wanahene. <sup>12</sup> Ani biyagola Yahoseba ibugua Yoasa Anduane Homogonaga andaha mali waragaria ha do ho helene. Ani ha do ho heangi Adalia ibu Yuda dindiha kuini wali berene.

## 23

*Yoasa ibu Yudanaga kini helenego ogo*  
(2 Kini 11.4-16)

<sup>1</sup> Anigo Adalia ibu Yuda dindiha kuini wali bereane dege mali kane hayagola loma binigo mo miaga Yahoiada ibugua ami agali haguane duriali Yarohama igini Asaraiabi Yahohanana igini Isimaelebi Obede igini Asaraiabi Adaia igini Maseabi Sigiri igini Elisabadabi bibahende mo ngoai howa tihondo habo nalolene bi hongohe mbira lo wini. <sup>2</sup> Duriali o biarume Yuda tano bibahendeha puwa Libaialirubi hameigini tara tara haru haga agalirubi Yarusalemeha haru dai bini.

<sup>3</sup> Dai buwa ti Anduane Homogonaga andaha ngoai hayagola Yahoiada ibugua ti Kini Yoasa andaneha hole lowa habo nalolene bi hongohe mbira lo wini. Yahoiadahanda Kini Ahasaia igini Yoasa tinaga deni haru tagira ibuwa tihondo mo walia halu lalu, Anduane Homogohanda abale Debedi aguanene kini haabo holebirago lalu lowinigo ai Yoasa o kago ibu kini holebira. <sup>4</sup> Anigo iname bulene maru ngago laro. Anduane Homogonaga loma binigo mo miagarubi Libaialirubi tidi tebirame biabe bialu howa Sabada horo haragola tidi mbirago ibu aribia haga bialu mbirago ibu halo haga biaga kamigoni. Halo kagola mendego ibu biabe bia aribia haga kamigoni. Anigo ai Sabada horo áyu holeberemagonaga tidi tebira harimigoni tidi mbiragome Anduane Homogonaga anda panga haraba mamage halu, <sup>5</sup> tidi mendegome kini andaga mamage halu tidi tebonegome panga haraba mbira mini Su laga biago mamage halu hai holeberemi. Wali agali bibahende Anduane Homogonaga anda tagirayagi ngoai haga hama ngatoria ngoai holebira. <sup>6</sup> Loma binigo mo miagarubi Libaialirubi tini hangu loma bia howa biabe bulene wini ngago Anduane Homogonaga anda tamuha pobehe holebira. Anduane Homogohanda bi lowinigo ngadagua talialu wali agali maru tanabi tagira holene nga. <sup>7</sup> Libaialiru bibahendeme wai biaga ayu tibu yuwa Anduane Homogonaga andaha Kini Yoasa mamage kamiria ibu mbiraha pole hame layagua nde Libaialime haru polene nga. Agali maru karu aria mbira ibu katoria kaware ibulani handaluore halimu. Agali mbira ibu anda ibiyagua ogoni ibu homelo bo wahalimu, lene.

✧ 23:3: 2 Sml 7.12



<sup>8</sup> Sabada horongi Libaialirubi Yudali haguaneerubi tigua loma binigo mo miaga Yahoiada ibugua tihondo bilimu layadagua bialu mamageali maru tinaga biabe biai howa horo odangi halo hole hearubi maru biabe bu aribia hole hearubi bibahendeore Yahoiada hearia Anduane Homogo andaha haru ibai hene. <sup>9</sup> Ibai hayagola Yahoiadahanda Kini Debidinaga wai biagane yandarebi humbibi Anduane Homogonaga andaha winigo ami agali haguane hearuhondo yilo mo migi bini. <sup>10</sup> Ani miya handala ami agali biaru tigua Anduane Homogonaga andaha kini bayuwa mamage holenaga anda unurahayagi howa hama pialu uyurahayagibi bibahende haame hene. Tigua loma biniru delaga dabu heagoriabi anda heagoriabi mamage hai hene.

<sup>11</sup> Ani haiore heagola loma binigo mo miaga Yahoiadabi ibunaga iginirubi tigua Yoasa haru tagira ibuwa kininaga manda ibunaga haguane ni mo karula hene. Ani buwa mbuga mbira kininaga haru holene mana gilibuwi wiago Yoasahondo mini. Ani muwa tigua Yoasanaga haguane ni kini dabo helolene naga olibe lininaga weli odo wia hene. Ani biai hayagola wali agali bu hearume turu halubi hongo howa ladagadaga bialu gi habe balu lalu, Kini Yoasaore ibu kini luore haabo howa hodagua helo, lalu hene.

<sup>12</sup> Wali agali bibahende bu hearume bi lagadaga bialu kini mini yaraga lalu hayuago hale howa kuini wali Adalia ibu andaga howa Anduane Homogonaga anda wali agali ibu ngoaiho heagoha abaleore pene. <sup>13</sup> Ani puwa ibugua Anduane Homogonaga anda haneni anda gene mbira heagoria hapara howa kinime hagadagua kini gahenge mbira ona hearia hendene. Ani handalu hearia ami agali haguaneerubi agali maru pilipe ale biguli pu lagarubi ti kini heagoria kaware hapara ho hearia hendene. Ani hondowa Adalia ibu miniha keba timbuni howa ibunaga aga minu lerelene. Ani bialu howa ibugua lalu, Ti wali agali koore kamigoni. Tigua ihondo mana koore lehe bialu harimida, lene.

<sup>14</sup> Ani biyagola Yahoiada ibugua Anduane Homogonaga andaha Adalia bo wahelo hame nale howa ami agali haguane hearuhondo lalu, Adalia minuwa Anduane Homogo andaha howa tagira haru pialu ami agali ho dugu bu karia dombeneha minu yalu pudaba. Agali mbirame wali biago pele mule manda bialu ibu poradagua talima piyagua agali ogoni homelo bo wahalimu, lene.

<sup>15</sup> Ani laya handala tigua Adalia minu yalu pialu kini andagaha anda polene panga mbira mini Nogo Hosi Panga uba andatagi biaga hariga wiagoha minu yalu pene. Minu yalu pialu tano tagirahayagi puwa homelo bo wahene.

*Yahoiadahanda wali agalime Anduane Homogo talima pelo biamogo binigo ogo  
(2 Kini 11.17-21)*

<sup>16</sup> Loma binigo mo miaga Yahoiada ibugua Kini Yoasabi wali agali bu hearuhondobi lalu, Anduane Homogola habo nalolene bi mbira tibi ibi ina bibahendeme ibunaga wali agaliore holeberema lalu lo wimiya, lene. <sup>17</sup> Ani laya handala wali agali hearume dama mitangi bialu gime wabini mini Balanaga bi pupu wiaga anda heagoha puwa bo giallo wahai hene. Lomabu delaga dabu anda ogoniha heagobi dama Bala wiagobi bibahende bo giallo wahai hene. Ani buwa tigua Balanaga loma binigo mo miaga mbira mini Madana heago ibu lomabu delaga dabu kaware heagoria bo ngelene. <sup>18</sup> Ani biai heagola Yahoiadahanda loma binigo mo miaga agalirubi Libaialirubi Anduane Homogonaga andaha biabe bulene winiru bilo ala Debidihanda biabe mo tahayadagua ibugua tahaga bini. Mosese heangi bi mana lowinigo tigua loma biniru Anduane Homogohondo bo delolenebi wali agali ngoai harangi iba gana haru helobi dabo helene. <sup>19</sup> Ani dabo helai lalu Yahoiadahanda Anduane Homogonaga anda panga haraba bibahendeni agali Anduane Homogonaga deni ko dodohe hearu anda naibilo agali mamage helaga bini.

<sup>20</sup> Ani buwa Yahoiadabi ami haguane hearubi agali mini lene hearubi wali agali haru haga haguane hearubi Yuda wali agali bibahende hearubi tigua Anduane Homogonaga

andaha howa kini haru halu kini ibuni andaga pole pene. Tigua pole pialu heagola wali agali bibahende mama talima pialu hene. Ti kini andaga panga haraba dunini wiagoria anda puwa Yoasa ibu kini biragane dagia wiagoria pu berene. <sup>21</sup> Adalia bo wahayagola wali agali bibahende hearu ti turu howa bu miniha dungu lowa turu haga bialu Yarusalemeni hene.

## 24

### *Yoasa ibu Yuda dindiha kini henego ogo (2 Kini 12.1-16)*

<sup>1</sup> Yoasa ibu aiyahanda taba hanayangi howa hama ibinigo mali kane hayagola ibu Yuda wali agalinaga kini pigane ogoningsi hene. Ibu aiya Beaseba tano wali mini Sibia berene. Yoasahanda mali pira maria (40) Yarusalemeni kini howa haru hene. <sup>2</sup> Ibu kini heangi mana bayaleore Anduane Homogonaga deni turu holene wiaru hangu bialu haabo henego irane loma binigo mo miaga Yahoiaada henegomeibunaga mini mandaru baya hangu mo tiga binigome ani biaga hene. <sup>3</sup> Ani bialu Yahoiaadanda wali kira dabalulu libu Yoasa one biruwa waneigini taba hanaga bini.

<sup>4</sup> Maniore howa Yoasa ibugua Anduane Homogonaga anda mo tiga bulene nga manda bini. <sup>5</sup> Ani manda buwa loma binigo mo miagarubi Libaialirubi olo ngoai howa lalu, Wali agalime Anduane Homogonaga anda arema bulenaga dagisi muni mali bibahendengi mulene winigo milo Yuda tano bibahende ha abale mo pialu yalu dai bilimu, lene. Ani layago hale howa Libaialirume abale nape emene hondo hene. <sup>6</sup> Ani hondo hemiria Yoasahanda loma binigo mo miaga haguane Yahoiaada olowa lalu, Libaialirume dagisi muni Anduane Homogonaga biabe bihaga Mosese heangi mulene lo winigo Yuda dindihabi Yarusalemehabi abale mule pudaba larugo nape hondo harimigo irane aginagabe, lene. Dagisi muni ogoni Anduane Homogonaga anda arema bulenaga mo wiaga hene.

<sup>7</sup> Ala wali ko biaga Adaliaibunaga aria Anduane Homogonaga anda mo ko halu mbirale maru Anduane Homogonaga loma bini wiaru mo yalu dama mini Balanaga bi pupu wule yalu pene.

<sup>8</sup> Kini Yoasahanda Libaialiruhondo lalu, Mbogoyi mbira wabialu daligani diri mbira tombelowa Anduane Homogonaga anda panga harabaha mo widaba, layagola tigua ani bialu mo wini. <sup>9</sup> Ani biyagola ibugua wali agali Yarusalemeha hearumebi Yuda dindi bibahende ha hearumebi Ngode Datagaliwabenaga biabe bihaga Mosese heangi lo winigodagua dagisi muni Anduane Homogonaga andaha yalu ibilo beba gilibu wia haga bini. <sup>10</sup> Agali haguane hearubi wali agali hearubi ti bibahendeme turu howa muni siliba yalu ibugu bialu mbogoyi biagoha mo wini. <sup>11</sup> Horo bibahendengi Libaiali hearume mbogoyi biago muni handaya ho haga agali hearia yalu ibiyagola tigua handalu hemiria muni tolayago hendene. Ani hondowa loma binigo mo miaga haguane timbuni heagobi kininaga beba gili bia dagala biaga heagobi libugua muni siliba haealai halu mbogoyi biago mo wiaganaha yalu dai biaga wini. Ani bigi biyagola muni siliba dewaore wini.

<sup>12</sup> Yoasa Yahoiaadala libugua muni siliba uruni Anduane Homogonaga anda biago goba halu mo ko hene wigi bini wiaru arema bilo haru haga agali hearuhondo mo migi biaga wini. Ani miyagola haru haga agali biarume irame anda biaga hearubi ege toleme anda biaga mugubeyi hearubi agali maru hari wiagoha howa ege tole anda bule podaga hearubi tihondo yolo miaga wini. Biabe ogoni alego maru bulene wiyaguabi nde yolo bia dege biaga wini. <sup>13</sup> Tigua anda bayuwa arema bigi bialu Anduane Homogonaga anda ala hongohayagobi helo bia dai bini. <sup>14</sup> Biabe ogoni biaiore howa muni ngolo silibarubi ibira hayago kinibi Yahoiaadabi libuhondo mialu

libugua Anduane Homogonaga andaha wulene mbirale irani delelobi ndisirubi ngolo silibame wabigi bilo muni biaru mini.

Yahoiada ibu nahome heangi mbirale loma biniru Anduane Homogonaga andaha lomabu delaga dabuni delaabo haga hene. <sup>15</sup> Yahoiada ibu mali handari mbirani pira tebira (130) halu homene. <sup>16</sup> Yahoiadahanda Ngode Datagaliwabenaga manani howa hongohe haabo halu Isaraele wali agali biamogo bialu Anduane Homogonaga andabi mo hongo halu mana bayaleore biaga henego mitangi buwa tigua ibu Debidinaga tano wiagoha kini hora haganegoria ibubi hora hene.

### *Kini Yoasahanda mini tara wialu ko binigo ogo*

<sup>17</sup> Yahoiada homayagola Yuda dindini haru haga haguane Yosa ko bilo mo bia halu hene. <sup>18</sup> Ani biyagola Yuda wali agalime Anduane Homogo ti mamalinaga Ngode Datagaliwabe mitangi nabi ibunaga andaha napiaga hene. Tigua dama mitangi bialu bi pupu wule mbirale gime wabinirubi dama wali mitangi bialu mbira mini Asera irame wabialu helene ogonihondo bi pupu wiaga hene. Tigua ko ogoni biyagola Anduane Homogohanda Yuda wali agalibi Yarusaleme wali agalibi tihondo keba timbuni hene. <sup>19</sup> Keba timbuni howa Anduane Homogo ibugua ibunaga mana latagi haga agali hearume wali agalihondo ibunaga bi mana lamule ibilayagola wali agali biaru hale habe manga ho hene. <sup>20</sup> Ani biyagola Ngode Datagaliwabenaga Dinini ibugua Yahoiada igini Segaraiaha karulayagola ibu wali agali deni heyu howa lalu, Anduane Homogo Ngode Datagaliwabe ibugua bi ogodagua layago hale hadaba. Tigua ibunaga mana waharimigome tiha ko timbuni anda ibilolebirago manda bilimu. Tigua ibu erembira mialu wahalu pirimigo ai ibugua nde tihondo ani dege biragoni, lalu lamini.✧ <sup>21</sup> Ani lamiyagola Kini Yoasahandabi agali maru hearumebi Segaraia bo waholene nga layagola wali agali hearume Anduane Homogonaga anda ngoai haga hama wiagoria howa ibu ege toleme bo wahene. <sup>22</sup> Yoasahanda Segaraia aba Yahoiada ibugua biamogo timbuniore biaga henego mitangi nabi howa Segaraia bo waholene nga manda bini. Segaraia ibu homolene kaware hayagola ibugua bi dalimu lalu, Anduane Homogohanda ti beremigo hondowa pani ngilo hameledo, lene.

### *Yosa ibu kini hamaro binigo ogo*

<sup>23</sup> Mali gahenge hayagola Sirianaga amime Yuda dindibi Yarusaleme tanobi wai bule anda ibuwa agali haguane bibahende bo wahene. Ani bo wahowa tigua Yudalinaga dabudabu bayale damene bibahende mo yalu puwa tinaga kini Damasagasani heagohondo mini. <sup>24</sup> Siria ami agali dewaore ndo emene hangu henego Anduane Homogohanda tigua Yuda ami agali dewaore hearu bo wahelo henge mini. Ani binigo irane Yoasabi Yuda wali agalirubi tigua ti mamalinaga Ngode Datagaliwabe erembira mialu wahalu penegonaga ani bini. Ani binigonaga pani Kini Yoasahondo mini. <sup>25</sup> Wai bialu hearia Siria amime Yosa hongo howa baya. Ani bo ngelalu mani ibunaga haru haga agali kirame ibu paliaganeni paleria pialu bo wahene. Ani binigo irane abale ibu loma binigo mo miaga Yahoiada igini Segaraia bo wahayago mitangi bialu pani bene. Yoasa homayagola ibu Debidinaga tanoha kini hora haga wiagoria ndo mendehe hora hene. <sup>26</sup> Ibugua haru haga agali kira ibu bo wahayago labo mbira ibu Amono wali mini Simeada berenego igini Sabada hene. Mendego Moaba wali mini Simiridi berenego igini Yahosabadi hene. <sup>27</sup> Ibu igini henerunaga bi tebi mana latagi haga agalime ibu mitangi bialu bi lenegobi Anduane Homogonaga anda ibugua arema binigobi te bibahende Kini Henerunaga Bi Te laga ngagoha gili bumaga ho nga. Yoasa igini Amasaiahanda ibu aba henegoria kini ha aribia hene.

✧ 24:20: Md 23.35, Lg 11.51

## 25

### *Amasaia ibu Yuda dindiha kini henego ogo (2 Kini 14.1-7)*

<sup>1</sup> Amasaia ibu aīya Yarusaleme tano wali mini Yahoadinihanda taba henenegroia howa hama ibinigo mali pira kirani duria (25) hayagola Amasaia ibu kini pigane halu mali pira kirani dira (29) Yarusalemeni haru hene. <sup>2</sup> Amasaia ibugua Anduane Homogonaga deni mana bayale bialu henegoyu ibu mini mbiraore nawi howa bini.

<sup>3</sup> Kini Amasaia ibu Yuda dindiha hongo howa haru heangi ibugua agali bu hearuhondo bidaba layadagua tigua agali haguane ala ibu aba Kini Yoasa bo wahayaru bibahende bo wahai hene. <sup>4</sup> Anigo agali haguane uruni ti waneigini bu hearu bo wa nahe helo wahene. Ibugua ani binidagoni irane bamba Anduane Homogonaga bi mana Mosesehanda gilibu wini wiago talialu ani bini. Anduane Homogonaga bi mana uruni ogodagua gilibu nga. Waneiginime mana ko biyagua ogoninaga pani aba aīyalahondo mialu bo waholene nawi. Anidagua dege aba aīyalame mana ko biyagua ogoninaga pani waneigini mia aribia halu bo waholene nawi. Mana ko birago ibuniore homelo bo waholene nga, lalu ogonidagua gilibu winigo nga.☆

<sup>5</sup> Amasaiahanda Yuda hameiginibi Beniyamini hameiginibi agali mali pira kira (20) pene hearu mo ngoai hadaba lowa dagalene. Ani dagalai howa daosini dege handari tebira (300,000) agali uruni wai yandare humbibi yabeheru hondowa amiali daosini mbira (1,000) haru hagabi handari mbira (100) haru hagabi ti hameigini headagua tale biaga bini. <sup>6</sup> Ibugua Isaraelenaga wai biaga agali daosini dege handari mbira (100,000) biamogo bilo muni siliba timbuni genda magi tono tebira ale yolo mini.

<sup>7</sup> Ani biyagola Ngode Datagaliwabenaga mana latagi haga agali mbira kini hearia ibuwa ibugua kinihondo lalu, Isaraele agali Eberaimiali o karume Anduane Homogonaga andaneha nahaganego ibugua ti biamogo nabulebirago ti í heba wai bu polene nawi. <sup>8</sup> Tí naga hongoni í polene manda biriyagua Anduane Homogo ibugua biamogo nabiragola í waitigiru ti wayali holebira. Ngode Datagaliwabe ibugua biamogo bulenebi mo dindiha holenebi ibunaga hongome dege bibehe kagoni, lene.

<sup>9</sup> Ani layagola Amasaia ibugua ladai bialu lalu, Ai muni siliba timbuniore tihondo mirugo agi buledabe, lene. Ani layago hale howa mana latagi haga agali biagome lalu, Anduane Homogo ibugua muni ngiatago halu dewa ngibehe kagonigo muni ogoni waha, lene.

<sup>10</sup> Ani layagola Amasaiahanda Isaraele ami ibiyaruhondo, Tí andaga dai bidaba, laya handala ti Yuda wali agalihondo keba timbuniore halu andaga pole pene.

<sup>11</sup> Ani piyagola Amasaia ibugua miniha mo hongo halu ibunaga ami heba dindi mbira mini Dindi Ulini Ibi Wiaga laga wiagoria pene. Ani puwa tigua wai bialu Idomo ami agali daosini pira (10,000) bo wahai hene. <sup>12</sup> Ibugua waitigi maru daosini pira (10,000) dege minuwa Sela tanoha haru pialu hari bareni howa helope hayagola ti toleni ibira halu bibahende homai hene.

<sup>13</sup> Amasaia ani bialu heatambu Isaraele amiali Amasaia heba wai nape biaru ti andaga dai bialu howa Yuda tano maru Samaria tano Bedehorono tanola dombeniha wiaru baba wai bule anda pugupugu bini. Ani puwa tigua agali daosini tebira (3,000) bo wahalu dabudabu dewaore yalu piai hene.

<sup>14</sup> Amasaia ibugua Idomoali bo wahai halu ibu Yarusaleme dai buwa Idomonaga dama mitangi bialu gime wabini wiaru mo yalu dai bini. Ani yalu dai buwa ibugua dama biaru helai howa tihondo bulu palialu bi pupu wialu inisenesi ngabilo lomabu delaga bini. <sup>15</sup> Ibugua ani biyagola Anduane Homogohanda keba howa ibunaga mana latagi haga agali mbira Amasaia hearia pu layagola ibugua Amasaia hale halu lalu,

☆ 25:4: Man 24.16

Tígua Idomoali baba wai birimigola Idomoalinaga damame tini biamogo nabinigo ai ina dama urunihondo bi pupu wialu kego irane aginagabe, lene.

<sup>16</sup> Ani lalu heaore Amasaiahanda la pugua bialu lalu, Bi nalabe. Iname kininaga mini mandaru talebu miaga mbira í habelo angi dabo helarimabe. Bi lone lariyagua ina í bo waha loleberogo ai ina bi nale waha, laya.

Ani layagola mana latagi haga agali biago ibugua bi nale wahole manda buwa wahabe naheyagola bi galone mbira ala lalu, Ina dama biaruhondo bi pupu wialu harigonagabi ina bi larugo í hale habe manga harigonagabi ogoni birigonaga Ngode Datagaliwabe ibugua í bo waholebirago manda bido, lene.

*Kini Amasaiahanda Isaraeleali baba wai bule manda binigo ogo*  
(2 Kini 14.8-20)

<sup>17</sup> Yudalinaga Kini Amasaia ibugua Isaraelenaga Kini Yahoasa hearia bi lo pelalu lalu, Ina baba wai bimiya ibidaba, lene. Yahoasa ogoni ibu Yahoahasa igini howa Yihu aguane hene. Agali bi yalu piyaru tigua Yahoasa hearia puwa Amasaiahanda bi layadagua lamini. <sup>18</sup> Ani lamiyagola Kini Yahoasa ibugua Amasaianaga bi layiyago ladai bialu bi yobage mbira tihondo ogodagua lene. Bamba Lebanono dindiha ira emene ko anihe mbira hari wiagoha heneyagome ira tamia timbuni heagohondo bi lo pelalu lalu, Í wane bedago í iginime dabu bilo ngibelo hamelo ko, laya. Ani lo heagola nogo gabua timbuni mbira ibu hariga ira anihe heagoha bolangua halu piyariaibunaga geme ira anihe ogoni hingedayagola gabu hayiya, lene. <sup>19</sup> Yahoasa ibugua bi yobage ogoni lai howa bi maru Amasaiahondo ladai bialu lalu, Amasaia-o ina Idomoali baba wai buwa wayali hari layane hale harugo ai inaga bu miniha turu timbuni halu kulo howa ininaga mini yaraga halu kedalo manda bu ko. Dindi ogoniha howa wai bialu wayali harigome í mini lene harigo ai ininaga dindi wiridagoria howa turu halu ini andagani hondo holene nga. Bameore ina baba wai bule ibalu keria ini mo ko halu Yuda wali agalibi heba mo ko hai holene yu anda ibuligo ema nabi hendore holene nga, lalu ladai bini.

<sup>20</sup> Ani layago lelowa Amasaia ibugua bi ogoni mo wahene. Ani mo wahayago irane Amasaia ibugua Idomoalinaga dama mo tene howa tihondo bi pupu wialu hayagola Ngode Datagaliwabehanda Amasaia pani neloibunaga mini mo giambe hayagome ibu Yahoasanaga bi mo wahene. <sup>21</sup> Ani biyagola howa Isaraelenaga Kini Yahoasa ibuguaibunaga ami agali hearu haru halu Yuda dindiha Bede Semese tanoni puwa Amasaianaga ami agali hearu baba wai bialu hene. <sup>22</sup> Wai biaho wialu Isaraele ami biarume Yuda ami hearu bo poda hanaore hayagola Yuda ami biaru tini dindiha pora bialu ibida piai hene. <sup>23</sup> Ani piai hayagola Yahoasahanda Amasaia minu yalu ibubiibunaga ami agali biarubi ti Bede Semese tano yu wahalu Yarusaleme tano anda pene. Anda pialu tigua tanonaga ege pabe timbuni wiagonaga panga haraba mbira mini Eberaiminaga Panga lagane henegoria howa bo gialama amuraore pialu pabe paulayagoria panga mende mini Paulagane wiagoria gialairi hene. Wai pabe gialenedago lunaga magi mida handari kira (200) agima gialai hene. <sup>24</sup> Gialai halu tanoha anda puwa Kini Yahoasa ibugua muni ngolo silibaru bibahende tanoha wiaru damene mo yai hene. Ani mo yai halu Anduane Homogonaga andaha anda puwa gabobi ndisibi bibahende Obededomo aguaneneme handaya ho hene wiaru mo yalu muni mbiraleru kini andagaha wiarubi mo yai dege hene. Ani bialu agali haguane maru Yuda dindiha hearu minu garabaya biai howa ibugua agali haguane biaru garabaya haru ha mbirale mo yayaruni ya bialu Samaria tano dai bini.

*Kini Amasaia homenego ogo*

<sup>25</sup> Isaraelenaga Kini Yahoasa ibu homeha Yudanaga Kini Amasaia ibu homa nabi mali pira mbirani duria (15) howa homene. <sup>26</sup> Amasaiahanda biabe maru pigane binirubi bu



maro binirubi bialu henedarunaga te mbuga mbira mini Yuda Kinibi Isaraele Kinibi Henerunaga Te laga ngagoha gili bumaga ho winigo nga.

<sup>27</sup> Kini Amasaia ibugua Anduane Homogonaga bi mana mo wahalu ibu Yarusaleme tanoha heagola agali maru hearume ibu homelo bo wahole ndilalu hene. Tigua bi uruni lalu ka layago hale halu Amasaia ibu Yarusaleme wahalu Lagisi tano ibida pu hene. Ani pu heagola waitigi biarume agali maru hearuhondo lamialu lalu, Kini Amasaia ibu Lagisi tanoha holebirago bo wahole pudaba, laya handala tigua Amasaia hearia puwa ibu bo wahene. <sup>28</sup> Ani bo wahayagola agali maru hearume Amasaianaga tingini nogo hosini mo paga halu Yarusaleme mo yu dai bini. Mo yu dai buwa ibu mamalirunaga homali Debidinaga tano winigoha hora hene.

## 26

### *Usia ibu Yuda dindiha kini henego ogo* (2 Kini 14.21-22, 15.1-7)

<sup>1</sup> Yudali bu hearume Amasaia hora howa ibu igini Usia ibu aba henegoria kini ha aribia helo dabo helene. Usia ibu mali pira mbirani waragara (16) hayagola Yudanaga kini hene. <sup>2</sup> Ibu aba Amasaia homayagola ibu kini howa ibugua wai timbuni bialu tano mbira mini Elada winigoria ogoni waitigirunaga giha howa ibuni mo yu dai bini. Ani bialu tano ogoniha mbirale giala hole bu wiaruni mo tiga bialu lone arema bialu hene.

<sup>3</sup> Usia ibu aiyahanda ibu taba heneneyangi howa hama ibinigo ibunaga mali pira mbirani waragara (16) hayagola ibu kini howa ibugua mali pira duriani kira (52) Yarusaleme tanoha haru hene. Ibu aiya Yarusaleme wali mini Yagolia berene. <sup>4</sup> Usia ibugua Anduane Homogo turu helo ibunaga deni howa mana bayale ibu aba Amasaia-handa bialu haga wiadagua talialu bialu haga hene. <sup>5</sup> Segaraiahanda Kini Usia mini mandaru talebu miaga heangi Usia ibugua Anduane Homogo mana bayuwa talialu biaga hene. Ani bialu heangi Ngode Datagaliwabehanda ibuhondo turu halu biamogo bini.\*

<sup>6</sup> Ani biaga howa Usia ibugua Pilidiali baba wai bu pialu wayali howa Gada tanobi Yabane tanobi Asadodo tanobi tano uruninaga ege pabe biaru giallo wahene. Ani buwa Asadodo kawareha Pilidia dindi maruha tano gahenge wabialu ege tole pabe bigi bini. <sup>7</sup> Ngode Datagaliwabehanda Usia biamogo timbuniore biyagola ibugua Pilidialibi Meunualibi Arebiali Gurubala tanoha henerubi bibahende bo podalu wayali hene. <sup>8</sup> Usia ibu hongo timbuniore hayagola Amonoalirume ibu andaneha howa ibuhondo dagisi muni miaga hene. Wali agali hapara para bu hearume ibu agali mini lene lalu Iyibi dindihayagi wali agali bu hearumebi ani laga hene.

<sup>9</sup> Usiahanda Yarusalemeha wai mamage anda lu ege pabeni panga mini Pau Lagane Panga heagoriabi Uliyane Panga heagoriabi pabe bu mabu bini heagoriabi bialu mamage helo mo hongo hene. <sup>10</sup> Ibugua dindi ko dalu naibagahabi wai mamage haga anda luni bigi bini. Ibugua nogo tara tara dewaore hininigo ti iba karulape nelonaga ibugua iba uli dewa dindi bare barehabi dindi bugubugu wiaruhabi tombo wigi bini. Usiahanda e hongolene hame timbuni lowa ibunaga biabe biahaga wali agalime pu mbira mini gerebi mabu barehabi dindi bayale ibane berehabi bilo helaga bini.

<sup>11</sup> Usia ibunaga ami agali dewaore wai biagane mana mandabi hongohe bayaleore hene. Usiahanda ibunaga beba gili bia dagala biaga agali Yaele Maseala libugua biabe ogoni bilo agali mbira Hananaia ibugua libu haru hene. <sup>12-13</sup> Ibugua ami agali daosini dege handari tebirani karia halu handari duria (307,500) heneru tinaga haru haga agali daosini kirani handari waragara (2,600) hene. Ti bibahende hongo taraore howa kini waitigi hearu hongo nakarulape hene. <sup>14</sup> Usiahanda ami agalihondo yandarebi

\* 26:5: Pig 41.15, 2 Bit 24.2, Dan 2.19

humbibi mandabi tingini dambi haganebi danda timubi ege tole ba amu holenebi miaga bini. <sup>15</sup>Yarusalemeha agali mandabi maru hearume wai pabeha howa timubi tole timbunibi hono gerela howa ba amu holenaga gurayagu ale wabiaga hene. Anduane Homogohanda Usia biamogo timbuniore biaabo hayagola ibu hongoore haabo howa dindi bibahendeha wali agalime Usia ibu mini leneore ka laga hene.

*Usia ibu mine hayagonaga pani nenego ogo*  
(2 Kini 15.5-7)

<sup>16</sup>Usia ibu agali hongohe heagola ibunaga mine holeneme ibuni mo ko hene. Ibugua Anduane Homogo ibunaga Ngode Datagaliwabe yo handalu ira hagua ngabilo mini inisenesi loma binigo delaga dabuni delole Anduane Homogonaga andaha pene.✧

<sup>17</sup>Loma binigo mo miaga agali pira halira (80) Asaraia heba Usia haruru pene. <sup>18</sup>Ani haruru puwa tigua ibuhondo lalu, Usia-o ina ira hagua ngabilo inisenesi Anduane Homogohondo delolene nawiorego loma binigo mo miaga Arono aguanene kamaru iname dege ani bulenaga loma bini kama. Anduane Homogonaga mana puguarigo ibugua í biamogo nabulebira. Í ibunaga anda loma binigo ogoriani howa abale tagira pu, lene.✧

<sup>19</sup>Usia ibu inisenesi delagane be yalu lomabu delagane dabu kawareni heyu howa ibugua loma binigo mo miaga biaruhondo keba timbuni hene. Keba timbuni ho hearia ibunaga wanakuini ge hamua ale tagira ibini.✧ <sup>20</sup>Ani biyagola Asaraia loma binigo mo miaga maru biarubi Usia handawa bialu mogo timbuni lowa ibuhondo abale tagira pu lene. Anduane Homogohanda pani ngiyago hondowa Usia ibu abaleore tagira pene.

<sup>21</sup>Ge hamua ale ogoni dabi habe naheore bu haabo haganego Usia ibu kini andaga yu wahalu ibuni hangu anda mendeha hama pialu Anduane Homogonaga andahabi pobe nahe hene. Ani hayagola ibu igini Yodamahanda kininaga biabe bulene wiaru bialu kini andagabi Yuda dindi bibahendebi ibuni handaya ho hene.

<sup>22</sup>Biabe maru Kini Usiahanda bialu henedarunaga Anduane Homogonaga mana latagi haga Emoso igini Aisaia ibugua mbuga mbira ngagoha gilibu winigo nga. <sup>23</sup>Kini Usia homayagola tigua ibu ge hamua ale biyago hondowa ibu kini hora hagaha ndo ibu mamaliru hora haga dindi wini wiagoha dege hora hene. Ani hora hayagola ibu igini Yodamahanda ibu aba henegoria Yuda dindiha kini ha aribia hene.✧

## 27

*Yuda dindiha Yodama ibu kini henego ogo*  
(2 Kini 15.32-38)

<sup>1</sup>Yodama ibu aiyahanda taba heneneyangi howa hama ibalu ibunaga mali pira kirani duria (25) peagola ibu kini howa ibugua Yarusalemeha mali pira mbirani waragaria (16) haru hene. Ibu aiya mini Yurusa ibu agali mbira Sadogo wane berene. <sup>2</sup>Yodama ibugua kini howa ibu aba Usiahanda bialu henedagua Anduane Homogo turu helo ibu deni howa mana bayale hangu wiaru bialu hene. Ibu abahanda Anduane Homogonaga andaha pialu ira hagua ngabilo inisenesi delolene manda biyadagua ibu nabini. Anigo wali agali hearu tigua nde mana ko bialu dama mitangi bialu gime wabu wiaruhondo lomabu mialu mbirale delaga bialu hene.

<sup>3</sup>Yodamahanda ibunaga biabe biahaga hearuhondo bidaba layagola tigua Anduane Homogonaga anda biago daliga uyurahayagi heagonaga panga haraba mini Daliga Panga laga bu helene. Ibugua Yarusalemeha tanoha dindi hambene mini Obele ege pabe ogonihayagi arema bialu mo tiga bini. <sup>4</sup>Yuda dindi harihabi ibugua tano dewa bu helalu irabuhabi ami agalinaga andabi mamage holene anda hongohe luorebi bu helaga bini. <sup>5</sup>Yodamahanda Amonoali baba wai bialu wayali hene. Ani wayali howa

✧ 26:16: Man 32.15, 1 Kin 13.1-4, 2 Bit 25.19 ✧ 26:18: Har 30.7-8, Dag 3.10, 16.39-40, 2 Bit 19.2 ✧ 26:19: 2 Kin 5.25-27 ✧ 26:23: Ais 6.1

ibugua Amonoalime ibuhondo mali tebiranaga muni siliba genda magi tono tebirabi widi tono daosini mbirabi (1,000) widi ale mini bali tono daosini mbirabi (1,000) ngilo mo bia hene. <sup>6</sup> Yodama ibugua Anduane Homogo ibunaga Ngode Datagaliwabe mitangi bialu ibu andaneha haabo howa ibu kini hongo timbuniorehe hene.

<sup>7</sup> Biabe maru binirubi wai binirubi mana maru lo winirubi Yodamahanda bialu henedarunaga te mbuga mbira mini Isaraele Yudala Kini Henerunaga Te laga ngagoha gilimumaga ho winigo nga. <sup>8</sup> Yodama ibunaga mali pira kirani duria (25) peagola ibu kini howa ibugua Yarusalemeha mali pira mbirani waragaria (16) haru hene. <sup>9</sup> Mani Yodama homayagola tigua ibu mamalirunaga homali Debidinaga tano wiagoha ibu hora hene. Hora heagola ibu igini Ahasahanda ibu aba henegoria kini ha aribia hene.

## 28

### *Ahasa ibu Yuda dindiha kini henego ogo*

*(2 Kini 16.1-4)*

<sup>1</sup> Ahasa ibu aiyahanda taba heneneyangi howa hama ibalu ibunaga mali pira kira (20) peagola ibu kini howa Yarusaleme tanoha mali pira mbirani waragaria (16) haru hene. Ani haru howa ibu mamali Kini Debidihanda Anduane Homogo turu helo ibunaga deni mana bayale bialu henedagua ndo ibugua bayale bulene wiaru nabi hene. <sup>2</sup> Ani nabi howa ibugua Isaraelenaga kini ala hene biarume ko bialu hagadagua bialu haga hene. Ahasa ibugua bi pupu wulenaga dama mini Bala boronosime dewa wabialu <sup>3</sup> dindi mini Hinomo Ulini wiagoha howa ira hagua ngabilo inisenesiru damahondo lomabu delaga bialu hene. Anduane Homogohanda wali agali dindi ogoniha bamba henedaruni bo taliatagi halu Isaraele wali agaliruhondo dindi ogoni mo miyagola urunime mana ko bialu henedagua ibugua ibunaga iginirubi damahondo lomabu delaga bini. <sup>4</sup> Ani bialu Ahasa ibu dama mitangi bialu mbirale gime wabinirunaga bi pupu wiaga andaruha piaga hene. Bi pupu wiaga anda uruni dindi hari wearuha wialu ira timbuni hearunaga tene gumba hearuhabi wiaga wini. Ani wiaga wiagoha howa Ahasa ibugua lomaru bo delalu ira hagua ngabilo inisenesi lomabu delaga bialu hene.

### *Siria Isaraelela amirume Yuda baba wai bule ibinigo ogo*

*(2 Kini 16.5)*

<sup>5-6</sup> Kini Ahasahanda mana ko dewa bialu heagola Yuda wali agalimebi nde Anduane Homogo ti mamalirunaga Ngode Datagaliwabe erembira mialu pene. Ani bialu heagola Sirianaga kini heagome ibunaga ami agali haru ibalu tigua Ahasa halu ibunaga ami agali hearu bo poda hana helo Anduane Homogohanda ibilene. Wai buwa Siria tigua Yuda wali agali dewaore Damasagasa garabaya bu yalu pene. Ani peagola mani Anduane Homogohanda Lemalaia igini Isaraelenaga Kini Pega heago ibunaga ami hearu heba Yuda dindiha wai bule ibilayagola tigua ibalu Kini Ahasabi ibunaga ami agali hearubi ti baba wai bialu horo ogoningi Yuda ami agali hongoheoreru daosini dege handari mbirani pira kira (120,000) bibahende bo wahai hene. <sup>7</sup> Isaraele ami agali hongohe mbira mini Sigiri heagome Yuda dindiha agali haguane tebirali hearu homelo bo wahene. Agali haguane uruni Kini Ahasa igini Maseabi kini andaga handayaho haga Asarigamabi kini biamogo bialu haga Eleganabi uruni bo wahene. <sup>8</sup> Isaraele agalime ti hameneore Yudaliru dara nahe howa tigua Yuda wali waneiginirubi bibahende daga lamaga halu daosini dege handari kira (200,000) bibahende garabaya haru pialu dabudabu bayale damene wiarubi bibahende mo yai halu tini dalu Samaria tano dai bini.

### *Anduane Homogonaga bi mana latagi haga Odedehanda bi hongohe lenego ogo*

<sup>9</sup> Horo uruningi Samaria tanoha agali mbira mini Odede ibu Anduane Homogonaga bi mana latagi halu mbiwia haga hene. Isaraele ami agali biaru wai hamaha howa

andaga dai biyagola Odede ibugua lola hole puwa tihondo lamialu lalu, Anduane Homogo ina mamalirunaga Ngode Datagaliwabehanda Yuda wali agalihondo keba howa tínaga giha minu ya haya. Anidagua biyagoyu tígua nde keba timbuniore howa Yuda wali agali uruni mo ko howa bo waharimigoni. Anduane Homogo ibugua mana ko lehe ogoni birimigo handaya. <sup>10</sup> Ani buwa tígua Yuda wali agalibi Yarusaleme wali agalibi tínaga garabaya biabe biaga helole hame ledemigonidago ai agua manda bu kamibe. Tígua manda bu handalu kamiria Anduane Homogo tínaga Ngode Datagaliwabenaga deni bayale tigabiore kamabe toba ho kamibe. Mana ko ngubi uruni tí hamene mbalini biaruhondo birimigo Anduane Homogo ibuhondobi ko birimidalo manda nabi kamibe. <sup>11</sup> Ainde bi o larogo hale hadaba. Áyu ogoni howa tígua wali waneiginiru garabaya bu yalu ibirimidaruni t́ni hamene mbalíniru ndobe. Anigo tígua tini dalu dai bilo yupe halu pu ladaba. Ani nabirimiyagua Anduane Homogohanda tandaga halu t́hondo keba timbuniore howa tí bo wahai holebira, lalu lamini.

<sup>12</sup> Isaraele agali haguane marialime Isaraele ami agalime mana ko ogoni biyadago tibi turu naheore hene. Agali uruni mini Yahohanana igini Asaraiabi Mesilemodo igini Beregaiabi Salumu igini Yahisigaiabi Hadalai igini Amasabi tigua turu nahe hene.

<sup>13</sup> Agali haguane mariali uruni tigua ami agali biaruhondo lamialu lalu, Tígua wali agali uruni garabaya bu yalu oali naibalimu. Anduane Homogo deni iname ko birimagonaga ibugua inahondo keba timbuni howa pani karulape ngibehe ndobe. Ai tígua mana ogonidagua birimiyagua nde inaha genda timbuniore Anduane Homogonaga deni wulebira, lene. <sup>14</sup> Ami agali biaru tigua bi ogoni hale howa Yuda wali agali garabaya haru hayarubi dabudabu mbirale mo yu ibiyarubi bibahende yupe halu agali haguane biarubi Isaraele wali agali bu hearubi tinaga giha ya hene. <sup>15</sup> Ani piyagola agali haguane mariali biaru tigua garabaya wali agali uruni handayaho howa aga maru ami agalime wai bialu dabudabu mo yu ibiyaru aria maru wali agali aga nabi hearu bilo mo migi bini. Ani bialu ge subí karulo helo migi dege bialu ti tomobi ibabi nelo mialu dere biarubi olibe lininaga welime haj halu kabu bigi bini. Ani bialu wali agali tini polene hongo nahe hearu bibahende nogo dongini berelalu garabaya wali agali bibahende tini dindiha ti dameneru hearia haru dai biai hene. Tigua haru pialu Yarigo tano wiagoria ira ayage ale mini dedi dewa bu heagoria yupe halu Isaraeleali ti Samaria dai bini.

*Kini Ahasa ibugua biamogo bibe lalu Asiriali hale henego ogo  
(2 Kini 16.7-9)*

<sup>16-17</sup> Isaraelealiru tigua Yudali bope halu peagola mani howa Idomoalirume ibalu wai lone bialu Yudali bo poda hana hene. Bo poda hana halu puwa Yuda wali agali garabaya biabe ale bialu haga helo minu yalu pene. Ani biyago hondowa Kini Ahasa ibugua bi lawia halu Asiria kini heago mini Tigilada Pilese heago ibugua biamogo bule ibabe lalu agali marume bi lo yu pelene. <sup>18</sup> Ogoningi dege Pilidiali tiguabi nde Yuda dindiha abene ni paliragohayagi tano emene hari barebare wiaruhabi dindi unurahayagibi wai bialu hene. Tigua ani anda ibuwa wai bialu Yuda wali agali bo poda hana halu Bedesemese tanobi Ayalono tanobi Gederodo tanobi ti karulene. Ani bialu Sogo tanobi Timina tanobi Gimiso tanobi dindi emene wiapara para bu wiaru heba karulai halu Pilidiali tigua tano uruni tininagaore wilo lowa mo wiai hene. <sup>19</sup> Kini Ahasa ibuhabi Yuda wali agalihabi genda ogoni anda ibiyadagoni irane Ahasa ibugua mana ko dewaore bialu Anduane Homogo erembira miyagola ibugua nde Yuda wali agali bope holenaga genda uruni henemane ani ibilene. <sup>20</sup> Mani howa Asiriali Kini Tigilada Pilese ibu Yuda dindi ibinigoyu ibugua Ahasa pele mia nabini. Iubi ibunaga ami agali haru hayadarumebi tigua Ahasa mo ko halu hene. <sup>21</sup> Anidagua biyago hondowa Ahasa ibugua Kini Tigilada Pilese mo palia hole manda bialu ngolo damenego Anduane Homogonaga andaha wini wiarubi kini andagaha wini wiarubi agali haguane bu hearu andagaha wini wiarubi

bibahende Tigilada Pilese mo miai hene. Ani miai hayagome Ahasa mbira biamogo nabini.

*Kini Ahasahanda Anduane Homogo waore henego ogo*

<sup>22</sup> Kini Ahasa ibu genda timbuniore ho heangi ibugua Anduane Homogo mitangi nabi hene. Ibugua Anduane Homogo erembira mialu mana ko dewaore biaabo halu hene. <sup>23</sup> Ibugua lalu, Sirianaga dama mitangi bialu bi pupu wiaga bu wiarume Siriali biamogo biyagoni ndobe. Ainde ibi dama urunihondo mbirale lomabu miruyagua urunime i biamogo bulebira bada, lene. Ani lo manda buwa Kini Ahasahanda Sirialinaga dama mitangi bialu gime wabini wiaruhondo mbirale lomabu mialu hene. Ibugua anidagua binidagome ibunihabi Isaraele wali agalihabi mo ko holene timbuniore anda ibu wini. <sup>24</sup> Ani bialu Kini Ahasahanda ndisi beledirubi bibahende Anduane Homogonaga andaha wiaga wiaru bo pambulo wahai hene. Ani buwa ibugua Anduane Homogonaga anda biago pangaru bibahende payu wahene. Ani buwa dama mitangi bialu bi pupu wulenaga lomabu delaga dabu Yarusaleme tano bibahendeha bu helai hene. <sup>25</sup> Ani bialu Yuda dindiha tano wiaru bibahendeha wali agalime dama mitangi bialu bi pupu wiaga anda dewa bu helene. Anda uruniha wali agalirume dama mitangi bialu mbirale gime wabini urunihondo bi pupu wialu ira hagua ngabilo delaga mini inisenesiru lomabu delaga bialu hene. Mana ko ogonibi bialu hayadagome ibuniha Anduane Homogo ibu mamalirunaga Ngode Datagaliwabehanda tandaga timbuniore anda ibilene.

<sup>26</sup> Biabe maru Kini Ahasahanda bialu henego ibu kini pigane hayangi howa hama ibalu homalu wahenegonaga te damene bibahende mbuga mbira mini Yuda Isaraelela Kini Henerunaga te lo ngagoha gilikumaga ho winigo nga. <sup>27</sup> Ahasa ibu homayagola tigua ibu Yarusalemeha Debidinaga tano laga wiagoria hora hene. Kini Ahasa homayagola ibu igini Hesegaia henego ogonime ibu aba henegoria kini ha aribia hene. <sup>\*</sup>

## 29

*Hesegaia Yuda dindiha kini henego ogo*

*(2 Kini 18.1-3)*

<sup>1</sup> Hesegaia ibu aiyahanda taba heneneyangi howa hama ibalu mali pira kirani duria (25) hayagola ibu kini pigane howa mali pira kirani dira (29) Yarusalemeni haru hene. Ibu aiya mini Abiya ibu Segaraia wane berene. <sup>2</sup> Hesegaia ibugua ibunaga mamali Kini Debidihanda Anduane Homogo turu helo ibunaga deni mana bayale wiaru bialu haga henedagua dege ibu ani bialu hene.

*Anduane Homogonaga anda mo bayale henego ogo*

<sup>3</sup> Hesegaia ibu kini halu mali piganenaga ege mbira layagola ibugua Anduane Homogonaga anda panga lone dugua hai howa panga uruni bayuwa mo tiga biai hadaba lene. <sup>4</sup> Ani lowa ibugua loma binigo mo miaga hearubi Libaiali bu hearubi bibahende Anduane Homogonaga anda hane ni tagira ibiragohayagi wali agali ngoai haga hama wiagoria mo ngoai hene. <sup>5</sup> Ani mo ngoai howa ibugua tihondo lamialu lalu, Libaiali kamiru tigua tini Anduane Homogo ina mamalirunaga Ngode Datagaliwabhondo lomabu mialu ibunaga anda ogoni ibuni deni bayaleore helo mo tiga bia halimu. Ani bialu mbirale tara anda ogoniha Anduane Homogo deni mo dodo holene damene ngane hendedemigo bibahende mo wahai halimu. <sup>6</sup> Ina mamalirume Anduane Homogo inanaga Ngode Datagaliwabenaga bi hale halu talialu bia nabi ibunaga deni mana ko dewaore bialu haga hene. Tigua Ngode Datagaliwabe erembira mialu puwa anda ibuni hagaore biagobi wahalu pu dege bini. <sup>7</sup> Ai tigua Anduane Homogonaga anda panga bibahende payai halu hale lamu daho ngelaga biaru hundi hai halu bini.

<sup>\*</sup> 28:23: 2 Bit 25.14, Yar 44.17-18    <sup>\*</sup> 28:27: Ais 14.28



Tigua ira hagua ngabilonaga inisenesi lomabu delaga biaru dela nabi wahalu Isaraele wali agalinaga Ngode Datagaliwabenaga lomabu delaga dabu heagoria loma marubi nadele wahene. <sup>8-9</sup> Yuda Yarusaleme wali agali bu hearu tigua mana ogonidagua bialu heagola Anduane Homogohanda ti baba keba timbuni halu waitigi bu hearu ibilalu ina mamaliru bo wahai helene. Ani bialu inanaga wali waneiginirubi minu yalu dindi taraha piai hene. Bi te ogonidagua biya layago wali agali tara tara bu hearume hale howa ti mini dege dindi halu gi hai ho hene. Mbirale uruni binidaruni ina manda biai ho kamagoni, lalu Hesegaiahanda lene.

<sup>10</sup> Hesegaia ibugua laabo halu lalu, Anidagua binigo ai áyu Anduane Homogo Isaraele wali agalinaga Ngode Datagaliwabehanda ina baba lone keba nahelonaga ina habo nalolene bi honghe mbira lo wulebero. <sup>11</sup> Ainde loma binigo mo miaga kamirubi Libaiali kamirubi tigua Anduane Homogonaga biabe bialu halimulo dabu helayago manda bilimu. Tigua Anduane Homogonaga deni howaibunaga biabe ngago bialu wali agalime ibuni mitangi bialu lotuore lalu helobi ira hagua ngabilonaga inisenesiru lomabu delelobi baya hangu mo tiga bialu haru halimu. Anidagua bulene ngago manda bialu biabe uruni bialu halimu, lene.

<sup>12</sup> Libaiali kininaga bi hale ho henedaruni tinaga mini uru Amasai igini Mahadabi Asaraia igini Yoelebi libu Kohada aria hene. Ani bialu Abadi igini Kisibi Yahalele igini Asariabi libu Merari aria hene. Simina igini Yoabi Yoa igini Idenebi libu Gesono aria hene. <sup>13</sup> Ani bialu agali kirali Simiri Yuelela libu Elisabana aria hene. Segaraia Madanaiala libu Asaba aria hene. <sup>14</sup> Yahuele Simaila libu Hemana aria hene. Ani bialu Semaia Usielela libu Yadudunu aria hene.

<sup>15</sup> Libaiali uruni tini aria hearia puwa tigua Anduane Homogo deni tiha ko mbira para nahe holenaga biaga mana winidagua bima lalu bibahende biai hene. Tiha dodo mbira para nahe howa tigua Anduane Homogonaga mana talialu Kini Hesegaiahanda bilimu lalu lamiyadagua Anduane Homogonaga anda mo tiga bini. <sup>16</sup> Ani bialu loma binigo mo miaga hearu tigua Anduane Homogonaga anda tamuha puwa mbirale Anduane Homogo deni ko dodohe wiaru bibahende mo wahai hene. Tigua mbirale ko uruni mo yalu Anduane Homogonaga anda haneni hama timbuni wali agali ngoaiho haga wiagoria yu tagira pene. Ani bialu Libai agali biaru tigua tanoha howa yu tagira pialu Kidirono Dindi Uli laga wiagoha wahene.

<sup>17</sup> Tigua Anduane Homogonaga anda bayale helo mbirale ko dodohe wiaru mo wahlenaga biabe ogoni ege mbiranaga horo mbira layagola pigane bialu howa horo haliningi biabe ogoni biai halu anda haneni bima tagira ibini. Ani buwa anda ogoniha Anduane Homogo mitangi bialu lotu lolenaga anda bayale helo biabe ogoni horo haliru mende bialu hene. Ani biai halu horo pira mbirani waragaria (16) hayagola anda ogoniha bulene winigo biaiore hene.

### *Anduane Homogonaga andaha wiagaru lomabu mialu henego ogo*

<sup>18</sup> Ani biaiore halu loma binigo mo miagarubi Libaiali biarubi tigua Kini Hesegaia berearia puwa lalu, Iname Anduane Homogonaga anda biagoibuninaga deni dodo nahe ngelonaga biabe bialu harimago bibahende biai harima. Ai loma biniru delai haga dabubi mberedi Anduane Homogohondo lomabu wulenenaga tebolo dagiabi mana ogoni bulenaga mbirale tara tarabi bibahendeibunaga deni dodo nahe bayale nga. <sup>19</sup> Ani bialu iname ndisi belediru mbirale tara tararu Kini Ahasahanda Anduane Homogo erembira mialu piyangi mo waheneru yu dai biai harima. Ani yu dai buwa iname Anduane Homogonaga deni dodo nahe ngelo mo bayale howaibunaga andaha lomabu delaga dabu kagoria kawareni dege ngeledema, lene.

<sup>20</sup> Kini Hesegaia ibugua bi ogoni hale howa horo mendengi gao layagola heyuwa Yarusalemeha agali haguane hearu mo ngoai hene. Ani ngoai ho heagola ti bibahende Anduane Homogonaga andaha pene. <sup>21</sup> Tigua nogo bulumaga wangabebi sibi

wangabebi sibi iginibi meme wangabebi karia dege dege haru pene. Nogo urunime Yuda wali agalinaga ko domo wahelonagabi kinibi ibu one waneiginirubi tinaga ko domo wahelonagabi Anduane Homogonaga anda dodo nahe bayale helonagabi bo lomabu delole haru halu pene. Ani haru puwa Kini Hesegeaia ibugua loma binigo mo miaga Arono aguanene bu hearuhondo lalu, Nogo uruni Anduane Homogonaga lomabu delaga dabu kagoria bo lomabu delalimu, lene. <sup>22</sup> Ani layagola tigua bulumaga wangabe karia biaru ala balu darama loma binigo mo miaga hearuhondo miyagola tigua darama mialu lomabu miaga dabu heago odo tindi tanda lalu hene. Ani buwa nogo sibi karia biarubi sibi iginu karia biarubi bowa darama lomabu delaga dabu biagoriani ani dege bini. <sup>23</sup> Ani bialu meme wangabe karia biaru kini halu agali marubi hearia haru pialu tigua meme uruninaga hagianeni gi wigi bini. <sup>24</sup> Loma binigo mo miaga biaru tigua nogo meme uruni balu darama lomabu delaga dabu heleagoria odope hene. Anidagua binidagoni irane kini ibugua lalu, Loma ogoni Isaraele wali agali bibahendenaga ko domo wahelo irame dai holene lomabi Isaraele wali agali bibahende biamogo bilonaga delamiya, lalu layadagua ani bini.

<sup>25</sup> Kini Hesegeaia ibu Anduane Homogohanda ala ibunaga bi mana latagi haga agali Gada Nadanalaha howa bi mbira Kini Debidi laminigo hale howa ibugua talialu ogodagua bini. Ibugua Libaiali hearu lamialu, Tigua ngida tara tara wiaru mo yalu Anduane Homogonaga anda tamuha hole pudaba, lene. <sup>26</sup> Ani laya handala Libaiali biaru tigua Anduane Homogonaga andaha pialu ngida tara tara Kini Debidinaga ala winiru mo yu howa loma binigo mo miaga hearu tiguabi nde pilipe biguli wiaru yuwa heyu ha dege bini. <sup>27</sup> Ti ani manda manda bu heagola Kini Hesegeaiahanda loma binigo mo miaga hearuhondo lamialu, Loma irame dai helonaga lomabu delolene dabu biagoriani deladaba, lene. Ani delalu heagola wali agali hearume Anduane Homogonaga mini yaraga halu iba ganaru lalu hene. Tibi loma binigo mo miaga hearubi tigua biguli pu lalu Libaiali biaru tigua ngida tara tara Debidinaga wini biaru balu hene. <sup>28</sup> Wali agali tigua iba gana lalu Libaiali tigua ngida tara tara balu loma binigo mo miaga biarume pilipe biguli pu lalu ti bibahende hearume Anduane Homogo mitangi bialu lotu lalu hene. Ani lalu heane dege loma irame dai helonaga delayago bibahende daiore hene. <sup>29</sup> Tigua loma uruni bu miai heagola Kini Hesegeaia halu wali agali bu hearubi bibahendeore tigua ge duli hangaho birai howa Anduane Homogo mitangi bialu lotu mandagi lalu hene. <sup>30</sup> Ani lalu howa Kini Hesegeaia bi agali haguane hearubi tigua Libaiali hearuhondo lalu, Tigua iba gana bamba Debidibi Anduane Homogonaga bi mana latagi haga mini Asababi libugua Anduane Homogonaga mini yaraga halu iba gana lolene gilibu wini uruni ladaba, lalu lamini. Ani lamiyagola Libaiali biaru tigua turu timbuni halu ge duli hangaho biruwa Anduane Homogo mitangi bialu iba ganaru lalu lotu lalu hene.

<sup>31</sup> Ti ani ngoai ho hearia Hesegeaiahanda wali agali hearuhondo lamialu lalu, Áyu tíni Anduane Homogohondo loma bia halu Anduane Homogonaga bo lomabu mulenebi ibuhondo kaj lalu loma mulenebi uruni Anduane Homogonaga andaha yalu ibalimu, lene. Ani layagola wali agali tigua kininaga bi layago hale howa loma uruni yalu ibini. Ani bialu wali agali marume tini manda bialu loma irame dai helo delole nogo tara tara haru ibini. <sup>32</sup> Tigua nogo bulumaga wangabe pira karia (70) sibi wangabe handari mbira (100) sibi iginibi handari kira (200) uruni bibahende bo loma bialu irame dai helonaga haru halu ibini. <sup>33</sup> Ani bialu tigua bulumaga wangabe handari waragaria (600) nogo sibi daosini tebira (3,000) Anduane Homogonaga lomabu mulene haru halu ibini. <sup>34</sup> Loma binigo mo miaga hearu ti dewa ndo howa tigua nogo tara tara haru ibiniru bo delolene biabe timbuni ogoni bibe naheyagola Libai agali maru hearume biabe ogoni abale biai holenaga ti biamogo bialu nogo balu podo manda manda bini. Tigua ogonidagua binidago irane Libaiali tigua Anduane Homogonaga

deni tini dodo nahe holenaga mana biagadago abale biai hene. Tigua ani biyadagua loma binigo mo miaga maru ti nabi heneya. Mani loma binigo mo miaga uruni tini mo tiga biai halu Anduane Homogo deni dodo nahe holene mana biai hayagola Libaiali tigua biamogo bialu nogo bo manda manda bialu hayago wahene. <sup>35</sup> Loma binigo mo miaga hearu tigua loma irame dai helonaga delalu biabe ogoni hangu ndo dewaore bini. Tigua Anduane Homogola ho gimbu bulenaga loma nogo abene wiaru podo delalu wali agalime loma irame dai helonaga yu ibiyadagua waini ibabi hambu yu ibalu biyagola urunibi odo lomabu delalu bini.

Ani biai howa Anduane Homogonaga andaha dai buwa mana ala binidagua lone bialu lomabu mialu Anduane Homogo mitangi bialu lotu lalu hene. <sup>36</sup> Tigua ani bialu hayago irane Ngode Datagaliwabehanda ti biamogo biyago manda bialu Kini Hesegaiabi wali agali bu hearubi tigua ibuhondo turu timbuniore ho haabo hene.

## 30

*Bolangua Halu Penegonaga Horo mitangi bialu tomo nolene mo manda manda bialu henego ogo*

<sup>1</sup> Kini Hesegaihandanda Isaraele wali agali Yuda wali agalibi bibahendehondo lalu, Anduane Homogonaga anda kagoria Yarusalemeni íbu ngoai howa Ngode Datagaliwabehanda biamogo biyagome Bolangua Halu Penegonaga Horo mitangi bialu tomo nole ibalimu, lalu lawia hene. Ani bialu ibugua Eberaimi hameigini hearubi Manase hameigini hearubi ti bibahendehondo beba gilibu wia halu ibalimu lene. <sup>2-3</sup> Tigua tomo ogoni ege mbira pigane ngabu laragola dawaga winigo ai ogoningi loma binigo mo miaga maru hearu ti Ngode Datagaliwabenaga deni dodohe henego mo tiga nabi dege heagola ti nakarulape hene. Ani bialu wali agali dewa Yarusalemeni íbu ngoai nahe wini. Ani biyagola kinibi agali haguane bu hearubi tigua bi lo mbira halu horo mitangi bialu tomo nolene ogoni ege mendegonaga mo baede hene.\* <sup>4</sup> Kinibi wali agali bibahendemebi bi ogoni lo mbira halu karulapeda manda buwa turuho hene. <sup>5</sup> Tigua Isaraele dindi gibuni bibahendehe hearu unurahayagi Beaseba tano wiagoria howa bi loyogo lalu abene uyurahayagi Dana tano wiagoria lama tagira pene. Tigua wali agali bibahendehondo lawia halu lalu, Bibahendeore Yarusaleme íbu ngoai howa Anduane Homogo Isaraele wali agalinaga Ngode Datagaliwabe ibugua Isaraele wali agali Iyibi dindiha hearu ti ba nabi Bolangua Halu Penegonaga Horo mitangi bialu tomo nolene winigo nole íbu ngoai halimu, lalu bi loyogo lelene. Ngode Datagaliwabenaga mana lowini ngadagua Isaraele wali agali ala mbiraore hangume mana ogoni talialu ngoai hagamadagua ndo ogoningi ti bibahendeore ngoai hai hene. <sup>6</sup> Kini Hesegaiabi agali haguane bu hearubi tigua bebani bi gili bialu Isaraele dindi Yuda dindibi bibahendehe yu purogo lelene. Bi bebani gilibu winidago ogodagua.

Isaraele wali agali Asiria amime bo wanahe emene yu wahene kamiru tí hale hadaba. Tí bibahende Anduane Homogo tí mamali Abarahama Aisaga Yagaba imarunaga Ngode Datagaliwabe ibuni karia dai bulene nga. Ani dai birimiyagua nde ibugua tí heba mandagi haabo holebira. <sup>7</sup> Ai tínaga mamali henerubi tí aba hamenerubi tigua mana ko bialu henedagua nabilimu. Tigua Anduane Homogo tinaga Ngode Datagaliwabe kago erembira mialu hearia ibugua ti pani nelu mialu bo wahai hene. Mbirale uruni biyago tínime de handarimigoni ndobe. <sup>8</sup> Tigua Anduane Homogonaga bi layaru hale habe manga hayadagua tígua ani nabi howa ibu andaneha haabo halimu. Tígua Yarusalemeni Anduane Homogonaga anda kagoria ibalimu. Anda ogoni ibuninaga haabo helo ibugua loma bia ho helene. Tígua anda ogoniha puwa Anduane Homogo inanaga Ngode Datagaliwabe kago mitangi bialu lotu lalu holene nga. Ibugua tí baba keba halu miniha tandaga nahelo ogonidagua bulene nga. <sup>9</sup> Ai waitigime tí daluha ibalu tí one waneigini

\* 30:2-3: Dag 9.9-11

damenerubi bibahende garabaya haru piai hayago t́ini manda bidami. Anigo ainde t́igua Anduane Homogo ibuni karia dai birimiyagua nde ibugua waitigi uruniha dara holene mo wia haragola tigua t́inaga damene one waneigini garabaya haru piyaruni golope halu pudaba laragola t́ini dalu ngagoria lone dai bilolebira. Anduane Homogo inanaga Ngode Datagaliwabe kago ibu dara holene irane nawiore ngagoria howa ina dara timbuni haga ka. Ani biaga kago manda bialu t́igua mini beregedalu ibuni karia dai birimiyagua nde ibugua t́i haru dai bialu t́ihondo lone erembira nangulebira, lalu gilibu wia hene.

<sup>10</sup> Agali marume beba ogoni yalu tano maru Eberaimi hameigini dindi wiaruhabi Manase hameigini dindi wiaruhabi uyuraore puabo halu Sebulunu hameigini dindi wiaruhabi pu layadagua yu purogo lai hene. Ani puwa tigua kininaga bi ogoni wali agali bibahende hale hai helo beba daga latagi hayagola wali agali maru hearume hondo oba howa mege bialu handabe mangaho hene. <sup>11</sup> Ani biyagoyu wali agali Ase hameiginibi Manase hameiginibi Sebulunu hameiginibi uruni marume Anduane Homogo ibuni deni tini mo dindiha halu ti Yarusaleme pole manda bini. <sup>12</sup> Tini ani biyagola Ngode Datagaliwabe ibunime Yuda wali agali mini mo mbiraore hayagola tigua bi hale halu Anduane Homogonaga manani howa tomo dawa nolene nga lalu kinibi agali haguane biarumebi layadagua Yarusalemeha pene.

### *Bolangua Halu Penegonaga Horo mitangi bialu tomo nalu henego ogo*

<sup>13</sup> Ege mende horo pongo bo wiyangi wali agali dewaore Mberedi Yidi Nahe Hirinigonaga Horo mitangi bialu tomo ogoni nole Yarusalemeni íbu ngoai hene. <sup>14</sup> Ani íbu ngoaiho howa tigua Yarusalemeha dama mitangi bialu mbirale gime wabini wiaru bi pupu wulenaga nogo tara tara bo lomabu mulene dabu hearubi maru ira hagua ngabilo mini inisenesiru lomabu delolene dabu hearubi uruni bibahendeore giallo yu tagira puwa Kidirono Dindi Ulini laga wiagoha yalu pu wahai hene. <sup>15</sup> Ege mende ogoninaga horo dene (14) layagola Bolangua Halu Penegonaga Horo tomo nolenengi tigua nogo sibi igini biaru Anduane Homogohondo bo lomabu mini. Horo ogonongi loma binigo mo miaga hearubi Libai agali bu hearubi tigua Anduane Homogo deni ti dodo nahe holenaga mana wiago abale nabi henegome tini taga halu mo tiga bule pene. Mo tiga biai howa Anduane Homogo deni tiha dodo nahe bayale howa tigua loma irani dai helolenaga Anduane Homogonaga andaha pene. <sup>16</sup> Loma binigo mo miaga biarubi Libaiali biarubi ti Ngode Datagaliwabenaga mana Mosese heangi lowini wiadagua biai halu ti Anduane Homogonaga andaha pu hene. Ani puwa Libai agali biarume nogo darama yu heago yamialu loma binigo mo miaga biaruhondo miyagola tigua yuwa nogo daramame lomabu delaga dabu heagoni tandalo ba hai hene. <sup>17</sup> Wali agali dewaore Anduane Homogo deni dodo nahe holenaga mana nabi howa tigua Bolangua Halu Penegonaga Horo mitangi bialu nogo sibi igini bo lomabu mibe nahe hene. Ani heagola Libaiali hearu tigua wali agali uruninaga nogo sibi igini ba halu Anduane Homogonaga loma bia heneore helo mo loma biaho ngelaga bini. <sup>18</sup> Ani bialu wali agali dewaore nogo sibi bo loma bini wiago nalu bereneru ti Anduane Homogo deni tini dodo nahe holenaga mana wiago nabi hene. Wali agali ani nabi hayadaruni maru Eberaimi Manase Isaga Sebulunu hameiginiru aria hene. Ti ogonibi heago hondowa Kini Hesegaiahanda wali agali uruninaga bi Anduane Homogohondo ogodagua lahalu lalu, <sup>19</sup> Anduane Homogo ina Isaraele mamalirunaga Ngode Datagaliwabe-o wali agali o karu ti ínaga deni dodo nahe holenaga mana biaga wiago nabi ínaga andaha íbu karuni ínini manda bide. Anigo ti ínini keria ibalu í mitangi bialu lotu lole hame timbuni lalu íbu kagoni. Ti ani kago handalu Anduane Homogo-o ínini baya buruguleore kegonigo wali agali uruninaga ko ngago domo wahabe, lalu lahene. <sup>20</sup> Ani lahayagola Anduane Homogohanda Kini Hesegaianaga bi layago hale howa wali agali uruninaga ko wiago domo wahalu ti bo wa nahe helene. <sup>21</sup> Wali agali Yarusalemeni horo karu bibahende



ngoai howa Mberedi Yidi Nahe Hirinigonaga Horo ogoni mitangi bialu ngoaiho howa turu timbuni ho hene. Ani howa loma binigo mo miaga hearubi Libai agali bu hearubi tigua Anduane Homogonaga andaha ngida tara tararu mo bila holene wiaru mo yuwa Anduane Homogonaga mini yaraga halu balu hene. Ngida tara tararu tigua balu hayadaruni bi hongoheore lagarume balu hene. <sup>22</sup> Anduane Homogohondo loma bayuwa bu milonagabi lotu bayale lelonagabi Libaiali tigua biabe bayaleore bialu tigatiga haru hene. Ani bialu heago hondowa Kini Heseгаiahanda Libaialiruhondo bayale birimida lalu bi bayale lamini. Wali agali tigua horo karuni tomo ogoni nalu Anduane Homogo mitangi bialu lotu bayaleore laabo halu hene. Tigua Anduane Homogo ti mamalirunaga Ngode Datagaliwabe kago mitangi bialu ibunaga mini yaraga halu turu howa kaj lalu hene.

*Horo karia mende lone lotu lalu henego ogo*

<sup>23</sup> Mberedi Yidi Nahe Hirinigonaga Horo karia harimigo uruni piai heagola wali agalime bi lo mbira halu lalu, Iname horo karia mendeni ogonidagua dege Anduane Homogo mitangi bialu lotu lamija, lene. Ani lowa ti horo karia mendeni turu howa ani bialu hene. <sup>24</sup> Wali agali tigua bo lomabu milonaga Kini Heseгаia ibugua nogo bulumaga wangabe daosini mbira (1,000) sibi daosini karia (7,000) mialu agali haguane hearu tigua nde bulumaga wangabe daosini mbira (1,000) sibi daosini pira (10,000) lowa wali agalirume bo lomabu milonaga mini. Horo ogoningi loma binigo mo miaga hearu aria dewaore Anduane Homogo deni tini dodo nahe holenenaga mana biaga wiadagua nabi henego ai tigua mana ogoni biai hayagola tini Anduane Homogo deni bayale hene. <sup>25</sup> Loma binigo mo miaga hearubi Libaiali hearubi Yuda wali agali bu hearubi Isaraele wali agali dindi abene uyurahayagi howa ibini hearubi wali agali tara dindi tara tara wiaruha howa Yuda dindini hole ibu henerubi Isaraele dindini hole ibu henerubi ti bibahende Yarusaleme ibu ngoaiho howa turu timbuniore hai hene. <sup>26</sup> Yarusaleme tanoha wali agali bu hearume turu holene tolai henedagoni irane bamba Kini Debidi igini Solomono ibu kini heangi ogonidagua binigo maha nabi wiaabo henego lowa horo áyu ogoni hangu tagira ibiyada manda bialu wali agalirume turu hai hene. <sup>27</sup> Mani Libaiali hearubi loma binigo mo miaga hearubi tigua heyuwa Anduane Homogohondo lalu, Wali agali uruni biamogo bialu mo bayale habe, lalu bi lahene. Ani la hayagola nde Anduane Homogo ibugua dahuliya andaga howa loma binigo mo miagarubi Libaialirubi tigua bi layago hale howa wali agaliru mo bayale hene.

## 31

*Heseгаiahanda Anduane Homogonaga andaha biabe bulene wiaru mo tiga binigo ogo*

<sup>1</sup> Anduane Homogo mitangi bialu lotu lalu holene horo timbuni biaru piai hayagola wali agali Yarusaleme ibu ngoai hayarume Yuda dindi tano wiaru bibahendeha purogo lai hene. Tano uruniha dama mitangi bialu ege tole mo hanga ho wiarubi dama wali beda lo mitangi biaga mbirale gime wabini mini Asera wiarubi damanaga lomabu delaga dabu hearubi dama mitangi bialu bi pupu wule ngoai hagane anda hearubi uruni bibahendeore wali agali bu hearume bo gialobaga bialu mo wahai hene. Ani buwa tigua Yuda dindi marubi Beniyamini hameigini dindibi Manase hameigini dindibi Eberaimi hameigini dindibi bibahendeha ibaga biai halu mbirale dama mitangi bialu biaga wiago damene bibahende gialobaga bialu mo wahai hene. Ani biai howa pugu pugu bialu tini andaga dai biai hene.

<sup>2</sup> Ani biyagola Kini Heseгаia ibugua loma binigo mo miaga hearubi Libaiali hearubi hameigini mbira mbira bibahende headagua mo tahaga bialu tinaga biabe ala biagadagua bialu helo helene. Tinaga biabe loma irame dai helo delolenebi Anduane Homogola ho gimbu bulenaga lomabu delaga wini. Ani bialu Anduane Homogonaga andaha ibu mitangi bialu lotu lolenebi ibuhondo kaj lalu mini yaraga holenebi ibunaga



andaha biabe bulene bibahende winigo bialu helo wini. <sup>3</sup> Ani bialu kini ibugua loma binigo mo miaga biaruhondo lamialu, Loma egerebagi alendobi bibahendengi irame dai helo delolenebi Sabada horongi loma bialu bo delolenebi Ege Pigane Ngabu laragola horo timbuni tagira ibirangi loma bialu bo delolenebi horo timbuni lotu lolene maru tagira ibirangibi Anduane Homogonaga mana lowini ngadagua bule nogo bulumagarubi sibirubi memerubi ininaga pabeha karu aria balimu, lalu lamini.✠

<sup>4</sup> Ani bialu kini ibugua Yarusaleme wali agali hearuhondo lamialu, Loma binigo mo miaga karumebi Libai agali karumebi tinaga biabe Anduane Homogonaga mana ngagome bibe lalu lowini ngadagua bilo tigua ti tomo nelonaga yalu ibugu bilimu, lene.✠

<sup>5</sup> Kini ibugua bi ogoni Yuda dindi bibahendeha loyogo layagola wali agali hearume widi lini bayaleore dewabi waini ibabi olibe lininaga welibi mone ibanebi tomo tara tara ti mabuha hayadaru alebi uruni bibahende loma binigo mo miaga hearume Libaiali hearumebi ti nelonaga yu ibugu bini. Ani bialu tigua tinaga tomo uruni pihalu tale buwa pinigo loma binigo mo miaga hearubi Libaiali hearubi ti nelo mini. <sup>6</sup> Ani bialu wali agali Yuda dindiha bu hearu tigua bulumaga pinigobi sibirubi pinigobi haru ibugu bini. Ani bialu tinaga dabudabu wiaru pihalu tale buwa pinigo Anduane Homogo tinaga Ngode Datagaliwabenaga loma biahonaga bini. Ani buwa tigua yalu ibuwa dewaore wua haealadaga helene. <sup>7</sup> Wali agalime mbirale uruni ege teboneni howa yu ibalu wiatagoha dege bialu heane ege kane pene. <sup>8</sup> Mani Kini Hesegaiabi agali haguanebi tigua wali agalime mbirale yu ibu wiyadaru hondowa turu timbuni halu Anduane Homogonaga mini yaraga halu Isaraele wali agalihondo turu timbuni howa kai lalu hene. <sup>9</sup> Ani bialu howa kini ibugua loma binigo mo miaga hearubi Libaiali hearubi tihondo hale halu, Tigua tomo dewaore o ngamigoni agua binibe, lene. <sup>10</sup> Ani hale hayagola Loma Binigo Mo Miaga Haguane Timbuni Sadogo aguanene Asaraia ibugua ladai bialu lalu, Anduane Homogohanda ibunaga wali agali biamogo bialu mo bayale hayagola tigua tomo dewaore Anduane Homogonaga andaha bu yalu ibiya. Tomo uruni aria dewaore iname nalu harimago ainde nai habe nahe ngamagoni ndobe. Ani binigo áyu tomo dewaore bu payabu ngagoni, lene.✠

<sup>11</sup> Kini Hesegaia ibugua bidaba layadagua agali biabe biaga hearume Anduane Homogonaga andaha mbirale mbirale do holenenaga tamu hobane maru bu helene. <sup>12</sup> Ani heleagoha tigua tomo dewa biaru wali agalime mbirale maru Anduane Homogohondo lomabu mini wiarubi bibahende tamu hobane bu helaga biyadaruha mo wigi bini. Ani buwa tigua agali mbira Libaiali mini Konanaia henego ibugua handayaho helo helalu ibu hamene mende Simaihanda Konanaia biamogo bilobi helene. <sup>13</sup> Ani helalu Kini Hesegaiabi Anduane Homogonaga anda handayaho haga haguane mini Asaraiaibi libugua Libaiali pira dabalulaku Konanaia Simaila biamogo bilo dabo helene. Agali uruni mini Yahiele Asaraia Nahada Asahele Yarimodo Yosabada Eliele Isimagaia Mahada Benaia layaru dabo helene.

<sup>14</sup> Ani bialu Libaiali mbira ibu Anduane Homogonaga anda panga haraba ni tagira ibiragohayagi wiago handayaho haga mini Imina hene. Agali ogoni igini Korehanda wali agali hearume tini hameme mbirale Anduane Homogohondo lomabu yalu ibiyagobi wali agalime mbirale maru Anduane Homogonaga loma bia hene wiabagiho wiarubi ibugua mialu loma binigo mo miaga hearu mo tahaga bilo dabo helene. <sup>15</sup> Loma binigo mo miaga maru hearu tinaga tanoha Libaiali maru hearu tigua biabe ogoni bulene wiago Kore biamogo bialu mbirale bu wiaru mo tale bia haga bialu hene. Libaiali uruni mini Idene Miniamini Yasua Semaia Amaria Segania layaru hene. Tigua loma binigo mo miaga tano uruniha hearu tomo talebu miai hayagola igiri emene agaliyaguabi bibahende karulape yaiore hene.

<sup>16</sup> Loma binigo mo miaga uruni ti igini mali pira tebira (30) piyagua igiri uruninaga mini loma binigo mo miaga dege helo mini gilibu wiagatoria gilibu winiru tigua Anduane Homogonaga andaha biabe bulene winigo bialu haga heneyagua nde tibi tomo nelo talebu ta hai haga hene. <sup>17</sup> Tigua loma binigo mo miaga hearunaga mini gilibu wialu howa tini hameigini hama ibidadagua mandagi dindiha gilibu wiaga wini. Ani biagadago irane biabe bulene wirangi tini damene baba mandagi bilonaga mini mandagi gilibu wini. Libaiali uruni ti igiri dalihahe mali pira kira (20) bolangua hayagua nde loma binigo mo miaga tinaga biabe biaga mini gilibu wiagoha gilibu wigi biaga wini. <sup>18</sup> Agali uruni tini mini gilibu wiagoha ti one waneigini heba mandagi gilibumaga ho wiaga hene. Ani bialu wali agali uruni tini Anduane Homogo deni dodo nahe holenaga mana biaga wiaru biaabo haga hene.

<sup>19</sup> Loma binigo mo miaga Arono aguanene maru hearu ti nde loma binigo mo miaga maru hearunaga tano wiagoria kaware palia para para biaruhondo loma binigo mo miaga marume tomo mo tale bia haga hene. Loma binigo mo miaga o biaru tinaga mini Libaialinaga mini gilibu wini wiagoha dege gilibu winirubi ti tomo nelo talebu miaga dege hene.

<sup>20</sup> Kini Heseгаiahanda Yuda dindi bibahendeha mini bilinahe howa mana tigabi bayale hangu biaabo halu Anduane Homogo ibunaga Ngode Datagaliwabenaga hame leadagua talialu haga hene. <sup>21</sup> Kini Heseгаia ibugua bialu henego bibahende Anduane Homogonaga andaha biabe bulene wiago biaabo halu Mosese heangi mana lowinigo wiadagua biai halu ibunaga miniha Ngode Datagaliwabenaga hame leago baya hangu talialu hole miniha hongo timbuniho hene. Anidagua bialu henegome ibunaga biabe bialu hayaru bibahende bayale hai hene.

## 32

*Asiria amime Yarusaleme karulole manda bialu henego ogo*  
(2 Kini 18.13-37, 19.14-19,35-37, Aisaia 36.1-22, 37.8-38)

<sup>1</sup> Heseгаiahanda Anduane Homogonaga andaneha howa mana baya hangu bialu heangi Asirianaga Kini Senageribi ibugua ibunaga ami hearu haru ibalu Yudali baba wai bialu Yuda dindinaga tano wai pabe hongohe bini wiaru karulai hene. <sup>2-4</sup> Senageribi ibu Yarusalemeha wai bule anda ibulebirago manda buwa Heseгаiahanda ibunaga agali haguanerubi ami haru hagarubi ti bi lo mbiraore howa Senageribinaga ami agalirume Yarusaleme hapara haragola iba nolene nawilo tagirahayagi iba payape hole lo manda bini. Tigua agali dewa Yarusaleme howa tagira haru pialu iba duguaga bibahende paya pai haga bini. <sup>5</sup> Ani buwa tigua Yarusalemenaga ege pabebi mo hongo halu arema bigi bialu hene. Pabe ogoriani mamage haga anda lu bialu ege pabe mendebi bini. Yarusaleme tanonaga pabe ni tagira ibiragohayagi uli mogo binidagoria mo hongo helo arema bini. Heseгаiahanda agali mugubeyi hearuhondo, Tigua yandare humbibi wabidaba, lene.

<sup>6</sup> Kini ibugua Yarusaleme agali bibahende hearu haru helo ami agali haru hagaru ti bibahende ngoai haga hama tanonaga panga haraba kaware wiagoria mo ngoai hene. Mo ngoai howa tihondo lalu, <sup>7</sup> Ti bibahende hongo howa mini dunubia ho halimu. Asirianaga kinibi ibunaga amibi urunihondo gi holene nawi. Tinaga hongo ina kamarunaga hongo kamagobi ndo ti nakarulapeore ka. <sup>8</sup> Ti tininaga hongoni ibulebirago iname Anduane Homogo inanaga Ngode Datagaliwabenaga hongo timbunioreni howa wai bimija kamagoni, lene. Kini Heseгаiahanda bi ogoni layago hale howa agali bibahendeme miniha dungulo hene.✧

<sup>9</sup> Asirialinaga Kini Senageribi ibunaga ami agali dewaore heba Lagisi tanoha howa ibugua ibunaga ami haru haga agali maru hearuhondo, Yarusaleme pudaba, lalu

Hesegaiabi Yuda wali agali ibu heba Yarusalemeha ngoai ho hearubi tihondo bi mbira lawia hene. Tigua Yarusaleme ibuwa Hesegaiabi Yuda wali agalibi tihondo lalu,

<sup>10</sup> Senageribi i Asirialinaga Kini kogoni. Tinaga hongo abiale howa i andaneha holene hame nale kamibe. Bi bame lo payapaya beremigome wai bialu agali balu wayali hagabe. Yarusalemeha karulape halu ti biamogo bulene mbira ai ibulubadalo manda buwa ihondo mine halu kamibe. <sup>11</sup> Hesegaiahanda tihondo lalu, Anduane Homogohanda ti biamogo biragola tigua ina bope holeberama, larago lolene nawi. Ibugua ti mo hondo haragoni. Ti bibahende Yarusalemeha howa iba hinabi nane halu homoleberemi. <sup>12</sup> Hesegaia ibunime Anduane Homogonaga lotu anda hearu bo gialalu lomabu delaga dabu hearubi giallo wahai hayagoni. Ani bialu ibugua Yuda wali agali bu hearu bibahende Yarusaleme ibai halu lomabu delaga dabu mbiraore ogoni hanguni ira hagua ngabilo mini inisenesi lomabu delalimu layagoni.\* <sup>13</sup> Inabi inaga mamalirumebi wali agali tara tara palima pedaru bo wahai halu wayali haga harimago hale naharimibe. Ani birimago wali agali biaru tinaga damame ti pele miyagola Asirialinaga kini i kogome ti bo wa naharuyabe. <sup>14</sup> Dindi dewaoreha tininaga dama henedaru helowa ina baba wai birimago ai tinaga dindi bayale ngelo tinaga dama urunime ti biamogo bialu ina bope nahego. Anigo Yarusaleme wali agali ti Anduane Homogohanda biamogo biragola tigua aginaga ina bope holeberemalo manda bu kamibe. <sup>15</sup> Hesegaiahanda ti mo hondo holigo ibunaga bi mo henene nahalimu. Wali agali tara tara hearume tinaga dama mo tene howa dama urunime ti biamogo nabibeheyagola ina wayali harima. Ogonigo tinaga Ngode Datagaliwabe ibunimebi ti biamogo bibe nahe holebira, lalu lamini.

<sup>16</sup> Asiriali haru haga agali biarume Anduane Homogo Ngode Datagaliwabenaga minibi ibunaga biabe bia haga Hesegaianaga minibi mege timbuniore bigi bini. <sup>17</sup> Senageribi ibugua beba gilibu wia henedago Anduane Homogo Isaraele wali agalinaga Ngode Datagaliwabe mo yo hondowa lalu, Wali agali tara taranaga damame ti mo wibe naheyagola ina bolangua halu wayali harugonigo ainde Hesegaianaga Ngode Datagaliwabe ibunibi inaga giha howa ti mo wibe nahe holebira, lalu Senageribihanda gili bini. <sup>18</sup> Asiria ami haru haga agali biarume wali agali wai pabeni hearu gi hai halu ba dai nabilonaga bi uruni hale helo Hiburu bi lalu hongo howa ga lalu lene. <sup>19</sup> Agali biarume bi ogoni layago Yarusaleme wali agalinaga Ngode Datagaliwabe mege bialu wali agali tara taranaga dama gime wabiniru ale dege mitangi bialu lene.

<sup>20</sup> Tigua ani layago hale howa Kini Hesegaia ibubi Emoso igini mana latagi haga Aisaiabi libugua Ngode Datagaliwabehanda Yarusaleme wali agali biamogo bilo ibuhondo bi lalu hene. <sup>21</sup> Libugua ani layago hale halu Anduane Homogo ibugua dahuliyali mbira ibilayagola dahuliyali biagome Asirianaga amibi tinaga haru hagabi bibahendeore bo wahai hene. Ani biyagola Kini Senageribi ibu taga timbuniore halu Asiria dindi dai bini. Ani daibu howa horo mbirungi ibugua ibunaga dama mitangi bialu gime wabini bi pupu wiaga anda heagoha anda puwa ogonihondo bi pupu wialu hearia ibu igini maru hearu tigua wai biagane ayu tibu yiarume Senageribi dibu homelene.\*

<sup>22</sup> Ani binigo Kini Hesegaia halu Yarusaleme wali agalibi ti Asirialinaga Kini Senageribibi waitigi maru henerubi tinaga giha hearia Anduane Homogohanda ti biamogo timbuniore bialu mo wigi bini. Ani biyagola ti luore wai nabi bayaleore hene. <sup>23</sup> Wali agalime dindi tara taraha howa mbirale mbira mo yalu Anduane Homogohondo lomabu miaga bialu Kini Hesegaiahondobi mbirale mbiraleru migi bini. Ogoningi howa wali agali hameigini dindi tara taraha hearume Hesegaia ibu agali timbuni mini leneore ka lalu hene.

\* **32:12:** Senageribihanda bi ogoni layago Anduane Homogo ibu wali agali dindi tara taraha hearunaga dama gime wabiniru ale ka manda bialu lene. ☆ **32:21:** 2 Kin 19.35

*Kini Hesegaia warago balu dabi hayagola mine henego ogo*  
(2 Kini 20.1-3, 12-19, Aisaia 38.1-3, 39.1-8)

<sup>24</sup> Horo uruningi Kini Hesegaia ibu warago timbuniore bowa homabeheore wini. Ani wuwa ibugua Anduane Homogohondo bi layagola Anduane Homogohanda hale howa ibu dabi holebira manda bilo manane mbira walia hene. <sup>25</sup> Ani biyagola ibugua Anduane Homogohanda ibuhondo bayale bigi biyaru mitangi nabi mine haga hene. Mine hayago hondowa Anduane Homogohanda turu nahe howa Hesegaiaibi Yuda wali agalirubi Yarusaleme wali agalirubi ti bibahendeha mo ko holene anda ibilene. <sup>26</sup> Maniore Hesegaiaibi wali agalirubi tini mo dindi halu, Iname nakarulapeore birimada, layagola Anduane Homogo ibugua Hesegaia kini heangi pani namini. <sup>\*</sup>

*Hesegaia homogo timbuniore mini lene henego ogo*

<sup>27</sup> Hesegaia ibu homogo timbuniore hayagola wali agali bibahende hearume ibu mini leneore ka manda bini. Ibunaga ngolo silibarubi ege tole tara tara muni timbunime minirubi mbirale padua ale nga bayale tara tara biagarubi wai humbirubi mbirale bayale tara tara muni timbunime miagarubi uruni bibahende wiai holenaga do hagane anda dewa bini. <sup>28</sup> Widibi waini ibabi olibe lininaga welibi mo wiagane anda bialu nogo bulumaganaga anda timbunirubi nogo sibirunaga pabe dewarubi bu helaga bini. <sup>29</sup> Ani bu heleagola Ngode Datagaliwabehanda Hesegaia biamogo biaabo hayagola ibugua nogo sibi memerubi bulumagarubi yolo bigi bialu tano dewarubi mo wigi bini.

<sup>30</sup> Biabe maru Kini Hesegaiahanda bialu henedaru mbira ibugua iba duguaga mini Gihono Yarusaleme tanoha iba dadabu yalu anda ibulenaga gana timbuni tano pabe tagiraha howa dindi andaneha gana wayalu tamuha anda ibini. Ibugua bibahende biyaru bayale hangu bini. <sup>31</sup> Babilono dindinaga haru haga agaliru ti Ngode Datagaliwabehanda agalime nabiagane ale mbira Yuda dindiha biya layago hale howa tigua agali maruhondo Kini Hesegaia hearia bayuwa hale hole pudaba lene. Tigua hale hayagola Ngode Datagaliwabehanda Kini Hesegaia ibugua agi birabe hondole ibuhondo bi mbira nale helene. <sup>†</sup>

*Hesegaia ibu kini hamaro binigo ogo*  
(2 Kini 20.20-21)

<sup>32</sup> Biabe maru Kini Hesegaiahanda bialu henedarubi ibugua Anduane Homogo mitangi bialu ibu andaneha howa binirubi Emoso igini Anduane Homogonaga mana latagi haga Aisaianaga mbuga ngagoha gilibu wialu mbuga mende Yuda Isaraelela Kini Henerunaga Te lo ngagoha gilibumaga ho winigo nga. <sup>33</sup> Hesegaia ibu homayagola tigua ibu tingini dindi hambene Kini Debibinaga aguanene hora heagoria hora hene. Yuda wali agalirumebi Yarusaleme wali agalirumebi dugu bialu Hesegaianaga mini yaraga halu hene. Hesegaia igini Manase ibu aba henegoria kini ha aribia howa Yuda dindiha haru hene.

### 33

*Manase Yuda dindiha kini henego ogo*  
(2 Kini 21.1-9)

<sup>1</sup> Manase ibunaga mali homberia (12) hayagola ibu kini pigane hene. Ani howa ibu kini heane Yarusaleme dindiha mali pira duriani duria (55) haru hene. <sup>2</sup> Manase ibugua mana bayale wiaru nabi mana ko ngubi bamba wali agali henerume biyagola Anduane Homogohanda uruni ti dindi ogoriani howa bo taliatagi halu Isaraele wali agaliru tihondo mo minigo mana odaruni biaga wiadagua dege Manase ibugua bialu hene. Mana ko uruni bialu hayadagome Anduane Homogonaga deni howa ko timbuniore bini. <sup>\*</sup> <sup>3</sup> Bamba ibu aba Hesegaiahanda damahondo bi pupu wiaga wiaruni bo giallo

<sup>\*</sup> 32:25: 2 Bit 24.18, 26.16, Iba 116.12    <sup>\*</sup> 32:26: 2 Kin 20.19, Yar 26.18-19    <sup>†</sup> 32:31: 2 Kin 20.8-11 de handabe

<sup>\*</sup> 33:2: Man 18.9, 2 Bit 28.3, Yar 15.4

wahai henego anda uruni ibugua lone mo tene howa biadai bigi bini. Mbirale dama mitangi bialu gime wabini mini Bala laga wiagonaga loma bo delaga daburubi bu hela bini. Ani buwa dama wali beda mitangi bialu gime wabini mini Asera wabu wialu bini. Urunidagua bialu howa ibugua yakundi bu karuhondobi bi pupu wialu haga hene. <sup>4</sup>Ani wialu howa ibugua dama mitangi bialu gime wabini uruninaga loma biniru bo delaga dabu Anduane Homogonaga anda heagoha bu helalu bini. Anigo bamba howa anda ogoninaga Anduane Homogohanda bi ogodagua lowini. Yarusalemeni anda timbuni o kagoni wali agalime ini hangu mitangi bialu lotu laga karu tinaga ka lowinigo nga.✧ <sup>5</sup>Anigo Manase ibugua Anduane Homogonaga anda pabe tamuhayagi hama timbuni kira wiagoria yakundi bu hearuhondo bi pupu wule lowa lomabu delaga dabu bu helaga bini. <sup>6</sup>Ibugua loma biniru bo delagadagua dindi uli mini Hinomoha ibu iginiru dabu ogoriani bo delene. Ani buwa ibugua agali homenenaga dininime ibu biamogo bilo olalu agali de gandeba handaga hearume ibu biamogo bilo olalu gamu gamu tara tara wiarubi bialu hene. Manase ibugua Anduane Homogonaga deni howa mana koorene ko dewaore bialu haabo heagola ogonime Anduane Homogo mo tandaga hayagola keba hene.

<sup>7</sup>Anidagua bialu Manase ibugua dama mitangi bialu mbirale gime wabiyago mo yu ibuwa Anduane Homogonaga anda biagoha mo wini. Bamba Anduane Homogohanda Debidi ibu iginini Solomonola libuhondo lamialu lenego ogo, Ina Isaraele hameigini homberia (12) karunaga dindi handai howa Yarusaleme tanoha anda o kagoni ininagaore helo dombeneha loma biaho helarogoni. Horo bibahendengi Isaraele wali agali bu kamiruni tigua ibalu i mitangi bialu ini hanguhondo lotu lalu halimulonaga helaro.✧ <sup>8</sup>Anigo inaga wali agali bu kamirume ina bi langerogo bia inaga biabe biahaga agali Mosese ibugua mana lowinigo talialu bialu ha birimiyagua nde ti dindi ogo ina bamba tinaga mamaliruhondo mo mirugoria howa bo taliatagi nahe ogoriani haabo halimulo helolebero, lalu Anduane Homogohanda lene. <sup>9</sup>Manase ibugua wali agali mana ko wiaru bia timbu helo haru pu tara halu hene. Mana ko bamba wali agali henerume biyagola Anduane Homogohanda uruni ti dindi ogoriani howa bo taliatagi halu Isaraele wali agaliru tihondo mo mini. Ala hene urunime mana ko biaga winidaru nira dege lowa Manase halu Yuda wali agali tigua ko timbuniore bialu hene.

### *Manase ibu mini beregedenego ogo*

<sup>10</sup>Kini Manasehanda mana ko urunidagua bialu heago hondowa Anduane Homogo ibugua ibunaga bi mana latagi haga bu hearuha howa bi layagola Manasebi Yuda wali agali tibi hale howa bia nabi hene. <sup>11</sup>Tigua ani nabiyagola Anduane Homogohanda Asiriali ami haru haga hearume ti Yuda dindi anda ibilalu Manase minilo henge mini. Tigua Manase minuwa ibunaga nguiha hugu helalu pu senime huba buwa Babilono dindi haru pene. <sup>12</sup>Manase tandaga timbuni nalu howa ibu mini beregedalu mini mo dindi howa ibugua Anduane Homogo ibunaga Ngode Datagaliwabehondo biamogo bibe lene. <sup>13</sup>Ani layagola Anduane Homogohanda Manase heneneore mini beregedayago hondowa Manase ibu kini hadai bilo Yarusaleme haru dai bini. Ani biyago hondowa Manase ibugua Anduane Homogo ibu Ngode Datagaliwabeore ka manda bialu bayale hene.✧

<sup>14</sup>Mani Manasehanda Yarusalemenaga ege pabe ni tagira ibiragohayagi bu helene arema bialu daliga bima irigi hene. Pabe arema binigo dindi ulini Gihononaga iba duguagagoha howa buyu pialu pabe panga haraba mini Wena Panga lagago bolangua halu hari mbira mini Obele bu mabu bialu mo tiga bini. Yuda dindinaga tano ege pabe bu mabu bini wiaru bibahendehe Manasehanda ami agali haru helo helaga bini.



<sup>15</sup> Anduane Homogonaga andaha dama mitangi bialu mbirale gime wabini helearubi dama wali beda mitangi bialu ira lu ibunime abale wabu helenegobi uruni Manase ibugua bo gialo wahene. Ani buwa ibugua damahondo mbirale lomabu delaga dabu Anduane Homogonaga anda tagiraha kaware binirubi Yarusalemeha mbira mbirahayagi binirubi bo gialowa Yarusaleme tagirahayagi wahene. <sup>16</sup> Ani buwa Manasehanda Anduane Homogonaga lomabu delaga dabu arema bialu Anduane Homogola ho gimbu bulenenaga bo lomabu delolenebi ibuhondo kai lolenaga loma bialu bo delolenebi migi bini. Ibugua Yuda wali agali bibahendehondo lalu, Tigua Anduane Homogo Isaraele wali agalinaga Ngode Datagaliwabe mitangi bialu ibuni hanguhondo lotu lalu halimu, lene. <sup>17</sup> Ani layagola wali agalime hale howa ani bialu hene. Tigua loma maru Anduane Homogonaga andaha ndo tini daluha howa tininaga lomabu delaga dabu winiruha loma bialu bo delaga bialu Anduane Homogonaga dege bo delaga bini.

*Manase homenego ogo*  
(2 Kini 21.17-18)

<sup>18</sup> Kini Manasehanda biabe maru bialu henedarubi ibunaga Ngode Datagaliwabhondo bi lenegobi Anduane Homogonaga mana latagi haga henerume Anduane Homogo Isaraele wali agalirunaga Ngode Datagaliwabe minini howa ibuhondo bi lenerubi mbuga mbira mini Isaraele Kini Henerunaga Te lo ngagoha gilibumaga ho winigo nga. <sup>19</sup> Te maru Manase ibu Ngode Datagaliwabhondo bi lenegobi Ngode Datagaliwabhanda ladai binigobi Manase mini beregeda nabi heangi mana ko damene ibugua bialu henedarubi dama dewahondo bi pupu wule anda binirubi dama wali mbira mini Aseranaga ira luni helaga binirubi bibahendeore mbuga mbira mini Anduane Homogonaga Mana Latagi Haga Agali Henerunaga Te lo ngagoha gilibu winigo nga. <sup>20</sup> Manase homayagola ibu kini anda pabe bu yaanda hene wiagoha hora hene. Ani hora hayagola ibu igini mini Amono ibu aba henegoria kini ha aribia hene.

*Amono ibu Yuda dindiha kini henego ogo*  
(2 Kini 21.19-26)

<sup>21</sup> Amono ibu aiyahanda taba heneneyangi howa hama ibinigo mali pira kirani kira (22) peagola ibu mali kira hanguni Yarusalemeni kini hene. <sup>22</sup> Amono ibugua mana ko timbuni ibu aba Manasehanda Anduane Homogonaga deni bialu hene wiadagua dege bialu hene. Ibugua mana ko ngubi ibu abahanda biaga wiadagua bialubi mbirale dama mitangi bialu gime wabini wiaruhondo ibu abahanda bi pupu wialu henedagua dege bialu hene. <sup>23</sup> Ibugua ibu abahanda mini beregedalu mini mo dindi howa Anduane Homogohondo mini mbiraore wiyadagua nawi hene. Ani nawiyagome ibu koore bia tago halu ko ala biniru bolangua hene.

<sup>24</sup> Horo mbirungi Amononaga agali haguane bu hearu tigua Amono homelo bo wahamiya lalu henge hai bialu hene. Ani bialu howa mani Amono ibu kini andaga berearia anda puwa tigua ibu homelo bo wahene. <sup>25</sup> Ani biyagola Yudali hearume agali haguane Amono homelo bo wahaga biaru bibahende minalu tinibi homelo bo wahai howa tigua Amono igini Yosaia ibu aba henegoria Yuda wali agalinaga kini ha aribia hene.

## 34

*Yosaia ibu Yuda dindiha kini henego ogo*  
(2 Kini 22.1-2)

<sup>1</sup> Yosaia ibunaga mali halira hayagola ibu Yuda dindiha kini pigane howa ibugua mali pira tebirani mbira (31) Yarusalemeni Yuda wali agali haru hene. <sup>2</sup> Yosaia ibugua Anduane Homogonaga deni howa mana bayale hangu bialu haabo haga hene. Ibugua

✧ 34:1: Yar 3.6

mana bayale tigabi bamba ibu mamali Kini Debidihanda bialu hagadagua bialu haabo hene. Ani bialu ibugua Anduane Homogonaga bi mana hale halu hongo howa talialu bialu haabo haga hene.

*Dama mitangi bialu mbirale gime wabini wiaru Yosaia ibugua mo wahai henego ogo*

<sup>3</sup> Yosaia ibu ibunaga mali halini layagola kini pigane hene. Ibu igiri emene ale dege heane mali nguini (15) hayagola ibugua ibu mamali Kini Debidinaga Ngode Datagaliwabe mitangi bialu lotu lalu hene. Ani bialu ibuni kini howa mali homberia (12) hayagola ibugua agali biabe biaga hearuhondo lamialu lalu, Tigua Yuda dindi bibahendehabi Yarusaleme bibahendehabi ibaga biai halu mbirale dama mitangi bialu gime wabini ngarubi bi pupu wulenaga anda bu karubi dama wali beda mitangi buwa mbirale gime wabini mini Aseranaga ira luni karubi maru tara tara bi pupu wule aeaneme wabinibi irame wabinibi ngaru bibahende bo gialo wahai halimu, lene.\* <sup>4</sup> Ibugua bia layadagua agali biabe biaga uruni tigua bi pupu wule gime wabini mini Balanaga lomabu delaga dabu hearubi ibunaga ira hagua ngabilo mini inisenesi lomabu delaga dabu kawareni bu helearubi bo gialo wahai hene. Tigua dama wali beda lo mitangi bialu mini Aseranaga ira luni wabu wiarubi dama mitangi bialu bi pupu wiaga maru wiarubi bibahendeore bo gingirulobaga bialu be abalu helene. Ani biai halu be abalu uruni mo yalu tagira puwa wali agali bamba mbirale urunihondo bi pupu wialu haga henedaru ti hora hene homalidagoriani bape hene.\* <sup>5</sup> Ani bialu ibugua dama mitangi bialu bi pupu wiaga uruninaga loma binigo mo miaga homenerunaga kuni wiaru mo yu puwa tininaga lomabu delaga dabu hayadagoriani delaga bini. Ibugua mbirale uruni biai hayagola Yuda dindibi Yarusalemebi Ngode Datagaliwabe deni dodo nahe lone bayale wini.\* <sup>6</sup> Kini Yosaia ibugua ani biyadagua dege tano maru Manase hameigini dindihabi Eberaimi hameigini dindihabi Simeono hameigini dindihabi piyai halu uyuraore Nabadali hameigini dindihabi dama mitangi bialu bi pupu wiaga dindi waitigime bo giala togolene wiaruha lomabu delaga dabu hearu bo gialo wahaiore hene. <sup>7</sup> Ibugua Isaraele dindi uruni bibahendeha ibaga biai halu damanaga nogo mbiraleru bo lomabu delaga dabu hearubi dama wali beda mitangi buwa bi pupu wiaga Aseranaga ira luni wabu wiarubi dama mitangi bialu gime wabini maru wiarubi bibahende bo gingirulobaga bialu be abalu helene. Ani bialu ira hagua ngabilo inisenesi lomabu delaga dabu hearubi ani dege biai hene. Ibugua biabe uruni biai halu Yarusaleme dai bini.

*Anduane Homogonaga bi mana lowinigo gilibuwi mbuga mbira wiarua handa walia henego ogo*

*(2 Kini 22.3-20)*

<sup>8</sup> Yosaia ibu kini heane dege mali pira mbirani halira (18) peagola dama mitangi bialu bi pupu wiaga wiaru bibahende bo gialo wahai howa Yuda dindibi Anduane Homogonaga andabi Anduane Homogonaga deni dodo nahe lone bayale wiadai bilene. Ani bialu ibugua Asalia igini Sabanabi Yarusaleme hondo haga Maseabi agali beba gili bia dagala biaga Yoahasa igini Yoabi tihondo lalu, Anduane Homogonaga anda arema bule pudaba, lene. <sup>9</sup> Libaiali maru Anduane Homogonaga anda panga mamage haga hearu tigua wali agalime Manase hameigini howabi Eberaimi hameigini howabi Isaraele dindi howabi Yuda dindi howabi Beniyamini hameigini dindi howabi Yarusaleme howabi muni migi bini Anduane Homogonaga andaha mo winidaruni agali tebira biarume Loma Binigo Mo Miaga Haguane Timbuni Hiligaia heagohondo mo mini. <sup>10</sup> Ani miyagola Hiligaia ibugua Anduane Homogonaga anda mo ko hene wiaru agali maru lone arema biyaru yolo bilo agali biabe handayaho haga tebira biarua mo miya. <sup>11</sup> Tigua muni ogonime irame anda biabe biaga hearubi ege toleme anda biabe

\* 34:3: 2 Bit 15.2    \* 34:4: 2 Kin 21.3, 2 Bit 33.3    \* 34:5: 1 Kin 13.2

biaga hearubi ti yolo bialu irarubi ege tolerubi Yudanaga kini ala henerume Anduane Homogonaga anda ogoni nagalone hayagola ko henego arema bilonaga yolo milo muni mini.

<sup>12</sup> Agali anda bialu haga hearu ti mini tigabiore howa biabe bayale bialu hene. Biabe uruni haru helo Libai agali maria dabene Merari hameigini howa Yahada Obadaiala dabaluhada hameigini howa Segaraia Mesulamala dabene. Libai agali uruni tigua iba gana haru helo ngida tara tarabi pilipe tabagebi mugubeyi hene. <sup>13</sup> Libai agali marume anda ogoni arema bulenaga ege tole irabi yalu ibilo haru haga halu marume biabe uruninaga bebani gili bigi bialu marume anda harabani mamage haga hene.

<sup>14</sup> Loma Binigo Mo Miaga Haguane Timbuni henego mini Hiligaia ibu Anduane Homogonaga anda hobane muni do hayagoha howa muni mialu hearia ibugua Anduane Homogonaga bi mana Mosese heangi lowinigonaga mbuga mbira wiaria handa walia hene. Handa walia howa ibugua beba gilibia dagala biaga agali Sabana hearia puwa lalu, <sup>15</sup> Anduane Homogonaga anda biagoha mbuga mbira bi mana Mosese heangi lowinigo wiaria handa walia harugo o ngero, lalu mini. <sup>16</sup> Ani miyagola Sabanahanda mbuga ogoni kini hearia yalu puwa ibuhondo lalu, Ina bidaba laridagua birimagoni. <sup>17</sup> Inaga biabe biaga agali biaruhanda tigua Anduane Homogonaga andaha muni wiaruhanda bibahende agali anda ayu arema bialu karunaga handayaho haga karuhondo mo mialu biabe bayale bialu ka, lalu lamini. <sup>18</sup> Ani lowa Sabana ibugua laabo halu lalu, Kini-o Loma Binigo Mo Miaga Haguane Timbuni Hiligaia ibugua mbuga ogo i ngiya, lowa ibugua kini hale helo mbugadagoniha bi lo wiaruhanda daga lene.

<sup>19</sup> Ani daga layago hale howa Kini ibugua ibunaga bu miniha genda timbuni halu ibuninaga aga bu henego mini lerelene. <sup>20</sup> Ani buwa kini ibugua Hiligaiabi Sabana igini Ahigamabi Migaia igini Abadonobi kininaga beba gili bia daga la biaga Sabanabi kininaga biabe biahaga Asaiabi ti olalu ibidaba lene. <sup>21</sup> Ti ibu ngoaiho heagola ibugua tihondo lalu, Ina mbuga ayu o yidogome Anduane Homogohanda mana iname bialu holene ogobi nga lalu lowiniyane handa walia kogoni. Anigo inanaga mamali henyaru tigua mana uruni talialu bia nabi heneyagome Anduane Homogohanda miniha tandaga timbuni howa inahondo keba ho henego ka. Anigo ayu mbuga ogo handa walia harimago Anduane Homogohanda ibi Isaraele Yudala dindiha wali agali bibahende karubi iname agua bialu holomaya hamelo kabe manda bule ibuhondo hale hole pudaba, lene.

<sup>22</sup> Kini Yosaihandanda bi ogoni layagola hale howa Hiligaiabi agali maru biaruhanda tigua Yarusaleme tanoha anda gahenge mbira binigoha abale puwa Anduane Homogonaga bi mana latagi haga wali mbira mini Huluda berenego berearia pene. Wali ogoni ibu agalini Salumu henego ibu Harasa aguane Tigiba igini howa ibugua loma binigo mo miaga hearunaga aga Anduane Homogonaga andaha howa biaga tamu hobane heagoha wiaruhanda handayaho haga hene. Agali ibiyarume Huludahondo bibahende biyaruhanda te lamiai hene. <sup>23</sup> Bi layaru hale howa Huluda ibugua tihondo ladai bialu lalu, Tigua ayu ogoni kini bedagoria dai buwa <sup>24</sup> Anduane Homogo ibugua bi ogodagua laya lalu, I Anduane Homogo kogome inaga bi mana mbuga ogoniha gilibu ngaru kini hale helo daga layadagonidagua heneneore Yarusaleme bo gialabagabu waholebero. Wali agali Yarusalemeha kamiruhanda bibahende ko birimirunaga pani mulebero, laya. <sup>25</sup> Wali agali tigua i erembira ngialu puwa dama mitangi bialu mbirale gime wabini wiaruhanda bi pupu wialu mbirale tara tara lomabu mini. Tigua mana ogonibi biyagome ina tihondo keba ho kogoni. Keba ogonime ina Yarusaleme wali agalihonda mo tandaga harago ereba naholebira. <sup>26</sup> Anduane Homogo Isaraele wali agalinaga Ngode Datagaliwabe i kogome tinaga kini biagohonda bi ogodagua laro. Hiligaiahanda ihonda mbuga ogoniha bi gilibu ngaru dagalo ngiyago hale harigoni. <sup>27</sup> Ani hale harigonaga ina Yarusaleme bo gialabagabu wahowa wali agali tano ogoniha karu tihondobi buleore manda bu ngo

laruyago hale howa í mini beregedalu inaga deni íni mo dindiha halu dugu timbuni bialu inaga aga lerelalu ihondo bi larigo hale haru. <sup>28</sup> Anigo ina í kengi Yarusaleme mo ko holene ogoni tagira naibilarogola í bayale dege holebere. Mani í homaregola tigua í homedaha mo ko holene ogoni Yarusalemeha ibilolebero, lalu Anduane Homogohanda ani laya, lalu wali biagome lene.

Anduane Homogonaga bi mana latagi haga wali Huluda ibugua mbiwia halu bi ogoni agali biaru tihondo lamiya handala tigua kini hearia lamule dai bini.

*Kini Yosaiahanda Anduane Homogohondo habo nalolene bi lowinigo ogo  
(2 Kini 23.1-20)*

<sup>29</sup> Kini Yosaia ibugua agali haguane Yarusalemeha hearubi Yuda dindiha hearubi bibahende íbu ngoai hadaba lene. <sup>30</sup> Íbu ngoai hayagola kini ibugua loma binigo mo miaga hearubi Libaiali hearubi wali agali homogo yagibanobi bibahendeore Anduane Homogonaga andaha mo ngoai hene. Ani íbu ngoai ho heagola ibugua mbuga habo nalolene bi lowinigo Anduane Homogonaga andaha wiaria handa walia hene biago mo yuwa bi ogoniha gilibu wiaru wali agali ti hale hai helo daga latagi hene. <sup>31</sup> Ani daga latagi halu kini ibu Anduane Homogonaga andaha anda gene luni heagoria heyu howa habo nalolene bi mbira Anduane Homogohondo lowialu lalu, Ina Anduane Homogonaga andaneha howa inaga minimebi gubalinimebi Anduane Homogonaga mbuga ogoniha bi gilibu wini ngaruni talialu biaiore holebero, lalu lowini. <sup>32</sup> Ani lowa ibugua Beniyamini hameiginirubi Yarusaleme wali agalirubi tigua habo nalolene bi ogoni talima pelo tihondo bi hongo howa lene. Ani layagola tiguabi nde, Habo nalolene bi mbuga ogoniha gilibu ngaru talialu biaiore holeberama, lalu lowini. Ani lowiyadagua Yarusaleme wali agalirume ti mamalirunaga Ngode Datagaliwabe andaneha hene. <sup>33</sup> Kini Yosaiahanda Isaraele dindi bibahendeha dama mitangi bialu mbirale gime wabu wini wiaru bo gialo wahai hene. Kini Yosaia ibu nahome heangi wali agalime Anduane Homogo ti mamalirunaga Ngode Datagaliwabe talima pelo hongo howa haru hene.

## 35

*Bolangua Halu Penegonaga Horo tomo nenego ogo  
(2 Kini 23.21-23)*

<sup>1</sup> Kini Yosaia ibugua Anduane Homogonaga mini yaraga halu Bolangua Halu Penegonaga Horo tomo Yarusalemeha nole manda bini. Ege mbiranaga horo pira mbirani maria (14) haragola nogo sibi igini dewa loma bialu bo miaga wini. <sup>2</sup> Loma binigo mo miagaru ti Anduane Homogonaga andaha biabe mbira mbira bayuwaore bilo Yosaiahanda tahaga bini. <sup>3</sup> Ani buwa ibugua Libaiali tini Anduane Homogohondo loma bia howa Isaraele wali agalinaga lawai haga heneru tihondo lalu, Tigua Anduane Homogonaga Habo Nalolene Bi lo winigonaga Mbogoyi payani mo yalu ibaga bialu haramilidagua lone nabuleberemi. Mbogoyi ogoni Anduane Homogonaga anda Debidi igini Solomonohanda binigoha ngelalimu. Ani ngelowa tigua Anduane Homogo tinaga Ngode Datagaliwabenangabi ibunaga Isaraele wali agalirunagabi biabe biahaga halimu. <sup>4</sup> Anduane Homogonaga andaha hameigini hangu hangu howa biabe mbira mbira bulene Isaraealinaga Kini Debidibi ibu igini Kini Solomonobi libugua ta howa gilibu winidagua tigua bule mandamanda bialu halimu. <sup>5</sup> Ani buwa wali agali Anduane Homogo mitangi bialu lotu lole íbu kagola tigua ti biamogo bigi bulenaga mandamanda bialu halimu. <sup>6</sup> Tigua Anduane Homogonaga deni howa dodo nahe halimulo mana bulene ngadagua bialu howa wali agali urunime nogo sibi iginiru memerubi haru ibirago Bolangua Halu Penegonaga Horo nogo biaru Anduane Homogohanda Mosese heangi bi mana lowini ngadagua bo mulene manda bilimu, lalu lamini.

✧ 35:4: 2 Bit 8.14

<sup>7</sup> Kini Yosaiia ibugua ibunaga nogo sibirubi sibi iginirubi meme iginirubi daosini dege pira tebira (30,000) bulumaga iginini wangabe daosani tebirabi (3,000) Bolangua Halu Penegonaga Horo ogoni wali agalirume bo lomabu mialu nelo mini. <sup>8</sup> Yosaiianaga agali haguane hearu tigua loma binigo mo miaga hearubi Libai wali agali hearubi tihondo nogo tara tara bo lomabu mialu nelo mini. Anduane Homogonaga anda handayaho haga Loma Binigo Mo Miaga Haguane Timbuni Hiligaiabi Segaraiabi Yahielebi tigua loma binigo mo miaga hearuhondo nogo sibi memerunaga iginiru daosini kirani handari waragara (2,600) mialu bulumaga iginini wangabe handari tebira (300) bo milo mini. <sup>9</sup> Libai agalinaga haguane Konanaia Semaia ibu hamene Nedanele imaru Hasabaia Yaiele Yosabada imaru tigua Libai wali agaliruhondo nogo sibi memerunaga iginini daosini duria (5,000) nogo bulumaga wangabe handari duria (500) Bolangua Halu Penegonaga Horo ogoninaga bo mule mini.

<sup>10</sup> Bolangua Halu Penegonaga Horo mandamanda biai hayagola loma binigo mo miagarubi Libai wali agali tigua Kini Yosaiia handa tihondo layadagua tinaga biabe bulene winigo bule hondo hai hene. <sup>11</sup> Libai agalirume nogo sibi memerunaga iginini balu dongone laga lalu howa darama hambuwa loma binigo mo miaga hearuhondo darama ogoni miyagola tigua bo lomabu delaga dabuni tandaloba haga bialu hene. <sup>12</sup> Ani buwa tigua nogo sibi memeru bulumagarubi podagadagua podo wigi bialu wali agali bibahende hameigini wabuni hearuhondo talebu migi bini. Ani buwa tigua Mosese heangi bi mana lowinigo ngadagua bialu loma irame dai helonaga dabuni delaga bigi bialu hene. <sup>13</sup> Libai agali tigua mana lowinigo ngadagua Bolangua Halu Penegonaga Horongi nogo sibi memeru hiruwa nogo bulumaga mbirini todobene be tara taraha dawaga bini. Ani dawaga buwa wali agalime nelo abale ta hagahaga bini.✧ <sup>14</sup> Ani biai howa Libai agali biarume tininaga tomobi loma binigo mo miaga Arono aguanene hearunaga tomobi dawa ta haga bini. Tigua ani binigo irane loma binigo mo miaga biarume nogo sibi memeru bo loma bialu irame dai helo dabuni delaga bialubi nogo habane delai haga bialubi haabo hayagome tininaga tomo dawalene henge nawiyagola Libai wali biarume ti biamogo bialu ani bini.

<sup>15</sup> Ala Kini Debidibi Asababi Hemanabi Anduane Homogonaga mana kinihondo latagi haga Yadudunu ibubi tigua iba gana lolebi ngida bolebi biabe uruni Anduane Homogonaga andaha bule mandamanda bu wini. Ani mandabu winidagua Asabanaga aguanene ti ngida balu iba gana laga hearume Anduane Homogonaga andaha biabe ogoni bulene wiaru bule hondo hene. Libai agali maru Anduane Homogonaga anda haraba mamage haga hearu tiguabi biabe bulene wiaru wanahe tibi Bolangua Halu Penegonaga Horo nolene Libai agali biarume dawa ta haga bini.✧

<sup>16</sup> Kini Yosaiia handa bilimu layadagua horo ogoningi wali agali bibahendeme Anduane Homogonaga mitangi bialu ibuhondo nogo sibi meme bulumagarubi bo loma bialu irani dai helo dabuni delai haga bialu Bolangua Halu Penegonaga Horo biabe bulene ti bayuwaore biai hene. <sup>17</sup> Isaraele wali agali bibahende hearume horo karu Bolangua Halu Penegonaga Horobi Mberedi Yidi Nahe Hirinigonaga Horobi Anduane Homogonaga mitangi bialu nalu hene.✧ <sup>18</sup> Bolangua Halu Penegonaga Horo ogoningi binidagoni bambaore Anduane Homogonaga mana latagi haga agali mini Samuele ibu homoyangi howa bima ibalu áyu turu halu henedagua nabi hene. Kini Yosaiia handabi loma binigo mo miagabi Libai agalibi Yuda wali agalibi Isaraele wali agalibi Yarusaleme wali agalibi tomo ogoningi nalu henedagua Isaraele alibi Yuda libi tinaga kini ala henerume nane lu haabo hene. <sup>19</sup> Anigo Yosaiia ibu kini heane mali pira mbirani halini (18) hayagola Bolangua Halu Penegonaga Horo mitangi bialu tomo ogoni dawa nene.

*Kini Yosaiia homenego ogo*  
(2 Kini 23.28-30)



<sup>20</sup> Kini Yosaihandanda Anduane Homogonaga andaha mana bulene wiaru mo tiga biyagola Iyibinaga Kini Negohanda ibunaga ami haru halu Asiria baba wai bule Iba Yuberedisi peagoria tano mini Kagemisini pene. Ani pu ka layago hale howa Yosai ibunaga wai bule pialu hearia <sup>21</sup> Negohanda bi lawia halu lalu, Yudanaga Kini-o ina ɪla wai bule ndo ibirugo Ngode Datagaliwabeanda ini waitigi baba abale wai bule pu layagola pole ko. Ina ɪla wai biriyagua Ngode Datagaliwabe ibu ɪ heba kago ibugua ɪ pani ngulebirago wai nabibiya, lalu bi lawia hene. <sup>22</sup> Ani lawia hayago hale halu Yosai ibunaga donge howa wai buleorelo manda bini. Ani manda buwa ibugua Iyibi amialime ibudalo manda nabilo labolabo tara karulalu yu dindi Megido wiagoria wai bule pene.

<sup>23</sup> Wai bialu hearia Iyibi ami agali biarume Kini Yosai timume bayagola ibugua ibunaga biabe biahaga agali biaruhondo lalu, ɪ bayago ai ɪ abale yalu pudaba, lene. <sup>24</sup> Ani layago hale howa tigua Yosai ibunaga wai biagane karisini howa ibu mo yaraga halu karisi mendeni ngelalu Yarusaleme yalu dai bialu hearia homaya. Homayagola tigua ibu mamalinaga homali wiagoria hora howa Yuda wali agalibi Yarusaleme wali agalirubi bibahende dugu bialu hene.

<sup>25</sup> Anduane Homogonaga mana latagi haga agali Yaremaiahanda Yosai mitangi bialu dara howa iba gana mbira gilibu wini. Ani gilibu winidangi howa wali agali hama ibalu áyu Isaraele dindini karumebi Yosai mitangi bialu iba gana ogoni lalu haabo haga. Mbuga mbira mini Yarusalemenaga Dugu gilibu winigoha dara howa iba gana ogoni gilibu winigo nga.\*

<sup>26</sup> Biabe maru Kini Yosaihandanda bialu henedarubi ibu Anduane Homogo mitangi bialu ibunaga mini yaraga halu lotu laabo henegobi ibu Anduane Homogonaga bi mana gilibu winigo ngadagua bayale bialu henegobi <sup>27</sup> ibu kini pigane henedangi howa bima ibalu henedarubi bibahendeore mbuga mbira mini Isaraele Yudala Kini henerunaga Bi Te laga winigoha gilibu winigo nga.

## 36

### *Yoahasa Yuda dindiha kini henego ogo* (2 Kini 23.30-35)

<sup>1</sup> Yosai homayagola Yuda wali agali hearume ibu igini Yoahasa kini ho aribia helo ibunaga hagianeni weli odo wia hayagola ibu Yarusalemeni kini hene. <sup>2</sup> Yoahasa ibunaga mali pira kirani tebira (23) peagola kini pigane howa ibu Yarusalemeni ege tebira hangu haru hene. <sup>3</sup> Ani bialu heagola Iyibinaga Kini Negohanda ibuwa Kini Yoahasa bo dugualu Yuda wali agalime dagisi muni siliba genda magi kilogarama daosini tebirani handari maria (3,400) wialu ngolo genda magi kilogarama pira tebirani mariabi (34) wilimu lene. <sup>4</sup> Ani buwa Kini Nego ibugua Yoahasa hamene Eliagimi dabalul Yuda dindiha kini helo helene. Ani helowa Kini Nego ibugua Eliagiminaga mini mende wia aribia halu Yahoigimi wini. Ani bialu Nego ibugua Yoahasa Iyibi dindiha garabaya haru pene.\*

### *Yahoigimi Yuda dindiha kini henego ogo* (2 Kini 23.36-4.7)

<sup>5</sup> Yahoigimi ibunaga mali pira kirani duria (25) peagola Yuda dindiha kini pigane howa ibugua mali bearia (11) Yarusalemeni haru hene. Kini Yahoigimihanda Anduane Homogonaga deni mana ko ngubi wiaru bialu haabo haga hene.\*

<sup>6</sup> Yahoigimi ibu Yuda dindiha kini heangi Babilononaga Kini Nebugadenesa ibugua ibunaga ami hearu haru ibuwa Yuda dindiha wai bialu Kini Yahoigimi minuwa pu senime huba bialu Babilono haru pene.\* <sup>7</sup> Horo uruningi dege Nebugadenesahanda

\* **35:25:** Áyu Isaraele dindini karumebi ... bi ogoni gilibu nga ina kamangi ndo ala agali bite ogoni gili binidago ibu heangi mitangi bialu gili bini. ✨ **36:4:** Yar 22.11-12 ✨ **36:5:** Yar 22.18-19, 26.1-6, 35.1-19 ✨ **36:6:** Yar 25.1-38, 36.1-32, 45.1-5, Dan 1.1-2

Anduane Homogonaga andaha puwa mbirale tara tara muni dewame miagane wiaru mo yalu Babilono dindi ibu andagaha wule yalu pene. <sup>8</sup> Kini Yahoiagimihanda biabe maru binidarubi mana ko ngubiore bialu henedarubi bibahende mbuga mbira Isaraele Yudala Kini Henerunaga Bite laga winigo gilibumaga ho winigo nga. Ibu igini mbira mini Yahoiagini henego ibu aba kini henegoria ha aribia hene.

*Yahoiagini Yuda dindiha kini henego ogo*  
(2 Kini 24.8-17)

<sup>9</sup> Yahoiagini ibunaga mali pira mbirani halira (18) peagola Yarusalemeni howa ege tebirani horo pira hanguni kini hene. Yahoiagini ibugua Anduane Homogonaga deni howa mana ko wiaru mo tene howa bialu haga hene. <sup>10</sup> Horo uruningi Kini Nebugadenesa ibugua ibunaga ami agaliruhondo lalu, Yahoiagini mini yalu Anduane Homogonaga andaha mbirale bayaleore ngarubi mo yalu Babilono ibalimu, lene. Ani buwa Nebugadenesahanda Yahoiagini aba hamene Sedegaia henego ogoni ibu Yuda dindihabi Yarusalemehabi kini helo dabo helene.✧

*Babilono amime wai bialu Yarusaleme karulene go*  
(2 Kini 24.18-25.21, Yaremaia 52.1-11)

<sup>11</sup> Sedegaia ibunaga mali pira kirani mbira (21) peagola ibugua Yudanaga kini howa Yarusalemeni mali bearia (11) hanguni kini hene.✧ <sup>12</sup> Ani howa Kini Sedegaiahanda Anduane Homogonaga deni mana ko wiaru bialu haga hene. Anduane Homogonaga mana latagi haga Yaremaiahanda bi mana layago hale howa ibuni mo dindi holene manda nabioore hene. <sup>13</sup> Kini Sedegaia ibugua Babilono kini heagonaga andaneha habe manga howa ibu habagi halu ibuni hangu hene. Abale Nebugadenesahanda Sedegaiahondo lalu, Ina Ngode Datagaliwabenaga minini howa ina bia larodagua biaiore holebero larene, lalu hongo howa layagola Sedegaia ibugua, E ani bulebero, lalu ladai bini. Sedegaia ibu mini giambeore howa mini beregedalu Anduane Homogo Israaelenaga Ngode Datagaliwabe karia dai bule hame nale hene.✧ <sup>14</sup> Loma binigo mo miaga hearubi Yuda wali agalinaga haguane hearubi tigua Anduane Homogo erembira mialu hameigini dindi tara tarani hearume dama mana koorene ko bialu mbirale gime wabiniruhondo bi pupu wiagadagua wialu Anduane Homogonaga anda loma biahene heago mo mebia hene. <sup>15</sup> Anigo Anduane Homogo Isaraele wali agali bibahendenaga mamali Ngode Datagaliwabe kagome ibunaga wali agalibi ibunaga andabi mo ko holene hame nale howa ibugua ibunaga mana latagi haga dewame bi hongo howa lamilo ibilaga bini. <sup>16</sup> Ibunaga bi mana latagi haga mana uruni hale hayagola wali agalime hale howa mo nagalone halu mege biaabo hayagola Anduane Homogo ibu keba timbunioore halu ti pani mulene manda bini.

<sup>17</sup> Ani manda buwa Anduane Homogohanda Babilononaga kini baba wai bilo ibi-layagola Nebugadenesa ibugua Yuda agali daliahe hearu balu Anduane Homogonaga andaha ha do hearubi bo wahaga bini. Nebugadenesahanda dara nahe howa wali agali wahebi waneiginirubi walibi agalibi ta nabi hongoharubi waragoberubi bibahendeore bo wahaga bilo Ngode Datagaliwabehanda kini biagonaga giha ya hai hene.✧

<sup>18</sup> Nebugadenesa ibugua Anduane Homogonaga andaha lotu lolenaga mbirale wiarubi ngolo silibaru do hagane hobaneha wiarubi kininaga andaha ngolo siliba wiarubi agali haguane runaga andaha wiarubi bibahendeore mo yai halu Babilono dindiha yalu piai hene. <sup>19</sup> Ani buwa ibugua Anduane Homogonaga anda heago delalu Yudanaga kini andagabi anda bayale hearubi bibahendeore bo heda hai halu Yarusaleme tanobi ege pabebi bo giallo delai hene.✧ <sup>20</sup> Ani giallo delai howa ibugua wali agali maru yu wahene hearu bibahendeore garabaya bu yalu Babilono piai hene. Tigua Babilononi howa

✧ 36:10: Yar 22.24-30, 24.1-10, 29.1-2, 37.1, Ese 17.12-13 ✧ 36:11: Yar 27.1-22, 28.1-17 ✧ 36:13: Ese 17.15

✧ 36:17: Yar 21.1-10, 34.1-5 ✧ 36:19: 1 Kin 9.8

Nebugadenesanagabi ibu aguanerunagabi garabaya biabe ale biaabo halu hearia mani Pesianaga kini ibugua Babilono baba wai bialu wayali howa ti golope hene. <sup>21</sup> Bamba Yuda wali agalime mali waragariani biabe bialu kanengi tinaga dindi bayale wilo biabe nabi halo holene mana lo wiadagua nabi ti biabe biaabo haga hene. Ani nabinigonaga pani ti Babilono dindiha mali pira karia (70) garabaya heagola dindi ogoni dabulu wiaabo hene. Ani binidagoni Anduane Homogohanda ala Yaremaiaha howa mbiwia hayago lola hai hene.\*☆

*Kini Sairusihanda Yuda wali agali tini dindi dai bidaba lenego ogo*

*(Esera 1.1-4)*

<sup>22</sup> Pesianaga Kini Sairusi ibu kini heane mali mbira peagola Anduane Homogo ibugua ibunaga mana latagi haga Yaremaiaha howa mbiwia henego lola hene. Ibugua Kini Sairusi mo mitangi bia howa bi ogobi gili bibe lalu mo walia hayagola wali agali dindi bibahende ibugua hondo heagoria hongo howa lo pela layadagua lo pelene. Ani layago ibugua bi lo pelenedaru uru.

<sup>23</sup> Pesianaga Kini Sairusihanda wali agali tigua bilimulo bi mbira laro. Anduane Homogo dahuliya andaganaga Ngode Datagaliwabehanda ina dindi bibahende handa gimbu buliya ihondo hongo ngiya. Ani bialu ibugua ibunaga anda mbira Yuda dindiha Yarusalemeni bibe laya. Ngode Datagaliwabenaga wali agali kamiru ti bibahende Yarusaleme dai bilimulo golope haro. Anigo Anduane Homogo tinaga Ngode Datagaliwabe ibu ti heba mandagi helo hameledo, lalu gilibu pelene.\*☆

---

\* **36:21:** Loma Binigo Mo Miaganaga Biabe 25.1-7 de handabe. ☆ **36:21:** Yar 25.11, 29.10 ☆ **36:23:** Ais 44.28

## Esera

### Mbuga ogoha gilibu ngarunaga nemandi ogo

Habo Nalolene Bi Bamba lo winigo gili binirume mbuga Bi Te Mendegobi Eserabi mbuga mbiraoreha ngelene. Bi Te mendego bi lo gombedaha hayagoria Esera ibugua lo yamialu lo gombedaha hayago Nehemaia ibugua lo yamiradagua bu wini.

#### **Esera ibugua te lo ngaroni irane tebira uru nga.**

Mbira

Pesia dindi handame haga Kini Sairusi ibugua Babilono howa Yarusaleme dindini dai bidaba layagola Yu wali agali tini dai binigo te lo nga.

Mende

Anduane Homogonaga anda bia dai buwa Ngode Datagaliwabehondo loma bia howa ibunaga mini Yarusaleme dindini howa yaraga haga winiyadagua yaraga halu hene.

Tebone

Mali dewaore peagola Esera ibugua Ngode Datagaliwabe mana lo ngago mandabiore howa handame haga kinime dabo helenego ibugua Yu wali agali maru haru halu Yarusaleme dai bini. Ani buwa tininaga mana manda bialu Ngode Datagaliwabenaga mana lowinigo bayuwa manda bilo lawai haga hene.

#### **Bulu бага бува кuni gilibu ngago (1.1-2.70)**

Babilononi garabaya howa pigane Yarusaleme dai binigo te lo nga. 3.1-6.22

Anduane Homogonaga anda biadai bialu Ngode Datagaliwabehondo lomabia hene. 7.1-10.44

Esera ibu wali agali maru baba garabaya howa dai bini.

*Kini Sairusihanda, Yuda wali agali tí Isaraele dindi dai bidaba, lenego ogo*

<sup>1</sup> Pesianaga handame haga Kini Sairusi ibu hearia mali mbira peagola Anduane Homogo ibugua bulebero lalu Ngode Datagaliwabe mana latagi haga Yaremaiaha howa lo winiyadagua lola hene. Anduane Homogo ibugua Kini Sairusinaga miniha howa bi ogobi gili bibe lalu mo walia hayago wali agali dindi bibahende kini ibugua hondo heagoria hongo howa lo pela layadagua lo pelene. Ani layagola ibugua bi lo pelene uru.✧

<sup>2</sup> Pesianaga handame haga Kini Sairusihanda wali agali tígua bilimulo bi mbira laro. Anduane Homogo dahuliya andaganaga Ngode Datagaliwabe ibugua ina dindi bibahende handa gimbu buliya ihondo hongo ngiya. Ani bialu ibugua ihondo anda mbira Yuda dindiha Yarusalemeni bibe laya.✧ <sup>3</sup> Ngode Datagaliwabe ibuninaga wali agali tí heba mandagi helo hame ledó. Tígua Yarusaleme dindini dai buwa Anduane Homogo Isaraelenaga Ngode Datagaliwabe kagonaga anda biadai bule poleberemi. Ngode Datagaliwabe ogoni ibunaga mini Yarusalemeni yaraga halu lotu lolene nga.

<sup>4</sup> Ibunaga wali agali maru dai bilo mbirale tumagi kayagua tinaga nenegeme silibabi ngolobi maru nayi aleru milimu. Mbirale yalu pelo nogo hosibi dongibi milimu. Ani buwa Anduane Homogonaga andaha Ngode Datagaliwabehondo mbiraleru loma bia howa Yarusalemeni wilobi milimu, lalu bi lo pelene.

<sup>5</sup> Ani layagola agali haguane maru Yuda hameigini howabi maru Beniyamini hameigini howabi loma binigo mo miaga hearubi Libaiali hearubi wali agali maru Ngode Datagaliwabe ibunime tini gubaliniha hangu hangu elahaga bigi biyarubi tígua Anduane Homogonaga anda biago biadai bule pole manda manda bini. <sup>6</sup> Tinaga nenege hearume dabudabu dewa mialu biamogo bini. Ndisi silibame wabinirubi ngolobi tomo nolenebi dawalenebi dabudabu yalu pelo hosi dongibi maru maru dewa mini.

Anduane Homogonaga andaha mbirale tara tara Ngode Datagaliwabenaga loma biaho wilobi mia dege bini.

<sup>7</sup> Kini Sairusi ibugua ndisi bebi gabo bebi Kini Nebugadenesahanda Yarusalemeni Anduane Homogonaga andaha wiaria ibunaga dama andaha wule mo yalu piyaru yadai bini. <sup>8</sup> Ibugua uruni muwa kininaga muni handaya ho haganaga haguane Mideredahondo mini. Ibugua ilumogo bialu bebani mo tiga bu howa Yuda gabumane haru haga heago Sesebasahondo mini. Ogodagua mini.

<sup>9-10</sup> Ndisi be ngolome wabiniru daga pira tebira (30).  
Ndisi be silibame wabiniru daga daosini mbira (1,000).  
Ndisi be tara ale maru winiru daga pira kirani dira (29).  
Ndisi be ngolome wabini emene dameneru daga pira tebira (30).  
Ndisi be silibame wabini emene dameneru daga handari mariani pira mbira (410).  
Tomo naganebi dawaganebi daga daosini mbira (1,000).

<sup>11</sup> Ngolome wabiniru silibame wabiniru maru tara tara wiaru heba bibahende daga lamaga howa daosini duriani handari maria (5,400) mini. Urunidagua ilumogo buwa miya handala Sesebasabi Babilono howa garabaya henerubi ti mandagi uruni mo yalu Yasusaleme dai bini.

## 2

### *Isaraele wali agali garabaya howa golalu Yarusaleme dai binigo ogo*

<sup>1</sup> Isaraele wali agali dewaore Babilono dindi yu wahalu tini dalu Yarusalemehabi Yuda dindi maru wiaruhabi hole dai bini. Bambaore Kini Nebugadanesa heangi ibugua wai bialu Yuda wali agali garabaya bu yalu Babilono penego ogoniha ti haabo hene. <sup>2</sup> Yudali agali haguane minu yalu penedaruni maru Serubabele Yosua Nehemaia imaru Seraia Lelaia Modegai imaru Bilisana Misiba Bigibai imaru Lehumu Bana imaru pu hene.

Ani howa Isaraele wali agali garabaya pu henego golalu Yarusaleme dai biniru hameigini mbira mbiranaga daga ogodagua.

<sup>3-20</sup> Paroso aria daosini kirani handari mbirani pira kariani kira (2,172) hene.  
Sebadia aria handari tebirani pira kariani kira (372) hene.  
Ara aria handari kariani pira kariani duria (775) hene.  
Yasua Yoabala aguanene Pahadamoaba aria daosini kirani handari halirani pira mbirani kira (2,812) hene.  
Elama aria daosini mbirani handari kirani pira duriani maria (1,254) hene.  
Sadu aria handari dirani pira mariani duria (945) hene.  
Sagai aria handari kariani pira waragaria (760) hene.  
Bani aria handari waragariani pira mariani kira (642) hene.  
Bebai aria handari waragariani pira kirani tebira (623) hene.  
Asagada aria daosini mbirani handari kirani pira kirani kira (1,222) hene.  
Adonigama aria handari waragariani pira waragariani waragaria (666) hene.  
Bigibai aria daosini kirani pira duriani waragaria (2,056) hene.  
Adini aria handari mariani pira duriani maria (454) hene.  
Ade (ibu mini mende Hesegaia) aria pira dirani halira (98) hene.  
Besai aria handari tebirani pira kirani tebira (323) hene.  
Yora aria handari mbirani pira mbirani kira (112) hene.  
Hasama aria handari kirani pira kirani tebira (223) hene.  
Giba aria pira dirani duria (95) hene.

<sup>21-35</sup> Yuda wali agali o dai biyadaruni tinaga mamalinaga tano mini uru wigi binigoha dai bialu haga haga bini.  
Bedelehemeha handari mbirani pira kirani tebira (123).  
Nedobaha pira duriani waragaria (56).



Anadodoha handari mbirani pira kirani halira (128).  
 Asamabedeha pira mariani kira (42).  
 Kiriada Yarimihabi Kebirahabi Berodohabi handari kariani pira mariani tebira (743).  
 Lamahabi Gebahabi handari waragariani pira kirani mbira (621).  
 Migimasaha handari mbirani pira kirani kira (122).  
 Bedelehabi Aihabi handari kirani pira kirani tebira (223).  
 Nebeha pira duriani kira (52).  
 Magabisiha handari mbirani pira duriani waragaria (156).  
 Elama mendeha daosini mbirani handari kirani pira duriani maria (1,254).  
 Harimiha handari tebirani pira kira (320).  
 Lodohabi Hadidihabi Onohabi handari kariani pira kirani duria (725).  
 Yarigoha handari tebirani pira mariani duria (345).  
 Senaha daosini tebirani handari waragariani pira tebira (3,630).  
 Tano uruniha ti daibu haga haga bini.

<sup>36-39</sup> Loma binigo mo miaga agali Yarusalemeni daibu henedaru tinaga minibi dagabi ogodagua.

Yasua aguane Yadaia aria handari dirani pira kariani tebira (973) hene.  
 Ime aria daosini mbirani pira duriani kira (1,052) hene.  
 Pasahuru aria daosini mbirani handari kirani pira mariani karia (1,247) hene.  
 Harimi aria daosini mbirani pira mbirani karia (1,017) hene.

<sup>40-42</sup> Libai hameigini Yarusaleme daibu heneru minibi dagabi ogodagua  
 Hodabia aguane Yasua Kadamielela aria pira kariani maria (74) hene.  
 Anduane Homogonaga andaha iba gana laga biaga heneru Asaba aria handari mbirani pira kirani halira (128) hene.  
 Anduane Homogonaga andaha mamage haga heneru Salumu ariabi Ade ariabi Talamono ariabi Agubu ariabi Hadida ariabi Sobai ariabi handari mbirani pira tebirani dira (139) hene.

<sup>43-54</sup> Garabaya howa golalu dai binidaruni Anduane Homogonaga andaha biabe bialu haga agali urunaga aguane dai binigo uru.

Siha Hasuba Tabaodo  
 Keroso Siaha Padono  
 Lebana Hagabaha Agubu  
 Hagaba Samalai Hanana  
 Gidele Gaha Leaia  
 Lesini Negoda Gasama  
 Usa Pasea Besai  
 Asana Meunimi Nebisimi  
 Bagabugu Haguba Hahu  
 Basaludu Mehida Harasa  
 Bagoso Sisera Tema

Nesia Hadiba uruni aguaneneru daibu ha dege bini.

<sup>55-57</sup> Solomononaga biabe biahaga aria henerunaga aguanene garabaya golalu tini daluha daibu henedaru uru.

Sodai Hasoberede Peruda  
 Yala Dagono Gidele  
 Sebadia Hadili Pogerede

Hasebaimi Amila uruni aguaneneru haga bini.

<sup>58</sup> Anduane Homogonaga andaha agali biabe biaga aguanene henerubi Solomononaga biabe biahaga aguanene henerubi bibahende garabaya golalu dai buwa henego dagalamaga howa handari tebirani pira dirani kira (392) tini daluni dai bu hene.

<sup>59-60</sup> Ani howa Delaia hameigini Tobia hameigini Negoda hameiginiru ti bibahende dagalamaga halu handari waragariani pira duriani kira (652) hene. Ti bibahende Telemela tanohabi Teleharasa tanohabi Kerubu tanohabi Adana tanohabi Ime tanohabi tano uruniha howa daibu hene. Ani daibu howa agali hameigini uruni ti tininaga mamali hama ibinigo Isaraele hameigini henedaru aria mbirago mini labe nahe howa ti Isaraele aria kamabe tara kamabe toba howa dege hene.

<sup>61</sup> Loma binigo mo miaga agali maru heneru tigua ti mamalirunaga mini mbugaha agua ngabe hondole tai bialu hearia tinaga minigo mbira wiaria handa walia nahe dege hene. Agali mini taibu wahenedaru tinaga mini uru. Hobaiabi Hagosobi Basilai imaru hene.\* <sup>62</sup> Loma binigo mo miaga agali uruni tinaga mamali heneru mini nawiyago hondowa agali haguane henerume ti loma binigo mo miaga nahelo lene.✠ <sup>63</sup> Ani heagola Yuda agali gabumane agali haguane heagome lalu, Agali uruni ti wali agalime Anduane Homogohondo tomo lomabu mini ngaru nanelo, lalu bi lowini. Agali haguane ogoni ibugua lalu, Loma binigo mo miaga agali haguane mbira ibu kangi ibugua Anduane Homogonaga hame ngago hale hole halaga biaga ege tole kira mini Urimu Tumimula ngagoha howa hale helo. Ani hale howa ibugua agali uruni tigua loma binigo mo miaga holene nga layagua nde tigua biabe ogoni bialu helo. Ai nabilo layagua nde wahelo, lene.†✠

<sup>64-67</sup> Isaraele wali agali garabaya golalu dai binidaruni bibahende daga lamaga halu daosini dege pira mariani kira halu handari tebirani pira waragaria (42,360) tini daluni daibu hene.

Tinaga biabe biahaga wali agali bibahende daosini dege kariani handari tebirani pira tebirani karia (7,337) haru halu dai bini.

Wali agali iba ganaru lalu ngida balu piliperu pulalu biaga handari kira (200) bibahende daibu hene.

Tinaga nogo hosi handari kariani pira tebirani waragaria (736) haru halu ibini.

Nogo hosi dongilame igini hono winiru mini muele laga handari kirani pira mariani duria (245) haru halu ibini.

Nogo kamele handari mariani pira tebirani duria (435) haru halu ibini.

Nogo dongi daosini dege waragariani handari kariani pira kira (6,720) haru dai bialu ibini.

<sup>68</sup> Ani ibalu Yarusalemeni Anduane Homogonaga anda heagoria anda ibugu bialu howa tini hameigini ibugu biyadagua agali haguane mbira mbirame Anduane Homogonaga anda biago biadai bilonaga turu halu munibi mbirale marubi bame migi bini. Tigua Anduane Homogonaga anda ogoni abale hene biagoria dege biadai bulene manda buwa ani bini. <sup>69</sup> Ani mialu howa mbirale dewa yu hearume dewa mialu emene yu hearume emene migi bini. Isaraele wali agalime anda ogoni bilonaga ngolo genda magi kilogarama handari duria (500) mialu muni siliba genda magi kilogarama daosini dege kirani handari halira (2,800) mo mogobu mini. Ani mialu loma binigo mo miaga agalime aga karulagane handari mbira (100) mo mialu bini.

<sup>70</sup> Ani bialu Libai hameigini loma binigo mo miaga bu hearubi wali agali marubi ti Yarusalemeha anda ibalu maru tano ogoniha hene. Ti maru emene kawareha pu hene. Wali agali iba ganaru lalu ngida balu pilipe pulalu biaga hearubi mamage haga agali hearubi Anduane Homogonaga andaha biabe biaga hearubi ti bibahende Yarusaleme tano kaware wiaruha haga haga bini. Ani heagola Isaraele wali agali maru ti nde tininaga tano wiyaruha hama pugu pugu bini.✠

\* **2:61:** Bamba Basilai ogoni ibugua wali mbira Gileada tanoali mini Basilai mende henego wane bereago dabu bini. Ani buwa ibugua ibu imane Basilai ogoni tinaga mamali lowa hama ibini. ✠ **2:62:** Dag 16.39-40 † **2:63:** Urimu Tumimula bi ogolabo irane mbuga Haru Tagira Penego 28.30 handabe. ✠ **2:63:** Dag 27.21 ✠ **2:70:** 1 Bit 9.2, Neh 11.3

### 3

#### *Ngode Datagaliwabe mitangi bialu lotu lone lalu henego ogo*

<sup>1</sup> Ege kane layagola Isaraele wali agali tinaga dindi winiyagoria daibu hene. Ani buwa ti bibahende Yarusaleme dindini ngoai hene. <sup>2</sup> Ngoai hearia Yahosadaga igini Yosubi loma binigo mo miaga ibu aria hearubi Seadeli igini Serubabelebi ibu hameigini hearubi tigua bo lomabu delolene dabu mbira Isaraelenaga Ngode Datagaliwabe hondo nogo tara tara bo loma bia helo wabini. Ani binigo irane Ngode Datagaliwabe ibugua ani bilimu lalu ibunaga agali Mosese heneyangi Mana lo winigoha gilibu winigo nga. ✧ <sup>3</sup> Garabaya golalu ibiyarume wali agali dindi ogoriani hearu hondowa gi howa dege tigua nogo tara tara bo lomabu delolene dabu ogoni ala wabu helenenaga gumuni wiagoria dege wabu helene. Ani wabu helowa tigua ogoriani mbirale bo loma bialu delaga winiyadagua lone egerebagi alendobi bo delaabo halu hene. ✧ <sup>4</sup> Anda Nemandaha Palu Holene Horo wiangi tomo turu halu nalimu lalu lo wiadagua tigua ani bule ngoai hene. Ani buwa horo uruningi nogo tara mbira mbira bo lomabu mulene mana lo wiadagua lone loma bigi bialu hene. ✧ <sup>5</sup> Ogoni biai howa tigua maru marunaga bo loma bialu delaga winiya ale loma buwa homane hangu hangu delai holenebi Ege Mbira Ngabulo kagonaga horongi loma biagane winiyadaguabi bini. Anduane Homogonaga horo mbira lomabu mule lowa tu wu winiyangi lomabu mini. Mialu Anduane Homogohondo bame turu halu miagarubi tigua yalu ibuwa mia dege bini. ✧ <sup>6</sup> Tigua Anduane Homogonaga anda gahenge wene bule howa Anduane Homogohondo ala lomabu delagane winiyagoria ege kanegonaga horo mbira layagola ogoriani lomabu delene.

#### *Anduane Homogonaga anda biadai bule teninigo ogo*

<sup>7</sup> Wali agali tigua tole dambu tiga biaga hearuhondobi anda biaga hearuhondobi biabe biyagonaga muni mini. Ani bialu wali agali Taia tanoni hearumebi Saidono tanoni hearumebi ira tamia hongohe Lebanononi dibayaru tihondo miyagola tigua tomo tara tararu ira lini ibaneru olibe lininaga welibi miniya. Ira uruni dibuwa iba solowarani yalu dindi Yobani anda ibule mandabu wini. O binidaruni Pesia handame haga Kini Sairusi ibugua bilimu layagola ani bini. <sup>8</sup> Yarusaleme dai buwa mali mendegonaga ege mende layagola tigua Anduane Homogonaga anda bule lowa bialu hene. Serubabelebi Yosubi tinaga damenerubi loma binigo mo miaga hearubi Libaiali hearubi wali agali garabaya howa golalu dai bini bibahende hearubi tigua anda biagoni bima lalu mandagi howa bialu hene. Libai agali mali pira kira (20) bolangua hene hearu tigua Anduane Homogonaga anda biago biadai bilo handaya howa ti helene. <sup>9</sup> Libaiali mbira ibu mini Yasubi ibu iginirubi ibu damenerubi Kadamielebi ibu igini ti Yuda hameiginirubi tigua anda biyago bilo Libaiali hayaru baba hogimbu buwa handaya ho hene. Libaiali hameigini Henadada heneyarumebi biamogo bialu hene.

<sup>10</sup> Agali biarume dindi mo tiga bialu gene hangayagola loma binigo mo miaga biaru tigua tininaga aga galonengi biagane winiyaru mo karulowa mbelo biguli pu laganeru giha yuwa tini holenebi hagahaga bini. Hameigini Asabalinaga Libai agali heneyaru ti bi ngilingele laga beledi ale winiyaru aria kira dege dege gime yu hene. Tigua Anduane Homogonaga mini yaraga ogodagua halimu lalu Kini Debidi halu heangi henerume lo winiyadagua lalu hene. ✧ <sup>11</sup> Tigua Anduane Homogonaga mini yaraga howa iba gana ogodagua lalu, Anduane Homogo ibu bayaore ka. Ibugua Isaraele wali agalihondo gubalini ho wiaabo ka, lalu hene. Anduane Homogonaga anda biago bule dindi mo tiga bialu gene hangayagonaga turu howa bibahendeme hongo howa ga lalu Anduane Homogonaga mini yaraga halu hene. ✧ <sup>12</sup> Anda gene hangalu hearia alali loma binigo

✧ 3:2: Har 27.1 ✧ 3:3: Dag 28.1-8 ✧ 3:4: Dag 29.12-38 ✧ 3:5: Dag 28.11-29.39 ✧ 3:10: 1 Bit 25.1 ✧ 3:11: 1 Bit 16.34, 2 Bit 5.13, 7.3, Iba 100.5, 106.1, 107.1, 118.1, 136.1, Yar 33.11

mo miaga hearubi Libaiali hearubi hameigini hangu hangu haguane hearubi tigua Anduane Homogonaga anda ala hene hendene biago mitangi bialu dugu timbuni bialu heagola maru hearume ti turu howa ga lalu hene. <sup>13</sup> Ogonibi biyagola dugu biyabe be turu howa ga layabe toba howa tale nabibehe hene. Tale nabibehedagoni ga layagobi dugu biyagobi hongo howa daligaore biyagola udura amura hearume hale hai hene.

## 4

*Isaraealime Anduane Homogonaga anda biadai nabilonaga waitigime madane binigo ogo*

<sup>1</sup> Yuda Beniyaminila hameiginirunaga waitigi bu hearume hale halu hearia Isaraele wali agali Yarusaleme daibu howa tigua Anduane Homogo tinaga Ngode Datagaliwabenaga anda biadai bialu ka layane hale hene. <sup>2</sup> Ani layago hale howa tigua Serubabelebi Isaraealeali hameigini haguane mbira mbira hearubi hondo puwa tihondo lalu, Inabi nde ti haru mandagi howa Anduane Homogonaga anda bimiya. Inabi nde tinaga Ngode Datagaliwabhondo lotu laga henego kama. Bamba Asirianaga Kini Esaradonohanda ina dindi ogoha hole pudaba layangi howa hama ibinigo iname tinaga Ngode Datagaliwabhondo lomaru bo mialu haga kamagoni, lene. <sup>3</sup>

Ani layagola Serubabele Yosuala libuguabi agali haguane bu hearu tiguabi ladai bialu lalu, Tigua Anduane Homogo inanaga Ngode Datagaliwabe kagonaga anda ogoni nabuleberemi. Kini Sairusi ibugua bilimu lalu inahondo langiyadagua Anduane Homogo ina Isaraele wali agalinaga Ngode Datagaliwabenaga anda inaneme buleberema, lene.

<sup>4</sup> Ani ladai biyagola agali tara dindi ogoriani luore hene hearu tigua Yudali hearu handabe manga howa ti anda bialu hearia wahalu pelonaga mo gi haga bule manda bini. <sup>5</sup> Ani bulenaga tigua Pesianaga gabumane agali hearume Yudaliru anda bialu heago mo ko halu bo gialo wahelonaga muni mini. Tigua Kini Sairusi heangi howa anidagua bialu heane dege Pesia dindiha Dariusi ibu kini ha aribia hene.

*Waitigi hearume, Yudali tigua ko biya, lalu beba pelenego ogo*

<sup>6</sup> Pesianaga Kini Dariusi homayagola Segesihanda Pesia dindinaga kini ha aribia hene. Ani heagola Yudanaga waitigi bu hearume Kini Segesihondo beba mbira gili buwa Yarusaleme wali agali bu karumebi Yuda dindi maruha bu karumebi ko biya lalu gilibu pelene. <sup>7</sup>

Ani pelo heagola Pesianaga Kini Segesi homene. Homayagola Adasegesi ibu kini ha aribia hene. Ani heagola Bisilamabi Midiredadabi Tabelebi ti baba biabe mandagi biaga hearubi tigua beba mende Aramaigi bi lalu gili buwa Pesia dindini kini hearia gilibu pelene. Ani gilibu pelayagola Pesia dindini howa Aramaigi bi laga hearume dagalowa kini hale helo bi lo beregedalu Pesia bi lalu lamini.

<sup>8</sup> Mani agali kira dindi ogoniha gabumane haru haga agali haguane Lehumu henego mende dindi ogoniha beba gili bia dagala biaga Simisai henego libuguabi nde Yarusaleme wali agali bu karume ko biya lalu beba mbira Kini Adasegesi hearia gilibu pelene. Beba gilibu pelalu howa bi ogodagua lowini.

<sup>9</sup> Kini-o bayale kebe. I Lehumu dindi ogoha gabumane agali haguane kogomebi dindi ogonaga beba gili bia dagala biaga Simisai ibubi dindi ogoha agali haguane maru godi lalu mana dabaki biaga karumebi inaga agali haguane Eregeali karumebi Babilonoali karubi Elama dindiha Susa tanoali karumebi ina bibahendeoreme beba ogo gilibu wia hama. <sup>10</sup> Wali agali bamba agali kini hongohe mini lene Asubanibala ibugua tini dindiha howa tali tagi haya handala dindi ogoha tagira ibu heneru maru Samaria tanoha karu maru Iba Yuberedisi poragoha bu karu ti bibahendemebi nde bi ogoni lo mbira halu beba ogoni gilibu wia hama.

☆ 3:12: Hag 2.3 ☆ 4:2: 2 Kin 17.24-41 ☆ 4:6: Esd 1.1

<sup>11</sup> Tigua beba ogodagua gilibu pelene.

Kini Adasegesi-o ina inaga biabe biahaga howa Iba Yuberedisi ange orayagi kamarume inihondo bi mbira loaho howa bi ogo gilibu ibilarama.

<sup>12</sup> Kini-o iname bi ogodagua lalu larama. Yuda wali agali dindi ina handaya ho hene tara tara wiaruha howa daibu karu tigua tano mo ko hene biago lone biadai bialu ka. Wali agali bamba tano ogoniha henedaru tigua ko bialu kininaga bi mo wahaga hene. Ani biaga henego áyu tigua tano pabe lone biadai birago ai emene howa biamaro bibehe nga. <sup>13</sup> Anigo ai kini-o bi ogore bayuwa hale habe. Yuda wali agalime tano ogoninaga wai pabe hongohe bu mabu biyagua tigua ihondo dagisi muni nangulebira. Anidagua biragola inaga dindiha biabe bulenego muni nawi tubagi ho holebere. <sup>14</sup> Inime inahondo mbiraleru ngialu bayuwa handayaho hariligodane Yudalime mani í mo ko nahelonaga langerema. Anidagua bialu kane hondowa iname bi ogo inaga gilibu wia harama. <sup>15</sup> Ai inaga agali beba gili bia dagala biaga kagohondo gabumanenaga mbugaha bi bamba í mamaliru heangi bini damene gilibu winidaru dagala labe. Ani dagalaragola hale halu keria wali agali Yarusaleme tano ogoniha henedaru ti ko mine haga mbira henedane hale holebere. Bamba ti mamaliru henedangi wali agali uruni tigua kini hearuhondo genda mo mialu agali dindi podene mbira handayaho haga hearuhondobi genda mo mia dege bini. Yarusaleme wali agali tigua kininaga bi mo wahaga bialu hearia kini ibugua tano ogoni bo gialo wahene. <sup>16</sup> Ani bini ngago ai kini-o iname bi ogodagua lawia harama. Ai tigua tano mo tiga bialu pabe hongohe biyagua nde Iba Yuberedisi abene orayagi dindi podene mbira ogoni ina handayaho naholebereda lalunaga lowia harama, lene.

<sup>17</sup> Tigua beba gilibu pelayadagoni hondowa Kini Adasegesi ibugua nde ladai bialu gili binigo ogo,

Gabumanenaga haguane agali Lehumubi beba gili bia dagala biaga Simisaibi libu baba biabe mandagi biaga Samaria tanoha kamirubi dindi podene maru wigi bidaruha hene Iba Yuberedisi abene orayagi haga kamirubi tí bibahendehondo horombe laro. Ai tigua bi lo ibilarimiyago ladai bero.

<sup>18</sup> Tigua bi gilibu ibilarimiyago marume dagalowa Pesia bi lowa dagalo beregedalu í langiya. <sup>19</sup> Ani langiyagola ina agali beba gili bia dagala biaga hearuhondo lamialu, Tigua ogoni henededabe taya bialu handadaba, laru. Ani larugola tigua handalu hearia Yarusaleme wali agalime mine halu kininaga bi mo wahalu haabo haga lalu gilibu wiaria handaya. Heneneore tano ogoniha agali ko dewaore bu heneya. <sup>20</sup> Bamba kini hongohe Yarusalemeni howa dindi dewa Iba Yuberedisi orayagi ibugua handameho haga heneya. Ani handayaho howa tigua wali agalihondo dagisi muni tara tara ngidaba laga heneya. <sup>21</sup> Ani heneyago ai tigua biabe biaruagoni mani inime bilimu larogola bule áyu nabilimu laya lalimu. <sup>22</sup> Tigua biabe bialu howa mani ini mo ko holene wuligo áyu ogoni abale ti karia pialu nabilimu lalu lamilimu laro, lene.

<sup>23</sup> Ani laya handala maru hearume Kini Adasegesinaga bi layago bebani gilibu yalu puwa Lehumu Simisaibi agali maru libu baba biabe mandagi biaga hearubi ti hearia yalu puwa hale helo dagalalu hene. Kininaga bi dagalayagola agali gabumane haguane uruni tigua hale hene. Hale halu abaleore ami agali hearu heba Yarusaleme pialu Yuda wali agaliru biabe bialu hayaru wahadaba lene.

### *Anduane Homogonaga anda lone binigo ogo*

<sup>24</sup> Bamba Kini Sairusi heangi howa Yudali tigua Anduane Homogonaga anda bialu hayagoni tinaga waitigi bu hearume wahadaba layagola Yarusalemeha anda bialu



hayago waho hene. Anda biala ha ho dege biane Kini Dariusi ibu Pesia dindinaga kini mali kirani haru hene.✧

## 5

<sup>1</sup> Mali ogoningi dege bi mana latagi haga Hagai Ido igini Segaraijala libugua Yuda dindihabi Yarusaleme tanohabi Anduane Homogonaga bi mana latagi halu hene.✧

<sup>2</sup> Seadeli igini Serubabelebi Yahosadaga igini Yosubi libugua bi mana latagi haga agali kirali biago labonaga bi layago hale halu libugua agali maru hearu haru howa Yarusalemeni Anduane Homogonaga anda biago lone bialu hene. Ani bialu hebigola bi mana latagi haga agali biagolabo libugua biabe biamogo bialu hene.✧

<sup>3</sup> Ani bialu hemigola Iba Yuberedisi abene orayagi dindi mbira mbira wiarunaga haru haga gabumane haguane mbira mini Tadenai heagobi Seda Bosenai ibu ami agaliru haru haga agali haguane heagobi libu heba biabe mandagi biaga agali maru hearubi tigua hale halu hearia Isaraealeli biarume biabe bialu ka layane hale hene. Ani hale halu tigua abale Yarusaleme pene. Puwa tigua agali Anduane Homogonaga anda bulenaga biabe bialu hearuhondo hale halu lalu, Tigua anda ogoni bialu harimidaruni tí aiwa bilimu layabe. <sup>4</sup> Agali biabe ogoni handayaho haga ai ima dege kamibe mini langidaba, lene. <sup>5</sup> Tigua ani layagola Ngode Datagaliwabe ibunime Yudanaga agali haguane biaru baya hangu handayaho heagola Pesianaga agali haguane biarume tinaga biabe bialu hearu nabidababe labe nahe hene. Ani labe nahe howa tigua nabidababe lalu agi buabe tobaho howa tigua Kini Dariusi hearia beba mbira gili bialu Yudali biarume bialu hayadaruninaga ogodagua bira lalu gilibu pelene. <sup>6-7</sup> Ani gilibu pelowa kini ibunaga bi ladai bilo hondo hene.

Tigua kinihondo bi gilibu pelenedagoni ogoale bira lalu beba gilibu pelene.

Kini Dariusi-o í bayaleore haabo habelo. <sup>8</sup> Kini-o ina Yuda dindiha puwa handalu hemaria tigua tininaga Ngode Datagaliwabe hongohe kagonaga anda biago lone bialu hearia handarima. Tigua ege tole timbuniru podo yu ibalu urunime anda bialu irarume baya hangu ala dunga haga bialu anda ndo baya taraore mbira bialu ka.

<sup>9</sup> Anidagua bialu heagola iname tinaga agali haguane hearuhondo hale halu lalu, Tigua Ngode Datagaliwabenaga anda bialu kamirubi biabe maru bialu kamirubi aiwa bilimu layabe, lalu hale harima. <sup>10</sup> Ani lalu, Agali biabe ogoni bilo handayaho haga uruni tinaga mini í langulenaga ai ima dege kabe, lalu hale harima.

<sup>11</sup> Ani hale harimagola Yudali biaru tigua ladai bialu lalu, Ina Ngode Datagaliwabe dindi hari bibahende ngaruni handayaho haga kagonaga biabe biahaga kama. Bambaore inanaga kini hongoheore mbira henegome anda ogoni bini. Ani binigo inanaga waitigi bu hearume bo gialabaga bialu mo ko hai henego ainde lone biadai bialu kamagoni. <sup>12</sup> Anidagua bialu kamagoni irane ogodagua. Inanaga mamali hearume Ngode Datagaliwabe dahuliya andaga kago mo keba halu hene. Ani mo keba halu heagola ibugua Kaladeali Nebugadanesa Babilononaga kini heagome ina baba wai bilo ibilaya. Ani ibilayagola ibugua ibalu ina mo ko howa bai halu bo podahana haya. Ani buwa Anduane Homogonaga anda heago bo gialo wahai halu wali agali bibahende Babilono dindiha helo garabaya buwa haru piaiore haya.✧

<sup>13-14</sup> Ani bialu Kini Nebugadanesa ibugua Ngode Datagaliwabenaga biabe bulenaga mbirale ngolomebi silibamebi wabini Anduane Homogonaga loma bia howa ibunaga andaha wiaga wiaru bibahende Babilonoha mo yu pi ai howa ibunaga mbirale dama mitangi bialu gime wabini Babilono dindiha wiaru bi pupu wiaga andaha ngelole mo yu pi ai haya. Ani biagola mani Sairusi ibu Babilononaga kini ha aribia haya. Ibu mali mbirani kini pigane howa Anduane Homogonaga anda ogoni bule pudaba laya. Ani lowa Kini Sairusi ibugua inanaga mbirale bibahende bi pupu wiaga andaha

✧ 4:24: Hag 1.1, Seg 1.1 ✧ 5:1: Hag 1.1, Seg 1.1 ✧ 5:2: Hag 1.12, Seg 4.6-9 ✧ 5:12: 2 Kin 25.8-12, 2 Bit 36.17-20, Yar 52.12-15

wiago mo yalu penedaruni inanaga agali haguane mbira mini Sesebasa heagohondo miadai biai haya. Ani buwa Kini Sairusi ibugua Sesebasa dabalú ibilenedagoni ibugua Yuda dindinaga gabumane haru haga howa handayaho habe laya.\* <sup>15</sup> Ani lowa kini ibugua Sesebasahondo lamialu lalu, Mbirale uruni Yarusaleme mo yalu dai bialu Anduane Homogonaga anda abale henedagoriaore helo bia aribia halimu, laya. <sup>16</sup> Ani laya handala yalu ibinigo ai Sesebasa ibugua mbirale uruni anda gahenge ogoniha ngelolenaga ibuni nde Yarusaleme íbu howa ibunime biabe ogoni handayaho halu Anduane Homogonaga anda ogoni bialu kamagoni. Abale biai nahe wene bulene ngelowa dege bialu kamagoni, lalu ladai biya.

<sup>17</sup> Yudali biaru tigua bi ogonidagua layago ai Kini-o karulapeyagua nde ínaga beba gili bia dagala biaga karuhondo Kini Sairusinaga bi ogoni henenedabe hondole gabumanenaga mbugaha dabalú handadaba labe. Ani handaragola Yudali uruni tinaga bi henene layada hawa layada lalu tigatiga handa walia holebere. Ani hondowa anda ogoni bilo lalubi ndo nabilo lalubi bi ladai bibe, lene.

## 6

*Kini Sairusihanda Anduane Homogonaga anda biadai bilimu lalu gilibu winiyago handa walia henego ogo*

<sup>1</sup> Ogoni layagola Kini Dariusihanda lalu, Babilononaga kinirume biniru mbugani gilibu wiagaha Anduane Homogonaga anda bilimu lene lo ngabe hondole hai bidaba, lene. <sup>2</sup> Hai bialu hearia Babilononi handa walia nahe howa dindi timbuni Egebadana ogoni Mediahayagi beba mbira gilibu wiagoha bi ogobi lo wiaria handa walia hene.

<sup>3</sup> Sairusi ibugua mali pigane handame haga heneyangi Yarusalemeni Anduane Homogonaga anda bilonaga bi ogo leneyane hendene. Anduane Homogonaga anda ogoni nogo tara tara bo loma bia ho mulenebi irani bo delolenebi anda ogoni helo gumuni mo tiga bialu biadai bilimu. Anduane Homogonaga anda ogoni daliganaga magi mida pira kirani karia (27) holebira. Aranenaga magi mida pira kirani karia (27) dege holebira. <sup>4</sup> Anda hái bulenenaga tole tongo tebira para howa ira tongo mbira para holebira. Uruni bibahendenaga yolo kininaga muni anda howa yolo mo mulebira. <sup>5</sup> Ndisi be tara tara ngolomebi silibamebi wabini Yarusalemeni Anduane Homogonaga andaha wiaria Kini Nebugadanesa ibu mo yalu Babilono dindini winiyarubi mo yalu dai buwa Yarusaleme Anduane Homogonaga andaha wiagadagoria ngelo yu dai bilo, lalu lo wiane hendene.

*Kini Dariusi ibugua, Biabe birimidagoni biaabo halimu, lenego ogo*

<sup>6</sup> Bi ogoni lo wiago hondowa Dariusi ibugua ogodagua ladai bini.

Iba Yuberedisi ange ni paliragohayagi gabumane agali haru haga Tadenaibi Seda Bosenaiibi libu heba biabe mandagi biaga kamiru tihondo larogo, Anduane Homogonaga anda biragoha hapai nahe henge milimu. <sup>7</sup> Yuda dindinaga gabumane agali haru hagabi agali tininaga haguanerubi heba tini Anduane Homogonaga anda abale henedagoria bia dai bilo. <sup>8</sup> Áyu ina tigua anda ogoni bilo biamogo bilimu lalu bi hongohe langero. Biabe biaga uruni tinaga hame lararu ale mulene wali agali Iba Yuberedisi ange ni paliragohayagi karu tigua muni dagisi kinihondo miragome yolo bulebira. Ani biragome biabe bialu kago pugu holo nabulebira. <sup>9</sup> Horo bibahendengiore loma binigo mo miaga agali Yarusalemeni karume Ngode Datagaliwabe dahuliya andaga kagohondo bo lomabu delole hame ledama lara ale miai halimu. Nogo bulumaga iginibi sibibi sibi iginibi ladi ale mini widibi ibibi waini ibabi olibe lininaga welibi milimu. <sup>10</sup> Tigua ogonibi beramigola uruni tigua Ngode Datagaliwabe dahuliya andaga kagohondo nogo tara tara bayale ibu turu haga aleru

\* 5:13-14: Esr 1.2-11

milobi ibuhondo inagabi i iginidarunagabi bi la haragola ina mo gumbila helo. <sup>11</sup> Ina bi hongohe mende larogome mbiralime bi larogo aribia haga biyagua ibuninaga anda ira mbira gialo muwa ngunihayagi de howa ibuni ogonime nogoba helo. Ani buwa ogoni ibunaga andabi ko ngubi wahagane ale helo. <sup>12</sup> Ngode Datagaliwabe ibunaga mini Yarusalemeni yaraga helo lenedagome kinibi hameigini dindi tara tararubi mbiralime bi o larogo mo aribia haragobi Anduane Homogonaga anda gialo wahole manda birago ibubi bope helo lalu bi ogoni Dariusi ina laro. Inaga bi ogoni bibahende hale halu biloore laro, lene.

### *Anduane Homogonaga anda loma bia henego ogo*

<sup>13</sup> Ogonibi layagola gabumane agali haru haga Tadenaibi Seda Bosenaibi haru haga marubi ti bibahendeme handame haga Kini biagome layadagua bini. <sup>14</sup> Yu wali agalinaga haguane biarume anda biagoni ala bigi bialu bayuwa bini. Anduane Homogonaga bi mana latagi haga agali kira Hagai Segaraialame mo hongo hayagola tigua ani bini. Isaraelenaga Ngode Datagaliwabehanda layadagua ani buwa Pesianaga handame haga Kini Sairusi Adasegesila ala henerumebi Dariusi heagomebi tigua bi hongoheme bilimu layadagua bialu biai hene. <sup>15</sup> Handame haga Kini Dariusi ibugua handame ho hearia mali waragane layangi tininaga ege daga mini Ada layagola horo tebonengi Anduane Homogonaga anda ogoni bu maro bini. <sup>16</sup> Ani biai howa Isaraele wali agalibi loma binigo mo miaga biarubi Libaiali biarubi wali agali maru maru garabaya ale howa dai bini hearubi heba ti bibahendeme turu timbuni halu Anduane Homogonaga anda biagoni Ngode Datagaliwabehondo loma bia hene. <sup>17</sup> Loma biyadagoni nogo bulumaga wangabe handari mbirabi (100) nogo sibi handari kirabi (200) sibi igini dalua handari mariabi (400) bo mini. Ani buwa wali agali tini ko biyaru domo wahelo lowa nogo meme wangabe pira mbirani kira (12) bo mini. Pira mbirani kira (12) bo minidagoni irane Isaraele hameigini pira mbirani kira hayagonaga manda buwa bo mini. <sup>18</sup> Mosese heneyangi agua bilimu lalu Mana lowinigo gilibu ngadagua tigua loma binigo mo miaga hearubi Libaiali biarubi Yarusaleme Anduane Homogonaga anda biagoria howa bulene winigo bilo mo manda manda bini.

### *Horo Bolangua Halu Penegonaga Tomo nenego ogo*

<sup>19</sup> Mali mbira howa ege mbirangi horo pira mbirani maria (14) hayagola wali agali garabaya biabe ale bialu hene dai biyaru tigua Bolangua Halu Penegonaga Horo mitangi bialu tomo nene. <sup>20</sup> Loma binigo mo miaga hearubi Libaiali hearubi tigua ilili bulene wiadagua ilili bialu Ngode Datagaliwabenaga deni ko domo wahowa gagahe hene. Ani buwa Libaiali biaru tigua nogo sibi igini dalua damene biaru Bolangua Halu Penegonaga Horo mitangi bialu wali agali bibahende garabaya biabe ale bialu howa daibiyarunagabi loma binigo mo miaga biarunagabi Libaiali tininagabi bo lomabia hene. <sup>21</sup> Nogo tara tara dalua bo loma biyaruni Isaraele wali agali garabaya biabe ale bialu howa daibu henerumebi wali agali dindi ogoriani hene tininaga mana ko wiaru wahai halu Anduane Homogo Isaraelenaga Ngode Datagaliwabe mini yaraga halu ibunaga lotu lole ibiyaru baba ti mandagi nalu hene. <sup>22</sup> Horo karuni Mberedi Yidi Nahe Nolenenaga Horo hayagola tigua ogoningi turu howa tomo nalu hene. Tigua turu henedagoni Anduane Homogohanda Asirialinaga kini biago mini mo beregedayagola ibugua Isaraele wali agali Anduane Homogonaga anda biyago bilo biamogo biyagonagabi ti turu hene.

## 7

### *Esera ibu Yarusalemeni anda ibinigo ogo*

1-5 O binidaruni biaha mali dewaore pialu Pesianaga handame haga Kini Adasegesi heangi agali mbira ibu mini Esera Babilono dindini hene. Ibunaga mamali loma binigo mo miaga haguane timbuni Arono heneya aria hene. Esera ibu Seraia igini Seraia ibu Asaria igini Asaria ibu Hiligaia igini Hiligia ibu Salumu igini Salumu ibu Sadogo igini Sadogo ibu Ahidubu igini Ahidubu ibu Amaria igini Amaria ibu Asaria mende igini Asaria ibu Meraiodi igini Meraiodi ibu Serahia igini Serahia ibu Usi igini Usi ibu Bugi igini Bugi ibu Abisua igini Abisua ibu Piniasa igini Piniasa ibu Eleasa igini Eleasa ibu Arono igini hene. Agali uruni ti Esera mamali hene.

6-7 Esera ibu Anduane Homogo Isaraelenaga Ngode Datagaliwabehanda Mana lowinigo Mosesehondo miyagoore manda timbunibi howa lawai haga hene. Anduane Homogohanda Esera biamogo biyagola Esera ibugua kini biagohondo hale hayaru bibahende miai hene. Handame haga Kini Adasegesi ibugua Babilono heane mali kane layagola Esera ibugua Babilono howa Yarusaleme pole Isaraele wali agali maru heba pene. Piyadaruni loma binigo mo miaga marubi Libaiali marubi Anduane Homogonaga anda iba gana lagabi Anduane Homogonaga anda mamage hagabi biabe biagabi ti heba pene. 8-9 Tigua ege piganegonaga horo mbira layagola Babilono wahalu Yarusaleme pole tagira pialu pene. Anduane Homogo ibugua ti biamogo biyagola abale ege daunigonaga horo mbira layagola Yarusalemeni anda pene. 10 Agali Esera ogoni ibugua Anduane Homogonaga Mana lowinigo lawai haga howa mana ogonime ledadagaore bayuwa bule hongo howa lomanda biaga hene. Ani buwa ibugua Isaraele wali agali hearume Mana bulenebi nabulenebi lo ngadagua bilo lawai haga hene.

*Kini Adasegesihanda beba Eserahondo gilibu minigo ogo*

11 Esera ibugua loma binigo mo miagabi Anduane Homogohanda Mana lowinigo Isaraelealiruhondo minigo manda biaihe howa lawai hagabi heago hondowa handame haga Kini Adasegesihanda Eserahondo beba mbira gili buwa minigome bi ogo lowini.

12 I handame haga Kini Adasegesi kogo ina loma binigo mo miaga agali Esera dahuliya andaganaga Ngode Datagaliwabe Mana lowinigo lawai hagabi ihondo beba ogo gili bu ibilaro.

13 Ina bi hongohe lo ibilarogome ogobi laro. Ina dindi bibahende handa gimbu bu kogoria Isaraele wali agali bibahende karubi loma binigo mo miaga karubi Libaiali karubi tigua Yarusaleme dai bule manda bidarume i heba dai bilo. 14 I heba inaga ganisolo agali kariali biarubi mandagi lo mbiraore halu tinaga Ngode Datagaliwabe ibugua Mana lowini ngago tihondo handayaho halimu lalu ngiyago wali agali Yarusalemeha karubi Yuda dindi bibahendeha karubi tigua mana ogoni bayuwa layadagua bialu handaya howa au kabe hondole pilimu larama. 15 Ibi inaga ganisolo biarubi iname Isaraelenaga Ngode Datagaliwabe ibunaga anda Yarusalemeha kago ibuhondo ngolobi silibabi mu winigo mirimago mo yalu pobelo hame ledama. 16 Babilono wali agali dindi bibahendeni hearume silibarubi ngolorubi ilu wiyaruni Isaraele wali agali tinimebi tinaga loma binigo mo miagamebi tinaga Ngode Datagaliwabe andaha wilo miyarubi bibahende mo yalu pobe.

17 Muni uruni bayuwa podaga buwa ogonime nogo bulumaga wangaberu nogo sibi wangaberu sibi igini daluaru ladi ale tara tarabi waini ibabi uruni yolo buwa Yarusalemeni tinaga Ngode Datagaliwabe andaha bo lomabu mulene dabuni mo milimu. 18 Ngolobi silibabi maru uruni bialu ibira harago inabi inaga hameiginirumebi Ngode Datagaliwabe ibunaga hameni howa bua birago ale tigua bilimu. 19 Ndisi tara tara tomo yagane alebi dawagane bebi ngiyaru damenego Ngode Datagaliwabehondo muwa Yarusaleme Anduane Homogonaga andaha yalu puwa ogoriani biabe bulene ngaru bule Ngode Datagaliwabe Yarusalemeni kago ibuhondo milimu. 20 Anduane Homogonaga andaha bulene mbira ndia hayagua kininaga muni wiaga biagoha muni maru ngilo.

<sup>21</sup> Iba Yuberedisi ange ni paliragohayagi tinaga hondo haga karuhondo ina bi hongohe lalu dahuliya andaga Ngode Datagaliwabe kagonaga Mana lowinigo lawai hagabi loma binigo mo miagabi Esera ibugua mbirale mbira tihondo hale hayagua hale harago damene abaleore milimu. <sup>22</sup> Ina magi o ngelarogo bolangua nahe unuyagi milimu. Silibanaga genda daosini tebirani handari maria (3,400) kilo mialu ladi ale mini widi nu handari duria (500) agima mialu waini iba lida magi daosini kira (2,000) mialu olibe lininaga weli lida magi daosini kira (2,000) mialu bulene nga. Ani bialu ibi tininaga hame laradagua mo milimu. <sup>23</sup> Dahuliya andaganaga Ngode Datagaliwabehanda ibunaga anda bilonaga mbirale hameledaru bayuwa Eserahondo miai halimu. Ogonibi beremigome Ngode Datagaliwabehanda ihondobi mani i homedoha handame haga kini aribia hararubi heba keba nahelo ani bilimu. <sup>24</sup> Tigua loma binigo mo miaga karubi Libaiali karubi Anduane Homogonaga andaha iba gana laga karubi mamage haga karubi biabe biaga agali karubi biabe maru anda ogoniha bialu karubi ti bibahendehondo dagisi muniore ngi nalalimu, lene.

<sup>25</sup> Esera iha inaga Ngode Datagaliwabehanda mini bayale gigabi wia hayagome gabumane agali hondo hagarubi godi hale hagarubi dabo helabe. Tigua wali agali Iba Yuberedisi ange ni paliragohayagi inaga Ngode Datagaliwabe Mana lowini ngago biaga karu haru helo ani dabo helabe. Mana lowinigo ogoni manda nabi karuhondo bayuwa manda bilo lawai habe. ✧ <sup>26</sup> Wali agali marume Ngode Datagaliwabenaga mana lo ngago mo wahayaguabi dindi bibahende i handame ho kogonaga mana lo ngago mo wahayaguabi ogoni ibu pani abaleore mulene nga. Pani ogoni bo homelolene ngayaguabi dindi mendeha bo pelolene ngayaguabi ibunaga mbirale ngaru mo garabaya biyaguabi ibuni garabaya biyaguabi urunidagua mbira bulene nga. ✧

Bi ogoni lalu Kini Adasegesihanda gilibu mini.

### *Esera ibugua Ngode Datagaliwabenaga mini yaraga henego ogo*

<sup>27</sup> Esera ibugua lalu, Anduane Homogo ina mamalirunaga Ngode Datagaliwabe kago ibunaga mini yaraga hama. Ibugua kininaga mini mo heya halu kini ibugua Anduane Homogonaga anda Yarusalemeni biyago mo baya bialu kagoni. <sup>28</sup> Ngode Datagaliwabe ibunaga biamogo bia holeneme i dara halu biamogo biya. Ani buwa kini biagobi ibunaga ganisolo agali biarubi haru haga agali maru biarumebi biamogo timbuni biya. Anduane Homogo inaga Ngode Datagaliwabe ibugua i biamogo bialu hongo ngiyagola ina Isaraele hameigini dewa biarunaga haguane Yarusaleme dai bima larugola ti i heba dai buleberema layagoni, lene.

## 8

### *Yudali Yarusaleme dai binirunaga mini ogo*

<sup>1</sup> Mini ogoha gilibu ngaruni Adasegesi ibu kini heangi Esera ini heba Yudali hameigini mbira mbira henedagua agali haguane heba dai bigi binigo mini uru

<sup>2-3</sup> Piniasa hameigini Gesomobi Idama hameigini Danielebi Debidi hameigini Segania igini Hadusubi Paroso hameigini Segaraiabi ibuni hameigini maru agali handari mbirani pira duriabi (150) uruni bibahende Esera heba Yarusaleme dai bini.

<sup>4</sup> Pahadamoaba hameigini Serahia igini Elioenai ibu heba agali handari kira (200) dai bini. <sup>5</sup> Sadu hameigini Yahasiele igini Segania ibu heba agali handari tebira (300) dai bini. <sup>6</sup> Adini hameigini Yonadana igini Ebede ibu heba agali pira duria (50) dai bini.

<sup>7</sup> Elama hameigini Adalia igini Yasaia ibu heba agali pira karia (70) dai bini. <sup>8</sup> Sebadia hameigini Maigele igini Sebadiaia ibu heba agali pira halira (80) dai bini. <sup>9</sup> Yoaba hameigini Yahiele igini Obadaia ibu heba agali handari kirani pira mbirani halira (218)



dai bini. <sup>10</sup> Bani hameigini Yosibia igini Selomidi ibu heba agali handari mbirani pira waragara (160) dai bini. <sup>11</sup> Bebai hameigini Bebai igini Segaraia ibu heba agali pira kirani halira (28) dai bini. <sup>12</sup> Asagada hameigini Hagadana igini Yohanana ibu heba agali handari mbirani pira (110) dai bini. <sup>13</sup> Adonigama hameigini Elibeledebi Yuelebi Semaiabi agali pira waragariaru (60) ti agali tebira biarua heba dai bini ndo emene maha dai bini. <sup>14</sup> Bigibai hameigini Udaibi Sagubi libu heba agali pira karia (70) hene. Hameigini uruni bibahende Yaruseleme dai biai hene.

*Eserahanda Libai hameigini maru hearu hai buwa Anduane Homogonaga andaha biabe bilo dabo heleneru ogo*

<sup>15</sup> I Esera ina agali uruni Ahaba tanoha iba dalialu piaga hariga wiagoria howa agali bibahende mo mogo bialu balai anda buwa horo tebiru ogoriani harima. Ani howa handalu hewaria loma binigo mo miaga agali maru ogoriani bu hearia handarugo ai Libai hameigini mbira nahandaru. <sup>16</sup> Ani nahende howa ina agali haguane dirali olalu ini koria ibidaba laru. Agali ibiyadaruni tinaga mini Eliese Ariele Semaia Elenadana Yaribi Elenadana mendebi Nadana Segaraia Mesulama imaru uruni bibahende olalu ibu ngoai hadaba laru. Ani bialu agali kira mana bayale lawai haga Yoiaribi Elenadanalabi ibidaba laru. <sup>17</sup> Ani ibiyagola tigua Kasibia dindiha agali haguane mbira mini Ido ibu Anduane Homogonaga anda handaya ho haga heneru aria kago hondo pudaba laru. Ani hondo puwa agali maru ibu heba biabe bialu haga hayadarubi haru halu Anduane Homogonaga andaha biabe bimiya ibalimu laru. <sup>18</sup> Ngode Datagaliwabehanda ina dara timbuni howa biamogo biyagome tigua Mali hameigini Libaiali mbira mini Serebaia henego ibilaya. Ibu agali bayaleore howa ibugua biagaru bibahende tigabi hangu biaabo haga hene. Ani henego ai ibu iginirubi ibu hamenerubi pira mbirani halira (18) henego uruni bibahende haru halu ibai haya. <sup>19</sup> Ani ibiyagola Ido ibugua nde agali kirali Hasabia Yasaiala libu Merari hameigini henego ibilalu libu dameneru pira kira (20) haru halu ibiniya. <sup>20</sup> Ani bialu agali maru handari kirani pira kira (220) Anduane Homogonaga andaha biabe biaga hearubi ibilalu biya. Bamba Kini Debidi halu ibunaga agali haguane heneru ti heangi ibugua agali uruni aria Libai hameiginiru baba biabe biamogo mogo bialu helo dabo helene. Agali uruni henedaru tinaga mini marunaga mini wiagadagoha gilibu winigo nga, lalu Eserahanda lene.

*Esera halu wali agali bibahendeme tomo nane haga mana bialu Ngode Datagaliwabehondo bi lalu henego ogo*

<sup>21</sup> Esera ibugua Iba Ahaba peago kawareni dege howa wali agali bibahende hearuhondo lamialu lalu, Ina bibahendeme tomo nane haga mana bialu Ngode Datagaliwabenaga deni inane mo dindiha howa ibuhondo lalu, Ina Yarusalem pole poramagoha inanebi inanaga waneiginirubi mbirale yidamarubi harigani baya hangu handayaho habe, lama laro, laya. <sup>22</sup> Esera ina tihondo lamialu, Ina harigani haru pelo ami agali hosini biralu ina haru pelo ina kinihondo ngi lolene taga howa ngi nalarudagoni irane ala ina kini heba mandagi howa ibuhondo bi ogodagua laru. Inanaga Ngode Datagaliwabe ibugua wali agali ibuniore talima pialu haga karu baya hangu handayaho haga ka. Anigo wali agali maru ibuhondo erembira mialu poraruhondo keba timbuni halu tini pani nelu mialu mo ko howaore baga ka, lalu kini lamiru. Ani lamu howa mani ibuhondo ami agali maru ina harigani mamage helo ngi lolene taga biya handala waharu. <sup>23</sup> Ani birugo ai ayu iname tomo nane howa ina hariga poramagoha baya hangu haru habe lalu Ngode Datagaliwabehondo bi lamirimagola ibugua hale halu harigani pialu hemagola handaya ho halu biamogo biaore biya, lalu Eserahanda lene.

*Anduane Homogonaga andaha wilonaga mbirale mbirale mua howaore miniru handayaho helo agali dabo heleneru ogo*

<sup>24</sup> Serebaia Hasabiala heba loma binigo mo miaga agali piralibi ibidaba laru. <sup>25</sup> Ani ibu hemigola kini ibuguabi kini biamogo biaga hearumebi ibunaga agali haguane hearumebi Isaraele wali agali bu hearumebi ngolo silibaru mbirale tara tara Anduane Homogonaga andaha biabe bule mo wulene ngigi biyaruni bibahende ina genda magi hondowa loma binigo mo miaga hearu tigua handayaho helo talebu ta haru. <sup>26-27</sup> Mbirale tigua handayaho helo mo ta harudaruninaga genda magi ogodagua. Muni siliba timbuni genda maginaga tono pira kirani kira (22) wialu ngolonaga genda magi kilogarama daosini tebirani handari maria (3,400) mialu ndisi be silibame wabini handari mbirabi (100) miru. Ndisi be mbira mbiranaga genda magi kilogarama pira tebirani maria (34) ale dege dege miru. Ani bialu ndisi be ngolome wabini pira kirabi (20) mialu ndisi be uruninaga genda magi emene kilogarama halira ale dege degebi miru. Ani bialu ndisi be kira boronosime baya taraore wabinigo yolo timbunime mibehe winigobi miru. Yolo ngolome wabini ndisi be kira miaga winidagua dege mibehe wiagobi mirugola mo yaga biya.\*

<sup>28</sup> Ina mbirale uruni bibahende loma binigo mo miaga agali homberiali hearuhondo mo talebu tahalu howa tihondo lalu, Ai tigua Anduane Homogo ina mamalirunaga Ngode Datagaliwabenaga biabe bia hole lomabia hene ha kamigonigo hale hadaba. Ai ndisi be ngolo silibarume wabini Anduane Homogo turu halu mua howaore miniru uruni bibahende ibuninagaore wiabagi ho ngagoni. <sup>29</sup> Mbirale uruni baya hanguore yalu puwa Anduane Homogonaga andaha yu anda poleberemi. Yalu puwa loma binigo mo miagarunaga haru haga karubi Libai hameigini haru haga karubi Isaraele wali agali haru haga karubi uruni bibahendenaga deni ngolo silibabi ndisi berubi genda magi lone handadai buwa tihondo mo milimu, laru. <sup>30</sup> Bi uruni lai halu loma binigo mo miaga bu hearubi Libai hameigini aria bu hearubi tigua ngolo silibabi ndisi be biarunibi mo yai halu ina haru Yarusaleme puwa Anduane Homogonaga andaha yalu ibirima, lalu Eserahanda lene.

### *Wali agali Yarusaleme dai binigo ogo*

<sup>31</sup> Ege mbiranaga horo hombeane (12) layagola ina Iba Ahaba yu wahalu Yarusaleme pole piaga hariga wiadagua pirima. Ani pialu hemagola Ngode Datagaliwabe ibunime ina harigani baya hanguore handayaho haya. Ani handayaho heagola inanaga waitigi bu hearumebi pageali bu hearumebi mbira harigani howa ina balu inanaga mbirale yalu ibirimarubi mbira gingila mia nabi bayale ibalu anda ibirima. <sup>32</sup> Ani ibalu Yarusalemeni anda ibuwa horo tebiru halo harima. <sup>33</sup> Horo maneni ngolo silibabi ndisi be biarubi bibahende Anduane Homogonaga andaha yalu puwa genda magi handarima. Genda magi agiradabe handai howa mbirale uruni loma binigo mo miaga agali Uria igini Meremodo henegobi Piniasa igini Eleasa henegobi Libai hameigini aria kira Yasua igini Yosabadabi Binui igini Noadiabi tihondo miai harima. <sup>34</sup> Mirimagola tigua mbirale uruni bibahende baya hangu dagalayagola bibahendeore wiai heneya. Ani wiagola mbirale uruninaga daga mbuga mbirani gili bialu mo winidagua wiaabo helo ani birima.

<sup>35</sup> Agali Babilono dindiha garabaya golalu dai biyadaruni ti Yarusalemeni anda ibu howa tigua Anduane Homogo ina Isaraele wali agalinaga Ngode Datagaliwabehondo nogo maru loma bialu irame dai helonaga bo mule haru ibiya. Tigua Isaraele hameigini homberia (12) henego manda bialu bulumaga wangabe homberia (12) haru ibiya. Nogo sibi wangabe pira dirani waragaria (96) haru halu ibuwa sibi igini hungubalua pira kariani kariabi (77) haru halu ibuwa lomabu bo delaya. Nogo meme wangabe homberia (12) tininaga ko biniru domo wahai helonaga loma bialu bo delaya. Loma uruni bibahende irame dai helo bo delai haya. <sup>36</sup> Ani bo delai halu Babilononaga Kini Adasegesi ibugua beba mbira ihondo gilibu ngiyagola mo yalu ibinigo ai ina

\* **8:26-27:** Tono mbira genda magi 1,000 kilogarama

gabumane Iba Yuberedisi abene orayagi haru haga heagobi ibunaga agali haguane bu hearuhondobi ti hendelo lowa yalu pudaba laru. Agali haguane uruni tigua beba ogoni hondowa iname Anduane Homogonaga anda loma biahene ogoni baya hangu bulumaya biamogo bialu haya, lalu Eserahanda lene.

## 9

### *Yudali hearume dindi tara wali berearu dabu binigo ogo*

<sup>1</sup> Eserahanda laabo halu lalu, Iname loma uruni delai howa inanaga agali haguane bu hearume ibuwa ihondo langialu lalu, Isaraele wali agalirubi inanaga loma binigo mo miaga agalirubi Libai hameiginirubi tigua wali agali tara ina aria ndo hearu hondowa tini hangu habagi nahe ta nabi mandagi haya. Tigua Kenana wali agalirubi Hidi wali agalirubi Perisi wali agalirubi Yabusu wali agalirubi Amono wali agalirubi Moaba wali agalirubi Iyibi wali agalirubi Amoro wali agalirubi ti bibahende mana koorene ko biagadagua bialu hene ka. <sup>2</sup> Ani bialu inanaga agali haguane Yudali bu hearume dindi uruniha wali berearu dabu bigi biyagome ina wali agali Ngode Datagaliwabe ibuninaga loma biahelene harimagoni ina ko halu dindi tara wali agali biaru haradagua bidama. Agali haguane hearubi haru haga hearubi tigua mana ko urunidagua bialu heagola hondowa wali agali maru hearumebi ti biyadagua talialu bialu ka, lalu i langiya.

<sup>3</sup> Tigua bi ogoni layago hale howa ina inaga bu miniha genda timbuniore haru. Genda howa ininaga aga bu hewago lerelalu mandari angaribi minu dogai halu i minibi naibiore bame ona biru wiru. <sup>4</sup> Ani berewane dege alendo halu alendonaga loma bo delolenengi haya. Wali agali hearume manda bialu tigua mana ko biyagonaga Isaraele wali agalinaga Ngode Datagaliwabehanda ina baba keba timbuni haga kago manda bialu ti gi ho haya. Ani gi howa ti dewaliore i berewagoria ibu ngoai ho birarimagoni.

<sup>5</sup> Ani biraabo howa loma bo delolenengi hayagola i aga minu lerelene biago bu berenego biwaore heyalu ge duli hanga ho biruwa inaga gi kirabali Anduane Homogo inaga Ngode Datagaliwabehondo dogoladaga haru. <sup>6</sup> Ani bu biruwa ina Ngode Datagaliwabehondo bi agua laru, Inaga Ngode Datagaliwabe-o ina taga timbuniore ho kogoni. Ai ina i kegoria ibalu ihondo bi labe naheore ko lo manda bido. Iname ko dewaore bialu harimada. Ani birimagome inanaga mana ko uruni dewaore wu tolalu hari daliga ela habehe wiyada. <sup>7</sup> Inanaga mamali alaore henedangi howa inaga wali agaliruore heneru tigua mana ko dege bima ibalu henego ayu inamebi nde mana ko timbuniore bialu harimada. Ani bialu hemagola inanaga waitigi kini bu hearu ibilarigola tigua ibuwa inanaga mbirale wu hemaru ti mo yai halu inanebi inanaga kinirubi loma binigo mo miagarubi minu bai halu maru garabayabu yalu ti daluha piai haya. Ani biyagola bamba inanaga mamalirume taga timbuni henedagua inabi nde tagaho dege kamagoni.

<sup>8</sup> Anigo Anduane Homogo inanaga Ngode Datagaliwabe-o ina ina lone mitangi bu dai bialu dara howa ina wali agali emene mbira mbira o daibu kamaruni hangu garabaya harimago golalu ininaga dindi baya gibi Yarusalemeni hole dai bidaba lari. Ina agali hameigini taranaga biabe biahaga hene harimago ina ina biamogo birigome bayale kamagoni. <sup>9</sup> Heneneore ina hameigini tara bu karunaga garabaya biabe biahaga hemaria ina ina yu wahalu embeda nahaga haabo kegoni. Inime ina dara timbuni howa Pesianaga kini bu hearume ina baba turu ho helo tinaga mini mo paliaho helari. Anidagua birigome iname dai bialu inaga anda loma bia hene abale gialo wahayago lone biadai bule ibulumaya haru dai biri. Iname anda ogoni bulumayanaga hongo

holene ína karulapeore ngialu baya hangu handayaho kegola ina Yarusalemehabi Yuda dindi maruhabi bayaleore kamagoni.

<sup>10</sup> Anigo inanaga Ngode Datagaliwabe-o ína mbirale bayale uruni bialu kegoni helowa iname ínaga mana lowini ngeru pugualu ko bialu haabo haga kamagonidago iname bi agi lolebe. Ina taga timbuni ho kamagoni. <sup>11</sup> Ínaga bi mana latagi haga agali hearu tigua íninaga bi mana wiaruni mo yu howa inahondo langialu haya. Tinaga ne harigaha howa ínime inahondo bi ogodagua lari. Tínaga dindi áyu pialu karuloleberemigo ínaga deni bayale ndo nga. Anidagua larogoni irane wali agali dindi ogoniha haga karume mana koorene ko ngubiore ngaru mo tene howa dindi ogoni bibahende bialu haga nga, lari. <sup>12</sup> Anidagua biaga kago tigua dindi ogoniha wali bedaruni dabu nabilimu. Tí wali bedamirubi agali dindi ogoniha karu dabu bilo namilimu. Ti bayale helo biamogo bulenebi tigua mbirale mbira bule bialu karu biamogo bulenebi uruni bibahende nabilimu laro. Tigua ínaga bi larogo hale halu taluwa bialu harimiyagua nde tí dindi ogoniha bayale halu hongoheore holeberemi. Ani bialu mani tínaga waneigini aguanene holebiraru tigua dindi ogoniha bayale haabo holebira, lalu larigoni ndobe.✧

<sup>13</sup> Heneneore inanaga Ngode Datagaliwabe-o ína inahondo bi ogonidagua langirigo mo wahowa iname mana ko liahe wiaru dege bialu harima. Ani bialu hemaria ínime ina bibahende mana lalu pani ngiri. Ani bialu ina mo ko halu bo amo lolene winigo ai ani nabi ínaga wali agali dara timbuni ho howa ina emene mbira mbira hangu helo yupe hari. <sup>14</sup> Ani birigo ai ina yu wahene emene kamarume ínaga bi lo winidaru lone mo wahowa dindi tara wali agali mana ko tara tara biaga bu karu dabu bigi bialu harimayagua ogoni mana ko timbuni buleberemada mandabu kama. Iname wali agali ogonidagua dabu bigi bialu harimayagua nde ína inahondo keba timbuniore halu wali agali emene yu wahene kamaruni bibahende bo wahai holebereda mandabu kamagoni. Ani bo wahai haregola ina aria lenego mbiraore hangubi mbira naholobada. <sup>15</sup> Anduane Homogo ina Isaraele wali agalinaga Ngode Datagaliwabe-o í mini bayale tigabiore howa ína emene mbira mbira hangu yu waharigo ina o kamagoni. Ai ina bibahende wali agali yu wahene kamarumebi mana ko dege biaga kamago íni kegoria kaware ibabe naheore kamagoni, lalu Eserahanda Ngode Datagaliwabehondo bi ani lamaro bini.✧

## 10

### *Yuda wali agalime wali agali tara baba dabu bulene nawiore lenego ogo*

<sup>1</sup> Esera ibu Anduane Homogonaga anda lomabia hene heagoha harabani howa ibugua Ngode Datagaliwabehondo bi lalu dindini bulu paluwa dugu bialu mana ko bialu heneru bibahende latagi hai hene. Ani lalu hearia Isaraele wali agalibi waneiginirubi dewali íbu ngoai halu Esera ho mabu buwa tibi nde ko biyarunaga dara howa dugu bigibigi bialu hene. <sup>2</sup> Ani bialu heagola Elama hameigini Yahiele mbira henego igini Segania ibugua Eserahondo lalu, Iname Ngode Datagaliwabenaga mana lo wiago pugualu hameigini tara tara Ngode Datagaliwabe mitangi nabiaga hearu aria wali berearu dabu birimagoni. Ani birimagoyu ina Isaraele wali agali kamarume mana ko ogoni domo wahelonaga bulene mbiraore hangu nga. <sup>3</sup> Bulene mbiraore ogoni iname buleore lalu bi hongohe mbira Ngode Datagaliwabenaga deni howa lo wialu iname dindi tara tara wali dabu birimarubi waneigini hayadarubi bibahende haru halu tini aba aiyá andaga dai biai helamiya. Ai ínabi agali maru Ngode Datagaliwabenaga mana talima pialu haga kamirubi tigua ina kamaruhondo ogoale bidaba lalu langilimu. Ani langeremigola iname langeremidagua bialu Ngode Datagaliwabenaga bi mana lo ngago bialu holeberama. <sup>4</sup> Genda áyu ogoni mo tiga bulene biabe ogoni ínaga ngagoni. Ani

ngago ai ína gi nahe abale heyalu mo tiga bia. Ani beregola ina í heba kamarunime mini mo mbiraore halu ína inahondo bidaba lalu larego biai holeberema, lalu Esera lamini.

<sup>5</sup> Ani layagola Esera ibugua bi hongohe mbira loma binigo mo miaga agali haru haga hearuhondobi Libai hameigini haru haga hearuhondobi Isaraeleali haru haga hearuhondobi Segania ibugua layadaguaore bule lalu Ngode Datagaliwabehondo lo widaba layagola tigua anidagua buleore lai hene. <sup>6</sup> Ani laya handala Esera ibu Anduane Homogonaga anda harabani birayago heyalu Eliasibi igini Yahohanananaga tamu hobane mbira heagoha anda pene. Ani pu howa Isaraele wali agali hearume mana ko timbuni biyagonaga daraore timbuni howa dugu bialu hene. Ani bialu howa ibugua horo ogoningi hobane ogoniha tomobi ibabi naneore biraabo hene.

<sup>7-8</sup> Ani heagola Yuda agali haguane bu hearume bi ogo yalu pudaba lene. Wali agali garabaya golalu dai bini Yarusalemehabi Yuda dindi bibahendehabi bu karu Yarusalemeni hangu íbu ngoai hadaba lole pudaba, lene. Tigua lalu, Horo tebiru bolangua nahelo abaleore Yarusalemeni íbu ngoai halimu. Mbirali ibu naibi dongeho hayagua ogoni ibunaga mbirale wu karu ina karulai halu ibuni ina Isaraele wali agali bu kamaru aria ndo lalu bo taliatagi hamíya, lene. <sup>9</sup> Tigua bi uruni yalu peagola Yuda hameigini bu hearubi Beniyamini hameigini bu hearubi horo tebiru biago bolangua naheaore Yarusalemeni ibuwa ege dininaga horo pira mende (20) layagola ti bibahende Anduane Homogonaga anda haraba wali agali ngoai haga wiagoria íbu ngoai ho hene. Ani ngoai ho hearia iba dalu timbuniore ibiyagome agali íbu ngoai ho hearu bibahende damu wahayagola dagare howabi bi galoneore mbira lolebirayane mitangi howabi duru laga laga bialu bu hene.

<sup>10</sup> Ani ngoai ho heagola loma binigo mo miaga Esera ibugua heyu howa lalu, Tigua dindi tara tara wali agali Ngode Datagaliwabe mitangi nabiaga hearu dabu bigi birimidagome Ngode Datagaliwabenaga bi mana lowini wiaru puguai harimida. Ani birimidagome ina Isaraele wali agali bibahendenaga mana ko tigua mo timbuniore harimida. <sup>11</sup> Anidagua birimidago ai hale hadaba. Anduane Homogo tí mamalirunaga Ngode Datagaliwabe ibunihondo lapani halimu. Lapani halu mana bayale ibu hameledadagua taluwa bialu halimu. Anidagua bialu howa dindi tara wali agali tí daluni karu heba mandagi nahalimu. Ani bialu dindi tara tara wali tigua dabu bini bedaru wahalu tini dalu pudaba lalimu, lene.

<sup>12</sup> Ani layagola wali agali biaru tigua bi hongo howa ladaga halu lalu, Ína bi ogoni heneneore larigo iname ogonidagua buleberema, lai hene. <sup>13</sup> Anidagua bia bimiyagoyu ai ina dewaliore kamago iba dalume damu wakago ina tagirani dalu damuyu howa mana ko dewaore birimadaru abale mo tiga bibe naheda. <sup>14</sup> Anidago ai inanaga agali haguane bu karu tinime mbirale uruni mo tiga bule Yarusalemeni helo. Tigua agali maru dindi tara tara wali Ngode Datagaliwabe mitangi nabiaga berearu dabu bu hayadaruni tinime horo mbira mbirangi Yarusaleme ibalu mo tiga bilo. Ani mo tiga bule ibalu tininaga tanoha agali haguane karubi godi hale halu mo tale biaga karubi haru halu ibugu bilo. Iname ogonidagua birimayagua Ngode Datagaliwabehanda keba ho hayago naholebirago anidagua bimíya, lene. <sup>15</sup> Bi ogoni layagola hale howa agali bibahendeme anidagua bimíya lalu e lai heagola agali kiralime dege e nale hene. Agali kira ogoni labo Asahele igini Yonadanala Tigiba igini Yahesiala libugua e nalene. Ani nale heagola agali kira mende Mesulama Libai aria Sabedaila libuguabi agali kira Yonadana Yahesialame bi layago dege lo hongo halu hene.

<sup>16</sup> Tigua agali mariali bi mo wahaga uruni ti ani helowa agali maru tigua tinaga genda ogoni agali haguanerume mo tiga bilo lalu hene. Agali haguane uruni Esera halu tinaga mini mbuga mbiraha gilibu wini. Ani buwa ege pininaga horo pigane layagola agali mbira mbira dindi tara wali Ngode Datagaliwabe mitangi nabiaga berearu dabu bu



hayadaruni tinaga mana uruni mo tiga bule ibidaba lalu olaga bini. <sup>17</sup> Tigua biabe ogoni ege tebirani bu maro bini.

*Agali maru dindi tara wali dabu bu henerunaga mini uru*

<sup>18</sup> Loma binigo mo miaga agaliru wali tara dabu bu henerunaga mini uru. Yosua ibu hamenerunaga hameigini aria Yahosadaga igini Masea Eliese Yaribi Gedalia imaru ti wali tara dabu bu hene. <sup>19</sup> Agali uruni tigua ti one waholeore lalu bi lowini. Ani lowialu tinime ko bu harimada lo manda bialu tigua nogo sibi wangabe mbira dege dege tinaga ko bialu hayadarunaga Ngode Datagaliwabehanda domo wahelonaga loma bialu bo delole haru ibini.

<sup>20</sup> Ani bialu Ime hameigini aria Hanani Sebadiala libubi ani bini.

<sup>21</sup> Harimi hameigini aria Masea Elaya Semaia Yahiele Usia imaru tibi nde ani dege bini.

<sup>22</sup> Pasuru hameigini aria Elioenai Masea Isimaele Nedanele Yosabada Elasa imaru tibi ani bini.

<sup>23</sup> Libaiali aria dindi tara wali Ngode Datagaliwabe mitangi nabiaga berearu dabu bu henedaru tinaga mini uru. Yosabadabi Simaibi Kelaia ibu mini mende Kelida ibubi Pedahia Yuda Eliesebi tigua nde ani dege bini.

<sup>24</sup> Agali iba gana lalu ngida ba pilipe la bigi biaga howa dindi tara wali Ngode Datagaliwabe mitangi nabiaga bereago dabu bu henego ibu mini Eliasibi hene.

Anduane Homogonaga anda mamage haga agali tebirali Salumu Teleme Uri imaru tibi nde anidagua dege dabu bu hene.

<sup>25</sup> Isaraeali maru wali tara dabu bu henerunaga mini uru. Paroso hameigini aria Lamia Isia Malagiya Miyamini Eleasa Malagiya mendebi Benaiabi uruni tibi dabu bu hene.

<sup>26</sup> Ani heagola Elama hameigini aria nde waragariali Madania Segaraia Yahiele Abadi Yaremodo Elaya imaru tibi nde ani dabu bu hene.

<sup>27</sup> Sadu hameigini aria nde waragariali dege Elioenai Eliasibi Madania Yaremodo Sabada Asisa imaru tibi ani dabu bu hene.

<sup>28</sup> Bebai hameigini aria tibi nde mariali henego ti mini Yahohanana Hanania Sabai Adalai uruni ti dabu bu hene.

<sup>29</sup> Bani hameigini aria waragariali Mesulama Malugu Adaia Yasubu Seala Yaremodo uruni hene.

<sup>30</sup> Pahadamoaba hameigini aria halirali Adana Kelala Benaia Masea Madania Be-salele Binui Manase uruni hene.

<sup>31-32</sup> Harimi hameigini aria nde Eliese Isiya Malagiyabi Semaia Simeono Beniyaminibi Malugu Semariabi uruni ti dabu bu hene.

<sup>33</sup> Hasumu hameigini aria nde Madenai Madada Sabada Elibeledede Yaremai Manase Simai imaru tibi dabu bu hene.

<sup>34-37</sup> Bani hameigini aria Madai Amarama Uele Benaia Bedia Keluhi Bania Meremodo Eliasibi Madania Madenai Yosu imaru tibi dabu bu haga bini.

<sup>38-42</sup> Binui hameigini aria nde Simai Selemia Nadana Adaia imaru hene. Ani bialu Maganadebai Sasai Sarai Asarele Selemia imaru hene. Ani bialu Semaria Salumu Amaria Yosebe imarubi uruni ti bibahende dabu bu hene.

<sup>43</sup> Nebo hameigini aria nde Yaele Madidia Sabada Sebina Yadai Yoele Benaia imaru uruni ti hene.

<sup>44</sup> Agali mini o daga larimaruni bibahendeme dindi tara wali Ngode Datagaliwabe mitangi nabiaga berearu dabu bu henego wali waneiginirubi bibahende, Tíni dalu wahalu pudaba, lai hene.

## Nehemaia

### Mbuga ogoha gilibu ngarunaga nemandi ogo

Nehemaianaga mbuga ogoni bi irane halu tebira bulu бага bu nga.

Mbira

Pesia dindinaga kini heagome Nehemaiahondo, Yuda wali agali Yarusaleme haruago handayaho hole pu, layagola puwa ibugua Yarusalemenaga pabe podu wiaru biadai bialu hene. Yarusaleme wali agali bayale holebi Ngode Datagaliwabe mo dunini halu lotu lolebi bayuwa haru halu hene.

Mende

Esera ibugua Ngode Datagaliwabenaga **Mana** lowinigo dagalalu howa wali agalime tininaga ko biyaru lapani henego lo nga.

Tebone

Nehemaia ibu Yuda dindinaga hondo haga howa biabe ogodagua bini lalu te lo nga.

Nehemaiahanda binidangi galone maru bigi binigo manda bibehe uru.

Biabe berolo manda buwa ibugua Anduane Homogonaga andaneha howa bialu haga hene.

Ani buwa ogoni binidagoni Anduane Homogohondo bi laho wiaabo hene ngagoria hendedemagoni.

#### **Bulu бага буwa kuni gilibu ngago (1.1-2.20)**

Nehemaia Yarusaleme dai binigo te lo nga. *3.1-7.73*

Yarusalemenaga pabe giallo payabu wiaru biadai bini. *8.1-10.39*

Ngode Datagaliwabenaga Mana lowinigo dagalayagola wali agali Ngode Datagaliwabe heba habo nalolene bi lowiyago mo gahenge ho dai bini. *11.1-13.31*

Nehemaia ibugua biabe maru bigi binidarunaga lo nga.

#### *Nehemaiahanda Yarusaleme mitangi bialu Ngode Datagaliwabehondo bi lenego ogo*

<sup>1</sup> Hagalia igini Nehemaiahanda bi lo winiyago gilibu ngago ogo. Kini mini Adasegesi Pesia dindi mali kira haru hearia ege mini Kisalebe hayagola i Nehemaia Pesianaga dindi tano timbuni Susa wiagoriani hewaria <sup>2</sup> i hamene mbira ibu mini Hanani ibu Yuda dindi howa agali maru heba ibiniya. Ibiyagola ina tihondo Yarusaleme dindibi Yu wali agali Babilono garabaya howa dai biyarubi ti abi kabe lalu hale haru. <sup>3</sup> Anidagua hale harugola tigua ladai bialu howa lalu, Wali agali tini dindini daibu hearuni genda timbuniore handalu hea. Isaraele wali agali baba wali agali taratara palu paraparabu hearumebi hondo yoabu waorehe hea, lalu langiya. Yarusaleme dindi ege tole pabe bu yandaho helenyarubi podobaga bialu haraba payaga biarubi arema nabi heda heneyangi howa podobagabu wiaabo hene wia, lalu langiya. <sup>4</sup> Ogonibi ladai biyago hale howa ina dugu timbuniore bialu biraabo haru. Tomo nane howa Ngode Datagaliwabehondo bi lalu haru.

Horo maru dara howa dugu bialu tomo nane Ngode Datagaliwabehondo bi lalu haru. Ibhondo bi larudagoni au laru. <sup>5</sup> Anduane Homogo Ngode Datagaliwabe Dahuliya andaga kego i daliga gibi minime mandabu mibe nahe kegoni. I gubalini halu ina bia laredagua gubalini howa bialu karu baba baya hangu bulebero lalu habo nalolene bi lo wirigo kagoni. <sup>6</sup> Anduane Homogo i handalu ina ihondo bi larogoni hale habe. Ina mbirangangi horombengibi laabo halu Isaraele wali agali inaga biabe bia haga biarunaga la halu kogoni. Ina Isaraele wali agalime ko birima lalu ina ihondo lapani halu langero. I aguanene biarumebi inabi ko timbuni birima. <sup>7</sup> Bambaore inaga biabe bia haga Moseseha howa bi mana iname bulumaya lamirigo talialu bia nabi harima. Iname ina bilimu laridagua nabi erembira ngialu inaga deni howa mana ko timbuni

bialu harima. ✧ <sup>8</sup> Ini Mosesehondo lamialu lalu, Tigua ina larodagua ndo birimiyagua dindi taratara ti wali agali maru karuha bo purogo lolebero. ✧ <sup>9</sup> Ani berogola tigua ko birimada lalu mini beregedalu ina bilimu larudagua birimiyagua dindi gimbuni ngaruha purogolo kamigoni dege ininaga lotu lalu halimulo helarugoria inime haru dai buwa helolebero, lowiri. Anduane Homogo inime bi abale ogonibi lo wiriru mitangi bialu áyu ina biamogo bia. ✧

<sup>10</sup> Anduane Homogo-o wali agali uruni ti ininaga wali agali inaga biabe bia hagabi biaruya hendedeni. Ani bialu ininaga hongome gini miriru o karuni. <sup>11</sup> Áyu wali agali inaga biabe bia haga maru inaga mini mo yaraga hole manda buwa ihondo bi lalu karunagabi ina langerogobi hale habe. Áyu kini biago ibugua dara halu biamogo bilo inime anidagua mo bia habe, lalu lamini.

Horo uruningi i kini biagonaga waini iba yu pu ibu biabe biaga haru.

## 2

### *Nehemaia ibugua Yarusaleme penego te ogo*

<sup>1</sup> Ege maria peagola horo mbiru Kini Adasegesi ibu tomo nalu berearia ina waini iba yalu puwa miru. Kini biagome i wanakuini dara howaore hewaria ala nahendegome <sup>2</sup> ibugua hale howa lalu, i wanakuini daraore timbuni ho kegoni irane aginaga bu kebe. Warago nabe harigodago ko i hame nalegobi mbira biyabe, lene.

Ogonibi layagola ina mogo timbuni lowa ibuhondo ladai bialu lalu, <sup>3</sup> Kini-o i luore haabo habe. Dindi inaga aguaneneru hora henego giallo paya bialu paberubi irame do haealabaga bu nga layago hale haru. Ogonibi bu ngagola ina turu howa au holiyabe, lalu. ✧

<sup>4</sup> Ogonibi larugola kini ibugua ihondo hale halu lalu, Ina agi buliya hame ledebe, laya. Ani hale hayagola ina abaleore Ngode Datagaliwabe Dahuliya andaga kagohondo bi lalu. <sup>5</sup> Ani lowa ina kini biagohondo lalu. Ina birurunaga turu keyagua nde ina hale harogodagua bia lolebere Yuda dindini Yarusaleme timbuni i aguaneneru hora henegoria dai bia labelo hame ledi. Ani buwa ina tano gialobagabu wiaruaru arema bule dai buliya, lalu.

<sup>6</sup> Kini biago ibu onela tomo nalu mandagi bereneyago ibugua o hale harudagua bibe laya. Ani bialu horo agiru bialu howa dai bulebe layagola aguadagua hole lalu lamiru. <sup>7</sup> Ani lamialu howa beba maru Iba Yuberedisi ange ni paliragohayagi handaya ho haga karuhondo i ti daluni bolangua halu pu lelo beba maru ngi lalu. <sup>8</sup> Ani bialu beba mende kininaga irabu hondo haga Asabahondo gilibu wiaha lalu. Ira maru dibuwa Anduane Homogonaga andahayagi mamage haga pabe harabaru mo tiga buliyabi tano timbuni ibuninaga wai pabe podayaru biadai buliyabi anda ini paluene anda mo tiga buliyabi ira dibu ngilo beba bo wiaha lalu hale harugola ibugua ani biya. Ina ngi larudagua ngiyago irane Ngode Datagaliwabe i heba ka handayagome ani biya.

<sup>9</sup> Kini biago ibugua ami haru haga marubi ami hosini biruwa wai biaga marubi i baba pudaba laya. Ani biya handala iname Iba Yuberedisi ange ni paliragohayagi puwa beba biago dindi uruni handayaho haga hearuhondo miru. <sup>10</sup> Ani birugola Bedehoronoali mbira mini Sanabaladibi agali mbira dindi Amono handagimbu bu haga mini Tobiabi libugua handalu hearia agali mbirame Isaraele wali agali bayale helonaga biabe bule ibu ka layago hale hene. Ani hale howa libugua henge daliga timbuniore lo hene.

*Nehemaia ibugua Yarusaleme tanonaga pabe podobagabu wiaru handama ibaga binigo te ogo*

✧ **1:7:** Man 28.14, Dan 9.5 ✧ **1:8:** LBM 26.33 ✧ **1:9:** Man 12.5, 30.1-5 ✧ **2:3:** 2 Kin 25.8-10, 2 Bit 36.19, Yar 52.12-14

<sup>11</sup> Yarusaleme dindi puwa horo tebiru haru. <sup>12</sup> Horo tebiru howa horo mbiru mbiragangi agali i heba mandagi henedaru maru haru tagira piru. Ngode Datagaliwabehanda ihondo bule pu lalu gubaliniha wia hayago mbirali nalamiore haru. Mbiraga tagira pialu pirimadangi nogo dongi mbira i birarudago hangu haru pirima. <sup>13</sup> Mbiraga ogoningi dege tano ngelalu Uliyane Panga hariga ni paliragohayagi winigoria howa tagira piru. Ani bialu gi lehayagi Abagua Iba Duguaga layagoria bolangua halu pialu Mburuma Wahaga Panga kaware piru. Pirudagoni pialu howa Yarusaleme tanonaga pabe podo ibiraho wiarubi panga irame do pirilibagabu wiarubi bayuwa handawa biru. <sup>14</sup> Ani bialu tano lene ni tagira ibiragoha gi lehayagi piru. Pialu panga mini Iba Duguaga poragohayagi pialu Kininaga Iba Goreyane bereagoria puabo haru. Ogoriani howa nogo dongi biagome hariga pobe nahe pabe podope heneyarume gege biniyagola <sup>15</sup> hariga Kidirononaga ulinihayagi dalia dai buwa pabe ogonihayagi handama nogo dongi biagoria bialu piru. Handalu hariga ibirudagua dai bialu tanoha anda pole hariga Uliyane Panga biadagua anda piru.

<sup>16</sup> O birudaruni bibahende dindi ogoriani haru haga hearume manda nabioire hene. Ini aria Yu wali agali hearubi loma binigo mo miaga hearubi wali agali haru haga hearubi handagimbu bu haga hearuni tihondo biabe uruni mandagi bima lolene hayadarunibi lamia nabi howa bialu haru. <sup>17</sup> Ani buwa áyu ina tihondo hongo howa lamialu lalu, Yarusalemenaga pabe podo бага bialu pangarubi gialo payabu ngagome inahondo ko genda timbuni ya kago handadaba. Urunibi bu ngagome tagabi aledago pabe pirilibagabu ngagoni wa dai bima, laru. <sup>18</sup> Ani bialu ina Anduane Homogo ibugua biabe buliya biamogo biyagobi kini biago ibugua langiyarubi tihondo lamiai haru.

Tigua hongo howa ladai bialu lalu, Mo gini bialu biadai bimija, larimi. Ani lowa tigua ani bule manda manda biya. <sup>19</sup> Agali maru Sanabaladibi Tobiabi Arebiali mbira ibu mini Gesemebi tigua iname bule manda manda birimago hale hene. Hale howa tigua ina hondo oba halu mege bialu lalu, Tigua ogoni agi bule manda buwa beramibe. Pabe lone biadai bialu hongo howa kini baba wai bule beramibe, laya.

<sup>20</sup> Ogonibi layagola ina ladai bialu lalu, Dahuliya Andaganaga Ngode Datagaliwabe kago ina ibunaga biabe bia haga kamago biabe bayuwa bulumaya ibugua hongo ngulebira. Ani biragola iname biabe ogoni buleberema. Anigo ti mbirale mbira Yarusaleme dindini ngagonaga anduanebi dindi ogo ababi ndo Yarusalemenaga malumebi manamebi ogo kami lowa manda nabioirego ti kamigoni, laru.

### 3

#### *Yarusaleme tanonaga ege pabe lone biadai binigo ogo*

<sup>1</sup> Yarusaleme tanonaga ege pabe ogodagua biadai bini. Loma binigo mo miaga Haguane Timbuni Eliasibi henego loma binigo mo miaga maru bu hearubi tigua pabe lene mbirahayagi panga haraba mini Nogo Sabinaga Panga laga wiagoria kaware dege bialu hene. Biai howa tigua pabe ogoni Anduane Homogo ibuninagaore helo tigua ibuhondo lotu lalu mo loma bia ho helene. Ani buwa tigua panga damene bibahende ala helaga winigoria hela dai bigi bini. Pabedagoni bima pialu amuraore pabe bu gimbubu migi bima irigi halu bamba wiagane mini Handari Mbirame (100) Mamage Haga laga wiagoria bima pialu amuraore pabe bu gimbubu migi bima iraga halu mamageali handa amunana bu haga agali bamba henego mini Hananelenaga laga heagoria biairi hene. Ani bialu tigua pabe ogoni Anduane Homogo ibuninagaore helo lowa lotu lalu ibunihondo loma bia hene. <sup>2</sup> Ani buwa loma binigo mo miaga biaru tigua pabe biairi hayagoria howa Yarigo tanoali hearume bu yolo mialu hene. Ani bialu heagola Imiri igini Saguru halu agali marume nde Yarigo tanoali uruni tigua biairi holobadagoria howa bu yolo mialu bima pene.

<sup>3</sup> Ani bialu heagola Hasena igini bu hearume nde Saguru halume bialu hayadagoria howa bu yolo mialu pabe panga mbira mini Wena Panga laga henegoria bialu hene. Ani bialu howa tigua panga harabarunaga ira helalu pangaru wabu helalu panga logobi hongohe hela tamuha howa panga gedene hatagi holenenagabi aeane mbira luni hela bigi bini.

<sup>4</sup> Meremodo halu agali marume Wenanaga Panga laga panga haraba biago abene mendehayagi bima pene. Meremodo ibu Uria igini howa Hagoso aguane hene. Ani bialu hemigola Mesulama halu agali marume Meremodo halu ibunaga agaliru tigua bialu heagoria howa bu yolo mialu bini. Mesulama ogoni ibu Beregia igini Mesesabele aguane hene. Ani bialu heagola Bana igini Sadogo halu agali marume Mesulama halu bialu heagoria howa bu yolo migi bialu hene.

<sup>5</sup> Ani bialu heagola Tegoa tanoali bu hearu tigua ibuwa nde Sadogo halume bialu heagoria howa bu yolo migi bialu hene. Ani bialu howa Tegoa tano haru haga agali hearu tigua hangu haru haga agali haguane hearunaga bi hale habe manga howa biabe ogoni nabi bame hene.

<sup>6</sup> Pasea igini Yoiadala Besodea igini Mesulamala libu nde agali maru haru howa Tegoa halu bialu hayagoria howa dege bialu hene. Tigua panga mini Yasananaga laga wiagoria bialu hene. Ani bialu tigua panga wabialu logobi hongohe helalu tamuha howa gedene hatagi holenenaga aeane luni hongohe mbira helalubi bini.

<sup>7</sup> Ani bialu heagola Gibeono tanoali Meladiala Meronodo tanoali Yadonola libugua nde agali maru Gibeono howabi Misiba howabi haru howa Yoiada Mesulamalame bialu heagoria howa bu yolo mialu gabumane haru haga agali haguane timbuni heagonaga anda Iba Yuberedisi ange ni paliragohayagi heagoria bialu hene.

<sup>8</sup> Hahaia igini Usiele halu agali maru haru howa tigua nde Meladia Yadonola libugua bialu hayadagoria howa bu yolo mialu hene. Usiele ibu ngolome mbirale tara tararu wabiaga hene. Hananaia halu agali marume Usiele halu bialu hayagoria howa bu yolo mialu amurayagi pabe mini Yangale Timbuni laga wiagoria biairi hene. Hananaia ogoni ibugua padua ngabi tara mbira mini sanda wabiaga hene.

<sup>9</sup> Hua igini Lebaia halu agali maru hearume Hananaia halu bialu hayagoria howa bu yolo mialu hene. Lebaia ogoni ibu Yarusaleme tano mendehayagi gabumane agali haguane mbira hene.

<sup>10</sup> Ani bialu heagola Harumaba igini Yadaia halu agali marume nde ibuni andaga kaware heagoria dege bialu hayagoria bu yolo migi bialu hene. Ani bialu heagola Hasabanea igini Hadusu ibugua nde agali maru haru howa Yadaia halu bialu hayagoria howa bu yolo mialu bima pialu hene.

<sup>11</sup> Ani bialu heagola agali kira Harimi igini Malagiya Pahadamoaba igini Hasubu libugua nde agali maru haru howa Hadusu halu bialu hayagoria howa bu yolo mialu hene. Ani bialu howa tigua anda daligaha bu gimbubu migi bima irigi halu mini Mberedi Hiraga Anda laga wiagoria bialu hene.

<sup>12</sup> Ani bialu heagola Halohese igini Salumu ibugua nde agali maru heba Malagiya Hasubulame bialu hayagoria howa bu yolo mialu bima pialu heagola ibu wane berearumebi nde biabe ogoni biamogo bialu berene. Salumu ogoni ibu nde Yarusalemenaga gabumane agali haguane mende howa ibugua dindi lene mbirahayagi haru haga hene.

<sup>13</sup> Ani bialu heagola Hanunu ibu Sanoa tanoali maru heba tigua agali marume bialu hayagoria howa bu yolo mialu howa pabe panga mbira mini Uliyane Panga laga wiago wabini. Wabuwa panga haga wiagoria wabu helowa logobi hongohe helalu aeane luni hongohe mbirame panga gedene hatagi holenenagabi helalu bini. Ani bialu tigua pabe panga abene mendehayagibi bima pialu panga haraba mbira mini Mburuma Wahaga



Panga laga wiagoria bima puabo hene. Ogoni luore mita magi handari mariani pira maria (440) wini.

<sup>14</sup> Ogonidagua bialu heagola Legaba igini Malagiya halu ibunaga agali bu hearu tiguabi nde ogoriani howa bima pialu pabe panga mbira mini Mburuma Wahaga panga laga wiago wabialu logobi hongohe helalu tamuha howa gedene hatagi holenenagabi aeane hongohe luni mbira helene. Malagiya ogoni ibu dindi lene mbiraha mini Bede Hagereme wiagonaga gabumane haru haga agali haguane hene.

<sup>15</sup> Kolohose igini Salumu ibu dindi lene mbiraha mini Misiba wiagonaga gabumane haru haga agali haguane hene. Ani howa ibugua agali maru haru howa pabe panga mini Iba Duguaga laga wiagoria howa bialu hene. Tigua ani bialu howa panga biagonaga ira emene marume hagira biadaga halu bini. Ani buwa tigua panga wabu helowa logo hongohebi helalu tamuha howa gedene hatagi holenenagabi aeane luni hongohe mbira helalu bini. Ani buwa pabe bima pialu iba mbira mini Selanaga Iba laga bereagoria bu mabu bini. Pabe ogoni kininaga mabu gama kaware wiagoria bialu hene. Ogoriani howa bima piaho wialu Debidinaga tanoha anda pole piaga egageria wiagoria bialu hene. <sup>16</sup> Ani bialu heagola Asabugu igini Nehemaia ibu dindi lene mbira mini Bedesuru wiagonaga gabumane haru haga agali haguane henego howa agali marume Salumu halu bialu hayagoria howa bu yolo migi bialu hene. Tigua nde bima pialu Debidinaga homali heagoria ami agali mini lenerunaga anda henegoriabi iba uli winigoria bima tagira pene.

#### *Libai ariame pabe bialu henego ogo*

<sup>17</sup> Libai aria maru hearu tigua nde tano pabe mendehayagi bialu hene. Agali tinaga mini uru Bani igini Lehumu halu Libai aria maru hearu tigua nde Nehemaia halu bialu heagoria howa bu yolo mialu bima pialu hene. Ani bialu heagola Keila dindiha dindi lene mbira wiaru haru haga agali haguane Hasabaia mbira heago ibugua agali maru heba tinaga daluhayagi bu yolo mialu bima pialu hene.

<sup>18</sup> Ani bialu heagola Henadada igini Babai ibu Keila dindiha gabumane agali haguane mende henego ibu halu Libai agali maru heba tigua Hasabaia halu bialu hayagoria howa bu yolo muwa bialu hene.

<sup>19</sup> Yasua igini Ese ibu nde Misiba tanoha agali haguane henego ibugua bu yolo muwa bialu hene. Ani buwa mbirale wai biaga damene tara tararu wiagane anda heagoria howa tigua bima pialu pabe gimbuni pau lenegoria biairi hene.

<sup>20</sup> Ani bialu heagola Sabai igini Barugu halu Libai aria Ese halu marume bialu heagoria howa bu yolo muwa bialu hene. Tigua minime biabe bule lowa hongo howaore bima pialu amuraore loma binigo mo miaga Haguane Timbuni Eliasibinaga anda harabani biairi hene.

<sup>21</sup> Ani biairi heagola Uria igini Meremodo ibu Hagoso aguane henego ibugua Libai agali maru haru howa biabe bu yolo mini. Tigua loma binigo mo miaga Haguane Timbuninaga anda haraba biagoria howa bima pialu anda abene mendehayagi bu bolangua hene.

#### *Loma binigo mo miaga agali maru pabe bialu heneru ogo*

<sup>22</sup> Loma binigo mo miaga agali dindi Yarusaleme kaware wiapara para biaruha haga maru hearu tigua pabe ala Meremodo halume bialu hene wiagoria howa bu yolo mialu bini. <sup>23</sup> Loma binigo mo miaga kira Beniyamini Hasubula libugua agali maru haru howa wai pabe libuni anda hane kawareni howa bialu hene. Loma binigo mo miaga dege Masea igini Asaraia ibu Ananaia aguane henego ibu nde agali maru haru howa ibuni anda hane kawareni dege pabe bulene wiagoria bialu hene.

<sup>24</sup> Ani bialu heagola loma binigo mo miaga Henadada igini Binui halu agali marume Asaraianaga anda heagoria howa bu yolo mialu bima pialu pabe pau lenegoria mini Pabe Pau laga wiagoria biairi hene.

<sup>25</sup> Ani bialu heagola Usai igini Palala halu agali marume pabe pau leagoria howa bima pialu kininaga anda mende daliga bu gimbu bima iraga hene heagoria howa bima pialu hene. Anda bu gimbu bima iraga hene ogoni mamage haga agali hearunaga anda kawareni bialu hene.

<sup>26</sup> Ani bialu heagola Paroso igini Pedaia halu agali maru hearu tigua nde biabe ala bini wiagoria howa bu gimbubu migi bima pialu amuraore panga haraba mini Iba Hambu Piaga laga wiagoria bima pene. Ani bialu anda bu gimbu bima iraga hene heago daligani agali maru Ngode Datagaliwabenaga anda mamage haga wiagoriani biairi hene. Pabe panga ogonibi agali mamageali handa amunana bu haga ogonibi kirabali pabe bialu hayagonaga abene ni paliragohayagi hene. Pabe o bialu henedagoni Yarusalemeha dege dindi hambene mbira mini Obele kawareni agali Ngode Datagaliwabenaga andaha biabe bialu haga hearu tini dalu wiagohayagi bialu hene.

*Agali marubi pabe ogoni bialu henerunaga mini gilibu winigo ogo*

<sup>27</sup> Tegoa tanoali hearume ibuwa nde Pedaia halu bialu hayagoria howa bu yolo mialu bima pialu hene. Agali uruni tigua pabe halu mende ogoni bialu howa Ngode Datagaliwabenaga anda mamage haga anda bu gimbu bima iraga hene biagoria howa bima pialu pabe abene uyurayagi pabe panga mbira mini Nogo Hosinaga Panga laga dindi hambene mbira mini Obele kawareni dege bialu hene.

<sup>28</sup> Loma binigo mo miaga maru hearu tigua nde Nogo Hosinaga Panga laga wiagoria bialu howa tininaga anda headagua bu yolo migi bialu biaanda haga bialu hene.

<sup>29</sup> Ani bialu heagola Imere igini Sadogo ibu nde agali maru heba loma binigo mo miaga maru biarume bialu hayagoria howa bima pialu Sadogo ibuni anda heagoria bialu hene. Ani bialu heagola Segania igini Semaia ibu Ngode Datagaliwabenaga anda panga mbira ni tagira ibiragohayagi heago mamage haga howa ibugua agali marume pabe bialu heagoria howa bu yolo mialu bima pialu hene.

<sup>30</sup> Selemaia igini Hananaiala Salaba igini waragane Hanunula libugua agali maru haru howa Semaia halu pabe bialu heagoria howa bima pialu hene. Libugua pabe halu mende ogoni bialu hene. Beregaia igini Mesulama ibu agali maru heba tigua agali maru pabe bialu heagoria howa bu yolo mialu Mesulama ibuninaga anda kawareni dege bialu hene.

<sup>31</sup> Malagiya ibu mbirale tara tara ngolome wabiaga henego ibu agali maru heba tigua marume pabe bialu hayagoria howa bu yolo mialu hene. Tigua ogoriani howa bima pialu Ngode Datagaliwabenaga andaha biabe bialu hagarubi agali biyinaya biabe biagarubi tininaga anda kaware heagoria pabe bialu haga winigoria bialu hene. Anda ogoni Ngode Datagaliwabenaga anda panga haraba mbira mini Mamage Haganaga Panga laga winigo ogoni ibu hobane daligahayagi pabe pau leagoria hene.

<sup>32</sup> Agali maru mbirale ngolome wabiaga hearubi agali biyinaya biabe biaga hearubi tigua pabe gimbuni ogoriani howa bima pialu amuraore pabe panga mini Nogo Sibinaga Panga laga wiagoria biairi hene.

## 4

*Nehemaia ibunaga waitigi bolangua henego te ogo*

<sup>1</sup> Sanabaladi ibu hale halu hearia iname ege tole hagira pabe biago biadai bira layago hale halu lembo howa keba timbuniore hene. Biabe uruni habane nabulene ale berami lalu mo yo handalu hondo oba hene. <sup>2</sup> Ibuni baba biabe mandagi biaga biarubi Samarianaga ami agali hearubi uruni tinaga deni howa lalu, Emenerume agi beramalo manda bu birabe. Tigua hagira podo ngagoni bibahende biadai biai holobadabe. Mbirale loma biragome Ngode Datagaliwabehondo bo mialu biabe uruni horo mbiru hangu biai holeberema lo manda biruabe. Tole dodobagabu wialu irame

bini wiaru damenego ira dayagome do pirilibagabu ngarudago tigua uruni bibahende biadai buwa abale henedagobi helolebadabe, lene.

<sup>3</sup> Agali mbira henego mini Tobia Sanabaladila heneyago ibugua lalu, Tigua pabe ogoni agi ale bule manda buwa biaruadabe. Pabe elole biraruni biango dudu emene ko mbirame irigi haragola podobaga bulebira, lene.

<sup>4</sup> Libugua bi ogonidagua lalu heagola ina Ngode Datagaliwabhondo bi ogodagua laru. Ngode Datagaliwabe-o tigua ina lahirarago hale habe. Yo hondowa oba halu karu taga pani tini nelu mibe. Tinaga mbirale ngaru bibahendeore pagealime mo page bilalu dindi nalene mendeha garabaya hama pelabe. <sup>5</sup> Tigua mege bialu hondo oba halu lahirayarubi ko tigua biyaruni embeda holeni. Iname pabe biadai bule bialu kamago hondowa tigua mege timbuni biyagonaga, lalu laru.

<sup>6</sup> Ngode Datagaliwabhondo bi lai halu puwa wali agali biarume biabe hongo howaore bule gubalini heneneore howa pabe biagoni luore winigo biai hole bini bulela hanuniore harima.

<sup>7</sup> Ani bialu hemaria Sanabaladibi Tobiabi Arebiali biarumebi Amonoali biarumebi Asadodoali hearumebi Yarusalemenaga pabe biadai bule biabe bayale bialu ka lalu podopeho wiaru mo pai hai haya layago hale howa keba timbuniore hene.

<sup>8</sup> Tigua keba ho howa wali agali Yarusalemeni hearuni mo talola halu mini burugulo helole manda buwa Yarusaleme wali agali bole manda manda bini. <sup>9</sup> Ani biyagoyu inanaga Ngode Datagaliwabhondo bi larima. Bi lowa mbiraga horombebi heba iname agali maru mamage helo helarima.

<sup>10</sup> Ina Yuda wali agalime biabe bialu howa iba gana laga winigo ogo Iname biabe uru bialu hangu hemaria hongo ibira hara.

Ege pabe biago podo ibira ibira binigo  
 ilu waholene dewaore wiaruagome  
 pabe biago áyu biai au hamiyadabe,  
 lalu hene.

<sup>11</sup> Waitigiali biarume ina nahende hemaria mo mogola howa bo wahole manda bialu biabe birimago giallo wahole manda biniya. <sup>12</sup> Yu wali agali maru inanaga waitigi uruni baba hatagobu henerume wai hanaga biyago tigua ina langiaabo haya. <sup>13</sup> Ani bira layago hale howa ina wali agali biaru wai biagane ayu tibubi yandarebi danda timurubi yuwa waitigi agali ibiragola wai bilo tini hameigini paleadagua pabe biai nahe wiagohayagi mamage helama piru.

<sup>14</sup> Ina handalu hewaria wali agali hearuni mini dege dindi howa ho hearia ina tihondobi tinaga haru haga hearubi handa gimbu bu haga hearubi tihondo ogodagua lamiru. Inanaga waitigialiru hondowa gi nahadababe. Anduane Homogo ibu gibi kago manda buwa tí dindinagabi tí waneigininagabi tí onenagabi tíni andanagabi wai beremalo manda buwa bimíya, laru. <sup>15</sup> Inanaga waitigiali biarume ina bole manda manda bu hearu handa walía harimago hale haya. Ani buwa tigua handalu hearia Ngode Datagaliwabhanda tinaga wai hono wirimigoni gialobagabu waheneyane handayiya. Ani biyíya handala ina bibahendeme pabe biala ho wirimago lone bule dai birima.

<sup>16</sup> Ogoningi howa inaga agali biaruni talebuki howa mendeme biabe biyagola mendeme wai biaganeru ale karulowa humbi yandarebi danda timurubi yuwa wai bule mamage hene. Inanaga haru bamba haga biarume wali agali pabe bialu <sup>17</sup> hearumebi gi mendehayagi biabe bialu gi mendehayagi wai bulene mbirale yu howa biabe bini. <sup>18</sup> Pabe bialu hearume wai biagane ayu tibu biago nogo dongoneha darali howa biabe bini. Agali mbirame waitigi ibira lowa walía halu mbelo biguli laga biago ila mandagi hariba. <sup>19</sup> Wali agali biaruhondobi haru haga haguane biarubi handa gimbubu haga biarubi ti bibahendehondo ogodagua lamiru. Ina lalu, Pabe bulene biago

✧ 4:4: Iba 79.12, 123.3-4 ✧ 4:14: Man 10.17, 2 Sml 10.12

luore wirago ai wali agali dindi ogoriani biabe bialu haramago bilibolo lowa pabe biago bialu harama. <sup>20</sup> Waitigiali ibira lalu walia haga mbelo biguli hale harimiyagua i kogoria ngoai halimu. Ani beremigola inanaga Ngode Datagaliwabe ibugua wai inanaga bia holebirago bia helo, lalu lamiru. <sup>21</sup> Horo bibahendengi muna biyagola tagira puwa tale bialu marume pabe biago biyagola marume yandare yuwa mamage ho harima. Ani bialu ne lai hayagola yakundiru hale yuwa Yarusalemeni haho wirima.

<sup>22</sup> Uruningi pabe bialu agali biabe birimadaru tihondobi handayaho henedaru tihondobi ogodagua lamiru. Tíbi tínaga biabe bia hagaru heba tíni andaga dai nabi Yarusalemeni palu howa mbiraga mamage hole halu horongi biabe bule hamiya, laru. <sup>23</sup> Inibi i heba biabe mandagi biaga harimadarubi inaga biabe biaga agali hayadarumebi inaga mamage haga hayadarumebi inanaga aga dongoneni birimadaruni gola nabi biaabo ho harima. Wai bulenenaga yarimadaruni giha waya bole howabi yaho wiaabo harima.

## 5

### *Nehemiahanda Yuda wali agalinaga genda wiaru mo tiga binigo ogo*

<sup>1</sup> Mani Yuda wali agali maru hearume tini dege dege buru pale howa maruhondo gimigomo bi lagalaga bialu hene. <sup>2</sup> Ti marume lalu, Ina waneigini dewa howa tomo nolene ndia wu kama. Ina tomo maru mo wia nabi harimayagua homoleberama, lalu hene.

<sup>3</sup> Ani layagola marume lalu, Iname inanaga damene bu hearuha tomo yolo bule muni mo dano harima. Ani birimago ai tinaga muni dano yadai nabirimayagua nde inanaga mabu andaru ti karulolobada, lene.

<sup>4</sup> Ani layagola marume lalu, Ina marume kinihondo dagisi mule howa muni ina damene hearunaga mo dano harimago. Ainde muni dano yadai nabirimayagua inanaga dindibi pu mbira lini daga mini gerebi mabu ngamarubi ti karulolobada. <sup>5</sup> Inane dameneore Yuda wali agali dege bu harimarume genda uruni mo ngialu kagoni. Tigua mandabu handalu hearia ti duniniore halu ina nagalone mbira kabe toba hayadabe. Tinibi inabi inanaga waneiginirubi ina bibahende ogobi dege dege kamagoni ndobe. Anigo iname bulene mbira nawida. Aniyagome inanaga waneigini maru minalu agali maru bu hearunaga garabaya biabe ale bialu helo muni mirimagoni. Anidagua birimagola agali urunime ina wane berearubi tinaga garabaya biabe ale bialu berelo minu yalu pu dege biya. Ani bialu inanaga dindibi pu mbira lini daga mini gerebi mabu wimarubi ti karulayagola iname mo yu dai bulenaga mbirale mbira bibe naheore kamagoni, lene.

<sup>6</sup> Ina tinaga bi uruni layago hale howa keba timbuni haru. <sup>7</sup> Keba howa ina genda uruni mo tiga bulene hariga taya biru. Mana liahe o bialu hayadagoni agali haguane hearubi haru haga maru hearubi tigua ogoni biyada manda bialu íbu ngoai hadaba lowa ina tihondo bi hongo howa lamialu lalu, Tígua tíni hameneore karu hangedape halu mo koore haga kamagoni, laru. Ani lowa lalu, Genda ogoninaga bi lamiya wali agali bibahende hearu íbu ngoai halimu, laru. <sup>8</sup> Ti íbu ngoai hayagola ina tihondo lamialu lalu, Ina damene marume Yu wali agali ndo wali agali tara tara karunaga garabaya biabe ale bialu hearu munime golalu haru dai bulenego muni tai timbuni bialu haru dai birimagoni. Ani birimago ai áyu tígua tínaga dameneru mo ko halu ti tínaga garabaya biabe ale bialu helalimulo tíha yahayada, laru. Ina anidagua larugola agali haguane bu hearume bi ladai bulene mbira nawiyagola de mbolaho howa ema nabi hene.

<sup>9</sup> Ani hemigola ina tihondo lalu, Tínaga mana bialu haga ngamiruni kooredago ai tígua Ngode Datagaliwabe andaneha howa mana tigabi ngaru bialu haramine. Tígua anidagua bialu harimiyagua nde inanaga waitigi agali tara tara bu karume mana iname biaga ngamago hondowa mege nabulebira. <sup>10</sup> Inibi i damenebi inaga biabe biaga agali

✠ 5:7: Har 22.25, LBM 25.35-37, Man 23.19-20

bu karubi iname wali agali marunaga muni tomobi dano helo karulape larima. Ani birimago ai áyu ina bibahendeme inanaga dano harimago yadai bidaba nale wahamiya. <sup>11</sup> Inanaga dano uruni embeda halu waholene nga. Ani beremagola tigua muniyaguabi widiyaguabi waini ibayaguabi olibe lininaga weliyaguabi mbirale uruni bibahende ngiadai nabilo. Wali agali uruninaga dindibi gerebi mabubi olibe mabubi andabi uruni bibahende tigua karulo harimidarubi bibahende áyu ogoni miadai biai hadaba laro, laru.

<sup>12</sup> Ani larugola agali haguane bu hearu tigua ladai bialu lalu, Ína ogodagua bilimu lalu lariruni biai holeberama. Ina damenerunaga mbirale karulo harimadaruni miadai biai halu inanaga dano hayadaruni ngi nale waholoma, laya.

Ani layagola loma binigo mo miaga hearu olalu, I bidaba, laru. Íbu heagola agali haguane biaruni tigua bule lalu lo wiyaruni loma binigo mo miaga biarunaga deni howa, Heneneore buleberema, lalu lo wilo, Bi lo widaba, laru. Ani larugola tigua ani bule lalu lo wiya. <sup>13</sup> Anidagua leagola ina labolabo mbira mandibu ale bobu henego hadowa be abalu maru para hearu taulopebe bilo titau lagadagua labolabo ogoni titau laru. Anidagua bialu ina tihondo lamialu lalu, Tigua mbirale bule lalu lo wirimiru nabirimiyagua ina labolabo biago titau larudagua Ngode Datagaliwabehanda tina andabi mbirale yu kamirubi bibahende titau lalu mo wahai haragola tina mbirale mbira nawi bame labolabo hangu ogobiore ona holeberemi, laru.

Ani larugola ti bibahende hearume lalu, Bayaleore. Ngode Datagaliwabehanda aniore bilo, lai hene. Ani lowa tigua Anduane Homogonaga mini mo yaraga hai lalu tina andaga dai buwa mbirale buleore lalu lo wiyaruni biaiore hene.

### *Nehemaiahanda ibuni hangu mitangi nabi henego ogo*

<sup>14</sup> Nehemaiahanda lalu, I Yudanaga gabumane haru haga haguane hewane dege mali homberia (12) haru. Adasegesi ibu mali pira kira (20) kini hene heagola i biabe ogoni pigane biru. Biabe bialu hewaneibunaga mali bibahende pira tebirani kira (32) ibu kini hene. Mali homberia (12) uruni i hewaore kini ibuguaibunaga gabumane agali hagianeru tomo nelo talebu miagane winiru aria i bi i damenerubi iname mbira nane haabo harimagoni. <sup>15</sup> Gabumane haru haga agali haguane ala henedarume wali agali genda timbuni mo miaga heneya. Uruni tigua wali agaliha tomobi waini ibabi gingila mialu muni kina dege handari mariabi (400) ngi laga heneya. Ani biyagola agali uruninaga biabe biaga bu hearubi tigua wali agali bu hearu mo nagalone halu hingedape haga biniya. Tigua ani biniyagoyu ina Ngode Datagaliwabe andaneha howa mana ogonidagua nabi haru. <sup>16</sup> I bi i damene bu hearubi iname dindi mbira yolo nabi howa ina Yarusaleme tanonaga ege pabe biago biadai bule biabe hongo howa biamogo bialu haru. Ani bialu inaga biabe biaga agali i andagaha hearu tiguabi nde pabe biago hongo howa biamogo bialu haya.

<sup>17</sup> Ani binigo ina horo bibahendengi wali agali biabe bialu harimadaru handari mbirani pira duria (150) bibahende i andaga tomo nalu haabo harima. Uruni tinaga agali hagianerubi Yuda wali agali tinibi heba tomo nalu harima. Wali agali dindi maruha howa i hondo ibiraru tibi nde i andaga dege tomo naga beremali. <sup>18</sup> Ani biagago manda buwa agali inaga tomo dawaga hearuhondo lamialu horo bibahendengi tomo dawalu howa nogo bulumaga mbirabi sibi bayaleoreru waragariabi ega dewaorebi dawalimu laruli. Ani bialu wali agali uruni ti waini iba nelonaga horo piru howa mo migi bilimu laruli. Yuda wali agali tiha genda timbuniore ngane handalu inaga tomo yolo bulene winigo kini ibuhondo ngi nale harugoni. Wali agaliha dagisi muni ngi labe lenego ai ogoni ngidaba nalaruli. I tomo nalu holene ininaga munime yolo bialu nalu haruli.



<sup>19</sup> Ngode Datagaliwabe-o ina wali agali uruni mitangiore halu mana bayale uruni bialu harudagoni manda bialu ihondo bayale biadai bibe laro, lalu Nehemaiahanda lene.

## 6

### *Agali marume Nehemaia mo ko holenaga ndelalu henego ogo*

<sup>1</sup> Agali Sanabalada Tobia Geseme imarubi inanaga waitigi maru hearubi tigua hale halu hearia tanonaga pabe biago biai haya. Panga dege wa nabi ka layago hale hene.

<sup>2</sup> Ani hale ho howa Sanabalada Gesemela libugua i hewaria bi mbira lawia halu libu kabaria unu yu dindi mini Ono wali agali pale mbira ngagoria ibabe laribiya. Ani laribiyago hale howa ina manda bu handalu hewaria libugua bi ogoni henene ndo i bole ohowa layada lo manda biru. <sup>3</sup> Ani manda bialu ina agali maru libu hearia bi yalu pelo ogodagua lawia haru. Nehemaia ibu ayu biabe timbuniore mbira yu wahalu pobe nahe bialu ka. Biabe biala halu libu lola hole ibabe naheore ka. Ibugua biabe ogoni ngelalu ibiyagua ibunaga agali biabe biaga karume biabe ogoni wahalu pugupugu bulubadago naibulebero laya lalimu, laru.

<sup>4</sup> Ani larugo hale howa dege agali kira ogoni labome ihondo lone ibabe laga bialu ma halu hale haabo hayagola inabi nde libuhondo bi mbira o larugoni dege laabo haru.

<sup>5</sup> Mani howa Sanabalada ibugua ihondo bi maru lawia hayiya. Ogoningi bebani bi gilibu wia hayadago andaneha pale nale agali ibunaga biabe biaga mbirame bame yalu pu layiya. <sup>6</sup> Bi beba ogoniha gilibu winidagoni ogodagua gilibu winiya.

Sanabalada ina hale halu hewaria Geseme ibugua lalu, Agali maru ina baba haga dege bu karunime bi laya laya maru lalu hemi, laya. Tigua bi lalu haruagoni ogodagua, I halu Yudali bu kamirubi tigua kini andaneha holene manga howa gabumane tini halu kini baba wai bule kami, laya. Ani bule manda buwa tigua tanoha ege pabe hongohe bialu kami, laya. Wai ani bialu inime dege i kini kogoni lolebere, laya. <sup>7</sup> Ai ina agali Anduane Homogonaga bi mana latagi haga Yarusalemeha hearuhondo lamialu lalu, Ayu Yuda ti tininaga kini hangu ka lalimu, lariya. Ani lariyago inaga bi ko uruni kini ibu hale holigo abale iyane lo tiga bibiya ibabe laru, lalu gilibu wia heneya.

<sup>8</sup> Ani layagola ina ladai bialu lalu, Ina bi o gilibu wia hariyaruni henene ndo laga biriya. Bi uruni ini degeme mandabu yinigo gilibu wia hariya, lalu ina bi ogonidagua gili buwa beba ibuni hearia yalu pudaba laru. <sup>9</sup> Ina manda bu handalu hewaria Sanabalada halu ibu damene bu hayadarume bi ogoni ina mo gi holenaga layada. Ai gi ho howa iname pabe biamaro nabulumayanaga layada lo manda biru. Ani manda buwa ina Ngode Datagaliwabhondo bi lamialu lalu, Ngode Datagaliwabe-o tinaga bi lalu karuni ani lalu helo waha. Ina biabe ogo dege biamaro buliya hongo ngibe, lalu haru.

<sup>10</sup> Ani lowa ina mani Mehetabele aguane Delaia igini Semaia ibuni andagaha tagira ibabe nahe hearia hondo piru. Hondo pu hewaria ibugua ihondo langialu lalu, Iyane hanguore ohalu Ngode Datagaliwabe anda hobane mbira Loma Bia Hene kagoha ha do hole mba. Inaga waitigi bu karume mbiraga ibalu i bo waholebirago iya anda ogoniha puwa panga payatagi ho habiya, laya.

<sup>11</sup> Ani layagola ina ibuhondo ladai bialu lalu, I agali mbiralihondo gi nahaga kogodago ai i ibida pialu ha do holenedago ai hondowabe. Ina Ngode Datagaliwabe andaha pialu ha do naholebero ndobe, laru.

<sup>12</sup> Mani ina mandabu handalu hewaria Semaianaga bi ogoni Ngode Datagaliwabehanda lamini ndoda lo manda biru. Ibunaga bi ogoni Tobia Sanabaladala libugua ogodagua labe lalu ndelowa muni hana hayada lo manda biru. <sup>13</sup> Libugua manda bialu Semaiahanda bi ogoni laragome i mo gi haragola ina Ngode Datagaliwabe andaha palue

porogome ina mana pugualu ko timbuni mbira bilo manda biyiya. Anidagua berogola tigua inaga mini mo ko howa nagalone halu i hendedape holenaga layada lo manda biru.

<sup>14</sup> Ani layada lo manda bialu ina Ngode Datagaliwabehondo bi lalu, Inaga Ngode Datagaliwabe-o áyu Tobia Sanabaladalame mana ko ihondo bule bialu kagoni manda bialu libuni mo ko habe. Ani bialu i mo gi halu inaga mana henene ngadagua ndo latagi haga wali mini Noadia o bedagonibi mana latagi haga agali maru bi tara tara lalu i mo gi haga bu karubi bibahende mitangi biai habe laru, lalu Nehemaiahanda lene.

*Ege pabe biago bumaro binigo ogo*

<sup>15</sup> Iname Yarusaleme tanonaga pabe biago bialu hemane dege horo pira duriani kira (52) piya. Ani peagola ege mini Elulunaga horo pira kirani dauni (25) layagola pabenaga biabe bulene damene bibahende biaiore harima. <sup>16</sup> Ani biai hemagola inanaga waitigi dindi tara tara kawareni bu hearu tigua hale halu hearia iname tanonaga pabe biago biai haya layago hale howa Ngode Datagaliwabe ibunime ina biamogo biyagola biai hayada lo manda bini. Ani manda buwa tigua inahondo mana ko bule manda bu hayaru habo layada lo manda bu hene. Ani manda buwa tinaga mini mo dindi halu nagalone hayada lo manda bialu tini gi ho hene.

<sup>17-18</sup> Tobia ibugua Seganaia wane Ara aguane bereago dabu bu hene. Ani heagola Tobia igini Yahohanana ibugua Mesulama wane Beregaia aguane bereago dabu bu hene. Ani howa iname tano pabe bialu hemagola inanaga agali haguane uruni tigua Tobia hearia beba dewaore gilibu pela ibuguabi nde gilibu ibila biaga hene. Horo uruningi Tobia ibu Yudali ti imane henegome Yudali agali haguane Yarusalemeha haga hearume ibu biamogo bulene manda biya. <sup>19</sup> Ani bialu howa inanaga agali haguane uruni tigua lalu, Tobia ibugua mana bayale hangu biaga ka, lalu ihondo langiaabo haga hene. Ani lalu howa mbirale bi ina larogo damene bibahende tigua Tobia lamiaga hene. Anigo Tobia ibugua i mo gi holenaga beba dewaore gilibu ibilaabo halu hene.

## 7

<sup>1</sup> Iname pabe bialu harimago biai howa pabe panga damene bibahende helai harima. Ani helai howa agali maru pabe panga mamage helo dabo helarima. Ani helowa agali marume Ngode Datagaliwabenaga mini yaraga halu iba gana lalu tinaga biabe ogoni bialu helo dabo helarima. Libai hameigini tibi nde tinaga biabe bialu helo helarima. <sup>2</sup> Ani bialu heagola ina agali kira Yarusaleme tano bibahendeha handayaho helo dabo helaru. Agali mbirago ini hamene Hanani henego dabo helalu mendego Yarusalemeni ami agali bibahende haru haga Hananaia henego dabo helaru. Hananaia ogoni ibu agali baya tigabi howa ibu Ngode Datagaliwabe andaneha haabo haga hene. Ibugua mana bayale biragome maru hearume biraru bu bolangua haga hene. <sup>3</sup> Ani hebigola ina libuhondo lamialu lalu, Agali Yarusaleme tanonaga pabe panga handayaho haga karuhondo egerebagiore pabe panga nadugualimu lalu lamilibu. Tigua ni dalu bodopaya biragola pabe panga dugua helo ani lalibu. Agali panga haraba mamage haga uruni ti biabe biai halu andaga polene tu haragola tigua panga payalu aeane luni ngagome panga gedene hongo howa hatagi halimu, lalu lamilibu. Libugua agali maru Yarusalemeha haga bu karuni aria marume haru haga helo dabo helalu marume tini andaga karuha howa mamage haga haga bilo dabo helalibu, laru.

*Isaraele wali agali Yarusaleme dai binirunaga daga lowa mini gilibu winiru ogo*

<sup>4</sup> Yarusaleme tano timbuni winigoyu wali agali dewa naheyagola tanoha anda dewa nabi dege hene. <sup>5</sup> Anigo Ngode Datagaliwabehanda agali haru haga hearubi agali haguane bu hearubi bibahende ibu ngoai hadaba lowa tinaga damenerubi bibahende-ore dagalalu mini mbuga mbirani gilibu wulene nga lalu i miniha mo manda bia haya. Ina ogonidagua bule mandabu hewaria wali agali Babilono dindiha howa garabaya

golalu Yuda dindiha ala daibu hene biarunaga mini mbuga mbirani gilibu wini wiaria handa walia haru.

<sup>6</sup> Bamba Kini Nebugadanesahanda Isaraele wali agali dewaore Babilonoha garabaya bu yalu pene. Ani binigo mani howa wali agali dewaore Babilono yu wahalu maru Yarusalemehabi maru Yudahabi daibu hai hene. Ti dai buwa tini mamalirunaga tano wiagoha haga haga bini. <sup>7</sup> Ti Babilono yu wahalu dai binidangi tinaga agali haguane Serubabele halu Yosua Nehemaia Asaraia Lamaia Nahamani Modegai Bilisana Misi-berede Bigibai Nehumu Bana imaru uruni bibahende dai bini.

Isaraele wali agali Yarusalemehabi Yuda dindihabi daibu henerunaga mini ogoha gilibu wialu dagabi gilibu wini ngago ogodagua.

<sup>8-25</sup> Paroso hameigini agali daosini kira halu handari mbirani pira kariani kira (2,172) hene. Sebadaia hameigini agali handari tebirani pira kariani kira (372) hene. Ara hameigini agali handari waragariani pira duriani kira (652) hene. Pahadamoaba hameigini Yasua Yoabalanaga aguanene agali daosini kira halu handari halirani pira mbirani halira (2,818) hene. Elama hameigini agali daosini mbira halu handari kirani pira duriani maria (1,254) hene. Sadu hameigini agali handari halirani pira mariani duria (845) hene. Sagai hameigini agali handari kariani pira waragaria (760) hene.

Binui hameigini agali handari waragariani pira mariani halira (648) hene. Bebas hameigini agali handari waragariani pira kirani halira (628) hene. Asagada hameigini agali daosini kira halu handari tebirani pira kirani kira (2,322) hene. Adonigama hameigini agali handari waragariani pira waragariani karia (667) hene. Bigibai hameigini agali daosini kira halu pira waragariani karia (2,067) hene. Adini hameigini agali handari waragariani pira duriani duria (655) hene. Ade ibu mini mende Hesegaia hameigini agali pira dirani halira (98) hene. Hasumu hameigini agali handari tebirani pira kirani halira (328) hene. Besai hameigini agali handari tebirani pira kirani maria (324) hene. Haribi hameigini agali handari mbirani pira mbirani kira (112) hene. Gibeono hameigini agali pira dirani duria (95) hene.

<sup>26-38</sup> Yuda wali agali maru dai binidaruni ti mamalirunaga tanoha mini dagaru gilibu ngaru ogodagua Bedeleheme Nedoba tanoha agali handari mbirani pira halirani halira (188) hene. Anadodo tanoha agali handari mbirani pira kirani halira (128) hene. Bede Asamabede tanoha agali pira mariani kira (42) hene. Kiriada Yarimi Kebira Berodo tanoruhabi agali handari kariani pira mariani tebira (743) hene. Lama Gebala tanoha agali handari waragariani pira kirani mbira (621) hene. Migimasa tanoha agali handari mbirani pira kirani kira (122) hene. Bedele Aila tanoha agali handari mbirani pira kirani tebira (123) hene. Nebo tano mendeha agali pira duriani kira (52) hene. Elama tano mendeha agali daosini mbira halu handari kirani duriani maria (1,254) hene. Harimi tanoha agali handari tebirani pira kira (320) hene. Yarigo tanoha agali handari tebirani pira mariani duria (345) hene. Lodo Hadidi Ono tanoruhabi agali handari kariani pira kirani mbira (721) hene. Sena tanoha agali daosini tebira halu handari dirani pira tebira (3,930) hene.

<sup>39-42</sup> Hameigini maru loma binigo mo miaga agali Yarusaleme daibu heneru tinaga mini dagaru ogodagua. Yasua aguane Yadaia hameigini agali handari dirani pira kariani tebira (973) hene. Ime hameigini agali daosini mbira halu pira duriani kira (1,052) hene. Pasuru hameigini agali daosini mbira halu handari kirani pira mariani karia (1,247) hene. Harimi hameigini agali daosini mbira halu pira mbirani karia (1,017) hene.

<sup>43-45</sup> Libai hameigini Yarusaleme dai biniru tinaga mini dagaru ogodagua. Hodabia aguanene Yasua Kadamielela aria pira kariani maria (74) hene. Agali maru Ngode Datagaliwabenaga andaha ngida balu iba gana lagaru Asaba aguaneneru aria handari mbirani pira mariani halira (148) hene. Ngode Datagaliwabenaga andaha mamage

haga Salumu Ade Talamono imaru Agubu Hadida Sobai imaru uruni ti aguaneneru aria handari mbirani pira tebirani halira (138) hene.

<sup>46-56</sup> Agali maru Yarusalemeni Ngode Datagaliwabenaga andaha biabe biagaru uru Siha Hasuba Tabaodo imaru Keroso Sia Padono imaru Lebana Hagaba Salamai imaru Hanana Gidele Gahara imaru Leaia Lesini Negoda imaru Gasama Usa Pasea imaru Besai Meunimi Nebusesimi imaru Bagabugu Haguba Harahuru imaru Basalidi Mehida Hasa imaru Bago Sisera Tema imaru Nesia Hadibala hameigini uruni ti bibahendena aguaneneru haga bini.

<sup>57-59</sup> Solomononaga biabe bihaga agali henerunaga aguaneneru tibi nde tini dalu wiyagoria daibu ha dege biniru mini uru Sodai Soberede Perida Yala Dagono Gidele Sebadia Hadili Pogerede Hasebaimi Amono imaru aguanene uruni ti daibu hene.

<sup>60</sup> Ngode Datagaliwabenaga andaha biabe bialu heneru ariabi Kini Solomononaga andaha biabe bialu heneru ariabi daibu henego dagalamaga halu handari tebirani pira dirani kira (392) bibahende daibu hene.

<sup>61-62</sup> Agali hameigini tebira Delaia Tobia Negoda ima heneru ti aguanene daibu henedaru bibahende dagalamaga halu handari waragariani pira mariani kira (642) hene. Uruni ti Telemela Telehasa Kerubu Adono Ime tano uruniha howa ibu hene. Anigo agali uruni ti abogo aguaneneore kama lolenebi tinaga mamali Isaraeleali agali haguane ogo heneru aria kama lalu mo walia holenegobi ti manda nabi hene.

<sup>63-64</sup> Ani heagola loma binigo mo miaga maru hearu tigua agali uruni loma binigo mo miaga ariadabe hondole tinaga mamalirunaga mini gilibu wiaga mbuga wiagoha tayabu handalu hemiria mbira handa walia nahe dege hene. Ani tayabu wahayagola ti loma binigo mo miaga kama lalubi ndo ti tara kama lalubi mbira labe nahe dege hene. Agali uruni tinaga hameigini mini Hobaia Hagoso Basilaibi uruni hene. Ani henego agali hameigini Basilai uruni tinaga mamali mbira mini Basilai henegome Gileada dindiha hameigini mende mini Basilai dege henego wane dabu bini. Hameigini ogonime ti mamali imanenaga mini Basilai ogoni manda bu hama ibaabo hene. Ani binigo nde agali hameigini tebira uruni tinaga mamali ogo lalu baya hangu mo walia habe naheyagola agali haguane bu hearume lo manda bialu howa agali uruni ti loma binigo mo miaga habe nahedago ti agali maru bame bu karuni ale dege helo manda bini. <sup>65</sup> Ani manda buwa Yudanaga gabumane haru haga agali haguane heagome agali uruni ti tomo Ngode Datagaliwabehondo lomabu mini ngaru nanalimu lene. Ibugua lalu, Loma binigo mo miaga haguane mbira ibilo hondo hama. Agali ogoni ibiragola agali o karu loma binigo mo miaga aria kabe be agali mende tara kabe lalu ege tole kira mini Urimu Tumimula Ngode Datagaliwabeibunihondo hale haga biagome halaga bialu bi hale ha lamija.\* Ani hale haragola Ngode Datagaliwabeibunime agali uruni tigua loma binigo mo miaga howa biabe bialu helo nabi helo lalu bi tigatiga langulebira, lene.†

<sup>66</sup> Isaraeleali daibu heneru bibahende daosini dege pira mariani kira halu handari tebirani pira waragaria (42,360) daibu hene. <sup>67</sup> Ani bialu wali agali tinaga biabe biagaru daosini karia halu handari tebirani pira tebirani karia (7,337) daibu hene. Ani heagola wali agali ngida balu iba gana lagaru handari kirani pira mariani duria (245) daibu hene.

<sup>68-69</sup> Ani bialu nogo hosi handari kariani pira tebirani waragaria (736) haru halu nogo kamele handari mariani pira tebirani duria (435) haru ibu hene. Ani bialu nogo dongi daosini waragariani handari kariani pira kira (6,720) haru halu hosi dongilame hono wini mini muele laga handari kirani pira mariani duria (245) haru ibu hene.†

\* **7:65:** Urumu Tumimla Haru Tagira Penego 28.30 de handabe. † **7:65:** Har 23.30, Man 33.8 † **7:68-69:** Bi ogoninaga maru Hiburu bi lalu gilibu winigo áyu nawigo ai abale wini ereba ka. Ani laramagoni irane bi ogha gilibu ngagoni Eseranaga mbugaha 2.66-67 ogoni gilibu ngagobi dege gilibu nga.

<sup>70-72</sup> Wali agali dewaoreme Ngode Datagaliwabenaga anda biago lone biadai bilo lowa muni mbiralerubi dewaore migi bini. Ani biyago hondowa gabumane agali haguane heagome muni ngolo genda magi kilogarama halira mialu ndisi be ngolome wabini pira duria (50) mialu aga loma binigo mo miaga hearume biagane ale handari duriani pira tebira (530) mialu bini. Ani miyagola Yuda hameigini mbira mbiranaga agali haguane bu hearume muni ngolo genda magi kilogarama handari mbirani pira waragariani halira (168) mialu siliba muni genda magi kilogarama daosini mbirani handari kirani pira duria (1,250) mini. Wali agali maru hearume muni ngolo genda magi kilogarama handari mbirani pira waragariani halira (168) mialu muni siliba genda magi kilogarama handari mbirani pira maria (140) mialu aga loma binigo mo miaga agalirume biagane ale pira waragariani karia (67) mialu bini.

<sup>73</sup> Ani bialu loma binigo mo miaga hearubi Libai hameigini bu hearubi mamage haga hearubi Ngode Datagaliwabenaga anda biabe bialu haga hearubi wali agali ngida balu iba gana laga hearubi Isaraele wali agali maru hearubi ti bibahendeore Yuda dindiha tininaga tano mbira mbira wigi biyadagua hangu hangu hama purogo lene. Ani pugu pugu bialu ege kane hayagola tini daluha daibu haga haga bini.✧

## 8

### *Mosese heneyangi mana lowinigo Eserahanda wali agalihondo dagalo minigo te ogo*

<sup>1</sup> Ege kane agima hayagola Isaraele wali agali Babilono howa dai biyaruni bibahende tano winiyagoria pu haga haga biai howa hene. Ege kane biagonaga horo mbira hayagola wali agali bibahende biaru tigua Yarusalemeni ngoai ho hene. Ngoai haga hama mbira pabe panga mini Iba Haraba kaware ogoni tamuha ngoai hene. Ani ngoai ho howa tigua Eserahondo, Mosese heneyangi Mana lowinigo wali agalime bilo Anduane Homogohanda Mosesehondo lamiyago mbuga ogoni mo yalu ibu, lene. Esera ibu agali loma binigo mo miagabi mana lowinigo lawai hagabi hene. <sup>2</sup> Eserahanda wali agalime layadagua tini mo ngoai ho heagoria mbuga biago mo yalu ibini. Wali agalibi waneigini mini bogabirubi bibahende ogoriani mo ngoai howa hene. <sup>3</sup> Gao layagola Eserahanda wali agali bu heagohayagi handamu howa mana lowinigonaga mbuga angalalu dagalo mini. Dagalalu heane hangu horombe hanuni hene. Wali agalime bayuwa hale ho hene.

<sup>4</sup> Esera ibu dagia mbira irame wabuwa galone biagane lalu helo lowa wabu winiyagoriani heyu howa dagalene. Ibugua dagalayanggi agali maru Madidaia Semabi Anaiabi Uriabi Hiligaiabi Maseabi ti Esera gi tighayagi hene. Pedaiabi Misaelebi Malagaiabi Hasumubi Hasabadanabi Segaraiabi Mesulamabi ti Esera gi lehayagi hene.

<sup>5</sup> Esera ibugua dagia daliga wabu winiyagoria heagola wali agali biarume de ibuni hangu handaya ho wini. Ani buwa ibugua Mana lo winigonaga mbuga biago anga layagola ti bibahendeme heyai hene.

<sup>6</sup> Esera ibugua lalu, Anduane Homogo Ngode Datagaliwabe timbuni gibiore kagonaga mini yaraga hama, lene.

Ani layagola wali agali bibahende hearume gi hariha yaraga hai howa hongo howa lalu, Aniore bima aniore bima, lene. Ani lowa tigua ge duli hanga howa bulu paliai howa Ngode Datagaliwabe mitangi bialuibunaga lotu lalu hene. <sup>7</sup> Ani biai howa heyuwa tini heneyagoria haga haga bini. Libai agali maru Yasuabi Banibi Serebaiabi Yaminibi Agubabi Sabedaibi Hodaiabi Maseabi Kelidabi Asaraiabi Yosabadabi Hananabi Pelaiabi tigua Mana lowinigo lo beregedalu wali agali mo wala howa lamini. <sup>8</sup> Tigua Mana lowini biago Hiburu bi lalu gilibu wiago Arama bi lalu lo beregedowa lamialu ogodagua lo nga lalu lamini.

✧ 7:73: 1 Bit 9.2, Neh 11.3



<sup>9</sup> Wali agali biarume Mana ogoni hale howa dugu timbuniore bini. Ani biyagola gabumane hondo haga Nehemaiabi loma binigo mo miaga howa mana lowinigo lawai haga Esera ibubi Libai agali biarubi ti bibahendeme wali agali biaruhondo lalu, Horo áyu ogoni Ngode Datagaliwabe ibuhondo loma bia harimagoni ngago tígua dugu nabadababe. <sup>10</sup> Ai andaga puwa turu halu tomo timbuni dawa nalimu. Tomobi waini ibabi dewa ngamigome mbiraore ale ngaru baba tale bialu nalimu. Horo áyu ogoni inanaga Anduane Homogo ibunaga helo loma bia henego nga. Ani bidago tígua dara howa nahadababe. Anduane Homogo ibugua turu holene ngiragome tí mo hongo holebira, lene.

<sup>11</sup> Libaiali agali biaru tigua wali agali bu hearu dombeniha ibaga bialu howa lalu, Horo áyu ogoni galone gibi mbira wirimagonigo tígua ogoriani daraho nahadababe, lalu lamima ibaga bini. <sup>12</sup> Ani lamiyagola wali agali biarume tini andaga dai buwa turu timbuniore howa tomobi waini ibabi tale bialu nalimu layadagua nalu berene. Tigua ani binidagua irane mana daga layago agua laya lalu manda biyagome ani bini.

*Anda Nemandaha Palu Holene Horo hayagola turu halu binigo te ogo*

<sup>13</sup> Horo mendengi hameigini hangu hangunaga haguanebi loma binigo mo miaga hearubi Libai agali hearubi tigua Esera heagoria puwa Mana lowinigo Anduane Homogohanda Mosesehondo laminigo handa daba bigi bule pene. <sup>14</sup> Tigua dabaluharia mana ogonime lo wialu lalu Anda Nemandaha Palu Holene Horo haga biragola Isaraele wali agalime anda nemanda buwa nemandaha hangu palima pilimu lo wiaria handa walia hene. <sup>15</sup> Ani lo wiago hondowa tigua Yarusalemehabi tano emene timbunirunibi wali agali heagoria bi ogobi lo pelene. Hariha purogo lowa ira olibe maganerubi ira tara tara yunihe maganerubi mialu howa ira yuni anda nemanda bilimu lalu Mana lowinigonaga mbugani gilibu wiyadagua bu yalu ibai halimu, lalu lo pelene.✧

<sup>16</sup> Ani buwa tigua ira magane hearu dando yalu ibuwa nemanda biaruni tininaga anda daliganibi anda kaware heagoriabi Anduane Homogonaga anda pabe tamuhabi ngoai hagane hama mbira pabe panga mini Iba Harabahayagibi mende Eberaimi Harabahayagibi anda nemanda biai hene. <sup>17</sup> Wali agali Babilono dindini garabaya howa dai biyaru bibahendeme nemanda biai howa ogoriani hene. Ogonidagua bambiraore Nunu igini Yosua heangi hangu biaga winigo. Ai mani nabiore heneyago wali agalime áyu turu timbuniore howa lone bule bialu hene. <sup>18</sup> Horo pigane harimidangi howa Ngode Datagaliwabenaga Mana lowiniyago daga laho dege halu ho hamaro binidangi dagalo maro bini. Tigua uruni bialu horo karu hene. Horo halini hayagola ho maro bulenenaga mana lo wiadagua bialu bu maro bini.

## 9

*Wali agali biarume tininaga ko biyaru lapani henego ogo*

<sup>1-2</sup> Ege o bagoninaga dege horo pira kirani maria (24) hayagola Isaraele wali agalime tini ko biyadaruharia daraho howa walia halu aga biaga wiago mo karulalu horo ogoningihina tomobi naneore hene. Dindi tara tara wali agali baba Isaraele wali agali baba mandagi nahe abale hangu hangu haga haga biaga wini. Tigua ko timbuni birimadarunaga dara kama lalu be abalu duguwa taga dugu hiralu biruwa biaga ale bialu haguani be dugu hiraume howa hene. Ani bu howa ko tigua biyarubi ti mamalirume biyarubi bibahende lapani hai hene. <sup>3</sup> Horo aua tebira agima Anduane Homogo tinaga Ngode Datagaliwabenaga Mana lo winiyaru dagalo miya. Ani bialu horo aua tebira mende ogonidagua dege tigua tininaga ko birimiru lapani halu Anduane Homogo tinaga Ngode Datagaliwabe mitangi bialu ibunaga lotu lalu hene.

<sup>4</sup> Dindi o harimidagoriani dagia mbira Libaialiru helo lowa wabu winiya. Ogoriani heyuwa Yasuabi Banibi Kadamilebibi Sebanaiabi Bunibi Serebaiabi Bani dege mendebi

✧ 8:15: LBM 23.33-43, Man 16.13-15

Kenanibi ti bibahende hai heneya. Uruni tigua Anduane Homogo tinaga Ngode Datagaliwabehondo bi hongo howa lalu hene.

<sup>5</sup> Libaiali tigua wali agalihondo Ngode Datagaliwabe mitangi bialu ibunaga lotu lalu hamiya ibidaba lenego mini uru Yasuabi Kadamilebi Banibi Hasabanaibi Serabaiabi Hodaiabi Sebanaiabi ani bialu Pedahaiabi tigua ani lene. Tigua lalu, Heyuwa Anduane Homogo Ngode Datagaliwabenaga mini yaraga hadaba. Ibunaga mini baya burugule yaraga ha ho wiaabo helo wali agalime mini yaraga haramarubi emene yabiabi degego ani bilo ibunaga mini daliga taraorego wali agali bibahendeme mo yaraga hama, lalu hene.

*Ko biyaru lapani halu bi lenego ogo.*

<sup>6</sup> Ani buwa Isaraele wali agali tigua Ngode Datagaliwabehondo bi ogodagua lene. Anduane Homogo-o í hanguore Anduane Homogo ke. Ína hari daligaha wabialu yakundi harini li hearubi ína wabiniya. Dindibi dindini ngarubi iba solowara bedarubi iba uruniha ngarubi ínime wabirigoni. Ani bialu tinaga holene ínime tiha wia hari. Dahuliyali hongohe karume ge duli hanga ho biruwa íhondo lotu lalu kagoni. <sup>7</sup> Anduane Homogo Ngode Datagaliwabe ína Abarama dabarigoni. Ani bialu Babilononaga dindi emene mini Ua howa haru halu tagira pirigoni. Haru halu tagira puwa ibunaga mini gahenge Abarahama wirigoni. <sup>8</sup> Ína handalu heria ibugua íha mini bilinaheore heane handariyagoni. Ani hondowa ibula habo nalolene bi mbira lo wirigoni. Bi lo wialu Kenanali dindibi Hidiali dindibi Amoroali dindibi Pereseali dindibi Yabusuali dindibi Giagisali dindibi Abarahama aguanenerume karulai helo ngulebero lalu lo wirigoni. Ína mini bilinahe kegome bi lo wirigonidaguaore karulayagoni. <sup>9</sup>

Inanaga mamali biaru Iyibi dindini genda handalu tandaga nayaru handariyagoni. Tigua íhondo biamogo biaha lalu iba solowara mini Iba Daramabi bereagoria howa olayagola hale hariyagoni. <sup>10</sup> Ína agalime nabigane ale gibi Iyibiali kinihondobi handa gimbubu haga hearuhondobi wali agali ogoriani hearuhondobi birigoni irane ínaga wali agali biaru mo ko hayagonigo manda buwa biri. Íni mini lene timbuni ogobi ko lalu walia harigoni áyubi haho wiaabo kegoni. <sup>11</sup> Ína bi larigome iba solowarani ínaga wali agali pelo iba bira migi migi bilowa hariga ba heneyagoni. Ani bialu dindi yobini haru halu ubade halu peneya. Ti bole talima ibiyaru tole íbaha haradagua iba nai heneya. <sup>12</sup> Horombe beralibame haru piriagoni mbiraga hayagola ira hungunaga wáme haru piriagoni. <sup>13</sup> Hari Sainaini íni daluwa ínínaga wali agali baba bi lalu ínaga mana bayale biaru bayuwa lawai halu lamiriyagoni. <sup>14</sup> Sabada horo ínaga taraorego bayuwa mandabu halimu lalu lawai halu lamiriyagoni. Ani bialu biabe biahaga Mosesehondo ínaga mana biaru wali agalihondo lamiriya.

<sup>15</sup> Tomo noa hayagola ína tomo dahuliya andaga tawe miriya. Iba noa hayagola ege toleha howa iba dugu tagi helariyagoni. Ani bialu dindi ngulebero lo wirigo karuladaba lalu lamiriya. <sup>16</sup> Anigo inanaga mamali biaru tigua mine halu ínaga mana bilimu lalu lamiriyaruni mo wahayiya. Tigua mana bilimu lalu lo wiridagua nabiyiya. <sup>17</sup>

Ínaga mana lamiriyaru embeda halu tihondo agalime nabigane ale biriyarubi embeda hai hayiya. Tini mine hayagobi Iyibi dindini garabaya dege lone hole lowa ti haru dai bilo agali haguane mbira tinime dabarimiya. Ani biyagoni ina ko birimaru domagane Ngode Datagaliwabe ína biamogo biahalu gubalini haga howa lembobi abaleore nahaga harigoni. Ínaga dara howa biamogo bia holene timbuniore wirigome wali agali biaru yu wanahe harigoni. <sup>18</sup> Tigua mbirale mbira bi pupu wulenaga nogo

✠ 9:7: Pig 11.31, 12.1, 17.5 ✠ 9:8: Pig 15.18-21 ✠ 9:9: Har 3.7, 14.10-12 ✠ 9:10: Har 7.8-12.32 ✠ 9:11: Har 14.21-29, 15.1, 15.4-5, 15.10 ✠ 9:12: Har 13.21-22 ✠ 9:13: Har 19.18-23.33 ✠ 9:15: Har 16.4-15, 17.1-7, Dag 20.7-13, Man 1.8, 1.21 ✠ 9:16: Dag 14.1-4, Man 1.26-33 ✠ 9:17: Har 34.6, Dag 14.18

bulumaga ale ngolome wabuwa heleneyagoni. Tigua hongo howa lalu nogo bulumaga ngolome wabini biagoni tinaga bi pupu wiaga mbirale ti Iyibi dindini garabaya hemaria haru halu ibini ogonime leneya. Anduane Homogo-o tigua í mo yo timbuniore handayagoni. ✧ <sup>19</sup> Ani biyagola dindi ko yobi biagoha homelo yupe nahe ínaga dara howa biamogo bulene timbuniore biagome haru harigoni. Ína hariga walia haga kira wiyago beraliba horombenaga ira hungu mbiraganaga lowa wiyagolabo mo yu bereba nahe haabo helarigoni. <sup>20</sup> Í bayale hegome ogodagua bulene nga lalu lamirigoni. Menabi ibabi nelo miriyagoni. ✧ <sup>21</sup> Dindi ko yobi wiagoria mali pira maria (40) haru hariyangi tinaga mbirale burupale wiyago miai hariyagoni. Ani birigola tinaga aga biarubi ko nahe wialu ge tandaga halu tobi nahe hene.

<sup>22</sup> Dindi kinime handayaho hearubi dindi hameigini tara taranaga wiarubi karulai helo hongo miriyagoni. Kini Sihono imarume handayaho hene Hesebono karulayiya. Kini Oga imarume handayaho hene Basana dindi wiaru karulayiya. ✧ <sup>23</sup> Ai tihondo waneiginibi dewaore dagala mibe nahe yakundi ale miriya. Ngulebero lalu ti mamaliruhondo lamiriyadagua karulelariya. ✧ <sup>24</sup> Kenana dindi tigua karulaya. Wali agali ogoriani paleneyaruni ínaga mo emene hai hari. Kenana wali agalirubi kinirubi tihondo ínaga wali agali tininaga hameme bilo hongo miri. ✧ <sup>25</sup> Ínaga wali agalime tano ege tole pabe hongohe anda pobe nahe wiaruni anda pialu karulaya. Dindi bayale tomo anda haga wiaru karulai hene. Dindi anda bibahende dabu dabu wiaore karulaya. Iba hambiagane uli wearubi karulaya. Ira olibebi lini do nolene ale irarubi pu mbira lini daga mini gerebi mabu gamarubi bibahende wiaore karulaya. Tigua wiago nolenegobi nowa anda haya. Ani bialu baya turu biniore helariyagoni. ✧

<sup>26</sup> Ani birigoni dege ínaga wali agali biarume í baba mine halu ínaga bi lariru hale nahayagoni. Ínaga Mana lowini biagoni tigua í erembira ngiya. Ala ínaga mana latagi hama piaga biaru tigua kagua beremigo nabadababe lalu í keria dai bidaba layaru bo wawai hayagoni. Tigua ínaga mini mo ko halu mege timbuni bigi biya. ✧ <sup>27</sup> Ani biyagola tinaga waitigi biarume ti balu dindir karulalu tinibi wali agali marume handaya ho helarigoni. Tini ko biagoha howa biamogo bia lalu í olayagoni. Olayagola dahuliya andaga howa ínime hale halu bia layadagua biriya. Íninaga dara holene timbuniore wigome biamogo bialu agali haru hagane haguane maru mirigoni. Ani birigola waitigi baba wai bialu wali agali biaruni koni hearia tigua biamogo biniya. ✧ <sup>28</sup> Bayale hene biagodagua dege howa tigua ko lone biadai biyagoni. Ani biyagola waitigi agalime bole ibilaga biadagua dege ibilarigola бага biadagua dege bayagoni. Bayagola tigua íhondo ko birimada lalu mini beregedalu í olowa hale halu biamogo bia layagola ínaga dara howa biamogo timbuniore bigi biri.

<sup>29</sup> Ínaga manaore hale habehe nga larigola tini mine halu balagala holenerume ínaga bi biagoni hengedo wahaya. Haabo holene ínaga Mana lo winigoha ngagoyu tininaga embone giambe mini wá nale heagome ínaga mana biago yu wahaya. ✧ <sup>30</sup> Nabadababe lalu lamialu hangu heane mali dewaore piya. Ínaga bi mana latagi halu lama piagarumebi lelo mo laharigoyu ti hale paihe haradagua bu haya. Ogonibi biyagola ínaga waitigialime ibuwa tini balu dindi andabi karulai helarigoni. ✧ <sup>31</sup> Ani birigoni degego ínaga dara halu biamogo bulene timbuniore wigome ínaga ti embeda halu bibahende bo hilu wawai naharigoni. Ngode Datagaliwabe-o ínaga biamogo bia holenebi dara holenebi timbuniorewi íni kegoni larama. <sup>32</sup> Inanaga Ngode Datagaliwabe-o íni hangu hongo timbuni gibiorehe kegoni. Ina bulebero lalu habo nalolene bi lo wiriru puguaore nabiaga biago kegoni. Asirialinaga kini biarume ina bo hengedayangi

✧ 9:18: Har 32.1-4 ✧ 9:20: Man 8.2-4 ✧ 9:22: Dag 21.21-35 ✧ 9:23: Pig 15.5, 22.17, Yos 3.14-17 ✧ 9:24: Yos 11.23 ✧ 9:25: Man 6.10-11 ✧ 9:26: Hgn 2.11-16 ✧ 9:27: Hgn 2.18, 3.8-9, Iba 106.44 ✧ 9:29: LBM 18.5 ✧ 9:30: 2 Kin 17.13-18, 2 Bit 36.15-16

howabi áyu ogoningibi iname tandaga dewaore narima. Inanaga kinirubi loma binigo mo miagarubi í mana latagi hagarubi inanaga mamalirubi inanaga wali agalirubi bibahendeore tandaga narima. Bibahendeore tandaga narimagoore dara halu mitangi bibe.✠ 33 Ína ina pani ngirigo ngulene wiagoria tigabi ngiri. Iname íhondo ko birimagoyu ína inahondo tigabi hangu biadai birili. 34 Inanaga mamalirumebi kinirumebi haguanerumebi loma binigo mo miagarumebi ínaga Mana lowini biago bayuwa handaya howa nahe. Ínaga bi mana agua bilimu lalubi ko holemini lalubi lamiriru hale nahe haya. 35 Ína dindi baya hini mirigoria howa ínaga biamogo bulene timbuni biagome kini biarume ínaga wali agali handaya ho hayagoni. Ani birigoni dege tigua ko birimada lalu mini beregedalu ínaga biabe bia holenebi manda nabi haabo hayagoni. 36 Ani birimagome dindi hini bayale ina tomo anda haga biagoria inane agali taranaga garabaya biabe ale bia halu kamagoni. 37 Dindi ogoninaga ibanego dindi taranaga kiniru iname ko birimangi handaya ho helarigo tiha pora. Inahondobi tinaga hame laradagua bialu inanaga nogo bulumagarubi tinaga hame laradagua biragola ina mini burugu lowa kama, lalu Ngode Datagaliwabhondo bi lai hene.

*Wali agali tigua bi lo mbira halu habo nalolenebi mbira gilibu winigo te ogo*

38 O biyagoni manda buwa ina Isaraele wali agalime beba gilibu wialu howa lalu Ngode Datagaliwabehanda laradaguaore bule lalu gilibu wialu howa inanaga haru hagarubi Libaialirubi loma binigo mo miagarubi tigua tinaga gi magi wialu gilibu wini.

## 10

1 Mbugani mini gilibu winigo ala gabumane agali haguane Hagalia igini Nehemaia ibugua ibunaga mini gilibu wini. Nehemaia ibu mini gili biyagola Sedegaia ibugua ibunaga mini gili bini. Ani gili biyagola mani agali maru mini gilibu wigi bini.

2-8 Loma binigo mo miaga maru heneru ti mini gilibu winigo uru Seraia Asaraia Yaremaia imaru Pasuru Amaraia Malagiya imaru Hadusu Sebaniaia Malugu imaru Harimi Meremodo Obadaia imaru Daniele Ginedono Barugu imaru Mesulama Abiya Miyamini imaru Masia Biligai Semaia imaru uruni bibahende tinaga mini gilibu wiai hene.

9-13 Libai hameigini maru heneru tinaga mini gilibu winigo uru Asanaia igini Yasuabi Henadada hameigini Binui ibubi Kadamiele Sabanaia Hodaia imaru Kelida Pelaia Hanana imaru ti mini gilibu wini. Miga Lehobo Hasabaia imaru Saguru Serebaia Sebaniaia imaru Hodaia Bani Beninu imaru ti mini gilibu wiai hene.

14-27 Wali agalinaga agali haguane hearu tinaga mini gilibu winigo uru Paroso Pahadamoaba Elama Sadu Bani imarubi Buni Asagada Bebai Adoniya Bigibai Adini imaru tinaga mini gilibu wini. Ade Hesegeia Asuru imaru Hodaia Hasumu Besai imarubi Haribi Anadodo Nebai imaru Magabiasa Mesulama Hesiri imarubi ti mini gilibu wini. Mesesabele Sadogo Yadua imaru Peladaia Hanana Anaia imaru ti mini gilibu wini. Hosea Hanania Hasubu imaru Halohese Piliha Sobege imarubi Lehumu Hasabana Masea imaru Ahia Hanana mendebi Anana imarubi tinaga mini gilibu wini. Malugu Harimi Bana imarubi uruni bibahende tinaga mini gilibu wigi bini.

*Habo nalolene bi hongohé lowinigo ogo*

28 Ina Isaraele wali agalime habo nalolene bi ogo bebani gilibu wirima. Ina loma binigo mo miaga kamarubi Libai hameigini kamarubi Ngode Datagaliwabehanda anda mamage haga kamarubi biabe bialu haga kamarubi ngida balu iba gana laga kamarubi wali agali maru bu kamarubi ina bibahendeore Ngode Datagaliwabehanda bi mana taliai halu wali agali ibuni mitangi nabiaiga ina daluha karu baba mandagi nahole

✠ 9:32: 2 Kin 15.19, 15.29, 17.3-6, Esr 4.2, 4.10

lalu ina habagi harima. Ina one bedarubi waneigini miniwi bu karubi bibahendeme inane heba bi baya hangu hale halu buleberama. <sup>29</sup> Iname ina damene darama mbiraore bu kamarubi inanaga agali haguane bu karubi ina bibahendeoreme habo nalolene bi hongoheore lo weramagoni. Ina bibahende mo ngoai howa bi hongohe ogoni Ngode Datagaliwabenaga bi mana bamba ibugua ibuninaga biabe bia haga agali Moseseha howa inanaga mamaliruhondo lamini ngago iname talialu bialu hole lalu lo werama. Inanaga Anduane Homogohanda inahondo bilimu layadagua iname buleberama. Ibugua mana lowinigo iname mitangi bialu bi hongohe lo wialu talialu buleore larama. Ani buleore lalu habo nalolene bi ogoni lo weramago puguarimayagua nde Ngode Datagaliwabe ibunime ina kamagoria mo ko holene ibilelo larama, lene.

<sup>30</sup> Ani lalu iname wali tara ina daluha Ngode Datagaliwabe mitangi nabiaga bedaru dabu nabuleore lo werama. Ina wanebi agali Ngode Datagaliwabe mitangi nabiaga karu namuleberema.✧

<sup>31</sup> Agali tara maru ina dindiha Ngode Datagaliwabe mitangi nabiaga karume Sabada horongibi horo timbuni maru inanaga lotu larangibi widi mbirale maru yalu ibiyagua iname uruni yolo nabimiya lo werama. Ani bialu mali kane haga biragola ina mabuha tomo nahenge howa ina baba dano mbira ho heneyagua mali ogoni tagira ibirangi dano yadai bia nale wahamiya lo werama.✧

<sup>32</sup> Mali mbira mbirani muni siliba emene maru Ngode Datagaliwabenaga andaha biabe bulene ngaru bilonaga migi buleberema.✧

<sup>33</sup> Muni siliba ogonime Ngode Datagaliwabenaga deni dagia tebolo ngagoria mberedi wulene yolo bilobi horo bibahendenaga widi lomabu delolene yolo bilobi horo bibahendengi nogo loma buwa irame dai helolene yolo bilobi Sabada horongi loma biaga ngaru bilonagabi maru ale Ege Gahenge Pigane Ngabulo kagola loma bialu miaga ngaru bilobi horo timbuni tara tara tagira ibiragola uruningi biaga ngaru bilobi mimiya. Ina Isaraele wali agalinaga ko ngaru domo wahelo nogo loma bo delolene yolo bulenebi loma marunaga yolo bulenebi maru tara tara Ngode Datagaliwabenaga andaha biabe bulene ngaru bilonaga yolo bulenebi uruni bulenenaga muni siliba tagu wuleberama.

<sup>34</sup> Ani bialu mana lowini ngadagua Anduane Homogo inanaga Ngode Datagaliwabenaga lomabu delaga dabu ngagoria lomaru wali agalime yalu ibu migi birago delolenenaga ira hameigini agome bo yulene wiaruabe hondole wali agali bibahendebi loma binigo mo miaga karubi Libai aria karubi ina bibahendeme mana lowini ngadagua bialu tadu biradagua bimiya larima.

<sup>35</sup> Ani bialu mali bibahendengi inanaga mabuha widi pigane hini denegobi ira lini ala boga biragobi uruni damenego iname Anduane Homogonaga andaha bu yalu ibuleberama larima.✧

<sup>36</sup> Ani buwa inanaga igiri wahene taba hanarago iname Ngode Datagaliwabenaga andaha taba yalu puwa loma binigo mo miaga karia igiri ogoni Ngode Datagaliwabenaga loma bia hene helo muleberama. Ani bialu bulumaga igini wangabe pigane wiragobi sibi memeru igini wangabe pigane wirago damene bibahendebi Ngode Datagaliwabe ibuninagaore loma bia hene helo haru ibuleberama. Mbirale uruni bibahende Ngode Datagaliwabenaga maname lowini ngadagua bialu ani buleberama.✧

<sup>37</sup> Ani buwa mali bibahendengi ina mabuha widi pigane denego balawa helo damberemago ariabi ira lini tara tara pigane denegobi gerebi lini pigane denegonaga waini ibabi olibe lini pigane denegonaga welibi uruni bibahende iname Ngode Datagaliwabenaga andaha do hole yalu puwa loma binigo mo miaga karuhondo lomabu muleberema.✧

Ani bialu Libai agaliru tigua tomo mbirale pini piniru mima ina mabuha ibiragola uruni muleberema, lene.

✧ **10:30:** Har 34.16, Man 7.3 ✧ **10:31:** Har 23.10-11, LBM 25.1-7, Man 15.1-2 ✧ **10:32:** Har 30.11-16 ✧ **10:35:** Har 23.19, 34.26, Man 26.2 ✧ **10:36:** Har 13.2 ✧ **10:37:** Dag 18.21



<sup>38</sup> Loma binigo mo miaga Arono aria mbira kago ibu Libai agali tomo tale bialu pini piniru mulenengi ti mandagi polene nga. Ani mo puwa Libai agali biaru tigua tomo pini piniru mo yayago tale bialu pini Ngode Datagaliwabenaga andaha tomo do haga hobane ngagoria yalu daibu wilo. <sup>39</sup> Ogoni irane wali agalirumebi Libai ariarumebi tomo damenego pigane boga birago widibi gerebi lininaga waini ibabi olibe lininaga welibi uruni damene Ngode Datagaliwabenaga anda tamu hobaneha tomo wiaga dabu ngagoria yalu pu wiagaha wulene nga. Ndisi berubi tamu hobane ogoniha dege wiaga wini. Anda ogoninaga tamu hobane maru loma binigo mo miaga hearu tinaga halu maru Ngode Datagaliwabenaga anda mamage haga agali hearu tinaga halu maru Ngode Datagaliwabenaga andaha ngida balu iba gana laga bu hearubi tinaga hene.

Iname Ngode Datagaliwabenaga anda ogoni yu wanahe baya hangu handayaho holene ngadagua handayaho hamiya lalu habo nalolene bi ogoni lo wirima, lalu wali agalinaga lahalu Nehemaiahanda lene.

## 11

### *Wali agali Yarusalemeni henerunaga mini uru*

<sup>1</sup> Horo uruningi Isaraele agali haguane bu hearu ti Yarusalemeni holene nga manda bini. Ani manda buwa wali agali maru tanoha hearu tigua tini damene hayadagua mo mogo bigi buwa damene pira halu mbira biraga buwa pini ai ibu damenego Yarusalemeni Ngode Datagaliwabenaga tano loma biahene biagoha holobadabe handamiya lowa tadu bialu hene. Ani buwa maru ti tano wiaruha hama pelonaga ani bini. <sup>2</sup> Ani bialu maru ti nde tini hameme Yarusaleme tanoha hole laga biyaru Isaraele wali agali bu hearume tihondo bayale larimi lalu turu haga bini. <sup>3</sup> Ani biyagola Isaraele wali agali maru hearubi loma binigo mo miaga bu hearubi Libai hameigini bu hearubi Ngode Datagaliwabenaga andaha biabe bialu haga hearubi agali ala Kini Solomononaga biabe bia haga henerunaga aguanene bu hearubi ti bibahendeore Yuda tano tini dindi wiyadaruha hama pugu pugu bini. <sup>4</sup>

### *Yuda dindihayagi agali haguane Yarusalemeni ibu henedarunaga mini uru*

<sup>4</sup> Yuda hameigini aria agali haguane kira Adaia Maseala hene. Adaia ibu Usia igini howa Segaraia aguane hene. Adaiaibunaga mamali maru hama ibiniru ogodagua. Amaraia Sebadaia Mahalalele imaru hene. Uruni ti Yuda igini Perese mbira henegonaga aguaneneru hene.

<sup>5</sup> Masea ibu Barugu igini Kolohose aguane hene. Maseaibunaga mamali maru uru Hasaia Adaia Yoiaribi Segaraia imaru haga bini. Uruni ti Yuda igini mende Selanaga aguaneneru hene.

<sup>6</sup> Perese ibu aguaneneru agali hongohe dege dege handari mariani pira waragariani halira (468) ti Yarusalemeni hene.

<sup>7</sup> Beniyamini hameigini nde agali haguane heneru mini uru Salu ibu Mesulama igini howa Yoede aguane hene. Ibu mamali maru Pedaia Kolaia Masea Idiele Yasaia ima uruni haga bini.

<sup>8</sup> Gabai Salaila libu Salu damene hene. Ani henego wali agali Beniyamini hameigini Yarusaleme heneru bibahende handari dirani pira kirani halira (928) hene. <sup>9</sup> Yoele ibu Sigiri igini howa ibu Beniyamini hameigini uruni tinaga agali haguane hene. Ani heagola Hasenua igini Yuda ibubi nde Beniyamini hameigini uruni aria howa Yarusalemeha hearu haru haga agali haguane mende hene.

<sup>10</sup> Loma binigo mo miaga hearunaga agali haguane heneru mini uru Yoiaribi igini Yadaia ibubi Yaginibi libu hene. <sup>11</sup> Ani heagola Mesulama aguane Hiligaia igini Seraia hene. Iibunaga mamali maru Sadogo Meraiodobi loma binigo mo miaga agali haguane

timbuni Ahidububi ti hene. <sup>12</sup> Agali uruni ti aria handari halirani pira kirani kira (822) bibahende Ngode Datagaliwabenaga andaha biabe bialu hene.

Adaia ibubi nde Yarohama igini howa Pelalaia aguane hene. Ibunaga mamali hama ibinigo mini uru. Amasi Segaraia Pasuru imaru Malagiya imaru haga bini. <sup>13</sup> Uruni ti aria dagalamaga halu handari kirani pira mariani huniane kira (242) hene.

Agali haguane Amasai ibu Asarele igini howa Asai aguane hene. Ibunaga mamali marubi Mesilemodo Imela hene. <sup>14</sup> Agali hameigini uruni aria handari mbirani pira kirani halira (128) uruninaga agali haguane Sabadiehe ibu dameneru ti howa ti ami agali hongo gibiorehe mini lene hene.

<sup>15</sup> Yarusalemeni Libai hameigini agali haguane henerunaga mini uru

Semaia ibu Hasubu igini howa Asarigama aguane hene. Ibunaga mamali marubi Hasabaia Bunila hene.

<sup>16</sup> Ani heagola Sabedai Yosabadala libubi nde Libai hameigini agali haguane howa libugua Ngode Datagaliwabenaga anda biagonaga biabe tagirahayagi bialu haga agali hearu handayaho haga hene.

<sup>17</sup> Agali haguane dege mbira Miga igini Madanaia ibu Asaba aguanene aria mbira Sabadi henego aguane hene. Ani howa Ngode Datagaliwabenaga andaha wali agalime lotu lalu howa kaj lalu iba gana lagaru Madanaia ibu haru haga haguane hene.

Ani haru heagola agali haguane mbira Bagabugaia ibugua nde Madanaia biamogo biaga hene. Yadudunu hameigini aria Galala mbira henego aguane Samua igini Abada ibubi agali haguane dege hene.

<sup>18</sup> Libai hameigini Ngode Datagaliwabenaga tano Yarusaleme biagoha heneru bibahende handari kirani pira halirani maria (284) hene.

<sup>19</sup> Agali haguane kirali Ngode Datagaliwabenaga anda Yarusalemeni heago mamage haga henego libunaga mini Agubu Talamonola hene. Libu aria bibahende dagalamaga halu handari mbirani pira kariani kira (172) hene.

<sup>20</sup> Ani heagola Isaraele wali agali maru hearubi loma binigo mo miaga maru hearubi Libai hameigini maru hearubi ti bibahende Yuda dindi tini dalu winidaruha haga haga bini. <sup>21</sup> Ani heagola Ngode Datagaliwabenaga andaha biabe bialu haga agali hearu ti nde Yarusalemeni dege dindi hombene mbira mini Obele wiagoria hene. Tigua biabe ogoni bialu helo agali kira Siha Gisibala libugua ti handayaho haga bini.

<sup>22</sup> Usi ibu nde Bani igini howa Hasabaia aguane hene. Ani howa ibugua Libai hameigini Yarusalemeni hearu handayaho haga hene. Usi ibu Asaba hameigini henego ibu mamali marubi nde Madanaia Migala hene. Asaba hameigini hearume Ngode Datagaliwabenaga andaha lotu lolenaga ngida balu iba gana lolene tigua haru haga hene. <sup>23</sup> Ani bialu helonaga kini hama ibinirume agali hameigini urunime Ngode Datagaliwabenaga andaha ngida balu iba gana laga bilo horo mbira mbiranaga haru holenedagua dabo wigi bini. Horo bibahendengi ani bialu helonaga kini henedarume mana wabu wini.

<sup>24</sup> Yuda hameigini aria Mesesabele igini Pedahaia ibu Sera hameigini mbira hene. Ani howa Pedahaia ibu Pesia dindiha howa Isaraele wali agalinaga bi lahaga hene.

### *Yuda Beniyaminila hameiginirunaga tano wigi biniru ogo*

<sup>25</sup> Wali agali dewaore tano kawareni tininaga dindi wigi binidagoria haga haga bini. Yuda hameigini aria maru Kiriada Ababi Dibonobi Yagabaselebi tano tebira uruniha halu maru nde tano uruni kaware dege dindi wigi biarua hene. <sup>26</sup> Ani heagola maru nde tano timbuni maru wiaru Yasua tanobi Molada tanobi Bedebelede tanobi <sup>27</sup> Hasarasuala tanobi Beaseba tanobi Beaseba tano wiagohayagi dindi emene wiapara para bu wiaruhabi Yuda hameigini biarua ti uruniha haga bini. <sup>28</sup> Ani heagola maru nde tano timbuni Sigilagaha halu maru Megona tanoha halu maru nde dindi emene Megona

tano wiapara para biaruha haga bini. <sup>29</sup> Maru nde Enerimono wiagoha halu maru Sora wiagoria halu marubi Yaramudu wiagoha hene. <sup>30</sup> Ani halu maru Sanoa Adulamala tano maru nde dindi emene emene tano uruni wiapara para bu wiaruha haga bini. Ani heagola maru Lagisi tano wiagohabi halu tano ogoniha dindi emene maru wiapara para bu wiaruhabi haga bini. Marubi nde Asega tanoha halu maru tano ogoni kawareha dindi emene wiapara hearuhabi haga bini. Anigo Yuda wali agali ti Beaseba dindiha tano abene unurahayagibi Beaseba dindi dombenehabi Hinomohayagi dindi ulini wupe hene wiagohabi uyurahayagibi bibahendeha paliame hene.

<sup>31</sup> Beniyamini hameigini maru ti nde Geba tanohabi Migimasa tanohabi Ai tanohabi Bedele tanohabi paluyu pialu dindi emene Bedele tano wiapara para biaruhabi paliyu pene. <sup>32</sup> Maru nde Anadodo tanohabi Nobo tanohabi Ananaia tanohabi <sup>33</sup> Hasoro tanohabi Lama tanohabi Gedaimi tanohabi <sup>34</sup> Hadidi tanohabi Seboimi tanohabi Nebalada tanohabi <sup>35</sup> Lodo tanohabi Ono tanohabi dindi ulini tigabi wiagoha mini Mbirale Tara Tara Wabiaga dindi ogoni wiaruhabi hai hene. <sup>36</sup> Ani heagola agali haguane hearume Libai aria maru Yuda dindini hearu tihondo lamialu lalu, Ti maru Beniyamini hameigini baba hole pudaba, lalu lamini.

## 12

### *Loma binigo mo miagabi Libai ariabi heneru tinaga mini uru*

<sup>1</sup> Loma binigo mo miagabi Libai ariabi dewaore ti Seadeli igini Serubabele heba loma binigo mo miaga haguane timbuni Yosubi heba Babilono yu wahalu Yarusaleme dai bini.

### *Loma binigo mo miaga agali mini uru*

<sup>2-7</sup> Seraia Yaremaia Esera Amaraia Malugu Hadusu imaru ibini. Seganaia Lehumu Meremodo imaru Ido Ginedoi Abiya imaru ibini. Miyamini Madaia Biliga imaru Semaia Yoiaribi Yadaia Salu Amogo Hiligaia Yadaia mende imarubi ibini. Yosua ibu loma binigo mo miaga haguane heangi agali mini o gilibu ngaruni tigua loma binigo mo miaga maru hearu haru haga hene.

<sup>8</sup> Libai aria daibu heneru ti mini uru. Yasua Binui Kadamiele imaru Serebaia Yuda Madanaia imaru uruni tigua Ngode Datagaliwabehondo kaj lalu iba gana laga heneru haru haga hene. <sup>9</sup> Libai aria Bagabugaia Unola libu aria marubi uruni tigua iba gana halu mbira laga lai kagola Bagabugaia Unola libugua nde libu hameneru heba iba gana halu mende lolene ngagoria ladai biaga hene.

### *Loma Binigo Mo Miaga Haguane Timbuni Yosuanaga aguanene heneru uru*

<sup>10</sup> Yosua igini Yoiagimi hene. Yoiagimi igini Eliasibi Eliasibi igini Yoiada <sup>11</sup> Yoiada igini Yonadana Yonadana igini Yadua hene.

### *Loma binigo mo miaga haguane hene mini uru*

<sup>12-21</sup> Yoiagimi ibu Loma Binigo Mo Miaga Haguane Timbuni heangi agali maru ti loma binigo mo miaga haguane dege howa tini damene hangu haru haga uru hene.

Seraia hameigini aria loma binigo mo miaga Meraia hene. Yaremaia hameigini aria Hananaia hene. Esera hameigini aria Mesulama hene. Amaraia hameigini aria Yahohanana hene. Malugi hameigini aria Yonadana hene. Sebanai hameigini aria Yosebe hene. Harimi hameigini aria Adana hene. Meraiodo aria Helegaia hene. Ido hameigini aria Segaraia hene. Ginedono hameigini aria Mesulama hene. Abiya aria Sigiri hene. Miniamini Moadiala hameigini aria Pilidai hene. Biliga hameigini aria Samua hene. Semaia hameigini aria Yahohanana hene. Yoiaribi hameigini aria Madenai hene. Yadaia hameigini aria Usi hene. Salai hameigini aria Kalai hene. Amogo hameigini aria Ebere hene. Hiligaia hameigini aria Hasabaia hene. Yadaia hameigini aria Nedanele hene.

<sup>22-23</sup> Loma binigo mo miaga haguane timbuni Eliasibi Yoiada Yonadana Yadua imaru ti heangi loma binigo mo miaga haguane maru henedaru tinaga mini mbuga mbiraha gilibu wini. Ani bialu Libai hameigini aria bu hearunaga minibi mbuga Yuda dindiha mbirale uru ale bialu ka lalu te gilibu wini. Tigua anidagua bialu gilibu wigi bima ibinigo Eliasibi aguane Yonadana ibu loma binigo mo miaga haguane heangi mini gilibu wiaga winidagua mani gili nabi wahene. Kini Dariusu ibu Pesia dindinaga kini heangi mini uruni mbuga biagoha gilibu maro bini.

*Ngode Datagaliwabenaga andaha Libai aria biabe bilo mo minigo ogo*

<sup>24</sup> Ngode Datagaliwabenaga mini yaraga halu howabi ibuhondo kaj lalu howabi bamba Kini Debidi ibu Ngode Datagaliwabenaga agali howa ibugua iba gana lalimu lenedagua lalu hene. Libai aria tigua duguni kira howa duguni mbiragome iba gana dugu mbira ngago laragola dugu mendegome iba gana dugu mende ngago ladai biaga hene. Ani laga winigo Hasabaia Serebaia Yasua Kadamiele uruni tigua iba gana lelo haru haga hene.

<sup>25</sup> Madanaia Bagabugaia Obadaia Mesulama Talamono Agubu imaru tinaga biabe Ngode Datagaliwabenaga anda handaya ho haga howa tigua dabudabu wiaga anda hobane wiaruha uruninaga panga harabani mamage haga hene. <sup>26</sup> Libai agali uruni ti loma binigo mo miaga haguane timbuni Yosua igini Yoiagimi ibu Yahosadaga aguane biago heangibi gabumane agali haguane Nehemaia heangibi loma binigo mo miaga Esera ibu Ngode Datagaliwabenaga mana lo wini ngago manda biaihe henego ogoni heangibi biabe ogoni bialu hene.

*Nehemaiahanda Yarusaleme tanonaga ege pabe biago Ngode Datagaliwabhondo lomabia henego ogo*

<sup>27</sup> Yarusaleme ege pabe biago bu yaanda hai howa tigua lotu lalu pabe ogoni Ngode Datagaliwabe ibuninagaore helo loma biaho helene. Tigua lotu ogoni lole howa Libai agali bu hearu bibahendeore tini henedagoha howa Yarusaleme ibu ngoai halu ti heba lotu lalu Ngode Datagaliwabhondo turu halu kaj lowa iba gana lole ibai hene. Ibai howa Libai agali uruni tigua iba gana larangi ti marume beledi ale kira gabame wabini biago labo ngilingele lelonaga balu marume ngida tara tara balu hene.

<sup>28-29</sup> Anidagua bulene wiya handala Libai agali Ngode Datagaliwabenaga andaha ngida balu iba gana laga hearuni bibahende tini dindi Nedobabi Bedegiligalabi Gebabi Asamabedebi maru wiaruha howabi bibahende Yarusaleme ibu ngoai hene. Dindi uruni Yarusaleme tano kaware dege wigi bini. <sup>30</sup> Ani ibu ngoaiho howa loma binigo mo miaga hearubi Libai agali hearubi tigua Ngode Datagaliwabenaga deni tiha ko mbira nawi holenaga mana biaga winida ale bini. Ani bialu wali agali bibahendeore Yarusaleme tanonaga ege pabe biagobi tano pabenaga panga haraba heagobi bibahendeore Ngode Datagaliwabenaga deni ko mbira para nahelonaga mana biaga winida ale biai hene.

<sup>31</sup> Nehemaia ina Yudanaga agali haguane hearu ege pabe biago daligaha mbalape wiagoria haru iraga howa ti bibahende halu kira tale buwa ho dugubu helaru. Ani helowa tigua pabe daliga biagoria Ngode Datagaliwabhondo kaj lalu iba gana lama pumabu bidaba laru. Tidi mbira layagome gi tighayagi lama pialu pabenaga panga mini Mburuma Yu Wahaga laga wiagoria pilimu laru. <sup>32</sup> Hosaia halu Yudali agali haguane maru hayadarume agali iba gana lama porago tigua talima pudaba laru.

<sup>33-35</sup> Ani bialu loma binigo mo miaga maru hearume ti poradagua mama mbelo biguli pu laga bima pudaba laru. Agali piyadaru tinaga mini uru Asaraia Esera Mesulama Yuda Beniyamini Semaia Yaremaia uruni ti pene. Ani piyagola Semaia aguane Yonadana igini Segaraia ibugua ti piyadagua mama talima pene. Segaraia ibunaga mamaliru ogodagua hama ibini. Madanaia Migaia Saguru Asaba imaru hene. <sup>36</sup> Ani piyagola Segaraia damene hearu tibi nde Segaraia piyadagua pene. Agali uruni tinaga

mini Semaia Asarele Milalai imarubi Gilalai Mai Nedanele imarubi Yudabi Hananibi uruni ti pene. Agali uruni tigua ngida balubi mbirale iba gana lalu mo bila hagane tara tara wiarubi bibahende bamba Ngode Datagaliwabenaga agali Debidihanda laga winidagua lama pene. Wabuni halu mbira tidu yalu piyadagonaga loma binigo mo miaga Esera ibu mana mandabi agali howa ibugua ti haru halu pene. <sup>37</sup> Tigua piaho wialu panga mbira mini Iba Duguaga laga wiagoria bolangua halu pialu tano anda polene egageria bama iraga heagoha iraga halu Debidinaga tano laga wiagoria anda pene. Pialu Debidinaga anda timbuni heago bolangua halu pialu ni tagira ibiragohayagi panga mbira mini Iba Haraba laga wiagoria tagira pene.

<sup>38</sup> Libai agali wabuni mende hayago ti nde daligaha iraga halu pabe mbalape wiagoriani gi lehayagi pudai bule piyagola ibi ti piyagoha pu tago halu piru. Ani pirugola agali dewaliore i pirudagua mama talima ibalu ina haru pialu anda bu gimbu bima iraga hene mini Mberedi Hiraga Anda heago bolangua halu pialu pabe Yangale Timbuni heagoria tagira pirima. <sup>39</sup> Ani pialu iname panga mini Eberaiminaga laga heago bolangua halu pialu Yasana Panga laga heagobi bolangua halu Wena Panga laga heagobi bolangua halu anda bima iraga hene mini Hananelenaga laga heagobi bolangua halu pu dege birima. Ani pialu anda bima iraga hene mende mini Mamageali Handari Mbira (100) Haga laga wiagobi bolangua halu pu dege bialu Nogo Sibinaga Panga laga heagobi bolangua harima. Ani piaho wialu Ngode Datagaliwabenaga anda biago mandaha pabe heagoria tagira pialu pabe panga mbira mini Mamagealirunaga laga heagoria lola haga birima.

<sup>40</sup> Ani bialu Libai agali wabuni kira biaru Ngode Datagaliwabenaga andaha anda pialu tini ho dugubu hagadagua haga haga buwa Ngode Datagaliwabehondo turu halu kaj lowa iba gana lalu hene. Agali i heba anda pirimaru aria maru agali haguane hearu aria <sup>41</sup> pialu maru loma binigo mo miaga aria penego tigua mbelo biguliru pu laga bima anda pirima. Loma binigo mo miaga piyadaruni tinaga mini uru Eliagimi Masea Miniamini Migaiia Elioenai Segaraia Hananaia imarubi pirima. <sup>42</sup> Agali maru pirimadarunaga mini Masea mendebi Semaia Eleasa Usi Yahohanana Malagiya Elama Ese imarubi pirima. Yaserahaia ibugua iba gana lagaru haru halu ti bibahende iba gana baya gibi laraga halu hene.

<sup>43</sup> Horo ogoningi Ngode Datagaliwabehanda turu holene tiha mo tola hayagola tigua loma dewaore Ngode Datagaliwabehondo mialu hene. Wali waneigini bu hearu bibahendeme turu hai hene. Tigua turu howa galalu iba gana ladagadaga biyaru wali agali kaundiaha hearume hale habehe lalu hene.

### *Wali agalime loma binigo mo miagabi Libaialibi biamogo binigo ogo*

<sup>44</sup> Horo uruningi agali marume wali agali tigua Ngode Datagaliwabehondo mbirale mige biragobi Ngode Datagaliwabenaga andaha mbirale wiarubi uruni wiaga tamu hobane haga haga bidaru handayaho helo dabo helaga bini. Anda hobane uruniha tinaga mabuni widi pigane denerubi ira lini damene pigane boga binirubi wali agalime tinaga mbirale wiarunaga pini pini Ngode Datagaliwabehondo minirubi bibahende mo miaga wini. Agali uruni tinaga biabe wali agali ti kagoha pialu mana lo ngadagua mbira tale bialu loma binigo mo miaga karubi Libai karubi talebu milimu lene ngaru mima ibaga biaga hene. Yuda wali agali tigua loma binigo mo miaga hearubi Libaialibi hearubi tinaga biabe biyago bayaleore biyago hondowa turu timbuni hene. <sup>45</sup> Loma binigo mo miagabi Libaialibi tigua wali agali Ngode Datagaliwabenaga deni tiha ko mbira para nahe helobi Ngode Datagaliwabe ibunime lalimu lalu lowini ngadaguabi lotu uruni lalu haga wini. Ani bialu heagola agali maru Ngode Datagaliwabenaga andaha ngida balu iba gana laga hearu tigua tinaga biabe ogoni biaga winidagua bialu hene. Bamba Kini Debidibi ibu igini Kini Solomonobi libugua agali uruni tinaga mamaliruhondo



ogodagua bialu halimu lamini wiadagua bialu hene.✧ <sup>46</sup> Agali ngida balu iba gana laga uruni tinaga mamali abale henerume Kini Debidibi ngida balu iba gana laga agali Asababi heangi howa Ngode Datagaliwabehondo turu halu kaj lowa iba gana lolene agali marume haru helo dabo helene.

<sup>47</sup> Ani bialu Serubabele heangibi Nehemaia heangibi Isaraele wali agali tigua horo bibahendengi tomo yalu ibalu agali ngida balu iba gana laga urunibi agali Ngode Datagaliwabenaga andaha mamage haga urunihondobi miaabo haga hene. Ngode Datagaliwabe ibunihondo lomabu mialu tigua Libai agali bu hearuhondo tomo bu mialu haga hene. Ani miragola Libai agali uruni tigua mana lo winigodagua bialu tomo loma bini uruni aria maru tale bialu loma binigo mo miaga hearu ti mo miaga hene.

## 13

### *Isaraeleali ti wali agali tara hearu baba ta nabi nahaga winigo ogo*

<sup>1</sup> Horo ogoningi wali agali ibu ngoai ho heagola Libai agali hearume Ngode Datagaliwabenaga bi mana Mosesehanda gilibu wini wiago dagalatagi hene. Tigua dagalalu hearia bi mbira ogodagua lo wiaria hendene. Amono wali agalibi Moaba wali agalirubi tigua Ngode Datagaliwabenaga wali agali karu baba hatago holene nawiore lalu gilibu wiaria dagalene.✧ <sup>2</sup> Mana ogonidagua lo winidagoni irane Isaraele wali agali ti Iyibi dindiha howa garabaya golalu tagira ibiyangi Amono Moabairubi tigua iba tomobi mbira Isaraele wali agalime nelo mia nabiyagonaga mana ani gilibu wini. Ani nabi howa tigua agali bi mana henene ngadagua ndo latagi halu mbiwia haga Balama mbira heagome Isaraele wali agali Ngode Datagaliwabehanda mo ko helonaga ibuhondo muni mialu bi la hole ibu lowa lamini. Lamiyagola Balama ibugua mo ko helonaga bi lolebiyaria Ngode Datagaliwabehanda Isaraele wali agali mo bayale helonaga bi lelo mo lahene.✧ <sup>3</sup> Isaraeleali tigua mana lowini dagalayago hale howa wali agali uruni tinaga mamali tarali heneyagola ti baba nahole lalu bibahende bo taliatagi haga bini.

### *Nehemaiahanda mbirale mo tiga binigo ogo*

<sup>4</sup> Loma binigo mo miaga Eliasibi ibugua Ngode Datagaliwabenaga anda dabudabu wiaga hobane heago handayaho helo dabo helayagola ibugua Tobiala nenege hinuwa biabe mandagi bialu hene. <sup>5</sup> Ani bialu howa Eliasibi ibugua Ngode Datagaliwabenaga andaha tamu hobane timbuni mbira heago ogoni Tobia ibu helo mini. Hobane timbuni ogoniha ala widiru lomabu delolene mo wiagabi ira hagua nga bilo lomabu delaga mini inisenesiru mo wiagabi Ngode Datagaliwabenaga andaha biabe buleneru damene mo mogobu wiagabi wali agalime loma bialu tomo loma biniru mo miaga hearu ti nelonaga migi biniru mo wiagabi wali agali tigua widibi waini ibabi olibe lininaga welibi Ngode Datagaliwabehondo miniru Libai aria hearumebi agali ngida balu iba gana laga hearumebi anda biago mamage haga hearumebi ti nelonaga mo wiagabi uruni bibahende hobane ogoniha wilo mo wiaga hene. <sup>6</sup> Mbirale uruni biyadaru Nehemaia i Yarusaleme nahewangi binigo i handa nabi haru. I Pesia dindiha Kini Adasegesi heagohondo mbirale ogodagua bialu kama lalu te lamule pu hewagola tigua uruni bialu hayiya. Kini ibu Babilono dindiha mali pira tebirani kira (32) haru hene hearia piru. Pu howa ina kinihondo hale halu Yarusaleme dai bero larugola e dai bia laya. <sup>7</sup> Dai bia laya handala i Yarusalemeni ibu hewaria Eliasibi ibugua Ngode Datagaliwabenaga anda tamuha hobane timbuni heago Tobia mo walia haya layane hale howa o biyadagoni mana ko liaheore biyada lo manda biru. <sup>8</sup> Ani biyiyago hondowa ina keba timbuni howa tamu hobane timbuni ogoniha anda puwa Tobianaga mbirale wiaruni damene bibahendeore mo batagi hai haru. <sup>9</sup> Ani mo batagi hai howa ina biabe biaga hearuhondo lalu, Tamu hobane ogoni Ngode Datagaliwabenaga deni

bayale ngelonaga mana tigabi biaga winidagua bidaba, laru. Anidagua biai heagola mbirale Ngode Datagaliwabenaga andaha biabe biagane damene wiarubi widi lomabu delolene wiarubi ira hagua nga bilo lomabu delaga inisenesi wiarubi bibahende ala winiru mo batagi hayaruni lone mo yu dai bialu wilo lowa ina, Tamu hobane o biagoaha mo wiai hadaba, laru.

<sup>10</sup> Ina bi mende hale halu hewaria Libai agali hearubi agali Ngode Datagaliwabenaga andaha ngida balu iba gana laga hearubi ti bibahende wali agalime tomo nangira lalu Yarusaleme wahalu tini daluha hama pugupugu biya layane hale haru. <sup>11</sup> Ani hale howa agali haguane bu hearuhondo ina keba howa lalu, Tigua irane aginaga Ngode Datagaliwabenaga anda bame helo waharimibe, laru. Ani lowa ina Libai agalibi agali Ngode Datagaliwabenaga andaha ngida balu iba gana laga biarubi bibahende haru dai bialu tigua biabe bialu haga wiyaruha daibu helaga biru. <sup>12</sup> Ani helewagola Yuda wali agali tigua lone widibi waini ibabi olibe lininaga welibi bibahende yalu ibalu anda hobane timbuni Ngode Datagaliwabenaga andaha biabe biagane damene wiaga wiaruha wigi bini. <sup>13</sup> Ani biyagola ina loma binigo mo miaga agali Selemaiabi mana lowini ngago lawai haga Sadogobi Libaiali Pedaiabi agali uruni tigua tamu hobane timbuni ogoniha handayaho helonaga dabo helaga biru. Ani helowa agali mbirabi ti biamogo bialu helonaga Saguru igini Madanaia aguane Hanana heago dabo helaru. Agali maru hearume lalu agali uruni ti tigabi bayaleore bialu haga ka layago hale howa ina ti dabo helaga biru. Marume agali ti heba biabe mandagi biaga hearunaga tomo mbiraleru mo tale bilo lowa helaru.

<sup>14</sup> Ani helowa ina lalu, Inaga Ngode Datagaliwabe-o inaga anda baya hangu handayaho holenenagabi í mitangi bialu lotu lolenenaga mana mo tiga bulebi ina o biruruni mitangi bibe, laru.

<sup>15</sup> Horo uruningi dege howa handalu hewaria Yudali maru hearume Sabada horongi waini iba wabulenaga gerebi lini geme hangedalu hemiria handaru. Yudali maru hearumebi nde Sabada horongi dege tomobi waini ibabi gerebi linibi poge linibi marualebi bibahende nogo dongi erekuinini mo paga howa Yarusalemeha yalu pole pialu hemiria handaru. Ani biyago hondowa ina bi hongo howa tihondo lamialu lalu, Tigua mbirale yalu pialu kamiruni Sabada horongidago yolo nabuleore, laru. <sup>16</sup> Agali maru Taia tano howa Yarusalemeha ibu hene. Agali uruni tigua Sabada horongi inanaga wali agalirume ti yolo mulumayanaga wena bo yalu dabudabu marualebi yalu Yarusaleme ibugu biaga hene. <sup>17</sup> Ani bialu heago hondowa ina Yudali agali haguane hearuhondo keba howa tihondo lamialu lalu, Tigua mana koore bialu Sabada horo mo ko halu horo maru bame ngaru ale dege bu hinarimidago irane agibe. <sup>18</sup> Bamba inanaga mamaliru tigua nde ogonidagua dege biyagola Ngode Datagaliwabehanda ti pani mialu tano ogo mo ko halu bo giala hole binigo. Ai tigua nde mana ko ogoni ale dege birimidagome Ngode Datagaliwabehanda Isaraeleali inahondo keba lone ha timbu holobadagonaga, ani laru.

<sup>19</sup> Ani lowa ina tihondo bi hongo howa lamialu lalu, Sabada horo holenaga bibahendengi alendo ni paliragola tanonaga pabe panga dameneru payai halimu. Sabada horo hai howa alendo haragola panga damene dugua holene nga, laru. Ani lalu inaga biabe biaga agali hearuhondo lalu, Tigua tanonaga pabe panga mamage halu agali marume mbirale muni mulene aleru Sabada horongi mo yalu anda naibilo mamage halimu. <sup>20</sup> Ani birimagola horo marungi agali marume mbirale muni mule yalu ibalu hearia tanonaga pabe panga payarimago hondowa ti horo mendengi ina panga duguilo lowa ti pabe tagirahayagi palu haga hene. <sup>21</sup> Ti ani palu heago hondowa ina tihondo bi hongo howa lalu, Ti tagira ogoria agile bialu kamibe. Ayu ogoni tini andaga pudaba. Halu mende Sabada horongi ibirimiyagua ina ti mana loleberogo lone naibalimu,

☆ 13:10: Man 12.19 ☆ 13:12: Mal 3.10 ☆ 13:15: Har 20.8-10, Man 5.12-14, Yar 17.21-22

lalu lamiru. Ani lamirugola ti mani naibi wahene. <sup>22</sup> Ani biyagola mani ina Libai agali hearuhondo lamialu, Tígua Ngode Datagaliwabenaga deni tiniha ko mbira para nahe holenaga mana biaga winidago bilimu. Anidagua bialu tını bayale tigabi howa wai pabenaga panga haraba bibahende ngagoria mamage hole pilimu. Ani bialu kamigola agali bu karume Ngode Datagaliwabenaga Sabada horonaga mana ngago pugua nabi baya hangu talialu agali tara tara bu karume tanoha mbirale yalu anda naibilo handayaho halimu, lalu lamiru.

Ani lai howa ina lalu, Inaga Ngode Datagaliwabe-o ina wali agali gubalini timbuniore howa dara holene irane nawini dara timbuni haga kegoni. Anigo ina biabe bayale maru bialu haruliru mitangi bialu ina i dara habe, laru.

<sup>23</sup> Ina horo uruningi dege maru wiaria handa walia harugo uru. Yudali maru hearume Asadodo wali berearubi Amono wali berearubi Moaba wali berearubi dabu bu hearia handaru. <sup>24</sup> Tinaga waneigini marume Asadodo wali agalinaga bi laga wiaru lalu hearia handaru. Marume dindi tara tara wiarunaga bi tara tara laga wiaru laga bialu hea. Ani lalu hearume ina Yuda wali agalinaga bi laga winiru ti manda nabi hearia handaru. <sup>25</sup> Ani heago hondowa ina agali urunihondo keba timbuni howa ti maru minu balu maru tinaga mandari dogo waharu. Ani buwa ina tihondo lamialu lalu, Tígua mana ko ogoniore bialu harimida. Ani bialu harimidagonaga Ngode Datagaliwabehanda tíha mo ko holene anda ibilo, lalu lamiru. Ani lowa ina agali urunihondo bi hongo howa lamialu, Tínimebi tinaga waneigini bu karumebi dindi tara tara wali agali bu karu baba dabu nabule lalu Ngode Datagaliwabenaga minini howa bi hongohe lo widaba, laru. <sup>26</sup> Ani lowa ina tihondo laabo halu lalu, Tígua mana ko Kini Solomonohanda bialu haga biagaore bialu harimida. Abale Ngode Datagaliwabehanda Solomonu gubalini ho howa ibu Isaraele wali agalinaga kini helo dabo helaya. Ani helowa Ngode Datagaliwabe ibugua Kini Solomonoha mini bayale gigabi timbuniore mo wia heagola kini maru dindi bibahendeha hearunaga mini gigabi wiaru nira dege lowa Solomonu ibu bolangua timbuniorehe hene. Ani howa ibugua dindi tara wali Ngode Datagaliwabe mitangi nabiaga berearu dabu biyagoni. Ani dabu bu heagola wali urunimeibunaga mini mo batara hayagola Solomonu ibugua mana ko bini. <sup>27</sup> Ani binigo iname nde mana tígua bialu kamiruni talialu dindi tara tara wali bedaru dabu birimayagua nde Ngode Datagaliwabenaga bi mana lowini ngago mo wahole beremada. Anigo iname ogonidagua bulenego bayaledalo manda bidamibe, laru.

<sup>28</sup> Loma Binigo Mo Miaga Haguane Timbuni Eliasibi igini Yoiada henego ibu igini mbira henegome dindi tara wali uruni aria mbira dabu bu hene. Wali ogoni ibu agali Sanabalada mbira heago wane Bedehorono tanoni berene. Ani dabu bu heagola ina Yoiada igiri daliahe ogoni Yarusaleme tanoha nahelo bo taliatagi haru. <sup>29</sup>

Ani buwa ina inaga Ngode Datagaliwabhondo lalu, Inime loma binigo mo miaga karunime mana ko bialu karuni handabe. Tigua loma binigo mo miaga biabe bulene ngago mo ngubia helaya. Ani biyagome inime habo nalolene bi loma binigo mo miaga karu bababi Libai agali karuni bababi lo wirigo habo lalu mo ko hayada, laru.

<sup>30</sup> Anidagua biyagonaga ina loma binigo mo miaga hearubi Libai agali hearubi ti Ngode Datagaliwabenaga deni ko nahe bayale helonaga dindi tara wali agali hearunaga mana ko tiha wiyadaru bibahende mo wahai harugoni. Ani bialu ina ti mbira mbiranaga biabe bialu helo tu wu ngelarugoni. <sup>31</sup> Ina wali agali marume lomabu delolenaga ira gabilo dabo helalu gabuwa ogongiore yalu ibalimu lalu henge mo bagiho ngelarugoni. Ani bialu tinaga mabuha widi pigane denegobi ira tara tara karunaga lini ala boga birarubi do yu ibalu lomabu mule wilimu, lalu lamiru.

✧ 13:23: Har 34.11-16, Man 7.1-5 ✧ 13:26: 2 Sml 12.24-25, 1 Kin 11.1-8 ✧ 13:28: Neh 4.1

Anidagua lowa ina Ngode Datagaliwabehondo bi lalu, Inaga Ngode Datagaliwabe-  
o mana bayale uruni ina birugo mitangi bialu ihondo turu halu biamogo bibe, lalu  
Nehemaiahanda lene.

## Eseda

### Mbuga ogoha gilibu ngarunaga nemandi ogo

Esedanaga mbuga ogoniha Isaraele wali agali Pesia dindiha garabaya pu henegoha howa bialu henerunaga bi te lo nga. Wali mini Eseda Isaraele wali biruwa ibu Pesia dindiha kini heagome dabu bini. Ani pu biruwa waitigime Isaraele wali agali Pesia dindiha hearu bo waholene henge wiagola Eseda ibugua Isaraele biamogo binigonaga te nga. Isaraele wali agali tinaga horo timbuni mbira wiabagi hene ngago mini Purimi laga wini. Horo ogoni tagira ibirangi tigua wai bialu wayali hayagonaga turu timbuni ho haga wini. Mbuga ogoniha Ngode Datagaliwabe mini lalu mbira nagilibuwi. Anigo mbuga ogoni daga lowa handalu keria Ngode Datagaliwabenaga dara halu biamogo bia holene winidane handa walia holebere.

#### **Bulu бага бува кuni gilibu ngago**

*1.1-2.23*

Eseda ibu kuini wali berenego *3.1-5.14*

Hamanahanda Yu wali agali bo waholene manda binigo *6.1-7.10*

Kini heagome Hamana bo wahenego *8.1-10.3*

Yu agali hearume waitigiru bowa wayali henego

#### *Kuini wali Basidi ibugua Kini Segesisinaga bi mo wahenego ogo*

<sup>1-2</sup> Kini Segesis ibu Pesia dindini kini heangi Pesianaga tano timbuni Susa wiagoria ibu biragane dagia wiagoriani handame ho berene. Ani biruwa ibugua dindi handari mbirani pira kirani karia (127) bibahende India howa piaho wialu Idiobia handa gimbu bu berene.✧

<sup>3</sup> Ibu mali tebira kini handameho howa ibugua gabumane agali dindi emene emene hondo biraga bibahenderubi gabumane agali haguane bibahenderubi mo ngoai howa ti tomo timbuni nelo dawa manda manda bini. Ami agali Pesia dindi howabi Midia dindi howabi haru haga hearu dindi mbira mbiranaga agali haguane hearu tibi bibahende ibu ngoai haga bini. <sup>4</sup> Agali haguane uruni ti ibu ngoaiho hearia kini ibugua ege waragariani horo bibahendengiibunaga andaha bibahende wiarubi homogo holene wiarubi anda yári biaru bibahendebi agali ibiyarume de hendelo walia haga bini. Tigua uruni bibahende hondowa baya burugule taraoreyane de hendene.

<sup>5</sup> Anidagua buwa Kini Segesisihanda agali homogo yagibanorubi Susa tanoha hearu bibahendeme tomo nole ibilo halu mendeibunaga anda pabe tamuha hama timbuni wiagoriani dawa manda manda bini. Tigua tomo ogoni nalu heane dege sarere mbira piai hene. <sup>6</sup> Tigua tomo nalu hayadagoriani yári bayaleore tara tara bu wini. Bamba agali marume tole daramabimebi mindibimebi tagalitaya alemebi pelemebi halepange ale winigobi tole tara dege mbira ngalasi ale winigobi uruni dindini duguni mo ngelaga buwa tigua dagia yári biru ogoriani wabu wini. Tigua tomo nole howa ogoniha aga pele mindibi tagalitaya alemebi yári bia howa pu bayaleme pongobia hene. Ani bialu tigua silibame yania holene gi pagida ale ngiringarale agani heaore windohayagi gerelape halu tole gene bayale bu heagoria pongobia hene. Ti tomo nalu birayagoria biragane dagia ngolo silibame wabinirubi ona bu payabu ngelene. <sup>7</sup> Agali biarume gabo be ngolome wabini tara tara ale wiaru mbira mbira mialu waini iba berelowa nalu berene. Kini ibugua agali uruni ti waini iba dewaore nelo mini. <sup>8</sup> Waini iba tigua nayadago magi manda bibe naheore nene. Kinihanda ibu andagaha biabe biahaga bu hearuhondo lalu, Agali mbira mbirame tini noa biradagua nelo hambu milimu, lene.

✧ **1:1-2:** Esr 4.6



<sup>9</sup> Horo ogoningi dege kini ibugua ibunaga tomo nalu heatambu kuini wali Basidi ibugua nde wali bibahende kininaga andagaha biru wiaru nelu tomo timbuni ibuni andagaha dawa manda manda bini.

<sup>10</sup> Kini ibu tomo nalu heane horo kane hayagola ibu waini iba nayagome emene lulu yu hene. Lulu yu howa ibu andagaha biabe bihaga igiri karia biaru ibidaba lene. Igiri uruni tinaga mini uru. Mehumana Bisida Habona imaru Bigida Abagada Seda Kagasa imaru hene. <sup>11</sup> Kini ibugua tihondo lalu, Kuini Basidi ibu kuininaga manda karulalu haru ibalimu, lene. Kuini ibu wali bayaleorego ibunaga yári bidagome kini ibugua ibunaga agali haguane agali maru tomo namiya ibalimu layarubi bibahende mo walia hole manda bini. <sup>12</sup> Anigo biabe bihaga igiri biarume kininaga bi lowia hayago lamiyagola kuini ibugua bi mo wahalu pobe manga hene. Ani biyagome kini mo kebaore hene.

<sup>13</sup> Kuini wali ibu bi mo wahayagonaga kini ibugua agali kinihondo mitangi bayale ina ogodagua bibe lalu talebu miaga heneru olo ngoai hene. Agali ti howa ogoale bulene nga manda bu helobi dindini howa gabumane mana lo wulenebi kini mitangi bayale talebu milo agali mitangi bayale talebu miaga hale holene ogoni kini ibunaga mana ogonidagua biaga wini. <sup>14</sup> Kinihondo mitangi bayale talebu miaga heneru tinaga mini uru. Kasena Seda Adamada imaru Tasisi Merese Masena Memugana imaru hene. Agali haguane karia uruni ti Pesia dindinagabi Midia dindinagabi haguane howa kinihanda handameho kagoria biabe daliga duniniru bialu kini ibu tigua laradagua hale lalu biaga hene. <sup>15</sup> Ani biaga henego ibugua agali biaruhondo lalu, I Kini Segesisi ina inaga biabe bia hagaruhondo bi lawia lalu Kuini Basidi ibu i hame ledodagua bilo ibabe larugola ibu inaga bi mo wahaya. Mana lo ngagome ibuhondo agi bulene lalu lo ngabe, laya.

<sup>16</sup> Memuganahanda kinihondobi ibunaga agali haguane biaruhondobi lalu, Kini-o hale ha. Kuini wali Basidihanda ko ogoni ihondo hangu ndo biya hendedeni. Ibugua kininaga agali haguane hearuhondobi dindi ina hondo kego bibahende agali karuhondobi ko ogoni biyagoni. <sup>17</sup> Wali bibahendeore dindi ina hondo kegoha biru ngarume kuini walime biyiyago te hale harangi tigua ti agalini mo yo hondolene tagira ibulebira. Tigua howa lalu, Kini Segesisihanda Kuini Basidi ibu koria ibabe lalu bi lo wia hayiyago mo wahayiya, lolebira. <sup>18</sup> Kuini walime mana ko ogoni biyiyago Pesia dindihabi Midia dindihabi agali haguane karu tinaga onerume hale harangi tinaga agaliniru lamulebira. Ani lamialu howa wali bibahendeme ti agalini yohandalu tinaga bi mo wahalu laibi laabo haragome ti agalini mo keba holebira. <sup>19</sup> Kini ini manda bialu iname bi o langeremago bayaleyagua wali agali ina hondo kego bibahende bu karuhondo bi mbira au lowia ha. Kuini wali Basidi mani i koria ibulene nawi, lalu lowia ha. Bi ogoni Pesia dindihabi Midia dindihabi mana mbugaha lo wini ngagoria wiaabo helo gilibu wibe. Mana ogoni lone lo beregeda nabi wiaabo helo laro. Ani buwa ina Kuini Basidi dugu wahalu wali bayale mbira taya bialu kuini berela aribia habe. <sup>20</sup> Bi ogoni lowia haregola dindi bibahende ina hondo kegoha wali bibahende bedarume hale hai howa ti agalini homogoyaguabi yagibanoyaguabi ta nabi yo nahende bi bayuwa hale holebira, lalu kinihondo lamiya.

<sup>21</sup> Kinibi ibunaga agali haguane biarubi tigua Memuganahanda ogodagua bibehedabe layago bayaleyagola hame lowa kini ibugua Memugananaga bi talialu bini. <sup>22</sup> Ani bialu dindi bibahende kini ibugua handayaho hearuha wali agali bibahende hearuhondo tininaga bi tara tara lagadagua lalu beba gilibu wia hai hene. Ibugua lalu, Agali ibu one waneiginirunaga haguane ibuni howa ibugua bi laragola tigua hale holene nga, lalu Kini Segesisihanda lo wini.

*Eseda ibu kuini wali berelo dabo berelenego ogo*

<sup>1</sup> Kini ibu ala keba ho hayago emene hadayagola ibugua Basidihanda mbirale ibuni-hondo biyaru mitangibu dai bini. Ani buwa ibugua Basidiore kuini wali naberelelo dugu wahenegobi manda bini. <sup>2</sup> Ani manda bialu berearia agali maru ibuhondo mini manda bayaleru talebu miaga hearume ibuni bereagoria birapara ho biruwa ibuhondo lamialu lalu, Ína wandari bayaleore bedaru taya bibeheda. <sup>3</sup> Dindi ína handayaho hene ngaru bibahendehe ínaga agali haguane bu karu tihondo wandari bayaleore bedaru taya bialu gabumanenaga dindi haguane timbuni mini Susa tano ngagoria haru halu ibuwa ínaga waliru mo mogobu berelaga anda kagoha bereladaba labe. Ani berelowa ínaga wali uruni mamage haga agali Hegai ibugua mamage howa handayaho helo. Anda ogoniha biruwa wandari uruni tininaga tingini weliru baya hangu hai halu yáriru bialu bedagola ti baya taraore helonaga ani bialu berelo. <sup>4</sup> Anidagua bialu bedagola ínime mbira hameore larago dabalú Kuini Basidi berenegoria bira aribia halu kuini berelo dababe, lalu lamini.

Anidagua layagola kini ibugua bi ogoni karulapeda lo manda bialu tinaga bi layago hale halu bibe layadagua bini.

<sup>5</sup> Susa tano ogoniha Yudali mbira Beniyamini hameigini aria ibu mini Modegai hene. Modegai ibu Yairi igini howa Simai aguane hene. Ani howa ibu Kisi aguanene hene. <sup>6</sup> Bambaore Babilononaga Kini Nebugadenesa ibugua Yudanaga Kini Yahoigini halu Yuda wali agali dewaore Yarusaleme howa Babilono dindiha garabaya bu yalu penego. Ani biyangi Modegai ibubi uruni heba mandagi garabaya pumaga halu pene.✧ <sup>7</sup> Ani howa Modegai aba hamene heyogonenaga wane mbira mini Eseda berene. Eseda ogoni ibu mini Hiburu bi lalu Hadasa laga berene. Ani berenego ai wandari biagonaga aiya abala homayagola Modegai ibugua Eseda mo mondo bialu ibuni waneore biraradagua berene. Ani bereagola Eseda ibu wandari maru berearu bababi bia tabe nahe wandari bayaore mbira ona berene.

<sup>8</sup> Horo mbirungi Kini Segesisi ibugua dindi bibahendehe bi lope halu wali agali bibahendeme wandari bayaleore mbira bereagua ogoni Susa tano haru ibai halimu lalu bi lope hene. Ani layagola tigua wandari maru haru ibiyadagua Esedabi nde haru ibini. Haru ibuwa anda mbira kini ibuni dalu piagone wandia heagoha wandari maru biaru bereagoha dege Esedabi ti haru berelene. Ani berelowa Hegai ibugua wali uruni mamage howa handayaho hene. <sup>9</sup> Hegai ibugua Eseda wandari bayaoreyane hendene. Ani hondowa ibugua Esedahondo yári wiaru abale mo mialu ibunaga tingini bayale helonaga tomo bayale tara tara wiarubi nalu berelo dawa migi bini. Ani buwa wali wandia biagoha paliaga hobane dunini mbira heneyagoha Eseda ibu palelo mo mini. Mo mialu kini andagaha wandari kariali berearume Eseda biamogo bialu helo dabo berelene.

<sup>10</sup> Abale howa Modegai ibugua Esedahondo ibu Yuda wali bedo nalabe lalu bi lamini. Anidagua lenego mitangi bialu Eseda ibugua nde ibu aba Modegaihanda bi layago hale howa berene. <sup>11</sup> Ani berenego Modegai ibu horo bibahendengi wali wandia biagonaga pabe haraba wiagoria bolangua haga bialu pu íbu biaga hene. Ani binigo irane Eseda ibu agua biraruabe hondolebi Esedahondo mbira agile bulubadabe te hale holebi ani pu íbu biaga hene.

<sup>12</sup> Mali mbira agimani wandari biaru bayale berelonaga tinginini welime hai ha mo yári biaha tomo dawaha bialu hene. Ege waragariani tigua wandari biaru ira mbira mini muwe kagonaga ibaneme hai halu ege waragaria mendeni tigua weli mbirale hai haga nga baya taraore biaga wiagobi biamaga howa ogonime hai halu hene. Anidagua biai halu tigua wandari uruni Kini Segesisihanda hendelo ibu berearia mbira mbira haru pugu bini. <sup>13</sup> Wandari mbirago ibu kini bedaria pole howa agabi yáribi ibunime

✧ 2:6: 2 Kin 24.10-16, 2 Bit 36.10

bulene hame ledago ale bu yalu pugu bini. <sup>14</sup> Alendo haragola wandari mbira mbira hangu kini bedaria pialu kini ogoni andagaha bedane egabi laga biaga. Ani biragola wandari kini bedaria pialu dai birago ibu kininaga wali wabuni halu mende agali mbira mini Sasagasa henegome ti mamage haga biru wiagoha berelo haru pugu bini. Wali uruni ti anda ogoniha biruwa kini bedaria napiaga biruwa horo mbiruore kini ibunime wali mbirago mini lalu íore ì koría ibabe lalu olayadago ibuore pugu biaga berene. Ibugua wali mbirago mini naleyagua nde wali ogoni ibu kini bedaria polene nawiore wini.

<sup>15</sup> Ai Eseda ibu kini hondo polene horo tagira ibini. Eseda ibu Modegai aba hamene heyogone Abihaili wane berene. Eseda aba homayagola Modegai ibu haru puwa mo mondo bialu ibu wane biraradagua berene. Ani bereagola agali hearume Eseda de hondowa ti turu timbuni haga hene. Anigo Eseda ibu kini hondo polene tu hayagola ibugua yári ibunime hame leago ndo bini. Ibu yári wali biaru mamage haga Hegai ibugua ogoale karulabe lalu lamiyadagua karulene. <sup>16</sup> Horo ogoningi Kini Segesisi ibu mali waragaria kini hene heagola mali kane ogoninaga ege pini mini Tebede layagola tigua Eseda ibu kini berearia haru pene.

<sup>17</sup> Ani haru piyagola kini ibugua Eseda de hondowa ibu hame timbuni lene. Ibugua wali maru hame lenedadagua ndo ibu Eseda hame timbuniore lo hene. Ibugua handalu hearia Eseda ibu wandari maru berearubi ndo ibu baya taraore mbira bereneyane hendene. Wandari maru ibiyarume kininaga gubalini bamia nabi degego ai Esedahanda ibunaga gubalini bamiyagola kini ibu abale puwa kuininaga tangi wiago Esedanaga hagianeni mo karula hene. Anidagua biyagola Eseda ibu Basidinaga henge mialu ibu kuini wali bira aribia ho berene. <sup>18</sup> Ani bereagola kini ibugua Eseda ibiyagonaga turu halu agali haguane bu hearu bibahendeore tomo mandagi namiya ibidaba lowa tomo timbuniore dawene. Ani buwa dindi ibunime hondo haga wiaruha wali agali bibahende hearu horo ogoningi biabe nabi halo hai halimu lene. Ani lowa kini ibugua turu howa mbirale tara tara bayale wigi biaru wali agali bu hearu tale bialu migi bini.

### *Modegaihanda kini pele mialu mo winigo ogo*

<sup>19</sup> Ogoningi dege Kini ibugua Modegai ibunaga anda hondo haga helo dabo helene.

<sup>20</sup> Bamba Modegaihanda Eseda lamialu, Í Yu wali bedo lalu wali agali nalamibe, lene. Anigo Eseda ibu wandari emeneni howa Modegaihanda de hondo heangi ibugua bi layaru hale howa biaabo haga berenedagua Modegaihanda bi ogoni layago hale halu Eseda ibugua wali agali mendealihondo, Ì Yu wali bedo, lalu nalami berene.

<sup>21</sup> Modegai ibu kininaga andagaha biabe bialu heangi agali kiralime Kini Segesisi handabe manga howa bo wahabiya lalu ndelo hene. Agali kirali ogonilabo libunaga mini Bigadana Teresela libunaga biabe kini andaga paliagane hobane heagoha panga haneni mamage haga hene. <sup>22</sup> Modegaihanda agali kira biago labome ndelo hearia handa walia hayago kini lamilonaga Kuini Esedahondo lamiai hene. <sup>23</sup> Agali kira biagolabome biyiyago henenedabe dabo handalu hearia henene ndelo winiyagola hondowa agali biagolabo irani bo manogo bia hayagola libu homene. Ani biyagola kini ibugua ibunaga agali haguane hearuhondo lamialu lalu, Mbirale o biyagoninaga bi gabumane mbugani gilibu widaba, layagola tigua ogonidagua gilibu wini.

## 3

### *Hamanahanda Yuda wali agali bo wahole manda manda binigo ogo*

<sup>1</sup> Mani howa agali mbira ibu mini Hamana henego ibu gabumane haru haga haguane helo Kini Segesisihanda dabo helene. Hamana ibu Hamedada igini howa Agaga aguanene hene.\* <sup>2</sup> Kini ibugua ibunaga agali haguane bibahende hearuhondo lalu,

\* **3:1:** Ala Agaga ibu Amalegeali dindini kini heangi ibunaga wali agalime Isaraele wali agali baba waitigiho haabo haga hene.

Tígua Hamananaga mini yaraga halu ibuhondo ge duli hanga howa bulu palilimu, lalu lamini. Ti bibahendeme kini ibugua layadagua biai hayagola Modegai ibu hangu Hamanahondo ge duli hanga holene ogoni manga howa nabi hene. <sup>3</sup> Mani kininaga agali haguane maru hearume de hondowa tigua Modegaihondo hale lalu, Ína kininaga bi layadagua nabirigo irane agibe, lene. <sup>4</sup> Tigua horo dewa haluore Modegai lamialu, Ína mana ogonidagua biaabo hariligo nabibe, laga bini. Ani lamiyagola ibugua tinaga bi hale nahene. Modegaihanda tihondo lamialu lalu, I Yu agali howa Hamanahondo ge duli hanga halu bulu palia nabibehe kogoni, lene. Modegaihanda bi o layadagoni hale howa agali haguane biarume Hamana lamini. Modegai ibu Hamanahondo ge duli hanga harabe be nahe bame harabe hondole tigua hondo hene. <sup>5</sup> Hamana ibugua handalu hearia Modegaihandaibunaga mini yaraga halu ibuhondo ge duli hanga nahe hearia hondowa ibu keba taraore hene. <sup>6</sup> Mani Hamanahanda Modegai ibu Yu agaliore heneyane handa walia howa ibu homelo bo wahole lo manda bu hene. Hamana ibu Modegai hangu bo wahole mitangi bu hene ndo Yu wali agali bibahendeore Pesia dindini hearunibi bo wahaioire hole manda bu hene.

<sup>7</sup> Kini Segesisi ibugua haru heangi mali hombeanegonaga (12) ege mbira mini Nisana hayagola Hamanahanda lalu, Yu wali agali bo waholene horo ege agonaga harabe dabo handamiya iname tadu bima, lene. Tigua tadu buwa handalu hearia ege hombeane (12) Adanaga horo halene (13) laragola Hamanahanda ti bo wahelo lalu lo wini.†

<sup>8</sup> Ani lo howa Hamanahanda kini hearia puwa ibuhondo lamialu lalu, Wali agali hameigini mbira dindi ína handayaho kego bibahendehe paliame hearia handaru. Ai tigua mana bialu hearu dindi ína handameho kegonaga mana lowini ngadagua ndo biragoni.

Ti ani bialu kago ína dindi ogoriani ti haabo helariyagua ani beregome wali agali ína hondo kego biamogo ndo bere. <sup>9</sup> Kini-o ína bi o larodagua bulene hame ledeyagua ína wali agali bibahende karuha bi lo pelai habe. Ani lo pelaregola tigua wali agali uruni bibahende homelo bo wahi helo. Anigo ína ogonidagua biriyagua ína íhondo heneneore larogo ínaga muni wiagane andaha siliba muni dewaore miliono pira duria (50 miliono) agima ína wia holebero. Ani werogola muni ogonime ína gabumanenaga biabe bibelo, lene.

<sup>10</sup> Hamanahanda ibu bi o layago hale hai howa Kini ibuguaibunaga gini gi magi mbira wu henego ogonime mana lo wule wabu wiraruibunaga minini howa magi ngelaga wu henego ogoniibuninaga gi hondoneni howa golalu Yu wali agalirunaga waitigi agali Agaga aguanene Hamedada igini Hamanahondo mini. <sup>11</sup> Ibugua ani mialu howa Hamanahondo lalu, Muni ngia nabi wahalu ína wali agali urunihondo bule hamelede ale bibe, lene.

<sup>12</sup> Ege mbiranaga horo halene (13) layagola Hamanahanda kininaga beba gili biaga bibahende hearu olalu ngoai hadaba lene. Ibugua bi bibahende tihondo lamiai hayagola tigua gilibu wigi bini. Tigua dindi ogoni bibahendehe wali agali bu hearu tininaga bi hangu hangu lalu gili bini. Beba gilibu wiyaruni haru hagarubi agali hagianerubi gabumane biabe biaga bibahenderubi tihondo wia hene. Beba gilibu wia hayago bibahendeni Kini Segesisinaga gi magi Hamanahondo golo miyagome magi ngela hayagola kini ibunioireme gili bini mbau lene. <sup>13</sup> Agali beba yalu piaga biarume dindi kini ibugua handameho heago andaneha dindi mbira mbira wiarunaga agali hagianerubi hearia yalu pene. Beba gili bialu pelayaru bibahendeni bi ogodagua lo wini. Ege mini Adanaga horo halene (13) laragola tígua Yu wali agali bibahende homelo bo wahi halimu. Horo ogoningiore wandari igiri daliaherubi wali agali waherubi

† 3:7: Isaraele wali agali tinaga ege Nisana ogoni inanaga bi lalu ege tebone mane agima labehe. Ai tinaga ege Ada tagira ibagago inanaga lalu ege mende tebone agima. Ogonigo Hamana ibugua ege bearia hondo holene wulebira. Ani buwa ibugua bule manda bu hayada ale bilo.

waneiginirubi bibahendeore homelo bo hilo wahai holene wulebira. Tí dara nahe howa bibahende bo hilo wahai halu tinaga mbirale bibahende ngarubi mo yai halimu. <sup>14</sup> Agali hagianerume wali agali bibahende hale helo beba ogoni dagalope holene nga. Bibahendeme hale hai howa horo ogoni tagira ibirangi tigua Yu wali agali bo wahai hole manda mandabu helo, lalu gilibu wini.

<sup>15</sup> Agali beba yalu piaga biarume beba biagoni yalu dindi bibahende ha abaleore pume hene. Tigua bi yalu piyagoni tano timbuni Susa wiagoriabi lope hayagola wali agalime hale hai hene. Hamana kinila libu hangu bu miniha dungulo biruwa waini iba nalu berene. Anigo wali agali Susa tanoha bu hearume bi ogoni lope hayago hale howa mogo lalu ti mini dege dindiho hene.

## 4

### *Modegaihanda ibu biamogo bia lalu Eseda hale henego ogo*

<sup>1</sup> Modegai ibu bi ogoni layago hale howa gi timbuni ho hene. Ibugua bu miniha genda timbuni halu mini burugu layagola ibugua aga bu heago minu lerelene. Ani buwa aga ko wiago mo karulalu ibugua hagianeni be abalu dugu ngelene. Anidagua biai halu tanoha anda puwa kiabu dugu hongo howa bima ibaga bialu hene. <sup>2</sup> Ani bima pialu kini andaga haneni bolangua hene. Ibu kini andaga anda polenego maname aga ko bu yalu kini andagaha anda napiaga winigo mitangi bialu nape tagiraha hene. <sup>3</sup> Horo ogoningini kinihanda bi ogodagua laya lalu latagi hayago dindi bibahende ha Yu wali agali bu hearu ti hale hai hene. Hale howa ti bibahende hearume genda timbuni halu mini burugulo hai hene. Ani howa tigua tomo nane wahalu kiabu dugu hongo howa bialu haga haga bini. Yu wali agali dewalioreme aga ko budabagabi wiaru karulowa be abalu wiagoria palima pene.

<sup>4</sup> Wali agali Esedanaga biabe bihaga bu hearume Modegai ibugua anidagua bialu ka lalu lamiyagola Eseda ibu genda timbuni howa mini burugu lo berene. Ani biruwa ibugua aga bayale wiaru Modegai ibu aga ko bu hayadago golo wahalu karula aribia helonaga mule yalu pudaba lene. Ani mule piyagola Modegai ibugua aga uruni yamialu karula nabi hene. <sup>5</sup> Ani biya handala Eseda ibugua ibugua biabe bihaga agali mbira mini Hadaga kinihanda dabo helenego ogoni íbu lowa ibuhondo lalu, Modegai ibugua irane aginaga biyadabe hondole ibuni karia hale hole pu, lene.

<sup>6</sup> Ani laya handala Hadaga ibugua Modegai ibu kini andaganaga pabe tagirani wali agali íbu ngoaiho haga hama wiagoria berearia hondo pene. <sup>7</sup> Ani biyagola Modegai ibugua mbirale biyaru bibahende Hadagahondo lamiai hene. Ani lamialu, Yu wali agali bibahende bo wahai hayagua muni ogodagua kininaga muni andaha wulebero lalu Hamanahanda layaya, lalu lamia dege bini. <sup>8</sup> Ani lalu Modegai ibugua beba Hamanahanda gilibu ta hayadaruni aria mbira yu heneyago Hadaga mo mini. Mo miyagola handalu hearia beba ogoniha howa Yu wali agali bibahende bo wahai halimu lalu gilibu wiarua hendene. Modegai ibugua Hadagahondo beba ogoni Eseda mule yalu pelo mialu mbirale uruni bibahendenaga te Eseda hale helo lawia hai hene. Ani bialu kini ibugua Yu wali agaliru bo wahai nahe dara helo Eseda ína kini lamule pobe lalubi lawia halu bini.

<sup>9</sup> Ani laya handala Hadaga ibugua Eseda berearia pialu bi o layaruni lamiai hene. <sup>10</sup> Ani lamiyagola Eseda ibugua Hadagahondo bi mbira Modegai lamule pu lalu lamini. <sup>11</sup> Ibugua lawia halu lalu, Ina kini bedaria napobehe bedo. Mbirali kini ibunime ogo í ibabe larago ibu dege kini andaga pugu biaga. Ibugua ibabe naledago bame anda piyagua ogoni homelo bo wahaga nga. Anigo mana ogoni wandialu polene hariga mbiraore hangu nga. Mana ogoni mbirali kini bedaria ibabe nalego bame anda poragola kini ibugua kininaga kango ngolome wabini ngago mo yaraga halu ogonime mbirali bame anda porago yaangua hayagua ogoni ibu bo wa naholebira. Mana ogoni



wali agali kininaga biabe biaga karubi wali agali bibahende bu karubi ti manda biaihe ka. Anigo ainde kini ibugua ege mbira agima i ibabe lalubi o nale henego ka, lalu Modegai lamibe, lene.

<sup>12</sup> Modegai ibugua Esedahanda bi lawia hayayago hale howa <sup>13</sup> ibugua ladai bialu lalu, i kini andagaha bira bedegonigo i ani biruwa nahomoleberobe toba holeni. Ina Yu wali agali maru kamaru mo ko holene wulebiradagua dege ibi nde mo ko holene dege wulebira. <sup>14</sup> Anigo ayu ina bi nale birariyagua nde ina biamogo bulene mbira taraha howa ibulebira. Anigo ibi i damene lenegobi mbira yu wa naheore bibahende homai holebira. Anigo i kuini wali birarigo bame ndo horo ko ayu o ibiragonaga ina Yu wali agali biamogo bialu mo wule bede bada, lene.\*

<sup>15</sup> Ani layayago hale howa Eseda ibugua Modegaihondo lawia halu lalu, <sup>16</sup> Ina ayu ogoni Susa tanoha ibaga bialu Yu wali agali bibahende lamiai halu ti bibahendeme i mitangi bialu horo tebiru mbi tebiru lowa tomobi ibabi naneore halimu. Inibi wali maru inaga biabe biahaga bedarubi iname nde tomobi ibabi nane ani dege holeberama. Ani biai howa mani kininaga mana ngago pugualu ina kini bedaria polebero. Anidagua berogola ibugua i bo wahayagua nde karulapego homoliya waha, lene.

<sup>17</sup> Esedahanda bi ogoni lawia hayagola Modegai ibugua hale halu bibe layadaguaore bule kini andaga pabe tagirahayagi henego wahalu pene.

## 5

### *Esedahanda Kini Segesisi Hamanala ibu andaga tomo namiya ibalibu lenego ogo*

<sup>1</sup> Eseda ibu tomobi ibabi nane dege horo tebiru berene. Ani berenego horo tebonengi ibu kuininaga aga biaga wiaru mo karulalu kini andaganaga hobane tamuha anda pialu kininaga tamu hobane timbuni wiagoha anda puwa kini biraga dagia wiagoha anda polenaga harabani handa anda ho hene. Ani handa anda ho heagola kini ibu kininaga biraga dagia wiagoriani biruwa panga harabahayagi handa tagi hene. <sup>2</sup> Handa tagi howa handalu hearia Eseda tagirani ibu hearia hondowa kini ibu miniha turu howa abale gi dogola amu halu kango ngolome wabini biago yaamu halu Eseda ibilo karulape lalu walua hene. Ani biya handala Eseda ibu abale kini bereagoria kaware ibalu kango ngolome wabini biago ngunini ela hene. <sup>3</sup> Ani biyagola kini ibugua lalu, Kuini Eseda-o i agile hame lowa ibu kebe. Dindi bibahende ina haru kogo i tuwu ngi lariyaguabi nde nguliyago agi nguabe, lalu hale hene.

<sup>4</sup> Ani hale hayagola Eseda ibugua ladai bialu lalu, Kini-o Hamana libu haru ayu alendo ina tomo timbuniore mandagi namiya ibulene turu ho keyagua nde libu ibalibulo hame lo kogoni, lalu hale hene.

<sup>5</sup> Ani layago hale howa kini ibugua Hamana olalu ibuhondo lalu, Eseda andaga tomo mandagi namiya abale ne naledaore mbaliya ibabe, lalu lamini. Ani bialu kinibi Hamanabi libu haru Eseda ibugua tomo manda manda bialu dawenego mandagi nole pene. <sup>6</sup> Pialu ti waini iba nalu biruwa kini ibugua Esedahondo hale halu lalu, Ina ihondo mbirale mbira ngi lalu hale harego ta nabi ngiai holeberogo ai nguliya agile hame lo bedebe. Ihondo ngi larego bibahendeore ngiai holebero. Inaga dindi timbuni ngelowa handame ho kogo tuwu ngi lariyaguabi nde mendeyagi ina handame howa haru habelo nguleberogo la, lene.

<sup>7</sup> Ani layagola Eseda ibugua kinihanda bi layago ladai bialu lalu, <sup>8</sup> Kini-o ina ihondo hale holeberogo damene e lai holeoreyagua nde yawi alendo tomo lone dawa manda manda biaguago Hamana libu haru tomo halu mende nole dai bilibu. Ani nole eberabigola inaga hame wirudago languliya, lene.

### *Hamanahanda Modegai bo wahole mandabu henego ogo*

\* 4:14: Yo 12.27

<sup>9</sup> Hamana ibu tomo nalu birayago biralu puwa ibu miniha turuore howa dungulo hene. Ibu pialu howa handalu hearia Modegai ibu kininaga andaga panga haraba kawareni naina berearia hendene. Anigo Modegai ibu Hamana timbuni daliga hayago hondowa heyalu ai horombeore ibirida lowa ibuhondo bi mbira naleore berene. Ani biyagola Hamana ibu keba taraore ho hene. <sup>10</sup> Hamana ibu miniha keba taraore ho donge howa ibugua mbirale mbira bia nabi andaga pene. Ibu andaga dai buwa ibunaga nenegeru olo ngoai halu ibu one Seresebi ti heba biramiya ibabe lene. <sup>11</sup> Ti íbu birai heagola Hamanahanda ti deni howa ibuninaga mini mo yaraga hene. Ibugua tihondo lamialu lalu, *í* mbirale dewaore bu wialu munibi dewaore wialu igiribi dewaore bu heledogoni. Ai kini ibugua *í* mo yaraga halu biabe timbuniore mo ngialu kininaga biabe biaga agali hagianeru bibahende *í* andaneha ka, lene. <sup>12</sup> Hamanahanda la dege bialu lalu, Kuini wali Esedahanda tomo timbuni kini iyanaga hangu dawa haya ndobe. Ibugua wali agali maru tomo namiya ibalimu nale kini iya hangu yawibi lone tomo namiya ibalibu lenego iya turu howa polebereba. <sup>13</sup> Anigo ina Yu hameigini Modegai biago kini andaga panga haraba kaware naina bereago de handarogola inaga miniha handabe manga holene tagira ibalu ai ina manda berogola mbirale bayale uruni galone ndo mbau larua, lene.

<sup>14</sup> Ani layagola Hamana one Seresehandabi ibunaga nenege biaru tiguabi ibuhondo lamialu lalu, Mini burugu nale waha. Agali marume ira luniore mida magi manda pira kira (20) ale dibuwa hengelo lamerene agi biaruabe. Anigo yawi egerebagiore haragola kini hale howa Modegai homelo irani bo manogo bia halu *í* miniha turu howa dungu lalu tomo dawa nama pobelo, lene. Bi o layadago hale howa mitangi bialu Hamana ibu bayaleda manda buwa ibugua agali maru lamiyagola agali biaru tigua Modegai bo manogo bu gerela holenaga ira dibu hengene.

## 6

### *Kini ibugua Modegai mo yaraga henego ogo*

<sup>1</sup> Mbi ogoningí kini ibu *u* palia nabi yange yange bu wiaabo howa ibugua ibunaga beba dagalaga hearuhondo lamialu, Dindi ogoriani mbirale maru ala binirunaga te gilibu winigonaga mbuga biago ihondo tigua bi maru dagalo ngule mo yalu ibidaba, lene. <sup>2</sup> Tigua te daga layagoha agali kira Bigadanabi Teresebi libugua kininaga anda haneru mamage henegonaga dagalope hene. Agali kira ogoni libugua kini bo wahole lowa hariga mbira tai bialu hene. Ani bialu henego mani Modegaihanda libugua mitangi bu heago handa walia howa libu manani helene, lalu gilibu wini wiago daga lalu lamini. <sup>3</sup> Ani daga layago hale howa kini ibugua lalu, Modegaihanda biabe ogoni biyagonaga ibu mini yaraga halu iname bayale mbira ibuhondo agi mirimayabe, lene. Ani layagola agali biarume ibuhondo lalu, Iname mbirale mbira ibuhondo nami, lalu ladai bini.

<sup>4</sup> Ani layagola kini ibugua tihondo ogodagua hale hene. Inaga agali haguane maru anda ogoniha kabe nahebe, lene.

Ti bi ogoni lalu heaore Hamana ibugua ira dibuwa hongo manda biaho helayagoria Modegai bo manogo bia hole lowa kini hale hole pabe tamuha ubaanda halu ibini. <sup>5</sup> Ani ibiyagola hondowa agali biabe biahaga biarume kinihondo ogodagua lamini. Hamana ibu áyu dege ibuwa *í* heba bi lole o hondo kagoni, lene. Ani layagola kini ibugua lalu, Ibu haru anda ibidaba, lene.

<sup>6</sup> Hamana anda ibiyagola kini ibugua ibuhondo lamialu lalu, Agali mbira ina ibu timbuni helo mini mo yaraga holiya ona haruagoni. Ina ibuhondo bayale maru agi bulene ngabe manda nabi kogonigo ina agi buliya hamelo kebe, lene. Ani layagola

☆ 6:2: Esd 2.21-22

Hamanahanda ibuni hangu mitangi bialu kini ibugua mbirali timbuni helo yaraga holebiaruago aidabe agali mende nahego ioredalo manda bini.

<sup>7-8</sup> Ani manda buwa ibugua kinihondo ogodagua ladai bini. Aga kini ininaga biagane biago agali ogonihondo mibe. Ani buwa ininaga nogo hosini biragane ale pume dariba halu kininaga yari nogo hosi hagianeni bialu agali biago ibu ogoriani berelabe.

<sup>9</sup> Inaga agali haguane hayaru aria mbirago ibugua agali ogoni inaga aga biagome yari bia helo dababe. Agali ogoni ibu yari bia howa nogo hosini berelalu agali haguane mbiragome haru halu tanonaga mo ngoai hagane hama timbuni ngatoria haru pelo. Libu pialu howa agali haguane ogoni ibugua bi hongo howa ogodagua ladaga halu lalu, Agali ogo de handadaba. Kini ibugua agali timbuni mbira mo yaraga heloa biyago o heledago de handadaba. Ibuhondo mana bayaleore biyadago de handadaba, laga bialu helo, lalu lamini.

<sup>10</sup> Hamanahanda bi o layagoni hale hai howa kini ibugua ladai bialu lalu, Ina abaleore gerai puwa nogo hosibi haru halu agabi mo yalu ibuwa inaga biabe biahaga Modegai mo mibe. Yu agali ogoni ibu i anda haraba panga kawareni biabe bialu hagago ibu timbuni helo mo yaraga halu mbirale bibahendeore ayu ina o larugonidagua ibuhondo biai habe, lene.

<sup>11</sup> Ani layagola Hamanahanda kininaga agabi mo yalu nogo hosibi haru halu ibuwa kininaga aga biago Modegaini karula hene. Ani buwa Modegai nogo hosini berelalu Hamana ibugua hama timbuni mo ngoai hagane wiatoria haru pene. Libu pialu howa Hamanahanda wali agali hearuhondo bi hongo howa ladaga halu, Agali ogo de handadaba. Kini ibugua agali timbuni mbira mo yaraga heloa biyago o heledago de handadaba, lalu haga bima pialu hene.

<sup>12</sup> Ogoni biai howa mani Modegai ibu kininaga biabe bule dai bini. Anigo Hamana ibu taga gibiore howa bu miniha gendaho yalu ibunaga dengui handa dindi ho yalu gerai abale ibuni andaga dai bini. <sup>13</sup> Andaga dai buwa ibugua mbirale bibahende ibuhondo biyago damene ibunaga nenegerubi ibu onebi lamiai hene. Ani lamiyagola ibu onebi ibunaga nenege mini gigabiwi biarubi tigua ibuhondo ladai bialu lalu, Ayu inaga hongobi mini lene harigobi ereba halu Modegai ibu i bolangua hole biyada. Ibu Yu agali kago ina ibunaga hariga ha pai holene henge nawiore. Inaga hongo ereba halu Modegaihondo mia aribia holobada, lalu lene. <sup>14</sup> Ti wene bi lalu heaore dege kininaga biabe biahaga biaru ti Hamana haru halu Eseda andaga tomo nelo haru pole lowa abale ibini.

## 7

### *Esedahanda Hamana ibu ko biya lalu latagi henego ogo*

<sup>1</sup> Horo mende biangi Hamana kinila libu haru Eseda andaga tomo nole pene. <sup>2</sup> Pu biruwa ti waini iba nalu biruwa kini ibugua Esedahondo hale halu lalu, Kuini Eseda-o iore agi hamelo bedebe. Mbirale ina ngi lowa hame lo bedego nguliya la. Dindi timbuni ina handame howa haru kogo tuwu ngi lariyagua nde ngia dege bulebero, lene.

<sup>3</sup> Ani layagola Kuini Eseda ibugua ladai bialu lalu, Kini-o ina i gubalini timbuni howa ihondo mana bayaleore mbira bulene hame lo keyagua nde ogodagua bia. Inibi inaga damene bu karubi ina bibahende homolene hame nale bedogoni. <sup>4</sup> Agali mbirame ibi inaga wali agali bu karubi ina bibahende homai holomaya bo wahai hole ndindelalu hayaya. Tigua ina minu garabaya bialu tinaga garabaya biabe ale bialu holomaya heloledale nde inaga bi lolene nawi karulape degeda lo manda bidole. Nagalonedale ina i mo genda nakolego. Ai ani ndo tigua ina bibahendeore bo wahai holebiragonaga bi ogoni latagi haro, lene.

<sup>5</sup> Eseda ibu bi ogoni layago hale howa Kini Segesisi ibugua Kuini Esedahondo hale halu lalu, Ko urunidagua gi nahe howa bulenego agali o bialu haruagoni ibu aibe. Agali

ogoni ibu agoha kabe langi, lene. <sup>6</sup> Ani layagola Esedahanda ladai bialu lalu, Ina bi ogoni larugo agali Hamana o bedago ibugua biniya laro. Ibugua ina baba waitigi howa ina mo ko halu bo wahai hole ka, lene.

Ani layagola Hamana ibu hale howa mogo lowa duru timbuni lalu berene.

<sup>7</sup> Kini ibugua bi ogoni hale howa keba timbuni halu tomo nalu berenego wahalu ibu anda mandaha mabu wiagoha tagira pialu pene. Ani piyagola Hamana ibugua handalu hearia kini tagira piyago irane ibu mo ko howa bolene wiyada lo manda bini. Ani manda buwa Hamana ibugua Kini Segesisihanda ibu mo ko holene nawilonaga Kuini Esedahondo i dara halu biamogo bia lalu berene. <sup>8</sup> Ani lalu ibugua Eseda ibu tomo nalu dagia o bereagoriani bulu palu wini. Ani wiaria kini ibu mabuha ibagabu halu andaga tomo nalu birayagoha dai buwa ibugua Hamana de hendene. Hamana ibu dara halu biamogo bia lowa Esedahondo hale halu berearia kini ibugua bi hongo howa ladaga halu lalu, Ae agali ogo ibugua i andagani kuini wali o bedago inaga deni howa kayu bule mbauleda, lene.

Kini ibugua bi ani lalu heaore dege agali biabe biahaga hearume labolabo mbira mo yalu ibuwa Hamananaga haguane bu yi hai hene. Ani binidagoni irane kini ibugua mbirali homelo bo waholobadane hondowa mana ogoni biaga winidagua bini. <sup>9</sup> Ani biyagola agali biabe biahaga mbira mini Habona henegome kinihondo lalu, Hale habe. Agali Hamana o kagome ibuni andagani ira luni mbira Modegai ogoriani bo manogo bia hole lowa dibu hingedago manda bidebe. Anigo bamba kini inaga waitigime i bo wahole ndelalu hearia Modegai ibugua handa walia howa ini langiyagome i biamogo biyagoni ndobe, lene.

Ani layagola kini ibugua lalu, Hamana ibuni ira dibu hangayadagoogoriani ibuni homelo bo manogo bia hole haru pudaba, lene. <sup>10</sup> Ani laya handala tigua Hamana haru puwaibunime Modegai bo manogo bia hole ira dibu hengene heagoria bo manogo bini. Tigua anidagua biyagome kini ibu keba timbuni ho hayago ereba hene.

## 8

*Kuini Esedahanda ibunaga hameigini Yu wali agali hearu homai holilono tinaga bi lahalu Kinihondo lamialu berenego ogo*

<sup>1</sup> Horo ogoningi dege Kini Segesisi ibugua Yu wali agalirunaga waitigi Hamana ibunaga andabi mbirale bibahende wiarubi Kuini Esedahondo mo miai hene. Ani bu howa mani Esedahanda kinihondo lalu, Modegai ibu i hameigini mbiraore ka, lalu lamini. Ani layago hale howa kini ibu andaga Modegai ibu nenege ibugu bilo lene.

<sup>2</sup> Ani buwa kini ibunaga gi magi mbira Hamana wu henego ogoni ibuni golo yu henego Modegainaga gi hondoneni mo karula hene. Gi magi ogoni kini ibuni hangunaga magi heaore mini. Ani biyagola Eseda ibugua Modegaihondo Hamananaga mbirale wiaru bibahende handayaho hai helo helene.

<sup>3</sup> Ani bialu mani Eseda ibugua kini berearia puwa ibunaga geha bulu paluwa dugu bialu berene. Ani bialu biruwa ibugua Agaganaga aguanene Hamanahanda Yu wali agaliru bo wahai holene nga manda bialu bi lo wiyago nabilo kinihondo mo waha lalu berene. <sup>4</sup> Ani lalu bereagola kini ibugua ibunaga kango ngolome wabini biago mo yuwa Esedahondo dogola amu hayagola ibugua kango biago ela halu bi lole heyini. <sup>5</sup> Heyuwa lalu, Kini-o Hamana ibugua Yu wali agali i daluha karu bibahende bo wahaiore halimu lalu lo wini. Anigo ina ihondo gubalini ho halu ina bi larugo bayaleyagua nde agali bu karume Hamananaga bi ko lo wiyago talialu buligo nabilonaga bi abale lo yalu purogo lelo ani bidaba la. <sup>6</sup> Tigua inaga hameigini bibahende uruni bo wahai hayagua nde i bayale agua birulebodabe, lene.

<sup>7</sup> Ani layagola Kini Segesisi ibugua Kuini Eseda Modegaila libuhondo lamialu lalu, Hale hadaba. Hamanahanda Yu wali agali mo ko holobada lo manda bialu ina ibuni

bo waharugoni. Ani bialu ibunaga mbirale wiaruni bibahende Eseda ihondo mo ngiai harugoni. <sup>8</sup>Ani birugo tigua inaga minini howa bi gili bialu inaga gi magi wialu binidago ai lone ina mo iriari bibe nahe ko. Anigo libugua Yu wali agaliruhondo beba mbira gili bialu purogo leloleyagua nde karulapego ani bidaba. Libugua bi ogoni inaga minini howa gili bialu ininaga gi magibi ngelalu bilibu, lene.

<sup>9</sup>Libugua ege tebone mini Sibananaga horo pira kirani tebira (23) layagola ogodagua bini.\* Modegaihanda kininaga beba gili biahaga bibahende olo ngoai hene. Ti ibu heagola ibunaga bi lamiyago tigua bebani gilibu wini. Ibugua beba uruni Yu wali agal-ihondobi gabumane dindi emene emene hondo biraga hearuhondobi gabumane agali haguane bibahendebi gabumane biabe biahaga bibahendebi dindi handari mbirani pira kirani karia (127) India howa piaho wialu Idiobiani hearu bibahendenaga gili bini. Tigua beba ogoni gili bialu howa Yu wali agali tinaga bi lalubi dindi mbira mbira ngaru tininaga bi lalu gili biagane wiadagua gili bini. <sup>10</sup>Modegaihanda tihondo lamialu, Beba ogoni Kini Segesisinaga minini howa gili bialu kininaga gi magibi ngelalu bilimu, lene. Agali beba yalu piaga biaru ti nogo hosi hongohe kininaga pabe tamuha hearu haru tagira puwa nogo hosini biralu beba biagoni yalu dindi bibahendeha purogo lai hene.

<sup>11</sup>Bebani bi ogodagua gilibu wini. Kini Segesisihanda lalu, Yu wali agali tano bibahendeha kamiru tinaga one waneiginibi tinibi waitigi agalime bo wahole ibiragola tigua nde ti baba wai bule lowa manda manda bu halimu. Agali dindi ogoriani haga karumeyaguabi agali dindi tara mendeha howayaguabi Yu wali agali ti baba wai bule ibiragola tigua wai biadai bialu tini mo wilimu. Ani bialu ti bibahende bo hilo wahai halu tinaga mbirale bibahende ngaruni Yuali ti mo yai halimu. <sup>12</sup>Hamanahanda Yu wali agali bibahende bo wahai hole lalu horo pongo bo wirangi tigua Pesia dindi bibahendeha anidagua bule lowa manda mandabu halimu. Tigua ege hombeane (12) Adanaga horo halene laragola anidagua bilimu. <sup>13</sup>Tigua dindi dunini mbira mbira wiyago bibahendeha wali agali bibahende karuhondo kininaga mana lo wiyago bi ogoni lope holene nga. Horo ogoni tagira ibirangi Yu wali agali ti waitigi baba wai biadai bule lowa manda manda bu helonaga, lalu bi ogoni gilibu wini. <sup>14</sup>Kinihanda layadagua agali bi yalu piaga biarume nogo hosini biralu abaleore gerai lalu pene. Susa tano timbuni wiagoriabi wali agali bibahende bu hearuhondo bi biagoni lope hai hene.

<sup>15</sup>Kininaga aga mindibi hari mindini alebi pelebi Modegai biahowa tigua ibu aga luni tagalitaya ale mbirame bia dambi helene. Ani buwa manda timbuni ngolome wabini yari taraorebi wiago ibunaga emboneni karula hene. Ibu yari biai halu kini andaga yu wahalu tagira piyagola Susa tanoha wali agali hearume de hondowa turu halu mambolo balu bi timbuni ladagadaga bialu hene. <sup>16</sup>Ani bialu Yu wali agali ti turu howa bu miniha dungulo hene. Ti wayali harimagoni manda buwa lone bope holobada lomanda nabi turuore ho hene. <sup>17</sup>Dindi dunini mbira mbira biarunaga tano bibahendeha howa Yu wali agalime kininaga bi lope hayago hale howa tigua halo biruwa turu timbuni halu tomo nolene horo mbira pongo bo wini. Wali agali tara tara dewa bu hearume Yu wali agali hondowa gi halu Yu hameiginiha ho tago bigi bini.

## 9

### *Yu agalime tinaga waitigi hearu bo wahai henego ogo*

<sup>1</sup>Ala kini ibugua bi lo wialu ege Adanaga horo halene (13) laragola waitigi agalirume Yu wali agali bo wahai helo lalu bi lo winigo horo o biagoni tagira ibini. Ibiyagola waitigirume Yu wali agali bole hayago ndo Yu agalime beregeda dai buwa wayali halu waitigi bo hingedape hene. <sup>2</sup>Kini Segesis ibugua dindi handame ho heago tano wiaru bibahendeha Yu wali agali hearume agali ti bo wahole ibiraru baba wai bule lowa manda

\* **8:9:** Isaraele tinaga ege Sibana ogoni inanaga ege dauni waragane haragola tagira ibaga.



mandabu hama pene. Ani biyagola wali agali dindi bibahende ha bu hearume Yu wali agali hondowa gi halu tigua mbirale mbira tihondo bibe nahe hene. <sup>3</sup> Gabumane dindi emene emene hondo biraga bibahende hearubi gabumane agali haguane hearu bibahende bi kininaga biabe hondo haga bibahende hearume bi Modegaihondo gi howa tigua Yu wali agali biamogo bialu hene. <sup>4</sup> Kini biagome hongo holene timbunibi mini lene bi Modegaihondo minigo dindi ibugua handame ho heagoha agali bibahende hearume manda biai hene. <sup>5</sup> Yu agali tigua waitigihondo hame laya ale bialu wai biagane ayu tibu ne gadele yu howa waitigi baba wai bialu agali dewaore bo wahai hene.

<sup>6</sup> Susa tano timbuni wiagoha hangu Yuali tigua waitigi agali handari duria (500) bo wahene. <sup>7-10</sup> Wai ogoni bialu howa tigua Yu wali agali waitigi Hamana igini pirabi bo wahalu binigo tinaga mini uru. Pasandada Dalobono Asabada imaru Porada Adalia Aridada imaru Pamasada Arisai Aridai Baisada imaru Hamana igini uruni bo wahai hene. Anigo Yu agali hearume ti waitigi bo wahai halu tinaga mbirale wiaru mo ya nabi wahene.

<sup>11</sup> Susa tanoha horo o biagoningi dege Yu agalime waitigi bo wahayaru kini hale helo daga lamini. <sup>12</sup> Lamiyagola kini ibugua Kuini Esedahondo lalu, Yu agalime Susa tanoha dege waitigi agali handari duria (500) bo wahai halu tigua Hamana igini pirabi bo wahai hayiyago ai ina manda berogola dindi emene emene maru wiyagoha wali agali daga aulole dewaore bo wahai ka bada manda bidogonigo ai áyu í agi hamelo kebe. Ini hameledego ale yuleberegó j ogoale hameledo lalu langia hangu berene, lene.

<sup>13</sup> Ani layagola Esedahanda kinihondo ladai bialu lalu, Kini-o ina larogo bule í hameledeyagua Yuali tigua áyu biyadagua yawibi ti waitigi karuhondo ani dege bilo bilabe. Ani bialu Hamana igini pira biarunaga tingini tigua ira wa helayagoria bo manogo bia helo, lene. <sup>14</sup> Ani layagola hale howa Kini ibugua lalu, Ogonidagua bilimu, lene. Ani lowa ibugua Susa tanonaga haru haga agali hearuhondo bi lowia hayagola tigua Hamana igini pira biarunaga tingini wali agali bibahendeme de hendelo irani bo manogo buwa gerela hene. <sup>15</sup> Ege Adanaga horo dene layagola Yu agali Susa tanoha hayaru lone mo ngoai howa agali handari tebira (300) bo wahalu tinaga mbirale wiaru mo ya nabi wahene.

<sup>16</sup> Yu agali dindi dunini mbira mbira wiaruha bu hearume ti wayali howa holenaga wai hongo howa bialu hene. Tini mo wialu waitigi wali agali ti handabe manga haga biaru daosini pira kariani duria (75,000) bo hilo wahai hene. Ani bialu ti waitigi biarunaga mbirale wiaru mo ya nabi wahene. <sup>17</sup> Ege Adanaga horo halene (13) layagola wai ogoni binigo ai horo dene (14) layagola tigua wai nabi howa horo ogoningi tomo timbuni dawa nalu turu taraore ho hene. <sup>18</sup> Ani buwa Yu wali agali Susa tanoha hearume horo nguiningi (15) ti turu howa halo birulene horo pongo bo wini. Ani binigo irane tigua ti horo halenengi (13) denengibi (14) waitigi bo wahalu horo nguiningi wai nabi wahene. <sup>19</sup> Irane ogoninaga Yu wali agali tano pabe nahe emene emene ngaruha tigua ege Adanaga horo dene (14) ogoningi halo bialu turu howa tomo timbuni dawa nalu maruhondo tomo mbirale tini bame turu halu talebu migi migi bulene horo pongo bo wini.

### *Tomo timbuni dawa nalu biraga mbira mini Purimi laga winigo ogo*

<sup>20</sup> Modegaihanda mbirale bibahende horo áyu dege biyagonaga te gili buwa Yu wali agali Kini Segesisihanda handame ho heagoha dindi kawarenibi kaundianibi bibahende ha hearuhondo beba gilibu purogo lelene. <sup>21</sup> Ibugua tihondo lamialu lalu mali bibahendengi ege Adanaga horo dene (14) nguinila (15) harangi horo ogonilabo timbuni lowa turu halu halo birulene pongo bo wilimu. <sup>22</sup> Horo kiru ogoningi Yu agali tigua ti waitigi biaru bo wahaga bialu hene. Ege ogoningi dege tinaga bu miniha genda halu daraho hayarubi bibahende ereba hai halu Yu wali agali ti miniha dungulo hene.

Ani heagola Modegaihanda tihondo lamialu lalu, Horo kiru ogoningi tomo timbuni dawalu tinaga nenege karubi wali agali yagibano tomo nolene nawi burupale karubi tale bialu bame migi bilimu, lene. <sup>23</sup> Ani layagola Yu wali agalirume Modegaihanda bi layadagua bialu howa mani tinaga mana bu hinuwa mali bibahendengi turu halu biaabo haga hene.

<sup>24</sup> Bamba Agaga aguanene Hamedada igini Hamana ibu Yu wali agali baba waitigi howa Yu wali agali bibahende homelo bo waholene horo agongidabe dabo hondole tadu bini. Hiburu bi lalu tadu ogoni mini Purimi laga wini. Hamanahanda Yu wali agali bibahende bo wahai hole lalu lo wini. <sup>25</sup> Anigo Eseda ibugua kini hearia lamule piyagola kini ibugua beba mbira gilibu wialu Hamanahanda Yu wali agaliru bo wahole lo winigo mo beregedalu ibuni homelo bo wahole lowini. Ogoninaga tigua ibuni ira wa helayagoria bo manogo bialu mani ibu igini biarubi bo manogo bia dege hene. <sup>26</sup> Irane ogoninaga tigua halo holene horo kiru ogoni mini Purimi laga wini. Purimi ogoninaga galone tadu lalu laga wini. Tigua ogonidagua biaganego irane tihondo mbirale tara biyagonagabi Modegaihanda tihondo beba purogo lelalu ti horo ogoningi halo biralimu lenegonagabi ani biaga wini. <sup>27</sup> Yu wali agalime horo timbuni Purimi ogoni tini manda bialu howa ti aguanene mani holebirarubi wali agali tara tara bu karu Yu hameiginiha ho tago holebirarubi bibahendenaga bi lowini. Mali bibahendenaga horo kiru ogoningi Modegaihanda bi layadagua mitangi bialu iname bialu hamiya lowini. <sup>28</sup> Tigua bi lo wialu lalu, Yu hameigini bibahende mani hama polebiraru wali agalibi waneiginibi wali agali dindi mbira mbiraha paliyu pedaru bibahendebi tano timbuni ngaru bibahendemebi horo timbuni Purimi ogoni mitangi bialu mali bibahendengi halo birulene nga, lalu lowini.

*Tomo timbuni dawa nalu biraga mbira mini Purimi laga winigo ogo*

<sup>29</sup> Abihaili wane Kuini Esedala Modegailame bi mbira bebani gili bialu beba ala Modegai ibugua pigane gili bialu horo kiru tomo dawa nalu holene mini Purimi laga ogoninaga bi lo pelenego mo hongo halu lone libugua bi ogoni gilibu pelene. <sup>30</sup> Libugua bi ogoni gili bialu Yu wali agali bibahende Pesia dindi bibahende handari mbirani pira kirani karia (127) wiaruniha gilibu purogo lelene. Beba ogoniha bi ogodagua lalu gilibu pelene. Tinaga bu miniha mo palia ho holene karulo howa wai bulene mbira manda nabi howa ti bayale halimu. <sup>31</sup> Ai tinaga waneigini mani ho aribia holebiraru tigua nde tomo nane howa dara ho halu dugu bialu hene biago mitangi biaho holebiradagua horo kiru Purimi manda bialu horo ogonilabo tagira ibirangi tomo timbuni dawalu nolene ogoni mitangi bialu helo biawai halimu. Modegai ibi Kuini Esedabi iyame mana ogoni gili bialu ti bibahendehondo wia haraba, lene. <sup>32</sup> Kuini Esedanaga mana ogonime Horo Purimi ogoni mo hongo halu tigua beba mbirani gilibu wini.

## 10

*Kini Segesisibi Modegaibi mini lene henego ogo*

<sup>1</sup> Kini Segesisihanda agali iba solowara angeha haga bu hearubi agali dindi ibugua hondo haga tamuha hearubi ti bibahende minuwa dindi ibugua handame heagoha garabaya biabe ale bia helo helene. <sup>2</sup> Ibugua Modegai mo yaraga halu mini lene helonaga mbirale bibahende bayale taraorebi timbunibi bialu bi bibahende layagobi mana biyagobi uruni bibahende Pesia dindinagabi Midia dindinagabi kinirunaga mbugani gilibu wini. <sup>3</sup> Ani buwa handame haga kini mbira Segesisu ibu hangu howa mende Yu agali Modegai ibu helenego kini ibugua hangu Modegai bolanguahe hene. Yu wali agalime Modegai hameore lowa ibu mini yaraga haga hene. Ibugua biabe biyagome Yu wali agaliru mitangi bialu ti bayale helonagabi ti hameigini mani hama

☆ 9:24: Esd 3.7

polebirarubi mbirale mbiranaga gi nahe baya hangu hama pelonaga biamogo bialu hene.

## **Yobo**

### **Mbuga ogoha gilibu ngarunaga nemandi ogo**

Yobonaga mbuga ogoniha agali mbira ibu mana bayale tigabi bialu heagola genda timbuni anda ibini. Ibu waneigini bibahende homai halu ibunaga nogo bulumagabi mbirale bibahende wiarubi ereba hai hene. Ani biagola mani ibuni warago timbuni bo wini. Yobo ibu ani genda timbuni yu wiagola ibunaga nenege agali tebirali Yobo heba dara hagabu birama lama ibini. Ai ti biruwa Yobo genda timbuni anda ibiyadagonaga bi luore lalu berene.

Yobonaga nenege tebirali biarume Isaraele wali agalime mana abale laga winigodagua mandabu berene. Tigua manda bialu hearia agali bayale dege bialu haga kagotha genda tandagaru anda naibaga. Mana ko mbira biyagua agali ogoni Ngode Datagaliwabehanda mo tiga bulenaga genda anda ibilaga lo manda bini. Ani manda buwa tigua Yobohondo lalu, Ngode Datagaliwabehanda í abale bayale hariligobi hodaibi lelo áyu ko biridaruni latagiha, lene. Anigo ai Yobo ibunime mitangi bialu Ngode Datagaliwabenaga deni ko mbira nabi dege hewane ai ibuni genda áyu ogoni bameore ibileda lo manda bini.

Ainde Yobo ibugua Ngode Datagaliwabehanda ibuhondo o biyadaruninaga ogodagua hale hene. Ngode Datagaliwabehanda mana agobi biaga kabe. Ibugua mana tigabi hangu biaga kabe. Wali agali ibunaga tuha howa ibu yutiga bialu heagua ogoni ibuha lini abiale daga ngabe. Yobo ibu ko mbira nabiaga howa ibugua Ngode Datagaliwabhondo bi hale holenege gi nahe hene. Yobo ibu Ngode Datagaliwabenaga deni ibu agali tigabiore ka lalu mini lene henegobi dege holene hamelo howa ani lene. Ani layagola Ngode Datagaliwabehanda bi layaruni baya hangu ladai nabi howa ibunaga manda hongola timbuni wiago Yobo walia hene. Ani layuago hale howa Yobo ibugua keba halu Ngode Datagaliwabhondo bi ko layagonaga daraho dai bini.

Lamaro bidagohayagi Ngode Datagaliwabehanda Yobo mo bayale halu Yobonaga nenege tebirali biaru talinigonaga gilibu nga. Agali uruni tigua Yoboha genda ibiyadagoni tene agoalemeda lowa bi larimidaruni tiga nabida lowa Ngode Datagaliwabehanda ti talini. Mbuga ogo ibugua Ngode Datagaliwabenaga mini ngaru bibahendebi mana ibugua biagaru bibahendebi agalime manda biai habe nahe lowa mo walia halu gilibu nga. Ngode Datagaliwabe ibu timbuniore howa agalinaga mini ngaru manda bidaru dindihaore lowa ibu bolangua hai howa ibu daligaore ka lalu mo walia howa gilibu nga.

#### **Bulu бага бува кuni gilibu ngago (1.1-2.13)**

Pigane binigo 3.1-31.40

Yobobi ibunaga nenege tebirarubi bi lenego

3.1-26

Yobohanda kiabu dugu binigo

4.1-14.22

Elibasa Bilidada Soba emaru tigua bi lenego

15.1-21.34

Tigua bi halu mende lalu henego

22.1-27.23

Tigua bi halu tebone lalu henego

28.1-28

Mana bayale gigabi lolene lenego

29.1-31.40

Yobohanda lamaro binigo 32.1-37.24

Elihuhandu bi lenego 38.1-42.6

Ngode Datagaliwabehanda Yobohondo ladai binigo 42.7-17

Lamaronaga bi lenego

*Yoboha mo ko holene anda ibinigo ogo*

<sup>1</sup> Dindi Usu mbira winigoha agali mbira ibu mini Yobo hene. Yobo ibu agali bayale tigabi howa Ngode Datagaliwabenaga deni ibuha ko mbira nawi hene. Ibugua Ngode Datagaliwabe mitangi bialu lotu laluibunaga tuha haabo howa bibe laradaguaore bialu haga hene. Ani howa ko mbira ibugua bini nawi hene. ✧ <sup>2</sup> Ibu oneme igiri karia wandari tebira lowa taba henene. <sup>3</sup> Iibunaga nogo sibi daosini karia (7,000) nogo kamele daosini tebira (3,000) bulumaga daosini mbira (1,000) nogo dongi angibuni handari duria (500) laga buwa hinu hene. Ani bialu ibunaga biabe biahaga wali agali dewaore halu bini. Ani heagola ni tagira ibiragohayagi wali agali bu hearume ibunaga mini yaraga halu haga howa ibu agali mini lene timbuniore hene.

<sup>4</sup> Yobo igini uruni tigua tini andaga mbira mbira hayagoria horo mbirungi tomo nole bibahende anda mbiragoria ala ngoai howa tomo naga biaga wini. Mbirago ibugua tomo dawa howa tini hamenerubi ti mbalini tebira biarubi olo ngoai howa tomo mandagi naga wini. <sup>5</sup> Ti tomo nai kagola Yobo ibugua lalu, Ngode Datagaliwabenaga deni ko mbira tíha nawi halimulo tínaga loma bo delalu bi la holiya j andagani ibalimu, laga wini. Ai horo mendengi egerebagiore Yobo ibugua abale ega bi naleha heyuwa nogo mbira lomabu mialu irani dai helo bo delaga biaga wini. Waneiginioire bibahende dagalai howa bibahendenaga loma bo delaga biaga. Ibugua waneigini mbiragome Ngode Datagaliwabehondo bi ko mbira lo heagua ogoni Ngode Datagaliwabenaga deni mana ko biyadago lowa ani biaga wini.

<sup>6</sup> Horo mbirungi dahuliyaliru Anduane Homogonaga wanakuini íbu ngoai ho heagola dama Heyolabe ibubi nde íbu ha dege bini. ✧ <sup>7</sup> Ani íbu heagola Anduane Homogohanda ibuhondo hale halu lalu, Í agoha howa íbu kebe, lene. Ani layagola dama Heyolabe ibugua ladai bialu lalu, I dindi mbiraoreni halu ndo ebero. Dindi bibahende ngaruha ibaga bu halu ebero, lene. <sup>8</sup> Ani layagola Anduane Homogohanda lalu, Agali inaga biabe bia haga Yobo heago handaribe nahendebe. Yobo ibu agali tigabi bayaleore howa ko mbira inaga deni ibuha nawiore ka. Bibahendengi ibugua ininaga tuha haabo howa ini mitangi bialu lotu lalu bi ledogo bibahende talialu biaore biaga ka. Dindi bibahende ngaruha mana tigabiore biaga agali ogonibi mende naheore ibu hangu kagoni, lene. ✧ <sup>9</sup> Ani layagola dama Heyolabe ibugua lalu, Ina manda bialu keria Yobo ibu ina mbirale mbira nami kegola ibugua í mitangi bialu lotu lalu holebirabe. Ndoyago. ✧ <sup>10</sup> Horo bibahendengi ina ibunibi ibunaga damene one waneiginirubi ibunaga dabudabu ngarubi bibahende baya hanguore de handayaho haabo kegoni. Ani bialu nogo bulumaga dewaore mirigola dindi timbuni wiaruha ho karulapedagoni. Ani bialu kegome ibu bayale kagoni. <sup>11</sup> Ai mbirale áyu yu howa homogo karuni mo wahai hariyagua ibugua ihondo keba howa erembira ngialu polebirago hondolebere, lene. ✧

<sup>12</sup> Ani layagola Anduane Homogohanda dama Heyolabehondo lalu, Hale harene. Iibunaga mbirale bibahende áyu wu karuni mo ko hai habelo inaga giha ya harogo. Ai ibuni dege mo ko naholebere, lene. Anduane Homogohanda ani laya handala ibu helalu dama Heyolabe ibu pene.

*Damame Yobo halu mbira ba hendenego ogo*

<sup>13</sup> Horo mbirungi Yobo waneiginiru bibahende igiri wahene biago andaga tomo timbuniore dawenego nole mo ngoaiho berene. <sup>14</sup> Ai biabe biahaga agali mbirame Yobo berearia bi yalu ibuwa lalu, Inaga nogo bulumagame dindi tombalu harima. Ai nogo dongi ti nogo pabe mendeha ogoriani dege tani nalu helo harima. <sup>15</sup> Ani helo hemaria Sabealirume abaleore ibalu nogo dongirubi bulumagarubi page haru halu agali inaga biabe biahaga biaruni bibahende bo wahai halu piyagola j hangu pora bialu ibida puwa

✧ 1:1: Pig 22.12, Ese 14.14, 14.20, Ya 5.11 ✧ 1:6: Pig 6.2 ✧ 1:8: Dag 12.7, Yos 1.2, 1.7, Yob 2.3, 42.7-8 ✧ 1:9: Mo 12.10 ✧ 1:11: Yob 2.5, 19.21



ini langule ibirudagoni, lene. <sup>16</sup> Agali ogoni ibunaga bi lai naheaore dege agali biabe biahaga mende ibuwa lalu, Hari daba timbuni biyagome inaga nogo sibi bibahendebi agali nogo haru haga bibahendebi bo wahai hayago. Mbiraoreli i hangu nabe puwa ini langule ibirudagoni, lene. <sup>17</sup> Ani lowa wene lalu bereaore dege agali tebone anda ibuwa lalu, Kaladia dindiha howa hameigini tebira bibahende ibuwa nogo kamele haru hai halu agali biabe biahaga bibahende bo wahai hayagola i hangu pora bialu puwa ini langule ibiru, lene. <sup>18</sup> Ani lalu berearia dege agali mane ogoria anda ibuwa lalu, I waneigini bibahende i igini wahene biago andagaha hangu mo ngoai howa tomo timbuni dawa nalu berearia <sup>19</sup> puyabu timbuni mbira amu wali agali nahe mbirale mbira anda nahaga dindi ko wiagoha howa abale aube tobane ibuwa anda podo dambi halu i waneigini biaru bibahende bo dambi hayagola homai haya handala i hangu pora bialu puwa ini langule ibiru, lene.

<sup>20</sup> Bi uruni laga biyago hale howa Yobo ibunaga bu miniha genda timbuni tagira ibalu mini burugu layagola ibugua dara holene walia halu ibunaga agaru minu lerelalu mandari angaruru pundu lalu bini. Ani buwa ibugua ge duli hangaho biruwa ma bulu palialu handa dindiho biruwa Ngode Datagaliwabhondo bi lene. <sup>21</sup> Ibugua lalu, I aiyahanda taba hanayang mbirale mbira nayi ibirugo mani homalu nde ogonibi dege poleberogoni. Anduane Homogoibunime mbirale uruni bibahendeore ngiai hayago ai ayu ibuni mo yalu dai biyadagoni. Ani biyadago nde ina ibunaga mini yaraga holene ngagoni, lene. ✧ <sup>22</sup> Genda timbuni urunime Yobo mo tandaga hayagola ibugua tandaga howa Ngode Datagaliwabhondo bi ko mbira nale hene.

## 2

### *Dama Heyolabeme Yobo halu mende ba hendenego ogo*

<sup>1</sup> Horo mbirungi dahuliyaliru lone Ngode Datagaliwabenaga wanakuini ngoaiho heagola dama Heyolabe ibubi nde lone ibu hene. <sup>2</sup> Ani ibu heagola Anduane Homogohanda lalu, Dama Heyolabe i agoha howa ibu kebe, lene. Ani layagola dama Heyolabe ibugua ladai bialu lalu, I dindi mbira hanguha howa ndo ibu ko. Ina dindi bibahendeha ibaga biai halu ibu kogoni, lene. <sup>3</sup> Ani layagola Anduane Homogo ibugua hale howa lalu, Agali inaga biabe biahaga Yobo handaribe. Agali ogoni ibuore inaga deni ko mbira nawiore kago abiya. Ibuore inaga tuha haabo haga howa ini mitangi bialu lotu laabo halu inaga mana ngogo taliaiore haga ka. Ibugua mana ko mbira nabiaga ka. Dindi bibahende ngaruha agali tigabi ibu ale mende nahe. Ina ibu mo ko hole poro lalu hale haabo harigola irane nawini howa ibu mo ko habelo yupe harugoni ndobe. Ai ayu ibu genda halu i wanahe ibu abale haralidagua haabo kagonidago, lene. ✧

<sup>4</sup> Ani layagola dama Heyolabe ibugua lalu, Henene laribe. Aniyagua nde agali mbira ibu homolene henge wiagua ibunaga mbirale wiyaruni bibahendeoreme ibunaga homolene mo wahalu ibuninaga holene mo yu dai biagago aguabe. <sup>5</sup> Ai nde agua birabe handabiya ibunaga tingini mo ko ha handa. Ani beregola ibugua ihondo bi koorene ko lolebirago, lene. <sup>6</sup> Ani layagola Anduane Homogohanda dama Heyolabe biagohondo lalu, Ina inaga giha ya harogo. Ai ini bua birago ale ibu tinginiha bibe. Anigo ibuni dege bo home nalabe, lene.

<sup>7</sup> Ai dama Heyolabe biagome Anduane Homogo ibu helalu Yobonaga tingini mo ko halu dere pipolo ngelole abale pene. <sup>8</sup> Yobo ibu tanonaga gibuni mburuma yu wahaga wiagoria puwa be abalu wiagoria berene. Ani biruwa todobene be dindime wabini mbira pambulo wahene winiyagome ibunaga dereru duru bigi bialu berene. <sup>9</sup> Ani bialu berearia ibu one ibuwa lalu, Ai Ngode Datagaliwabeore yu tiga bialu haabo kebe.

✧ 1:21: Yob 2.10, Aga 5.15, 1 Ti 6.7 ✧ 2:3: Yob 1.1, 1.8, 9.17, 27.5-6

Wahalu í abale homole Ngode Datagaliwabe yu wahalu ibuhondo bi ko la naberego, lene.

<sup>10</sup> Ani layagola Yobohanda ladai bialu lalu, Ína bi laregoni wali lulume mbira lagadagua laridago. Ai iname mbirale bayale bibahende Ngode Datagaliwabehanda ngiyaru yu harimagodago nde gendabi iname yu holomaya ngiraru yu wahalu polene ngabe, lene. Heneneore genda tandagabi timbunioreme Yobo bo hangedape hayagoyu ai nde ibugua Ngode Datagaliwabehondo bi ko nale howa hibuore lalu yu hene.\*

### *Yobonaga nenege tebirali ibinigo ogo*

<sup>11</sup> Yobonaga nenege tebirali urunime ibu genda timbuniore yu ka lalu layago hale howa ainde tigua de hondo pole horo pongo wini. Ani buwa horo mbirungi tinaga dindi wahalu Yobo berearia puwa ibu heba dara hagabu birama ibunaga bu mini mo palia haga bialu birama lole pene. Agali pendaruni tinaga mini uru Temana tano howa Elibasa pene. Suha dindi howa Bilidada pialu Soba ibu Nama dindi howa pialu bini. <sup>12</sup> Ti pialu amura wene pialu howa handa amu halu hemiria Yobonaga tingini mo ko halu mo tara howa bereagola agali haraligo ndoyane ai tara bedabe toba habehe berene. Ani hondowa dara timbuniore howa tinaga mini tigi layagola tigua hondo howa dugu biadaga halu hene. Ani bialu tinaga aga biaruni budu lerela бага bialu tinaga hagianeni be dugu wialu bini. <sup>13</sup> Biai howa nde ti horo karu Yobo ibu genda timbuni yuwa bereagola tibi nde bi nale biraabo hene.

## 3

### *Yobo ibu aiyahandaore abule taba henededabe lalu dugu binigo ogo.*

<sup>1</sup> Horo karu piai hayagola Yobohanda horo ogoningi bi pigane latagi halu ibu aiyahanda taba henededagoni horo koore lalu bime mo ko hene.\* <sup>2</sup> Ibugua bi ogodagua lene. <sup>3</sup> Ngode Datagaliwabe ibugua horo í aiyá ibu wali gali bere birulenaga horo pigane berenedagobi horo í taba hanayadangibi mo ko habe naheyane henedabe. <sup>4</sup> Ibugua horo ogongi nime wá nahe aruma hangu haho ngela nabinidago. Horo ogonibi nde embeda halu mo waha nabiyaada. <sup>5</sup> Horo ogoningi dindi ogoria ni nadelo ginu hagua mindibime dambi hai halu wá holene mo waha nabinidago. <sup>6</sup> Ainde horo í aiyá ibu í hono wule mbiraga í abala palenedago horo ogoni Ngode Datagaliwabehanda mo wakale nde abiyane wahenedabe. Mali egerunaga agalime horo nigoni daga nalelo Ngode Datagaliwabehanda mo wahenedale nde bayale karulape. <sup>7</sup> Mbiraga ogoningi wali agali turu hagabu mandagi paluwa wali ege habolela nabi wakale nde haru. <sup>8</sup> Agali maru gamugamu biaga karume dama abagua ale mini Lebiadana mo heya howa horo ogoni mo ko hela nde nabiada. <sup>9</sup> Mbiraga ogoningi nde mbi laho wiaabo howa harini yakundi da nabi wahalu ega bi nale wahenedale nde karulapeda. <sup>10</sup> Heneneore mbi mbira ogoni mo koore halu mo embeda halu í aiyahanda taba honole ege habo nalelo mo waha nabinida. Ai urunidagua nabinidagome í genda dewaore wiagoaha yaho kogoni, lene.

<sup>11</sup> Ainde í aiyánaga tombeha berewaria homa nabini. Í aiyahanda taba hanayangí homa nabinidago nde aginagada. <sup>12</sup> Í aiyahanda bani palelo biruwa andu ngialu berenedaru agibuleda. <sup>13</sup> Ai í homenedale nde áyu ogoni bayaleore padolela. <sup>14</sup> Ai nde kiniru agali hagianeru ti homaliha dungule padarudagua padolela. Tigua tano timbuniru marume bo gialo wahayagola lone bu karulaga heneru homalu áyu ti homaliha hãlo padagoni. <sup>15</sup> Kini iginiru maru muni ngolo silibaru ti andagani tolo ngelalu homayadagua homowa áyu ogoni homaliha hãlo padolela. <sup>16</sup> Nime wá kago nahende í aiyá tombeha howa homa nde nabinida.

\* 2:10: Yob 1.21-22, Iba 39.1, Ya 5.10-11    \* 3:1: Yar 20.14-18

<sup>17</sup> Homenerunaga dindiha nde agali mana ko biaga heneru nde áyu ko nabi halu maru biabe erekuibi bialu haga heneru nde áyu ti bayale h̄alo holene handa walia haga. <sup>18</sup> Garabaya biabe bialu heneru golope henego turu ho ka. Tinaga haru haga ala henerume biabe bia lenedagua áyu nahale ka. <sup>19</sup> Dindi ogoniha puwa agali mini lene homogo heneyaguabi yagibano agali mini lene ndo heneyaguabi ti ogobi degedege ka. Agali mendenaga garabaya biabe ale biahaga heneyaguabi nde dindi ogoniha howa áyu ibu golope hene ka.

<sup>20</sup> Ngode Datagaliwabe ibugua maru genda yu howa tandaga nalu karu aginaga helo wahagabe. Maru genda yu karu ti karia wá holene helagadago aginagabe. <sup>21</sup> Agali genda uruni yu karu homolene hamelo karia homela nabiaga. Agali urunime tinaga homolene taya biaga ka. Marume muni ngolo dindiha wiaruagola uli walu taya biagadagua tigua nde tinaga homolene taya bialu kagoni. <sup>22</sup> Ai homalu hora haragola turu timbuni holebira. <sup>23</sup> Ngode Datagaliwabehanda agali uruni ti ibagabu holene hariga bibahendeha hangai hai kagola ibaga bialu polene henge nawiore. Ainde tigua awe bialu holene toba harago irane Ngode Datagaliwabehanda walia nahe do haruada.

<sup>24</sup> I tomo nane kogola inaga kabanaha dugu bialu haabo kogoni. I mo koore kagola galalu dugu bigi berogoni. Inaga bu miniha genda gana habanaha iba biruwa tolalu piagadagua poragoni. <sup>25</sup> Abale uruni ale mbira iha anda ibuli lowa gi halu hagaru ai áyu ini anda ibai howa i mo ko halu kagoni. <sup>26</sup> Ani bidagola inaga bu miniha mo palia nahe howa ini baya hangu nabere ko. Horo bibahendengi genda dege ibaho ngagoni, lalu Yobohanda lene.

## 4

### *Elibasahanda bi pigane lenego ogo*

<sup>1</sup> Elibasa ibugua Yobonaga bi layaru hale howa ibugua ogodagua ladai bini. <sup>2</sup> Yobo-o ihondo bi emene mbira lole hamelo kogo larogola ihondo keba holeberogo nde harugo ani bibelo. Ina bi loleberogo yamaga habe nahego larogo lowa lalu, <sup>3</sup> Yobo-o ina wali agali dewaore mini bayale talebu mialu wali agali hongo nahe karu mo hongo hariligoni. <sup>4</sup> Agali maru genda timbuni wiarume bopeore hayaru ina tihondo bi bayale laga birigome ti lone mo hongo hariligoni. Ina ani birigola ti hongo howa hayadagua hodai biaga biyagoni. <sup>5</sup> Anigo aiore daraba. Genda gibiore wirunime ini bope ibuni heagola inaga mini mo luluya heagola bedegoni. <sup>6</sup> Iore Ngode Datagaliwabe yutiga biaga kegoni. Ina ibu hangu mitangi bialu lotu lalu ibunaga tuha haabo haga howa mana bayale tigabi ngaru hangu bialu haga harigoni. Ai áyubi nde ibugua i biamogo bilo ibunihondo mini dunu biaho holene ngagoni.

<sup>7</sup> Yobo-o agali mbira mini tigabi ibuha ko mbira nawi howa genda tandagala timbuniore yalu homene mbira ina manda bidebe. Ina manda bialu koria mbirali mbira ani homene nawi. <sup>8</sup> Anigo agali maru dege mana ko wiaru bialu hemiria genda tandaga urunibi yuhaga biyaria handaga biru. Uruni manane agali mbira ibu mabuha tomo egene bayale hangayagua agali ogoni ibu tomo bayale bialu naga. Tomo egene ko hangarago ibu tomo ko bialu naga. <sup>9</sup> Agali ko biaga karu Ngode Datagaliwabehanda ira yobu wahe delaragola tebone nawule do taulo waharalidagua mo ko halu bo amolaga. <sup>10</sup> Agali ko karu tigua agali mende kago mo ko howa tini turu howa budi ale gabua timbuni laionome tomo nolene bo yuwa ngororo lagadagua laga ka. Ani bialu karia Ngode Datagaliwabehanda agali ogoni ibuni mo ko halu bope haga. Ani biragola agali uruni ale budi laiono ne hondo wahene howa ai nogoru lone neme babe nahe kaligobi haga. <sup>11</sup> Ani bidagola laionome ibu tomo bo naga ale nabe nahe howa ibuni homalu

✧ 3:21: Mo 9.6

ibunaga igini hono wiyaru tibi purogo laga. Manane ogonibi agali ko biaga karuha anda ibaga, lalu Elibasahanda lene.

*Ngode Datagaliwabe deni ko nawi agali mbira nahe lenego ogo*

<sup>12</sup> Elibasa ibugua laabo halu howa lalu, Horo mbirungi bi hendore mbira layagola hale habe nahego hale haru. <sup>13</sup> Bi ogoni mbi hanuni agali paliahondo hai hagangi hale haru. I palewaria mini dewaore inaga emboneha pu ibu biya. <sup>14</sup> Ani biyagola palewaria mbirale mbirame i mo gi bia hayagola mogolo puwa inaga tingini bibahende duru lagimbu biya. <sup>15</sup> Ani biyagola puyabu emeneore mbira ibalu inaga denguini pulaede haya. Aniore biyagola ai gi timbuni bialu ma iriru piripereore laya. <sup>16</sup> Aniore biyagola handalu hewaria mbirale mbira ona hearia hongo howa de handaya harugoyu baya hanguore ogoaleda lalu handawa bibe nahe howa giligelebi mbira nalaya. Ai anigo mani howa bi mbira ogobi layane hale haru. <sup>17</sup> Ngode Datagaliwabehanda wali agali bibahende wabiniru ibunaga tuha hai ka. Anigo uruni aria mbira tigabiore ko mbira para nahe Ngode Datagaliwabe ibuniale mbira ibunaga deni nahe layuago hale haru. <sup>18</sup> Dahuliyali bu karu ti Ngode Datagaliwabe heba mandagi howa ibuninaga biabe biahaga kago. Marungi nde tinaga biabe baya hangu nabiaga kagola Ngode Datagaliwabe ibunime dahuliyali uruni marume biabe baya hangu nabiyanane handaga. <sup>19</sup> Anigo ina manda bialu keria wali agali dindini heneme ko ngaru nabioore howa dahuliyaliru bolangua howa Ngode Datagaliwabenaga deni wali agali ko nawi mbira kada manda bidebe. Ngode Datagaliwabehanda agali dindi duguwa wabinigome agali abaleore wali agalime biripabua geme hengedaragola homagadagua homagago agua. <sup>20</sup> Agali mbirago ibu egerebagi bayale howa alendo homaga. Homedagola mani wali agali marume o homayagoni embedaho wahaga. <sup>21</sup> Wali agali maru manda bogaru nabi dege wene kaore homa ibu abale ibuwa agalime balai anda nguni pume amuna dariba henego hadape haragola anda dangi abale ibira haralidagua biaga.

## 5

<sup>1</sup> Elibasa ibugua laabo halu lalu, Yobo-o ai biamogo bia lalu bi la naberego. Ina bi laregola hale halu biamogo bulene mbirali ibulebirabe. Ai dahuliyali mbirame ibalu i biamogo bulebirabe. <sup>2</sup> Agali mbira ibu miniwioreme bulene ngago nabi howa ibuninaga miniha tandaga timbuni howa mini ko wu haabo hayagua mana ogonibi biragome ibuni balu homelaga nga. <sup>3</sup> Ina agali maru tininaga dindi hobane winidagoha haabo haga hearia hendenego ai aniha howa tigua mana tiga nabi dewa bialu hearia hondowa Ngode Datagaliwabhondo agali ogonibi bialu heago abale bo waha larugoni. <sup>4</sup> Ani biragola tinaga waneiginiru ha ko holebira. Agali korume manani dabole haru poragola waneigini uruni tinaga bi la holene mbirali naholebira. <sup>5</sup> Wali agali hina gariho karubi iba noa howa dendepe lebolaho karubi ti agali ko uruni mabuha tomo damene bibahende ngaru nalu pu anihe karunaga lini dedaru heba ti do naiore holebira. Ani nai howa agali ko uruninaga muni do henedaru mia dege bule lowa taya bialu holebira. <sup>6</sup> Genda bame tomo nolene ale dindini anda nahaga ina manda bidamagoni ndobe. <sup>7</sup> Genda damene ngaru yu anda ibulene tene wali agali inane kamagoni. Be irani deledagola tula lalu duni ibaneru bilibulu purogo laralidagua bilo ko ngaru inaneme bero lalu bialu haramaligoni, lene.

*Burupale nganggi Ngode Datagaliwabehanda handayaho hagago ogo*

<sup>8</sup> Elibasa ibugua la dege bialu howa lalu, Anigo ina genda i yu kegonidagua yu howayagua nde Ngode Datagaliwabhondo pele ngi lalu ina genda yu kogoni mo waha lalu bi lolebero. <sup>9</sup> Ibugua agalime nabiagane ale dewaore biai haga kago iname daga labe nahe kamagoni. Inanaga ngamaru bolangua howa ngagola iname baya hangu

☆ 4:13: Yob 33.15

manda biai habe naheore kama. <sup>10</sup> Ibugua iba dalu dindini ibilaragome mabuha iba pialu mo gomba helaga. <sup>11</sup> Ibugua agali mini nawi karu mini lene ho aribia helalu maru genda yu howa dugu bialu karu mo wahalu ti mo turu howa bayale hadai bilaga.✧

<sup>12</sup> Agalime bogabi tingi howa wali agali maru mo hondo halu mo luluya haga karu tigua lone nabilo Ngode Datagaliwabehanda uruni biagadarunaga mini mo talola haga biaga ka. <sup>13</sup> Agali marume wali agali maru karu mo ko hole mini dewa wu karia Ngode Datagaliwabehanda tigua bule manda bu wiyaruni tiniha daibilaga. Manane agalime gabua tara tara ge gono wiyagoha ibuni dai bialu dagadagua tiniha dai biragola bule manda bu wiyaru wahaga.✧ <sup>14</sup> Tinaga mini mo luluya kagola mbirale mbira bibe nahe haga. Ega bi lalu ni deaguabi uruni tigua hariga handabe nahe arumahaore haradagua biaga. <sup>15</sup> Anigo Ngode Datagaliwabehanda agali maru mbirale burupale karu biamogo biragola agali timbuni hongohi ha heaguabi agali burupale darabi uruni mo ko habe nahe haga. <sup>16</sup> Ani biragola agali yagibano mini nalene uruni Ngode Datagaliwabehanda ti biamogo bilo maliaho haga. Ani bidagola agali ko biaga karume ti mo ko holene henge nawi haga.

<sup>17</sup> Ai nde Ngode Datagaliwabe Hongo Haiheore Kagome agali mbira mana ko bialu kago mo tiga biyagua agali ogoni ibu turu howa miniha dungulo holene nga. Ai áyu í mo tiga bule bialu karia ínime ibu erembira mialu holeni.✧ <sup>18</sup> Ngode Datagaliwabe ibugua í mana bialu genda mo ngiyagua mani í mo bayale holebirago ina manda bidamagoni.✧ <sup>19</sup> Ibugua í biamogo dewa bialu kagola mani í mo ko holene mbira nawulebira. <sup>20</sup> Hina gari timbuni piyaguabi ibugua í tomo karulape nalu habelo ngulebira. Wai birangibi ibugua í baya hangu handayaho kagola waitigirume í nablebira.

<sup>21</sup> Agali marume ínaga mini mo ko hole bi layagua Ngode Datagaliwabehanda í biamogo biragola tigua bi laragome ínaga mini mo ko naholebira. Mo ko holene mbira íha anda ibiyagua Ngode Datagaliwabeibunime í handayaho kagola í gi nahe holebere. <sup>22</sup> Hina gari timbuni mbira porangibi genda tara maru tagira ibirangibi Ngode Datagaliwabehanda í turu howa dungulo habelo biamogo bialu haru holebira. Ibugua ani haru kagola í nogo gabuarume bo noligonaga gi naheore holebere. <sup>23</sup> Í mabuha e hongole dindi alialu keria ínaga nama toleme nigí nabulebira. Nogo gabua karume í bo nanolebira. <sup>24</sup> Ani biragola ínaga mbirale wiriruni baya hangu wiai kagola í turu howa íninaga balai andaha dungulo birulebere. Ínaga nogo sibiru mbira ereba nahe bibahende hai karia hondolebere. <sup>25</sup> Ínaga waneigini aguaneru dewaore dindini datani bu karunidagua holebira. <sup>26</sup> Ínibi nde howaore halu maniore homolebere. Agalime tinaga mabuha widi hongowa boga bialu nolene tu haragola dagadagua í howaore halu homolene tu haragola homolebere. <sup>27</sup> Ai Yobo-o ina minime manda bialu kamaria ogoni heneneoredane hendedama. Ina bi áyu larogoni í biamogo bilo larogo baya hangu hale mia howa hale halu miniha tale bibe, lalu Elibasahanda ani lene.

## 6

### *Yobo ibu genda timbuni yu haabo henego ogo*

<sup>1</sup> Elibasahanda bi ani layagola Yobohanda bi ladai bialu lalu, <sup>2</sup> Aiore nde ínaga genda damene bibahende genda magi handagane ale ngagoriani mo ngelowa handaruyagua <sup>3</sup> iba mu ngarunaga genda emene nira lowa ina tandaga tara tara o ngaruninaga genda timbuniore yu kogoni. Ani yu howa keba ho kogome bi dewa tara tara lalu kogoni ndobe. <sup>4</sup> Ngode Datagaliwabe Hongo Haiheore kago ibugua timu tomiaherume í baya. Timu uruni tomiaime ínaga tinginiha anda piyagola ínaga miniha mo ko henego bedo.

✧ 5:11: Yob 22.29, 36.7 ✧ 5:13: 1 Ko 3.19 ✧ 5:17: Iba 94.12, Min 3.11-12, Hi 12.5-6 ✧ 5:18: 1 Sml 2.6, Ais 30.26, Hos 6.1



Ngode Datagaliwabehanda mbira *i* mo gi bia holene ko tara tara wiaru ibilalu *i* mo gi haya.

<sup>5</sup> Nogo dongi bulumagarume tinaga tomo nolene datani karulape heagua ti bi lada-gadaga nabiaga ndobe. <sup>6</sup> Ina wali agalime tomo magubi wiagua nde ibi nahe howa bame nalu holene karulape ngabe. Anidagua nabiaga ndobe. Ega habanaga ibane bedago nolene dendebe ngabe. Nabiore ndobe. <sup>7</sup> Inaga tiniha tomo uruni ale noa nabiore bedo. Ina tomo urunibi de hondowa koorene ko dege nga.\*

<sup>8</sup> Ngode Datagaliwabhondo bi hale harugola ibugua ihondo ladai nabi. Ina bi ibuhondo biaore larodagua bilo hameore lo bedo. <sup>9</sup> Ibugua iore bo hengedo warubaga bialu bo tongolo milelo hameledo. <sup>10</sup> Ina genda timbuniore yu ha kogo howanibi turu howa yagaloyu ibaga bibehe kogoni. Ina Ngode Datagaliwabe ibu mana bayale tigabi hangu biaabo haga kago ibu andaneha *i* haabo haga kogoni. <sup>11</sup> Inaga hongo bibahende ereba hai haragodago ainde *i*ha lone bayale mbira agile tagira ibilonaga mini dunu biaho holedabe. *I* dindi ogoria lone holene nawi ngagodago ai irane aginaga miniha dunubia ho holedabe. Inaga holene ereba hayagua nde bayale ogoni. <sup>12</sup> Ina manda agua bidebe bialu keria inaga hongo gibiore ege tole alebi ege tole boronosi alebi mbira kane hendedebe. Ani ndoyago. <sup>13</sup> Inaga hongo bibahende ereba hai haragome *ini* bayale holenaga mbirale mbira bibe naheore bedogoni ndobe.

<sup>14</sup> Mbirali ibu genda yu kago hondowa ibunaga nenege karume kaware ibu haga. Ibugua Ngode Datagaliwabe Hongo Haiheore kagohondo erembira mu heaguabi ibu andaneha haabo heaguabi ibu nenege heneneore kaware haabo haga. <sup>15</sup> Anigo *ti* inaga nenege bu kamiru *tigua* ihondo *ke* timbuniore halu kamigoni. *Tiore* iba emene dewa poraru gaea birangi iba hundiai hene lebolahe ngaligobi kami. <sup>16</sup> Dalu ibirangi iba emene dewa poraru biru tolatagi halu pugulalu piaga. <sup>17</sup> Gaea timbuni birangi iba emene dewa poraru hundiai haga ndobe. <sup>18</sup> Marungi nde agalime ibunaga nogo kamele haru halu dindi kaundiaha dabudaburu mo yalu pialu karia ti iba nolene nawidagola hariga pole piyago yu wahalu pubagi halu iba goreyane biragane ngagoha iba taya bima piagaya. Iba taya bima pialu karia iba nabere hundiai hayadago hondowa maruha bedabe hondole taya bima ibaga dege bialu karia handa walía nahe howa tini dindi ko ogoniha homa ereba haga nga. <sup>19-20</sup> Tano kira Temali karubi Sebali bu karubi tigua nde urunidagua dege bialu iba porabe toba howa tinaga nogo kameleru haru pialu karia iba hundiai hayadago hondowa mogo timbuni laga. Mogolalu tinaga miniha mo ko heneore haga. <sup>21</sup> Ainde *ina* manda bu handalu koria *ti* iba uruni alebe tobaneda. *Tigua* *i* biamogo bule ibalu hemiria ai *i* mo ko heneore berewago de hondowa mogo timbuni lo bedemigonida. <sup>22</sup> Ogo manda bidaba. Ina mbirale mbira ngidaba lalu *tihondo* hale haruyabe. Be *tigua* agali mende kagome *i* muni mbiraleru mbira ngilonaga hale halimu lalu *ti* hale haruyabe. <sup>23</sup> Be *ina* *tihondo* *i* waitigi giha howa biamogo bialu mo widaba laruyabe be kini ko mbiranaga garabaya biabe ale biaga howa *i* munime goladaba larube. Anidagua naleore ndobe.

<sup>24</sup> Anigo *ina* mana ko agi birudabe manda buliya áyu ogoniore ihondo abale langid-aba. Ani langirimiyagua inaga ne hariga ndibulo biruwa bi laramigo hale holebero. <sup>25</sup> Tinaga bi henenyagua nde bi ogonime inaga miniha mo heya haragola inaga mini mbi-raore wu holebero. Anigoyu inaga mana ko mbira nabiore kogola tigua ne harigaha howa bi bame dege lope halu kamilo manda bido. <sup>26</sup> Genda ogonime *i* mo ko heneore kogoni ndobe. Ani bidago hondowa tigua inaga bi larogo lako halu bi larogoni bame puyabu pipulalu kabe toba kamigonida. Ani manda bu howa tigua *i* mo tiga buleberemabe tobaho kamibe. <sup>27</sup> Ani ndoyago. *Tigua* aba *aiya* homene waneigini hono wahene bu

\* **6:7:** Hobane 5-7 uruniha howa Yobo ibugua bi yobage lalu ibu agali Elibasahanda bi layagome ibu emeneore mbira biamogo nabini lalu leda. Ani lowa tomo dende nabi ledago ibunaga genda uruni latagi halu biraabo holebero leda.

karu garabaya biabe ale bilonaga ai ibu mirabe hondole gadi tadu biaga kami. Ani bialu tí muni mo yule tínaga nenege karu pu laga kami. <sup>28</sup> Ina tíhondo ke halu mo hondo naholeberogo nde i deni handade halu mo tale bidaba. <sup>29</sup> Tígua bi uruni ale wahalu mana tiga nabi laramigo wahalu mana bayale tigabiore ngagoria howa i mo tale bilimu. Ina mana ko mbira nabioire kogo i bo hingedape nahalimu. <sup>30</sup> Tígua manda bu handalu kamiria inaga bi larogo tigabi ndodabe. Be tígua manda bu handalu kamiria ina mbirale ko bayalela ngago mo tale nabibehe kobe toba kamibe, lalu Yobohanda lene.

## 7

<sup>1</sup> Yobohanda lalu, Wali agali dindi ogoria kamangi ina ami agali helonaga mbiralime gililo yu puwa mo hela hene ale kama. Ina mbiralinaga biabe biahaga howa biabe hangu bialu haabo haga kama. <sup>2</sup> Ina garabaya biabe ale biahaga karume tinaga tingini gomba helonaga ni abale palia nabira lowa haga ale kama. Biabe bialu hagame tinaga biabe biyagonaga yolo ngilo hondo ho hagadagua kamagoni. <sup>3</sup> Ainde Ngode Datagaliwabehanda ege bibahendengi i ko dege haabo holiya helayada. Mbiraga bibahende inaga miniha genda yu haabo kogoni. <sup>4</sup> Ini dagiani paluwa u baya hangu paliahondo nahe abale gao lelonaga yange yangebu paliruli. Ani padoria egabi abale nale mbi lu dege wiaabo kagola dagiani palu beregeda beregeda bialu ngone dege gao laga. <sup>5</sup> Inaga tinginini dere bidagoha bunguna himirume orabe toba kagoni. Dere lebola kagola dabi hayabe toba koria ndo dabi nahe habaneha dere angibu berenedago lone tugudatagi haga biaga. <sup>6</sup> Ainde i dindi ogoriani holene horo abaleore pu bolangua hai haga biragola inaga tingini mani bayale hadai bulene nawi bada, lene.

### *Yobohanda ibunaga genda wiaru Ngode Datagaliwabehondo laminigo ogo*

<sup>7</sup> Yobo ibugua laabo halu lalu, Ngode Datagaliwabe-o i dindi ogoriani holene horo tubagi haragoni i manda bide. Inaga ngui harigaha howa buhe latagi haroni ale ndobe. Ainde inaga turu holene mani naibulubada. <sup>8</sup> Wali agali áyu i handalu karunime mani i nahondolebirada. I hai biyaguabi handa walia naholebira. <sup>9</sup> Harini ginu pobo wialu abale pu ereba hagadagua mbirali homarago homalu homenerunaga dindiha abale piaga. Ani pu kago ibu dindi ogoriani hole lone dai nabiaga. <sup>10</sup> Ibu lone dai bialu ibuni andaga hayagoha pu nabulebira. Ani bialu ibunaga damene ibu mandabi henerume embeda ho waholebira.

<sup>11</sup> Inaga bu miniha ogoni mitangi bu howa bi nale inaga ne hariga paiho naholebero. Inaga bu miniha dugu timbuni bialu kogome ini genda timbuniore yu kogo. Ani yu howa ina bi lalu haabo holebero. <sup>12</sup> Ainde ina i mamage haabo kego agibe. Ina manda bu handalu keria i puya dama ibaha wiaga biagobi howa ina mbirale ngaru mo ko hai habehedane hendedebe.\* <sup>13</sup> Ina uore paliahondo haruyagua ogonime iha tandaga ngago emene mo embeda holobada lo manda biruli. <sup>14</sup> Anigo i paliahondo howa emaga handalu hewaria dama ko tara tara bu hearu ina i mo walia haga birigoni. Ani mo walia haga birigome ina i mo gi timbuni hari. <sup>15</sup> Ani beregome inaga tingini ogo ho howa genda tandaga tara ngaruni yu habe mangabago uruni wahalu homoliya mbiralime inaga ma gingimabu wahayagua nde karulapeda. <sup>16</sup> Ainde mangaba. I dindi ogoria holene mangaore kogoni. Ngode Datagaliwabe-o ina ihondo genda lone mo ngia nabibe. Ai inaga holene henge emene hanguore ngagonidago i bame holiya helabe.

<sup>17</sup> Ina galone aginaga ina wali agali mitangi haabo haga kebe. Inaga deme ina handayaho haabo haga kego irane agibe.\* <sup>18</sup> Egerebagi bibahendengi iname bialu harimaru ina dabaki bialu haabo haga kego irane agibe. Ina emene mbira ha nabi

\* **7:12:** Bambaore howa bi te mbira lalu puya dama laga mbira ibaha ngagome mbirale bibahende mo ko hai hole bialu hearia Ngode Datagaliwabehanda puya ogoni garabaya minu helowa handayaho ka laga wini. Puya dama ogoni mini Lahaba laga wini. Yobo 9.13, 26.12-14 de handabe. ✧ **7:17:** Iba 8.4, 144.3, Hi 2.6

bibahendengi ina ba handalu haabo kego agibe. <sup>19</sup> Ainde hamiaga emene mbedogo buliya í handayaho haabo nahe emene hangu de handa taraho habelo hameledo. <sup>20</sup> Inaga mana kome í mo ko hayagola ina í mo genda hangu halu hole mitangi bu ke bada. Inaga timu kaboro baregome bila helonaga bo manda biaga ira tili ale í harudabe. Dandayi wadarume garabaya haru hagadagua ina ina wali agali haru haga hegola ina í mo keba timbuni halu haruyabe. <sup>21</sup> Mana ko wiaru bialu harugonaga ina domo wanaholebe. Ina kagua biniru íha ngago irane aginaga domo wanaholebe. Ainde í tigimandi hangu halu nde homaliha poleberoda. Pedoha ina í taya bialu keria í lone nahondolebereda, lalu Yobohanda lene.

## 8

### *Agali ko biaga karu dindini lu naholebira lenego ogo*

<sup>1</sup> Yobohanda bi lai heagola Sua dindiha howa agali mbira mini Bilidada heago ibugua lalu, <sup>2</sup> Ina bi lalu keruni mini nawi howa larego puyabu pu laradagua laabo halu kegoni ndobe. Mana ogoni angi waholeberebe. <sup>3</sup> Ngode Datagaliwabe Hongo Haiheore kago ibugua ibunaga mana bayale tigabi bialu haga ngago lone mo iriari bialu ina mo hondo nahaga ka. Horo bibahendengi ibugua mana bayale tigabi dege biaabo haga kagoni. <sup>4</sup> Inaga waneigini bu hearume Ngode Datagaliwabe deni howa mana ko mbira biyago hondowa ibugua ko biyagonaga pani nelu miyada. <sup>5</sup> Ani binigo ai ina Ngode Datagaliwabe Hongo Haiheore kagohondo í biamogo bia lalu holene nga. <sup>6</sup> Í agali tigabiore howa Ngode Datagaliwabe deni íha ko mbira nawi keyagua nde ibugua í biamogo bule ibulebira. Ala ini andagani bayale hariligobi habelo biamogo bulebira. <sup>7</sup> Inaga mbirale bayale dewa yu harigo ereba hayaru emene nira dege lowa ibugua uruni bolangua howa dewaore yu habelo ngulebira. <sup>8</sup> Ina agali ala halu homeneru ti mini gigabi wu henerunaga tene baya hangu goaru handalu mamali henerunaga manda bu heneru mo tale bu handabe.

<sup>9</sup> Ina wali agali dindi ogoriani tigi mandi hangu howa inanaga manda emene ko dege ngama. Egerebagi ni daragola munini dindini hagadagua halu abaleore ereba hagadagua inabi ereba haga kama. <sup>10</sup> Agali ala heneyaru ti mini gigabi timbuniwi heneya. Ani heneyago manda bialu ina mini manda bayale uruni ina mamalime manda bu heneyago mitangibu dai bibe.

<sup>11</sup> Tigua bi maru ogodagua laga. Iba nabere ngagoria tola damberu anda nahaga. Uruni iba bedagoha dege bayale anda hai haga. <sup>12</sup> Anigo ai iba bedago hundiagua nde tola dambe uruni agalime gandu lalu mbirale galone mbira bibe nahe holebira. Ti wene emene dege kangu gabu halu ereba hayago. Datani maru karu ti tola dambe uruni gabu haradagua nahaga ka. <sup>13</sup> Mbirali Ngode Datagaliwabe erembira mialu piaga kago ibu tola damberu iba naberani hagagobi ka. Agali uruni ale kago ibu Ngode Datagaliwabe embedaho wahayago ai mbiralihondo dunubia holene nahedago homolene harigani pialu haga ka. <sup>14-15</sup> Tinime inane hangu howa bayale holeberema lo manda bu haga ka. Anigo tigua yu tiga ogonidagua bu kago habo laga. Ti lulu mini nawiore mbira ona howa gamuni anda kago gibu yalu irigi haradagua bialu kago ai gamuni andadago abaleore tongo laragola agali ogoni mo ko howa pilope holebira. <sup>16</sup> Agali urunibi ti mabuha datani hongohe kaligobi hayagoni. Ti bayale anda halu tinaga pini mabuha dindi bayale wiagoha purogo laga. <sup>17</sup> Uruninaga pini ege tole ngaruha anda pialu mabubu hinigi bidagola duguabe nahe hongohe haga. <sup>18</sup> Anigo mbiralime datani ogoni ale dugu waharagola mani ho aribia hararume datani hongohe mbira ogoriani heneda lo manda nabulebira. <sup>19</sup> Anigo mbirali Ngode Datagaliwabe erembira miaga karu ti turu hagabu holene henge emene tigimandi hangu ngelo ka. Tini homarangi mendealime dindi ibu henedagoria ho aribia holebira.

<sup>20</sup> Mbiralime Ngode Datagaliwabehondo mini bilina haabo ho kayagua ibugua o biago embeda ho wahalu napolebira. Mbiralibu mana ko ngaru bialu haga kayagua nde Ngode Datagaliwabehanda ogoni ibu erembira mialu biamogo nabulebira. ✧ <sup>21</sup> Yobo-o hale ha. Ngode Datagaliwabehanda inaga mana bayaledane hondowa inaga bu miniha mo palia haragola ina turu howa oba halu galalu holebereda. ✧ <sup>22</sup> Ani bulebiragoyu ibugua agali maru i handabe manga haga karu bo hingedape haragola ti taga tene handalu holobada. Ko biaga karu tinaga mbirale wu karu heba homalu ereba hai holobada, lalu Bilidadahanda lene. ✧

## 9

### *Yobo ibu Ngode Datagaliwabela bi lo tiga bulene manda binigo ogo*

<sup>1</sup> Yobohanda Bilidadahondo ladai bialu lalu, <sup>2</sup> Inaga bi tigabi degego ai agali mbira ibu Ngode Datagaliwabenaga manani howa mo tale bilo pu heagua nde Ngode Datagaliwabehanda agali ogoni ibugua bialu kago tigabida lo hondolebirabe. ✧

<sup>3</sup> Mbiralibu ibu Ngode Datagaliwabela lai lolene hamelo heagua nde Ngode Datagaliwabehanda ibuhondo bi daosini mbira (1,000) agima hale hayaguabi agali biagome bi mbira ladai bibe nahe holebira. <sup>4</sup> Ngode Datagaliwabe ibuha mini mandabi dewaore gigabi wialu hongo gibiorehe ka. Ani kago ai mbiralime ibunaga mini gigabiwi hongo timbunihe kagobi aiwa bope halu bolangua habehe kabe. <sup>5</sup> Ngode Datagaliwabehanda hari timbuni wedaruni hela amu habehe ka. Iyunaga keba holeneme hari biaru bo haealabagabu wahaga kagoni ndobe. <sup>6</sup> Ibugua dumbirumbi bia gimbu bilo dindi mo ema bia haga ka. Dindi andaneha dindi hongo helo pini karu mo ema bia halu habolope haga. <sup>7</sup> Ibugua bi laragome ni tagira naibulebira. Yakundi bu karu dindini wa nahelo ibugua wa holene mo ge haga ka. <sup>8</sup> Hari daliga li karuni ibuni hangume yangalo helene ka. Iba solowara timbuni bedarume yaribu timbuni bialu tala amunana bialu kagoria ibuni geme halu ibagabu haga ka. <sup>9</sup> Ngode Datagaliwabehanda yakundi wabialu tinaga mini hangu hangu wiai halu daligaha helame ho karuni. ✧ <sup>10</sup> Ibugua biabe hongohe tara tara agalime nabiagane ale biai haga kago inanaga mini emeneore ngamagome manda bibe nahe kama. Ibugua nahendene ale bibahende wabini ngaru iname dagalai habe naheore kamagoni ndobe.

<sup>11</sup> Ngode Datagaliwabe ibugua i bedogoria kawareore ibalu pu bolangua hayaguabi ina ibu de handabe naheore ko. <sup>12</sup> Iyunime mbirale hameleda alego yamiragola mbiralime hangai habe nahe ka. Mbiralime ogoni agi berebe lalu ibuhondo bi labehe ai kabe. <sup>13</sup> Ngode Datagaliwabehanda ibunaga lembo holene ya andaho ha nabiagaore ka. Ibugua puya dama mbira mini Lahaba iba solowaraha biraga biagohondobi ibunaga nenege ibu damene biaruhondobi biyago manda bibe. Ibugua waitigi uruni bibahende bope halu ibu andaneha dege hai heledagoni ndobe.\* <sup>14</sup> I hongo naheore kogo ina Ngode Datagaliwabehondo bi mbira ladai au buledabe tobaho kogoni. Ina Ngode Datagaliwabenaga manani haruyagua nde bi ina ibuhondo agilego lolobodabe. <sup>15</sup> Ina mbirale mbira ko nabi bayale dege hene hewayaguabi ina manani bolangua halu yo pole bi mbira labe naheore kogoni. Ngode Datagaliwabe ibuni hangu tigatiga mo dabaki biaga kago manda buwa ina ibuhondo i dara howa biamogoore bibelo hameledo lalu lolebero. <sup>16</sup> Ina ibuhondo manani howa bi lo tiga bule ibu laruyagua ibugua ibuwa inaga bi hale naholobada. <sup>17</sup> Ibugua i bope hole iba dalu puyabu timbuniru ibilaga ka. Inime mitangi bu handalu koria iha ko mbira nawiore kodalo manda bu kogoyu ibugua i mo genda halu haabo ka.

✧ **8:20:** Yob 4.7, 21.30 ✧ **8:21:** Yob 5.22, Iba 126.1-2, 132.16 ✧ **8:22:** Yob 18.14, 21.28, Iba 132.18 ✧ **9:2:** Yob 4.17 ✧ **9:9:** Yob 38.31, Amo 5.8 \* **9:13:** Puya dama mini Lahaba ngago Yobo 3.8, 7.12, 26.12 uruniha gilibu ngago de handabe.

<sup>18</sup> Ibugua i yu wahalu pu nabi haabo kagome i emene halo birabe naheore bedo. Ibugua ihondo o bialu kagonime i mo genda timbuniore halu ka. <sup>19</sup> Ina Ngode Datagaliwabela hongo manda biruyagua nde ibunaga hongo timbunihe kagome i mo nagalone holebira. Ina ibu manani ibu lalu olaruyagua nde ibu godi lole ibilo aiwa haru ibulubadabe. <sup>20</sup> Iha ko mbira nawi howa ina mana kobi mbira nabi howa ibuhondo mini bilinahe haabo harugoni. Ani bialu harugoyu ina Ngode Datagaliwabenaga manani pu haruyagua inaga bi lako hai harogome ini manani holene wulebira. <sup>21</sup> Heneneore larogo iha ko mbira nawiore ko. Ainde i habane nabulene harudalo habe mangaho ko. <sup>22</sup> Ina manda bidogo ko mbira iname bini wiaguabi nabi hemayaguabi tanabi Ngode Datagaliwabeanda ina bo wahai haga ka. <sup>23</sup> Mbirali bayale kagoaha mo ko holene anda ibiyagua nde Ngode Datagaliwabe ibu de hondowa turu dege haga ka. <sup>24</sup> Agali mana ko biaga bu hearume dindi ogo haru howa handayaho helo Ngode Datagaliwabe ibunime dabalul helaga bini ka. Ibugua agali manani howa bi lo tale biaga karunaga mini mo luluyu haragola tigua manani mo tale bialu bi lolene ngadagua nalaga ka. Ngode Datagaliwabe ibunime mbirale ogoni mo bia naheyagua nde aiwa mo bia hene biagabe.

<sup>25</sup> I ema bu holene horo winigo abale piai haragonida. Horo daiore lalu agali bi lo yu pole poralidagua bolangua halu poragoni. Anidagua biragome mani iha bayale holene henge mbira nawulubada. <sup>26</sup> I dindini holene abaleore piai halu iba talu ibani dai lalu piagadaguabi ega neneme mbirale nolene ale dindini bedagola hondowa abale yulope halu minule piagadagua piai haragonida. <sup>27-28</sup> Iha genda ibu ngaru yu wahai halu bame haruyagua nde bayaleoreda manda bido. Anigo i bayale holene manda bu ha koria genda tandagala iha ngagome i mo gibia haragola haabo kogoni. Ani bidogo irane Ngode Datagaliwabe inaga deni iha ko mbira ngane hondowa yu heledegoni. <sup>29</sup> Ani ngane hendedego inime mini nawi tingi halu latara howa harudago inaga bi bame lo waharudane hendedo. <sup>30-31</sup> Ainde ina tobo bayaleore ngago mo yalu iba gagahe bedagoha puwa inaga deni iha dodo emene mbira para nahe bayaleore holenaga wayawaya baruyagua nde ogoni berogomebi bame dege boleberoda manda bido. Irane ina i minalu dindi ko waru tabu ngagoha bape haregola warubaga bialu dodohe dege wulubada. Ani beregola inaga aga karuledorume manda bu handalu karia inaga tingini ko ngubiore mbira wiagoria karulo harudalo manda bialu inaga aga ibu i tinginini bulene turu naheore wulebadalo manda bido.

<sup>32</sup> Ngode Datagaliwabe ibu agali kagobi dege henedale nde ina ladai bialu iyame manani pialu bi lo dabaki kabalego. <sup>33</sup> Ainde mbiralime dombegua howa i Ngode Datagaliwabela iyanaga bi hale howa mo tale bilo hameledo. <sup>34</sup> Mbirali o biagome Ngode Datagaliwabe hondo lamialu i pani ngialu minu baabo nahe wahalu iha mo gi holene ngaru naibilabe lalu lamia holene naheore ndodabe. <sup>35</sup> Mbiralime ogonidagua lolene kale nde ina Ngode Datagaliwabe hondo gi nahe howa iha genda ngelo kogoni bibahende latagi hai kole. Anidagua larogo irane ini miniha ko mbira nawiore manda bido laro, lalu Yobohanda lene.

## 10

### *Yobo ibuni holene manga ho henego ogo*

<sup>1</sup> Yobohanda laabo halu lalu, I dindini holeneore mangaba. Homaruyagua nde karulapeore ogoni. Inaga genda timbuni yu kogonaga bi latagi halu holene nga lo manda bido. <sup>2</sup> Ina Ngode Datagaliwabe hondo ogodagua lolebero. Ina i bame manani ibu nahelabe. Ina ihondo keba ho keyagua nde ina ko birudago tigatiga langibe.

<sup>3</sup> Ainde ina mandabu handalu keria agali inime wabinigo mo ngubia halu mo ko holene mana ogoni bayaleda lo manda bidebe. Ani bialu howa agali ko biaga karume



mana ko bialu karu hondowa ínaga miniha dungulo haga kebe. <sup>4</sup> Ina wali agali kamarume mbira mitangi bialu manda beramalidagua ínaga manda birilibe. <sup>5</sup> Ina wali agali kamarunaga holene emene tigi mbira hangu halu homaramalidagua í ogonibi dege kebe. <sup>6</sup> Ani ndoyagua irane aginaga ínaga íha ko mbira ngabe hondole taya bialu haabo kebe. <sup>7</sup> Iha ko bini mbira nawiore kogo í manda bedegoni. Ani manda buwa mbiralime í ínaga giha howa mo wialu pele mulene naheorego ínaga manda bu kegoni.

<sup>8</sup> Inaga tingini bibahende ínaga gimeore wabiai hariyago ai ínaga gi degeme í mo ko halu kegonida. <sup>9</sup> Ina ínaga tingini agalime dindi duguwa todobene be wabiagadagua wabirigoni. Ainde áyu í mo dodobaga bialu lone dindi abalu ale holiya hameledebe. <sup>10</sup> Inime í aiyana tombeha wia halu wabirigoni. <sup>11</sup> Inaga kunibi gungubunibi í tinginiha helai harigola ínaga tingini gimbu bialu hongohe haya. Ani bialu kuni gungubunila dambi helonaga mbirini dongoneru wabu heladambi hariya. <sup>12</sup> Ina íha holene mo karula howa íhondo gubalini timbuniore ho harigoni. Ina í baya hanguore handayaho hegola í homa nabi haabo kogoni. <sup>13</sup> Ina í bayuwa handaya ho keore nde í áyu mo ko haregoni hole manda bu dege henedalo manda bido. <sup>14</sup> Ina í handayaho kegola ínaga ko mbira bidole nde ínaga ko ogoni birugo domo wanahole ledeleda. <sup>15</sup> Ina mana ko ngago biruyagua nde ínaga í pani ngialu minu bole kegoni. Anigo ínaga mana bayale bialu haga howa ko mbira íha nawi hewayagua nde ínaga í bayale harudago hondowa turu halu bayale birida nalaga kegoni. Iha genda dewa anda ibalu í mo ko haragome í taga timbuni ho kogoni. <sup>16</sup> Anigo ainde ínaga bayale kogoni mitangi bialu turu halu ibaga bu haruyagua nde laiono gabuame nogo mbira abaleore talialu bagadagua ínaga í talima ibaga bialu bope hole kegoni. Ani bialu í bope holenaga agalime nabiagane aleru dewa biaga kegoni. <sup>17</sup> Ina íla keba ho kego mo walia halu íha genda dewa ibilarili. Ani bialu ínaga miniha keba holene ogoni timbuniore halu íha tandaga dewaore ami agali dewaore tidiyu ibalu íla wai bule ibiradagua ibilalu kegoni.

<sup>18</sup> Ngode Datagaliwabe-o irane aginaga ínaga í aiyahanda taba henelo wahenebe. Wali agali mbirame í hondo manda nabilo aiyaga tombeha biru homedole nde karulapeda lo manda bu kole. <sup>19</sup> I aiyaga tombeha berewangi homalu ínaga tingini ohowa mo yu pialu homaliha hora henedale nde karulapedale. I dindini naibu haradagua ogoni. <sup>20</sup> Ngode Datagaliwabe-o ínaga holene tubagiore ngago í manda bide. Ani manda bialu íhondo genda dewa nangibe. Inaga bu miniha mo palia holene emene karulo howa nde homoliya helabe.

<sup>21</sup> Mani howa nde í homalu dindi ko arumahe ngagoha pu howa dindi ogoria hole lone dai nabuluboda. <sup>22</sup> Dindi í poleberogoha ngaruni mbirago tigabi nawi bibahende mo libilabale hangu mini burugu lolenebi wiai ka. Wá holene naheore aruma holene degeme dindi ogoni haru hai kagoni ndobe, lalu Yobohanda lene.

## 11

### *Yobo mini beregedolene nga lenego ogo*

<sup>1</sup> Nama dindiha howa ibini Soba ibugua Yobohanda bi layago hale howa Yobohondo lamialu lalu, <sup>2</sup> Yobo-o ínaga bi dewa laabo halu bedegoni iname ínaga bi dewa laabo haregome í ko nabiaga agali bayaleore mbira heneda lolomayanaga lalu bedebe. <sup>3</sup> Ina manda bu handalu keria ínaga bi urunime inanaga ne hariga ndibulo birulubabe toba kebe. Mini bayale wuleneru ínaga mo ko halu bi lai harigo ainde ínaga manda bu handalu keria urunidagua larigonaga í mo taga holene mbirali nahedalo manda bidebe. Inaga ne hariga ndibulo bira nabi howa ínaga bi larigoni damene ladai bulebero. <sup>4</sup> Inime bi lariruni bibahende bayale hangu laru lari. Ani lalu ínaga ko mbira nabi kogome Ngode Datagaliwabenaga deni íha ko mbira nawi ko larigoni. <sup>5</sup> Ainde galonedago

ina bi ogoni Ngode Datagaliwabe ibunime ihondo ladai bilo karulapeda lo manda bido. <sup>6</sup> Ibugua ihondo ladai bidale nde ibunimeore mini gigabi wulenebi manda bulene bayale ngarubi irane ogo lalu wia do hene ina agalime manda bibe nahe ngaru ibunime ihondo langiai kale. Yobo-o Ngode Datagaliwabehanda ina ko biridagonaga pani timbuniore mo ngia nabi emene mo ngiyadalo manda bibe.

<sup>7</sup> Ina manda bu handalu keria Ngode Datagaliwabe Hongo Haiheore kagonaga mini gigabi ngagobi manda timbuni bidagobi ina manda biai halu emene timbunibi ogobi nga lalu magi ogodagua lalu manda biai habehebe. <sup>8</sup> Ngode Datagaliwabe ibunaga manda hari daligaore damindini ale wialu dindihaore daliape halu homeneru haga humbirini andaga bolanguahe ngagoni. Ina ibunaga mini manda ngaru handa walia holenaga agi buleberebe. <sup>9</sup> Ibunaga mini luniore dindi ngago bibahende bolanguahe nga. Iba solowara timbuni bedago bolangua haihe nga. <sup>10</sup> Ngode Datagaliwabe ibunime ila godi laba lole minu yalu piyagua i mini yalu napelo hapai holene karulape ai kabe. <sup>11</sup> Ngode Datagaliwabe ibugua agali abogo ibu habane nabulene ka lo manda biaiho ka. Tigua mo hondo halu mana ko bialu kago manda buwa ibugua tinime ko biyagonaga mo tale biaga ka. <sup>12</sup> Nogo dongi gabua angibuni mbirame igini dambole nawiagadagua agali mbirame mini nawiore howa mini gigabi wibe nahe ka.

<sup>13</sup> Yobo-o ina mini beregedalu Ngode Datagaliwabehondo bi lalu inime i dara halu biamogo bia lolene nga. <sup>14</sup> Ina mana ko birigo erembira mialu waholene nga. Mana ko ngago ila hole lone naibilo wahai holene nga. <sup>15</sup> Ina mana ogonidagua biriyagua nde iha ko mbira nawi howa i dengui handadaga halu taga nahe holebere. I hongohe howa mbirale mbira hondowa gi nahe holebere. <sup>16</sup> Iha genda tandaga ngaruni embeda hai holebere. Ibalime ira yuni dataniru yu poragola embeda hagamaga mbirale uruni embeda hai holebere. <sup>17</sup> Inaga holene bibahende beregedalu bayale holebere. Inaga holene bayaleore horombe hanuni ni dedaligobi holebere. Iha genda bibahende ibai halu timbuniore aruma ale wiyago ai bodopaya bialu egerebagi ale holebira. <sup>18-19</sup> Ani beregola Ngode Datagaliwabe ibugua i baya hangu handayaho holebirago hondolebere. Ibhondobi i mini dunubiaho holebere. Ina gi holene mbira nawiore howa i u paliahondo holebere. Ani bialu kegola dewalime ina ti biamogo bibelo hondo ibugu bulebira. <sup>20</sup> Wali agali mana ko tara tara ngaru bialu haga karu ti dege Ngode Datagaliwabenaga lembo holene ngagoria yo pialu pole hariga tara tara taya bialu ha holebirago handa walia naholebira. Ani bialu howa ti homa hangu maliaho holebira, lalu Soba ibugua lene.

## 12

### *Yobo ibu nenegenaga bi hale habe manga henego ogo*

<sup>1</sup> Ani lai heagola Yobohanda ladai bialu lalu, <sup>2</sup> Heneneore ti tebirali hangu mini bayalebi manda timbunibi tiha hangu wiarua. Ti homaramingi mini gigabi wulene bayale uruni ngaore homalu tini heba yamaga halu ereba holobada. <sup>3</sup> Ani ndoyago. Ibi nde mandabi dege kogoni. Manda tigua bidamigome manda ina bidogo bolangua nahe kami. Tigua bi larimigoni damene wali agali bibahendeme manda biai ka.

<sup>4</sup> Anigo ai ti inaga nenegeha kamigoni howa ihondo mege bialu kami. I mana tigabi ngago bialu howa Ngode Datagaliwabenaga deni iha ko mbira nawi ko. Abale howa ibugua inaga bi larogo hale hagago ayu nde tigua ibalu ihondo mege beremi. <sup>5</sup> Maru ti bayale halu genda ngaru tiha anda naibi howa maru darabi genda yu karu hondowa ti oba haga ka. Ti ohe howa maru harigani pilole bialu kago hondowa pilape helo baya hangu helope haga ka. <sup>6</sup> Anigo agali pagebibi karubi Ngode Datagaliwabenaga bi mo wahaga karubi ti bayale mbira ka. Tigua handalu karia tinaga minibi dindini holenebi

ngago karulapeore kama lowa tininaga hongo mo tene halu Ngode Datagaliwabe ale helaga ka.

<sup>7-8</sup> Ega nogo wenaru ema bialu piaga maru biru ngaru tigua tí lawai helo pudaba. Ani ndoyagua nde dindini haga urunime tíhondo Ngode Datagaliwabenaga mana ngago lawai helo hale hadaba. <sup>9</sup> Ti bibahendeme Anduane Homogo ibugua ti wabinidalo manda biaiho ka. <sup>10</sup> Wali agalinaga holenebi maruale uruni tinaga holenebi ibugua wabinigo bibahende ibuni giha hai ka. <sup>11</sup> Iname tomo nabebedabe nanabebedabe hondole nahanda ala beremali. Anidagua dege inanaga haleme bi bayaledabe kodabe hondole hale haramali. <sup>12-13</sup> Agali ala hene wahe ti mini gigabiwi mandabi dewa ka. Ngode Datagaliwabenaga mini gigabi wulene ngagome agali wahe ala hene uruninaga manda ngago bolangua haihe ka. Ani bialu ibunaga hongo timbuniorehe mbirale ibugua bule hameledago bia dege biaga ka.

<sup>14</sup> Ngode Datagaliwabehanda mbirale mbira gialobaga biyagua mbiralime biadai bibe naheore. Ibugua mbirali minalu garabaya helayagua nde mendealime ibalu ibu golope habe naheore. <sup>15</sup> Ibugua iba dalu naibilo hangai hayagua nde gaea dege biaho wialu dindini ngago damene bibahende gau lai holebira. Ibugua iba dalu dege ibaho wiaabo helayagua nde iba li timbuni birame helaragola dindi dewaore namulai holebira. <sup>16</sup> Ngode Datagaliwabe ibu hongo gibiorehe howa wayali holene ibunaga nga. Agali mo hondo haga karubi mendealime mo hondo hene karubi ti bibahende Ngode Datagaliwabenaga giha hai ka. <sup>17</sup> Wali agali ibugua haru haga karunaga mini gigabi wiaru mo wahowa mini nawi ale helalu agali haguane wali agali manani helowa daba ki biaga karu tibi mo luluya haragola tinibi lulu karume biagadagua bilo helaga ka. <sup>18</sup> Ibugua kini karunaga biabe bo dugualu tinaga aga golowa ti garabaya biabe biaga karunaga labolabo bobu hagadagua bu helaga. <sup>19</sup> Ngode Datagaliwabehanda dege agali loma binigo mo miaga karubi agali haguane karubi bope halu mo dindiha helaga ka. <sup>20</sup> Agali mbira ibunaga bi wali agalime hale haga heagua nde Ngode Datagaliwabehanda agali ogoninaga ne hariga ndibu lelaga. Agali wahe miniwi karunaga mini gigabi ngago ibugua mo wahai haga ka. <sup>21</sup> Ibugua agali haguane karu bope howa ti mo ngubiore halu taga timbuni ho helaga. Agali haru haga karunaga hongo biba hai helaga ka. <sup>22</sup> Ngode Datagaliwabe ibunime dege mbirale wia do hene ngaru mo paniho ngelalu arumaho ngaru wá helalu biragola wá hai haga. <sup>23</sup> Ibugua hameigini mbira hongo nahe karu mo hongo halu mini lene mbira helowa mani mo ko halu bo haealabaga bu wahaga. Ibugua dege hameigini emene karu mo dame bia howa dewaore helalu dindi taraha garabaya minalu pelaga. <sup>24</sup> Ibugua dege dindi bibahendeni agali haguane karunaga mini mo luluya howa ti mini burugulo luluyu ibagabu helaga. <sup>25</sup> Ti arumaha howa gi minaga bialu hariga taya bima ti agali lulu iba neneme ge pu ko hagadagua ibagabu heleda.

## 13

<sup>1</sup> Bi bibahende tigua latagi harimigoni damene ina bambaore howa deme handalu haleme hale haabo haga dege kogoni. Mbirale uruni i manda biaiho kogoni ndobe. <sup>2</sup> Tigua manda bidamigo damene bibahende ina manda biai ko. Manda tigua ngamigome inaga manda ngogo bolangua nahe kami. <sup>3</sup> Ani kamigo ainde i tí heba bi lolene manga ho ko. Ngode Datagaliwabe Hongo Haiheore kago ibula hangu bi lolene hameledo. Inaga genda timbuni o yu bedogo tiga bulenaga ibuhondo bi laba lolene hamelo bedo. <sup>4</sup> Tigua manda nabi howa ke holene bi dewaore laramigome tí mandabi tingi ho haga kamigoni. Tí anogoda mbira wali agali warago bo ngago biamogo bulene manda nabi kagobi dege kamiria hendedogoni. <sup>5</sup> Ani kamigonigo ai tí lone bi nale harimiyagua nde wali agali maru karume tí agali mini gigabiwi mbira ka lolebira bada.

<sup>6</sup> Ina bi ladai berogonaga tí bayuwaore hale halimu. <sup>7</sup> Tígua bi nagalone dewa kē halu laabo halu kamigo ai bi ogoni aleme Ngode Datagaliwabe biamogo bialu la harama mitangi bidamibe. <sup>8</sup> Tígua bi laramiru bibahendeme ì bo hangedape halu Ngode Datagaliwabehayagi howa ibu biamogo bialu laramibe tobaneda. Ainde tígua godini howa kē holene bi urunime Ngode Datagaliwabe ibunaga lahalu mo hongo hole ho kamibe. <sup>9</sup> Ani beremigo begelo hondowa Ngode Datagaliwabehanda tíha mbirale bayale hondolebirabe. Tígua agali dindini hene karu mo hondo haramilidagua Ngode Datagaliwabe bi mo hondo hole mandabu kamibe. <sup>10</sup> Tínaga miniha Ngode Datagaliwabe biamogo bialu ì bope holene hangu manda bu kamigo mini ogoni tíha haabo hemiyagua nde Ngode Datagaliwabehanda tíhondo keba holebiralo manda bido. <sup>11</sup> Ani biragola ibunaga hongo timbuni kago hondowa tí mogolalu gi timbuni holeberemi. <sup>12</sup> Bi uruni galonebe toba howa lalu kamigo ai bame habane nabulene be abalu ale nga. Bi uruni hongo naheore iba waru tabu ale bame dege nga.

*Yobo ibugua, Ngode Datagaliwabehanda ì bo wahayagua nde ani bilo, lenego ogo*

<sup>13</sup> Yobohanda laabo halu lalu, Bi ìna hangu loliya tígua bi nale biradaba. Mbirale ìha bulubadago bibahende biai helo ìna bi nale naholebero. <sup>14</sup> Ì gi naheore bedo. Ìna harugo lowa homolene wiagua nde homole. Ai Ngode Datagaliwabela bi lole manda manda bu kogoni. <sup>15</sup> Ainde Ngode Datagaliwabehanda ì homelo bo wahayagua nde ibunime hame ledadagua bilo. Ìna mendealihondo mini dunubia holene nahe howa nde harugo ibuhondoore mini dunubia ho haabo holebero. Ani nabidaore ìna ibunaga deni tigatiga laede halu, Ìna ko mbira nabi kogoni, lolebero.✧ <sup>16</sup> Anioiredago ìna gi nahe howa Ngode Datagaliwabela bi laruyagua ibugua ì agali ko nabiaga ka lo manda buwa ì dara halu homa nabi emene bayale holiya helo waholebira. Ani larogo irane agali ko biaga karume Ngode Datagaliwabela bi lole gi haga ka. <sup>17</sup> Ìna mbirale ìnaga miniha ngogo latagi harogo tígua ìnaga bi o larogo baya hangu hale hole biralimu. <sup>18</sup> Ìna biako hene mbira nawi kogome ìni godini howa yo pialu polebero. Anigo agalime godi lo pole howa bi lo manda biagadagua ìna Ngode Datagaliwabela bi lole manda bu yido. <sup>19</sup> Ngode Datagaliwabe-o ìna ìla bi wai bialu howa ko bini mbira ogo lalu mo walia holeberebe. Mbira wiagua nde ì bi nale ne hariga ndibu lalu homolene karulape. <sup>20</sup> Ngode Datagaliwabe-o ìna ìhondo kira bibelo hale haro. Hale harogo e lariyagua nde ìna gi howa ha do holene manda nabulebero. <sup>21</sup> ìhondo bi kira hale holeberogo ogo. Ìna ì mo tandaga nahabelo hame ledo. Bi mende mbirale ì mo gi holene damene nangelabe. <sup>22</sup> Ìna ogonidagua buleyagua nde ìna ladai buliya ìhondo bi labe. Ani ndoyagua nde ìnime ladai bibelo ìna bi ala lolebero. <sup>23</sup> Ìha ko mbira agi ngabe. Mana ko mbira agi biruyabe. Mbirale mbira wiagua nde ìna ì langibelo hameledo. <sup>24</sup> Ìna ì handa tara howa ìla waitigi ho haradagua bialu erembira ngialu piriligo irane aginagabe. <sup>25</sup> Ì habane nabulene bameore ira yuni dogolope hene alebi datani gaule ale bame puyabume dindini pulo yu pu ibu bialu hagagobi kogoni. Ani kogodago ainde irane aginaga ìna ì talima ibaga bialu mo gi halu kebe. <sup>26</sup> Ainde ì igiri emene hewangi ko ìna bini mbira wiagola áyu mo wu howa genda timbuni ngaru ìha mo ngialu kegoni bada. <sup>27</sup> Ì ibaga bialu napolianaga ìna ìnaga ge pu senime minu kabubu ngelaga kegoni. Anigo ainde ì heyalu piruyagua ì porogoha agohayagi porobe hondole haruru ibaga bialu ìnaga ge pirudagoha handaya halu goarima ibaga ke.✧ <sup>28</sup> Ina wali agali kamaruni ira pubume nedagola togo bidaligobi halu bombome aga nedagola budaraligobi howa abaleore mo ko haga kamagoni ndobe.

## 14

<sup>1</sup> Yobo ibugua lalu, Ina wali agali ina aiyahanda taba hanayangi howa horo emene tubagi niruniha hangu dindini kamagola genda dewaore tagira ibaga.

<sup>2</sup> Ina balawaya baya egerebagi bayale dedane handarigo ai alendo handalu karia yogo bialu ko haraligobi kamagoni. Ani bialu ni dedagola inanaga munini kane handaramaligo ai ni beralibame ge haragola munini biago ereba haraligobi kamagoni.

<sup>3</sup> Ani bidamago í iname ko biniru aginaga dabalulu kebe. Ngode Datagaliwabe-o í galone nahe mbirago kogodago ína í aginaga dabalulu kebe. <sup>4</sup> Ina wali agali mana ko biaga dodohe kamago. Ínaga deni bayale helo ko birimadaru domo wahabehe mbira ai kabe. Mbirali naheoreyago. <sup>5</sup> Wali agali ina dindi ogoria holenenaga horo ege malibi ogodaguaore helo lalu pongo bo wirigo mbiralime ibuore bolangua howa lu hole laluibunaga holene horo ege malibi dewa lone mo tago habehe ai ibu kabe. <sup>6</sup> Ai agali garabaya biabe ale bia hagame ibunaga biabe bulenego bu maro buwa alendo ibuni turuho hagadagua íbi nde bu miniha turu hagabu holiya yupe habelo hamelo kogoni.

<sup>7</sup> Ina manda bialu koria ira dibinigonaga teneha karulapeyagua lone ogoriani dongoria biaga ndobe. <sup>8</sup> Ira ibunaga pini bambaore heneyaguabi tene ibu gabu hayaguabi <sup>9</sup> ira teneha dindi ibane bere wiagua nde ira dibayagonaga teneha howa lone dongoria biaga ndobe. Ani anda howa gini gene halu ira gahenge lone anda haga. <sup>10</sup> Anigo wali agali ogonidagua biaga ndo. Ina homaramagola mani holebiraru tigua ina hendelo ndo homalu ereba haramagoniore. <sup>11</sup> Manane iba gorenge timbuni bereneru hundialu iba ema bialu piagaru hundu tege laraligoni. <sup>12</sup> Ogonidagua dege wali agali homeneru lone heya nabiaga. Dindi harila piyaguabi ti heyulene henge nawi howa paliaho wulebira.

<sup>13-14</sup> Wali agali homayaruni lone dére holene henge nawi bada. Anigo ai Ngode Datagaliwabe-o mani kebaho keruni embeda helonaga áyu í wali agali abale home-nerunaga dindiha mo do howa horo mbiru nde í mitangi bulene horo mo ngelabe. Ina dindi ogoni holiya henge ngiridago piai helo hondo holebero. <sup>15</sup> Horo uruni piai haragola nde ínimeore wabini í yu wanahe íni kegoria kawareore haparaho holiya hamelo holebere. Ani buwa ínime í olaregola homene dindi uruni wahalu íni keria ibulebero. <sup>16</sup> Ani buwa ogoningi ína ibaga bialu kogo baya hangu mamage halu ko biruruni mo embeda holebere. <sup>17</sup> Wali agalime nuha mbirale mbira kabubu honowa embeda haralidagua ko ína biruruni manda biaho wia nabi ína domo wahai holebere.

<sup>18-19</sup> Hari timbuni wedaru podarangibi ege tole timbuni bedaru pendege lalu porangibi ibame ege tole ngaru gindulobaga bialu dindi bibahendeha hilo yai halu porangibi ani buwa iba dalu timbuni ibalu dindi bayale ngaru hilo yalu piai halu bulebira. Agali dege lone heyule lowa mini dunubia ho karia uruni mo waholebere bada. <sup>20</sup> Íninaga hongo timbuni daligaore ngegome ti bope halu homelarili. Ti homalu tinaga denguiru mo tara halu aibe tobahe ngagola ai ti homenerunaga dindiha hama pudaba lariligoni. <sup>21</sup> Ti ani pu kagola dindini ti igini helalu homayaru nde agali mini lene homogo hayaguabi yagibano kagola wali agalirume mo taga howa mo ko halu hayaguabi homene tigua handa dai bialu manda bibe nahe holebira. <sup>22</sup> Tigua tininaga tinginiha tandaga timbuni nalu karunagabi tiniha genda ibiyarunagabi dugu bialu biraabo holebira, lalu Yobohanda lene.

## 15

### *Wali agali ko biaga karume biabe biragobi yolo mulebira lenego ogo*

<sup>1</sup> Yobo ibugua bi lai heagola Temana tanoali Elibasa ibugua ladai bialu lalu, <sup>2</sup> Yobo-o ína í agali mini gigabiwi kebe toba harugo. Ai áyu ínaga bi bame puyabu ale halu nagalone dege lopaya berego agibe. <sup>3</sup> Ína lai hangu laabo harilidagua agali mini gigabiwi kagome ani lalubi nagalone ladai biaga kabe. <sup>4</sup> Bi ogoni ale lariligome wali



agali mo luluya haragola tigua Ngode Datagaliwabehondo gi howa ibu andaneha halu bi nalolebira. <sup>5</sup> Ina bi dewa lalu kegome iní ko biridaruni mo walia harili. Inaga biore baya wále marume ko bu howa uruni dambi holenaga bi lalu hagagobiore lariligo manda bido. <sup>6</sup> Ina í manani howa lo dabalú ko biri lolenego inaga biabe ndo. Ininaga bime mo dabaki halu iní bope harigoni. Ani bialu ina ko biri lalu mo walia ho nge.

<sup>7</sup> Agali mende naheha í aiyahanda í ala taba henene kebe. Ina manda bu handalu keria Ngode Datagaliwabehanda dindi hari nawabiha iní dindi ogoriani ala hene haribe. <sup>8</sup> Ngode Datagaliwabehanda mbirale bu ngaruni wabule manda manda bialu bi lalu heangi í hale ho henebe. Agali mini gigabiwi í hangu kebe. <sup>9</sup> Inaga manda ngegome inanaga manda ngamago bolangua naheore. Mbirale ina manda bidego damene bibahende iname manda biai kama. <sup>10</sup> Agali waheore dagua peleoreru ina baba mandagi kama ndobe. Tinaga mali luore í aba ibunaga mali henedago bolangua hene kama.

<sup>11</sup> Yobo-o Ngode Datagaliwabe ibugua inaga genda yu kegoni mo dabiabia halu í miniha mo palia ho habelo hamelo ka. Ngode Datagaliwabehanda ihondo bi lolebi-radagua iname bi hendore langialu galone laga birima. Ani larimago ai mbirale Ngode Datagaliwabehanda ihondo bule ngago nagalonedane ina turu nahe kebe. <sup>12-13</sup> Ina mogolo hondowa Ngode Datagaliwabehondo keba timbuni halu de darama bialu ibuhondo bi ko tara tara ngaru lalu kego irane aginaga bialu kebe.

<sup>14</sup> Wali agali mbiraliha ko nawi mbira kabe. Ngode Datagaliwabenaga deni wali agali bayale tigabi lenego mbirali habehe kabe. <sup>15</sup> Dahuliyali bu karu ti dege bayale kagoyu ainde Ngode Datagaliwabe ibugua dahuliyali marume mana tigabi ndo bialu hearia handa walia hene. Ani bialu mbirale hari daligaha ngaru maru bayale ndo nga. <sup>16</sup> Wali agalime kembobe lebola haragola iba noa hagadagua ina mana ko ngago bua timbuni haga kama. Anigo ina dindi wali agali lene kamago bayale tigabiore ndo ko ngubiore howa habane nabulene kamagoni.

<sup>17</sup> Yobo-o ina bi o larogo í baya hangu hale harene. Ina deme mbirale handarugobi bi hale howa lo manda birugobi garea lowa languliya í hale habe. <sup>18</sup> Agali mini gigabiwi karume ti abahanda manda bulenebi mini wulenebi ti lawai heneyaru ihondo lawai haya. Tigua í lawai halu howa bi mbirago mo do naheore bibahende í langiai haya. <sup>19</sup> Agali uruni ti tininaga dindiore winidagoria haabo haga heneya. Ti heagoha agali dindi taraha howa bame íbu pehene mbira tinaga mini mo luluya halu mo batara holene mbira ti baba mandagi nahaga hene.

<sup>20</sup> Ina bi ogodagua laro. Mana ko biaga karu tigua wali agali maru karu madane bialu bo hengedope halu mo ko haga biragonaga pani nalu kane dege tini homolebira. <sup>21</sup> Tigua bi gibi mbira mogole hale howa nde ti mo ko holene ko tara tara ibarua lalu minime mogo lowa giho birulebira. Ani biruwa tiha gi holene embeda howa bame hadapaya bu karia pagealime nendebu howa ti minu balu tinaga mbirale maru ngaru mo pagebu yalu polebira. <sup>22</sup> Anidagua biragola aruma holeneme dindi aruma hai hagadagua ko tara tara ngarume mo ko holene anda ibiyada lo manda biaga. Waitigi ti ayu tibu ne gadele yu kagome ti dibulebadalo minime dege manda bialu ti yo pialu polene henge nawidane handaga. <sup>23</sup> Mana ko biaga uruni ti bame ibaga biaabo halu karia ega bodo hariawe ale timbunime ne nolene taya bialu homene tingini nole yagalo yu ibaga. Ani biyago hondowa tigua aruma holeneme dindi bibahende dambi hai hagadagua mo ko holeneme ti abaleore minulene kaware ibirago lo manda biaga. <sup>24</sup> Ti miniha tandaga holenemebi mini burugu timbuni lolenemebi mo gi ho haga. Anidagua biragome tinaga miniha bope halu kini hongohé kagome waitigi mo ko howa baradagua bini haga.

✧ 15:14: Yob 25.4-6

<sup>25</sup> Mo ko holene uruni wali agali ko biaga bu karuha anda ibagago irane tinime mitangi bialu ti Ngode Datagaliwabe Hongo Haiheore kago bolangua halu ti daligaore kamabe tobaho howa ibu ba handalu karia genda uruni tiniha anda ibugu biaga. <sup>26</sup> Tigua mine howa dogo halu wai biaga ale karulalu wai humbiru yalu Ngode Datagaliwabela wai bule gerai poradagua biaga ka. <sup>27</sup> Ai ti bayale howa dabudabu tara tara ale dewaore mo tago halu wua kagoni. <sup>28</sup> Ani kago mani mo ko halu tinaga anda karu gialapaya bini wialu tano ogoniha wali agali mbira naholebira. <sup>29</sup> Tinaga muni mbirale ngarubi wiaabo nahe bibahende ereba hai holebira. <sup>30</sup> Aruma holeneme dindi bibahende dambi hai haralidagua mo ko holene ibu ngagola ti yo pialu napolebira. Bo daragola ira yuni abalu puyabume yu purogo laralidagua Ngode Datagaliwabenaga keba holene ngagome ti bo ereba helolebira. <sup>31</sup> Tigua mana ko ngago yu kagome mbirale bayale ngaru mo yu anda ibulebirabe toba haga. Ani ndoyago. Ko bulene ogoni ale ngagome mbirale bayale mo yu anda naibaga tigua ko biyagonaga lini ogonibi dolebira. <sup>32</sup> Ani biragome tini mali dewa nahe wene dege kaore agalime ira hongone anda halu kago dibu wahagadagua abale homolebira. <sup>33</sup> Wali agali uruni ti pu mbira mini gerebi lini daga bayale do girigerelo ngagoyu ainde boga nabi wene dedaore ko halu tagalopebe biagagobi ka. Ti ira olibe lini dole pabua balu kagoyu lini bayale nade ko halu tagalo wahai hagagobi dege ka. <sup>34</sup> Wali agali Ngode Datagaliwabehondo mini mbiraore nawiaga bu karu tinaga waneigini aguaneru naholebira. Ani bialu wali agali maru mana tigabi nabiaga hearume ti muni mbiraleru ohowa mo yu hayaru tinaga anda irame dai holebira. <sup>35</sup> Waneigini aija tombeha biru anda hagadagua mo hondo holenebi ke holenebi ko bulene mana tara tara bu miniha howa anda halu biatagi haga. Tinaga miniha mana ko bulene wu tolotagi kagome mana ko tara tara ngaru bialu haga ka, lalu Elibasa ibugua bi ogoni Yobohondo lamini.

## 16

*Yobohanda lalu, Ngode Datagaliwabe ibugua i mo ko hayago helowa ai i biamogo bialo, lenego ogo*

<sup>1</sup> Yobo ibugua Elibasahondo ladai bialu lalu, <sup>2</sup> Bi ogoniale i hale haabo henego ai lone hale habe mangaore ko. Tigua bi ogoni larimigome i biamogo ndo beremi. <sup>3</sup> Tigua bi nagalone ngago laabo halu kamigo ai lamaro angi buleberemibe. Tigua mini agialego wu howa ila lai loa haabo kamibe. <sup>4</sup> Anigo ina tihondo langerogo nde ti i bedogoria bialu i nde ti kamigoria kole nde ayu tigua ihondo bialu kamidagua dege ina tihondo bialu kole. Ina ti daraho kogo mo walia halu bi dewa lalu kole. Tiha mo ko holene anda ibu winidagola mogolo hendedogoni lowa walia halu ina ma bonge lalu bi laga bidole. <sup>5</sup> Inaga ne harigaha ti mo hongo holene bi lalubi tandaga nalu bedemigo emene ibira helonaga bi lalubi bi dewaore ledole. Ainde ina anidagua bialu haruyagua nde ogonidagua berogome ti biamogo agua bilodabe. <sup>6</sup> Anigo ainde inime ogodagua manda bido. Ina bi lalu biraruyaguabi nale waharuyaguabi uruniha galone mbira nawi dege. Uruni mbira berogola i biamogo bialu tandaga bidago ereba naholebira.

<sup>7</sup> Ngode Datagaliwabe-o heneneore ina inaga hongo bo pirilape hai harigoni. Ani bialu ina inaga waneigini homai helarigoni. <sup>8</sup> Ina ila waitigi howa mo obiore helalu inaga tingini yolalu kuni dege kogoni. Ani bidago agali bu karume i de hondowa ina ko mbira birugola pani ngialu keba tobaho ka. <sup>9</sup> Ngode Datagaliwabe ibugua i handabe manga howa ila waitigi haya. Ibugua ihondo keba timbuni howa biango dudume nogo tiaru balu neme no didabaga biagadagua i mo ko halu inaga tingini bo budabaga binigo ngogoni.

<sup>10</sup> Agali marume i mo ko holenaga i bedogoria ho mabu bialu tigua i hondo oba howa mege bialu tinaga gi habeme inaga denguini balu ka. <sup>11</sup> Ngode Datagaliwabehanda agali mana ko biaga hearunaga giha i minu ya haya. <sup>12</sup> Bamba nde i bayaleore hewaria

Ngode Datagaliwabehanda ibuwa i mani yuwa bayagola ai bameore homo wahene tungulo mule ngogoni. Ibugua i mo ira lago ale mbira heledagola <sup>13</sup> ami agalirume ba ba lalu timume i duduraga howa balu kagoni. Ibugua inaga tombe dabame poda haealape helayagola tini dindini odopaya bida. Ngode Datagaliwabehanda i nde dara nahe kagoni ndobe. <sup>14</sup> Ami agalime waitigi handabe manga timbuniore halu wai hongo howa bialu baabo hagamada Ngode Datagaliwabehanda i hagira bialu hongo howa ila wai bialu ba dege bialu haabo ka. <sup>15</sup> Bamba nde i agali mini lene mbira harugo ainde áyu i yagibano howa taga pani nalu dindi abaluni bedo. Ani biruwa inaga yári aga bayaleru golo wahalu dara howa aga karulaganenaga ngaru mo karulo bedogoni. <sup>16</sup> Dugu dege bialu hewagola ainde inaga de darama bialu to howa inaga dengui arumahe koore bedogoni. <sup>17</sup> Iha ko bini mbira nawiore kogoyu genda ogoni iha bameore íbu nga. Ina mendeali kago mo ko holenaga mbirale mbira nabi henego ko. Ani bialu Ngode Datagaliwabehondo bi lalu howa inaga bu miniha ko mbira do nabi howa ibunaga deni tigabiore halu bi lalu henego ko.

<sup>18</sup> Dindi-o ina bi larogo hale habe. I homaragola inaga darama odo paya birago ina darama ogoni hora hadambi nahabe. Darama o ngagome ihondo ko biniru Ngode Datagaliwabe lamialu mo tiga bulenaga olelo ngelabe.✧ <sup>19</sup> Anigo áyu ogoni mbirali inaga bi lahaga dahuliya andagaha ka. I ko mbira nabi kogo ibu manda bu ka. Ani manda buwa ibugua i manani helalu inaga bi hongo howa laharagola wayali holebero.✧ <sup>20</sup> Inaga nenege bu karume i hame nale howa mo nagalone haga ka. Anigo ina Ngode Datagaliwabehondo bi lalu dugu biaabo haruli. <sup>21</sup> Agalime ibunaga nenege kago biamogo biagamada inaga bi lahaga biagome i Ngode Datagaliwabela bi lotiga buliya i biamogo bilo hamelo ko. <sup>22</sup> Irane i dindi ogoriani holene horo emene tubagi mali mbirabe be kirabe tobane ngagoni. Anigo nde i homene piaga hariga ngagoha poleberogo dindi ogoria i lone dai bulene nawulebira manda bido.

## 17

<sup>1</sup> Inaga hongo piai haruago i homolene kaware hapara haragoni. Ai homalime i ibilonaga maliaho nga. <sup>2</sup> Agali maru tigua i ho mabu bu howa mege bialu karia hendedo. <sup>3</sup> Ngode Datagaliwabe-o ina ila godi lalu bolangua habe nahe kogo. Mbirali mbira dombegua howa iha ko mbira nawida lalu inaga henge muwa bi lahelolo helolene karulape. Anigo agali mbira ogonidagua bia holene naheda. Anidago ai ini degeme inaga bi laholene agali ogoni haradagua habelo hameledo. <sup>4</sup> Inaga nenege o karume i biamogo bibe nahe kago irane inime agali uruninaga mini bayale gigabi wiaru mo wahai harigola tigua i bope holene dege mandabu ka. Anidagua bini kago ina ti bolangua nahelabe. <sup>5</sup> Ngode Datagaliwabe-o bamba bi mbira lagane ngago ogo, Mbiralime muni mbirale ngaru hame lowa ibu nenege kago bameore manani haru pu helayagua agali ogonibi ibu waneigini bu karubi tigua ko bibahende agali o biagome biyagonaga pani nolebira, lagane ngago manda bibe.

<sup>6</sup> Áyu Ngode Datagaliwabe ibugua genda ogoni i mo ngidago hondowa wali agali bu karume inaga denguiha hamiaga toloba halu kagoni ndobe. Ti bibahendeme ihondo mege bialu lalu, Ai Yobohanda mana ko timbuniore bu heneyagonaga pani nalu kagonida, laga bialu ka. <sup>7</sup> Inaga bu miniha genda timbuni howa dugu biaabo halu kogome inaga de to halu mbirale ngaru handabe nahe kogoni ndobe. Ani bialu inaga tinginibi obu wahalu kuni hangu bedogoni. <sup>8</sup> Wali agali mini bayalewi karume iha bidago hondowa ti mogo lowa lalu, Ibu Ngode Datagaliwabe mitangi nabiaga ka, laga. <sup>9</sup> Anigo ainde maru mana bayale tigabi bialu haga karu tigua mana ogoni wanaholebira. Tigua mana tigabi dege hongo howa bialu haabo holebirago waha.

<sup>10</sup> Ai bi lone ladaba. Ani laramigo ina hale howa tí bibahende mbiraoreli hangubi mbira mini gigabi wulenebi manda timbunibi nawi degedane hondolebero. <sup>11</sup> I dindi ogoria holene abale ereba haragonida. Mbirale ina bule lowa hame timbuni lo wirugo damene ai nabibehe ko. <sup>12</sup> I arumaha bedogola ai inaga nenege bedarume lalu, Ani ndo í wá kagoa bedegoni, laga ka. Tigua lalu, Wá holene tagira ibulebirago í genda nahabe, laga. Ani laragola ina handalu koria aruma dege ngane hendedo. <sup>13</sup> Ainde homenerunaga dindiha hangu polene maliaho kogo dindi ogoni inaga anda holebira. I dindi ogoniha padogola arumame i bu dambi holebira. <sup>14</sup> Ina homalihondo i aba lolebero. Ngoe bomborume inaga tingini nalu bedaru ti i aiya mbaliniru lolebero. <sup>15</sup> Ani loleberogo ai genda tandaga bu ngaruni ereba halu mani i bayale holene mbira wiarua lo manda nabi kogo i aginaga mini dunubiaho holeberobe. I mani bayale holebere, lalu aiwa langulebirabe. <sup>16</sup> Ina handalu koria i lone bayale ho dai bulenaga mini dunubia ho holene homenerunaga andagaha pu kogoria wulubadabe, lalu Yobohanda lene.

## 18

### *Ngode Datagaliwabehanda agali ko biaga karu pani nelo miaga kago lenego ogo*

<sup>1</sup> Yobohanda bi lai hayagola agali Suha dindiha howa ibini Bilidada ibugua lalu, <sup>2</sup> Yobo ina bi nale ne hariga ndibulo angi birulebe. Ina minime mitangi ala buwa bi lariyagua nde iname i baba bi loleberema. <sup>3</sup> Ina manda nawi nogo bulumaga aleda lo manda berego agi. <sup>4</sup> Inaga miniha keba holene ngelo bedegome ini mo ko haregoni ndobe. Yobo ina agua manda bide. Ina manda bu handalu keria Ngode Datagaliwabe ibugua ibunaga mana biaga ngago wahalu ina hameledego hangu bilo hameledebe. Ibugua mbirali ko biragonaga pani nelo mialu genda mo miaga ngago ibunaga mana ogoni mo aribia naholebira. Ibugua mbirale bibahende wabiai howa dindini heledaruni mo wahalu dindi dege ngelo karulapedabe. Ibugua dindi hari wedaru hela amu howa dindi hangu ngelolene ngabe. Anidagua nabulebira ndobe. <sup>5</sup> Agali ko biaga karu ti ira hale lamu hundia hagadagua Ngode Datagaliwabehanda uruni ti mo hundia hai holebira. Ti lone nadolebira. <sup>6</sup> Anidagua biragola maru karume ko biaga uruni andagaha hale lamu dowá wá ho ngaria nahondolebira. <sup>7</sup> Agali ko biaga uruniale karume tini ala hongo howa ibaga bu hayago ai áyu genda yu halu ma podope halu hendeore ibaga bu hagaya. Tigua agali mende kago ko bilonaga lo manda bu hayagome tiniha dai bialu tini mo ko hagaya. <sup>8</sup> Agali ko biaga urunime uliha niao wa ngagoria gabua minagadagua tigua ko biragome tini minaga. <sup>9</sup> Gono ngagoa nogo egaru dedaligobi agali ko biaga uruni tinaga ge do wiaabo haga. <sup>10</sup> Ti hariga poragoa agalime ega yari ge gono ngagoa do ngaligobi wulebira. <sup>11</sup> Mbirale mo gi holene tara tara ti ibagabu kagoa ibai halu talima ibaga biaga.

<sup>12</sup> Bamba agali ko biagaru ti homogo karulape henego áyu tiha tubagi hai halu yag-ibano ka. Ai ko holeneme ti poragoa mo ko hole manda manda bida. <sup>13</sup> Homolenenaga warago nahendene ko tara mbira agali ko uruni tiha anda ibalu tinaga gi ge tinginiru mo ko halu homelolebira. <sup>14</sup> Agali ko biaga ibugua manda bialu ibunaga anda munirume ibu holene mo bayale hene holeberobe tobaho karia dege ibu homolebira. Ibu homenerunaga andaha wali agali mo homa haga karia puwa ogoni ibu baba holebira. <sup>15</sup> Ibu ani homedagola mani ibu waneigini damenerubi ibu aria lenego mbira howa ibu andaga ogoniha napaluebira. Anda tabuanda karia wali agali maru bu karu tigua ibalu anda ogoniha ngubidagola ege tole dambini pauda ale mini saloba ngagome anda ogoni ngubirago mo ereba helonaga delolebira. <sup>16</sup> Agali ko biaga bu karuni ira piniha manda biragola yuni gilope halu gau lagadagua ti homai holebira. <sup>17</sup> Ani homaragola ti ala mini lene henego mani nde wali agali bu karume ti mitangi nahe

✧ 18:5: Yob 21.17

embedaho waholebira. <sup>18</sup> Ti homa nabi dindini heangi nime wá hayagoha heneya. Anigo tiha homa anda ibirangi ti aruma kagoha warape holebira. <sup>19</sup> Ti biragola ti aria lenego mbira waneiginiyaguabi ti aguaneyaguabi mbira nahe bibahende homai holebira. <sup>20</sup> Anidagua bidagola wali agali ni tagira ibiragohayagibi ni paliragohayagibi bibahende karume ogonidagua biya larago hale howa ti mogolai halu gi timbuni ho holebira. <sup>21</sup> Wali agali Ngode Datagaliwabehondo mini mbiraore nawi howa yu tiga nabiaga karu tiha mo ko holene uruni ale anda ibugu bulebira, lalu Bilidadahanda Yobohondo lene.

## 19

### *Yobohanda Bilidadahondo ladai binigo ogo*

<sup>1</sup> Bilidada ibugua bi lai heagola Yobohanda ogodagua ladai bini. <sup>2</sup> Tígua bi laramirunime i biamogo nabi howa iha tandaga mo ngirimigo angi lamaro buleberamibe. <sup>3</sup> Ainde tígua i warape halu mo ko dewa harimigo t́ni taga nabidabe. <sup>4</sup> Ainde Ngode Datagaliwabenaga deni ko mbira ina bu hewagua nde t́naga ndogo ininaga koyane ndodabe. <sup>5</sup> Tígua handalu kamiria i agali ko halu t́ni bayale haruabe. Genda ni yu koruni hondowa ai i agali ko kagoni lowa tígua i mana laramibe.

<sup>6</sup> Anigo ina ko mbira nabioire henego o kogoni ndo laruyagoda. Genda uruni Ngode Datagaliwabehanda ibunaga hameme ibiledagoni. I áyu ibuninaga gonoha do wiwaria hadedagoni. <sup>7</sup> Ainde Ngode Datagaliwabehanda i mo ko halu baore bidagoni. Ani biragola ina nde i nabe wahalu waha lowa ibuni olalu kogoni. Ani larogola ibugua mana tigabi bialu ina larogoni hale howa ladai nabi ka. <sup>8</sup> Ibugua i polenegoha pabe helai kagola ai i polene diri nahende kogoni. Hariga wiaruni aruma holeneme dambi hai heleagola hariga handabe naheore kogoni. <sup>9</sup> Ibugua inaga mini mo ko heagola ainde wali agali bu karunime i agali ko biaga kalo manda bidagoni. <sup>10</sup> Agalime anda mbira gialabaga biagadagua ibugua i mo gialabagabu wa kagoni. Ibugua i bayale holiya biamogo bulubadalo manda bu harugo. Ainde mini ogoni wirudaruni gialabaga bu wa kagoni. <sup>11</sup> Ngode Datagaliwabehanda ihondo keba halu ibunaga waitigihondo bulene wiadagua ihondo bialu kagoni. <sup>12</sup> Ibunaga wai biaga ami agaliru i andagaha hariga bama anda ibuwa abale ho mabu bialu i minu bayagoni.

<sup>13</sup> Ngode Datagaliwabehanda i hamenerume i yu wahalu kaundiaha heleda. Inaga nenegerume i embeda haya. Inaga deni i dindi tarali hene mbaule haya. <sup>14</sup> Ininaga darama mandagiorerunibi nenegeore henerubi bibahendeme i yu wahalu piai haya. <sup>15</sup> Agali maru abale i andaga ibuwa palu hagarume áyu i mo embeda haya. Wali inaga biabe bia halu biragarume i agali tara handale halu piya. <sup>16</sup> Agali inaga biabe biahaga hearu olalu hewaria mbiralime ya lalu ini hewaria naibiya. Ina bi bayaleore lalu hewariabi tigua i dara halu hondo ibu nabiya. <sup>17</sup> Bi lole ne ha larogola ne harigaha howa ngu tagira ibirago handalu wali ini one bedagome i bedogoria kaware naibi ohaya. Ini hameneorerume i ko tara ale mbira hende tingi haya. <sup>18</sup> Waneigini biru hearume i mo ko halu mege biya. I heyalu dindi mbiraha pialu hewaria ihondo bi ko laya. <sup>19</sup> Iniore nenegerume i mangaore haya. Maru ina gubalini harulirume i handa tara halu erembira ngialu i warape holene manda biya. <sup>20</sup> Ainde i obi kuni hanguore kogoni. Mo koore helayagome homabehe biru ngogonidago. Ainde i homolene hariga agileme pai haruabe.

<sup>21</sup> Wali agali inaga nenegeru-o Ngode Datagaliwabe ibuninaga gime i minu bayago. Ainde i dara halu are ladaba. <sup>22</sup> Tígua nde Ngode Datagaliwabehanda i mo ko halu biyadagua dege beramibe. Áyu mo koheore bedogoni hendedamigo hondowa nde t́naga bime i bope dege haramigo agi.

<sup>23</sup> Ainde inaga bi ogo ereba nahe manda biaabo helonaga agali marume mbugaha gilibu wiyagua karulapeda. <sup>24</sup> Inaga bi ogoni ereba nahelo agalime ege tole timbuni



ngarunaga nabi tara tole podagame bi ogoni wiaabo helonaga gilibu wiyagua nde karulapeore ogoni. <sup>25</sup> Anigo ai Mbirali ihayagi howa tigatiga lalu biamogo bulene kalo manda bido. Mani ogoniibunime bi lotiga buliya biamogo bule ibulebira. <sup>26</sup> Inaga tingini ogo ibu togo biyaguabi ina Ngode Datagaliwabe de handaore bulebero. <sup>27</sup> Wali agali maru tigua hangume dege nahondolebira. Ininaga deoreme Ngode Datagaliwabe handaore bulebero. Ibuore hondoame homo tongolo handalu kogoni.

<sup>28</sup> Tigua ogodagua lalu kamigo nde genda ibalu karuni tene Yobo ibunigo ai iname i ko biyagonaga manani dabamiya lalu kamigoni. <sup>29</sup> Anigo tini de handalu dege halimu. Bi urunidagua laramigome Ngode Datagaliwabenaga miniha ka lalu kamiria tini nde handa dai buligo. Ani biragola wali agali mana ko biaga kamiru Ngode Datagaliwabehanda ibunaga mana tigabi dabaga ngagoria ibu holene winidalo handa walia holeberamiore, lalu Yobohanda ladai bialu lene.

## 20

### *Agali ko biaga karu dindini tigi mbira hangu holebira lenego ogo*

<sup>1</sup> Yobohanda bi lai heagola Namali Sobahanda ladai bialu lalu, <sup>2</sup> Yobo-o i hale harene. Ina bi larigome i mo keba harigola ainde mini burugulo bedo. Anigo ina bi larigonaga abale ladai bero. <sup>3</sup> Ina keba bi larigome ina mo taga henego bedema. Anigo ina inaga bi uruni tigatiga ladai bulene manda bido. <sup>4</sup> Bambaore Ngode Datagaliwabehanda wali agali dindini pigane wabu helayangi howa hama ibalu ayu kamagoria tagira ibidago <sup>5</sup> agali mana ko biaga kago ibu turu howa miniha dungulo holene henge emene tubagi dege wiagago i manda bidegoni ndobe. <sup>6</sup> Agali ko biaga ogonibi kagome ibu abale timbuni halu wali agali marunaga deni mini lene daliga haga. Hari daligaore hari beralibaha bolanguahe kaligobi haga. <sup>7</sup> Anigo agali o biago ibuni ti to ngago ngu bialu ereba hagagobi mo ko halu erebaore holebira. Ani ereba kagola maru ibu mandabi karume agali ogoriani haraligo agua biya. Ayu ibu ani kabe lolebira. <sup>8</sup> Agali ko biaga ogonibi kago ibu mbiraga emaga hendenege ereba hagadagua ibu ereba halu wali agali karume ibunaga dengui lone nahondolebira. <sup>9</sup> Ibu daluni ala hearia hendenege ai nahe lone nahondolebiraore. <sup>10</sup> Anigo agali ogoninaga waneiginiru ti aba ibugua yagibano karu mo hondo howa tinaga mbiraleru page bigi bini biaru yadai bule yagibano uruni ti karia puwa dara halu biamogo bia lama polebira. <sup>11</sup> Ibu igiri wene daliahe kaore ibunaga hongo biba halu abale homalu dindi abalu ale holebira.

<sup>12-13</sup> Agali mana ko biaga kagome ko uruni hame timbuni lowa wali agalime tomo dendebiru mbira nalu howa abale mbedogo nabi ne harigaha hayu yu biragadagua mana ko yu haabo hagaya. <sup>14</sup> Anigo mana ko bialu kagome tomo bayale narago mbedogo biragola tomo ogoni ko tomia ale heba naragola tinaga tiniha howa mo ko haralidagua mana ko biragome kaubialu ti mo ko holebira. <sup>15</sup> Agali ko biaga kago ibugua muni dabudaburu dewaore page minigo wu karia Ngode Datagaliwabehanda agali ogoni tomo dewa no karia tombeha balua howa magu taguiralidagua mbirale tara tara wu karu mo wahai holebira. <sup>16</sup> Agali ogoniale kago nogombi tomia pale ngagome mbirali hayaragola homaralidagua tinaga mbirale ilo mu bu ngarume ibuni bo waholebira. <sup>17</sup> Ibugua mbirale uruni mo mogobu wialu howa ibuni turu howa bayale holobobe tobaho heaore homalu turu holene ogonibi nahondolebira. <sup>18</sup> Ibugua muni mbiraleru erekui biabe bialu mo mogobu wialu hayaru ai mbirale uruni mo ngelowa turuho ha nabulebirago irane Ngode Datagaliwabehanda mbirale uruni agali mendeme mo yu pelolebira. <sup>19</sup> Agali ko ogoni ibugua yagibano bu hearu dara nahe howa ti hendedape halu tihondo mana ko bialu o tara tara howa ke halubi tinaga anda bu hearu ti karulo haga biya. <sup>20</sup> Horo bibahendengi agali ogonibime mbirale

✧ 19:26: Iba 17.15, 1 Ko 13.12, 1 Yo 3.2

mendealinaga ngago de dimagoli hama ibaga biaabo halu bame ha nabi hame dege timbuni lowa taya biaabo haga. Anidagua bialu kagola Ngode Datagaliwabehanda ti mbirale uruni yu helo wa naholebira ndobe. <sup>21</sup> Wali agalime tomo bayaleru ngagola abale nai hagadagua agali ko ogonime mbirale dimagoli harago mo ya dege bialu mani mo yulene nawulebira. Anigo ibunaga holene ogoni tigi mbira hanguni halu ereba holebira. <sup>22</sup> Ibugua mbirale bayale dewa uruni mo wu kangi genda timbuni ibuha anda ibiragola ibuni dambi halu bope holebira.

<sup>23</sup> Agali ogoni ibugua mbirale dewaore mo wulene hamelo kaore Ngode Datagaliwabehanda ibu mbirale mulubadaruni keba timbuni ho howa genda tandaga tara tara ngaru mo ya haragola ibuha wu tolo holebira. <sup>24</sup> Ibugua waitigirume wai biaga ayu tibu ne gadele aeaneme wabini mo yalu ibira handala ibu dibulilono ibida pialu karia timu boronosime wabini yayagome bade halu nogoba holebira. <sup>25</sup> Ani nogoba haragola timume erembirahayagi dene ngarale bolatagi kagola dugulebira. Ani duguwa handalu karia agali ko biago ibunaga darama timu biagoria kago hondowa ibuni gi timbuni holebira. <sup>26</sup> Ibunaga muni dabudaburu bayale mo mogobu wiyaruni bibahende mo ko hai holebira. Agali ko biaga biagobi ibu waneigini damene bu karubi bibahende ira dalude timbuni dedagoria dai helolebira. <sup>27</sup> Ai hari daligame agali ogoninaga ko ngaru bibahende ha pani haragola dindi ngagome agali biago manani howa ko birigoni lalu latagi helolebira. <sup>28</sup> Ngode Datagaliwabehanda ibu baba keba timbuni haragome iba li timbuni ibalu mbirale mbira yu wa nahe yu piai hagadagua ibunaga muni mbirale wiyaru mbira ibira nahe hilu yalu piai helolebira. <sup>29</sup> Ngode Datagaliwabehanda agali ko biaga karunaga pani ogonidagua mule lowa manda manda bu kago ti kagoaha ibilalu bo wahai holebira, lalu Sobahanda Yobohondo lene.

## 21

### *Agali ko karu tinaga holene bayale nga lenego ogo*

<sup>1</sup> Yobohanda Sobahondo ladai bialu lalu, <sup>2</sup> Tigua ina bi larogo baya hangu hale hadaba. Ai tigua ogonidagua birimiyagua inaga bu miniha mo palia holeberemi. <sup>3</sup> Ina bi ala loliya hondo bira. Ina bi lai kogola Soba ina i mege bialu bi loa biyagua nde ani labelo. <sup>4</sup> Ina bi o larogo agalihondo ndo laro. Ina Ngode Datagaliwabehondo bi lalu kogola ai ibugua ihondo bi ladai nabi kagome inaga miniha tandaga timbuni biragola kogoni. <sup>5</sup> Tigua i handayaho biruwa tinaga gi hayalu mogolo biralimu. <sup>6</sup> Mbirale ko gendabi damene iha ibiyaru mitangi bu dai bialu koria ini mogo lowa tingini duru laruli.

<sup>7</sup> Agali ko biaga karu Ngode Datagaliwabehanda ti dindini lu halu hodagua helagayo aginaga helagabe. Ani helalu tini mo timbu halu mbirale muni dewa mialu mo homogo helo helagadago irane agibe. <sup>8</sup> Agali uruni tinaga waneiginibi aguanebi dewaore bu karu ibu kane dege ti anda hai harago hendelo helolebira. <sup>9</sup> Ngode Datagaliwabehanda agali ko uruni ti kagoria genda mbira naibilaga kagoni. Ti one waneiginibi bayale dege halu tiha gi holene mbira nawiagaya. <sup>10</sup> Tinaga nogo bulumaga wangabe karume angibuni karu hende laragola urunime igini wiraru mbira ko nahe bayale dege hono yu haga ka. <sup>11</sup> Agali uruni tinaga waneigini dewaore karume nogo sibi igini pora bialu gini biagadagua turu hagahaga bialu ka. <sup>12</sup> Agali maru ngida bagaru tabage bagaru pilipe lagaru tigua mbirale uruni biragola waneigini uruni tigua turu howa mali lialu iba ganabi lalu haga ka. <sup>13</sup> Agali ko uruni ti dindini holene bayale dege wiaabo hagaya. Ti homarangi tini genda tandagabi mbira nahe bayale paliagadagua homalu homenerunaga andagaha hole piagaya.

<sup>14</sup> Tigua Ngode Datagaliwabehondo lamialu lalu, Iname i talima ibule ndo kamago i ina helalu pobe, laga ka. <sup>15</sup> Tigua la dege bialu lalu, Ngode Datagaliwabe Hongo Haiheore ka layago iname ibunaga biabe biahaga holomaya ibu aigo kabe. Iname ibuhondo bi larimiyagua nde mbirale ibuha howa ibini bayale agile mo yu holeberemabe. <sup>16</sup> Agali

ko biaga uruni tinaga hongoni howa mbirale bayale ngaru ngelo hagago uruni tinime erekui biabe bialu mini ndo yu haga. Ani biaga kago manda bialu ina tinaga bi hale howa talialu nabulebero.

<sup>17</sup> Ngode Datagaliwabehanda agali ko biaga karu halu dewa balu homelaga ndo bada. Ani bialu mo ko holene ngarubi tiha dewa naibilaga. Ibugua agali ko biagarume ko biyagonaga keba howa tiha genda dewa mo miaabo nahaga ka. <sup>18</sup> Datani ko gaule ngaru puyabu ibiragome hilo yu piagadagua Ngode Datagaliwabehanda agali ko uruni pani miaabo nahagaya. <sup>19</sup> Tigua bi ogodagua laga kami, Ngode Datagaliwabehanda agali ko biaga bu karume ko biyarunaga pani tinaga waneiginime na aribia helaga, laramili. Anigo ina mandabu handalu koria anidagua bulenego tiga nabidago Ngode Datagaliwabeibunime agali ko biaga karu tini ko biyagonaga pani nolene mo ngiyadalo manda bilo pani tiniore nelu mulene nga manda bido. <sup>20</sup> Tinimeore ko biragola Ngode Datagaliwabe Hongo Haiheore kagonaga keba holene mo walia hayadalo manda bilo pani tini nelu mulene nga. <sup>21</sup> Agali uruni ti dindini holene ha maro birangi homalu tinaga one waneigini helalu homayago agua haruabe lo manda bulebirabe.

<sup>22</sup> Dahuliyaliru ti nde ina agali kama ale ndo kagoyu Ngode Datagaliwabehanda uruni tibi mo tale biaga ka. Anidagua biaga kagodago ainde iname ibuhondo mbirale bayale ogo ale bibe lalu lawai habehe mbirali ai kabe. <sup>23-24</sup> Wali agali maru ti dindini holene bayaleoreni hearia handaru. Tiha genda tandaga holeneru mbira anda naibi haabo halu tinginibi ko nahe homolene tuore hayagola homame ngola haga biya. <sup>25</sup> Wali agali maru nde ti dindini holene koore haga biyaria handaru. Wali agali uruni ale heagome tiha turu holene nawi tandaga gendala haabo halu homame ngola haga biya. <sup>26</sup> Anigo wali agali bibahendeore homagane howa homaliha palialu ti ogobi dege dege haga. Tinaga tingini ngagoria himi ngoerume biru ngoai haga.

<sup>27</sup> Ai tinaga mini ngamigo i manda biaiho ko. Tigua i bope holene dege mandabu bedemi. <sup>28</sup> Tigua bi laramigo mbirale mo ko holene ngago damene agali timbuni ko biaga ibuha ibalu ibu damene bu kagoha mo ko halu maru karume lone handa nabi ereba hai holebira, larimi. <sup>29</sup> Anigo tigua agali dindi mbira mbirani pu ibu biraruhondo lalu agali ko biaga karu tiha agi biagabe lalu bi hale nahe kami bada. <sup>30</sup> Uruni tigua ti langialu, Ngode Datagaliwabehanda keba halu wali agali dindi mbira mbirani bu karu pani nelu mirangi ibugua wali agali ko biaga karu pani mialu bo wanahe ti bayale helo wahaga, lalu langigi bulebira. <sup>31</sup> Anidagua biaga kagodago ai agali ko biaga kagohondo, Ti ko birimi, lowa dabaki bulene ai kabe. Tigua ko birimi lolenebi ko biyagonaga pani nelu mulenebi mbirali naholebira. <sup>32-33</sup> Agali ko biaga uruni ti homarangi wali agali dewaore ibu ngoai howa homenenaga tingini homaliha mo yu puwa hora haga. Ani bialu agali marume tinaga homali baya hangu handayaho helagaya. Ani bidagola agali ko uruni ti tinaga homaliha ema nabi palu wiagaya. <sup>34</sup> Mbirale uruni biaga wiago mitangi berogola ti agali bi nagalone dewa laga heago ale howa ihondo ke halu kamida lo manda bido. Tigua mandabu handalu kamiria bi ogoni aleme inaga miniha mo hongo holobadalo manda bide mibe. Daraba bi ogonime i emeneorebi mbira biamogo nabioire ndobe, lalu Yobohanda lene.

## 22

*Yobo mini beregedayagua Ngode Datagaliwabe ibugua ibu mo bayale holebira lenego ogo*

<sup>1</sup> Yobohanda bi lai heagola Temana tanoali Elibasahanda Yobohondo lalu, <sup>2</sup> Ina agali damene kamarume Ngode Datagaliwabe kago mbirale mbira biamogo bibehe kamabe. Ani nabibehe kama. Agali mini gigabiwi karumebi nabibehe dege ka. Agali tini hangunaga biamogo bigi bibehe kagoni. <sup>3</sup> Ina mandabu handalu keria inaga mana

✧ 21:19: Yob 5.4 ✧ 21:28: Yob 18.15, 18.21 ✧ 22:2: Yob 35.6-8

tigabiore bialu kegome ainde Ngode Datagaliwabe ibunaga biabe bilo biamogo bia holebirabe. Ani bialu ina mana bayale beregomebi Ngode Datagaliwabe ibu bayale helonaga biamogo biagabe. Ani ndoyago. <sup>4</sup> Ina Ngode Datagaliwabe Hongo Haiheore kagonaga andaneha howa ibu mitangi bialu lotu lalu haga keyagua ina mandabu handalu keria ani bialu kegonaga ibugua i manani helowa mo tiga bulebirabe. Anidagua nabulebira. <sup>5</sup> Yobo-o ina ko dewaore bialu haridagome iha ko ngelo bedegoni ndobe. Anidagua biridagome Ngode Datagaliwabehanda i manani heledagoni.

<sup>6</sup> Ina mana ogodagua birida. Inaga nenege hearume mbirale wiaru dano hole ngi layagola dano helo muwa mani dano hanga lalu tinaga mbirale mbira yu howa tihondo miadai nabi yu haabo harida. Marume tinaga aga golo ngiyagola ina tinaga aga dano haridago yadai nabi yu haabo harigome tinaga tingini dagare ho helarigoni.\* <sup>7</sup> Mbirali iba noa howa kembobe lebolaho heago hondowa iba nelo hambu mia nabirida. Mendeali garibilo heago hondowa tomo nelo namirida. <sup>8</sup> I agali timbuni mini lene howa mbirale bibahende ini hameledego ale bulene karulape manda birilida. Agali mendenaga dindi wiaru ina bame karulo harida. <sup>9</sup> Agali homeneru one dalo berearume ti biamogo bia lama ibiyagola ina ti biamogo nabi howa bo pelarida. Waneigini aiya abala homene karubi nde ani dege bialu ti biamogo bulene nahe howa bayale helonaga ina biamogo nabi bame helo waharida.\* <sup>10</sup> Ina mana urunidagua bialu harigome ai ayu i minu yania halu mo ko holene abale ibu ho mabu biai halu i mo gi haragoni ndobe. <sup>11</sup> Aruma ale timbunime i bu dambi heagola ina mbirale mbira handa amunana bialu handabe nahe bedegoni. Ani bialu iba li timbuni aleme i bu dambi henego bede.

<sup>12</sup> Yobo-o ina yakundi bu karuni de handadaga halu hari daligaha kago hendedegoni. Ngode Datagaliwabe kago ibu daligaore howa yakundi biaruni handadali howa de handaga ka. <sup>13-14</sup> Urunime inaga mini mo heya haragola ina ogodagua laga ke. Ngode Datagaliwabehanda agile dege manda bidabe. Ibu hari daligaoreni ibagabu kagola hari beraliba mindibigome ibu ho ge halu aruma holene ngagomebi dambi halu bidagola ibugua inanaga dengui nahondolebira. Ibugua mana iname beremago de hondowa ko birimago agua hondolebirabe.†

<sup>15</sup> Anigo Yobo i agua manda bide. I hariga ko ala tawe agali mana ko biaga hearu ti pene ngatoria lone pole hongo ho kebe. <sup>16</sup> Agali uruni ti dindini lu haludagua nahe heaore dege abale Ngode Datagaliwabehanda tinaga dindi ogoria holene biba helaga biya. Anda mbira iba angeni haparaho kago iba li timbuni hongoheore ibalu anda gialabaga bialu ibame yu piai hagamaga agali uruni mo ko halu bo wahai haya. <sup>17</sup> Agali uruni tigua Ngode Datagaliwabe erembira mialu lalu, Ngode Datagaliwabe Hongo Haiheore kago ibugua inahondo agi bulubadabe, lene. <sup>18</sup> Anigo tigua Ngode Datagaliwabe ibunime mbirale bayale wiaru yu helaga biyago manda nabiyu. Anidagua biyagonaga ina agali ko uruninaga bi larago hale nahe wahalu tinaga mini ngago i talia nabulebero.\* <sup>19</sup> Agali ko nabiaga tigabi karu tigua Ngode Datagaliwabehanda agali ko biaga uruni pani mirago hondowa ti turuho haga. Mbirali ibuha ko bini mbira nawi kagome ko biaga karu hondo oba halu mege biagaya. <sup>20</sup> Tigua mege bialu lalu, Waitigi uruni mo ko hai haya. Ani bialu tinaga mbirale bayale wiaru damene bibahende iraha dai hayagoni ndobe, laga ka.

\* **22:6:** Ayu mana Yobohanda birida lalu Elibasa ibugua layadagoni Isaraele wali agalime nabulene nga lalu mamali mana lowini nga. Te ogoninaga Haru Tagira Penego 22.26-27 handalu Loma Binigo Mo Miaganaga Biabe 24.6, 10-13 handa dege bibe. \* **22:9:** Man 15.7-11 † **22:13-14:** Ainde Elibasa ibugua Yobonaga mini wiago manda nabi howa lene bada. Yobo ibugua ala lenego ogo, Ngode Datagaliwabe ibugua wali agali ko biaga karu pani mialu bo wanahe ti bayale helo wahaga ka, laya. 21.29-33 ngago de handabe. Ai Yobo ibugua bi ogo, Ngode Datagaliwabehanda agali ko biaga uruni de nahende howa ibu ha do haruabe, naleya. \* **22:18:** Yob 21.16

<sup>21</sup> Anigo Yobo-o hale habe. Ai áyu Ngode Datagaliwabela bi mo tiga bialu lone mini mo mbiraore habe. Anidagua biriyagua nde ibugua í lone biamogo biragola bayale holebere. <sup>22</sup> Ibugua íhondo lawai holebirago bayuwa mo yaluibunaga bi langirago ínaga miniha yu tiga bibe. <sup>23</sup> Anigo ína genda yu keruni wahalu mini mo dindi halu Ngode Datagaliwabe Hongo Haiheore kagoha dai biriyagua nde ibugua ínaga holene lone mo bayale helolebira. Ani bialu mana ko íni andaga bialu haridaru wahai halu ko ngagoria nahe wandialu habe. <sup>24</sup> Ínaga ngolo bayale mo ngeru dindi ko ngagoha mo waholene nga. <sup>25</sup> Ani bialu Ngode Datagaliwabe ibuni ngolo siliba bayale uruni wiyagoria ho aribia helo helabe. <sup>26</sup> Ína ogonidagua bialu Ngode Datagaliwabe Hongo Haiheore kagohondo mini mbiraore wia daibu hariyagua nde ibugua íhondo bayale biragola íha mo palia holene karulo holebere. <sup>27</sup> Ína Ngode Datagaliwabehondo bi laregola ibugua ínaga bi larego hale halu mbirale ngi larego ngulebira. Ani biragola ínaga mbirale buleore lala Ngode Datagaliwabehondo bi lo wirigo turu howa biai holebere. <sup>28</sup> Ani bialu ínaga mbirale mbira bule lala miniha magoyu harengi Ngode Datagaliwabe ibugua bule manda bu keru mo bayale holebira. Ani biragola í hariga poregocha wá kagoria pialu puabo holebere. <sup>29</sup> Ngode Datagaliwabehanda mbirali ibuni mo yaraga halu kago bope halu mendeali ibuni mo dindiha haga kago pele mialu haru dai bulebira. <sup>30</sup> Ibugua deni íha ko mbira para nahe mana tigabi bialu kego hondowa ibugua wali agali ko biaga karu dara howa pele mialu haru dai biagadagua íbi ko mbira nabi keyagua í mo wialu haru dai bulebira, lala, Elibasahanda lene.

## 23

### *Yobohanda lala, íha ko bini mbira nawida lolebira, lenego ogo*

<sup>1</sup> Yobohanda Elibasahondo ladai bialu lala, <sup>2</sup> Hale hadaba. Áyubi nde ína miniha genda yu haabo kogonaga Ngode Datagaliwabela bi dewa lala haabo ko. Ína dugu bialu kogo wahole manda bialu koria habe naheore haragoni. <sup>3</sup> Ína Ngode Datagaliwabe íbu agoha kabe hondole hamelo kogoni. Ibuni godi hale hagani kalo manda bidole nde áyu ogoni abale íbu wanakuini pu kole. <sup>4</sup> Ani pu howa agalime godi hale haga deni howa bi lagadagua genda yu korunaga bi íni biamogo bilonaga latagi kole. <sup>5</sup> Ína bi ani ledole ibugua ínaga bi ladai bialu agi larabe hondowa íbunaga miniha ogoale wiarua lo manda bidole. <sup>6</sup> Tígua manda bialu kamiria Ngode Datagaliwabehanda íla waitigi halu íbunaga hongo gibiorehe kagome íbo hangedape holebirabe toba kamibe. Anidagua nabulebira manda bido. Ibugua ínaga bi larogola hale mia howa bayuwa hale holebira. <sup>7</sup> Í agali tigabi howa íbunaga deni godi lole pu kole í íbula bi ladene bialu ledole. Ani bialu ínaga bi hale howa ibugua tigatiga latagi halu íha ko bini mbira nawida lolebira. Ani bialu íla godi lolene winigo bibaore holebira.

<sup>8</sup> Ngode Datagaliwabe íbu ni tagira íbiragohayagi kabe toba howa hondo pirugola ogoniha íbu naheya. Ni paliragohayagi kabe toba howa hai bialu hewaria ogonihabi íbu nahe degeya. <sup>9</sup> Ngode Datagaliwabehanda íbunaga biabe dindi uyurahayagibi dindi abene unurahayagibi bialu hagago ai urunihabi hearia í nahende dege. <sup>10</sup> Anigo Ngode Datagaliwabe íbugua ínaga hariga porogoha bibahende íbu manda biai ka. Ibugua í abidabe hondole ba handayagua nde bayaleore ngolo aledane hondolebira.\* <sup>11</sup> Ína hariga tiga tigaore íbuni piaga ngagoriani íbagabu haruli. Ína hariga ogoni wahalu mendeni pu tara nahe ko. <sup>12</sup> Ibugua bi ledaruni ínaga mbira wanahe bibahende ledadagua taluwa bialu haabo haruli. Íbunaga bi dendeiore tomo dendei tara tara ngaru bagi hene lowa nga.

<sup>13</sup> Anigo Ngode Datagaliwabe íbugua mbirale mbira bule manda biyagua nde aiwa nabibe labehe kabe. Ibugua bule hame ledago biaore bulebira. <sup>14</sup> Ani biaga kago

\* 23:10: Iba 66.10, 139.1-3, Ya 1.12



ibugua iha mbirale bule manda manda bu ngago biaiore holebira. Ibu miniha manda tara tara ngaru bibahende iname manda nabibeheore kamagoni. <sup>15</sup> I áyu ibunaga wanakuihayagi howa ibugua mana ogonibi biaga kago manda bialu koría i gi howa inaga gubaliniha duru lalu bedo. <sup>16</sup> Ngode Datagaliwabe Hongo Haiheore kago ibugua inaga hongo bibahende bo pirilope hayagola i gi timbuni ho kogoni ndobe. <sup>17</sup> Abale i ogonidagua ndo henego ai áyu ibugua aruma holene timbuni iha ibilayagola i mo ko hene ndo. I Ngode Datagaliwabe kago mitangi bialu mogolo kogoni ndobe, lalu Yobohanda lene.

## 24

### *Ngode Datagaliwabehanda mana tigabi ndo bira, lalu Yobohanda manda binigo ogo*

<sup>1</sup> Yobohanda laabo halu lalu, Ngode Datagaliwabe Hongo Haiheore kagome wali agali mana ko biaga karu manani howa ko biya lalu dabaki bulene horo pongo nawi kagonida. Ainde wali agali Ngode Datagaliwabehondo mini mbiraore wu karume ibugua ko biaga karu manani abale nahelaga kagonaga irane ti manda nabi ka. <sup>2</sup> Mana ko biaga maru bu karume mendeali kagonaga dindi ti page karulole tubarini ege tole berelama pedago emene hela amu haga bialu tinaga dindi ogonibe toba helo ani biaga ka. Ani bialu mendealinaga nogo sibi kago hado page bialu tinaga nogo sibi kagoha mandagi biamaga ho helaga. <sup>3</sup> Agali ko biaga urunime waneigini aiya abala homene karunaga nogo dongi kago hado page biaga ka. Ani bialu wali dalo bedarume mbirale dano haragola agali ko biaga urunime wali dalo uruninaga nogo bulumaga kago dano hangaragola yadai bule dano ko lalu wali uruni tini mitangi bu helonaga haru halu piaga. <sup>4</sup> Agali ko biaga urunime wali agali muni mbiraleru burupale karu mo gi haragola tini hameme mbirale mbira bibe nahe haga. Tigua gi timbuni halu agali ko biaga uruni kagoha nahe ti kaundiaha ha bagi haga ka. <sup>5</sup> Wali agali yagibano darabi uruni ti dindi ko wali agali nahaga ngagoha hama piaga. Ani pu howa ti mbirale mbira nolene nawio redagola nogo dongi gabuame tomo nagane aleru hai bima ibagadagua ti waneiginirunaga taya bima ibaga bialu holebira. <sup>6</sup> Tigua mendeali dalu ngagoha pialu tomo ko yu wahene ngaru ilu mogo bima piaga ka. Agali ko biaganaga pu mbira lini daga mini gerebi mabuha lini bogabi dedago agali biabe bihaga karume do yalu piai heagola yagibano uruni ti nde mani ibu aribia howa ko maru yu wahaga bini dedaru do naga. <sup>7</sup> Mbiraga tinaga tingini yi ho paluene mbirale mbira nawidagola bame dagareho paliaga. <sup>8</sup> Ti dindi hari ngagoha pu karia iba dalu ibiragome ti damiaga. Ani biragola tinaga anda mbira naheore bame howa ti hari uruniha egeanda kagoha pialu dalu tu biraga.

<sup>9</sup> Agali ko biaga urunime wali dalo bedagoha pialu tinaga waneigini karu gililo yalu puwa tinaga garabaya biabe ale biaga helo haru piaga. Ani bialu wali agali yagibano karuhondo dano helo muwa ogoninaga waneiginiru mani dano hangaragola miadai bule dano ka lalu manda biaabo helonaga manane waneigini ogoni minu yalu piaga. <sup>10</sup> Anigo yagibano uruni ti aga bulene nawiore darabi mbira biraga. Ani biruwa mendeali mabu ngagoha widi gandulo ngago mo mogo bulene biabe hangu bialu howa tini tomo nolene mbira nangiragola garibi timbuniore lo haga. <sup>11</sup> Tigua ira olibe bu karu dombeneha howa olibe lini dambialu ibane weli helo wabiaga. Ani bialu marume gerebi lini dedago dalu waini iba wabule ege toleni uli guabini ngagoha do ngelowa pingidelo geme hingedalu haga. Ainde ti ira lini uruni ibane mbira nole ndo biabe hangu bame bialu howa tinaga dendepe lebola ho haga. <sup>12</sup> Tanoha agali ko biaga urunime wali agali mo ko hene hearubi homo wiarunagabi tigua dugu bialu ti biamogo bia lalu Ngode Datagaliwabe olalu ka. Ani olaragola ibugua tinaga genda wu hayadaruni mitangi nabi tinaga bi hale nahaga ka.

✧ 24:2: Man 27.17, Min 22.28, Hos 5.10

<sup>13</sup> Ngode Datagaliwabehanda mana hameledago marume bulene hame nalaga. Ti dogo halu mana bayale bulene ngago baba waitigi halu bibe manga haga ka. Ti wá holene hariga ngagoria pobe manga howa arumanaga mana ngago hangu bialu haga ka. <sup>14</sup> Egerebagiore ni natagira ibidaha agali ko biaga karume yagibano karu bo wahole tagira piaga. Ani bialu mbiraga mbirale ngaru mo page bule taya bialu haga ka. <sup>15</sup> Agali one bedaru kayu biaga karume ne lelo howa ne laragola ti abale pialu agali mende one baba kayu yu palue piaga. Tigua ani pialu mendealime i abogodalo manda nabilo tinaga dengui minu kabu bialu piaga. <sup>16</sup> Mbiraga pagealime anda ti dalu anda puwa mbirale uruni mo page biaga. Ani bialu horombe tinaga biabe biagadago bulene nakarulapedagola tini andagaha bira do haga ka. <sup>17</sup> Agali maru karume mbiraga ibagabu holene gi hagadagua agali ko biaga urunime ti mbiraga ibaga bialu horombe ibaga bulene gi haga ka. Aruma holeneme ti mo turu haga ka.

<sup>18</sup> Agali mana ko biaga karu ti dindini lu naholebira. Iba li abaleore ibalu hilo yalu piai holebira. Tinaga dindi ngago Ngode Datagaliwabehanda ko ha laragola mo ko hai holebira. Ani mo ko hai hene ngagola mbiraoreli hangubi mbira tinaga gerebi mabu ngagoha biabe bule pialu karia nahondolebira.\* <sup>19</sup> Ni tandagabi dadali harangi dindiguni ngago do iba halu ereba hagadagua dege homeneru dalu ngagoha ko bialu hene homararu ti ogoniha haru pialu pu erebahaga nga. <sup>20</sup> Tinaga tingini ngago himiru ngoe bedaru tinaga tomo nolene dendebe taraore mbira nga. Ani bialu agali uruni mbirali abogo ogoria hene nalolebira. Ti ayaore bedagome embedaho waholebira. Ani bialu mana ko tigua bialu haga ngagobi ereba hai holebira.

<sup>21</sup> Anigo ina bi ogodagua laro. Agali ko biaga karu tigua wali maru waneigini taba hanabe nahe bedaruhondo mana ko biaga hene. Ani bialu wali dalo agalini homene bedaru dara howa biamogo nabiaga dege hene. <sup>22</sup> Anigo Ngode Datagaliwabehanda ibunaga hongome agali mini lene timbuni karu bope halu homelabehe kagoni. Ibugua ko biaga karu ti dindini lu helo nahelaga ka. Ti homolene nga manda biragola ibugua tinaga holene maro bilaga ka. <sup>23</sup> Agali ko urunime tini lo mitangi bialu lalu, Iha genda naibagago i bayale kogoni, laga ka. Ti ani mitangi bu karia Ngode Datagaliwabehanda horo bibahendengi agali urunime mana bialu karuni handayaho haabo haga ka. <sup>24</sup> Ti dindini tigimandi hangu tininaga mini yaraga ho kaore balawaya dedaru abale gaulalu dogolo ibira hagadagua dege ti homalu ereba haga ka. Widi lini bogabi dedagola agalime irane gandulo wiagagobi ka. <sup>25</sup> Ai ina bi larogo henene ndoyagua nde i ke howa laregoni lalu aiwa lolebirabe. Inaga ne harigaha howa bi larogoni bame bi dege larego lalu aiwa mo walia holebirabe, lalu Yobohanda lene.

## 25

### *Ngode Datagaliwabe deni wali agali nagalone kama lenego ogo*

<sup>1</sup> Yobohanda bi lai heagola Suha dindi howa ibini Bilidada ibugua ladai bialu lalu, <sup>2</sup> Ngode Datagaliwabe ibu hongo timbunihe howa ibugua wali agali handame ho haga ka. Wali agali bibahendeme ibu gibiore kago hondowa duru lai haga ka. Anigo ibugua

\* **24:18:** Hobane ogoni howa lama pialu 28.28 ogoniha gilibu ngaru agali aiwa latagi henebe tobane wá nale nga. Elibasa ibugua bi halu tebira lenego nga. Ani bialu Bilidada ibuguabi nde bi halu tebira dege lo nga. Anigo ai Hiburu bi áyu yu kamagoha gilibu ngagome Soba ibugua bi halu ki hangu lene lalu gilibu nga. Bilidada ibugua lamaro binigo Be 25 gilibu ngago emene tubagiore nga. Ani bialu Yobonaga bi gilibu ngagohabi nde ibu nenegerume abale layagola galone timbuni biamagahe dege gilibu nga. Ani ngago hondowa agali mandabi bu hearume mitangi bialu Sobanaga minibi wini degego ai mani mo wahene bada lo manda biya. Tigua mitangi bialu bi ogoni 24.18-25 ogoriani Sobanaga bi gilibu nga bada leda. Agali mandabi uruninaga bi ogoni tiga tigabe be bame degebe tobara. Anigo iname Hiburu bi áyu gilibu ngagoria talialu lolene karulape kama. Ai Be 24.18-25 bi ogoriani gilibu ngago Yobohanda leneyagua nde 24.18-20 ngagoria ibu nenege biarunaga mini ogobi ngami ledago ani bialu 24.21-25 ngagoria ibugua tinaga mini wiago ladai bialu bi leda.

hari daligaha karubi ngarubi bibahende mo palia holene karulo helaga ka. <sup>3</sup> Dahuliya andagaha dahuliyali Ngode Datagaliwabenaga biabe biahaga karu daga labe nahe dewaore ka. Ngode Datagaliwabenaga wá holeneme wali agali karia wá hadali nahaga agoha ngabe. <sup>4</sup> Ani kago ai ina dindi wali agali bu kamarume inane mo bayale halu Ngode Datagaliwabenaga deni dodo mbira nahe bayale agua holedabe. <sup>5-6</sup> Ibugua ege yakundi karunaga wá holene de hondowa emene ko hangu manda biyagua ainde ina wali agali dindinaga himibi ngoebi ale kamago de hondowa ina nagalone kamane hondolebira ndobe, lalu Bilidadahanda lene.

## 26

*Ngode Datagaliwabenaga hongo ina wali agalinaga mini mandaru bolanguahe ka lenego ogo*

<sup>1</sup> Yobohanda Bilidadahanda bi layago ladai bialu ogodagua lene.

<sup>2</sup> Íore nde mbirali hongo nahe kago biamogo biaga agaliore mbirago í henedabe.

<sup>3</sup> Ani bialu agali mini mandabi nawi í kogo hondowa ína agali mini gigabiwibi manda timbunibibi kegome í biamogo bialu harida. Ina hale ho berewagola ína bi bayale dewaore latagi harigoni ndobe.

<sup>4</sup> Ína bi bayale uruni latagi habelonaga aiwa lamogo biyadabe. Ína í biamogo birigo ainaga dininime mo walía hayabe.

<sup>5-6</sup> Agali homenerunaga dinini ti humbirini andaga dindi andane iba bedagoha ha do hayaguabi tigua Ngode Datagaliwabenaga deni ha do habe nahe. Ti Ngode Datagaliwabenaga deni dege howa ibugua ti de handaya haragola ti gi halu mogo lowa durulalu haga ka.

<sup>7</sup> Ngode Datagaliwabehanda hari li kago wabuwa mbirale mbira naheha helene ka. Ani bialu ibugua dindi ogonibi dege wabu ngeleda. Dindi ogo ibuni wulenedagoria ngelowa minu yaniaho haga mbira naheore ibuni winigoria wiaabo heleda.

<sup>8</sup> Ani bialu Ngode Datagaliwabehanda hari daliga beraliba kago iba payadaga ho berelaga ka. Iba ogoni gendabiore bedagoyu ibame hari beraliba kago budalu pugulope nahaga.

<sup>9</sup> Ainde ibugua ibunaga handame ho hagane dagia ngago hari beralibame mo ge haga nga.

<sup>10</sup> Ani bialu iba solowara bedago biruleneore ngagoria berelo tubari winigoria birimida dai bileda. Iba bira maro biledagoha mbiraga horombela ngola hagane tubari ogoni nga.

<sup>11</sup> Ainde Ngode Datagaliwabe ibugua keba harangi hari daliga li kago mogo timbuni lowa duru lalu haga. <sup>12</sup> Bamba puya timbuni dama mbira mini Lahaba wiago ibugua Ngode Datagaliwabehondo mine hene. Ani biyagola Ngode Datagaliwabe ibuninaga hongo timbuni heagomebi mini gigabi wiagomebi Lahabanaga hongo heago bope halu iba solowara timbuni bereagobi ema nabi hendore berelo berelene.

<sup>13</sup> Ngode Datagaliwabehanda ibunaga buhe loleneme hari beraliba timbuni heago pulo wahai halu hariha lone wá helene. Ani bialu Ngode Datagaliwabe ibuninaga gime puya dama ogoni ibida pialu hearia balu homelene.\* <sup>14</sup> Mbirale emene uruni Ngode Datagaliwabe ibugua binidaru iname manda bialu miniha mo pehalu beremagome Ngode Datagaliwabe ibuninaga hongo timbuni ngago emene mbirahayagi manda bu kamagoni. Anigome inanaga manda ngamago bolangua ho nga. Ani ngago ainde ibugua ibunaga hongo ngago bibahende inahondo mo pani hai hayagua nde iname bi emeneorebi mbira labe nahe wulebira, lalu Yobohanda lene.

\* 26:13: Yobo 9.12-13 de handabe

## 27

### *Yobohanda ibu ko nabioire lalu bi hongo howa latagi henego ogo*

<sup>1</sup> Yobohanda bi laabo halu lalu, <sup>2</sup> Ngode Datagaliwabe ibugua ihondo mana tiga nabi wiago biyagola áyu i mo ko henego kogoni ndobe. Ibugua inaga bi baya hangu hale howa ko birida nabida lalubi mo tale nabiyagola inaga miniha genda timbuni ho kogoni. Anigo Ngode Datagaliwabe Hongo Haiheore howa ibu haluhe kagonaga minini howa heneneore larogo. <sup>3</sup> Horo bibahendengi ibugua i homa nabi buhe lolene ngiaabo haragome <sup>4</sup> ina bi kobi inaga ne harigaha howa ke holenebi mbira nalole kogoni.

<sup>5-6</sup> Anigo ina bi larogo hale hadaba. Áyu tigua ihondo bi larimigo damene heneneore larimida lalu nalolebero. I aiyahanda taba hanayanghi howa hama ibinigo áyu kogoni howa iha ko mbira nawi inaga bu miniha Ngode Datagaliwabenaga deni ko mbira nabi bayale henego kodalo manda bido. Ina bi mbiraore ogoni dege laabo halu howa homalu waholebero.✧

<sup>7</sup> Agali maru ila waitigi halu karu nde Ngode Datagaliwabehanda pani mialu bo wahelo hameledo. Mana tigabi nabiaaga karu pani mialu bagadagua dege mege biaga urunibi pani mialu belo hameledo. <sup>8</sup> Maru nde Ngode Datagaliwabehondo mini mbiraore nawi howa ibu talima napiaga karu ti dindi ogoriani holene ngago Ngode Datagaliwabehanda biba helarangi tinaga mini dunubia holene agua wulebirabe. <sup>9</sup> Tiha genda mbira anda ibirangi tigua ibuhondo biamogo bia lalu olaragola ibugua tinaga bi larago hale holobadabe. Hale naholebiraore ndobe. <sup>10</sup> Agali uruni ale kagome Ngode Datagaliwabe Hongo Haiheore kagoha turu holene handa walía holebirabe. Ibugua Ngode Datagaliwabehondo bi lalu holebirabe. Naholebira ndobe.

<sup>11</sup> Tigua Ngode Datagaliwabenaga hongo timbuniore kago manda bilimulo ina ti lawai holiya hale hadaba. Ibugua mbira bule manda mandabu ngago damene languliya hale hadaba. <sup>12</sup> Anigo Ngode Datagaliwabenaga mana ngago tini handarimi. Ani handarimigo hondowa lone aginaga bi lako halu kamibe.

<sup>13</sup> Ngode Datagaliwabe Hongo Haiheore kago ibunime agali ko biaga karubi mendeali kago bo wahaga karubi tihondo genda tandagabi tara tara nelo mule manda manda bu ngeledago uru. <sup>14</sup> Agali ko uruni ti waneigini dewaore heaguabi tinaga waitigirume ibalu bo wahai holebira. Ani bialu ti waneiginiru tomo nolene ndia holebira. <sup>15</sup> Agali maru yu wahene karu mani ti warago timbuni baragome homolebira. Ani homaragola ti onerume dara howa dugu bialu birulene henge nawulebira. <sup>16</sup> Agali ko uruni tigua muni silibaru dewa daga labe nahe tini andagaha mo wua howa agaru mo wua ha dege buwa tini andagaha timbuni dewaore wiaga. Ani wialu mbirale uruni tinaga miniha nagalone ale ngama lo mitangi bu holebira. <sup>17</sup> Ani wua holebirago mani howa agali mini tigabi karume aga uruni karulo halu agali maru tigatiga biaga karume muni silibaru mo yuwa tini talebu tahaga bulebira. <sup>18</sup> Agali ko biaga karume anda bia bulebirago anda ogoni hongohe lu haabo naholebira. Anda ogoni gamuni anda abale budahole biradagua bialu mabuha andira nemanda bidago gialahole biralidagua bulebira. <sup>19</sup> Mbiraga tini palue howa tinaga mbirale wiyaruni bayale ngelalu paluebira. Ai egerebagi heyuwa handalu karia tinaga mbirale wiyaruni nawidane hondowa mogo lolebira.

<sup>20</sup> Iba li timbuni ibalu dindi anda bibahende namulai hagadagua mo ko holene tara tara ko biaga karuha ibai holebira. Mbirangani mo ko holene urunime ti puyabu hongoheme pulo waharadagua biragola tini dindi anda ngagoria naholebira. <sup>21</sup> Ni tagira ibiragohayagi howa puyabu hongo howa ibalu ti bibahendeore puloyu piaiore holebira. <sup>22</sup> Puyabu hongohe ogonime ti mo ko howaore baragola tigua puyabu hongohere ogoni ibalu pelo ti ibida pole manda bulebira. <sup>23</sup> Anigo tigua puyabunaga hongo

✧ 27:5-6: Yob 2.9, 13.15

ngago helabagi habe naheore holebira. Puyabume ti hondo oba halu mbelebagabu yu pu waholebira, lene.\*

## 28

### *Manda bulenebi mini gigabi wulenebi agiha ngaria taya bibehebe lenego ogo*

<sup>1</sup> Agalime dindiha uli timbuniore tombama anda puwa ngolo silibaru duguaga. Ani bialu tigua ira timbuni delowa ngolo silibaru ira ogoriani delalu dodo para karu do taulo waharagola ngolo siliba uruni baya ngiringarale wiaga. <sup>2</sup> Ani bialu tigua ege tole aeane taya bulebi nde dindiha uli timbuni tombama anda piaga. Ani bialu tigua ege tole goba palego irani delaragola goba ibuni tagira ibaga. <sup>3</sup> Tigua uli unuraore ege tole tara tara dindihaore padago mule tombama anda piaga. Tigua hale lamu yalu pialu uli ogoniha wá haragola ege tole panigi ngaria dugu yu tagira ibaga. <sup>4</sup> Tigua uli uruni kaundiaoreha wali agalime napiaga ngatoria tombaga. Ti hangume howa uli ogoni tombaga. Tini pume hende howa daliape halu biabe ogoni biaga ka. <sup>5</sup> Agali marume nde dindini tomoru hangalu haga. Anigo maru dindi ogoni uliha biabe bialu ege tole ngago bo polobaga bialu dindi ngago mo beregeda beregeda buwa dindi andanaha irame do taulobagabu ngelaga. <sup>6</sup> Agalime ege tole mindibi hari mindini handalehe baya taraore mbira mini sabaea laga ngago dindiha ege tole ngagoha padaria duguaga. Ani bialu ngolobi dindiha dege duguaga nga. <sup>7</sup> Ega nenebi bodo hariawe bedarumebi gundu uli dindiha tombama anda penedago nahende beda. <sup>8</sup> Budi gabua laiono karubi nogo biango gabua tara tara bu karubi ti bibahende gundu uli uruniha anda napene haga bida.

<sup>9</sup> Agalime dindi hongohe ege pale ngagoha tombalu hari tene ngaru bo haealabaga biai haga. <sup>10</sup> Ani bialu ege tole ngagoha uli tombama anda piaga. Tigua tombama anda pialu howa ege tole bayale tara tara padaria handa walía hole bayuwa handaga. Ege tole uruni muni timbunime miagaru wiaga. <sup>11</sup> Agali biabe biaga karume uli tombalu karia iba tagira ibiyagua iba uli ogoniha biru tololilono payapai haga. Ani bialu mbirale bayale tara dindiha wia do hene ngago mo yalu tagira ibaga.

<sup>12</sup> Anigo ainde iname mini gigabi wulene manda bulenela agoha ngaria mo maliyabe. Mini gigabi wulenebi manda bulenebi mulene dindi mbira agoha ngabe. <sup>13</sup> Mini gigabi wulenebi manda bulenebi galone taraore mbira muni tara alebi bolangua hai hene dunini taraore mbira nga. Anigo wali agalime ogoni manda nabi ka. Ani bialu mini gigabi wulenebi manda bulenebi dindini wali agali katoria nawi. <sup>14</sup> Solowara bedagola dindi iba andanaha ngago libugua ogodagua lara. Mini gigabi wulene manda bulenela dindi ogohayagi nawi lara. <sup>15</sup> Iname ngolo siliba dewame yolo bule manda nabi wahama. Iname mini gigabi wulene manda timbuni bulenela munime yolo bibe naheore ndobe. <sup>16</sup> Ainde heneneore larogo iname ngolo baya taraore dindi mini Obia ngagoha howa duguini ngagome yolo bulene wiaguabi iname mini gigabi wulene manda timbuni bulenela yolo bibe naheore. <sup>17</sup> Iname mini gigabi wulene manda timbuni bulenela mule lowa ege tole baya burugule tara ngarumebi ngolo bayaleme wabini yári tara tarabi ngaru yolo birimayaguabi urunime yolo bibe naheore daraba. <sup>18</sup> Mini gigabi wulene manda timbuni bulenela yolo bulene mbirale iba solowaraha wini yári baya taraore ngarumebi ege tole peleore iba wai ale ngarumebi yolo bibe naheore nga. Wali agalime halepangeha paliaga mbira mini pealo ogoni muni dewaoreme miaga. Anigo pealo yolo biaga ngadagua mini gigabi wulenebi manda timbuni bulenebi yolo mibe naheore. <sup>19</sup> Ainde ege tole ambuabi mini tobasa Sudana dindiha howa dugu yaga ngagobi ngolo irani delene baya taraore yolo miaga ngagobi

\* **27:23:** Bi hobane ogoniha howa lo ngago Yobo ibu nenege tebirali biarume abale layaru ale dege lo nga. Ani ngago hondowa agali mandabi bu hearume bi ogoni Yobohanda lene ndo agali ibu nenege tebirali biarume mbiragome lenego gilibu nga lo manda biya.



ogonilabomebi mini gigabi wulene manda timbuni bulenela ngago yolo bibe nahe dege nga.

<sup>20</sup> Ai iname mini gigabi wulene manda timbuni bulenela agiha taya bulene wiaruabe. Mini gigabi wulene manda timbuni bulenela dalu mbira agoha ngabe. <sup>21</sup> Mini gigabi wulene manda timbuni bulenela libuni daluha bira do kagola wali agalimebi mbirale ema bialu piaga maru biru ngarumebi ogonilabo nahondolebiraore. Ega hari daligaha yagaloyu ibagabu hagago urunimebi nole handabe nahe dege nga. <sup>22</sup> Homene dindi humbirini andaga ngagome ogodagua leda. Inabi nde mini gigabi wulene manda timbuni bulenela mini emene hale ha harugo ainde ina deme handa nabi ko, leda.

<sup>23</sup> Ainde hale haramine. Ngode Datagaliwabe ibuni hangume mini gigabi wulene manda timbuni bulenela libu daluha kago de hendeda. Ani bialu hariga ogoniha polene ngago manda bida. <sup>24</sup> Irane ibugua dindi bibahende de handai halu hari daliganaga andaneha ngarubi bibahende manda biai ka. <sup>25</sup> Bambaore howa Ngode Datagaliwabeanda magi manda bialu puyabunaga hongo mo tale buwa ibu karulape ngelene. Iba bedarubi magi manda buwa mo tale bialu iba solowara timbuni ngagoa birulene karulape ngadagua biradaba lene. <sup>26</sup> Ani bialu Ngode Datagaliwabeanda iba dalu ibunaga mana mialu hari beralibabi hari dababi hari kulubi uruni ti hariga polene ngagobi mo mialu bini. <sup>27</sup> Ngode Datagaliwabeanda mbirale uruni bialu henedangi ibugua mini gigabi wulene manda timbuni bulenela ngola hene. Ngola halu ibugua minibi mana wiagobi mo tale bini. Ani bialu mini gigabi wulene manda bulenela hongohe wiaabo helalu ibugua karulape lalu bini. <sup>28</sup> Ainde Ngode Datagaliwabeanda ina dindi wali agali bu hemaruhondo langialu lalu, Mbirali ibu Anduane Homogo ini andaneha howa ko bulene ngaruhondo erembira mialu haga kagome ibu mini gigabi wialu manda timbunibi ka, lalu Yobohanda lene.☆

## 29

### *Yobo ibuni abale bayale henego mitangibu dai binigo ogo*

<sup>1</sup> Yobohanda bi la dege bialu lalu, <sup>2</sup> Ainde i abale bayale henegobi haruyagua nde karulapeda. Abale hewangi Ngode Datagaliwabeanda i baya hanguore handayaho hene. <sup>3</sup> Ibugua i bayale wa kagoria ibagabu holiya aruma wiagoha wa holene hale lamu ibuni heagoria ibagabu haru. <sup>4</sup> Ainde i daliahe howa hongohe abale henegobiore hoa lo manda bido. Ngode Datagaliwabe ibuni inaga nenegeore howa ibugua i one waneiginiru i andagaha mbirale wiarubi baya hangu handayaho haya. <sup>5</sup> Horo uruningi dege Ngode Datagaliwabe Hongo Haiheore kago ibu ila haabo heagola inaga waneiginirubi ini heba mandagi haabo harima. <sup>6</sup> Ani howa inaga nogo bulumaga memerunaga andu ibaneru hambigi bialu haru. Ani bialu olibe lininaga weli ina be timbuni ege toleme wabu wiwagoha hambu tolo wigi biru.

<sup>7</sup> Horo uruningi i tanonaga agali ala hene miniwi mbira howa tanonaga pabe panga haraba kawareni wali agali ngoai haga hama timbuni wiagoria tagira puwa agali ala hene miniwi maru wali agalinaga godi larago hale hole berearu baba mandagi biraruli. <sup>8</sup> Ainde i harigani porogola igiri daliahe hearume i ala bolangua holiya henge ngialu ti habagi haga biaga. Agali wahe ale berearume inaga mini yaraga howa i anda eberogola ti heyalu i biruliya henge ngiaga hene. <sup>9</sup> Wali agalinaga agali haguane karume ina bi larogo hale hole ti bi nale birama piaga. <sup>10</sup> Agali timbuni bu hearumebi bi nale dege biraga hene.

<sup>11</sup> Wali agalime ina bi larogo hale howa tigua inaga mini yaraga haga. Tigua mbirale ina mana bayale berogo damene hondowa ti turu hai haga hene. <sup>12</sup> Ani biradago yagibano bu hearume ti biamogo bia lalu heago ina hale howa biamogo biruli. Waneigini ti aija aba homene hearu ti biamogo bulene mbira nahe burupale bu hearu

☆ 28:28: Iba 111.10, Min 1.7, 9.10

ina ti dara howa biamogo biruli. <sup>13</sup> Ani bialu wali agali ti mo ko holene kaware wiagola ina ti biamogo birugola ti turu howa Ngode Datagaliwabehondo kai lalu i mo bayale habe lalu bi la haga biaga. Wali dalo berearu ina biamogo bigi birugola ti turu halu tinaga bu miniha dungulo biraga. <sup>14</sup> Horo bibahendengi ina mana bayale tigabi ngaru hangu bialu haabo hewagola mana bayale tigabi uruni ini tingini yari ale karulo haru. <sup>15</sup> I maru de kohe hearunaga de hendelo de ale halu ge kohe ibaga bialu napiaga hearunaga ge ale i haru. <sup>16</sup> I yagibano hearunaga aba ale howa ina ti baya hangu handayaho haru. Agali maru i manda nabi de nahendeneru godini haru ibugu biyagola ina biamogo bialu tinaga bi la haru. <sup>17</sup> Ina agali ko biaga hearunaga hongo bope halu burupale darabi bu hearu agali uruni giha hearia mo wialu pelaga biru.

<sup>18</sup> Ina mandabu handalu hewaria ainde i dindi ogoria lu howa ho dagua halu ini andagani miniha mo palia holene karulo biruwa homa hangu maliaho biruloboda manda bu haru. <sup>19</sup> Ira hongoheme pini dindiha pialu iba dindi andaneha bedago mialu mbiraga pibiya ibira haragome yuni iba mialu biragola ira hongohe kaligobi i holeberobe tobaho haru. <sup>20</sup> Wali agali bibahendeme i mitangi bialu agali mini leneore lalu haga heneya. Inaga hongo karulape kogonaga turu halu biabe hongohe ngaru biaabo halu holeberobe toba haru.

<sup>21</sup> Ina maru hearu mana bayale ogobi bulene nga lalu lamigi birugola tigua bi nale baya hangu haleho biraga biya. <sup>22</sup> Iba dalu ibalu dindiha anda poralidagua ina bi laga birugo wali agali tiha anda pugu biya. Ina bi lai harugola bi laru aria latago holene mbira tigua nayi degeya. <sup>23</sup> Ani howa tigua inaga bi larugo baya hangu haleho bira dege biya. Tigua iba dalu naibi gaea biaho winigo ai iba dalu pigane ibiragola turu hagadagua ina bi laga birugo hale howa turu timbuni haga biya. <sup>24</sup> Agali damene hearu tihondo hambio hondo habe laga birugola agali timbuni mbirame ti mo bila hayabe toba howa mogolo handaga biya. Ani bialu inaga wanakui walo mialu ti baba bi lalu oba tabirini halu birugome ina tinaga miniha mo hongo haga biru. <sup>25</sup> I tinaga agali haguane haradagua howa ina ti bayale helonaga tinaga mini haru helo mo tiga bialu haruli. Kinime ibunaga ami agaliru baba hagadagua ina ti baba haabo haruli. Mbiralu homaragola dara dege howa dugu bialu bedaria miniha mo hongo hole bi lagadagua ina ti baba bi ani laruli, lalu Yobohanda lene.

## 30

### *Yobo ibuha genda tagira ibiragonaga bi lenego ogo*

<sup>1</sup> Yobohanda laabo halu lalu, Ainde ayu agali yagibano waneigini bu karume ibalu i mege bialu hondo oba haga bira. Ti aba nde wali agali bu hearunaga deni ko yagibano howa tigua mbirale bayale mbira bibe nahe hene. Ani heagola inaga biangome nogo sibi haru heago biamogo bibe nahe kago manda buwa ti nogo haru hole pudaba nalaruli. <sup>2</sup> Ina handalu koria ti biabe bulene hongo nahedane hondowa inaga biabe bia hole ibidaba nalaruli. <sup>3</sup> Agali uruni ti tomo nolene nawi howa obiore halu tinaga tiniha tomo noa haabo ho haga hene. Ani howa ti dindi ko wali agali nahaga iba dalu naibaga ngagoha ibida pialu ogoniha tomo nolene ko nanabehe ngaru ilu yuwa naga hene. <sup>4</sup> Ani bialu mbirale ko kaubi anda ho karunaga yuni pinibi bu naga hene. <sup>5</sup> Ani nalu haga henego ai andaga wali agali bu kagoria dai biragola wali agali bu karume pageali bo taliradagua bialu talu pelaga hene. <sup>6</sup> Anidagua bira handala ti ibida pialu dindi hau ngaruhabi egeanda karuhabi ho palia edede bima ibaga bu haga hene. <sup>7</sup> Tigua dindi ko wali agali nahaga ngagoha ira yuni tilatilabi bu karu tenaha ibagabu howa nogo dongime korana lagadagua lama ibaga bialu haga ka. Ani bialu tini ira karu andaneha gumba biru ngoai haga ka. <sup>8</sup> Wali agali andagaha bu hearume ti bo taliya handala ibida pu henego ai ti ko yagibano mini nawiore bu ka.

<sup>9</sup> Ani biaga biarume i mege buwa iba ganame i guralu ka. Tigua i ko habane nabulene mbira o bedagonida lo manda buwa inaga mini lalu i mo ko haga bialu ka. <sup>10</sup> Tigua i koore mbirada lo manda bialu i de hondolene mangaho ka. Ani bialu tigua i bedogoria kaware nahe kaundia ka. Ani howa tigua kaware ibiyagua nde inaga denguiha hamiaga toloba hole ibaga ka. <sup>11</sup> Ngode Datagaliwabehanda i bope halu inaga hongo bibahende ereba hai helaya. Anidagua biyagola tigua i mege bialu gi nahe howa ihondo ko dewa bialu ka. <sup>12</sup> Agali ko ngubi urunime ihondo mogo nale howa dege bialu ka. Tigua i bedoria ibalu ila gungu bialu i bo talialu ka. Ani buwa tigua i bo waholenaga mbirale tara tara bialu ka. <sup>13</sup> Tigua i polene hariga ngaru hapai haga bidagola i ibida pobe nahe ko. I mo ko hene koore bedogo ainde mo koorene ko hole bialu ka. Tini hongo nahe kane hendedogoyu ainde tigua hongohe tingi howa i mo ko halu kagoni ndobe. <sup>14</sup> Ami agali dewaoreme tanoha wai pabe kago bo giala anda halu wai bule gerai lalu pugu pugu biagadagua tigua ibalu i baba wai bialu ka. Iba solowara bedago ibalu iba angeni puduhole biagadagua tigua ibalu i baba wai bialu ka. <sup>15</sup> Mbirale ko tara tara wiaru iha ibalu i mo gibia halu ka. Puyabume ira yuni yu piagadagua i mini timbuni lene hewago ereba hayagonida. Hari beraliba kago piai halu hari mindini hangu haralidagua inaga mbirale wiwaru damene bibahende ereba hai hayagoni ndobe.

<sup>16</sup> Homolene kaware ngagola inaga tinginiha tandaga dege handalu biraabo kognida. <sup>17</sup> Mbiraga inaga tingini bibahende tandaga biai halu timume baradagua biaga. Ani bialu tandaga ogoni biaho wia dege bialu ereba nahaga. <sup>18</sup> Ngode Datagaliwabehanda ibunaga hongo gibiorehe kagome inaga tingini mo tara ale ho ngeledagonida. Agani yuwa ma mini ndibu lagadagua i hongo howa minu garabayabu ngeledagoni ndobe.\* <sup>19</sup> Ngode Datagaliwabehanda dindi waru wiagoha i minu bape hayagola ai áyu ina galoneore mbira be abalu alebi dindi himu alebi bedogonida.

<sup>20</sup> Ngode Datagaliwabe-o inaga deni heyu howa i biamogo bia lalu kogoyu de handa hondowa inaga bi ihondo larogo hale nahaga kegonida. <sup>21</sup> Ina i dara emeneorebi nahaga kegonida. Inaga hongo ngegome i mo ko holenege dege mandabu kegoni ndobe. <sup>22</sup> I dabiabi ira yuni ale daliga baraga haregola i puyabume yalu pobehe bedogoni ndobe. Puyabume i yu pu waholebira. <sup>23</sup> Ina i mo homa halu i dindi mbira wali agali bibahendenaga tu wia homanda mandabu wirigoha hama pu lolebereda lo manda bido. <sup>24</sup> Mbiralime ibu mo ko holene kaware ngagola ibu biamogo bia lalu dugu bialu kagola ainde mendealime ibalu agali ogoni mo ko halu minu bolene karulapebe. Ani bulene nakarulapeore ndobe.

<sup>25</sup> Bamba nde agali genda yu hearu ina ti dara haga biruli. Maru mbirale nawi tubagiho karu dara timbuni haruli. <sup>26</sup> I bayale haabo holeberobe tobaho hewaria ainde mo ko holene iha abale anda ibidagonida. I wá holeneha dege holeberobe toba ho hewaria ainde aruma holene ibalu i budambi haragonida. <sup>27</sup> Inaga miniha genda yu bedogome horo bibahendengi iha genda tandagala ibalu haabo ka. <sup>28</sup> I hako kogola inaga dengui mo beregedalu mindibiore tara kagoni ndobe. Nime dalu ndo bame warago bedagome bida. Wali agali bu karu ti dege dombeneha howa i biamogo bidaba lalu hale halu kogola tigua i biamogo nabi kagoni. <sup>29</sup> I tandaga timbuni nalu howa ina dugu biango dudume dua laradagua bialu ega yarime kua laradagua bialu kogoni. <sup>30</sup> Inaga tingini mindi bialu yogo biragola inaga dongone o lagalopaya bialu kogonida. Ani bialu warago ogonime inaga tingini mo poboyogo bia ka. <sup>31</sup> Bamba nde i bayale hewangi ina ngida balubi tabaga balubi pilipe lalubi turu holenenaga iba ganaru lalu haruli. Anigo ainde mbirale ngida balu pilipe lalu biaruane hale haruligo ai áyu homene dara holenenaga lo aribia hole íbu ngagonida, lalu Yobohanda lene.

\* **30:18:** Mendedagua lo beregedolene ogo. Tandaga ogoni timbuniore bidagome i pendegelo yu ibaga bilaragola ininaga agame pauladai buwa ininaga ma hongo howa bobia ka lolene manda biya.

## 31

### *Yobohanda ko mbira nabioire kogoni lenego ogo*

<sup>1</sup> Yobohanda bi laho wialu lalu, Ina wandari bedaru dimagoli howa handayaho wiaabo nahole lalu bi hongohe lo winigo nga. <sup>2</sup> Ngode Datagaliwabe Hongo Haihe-ore kagonime ina wali agali bibahende ta nabi kamarume birimagonaga inahondo ibunime inaha bua birago ale biai hagabe. <sup>3</sup> Ibugua wali agali ko biaga karu genda yu helo mo miaga ndobe. Ani biragola genda ogoni ibugua wali agali uruni mana bialu bo hilo wahaga. <sup>4</sup> Anigo ai Ngode Datagaliwabe ibugua ina bialu hagago bibahende handai halu harigani porogobi manda biai halu de handai ka.\*

<sup>5</sup> Ina wali agalihondo ke howa mbiraligo mbira mo hondo nahe kogoni. <sup>6</sup> Ngode Datagaliwabehanda ina biagaru baya hangu manda biai ho heagua nde ina ko lehe bini mbira handa walia naholebira. <sup>7</sup> Anigo ina hariga tigabi ngaru wahalu de ibu ko ngaru hendedagoha pupe halu haruyaguabi Ngode Datagaliwabenaga deni i dodohe hewane handayagua nde <sup>8</sup> Ngode Datagaliwabe ibugua kayualime tomo i mabuha ngaru bu hanalu mabu dugua hai helelo. <sup>9</sup> Ai i nenegeali mbira ibu one ina dimagoli howa agalidago ibuni tagira poragola wali bedago kayu bule mayu haruyagua nde <sup>10</sup> i one bedago ibu agali wali agalinidagonaga garabaya biabe ale biahaga biruwa balawa wabule widi lini dambia halu berelobi agali maru karu haru palia ariri bilobi. <sup>11</sup> Ani bialu ina agali mbira ibu one bedagoha mana ko biruyagua nde ini godini haru pialu mana timbuniore ngagoria pu helolebira. <sup>12</sup> Mana ko uruni ira hungu ale howa wali agali daga. Ina nde ko uruni ale mbira biruyagua ira hungu ogome inibi inaga mbirale wirudarubi bibahende do gindulo wahara handala ini nde homalu homenenaga dindiha pu helolene nga.

<sup>13</sup> Abale wali agali inaga biabe bia hagarume ihondo mbirale mbiranaga bi mbira leagola ina tinaga bi hale nahene wiagua <sup>14</sup> nde Ngode Datagaliwabehanda ina ko ogoni birudagonaga manani dabile ibirangi ina agua ladai buliyadabe. <sup>15</sup> Ngode Datagaliwabehanda i aiyana tombeha howa i wabialu wali agali urunibi nde ti aiyana tombeha howa wabini. Ngode Datagaliwabe mbiraore ogoni ibu hangume ina bibahende wabinigo ai ina bibahende mbiraligo bolangua nahe ogobi dege dege kamagoni.

<sup>16</sup> Wali agali yagibano burupale hearuni ti ina biamogo buwa miaabo halu haruli. Wali mbira ibu agalini homene dalo bereagua ina ogoni ibu bame bereho wanahe biamogo biruli. <sup>17</sup> Inaga tomoru ini hangu nole lowa habua buwa wia nabi waneigini aba aiyana homalu hono wahene karubi talebu mialu naruli. <sup>18</sup> Bambaore i igiri eme-neni howa waneigini aba aiyana homalu howa hono wahene karu wali dalo bedarubi bibahende biamogo bialu haabo haruli. <sup>19</sup> Ai agali mbira ibu aga nabi howa dagare halu duru lama pialu hearia ina dagarenaga aga nami pelaruyabe. <sup>20</sup> Napele howa ininaga nogo sibi herunaga irinime wabini dagarenaga aga winiru miruligo agua. Aga mirugome ibunaga tingini dambi halu poboyogo biragola inihondo turu halu kaj lama piaga. <sup>21</sup> Ainde bi laruruni agali haguane karume henene lagane lelona ani biaga tingi halu ke halu waneigini aba aiyana homene karunaga mbirale ngaru mo page biruyagua nde <sup>22</sup> Ngode Datagaliwabehanda ini pani ngialu ininaga gi kirabali payaneha dogo mialu ibira helolene nga. Ani biruyagua nde inaga gi kirabali ani dogo wahelo waha. <sup>23</sup> Ina Ngode Datagaliwabenaga hongo timbuni gibioire ngagome wali agali mana ko bialu karuni tiha ko genda tandaga bulene ngarume ti mana bialu yu helaga ka. Ani biagonaga ina gi timbuniore howa mana tigabi wiaru hangu bialu haruli.

<sup>24-25</sup> Ina biabe hongo howa bialu munibi mbirale bibahende wiaru dewaore mo wirugo. Ai dewa uruni yu haruda lowa mine naharuli. Inaga ngolo muni mbirale

\* 31:4: 2 Bit 16.9, Yob 36.7, Min 5.21

bibahende urunimebi ini bayale holiyanaga bulubadalo manda nabi haruli. <sup>26-27</sup> Nime wá bayale halu egemebi wá hadege biagola ina turu halu libunaga mini yaraga howa gamu gamu nabiruli. Libunaga mini yaraga halu ni egela kaundia kagoda lowa ibu nunu laradagua inaga gibi heba nunu nalarulio. <sup>28</sup> Ai urunidagua bialu howa ke haruyagua Ngode Datagaliwabe Hongo Haiheore kago erembira mirudago. Anidagua birudagonaga ini godini haru pialu mana bulene nga.

<sup>29</sup> Inaga waitigi heneru pani nalu mo ko haga biragola ina urunidagua biragonaga miniha haruore biyadalo manda nabiruli. <sup>30</sup> Ina nde waitigi bu karuni ti mo ko halu bo wahabe lalu Ngode Datagaliwabehondo bi heba nalaruli. Horo mbiru ina ani bini wiagua ogoni kaguaore bu kogoni. <sup>31</sup> Inaga agali biabe biagarume lalu, Agali ibiraruni tomo ta nabi miai haga ka, lene howa ina maru nane napelaruli. <sup>32</sup> Agali maru dindi taraha ibu howa agoha paluebe tobaho hearu tagira palelo wanahe i andaga haru paliruli. <sup>33-34</sup> Agali marume mana ko ngaru buwa ya doho haga. Ogonidagua inabi nde ko buwa doho haruyagua nde i wali agali baba bi lole tagira ibaga nabi ini andagaha bira do holene karulape. Ani bule birugo irane wali agalime inaga ko mo doho harugo handa walia howa mo taga halu mege tara bulebiragonaga i bira do holene karulape. Anigo ina ko mbira buwa do naheore kogoni.

<sup>35</sup> Aiore nde agali mbiralime inaga bi larogo baya hangu hale mia howa hale helo hameledogoni. Ina ko mbira nabioire kogo lalu bi ogoni mo hongo halu ogodagua laro. Ina mana ko ngaru mbira buwa dongeho haruyagua Ngode Datagaliwabe Hongo Haiheore kagome bi larogo ladai bilo hameledo. Ibugua i manani ibu helaga kago. Ai ina ko birugola i pani ngiyaruni uru birigoni lalu walia hole bebani gilibu ngeledale <sup>36</sup> ina ogoni payani yu halu emboneni kininaga manda karularadagua karulo koleda. <sup>37</sup> Ani bialu ina Ngode Datagaliwabenaga deni kini igini taga nahe pu hagamadagua pu howa ina bialu harudaruni latagi hai halu koleda.

<sup>38-39</sup> Ai ina mana tigabi ndo mbira bialu agali mbiranaga dindibi tomo hengenerubi bibahende karulowa yolo nabi haruyagua nde anduane ogoni ibu tomo nolene nawi howa ihondo keba emene ndo holebira. <sup>40</sup> Ai nde tomo balawa wabiaga mini widibi mende mini balibi mbiraleru hangedogoha ani puru datani karu andaho helo, lalu lene. Ani lalu Yobohanda bi lenego ogoria lamaro bidagoni.

## 32

### *Elihu ibugua hale halu hearia bi layago ladai bibeheyane hendenego ogo*

<sup>1</sup> Yobonaga nenege agali tebirali biarurugola handalu hearia Yobo ibuha ko mbira nawi ibu tigabi bayaleore ko lalu lo hongo hayagola tigua balalu bi maru lolene nawiagola ti Yobonaga bi layago ladai nabi hangaho biraabo hene. <sup>2</sup> Ani lalu beremigola igiri daliahe mbira ti bi lalu beremigoria biruwa hale ho berene. Igiri ogoni Baragele igini Elihu bereneya. Elihu ibu Lama hameigini howa Busu bamba henegonaga aria hene. Ani biruwa Elihu ibugua Yobohanda ibuha ko mbira nawi tigabi ko lalu Ngode Datagaliwabehanda ihondo ko bialu ka layago hale howa keba timbuni hene. <sup>3</sup> Ibugua Yobonaga nenege tebirali biarurugola Yobonaga bi layago ladai nabiyagola keba dege hene. Tigua lalu Yobo ibugua mana ko biyagome ko bini dewa nga lalu beremigo hondowa ibu keba halu bini. <sup>4</sup> Elihu ibu agali wahe ala hene tebirali biarume bi lelo hale ho berenego ainde ti lai heagola ibugua Yobohondo bi lamule manda bini. <sup>5</sup> Ibugua keba timbuniore henego irane agali tebirali biarurugola bi layagome Yobohondo bi baya hangu ladai nabiyago hondowa keba hene. Ani hale ho biruwa Baragele igini Busu aguane Elihu ibugua lalu,

<sup>6</sup> I igiri daliahe dege kogola ti nde agali wahe kami. Ani kamigo manda buwa ina tihondo bi lolene taga howa biraabo haru. <sup>7</sup> Ina mandabu handalu hewaria ti mali lu dewaore hene howa tiha mini bayale gigabi wulenebi manda timbunibi wu kamigoyane



latagi halimulo biraru. <sup>8-9</sup> Anigo ainde mini bayale gigabi wulene agali ala hene kagoha dege ndo wiagada. Ai Ngode Datagaliwabe Hongo Haiheore kagonaga Dinini inaha ibalu ibugua dege ina mini bayale gigabi wulene ngiaga hayada. Anidagua bidagome ai agali ala hene wahe kago hangume ko bayalela mo tale biaga ndodane hendedo. <sup>10</sup> Anidago ina nde inaga mini ngogo latagi harogo tí hale hadaba.

<sup>11</sup> Ina tígua bi larimigo baya hangu hale halu mo tale birugoni. Tígua ndelaheore handalu biabe erekuibi bialubi mini bayale gigabiwi manda timbunibi taya bialu Yobo biamogo bule lalu harimigoni. Ani lalu hemigo hondowa ina tínaga bi larimigo bayuwa hale haru. <sup>12</sup> Ai ina handalu hewaria tí bedemiru aria mbirame Yobohanda bi layago ko laya lalu mo walia naharimi. Ani bialu tígua ibunaga bi layago bayuwa ladai nabirimi. <sup>13</sup> Anigo tígua mitangi bialu lalu, Ainde Ngode Datagaliwabe ibunime Yobohondo ladai bilo ina waholene karulapeda. Ina agalime ladai bulenego nakarulapedago wahama, loleberemi. <sup>14</sup> Yobo ibugua ila bi nale howa ibugua tí baba dege bi laya. Anigo ibugua bi ogoni ihondo lenedale nde ina tígua ladai birimidagua ndo ladai bidole.

<sup>15</sup> Ai Yobo-o de handa. Inaga nenege agali o bedarunaga mini emene tubagioreda. Ani bidago hondowa ina ti bime bope harigoni. Tigua bi mbira lone labe nahe tinaga ne hariga ndibulo biru wima pedagoni. <sup>16</sup> Ai bame bi nale heyu kago handa. Ina manda bialu koria tigua bi lone lolene nayi ka lo manda bidogo ai ina handayaho birulene nakarulapego <sup>17</sup> ihondo bi maru lolebero. <sup>18</sup> Ina nde bi maru ihondo lolene manda bidogo ai inaga miniha yu donge holene hame naledo. <sup>19</sup> I bi lolene dewaore inaga bu miniha yidogo ai miniha yaanda ho bedoria inaga tombene nogo dongone beha waini iba hambu yidaria waini biru tolowa nogo dongone be pambulalu waini iba purogo lagadagua bibebe ko. <sup>20</sup> Ainde inaga miniha genda nabi yabia bilo bi ogoni latagi holebero. <sup>21</sup> Ina mbiralinaga bi lahowa nalolebero. Ina mbirali la debodebo bialu bi dendebe nalolebero. <sup>22</sup> Ina bi nagalone ngaru dewa laabo halu mendeali la debodebo bialu bi nalaruli. Mana ogonidagua biruyagua nde Ngode Datagaliwabe ini wabiaga kago ibunime i homoliya bo waholebira, lene.

### 33

*Ngode Datagaliwabehanda agali mo tiga biaga ngago ogodagua lalu Elihuhanda lenego ogo*

<sup>1</sup> Elihuhanda laabo halu lalu, Yobo-o hale harene. Ayu inaga bi ihondo larogo bibahende baya hangu hale hai habelo hameledo. <sup>2</sup> Ina bi yidogo ayu ogoni dege latagi haro. <sup>3</sup> Ina bi latagi harogome i mo walia holebirago ogo. I Ngode Datagaliwabenaga deni agali tigabi howa ina mini tigabi bu habaneha wu kogo latagi haruli.

<sup>4</sup> Ngode Datagaliwabe Hongo Haiheore kago ibunaga Dinini kagome i wabialu ibunaga buhe lolene iha pulaanda hayagome i holene karulo howa ema bialu ibaga bu ko. <sup>5</sup> Yobo-o ina abale heyalu ila lai la nabere. Ina ladai bulene karulapeyagua bi ina larogo ladai bibe. <sup>6</sup> Ngode Datagaliwabenaga deni iya ogobi labolabo kabagoni ndobe. Ibugua i dindime wabialu ibi dindime dege wabini kegoni. <sup>7</sup> Anidagua binigo manda bialu ina i hondowa gi nahabe. Ina iha genda timbuni mo ya halu mo gi naholebero.

<sup>8</sup> Ina bi larigo damene i hale hai harugoni. Ina bi hongo howa ogodagua lari. <sup>9</sup> Ina mana ko mbira nabioire howa i Ngode Datagaliwabenaga deni ko mbira nawioire kogoni lari. <sup>10</sup> Ani kogola Ngode Datagaliwabe ibugua i waitigi mbira haradagua bialu ko biaga kagohondo genda mo miagadagua i mo ngialu ka lari. <sup>11</sup> Ibugua inaga ge seni pume minu kabu biya. Ani bialu i ibagabu kogoha inaga ge ibugua guariama ibaga bialu mayu ka, lalu larigoni.

☆ 33:9: Yob 10.7, 16.17, 27.5-6 ☆ 33:10: Yob 13.24, 19.11 ☆ 33:11: Yob 13.27

<sup>12</sup> Ani larigo ai Yobo-o hale harene. Ina bi uruni larigo tigabi ndo lari. Ani larigo ai ina inaga bi lariruni ladai bulebero. Ngode Datagaliwabe ibu duniniore kago ibunaga mandabi hongobi timbuniore wali agalinaga ale ndo bolanguahe ka. <sup>13</sup> Ina lalu, Iname Ngode Datagaliwabhondo bi laramago ibu hale nahagaya, lariligo irane aginagabe. <sup>14</sup> Ngode Datagaliwabe ibugua inahondo bi hariga tara tarani langigi biaga ka. Anigo ibugua bi larago iname yu tiga nabi haramali.

<sup>15</sup> Wali agali mbiraga padaria Ngode Datagaliwabhenda emagaha howabi de gandebaha howabi bi lamiaga. <sup>16</sup> Uruniha howa ibugua iname ko birimago mo walia halu ina lawai halubi mini bayale wulene mo walia haga. Ibunaga bi ogoni inanaga bu miniha hongohe haabo helo ani helaga. <sup>17</sup> Anidagua biragome mana ko lone nabulumayanaga mo gi haga ka. Ani bialu ina mine naholomayanagabi ani biaga ka. <sup>18</sup> Ani bidadago irane iname mine halu kamaria inanaga waitigi bu karume ibalu ina bo waharagola ina homalu humbirini andagaha napolomayanaga anidagua biaga ka.

<sup>19</sup> Marungi nde Ngode Datagaliwabhenda ina wali agali mo tiga bulenaga mana ogobi nga. Mbiralibuha warago timbuni ibilaragola ibu dagiani paliaho wiaabo halu ibuha palibe nahe halu tingini tandaga timbuni biaabo haga nga. <sup>20</sup> Ani wuwa tomo nolene magu timbuni haga ka. Maru bu karume tomo bayaleru dawa yalu ibiragola warago bo wiyago ibu magu halu uruni tomo ndo tara ale handaradagua biragola nanaga. <sup>21</sup> Tingini obialu kuni bibahende pani haihe wiaga. <sup>22</sup> Agali uruni homolene kaware ngagola ti abale homalu humbirini andagaha hole piaga.

<sup>23</sup> Anigo Ngode Datagaliwabenaga dahuliyali daosini dewaore bu karu aria mbirago ibugua ibalu agali biagome mana bayalego bialu helo bi lamulebira. <sup>24</sup> Ani lamuwa ibugua dahuliyali biagome Ngode Datagaliwabhondo agali biago dara halu biamogo bia lowa bi lamialu, Ina agali ogoni ibu dai bulene hariga mbira wiaria handa walia harugo ainde agali ogoni humbirini andaga hole napelo dara habe, lolebira. <sup>25</sup> Ani laragola agali biago bayale halu abale igiri daliha haraligobi holebira. <sup>26</sup> Agali ogonime Ngode Datagaliwabhondo bi laragola ibunaga bi larago hale halu howa ibu turu howa Ngode Datagaliwabe kagoa kaware holebira. Ani kagola Ngode Datagaliwabhenda ibuha mo ko hene ngago damene bibahende mo tiga biai holebira. <sup>27</sup> Anidagua biragola agali ogoni ibugua wali agali maru karuhondo lamialu lalu, Ina mana ko dewa wiaru bialu haru. Ani bialu hewaria Ngode Datagaliwabhenda i minu bolene winigo ai ibugua i dara halu bo wanahaya. <sup>28</sup> Ibugua i haru dai biyagome i humbirini andaga nape homa nabi kogoni ndobe lolebira.

<sup>29</sup> Ngode Datagaliwabhenda wali agalihondo dewa halu ogonidagua bia dai dai bialu ka. <sup>30</sup> Ibugua ti biamogo bialu mo wiragola ti homa nabiaga. Homa nabi howa Ngode Datagaliwabhenda wali agalinaga holene miadai biragola ti turuho haga.

<sup>31</sup> Yobo-o ai ina ihondo bi maru larogo hale hole ema nabi hale ho birabe. <sup>32</sup> Ainde ina bi lolene maru yu bereyagua i hale holiya latagi habe. Irane wali agali bu karume iha ko mbira nawi bayale ko lalu mo walia habelo hameledo. <sup>33</sup> Bi lolene nayi bereyagua nde ina bi larogo dege hale hole ema nabi birabe. Ina mini gigabi howa holene mana langiai holeberogo bayuwa hale habe, lene.

## 34

### *Yobohanda Ngode Datagaliwabhondo bi lako henego ogo*

<sup>1</sup> Elihuhanda laabo halu lalu, <sup>2</sup> Agali manda timbunibi mini gigabiwi kamiru tigua ina bi o larogo baya hangu hale hadaba. <sup>3</sup> Iname tomo dende bidabe be magu bidabe hondole nahanda ala beremali. Anidagua dege iname bi hale howa kobe bayalebe

✧ 33:15: Yob 4.13

mo tale beremali. <sup>4</sup> Ai iname bi hale harimaru bayale tigabi agodabe hondole mo tale bim<sub>i</sub>ya.

<sup>5</sup> Yobo ibugua ogodagua laga, Ina biako hene mbira nawiorego ai Ngode Datagaliwabehanda ihondo mana tigabi ndo biya. <sup>6</sup> Ina kagua mbira nabioire howa ko mbira iha nawiore ko. Anigo Ngode Datagaliwabe ibugua i ke hagane mbira kagoni lo manda buwa i mo ko henego kogoni ndobe. I ibunaga yandareme nogoba haradagua biyagola i dabi halu bayale habe nahe kogoni, lalu ogodagua layagoni.

<sup>7</sup> Mana ko Yobohanda biyadagua bini mende ai kabe. Yobohanda Ngode Datagaliwabehondo mege timbuni biya. <sup>8</sup> Ibu mana ko biaga karu baba mandagi haga kagoni. <sup>9</sup> Mana uruni biagadago irane ibugua lalu, Iname mana tara tara Ngode Datagaliwabehanda hameledago bialu harimayagua mbirale bayale mbira agile yadai bimiyadabe. Ina yadai bulene mbira nawidalo manda bido, laya.\*

<sup>10</sup> Yobohanda ani laya lowa Elihu ibugua laabo halu lalu, Agali mini gigabiwi bedemiru tigua bi o larogo hale halimu. Ngode Datagaliwabe Hongo Haiheore kago ibugua mana ko nabiaga ka. <sup>11</sup> Iname mana bialu harimadagua ibugua bayuwa mo tale bialu inaneme bialu harimagobi karulape mo ta haga ka. <sup>12</sup> Ina heneneore larogo, Ngode Datagaliwabe Hongo Haiheore kago ibugua mbirali ko nabiaga kagohondo mo ko halu mana liahe nabiaga ka. <sup>13</sup> Ngode Datagaliwabehondo dindi ogo handayaho habe lalu biabe ogoni bilonaga hongo mo miyadago aiwabe. <sup>14-15</sup> Ngode Datagaliwabehanda holenenaga buhe lolene ngiyago ibuni mo yu dai biyagua nde ema bialu piaga bibahende abaleore homai halu ina wali agalibi nde abale dindi tago buleberema.\*

<sup>16</sup> Yobo-o i hale harene. I mini gigabiwi ngeyagua nde bi o larogo baya hangu hale ho birabe. <sup>17</sup> Ngode Datagaliwabe ibugua mana bayale tigabi ngago hame nalagayagua nde ibuni duniniore haabo howa dindi ogo ibugua handameho habehe kabe. Anigo Ngode Datagaliwabe ibu hongo timbunihe howa mana bayale tigabi ngaru bialu haabo haga ka. Ani biaga kago ai ina ibu ko bira lalu ibugua bialu kago manani howa mo tale bialu kego irane agibe. <sup>18</sup> Agali mbirame kinihondo i ko habane nabulene mbira kegoni lalu aiwa labehe kabe. Agali haguane mbira kagohondo lalu, I agali ko mbira kegoni, labehe ka aibe. <sup>19</sup> Ngode Datagaliwabehanda wali agali bibahende wabiai hene kago ibugua dege ogonidagua lolebira. Ibunaga deni wali agali bibahende mbirale dewawi heaguabi nawi heaguabi bibahende ogobi dege dege ka. <sup>20</sup> Agali mini lene timbuni howa hongohe heaguabi ibugua urunibi kago abaleore homelaga ka. Mbiraga padagola Ngode Datagaliwabehanda agali uruni ale handia nahe tinaga holene abaleore biba helalu homelaga.

<sup>21</sup> Ngode Datagaliwabehanda ina wali agalinaga mana bialu kamaru de handai halu ina ibagabu kamarubi manda biaiho haga ka. <sup>22</sup> Agali ko uruni ti Ngode Datagaliwabehanda de nahendelonaga bira do holene arumahe mbira nawiore ndobe. <sup>23</sup> Ngode Datagaliwabe ibugua mana iname bialu kamago manda biai ka. Ani kagome ibugua iname ko biyadabe be nabitabe hale holenaga manani haru pu nahelaga. <sup>24</sup> Ibugua agali haguane karu bope halu dugu wahole howa ti agali abiore kabe lalu dabo hondolene henge nawiore. Ibuni manda biaiore ka. Ibugua agali uruni bo dugualu agali mende haguane hela aribia haga ka. <sup>25</sup> Tigua mana ko biaga ngago manda biaho howa mbiraga ti padaha ibugua ti mo mogola halu bo hangedapeore haga. <sup>26</sup> Ibugua wali agalinaga deni howa agali urunime mana ko biyadalo manda biai helonaga ti

\* **34:5:** Yob 27.2, 31.6 \* **34:9:** 21.7-13 ngagoha Yobohanda lalu, Ngode Datagaliwabehanda agali mana ko biaga bu karu helo wahaga ka, lalu gilibu nga. Ayu Elihuhanda bi layago Yobohanda 21.15 howa ledadagua layiya. Anigo Elihuhanda Yobohondo bi laede hayadaruni henene ndo laya. 21.16 ngagoria Yobohanda agali ko uruni baba mini mbiraore nahe berenagonaga bi lo nga. \* **34:10:** Pig 18.25, Man 32.4, Iba 92.15, Lm 9.14 \* **34:11:** Iba 62.12, Ese 33.20, Md 16.27, 2 Ko 5.10, 1 Pi 1.17 \* **34:14-15:** Pig 3.19, Aga 12.7 \* **34:21:** Yob 31.4, Yar 16.17, 32.19 \* **34:22:** Iba 139.12, Amo 9.2-3, Hi 4.13

pani mialu bope haga ka. <sup>27</sup> Ngode Datagaliwabehanda ti bope hagadago irane tigua ibu erembira mialu mana bulene winigo wahalu ko wiaru bialu hayagonaga pani ogoni miaga ka. <sup>28</sup> Tigua wali agali yagibano hearu mo ko haga biyagola yagibano biarume Ngode Datagaliwabehondo biamogo bia layago ibu hale haga ka. <sup>29</sup> Anigo Ngode Datagaliwabehanda pani uruni namule manda biyagua nde pani nami harida lalu ibuhondo bi aiwa lolebirabe. Ibunaga dengui handa taraho heagua nde wali agali biamogo bulene naholebira. Anigo ibugua wali agalibi dindibi bayuwa handayaho haga ka. <sup>30</sup> Ibugua ani biagago irane agali ko bu karume kini howa wali agali mana ko ngagoha haru halu napelonaga handayaho haga ka.

<sup>31</sup> Tí mbirali hale ho beremigola Yobo ibugua Ngode Datagaliwabehondo lalu, *Ína genda ihondo mo ngiriru yu harugo ai mana ko lone nabuleore, lalu layabe.* <sup>32</sup> Mana *ina* bialu harugo damene ko bialu haruyagua nde waholiya mbirale *iha wá* nale harudaru mo walia habe, lalu bi layane ai hale harimibe.\* <sup>33</sup> Anigo Yobo *ina* mbirale Ngode Datagaliwabehanda *ihondo* birago turu nahe ke. Ani kego mitangi bialu Ngode Datagaliwabe ibugua *ina* hameledego bulubada lo mitangi nabibe. Anigo dabolene *inaga* biabe ndo *ininaga* nga. Ainde *iha* manda bayale wiagua nde *ina* hale holomaya *inaga* manda bayale ogoni latagi harene.

<sup>34</sup> Agali mini gigabiwi manda timbunibi karu tigua *inaga* bi ogoni hale howa *ihondo* agua laga, <sup>35</sup> Yobohanda bi bame lopebe bialu kago bi ko dege lalu ka. Ibunaga bi lalu kago miniha mo tale nabi bameore lope halu ka, laga. <sup>36</sup> Yobohanda bi lalu karuni agali mana ko biaga karume lagadagua lalu ka. Ani lalu kagonaga Yobo ibugua bi uruni lalu kago wahelonaga Ngode Datagaliwabehanda Yobo lone ba hondole hamelo ka. <sup>37</sup> Ibugua mana ko bialu howa Ngode Datagaliwabehondo lone mine gibiore lalu kagoni ndobe. Ibugua inahondo lai laabo halu Ngode Datagaliwabela keba howa lai dege lalu kagoni, lalu Elihuhanda lene.

## 35

### *Elihuhanda Yobo ibugua bi lako hayagonaga ibuhondo keba halu lai lenego ogo*

<sup>1</sup> Elihuhanda laabo halu lalu, <sup>2</sup> Yobo *ina* bi ogodagua larigo, Mana *ina* bialu hagago bayale tigabi Ngode Datagaliwabehanda biaga ngago bolangua hene biruli, lalu kegoni ndobe. *Ína* manda bialu keria bi ogoni alego tigabidabe.\* <sup>3</sup> Ani bialu *ina* bi ogodagua lalu, Ngode Datagaliwabe-o *ina* mana ko mbira nabi hewayagua nde ogonime *í* biamogo agua bulubadabe. Ani bialu *iha* bayale mbira agile tagira ibulubadabe, larigoni.\*

<sup>4</sup> Yobo-o ai *ina* bi larigobi *inaga* nenege bedarume bi layarubi *ina* ladai biai holebero. <sup>5</sup> Ai hari daligaha handa daga halu hari beraliba ngaru de handa. Ti li daligaha ngagoni ndobe. Ogonidagua dege Ngode Datagaliwabe ibu daligaore kagoni. <sup>6</sup> Anigo *ina* mana ko biriyagua ogonime Ngode Datagaliwabe mo ko naholebira. *Ína* mana ko dewaore biaabo hariyaguabi ani beregome ibu mo ko agua holobadabe.\* <sup>7</sup> Anigo *ina* mana bayale tigabi dewa beregome Ngode Datagaliwabe agua biamogo buledabe. Ani bialu *inaga* giha howa mbirale bayale mbira ibu agile mo yulubadabe. <sup>8</sup> *Ína* mana ko mbira biriyagua nde ogonime *ina* agali kamago dege mo ko holebira. Ani bialu mana bayale ngago biriyagua ogonimebi nde *ina* wali agali dege biamogo bulebira.

<sup>9</sup> Agali hongohe bu karume agali maru hongo nahe karu bope halu hingedape haabo haga ka. Anidagua biragola agali hongo nahe uruni tigua dugu tara bialu mbiralime ti biamogo bilonaga olalu haga ka. <sup>10</sup> Ai urunibi karume Ngode Datagaliwabe ti wabu helenego ibuhondo bi nalaga ka. Anigo *ina* genda yu kamangi ibugua inanaga

\* **34:32:** Yob 13.19, 24.25 \* **35:2:** Yobohanda bi dewa lalu haabo hayagome ibugua mana ko mbira nabi ko laya. 10.7 ngagobi 27.5-6 ngagobi dege de handabe. Anigo Elihuhanda Yobohondo ko biridaore layago bameore bi laede halu tigatiga ndo laya. \* **35:3:** Yob 7.17-20 \* **35:6:** Yob 22.2-3

miniha mo hongo haga biragola iname turu howa iba gana lalu haramali. <sup>11</sup> Ngode Datagaliwabehanda inahondo manda timbuniore nogo egabi tara tara bibahende biru karunaga manda ngarubi ndo bolanguahe ngiaga ka. Ani kagoyu iname ibu kagoria dai naberemali. <sup>12</sup> Wali agalime Ngode Datagaliwabehanda ti biamogo bilo olaga kagoyu tinime mine halu ko bialu kagonaga ibugua biamogo nabiaga ka. <sup>13</sup> Tiha mini tigabi nawi kagola Ngode Datagaliwabe Hongo Haiheore kagome tigua ibuhondo bi lalu kago hale nahaga ka. <sup>14</sup> Ngode Datagaliwabehanda tinaga bi hale nahaga kayagua Yobo-o ibugua inaga bi larego hale naholobadago irane ina ibu de nahende ko larigonagada. Ani lalu ina Ngode Datagaliwabe ibu inaga genda yu harigo biamogo bilo lowa luore hondo harigoyu ibugua inaga bi hale nahaya lari. ✧ <sup>15</sup> Ina lalu, Ngode Datagaliwabehanda agali ko biaga karu pani nelu ba nabi helo wahalu tigua mana ko birago hondowa la nabi wahaga ka, lari. ✧

<sup>16</sup> Yobo inha galone napale howa bi anda dege halu bi larego irane manda nabi howa bame lopebe biaga kegoni, lalu Elihuhanda lene.

## 36

### *Ngode Datagaliwabehanda ina mo tiga bulenaga genda mo ngiaga ka lenego ogo*

<sup>1</sup> Elihuhanda laabo halu lalu, <sup>2</sup> Yobo-o ina baya hangu lawai holiya i ema nabi hale ho birabe. Ina bi maru Ngode Datagaliwabehanda laradagua lalu ihondo lolebero. <sup>3</sup> Ngode Datagaliwabe i wabini kago ibugua mana tigabi hangu biaabo hagago inaga miniha manda tara tara toledogo i mo walia halu latagi holebero. <sup>4</sup> I ke nahaga kogo ina heneneore laro. I agali manda timbuniorebi mbira ila mandagi bedabagoni.

<sup>5</sup> Ngode Datagaliwabe ibu hongo timbunihe howa ibugua wali agali mitangi bialu handape nahaga ka. Ibu mini timbuni gibiorewi kagome harihabi dindihabi bibahende ibugua manda biai ho ka. <sup>6</sup> Wali agalime mana ko biraru hondowa ibugua ko biaga uruni dindini lu ibagabu haabo nahelaga. Ani bialu yagibano karu biamogo bialu ti mo tigabu helaga ka. <sup>7</sup> Ibugua wali agali tigabi karu handayaho kagola kininaga mini yaraga hagadagua wali agali uruninaga mini mo yaraga holebira. <sup>8-9</sup> Anigo wali agali pume gi ge minu kabubu ngelagadagua mo ko holene mbira tagira ibiragome ti daribaho ngelayagua nde Ngode Datagaliwabehanda tihondo lamialu ogodagua laga. Mo ko holene tiha ibu ngaruni irane tigua tininaga mini mo yaraga halu mana ko tara tara dewa bialu haabo harimigonaga ani anda ibilaga biaga, laga. <sup>10</sup> Ani bialu ibugua ti mana bayale bialu helogo lawai halu mana ko tara tara ngaru erembira mialu pilimu laga ka. <sup>11</sup> Ainde tigua ibunaga bi mana lamirago baya hangu hale howa bialu ibu andaneha heagua nde ti holene bayale taraore haabo helaga ka. <sup>12</sup> Anigo tigua bi hale nahayagua nde waitigi bu karu ibalu ti bo wahai haragola tigua mbirale bule wiyaru manda nabiaga ka.

<sup>13</sup> Wali agali Ngode Datagaliwabe erembira mu haga karume ibugua tiha genda timbuni ngago anda ibilo hondo kagola tigua tandaga ho howa Ngode Datagaliwabehondo biamogo bia lalu bi nalaga ka. <sup>14</sup> Anidagua biaga howa tigua wali agalinaga deni mana koorene ko ngaru bialu hayagua tini wene waneigini daliahe dege kaore abale homaga. <sup>15</sup> Anigo Ngode Datagaliwabehanda tihondo mana bayale tigabi ngaru taluwa bialu helonaga biawai hole ibugua wali agaliha genda tandaga ibiraru ibilo wahaga ka. Ibugua anidagua bialu haru dai buwa bayale helo helaga biaga.

<sup>16</sup> Yobo-o i genda timbuniore yu howa ayu dege ereba hole bedegoni. Anigo ainde Ngode Datagaliwabe ibugua i haru dai bialu bayale berelalu ihondo tomo mbirale bayale ngaru ngialu biragola mbirale ngarume i hapai helo hame naleore kagoni ndobe. <sup>17</sup> Anigo ayu Ngode Datagaliwabehanda i ko biaga mbira keria hendeda. Ani



hondowa ibugua í ko birida lalu í tandaga handabelo minu baragoni ndobe. <sup>18</sup> Anidagua bidago ínaga miniha tandaga holene ngelo kegome ínaga Ngode Datagaliwabe mege bulene bi mbira loligo de hondowa bi labe. Íni mo homogo holene duniniorebe toba howa ínaga Ngode Datagaliwabe kago yu waholeni de hondo habe. <sup>19</sup> Ína Ngode Datagaliwabe hondo ì biamogo bia lalu ibu olariyaguabi íninaga hongome mo bayale hole hariga taya biriyaguabi urunime áyu í mo ko hene kegoni ereba naholebira. <sup>20</sup> Ani bialu ínaga aruma holene abale ibilo hame lolene nawigo irane aruma holene ogoni ale ngagoha ko tara tara wali agali kagoha abaleore anda ibaga nga. <sup>21</sup> Íha genda áyu dege anda íbu ngaruni hondowa turu nahe bedegonigo ainde ínaga mana ko bule ngaru turuore howa bialu hariya. Ani biriyago manda bialu í ko ngagoha haabo holigonaga de handalu mamage ho holene nga.

<sup>22</sup> Ai hale ha. Ngode Datagaliwabe ibu daliga hongo timbuniorehe ka. Ibugua ina biawai hagadagua aiwa biawai holebirabe. <sup>23</sup> Ngode Datagaliwabe hondo ínaga ogoale bia lalu bi lamibehe mbirali ai kabe. Ngode Datagaliwabe ínaga mana tigabi ndo birida lalu labehe mbirali ai kabe. Urunidagua lolene mbirali naheore ndobe. <sup>24</sup> Wali agalime mbirale Ngode Datagaliwabe handa wabini ngaru de hondowa ti turu halu ibunaga mini yaraga halu iba gana laga ka. Anidagua biagago manda bialu ínabi nde anidagua dege bulene nga. <sup>25</sup> Wali agali bibahendeme Ngode Datagaliwabe handa bini ngaru handa hondowa biabe binidago irane baya hangu manda nabioire ka, lene.

*Ngode Datagaliwabenaga hongo holenebi manda bulenebi daligaore nga lenego ogo*

<sup>26</sup> Elihuhanda laabo halu lalu, Ngode Datagaliwabe ibu dunini daligaore ka. Iname ibu baya hangu manda biai habe naheore ibunaga malibi agirabe iname manda nabioire kama. <sup>27</sup> Ibugua iba dindini bedaru hariha haru irigi howa mo iba dalu bu hinilaga ka. <sup>28</sup> Ani bialu iba hari beralibaha howa dindini ibira haragola wali agali dindini bu kamarume iba bayale dewaore berelo haramali. <sup>29</sup> Hari beraliba timbuni ngagome hari bibahende bu dambi hai halu Ngode Datagaliwabenaga balai anda haradagua biaga ngago agua bialu biagabe ina manda nabioire kama. Ani bialu hari beraliba andaneha howa hari daba bialu kilikulu lagago agua bialu lagabe ina manda nabioire kamagoni ndobe. <sup>30</sup> Ibugua dege hari dabanaga wá timbuni datagi helaragome hariha wá haame halu iba solowara bedago andaneha aruma ho wiaga. Ani bialu wá haragome mbirale bibahende ngaru panigi ona wiai haga. <sup>31</sup> Ngode Datagaliwabe handa hari beraliba iba dalubi handayaho howa haru haga ka. Anidagua dege dindini wali agali hameigini tara tara bi tara tara laga bu karu handameho howa haru hai haga ka. Ani bialu mabuha tomo damene bayale mo anda hai helaragola wali agali tomo nalu holene karulape helaga. <sup>32</sup> Ibugua wá holene hari daba giha yu howa ibu de hendedagoha bilina howa timu baradagua bope haga ka. <sup>33</sup> Hari daba birangi iba dalu puyabula hongoheore ibulebirago mo walía haga nga. Ani biragola nogo bulumaga bu karu tibi nde dalu timbuni ibarua manda bu haga ka.

## 37

<sup>1</sup> Hari daba bialu hari kulu laragola ì mogo timbuni lalu ínaga gubaliniha duru lalu haabo haga. <sup>2</sup> Hari kulu laruago hale hadaba. Ogoni Ngode Datagaliwabe handa ga lalu bi hongo howa ladaga haruagoni. <sup>3</sup> Ibugua hari daba biragome beraliba ngaru dindi gimbuni ngaru bibahendeha piái helaga ka. <sup>4</sup> Ani bialu mani ibugua bi hongo howa ladaga haruagola iname ibunaga hongo ogobioireda lo manda beremali. Ngode Datagaliwabe handa ogonidagua birangi hari daba migimege lalu purogo lelaga.

<sup>5</sup> Ngode Datagaliwabe handa bi latagi harago bayaleore tara mbira latagi haga ka. Ani bialu ibugua inanaga mini ngamago bolangua howa mbirale tara tara iname manda nabini ngaru biaga ka. <sup>6</sup> Ibugua bi laragola dalu dindiguni ibira haga. Ibunime dege bi

laragola iba dalu timbuniore ibaga. <sup>7</sup> Anidagua bialu ibugua wali agalime biabe biala ho ngaru nabilonaga hapai haga. Ibugua biaga ngago damene wali agali bu karume manda bilonaga ani biaga. <sup>8</sup> Ogonidagua bigi birangi nogo ega tara tara ema bialu piaga karume tini paliaga ngagoha pu haga haga biaga. <sup>9</sup> Puyabu hongoheore tini daluha howa heyalu puloyu ibagaya. Ani bialu puyabu ogonime dagare bulene puloyu ibaga. <sup>10</sup> Ai Ngode Datagaliwabeibunime hongo howa pu laragola puyabume dindiguni ibira helaragola iba bedaru mo dindiguni bu hinalu giambe helaga ka. <sup>11</sup> Ibugua hari beraliba timbuni ngagoha iba mo mogobu berelowa ogoni dombeneha hari daba bape haragola dindi tara tara ngagoha purogo lelaga. <sup>12</sup> Ngode Datagaliwabeibunime bidaba laradagua hari beraliba dindi bibahendeha purogo lalu ibugua bibe lalu lamirago bule piai hagaya. <sup>13</sup> Marungi nde wali agali bu karume mana bialu karu damene mo tiga bule dalu pudaba lalu lamiaga. Marungi nde wali agali mo bayale hole dalu pudaba laga. Marungi nde dindi bibahende ngago lone mo bayale holenaga dalu ibilaga.

<sup>14</sup> Yobo-o í hale ho biruwa Ngode Datagaliwabebanda biabe hongohe tara tara biaga ngago bayuwa manda bibe. <sup>15</sup> Ngode Datagaliwabe ibugua hari beraliba ngagoha hari daba bidaba lagago agua biaga manda bidebe. <sup>16</sup> Ani bialu Ngode Datagaliwabebanda hari beraliba bameore lina ngeledago ogoaleni ngeledalo í manda bidebe. Ainde Ngode Datagaliwabe ibu bibahendeore manda biaihe howa ibugua biabe bayale tara tara ngaru biai haga ka. Ani bidago ina uruni bibahendenaga manda nabioire kegoni ndobe. <sup>17</sup> Ainde puyabu poboyogobi puladaga haragola inaga aga tinginibi poboyogo biragola lone mo dagare bia holenaga mbira bibe naheore kegoni. <sup>18</sup> Ainde Ngode Datagaliwabebanda hari li kago wabialu ibuni holene ngagoria hongo howa helo heleda. Ani kagola hari mindini ogoni wabini ngaru iba wai handaradagua bulene heleda. Ai ina agua manda bide. Ina ibu biamogo bia halu biabe uruni maru bibehe kebe. <sup>19</sup> Ina bibehe keyagua nde iname Ngode Datagaliwabenaga godi lolene ngagoria pu howa ibu baba bi ogodagua lolene nga lalu ina inanaga miniha wa nalebi manda nabibi ibula bi lolenego iname manda manda bibe nahe kamago ina langulene karulape kegoni. <sup>20</sup> Ainde Ngode Datagaliwabebanda ina bi larogola ibugua hale hayagua nde í bo waholigo ina bi lole kogo nalolebero.

<sup>21</sup> Puyabume hari beraliba wiaru pulo wahai hayagola hari mindini pani halu ni hongohe darago demborerebi iname de handabe naheore kamagoni ndobe. <sup>22</sup> Dindi abene uyurahayagi hariha howa wa hongohe hadali kagonaga wa ogoni ngolo handalehe ka. Ogoni Ngode Datagaliwabebandaibunaga yari heledagola wa timbuni holeneibunaga hongo holene heba ibirago handalu iname mogolo hondowa gi haramali. <sup>23</sup> Ngode Datagaliwabe Hongo Haiheore kago ibu daligaore kagoria iname kaware hapara halu pobe nahe kama. Ibu tigabiore howa hongo timbunihe ka. Ibu mana tigabi hangu biaga kago ibugua ina bame bope naholebira. <sup>24</sup> Ani biaga kago manda bialu wali agali bu karume ibuhondo gi hai haga ka. Ani bialu mbirali ibu mini gigabiwi ko lo mitangi bu karume bi larago ibu hale nahaga ka, lalu Elihuhanda lene.

## 38

### *Anduane Homogohanda wabinirume Yobonaga manda bolangua kago ogo*

<sup>1</sup> Elihu ibugua bi lai heagola Anduane Homogo ibuni hari daba bialu iba dalu timbuni ibiyagoha howa ibugua Yobohanda bi lalu hayaru ladai bialu lalu, <sup>2</sup> Yobo-o í mini bayalebi manda bayalebi nawiooredago. Í agali agobime bi dewa lama ibaga bialu howa inaga biabe bule ngoru mo habo lalu kebe. <sup>3</sup> Ai áyu í agalioreyagua naigoria heyu howa bi maru ladai bibelo hale haro. <sup>4</sup> Ina dindi ogo wabialu mo hongo halu harungi í agoha haribe. Bi te ina baya hangu mandabu keyagua nde í langerene. <sup>5</sup> Dindi

☆ 38:1: Yob 40.6, Ese 1.4 ☆ 38:4: Iba 104.5, Min 8.29, 30.4

ogobiore wiloda manda bialu wabinidago aiwabe. Dindi ogoninaga magi manda bule hagane pu yalu mandabu penedago ai kabe. Ína manda bidebe. <sup>6</sup> Dindi ogo hongo howa yu helonaga gene agohayagi kabe. Dindi wabulenaga gene ege tole dindiha ala ngelenedago aiwabe. <sup>7</sup> Dindi ogoni pigane wabialu heangi yakundi bu hearume turu halu iba gana layagola dahuliyali hearume turu howa iba gana ladaga halu hene.

<sup>8</sup> Iba timbuni solowara bedaru dindinaga tombeneha howa tidatagi halu ibiyagola ai naibi harula lalu iba ibu birulene ngagoria biradaba lenedago aiwabe. ✧ <sup>9</sup> Iba solowara pigane íbu bereagola hari beralibame iba ibu aga biradagua bia howa yári buwa berelene. Wali aiyame waneigini agame yári bia hagadagua hari beraliba mindibime iba dambi helenego ína ndobe. <sup>10</sup> Ani bialu iba ibu birulenegoha biru wahelo pabe bu mabu bido. <sup>11</sup> Ani berelowa iba solowara ibuhondo bi ogobi lamido. Iba yaribu bialu howa íninaga hobane ngelarogoria ibalu dai bibe. Dindi mendeha pogolo amu nahabe, ledogoni.

<sup>12</sup> Yobo-o la naberego agua biya. Halu mbira ína bi larigola mbiraga winigo ega bi layabe. Be horo bibahendengi egerebagi hangu wiaaboha larilibe. <sup>13</sup> Arumame mbiraga balangiya aleme dindi dambi hai kagola wali agali ko biaga karume ko bule mbiraga ibagabu hagago. Ai horo mbirungi mbiraga pageali ko biagaru íbu heagola uruni íbida pelo ína ega bi la larigola ega bi layagola agali ko bialu íbida piai hayabe. <sup>14</sup> Ega bi laragola ni dedagome wá haragola mbiraga arumaha wia do hayaru wá kagoria baya hanguore handai holeberema. <sup>15</sup> Uruni agali ko karunaga mana ko ngaru turu howa bialu haga horombe ale nga. Anigo horongi tinaga biabe ko biradaruni wahalu bibe nahedagola bame haga.

<sup>16</sup> Ai iba solowara bedagonaga andaneha anda puwa iba andane dindiha ibagabu halu iba dugu daga haga ngago handaribe. <sup>17</sup> Agua biyabe. Ína dindi andaneha puwa wali agali homeneru piaga panga haraba arumame ndibulo wahe wiago handaribe. <sup>18</sup> Dindi ogoni timbuniore ngago ai dindi ogoninaga lene lene gimbuni ngaruha handai kebe. Hondowa manda biai keyagua nde í langia nabere.

<sup>19</sup> Ai wá holene ibu nde íbuni dalu pole piagago hariga í hendedebe. Mbiraga íbuni dalu agoha ngabe. <sup>20</sup> Wá holene aruma holenela libu libuni dalu dai bilonaga hariga ogodagua pudaba lowa walia halu lone dai bidaba loleberebe. <sup>21</sup> Yobo-o í agali waheoredago ína libu dalu ogo lalu walia holeberegoni. Irane ína wá holenebi aruma holenebi wa nabi hewangi í aiyahanda í ala taba henededago.

<sup>22</sup> Iba dalu dindigunila mo mogobu ngelaga ngago í hondo piribe. <sup>23</sup> Ína uruni wali agalime mine howa wai bialu бага бага bialu karu bolenaga manda mandabu ngeledogoni. <sup>24</sup> Ni pigane dole hoai lalu bibahendeha datogo mani lole piganeore hoai lagago hariga agoha pole porabe. Ni tagira ibiragoha howa puyabu ibuwa bibahendeha pume hagago íbunaga hariga a ngagobe. <sup>25</sup> Dindi ogoria iba íbilonaga hari daligaha howa iba gana bialu aiwa dadabu íbilagabe. Hari daba ale timbuni kilikulu laga bialu purogo layaruni pelo hariga aiwa bo wia kabe. <sup>26</sup> Dindi wali agali nahaga ngagoha iba dalu íbilaruni aiwabe. <sup>27</sup> Abale dindi ogoniha dindi hangu wialu mbirale anda nahaga winigo ai dalu íbalu dindi mo karulape howa dataniru anda harago aiwa mo bia hagabe.

<sup>28</sup> Mbiraga dalubi pibiyabi íbira hagayago libu aba kabe nahe. <sup>29</sup> Dalu dindiguni íbira hagarubi kewaro bagarubi ti aiyá bedabe nabere. <sup>30</sup> Dagare bulene horo tagira íbirangi iba bedaru gíambe ege tole ale halu dindigunime iba solowara bedaru bu dambi hai haga ngagoni.

<sup>31</sup> Ai nde Yobo ína yakundi karuni bibahende mo mogo buwa mbiraore hanguni helai holeberebe be yakundi maru mandagi dariba homaga hene ngaru hadape halu purogo

✧ 38:8: Yar 5.22

ladaba loleberebe. <sup>32</sup> *Ína yakundi maruhondo hariga mo walia halu mali mbiragonaga hariga ogodagua ibabe loleberebe.* <sup>33</sup> Yakundi li harini karuni tinaga mana talialu haga ngaru *í* manda bidebe. Dindini ngarubi nde mana mbira yakundiru ti biaga ale dege bidaba loleberebe.

<sup>34</sup> *Ína hari beraliba kagohondo iba dalu íni damulenaga ibila lowa hongo howa larego hale halu beralibame iba ani ibilolebirabe.* <sup>35</sup> Ani bialu hari dabahondo *í* mbiraha pu laregola ibugua ladaí bialu lalu, *Ína bia laredagua biai hole kogoni, lolebirabe.* <sup>36</sup> Ega gabiago ale ma luhe bedaruhondo iba li timbuni ibulebira lalubi ega gogologo bedaruhondo ega bi larago bi la lalubi manda aiwa talebu miniyabe. <sup>37</sup> Harini beraliba karuni iba hambu tolo wiaga todobene be ale ngago. Uruni ai aleme daga labehebe. Iba uruni dindini odope hole agali aiwa polebirabe. <sup>38</sup> Ani biragola dindini be abalu titaulo ngaruni mo gede halu dindini para helonaga aiwa lamibehebe.

*Éma bialu piaga bedaru manda aiwa mini yu kabe lolene ogo*

<sup>39-40</sup> Anduane Homogohanda laabo halu lalu, Yobo-o *ína* ema bialu piaga bedaru budi gabua ale laiono ti ege gundu bira do haga ngaruha bedaria bo nelu haru eberegola laiono tigua karulapeore bo nalu berelo mirilibe. <sup>41</sup> Ega hombo hagau bedaru tomo nolene nawidagola dindi kaundiaruha tomo taya bima pedaha tinaga iginirume *ihondo* tomo ngi lowa olalu bedagola ti tomo nelu aiwa miagabe, Anduane Homogohanda Yobohondo bi ani lene.

## 39

<sup>1</sup> Aguanaga. Nogo meme irabuha gabua karu ti iginu ogoni hono wiaga kalo manda bialu nogo gabua meme ale mini dia karu ti iginu wirago *í* hendedebe. <sup>2-3</sup> Nogo meme hari bare ngaruha haga karubi nogo dia karubi tinaga iginu ege ogodagua ti *aiya* tombeha bialu horo ogongiore hono wulebiralu manda bidebe. <sup>4</sup> Nogo uruni ti *aiya* baba hari bare ngaruhabi dangi te ngaruhabi ibagabu bialu anda haga. Ti anda halu hongo kagola ti *aiya* wahalu tini hangu hama piaga. Ani bialu dai nabi puabo haga.

<sup>5</sup> Nogo gabua dongi dariba karu tini hame ledagoha pupe halu pelo golope holene ai kabe. <sup>6</sup> Dindi ko wali agali nahaga tayanda amu ngaruni tinaga dindi ogoni halu ti ogoniha ibagabu helo midogoni. <sup>7</sup> Nogo dongi uruni ti andagani hayagua agalime hende ho dariba howa ba talia bigi bialu tinaga biabe bia helo helaga. Ani biagayane handalu tanoha bi dewa lalu giligele dewa laga ogoriani ti habe manga haga. <sup>8</sup> Ani bira handala ti hari wali agali nahaga irabu te ngaruha puwa tinaga tomo datani ira yuni ngaru nalu haga.

<sup>9</sup> Yobo-o nogo bulumaga gabua karume *ínaga* biabe biahalu hagabe. Ne laragola anda palelo manda mandabu wirigoha tini manda bialu palue piagabe. <sup>10</sup> *Ína* ti pume hende howa haru halu dindi ulinu unu ngaruha tomo hongole dindi alilo haru pu poleberebe. <sup>11</sup> Tinaga hongo timbunihe ndoyabe. Anidagola *ína* manda bialu keria tinaga hongo timbuni gibiorehe kagome *ínaga* biabe timbuni ngaru bia holebiralu manda bidebe. <sup>12</sup> Nogo bulumaga gabua karume *ínaga* mabuha puwa tomo widi lini bogabi dedaru gandulo yalu ibuwa amu yuni iraneru yu wahaga ngagoria yalu ibule pudaba laregola tigua hale halu pu polebirabe.

<sup>13</sup> Ainde ega yari ale bedaru ti turuho kangu tinaga babaganeme yabu yabu laga. Ani bialu howa ega gabiago ale ma luhe bedaru tinaga iginu bedaru baya hangu handayaho biragadagua ega yari ale uruni tinaga iginu baya hangu handayaho ha nabiaga beda. <sup>14</sup> Ega yari ale uruni tinaga habaneru wialu howa egame dambiho paliagadagua palia nabi dindime mo poboyogo bia helo dindini ngelaga beda. <sup>15</sup> Anidagua bialu wali agalimebi ema bialu piaga gabua maru bedarumebi ibalu tinaga habane ngago hangedowa togodolobadago manda nabiaga. <sup>16</sup> Ega yari ale urunime tinaga iginu gali

karu baya hangu handayaho ha nabi mendenaga haru haradagua biaga. Homayaguabi homelo wahalu piaga. Ti bame habane wirago dege halu handa dai nabi wahalu piaga. <sup>17</sup> Inime ti mini mandabi nawi ogonibi helo henemane heledo. <sup>18</sup> Anigo ega yari ale uruni ti heyalu gerai larangi tinaga babaganeme giligele lalu hongo howa piaga. Tigua gerai lalu howa agali nogo hosini biralu gerai lararu yu wahalu ibu bolangua habehe piaga.

<sup>19</sup> Yobo-o ai agua biya. Ina nogo hosi karu hongo mialu tinaga mani irini luni karuni ina heledebe. <sup>20</sup> Nogo hosi karuni tigua pagayame daligaore pogola daga hagamadagua pogo lelonaga hongobi bi hongo howa lalu kagoni wali agali mo gi haga biagamadagua bilonaga hongobi ina minibe. <sup>21</sup> Hosi urunime tinaga hongo timbuni kagonaga parali howa turu halu tinaga gi gindi bame dindi godalu halu howa wai bule gerai lalu piaga. <sup>22</sup> Hosi uruni ti mogo lalu gi nahaga ka. Wai timbuniore biyaguabi ti gi halu ibida pu nabiaga. <sup>23</sup> Hosirume ami agali wai bilo tinaga erekunini berelalu gerai lalu piaga. Ani pialu howa timu nu nogo dongoneme wabiniha henedarume giligele lalu aminaga yandare yidarume ngiringara lalu bialu kaore yalu piaga. <sup>24</sup> Nogo hosime pilipe ale biguli bi hale hayagua tinaga minaha habe nahe ka haragola abale wai pole hongo tara halu piaga. <sup>25</sup> Pilipe ale biguli biago bi hale hayagua bi hongo howa lalu hosime wai biaruabe hondole nga haga. Ami haguane kagome bi ledagola ami agali karume ga ladaga halu wai bule porabupe halu piaga.

<sup>26</sup> Yobo-o ega nene bedaru ti unurayagi pole howa babagane agua yabu loabe lalu ihondo hale hagabe. <sup>27</sup> Ainde ega bodo hariawe alerume ti hari nene ngaruha anda bule pole howa ihondo hale halu piagabe. <sup>28</sup> Ega bodo hariawe uruni tinaga ha do anda hari nene urunihadane ege tole kaba ngaruha tinaga anda uruniha biaga. <sup>29</sup> Uruni tinaga anda biago ha bira do howa handa tagi halu tomo naga ale maru balu nole handa ai nai biaga. Kaundianibi kawarenibi ngaru handa waligaore haga. <sup>30</sup> Agali wai bialu bo homelenenaga tinginiru dindini wima pedarunaga ega uruni ti abale ibuwa biru mabu biaga. Tinaga igini bedarume homene tingini ngarunaga darama nole turu howa tama bialu biraga, lalu Anduane Homogohanda lene.\*

## 40

<sup>1</sup> Ani lowa Anduane Homogohanda Yobo hale halu lalu, <sup>2</sup> Ai Yobo-o ina i Ngode Datagaliwabe Hongo Haiheore kogohondo lai lalu kegobi ina mana tiga nabi birida larigobi bibahendenaga bi ayu ihondo hale haruru ladai biai habelo henge ngerogo ladai buleberebe be bape halu waharebe, lene.

*Ngode Datagaliwabenaga bi Yobohanda ladai bibe nahe henego ogo*

<sup>3</sup> Ani layagola Yobohanda Anduane Homogohondo ladai bialu lalu, <sup>4</sup> Anduane Homogo-o i nahabane galone naheore kogoni howa bi la ko haruda. Ani buwa ihondo agua ladai buabe. Ina bi mbira larolono labe naheore kogoni. <sup>5</sup> Ina bi dewaore larugonigo ai bi lone naloleore, lene.

*Anduane Homogohanda Yobohondo lalu, Inaga henge i mialu daliga birabe, lenego ogo*

<sup>6</sup> Anduane Homogo ibuni iba dalu hari puyabu timbuni biyago ha howa lalu, <sup>7</sup> Ai i agaliore heneyagua ina ihondo bi hale haga berogo ladai bule heyu habe. <sup>8</sup> Ai ina hongo howa lalu, i agali ko nabiaga tigabiore kogoni, larigodago irane agome ina ihondo kagua biridago manani dababa laribe.\* <sup>9</sup> I hongo timbunihe ini kogobi dege kebe be ina bi laregola inaga bi hari daba bialu kulu kala laradagua biagabe.

<sup>10</sup> Ina bibehe karulape keyagua nde inaga henge i mialu yari bayaleru mini lene holeneru hongo timbuni holenerubi yu howa wali agali bu karu handame howa i daliga birabelo. <sup>11</sup> Ani biruwa handalu keria agali mine haga karume tininaga mini yaraga

\* 39:30: Md 24.28, Lg 17.37    \* 40:8: Yob 27.2-6, 30.18-24, 31.6



howa mine hayagua nde ina tandaga timbuniore howa tihondo mana bialu hingedope habe. <sup>12</sup> Ai aniore bialu agali mana ko biaga karu bope habe. Ani bialu ko biaga uruni tini henegoria kaore dege helowa bo hingedope habe. <sup>13</sup> Ani hingedope howa wali agali maru karume lone hondoligo nahendelo dindi dugudambi halu hora habe. <sup>14</sup> Ina uruni biai harego hondowa ininaga hongome i bolangua halu wali agali ko biaga karu bope howa pani midegola ai ina inaga mini yaraga holebero, lene.

*Nogo gabua tara timbuni mbira mini hibobodamusi kago Ngode Datagaliwabe ibuni hangume handayaho hagane kago ogo*

<sup>15</sup> Anduane Homogohanda laabo halu lalu, Yobo-o ai ina nogo gabua tara timbuni mbira mini hibobodamusi kago hondole pu. Inime uruni ti wabialu ibi nde wabia dege birugo kegoni. Hibobodamusi uruni tinaga tomo nogo bulumaga karume datani naralidagua tibi datani naga ka. <sup>16</sup> Ani howa tinaga tingini hongo timbuniore howa tinaga erembirahabi tombehabi hongo timbuniorehe ka. <sup>17</sup> Tinaga erene hongoheore ira tamia ale halu tinaga gi ge hongo gibeheore ka. <sup>18</sup> Tinaga kuniru giambeore ege tole mini boronosime wabini anda gene ale howa tinaga gi geru hongohe giambe nama kuluba timbuni ale ka. <sup>19</sup> Ai Ngode Datagaliwabe inime ema bialu piagaru wabialu howa nogo mini hibobodamusi uruni ti daliga timbuniore bolanguahe helo wabinigo ka. Wabini anduane ini hangu uruni bibahende bolangua haihe kogoni.

<sup>20</sup> Nogo hibobodamusi uruni tinaga tomo nelo datani hari barebare ngaruha nogo tara tara maru karu ti ibagabu howa nalu haga ngaruha ibubi nalu holebira. <sup>21</sup> Ani howa ti paliaga ira anihe tilitili karu teneha pialalu tolate iba pugua ngaruha ha do haga biaga ka. <sup>22</sup> Ani howa nde iba angeni ira karu teneha pialu paliaga ka. <sup>23</sup> Ti ani karia iba li timbuniore hongohe ibalu tinaga ma namu lai hayaguabi tiha gi holene mbira nawi howa embedaho haga ka. <sup>24</sup> Ti ani kagola agali abi aleme tinaga de mo ge howa minabehebe. Agali abime ti gonoha hadabehe kabe, lene.

## 41

*Abagua dama ale mbira mini Lebiadana ibu ema bialu piaga bedarunaga haguane timbuniore bedago ogo*

<sup>1</sup> Anduane Homogohanda Yobohondo laabo howa lalu, Ai Yobo-o ina wena бага hugime Lebiadana minabehebe be ogoninaga hege minu palu dariba habehebe. <sup>2</sup> Iunaga ngui harigaha diri bolo wuwa pu ogoniha hende halu haru poleberebe. Ani ndoyagua nde pume ibunaga ne hanganeha hende holeberebe. <sup>3</sup> I urunidagua bibehe kebe. Ina ogonidagua bialu ibu minu yania hariyagua nde ihondo bi darabini lalu, Ai nde i poliya ina dara halu i yupeha, lolebirabe. <sup>4</sup> Ibugua inila bi lo pongobo wialu inaga biabe bulene ngago ibugua bia holiya lolebirabe. <sup>5</sup> Ega hinini bedagola mo gini bia hagadagua ogoni ibu mo ginibia holeberebe. Be i wane emenerume mo gini bia helo ina ibunaga mani hende howa haru poleberebe. <sup>6</sup> Agali wena minaga muni dewawi karume ogoni ibu yolo ogodagua mibeheda lowa bi wai bialu ai tigua bo podaga buwa muni tagulebirabe. <sup>7</sup> Ainde ina ibu boga dege bialu timu agirabe tobahe ibunaga tingini embonerunaga hai heloleberebe. <sup>8</sup> Iunaga tinginini gi wialu ela ha handa. Ani beregola ibugua hongo timbuni howa wai birago handaregola ibu bedagoha halu mende ela nahole labelo mbira bulebirago hondolebere.

<sup>9</sup> Abagua mini Lebiadana ogoni minule lo manda bideyagua nde mini ogoni ayu yu waholene nga. Irane ina ibu bame handaba haregola inaga gi ge ala duru lalu mogolowa hongo nahe pandina ibira holebere. <sup>10</sup> Abagua ogoni ibu padaria agali mbirame mo heya howa balu wayali habe nahe ka. Abagua ogoni balu wayali holene mbirali naheyagua nde agali abi aleme i bolangua holobadabe. <sup>11</sup> Ayu dindini

ngaruni bibahende ininaga ngagoni. Mbiralime ihondo mbirale mbira ibunihondo mani ngiadai bulenaga yuha lalu ngini mbirali ai kabe.✧

<sup>12</sup> Ai abagua ogoni ibunaga tingini hongobi ogobiore beda lalu garea laro. <sup>13</sup> Agali abi aleme abagua ogoninaga tingini o ligilaga ledago lagalo wahabehebe. Iibunaga ne gibiore ho bedagoria í agali abi aleme hapara holeberebe. <sup>14</sup> Iibunaga ne gibiore dewa kago hondowa agali gi taraore haga. Anigo aiwa ibunaga ne mo halabehebe. <sup>15</sup> Ibu tinginini o ligilaga ledarume ibunaga tingini humbi ale halu mo hongo kagola ibuni turu taraore haga beda. <sup>16</sup> O ligilaga ledagome tingini bibahende dambi hai halu ndibulo wa kagola ibu kabaneha puyabu emene mbira anda pobe nahe beda. <sup>17</sup> Ani bialu hongo howa ndibulo wa kagola mbiraleme dongone ligilaga ledago lagalowa taulo wahabe nahe.

<sup>18</sup> Ibu kiame baragola wá timbuni ibunaga ngui harigaha howa tagira ibalu yabulo togo laga. Ani buwa ibunaga debi handalu keria egerebagi ni tagira ibiraligobi haga. <sup>19</sup> Iibunaga ne harigahabi howa ira hungu kiau latagi howa dido lalu purogo laga. <sup>20</sup> Ani bialu ira hagua pobo timbuni biraligobi ibunaga ngui harigaha howa tagira ibaga. <sup>21</sup> Ibugua ne hariga ha laragola ira hungu bialu kiau latagi haga.

<sup>22</sup> Iibunaga ma hongo taraore kago hondowa agalime gi taraore haga. <sup>23</sup> Iibunaga tingini o ligilaga ledaru baya hanguore tinginiha paraho wa kagome ibu mogoore nale biraga beda. <sup>24</sup> Iibunaga bu mini giambe dege lalu ege tole ale biruwa ibu mbirale mbira gi holene manda nabi beda.

<sup>25</sup> Abagua ogoni ibu heyaragola agali hongohe pari wayaliore heneyaguabi gi taraore howa duru lalu ibida pobe nahe haga. <sup>26</sup> Danda timu yandare yidaru bibahendeme bai hayaguabi ayu tibu nene gadeleme dibayaguabi ibu mutudu nawulebira. <sup>27</sup> Ibugua uruni bibahende nagalonedane yohondo biraga beda. Aene yandareme bayaguabi ogoni dangi yuni gabuni ale haga. Boronosi yandare hongohe giambeoreme bayaguabi ogoni bame yohondowa ira magane goba ale haga. <sup>28</sup> Danda timu yandarerume bayaguabi ibu gi howa mogo lalu ibida napiagaore. Ege tole dugualu bayaguabi uruni bame ibunaga tinginini ira yu gilope haradagua biaga beda. <sup>29</sup> Wai biaga kango yiaguabi ogoni bame perabo gabuni ale handale halu timu yandareru ngilingele layagua uruni nagalonedana lowa mo yohondo wiaga.

<sup>30</sup> Abagua ogoni ibunaga tombehayagi o ligilagalo kago todobene be dindime wabinigo pambu lene yapara hene mbaule nene gadele ka. Ibu dindi waru ngagoria poragola tombeha o kagome dindi godama iba ganarua biradagua bima piaga. <sup>31</sup> Solowaraha do lalu poragola iba bedago tala ai nai bialu todobeneha iba kidikodo lalu tala tagitagi baradagua biaga. <sup>32</sup> Ibani ibu do lalu penegoria iba pele agali waherunaga dagua pelaragobi biaga. <sup>33</sup> Abagua ogoni ibuore mbirale mbirago hondowa gi holene nawiore biruwa ema bialu piaga maru bedaru aria mbira ibu ale nabereore. <sup>34</sup> Ema bialu piaga bedaru aria maru mini lene timbuni bereaguabi ibugua uruni mo awadale halu handa angua howa beda. Ema bialu piaga maru bedarume tininaga mini yaraga hayaguabi uruni bame degedago lowa ibuni bibahendenaga kini beda, lalu Anduane Homogohanda lene.

## 42

### *Yobo taga howa mini beregedenego ogo*

<sup>1</sup> Anduane Homogohanda bi ani lai hayagola Yobo ibugua Anduane Homogohondo ladai bialu lalu, <sup>2</sup> Anduane Homogo-o inime hangu mbirale bibahende biai hagaore kego manda bu kogoni. Ini biabe mbira bule lo manda bidego mendealime nabibe nalaga. <sup>3</sup> Ina ihondo bi mbira ogodagua hale halu lalu, Agali minibi mandabi nawi mbirame inaga biabe buleberogoha hapai kago aidabe, lari. Ina bi dewaore irane

✧ 41:11: Man 10.14, Iba 50.12

nawini howa bi ko dewa lalu harudagonaga daraba laro. Bi tara maru lalu harudaruni ininaga mini mandala bolanguahe larudago ai uruni baya hangu manda budai buliya.\*  
 4 Ani bialu ina ihondo lalu, Yobo-o ina bi larogo bibahende baya hangu hale hai howa ladai bibe, larigoni.\* 5 Ainde Anduane Homogo-o abale howa agali degeme bi layaru hale howa í kegoda lalu manda bu harugo ai áyu ininaga deme í handaore bidogoni.  
 6 Ani hondowa inime bi lalu harugonaga taga henene ho kogoni. Taga howa mini beregedo kogo walia halu be abalu dugu hiruwa bedogoni, lalu Yobohanda lene.

*Anduane Homogohanda Yobonaga nenege agali tebirali biaru talinigo ogo*

7 Anduane Homogohanda Yobohondo bi lai howa ibugua Temana tanoali Elibasahondo bi ogodagua lene. Elibasa íbi inaga nenege agali kirali biago labohondobi kebaore ho kogoni. Irane tigua mana galone ina biagaru inaga biabe biahaga agali Yobohanda layadagua ndo la ko harimi. 8 Ai tigua áyu ogoni puwa nogo bulumaga wangabe karia nogo sibi wangabe karia lowa inaga biabe biahaga agali Yobo karia haru halu ibule pudaba. Haru ibuwa inaga bo lomabu ngialu irani delai halimu. Ani bidamigola Yobo ibugua tigua ko birimigonaga inihondo dara halu biamogo bibe lowa bi larago ina hale howa tigua bi la ko harimigonaga mana bialu pani nanguliya ani bule pudaba. Irane inaga biabe biahaga agali Yobohanda bi layadagua ndo larimigodane ani bidaba laro, lene.

9 Anidagua laya handala Temana tanoali Elibasabi Suba dindiali Bilidadabi Nama dindiali Sobabi ti bibahendeme Anduane Homogo ibugua bilimu layadagua biai hene. Biai heagola Yobohanda ti dara halu biamogo bilo Anduane Homogohondo tinaga bi la hene. Biamogo biya handala tini andaga pugu pugu bini.

*Anduane Homogohanda Yobo lone mo bayale henego ogo*

10 Yobohanda ibunaga nenege tebirali biaru biamogo bia lalu bi lo heagola Anduane Homogohanda Yobo bayale helonaga lone biamogo bini. Anduane Homogohanda Yobo mbirale abale wu hayaruni emene hangu lowa mani dewaore miatago halu mini.\* 11 Ani heagola Yobo ibunaga damene hearubi ibuni hamene mbalini bu hearubi bibahendeore ibu andaga tomo nole ngoai hene. Tigua Yobo ibu genda timbuni Anduane Homogohanda mo miyagonaga mitangi halubi ogoninaga Yobo dara halubi Yobonaga bu mini mo hongo hole ani ngoai hene. Ani biruwa ti bibahendeme muni silibabi gi magi ngolome wabinirubi mbira dege dege Yobo migi bini.

12 Horo ogoningi howa Anduane Homogohanda Yobo mo bayale halu hene. Hamaro bulenehayagi abale haraligobi ndo lowa bayaleore helene. Iibunaga nogo sibi daosini deria (14,000) hinalu nogo kamele daosini waragaria (6,000) hinalu bulumaga daosini kira (2,000) hinalu nogo dongi angibuni daosini mbira (1,000) hinu halu bini. 13 Ani howa ibu igiri karia hono wialu wandari tebira hono wini. 14 Wandari wahenego mini Yamima wialu mendego mini Kesia wini. Tebonego mini Kerene Habugu wigi bini.\* 15 Wandari uruni baya dege lalu ti dindi ogoniha wandari bayale ti ale mbira nabere lowa ti hangu bayale berene. Ai Yobohanda ibunaga paluni wiaru ibu iginiru tale biahaga bialu howa ibu wane tebirali biarubi nde tale bialu mini.

16 Yobo ibu mali handari mbirani pira maria (140) karulape howa ibunaga aguanerubi tinaga waneigini hayarubi bibahende handaioire hene. 17 Ani handalu nde Yobo ibu biru wia dege bialu waheore hayagola biru mo la ai halu homene.

\* 42:3: Yob 38.2, Iba 131.1, 139.6 \* 42:4: Yob 38.3, 40.7 \* 42:10: Yob 1.1-3, Iba 14.7, 85.1-3, 126.1-6 \* 42:14: Yamima inanaga bi lalu Ega Malibu ale. Kesia inanaga bi lalu Ira Nghaga mini Kesia. Kerene Habugu inanaga bi lalu dengui yári mo biahaga Padua.

## Iba Gana

### Mbuga ogoha gilibu ngarunaga nemandi ogo

Isaraele wali agalime Ngode Datagaliwabe mitangi bialu iba gana lolenebi ibuhondo bi lolenebi mbuga ogoniha gilibu winigo nga. Tigua Yarusalemeha ngoai holene wiangi harigani pialu howa iba gana lagabi Anduane Homogonaga andaha lotu lalu howa iba gana lagabi hene. Wali agalime turu howabi genda howabi iba gana lalu haga hene. Mali mbiraore ndo mali dewaore howa wali agali maru hearume iba gana gilibu yu ngoai howa mbuga mbiraoreni gilibu winigo nga. Iba gana tara tara gilibu ngaru Ngode Datagaliwabehondo iba gana lolenebi ibuhondo bi lolenebi uru.

Ngode Datagaliwabenaga mini yaraga halu lolenebi  
 Ko birimaru lapani halu domabe lolenebi  
 Kini gahenge dabobagi helolene horongi bi lolenebi  
 Ina gi ho kamangi mamage holenagabi mini dunubia holenenagabi bi lolenebi  
 Turu howa kaj lolenebi  
 Waitigi ibiragola pani mulenaga bi lolenebi  
 Wali agalime mana bayaleore mo tene holenaga bi lolenebi uruni nga.

Iba gana uruni ina dindi holene hariga baya gibiore walia halu mo hongo haga nga. Yasuhanda iba gana mbuga ogoniha howa mana lawai haga hene. Keriso hamewaneigini pigane henerumebi hama ibalu áyu kamarumebi iba gana mbuga ogoni mo tene halu laga henego kama.

Ngode Datagaliwabehondo iba gana lolenebi bi lolenebi gilibu ngaruni ina wali agalime lolenenaga lo nga. Ina kamagoria horo marungi keba holene wialu horo marungi turu holene wiaga. Horo marungi wandari igiri bayale hongohe holene wialu horo marungi wali agali wahe holene horo wigi biaga. Iba gana mbugani howabi gilibu ngago wali agali holene áyu kamagoria ngolo be lo nga. Iba gana urunime Ngode Datagaliwabenaga wali agali bamba heneru biamogo bialu mini mo hongo hama ibaho winigo áyu inabi ogonidagua dege biaga.

#### **Bulu бага бува кuni gilibu ngago**

Mbuga ogoniha iba gana mbira mbira lamaga halu handari mbirani pira duria (150) gilibu nga. Uruni tale buwa wabuni duria tu urubi wigi bida.

Mbuga Mbira  
 Iba Gana 1-41  
 Mbuga Mende  
 Iba Gana 42-72  
 Mbuga Tebone  
 Iba Gana 73-89  
 Mbuga Mane  
 Iba Gana 90-106  
 Mbuga Dauni  
 Iba Gana 107-150

## Mbuga Mbira

### 1

*(Iba Gana 1-41)*

*Turu henene holenenaga ogo*

<sup>1</sup> Mbiral mana ko biaga karume ko bia larago hale halu nabiagabi<sup>\*</sup>

tigua ko biradagua nabiagabi

Ngode Datagaliwabe deni habane nabuleneme mege bialu bedagoria nabiragabi kago

<sup>\*</sup> 1:1: Iba 26.4, Min 14.15, Yar 15.17

ibu turu ho ka.

<sup>2</sup> Ani nabi ibugua Anduane Homogohanda bi ledadagua bulenegoha  
turu holene ngaria handa walia howa

mbiraga horombebi daga lalu mitangi biaabo haga ka.✧

<sup>3</sup> Ira iba angeni bu karu anda halu

lini dolenengi dalu

yuniru gau nalagadagua

ibugua mbirale bigi birago bayale haga bulebira.✧

<sup>4</sup> Ai ko biaga kago ibu ogonibi ndo ka.

Ibu puyabume abalu hilu yalu piaganego ale ka.

<sup>5</sup> Ani bidago Ngode Datagaliwabehanda godi larangi

ko biaga karu tí koore biaga kamigoni lalu

ibuninaga wali agali karu heba mandagi habe nahedagola

ti dabo bagi holebira.

<sup>6</sup> Mini tigabiwi karu Anduane Homogohanda ti haru howa mamage haga.✧

Ko biaga karume hariga pialu karu homoleneni tagira pole pora.

## 2

### *Ngode Datagaliwabehanda Kini Dabo helenego ogo*

<sup>1</sup> Hameigini tara tara palu ngarume✧✧

handabe manga hamiya lalu lo manda bialu kago aginagabe.

Wali agali urunime aguaore bamiya lalu ndi nde lalu karu irane aginagabe.

<sup>2</sup> Anduane Homogohondobi mbirali kini helo ibugua dabayagohondobi

wali agali tinaga kinirume wai bule manda bu ka.

Haru hagarumebi mandagi mo mogobu biruwa handabe manga halu ti hoba mialu  
kagoni.

<sup>3</sup> Wali agali o biarume lalu,

Libugua ina haru hole dariba hayago hado wahamiya, lalu ka.

Libugua ina haru nahelo yu wahamiya, lalu ka.

<sup>4</sup> Anidagua lalu kagoni.✧

Anduane Homogo ibu dahuliya andaga ibuninaga dagiani handadaliho biruwa  
ti hondo oba lalu ka.

Tigua ni lo manda biraruni

bame de gangabi henene lalu buluba ndodagola

ibugua mo yo hondo ka.

<sup>5</sup> Ani bialu ti bayale bidabani keba holeneme

ti mini wilo mo gi lalu ka.

<sup>6</sup> Ibugua keba howa lalu,

Inaga Hari Saiono loma bini ngagoria

inaga kini ibu ogoriani tagira ibu heledo, lene.

<sup>7</sup> Kini ogoni ibugua agua lolebira.✧

Anduane Homogohanda ledadagua latagi lalu larogo.

Ibugua ihondo lalu, í í igini kegoni.

Áyu í í aba harogoni.

<sup>8</sup> Wali agali hameigini tara tara palu ngaru bibahende✧

✧ **1:2:** Yos 1.8, Iba 119.1, 119.35, 119.47, 119.92 ✧ **1:3:** Ais 3.10, Yar 17.8, Ese 47.12 ✧ **1:6:** Nah 1.7, Yo 10.14,  
2 Ti 2.19 ✧ **2:1:** Iba 46.6 ✧ **2:1:** Ab 4.25-26 ✧ **2:4:** Iba 37.13, 59.8, Min 1.26 ✧ **2:7:** Ab 13.33, Hi 1.5, 5.5  
✧ **2:8:** Iba 72.8, Dan 7.13-14, Yo 17.4-5



ina haru hoabe lariyagua ani bia lolebero.  
Dindi bibahendebi mbirale bibahende ngarunibi  
inaga dege holebira.

<sup>9</sup>Uruni bibahende ina kangome bo podolebere.✧  
Mbodoli be gingiru laradagua  
bibahende bo gingirulo paya paya bulebere.

<sup>10</sup>Bi hiriribi urunibi lene ngago manda buwa  
dindini kini harimidaru tina tiga bialu halimu.  
Haru haga bibahende harimidaru tibi hale halu bayuwa manda bilimu.

<sup>11-12</sup>Gi howa Anduane Homogonaga biabe bialu halimu.✧✧  
Duru lalu ma podope halu ibu igini mitangi bialu lotu lalimu.  
Ibu abale keba haragola ti homo tongolodaga holigo  
ti mini wialu ogonidagua bilimu.  
Ibuha mo humbi howa ha do ho karu ti turubioreni ka.

### 3

*Debidi ibu mo hongo helo egerebagi Anduane Homogohondo bi lenego ogo*

<sup>1</sup>Anduane Homogo-o inaga waitigi dewaore bu kagoni.✧  
Tigua i bole manda mandabu kagoni.

<sup>2</sup>Tigua i lo guralu howa lalu,  
Ngode Datagaliwabehanda i biamogo nabulebira, lalu ka.

<sup>3</sup>Ti ani laragoyu Anduane Homogo-o i inaga wai humbi ale howa✧  
i ho hangai haga kegoni.

Inime i wayali holiya biamogo biaga ke.  
Inime inaga genda bu ngago mo wahalu  
i mo hongo haga kegoni.

<sup>4</sup>Ina Anduane Homogohondo, i biamogo bia, lalu olaruli.✧  
Ibuninaga hari loma biahene biagoria howa  
ibugua ina bi larogo ladai biaga ka.

<sup>5</sup>Mbiraga i paliahondo kogola  
Anduane Homogohanda i handayaho haga ka.

<sup>6</sup>Ami agali daosini pira agimame (10,000) i ho hagira biragola✧  
ina ti hondowa gi naholebero.

<sup>7</sup>Anduane Homogo-o i ibabe.✧  
Inaga Ngode Datagaliwabe-o i biamogo bule ibabe.  
Inaga waitigi karu baba wai biaga i kegoni.  
Agali ko karume i mo ko nahelo  
tinaga ne bo hondaga kegoni.

<sup>8</sup>Anduane Homogo ini hangume inaga wali agali karu haru dai biaga kegoni.✧  
Ti bayale helo ina biamogo bibelo hamelo ko.

### 4

*Debidi ibuni mo hongo helo mbiraga bi lenego ogo*

✧ 2:9: Iba 89.23, Mo 2.26-27, 12.5, 19.15 ✧ 2:11-12: Pb 2.12, Hi 12.28 ✧ 2:11-12: Yo 5.23, 1 Pi 2.6 ✧ 3:1: 2 Sml 15.13-17.22 ✧ 3:3: Iba 62.7 ✧ 3:4: Iba 4.3, 43.3 ✧ 3:6: Iba 23.4, 27.3, 118.10-13 ✧ 3:7: Yob 16.10, Iba 22.21, 57.4, 58.6 ✧ 3:8: Iba 28.8, 29.11

<sup>1</sup> Ngode Datagaliwabe-o ina i mo wayali haga kegoni.✧  
Ina í olarogola ina inaga bi larogo hale habe.

Bamba inaga miniha genda yu hewagola  
ina inaga genda mo wahai harigoni.

Ína áyubi i dara holene irane nawini howa  
inaga bi hale halu biamogo bibe.

<sup>2</sup> Agali bu kamiru tígua inaga mini mo ko haga bialu  
horo agiru holeberemibe.

Ko ngaru hangu mo tene halu  
mana henene bulene ngaru nabi  
horo agiru holeberemibe.

<sup>3</sup> Tígua bi ogoninaga irane manda bilimu.✧

Wali agali Anduane Homogonaga andaneha haga karu  
ti ibuninagaore helo dabene ka.

Horo bibahendengi ina ibuhondo olalu haabo kogola  
ibugua ina olarogo hale haga ka.

<sup>4</sup> Tígua mana ko bialu kamigo wahalu✧

Anduane Homogohondo gi ho holene nga.

Tígua dagiani paluwa bi maru nale  
mana ogoni baya hangu manda bilimu.

<sup>5</sup> Tígua Anduane Homogo ibugua hame laga aleru ibunihondo lomabu milimu.✧  
Ibunihondo tí mini mbiraore wu halimu.

<sup>6</sup> Wali agali dewalime lalu,✧

Anduane Homogo-o inaga mo bayale holene ngibelo.

Ína ina dara halu biamogo bibelo hamelo kama, lalu lagane ka.

<sup>7</sup> Tomo widi gerebi liniru dewa andaho kagola✧

mabu anduane karume ti turuho haga.

Anigoyu ina iha turu holene wia harigome  
tinaga turu holene bolangua heneore ngirigoni.

<sup>8</sup> Anduane Homogo-o inimeore i handayaho kegome✧ i bayaleore kogoni.

I dagiani palialu howa mbirale mbirahondo gi nahe

miniha dungulo howa paliahondo haruli.

## 5

### *Anduane Homogohanda ibu handayaho helonaga bi lenego ogo*

<sup>1</sup> Anduane Homogo-o ina gendaore howa  
ihondo bi larogo hale habe.

<sup>2</sup> Inaga Ngode Datagaliwabebi Kinibi íni hanguore kego mitangi bialu  
ina i biamogo bibelo ihondo bi ogoni larogo bayuwa hale habe.✧

<sup>3</sup> Anduane Homogo-o egerebagi bibahendengi ina ihondo bi laruli.✧

Ni dolene tu haragolabi ina ihondo bi laabo haruli.

Ina bi laruga ladai bibelo i hondo kogoni.

✧ 4:1: Iba 17.6, 18.6, 18.18-19 ✧ 4:3: Iba 6.8-9, 50.5, 135.4 ✧ 4:4: Iba 77.6, 119.11, Eb 4.26 ✧ 4:5: Man 33.19, Iba 51.19, 62.8 ✧ 4:6: Dag 6.26, Yob 7.7, 9.25 ✧ 4:7: Iba 97.11-12, 119.14, 119.72 ✧ 4:8: Yob 11.19, Iba 16.9 ✧ 5:2: Iba 3.4, 65.2 ✧ 5:3: Iba 30.5, 88.13, 130.6

<sup>4</sup>Ngode Datagaliwabe-o wali agalime mana ko birago hondowa  
 ina turu nahagaore kegoni.

Wali agali mana ko biaabo haga karu  
 ti i kegoria haparaho habe naheore ka.

<sup>5</sup>Wali agali mine haga bu karu\*  
 ti inaga deni helo turu nahaga ke.

Wali agali ko biaga karu  
 tihondo handabe manga haga ke.

<sup>6</sup>Wali agali ke howa bi laga karu\*  
 ina ti bo wahaga ke.

Darama hangu noa haga karubi  
 bi nagalone ngago lo payapaya biaga karubi  
 ina urunihondo handabe manga haga kegoni.

<sup>7</sup>Ina ihondo gubalini timbuni ho kegonaga\*  
 ina inaga anda kegoha ibulebero.

Inaga anda loma biahene kagoria howa  
 ina ge duli hangaho biruwa  
 i mitangi bialu lotu lalu birulebero.

<sup>8</sup>Anduane Homogo-o inaga waitigi dewaore kagonigo\*  
 ina inaga bi mana bayale ngagoria talialu holiya  
 ina i haru habe.

I ibagabu kogoha ina hariga bayale tigabi ngago mo walia habe.

<sup>9</sup>Inaga waitigi bu karu tiha henene lolenego nawi howa\*  
 tigua agali ta nabi karu bo waholene hangu manda bu kagoni.

Tinaga ne hariga homaliha homa ngu ale bialu helo howa  
 tigua agali maru karu mana ko bulene ngago bilo  
 bime ladebodebo biaga ka.

<sup>10</sup>Ngode Datagaliwabe-o ina agali uruni tini ko biragonaga\* pani nelo mibe.  
 Tinaga mini wu kago mo wahabe.

Tigua i handabe manga howa mana ko ngaru bialu kago  
 agali ko uruni ti i kegoha nahelo  
 kaundiaha bo batagi ho helabe.

<sup>11</sup>Wali agali maru ina ti handayaho habelo haga karume\*  
 ti turu timbuniore ho holebira.

Tinaga bu miniha turu holene tolai ho howa  
 tigua iba gana turu halu lolebira.

Ina wali agali i gubalini haga karu  
 ti baya hangu handayaho habe.

Tigua i bayale kegonaga turu timbuni ho howa  
 inaga mini yaraga holebira.

<sup>12</sup>Anduane Homogo-o wali agali inaga bi mana taluwa bialu haga karu\*  
 tihondo mana bayale biaga kegoni.

Inaga gubalini holeneme wai humbi ale howa  
 ti ho ge haga kegoni.

\* 5:5: Hab 1.13    \* 5:6: Iba 55.23, Mo 21.8    \* 5:7: 1 Kin 8.29-30, Iba 132.7, 138.2    \* 5:8: Iba 24.4-5, 27.11  
 \* 5:9: Iba 62.4, Lg 11.44, Lm 3.13    \* 5:10: 2 Sml 15.31, 17.14, 17.23    \* 5:11: Ais 65.13    \* 5:12: Iba 115.13

## 6

*Genda ibu wiagola biamogo bilo Anduane Homogohondo bi lenego ogo*

<sup>1</sup> Anduane Homogo-o inaga keba ho kegome<sup>☆</sup>  
ihondo keba nahabe.

Í miniha keba ho kegonigo  
i pani nolene na mo ngibe.

<sup>2</sup> Anduane Homogo-o i hongo nahe kogo<sup>☆</sup>  
ina i dara howa biamogo bibe.

Inaga hongo biba halu ereba hayago  
inime i lone mo hongo habe.

<sup>3</sup> I miniha genda timbuniore ho kogo  
Anduane Homogo-o ai agua bidebe.

I genda yu agiru holiya karulapedabe.<sup>☆</sup>

<sup>4</sup> Anduane Homogo-o ina i biamogo bialu gi mibe.  
I nahomoliya ina dara howa abale pele ngibe.

<sup>5</sup> Homene dindiha karume i mitangi nabiagaya<sup>☆</sup>

Tini haga haga bidagoha howa  
inaga mini yaraga nahagaya.

<sup>6</sup> Ina olalu haabo kogola  
inaga hongo biba hai haya.

Mbiraga bibahendengi inaga de ibame dagia goba ho wiaga.

Ina dugu bialu haabo kogola  
inaga haguanda de ibame goba ka.

<sup>7</sup> Inaga waitigi dewaore bu kagola<sup>☆</sup>  
ina dugu bialu haabo kogome

inaga de to howa mbirale mbira bayuwa handabe nahe kogoni.

<sup>8</sup> Anduane Homogo ibugua ina dugu berogo hale ho kagoni.<sup>☆</sup>

Wali agali mana ko biaga kamiru  
ti i kogoria hapara nahe purogo ladaba.

<sup>9</sup> Ina Anduane Homogo olalu i biamogo bia larogola  
ibugua hale halu i biamogo biaga ka.

<sup>10</sup> Inaga waitigi bu karu  
ti genda timbuni yu holebira.

Gi timbuniore howa ti taga timbuni ho holebira.

Tigua i abale yu wahalu puwa  
tini pu luluya hama ibaga bulebira.

## 7

*Debidi ibu genda yu howa Anduane Homogohondo bi laminigo ogo*

<sup>1</sup> Anduane Homogo inaga Ngode Datagaliwabe-o<sup>☆</sup>  
waitigi bu karume i handa walia nahelo

iniha ha do hole eberogoni.

Agali i minule talima ibalu karume  
i bo wa nahelo biamogo bialu

i mo ko nahelo ina i pele ngibe.

☆ 6:1: Iba 38.1, Yar 10.24 ☆ 6:2: Iba 41.4, Hos 6.1 ☆ 6:3: Iba 90.13 ☆ 6:5: Iba 88.11, 118.17, Ais 38.18

☆ 6:7: Yob 17.7, Iba 38.10, Dug 5.17 ☆ 6:8: Iba 119.115, Md 7.23, Lg 13.27 ☆ 7:1: Iba 31.1, 31.15, 71.1

<sup>2</sup> Laiono gabuame wali agali bo budabaga biagadagua  
 ina waitigi karume i bo budabagabu waholani.  
 Tigua dindi ko mbirali i biamogo bulene nahe ngagoha  
 minu waholigo i pele ngibe.

<sup>3</sup> Anduane Homogo ina Ngode Datagaliwabe-o\*  
 iha biako hene mbira wiaguabi  
 ina mbirali kagohondo ko mbira bini wiaguabi  
<sup>4</sup> ina ina nenege mendeali kago ndelene wiaguabi\*  
 waitigi karuhondo bame ko biaede hene wiaguabi  
 urunidagua ina bini wiagua nde  
<sup>5</sup> waitigime i minilo wahabe laro.  
 Tigua i bo hengedo wahalu  
 ina tingini bo budabaga bialu  
 dindini bame baai halu pelo wahabe.

<sup>6</sup> Anduane Homogo-o inime keba howa heyabelo hamelo ko.\*  
 Inaga waitigime ila wai hongo howa bialu karu  
 ti mo ko halu bai habe.  
 Ina mana tigabi hangu biaga kegoni ndobe.  
 Ani kego ai ina abale ibalu i biamogo bibe.

<sup>7</sup> Ina dahuliya andaga biragane dagia ngegoriani biruwa\*  
 ina wali agali bibahende karu ini kego ha mo ngoai halu  
 handame ho habe.

<sup>8</sup> Anduane Homogo-o ina wali agali bibahendeme mana ko birago mo tale bialu dabaga  
 ke.\*  
 Ina mana bayale tigabi wiago bialu haabo halu harugo manda buwa  
 inime i dababe.

<sup>9</sup> Ngode Datagaliwabe-o i bayale tigabi biaga kegoni.\*  
 Ina wali agali bibahendenaga bu miniha manda buwa  
 mo tale bialu dabaki biaga kegoni.  
 Wali agali mini kowi karume mana ko biraru  
 inime mo wahai habe.  
 Dabaki bialu wali agali tigabi karu ti bayale helo  
 ina ti biamogo bigi bibe.

<sup>10</sup> Ngode Datagaliwabe ibu ina haru hagaore kagoni.\*  
 Ibugua wali agali mana tigabi biaga karu biamogo biaga kagoni.

<sup>11</sup> Ngode Datagaliwabe ibu mana tigabi ngadagua\*  
 tigatigaore mo tale bialu dabaga ka.

Wali agali mana ko biaga karu  
 ibugua ti bope haabo haga ka.

<sup>12</sup> Wali agali ko biaga karu tigua mana ko wahai halu\*  
 mini beregeda nabi heagua nde

Ngode Datagaliwabe ibugua ibunaga wai biagane ayu tibu baya hangu nage wialu ne  
 holebira.

Ibugua ibunaga danda ngago wai bule  
 manda manda bu wulebira.

\* 7:3: 1 Sml 24.11 \* 7:4: 1 Sml 24.7, 26.7, Iba 109.4-5 \* 7:6: Iba 35.23, 94.2, 138.7 \* 7:7: Iba 22.27 \* 7:8:  
 Iba 26.1, 43.1, 98.9 \* 7:9: Iba 34.21, 40.2, 94.23, Mo 2.23 \* 7:10: Iba 18.2, 18.30, 97.10-11 \* 7:11: Iba 50.6,  
 90.9 \* 7:12: Man 32.41-42, Iba 64.7



- 13 Ibugua wali agali uruni bo waholenaga☆  
 manda manda bialu timu edaho kagoni.
- 14 Wali agali ko biaga karume ogobi ka manda bidaba.☆  
 Tigua mana ko ngaru bulenaga buleore lalu  
 miniha hongo haga ka.  
 Tigua mana ko ngaru hangu bialu haabo holenaga  
 ke haabo haga kagoni.
- 15 Agali mende kago minule lowa☆  
 gundu uli tombo wu haga ka.  
 Uli ogoni tombo wu kagoha  
 tini pu aribia holebira.
- 16 Anidagua dege ko tigua biyagome  
 tiniha wiadambi hai holebira.  
 Agali mende kagola keba howa lai lalu gungu bule mandabu heagua nde  
 o biagohondo bule mandabu kago tiniha biadai bulebira.☆
- 17 Anduane Homogo ibugua tigabiore bialu haabo haga kagonaga  
 ina ibuhondo kaj lalu ko.  
 Anduane Homogo Daligaorene Daliga kagonaga mini yaraga halu  
 ina iba gana bayaleru laga bialu holebero.

## 8

*Ngode Datagaliwabe ibuni daligaore gibi howa wali agalibi daliga dege helo wabinigo  
 ogo*

- 1 Anduane Homogo inanaga Anduane-o☆  
 wali agali dindi bibahendeni bu karume  
 í hongohe gibiore panigi ke lowa manda biai kagoni ndobe.  
 Mbirale ínime wabiriru bibahendeme ínaga mini mo yaraga haragoni ibalu  
 dahuliya andaga íni kegoria anda ibirane hale ho kegoni.
- 2 Wandari igiri emenemebi gali andu nalu karumebi heba☆  
 ínaga mini dege yaraga halu iba gana lo ngialu kagoni.  
 Ínaga waitigi karu í kegoria naanda ibilonaga  
 wai pabe ndo gibiorego payatagi howa ínini handatagi ho kegoni.  
 Mbirali mbirame ina bigi berego ha hangai halu  
 íla waitigi hole manda biyagua ogoni bulilono hapai haga kegoni.
- 3 Ina hari daliga ina wabini li kagoni de handadaga howa handarogola☆  
 egebi yakundibi li bu karubi helo  
 ínime helenedagoriaore li bu karia hendedogoni.
- 4 Ani hondowa nde mitangi bialu koría☆  
 ai ina wali agali nde emene ko bameore handini o bu kamarunidago  
 ina mitangi halu handayaho habe nahego  
 nde agiorenaga ina mitangiho haruadabe lo manda bigi biruli.
- 5 Nde abule emene bame ogonibiore kamagoni manda buwa dege  
 ina wali agali ínini ale degegoyu  
 ina emeneore nira holomaya wabu heledegoni.  
 Ani wabu helowa íninaga wá holenemebi mini yaraga holenemebi

☆ 7:13: Iba 18.14, 45.5 ☆ 7:14: Yob 15.35, Ais 59.4, Ya 1.15 ☆ 7:15: Iba 57.6 ☆ 7:16: Iba 140.9-11 ☆ 8:1:  
 Iba 113.4, 148.13 ☆ 8:2: Iba 44.16, Md 21.16, 1 Ko 1.27 ☆ 8:3: Iba 111.2 ☆ 8:4: Yob 7.17-18, Iba 144.3, Hi 2.6-8

- ínani manda karulo haradagua karulaho heledegoni.  
<sup>6</sup>Ina wali agalime ínà mbirale bibahende wabini dameneru✧  
 hondo halu ina haguane holomaya heledegoni.  
<sup>7</sup>Nogo sibi bulumagabi hinini damenego bibahendebi  
 gabua tagiraha haga damene bibahendebi  
<sup>8</sup>ega damene bibahendebi wenabi ibaha biraga damene bibahendeorebi  
 uruni bibahendeore wali agalime hondo hai helo heledegoni.  
<sup>9</sup>Nde aniore bidegome Anduane Homogo inanaga Anduane-o ínaga hongo holene  
 gibiorehe panigi ke lowa  
 wali agali dindi bibahendeni karume manda biaho kagoni ndobe.

## 9

### *Anduane Homogo ibuni tigabi biaga kagonaga kai lenego ogo*

- <sup>1</sup>Anduane Homogo-o ínaga bu miniha  
 ina íhondo kai timbuniore lo kogoni.  
 Ína baya taraore bialu harigonaga  
 ina wali agali bu karu lamigi bulebero.  
<sup>2</sup>Ina í mitangi bialu turu ho holebero.✧  
 Anduane Homogo Daligaorene Daliga kego  
 ina í mini yaraga halu iba gana lolebero.  
<sup>3</sup>Agali í baba waitigi hayaru í de handalu ti ibida piai haya.  
 Ti pilalu homai haya.  
<sup>4</sup>Ína dabagane dagiani biruwa mana mo tale biagadagua  
 tigatiga hangu mo tale biaga kegoni.  
 Ina bialu hewaru hondowa ina mo tale bialu heria  
 í tigabi bolanguahe hewaria handari.  
<sup>5</sup>Wali agali í mitangi nahaga hearu ina ti mo dabaki harigoni.✧  
 Wali agali ko biaga  
 o biaru ti abogo ogoria hene lalu mani te mbira nalelo  
 ina bo wahai harigoni.  
<sup>6</sup>Ngode Datagaliwabe ina inanaga waitigi uruni bo wahai halu  
 tinaga tano wiaru bibahende bo gialo wahai harigoni.  
 Uruni bibahende mo ko hene wiaabobo bu ngago  
 manibi mitangi bulene mbira naholebiraore.  
<sup>7</sup>Anduane Homogo ibu kiniore haluhe haabo ka.✧  
 Ibugua godi hale hole dagiani birule manda manda bu ka.  
<sup>8</sup>Ibugua mana tigabiore biaga halu✧  
 wali agali bibahende handayaho howa haru hai ka.  
 Ibugua mana tigabiore ngagoria howa  
 hameigini tara tara karume bialu hayaru bibahende  
 mo talebuki bulebira.  
<sup>9</sup>Anduane Homogo ibuniore anda hongohe kaligobi kagoni.✧  
 Mbirali ibunaga waitigime bole taliragola

✧ 8:6: Pig 1.26-28, 1 Ko 15.27, Eb 1.22, Hi 2.8 ✧ 9:2: Iba 5.11, 83.18 ✧ 9:5: Man 9.14, Min 10.7 ✧ 9:7: Iba 102.12, 102.26, Hi 1.11 ✧ 9:8: Iba 96.13, 98.9 ✧ 9:9: Iba 37.39, 46.1, 91.2

ibu kagotha pu holebira.

Genda tagira ibirangi ibu kagotha pialu ha do holebira.

<sup>10</sup> Anduane Homogo-o wali agali ini keria ibiraru\*  
erembira mialu napiaga kegoni.

Í ogonibi kegonigo wali agali í mini manda bu karume íhondo mini mbiraore wu holebira.

<sup>11</sup> Anduane Homogo ibu Saiono tanoni kini kago\* ibunaga mini yaraga halu ibuhondo iba gana lolene nga.

Ibugua biabe hongohe tara biyarunaga  
wali agali hameigini tara tara karume hale hai helo bi loyogo lolene nga.

<sup>12</sup> Wali agali genda yu karu\*

Anduane Homogo ibugua ti mitangi ho haga kagoni.

Ibugua wali agalime dugu bialu karu  
helalu handa tara nahaga kagoni.

Wali agali uruni mo ko haga karu  
ibugua ti pani nelo miaga ka.

<sup>13</sup> Anduane Homogo-o ina i dara habe.

Genda tandagala i waitigime mo ngirago ina de handabe.

I homolene kaware wiagoria pu hewaria  
ina i haru dai bialu mo wirigoni.

<sup>14</sup> Ina uruni bibahende biai haga kegonaga\*

ina bi te loyogo lai halu

inaga mini mo yaraga holebero.

Ina Saiono tanonaga pabe haraba ngagoria heyu howa

ina biriru bibahende latagi halu

i mo wirigonaga turuho holebero.

<sup>15</sup> Wali agali hameigini tara tara í mitangi nahaga karume\*

I uli pelonaga uli tombo wu hearia

habolo puwa tini ogoniha pilaya.

Tigua wena nuha minule nu wiaho hearia

tini nu ogoniha do wiya.

<sup>16</sup> Anduane Homogohanda manani tigatiga mo tale birangi\*

ibunaga mini tigabi ngago mo walia haga ka.

Wali agali ko biaga bu karume maru mo ko hole lowa

wai hanalu bu karu

mo habo lalu tini mo ko henego polebira.

<sup>17</sup> Wali agali hameigini tara tara mana ko biagaru\*

Ngode Datagaliwabe erembira miaga bu karu

ti bibahende humbirini andaga pu hai holebira.

<sup>18</sup> Ngode Datagaliwabehanda wali agali yagibano bu karu\*

embeda nahe mitangi biaabo haga ka.

Genda yu karu Ngode Datagaliwabehanda ti biamogo bilo

ibuhondo mini dunu biaho kagola

ibugua ti genda yuwa lu helowa naholebira.

\* 9:10: Man 31.6-8, Iba 37.25, 70.4, 91.14 \* 9:11: Iba 107.22 \* 9:12: 2 Sml 4.11, Iba 9.18, 10.17, 22.24, 37.25, Ais 49.14-15, Hi 13.5 \* 9:14: Iba 13.5, 20.5, 35.9 \* 9:15: Iba 7.15, 94.23, Min 5.22, 26.27 \* 9:16: Har 14.31, Min 5.22 \* 9:17: Yob 8.13, Iba 50.22 \* 9:18: Iba 12.5, Min 23.18, 24.14

<sup>19</sup> Anduane Homogo-o dindini wali agali bu karume  
ihondo ngui higi buyu helo wanahe  
ini abale heyalu ibabe.

Wali agali hameigini tara tara i mitangi nabiaga karu  
ti inaga deni ibu helowa

ini manani tigatiga mo dabaki habe.

<sup>20</sup> Anduane Homogo-o ina wali agali uruni mo gi hai habe.\*

Wali agali hameigini tara tara bu karu  
tini habane nabulene kamarunida lo manda bilo helabe.

## MBUGA MANE

*(Iba Gana 90-106)*

### 10

*Anduane Homogohanda biamogo bilonaga bi lenego ogo*

<sup>1</sup> Anduane Homogo-o irane aginaga ina helalu i kaundia kebe.  
Ko ina kamaria ibu ngagola i ha do ho kego irane agibe.

<sup>2</sup> Wali agali mini kowi karume mine halu  
wali agali yagibano karu mo ko hole talima ibaga bialu ka.

Tigua uli tombo wuwa maru uli pelo ngaria  
habo lalu tini uli ogoniha uli pelo hame ledo.\*

<sup>3</sup> Wali agali ko biagarume tinaga miniha mana ko hame lararunaga mine haga ka.

Mbiralime mbirale bu ngaru dimagoli hai haga karume  
Anduane Homogohondo bi ko lalu erembira miaga ka.\*

<sup>4</sup> Wali agali ko karume Anduane Homogo mitangi nabiaga ka.

Tigua mine howa lalu,  
Ngode Datagaliwabe ibugua i ko birugonaga pani nangulebira, laga ka.\*

<sup>5</sup> Mini kowi karume biraru damene bibahende mbirale dewa mo mogo biaga ka.

Anduane Homogo-o inaga mini wu kego ti manda nabioire kagoni.

Tigua tinaga waitigi karu mege biaga ka.\*

<sup>6</sup> Tigua hangu hangu mitangi bialu,

I hongoheore kogoni.

Mbirale tara tara ngarume i bope naholebiraore.

I kogoha genda mbira anda naibulebira,

lo mitangi biaga ka.\*

<sup>7</sup> Bibahendengi tigua bi ko laabo halu maru karu ha haga ka.

Ke howa mendeali kago mo gi hole bi laabo haga ka.

Mana ko bulenenaga bi ko ngaru

tigua abale yamialu lo pebe bialu haga ka.\*

<sup>8</sup> Wali agali ko ogonidagua biaga karume

wali agali maru bayale kago bo wahole

ohowa harigani bira do haga.

Mbirali hongo nahe kago mo ko hole

ohowa harigani bira do haga ka.\*

<sup>9</sup> Laionome ibu nagane ale ibirago balu nole

ohowa yu biragadagua ti biraga ka.

\* **9:20:** Iba 62.9, Ais 31.3, Ese 28.2   \* **10:2:** Iba 7.16, 9.15, Min 5.22   \* **10:3:** Iba 94.4, Lm 1.32   \* **10:4:** Iba 14.1-2, 53.1   \* **10:5:** Iba 12.5, Ais 26.11   \* **10:6:** Ais 56.12, Mo 18.7   \* **10:7:** Yob 20.12, Iba 12.2, Lm 3.14  
\* **10:8:** Iba 17.11, Hab 3.14

Wali agali yagibano porago minule  
 harigani ohowa yu biraga ka.  
 Ibalu karia gono wiyagoha do ngaria  
 abale hado yalu piaga ka.✧

10 Tigua hendore oho biruwa  
 tinaga hongo timbuni daligaorehe kagome  
 mbirali hongo nahe kago abale mo ko haga ka.

11 Wali agali ko urunibi karu tigua lo manda bialu,  
 Mana ina berogo Ngode Datagaliwabe ibu mitangi nabiaga kagoni.  
 Ibu de muguliho kagonigo  
 ina berogo de nahondolebira ndobe,  
 laga biaga kagoni.✧

12 Anduane Homogo-o ina ko biaga karu bole  
 inaga gi yaraga howa nende biaho habe.  
 Ngode Datagaliwabe-o ina hongo nahe karu biamogo bule embeda nahabe.

13 Wali agali ko biaga karume  
 Ngode Datagaliwabe í mege bialu erembira ngiaga kagoni.  
 Tinaga miniha lo manda bialu,  
 Ina ko berogonaga pani nangulebira, laga biaga kagoni ndobe.  
 Mini urunibi wiaga karuni ina bo wahai habe nahedane kebe.

14 Ina wali agali ko biaga urunime mana biaga ngago✧  
 manda biaiho ke.  
 Ko urunibi kagome wali agali maru bu karu genda mo miaga ngago damene  
 í manda biaiho kegoni.

Ina wali agali genda uruni yu karu biamogo biaga kegoni.  
 Wali agali hongo nahe karubi  
 waneigini aba aiyala homene karubi  
 ina ti biamogo biaga kego manda buwa ti inihaha hanaho kagoni.

15 Wali agali mana ko biaga urunime ko birago mani nabilo  
 tinaga hongo kago bo podai habe.

16 Anduane Homogo ibu kini haluheore kagoni.✧  
 Wali agali hameigini tara tara bibahende ibu mitangi nabiaga karu  
 ibunaga dindi ngagoria howa bo taliatagi halu ereba hai helolebira.

17 Anduane Homogo-o ina wali agali ini andaneha karume bi larago hale howa  
 tinaga bu mini mo hongo harili.✧

18 Waneigini aba aiyala homene karumebi  
 wali agali genda yu karumebi  
 dugu bialu ihondo bi lalu karu hale harili.

Tinaga godi tigabi lolene ngadagua lelo  
 ina ti biamogo bulebere.

Ina ogonidagua beregola  
 dindiali karume ti lone mo ko holene mbira nawulebira.✧

✧ 10:9: Iba 17.12, Mai 7.2 ✧ 10:11: Yob 22.13, Iba 94.7, Ese 9.9 ✧ 10:14: Iba 68.5, 2 Ti 1.12, 1 Pi 4.19 ✧ 10:16:  
 Iba 145.13, Yar 10.10, Dan 4.34, 1 Ti 1.17 ✧ 10:17: Har 22.23, Iba 9.12 ✧ 10:18: Iba 82.3, Ais 11.4



## 11

### *Anduane Homogohondo mini mbiraore honghe wu kago ogo*

- <sup>1</sup> Anduane Homogohanda ì handayaho holebiragonaga✧  
mini mbiraore wu ko.  
Egame agali ibirago handalu ibida piagadagua  
tigua ìhondo, Hari bare ngaruha ha do hole ibida pu, laga kamiruni  
tí lulu mini nawi be tobaheda.
- <sup>2</sup> Tigua lalu, Agali ko biagome agali bayale kago bole✧  
ibu aruma kagoaha howa timu edaho kagoni.
- <sup>3</sup> Wali agali bibahendeme mana tigabi ngago nabiaga heagua nde✧  
mbirali tigabi kago ibugua ago bulene wiaruabe, lalu kami.
- <sup>4</sup> Anduane Homogo ibu ibunaga anda lomabia heneha kagoni.✧  
Ibu dahuliya andaga kini howa  
ibugua wali agali bibahende bu karu de handaiore ka.  
Wali agalime bialu karuni ibu manda biaiore kagoni.
- <sup>5</sup> Anduane Homogo ibugua wali agali ko biaga bayale biagabi manda bu ka.✧  
Ibugua wali agali mana lo ngaru wahaga karu handabe manga haga ka.
- <sup>6</sup> Wali agali ko biaga bu kagoaha✧  
ibugua ira hungubi ege tole ambuabi mini soloba dedaore hedope holebira.  
Puyabu pobo timbuniorebi ibilalu ti pani nalu holebira.
- <sup>7</sup> Irane Anduane Homogo ibuni mini tigabi howa✧  
mana bayale tigabi biraru hondowa turuho haga ka.  
Wali agali mana bayale tigabi biaga karu  
tigua ibuninaga wanakui hondolebira.

## 12

### *Anduane Homogohanda biamogo bilonaga bi lenego ogo*

- <sup>1</sup> Anduane Homogo-o ìna ì biamogo bibe.✧  
Mbirali bayale mbira naheorego.  
Tigabi biaga mbira karia nahondolebere.
- <sup>2</sup> Wali agali bibahendeme ke dege haga ka.✧  
Tigua mendeali kago mo guya halu bi ladebodebo biaga ka.
- <sup>3</sup> Anduane Homogo-o wali agali bi ladebodebo biaga karunaga ne harigabi  
mine haga karunaga hégebi  
bibahende bo ndibu lai habe.
- <sup>4</sup> Wali agali ko biaga uruni tigua lalu,  
Inanaga hégame wayali holeberama.  
Inanaga ne hambu anduane aibe.  
Ina handayaho haruago aibe, laga biaga ka.
- <sup>5</sup> Anduane Homogo ibugua lalu,✧  
Ko biaga bu karume yagibano karu hingedape hayadago hondowabi  
burupale karu ti dugu biaruago hale howabi  
ìni abale ibulebero.

✧ 11:1: Iba 2.12, 121.1 ✧ 11:2: Iba 7.12, 37.14, 64.3-4 ✧ 11:3: Iba 87.1, 119.152 ✧ 11:4: Mai 1.2, Md 5.34  
✧ 11:5: Pig 22.1, Iba 34.19, Ya 1.12 ✧ 11:6: Iba 75.8, Yar 4.11-12, Ese 38.22 ✧ 11:7: Iba 7.9-11, 16.11, 33.5  
✧ 12:1: Ais 57.1, Mai 7.2 ✧ 12:2: Iba 41.6, Yar 9.8, Lm 16.18 ✧ 12:5: Iba 10.18, 34.6, 35.10, Ais 33.10

Tini bayale holenenaga maliaho karu  
ina ti ogoriani mo helolebero, laya.

<sup>6</sup> Anduane Homogonaga bi lo winigo bibahende heneneore lo nga.✠  
Ibunaga bi bayaleore laganego  
siliba irani ka halu delene ngarale ngaligobiore ngagoni.

<sup>7</sup> Anduane Homogo-o inime ina bu kamaru✠  
baya hangu de handayaho habe.

Ko biaga karume ina mo ko holigo  
ina ina baya hangu mamageho haabo habe.

<sup>8</sup> Ko biaga karu tigua dindi bibahendeha mine halu ibaga biame haga ka.✠  
Wali agali bibahende karume mana ko bulenego hame lowa  
mana ogoni bayaleda mitangi biaga ka.

## 13

### *Anduane Homogohanda biamogo bilo bi lenego ogo*

<sup>1</sup> Anduane Homogo-o ina i angi mitangi bule kebe.✠

ina i embeda halu yu waore haribe.

ina i dengui lone hondoliya  
ihondo angi mo walia holeberebe.

<sup>2</sup> I genda yu kogonigo angi mo waholeberebe.

I miniha tandaga ngelo koruni  
horombe mbiragabi agiru hondo holeberebe.

I waitigi karunaga andaneha naholiya  
ina i angi biamogo buleberebe.

<sup>3</sup> Anduane Homogo inaga Ngode Datagaliwabeore-o✠

ina i mitangi halu inaga bi larogo hale habe.

I nahomoliya inaga de mo ngalalu lone mo hongo habe.

<sup>4</sup> I homaruyagua inaga waitigime lalu,✠

Iname ibu bope harimadagoni, loligo nalelo.

Tigua i pilarogo hondowa turu holigo nahelo.

<sup>5</sup> Ani lolebiragoyu ina i gubalini holebeda lo manda bialu  
mini mbiraore wu kogoni.

ina i pele ngiaabo holeberegonaga  
i turu timbuniore ho kogoni.

<sup>6</sup> Anduane Homogo ina ihondo bayale dege biaabo harigonaga✠

ina inaga mini yaraga halu  
iba gana laga bialu holebero.

## 14

### *Wali agali mini kowinaga mana ogo (Iba Gana 53)*

<sup>1</sup> Wali agali mitangi yole biaga karume tini miniha mandabu donge halu✠✠  
Ngode Datagaliwabe ogoni nahe laga ka.

✠ 12:6: Iba 119.140, Min 30.5 ✠ 12:7: Iba 37.28, 97.10 ✠ 12:8: Iba 55.10-11 ✠ 13:1: Yob 13.24, Iba 88.14, Ais 59.2 ✠ 13:3: Yar 51.39 ✠ 13:4: Iba 25.2, 35.19, 38.16 ✠ 13:6: Iba 116.7, 119.17 ✠ 14:1: Iba 10.4, 53.1 ✠ 14:1: Lm 3.10-12

Wali agali mini urunibi wu karuni tini ko ngubi habane nabuleneore howa  
ko tara tara ngaru bima polenaga ani lalu ka.  
Mana tigabi hangu biaga mbirali naheore.

<sup>2</sup> Anduane Homogohanda dahuliya andaga howa handadali halu<sup>☆</sup>  
wali agali bibahende bu karu de handame howa  
mbirali miniwi galone manda biagabi  
Ngode Datagaliwabe kalo manda bu hagabi  
au haga bidabe hondole handadali ho ka.

<sup>3</sup> Ani handalu karia mbirali bayale naheore  
ti bibahende ko biai hene ogobi dege dege hoyu pedaria hendeda.  
Hariga tigatiga polene wiadaguaore pene mbirali naheore  
bibahende putagi halu piai hene dege hearia hendene.  
Mana tigabi hangu biaga mbira naheore.  
Mbiraoreorebi mbira naheore lama agini.

<sup>4</sup> Anduane Homogohanda lalu,<sup>☆</sup>  
Wali agali ko biaga uruni ti mini nawidabe.  
Ti galone mbira manda nabiagadabe.  
Wali agali ko biaga urunime  
inaga wali agali bameore ti tomo naradagua budu nalu kagoni.  
Ani bialu howa tigua tinaga bu minime ihondo bi mbira nalagaore kagoni, lalu ka.

<sup>5</sup> Ani bialu ha kagoyu Ngode Datagaliwabe ibuni  
wali agali ibugua bi larago hale halu biaga karu baba howa  
biamogo bigi birago hondowa  
ti gi timbuniore howa duru ala lalu holebira.

<sup>6</sup> Wali agali ko biaga karume<sup>☆</sup>  
wali agali maru abogo ka nalene karunaga minime mbirale bule mandabu wigi  
bidaru  
mo pere laga biaga ka.  
Ani bia biyaguabi wali agali abogo ka nalene uruni  
tinaga ha do holene Anduane Homogoha ngagome ti bayale holebira.

<sup>7</sup> Ina Isaraele wali agali bibahende pele ngialu haru dai biai helo<sup>☆</sup>  
Ngode Datagaliwabehanda mbirali Saiono howa ibi nalara.  
Anduane Homogohanda ibunaga wali agali biamogo biragola  
ti bayuwa ho dungulo halu  
tigua mbirale bigi biraru bayale hangu haga birago hondowa  
tini turuore nde au holobadabe.

## 15

*Ngode Datagaliwabehanda iname mana bulumaya hame ledago ogo*

<sup>1</sup> Anduane Homogo-o mbirali inaga andaha anda ibabehe ai kabe.<sup>☆</sup>  
Mbirali Hari Saiono wali agali ge nahaga  
ini dege haga ngegoria ibu howa  
i mitangi bialu ihondo bi labehe ai kabe.

<sup>☆</sup> 14:2: Iba 33.13, 102.19    <sup>☆</sup> 14:4: Ais 64.7, Yar 10.25, Amo 8.4    <sup>☆</sup> 14:6: Iba 9.9, 142.5    <sup>☆</sup> 14:7: Yob 42.10, Iba 53.6, 126.1    <sup>☆</sup> 15:1: Iba 23.6, 24.3, 27.4, 61.4

<sup>2</sup> Mbirali Ngode Datagaliwabehanda bibe ledadaguaore hale howa biai halu<sup>✧</sup>  
 mana tigabi bulene ngadaguaore bialu  
 ibugua bi larago henene hangu lalu  
 ibu bu miniha ke holene mbira nawi kago ibuore anda pobehe ka.

<sup>3</sup> Tindule mbiralinaga mini mo ko hole ndinde lowa<sup>✧</sup>  
 agua laya laya lama ibaga nabiaga kago  
 ibu anda pobehe ka.

Mbirali ogonibi kago ibugua ibunaga damenehondo kagua nabiaga ka.  
 Wali agali mendeali lo guralu diburibu lama ibaga nabiaga ka.

<sup>4</sup> Ani bialu wali agali maru Ngode Datagaliwabehanda handabe manga halu erembira  
 mini karu<sup>✧</sup>

mbirali ogoni ibuguabi handabe manga halu erembira dege mulebira.  
 Anduane Homogo ibugua bibe ledadagua hale halu biaga karu hondowa  
 ibu turu halu wali agali uruninaga mini mo yaraga haga ka.

Ibugua mbirale mbira buleore lalu lo winiyagua  
 o lenedagoni gendabi bibe naheoreyaguabi tanabi biaore bulebira.

<sup>5</sup> Mbiralime ibuhondo mbirale mbira dano habiya ngibe layagua mialu<sup>✧</sup>  
 danoali biagome yadai biragola nde huniane mbira pu helowa ndo  
 ibugua miyagobiore yadai bia lowa mo yulebira.

Marume ibuhondo dange hana howa  
 mendeali kagua nabini tigabi kago ndelo ngibe layagua  
 ibu ani nabiaga ka.

Mana bayale urunibi biaga karu ti ema nabi haabo holebira.

## 16

*Mbirali ibu Ngode Datagaliwabehondo mini mbiraore wuwa miniha dungulo howa  
 ibuhondo bi lenego ogo*

<sup>1</sup> Ngode Datagaliwabe-o i iha ha doho howa bayale holebero manda buwa<sup>✧</sup>  
 i kegoria eberogo ina i de hondo habe.

<sup>2</sup> Ina Anduane Homogohondo au laro.  
 i inaga Anduane kegoni.

Mbirale bayale bayale o bu ngoruni  
 inaga gini howa ibini hangu o bu ngoruni laro.

<sup>3</sup> Anduane Homogonaga wali agali mini bilinahe karu<sup>✧</sup>  
 ti wali agali bayaore bu kagoni.

I ti heba mandagi howa turu timbuniore ho haga biruli.

<sup>4</sup> Wali agali maru mbirale gime wabiniru tinaga bi pupu wiagane ogoni lowa<sup>✧</sup>  
 uruni hendehende gerai piaga karu  
 tigua genda yulene dewaore bu wulebira.

Ina ti heba mandagi howa  
 bi pupu wiagane urunihondo mbirale bo lomabu miradagua namulebero.

Mbirale gime wabini uruni tinaga bi pupu wiagane ogoni lowa  
 uruninaga mini mo yaraga haradaguabi i naholebero.

<sup>5</sup> I mbirale galone yu haradagua bu kogo<sup>✧</sup>

✧ 15:2: Ais 33.15, Seg 8.16, Eb 4.25 ✧ 15:3: Har 23.1, Iba 28.3, 50.20 ✧ 15:4: Yos 9.18-20, Hgn 11.35, Ab 28.10

✧ 15:5: Man 16.19, Ese 18.8 ✧ 16:1: Iba 7.1, 17.8 ✧ 16:3: Iba 101.6, 119.63 ✧ 16:4: Yos 23.7, Iba 32.10,  
 106.37-38 ✧ 16:5: Iba 23.5, 119.57, 125.3, Dug 3.24

Anduane Homogo íbi ínaga bi manabi ogoni dege galone yido lowa yu kogoni.  
 I mbirale buru pado alego ína ngiaiore hariligoni.  
 I mani hama polobodagoni ína haru holebere lowa  
 íha hanaho kogoni.

6 Ína íhondo mbirale bayale bayaleru turu halu ngigi birigoni.✧

Ína o ngigi biriyaruni nde baya taraore ngigi biriyago hondowa í turuore ho kogoni.

7 Anduane Homogo ibugua í mo tiga bialu haru haganegonaga✧  
 ina ibunaga mini mo yaraga haro.

I mbiraga padoria ínaga bu miniha howa bi langiaga.

8 Anduane Homogo ibuni kawareore í heba o kagonida lo manda buore haabo haruli.✧✧

Ibuni kaware í heba howa í mo hongo haga kago manda buwa  
 í gi halu mogo nale holebero.

9 Anigo í turu howa ínaga bu miniha dinguore lowa✧  
 mbirale mbira hondowa gi naholeore kogoni.

10 I homolene winigoria howa✧

homanaga hongome yani nahelonaga ína í gi miriligoni.

Ina ínaga biabe bialu mini bilina ho harugonaga

ína í humbirini andaga homa dinini bu karu baba holiya wahalu  
 yupe naholebere lo manda bido.

11 Ínime íhondo haabo holene hariga ogodagua lalú✧  
 walía holebere lo manda bido.

Íni í heba kegome í miniha turu bialu dinguore laragola  
 turuho haabo haruli.

## 17

### *Debidi ibu mini tigabi howa Anduane Homogohondo bi lenego ogo*

1 Anduane Homogo-o ínaga bi larogo hale habe.

I tigabi ibaga bu henego

ai ínaga genda ngaru í keria mo yalu eberogoni.

Ina íhondo bi ke howa ndo larogo hale habe.

2 Ína í biamogo beregome

ína godi lalú wayali holebero.

Ína mana bayale ogo nga de handabelo hame ledogoni.

3 Inaga miniha ngogo í manda biaiho ke.✧

Ína mbiraga ibuwa í ba handariyagua

mini ko íha mbira ngaria handa nabulebere ndobe.

Ina ínaga ne harigaha howa bi ko nalolebero lo wirugoni.

4 Agali maru karume bi ko lagadagua í nalaga kogoni.

Ina ínaga bi lowini ngago hongo howa yu halu

keba holenebi wai bulene ngarubi bibahende erembira miai harugoni.

5 Ina ínaga hariga ngagoria pialu kogome✧

ínaga geme hariga mendeha pubagi nahene kogoni.

✧ 16:6: Yar 3.19 ✧ 16:7: Iba 73.24, 77.6 ✧ 16:8: Iba 27.8, 73.23 ✧ 16:8: Ab 2.25-28 ✧ 16:9: Iba 13.5, 30.12, 108.1 ✧ 16:10: Iba 49.15, 86.13, Ab 13.35 ✧ 16:11: Iba 36.7-8, 43.4 ✧ 17:3: Iba 16.7, Seg 13.9, Mal 3.2-3, 1 Pi 1.7 ✧ 17:5: Iba 119.133



6 Ngode Datagaliwabe-o ina íhondo bi larogola í hale harili.

Ani kego manda bialu  
ina íhondo bi áyu larogo haleore habe.

7 Ínaga gubalini holene timbuniore ngego✧  
ina kamagohondo mo walia habe.

Ína ínaga gi tigame ina yania haga kegonigo  
ina waitigi hondoligo íni andaneha ha do kama.

8 Íninaga deore baya hangu handayaho harilidagua✧  
i handayaho habe.

Ega angibunime ibu igini babaganeme dambi hagadagua  
i mo do howa handayaho habe.

9 Agali ko karume i mo ko nahelobi  
ínaga waitigi ho mabu bupe karume i bo wa nahelobi  
ani handayaho habe.

10 Tigua agali mende kago dara nahagaore ka.✧

Tigua bi hongo howa laabo halu  
tininaga mini hangu yaraga halu bi laga kagoni.

11 Tigua i ge porogoha talima ibaga bialu  
i ho mabu bupe haiho kagoni.

Tigua i gi dolaho yu ibaga bialu  
i bope hole manda mandabu ka.

12 Ti laiono gabua ale howa  
mbirale ema bialu porago minu bo nole lowa ha do haga ka.

Laiono daluame mbira bo nole yu bira do ho hagadagua  
i bo wahole manda manda bu hai ka.

13 Anduane Homogo-o í ibalu  
waitigi bu karu baba wai bialu ti bope hai habe.

Ínaga ayu tibu ne gadele biago yu ibalu  
waitigi karu bo wahai habe.

Agali ko uruninaga giha howa  
i mo wialu haru dai bibe.

14 Anduane Homogo-o  
agali ko uruni ti dindini wini ngaru hangu mo tene haga bu karu  
tinaga giha koria ínaga hongome i mo wialu biamogo bibe.

Wali agali í hame nalaga ho karu  
ti pani karulape nelo mibe.

Tinaga waneigini aguanene maha holebiraruhondobi  
pani mia dege bibelo hameledo.

15 Ai ini agali tigabiore kogodago✧  
mani íninaga denguiore hondolebero.

De ngalalu heyu howa í kegobi hondowa  
i turu timbuniore holebero.

✧ 17:7: Iba 31.21 ✧ 17:8: Man 32.10, Iba 91.1, 91.4, Seg 2.8, Md 23.37 ✧ 17:10: 1 Sml 2.3, Yob 15.27, Iba 73.7

✧ 17:15: Iba 4.6-7, 16.11, 1 Yo 3.2

## 18

### *Anduane Homogohanda biamogo biragola ina wayali holeberema lenego ogo (2 Samuele 22.1-51)*

- <sup>1</sup> Anduane Homogo-o ína ì mo hongo haga kegoni.  
Ina ìhondo gubaliniore ho kogoni.
- <sup>2</sup> Anduane Homogo ibuni ìnaga wai pabe hongoheore kagoni.✧  
Ibu ege tole ale howa ì ho gehalu  
waitigirunaga giha howa ì mo wiaga.  
Ibu ìnaga humbi ale howa ibugua ì hapai haga ka.  
Ibugua ì mo wialu handayaho holene hongo karulapeore kagoni.
- <sup>3</sup> Anduane Homogonaga mini yaraga hamìya.  
Ina ibu olalu haruli.  
Ibugua hale halu ì biamogo bialu  
ìnaga waitigirunaga giha howa ì mo wiaga kagonaga  
iname ibunaga mini yaraga holene nga.
- <sup>4</sup> Ì homolene kawareni harugoni.✧✧  
Homolene pume dariba haradagua ì dariba hayagoni.  
Iba li hongoheme ibalu dambi haradagua  
agali ko bu karume ì bo wahole ani biyagoni.
- <sup>5</sup> Homolene dameneme ì mabu bupe howa pume dariba haradagua biyagoni.  
Homalime ì minule mandabu hayagoni.
- <sup>6</sup> Ìnaga miniha genda ho howa Anduane Homogo olalu harugoni.  
Ìnaga Ngode Datagaliwabhondo ì biamogo bia lalu harugoni.  
Ibuni andaga howa ìnaga bi hale haya.  
Ibuhondo ì biamogo bia larugo hale hayagoni.
- <sup>7</sup> Ngode Datagaliwabe ibugua keba timbuniore howa  
dindi mo dumbirumbi bilaya.  
Dindi hari timbuni wearu mo emabia hayagola ema bia gimbu biya.
- <sup>8</sup> Ibunaga ngui harigaha howa ira hagua tagira ibalu  
ibunaga ne harigaha howa ira hungu datagitagi biyagome  
mbirale wiaru bibahende do mundu laya.
- <sup>9</sup> Ibugua hari daliga buda edene bialu daliape haya.  
Daliape hayagola hari beraliba mindibi ibu geha hai haya.
- <sup>10</sup> Ibunaga dahuliyali mbiranaga erekunini biralu yagalalu daliape haya.✧  
Puyabu ega babagane aleheme ibu yalu abaleore daliape haya.
- <sup>11</sup> Aruma holeneme ibu dambi hai haya.  
Hari beraliba mindibigome ibuni ho ge hayagoni.
- <sup>12</sup> Hari daba timbuni ibu heagoha bialu  
kulu megelalu wá timbuni hama ibu mo bamba halu piya.  
Iramebi dalu dindi kunimebi beraliba mindibi biago bo haealabaga bialu ibira helaya.
- <sup>13</sup> Anduane Homogo ibuni hari daligaha howa bi hongo howa hari kilikulu laradagua  
biayua.  
Anduane Homogo Daligaorene Daliga kagonaga bi layuago hale hene.
- <sup>14</sup> Ibugua ibunaga timu edalu ba amunana biyagome waitigi purogo laya.  
Hari dabame waitigi bu hearu bayagola ti ibida bilibulu lalu piat haya.

- 15 Anduane Homogo ína waitigi hearuhondo keba harigome  
 ínaga ngui harigaha buhe tagira ibiyagome puyabu hongohe pulo yu purogo  
 laradagua biya.  
 Iba solowara timbuni bereago hundiai hayagola  
 dindi andaneha gene wiyago bame ha pana ho haya.
- 16 Anduane Homogo ibu daligaha howa gi yupe halu i minu yania haya.  
 Iba solowara timbuni bereagome i dambi hewaria ibugua i gini miya.
- 17 Inaga waitigi hongoheore hearunaga giha hewaria ibugua ibuninaga gime i mo wiya.  
 Agali marume i handabe manga ho hearu ina ti bo podabe nahe hewariabi  
 ibugua i mo wialu haru dai biya.
- 18 Bamba íha genda ngelo hewangi tigua íla wai bule ibiya.  
 Ani ibiyagoyu Anduane Homogohanda i handayaho haabo hayagoni.
- 19 I homolene wiagoha kaware hewaria ibugua i biamogo biya.  
 Ibugua i gubaliniore ho kagome i gini minigo ko.✧
- 20 Ina mana bayale tigabi wiaru talialu bialu hewago hondowa✧  
 Anduane Homogohanda ihondo bayaleore biaga.  
 Ina mana ko mbira nabi hewago hondowa ibugua ihondo mana bayale biaabo haga ka.
- 21 Anduane Homogonaga mana tigabi ngaru ina taluwa bialu harugoni.  
 Ina inaga Ngode Datagaliwabe erembira mialu mana ko wiaru nabi bayale haru-  
 goni.
- 22 Ibunaga bi mana lo ngaru ina baya hangu talialu bialu haru.  
 Ibugua bia layadagua ina mo wa nahe biaabo harugoni.
- 23 Ina ibu deni howa ko mbira nabioire ibu mandabu ka.  
 Ina mana ko mbira buli lowa ini ibagabu harugoha mamage haluore haruli.
- 24 Ibugua ina mana bayale tigabi wiaru talialu bialu hewago hondowa✧  
 ina mana ko mbira nabi hewago hondowabi  
 Anduane Homogohanda ihondo bayaleore biaga.
- 25 Anduane Homogo-o mbiralime í wahalú nape talima ibalu heagua  
 ínabi nde ogoni ibu yu wahalú napiaga ke.✧  
 Mbiralime ko mbira nabiaga howa ibuha ko nawi heagua nde  
 ínabi ogoni ibuhondo mana bayale biadai biaga kegoni.
- 26 Mbiralime mana tigabi dege biaga heagua  
 ínabi nde ogoni ibuhondo mana tigabi dege biadai biaga ke.  
 Anigo mbiralime mana ko biaabo haga heagua  
 ina ibuhondo handabe manga haga kegoni.
- 27 Wali agali tini mo dindiha haga karu  
 ina ti biamogo bialu haru dai biaga ke.✧  
 Wali agali maru tini mo dunini howa mine haga karu  
 ina ti mo dindiha haga kegoni.
- 28 Anduane Homogo inaga wá hagane haleore í kegoni.✧  
 I arumaha kogola ina aruma holene mo wahaga kegoni.
- 29 Ina waitigi bu karu bope halu wayali holiya ina i hongo ngiaga ke.  
 Ina waitiginaga tano ngaruha ege pabe hongohe timbuni karu pogola anda poliya  
 ina i hongo timbuniore ngiaga kegoni.

✧ 18:19: Iba 31.8, 118.5 ✧ 18:20: 1 Sml 24.19 ✧ 18:24: 1 Sml 26.23 ✧ 18:25: Iba 25.10, 31.23, 37.28, 40.11, 89.24 ✧ 18:27: Iba 101.5, Min 6.17 ✧ 18:28: Yob 29.3

- 30 Ngode Datagaliwabe ogoni ibunaga mana baya buruguleore biai haga ka.✧  
 Ibugua bi laragobi heneneore dege laga ka.  
 Ibunime wali agali waitigi handalu ibida porarunaga humbi kago  
 ti bibahende ibuha hage hai haga ka.
- 31 Anduane Homogo ibuni hangu Ngode Datagaliwabeore kagoni.✧  
 Inanaga ha do holene anda ege tole ale hongohe Ngode Datagaliwabe ibuni  
 hanguore ka.
- 32 Ibugua inaga ha do anda hongoheore kagonigo✧  
 i ibaga bu koria ibugua hariga bayale mo tiga biaga ka.
- 33 Ibugua i nogo gabua mini dia ibagabu poralidagua pialu holiya i handayaho haga ka.✧  
 Hari nene ngaruha pialu koria ibugua handayaho kagome i pi nalaga ko.
- 34 Ibugua i wai bulene biawai haragome  
 danda boronosime wabini hongoheore hibule ngago  
 ina edalu babehe kogoni.
- 35 Anduane Homogo-o inaga waitigi hearunaga giha hewaria  
 inaga humbi i ngirigola i wayali harugoni.  
 Ina i biamogo birigome i wali agali karunaga deni agali mini leneore kogoni.
- 36 Hariga i polene wiagoha ina handayaho kegome waitigime i mina nabi.✧  
 Ina hariga bayale mo wirigome  
 i porogoha inaga ge gondo lalu pi nale bayale kogoni.
- 37 Ina waitigi hearu talima pialu minu yania hai haruli.  
 Ina ti talima pugupugu bialu ti baiore hole wahalu dai nabi haruligoni.
- 38 Ina ti bogaiore hewagola homo ibira hai haga.  
 Ibira halu inaga geha wiai howa lone heyabe nahe wiaga.
- 39 Ina waitigi baba wai buliya inime hongo ngirigoni.  
 Ina i biamogo birigome inaga waitigi hearu ina ti bo podahana hai harugoni.
- 40 I waitigi biaru i handalu ibida purogo lelo ina mo bia hari.  
 Ina i handabe manga haga hayaru bo wahai harugoni.
- 41 Tigua mbiralime ti biamogo bilo ga lalu hayagoyu ti biamogo bulene mbira ai kabe.  
 Mbiralime naheore ndobe.  
 Tigua ti biamogo bilo Anduane Homogo olayagoyu  
 ibugua tinaga bi hale nahaya.
- 42 Ina ti bo tagadabaga biwagola ti bame be abalu ale wialu  
 puyabume yu purogo labehe hayagoni.  
 Ba dege bialu bo hengeda halu hariga teneni waru wiraligobi haya.
- 43 Wali agali ko hearume i bo waholilono ini abale ibalu i biamogo biri.  
 Ina wali agali hameigini tara tara bu hearu handayaho holiya ina i dabo helarida.  
 Wali agali tara tara ina nahendene hearu ayu i andaneha ibu hai ka.
- 44 Wali agali dindi taraha howa ibu hene karume inaga wanakuiha ibalu ge duli hanga  
 haga ka.  
 Tigua ina bi larugola abale hale halu i talima ibaga.
- 45 Tinaga hongo ibira howa  
 tigua tano wai pabe hongohe hearu wahalu  
 tini duru lagalaga bima i koria ibaga.
- 46 Anduane Homogo ibu haluheore kagoni.

✧ 18:30: Iba 17.7, 119.140, Dan 4.37 ✧ 18:31: Man 32.31, 32.39, 1 Sml 2.2, Ais 45.5 ✧ 18:32: Iba 91.2 ✧ 18:33:  
 Man 32.13, 2 Sml 2.18, Hab 3.19 ✧ 18:36: Min 4.12

Ibu inaga ege tole ale honghe kago  
ibunaga mini mo yaraga hamiya.

Ngode Datagaliwabe hongheore ogoni ibu i pele ngiaga kagonigo  
ibunaga mini timbuni yaraga haabo hamiya.

<sup>47</sup> Ibugua i biamogo bialu waitigi hearu bope halu i mo wayali haga ka.✧  
Wali agali hameigini dindi tara tarani hearu i andaneha helai haga ka.

<sup>48</sup> Ibugua inaga waitigiru giha hewaria  
i biamogo bialu i bayale mo wiaga ka.

Anduane Homogo-o ina i pele ngialu inaga waitigiru mo dindiha helalu  
i mo wayali helarigoni.

Ina agali bo wahaga bu hearume i bo wahole biyaria i biamogo birigoni.

<sup>49</sup> Anidagua birigonaga ina wali agali hameigini tara tara karunaga deni howa  
inaga mini yaraga holebero.✧

Ina inaga mini yaraga halu iba gana lolebero.

<sup>50</sup> Anduane Homogohanda Debidi i kini dabo helayago  
inaga waitigiru bope holiya ibugua i mo wayali helaga ka.  
Ibugua iniore kini dabo helene kogohondo gubaliniore haabo haga ho kagoni.  
Inaga waneigini aguanene mani holebiraru tihondobi ibugua gubalini ho haabo  
holebira.

## 19

*Ngode Datagaliwabehanda mbirale wabu heledarume ibuninaga mini mo yaraga  
holene walia kago ogo*

<sup>1</sup> Hari daligani li bigi biragome✧

Ngode Datagaliwabe ibuninaga mini mo yaraga holene  
inahondo bayuwaore walia haga bialu kagoni.

Mbirale li harini bu karu bibahendeme  
Ngode Datagaliwabe ibugua bayaore wabiniyaru  
panigiore mo walia haga bidagoni.

<sup>2</sup> Horo mbira mbira haga beramago bibahendeme inahondo✧

Ngode Datagaliwabe ibugua mbirale wabini harini li bu karunaga lalu langigi bialu  
ka.

Mbiragabi mbi mbira mbira bibahendengi bi langialu dege kagoni.

<sup>3</sup> Horobi mbibi libuni ne hariga nawi bi nalabehe kagoni.

Ogoni labo libugua bi mbira lararia hale naharamaligoni.

<sup>4</sup> Bi hale naharamaligoyu horola mbila libugua bigi biragome✧  
wali agali bibahendeme de handalu manda bilonaga lamialu kagoni.

Libunaga bi ogoni dindi bibahendeni pume haragola  
wali agali bibahende hale haiho kagoni.

Ngode Datagaliwabehanda li harini hona ni ibu palelonaga  
balai anda mbira bu heledagoni.

<sup>5</sup> Igiri mbirame wandari dabu buwa ibu andaga haru pialu  
igiri ibu turu hama piagadagua

ni ibu egerebagi turuho yalu tagira ibugu biaga.

Agali gerai lagame gerai lo yalu hariga pu bola galo nabi  
tiga tigaore polene ngadagua

ni ibu hariga ibuni piaga ngadaguaore turu halu piaga.

✧ 18:47: Iba 94.1 ✧ 18:49: Lm 15.9 ✧ 19:1: Iba 8.1, 50.6, Lm 1.19-20 ✧ 19:2: Iba 74.16, 139.12 ✧ 19:4:  
Lm 10.18



<sup>6</sup> Ni ibu lirayagi howa tagira ibalu nairayagi anda piaga.✧  
Ani biagago mbirale mbira ni ibunaga tandaga biragome daba nahelo  
mo do habe nahe nga.

*Anduane Homogonaga bi lowini ngago ogo*

<sup>7</sup> Anduane Homogonaga bi lowini ngago✧  
baya gibi tigabiore lowini ngagoni.

Ibunaga bi ogonime wali agali holene gahenge ngialu  
ina mo hongo hodai biaga.

Anduane Homogonaga bi lo ngaru ina hanaho habehe kama.

Wali agali mini nawi karu

ibunaga bi ogonime mini gigabi mo wia haga.

<sup>8</sup> Anduane Homogonaga bi lowigi bidaru tigabiore lowigi bidagoni.✧

Bi uruni hale halu biaga karu ti turuho haga ka.

Anduane Homogonaga bi lo ngaru duniniore lo ngagoni.

Bi urunime ina manda bayale bulene ngiaga nga.

<sup>9</sup> Anduane Homogohondo giho holene mana bayaleore ogoni.✧

Ibuhondo giho holene mana ogoni

wali agalime bialu haho wiaaboore holebira.

Anduane Homogohanda bi o langiradaruni

henenebi tigabiorebi langiaabo haga ka.

<sup>10</sup> Anduane Homogonaga biore baya duniniore✧

wali agalime hame loabi muni ngolo dindiha lowa nga.

Muni ngolo uruni koda lowa

ibunaga bi ogoni baya gibiore ngago iname gubaliniore howa hame lolene nga.

Anduane Homogonaga biore dendebe tombehe

mone ibane dendebiore mbaria ngaru magubida lowa

bi ogoni dende taraorebi ngagoni.

<sup>11</sup> Anduane Homogo inaga bi lowigi bidegome✧

i inaga biabe biaga kogoni mana lalu mo tiga bigi biaga.

Ina inaga bi lo ngegodagua hale halu bigi berogola

ina nde ihondo turu halu i buru pado alego tiga handalu ngiaiore hariligoni.

<sup>12</sup> Mbiralime ibuninaga ko biyago ibunime handabe nahe ka.✧

Mana ko mbira bigi buwa

inime bu dambiho ko lo manda nabi koyagua

mana ko o birudarunigo ina domai habe.

Ani beregola inaga deni i dodo nahe holebero.

<sup>13</sup> Mana ko mbira ina bero lalu buligobi✧

ina i yaniho habe.

Ko bulene tara tara ngarume i mo pila haabo haragola

i ko andaneha haabo holigo ina i gi mibe.

Ani beregola i ko mbira para nahe tigabiore holebero.

<sup>14</sup> Anduane Homogo-o i inaga ha do haganebi i gi miaganebi kegoni.✧

Ina bi larogobi mitangi berogobi

inaga deni karulape helo hame ledi.

✧ 19:6: Iba 113.3 ✧ 19:7: Iba 119.130 ✧ 19:8: Iba 12.6, 36.9, 119.128 ✧ 19:9: Iba 119.138, 119.142 ✧ 19:10:  
Iba 119.72, 119.103, 119.127 ✧ 19:11: Iba 17.4 ✧ 19:12: Iba 40.12, 51.1-2, 90.8 ✧ 19:13: Iba 18.32, 25.11,  
119.133 ✧ 19:14: Iba 18.2, 31.5, 104.34

## 20

### *Wayali holenaga Anduane Homogohondo bi lenego ogo*

- <sup>1</sup> Í genda yu kengi Anduane Homogohanda biamogo bilo.  
Yagabanaga Ngode Datagaliwabehanda í handayaho helo.
- <sup>2</sup> Ibugua ibuni anda Saiononi kagoria howa  
í baya hangu handayaho halu  
mo hongo helobi hamelo ko.
- <sup>3</sup> Ibugua ína lomabu mererubi  
loma irani dai helo bu delaregobi  
bibahende hondowa turuho helo.
- <sup>4</sup> Í mbirale hamelo keru bibahendeibunime ngilo.✧  
Biabe maru biaore bule lalu miniha mandabu keru  
ibugua í biamogo bilo hamelo ko.
- <sup>5</sup> Ína wai bialu wayali harengi iname turu hai howa✧  
inanaga Ngode Datagaliwabe kagonaga mini yaraga holeberema.  
Anduane Homogoibunime ína bi lareru bibahende hale hai helo hamelo ko.
- <sup>6</sup> Anduane Homogohanda mbiraliibunime dabo helene kago  
biamogo biagago í manda bu kogoni.  
Ibuni dahuliya andaga bayale ngagoria howa  
ibugua ína bi larogo hale hagaore ka.  
Hale howa ibuninaga hongomeore í pele ngiragola  
ina wai bialu wayali haruli.
- <sup>7</sup> Hameigini maru bu karume wai biaga garo ale ngagoria✧  
tinaga mini hanaho haga ka.  
Marume wai biaga nogo hosi karunaga hongoni  
mini hanaho haga ka.  
Iname nde Anduane Homogo inanaga Ngode Datagaliwabe kagonaga minini hanaho  
haga kamagoni.
- <sup>8</sup> Agali uruni ti ibira halu ereba hai holebiragoyu  
iname heyalu hongohe ho aribia holeberema.
- <sup>9</sup> Anduane Homogo-o ína inanaga kini kago wayali helo mo hongo habe.  
Iname í olalu kamangi ína hale howa biamogo bibe.

## 21

### *Kini ibu wayali hayagonaga Anduane Homogo mini yaraga henego ogo*

- <sup>1</sup> Anduane Homogo-o ína kini kago mo hongo harigonaga ibu turuho kagoni.  
Biamogo bialu wayali helarigonaga  
ibugua íhondo turu timbuniho kagoni.
- <sup>2</sup> Ína ibunaga bu miniha hamelo heago ale miami hariya.  
Ibu wayali holenaga pele ngi layagola hale halu  
ina nangule nale miaore birigoni.
- <sup>3</sup> Ína ibu mo bayale hagane aleru ibu hearia ibilariyagoni.  
Kininaga manda ngolome wabini wiago  
ibunaga hagianeni ína mo karula hariya.
- <sup>4</sup> Ibugua holene bayale ngibe lalu hale hayagola✧

✧ 20:4: Iba 21.2 ✧ 20:5: Iba 9.14, 60.4 ✧ 20:7: Iba 33.16-17, Min 21.31, Ais 31.1 ✧ 21:4: Iba 61.5-6, 91.16

ína anidagua miriya.  
Ibu dindi ogoriani holene luore helo  
mo wia hariya.

<sup>5</sup>Ína ibu biamogo birigome  
ibu agali mini lene mbira ka.  
Ibuha hongo holenebi mini lenebi kago  
ínime mirigoni.

<sup>6</sup>Ína ibuhondo bayale holeneru wiaabo helo mirigoni.✧  
Íni ibu heba kaware haabo kegome  
ibu mo turu haabo haga ke.

<sup>7</sup>Kini ibugua Anduane Homogohondo mini mbiraore hongohe wu kagoni.✧  
Anduane Homogo Daligaorene Daliga kago  
ibugua kini gubalini ho haabo haga kagome  
ibu hongohe ha ho wiaabo holebira.

<sup>8</sup>Kini ibugua waitigi bu karu bibahende minu yania hai holebira.  
Agali ibu handabe manga haga karu hondowa  
ibugua garabaya helai holebira.

<sup>9</sup>Ibuni hamani hapani ho howa✧  
ibugua irame bo dalu mbirale ngaru dai hagadagua  
waitigi karu bo wahai holebira.

Anduane Homogohanda ti baba keba halu bope haragola  
ti bibahende irame dalu do amo lai holebira.

<sup>10</sup>Kini ibugua tinaga waneigini bu karu bo wahai holebira.  
Tinaga waneigini aguanene mani holebirarubi  
mbira naheore ereba halu amo lai holebira.

<sup>11</sup>Tigua kini ibu mo ko hole lowa✧  
dindiha hendore ndi lama ibaga bialu howabi  
tigua mo henene halu ibu bope naholebira.

<sup>12</sup>Kini ibugua danda tege lalu ti kagoaha timu baede haragola  
tigua gi halu ibida piai holebira.

<sup>13</sup>Anduane Homogo-o í hongo haabo holene taraore kego inaha ibilariligo  
ina ínaga mini yaraga holeberema.  
Iname iba gana lalu ínaga mini yaraga holeberema.

## 22

### *Tandaga howa dugu binigobi kai lalu iba gana lenegobi ogo*

<sup>1</sup>Ínaga Ngode Datagaliwabe-o✧

Ínaga Ngode Datagaliwabe-o  
ína í aginaga wahalú piribe.

Í biamogoore bibelonaga dugu bialu bi larugolabi  
hale nahole í kaundia uyuraore haruago irane aginagabe.

<sup>2</sup>Ínaga Ngode Datagaliwabe-o ina horombe olalu kogo✧  
ína ladai nabi ke.

Mbiragabi nde olaabo halu kogoyu

✧ 21:6: Iba 16.11, 45.7, Ab 2.28 ✧ 21:7: Iba 16.8 ✧ 21:9: Iba 18.8, Ais 26.11, Mal 4.1 ✧ 21:11: Iba 2.1

✧ 22:1: Iba 10.1, Md 27.46, Mg 15.34 ✧ 22:2: Iba 42.3, 88.1

ina inaga genda mo wanahe haabo kegoni.

<sup>3</sup> Anigoyu i Ngode Datagaliwabe Kini Loma Bia Hene howa haru kegoni.

I Kini kegola Isaraele wali agalime inaga mini mo yaraga haga.

<sup>4</sup> Inanaga mamali heneyarume ini hanaho haga biniya.\*

Tigua i ani hanaho hemiria ina ti pele migi biniya.

<sup>5</sup> Tini kooreni howa i olaga biyagome

tinaga waitigirunaga giha howa yo pialu pugu biniya.

Tigua ini hanaho haga biniyangi

ti heagoria buru pale mbira nawi heneya.

<sup>6</sup> Ayu wali agali bu karu bibahendeme\*

iore handabe manga halu kerekere lalu ka.

Tigua ani lalu kagome i agali abale haruligobi ndo

ayu ngoe dindini pialu ngaligobi ko.

<sup>7</sup> I handaya haga biraru bibahendeme i mege bialu\*

tinaga ngui yogo bialu ihondo hege doma bigi biaga ka.

<sup>8</sup> Anidagua bigi bialu howa tigua ihondo lalu,\*

I Anduane Homogoni hanaho hegodago

ibugua i genda yu keruni yamogo nabiradago aginagabe, laga.

Anduane Homogo ibugua i kalo manda bidayagua

i biamogo nabiradago aginagabe, laga.

<sup>9</sup> I pigane i aiyahanda taba hanayangi howa\*

inaga gi habeni halu anda harugo kogoni.

<sup>10</sup> I pigane hono wiyangi inaga gi habeni honope henego\*

inaga Ngode Datagaliwabe ini hanaho halu dege anda harugo ayu o kogoni ndobe.

<sup>11</sup> Ai gendabi tara tara i kogoria hapara kago\*

i biamogo bulene mbirali nahego i dege ke lo kogoni.

<sup>12</sup> Waitigi dewa bulumaga gabua agali hayaga alerume

ho mabu bupe kagola i dombeneha ko.

Bulumaga wangabe gabua hongohe hiriribiore

Basana dindini bu heane hendene

ogobioreme i ho mabu bupe kane ko.

<sup>13</sup> Laiono gabuame agali bo tidu bagabu nole

ne hala howa ngororo lagadagua

tigua i bo nole ogonidagua bialu ka.

<sup>14</sup> Inaga hongo holene ereba haya.\*

Iba dindini odo paya bini pu ereba hagadagua

inaga hongo bibahende ereba hai halu pirilipe haya.

Inaga kuni damenego bibahende hibi habo lai halu

inaga gubalini nira nama anda piarua.

<sup>15</sup> Inaga kembobe yobi abalu ale halu\*

inaga hegene dugu tagi halu ne hambuni dugu bandalape ka.

Anduane-o ani bidago i durumbu o ngagoha homo tongolo muliya ngeledegoni.

\* 22:4: Iba 78.53, 107.6    \* 22:6: Yob 25.6, Iba 31.11, Ais 41.14, 49.7    \* 22:7: Ais 53.3, Md 27.39, Mg 15.29, Lg 23.35    \* 22:8: Md 27.43    \* 22:9: Iba 71.5-6    \* 22:10: Ais 46.3, 49.1    \* 22:11: 2 Kin 14.26, Iba 72.12, Ais 63.5

\* 22:14: Iba 73.26, Dan 5.6    \* 22:15: Iba 38.10

- 16 Agali ko biagaru biango dudu tidiyu haradagua  
tidiyu howa *i* ho mabu bupe ka.  
Tinaga ne tandagabigome *inaga* gi geru hayama iri dali bialu  
tinaga neme *i* haya bolomogo bida.
- 17 Tigua *inaga* kuniru panaga karia hondowa  
*i* yo handalu bame kuni hanguore o kagonida lowa handayaho ka.
- 18 Tigua *inaga* aga ti mo tale bialu<sup>☆</sup>  
aga luni mbira daliga biagane wiwago  
ti *ái* ibu harabe hondole tadu bira.
- 19 Anduane Homogo-o *ina* *i* hangu helo wanahabe.<sup>☆</sup>  
*I* biamogo bulene *i* dege kegonigo  
*i* biamogo bule abale *íbu*.
- 20 *Inaga* waitigi karume ayu tibume *i* ma puguligo pele ngibe.  
Biango ale o bu karume *i* bo homa boligo  
*ina* *i* abale pele ngi.
- 21 Laiono o bu karume *i* bo nabeheore halu<sup>☆</sup>  
bulumaga wangabe gabua o bu karumebi *i* bayagua  
*i* yo pialu pobe naheore kogonigo *i* gini mia.
- 22 *Ína* gi mialu *i* biamogo ogodagua biya lalu<sup>☆</sup>  
*ina* *inaga* wali agali karu hale helo loyogo loliya.  
Ti mo ngoai ho bedagoria howa  
*ina* *inaga* mini yaraga holebero.
- 23 *Ina* ogodagua lolebero.  
Anduane Homogonaga biabe biahaga kamirume  
ibunaga mini yaraga hadaba.  
Yagabanaga waneigini kamirume  
Anduane Homogohondo *kai* ladaba.  
Isaraele hameigini kamirume  
Anduane Homogo ibu mitangi bialu lotu ladaba.
- 24 Ibugua yagibano karu biamogo bulene ha do waha<sup>☆</sup>  
tigua tandaga nalu karu hondowa nahende tingiha nabiaga kagoni.  
Ani nabi howa tinime biamogo bia lalu olaragola  
ibugua hale halu biamogo biaga ka, lolebero.
- 25 Bibahendeore ngoai ho kagoria *ina* birirunaga lalu<sup>☆</sup>  
*ina* *inaga* mini yaraga holebero.  
*Íhondo* turu halu mbirale bo ngulebero lalu lo wirugo  
wali agali *íhondo* gihe biru ngaru bibahendenaga deni howa ngulebero.
- 26 Yagibano damene *íbu* ngoai ho bedaru<sup>☆</sup>  
bibahendeme ti noabiradagua nendebu nolebira.  
Anduane Homogo mitangi bule *íbu* ngoai ho bedaru bibahendeme  
ibunaga mini yaraga holebira.  
Wali agali uruniore bayale hangu hama puabo helo  
aniore bilo laro.
- 27 Wali agali hameigini tara tara paluyu pedaru<sup>☆</sup>

☆ 22:18: Md 27.35, Mg 15.24, Lg 23.34, Yo 19.24    ☆ 22:19: Iba 22.11, 70.5    ☆ 22:21: Iba 34.4, 118.5    ☆ 22:22: Iba 40.10, Hi 2.12    ☆ 22:24: Iba 31.22, 69.17, 69.33, Hi 5.7    ☆ 22:25: Iba 35.18, 40.9-10, 61.8    ☆ 22:26: Iba 40.16, 69.32    ☆ 22:27: Iba 2.8, 82.8, 86.9



bibahendeme Anduane Homogo ka manda bialu  
ibu karia ibalu ibu mitangi bialu lotu lai holebira.

<sup>28</sup> Anduane Homogo ibu kini howa✧  
hameigini tara tara paluyu pedaru bibahende  
ibugua handame ho kagoni.

<sup>29</sup> Wali agali minehe dindini holene mo tene ho karu bibahende ibalu✧  
Anduane Homogonaga ge ha bulu paliai holebira.  
Homalu dindi tago bulebirago manda buwa  
bibahendeme ani biai holebira.

<sup>30</sup> Mani dabane hama porarume Anduane Homogonaga biabe bia holebira.✧  
Tigua Anduane Homogo lalu maha anda ho aribia hene karu lamulebira.

<sup>31</sup> Maha taba honolebiraru tibi lamialu,✧  
Anduane Homogohanda ibunaga wali agali pele miya, lalu lamulebira.

## 23

*Anduane Homogo ibu inanaga haru haga kago ogo*

<sup>1</sup> Anduane Homogo ibu inaga haru haga kagoni.✧  
Ani kagome i buru pale mbira ngagola ibunime karulape ngulebira.

<sup>2</sup> Ibugua i tani gahenge kagoriabi  
iba gagahe bedagoriabi✧  
ema nabi biruliya haru haga ka.

<sup>3</sup> Ibugua hongo gahenge i ngiaga.✧  
Ibugua ala bulebero lalu lo wiyadagua  
i hariga tigabini haru piaga ka.

<sup>4</sup> I homolene ngatoria kaware pu haruyaguabi  
i gi naholebero.✧  
Anduane Homogo-o iore i heba haabo haga kegoni.  
Inaga kango halimbubi yidegome i biamogo biaga.

<sup>5</sup> Inaga waitigi karu handaya ho helowa✧  
ina i tomo karulapeore noliya manda manda bu ngiaabo harili.  
Agali hagianeru tomo nabiyi ibabe lowa bulenedagua  
habane nabuleneore i kogohondo biaga ke.  
Inaga iba beha iba hambu tola tagiore howa ngiaga ke.

<sup>6</sup> Inaga gubalini haho wiaabo holenebi  
dara howa biamogo bulenebi✧  
i porodagua mandagi ibagabu haaboore holebiralo manda bido.  
Ina Anduane Homogo i andagaha haabo holebero.

## 24

*Anduane Homogo ibu dindi bibahendenaga kini kagonigo ogo*

<sup>1</sup> Dindi bibahendebi mbirale dindini karubi ngarubi✧  
bibahendeore Anduane Homogo ibunaga hangu nga.  
Wali agalibi mbirale tara tara dindini ema bialu piaga damenerubi

✧ 22:28: Iba 47.7-8, Seg 14.9 ✧ 22:29: Iba 89.48, Ais 10.16 ✧ 22:30: Iba 102.18, 102.28 ✧ 22:31: Iba 71.18, 78.6 ✧ 23:1: Iba 34.9-10, Ais 40.11, Yo 10.11, 1 Pi 2.25 ✧ 23:2: Iba 36.8, 65.11-13, Ese 34.14, Mo 7.17 ✧ 23:3: Iba 5.8, 19.7, 85.13 ✧ 23:4: Iba 16.8, 27.1, Ais 43.2, Mai 7.14 ✧ 23:5: Iba 78.19, 92.10, Lg 7.46 ✧ 23:6: Iba 25.7, 25.10, 27.4-6, 2 Ko 5.1 ✧ 24:1: Har 19.5, Man 10.14, Iba 50.12, 1 Ko 10.26

- bibahendeore Anduane Homogoibunaga hanguka.  
<sup>2</sup> Anduane Homogohanda iba andaneha berelowa<sup>☆</sup>  
 dindi ogo daliga wabu ngeleda.  
 Dindi ogonaga gene dunini iba solowara timbuni bedago andaneha wa namu lowa  
 dindi ogo pagaho ngeleda.
- <sup>3</sup> Mbirali Anduane Homogo mitangi halu hari nene kagoria<sup>☆</sup>  
 iraga halu polene karulape ai kabe.  
 Anduane Homogonaga anda lomabia hene hari nenenikago  
 ge nahaga ogoniha ge yaanda halu polene karulape ai kabe.
- <sup>4</sup> Mbirali ibu gime mana ko mbira nabiagabi<sup>☆</sup>  
 ibu bu minime mana ko mbira mitangi nabiagabi  
 mbirale gime wabiniru mitangi nabiagabi  
 tindule ogoale buliya lowa lahondo nahagabi  
 uruniale nabiaga kago ibuni iraga halu polene karulape ka.
- <sup>5</sup> Wali agali urunibi karu  
 Anduane Homogohanda ti pele mialu mo bayale holebira.  
 Ngode Datagaliwabe ibugua tiha ko mbira nawi ti tigabiore kamigoni lolebira.
- <sup>6</sup> Wali agali urunibi karume<sup>☆</sup>  
 Ngode Datagaliwabe mitangi bialu ibu kagoria ibaga.  
 Yaganaga Ngode Datagaliwabe kago mitangi bialu  
 ibuni kagoria kaware ibugu biaga.
- <sup>7</sup> Kini gibi kago ibu anda ibilo.<sup>☆</sup>  
 Panga payapai kamiruni amura dugu amu nana bidaba.  
 Panga haraba bambaore howa payaho wiaabo hene karuni dugupe hadaba.  
 Kini gibi biago ibilo ani bidaba.
- <sup>8</sup> Kini gibi ogoni ibu ai kabe.  
 Kini ogoni ibu Anduane Homogo hongo gibihe biago kagoni.  
 Anduane Homogo ogoni ibu wai bialu wayali haga gibi biagoni ka.
- <sup>9</sup> Kini gibi kago ibu anda ibilo.  
 Panga payapai kamiruni amura dugu amu nana bidaba.  
 Panga haraba bambaore howa payaho wiaabo hene karuni dugupe hadaba.  
 Kini gibi biago ibilo ani bidaba.
- <sup>10</sup> Kini gibi ogoni ibu ai kabe.  
 Anduane Homogo Bibahendeore Haru Haame Ho Haga biago  
 ibuniore Kini gibi ogoni kagoni.

## 25

### *Anduane Homogohondo handayaho habe lalu bi lenego ogo*

- <sup>1</sup> Anduane Homogo-o ina inaga miniha mitangibu kogonaga<sup>☆</sup>  
 ihondo bi larogoni.
- <sup>2</sup> I inaga Ngode Datagaliwabeore kegoni.<sup>☆</sup>  
 Ina ihondo mini mbiraore wu kogoni.  
 I wai wayali naharogonaga taga paninelabe.  
 Waitigi karume i bope halu wayali howa  
 i hondo oba nahelabe.

<sup>☆</sup> 24:2: Iba 104.5, 136.6, 2 Pi 3.5    <sup>☆</sup> 24:3: Iba 15.1    <sup>☆</sup> 24:4: Iba 15.4, Ais 33.15-16, Md 5.8, 1 Ti 2.8    <sup>☆</sup> 24:6: Iba 27.8, 105.4    <sup>☆</sup> 24:7: Ais 26.2, Hag 2.7, Mal 3.1, 1 Ko 2.8    <sup>☆</sup> 25:1: Iba 86.4, 143.8    <sup>☆</sup> 25:2: Iba 31.1, 41.11

<sup>3</sup> Wali agali íhondo mini mbiraore wialu mini dunubiahe karu✧  
ti wai wayali naharagonaga taga naholebira.  
Wali agali mine halu mana ko biaga karu  
tini dari halu taga holebira.

<sup>4</sup> Anduane Homogo-o ínaga mana bayale ngeru í lawai halu✧  
hariga tigabini pialu holiya mo walia habe.

<sup>5</sup> Ína bi mana henene lo ngego talialu bialu holiya í lawai habe.✧  
Ngede Datagaliwabe ína í haru dai bialu pele ngiaga kegonaga  
ína ani bibe laro.  
Horo bibahendengi ína í biamogo bibelo  
mini dunubiaho haruligo kogoni.

<sup>6</sup> Anduane Homogo-o ínaga dara holenebi gubalini holenebi✧  
irane nawini haga kego mitangi bibe.  
Ínaga mana ogoni bambaore howa wiaga biago áyu wiaabo kagoni.

<sup>7</sup> Anduane Homogo-o í igiri daliahe hewangi✧  
ko dewa bialu harugobi  
mine harugobi mitangi nahabe.  
Anduane Homogo-o í bayaleore haabo kegonigo  
ínaga gubalini holeneme í dara halu mitangi bibe.

<sup>8</sup> Anduane Homogo ibu bayale tigabiore kagoni.✧  
Wali agali mana ko biaga bu karume  
mini beregedalu mana bayale bialu helo  
ibugua biawai haga ka.

<sup>9</sup> Ibugua wali agali tini mini mo dindi haga karu✧  
bayuwa haru haga ka.  
Tiguaibunaga mana tigabi ngaru hangu bialu helo  
ibugua biawai haga ka.

<sup>10</sup> Anduane Homogohandaibunaga habo nalolene bi lowini ngagobi✧  
ibunaga mana ngagobi wali agali talialu biaga karu  
ibugua tihondo gubalinibi mini bilinahebi howa  
ti hariga tigabini haru haabo haga ka.

<sup>11</sup> Anduane Homogo-o íni mini tigabi howa bule lalu lo wiridagua✧  
mana ko bialu harugo domo wahabe.  
Ina ko timbuniore biruru nde ína domo wahaiore habe.

<sup>12</sup> Wali agali Anduane Homogo mitangi bialu  
mogolo haga karu aibe.

Uruni ti mana bayale dabalubialu helo  
ibugua hariga tigabi mo walia halu holebira.

<sup>13</sup> Wali agali urunibi karu ti bayale halu✧  
tinaga waneigini aguanenerubi dindi ogoria howa bayale holebira.

<sup>14</sup> Anduane Homogo ibugua wali agali ibuni andaneha karu nenegeore haga kagoni.✧  
Ibuguaibunaga habo nalolene bi lowini ngaru  
tihondo lawai haga kagoni.

✧ **25:3:** Ais 21.2, 49.23, Hab 1.13 ✧ **25:4:** Iba 27.11, 86.11 ✧ **25:5:** Iba 40.1, 43.3, 79.9 ✧ **25:6:** Iba 98.3, 103.17  
✧ **25:7:** Yob 13.26, Iba 31.19, 51.1 ✧ **25:8:** Iba 32.8, 86.5, 92.15 ✧ **25:9:** Iba 23.3, 27.11 ✧ **25:10:** Iba 40.11,  
103.18 ✧ **25:11:** Har 34.9, Iba 79.9 ✧ **25:13:** Iba 69.36, Min 1.33, Yar 23.6 ✧ **25:14:** Pig 17.1, Yob 29.4, Min  
3.32

- 15 Ina horo bibahendengi Anduane Homogohanda i biamogo bilo<sup>☆</sup>  
 ibuhondo mini dunubia ho haga kogoni.  
I mo ko holene bu ngagoria kogola  
 ibugua i pele ngialu mo wiaga kogoni.
- 16 Anduane Homogo-o ini hangu howa inaga hongo ereba hayadago  
ina i dara halu biamogo bule abale ibabe.<sup>☆</sup>
- 17 I hendore holene ngadagua holiya<sup>☆</sup>  
iha genda bu ngelo koruni ina mo wahabe.  
 Mini tumutumu bulene ngarume i bope nahelo  
ina i abale biamogo bibe.
- 18 Iha genda tandagaru ngelo koru mitangi bialu<sup>☆</sup>  
ina ko bini ngoru bibahende ina domo wahai habe.
- 19 Inaga waitigi dewaore bu karu de handa.<sup>☆</sup>  
 Tigua i handabe manga timbuni kagobi de handabe.
- 20 Inaga waitigi karume i bo wanahelo  
ina i handayaho halu pele ngibe.  
 Tigua i mo taga nahelo  
ina i kegoha ha do hole ibulebero.
- 21 Ina ihondo mini mbiraore wu kogo<sup>☆</sup>  
inaga mana bayale tigabi bulene ngorume  
i haru haabo helo hamelo kogoni.
- 22 Ngode Datagaliwabe-o inaga Isaraele wali agali bu karunaga genda tara tara  
 ngarume<sup>☆</sup>  
 ti bo hengeda nabilo  
ina ti pele mialu haru dai bibe.

## 26

### *Wali agali tigabi karume bi lolenego ogo*

- 1 Anduane Homogo-o ina ihondo mini mbiraore wu haabo howa<sup>☆</sup>  
 mana tigabi hangu bialu harugo  
ina i bayale ka labe.
- 2 Anduane Homogo-o ina bialu haga ngoru<sup>☆</sup>  
ina bibahendeni howa i ba handabe.  
Inaga bu minibi baya hangu dabo handaga bigi bibe.
- 3 Inaga dara halu gubalini holeneme i handayaho haga kegoni.<sup>☆</sup>  
I mini bilinahe kegome  
i poleberogoha pu bamba halu ina i yu wahalu napiaga kegoni.
- 4 I agali ko biaga karu heba naharuli.  
 Agali tombene hondokihe karu baba i nenege nahaga kogoni.<sup>☆</sup>
- 5 I agali mini kowi karu baba ibaga bibe manga howa<sup>☆</sup>  
 mana ko biaga karu helalu habagi ho haruli.
- 6 Anduane Homogo-o iha ko mbira nawiore kogo walia halu<sup>☆</sup>  
ina inaga gi wayawayaya bo waharogoni.

☆ 25:15: Iba 123.2, 124.7 ☆ 25:16: Iba 69.16, 143.4 ☆ 25:17: Iba 40.12, 107.6 ☆ 25:18: Iba 31.7, 103.3  
 ☆ 25:19: Iba 3.1-2, 9.13 ☆ 25:21: Iba 41.12 ☆ 25:22: Iba 130.8 ☆ 26:1: 2 Kin 20.3, Iba 28.7, Min 20.7  
 ☆ 26:2: Iba 17.3, 139.23, Seg 13.9 ☆ 26:3: 2 Kin 20.3 ☆ 26:4: Iba 1.1, Yar 15.17 ☆ 26:5: Iba 1.1, 31.6,  
 139.21-22 ☆ 26:6: Iba 73.13, 1 Ti 2.8

I inaga lomabu delaga dabu bu kagoria pu mabu bialu howa  
ina i mitangi bialu lotu lalu kogoni.

7 Ina anidagua bialu howa  
ihondo kai lalu iba ganaru larogoni.

Ina mbirale bayale bialu hariruni  
wali agali bibahendeme hale helo ina lamiai harogoni.

8 Anduane Homogo-o inaga anda ini kegoha kago i hame timbuni ledó.

I mini timbunibi wa holenebi haabohe ngagoria kego  
inaga gubalinime hame timbuni lo kogoni.

9 Mana ko biaga karu heba ina i bo wanahabe.\*  
Mendeali homelo bo wahaga karu ina ti bo waharengi  
i ti heba homoliya ba nabi helabe.

10 Uruni tigua mana ko ngubiore ngaru biaabo haga kagoni.\*  
Tigua wali agali bayale kago mo ko halu  
agali tara karume bame bo wahelo  
ohowa muni hana haga kagoni.

11 Anigoyu inime mana bayaleore ngaru taluwa bialu haga kogonigo  
ina i dara howa biamogo bialu haru dai bibe.

12 I mana tigabi yani ho howa hongoheore haga kogo\*  
mbirale mbirame i mo ko habe nahe.  
Wali agali Anduane Homogo mitangi bialu lotu lole ngoaiho bedagoria howa  
ina ibunaga mini yaraga halu holebero.

## 27

### *Anduane Homogonaga mini yaraga halu bi lolene ogo*

1 Inaga wa holenebi i pele ngulenebi Anduane Homogo ibuni hangu kagoni.  
Ani kagola i mbirali hondowa gi naholebero.\*  
Anduane Homogo ibugua mbirali gibi ale bu ngarunaga howa  
i mo wiaga kagola ina mbiralihondo gi naholebero.

2 Agali ko inaga waitigi karume\*  
i de handaya halu bo wahole manda biyagua  
tiniha dai bulebira.

3 Agali wai tidiyu henego bibahendeoreme iore bole lowa  
ho mabubupe ho kayaguabi i gi naholebero.  
Inaga waitigi karume i baba wai kama layaguabi ti ani lo helo  
i Anduane Homogohondo mini mbiraore wiaabo howa  
miniha dungulo holebero.\*

4 I Anduane Homogohondo bi lalu mbirale mbira hangu bulene hamelo ko lalu lamiru.\*  
Ogonigo i dere emabu kongi  
Anduane Homogo ibu andagani haabo holene hame ledó lalu lamiru.  
Ani lowa Anduane Homogonaga biamogo bulenebi  
baya turubini bulenebi  
mana bayale uruni alego bayuwaore handa tiga bialu

\* 26:9: 1 Sml 25.29, Iba 28.3    \* 26:10: Man 16.19, 1 Sml 8.3, Ais 33.15    \* 26:12: Iba 22.22, 27.11, 40.2, 107.32  
\* 27:1: Iba 118.14, Ais 33.2, 60.20, Mai 7.8    \* 27:2: Iba 9.3, 14.4    \* 27:3: Yob 4.6, Iba 3.6    \* 27:4: Iba 18.6,  
23.6, 90.17



ĩ hama polenego ogodagua hama pobe lalu bi langigi bilo hame laru.

<sup>5</sup> Gendabi mini burugule wigi bidangi ibugua ĩ bira do helolebira.

Ibugua ibuninaga andaha ĩ bayale holiya mo do holebira.

Ani bialu ibugua ĩ taba muwa

ege tole hari wedagoria neneoreni bo iraga holene tobaheni minu berelolebira.✧

<sup>6</sup> Anidagua bigi biragola ĩna ĩnaga waitigiru bope halu✧

ĩ wayali holebero.

Ĩna turu howa ali iwaru lalu

Anduane Homogonaga andaha ibunaga lomaru bo delolebero.

Ĩna Anduane Homogonaga mini yaraga halu iba gana lolebero.

<sup>7</sup> Anduane Homogo-o ĩna ĩ olarogola hale halu ladai bibe.✧

Ĩna ĩ dara nahabehe kogoni harugo

ĩ dara halu bi larogo hale halu ladai bibe.

<sup>8</sup> ĩna ĩhondo lalu,✧

Ĩ mitangi bialu lotu lole ĩ kogoria ibabe, larigola

ĩna, E Anduane Homogo-o ibulebero, lalu ladai birugoni.

<sup>9</sup> Anduane Homogo ĩna ĩhondo manga halu erembira nguleni.✧

Anduane Homogo-o ĩ ĩnaga biabe biahaga harugonigo

ĩna ĩhondo keba halu erembira ngialu poleni.

Ĩnaga Ngode Datagaliwabe ĩnaga Pele Ngiaga-o

ĩ biamogo biaga ĩ harigonigo

ĩ helalu erembira ngialu poleni laro.

<sup>10</sup> ĩ aba aiyalame ĩ handabe manga halu bo batagi hayaguabi✧

Anduane Homogo ibugua ĩ ibunaga adogeha yamuwa de hondo holebira.

<sup>11</sup> Anduane Homogo-o ĩnaore bialu holiya✧

ĩna manda bu ngedagua ĩhondo walia habe.

Ĩnaga waitigi dewa bu karume ĩ boligo

ĩ hariga gibi hiriribini haru nape hariga tigabini haru pobe.

<sup>12</sup> ĩnaga waitigi ĩ bolene kagoria ĩ hangu helo wahalu poleni.✧

Tigua tindule ĩ nabinigobi bame dibade halu

ĩ mo gila halu bi lai damene haragola ti bime ĩ bo ngoai haga kago

Anduane Homogo ĩna ĩ yu wahalu poleni laro.

<sup>13</sup> Anduane Homogo ibunaga mana baya gibiore

áyu ina kamangi bigi birago ĩ hondole holebero manda bido.✧

<sup>14</sup> Anduane Homogohanda biamogo bulebira manda bialu✧

ibuhondo mini mbiraore wu halimu.

Bu miniha genda nahe hongo ho halimu.

Anduane Homogohanda biamogo bulebira manda bialu

ibuhondo mini mbiraore wu halimu.

## 28

### *Anduane Homogohondo biamogo bia lalu bi lenego ogo*

<sup>1</sup> Anduane Homogo-o ĩ ege tole ale hongohe kego✧

ĩna ĩ biamogo bibelo olalu kogoni.

✧ **27:5:** Iba 17.8, 31.20, 40.2, 50.15 ✧ **27:6:** Iba 3.3, 107.22 ✧ **27:7:** Iba 4.3, 13.3, 61.1 ✧ **27:8:** Iba 34.4, 105.4, Amo 5.6 ✧ **27:9:** Iba 6.1, 40.17, 69.17, 94.14 ✧ **27:10:** Ais 40.11, 49.15, Yo 16.32, 2 Ti 4.16-18 ✧ **27:11:** Iba 5.8, 25.4, 86.11 ✧ **27:12:** Man 19.18, Md 26.60, Ab 9.1 ✧ **27:13:** Iba 31.19, Yar 11.19 ✧ **27:14:** Iba 62.5, Min 20.22, Ais 25.9 ✧ **28:1:** Iba 83.1, 88.4, 143.7

Ína í olarogo haleore habe.

Ína inaga bi larogo hale halu í biamogo nabiriyagua nde  
í agali homene dindiha pu karu ale holeberodalo manda bido.

<sup>2</sup>Ína í biamogo bia lalu í olalu kogola<sup>☆</sup>  
ína inaga bi hale habe.

Ína ininaga anda loma bia heneha í keria inaga gi yaraga halu  
íhondo bi lalu kogola hale habe laro.

<sup>3</sup>Ína mini kowi karu heba í bope nahabe.<sup>☆</sup>

Uruni tigua mana ko biaga howa  
bi bayale dege lalu  
miniha handabe manga holene ngaru doho haga kago  
í ti heba mo ko hamaga nahabe.

<sup>4</sup>Tigua ko uruni biyagonaga pani nelu mibe.<sup>☆</sup>

Ko biaganego pani nelu mo mibe.  
Tinime mana ko bibahende biyarunaga  
tini biyagobi pani nelu migi bibe.

<sup>5</sup>Agali ko uruni tigua Anduane Homogohanda biabe timbuni bini ngaru mitangi  
nahagabi<sup>☆</sup>

bibahende wabini ngaru mitangi nahagabi ka.  
Tigua ani bialu kagonaga pani mialu  
ibugua ti bo wahaiore holebira.

<sup>6</sup>Anduane Homogohanda ina dugu bialu biamogo bia lalu olalu harugola  
ibugua hale hayagonaga ina ibunaga mini yaraga harogoni.

<sup>7</sup>Anduane Homogo ibugua í handaya howa<sup>☆</sup>  
inaga humbi ale kogoni.

Ibu karulapeore kago mitangi bialu  
í ibuha hanaho kogoni.

Ibugua í biamogo biaga kago  
ína turu halu iba ganaru lalu  
ibunaga mini yaraga halu kogoni.

<sup>8</sup>Anduane Homogohanda ibunaga wali agaliru baya hangu handayaho haga.

Ibugua agali kini helo ibunime dabo helayagobi  
biamogo bialu mamage ho haga ka.

<sup>9</sup>Anduane Homogo-o inaga wali agali pele mialu<sup>☆</sup>

ti ininagaore helo dabo helarigo  
inime bayuwa biamogo bibe.

Nogo sibi haru haga ale howa  
ína wali agali uruni tinaga haru haganeore ini howa  
ti bayuwa handaya halu haru haabo habe.

## 29

*Anduane Homogohanda dalu puyaburuha howa bi latagi hagago ogo*

<sup>1</sup>Dahuliyali kamiru-o<sup>☆</sup>

Anduane Homogo kagonaga mini mo yaraga hadaba.  
Wá taraore holenebi hongo holenebi

<sup>☆</sup> 28:2: Iba 5.7, 138.2    <sup>☆</sup> 28:3: Iba 26.9, 55.21, Yar 9.8    <sup>☆</sup> 28:4: 2 Ti 4.14, Mo 18.6, 22.12    <sup>☆</sup> 28:5: Yob 34.27,  
Ais 5.12    <sup>☆</sup> 28:7: Iba 13.5, 18.2, 22.4    <sup>☆</sup> 28:9: 1 Kin 8.51-53, Iba 78.1    <sup>☆</sup> 29:1: Iba 96.7-9

- ibuni hangu kago turu timbuni hadaba.  
<sup>2</sup> Anduane Homogo ibuni baya buruguleore kagonaga mini yaraga hadaba.✧  
 Ibu mitangi bialu ibunaga wanakuihayagi bulupalialu  
 ibunaga mini yaraga halu lotu ladaba.
- <sup>3</sup> Anduane Homogonaga bi larago  
 iba solowara bedarume hale hai haga.  
 Ngode Datagaliwabe ibuni mini leneore kagome  
 ibunaga bi hari kulu laradagua biayua.  
 Iba solowara berearuha daligani  
 ibunaga bi timbu hari kili kulu laradagua biayuagoni.
- <sup>4</sup> Anduane Homogonaga bi hongohe gibi taraore layuagoni.  
 Wali agali bibahende bu hearume ibunaga bi laragola  
 hale howa mogo lalu gi hai haga.
- <sup>5</sup> Anduane Homogo ibunaga bime  
 ira tamia hearu bo dangia lahole biagaya.  
 Ira tamia Lebanono dindi hene heaguabi aniore biagaya.
- <sup>6</sup> Anduane Homogohanda Lebanono dindiha hari timbuni wearu mo emabia haragola  
 nogo bulumaga iginime pogoladagadaga biagadagua bilaga ka.  
 Hari Hemono wedago nogo bulumaga wangabe daluame  
 pogoladagadaga biradagua ani bilaga ka.
- <sup>7</sup> Anduane Homogohanda bi laragola  
 hari daba migimege lalu wá timbuni hagimbu biagaya.
- <sup>8</sup> Ibugua bi laragome dindi ko wali agali nahaga ngaru  
 mo birila gimbu biagaya.  
 Kedese dindi ko iba dalu naibaga ngaru  
 mo birila gimbu biagaya.
- <sup>9</sup> Anduane Homogohanda bi hongo howa laragola  
 nogo gabua karume hale halu mogolo puwa  
 igini abale wupe hagaya.  
 Ibugua bi hongo howa laragome  
 ira yuni karu gilopaya bilagaya.  
 Ibugua anda kagoaha wali agali bibahendeme lalu,  
 Ngode Datagaliwabe ibu mini leneore ka, lagaya.
- <sup>10</sup> Anduane Homogo ibugua iba solowara timbuni bedaru handameho haga.✧  
 Ibu Kini timbuniore howa hondo haabo haga kagoni.
- <sup>11</sup> Anduane Homogohanda ibunaga wali agali bu karu  
 mo hongo haabo haga kagoni.  
 Ibugua ti mo bayale heledagola  
 ti mo palia holene karulo haabo haga ka.

## 30

### *Anduane Homogohondo kaj lalu bi lenego ogo*

- <sup>1</sup> Anduane Homogo-o ina i waitigi hearume i bo hangedalu turu nahelo  
 i pele ngialu haru dai birigonaga  
 ina turu timbuniore howa

ínaga mini yaraga halu kogoni.

<sup>2</sup> Anduane Homogo-o í ínaga Ngode Datagaliwabeore kegonigo<sup>☆</sup>  
ina íhondo biamogo bia lalu olarugola hale hari.

Hale howa ina í biamogo bialu mo dabi ho helarigo ko.

<sup>3</sup> Anduane Homogo-o í homene ale hewaria<sup>☆</sup>

ina í lone mo heya harigoni.

Í homene dininiru pu hagaha hewaria

ina íha holene karula halu ngia dai birigoni.

<sup>4</sup> Anduane Homogonaga wali agali mini bilinaheore kamiru-o<sup>☆</sup>

tígua ibu mini yaraga halu iba gana lalu hadaba.

Mbirali mini Baya Buruguleore kago

ibunime tíhondo mbirale bigi biyarunaga mitangi bialu

ibunihondo kai lalu hadaba.

<sup>5</sup> Ibugua keba tigimandi hangu ho haga kagoyu<sup>☆</sup>

ina dindini kamangi ina mitangitangi bialu

biamogo biaabo haga kagoni.

Mbiraga de iba ibalu palu heyalu

horu mendengi turu ha aribia holebira.

<sup>6</sup> Ini hangu mitangi bialu lalu,<sup>☆</sup>

Í karulapeore kogo ínaga waitigi karume

í mo para nahabehe ko, laru.

<sup>7</sup> Anduane Homogo-o ina íhondo bayale bialu haabo kegoni.

Ína anda hongohe hari neneni hagagobi howa

í helarigo kogoni.

Ani birigoyu í helalu pialu í ha do harigola

íha gi holene timbunime bo hengeda dambi haga biya.

<sup>8</sup> Ina Anduane Homogo í olarugoni.

Í dara howa biamogo bia, hongo howa lalu harugoni.

<sup>9</sup> Í homaruyagua nde

íha howa bayale mbira agi tagira ibulubadabe.

Í homaliha piruyagua nde

bayale agi bia tagi holobadabe.

Homenerume ínaga mini yaraga holobadabe.

Ína bayale biaabo haga kegonaga

tigua latagi agua holobadabe.

<sup>10</sup> Anduane Homogo-o ina ínaga bi larogo hale howa dara habe.

Anduane Homogo-o ina í biamogo bibe laro.

<sup>11</sup> Ína íha genda wiwaru bibahende mo wahi harigola<sup>☆</sup>

turu howa mali lulene wia aribia helarigoni.

Abale í mbirali homaragola daraho hagagobi hewaria

ina íha dara holene uruni mo wahi halu

ínaga bu miniha turu holene mo wia aribia helarigoni.

<sup>12</sup> Ainde ina íhondo bi nale holebero ndo

ina ínaga mini yaraga halu iba ganaru lalu holebero.

☆ 30:2: Iba 6.2, 88.13, 103.3    ☆ 30:3: Iba 28.1, 86.13    ☆ 30:4: Har 3.15, Iba 135.13, 149.1    ☆ 30:5: Iba 103.9, Ais 26.20, 2 Ko 4.17    ☆ 30:6: Yob 29.18, Iba 10.6, 62.2, 62.6    ☆ 30:11: Aga 3.4, Ais 20.2, Yar 31.13

Anduane Homogo-o í inaga Ngode Datagaliwabeore kegonaga  
ina íhondo kaj lalu haabo holebero.

## 31

*Anduane Homogohondo mini mbiraore wuwa bi lenego ogo*

<sup>1</sup> Anduane Homogo-o ina í kegoha ha do hole eberogoni.☆

I waitigi karume i bope nahelo ina biamogo bibe.

Ínaga mini tigabiore kegonigo i pele ngibe laro.

<sup>2</sup> Inaga bi larogo hale habe.☆

Ína i pele ngule abale ibabe.

I ha do holene egeanda ale í kegoni.

Inaga waitigirume i bope holigo

ina i ho hagira bu habe.

<sup>3</sup> Heneneore í inaga ha do anda ale howa☆

i baya hangu handayaho kegoni.

I hariga polene ngagoria pialu kogola

ina haru holebero lalu abale lo wiridagua

i haru halu bamba habe.

<sup>4</sup> Waitigi karume i gonoha delo

gono wiaho ngagoria pialu do wuligo

í inaga ha do anda kegonigo ina handayaho habe.

<sup>5</sup> Ini íha ya harogoni.☆

Anduane Homogo-o í Ngode Datagaliwabe mini bilinaheore kegonigo

i pele ngialu haru dai bulebere.

<sup>6</sup> Wali agali dama mitangi bialu

gime wabini ngagohondo bi pupu wiaga karu hondowa

i turu nahaga kegoni.

Ina nde íhondo mini mbiraore wu haga kegoni.

<sup>7</sup> Ina i gubaliniho haabo haga kegonaga

ina íhondo turu timbuni ho kegoni.

I genda yu kogo í hendede.

Mo ko holene íbu ngago í manda bu kegoni.

<sup>8</sup> Waitigi bu karume i minu garabaya bilo☆

ina i yupe nahe

handayaho haabo harigola i bayale kegoni.

<sup>9</sup> Anduane Homogo-o i genda timbuniore yu kogo

ina i dara halu biamogo bibe.

Ina dugu bialu haabo hewaria inaga de tohe kegoni.

Inaga hongo bibahende pirilape haya.

<sup>10</sup> I miniha genda yu kogome☆

inaga holene mo tubagi holobada.

Ina dugu hongo howa bialu haabo kogome

i dindini lu haabo naholeda.

Iha genda timbuniore ngelo kogome

☆ 31:1: Iba 22.5, 71.1, Ais 49.23 ☆ 31:2: Iba 71.2 ☆ 31:3: Iba 18.2, 23.3, 25.11 ☆ 31:5: Lg 23.46, Ab 7.59

☆ 31:8: Iba 18.19 ☆ 31:10: Iba 32.3, 102.3



inaga hongo ibira halu ereba haya.  
Inaga kunibi gedaore haragoni.

11 Waitigi bu karume i mege bialu ka.  
I damene karume ihondo bi ko lalu kagoni.  
I mandabi karume i hondowa gi hara.  
I harigani pialu koria wali agali lola haga birarume  
i handalu ti ibida pugupugu biaga.

12 Wali agali bu karume agali homenego embeda ho wahagadagua\*  
tigua i embeda hai haya.

I iba be pambulo wahene ngaligobi harudane hendedo.

13 Waitigi dewa karume i mege timbuni bialu hearia hale haru.  
Tigua i mo gibia timbuniore hole haragoni.  
Tigua mo ngoai howa i mo ko hole manda bialu  
i bo waholenaga bi pongo balu ka.\*

14 Anigo uruni bialu helowa  
Anduane Homogo-o ina ihondo mini mbiraore wu ko.

Inaga Ngode Datagaliwabeore i kegoni, lalu ko.

15 Horo bibahendengi inaga giha i haabo kogoni ndobe.

Ina i waitigi karunaga giha koria  
agali i mo ko hole talima ibaga bu karunaga giha koriabi i yamibe.

16 Inaga biabe biahaga agali kogo hondowa i dara habe.\*

Ina gubalini timbuni haga kegome i pele ngibe.

17 Anduane Homogo-o ina i olalu kogonigo\*  
waitigi bu karume i bope helo yupe nahabe.

Agali ko uruni tini mo ko hai helabe.

Ti homonerunaga dinini pu hagaha pialu  
tinaga ne harigaha bi nalelo mo ereba habe.

18 Agali uruni tigua mine halu mege bialu\*  
agali tigabi karuhondo bi ko laga kagoni.

Tigua ke holene bi ngaru dege laabo haga ka.  
Tinaga ne harigaha bi lagadaru ereba helo ti bo wahai habe.

19 Wali agali ini andaneha karu bayale helonaga\*  
ina baya hanguore bialu kegoni.

Wali agali inihondo mini mbiraore wu haga karu  
ina baya hangu handayaho haga kegoni.

Wali agali bibahende bu karume de handai helo  
ina ani bialu kegoni.

20 Wali agali maru bo wahole manda bialu karume\*  
ti gingila mialu babe nahe helo  
ina inaga wali agali ininaga gubaliniha mo do ho kegoni.

Tinaga waitigi karume ti mege bialu bope nahelo  
ina wali agali uruni ini andaneha bayaleore helo  
mo do ho kegoni.

21 Anduane Homogonaga mini yaraga holene nga.\*

\* 31:12: Iba 88.4-5 \* 31:13: Yar 6.25, 20.3, 20.10, Md 27.1 \* 31:16: Dag 6.25-26, Iba 4.6, 67.1 \* 31:17: 1 Sml 2.9, Iba 25.2, 115.17 \* 31:18: 1 Sml 2.3, Iba 12.3, Yu 15 \* 31:19: Ais 64.4, 1 Ko 2.9 \* 31:20: Yob 5.21, Iba 27.5, 32.7 \* 31:21: 1 Sml 23.7, Iba 17.7

- Inaga waitigi karume i bo wahole ho mabu bu heagola  
 ibugua i gubalini howa ibunaga hongome i biamogo biya.
- 22 Bamba i gi timbuni ho howa\*  
 ini kegoria naholiyanaga ina i bo taliatagi harida lo manda biru.  
 Ani bu howa ina ihondo i biamogo bia lalu dugu bialu hewaria  
 ina hale halu biamogo birigoni.
- 23 Anduane Homogonagaore wali agali mini bilinaheore kamiru-o  
 tigua ibunihondo gubalini hoore halimu.  
 Wali agali ibu talima pialu mini bilinahe karu  
 ibugua ti handayaho haga ka.  
 Wali agali mine haga karu  
 ibugua ti pani tini biyagobi nelo mo miaga ka.
- 24 Wali agali Anduane Homogohondo mini dunubiaho kamiru-o\*  
 ti gi nahe elahe howa hongo haabo ho halimu.

## 32

*Ko binigo latagi holenebi Ngode Datagaliwabehanda domo waholenenagabi ogo*

- 1 Mbirali ibunaga ko biniru Anduane Homogohanda domo wahalu\*  
 mana liahe biniru mo wahene kago  
 ibu turubiore ka.
- 2 Mbirali Anduane Homogohanda ko bira lene nabiagabi\*  
 ibuni miniha mo hondo holene mbira nawiore kagobi  
 ogoni ibu baya turubiore ka.\*
- 3 Ina ko biruru ogo biru lalu lapani nahe donge ho howa\*  
 mbiraga horombebi miniha ulu lalu haabo hewaria  
 inaga tingini bia ko halu homabeheore haru.
- 4 Anduane Homogo-o mbiraga horombebi ina i pani ngiaabo hari.  
 Ani birigome inaga hongo bibahendeore pirilipe hai haya.  
 Dadimba tanini bereneru gaeangi poboyogo biragome yo biaganedagua  
 inaga hongo ogonidagua biya.
- 5 Ani biyagola ina ko biniru Anduane Homogo i langirugoni.\*  
 Ko mbira do nahe howa binirubi tigatiga langiai harugoni.  
 Ko biruru Anduane Homogo ihondo lapaniore hole lo manda bu henegobi  
 lapani hai harugoni.  
 Ani birugola ina ko biruruni domo wahai harigoni.
- 6 Ani biaga kago manda buwa\*  
 Anduane Homogo inaga wali agali mini bilinahe karu  
 bibahendeme ti burupale kangi ihondo bi lolene nga.  
 Genda timbuni iba li ale ti kategoria anda ibu nganggi ihondo bi layagua  
 genda timbuni ogoni ti namu nalolebira.
- 7 Inaga ha do anda i kegoni.\*  
 Gendabi nganggi ina i biamogo birili.  
 I homedolego ibugua ogodagua mo wiya lalu  
 maru hale helo iba gana dalimu lalu lamulebero.

\* 31:22: Ais 38.11-12, Yna 2.4 \* 31:24: Iba 27.14 \* 32:1: Iba 85.2, 103.3 \* 32:2: Yo 1.47, 2 Ko 5.19 \* 32:2:  
 Lm 4.7-8 \* 32:3: Iba 31.10, 38.8, 39.2-3 \* 32:5: LBM 26.40, 2 Sml 12.13, Yob 31.33, Iba 103.12, 1 Yo 1.9 \* 32:6:  
 Iba 46.1-3, 69.1, 69.13 \* 32:7: Hgn 5.1-31, Iba 31.20, 91.1, 121.7

Ína í mo wiriligonaga ani lolebero.

<sup>8</sup> Anduane Homogohanda lalu,✧

Í hariga pobelogo ina walia haga bulebero.

Ina í handaya ho howa

ogodagua bia ogodagua nabibe laga bialu langulebero.

<sup>9</sup> Nogo hosi dongirume mini nawi howa piagadagua pialu keria

í hariga polene ngadagua pobelo

ege pu ne hanganeha magui howa

pume hende howa haru poliya holeni, lalu leda.

<sup>10</sup> Mini kowi karu ti tandaga timbuni nalu haga.✧

Anigo Anduane Homogoha hanaho haga karu

tiibunaga gubalini holenehayagi howa yo pialu pugu biaga.

<sup>11</sup> Anduane Homogohanda bigi biyago mitangi bialu mini tigabiwi kamiru✧

ti gubaliniha turuore halimu.

Ibugua bi ledadagua bialu kamiru

tí turuore howa ga lalu ladaga halimu.

### 33

#### *Anduane Homogonaga mini yaraga halu iba gana lenego ogo*

<sup>1</sup> Tí mini tigabiwi kamiru bibahendeme

Anduane Homogohanda bigi biyagonaga turuore howa ga lalu ladaga halimu.

Tí Anduane Homogohanda ledadagua hale halu biaga kamirume

ibunaga mini yaraga halimu.

Wali agali mini tigabiwi karume mana ogonibi bulene nga.

<sup>2</sup> Gaḡa hiliyularume Anduane Homogonaga mini yaraga halu

ibuhondo iba gana lo milimu.

<sup>3</sup> Iba gana gahenge wabuwa Anduane Homogohondo lo mialu howa

hiliyula gaḡaru lagane mugubeoreme lalu

uruore halu hongo howa ladaga halimu.

<sup>4</sup> Anduane Homogonaga bi damenego bibahende henene hanguore lo nga.

Ibugua mbirale galone bigi bulebero ledagobi heneneore bulebira lowa

ibuha hanaho habehe kama.

<sup>5</sup> Anduane Homogo ibu mana tigabi bulenebi henene lolenebi gubalini haga ka.✧

Ibunaga gubalini haabo holeneme dindi bibahendeha tolai ka.

<sup>6</sup> Anduane Homogohanda hari daliga li kagoni✧

ibunaga bime ani ha lowa

ni ege yakundiru li bu karunibi ani hadaba layagola heneru ka.

<sup>7</sup> Ibugua iba dameneru mbiraore hanguni mo mogo buwa berelene.✧

Iba solowaranaga guru kuyama

uli gibiruha panga payanda ho ngelama poradagua bini.

<sup>8</sup> Dindi bibahendeni bu kamirume Anduane Homogo mitangi halu

ibunaga mini yaraga hadaba.

Wali agali dindi bibahendeni kamirume ibu daligaore ka manda bialu

✧ 32:8: Iba 25.8, 33.18 ✧ 32:10: Iba 16.4, Min 13.21, Lm 2.9 ✧ 32:11: Iba 7.10, 64.10, 97.12 ✧ 33:5: Iba 11.7, 37.28, 119.64 ✧ 33:6: Pig 1.6, 2.1, Iba 104.30, Hi 11.3 ✧ 33:7: Har 15.8, Yos 3.16, Iba 78.13

- ibunaga mini yaraga hai hadaba.  
<sup>9</sup> Ogoni irane ibugua bi hangu layagola✧  
 mbirale bibahende dindini ngaruni íbu helene.  
 Ibunaga bime mbirale ogoale tagira íbu ha laga biyagola  
 tagira íbu haga bini nga.
- <sup>10</sup> Dindini hameigini tara tara paluyu pedarume✧  
 mbirale nagalone bule mandamanda bu wigi bidaru nabilonaga  
 Anduane Homogohanda mo pere laga.  
 Tiga bule miniha manda bu yidaru bualono burugu lelo  
 ibugua mini yaniho haga.
- <sup>11</sup> Anigo Anduane Homogo ibugua bule manda bu winiru✧  
 mbira ereba nahe wiaabo holebira.  
 Ibugua bule manda bu yinigo  
 mbirale mbirame mo ereba habe nahe hongoheore wiaabo holebira.
- <sup>12</sup> Hameigini mbira tinaga Ngode Datagaliwabe mende nahe✧  
 Anduane Homogo ibuni hangu ka lowa yu tigabu karu  
 ti turubiore ka.  
 Wali agali Anduane Homogohanda ibuninagaore helo lowa dabene karu  
 ti turubiore ka.
- <sup>13</sup> Anduane Homogohanda dahuliya andaga howa de handadali halu  
 wali agali bibahende bu kamaruni handai ho ka.✧
- <sup>14</sup> Ibugua kini howa haru kagoria howa de handadali halu✧  
 ina dindini wali agali bu kamaruni de handai ka.
- <sup>15</sup> Wali agali damene bibahendenaga mitangi bulene pigane ibugua mo wia howa✧  
 tiga birago damene bibahende ibuni manda biai ho ka.
- <sup>16</sup> Kini ibunaga ami hongohe kago hangume agalila wai bialu ibu wayali haga ndo.✧  
 Wai biaga ami agali mbira ibu wai bialu wayali haganego  
 ibuninaga hongo hangume ndo.
- <sup>17</sup> Wai biagane agalime nogo hosini biruwa wai biyaguabi wayali naholebira.✧  
 Hosi uruninaga hongo gibi ha kagome agali pele mia nabulebira.
- <sup>18</sup> Anduane Homogohanda wali agali ibugua bia ledadagua hale halu biaga karu  
 ibunime bayuwa de handayaho ka.  
 Ibugua ti gubalini haho wiaabo haga ka manda buwa  
 ibuhondo mini mbiraorewu karu  
 ibugua mamage halu handayaho haga ka.✧
- <sup>19</sup> Wali agali urunibi karu homolilono✧  
 ibugua ti pele miaga ka.  
 Hina gari timbuni porangi  
 ti tomo karulape nalu helo mulebira.
- <sup>20</sup> Iname Anduane Homogoha hana howa✧  
 ibuni mini dunu bia ho kamagoni.  
 Inanaga pabe tigibi ina biamogo biagabi  
 Anduane Homogo ibuni hangu kagoni.

✧ 33:9: Iba 148.5 ✧ 33:10: Iba 2.1-3, Ais 8.10, 19.3 ✧ 33:11: Yob 23.13, Iba 40.5, Min 19.21, Ais 55.8 ✧ 33:12: Man 7.6, Iba 28.9, 144.15 ✧ 33:13: Yob 28.24, Iba 11.4, 14.2 ✧ 33:14: 1 Kin 8.39, 8.43, Iba 102.19 ✧ 33:15: 2 Bit 16.9, Yob 10.8, Iba 119.73 ✧ 33:16: Iba 44.6, 60.11 ✧ 33:17: Iba 20.7, 147.10, Min 21.31 ✧ 33:18: Yob 36.7, Iba 32.8-10, 1 Pi 3.12 ✧ 33:19: Yob 5.20, Iba 37.19, Ab 12.11 ✧ 33:20: Iba 62.1, 115.9, Ais 8.17

<sup>21</sup> Ibu kagome ina ibuha hanaho howa  
 turuho baya kamagoni.  
 Ibunaga mini baya buruguleore hongohe ngagoria  
 ina hanaho kamagoni.

<sup>22</sup> Anduane Homogo-o ina íni mini dunu bia ho kamagonigo  
 ina ina gubalini haho wiaaboore habelo hamelo kama.

## 34

*Anduane Homogo ibu baya gibiore biaga kagonaga ibuhondo kai lenego ogo*

<sup>1</sup> Ina Anduane Homogohondo kaiore laabo halu holebero. ✠✠

Ina ibunaga mini yaraga nahe naholebero.

<sup>2</sup> Ibugua bigi biyarunaga ina ibunaga mini mo yaraga halu holebero.

Wali agali marume hangedope haragola genda ho haga kamiru  
 ti ina bi o larogoni hale howa turu halimulonaga laro.

<sup>3</sup> Tíbi íbi ina Anduane Homogo ibu daliga gibiore ka lama. ✠

Ibunaga mini ina haru mandagi mo yaraga hama.

<sup>4</sup> Ina Anduane Homogohondo bi larugola ✠

ibugua hale halu ladai biya.

I gi bulene tara tarame daribaho wiaria

ibugua i golope haya.

<sup>5</sup> Marume hangedope haragola miniha gendaho haga karu

ti Anduane Homogo ibugua biamogo birago hondowa turu haga.

Anigo ti miniha genda howa turu nahe mbira naholebiraore.

<sup>6</sup> Hongo nahe karume Anduane Homogo olaragola ✠

ibugua hale halu biamogo biagaore ka.

Ti genda tara tara yu haga bidaria

ibugua ti pele miaga ka.

<sup>7</sup> Wali agali Anduane Homogohanda laradagua hale halu biaga karu ✠

ibunaga dahuliyalime mamage helaga biaga.

Uruni ti kagoria gendabi hiriribiru íbu wigi bidagoria howa

ti ibunime gi miaga ka.

<sup>8</sup> Anduane Homogo baya gibiore ka laramagoni ✠

heneneore leneda lole ínime manda bialu handabe.

Ibuha ha doho karu ti bayale holene handa walia howa turuho ka.

<sup>9</sup> Anduane Homogonaga wali agali kamiru bibahendeme ✠

ibunaga andaneha halimu.

Ibugua bia laradagua hale halu biaga karu

ti mbirale mbira buru palia nabi karulapeore holebira.

<sup>10</sup> Tomo garibilo habe nahe laiono hongoheru heba mbiru garibilo hagagoyu ✠

wali agali Anduane Homogohanda bia laradagua biaga karu

ti mbirale bayale damenego mbira buru palu naholebira.

<sup>11</sup> I nenege kamiru-o ina bi larogo hale hole ibidaba.

Tí Anduane Homogonaga andaneha halimulonaga bulene

ina lawai holiya ibidaba.

✠ **34:1:** 1 Sml 21.13-15 ✠ **34:1:** Eb 5.20, 1 Te 5.18, 2 Te 1.3, 2.13 ✠ **34:3:** Iba 69.30, Lg 1.46 ✠ **34:4:** Iba 18.6, Md 7.7, Lg 11.9 ✠ **34:6:** Iba 3.4, 34.17-19 ✠ **34:7:** 2 Kin 6.17, Dan 6.22, Seg 9.8, Hi 1.14 ✠ **34:8:** Iba 2.12, 1 Pi 2.3 ✠ **34:9:** Iba 31.23 ✠ **34:10:** Yob 4.10-11, Iba 84.11



- 12 Tí turu ho holene hamelo kamibe.✠  
Tí luore bayale halu hodagua holene hamelo kamibe.
- 13 Anidagua holene hamelo kamiyagua✠  
tínaga ne harigaha howa  
bi ko nale tindule kebi naheore halimu.
- 14 Ko bulene ngaru erembira mialu  
mana bayale bialu halimu.✠  
Tínaga gubalinioreme mbirale mo palia howa bigi bulenego dabalu bialu halimu.
- 15 Wali agali mini tigabiwi karu✠  
Anduane Homogo ibunime de handaya howa mamage haga ka.  
Tigua genda yu howa ibu olaga biragola  
ibunime hale halu biamogo biaga ka.
- 16 Mana ko biaga karu hondowa✠  
Anduane Homogo ibu turu nahaga ka.  
Ko biagaru homaragola  
wali agalime uruni ti abaleore embedaho waholebira.
- 17 Mini tigabiwi karume Anduane Homogo olaragola✠  
ibugua hale halu ladai biaga ka.  
Ti genda tara tara yu howa ibu olaga biragola  
ibugua hale halu biamogo bigi biaga ka.
- 18 Wali agali mini dege dindi howa turu nahe karu✠  
Anduane Homogo ibu ti katoria kaware ka.  
Miniha hanaho holene mbira nawioiredagola  
agini hanaho hoabe tobaho karu ibugua pele miaga ka.
- 19 Mbirali mini tigabiwi kago ibu tandaga nolenebi genda yulenebi handalu holebira.  
Ibu ani tandaga nalu kariabi genda yu kariabi  
Anduane Homogo ibunime ibu pele mulebira.✠
- 20 Anduane Homogo ibunime mbirali mini tigabiwi kago hondo haga ka.✠  
Ibunaga kuni emeneorebi mbira bu lolani handalu ibunime yaniho holebira.
- 21 Ko bulene bibahende ngarume  
wali agali ko biaga karu bo home lolebira.  
Wali agali mini tigabiwi karuhondo handabe manga haga karu  
Anduane Homogohanda ti pani mulebira.
- 22 Anduane Homogohanda ibuninaga wali agali pele mulebira.✠  
Ibuha ha do hole ibu karia poraru ti bayale holebira.

## 35

### *Anduane Homogohondo biamogo bia lalu bi lenego ogo*

- 1 Anduane Homogo-o agali ìla manga halu hoba migimigi bu karu  
ìna tihondo manga halu hoba mu habe.  
Inaga waitigi bu karu baba  
ìna nde ti baba wai bialu habe.
- 2 Ìna wai biagane ale ngeru mo karulalu humbi mo yalu  
ì biamogo bule ibabe.

✠ 34:12: 1 Pi 3.10-12 ✠ 34:13: 1 Pi 2.22 ✠ 34:14: Ais 1.16-17, Lm 12.18, Hi 12.14 ✠ 34:15: Yob 36.7, Iba 34.6, 34.17 ✠ 34:16: Min 10.7, Yar 44.11, Amo 9.4 ✠ 34:17: Iba 34.6, 34.15, 34.19, 145.19-20 ✠ 34:18: Iba 51.17, Ais 57.15, 66.2 ✠ 34:19: Min 24.16, 2 Ti 3.11-12 ✠ 34:20: Yo 19.36 ✠ 34:22: 2 Sml 4.9, 1 Kin 1.29, Iba 103.4

<sup>3</sup>I bo wahole talima ibiraru hondowa  
 ina ayu yandarebi mo yalu  
 i pele ngule abale ibabe.

Ina ihondo lalu,  
 I biamogo biaga i kogoni, labe.

<sup>4</sup>Agali uruni tigua i bo wahole kagola<sup>☆</sup>  
 ina ti bope halu mo taga habe.  
 Tigua i bo wahlenaga wai hanalu kago  
 ina agali uruni talima pialu mo luluya habe.

<sup>5</sup>Anduane Homogo-o  
 inaga dahuliyalime agali ko uruni bo talia togolalu  
 puyabume datani pulo waharadagua bilabe.

<sup>6</sup>Inaga dahuliyalime ti bama talima pialu kagola  
 agali ko biagarunaga hariga poragoria  
 aruma helalu mo ko habelo hameledo.

<sup>7</sup>Ina ti mo ko naheore hewaria  
 tigua i gonoha delo gono wia do ho kagoni.  
 I pilo ngelo gundu uli tombo wiaho ka.

<sup>8</sup>Tigua ani bu kagoyu tini nahende kaore  
 mo ko holene abale ibu ngelabe.  
 Gono i delo wiyadagoha tini da aribia helabe.  
 I uli pelo gundu uli tombo wiyadagoha  
 tini uli pelo hameledo.

<sup>9</sup>Anduane Homogo ina anidagua beregola  
 i turu timbuni ho holebero.

Ina i pele ngeregola  
 inaga bu miniha dungulo holebero.

<sup>10</sup>Ina Anduane Homogohondo kai lalu,  
 Anduane Homogo-o i ale mende ai kabe.

Ina wali agali yagibano karu biamogo bialu  
 agali hongohe karunaga giha howa biamogo bialu mo wirili.  
 Agali homogo hongohe karume yagibano karu mo ko holilono  
 ina pele mialu mamage ho harili.

<sup>11</sup>Agali ke haga bu karume ihondo bi laede halu  
 ina mana ko nabinigo tigua ina ko biya laga ka.

<sup>12</sup>Ina tihondo mana bayale bialu kogola<sup>☆</sup>  
 tigua ihondo ko biadai biaga ka.

Anidagua bialu haragome  
 inaga bu miniha genda ho kogoni.

<sup>13</sup>Ti warago timbuni bo ngang i ina ti dara halu<sup>☆</sup>  
 ini mo dindiha howa dara holene aga karulalu tomo nane haruli.  
 Tomo nane howa ina Anduane Homogohondo tinaga bi la halu harugoni.

<sup>14</sup>Ina ini aba hamene haniniru baba miniha gendaho hagadagua  
 ti dara halu gendaho ibaga bialu harugoni.

I agali darabi aija homene igini haradagua buwa

dugu bialu inaga bu miniha genda yu harugoni.

15 I genda yu hewangi

ti mo mogo buwa i hondo oba halu turu haga biya.

Tigua i mo ko holenaga mo ngoai ho hayagoni.

Agali maru i de nahendene hearume

i mo ko holenaga bi ko lalu i baabo haya.

16 Tigua i mege biaabo halu haya.

Tigua i handabe manga halu

ngui higi bu yu ibagabu hayagoni.

17 Anduane Homogo-o tigua agira halu ogonidagua bialu haabo helo heloleberebe.

Tigua i mo ko nahelo tinaga giha howa

ina i pele ngibe.

Ti laiono gabua ale howa i bo wahole kago

tinaga giha kongi ina i mo wibe.

18 Ina i biamogo birigonaga

ina wali agali dewa ngoaiho karia howa

ti hale helo ihondo kai lolebero.

Wali agali dewaliore bu karunaga deni howa

inaga mini yaraga halu holebero.

19 Agali maru ila waitigi bame irane nawini ho karume✧

i mege bialu bope helo nahelabe.

Tigua i bameore handabe manga ho karume

i hondo oba halu mini ko wialu mine helo nahelabe.

20 Agali uruni tigua mendeali karu baba

bayale holenenaga bi nalaga ka.

Tigua wali agali bayale karu baba karia

ko mbira nabini kago mo yapara howa

bo wahole bi lalu haga ka.

21 Tigua ihondo bi hongo howa ladagadaga bialu lalu,

Heneneore ina ko birigo ina handarima, lalu haga ka.

22 Anduane Homogo-o tigua ani biyaruni i de handarigo

ina bi nale nahabe.

Anduane Homogo ina i helalu kaundiaha nahabe laro.

23 Anduane Homogo-o iore abale heyalu

i biamogo bule ibabe.

Inaga Ngode Datagaliwabe-o i heyalu

ina bi lalu koru mo hongo halu lahabe.

24 Anduane Homogo-o i mini tigabiore kego✧

ina i mana mbira ko nabini kogo latagi habe.

Waitigi karume manda bilo

i biamogo bialu inaga bi lahabe.

Agali uruni tigua i hondo oba halu

bi ko lalu mine helo nahelabe laro.

25 Tigua tini lo mitangi bialu lalu,

Mbirale bilo hamelo harimago ai tagira piyagoni.

Agali o biago iname mo ko ho waharimagoni, nalelo

✧ 35:19: Iba 69.5, Yo 15.25 ✧ 35:24: Iba 26.1, 43.1

ína i handayaho habe laro.

<sup>26</sup> Iha genda ibiyagonaga turuho haga karu  
 ina ti taga helo mo luluya ho helabe.  
 Tigua i bope halu tininaga mini yaraga haga karu  
 ina ti bope halu mo taga ho helabe.

<sup>27</sup> Ina i agali tigabi ka labelo hamelo karu  
 tigua turu ho howa tinaga bu miniha dungulo helo helabe.  
 Horo bibahendengi tigua lalu,  
 Anduane Homogo ibu dunini heneneore mbira ka.  
 Ibugua ibunaga biabe biahaga kago bayale helo hame laabo haga ka, lolebira.

<sup>28</sup> Ina i mana bayale bialu mini tigabi kego lalu<sup>☆</sup>  
 horo bibahendengi howa latagi halu  
 inaga mini yaraga halu haabo holebero.

## 36

### *Wali agalime mana ko biaganego ogo*

<sup>1</sup> Mana kome mini kowi karunaga bu miniha bi lamiaga.<sup>☆</sup>  
 Mana ko biaga karume Ngode Datagaliwabehondo gi nahaga howa  
 erembira mialu yo handaga ka.  
<sup>2</sup> Ko biaga uruni tigua mine howa tini lalu,  
 I duniniore mbirago kogoni, laga ka.  
 Ngode Datagaliwabehanda tigua ko biyaru handa walia halu  
 dabaki nabulebiralo manda biaga ka.  
<sup>3</sup> Horo bibahendengi ogoni ale biaga karume  
 mana ko bulenenaga bi mo tene howa  
 ke halu bi laabo haga ka.  
 Mana bayale bulenenaga mini bayale mbira tiha nawiore kagoni ndobe.  
<sup>4</sup> Dagiani u paluwa mana ko bulenenaga  
 miniha mitangitangi bialu paliaga ka.  
 Tigua mana ko bulenego bibe manga nahaga howa  
 ko bulene ngagoha haabo haga ka.

### *Ngode Datagaliwabenaga mana bayale ngago ogo*

<sup>5</sup> Anduane Homogo-o inaga gubalini haabo holene emene ndoore<sup>☆</sup>  
 hari daliga elahe wu kegoni.  
 Inaga mini bilinahe ngego timbuni yangale howa  
 hari mindini elahe wu kegoni.  
<sup>6</sup> Inaga mini tigabi timbuniore ngego  
 dindi hari ngaru bolanguahe ngegoni.  
 Inaga mana tigabiore mo dabaki haga ngegobi  
 ina kamarume manda biai habe nahe kama.  
 Ogoni iba solowara uli unuraore ngaligobi nge.  
 Anduane Homogo-o inime wali agalibi  
 ema bialu piaga bedarubi nogo tara tarabi  
 handayaho hai haga kegoni.

<sup>7</sup> Ngode Datagaliwabe-o inaga gubalini haabo holene baya buruguleore ngegoni<sup>☆</sup>

<sup>☆</sup> 35:28: Iba 51.14, 71.15, 71.24    <sup>☆</sup> 36:1: Lm 3.18    <sup>☆</sup> 36:5: Iba 57.10, 108.4    <sup>☆</sup> 36:7: Lud 2.12, Iba 17.8, 31.19, 91.4

- ı hame timbuni lo ko.  
 ı̄ ogonibi kego wali agali bu karu tanabi ti ı̄ni kegoha kaware ibiragola  
 ega angibuninaga babaganeme igini dambiho paliagadagua  
 ı̄na ti dambiho haga kegoni.  
 8 ı̄ andaga tomo dewa bu payabu ngegome✧  
 wali agali tomo garibi nale haga ka.  
 ı̄naga turu holene iba bayale timbuni duguaragobi ngego  
 wali agalime nelo miaga kegoni.  
 9 Ina bibahendenaga holene tene Anduaneore ı̄ kegoni.✧  
 ı̄ni wá taraore holene Anduane kegome  
 ı̄niha howa ina wá bayaleore de hondo kamagoni larama.  
 10 Wali agali ı̄ mandabi karu  
 ı̄na ti gubalini ho haabo habe.  
 Wali agali mini tigabi karu ti bayale haabo helo  
 ı̄nime ti biamogo bialu habe.  
 11 Agali mine haga bu karume  
 ı̄ bo hangedope holani handabe.  
 Mini kowi bu karume ı̄ bo batagi holani handabe.  
 12 Agali ko biaga biaru ebere pilo ngaruni de handa.  
 Ti lone heyabe naheore ngagoni.

## 37

### *Mini kowi bayalewibi kirabalinaga hamaro bulenego ogo*

- 1 Mini kowi karume birago hondowa tí mini dege dindi nahalimu.✧  
 Tigua bira larago hale howabi ti biradagua bua nahalimu.  
 2 Irane ti tani gau laralidagua emene howa gau lolebira.✧  
 Uruni ti gaeangi tomo gau laralidaguaore gau lalu ereba holebira.  
 3 Anduane Homogoni hanaho howa mana bayale bialu halimu.  
 Ani birimiyagua tınaga pabe tigila Anduane Homogo ibuni kagola  
 tí ibuha bayale holeberemi.  
 4 Turu holene Anduane Homogohayagi hai bialu halimu.✧  
 Ani birimiyagua ibugua tınaga gubalinime hameledami aleru ngulebira.  
 5 ı̄ni Anduane Homogoha hanaho habe.✧  
 Ani kegola ibugua ı̄ biamogo bulebira.  
 6 ı̄na mini tigabiwi howa mana bayale bigi bereruni✧  
 wali agalime de handai helo  
 horombe hanuni ni dedagola  
 wá haame haralidagua helo wále  
 ibugua ani mo helolebira.  
 7 Anduane Homogo ibugua bule ngago bilo✧  
 ı̄ ema nabi hondo habe.  
 Maru ti ho timbu halu ho yanga laragola

✧ 36:8: Yob 20.17, Iba 16.11, Mo 22.1 ✧ 36:9: Yar 2.13, Yo 4.10, 4.14, 1 Pi 2.9 ✧ 37:1: Iba 73.3, Min 23.17, 24.1,  
 24.19 ✧ 37:2: Iba 90.5-6 ✧ 37:4: Ais 58.14 ✧ 37:5: Min 16.3, Md 6.25, Lg 12.22, 1 Pi 5.7 ✧ 37:6: Yob 11.17,  
 Mai 7.9 ✧ 37:7: Iba 62.1, Ais 30.15, Yar 12.1



í mini dege dindi nahabe.  
 Mini kowi karume ko bule lo manda bu heneru bigi birago hondowa  
 í mini dege dindi nahabe.

8 Mini dege dindi holene ngagolabi keba holene ngagolabi mogo nalabe.✧

Urunime genda dege yu anda ibaga.

9 Mini kowi karu ti bo batagi halu✧

Anduane Homogoni hanaho karume dindi karulolebira.

10 Emene howa mini kowi karu ereba haiore holebira.✧

Ti kabe hondole hagadagoria hai birimiyaguabi

handa walia nahe ereba ho waore holebira.

11 Tini mo dindiha howa deme handagabu karume dindi ogoni karulolebira.✧

Mo palia holene ti karula howa

mbirale dewa turuho wu holebira.

12 Mini kowi karume mini tigabiwi karu mo ko holenaga ndi nde lalu

handabe manga howa ne gengero lalu ka.

13 Ani bialu helowa

Anduane Homogohanda mini kowi uruni handaya howa

oba halu ka.

Tinaga homo ereba holene horo hapara harago hondowa

ibu oba halu ka.

14 Mini kowi karume yagibanorubi buru pale darabi karubi dibule

ayu tibu gililomi bogole danda edaha bira.

Mana tigabi biaga karu bo wahole ani bialu ka.

15 Tigua ani bialu karia tininaga ayu tibu yidago yamuwa

tini bo wahalu danda edaho ngaru minu podo waholebira.

16 Mini kowi karume dabudabu dewa bu hombedo wu karuni galone nabulene lowa✧

mini tigabiwi karume mbirale emene wu kago baya galoneore wu ka.

17 Ogoni irane Anduane Homogo ibugua mini kowi karunaga hongo mo ereba hai halu

mini tigabiwi karuibunime handaya ho holebira.

18 Anduane Homogo ibuguaibunaga bi larago hale halu biaga karu

ibunime handaya ho haabo halu

dindi ogoni tinagaore wiaabo helolebira.

19 Mo ko holene wigi bidangi ti tandaga nanolebira.

Hina gari birangibi ti nolene karulape wulebira.

20 Ani wulebiragoyu mini kowi karu ti homolebira.

Anduane Homogonaga waitigi karu

balawaya minana anda hene mbira dedaligobi dowa

gilope halu ereba haralidagua ti ereba holebira.

Ira hagua pu ereba haralidagua ereba holebira.

21 Mini kowi kagome mbirale dano howa

yadai nabi nalu puabo haga.

Bayale biaga kagomeibunaga mbirale ngaru

habua nabi mo guaila howa tale biaga.

✧ 37:8: Iba 73.3, Eb 4.26 ✧ 37:9: Yob 27.13-14, Ais 57.13 ✧ 37:10: Yob 20.9, Hi 10.36-37 ✧ 37:11: Md 5.5

✧ 37:16: Min 15.16, 16.8, 1 Ti 6.6

22 Anduane Homogohanda mo turu hene karume  
dindi karulolebira.  
Ibugua ha hene karu ti bo batagi holebira.

23 Anduane Homogohanda wali agali hangu hanguhondo✧  
hariga ogodagua pobe lalu walia haga.  
Ibu turu helo hangu biaga kagonaga pabe tigila  
Anduane Homogo ibuni holebira.

24 Uruni ti pilope hayaguabi  
pilo ibiraho wiaabo naholebira.  
Anduane Homogoibunime ti gini mialu  
lone mo heya ho helolebira.

25 I igirini howa hama ibalu✧  
ai áyu agali waheore kogoni.  
Henego manda berogola  
áyu agima ndogo luore haruda manda bido.  
O hama ibiwadagoriani howa handalu hewaria  
wali agali mini tigabiwi hearu mbira  
Anduane Homogohanda yu wanahayane handaru.  
Tinaga waneiginibi ti hina noa howa  
mendeali hina nayago tagamini handadeho heariabi heba nahende dege haru.

26 Tigua tinaga mbirale karulape wuwa  
maru buru pale haga bidaru turu halu talebu migi biaga.  
Ti waneigini baya bu karu hondowabi  
ibuni turu ho haga biaga.

27 Ko bulene erembira mialu mana bayale bilimu.  
Ani birimiyagua tinaga aguanenerume dindini luore haabo holebira.

28 Anduane Homogo ibu mana bayale bulene gubalini haga kagome✧  
wali agali ibuhondo mini bilinahe karu yu wanahaga ka.  
Tinaga pabe tigila ibuni haabo holebira.  
Mini kowi karu tinaga aguaneneru bo batagi holebira.

29 Mini tigabiwi karume dindi karulalu  
ogoriani haho wiaabo holebira.

30 Mbirali mini tigabiwi kagonaga ne harigaha howa  
bi latagi hararu mini gigabiwi howa bi laga.  
Ibunaga hégame mana tigabi bulene dege bi latagi haga.

31 Ngode Datagaliwabenaga mana lowinigo✧  
ibunaga bu miniha mo hangedagome  
ibu ge gundu lalu pi nalaga.

32 Mini kowi kagome mini tigabiwi kago ma yu howa  
bo wahole manda biaga.

33 Ani biagagoyu bo wahelo  
Anduane Homogohanda yupe naholebira.  
Godi lalu kariabi  
ibugua ko bini mbira ngaria handa walia naholebira.

✧ 37:23: 1 Sml 2.9, Min 16.9 ✧ 37:25: Iba 37.28, 59.15, 109.10 ✧ 37:28: Iba 11.7, Min 2.22, Ais 14.20 ✧ 37:31:  
Man 6.6, Iba 40.8, 119.98, Ais 51.7

34 Anduane Homogoha mini dunu bia ho howa  
 ibugua bibe ledadagua bialu habe.  
 Ani biriyagua ibugua í mo yaraga halu  
 dindi í karulabelo ngulebira.  
 Ani biragola mini kowi karu pani narago  
 í deme handa ai ho holebere.

35 Bamba mbiru agali mini kowiore ibuni hangu hongohe karulape ko mitangi howa✧  
 wali agali mo gi halu  
 ge pera bai haga mbira heane hendewane.  
 Lebanono dindini ira tamia mbira luni panigi pudagaho hagadagua  
 agali ogonime maru hearu hingedope howa  
 ibuore pudagaho heane hendewane.

36 Mani halu mbiru dindi odagoriani lone bolangua halu pialu hewaria  
 agali odagoni naheya.  
 Kabe hondole ina hai bialu hewariabi  
 ibu nahe erebaore hayiya.

37 Wali agali mana bayale biaga karu handalimu.✧  
 Mini tigabiwi karume mana bayale bigi birago handawa bilimu.  
 Mo palia haga karu  
 ti aguanene dewa ho dame bulebira.

38 Ko biaga karu aria bibahende homai halu  
 tinaga aguanene bibahendeore homa mundulanda holebira.

39 Wali agali mini tigabiwi karu  
 Anduane Homogohanda ti pele mulebira.  
 Gendabi timbuni nganggi ti ibida pialu  
 ha do hagane Anduane Homogo ibuni holebira.

40 Anduane Homogohanda ti biamogo bialu gi miaga.✧  
 Mini kowi karume ti mo ko hole ibirangi  
 ti ibu karia ibida poragola ibugua ti mo wiaga.

## 38

### *Tandaga handalu howa Anduane Homogohondo bi lenego ogo*

1 Anduane Homogo-o ina keba ho kegonigo  
 ihondo keba howa i minu boleni.

2 Ina inaga timume i bogalu  
 inaga gime i bope ho heledegoni.

3 Ina ihondo keba harigola✧  
 inaga tingini tandaga timbuni handalu kogoni.

Ina ko bini ngogome  
 iha warago timbuni balu ngogoni.

4 Ko iha ngagome i bo dambi hai haragola✧  
 nu gendabi ale howa yu habe nahe kogoni.

5 Ini mini nawi howa mana liaheore birugome  
 inaga tinginini dere bidaru

✧ 37:35: Yob 5.3 ✧ 37:37: Ais 32.17, 57.2 ✧ 37:40: 1 Bit 5.20, Ais 31.5, Dan 3.17, 3.28, 6.23 ✧ 38:3: Yob 33.19,  
 Iba 32.4, 102.10, Ais 1.6 ✧ 38:4: Esr 9.6, Iba 40.12

- ibane timbuni tuguda tagitagi bialu ngu taraore biragoni.  
<sup>6</sup> I miniha genda timbuni yu kogome  
 ini handa dindi ho bedogoni.  
 Horo bibahendengi dara howa  
 dugu biaabo halu kogoni.
- <sup>7</sup> Inaga tinginiha poboyogo timbuni bialu  
 irame daradagua bidagola i warago timbuniore balu kogoni.
- <sup>8</sup> Mbirale tara mbirame i bo hangedaradagua bidagome  
 i hongo nahe kogoni.  
Inaga miniha mo ko henego  
 tandaga howa ya lalu ngogoni.
- <sup>9</sup> Anduane Homogo-o ina inaga hame hongohe ngelo kogoni\*  
 manda biai kegoni.  
Inaga bu miniha dugu bialu koru mbira do naheore  
 ina haleme hale hai ho kegoni.
- <sup>10</sup> Inaga bu hongo howa ala duguaga bialu  
 inaga hongo pirilape ka.  
Inaga de aruma hai kagome  
 mbirale mbira handabe naheore kogoni ndobe.
- <sup>11</sup> I tinginini dere ko ngubi bidarume  
 inaga damene nenegeru ini kogoria ibua nahaya.  
I one waneiginirubi ti kaundianiore haruruni ndobe.
- <sup>12</sup> Inaga waitigi bu karume  
 i gonoha delonaga gono wu kagoni ndobe.  
 Agali i mo ko halu bole karume  
 i bo wahamiya laga bialu ka.  
 Horo bibahendengi tigua  
 ihondo mana ko hangu bulene manda bialu haga kagoni.
- <sup>13</sup> I hale tuluhe ale howa  
 tigua bi lararu hale habe nahe ko.  
Inaga bi ndibulo wahene ale howa  
 ne hariga ha lalu bi labe nahe ko.
- <sup>14</sup> I agali hale tuluhe haraligobi howa  
 tigua bi lararu ina ladai bibe naheore kogoni.
- <sup>15</sup> Anduane Homogo-o ina ihondo mini mbiraore wu kogoni.  
 Anduane Homogo inaga Ngode Datagaliwabeore-o  
 ina inaga bi larogo ladai biaga kegoni.
- <sup>16</sup> Waitigi bu karume wai hanalu i bope holenaga  
 mine bi lelo nahelabe.  
I emene pilope harogola  
 ti turu helo nahelabe laro.
- <sup>17</sup> I tandaga timbuni handaabo halu kogome  
 i pilolene kawareore ngagoni.
- <sup>18</sup> Ina ko bialu haruru ihondo latagi hai harugoni.\*  
 Ini mana liahe birudarunaga dara timbuniore ho kogoni.
- <sup>19</sup> I waitigi dewaore hongo gibihe bu ka.

\* 38:9: Iba 6.6, 10.17, 102.5    \* 38:18: Iba 32.5, 2 Ko 7.9-10

I bame handabe manga haga karu  
 ti dewaore daga labenahe ka.  
 20 Ina mana bayale hangu bialu kogola  
 tigua ihondo mana ko biadai biaga kagoni.  
 Ina mana bayale ngago talialu bialu kogola  
 tigua i baba bameore mo waitigi haga kagoni.

21 Anduane Homogo-o ina i yu wanahabe laro. ☆  
 Inaga Ngode Datagaliwabe-o i helo wahalu kaundia nahabe.  
 22 Anduane Homogo-o i Pele Ngiaga ini hanguore kego  
 i biamogo bule abaleore ibabe.

## 39

### *Agali mbira ibuha genda yu howa bi lenego*

1 Ina bi lo wirugo ogo, ☆  
 Inime bi ko loligo  
 mana berogobi baya hangu mamage howa bialu holebero.  
 Agali mana ko biaga i koria kaware kangi  
 ina ti baba bi mbira nalolebero, larugoni.  
 2 Ina inaga ne hariga ndibulo howa  
 bi mbira nale haru.  
 Bi bayalenaga lalubi mbira nale dege harugoni.  
 Anigoyu iha genda timbuniore ngelo hene.  
 3 Ina mini tumutumu bu harugoni.  
 Ina mitangitangi bialu haabo hewagola  
 inaga miniha mo ko haiore hene.  
 Ai ina inaga ne hariga ndibu lowa ndo  
 ina bi lolebero manda biru.  
 4 Ina Anduane Homogohondo hale halu lalu, ☆  
 Anduane Homogo-o inaga holeneha i mali agira agima holeberobe.  
 I angi homoliyadabe.  
 I dindini holene tubagi dege wiaruabe be ludabe  
 ini langibe, laru.  
 5 Inaga holene tigimandi hangu ngeledegonida. ☆  
 Inaga deni inaga holene emene ogoni  
 nagaloneoredane hendede.  
 Wali agali bibahendenaga holene lu ndo  
 mbiralime ne harigaha buhe halu mbira hangu latagi hagagobi dege nga.  
 6 Ni daragola ina mbiralinaga munini ale kama.  
 Dindini mbirale bayale wini ngaru mule biabe erekuibi bia bialu howa  
 bame nagalone bialu haga.  
 Iname mbirale dewaore mo mogo bialu kamagoyu  
 ai ibu holebirabe manda nabi kama.  
 7 Ai Anduane Homogo-o ina agilenaga mini dunubia ho holiyabe.  
 Ina hangu i biamogo bibelo lowa  
 ina inihondo mini dunubia ho kogoni.  
 8 Ina i pele ngialu ina ko biruru domo wahabe.

☆ 38:21: Iba 22.19, 35.22 ☆ 39:1: Iba 141.3, Kl 4.5, Ya 3.2 ☆ 39:4: Iba 90.12 ☆ 39:5: Iba 62.9, 90.4, 144.4



Agali ko mini nawi ale karume  
 i hondo oba halu mege bialu helo nahelabe.  
 9 Ina inaga ne hariga ndibu lowa  
 bi mbira nale holebero.  
 Ogonaga irane ina tandaga uruni narogo  
 inime ihondo ibilaridagonaga bi nalolebero.  
 10 Ainde i lone nababe laro.  
 Ina i pani ngirigome  
 ai homabeheore kogoni ndobe.  
 11 Wali agalime mana ko birarunaga ina pani mirili.  
 Bombome aga labolabo nalu budabaga biagadagua  
 ina inanaga mbirale hameledamaru mo wahai haga kegoni.  
 Heneneore larogo wali agali bibahendenaga ne harigaha buhe halu mbira hangu  
 latagi hagagobi dege ka.

12 Anduane Homogo-o inaga bi larogo hale habe.  
 Ina bi lalu kogoni baya hangu hale ho habe.  
 Ina dugu bialu koria de iba ibirago hondowa  
 ina i biamogo bibe.  
 Inaga mamaliru ti nde dindi ogoria tigi mbira hangu halu homayadagua  
 inibi nde dindi ogoria tigimandi hangu holeberogo  
 i manda biaiho kegoni.  
 13 I lone mo tandaga nahe  
 emene hangu nde inaga bu miniha dungulo holiya helabe laro.  
 Mani i homalu nde dindi ogo wahalu poliyadago  
 ani helabe laro.

## 40

### *Anduane Homogonaga mini yaraga halu iba gana lenego ogo*

1 Anduane Homogo ibugua i biamogo bilonaga  
 i mini dege dindi nahe ema nabi haru.  
 Ani hewaria nde  
 ibugua ina bi larugo hale halu biamogo biya.  
 2 I gundu uli gibi hiriribiha pilo wiwaria<sup>☆</sup>  
 ibugua hale halu gililo miya.  
 Uli unuraore lumburaha homole yupe halu hewaria  
 ibugua i gililo miya.  
 Ibugua i gililo muwa ege toleni mo heya ho helalu  
 i yo pialu poliya ani biya.  
 3 Ibugua ina iba gana gahenge mbira<sup>☆</sup>  
 inanaga Ngode Datagaliwabe kagonaga mini yaraga halu loliya lawai haya.  
 Ani biyaego hondowa wali agali dewaoreme mini wialu  
 ti Anduane Homogohondo mini mbiraore wulebira.

4 Wali agali Anduane Homogohondo mini mbiraore wuwa<sup>☆</sup>  
 mbirale tara gime wabiniru mitangi nahe  
 mbirale uruniale mitangi haga karume biagadagua nabiaga karu  
 ti turuho ka.  
 5 Anduane Homogo inanaga Ngode Datagaliwabe-o<sup>☆</sup>

☆ 40:2: Iba 27.5, 69.2, Yar 38.6, 38.10-13    ☆ 40:3: Iba 32.7, 33.3, 64.9    ☆ 40:4: Iba 84.12, 125.5    ☆ 40:5: Iba 71.15, 139.17-18, Ais 55.8-9

ina inanaga mbirale dewaore gibi bia haga birigoni.

Í aleore mende nahe manda bidama.

Iname bima lama hama polomadagonaga dewaore

inaga miniha magoyu kegoni.

Hama ibirimahayagibi walia hama ibirigoni.

Ína inanaga bia hama ibirigoni manda bialu howa

ina daga au loabe tobahe gibiore bia harigoni mandabu kama.

<sup>6</sup> Ogoni bia harigonaga iname ihondo turu halu mbirale lomabu ngulenegobi<sup>✠✠</sup>

mbirale homa hende loma delagane dabuni bo delo ngulenegobi

uruni alego í hame nalagayagoni.

Inanaga ko domabelo lowa mbirale mbira bo delo ngulenegobi

í hame nalaga degeyagoni.

Ina inaga bi larego hale halu buliyanaga

ina inaga hale kira wabuwa dugua ho heledegoni.

<sup>7</sup> Ína ani bidego manda buwa ina buliya damenego

inaga mbugani mana lo ngegonidagua

ina bule kogoni laru.

<sup>8</sup> Inaga Ngode Datagaliwabe-o<sup>✠</sup>

ina ina hame ledegodaguaore bule turuho kogoni.

Ínaga bi mana lo ngeru

ina inaga bu habaneha mo hangedogoni.

<sup>9</sup> Anduane Homogo inaga wali agali mo ngoaiho bereagoria

ina ina kamaru pele ngiaga í kego lalu

bi baya turubi ogoni ti hale hai helo lamiru.

Ina bi ogoni dege lalu kone lairi naholeberogo í manda bidegoni.

<sup>10</sup> Anduane Homogo ina wali agali pele miaga kegonaga bi te<sup>✠</sup>

ogoniore ini yu donge nahe lamiru.

Ína biamogo biaabo hariligonagabi

í mini bilinahe kegonagabi wali agali lamiaabo haru.

Ínaga wali agali bibahende mo ngoaiho bereagoria

Anduane Homogohanda ina handaya haho wiaabo halu

gubalini haho wiaabo haga ka lalu

ina yu donge nahe lamiaiore haru.

<sup>11</sup> Anduane Homogo-o ina i dara howa biamogo bulene nawi howa

dara howa biamogo biaabo hariligoni.

Ogoninaga biairi naholebeda lo manda bido.

Ínaga gubalini holenemebi mini bilinahe holenemebi

i yani ho wiaabo kegola

i bayale karulapeore holoboda lo manda bido.

*Ngode Datagaliwabehanda biamogo bilonaga bi lenego ogo*

*(Iba Gana 70)*

<sup>12</sup> Genda bulene tara tara dewaore<sup>✠</sup>

i kogoria bu payabu ngagola kogoni.

Genda bulene dewaore wu mabu bupe kagola

i dombeneha kogoni.

✠ 40:6: Ais 1.11, Yar 6.20, Mai 6.6-8 ✠ 40:6: Hi 10.5-7 ✠ 40:8: Iba 37.31, 2 Ko 3.3 ✠ 40:10: Iba 89.1, Ab 20.20, 20.27 ✠ 40:12: Iba 18.5, 38.4, 65.3

Genda bulene uruni daga aulole nalabehe dewaore ngagoni.

Mana ko ina bigi birurume  
ini bope henego kogoni.

Ini ko uruni birugome i mininaga de au henego  
mbirale bayuwa handabe nahe kogoni.

Ina ko biruruni dagalabe nahe  
ininaga hagianeni mandari li bu karubi ndo gibiore birugoni.

Inaga miniha hongo mbira naheore pirilipe ho wahenego kogoni.

<sup>13</sup> Ani bidane kogo Anduane Homogo-o ina i pele ngibe.

Áyu ogoniore i mo wia.

<sup>14</sup> Agali marume i bo wahole manda bialu karu  
ina ti bope halu tinaga miniha mo talola howa  
mini burugulo helabelo hamelo kogoni.

I genda timbuni yu kogo hondowa  
wali agali maru ti turu haga ka.

Wali agali urunibi biaga karu  
ina bo badai bialu tinaga mini ti taga ho helo  
bope habelo hamelo ko.

<sup>15</sup> Wali agali urunime inaga mini lahiralu i mege biaga karuore  
ina ti mo taga haho wiaabo habelo hameledo.

Ína ani berego handalu tini taga halu  
tini mana bialu hayadago mitangi budai bilo  
mo taga habelo hamelo kogoni.

<sup>16</sup> Wali agali maru i keria ibiraru  
ti bibahende turuho helo hameledo.

Ína ti pele mirigonaga turu howa kai lalu karume  
Anduane Homogo ibu gibi daligaore ka lai helo hameledo.

<sup>17</sup> Anduane Homogo-o i ko yagibanoni hongo naheore kogoni.

Í ani kogonigoyu  
ina i embeda nahe mitangi bu kegoni.

Í inaga Ngode Datagaliwabebi inaga pele ngiagabi kegonigo  
i pele ngule áyu ogoni abale ibabe laro.

## 41

*Agali mbira warago bo wuwa Anduane Homogohondo bi lenego ogo*

<sup>1</sup> Yagibano karu mitangi bialu biamogo biaga karu\*  
ti turubiore holebira.

Uruni tiha genda timbuni tagira ibirangi  
Anduane Homogohanda ti biamogo bulebira.

<sup>2</sup> Anduane Homogohanda ti biamogo bialu\*  
handayaho holebira.

Ibugua ti dindini turu ho helo  
baya hangu handayaho holebira.

Tinaga waitigi karume mo ko helo  
ibugua ti yupe naholebira.

<sup>3</sup> Wali agali uruni ti warago timbuni bo ngangí  
Anduane Homogo ibugua handayaho haabo holebira.

\* 41:1: Min 14.21    \* 41:2: Iba 27.12

Anduane Homogohanda ti warago bararu mo dabi halu  
bayale helo mo hongo holebira.

<sup>4</sup>Ina bi ogodagua laru.

Anduane Homogo-o ina ihondo ko timbuniore birugoni.

Ina ani birugo ina i dara howa biamogo bialu  
iha warago timbuni ngago mo dabi habe.

<sup>5</sup>Inaga waitigi karume ihondo bi tandagabi lalu kagoni.

Tigua lalu, Ibu abale homa nabirago  
ina embedaho wahamiya, laga bialu ka.

<sup>6</sup>Agali i warago bo ngoria de hondo ibirarume

dara hetingi howa hondo ibaga.

I warago ko timbuni bo ngogonaga te hale holene hame laga.

Hale halu tagira puwa bibahendeha

inaga warago ogoninaga te loyogo laga.

<sup>7</sup>I handabe manga haga karume

i warago ogoninaga hagarere bi lagalaga bialu haga.

Tigua mitangi bialu

ko timbuniore mbirame i mo ko haragonida lo mitangi biaga.

<sup>8</sup>Tigua lalu,

Warago ko tara mbirame minidagonigo

ibu lone heyulene nawi homolebira, laga bialu kagoni.

<sup>9</sup>Inaga nenegeore mbira henego<sup>✧</sup>

iya haru mandagi ibagabu halu

tomobi mandagi nalu biraga henego ogoni ibuguabi nde

i handabe manga dege halu handa tara haya.

<sup>10</sup>Anduane Homogo-o ainde ina i dara howa biamogo bialu

inaga warago ngogo mo dabi habe.

Inaga waitigi biarume ihondo biyarunaga pani

ina biadai buliya ani bibe.

<sup>11</sup>Waitigi bu karume i bope nahayagua nde

ina i gubaliniore ho kedalo mandabu holebero.

<sup>12</sup>Ina mbirale beroru tigabi bialu koria de hondowa

ina i biamogo bulebere.

I iniha haparaho holiya

ina i handayaho haabo holebere.

<sup>13</sup>Anduane Homogo Isaraele wali agalinaga Ngode Datagaliwabe kago

ibunaga mini áyu ogoni yaraga holene nga.<sup>✧</sup>

Wali agali mani hama polobadarumebi

ani dege bialu haabo helo.

Aniore bilo laro.

## MBUGA MENDE

*(Iba Gana 42-72)*

### 42

*Agali mbira dindi taraha haru pu henegome Ngode Datagaliwabhondo bi lenego ogo*

<sup>✧</sup> 41:9: 2 Sml 15.12, Iba 55.12-13, 55.20, Yar 20.10, Md 26.23, Mg 14.20, Lg 22.21, Yo 13.18    <sup>✧</sup> 41:13: Iba 106.48

- <sup>1</sup> Nogo meme ale mini dia gabuame iba noa howa hége lebola ho yalu<sup>☆</sup>  
 iba libule porago hendehende gerai piaganedagua  
 Ngode Datagaliwabe-o i i kegoria haparaho hole ibulene hameore lo ko.
- <sup>2</sup> Ngode Datagaliwabe i holenehe kegoni.<sup>☆</sup>  
 Iba noa biradagua inaga minime i kegoria haparaho holeneore hamelo kogoni.  
 Ina i kego de handalu  
 inaga mini yaraga hole angi ibuliyadabe.
- <sup>3</sup> Mbiraga horombebi i dugu biaabo halu<sup>☆</sup>  
 tomo nane tomo ininaga de iba no paliruli.  
 Horo bibahendengi wali agali inaga waitigi karume ihondo,  
 Inaga Ngode Datagaliwabe hayuagoni agoha kabe, laabo haga.
- <sup>4</sup> Ala bialu haruligo mitangi budai berodagua nde<sup>☆</sup>  
 inaga gubaliniha tandagaore bialu habe naharagola haruli.  
 Wali agali maru heba wabuni Ngode Datagaliwabenaga andaha pole poramaligobi  
 ti maha ibilo ina haru bamba haruligobi nde  
 mitangiore halu ko.  
 Wali agali turuhe damene wabuni buyu pialu  
 iba ganaru lagalaga bialu  
 Ngode Datagaliwabenaga mini yaraga hagahaga bima ibunaga andaha pole pora-  
 maligoore  
 mitangi haabo halu ko.
- <sup>5</sup> Ai nde áyu iore miniha turu naheore haabo kogoni aginagadabe.<sup>☆</sup>  
 Inaga miniha genda bialu lungulungu biaruagoni agiorenagadabe.  
 Ani biaruagoni bilo  
 ina inaga Ngode Datagaliwabenini mini hanaho holebero.  
 Inaga Pele Ngiagabi inaga Ngode Datagaliwabebi kagonaga mini  
 ina lone mo yaraga holebero.
- <sup>6-7</sup> I ininaga dindini hewaria bo ba tagi haya handala dindi taraha o pu kogoni koria<sup>☆</sup>  
 inaga gubaliniha tandagaore bialu tumbudu biragola kogoni.  
 Ani biragola inaga mitangi mo tiga bialu  
 Ngode Datagaliwabe kagohayagi pelaruli.  
 Ibugua dara bulenego iba yaribu bu yu ibilaradagua  
 inaga mini dara buleneme bu dambi haga.  
 Genda tara tara bulenego Hari Hemono howabi Hari Misa howabi  
 iba dugutagi halu ue lama Yodanaha pugulupebe biradagua biragola  
 birama iralu i namu labehe kogoni.
- <sup>8</sup> Ani kogonigo Anduane Homogo gubalini haho wiaabo haga kago<sup>☆</sup>  
 ibugua horongi ibunaga gubalini holene ogoni walia helo hameledo.  
 Ibugua ani birago hondowa  
 ina mbiraga iba gana lo mialu  
 i holene ngiagane tene Ngode Datagaliwabe kago  
 ibuhondo bi ogoni lolene hameledo.
- <sup>9</sup> Inaga waitigirume bolilono inaga mo wiaga Ngode Datagaliwabe kagohondo,  
 Ina i aginaga embedaho waharibe, laro.  
 Inaga waitigi karume i bo hengedo waharagola

☆ 42:1: Iba 119.131 ☆ 42:2: Iba 42.11, 43.5, 63.1, 143.6, Yar 10.10, Dan 6.26, Md 26.63, Lm 9.26 ☆ 42:3: Iba 80.5  
 ☆ 42:4: 1 Sml 1.15, Yob 30.16, Iba 95.2, 100.4, Ais 30.29 ☆ 42:5: Iba 9.1, 38.6, Md 26.38 ☆ 42:6-7: Iba 69.1-2,  
 88.7, Yna 2.3 ☆ 42:8: Iba 16.7, 57.3, 63.6, 149.5



tandaga narogo naabo holiya kego aginagabe.

<sup>10</sup> Tigua ihondo, Inaga Ngode Datagaliwabe hayuago agoha kabe, lalu mege biaabo haragome iore hingedope haabo haragola kogoni.

<sup>11</sup> Ai nde áyu iore miniha turu naheore haabo kogoni aginagadabe. Inaga miniha genda bialu lungulungu biaruagoni agiorenagadabe. Ani biaruagoni bilo ina inaga Ngode Datagaliwabeni mini hanaho holebero. Ina inaga Pele Ngiagabi inaga Ngode Datagaliwabebi kagonaga mini ina lone mo yaraga holebero.

## 43

*Agali mbira dindi taraha haru pu henegome Ngode Datagaliwabhondo bi lenego ogo*

<sup>1</sup> Ngode Datagaliwabe-o í erembira ngialu piaga karume<sup>☆</sup> i bope hole manda bialu ka.

Tini koore howa tinaga bi ke halu la hole bialu kago ina mana tigabi bialu kogo tigua hendelo ina mo walía habe.

Ina i biamogo bialu agali ko uruninaga giha howa yamibe laro.

<sup>2</sup> Inime hangu i handayaho haga kegonigo irane aginaga ina i mo embedaho kebe.

Inaga waitigi bu karume i bope halu inaga mini mo ko haga kagonaga i tandaga haabo haruligo irane agibe.

<sup>3</sup> I heyalu Hari Saiono ininaga hari loma bia hene wedagoria tigatiga puabo halu poliyabi<sup>☆</sup>

ininaga anda í kegoria ibuliyabi ina ininaga wá holenemebi henene lolenemebi i haru haabo habelo hameledo.

<sup>4</sup> Ngode Datagaliwabe-o ininaga lomabu delaga dabu bu heledagoria polebero.

Ina i mo turu halu miniha dungulo helariligodago anidagua bibe laro.

Inaga Ngode Datagaliwabe iore kegoni. Ina ngida ale balu inaga mini yaraga halu iba ganaru lalu holebero.

<sup>5</sup> Ai nde áyu iore miniha turu naheore haabo kogoni aginagadabe. Inaga miniha genda bialu lungulungu biaruagoni agiorenagadabe. Ani biaruagoni bilo

ina inaga Ngode Datagaliwabeni mini hanaho holebero. Ina inaga Pele Ngiagabi

inaga Ngode Datagaliwabebi kagonaga mini ina lone mo yaraga holebero.

## 44

*Isaraele wali agalime ti biamogo bia lalu Ngode Datagaliwabhondo bi lenego ogo*

<sup>1</sup> Ngode Datagaliwabe-o ina biabe hongheore bialu harigo inanaga haleme hale harimagoni.<sup>☆</sup>

<sup>☆</sup> 43:1: 1 Sml 24.15, Iba 5.6, 26.1, 38.12    <sup>☆</sup> 43:3: Iba 36.9    <sup>☆</sup> 44:1: Har 12.26-27, Iba 78.3

Ina mamali ala dindini heneyarume bamba heneyangi  
 ɪni binigo te inahondo langiya.

<sup>2</sup> ɪna dindi aba ala ogoria hene hearu bo taliatagi halu<sup>☆</sup>  
 inanaga mamaliru dindi ogoriani haru ɪbu helariya.

Wali agali tara tara bu hearume biyagonaga ɪna ti pani mialu  
 inanaga mamaliru biamogo bialu mo dewa halu bayale helo helariya.

<sup>3</sup> Inanaga mamaliru tigua wai bialu howa  
 tininaga wai biaganeme dindi ogo karulene ndo.<sup>☆</sup>

Tininaga hongome wai buwa wayali hene ndoore.

ɪnime ti gubalini ho howa  
 ɪnaga wá holene helarigomebi  
 ɪnaga hongoni howa ti wayali ho hene.

<sup>4</sup> ɪnaga Kinibi ɪnaga Ngode Datagaliwabebi ɪore kegoni.

ɪnime bi ledegola Yagabanaga hameigini karume wai bialu wayali haga.

<sup>5</sup> ɪnaga hongoni howa iname waitigi bu karu bo batagitagi beramali.

Ina ɪnaga minini howa waitigi bope halu wayali haramali.

<sup>6</sup> ɪnaga danda timu yandareru wia ngogo<sup>☆</sup>  
 urunime ɪna wai bialu wayali harodalo manda nabiore kogoni.

Wai bialu ayu tibu yu ha kogonigo  
 ogonimebi ɪ wayali holiyanaga biamogo nabiaga manda bidogoni.

<sup>7</sup> Mbirale urunime ndo ɪna ina biamogo birigola  
 waitigi bope harima.

Waitigime ina handabe manga ho hearia  
 ɪna ti bope haga bialu mo taga harigoni.

<sup>8</sup> ɪname Ngode Datagaliwabe ɪninaga mini dege yaraga halu  
 ɪna birigonaga kaj lalú haabo holeberema.

<sup>9</sup> Ani birigoyu ai ɪna ina mo nagalone halu erembira ngirigoni.

Inanaga ami agaliru heba ɪ wai nape.  
 Anidagua bialu kego irane aginagabe.

<sup>10</sup> ɪna ogonidagua birigome inanaga waitigiru ibiyagola  
 ina ibida pirimagoni.

Ibida pirimagola tigua inanaga mbirale wimaru  
 mo yalu piái haya.

<sup>11</sup> Tigua nogo sibi bo wahagadagua  
 ina bo homelelo ale helarigoni.

Inane dindini hemaria ɪna ina bo taliatagi halu  
 wali agali dindi tara tarani bu hearu  
 ti dege dombeneha hama pelarigoni ndobe.

<sup>12</sup> ɪnaga wali agali biaru wali agali dindi tara tarani bu hearunaga garabaya biabe ale  
 bialu helo pelarigoni.

Dindi tarani hearu tigua ɪ yolo emene hangu bigi biyagome  
 ɪna muni timbuni namo yi kegoni.

<sup>13</sup> ɪna ogonidagua birigola  
 wali agali ina baba mandagi haga karume  
 ina hondo mege bialu ka.

☆ 44:2: Iba 78.55, 80.8    ☆ 44:3: Man 8.17, Yos 24.12    ☆ 44:6: Iba 33.16, Hos 1.7

Wali agali bu hama pedarume inahondo oba haga birago  
 ina ina mo taga helo birigoni.

14 Ina wali agali dindi tara taraha karu mo heya harigola  
 tigua ina mini lalu mo taga halu ka.

Inaha mbirale mbira biragola  
 tigua ina hondo oba halu kagoni.

15-16 Agalime ihondo mege bialu bi koru lalu kagola  
 i tagabi howa handa dindi ho kogoni.

Inaga waitigirubi agali i handabe manga haga karubi  
 ina ti handarodagua inaga miniha mo ko halu  
 i taga timbuni ho kogoni ndobe.

17 Ngode Datagaliwabe-o iname i embeda nahe howa  
 inaga habo nalolene bi lowini biagobi  
 mo habo nale kama.

Ani birimagola mbirale genda uruni inaha anda ibiragoni.

18 Iname i erembira ngialu pu nabi✧  
 inaga harigani polenegobi yu wanahe kamagoni ndobe.

19 Ina ani bialu kamagoyu ina ina gabua tara tara haga ngagoaha helowa✧  
 arumaha homolene ngatoria helaridagoni.

20-21 Iname inanaga Ngode Datagaliwabe kago erembira mialu puwa✧  
 mbirale gime wabini ngaruhondo bi pupu wialu henedale nde  
 inime manda bidele.

Ina bu kamarunaga miniha wia do hene ngamaru bibahende  
 ini manda biai ho kegonigo i ani manda bidele.

22 Ina ininaga wali agaliore kamagonaga✧  
 tigua ina bo wahalu haabo kagoni.

Tigua ina handalu karia  
 nogo sibi ale dege bo waholene ale kamaria hendedagoni.

23 Anduane Homogo-o i abale heyabe.

Aguanaga paliahondo kebe.

Ina wahalu erembira ngialu puabo nahabe.✧

24 Irane aginaga ha do ho kebe.

Agali bu karume ina mo ko haragola

ina tandaga timbuni halu genda dewaore yu kamago embeda nahabe.

25 Ina dindini pilo ibira halu

inanaga tingini homene ale dindi himuni wima pedemagoni ndobe.

26 Ngode Datagaliwabe-o abale heyalu

ina biamogo bule ibabe.

Inaga gubalini haabo holene ngegome ina mitangi bialu  
 ina homoligo abale pele ngibe laro.

## 45

*Kini ibu wali dabu biyangi iba gana la henego ogo*

1 Bi bayale maru inaga miniha yu ko.

Ina iba gana ogoni podo yuwa kini kagohondo mulene manda bido.

✧ 44:18: Yob 23.11 ✧ 44:19: Iba 23.4 ✧ 44:20-21: Iba 139.1, Yar 17.10 ✧ 44:22: Lm 8.36 ✧ 44:23: Iba 35.23, 78.65

Beba bayale gili biaganaga peni ale howa  
 inaga hégame bi bayale lalu ko.

<sup>2</sup>Í agali bayaore kegoni.

Agali mende í ale naheore.

Ína bi laga biriligo baya tigabiore larili.

Ngode Datagaliwabehanda í mo bayale halu haabo kagome  
 í ogonibi kegoni.

<sup>3</sup>Í kini timbuni hongoheore kegoni.

Í baya burugule tara howa mini lene timbuni kegoni.

Ínaga wai biagane ayu tibu yaganeha yuwa  
 wai bule manda manda bu habe.

<sup>4</sup>Í kini dunini mbira mini leneore kegoni.

Ína henene lolene ngagobi

mana tigabi dege bulene ngagobi

ogoni wayali helonaga wai bule inaga nogo hosini biralu pobe.

Ína wai hongo howa beregome ini wayali holebere.

<sup>5</sup>Ínaga timu de biaole ngerume

waitigi bu karunaga gubalinini bolomogo biaga ngegoni.

Ína dindi tara taranaga hameigini karu baba wai bialu

bope haregola ti í andaneha hai holebira.

<sup>6</sup>Ngode Datagaliwabe-o í kini haluhe haabo haga kegoni.✠✠

Wali agali ina hondo hene karu

mana tigabi ngatoria helo haru haga kegoni.

<sup>7</sup>Í mana tigabi bulene ngago hamelowa✠

mana ko ngago manga haga kegoni.

Irane ogoninaga inaga Ngode Datagaliwabe ibugua í dabo helene.

Dabo helalu kini maru karu turu hagadagua ndo

ti bolangua halu inaga hagianeni weli odo wiyagola

í mo turu taraore ho helene.

<sup>8</sup>Ínaga aga bayale luni biagimbu bu kegoni

nga baya taraore mini muwe kasiaala ngabini mbauleda.

Kini andagaru nogo elebeninaga ne gayaneme mo yáribia halu

anda uruniha tigua í mo turu holenaga ngida aleru lalu kagoni.

<sup>9</sup>Kini waneru wali mini lene berearu heba í andagaha biru hayua.

Ínaga gi tigahayagi kuini wali ibu bedagoni.

Ibu ngolo Obira dindi tawame yári wabini ngaru karulo beda.

<sup>10</sup>Kini one wandari mabuage-o

ina bi o larogo hale halu manda bibe.

Í damene bu karubi wali agali maru bu karubi mitangi budai nabibe.

<sup>11</sup>Ína ogonidagua bialu í wandari bayaleoreda de hondowa

kini ibugua í gubalini timbuni ho holebira.

Ibu inaga agali haguane ka manda buwa

inaibunaga bi larago hale halu birulene nga.

<sup>12</sup>Taia wali agali bu karume

í mo turu holene aleru yalu ibulebira.  
Wali agali homogo karumebi í mo turu holene marubi yalu ibalu  
íhondo mulebira.

<sup>13</sup> Kininaga wandari mabuage biago kini andaga tamu hobaneha bedago  
ibu baya gibiore mbira bedagoni.  
Ibu aga baya taraore pu ngolo aleme wabini mo karulo bedagoni.

<sup>14</sup> Wandari o biago ibu aga baya taraore ogoni karula howa  
tigua ibu kini berearia haru halu piya.  
Wandari maru ibu baba biraga berearubi  
ti haru kini andaga pole haru piya.

<sup>15</sup> Tigua turu timbuni halu bu miniha dungulo howa  
kini andaga anda piai haya.

<sup>16</sup> Kini-o í igini dewaore holebiraru  
tigua í mamaliru henedagoria kini ha aribia holebira.

Ína ti mini leneore helowa  
tigua wali agali dindi bibahendeha karu haru helo helolebere.

<sup>17</sup> Í mini lene timbuni kego lalu ina iba gana ogoni latagi harogola<sup>☆</sup>  
wali agali mani holobadarume  
í mitangi biaabo holebira.

Ani mitangi bialu wali agali bibahende bu karume  
ínaga mini yaraga ho haabo holebira.

## 46

### *Ngode Datagaliwabe ibuni ina heba kagonigo ogo*

<sup>1</sup> Ngode Datagaliwabe ibu inanaga ha do hagabi ina hongo ngiagabi ka.<sup>☆</sup>  
Gendabi tara tara handaga beremangi  
ina biamogo bule ibu hapara howa  
manda mandabuore haga kagoni.

<sup>2</sup> Ibu ani kago manda buwa ina gi naholeberema.  
Dindi dumbirumbi biyaguabi hari wedaruninaga pinipodo бага bialu  
iba solowara hanunini podopai hayaguabi  
ina gi naholeberema.

<sup>3</sup> Iba solowararume iba tangu bahalu togo layaguabi<sup>☆</sup>  
iba ue timbuni lagimbu biyaguabi  
iba hai ngoda timbuni wiame hayaguabi  
ina gi naholeberema.

Iba yaribu bu yu puíbu bialu hari wedaru mo emabi haga biyaguabi  
ina gi naholeberema.

<sup>4</sup> Ibaore mbira porago iba ogonime<sup>☆</sup>  
Ngode Datagaliwabenaga tano Yarusaleme mo turu halu  
Ngode Datagaliwabe Daligaorene Daliga kago ibuni hangu haga  
anda loma buwa habagi ho helene kagobi  
mo turu haga iba ogoni pora.

<sup>5</sup> Ngode Datagaliwabe ibu tano odagoniha kagome<sup>☆</sup>

<sup>☆</sup> 45:17: Iba 138.4, Mal 1.11    <sup>☆</sup> 46:1: Iba 62.7-8, 91.2, 142.5    <sup>☆</sup> 46:3: Iba 93.3-4, Yar 5.22, Md 7.25    <sup>☆</sup> 46:4: Iba 48.1, 48.8    <sup>☆</sup> 46:5: Yol 2.27, Seb 3.15, Seg 8.3



tano ogoni mo ko halu bo ereba naholeorebira.  
Egabi lole muna biraoreibunime ibalu  
tano ogoni biamogo bulebira.

<sup>6</sup> Hameigini tara tara paluyu pedarume<sup>✧</sup>  
gi gibi howa duru ala lalu holebira.

Handame haga kini bu karubi  
wali agali tigua haru haga karubi  
bibahende bo purogo lelelebira.

Ngode Datagaliwabe handa bi timbuni hari kulu laradagua laragola  
dindi bibahendeni wali agali bibahende bu karuni  
bo haeala бага bialu ereba hai helolebira.

<sup>7</sup> Anduane Homogo Hongo Haiheore kago ibuni ina heba ka.  
Yagabanaga Ngode Datagaliwabe ibuni inanaga ha do hagane kagoni.

<sup>8</sup> Anduane Homogohanda bigi biyadago de handamiya  
bibahende ibai hadaba.  
Anduane Homogo ibugua dindi bibahendeni mbirale mogolo handabehe binidaru  
de handadaba.

<sup>9</sup> Dindi bibahendeni wai bialu karu  
ibugua mo hundia haga kagoni.

Agalinaga danda minu podaki halu  
yandare podo gingirulo бага bialu  
humbi yiniyaru yamuwa irani mo delaga kagoni.

<sup>10</sup> Ibugua lalu, Wai nabilimu.<sup>✧</sup>

Ngode Datagaliwabe iore kogonigo manda bilimu, lalu ka.  
Dindi bibahendeoreha wali agali paluyu pedarume inaga mini tini kaha howa  
mo yaraga hagahaga bialu kagola kogoni  
tini manda bilimu, lalu kagoni.

<sup>11</sup> Anduane Homogo Hongo Haiheore kago ibuni ina heba ka.  
Yagabanaga Ngode Datagaliwabe ibuni inanaga ha do hagane kagoni.

## 47

*Ngode Datagaliwabe ibu haru haga daligaore kagonigo ogo*

<sup>1</sup> Wali agali bu kamiru bibahendeme  
Ngode Datagaliwabehondo turu halu gi habe bo midaba.  
Turu howa ibunaga mini mo yaraga halu  
iba gana dalimu lo midaba.

<sup>2</sup> Anduane Homogo Daligaorene Daliga gibiore kagohondo  
iname gi habehe kamagoni.

Ibu kini timbuni gibiore howa  
wali agali dindi bibahendeni bu kamaru de handa gimbu buwa haru kagoni.

<sup>3</sup> Iname wali agali maru karu bope halu  
wayali holomaya ibugua ina mo wayali helaya.

Hameigini tara tara palu ngaru  
iname de hondo howa haru holomaya helayagoni.

<sup>4</sup> Ina dindi kamagonibi ibugua dege, Ti ogoria hadaba, lalu  
mo ngiyagoria bu kama.

Ibugua ina gubalini howa ani mo ngiyagome

✧ 46:6: Yos 2.9, 2.24, Iba 2.1 ✧ 46:10: Man 4.35, 1 Kin 18.36-39, Ais 2.11, 2.17

ina nde dindi bayaore ogoriani howa  
miniha turu halu yangalo kamagoni.

- <sup>5</sup> Ngode Datagaliwabe ibu handame haga kini howa  
ibuninaga biragane dagiani birule iraga haragoni.  
Anduane Homogo ibu ani iraga harago hondowa  
wali agalime turuore gibi howa  
bi timbuni ga lowa ladaga daga bialu mbelo biguliru bibe laga biragoni.
- <sup>6</sup> Ngode Datagaliwabenaga mini yaraga halu  
ibuhondo iba gana lo midaba.  
Inanaga kini ibu hangu kago ibunaga mini yaraga halu  
iba gana lo midaba.
- <sup>7</sup> Ngode Datagaliwabe ibu wali agali dindi bibahendeni bu karunaga kini kago  
ibunaga mini mo yaraga halu iba gana laga bialu halimu.
- <sup>8</sup> Ngode Datagaliwabe ibu kini kago howa kininaga biragane dagia loma bia heneni  
biruwa  
ibugua mana tigabi dege lalu biraga.  
Ogoriani biruwa ibugua hameigini tara tara dindi bibahendeni bu kamaru haru haga  
kagoni.
- <sup>9</sup> Hameigini bibahende dindi tara tarani karunaga haru haga dameneru bibahende bi  
Abrahamanaga Ngode Datagaliwabe hene kago ogoni ibunaga wali agali bu  
karubi heba  
ti mandagi mo ngoaiho haga.  
Ngode Datagaliwabe ibu ami hongohe dindini bu karubi ndo  
hongo gibiorehe howa haru haga ka.  
Ibu haru haga hongohe daligaore kagoni.

## 48

### *Saiono tano Ngode Datagaliwabenaga winigo ogo*

- <sup>1</sup> Anduane Homogo ibu mini leneore kagonigo  
ibunaga mini yaraga holene nga.  
Ngode Datagaliwabenaga tano ngagoria anda puwa  
ibunaga hari loma bia hene ngagoria  
ibunaga mini yaraga hamiya.
- <sup>2</sup> Ngode Datagaliwabenaga hari loma bia hene ogoni<sup>✧</sup>  
daliga timbuniore bayale nga.  
Dindi abene uyurahayagi Saiono tano ogoni kini dunini kagonaga ngago lalu  
wali agali dindi bibahende ha karume turu timbuni ho kagoni.
- <sup>3</sup> Ngode Datagaliwabenaga tano ogoniha wai anda ibiragola  
ibugua wali agali ibu heba haga karu abale biamogo bialu  
ti bayale haga ka.
- <sup>4</sup> Bamba kini tara tara bu hearume mo mogo bialu  
Saiono tanoha hearu baba wai bule ibiya.
- <sup>5</sup> Ti ibalu tano biago de hondowa mogolo handaya.  
Mogolo hondowa gi halu ibida pugupugu biai haya.
- <sup>6</sup> Ti mogo timbuni lalu walime gali taba honole<sup>✧</sup>  
tandaga timbuniore hagagobi hayagoni.
- <sup>7</sup> Puyabu timbuniore ni tagira ibiragohayagi howa ibiragome

Tasisi tanonaga iba sibi timbuni bu ngaru bo gingirulo wahai hagadagua  
Ngode Datagaliwabe ibugua waitigi uruni bo amo lai hayagoni.

<sup>8</sup>Ngode Datagaliwabe handa bamba biniyago  
ina haleme hale ho harimagoni.  
Anduane Homogo Hongo Haiheore kagome  
ibuninaga tanoha mbirale uruni biniyago  
ai ina deme handai harima.  
Ibugua ibunaga tano ogoni mo hongo haragome  
bayale wiaabo holebira.

<sup>9</sup>Ngode Datagaliwabe-o ina inaga andaha biruwa  
inaga gubalini haabo holene mana ngego mitangi bialu bedema.

<sup>10</sup>Wali agali dindi bibahende ha bu karume  
inaga mini yaraga halu kagoni.

Í mini leneore kegonaga dindi bibahende ha  
wali agali karume loyogo leda.

Ína inaga mana tigabi ngegome  
wali agali bu karu handayaho haga kegoni.

<sup>11</sup>Hari Saiononi wali agali bu karu  
ti bibahende turu hai helo helabe.

Wali agali tinime mana biragobi  
ina tigatiga ngadaguaore mo tale biaga kegoni.

Yuda dindiha tano ngaruha karu ti bibahende turu hai helo helabe.

<sup>12</sup>Ngode Datagaliwabenaga wali agaliru  
tigua Hari Saiono kagoria tanonaga ege pabe kadagua pu mabu bilimu.

Pu mabu bialu pabe daligani mamagealinaga anda lu bima iraga halu bu heledaru  
bibahende dagalai halimu.

<sup>13</sup>Tigua Saiononaga ege pabe kagobi anda hongohu bu karubi  
bayuwa handa kia bu helalimu.

Wali agali mani holobadaru te lamulenaga baya hanguore handalimu.

<sup>14</sup>Tigua mani holobadaruhondo ogodagua lamilimu.✧

Ngode Datagaliwabe ibu inanagaore kagoni.

Ibu inanaga Ngode Datagaliwabeore haluhe haabo holebira.

Horo bibahendengi ibugua bamba halu

ina hariga polomayago walia halu  
haaboboore holebira, lalu lamilimu.

## 49

*Wali agali munihabi dabudabuhabi minipe karu ti mini nawi kago ogo*

<sup>1</sup>Wali agali bibahendeme bi o larogo hale halimu.

Tí wali agali dindini bu kamiru bibahendeoreme  
ina bi larogo hale hole hale miaho halimu.

<sup>2</sup>Wali agali timbuni mini lenebi mini nalenebi  
homogobi yagibanobi tí bibahendeme  
ina bi o larogo baya hanguore hale halimu.

<sup>3</sup>Inaga bu miniha mitangi bulene bayale hangu palu toledago.

Ina mini gigabiwi holenenaga bi loleberogo  
ogoni tí wále helonaga lolebero.

<sup>4</sup>Ina pigane bi yobage lowa ala lolebero.  
Lalu howa ngida balu iba ganabi lalu  
bi yobage larugonaga irane mo walia halu langulebero.

<sup>5</sup>Mbirale gibi hiriribi wigi bidangi✧  
i gi naharuli.  
Waitigime i bole lowa hoyu mabu biyaguabi  
i gi naharuli.

<sup>6</sup>Agali ko biaga karume dindi dabudabu dewa wuwa mine halu lalu,  
Ai homogo karulapeore kogoda, lowa  
dindi dabudabu urunini hanaho howa  
tininaga mini mo yaraga haga karume  
i bole manda biaga ka.

Ti ani bialu kago helowa i ti hondowa gi naharuli.

<sup>7</sup>Mbirali mbirame ibuninaga holeneho munime yolo bibe nahe ngagoni manda  
bidama.✧

Ibugua muni wiyadagome Ngode Datagaliwabehondo  
i nahome holego i muni ngerogo  
labe nahe ka manda bidama.

Ani nabibeheore nga.

<sup>8</sup>Ani bibe nahedagoni irane✧  
wali agalinaga holene buhenaga yolo gibi daligaorene daligago  
yolo bibe naheore nga.

Ibugua Ngode Datagaliwabe yolo mule manda bulubadagoni nakarulapeore holebira.

<sup>9</sup>Ibu homa nabi dére haaboore holego lalu  
Ngode Datagaliwabe munime yolo nabibeheore holebira.

<sup>10</sup>Wali agali mbirale mandabi mini gigabiwi karubi  
homaga birane hendedama.

Mini nawibi lulu alebi bibahende homa dege birane hendedama.

Tigua mbirale dindini howa ilu wialu hayaruni  
tinaga aguanene holebiraru ti helo ngelalu  
tini homaga birane hendedamagoni.

<sup>11</sup>Ala dindini hayangi tininaga dindini hayagonigo  
ai homalu pialu howa tinaga dindi anda tene homali biago bu hinalu  
homali biagoniha haaboore holebira.

<sup>12</sup>Mbirali mini lene timbuni heneyaguabi  
homa anda ibidangi yo pialu pobe nahe holebira.

Ani nabibeheore nga.

Homa anda ibidangi nogo biango homagadagua homolebira.

<sup>13</sup>Wali agali tini hangu howa karulape kama manda bialu karu  
tihondo agi birabe handamiya.

Tininaga mbirale ngagoria mini hanaho karu homolebirago de handamiya.

<sup>14</sup>Wali agali urunibi karu ti nogo sibi homagadagua homalu  
Homa ibu tinaga haru haga haguane holebira.

Ti homaragola tinaga tingini abale togo bialu  
tinaga dindi haraligo yu wahalu  
tinaga dinini kaundiaore humbirini andaha polebira.

Anidagua bigi birago hondowa

- wali agali mini tigabiwi karu ti turu halu holene nga.  
<sup>15</sup> Anigo Ngode Datagaliwabehanda i gini mulebira.✠  
 Ibugua homolenenaga hongome i yani nahelo  
 pele ngulebira.
- <sup>16</sup> Wali agali mbirali ibunaga dabudabu dewa wiatago halu ibu homogo hayagua  
 ogonidagua biragonaga i mini dege dindi ho nahabe.
- <sup>17</sup> Ibu homalu ibunaga mbirale wiyadaruni✠  
 ibuni yalu napolebira.  
 Dabudabu ilu wiyadarume  
 tinaga anduane homaliha anda poradagua  
 tibi homaliha dege anda porama nalolebira.
- <sup>18</sup> Ibu dindini kangsi ibu turu howa dungulo kayaguabi  
 ibu erekui biabe bialu mbirale dewa mo wiragola  
 marume ibunaga mini yaraga halu ibu bayaore awadaga handalu kayaguabi
- <sup>19</sup> mbirali homogo ogoni ibubi homalu  
 ibunaga mama mamali ala homalu peneru aruma haho wiaabo hagaha kadagua  
 ibunibi ogoniha dege pu holebira.
- <sup>20</sup> Mbirali mini lene timbuni heneyaguabi  
 homa anda ibidangi yo pialu ibida pobe nahe holebira.  
 Ani nabibeheore nga.  
 Homa anda ibidangi nogo biango homagadagua dege homolebira.

## 50

### *Ngode Datagaliwabehanda wali agali dabaki bulebirago ogo*

- <sup>1</sup> Ngode Datagaliwabe Hongo Haiheore Anduane Homogo kago  
 ibugua bi laragoni.  
 Wali agali ni tagira ibiragohayagi karubi  
 ni paliragohayagi karubi dindi bibahendeha  
 ibugua ti olalu kagoni.
- <sup>2</sup> Ngode Datagaliwabe ibu Saiono tano dunini dindi bayaleoreni howa  
 ibugua ibunaga wa holene taraore biago  
 wa haame halu kagoni.
- <sup>3</sup> Inanaga Ngode Datagaliwabe o ibaruagoni.  
 Ibu ebero lalu panigi ibaruagoni.  
 Mbirale ngaru dai helonaga ira dene ala bamba halu  
 puyabu timbuni iba dalu dindi guni heba  
 ibuha ho mabu bialu ibarua.
- <sup>4</sup> Ibugua dindibi hari daligabi olowa  
 libuhondo lamialu lalu,  
 Inaga wali agalime bialu hayarunaga dabaki berogo  
 hondole ibidaba, laruagoni.
- <sup>5</sup> Ngode Datagaliwabehanda lalu,  
 Inaga wali agali inihondo mini mbiraorewi karu  
 tigua ihondo nogo bo lomabu delalu howa  
 inila habo nalolene bi lo wiyaru  
 ti ini heba mandagi holomaya mo mogo bialu ibidaba, laruagoni.
- <sup>6</sup> Hari daligame latagi halu lalu,✠



Ngode Datagaliwabe ibu tigabiore ka.  
Ibugua tigatiga dabaki biaga ka leda.

<sup>7</sup> Ngode Datagaliwabehanda lalu,  
Inaga wali agali bu kamiru-o  
bi loleberogo bayuwa hale halimu.  
Isaraele wali agaliru-o  
ina tihondo bi lolene yidogo  
tigua ko birimiru latagi holebero.  
Ini hangu Ngode Datagaliwabe howa  
tinaga Ngode Datagaliwabeore kogoni.

<sup>8</sup> Ina tigua lomabu yalu ibirimigonaga ndo dago bero.  
Horo bibahendengi tigua loma irani dai helaga bialu kamigoni  
inime de hondo kogoni.

<sup>9</sup> Ina tinaga nogo pabeha nogo bulumaga memeru wangabe kago  
i yamulenego burupalia nabi kogoni.

<sup>10</sup> Nogo gabua irabuha haga karubi  
dindi hari daosini dewaore daga labe nahe ngaruha nogo bulumaga karubi  
bibahendeore ininaga kago ndobe.

<sup>11</sup> Ega gabua bedaru bibahendebi  
dindi bibahendeni ema bialu piaga bedarubi  
uruni bibahende ininagaore beda.

<sup>12</sup> I tomo garibilo koyagua<sup>☆</sup>  
tihondo mbira ngi nalolebero.  
Dindi bibahende ngagobi ogoniha wini ngarubi  
bibahende ininagaore wiai ka.

<sup>13</sup> I bulumaga wangabenaga mbirini naga kobe  
be nogo memenaga darama naga kobe.  
Uruni ale i nanagaore ndobe.

<sup>14</sup> Tigua ihondo kajore lalu lolene nga.  
Uruniale tigua inihondo lomabu ngulene karulape nga.  
Ngode Datagaliwabe Daligaorene Daliga kogo  
inihondo mbirale mbira ngule lalubi lo wirimigo damene  
nguleneore ngagoni.

<sup>15</sup> Tigua tiniha genda tagira ibirangi<sup>☆</sup>  
ini abale olalimu.  
Olaramigola ina hale halu ti biamogo bulebero.  
Ina ti biamogo berogola  
tigua inaga mini yaraga halu holeberemi, lalu layagoni.

<sup>16</sup> Ngode Datagaliwabehanda wali agali mana ko biaga karuhondo bi ogodagua larag-  
oni.

Tigua inaga mana lo wini ngoru bame lo payapaya bialu  
habo nalolene bi lo ngagonaga tebi lalu kamigo aginaga laramibe.

<sup>17</sup> Ina ti mo tiga buliya ha nabi<sup>☆</sup>  
tigua inaga bi mo wahalu haabo kamigoni.

<sup>18</sup> Tigua agali page biaga karu lola howa  
abale mo nenege haga kami.

Wali agali kayu yama ibaga biaga karu baba  
mandagi ibagabu haga kami.

<sup>19</sup> Tígua ne harigaha howa ke holene lalu  
bi ko dege lalu haabo haga kamigoni ndobe.

<sup>20</sup> Tí damene bu karu baba godi lalu  
tí aiyá igini bameore mege bialu kamigoni.

<sup>21</sup> Tígua anidagua bialu kamigonaga<sup>✧</sup>  
ina bi mbira nale harugoni ndobe.

I ani hewagola tígua mandabu handalu hemiria  
i nde tí ale dege kabe toba harimi.

Ani birimigonaga ina tí dago berogoni.

Ina tí panigi handalimulo ko birimiru latagi holebero.

<sup>22</sup> Wali agali ihondo erembira ngiaga kamiru  
tí bi o larogo hale hadaba.

Tígua hale naharimiyagua nde tíha mo ko holene anda ibiragola  
tí biamogo bulene mbirali naholebiraore.

<sup>23</sup> Mbiralime ihondo kai lalu lomabu ngialu kago<sup>✧</sup>  
ibugua inaga mini yaraga halu haga kagoni.

Wali agali inaga bi hale halu i andaneha haga karu  
ti ina pele mulebero, laragoni.

## 51

*Ko binigo domo wahelonaga Ngode Datagaliwabehondo bi lenego ogo*

<sup>1</sup> Ngode Datagaliwabe-o gubalini haho wiaabo haga kego<sup>✧✧</sup>  
ina iore dara howa biamogo bibe.

Ína wali agali dara nahabeheorego dara hagayagodago  
i dara halu ko biruru domo wahabe.

<sup>2</sup> Ina ko biruru bibahende domo wahalu<sup>✧</sup>  
i dodo nahe helabe.

<sup>3</sup> Ko ngubiore birulo manda bialu<sup>✧</sup>  
miniha tagaore biaabo haragola haruli.

<sup>4</sup> Ina ko biruruni ihondo birugoni.<sup>✧</sup>

Mendealihondo biru lole ndo ihondoore birugoni.

Ínaga deni ko ngubiore birugoni.

Ani birugonaga ina ihondo i mana pugualu  
ko birigo pani nolene nga larego nde  
tigatiga labehedaguaore larego  
i balolene henge nawiore manda bido.

<sup>5</sup> I pigane i aiyahanda taba hanayangi howa<sup>✧</sup>  
ko hangu bialu haho winigo áyubi bialu dege kogoni.

I aiyanaga tombeha biruwabi mini kowi dege biraru.

<sup>6</sup> Ína henene hangu lagabi  
miniha ko do nahebi kago hondowa turu haga kegoni.<sup>✧</sup>

✧ 50:21: Iba 90.8, Ais 55.8-9, 57.11, Lm 2.4 ✧ 50:23: Iba 27.6 ✧ 51:1: 2 Sml 12.1-15 ✧ 51:1: Iba 109.26, Ais 43.25, Ab 3.19, Kl 2.14 ✧ 51:2: Ais 1.16, Yar 4.14, Hi 9.14 ✧ 51:3: Ais 59.12 ✧ 51:4: 2 Sml 12.13, Lg 15.21, Lm 3.4 ✧ 51:5: Yob 15.14, Eb 2.3 ✧ 51:6: Iba 15.2, Min 2.6, Ya 1.5

Ani biaga kego ínaga mini giga buleneme  
ínaga miniha tolotagi helabe.

<sup>7</sup> Dodo nahe holiya ko biruru domo wahabe.✠

Bu miniha peweleore holiya í wayawaya bia habe.

<sup>8</sup> Bi baya turubiru halu mbira hale holiyanaga henge ngialu✠

ína ko biruru domo wahabe.

Ína í hengedo mbaralo wahalu

ínaga kuniru minu bu larigoyu

í lone heyalu turuho holebero.

<sup>9</sup> Ina ko ngubi biruruni í de handa tara howa✠

ína bibahendeore domo wahai habe.

<sup>10</sup> Ngode Datagaliwabe-o ínaga bu habaneha mini gahenge wabu wia habe.✠

Ínaga bi larego hale halu bua holeneo gahenge íha wabu wia habe.

<sup>11</sup> Ína í kodago wahalu pu lowa bo batagi holeni.✠

Ínaga Dinini tigabi íha heledego tagira peloleni.

<sup>12</sup> Pele ngini kogoni manda buwa turu ho haruligo✠

turu biagoni ereba hayago lone ngiadai bibe.

Bi larego hale halu biaga holiya biamogo bibe.

<sup>13</sup> Ani beregola ina ko biaga karuhondo✠

ínaga bi lo ngedagua tihondo lawai holiya.

Lawai harogola hale halu

tigua íni keria dai bulebirago bilo.

<sup>14</sup> Ina ko birurunaga homolenego hame naledogo✠

Ngode Datagaliwabe-o í pele ngibe.

Ani beregola ina turu halu

í tigabi biaga ke lalu wali agali bi mana lamuliya.

<sup>15</sup> Ina ínaga bi mana loliyabi

Anduane Homogo ínime lamogo bibe.✠

Ani berego handalu ina ínaga mini mo yaraga holebero.

<sup>16</sup> Ína mbirale bo lomabu ngilo hame lagadale

ína bo lomabu ngidolego✠

ai í hame nalagayago.

Mbirale ngabi í nga habelo lowa

bo lomabu delaga dabuni delarogomebi

í mo turu nahagaya.

Aniyagodago ina íhondo loma ngiradagua ini íhondo ngerogoni.

<sup>17</sup> Ngode Datagaliwabe-o ínaga bi larego hale halu biaore bule lalu✠

ini áyu ngerogoni.

Ini mo yadindi halu bu mini henene beregedalu ini ngerogola

ína nayamia nabulebere manda buwa áyu ngerogoni.

<sup>18</sup> Ngode Datagaliwabe-o Saiono tano podope hayadago

wali agali karu dara halu biamogo bibe.

✠ 51:7: Dag 19.18, Ais 1.18, Hi 9.19 ✠ 51:8: Iba 35.10, Ais 35.10, Yol 1.16 ✠ 51:9: Yar 16.17 ✠ 51:10: Iba 78.37, Md 5.8, Ab 15.9, Eb 2.10 ✠ 51:11: 2 Kin 13.23, Ais 63.10-11, Yar 7.15 ✠ 51:12: Iba 13.5 ✠ 51:13: Iba 22.27, Ab 9.21-22 ✠ 51:14: 2 Sml 12.9, Iba 35.28, 71.15 ✠ 51:15: Har 4.15, Iba 9.14 ✠ 51:16: Iba 40.6 ✠ 51:17: Iba 34.18

Yarusaleme wai pabe biago podo bagabu ibira ho ngago  
waitigi anda ibuligo

ína ege pabe ogoni lone biadai bibe.

<sup>19</sup> Anidagua bu howa mbirale bo lomabu ngulene ngadagua ngirimayaguabi  
mbirale bo lomabu delaga dabuni delarimayaguabi  
í turu holebere.

Nogo bulumaga wangaberubi ínaga bo lomabu delaga dabuni bo deloleberema.

## 52

*Mana ko ngago hondowa turu haga karu ti lulu ale kago ogo*

<sup>1</sup> Agali timbuni hongohe tingiho kego<sup>☆</sup>

ínime mana ko bialu kegonaga turu howa mine haabo harego irane aginagabe.

Ogonibi biaga kego

Ngode Datagaliwabenaga deni í koorene ko biaga kegoni.

Ngode Datagaliwabe ibu mini bilinahe howa

wali agali urunibihondo dara haabo haga kagoni.

<sup>2</sup> Ína horo bibahendengi mendeali kago mo ko holene hangu manda bialu haga kegoni.<sup>☆</sup>

Ínaga hége leda ne gadele ale howa

wali agali mende kago podaga kegoni ndobe.

Ke howa lolene hangu wai hanalu haabo harili.

<sup>3</sup> Ína mana ko bulenego hame lalu

mana bayale bulenego manga halu haga ke.

Ke holene damenego turu haga howa

bi henene lolenego manga haga kegoni.

<sup>4</sup> Í ke hagaore kegoni.

Ína bi ko laregome

wali agali karu mo tandaga haabo haga kegoni.

<sup>5</sup> Ngode Datagaliwabehanda íni andagaha bederia  
mo ko howa bo gililo batagi holebira.

Ibugua í wali agali dindi ogoria karu baba  
nahabelo bo waholebira.

<sup>6</sup> Wali agali bayale tigabi bu karume

íha mbirale uruni birago hondowa

ti gi timbuni ho holebira.

Tigua í hondo oba halu lalu,

<sup>7</sup> Agali o kagome Ngode Datagaliwabehanda ibu biamogo bialu<sup>☆</sup>  
mo hongo helo ibuha hana nahe ka.

Ibugua ibunaga muni mbirale ngaru hangu mo teneho howa

mana ko bialu kogome í biamogo biragola

karulape holebero lo manda biaga kago de handa, lolebira.

<sup>8</sup> Anigo í ogonibi ndo kogoni.

Í Ngode Datagaliwabenaga anda haneni

ira olibe haradagua bidogoni.

Ngode Datagaliwabe ibugua í gubalini ho haabo haga kagonaga

ína ibuhondo mini mbiraore wu haabo kogoni.

<sup>9</sup> Ngode Datagaliwabe-o ínaga í biamogo bialu haga kegonaga

ina ihondo kai laabo holebero.  
 Inaga wali agalirunaga deni howa  
 ina inaga mini yaraga halu  
 Ngode Datagaliwabehanda bayaleore biaga kagoni lalu latagi halu holebero.

## 53

*Wali agali mini kowinaga mana ogo  
 (Iba Gana 14)*

<sup>1</sup> Wali agali mitangi yole biaga karume<sup>✠✠</sup>  
 tini miniha mandabu donge halu

Ngode Datagaliwabe ogoni nahe laga ka.

Wali agali mini urunibi wu karuni  
 tini ko ngubi habane nabuleneore howa  
 ko tara tara ngaru bima polenaga ani lalu ka.  
 Mana tigabi hangu biaga mbirali naheore.

<sup>2</sup> Ngode Datagaliwabehanda dahuliya andaga howa handadali halu<sup>✠</sup>  
 wali agali bibahende bu karu de handai howa  
 mbirali miniwi galone manda biagabi  
 Ngode Datagaliwabe kalo manda bu hagabi  
 au haga bidabe hondole handadali ho ka.

<sup>3</sup> Ani handalu hearia mbirali naheore  
 ti bibahende ko biai hene ogobi dege dege hoyu pearia hendeda.  
 Hariga tigatiga polene wiadagua pene mbirali naheore  
 bibahende putagi halu piai hene dege hearia hendene.  
 Mana tigabi hangu biaga mbira naheore.  
 Mbiraorebi mbira naheoreya.

<sup>4</sup> Ngode Datagaliwabehanda lalu,  
 Wali agali ko biaga uruni ti mini nawidabe.  
 Ti galone mbira manda nabiagadabe.  
 Wali agali ko biaga urunime  
 inaga wali agali bameore ti tomo naradagua budu nalu kagoni.  
 Ani bialu howa tigua ihondo bi mbira nalagaore kagoni, laragoni.

<sup>5</sup> Ani bialu ha kagoyu Ngode Datagaliwabe ibugua  
 ti mo gi timbuni taraore holebira.  
 Abale ti gi ogonibi nahenedagua gi ho helo  
 irane ibugua tinaga waitigi karu bo wahai halu  
 tinaga kuni dindini hora nahe bu payapayabu ngelolebira.  
 Ibugua wali agali uruni ti erembira miai hayagome  
 ai ti mo ko howa bo wahai holebira.

<sup>6</sup> Ina Isaraele wali agali bibahende pele ngialu haru dai biai helo  
 Ngode Datagaliwabehanda mbirali Saiono howa ibi nalara.  
 Ngode Datagaliwabe ibugua ibunaga wali agali biamogo biragola  
 ti bayuwa ho dungulo halu  
 tigua mbirale bigi biraru bayale hangu haga birago hondowa  
 tini turuore au holobadabe.

✠ 53:1: Iba 10.4, 14.1 ✠ 53:1: Lm 3.10-12 ✠ 53:2: 2 Bit 15.2, 19.3, Iba 33.13



## 54

*Mbiralime Ngode Datagaliwabehanda biamogo bilonaga bi lenego ogo*

- <sup>1</sup> Ngode Datagaliwabe-o inaga hongome\*  
 i pele ngialu gi mibe.  
 Inaga hongo timbunihe kegome  
 i golope hene holiya golope habe.
- <sup>2</sup> Ngode Datagaliwabe-o ina inaga bi larogo hale habe.  
 Ina bi larogo hale habelo hame ledogoni.
- <sup>3</sup> Agali minehe karu tigua ila wai bule ibu kagoni ndobe.  
 Agali uruni ti wali agali maru bo wahole hamelo kagoni.  
 Agali ko biaga uruni tigua Ngode Datagaliwabe  
 i nagalonedalo manda biaga kagoni.
- <sup>4</sup> Ngode Datagaliwabeibunime i biamogo biagaore kagoni ndobe.  
 Anduane Homogoibunime i mo wialu  
 hotali wiagane humbi ale haradagua biaga kagoni.
- <sup>5</sup> Ngode Datagaliwabehanda inaga waitigirume mana ko ihondo bialu hayaru  
 tiniha daibu wiai helo.  
 Ngode Datagaliwabe i mini bilinahe kegome  
 inaga waitigi karuni bo wahai habe.
- <sup>6</sup> Anduane Homogo-o ina ihondo turu howa  
 mbirale ngoru lomabu ngule kogoni.  
 I bayaleore kegonaga ina kai timbuniore larogoni.
- <sup>7</sup> Iha genda timbuni anda ibiyagola\*  
 ina i biamogo bialu harigoni.  
 Ina inaga waitigi hearu bo waharigo  
 i de handarugoni.

## 55

*Mbiralimeibunaga nenege heagome ibu nde lenegonaga Ngode Datagaliwabhondo bi lenego ogo*

- <sup>1</sup> Ngode Datagaliwabe-o ina inaga bi larogo hale habe.  
 Ina dugu bialu bi larogo hale naholenaga hale pai nahabe.
- <sup>2</sup> Aiore inaga bi larogo baya hangu hale howa ladai bibe.  
 Genda iha ngagome ini bope holene tiga birane hendedo.
- <sup>3</sup> Waitigi bu karume i mo ko holenaga  
 bi hongo howaore lalu kagoni ndobe.  
 Agali ko karu tigua i bopeore hole kagola  
 inaga bu miniha mo ko henego kogoni.  
 Tigua keba timbuni haragome  
 iha genda dewaore mo wiaga.
- <sup>4</sup> I ti hondowa gi timbuni halu\*  
 ini miniha homolenenaga gi holene ibu ngagoni.
- <sup>5</sup> I ani giho kogola inaga tingini duru larogoni.  
 Gi holene timbunime i bope kagola kogoni ndobe.
- <sup>6</sup> Anigo ina ogodagua laro,\*

Ainde i babagane halu polene ega aleore hoa ho kogoni.

I ogonibi kole ina yagalo yu pialu  
mini ibilo dindi mbiraha halo birule manda bidole.

<sup>7</sup> Yagalo yu pialu dindi kaundiaha  
wali agali mbira nahaga ngagoha puwa  
haabo hole manda bidole ndobe.

<sup>8</sup> Iba dalu puyaburu hongoheore ibiragola  
i abale yagalalu puwa bira do ho kole.

<sup>9</sup> Anduane Homogo-o ina tanoha agali maru gungu bialu karia hendedogo  
ina tinaga bi larago mo luluya halu  
ti bo ereba hai habe.

<sup>10</sup> Mbiraga horombebi tigua tanonaga ege pabe bidagoria  
daligani puibu bialu haga ka.

Wali agali tano ogoniha bu karume  
mana ko dewa mo ko holene ngaru biaabo haga kagoni.

<sup>11</sup> Tano ogoniha wali agali bu karume  
tini bagabaga bialu mbirale ngarubi mo ko haga ka.

Hariga gebage ngagoriabi ngoai haga hamanibi  
wali agali bu karume mendeali kago bame bime bope haga bialu  
tinaga mbirale yu kago yamule mo hondo haga bialu ka.

<sup>12</sup> I waitigi mbira kagome ihondo bi ko laede hayagua  
ina bi uruni lelo wahabehe ko.

I handabe manga haga kagome i hondo oba halu mege biyagua  
ina ibu i nahendelo bira do habehe kogoni.

<sup>13</sup> Ai ani ndo o biyaruni ina birigoni.✧

I inaga nenegeore howa  
ila haabo haga kegoni ndobe.

Iya haru haabo haga berebali ndobe.

<sup>14</sup> Bamba iyane haru mandagi ibagabu halu te bayaleru lalu  
wali agali maru heba Ngode Datagaliwabenaga anda biago heagoria mandagi  
haribagoni ndobe.

<sup>15</sup> Inaga waitigi bu karunaga minihabi ti andagahabi  
mana ko dewaore wu toleda.

Ti homolene tu ndo wene kaore abale homalu  
homene dininiru pu hagagoha piai helo hamelo kogoni.

<sup>16</sup> Ina Anduane Homogo ininaga Ngode Datagaliwabehanda biamogo bilonaga olalu  
haabo kogoni.

Ibugua i pele ngialu mo wulebira.

<sup>17</sup> Gendame i bo hangedalu haabo kagonaga✧  
ina egerebagi horombe mbiragabi ibuhondo dugu bu mialu haabo haruli.

Ina bi larogola ibugua hale holebira.

<sup>18</sup> Waitigi dewaoreme ila wai bialu haga karu helowa  
ibunime i bayale mo wialu haru dai bigi bulebira.

<sup>19</sup> Tigua ibuhondo gi nahaga howa  
ko biyarunaga mini beregedolene manga haga ka.

Ngode Datagaliwabe ibu kini henego ayubi haabo kagoni howa  
ibugua inaga bi lamerogo hale halu

waitigi karu bope hai howa wayali holebira.

<sup>20</sup> Inaga nenege ala henego ogoni  
 ibugua ibuninaga nenege bu karu baba wai bialu haya.  
 Ibu baba buleore lalu bi abale lo wiyaru mo habolaya.

<sup>21</sup> Ibunaga ne harigaha bi bayale dendebe lalu<sup>☆</sup>  
 miniha ıla waitigi haya.  
 Ibunaga bime ı miniha dungulo helaga biyagoyu  
 bi ogoni ayu tibu ne gadeleore ale howa bo podaga nga.

<sup>22</sup> ı genda yu keruni bibahende<sup>☆</sup>  
 Anduane Homogo ibunaga giha mo yaholene nga.  
 Ibugua ınaga genda uruni mo yalu  
 ı mo hongo holebira.  
 Anduane Homogo ibugua agali ko bu karume  
 mana tigabi biaga karu bibahende mo ko helo yupe naholebira.

<sup>23</sup> Ngode Datagaliwabe-o ına agali ko mendeali homelo bo wahaga bu karubi  
 ke halu mo hondo haga karubi  
 ti holene ha maro nabi hongohe kaore dege  
 homaliha ereba hai helo bo talu pelai habe laro.  
 ı nde ıhondo mini mbiraore hongohe wu haabo holebero.

## 56

*Agali mini mbiraorewime Ngode Datagaliwabehondo bi lenego ogo*

<sup>1</sup> Ngode Datagaliwabe-o ına ı dara howa biamogo bibe.<sup>☆</sup>  
 Agali bu karume ı talima ibaga bialu bo wahole kagoni.  
 Waitigime ı mo ko hole manda bialu haabo kagoni.

<sup>2</sup> Waitigi karume egerebagi howa ı bole bialu heane  
 alendo haga bialu haabo kagoni ndobe.  
 Ti dewalioreme ı baba waitigi ho ka.

<sup>3</sup> Anduane Homogo Daligaorene Daliga kego-o<sup>☆</sup>  
 ıha gi holene anda ibirangi  
 ına ıhondo mini mbiraore wialu haabo haruli.

<sup>4</sup> Ina Ngode Datagaliwabehondo mini mbiraore wu kogome<sup>☆</sup>  
 mbirale ngaru hondowa ı gi naharuli.  
 Ina ibunaga bi henene lo ngaru mitangi bialu  
 ibunaga mini yaraga haabo halu kogoni.  
 Agali karume ıhondo bulene mbira nawigo agi bulubadabe.

<sup>5</sup> Ina mbira bule kogola  
 waitigi karume mo ko hole manda biaabo haga ka.  
 Tigua ı mo tandaga hole hariga taya bialu haabo ka.

<sup>6</sup> Ti mo ngoai halu ha do howa  
 ına mbira bule bialu koria de yu howa  
 tigua ı bo wahole hamelalu ani biaabo haga ka.

<sup>7</sup> Ngode Datagaliwabe-o tigua mana ko bialu kagonaga pani nelo mibe.  
 ına tihondo keba timbuni howa bope habe.

<sup>☆</sup> 55:21: Iba 12.2, 28.3, 59.7, Min 5.3-4    <sup>☆</sup> 55:22: Iba 15.5, 37.5, 1 Pi 5.7    <sup>☆</sup> 56:1: 1 Sml 21.13-15    <sup>☆</sup> 56:3: 1 Sml 30.6, 2 Bit 20.3    <sup>☆</sup> 56:4: Iba 118.6, Ais 31.3, Hi 13.6

<sup>8</sup> Inaga genda yu kogobi bu miniha mo ko hene kogobi  
 i manda bu kegoni.

Ina dugu birugonaga de iba ibiyago  
 ina inaga iba beha berelo kegoni.

Ina uruni mitangi bu haabo howa  
 inaga mbugaha gilibu ngegoni.

<sup>9</sup> Ina i olarongi inaga waitigi ibida piai holebira.\*

Ngode Datagaliwabe-o ti ani biragola  
 ina mbira manda bidogoore ogo  
 ina ihayagi haabo kegoni mandabu kogoni.

<sup>10</sup> Ina Ngode Datagaliwabenaga bi henene lo ngaru mitangi bialu  
 ibu mini yaraga halu kogoni.

Ina Anduane Homogonaga bi lo ngarunaga  
 ibu mini yaraga halu kogoni.

<sup>11</sup> Ina ibuhondo mini mbiraore wu kogome\*

mbirale ngaru hondowa gi naholebero.  
 Agali uruni tigua ihondo mbira bulene nawigo agi bulubadabe.

<sup>12</sup> Ngode Datagaliwabe-o ina mbira bule lalu ihondo lo wirugoni biaore bulebero.

Ina ihondo turu howa  
 kai lolenaga loma mbira ngulebero.

<sup>13</sup> Irane i homole hewaria ina pele ngialu mo wirigonagabi  
 waitigirume i bope nahelo i handaya halu biamogo birigonagabi  
 ina loma ogoni ani ngulebero.

Ngode Datagaliwabe-o i heba ibagabu kogome  
 ina inaga wa holene ngegoria inaga deni haaboore holebero.

## 57

### *Ngode Datagaliwabehondo biamogo bia lalu bi lenego ogo*

<sup>1</sup> Ngode Datagaliwabe-o ina ihondo dara howa biamogo bibe.\*

Ina i handayaho habelo ini keria eberogoni.

Ega bawalime igini babaganaha tongo bidagola bayale biragadagua  
 i iniha kogola bayale holebero.

Dalu puyabubi timbuniore ibagadagua  
 i mo ko holene ibu ngago ereba hai helonaga  
 i ini andanaha haabo holebero.

<sup>2</sup> Ina Ngode Datagaliwabe Daligaorene Daliga kagohondo  
 i biamogo bia lole olalu haabo haruli.

Ibugua mbirale bibahende iha tubagiho kogo damene ngiai haga ka.\*

<sup>3</sup> Ibugua dahuliya andagaha howa inaga bi larogo hale halu i pele ngulebira.

Ibugua agali i mo ko hole karu bope hai holebira.  
 Ngode Datagaliwabehandaibunaga gubalini haabo holenebi  
 mini bilinahe holenebi i walia halu  
 ibugua i yu wahalu napolebiraore.

<sup>4</sup> Laiono gabuame wali agali bo nole nendebu hagadagua\*  
 i koria waitigirume ho mabu bu kagoni.

\* 56:9: Iba 56.4, Lm 8.31    \* 56:11: Iba 56.4    \* 57:1: 1 Sml 22.1, 24.3    \* 57:1: Iba 56.1, 63.7, Ais 26.20

\* 57:2: Iba 38.8    \* 57:4: Iba 55.21, 64.3, Min 30.14

Tinaga ne timu yandareru ale taraore ho ka.  
Tinaga hége wai biaga ayu tibu ne gadele ale ho ka.

<sup>5</sup> Ngode Datagaliwabe-o íni timbuniore dunini kego  
wali agali handai helo  
hari daligani mo walia habe.  
Dindi bibahende ha ínaga wá holenebi mini lene holenebi  
panigi mo walia ho ngelabe.

<sup>6</sup> Waitigi bu karume í delo gono wia do ho kagome  
í genda timbuni yu kogoni.  
Tigua hariga í polenego uli tombo wu kago ha  
gabua pilagadagua í pilelo winigo  
uli ogoniha tini pilai haya.

<sup>7</sup> Ngode Datagaliwabe-o ína mini bilinahe howa<sup>☆</sup>  
íhondo mini mbiraore hongohé wu kogonigo  
ína iba ganaru lalu ínaga mini yaraga halu holebero.

<sup>8</sup> Ini padogoria heyuwa  
ína ngida aleru barogome  
ni tagira ibilo mo heya holebero.

<sup>9</sup> Anduane Homogo-o ína dindi tara tara ngaruha pu howa  
íhondo kai laabo holebero.

Hameigini tara tarabu karuha pialu  
ína ínaga mini yaraga hama polebero.

<sup>10</sup> Anduane Homogo-o ínaga gubalini haabo holene emene ndoore<sup>☆</sup>  
hari daliga elahé wu kegoni.

Ínaga mini bilinahe ngego timbuni yangale howa  
hari mindini elahé wu kegoni.

<sup>11</sup> Ngode Datagaliwabe-o íni timbuniore dunini kego  
wali agalime handai helo  
hari daligani mo walia habe.

Dindi bibahende ha ínaga wá holenebi mini lene holenebi  
panigi mo walia ho ngelabe.

## 58

### *Ko biaga karu pani mibe lalu Ngode Datagaliwabehondo bi lenego ogo*

<sup>1</sup> Agali haguane bu kamiru-o tígua godi hale halu howa  
bi tigabi lolene ngadagua laramilibe.

Tígua wali agali bibahende tigatiga dabaki biaga kamibe.

<sup>2</sup> Ani ndoore. Tínga miniha ko bulene hangu wu tolatagi ho kamigoni ndobe.

Tígua dindi bibahende ha wali agali bu karu homelo  
bo wahaga biaga kamigoni.

<sup>3</sup> Mini kowi karume dindini ibagabu kangi  
ko dege biaabo haga kagoni.

Ti aiyahanda ti taba hanayangí howa  
ké dege halu henego áyubi anidagua dege bialu haabo ka.

<sup>4</sup> Tinaga bi larago damene bibahende nogombi taranaga tomia ale ka.

☆ 57:7: Iba 108.1 ☆ 57:10: Iba 36.5, 103.11, 108.4



Tinaga hale tuluho wahene nogombi ale howa  
bi larago mbira hale habe nahe ka.

<sup>5</sup> Agali maru manda timbunibi karume

nogombi heyalu mali lilonaga iba gana laragola  
nogombime hale nahagadagua ko biaga uruni ti hale nahaga ka.

Agali manda timbunibirume nogombi heyalu mali lilonaga pilipe laragola hale nahagadagua  
agali uruni ti hale nahagaore ka.

<sup>6</sup> Ngode Datagaliwabe-o agali ko uruni bo wahai habe.

Anduane Homogo-o agali uruni ti laiono gabua kebahe agali hayaga ale kago  
tinaga ne bo gingirulo бага bialu ne bibahende dugu wahai habe.

<sup>7</sup> Iba dindini ibira haragola abale yo bialu ereba hagadagua  
agali ko uruni ereba hai helabe.

Datani gahenge harigani anda harago geme hengedaragola gaulai hagadagua  
agali ko uruni bo hangedai habe.

<sup>8</sup> Gangade dindiha biralu homaragola ngu biagadaguabi<sup>☆</sup>

waneigini gali aiya tombeha bedaore homenego  
taba hanaragola wá nahende  
arumaha dege biralu homaraligobi  
agali ko uruni homai helabe.

<sup>9</sup> Agalime ira emene karu dibu waharadagua

Ngode Datagaliwabehanda agali ko uruni abale bo wahai holebira.

Ti homa nabi kaore

Ngode Datagaliwabehanda tihondo keba timbuni halu  
durumbu hilo waharadagua bulebira.

<sup>10</sup> Ngode Datagaliwabehanda ko biaga karu bo waharangi  
mini tigabi karume turu timbuniore ho holebira.

Turu howa tigua ko biaga uruninaga daramame  
tininaga ge wayawaya bulebira.

<sup>11</sup> Wali agali bu karume lalu,<sup>☆</sup>

Heneneore Ngode Datagaliwabehanda

wali agali mini tigabi howa bayale biaga karuhondo bayale dege biaga ka.

Heneneore Ngode Datagaliwabe kago ibuguaore

wali agali godini howa manani tigatiga dabaga ka, lolebira.

## 59

*Waitigime mo ko nahelonaga Ngode Datagaliwabhondo bi lenego ogo*

<sup>1</sup> Inaga Ngode Datagaliwabe-o waitigi karunaga giha howa<sup>☆</sup>

ĩ mo wialu biamogo bibe.

Tigua ĩ bo wanahelo

ĩna ĩ baya hangu handayaho habe.

<sup>2</sup> Agali ko karume ĩhondo ko nabilo

ĩna ĩ biamogo bialu mo wibe.

Ti darama hangu noa haga karunaga giha howa

ĩ gingila mialu mo wibe.

<sup>3</sup> Agali uruni tigua ĩ bo wahole bira do haga bidagoni de handa.

<sup>☆</sup> 58:8: Yob 3.16    <sup>☆</sup> 58:11: Iba 67.4, 92.7    <sup>☆</sup> 59:1: 1 Sml 19.11

Ína ko mbira birugonaga ndo tigua ìla bame wai bule kagoni.

<sup>4</sup> Anduane Homogo-o ìna ko mbira nabi biako henebi nawi kogoyu tigua ìla wai bialu bo waholeore abale íbu hapara ho kagoni.

<sup>5</sup> Anduane Homogo Hongo Haiheore Ngode Datagaliwabe-o ìna ì biamogo bule abale ibabe.

Í Isaraele wali agalirunaga Ngode Datagaliwabeore kego ìna agali o karu de handabe.

Íni abale ibalu agali bu karuni pani mibe.

Ína ti dara holeni nahabe.

Wali agali mana bayale bule kama lalu ha howa tigua mana ko bule mitangi bialu kago manda bibe.

<sup>6</sup> Mbiraga agali uruni tigua tanoha dai bialu wai pabe gibuni gibuni ibagabu howa biangome gigaṽ laradagua lama ibagabu ka.

<sup>7</sup> Uruni tigua bi ko lalu mege biraru hale habe.

Tinaga bi nehe howa wai biaga ayu tibu ale laga ka.

Tigua bi ko laga bialu,

Iname bi laramago aiwa hale holebirabe, lalu ka.

<sup>8</sup> Anigo Anduane Homogo-o ìna ti hondowa oba haga ke.

Dindi tara taranaga hameigini bibahende karu

ìna ti mege biai haga kegoni.

<sup>9</sup> Ína hangu ì mo hongo halu handayaho haga kegoni.✧

Ngode Datagaliwabe-o ìni kegoha ibalu ì bira do haruli.

<sup>10</sup> Ínaga Ngode Datagaliwabe ibunime ì gubalini timbuni ho howa ibugua ì biamogo bule ibulebira.

Ibugua ìnaga waitigi karu bope halu howa

ìni de hondoliya walia holebira.

<sup>11</sup> Ngode Datagaliwabe-o ìnaga wali agalirume mbirale uruni embedaho waholigo waitigi biaru homelo bo waholene nakarulapeda.

Anduane Homogo-o ì ìna wali agali haru haga kego

ìnaga hongome waitigi bu karu bo waratagi halu bope hai habe.

<sup>12</sup> Tigua mana ko bulene hangu mo tene halu

tinaga ne hambuni howa bi ko dege lalu haabo haga kagoni ndobe.

Tigua ìnaga mini mo ko howa bi ko ngaru lalu

ke howa bi dewa lalu haga kagonaga

ìna ti mine halu kagoria tini pani nelu ngelabe.

<sup>13</sup> Ína bi ko laga karunihondo keba howa

ti bo waholene karulape nga.

Agali ko uruni bo wahaiore habe.

Anidagua beregola wali agali bu karu bibahendeme manda bialu

Ngode Datagaliwabe ìnioreme Isaraele wali agalirunaga haru haga kegoni manda bulebira.

Wali agali dindi bibahendeha karubi ìna dindi bibahendeni haru kegonigo tigua manda biai helo lo yanga lolebira.

✧ 59:9: Iba 9.9, 18.17

- 14 Mbiraga inaga waitigi tigua tanoha dai bialu  
wai pabe gibuni gibuni ibagabu howa  
biangome gigau laradagua lama ibagabu ka.
- 15 Tigua puibu bialu nolene taya bialu haabo howa  
tinaga tombeha tomo noa biaabo hayagua nde ti ngiriningerene lalu haga ka.
- 16 Ti ani biagagoyu ina inaga hongo timbuni ngegonaga iba gana lalu holebero.✧  
Ina egerebagi bibahendengi  
ina ihondo gubalini ho haabo haga kego mitangi bialu  
iba gana hongo howa lalu holebero.  
Abale iha genda tara tara ibiyagola  
ina i handayaho haabo howa inaga wai pabe ale harigonaga  
ina iba gana ani lolebero.
- 17 Inaga hongo holene iniore kegoni ndobe.✧  
I ani kegonaga ina inaga mini yaraga halu iba gana lolebero.  
Ngode Datagaliwabe-o inaga wai pabe hongoheore ini howa  
ina i gubalini ho haabo haga kegoniore laro.

## 60

### *Ngode Datagaliwabehanda pele milo bi lenego ogo*

- 1 Ngode Datagaliwabe-o ina ina bo taliatagi halu✧  
inanaga waitigime bo podahana helo  
yu wahai harigoni ndobe.  
Ina inahondo keba timbuniore ho harigonigo  
ayu ina kamagoha abale dai bialu ina pele ngibe.
- 2 Ina inanaga dindi wiago mo dumbirumbi bia halu  
gai buki bilalu dindi hadene biyagola  
uli timbuni wupe helarigoni.  
Ai ayu dindi mo ko hai habehe ngago  
ina lone motiga bibe.
- 3 Inaga wali agali bu kamaru  
inime genda timbuniore mo ngidegoni.  
Ina waini iba timbuni hambu ngidegola no howa  
ina luluyu ibagabu haradagua bidamagoni ndobe.
- 4 Wali agali ini andaneha karume waitigi ibira handala✧  
ti abale ini kegoha hole ibilo walia holenaga  
ina hagua delagadagua delalu walia harigoni.
- 5 Ina ina gubalini timbuni ho haga kegonigo bayale hai holomaya  
inaga bi larogo hale habe.  
Inaga hongo timbuni ho kegome ina pele ngibe laro.
- 6 Ngode Datagaliwabehanda ibuni andaga howa lalu,  
Ina wai bialu bo podahana hai halu wayali harugo  
Segeme dindibi Sugodo dindiha dindi ulini bugubugu wuyu pedarubi  
dindi uruni inaga wali agaliru ti helo  
ina ti tuwu ta hai holebero.
- 7 Gileada dindibi Manase dindibi ininagaore nga.  
Eberaimi ibu inaga ege manda ale nga.

Yuda ibu kininaga haru haga gewa ale nga.  
<sup>8</sup>Moaba dindi inaga wayawaya bulene ndisibe ale wialu  
 Idomo dindi inagaore ngo lalu ina inaga ge su golowa  
 dindi ogoriani ba amu holebero.\*  
 Ina Pilidialiru balu wayali howa  
 turu halu ga lalu harogoni, laya.

<sup>9</sup>Ngode Datagaliwabe-o ege pabe hongohe bu mabubi tano ngagoha  
 i aiwa haru anda polobadabe.

Idomo dindiha i aiwa haru polobadabe.

<sup>10</sup>Ngode Datagaliwabe ina ina erembira ngiribe.

Ina inanaga ami agali karu biamogo nabuleorebe.

<sup>11</sup>Agalinaga hongome ina biamogo bulene nakarulapego\*  
 iname waitigi bu karu baba wai bulumaya  
 inioreme ina biamogo bibe.

<sup>12</sup>Ngode Datagaliwabe ibu ina heba kayagua nde  
 iname wai bialu wayali holeberema.

Ibunime waitigi karu bope hai holebira.

## 61

*Ngode Datagaliwabe handa handayaho helonaga bi lenego ogo*

<sup>1</sup>Ngode Datagaliwabe-o ina i olarogo hale habe.

Ina bi larogo baya hangu hale habe.

<sup>2</sup>I dindi kaundiaha pu koria\*

inaga miniha genda timbuni yu kogo  
 ina i biamogo bibelonaga i olalu kogoni.

Waitigi bu karume i bo wanahelo

i ha do holiya bayuwa haru pu helabe.

<sup>3</sup>Inime i handayaho haga kegonigo ani bibe laro.\*

I inaga wai pabe hongoheore kego  
 waitigirume ibalu i bo wanaholebira.

<sup>4</sup>Inaga anda kegoha i bayale haabo halu homolene\*  
 hame timbuni lo kogoni.

Ega bawali iginime ti angibuni babaganeha bayale bira do hagadagua  
 i ini andaneha bayale holene hamelo kogoni.

<sup>5</sup>Ngode Datagaliwabe-o ina ihondo ogoale bule lalu lowigi birugo bibahende  
 i hale hai harigoni.

Wali agali inaga mini yaraga haga karuhondo migi biaga birilidagua  
 ina ibi karulape ngiaga kegoni.

<sup>6</sup>Kini ibu dindini tubagi helo ndo mali dewaore helo helabe.  
 Ibu dindini luore helo helabe.

<sup>7</sup>Ngode Datagaliwabe-o kini ibu inaga deni luore haabo helo helabe.  
 Ina gubaliniore ho haabo haga kegome  
 ibu baya hangu handayaho haabo habe.

<sup>8</sup>Ina bamba ihondo ogoale buleore lalu bi lowirugo damene\*

\* 60:8: Ludi 4.8 de handabe. ✧ 60:11: Iba 118.8, 146.3 ✧ 61:2: Iba 18.2, 42.6, 77.3, 94.22 ✧ 61:3: Min 18.10  
 ✧ 61:4: Iba 17.8, 27.4, 91.4 ✧ 61:8: Iba 56.12

horo bibahendengi ina talialu bialu  
 ina mini yaraga halu iba ganaru lalu haabo holebero.

## 62

*Ngode Datagaliwabe ibugua ina handayaho haabo ka lenego ogo*

<sup>1</sup> Inaga Ngode Datagaliwabe mbiraore kago<sup>☆</sup>  
 ibugua i pele ngilo hondo ko.

Ina ibu hanguniore hanaho haga kogoni.

<sup>2</sup> I haru hagabi pele ngiagabi ibuni hanguore kagoni.<sup>☆</sup>

Ibu hangu inaga wai pabe ale hongohe kagoni.

Ina wai bialu koria waitigirume i bope habe naheore holebero.

<sup>3</sup> Tigua i mo ko halu bo waholenaga  
 horo agiru wai bialu holeberemibe.

Paberu gialohole bialu dindini podo ibiraho wiagadagua  
 i mo ko helo hamelo kamibe.

<sup>4</sup> I mini leneore kogodago  
 tigua inaga mini mo ko hole bialu kamigoni.

Tigua ke halu mo hondo holene mana hamelo kami.

Tinaga ne harigaha howa bi lalu Ngode Datagaliwabehanda i mo bayale helo lalu  
 kamigoyu

tinaga bu miniha Ngode Datagaliwabehanda i mo ko hayagua karulapeoreda  
 lo mitangi bialu kamigoni ndobe.

<sup>5</sup> Inaga Ngode Datagaliwabe mbiraore kago<sup>☆</sup>  
 ina ibuni hanguni hanaho howa  
 mini dunubia ho kogoni.

<sup>6</sup> I haru hagabi pele ngiagabi ibuni hanguore kagoni.

Ibu hangu inaga wai pabe ale hongohe kagoni.

Ina wai bialu koria waitigirume i bope habe naheore holebero.

<sup>7</sup> I pele ngiagabi i mini lene ka lelobi  
 Ngode Datagaliwabe ibuni hanguha hanaho haruli.

Ibu inaga haru haga hongohe ka.

Ibuni inaga wai pabe ale hongohe kagola  
 waitigirume ibalu i babe nahe holebira.<sup>☆</sup>

<sup>8</sup> Inaga wali agali bu kamiru tigua Ngode Datagaliwabehondo mini mbiraore wu haabo  
 halimu.<sup>☆</sup>

Genda howa ti mini dege dindi ho kamiru bibahende  
 ibuhondo lamiai halimu.

Ibu inanaga ha do haga kago  
 ina ibuha howa bayale haabo holeberema.

<sup>9</sup> Wali agali bibahende bu karuni  
 ne harigaha howa buhe bame latagi hagagobi hangu bu kagoni.

Wali agali mini lene bu karubi emene karubi  
 habane nabulene bame dege bu ka.

Wali agaliru ti holenenaga galone mbira ngabe nawi hondole magi handarimayagua  
 tinaga galone nawi bame dege ka.

<sup>☆</sup> 62:1: Iba 37.39, 59.9    <sup>☆</sup> 62:2: Iba 62.6, 89.26    <sup>☆</sup> 62:5: Iba 62.1    <sup>☆</sup> 62:7: Iba 46.1, 85.9    <sup>☆</sup> 62:8: 1 Sml 1.15,  
 Iba 52.8, Ais 26.4



Ti bibahendenaga galone magi handalu  
genda magi emeneore ne harigaha buhe laraligobi bameore nagalone dege ka.

<sup>10</sup> Tígua mitangi bialu howa  
wai beremagome ina biamogo biaga lalu<sup>☆</sup>  
mbirale mo page bini ngamaru urunimebi ina mo homogo holobadalo  
mitangi nabilimu.

Tínaga muni dabudaburu dewaore wu hemiyagua nde  
urunime tí hongo karulape ngulubadalo  
ogoriani mini hanaho nahalimu.

<sup>11</sup> Ngode Datagaliwabeanda lalu,  
I hongo daligahe i ale mende nahe ini hanguore kogoni,  
lenego hale haabo harugoni.

<sup>12</sup> Ibugua lalu, Inaga wali agali karu gubalini haabo haga kogoni,<sup>☆</sup>  
lalu hayuago i hale haabo haru.  
Anduane Homogo-o wali agali bibahendeme biabe bialu harimadagua  
ina ina hangu hanguhondo emena karulape ngiadai biaga kogoni.

## 63

*Mbirali ibu Ngode Datagaliwabe heba hole hameore lowa iba gana lenego ogo*

<sup>1</sup> Ngode Datagaliwabe-o i inaga Ngode Datagaliwabe kogoni.<sup>☆☆</sup>

Ina i handa walia hole lowa  
miniha hongo howaore hai bialu kogoni.

Inaga minimebi tinginimebi  
i hebaore hole hame timbuniore lo kogoni.

Wali agalime dindi koore yobi iba naberani howa  
iba noa timbuni halu hege lebolaho hagadagua  
ini i hebaore hoa howa hame timbuniore lo kogoni.

<sup>2</sup> I ininaga anda loma biahene kagoha haga kego  
i kegoniore i de hondoa ho kogoni.

Ina inaga hongo holene gibiore ngegobi  
inaga wa holene tara baya agiore loabe tobahe ngegobi  
de hondoleore hameledo.

<sup>3</sup> Dindini holiyanaga holene ngirigo yuwa bayale dege turuho kogoyu  
ogoni goyane lowa ina i gubalini haho wiaabo hariligo baya daligaore ngegoni.

I ani biaga kegonaga ina inaga mini mo yaraga holebero.

<sup>4</sup> I dindini emabu kongi ihondo kai lalu  
inaga mini mo yaraga haabo halu kone dege ini homalu waholebero.

Inaga gi ihondo yaraga halu bi lolebero.

<sup>5</sup> Tomo bayaleru karulapeore nowa tombe howa dungu lo holenedagua  
inaga dininime dinini tomo karulapeore nowa dunguore lowa holebero.

Ani bialu ina iba gana baya turubiru turuore howa  
inaga mini mo yaraga halu lolebero.

<sup>6</sup> I mbiraga tamuni paluwa iore mitangi biruli.<sup>☆</sup>

Mbiraga lu biagoniha inaga minime i hangu mitangitangi biruli.

<sup>7</sup> Ani mitangitangi biaabo haruligo irane<sup>☆</sup>  
ina i biamogo biaaboore hariligonaga

☆ 62:10: Ais 61.8, Ese 22.29, Lg 12.15, 1 Ti 6.10 ☆ 62:12: Yob 34.11, Iba 103.8, Yar 17.10, Md 16.27, Lm 2.6, 1 Ko 3.8, Mo 2.23 ☆ 63:1: 1 Sml 23.14 ☆ 63:1: Iba 42.2, 84.2, 143.6 ☆ 63:6: Iba 42.8, 119.55, 149.5 ☆ 63:7: Iba 61.4

ina ani mitangitangi biruli.

Ega angibunime ibu iginiru ibuninaga babaganeme minu tongo biagadagua  
 inaga babagane andane gumba kagoha howa  
 i turu halu iba gana turubiru laruli.

<sup>8</sup> Ina ini yu paraguabu ngogola<sup>☆</sup>  
 inaga gime i baya hanguore yaniho haga kegoni.

<sup>9</sup> Agali marume i bo waholeore manda bialu karuni  
 tini homalu humbirini andaga homene dinini pu haga ngagoha pu holebira.

<sup>10</sup> Agali odaruni waiangi agali waime homelo bo yongobu wahalu pedaria  
 biango dudurume ti buduyu pugu pugu bulebira.

<sup>11</sup> Ani bulebiragoyu ai i kini kogoni howa wai bigi berongi<sup>☆</sup>  
 Ngode Datagaliwabehanda i wayali holiya biamogo biaganegonaga  
 i turu ho holebero.

Wali agali maru Ngode Datagaliwabehanda mini lalu,  
 iore talima ibule, laga karume  
 turu halu inaga mini mo yaraga holebira.

Wali agali ke haga karunaga ne hariga ina mo ndibu lolebere.

## 64

### *Ngode Datagaliwabehondo handayaho habe lalu bi lenego ogo*

<sup>1</sup> Ngode Datagaliwabe-o ina genda timbuniore howa  
 ihondo bi larogo hale habe.

I waitigi karu hondowa gi ho kogoni.  
 Tigua i bo waholigo ina i handayaho habe laro.

<sup>2</sup> Agali ko biaga karume ndelalu hariga tai bialu  
 i bo wahole mo mogobu kagoni.

Tigua i mo ko nahelo ina i handayaho habe.

<sup>3</sup> Tinaga hege ayu tibu ne gadelehe ale howa  
 tigua bi ko lalarume i timume bogole edaho hagadagua kagoni.

<sup>4</sup> Tigua ha do ho howa agali bayale kagoha  
 timu bo pelagadagua ndelalu kagoni.  
 Agali urunime gi nahaga howa ke gibi hararume  
 timu ala бага biagadagua balu kagoni.

<sup>5</sup> Tigua mana ko uruni bulenaga<sup>☆</sup>  
 tini mo hongo hagahaga bialu ka.  
 Agali bayale karu gonoha delonaga  
 tigua gono ogoha wimiya laga bialu kagoni.

Tigua gono wuwa lo mitangi bialu,  
 O beremagoni mbiralime nahondolebira, laga ka.

<sup>6</sup> Mana ko ngaru bule tigua pongo bo wialu howa lalu,  
 Iname mana ko gibiore mbira bulene hariga handa walia harimagoni, lalu ka.  
 Agalinaga bu habaneha mini wia do ho kago o gibihego  
 iname handabe naheore kamagoni.

<sup>7</sup> Agali korume bi ogonibi laragoyu Ngode Datagaliwabehanda ibunaga timume ti  
 baragola  
 ti abale ibira holebira.

<sup>8</sup> Tigua agali maru karu bo wahole layagonaga

Ngode Datagaliwabehanda tini bo wahai holebira.  
 Wali agali maru karume ti de handaya howa  
 mege bialu tinaga ma bonge laga bulebira.  
<sup>9</sup> Wali agali bibahendeme Ngode Datagaliwabehondo gi hai holebira.  
 Tigua Ngode Datagaliwabehanda biyarunaga te laga bialu howa  
 mitangi bu haabo holebira.  
<sup>10</sup> Wali agali tigabi biaga karume<sup>☆</sup>  
 Anduane Homogohanda biyarunaga turu holebira.  
 Tigua ibuha ha do ho howa bayale holebira.  
 Wali agali mini bayale karume  
 Ngode Datagaliwabenaga mini yaraga haabo helo laro.

## 65

### *Ngode Datagaliwabenaga mini mo yaraga halu kai lenego ogo*

<sup>1-3</sup> Ngode Datagaliwabe-o iname Saiono tanoni inaga mini yaraga holene karulapeore  
 nga.  
 Iname ihondo bi laramago hale halu ladai biaga kegonaga  
 ihondo buleore lalu lo wirimaru biaore buleberama.  
 Wali agali dindi tara tarani karume ko bigi biyarunaga  
 ikeria ibugu bulebira.  
 Iname ko beremarume inane bope haga biragola kamaria  
 ina domo wahaga biriligoni.  
<sup>4</sup> Wali agali inime dabaga bialu<sup>☆</sup>  
 inaga andaha ini kegoria helo dabaga bereru  
 ti turuore ho ka.  
 Ina ti haru anda eberegola mbirale bayale tara tara damene  
 inaga anda loma binigo kagotha bu ngaru hondowa  
 ina miniha hina ale tombe howa dungulo holeberema.  
<sup>5</sup> Ngode Datagaliwabe-o iname ihondo bi laramago hale halu  
 ina gi migi biriligoni.  
 Ina ina pele ngulenaga mbirale baya tara tara nahendene aleru bigi biriligoni.  
 Wali agali dindi bibahendeni paluyu pedarubi  
 iba solowara domalu dindi kaundiani bu karubi  
 ti bibahendeme ihondo mini mbiraore wialu iha mini hana ho haga ka.  
<sup>6</sup> Ihongo gibihe kegome dindi hari gibi wa yu pedaruni  
 ina wene wedagoni.  
 Inaga hongo timbuni ngego mo walia halu ani wedagoni.  
<sup>7</sup> Iba solowarame bi timbuni tigi tugua lararubi  
 yaribu bialu lararubi mo hundia halu  
 wali agalime bi timbuni awa lalu ladagadaga bialu karu mo hundia haga kegoni.  
<sup>8</sup> Ina gibi urunidagua bigi bialu kego hondowa  
 ina wali agali dindi bibahendeni bu hama pedamarunaga bi nawidagola  
 ina bigi berego dege hondole bame ne angala howa de handaya ho hama pedam-  
 agoni.  
 Ina bigi berego handalu turu halu ogodagua biya lalu loyogo laramagola  
 wali agali pali maro bidarumebi heba bi ladagadaga bialu holebira.  
<sup>9</sup> Ina wali agali palu ngamaru handaya ho ko lalu

<sup>☆</sup> 64:10: Iba 32.11, 58.10, 68.3    <sup>☆</sup> 65:4: Iba 33.12, 36.8, 84.4

hariha howa dalu ngialu<sup>☆</sup>  
 inanaga dindir mo baya halu mo ibane berela halu kegoni.  
 Iba nagane gendo ngamaruha iba duguaho wiaabo helalu  
 iba maru piagaru hundia nabi pia ho wiaabo heledagoni.  
 Inanaga tomo hingedamarubi baya gumbile wiaabo heledegola  
 bu dawalu naabo haramagolabi  
 tene haho wiaabo kagoni.  
 Urunidagua bialu kegome ina wali agali dara howa biamogo bule handaya ho ko lalu  
 walia halu kegoni.  
 10 Tomo hongole howa dindi alu ngamaria  
 hariha howa daluore ngigi birili.  
 Dalu ibilaregome dindi damiai haga.  
 Dalu emene haburalu ibilaga biriligomebi  
 dindi ibane biralu mo gomba haga beregola  
 tomo hingedamaru bayuwa anda haga.  
 11 Ína ani bigi beregome tomo au lolebe tara gibi bu ngaria bu hono puwa dawaga  
 beramali.  
 Ína biamogo berego damene bibahende ani biai haregola  
 tomo nolene bu payabu wiaabo haga.  
 12 Nogo sibi bulumagaru hagaha nogo wabuni haabo halu  
 dindi hambenerunaga wá hondo holene bayaore ngagoni.  
 13 Tagira nogo sibiru tanini bu haame halu  
 dindi ulini guagua ngaruha tomo tara tara anda halu gumbilo tagiho ngagoni.  
 Uruni bibahendeore inahondo ngiridarumebi  
 wali agali bibahendemebi íhondo turu timbuniore howa  
 iba gana dalimu ladaga halu íhondo lo ngeremagoni.

## 66

### *Ngode Datagaliwabhondo turu howa kái lalu iba gana lenego ogo*

1 Wali agali dindi bibahendeni bu kamiru-o  
 tí turu halu hongo howa ladaga halu<sup>☆</sup>  
 Ngode Datagaliwabenaga mini yaraga halimu.  
 2 Iba ganaru lalu ibu mini leneore kago lalu  
 latagi holene nga.  
 Ibutaga mini timbuni ngago mo yaragaore holene nga.  
 3 Tígua Ngode Datagaliwabhondo lamialu lalu,  
 Mbirale ína biagago damene bibahende  
 dunini hangu biai haga kegoni.  
 Í hongo timbuni daligaore kego hondowa  
 ínaga waitigi bu karume mogo lalu  
 í wanakuihayagi ibalu bulupaligi bialu haga ka.  
 4 Wali agali dindi bibahendeha bu karume<sup>☆</sup>  
 í mitangi bialu lotu lalu ka.  
 Tigua íhondo iba ganaru lalu  
 ínaga mini yaraga halu ka, lalu lamilimu.  
 5 Ngode Datagaliwabehanda biyadaru tí de hondole ibidaba.<sup>☆</sup>  
 Wali agali bu hearu dombeneha howa

<sup>☆</sup> 65:9: Man 32.2, Iba 46.4, 72.6, 104.13, 104.24, 147.8, 147.14    <sup>☆</sup> 66:1: Iba 100.1    <sup>☆</sup> 66:4: Iba 67.3, 96.1-2, 117.1

<sup>☆</sup> 66:5: Iba 46.8

tarale timbuni biyadaru de handadaba.

<sup>6</sup>Ibugua iba solowara timbuni bereago hundiai helalu<sup>☆</sup>  
dindi mo yobia haya.

Dindi yobialu pani helayagola

inanaga mamaliru ti geni dindi dindi ibiyagoni.

Ibugua biyagonaga iname ogoriani ibuhondo turu timbuni hene.

<sup>7</sup>Ngode Datagaliwabe ibu hongo gibihe howa  
ibu kini haluhe haabo haga ka.

Ibugua hameigini tara tara hama pedaru bibahende  
ibunaga deme de handa amu haga ka.

Wali agali maru ibunaga mana hale howa dogaga haga karu  
ti mini timbuni bolanguahe kama loligo henge namilimu.

<sup>8</sup>Wali agali hameigini tara tarani palima pedemiru  
ti bibahendeme inanaga Ngode Datagaliwabe kagonaga mini yaraga hadaba.

Wali agali bibahendeme hale hai helo  
tigua ibunaga mini mo yaraga hai hadaba.

<sup>9</sup>Ina koha pi nalolomaya  
ibunimeore baya hangu handayaho hayagome<sup>☆</sup>  
ina homa nabi bayale kamagoni.

<sup>10</sup>Ngode Datagaliwabe inime ina ba handarigoni.<sup>☆</sup>

Agalime siliba dodo para kago do taulo wahelonaga  
irani deledagola baya tara wiagadagua  
ina ina kamaruhondo ani biridagoni.

<sup>11</sup>Inime ina wena nu aleha minu hanarigoni.

Inanaga erembirani genda timbuni mo ya harigoni.

<sup>12</sup>Waitigi bu hearume ina bo hingedelo waharigoni.

Ina ira deagoriabi iba li timbuni peagohabi  
ibagabu harimagoni.

Ina ani birigoyu ai ina dindi bayale ngagoria  
haru ibu heledegoni.

<sup>13-14</sup>Bamba genda iha tagira ibiyangi

ina ihondo loma mbira irani dai helo bo delole lalu bi lo wirugoni.

Ina bi ogoni larugo mitangi bialu

ai loma uruni bu yalu ibulebero.

Ina nogoru inaga andaha haru ibalu

irani bo delolebero.

<sup>15</sup>Nogo sibi habatigiru ina inihondo lomabu ngialu irani bo delolebero.

Ina bulumaga wangabe karubi meme wangabe karubi

ihondo loma bialu irani bo delolebero.

Uruni delarogola nga bayale birago i nga ho holebere.

<sup>16</sup>Wali agali Ngode Datagaliwabe andaneha haga bu kamiru-o

ti ina bi larogo hale hole ibidaba.

Ngode Datagaliwabe handa i biamogo biyaru bibahende

langiai holiya ibidaba.

<sup>17</sup>Ina ibuhondo i biamogo bia lalu olalu harugoni.

Ibunaga mini yaraga halu ina iba ganarubi larugoni.



- 18 Mana ko birugo bu donge ho kole nde✧  
 Anduane Homogohanda inaga bi larugo hale nakale.  
 19 Ngode Datagaliwabehanda ina ibuhondo bi larugo haleore haya.✧  
 Ibugua inaga bi larugo heneneore hale howa ladai biya.
- 20 Ngode Datagaliwabehanda i erembira nangi.  
 Ibugua inaga bi larugo hale halu  
 i gubalini hayago wanahe haabo hayagonaga  
 ina ibu mini yaraga harogoni.

## 67

### *Ngode Datagaliwabehondo kai lalu lenego ogo*

- 1-2 Ngode Datagaliwabe-o ina ina dara nahabehego✧  
 harugo lowa dara halu biamogoore bibe.  
 Ina de hondo halu pele ngulene ngadagua pele ngibe.  
 Ani beregola wali agali dindi bibahendeni karumebi  
 inaga hame ogobi wiyada manda bilo ani bibe.  
 Hameigini tara tara paluyu pedaru bibahendemebi  
 ina ti pele mirida manda bilonaga ani bibe.
- 3 Ngode Datagaliwabe-o wali agali karume  
 inaga mini mo yaraga helo hameledo.  
 Wali agali bibahendeoreme inaga mini mo yaragaore helo hameledo.
- 4 Hameigini tara tara paluyu pedarume✧  
 tinaga miniha turu halu yanga lowa iba gana lelo.  
 Ina wali agali tale nabi bibahendehondo ogobi dege dege biaga kegonaga ani lelo.  
 Dindi bibahendeni hameigini paluyu pedamaru  
 ina bayuwaore haru hariligonaga iba gana lo ngilo hameledo.
- 5 Ngode Datagaliwabe-o wali agali karume  
 inaga mini mo yaraga helo hameledo.  
 Wali agali bibahendeoreme  
 inaga mini mo yaragaore helo hameledo.
- 6 Dindini tomo hangamaru damene bibahende anda haragola nalu kamagoni.✧  
 Ngode Datagaliwabe inanaga Ngode Datagaliwabeore kago  
 ibugua ina mo gumbila hayagome  
 ina turu halu dungulo kamagoni.
- 7 Ngode Datagaliwabehanda inahondo turu howa mo gumbila halu kagoni.  
 Wali agali ona kaware karumebi dindi lene leneha paluyu pedarumebi  
 bibahendeme ibunaga mini mo yaraga haiore helo hameledo.

## 68

### *Isaraele wali agali ti Ngode Datagaliwabehanda biamogo biyagonaga turu halu iba gana lenego ogo*

- 1 Ngode Datagaliwabe ibuni abale heyalu ibunaga waitigi bu karu talia togo laragoni.  
 Ibhondo handabe manga haga karu ti ibida piai haragoni.

- <sup>2</sup> Puyabume hagua pulo yalu purogo lagadagua dege  
Ngode Datagaliwabehanda waitigi bu karu bo taliatogo lai haragoni.  
Wagaya ira dene hondowa elalu ereba hagadagua  
wali agali ko karu Ngode Datagaliwabenaga deni howa mo ko hai haga.
- <sup>3</sup> Wali agali mini tigabi karu ti dege turubiore howa  
Ngode Datagaliwabenaga deni miniha dungulo halu ti turu timbuni ho haga.
- <sup>4</sup> Ngode Datagaliwabehondo iba gana ladaba.  
Ibunaga mini yaraga halu iba ganaru lalu holene nga.  
Ibu hari beralibani biralu piaga kago ibilo  
hariga mo tiga bia holene nga.  
Ibunaga mini Anduane Homogo ka.  
Iname ibunaga deni howa turu hamija.
- <sup>5</sup> Ngode Datagaliwabe ibu ibuni andagaha howa✧  
ibugua waneigini aba aiyala homene karubi  
wali dalo agalini homene bedarubi  
ti bibahende handayaho haga ka.
- <sup>6</sup> Wali agali tini hangu haga karu✧  
ti anda mo migi bialu bayale berelaga ka.  
Wali agali garabaya bu helene karu ti golope howa  
ibugua tini daluha haru dai bialu ti turu ho helo helaga biaga.  
Agali doga haga bu karu ti dindi ko yobi iba dalu naibaga ngagoha  
pu haabobo bu holebira.
- <sup>7</sup> Ngode Datagaliwabe-o bamba ina inaga wali agali haru tagira ibalu  
ti dindi ko wali agali nahaga wiagoha haru halu ibirigoni.
- <sup>8</sup> Horo ogoingi Ngode Datagaliwabe ibu Hari Sainai ala ibu hariligoria áyu ibu kegoni.✧  
Isaraele wali agalinaga Ngode Datagaliwabe ini ibirigola dindi dumbirumbi bialu  
hari daligaha howa iba dalu timbuniore ibiniya.
- <sup>9</sup> Ngode Datagaliwabe inime inaga dindini iba dalu timbuniore ibilarigola  
dindi ala ko wiyago lone mo bayale harigoni.
- <sup>10</sup> Inaga wali agali ti dindi ogoni karulayagoni.✧  
I baya gibiore kegome  
wali agali burupale hearuhondo tomo dabudaburubi migi birigoni.
- <sup>11</sup> Anduane Homogohanda bi layagola  
wali dewa biru wiarume bi te uruni lamima piyagoni.
- <sup>12</sup> Bi te lamima piyadagoni ogodagua,  
Kini karu heba tinaga ami bu karubi bibahende ibida piai haragoni.  
Agali tigua wai labuha howa mbirale mo yalu ibiyaru  
wali andaga berearu baba talebu ta haga biya.
- <sup>13</sup> Ega malibu ale silibame wabiniru babagane ngolome hoai laradaguabi wiaru  
tigua mo tale bigi bini.  
Ainde irane agome agali maru wai nape  
pabeha nogo sibi heba hayabe, laga biya.
- <sup>14</sup> Ngode Datagaliwabe Hongo Haiheore kagome  
Hari Salamono ogoniha kini hearu bo taliatagi halu purogo lelowa  
ibugua dalu dindi guni timbuni hari ogoniha ibilaya.

✧ 68:5: Iba 10.14, 10.18, 146.9 ✧ 68:6: 1 Sml 2.5, Iba 107.10, 107.34, Ab 12.6 ✧ 68:8: Har 19.18 ✧ 68:10: Man 26.5, 26.9, Iba 74.19

- 15 Hari Basananaga ibu hari timbuniore weda.  
Hari ogoninaga hombene bolebolene dalidali bigi bida.
- 16 Hari timbuni hombene dewa bolebolene hagahagabi kego-o  
ina hari emene Ngode Datagaliwabe ibuni birulenaga dabo heledago de hondowa  
irane aginaga henge larebe.  
Anduane Homogo ibu hari ibuni dabenegro ogoniha haabobo bu holebira.
- 17 Anduane Homogo ibuni Hari Sainai wahalu  
ibuni anda loma bia hene biagotha ibu kagoni ndobe.  
Ibunaga ami agaliru wai biaga garo ale nogo hosime gililo yalu piaga mini karisiru  
daosini dagalabe nahe dewaoreni hagahaga bialu ti haru ibiyagoni.
- 18 Ngode Datagaliwabe ibu ibunaga hari daligaore wiagoria iraga halu✧  
agali dewaore minalu haru halu piya.  
Agali dogaehe wai biaga hearume  
ibu mo turu halu mbirale migi biyaru mo yaya.  
Anduane Homogo Ngode Datagaliwabe ibuni hari daligaore ogoniha haabo holebira.
- 19 Iname Anduane Homogonaga mini yaraga hamiya.✧  
Ibugua inanaga genda ngelo kamaru  
horo bibahendengi ya haga kagoni.  
Ina pele ngialu mo wiaga Ngode Datagaliwabe ibuni hanguore kagoni ndobe.
- 20 Inanaga Ngode Datagaliwabeibunime ina pele ngialu haabo kagome✧  
ina bayale kamagoni.  
Anduane Homogo ibu inanaga Anduane Homogo kago  
ibugua ina homa nabi bayale holomayanaga pele ngiaga kagoni.
- 21 Ngode Datagaliwabehanda ibula waitigi haga karubi  
mana ko ngaru hangu mo tene haga karubi  
ti bibahende bo wahai holebira.
- 22 Anduane Homogohanda lalu,  
Tínaga waitigi amu Basana dindini bu karu minu yudai bulebero.  
Ti unuraore iba solowara timbuni bedago andanehaore heaguabi  
harugo lowa ina minu yudaiore bulebero.
- 23 Tínaga waitigi uruni baiore howa tí bu miniha dungulo halimulo  
tínaga biango bu karume waitigi uruninaga darama na dege bialu no karulapelobi  
ina ani minu yudai bulebero, laya.
- 24 Inaga Ngode Datagaliwabe-o ina wai bialu wayali harigo de hondowa  
manda bu kama.  
Ngode Datagaliwabe inaga kini kego  
ininaga anda loma bia heneha turu halu anda porego  
ina bibahendeme de handai ho kama.
- 25 Iba gana lagarume bamba halu  
ngida ale lagaru ti maha ibiragoni.  
Wandarime irabitele ale maru yuwa tigua bama dombeni ibiragoni.
- 26 Tigua iba gana laraga halu howa lalu,  
Wali agali ibu ngoaiho kamarume  
inanaga Ngode Datagaliwabenaga mini yaraga hama.  
Ina Isaraele wali agali bu kamarume  
Anduane Homogonaga mini mo yaraga hama, lama ibiragoni.

✧ 68:18: Eb 4.8 ✧ 68:19: Iba 55.22, 65.5, Ais 46.4 ✧ 68:20: Man 32.39, Iba 49.15, 56.13, 106.43

27 Beniyamini hameigini emene hayaru tigua mo bamba hara.  
Yuda hameigininaga agali haguane bu hearu  
tigua Beniyamini hameigini erembiraha pora.  
Sebulunu hameiginibi Nabadali hameigini tinaga haguane bu hearubi  
tigua o piyaru mama talima poragoni.

28 Ngode Datagaliwabe-o íninaga hongo inahondo mo walia habe.  
Bamba ínaga hongo ogonime ina mo wirigonigo áyu walia habe.

29 Íni anda Yarusalemeha kagoria  
kini tara tara bu hearume í mo turu hole  
mbirale mbirale bame íhondo ngule mo yalu ibiragoaha howa  
ína ínaga hongo walia habe.

30 Nogo gabua timbuni iba puguaha haga biago hongo howa talibe.\*  
Nogo bulumaga wangaberu bulumaga igini heba haradagua helaga karubi  
hongo howa talibe.

Tinaga muni siliba yu karu íhondo ngialu íni kegoha ibalu  
bulupalialu ge duli hanga helonagaore  
ína hongo howa talibe.

Hameigini tara tara wai bule hamelo karu  
ibida bilibulu purogo lelo bo taliatagi hai habe.

31 Iyibinaga kinime ibunaga agali haguane bu karu ti  
ínaga bi larego hale helo Yarusalemeni ibilaga bulebira.  
Idiobialirume gi yaragaho howa íhondo bi lolebira.

32 Wali agali dindi tara tarani bu kamiru aibe.  
Tígua Ngode Datagaliwabehondo iba ganaru lagalaga bidaba.  
Anduane Homogonaga mini yaraga halu iba gana ladaba.

33 Mbirali ibu hari daligaha beralibani ge halu piaga kago  
ibunaga mini yaraga hadaba.  
Ibunaga bi hongo howa hari kulu laradagua biaruago hale hadaba.

34 Wali agali bu kamiruni bibahendeme  
Ngode Datagaliwabenaga hongo timbuni kago lalu latagi halu hadaba.  
Isaraele wali agalirunaga kini daligaore ibu kagoni.  
Ibunaga hongo taraore hari daligani walia harane de hondo kama.

35 Ngode Datagaliwabe-o í tara baya burugule gibiore howa  
íninaga anda loma bia heneha kegoni.  
Isaraele wali agalirunaga Ngode Datagaliwabe ibugua  
ibunaga wali agali bu karuhondo hongo miaga ka ndobe.  
Ina Ngode Datagaliwabe mini yaraga hai hamíya.

## 69

### *Mbiralime Ngode Datagaliwabehondo biamogo bia lalu bi lenego ogo*

1 Ngode Datagaliwabe-o í gi mibe.\*

Iba birama irayagola ai ibame namu lelo ma paho kogonigo gi mibe.

2 Waru lumburani hewaria unura waruha yalu anda porane kogoni.\*

Ge hade holene dindi giambe mbira nawida.

Iba uli bereagoaha ge hape halu ko.

Ani bialu koria iba yaribu bu yu ibalu í bu dambi haragola

\* **68:30:** Agali marume mitangibu handalu hearia nogo gabua iba puguaha haga layadagoni Iyibi dindihondo lene bada lomanda biya. ✨ **69:1:** Iba 69.2, 69.14-15, Yna 2.5 ✨ **69:2:** Iba 40.2

iba nalu homole kogoni.

<sup>3</sup> Ai homaore biruda handala Ngode Datagaliwabe-o  
ina i biamogo bibelonaga ina i o dege lalu hewane ai inaga kembobe pu kagoni.

I eberebe hondole lowa  
de handayaho wia dege biwane  
ai inaga de tandaga bialu hongo bibahende pirilipe kagoni.

<sup>4</sup> Wali agalime irane nawioreni i bame handabe manga haga karu  
ti dewaore daga labe nahe kagoni.

Inaga hagianeni mandari li bu karuni goyane lowa  
ti dewaore daga labe nahe kagoni.

Inaga waitigi urunime tindule ina agua biya lalu ti bi degeme mo para halu kagoni.  
Tigua hongo gibi howa i bo waore hole manda bialu kagoni.

Ti bi degeme i kayu nabini wiwago tindule, i kayu biri, lalu ka.

Ti bime mo para hayagola mbirale inaga wiwago irane nawini bameore ti mirugoni.

<sup>5</sup> Ngode Datagaliwabe-o ina i ko nabiaga kogoni lalu ndo laro.

I ko biaga dege ha kogonigoyu nde ina ko biruruni mbira i deni wia do hene nawi  
tigatiga binigobi lapani hai harugoni ndobe.

I mini nawi howa birurubi i manda biai ho kegoni.

<sup>6</sup> Anduane Homogo i Hongo Haiheore howa Bibahende Haru Haame Ho Haga kegoni.

Ina mana ko mbira berogome wali agali ini hana ho karu taga helo mbira buligo  
inaga gime i yaniore habe.

Isaraele wali agalinaga Ngode Datagaliwabe i kegonigo  
ina mana ko berorume wali agali i mitangi bialu lotu laga karu  
taga halu de handa dindi hai helo ina mbira buligo  
ina i mamage habe.

<sup>7</sup> Ina i talima ibalu kogonaga wali agalime i lo guralu mege bialu i mo taga halu kagoni.

<sup>8</sup> Ininaga hameneorerume i kogoni agali tara dindi tarali ka manda bidagola kogoni.

Ininaga aba aiya hamene mbalinirume i kogoni tiha howa tagira peneda ndo  
agali tara mbira dindi kaundiali ibu kagoni ledaha kogoni.

<sup>9</sup> Inaga anda bayale haabo helo ina hame timbuni lalu kogome\*  
inaga bu habanaha ira daradagua biragola haruli.

Wali agali karume i mege bialu bi laga biragoni ini laba halu kagoni.

<sup>10</sup> Inaga deni inime ini mo dindiha halu tomo nane haruli.

Ani berogola wali agalime hondowa i mege bialu lo guraga.

<sup>11</sup> Dara howa duguanda howa aga biaganedagua bu kogola  
tigua i hondo oba halu lo guraga.

<sup>12</sup> Ti hariga hariga mo mogobu kago howa i kedalu dege lalu kagoni.

Lulu iba nowa tibaga lowa karumebi  
ti ne harigaha howa iba gana ende haga bialu laga birago  
i lo guralu hangu laga biragoni.

<sup>13</sup> Ti ani lo helowa ina Anduane Homogo ihondo bi lolebero.

Ani larogo hale halu Ngode Datagaliwabe-o inime ogoangi ladai bule lo manda bidengi  
ladai bibe.

Ina hale halu ladai bulebeda lo manda bidogo irane  
ina i gubalini timbuniore ho kego manda bidogome.

Ani bialu i ke nahagaore kego manda buwa

\* 69:9: Yo 2.17, Lm 15.3



- heneneore i pele ngulebereda lo manda bu kogoni.  
 14 Waru lumburani kogola ge namulai halu ini waruha anda piai habehe bu hinarago  
 ina i gi mibe.  
 Inaga waitigirume i bo waholigo  
 ina i de hondo habe.  
 Iba uli ngagoha i ibaha namulai holigo  
 ina i de hondo habe.  
 15 Iba li timbuni ibiragome i namu lalu hilu yalu poligo  
 ina i de hondo habe.  
 Iba uli bedagoha i namu lolani  
 ina i de hondo habe.  
 Homalime i mo mbedogo buligo ina i de hondo habe laro.
- 16 Anduane Homogo ina i horo bibahendengi gubalini haho wiaaboore haga kegome  
 ina bibe larogo hale halu ladai bibe.  
 Inaga gubalini haho wiaabo holene ogoni mana bayaore gibi ogoniya.  
 Inaga dara holene gibi ngegome i handaya halu  
 ina bibe larogo hale halu ladai bibe.  
 17 Inaga biabe bia haga o kogo ko handala i ha do nahabe.  
 I genda timbuniore yu kogonigo  
 ina bi larogo hale halu ayu ogoni abale ladai bibe.  
 18 Ayu ogoni i kogoria kaware ibalu i gini mibe.  
 Inaga waitigi karume ibalu i yani nakaore  
 ina abale ibalu i gini mibe.
- 19 Agali bu karume i mege bialu lo guralu karu i mandabide.  
 Tigua i mo taga halu mo yo hondo wahalu ti ge waraha heledagoni i de hendedegoni.  
 Inaga waitigi bibahende karu i de handaiore ho kegoni.  
 20 Tigua i mege biyago mitangi bialu hewaria\*  
 inaga miniha genda gibi halu inaga gubaliniore tumbudu bidagoni.  
 Hongo mbira hole ndo aiore hongo pirilipe haiho kogoni.  
 Ai i darahe mbiraorebi nde holebira lo manda biwaria mbira naholeoreya.  
 Inaga mini mo dungulo dai bulene bi lolene mbira holebirabe toba hewaria  
 mbiraoreorebi mbira naholeoreyane handaru.  
 21 I tomo garibilo hewaria tomo kaubi tara mbira na lalu ngiya.\*  
 Iba noaho harugola waini iba ko kaubi na lalu hambu ngiya.
- 22 Ani biyago ti turu halu tomo timbuni dawa payabu nalu bedaria tini ogoningi homai  
 nahara.\*  
 Turu ogoriani hairi halu tomo loma bini ngaru narolo manda bidaria  
 bibahende homa hilai nahara.  
 23 Uruni bibahende arumaha luluyu helo ti bibahendenaga de mo ndibulai habe.  
 Ti bibahende ere pode ulahe helo  
 tinaga erene kuni mo gedaore haabo habe.  
 24 Ina tihondo keba timbuniore halu ti mini wilo mana halu mbira labe.  
 Inaga keba holeneme ti bo ereba hai helabe.  
 25 Ti balai anda karuha mbiraorebi mbira yu waheloleni.\*  
 Bibahende bo mburi labe.  
 Balai andaru ti haradago bame dabulu ngelabe.

\* 69:20: Yob 16.2, Iba 142.4, Ais 63.5    \* 69:21: Md 27.48, Mg 15.36, Lg 23.26, Yo 19.28-29    \* 69:22: Lm 11.9-10  
 \* 69:25: Ab 1.20

- <sup>26</sup> Agali maru ti ala ko biyagola ína ti pani mini hayaruni  
ai agali ko biaga karume agali o biaruni lone áyu mo tandaga halu ka.  
Ani bialu agali maru ala ko biyagola  
ína ti pani mialu tinginini motudu wilarigo  
agali biaruni áyu agali ko biaga karu tigua lone mege bialu mo tandaga halu ka.
- <sup>27</sup> Agali ko biaga uruni tigua ko biraru bibahende  
ína baya hangu de hondo howa ilu wigi bibe.  
Ko biaga uruni mbiraligo ínaga waneigini pele miniyi karuhayagi anda ibulani.
- <sup>28</sup> Ko biaga uruni tinaga mini haabo holenenaga mbugani gilibu wulani domo wahabe.✧  
Ínaga wali agali mini tigabiwi karunaga mini gilibu ngegoria  
ko biaga uruninaga miniore mbira mbuga ogoriani gilibu wulani.
- <sup>29</sup> Ai ì genda timbuniore yuwa tandaga nalu kogoni.  
Ngode Datagaliwabe-o ína ì gini mialu lone mo heyu helabe.
- <sup>30</sup> Ina iba gana mbira lalu Ngode Datagaliwabenaga mini mo yaraga holebero.  
Ina ibuhondo kaj lalu ibu timbuni daligaore gibi ogobi ka lalu maru lamulebero.
- <sup>31</sup> Ogonidagua berogo hondowa Anduane Homogo ibu turuore holebira.  
Nogo bulumaga dewaru bo lomabu merogo hondowa turu hagadagua ndo  
ibugua turu timbuniore holebira.  
Bulumaga wangabe habaheore timbunigo bo lomabu mialu delaruyaguabi hondowa  
ibugua turu emene holebirago  
o larogodaguaore biruyagua turu timbuniore holebira.
- <sup>32</sup> Wali agali gendayu karume ogonidagua berogo hondowa ti turu holebira.  
Wali agali Ngode Datagaliwabe dunini kago mitangi bialu lotu laga karu  
ti turu halu miniha elahe holebira.
- <sup>33</sup> Anduane Homogo ibugua wali agali mbirale buru pale karume  
ibuhondo bi larago hale halu biamogo biaga ka.  
Ibugua ibunaga waneigini garabaya andaha karubi embeda nahaga ka.
- <sup>34</sup> Hari daligabi dindibi iba solowarabi mbirale iba solowaraha bedarubi  
ti bibahendeme Ngode Datagaliwabenaga mini mo yaraga hai halimu.
- <sup>35</sup> Ngode Datagaliwabehanda ibunaga Yarusaleme wali agali pele mialu  
Yudanaga tano mo ko hene ngaru lone bia aribia holebiragonaga  
tigua ibunaga mini mo yaraga holene nga.  
Ibunaga wali agali ti turu halu tano odaruniha ho halu  
dindi ogoni ti karulalu tinagaore holebira.
- <sup>36</sup> Ibunaga biabe biaga karunaga waneigini aguane mani hararume  
dindi ogoni karulolebira.  
Wali agali ibu gubalini heneneore haga karume  
dindi ogoni karulowa haabo holebira.

## 70

### *Ngode Datagaliwabehanda biamogo bilonaga bi lenego ogo (Iba Gana 40.13-17)*

- <sup>1</sup> Ngode Datagaliwabe-o ainde ìjore pele ngibe.✧  
Anduane Homogo-o ína áyu ogoni ì biamogo bule íbu.
- <sup>2</sup> Agali marume ì homelo bo wahole karu tiore taga halu pelo  
ína ti bope halu mo luluya habe.  
Agali marume ì genda yu kogonaga turuho karu

- ina ti taliai halu tinaga mini bope halu mo dindiha ho helabe.  
<sup>3</sup> Agali i mege bima ibaga bialu karuni  
 mana tinime bialu karu nagalone bialu harimada lowa mogolo hendelo  
 ina ti mo taga habe.
- <sup>4</sup> Wali agali i keria ibaga karu  
 ti dege turubi howa iniha mini hanaho helo.  
 Wali agali inime pele mirigonaga turu haga karu  
 uruni tigua bibahendengi laabo halu lalu,  
 Ngode Datagaliwabe ibu duniniore ka, lalu helo.
- <sup>5</sup> Ngode Datagaliwabe-o ininaga hongo nakarulape kogonigo  
 i koria abale ibabe.  
 Inaga Anduane Homogobi Pele Ngiagabi iniore kego  
 i biamogo bule emene handayaha nabi abaleore ibabe.

## 71

### *Agali waheme bi lenego ogo*

- <sup>1</sup> Anduane Homogo-o i ila mandagi haabo kogola\*  
 waitigi karume i mo ko habe nahe ko.  
 Tigua i bope halu wayali helo yupe nahabe.
- <sup>2</sup> I tigabiore kegonigo  
 i waitigirunaga giha koria pele ngialu haru dai bibe.  
 Ina bi larogo hale halu i pele ngibe.
- <sup>3</sup> Inaga wai pabe hongohe alebi anda hongohe alebi i habe.\*  
 I ibida pialu iha dege ha do hole eberogola handayaho habe.  
 Inime dege i baya hangu handayaho kegola i bayale holebero.
- <sup>4</sup> Inaga Ngode Datagaliwabe-o agali mini kowi karunaga giha koria  
 i haru dai bibe.  
 Agali hongoheore tara howa mana koorene ko ngago biaga karunaga giha kogola pele  
 ngibe.
- <sup>5</sup> Anduane Homogo Bibahende Haru Hame Ho Haga-o  
 i iha mini dunubia ho kogoni.  
 Ina igiri daliaheni howa ihondo mini mbiraore wu henego kogoni.
- <sup>6</sup> Bibahendengi ina iha hanaho harugo kogoni.  
 I aiyahanda taba hanayangi howa ina i handayaho haabo harigoni.  
 Ani harigonaga ina inaga mini yaraga halu haabo holebero.
- <sup>7</sup> Wali agali bu hearu dewalime i de hondowabi  
 ina ihondo biriru hondowabi  
 ina i hongo howaore handayaho kagonida lomanda biai ho ka.
- <sup>8</sup> Horo bibahendengi ina wali agali bu karu hendelo inaga mini yaraga halu  
 i mini leneore kegoni latagi halu haabo haruli.
- <sup>9</sup> Ayu i agali waheore howa hongo hodai bule ndo biru ngogo\*  
 ina i erembira ngialu yu waholeni nahabe laro.
- <sup>10</sup> I waitigi bu hearu tigua i bo waholenaga  
 mo mogobu howa ndelalu kagoni.
- <sup>11</sup> Tigua lalu, Ngode Datagaliwabehanda agali ogoni yu wahayadago abale minamiya.

\* 71:1: Iba 31.1-3    \* 71:3: Iba 18.2, 42.8, 90.1, 91.9    \* 71:9: Iba 92.14, Ais 46.4

Ibu biamogo bulene mbira naheoredago  
iname abale talima pugupugu bialu minu yania hamija,  
laga bialu kagoni.

12 Ngode Datagaliwabe-o i hangu helalu í kaundia nahabe.✧  
Inaga Ngode Datagaliwabe-o ina i biamogo bule abale ibabe.

13 Agali ihondo bi laedede bialu karuni  
inime ti bope halu ereba hai helabe.

Tigua i mo ko hole wai hanalu kago  
ai tini taga helo mo ko hai halu mo luluya ho helabe.

14 Anigo ina i biamogo bibelonaga ihondo mini dunubia ho kogoni.✧  
Ina inaga mini yaragaore haabo holebero.

15 Ina mana tigabi bigi biriruni wali agali bu karu lamialu holebero.  
Ina pele ngialu haru dai biriruninaga tene i manda biai nahego  
nde harugo lowa te ogoni horo bibahendengi tihondo lamiaabo holebero.

16 Anduane Homogo Ngode Datagaliwabe kego i hongo timbuniore kegonaga  
ina inaga mini yaraga halu holebero.

Ini hangu mana bayale tigabiore biaga kego lalu  
ina latagi halu holebero.

17 Ngode Datagaliwabe-o i bamba igiri emeneni hewangi  
ina i lawai haabo hariligoni.

Áyubi nde ina mbirale bayale tara tara bererunaga  
ina latagi halu haabo kogoni.

18 Ainde i agali waheore halu inaga mandariru daguame be duguame haradagua  
biyadago✧

Ngode Datagaliwabe-o ina i yu wanahabe laro.  
Ina wali agali mani holobadaruhondo inaga hongo timbuni ogobiore ka lalu lamigi  
buliya  
ini ila haabo habe.

19 Ngode Datagaliwabe-o ina mana bayale tigabi biriruni  
wali agali bibahendenaga deni panigi wiai ka.

Ina biabe hongohe timbuniore bini ngegoni ndobe.  
Agali dindini hene karu i ale mbira nahe

ini hangu bolangua haiheore kegoni.

20 Ina iha genda tandagabi tara tara ibilaga birigoni.

Inime i lone mo hongo holebere lo manda bu kogoni.  
I homaliha ngoria inime i lone mo heya holebere.

21 Ina i mini lene winigo mo yaragaore ho ngelalu  
inaga bu miniha mo palia holebere.

22 Inaga Ngode Datagaliwabe-o inaga mini bilinahe haabo kegonaga  
ina ngida ale balu inaga mini yaraga halu iba gana lolebero.

Isaraele wali agalinaga Ngode Datagaliwabe baya buruguleore kego  
ina ngida ale balu inaga mini yaraga halu iba ganaru lalu holebero.

23 Ina lalu howa turu timbuniore halu bi hongo howa ladaga holebero.  
Ina i pele ngialu mo wirigonaga

ina ne hariga hangume ndo  
 inaga minimebi gubalinimebi ihondo iba gana lalu latagi holebero.  
 24 Agalime i mo ko hole wai hanalu henego  
 ai tini ko halu mo taga hai hayagonaga  
 ina horo bibahendengi inaga mana bayale tigabi biaga kego lalu  
 wali agali bu karuhondo lamiai holebero.

## 72

### *Kini kagonaga Ngode Datagaliwabehondo bi lahenego ogo*

- 1 Ngode Datagaliwabe-o kini kagome inaga mana tigabi bulene ngeru bayuwa manda  
 bilo biawai habe.  
 Mana tigabi bulenego bayuwa manda buwa wali agalime godi lararu  
 ibugua hale howa tigabiore dabaki bilo biawai habe.  
 Ina tigabiore dabaga kedagua kini ibuguabi wali agalinaga godi larago hale halu  
 tigabi dege dabaga helo biawai habe.
- 2 Ina biawai haregola ibugua mana tigabi bulene manda buwa  
 inaga wali agali karu ibugua bayuwa hondo helo.  
 Wali agali yagibano darabi karu agali hongohe karume hingedope haragola  
 dindiha haga karuhondo mana tigabi bialu haru helo.
- 3 Wali agali tinime mbirale bigi birago bayale helobi  
 tinaga mini dungulo haabo helobi biamogo bibe.  
 Tigua mana tigabi hangu bigi bigi bialu haabo helo helabe.
- 4 Kini kagome wali agali yagibano darabi karunaga genda yu karu handalu yamogo  
 bialu  
 yagibanorume buru pale ka aleru biamogo bialu mo milo hameore ledi.  
 Wali agali yagibano darabi uruni hingedope haga agali ko karuni tinde kini agali  
 ibugua warape halu hingedo mbaralo wahelo hameore ledi.
- 5 Ni dedago dalu kaore ege dedagobi dalu wa kaore  
 inaga wali agali bu karume i mo dunini halu mitangi bialu lotu laabo helo  
 hameledi.
- 6 Kini ibugua mana bayale biragome dalu ibuwa mabuni tomo hingedaru damume  
 haragola tomo bayale anda hagadagua  
 wali agali bu karu ibunaga maname anda helo ina kini kago mo bayale habe.
- 7 Ibu kini kangi wali agali bu karuha mana tigabi bulene dungume halu anda helo.  
 Ege dalu kangi mbirale bigi birago lini dalu bayale haga bilo biamogo bibe.
- 8 Kini ibugua handame howa haru holenego  
 wali agali iba solowara biru paluyu pedaru bibahendeoreyagi howa paluyu pialu\*  
 solowara ange ederayagi karu bibahende ibugua handairi holebira.  
 Wali agali dindini paluyu pedarubi bibahende iba Yuberedisi duguaragoria howa  
 paluyu pialu  
 dindi wia maroha wali agali palumaro bidagoria handairi holebira.
- 9 Wali agali dindi ko ege kekeleke wini haga karume  
 kini ogonihondo bulu palialu ti kini ogoni ibu andanaha holebira.  
 Kini ogoni ibunaga waitigi karu tinime dindini mbala puwa mo ko howa palipe  
 holebira.
- 10 Sebenanaga kini kagomebi kini maru iba solowara biruyu mabu bilowa dindi  
 dombeneha ngarunaga karumebi  
 tigua kini ogonihondo mbirale debene maru ibu mo turu halu mulebira.  
 Arebia dindinaga kini kagomebi Idiobia dindinaga kini kagomebi

\* 72:8: Seg 9.10



libugua mbirale debeneru mo mogobu yalu ibuwa kini ogoni dege mulebira.

11 Kini bibahendeore karume ibu wanakuiha tinaga ge duli podalu bulu paliai holebira.  
Hameigini tara tara dindi bibahendeni hoyu pedaru bibahendeoreme  
kini ogoni ibunaga biabe bia hai holebira.

12 Ani bulebirago irane wali agali yagibano darabi karume kini ogoni olaragola  
ibugua tinaga bi hale halu biamogo biagaore ka.

Wali agali maru buru paleore marume namiaga hondo wahene karu  
kini ogoni ibunime de handalu migi biaga ka.

13 Kini ogoni ibugua wali agali hongo naheru mbirale nawi yagibano darabi karu  
daraore halu  
ibunime ti biamogo biaga ka.

Wali agali mbirale nawi buru paleore karu  
ibunime ti gi miaga ka.

14 Maru mini kowi karume wali agali darabi urunibi karu hangedope halu mo ko hole  
bialu karia<sup>☆</sup>  
kini ogoni ibunime ti gini miaga ka.

Kini ibugua wali agali uruni gubalini timbuniore ho kagome ti ani biamogo biaga ka.

15 Ani biaga kago manda buwa kini baya ogoni ibuore ha ho wiaaboore helo hameledo.  
Muni ngoloru Arebia tawego kini ogoni turu halu milo hameore led.

Wali agali bu karume kini ogoninaga Ngode Datagaliwabehondo bi la helo hameledo.  
Kini ogoni biamogo biaabo helonaga wali agali karume habe lalu lamulebira.

Ani larago hale halu Ngode Datagaliwabe ibugua kini ogonihondo bayale dege bialu  
ibu bayale helo biamogo bilo hameledo.

16 Dindi bibahende ngaruha widi balirubi tomo nema maru alebi anda hagahaga bialu  
dindi bare bare ngaruni nema hangume andaho namu lelo.

Lebanono dindiha mbira tomo anda haga ngadagua anda heloore hameledo.

Tano ngaruha wali agali dewa palu to lalu bo dene ngagoria  
dangi anda hagahagadagua anda halu tolotagi helo hameledo.

17 Wali agali bu karume kini baya ogoninaga miniore embeda nahelo.<sup>☆</sup>

Ibunaga mana baya biaga kini ogoni ka lalu lolenego lairi nahe  
honani li harini daho ngadagua

wali agalime kini ogoninaga mini mo yaraga haho wiaaboore helo hameledo.

Ani bialu wali agali dindi tara tarani palu ngarume Ngode Datagaliwabehondo bi  
lamialu,

Kini biagohondo bayale dege bialu bu anda helo mo bayale hiridagua  
inabi nde bayale holomaya mo bayale habe,

lalu lamigi bilo hameledo.

18 Anduane Homogo Isaraele wali agalinaga Ngode Datagaliwabe kago ibunaga mini  
mo yaragaore halimu.

Ibuni hangume mbirale bayaleore turubi o laruruni bigi biaga kagoni.

19 Ngode Datagaliwabe ibunaga mana bayaore gibi biaga kago  
ibunaga mini baya taraore ogoni mo yaraga haho wiaaboboore wilo.

Ibunaga mini mo yaraga holenemebi

ibunaga wa holenemebi

dindi bibahende ha dungume halu tolotagi heloore hameledo.

Henene aniore bilo bi labe.

☆ 72:14: Iba 116.15 ☆ 72:17: Pig 22.18, Yar 4.2, Lg 1.48

<sup>20</sup> Yasi igini Debidihanda Ngode Datagaliwabehondo bi laga binigo ai lairi ogoni.

## MBUGA TEBONE

(Iba Gana 73-89)

### 73

*Ko biaga karu mini wilo Ngode Datagaliwabenaga mana laga kago ogo*

<sup>1</sup> Ngode Datagaliwabehanda Isaraele wali agalihondo bayaore gibi turubini hangu biaga kagoni.

Ibugua wali agali tinaga bu habaneha mana ko mbira nawi tigabiore karuhondo baya turubiniore bigi biaga kagoni.

<sup>2</sup> Ibugua ani biaga kagoyu ai jore mana ko bialu pilalu penego habo laru.

I ge gundu lalu pilope halu mini mbiraore wu harugoni hadogoea lowa yu wahalu tagira pobehe haru.

<sup>3</sup> Ani harudagoni irane ina handalu hewaria wali agali mini kowi hearu tigua mbirale bigi biyaru bayale haga bialu\* ti homogo hama piyago hondowa ani haru.

Tigua biyago handarugola tinaga wiago degeni inaga miniha i nayido agini henge lolenego hongohe tagira ibiya.

Ani biyagome i mini mbiraore wu harugoni yu wahalu tagira pobehe haru.

<sup>4</sup> Ani handalu hewariabi wali agali ko biaga uruni ti warago bolenebi tandaga nolenebi mbira nahende tinaga tinginibi bayaore hongohe hearia handaru.

<sup>5</sup> Wali agali maru karume tandaga nalu kadagua wali agali ko biaga uruni ti kagoria tandaga nane kane handaga biruli.

Wali agali maru kagoria genda bulene tara tara ibu wigi biagadagua wali agali ko biaga uruni ti kagoria naibu wiraya.

<sup>6</sup> Ti genda mbira nahende howa mine timbuni halu tinaga tingini ganini wialu balagala hama ibaga biaga ka.

Ani bialu tigua wali agali maru karu bame irane nawinini motudu wini balu mo ko haga ka.

<sup>7</sup> Tinaga bu miniha mana ko ngubi tara tara buleneru hangu wai hanalu tinaga bu habaneha ko buleneme tolotagihe ka.

<sup>8</sup> Tigua wali agali maru karu mege bialu hondo oba halu bi ko tara tara biaga ka.

Tigua mine gibiore halu wali agali maru karu hangedope halu mo tandaga holeneago agua habehedabe hondole hariga hai bialu haga ka.

<sup>9</sup> Ani bialu tigua Ngode Datagaliwabe dahuliya andaga kago lalubi lo guralu haga ka.

Tininaga mini mo yaraga halu tigua hame ledadagua hangu wali agali marume bilo bidaba lalu hongo howa lamiaga ka.

<sup>10</sup> Anidagua lamiragola nde Ngode Datagaliwabenaga wali agali karumebi heba mini kowi urunime bi larago hale halu turu howa yu tiga biaga ka.

<sup>11</sup> Agali ko urunime bi urudagua laga ka.

Iname mbirale bigi beremaruni Ngode Datagaliwabe ibu manda nabulebira.

Ngode Datagaliwabe Daligaorene Daliga kago ibugua iname beremarubi laramarubi goarialu

handa walia holeneago hariga nawiore laga ka.

\* 73:3: Iba 37.1, Yar 12.1

- 12 Wali agali mini kowi karu tigua mana urunibi bigi biaga ka.  
Tinaga mbirale dewa bu payabu wia ngagoyu  
uruni ngelowa dege maru lone mo te dege bule hai bialu kagoni.
- 13 Ko biaga uruni ti ani bialu kagodago ai i mana ko mbira nabioire  
inime ini mini haru halu ko nabi tigabi harugoni o kogoni.  
Ai ti ko biyadagua i nde bua nale hogoralebu harudagoni nde irane nawini aginaga  
haruyabe.
- 14 Ngode Datagaliwabe-o ina mbiraga horombebi i tandaga dege ngiaho wialu  
egerebagi bibahendengi ina i minu baho ngegoni irane aginagabe.
- 15 Wali agali mini kowi biaru tigua layadagua ina mbira lenedale  
ina inaga wali agalime lolenedagua ndo ledole.
- 16 Ko biaga uruni tigua mbirale bigi biragonaga teneorego agidabe hondole lowa  
handalu hewaria ina handa walia habe nahe erekuibioreyane handaru.
- 17 Mitangi bialu tenego minime daba dege bialu howa handa walia nahe henego\*  
maniore Ngode Datagaliwabe inaga andaha anda pirugola tenego handa walia  
haru.  
Inaga andaha anda pirugola inaga mini biagoni wa layagola mbirale bayuwa manda  
bibehe haru.  
Wali agali ko biaga uruni tibi nde mani ogobini tagira polobada lalubi  
mitangi tagira ibu dege biya.
- 18 Ngode Datagaliwabe ina wali agali mini kowi uruni ti hariga gindigunduleore  
ngarunaga pelo pelolebere.  
Hariga gindigundule uruninaga pialu karia ge kundu lowa  
mo paraho pilope halu homo tongolo milolebere.
- 19 Ti abaleore homo tongolo mu daga holebira.  
Agali homaradagua ndo mo koore howa homolebira.
- 20 Anduane Homogo-o ko biaga uruni ti bame mbiraga emaga andaha mbaria dange  
harigi yu hagedadagua yu kago  
egerebagi gao laragola ereba hagedadagua yu karu ereba hai holebira.
- 21 Inaga miniha tandaga bialu  
tinibi toga layagola
- 22 i bu habaneha keba dege dindi halu nogo gabua mini nawi hagedadagua howa  
i mitangi bulene ereba halu  
ina mana biruru i deni ogonibi bialu harugoni.
- 23 Ani bialu howa dege ina Ngode Datagaliwabe i yu wanahe  
i hegoha kaware haparaho harugola  
ina nde inaga gini yaniho hariligoni.
- 24 Ina i aguaore habe lalu inaga bi mana bayaoreru langialu mo tiga bialu kegoni.\*  
Ani mo tiga bialu howa i hamaro berongi nde ina ihondo turu halu habiya ibu lole  
kegoni.
- 25 I de handayaho haga dahuliya andagani mende ai kabe.\*  
Mendeali nahe Ngode Datagaliwabe i hangu kegoni.  
I hangu kego manda buwa ina i gubalini timbuniore ho kogoni.  
Mbirale dindini bu payabu ngaru gubalini holene agi ngabe.  
Ina fore gubaliniho kogoni.

\* 73:17: Iba 27.4, 37.38, 77.13    \* 73:24: Iba 48.14, 49.15, 58.11    \* 73:25: Iba 16.2

26 *Í*naga minibi tinginibi hongo nahe gedaore hayaguabi<sup>☆</sup>  
 Ngode Datagaliwabe *í* *ín*aga hongo holene tene kegome  
*í* karulapeore haabo holebero.

27 Ngode Datagaliwabe *í* yu wahalu piaga karu ti pu erebaho wahalu homolebira.  
 Wali agali ala *í*hondo mini mbiraore wuwa *í* talima ibaga howa  
*á*yu *í* erembira ngialu tagira pu karu heneneore pani mialu ereba hai helolebere.

28 Uruni ani buleberegoyu *í* dege Ngode Datagaliwabe *í* kegoha hapara ho kogome<sup>☆</sup>  
 bayaore turubi *í* hoale ngagoria kogoni.  
 Anduane Homogo Bibahende Haru Haame Ho Haga-o  
*ín*aga pabe tigila *ín*i kegome kogoni howa  
 mbirale *ín*a bigi biriru agua biri lalu latagi hai holebero.

## 74

*Isaraele wali agaliru biamogo bibe lalu Ngode Datagaliwabehondo bi lenego ogo*

1 Ngode Datagaliwabe-o *ín*a inahondo erembira ngialu kego irane agibe.

*Í*naga wali agali bu kamaruhondo keba ho haabo holeberebe.

2 *Í*naga *ín*aga wali agali bu kamaru mitangi bibe.

Bambaore howa *ín*a *ín*inaga wali agaliore ina holomaya dabo helarigoni.

*Í*nime ina haru dai birigome *ín*aga wali agaliore kamagoni ndobe.

Hari Saiono *ín*i hene biago mitangi bibe.

3 Ina waitigi bu hearume *ín*aga anda hayago mo ko hai hayagoni.

Mbirale mo ko hayadaruni *ín*i hondole ibabe.

4 *Í*la waitigi biarume *ín*aga anda *í* ina baba lola haga biagoha howa  
 wai bi dalimu lalu mambolo balu mbirale wiaruni mebia haya.

*Í*naga mbirale wiruni mo batagi halu tininaga mbirale wiaru wia aribia ka.

5 Agalime irabuha ayume ira dibu paya biagadagua  
 tigua *ín*aga andaha ani biyagoni.

6 Ira pelo mbaraleni giligili bialu kau wuwa  
 anda ogoniha mo yaribiaho helaga bini hearuni  
 waitigi biaru tigua ayume diba hamame bo giala bigi biya.

7 Tigua *ín*aga anda biago giala бага bialu irame heda haya.

Dindi andabi *ín*i holene lomabia ho wini biago  
 tigua mebia hai haya.

8 Urunime ina bopeore holene mitangi bialu anidagua biya.

Ina dindiha Ngode Datagaliwabe mitangi bialu lotu lolenaga loma biahene bibahende  
 hearu anidagua biya.

9 Iname *í* mitangi bulenaga manane waliaho wini biaru bibahende mo wai haya.

*Í*naga bi mana latagi haga agali mbira *á*yu nahe kamagoni ndobe.

Ina ogonibi dege kamaore genda uruni angi ereba holobadabe  
 ina kamarume manda bibe nahe kamagoni ndobe.

10 Ngode Datagaliwabe-o waitigi uruni tigua *í* hondo oba halu lu agua holobadabe.

Tigua *ín*aga mini lo mege bialu bi ko lalu haabo holebirabe.

11 *Í*naga ina biamogo nabi kego irane agibe.

*Í* bame bira dege bidego agibe.

<sup>☆</sup> 73:26: Iba 16.5, 40.12, 84.2    <sup>☆</sup> 73:28: Iba 14.6, 40.5, Hi 10.22, Ya 4.8

- 12 Anigo Ngode Datagaliwabe-o bambaore howa í inanaga kini henego haabo kegoni.  
Ína pele ngiaabo harigola ina waime ba nabi harimagoni.
- 13 Íninaga hongo timbuni gibihegome iba solowara timbuni bereagoha\*  
hanuni ina polomayanaga iba bira migimigi bilarigoni.  
Iyibi agali wena timbuni solowaraha biraraligobi hearia bo wahai hari.
- 14 Ani bialu ína abagua ale timbuni mini Lebiadananaga\* hagueneru bo tagadaga  
birigoni.\*  
Ibunaga tingini dindi ko iba dalu naibaga wiagoha  
nogo gabua hearu nelu mirigoni.
- 15 Ína iba dindiha howa ibilarigola dugualu pugu biya.  
Iba timbuni pialu hearu hundu tegelope helaga birigoni.
- 16 Ína mbiraga horombela tu wialu\*  
ni egela hari daligaha helaga biriya.
- 17 Ína iba dindila tubari ngelalu bigi biriyagoni.\*  
Mali bibahendenaga gaea bulene horobi dalu ibulene horobi  
tuwu ngelariyagoni.
- 18 Anduane Homogo-o ína ani birigola íla waitigi bu karume  
í hondo oba halu karuni mitangi bibe.  
Tini mini nawi kariane tigua mitangi bialu  
í kego bame degeda lomanda bialu mege biaga ka.
- 19 Ínaga wali agaliru hongo nahe bu kamagonigo  
waitigi bu karume ina bope halu mo ko holigo  
ína ina yu wa nahabe.  
Waitigi karume ínaga wali agali kamaru mo ko halu kago  
ína erembira nangi ina mitangibu haabo habe laro.
- 20 Inanaga dindi lenelene ngamaru bibahendeha  
waitigime wai mo ko howaore biaga kago manda bialu  
ína habo nalolene bi ina baba lo wirigoni manda bibe.
- 21 Agali ko karume wali agali hongo nahe bo hingedene karu  
ína ti yu wanahabe.  
Wali agali yagibano burupale bu karume  
ínaga mini mo yaraga halu helo ínime ti biamogo bigi bibe.
- 22 Ngode Datagaliwabe-o ínime abale ibalu  
waitigi karuhondo bi hongo howa labe.  
Agali ko minehe bu karume  
í mege bialu hondo oba haabo haga kago mitangi bibe.
- 23 Í waitigi bu karume bi ko hongo howa lalu í mege bialu kagoni.  
Tigua ga lama ibaga bialu haabo haga kago  
Ngode Datagaliwabe-o  
tigua ani bialu karu hondo donge nahabe.

## 75

### *Ngode Datagaliwabeanda wali agali tigatiga dabaki biagago ogo*

\* 74:13: Har 14.21 \* 74:14: ogoni mbuga maruha ibu abagua ale nga lalu gilibu nga. Maruha ibu iba ibia ale gibi hiriribi beda lalu gilibu nga. Hobane ogoni gilibu ngago bi yobage ale lalu ibu Iyibinaga agali haguane hearu mitangi bialu leda. Ais 27.1, Ese 29.3, Yob 41.1 de handabe. ✧ 74:14: Yob 41.1, Iba 104.26, Ais 27.1 ✧ 74:16: Pig 1.14 ✧ 74:17: Pig 8.22, Ab 17.26



- <sup>1</sup> Ngode Datagaliwabe-o iname íhondo kaj lalu kama.  
 Íhondoore iname kaj laabo halu kamagoni.  
 Iname í mini leneore kego latagi halu  
 mbirale bayale tara tara ína biriru te lalu kamagoni.
- <sup>2</sup> Ngode Datagaliwabehanda lalu,  
 Godi lolene horo mbira daba bagiho ngeledo.  
 Ina godi larogo tigabiore lalu  
 wali agali ta nabihondo ogobi dege dege laruli.
- <sup>3</sup> Wali agalibi nogo tara tarabi dindini bu karuni bibahende gi hai howa duru layaguabi  
 dindibi dumbirumbi bialu ema biyaguabi  
 ina dindinaga gene dunini karu yania ho kogola hongohe wiaabo holebira.
- <sup>4</sup> Ina wali agali mana ko biaga hearuhondo,  
 Tíore mine nahe halimu, lalu  
 wali agali balagala haga hearuhondo,  
 Tíninaga mini yaraga nahe halimu.
- <sup>5</sup> Tígua tíni mandabi tingi howa mine nahalimu, lalu laragoni.
- <sup>6</sup> Wali agalime bialu karu manani dabaki bule  
 ni tagira ibiragohayagi howabi ni paliragohayagi howabi  
 uyurahayagi howabi unurahayagi howabi ndo ibaga.
- <sup>7</sup> Ngode Datagaliwabe ibunimeore daba ki biaga ka.\*  
 Ibugua agali mendego mo dindiha halu mendego mo yaraga haga ka.
- <sup>8</sup> Anduane Homogohanda ibunaga gini gabo be mbira yu haga.  
 Gabo be ogoniha ibunaga keba holene waini iba ale biru toleda.  
 Ibumime odope haragola wali agali ko biaga karume naiore haga.
- <sup>9</sup> Ina horo bibahendengi Yagabanaga Ngode Datagaliwabe kagonaga mini lalu howa  
 ibunaga mini yaraga halu iba gana lalu haabo holebero.
- <sup>10</sup> Ibugua wali agali ko biaga karunaga hongo bo ereba halu  
 wali agali tigabi karunaga hongo holene ibugua mo tago halu timbuniore  
 helolebira.

## 76

### *Ngode Datagaliwabehanda wai bialu wayali haga ka lenego ogo*

- <sup>1</sup> Yuda dindiha karu tigua Ngode Datagaliwabe ibu kaore lalu manda biai ho ka.  
 Isaraele dindiha karubi tigua ibu mini leneore ka lalu mo yaraga haga ka.
- <sup>2</sup> Ibunaga anda Yarusalemeha ka.  
 Ibu Hari Saiono kagoha haabo haga kagoni.
- <sup>3</sup> Ibu ogoniha howa ibugua waitigirunaga danda timuru bo gingirulo wahaya.  
 Yandarerubi humbibi wai biagane ale dameneru bibahendeore  
 ibugua bo gingirulo wahai haya.
- <sup>4</sup> Ngode Datagaliwabe-o í wá holene taraore kegoni.  
 Í mini lene howa kini duniniore kegoni.  
 Í daligaore howa hari mini lene timbuni wedaru dindiha lowa  
 í bolanguahe daligaore kegoni.  
 Hari uruniha howa ína waitigi baba wai bialu wayali halu dai bu kegoni.
- <sup>5</sup> Tigua ti baba wai bialu wayali hayarume

\* 75:7: 1 Sml 2.7, Iba 50.6, 147.6, Dan 2.21

ami agali hongohe hearunaga wai biagane mbirale karulo hayaru  
yu wai hayiya.

Ani bialu ti homaiore hayiya.

Tinaga hongobi wai bulenaga mugube yu hayarubi  
bameore habane nabulene haya.

<sup>6</sup>Yagabanaga Ngode Datagaliwabe-o ina tihondo bi hongo howa larigola  
tinaga nogo hosibi agali nogo hosini berearubi  
ti bibahende homai halu tingini dindini wima piyiya.

<sup>7</sup>Anigo Ngode Datagaliwabe-o ina bibahende ihondo giore haga bu kamaruni ndobe.

Í keba ho kegola mbirali ai ibugua inaga deni ibu holobadabe.

Mbirali naholebira ndobe.

<sup>8</sup>Í dahuliya andagaha howa wali agali ko birimi lalu latagi harigola  
ti bibahendeore hearume gi timbuni howa  
bi nale ema nabi haya.

<sup>9</sup>Horo ogoningi wali agali marume mo ko hene hearu  
ina biamogo bule heyu hariya.

<sup>10</sup>Agali keba timbuni haragome✧

wali agali maru karu tigua inaga mini mo yaraga helo haga.

Agali waiha homa nabi karume

í mitangi bialu lotu lolene ngadagua lalu holebira.

<sup>11</sup>Tigua Anduane Homogo tinaga Ngode Datagaliwabehondo  
mbirale mbira mule lalu lo wirimidagua  
ibuhondo miaore bilimu.

Wali agali tara tara dindi kawareni kamiru

tiguabi ibuhondo mbiraleru turu halu milimu.

Ngode Datagaliwabehanda wali agali ibuhondo gi helo mo gi haga ka.

<sup>12</sup>Ibugua kini mine haga karu mo dindiha halu

kini maru dindi tara tarani karubi ibugua ti mo gi haga ka.

## 77

*Genda ibu wiyagola Ngode Datagaliwabe olenego ogo*

<sup>1</sup>Ina Ngode Datagaliwabehondo hongo howa olalu kogoni.✧

Ina ibuhondo bi larogo hale habe lalu olalu kogoni.

<sup>2</sup>Genda anda ibirangi ina Anduane Homogohondo bi laruli.

Mbiraga bibahendengi ina gi yaraga halu Anduane Homogohondo bi laruligoyu  
iha mo palia holene nawi dege kogoni.

<sup>3</sup>Ina Ngode Datagaliwabe mitangi biaabo halu koria  
inaga bu miniha dugu bialu haruli.

Ina mitangitangi bialu mini hurula bialu kogola  
inaga miniha genda dege dindi ho haruli.

<sup>4</sup>Ibugua i palia hondo nahe mo yangayangabu helaga kagoni.

Inaga bu miniha genda yu kogome bi labe naheore kogoni.

<sup>5</sup>Ainde ini bamba bayale hama ibiniru mitangibu dai bialu haruli.

Mali ala bolangua halu peneru mitangiore bialu haruli.

<sup>6</sup>Mbiraga paluwa ina mitangitangi dege biruli.✧

Inaga miniha mini hurula bu howa inihondo bi ogobi laruli,

<sup>7</sup> Anduane Homogohanda inahondo erembira ngialu haabo holebiradabe.

Inahondo turu lone naholobadabe.

<sup>8</sup> Ibugua ina dara howa gubalini haraligo hairi áyu kagonidabe.

Ibugua buleore lalu bi lo wiyaru habo layadabe.

<sup>9</sup> Ngode Datagaliwabehanda ina dara howa biamogo bulene embeda hayabe tobaheda. Ibunaga dara holene winigo ai keba holene wia aribia hayadabe, lo mitangi bu harugoni.

<sup>10</sup> Ina urunidagua mitangibu howa lalu, Ngode Datagaliwabe Daligaorene Daliga kago ibugua ina áyu pele ngulenego manga hayada.

Ibu ogonibi haruada mitangi bialu

inaga bu miniha tandaga timbuniore ho kogoni ndobe, larugoni.

<sup>11</sup> Anduane Homogo-o biabe timbuni ina biriruni mitangibu dai bulebero.

Bambaore ina mbirale tara nahendene ale bigi biriru mitangi budai bulebero.

<sup>12</sup> Biabe bibahendeore ina biriru damene mitangi biaiore holebero.

Ina biabe hongohe taraore bigi biriruni mitangi biai holebero.

<sup>13</sup> Ngode Datagaliwabe-o ina bigi biriligo bibahende bayale tigabiore birili.

Mbirale bi pupu wule dama mitangi bialu gime wabini ngaruni

bibahendeore í ale mbira nawiore.

Ina uruni bolangua haihe kegoni.

<sup>14</sup> Ngode Datagaliwabe-o mbirale nahendene ale agalime bibe nahe ngaru

biai haga ini hanguore kegoni.

Bamba ina wali agali dindi tara tarani bu hearuhondo

ininaga hongo timbuni walia harigoni.

<sup>15</sup> Yagaba Yosebelanaga aguanene

ininaga wali agali mani andaho aribia hene hearu

ininaga hongoooreme pele mialu haru dai birigoni.

<sup>16</sup> Ngode Datagaliwabe-o bamba iba berearume í hondowa gi hai haya.

Iba solowara timbuni berearumebi duru lalu biraya.

<sup>17</sup> Beralibame iba dalu timbuniore ibira halu

hari kilikulu timbuniore layuagobi

hari daba migimege laga bialubi uruni bibahende biai haya.

<sup>18</sup> Humbirini wai biyago dombenaha howa hari kilikulu timbuni lelarigoni.

Hari daba migimege lelarigome dindi bibahende ha wá hagimbu biyagola

dindi ogo mogo lalu dumbirumbi biagimbu biya.

<sup>19</sup> Iba yaribu biyagoria ini iba daligani pirigoni.

Iba solowara timbuni bereagoha hariga bo wialu pirigoni.

Í penegoha ge ngane nahandabeheya.

<sup>20</sup> Ini haru haganeore howa bamba halu pirigola

inaga wali agali í talima ibagaya.

Mosese Aronola haru haga helarigome

libugua wali agaliru haru howa handayaho hayagoni.

## 78

*Ngode Datagaliwabe ibunaga wali agaliru baba bi lenego ogo*

<sup>1</sup> Inaga wali agaliru-o ina tihondo bi lawai harogo

tigua bayuwa hale haiore halimu.

Ina bi larogo hale dugua halu baya hangu hale halimu.

<sup>2</sup> Ina bi yobageru hangu lolebero.\*

Mbirale nahendene ale tara tara bamba wia do ho winiru  
ina áyu garea lalu manane walia halu langulebero.

<sup>3</sup> Bamba ina mamalirume te uruni inahondo langiyagola  
iname hale howa mandabu harima.

<sup>4</sup> Iname nde bi uruni ina waneiginiruhondo lamia nabi ya do holene nakarulapeore.  
Anduane Homogonaga hongo timbuniorehe kagonagabi  
biabe hongohe damene binigonagabi agalime nabiaga ale bigi binigonagabi  
iname ina waneigini aguanene mani holebiraru lamuleberema.

<sup>5</sup> Ibugua ibunaga bi mana lowinigo  
Israele wali agaliruhondo lamigi bini.

Ibunaga mana bulene winigo Yagaba aguanenerume taluwa bialu helo lamini.

Ibugua bamba ina mamaliruhondo lalu,

Tígua tínaga waneiginihondo inaga bi mana ogoni lawai halimu, lalu lamini.

<sup>6</sup> Tí waneigini aguaneru mani holobadarume hale halu lo manda bilo.

Tigua ti waneiginiru maniore hama polobadaru lawai hama puabo haragola ti  
manda biai helobi lawai halimu, lene.

<sup>7</sup> Tigua anidagua lawai hama puabo hayagua nde  
mani holobadaru tigua Ngode Datagaliwabhondo mini mbiraore wu halu  
ibugua biabe hongohe bialu henedaru embeda nahe yu haabo holebira.

Yu haabo howa tigua ibunaga mana bulene ngaru taluwa bialu haabo holebira.

<sup>8</sup> Tinaga mamalime ala bialu henedagua naholebira.

Tinaga mamalime doga haga howa Ngode Datagaliwabenaga bi mo wahalu  
ibuhondo mini mbiraore hongo howa nawi halu  
mini bilina nahe hene.

<sup>9</sup> Bamba Eberaimi hameigini tigua danda timu yandarerume  
wai hongo howa bule pialu hearia baya handala ibida piai hene.

<sup>10</sup> Ngode Datagaliwabehanda habo nalolene bi lowinigo tigua habo lalu  
ibunaga bi mana bulene winirubi talialu bia nabi hene.

<sup>11</sup> Ibugua tininaga deniore howa mbirale biyaru damenebi  
agalime nabiagane ale biyaru bibahendebi  
tigua embeda hai heneya.

<sup>12</sup> Tinaga mamaliru Iyibi dindiha dindi emene mbira mini Soana wiagoria heagola\*  
ti de hendeaore dege Ngode Datagaliwabehanda agalime nabiagane ale dewa  
biniya.

<sup>13</sup> Ibugua iba solowara timbuni bereago mo bira li ni bilowa\*  
Israele wali agaliru dombeni haru pene.

Iba bira li ni biyagola iba ibuni bira amu nana bialu pabe ale hene.

<sup>14</sup> Horombe ibuni hari beraliba mbiraha howa ti haru bamba halu\*  
mbiraga ibuni ira hungu mbiraha howa ti haru halu pu bamba haga biniya.

<sup>15</sup> Ibugua dindi ko iba naibaga wiagoria howa ege tole bayagola\*  
iba duguatagi helayagola wali agali ti iba ogoni nalu hene.

<sup>16</sup> Ibugua ege toleha howa iba ibilayagola  
iba timbuni piagagobi pupe halu piya.

\* 78:2: Md 13.35    \* 78:12: Har 7.8-12.32    \* 78:13: Har 14.21-22    \* 78:14: Har 13.21-22    \* 78:15: Har 17.1-7, Dag 20.2-13

- 17 Ibugua ani biyagolabi tigua Ngode Datagaliwabe kagohondo mana ko hangu bialu haabo haya.  
Dindi ko iba dalu naibaga wiagoha howa  
tigua Daligaorene Daliga kagohondo mine halu doga haabo haya.
- 18 Tigua Ngode Datagaliwabe ba handalu<sup>☆</sup>  
tomo ti hame timbuni layaru ibuhondo hongo howa ngi lalu haya.
- 19 Tigua Ngode Datagaliwabe mege bialu lalu,  
Ngode Datagaliwabehanda ina dindi ko ogoria kamagoha  
tomo dewa ngia ngulebadabe, lalu heneya.
- 20 Ibugua abale heneneore ege tole bayagola  
iba bayale timbuni tagira ibilayagodago  
ai dindi ko ogoriabi nogo ega mberediru ngulene karulapedabe, laga bialu hene.
- 21 Tigua bi ogoni lalu heago hale howa  
Anduane Homogo ibu keba ho hene.  
Ibugua keba halu Yagaba aguane biaru bu heagoha ira hedope hene.  
Ani buwa ibugua keba ala hayago timbuniore ho hene.
- 22 Keba henedagoni irane tigua ibuhondo mini mbiraore nawiyagonaga ibu keba hene.  
Ti bayale holenaga ibuhondo ina pele ngi lalubi  
mini mbiraorebi nawiore hene.
- 23 Uruni biyadaruni waha lowa ibugua hari li kagohondo bi layagola  
hari haedene bialu henge winiya.
- 24 Ibugua hariha howa tomo ibira helayagola<sup>☆</sup>  
tomo ogoni dahuliya andaga tawe mini mena ti nelo mini.
- 25 Tigua dahuliyalinaga tomo ogoni mialu nene.  
Ngode Datagaliwabehanda tihondo tomo dewaore miyagola  
ti nalu no karula pene.
- 26 Mani ibugua puyabu hongohe ni tagira ibiragohayagi howa puloyu ibilene.  
Ibunaga hongome dege puyabu dindi abene unurahayagi howa puloyu ibilene.
- 27 Ibugua ega dewaore be abalu dugupe haradagua bialu  
iba angeni iba mu wiradagua bialu  
ti heagoria odo ibira ibira bilene.
- 28 Ngode Datagaliwabehanda ega uruni ti heagoria ibira helalu  
ti balai anda bu hemigoha manda manda tagira wiaru bibahendeha biru mabu  
bilene.
- 29 Wali agali tigua tomo uruni nalu no karula pene.  
Mbirale uruni ngi lalu wali agalime dugu bialu hayaruni  
Ngode Datagaliwabehanda mini.
- 30 Tigua tomo uruni na nalu hayagoyu  
tinaga noa holene hame ereba nahe tomo na dege bialu heaore
- 31 Ngode Datagaliwabehanda tihondo keba timbuniore ho howa  
Isaraeali miniwi hongohe bu hearubi  
igiri daliahe hearubi bibahende bo wahaiore hene.
- 32 Ngode Datagaliwabehanda tihondo agalime nabiagane ale uruni biyago hondowa  
wali agali bu hearume mana ko dege bialu haya.  
Tigua ibuhondo mini mbiraore nawi dege haya.
- 33 Tigua ani bialu heagola ibugua ti abaleore ne harigaha howa  
buhe latagi haradagua bialu bo wahaiore hene.

<sup>☆</sup> 78:18: Har 16.2-15, Dag 11.4-23, 11.31-35    <sup>☆</sup> 78:24: Yo 6.31



- Ibugua ti heagoria ko gibi anda ibilayagome  
ti dindini holene winigo abaleore mo ereba ho wahai hene.
- 34 Ngode Datagaliwabehanda maru ani bo wahai hayago de hondowa  
maru hearume ibu mitangibu dai bialu tinaga mini beregedalu  
mini mbiraore wiai halu ibuhondo bi hongo howaore lalu hene.
- 35 Ngode Datagaliwabeibunime ti haru hagaore howa<sup>☆</sup>  
tigua ibu tinaga humbi ale ka lo mandabu hene.  
Ibu Daligaorene Daliga kago ibugua ti biamogo biagaore kalo  
manda bu hai hene.
- 36 Tigua ani manda biyagoyu  
tinaga ne harigaha howa ibuhondo bi henene ndo bame bi degeme lalu hene.
- 37 Tinaga bu miniha ibula mini hana haga nabi hene.<sup>☆</sup>  
Tigua ibunaga habo nalolene bi lo wiyaru  
pugualu ha dege bini.
- 38 Ani biyago bialu helowa Ngode Datagaliwabe ibugua ti dara howa  
tinaga ko wiago domo wahai halu ti bo wa nahe helene.  
Tigua ko biyago hondowa ibugua keba ho donge howa  
ibunaga mini haru haga bialu wahaga bini.
- 39 Ibugua mitangi budai bialu ti wali agali ha kagonigo<sup>☆</sup>  
ti bame puyabu mbira abaleore ibalu pu bolangua hagagobi dege kagonidalo  
mitangi bini.
- 40 Horo bibahendengi tigua dindi ko iba dalu naibaga wiagoha howa  
ibunaga bi mo wahalu ti dogaga hene.  
Tigua halu dewaore ibu mo genda haga bialu hene.
- 41 Tigua Ngode Datagaliwabe ba handalu haabo haga hene.  
Isaraealinaga Ngode Datagaliwabe mini tigabi baya burugule kago  
tigua mo genda haga bini.
- 42 Tigua ibu hongo gibihe kago embeda halu  
ibugua ti waitigi giha hearia haru dai biyagobi mitangi nabi hene.
- 43 Ogoningi ibugua Iyibi dindiha dindi emene mini Soana wiagoria  
agalime nabiagane ale dewaore bialu hayagobi ti embeda hene.
- 44 Iba bibahende peago ibugua mo darama bume hai helayagola<sup>☆</sup>  
Iyibi wali agali hearume iba nolene nawini.
- 45 Bunguna tawalina dewa ibilayarume ti hayaga bini.<sup>☆</sup>  
Yago dewabi ibilayagola yago biarume  
tinaga mabuha tomo hengearu mo ko hai hene.
- 46 Ngode Datagaliwabehanda pagaya ale tara dewa ti hearia ibilayagola<sup>☆</sup>  
Iyibi wali agalirunaga mabuni tomo hengearu damene nai hene.
- 47 Ibugua dalu dindiguni timbuni ibilayagome<sup>☆</sup>  
tinaga pu mbira lini daga mini gerebi hearu  
bibahende bo gindulo wahaiore helene.  
Ira poge ale bu hearubi kewaro ibirahayagome  
bo gilo wahai helene.
- 48 Dalu dindiguni timbuni ibilayagome tinaga nogo bulumaga bo homelalu  
hari daba ibilalu nogo sibi damenerubi bo wahaiore helene.
- 49 Ibugua Iyibi wali agali biaruhondo keba timbuniore ha ho wiaabo halu

<sup>☆</sup> 78:35: Har 15.13, Man 7.8, Ais 41.14, 63.9    <sup>☆</sup> 78:37: Ab 8.21    <sup>☆</sup> 78:39: Iba 103.14-16, Yo 3.6-8, Ya 4.14    <sup>☆</sup> 78:44: Har 7.17-21    <sup>☆</sup> 78:45: Har 8.1-6, 8.20-24    <sup>☆</sup> 78:46: Har 10.12-15    <sup>☆</sup> 78:47: Har 9.22-25

- dahuliyalirume ti mo ko holene tara tara ibilaga bini.
- 50 Ibugua ibunaga keba holene wanahe  
tiha warago timbuni mbira ibilayagome  
wali agali homa dege dindi hene.
- 51 Iyibi wali agalinaga igiri wahene damene bibahende bu hearu✧  
ibugua homelo bo wahai hene.
- 52 Mani ibugua ibuni nogo sibi haru haga ale howa✧  
ibunaga wali agali biaru haru tagira pialu  
dindi ko iba dalu naibaga wiagoha howa ibuni bamba halu  
hariga walia hama pene.
- 53 Ibugua ti haru halu piyagola✧  
tiha gi holene mbira nawi howa bayaleore hene.  
Ti waitigi biaru dege iba solowarame bo nai helene.
- 54 Ibugua ti ibunaga dindi loma biaho wiagoha haru halu ibini.✧  
Dindi ogoni dindi hari ibuninaga hongomeore mo wini.
- 55 Ibunaga wali agaliru haru ibalu howa✧  
wali agali tara tara dindi ogoriani hene bu hearu bo talia togolene.  
Dindi ogoni Isaraele hameigini bibahendehondo tu wa tahalu  
ibugua dindi andabi ti helo mo migi bini.
- 56 Ibugua ogoni biai hayagola✧  
Isaraele wali agali tigua Ngode Datagaliwabe Daligaorene Daliga kagohondo dogo  
howa  
ibu ba hendene.  
Tigua ibunaga mana bulene winigo talia nabi dege hene.
- 57 Tinaga mamalirume bamba bialu henedagua tiguabi nde dogo howa  
ibunaga bi mo wahaga bialu hene.  
Wali agali uruni ti tiga nabioire timu yole ngaligobi hene.
- 58 Dama mitangi bialu mbirale gime wabini wiaruhondo bi pupu wulenaga anda bu  
helaga biyagome  
Ngode Datagaliwabe mo keba haya.  
Tigua dama mitangi bialu mbirale bi pupu wulenaga gime wabigi biyagome  
Ngode Datagaliwabe mo keba ha haya.
- 59 Ngode Datagaliwabehanda tigua mana bialu hearu hondowa  
ibu keba timbuniore ho howa  
Isaraele wali agali erembira mialu wahene.
- 60 Ibugua ibunaga Balai Anda Silo tanoni heagobi wahene.✧  
Anda ogoniha howa ibu wali agali dege dombeneha haabo haga henego  
wa dege hene.
- 61 Ina baba waitigi hearume ibunaga Habo Nalolene Bi lo winigonaga Mbogoyi biago✧  
mo yalu pelo wahene.  
Mbogoyi ogoriani howa ibunaga hongo holenebi wá holenebi timbuniore  
tihondo walia haga wini.
- 62 Ibunaga wali agaliru baba keba timbuniho howa  
ti waitigime ibalu bo wahai helo yupe ho hene.
- 63 Igiri daliahe hearu waime bo wahai hayagola  
wandari mabUAGE berearu ti dabu bulene igiri mbira nahene.

✧ 78:51: Har 12.29 ✧ 78:52: Har 13.17-22 ✧ 78:53: Har 14.26-28 ✧ 78:54: Har 15.17, Yos 3.14-17 ✧ 78:55:  
Yos 11.16-23 ✧ 78:56: Hgn 2.11-15 ✧ 78:60: Yos 18.1, Yar 7.12-14, 26.6 ✧ 78:61: 1 Sml 4.4-22

64 Agali loma binigo mo miaga hearu bo wahai hayagola  
ti oneme dara howa dugu bialu birulene henge nawini.

65 Aniore biagola Anduane Homogo ibu agali dagiani palene heyaradagua bialu  
agali hongoheme waini iba dewa nalu bi hongo howa lagadagua lalu biya.

66 Ibugua waitigi hearu baba wai bialu ti bo talia dai bini.  
Ti bopeore hayagola tigua taga timbuni halu  
wai lone bibe nahe hene.

67 Yosebe aguanene bu hearu erembira mialu  
ibugua Eberaimi hameigini hearu ariabi mbira dabo hela nabi wahene.

68 Ti wahalu ibugua Yuda hameigini aria dabo helalu  
hari ibuniore gubalini ho haga Saiono biagobi dabene.

69 Hari hambene ogoriani ibugua ibunaga anda Dahuliya andagaha kagobi bini.  
Ibunaga anda ogoni hongohe  
dindi ogo hongohe ngagobi haabo helo  
ibugua bu helene.

70 Ngode Datagaliwabehanda ibunaga biabe biahaga helo Debidi dabaya.✧

Ibugua Debidi nogo sibiru haru haga hearia dabo helayiya.

71 Ngode Datagaliwabehanda Debidi ibu Isaraele wali agaliru haru haga kini helo dabo  
helayiya.

72 Debidi ibu mini tigabi howa wali agaliru haru haga hene.✧

Ibugua haru holene mugube yu howa  
ti baya hangu haru halu handayaho hayiya.

## 79

### *Isaraele wali agali biamogo bilo Ngode Datagaliwabehondo bi la henego ogo*

1 Ngode Datagaliwabe-o wali agali tara tara í mitangi nabiaga karume✧  
ínaga dindi wai bialu karulole ibu ka.

Tigua anda ínagaore helo loma biaho helarigoha anda puwa mebia haya.  
Yarusalemebi mo ko halu bo gialo wahai haya.

2 Tigua ínaga wali agali bo wahalu ega bodo hariawe aleme nelu  
tinaga tingini ngelalu pene.

Ínaga biabe biahaga wali agali hearu bo wahai hayagola  
nogo gabua bu hearume tinaga tingini nalu kagoni ndobe.

3 Waitigi biarume ínaga wali agali biaru bo wahayagola  
uruninaga darama Yarusaleme tanoha iba poradagua pialu kagoni.

Homayaru mo horo holene agali mbira naheoreya.

4 Hameigini tara tara ina kamagoria kaware bu karume  
ina mege buwa hondo oba halu bi kuru laga bialu ka.

5 Anduane Homogo ínaga inahondo keba ho haabo holeberebe.✧

Ínaga kebago hongohe ira hungu ale dalu hundia nabulene kebe be agua bidebe.

6 Hameigini tara tara í mitangi bialu lotu nalagabi ínihondo bi nalagabi karu  
tihondo keba hariyagua nde karulapeda.

7 Wali agali uruni tigua ínaga wali agali hearu bo wahai halu  
ínaga dindi andaru mo ko halu mo labu hai haya.

8 Inanaga mamalirume mana ko bialu hayagonaga pani nolene winigo

✧ 78:70: 1 Sml 16.11-12, 2 Sml 7.8, 1 Bit 17.7 ✧ 78:72: 1 Kin 9.4 ✧ 79:1: 2 Kin 25.8-10, 2 Bit 36.17-19, Yar 52.12-14 ✧ 79:5: Iba 85.5, Ese 38.19

- inahondo nguleni nangibe.  
 Ina mini dege dindi ho kamago hondowa dara halu  
 inanaga mini mbiraore ngamago mo hongo habe.✧
- <sup>9</sup> Ngode Datagaliwabe-o ina pele ngiaga íore kegoni.✧  
 Í mini leneore kegome ina mitangi bialu biamogo bibe.  
 Iname ko birimaru domo wahalu ina haru dai bibe.  
<sup>10</sup> Hameigini tara tara bu karume lalu,  
 Tí naga Ngode Datagaliwabe agoha kabe, laga bialu kago  
 irane aginaga ína ti ani leledebe.  
 Hameigini tara tara uruni tigua wali agali ínaga biabe biahaga bu hearu  
 bo wahai halu tinaga darama piyadagua tininaga darama ani pelo  
 ínaga tini bo waharego ina hondole hamelo kama.
- <sup>11</sup> Garabaya andaha bu karume dugu biarugo hale habe.  
 Waitigi bu karume inanaga wali agali garabaya karu  
 ti homelo bolene nga layago nahomelo  
 íninaga hongo timbuni ngegome ti haru dai bibe.
- <sup>12</sup> Anduane Homogo-o waitigi agali uruni tigua íhondo bi ko laabo hayagonaga  
 ínaga tihondo pani ka halu miadai bibe.
- <sup>13</sup> Ína ani beregola ina nogo sibi ale howa ínaga wali agali bu kamarume  
 íhondo kai laabo holeberema.  
 Inanaga waneigini aguaneneru mani hama polobadaru tiguabi  
 ínaga mini yaraga halu hadege bulebira.

## 80

*Isaraele wali agalime Ngode Datagaliwabehondo bi lalu ti lone hongo howa holomaya biamogo bibe lenego ogo*

- <sup>1</sup> Isaraele wali agalinaga Haru Haga-o iname bi langeremaru hale habe.✧  
 Ina nogo sibi ale bu kamarunaga haru haga íni kegonigo  
 iname dugu bialu lamaru hale habe.  
 Dahuliyali babaganehe kirali kago labo dindiha helowa  
 ínaga de handape howa handayaho kegoni.
- <sup>2</sup> Ina Eberaimi hameiginibi Beniyamini hameiginibi Manase hameiginibi bu ka-  
 maruhondo ínaga mo walia halu  
 ínaga dara holene ogoni inahondo mo walia habe.  
 Inaga hongo holene timbuniore ngegoni mo walia halu  
 ina bayale holomaya biamogo bibe.
- <sup>3</sup> Ngode Datagaliwabe-o ina lone íni keria haru dai bibe.  
 Ina bayuwa holomaya ínaga dara holene walia halu  
 ina biamogo bibe.
- <sup>4</sup> Anduane Homogo Ngode Datagaliwabe Hongo Haiheore-o  
 ínaga wali agali kamarume íhondo bi laramago hale howa  
 í dara nahe handa taraho kegoni dege  
 keba haho wiaaboore hole kebe.
- <sup>5</sup> Dara holene ngirigo tomo ale nalu de iba ngirigo iba ale nalu kamagoni.
- <sup>6</sup> Hameigini tara tara ina baba mandagi handa ai nai palearume anda ibalu  
 inanaga dindi wimago ti i hole lowa garere bilo  
 ínaga mo garere bia harigoni.

Ani biyago handayagola inanaga waitigi bu hearume  
inanaga dongone hondo wahalu mege bialu hondo oba hayagoni.

<sup>7</sup> Ani biyago Ngode Datagaliwabe Hongo Haiheore-o  
ínaga dara holene walia halu ina lone haru dai bibe.

Ína ina dara halu lone pu ereba naholomaya haru daibu helabe.

<sup>8</sup> Pu mbira lini daga mini gerebi mbira Iyibi dindini hearia egene dogodo yalu ibuwa<sup>✧</sup>  
maru dindi ogoriani hene hearu dugu ba tagitagi buwa  
gerebi lini daga pu ogoni dugu ba tagi hariru henedagoria hongo aribia harigoni.

<sup>9</sup> Gerebi lini daga pu ogoni ibu bayuwa anda helonaga hama ba ai nai buwa  
hangarigoni.

Hengegola pu o biagoni anda halu  
pini dindiha unuraore dalipe halu bayaore anda hayagoni.

Pu biagonaga yuni maganeru yulume hayagola  
dindi bibahende namulai hayagoni.

<sup>10</sup> Ibunaga maganerume hari wiaru angua hai halu  
ibunaga maganeme ira tamia timbuni gibi hearu angua hai hayagoni.

<sup>11</sup> Gerebi lini daga pu ogoni ibunaga magane yulu yalu pialu  
amu iba solowara mini Medidereniana bedagoria dogolo paga hayagoni.

Ani bialu hoyulo yalu pialu puni Iba Yuberedisi poragoria yulu paga hayagoni.

<sup>12</sup> Bayaore ani anda hayagoyu  
ai gerebi lini mabu ogoninaga pabe ho mabu biago aginaga podope haribe.

Pabe biagoni podope hariyagome  
ai wali agali ti hariga o biagoniha pume halu  
gerebi lini do wiaruni bame gi dege palia habehe ngagoni.

<sup>13</sup> Nogo gabua bu karume geme hengedo ngagola  
ema bialu piaga ale karume nama aribia halu kagoni.

<sup>14</sup> Ani bidago Ngode Datagaliwabe Hongo Haiheore-o  
ainde lone mini wiadai bialu ina darabi o bu kamagoni  
lone daraho dai bibe.

Ína Dahuliya andagani kegoni howa ina kamago de handadali halu  
ina biamogo bule ibabe.

Irane ina ínaga pu gerebi lini daga ale ínime hangarigo kamagoni.

<sup>15</sup> Pu mbira lini daga mini gerebi biago íninaga hongome hangarigoni  
ina o bu kamagonigo ina pele ngule ibabe.

Pu o biagoni áyu dege hongone hongo halu anda helo  
mo anda harigonibi kamagoni.

<sup>16</sup> Inanaga waitigi hearume gerebi lini daga pu biagoni dibupe howa ira bo delalu  
kagoni.

Tigua ani bialu kago  
Ngode Datagaliwabe ína inanaga waitigi uruni handabe manga halu  
bibahendeore bo mburilai habe.

<sup>17</sup> Uruni ani bo mburi lalu ina íninaga waneigini holomaya dabene biago kamaruni  
ina mo anda halu mo hongo harigoni kamago  
ai áyu ina de hondo halu biamogoore bibe.

<sup>18</sup> Ína ani biamogo biriyagua iname í helo wahalu lone napoleore beremagoni.  
Ani buleberemago ína ina hongohelabe.

<sup>✧</sup> 80:8: Ais 5.1-7



Ína ani heledegola iname ínaga mini mo yaraga halu haabo holeberema.

<sup>19</sup> Anduane Homogo Ngode Datagaliwabe Hongo Haiheore-o  
 ina íni keria ina haru dai bibe.  
 Ina nahome yo pialu polomaya  
 ina dara halu biamogo bibe.

## 81

*Turu halu mandagi ngoai howa lotu lolene horongi iba gana lenego ogo*

<sup>1</sup> Ina mo hongo haga Ngode Datagaliwabe kagohondo turu howa bi dalimu lama.  
 Yagabanaga Ngode Datagaliwabe kagonaga mini yaraga halu  
 iba gana lamíya.

<sup>2</sup> Irabitele kilinglele lalu bayuwa bamiya.  
 Gawa ale yugulelerubi baya hangu hibú howa mo bila hama.

<sup>3</sup> Ege pigane ngabu laragolabi ege do hanuni haragolabi<sup>☆</sup>  
 turu halu mandagi ngoai howa lotu lolene horo tagira ibiragonaga  
 biguliru pu lolene nga.

<sup>4</sup> Ina Isaraele wali agalime mana bulene ngago ogoni.  
 Yagabanaga Ngode Datagaliwabe ibunime mana ogoni bulene inahondo nginigo  
 anidagua bulene nga.

<sup>5</sup> Horo mbiru Ngode Datagaliwabe ibugua Iyibiali baba wai bu piyangi mana ogoni  
 tehinuwa  
 ina Isaraele wali agali kamaruhondo ngiya.

Mbiralime bi mbira laruago hale kogo aiwa laruabe í manda nabi ko.

<sup>6</sup> Bi laruagome lalu,  
 Tínga payani mbirale gendabi yu harimiruni ínaga mo wahai haru.  
 Tígua erekui biabe timbuni biaga kamiru  
 dindini ibiraho ngeladaba laru.

<sup>7</sup> Tígua genda yu howa í olarimíngi ínaga tí biamogo birugoni.<sup>☆</sup>  
 Hari kilikulu larago dombeneha howa  
 ínaga bí larimigo hale haru.  
 Bamba tí Meriba iba bereagoria hemingi  
 ínaga tí ba handarugoni.

<sup>8</sup> Inaga wali agaliru-o ínaga tíhondo bi hongohe mbira langerogo hale halimu.  
 Isaraele wali agaliru-o tígua ínaga bí larogo hale halimulo hamelo kogoni.

<sup>9</sup> Wali agali tara tara bu karunaga dama mitangi bialu mbirale gime wabini ngaru<sup>☆</sup>  
 tígua talima napilimu.

Mbirale uruni alehondo bi pupubi nawilimu larogoni.

<sup>10</sup> Anduane Homogo tínaga Ngode Datagaliwabe íni hangu kogoni.<sup>☆</sup>  
 Tí Iyibi dindiha hemiria ínioreme haru tagira ibirugoni.  
 Tínaga ne harigaha tomo yaanda haga buliya ai ne haladaba larugoni.

<sup>11</sup> Ina bí larugola ínaga wali agalime hale habe manga haya.  
 Isaraele wali agali tigua ínaga bí larugo talialu bia nabi haya.

<sup>12</sup> Tigua ani bialu heagola<sup>☆</sup>  
 ínaga tí mini giambe haabo hayagola helo waharu.  
 Wali agali urunime tini hameleago ale bialu helo

☆ 81:3: Dag 10.10 ☆ 81:7: Har 17.7, Dag 20.13 ☆ 81:9: Har 20.2-3, Man 5.6-7, 32.12, Iba 44.20, Ais 43.12

☆ 81:10: Har 20.2, Iba 37.4, 107.9 ☆ 81:12: Yob 8.4, Ab 7.42, Lm 1.24-26

yupe ho waharugoni.

<sup>13</sup> Inaga wali agali bu karume inaga bi hale helo i hameore ledó.

Isaraele wali agali tigua ina hameledogo talialu bilo hamelo kogoni.

<sup>14</sup> Tigua anidagua bidale nde ina ti waitigi karu abaleore bope hai kole.

Ti waitigi bibahende karu baba wai bialu bopeore hai kole.

<sup>15</sup> Wali agali i handabe manga haga karume ihondo gi timbuni howa

inaga buha ibalu bulu palialu ge duli hanga ho bedale.

Tigua ko biyarunaga pani neló mirugoni nalu haabo kale.

<sup>16</sup> Ina tihondo ladi ale mini widi bayaleore nalu halimulo ngialu

irabuha mone tara dedarunaga ibanerubi nalu halimulo ngia dege berogola

tigua karulapeore nalu kamile,

lalu layuane hale haru.

## 82

*Ngode Datagaliwabe ibu Haguane Duniniore kago ogo*

<sup>1</sup> Dahuliya andagani dahuliyali hondo hagaru ngoai ho bedagoria

Ngode Datagaliwabe ibuni duniniore howa haru ka.

Ibugua dahuliyali o biarume bi lararu hale howa

tinaga bi dabaki bialu lamiaga ka.

<sup>2</sup> Ibugua lalu, Tigua godi dabaramiligo

tigatiga ndo ke howa daba ko haramiligo nahalimu.

Tigua agali ko biaga karunaga laharamiligo wahalimu.

<sup>3</sup> Tigua wali agali yagibano karubi waneigini ti aija abala homene karubi

biamogo bialu halimu.

Wali agali maru genda yu howa hako karubi hongo nahe karubi

ti mitangi bialu tihondo mana bayale bialu halimu.

<sup>4</sup> Wali agali uruni mbirale burupale howa

ti agali ko biaga karunaga giha karia haru daibu helalimu.

<sup>5</sup> Tí mini nawi howa manda nabioire bu kamigoni.✧

Tí ko biaga howa arumaha ibagabu kamigola

wali agalime mana tigabi talialu bulene ngago nabiaga ka.

<sup>6</sup> Tí dahuliyali howa✧

Daligaorene Daliga i kogonaga iginiore kamigoni ndobe laro.

<sup>7</sup> Tí ani kamigoyu

wali agali dindini karu homagadagua dege homoleberemi.

Kini waneiginiru homagadagua dege tibi homoleberemi, lene.

<sup>8</sup> Ngode Datagaliwabe-o dindi bibahendeni wali agali bu karu

handameho hole í abale ibabe.

Wali agali hameigini tara tara padaru bibahende inaga dege kagoni.

## 83

*Ngode Datagaliwabehanda Isaraele wali agali baba waitigi karu bope helo bi lenego ogo*

<sup>1</sup> Ngode Datagaliwabe-o inaga ne ndibulo nahabe.

Íore bi nale nahabe. Í ema nabi nahabe.

<sup>2</sup> Í waitigi biarume íla wai bule kagoni de handa.

Agali í handabe manga haga karume ihondo dogá halu kagoni.

✧ 82:5: Iba 11.3, 75.3 ✧ 82:6: Yo 10.34

- <sup>3</sup> Tigua bira do howa ínaga wali agali mo ko holenaga  
ohowa ndindelalu kagoni.  
Ínaga wali agali uruni ína handayaho haga kego  
mo ko hole miniha magoyu kagoni ndobe.
- <sup>4</sup> Tigua lalu, Isaraele wali agali bu karuni  
mani holobadarume abogo hene lalu manda nabilo bo wahai hamija, lalu ka.
- <sup>5</sup> Tigua ogonidagua bulenaga mini mo mbiraore ho ka.  
Ti mandagiore howa í bope hole kagoni.
- <sup>6</sup> Urunidagua bule haruaruni  
Idomoalirubi Isimaelealirubi  
Moabalirubi Hagarialirubi
- <sup>7</sup> Gebalailirubi Amonoalirubi  
Amalegealirubi Pilidialirubi  
Taialibi uruni bibahendeme í bope hole kagoni.
- <sup>8</sup> Asiria wali agali tibi nde uruni baba hamagamagabu dege ka.  
Hameigini hongohe uruni tigua Lode aguanene Amonoalibi Moabalibi  
biamogo bule hamagamagabu ka.
- <sup>9</sup> Tigua anidagua bule kago ína uruni pani mialu<sup>☆</sup>  
bamba Midianalihondo biridaguabi  
Sisera Yabinialilahondo Iba Kisono poragoria howa biridaguabi bialu  
ti bo wahai habe.
- <sup>10</sup> Ína ogoningi Endoni tano howa agali bo wahai harigola  
tinaga tingini dindini wu togo bialu ngu biai haya.
- <sup>11</sup> Tinaga ami agali haru haga bu karuhondo<sup>☆</sup>  
ína abale agali Orebe Sebahondo biridagua bibe.  
Tinaga agali haguane bu karuhondo ína Seba Salamunala bo waharidagua bo wahabe.
- <sup>12</sup> Agali uruni tigua lalu, Iname Ngode Datagaliwabenaga dindi ogo  
inanaga dindi dege ngelo karulamija, layago bo waharigoni.
- <sup>13</sup> Inaga Ngode Datagaliwabe-o agali uruni bo purogo lelalu  
be abalu taulotogo laradaguabi  
puyabume widi aeane yuniru pu lo yu purogo laradaguabi  
bialu bo taliatogo lelabe.
- <sup>14</sup> Irame irabu ngaru bo dai hagadaguabi  
dindi hombeneni dangi bu karu bo dagadaguabi
- <sup>15</sup> agali o bu karuni ti gi halu ibida purogo lelo  
ína iba dalu timbuni ibilalu  
puyabu hongohe ti kagotha pelo pelabe.
- <sup>16</sup> Anduane Homogo-o tigua ínaga hongo hondowa taga halu  
íni kegoha dai bilo ína ti bope hai habe.
- <sup>17</sup> Tigua íhondo gi timbuni ho haabo helo  
ína ti bope habelo hamelo kogoni.  
Tigua taga timbuni halu tini homade helo hameledogoni.
- <sup>18</sup> Íni hanguore Anduane Homogo howa Daligaorene Daligabi kego manda bilobi<sup>☆</sup>  
ína dindi bibahendeha handameho howa  
íni hanguore heneda lomanda biai helobi  
hame timbuni lo kogoni.

<sup>☆</sup> 83:9: Hgn 4.6-22, 7.1-23    <sup>☆</sup> 83:11: Hgn 7.25, 8.12    <sup>☆</sup> 83:18: Har 6.3, Iba 59.13, 92.8

## 84

### *Mbirali ibu Ngode Datagaliwabenaga andani hole hameore lenego ogo*

<sup>1</sup> Anduane Homogo Hongo Haihe-o ina inaga andaore gubalini timbuniore ho kogoni.

<sup>2</sup> Inaga anda ogoniha i ho palu holeneore hame timbuni lo kogoni.✧

I mbirale marunaga hame nawigo

Anduane Homogo inaga andaha holeneoorenaga hame bibahende ogoniha piai helowa kogoni.

Inaga minimebi tinginimebi bibahendeme ina turuore halu

iba gana turubiru bibahendeorenaga holene tene

Ngode Datagaliwabe haluhe kagohondo lo mialu kogoni.

<sup>3</sup> Anduane Homogo i Hongo Haihe inaga kinibi inaga Ngode Datagaliwabebi i hangu kegoni.

Ngode Datagaliwabe inaga andaha bo lomabu miaga dabu ngagoria

ega emene yatagoberu anda bia para howa tini palu ngagoni.

Tinaga iginiru ogoniha palelonaga ma palia kogoni.

<sup>4</sup> Wali agali inaga andaha haga karu ti baya turubiore kagoni.

Tigua turu howa inaga mini yaraga halu iba ganaru laabo halu kogoni.

<sup>5</sup> Wali agali Hari Saiono kagoria pole turu howa kulo karu✧

tinaga hongo holene tene i kegonigo lowa

uruni ti turu haaboho holebira.

<sup>6</sup> Ti Hari Saiono pole pialu Baga dindi ulini iba nabere mbira ngagoria tagira poragola

dindi yobi iba nabere wiyagoni ndo iba tagira ibulebira.

Dindi ulini ngarunaga iba birumaga ladaga halu

iba gendo ngarunaga iba dugutagi hagahaga bulebira.

<sup>7</sup> Ti iba ani bedaria nama pialu ti hongo ho yalu polebira.✧

Ti Hari Saiono anda pialu howa Ngode Datagaliwabe karia hondolebira.

Ngode Datagaliwabe ibu wali agalime bi pupu wule mbirale gime wabini heledaru ale

ndo  
ibu daligaore gibi henedane ti hondolebira.

<sup>8</sup> Anduane Homogo Hongo Haihe Ngode Datagaliwabe-o

ina ihondo bi larogo hale habe.

Yagabanaga Ngode Datagaliwabe-o

ina bi larogo bayuwaore hale habe.

<sup>9</sup> Ngode Datagaliwabe-o inime inanaga kini helo dabo helene kagoni

ibugua ina de hondo mamage haga kago

ina ibuhondo bayuwa turubini dege bigi bibe.

<sup>10</sup> Inaga andaha horo mbiru hangu andapu harogome✧

horo daosini mbira tagira maruha haroruni bolangua hai holebira.

Ai wali agali mini kowi karu baba mandagi ti andagani palu holeneo i hame nale kogoni.

Inaga Ngode Datagaliwabenaga anda panga harabaniore heyu haabo hole hamelo kogoni.

<sup>11</sup> Anduane Homogo Ngode Datagaliwabe ibu inanaga mamage haganebi inanaga kini howa wa haganebi kagoni.✧

Ibugua inahondo bayale turubini dege bigi bialu ina mo yaraga halu kogoni.

✧ **84:2:** Iba 42.2, 63.1 ✧ **84:5:** Iba 81.1, 86.11, 122.1, Yar 31.6 ✧ **84:7:** Iba 42.2, Ais 40.31, Yo 1.16, 2 Ko 3.18

✧ **84:10:** 1 Bit 23.5, Iba 27.4 ✧ **84:11:** Iba 34.10, 85.9, Ais 60.19-20, Mal 4.2

Ibunaga deni wali agali mana tigabi hangu bialu haga karuhondo  
ibugua mbirale bayale ngaru mbira nangule nalaga kagoni.

<sup>12</sup> Anduane Homogo Hongo Haiheore-o wali agali ihondo mini mbiraore wuwa  
ini hanaho karu ti turuoreho kagoni.

## 85

*Ngode Datagaliwabehanda Isaraeleali haru dai bilonaga bi lenego ogo*

<sup>1</sup> Anduane Homogo-o ininaga dindi ngago hondowa  
dara halu biamogo birigoni.

Isaraele wali agali bayaleore helo  
ina ti mo bayale hodai bilarigoni.

<sup>2</sup> Tiha ko wiaru domo wahalu  
tigua mana ko biyarubi domo wahai harigoni.

<sup>3</sup> Bamba ina tihondo keba timbuni ho harigo wahalu  
ina tandagaore ala harigobi ai nahe kegoni.

<sup>4</sup> Ngode Datagaliwabe-o inanaga Pele Ngiaga i kego  
ina haru dai bibe.

Inahondo kebaore holeni nahabe.

<sup>5</sup> Inahondo keba ho haabo holeberebe.

I keba ho kegoni ereba naholebirabe.

<sup>6</sup> Ina wali agali kamaru turu holomaya<sup>✧</sup>  
inanaga holene mo hongo habe.

Ina ani beregola iname inaga mini yaraga halu holeberema.

<sup>7</sup> Anduane Homogo-o inime ina gubalini ho haabo kego  
hondolomaya walia habe.

Ina bayale holomayabi ina pele ngialu haru dai bibe.

<sup>8</sup> Anduane Homogo Ngode Datagaliwabehanda bi larago  
ina hale ho haga kogoni.

Iname mana ko ala bialu harimadagua lone biadai nabi harimayagua  
ibugua ibunaga wali agali ina kamaruhondo mo paliaho holene ngialu  
bayale holomaya helolebira.

<sup>9</sup> Wali agali ibunaga mini mo dunini ho haga karu  
ibugua ti pele mialu haru dai buleore mandabu kagoni ndobe.

Ibugua ina haru dai bialu inanaga dindi ngagoria  
ibunaga pele mulene ina heba mandagi wiaabo holebira.

<sup>10</sup> Horo ogoningi Anduane Homogonaga gubalini holenebi mini bilinahe holenebi  
lola halu hogimbu bialu mbiraore holebira.

Anduane Homogonaga mini tigabi wulenebi mo palia holenebi  
biamaga howa tiha wulebira.

<sup>11</sup> Wali agali Anduane Homogohondo mini bilina ho haragome  
dindini howa hama iraga holebira.

Ngode Datagaliwabenaga mini tigabiwi kagome  
dahuliya andaga howa handadali holebira.

<sup>12</sup> Anduane Homogohanda ina mo bayale ho helaragola  
mbirale iname beremaru bayale hai holebira.

Inanaga dindiha tomoru bayale andaho hai holebira.

<sup>13</sup> Wali agali tigua mana tigabi biragome Anduane Homogo ibilonaga

<sup>✧</sup> 85:6: Hab 3.2



hariga mo manda mandabu wulebira.

## 86

*Anduane Homogohanda biamogo bilo bi lenego ogo*

<sup>1</sup> Anduane Homogo-o ina bi larogo hale howa ladai bibe.

I hongo nahe howa ini biamogo bibe naheore kogo  
ina i biamogo bibelo hamelo ko.

<sup>2</sup> Ina i talima ibalu haga kogonigo i homoligo  
pele ngialu abale gi mibe.

I inaga biabe biahaga howa ihondo mini mbiraore wu kogonigo  
inime i pele ngibe laro.

<sup>3</sup> Inaga Anduane Homogo ini hangu kego  
ina i dara howa biamogo bia habe laro.

Egerebagi alendobi bibahendengi howa ina ihondo bi laabo haruli.

<sup>4</sup> Anduane Homogo-o ina ihondo bi laabo haga kogonigo  
inaga biabe biahaga i kogo mo turu habe.

<sup>5</sup> Ini bayale biaga howa iname ko birimaru domo wahaga ke.✧

Wali agali ihondo bi laga karu  
tihondo ina gubalini timbuni haabo ho kegoni.

<sup>6</sup> Anduane Homogo-o inaga bi larogo bayuwa hale haore bibe.

I biamogo bia lalu i olalu kogo hale habe.

<sup>7</sup> I biamogo bia larogola ina i biamogo biaga kego mitangi bialu✧  
i genda yu kongi biamogo bia lalu inihondo bi laruli.

<sup>8</sup> Anduane Homogo-o ini ale mende naheore bibahende bolangua haiheore kegoni.✧

Biabe ina biriligodagua bulene agali mbira naheore.

<sup>9</sup> Hameigini tara tara inime wabu helariru bibahendeme✧

inihondo ge duli hanga hole ibuwa

tigua i timbuniore kego lalu ininaga mini yaraga halu holebira.

<sup>10</sup> Ini hanguore hongo timbunihe howa✧

mbirale baya gibi tara tara ngaru inime biaga kegoni.

Ngode Datagaliwabe henene ini hanguore kegoni.

<sup>11</sup> Anduane Homogo-o mana ina bialu holiya hamelo kego biawai habe.✧

Ina horo bibahendengi mini bilinahe howa

ina laredagua bialu holiya ani biawai habe.

Inaga mini iha paga howa inaga biabe biaabo halu holiyabi

ina i biamogo bigi bibe.

<sup>12</sup> Anduane Homogo inaga Ngode Datagaliwabe-o inaga miniha howa

inaga mini yaraga haabo holebero.

Ngode Datagaliwabe i timbuniorebi mini lenebi kego, lalu

ina wali agali karuhondo lamiaabo holebero.

<sup>13</sup> Bibahendengi ina ihondo gubalini ho haabo kegoni.

Inime i homolilono pele ngialu haru dai birigome

i homalu humbirini andaga nape kegoni.

✧ 86:5: Neh 9.17, Iba 25.8, Yol 2.13, Yna 4.2 ✧ 86:7: Iba 17.6, 50.15, 77.2 ✧ 86:8: Man 3.24, 2 Sml 7.22, Yar 10.6

✧ 86:9: Iba 66.4, Ais 66.23, Mo 15.4 ✧ 86:10: Iba 72.18, Ais 44.6-8, Mg 12.29 ✧ 86:11: Iba 25.5, Yar 32.39

- 14 Ngode Datagaliwabe-o wali agali minehe bu karume  
 ıla wai bule ıbu kagoni ndobe.  
 Agali ko mendeali kago dara nahaga karume  
 ı homelo bo wahole bialu kagoni.  
 Uruni tigua ınaga bi hale habe manga haga kagoni.
- 15 Tigua ani biagagoyu Anduane Homogo ına dara holene irane nawini  
 dara holene timbuni ıha toledagome keba abale nahaga kegoni.  
 ına ina gubalini timbuniore ho howa  
 bi ledego lone lo iriari nabiagaore ı mini bilinahe kegoni.
- 16 ına ı korıa dai bialu dara habe.  
 ı aiyahanda biabe biaga wiyadagua bialu kogonigo  
 ı mo hongo halu pele ngibe.
- 17 Anduane Homogo-o ınaga mana bayaleore biaga ngego  
 ihondo walia habe.  
 ı waitigi bu karume manane ogoni de hondowa  
 ınime ı biamogo bialu mo hongo ho heledagonida lo manda bialu  
 tini taga timbuniore ho holebirago helo ani bibe.

## 87

### *Yarusaleme tano mo yaraga halu iba gana lenego ogo*

- 1 Anduane Homogo ibugua ibuninaga tano mbira hari hambene loma bini winigoria  
 bini.
- 2 Ibugua Isaraelenaga dindi maru bu ngaru gubalini ho kagobi ndo  
 Yarusaleme tanoore gubalini timbuniore ho kagoni.
- 3 Ngode Datagaliwabenaaga tano odagoriani wali agali bu kamiru-o  
 Ngode Datagaliwabe ibugua tí lalu bi baya turubioreru mbira laga birago hale  
 halimu.
- 4 Ngode Datagaliwabe ibugua ogodagua laya.  
 Wali agali ınaga bi larogo hale halu biaga karu damenego dagalama porongi  
 ına İyibi wali agalibi Babilonia wali agalibi dagalamaga dege holebero, leda.  
 Pilidia wali agalibi Taia wali agalibi Idiobia wali agalibi  
 uruni tibi Yarusaleme wali agali heba dege dagalamaga holebero, leda.
- 5 Yarusaleme tano lalu agua lolebira.  
 Hameigini tara tara paluyu pedaru  
 ti bibahendenaga dindi duniniore ogoni holebira, leda.  
 Ngode Datagaliwabe Hongo Haiheore kagome Yarusaleme heyu helalu  
 dindi ogoni hongoheore helo mo hongoho helolebira.
- 6 Anduane Homogo ibugua wali agali maru dindi tara tarani karunaga minibi gili buwa  
 Yarusaleme wali agalinaga minibi heba gilimumaga howa daga lamaga holebira.
- 7 Yarusaleme wali agali bu karume turuore howa iba gana lalu,  
 Iname mbirale bayale bayale yu kamarunaga tene Yarusalemeha ngagoni, lalu  
 holebira.

## 88

### *Ngode Datagaliwabehondo biamogo bia lalu olenego ogo*

- 1 Anduane Homogo Ngode Datagaliwabe-o ınaga pele ngiagaore ını kegoni.  
 Horo bibahendengi ı biamogo bia lalu olaabo haruli.  
 Mbiraga ngagoha howabi ihondo bi laabo haruli.
- 2 ına bi larogo hale ha.

I pele ngi lowa olalu kogoni hale habe.

<sup>3</sup>Iha genda damene dewaore íbu ngagome  
i homolene kawareni pu kogoni ndobe.

<sup>4</sup>Inaga hongo holene ereba hai halu  
i agali áyu dege homole bu karu ale homole kogonida.

<sup>5</sup>Tigua i yu wahayagola agali homeneru baba mandagi kogonida.  
I agali marume bo wahalu pene ale howa  
homaliha wiradagua bidogoni.

Agali mbira mbirali abogo lalu embedaho wahene  
biamogo bibe nahe aibe tobahe hagadagua i haruda laro.

<sup>6</sup>Ína i gundu uli timbuni unuraore arumahe wiagoaha bape ho waharigonida.

<sup>7</sup>Ínaga keba holene timbuni wigome i dambi halu  
iba solowara timbuni bedagome dambi haradagua bu heledegonida.

<sup>8</sup>Ína inaga nenegerume i erembira ngialu piai heledegonida.

Ína i mo koorene ko howa hiriri bini heledegola  
tigua i handa tara haga ka.

Ína ani bidegome i dariba ho heledegola  
hadalu pobe nahe kogoni.

<sup>9</sup>I genda yu kogome inaga de ko halu au hara.

Anduane Homogo-o ina horo bibahendengi inaga gi yaraga howa í olalu  
i biamogo bia lalu haabo kogoni.

<sup>10</sup>Ína wali agali homene ngaru mo heya halu  
agalime nabiagane aleru birilibe.  
Wali agali homenerume lone heyu howa inaga mini yaraga hagabe.

<sup>11</sup>Wali agali homaliha ngarume, Ína gubaliniore ho kegoni, lagabe.  
Dindi mo ko heneha karume, í mini bilinahe kego, lagabe.

<sup>12</sup>Arumaha karume ina agalime nabiaga ale biriliru de handagabe.  
Dindi ina embedaho waheneha pu karume  
ina mana bayale tigabi bereru de handagabe.

<sup>13</sup>Anduane Homogo-o ina i biamogo bibelo í olalu ko.  
Egerebagi bibahendengi ina íhondo bi lalu haabo haruli.

<sup>14</sup>Bi ani laruligo Anduane Homogo ina irane aginaga i erembira ngialu kebe.  
Ína irane aginaga i handa tara halu ha do kebe.

<sup>15</sup>Bamba i igiri emeneni hewangi genda dege yama ibalu henego  
áyu nde homolene kawareni haabo kogoni.

Ína i pani ngirirume inaga hongo holene bo pirilape henego kogoni ndobe.

<sup>16</sup>Ínaga keba holene timbuni ngegome  
i bo dambi henego kogoni.

Ína íhondo pani ngirigo nguwa dege babi bo baulo waharigoni ndobe.

<sup>17</sup>Horombe mbiragabi urunidagua biaabo harigola  
iba li timbuni ibalu bibahende dambi hai hagadagua kome i bo dambi helarigoni.

Dindi bibahendeha howa waitigime i bole ho mabu bu hagadagua  
ko dewa uruni i koría ibaabo haga.

<sup>18</sup>Inaga nenegealiore hearume i erembira ngialu ina piai helarigola  
ainde inaga nenege aruma holene dege ngeledegonida.

## 89

*Isaraele wali agali ti dindiha ibu ngangti tigua iba gana laga winigo ogo*

<sup>1</sup> Anduane Homogo-o ina ina gubalini haho wiaaboore haga kegonaga<sup>✠✠</sup>  
ina iba ganaru lalu laaboore holebero.

Ína mbirale mbira bigi bulebero lalu lowirigo pugua nabi biaiore haga kegonaga lalubi  
ina latagi halu laaboore holebero.

<sup>2</sup> Ínaga wali agali gubaliniho haga kegoni haho wiaaboore holebira manda bido.

Ína bi lo wigi bideruni mbira lo aribia halu mendeale nalagaore  
hari ema bibe nahe li de hendedemagobi hongohe wiaabo ho ngagoni.

<sup>3</sup> Ína lalu, Ina agali mbira dabenego ogoni ibula habo nalolene bi mbira lowinigo ngo,  
lariyagoni.

Inaga biabe biahaga Debidihondo bi lowirigo pugua nabulebiraore lalu lamido, lariyag-  
oni.

<sup>4</sup> Isaraele wali agalinaga kini maha hama polebiraru bibahendeore

Debidi íha howa tagira pene hangume haga bulebira.<sup>✠</sup>

Hameigini mendeme hapugua nabulebiraore, lamiriyagoni.

<sup>5</sup> Ani laga biriyago Anduane Homogo-o dahuliyali dahuliya andagani bu karume

ina mbirale baya gibi hangu bigi biriligonaga laga bialu

туру howa iba ganame inaga mini mo yaraga halu kagoni.

Anduane Homogo í mini bilinahe howa mbira bulebero lo ngego biagaore kegonaga  
lalu

iba ganaru tigua laga bialu kagoni.

<sup>6</sup> Anduane Homogo-o dahuliya andagani bu karuni í ale mbira nahe.<sup>✠</sup>

Dahuliyali bu karunibi í ale mbira naheore.

<sup>7</sup> Dahuliyali haguane tini dege dege ngoaiho biruwabi

tigua Anduane Homogo í hondowa gi timbuniore haga ka.

Dahuliyali Anduane Homogo í ho mabubu haga karu

tibi nde gi timbuni howa pandi hinu haga kagoni.

<sup>8</sup> Anduane Homogo Ngode Datagaliwabe Hongo Haiheore-o

hongo gibiorehe í kegobi mbirali naheore.

Anduane Homogo-o ina mbirale mbira bule ledego lo beregeda nabi biaore biaga howa  
í mini bilinahe kegoni.

<sup>9</sup> Iba solowara hongohe bedaru ina de hondo haga kegoni.

Iba solowara ibu yaribu hongohe bialu bi lalu lile laragola

bi nale ema nabi berelo ina mo palia haga kegoni.

<sup>10</sup> Iyibi wali agalinaga hongo holene tene gibi biago bo podalu

bibahende mo ko haiore harigoni.

Ínaga hongo holene gibime inaga waitigi hearu bibahende bope hai harigoni.

<sup>11</sup> Dahuliya andagabi dindi bibahendebi ininaga dege nga.<sup>✠</sup>

Ínime dindi timbuni ogo wabialu mbirale bibahendeore dindini wilo wabu wiri-  
yarunibi

ininaga dege o bu ngaruni.

<sup>12</sup> Mbirale uyurayagi ngarubi karubi unurayagi ngarubi karubi bibahendeore inime

wabini nga.

✠ 89:1: 1 Kin 4.31 ✠ 89:1: Iba 101.1 ✠ 89:4: 2 Sml 7.12-16, 1 Bit 17.11-14, Iba 132.11, Ab 2.30 ✠ 89:6: Iba 40.5, 86.8, 113.5 ✠ 89:11: 1 Bit 29.11, Iba 24.1-2, 50.12

Hari Tabo Hari Hemonolame Anduane Homogo íhondo turuore gibi halu iba gana lo ngiragoni.

<sup>13</sup> Anduane Homogo í hongo gibiorehe kegoni nde aguada.

Ínaga hongo holeneho magi manda bibe nahe hongo gibiorehe kegoni aguadabe.

<sup>14</sup> Í kini howa wali agali bibahende haru kegonigo  
mana tigabi bulenenibi mana tigatiga dabolenenibi  
tiagaho biruwa haru kegoni.

Ína mbirale bibahende bigi beregoria  
ínaga gubalini holenebi mini bilinahe howa bulebero laridagua bulenegobi  
walia haabo halu haga kegoni.

<sup>15</sup> Wali agalime í duniniore kego mitangi bialu íhondo iba gana lo ngiaga karu  
ti ínaga dara halu biamogo buleneni ibagabu ka.

Wali agali uruni ti wá holeneha ibagabu haradagua bidago ti turuore au ho haruadabe.

<sup>16</sup> Anigo ína tihondo baya turubini dege bigi bialu kegonaga  
tigua egerebagibi alendobi mbiragabi  
bibahendengi ínaga mini mo yaraga halu haabo kagoni.

<sup>17</sup> Inanaga hongo holene tene í kegonaga iname íhondo turu timbuniore ho kama.

Inanaga waitigi karu baba wai bialu kamaria  
ína ina gubalini halu dara howa  
wai bulumaya mo hongo haregola  
inanaga waitigiru bope halu ina wayali haga beremali.

<sup>18</sup> Anduane Homogo-o ína waitigime bolilono ina mamage holene mbira ínime dabo  
helariya.

Í mana bayale tigabiorego hangu biaga ina Isaraele wali agalinaga Ngode Datagaliwabe  
baya buruguleore kegoni.

Inanaga kini mbira ina haru helogo ínime ngirigoni.

*Ngode Datagaliwabehanda Debidihondo buleore lalu bi lowinigo ogo*

<sup>19</sup> Ala bambaore ína ínaga biabe biahaga mini bilinaheore heago  
de gandeba mbira hendelo mialu

de gandeba ogoniha howa ína bi ogodagua lariya.

Wai biagane ami agali mini lene mbira ína dabaru.

Wali agali bu hearu helowa ibu hangu dabalu  
ibunaga hagianeni kininaga manda mo karula haru.

Karula howa haru haga kininaga dagiani berelaru, lariya.

<sup>20</sup> Inaga biabe biahaga Debidí hearia hondowa<sup>☆</sup>

ína ibu tinaga kini helo dabo helalu  
weli loma binime ibu hagianeni odo wiru.

<sup>21</sup> Ina ani buwa ínaga hongo holene ibu heba haaboore helolebero.

Inaga gime ibu mo hongo harogola ibu hongoheore haabo holebira.

<sup>22</sup> Ani berogola ibunaga waitigirume ibu baba wai bialu

ibu bope halu mo taga habe nahe holebira.

Wali agali mini kowi karumebi ibu minupe habe naheore holebira.

<sup>23</sup> Ina ibunaga waitigi karuni geme hengedo mbaraho wahalu

ínaga kini ogoni handabe manga haga karuni bibahende homelo bo wahai hole-  
bero.

<sup>24</sup> Ina ibu gubalini timbuniore halu ibu heba haho wiaaboore holebero.

Ibugua ibunaga waitigiru baba wai bigi birangi

<sup>☆</sup> 89:20: 1 Sml 13.14, 16.12, Ab 13.22



- ibu wayali hangu haabo helolebero.
- 25 Dindi iba solowara mini Medidereniana bedagoria howa wima pialu  
iba timbuni mini Yuberedisi poragoria wiape kagoni  
bibahendeore Kini Debidi ibunaga halu ibugua handa gimbu bilo mulebero.
- 26 Ina ani berogola ibugua ihondo ogodagua lolebira.  
Inaga ababi inaga Ngode Datagaliwabebi í kegoni.  
I de handayaho howa mamage hagabi  
inaga pele ngiagabi í hangu kegoni, lolebira.
- 27 Ina ibu í igini wahene helolebero.✧  
Kini maru karubi ndo ibu mo duniniore helolebero.
- 28 Inaga gubalini haho wiaabo kogome ibu yu wa naholebero.  
Ina ibula habo nalolene bi lo wuleberogo  
bi ogoni pugua nabi wiaabobo bu wilonaga lo wulebero.
- 29 Bibahendengi ibu damene hangume kini haabo holebira.  
Isaraelenaga kini hameigini mendeme ha pugua nabi  
Debidi ibuniha howa tagira pene hangume ho aribia haga biaabo holebira.  
Hari damindini haabo hene li kadagua haaboore hama polebira.
- 30 Ani ani bulebirago ai mani Debidi ibunaga aguanene hama porarume  
ina mana lo ngogo hale halu bia nabi mo wahalu  
ina bilimu lalu bi ledodagua nabiaguabi
- 31 ina bi laga berogo hale howa mo yo handaga bialu  
tigua inaga erembira ngialu puguabo hayaguabi
- 32 nde ina tigua ko biraruni ilu wu ha dege buwa pani mulebero.  
Tigua mana liahe dewaore biyagonaga tandaga nalu howa manda bilo  
ina gewa tibume mana lalu bolebero.
- 33 Ani ba boleberogoyu  
ina Debidi gubaliniho kogoni nde ogoningibi gubalini haho wiaaboore holebero.  
Ina ibu yu wanahe ibuhondo habo nalolene bi lo wirugobi pugua nabulebero.
- 34 Ina ibula habo nalolene bi lo wirugobi napugulebero.✧  
Bulebero lalu lo wirugo ariabi mbiraore hangubi habo nalolebero.
- 35 I Ngode Datagaliwabe mana bayale tigabioreru hangu biaga kogo howa  
habo nalolene bi ogoni lo wirugoni.  
Ina bi halu mbira hangu lo ngogoni mani wia aiai bilonaga lo ngeledogoni.  
Ina Debidihondo bi lowirugo ke halu habole naloleberoore.
- 36 Debidinaga aguanene ti ho tawe hama puaboore holebira.  
Kini Debidinaga haru holene ngagoria  
ibunaga aguanene maha hararu mbiragome mia aribia haga bima piaho ngane  
honani dalu haho ngadagua  
tigua wali agali haru haho wiaaboore holebira.  
Ti ani haru helonaga ina handayaho holebero.
- 37 Kini Debidi ibu ariame dege wali agali haru haho ngane  
ege mbiraga tagira ibuwa dalu wáho kalidagua haru haaboore holebira.  
Ege li harini kagonime mbirale bibahende de handai ho howa  
wali agali bibahendehondo ina bi lo ngoruni  
henene hanguore leda lalu lo pana haga ege ibu li harini kagoni.

*Kininaga waitigirume ibu bope hayagola dugu binigo ogo*

- 38 Anigo áyu ínaga kini ínime dabo helarigo ibula kebaho kegoni.  
Kini ibuni hangu helo wahalu í erembira mialu pedegoni.
- 39 Ínaga biabe biahaga biagola habo nalolene bi lo wirigoni ínime puguarigoni.  
Pugualu kininaga manda golo muwa waruha ba horo helarigome  
ai kininaga manda biagoni mebia halu angu tolobu wahayagoni.
- 40 Ibunaga tanonaga ege pabe biaruni gialo payabu waharigome  
ai ibunaga anda hongohe bu helearuni bibahende mo ko hai hayada.
- 41 Ani bidagola ibunaga dabudabu panigi bu payabu ngaria  
wali agali hariga puibu birarume mo page yalu pugu bira.  
Wali agali ibula mandagi handa ai nai padarume ani birago handaragola  
ibuhondo mege bialu oba halu kagoni.
- 42 Ína ibunaga waitigirume kini biagoni balu bope helalu  
waitigi biaru ti miniha turu halu mambolo bama pelariyagoni.
- 43 Kini biagonaga wai biagane ami agali hayarunaga hongobi  
tinaga wai biagane ale wiaru bibahendenaga hongobi  
pirilipe hai helariya.  
Ibu wai bialu hearia bope helalu dari helariyagoni.
- 44 Ani helalu ibu kini howa wali agali haru haga hayagoni ogoningi hairi helalu  
ibuni dindiha minupeho berelariyagoni.
- 45 Ína ibunaga mali gadia dai bialu ibuni abaleore mo agali wahe helarigome  
ibu mo taga holene gibioreme dambiho heledegoni.

*Ngode Datagaliwabehanda ibu gi milo ibuhondo bi lenego ogo*

- 46 Anduane Homogo-o í ha do ho kegoni nde ani haaboore hole kebe.  
Ínaga keba holene gibi  
ira daradagua dalu kagoni dairi agoangi holebirabe.
- 47 Anduane Homogo-o ina wali agali dindini bu kamaruni  
nde lu ndo emene tigimandi hangu halu  
homaga kamagonidago manda bibe laro.  
Ína ina bu kamaruni wabiriyago  
áyu nde ina bibahende bu kamaruni mini homa biago kamago  
homalu ereba hai hole kamagonidago manda bibe.
- 48 Mbirali nahome haho wiaaboore holego ai kabe.  
Mbogoyi heba uliha yaanda haragola í mangabago  
heyalu poro labehe mbirali ai kabe.
- 49 Anduane Homogo-o ainde agua berebe.  
Ai áyu ina gubalini naheore kebe.  
Debidihondo habo nalolene bi lo wialu  
ogoale bulebero lo wigi biriruni agua buleberebe.
- 50 Anduane Homogo-o ínaga biabe biahaga o kogo nde mitangi bibe.  
Wali agali í mitangi nabiaga bu karume í mege bialu kagoni.  
Tigua ihondo bi ko tara tara lalu  
tandaga ngiragola í genda yu howa dongeho haruli.
- 51 Anduane Homogo-o ina í kini holiya dabo helarigoni kogola  
ínaga waitigi karume ihondo bi ko lalu ka.  
Í porogoha bayale mbira nawi  
í mege bialu mo ko haga karia dege iraga haga bialu kogoni.
- 52 Iname Anduane Homogonaga mini mo yaraga haaboore halu hamiya hameledo.

Ani bilo. Aniore bilo laro.

## 90

### *Mbiralime Ngode Datagaliwabehondo bi lenego ogo*

- <sup>1</sup> Anduane Homogo-o í inanaga andaore haradagua bidegoni.✧  
Inanaga mamali heneyaru tibi íha dege howa heneyago  
ai áyu inabi íha dege howa bu kamagoni.
- <sup>2</sup> Dindini hari wedarubi nawe howa mbirale bibahende dindini ngarubi nawabi howa✧  
Ngode Datagaliwabe íniore ala haabo heneyago  
áyubi haabo kego manibi haho wiaaboore hole kegoni.
- <sup>3</sup> Wali agali bu kamaruni homalu lone dindi tagobi lelariligoni.  
Ína inahondo, Dindi wali agali bu kamiruni tí dindime wabinigo homalu  
lone dindiho dai bilimu, lalu kegoni.
- <sup>4</sup> Iname mali daosini (1,000) mbira bolangua hayago lu laramaligo✧  
ína ogoni lu ndo bame abe harimago handaradagua birili.  
Mbiraga agalime mamage ho ariari bialu  
mbiraoregome mamage tigimandi haraligobi tigimandidane handaga kegoni.
- <sup>5</sup> Iba li ibalu wali agali hiliyalu poragola iba nalu homagadagua  
ína wali agali hiliyalu pirili.  
Ina emene tigimandi hanguni emaga handaradagua bialu halu homaramali.  
Ina egerebagi tani mbira áyu dege delatagi howa
- <sup>6</sup> ala anda haga bialu lini dalu  
ni handaragola yo bialu  
alendo gaulo daga hagadagua ina ani bialu kamagoni.
- <sup>7</sup> Ína inahondo handabe mangaho kegonaga  
iname í hondowa gi timbuniore ho kamagoni.  
Ínaga keba holeneme ina handayaho kegome  
ina bibahende do ereba hai haramagoni.
- <sup>8</sup> Inanaga mana ko tara tara beramaliruni  
bibahendeore í de handaiho kegoni.  
Mana ko maru ohowa bia do hene birimarubi  
bibahendeore í deni panigi mo ngelowa kegoni.
- <sup>9</sup> Ina wali agali dindini lu holenego ínaga keba holeneme mo tubagi halu  
inanaga buhe bame halu mbira hangu laradagua abaleore lalu bolangua haragoni.
- <sup>10</sup> Ina wali agali dindini mali pira karia hangu haramali.  
Hongohe harimayagua nde mali pira halira haramali.  
Anigo áyu o haramadagoniha genda bulene erekui biabe bulenela dege ngaria handalu  
haramali.  
Mali podo nginidadagua hai halu bialu  
inane abaleore pu ereba haramali.
- <sup>11</sup> Ínaga keba holenenaga hongo gibi ngegoni de handai hene ai kabe.  
Wali agalime mana ko biraru hondowa ína handabe mangaho kegola  
wali agalinaga bu miniha gi timbuni bulene tagira ibaganego aiwa manda bidabe.
- <sup>12</sup> Ina dindini lu ndo emene tigimandi hangu hole harimada manda bulumaya✧  
ína lawaiha biawaiha bibe.

Inanaga horo dagalo wia henení harimada manda bialu  
miniwi holomaya ínaga mini dingi dangia lolenego inanaga bu habaneha wia habe.

<sup>13</sup> Anduane Homogo-o ínà inahondo kebaho haabo kegoni agoangi hairi hole kebe.✧  
Ina ínaga biabe biahaga kamaru hondowa dara habe.

<sup>14</sup> Ina horo bibahendengi dindini hama poramangi  
miniha turu halu dungu lowa iba gana lalu haabo holomaya  
ínà egerebagi bibahendengi ínaga gubalini haho wiaabo holeneme inaha  
tolotagiho helaga bibe.

<sup>15</sup> Ína mali dewani ina genda yu dindihaore warapeho helarigonigo  
ai áyu ina lone mo turuho helabe.

Ina genda yu hemane mali piyago daga lowa  
mali o biagoni taheni turuho hama polomaya ina mo turu habe.

<sup>16</sup> Ína biabe hongohe gibi beredaru ínaga biabe biahaga kamaru ina hondolomaya  
walia habe.

Inanaga waneigini maha hararu tibi ínaga hongo holene baya tara tara ngeru  
hendelo mo walia habe.

<sup>17</sup> Anduane Homogo inanaga Ngode Datagaliwabe-o  
iname í duniniore ke mitangi bialu haramaligo✧  
ínà inahondo dara halu baya turubini bigi bibe.

Iname mbirale bigi beramaru bayale haga bialu  
lini daga bilo bulumaya mo hongo habe.

## 91

### *Anduane Homogo ibu inanaga mamage haga kagonigo ogo*

<sup>1</sup> Mbirali Anduane Homogo Daligaorene Daliga kagoaha ha do hole porago✧  
ibu Anduane Homogo Bibahende Hongo Haiheore kagonaga tuha puwa  
baya turubini pu holebira.

<sup>2</sup> Anduane Homogonaga tuha howa ibugua ibuhondo ogodagua lolebira.✧  
Ína í bu dambi halu ínaga pabe tigila í howa í baya hangu handayaho hariligoni.  
Inaga Ngode Datagaliwabe í kegoni.  
Ina íni hanaho kogoni, lolebira.

<sup>3</sup> Heneneore Ngode Datagaliwabe ibugua í baya hangu handayaho halu mamage  
holebira.✧

Damame agalimeyaguabi gono wia do hene ngaruha í do wia nabulebere.  
Warago hiriribi tara tara wali agali bo home laganeale ngarumebi í ela naholebira.

<sup>4</sup> Ega angibunime ibunaga babaganeme ibu igini bu dambi hagadagua✧  
Anduane Homogo ibugua í bu dambiho holebira.

Ani biragola í ibunaga tuha howa bayaleore holebere.  
Anduane Homogohanda bule ledago biaga mini bilinahe kago  
ibugua ínaga humbi howa ibu erembiraha mo ngelowa hatali wu holebira.

<sup>5</sup> Mbirale mbira mbiraga bulubada lowa í miniha gigi howa palulene nawi.✧  
Horombe howabi í nahende keria abale ibuwa í balu polobada lowa  
í gigi howabi holene nawi.

<sup>6</sup> Dama ko tara tara bu karume mbiraga horombebi wali agali bo wahama ibaga bialu  
kago✧  
ínà dama uruni hondowabi gi holene nawi.

✧ 90:13: Har 32.12-13 ✧ 90:17: Iba 27.4, Ais 26.12 ✧ 91:1: Iba 31.20, 121.5, Ais 25.4, 32.2 ✧ 91:2: Iba 14.6,  
18.2, 56.4, Yar 16.19 ✧ 91:3: 1 Kin 8.37, Iba 124.7, Min 6.5 ✧ 91:4: Iba 36.7, 40.11, 63.7, Ais 51.16 ✧ 91:5: Yob  
5.19-23, Iba 23.4, 27.1, 64.4 ✧ 91:6: 2 Kin 19.35, Yob 5.22

- 7 Áyu dege í deni wali agali daosini mbira (1,000) bibahende homa hilayaguabi<sup>✧</sup>  
daosini pira (10,000) í kegohayagi homai hayaguabi  
í ela naholebirago giho holene nawi.
- 8 Anduane Homogohanda wali agali ko biaga karume mana ko biyagonaga pani  
mirago<sup>✧</sup>  
íni deme handalu hondolebere.
- 9 Ína Anduane Homogo ínaga mamage haga helalu  
ínaga Ngode Datagaliwabe Daligaorene Daliga kago hatali wiagane humbi helar-  
igoni.
- 10 Ani helo waharigome mo ko holene tara tara ngarume í kegoria anda naibulebira.  
Warago ko tara tara gendabi ngarubi í andagani anda naibulebira.
- 11 Ngode Datagaliwabe ibuguaibunaga dahuliyaliru lamialu<sup>✧</sup>  
í ibagabu kegoha, Tí mamage hama ibagabu hole pudaba, lalu lamulebira.
- 12 Ege tole ngagome ínaga ge nabehedagola  
dahuliyali uruni tinaga gime í taba yaraga holebira.<sup>✧</sup>
- 13 Ínaga geme laionobi nogombibi<sup>✧</sup>  
laiono hungubaluabi puya tomia palebi  
bibahende hengeda hai holebere.
- 14 Ngode Datagaliwabehanda ogodagua larago,<sup>✧</sup>  
Wali agali í gubalini heneneore ho karu  
ínime ti haru dai bialu pele mulebero.
- Í tinaga Anduane Homogo ka lowa henene yu tigabu karu  
tinaga hatali wiaga humbi ínime holebero.
- 15 Tigua í olaragola ina tinaga bi larago hale halu ladai bulebero.<sup>✧</sup>  
Ti kagoria gendabi íbu ngangi íni ti heba haabo holebero.  
Ina ti gi mialu haru dai bialu ti mo yaragaho helolebero.
- 16 Tinaga holene lu hama pelo tinaga mali mo tago holebero.  
Tigua bima ibiyagonaga yolo uruni mulebero.  
Ina ti pele mialu íni ti heba haabo holebero, lene.

## 92

### *Anduane Homogonaga mini yaraga halu iba gana lenego ogo*

- 1 Anduane Homogo-o íhondo kaj lolene bayaleoreda.  
Í Ngode Datagaliwabe Daligaorene Daliga kegoni lalu  
í mini yaraga halu iba gana lolene bayaleore ngagoni.
- 2 Egerebagi bibahendengi ina í gubalini ho haabo kegonaga lolene karulape ogoni.  
Mbiraga bibahendengi ina í mini bilinahe kegonaga lolebero.
- 3 Ina ngida ale tara tararu balu ínaga mini yaraga holebero.
- 4 Anduane Homogo-o ina biabe hongohe biriru mitangi bialu í turuho kogoni.  
Ína bayaleore dewa birigonaga  
ína turuore halu iba ganaru lolebero.
- 5 Anduane Homogo-o ina biabe biriliru timbuniore hongohe biaga ke.<sup>✧</sup>  
Ínaga miniha mitangi bideru iname manda bibe nahe kamagoni.
- 6 Wali agali mini nawi karumebi mini giga nabi karumebi

✧ 91:7: Yos 14.10 ✧ 91:8: Iba 37.34, 58.10 ✧ 91:11: Iba 34.7, Md 4.6, Lg 4.10 ✧ 91:12: Md 4.6, Lg 4.11

✧ 91:13: Hgn 14.6, Dan 6.22, Lg 10.19 ✧ 91:14: Iba 9.10, 59.1, 145.20 ✧ 91:15: 1 Sml 2.30, Yob 12.4, Yo 12.26

✧ 92:5: Iba 139.17, Ais 28.29, 55.8-9, Lm 11.33-34



- mbirale uru manda nabibehe ka.  
<sup>7</sup> Wali agali mini kowi bu karu ti datani bu hagagobi ka.  
 Ko biaga bu karume mbirale ngago damene yu howa homogo ha holebira.  
 Ani bulebiragoyu ti mo ko hai halu erebaore holebira.  
<sup>8</sup> Anduane Homogo-o íni kini haluhe haabobo hagaore kegome ti ani bulebira.  
<sup>9</sup> Agali íla waitigiho karu ti homalu  
 agali mini kowi karu bope hai holeberegó ina mandabu kamagoni.  
<sup>10</sup> Ína nogo bulumaga wangabe gabuanaga hongo kaligobi íha hongo timbuni helari.  
 Ína íhondo bayale birigonaga turuore ho kogoni.  
<sup>11</sup> Í waitigi bu hearu mo ko hai harigo de handalu  
 agali ko hearu yiya lalu dugu biayuago hale haru.  
<sup>12</sup> Wali agali mini tigabi bu karu ti ayage timbuni andaho karubi holebira.✧  
 Ti Lebanono irabuha ira tamia bayale timbuni bu karubi holebira.  
<sup>13</sup> Ti Anduane Homogonaga anda haneni ira hengene mbira haradagua bida.✧  
 Inanaga Ngode Datagaliwabe ibunaga andaha howa ti bayaleore holebira.  
<sup>14</sup> Ti lu ho waheneore heaguabi lini bayale daabo haga kagoni.✧  
 Tinaga yuniru gahenge halu  
 ti hongohe haabo howa gabu nahaga ka.  
<sup>15</sup> Ti ogonibi kagome Anduane Homogo ibu mini tigabiore kago hendelo mo walia ka.  
 Inaga hapai haga kago ibuha lehe mbira nawiore.

## 93

### *Anduane Homogo ibu kini kagonigo ogo*

- <sup>1</sup> Anduane Homogo ibu kini kagoni.  
 Ibunaga mini mo yaraga holenebi hongo gibihe holenebi karulowa kagoni.  
 Dindi timbuni o ngagoni ibunime wabu winiyadagua  
 ema bialu girigurabi mbira bule ndoore ngagoni.  
<sup>2</sup> Anduane Homogo-o bambaore mbirale bibahende nawiangi✧  
 ína handame ho haabo hene kegoni.  
 Í ala henerunagabi áyu kamarunagabi  
 mani holebirarunagabi kini haluhe haabo kegoni.  
<sup>3</sup> Anduane Homogo-o iba solowararu uli unuraoreha berenerume  
 ai áyu bi timbuniore hongo howa tilitula lalu la ho nga.  
<sup>4</sup> Anduane Homogo ína mbirale bibahende dahuliya andagani ngagoni  
 ínaga hongo gibihe kegome yani howa handayaho kegoni.  
 Iba solowara tilitula lalu kadu bararaga bialu karuni  
 hongo emene bamedago lowa í hongo gibiorehe kegoni.  
 Iba solowara yaribu buyu ibalu iba angeni hongo howa haealo bade haga bialu karuni  
 emene bamedago lowa í hongo gibiorehe kegoni.  
<sup>5</sup> Anduane Homogo ínaga mana lo ngeruni bibahendeore wialu wiaabobore bulebira.✧  
 Ínaga anda loma biniore kagoni ibu haho wiaaboore holebira.

✧ 92:12: Iba 1.3, 52.8, Ais 65.22, Hos 14.5-6 ✧ 92:13: Iba 100.4, 135.2 ✧ 92:14: Iba 1.3, Yo 15.2 ✧ 93:2: Iba 45.6, 90.2, Dug 5.19 ✧ 93:5: Iba 19.7, 29.2, 96.9, 1 Ko 3.17

## 94

*Anduane Homogohanda wali agali ko biagabi bayale biagabi tigatiga dabolebirago ogo*

- 1 Anduane Homogo í Ngode Datagaliwabeore howa✧  
wali agali mana ko biaga karume biyarunaga pani nelo mirili.  
Áyu ínaga lembo holene ngego tihondo mo walia habe.
- 2 Wali agali bibahende ínaga deni íbu hai helolebere.  
Wali agali mine haga karume mana ko biyarunaga pani nelo abale mule ibabe.
- 3 Mana ko biaga bu karume mana ko bialu turuho helo henge agua agima muleberebe.✧  
Anduane Homogo-o tinaga henge agira ngabe.
- 4 Agali ko biaga karume mana ko biyagonaga turu haga bialu  
mine ho helo horo agiru heloleberebe.
- 5 Anduane Homogo-o uruni tigua ínaga wali agali bo hingedape halu  
genda timbuni mo mialu kagoni ndobe.
- 6 Wali dalo berearubi waneigini ajiya abala homene karubi  
tigua bo wahi haga ka.  
Wali agali dindi taraha howa inanaga dindini íbu hene karu  
homelo bo wahi halu biaga.
- 7 Tigua lalu, Anduane Homogohanda ina de nahendeda.  
Isaraele wali agalinaga Ngode Datagaliwabehanda iname bialu kamarunaga  
manda nabi  
bame kago waha, laga ka.
- 8 Inaga wali agaliru-o tigua mana ko dege biaabo halu kamigo agua beremibe.  
Tí wali agali mini nawi lulu ale kamigo angi mini wiadai buleberemibe.
- 9 Ngode Datagaliwabehanda inanaga hale wabu helenego  
ibu bi hale habe nahe kabe.✧  
Ibugua inanaga de wabinigo  
ai ibu de handabe nahedabe.
- 10 Hameigini tara tara dindi bibahende ha karume ko biragola✧  
ibugua ti mo tiga bialu pani namulebirabe.  
Ibugua wali agali lawai haga kago ibuha manda mbira nawi kabe.
- 11 Anduane Homogo ibugua wali agalinaga miniha bibahende ngaru manda baiho ka.✧  
Tigua ogoale bule lomanda manda bu kago hondowa  
ibugua mbirale uruni bibahende tagira napolebira mandabu ka.
- 12 Anduane Homogo-o ina wali agali mo tiga biriru ti turuho ka.✧  
Inaga mana lowini ngego lawai hene karu tibi turuho ka.
- 13 Ina ogonidagua bini karu ti miniha dungulo kane dege  
agali ko biaga karu ti homai halu homaliha piai helo  
í maliaho haga ke.
- 14 Anduane Homogohanda ibunaga wali agali yu wa nahaga ka.✧  
Heneneore ibugua ibunaga wali agali bu karu  
erembira mialu yu wanahagaore ka.
- 15 Mani howa agali godi lararume tigatiga dege lolebira.  
Ani laragola hale howa wali agali tigabi karume  
bi ogoni talialu bialu holebira.

✧ 94:1: Ais 35.4, Nah 1.2, Lm 12.19 ✧ 94:3: Yob 20.5, Iba 13.2 ✧ 94:9: Har 4.11, Min 20.12 ✧ 94:10: Yob 35.11, Iba 44.2, Ais 28.26 ✧ 94:11: Yob 11.11, 1 Ko 3.20 ✧ 94:12: Yob 5.17, Min 3.11, 1 Ko 11.32, Hi 12.5 ✧ 94:14: 1 Sml 12.22, Lm 11.1-2

- 16 Mbiralime i biamogo bialu agali ko hearu bope hayago aibe.  
Mbiralali i la mandagi howa agali ko biaga hearu ko nabilonaga  
i biamogo biyago aiwabe.
- 17 Anduane Homogohanda i biamogo nabinidale  
nde i homene dininiru piagagoha abale pu kole.
- 18 Ina lomanda bialu koria i ge harogoria gondo lalu i pilarogonigo laru.✧  
Ai Anduane Homogo-o inaga gubalini haabo hariligome  
inaga gime yania harigola i pi nale bayale kogoni.
- 19 Horo i genda ho kongi howabi ko ngarunaga mini dege dindiho hewagolabi  
inime inaga mini mo palia halu i turuho helarigoni.
- 20 Agali haguane tigabi ndo ko dabaga karu baba  
i biabe mandagi nabiaga kegoni.  
Agali ko uruni tigua wali agalime mana ko biraru hondowa  
karulape dege bira lalu ani bialu helo wahaga ka.
- 21 Tigua wali agali ko nabi bayale biaga karu mo ko hole ndinde laga ka.  
Wali agali tiha ko nawi karu homelo bo wahole  
ko biaga urunime manani helalu kagua dabaga ka.
- 22 Anigo Anduane Homogohanda hongoheore howa i biamogo biaga ka.✧  
Inaga Ngode Datagaliwabehanda i baya hanguore handayaho haga kagoni.
- 23 Tigua mana ko dewaore biyagonaga ibugua emena ko ngaru tihondo mo mulebira.  
Tinaga ko biyaru mitangi bialu tini homelo ibugua ti bo wahai holebira.  
Anduane Homogo inanaga Ngode Datagaliwabehanda ti bo wahaiore holebira.

## 95

### *Anduane Homogonaga mini mo yaraga halu iba gana lenego ogo*

- 1 Uru-o ti ibidaba.  
Anduane Homogonaga mini mo yaraga halu iba gana lamiya ibidaba.  
Ngode Datagaliwabe ibugua ibunaga hongome ina haru dai bialu pele ngiyago mitangi  
bialu  
ibuhondo turu halu iba gana lo mimiya ibidaba.
- 2 Iname ibu kagoria kaware hapara howa ibuhondo kai lo maliya ibidaba.  
Iba gana baya turubiru ibunaga mini mo yaraga halu  
ibuhondo lo mimiya ibidaba.
- 3 Anduane Homogo ibu Ngode Datagaliwabe hongohe kagoni.  
Ibu kini hongo gibihe howa  
dama mitangi bialu wali agali gime wabini karubi ndo  
ibu daligaore gibi kagoni.
- 4 Ibugua gundu uli unura wiape karuha howa  
handame hama iralu hari daligaore wedarunaga neneni handairi howa  
dindi bibahendeha handame ho kagoni.
- 5 Ibugua wabini iba solowara bedarubi dindi bibahende ngarubi  
bibahende ibunime dege handame ho kagoni.
- 6 Uru-o ti ibidaba.  
Iname inanaga ma podope halu Anduane Homogo ibu duniniore kago mitangi bialu  
ibuhondo lotu lamiya.  
Anduane Homogo ibu ina Wabiaga kago  
iname ibu kagoria kaware ibuwa ge duli hangaho biruwa  
ibu mitangi bialu lotu lamiya ibidaba.

7 Ibu inanaga Ngode Datagaliwabe kagoni.☆☆☆

Ibugua ibunaga wali agali bu kamaru nogo sibi haru haradagua haru haga kagoni.  
Ina tomo nolomaya ibugua ngiaga kagoni.

Ibugua áyu bi o larago hale hadaba.

8-9 Ngode Datagaliwabeanda tihondo bi lamialu lalu,☆☆

Tinaga mamali ala henerume inaga bi hale howa nahe tingi lalu  
tinaga bu miniha anda polani hondowa ıla waitigi ho hene.

Tigua dindi ko wali agali nahaga mini Meriba Masala wiagoria  
ina ti biamogo timbuni birugo de hendene.

Ani anigo ina ti haru lalu hewagola  
tigua inaga hongo ba handalu hene.

Ti ani binigo ina bi larago tigua áyu hale howa tınaga mamali binidagua bulemi  
nabilimu.

10 Dindi ko o biagoria mali pira mariani (40) ina ti haru howa bima ibiruru  
bibahende handai dege howa tigua i abi haruabe hondole ba handalu hene.

Wali agali urunime horo bibahendengi hariga koha pialu haabo lalu  
inaga bi lo wirugoni hale lalu bibe manga haga karunida lowa

11 ina tihondo lemboore howa bi hongohe mbira bule lalu lo wirugo ogo.☆

Wali agali uruniore ina ti mini ibu halo birulene muleberogoria anda napolebi-  
raore,

lalu Ngode Datagaliwabeanda ani lene.

## 96

*Ngode Datagaliwabe ibu kini daligaore howa bibahende handame ho kago ogo*

1 Anduane Homogohondo iba gana gahenge lo mulene nga.

Dindi bibahendeni bu kamirume Anduane Homogohondo iba gana lo mulene nga.

2 Anduane Homogohondo iba gana lo mialu ibunaga mini mo yaraga halimu.

Ibugua ina haru dai bialu pele ngiyagoni lalu

horo bibahendengi wali agali bibahendeme hale hai helo lamiaaboore halimu.

3 Ibu daliga gibiore ka lalu

hameigini bibahende paluyu pedaru hale hai helo lamilimu.

Ibugua biabe timbuni bayale bima piyarunaga lalu

wali agali bibahende lamiai halimu.

4 Anduane Homogo ibu daliga gibiore kagoni.

Iname ibunaga mini uyura mo yaraga haabo lalu hamiya.

Mbirale wali agalime dama mitangi bialu gime wabini ngaru hondowa  
ina gi holene nawi.

Anduane Homogo ibu dege daliga gibi kago

iname ibu hondowa dege giho holene nga.

5 Wali agali hameigini tara tarame mbirale dama mitangi bialu tini gime  
wabiniruhondo bi pupu wiagaru

uruni bibahende ke howa hangu bialu kagoni.

Inanaga Anduane Homogo ibugua hari daligabi mbirale bibahende hariha karubi  
ngarubi wabinigo

ibuni hangu daliga gibiore kagoni.

☆ 95:7: Iba 80.1, 100.3 ☆ 95:7: Hi 3.15, 4.7 ☆ 95:7: Hi 3.7-11 ☆ 95:8-9: Dag 14.22, Man 6.16 ☆ 95:8-9:  
Har 17.1-7, Dag 20.2-13 ☆ 95:11: Dag 14.20-23, Man 1.34-36, 12.9-10, Hi 4.3-5

<sup>6</sup> Anduane Homogo ibu kini howa wá holenebi mini mo yaraga holenebi ibunaga hangu ngagoni.

Ibunaga anda lomabu heleneni mbirale bu ngarume  
Anduane Homogo ibuni hongohe howa ibuni baya buruguleore gibi  
agi loabe tobahe kagobi walia ho nga.

<sup>7</sup> Wali agali dindini bu kamiru bibahendeme<sup>☆</sup>

Anduane Homogonaga mini mo yaraga halimu.

Ibunaga wá holenebi hongo holenebi daliga gibiore nga lalu  
ibunaga miniore mo yaraga halimu.

<sup>8</sup> Anduane Homogonaga mini timbuni daligaore ngago mo yaraga halimu.

Ibuhondo mbirale mbira lomabu migi bule giha yaga bialu  
ibunaga andaha anda ibugu bilimu.

<sup>9</sup> Wali agali bibahende kamiru Anduane Homogo ibu baya buruguleore kagoria ibalu<sup>☆</sup>  
bulu palialu ibunaga lotu lalu halimu.

Wali agali dindi bibahendeni kamiru tígua ibu gibiore kago hondowa duru ala lalu  
halimu.

<sup>10</sup> Wali agali hameigini tara tara bibahende bu hama pedaru lamialu,<sup>☆</sup>

Anduane Homogo ibu kini ka, lalimu.

Dindi timbuni o ngagoni ibunime wabu winidagua  
ema bialu girigurabi mbira nabuleore ngagoni.

Ani kago howa mani ibugua ibalu

wali agali bibahende baba godi lalu tigatigaore dabilebira, lalu lamilimu.

<sup>11</sup> Dindi timbuni ogo íbi hari li kego íbi libu nde turu halibu.

Iba solowara índé tigitugu lalu íninaga bi dalimu labe.

Mbirale iba solowaraha biru ngamiru tinde bi ladagadaga bialu t́ninaga bi ladaba.

<sup>12-13</sup> Mabú wima pedamirubi mbirale mabuni andaho hama pedamirubi<sup>☆</sup>

tí bibahende turu timbuniore ho halimu.

Anduane Homogo ibuni dindi ogo bibahende handagimbu buwa

haru hole ibulene tu harangi mbirale urunime bi urunidagua lagalaga bulebira.

Ira teha ira bu karume turu gibiore howa

tininaga bi lalu bi dalimu lagalaga bulebira.

Ibugua dindini wali agali bu kamaru mana tigabiore buleneni haru holebira.

Bi heneneore loleneni howa ti dabilebira.

## 97

### *Anduane Homogo ibu kiniore kago ogo*

<sup>1</sup> Anduane Homogo ibu kiniore howa handame ho ka.

Dindi o ngego ína turu holene nga.

Dindi iba dege dombeneha ngamiru tíguabi turu haga bidaba.

<sup>2</sup> Beraliba arumalame ibu ho mabu bida.

Ibugua wali agali ta nabi karu mana tigabi ngagome haru howa handaya ho haga  
ka.

<sup>3</sup> Ira hungu bamba halu puwa

waitigi ho mabu bidaru dai helaga ka.

<sup>4</sup> Ibugua hari daba migimege lalu

dindi bibahende ngago wá hame helaga ka.

Dindi ngarume uruni hondowa duru laga.

<sup>☆</sup> 96:7: Iba 29.1-2    <sup>☆</sup> 96:9: 2 Bit 20.21, Iba 33.8, 93.5, 114.7    <sup>☆</sup> 96:10: Iba 9.8, 67.4, 93.1, 98.9    <sup>☆</sup> 96:12-13: Iba 98.9



- <sup>5</sup> Anduane Homogo ibu dindi bibahende ngarunaga Anduane ka.  
Dindi hari ngarume Anduane Homogonaga deni wagaya do elagadagua do elai haga nga.
- <sup>6</sup> Hari daliga li karume ibunaga mini tigabiore nga lalu latagi ka.  
Hameigini tara tara dindi bibahendeni karume  
ibunaga wá taraore harago de handai haga ka.
- <sup>7</sup> Wali agali mbirale dama mitangi bialu gime wabini ngaruhondo bi pupu wiaga karu<sup>☆</sup>  
ti mo taga timbuniore holebira.  
Gime wabini ngarume Anduane Homogo hondowa bulu paliai holebire.
- <sup>8</sup> Anduane Homogo-o ínaga mana tigabi hangu ngegome wali agali dabaga kego manda  
buwa  
wali agali Saiononi karubi Yuda dindiha tano dewa wima pedaruha bu karubi  
ti bibahendeme íhondo turu halu miniha dungulo haga ka.
- <sup>9</sup> Anduane Homogo Hongo Haiheore-o  
ína dindi bibahende handameho kegoni.<sup>☆</sup>  
Íore mini lene daligaorene daliga howa  
bi pupu wulenaga gime wabu ngaru bibahende bolangua haihe kegoni.
- <sup>10</sup> Anduane Homogohanda wali agali mana ko ngaru hame nalaga karu  
tihondo gubalini ho haga ka.  
Ibunaga wali agali karu handayaho haga ka.  
Ibugua ti agali ko biaga karunaga giha karia gingila mialu  
haru dai biaga ka.
- <sup>11</sup> Anduane Homogonaga wá holeneme wali agali mini tigabi karuni wá hadali haga ka.  
Turu holeneme wali agali bayale biaga karu  
tinaga bu miniha mo turuho helaga ka.
- <sup>12</sup> Wali agali mini tigabiwi kamiru tí turu ho hadaba.  
Tígua Anduane Homogohanda bayale biyarunaga turuho hadaba.  
Ngode Datagaliwabe ibu mini baya buruguleore kago  
ibugua uruni biyaru mitangi bialu tígua ibuhondo turu halu kaj ladaba.

## 98

### *Anduane Homogo ibu wali agali bibahende handame ho haga kago ogo*

- <sup>1</sup> Anduane Homogohondo iba gana gahenge lama.<sup>☆</sup>  
Ibugua mbirale baya tara tara biai hayagoni.  
Ibuninaga hongo timbuni kagomebi ibunaga mana baya burugule ngagomebi  
ibugua waitigi bope hai hayagoni.
- <sup>2</sup> Anduane Homogohanda wai buwa ina wayali haru lalu latagi haya.  
Ibugua Isaraele wali agaliru pele mialu haru dai bulenaga  
hongo timbuni wali agali tara tara bu hearuhondo walia hayagoni.
- <sup>3</sup> Ibugua ibunaga bi lowiniru mitangi bialu<sup>☆</sup>  
Isaraele wali agalihondo gubalini haabo halu ti yu wanaheore heneya.  
Inanaga Ngode Datagaliwabehanda ina waitigi bope halu ina haru dai biyago  
wali agali dindi bibahendeha bu hearume hale halu manda biaiore haya.
- <sup>4</sup> Wali agali dindi bibahendeni kamiru  
tígua Anduane Homogohondo turu halu iba gana ladaba.

<sup>☆</sup> 97:7: Har 20.4, Man 5.8, 27.15, Yar 10.14, Hi 1.6, Ya 2.19    <sup>☆</sup> 97:9: Har 18.11, Iba 83.18, 95.3, 96.4    <sup>☆</sup> 98:1: Har 15.6, Iba 33.3, 40.5, Ais 52.10    <sup>☆</sup> 98:3: Iba 22.27, Lg 1.54, 1.72

Bu miniha dungulo holenaga iba gana turu howa dalimu lalu  
ibunaga mini yaraga hadaba.

<sup>5</sup> Anduane Homogonaga mini yaraga halu iba gana ladaba.  
Ngida aleru baya hangu balu bi bayalero lelo badaba.

<sup>6</sup> Pilipe biguliru pu lalu bi hongo howa ladaga halu  
Anduane Homogo ibuni inanaga kini kago lalu  
ibunaga mini yaraga hadaba.

<sup>7</sup> Iba solowara bedego íbi ibaha wena tara tara bedamirubi  
tígua bi hongo howa ladaga hadaba.

Dindi íbi wali agali dindini kamirubi  
tí bibahendeme iba gana ladaba.

<sup>8</sup> Iba timbuni poramiru tíguabi nde gi habe badaba.  
Dindi hari wedemiru tíguabi nde turu howa  
Anduane Homogonaga deni iba ganaru ladaba.

<sup>9</sup> Irane ibugua dindi bibahendeni handameho howa haru hole ibiragonaga ani bidaba.  
Ibuguaibunaga mini bayale tigabi ngagome  
wali agali bibahende haru haabo holebira.

## 99

### *Anduane Homogo ibu kini duniniore kago ogo*

<sup>1</sup> Anduane Homogo ibu kiniore howa handame ho ka.✧

Wali agalirume ibuhondo gi howa duru lalu haga.

Dahuliyali babaganehe kirali kago labo dindiha helowa  
ibu de handape howa handayaho kagola  
dindi dumbirumbi bialu haga.

<sup>2</sup> Anduane Homogo ibu Saiononi howa hongo timbunihe kagoni.  
Ibugua hameigini tara tara dindi bibahendeha karu  
handame howa haru hai ka.

<sup>3</sup> Wali agali bibahendeme ibu kini duniniore howa mini lene ka lalu  
ibunaga mini yaraga holebira.  
Ibu mini tigabi baya buruguleore kagoni.

<sup>4</sup> Kini hongo haiheore-o í mana bayale tigabi ngago dege hame laga kegoni.

Ína mana bayale tigabi lo ngegoni

ina Isaraele wali agalirume bialu haabo holomaya ngirigoni.

Wali agali tara karume biraru hondowa

iname tigatiga mo tale bialu holomaya mo walia hari.

<sup>5</sup> Anduane Homogo inanaga Ngode Datagaliwabe kagonaga mini yaraga holene nga.

Ibuni kagoha hapara howa ibu mitangi bialu lotu lalimu.

Ibu mini tigabi baya buruguleore kagoni.

<sup>6</sup> Mosese Aronola libu Anduane Homogonaga loma binigo mo miaga agali hene.

Samuele ibugua ibuhondo bi laga hene.

Uruni tigua Anduane Homogo olayagola

ibugua tinaga bi hale haga hene.

<sup>7</sup> Ibuni hari beraliba timbuni heagoha howa✧

ibugua tihondo bi lamigi bini.

Ibuguaibunaga mana bulene winiru ti lamigi biyagola

tigua hale halu biai haga hene.

- <sup>8</sup> Anduane Homogo inanaga Ngode Datagaliwabe-o<sup>☆</sup>  
 ínaga wali agalirume ihondo bi layaru hale halu ladai birigoni.  
 Tigua mana ko birarunaga pani nelo miaga kego howa dege  
 ínini Ngode Datagaliwabeore howa ko uruni domo wahai haga kego ti walia harigoni.
- <sup>9</sup> Anduane Homogo inanaga Ngode Datagaliwabe kagonaga mini yaraga hama.  
 Iibunaga hari loma bini kagoria howa ibu mitangi bialu lotu lama.  
 Anduane Homogo inanaga Ngode Datagaliwabe ibu tigabi howa baya buruguleore  
 kagoni.

## 100

*Anduane Homogonaga mini mo yaraga halu iba gana lalu lenego ogo*

- <sup>1</sup> Wali agali dindi bibahendeni paluyu pedamirume  
 Anduane Homogohondo turu howa iba gana lo milimu.
- <sup>2</sup> Turu howa iba gana turubiru lama lama  
 ibu mitangi bialu lotu lole ibunaga wanakuini ibu halimu.
- <sup>3</sup> Anduane Homogo ibu Ngode Datagaliwabeore ka manda bilimu.<sup>☆</sup>  
 Ibugua ina wabinigo ina ibunagaore kama.  
 Iibunaga wali agali howa ina ibunaga nogo sibi kamagoni.  
 Anigo ibugua nogo sibi haru hagamadagua ina haru haga ka.
- <sup>4</sup> Iibunaga anda loma bia henegonaga harabani anda ibalu  
 ibuhondo kaj lalu iba ganaru lama lama anda maliya.  
 Iibunaga mini yaraga hama hama anda tamuha anda maliya.  
 Ibihondo kaj lalu ibunaga mini mo yaraga hamiya.
- <sup>5</sup> Anduane Homogo ibu bayaore gibi kago ibunaga gubalini holene ngagome<sup>☆</sup>  
 ina gubalini haho wiaabo kagoni.  
 Ibugua ibunaga wali agaliruhondo,  
 Bulebero, lowiniru mbira mo habo nale  
 ibu mini bilinahe howa biaiore haga kago  
 ibunaga mini yaraga hamiya.

## 101

*Kini Debidi ibugua buleore lalu bi lowinigo ogo*

- <sup>1</sup> Anduane Homogo-o ina iba gana lalu bi lo wirugo buleore lalu larudaguabi  
 ínaga mana tigabi bulene ngadagua bulebi  
 ina í mitangi bialu iba gana ogo ihondo lalu kogoni.
- <sup>2</sup> Ina mana ko nabi bayale dege dege holeberogo  
 Anduane Homogo-o ina biamogo bule í koría angi ibuleberebe.  
 I damenerunaga deni howa mana tigabi dege biaabo holebero.
- <sup>3</sup> Ina mana ko bulene ngago bibe mangaore holebero.<sup>☆</sup>  
 Wali agali Ngode Datagaliwabhondo erembira mialu haga karuhondo  
 turu naheore kogoni.  
 I ti heba mandagi ibagabu naholebero.

<sup>☆</sup> 99:8: Dag 14.20, Man 9.20, Yar 46.28, Seb 3.7    <sup>☆</sup> 100:3: Iba 79.13, 95.7, Ese 34.30-31, Eb 2.10    <sup>☆</sup> 100:5: 1 Bit 16.34, 2 Bit 5.13, 7.3, Esr 3.11, Iba 106.1, 107.1, 118.1, 136.1, Yar 33.11    <sup>☆</sup> 101:3: Man 15.9, Iba 5.5, 40.4

- <sup>4</sup>Ke hagane mana biaga ngagobi ina nabulebero.  
Agalime mana ko biaga ngagobi mitangi naholebero.
- <sup>5</sup>Wali agali mendeali ndelalu haga karu ina ti bope holebero.✧  
Mine haga karubi ina handabe manga holebero.
- <sup>6</sup>Ngode Datagaliwabehondo mini bilinahe karu tihondo ina turu haabo holebero.✧  
Mana bayale bialu henene laga karu  
ti degeme inaga biabe biaga helo i andagaha helolebero.
- <sup>7</sup>Wali agali ke haga bu karu✧  
ti inaga anda timbuni kagotha naholebira.  
Wali agali tombene hondokihe karu ti ila naholebiraore.
- <sup>8</sup>Horo bibahendengi inaga dindi ngagotha ko biaga karu  
ina mo ko halu bo batagi haga bulebero.  
Wali agali ko biaga karu damene  
Anduane Homogonaga tano ngagoria nahelo  
ina ti bo talu pelai holebero.

## 102

### *Igiri daliaheme genda yu howa bi lenego ogo*

- <sup>1</sup>Anduane Homogo-o ina ihondo bi larogo hale habe.  
Ina i biamogo bibelonaga i olalu kogo hale habe.
- <sup>2</sup>I genda timbuni yu kongi  
ina i yu wahalu napobe.  
Ina i olarogola bi larogo hale halu abale biamogo bibe.
- <sup>3</sup>Inaga holene emene tigi mbira hangu ira hagua bialu abaleore pu ereba hagagobi  
kogoni ndobe.  
Inaga tingini poboyogo bialu  
ira timbuni dedagola poboyogo biraligobi bialu helo kogoni ndobe.
- <sup>4</sup>Datani gaule agalime hangedalu piagadagua  
Ngode Datagaliwabehanda i hangedo wahenego kogoni.  
Inaga tiniha tomo nolene garibi nale ko.
- <sup>5</sup>I tandaga timbuni howa e lalu ngogoni.  
Inaga tingini timbuni nahe yolalu kuni hangu haragonida.
- <sup>6</sup>I mo ko henego koore  
dindi ko wali agali nahaga ngagotha ega ewatia biragagobi  
dindi labu ngagotha ega halengau biragagobi bedogonida.
- <sup>7</sup>I dagiani palia padogoyu  
ai i paliahondo nahe yangayanga bu wiaabo kogoni ndobe.  
Ega warakuli anda dangini hangu biragadagua  
ini hanguore bedogonida.
- <sup>8</sup>Mbiraga horombebi waitigi bu karume  
ihondo bi ko dege lalu haabo ka.  
Tigua i mini lowa mege bialu ha haga bialu ka.
- <sup>9-10</sup>Ina ihondo keba timbuni ho kegome  
i nde beru dugu nalu  
de iba pugulope halu

- gabo beha iba biraradagua bedago nalu bedogonida.  
 Ína ÿ minalu mbirale ko ngaru mo wahagadagua  
 mo wahenego bedogonida.
- 11 I dindini lu holene nawi  
 tubagiore alendo halu ni dadai biraligobi kogoni.  
 Datani gaule ngaligobi bedogonida.
- 12 I ogonibigoyu nde Anduane Homogo-o ÿ kini haluheore kegoni.  
 Wali agali maha ho aribia holebirarume  
 ÿ manda biai holebiragoni ndobe.
- 13 Ína Saiono tano ngago mitangi bialu dara holeberegõ manda bido.  
 Ína dara howa biamogo bulene horo biagoni abale tagira ibiyada.  
 Horo ogoni áyu ngagoniore ndobe.
- 14 Saiono tano bo gialabagabu wahayago  
 ínaga biabe biahaga karume tano ogoni mitangi timbuni bialu hamelo ka.  
 Áyu tano ogoni mo ko hai hene ngagoyu  
 tigua dara ho haabo ka.
- 15 Hameigini tara tara dindi bibahendeni palima pedarume  
 Anduane Homogohondo gi hai holebira.  
 Dindi bibahendeni kini karume  
 ibunaga hongo timbuni kago hondowa  
 ti gi hai holebira.
- 16 Mani howa Anduane Homogohanda Saiono tano lone biadai birangi  
 ibunaga hongo ogobi lalu walia holebira.
- 17 Ibugua ibunaga wali agali yu wahene karume olaragola hale holebira.  
 Tigua ibuhondo bi lararu hale howa erembira mialu napolebira.
- 18 Anduane Homogohanda mbirale áyu inahondo biraruni  
 ina waneigini aguanene mani holobadarume hendelo mbugani gilibu widaba.  
 Wali agali mani holebirarume Anduane Homogohanda biniru te hale howa  
 ibunaga mini yaraga halu holebira.
- 19 Iname bi ogodagua gilibu wimiya.  
 Anduane Homogo ibuni haga daligaoreha howa handape haya.  
 Ibu dahuliya andagani howa dindiha handadaliho haya.
- 20 Wali agali garabaya bini hearume  
 tandaga nalu howa dugu biayuago hale haya.  
 Hale howa ibugua agali godi hale hagame bo waholene nga lene hearu  
 ti homa nabilonaga biamogo bialu golope haya, lalu gili bulene nga.
- 21 Ibugua ani biyago hale howa Saiono dindini wali agali bu karume  
 Anduane Homogonaga mini latagi halu  
 Yarusalemeni howa ibunaga mini yaraga halu holebira.
- 22 Hameigini tara tara dindi bibahendeni palima pedarubi tinaga kini karubi  
 ti bibahendeme Anduane Homogo mitangi bialu  
 lotu lole íbu ngoai harangi ani lalu holebira.
- 23 I wene igiri daliathe dege hewaria  
 Anduane Homogohanda ínaga hongo bope ho heledagonida.  
 Ibugua ÿ dindi ogoriani lu naholiya  
 ínaga holene mo tubagi ho heledagoni ndobe.



24 Inaga Ngode Datagaliwabe-o í haluhe haabobo bu kegoni.✧  
I agali wahe ndo wene igiri daliahe dege kogonigo  
 ina i áyu ogoni yamia nabibe.

25 Bambaore ina dindi bibahende wabiniyagoni.✧

I ninaga gimeore hari daliga li kago wabialu  
 mbirale karubi ngarubi bibahende wabiai hariya.

26 Aga labolaboru goba halu budahole biagadagua  
 dindi harila mo ko holebiragoyu  
 ini hangu haabobo bu haga kegoni.

Agalime aga labolabo goba haragola wahagadagua  
 dindi harila ereba hai haragola lone nahondoleberemaore.

27 I naga holene ala henegobi dege haho wiaabo haga kegoni.✧

28 I ani kegoni howa inanaga waneiginiru ti bayale helo  
 ina handaya ho holebere.

Tinaga aguanene maniore hama polobadarubi  
 ti ini andaneha bayale haabo holebira.

## 103

### *Anduane Homogohanda ibunaga wali agali gubalini haga kago ogo*

1 I na Anduane Homogonaga mini mo yaraga holebero.

I naga minimebi tinginimebi mbirale iha kago damenego  
 bibahendeme ibunaga mini baya buruguleore kago mo yaraga haabo holebero.

2 I na Anduane Homogonaga mini mo yaraga holebero.

Ibugua ihondo turu halu bayale dege bigi biaga kago embeda naholeorebero.

3 Ibugua ina ko beroru bibahendeore domo wahai haga ka.✧

I ni warago tara tara anda ibu wigi bidangi  
 mo dabi haga kagoni.

4 Anduane Homogo ibugua iore homoliya yupe nahe haru dai biaga ka.✧

Haru dai bialu ibugua i gubalini halu dara timbuni haga kagoni.

5 I ani ho ko lalu walia halu i dindini kongi✧

ibugua mbirale bayale dewa bu hombedo ngiragola  
 i karulapeore wu haabo haruli.

Ibugua ani bigi biragome i lone igiriho dai bialu  
 hongohe ega bodo hariawe ale haruli.

6 Wali agali darabi dindiha haga karu maru karume ti hingedope haragola

Anduane Homogohanda tinaga bi tigatiga lahaga ka.

Ibugua ti mo yaraga halu ti holene ngadagua helolebira.

7 Anduane Homogo ibugua Isaraele wali agali biamogo bulenenaga

ibu miniha manda manda bu yu heago damenego Mosese walia hene.

Walia halu Anduane Homogo ibugua biabe hongohe bigi biyaru

Isaraele wali agali ti de hendelene.

8 Anduane Homogo ibugua ina dara howa biamogo biagabi✧

gubalini timbuniore hagabi ka.

Ibu keba ala awane nahaga howa

ibugua ibunaga gubalini haho wiaabo holeneme

✧ 102:24: Yob 36.26, Iba 90.2, Ais 38.10, Hab 1.12 ✧ 102:25: Hi 1.10-12 ✧ 102:27: Ais 43.10, Mal 3.6, Ya 1.17

✧ 103:3: Ais 33.24, Yar 17.14 ✧ 103:4: Iba 34.22, 56.13 ✧ 103:5: Ais 40.31 ✧ 103:8: Ya 5.11

- ina yaniho wiaabo helowa haga kagoni.
- <sup>9</sup> Iname mana ko liahebi beramarunaga  
Anduane Homogo ibugua ina ba talia bia biaganegoyu  
ani bialu haabo nahaga.  
Ibugua ibunaga wali agalihondo handabe manga howa  
keraho haabo nahaga kagoni.
- <sup>10</sup> Iname mana ko gibi dewaore bidamaria<sup>☆</sup>  
ko birimarunaga pani ogonibi tahe ngulene ngadagua ndo  
ibugua pani emene hangu ngiaga kagoni.  
Iname mana ko liahebi birimarunaga pani timbuniore nabehegoyu  
ibugua ina yopialu pelaga bialu kagoni.
- <sup>11</sup> Hari daliga li kagome dindi bibahende ngagoni dambi hai kadagua<sup>☆</sup>  
Anduane Homogo ibugua wali agali ibuhondo mitangi bialu giho haga karu  
ibunaga gubalini holene timbuniore ogonibime ti gubalini ho kagoni.
- <sup>12</sup> Uyu ni tagira ibagagoha howa namu ni paliagagoha polenego<sup>☆</sup>  
kaware ndo kaundiaore gibi ngagoni.  
Ani ngadagua Anduane Homogohanda iname ko birimaru bu wu kamaria  
ibugua domalu hiliyalu pialu  
kaundiaore gibi namura ona agima ndooreni yalu pu wahaga kagoni.
- <sup>13</sup> Abame ibunaga waneigini gubalini howa baya hanguore handayaho hagamadagua<sup>☆</sup>  
Anduane Homogohanda wali agali ibuhondo mitangi bialu giho haga karu  
baya hangu ogonidaguaore gubalini howa ibuni handayaho haga kagoni.
- <sup>14</sup> Ibugua ina ogo aleme wabirugo ni bu karuni lalu ibuni manda bidagoni.<sup>☆</sup>  
Bame dindi dugualu wabirugo ni bu kagoni lalu ibuni manda bu kagoni.
- <sup>15</sup> Ina wali agali bu kamaruni inanaga holenegro<sup>☆</sup>  
emene tubagi tigimandi hangu tani mbuambua andaho kalidagua kamagoni.  
Tani mbuambua minalu anda howa lini do haganedagua ina bu kamagoni.
- <sup>16</sup> Tani mbuambua lini biago dedaria puyabume pulo ba haragola  
dindini dogolope haga.  
Dindini dogolope hayagua o piyagoni haga.  
Dogolope henego lone dene biagoria dodai bidaria nahandaga.
- <sup>17</sup> Ani biagagoyu ai wali agali Anduane Homogo andaneha howa<sup>☆</sup>  
ibuhondo mitangi bialu giho haga karu  
ibugua ti dara halu gubalini haho wiaaboore haga kagoni.  
Uruni tinaga waneigini dabane mani hama polebirarubi  
ibugua ti gubalini halu tihondo bayale dege biaabo halu holebira.
- <sup>18</sup> Anduane Homogonaga habo nalolene bi lo winidagua bialu karu  
ibugua bia lenedagua hale halu birarubi  
nde tihondo bayale dege biaabo halu holebira.
- <sup>19</sup> Anduane Homogo ibu dahuliya andagani kini biruwa  
mbirale bibahende ibugua handame ho kagoni.
- <sup>20</sup> Dahuliyali hongo gibihe kamiru  
Anduane Homogo ibugua bi larago baya hanguore hale halu bia larago biaga  
kamiruni  
tibi turuore gibi halu Anduane Homogonaga mini mo yaraga hadaba.
- <sup>21</sup> Dahuliya andaga howa Anduane Homogohanda laradagua hale halu

<sup>☆</sup> 103:10: Esr 9.13   <sup>☆</sup> 103:11: Iba 57.10, Eb 3.18   <sup>☆</sup> 103:12: Ais 43.25, Mai 7.18   <sup>☆</sup> 103:13: Mal 3.17   <sup>☆</sup> 103:14: Pig 3.19, Iba 78.39, Aga 12.7   <sup>☆</sup> 103:15: Yob 14.1-2, Ya 1.10-11, 1 Pi 1.24   <sup>☆</sup> 103:17: Lg 1.50

ibunaga biabe biahaga kamiru tiguabi  
turuore halu Anduane Homogonaga mini mo yaraga hadaba.

<sup>22</sup> Mbirale bibahendeore Anduane Homogo ibuni wabini ngamirubi kamirubi  
tí bibahendeorenaga kini ibuni howa ibugua tí handame ho kago  
tígua turuore halu ibunaga mini mo yaraga hadaba.

Ani bidaba.

Inabi Anduane Homogonaga miniore mo yaraga holebero.

## 104

*Ngode Datagaliwabehanda bibahende wabiai henego iname ibunaga mini mo yara-  
gaore holene ngago ogo*

<sup>1</sup> Ina Anduane Homogonaga mini mo yaraga holebero.

Anduane Homogo inaga Ngode Datagaliwabe-o í daliga gibiore kegoni.

Í kini daliga gibiore howa mini mo yaraga holenebi duniniore holenebi  
aga karularadagua karulo kegoni.

<sup>2</sup> Wá holene gibioreme iní aga karu laradagua karulo howa haru kegoni.✧

Agalime balai anda dungume howa anda biagadagua  
ina hari daliga li kagoni wabuwa dungume ho heledegoni.

<sup>3</sup> Ani buwa ininaga andaga iba bedago yarali howa uyuraore daligani bu kegoni.✧

Í hari beraliba ngarunaga biralu eberegola  
puyabume í yalu ibirayagoni.

<sup>4</sup> Puyaburume inaga bi yalu ina kamaria pu lareya.✧

Hari daba biralirubi inaga biabe dege bia ha lareya.

<sup>5</sup> Dindi timbuni ogo inime wabuwa winiyagobiore hongohe ngagoni.

Dindi ogo imi ema emene mbira nabi girigurabi mbira nabulebiraore.

<sup>6</sup> Iba solowarame dindi timbuni ogo bibahende bu dambi haiho winiya.

Iba ogonime hari hearubi bibahende biru namulaiho winiya.

<sup>7</sup> Ani dambi haiho wiaria inaga bi hongoheme iba solowara taliriya.

Taliri handala iba ibu gerai ibida puabo hayiya.

Iba solowara ibu inaga bi hongohe biago hale halu  
bia laridagua bialu ibida piyiya.

<sup>8</sup> Ibida pialu hari hearu yu wahalu porabu pebe bialu

dindi ulini wiaruha inime tini berelo wabu winiyarunaga pu birayiya.

<sup>9</sup> Iba uruni biru bolangua nahelonaga

inime tu winiyagoriani iba áyu ogoriani birairi kagoni.

Áyu ibame ala bibahende namulaiho winiyadagua

lone namulai naholebira.✧

<sup>10</sup> Dindi uliniruha howa iba dugutagi helalu

hari labo dombeneruha howa iba duguaga duguaga bilalu

unura pugulu pebe biledegoni.

<sup>11</sup> Ani biledegoria nogo gabua tara tara karume

iba uruni naga naga bialu kagoni.

Nogo dongi gabua karumebi iba noa howa

hége lebolaho henedagobi karulapeore nalu kagoni.

<sup>12</sup> Iba uruni angeni ira bu karuha egarume tininaga anda bigi bigi bialu biruwa

iba ganaru turu howa laga laga bialu biru ngagoni.

- 13 Hariha howa dalu hari hambene ngarunaga dalipe helaga bialu kegoni.  
Ani bigi beregome dindini mbirale bayale bayale bu paya bu ngagoni.
- 14 Nogo bulumagarume nelo tani mo anda helalu  
ina wali agalime nalu holomayanaga  
tomo inaneme hingedamaru mo anda haga beregola nalu kamagoni.
- 15 Ani bialu iname ina mabuni pu mbira lini daga mini gerebi hangalu  
linime pingidowa waini iba wabu nalu  
ina miniha turuore halu dungu lo kamagoni.  
Ira olibe lininaga ibane hambuwa denguinibi hagianibi haiho kamagola  
inanaga dengui haihe wále bu kamagoni.  
Widi hangalu dowa mberedi wabuwa  
dawa no kamagola ina tinginiha hongo ngidagola kamagoni.
- 16 Lebanono dindini ira tamia bu karuni  
hariha howa dalu ibaabo haragome damiaabo haga kagoni.  
Ira tamia uruni Anduane Homogo ibugua bamba hengenego  
ibuninaga ira bu kagoni.
- 17 Ira tamia uruniha egarume tininaga anda bigi bigi biaga beda.  
Ai ega ma luhe mbira bedarume tinaga anda ira guraya ale karuha biaga bedagoni.
- 18 Meme gabua karu ti hari timbuni wedarunaga nenenen ibagabu haga kagoni.  
Tia amala horia ale bedaru ti egeandaha bira do haga bedagoni.
- 19 Harini ege wabu helariyagome tagira ibuwa ngoaho haga bialu  
mali mbiragonaga ege biagoni ogoaleneda lalu ibuni langialu kagoni.  
Ai ni ibu nde ogoangi anda pialu dadai bialu  
palue ibuni manda bu kagoni.
- 20 Ina aruma helaregola mbiraga nogo ega gabua tara tara  
ti bibahende tagira ibuwa ibaga bu haga kagoni.
- 21 Laiono hungubaluarume tomo taya bialu howa  
ne noani bi hongo howa ladaga halu larayagoni.  
Ngode Datagaliwabe ina tomo ti nelo mereyago  
ogoni mbira agini ngabe hondole taya bialu howa bi ani larayagoni.
- 22 Ti ani bialu howa ni dara handala  
uliha tini paliradagoha palima dai biaga.
- 23 Ani pedaha wali agali ti heyalu biabe bu puwa  
biabe bialu kane dege alendo ni palira handala ti andaga piaga.
- 24 Anduane Homogo-o ina mbirale dewaore wabiriyagoni.  
Ina mini gigabiwi gibiore kegome  
mbirale uruni bibahende inime wabiriyagoni.  
Dindi timbuni ogoni mbirale tara tara ini wabiriyarunime  
wu tolotagi kagoni.
- 25 Iba solowara timbuniore gibi bedagoni.  
Iba o bedagoniha wena timbuniore gibirubi  
wena emenebi dewa daga labenaheore bialu  
mbirale marualebi ogoniha dege biru ngagoni.
- 26 Iba solowara daligani iba sibi puibu daibu biaga.✧  
Iba unura dindiha wena gibi hiriribi bamba ini wabu berelene  
o bedagome gini biaga bedagoni.\*

✧ 104:26: Yob 41.1, Iba 74.14, Ais 27.1 \* 104:26: Iba Gana 74.14 de handabe

- 27 Uruni bibahendeme ti tomo noa biaruangi  
 ina dege mibelo inaga gi handayaho biraga bedagoni.
- 28 Ina ti tomo nolene meregola ti naga.  
 Ti tomo merego karulapeore nalu tombeore hara handala piaga.
- 29 Ina ti erembira meregola ti giho haga.  
 Inaga buhe tiha helarigo yameregola  
 ti homo tongolo daga halu lone dindi tago biaga.
- 30 Ina ti buhe lolene meregola ti emabu haga.  
 Ina dindini mbirale bibahende gahenge hangu tagira ibu helaga bialu kegoni.
- 31 Anduane Homogonaga hongo holenebi  
 ibunaga wa holenebi wiaaboore helo hame ledó.  
 Anduane Homogo ibugua mbirale ibunime wabu helaga biyadaru handaga bialu  
 ibuni turuore helo hame ledogoni.
- 32 Anduane Homogo ibugua dindi timbuni o ngagoni de handaya haragola  
 dindi ogoni duru laga.  
 Ibunaga gime hari karuni ela haragola  
 hari karuni hagua hungula bulebira.
- 33 I dindini emabu kongi  
 ina Anduane Homogohondo iba ganaru lo mulebero.  
 Ina inaga Ngode Datagaliwabe kagonaga mini mo yaraga halu iba ganaru laho ngoore  
 dege  
 ini homalu lairi holebero.
- 34 Anduane Homogo ibugua i mo turu haga biragola haruligo  
 ina iba gana lo meroruore ibu hale halu turuore helo hame ledó.
- 35 Anduane Homogo-o wali agali mana ko biaga bu karuniore  
 dindini nahelo balu bo ereba habelo hame ledó.  
 Wali agali ko ngubiore uruni ereba hai helo hame ledó.  
 Ina Anduane Homogonaga miniore mo yaraga holebero.  
 Anduane Homogonaga mini mo yaraga hama.

## 105

### *Anduane Homogo ibunaga wali agali pele minigo ogo (1 Bi Te 16.8-22)*

- 1 Iname Anduane Homogohondo turu howa kaj lalu  
 ibu daliga gibiore ka lalu lamiai hamija.  
 Wali agali hameigini dindi tara tarani paluyu pedaru  
 ti bibahendehondo ibugua gibiore uruale biya laga bialu  
 hale hai helo loyogo laga bimija.
- 2 Iname ibunaga mini mo yaraga halu iba gana lalu hamija.  
 Ibugua mbirale bayale bigi biyarunaga  
 bibahende hale hai helo laraga halu lamiai hamija.
- 3 Anduane Homogo ibu mini tigabiore kago  
 ina ibunaga kamago iname ibuhondo turu hamija.  
 Wali agali Anduane Homogohanda hame ledadagua biaga kamaru  
 ina turuhu holene nga.
- 4 Anduane Homogohanda ina biamogo bilonaga ibu karia puabo hamija.  
 Iname Anduane Homogo ibu kagoha kaware haparaho haabo hamija.
- 5-6 Abarahama aguanene Anduane Homogonaga biabe bia hagane kamirubi



Yagabanaga aguanene Anduane Homogoibunime dabene kamirubi  
 tígua Anduane Homogohanda manane tara tara agalime nabiagane ale bigi bi-  
 yarubi  
 wali agali ko biaga hearuhondo pani migi biyarubi  
 mitangiore biaabo halimu.

- 7 Anduane Homogo ibu inanaga Ngode Datagaliwabe kagoni.  
 Ibugua mana lo ngaruni wali agali dindi bibahendeha bu karume bilonaga lo nga.
- 8 Ibugua habo nalolene bi lowinigo ngaruni wia a<sub>i</sub> a<sub>i</sub>ore bulebira.  
 Ibugua bi lo wialu ogoale bulebero laga bialu lo ngaruni  
 mani hama porarume handaga bialu karia wia a<sub>i</sub> a<sub>i</sub>ore bulebira.
- 9 Ibugua Abarahamala habo nalolene bi lo wialu<sup>☆</sup>  
 Aisagahondo ogoale bulebero lenegobi heneneore bulebira.
- 10 Anduane Homogo ibugua Isaraelehondo habo nalolene bi lowinigo<sup>☆</sup>  
 ogoni wali agalirume bialu haabo helonaga lowini.
- 11 Anduane Homogo ibugua Isaraelehondo lalu,  
 Ina tihondo Kenana dindi karulalimulo ngulebero.  
 Dindi ogoni tibi tinaga waneigini mani holebirarubi  
 tininaga dindi ogoniore halimulo ngulebero, lene.
- 12 Ala Ngode Datagaliwabenaga wali agali dewa ndo henedaruni  
 ti emene mbira hangu Kenana dindini hene.  
 Ti dindi tene ndo mendeali dindini bame igiri yango pu haradagua bini.
- 13 Ti dindi mbirani baya hangu ho dambolo hene ndo.  
 Ti togolo yalu pialu dindi wiaruni bibahendeha ge hai haga hene.  
 Kini mbiragonaga dindiha puwa emene tigimandi dege halu  
 lone hili yalu pialu kini mende heagonaga dindiha pu halu  
 ani bigi bialu hene.
- 14 Ti ani bu ha heagolabi  
 hameigini maru hongohe hearume ibunaga wali agali uruni hangedope holilono<sup>☆</sup>  
 Ngode Datagaliwabe ibugua ti mamage hene.  
 Mamage howa ibugua kini hearu talialu  
 ibunaga wali agali urunihondo kagua mbira bulumini lalu lamini.
- 15 Ibugua lalu, Inaga biabe bia haga inime dabene karu mo ko holemini.  
 Inaga mana latagi haga karuore mbira ela nahalimu, lene.
- 16 Anduane Homogohanda ti dindini tomo wiago damene bibahende mo yu ereba hai  
 halu<sup>☆</sup>  
 hina gariore gibi tagira pelene.
- 17 Ani ibilole howa dege ti maha ibilonaga<sup>☆</sup>  
 ibugua Yosebe ala bamba halu Iyibi dindi pu helene.  
 Ibu hamene biarume Yosebe ti muni tagu wialu agali maru hearu  
 tinaga garabaya biabe ale bia haga helo minu mini.
- 18 Tigua ibunaga ge kirabali pu senime minu huba biagola<sup>☆</sup>  
 ge tandaga timbuni hene.  
 Ani bialu aeane gendabi mbira ibunaga mani hende hene.
- 19 O biyadaruni Anduane Homogo ibugua ala Yosebehondo emagaha howa bulebira  
 lamiyadagua  
 henene tagira pene.

☆ 105:9: Pig 12.7, 17.8, 26.3 ☆ 105:10: Pig 28.13 ☆ 105:14: Pig 20.3-7 ☆ 105:16: Pig 41.53-57 ☆ 105:17:  
 Pig 37.28, 45.5 ☆ 105:18: Pig 39.20-40.23

- 20 Ani biyagola Iyibi dindinaga kini heagome Yosebe gololenaga✧  
 agali mbira heagome lama pu lene.  
 Iyibi dindinaga kini wali agali dewaore haru haga heagome Yosebe golope hene.
- 21 Golope howa kini biagome ibunaga gabumane agali haguane helo✧  
 Yosebe dabo helene.  
 Dabi helowa Yosebe ibu Iyibi dindi bibahende hearunaga haguane helo helene.
- 22 Kininaga gabumane haru haga hearubi  
 kinihondo mitangi talebu miaga hearubi  
 uruni bibahende de hondowa haru holene hongo ibugua Yosebehondo mini.
- 23 Mani Yagaba ibu Iyibi dindi pialu✧  
 ogoriani ho ibira howa hene.
- 24 Ibu ani hearia Anduane Homogohanda Yagaba hameigini biamogo bialu✧  
 ti waneigini dewa tagira ibu helene.  
 Yagaba hameigini uruni ti hongoheore helalu  
 tinaga waitigi hearunaga hongo dindiha helo helene.
- 25 Anduane Homogo ibugua Iyibi wali agalime ibunaga wali agali handabe manga helo  
 helene.  
 Ani helayagola Iyibi wali agali tigua Anduane Homogonaga biabe biahaga hearu mo  
 hondo hole  
 henge taya bialu helo helene.
- 26 Mani Anduane Homogohanda ibunaga biabe biahaga ala dabene Mosesebi Aronobi  
 heba libu haru Iyibi dindi pelene.✧
- 27 Puwa libugua Iyibi dindini howa Ngode Datagaliwabenaga biabe hongoheore bialu  
 manane tara tara agalime nabiagane ale dewa bialu hene.
- 28 Ngode Datagaliwabehanda aruma holeneme Iyibinaga dindi bu dambi hayagola✧  
 wali agali hearu ti arumaha hene.  
 Iyibi wali agali arumaha hayagoyu tigua Ngode Datagaliwabehanda bidaba layadagua  
 nabi  
 ibunaga bi mo wahene.
- 29 Ibugua tinaga iba berearuni mo darama biai halu✧  
 wena ibaha berearuni bibahende bo homelai hene.
- 30 Yago dewaore gibi tidi yalu ibilalu  
 tinaga dindini yago dege birame helalu✧  
 kininaga andaga hearuhabi heba yago degeme tolotagi helene.
- 31 Ngode Datagaliwabehanda bungunabi hinabibi alebi tidi yalu pudaba layagola✧  
 ti tidi yalu puwa Iyibi dindi damenego pedegone mbira wuwa nahe  
 bibahendeoreha tolotagi hene.
- 32 Ibugua tinaga dindini dalu ibuni ibi nale✧  
 dalu dindi kunibi hari dababi gibiore ibilene.
- 33 Ogoni ibiyagome Iyibi wali agalinaga mabuni pu mbira lini daga mini gerebi hongo  
 wiarubi podai halu  
 poge ira hearubi podai halu  
 ti dindini ira hearu damenego bibahendeore podai hene.
- 34 Ibugua bi hangu layagola pagaya ale dewaore gibi daga labe nahe tidi yalu tagira  
 ibini.✧

✧ 105:20: Pig 41.14 ✧ 105:21: Pig 41.39-41 ✧ 105:23: Pig 46.6, 47.11 ✧ 105:24: Har 1.7-14 ✧ 105:26:  
 Har 3.1-4.17 ✧ 105:28: Har 10.21-23 ✧ 105:29: Har 7.17-21 ✧ 105:30: Har 8.1-6 ✧ 105:31: Har 8.16-17,  
 8.20-24 ✧ 105:32: Har 9.22-25 ✧ 105:34: Har 10.12-15

- 35 Tagira ibuwa tigua dindini tomo bibahende hengearu damenagonaga yuni tugu  
naioire halu  
mbirale andaho hearu damene tene heba na anda hene.
- 36 Ngode Datagaliwabe ibugua Iyibi wali agalinaga igini wahene damenego bibahende<sup>☆</sup>  
homelo bo wahai hene.
- 37 Mani ibugua Isaraele wali agali Iyibi dindi yu wahalu haru tagira pene.<sup>☆</sup>  
Tinaga giha muni ngoloru silibaru yalu tagira pene.  
Isaraele wali agali ti bibahendeore bayale hongohe hangu tagira pene.
- 38 Iyibi wali agalime Isaraele wali agali hondowa giho henego  
Isaraele wali agali tagira pialu piyagola  
ti turuore halu dungulo daibu hene.
- 39 Ngode Datagaliwabehanda hari daligani ibunaga wali agali hearu tigatiga hari  
beraliba mbira ngelowa<sup>☆</sup>  
ibunaga wali agali uruni andaneha helene.  
Mbiraga harini ira hangu delayagola  
ogonime wá hadali hayagola Isaraele wali agali ti wáni bayale hene.
- 40 Tigua Ngode Datagaliwabehondo tomo noa kama layagola<sup>☆</sup>  
ibugua ti nelo hariha howa ega deware ale ibilayagola  
ti ega uruni balu nene.  
Ti tomo nelonaga ibugua dahuliya andaga howa mberedi dalilayagola  
ti karulapeore nowa tombeho hene.
- 41 Ti iba nelonaga tole timbuni mbiraha howa iba tagira pelene.<sup>☆</sup>  
Dindi ko dalu naibagaha iba timbuni biagoni tayandaha dugutagi haradagua bialu  
o biagoriani gerai yupe helene.
- 42 Anduane Homogo ibugua ala bamba howa habo nalolene bi hongohe mbira  
ibunaga biabe biahaga Abarahamahondo lowinigo  
ogoningi mitangi bini.
- 43 Anduane Homogo ibugua anidagua bialu  
ibunaga wali agali dabeneru haru halu tagira pene.  
Haru tagira piyagola ti turu hama iba gana ladaga halu mambolo bama pene.
- 44 Anduane Homogo ibugua wali agali hameigini tara maru hearunaga dindi wiaru  
muwa<sup>☆</sup>  
ibunaga wali agali uruni mo mini.  
Wali agali tara uruninaga mabu wiarubi muwa  
ibunaga wali agali uruni ti karulelene.
- 45 Ibugua ogonidagua binidagoni irane  
Anduane Homogohanda bi lenedarubi  
ibunaga mana lowinidarubi bibahende  
Isaraele wali agalime talialu biai helonaga ani bini.  
Anduane Homogonaga mini mo yaragaore hama.

## 106

*Anduane Homogohanda ibunaga wali agalihondo mana bayale biaga ka lenego ogo*

<sup>1</sup> Anduane Homogonaga mini yaraga hama.<sup>☆</sup>

Ibugua mana bayale biaabo haga kagonagabi

ibunaga gubalini holene ha ho wiaabo haga kagonagabi

<sup>☆</sup> 105:36: Har 12.29    <sup>☆</sup> 105:37: Har 12.33-36    <sup>☆</sup> 105:39: Har 13.21-22    <sup>☆</sup> 105:40: Har 16.2-15    <sup>☆</sup> 105:41:  
Har 17.1-7, Dag 20.2-13    <sup>☆</sup> 105:44: Yos 11.16-23    <sup>☆</sup> 106:1: 1 Bit 16.34, 2 Bit 5.13, 7.3, Esr 3.11, Iba 100.5, 107.1,  
118.1, 136.1, Yar 33.11

- iname Anduane Homogohondo kai lama.
- <sup>2</sup> Ibugua mbirale timbuni bigi binirunaga garealalu aiwa lai habehedabe.  
Mana bayale biniru mitangi bialu  
ibunaga mini yaraga karulapeore hai habehe aiwadabe.
- <sup>3</sup> Wali agali ibunaga bi hale halu bia laradagua biaga karubi  
mana tigabi ngaru biaga karubi  
ti turu ho holene nga.
- <sup>4</sup> Anduane Homogo-o inaga wali agali biamogo berengi  
ibi nde mitangi bibe.  
Ina ti pele mialu haru dai berengi  
ibi nde haru dai bibelo hameledo.
- <sup>5</sup> Inaga wali agali ti bayale howa mbirale bayale damene ngaru mo wuwa  
tigua turu haga bialu kadagua  
ibi nde ti heba turu hamaga ho holeneore hamelo ko.  
Ina turu holene ogoni irane ina ininaga wali agaliore henene kamagome  
mini mbiraore halu mandagi howa turu haga bu holeberama.
- <sup>6</sup> Bamba ina mamalirume mana ko bialu heneyadagua  
inamebi nde mana ko tara tara dewa wiaru bialu harimagoni.
- <sup>7</sup> Inanaga mamalirume Iyibi dindini heangi<sup>☆</sup>  
ina biabe nahendene ale biriruni ti manda nabi haya.  
Ina inaga gubalini holene walia halu ti biamogo biriruni  
tigua embeda hai halu  
iba solowara Daramabi bereagoria heangi  
tigua Anduane Homogo Hongo Haiheore haabo kego ini erembira ngiya.
- <sup>8</sup> Tigua ani biyagoyu Anduane Homogohanda ibunaga hongo timbuni winigo mo walia  
halu  
ibugua ti biamogo bule lalu bi lowinidagua pele mialu gi mini.
- <sup>9</sup> Ibugua iba solowara Daramabi bereagohondo bi lamiyagola<sup>☆</sup>  
iba biagome bira migimigi bialu dindi pani hene.  
Pani hayagola ibugua wali agali haru halu ti iba biraga biagoria  
bame dindi hanguni poradagua bini.
- <sup>10</sup> Agali ti handabe manga haga hearume ti mo ko holebiyaria  
ibugua ti pele mini.  
Ti waitigi hearunaga giha hearia  
ibugua pele mialu haru dai bini.
- <sup>11</sup> Iba solowara timbuni biagome waitigi biaru bo tangu dambi hai halu ibame nai  
helene.  
Mbiraoreli hangubi mbira pora bialu napene.
- <sup>12</sup> Anduane Homogohanda anidagua biyagola ibunaga wali agali biarume<sup>☆</sup>  
ibugua buleore lalu lowigi biniru heneneore biragonida manda bini.  
Manda bialu ibuhondo mini mbiraore wiai halu  
tigua ibunaga mini yaraga halu iba ganaru lalu hene.
- <sup>13</sup> Ibugua ani biyago bilowa dege  
tigua uruni biyaru abaleore embeda hai hene.  
Tigua mbirale bule manda biyaria Anduane Homogohondo haleha nabi  
tini miniha tagira ibiyaru ale dege bialu hene.

- 14 Dindi ko iba dalu naibaga wiagoria howa tinaga miniha tomo noa dege halu<sup>☆</sup>  
tigua Ngode Datagaliwabe ba hendene.
- 15 Tigua ibuhondo bi haya halu ngi laabo hayagola  
ibugua ngi layago mialu tiha warago timbunibi tagira ibilene.
- 16 Ti dindi ko iba dalu naibaga wiagoria howa tigua Mosesebi<sup>☆</sup>  
Anduane Homogonaga biabe biahaga helo loma bia hene Aronobi  
libuhondo henge lalu hene.
- 17 Ti ani bialu hemigola dindi mo gaibuki hayagola  
gundu uli timbuni mbira o biagoria wu pehene.  
Ani biyagola Dadanabi Abiramabi libu one waneigini damene bu hearubi  
bibahendeore gundu uli o biagoaha uli piai hene.  
Uli piai hayagola dindi ibunime lone mo gegebu dambi hene.
- 18 Wali agali maru ko biaga biaru talima pialu hearuni  
ira hedo ibira halu ti dai helene.
- 19 Tigua Hari Horebe wiagoria howa nogo bulumaga ale mbira ngolome wabu ngelowa<sup>☆</sup>  
dama ogonida lowa bi pupu wialu hene.
- 20 Tigua Ngode Datagaliwabe ibu duniniore mini lene kago mitangi bialu lotu laga  
henego wahalu  
nogo bulumaga datani nalu haga heago ale wabu ngelowa  
ogoni mitangi bia aribia halu ibuhondo bi pupu wialu hene.
- 21 Ngode Datagaliwabehanda ti Iyibi dindini hearia  
ibugua nahendene ale tara tara bialu  
Isaraele wali agali Iyibialirunaga giha hearia mo wini.  
Ibugua ani biyagoyu Isaraele wali agalirume ibu mo embeda ho hene.
- 22 Ngode Datagaliwabehanda Iyibi dindini agalime nabiagane ale timbuni dunini wiaru  
bialu  
iba solowara Daramabi bereagoria ibugua nahendene ale tara tara biyagola  
wali agali tigua mogolo hendene.
- 23 Ngode Datagaliwabehanda ibunaga wali agaliru bo wahole layagola  
ibunaga biabe biahaga helo dabo helene Mosese ibugua Ngode Datagaliwabenaga  
deni heyu howa  
Isaraele wali agali biamogo bialu Ngode Datagaliwabehanda bo wanahelo  
ibunaga keba holene wiago ha pai hayagola  
Ngode Datagaliwabehanda ibunaga wali agali ba nabi wahene.
- 24 Ngode Datagaliwabehanda bulebero lalu lowiyago tigua yu tiga nabi howa<sup>☆</sup>  
dindi bayale ibugua ti ngulebero layago mo waho hene.
- 25 Tigua tinaga balai andaha ho palu howa bi gomogomo lalu  
Anduane Homogohanda tihondo bi layago talialu bia nabi wahene.
- 26 Ti ani heagola Ngode Datagaliwabehanda tihondo bi hongohe lalu,  
Tí dindi ko ege tole hangu wiaga ngagoaha ina tí home lelolebero.
- 27 Tinaga waneigini aguanene mani holobadaru ti dindi taratara ngaruha talia togo  
lelarogola<sup>☆</sup>  
ti hameigini tara tara Anduane Homogo manda nabi bu karu heba howa  
dindi tara ogoniha halu homolebira, lene.



- 28 Mani tigua Peo dindini howa dama mitangi bialu gime wabu wini mini Balahondo bi pupu wialu hene.✧  
Tigua mbirale ema nabulene bi nalaga ogonihondo lomabu mini tomo wiaru nalu hene.
- 29 Tigua mana ogonidagua bialu hayagome Anduane Homogo mo keba hayagola ibugua warago koore mbira tiha anda ibilaya.
- 30 Warago ogoni ibilayagola Piniashanda heyuwa mana ko bialu hearu bibahende minu бага biyagola warago timbuni biago ereba haya.
- 31 Piniashanda mbirale o binidaruni bayale biya lalu wali agalime mitangi biaho kadagua maniore wali agali holebirarumebi anidagua dege mitangi biaabo holebira.
- 32 Isaraele wali agalime iba Meriba peagoria howa✧  
Anduane Homogo mo keba halu heneya.  
Tigua ani biyagome pani tini nolene winigo genda ogoni Mosesehanda tinaga yu aribia heneya.
- 33 Tigua Mosese mo tandaga timbuni hayagola ibugua bayuwa mitangi nabi howa bi bayale ndo mbira lene.
- 34 Anduane Homogohanda tihondo wali agali tara karu homelo bo wahai halimu lalu lamiyago✧  
tigua nabe wahene.
- 35 Isaraeleali tigua wali tara berearu dabu bigi buwa tinaga mana ko wiago taluwa bialu haga heneya.
- 36 Tigua dama mitangi bialu gime wabu wiaruhondo bi pupu wialu hayagome Ngode Datagaliwabehanda tini mo ko helo helene.
- 37 Tigua dama mitangi bialu gime wabini Kenana dindini wiaruhondo✧  
tinaga waneiginiru bu hearu bo lomabu miaga heneya.
- 38 Ti waneigini urunime ko bini mbira nawioregoyu✧  
tigua bameore homelo beneyago  
waneigininaga daramame Ngode Datagaliwabenaga deni dindi ogoni mebiahe winiya.
- 39 Tigua mana ko ogonidagua biyagome tini Ngode Datagaliwabenaga deni dodohe halu ibu erembira mialu ibuni talima nape wahene.
- 40 Anduane Homogohanda ibunaga wali agali urunihondo keba timbuni howa ibugua ti handabe mangaore heneya.✧
- 41 Anduane Homogohanda Isaraele wali agali yupe howa ti hameigini tara tara hearunaga giha helene.  
Ani biyagola ti waitigi biarunaga andaneha hene.
- 42 Waitigi urunime ti genda dewaore mo ya heagola ti waitiginaga andaneha haabo hene.
- 43 Anduane Homogohanda ibunaga wali agali biamogo biaabo hayagoyu ti dogo howa ibugua bi layago mo wahalu mana ko dewaore bialu hene.
- 44 Tigua ani biaabo hayago helowa Anduane Homogo olalu ibuhondo bi layagola ibugua hale howa tiha genda wiago de handalu ti dara haga biniya.
- 45 Ibugua tihondo dara timbuni halu habo nalolene bi ala lowiyago mitangi biniya.

✧ 106:28: Dag 25.1-13 ✧ 106:32: Dag 20.2-13 ✧ 106:34: Hgn 2.1-3, 3.5-6 ✧ 106:37: 2 Kin 17.17 ✧ 106:38: Dag 35.33 ✧ 106:40: Hgn 2.14-18

Ibugua tihondo gubalini haabo hayagome lone mitangi bialu ti dara heneya.  
 46 Anduane Homogohanda ti waitigi bu hearunaga miniha mo wála hayagola  
 tigua Isaraeleali hondowa daraho dai bini.

47 Anduane Homogo inanaga Ngode Datagaliwabe kego  
 ína ina waitigi karunaga giha howa yamialu  
 inanaga dindini lone holomaya haru dai bu helabe.  
 Ína anidagua beregola iname íhondo turu halu kaj lalú  
 ínaga mini baya buruguleore yaraga halu haabo holeberema.

48 Anduane Homogo Isaraele wali agalinaga Ngode Datagaliwabe kago  
 ibu mini yaraga hamiya.  
 Áyubi maniore howabi ibunaga mini yaraga haaboore hamiya.  
 Ina wali agali bibahendeme lalú,  
 Heneneore Anduane Homogonaga mini yaragaore hama, lalú  
 aniore laabo hamiya.

## MBUGA DAUNI

*(Iba Gana 107-150)*

### 107

*Anduane Homogo ibu bayale gibiore biaga kagonaga mini mo yaraga henego ogo*

- 1 Anduane Homogo ibugua inahondo baya gibi dege bigi biaga ka.\*  
 Ibugua ina gubalini haho wiaaboore haga kagoni.  
 Ibugua ani biaga kagonaga iname ibuhondo kaj lolene nga.
- 2 Ala tínaga waitigi hearunaga gime tí minu yaniho hearia  
 Anduane Homogohanda gingila mialu haru dai bini kamiru  
 tigua ina larodagua dege lalú  
 ina haru Anduane Homogonaga mini mo yaraga hamiya.
- 3 Tí dindi haluni taraha hemiria ibugua haru dai biyagoni.  
 Dindi tara tara ni tagira ibiragohayagibi ni paliragohayagibi  
 uyurahayagibi unurahayagibi dindi uruni bibahendeni hemiria  
 ibugua tí haru dai biai hayagoni.
- 4 Wali agali maru dindi ko wali agali nahaga wiagoha pupe halu pene.  
 Piyago puwa hariga nawiaha pu lulu yuwa  
 wali agali pale andahe mbira nawiaha iraga howa pu taluaho hene.
- 5 Pu taluaho howa hina gari gibiore bialu  
 iba noa howa hége lebolaho daga hayagola  
 ai tongoore lole ogonida lo manda bini.
- 6 Tini darabi ogonibiore howa Anduane Homogo olayagola  
 ibugua ti biamogo bigi bialu  
 genda yu hearuni yamuwa mo wahaga bini.
- 7 Ani bialu ibugua ti hariga tigabini pelo haru pialu  
 tano mbira ti holene winiyagoria haru pu helene.
- 8 Anduane Homogohanda ti gubalini haho wiaabo halu  
 tinaga mbirale baya gibi turubini hangu bia haga bialu hayagonaga  
 tigua Anduane Homogohondo kajore lolene nga.
- 9 Wali agali iba noa howa hége yobu karu iba nelo ibugua miragola\*

\* 107:1: 1 Bit 16.34, 2 Bit 5.13, 7.3, Esr 3.11, Iba 100.5, 106.1, 118.1, 136.1, Yar 33.11    \* 107:9: Iba 34.10, Lg 1.53

ti iba karulapeore nowa dungulo helo miaga ka.  
Wali agali tomo noaho karu nelu tomo dewaore miragola  
ti haruore nowa tombe tolo haga kagoni.

- 10 Wali agali maru arumaore dumbiliniha howa<sup>☆</sup>  
pu senime gi ge minu hubabu wiagola  
garabayaore howa gendaho hene.
- 11 Ti ogonibiha henedagoni irane  
tinime Ngode Datagaliwabe Hongo Haiheore kagome  
ogoale bibe nabibe lalu laga biyagola  
tigua ibunaga bi erembira mialu piyagome tini ogonibiha pu hene.
- 12 Pu howa ti erekui biabe biadege bialu  
hongo bibahende pirilipe hai hayagola hene.  
Hongo bibahende ereba hai halu dindini pilo ibira haga biyagola  
ti gi mulene mbirali nahene.
- 13 Tini darabi ogonibiore howa Anduane Homogo olayagola  
ibugua ti biamogo bigi bialu genda yu hearuni yamuwa mo wahaga bini.
- 14 Anduane Homogohanda ti arumaha mini burugule ogoniha hearia<sup>☆</sup>  
pu seni biaru hadape halu  
ti garabaya hayago lone hodai nabilo golope halu pelene.
- 15 Anduane Homogohanda ti gubalini haho wiaabo halu  
tinaga mbirale baya gibi turubini hangu bia haga bialu hayagonaga  
tigua Anduane Homogohondo kajore lolene nga.
- 16 Ibugua aeane hongohe mini boronosime panga payadaruni duanialu  
aeane garabaya anda hobanda karuni podo gingirulo bagabu ibira ibira bile  
laga ka.
- 17 Wali agali maru ti kedange howa tinime mana ko tara tara dewa bigi biyagome  
warago balu tandaga nalu hene.
- 18 Ti tomo noa nahe magu gibi halu tomoore de handaya haga biyagola  
tongolo mialu dai bigi bini.
- 19 Tini darabi ogonibiore howa Anduane Homogo olayagola  
ibugua ti biamogo bigi bialu genda yu hearuni yamuwa mo wahaga bini.
- 20 Anduane Homogo ibunaga bime ogoale bia layagola  
tinaga tingini biaruni lone mo dabiho dai bialu  
homalihaore anda pole biyaria  
ibugua ti gililo mu yudai bigi biyagoni.
- 21 Anduane Homogohanda ti gubalini haho wiaabo halu  
tinaga mbirale baya gibi turubini hangu bia haga bialu hayagonaga  
tigua Anduane Homogohondo kajore lolene nga.
- 22 Tigua Anduane Homogohondo kai lalu  
mbirale ibuhondo bo lomabu mulene nga.  
Tigua iba gana turu halu lalu wali agali maru karu hale helo  
Anduane Homogohanda mana bayaore bigi biyarunaga mo yaraga halu lamiaga  
bulene nga.
- 23 Agali maru ti iba sibini palu howa  
iba solowara angeni gago taguape hama ibaga bialu  
dindi ngagoha ibaga biai halu

<sup>☆</sup> 107:10: Yob 36.8, Ais 9.2, 42.16, Lg 1.79    <sup>☆</sup> 107:14: Iba 68.6, 146.7, Ab 12.7

tinde muni biabe ogoni biaga hene.

<sup>24</sup> Agali iba sibini biabe bialu haga uruni tiguabi

Anduane Homogohanda bigi biyago handaga bini.

Anduane Homogo ibugua iba solowarani mbirale bayaore bigi biyago handaga bini.

<sup>25</sup> Anduane Homogo ibugua ani bia layagola

puyabu hongoheore pu lalu iba solowara yaribu gibiore bini.

<sup>26</sup> Ani biyagome iba sibiru uyura daligaore mo baraga halu

lone unura mo baraliore haga bini.

Hiriribi ogonidagua bigi biyago handayagola

agali iba sibini biabe biaga biarume

aiore áyu homarimadagoni manda buwa gi timbuniore ho hene.

<sup>27</sup> Tinaga mini bibahende puguai halu homolene anda ibiyagola

lulu iba nowa mini ereba howa sibaga lo haradagua

ti iba sibi biagoriani ibagabu hene.

<sup>28</sup> Tini darabi ogonibiore howa Anduane Homogo olayagola

ibugua ti biamogo bigi bialu

genda yu hearuni yamuwa mo wahaga bini.

<sup>29</sup> Anduane Homogo ibugua puyabu hongohe pu layagoni pulairi helalu

iba yaribu gibiore biyagoni mo hundia halu

iba solowara ema nabi bayale berelene.

<sup>30</sup> Iba solowarame ema nabi bayaore birape hayago hondowa

agali biaru ti turuore halu hene.

Anduane Homogo ibugua ti bayuwa haru pialu

iba sibi anda pu wiaga wiagoria ubandaho ngelene.

<sup>31</sup> Anduane Homogohanda ti gubalini haho wiaabo halu

tinaga mbirale baya gibi turubini hangu bia haga bialu hayagonaga

tigua Anduane Homogohondo kajore lolene nga.

<sup>32</sup> Uruni tigua Ngode Datagaliwabenaga wali agali mandagi ngoaiho bedagoria

Anduane Homogo ibu daligaore gibi kagoni lalu

bibahende hale hai helo lope holene nga.

Agali haguane dege dege ngoaiho bedarubi hale hai helo

ogoriani ibunaga mini laraga holene nga.

<sup>33</sup> Anduane Homogo ibugua iba poraruni hundilai helalu

iba dindiha howa dugualu karuni bibahende hundi tege lelaga hene.

<sup>34</sup> Dindi bene bere mbirale anda holene ngaruni mo beregedowa

mbirale mbira anda habe nahe koore ibi dindi kuni panaho ngelaga hene.

Ogonidagua biaganego irane wali agali dindi ogoriani hearume ko gibiore biyagola

ti genda ogoni yilo Anduane Homogo ibugua miaga hene.

<sup>35</sup> Dindi ko mbirale mbira anda nahaga ngarunaga iba goroyane tagira íbu berelalu

dindi yobu dagahe ngarunaga iba dugutagi helaga bini.

<sup>36</sup> Ibugua dindi bene bere ogoriani wali agali ala tomo nolene nawi buru palu haga

hearu

dindi ogoriani haru ibalu tigua anda bu hene.

<sup>37</sup> Ti ogoriani hope ho howa ti mabuni tomo hangalu

pu mbira lini daga mini gerebi dewa hongo wini.

Hongowa tomo dewaore ti mabuni bu ngaria bialu

gerebi lini dewaorebi daga hene.

<sup>38</sup> Anduane Homogo ibugua ibunaga wali agalihondo baya gibiore bialu

ti mo gumbila hayagola

tinaga waneigini dewaore hene.  
Ibugua tinaga nogo tara tara hearubi dewaore ho dame bilene.

<sup>39</sup> Anduane Homogonaga wali agali biaru tinaga waitigi hearume bo hengedalu  
mo taga hayagola tandaga nalu dindihaore darabi hearia hondowa

<sup>40</sup> ibugua ibunaga wali agali biaru bope haga agali haguane hearu mo habane nabulene  
helalu  
ti dindi ko hariga nawi wiagoha luluyu ibagabu helo helene.

<sup>41</sup> Ani biyagoyu wali agali yagibano darabi ha ko howa hearu  
ibunime ti biamogo bigi bini.

Tinaga waneigini dewaore nogo sibi ale tagira ibu helo biamogo bini.

<sup>42</sup> Wali agali mini tigabiwi karume  
Anduane Homogohanda baya turubi urunibi bigi biaga kago hondowa  
ti turuore halu miniha dinguore lo haga ka.

Wali agali mini kowu karu tinaga bi mbira lolenego nawioiredagola  
ti bame ne hambu ndibu lowa hama pedagogi.

<sup>43</sup> Anigo ai wali agali mini gigabiwi karume bi o laruruni damenego bibahendeore  
baya hangu mitangi biai helo hameledo.

Anduane Homogo ibugua ti gubalini gibiore haho wiaabo haga kago  
ogoninaga laluore maru karu hale hai helo hameledo.

## 108

*Ngode Datagaliwabehanda ibunaga wali agali biamogo bilonaga bi lenego ogo  
(Iba Gana 57.7-11, 60.5-12)*

<sup>1</sup> Ngode Datagaliwabe-o i mini bilinahe howa  
ihondo mini mbiraore hongohe wu kogonigo  
ina iba ganaru lalu  
inaga mini yaraga halu holebero.

<sup>2</sup> Ini padogoria heyuwa ina ngida aleru barogome  
ni tagira ibilo mo heyu holebero.

<sup>3</sup> Anduane Homogo-o i dindi tara tara ngaruha pu howa  
ihondo kai laabo holebero.

Hameigini tara tarabu karuha pialu  
ina inaga mini yaraga hama polebero.

<sup>4</sup> Anduane Homogo-o inaga gubalini haabo holene emene ndoore  
hari daliga elahe wu kegoni.

Inaga mini bilinahe ngego timbuni yangale howa  
hari mindini elahe wu kegoni.

<sup>5</sup> Ngode Datagaliwabe-o ini timbuniore dunini kego wali agalime handai helo  
hari daligani mo walia habe.

Dindi bibahendeha inaga wa holenebi mini lene holenebi  
panigi mo walia habe.

<sup>6</sup> Ina ina gubalini timbuni ho haga kegonigo  
bayale hai holomaya inaga bi larogo hale habe.

Inaga hongo timbuni ho kegome ina pele ngibe laro.

<sup>7</sup> Ngode Datagaliwabehanda ibuninaga andaha howa lalu,  
Ina wai bialu bo podahana hai halu wayali harugo

Segeme dindibi Sugodo dindiha dindi ulini bugubugu wuyu pedarubi



dindi uruni inaga wali agaliru ti helo  
ina ti tu wu ta hai holebero.

<sup>8</sup> Gileada dindibi Manase dindibi ininagaore nga.  
Eberaimi ibu inaga ege manda ale nga.

Yuda ibu kininaga haru haga halimbu ale nga.

<sup>9</sup> Moaba dindi inaga wayawaya biaga ndisibe ale wialu  
Idomo dindi inagaore ngo lalu ina inaga ge su golowa  
dindi ogoriani ba amu holebero.

Ina Pilidialiru balu wayali howa  
turu halu ga lalu harugoni, laya.

<sup>10</sup> Ngode Datagaliwabe-o pabe hongohe bu mabubi tano ngagoha  
i aiwa haru anda polobadabe.

Idomo dindiha i aiwa haru polobadabe.

<sup>11</sup> Ngode Datagaliwabe ina ina erembira ngiribe.

Ina inanaga ami agali karu biamogo nabuleorebe.

<sup>12</sup> Agalinaga hongome ina biamogo bulene emene nakarulapego  
ina waitigi bu karu baba wai bulumaya  
inioreme ina biamogo bibe.

<sup>13</sup> Ngode Datagaliwabe ibu ina heba kayagua nde  
iname wai bialu wayali holeberema.  
Waitigi karu ibunime bope hai holebira.

## 109

*Agalime genda yu howa Anduane Homogo olenego ogo*

<sup>1</sup> Ngode Datagaliwabe-o ina inaga mini yaraga halu  
bi larogo haleore howa ladai bibe.

<sup>2</sup> Agali ko bu karumebi ke hagane bu karumebi i handabe manga howa  
ke halu i mege bialu kagoni ndobe.

<sup>3</sup> Tigua i mini lalu ke howa bi koore lalu ka.

Tigua irane mbira nayi howa bi ko ogoni lalu ka.

<sup>4</sup> Ina nde ti gubalini ho howa Anduane Homogohondo tinaga bi lahalu kogoni.

Ina ani berogo bilowa tigua nde i handabe manga haga ka.

<sup>5</sup> Ina tihondo mana bayaleru bialu kogola  
tigua ihondo mana ko biadai biaga ka.

Ina tihondo gubalini ho kogola  
tigua ihondo gubalini nahe handabe manga haga ka.

<sup>6</sup> I waitigi kagonaga bi larago mo tale bilonaga  
agali ko mbira dabo helabe.

Ibuninaga waitigi kagome ibuni godini haru pu helelo helabe.

<sup>7</sup> Agali godi hale haga kagome agali godini pu kagola  
ko bini mbira ngane handalu garabaya helelo hameledo.

Agali ogonime Ngode Datagaliwabehondo bi laradagobi  
ko dege bini lalu walia holebira.

<sup>8</sup> Ibu dindini lu nahe abale homelo hameledo.✧

Biabe ibugua bialu haga ngaru  
agali mendealime bia aribia halu helo hameledo.

<sup>9</sup> Agali ogoninaga waneigini ti aba nahe helo

✧ 109:8: Ab 1.20

ibu onebi wali dalo berelo hame ledogoni.

10 Ibugua waneiginiore tinaga anda mbira nahe yagibanoore howa  
ibaga hangu bialu ngi ngi laabo haga helo hamelo kogoni.

Ti anda koha palu karia agali marume ibalu  
ti bo taliatagi helo hamelo kogoni.

11 Waitigi agali ogoni ibu baba agali maru dano ho heneme  
ibunaga dindibi mbirale wiyadarubi ti karulai helo hameledo.

Agali dindi taraha howa ibu hene karume  
ibunaga biabe bialu hayagonaga yolo ti mo nelo hameledo.

12 Maru karume agali ogoni biamogo nabilo  
ibu waneigini helalu homeneru mbiralime dara howa biamogobi nabilo hamelo  
kogoni.

13 Ibugua waneigini aguanenerubi homai halu  
dabane mani holebirarume ibunaga mini embedaho wahelo hamelo kogoni.

14 Anduane Homogohanda agali biagonaga mamali bamba henerume  
ko biyaru mitangi bu wiaabo halu  
ibu aiyahanda ko biyarubi domo wanahelo hameledo.

15 Anduane Homogo ibugua urunime ko bibahende biyaru mitangi bu wiaabo halu  
marume ti hameigini heneru embeda ho wahelo hameledo.

16 Agali o biago ibugua mendeali kago  
dara holene mitangi nabiaga hene.

Ibugua yagibano hearubi mbirale nayi burupale hearubi  
hongo nahe genda yu hearubi ti mo tandaga halu bo wahaga hene.

17 Bamba ibugua agali maru hearu mo ko helonaga ha haga hene.  
Áyu marume nde ibuni ha helo hameledo.

Ibugua Ngode Datagaliwabehondo agali mende kago  
biamogo bibe lalu bi laholene mangaho haga hene.

Ibuni nde maru karume turu howa biamogo nabilo hameledo.

18 Horo bibahendengi ibugua aga karulo haabo hagadagua  
ibu mendeali kago ha holene mugube hene.

Ibugua maruhondo ha haragome ibuni tinginiha iba ale anda pialu  
ibu kuniha weli ale anda pelo hameledo.

19 Ha holene bi ogonime ibuni tingini aga biadambi haradagua bialu  
ibuni mandibu wu haradagua bilo hameledo.

20 Anduane Homogo-o waitigime ihondo bi ko ogonibi laga kago  
tini ko helo pani ogonidagua nelo mibe.

21 Inaga Anduane Homogo Bibahende Haru Hame Ho Haga-o  
ína i biamogo bulebero lalu lo wiridagua  
biamogo bibelo hamelo kogoni.

Ínaga gubalini holenemebi bayaleore bulenemebi  
i pele ngialu haru dai bibelo hamelo kogoni.

22 I bu miniha genda tandagabi yu haabo kogome  
i yagibano howa burupale kogoni.

23 Alendo ni anda poragola ni munini biago abale ereba haralidagua  
i abale pu wahole kogoni ndobe.

I ore bame hinabibi ale bedoria  
puyabume pulo wahabehe kogoni ndobe.

24 I tomo nane kogome inaga ge duli hongo nahe kogoni.

Ini obu wahu inaga kuni bibahende pirilape hai ka.

<sup>25</sup> Wali agali i de handararume i hondo oba halu\*  
mege bialu ma tandalaga bialu kagoni ndobe.

<sup>26</sup> Anduane Homogo inaga Ngode Datagaliwabe-o i biamogo bibe.  
Ina ihondo gubalini timbuni ho haabo haga kegome  
i pele ngibe.

<sup>27</sup> I waitigi bu karume i pele ngiaga ini kegonida  
manda bilo walia habe.

<sup>28</sup> Tigua i Ngode Datagaliwabehanda mo ko helo laga bialu ha holebiragoyu  
ina i biamogo biaabo haga kegoni.

Agali i mo tandaga haga karu  
tini mo tandaga habelo hamelo kogoni.

Inaga biabe biahaga i kogo  
inaga miniha dungulo holiya mo dungula habe.

<sup>29</sup> I waitigi biaru ti taga pani timbuni nalu helo hameledo.  
Tigua aga lu biagimbubi karulagadagua  
ti taga harago wali agali karume hendelo  
ina taga holeneme ti karulagimbu bu helabelo hamelo kogoni.

<sup>30</sup> Ina bi hongo howa ladaga halu Anduane Homogohondo turu howa  
kai timbuni lalu holebero.

Wali agali dewali Anduane Homogo mitangi bialu lotu lole ngoai ho kagoria  
ina Anduane Homogonaga mini yaraga holebero.

<sup>31</sup> Ibugua wali agali yagibano karu biamogo biaga ka.  
Wali agali marume godi deni haru tagira puwa uruni ti bo waholene nga nalelobi  
ibugua ti handayaho halu tinaga lahaga ka.

## 110

*Anduane Homogola kini mbira ibunime dabenegola iba gana lenego ogo*

<sup>1</sup> Anduane Homogohanda inaga Anduane Homogo kinihondo ogodagua laya.\*

I waitigi karu inaga geme hengedai habelo ina mo heloliya  
i inaga gi tigahayagi ogoria birabe, laya.

<sup>2</sup> Anduane Homogo ibugua ina handayaho habelo  
Saiono howa dindi dewaore mo tago holebira.

Ibugua ogodagua lalu,

Ina i waitigi karuni i andaneha ina handayaho habe, leda.

<sup>3</sup> Ina i waitigi karu bo pole wai tagira porengi  
inaga wali agali karume wai iha anda ibalu  
tini hameme wai ina haru bu ma lelebira.

Mbiraga dadimba ibiragome tanini damiragola  
tani ibuha hongo gahenge anda ibagadagua dege  
inaga igiri daliaheru tiha hongo holene gahenge anda ho howa  
Ngode Datagaliwabenaga hari kago iraga halu i keria ibulebira.

<sup>4</sup> Anduane Homogohanda ihondo bulebero lowialu mbira ogodagua layagoni.\*  
Loma binigo mo miaga mbirali Ngode Datagaliwabhondo loma binigo mo miaga  
Melegesedege heneyagobi dege

\* 109:25: Md 27.39, Mg 15.29    \* 110:1: Md 22.44, Mg 12.36, Lg 20.42-43, Ab 2.34-35, 1 Ko 15.25, Eb 1.20-22, Kl 3.1, Hi 1.13, 8.1, 10.12-13    \* 110:4: Hi 5.6, 6.20, 7.17, 7.21

í haho wiaabo holebere, lalu lowini.  
 Anduane Homogohanda bi ogoni heneneore henene ledago  
 ibugua bi ogoni lone mende ale lo aribia naholebira.

<sup>5</sup> Anduane Homogo ibugua ínaga gi tigahayagi mo hongo holenaga  
 ibuni í heba hapara ho kagoni.

Ibu keba harangi ibugua kini tara tara karu balu bope hai holebira.

<sup>6</sup> Ibugua wali agali dindi tara tarani bu karume  
 ko biyarunaga pani tini nelo dabo mulebira.

Ani bialu wai biagane wai hamani  
 agali dewaore homene bo payapaya bulebira.

Dindi bibahendenaga kini hama pedaruni bibahende  
 ibugua bope hai holebira.

<sup>7</sup> Ani bialu kini ogoni ibu agali balu pialu  
 iba kaware hariga teneni poragoni dalipe howa hambu nolebira.

Ani bigi biyarume kini ibu hongohe halu  
 wai bigi biragola wayali haabo holebira.

## 111

### *Iname Anduane Homogonaga mini yaraga hamiya lalu lenego ogo*

<sup>1</sup> Anduane Homogonaga mini yaraga hamiya.

Ina ibunaga wali agali ngoaiho kagoria pialu  
 ibuhondo gubalini timbuni howa kaj lalu holebero.

<sup>2</sup> Anduane Homogohanda biabe nahendene ale gibiore biaga ka.  
 Wali agalime biabe uruni birago hondowa turuho haga bu karu  
 tigua biabe uruni bayuwa manda bule begelo handaga ka.

<sup>3</sup> Ibugua biabe biraru damene bibahendeme  
 ibu mini leneorebi  
 ibu haru haga kiniorebi ka lalu walia haga nga.  
 Ibunaga mana tigabi ngagoni wiaabobo bu wulebira.

<sup>4</sup> Anduane Homogo ibunime mbirale biniru damene wali agalime mitangi biaabo helo  
 ibugua tinaga miniha mo wála halu haabo haga ka.

Ibugua inahondo dara holene nawi howa  
 ina dara halu bayale biamogo biaabo haga ka.

<sup>5</sup> Ibugua wali agali ibu mo dunini ho karuhondo tomo nelo miaabo haga ka.  
 Ibugua wali agalihondo habo nalolene bi bamba lowinigo embeda nahagaore ka.

<sup>6</sup> Ibugua í hongo ogobi ko lalu walia halu  
 wali agali maru bu hearunaga dindi wiaru  
 ibunaga wali agaliruhondo mo mini.

<sup>7</sup> Ibugua mana biaga ngaru damene bibahende mini bilinahe howa  
 tigabiore biai haga ka.

Ibugua mana bulene nga leneru  
 iname mo dunu bia howa talialu bulene nga.

<sup>8</sup> Anduane Homogo ibugua bi mana urunibi lo wiyaru  
 ibu heneneorebi bayale tigabibi howa lowiyago  
 bi uruni wiaabobo bu wulebira.

<sup>9</sup> Ibunaga wali agaliru ibunime golope halu haru dai bialu  
 tihondo habo nalolene bi wiaaboore helo lowini.  
 Anduane Homogo ibu baya burugule mini leneore ka.

10 Mbirali ibu mini bayale gigabiwi hoa hayagua✠  
 ala Anduane Homogo gibiore ka lalu ibu mo dunini holene nga.  
 Wali agalime ibuni hamelo kago bialu kane hendedagohondo  
 ibugua mini bayale gigabi wuleneru talebu miaga ka.  
 Ibu ogonibi ka manda bialu  
 ibunaga mini yaraga haaboore holene nga.

## 112

### *Wali agali bayale bu karume turu holene ngago ogo*

1 Anduane Homogonaga mini yaraga holene nga.  
 Mbirali ibu Anduane Homogo mitangi bialu mo dunini haga kago  
 ibu turuore ho haga ka.  
 Anduane Homogonaga bi mana talialu bulene hamelo haga kago  
 ibu turuore ho ka.

2 Agali bayale biaga kagonaga waneiginiru  
 ti wali agali maru bu karuha howa mini lene haga bulebira.  
 Agali ogoninaga aguane holebiraru  
 Ngode Datagaliwabehanda ti biamogo bialu bayale biaabo holebira.

3 Ibu damene ti muni mbiraleru dewawi howa  
 ibu homogo bayale haabo holebira.

4 Arumaho ngagoha wali agali bayaleru✠  
 biamogo bulenaga wá holene tagira ibaga.  
 Wali agali mendeali dara howa biamogo biagabi  
 maruhondo bayale biagabi tigatiga hangu biagabi  
 ti kagoha wá haabo holebira.

5 Mbirali ibu mbirale dewawi kagome ibunaga mbirale ngaru  
 maru karume dano helo turu howa miagabi  
 ibunaga biyinaya birago tigabi hangu biagabi howa  
 ibu turubiore haga ka.

6 Wali agali bayale biaga kago ibu pinale mini bilinahe kagola  
 wali agali marume ibu embeda nahe mitangi bu haabo holebira.

7 Genda timbuni mbira yu anda ibira larago hale howa✠  
 ogoni ibugua gi nahe haga ka.  
 Ibugua Anduane Homogohondo mini mbiraore hongo ho wu haga ka.

8 Ibugua mbirale biraru hondowa mogolalu gi nahaga ka.  
 Waitigi ibirarume wai bialu wayali nahe  
 bame degedane ibu de hondolebira.

9 Ibugua yagibano karuhondo mbirale dewa talebu miaga ka.✠  
 Ibugua wali agali maru dara howa biamogo biagago wiaaboore holebira.  
 Ibu dindini mini lene mbira kagola  
 wali agalime ibunaga mini yaraga halu holebira.

10 Wali agali ko biaga karume bayale biaga o biago hondowa  
 ti keba ho holebira.  
 Tigua wali agali bayale o biagobi handabe manga haragome  
 mani tinibi mo ko holebira.  
 Ko biaga karu ti mbirale bayale mo yule hamelo hayaruni  
 nayi dege howa pu ereba holebira.



## 113

*Wali agalime Anduane Homogohanda tihondo bayale biyagonaga turu henego ogo*

- 1 Anduane Homogonaga mini yaraga holene nga.  
Ibunaga biabe biahaga kamiru  
tigua Anduane Homogonaga mini yaraga hadaba.
- 2 Ibunaga mini áyubi manibi yaraga haaboore holene nga.
- 3 Ni tagira ibiragohayagi howabi ni paliragohayagi howabi  
wali agali bibahendeme Anduane Homogonaga mini yaraga holene nga.
- 4 Anduane Homogohanda hameigini tara tara dindi bibahendeni karu  
handayaho howa haru haame haga kagoni.  
Ibunaga wá holene hari daliga bolangua howa daligaorene daliga kagoni.
- 5 Mbirali Anduane Homogo inanaga Ngode Datagaliwabe ale mbira naheore.  
Ibu daligaorene daligaha kagoni.
- 6 Ibu de handadali halu  
hari daligabi dindibi handape haga kagoni.
- 7 Ibugua yagibano dindiha karu mo yaraga halu  
wali agali maru burupale karu ti gendayu karia  
mo heyu howa bayale helaga ka.
- 8 Ibugua wali agali urunibi mini lene helalu  
ibunaga wali agali haguane karu baba mandagi helo helaga biaga ka.
- 9 Wali waneigini nataba hanaga bedaru biamogo buwa  
ibugua wali urunibi turuore ho berelo waneigini dewaore miaga ka.  
Anduane Homogonaga mini yaraga hama.

## 114

*Isaraele wali agalime Iyibi dindi wahalu tagira piyangi iba gana lenego ogo*

- 1 Bamba Isaraele wali agalime Iyibi dindi wahalu tagira pene.✧  
Yagaba aguaneru ti dindi tarani howa wahalu tagira pene.
- 2 Ogonidagua piyangi Yuda wali agali ti Anduane Homogonaga helo dabo helene.  
Isaraele wali agali tibi nde ibunaga wali agaliore helene.
- 3 Iba solowara Daramabi bereagome de hondowa ibida pene.✧  
Iba Yodana ibu ema bialu pu nabi berene.
- 4 Dindi hari timbuni wearume nogo memerume pogolama ibaga biradagua bialu  
hari emene wearume nogo sibi iginime pogo laradagua bini.
- 5 Iba solowara Daramabi-o í agua biyane ibida piribe.  
Iba Yodana íbi nde agua biyagola pu nabi biraribe.
- 6 Hari timbuni wedemiru-o  
tigua nogo memerume pogolama ibaga biradagua bialu harimigo irane agibe.  
Hari emene wedemiru-o  
tibi nogo sibi iginime pogo laradagua bialu harimigo aginagabe.
- 7 Dindi-o Anduane Homogo áyu o ibiragonigo  
í gi howa duru lalu wia.  
Yagabanaga Ngode Datagaliwabe o ibiragoni hondowa  
í duru lalu ema bialu wulene nga.
- 8 Ibugua ege tole timbuni ngago mo iba hambiaga goriane berelalu✧

✧ 114:1: Har 12.51 ✧ 114:3: Har 14.21, Yos 3.16 ✧ 114:8: Har 17.1-7, Dag 20.2-13

dindi hariha ege tole timbuni kago mo iba timbuni pelaga kagoni.

## 115

*Ngode Datagaliwabe mbiraore howa ibuni hangu heneneore kagoni ogo*

<sup>1</sup> Anduane Homogo-o ina ina horo bibahendengi gubalini haho wiaaboore halu mini bilinahe howa ina yu wanahagaore kegoni.

Í aniore biaga kegonaga iname inanenaga mini mo yaraga holene nawiore. Iname inaga mini hanguore mo yaraga haabo holene nga.

<sup>2</sup> Wali agali hameigini tara tara paluyu pedarume inahondo hale halu, Tinaga Ngode Datagaliwabe hayuagoni agoha kabe, lalu kagoni irane aginagadabe.

<sup>3</sup> Inanaga Ngode Datagaliwabe ibu dahuliya andagani kagoni. Ibu hongo haihe howa ibuni mbirale mbira bule manda biyagua ta nabi biai habehe kagoni.

<sup>4</sup> Wali agali tara tara karume muni ngolomebi silibamebi<sup>☆</sup> mbirale mbira gime wabuwa tinaga bi pupu wiagane uruni laga ka. Bame wali agali tini degeme wabu helene urunihondo tinaga bi pupu wiagane laga kagoni.

<sup>5</sup> Mbirale gime wabini uruni ti ne hariga wia ngagoyu bi nalabehe. De kagoyu tinaga deme nahandabehe.

<sup>6</sup> Tinaga hale kagoyu hale nahabehe. Ngu hariga ngagoyu nguime nga nahabehe.

<sup>7</sup> Tinaga gi kagoyu ema bialu mbirale mbira ela nahabehe. Ge kagoyu ibaga bialu pobe nahe. Tinaga ne harigaha howa bi mbira latagi habe nahe kagoni.

<sup>8</sup> Wali agali uruni wabiaga karumebi mo dunini haga karu tinibi mbirale tini wabini urunibi dege helo hame ledi.

<sup>9</sup> Isaraele wali agali kamiru tí Anduane Homogohondo mini pagaho halimu. Ibugua tí biamogo bialu de handayaho haga kagoni.

<sup>10</sup> Ngode Datagaliwabenaga loma binigo mo miaga Arono aria kamiru tí Anduane Homogohondo mini pagaho halimu. Ibugua ti biamogo bialu de handayaho haga kagoni.

<sup>11</sup> Wali agali ibu mitangi bialu lotu laga kamiru tí Anduane Homogohondo mini pagaho halimu. Ibugua ti biamogo bialu de handayaho haga kagoni.

<sup>12</sup> Anduane Homogo ibugua ina mbirale burupale kama aleru mitangi bialu biamogo biaga kagoni.

Ibugua Isaraele wali agalibi Ngode Datagaliwabenaga loma binigo mo miaga karu ariabi ibunime ti mo gumbila holebira.

<sup>13</sup> Anduane Homogo ibugua wali agali emene timbunibi<sup>☆</sup> ibu mitangi bialu ibu andaneha haga karu ibunime ti mo gumbila holebira.

<sup>☆</sup> 115:4: Iba 135.15-18, Yar 10.5, Mo 9.20    <sup>☆</sup> 115:13: Mo 11.18, 19.5

- 14 Anduane Homogo ibugua tíhondo waneigini dewaore ngialu  
tinaga waneigini mani hama poraru tihondobi  
waneigini dewaore milo hamelo kogoni.
- 15 Anduane Homogo dindibi hari daligabi bibahende wabini kagome  
tí mo gumbilaore helo hamelo kogoni.
- 16 Hari daliga bibahende Anduane Homogo ibuni hangunaga ngagonigo  
ai dindi timbuni o ngagoni ina wali agali holomayanaga ngini.
- 17 Wali agali homalu dinini humbirini andaga pugu biyagoni  
tigua humbirini andaga pu howa Anduane Homogonaga mini mo yaraga nahaga.
- 18 Ai ina wali agali dindini dére emabu kamaru  
iname Anduane Homogonaga mini mo yaraga halu ibuhondo kaj lamija.  
Áyu kamangibi manibi kaj laaboore hamija.  
Anduane Homogonaga mini mo yaragaore haabo holene nga.

## 116

*Homolene wiagoria howa gi miyagola yo pialu peneme Ngode Datagaliwabenaga mini yaraga henego ogo*

- 1 Ina Anduane Homogohondo bi larugo ibugua hale halu biaga kagonaga  
ina ibuhondo gubalini ho kogoni.  
Ina ibuhondo bi larogo haleore haga ka.
- 2 Ina ibu olarongi ta nabi haleore halu biaga ka.✧  
Ibu ani biagagodago i dére emabu kongi ibu olahe wiaabo holebero.
- 3 I homoleneore gi biyagome mo dombe wia hayagola dombeneha haru.✧  
Homaliha horo heago hondowa homali hondowabi  
gi ogonibi dege biyagola haru.  
Miniha gi dege dindiho mini tumutumumu bu ho wiru.
- 4 I aniore howa nde ina Anduane Homogo olalu,  
Anduane Homogo-o homaore bidogo gi mia, lalu olaru.
- 5 Anduane Homogo ibugua ina dara nahabehego  
dara howa biamogo biagabi bayaore bigi biagabi ka.  
Inanaga Ngode Datagaliwabe ibu wali agali dara hagaore kagoni.
- 6 Wali agali ko hongo nahe paipai biadai bibe nahe karu  
Anduane Homogo ibugua ti biamogo biaga ka.  
I homolene wiagoria hewaria ibugua i gi miya.
- 7 Ai i de dege dindiho naholebero.  
Miniha dungulo dai buwa bu ibira ho holebero.  
Anduane Homogohanda ihondo bayaore biyago manda bialu ani holebero.
- 8 Anduane Homogohanda i homolene wiagoria hewaria  
gi mialu inaga de iba domaya.  
I pilole hewaria ibugua i gini yani ho haya.
- 9 Ibugua ani binigome ai áyu i Anduane Homogonaga deni howa  
wali agali maru dére karu kadagua mandagi kamagoni.
- 10 I homolene kawareore wiago hondowa✧  
aiore nde homaruda manda buwa dege  
ina Anduane Homogohondo mini mbiraore wiaaboore haru.
- 11 Homolene giore halu

wali agali bu harimaruni mbiraligomebi i pele nguleneho mbira nahayuago, lalu hanguore i homoleda manda buwa dege  
Anduane Homogohondo mini mbiraore wiaaboore haru.

<sup>12</sup> Anduane Homogohanda ihondo bayale dege bima ibiyagonaga  
ina ibuhondo agi muledabe.

<sup>13</sup> I homoleore kaware hewaria gi miyagonaga kai lalu  
ina waini iba lomabu mule ibu karia hambu yalu ibulebero.

<sup>14</sup> Ibugua wali agaliru mo mogobu biru ngagoria puwa  
ina ibuhondo mulebero lalu lowirugo miaore bulebero.

<sup>15</sup> Anduane Homogo ibugua ibunaga wali agali mbirago homaga biragola\*  
ibu miniha tandaga haore biaga ka.

<sup>16</sup> Anduane Homogo-o i inaga biabe biahaga kogoni.  
I aiyahanda inaga biabe biahalu bereneyadagua  
ayu ina inaga biabe biahalu ko.

I homoleore hewaria ina i gini mialu bayale heledagoni.

<sup>17</sup> Ina ihondo kaiore lalu mbirale mbira lomabu ngialu  
ihondo bi lolebero.

<sup>18-19</sup> Yaruseleme inaga anda ngagoria anda puwa  
inaga wali agali bibahende ibu ngoai ho bedaria  
ina ihondo, Ngulebero, lalu lowirugo lomabu ngiaore bulebero.

Anduane Homogonaga mini mo yaragaore holene nga.

## 117

### *Anduane Homogonaga mini yaraga holene nga lenego ogo*

<sup>1</sup> Wali agali hameigini tara tara bu kamiru\*  
ti bibahendeme Anduane Homogonaga mini yaraga hadaba.  
Wali agali dindi tara tara bibahendeha bu kamiru  
tigua ibunaga mini yaraga hadaba.

<sup>2</sup> Ibugua ina gubalini timbuniore ho haabo haga kagoni.  
Ibugua bi lowiyago habo nale mini bilinaho haabo haga kagoni.  
Iname ibunaga mini yaraga hama.

## 118

### *Ngode Datagaliwabehanda biamogoore biyagonaga ibuhondo kai lenego ogo*

<sup>1</sup> Iname Anduane Homogohondo kaiore lalu hamiya.\*  
Ibugua inahondo mana bayale hangu bigi biyagonaga ani lalu hamiya.  
Ibugua ina gubalini ho kago haho wiaaboore hole kagonaga  
ibuhondo kaiore lalu hamiya.

<sup>2</sup> Isaraele wali agali kamirume,  
Anduane Homogo ibugua horo bibahendengi  
ina gubalini ho kago haho wiaaboore haga kagoni, lalimulo hameledo.

<sup>3</sup> Ngode Datagaliwabehanda loma binigo mo miaga kamirume,  
Anduane Homogo ibugua horo bibahendengi  
ina gubalini ho kago haho wiaaboore haga kagoni, lalimulo hameledo.

<sup>4</sup> Wali agali Anduane Homogo mitangi halu lotu laga kamirume,  
Anduane Homogo ibugua horo bibahendengi

\* 116:15: Iba 72.14 \* 117:1: Lm 15.11 \* 118:1: 1 Bit 16.34, 2 Bit 5.13, 7.3, Esr 3.11, Iba 100.5, 106.1, 107.1, 136.1, Yar 33.11

ina gubalini ho kago haho wiaaboore haga kagoni, lalimulo hameore ledo.

<sup>5</sup> I genda gibiore yu hewangi Anduane Homogo olarugola<sup>☆</sup>  
 ibugua hale halu inaga genda yu hewagoni mo wahalu i golope hayagoni.

<sup>6</sup> Anduane Homogo ibu i heba hapara ho haabo haga kagonigo<sup>☆</sup>  
 i gi naholebero.

Wali agalime ihondo mbirale mbira agi bulubadabe.

<sup>7</sup> I biamogo biaga Anduane Homogo ibuni kagoni.

Ibu ani kagome inaga waitigi karu Anduane Homogo ibugua bope haragola  
 i de hondolebero.

<sup>8</sup> Wali agali tini dege dege hanaho holenege goyane lowa  
 Anduane Homogoniore hanaho holenege duniniore nga.

<sup>9</sup> Dindini haru haga karubi agali haguane karubi  
 tini hanaho holenege goyane dege lowa  
 Anduane Homogoni hanaho holenege duniniore nga.

<sup>10</sup> Inaga waitigi dewaoreme i bole homabu bupe hearia  
 Anduane Homogonaga hongome ina uruni bibahende bope hai haru.

<sup>11</sup> Ti bibahendeme i bole ho mabu bupe howa i mo dombe wia hearia  
 Anduane Homogonaga hongome ina uruni bibahende bope hai haru.

<sup>12</sup> Mone tidu yalu ibiradagua waitigi bibahende tidu yalu ibuwa ini mbulupe hayagoyu  
 o biaruni irame gaeangi bo daradagua bialu bibahende bo mburi lai haya.

Anduane Homogonaga hongome ina uruni bibahende bope hai haru.

<sup>13</sup> Tigua i bole anda ibalu mo ko howaore bayagola i bope habehegoyu  
 Anduane Homogo ibugua i biamogo biya.

<sup>14</sup> Anduane Homogo ibugua i mo hongo helagaore ka.<sup>☆</sup>  
 Ibutime i gi mialu biamogo biyagoni.

<sup>15</sup> Ngode Datagaliwabenaga wali agali karume agali balu ibuwa  
 tinaga balai anda tamuha tini wai mambolo baruago hale hadaba.

Anduane Homogonaga hongo gibigome ina mo hongo hayagola  
 bibahende bai harimagoniyago, lalu biraruago hale hadaba.

<sup>16</sup> Anduane Homogonaga hongo gibi biagome ina biamogo biyagola  
 ina wai bialu wayali harimagoni.

<sup>17</sup> I ala awane nahomolebero.  
 Nahome howa dere emabu kongi  
 Anduane Homogohanda bigi biyaru ogodagua biya lalu  
 te laga bulebero.

<sup>18</sup> Anduane Homogo ibugua i mini wuliya mana lalu  
 pani hiriribiore ngia nguwa i bo home nalayagoni.

<sup>19</sup> I Anduane Homogonaga mini mo yaraga halu ibuhondo kaj lo poleberogo  
 ibunaga anda panga karuni dugupe hadaba.

<sup>20</sup> Anduane Homogonaga anda anda pole panga haraba o kagoni.

Wali agali mini tigabiwi karu hangume  
 panga o duguaho ngagoniha anda pobehe ka.

<sup>21</sup> Anduane Homogo-o ina ina bi larugo hale halu biamogo birigome  
 i wayali ho kogoni.



Biamogo birigonaga ina inaga mini mo yaraga holebero.

<sup>22</sup> Ege tole mbira anda biagame galone nabibehedago lowa dabo wahenego<sup>☆☆</sup>  
ege tole ogoniore mo timbuni duniniore ho heleda.

<sup>23</sup> Ogoni Anduane Homogo ibunioreme mo yu daibu helenego  
iname de handalu handawa bu kamagoni.

<sup>24</sup> Ayu ogoni Anduane Homogohanda inanaga waitigi bope hayagonaga  
iname ibuhondo turu gibiore halu bi te lalu mitangi biaabo hamiya.

<sup>25</sup> Anduane Homogo-o ina gi mialu haru dai bia, larama.<sup>☆</sup>

Iname mbirale bigi beremago damene bibahendeore  
bayale halu lini daga bilo bulumaya  
Anduane Homogo-o biamogo bibe, larama.

<sup>26</sup> Mbirali Anduane Homogonaga minini howa ibirago<sup>☆</sup>  
Ngode Datagaliwabehanda ogoni ibuhondo turu halu bayale bilo larama.  
Anduane Homogonaga andani howa iname ibunaga mini mo yaraga harama.

<sup>27</sup> Anduane Homogo ibu hangu Ngode Datagaliwabe heneneore kagoni.  
Ibugua ina baya hanguore de hondo hayagoni.

Ira magane giha podo yagayaga bialu  
bo lomabu miaga dabu ngagoria pu mabu bidaba.

<sup>28</sup> Inaga Ngode Datagaliwabe kegonigo  
ina ihondo kajore lalu ko.

Inaga Ngode Datagaliwabe kegonigo  
ina i timbuniore kego wali agali lamialu  
inaga miniore mo yaraga holebero.

<sup>29</sup> Iname Anduane Homogohondo kajore lalu hamiya.  
Ibugua inahondo mana bayale hangu bigi biyagonaga ani lalu hamiya.  
Ibugua ina gubalini ho kago haho wiaaboore hole kagonaga  
ibuhondo kajore lalu hamiya.

## 119

### *Anduane Homogonaga bi mana bayale lo ngago ogo*

<sup>1</sup> Wali agali tiha ko mbira nawiore howa tigatigaore ibaga bu karu<sup>☆</sup>  
ti turu ho haga ka.

Tigua Anduane Homogonaga bi mana lo ngadagua bialu haga kago  
ti turuore haga kagoni.

<sup>2</sup> Wali agali ti Anduane Homogohanda mana urubi bulene nga lene ngaru  
minime talialu bialu haga karu  
ti turuore ho haga ka.

<sup>3</sup> Wali agali urunidagua biaga karu tigua mana ko ngaru nabiaga howa  
Anduane Homogonaga mana lo ngaru hangu biaga ka.

<sup>4</sup> Anduane Homogo-o inime inahondo inaga bi mana damenego langiai halu lalu,  
Inaga bi uruni bayuwa taluwa biaabo halu halimu, larigoni.

<sup>5</sup> Inaore mini bilinahe howa inaga bi mana ogoni taluwa  
bialu haabo holenego hamelo ko.

<sup>6</sup> Ina inaga bi mana taluwa bialu haabo haruyagua

☆ **118:22:** Lg 20.17, Ab 4.11, 1 Pi 2.7 ☆ **118:22:** Md 21.42, Mg 12.10-11 ☆ **118:25:** Md 21.9, Mg 11.9, Yo 12.13

☆ **118:26:** Md 21.9, 23.39, Mg 11.9, Lg 13.35, 19.38, Yo 12.13 ☆ **119:1:** Iba 128.1

íha taga holene emeneorebi mbira nawulebira lo manda bido.

<sup>7</sup>Ína ínaga mana bayale tigabi ngego manda bialu kongi  
ínaga bu miniha ko mbira nawi howa  
ínaga mini yaraga halu holebero.

<sup>8</sup>Ínaga bi mana debene bibahende ngeru taluwa bialu holebero.  
Ína ani bialu holiyago ína í yu wanahabe.

*Anduane Homogonaga bi mana lo ngadagua hale halu bulenego ogo*

<sup>9</sup>Wandari igiri daliaherume tini mo dodo nahe tigabiore agua habehebe.

Ína ogo bibe lalu laga birigo hale halu bigi biyagua  
ti tigabi ogonibi holebira.

<sup>10</sup>Ínaga gubalinioreme Anduane Homogo ínaga biabe bule bialu ko.✧  
Ínaga bi mana lo ngego mbira ína puguligo haru habe.

<sup>11</sup>Ína í deni ko mbira nabulenaga  
ínaga bi mana lo ngegoni ínaga gubalinini mo hengedo.

<sup>12</sup>Anduane Homogo-o ínaga mini mo yaraga harogo  
ínaga hame ngego íhondo biawai habe.

<sup>13</sup>Ínaga bi mana lo ngego bibahende lone loyane bialu laho wiaabo holebero.

<sup>14</sup>Dindi daburabu dewaore wu howa turu holenege emene lowa  
turu timbuniore holenege ínaga bi lo ngedagua hale halu  
bulenego ha ngaria handaga bialu ko.

<sup>15</sup>Ogodaguaore bibe lalu lo ngego bayuwa lo manda biruli.

Ínaga bi mana lawai haragobi mo yule lowa  
bayuwaore hale halu mitangi bialu haruli. <sup>16</sup>Ínaga bi mana bayale lo ngeru  
hondowa✧  
í turu halu daga laruli.

Ogo ale bibe lalu lo ngeru  
ína embeda naholebero.

*Anduane Homogonaga bi mana ngago manda bialu miniha dungulo henego ogo*

<sup>17</sup>Anduane Homogo ínaga biabe biahaga í kogo  
ína í biamogo bibelo hamelo kogoni.

Írane í homa nabi howa ínaga bi mana ngego  
baya hangu talialu bialu holiyanaga ani bibe laro.

<sup>18</sup>Ínaga mana lowini ngegoha bi bayale heneneore ngago manda biai holiya  
ínaga miniha de mo ngala habe.

<sup>19</sup>Í nde dindi ogoriani lu haho wule ndo kogo manda bialu  
ínaga bi mana bayale lo ngego ínaga deni mo do nahabe.

<sup>20</sup>Horo bibahendengi ínaga bu minime ínaga bi mana bayale lo ngeru  
ína talialu buaore howa homalu kogoni ndobe.

<sup>21</sup>Wali agali mine haga bu karu  
ína ti talialu mo tiga bigi birili.

Ínaga bi mana lowini ngego erembira mialu  
tinime hameledago ale bima piaga karume ti koha polebira.

<sup>22</sup>Ína ínaga bi mana debene lo ngeru taluwa bialu kogonaga  
tigua íhondo mege bialu bi koru lalu helo nahelabe.

<sup>23</sup>Agali haguane bu karume mo mogobu howa  
í bo waholenaga hariga tai bialu karuni helowa

✧ 119:10: Iba 119.2, 119.21, 119.118, 119.145 ✧ 119:16: Iba 119.35, 119.70, 119.92-93, 119.174

ina ínaga bi mana tigabi bayale ngego hangu mitangi bialu lo manda biaabo holebero.

24 Ínaga bi mana tigabi ngeru hangume  
i mo turu halu haru haabo haga kagoni.

Ínaga bi mana urunime i lawai halu haabo haga.

*Anduane Homogonaga bi mana buaore howa bialu holiya lenego ogo*

25 Tigua i bope hayagola dindi abaluha padogoni ndobe.

Ínime bulebero lalu bi lo wiridagua  
i lone heyuliya mo hongo habe.

26 Ina mana biruru bibahende ihondo langiai harugola  
ina nde ihondo bi ladai birigoni.

Ínaga mana ngeruni bibahende i lawai habe.

27 Ínaga bi mana ngeruni ina manda buliya biamogo beregola  
ina ínaga bi mana bayale uruni bibahende mitangi biaabo halu holebero.

28 Inaga miniha genda yidogome i dambi kagola kogoni.

Ínime mo hongo holebero lalu abale langiridagua  
i mo hongo habe.

29 Inaga hariga ngego wahalu i pu tara holigo  
baya hangu handayaho habe.

Ína ihondo mana bayale bialu  
ínaga mana tigabi ngeru i lawai habe.

30 Ina ínaga bi lo ngego taluwa bialu hole lalu bi lo wirugoni.  
Horo bibahendengi ínaga bi mana hangu hale halu mitangi bu kogoni.

31 Anduane Homogo-o ina bi langiriruni talialu biaabo haruli.  
Mbirale mbirame i mo taga helo nangelabe.

32 Ina manda bulene dewaore ihondo ngirigome<sup>☆</sup>  
ina ínaga bi lareru buaore howa bialu holebero.

*Anduane Homogohondo manda bulene ngilonaga bi lenego ogo*

33 Anduane Homogo-o ina ínaga bi mana taluwa bialu holiya  
ina mana ogoni irane ngaru baya hangu i mo wála habe.

34 Inaga bi mana baya hangu taluwa bialu holiya<sup>☆</sup>  
galone ngago i garealo ngialu lawai habe.

Inaga miniha ínime mo heya haregola  
ina bi mana lo ngago bibahende buaore howa taluwa bialu holebero.

35 I ínaga bi mana taluwa bialu howa turu haga kogonigo  
ainde ínaga bi mana bulene hariga pedadagua pialu holiya  
inaga ge baya hangu haru habe.

36 Inaga miniha mbirale ngaru dimagoli ho holiya ndo<sup>☆</sup>  
ínaga bi lo ngego ina talialu buaore holiyanaga hame lolene ngibe.

37 Mbirale ko habane nabulene ngaru erembira mialu holiyanaga  
i biamogo bibe.

Ínime ihondo bayale bule lalu abale bi lo wiridagua  
i biamogo bibe.

38 Ini mitangi bialu mbirali ina bia laredagua biaga karuhondo  
bayale buleore lalu bi hongohe lo wiaga kegoni.

Ína bi hongoheore ogoni bulebero lalu lowirigo

☆ 119:32: 1 Kin 4.29, Ais 60.5, 2 Ko 6.11-13 ☆ 119:34: Iba 119.73, Min 2.6, Ya 1.5 ☆ 119:36: Mg 7.21-22, 1 Ti 6.10-11, Hi 13.5

ínaga biabe biahaga ì kogohondo biai habelo hamelo kogoni.

39 Ìhondo bi ko lalu kago bibahende giho kogonigo  
bi ko urunime ì bope holigo ína ì biamogo bibe.

Ínaga bi mana tigabi ngeru baya gibiore ngegoni.

40 Ínaga bi mana damenego  
ína talialu bialu hole hamelo kogoni.

Ína mana tigabiore biaga kego  
ìhondo holene gahenge ngibe.

*Anduane Homogonaga mana lowinigo yu tigabu henego ogo*

41 Anduane Homogo-o ína ì gubalini ho kego ì walia habe.

Ínime ì mo wialu pele ngulebero lalu bi lo wiridagua bibe.

42 Ína bi heneneore larigo manda buwa<sup>✧</sup>  
ína ìhondo mini mbiraore wu kogome  
wali agali ìhondo bi ko lararu ladai buliya  
ína ì pele ngulebere.

43 Ína bi tigabiore larigonaga ína mini dunubia ho kogome  
ína bi heneneore hangu wali agali karuhondo latagi haabo holiya  
ì mo hongo habe.

44 Ínaga bi mana lo ngego ína taluwa bialu haabo holebero.

45 Ínaga bi ledegoore ína talialu bule bialu kogonigo  
mbirale ngarume hapai nahelo hameledo.

46 Ína ínaga mana lamulene nga lariruni kini bu karu lamule  
ì taga nahe howa lamulebero.

47 Ína ínaga bi mana lowini ngego hame timbuni lo howa<sup>✧</sup>  
talialu buaore ho kogoni.

48 Ínaga bi mana uruni bayaleoreda lo manda bu howa  
ína hame timbuni lo kogoni.

Ína bi mana debene tigabi uruni bia laridagua bialu haabo holebero.

*Anduane Homogonaga bi mana ngago galoneore nga lowa mini mbiraore winigo ogo*

49 Bamba ínime ogoaleore bule lalu  
íninaga biabe biahaga ìhondo lo wirigo mitangi bibe.

Ína ogoni biaore buleberedalo manda buwa  
ì mini dunubia ho kogoni.

50 Ìha gendaru anda ibugu biyangi ína bulebero lalu bi lo wirigome  
ì mo dengalaho helarigola homa nabi halu  
ínaga bu miniha mo palia holene karulo haru.

51 Wali agali mine haga bu karume ì mege bialu karu helowa  
ína ínaga bi mana lowini ngago erembira mialu napiruli.

52 Anduane Homogo-o ína ìhondo bi ala langigi biriruni mitangi budai bigi berogome  
ì mo hongo haga biaga.

53 Wali agali ko biaga karume ínaga bi mana lo ngego puguarago hondowa  
ì bu miniha keba timbuni haruli.

54 Ìni dindi ogoriani kogoni howa  
ína ínaga mana ngegonaga iba gana minime manda bialu laabo holebero.

55 Anduane Homogo-o mbiraga ì mitangi bialu  
ína ínaga mana ngago lo manda biruli.

✧ 119:42: Iba 102.8, 119.39, Min 27.11 ✧ 119:47: Iba 119.16, 119.97, 119.127, 119.159

56 *Í*na mana bibahende *ina* taliai halu bialu kogola  
*ina* miniha dungulo haruli.

*Anduane Homogonaga mana ngago mo dunini holene hamelo henego ogo*

57 Anduane Homogo-o *iore* hamelo kogoni.✧

*Í*na mana ngeru taluwa biaiore hole lalu bi lo werogoni.

58 *Í*na *ihondo* dara howa biamogo bulebero lalu bi lo wirigodago  
*i* dara holene irane nawigoria nde harugo *i* dara howa biamogo bibe laro.

59 *Inime* bialu harudaru manda biaiho howa✧  
*ina ina* bia laredagua talialu biai hole lalu  
*ihondo* bi lo wero.

60 *Ina* awe buliya lalu hondo ha nabi  
 abaleore *ina* bi ledego talialu bulebero.

61 Agali ko bu karume *i* bialu kogoha hapai howa  
 tinaga mana ngagoha *i* haru pubagi holenaga bialu ka.

Tigua ani bialu kagoyu  
*ina ina* bi mana lowini ngego embeda nahe ko.

62 Mbi hanuniore *i* heyu biruwa  
*ina* bi mana tigabiore ngadagua lope haga kegonaga  
*ina ina* mini yaraga haruli.

63 Agali *ina* biabe biahaga howa  
*ina* mana ngago talialu haga karu  
*i* ti baba ibagabu haruli.

64 Anduane Homogo-o wali agali dindi bibahendeni bu karuha  
*ina* gubalini holene toledago  
*ina* mana ngego damene manda buliya *i* lawai habe.

*Anduane Homogonaga bi mana galone duniniore nga lenego ogo*

65 Anduane Homogo-o *ina* biabe biahaga  
*ihondo* mana bayaleore birigoni ndobe.

*Í*na buleore lalu bi abale lo wiridagua biaore birida.

66 *Í*na mana lo ngego mitangi bialu mini mbiraore wu kogo  
*ina* mini bayale gigabi wulenebi manda bayale bulenebi  
*ihondo* ngibelo hameledo.

67 *Í*na *i* abale pani ngia nabi heha *ina* harigani polene winigo wahalu✧  
*i* pubagi harugoyu  
 ai áyu *ina ina* bi mana bayaleore ngeru bialu kogoni.

68 *Í* bayaleore howa *i* dara habe naheoreni dara haga kegoni.  
*Í*na bi mana bayaleore lo ngeru *i* lawai habe.

69 Wali agali mine haga bu hearume  
*i* mini lalu ke halu bi ko dewa layagoyu  
*ina ina* bi mana dege talima pialu  
 bu miniha buaore howa biaabo halu kogoni.

70 Wali agali uruni tiha mini bayale wia aribia holene nawiore kagoyu  
*ina* nde *ina* mana lo ngeru hangu hamelo kogoni.

71 *Í*na *ihondo* pani ngialu minu barigoni bayaleore birida.  
 Ogoni birigome *ina ina* bi mana bayuwa lo manda birugoni.

72 Muni bu ngaru gubalini holenego dindiha lowa  
*ina* mana lo ngeru galone duniniore lo mitangi bu haruli.



*Anduane Homogonaga bi mana tigabiore lo ngago ogo*

73 Ínime í o kogobi wabuwa baya hangu handayaho haga kegoni.

Ínaga mana lo ngego bayuwa lomanda biai holiya  
íha manda bayale bulene ngibe.

74 Ína bulebero lalu lowiriru ína talialu bialu kogo hondowa  
wali agali í mo dunini ho karume turu ho holebira.

75 Anduane Homogo-o ínaga bi mana ngeru  
tigabiore wiai kegoni í manda bido.

Í mini bilinaheore kegome  
ína mana lehe birugonaga íhondo genda mo ngridalo manda bu kogoni.

76 Ínaga biabe biahaga í kogonigo  
ína íhondo gubalini ho haabo holebero lo wirigodagua  
gubalini halu ínaga bu mini mo hongo habe.

77 Ína ínaga bi mana lo ngeru bialu howa í turuore ho kogonigo  
ína í dara howa biamogo biriyagua  
íha holene bayale yu holebero.

78 Wali agali mine haga bu karu  
ti ke howa í bame godini íbu helaga biaga kagonigo  
ti mo taga habelo hameledo.  
Ína nde ínaga mana lowini ngeru mitangi biaabo halu holebero.

79 Wali agali í mitangi bialu mo dunini howa  
ínaga mana ngeru mandabi karu ti í koria ibilo hamelo kogoni.

80 Ína mana bulene nga larigoni  
mbira wanahe ína biaiore holiya biamogo bibe.  
Ína mana bulene ngago mbira nabi koria taga pani noligo  
ínaga mana damene ngeru bayuwa bialu hole hamelo ko.

*Anduane Homogohanda biamogo bilo ibuhondo bi lenego ogo*

81 Anduane Homogo-o ína í pele ngibelo ha dege biwane  
ínaga bu miniha genda timbuni bialu ínaga hongo ereba haya.

Ína ínaga bi mana lowini ngego mitangi bialu  
mini mbiraore hongohe wu kogoni.

82 Ína buleore lalu lo wiriruni berebe hondole dege handayaho hewagola  
ai ínaga de tandaga bida.

Ai ogonidagua bidago  
ína í angi biamogo buleberebe lalu kogoni.

83 Í mo ko henego ai nogo meme dongoneha waini iba hambu berelaganego  
ko haragola budubagabu wahene ngaligobiore kogoni.

Í ogonibi kogo howa ínaga bi mana lowini ngeru embeda nahe kogoni.

84 Mali ege horobi agira í maliaho holedabe.  
Agali í mo ko halu karu ti pani angi nelo muleberebe.

85 Wali agali mine hagabi ínaga bi mana lo ngeru nabigabi karu  
tigua í gonoha do ngogola minulenaga mana maru ohowa bialu ka.

86 Ínaga bi mana bibahende lo ngeru heneneore lo ngego  
iname mini mbiraore wiai habehe kama.  
Agali maru karume í hondowa ke halu bi ko lararume  
í mo tandaga halu ka.

Tigua ani bialu kago í biamogo bibelo hamelo kogoni.

87 Tigua í bo waholebiyaria habo layago  
ína ínaga bi mana wanahe yu tiga bu kogoni.

88 Ina ínaga bi mana bibahende lo ngeru taluwa biai holiya  
ína gubalini haabo ho kego i bayale holiya handayaho habe.

*Anduane Homogonaga mana lowini ngagoria mini mbiraore wu henego ogo*

89 Anduane Homogo-o ínaga bi mana ngego<sup>✧</sup>  
hari daligaha mbirale bibahende hongo ho wiaabo kadagua wiaabo holebira.

90 Íni mini bilinahe kegome  
bi ledegoore áyu manibi wiaabobo bu wulebira.  
Ína dindi o wabu ngego ibuni wuleneore ngagoria wilalu  
wia amu nana nabi wiaabo haga ngagoni.

91 Mbirale ngaruni bibahende aniore wiai helo lalu  
ínime laridagua wiaabo henego ngagoni.  
Irane mbirale urunime íninaga biabe biai hagago  
ani wiai henego nga.

92 Inaga turu holene tene ínaga bi mana ngagoha nawidale  
ínime i genda tandagala mo ngirigome i homedoleda.

93 Ina ínaga bi mana lo ngego yu wanaholeberogo  
irane ína mana ogoni taluwa bialu kogome  
i homa nabi bayale heledegoni.

94 I ínagaore kogonigo ai ína i pele ngibe.  
Ina ínaga bi mana lo ngeru talialu bu manda biaabo haga kogoni.

95 Agali ko bu karume i bo wahole bira do haga bida.  
Tigua ani bule kagoyu  
ína ínaga bi mana lo ngeru bibahende mitangi bialu haabo holebero.

96 Mbirale bibahende ngaru wiaabo nahagayane handarugoyu  
ínaga bi lo ngeruni dege duniniore baya burugule wiaabo holebira manda bu ko.

*Anduane Homogonaga bi mana lo ngago gubalini ho henego ogo*

97 Anduane Homogo ínaga bi mana lo ngeruni  
ína gubalini timbuniore ho kogoni.  
Ina ínaga bi mana lo ngeruni mbiraga horombebi mitangi biaabo haruli.

98 Ínaga bi mana lo ngerunime i heba haabo howa  
íhondo manda bulene dewaore ngiaga.

Ínaga bi mana lo ngerume i manda bulene gibiore ngiragola  
ínaga waitigi karunaga manda bidarubi ndo  
i manda bu bolanguahe holiya biamogo biaga.

99 Horo bibahendengi ínaga bi mana lo ngeruni mitangitangi bialu  
ínaga miniha mo pehaga bialu haabo kogoni.

I ani bialu kogome ínaga miniha manda bulene bayaore anda ibiragola  
ínaga lawai haga karume manda bidagobi ndo i manda daligabi kogoni.

100 Ína bibe lededagua bialu kogome  
ínaga manda bulenego agali wahe karume manda bidagobi ndo  
i mini gigabi wulene bolanguahe kogoni.

101 Ínaga bi mana lo ngedagua hangu bulenaga<sup>✧</sup>  
ína mana ko bulenego bibahendehondo igilaga bialu wandialu kogoni.

102 Anduane Homogo ínaga lawai haga i kegoni howa  
ínime i lawai haga bialu kegoni.

Anigo ína bi lawai haga bereruni  
ína mbira hale howa mo wanahe kogoni.

- 103 Anduane Homogo ínaga bi mana baya dendebiore ngagoni.✧  
 Mone ibane mbira narogola neha dende gibi biaganego goyane lowa  
 Anduane Homogo ínaga bi mananaga dendeore gibi biaga ngagoni.
- 104 Anduane Homogo ínaga bi mana lo ngegome  
 ihondo mitangi bulene baya gibiore ngiaga ngagoni.  
 Ani ngiagagome i mana ko bulene damenego  
 ina bibahendeore manga bialu magu biragola haruli.  
*Anduane Homogonaga bi mana lo ngagome wá holene ngiaga ngago ogo*
- 105 Anduane Homogo ínaga bi mana lamu hale ale ngagome✧  
 i hariga tigabini poliya biamogo bialu haru haga ngagoni.  
 I hariga polenego ogodagua pu lalu ge mugu mo wá hagane hale ale ngagoni.
- 106 Anduane Homogo ínaga bi tigabiore lo wigi bideruni handalu langeredagua  
 ina hale halu biaore bule lalu lo ngogoni.  
 Bi lo wirugo ogoni pugua nabuleorebero.
- 107 Anduane Homogo-o i tandaga gibiore hiriribi nalu kogonigo  
 tandaga nalu homa nabuliya  
 ina i biamogo bulebero laridagua biamogoore bibe.
- 108 Anduane Homogo-o ina ihondo bi lalu turuore halu kai larogoni.  
 Ina ihondo kai larogoni yamialu  
 ínaga bi lo ngeruni ihondo bayuwaore biawai habe.
- 109 Horo bibahendengi i homolene kawareore ngagoria pu haga biruligoyu  
 ínaga mana lo ngeruni embeda naharuli.
- 110 Agali mini kowi hearume i do wuliyana gono weneyago de handarugoyu  
 ina Anduane Homogo ínaga bi lo wiriyaruni mbira pugua nabi kogoni.
- 111 Inaga dabudabu wia ai aïore bulenego  
 Anduane Homogo ínaga bioreda manda bialu  
 ínaga biore hongo howa yaniho kogoni.  
 Ani yaniho kogola ínaga bigome iore mo turu gibiore haga.
- 112 Anduane Homogo ínaga bi mana lo ngedagua✧  
 ina bialu mbira mo wanahe  
 bia dege bialu kone homaluore wahole kogoni manda bu ko.  
*Anduane Homogonaga mana ngagome ina mo bayale haga nga lenego ogo*
- 113 Wali agali karume ke howa i talima ibaga tingi haga karu  
 ina ti handabe manga ho kogoni.  
 Ina ínaga bi mana ngeru mitangi bialu hame timbuni lo kogoni.
- 114 Ini hangu i handayaho haga howa ínaga humbi ale kegoni.✧  
 Ina buleore lalu bi lo wigi biriruni manda bialu  
 ina mini dunubia ho kogoni.
- 115 Wali agali mana ko biaga kamiru tí i kogoria nahe pudaba.  
 Inaga Ngode Datagaliwabe bi mana ngago taluwa bialu holebero.
- 116 Ina mo hongo holebero lalu lo wirigonidagua  
 i mo hongo habe.  
 Mo hongo hariyagua i homa nabi bayale holebero.  
 Ina ihondo mini dunubia ho kogoni bame mo hole buligo  
 ínaga hongo ogoni ngibe.
- 117 I bayale holiya ínaga gini yaniho habe.  
 Ina bi larego ina hale halu bialu holebero.

✧ 119:103: Iba 19.10, Min 8.11 ✧ 119:105: Min 6.23 ✧ 119:112: Iba 119.33, 119.36 ✧ 119:114: Iba 32.7, 91.1

- 118 Wali agali ínaga bi mana mo wahaga karuhondo  
erembira mialu haga kegoni.  
Tigua ke howa mana bule ngaru bame habane nabulene wialu  
ereba hai holebira.
- 119 Ína wali agali mana ko biaga karu ko ngubi nagalone dege kagoni lo mandabu  
kegoni.  
Ína ínaga bi mana ngeru hameore lo kogoni.
- 120 Ína í gibiore kego manda buwa í gi halu duru lalu kogoni.  
Ínaga godi tigabiore lole ngego mitangi bialu í giho kogoni.  
*Anduane Homogonaga bi mana lo ngaru talialu bulene ngago ogo*
- 121 Ína mana bayale tigabi ngaru dege bialu haru.  
Waitigi bu karume í mo ko helo ínaga í yu wa nahabelo hameledo.
- 122 Ínaga biabe biahaga kogonigo  
ína í biamogo buleore lalu bi lowibe.  
Wali agali mine haga karume í mo genda nahelo hameledo.
- 123 Bamba ínaga í bayale holiya biamogo buleore lalubi  
í pele ngialu haru dai buliya lalu lo wirigodagua bibelobi  
í íha maliaho haabo kogome ínaga de tandaga biragoni.
- 124 Ínaga gubalini holeneme í dara howa biamogo bialu  
ínaga bi mana debene ngeru í lawai habe.
- 125 Í ínaga biabe biahaga kogonigo  
ínaga bi mana baya hangu manda buliya mini bayaleru talebu ngibe.
- 126 Anduane Homogo-o wali agalime ínaga bi mana ngeru angua halu piagaya.  
Tigua ani bialu karunaga ínaga ti pani nelu mulene tu áyu ogoni.
- 127 Ína ínaga bi mana gubaliniore ho ko.  
Ína ngolo bayale ngago hameledogobi emene dindiha lowa  
ogoni bolangua howa ínaga bi mana ngeru ínaga gubalini timbuniore ho kogoni.
- 128 Ína ínaga bi mana ngeru bibahendeore talialu biaiore haruli.  
Hariga í kegohayagi ndo  
mendeha pubagi halu polene hame naleore kogoni.  
*Anduane Homogonaga bi mana lo ngadaguaore bua holene ngago ogo*
- 129 Anduane Homogo ínaga bi mana lo ngeru bayaore gibi lo wigi bidegoni.  
Anidane hondowa ínaga gubalinioreme turu howa  
ína bibe lededagua bialu kogoni.
- 130 Ínime ínaga bi mana lo ngeruninaga galonego mo walia halu kegome\*  
wali agali tinaga miniha wá laga biragola bu kagoni.  
wali agali mini timbuni nawi karu  
ínaga bi maname mini mo dingi dangia lenego  
ai miniwi bogabi bu kagoni.
- 131 Ínaga bi mana lo ngeru gubalini gibiore ho kogome  
ína mbira íhondo bia lare alego bia dege bulenaga  
ína ínaga bu miniha heyuwa manda manda bu kogoni.
- 132 Anduane Homogo ínaga wali agali í gubalini haga karu dara howa biamogo birilidagua  
í de handaya halu íbi dara howa biamogo bibe.
- 133 Í mana ko bialu pilolilono de handayaho halu  
mamage holebero lo wiridagua  
ína í mamage habelo hameledo.  
Ko buleneme í bope holigo ínaga í yaniho habe.

\* 119:130: Iba 19.7, Min 1.4

- 134 *Í* *ina* bi lo ngerudagua hale halu biaiore holiyanaga  
wali agali mini kowi karume *i* hangedope halu mo ko holigo  
*ina* *i* yaniho habe.
- 135 *Í* *i* kogoria kaware hapara howa<sup>✧</sup>  
*ina* bi mana lo ngeru *ihondo* lawai halu  
*ina* *i* mo gumbila habe.
- 136 Wali agalime Anduane Homogo *ina* bi mana lo ngedagua nabi puguabo halu  
kagonaga  
*i* dugu dege beroria *ina* deha deiba iba ale dugualu haabo kogoni.
- Anduane Homogonaga bi mana tigabiore ngago ogo*
- 137 Anduane Homogo-o *í* tigabiore kegoni howa  
*ina* bi mana lo ngeruni damenego bibahendeore tigabiore lo ngegoni.
- 138 *Ína* inahondo bi mana ngideruni damenego bibahendeore tigabiorebi bayaorebi  
hangu ngagoni.
- 139 *Inaga* waitigi karume *ina* bi lo ngeruni ti mitangi nabiagaore kagoni.  
Ti ani kago handarodagua *ina* bu habane nigonihaha keba gibiore ira daradagua  
biragola haruli.
- 140 Anduane Homogo *ina* bulebero laga bialu bi lo wigi bideruni heneneore biagayane  
*ina* haruore handama ibido.  
Bulebero lo ngedagua heneneore bigi birigo hondowa  
turuore howa yaniho kogoni.
- 141 *I* agali mbira abogo ka nalene  
emene ko dindihaore howa marume *i* mege biaga kogoyu  
*ina* Anduane Homogo *ina* bi mana dege ha do wanaharuli.
- 142 Anduane Homogo *ina* mana tigabi bulenego wia *ai ai* bialu  
*ina* bi mana lo ngeruni henene hanguore lo wigi bidegoni.
- 143 *I* kogoria genda bulenebi mini dege dindi holenebi dewaore *ibu* wia ngagoyu  
*ina* *ina* bi lo ngeru hondowa nde turuore bigi biragola haruli.
- 144 *Ína* bi lo ngeruni tigabi hanguore wia *ai ai* binigo lo ngegoni.  
*Ína* bi lo ngedagua biruyagua *i* haabo holeberogo  
lededaguaore baya hangu manda bialu buliyanaga biamogoore bibe.  
*Ína* ani beregola *i* bayale dunguleore holebero.
- Anduane Homoghondo biamogo bia lalu bi lenego ogo*
- 145 Anduane Homogo-o *ina* *í* hongo howaore olarogoni.  
*Ína* mana bulene nga lalu lo ngeru *ina* talialu holiya  
*ina* *ihondo* bi larogo hale habe.
- 146 *Ina* *í* olalu kogoni.  
*Ína* bi mana lo ngego taluwa bialu holiya  
*i* pele ngialu haru dai bibe laro.
- 147 *Ina* gao naledaha *i* biamogo bibelo *í* olaruli.  
*Ína* buleore lalu bi lo wigi birirunaga  
*ina* mini dunubia ho kogoni ndobe.
- 148 Mbiraga *i* dengala ho wialu  
*ina* bi mana debene lo ngeru dege mitangi biaabo haruli.
- 149 Anduane Homogo-o *í* gubalini haabo ho hariligo  
*ina* bi hale habe.  
*Ína* dara howa biamogo biriligo walia halu

✧ 119:135: Iba 4.6, 119.12, 119.26



- i homa nabi bayale holiya handayaho habe.  
 150 Agali marume mini ko wu howa i bo wahole bialu hayaru  
 inaga mana mo tene nahaga karubi  
 tini kaware o ibiragoni ndobe.  
 151 Anduane Homogo-o inaga bi mana bibahende henene wiaabo haga ngelowa  
 ini i kogoha kaware haabo kegoni.  
 152 Bambaore howa inaga bi mana lowiriru mandabi harugoni ndobe.  
 Ina bi uruni lo wialu wiaabo helo nge.  
*Anduane Homogohondo, I biamogo bia, lalu bi lenego ogo*  
 153 Ina inaga bi mana lo ngeru embeda nahe kogo  
 ina iha genda timbuni ngaru de hondowa i biamogo bibe.  
 154 Inime pele nguleore lalu lo wiridagua i pele ngibe.  
 Godi lalu koriam i bo waholene nga loligo ina inaga lahabe.  
 155 Ko biaga karu tigua inaga bi mana lo ngeru talialu nabiagaore kago  
 ina ti pele mialu haru dai nabule kegoni.  
 156 Anduane Homogo-o inaga dara holene timbuniore ngegome  
 ina dara howa biamogo bulebero lalu bi lo wiridagua  
 ayu ogoni i biamogo bibelo hameledo.  
 157 Waitigi dewaoreme i baba waitigi ho halu mo ko haga bidagoyu  
 ainde ina inaga bi mana galoneore lo ngeru yu wahalu nape kogoni.  
 158 Agali ko biaga biarume ina mana bayale bulene nga lo wiriruni nabiaga karu  
 hondowa  
 ina tihondo turu nahe handabe manga timbuni ho haruli.  
 159 Anduane Homogo-o inaga bi mana bulene nga larigo  
 ina gubaliniore howa bua haabo kogoni manda bibe.  
 Inaga gubalini holene ho haabo haga kegonigo  
 ainde i dara halu pele ngibe.  
 160 Inaga bi mana ngerunaga irane henene lolene dege lo nge.✧  
 Inaga bi mana lo ngeruni tigabiore wiaabobo bu wiaga nga.  
*Anduane Homogonaga bi mana lo ngaru hame lalu gubaliniore ho henego ogo*  
 161 Irane nawini agali haguane bu karume i mo ko halu kagoyu  
 ina inaga bi mana lo ngeru mitangiore bu haga kogoni.  
 162 Mbiralime ngolo dewa handa walia howa turu hagadagua  
 ina buleore lalu lo wigi birirunaga mitangi bialu  
 i turu timbuniore ho kogoni.  
 163 Ke hagane mana koorene ko ngago i mangaore ho kogoyu  
 ina inaga bi mana lo ngeru hangu gubalini timbuniore ho kogoni.  
 164 Ina mana tigabini howa bi lolene ngadagua laga kegonaga  
 ina horo bibahendengi ihondo kahalukaj laruli.  
 165 Wali agali inaga bi mana gubalini ho haga karu ti bayale halu✧  
 mbirale mbirame ti mo pila holene nawulebira.  
 166 Anduane Homogo-o ina i pele ngialu haru dai bibelo maliaho howa  
 mana inime bibe lalu lo wirigo ina bialu kogoni.  
 167 Inaga bi mana lo ngeru ina taluwa bialu hagaore kogoni.  
 Bi mana uruni gubaliniore howa bua timbuni ho kogoni ndobe.  
 168 Ina inaga mana lo ngerubi bulene nga lalu bi lederubi  
 bibahendeore talialu biai halu kogoni.

Ḳna mana ogoni bialu koria Ḳ de handai ho kegoni.

*Anduane Homogohanda biamogo bilo ibuhondo bi lenego ogo*

- 169 Anduane Homogo-o Ḳ biamogo bia lalu olalu kogo hale habe.  
Abale howa Ḳna Ḳhondo manda bulene nguleore lalu bi lo wiridagua Ḳ manda bulene timbuni mo ngibe.
- 170 Ainde Ḳna Ḳhondo bi larogo baya hangu hale halu Ḳna pele ngialu haru dai bule laridagua áyu Ḳ pele ngibe.
- 171 Ḳna Ḳnaga mana lo ngeru Ḳ lawai haabo haga kegonaga Ḳna Ḳnaga mini yaraga haabo halu holebero.
- 172 Ḳnaga bi mana damenego bayale tigabi dege ngegonaga✧ Ḳna mana ogoni lalu iba gana la halu holebero.
- 173 Ḳnaga bi mana damenego bibahende talialu bialu kogonigo ai nde Ḳna Ḳ biamogo bule manda bu haabo habe.
- 174 Anduane Homogo-o Ḳ pele ngialu haru dai bibelonaga ha dege biwane Ḳnaga bu miniha tandaga bialu Ḳ hongo ereba haragoni.  
Ḳnaga bi mana lo ngegome Ḳ mo turu haga biaga ngagoni.
- 175 Ḳnaga mini yaraga halu holiya Ḳna Ḳha holene bayaleore ngibe.  
Ḳnaga bi lo ngegome Ḳ biamogo bia helo hameledo.
- 176 Ḳ hariga bayale yu wahalu pu tara howa✧ Ḳ nogo sibi pu ereba hene ale ko.  
Ḳna Ḳnaga bi mana lowini ngeru yu wanahagaore kogo manda buwa Ḳna Ḳnaga biabe biahaga Ḳ kogonigo Ḳ taya bibe.

## 120

*Anduane Homogohondo, Biamogo bia, lalu bi lenego ogo*

- 1 Ḳha genda timbuni anda ibiyangi Ḳna Anduane Homogo olarugola✧ ibugua Ḳ biamogo biya.
- 2 Ḳna Anduane Homogohondo bi lalu, Anduane Homogo-o agali ke haga karume Ḳ mo hondo holigo Ḳ biamogo bibe, larugoni.
- 3 Ke haga bu kamiru tíhondo Anduane Homogohanda agua bulubadabe. Tí pani nalimulo aguaore ngulubadabe.
- 4 Ibugua tí aminaga yandarerume nogoba halu ira hedope halu tí delolebira.
- 5 Ḳ tí dege dombeneha kogoni Mesege dindibi Keda dindibi wali agali ko biaga karu baba haradagua bidogoni.
- 6 Agali maru wali agali bu karu baba mandagi habe manga haga karu Ḳ ti heba mandagi luore haabo haruda.
- 7 Ḳna mo palia holenenaga bi lalu koria tigua wai bule dege manda biaga kagoni ndobe.

## 121

*Anduane Homogo ibu inanaga mamage hagane kago ogo*

- 1 Ḳna hari wedaruha de handadaga berogoni.✧  
Ḳ ani bia berogonigoyu

✧ 119:172: Iba 51.14, 119.138 ✧ 119:176: Ais 53.6, Yar 50.6, Md 18.12, Lg 15.4 ✧ 120:1: Iba 118.5, Yna 2.2  
✧ 121:1: Iba 87.1, 123.1

- mbirali í biamogo bule ibulubadago agohayagi howa ibulubadabe.  
<sup>2</sup> Anduane Homogo ibugua hari daligabi dindi timbuni o kamagobi wabinigo\*  
 ibunime dege í biamogo biaga kagoni.  
<sup>3</sup> Ibugua í pilope nahabelo handayaho holebira.\*  
 Ibu u napaliaga howa í mamage kaore dege halu egabi laga biaga kagoni.  
<sup>4</sup> O larogo bayuwa hale habe.  
 Anduane Homogo ibu Isaraele wali agalinaga mamage haga kago howa  
 ibu u emene mbira napaliagaore ka.  
 Ibu umubi heba nalagaore kagoni.  
<sup>5</sup> Anduane Homogo ibugua í kegoha kaware haparaho howa  
 í mamage haabo haga kagoni.  
 Ibu ani kagola í ibu gumbaha howa bayaleore dungulo holebere.  
<sup>6</sup> Horombe ni tandagabi daragome í daba halu mo ko naholebira.\*  
 Mbiraga ege daragomebí í mo ko naholebira dege.  
<sup>7</sup> Mbirale ko hiriribi tara tara ngarume í mo ko mbira holilono\*  
 Anduane Homogo ibugua í handayaho mamage holebira.  
<sup>8</sup> Í íni andagani palialu tagira pu haregoriani\*  
 ibugua mamage hama ibagabu holebira.  
 Í andagani daibu paleregolabi  
 ibugua dege mamage holebira.  
 Áyubi awebi ibugua ani biaabo holebira.

## 122

### *Yarusaleme tano mitangi bialu kai lenego ogo*

- <sup>1</sup> Tigua íhondo, Anduane Homogonaga anda maliya ma íbu, layagola í turuore haru.\*  
<sup>2</sup> Ani layagola ina pialu  
 ai áyu Yarusaleme anda puwa pabe tamuha o kamagoni handadaba.  
<sup>3</sup> Yarusaleme tano biagoni lone bu aribia hene  
 baya gibiore de hondoabi kagoni.  
<sup>4</sup> Isaraele hameigini tara tara palu ngaru  
 ti bibahendeme Anduane Homogo ibuhondo kai lole ogoriani íbu ngoai halimu  
 lenedagua  
kai lole ibugu biaga kagoni.  
<sup>5</sup> Dindi ogoriani godi anda kago ogoniha Isaraele wali agalinaga kinirume biruwa  
 godi hale halu mo tiga biaga kagoni.  
<sup>6</sup> Yarusaleme dindini gendabi mbira nawi mo paliaho wilo  
 Anduane Homogohondo bi ogodagua lalu halimu.  
 Wali agali Yarusaleme tano mitangi timbuni ho karu  
 ti bayaleore helo biamogo bibe.  
<sup>7</sup> Wali agali Yarusaleme tanonaga pabe tamuhayagi bu kamiru  
 tí tni dege dege ngeke nale gungu nabi bayuwaore mo paliaho helo biamogo bibe.  
 Kinibi ibunaga agali haguane karubi uruni andagahayagi haga karu  
 tibi turuho mo paliaho dege helo biamogo bibe, lalu ani laga bilimu.  
<sup>8</sup> Í damenebí í ariabi igiri yangobi Yarusalemeni íbu karu mitangi bialu  
 bi ogo Yarusalemeni kamiru tíhondo larogoni,

\* 121:2: Iba 115.15, 124.8    \* 121:3: Iba 41.2, 66.9, 127.1    \* 121:6: Ais 49.10, Mo 7.16    \* 121:7: Iba 91.10-12  
 \* 121:8: Iba 113.2, 115.18    \* 122:1: Ais 2.3, Seg 8.21

Tí ngeke nale gungu nabi bayuwaore mo paliaho halimu, laro.

<sup>9</sup> Ina Anduane Homogo inanaga Ngode Datagaliwabe kago  
ibunaga anda kagoore ina mitangi timbuni ho kogoni.  
Ngode Datagaliwabehanda Yarusaleme wali agaliore biamogo bialu  
mo bayale helonaga ibuhondo bi lahalu kogoni.

## 123

*Anduane Homogohanda dara howa biamogo bilonaga bi lenego ogo*

<sup>1</sup> Anduane Homogo-o ini dahuliya andaga haru kegoha<sup>☆</sup>  
ina handa daga halu ihondo bi lalu kogoni.  
<sup>2</sup> Biabe biahaga agali kagome ibunaga anduane kago mini hana ho hagadaguabi<sup>☆</sup>  
biabe biahaga wali bedagome ibunaga anduane bedago mini hanaho bira-  
gadaguabi  
Anduane Homogo inanaga Ngode Datagaliwabe-o  
ina dara howa biamogo bibelo ina iha hanaho holeberema.  
<sup>3</sup> Anduane Homogo-o ina de hondowa dara habe.  
Wali agali bu karume ina mo ko hayago  
ai ina daraore howa biamogo bibe.  
<sup>4</sup> Agali homogo mbirale dewawi hearume  
ina mege bialu haabo haya.  
Agali mine haga hearume  
ina bope halu haabo haga kagoni.

## 124

*Anduane Homogo ibugua ibunaga wali agali biamogo biaga kago ogo*

<sup>1</sup> Anduane Homogohanda ina biamogo nabinidale ina nde abiore kamaledabe.  
Bi o larogioniore Isaraele wali agali tigua bi ogodagua ladai bidaba-o.  
<sup>2</sup> Inanaga waitigi hearume ina bo anda ibiyangi  
Anduane Homogo ibugua ina mo wialu biamogo nabinidale  
<sup>3</sup> inanaga waitigi biarume tinaga keba holeneme ina bibahende mo ko howaore bo  
wahai kale.  
<sup>4</sup> Iba li ibalu mbirale ibame hilu dambiho yalu puabo hagadagua  
inanaga waitigirume ina bamba bo mburi lalu erebaho wa heledale ndobe.  
<sup>5</sup> Iba li hongoheore ibiyagome ina bibahende mbelelo yalu pialu  
yu ereba kagola homai kamale ndobe.  
Homabehego nahome yopene harimago kamagoni, lalu ladai bilimu.  
<sup>6</sup> Inanaga waitigi bu hearume ina bibahende bo mburi laihe nale  
Anduane Homogo ibunime ina bibahende hatali wu haabo hayagonaga  
iname ibuhondo kai laaboore hamiya.  
<sup>7</sup> Agalime ega gono wedaria ega mbira gono dagoha da puda halu kundulo mialu  
ibida porayadagua ina pirimagoni kamagoni.  
Ina gono wearuha do ngamalego Anduane Homogo ibugua gono kundulupe helaga  
biyagome  
ina yo pialu pene kamagoni.  
<sup>8</sup> Anduane Homogo ibugua hari daligabi dindi timbuni o kamagobi wabinigo  
ibunime dege ina biamogo biaga kagoni.

☆ 123:1: Iba 121.1 ☆ 123:2: Iba 25.15, Mal 1.6

## 125

*Anduane Homogohanda ibunaga wali agali handayaho haga kago ogo*

- <sup>1</sup> Wali agali Anduane Homogoha mini mbiraore wu karu<sup>☆</sup>  
ti Hari Saiono ale imiema nabi durubi nalaga hongo haabo haga ka.
- <sup>2</sup> Hari wedarume Yarusaleme ho hagira bu kadagua  
Anduane Homogohanda ibunaga wali agali handayaho howa  
ho mabu bu haabo holebira.
- <sup>3</sup> Wali agali ko biaga karume wali agali mana tigabi biaga karu  
handayaho haabo naholebira.  
Tigua handayaho haabo hayagua nde wali agali tigabi karume  
tibi nde mana ko biaga holobada.
- <sup>4</sup> Anduane Homogo-o wali agali bayale ínaga mana ngeru taluwa bialu haga karu  
tihondo ínaga mana bayale biadai bibe.
- <sup>5</sup> Ína wali agali ko biaga karunaga pani nelu mialu howa  
wali agali maru ínaga mana ngeru mo wahalu piaga karubi  
ti bibahende pani nelu miai habe laro.

Isaraele wali agaliru tiha mo palia holene wia helo hameledo.

## 126

*Isaraele wali agalime Anduane Homogohanda ti biamogo bilonaga ibuhondo bi lenego ogo*

- <sup>1</sup> Anduane Homogohanda ina dindi taraha garabaya hemaria haru dai bialu  
Yarusalemeni lone helayagoni<sup>☆</sup>  
Ibugua ani biyagonaga  
iname ogoni henene ndo emaga handarimabe toba harimaya.
- <sup>2</sup> Ina Yarusalemeni daibu howa turuore gibi halu  
oba hangu haho wiaabo halu  
turu howa iba ganaru podaga podaga bialu gibiore laho wiaabo harimagoni.  
Ina ani birimago hondowa wali agali hameigini tara tara paluyu pearume  
tini dege dege ladele bialu au laya.  
Anduane Homogohanda ibunaga Isaraele wali agali biamogo bule  
gibiore nabibehe wiagoni biya hendedemini, laya.
- <sup>3</sup> Ogoni heneneore ndobe.  
Anduane Homogohanda ina biamogo bulenaga biabe gibiore biyagoni.  
Ibugua ani biyagonaga ina turuore gibi halu  
ina miniha dinguore lo harimagoni.
- <sup>4</sup> Anduane Homogo-o ina ala turuho dinguore lo haramalidagua holomaya hela dai  
bibe.  
Iba hundiragola gana iba piagagoha yobu ngaria dalu lone ibiragola iba piaga  
wiyadagua lone piaga.  
Ogonidagua Anduane Homogo ínaga ina áyu kamaru lone mo gumbilo dai bibe.
- <sup>5</sup> Wali agali deiba ibalu howa tomo hangalu karume<sup>☆</sup>  
mani tomo hangaragoni bu ngaria turuore halu bu hanaga bilo hameledo.
- <sup>6</sup> Wali agali dugu bialu tomo egene hongole yalu pialu hangayarume  
mani tomo uruni bu ngaria bu hombedo hanalu

☆ 125:1: Iba 121.8, Seg 2.5 ☆ 126:1: Ab 12.9 ☆ 126:5: Yar 31.9



turu hama iba gana lamalama andaga dai bulebira.

## 127

*Anduane Homogo ibu baya gibiore biaga kagonaga kai lenego ogo*

- <sup>1</sup> Anda biaga gabendame anda bialu karuni<sup>✧</sup>  
Anduane Homogoibunime bialu kaha ndo tini hangu hongome bialu kayagua ti bame biabe bu wahole bialu kagoni.  
Mamage haga agalime tano handayaho karuni  
Anduane Homogo ibugua mamage kaha ndo  
tini hangunaga hongome kayagua ti bame irane nawini mamage halu egabi lo kagoni.
- <sup>2</sup> Egabiore lara handala heyalu  
munibi tomobi mitangi bialu biabe bule tagira poramali.  
Biabe bialu ne lo wákaha mbiraga andaga dai bialu u palia puda haramali.  
Urunidagua bialu kamaruni nde irane nawini dege  
bame hongo bibaho bialu kamagoni.  
Irene Anduane Homogo ibugua wali agali ibuni gubalini ho karu ti mbiraga u padaha  
ibunime ti tomo nolenebi mbirale wu holenebi  
manda mandabu wia haga kagoni.
- <sup>3</sup> Anduane Homogo ibugua inahondo baya turubini bialu waneigini ngidaruni  
turu halu mbirale bame ngiradagua bidagoni.  
Waneigini bu karuni ibugua ina mo gumbila halu inahondo ngidagoni.
- <sup>4</sup> Agali daliaheme ibu igini igiri hono wu haga bidago  
ogoni wai biagane agalime ibu giha timu ayagu yu hagamadagua yu ka.
- <sup>5</sup> Timu ayagu ogoniale dewaore wu kago ibu baya turubiore ka.  
Ibunaga waitigi karu baba bi godi laga birangi  
ibu igini dewa urunime lamogo biragola  
ibunaga waitigidarume ibu godi lo wini labe naheore holebira.

## 128

*Anduane Homogohanda ibunaga bi mana hale haga karu mo bayale holebero lenego ogo*

- <sup>1</sup> Wali agali Anduane Homogohanda hame ledadagua bialu karu  
ibunaga bi mana lo ngadagua bialu hagabi karu  
ti turuore ho ka.
- <sup>2</sup> Í ogonibi keyagua ínaga biabe bereruha howa karulape mo ngialu  
mbirale burupale keru yu holebere.  
Mbirale ínaga bereru damene bibahende bayale hai haragola  
ínaga turubiore holebere.
- <sup>3</sup> Í one ibu nde gerebi lini dewaore daga kaligobi birulebira.  
Ira olibe hongone dewa ira tenaha anda ho mabu biralidagua  
ínaga waneiginiru ti ínaga andagani ira dedagoria biru mabu bulebira.
- <sup>4</sup> Heneneore mbirali Anduane Homogonaga bi ledago taluwa biaga kago  
ibuha mo turu holene ogonibi migi bulebira.
- <sup>5</sup> Anduane Homogo ibugua Saionoha howa í mo bayale helo.  
Í dindini homa nabi wene keore Yarusalemeni mbirale uruni heneneore biaabo  
halu kane handabelo hameledo.

<sup>✧</sup> 127:1: Iba 121.4

<sup>6</sup>Í dindi ogoria luore haabo howa  
ínaga waneigini aguaneru de handabelo hameledo.

Isaraele wali agaliru tiha mo palia holene wia helo hameledo.

## 129

*Isaraelealirume waitigi bu hearu mo ko helonaga Anduane Homogohondo bi lenego ogo*

<sup>1</sup>Isaraelealiru-o bambaore howa tí waitigirume pigane hemingi howa  
mo ko hama ibalu haabo henego te langibe.

<sup>2</sup>Ina íhondo langialu lalu,  
Í daliahe dege hewangi  
waitigime mo ko hama ibalu haabo henego áyu kogoni.  
Tigua ani binigoyu í bope nahe kogoni.

<sup>3</sup>Tigua í pu payini tibume minu bayagola  
ínaga tingini erembiraha poda gaibu бага biya.  
Inaga tingini bayago dere tibu bene wiadagua luni biagimbu bigi bialu  
iba ganarua ale pupe haga biya.

<sup>4</sup>Tigua ani biyagoyu Anduane Homogo ibu tigabiore kagome  
í biamogo bialu waitigi biarunaga garabaya biabe ale bialu haga ndo  
í golope hene ko, lalu langerogoni.

<sup>5</sup>Waitigirume Saiono handabe manga haga bu karu  
tini daluha bo taliadai bimija hamelo ko.

<sup>6</sup>Tiore anda dangini gondo anda ho hagadagua hayagua bayaleda.  
Mbiralime gondo ogoni dugu wanahe kaore minalu abale gau laga.

<sup>7</sup>Gondo anda dangini anda hene ogoni  
mbiralime gandu lowa mo kabubu yalu napiaga ndobe.

<sup>8</sup>Wali agali kaware bolangua halu porarume tihondo ogodagua lalu,  
Anduane Homogohanda tí mo bayale helo.

Iname nde Anduane Homogonaga minini howa tí mo bayale helo hameledama, lalu  
nalolebira ndobe.

## 130

*Mbirali ibu Anduane Homogohondo biamogo bia lalu lenego ogo*

<sup>1</sup>Anduane Homogo-o ínaga bu miniha gendaore gibi ho howa íhondo bi larogoni.✧

<sup>2</sup>Anduane-o ina íhondo duguore bialu bi larogoni hale habe.  
Ína í biamogo bia lalu olarogoni hale habe.

<sup>3</sup>Ína iname ko birimaruni damenego bibahendeore mo ilu wiai ho kele✧  
ina kamaruni mbira pani nane yo pialu ai pedalebe.

<sup>4</sup>Ina mbiraorebi yo napobeheore kamalegoyu✧  
ína iname ko beramaru domo wahaga kegoni.  
Iname í hondowa giho holomayanaga  
ko beramaru ina domo wahaga bialu kegoni.

<sup>5</sup>Íore Anduane Homogohanda biamogo bilo lowa ibuha hana howa miniha didiho  
haruli.✧

Ibugua biamogo bulebero lalu ibunaga bi lo wiyagoria yaniho haabo haruli.

✧ **130:1:** Dug 3.55, Yna 2.2 ✧ **130:3:** Iba 143.2, Lm 3.20, 3.23-24 ✧ **130:4:** Yar 33.8-9 ✧ **130:5:** Iba 33.20, 40.1, Ais 8.17, 30.18

<sup>6</sup> Iore Anduane Homogohanda biamogo bulebira lowa miniha didiore howa haruli.✱  
Mbiraga mamageali mbira egabi ala la lowa hale gogabu haradagua ndo  
i miniha didi gibiore biyagola dugudaga howa yangayangabu haruli.

<sup>7</sup> Isaraele wali agaliru-o Anduane Homogo ibugua ina gubalini gibiore haho wiaabo  
haga kago manda bialu  
iname ibuhondo mini mbiraore wialu ibuha hanaho holene nga.  
Ina mbira mo ko holani handalu ibugua biamogo biaga kagoni.

<sup>8</sup> Ibugua Isaraele wali agali ibuninaga ka lalu✱  
tigua ko binidaru domo wahai halu  
ti gi mialu haru dai biai haga kagoni.

## 131

*Mbiralime mini mbiraore wu howa Anduane Homogohondo bi lenego ogo*

- <sup>1</sup> Anduane Homogo-o ina mine halu haruligo wahalu  
ini bayale kogo mitangi bialu balagala haruligobi waharu.  
Ina mana timbuni i manda bibe nahe ngarubi  
mbirale nahendene ale bulene taibiore ngarubi  
uruni i mitangi nabi holebero.
- <sup>2</sup> Ina ani nabi howa ai i karulape inaga mo palia holeneha bedogoni.  
Waneigini gali ti aiya bani bayale paliagadagua  
inaga miniha nde hadape howa dungulo kogoni.
- <sup>3</sup> Isaraele wali agaliru-o tigua Anduane Homogohondo mini mbiraore hongohe  
ayu ogoni howa wu haabo ho halimu.

## 132

*Anduane Homogonaga anda mitangi bialu kai lenego ogo*

- <sup>1</sup> Anduane Homogo-o Debidihanda erekui biabe ndelaheore bialu hayagoni mitangi  
bialu  
ina ibuore embeda holeni.
- <sup>2</sup> Anduane Homogo-o Debidi ibugua ogo ale buleore lalu  
Isaraele wali agalinaga Ngode Datagaliwabe Hongo Gibihe kego ihondo bi lo wigi  
biyagoni  
ina mitangi budai bibe.
- <sup>3</sup> Ibugua bi ogodagua lo wigi biyagoni.  
Ina i andaga napolebero dagianibi u napaluebero.
- <sup>4</sup> Halo birabi mbirale mbirani malia howa paliabi nabulebero.
- <sup>5</sup> Isaraele wali agalinaga Ngode Datagaliwabe Hongo Gibihe kagonaga andaore mbira  
bu heore lolego buwa  
Anduane Homogo ibu anda ogoniha kagola i ini andaga u palue polebero, lalu  
Debidihanda bi uruni leanego mitangi bibe.
- <sup>6</sup> Anduane Homogonaga Habo Nalolene bi lo winigonaga Mbogoyi biagoni dindi ogoha  
nga lalu✱✱  
ina Bedelehemeni hemaria langiyane hale harima.  
Mbogoyi biagoni Yarimu dindini wiaria handa walia harima.
- <sup>7</sup> Handa walia howa iname lalu, Ai Mbogoyi ogo mo yalu Anduane Homogonaga andani  
ma nalarami, larima.  
Anduane Homogonaga biragane dagia ngagoria kaware hapara howa

ina bulu palialu ibunaga mini mo yaraga halu lotu lamija ma, lalu larima.

<sup>8</sup> Anduane Homogo-o inaga Mbogoyi biagoni heba ininaga andani haabo hole ibu habe. Mbogoyi ogonime Anduane Homogo i hongo gibihe kego walia halu manane ogoni ngagoni.

<sup>9</sup> Inaga loma binigo mo miaga agali karu tiguabi mana tigabi hangu bilo hameledo. Inaga wali agali bu karume turuore gibi howa bi ladagadaga bilo hamelo kogoni.

<sup>10</sup> Anduane Homogo-o inaga biabe bia haga Debidiore mitangi bibe. Kini inime dabene ogonihondo handa tara halu erembira muleni.

<sup>11</sup> Anduane Homogo-o ala ina bi hongoheore mbira Debidihondo lo wiriyagoni pugua nabuleore kegoni.✧

Ala ina Debidihondo ogodagua lariyagoni,  
Debidi ini halu homedeha mani i igini hararu aria mbirago kini i pani ho aribia helo dabo helolebero, lariyagoni.

<sup>12</sup> Ina Debidihondo laabo halu lalu,  
Inaga igini hararume ina habo nalolene bi pongo bo wirudagua bialu ogoale bilimu ogo ale nabilimu lalu lamerodagua biyagua nde mani inaga aguane hararu ti iginime kini dege halu inaga dagia iniha tagira pene degeme mia aribia haga bulebira, lalu lo wiriyagoni.

<sup>13</sup> Anduane Homogohanda Saiono tano ibuninagaore helo ibunime dabene. Ibu Saionooreni ho teneho hole hameleda.

<sup>14</sup> Ibugua lalu, I tano ogoriani haho wiaaboore holebero. Ina dindi ogoriani howa ini kini howa haru holenaga dindi ogoni dabedo.

<sup>15</sup> Ina Saiono tanoni wali agali bu karu buru pada ale dewaore bu hombedo mulebero. Ogoniha wali agali yagibano tomo noanoalo bu karu tibi tomo karulapeore nelu mulebero.

<sup>16</sup> Saiononi loma binigo mo miaga karume inaga wali agali gi mialu haru dai bulene biabe bayale bilo biamogo bulebero. Saiononi wali agali bu karu ti turu halu iba gana lalu bi ladagadaga bu holebira.

<sup>17</sup> Ina dindi ogoriani howa Debidi ibuha howa tagira pene mbira kago kini gibiorene gibi helo dabo helolebero.✧

Kini ogoni lamu hale daabo hagadagua ibugua wali agali handame holene ereba nahe wiaaboboore holebira.

<sup>18</sup> Kini ogoninaga waitigi karu ina ti mo taga halu taga pani timbuniore nelolebero.

Ai wali agali kini ogoni ibugua handayaho hene karu ina ho timbu hama baya hama puabo helolebero, lalu Anduane Homogohanda ani lene.

## 133

*Ngode Datagaliwabenaga wali agali mo palia howa mandagi holene turubiore ngago ogo*

<sup>1</sup> Ngode Datagaliwabenaga wali agali ti baya hangu mini mo mbiraore howa mandagi hayagua nde✧

mana ogoni bayaleore halu ti miniha dungulo holebira.

<sup>2</sup> Tigua mana ogonidagua bulenego bayaore olibe lini ibaneme weli baya tara wabini mbira

Arononaga hagianeni odo wiyagola pugulalu ibunaga angarini pora bialu  
aga lu biagoria pugulope hayagobi holebira.

<sup>3</sup> Mini mo mbiraore holene mana ogoni Hari Hemononi dadimba mbiraga ibira har-  
aligobi halu

Saiononaga hari bu karuha ibira hagagobi holebira.

Dindi ogoniha Anduane Homogohanda wali agali mini mo mbiraore ho karu  
tihondo bayale dege bialu holebero lo winigo nga.

Bi lowinigo ogo, Tí haabo holene yu halimulonaga ngulebero, lene.

## 134

*Anduane Homogonaga mini yaraga hama lenego ogo*

<sup>1</sup> Anduane Homogonaga andaha mbiraga biabe biahaga kamiru  
ibunaga mini yaraga hole ibidaba.

<sup>2</sup> Tígua ibunaga andaha howa gi yaraga halu  
Anduane Homogohondo bi lalu ibunaga mini yaraga hadaba.

<sup>3</sup> Anduane Homogo ibu hari daligabi dindi o kamagonibi wabini kago  
ibugua Saionoha howa tí mo bayaleore helo laro.

## 135

*Anduane Homogonaga mini yaraga halu iba gana lenego ogo*

<sup>1</sup> Anduane Homogonaga mini yaraga hamíya.

Anduane Homogonaga biabe biahaga kamiru  
tígua ibunaga mini yaraga hadaba.

<sup>2</sup> Tí Anduane Homogo inanaga Ngode Datagaliwabenaga anda pabe timbuni kago  
tamuha haga kamiru  
tígua ibunaga mini yaraga hadaba.

<sup>3</sup> Ibu bayaleore kagonaga iname ibunaga mini yaraga hamíya.  
Ibugua inahondo dara howa bayale biaabo haga kagonaga  
iname ibunaga mini yaraga halu iba ganaru lamíya.

<sup>4</sup> Anduane Homogohanda Yagaba ibunaga helo dabenedagua  
ibugua Isaraele wali agali ibuninagaore helo dabo helene ka.

<sup>5</sup> Anduane Homogo ibu mini leneore howa  
dama mitangi bialu bi pupu wulenaga gime wabini ngaruni  
ibugua bolangua haiheore kago i manda bidogoni.

<sup>6</sup> Anduane Homogohanda mbirale ibunime bule hame ledadagua  
hari daligahabi dindinibi biaga ka.

Iba solowarahabi iba andanehabi bibahendeoreni  
ibugua bua biradagua biai haga ka.

<sup>7</sup> Ibugua harini ginu dindi bibahende ha wiame helalu  
hari daba bilaragola howa iba dalu ibilalu  
puyabu tara tara ibuni andagaha wia do ho winiru mo heya halu  
dindi bibahende ha pulame helo pelaga ka.

<sup>8</sup> Iyibi dindini Iyibialinaga igini wahene bibahende bo wahai halu  
tinaga nogo igini pigane wini hearubi bibahende bo wahai hene.✧

<sup>9</sup> Iyibi dindiha dege ibugua kinibi ibunaga agali haguane hearubi bibahende pani nelu  
mialu  
agalime nabigane alebi nahendene ale dewaorebi bialu hene.✧



- 10 Anduane Homogohanda hameigini tara tara dindi dewaoreni hearu bo wahaga bialu kini hongohe bu hearunibi bo wahai haga bini.
- 11 Ibugua Amoro wali agalinaga Kini Sihono bo wahalu<sup>☆</sup>  
Basana wali agalinaga Kini Oga bo wahalu  
Kenana dindiha kini dewa bu hearubi bo wahai halu bini.
- 12 Ibugua dindi uruni ibunaga wali agaliruhondo mini.  
Isaraele wali agali hearu tihondo dindi uruni bibahende miai hene.
- 13 Anduane Homogo-o wali agali bibahendeme í Ngode Datagaliwabeore kagonida lalu latagi haabo holebira.  
Wali agali mani holebirarubi ti bibahendeme í ogonibiore ke lalu manda bulebira.
- 14 Anduane Homogohanda ibunaga wali agali handayaho haabo holebira.  
Ibugua dara holene nawi howa ibunaga biabe biahaga karu dara haabo holebira.
- 15 Hameigini dindi tara taraha bu hearume dama mitangi bialu<sup>☆</sup>  
mbirale bi pupu wulenaga ngolo silibarume wabu helaga biaga.  
Mbirale uruni tininaga gi degeme wabigi bini.
- 16 Mbirale uruni wabu helayaru tinaga ne hariga ngagoyu bi nalaga nga.  
Tinaga de heledagoyu mbirale deme nahandaga nga.
- 17 Tinaga hale wabu heledagoyu bi hale nahagabi  
tiha bu hebi nalagabi nga.
- 18 Mbirale uruni ale wabu helayarubi  
uruni yu tiga biaga agali karubi  
tini nde mbirale urunibi dege helo hamelo kogoni.
- 19 Isaraele wali agaliru-o Anduane Homogonaga mini yaraga hadaba.  
Anduane Homogonaga loma binigo mo miaga kamiru tíguabi ibunaga mini yaraga hadaba.
- 20 Libai agali kamiru tíguabi Anduane Homogonaga mini yaraga hadaba.  
Wali agali Anduane Homogo mitangi bialu lotu laga kamiru tí bibahendeme ibunaga mini yaraga hadaba.
- 21 Anduane Homogo ibunaga dalu Saiono Yarusalemeha howa wali agali bu kamiru tígua ibunaga mini yaraga hai hadaba.

## 136

### *Anduane Homogohondo kaj lalu iba gana lenego ogo*

- 1 Anduane Homogohanda inahondo bayale bialu haga kagonaga<sup>☆</sup>  
iname ibuhondo kaj timbuni lolene nga.  
Ibugua ina gubalini ha ho wiaaboore haga kagoni.
- 2 Anduane Homogo ibu mbirale bi pupu wulenaga gime wabini ngaru bolangua haihe kago  
iname ibuhondo kaj lama.  
Ibugua ina gubalini ha ho wiaaboore haga kagoni.
- 3 Anduane Homogo ibu dindini haguane hene karu bolangua haihe kago  
iname ibuhondo kaj lama.  
Ibugua ina gubalini ha ho wiaaboore haga kagoni.
- 4 Agalime nabiagane aleru ibugua dege biaga ka.  
Ibugua ina gubalini ha ho wiaaboore haga kagoni.

☆ 135:11: Dag 21.21-35, Yos 12.7-24 ☆ 135:15: Iba 115.4-8, Mo 9.20 ☆ 136:1: 1 Bit 16.34, 2 Bit 5.13, 7.3, Esr 3.11, Iba 100.5, 106.1, 107.1, 118.1, Yar 33.11

- 5 Hari daliga li karuni ibunaga mini bayale gigabi wiagome wabini.✧  
Ibugua ina gubalini ha ho wiaaboore haga kagoni.
- 6 Ibugua iba andaneha berelowa dindi daliga wabu ngeleda.✧  
Ibugua ina gubalini ha ho wiaaboore haga kagoni.
- 7 Ibugua ni egebi wabini.✧  
Ibugua ina gubalini ha ho wiaaboore haga kagoni.
- 8 Ibugua nime horombe wá halu hondo helo heleda.  
Ibugua ina gubalini ha ho wiaaboore haga kagoni.
- 9 Ibugua egebi yakundirubi urunime mbiraga dalu hondo helo heledagoni.  
Ibugua ina gubalini ha ho wiaaboore haga kagoni.
- 10 Ibugua Iyibi wali agalinaga igini wahene bo wahi hene.✧  
Ibugua ina gubalini ha ho wiaaboore haga kagoni.
- 11 Ibugua Isaraele wali agali Iyibi wahalu haru tagira pene.✧  
Ibugua ina gubalini ha ho wiaaboore haga kagoni.
- 12 Ibugua hongo timbuniore heagome ti ani haru tagira pene.  
Ibugua ina gubalini ha ho wiaaboore haga kagoni.
- 13 Ibugua iba solowara Daramabi laga bereago bira migimigi bilene.✧  
Ibugua ina gubalini ha ho wiaaboore haga kagoni.
- 14 Ibuni bamba halu ibunaga wali agali haru halu iba solowara Daramabi domaede hene.  
Ibugua ina gubalini ha ho wiaaboore haga kagoni.
- 15 Ibugua ani biyagoyu Iyibinaga kinibi ibunaga ami agali hearubi iba ogoniha iba nalu homai helene.  
Ibugua ina gubalini ha ho wiaaboore haga kagoni.
- 16 Ibugua dindi ko wali agali nahaga wiagoria ibuni bamba halu ibunaga wali agali haru halu pene.✧  
Ibugua ina gubalini ha ho wiaaboore haga kagoni.
- 17 Ibugua kini hongohe hearu bo wahi hene.  
Ibugua ina gubalini ha ho wiaaboore haga kagoni.
- 18 Ibugua kini mini lene hearubi bo wahi hene.  
Ibugua ina gubalini ha ho wiaaboore haga kagoni.
- 19 Ibugua Amoro wali agalinaga Kini Sihono bo wahene.✧  
Ibugua ina gubalini ha ho wiaaboore haga kagoni.
- 20 Basana wali agalinaga Kini Ogabi bo wahene.✧  
Ibugua ina gubalini ha ho wiaaboore haga kagoni.
- 21 Kini uruninaga dindi wiaru ibunaga wali agaliruhondo mini.  
Ibugua ina gubalini ha ho wiaaboore haga kagoni.
- 22 Ibugua dindi uruni ibunaga biabe biahaga Isaraelealiruhondo mini.  
Ibugua ina gubalini ha ho wiaaboore haga kagoni.
- 23 Waitigime ina bopeore hayagola ibugua ina embeda nahene.  
Ibugua ina gubalini ha ho wiaaboore haga kagoni.
- 24 Ina waitiginaga giha hemaria ibugua ina mo wialu haru dai biya.  
Ibugua ina gubalini ha ho wiaaboore haga kagoni.
- 25 Ibugua wali agalibi ema bialu piaga damene bibahendebi tomo karulape nelo miaga ka.

Ibugua ina gubalini ha ho wiaaboore haga kagoni.

<sup>26</sup> Ngode Datagaliwabe dahuliya andaga kagohondo iname kai lamiya.  
Ibugua ina gubalini ha ho wiaaboore haga kagoni.

## 137

*Isaraele wali agali dindi taraha garabaya pu howa tininaga dindi mitangi bialu iba gana darabi lenego ogo*

<sup>1</sup> Babilono dindini iba piyarunaga angeni ina bira bigi bu harima.\*

Ogoriani biruwa nde inanenaga dindi Saionoore mitangi harima.

Iname dindi biago mitangiore harimadagua nde

daraore howa inane dindinaga duguore bu wia harima.

<sup>2</sup> Iname inanaga ngida gawa hiliyularu iba angeni ira hiribi ale hearunaga maganeni derela ho ngelowa

ina labe manga biyagola nale bame biru wirima.

<sup>3</sup> Agali ina garabaya biaga biarume inahondo lalu,

Tigua iba gana maru ina mo turu holenaga laga bidaba.

Tininaga dindi Saionoore lalu kai laga bialu mbira ina hale holomaya la handadaba, laga biya.

<sup>4</sup> Ti ani laga biyagoyu ina dindi taraha garabaya pu howa

ina Anduane Homogonaga iba ganago bame laholo au bulebe.

Ani nabuleore ndobe.

<sup>5</sup> Yarusaleme-o ina i embeda haruyagua

o ngidaru lone aginaga bole ndodago nabolebero.

<sup>6</sup> Yarusaleme-o ina i embeda halu

inaga turu holene tene

Yarusaleme mitangi harogome tagira ibaga manda bidogobi heba embeda dege haruyagua

o i iba gana lone mani nalolego inaga bi mo pu helabe laro.

<sup>7</sup> Anduane Homogo-o Babilonoalime Yarusaleme bo giallo paya bialu bayangi

Edomoali ti wai Babilonoha anda puwa tigua bi laga biyagoore bayuwa mitangi bibe.

Tigua ogodagua laga biyagoni.

Weagua tira dindi hangu ibira helo bibahende bo giallo bagabu wahadaba, lalu laga biyagoni i hale harigoni.

<sup>8</sup> Babilono-o bi o larogo hale habe.\*

I nde bo mburi lelebirago lelo ani habe.

Ina inahondo koore birigonaga paipai mbirali ibugua ihondo bulebirago handabe. Mbirali inanaga paipai bia haga kago ibu turu holene nga.

<sup>9</sup> Agali inanaga wai puhaga haruago ibugua ibalu Babilono inaga waneigini emene hono yu hama pederuni yamuwa

ege toleni embone tuguduki haga bulebirago ani bilo hono yu habe.

## 138

*Anduane Homogohondo kai lenego ogo*

<sup>1</sup> Anduane Homogo-o ininaga miniha hongo timbuniore howa

\* 137:1: Neh 1.4 \* 137:8: Mo 18.6

- ihondo kai larogoni.  
 Ina mbirale dama mitangi bialu gime wabini ngagoria howa  
 inaga mini yaraga halu iba gana lalu kogoni.
- <sup>2</sup> Inaga anda loma bia hene kago handade halu ina ge duli hanga ho biruwa  
 inaga mini yaraga halu kogoni.  
 Inaga gubalini holene wiaabo kegonagabi  
 i mini bilinahe kegonagabi ina ani lalu kogoni.
- Inaga minibi ina mana ogo bulene nga lenerubi duniniore nga lalu  
 inahondo mo walia harigonaga ina iba gana ogo lalu kogoni.
- <sup>3</sup> Ina i olarugola ina inaga bi hale howa  
 ininaga hongo timbuniore kegome i mo hongo haabo harigola kogoni.
- <sup>4</sup> Kini dindini bu karu bibahendeme ina bi lowiriru hale howa  
 tigua inaga mini yaraga holebira.
- <sup>5</sup> Tigua ina bibahende birirunaga iba ganabi  
 i mini timbuni lene kegonaga iba ganabi lalu holebira.
- <sup>6</sup> Anduane Homogo-o i daliga duniniore kegoni howa\*  
 wali agali mini mo dindiha haga karu mitangi bu haga ke.  
 Wali agali mine haga karu ti nde inaga deni ha do habe nahe ka.
- <sup>7</sup> Iha genda ibu mabu biragola\*  
 inime i handayaho halu pele ngiaga kegoni.  
 Waitigi bu karume ihondo keba haragola  
 ina i pele ngialu ininaga hongome i bayuwa mo wiaga kegoni.
- <sup>8</sup> Anduane Homogo-o mbirale ihondo bulebero lalu lo wiriruni  
 biaiore holebere lo manda bido.  
 Inaga gubalini holene wiaabo haga kegoni.  
 Ina biabe bule biriruni bibahende bu maro bibelo hameledo.

## 139

### *Ngode Datagaliwabe ibugua ina manda biai halu de hondo kago ogo*

- <sup>1</sup> Anduane Homogo-o ina i ba handalu ai ogobiore kalo manda biaiore kegoni.\*
- <sup>2</sup> Ina mbirale bigi berogo bibahendeore i manda biaiore ke.\*  
 I kaundiaore uyura howabi inaga miniha mitangi berogo damene bibahendeore  
 manda biai kegoni.
- <sup>3</sup> I biabe bialu koyaguabi o halo bedoyaguabi\*  
 ina i handaya kegola dege bialu kogoni.  
 Ina bigi berogo damene bibahendeore manda biai ho kegoni.
- <sup>4</sup> Bi mbira naledoore ogo ale lolebira lowa\*  
 i abale manda bu bolangua kegoni.
- <sup>5</sup> Ina i homabu bupe halu  
 inaga hongome i pabe tigila haradagua bidegola kogoni.
- <sup>6</sup> Ina i ogobiore kagoni lowa baya hanguore bilibele lo manda biai ho kegoni.  
 Manda bulene daligaore ogonibi ina mandabu mibe naheoreda.
- <sup>7</sup> I ke handala i ibida pole pialu ha do hole ani pobehe kobe.\*

\* 138:6: Ais 57.15, Ya 4.6, 1 Pi 5.5    \* 138:7: Iba 23.3-4    \* 139:1: Iba 17.3, Yar 12.3    \* 139:2: 2 Kin 19.27, Md 9.4, Yo 2.24-25    \* 139:3: Iba 17.3, Yar 12.3    \* 139:4: Hi 4.13    \* 139:7: Yar 23.24, Yna 1.3

- Í nahego mbira dindi agohayagi ngabe.  
<sup>8</sup> Dahuliya anda iraga halu ibiruyagua í ebere ke.  
 Humbirini andaga dalipe halu  
 ni bu karu baba bia tagoho hole yupe haruyaguabi  
 í niguniha ha dege bulebere.
- <sup>9</sup> Yagalo yalu pialu ni tagira ibagahayagi ha do hole piruyaguabi  
 o ndo ni paliagahayagi pu haruyaguabi
- <sup>10</sup> dindi gibuni gibuni urunihabi í ha dege bulebere.  
 Ína í biamogo bulebi haru holebi ha dege bulebere.
- <sup>11</sup> Aruma holeneme í budambi heladaba lalu  
 wá emeneore mbira nahe aruma dumbilinioreha ha do hole lalu manda  
 biruyaguabi  
 í ha dege bulebere.
- <sup>12</sup> Ína í arumaha ndo koria hondolebere.✧  
 Mbiraga dumbilini mbauleyaguabi  
 ína í horombe hau hanunini koria handaradagua hendede.  
 Handalu keria wá arumala tu nangaria hendede.  
 Mbiragabi horombeni handaradagua dege hendede.
- <sup>13</sup> Inaga tingini gi gebi embone minibi tara tara hama pedaruni  
 ína wabu helene kogoni.  
 Ína í aiya tombeha í mo gimbu bialu berelariyagoni.
- <sup>14</sup> Ína mbirale bigi berego taraore bigi biagayagonagabi  
 í timbuni gibi baya buruguleore howa í manda biai ho kegonagabi  
 ína ínaga mini mo yaraga haro.  
 Ina wali agalime í hondowa mo yo handabe nahe kamagoni.
- <sup>15</sup> Í aiya tombeha biruwa ínaga kuni dameneru wene hole mo gimbu gimbu bigi bialu  
 heagola✧  
 í tombeha bira do howa anda haga bialu hewago  
 í manda bu harigo kegoni.
- <sup>16</sup> Í aiyahanda í taba nahene tombeha berewago í handarigoni.  
 Ína ani bialu nde í dindini howa mali ogodagua holebira ogoangi homolebira lalu  
 manda buwa  
 ínaga mbugani gilibu wu kegoni.  
 Í aiyahanda í taba naheneha abogo ibu lu ogodagua helo lalu  
 mali podo manda bu winigo ínaga mbugani gilibu wiai kegoni.
- <sup>17</sup> Anigo Ngode Datagaliwabe-o ínaga mitangi bulene daligaore tara  
 í aleme manda bibe nahedagolabi daga labe nahedagolabi  
 í mogolo kogoni.
- <sup>18</sup> Daga laruyagua iba angeni iba mu ngaru emene karulape lowa  
 ínaga mitangi bulene daga nalabeheore la dege bialu  
 lo umulowa paliahondo howabi dengala howabi í heba dege halu  
 ína í manda biai habe naheore kogoni.
- <sup>19</sup> Ngode Datagaliwabe-o wali agali mini kowi bu karuore homelo bowaore ha nabira  
 lalu kogoni.  
 Wali agali bame irane nawini bo wahama ibaga biaga karu  
 ti baba í mandagi habe mangabago  
 tiore erebaha nabira lalu kogoni.



- 20 Ko biaga uruni tigua í lalu bi ko laga bialu  
 ínaga mini mo ko hole lalu lo guraga bialu ka.
- 21 Anduane Homogo-o í handabe manga haga karu  
 ina uruniore handabe manga ho ko.  
 Íhondo waitigi ho karu  
 ina ti mo yo hondowa de handape ho kogoni.
- 22 Ina ti handabe manga timbuniore ho ko.  
 Ti í waitigi ka lo kogoni.
- 23 Ngode Datagaliwabe-o ina inaga bu habanehabi minihabi hai bialu✧  
 ko mbira ngabe hondole mitangihabi tayabume halu manda bibe.
- 24 Ina ani taya bialu mana ko mbira iha au ngabe handalu✧  
 inaga haabo holene harigani puabo holiya í haru habe.

## 140

### *Anduane Homogohanda handayaho helo bi lenego ogo*

- 1 Anduane Homogo-o wali agali ko biaga karume í mo ko holigo pele ngibe.  
 Agali bo wahaga karume í baba waitigi nahelo biamogo bibe.
- 2 Tigua mana ko bulenaga ndindi laabo halu  
 wali agali bu karu tini keba haga haga bilo mo keba haga ka.
- 3 Tinaga hége ne gadele puyanaga ne ale howa✧  
 tigua bi lararume nogombi ko tomia pale ngagonaga tomia ale  
 tinaga ne hambuni ngagoni.
- 4 Anduane Homogo-o agali ko karunaga hongome í bope nahelo  
 ina í handayaho habe.  
 Agali bo wahaga karume í mo ko holenaga bi ndindi lalu kago  
 í ba nabilo hapai habe.
- 5 Mine haga bu karume í gonoha doliya gono wu kagoni.  
 Tigua gono ogoni pu payini timbuni mbirame inaga geni do ngelonaga  
 í hariga poleberogoha gono wia do ka.
- 6 Ina Anduane Homogohondo lamialu lalu,  
 Inaga Ngode Datagaliwabeore íni kegoni.  
 Anduane Homogo-o ina biamogo bia lalu olalu kogo hale habe.
- 7 Anduane Homogo Bibahende Haru Haame Ho Haga-o  
 í haru dai biaga hongoheore í kegoni.  
 Ina waitigiru baba wai bialu hewangi  
 ina í handayaho harigoni.
- 8 Anduane Homogo-o agali mini kowi karume bule hameledaru buligo nabilabe.  
 Tigua ko bulenaga bi pongo balu karuni biatagi nahelabe.
- 9 Waitigi bu karume í bope halu balagala howa ibaga bu nahelabe.  
 Tigua í bo waholenaga mo gi halu karuni tiniha biadai bilabe.
- 10 Ira dedaore tinaga hagianeni ibira helolene karulapeda.  
 Ti gundu uli ngagoha uli pu wiaabo helo minu bape habe.
- 11 Agali ko urunime ke howa wali agali maru karu bame godi deni heledago  
 tigua godi lalu bolangua nahelabe.  
 Agali bo wahaga bu karu tiha mo ko holene mbira ibilalu

ti bo ereba hai helabelo hamelo kogoni.

- <sup>12</sup> Anduane Homogo-o wali agali ko urunibi karume wali agali yagibano karu mo ko holebiragola ina yagibano karu biamogo biaga kegoni. Wali agali burupale karu tihondobi bayale bulene ngadagua biriligo i manda bu kogoni.
- <sup>13</sup> Wali agali mana tigabi biaga karume inaga mini yaraga halu ini kegoha haabo holebira.

## 141

### *Mbiraga Anduane Homogohondo bi lenego ogo*

- <sup>1</sup> Anduane Homogo-o ina i olarogo ayu ogoniore i biamogo bibe. Ina i olalu kogola ina inaga bi haleore habe.
- <sup>2</sup> Inaga bi ihondo larogoni ira hagua ngabi mini inisenesinaga hagua irigi haragola\* nga halu turu harilidagua turu halu hale habe. Mbiraga ihondo mbirale lomabu delene yamirilidagua inaga gi yaraga halu ihondo bi larogo yamibe.
- <sup>3</sup> Anduane Homogo-o inaga ne hariga howa bi latagi haroru mamage habe.\* Inaga ne hambuni bi loleberoru damene handayaho habe.
- <sup>4</sup> Mana ko ngago bulenaga inaga bu miniha heyuligo mamage habe. Wali agali ko biaga karume mana ko biradagua i ti heba howa ko biamaga halu holigo i nahelabe. Ti dawe halu tomo nalu bedagoha i ti heba mandagi naberelabe.\*
- <sup>5</sup> Wali agali mini tigabi kagome i dara howa mo tiga bialu pani ngiyagua nde ogoni karulape. Wali agali ko karume inaga mini yaraga holene manda biyagua i mangaba lolebero. Irane ina ihondo lalu wali agali ko karume ko biyagonaga pani mibe laabo haruligonaga i manga holebero.
- <sup>6</sup> Agali marume wali agali ko uruni mo ko howa minu baragola tigua Anduane Homogonaga bi layago heneneoreda lo manda bulebira.
- <sup>7</sup> Agalime ira kambulalu dangialabaga biagadagua bialu agali uruninaga kuni gingirulobaga buwa homali ngagoha waholebira.
- <sup>8</sup> Anduane Homogo Bibahende Haru Haame Ho Haga-o\* ina ihondo mini mbiraore wu haabo kogoni ndobe. Ina iha ha do kogonigo i nahome helabe.
- <sup>9</sup> Agali ko karume gono ngagoha i do wuligo handayaho halu inime i baya hangu pabe bu habe.
- <sup>10</sup> Agali ko uruni tininaga gono ngagoha tini do nga handala i poleberogoha mo pila holene mbira nawi howa bayale yo pialu poliya helabe.

## 142

### *Anduane Homogohanda biamogo bilo bi lenego ogo*

- <sup>1</sup> Anduane Homogohanda i biamogo bilonaga ina ibu olalu kogoni.\*

\* **141:2:** Mo 5.8   \* **141:3:** Iba 34.13, Ya 1.26, 3.8   \* **141:4:** Min 23.6   \* **141:8:** 2 Bit 20.12, Iba 25.15, 123.1-2  
\* **142:1:** 1 Sml 22.1, 24.3

Ina i biamogo bia lalu haya howa bi lalu kogoni.

<sup>2</sup> Iha genda nganggi ina ibu karia genda ogoni yalu piruli.

I mini burugulo koru bibahende ibuhondo lamiai haruli.

<sup>3</sup> I mini dege dindi halu homolene kawareda lo manda bu kongi✧

Anduane Homogo ibugua i ogoale bulene ngalo mandabu kogoni.

Waitigi karume i gonoha do wuliya hariga poleberogoha gono wia ho ka.

<sup>4</sup> Ini kogoria kaware handa ai nai bialu koria✧

mbirali i biamogo bulene mbira naheda.

Agali ko karume i bo waholilono

mbirali i handayaho howa mamage holenebi naheoreda.

I dara howa biamogo bulenebi mbira naheoredane hendedo.

<sup>5</sup> Anduane Homogo-o ina i biamogo bibelo olalu kogoni.

Ini hanguore i handayaho haga kegoni.

I homa nabi kongi inila habiya hamelo kogoni.

<sup>6</sup> Ina biamogo bia lowa i olalu kogonigo hale habe.

Inaga bu miniha mini dege dindi ho howa lalu kogoni.

Agali i mo ko hagadaruni ti hongo timbuniorehe kago

ina ti bope habe naheore kogoni ndobe.

I tinaga giha koria ina gi mialu yamibe.

<sup>7</sup> Gendaru ibu ngagoha kogo bayaleore holiya ina i biamogo bia laro.✧

Iniaga wali agali ngoai ho kagoria

ina tinaga deni inaga mini yaraga halu holebero.

Ini ihondo bayale birigonaga ina ani bulebero.

## 143

*Anduane Homogohondo biamogo bia lalu bi lenego ogo*

<sup>1</sup> Anduane Homogo-o ina ihondo bi larogo hale habe.

I mini tigabiorebi mini bilinahebi kegome

ina biamogo bia lalu koru hale habe.

<sup>2</sup> Ina godi larengi inaga biabe biahaga i kogo godini heloleni nahelabe.✧

Iniaga deni mbirali ibuha ko nawi mbira naheore ndobe.

<sup>3</sup> Waitigi bu karume i talima ibaga bialu i bopeore henego ko.

Tigua i arumaha minu dariba ho wiradagua bidagola

i wali agali bamba homo gialo wahene ngaligobi kogoni ndobe.

<sup>4</sup> I ani bidagome i mini tumutumu bialu

mini dege dindi ho kogoni.

<sup>5</sup> Bambaore biniru ina lone mitangibu dai bero.✧

Mbirale bayale damene bibahende ina biriruni mitangi bialu

biabe bayale birirubi mitangibu dai berogoni.

<sup>6</sup> Ina inaga gi yaraga halu ihondo bi lalu kogoni.

Wali agalime iba noa howa kembobe lebola haradagua

inaga dininime inaga bi mana lo ngeru noa halu hame timbuniore lo kogoni.

<sup>7</sup> Anduane Homogo-o ina mini dunubia ho harugo ereba harago

ainde ina bi larogo ayu ogoni abale hale habe.

✧ **142:3:** Iba 77.3, 140.5, 143.4 ✧ **142:4:** Yob 11.20, Iba 88.8, 88.18 ✧ **142:7:** Iba 13.6, 143.11, 146.7 ✧ **143:2:** Lm 3.20, Ga 2.16 ✧ **143:5:** Iba 77.5, 77.10-11

I abale homalu homene dininiru piagane ngagoaha poligo  
i ha do nahabe.

<sup>8</sup> Ina ihondo mini mbiraore wu kogonigo\*  
egerebagi bibahendengi inaga gubalini holene ngegoni i mo mitangi biaabo helabe.  
Ina ihondoore bi lalu haga kogonigo  
ai hariga ina pialu holiyago inime mo walia habe.

<sup>9</sup> Anduane Homogo-o ina i handayaho habelo ini keria eberogoni.  
Waitigi bu karunaga giha koria i mo wialu haru dai bibe.

<sup>10</sup> Inaga Ngode Datagaliwabe iniore kego\*  
ina inaga hame ngego hangu taluwa bialu holiya i lawai habe.

Ina ihondo bayale bialu  
i tigabi holene ngagoria ibagabu holiya haru habelo hamelo kogoni.

<sup>11</sup> Anduane Homogo-o inime bule lalu abale lo wiridagua  
i mo wialu bayuwa haru dai bibe.  
I bayaleore biaga kegome iha genda bibahende ibu ngagoria kogola  
inime i pele ngibe.

<sup>12</sup> I ininaga biabe bihaga kogo manda buwa  
ina ihondo gubaliniore ho haga kegonigo i waitigi bu karu homelo babe.  
I bope haga karu bibahendeorebi bo wahai habe.

## 144

*Kini mbirame ibu wayali henegonaga Anduane Homogohondo kai lenego ogo*

<sup>1</sup> Ina Anduane Homogonaga mini yaraga harogoni.

I biamogo biaga hongo timbunihe ibu kagoni.

Ibugua i wai buliya baya hangu biawai halu  
i mo manda mandabu helaga kagoni.

<sup>2</sup> Ibugua i handayaho haga howaibunime i ho hagira bu haga ka.  
Inaga humbi alebi pele ngiagabi ibu hanguore kagonigo  
ina ibuha mini mbiraore wu kogome  
ibugua i mo wialu haru dai biaga kagoni.

Ibugua hameigini tara tara dindi bibahendeha karu i andaneha hai helaga kagoni.

<sup>3</sup> Anduane Homogo-o ina wali agali agi ale kamagola\*  
ina mitangi ho haga kebe.

Ina bame nahabane mbira kamagonidago  
ainde ina irane aginaga ina mo galone harilibe.

<sup>4</sup> Ina wali agali bameore ne harigaha buhe halu  
mbira hangu tagira pialu ereba hagagobi kamagoni ndobe.

Inanaga dindini holene tubagiore  
bame ni daragola munini emene howa abale ereba haraligobi kamagoni.

<sup>5</sup> Anduane Homogo-o hari li kagoni kambulaki bialu abale dalia.

Inaga gime dindi hari wedaru ela hariyagua ira hagua timbuni tagira ibulebira.

<sup>6</sup> Hari daba mo bia halu waitigi bu karuni bo purogo lela.

Ti gerai lalu ibida purogo lelo inaga timume bo pelabe.

<sup>7</sup> Ina hari daligaha howa gi dogolape halu

ī iba andaneha bedogo wahalu tagira ibuliya gini yamia.  
 Agali dindi tarani howa ibini bu karunaga andaneha koria  
 ina ī abale mo wialu golope habe.

<sup>8</sup> Agali uruni tiha henene lolene mbira nawiore howa  
 tigua gi doladaga halu henene larama lowa ke dege hagane ka.

<sup>9</sup> Ngode Datagaliwabe-o ina iba gana gahenge wabialu ihondo lolebero.  
 Ina ngida ale balu ihondo iba gana lolebero.

<sup>10</sup> Ina kinirume wai bialu wayali helo biamogo biaga howa  
 inaga biabe biahaga Debidi inibi nde biamogo bialu haru dai biaga kegoni.

<sup>11</sup> Waitigi ī bope haga bu karunaga giha koria haru dai bibe.  
 Agali dindi taraha howa ibini bu karunaga andaneha koria  
 ina ī abale mo wialu golope habe.

Agali uruni tiha henene lolene mbira nawiore howa  
 tigua gi doladaga halu henene larama lowa ke dege hagane ka.

<sup>12</sup> Ina igini igiri daliahe kaore  
 ira hongone karu hongohe anda hagagobi helo hamelo kamagoni.  
 Ina wane bedarubi baya dege halu kini andaga kagoa  
 mo yari bia hene ngagobi berelo hamelo kamagoni.

<sup>13</sup> Inanaga tomo wiaga andaha tomo bayale dewaore wu tolatagi helo hamelo kama.  
 Inanaga dindini nogo sibi karume igini daosini dewaore honoyu helo hamelo kama.

<sup>14</sup> Nogo bulumaga bu karumebi igini dewa honoyu kagola  
 mo ko nahelobi maru homa nabilobi hamelo kamagoni.

Inanaga hariga polene ngagoria  
 wali agaliyaguabi waneiginiyaguabi mbiragome  
 ibuha genda tandagaru tagira ibiragola  
 dugu bima pelo hame naledema.

<sup>15</sup> Dindi mbiraha wali agali bayale urunibi bu karu ti turu ho ka.✧  
 Wali agali Ngode Datagaliwabe ibuni tinaga Anduane Homogo ka lalu haga karu  
 tibi turuore ho kagoni.

## 145

*Anduane Homogonaga mini mo yaraga halu iba gana lenego ogo*

<sup>1</sup> Inaga Ngode Datagaliwabebi inaga kinibi ī kegonigo  
 ina wali agali bibahendehondo ī daliga gibiore ka lalu lamulebero.  
 Ina ihondo kaj lalu laaboore holebero.

<sup>2</sup> Horo bibahendengi ina ihondo turu halu kaj laabo halu holebero.  
 Ina inaga mini mo yadagadaga haabo haluore holebero.

<sup>3</sup> Anduane Homogo ibu mini lene daliga gibiore kago  
 bibahendemeibunaga mini mo yaraga holene nga.  
 Ibu daliga gibiore haruagoni  
 iname ogobiore ka lowa manda biai habe nahe kama.  
 Inanaga manda bulenego emene ko tubagi kamagoni.

<sup>4</sup> Inaore mbirale bigi biriruni wali agali ayu karume agua bigi biya lalu inaga mini mo  
 yaraga halu ka.  
 Wali agali dabane mani hararu tiguabi nde

✧ 144:15: Iba 33.12



- tinaga waneigini lamiragola uruni tiguabi nde  
 ínaga mini mo yaraga halu dege holebira.  
 Tigua ínaga biabe hongoheore gibi bigi biriruni agua bigi biya lalu  
 bi te lalili bima puabo holebira.
- <sup>5</sup> Wali agalime ínaga hongo baya gibi holenenaga lalubi  
 í kini gibi kego lalubi bite laabo holebira.  
 Ína biabe hongohe gibiorebi agalime nabibeheru bigi birigonaga  
 ina miniha mitangidangi bialu haabo holebero.
- <sup>6</sup> Ínaga hongo gibioreme biabe bigi birigonaga wali agali tigua bite laga bulebira.  
 Inabi nde í daligaore gibi kagoni lalu maru karu lamulebero.
- <sup>7</sup> Tigua ínaga mana baya gibiore biaga kegonaga maru lamialubi  
 ínaga dara holene ngegonaga gara lalubi iba ganaru lalu holebira.
- <sup>8</sup> Anduane Homogo ibugua ina gubalini timbuniore hagabi dara howa biamogo biagabi  
 ka.  
 Ibu keba abale tungulope nahaga howa  
 ibugua ibunaga gubalini haho wiaabo holeneme ina yaniho wiaabo helowa haga  
 kagoni.✧
- <sup>9</sup> Ibugua wali agali bibahendehondo mana bayale ogobi degedege bialu mbirago bume  
 hembome nalagaore kagoni.  
 Mbirale tara tara ibunime wabiniru bibahendeore dara howa ibuni handayaho haga  
 kagoni.
- <sup>10</sup> Anduane Homogo-o mbirale mbirale ema bialu piaga íni wabini karu  
 bibahendeoreme ínínaga mini mo yaraga haiore holebira.  
 Ínaga wali agali bibahendeoreme ínihondo turu halu kái lalu lai holebira.
- <sup>11</sup> Ína dindi bibahende de handame howa baya buruguleore haru kegonaga tigua maru  
 hale helo lamialu  
 ínaga hongo holene gibiore ngegonagabi lalu lamulebira.
- <sup>12</sup> Wali agali karu bibahendeme Anduane Homogo ínaga biabe hongohe gibi bigi biriruni  
 manda biai helo ani lamulebira.  
 Í kini baya buruguleore hongohe howa  
 ínaga mini daliga gibiore ngegoni manda biai helobi ani loyogo lalu holebira.
- <sup>13</sup> Ínaga handame holene wiaaboore howa  
 wali agali bibahende haru haho wiaaboboore haga kini holebere.
- Anduane Homogo ibugua mbirale mbira bulebero laga bialu lo wigi binigo  
 mbira pugua nabi lo beregedabi nabi  
 ibu mini bilinahe howa bulebero lenedagua biaiore haga kagoni.  
 Ibugua ina dara gibi haga howa mbirale bigi biraru ina biamogo bulenaga dege bigi  
 biaga kagoni.
- <sup>14</sup> Wali agali genda yu howa mini burugulo karu bibahende biamogo bialu  
 wali agali yangoneme hangedope haragola dindiha haga karubi  
 ibunime ti mo yaragaho helolebira.
- <sup>15</sup> Mbirale dindini emabu bedaru damene bibahendeme ínaga gi hangu hondole  
 hanaho beda.  
 Ti tomo noa harangi ínaga ti karulape nelo miaga kegoni.
- <sup>16</sup> Ínaga ti bibahende tomo karulapeore nelo mialu  
 ti mbirale maru buru pada alebi mulene ngadagua miaga kegoni.

---

✧ 145:8: Dag 14.18, Iba 103.8

- 17 Anduane Homogo ibu mini tigabiore howa ibugua mbirale bigi biraru damene tigabi bialu  
ina daraore howa biamogo bigi biaga kagoni.
- 18 Wali agalime ti miniha tigabi howa heneneorenaga Anduane Homogo olalu karu  
ibuni ti kagoria kawareore ibu haga kagoni.
- 19 Wali agali Anduane Homogohondo giho haga karu  
ti burupale ngaru ibunime tiga handaga haga.  
Ti genda yu howa ibuhondo bi laragola ibunime hale halu gi miaga ka.
- 20 Wali agali Anduane Homogo ibuore gubalini haga karu  
ibunime ti baya hanguore handayaho halu mamage haga ka.  
Wali agali mana ko biaga karu ibugua ti bibahende bo mburi lai holebira.
- 21 Ina Anduane Homogonaga mini mo yaraga haabo holebero.  
Ibugua mbirale ema bialu piaga ibuni wabini karu bibahendeoreme  
ibunaga mini baya buruguleore kago mo yaraga haaboore holene nga.

## 146

### *Anduane Homogo ibu Pele Ngiaga ka lalu mini yaraga halu bi lenego ogo*

- 1 Anduane Homogonaga mini yaraga hama.  
Ini bu miniha howa ibunaga mini yaraga harogoni.
- 2 I dindini kogoni howa ibunaga mini yaraga haabo holebero.  
Ina inaga Ngode Datagaliwabe mini yaraga halu  
iba gana laabo halu kone dege ini homalu waholebero.
- 3 Dindini agali haguane karuha mini hanaho nahabe.  
Agali dindini hene bu karu  
tigua í pele ngialu haru dai nabibehe kagoni.
- 4 Agali uruni ti homarangi lone dindi dege hodai bulebira.  
Ti homarangi mbirale ogoale bule lalu lo wiyaruni budai nabulebiraore.
- 5 Wali agali ti Yagabanaga Ngode Datagaliwabe kagome ti biamogo bilonaga ibuhondo  
mini mbiraore wu karume  
ti turu ho haga ka.  
Uruni tigua Anduane Homogo tinaga Ngode Datagaliwabehondo mini dunubia ho  
kagome  
ti turuore ho kagoni.
- 6 Ngode Datagaliwabe ogoni ibugua hari daligabi dindibi iba solowarabi wabialu  
uruniha karubi ngarubi wabiai henego<sup>☆</sup>  
ibugua mbirale ibuni buleore lalu bi lowiniru bibahende biaiore haga ka.
- 7 Wali agali maru ti waitigi andaneha bope ho karu  
Anduane Homogo ibunime ti biamogo biaga ka.  
Maru tomo nane garibilo karuhondo ibugua ti tomo nelo miaga.  
Anduane Homogo ibugua maru garabayaha karu ti golope haga biaga.
- 8 Ibugua wali agali de kohe karu de hendelo mo ngala halu  
wali agali gendame bo dambi karu genda mo wahai halu mo hongo haga ka.  
Anduane Homogohanda ibunaga wali agali bayale tigabi karu gubalini ho haga ka.
- 9 Wali agali dindi taraha howa ina dindini ibu hene karubi ibugua handayaho haga ka.  
Wali dalo bedarubi waneigini aiyá abala homene karubi ibugua ti baya hanguore  
handayaho haga ka.

☆ 146:6: Iba 115.15, 117.2, Ab 4.24, 14.15

Ibugua ani biagagoyu agali ko biaga karume mana ko bule manda bialu karu mo libilabala halu mo luluya haga ka.

- <sup>10</sup> Anduane Homogo ibu kini haluhe haabo kagoni.  
Saiono wali agaliru-o tɪnaga Ngode Datagaliwabe ibu kiniore haabobo bu ka.  
Iname Anduane Homogonaga mini yaraga hamiya.

## 147

*Anduane Homogo Hongo Haiheore kagonaga mini yaraga halu iba gana lenego ogo*

- <sup>1</sup> Anduane Homogonaga mini yaraga hamiya.  
Iname inanaga Ngode Datagaliwabe mini yaraga halu  
ibuhondo iba ganaru lolene bayaleore ogoni.  
Inameibunaga mini yaraga holene bayale tigabiore nga.
- <sup>2</sup> Anduane Homogohanda Yarusaleme lone mo heya ho helowa  
ibunaga wali agali dindi taraha garabaya pu haga bini hearu haru dai biragoni.
- <sup>3</sup> Wali agali tini bu miniha genda timbuni yu haga bidaru<sup>☆</sup>  
ibugua mo karulape helaga ka.  
Ibugua tinaga dere bidaru dabi helo kabu bia haga kagoni.
- <sup>4</sup> Ibugua yakundi hari daligani bu karuni bibahende daga lai howa<sup>☆</sup>  
ti mbira mbiranaga mini lai haga ka.
- <sup>5</sup> Inanaga Anduane Homogo ibu mini leneore howa hongo haiheore ka.  
Ibunaga mini gigabi ngago iname manda biai habe nahe kama.
- <sup>6</sup> Ibugua wali agali tini mo dindiha haga karu mo yaraga hagago  
nde wali agali ko biaga karu ti dindiha hingedape haga ka.
- <sup>7</sup> Anduane Homogonaga mini yaraga halu ibuhondo iba ganaru lolene nga.  
Inanaga Ngode Datagaliwabehondo ngida ale balu  
bi bayale mo bila howa bayale bolene nga.
- <sup>8</sup> Ibugua hari daligaha beraliba helame haga.  
Iba dalu dindini ibilaragola  
hari bare bare ngaruha datani bayale anda helaga biaga ka.
- <sup>9</sup> Ibugua ema bialu piaga karubi bedarubi tomo nelo mialu  
ega igini bedarume tomo noa halu bi laragola hale howa  
ibugua ti tomo nelo mia dege biaga ka.
- <sup>10</sup> Anduane Homogohanda nogo hosinaga hongobi<sup>☆</sup>  
ami agalinaga hongobi hondowa turu haga ndo ka.
- <sup>11</sup> Wali agali ibu mitangi bialu mo dunini howa  
ibunaga gubalini holene wiaabo ka manda bialu  
ibuhondo mini mbiraore wiaga karu ti hondowa ibugua turuho haga ka.
- <sup>12</sup> Yarusaleme wali agaliru-o Anduane Homogonaga mini yaraga hadaba.  
Saiono wali agaliru-o tɪnaga Ngode Datagaliwabenaga mini yaraga holene nga.
- <sup>13</sup> Ibugua Yarusalemenaga pabe panga kago mo hongo howa  
wali agali bu karu bayaleore biamogo bialu haga ka.
- <sup>14</sup> Ibugua tɪnaga dindi tubari handayaho halu  
widi bayaleru tɪ mabuha anda haga biledagola  
tɪgua widi lini dewaore nalu tombeho haga kamigoni.

<sup>☆</sup> 147:3: Iba 51.17, Ais 57.15, 61.1, Lg 4.18    <sup>☆</sup> 147:4: Pig 15.5, Ais 40.26    <sup>☆</sup> 147:10: Iba 33.16-18, Hos 1.7

- 15 Ibugua bi mbira dindihondo laragola  
bi ogoni hale halu abaleore biai haga.
- 16 Ibugua dindiguni timbunirume dindini dungume helalu  
puyabume abalu pulo yalu piagadagua pibiya pulo yu purogo lelaga ka.
- 17 Iba angeni iba mu wiame kadagua  
ibugua dalu ibilaragola dindiguni wiame helaga biaga.  
Ibugua dindini dagare ogonibi ibilaragola  
mbiralime dagare bidago bilowa dagare nahe tingi halu donge ho habe naheore ka.
- 18 Mani howa ibugua bi laragola dindiguni ngaru mo iba bu hinilaga.  
Ibugua puyabu ibilaragome iba bedago mo ema bia halu pelaga ka.
- 19 Ibugua ibunaga bi lowiniru Yagabahondo lamini.  
Ibunaga bi mana Isaraele wali agaliruhondo mini.
- 20 Ogonidagua ibugua hameigini tara tara dindi bibahendehe karuhondo nalami.  
Tigua ibunaga bi mana lo ngago manda nabi ka.

Iname Anduane Homogonaga mini yaraga hamiya.

## 148

*Hari daligahabi dindihabi karu bibahendeoreme Anduane Homogonaga mini mo yaraga hai holene ngago ogo*

- 1 Anduane Homogonaga mini mo yaraga hadaba-o.  
Tí hari daligaha kamiru bibahendeme Anduane Homogonaga miniore mo yaraga hadaba.
- 2 Ibunaga dahuliyali kamiru tí bibahendeme ibunaga miniore mo yaraga hadaba.  
Dahuliya andaganaga ami kamiru bibahendeme ibunaga mini mo yaraga hai hadaba.
- 3 Ni egela li kabigo libugua ibunaga mini mo yaraga hadaba.  
Yakundi harini li ngiringaralo bu kamiru tíguabi ibunaga mini mo yaraga hadaba.
- 4 Dahuliya andaga da habaneoreha kamiru tínime ibunaga mini mo yaraga hadaba.  
Hari daliga yarali howa iba uyura bedamirumebi ibunaga mini mo yaraga hadaba.
- 5 Mbirale uruni bibahendeore Anduane Homogo ibunaga bime tagira íbu hadaba laga biyagola  
tagira íbu haga binigo ka.  
Ibugua ani binigo uruni bibahendeoreme ibunaga mini mo yaraga hai holene nga.
- 6 Ibunaga bime ti hangu hangu abogo ogoria ha laga biyadagua haabo henego ka.✧  
Ti mbiragome ibunaga bi mo wahabe nahe kagoni.
- 7 Dindini kamirumebi iba solowara guru kuyama unura bedarumebi  
wena gibiore wialuwioire unura bedamirumebi
- 8 hari dabamebi dalu dindigunimebi pibiyamebi hari beralibamebi  
puyabu hongoheore Anduane Homogonaga bi larago hale haga kamirumebi  
tí bibahendeoreme ibunaga mini mo yaraga haiore hadaba.
- 9 Dindi hari timbuni wedamirumebi dindi hari emene wedamirumebi  
ira lini nagane ale daga kamirumebi irabu ira kamirumebi
- 10 nogo hinini dambole kamirumebi nogo gabua tagira hope hene kamirumebi  
mbirale tombeme piaga ngamirumebi ega bibahende bedamirumebi

✧ 148:6: Yob 38.33, Yar 33.20, 33.25

ti bibahendeoreme Anduane Homogonaga mini mo yaraga haiore hadaba.

<sup>11</sup> Kini kamirumebi wali agali bibahende bu kamirumebi gabumane kamirumebi agali haguane kamirumebi

<sup>12</sup> igiri daliahe bu kamirumebi wandari daliahe bedamirumebi wali agali wahe kamirumebi wandari igiri emene kamirumebi ti bibahendeoreme Anduane Homogonaga mini mo yaraga haiore hadaba.

<sup>13</sup> Ti bibahendeme Anduane Homogonaga mini mo yaraga haiore holene nga.

Wali agali marunaga mini ngagobi ndo ibunaga mini daligaore ngagoni. Ibunaga mini baya burugule daliga gibiore ibu ale mende naheorego dahuliya andaga angua hai halu dindi bibahendebi angua hai kago ibu hangunaga mini mo yaraga haiore holene nga.

<sup>14</sup> Anduane Homogo ibugua ibunaga Isaraele hameigini gubaliniore halu yabu howa mo hongo hayagola tigua ibunaga mini mo yaraga haga kagoni.

Anduane Homogonaga miniore mo yaraga hai hadaba-o.

## 149

### *Anduane Homogonaga mini yaraga halu iba gana lenego ogo*

<sup>1</sup> Anduane Homogonaga mini yaraga hama.

Ibuhondo iba gana gahengeru lamiya.

Wali agali ibuhondo mini bilinahe haga kamiru

tigua ibu mitangi bialu lotu lole ngoai ho kamigoria ibunaga mini yaraga hadaba.

<sup>2</sup> Isaraele wali agaliru-o ibugua tinaga Wabiaga ka mitangi bialu turuho hadaba.

Saiono wali agaliru-o tinaga kini ibu kagonaga turu timbuni ho hadaba.

<sup>3</sup> Tigua mali lialu ibunaga mini yaraga hadaba.

Tabageru balubi ngida ale balubi ibunaga mini yaraga hadaba.

<sup>4</sup> Anduane Homogohanda ibunaga wali agaliruhondo gubalini ho kagoni.

Ibugua wali agali tini mo dindiha haga karunaga mini yaraga halu

wai bialu wayali helo biamogo biaga ka.

<sup>5</sup> Ngode Datagaliwabenaga wali agali ti wayali harimigonaga turuho holene nga.✧

Mbiraga tininaga dagiani biruwa tigua turu halu iba ganaru laabo holene nga.

<sup>6</sup> Tigua Ngode Datagaliwabenaga mini yaraga halu bi dalimu lalu

wai biagane ayu tibu ne gadeleru tini gime yu howa ga ladagadaga bialu turu ho holene nga.

<sup>7</sup> Tigua ayu tibu yu howa hameigini tara tara dindi bibahendeha karu baba wai bialu

wali agali Anduane Homogo manda nabi karu ti ko biyarunaga pani mialu

bo wahai holene nga.

<sup>8</sup> Waitiginaga kinibi agali haguane bu karubi

pu seni aeaneme wabini ngagome tinaga gi geru minu dabaho helolene nga.

<sup>9</sup> Ngode Datagaliwabenanda hameigini tara tara dindi bibahendeha bu karu

pani mulene nga layadagua tigua milimu.

Ngode Datagaliwabenaga wali agali kagome wayali ogonibi holebira.

Anduane Homogonaga mini yaraga hamiya.

✧ 149:5: Yob 35.10



## 150

### *Anduane Homogonaga mini mo yaragaore holene ngago ogo*

- <sup>1</sup> Anduane Homogonaga miniore mo yaraga hai hamija.  
Ngode Datagaliwabe ibuibunaga andaha kago  
ibu mini mo yaraga hamija.  
Dahuliya andagani ibu hongo gibiore ho kago  
ibunaga miniore mo yaraga hamija.
- <sup>2</sup> Ibugua biabe hongohe gibiore bigi biyarunaga  
iname ibunaga mini mo yaragaore hamija.  
Dunini gibi daligaorego ibuni hangu kago manda bialu  
ibu hangunaga mini mo yaraga hamija.
- <sup>3</sup> Mbelo biguli pu lalu  
ibunaga mini mo yaraga hamija.  
Ngida aleru balu mbirale kelengele laga irabitele aleru balu  
ibunaga mini mo yaraga hamija.
- <sup>4</sup> Tabageru balu gi geru ema bialu mali lialu  
Anduane Homogonaga miniore mo yaraga hamija.  
Ngida aleru balu pilipe aleru lalu howa  
ibunaga mini mo yaraga hamija.
- <sup>5</sup> Mbirale ngilingele lagane haeagobi ngaru hongo howa tilitola lalu balu howa  
Anduane Homogonaga mini mo yaraga hamija.
- <sup>6</sup> Mbirale dindini emabu bu kamiru damenego bibahendeoreme  
Anduane Homogonaga mini mo yaraga hai halimu.

Anduane Homogonaga mini mo yaraga haaboore hamija.

## Mini Bayale Gigabi

### Mbuga ogoha gilibu ngarunaga nemandi ogo

Isaraele wali agalime tinaga holene mo tiga bilo bi mana tumagi dendebe dewa lowialu mo mogo buwa mbuga ogoniha gilibu wini. Bi duniniore mbira gilibu ngago ogo

Mbirale bayuwa manda bule hame lariyagua ala Anduane Homogo ibu gibiore ka manda buwa ibu andaneha habe. (1.7)

Bi mbira piganegome lalu bayale holene mana ogoni wali agali waneiginirunaga mini bayale wulenebi manda bayale bulenebi lowini. Bi ogoni bayuwa mamage halu bayale hangu dabalulene wulebira. Lawai hagarume Isaraele wandari igiri daliahe hearuhondo mana lawai henego lo nga. Iname horo bibahendengi Anduane Homogonaga deni howa bialu holene mana lo nga. Isaraele wali agali lawai halu henerume wali agali mini gigabiwi karume biagabi mini nawi karume biagabi lawai halu henegonaga mana lo nga.

Mana maru lawai henego uru

Agalini onene waneiginiru heba holenebi wali agali maru heba holenebi biyinaya biabe bayale bulenebi mini haru holenebi mana lo nga. Bi maru ledagome inanenaga mini yaraga holene nawi lalu ina mo dindihaore halubi yagibano karu dara halu biamogo bulenebi wali agali maru nenege hinalu holenebi lowigi bida.

#### **Bulu бага буwa kuni gilibu ngago (1.1-9.18)**

Mini gigabi wulene iba gana ale lenego 10.1-29.27

Solomonohanda mini gigabiwi howa bi bayale tara tara lenego 30.1-33

Aguhanda bi bayale lenego 31.1-9

Lemuele aiyahanda bi bayale lenego 31.10-31

Agali oneme mana bayale bialu holenenaga iba gana ale lenego

*Bi lo ngarume wali agali bibahende ta nabiore biamogo biaga nga*

<sup>1</sup> Mbuga ogoha bi bayaore lowigi bidago ogoni Debidi igini Isaraele wali agalinaga Kini Solomonohanda laga binigo lo nga.\*

<sup>2</sup> Bi baya gibiore lowigi bidarunime ina mitangi bulene bayaleore ngialu ina mana bayale bulene biawai haga nga. Ani bialu tigua mbirale bibahende bi lo ngarunaga tene handarimiyagua bi uruninaga irane bayuwa manda buleberami. <sup>3</sup> Mbuga ogoha bi baya lo ngarume ti wali agali miniwi howa mbirale bigi bialu halimulonaga lo nga. Ani bialu mana bayalebi tigabibi bialu wali agali bibahendehondo mana tigabi mbiraore ogobi dege dege bilimulo biawai haga nga. <sup>4</sup> Ani bialu bi ogonime wali agali maru manda emenebi karu ti manda bayuwa bilo biamogo bulebira. Ani bialu wandari igiri daliahe karubi ti mana bayale bialu helo walia haga. <sup>5</sup> Mbuga ogoha bi lo ngarume wali agali mini dingi dangiale karunaga minibi mo gigabiaore halu wali agali sigulu bini karumebi mbirale manda bayuwa buwa mana bayale bigi bilo biawai haga.\*

<sup>6</sup> Mini giga bulene bi lo ngarunaga galone palia do karu bi yobage lowa lowigi bidago uruninaga galonego handa walia halu agali wahe miniwirume genda ngaria handaga bidago lamogo bibehe holebira.

*Wandari igiri daliahehondo bi ledago ogo*

<sup>7</sup> Mbirale bayuwa manda bule hame lariyagua ala Anduane Homogo ibu gibiore ka manda buwa ibu andaneha habe. Wali agali mbirale bayuwa manda nabiga mini nawi

\* 1:1: 1 Kin 4.32    \* 1:5: Min 9.9, 14.6, Aga 9.11

karume ti mini bayale gigabi holene hame nale howa mbirale lo manda bua nahaga ka.✠

<sup>8</sup> Inaga igini-o inaga aba aiyalame bi langiragoore bayuwa hale halu mo wanahe laradagua bibe. <sup>9</sup> Inaga mandani yari baya bidegomebi inaga mani gurubu gele baya ngegomebi inaga dengui mo baya hagadagua inaga aba aiyalame bi larago hale halu mana bayale beregome i mo baya holebira.

<sup>10</sup> Inaga igini-o mana ko biaga layagoli kagome i ko bibelo ndole biyagua tigua bi larago hale halu bima laradagua buleni nabibe.✠ <sup>11</sup> Tigua ihondo lalu, Wali agali mbira homelo bo wahamiya maibu nabulenebe, lolebira. Harigani yu bira do howa wali agaliyaguabi mbira ibirago tanabi bamiya. Bo waholene irane nawiniyaguabi bame agali boanaga halu mbira bo wahamiya maibu, lolebira. <sup>12</sup> Homame abaleore ibalu wali agali bo yalu humbirini andaga piagadagua mbirali dinini liahe ibirago abaleore porabu ede howa bo wahalu maliya maibu, lolebira. <sup>13</sup> Wali agali uruninaga mbirale tara tara bu yidaru gingila mialu yalu puwa ina andagani mo hombedo tolo tagiho ngelamiya. <sup>14</sup> Iname wali agalinaga pagepage bialu mima ibaga beremago bibahende mo yu ngoai howa inane talebu yu pugupugu beremagola pagepage bini degeme homogo hamiyago i maibu, lolebira.

<sup>15</sup> I igini-o pagebibi layagoli karume ihondo bi ogonidagua layagua tigua bi laragoni haleore holeni nahabe. Tigua bi larago hale nahe i wahalu pobe.✠ <sup>16</sup> Horo bibahendengi agali ko biaga uruni aleme ko tara tara bulenego hangu manda bialu ko bule hame timbuniore lo haga. Ti horo bibahendengi howa wali agali bo waholenego hangu manda bialu haga ka. <sup>17-18</sup> Ani biagago ayu agali uruni ti tini hai biragoni ale mo mulebira. Ti do wulenenaga gono tini wama ibaga biragoni holebira. Ega bedaru ti dehe miniwi beda. Agali mbirame ibu bole lowa danda edararia handayagua ega ibu biraabo nahe ibida polebira. Egame ani biagago ayu ai pagebibi layagoli hearuni ti ega ale ndoya. Ti mana ko bule hongo gibi howa bialu heagome ti do wialu homolenenaga gono tinime waga bialu heagoni. <sup>19</sup> Pagepage biagabi wali agali bo wahagabi agali ko anda andabi ogoni ale biagago lu naholebira. Pagepage biyadaruni ibuni homolenenaga kango tigi hene holebira.

*Wali agali mini gigabiwi holene hadowa hararu ti genda timbuniore hondolebirago ogo*

<sup>20</sup> Agalime hariganibi magedinibi howa olagadagua mini bayale gigabi wuleneme wali agalihondo olalu ka.✠ <sup>21</sup> Tano timbuni ngagoha wali agali ubanda tagi biaga harabani howabi wali agali dewa mo ngoaiho haga ngarunaga howabi mini bayale gigabi wuleneme olowa agua lalu ka.

<sup>22</sup> Wali agali mini nawi karu aibe. Ti mini nawi ogonibi dege haabo hole hame ledamibe. Ti wali agali lulu ale kamigoni. Ti manda bayale bulenego hame nale howa manda bayale tigabi bulenego mege bialu kamigoni. Mana ko o bialu kamigoni angi yu wahole kamibe.✠ <sup>23</sup> Ti mana ko yu kamigoni wahalimulo ina ti talialu bi hongo howa loleberogo hale halimu. Ina tihondo mbirale agua bidaba lalu langialu inaga manda bulene bayaleru ti talebu nguleberogo tigua bayuwa hale halimu. <sup>24</sup> Ina ti i kogoria ibidaba lalu olalu haabo harugoyu ti hale hoa nahe harimi. Ti i kogoria ibulenego manga harimi. <sup>25</sup> Ina tihondo agua bidaba lalu langirugo ti hale howa nahe tingi halu ina ti mo tiga buliya hame naleore harimigoni.✠ <sup>26</sup> Ani birimidago karulapego ina nde tigua birimidagua dege bulebero. Genda bulene tara tara ti kamigoria anda ibu ngagola genda timbuni yu kamingi ina ti hondo oba hagua. Ti genda timbuni yu kamingi ina ti lo guralu mege biagua. <sup>27</sup> Genda bulenego gibi hiriribiore dalu puyabula haru ibiradagua

✠ 1:7: Yob 28.28, Iba 111.10, Min 9.10, 15.33 ✠ 1:10: Man 13.8, Iba 50.18, Min 16.29 ✠ 1:15: Iba 1.1, 119.101, Min 4.14 ✠ 1:20: Min 8.1-3 ✠ 1:22: Iba 1.1, Min 1.4, 1.32, 9.4, 22.3 ✠ 1:25: Iba 107.11, Min 15.10, Lg 7.30

ibuwa tí bu dambi haragola tandaga nalu gendaore yu kamingi ina tí hondo obaore halu mege biagua. <sup>28</sup> Gendaore yu howa tigua ina biamogo bule íbu lalu mini gigabi wulene ololeberemigoyu ina hale halu tí biamogo nabuleorebero. Tigua í hai bialu taya bume holeberemigoyu í handa walia naholeberemi. <sup>29</sup> Tí mini bayale gigabi wulene hame naleore halu Anduane Homogo andaneha howa giho halu ibugua laradagua hale halu bulenego mangaore haabo ho harimigoni. <sup>30</sup> Mbirale agua bidaba lalu ina tíhondo bi bayale langigi biruru tí hale holene hame naleore halu ina tí bayale halimulo mo tiga birugola tí hame nale í erembira ngirimigoni. <sup>31</sup> Ani birimigonigo ai tíni mana ko bialu harimigonaga emena ko nolene winigo tíni noleberemi. <sup>32</sup> Wali agali mini nawi odahe karume í mini bayale gigabi wulene kogo hame nalagaya. Hame nale howa tigua í erembira ngiaganego mana ani biragome tini bo home lagane. Wali agali marume ti mbirale bibahende manda biaihe kama lo manda biaganego uruni tí lulu ale ka. Tininaga mitangi ogonibi bu kagome tini balu home lolebira. <sup>33</sup> Ani bulebiragoyu ai wali agali ina bi larogo baya hanguore hale halu bialu karu ti bayaleore holebira. Uruni tigua mbirale ko ngarubi gendabi ngarubi mbira ti kagoria naibu wulebira manda buwa ti genda mbira nayi gi nahe hada payabu baya holebira. <sup>\*</sup>

## 2

### *Mini tigabiwi karu ti holene bayale yu holebirago ogo*

<sup>1</sup> Í igini-o ina mana lawai haga berogo embeda nahe ínaga bu miniha baya hangu mo yai habe. <sup>2</sup> Mini bayale gigabi wulene bi larago bibahende hale halu mo yai hole manda bibe. <sup>3</sup> Ína mini bayale gigabiwi holenebi manda bulenebi tai bibe. <sup>4</sup> Muni silibarubi mbirale wia do hene ngaru deborebo buwa taya birilidagua mini gigabi wulene galoneorego baya hangu taya bibe. <sup>5</sup> Anidagua biriyagua Anduane Homogo ibu gibiore ka manda bu holeneago agua holene wiarua lowa bayuwaore manda bulebere. <sup>6</sup> Mini gigabi wulene Anduane Homogo ibugua ngiaga. Mbirale tara tara manda bu kamarubi galone ogo aleda lalu miniha wálo holenebi uruni Anduane Homogo ibugua ngiaga. Anduane Homogo ibugua mo manda bia haga ka. <sup>7</sup> Wali agali mini tigabiwi ko mbira miniha do nahe karu Anduane Homogo ibunime biamogo bialu pabe tigila ibunime hatagiho haga ka. <sup>8</sup> Wali agali maru karuhondo mana tigabi bulene ngadaguaore biaga karuhondo Anduane Homogo ibunime ti mamage haga ka. Ani bialu Anduane Homogo ibunaga heneneore karu ibunaga erembiraha mo ngelowa ibuni mamage howa handa tagiho haga ka. <sup>\*</sup>

<sup>9</sup> Ani biaga kago áyu ina bi larogo hale halu larodagua biriyagua mana tigabi henene hanunigoria bulene wigi bidago manda bulebere. Agua buabe tobatoba ndo miniha ogo ale bulene wiyada lo manda bulebere. <sup>10</sup> Í mini bayale gigabiwi howa ínaga manda bulene ngegome í mo dungula holebira. <sup>11</sup> Mitangi bayale buleneme í pabe bianda halu manda bayale buleneme í mamage holebira. <sup>12</sup> Ani biragola ina agali mana ko biaga karubi bi ko tiga nabi laga karubi talima napolebere. <sup>13</sup> Agali uruni tigua hariga tigabi pedago yu wahalu hariga arumahe ngagoria pialu ka. <sup>14</sup> Ti mana ko tara tara habane nabulene ngaru bule turu haga ka. <sup>15</sup> Agali uruni tigua birago mana tigabi ndo mo hondo howa biaga ka.

<sup>16</sup> Anigo agali mendeali oneme íla kayu yaba lole í kegoha ladebodebo bima ibiragola mini gigabi wulene í pabe bu yaanda kagola wali ogoninaga bi larago hale halu bibe nahe holebere. <sup>17</sup> Wali ogonibime ibu wandarini agali pene biago wahene biraga. Libu wahalu nambaliya lalu Ngode Datagaliwabenaga deni habo nalolene bi lo wiyago mitangi nabi biraga. <sup>18</sup> Anigo ina wali ogonibi bedago andaga pialu hariyagua í agali

<sup>\*</sup> **1:28:** Iba 18.41, Ais 1.15, Mai 3.4, Seg 7.13    <sup>\*</sup> **1:33:** Iba 25.12-13, Min 3.24-26    <sup>\*</sup> **2:6:** 1 Kin 3.9, 3.12, Ya 1.5

<sup>\*</sup> **2:8:** 1 Sml 2.9, Iba 66.9

homenerunaga harigani pialu haradagua bulebere. <sup>19</sup> Agali wali ogoni heba nenege hagaru ti dai nabiaga. Ti bayale holenenaga harigani pobe nahe holebira. <sup>20</sup> Anigo ina agali bayale biaga karunaga harigani pialu howa agali mini tigabiwi karume biradagua bialu habe. <sup>21</sup> Wali agali mini tigabi karubi mana tigatiga biaga karubi ti dindi ogoria bayale haabo holebira.✧ <sup>22</sup> Anigo Ngode Datagaliwabeanda wali agali ibu talima naibaga karubi mana ko biaga karubi uruni ti agalime ibuninaga mabuha datani anda harago dugu wahagadagua dugu waholebira.

### 3

#### *Bi ogo wandari igiri daliatheruhondo laga bida*

<sup>1</sup> Inaga wanebi iginibi ina ihondo bi langigi buleberogo bi uruni embedaore nahabe. Embeda nahe horo bibahendengi ina bibe larugoni mitangi biaabo halu habe.✧ <sup>2</sup> Ani bialu ina bi larodaguaore bialu hariyagua dindini mali luore haabo halu ina mbirale bigi bereru baya hangu haga bulebira.✧ <sup>3</sup> Wali agali maru gubalini holenegobi mini bilinahe howa nenegeho haabo holenegobi hado waholeni kongi henedagola haabo habe. Mana bayale bulene uruni hado wanahe mani magagua wiradagua wu haabo habe. Inaga gubalinini gilibu ngelowa bialu habe. <sup>4</sup> Aniore bialu hariyagua dindini wali agali karumebi ihondo turu halu Ngode Datagaliwabe ibuguabi ihondo turuha bigi biragola ina mbirale bigi bereru bayale haga bulebira.✧

<sup>5</sup> Ina inaga Anduane Homogohondo mini mbiraore hongo howa wu habe. Ini hangu miniwi karulape kogo manda nabibe.✧ <sup>6</sup> Mbirale bibahende bigi bereru bialu howa Anduane Homogo ala mitangi haga bibe. Ani biriyagua i polene hariga tigabigo ibugua walia haga bulebira.✧ <sup>7</sup> Inime ini mini gigabiwi kobe toba holeni. Ani mitangi nabi Anduane Homogonaga andaneha howa ibugua bia laradagua hale halu bialu mana ko bulene mangaore gibi ho habe.✧ <sup>8</sup> Ani bialu hariyagua mana ogoni beregonime ini biamogoore bialu tingini mo ko henego marasinime mo dabi halu mo baya hagamadagua ini mo bayaore holebira. <sup>9</sup> Ina Anduane Homogonaga mini mo yaraga halu i mabuni tomo hangareru damene bibahendeorenaga hini degedegeru loma bialu ibu bu mibe. <sup>10</sup> Anidagua biriyagua nde Anduane Homogohanda inaga mabuni tomo hengederuni bibahende wu dame bilo mo anda helolebira. I mabuni tomo ani bu payabu ngelaragola tomo biaru namibe nahe maru wiatogo bialu helolebira. Waini iba pingidowa odo berelaga be timbuni a kegonibi waini iba biru tolotagi halu odo pebe bulebira.

<sup>11</sup> I wanebi iginibi Anduane Homogohanda i mo tiga bialu mana layagua handabe manga halu keraho holeni o biagoni i mini wibelonaga biya manda bibe.✧✧ <sup>12</sup> Irane abame ibu iginu gubalini howa dege mana liahe mbira biragola mana lagadagua dege Anduane Homogohanda wali agali ibuni gubalini ho karu mini wilo mana laga kago i keba nahabe.✧ <sup>13</sup> Wali agali mbirale bayuwa manda buwa mini gigabi karu ti turuho holene nga. <sup>14</sup> Ani bulene ngago irane mini gigabi holenege ibu mbirale taratara muni daligame miagane ngolobi silibabi ale ndo uruni bolangua howa daligaore ngagoni. <sup>15</sup> Ani bialu dindini mbirale taratara bayaore i hame lagane ale maru ngaru alebi ndo mini gigabi ibu daligaore ngagoni. <sup>16</sup> Mini gigabi holenege i biamogo biragola i dindini luore haabo holebere. Ani bialu mini gigabi holenege i mini lene holenebi homogo holenebi ngulebira. <sup>17</sup> Mini giga bulenege i dindini holenege turu howa dungulo bayuwaore hama pobelo haru hama pialu i haru hairi holebira. <sup>18</sup> Mini giga bulenege holene miaga ira ale nga. Ani ngago wali agali mini gigabi holenege yu tigabu karu ti miniwi howa holene bayaore yu howa turuho ka.

✧ **2:21:** Iba 37.29 ✧ **3:1:** Har 20.6, Man 30.16, Iba 119.61 ✧ **3:2:** Iba 91.16, 119.165, Min 11.10, 11.27 ✧ **3:4:** Lg 2.52 ✧ **3:5:** Iba 37.3-5, Min 23.4, Yar 9.23 ✧ **3:6:** 1 Bit 28.9, Min 16.3, Ais 45.13 ✧ **3:7:** Lm 12.16 ✧ **3:11:** Yob 5.17 ✧ **3:11:** Hi 12.5-6 ✧ **3:12:** Man 8.5, Min 13.24, Mo 3.19



<sup>19</sup> Anduane Homogohanda ibunaga mini gigabi wiagome dindi wabini. Ibunaga manda bulene wiagome haribi wabu helene. <sup>20</sup> Ani bialu ibunaga mini gigabi wiagome dindi ogoria iba mo dugua halu mo pelaga ka. Hari beralibaha howa iba mo mogo bialu dalubi mo ibila haga ka.

<sup>21</sup> I wanebi iginibi ínaga manda bayalebi mini gigabi wulenebi baya hanguore yu waholeni hondowa yu habe. <sup>22</sup> Manda bayale mini gigabi wulanela libugua ínaga holene bayale mo ngialu í yári baya taraore bu haradagua bu holebere. <sup>23</sup> Ani bu howa í poleberegoha mbiraleme ínaga ge bobidi lolene mbira nawi hariga bayaleni hangu polebere. <sup>24</sup> Andaga paleregohabi í gi holene mbira nawi embedaho howa u bayaleore pu paluebere. <sup>25-26</sup> Ínaga waitigirume í ho mabu bupe halu gono wiradagua bidagoha nadelo Anduane Homogohondo mini mbiraore hongo howa wu habe. Ani beregola ibugua í baya hangu mamage holebira. Ani biragola mo ko holene bu ngarume mbirali ko biaga karuha mo ko holene abaleore iba dalu puyaburu hongohe ibiraligobi ibiyaguabi í gi nahe holebere.

<sup>27</sup> Mbiralime mbirale mbira buru pale howa íhondo ngi lalu hale hayagua nawi nale howa mulene wiagua nde mulene nga. <sup>28</sup> Í dameneme íhondo mbirale hale harago ale áyu dege mulene wiagua ngelo howa ína ibuhondo yawi nguliya mo ibule áyu pu, nalabe. <sup>29</sup> Ínaga nenege maru íni baba handa ai nai padaru ti ínaga nenegeore kamagoni lo mitangi bu kago ína ti mo ko hole mbira bulene manda nabibe. <sup>30</sup> Mbiralime íhondo ko mbira nabi kayaguabi íla keba nahe kayaguabi bame o biagohondo lai nale holene nga. <sup>31</sup> Agali wai biaga karu tigua biagadagua ko bule lowa bu miniha kiau nale holene nga. Ani bialu tigua hariga piagadagua polene nawi. <sup>32</sup> Irane Anduane Homogo ibugua agali urunibi karuhondo turu nahaga ka. Anigo maru mana tigabi ngadagua bialu haga karuhondo Anduane Homogohanda turu haga ka. <sup>33</sup> Anduane Homogo ibugua ko biaga dameneru ti mo ko hai holebira. Maru mana bayale biaga karu ti ibunime handayaho halu mo bayale holebira. <sup>34</sup> Maru balagala haga karuhondo Anduane Homogohanda mana tinime bialu ka ale dege biadai bulebira. Anigo maru mana tigabi bialu tini mo dindiha haga karuhondo ibugua ti biamogo biaga ka. <sup>35</sup> Mini gigabiwi karu hondowa wali agalime ti mini lene ka lolebira. Anigo mini nawi karume tininaga mini nawi howa taga pani nolebira.✧

## 4

### *Tí mini gigabi holenebi manda bulenebi mo yu holene ngago ogo*

<sup>1</sup> I waneigini-o tí abahanda bi larago baya hangu hale halimu. Ani birimiyagua tí mini bayalewi holeberemi. <sup>2</sup> Bi ína tí langigi beroru bayaleorego tigua mo wa nahalimu. <sup>3</sup> I aiyahanda waneigini mende nahonowi í hangu hono winigome <sup>4</sup> igiri emeneni hewagola í abahanda í lawai halu bi ogodagua langini. Ína bi laga berogo ínaga bu habaneha mo yai howa bialu hariyagua í bayale holebere. <sup>5</sup> Í mini bayale gigabiwi holenebi manda bulenebi mo yu habe. Ína bi larogo hale howa nahe tingi nahe bayuwa mitangi bialu embeda nahabe. <sup>6</sup> Mini bayale gigabi wulene yu wa nahe hame laabo hariyagua ogonime í bayale haru holebira. <sup>7</sup> Ína mo yu holene duniniore mbira mini bayale gigabiwi holene ogoni nga. Ína mbirale ngaru dewa heneneore mo yu habehego duniniore mini gigabiwi holene ngago ogoni mo yu habe.✧ <sup>8</sup> Mini bayale gigabi wulene ogoni ína hameore lalu hongo howa yu ndibulo hariyagua ogonime ínaga mini yaraga halu mo timbu holebira. <sup>9</sup> Ani bialu ogoni ibu ínaga emboneni yári taraore bini mbau lalu kininaga manda ale holebira, lalu í abahanda íhondo bi ani lene.

### *Hariga kira ale ngago ogo*

✧ **3:24:** Yob 11.19, Iba 3.5, Min 6.22 ✧ **3:27:** Lm 13.7, Ga 6.10 ✧ **3:35:** Ya 4.6, 1 Pi 5.5 ✧ **4:7:** Md 13.44, Lg 10.42

<sup>10</sup> I igini-o ina bi larogo baya hangu hale hariyagua dindi ogoria lu haabo holebere. <sup>11</sup> I mini bayale gigabiwi habelobi hariga tigabini pobelobi ina lawai halu mo tiga birugoni. <sup>12</sup> Ina hariga tigabi ogoriani pialu hariyagua mbirale mbirame hapai habe nahe howa i gerai lalu piriyauguabi pilo ibira nahabehe holebere. <sup>13</sup> Ina bi bayale ogoni lawai harugo yu ndibulo habe. Mana uruni inaga holene ibuniorego manda buwa bayuwa de hondo habe. <sup>14</sup> Agali ko biaga karu hariga poradagua i nape tigua biradaguabi nabibe. <sup>15</sup> Ina hariga ogoriani nape wandialu habagi halu pobe. <sup>16</sup> Agali ko biaga karume ko mbira nabiyagua ti palia nabi yanga yanga bu haabo haga. Tigua agali maruhondo ko bialuore palue lowa haga ka. <sup>17</sup> Mana ko bulenebi wali agali maru bo waholenebi ogoni tinaga hina ibala ale bu hinaga.

<sup>18</sup> Agali mini tigabiwi karunaga hariga ni egerebagi howa dalu horombeni hongoho daraligobi nga. ✧ <sup>19</sup> Agali ko biaga karunaga hariga arumahe wiagagobi nga. Ti pilo ibira ho wialu tinaga ge bidi larago ogo aleme bidi laralo manda nabi piaga.

<sup>20</sup> I igini-o inaga hale dugua ho howa bi laga beroru baya hangu hale haga bibe. <sup>21</sup> Ina bi laga birugo embeda holigo bayuwa manda bu howa inaga bu habaneha mo peho habe. <sup>22</sup> Anigo ina inaga bi laga beroru baya hangu manda buwa bialu hariyagua bi urunime ihondo holene ngialu hongo habelo mo hongo holebira. <sup>23</sup> Ina horo bibahendengi inaga bu miniha mitangi bulene bayuwa mamage haabo habe. Ani bialu hariyagua iba uliha howa bayale tagira ibagadagua inaga miniha howa mitangi bayale tagira ibulebira. ✧ <sup>24</sup> Bi larego lalu howa tindule lalu mbira lolene nawi. Inaga ne harigaha howa ke halu bi ko maru heba lolene nakarulape. <sup>25</sup> Ina hariga pole manda birigoria tigatiga hondo yalu puabo habe. Handa ai nai nabi hendedegoria hondo yalu puabo habe. <sup>26</sup> Mbirale mbira bule howa ala miniha bayuwa manda manda bibe. Anidagua manda biriyagua mani ina mbirale berego bayale holebira. ✧ <sup>27</sup> Ko ngagoria hondo wandialu hariga tigatiga hendedegoria hondo yalu puabo habe. Hariga gi tigaha pedagoria pialu gi leha pedagoria ge ha amu nahe tigatiga puabo habe.

## 5

### *Wali kayu bulene nawi lenego ogo*

<sup>1</sup> I igini-o ina bi larogo bayuwa hale habe. Ina mini bayale gigabi wulenebi manda bulenebi ihondo ngule hame ledi. <sup>2</sup> Ogonigo ina mana tigabi bialu howa inaga bi larego bibahende agali manda bayalewime laradagua bulebere. <sup>3</sup> Wali mana ko biaga bedago ibugua i haru pole lowa dimagoli bi dewa laabo haragome inaga bu bamulebirago de hondo habe. <sup>4</sup> Ina ibunaga bi layago hale halu biriyagua mani handalu keria mbirale kaubi wiagagobibi ayu tibu alemebi i nogoba haragola tandaga biraligobi bulebira. <sup>5</sup> Wali ogonibigome i haru halu homene dinini pu hagaha haru tagira polebira. <sup>6</sup> Ibu haabo holenenaga hariga tigabi pedagoria napiaga beda. Ibu hariga ko pedagoha pialu haruda manda nabi howa pupebe dege biaga beda.

<sup>7</sup> I igini-o ai ina bi larogo bayuwa hale halu embeda nahabe. <sup>8</sup> Wali ogonibi bedagoria habagi howa kaundia habe. Ibu anda haneni ge bolanguabi heba nahabe. <sup>9</sup> I mini bayale wirigo yu waholenego dege de hondo habe. Wali biagonaga anda haneni bolangua hariyagua agali ko karume ihondo dara naholebiraore ndobe. I igiri daliahe keore bo waholebira. <sup>10</sup> Inaga mbirale biabe erekuibi bialu bayale mo wereru agali marume mo yalu pialu tinaga holebira. <sup>11</sup> Waragome i minaragola kuni hangu wulebere. Ani bialu homole wuwa dagiani paluwa dugu taraore bialu wulebere. <sup>12</sup> Ani wuwa ina ogodagua lolebere. I luluyu kogo ina mine halu agali marume i mo tiga nabilarugoni

irane aginagabe. <sup>13</sup> Inaga lawai hagame bi layago hale nahe tingi halu donge harugoni. <sup>14</sup> Ayu i wali agali bibahende deni ko hai kogoni, lalu lolebere.

<sup>15</sup> I agali mendealinaga iba uli ngagoha napobe. Agali mbirame iba uli ibuninaga ngagoha nalu hagadagua i one mbiraore ogonila mandagi halu ibu hangu gubalini holene nga. <sup>16</sup> Wali i one ndoru baba waneigini hono wima ibaga biriyagua mani waneigini urunime i biamogo nabulebira. Ani manda buwa i onela hangu inaga waneigini hono wulene nga. <sup>17</sup> Wali kayu dewa yalu waneigini hono wereruni wali biaru ti aria ho tago holebirago ani bulene nawi. <sup>18</sup> Ngode Datagaliwabehanda i oneore mo turu halu biamogo binigo beda. I one ibu inaga iba uli ale bedago ina ibuhondo turuhu holene nga. <sup>19</sup> Ibu bayaleore biruwa ibunaga mana bayaleore biragome i mo turu helo. Ibugua i gubalini hayago ogoninaga ina ibu mitangi bialu gubalini haabo habe. <sup>20</sup> I igini-o ina wali mendehondo gubalini holene irane aginagabe. Ina agali mende oneme bi laragome inaga mini daraga bilo kego aginagabe. <sup>21</sup> Anduane Homogo ibugua mbirale bibahende ina beregoni manda biai halu ina hariga poregohabi handai haga ka. <sup>22</sup> Agali mana ko biaga kagonaga mana ko biragome ibuni gono wiaga. Ibugua ko biyagome gono wiyagoha ibuni do wiaga. <sup>23</sup> Agali ogonibi ibuninaga mini haru nahaga howa ibugua lulume biagadagua biaabo haragome ibuni bo homelaga.

## 6

### *Mana maru ina bulene nawigo ogo*

<sup>1</sup> I igini-o agali mbirame mendealila dano ho heagola dano yadai nabiyagua ina nguliya lalu lo wiriyagua mana ogoni nakarulapeore. <sup>2</sup> Ina dano henego nguliya lalu lo wirigome ini garabaya ale bialu gono ini wia harigome do wulebere. <sup>3</sup> I igini-o anidagua buliya lalu lo wiriyagua i agali ogoni ibu andaneha taga pani nalu garabaya holene nakarulapego ibu karia gerai puwa i golopeha lalu lamibe. <sup>4</sup> Ina palia nabi halo birabi nabi abale pole manda bibe. <sup>5</sup> Ega nogorume gono ngago hondowa ti ibida piagadagua i abale ibida pole anidagua bulene wulebira.

### *Wali agali mangahe kamiru de hondo halimu, lenego ogo*

<sup>6</sup> Wali agali biabe nabiaga mangahe kamiru tihondo ina bi mbira langulene yido. Ti uburulime bialu heagoni de handalu o bialu heagonidagua bule manda bialu ti mo yalimu. <sup>7</sup> Uburuli biaruni tinaga de handameho hagabi haguanebi ogoale bidaba lowa haru hagabi mbira nahego handabe. <sup>8</sup> Ani nahegoyu tini hangu hangu mini wialu tomo bu payabu nganggi bu hombedo yalu pialu tomo gari porangi nalu hole lowa bu wia do haga kagoni. <sup>9</sup> Ani biaga kago ai wali agali mangahe kamiru ti tamuni u palu ngamigoni wene paliaho wiaabo dege hole hame ledamibe. Tinaga tamu yu wahalu anggi heyulenaga paliaho dege ngamibe. <sup>10</sup> U palu hameledogo emeneore lone palu wuliya laga kamigoni. Gi geru mo muli haga buwa u emeneore paluwa nde heyuliya laga kamigoni. <sup>11</sup> Anidagua birimiyagua tinaga mbirale ngamiruni abaleore ereba hai haragola ti mbirale mbira nawi yagibanoore holeberami. Pagealime anda bangu lalu mbirale ngaru bibahendeore hilu gangalibu yalu piai haragola mbirale mbira nawiore hagadagua ti ogonibi holeberami.

<sup>12</sup> Wali agali habane nabulene mana ko hangu biaga karume ke hangu hama ibaga biaga. <sup>13</sup> Tigua bi tigatiga latagi nahe howa tini mitangi bidago gimebi gemebi demebi mana tara tara biragome ti aria maru karu manda bilo walia haga. <sup>14</sup> Ani bialu howa tigua mana ko hangu biaabo hole mitangi bialu wali agali maru karu ko bilo mo bia haga ka. <sup>15</sup> Anidagua biragome ti kategoria mo ko holene abaleore ibu wialu mo ko haragola ti lone mo bayale holene henge nawulebira.

✧ 5:21: Min 4.26, Yar 16.17, Hos 7.2, Hi 4.13 ✧ 6:6: Yob 12.7 ✧ 6:10: Min 24.33-34 ✧ 6:11: Min 10.4, 13.4, 20.4

16-19 Anduane Homogo ibu handabe mangaore hagane mana koore karia ngago uruni wali agalime bilo hame nalagaorego mana uru.\*

Mbira: Mine halu wali agali maru karu nagalone ka mitangi biagabi

Mende: Ne harigaha howa ke hagabi

Tebone: Wali agali bame irane nawini bo wahagabi

Mane: Ko bule miniha magoyu hagabi

Dauni: Ko bule abale porabu hagabi

Waragane: Godi lalu ke howa lagabi

Kane: Hamene damenemabi hoba mu hagahaga bilo ndelope hagabi

Mana urunibi Anduane Homogo ibu hame nalagaore ka.

### *Wali agali mendeali one kayu yulene nawigo ogo*

20 Inaga igini-o í abahanda bia larago hale howa bialu í aiyahanda mana lawai harago mo embeda nahabe. 21 Libugua bi íhondo langirago inaga bu miniha mo hongowa talialu bialu haabo holene nga. Ani mo hongo howa biriyagua bi mana ogoni inaga mani magagua wirilidaguabi mandani yári birilidaguabi wu haabo holebere. 22 Í ibaga bialu poregotha bi ogonime inaga hariga mo walia halu í u paleregohabi ogonime í mamage holebira. Palialu heyaregola bi ogoni degeme í mini bayale wulene ngulebira. 23 Í aba aiyalanaga bi mana larago hariga mo walia haga wá holene hale ale holebira. Bi mana ogonime í mo tiga biragola ina mana bayale tigabi ngago bialu bayale dege haabo habelonaga bulebira. 24 Libunaga bi mana langiragome í wali ko biaga arume mo pila nahelonagabi mendeali ti one bedarume í dimagoli howa ndole biyagua hale nahabelonagabi langulebira. 25 Wali tingini bayale bedaru de hondowa dimagoli nahabe. Tinaga deme í handaya hayagua ti bedagoha poleni napobe. 26 Mbiralí ibu wali agali kayu biaga baba kayu biyagua ogoni ibunaga yolo timbuni ndo emene dege tomo halu mbira hangu nolene karulape yu waholebira. Anigo mbiralime agali mendeali one baba kayu biyagua ogoni ibunaga yolo timbuni dewaore yu waholebira. Ibuninaga holene yupe halu homoleneore wulebira.

27 Ira dedaore inaga galukunini ya para hariyagua irame inaga tingiliya bidego nadolebirabe. 28 Ira timbuni dedagoria daligani ibagabu kegola inaga ge habe nadolebirabe. 29 Ogonidagua dege mbiralí agali mendeali one bedago kayu biriyagua tigua í yo pialu pe nalolebira mo ko howa baore bulebira.

30 Mbiralí ibu tomo garibi laragola mendealinaga tomo wialu pedago mo nayagua nde tomo anduane biagome bi ko mbira nalolebirabe. 31 Anigo ibugua binida lalu handa walia hayagua anduane biagome manani haru poragola ibugua ibu wu heneda ale bibahendeore anduanedagohondo miai holebira. 32 Anigo mbiralime agali mendeali one bedago kayu biyagua nde mana ogoni tigabi ndogo lulu howaore bulebira. Agali mana ko ogoni ale biaga kago ibugua ibuni mo ko hagaore ka.\* 33 Ani biragola marume ibu mo ko howaore balu ibuhondo bi ko lamialu biragola taga timbuniore ho haabo holebira. 34 Agali mbiralí ibu one agali mendeme kayu biyagua agalinime keba timbuniore haga ngagoni. Ai ogonidagua dege wali agalinidago ibugua keba timbuni howa ibu one kayu biaga biago pani nelo mo ko howaore bolebira. Ibugua dara holene mbira nawulebiraore. 35 Nogo muniru dewaoreme ibu one tawa bo miyaguabi urunime ibunaga lembo holene timbuni ngago mo ereba naholebiraore.

## 7

1 I igini-o ina íhondo bi larogo hale halu embeda nahe inaga miniha bayuwaore mo yabe. 2 Ani bialu ina bi larogodagua bialu hariyagua í bayale holebere. Inaga bi larogoni baya hanguore yani ho habe. Ininaga de kira kegoni mo ko holani hondowa hogorale bu

\* 6:16-19: Iba 18.27, 120.2-3, Ais 1.15    ☆ 6:32: Min 7.7-13

hondo harilidaguaore hondo habe. <sup>3</sup> Ina bi laga beroru ínaga miniha mo yuwa haabo habe. Mani magagua wiradagua wu haabo habe. <sup>4</sup> Mini bayale gigabi wulenegobi manda bayale bulenebi í mbalini nguinioregohondobi í dameneoregohondobi mitangi tigabi birilidagua bibe. <sup>5</sup> Anidagua mitangi bu hariyagua wali ibu agali one bedagome íhondo page bibiya mbaibu lowa ndole biyagua mini bayale gigabi wulene ogonime ínaga pabe tigila dibidagola í porabutagi halu puwa walime laradagua hale halu bibe nahe holebere.

*Wali mbira agali oneme mana ko ngubiore biaganego ogo*

<sup>6</sup> Horo mbiruore í ini andagani howa anda windoha de handatagi ho haru. <sup>7</sup> Ani howa handalu hewaria igiri daliahe dewaore mini nawi odahe urubi degedegeru dewa harigani puíbu biyaria handaru. Maru haru dege lowa mini nawi lulu andaore igiri daliahe mbiraore panigi bendo lalu piyaria handaru. <sup>8</sup> Igiri daliahe odagoni ibu pialu wali koore mbira bereago andagani anda hanehane kaware pu banga biyaria handaru. <sup>9</sup> Ne lo waheaha arumaha piyaria handaru. <sup>10</sup> Wali biago ibu yári bayanda walime biagadagua bu berenego ibugua igiri odagoni haru palue lowa ndole bule manda bini. Ani manda buwa igiri biago pialu hearia hondowa wali biagome abale lola hole tagira ibini. <sup>11</sup> Wali odagoni ibu elahe taga nahagaore biruwa andagani biru dambo nalaga hariga hariga hangu ibagabu haabo haga berene. <sup>12</sup> Wali odagoni ibu horo bibahendengi agali dege taya bima hariganibi magedi hamarunagabi ibaga bume haga berene. <sup>13</sup> Ani biaga berenego wali odagonime igiri daliahe o biagoni minu yani howa nunu laya. Nunu lowa igiri biagonaga deni tigatiga handaya howa au laya.

<sup>14</sup> I áyu mbirale loma bini mbira bo delalu henego o delarudagonaga nogo mbirini maru í andagani dawa ngelalu ibiru, laya. <sup>15</sup> Anidagua dawa ngelalu ai í lola harabe hondole hai bima ibalu hewaria ndodabe. Ai áyu ibalu heria lolaore kogoni, laya. <sup>16</sup> Ani bialu í andagani paluene tamu bayaore mo ginibu ngelalu ibiru. Tamunguru aga bayaore iyibi dindi tawe kala tara taraherume dungua ho ngeledo, laya. <sup>17</sup> Ani bialu tamu odagoriani padua tara tara nga baya tara tara biagaru odope howa baya ngabu ngeledo, laya. <sup>18</sup> Ani bidogo iya gini bialu turuho bedabaore egabile labiyago mbaibu, laya. <sup>19</sup> I agalini ona andagaha nahego ibulubada lowa gi nahabe. I agalini ibu dindi kaundiaore mbiraha ho hama piyagoni. <sup>20</sup> Ibu muni dewaore hombedo yalu piyago abale dai nabulebira. Sarere kira ale hai halu dai bulebira manda bido, laya. <sup>21</sup> Wali biagome igiri daliahe biago ndole bu mialu igiri biagonaga bu mini mo heya holenaga bi hale hoabi tara tara dewaore lene. <sup>22</sup> Wali biagome bi ani layagola igiri ibugua hale halu ibu abale wali biago andaga piyadagua haruru pene. Nogome ibu bo dawale haru piarua manda nabi howa nogo anduanenaga geha haruru piagadagua ibu wali biago haruru pene. Agali luluyu karia garabaya helo gi minu huba buwa garabaya haru poradagua bini. <sup>23</sup> Igiri odagoni ibugua manda bialu ibu timu mbirameibunaga gubalini mogo bianeregoria bolomogo biragola ibu bo ibira holobada lowa ibu manda nabi pene. Nogo gabuame nĩaᵒ weda manda nabi howa gerai mabu dugua hole pupe halu karia ibuni nĩaᵒ wedagotha do wiaganedagua do wialu homole porogonida ibu manda nabini.

<sup>24</sup> Ani biyane handarugo ai ínaga iginiru-o tígua ina bi larogo baya hanguore hale hoa howa hale halimu. <sup>25</sup> Wali ko ngubi ogonibime tínaga bu mini ba mulani tí gi howa igilo muwa halimu. <sup>26</sup> Agali igini dewaore wali ko ogoni aleme mo ko hai halu agali dagalabe nahe dewaore balu homelai hene ngago wali ko ogoni ale bedagoria tí kaware hapara nahe gi howa igilo mialu tí kaundia halimu. <sup>27</sup> Bayanda wali andaga pole hariga pedagoni homaliha anda pole hariga poradagua bida. Wali ko ogoni ale bedago andaga pole pirimiyagua o homene dinini pu hagaha pole poramigoni.



## 8

*Mini bayale gigabi wuleneme biaganego ogo*

- <sup>1</sup> Mini bayale gigabi wuleneme wandari mbira heyu howa olaradagua ina olalu ka.✧  
Manda buleneme bi larago ina hale habehe kama.
- <sup>2</sup> Ibugua hariga bare hambene ngarunagabi  
hariga gebage ngarunagabi heyu howa ina olalu ka.
- <sup>3</sup> Tanoha anda pole wali agali ubanda tagi biaga panga haraba dugu ai kagoria howabi  
inahondo agua lalu ka.
- <sup>4</sup> Dindi wali agali kamiru bibahendehondo ina ti olalu kogoni.
- <sup>5</sup> Wali agali miniha boga nabi kamiru  
ti ogoni mo yule i kogoria ibidaba.  
Wali agali mitangi bayuwa tigabi nabiaga kamiru  
ti ogoniore mo yule i kogoria ibai hadaba, lalu ka.
- <sup>6</sup> Ina tihondo bi baya buruguleorebi tigabiorebi langigi berogo  
bayuwa hale hadaba.
- <sup>7</sup> Ina horo bibahendengi bi henene hangu laga kogoni.  
Ke holenebi bi yole ko tara tara ngarubi i hame nalagaore kogoni.
- <sup>8</sup> Ina bi laga bialu kogoni bibahende tigabi hanguore lalu kogoni.  
Bi ke howabi wali agali mo guya holebi mbira nalagaore kogoni.
- <sup>9</sup> Wali agali tinaga mitangi bulenebi manda bulenebi wale tigabi karume  
ina bi larogonaga tenego manda biai ka.  
Tigua ina bi larogoni henene laralo manda bulebira.
- <sup>10</sup> Inaga bi tihondo langialu kogoni muni ngolo silibabi ale ndo  
inaga bi ogoni ibu galone daligaore pale ngago  
tigua ogoni duniniore lowa yamilimu.
- <sup>11</sup> I mini Bayale Gigabi kogoni.✧  
Dindini tole ale tara tara ngiringarale palido hene duguwa  
muni milo wabu ngarubi ndo kogoni.  
Mbirale mbira baya ti hame lagane ale dindini ngarubi ndo  
i baya gibi daligaore kogoni.
- <sup>12</sup> I mini Bayale Gigabi kogoni.  
Mana bayale wale agua bialu holene nga lalu  
ina manda bidogoni.  
Ina mbirale bibahende bayuwaore manda biai howa  
mbirale baya hangu dabaga bulenego manda bidogoni.
- <sup>13</sup> Wali agali Anduane Homogo andaneha howa ibugua laradagua bialu haga karume  
mana ko bulene handabe manga holebira.  
Mine holeneru ininaga mini mo yaraga holeneru mana ko tara tara buleneru ke  
holeneru  
mana uruni aleru i hame nalagaore kogoni.
- <sup>14</sup> Ina mbirale bule lalu manda mandabu wuwa bule ledogonidagua biruli.  
I mitangi bayuwa tigabiore biaga howa hongo gibihe kogoni.
- <sup>15</sup> Kini agali karumebi agali haguane karumebi tininaga dindi bayuwa hondo helo  
ina biamogo bialu dindi mo baya holenenaga bi mana bayuwa wabu wilo biamogo  
biruli.
- <sup>16</sup> Dindini wali agali hondo haga agali haguane karu damenego bibahendeore ta nabi  
ina biamogo bigi berogome  
tigua wali agali haru kagoni.

- 17 Wali agali i hondole lowa hongo howa taya bialu karume  
i handa walia holebira.  
Wali agali i gubalini haga karu ina ti gubalini timbuniore haga kogoni.
- 18 Ina wali agali mo homogo holene mbirale dewaorebi  
mini mo yaraga holenebi tihondo mule kogoni.  
Ti mana bayale tigabi bima pialu ti homogo holenenaga mbirale bayale bayale handa  
walia helo hamelo kogoni.
- 19 Ina mbirale tihondo miagane ngogo  
muni ngolo silibaru emene bayale lowa baya daligaore miaga kogoni.
- 20 Horo bibahendengi ina mana tigabi hangu bialu haga kogoni.  
Dabolene tigabi dege dabaga kogoni.
- 21 Wali agali i gubalini haga karu ina tihondo homogo holenenaga dewa mialu  
ti andagani mbirale bayale bayaleme wu tolo tagi helaruli.
- 22 Ala bambaore Anduane Homogohanda mbirale wabule lowa iore ala wabini.✧  
Ani buwa mani ibugua mbirale maru maru wabini.
- 23 Ala bambaore Anduane Homogohanda dindi nawabi howa  
piganengi iore ala wabiyagola i ala hene.
- 24 Anduane Homogohanda iba solowarabi iba bedaru damene bibahendeorebi nawabi  
howa  
iore ala tagira ibu helenego kogoni.
- 25 Hari emene wedarubi timbuni wedarubi nawabi howa  
iore ala wabu helenego kogoni.
- 26 Dindi bibahende ngarubi mabu wima pedarubi uruni bibahende nawiaha i ala  
wabini.
- 27 Anduane Homogohanda hari daliga li kago wabialu howa  
hari ligonime iba solowara mo mabu bupe helayadagoning  
i ibula hene.
- 28 Ibugua beraliba li harini ngelalu dindiha howa iba dugu dagadaga bilalu  
dindi biru namu lalu iba solowara tagira ibu berelayadagoni  
i hewane dege ani bini.
- 29 Iba solowara ibu birairi helogoria tu bo mialu  
tu o werogo bolodaga holeni lalu lamiyangi i hene.  
Dindi timbuni ogoni wabu wulenaga gumuni ala ibu pelayangi i hene.
- 30 Anduane Homogohanda biabe uruni bigi biyangi i ibu heba henego  
ibugua i mbirale mandabi biabe de hondo haga haradagua helaya.  
Ibugua mbirale wabigi biyaru hondowa ina turu gibiore ho harugome  
Anduane Homogo ibu mo turu haga biru.  
Ina Anduane Homogo ibu deni turu timbuniore ho haru.
- 31 Dindi ogo bibahende wabu wiyagobi  
wali agali dindi ogoriani wabu helayagobi hondowa  
i turu timbuniore ho haru.
- 32 Anigo ai mini bayale gigabi ibugua bi agua latago hara.  
Inaga waneiginiru-o tigua inaga bi larogo baya hangu hale halu  
ina biagane mana ngodagua tigua talialu bilimu.  
Anidagua birimiyagua ti turuho holeberami.
- 33 Ina ti lawai haga berogoni baya hangu hale haga bilimu.  
Ani birimiyagua ti mini bayale gigabiwi holeberami.  
Mana ogonidagua bulenego hado wanahalimu.

✧ 8:22: Min 3.19, Yo 1.1, Mo 3.14

<sup>34</sup> Wali agali inaga bi larogo hale halu biaga karu  
ti turu holene nga.

Ina ti horo bibahendengi lawai holiya ibuwa  
i ubanda tagi biaga anda harabani ibu haabo haga karu  
ti turu haga kagoni.

<sup>35</sup> Wali agali i yamu yu karu ti holeneore yu holebira.

Ani bialu Anduane Homogo ibugua tihondo turuore ho holebira.

<sup>36</sup> Wali agali i yamia nabi karu  
ti tinime tini mo ko halu ka.

Mbirali i handabe mangaho kago ibu homolene hamelo kagoni.

## 9

### *Mini bayale gigabi wulene wali agali olalu kago ogo*

<sup>1</sup> Mini bayale gigabi wulene ibugua ibunaga anda mbira bu heleda. Anda ogoninaga gene karia baya hanguore bogo mbara laga buwa mo yári bia howa anda gene weda.

<sup>2</sup> Ibugua nogo mbira bo dawalu waini iba wiaruni mo dendebiore howa nga. Ani buwa tomo nalu birulene dagiaru bu manda manda buwa ngeleda. <sup>3</sup> Ani bu ngelowa ibunaga biabe bia haga wandari biru wiaru uyuna tanoha dindi bare hambene wiarunaga pu howa ogodagua lalimu lalu lamiya. <sup>4</sup> Wali agali mini timbuni nawi kamirubi lulu ale bu kamirubi bibahende mini bayale gigabi wulene andaga ibidaba. <sup>5</sup> Tomo dawa ngogobi waini iba dendebi hambu ngogobi nole ibidaba. <sup>6</sup> Mini nawi howa mana ko bialu kamiruni wahalu holene bayale yu hole mo ibidaba. Mini wulene hariga ngagoria anda ibalimu, laya lene.

### *Agali kiralinaga mana ogo*

<sup>7</sup> Wali agali minehe balagala haga kagohondo ogonidagua nabibe lalu ina mo tiga biriyagua ti ihondo bi ko lalu ladai bulebira. Wali agali ko kago mo tiga biriyagua tigua i balu inaga tingini mo ko holebira. <sup>8</sup> Ani bulebira mine halu balagala haga kago mo tiga nabibe. Ibugua ila waitigi ho haabo holebira. Anigo mbirali mini bayale gigabiwi kago mo tiga biriyagua ibugua ihondo turu ho holebira. <sup>9</sup> Mbiralini mini bayale gigabiwi kagohondo bi lamiriyagua ibuha mini bayale gigabiwi timbuniore holebira. Ani bialu mbirali mini tigabi kagohondo bi lariyagua ibunaga manda ngagoha mo tago holebere.

<sup>10</sup> Mini bayale gigabiwi holene hame lariyagua ini ala Anduane Homogo andaneha holene nga. Anduane Homogo ibu bayale tigabiore kago i manda bayale henene mo yu keyagua i manda timbuniorewi kegoni. <sup>11</sup> Mini bayale gigabi wulene yu kegome i dindini mali dewaore howa hodagua holebere. <sup>12</sup> Miniha i mini bayale gigabi wulene yu hariyagua ini mo bayale halu mini timbuni taraore yu holebere. Anigo i manga halu hado wahene mbirago hariyagua nde mini mandala nawiore holebere.

### *Mini nawime wali agali olalu kago ogo*

<sup>13</sup> Mini nawi howa biagane ngago wali mini nawime lulubi lagimbu bialu biagadagua biaga nga. <sup>14</sup> Wali ko uruni aleme ibunaga anda harabanibi tano hanuni bare hambene ngagoria howa dagia ngagoriabi birigi biaga. <sup>15</sup> Ani biruwa ibugua wali agali maru tinaga biabe biala heneruha pole harigani pugu biraru olowa ibidaba laga. Ani lowa ibugua tihondo lalu, <sup>16</sup> Mini timbuni nawi kamirubi lulu ale kamirubi ti i andaga ibidaba, laga. <sup>17</sup> Ani lowa ibugua lalu, Iba mendealinaga hambu ngaria mo page binigo iba ogoni gagahene nolene dendebiore wulebira. Tomo mbiralinaga wialu pedago o howa mo kayu binigo ogoni dendebiore holebira, laga. <sup>18</sup> Agali maru ibunaga bi hale hole ibiyaru ti wali biagonaga anda tamuha ko ngubiore homali ale ngu bialu kago nahende

✧ 9:10: Yob 28.28, Iba 19.9, 111.10, Min 1.7

haga. Wali ogoni ibu bedaria agali maru ala pendarubi áyu pialu karubi homene dininiru pu hagaha pu kago ti manda nabi howa ibu bedaria piaga.

## 10

### *Solomonohanda mana bayale gigabi maru lowinigo gilibu ngago ogo*

<sup>1</sup> Mana bayale gigabi bialu holenenaga Solomonohanda bi tumagi laga binigo ogodagua leda.

Waneiginiru ti mini bayale gigabiwi kayagua ti ajiya abala turuho holebira. Anigo waneigini ti mini gigabi ndo mini nawi kayagua ko biragome ti ajiya abala mo tandaga holebira.

<sup>2</sup> Ína muni page binigome homogo hariyagua muni ogonime í mo bayale naholebira. Anigo ína mana tigabi hangu ngaru talialu biaabo hariyagua mo ko holene mbira íha nawulebira.

<sup>3</sup> Anduane Homogohanda wali agali tigabi karu tomo nolene mbira burupale nahelaga ka. Anigo wali agali mana ko biaga karume mbirale hamelo kago milo henge namiaga ka.

<sup>4</sup> Í biabe bulene mangahe hariyagua yagibano noa noalo holebere. Anigo í biabe ebebebi hariyagua mbirale dewawi homogo holebere.

<sup>5</sup> Agali miniwi kagome tomo nolene tu haragola bu mogobu wiaga. Anigo agali mbira ibu biabe nabi palia hangu biyagua nde horo ogoningi tomo nolene nawidagola ibu one waneigini heba ti noa noalo howa taga pani nolene wulebira.

<sup>6</sup> Anduane Homogohanda wali agali mini tigabiwi karuhondo bayale dewa miaga ka. Anigo wali agali ko kago ibugua bi laragome wali agali mo hondo holenaga miniha ohe howa bi laga ka.

<sup>7</sup> Wali agali mana bayale biaga karu homarangi marume ti mitangi bialu dara howa mani tigua bayale biyarunaga te laabo haga. Anigo wali agali mana ko biaga karu homaragola marume ti abale embedaho wahaga.

<sup>8</sup> Wali agali mini bogabi karu tigua wali agali marume ogodagua bibe lalu bi bayale lamiragola ti bayuwa hale haga. Anigo wali agali mini nawi howa bi habane nabulene kudaga bi dege laga karu ti mo ko holebira.

<sup>9</sup> Wali agali mini tigabiwi karu ti miniha maburabi holebira. Anigo wali agali mana ko biaga karu tinaga mini ko do habe nahe holebira.

<sup>10</sup> Mbiralime henene lolene ngadagua la nabi hayagua ibugua genda dewa mo yalu ibaga. Mbiralime kudaga bi dewa lagimbu biaga kago ibugua mo ko holebira.

<sup>11</sup> Wali agali mini tigabiwi karunaga bi larago haabo holene iba ale. Anigo wali agali mini kowi karunaga bi laragome tininaga miniha ko ngago do howa tigua wali agali maru karu mo ko hole manda bu haga ka.

<sup>12</sup> Handabe manga holeneme ko mo bia haga. Anigo ko biagame ko bibahende biniru gubalini holeneme la nabi wahaga.✧

<sup>13</sup> Mbirali ibu mini dingidangiale kagome ibunaga miniha bayale gigabiwi howa bi latagi haga. Anigo mbirali ibu mini giga napale kago ibu pani nolene wulebira.

<sup>14</sup> Mbirali mini bayale gigabiwi kagome manda tara tara bulene ibunaga miniha yu haga ka. Anigo mbiralime bame kudaga bi hangu lalu kagoria ko abale anda ibilo henge miaga ka.

<sup>15</sup> Tano pabe bu yanda howa tamuha wiagadagua wali agali homogo karu ti mbirale bu ngarume pabe bu mabu bidagola bayale ka. Tano pabe bu yanda nahe howa wiagadagua yagibano karu mbirale burupale kagome ti abale mo ko haga.

<sup>16</sup> Bayale biragonaga yolo haabo holene nga. Anigo ko biragonaga yolo ko dewa bilo mo bia haga ka.

✧ 10:12: Ya 5.20, 1 Pi 4.8

<sup>17</sup> Wali agali maru mana birago mendealime mo tiga biragola hale haga karu ti haabo holene harigani pialu ka. Anigo wali agali maru mana mendealime mo tiga biragola i ndo lalu hale nahaga karu ti mo ko holene harigani pialu ka.

<sup>18</sup> Mbiralime wali agali maruhondo keba howa nahe tingi halu kago ibunaga miniha ko do haragome ibu tindule hangu laga ka. Mbiralime diburibu loyu ibaga biaga kago ibu mini nawi lulu ale ka.

<sup>19</sup> Mbiralime bi dewa laga kayagua ibunaga bi laragome ko dewa bibehe holebira. Anigo mbirali ibu mini bayale gigabiwi kayagua bi dewa lagimbu nabi holene nga.

<sup>20</sup> Wali agali mini bayale tigabiwi karunaga bi larago muni siliba bayaleorego ale ka. Anigo wali agali ko biaga karunaga mitangi bulenego habane nabulene hangu mitangi biaga ka.

<sup>21</sup> Mbirali mini tigabiwi kagonaga bi laragome wali agali dewa biamogo bulebira. Anigo mbirali mini nawi howa biragome ibuni bo homelolebira.

<sup>22</sup> Anduane Homogo ibunime ina biamogo bialu mbirale dewa ngiyagua urunime ina genda namo ngulebira.✧

<sup>23</sup> Wali agali karume ko ngaruni bia dege dindi hole lowa turuho kayagua ti mini nawi lulu ale ka. Anigo wali agali manda bayalebi mini bayale gigabiwi karume mana bayale ngaru hangu bule lowa turuho holebira.

<sup>24</sup> Mini tigabiwi karu ti tini hame lara alego mulebira. Anigo ko biaga karu tini mo gi hara alegoore mulebira.

<sup>25</sup> Wali agali ko biaga karu ti katoria ko bulene mbira ibiragola puyabu timbuni iba li heba ibuwa mbirale ngaru yalu piai hagadagua ti yalu piai holebira. Anigo wali agali mana tigabi biaga karu ti dege hongo howa bayale haabo holebira.

<sup>26</sup> Wali agali mangahe karuhondo inaga biabe biaha nalabe. Irane marasini kome ne hambuni kau biagadaguabi ira haguame de iba dege dindi hagadagua bialu ina ibuhondo handabe manga holebere.

<sup>27</sup> Anduane Homogohanda bi laradagua bialu hariyagua dindini lu holebere. Anigo ko biaga karu tigi mandi hangu halu tinaga horo nakaha abale homolene wulebira.✧

<sup>28</sup> Wali agali mini tigabiwi karu ti Anduane Homogohondo mini dunubia ho howa turu halu holebira. Anigo ko biaga karu tigua bayale mbira nahende ti bameore holebira.

<sup>29</sup> Mini tigabiwi karu Anduane Homogohanda ti baya hangu handayaho haga ka. Anigo mana ko biaga karu ibugua ti kagoaha ko anda ibilolebira.

<sup>30</sup> Wali agali mini tigabiwi karu ti dindini bayale haabo holebira. Anigo ko biaga karu ti dindini haabo naholebira.

<sup>31</sup> Wali agali mini tigabiwi karume bi larago mini bayale gigabi holenenaga laga ka. Anigo wali agalinaga hegeme bi ko laga kago ogoninaga ne hambu ndibulo waholebira.

<sup>32</sup> Mini tigabiwi karume bi lalu howa wali agali hale ho karu ti mo dendebia holenaga manda bialu bi bayale laga ka. Anigo wali agali mini kowi karu tigua bi laragome wali agali hale ho karu mo tandaga haga ka.

## 11

<sup>1</sup> Wali agalime mendealinaga mbirale yidago mo page bulenaga genda magi handaga ngago ke howa wiagadagua ndo hada dai biaga karu Anduane Homogohanda ti handabe manga haga ka. Anigo maru genda magi tigatiga ngadagua handalu yolo bulene ngadagua biaga karuhondo ibugua turu haga ka.✧

<sup>2</sup> Wali agali tininaga mini yaraga haga karu mani taga pani nolebira. Mini bayale gigabiwi karu tigua tini mo dindiha ho haga ka.

✧ 10:22: Pig 24.35, 26.12, Iba 37.22 ✧ 10:27: Iba 19.9, 55.23, Min 9.11 ✧ 11:1: LBM 19.35-36, Man 25.13-16, Min 16.11



<sup>3</sup> Wali agali mini tigabiwi karume mana tigabi dege biaga ka. Anigo ke haga karu ti tininaga ke howa mana biaga ngagome tini mo guya haga.

<sup>4</sup> Mbirale dewawi homogo ha hariyaguabi í homolene horo harangi urunime í mo wia nabulebira. Anigo ina mana tigabi ngaru talialu bialu hariyagua nde ogonime í biamogo biragola í abale homa nabi luore holebere.

<sup>5</sup> Wali agali tigabi karume mana tigabi dege biragome tini biamogo biragola hariga tigabi ngatoria pialu holebira. Mana ko biaga karume tini mo ko haga ka.

<sup>6</sup> Wali agali mana tigabi biaga karu tini mana tigabi ogonime ti bayale helonaga biamogo biaga. Anigo dimagoli halu mana koru bialu haga karu tininaga mana ko biyagome tini mo ko haga nga.

<sup>7</sup> Wali agali ko biaga karume tininaga hongome mbirale bayale ngaru mo wu holeberamabe toba ho haga ka. Anigo mani tigua mbirale mbira bule lowa tinaga miniha magoyu hayago tini homaragola tini heba homamaga haga.

<sup>8</sup> Wali agali mana bayale biaga karu ti kagoha genda tandagaru anda ibiyagua Anduane Homogo ibunime ti pele miaga ka. Genda tandaga urunibi wali agali maru mana ko biaga karuha mo ya holebira.

<sup>9</sup> Mbirali mana ko biaga karume bi ko lalu ndelayagua tinaga bi ogonime wali agali bu karu mo ko haga. Anigo maru mini tigabi karu tigua tinaga mini bayale gigabi ngagome tini pele miragola ti bayale holebira.

<sup>10</sup> Mana tigabi bialu haga karu tinaga holene bayaleore ngagola wali agali bu karume turu hai holebira. Anigo mana ko biaga karuni aria mbirago homayagua wali agalime turu timbuniore holebira.

<sup>11</sup> Wali agali mini tigabi karu tigua mana bayale biragome tinaga tanoha bayale holene wulebira. Anigo wali agali mana ko biaga karu tigua bi ko tara tara laragome tinaga tanoha wali agali karu mo ko haga.

<sup>12</sup> Mbiralime wali agalihondo bi ko lalu mege biyagua ogoni ibu mini nawi lulu ale ka. Wali agali mini bayale gigabiwi kagome bi ogoni ale nale ema nabi holebira.

<sup>13</sup> Mbiralime bi diburibu laga kagohondo bi do henego ibu lamulene nawi. Ai mini bilinahe kagohondo lamulene karulape.

<sup>14</sup> Gabumane haru haga karume wali agali hariga bayaleni pelo walia nahayagua wali agali mo ko halu dindibi mo ko holebira. Anigo gabumane biamogo bialu mitangi bayale talebu mulene dewa bu hayagua wali agali bayale holebira.\*

<sup>15</sup> Mbiralime dano henego ibuni mibe naheyagola ina mia holiya leneyagua ogoninaga mani ini genda timbuni wulebira. Ogoninaga í bayale hole manda biriyagua ina mana ogonibi ngatoria wandialu habe.

<sup>16</sup> Wali mana bayale biaga bedaru wali agali marume tinaga mini yaraga halu yo nahondolebira. Anigo wali mana ko biaga bedaru ti taga pani nalu birulebira.

Agali mangahe karume mbirale nayi holebira. Agali biabe ebebebi hongo howa bialu haga karume mbirale dewa wua holebira.

<sup>17</sup> Ina wali agali maruhondo dara howa biamogo biriyagua mana ogonibi beregome ini biamogo beregoni. Anigo ina maru mo tandaga hariyagua inibi mo tandaga holebere.

<sup>18</sup> Wali agali ko biaga karume mbirale ngaruni tini biamogo nabibehe habane nabuleneore ngagoni. Anigo wali agali bayale tigabi biaga karume biragonaga yolo bayale mulebira.

<sup>19</sup> Wali agali mana tigabi dege biaga karu ti haabo holene yulebira. Anigoyu wali agali mana ko dege bule hamelo karu ti homolene wulebira.

<sup>20</sup> Anduane Homogohanda wali agali ko hangu mitangi biaabo haga karuni ti handabe manga ho kagoni. Ibugua wali agali mana tigabi biaga karuhondo gubalini ho ka.

\* 11:14: Min 15.22

<sup>21</sup> Anduane Homogohanda wali agali ko hangu biaga karuni manani helalu ti pani nolene ngago heneneore na bulebira. Anigo wali agali mana tigabi biaga karu ti pani nane bayale helolebira.

<sup>22</sup> Wali mbira dengui bayaleore biruwa ibugua mana ko hangu biaabo haga be-dayagua ogoni ibu gi magi ngolome wabini nogoni yári bia howa nguira da haganego ale beda.

<sup>23</sup> Wali agali mini tigabi karume ti hameledaru biragola bayale dege tagira ibulebira. Anigo ko biaga karume tini hame ledaru biyagua ko dege tagira ibiragola bibahende karume keba hai holebira.

<sup>24</sup> Wali agali marume tinaga muni mbirale ngaru wali agali maru turu helo migi buwa uruni tinaga biabe biragoha muni dewaore wia tago haga. Anigo wali agali marume tinaga mbirale mbirale ngaru mendealihondo tale bialu mibehe howa namiyagua ibuni noa noalo hangu halu burupale haabo holebira.✧

<sup>25</sup> Wali agali mbirame ibunaga mbirale ngaru wali agali maru biamogo bialu miyagua ibuni dewaore yu haabo holebira. Ina wali agali maru biamogo biriyagua tigua nde í biamogo biadai bulebira.

<sup>26</sup> Mbiralime ibunaga tomo yolo bule ibiragola yolo dibaudu howa mule layagua ogoninaga maru tigua ibu mege bulebira. Anigo wali agalime ibunaga tomo yolo bule ibidaba layagua tigua ibuhondo turu holebira.

<sup>27</sup> Mbiralime mana bayale hongo howa talialu biyagua wali agali marume ibuhondo turu howa dungulo holebira. Anigo ibugua ko hangu bule manda biyagua nde ko hangu handa walia holebira.

<sup>28</sup> Wali agali mbirame ibunaga mbirale ngaru mitangi bialu mo tene hayagua nde ibu dalu ibirangi ira yuni gilope hagadagua ibira holebira. Anigo mini tigabiwi karu ti ira yuni gaeangi gahenge haabo hagadagua holebira.✧

<sup>29</sup> Agali mbirali ibugua ko biragome ibu one waneigini karuha ko yu anda ibilaragola ibunaga mbirale bibahende ngaru ereba hai halu nayi holebira. Ogonidagua dege mbirali mitangi bayale nabiaga kago ibugua mini bayale gigabi kagonaga biabe bia haga holebira.

<sup>30</sup> Mini tigabi karume mana birago haabo holene lini daga ira ale ka. Agali mini bayale gigabi kago ibugua agali maru ibula mini mbiraore howa mandagi hole hame laga ka.✧

<sup>31</sup> Wali agali mini tigabi karu ti dindi ogoria howa bayale biyagonaga yolo miaga manda bidama. Ogonigo wali agali mana ko biagaru tigua ko biyagonaga pani mia nabi yo pialu polobada manda nabimiya. Anduane Homogohanda tihondo ko biyagonaga pani mulebiraore ndobe.✧

## 12

<sup>1</sup> Wali agali mini gigabi holene hamelo karu tigua mana ko biyago mendealime mo tiga biragola ti turu haga ka. Anigo mbirali ibu ko biyago mendealime mo tiga bilo hame nale kago ibu mini nawi lulu aleore kagoni.

<sup>2</sup> Anduane Homogohanda wali agali bayale biaga karuhondo turuho kagoni. Anigo wali agali ko hangu bule manda biaga karu ibugua ti pani mule mandabu ngeleda.

<sup>3</sup> Mbiralime ko hangu biaabo haragome ibunaga holene bayale helo mo hongo naholebira. Anigo mbiralime mana tigabi hangu biaabo hayagua ogoni ibu ira pini dindiha anda pedagola agalime duguabe nahe hagagobi ka.

<sup>4</sup> Agali one mana bayale biaga bedagome ibu agalininaga mini yaraga haga. Anigo ibu oneme mana ko hangu biaabo haga bedayagua ibu agalininaga kuniha warago ko mbira kuni bomboro bima anda piagago ale beda.

<sup>5</sup> Wali agali mini tigabi karume mana tigabiru hangu bule manda bu haabo haga. Anigo wali agali mini kowi karume wali agali maru mo hondo holene tara tara mitangi biaabo haga ka.

<sup>6</sup> Ko biaga karunaga bi laragome mbirali homelo bole lowa ha do howa mayu hagago ale nga. Anigo mini tigabi karunaga bi laragome wali agali genda yu karu biamogo bialu bayale helo mo paliaho helaga.

<sup>7</sup> Ko biaga karu tinaga aguanene mbira yu wa nahe ereba halu homa maroore bulebira. Anigo tigabi biaga karu tinaga aguanene ereba nahe bayale ho dame bima puabo holebira.

<sup>8</sup> Mini bayale gigabiwi karu wali agalime tinaga mini yaraga holebira. Anigo mini nawi kagonaga mini marume hangedape holebira.

<sup>9</sup> Agali mbirame mine halu i homogo kogoni lowa ibu tomo nolene burupale kayagua ogoni nakarulape. Anigo agali mini lene ndo mbirame ibunaga biabe bia haga mbiraore hangu ibu andagaha helo kayagua ogoni ibu agali mende homogo tingi haga biago bolangua ho kagoni.

<sup>10</sup> Wali agali tigabi karume tinaga nogo ega hinayaru dara howa bayuwa de hondo haga. Anigo agali ko karume tinaga nogo ega hinayaru бага bialu bayuwa de hondo nahaga.

<sup>11</sup> Wali agali biabe erekuibi biaga karume ti tomo nolene dewa bu wulebira. Anigo mbiralime habane nabulene tara tara ngagonaga biabe erekuibi bialu hayagua ogoni ibu bame bu waharago ibu mini nawi ka.

<sup>12</sup> Ko biaga karu tigua marume ko bialu mbirale dewa mo yarago dimagoli howa hamelo wiaga. Anigo mana tigabi biaga karu ti bayale biragome tinaga holene karulapeore holebira.

<sup>13</sup> Ko biaga karunaga bi ko laragome tini garabayabu wiaga. Anigo bayale biaga karu ti kagoria genda ibiyagua ti yo pialu polene hariga wulebira.

<sup>14</sup> Ina bi laregobi mana beregobi bayaleyagua ogonime i bayale habelo biamogo bulebira. Anigo ini beregonaga yolo mulebere.

<sup>15</sup> Wali agali mini nawi karume, Ina tigatiga manda bidamago, lo mitangi biaga. Anigo wali agali mini bayale gigabiwi karu tigua marume mitangi bayale talebu miragola turu halu hale haga.

<sup>16</sup> Mbirali mini nawi kagome ibuhondo ko mbira biragola keba abaleore haga. Anigo mbirali mini bayalewi kagohondo marume bi ko layagua ibugua donge halu bi ladai nabi mini burugulo naholebira.

<sup>17</sup> Godi laragola agua biya lalu de hendene kago ibu agali henene lagame kayagua ibugua henene hangu lolebira. Anigo ibu agali ke haga kayagua ogoni ibugua godini tindule nabinigobi lolebira.

<sup>18</sup> Mbiralime mitangi bayuwa nabi howa bi layagua nabime nogoba hagadagua ibunaga bi laragome mendealinaga bu habane nogoba holebira. Anigo mbirali mini bayale gigabiwi kago ibugua bi laragome marasini bayaleme mo dabi hagadagua mo bayale holebira.

<sup>19</sup> Ke holene tigi mbira hangu howa ereba haga. Anigo henene lolene wiaabo holebira.

<sup>20</sup> Wali agali ko hangu bule mitangi biaabo haga karu tinime tini mo hondo hara. Anigo wali agali bayale helonaga biamogo bulene mitangi biaga kago ibuni turuho holebira.

<sup>21</sup> Wali agali mini tigabiwi karu ti kagoria genda mbira handa walia naholebira. Anigo wali agali ko biaga ti kagoria ko dewa wiaabo holebira.

<sup>22</sup> Anduane Homogo ibu agali ke haga bibahende karuhondo turu nahe howa waitigi ale haga ka. Anigo ibu henene hangu laga karuhondo turu haga ka.

<sup>23</sup> Wali agalime mbirale bayale bulene mandabidaru abale latagi nahaga. Anigo wali agali mini nawi karume bi anda dewa howa laragola wali agalime ibunaga bi hale howa ibu agali mini nawi lulu ale ka manda biaga.

<sup>24</sup> Biabe erekuibi hongo howa biaga kagome handayaho haga holebira. Anigo biabe mangahe karu garabaya biabe ale biahaga holebira.

<sup>25</sup> Mbirali mini burugulo haabo haga kago ibuha genda tagira ibalu ibunaga mini mo ko holebira. Anigo mbiralime ibunaga nenegehondo bi bayale layagua bi ogoni laragome ibu nenege kago miniha dungulo holebira.

<sup>26</sup> Wali agali mini tigabi karume tinaga nenegehondo hariga tigabi walia halu de hondo haga. Anigo mana ko biaga karu ti hariga tigabi pedago yu wahalu pu luluyu haga ka.

<sup>27</sup> Agali mangahe karume tia bo puwa mbira naboyiore dai bulebira. Anigo biabe pinditigi kau bogalo biaga karu ti agali mini lene holebira.

<sup>28</sup> Wali agali mana tigabi bialu karu ti haabo holenenaga harigani pialu ka. Anigo ko bulenenaga hariga pu maro bialu homolene dege wulebira.

## 13

<sup>1</sup> Waneigini bayale miniwi karume ti aija abalanaga bi larago hale holebira. Ai ko minehe karume mbiralime ti mo tiga bilo hame nalolebira.

<sup>2</sup> Wali agalihondo bi bayale tigabigo hangu laga kago karia mbirale bayale bayaleru anda ibugu bulebira. Ai wali agali ke hagaru mbirale mbira bule lo winigo puguaga karu ti wali agali maru karu bo wahole bulenego hangu manda bialu haga ka.

<sup>3</sup> Mbirali ibunaga ne harigaha howa bi laga birago bayuwa minila haru howa laga biyagua ibu genda nahende bayale holebira. Ai mbirali mini haru nahe howa bi bame nagalone lagimbu biaga kago ibu ibuni bime genda tara tara ibuni kagoria mo yu anda ibulebira.

<sup>4</sup> Mbirali mangahe kagome mbirale ngaru hameore timbuni layaguabi nayulebira. Ai wali agali erekui biabe biaga karume ti erekui biabe bialu mbirale ti hame lara ale mo wiai holebira.

<sup>5</sup> Wali agali baya mini tigabiwi karume ke tara tara holenege ti handabe manga timbuni haga. Ai wali agali mini kowi karu ti mana ko tagabi ngaru taga nahe bialu haga ka.

<sup>6</sup> Wali agali mana tigabi biaga kago tinaga pabe tigila tini mana tigabi biragome hapai haragola ti tamuha bayale holebira. Ai wali agali ko biaga karu ti tinime mana ko bigi biragome mendeali ndo tiniore mo ko haga bulebira.

<sup>7</sup> Wali agali marume mbirale mbira nawiore howa yagibanome homogo tingi haga biaga. Ai wali agali maru homogoore mbirale dewa bu hombedo wu howa mbirale nawi yagibanoore tingi haga kagoni.\*

<sup>8</sup> Wali agali homogo karu pagealime bo wahole biyagua ti gi tagotago muni bu yidago ba ede halu tini yo pialu pole ka. Ai wali agali yagibano karu ti pagealime tinaga mbira agi yidago muluba ndoda handala ti gi nahe hada holobu haga ka.

<sup>9</sup> Wali agali mini tigabiwi howa mana tigabi biaga karu ti lamu hale wa bayaore hamehe ngaligobi ka. Ai wali agali mini kowi howa mana ko biaga karu ti lamu hale hundiama dalidali biaganego ale ka.

<sup>10</sup> Mine holeneke keba holenebi gungu bulenebi yu anda ibagane. Ai marume lamirago hale halu laradagua biyagua wali agali ogoni mini bayale gigabiwi holebira.

<sup>11</sup> Muni awadaga mbira ibu ngaria mo yu hariyagua muni ogoni abaleore ereba hai holebira. Ai erekui biabeore bialu emeneore mbira ilu wigi binigo anda halu timbu holebira.

\* 13:7: Min 12.9

<sup>12</sup> Mbirale mbirani mini pagaho karia mbirale odagoni habo layagua miniha dugupe ho haga. Ai miniha mbirale mbira bia nabira mandabu henego henene halu biyagua turu holene tagira ibalu miniha ho dungulo daibu hagane.

<sup>13</sup> Mbirali ibu mendealime bi bayale ibu biamogo bialu lamirago mo wahalu piyagua ogoni ibu gendabi hangu handalu kane ibuni mo ko holebira. Ai mendeali bi ogo-nidagua lamiragola ibunaga koyane layada lalu lamirago hale halu biyagua ogoni ibu bayale turubi hama polebira.

<sup>14</sup> Wali agali mini bayale gigabiwi karume mana lawai halu karuni holene miaga iba duguaradagua bialu ka. Bi mana tigabi lawai hayarume ti homolene ngagoria kaware kagola nahome yo pialu ibida pelo hariga walia holebira.

<sup>15</sup> Wali agali mbirale bayuwa mandabi kago mo yo nahandaramali. Ai wali agali ke hagaru mbira buliya lowa lahondo haga karu ti hama pialu tini mo ko holene tagira pole pora.

<sup>16</sup> Wali agali miniwi karume miniha bayuwa mitangi ala buwa mani mbirale biatagi haga bulebira. Ai wali agali mini nawi karume tini mini nawi lulu ale ogobi kama lalu tinaga mana bibahende handai helo walia hai holebira.

<sup>17</sup> Wali agali bi yu puibu biaga kagome bi lamibe lenegobi ndo ke howa mo mendedagua howa lamiyagua genda tara tara tagira ibaga. Ai bi henene lamibe lenedaguaore lamiyagua o wali agali bayuwa helonaga mo palia holebira.

<sup>18</sup> Wali agali marume ti mana lalu mo tiga biragola ti hame nale howa dogaho haabo hayagua ogoni ibu yagibanoore halu tagahe haabo holebira. Ai marume ti mana lalu mo tiga biragola tigua laradagua hale halu biyagua o bi hale haga ogoni wali agalime mo yo nahondolebira.

<sup>19</sup> Mbiraleore mbira mule hame timbuni lo hadege buwa o biagoniore miriyagua nde miniha dungu lalu turuore gibi hagane. Anigo wali agali mini nawi howa tigua mana ko bialu karuni erembira mialu waholenego hame naleore kagoni.

<sup>20</sup> Wali agali mini bayale gigabiwi karu heba mandagi ibagabu hariyagua íbi nde mini bayale gigabiwi dege holebere. Ai wali agali mini nawi howa ko biaga karu heba ibagabu hariyagua í mo ko holebira.✧

<sup>21</sup> Genda buleneme wali agali ko biagaru poradagua haruru ibagabu haabo holebira. Ai wali agali mini tigabiwi karu ti tini hangayagonaga lini mbirale bayale bayale dewa do nolebira.

<sup>22</sup> Wali agali mini tigabiwigo ti homalu howa tinaga dabudabu ngaru ti waneigini aguanenaga ngelalu homaga. Ai wali agali mini kowi karunaga dabudabu ngelalu homaragola wali agali mini tigabiwi karu ti karulaga.

<sup>23</sup> Wali agali yagibano karunaga mabuni tomo mbirale dewa anda howa bu wiaga. Ai wali agali ko biaga karume uruni hangedope howa ti bu naga.

<sup>24</sup> Waneiginime mana ko biragola aīya abalame mo tiga bialu mana nalayagua libu waneigini ogoni gubalini nahe ka. Aīya abalame libu waneigini gubalini ho kayagua libu waneigini mana lolebira.✧

<sup>25</sup> Wali agali mini tigabiwi karu tinaga tomo nolene bu payabu ngagola ti no dege paluebira. Ai wali agali mini kowi mana ko biaga karu ti tombeha garibi lo dege haabo holebira.

## 14

<sup>1</sup> Wali mini gigabi bedagome ibuni andagani biruwa biabe bayale bulene ngaru biragome ibu damene bibahende mo bayale halu hongo haihe helaga. Ai wali mini nawi bedagome ibuni andagahabi ibu damenerubi bibahende mo ko hai haga.



<sup>2</sup> Mana tigabi ngaru talialu bialu haga kagome ibuni Anduane Homogohondo gi ho halu ibu andaneha haabo haga ka. Anigo mana talialu biaga tingi howa ke haga karu tigua Anduane Homogo mo yo handaga ka.

<sup>3</sup> Mbirali mini nawi kagonaga bi laragome wali agali bu karu mo walia halu ibuninaga mini hangu mo yaraga halu haga ka. Mbirali mini gigabiwi kagonaga bi laragome ibuni mo bayale haga ka.

<sup>4</sup> Dindi tombolene nogo bulumaga mbira naheyagua tomo bu wiaga anda tabuanda haga ka. Anigo nogo bulumaga hongohe kagome dindi tombaga kayagua mabuha tomo dewaore anda haga nga.

<sup>5</sup> Mbirale biyago de hendene kagome bi heneneore lalu biyane handayago latagi haga heagua ibugua biyane de handayago bi tigatiga latagi haga ka. Anigo mbirali ke hagame layagua ibunaga bi larago tindule dege lolebira.

<sup>6</sup> Mbirali mine haga kagome manda bulene bayale damene ngaru mo yule manda bu karia mo ya nabulebira. Anigo mbirali ibunaga mini gigabi heagua ibugua manda bulene bayale ngaru hi nahe mo yulebira.

<sup>7</sup> Mbirali mini nawi kago baba mandagi nahe habagiho holene nga. Ogoni ibugua mini bayale talebu ngia nabulebira.

<sup>8</sup> Mbirali mini gigabiwi kago ibugua ibunime biraru bayuwa mitangi buwa biaga ka. Anigo mbirali mini nawi kago ibugua i mini gigabiwi kogo mitangi biragome ibuni mo hondo haga ka.

<sup>9</sup> Wali agali mini nawi karume tinaga mini mana ko bulene ngago ha hangu mo tene haabo haga ka. Anigo mana tigabi biaabo halu haga karume wali agali maru baba mini mo mbiraore ho haga ka.

<sup>10</sup> Mbirali ibunaga miniha genda holenebi turu holenebi ibuni hangume manda biaga ka. Ani manda biagadagua mendeali kagome manda nabibehe ka.

<sup>11</sup> Mbirali ko biaga kagome ibunibi ibunaga damenerubi mo ko hai holebira. Anigo mbirali bayale biaga kagobi ibunaga damenerubi ko nahe bayale haabo holebira.

<sup>12</sup> Mbiralime hariga ogoni pialu kogo bayale porogo ibuni hangu mitangi bu kagome hariga ogoriani homolene harigadago manda nabi pupe haga. ✧

<sup>13</sup> Iname oba haramagome bu miniha genda ngago mo ereba naholebira. Turu hagabu holene ngago ereba harangi miniha genda wiaabo holebira.

<sup>14</sup> Wali agali ko biaga karu tinime mana ko biragonaga pani nolebira. Anigo mana bayale biaga karu ti nde bayale bialu kagonaga lini nolebira.

<sup>15</sup> Mbirali manda emene hangubi kago ibugua marume bi larago bibahende mo henene hai haga ka. Mbirali mini gigabi kago ibugua mana ibunime biraru mamage howa bialu haga ka.

<sup>16</sup> Mbirali mini gigabi kago ibugua mamage ho howa genda tara tara ibuha anda ibiragola ibu habagi haga ka. Anigo mbirali mini nawi kago ibugua mbirale bibahende biraru bayuwa mini haru nahe howa ko bule abale pudu laga ka.

<sup>17</sup> Mbirali keba abale tungulope haga kago ibugua mana ko luluyu howa biagadagua bialu haga ka. Wali agali maru karume mbirali ibuni hangu mitangi biaga ohe kago ogoni ale biagohondo handabe manga haga ka.

<sup>18</sup> Wali agali maru manda emene hangubi karu tinaga mana mini nawi lulume biagadagua bialu haga ka. Anigo mini gigabiwi karume mana bialu karu tinaga mana bayale mandani yari biraligobi biaga ka.

<sup>19</sup> Ko biaga karu tigua mana tigabi bialu haga karu andaneha bulu palu howa, Ina dara halu biamogo bidaba, lolene wulebira.

<sup>20</sup> Mbirali ibu yagibano heagua ibu dameneore karu tigua agali ogonibi kago handabe manga haga ka. Anigo mbirali ibu homogo heagua ibunaga nenege dewaore holebira.

✧ 14:12: Min 16.25, Lm 6.21

<sup>21</sup> Wali agali mende kago mo ko haga karu ti mana koorene ko ngaru bialu ka. Anigo mbirali yagibano mbirale nawi kago dara halu biamogo biaga karu ti turubiore ka.

<sup>22</sup> Mana ko anda helonaga biabe bialu harimiyagua t́ni mini nawi koorene ko holeberemi. Biabe bayuwa biaabo harimiyagua wali agali marume t́hondo mini mbiraore wialu t́ mini leneore kami lolebira.

<sup>23</sup> Biabe bulene ngago bialu kago ibu mbirale yu haga ka. Anigo bame te hadalu biraga kago ibu yagibano holebira.

<sup>24</sup> Mini gigabi karu ti mbirale bayale ngaru mo wu howa mini lene haga. Anigo mini nawi lulu ale karu ti tinime mana biragome panigi walia hatagi holebira.

<sup>25</sup> Godi larangi mbirali de hendene kago ibugua bi tigatiga binigobi laragome mbirali biago golope holebira. Anigo ai mbirali birago de hendene kago ibugua ke halu bi layagua ogoni ibu wali agali ndelaga holebira.

<sup>26</sup> Mbirali ibu Anduane Homogo andaneha haga heagua ibuha gi holene mbira nawi howa ibu hongohe haabo halu ibu waneiginirubi bayale dege hai holebira.

<sup>27</sup> Anduane Homogohondo giho halu ibu andaneha haragome iba gagahe bayale nolene ibiraligobi holene bayaleore wulebira. Anidagua biragome mbirali ibuha homolene kaware anda ibiragola mo habo lai holebira.

<sup>28</sup> Kini ibugua wali agali dewaore haru heagua ibu mini lene timbuniore ka. Anigo ibugua wali agali emene hangu haru heagua ogoni ibu bame agali damene maru karu ale dege holebira.

<sup>29</sup> Mbirali keba abale nahaga kago ibu mini gigabiwi ka. Anigo mbirali keba abale haga kago ibu mini nawi lulu ale ko lalu walia haga ka.

<sup>30</sup> Miniha mo palia holene ngelo kago ibunaga tinginibi bayale dege holebira. Anigo miniha dimagoli holeneru henge loleneru wu heagua mana uruni warago koore mbira alegome ibuninaga kunini dere biradagua bulebira.

<sup>31</sup> Mbiralime wali agali yagibano karu mo ko halu hendedape hayagua nde ibugua yagibano uruni wabini Ngode Datagaliwabe kagobi mo yo handaragoni. Anigo yagibano karuhondo bayale biaga karu tigua Ngode Datagaliwabenaga mini mo yaraga haga ka.

<sup>32</sup> Ko biaga karu tigua mana biragome tini mo ko holene yu anda ibaga. Anigo mana bayale biaga karume ti mbirale mbira hondowa gi nahaga. Tigua homolene kaware wiaguabi tinaga holene yu tiga hongohe haabo haga ka.

<sup>33</sup> Mini nawi karu tigua mini giga bulene hai bialu mulene nga manda nabiaga. Anigo wali agali mandabi karu tiha mini giga bulene wiaabo haga ndobe.

<sup>34</sup> Wali agali bibahendeme mana tigabi ngaru taluwa bialu hayagua tinaga dindibi nde bayale mini lene dege wulebira. Anigo tigua mana ko ngaru bialu hayagua nde mani tini taga holene wulebira.

<sup>35</sup> Kini ibunaga biabe bia haga agali karume biabe bayale bialu heagua nde kini ibuni turu ho haga. Anigo ibunaga biabe bia haga karume biabe bia ko kagola kini ibuni taga howa o biaruhondo handabe manga howa keba timbuni haga.

## 15

<sup>1</sup> Mbiralime íhondo keba gibiore hayagua ína ibuhondo bi hendore tabilego ladai beregola ibunaga keba hayago hadolebira. Ai ínaga bi larego kahe tandagabi lariyagua ibu mo keba holebere.✧

<sup>2</sup> Wali agali mini bayale gigabiwi kagome bi laragola maru karume hale howa bi ogonime manda tigabi bulene mo hamela haga. Ai wali agali mini nawi karume bi latagi haganego galone napale lulu bi ale lalu haga.

✧ 15:1: Hgn 8.1-3, 1 Sml 25.10, Min 25.15

<sup>3</sup> Anduane Homogohanda dindi bibahendeni biragoni damenego ibunaga deme handaiore ho ka. Ibugua iname beremaruni ko birimayaguabi bayale birimayaguabi bibahende ibu de handayaho ka.✠

<sup>4</sup> Bi mbira turubi laga biragola hale haragome miniha turu holenebi dungu lolenebi anda ibiragola hongo hodaibu hagane. Ai bi ko tandagabigo hale howa bu miniha timu ale ho yu ibagabu haga.

<sup>5</sup> Í aija abalame bi langigi biyago hale halu bia nabi mo wahariyagua í mini nawi kegoni. Ai mo tiga bialu mana laragola hale hariyagua í miniwi kegoni.

<sup>6</sup> Wali agali mini tigabiwi karu ti andagani mbirale dewa bu payabu wulebira. Ai wali agali mini kowi karu tinaga mbirale ngarume tini genda dege mo migi bulebira.

<sup>7</sup> Wali agali mini bayale gigabiwi karume wali agali maru karubi mini bayale gigabi degewi helo bi lamiaga ka. Ai wali agali mini bayale gigabi nawi karume ogonidagua nabulebira.

<sup>8</sup> Wali agali mini tigabiwi karume Anduane Homogo ibuhondo bi larago hale howa ibugua turu timbuniore ho haga ka. Ai wali agali mana ko biaga karume ibuhondo mbirale loma bialu mule yalu ibiragoni ibu hame nalagaore kagoni.

<sup>9</sup> Anduane Homogo ibu wali agali mana tigabi hangu biaga karu gubalini ho haga ka. Ai wali agali mana ko biaga karu tinaga mana birago hondowa ibu hame nalagaore kagoni.

<sup>10</sup> Hariga bayale pedagoria yu wahalu piaga kago ibu yolo koore mulebira. Wali agali karu ti marume mo tiga bilo hame nalaga kayagua ti homolebira.

<sup>11</sup> Anduane Homogohanda wali agali homeneru haga dindi ngago de handai ho kagoni. Ogonigo ibugua ina wali agali dindini kamarunaga miniha mitangi bidamarubi hame ngamarubi manda biaiore ho kago ndobe.

<sup>12</sup> Mine haga karu ti mendealime ti mo tiga bilo hame nalaga ka. Tigua mbirali mini bayale gigabiwi kagome mitangi bayale tihondo talebu ngilobi hale halu ngi nalaga ka.

<sup>13</sup> Mbiralime ibunaga miniha turuho kayagua ibunaga wanakuini bayale wále holebira. Anigo ibunaga miniha genda ngagola wanakui hila dalihe holebira.✠

<sup>14</sup> Wali agali mini dingidangiale karume manda tara tara bua halu hai biaabo holebira. Wali agali mini boga nabi karume bi bame nagalone dege laabo holebira.

<sup>15</sup> Wali agali yagibano karu ti mbirale burupale ko howa genda timbuni wiaabo haga ka. Anigo wali agali turu halu miniha dungulo haga karu ti horo bibahendengi tomo timbuni dawa wuwa nalu hagagobi holebira.

<sup>16</sup> Ína mbirale emeneru wu howa Anduane Homogo andaneha hariyagua nde ínaga holene me homogo muni dewawi karunaga holene bolangua ho ke.✠

<sup>17</sup> Wali agali í gubalini haga karu heba howa tígua nema hangu nalu kamigome wali agali maru í handabe manga haga karu heba howa nogo mbirini nalu hagago bolangua ka.✠

<sup>18</sup> Kera poboyogobi haga kago ibugua maru mo kera haga. Anigo ema nabi hibulalu hondo kagome mo palia holene yu anda ibaga.

<sup>19</sup> Í mangahe keyagua gendabi mangabibi bibahende handa walua holebere. Anigo í henene mini bilinahe keyagua í kegoria genda nawulebira.

<sup>20</sup> Waneigini mini bayale gigabiwi karume ti aija abala mo turu haga. Waneigini mini nawiore karume ti aija abala yo handaga ka.

<sup>21</sup> Mbirali mini nawi lulu ale kagome mana nagalone bialu ibuni turuho haga. Mbirali mini bayale gigabiwi kagome mana tigabi hangu biaga ka.✠

✠ 15:3: Yob 34.21, Yar 16.17, 32.19, Hi 4.13 ✠ 15:13: Min 17.22 ✠ 15:16: Iba 37.16, Min 16.8, 1 Ti 6.6 ✠ 15:17: Min 17.1 ✠ 15:21: Eb 5.15

<sup>22</sup> Ína biabe maru bule mitangibu keyagua mbirali mandabi kagohondo manda bayale talebu ngilo hale holene nga. Ani biriyagua ínaga biabe berego bayale holebira. Ani nabiriyagua nde ínaga biabe berego bame erekuibi bu waholebere.

<sup>23</sup> Wali agalime bi lalu kagola henge wilo hondo howa ínaga tihondo bi bayale tigabi mbira ogoningi lariyagua ogoninaga í turu holebere.

<sup>24</sup> Wali agali mini bayale gigabiwi karume homolene hariga ubadali kadagua ndo haabo holene hariga ubadaga kadagua pialu haga ka.

<sup>25</sup> Anduane Homogohanda agali tini mini mo yaraga haga karunaga anda mo ko holebira. Anigo ibugua wali dalo agalini homene bedaru biamogo bialu wali ogoninaga dindi ngaru mendealime nakarulelo handaya ho holebira.

<sup>26</sup> Mitangi ko tara tara biaganeru uruni Anduane Homogonaga deni mbirale homene ngubi wiagagobi nga. Anigo bi bayale ina lamaru Anduane Homogo deni bayalego ibu turu holebira.

<sup>27</sup> Mbiralime muni dimagoli howa ko tara tara bialu miyagua ani biragome ibu one waneiginiruha genda tara tara yu anda ibulebira. Mbiralí ibugua mana ko mbira bilo mendealime muni ohowa mirago wahayagua ogoni ibu bayale haabo holebira.

<sup>28</sup> Wali agali mini bayalewi karume mitangi ala buwa mani maruhondo bi ladai biaga. Ko biaga karume bi ladai bialu bayuwa mitangi nabi ala laga biragome ko yu anda ibaga.

<sup>29</sup> Wali agali ko biaga karu ti kagoria Anduane Homogo ibu kaware nahaga ka. Anigo wali agali mini tigabi karume Anduane Homogohondo bi laragola ibugua hale ho haga ka.

<sup>30</sup> Ína mbirali ibunaga wanakui wále howa turuho kane handariyagua íbi dungulo holebere. Ína te bibi bayale mbira hale hariyagua ogonime í mo turu howa ínaga tingini mo hongo holebira.

<sup>31</sup> Marume í mo tiga bialu bi laragola hale howa miniha mo peho hariyagua í mini bayale gigabiwi kegoni.

<sup>32</sup> Ína mbira birigonaga marume mo tiga biragola hale nahariyagua ínime íni mo ko haregoni. Marume í mo tiga biragola bi hale hariyagua í mini bayale gigabiwi holebere.

<sup>33</sup> Anduane Homogo andaneha holene ogoni mini bayale gigabiwi holenenagabi manda bulenenagabi hariga ogoni. Ínime ala íni mo dindiha hariyagua mani í mini yaraga hene holebere.

## 16

<sup>1</sup> Iname mbirale maru bule lo mandabu weremaligoyu Anduane Homogo ibugua mbirale ogoni inahondo bibe nabibe lalu ibunime mandabu bolangua ho ka.

<sup>2</sup> Iname mana beremaligo bayale tigabi beramalo mitangi buwa beremali. Anigo Anduane Homogohanda iname mana beremaligonaga irane manda bialu inanaga miniha mitangi bidamagobi dabo handai haga ka.✧

<sup>3</sup> Ína mbirale bule manda bidego bibahende Anduane Homogonaga gini wia hai habe. Ani beregola uruni bibahende bayale hai holebira.✧

<sup>4</sup> Anduane Homogo ibugua mbirale bibahende wabiai heneru tigua biabe tara tara bilo mandabu nga. Ogonidagua dege Anduane Homogohanda mana ko biaga karunaga hamaro bulene horo harangi godi lalu wayali nahelonaga dabo ngeleda.

<sup>5</sup> Anduane Homogohanda wali agali mine halu tini mini mo yaraga haga karuhondo turu nahagaore ka. Ibugua ti bame pelo wa nahe ibunaga hongo holene walia halu pani mulebiraore. Ogonidagua bulebirago iname manda bulene nga.✧

<sup>6</sup> Mbiralime Anduane Homogo gubalini howa ibuha hogimbu bu kayagua ibunaga ko biyago bibahende Anduane Homogohanda domo waholebira. Mbiralime Anduane Homogo andaneha kayagua ibu ko bulene ngagoria howa wandialu bayale holebira.

<sup>7</sup> Ína Anduane Homogohanda hameledadagua bialu ibu mo turu halu hariyagua ínaga waitigi karu mo nenege bu hinu holebere.

<sup>8</sup> Ína mana tigabi bialu howa mbirale emene wu hariyagua ogonidagua bidegome mbirali ibugua ko bialu howa munibi mbirale dewabi wu kago bolanguahe holebere.✧

<sup>9</sup> Ína ogoale mbira bule lalu lo manda beregola Anduane Homogo ibugua ína berego bibelo mo tiga bialu haru holebira.

<sup>10</sup> Kini karume wali agalihondo bi lamirago Anduane Homogoibunime laminigo laga ka. Godi lolene horo harangi ibugua wali agalime bi larago dabalutigatiga hangulaga ka.

<sup>11</sup> Anduane Homogohanda lalu, Magi manda beregobi genda magi handaregobi tigatiga howa hangu handalu yolo mule wulene nga. Wali agali mo hondo holene nawi, lene.

<sup>12</sup> Kini karu tigua wali agalime ko birago hondowa hame nalagaore ka. Irane mana tigabi hangu biragome gabumane karu mo hongo holebira.

<sup>13</sup> Kini karu tigua wali agalime bi henene larago hale howa ogonibi laga karuhondo turu haga ka.

<sup>14</sup> Kini ibugua mbiralihondo keba hayagua ogoni ibu bo wahole manda bulebira. Anigo wali agali mini bayale gigabiwi karume kini mo turu haabo hole manda bulebira.

<sup>15</sup> Kini ibu mbiralihondo turu ho kayagua ibugua o biagohondo bayale dege biragola ibu bayale holebira. Kininaga mana ogoni tomo anda helo ginume dalu hambu yuwa ibilaradagua biaga ka.

<sup>16</sup> Í mini bayale gigabiwi howa manda bayalebi keyagua ogonibi kegome muni ngolo silibala bolanguaheore yu ke.

<sup>17</sup> Wali agali mana tigabi biaga karu ti ko bulene hariga ngagoria wandialu bayaleni piaga ka. Anigo mbiralime ibuni birago de hondo halu mamage hayagua holene bayale yu haabo holebira.

<sup>18</sup> Mine holeneme mo ko holene waranda halu balagala holeneme í mo pila holene hinu holebere.

<sup>19</sup> Marume mine howa mbirale dewa page bialu mo wini tale bialu haga. Anigo mbirali ibuni mini mo dindiha halu yagibano karu heba hayagua mana ogonibi biragome mine haga uruni bolanguaheore ka.

<sup>20</sup> Mbiralime mana bayale lawai henego yu tiga bialu hayagua ogoni ibunaga holene bayale wulebira. Anduane Homogohondo mini mbiraore hongo howa wu hariyagua miniha dungulo holebere.

<sup>21</sup> Mini bayale gigabiwi karu hondowa bibahendeme ti manda bayalebi bogabi ka lai haga ka. Tigua bi bayale lagayagua wali agali marume tinaga bi larago hale hole hame lolebira.

<sup>22</sup> Mini nawi lulu ale karu tigua mana nagalone dege manda biragome tini mo ko haga. Anigo mini bayale gigabi wulene ogoni yu karuhondo holene bayale tolatagi howa miagago ale nga.

<sup>23</sup> Mini bayale gigabiwi karume mitangi ala buwa mani bi bayale laga. Ani laragola wali agali marume hale hoa haabo holebira.

<sup>24</sup> Bi bayale laragoni mone ibane ale dendebe ogonime wali agali hale hararu tinaga miniha mo didi bia howa tinginibi mo hongo haga.

<sup>25</sup> Wali agali marume ti hariga tigabini pialu kamabe toba howa piaga. Ani mitangi bialu piagago pu maro biragola homolene dege handa walia haga ka.✧



<sup>26</sup> Biabe biaga karume mitangi bialu ti biabe nabiyagua nde tomo nolene nawulebi-rago lowa ogoni mitangi biragome ti biabe erekuibi biaabo helo mo hongo haga.

<sup>27</sup> Wali agali mini koorewi karume wali agali maruhondo ko bule lowa hariga tara tarani taya biaga. Tinaga bi laragoni ira hungu timbuni ale daradagua bialu wali agali mo ko haga.

<sup>28</sup> Ko biaga karume wali agali maru karu tini dege dege lai lelo mo la haga ka. Bi diburibu laga karume kirali nenege turu haga bu kagolabo mo keba haga bialu mo dala hangu hangu haga ka.

<sup>29</sup> Mbirali kebahe kagome mendeali bo wahaga biaga kago ibunaga nenege la de-bodebo bialu hariga koni haru halu piaga kagoni.

<sup>30</sup> Wali agali ihondo bi nale ne hambu ndibu lowa debia haga kagoria nahe ti de hondo mamage habe. Wali agali urunibi biaga karu ti ko mbira bule lo mandabu haga ka.

<sup>31</sup> Wali agalime maru daguahe karu hondowa manda bialu wali agali wahe uruni ti mana tigabi bialu dindini lu heneda manda biaga ka. Ani manda buwa tinaga mini yaraga haga.

<sup>32</sup> Mbirali keba abale nahaga kago ibu mana bayale bira. Ogonidagua biragome ami agali wayali hagane kago bolanguahe haga ka. Mbiralime ibuninaga mini bayuwa haru haga kago ibu agalime wai bialu wayali howa tano mbira karulo hagagobi ndo ibu daliga bolanguahe ka.\*

<sup>33</sup> Wali agali marume mbira agi bibahedabe hondole tadu biaga. Anigo Anduane Homogo ibugua wali agalime ogo ale bilo lalu ibunime mandabu ngeleda.

## 17

<sup>1</sup> Mbirali ibu one waneigini heba mini mo mbiraore howa hina hangu nalu kagome wali agali dewa heba keba halu lai gungu bialu howa tomo timbuni dawa nalu kago bolanguahe kagoni.

<sup>2</sup> Agali garabaya biabe ale bia haga mbira ibu manda bayalebi howa ibunaga biabe bayuwa biyagua ogoni ibugua ibunaga anduane biagonaga igini habane nabulene kago haru haga holebira. Ani haru karia ibu anduane biago homaragola mbirale paluni winiru tale bialu ibu igini mialu ibubi mulebira.

<sup>3</sup> Ngolo silibabi irani delowa ko bayalela dabo handagadagua Anduane Homogohanda ina wali agali bu miniha dabo hondolebira.

<sup>4</sup> Wali agali ko biaga karume ko binigonaga te larago hale hoa haga. Ke haga karumebi ke henegonaga te larago hale hole hame laga ka.

<sup>5</sup> Ina yagibano karu hondo oba hariyagua Ngode Datagaliwabe í wabinigobi mege dege beregoni. Ina wali agali maru genda yu kago hondowa mine halu mege biriyagua ini pani nolene wulebira.

<sup>6</sup> Wali agali wahe karume ti aguane hondowa turu timbuni haga ka. Ani turu hagamadagua waneiginirumebi ti aiya abalahondo turu haga ka.

<sup>7</sup> Bi bayale lolenego ogoni mini nawi karunaga bi ndo nga. Ogonidagua dege ke holenegobi wali agali mini lene karunaga ndo nga.

<sup>8</sup> Mbiralime wali agali maru muni hana haga buwa ibuni manda bialu muni ogonime ibu hameme tara tara bule manda biaga.

<sup>9</sup> Ina wali agalime ihondo gubalini helo hame lariyagua tigua ihondo ko birago la nabi wahabe. Ko biyago embeda nahe mitangi bu wiaabo hariyagua ogonime inaga nenegeali mo dala hangu haga biaga.

<sup>10</sup> Ina mbirali mini bayale gigabiwi kagome mbira biragola mo tiga biriyagua halu mbira hangu lamideore ibugua abale manda bialu mo yulebira. Anigo ina mbirali mini

\* 16:32: Min 19.11

nawi kago mo tiga bialu gewame pira pira bariyaguabi ibu manda nabi dege haabo holebira.

<sup>11</sup> Wali agali ko bialu haabo haga kagoria ti mo tandaga holenaga mbira ibilaradagua homolene ibu wulebira.

<sup>12</sup> Ina biango ale mini bea iginiru minu page binigonaga angibuni ogoni harigani lola hariyagua í bo nolebira manda buwa gi holene karulape nga. Anigo ina agali mini nawi kagome mana ko ngago bule mitangi bu kago lola hariyagua nde koorene ko timbuniore holene tagira ibulebirago manda bibe.

<sup>13</sup> Marume tihondo bayale biragola tigua tihondo ko biadai birimiyagua horo bibahendengi tí andagaha genda ko tara wiaabo holebira.✠

<sup>14</sup> Agali mbirame keba emene hayagua ogoni iba payadagoha diri emene bo wia haradagua biaga. Ani biragola iba piai holilono abale diri bo wiragoria payadagaha keba timbuni anda ibuligo abale paya pai holene nga.

<sup>15</sup> Mbiralime mana koore biragola mo tiga nabi bame yupe holenebi mendealime ko nabini kago bame pani mulenebi mana kira ogonilabo Anduane Homogo ibu hame naleore ka.

<sup>16</sup> Wali agali mbirali mitangi bayale nabiaga kagome ibu mini gigabi wulene hame naleyagua irane aginaga ibu sigulu muni wule yalu ibinidabe.

<sup>17</sup> Nenege bayale karume ta nabi horo bibahendengi gubalini haabo haga. Anigo ina genda yu kamangi ina hamenerume yamogo bule ibaga ka.✠

<sup>18</sup> Agali mbiralime dano mbirame hene ngago ibugua mibe nahe howa ina muliya layagua ibu mini nawi ka.

<sup>19</sup> Ko bulene hamelo kago ibugua wai bilo mo bia haga. Mine haabo haga karume mo ko holene hai biaga.

<sup>20</sup> Mbiralime ko hangu mitangi bialu bi ko hangu laabo haga kago ibu bayale mbira handa walia nahe ko dege hondolebira.

<sup>21</sup> Waneiginime ti mini nawi howa ko biaabo haga kayagua ti aija abalame miniha genda howa dara ho haabo holebira.

<sup>22</sup> Miniha turu holene ogoni marasini wali agali mo bayale haga ale nga. Anigo wali agalinaga mitangi bulene dindiha haabo haga kayagua ogoni warago ko mbiralinaga kuniha mo ko hama anda piagago ale nga.✠

<sup>23</sup> Wali agali karu tinaga godi la helo lowa tigua godi dabaga tiga nabi kagohondo muni ohowa miragola godi dabaga biago ibu muni mo yu howa godi tigatiga lolene ngadagua ndo lolebira.

<sup>24</sup> Wali agali mandabi mini dingidangiale kagome mana birago tigabi hangu bule manda bulebira. Anigo mini nawi kagome mbirale ngaruni bia dege dindi halu hariga ngaruha pu dege dindi holebira.

<sup>25</sup> Waneiginime mini nawi howa mana nakarulape bialu haabo hayagua tigua ti aija abala tandaga gendabi holene mo yu anda ibaga.

<sup>26</sup> Godime lalu howa agali ko nabi kago yolo bia layagua ogoni nakarulape. Agali mini lene karume mana tigabi biyagonaga gewame bolene ogoni nakarulapeore ngagoni.

<sup>27</sup> Mbirali mini bayale gigabiwi kagome bi nahabane nalolebira. Mitangi bayalebi kagome keba abale naholebira.

<sup>28</sup> Anigo mbirali mini bayale nawi kagome ibu bame bi nale ne hambu ndibulo hayagua marume mitangi bialu ogoni ibu mandabi mbira kagoni lolebira.✠

✠ 17:13: Yar 18.20, Lm 12.17, 1 Te 5.15, 1 Pi 3.9 ✠ 17:17: Lud 1.16, Min 18.24 ✠ 17:22: Min 12.25, 15.13-15

✠ 17:28: Min 10.19

## 18

<sup>1</sup> Mbiralí íbu wálí agalí maru heba nahaga kayagua ogóní íbu íbuní hangú mítangí haga ka. Íbugua wálí agalí marume mítangí bayale biragonaga hame nale howa láí lolebira.

<sup>2</sup> Mbiralí miní nawí kagome mítangí bayale bulenebí manda bayale bulenebí tanabí hame nalaga ka. Íbugua biagago damene mine halu íbu manda bíaihe tingí howa biaga ka.

<sup>3</sup> Ko biaga karume maru karu tí habane nabulene kagoní laga. Aní lowa tigua maru mo taga halu tinaga miní mo ko haga.

<sup>4</sup> Miní bayale gígabiwí kagome bí larago galone dewa pale. Iba bíru tólalu pugulo tagítagi bíalu piagadagua miní gíga bulene ogónime tólotagíhe howa laga ka.

<sup>5</sup> Mbiralíme ko bídagola godíní howa bíamogo bíalu laholene nawí. Mbiralí ko nabíní biago íbu godíní howa yó píalu polene winígoyu ína haríga hangái haregome mana ogóníbí bulene nakarulape nga.

<sup>6</sup> Miní nawí kagome wálí agalí maru baba bí láí hangú lalu kayagua tigua íbunaga bí ogóní hale howa íbuní belonaga dano biaga.

<sup>7</sup> Mbiralíme mítangí bayale nabí howa bí layagua íbunínaga bí laragome íbuní mo ko halu gono ngagoha wiradagua biaga.

<sup>8</sup> Wálí agalíme díburíbu laragola íname turu halu hale hoá haramalí. Bí ogóní tomo dendebí naramalígo bídagola hale hole dendeho haramalí.✧

<sup>9</sup> Bíabe bulene mangahe kago íbu mbírale mo ko haga kagóbí ka.

<sup>10</sup> Anduane Homogo íbu anda mbíra hongóhe hagagóbí kagoní. Anduane Homogo ogóníbí kagola wálí agalí miní tígabiwí karu tí gerai puwa íbuha bayale ha do holebira.

<sup>11</sup> Wálí agalí homogo karume tanonaga pabe hongóheme payanda hagadagua tinaga múní ngarume tíni pabe bíá anda kagola bayale kamalo manda bíalu haga.

<sup>12</sup> Mbiralíme mine halu íbunínaga miní yaraga hayagua ogóní íbu maní mo ko holebira. Íní alá mo díndíha naharíyagua í miní lene ndo holebere.

<sup>13</sup> Bí larago baya hangú hale háí howa maní ína ládái bulene nga. Ogónídagua nabíríyagua ína lulubí lagadagua lowa maní íní taga holene wulebira.

<sup>14</sup> Mbiralíme warago bó wúwa íbunaga mínime holene hame layagua ogónídagua manda bíragome íbu mo dábí holebira. Anígo íbunaga mínime holene ogóní galone ndo manda bíyagua nde anídagua manda bíragome íbunaga holene ogóní abale yupe haga.

<sup>15</sup> Wálí agalí manda tímibuníbí karume manda bulene maru mendealíme lawái harago hame lowa abale mo yái hole hale ho holebira.

<sup>16</sup> Ína agalí haguane mbírala bí lole manda búwa íbu mo turu halu mule mbírale mbíra yalu píríyagua íbugua í henge ngíalu íbu lolebira.

<sup>17</sup> Mbiralíme godí dení howa bí pígame larago bayale tígatíga hangú lene mbau lolebira. Agalí marume hale halu bí ogóní mo wála ha laragola agalí ago íbu wáyalí holebírabé manda bíbé náhe.

<sup>18</sup> Agalí manda tímibuníbí kírame godí laragola mo tíga nabíbeheyagua godí hale hagame tadú ale tólé emene baraga halu agalí aí íbu wáyalí hayadabé hondolebira.

<sup>19</sup> Ína í hamene míníha keba ho helaríyagua wálí agalí maru anda naíbíló tanonaga pabe payatagí hagadagua íbunaga mítangí bulene paya anda haregola í hame nale howa bí nalolebira. Anígo agalí kíralí láí lo howa mo tíga bíalu líbu gí tígání nabíyagua ogónime haríga hangái kagola líbu miní mo mbíraóre hábe náhe panga hongóheme payatagí kagola anda póbe náhe hagadagua holebira.

<sup>20</sup> Bi laregonaga lini iniore nalu holebere. <sup>21</sup> Ina bi laregome wali agali karu bayale helo biamogo bialubi mo ko halubi larili. Ogoni manda buwa ina bi bayaleru hangu lole manda biriyagua bayale holebira.

<sup>22</sup> Ina wandari mbira dabu biriyagua ogoni bayaleore. Ani biriyagua Anduane Homogo ibugua ihondo turuho ka lalu walia ho kegoni.

<sup>23</sup> Yagibano kagome homogo kagohondo ibu biamogo bia lalu bi hendore laga ka. Anigo homogo kagome yagibano ladai bialu bi bayale ndo hongo howa ladai biaga.

<sup>24</sup> Wali agali dewa nenege hinariru i yu wahalu piai holebiragoyu maru mbira mbira hangume i hamene mbalinila haradagua ndo iha haparaore holebira.✧

## 19

<sup>1</sup> Mbirali ibu yagibano howa mini tigabi kayagua ibugua mbirali mini nawi howa ke haga kago bolanguahe ka.

<sup>2</sup> Wali agali mbiralime mbirale mbira bialu howa ogo ale berolo manda nabi howa bialu hayagua ogoni nakarulape bira. Mbiralime biabe mbira ala bigi bule manda biyagua biabe ogoni biako holebira.

<sup>3</sup> Wali agali marume mini nawi howa biyagome tini mo ko howa mani Anduane Homogohanda ko ogoni ibilayada laga ka.

<sup>4</sup> Homogo kago ibu nenege dewa haga ka. Anigo yagibano kago ibunaga nenege kagome ibu yu wahalu poragola nenege mbira naheore holebira.

<sup>5</sup> Ina godi lalu howa ke halu lariyagua i yo pialu polene nawi pani nolene wulebira.

<sup>6</sup> Wali agali dewalime mini lene karu ti mo dunini halu hamelo haga ka. Mbiralime mbirale mbira miaga kayagua wali agali dewalime ibu nenege hole hame lolebira.

<sup>7</sup> Agali mbira yagibano kayagua ibu hamenerume ibula holene hame nalaga ka. Ibugua ti katoria ladebodebo bima haparapara bima piyaguabi ibunaga bime mbira yamia nabulebira.

<sup>8</sup> Mbirali ibugua ibuni biamogo bule manda biyagua ibu mini bayale gigabi holebi manda bayalebi holebi hoa howa hai bulebira. Ani buwa ibugua manda bulene bayale ogoni ibunaga emboneha mo yu hayagua ibuni holene mani bayale dege holebira.

<sup>9</sup> Mbirali ibu godi lalu howa ke haga kago pani nolene ngagoria howa yo pialu napolebira. Ke haga ogonibigo tigua bo homelolebira.

<sup>10</sup> Mini bayale nawi kagome munibi mbirale marubi dewawi hayagua ogoni nakarulape. Garabaya biabe ale bia hagarume wali agali mini lene karu haru hayagua ogonibi nde nakarulape dege.

<sup>11</sup> I mini bayalewi keyagua i keba abale holigo inaga mini haru holene nga. Mbiralime ihondo ko biragola ina mitangi bu wiaabo nahe hariyagua bayaleore beregoni.

<sup>12</sup> Kinime keba hagago budi gabua ale laionome ngororo hongo howa lalu keba hagagobi haga. Anigo ibu miniha dungulo howa wali agali biamogo biragola dalu ibiragome datani bayale mo anda hagagobi haga ka.

<sup>13</sup> Waneigini mini nawi karume ti aija abala mo genda timbuni holebira. Agali mbira one ibu wali keba abale hagabi lai laabo hagabi bedago ogoni ibu anda dangiha diri ngagola iba emene bondo laabo haradagua biaga beda.✧

<sup>14</sup> Aba aiyame munibi andabi iname hondo holomaya ngibehe kagoni. Anigoyu Anduane Homogo ibugua hangu ina agali kamaruhondo wandari mini bayalewi ina one berelo ngibehe kagoni.

<sup>15</sup> Wali agali mangahe karume u hangu paliaabo haga ka. Wali agali bame gi pauloyu bira hangu biaga karu ti tomo nolene nawidagola garibilo haabo holebira.

<sup>16</sup> Ngode Datagaliwabenaga bi mana lo ngaru talialu biaga kago ibu bayale haabo holebira. Ngode Datagaliwabe mana lo ngaru talia bia nabi erembira miaga kago ibu homolene wulebira.

<sup>17</sup> Ina yagibano karu dara howa mbirale miriyagua í Anduane Homogola dano haradagua bidego mani ibugua íhondo yadai bulebira.

<sup>18</sup> Tí naga waneigini emeneni howa mini bayale wilo mo tiga bilimu. Ani nabi helarimiyagua mani tini hama pialu ha ko holebira.

<sup>19</sup> Mbiralí keba abale haga kayagua ibuni ko biyagonaga genda yu helo wahabe. Ina ibu genda yu kago biamogo biriyagua nde manibi ina ibu lone biamogo dege biaabo holebere.

<sup>20</sup> Mbiralime í lawai haragola ina bayuwa hale howa mitangi bayale bulene talebu ngirago mo yu hariyagua mani í mini bayale gigabi wulenebi manda bayalebibi holebere.

<sup>21</sup> Wali agalime mbirale tara tararu bule lowa mandabu wiaga. Ani manda bu wiagago Anduane Homogo ibugua bule manda manda bu wini ngago dege tigua bulebira.

<sup>22</sup> Mbiralime buleore lalu bi hongo howa lo wiyago biaga kago wali agalime ibu hameore laga. Yagibano holene nakarulape howa yagibano karu tigua ke haga kago bolangua howa bayale kagoni.\*

<sup>23</sup> Ina Anduane Homogonaga andaneha hariyagua ibugua holene gahenge ngiaga ka. Ani ngiragola yu howa í bayale haabo halu mo ko holene mbira í kegoria nawulebira.✧

<sup>24</sup> Wali agali maru mangahe kagome tomo ngago gime mialu ne harigaha nolenebi manga dege haga kagoni.

<sup>25</sup> Mine haga kago mana lalu minu bariyagua mini nawi kagome barego de hondowa ibu manda bialu mini bayale wulebira. Ina mbiralí mini bayalewi kago mo tiga biriyagua ogoni ibu manda bayale bialu mini bayale gigabiwi holebira.

<sup>26</sup> Waneiginime ti aija bo batagi halu ti abahondobi ko dege bialu hayagua ogonime ti damene mo tagaore haragoni.

<sup>27</sup> I waneigini-o tí mini bayale gigabiwi holenaga mana bayale lo manda bulene manga harimiyagua mana áyu yu kamigo wahalu tí mini nawi holeberemi.

<sup>28</sup> Ko biaga kagome godi deni wiyanaya hayagua ibugua mo hondo haragome godi tigabi nadablebira. Ko biaga kago ibu mana ko ogonibi hamelalu dende haga.

<sup>29</sup> Bi ko laga karubi mendeali lahiraga karubi ti minu bolene wulebira. Mini nawi howa ko biaga karu tibi nde ani dege bulene wulebira.

## 20

<sup>1</sup> Agalime iba mbia dewaore nayagua bi ko taratara dewa lalu gungu bia dege dindi holebira. Mbiralí iba mbiame ibu haru helo hayagua ibu mitangi tigatiga nabiaga lulu ale ka.✧

<sup>2</sup> Hari kulu timbuni laga biragola wali agali bibahendeme mogo lalu gi hai hagamadagua kini kago keba harago hondowa wali agali gi hai haga. Kini kago keba helo lowa mo keba hariyagua ini homole andanda bialu kego homolebere.

<sup>3</sup> Lai lalu gungu bulene kaware nga handala wahalu erembira mialu piriyaagua í mini lene holebere. Ai wali agali mini bayale nawi kagome lai lalu gungu abale porabu paraho holebira.

<sup>4</sup> Agali mangahegome ibu mabuni tomo hongole dindi aluene ngangí alia nabi mangani wahayagua ibu ani biragome mabu ogoriani tomo wini mbira buyu pialu nanolebira.

\* **19:22:** Bi ogoni daga lowa bi mende manda bulene ogo. Mbiralime mbirale yu kago tale nabi ibuni hangu yu holene tagabiore nga. ✧ **19:23:** 1 Ti 4.8 ✧ **20:1:** Min 23.29-35, Ais 28.7, Hos 4.11



<sup>5</sup> Wali agalinaga mitangi bulenego iba uliha goriane biraradagua bidago mbirali dehe bogabi kago ibugua ibunaga bime miniha paliaruagoni haealo hondolebira.

<sup>6</sup> Dewalime ne harigaha howa ibu nenege bamba henegola haho wiaabo haruli lolebirago ogoni bame bime lara. Anigo mini bilinahe howa henene aniore biaganego mbirani mbira mbira kabe hondole hai bibe.✠

<sup>7</sup> Waneigini aba ibu agali mini tigabiwi howa mana bayale hangu biaga kayagua ibu waneigini karu ti turu habehe ka.✠

<sup>8</sup> Kini ibugua godi dabaki bule biragane dagiani biruwa godi hale hole ibiraru de hondowa ibugua ko bini bayuwa dabaluhanda walia haga.

<sup>9</sup> Mbiralime, Iha ko mbira nawi bayale tigatiga hene kogo áyubi ko mbira nabiore kogoni, lalu aiwa labehe kabe.✠

<sup>10</sup> Wali agalime mbiralinaga mbirale yolo mule yalu ibiragola genda magi handalu howa ke halu dibaudu haga karu tihondo Anduane Homogo ibugua turu nahaga ka.

<sup>11</sup> Iname mbirali ibunaga mana birago hondowa ibu ogobi ko lalu walia haragola handabehe kama. Ogonidagua dege waneiginiru tigua biragome ogobi kama lalu walia haga kagoni.

<sup>12</sup> Anduane Homogohanda ina de hondolomaya inahondo de ngialu hale holomaya halebi ngiaga ka.

<sup>13</sup> Í palia hangu biaga keyagua mbirale nayi yagibano holebere. Anigo ina biabe biaabo hariliyagua tomo nolene dewa bu payabu wuwa karulapeore nalu holebere.

<sup>14</sup> Mbiralime mbirale mbira yolo mule howa ogoninaga yolo daligaoreda lowa bi dewa laabo haga. Ani lowa ibugua mbirale wiago yolo buwa ibunaga nenegeruhondo balagala halu lalu, Ogoni yolo dindiha winiyago miru, laga.

<sup>15</sup> Ina manda timbunibi howa wali agali mo wala halu bi laregome ngolo silibabi tole marubi muni timbunime miaganerubi ndo uruni ina bolanguahe holebere.

<sup>16</sup> Mbirali ibu dano henego ibunime mibe nahedagola mendealime ina mia holiya lo kayagua ogoni ibu mini nawi ka. Anigo mbiralime ihondo dano hole ibiragola ibunaga mbirale mbira í mo yu hole manda bibe. Mani inaga dano hayago ngiragola ibuni yadai bule.

<sup>17</sup> Ina ke halu mbirale mirigoni tomo dendebe ale manda bialu yu ke. Anigo mani howa inaga ne harigaha iba mu tolo tagiho hayu hene mbau lolebira.

<sup>18</sup> Ina biabe mbira bule mitangi bialu howa bayale bulenaga mini giga bulene ala hai bibe. Ina waitigi baba wai bule manda biriyagua wai agua buledabe lo manda bibe.

<sup>19</sup> Wali agali bi diburibu laga karu tihondo bi hagarere lalu lamirigo tigua bi ogoni maruhondo abale lamigi bima polebira. Ani bulebirago diburibu dewa laga kago baba nenege holene nawi.

<sup>20</sup> Ina inaga aija abalahondo bi ko lalu ha hariyagua hale lamu hundiragola arumaha hagadagua inaga holene abale ereba holebira.

<sup>21</sup> Mbirali ibu aija abala homa nabi kaore paluni ala karulole manda biyagua mbirale uruni bayale wu ha nabulebira.

<sup>22</sup> Mbiralime ihondo ko biyagua ina ko biadai bule manda nabibe. Anduane Homogohanda inaga genda ogoni mo tiga bilo lowa ibunaga giha ngelowa ibuhondo mini mbiraore wu habe.

<sup>23</sup> Wali agalime mbirale yolo bule biragola agali mbirame genda magi handalu howa ke hayagua Anduane Homogo ibugua o biagohondo turu nahagaore ka.

<sup>24</sup> Ina dindini kamangi hariga pialu holomayanaga Anduane Homogohanda manda mandabu ngela haga ka. Anigo mbiralime ibu polene hariga ogoriani pialu holebero lalu ibuni hangume manda bibe nahe.

<sup>25</sup> Ína Anduane Homogohondo mbirale mbira mule howa mitangi ala bayuwa buwa nguliya lalu tigatiga lo wibe. Abale hibilaba lo howa nguliya lariyagua mani mini dege dindi holene wulebira.

<sup>26</sup> Kini mini bayale gigabiwi kagome godini dabaki halu howa mbiralime ko biyago handa walía halu dara nahe pani mulebira.

<sup>27</sup> Inanaga dinini Anduane Homogohanda wá hagane hale lamu ale ngingo iname bibahende mitangi beremarubi mana beremarubi bayuwa dabalú hondolomayanaga ngini.

<sup>28</sup> Kini kagomeibunaga wali agaliruhondo tigabi dege bialu ti dara howa biamogo biyagua ibu bayale haru halu lu haabo holebira.

<sup>29</sup> Iname igiri hongohe dalíahe kago hondowa turu haramali. Wali agali wahe dagua-heru kago hondowa iname ti bayuwa mitangi bialu tinaga mini yaraga holeberema.

<sup>30</sup> Mbiralime ko biragola ína tibume bariyagua mani ogonime ko biyago erembira mialu ibu bayale miniwi holebira.

## 21

<sup>1</sup> Anduane Homogohanda iba ganaha pelagadagua ibugua kininaga mini mandaru ibu hame ledadagua bilo mo tiga bialu haru haga ka.

<sup>2</sup> Ínime manda bialu keria mbirale ína bialu keruni bayale dege bialu ko manda birili. Anigo Anduane Homogohanda í miníha mitangi bu keruni manda biai howa irane ogonaga ani berego lalu manda biai ho ka.✧

<sup>3</sup> Iname mana tigabi ngaru bialu holene bayaleore nga. Anduane Homogohondo lomabu meremago nira lowa mana bayale tigabi uruni bialu holenegoibunaga deni duniniore nga.✧

<sup>4</sup> Mana ko biaga karu tigua mine haragomebi balagala haragomebi ti haru haragola mana ko dewa tiha tolo tagihe holebira.

<sup>5</sup> Biabe biaga kago ibu minime manda ala buwa ogo aleore bulebero lalu biyagua ibugua mbirale bayale dewa yu haga. Anigo mbirale miníha mitangi ala nabi howa abale bupebe biyagua biabe ibugua birago bayale ndo halu ibu mbirale tubagiho haabo haga.✧

<sup>6</sup> Mbiralime mana ke halu mandabi tingi howa mbiralinaga mbirale mbirale ngaru homogo holenaga dewa mo yaga heagua ogoni ibu homolenaga harigani pu ka. Ani wu kagolaibunaga muni dabudabu wiyaruni ereba hai hole emene tigi mbira hanguni harini ginu wiagagobi nga.✧

<sup>7</sup> Mana ko biaga karume mana bayale bule hame nalaga howa tigua maru karu bo wahagahaga biragome podene maru tiniha dai bialu tini mo ko hai holebira.

<sup>8</sup> Mbiralí mana ko biaga heagua ibugua mana ko bima puabo holebira. Ai mbiralí mana ko nabiaga bayale heagua ibugua mana tigabi ngaru bima puabo holebira.

<sup>9</sup> Agali mbiralí ibu oneme lai laabo hayagua anda mbiraoreha paluene emene bayale lowa agali ibu tagira pu holenego bayaleore nga.✧

<sup>10</sup> Mana ko biaga karume mana ko damene ngaru bulene garibilo haabo haga. Ani bialu tigua maru karu dara nahaga ka.

<sup>11</sup> Mbiralí mine halu balagala haga kago pani mirago hondowa maru mini nawi karu ti deme handalu minime manda bialu irane handa walía haga ka. Anigo mbiralime mana lawai haragola mini gigabi kagomeibunaga manda bulene wia tago holebira.

<sup>12</sup> Anduane Homogo ibu mana tigabi hangu biaga kago ibugua mana ko biaga karume tini andaga tamuha biruwa bia do halu karubi heba dehandai haga ka. Ani hondowa Anduane Homogo ibugua mana ko uruni ale biaga karu mo ko hai holebira.

✧ 21:2: Min 24.12, Lg 16.15 ✧ 21:3: Iba 50.8, Ais 1.11, Hos 6.6, Mai 6.7-8 ✧ 21:5: Min 10.4, 13.4 ✧ 21:6: Min 10.2 ✧ 21:9: Min 21.19, 25.24

<sup>13</sup> Yagibano karume ti biamogo bia lalu í olaragola ina hale nahe tingi halu piriyaagua mani marume ini nde biamogo bia lalu olariyaagua tigua hale nahe tingi halu í biamogo nabi wahalu polebira.✠

<sup>14</sup> Mbiralime ihondo keba hayagua wali agali marume nahende kaha libuni hangu howa ibu mo turu halu mbirale mbira bame ibu mibe. Ani meregolaibunaga keba ho hayago ereba holebira.

<sup>15</sup> Wali agalime mana bayale bilonaga lo tiga biragola wali agali mini tigabiwi karume de hondowa ti turu haga. Anigo maru mana ko biaga karume de hondowa tinaga bu miniha genda timbuni ho haga.

<sup>16</sup> Mbirali ibu mini gigabi wulene hariga ngago yu wahalu piyaagua ogoni ibu homalu homene dininiru baba humbirini andaha hama polebira.

<sup>17</sup> Mbirali ibu tomo bayale noleneru waini iba nagimbu buleneru mo tene halu turu howa awadaga holene hamelo heagua ndeibunaga muni biba halu mbirale bibahende tubagi hai holebira.

<sup>18</sup> Mini kowi karume mbirali bayale tigabi kagoha genda mo mule manda bialu karia genda biago lone mini kowi biaru tini karia íbu dai biaga.

<sup>19</sup> Agali mbirali ibu oneme lai lalu gomogomo laabo hayagua anda mbiraoreha paluene emene bayale lowa agali ibu tagira pialu dindi ko wali agali nahaga ngagoha holene ogoni bayaleore nga.

<sup>20</sup> Mbirali mini gigabiwi kago ibu andagaha mbirale bayale ngaru dewaore mo wiaga. Anigo mbirali mini nawi kago ibuguaibunaga mbirale anda ibiraru abale mo hole biai haga.

<sup>21</sup> Mbirali ibugua mana bayale ngaru talialu bialu wali agali maru karu gubalini halu hayagua ibu holene bayale yu holebira. Ani biragola marume nde ibuhondo mana tigabigo hangu bialu tigua ibu mini lene ka lolebira.

<sup>22</sup> Mbirali mini gigabiwi kago ibugua ami agalime wai bialu tano mbira karulelo wai hono miaga ka. Tano ogoniha haga karume manda bialu wai pabe hongohe kagodago waitigi karume wai anda ibalu bo poda nabulebira lo manda bu haga. Ani manda bu karia waitigirume wai pabe podama anda pialu tano karulaga.

<sup>23</sup> Wali agalime tininaga ne hambu haru howa bi laga heagua uruni tiha genda naanda ibaga.✠

<sup>24</sup> Mine haga karume balagala howa maru karuhondo mege bialu haga. Ani bialu howa horo bibahendengiibuninaga mini hangu mo yaraga halu haabo haga ka.

<sup>25</sup> Biabe bibe manga haga kago ibugua biabe nabi howa mbirale bame awadaga mo yu holene hamelo karia nayiore halu hame loleneme ibuni balu homelolebira. <sup>26</sup> Mangahe o biagome mbirale dewaore bame yulene hangu mitangi bialu haga. Anigoyu mbirali tigabi biaga kago ibugua maru karuhondo mbirale turu halu bame tale bialu miaga ka.

<sup>27</sup> Anduane Homogo ibugua ko biaga karu tinaga lomabu mirago hondowa ibu turu nahaga ka. Mbiralime mo hondo howa mana lehe biagarume lomabu miyagua Anduane Homogo ibugua mana ogoni ko ngubioroda manda biaga ka.

<sup>28</sup> Mbiralime ko birago mendealime ina handaru lowa ibu ke haga kayagua ogoni ibu homolene wulebira. Anigo mbirali ibu bi baya hangu hale hagame bi layagua maru bu karumeibunaga bi larago baya hangu hale haga.

<sup>29</sup> Mbirali mana ko biaga kago ibu ke halu ohowa ibu agali tigabi hetingi haga. Anigo mbirali tigabi bayale biaga kago ibugua mana birago bibahende bayale helonaga mamage howa biaga.

<sup>30</sup> Í Anduane Homogola waitigi hariyaagua íha mini gigabiwi kegobi manda bayale bu kegobi maru ale ngaru biaga mugube yu kegobi uruni bibahende nagalone hai holebira.

<sup>31</sup> Ami agali karume wai bu polenaga nogo hosiru mo manda manda biaga. Ani biagago Anduane Homogo ibuni degeme tigua wai bialu mo wayali helaga ka.

## 22

<sup>1</sup> Mbirale dindi dabudabu bu payabu wuwa homogo holeneho nagalane lowa wali agalime abogo mini tigabi mana baya gibi biaga ka lene holeneho bayaore gibi duniniorego ogoni dabolene nga.✧

<sup>2</sup> Wali agali homogo karubi yagibano karubi bibahende Anduane Homogohanda wabini dege bu ka.

<sup>3</sup> Wali agali miniwi dehe karume handalu karia genda bulene ti kagoria anda ibaruane handalu ti ala igilo mialu haga ka. Ai mini nawi karume genda bulene ti kagoria anda ibule ibiraria handa hondowa dege o ibiragoniha porabu ya howa mani tini genda yu haga ka.

<sup>4</sup> Inime ini mo dindiha halu Anduane Homogohanda laradagua bialu ibu andaneha hariyagua homogo holenebi mini mo yaraga holenebi bayale holenebi uruni yu holebere.

<sup>5</sup> I holene bayale hame laryagua wali agali mini kowi mana ko biaga karu minigi biaga gono harigani waga bidago uruniha ti do wiagadagua i gono uruniha do wuleni hariga balalu pugu bibe.

<sup>6</sup> Waneigini emene bidaore mana bayale bulene abale biawai habe. Ani biriyagua awe wahe haragolabi mana bayale bulene ogoni yu wanaholebira.✧

<sup>7</sup> Wali agali yagibano karume ti homogo karunaga garabaya biabe ale biahaga ka. Wali agali muni danoho karu ti muni anduane kagonaga garabaya biabe ale biahaga ka.

<sup>8</sup> Mbiralime mana tigabi ndo bialu hayagua ibu kagoria genda dewa anda ibulebira. Ani ibiragola ibugua wali agali maruhondo ko bibe nahe holebira.✧

<sup>9</sup> Mbiralime mbirale ngaru yagibano karuhondo turu halu miyagua Anduane Homogohanda o biagohondo turu howa bayaleore biaga kagoni.

<sup>10</sup> Wali agali mine haga karuni bo batagi hariyagua lai lolenebi bi ko lolenebi mege bulenebi ereba holebira.✧

<sup>11</sup> Mbiralime horo bibahendengi Anduane Homogonaga deni howa ko mbira nawi tigabi hangu hole hame lagabi ibunaga bi bayale lagabi kayagua kini kagome ibu nenege bu hinulebira.

<sup>12</sup> Anduane Homogohanda mbirali manda bayale bidaru baya hangu mamage haga ka. Ibugua mbirali ke haga kagome bi lararu mo nahabane haga ka.

<sup>13</sup> Wali agali mangahe karume andaga hangu biraabo haga ka. Tigua ogodagua mitangi biaga. I tagira pialu koria laiono gabua mbira harigani kagome i bo nolebira, lo mitangi biaga ka.

<sup>14</sup> Wali ko biaga bedagome de duguyu agali hangu tai bima ibaga bialu howa ibunaga bi larago gundu uli mbira unuraore handape habe nahe ngagobi laga. Anduane Homogohanda agali mbiralihondo keba howa pani mule kago ogoni ibu uli ogoniha pilope helolebira.

<sup>15</sup> Waneiginirume bayuwa mitangi nabi howa mana ko bialu haga bulebira. Anigo ina ti mini wilo tibume bariyagua tigua mana ko ogoni nabi waholebira.

<sup>16</sup> Mbiralime yagibano karunaga mbirale ngaru ibu mo yayaguabi homogo karuhondo turu halu mbirale miyaguabi ani biragome ibuni yagibano holebira.

*Agali mini bayale gigabiwi hearume bi bayale pira tebira (30) lenego uru*

<sup>17</sup> Ina ayu agali mini bayale gigabiwi karubi mandabi karubi tigua bi lenego lawai hole hameledo. Ina bi ogoni langerogo baya hangu hale howa mitangi bibe. <sup>18</sup> Bi ogoni inaga

miniha mo yu hariyagua ína maruhondo lamialu howa í miniha dungulo holebere. <sup>19</sup> Ina í Anduane Homogohondo mini mbiraore wibelonaga hamelowa áyu ogoni bi mbira hale habelo larogoni. <sup>20</sup> Í mini bayale gigabiwi halu manda bayalebi habelonaga ína bi bayale pira tebira (30) uru í lawai hole gilibu wero. <sup>21</sup> Bi ogoni hale howa í henene lolenenaga irane manda bulebere. Agali marume bi henene agodabe dabile pu larangi ína handa walia howa bi tigabigo tihondo ladai bibehe holebere.

<sup>1</sup>  
<sup>22</sup> Ina manda bialu yagibano karu ti habane nabulene ka lowa tinaga emene ngaru namo yabe. Ti godi lo piyagua godime ti hingedape helo manda buleni. <sup>23</sup> Ogoninaga irane Anduane Homogohanda yagibano ti dara howa biamogo bulebira. Mbiralime yagibano karuhondo ko biyagua Anduane Homogohanda o biagohondo pani miadai bulebira.

<sup>2</sup>  
<sup>24</sup> Ina wali agali keba abale haga karu heba nenege nahabe. <sup>25</sup> Ti heba nenege haabo hariyagua mana ko tigua biaga ngarume íbi dariba halu mani í mo ko holebira.

<sup>3</sup>  
<sup>26</sup> Wali agali mbirame dano henego ibuni namibehedagola ína mia holiya lowa habo nalolene bi nalowibe. <sup>27</sup> Ina dano biago yadai nabibehe kegola tigua ínaga mbirale bibahende ngeru mo yai halu paliaga dagia heba ungu yuligo dege manda bibe.

<sup>4</sup>  
<sup>28</sup> Inaga mamalirume dindi tu bamba winigo ína mo ya ai nai nabibe.✧

<sup>5</sup>  
<sup>29</sup> Agali mbira biabe bayale monehe biaga kago ogoni ibugua kininaga biabe bia holene karulapeore holebira. Agali ogonibigome agali mini nalene karunaga biabe biahabe nahe holebira.✧

## 23

<sup>6</sup>  
<sup>1</sup> Í agali homogo kago baba tomo nalu biruwa í miniha mitangi ala bayuwa bu biruwa nabe. <sup>2</sup> Í tomo timbuni naga keyagua ínaga noa holene haru howa haru narugo mangaba labe. <sup>3</sup> Tomo timbuni nabelo ngiragome bu mini bamialu ibugua í mo hondo holigo de hondo habe.

<sup>7</sup>  
<sup>4</sup> Homogo hole lowa erekui biabe bereria íni abale wahe halu mo ko holigo de hondo habe.✧ <sup>5</sup> Muni dewa bu hombedo yu ha hariyaguabi abaleore ereba hai holebira. Babaganehe ega bodo hariawe yagalo yalu hariha iraga haradagua muni yidegoni babaganehego de handaya haregola abaleore yagalalu polebira.

<sup>8</sup>  
<sup>6</sup> Agali tomo ibuni hangu nole habua biaga karu heba mandagi tomo nalu nahabe. Ibunaga tomo bayale dendebiore ngago hondowa dimagoli nahabe. <sup>7</sup> Ina ibu heba tomo nalu birariyagua ibugua íhondo ogodagua lolebira. Ae tomo bayale dewa ngaruni íni hameme noa biradagua narene, lalu bame lope howa ibugua í henemane mitangi bialu mo turu halu ndo lara. Ibuni miniha mitangi ko bidagobi lolebira. <sup>8</sup> Ina agali ogoninaga mana hondo manda berengi abale o narigo magu tagu tagi hoa holebere. Ani buwa ína ibuhondo bi la debodebo bialu larigobi bame galone ndo laruda manda bulebere.

9

✧ 22:28: Man 19.14, 27.17, Min 23.10 ✧ 22:29: 1 Kin 11.28, Min 10.4, Aga 9.10, Md 25.21, Lm 12.11 ✧ 23:4: Min 28.20, 1 Ti 6.9-10



<sup>9</sup> Wali agali mini nawi karuhondo bi bayale nalabe. Ína bi bayale manda bulene lamiriyagua ibugua mo himu bagabu waholebira.

<sup>10</sup>

<sup>10</sup> Dindi tu bamba wini ngago dugu ai nai nabibe. Waneigini hono wahene aba aiya nahe karunaga dindi ngarubi page karu nalabe. ✧ <sup>11</sup> Irane Anduane Homogo ibu hongo gibihe kagome dindi ogoninaga lalu bi laramingi waneigini hono wahene uruninaga bi Anduane Homogo ibunime la holebirago haya nahabe.

<sup>11</sup>

<sup>12</sup> Marume mana bayale í lawai haragola o lawai haragoni ína bayuwa hangu hale mia howa manda bialu mo yai habe.

<sup>12</sup>

<sup>13</sup> Wandari igiribi kagua biragola tígua boliya hondo ha dege nalalimu. Abale mini wilo babe. <sup>14</sup> Mini wilo bolene ogonime ibu homolenehayagi napelo holenehayagi helonaga biamogo buleberami.

<sup>13</sup>

<sup>15</sup> Í igini-o í mini bayale gigabiwi hariyagua í turuore holebero. <sup>16</sup> Ína mini bayale gigabiwi howa bi larego hale halu ína ínaga miniha turu taraore ho holebero

<sup>14</sup>

<sup>17</sup> Agali ko biagarume mana biagago í hame nalabe. Í Anduane Homogonaga andaneha hole hongo haabo habe. <sup>18</sup> Ína ogonidagua biriyagua mani bayale halu í abale homa nabi mini dunubiahe holebere.

<sup>15</sup>

<sup>19</sup> Í igini-o ína bi larogo hale halu mini bayale gigabiwi habe. Í ibagabu kego baya hanguore minila haru ibagabu habe. <sup>20</sup> Agali waini iba timbuni nagimbu biaga bababi tomjegene yabagi howa tomo timbuni nagimbu biaga bababi mandagi ibagabu holeni. <sup>21</sup> Lulu iba nowa lulu yaga karubi tomo timbuni nagimbu biaga karubi áyu dege yagibanoore holebira. Tomo timbuni nolenegobi iba mbia naabo holenegobi nowa bame u hangu palima ibaga biriyagua aga ko budu pugubigo bu holebere.

<sup>16</sup>

<sup>22</sup> Í aba nahenedale í áyu kegoni nakelego í abahanda laradaguaore bayuwa hale halu bibe. Í aiya wahe bedangi í áyu kego habelo hondo heneyagonaga turu halu biamogo bigi bibe.

<sup>23</sup> Henene loleneru mini bayale gigabi wuleneru mbirale bibahende manda taratara buleneru miniwi holeneru mana uruni alego yu hole hongo habe. Mana uruni ale yu howa bulenerunaga yolo agi ale mibehebe. ✧

<sup>24</sup> Waneigini ti mini bayale gigabiwi howa mana bayale hangu biaga kayagua ti aiya abala libu miniha turu timbuniore holene irane nga.

<sup>25</sup> Í aba aiyalame í hondowa miniha turuho helo mana baya o langiruruni bialu habe. Í aiyahanda í taba henegonaga embeda holeni ibu turu ho berelabe.

<sup>17</sup>

<sup>26</sup> Í igini-o ína bi laga berogo baya hanguore hale halu mana ína bigi berogo handalu ína íhondo turu halu í berodagua bigi bibe. <sup>27</sup> Bayanda walibi wali maru agali page biagabi bedaruni hinawai uli ale ngagoha igiri agali ogoniha pilope haga biraru wialu tongolo migi bulebira. <sup>28</sup> Pagealime mbirale page bule haradagua wali ogoni aleme agali au bolangua harabe hondole lowa deyu haga biaga beda. Wali ogoni aleme agali

dewa mo gabua henego ti one waneigini wahowa wali ogoni ale bedagoha taya bima ibaga bialu kagoni.

18

<sup>29</sup> Agali maru genda timbuniore yu howa agi bule birudabe lowa tini dara halu hearuni agali aruyabe. Bi timbuni lagimbu bialu hearuni agali aruyabe. Dongone motudu wuwa dege haabo hearuni agali aruyabe. Agali de daramabi hearuni agali aruyabe. ✧ <sup>30</sup> Uruni bibahende ti agali iba mbiabi waini ibabi lulu iba taratara ngaru naga hearuni agali uruni ndoyabe. ✧ <sup>31</sup> Waini ibame í mo pila holani de hondo habe. Deme handaregola baya de hondoabi wialu naregola bame kembobeha heyolope holene awadaga wulebira. <sup>32</sup> Ani anigoyu mani howa handalu keria puya tomia palegome í hayalu piyabe toba holebere. <sup>33</sup> Ínaga mitangi bulenego mo ko henedago mbirale taratara ínaga denguini bilingi bolangu biraria hondolebere. Ani bialu ne harigaha howa bi taratara ngagoni la dege dindi halu lulu bi dewa iba duguaradagua bulebere. <sup>34</sup> U pialalu keria íni tamuni ndo garo mo liahaga bima pialu kagoria erembirani palirube toba holebere. <sup>35</sup> Ani bialu ína bi agua lolebere. Agalime í balu piyago nahende paliruda, lolebere. Í padogo heyabe nahedagoni irane aginagadabe. Ai í heyalu iba mbia mbira lone nolebero, lolebere.

## 24

19

<sup>1</sup> Wali agali ko biaga karu hondowa ína ti ale hoabagolo manda nabibe. Ti heba ibagabu hole nenege nahabe. ✧ <sup>2</sup> Tigua ko buleneru hangu mitangi biaabo halu tinaga ne harigaha howa bi laragome mendeali mo ko holenaga hangu laga ka.

20

<sup>3</sup> Agali mini bayale gigabiwi mbirale bayuwa mandabi kago ibunaga anda bayale holebira. Ibu one waneiginibi bayale hongohe dege holebira. <sup>4</sup> Agali ogonibi kagome mbirale taratara muni daligame miaga ngaruni muwa ibu andagani mo hombedo tagiho ngelaga ka.

21

<sup>5</sup> Agali hongohe holenego emene karulape lowa agali mini bayale giga biaga holenego bayaore gibi nga. <sup>6</sup> Kini mbira ibu hameigini mende kagola wai bule manda biyagua ala agali miniwi mandabi wai hanaga karume wai agua bimiya lalu bi lamirago hale holene nga. Agali mandawi dewa bu karume lamirago hale hai halu laradagua biyagua wai buwa wayali holebira.

22

<sup>7</sup> Mini bayale gigabiwi howa bi lolene ogoni daligaore taibi ngago mini nawi karume manda bibe nahe ka. Marume bi dunini laragoria mini nawi karume galone mbira labe nahe holebira.

23

<sup>8</sup> Ína ko bulene hangu manda biaabo hariyagua wali agali karume í ko biaga lene holebere. <sup>9</sup> Mbirali mini nawi kagome mana tiga nabi ngaru hangu bule manda biaabo hagago ogoni bibahende mana ko dege nga. Wali agalime handalu karia ogoni ibu maruhondo mine howa mege dege biaga kagonaga handabe manga haga ka.

24

<sup>10</sup> Í kegoria genda ibirangi í hongo ibira hayagua í gedaore dege haga kegoni. ✧

25

<sup>11</sup> Mbiralime ko nabi howa godime lo mbira halu o biago homelo bole lo wirangi ína puwa agali ogoni ba nabilonaga haru dai bibe. <sup>12</sup> Ína ogonidagua bulene ínaga biabe ndo lolene nawi. Anigo Ngode Datagaliwabe ibugua ína mitangi bia do keru handalu ína bi larerunagabi irane bibahende manda biaihe kagoni. Ani manda buwa ibugua wali agali hangu hangume biabe biradagua yolo mulebira.

<sup>26</sup>  
<sup>13</sup> Í igini-o ína mone ibane naregola ínaga ne hambuni dendebiore hagamadagua <sup>14</sup> ína manda bayale bulenebi mini bayale gigabiwi holenebi ogoni bayale dendebiore nga. Mini bayale gigabiwi hariyagua mani íni hama poregotha bayaleore mini dunubiahe holebere.

<sup>27</sup>  
<sup>15</sup> Mbiralí ibu ko page bibi howa ibugua wali agali mini tigabiwi kagonaga anda bangulalu tinaga mbirale ngaru mo page bule lowa wahondo bira do hagamadagua nahabe. <sup>16</sup> Wali agali mini tigabi karu dewa halu pilo ibira hayaguabi ibu lone heyu holebira. Anigo ko biaga karume ko bialu kagoria ibira haragola ti ko haiore ho waholebira.

<sup>28</sup>  
<sup>17</sup> Ínaga waitigi karu genda yu kago hondowa í turu halu gi habe nababe. Ti harigani pialu karia mbirale ngarume ge bobidi lenego tandaga howa kagola í hondo oba nahabe. <sup>18</sup> Anduane Homogo ibugua ínaga waitigi biaru pani mulene winigo í turu halu oba harigo hondowa ti pani namuligo í anidagua nabibe.

<sup>29</sup>  
<sup>19</sup> Wali agali mini kowi karume mana bigi birago hondowa í genda howa mini hululabu nahabe. Ínaga mitangi bulenego íni mo ko holigo ani nabibe. Ani bialu ko biaga uruni tigua bigi birago hondowa tigua biradagua bua howa hame nalabe.✧  
<sup>20</sup> Irane ti turu howa kagoni tigimandi áyu kanginaga kago mani anidagua naholebirago í ti biradagua bua nahabe. Wali agali mini kowi karuni lamu hale hundiradagua bibahende hundu tegelope haiore holebira.

<sup>30</sup>  
<sup>21</sup> Í igini-o ína Anduane Homogo mo dunini howa ibunaga andaneha halu kini kagobi mitangi bialu ibunaga mini mo yaraga habe. Wali agali karume Anduane Homogo minibi kininaga minibi mo yo handalu mine haga kagoria nahe í habagiho habe. <sup>22</sup> Wali agali urunibi kagoria mo ko holene abaleore íbu wulebira. Anduane Homogohandabi kini ibuguabi urunibi karuhondo genda abi aleore mo wia holobadabe manda bibe nahe kamagoni.

### *Bi bayale maru lenego ogo*

<sup>23</sup> Agali mini bayale gigabiwi hearume bi maru uru la dege bini. Agali godi dabaga kago ibugua wali agali ti godi lola ibirangi maru biamogo bia halu maru mo wahayagua ogoni tigabi ndo bira. <sup>24</sup> Godi dabaga kago ibugua mbirali ko biyago manani helenege bame golope hayagua wali agali dindi bibahendeni karume dabaga ogoni hame nale howa tigua ibu ha halu mege bulebira. <sup>25</sup> Anigo dabaga kagome tigatiga dabalú agali ko biyagohondo pani karulape miyagua dabaga ogoni ibu bayale howa mini lene holebira.

<sup>26</sup> Mbiralime íhondo bi tigatiga ladai biyagua ogoni ibu ínaga nenege heneneore kagoni.

<sup>27</sup> Ína anda mbira bule manda biriyagua ala dindi mbira mo tiga bialu tomo ogoriani hangabe. Ani buwa mani anda bibe.

✧ 24:19: Iba 37.1, Min 24.1

<sup>28</sup> Í mendealinaga godi wiyanaya pu hariyagua ibu ko nabi kagola ína ke howa hangedape halu manani nahelabe. <sup>29</sup> Ína bi ogodagua lolene nawi. Ibugua ihondo ko biyagobiore ína biadai bulebero, nalabe.

<sup>30</sup> Ina ibaga bialu howa agali mbiranaga mabu de handaru. Agali ogoni ibu mini nawi mangaheyane handaru. <sup>31</sup> Ibunaga mabu ogoriani datani aniherubi tani korubi andaho hearia handaru. Toleme pabe bu yaanda hene biagobi podope ho wia. <sup>32</sup> Ina mabu ogoni de hondowa mitangitangi bialu manda maru bayale birugo ogo. <sup>33</sup> Agali mangahe karume agua laga. Biabe nabi emene paluwa erehi dogolalu heyuliya, laga. ✧ <sup>34</sup> Ti ogonidagua bialu palia hondo karia pagealirume mbirale abale mo yalu piai hagadagua tinaga mbirale ngaru ereba hai haragola ti yagibanoore holebira.

## 25

### *Solomonohanda bi bayale maru lenego uru*

<sup>1</sup> Solomonohanda bi maru leneru Yudanaga Kini Hesegeia heangi ibunaga beba gili bia hagarume gilibu wini.

<sup>2</sup> Anduane Homogo ibugua mbirale dewaore mandabu do heneru ibuni hangume manda bidago ogoninaga iname ibunaga mini yaraga haramali. Anigo kini kagome mbirale dewa ína kamagoha wia do ho ngago ína manda bulumaya langiragola iname ibunaga mini yaraga haramali ndobe.

<sup>3</sup> Iba andaneha ngarubi hari daligaha karubi iname manda biai habe nahe kamadagua kini ibunaga miniha manda bidagobi iname manda nabibehe kama.

<sup>4</sup> Siliba mbira irani delowa dodo aealuru do ereba haragola siliba ogoni bayaleore howa ogonime mbirale bayale wabibehe wiaga. <sup>5</sup> Ogonidagua dege ko biaga karu kini baba mandagi nahelo bo pelayagua kini ibu mana bayaleore biragola dindi ibugua hondo kagobi mo hongo halu bayale tigabi holebira.

<sup>6</sup> Í kini kagoria íbu keyagua í timbuni mbira kogoni lo mitangi bialu íni mini yaraga nahabe. ✧ <sup>7</sup> Ína mbirali timbuni mbiragonaga henge í mia aribia ho bederia tigua íhondo dalia layagua ogoni bayale ndo. Í wali agali mini lene ndo karu baba keria tigua í agali mini lene karu baba hole pu layagua bayale ogoni. <sup>8</sup> Mbiralime mbira bialu karia ína deme hondowa ibu ko biya lalu godini abale puwa latagi nahabe. Mendeali manda bayuwa biaihe kagome mani ínaga bi larigo bope hai haragola ína agi buleberebe.

<sup>9</sup> Í nenegehondo mbirale mbiranaga bi mbira lole manda yu keyagua ína nenegeali ogoni ibuni karia puwa lo tiga bilibu. Anigo ína bi mbira ogoninaga hale harigo mendealihondo lamia nabibe. <sup>10</sup> Marume bi ogoni hale howa í diburibu laga ke lalu í mo taga halu íhondo ko mitangi bu wiaabo holebira.

<sup>11</sup> Mbiralime bi galone mbira lalu ibugua bi laragonaga galone baya hanguore mo wala hayagua bi ogoni moneheore manda harení gaigulu daradagua bulebira.

<sup>12</sup> Mbirali ala henego ibugua mbirale bigi biyago handaga binime mendeali áyure hene kago mana lalu lamigi biragola mendeali biagome bi ogoni henene galoneoreda manda bialu yamiyagua ogoni ibu nde ibunaga manda teneni ega ubiya iri biradagua bulebira.

<sup>13</sup> Mbirali bi yalu pu lenegome bi lamibe lenedaguaore tigatiga lamiyagua ogoni gaeangi biabe bialu howa hége lebolaho keria iba libule naragola tingini dungu lagadagua bi tigatigaore lamiyiyagua miniha dungulo holebira.

<sup>14</sup> Wali agalime mbirale mbira nguliya lowa nami wahalu piyagua ogoni dalu ibule tingi howa hari kulu timbuni lowa dalu naibi ngaligobi holebira.

15 Ína keba abale nahe bi hendeore laga bialu hariyagua agali ínaga bi hale hoa nahagaru mini mo beregedabehe holebere. Agali haguane karunaga minibi mo beregedabehe holebere.✧

16 Mone irani dedaria de handariyagua í tombe karulape do nabe. Ína dewa do nagimbu biriyagua magu tagu tagi holigo. 17 Í mendeali andaga hangu nenege puabo holene nawi. Ibugua í handabe manga halu hame nalolebirago.

18 Mbiralime ibu nenege kago mo hondo halu ndelayagua ogoni timu yandare kangorume baragola tandaga biagadagua bulebira.✧

19 Í kegoria ko mbira íbu ngangi ína manda bialu mbirali ke haga kago ibugua í biamogo bulubadalo manda biriyagua ogoni ne koheme tomo nagadaguabi ge koheme hariga piagadaguabi beregoni.

20 Mbirali miniha genda ho kane hondowa ína puwa turu helonaga iba gana lariyagua ogonime ibu biamogo ndo bere. Ogoni mbiralime puyabu dagarebi ibirangi ibunaga aga golo wahagago alebi dere bidagoria ibi odope hagadaguabi beregoni.

21 Ínaga waitigi kago tomo noaho kayagua tomo nelo mibe. Ibu iba noaho kayagua iba nelo hambu mibe.✧✧ 22 Ína mana bayale ogonidagua berego hondowa ibuni mana ko bigi biyago mitangi halu ibuni taga pani nolebira. Ani bialu ína mana bayale beregonaga Anduane Homogo ibugua íhondo turu halu yolo bayale ngulebira.

23 Puyabu ibiragome dalu yalu ibagadagua diburibu laragome keba holene mo yu anda ibaga nga.

24 Agali mbirali ibu oneme lai laabo hayagua anda mbiraoreha paluene emene bayale lowa agali ibu tagira pu holenege bayaleore nga.✧

25 Mbirali ibu iba noa howa hége lebola haragola iba libule turu howa nagadagua dindi kaundia mbirahayagi howa bi bayale maru yalu ibiragola hale hayagua ogoni turu taraore holene nga.

26 Agali tigabi mbira kago ibu ko biaga kagome ko mo bia helo ibuni henge miyagua ogoni ibu iba uli bayale nagane winigo mo gangulumu bia haradagua bira.

27 Mone ibane dewa naabo holene bayale ndo nga. Ogonidagua wali agali marume mbirali ibunaga mini yaraga helo lowa mbira bialu kagoni ogoni bayale ndo dege ngagoni.

28 Mbiralime ibunaga mini haru nahe howa keba abale haga kayagua marume ibu hingedape holebira. Ogonibigo ibu tano mbiraha pabe nahe ngagola waitigi anda ibuwa mbirale mo ko haganego ale ka.

## 26

1 Wali agalime mbirali mini nawi kagonaga mini yaraga hayagua ogoni gaea birangi dalu dindi guni ibaganego alebi tomo ibiredagola bu wulene horongi iba dalu ibaganego alebi biragoni.

2 Agali mbirali ibu mana liahe mbira nabi kagola marume ibuhondo bi ko lalu ha hayagua bi ogonime ibu mo ko naholebira. Tinaga bi laragoni egarume yagalo yu ibaga biaabo halu mbirani biru dambo nalagagobi holebira.

3 Nogo hosiru gerai pelo tibu tandaga biagame balu nogo dongiru bayuwa tiga tiga haru polenaga ibu ne harigaha aeane mbira bangabia ho helaga. Ani bialu mbirali mini nawi kago mini wilo gewame minu bolene nga.

4 Mbirali mini nawi kagome íhondo bi nagalone mbira hale haragola ína ladai biriyagua íbi nde mini nawi ibu ale dege kegoni.

✧ 25:15: 1 Sml 25.24, Min 15.1, 16.14 ✧ 25:18: Iba 57.4, 120.3-4, Min 12.18 ✧ 25:21: Md 5.44 ✧ 25:21: Lm 12.20 ✧ 25:24: Min 21.9, 21.19



<sup>5</sup> Wali agali mini nawi kagome bi nagalone mbira íhondo hale hayagua ínabi nde ibuhondo nagalone dege ladai bibe. Irane ibugua ibu manda timbunibi kogoni manda buligo anidagua ladai bibe.

<sup>6</sup> Ína mbirali mini nawi kagohondo bi mbira yalu pu lalu lawia hariyagua ogoni ína ínínaga ge gandulo waharadagua beregoni.

<sup>7</sup> Agali ge kohe kago ibaga nabibehe hagadagua mbirali mini nawi kagome bi bayale gigabi mbira lole manda bialu karia labe nahe kagoni.

<sup>8</sup> Mini nawi karu mini yaraga halu karuni laba dandaha tole berelowa bole hongo howa ndibulo yani hagago ale bialu kagoni.

<sup>9</sup> Agalime lulu iba nowa lulu yu howa ibunaga gini ani kenda kago dugule manda biagadagua mbirali mini nawi kago ibugua bi bayale mbira lole manda bialu karia nalabehe kagoni.

<sup>10</sup> Biabe hondo haga kagome mini nawi karubi maru tanabi karuhondobi biabe bilo miyagua ogoni agalime danda bu yuwa timume agali boga dege dindi hagago ale bira.

<sup>11</sup> Biangome magu tagu wuwa lone ibuni no dai biagadagua mbirali mini nawi kagome mana ko ala ibuni binigo lone budai dai bialu haga ka.✧

<sup>12</sup> Mbirali mini nawi kago ibu manda bayale bilo biamogo bulene karulape. Anigo mbiralime mbirale bibahende ibuni manda biaihe tingi ho kayagua ogonibigo ibu biamogo bulene erekuibiore holebira.✧

<sup>13</sup> Wali agali mangaheme andaga hangu bame biraabo howa ibugua ogodagua lalu, Laiono timbuni mbira harigani ibaga bu kago í tagira napolebero, laga ka.

<sup>14</sup> Anda panga hiniyime panga yani ho wiagadagua mbirali mangahegome ibuninaga dagiani palu beregedaga dege bialu wulebira.

<sup>15</sup> Wali agali marume mangaheore howa tinaga ne harigaha tomo mo yanda halu nolenegobi bibe manga dege holebira.

<sup>16</sup> Mbirali mangahe kago ibugua agua manda biaga. Ina manda bidogome agali karia mini gigabi mbirale bayuwa latagi hai haga karuni bolangua ho kogoni, lo mitangi biaga ka.

<sup>17</sup> Kirali lai lalu kagoha puwa í ogoniha bangabia ho pu hariyagua ogoni biango mbira harigani pialu karia hondowa haleni minu gili laradagua beregoni.

<sup>18-19</sup> Mbiralime ibunaga nenege mbira mo hondo howa mani ibugua lalu, Tabirini habiya biru, layagua ogoni ibu agali lulu mbirame timume boga dege dindi halu ira dedaore dugu giligalalo waharadagua biragoni.

<sup>20</sup> Ira bo dela nabiyagua ira nade hundulebira. Wali agalime bi diburibu nale hayagua gimigomo lalu keba holene nawulebira.

<sup>21</sup> Ira gabunime ira dene bayuwa hungu bialu dagadagua agali lai hangu laga kagome wai bilo mo bia haga kagoni.✧

<sup>22</sup> Mbiralime diburibu lalu mendeali lo gurarago ina hale hole hame laramali. Bi ogonibi laragoni tomo dendebe aledagola iname abale naramali.✧

<sup>23</sup> Mbiralime bi hongo halu mana bayale bulenenaga letingi howa mana ko bulenaga layagua bi ogoni todobene be dindi dongoma degeme wabinigo silibame hira dambi kagola bayale wini mbau lagagobi nga.

<sup>24</sup> Wali agali tombene hondo kihe karume bi bayale turubi hangu lararume handabe manga holene tinaga miniha wu kago nawi tingi haga. <sup>25</sup> Bi urunibi laragoni ínaga haleme hale hoabi lolebiragoyu ínaga tigua bi laragoni henene lara manda nabibe. Tinaga miniha ko tara tara tolo tagiho kagoni. <sup>26</sup> Tinaga mini ko ogoni wia do ho kagoyu wali agali marume o tinaga mana ko birago bayuwa handai holebira.

<sup>27</sup> Wali agali mbirame ko mbira bule lo mitangi bu hayagua ogonime ibuni mo ko holebira. Mbirali uli pelo wa karia o biagoniha ibuni uli pu wulebira. Ibugua tole hari hombeneni dugu yalu iragaho ngeledaria mani tole biago pendegelope howa ibuni dambulebira.

<sup>28</sup> Ina wali agali maruhondo ke howa mo hondo hariyagua ina ti handabe manga ho kegobi walía hare. Anigo inaga miniha mende manda bu howa bime mende ale lariyagua mo ko holene hangu yu anda ibaga.✧

## 27

<sup>1</sup> Ina miniha balagala howa yawi mbirale ogo ale mbira buliya lalu lo wia nabibe. Irane áyu yawila dombene nigonihá bulubadago í manda nabi kegoni ndodabe.✧

<sup>2</sup> Wali agali íla haga karumebi tara karumebi inaga mini mo yaraga hayagua karulapego ai tigua ani yaraga helo. Inime dege ininaga mini mo yaraga holeni.✧

<sup>3</sup> Wali agali marume mini haru nahe howa lulume biradagua mana koore bigi biragome ina genda iba mumebi ege tolemebi ogoninaga genda ale ndo genda timbuniore mo ngigi biaga nga.

<sup>4</sup> Wali agali keba gibi haga karu tigua binigome wali agali maru karu bame irane nawini mo tandaga halu mo ko haga. Ai keba holenege emene haru lowa wali agali dimagoli holenegeobi í nayido agini henge lolenegeobi koorene ko ngubiore ngagoni.

<sup>5</sup> Mbiralime mana liahe mbira biyagua tigatiga ibunihondo la ede halu mo tiga bialu lamulenege mana tigabi ogoni. Ani lamia nabiriyagua ina ibu dara nahe howa ainaga koyane lo heneda manda bulebira.

<sup>6</sup> Inenegeali libu gubalini hagabu haga kabigo ibugua mbira biragome í tandaga mo ngiyaguabi ogoni í biamogo bialu dege biraria biarua manda bibe. Ai inaga waitigi kagome ihondo keba nahe miniha hade tingi howa mana maru bigi bulebirago ogoni hondole íbi nde dehe dehe habe.✧

<sup>7</sup> Mbirali tomo karulapeore no tolotagiho bedago ibu tomo bibahende magu hai holebira. Tomo dendebiore mone ibane dawa ngo lariyaguabi ibu mangaore holebira. Ai tomo noa howa tongolabehe kangi tomo bibahende tanabi bayale hangu ngabe toba holebira. Tomo ko kaubiyaguabi ogoni mo dendebia dege howa nolebira.

<sup>8</sup> Agali ibuninaga dindi anda ngelo wahalu ibaga ibagabu kagoni ega mbaria ibunaga anda helo wahalu yagalo yu ibagabu kaligobi ka.

<sup>9</sup> Weli ngabi taratara ngarume ina mo turu hagadagua inanaga nenege karume ina genda yu kamangi biamogo bigi biragome ina miniha turu biagane.

<sup>10</sup> Inenege inila bamba hama ibinidago embeda halu yu waholeni nahabe. Bamba í abala mandagi haga henedagobi yu waholeni ogoni íla ho aribia habe. Í genda yu hariyagua ini hamenegeore karia pole manda buwa dindi kaundiagoha tongone pole manda nabibe. Mbirali kaware inila handa ai nai padabigo ibugua bayuwa biamogo bulebirago bilo ibuhondo hale habe.

<sup>11</sup> Inigini-o í turu holiya mini bayale gigabi wulene dabalú hongo howa yu habe. Í ani yu howa wali agali marume í gurayagua tihondo ina ladai bulene karulape wulebira.

<sup>12</sup> Wali agali miniwi dehe karume handalu karia genda bulene ti kagoria anda ibaruane handalu ti ala igilo mialu haga ka. Ai mini nawi karume genda bulene ibu kagoria anda ibule ibiraria handa hondowa dege o ibiragoniha porabu ya howa mani ibu genda yu haga ka.

<sup>13</sup> Mbirali ibu dano henego ibunime mibe nahedagola mendealime ina mia holiya lo kayagua ogoni ibu mini nawi ka. Anigo mbiralime ihondo dano hole ibiragola ibunaga

mbirale mbira í mo yu hole manda bibe. Mani ínaga dano hayago ngiragola ibuni yadai bule.

<sup>14</sup> Egerebagiore haragola ínaga nenege barila halu ibuhondo bi dalimu lariyagua ogoni ina ibuhondo bi ko lalu ha haradagua dege beregoni.

<sup>15</sup> Agali mbira one ibu wali keba halu lai dege lalu bi laabo haga bedayagua ogoni ibu anda danginiha diri ngagola iba emene bondo laabo hagadagua biaga beda. ✧ <sup>16</sup> Wali ogoni ibu mana ogonibi nabilo ibu agalinime mbira bibe naheore. Ogoni ibu iname puyabu gime minu yule lowa bialu haganego alebi weli gini odo yu haganego alebi beda.

<sup>17</sup> Tigua aeane naga wule lowa mbirale maru aeaneme dege aeane naga wiaga. Ogonidagua dege wali agali mbirame mendealinaga mini mo tiga biragola bayale haga.

<sup>18</sup> Ínaga poge hengedegome lini delo de hondo hariyagua lini bayale dedagola do nolebere. Biabe bia haga kagomeibunaga haru haga kago bayuwa de hondo hayagua haru haga biagome ibuhondo turu haluibunaga mini yaraga holebira.

<sup>19</sup> Ína iba bedagoha de handape hariyagua íninaga denguiore hondolebere. Anidagua dege mbiralime mana biragobi mitangi biragobi bibahende bayuwa manda biai hayagua ibugua í ogobi kogoni lalu ibuni manda bulebira.

<sup>20</sup> Wali agali dewaore homayaguabi tigua humbirini anda tolotagi naholebira. Ogonidagua dege mbiralimeibuninaga hame ngago wu karula napolebira. ✧

<sup>21</sup> Ngolo silibala irani delowa dabo handaga. Ogonidagua dege wali agali kodabe bayaledabe hondole tininaga mana biragoria handalu maru karume ti dabaki biaga.

<sup>22</sup> Ína mbirali mini nawi lulu ale kago hongo howa homabeheore bope hariyaguabi ibunaga mana biagane biago yu wa nahe wiaabo holebira.

<sup>23</sup> Ínime ínaga nogo meme sibiru bayuwa de hondo habe. <sup>24</sup> Irane ínaga muni mbirale yu kerubi wiaabo naholebiraore. Kininaga hameiginirubi haabo naholebira. <sup>25</sup> Ínaga daluni tani luni andaho karia handariyagua ínaga tani ogoni gandu lowa mo mogo bialu íninaga nogoru ti nelomibe. Ani beregola tani bayale gahenge andaho aribia holebira. <sup>26</sup> Mani ínaga nogo memerume yolo muwa dindi yolo bulene wulebira. Ani buwa nogo sbinaga irini podowa íninaga aga ogonime wabulene wulebira. <sup>27</sup> Ína ínaga nogo memerunaga andu hambuwa ínibi í one waneiginirubi tínaga biabe biahaga wali bedarubi karulape nalu holeberemi.

## 28

<sup>1</sup> Wali agali ko biaga karume ti mbiralime bole talima ibiragola piagadagua bame gi howa ibida piaga kagoni. Anigo wali agali tigabi karu ti budi gabua laiono ale elahe haabo haga ka. ✧

<sup>2</sup> Wali agali dindi timbuni mbiraoreha haga karume ko hangu biaabo hayagua dindi ogoninaga haru haga tara tara hela aribia haabo holebira. Anigo dindi mbiraha haru haga bayalebi mini gigabiwibi kayagua o biagome wali agali bayuwa haru halu dindi bayale hongohewiaabo holebira.

<sup>3</sup> Agali mbirali ibu haru haga howa wali agali yagibano karu henge dape haga kayagua ogoni ibu iba li timbuni poragome mabuha tomo henge daru mo ko haradagua bialu kagoni.

<sup>4</sup> Wali agali mana lo ngaru erembira miaga karume wali agali ko biaga karunaga mini yaraga haga ka. Anigo mana lo ngaru biaga karume ko biaga karu heba mini mbiraore nahaga ka. ✧

<sup>5</sup> Wali agali ko biaga karu ti mana tigabi agobi ngabe manda nabi kagoni. Anigo Anduane Homogo talima piaga karu ti mana tigabi ogoni manda buwaore ka.

✧ 27:15: Min 19.13, 21.9, 21.19 ✧ 27:20: Min 30.16, Hab 2.5 ✧ 28:1: LBM 26.17, 26.36, Iba 53.5 ✧ 28:4: 1 Kin 18.18, 18.21, Eb 5.11

<sup>6</sup> Mbirali yagibano howa mana tigabi biaga kagome mendeali homogo howa mana tigabi nabiaga kago bolanguahe kagoni.

<sup>7</sup> Wandari igiribi daliahe mana lo ngadagua bialu haga karu ti mini gigabiwi kagoni. Urunime ti wali agali ko mangahe habane nabulene karu baba nenege ho hayagua nde ti ajiya abala mo taga haragoni.

<sup>8</sup> Agali mbirame ibunaga muni wali agali maru ti dano hadaba lowa dano biago yadai biragola muni miyagobi ndo dewa ngidaba lowa ibu homogo hayagua ibu muni ogoni nayi holebira. Muni ogoni mbirali yagibanoru dara howa biamogo biaga kagonaga giha mo mulebira.

<sup>9</sup> Ina mana lo ngago hale halu nabiriyagua Ngode Datagaliwabehanda ibuhondo bi lariligo hale hoa nabi ko ngubidane hondolebira.

<sup>10</sup> Ina agali tigabi kago ko bilo mo hondo hariyagua ina gono wirigoha ini do wulebere. Wali agali ko mbira nabiaga bayale karu ti Ngode Datagaliwabehanda yolo karulapeore mulebira.

<sup>11</sup> Homogo karume ti mini gigabiwi kama manda biaabo haga. Anigo yagibano kagome wali agali maru karunaga mini ngago bayuwa tale biaga kayagua ibu mini gigabiwi heneneore ka.

<sup>12</sup> Haru haga agali tigabi mbira tagira ibu harangi wali agali bibahendeme turu howa ibu mini yaraga haga. Anigo agali mini kowi kagome haru hole tagira ibu harangi wali agalime ibu hondowa ti ha do haga.

<sup>13</sup> Wali agali mbirame ko biyago do ho hayagua ibugua mbirale bigi birago bayale naholebiraore. Anigo mbiralime ko bibahende biyago lapani halu kohondo erembira miyagua Ngode Datagaliwabehanda ibu dara howa biamogo bulebira.✧

<sup>14</sup> Anduane Homogohanda laradagua biaabo hariyagua í turu ho haabo holebere. Anigo Anduane Homogonaga bi hale habe manga howa dogo ho hariyagua í ko ngagoria polebere.

<sup>15</sup> Agali ko biaga mbirame haru haga howa wali agali hongo nahe karu hingedape haga. Agali ogoni ibu budi gabua timbuni laiono hongo howa ngororo lagadaguabi biango dudu ale timbuni mini bea mbirame tomo taya bima ibaga biagadaguabi bialu ibu hiriribi haga.

<sup>16</sup> Haru haga kago mini giga napale hayagua wali agali mo ko halu haru ha ko holebira. Anigo haru haga mbirame wali agalinaga ngaru guru nolenebi mo hondo holenebi hame nale kago ibugua luore haru haabo holebira.

<sup>17</sup> Mbiralime mendeali homelo bo wahaga kago ibu tandaga nalu haabo holebira. Ibu bayale holene mbira handa walia nahe ibagabu kaore homalu waholebira. Ogonibi kago mbiralime ibu biamogo bulene nawi.

<sup>18</sup> Ina mana tigabi bialu hariyagua í bayale holebere. Ina ko bialu hariyagua í abale pilope holebere.✧

<sup>19</sup> Wali agali mbirame biabe erekuibi bialu mabu hangayagua ibu tomo nolene dewa wu holebira. Anigo wali agali horo mo hole bialu biabe nabiaga karu ti yagibano haabo holebira.

<sup>20</sup> Wali agali mini tigabi karu ti turu holeneme tolotagiho holebira. Anigo mbirali ibu abale hibilaba lowa homogo hole manda biyagua pani nane napolebira.

<sup>21</sup> Agali mbirame godi hale halu howa irane baya hangu dabo handa nabi mendegonaga abale la halu mendego hingedape hayagua nakarulape bira. Anigo godi dabaga marume muni emeneorebi mbira ngilo lowa ke halu godi la holebira.

<sup>22</sup> Wali agali habuabi karume ti homogo holenaga abale hibilaba lalu kagoyu ti yagibano holene kaware ibirago manda nabi ka.

<sup>23</sup> Mbiralimo kula haragola turu haraligo dindiha lowa ina mbirali mana lalu mo tiga biriyagua o biagome mani ihondo turu timbuni holebira.

<sup>24</sup> Mbiralime ibu aba aiyalanaga mbirale ngaru page ndoda lo manda buwa page biyagua ogoni ibubi pagebibi maru kagobi dege kagoni.

<sup>25</sup> Mbiralimo habua biaga kagome wali agali maru mo keba haga. Ai mbirali Anduane Homogohondo mini mbiraore hongo ho wu kago ibu bayale hangu hama puabo holebira.

<sup>26</sup> Mbiralime ibuninaga manda hangume mbirale bibahende karulape biai habehe kogoni mitangi bu hayagua ogoni ibu mini nawi ale kagoni. Anigo mbirali mini gigabiwi kagome lawai haradagua bialu hayagua ogoni ibu bayale holebira.

<sup>27</sup> Yagibano karuhondo mbirale miriliyagua i mbira buru palia nabi holebere. Yagibano karu nahende tingi howa mbirale nami hariyagua wali agali dewaoreme i ha hene holebere.✧

<sup>28</sup> Mini kowi karume haru harangi wali agali ti ha do holebira. Anigo haru haga ko uruni ibira haragola mini tigabi karume lone haru ho aribia holebira.✧

## 29

<sup>1</sup> Agali mbira dewa halu mo tiga birago bilowa ibu mine haabo hayagua abaleore ibu mo ko haragola marume ibu biamogo bulene hariga nawulebira.✧

<sup>2</sup> Agali mini tigabiwime wali agali haru kagola wali agali bibahende ti turu hai haga. Anigo mana ko biaga karume haru haragola wali agali bibahendeme miniha genda howa mini dege dindiho haga.✧

<sup>3</sup> I mini bayale gigabiwi hole hame lariyagua i aiya abala libu turuore holebira. Agali bayanda waliru heba ibaga bu haga kago ibu ibunaga muni mbiralebi bibahende ogoniha wahai haga ka.

<sup>4</sup> Kini kagome wali agali mana tigabini haru hayagua wali agali bayale halu dindibi bayale dege wulebira. Anigo kini ibu wali agalihondo muni hangu ngi laabo hagagome dindi ibugua hondo kago ibira halu mo ko holebira.

<sup>5</sup> Agali mbirame ke halu ibu nenege ladebodebo biyagua ogoni ibugua ibunaga nenege gonoha delonaga gono wia haradagua biragoni.

<sup>6</sup> Mbiralime mana ko mbira biyayagua ko ogoni biyagome ibuni do wulene gono wia kagoni. Anigo wali agali mana tigabi biaga karu ti turu ho haga ka.

<sup>7</sup> Wali agali mini tigabiwi karume yagibano karunaga genda ngago mitangi buwa mo tiga bialu ti biamogo biaga. Anigo wali agali mana ko hangu biaga karume mana ogoninaga irane manda nabiaga ka.

<sup>8</sup> Mine halu mege biaga karume wali agali tanoha bu karu tini dege dege handabe manga helo mo keba helaga. Anigo mini bayale gigabiwi karume keba ho hayaruni mo hada halu agali biarunaga mini lone mo paliaho helaga.

<sup>9</sup> Mbiralimo miniwi kagome mini nawi mbira kago manani helayagua mini nawi biagome abale keba howa lahiralu ibu ne hambu ndibulo nahaga kagoni.

<sup>10</sup> Mbiralimo agali daruma hangu noa haga kagome wali agali mana tigabi biaga karu handabe manga haga ka. Anigo mbirali mini tigabiwi kagome maru mana tigabi biaga karu bayuwa handaya ho haga ka.

<sup>11</sup> Wali agali mini nawi karume tinaga bi laragome keba holene abale walia haga ka. Anigo wali agali mini bayalewi karu tigua abale keba nahe donge ho haga ka.

<sup>12</sup> Agali haguane kago ibugua agali ke haga kagome bi larago hale hayagua ibunaga andaneha haga karubi ke haga dege bu holebira.

✧ 28:27: Man 15.7, Min 19.17, 22.9 ✧ 28:28: Yob 24.4, Min 28.12, 29.2 ✧ 29:1: 1 Sml 2.25, 2 Bit 36.16 ✧ 29:2: Esd 8.15, Min 11.10, 28.12, 28.18



<sup>13</sup> Wali agali yagibano karubi yagibano uruni hingedape haga karubi tigua mbiraore ogobi degedege yu kago ogo. Anduane Homogohanda wali agali ta nabihondo de hendelo de ogobi degedege mini.

<sup>14</sup> Kini kagome yagibano karunaga godi tigatiga mo dabaki biyagua ibunaga hameigini dameneruha kini howa haru haabo holebira.

<sup>15</sup> Ina waneigini mini wilo mana lalu mo tiga biriyagua ti mini gigabiwi halu manda bayalebi holebira. Anigo waneigini tinime hame laradagua bilo helariyagua urunime ti aiya abala mo taga holebira.

<sup>16</sup> Agali ko biaga karume haru haga harangi ko anda hama piaho wiaabo holebira. Anigo agali uruni ti lu haabo nahe ibira haragola mini tigabiwi karume hondolebira.

<sup>17</sup> Tinaga waneigini mo tiga birimiyagua mani tigua waneigini uruni hondowa turu holeberemi. Taga holene irane tiha nawulebira.\*

<sup>18</sup> Anduane Homogohanda wali agalihondo mana ogodagua bulene nga lalu bi lamia nabadayagua tigua mana ko tara tara bialu holebira. Wali agali karume Ngode Datagaliwabenaga bi mana lo ngadagua bialu hayagua ti turuho holene nga.\*

<sup>19</sup> Inaga biabe bia haga karuhondo ogo ale bia lowa bime hangu lariyagua ina tinaga mana birago mo tiga bibe nahe holebere. Ina bi o lameregoni hale howa manda bulebiragoyu tigua bia nabulebiraore.

<sup>20</sup> Mbiralali mini bayale nawi heagua ibu mini wilo iname ibu biamogo bibehe kamagoni. Anigo mbiralali miniwi kagome bi ala bayuwa mitangi nabi howa abale lagane kago iname ibu biamogo bulene taibi holebira.

<sup>21</sup> Ina inaga biabe bia haga mbira kago ibu emene kaore ibuhondo mbiraleru hame ledadagua mialu haabo hariyagua mani ibu mini ko wialu i mo tandaga holebira.

<sup>22</sup> Wali agali gongoma keba abale haga kagome wali agali maru mo keba halu ko dewa mo yu anda ibaga ka.

<sup>23</sup> Mbiralime mine halu ibuninaga mini yaraga haragome ibuni mo dindiha holebira. Anigo mbiralali ibuni mini mo dindi haga kago marume ibu mini mo yaraga holene wulebira.

<sup>24</sup> Mbiralime pagebibi kago heba hagayagua ibunime ibunila mo waitigi ho ka. Ibugua page biamogo bialu hayago latagi hayagua godime ibu manani helolebira. Anigo ibugua biyago la nabi donge ho hayagua Ngode Datagaliwabehanda ibu pani mulebira.

<sup>25</sup> Ina mbiralali hondowa gi hariyagua gono ngagoha do wiagadagua gi haregome ini do wulebere. Anigo ina Anduane Homogohondo mini mbiraore hongo howa wu keyagua i gi nahe bayale holebere.

<sup>26</sup> Wali agali dewame haru haga karu ti hame lelonaga tihondo bi ladebodebo biaga ka. Anigo Anduane Homogo ibugua hangu inanaga bi hale howa tigatiga dabalulu ina biamogo biaga.

<sup>27</sup> Wali agali mini tigabiwi karume ko biaga karu handabe manga haga ka. Ko biaga karume nde wali agali mini tigabi karu handabe manga haga dege kagoni.

## 30

### *Aguhanda bi maru lenego ogo*

<sup>1</sup> Bi ogo Yage igini Agu ibugua Idiele Ugalalahondo lene.

<sup>2</sup> Agu ibugua lalu,

I agali heneneore hagadagua ndo ko.

Ina agali marume mitangi biagadagua nabiruli.

I mini nawi dege ko.

\* 29:17: Min 13.24, 22.15, 23.13-14    \* 29:18: 1 Sml 3.1, Amo 8.11-12

<sup>3</sup> Ina mini gigabi wulenebi manda bayalebi nawi dege ko.  
Ngode Datagaliwabe ibu bayale tigabiore kago helowa  
ina ibu baya hangu manda nabi kogoni.

<sup>4</sup> Mbirali dahuliya andagaha iraga halu pialu dai bini ai kabe.✧

Mbirali ibunaga gime puyabu pu larago mini yania hene ai kabe.

Agalime mbirale agame kabu buwa yu hagadagua iba hari beralibaha minu yu kago  
aiwabe.

Dindi bibahende ngaru aiwa mo hongo kagola ngabe.

Ogoni biyagoni ibu minibi ibu waneigini minibi ai kabe.

Ína manda bu keyagua ogo ka lalu langibe.

<sup>5</sup> Ngode Datagaliwabe ibugua bulebero ledaru bibahende biaiore haga ka. Ibugua  
bi heneneore hangu laga ka. Ami agalirume wai bialu howa humbime tini mo ge  
hagadagua wali agali Ngode Datagaliwabe ibu karia poraru bibahende ho ge haga ka.

<sup>6</sup> Íninaga bi latagi halu howa bi ogoni Ngode Datagaliwabenaga bi laro lalu nalabe.  
Anduane Homogohanda í talialu mani wali agalime ínaga bi lariru hale heneru í tindule  
laridane walia holebira.

### *Bi bayale gigabi maru gilibu ngago*

<sup>7</sup> Ngode Datagaliwabe-o ina íhondo ngibe lalu bi kiraore hale harogo ogoni labo  
ngibelo hame lo ko. Ngode Datagaliwabe-o í dindini kongi howa <sup>8</sup> ke hagane mana  
ngaru erembira mialu holiya í biamogo bibe. Ani bialu í yagibano homogobi mendego  
nahelabe. Horo bibahendengi tomo karulape nalu holiya ngibe.✧✧ <sup>9</sup> Ina mbirale dewa  
wu howa Ngode Datagaliwabe í erembira ngialu ini karulape ko manda buligo karulape  
dege ngibe. Ai yagibano howa nde ina mbirale ngaru page bima ibaga bialu koria  
Anduane Homogo ínaga mini mo dindiha holigo o larogonidagua bibe.

<sup>10</sup> Ina agali haguane bedaria puwa ibunaga biabe bia haga kago mege bialu lo gura  
nabibe. Biabe biahaga biago ibugua Ngode Datagaliwabe mini lalu í mo ko habe lalu bi  
lamiragola í mo ko holigo lo gura nabibe.

<sup>11</sup> Wali agali marume tinaga aba mo ko helonaga Ngode Datagaliwabe mini lalu  
lamiagaya. Marumebi ibuhondo, I aiyá dara howa biamogo bia, nalagaya.

<sup>12</sup> Wali agali marume tiha ko mbira nawi kama mitangi biagaya. Anigo uruni biaga  
karu tinaga ko wiaabo kagola ti Ngode Datagaliwabenaga deni ko dodoheore ka.✧

<sup>13</sup> Wali agali marume mine howa tini bayaleore kama mitangi bialu maru ko nagalone  
karuni lo manda biaga ka.

<sup>14</sup> Wali agali marume yagibano karu hangedape hagaya. Tinaga ne harigaha wai  
biaga ayu tibu nene gadele alebi nabi emene nene gadele alebi howa wali agali ko  
yagibano karunaga dindi dabudabu emene wiago karulai hole biagaya.

<sup>15</sup> Gindi darama naga mbira ibu wane kira bereneya. Libu harunaga mini mbiraore  
laga bereneya. Libunaga mini I Ngi laga bereneya.

Mbirale maria urume haru naru nalaga ngago uru

<sup>16</sup> Mbira: Homonerunaga dindi Humbirini anda

Mende: Wali waneigini nahaga bedago

Tebone: Dindi yobime iba hame laabo haganego

Mane: Irame mbirale dewaore daragoyu uruni mo emene dege halu ibuha dolene wia  
dege biaga.

<sup>17</sup> Wali agali tinaga aba aiyalanaga bi mo wahalu mege biadai biaga heagua ogoni ega  
nene bedarume tinaga de halu nalu tini homarangi ega bodo hariawe bedarume tinaga  
tingini budalu nolene wulebira.

<sup>18</sup> Mbirale mariaore bigi biagayago ogoninaga tenego agime bira loabe tobahe gim-buni handabe nahe ogoniha wia.

<sup>19</sup> Mbira: Ega bodo hariaweme li hariha yagalo yu ibagabu heago

Mende: Nogombime ege tole timbuni ngarunaga pu ai halu pialu ngaligo

Tebone: Iba sibi iba solowarani paga howa polene hariga manda bialu pialu kaligo

Mane: Wali agali kiralime libuni gubalini haga haga bialu kaligo

uruni bigi bialu hearuni agime bira loabe tobaheya.

<sup>20</sup> Wali mbira ibu agalini ma hondowa ibu agali kayu biaga bedagome agua biaga. Ibugua agali kayu yuwa tomoru hibilabalo dawa nowa ibunaga ne wayawaya biagadagua bialu birulebira. Ani bu biruwa ibugua lalu, I kagua mbira nabioire bedogo agiyabe, lolebira.

<sup>21</sup> Mana maria dindini tagira ibagaru ogoni ko gibioiredagola dindi ibunime ogoni turu nahe howa mogo lowa duru lalu wiaga.

<sup>22</sup> Mana uruni ogodagua

Mbira: Mbirali ibu garabaya biabe ale bialu henego mani ibu kini ha aribia harago

Mende: Mbirali mini nawi kago ibugua tomo dewa no kangi biagago

<sup>23</sup> Tebone: Wali mbira ala agalime hondo wahene lu berenego mani ibu agalinimebi ibu hame nalaragola bame biraabo hagago

Mane: Wandari mbira biabe bia haga berenego ibu mani wali anduane biago birayago-ria bira aribia harago

uruni bibahende dindini biaganego nakarulapeore.

<sup>24</sup> Dindi ogoria ema bialu piaga maria bedago ti emene koore biruwa mini gigabiore beda.

<sup>25</sup> Mbira: Uburuli ti emene koore bedagoyu tigua tomo nawi harangi nolenaga tomo andaha mo yu pu wiaga beda.

<sup>26</sup> Mende: Tia pagana ale ege bare ngagoha anda buwa biraga bedaru ti emene ko hangu hongo nahe bedane hendede tiraga ege tole ngaruha ti anda pu paliaga.

<sup>27</sup> Tebone: Pagaya ale bedaru tinaga haru haga nahe bedane hendede tiraga tigua baya hangu biru dugu bialu porane hondolebere.

<sup>28</sup> Mane: Gau emene ko bedaru gime bame minu yaramaligoyu ti kini andaga timbuni karuha pu bedane hondolebere.

<sup>29</sup> Mbirale mariame ge porago de hondoabi piaga uru

<sup>30</sup> Mbira: Laiono karu ti hongo gibioire howa maru karu bolanguahe ka. Ti ibaga bialu howa ti mbirale mbira kagohondo gi nahe howa puabo haga ka.

<sup>31</sup> Mende: Ega gogologo budubai bedaru ti tigatiga howa de handadele bigi bialu haga ka.

Tebone: Nogo meme wangabe karu

Mane: Kini agaliru ti ami hongohe heba kangi mendeme ti bope naholobada manda bu haga.

<sup>32</sup> Ina mana ko lulu ale mine howa ininaga mini yaraga halu hariyaguabi ina mana ko mbira bule lowa manda manda bu hariyaguabi uruninaga inaga ne hariga hangai halu uruni abale wahai habe. <sup>33</sup> Nogo bulumaga andu iba hambuwa mo beregeda beregeda biaabo halu hariyagua ogoni ibu mo mbada holebira. Agali mbiralinaga nguini bariyagua darama ibulebira. Manane urunidagua dege mbirali baba keba hariyagua бага бага bulene wulebira.

## 31

*Kini Lemuele aiyahanda mana lenego nga.*

<sup>1</sup> Bi uru Kini Lemuele aiyahanda ibu igini mini bayale wilonaga mana lalu lamini.

<sup>2</sup> Inaga iginiore ina taba henenego íore kegoni. Ina Ngode Datagaliwabhondo bi lalu igiriore ngi larugola nginigo í kegoni. Ina íhondo bi agi lalu loabe. <sup>3</sup> Í wali hangu yama ibaga bialu keria ínaga hongo bibahende ogoniha ereba hai holani de hondo habe. Ínaga muni yidegobi wali uruni ti mo nai holani de hondo habe. Mana ogoni aleme kini agaliru mo koore haga ngagoni. <sup>4</sup> Lemuele-o bi larogo hale habe. Kini agalirume waini ibabi lulu iba tara tara ngarubi noa haabo holene nawi. <sup>5</sup> Kini agali biaru ti lulu iba no karia mana lo wini ngaru bibahendeore embeda hai halu wali agali buru pale karu biamogo bulene winigobi embeda hai hagadagua holani. <sup>6</sup> Iba mbia tara tara ngaruni wali agali áyu ogoni homole andanda bialu karu tinaga ngagoni. Ani bialu wali agali genda timbuniore yuwa mini burugulo karubi tinaga nga. <sup>7</sup> Tigua lulu iba naragome tini mini hulula bu karu embeda helobi genda timbuni tara tara yu karu embeda helobi narama manda buwa naga kagoni.

<sup>8</sup> Wali agali genda tara tara yuwa tinime latagi au hoabe tobaho karunaga bi ina lahole mandabu habe. Godi larangibi uruni ko bi nayida manda buwa godi hale hagame mendealigonaga la hayagua ina bi hongo howa ladaga halu tigatigaore dabadaba labe. <sup>9</sup> Ani bialu ínime godi larago hale halu dabaga dagiani birarengibi godi larago hale halu tigatigaore dababe. Wali agali yagibano buru paleore darabi karunaga bi la halu dege labe.

*Wali biabe bayaore biaga ebebebi bedago ogo*

<sup>10</sup> Igirime wandari dabu bule lowa wandari mana bayaore biaganego hame lowa hai bulene taibiore. Wandari ogonibigonaga yolo bulene nogo muniru ngolo silibarubi tahe ndo dindiha lowa ibunaga mana bayale biagago daligaore bedagoni.✧

<sup>11</sup> Wali ogonibigo agalinime ibu one mana bayaore tigabi hangu biaga beda lowa ibu oneni mini paga howa ibu miniha turu ho holebira. Ani bialu horo bibahendengi libu haru miniha dungulo howa mbirale burupale naholebira.

<sup>12</sup> Wali ogoni ibugua ibu agalini mo ko hole mbira nabi ibuhondo mana bayale dege biaabo haga bedagoni.

<sup>13</sup> Ibugua nu puru aga lebiaga puru taya buwa nu bia agaru lebia bigi bialu ibu gi ema hanguni biraga bedagoni.

<sup>14</sup> Iba sibime dindi kaundiaha howa mbirale mbirale tara tara hombedo yalu ibaganedagua wali ogonibigo ibugua tomoru dindi kaundiaha howa bu hombedo hanalu ibalu holebira.

<sup>15</sup> Wali baya ogonibime ibu ala mbiraga gao naledaha heyuwa ibu agalini waneiginirunaga tomo dawalebira. Ani bialu wandari emene ibu andagani ibu baba biraga biru ngaru ti biabe bilonaga ibugua mo ta holebira.

<sup>16</sup> Wali ebebebi ogonibigo ibugua dindi mbira tu wule hayagua ibu deme bayuwa ala handama ibaga buwa mani tu wialu yolo miaga. Ani buwa ibugua biyinaya bialu muni ilu winidagome pu mbira lini daga mini gerebi egene yolo muwa dindi odagoriani hangaga.

<sup>17</sup> Wali ogoni ibu ebebebi biabe dege bialu gi pururumabi payalu kunihe hongohe beda.

<sup>18</sup> Ibugua ibunaga biyinaya birago bayale haruane handayagua ibugua mbiraga lamu hale dela howa birago ale biaho wiaabo holebira.

<sup>19</sup> Wali ogonibigome aga lebiyagua dewalime yani haga buwa lebibehé ngaruni ibuni hangume gi tale bialu biaga beda.

<sup>20</sup> Ibugua wali agali yagibano burupale karu hondowa dara halu ibunaga mbirale ngaru talebu migi biaga beda.

✧ 31:10: Min 12.4, 18.22, 19.14

<sup>21</sup> Ibugua horombe biruwa dagare birangi bulenenaga aga wabuwa ibu agalini waneiginirubi wabu ta henegome gaea timbuniore bialu kewara pibira ibira hayaguabi ibu miniha mogo nale biraga.

<sup>22</sup> Ibu andagani wali agali paligi bilonaga balangiyaibunime wabu ngelaga biaga. Ani bialu ibugua labolabo tohe bayaore ngarubi tagalitayabi bayaore ngarubi muwa ibuninaga aga urunime wabuwa bu haga.

<sup>23</sup> Wali ogoninaga agalini wali agali bu karumebi agali haguane karumebi ibu mini lene ka laga. Wali ogoni agalini ibu dindi ogoninaga agali haguane dege mbirago haga.

<sup>24</sup> Wali ogoni ibugua aga tara tara ngago lebialu nogo dongonebi dewa wabu paya biragola agali biyinaya biaga karume yolo yalu mo ibugu biaga.

<sup>25</sup> Maru karume wali ogoni ibu wali mini lene beda laga. Wali ogoni ibu miniha hongo ho biruwa ibu wali hongoheore biraga. Mbirale mani bulubadarunaga ibu miniha gi mbira naheore biraga.

<sup>26</sup> Ibugua wali agali lawai hayagua baya hanguore manda bilo mini bayale gigabi wu biruwa lawai haga.

<sup>27</sup> Ibu andagani mbirale ngarubi waneigini karubi hondo holenege ibu manga nahe bayuwa mabura bu hondo halu erekui biabe biaga beda.

<sup>28</sup> Ibunaga waneigini bu karume ti aijaore baya gibi lalu ibunaga mini mo yaraga halu kai lo ariari biaga. Ibu agalinime ibu onenaga mini mo yaraga halu kai lalu bi ogodagua laga.

<sup>29</sup> Ibugua lalu, Dindi ngagoria wali mana baya gibiore bigi biaga dewaore biru wima pedagoyu ina wali uruni bibahende bolangua hai howa í daligaore bedegoni, laga.

<sup>30</sup> Wali mbirame inahondo bi bayale hale hoabiore lelebiragoyu ibunaga mana birago mende ale holebira. Wali mbira ibunaga dengui tingini bayaore de hondoabi bira birulebiragoyu nde ibu dengui baya ogonibi biraabo naholebira. Ani manda buwa iname wali Anduane Homogo andaneha biruwa ibugua laradagua bialu bedagonaga hangu mini mo yaraga habehe kama.

<sup>31</sup> Iname wali ebebebi manabi baya gibiore biaga ibunaga biabebe baya maburabiore biaga ogonibi bedagonaga mini yaraga holeneore nga. Wali agali bibahendeme ibugua biradaru loyogo lalu ibunaga mini mo yaraga hai holene nga, lalu Kini Lemuelenaga aiyahanda bi lai hene.



## **Agali Mandabi Henegonaga Bi** **Mbuga ogoha gilibu ngarunaga nemandi ogo**

Mbuga ogoha agali manda timbunibi mbirame ibunaga mini wiago latagi hene. Agali manda timbunibi ogoni ibugua mbirale wiaru baya hangu begelo handai halu wali agalime mana bialu haga wiarubi manda biaiore hene. Ani hondo heagola mbirale uruni marume ibu mo genda hene. Ibugua handalu hearia wali agali dindini holene emene tubagi hangu halu bayale ndoyane hendene. Mbirale bibahende wali agali bibahendeme bialu heago damene galone ndo dege bialu hearia hendene. Ani hondowa agali ogoni ibugua lalu, Ina wali agali áyu dindini kamagoni irane nawini howa nagaloneore kama, lene. Ngode Datagaliwabe ibunaga holene inaha kagoni howa mana ngago iname baya hangu manda nabiore kamagoni. Bi gendabi urunibi hale halu ina wali agalime manga nahamiya.

Ai agali manda timbunibi ogoni ibugua lalu, Tígua bi ogoni hale holene manga nahalimu, laya. Iname bi ogoni wá nale harimayaguabi harugo lowa Ngode Datagaliwabehanda ina dindi ogoria holomaya henge emene nemandi ngidagonaga biabe erekuibi bialu turu haga bialu holene nga.

Dewaoreme bi ogonibigo Baibolo mbugaha ngago hondowa ti mogolo handaga. Anigo mbuga ogome ina mbira mo walia ho ngago ogo. Mbirali ibu genda tara tara bibahende ngarume ibuni mo ko halu kago ogoni ibubi nde Ngode Datagaliwabe waneigini bu karu aria holene karulape dege ka. Mbuga ogome wali agali maru genda tara tarawi mo ko hene hearu mbuga ogo gili biyadagome dewaliore biamogo bigi bini. Tigua mbuga ogo dagalalu howa tini hangu ndo harimayane hendene. Ani bialu bi ogonime Ngode Datagaliwabehanda mbira ogo bulebero lalu mbuga maruha bi lo wigi bini wiarume wali agali miniha lone mo mitangi biahaga bini.

### **Bulu бага бува кuni gilibu ngago (1.1-2.26)**

Iname dindini howa holene irane ngabe be nawibe 3.1-11.8

Iname bialu holene te laga binigo 11.9-12.8

Waneigini daliahehondo bi lenego 12.9-14

Lamaro bialu Ngode Datagaliwabe mo tene holene ngago

### *Mbirale bibahendeore nagalone ngago ogo*

<sup>1</sup> Agali manda timbunioirebi mbirame bi ogoni latagi hene. Agali ogoni ibu Debidi igini howa bamba ibu Yarusalemeni kini hene. <sup>2</sup> Agali manda timbunibi ogoni ibugua lalu, Mbirale bibahende bu ngaruni mbira galone nawioireni howa bibahende nagalone hangu wiai ka. <sup>3</sup> Iname mali bibahendengi biabe ndelahe bialu haabo haramali. Anidagua bialu ha haramaligo ai biabe ndelahe ogoninaga lini bayale mbira agile mo yaramalibe. <sup>4</sup> Wali agali ala heneru homaragola mani maru ha aribia haga. Anigo dindi dege mendeme ibu winigoria wia aribia naholebira. Dindi ibu winigoore wiaabo haga. <sup>5</sup> Horo bibahendengi ni ibu tagira ibalu horo bibahendengi ni ibu palialu horo mendengi tagira ibulenaga lone dai buwa manda mandabu wiaga. Horo bibahendengi ni ibu anidagua dege bialu howa ibu ha timbuni laga. <sup>6</sup> Puyabu ibu nde uyurahayagi howa puloyu unurahayagi piaga. Ani bialu nde lone beregedalu uyurahayagi puloyu dai biaga. Ai puyabu ibu anidagua bialu ibaga dege bialu haabo haga. <sup>7</sup> Ai iba poraru bibahende solowaraha pialu pu mogo biai haragome solowara ibu bialu biru to nale wiaabo kagoni. Iba uruni ti lone iba maneha dai buwa mani solowaraha lone pupe halu piaga. <sup>8</sup> Iname mbirale dindini ngaru bibahende manda bu handalu kamaria uruni manga hai haramali. Inanaga manga holene ogoni ogoale lalu latagi habe naheore kamagoni. Dindini ngaru bibahende deme handalu bi damenebi hale

hai haramaligoyu ai urunime ina karulapu nabi dege kamagoni. <sup>9</sup> Mbirale tara tara abale deme hendenedaru ale dege mani hondoleberema. Mbirale mbira agalime bialu heneru manibi uruni ale dege bialu holebira. Anigo dindi bibahendeha gahenge mbira nawiore. <sup>10</sup> Marungi agalime lalu, Mbirale ogo gahengeda, lagago ogoni henene ndo. Ogoni ibu ina dindi ogoria nahemangi ala winigo dege nga. <sup>11</sup> Mbirale bamba inanaga mamaliru heangi bialu hene ngaru mbiralime manda biai naholebira. Manibi mbirale dewa tagira polebirago ogoni inanaga aguanene mani holobadaru tiguabi manda biai naholebira.

### *Manda timbuni bulenego nagalone ngago ogo*

<sup>12</sup> I agali manda timbunibi mbira kogoni. I Isaraele wali agalinaga kini howa Yarusalemeni harugoni. <sup>13</sup> Ani howa ina dindini ngaruni damene bibahende mandabu handaiore hole manda biru. Ani manda bialu uruninaga tene baya hangu tayabu handaru. Anigo Ngode Datagaliwabehanda iname biabe bialu holomaya ngiyadaruni genda timbuniore mo ngiyadane hendedo. <sup>14</sup> Ina dindi ogoria mbirale tara tara tagira ibaga ngaruni irane dabo handai harugo ai heneneore mbirale bibahendenaga galone mbira nawi degeya. Mbiralime gerai pialu puyabu minu yania hole poradagua biya. <sup>15</sup> Mbirale mbira yole ngago mbiralime mo tiga bibe nahe. Mbirale mbira nawigo iname daga labe nahe.

<sup>16</sup> Inime manda bialu hewaria i manda timbunibi howa ina kini abale Yarusalemeni henedaru bolangua hene kogonida lo manda bu haru. Ina manda tara tara biaihe howa mini gigabi wu kogoni. <sup>17</sup> Ani wu howa ina mini giga bulenenaga tenego handa walia hole hongo howa taya bialu mini nawi lulu ale hope hagagonaga tenebi taya bialu biru. Ani taya bialu harudagoni i lulu yu howa gerai lalu puyabu minu yania hole poradagua biruya. <sup>18</sup> Heneneore mbira ngago larogo mbirali ibu manda timbuniore bu heagua ogoni ibuha genda timbuniore tagira ibaga. Ibunaga manda bia timbu hama irigi hayagua ibuha genda bu ngarubi anda hama irigi dege halu mo timbu haga nga. <sup>\*</sup>

## 2

### *Turu holene tara tara ngaru bibahende galone nawi dege ngago ogo*

<sup>1</sup> Ina hamelewago bulenagabi mo turu holenaga bulene wiarubi galone agidabe hondole hai biru. Ani hai birugola urunihabi galone mbira nawi degeyane handaru. <sup>2</sup> Ina hai bialu hewaria oba holenegro galone mbira nawiore bame lulu biabe aleyane handaru. Mo turu holene ngagomebi ina biamogo bulene emene mbira nawioreyane handaru. <sup>3</sup> Ina mini gigabi wulenenaga hariga taya dege biruria waini ibabi nalu mo turu holenenaga mana tara tara wiarubi bialu hole manda biru. Ina wali agalime dindi ogoria emene tigi mbira hangu howa talialu bialu helonaga bayale mbira agilego winidabe hondole lowa taya bule manda biru.

<sup>4</sup> Ina biabe bulene timbuni bu wiarubi bia dege biru. Ininaga anda timbunirubi bialu gerebi mabubi hanga dege bialu haru. <sup>5</sup> Ani buwa ina mabuha tomo tara tarabi hangalu ira lini daga ale tara tara hearubi hangaru. <sup>6</sup> Inaga mabuni ira lini daga ale hangarudaruni iba mulenaga iba goreyane berelo uli dewa dege tombo wiru. <sup>7</sup> Wali agali dewaore inaga garabaya biabe ale bia haga helonaga yolo bu helaru. Wali agali uruni tinaga waneigini hayarubi inaga garabaya biabe ale bia haga dege haya. Ina nogo bulumaga sibirubi dewa hinarugo Yarusaleme tanoha agali maru ala henedarume nogo dewaore ina hinu harudadagua mbira hinu ha nabini. <sup>8</sup> Dindi ina handame ho harudagoria ngolo silibaru dewaore mo yu anda ibalu dindi taraha howa kini bu hearumebi ngigi biyagola dewaore mo wiatago ho haru. Wali agali marume i mo turu

<sup>\*</sup> 1:16: 1 Kin 4.29-31    <sup>\*</sup> 1:18: Aga 12.12    <sup>\*</sup> 2:4: 1 Kin 10.23-27, 2 Bit 9.22-27    <sup>\*</sup> 2:7: 1 Kin 4.23

halu iba gana laga bilonagabi dabo helaga biru. Ani bialu ininaga bu miniha turuho holenaga wali dewa berearubi mo ngoai howa haru biraru.✧

<sup>9</sup> Aniore birugome mbirale uruni bibahende ina mo wiai howa i homogo timbuniore haru. Agali homogo maru ala Yarusaleme tanoha henedaru aria mbira homogo mbirale dewawi i ale mbira nahene. Ai áyu ogoni i agali manda timbuni bogabi haabo harugoni.✧ <sup>10</sup> Ina mbirale mule hame laruru mialu mbira bulene hamelarurubi biru. Ina minime mbirale mbira mo turu holenaga hame larugo yamagaho ha nabi muabirago ale damene mia dege biruli. Biabe ini bini ngorubi hondowa bayaleore biru lowa turu hagabu harugoni. Ainde biabe uruninaga yolo turu harudagoni. <sup>11</sup> Anigo mani inime biabe ndelaheore bu ngelaruda lo mitangi bialu ai ogodagua manda biru. Uruni bibahendeme i biamogo bulene mbira nawiore howa bibahende nagalone hangu mo wiai haruda lo mitangi bu haru. Uruni nagalone bameore mbiralime puyabu minu yania hole talima poradagua binidalo manda biru. <sup>12</sup> Anigo mbirale uruni bibahende ina biai kogodago kini mani ho aribia harago ibugua tara mbira agialego bulubadabe. Ibugua bulene nawiore.

### *Mini gigabi ogoni nagalone degego ogo*

Anidagola ina mini gigabi wulenela mini nawi lulu ale holenelanaga tenego goaria hondole taya bialu haru. <sup>13</sup> Ani taya bialu hewaria inaga miniha howa manda bialu handa walia harugo ogo. Mini gigabi wulenego ibu lulu mini wiaga ngaru bibahende bolangua halu ibu duniniore howa wá holeneme aruma holene bolangua hagadagua bolanguahe wiane handaru. <sup>14</sup> Mini gigabiwi karu ti ogoale berolo miniha manda bialu biaga. Ai mini nawi karu ti galone nawini aruma ale ngaruha pupebe bialu haga ka. Bi ogoni henenege ina mendebi manda bidogo ogo. Dindi ogoria howa mini gigabiwi karubi mini giga nabi lulu karubi ereba holene ogobi dege dege ngane hendedo. <sup>15</sup> Ani handalu ina mbirale agali mini giga nabi lulu karuha tagira polobada alego ibi ani dege bulubadane hendedo. Anigo nde inaga manda bulene mini giga bulenebi áyu timbuni wu kogonime ini biamogo agua bulubadabe. Mende manda berogomebi manda timbuni bidogoni galone nahedane hendedo. <sup>16</sup> Mani haragola wali agalime agali mini gigabiwi karubi lulu ale karubi bibahende embeda hai dege holebira. Mini gigabiwi karubi mini giga nabi karubi homolenenaga ogobi dege dege nga. <sup>17</sup> Anidagola i manga timbuniore harugoni. Irane dindini ngaru bibahendeme i genda mo ngulene dege ngagonaga manga ho haru. Mbirale uruni bibahende irane nawi ina puyabu poragoa gerai lalu haruru puwa minu yania haradagua bialu harugoni.

### *Biabe erekuibi bialu kamaruni irane nawi dege ngago ogo*

<sup>18</sup> Ina erekuibi mbira bialu harugo mani kini mendeali i henegoria ha aribia harago ibugua karulo holobada manda biru. Aniore bulubadagonaga i mangaore ho harugoni. <sup>19</sup> Mani agali kini i henegoria ha aribia holobadago ibu agali manda timbunibime ha aribia holobabe be manda nabi lulu ale kagome ha aribia holobabe tobara. Anigo agali ogoni ibugua mbirale inaga manda timbuni biwagome biabe erekuibi bialu hene bu helaruruni ibugua handayaho holobada. Mbirale urunidagua bulubadagobi nde galone nawi dege. <sup>20</sup> Anidagua bulubadagonaga ina biabe erekuibi bialu harugo mitangi berodagua inaga bu miniha kebaore ho kogoni. <sup>21</sup> Mbirali ibu nde ibuninaga biabe bulenenaga bayuwa lo manda bialu mini gigabiwi howa biabe erekuibi bialu mbirale tara tara dewa mo ngelo haga. Ani mo ngelo howa mani agali ogoni ibuni homaragolaibunaga mbirale wiyaru agali bame karu ti mo haga. Mana ogonidagua bulenego irane nawi koore nga. <sup>22</sup> Ina dindini kamangi biabe erekuibi bialu haabo howa mini burugulo haramaligo ainde biabe erekuibi bialu harimarume ina mbirale bayale agi ngiada biaga ngabe. <sup>23</sup> Ina dindini kamangi mbirale dindini wini bu

ngarunime ina mo mini burugula halu genda dege mo ngiaga nga. Ani biragola mbiraga miniha uruni dege mitangi biaabo halu u baya hangu napale yange yange bu wiaabo haramali. Mana urunidagua bulenegobi nde galone nawiore.✠

<sup>24</sup> Iname tomo ibabi nalu howa biabe birimagonaga turu holene nga. Anidagua beremago uruni tene ina ndo Ngode Datagaliwabe ibuni nde uruninaga teneore kag-  
oni.✠ <sup>25</sup> Iname ogonidagua bulumaya Ngode Datagaliwabe handa ina turu holomaya yupe nakale iname tomo ibabi nalu howa turu agua habehe kamalebe. <sup>26</sup> Ngode Datagaliwabe ibugua wali agali ibu gubaliniore ho karu tihondo manda timbunibi mini gigabi wulenebi mo mialu uruni mo turuho helaga ka. Ani biagagoyu wali agali maru mana ko biaga karu Ngode Datagaliwabe handa tihondo turu nahe tigua biabe ndelahe biragome tinaga mbirale ngaru mo mogo bialu howa wali agali Ngode Datagaliwabe handa turuho hayaru tihondo mo migi biaga. Mana urunidagua bialu holenegobi nde irane nawi dege. Mbirali puyabu minu yania hole talima poradagua bialu haga.✠

### 3

*Bialu holene damene horo Ngode Datagaliwabe ibunime pongobo winigo ngago ogo*

<sup>1</sup> Dindini ngaruni damene bibahendeore bulenebi lolenebi nolenebi wulenebi Ngode Datagaliwabe ibugua uruninaga horo pongobo winingi biaga.✠

<sup>2</sup> Ibutime ina dindini holene horo mo wialu ina homolene horobi mo ngelaga ka.✠

Tomo hongolene horobi tomo bialu nolene horobi mo ngeleda.

<sup>3</sup> Agali bo home lolene horobi warago ngaru mo dabi holene horobi ibugua dege mo ngeleda.

Mbirale ngaru mo waholene horobi bayale helo wabulene horobi ibugua pongobo ngelalu bida.

<sup>4</sup> Dugu bialu holene horobi oba halu holene horobi ibugua dabo ngeleda.

Dara holene horobi iba gana lalu mali lulene horobi ibugua dabo ngelenego nga.

<sup>5</sup> Agalime ibu one baba turu hagabu holenebi waho holene horobi ibugua dege pongobo winigo nga.

One agalinila mini mbira ho holene horobi naholene horobi ibugua dege dabo wini nga.

<sup>6</sup> Mbirale mbira wahenego handa walia holene horobi mbirale yu waholene horobi ibugua dabo ngeleda.

Mbirale ngelo mo wulenebi yu wahalu ba aḡ naḡ bulene horobi ibugua dabo ngeleda.

<sup>7</sup> Ibugua degeme aga budulene horobi lone lebia dai bulene horobi dabo ngeleda.

Bi nale holene horobi bi lalu holene horobi pongobo wini nga.

<sup>8</sup> Ibugua dege mendeali gubalini ho holene horobi handabe manga ho holene horobi dabo ngeleda.

Wai bulene horobi wai nabi holene horobi ibugua dege pongobo ngeleda.

<sup>9</sup> Biabe biaga karume tinaga biabe biragonaga lini bayale agi yu hagabe. <sup>10</sup> Ngode Datagaliwabe handa genda mo ngiraru dege yu haga kamagoni ndobe. <sup>11</sup> Ibugua mbirale bibahende ibunime ibiloa birangi ibilaga biaga ka. Ani bialu howa ibugua inahondo mini bayale mo wia haragola iname mbirale alaore bini ngarubi mani bulubadarubi bibahendeore manda bua howa haga kamagoni. Ani kamagoyu Ngode Datagaliwabe handa mbirale ala binirubi maniore bulubadarubi bibahende ina mo walia naholebira. <sup>12</sup> Ina uruni bibahende manda bu handalu hewaria dunini mbiraore hangu wiaria handarugo ogo. Ina dindini kamangi howa mana bayale hangu bialu turu

✠ 2:23: Yob 5.7, 14.1 ✠ 2:24: Aga 3.13, 5.17, 9.7, Ais 56.12, Lg 12.19, 1 Ko 15.32 ✠ 2:26: Yob 32.8, Min 2.6

✠ 3:1: Aga 3.17, 8.6 ✠ 3:2: Hi 9.27

hagabu dege holene wiaria handaru. <sup>13</sup> Iname tomobi ibabi nalu dungulo howa mbirale bialu karu turubi hangu bialu holene ngalo manda bido. Mbirale uruni bibahende Ngode Datagaliwabehanda inahondo bame ngingida manda buwa ani bulene nga.

<sup>14</sup> Ngode Datagaliwabehandaibunaga mana mo iriari mbira nabiaga ngago i manda buore harugoni. Ibugua biniru wiaho wiaaboboore bu wulebira. Mbiralime Ngode Datagaliwabenaga mana ngagoha mo tago habe naheore wialuibunaga mana uruni aria mbirago mo wahabe naheore nga. Ngode Datagaliwabehanda ogonidagua nge- lenedagoni irane ina wali agali bibahende kamarume ibugua biniru handawa buwa ibuni andaneha hai holomaya ani ngelene. <sup>15</sup> Mbirale ayu birarunibi awe bulebirarubi uruni bibahende abale biaga winigo dege tagira pora. Ngode Datagaliwabehanda abale binidaru bu wa nahaga. Ayubi nde lone abale binidaru biadai bigi biaga ka.

### *Wali agalinaga mana lehe ngago ogo*

<sup>16</sup> Ina manda bialu hewaria mana lehe marubi dindi ogoria wia dege biane handaru. Wali agalime mana tigabi bayale ngaru nabi howa tigua mana ko nabulene wiaru dege mo tene howa bialu ka. <sup>17</sup> Ani bialu kago manda buwa inime lo mitangi bialu bibahende ngaru bulene horo pongobo ngangibulebirago Ngode Datagaliwabe ibugua wali agali bayale biagarubi ko biagarubi ti dabaki bulene horo mbira manda mandabu ngago horo ogoningi bibahende dabaki bulebira lo mitangi biru. <sup>18</sup> Ani bialu Ngode Datagaliwabehanda ina wali agali nogo biango ale dege ka lo mitangi bialu ina ba handalu ka lo manda bido. <sup>19</sup> Anidagua larogoni irane nogo biangoru homalu ereba hagadagua ina wali agalibi nde homalu ereba haga kama. Nogo biangoru ti homa- gadagua ina wali agalibi nde homaga dege kamagoni. Nogo biangoru ti bu he laga kadagua ina wali agalibi nde bu he laga dege kamagome ina bibahende holene ogobi dege dege kama. Ani kamagome ina wali agalinaga holeneme nogo biangonaga holene bolanguahe ndo kama. Ani ndo kirabalinaga holene nagalone labolabo nga. <sup>20</sup> Ngode Datagaliwabehanda dindime kirabali wabinigo ai ina bibahende homaramangi ina haru mandagi lone dindi holeberema. <sup>21</sup> Marume wali agalinaga dinini irigi halu nogo biangoronaga dinini dindiha dalipe haga lo manda biaga. Ani lagago uruni ogodaguaore biaga lalu manda biai habehe ai kabe. <sup>22</sup> Ina uruni mitangi biai howa manda bu handalu koria iname bulene mbiraore hangu ngane hendedo. Iname bulene ogo. Inanaga hariga mende nawiorego iname bulene ngaru bibahende turu howa bialu holene nga. Mani ina homaramangi ogoale bulebira lalu mo walia halu langulene mbira ai kabe.

## 4

<sup>1</sup> Ina lone handalu hewaria dindi ogoriani wali agali bu hearume mana tigabi ndo bialu hearu handai harugoni. Agali ko hearume wali agali dewaore hingedape hayagola dugu bialu heagoni. Anigo ti biamogo bulene mbirali naheoreya. Gabumane karu tinibi ko howa mana ko biaga karubi dege biamogo biaga ka.

<sup>2</sup> Ina manda bialu hewaria wali agali homayaru ti hangu yo piya manda bidogo irane ina dindini kamarume genda handalu kamadagua ti nahondolebira.

<sup>3</sup> Wali agali dindi ogoriani karu ti aiyahanda nahono winidale ti yo peneore kale. Dindi ogoriani wali agali bu karume mana ko biraru ti nahendedale.

<sup>4</sup> Ina handalu hewaria mana tara mendebi handa dege biru. Wali agali karu tigua ti nenege karume mbirale dewa buwi kago hondowa henge lowa tibi ogonidagua dege bu wulenaga erekui biabe biaabo haga ka. Ogonidagua biaga karu mini nawi lulu ale howa agali mbirame gerai lalu puwa puyabu minu yani haradagua bialu ka. <sup>5</sup> Tigua lalu, Biabe nabiaga bame bira hangu biaga kago ogoni ibu lulu ale mini nawi kagoni. Ani biyagua ibunaga hongo ereba halu homolebira, laga. <sup>6</sup> Anigo ina manda bialu



koría iname emene yidamaruni yu howa miniha dungulo holenego karulapeoredane hendedo. Iname horo bibahendengi gi kirabalime erekui biabe biaabo halu halo bira nabi harimayagua ina puyabu minu yani hole lowa gerai talima poradagua berema.✠

<sup>7</sup> Ina handalu hewaria mana nagalone mende bialu hearia handaru. <sup>8</sup> Agali mbira ibu iginibi hamenebi naheore ibuni hangu howa erekui biabe bialu mbirale ilu tete bu wiaga ka. Ibu dewaore bu wu howa karulape ngo lo manda nabi dewa wua dege haga. Ibugua lo mitangi bialu, Ina erekui biabe biaabo halu turu nahe kogoni agidabe. Ibugua mbirale uruni karula aribia holene mbirali naheoredalo mitangi nabiaga. Agali ogonime ogonidagua biragoni turubi ndo nagalone dege bialu habane nabulene holebira.

<sup>9</sup> Mbirali ibuni hangu hayagua bayale ndo. Kirali howa biabe mandagi bialu hayagua ogoni bayaleore holebira. <sup>10</sup> Mendealigo pilope hayagua mendegome gi mibehe holebira. Anigo ibuni hangu howa pilo ibira haragola biamogo bulene mendeali naheyagua ibu darabiore holebira. <sup>11</sup> Dagare biragola libu mandagi paliyagua dagare naholebira. Anigo ibuni hangu hayagua ibunaga tingini agua mo poboyogo bia habehebe. <sup>12</sup> Waitigime mbiraoreali baba hangu wai biyagua waitigi ibu wayali habehe holebira. Ai waitigime kirali karia bayagua wayali nahabehe holebira. Pu tebira yuwa payinigo abale tongo nalaga.

<sup>13-14</sup> Mbirali yagibano henemebi garabaya henemebi irigi howa ibu dindini kini habehe kagoni. Ani hayagua ibu kini howa wahe harangi ibugua agali marume manda bayaleru talebu milo henge namiyagua ibu mini nawi ale habane nabulene mbira holebira. Ibu ogonibi kangi igiri daliahe mbira yagibano mbiraleru burupale howa mini giga bulenebi manda bayalebi kayagua ibugua kini biago bolanguahe holebira. <sup>15</sup> Ina wali agali bibahendeore dindi ogoria palu ngaru mitangi bu handarugola ti kagoniha dege howa igiri bayale daliahe mbira heago ibu kini ho aribia habehe kago handaru. <sup>16</sup> Kini mbirame wali agali dewaore daga labe nahe handayaho howa ibu homaragola wali agali hameigini mani ho aribia hararume kini ibugua biabe timbuni biyaru tigua mitangi bu dai nabulebira. Anigo ibugua biyagoni galone ndo halu agali mbirame gerai puwa puyabu minu yani hole piagagobi dege holebira.

## 5

### *Ína mbira bule lalu Ngode Datagaliwabhondo bame bi dege lo wulene nawi lenego ogo*

<sup>1</sup> Anduane Homogonaga andaha anda pialu howa minila haru polene nga. Ina mana mbira hale halu manda bulenaga piriyaagua bayaleda. Anigo wali agali mini nawi karume lomaru bo delole piagadagua í bame pupe holenego nakarulape. Wali agali urunibime Ngode Datagaliwabe deni ko bayalela dababe nahe kagoni. <sup>2</sup> Ngode Datagaliwabhondo ogo ale bule lowa bi bame lowia nabi mitangi ala buwa bi labe. Ibu dahuliya andagani kago í nde dindi ogoriani wali agali dege kegoni manda buwa ína bi dewa lolene nawi galone ngadagua lalu habe.✠ <sup>3</sup> Ina mbirale ngarunaga mini tumutumumu bu hariyagua emaga ko hondolebere. Bi lo payapaya dewa biriyagua ína lulu bi dewa lolene wulebira. <sup>4</sup> Ina Ngode Datagaliwabhondo mbirale mbira bule lalu lo wuwa awe bule lalu lu hondo haabo nahabe. Mini nawi ale kagohondo Ngode Datagaliwabhonda turu nahaga. Ina bule lo wirigo abale bibe.✠ <sup>5</sup> Ina Ngode Datagaliwabhondo mbirale mbira bule lalu lo wuwa nabiriyagua mana ogoni bayale ndo bere. Bule lalu lo wiridagua nabibehe keyagua nde ína mbirale mbira bule lalu bi lo wia nabibe.✠ <sup>6</sup> Ina bi laregome íni ko mo bia holigo de hondo habe. Ina loma binigo mo miaga agali karuhondo lalu, I mini nawi howa bame laruya, lolene nakarulape.

✠ 4:6: Min 15.16-17, 16.8 ✠ 5:2: Min 10.19, Md 6.7 ✠ 5:4: Dag 30.2, Man 23.21-23, Iba 66.13-14, 76.11 ✠ 5:5: Min 20.25, Ab 5.4

Anidago ína Ngode Datagaliwabe aginaga mo keba holebe. Ína ibu mo keba haregola mbirale erekui biabe bialu ilu wiriru mo ko holigo. <sup>7</sup>Ína biabe bu waholeru dewa biaga keyaguabi emagaru dewa handa gimbu biaga keyaguabi bi lagimbu biaga keyaguabi uruni ale nagalone degedago ína Ngode Datagaliwabe ibu gibiore ka manda bialu ibu andaneha holene nga.

*Homogo holene hangu manda nabibe lenego ogo*

<sup>8</sup> Gabumane agali karume wali agali yagibano karunaga mo genda hayaguabi tinaga godi larago baya hangu mo tiga nabiyaguabi tihondo bulene tigabi ngadagua nabiyaguabi uruni hondowa ína mogo nalabe. Haru haga karume mana urunibi birago irane tinaga haguane karume tini genda mo wia haga. Anigo haguane o haruaruni tinaga haru haga daliga karumebi mana uruni ale dege bialu hagaya.

<sup>9</sup> Agali haguane urunime ogonidagua bialu wali agali ti dindini tomo hengenerunaga muni miagane winiru ti mo page biaga. Haru haga urunime muni uruni mo page buwa tini hangu tale bu ta haga. Kini ibubi nde ogonidagua dege wali agalihondo dagisi muni ngi lalu hagaya.

<sup>10</sup> Ína muni gubalini hariyagua karulape wu ha nabulebere. Ína homogo hoa hariyagua mbirale hamelederu bibahende wu hai naholebere. Uruni bibahende galone nabulene holebira. <sup>11</sup> Í homogo howa mbirale dewa wu kegobi dege í andagani tomo nolene ne harigawibi dewa dege holebira. Ína bialu kegoni maru karume í homogo ka lowa manda bilonaga hangu bialu kegoni. <sup>12</sup> Biabe biaga karume tomo nolene dewa bu wiyaguabi nawiyaguabi ti mbiraga u baya hangu paliaga ka. Anigo agali homogo karu ti u palia hondo nahe tinaga mbirale wiyaruni mitangi tangi bialu yange yange bu wiaga.

<sup>13</sup> Dindi ogoria nabuabi ale mbira bialu hearia ina handarugo ogo. Wali agalime muni tini buru palirangi mule lowa do haga. <sup>14</sup> Ani buwa muni urunime biyinaya mbira bialu bia ko howa muni do hayaru biba haragola mani ti waneiginiruhondo mulene nawiaga. <sup>15</sup> Ina aiyahanda ina taba hanayangi mbirale mbira nayi ibirimadagua dege ina homarangibi mbirale mbira nayiore poleberema. Iname dindi ogoria howa erekui biabe bialu mbirale mo mogobu ngamarubi mbira nayiore poleberema. <sup>16</sup> Mbira nayiore ina aiyahanda taba hanayagobi dege poleberama. Iname erekui biabe bialu puyabu minu yania haradagua bialu kamagoni aginagabe. Mbirale mbira agi yu holeberemabe. <sup>17</sup> Dindi ogoriani howa ina bayale ndo halu inaha genda tandagala anda ibalu horo bibahendengi mini burugulo halu kebabi halu waragobi balu haga beremali. <sup>18</sup> Iname bayaleore mbira bulene wiaria ína handa walia harugo ogo. Ngode Datagaliwabehanda holene horo henge emene tubagi ngidagoria iname turu howa biabe bialu ibabi hinabi nalu holene ogoni hangu wiaria handaru.

<sup>19</sup> Ngode Datagaliwabehanda agali mbirahondo munibi mbirale dewa gime biabe biyagonaga miyagua agali ogoni ibu turuho holene nga. Irane Ngode Datagaliwabehanda mbirale uruni agali o biagohondo bame turu halu minigonaga ibu turu holene nga. <sup>20</sup> Agali ogonibime Ngode Datagaliwabehanda ibu tigimandi turuho helonaga henge miyago ibu dindi ogoria agua holedabe lowa mini dege dindi nahe holebira.

## 6

*Dindini holene galone nawi manda binigo ogo*

<sup>1</sup> Ina dindi áyu kamagoriani wali agali bu karu mo genda haga mana ko mbira wiaria handarugo ogobi wia. <sup>2</sup> Ngode Datagaliwabehanda agali mbiragohondo muni dewabi mini timbunibi mbirale mbira ibu hame ledaru alego mbira buru palia nabi helo miai haga ka. Ani muwa Ngode Datagaliwabe ibugua agali ogonime mbirale uruninaga turu

✧ 5:15: Yob 1.21, Iba 49.17, 1 Ti 6.7

hama pelo yupe naholebira. Anigo mani hameigini tara ibirarume agali biagonaga mbirale ngaru mialu turu hama polebira. Mana ogonibigo turu nabiya. <sup>3</sup> Iname waneigini handari mbira (100) hono bila howa mali dewaore harimayaguabi mbirale bayale bu ngamarunaga lini nane kamaore dege homaramagola marume ina bayuwa hora nahayagua ogoni nakarulapeoreda manda bido. Ina ogonibi harimayagua nde gali mbira aija tombeha howa homayago ibu bolangua holebira. <sup>4</sup> Gali ogonibi taba honolenego bayale ndo. Ibu mini lene ndodagola tigua hora howabi ibu mitangibu wiaabo nahaga. <sup>5</sup> Waneigini ogoni ibu nime wá haragobi nahendene howa mbirale mbirabi manda nabi paluene dege manda biaga. Ai waneigini o biagobi ibunaga holene ogonime <sup>6</sup> agali mbirale dewa buwi biagonaga holene bolangua haga. Agali ogonibigo ibu mali daosini mbira (1,000) daosini kira (2,000) heneyaguabi ibugua dungulo bayale holene manda nabi turu nahe dege haga. Ina bibahende kamarubi homalu gali biagobi agali biagobi libu piyadagua dege pu holeberema ndobe.

<sup>7</sup> Iname biabe beremaligo bibahende tomo nolenenaga hangu beremali. Anigo iname tomo nolene karulape wu tolo haabo naharamali. <sup>8</sup> Agali mini gigabiwi karume mini nawi karu agua bolangua hagabe. Agali yagibano mbirame wali agali bu karu deni mana bayale mbira biyagua ogonime ibuni agua biamogo bibehebe. <sup>9</sup> Mana ogonibigo galone ndo mbiralime gerai lalu puwa puyabu minu yani haradagua bira. Ina mbirale dewa tara tara wu hole mitangi bu wiaabo nahe emene ngamaru karulapedalo manda buwa miniha turuho holene nga.

<sup>10</sup> Mbirale bibahende tagira ibagago uruni bambaore Ngode Datagaliwabe handa tagira ibilonaga manda manda bu wini. Ani binigo ina wali agalime mana beremarubi Ngode Datagaliwabe ibu manda biai kago manda buwa iname ibula lai labe nahe kamagoni. Ogoni irane ibunaga hongo kagome inanaga hongo kamago bolangua haihe ka. <sup>11</sup> Iname lai laabo harimayaguabi ina wayali habe nahe holeberema. Iname bi bame lo waharamagome inane emenebi mbira biamogo nabulebira. <sup>12</sup> Ginu ngarume ni ge haragola munini abaleore ereba hagadagua ina dindini emene tigi mbira hangu halu ereba holeberema. Anigo inanaga holene ogoni galone nawidago iname mana bayalego talima polomaya agua manda bibehebe. Ina homedemaha dindi ogoria bulebira ogo ale bulebira lalu agua manda bibehebe.

## 7

### *Dindini holene mitangi bulenego ogo*

<sup>1</sup> Nga biagane mini sanda yolo timbuniore miaganego nira lowa wali agalime í bayaleore kegoni lolenegome bolangua ka. Ai í taba henene horo ogoni dindiha lowa í homarego horo bayale nga.✧

<sup>2</sup> Iname mbirali homenegonaga dugu bialu karia duguanda pirimayagua ogoni bayaleore. Tomo timbuni dawa nalu karia polenego dunini ndo nga. Ogoni irane ina dindini kamaru bibahende homaga dege kamagoni mitangi bialu holene nga.

<sup>3</sup> Ina miniha genda ho holene bayale lowa oba dege ho holene bayale ndo nga. Ogoni heneneorego irane genda haramagome inanaga wanakui mo aruma howa ina dindi ogoria mana bibahende ngago bayuwa manda bulumaya biamogo biaga nga.

<sup>4</sup> Mbirali turu ho holene hangu mitangi biaga kago ibu mini nawi ka. Ai mini gigabiwi kago ibu homolenenaga mitangi bialu holebira.

<sup>5</sup> Wali agali mini nawi karume í mini yaraga harago galone ndo lowa mbirali mini gigabiwi kagome í talialu mo tiga biyagua ogoni bayaleoreda manda bibe.

<sup>6</sup> Wali agali mini nawi karume oba hararuni galone nawini oba haga. Ogoni mamunali anihe irani delaragola dide hangu lalu todobene be do pobo nahagagobi tinaga oba ogoni galone ndo holebira.

✧ 7:1: Min 22.1

<sup>7</sup> Agali mbira ibu mini gigabiwi howa wali agali marunaga muni mbiraleru mo hondo howa miyagua ibu agali mini nawi kagobi dege kagoni. Agali mbirame ohowa muni mirago nayagua mana ogonibi biragome ibuni mini bayale ala wiyago mo ko haragoni.

<sup>8</sup> Agali mbirame biabe mbira tehinalu bialu bu maro biyagua ibu bayale biaga ka. Mine holene nira lowa ema nabi hibu loleneme bolangua holebira.

<sup>9</sup> Iname wali agali maru karuhondo keba abale nahe mini haru holene nga. Keba haho wiaabo holene wali agali mini nawi karunaga mana nga.✧

<sup>10</sup> Ala bayale haramaligo áyu ko kamagoni irane aginagadabe lolene nawi. Bi ogonibi larimayagua ina mini giga bulene nawi howa laramali.

<sup>11</sup> Wali agali bibahende dindi ogoria kamaru ina mini gigabiwi holene nga. Holene ogoni bayaleorego ina aba homole howa mbirale bayaleru paluni ngiagago ale ngagoni.

<sup>12</sup> Mini gigabi wulene ogonime horo kongi munime ina biamogo biagadagua biamogo biaga. Anigo mini gigabi wulenemebi manda bayale bulenemebi muni ngaru bolangua howa ina biamogo biaabo haga nga.

<sup>13</sup> Ngode Datagaliwabehanda mbirale bibahende biyaru bayuwa manda bulene nga. Ibugua mbirale mbira wabu ko hayiyagua aiwa mo tiga bu helabehebe. <sup>14</sup> Mbirale bibahende bayale dege ngangí ínaga miniha dungulo howa turu habe. Ko holene mbira í kegoria ibirangi Ngode Datagaliwabehanda ina kamagoria kobi bayalebi ibilagada manda bibe. Ogonigo mani agi bulebirabe ina manda nabi kamagoni ndobe.

<sup>15</sup> Ina dindini howa mbirale bibahende handalu hewaria ínaga holene ogoni galone ndoyane handarugoni. Ani handalu hewaria agali mana tigabi wiadagua bialu hearu homaya. Agali maru mana ko wiaru bialu heagoyu ti dindini lu haabo hea. <sup>16</sup> Anigo iname mana tigabi bulenebi mini bayale gigabiwi holenebi mitangi beremagome inane mo ko holigo hongo nahamiya. <sup>17</sup> Iname mana ko tara tara ngaru bulebi mini nawi howa bulenebi hongo howa nabimiya. Ina homolene nangangi inane abale mo homa holigo nabimiya. <sup>18</sup> Mana ogoni labo bulene ngagoria nabi wandialu hamiya. Mbiralime ibuni mo dindiha halu Ngode Datagaliwabe ibu gibiore ka manda bialu hayagua ibugua mbirale birago damene bibahende bayale hai holebira.

<sup>19</sup> Tano mbirani agali haguane pira hayagua tigua tano bayale wilo mo hongo harago emene nira ale lowa mini gigabi wuleneme agali mo hongore haragome bolanguahe ngagoni.

<sup>20</sup> Mbirali dindi ogoriani howa mbirale mbira bia ko nahaga tigabi hangu biaabo haga mbira naheore. Horo marungi ibubi ko bigi biaga dege kagoni.

<sup>21</sup> Wali agalime bi larago bibahende hale hai nahabe. Hale hariyagua nde ínaga biabe biahaga kagome í mini lalu bi ko lararia hale holebere. <sup>22</sup> Hale howa ina manda bialu keria horo marungi marunaga mini lalu bi ko dege lariligo mitangi bigi bulebere. <sup>23</sup> Ina ínaga mini bayale gigabi wuleneme mbirale uruni bibahendenaga tene manda biai holebero mitangi birugoni. Anigo í agali mini gigabiwiore hole tai dege bialu harugoyu ínaga manda bulenego emene halu uruni bibahende manda biai habe naheya. <sup>24</sup> Holene áyu kamagonaga galone ogobi nga lalu aiwa manda biai habehebe. Iname holene ogoninaga galone taibidago manda bibe nahe kama. Anidago bibahendenaga tene aiwa handa walia habehebe. <sup>25</sup> Anigo ina mini bayale gigabi wulenebi manda bulene tarabi yu tiga bule hibu laabo halu mbira manda nabi harugonaga manda bulebi hongo howaore hai bialu harugoni. Mini nawi howa mana ko ngago biaganego irane manda bulenaga ina hongo howa hai bialu harugoni.

<sup>26</sup> Ina handalu hewaria homoleneme genda ngiagago emene bagi hene lowa wali ko biaga bedarume genda ngiagago timbuniore ngiagayane handa walia harugoni. Mbirale do wilo gono wia hagadagua ina agali kamaru do wulumaya gono walime wida. Tinaga gi karuni ina dariba haga pu seni ale ho bedagoni. Agali Ngode

✧ 7:9: Ya 1.19

Datagaliwabenaga andaneha haga kago ibu gono tara uruni aleha howa yo pialu ibida pobehe holebira. Ai agali ko biaga karu ti gono ogoni aleme minu yani kagola yo pialu pobe naheore holebira. <sup>27</sup> Agali mandabi ibugua lalu, Heneneore ina manda nabi henego emeneore manda bigi bialu ai walinaga mana biagago handa walia ho kogoni. <sup>28</sup> Ina mbirale marunaga irane manda nabi dege howa tai biaabo harugola handa walia naheore. Wali agali daosini dewaore bu hearu dombeneha handalu hewaria ina agali bayale mini tigabi mbira mbira ha dege bia. Anigo wali bayale mini tigabi lenego mbira nabereoreyane handaru. <sup>29</sup> Uruni bibahende manda bulenaga hai bialu hewaria ina mbira handa walia harugo ogo. Ngode Datagaliwabehanda wali agali wabiyangi mini tigabiwi holomaya wabinigoyu inaneme mini tara tara wialu áyu nakarulapeore kamagoni handa walia kogoni, laya.

## 8

<sup>1</sup> Wali agali mini bayale gigabiwi karu ti degeme mbirale bibahende ngarunaga irane ogobiore nga manda biai ho kogoni. Anigo wali agali mini gigabiwi uruni hingedape habehe ai kabe. Mbirali ibunaga wanakui arumahe hayagua ogoni mini bayale gigabi wulenemebi manda bayale bulenemebi ibunaga wanakui mo wála holebira.

### *Kininaga bi larago hale halu bulene nga lenego ogo*

<sup>2</sup> Ngode Datagaliwabehondo bi hongo howa lo wirigo manda bialu kininaga bi larago hale howa mo wanahabe. <sup>3</sup> Ina kinila bi iriari biyagua bi hongo howa nalabe. Kini kagome ibuni hame ledadagua bibehe kago manda bialu ina ibu kago ha hariyagua ibu helalu abale wahalu pobe. <sup>4</sup> Kini ibugua bi larago hale halu wali agali bibahendeme buleneore nga. Agali mbirame kinihondo hale halu ina ogo aginaga biribe lolene henge nawiorego manda bibe. <sup>5</sup> Wali agali kininaga bi larago bibahende hale halu biraru ti bayale holebira. Agali mini gigabiwi kago ibugua mbirale mani bulebadago ogoangi bulubadalo manda biai ho ka. <sup>6</sup> Ina wali agali kamarume inane nakarulape kamagonaga genda yu howa bibahende bulene ngagonaga horobi hariga bayalebi ngagonigoyu ina manda emene hangu bidama. <sup>7</sup> Mani agi bulebirabe ina manda nabi kamago ai uruni ogo ale bulebira lalu ina langulene mbirali nahe. <sup>8</sup> Homolene wirangi inanaga dinini ibu tingini yu wahalu poragola mbiralime hapai habe nahe holebira. Ani bialu iname homolenenaga horobi mo aribia habe nahe kama. Wai birangi ami haguane ami agali wai wahalu tini dindi dai bilo yupe nahaga. Ogonidagua dege mana ko bialu harimagome ina yo pialu pobe nahe ko ogonime inani paraho wiaabo holebira.

### *Ko biagarumebi bayale biagarumebi bialu haganego ogo*

<sup>9</sup> Wali agalime dindi ogoria howa bibahende bialu haganeru handalu ina manda biai harugoni. Ani handalu hewaria agali haguane bu hearume wali agali maru hingedape halu tihondo ko dewa biyaria handaru. <sup>10</sup> Horo marungi ina handalu hewaria agali ko biaga mbira homayagola wali agalime hora halu hearia handaru. Wali agali biarume ti homali yu wahalu dai bialu howa tano agali homayagome mana ko bialu hayagoha tigua agali o biagonaga mini yaraga hama piya. Mana urunibi galone nawi dege biyagoni.

<sup>11</sup> Wali agalime ko biyagonaga pani abale mia dai nabiragome ti ko bia toa helonaga mini mo heya haga. <sup>12</sup> Wali agali ko biaga karu ti ko dewa biaabo halu howa abale homa nabi dindini lu haabo haga. Anigo bi mbira laganego, Wali agali Ngode Datagaliwabe gibiore ka manda bialu ibu andaneha haga karu ti bayale haabo holebira. <sup>13</sup> Mana ko biaga kago ibu Ngode Datagaliwabenaga bi mana lo ngago bia nabiyagua ibu bayale habe nahe howa emene tigi mandi hangu dindini holebira, lagane ogoni nga. <sup>14</sup> Tigua ani laganegoyu ina handalu hewaria mana ogonidagua tagira naibagago ogoni habane



nabuleneda. Marungi wali agali mini tigabiwi karume yolo mulene winigo nami ko biaga kagonaga pani no aribia haga ka. Wali agali ko biaga karume pani nolene winigo nane mini tigabiwi karunaga yolo mu aribia hagayago ogoni galone ndoya.

<sup>15</sup> Anidago ina manda berogola ina turu hagabu holeneo hangu bialu harimayagua bayaleda. Ina hariga polene bayale mende nawi. Ani manda buwa iname iba hinabi nalu turu hagabu holene nga. Iname biabe bulene ngago bialu helo Ngode Datagaliwabehanda ina dindi ogoria heledago horo bibahendengi ina turu hagabu hangu hamiya.

<sup>16</sup> I mini bayale gigabiwi hole wali agalime mana tara tara horombe mbiragabi bialu hagaru irane hai bule biabe hongo howa birugoni. <sup>17</sup> Ani hai bialu hewaria ina Ngode Datagaliwabehanda mbirale bibahende wabinigo dindi ogoria agua tagira ibinida lalu iname tene manda biai habe naheya manda biru. Iname erekui biabe bialu handa walia hole lowa tai biaabo harimayaguabi handa walia naholeberema. Agali mini gigabiwi karume bibahende manda biai kama layaguabi henene ndo laragoni. Tiguabi mbirale uruni bibahende manda biai habe nahe ka.

## 9

### *Mbirale ogobi dege ina kamagoria ibulebira lenego ogo*

<sup>1</sup> Ina mbirale uruni bayuwa mitangi bu wiaabo howa agua manda biru. Wali agali mini gigabiwi karubi mini tigabiwi karubi tanabi tigua biagaru Ngode Datagaliwabe ibugua mandabu winidagua hangu biaga. Ibugua tinaga gubalini holenebi handabe manga holenebi haru haga ka. Ina wali agali kamarume mani agi bulebirabe manda nabi kamagoni. <sup>2</sup> Ina mini tigabiwi kamayaguabi mini ko wiyaguabi mana bayale biagabi ko biagabi mbirali Ngode Datagaliwabe deni dodohebi dodo nahebi mbirale ibuhondo bo lomabu miagabi namiagabi ina bibahende kamagoria mbirale ogobi dege ibaga. Ngode Datagaliwabehondo ogo ale bule lalu bi lowini kagohondobi nalowi kagohondobi wali agali bayale biagabi ko biagabi mana mbiraore ogobi dege dege bulebira. <sup>3</sup> Wali agali dindi bibahendeni kamaru inahondo mana mbiraore ogobi dege dege biagago ogoni tiga nabioroda. Wali agali ti dindini kangi ko bulenebi mini nawi howa bulenebi tinaga miniha tolo tagihe kagoni. Ogonibi kaore ti abale homaga. <sup>4</sup> Wali agali dindini kangi tigua mini dunubia holene henge nga. Biango dére kagome laiono homene ngago bolanguahe kagoni. Ogonidagua dege wali agali karume homayaru bolanguahe ka. <sup>5</sup> Wali agali karume manda bialu karia ti homole kama manda bidagoni. Anigo wali agali homayaru ti mbirale mbira manda nabibehe nga. Ti mbirale mbira bayale mulene henge nawulebira. Wali agali karume homayaru mitangi bu wiaabo nahe embeda holebira. <sup>6</sup> Wali agali homarangi hame lagagobi dimagoli hagagobi keba haganebi uruni bibahende ereba hai halu dindi ogoria mbirale mbira bu dai bulene henge nawulebiraore.

<sup>7</sup> Ini tomo wiridaru nalu turu ho habe. Waini iba hambu wiridarubi nalu bu miniha dungulo habe. Ngode Datagaliwabe ibugua anidagua berego karulape lo manda bida. <sup>8</sup> Horo bibahendengi í yári bayaleru bu haabo howa turu ho habe. <sup>9</sup> Inanaga holene galone nawiore kamago ai wali mbira ini gubalini hene bereagua Ngode Datagaliwabehanda í dindi ogoriani habelo henge ngiradagua horo bibahendengi wali ogonila turu hagabu haabo habe. Í dindi ogoriani howa ina biabe bialu harigonaga yolo ogoni ngidago ani bialu habe. <sup>10</sup> Biabe mbira bialu kego nde hongo howa bialu habe. Mani í homene dininiru ti daluha pu howa ina biabe bulenebi manda bulenebi mini gigabi wulenebi mbira nawulebirago áyu kengi ani bibe.

<sup>11</sup> Dindi ogoria mendebi nde wiane ina handa dege birugo ogo. Marume hongoore howa gerai laragolabi ogoni ibu pole biyagoria bolangua habe nahe haga. Ami agali hongohe karume tigua wai bialu wayali haabo nahaga. Mbirali mini gigabiwi karu

manda timbunibi karubi tigua muni mbiraleru dewa nawiore hagaya. Marume biabe tara taranaga haru haga mugube timbuniyi karu ti manga nahe hibu lalu howa biabe timbuni biaabo haragome tigua biabe haru haga timbuni ho aribia nahagaya. Ndelahе gendabi ngaru ina bibahendehа ibai hagaya. <sup>12</sup> Genda timbuni mbira inaha agilego ibulubadabe bibahendeme manda nabi kamagoni ndobe. Wena pialu karia nu ngaha hana ho wiagadaguabi nogo egaru gonoha do wiagadaguabi mo ko holeneme ina manda nabi kamaria abaleore gono ngagoha do wiaga manda bidamagoni.

*Wali agali mini gigabiwimebi mini nawimebi mana biaganego ogo*

<sup>13</sup> Ina mbirale mbira tagira ibiyago mitangi bialu wali agali mini gigabiwi karume dindini howa mana biaganego manane bayale mbira ina handarugo ogo. <sup>14</sup> Tano emene mbira wiagoha wali agali dewa nahe wia. Ani wiagola kini hongohe mbirame ibunaga amiru heba ibalu wai bialu tano ogoni karulole ibiya. Ami biarume tano ogoni ho mabu bupe howa tano pabe bo podole manda manda biya. <sup>15</sup> Ani biyangi agali mbira yagibano tano ogoniha henego ogoni ibu mini gigabiwi manda bayalebi hene. Ibunaga mini gigabi wulene biagome tano ogoni waitigirunaga giha hearia ibugua mo yu dai bulene hariga manda bu hene. Ibu ogonibi henego agali bu hearume yagibano biago mitangi nabi hene. <sup>16</sup> Anigo ina lalu, Mini gigabi wuleneme hongo holene timbu ngago bolangua kagoni, lalu haruli. Wali agalime mbirali yagibano kago hondowa ibu mini gigabiwi kagoni mitangi nabi howa ibugua bi laragola hale nahaga ka. <sup>17</sup> Iname agali mini gigabiwi kagome bi hendore laragola hale harimayagua ogoni bayale. Agali ogonibi kago ibugua bi laragome agali maru bi habane nabulene laga karunaga haru haga agalime bi dalimuore lagago bolanguahe kagoni. <sup>18</sup> Mini gigabi wuleneme wai biagane ale bibahende ngaru bolanguahe ngagoni. Anigo wali agali ko biaga mbira kago ibugua mana tiga nabi biragome mana bayale bibahende ngago mo ko hai haga ka.

## 10

<sup>1</sup> Tawalinarume nga biagane mini sandanaga beha anda pialu homa anda hayagua sanda nga biaga biago ngu bulebira. Ogonidagua dege mbiralime mini nawi howa biragome agalinaga mini gigabi wulene timbuni daliga ngago bo pelalu hingedape holebira.

<sup>2</sup> Wali agali mini gigabiwi kagome mana bayale biaga ka. Ogonidagua wali agali mini nawi kagome mana tigabi ngaru nabiaga ka. <sup>3</sup> Wali agali mini nawi ogonibime harigani pialu howa mbirale mbira biragome wali agali maru karuhondo ibu mini nawiore ka walia haga.

<sup>4</sup> Inaga haru hagame ihondo keba hayagua ina biabe bialu kego wahalu pu nabibe. Ina timbuni bia ko hariyagua ema nabi bi nale kegola ibugua ina ko birigo la nabi waholebira.

<sup>5</sup> Ina dindi bibahendeni handalu hewaria agali haru haga haguane marume mana ko mbira bigi biyaria handarugo ogo. <sup>6</sup> Haru haga haguane karume wali agali mini nawi karuhondo haru haganaga biabe timbuni ngaru bilo mo mialu homogo karuhondo biabe dindiha bayale ndo ngaru bilo mo miaga. <sup>7</sup> Ina handa dege bialu hewaria garabaya biabe ale bia haga hearume ti nogo hosini biralu pialu hea. Anigo haru haga timbuni hearume ti garabaya biabe ale bia hagame geni dindi dindi piagadagua pialu heagoni.

<sup>8</sup> Ina gundu uli timbuni mbira tombo wiriyagua ini uli ogoniha pilabehe holebere. Ina ege tole pabe minu gialariyagua nogombime i hayabehe holebira. <sup>9</sup> Ina dindi hari ngagoha tole timbuni ngaru polalu hariyagua tole urunime i babehe holebira. Ina ira balu hariyagua nde ira ogonime ini dibu bai habehe holebira. <sup>10</sup> Ayu ne nahego yu

✧ 10:8: Iba 7.15, Min 26.27

howa nage nawiriyagua erekui biabeore bialu ira dibulebere. Mbirali mini gigabiwi kago ibugua biabe bulenaga ala manda manda bialu haga ka. <sup>11</sup> Mbiralime nogombi mo dambola holene mana manda bu karia ibugua nogombi ogonime ibu ala hayilo henge miyagua mo dambola holene mana biago manda bialu hayago nagalone holebira. <sup>12</sup> Mbirali mini gigabiwi kago ibugua bi larago hale howa maru karume ibunaga mini mo yaraga holebira. Anigo mini nawi kago ibugua bi laragome ibuni mo habane nabulene holebira. <sup>13</sup> Agali ogoni ibugua bi tehinalu larangi bi la ko howa mani ibu bi lamaro bulebiraha bi larago agali lulume laradagua bulebira. <sup>14</sup> Wali agali mini nawi karume bi laho dege ngane laho wiaabo holebira.

Mani agi bulebirabe ina manda nabi kama. Ai ina halu homedemahabi dindi ogoria agi bulebirabe mbiralime ina langibehe ai kabe.

<sup>15</sup> Mbirali mini nawiore kagome erekui biabe bialu ibunaga hongo bame biba ho wahowa ibu andaga polene hariga pedagoria nape pu tara howa ibuni andaga handa walia habe nahe holebira.

<sup>16</sup> Dindi mbiranaga kini igiri emene mini boga nabime haru haga kayaguabi agali haguane maru karume egerebagi heyalu tomo ibabi timbuni dawa gimbu bu naabo halu kane mbiraga hayaguabi dindi ogoriani genda timbuniore tagira ibulebira.

<sup>17</sup> Dindi mendenaga kini kago ibu mini bogabiore howa bulene ngago bayuwa manda bialu ibunime bi lalu haru haga ogoriani karume hina ibabi narago ti lulu yilo lowa nagimbu bialu ndo tingini hongo helo lowa nolene ngadagua nayagua dindi ogoni bayaleore wulebira.✧

<sup>18</sup> Agali mbirame ibunaga anda arema bulene manga howa dangi nalayagua iba bondo lalu anda ogoni podo ibira holebira.

<sup>19</sup> Tomo timbuni dawa payabu naragome wali agali mo turu halu waini iba naragome agali mini mo dungula hagane nga. Anigo muni nayi howa ogoni kirabali nabe nahe holebere.

<sup>20</sup> Í ñinaga paliagane tamuha howa ñna homogo karu nahendedaha mege bialu kini kagobi hagarere bi lowa la hira nabibe. Ñna larigoni ega mbirame lo yalu puwa tini lamule poligo manda bibe.

## 11

### *Mini gigabiwime biabe biagago ogo*

<sup>1</sup> Ñnaga muni wiridaruni muni biabe timbuni tara tara bialu karuha wia holene nga. Ani beregola ñnaga muni urunime igini dewa ngagola wirigo bolangua howa dewa yu holene wulebira.✧ <sup>2</sup> Ñnaga galone ale ngeru kahalu hali halu agima tale bialu mani dewa tago haragola mo yu dai bule wia haga bulene nga. Mani dindi ogoria mo ko holene agi ale ibulebirabe í manda nabi kego ani bulene nga.

<sup>3</sup> Beralibaha iba biru tolaragola dindini iba dalu ibaga. Ira mbira uyurahayagi podo ibira heneyaguabi unurahayagi podo ibira heneyaguabi podo ibira henedagoria wiaho wiaabo holebira. <sup>4</sup> Horo bayale iba dalu puyaburu ibilonaga horo maliaho howa mbirale mbira ñna nahenge harigo ai nolene bogabi dedariabi nadonolebere. <sup>5</sup> Ngode Datagaliwabehanda mbirale bibahende wabinigo. Ai waneigini aña tombeha aguaore bialu anda harabe ina manda nabibehe kamagonidagua dege ibugua wabini ngaru damene bibahende manda biai habe nahe kama. <sup>6</sup> Ñna tomo egene maru egerebagi hangalu maru alendo hangabe. Mende egerebagi hangarigo bayale anda holebirabe be alendo hangarigo bayale anda holebirabe ina manda nabiore kama. Tomo egene uruni andaho kagola egerebagi hengene alendo hengene lalu dabaki habe nahe ogobi labolabo andaho holebira.

✧ 10:17: Min 31.4 ✧ 11:1: Ais 32.20, Md 10.42, Ga 6.9-10, Hi 6.10

<sup>7</sup> Wá holene ngago ibu baya taraore mbira ngagola nime wá harago hondowa iname turu haramali. <sup>8</sup> Mali bibahendengi ina dindi ogoria hama ibinigo kama manda buwa turu ho haabo holene nga. Mali dewaore dindi ogoria harimayaguabi iname mbirale uruni embeda nahamiya. Ina homalu puwa mali dewaore homene dininirunaga dindi humbirini andagaha puwa haabobo holeberamago áyu howa turu ho holene nga. Mbirale bibahende mani ibulubadaru nagalone dege holebira.

*Wandari igiri daliaherunaga mana lenego ogo*

<sup>9</sup> Wandari igiri daliahe kamiru tí áyu wandari igiri kamingi turu ho halimu. Tí nime bialu holene bayale tigabi ngaru hangu bialu halimu. Ani bialu howa tínaga bu miniha bayale bulene hame ngamidagua talima pialu halimu. Ani bialu ha kamigo mani Ngode Datagaliwabehanda tígua beramigonaga manani dabolene wulebirago mitangi bialu tígua beramiru bibahende mamage howa bilimu. <sup>10</sup> Tí wandari igiri daliahe kamirubi dege holenenaga horo emene tubagi hangu ngago ai uruninaga galone mbira nawiore. Ani ngago mitangi bialu mbirale tara tara ngarume tíha genda tagira ibulebirarunaga mini burugu nale halimu. Ani bialu howa tínaga tinginiha tandaga mo ngiaga ngarunaga mo tene nahalimu.

## 12

<sup>1</sup> Anduane Homogohanda ina bibahende wabinigo ai tí wandari igiri daliahe kamingi howa ibuniore mitangi bialu halimu. Tígua ibu embedaho howa mani tí wahe kamingi mo genda holene mbira tíha anda ibiragola tígua lalu, I dindini holeneore turu nahe ko, lalu holigo ibuniore mitangi bialu halimu. <sup>2</sup> Horo ogonongi tínaga de auhe biruwa nibi egebi yakundibi bibahende nade ginu haguame wá holene bu dambi hai hayada loleberami. <sup>3</sup> Ani bedamingi tínaga gi hongo nahe howa duru lalu holebira. Ai tínaga gebi hongo nahe halu paulobagabi holeberemi. Tínaga ne kamiru pialu mbira mbira hangu kagola tomo bayale hongohe ngago baya hangu hayalu nabe nahe holeberemi. Tínaga de au haragola mbirale ngaru bayuwa nahondoleberemi. <sup>4</sup> Ani bedamingi dege tínaga hale tulu kagola tígua mbirale hale habe nahe howa anda manda tagirahayagi ege toleme kilingele lalu widi dambiaganegobi ngida piliperu bayale mbira tagirayagi laru-agobi baya hangu hale nahe holeberami. Ai tí mbiraga u padamigola ega bilaragome dege tí mo barila holebira. <sup>5</sup> Ani kamingi tí hari bare ngaruha holene gi halu geme ibaga bialu polenego mogo lalu gi holeberemi. Tínaga mandari kamigoni dagua halu pele hangu hai holebira. Anidagua birangi harigani tini pobe nahedagola poa halu gililo yu ibaga bu holeberemi. Mbirale bulene ngaru bule tínaga bu miniha heyalu kiau nalolebira.

Ani bialu homoleberemi. Homalu tínaga haabobo bu holene wiyagoria hole poleberemi. Ani poramigola wali agali tínaga tanoha karu ti íbu ngoai howa dugu bialu holebira. <sup>6</sup> Tí homa nabi kamingi howa Anduane Homogo ibuni ala mitangi bialu halimu. Ai tí homaramingi hale hedo wiaganaga pu seni silibame wabini ngago tongolope halu lamu hale ibuni wiaga ngolome wabini ndisibe ngago pambu lalu hale hundiagadagua hundulebira. Iba hambiaga iba be pume hende howa iba uliha bape halu iba hambialu karia be hende haga pu ogoni ibuni tongolope haragola iba be ibira halu pambu lagadagua bialu <sup>7</sup> inanaga tingini ibu lone dindi halu inanaga dinini Ngode Datagaliwabehanda inaha helayago ibu ibuni karia dai bulebira.

<sup>8</sup> Agali manda timbunibi biago ibugua lalu, Uruni bibahendenaga galone nawiorene nawiya.

*Mbuga ogonaga lamaro binigo ogo*

<sup>9</sup> Agali manda timbunibi ogoni ibugua ibunaga mini gigabi wiagome wali agali lawai hene. Ibugua bi lolenebi bi yobage lalu lolenebi baya hangu minime tale bini. Tale bialu

✧ 12:1: 2 Sml 19.35, Min 22.6, Dug 3.27

bi ogoni bayaleda lo manda biyago mbugani gilibu wini. <sup>10</sup> Ibugua bi marume hale halu dende helonaga lolenego erekuibi tayabu wahalu ai ibugua bi heneneore wiago gilibu wini. <sup>11</sup> Anigo agali manda timbunibi karunaga bi larago nogo sibi haru hagame sibi mo tiga biaga kango nguni dehe yagagobi laga ka. Ani bialu agali manda timbunibi kago ibunaga bi mo mogo bialu mbugani gili biyagua ogoni ira nili bene hagadagua holebira. Ai ina bibahende haru haga nogo sibi anduane Ngode Datagaliwabe ibunime bi uruni inahondo langiya.

<sup>12</sup> I igini-o mbira hangu langero. Agalime mbuga dewaore gili biagago gili biari naholebira. Ani biragola mbuga uruniha ngaru manda biai holenaga hondo manda bialu keria í mo manga timbuni holebirago manda bialu habe.

<sup>13</sup> Ainde bi lamaro bulenenaga bi ogodagua laro. Iname bialu haabo holene duniniore mbira ngago ogo. Ngode Datagaliwabe ibu gibiore kago manda buwa iname ibunaga mana lo wini ngago talialu bialu howa ibu andaneha haabo holene nga. Iname ani bialu holomayanaga ibugua ina wabini. <sup>14</sup> Ngode Datagaliwabe mana bayalebi kobi bia do howabi inaneme bialu harimagoria howa bibahende ibu dabaki bulebira, lalu lamaro bini.✧



## Solomononaga Iba Gana

### Mbuga ogoha gilibu ngarunaga nemandi ogo

Mbuga ogoha gubalini henene holenenaga iba gana lalu gilibu nga. Agali mbirame wali mbirahondo gubaliniore halu ibu iba gana laga bialu heneya. Wali ibugua nde hale haga buwa agali biago gubaliniore halu iba gana ladai bigi bini.

Gubalini heneneore holene tene Ngode Datagaliwabe ibuniore ka. Anigo Isaraele wali agali ala henerume Solomononaga Iba Gana ogoni onene agalinila mini mbiraore halu gubalini hagadagua ina Ngode Datagaliwabela mini mbiraore howa gubaliniore holene nga lalu mitangi bu hene. Ina kamarumebi Keriso hamewaneigini howa Kerisola mini mbiraore howa gubalini haga haga bialu holene nga. Anduane Homogonaga mbuga Pigane Binigo 2.24 gilibu ngago ogo. Agali ibugua ibu aba aiyala helalu ibu onela mandagi howa libu ho mbiraore holebira, lalu gilibu nga. Bi marubi uru, Aisaia 62.5, Hosea 2.19-20, 2 Korindi 11.2 uruni handabe.

Solomononaga Iba Gana mbuga ogoniha mini mbiraore halu gubalini holene mana mo walia halu onene bayaleore agalini bayaleorela mini mbiraore holene nga lalu walia ho nga. Ngode Datagaliwabehanda bayale holene ogonidagua ina ngule manda biaga ka.

#### **Bulu бага буwa kuni gilibu ngago (1.1-2.7)**

Iba Gana mbira lenego 2.8-3.5

Iba Gana mende lenego 3.6-5.1

Iba Gana tebone lenego 5.2-6.3

Iba Gana mane lenego 6.4-8.4

Iba Gana dauni lenego 8.5-14

Iba Gana waragane lenego

<sup>1</sup> Iba gana ogoni bayaleore Solomonu ibunime lenego gilibu winigo nga.✧

### **Iba gana mbira**

*Wandarime iba gana lenego ogo*

<sup>2</sup> Ína í nunu laabo harilidagua laabo habelo hameledo.

Waini iba bayalegome dende biaganego goyane lowa ínaga gubalini holenegro taraoreda.

<sup>3</sup> Ínaga tinginini nga biagane iba mini sanda hai harigo ngabioreda.

Ínaga mini hale howa í turu halu nga biagane ogonibi mitangi biruli. Wandari bedarume í gubaliniore haga bedagoni.

<sup>4</sup> Ína í haru halu iya ibida mba.

Í ínaga kini ale halu ínaga tamuha í haru halu pu. Agalime waini iba hame lowa gubalini hagadagua ndo iyane mandagi gubalini halu turu hagabu holeberaba. Wali marume í gubalini timbuniore hagago irane hendedo.

<sup>5</sup> Yarusaleme waliru-o hale hadaba.

Í tingini mindibi bira bedogonigo

í hulu wandari bayawana Keda dindi yobi ngagoha balai anda mindibi kagobi bedo.

Kini Solomonu anda háini yári labolabo baya burugule gerelaho ngagobi bedogoni.

<sup>6</sup> Ínaga tingini tara mende aledagola mo yo nahandalimu.

Nime í do mindibia henego.

Í mbalinirume í handabe manga howa ína gerebi mabuha biabe bialu holiya helaya.

✧ 1:1: 1 Kin 4.32

Biabe ogoni bialu howa ina inaga tingini baya hangu handayaho holene henge nawini.

7 Inaga yamali-o ina nogo memeru tani bayale nelo ogoha haru pu helolebero lalu i langi.

Ni tandagabi daragola ti gumba agoha holebirabe.

Agali maru nogo meme haru haga kagoria  
ina i taya bialu holiyadago agibe.

*Igirime iba gana lalu ladai binigo ogo*

8 I lawini-o i wandari bayaore bedegoni.

Ina i de hondoleyagua nogo meme sibiru ge piyadadagua talima ibabe.

Talima ibalu inaga nogo memeru tani bayale nelo  
nogo sibi haru haga agali marunaga balai anda bu kagoria kawareni  
tani bayale nolene karia handa walia holebere.

9 Inaga yamali debene bedego inaga yari bidegoni bayaleore  
Iyibi kininaga karisi gili lole nogo hosinaga yari biaganego aleda.

10 Inaga mandarini yari pingipongo biderumebi hale ira dederumebi  
inaga pe mo bayaleore halu gurubu gele ngegome inaga mani ngiringara leda.

11 Anigo iname yari maru ngolo silibamebi inaga wabuwa nguleberema.

*Wandarime iba gana lalu ladai binigo ogo*

12 Inaga kini ibu paliaganeni palearia  
ina sanda bayaleore hai hewagome nga taraore biame haya.

13 Inaga yamali ibu sanda nga taraorebigi  
inaga galu hombeni palu paga ho wiarua.

14 Inaga yamali ibu palawaya minana anda halu  
Engedi dindinaga gerebi maburuha dedagobi kagoni.

*Igirime iba gana lalu ladai binigo ogo*

15 Inaga yamali-o i ore nde wali baya buruguleoreda.

Ina i gubalini kego walia halu inaga de gilibida.

*Wandarime iba gana lenego ogo*

16 Inaga yamali i huliya igiri bayaore kegonigo  
ina i hondowa turu timbuni ho kogoni.

Datani bayale ogoni iyanaga dagiani tamunguru ale holebira.

17 Ira tamia karunaga maganerume iyanaga anda dabira helalu  
ira guraya aleme anda ogoninaga dangi haradagua bulebira.

## 2

1 I Saroni dindi ira teha palawaya minana anda haragobi bedo.  
I hari bu karuha dindi ulini ngaruha palawaya dedagobi bedogoni.

*Igirime iba gana lenego ogo*

2 Datani anihe bu karu dombeneha palawaya hagamadagua  
i lawini biago ibu wali dege dombeneha bayale birarua.

*Wandarime iba gana lenego ogo*

3 Ira dege dombeneha ira lini bayale daga mbira hagamadagua  
inaga yamali biago ibu agali dege dombeneha biatago nahe kagoni.

Ni tandagabi darangi i ira ogoni tenaha gumba birulene hameore ledo.

Ira ogoninaga lini bayale dedago do narogola inaga ne harigaha dendeore biagane.

4 Ibunaga anda heagoaha tomo timbuni dawa wiagoria ibugua i haru piya.

Tomo nagane anda biagoha labolabo bayaleorerume yári bidagonaga turu haradagua ibugua ñ gubaliniore hayagonaga turuho kogoni.

<sup>5</sup> Ñ lawini ñna ibu gubaliniore kogola ñnaga kuni gedaore halu hongo naharuago aiore ira linirubi gerebi lini do gembe binirubi ñ hongo helonaga nabehe bedo.

<sup>6</sup> Ñ lawini biagome ibunaga gi lehagome ñnaga mahayagi yani halu ibunaga gi tigagome ñnaga tinginini yani haya.

<sup>7</sup> Yarusaleme waliru-o tígua nogo gabua mini dia karu mitangi bialu mbira nabuleore lalu ñhondo bi lo widaba.

Mbirale ogoni iyanagago tígua iya mo mogola howa gubalini holene mo dala hangu hangu nahalimu.

## **Iba gana mende**

### *Wandarime iba gana lenego ogo*

<sup>8</sup> Ñ lawini ñ bedoria ibaruane hale ko.

Ibu amura hari bare wiagohayagi howa pogola edene bima gerai lalu ibaruane hale ko.

<sup>9</sup> Ibu gerai lalu biango dudu aleme dai lagadagua lalu nogo bulumaga wangabe daliaheme dai lagadagua lalubi ibarua.

Abale ibalu anda mandaha ibu kago hendedo.

Íbu howa ibu windoha handa anda haragoni.

<sup>10</sup> Handa anda howa ibugua ñhondo bi langiragoni.

### *Igirime iba gana lalu ladai binigo ogo*

Ñnaga lawini gubalini-o tagira ibu.

Yamali-o iya haru áyu mbaliya tagira ibu.

<sup>11</sup> Iba dalu to hayago dalunaga gi nahabe.

<sup>12</sup> Áyu ogoni dindi bibahende ha palawaya dame kago ai iba gana lolenengida.

Ega bedarume turu halu bi taratara lagalaga biarua.

<sup>13</sup> Ira poge ale karume lini dalu ibirarua.

Pu kuabu tara tara irabuha karume lini dagadaga biaruago ai palawaya uruninaga nga baya taraoreda.

Ñnaga lawini gubalini-o tagira ibu.

Baya-o iya mbaliya tagira mbaibu.

<sup>14</sup> Ñ andaga tamuha ega emenerume ibuni andaga ege kaba ngagoha bira do hagadagua bira do haridago.

Ainde ñnaga dengui baya hondoabago hondoliya tagira ibalu ñnaga bi baya tara laruegobi hale holiya tagira ibu.

<sup>15</sup> Biango dudu emene bu karuni minu yani hadaba.✧

Iyanaga gerebi mabu gamaha anda ibuwa palawaya bayale dedaru mo ko holigo abale minadaba.

### *Wandarime iba gana lenego ogo*

<sup>16</sup> Ñnaga yamali ogoni ibu ñ agalini kagola ñ nde ibu one bedogoni.

Ibugua ibunaga nogo memeru palawaya bayale bu karu dombeneha tani nelo haru pu haga.

<sup>17</sup> Ibugua nogo meme biaru handayaho kane dege ni anda pialu dagare bulebira.✧

Hari bare hambene bu ngaruha nogo gabua mini diame gerai lalu ibagadagua ñ lawini-o ñ abaleore ibabelo hameledo.

✧ 2:15: Iba 80.13, Ese 13.4, Lg 13.32 ✧ 2:17: Sol 4.6

### 3

<sup>1</sup>Ina mbi bibahendengi ininaga dagiani paluwa paliahondo nahe yange yange bu wuwa inaga gubalini biago hangu emaga handaabo haruli.

Ina emagaha ibu hangu taya biaabo howa handa walia naheore haru.

<sup>2</sup>Ai emagaha dege i heyalu puwa tano wiagoha ibagabume halu ibu taya bialu haruya. Ina inaga yamali taya bialu tano biagoniha hariga peago bibahendeha taya bume harugoyu

ina ibu mbiraha lola halu handa walia naheore harugoni.

<sup>3</sup>Tanoha mamage haga agali hearume i de handaya.

Ina tihondo hale halu lalu, Inaga yamali de handarimibe, laru.

<sup>4</sup>Ina ti yu wahalu pialu hewaria nde aube tobane buwa i lawini biago pialu hearia handa walia haru.

Ibugua i yu wahalu polilono ina ibu minu yani haabo howa

i aiyá andaga tamu ini taba henenegoha haru piru.

<sup>5</sup>Yarusaleme waliru-o tigua nogo gabua mini dia karu mitangi bialu mbira nabuleore lalu ihondo bi lo widaba.

Mbirale ogoni iyanagago tigua iya mo mogola howa gubalini holene mo dala hangu hangu nahalimu.

### Iba gana tebone

#### *Wandarime iba gana lenego ogo*

<sup>6</sup>Dindi ko iba dalu naibaga ngagoha howa ibiragoni agiledabe.

Mbirale ira hagua ngabilo delagane mini inisenesibi muwebi delaragola ira hagua biale hara.

Mbirale ogoni hagua biragonaga nga baya taraore

agali biyinaya biagarume muni taguiaga ngaligobioiredane hendedo.

<sup>7</sup>Dagia bayalego agalime áyu dege mo yalu ibirago de handa.

Solomono ibu dagia ogoriani biralu ibiragoni.

Ani ibalu ami agali hongohe karu pira waragariame (60) haru ibiragoni.

Isaraele ami agali uruni ti hongoheoreda.

<sup>8</sup>Ami agali uruni ti abale howa wai biagane mugubeore ka.

Tigua ayu tibu nene gadeleme wai biaganebi ka.

Tinaga ayu tibu ta howa yagayaga bialu

waitigime ibuligonaga tinime mbiraga mamage haabo haga ka.

<sup>9</sup>Solomono ibu kininaga biragane dagiani berelalu yalu ibira.

Kininaga dagia ogoni ira baya tara tararu Lebanono dindiha taweme dibu yu ibuwa wabu wia.

<sup>10</sup>Dagia ogoninaga gene silibame wabu heleya.

Labolabo aga pu ngolo aleme lebialu dungua ho heleya.

Dagiani biragane gedaore labolabo tagalitaya aleme wia dambi hea.

Yarusaleme wali berearume labolabo ogoni baya hanguore lebialu mo yári bia ho ngeleya.

Tigua kininaga biabe ogoni bulene turuore howa biagaya.

<sup>11</sup>Yarusaleme wali bedemiru-o tí Kini Solomono de hondole ibidaba.

Ibugua kininaga manda mo karulo beda.

Kini Solomono ibuni wali dabu biyangi ibu aiyahanda manda ogoni ibunaga hagianeni mo karula hayagoni.

Horo ogoningi ibu turu timbuniore ho haya.

### 4

#### *Igirime iba gana lalu ladai binigo ogo*

- <sup>1</sup> Inaga yamali-o í hulu wandari bayaore bedegoni.  
Inaga dengui labolabome buyi howa bo bidegonigoyu  
     inaga de gili bidagome ina i gubalini kego walia hara.  
Inaga mandari libilabu lama nogo memeru tidi yalu turu howa mali lima  
     Gileada hari bare emene ngarunaga daliradagua biarua.
- <sup>2</sup> Inaga neru nogo sibi karunaga irini áyu dege podowa wayawaya bini peleore ha-  
     gadagua inaga ne peweleda.  
Inaga ne mbira honda nabi bibahende bayaleore tigabi dege hai harua.
- <sup>3</sup> Inaga ne hambu daramabiore aga daramabi ngaligobida.  
Ina bi laregola ne hambu moheoreda.  
 Labolabome inaga dengui buyi kegoyu ina inaga wanakui honani ale hendedo.
- <sup>4</sup> Wai pabeni Debidinaga mamage haga anda lu kagobi inaga ma lu bayaleoreda.  
Inaga mani gurubu gele bayaore ngeru  
     ami agalinaga humbi dewaore anda lu biago háini girigerelo wiradagua biarua.
- <sup>5</sup> Inaga andu kira keru nogo dia wangabe labo laboli hono winigo baya taraore  
 palawaya karu dombeneha tani nalu haradagua biarua.
- <sup>6</sup> Ina hari hombeneni mbirale inisenesi ngabi maru buwi ngagoria pu holebero.  
Ina hari hombene ogoriani pu koore dege  
     ni anda pialu dagare bilo holebero.
- <sup>7</sup> Inaga yamali-o í baya taraoreda.  
Inaga tinginini motudu mbira nawi baya taraore bedegoni.
- <sup>8</sup> I one-o iyame Lebanono hari ngaruni yu wahalu mbaliyago iya haru mbaibu.  
Ina Hari Amanabi Seniribi Hemonobi uruninaga nenegoria howa daliape habe.  
     Hari uruniha budi gabua timbuni mini laionorubi lebadirubi haga ka.
- <sup>9</sup> I one inaga yamaliore bedegoni.  
Ina i emene hangu handaya harigome inaga yamali mo ko harua.  
Ina inaga mani gurubu gele ngeru de hondowa i homalu dai bidogoni.
- <sup>10</sup> Inaga yamali i one-o ina i gubalini hariligonaga i turuore ho kogoni.  
Waini iba dende biaganego bagi hene lowa inaga gubalini holene ogoni baya taraoreya.  
     Pauda nga biagane tara tara ngaru bagi hene lowa inaga tinginini sanda hai  
     harigoni nga taraore bida.
- <sup>11</sup> I one bayale-o ina bi laregoni mone ibane dende biagadagua ina hale harogola  
     dendebioreda.  
Ina bi laregonibi dendebi nogo memenaga andu iba aleda.  
Inaga aga bideru baya ngabi Lebanononaga iraru ngabi ale bida.
- <sup>12</sup> I yamali-o í mabu gama mbira wia do henego ale bedego  
 agali mbirame ge haanda habe nahe pabe bu yaanda hene wiaganegobi bede.  
 Mabuha iba duguaragola mbirali ibu hangu iba hambiganego ale i bede.
- <sup>13-14</sup> Mabu ogoniha ira bayale bayaleru andaho haganegobi i bedegoni.  
Ira marume lini baya dendebi noleneru daga.  
Marume sanda bayale wabulene dalu  
     marume tomo mo dendebia holenebi daga.  
Ira marume yári tara tarabi dalu  
     marume hagua ngabilo delolenebi daga.
- <sup>15</sup> Iba duguaraga halu poragome mabu mo bayale hagagobi i bede.  
Iba emeneru Lebanono hari ngagoha howa mabu ogoniha dugu dalidali biagagobi  
     bede.



*Wandarime iba gana lenego ogo*

<sup>16</sup> Puyabu uyu ibirago leneha howa eberego í heyabe.  
 Puyabu unu leneha howa eberego ina inaga mabuha pulo yalu ibuwa  
 nga biaganeme tolotagi hela.  
 Inaga yamali ibu ibuninaga mabuha ibalu  
 ira lini bayale dedaru do nela.

**5***Igirime iba gana lalu ladai binigo ogo*

<sup>1</sup> I one inaga yamali-o ini mabuha ibu kogoni.  
 Ina mbirale bayale ngabiru mo mogo bu ngelowa  
 mone ibane bayale dendebigobi nalu bedo.  
 Ina nogo memenaga andu ibabi waini ibabi na dege bialu bedogoni.

*Wali marume iba gana lenego ogo*

Libu yamali bayalego labo-o libugua ibabi hinabi nalu  
 no karula poragola haru lole nalibu.

**Iba gana mane***Wandarime iba gana lenego ogo*

<sup>2</sup> Mbiraga i paluwa miniha paliahondo nahe yange yange bu wiru.  
 I yange yange bu wuwa dege emene paluwa emaga handalu hewaria  
 i lawini biagome anda i palewago haneni panga dugua lalu hearia handaru.

*Igirime iba gana lenego ogo*

I lawini inaga yamali-o i anda ibuliya panga duguabe.  
 Mbiraga pibiya ibiyagome inaga dengui damialu  
 mandani dimba beda, laya.

*Wandarime iba gana ladai bialu lenego ogo*

<sup>3</sup> Ina ininaga aga golo waharugodago lone aginaga buliyabe.  
 Inaga ge wayawaya bu waharugodago lone aginaga mo dodo heloliyabe.

<sup>4</sup> I lawini biagome anda pangani gime yani hayuago hale howa  
 inaga miniha dungu lalu turuore biya.

<sup>5</sup> Ina heyuwa panga dugua hole manda biru.  
 Inaga gime anda panga duguagane heagoria yani harugola  
 sanda inaga gini heago para haya.

<sup>6</sup> Ina i lawini anda ibilo panga dugarugoyu  
 ibu abale piyiyagola ina de handa nabi haru.  
 Ina ibunaga bi hale hoa howa inaga miniha genda biya.  
 Ina ibu hai biaabo howa handa walia nahe dege haru.  
 Ina ibu olarugoyu ibugua ladai binigo i hale nahe dege haru.

<sup>7</sup> Tano pabe mamage haga agalirume i handa walia howa  
 tigua i bo mberaho wahalu  
 i dagarenaga biagane aga biwago ti golo yalu piya.

<sup>8</sup> Yarusaleme waliru-o tigua i yamali handa walia harimiyagua  
 i hame lowa gubalini dugupe ho kogo lamilimu.  
 Tigua bi ogoni lamuleberema lalu ihondo bi lo widaba.  
 Bi uruni emaga andaha howa ani lalu haruya.

*Walirume iba gana lenego ogo*

<sup>9</sup>Í wandari maru bedaru bolangua howa í hulu wandari bayaore bedegoni.

Í yamali ogoni ibu agali abibe.

Ibu ina wali maru bedemaru agalini karu bolanguahe kagola iname bi lo wu-lumayabe.

*Wandarime iba gana lenego ogo*

<sup>10</sup>Inaga yamali ibu tingini hongoheore baya dombare ka.

Agali daosini pira (10,000) dewaore bu karunaga dengui baba bitago naheore kagoni.

<sup>11</sup>Ibunaga dengui ngolo ale ngiringarale.

Ibunaga mandari mindibi bayaleore ega mindi mbiranaga iri mbauleya.

<sup>12</sup>Ibunaga de baya pewele ega gabiago iba angeni wayawaya bini bedaligobiya.

<sup>13</sup>Mabuha mbirale bayale ngabiru bu hagadagua

ibunaga peiri heago bayaleoreya.

Ibunaga ne hamburu palawaya bayaleore dedagobi howa bi larago bayale ngabi sanda ale laga.

<sup>14</sup>Ibunaga giru bayaleore hongohe howa

ibunaga gi hondoneru mo yári bia halu gi magi muni timbunime miagaru ibu gini nga.

Ibunaga tingini wála honeore howa ngiringara lalu heore.

Nogo dongone ege tole mindibi muni timbunirume miagago aleme yáribi hea.

<sup>15</sup>Ibunaga ge biagolabo tole pele bayale kirame gene wawa helene mbaulebi ngolome wabu helene peleorego aleda.

Ibu timbuniore Lebanono hariha ira tamia bayaleore lu timbuni hearubi kagoni.

<sup>16</sup>Ibugua í nunu laragola inaga bu bamialu turu bialu dungu laga.

Ibunaga tingini bibahendego baya gibiore ka.

Yarusaleme waliru-o inaga yamali larugoni ibu ogonibiore ka.

**6***Walirume iba gana lenego ogo*

<sup>1</sup>Í wandari maru bedaru bolangua howa í hulu wandari bayaore bedegoni.

Ínaga yamali ibu ani piyabe.

Iname í biamogo bialu tayabia holomaya ibu hariga ogoha piya lalu langibe.

*Wandarime iba gana lenego ogo*

<sup>2</sup>Inaga yamali ibuni mabuni ira nga biaga ale bu kagotha pu ka.

Ibu mabuha ibunaga nogo memeru tani nelo halu palawaya bayale dedaru do mogo bialu ka.

<sup>3</sup>Inaga yamali ibu inaga halu ibi nde ibunagaore bedogoni.

Palawaya kago dombeneha howa ibugua ibunaga nogo meme tani nelo haru kagoni.

**Iba gana dauni***Igirime iba gana lalu ladai binigo ogo*

<sup>4</sup>Inaga yamali í baya burugule Yarusaleme tano alebi

Tisa tano hameleore ngago alebi kegoni.

Í baya buruguleore ami agaliru wai bule lowa pelagi yalu tidiyu ibirago hondowa mitangi bu wiagadagua ngogoni.

<sup>5</sup>Ína í de handaya haabo kegame í minu yani haradagua bidego

í handa taraha.

Ínaga mandari kerume nogo meme wabuni tidu yalu  
Gileada hari bareni mali lima daliape hene mbauleda.

<sup>6</sup>Ínaga neru nogo sibi karunaga irini áyu dege wayawaya bini peleore hagadagua ínaga  
ne pweleda.

Ínaga ne mbira honda nabi bibahende bayaleore tigabi dege hai harua.

<sup>7</sup>Labolabome ínaga dengui buyi kegoyu ina ínaga wanakui honani ale hendedo.

<sup>8</sup>Kini ibu wali dewa dabu bila.

Pira waragaria (60) dabu berolono bini biralu  
pira halira (80) one wabuni mende biralu

wandari maru mini nalenebi bira dege biniru ani bila.

<sup>9</sup>I nde one mbiraore hangu gubalini howa berelalu

ibu ínaga yamaliore ega malibu ale bayaleore bedagoni.

Ibu aiyahanda ibu wane mbiraore ogoni dege gubalini haga berenego  
ina ibuhondo turuho ko.

Wali bibahende biru ngarumebi ibu de hondowa ibunaga mini mo yaraga haga.

Kini one biru ngarumebi ibu one wabuni mende bedarumebi

tigua iba gana lalu ibu mini yaraga haga.

<sup>10</sup>Egerebagi ni tagira ibiraligobi dumbiyalu wálo yalu ibiragoni aibe.

Ibunaga wanakui do mbarale ni tagira ibule howa dorone tagira ibagagobi ibalu  
ege do mbarale daganegobi halu bida.

Ami agalirume wai bule lowa humbi demborerebi yalu tidiyu ibirago de hondowa  
mitangi bu wiagadagua

ina ibu de hondowa mitangi biaho ngogoni.

<sup>11</sup>I mabuha dalipe howa ira lini bayale dagane bu karu dombeneha íbu ko.

Dindi uliniha ira bayale do ngoria bialu anda harago hondole íbu ko.

Gerebi yuni gahenge mabirago handalu

ira marume palawaya tara tara nga biagane ale do ngarubi hondole íbu halu bido.

<sup>12</sup>Inaga yamali-o ina ínaga bu mo durula harigoni.

Ina manda bialu hewaria agali mbirame karisini howa nogo hosime gililo yalu pelo poa  
hagadagua kogoni.

### *Walirume iba gana lenego ogo*

<sup>13</sup>Sulama wandari-o mali lia mali lia ina de hondolomaya ina mali lia.

### *Wandarime ladai binigo ogo*

Irane aginaga wali agali bu karunaga deni ina mali luliya tí hondoa kamibe.

## 7

### *Igirime iba gana lalu ladai binigo ogo*

<sup>1</sup>Inaga yamali í wandari baya buruguleoreda.

Ínaga geni gesu bidegola paliaore biarua.

Ínaga ge bagu bayaleore agali bigiya wabiagame tole podalu wabiade hene mbauleo-  
reda.

<sup>2</sup>Iba be mbira amu ngago waini iba dendebe biraho wiagane ale nga.

Palawaya bayale ngabiru do mabu bidagoria widi mberene amu do huba bu nga.

<sup>3</sup>Ínaga andu kira keru labo nogo dia igini labo laboli hono wini ogobi labolabo  
daburabuho kagobida.

<sup>4</sup>Ínaga ma kego anda lu mbira pele bima iraga kagobida.

Ínaga de Hesebono tano ogoninaga tole panga haraba kawareni uliha iba bedagobida.

Ínaga ngui bayaore Lebanono agali mamage hagarunaga anda lu bima irigi hene Damasagasa tanohayagi heagonibida.

<sup>5</sup>Ínaga haguane Hari Kamele kagobida.

Ínaga mandari baya taraore pingi pongo bideru didoleda.

Mandari gogorali elepebe bidago hondowa kini kagome hame lowa odope habeheda.

<sup>6</sup>Hulu wandari baya taraore í bedegoni.

Ína í mo turuore harigola ina í gubaliniore ho haruli.

<sup>7</sup>Íore hulu wandari ndo gurulu gibi bibi ayage aleda.

Ínaga andu kego labo geromi lini aleda.

<sup>8</sup>Ina iraga howa geromi lini dedago dolebero.

Ina handalu hewaria ínaga andu kego labo pu mbira miini gerebi lini dewa dowi kagobiya.

Ína buhe larigo ngabi dendebe ira lini mini abelo aleya.

<sup>9</sup>Ínaga ne hambu ngabiore waini iba aleda.

Ína í nunu laregola waini iba dende biagadaguaore biarua.

### *Wandarigome iba gana lenego ogo*

Inaga yamali-o ina íhondo waini iba ngulebero.

Waini iba ogoni alego nolene bayale holebira.

<sup>10</sup>I ibunaga lawini bedogo ibugua í gubalini haabo haga kagoni.

<sup>11</sup>Inaga yamali bubu-o iya dindi emene mbira anda bu karuha palu hama mbaliya í porodagua mba íbu.

<sup>12</sup>Egerebagiore iya heyalu puwa gerebi ira bu karu de hondo mbaliya.

Gerebi ira uruni mabialu pabua balu yigiyaga ledabe handabiya.

Ira lini mini pomegaranade bayale daga bu karume lini dole pabua bayadabe hondo mbaliya.

Iya mabu ogoniha pu howa ina í gubaliniore kodagua walia holiya.

<sup>13</sup>I lawini-o ina ira lini bayale bayaleru do yalu ibuwa

í nabelo panga haraba kawareni ngeledo.

Maru ala do yinigo ngelalu maru áyu dege do yinigo ngelalu bido.

Iyame pu kuabu ale iyanaga bu mo heya hagane karubi ngabia handaba.

## 8

<sup>1</sup>I aiyahanda í í mbalini taba honowa andu nabelo nginidale ina ogoni bayaleda lalu kole.

Ogonigo ina í harigani lola haruyagua

í nunu larogola wali agali karume hondowa í ko bere lolene nawulebira.

<sup>2</sup>Ina í gubalini holenenaga mana lawai habelo

í aiyá andaga í haru polebero.

Ina í waini iba bayalego mbirale mo dende bia hagane ale heba bimaga maga binigo

í nabelo mo yalu ibuwa ngulebero.

<sup>3</sup>I lawini ibunaga gi lehangome ínaga mahayagi yani halu ibunaga gi tigagome ínaga tinginini yani haya.

<sup>4</sup>Yarusaleme waliru-o tígua mbira nabuleore lalu íhondo bi lo widaba.

Mbirale ogoni iyanagago tígua iya mo mogola howa

gubalini holene mo dala hangu hangu nahalimu.

## Iba gana waragane

### *Walirume iba gana lenego ogo*

<sup>5</sup> Dindi ko dalu naibaga ngagoha howa ibunaga yamalila gi pingipongo bialu ibiragoni wali aibe.

### *Igirime iba gana lenego ogo*

Í aiyahanda ira mini abelo teha í taba heneneyago  
ina í ogoniha paleria mo barila harugoni.

### *Wandarime iba gana lenego ogo*

<sup>6</sup> Ina wali mende gubalini nahe í hangu gubalini haabo habe.

Wali mende inaga gime yani nahe í hangu yani habe.

Homame hongo howa agali bope hagamada inaga gubalini holene hongohe ngo.

Ina í hame lolenego ira hungu bialu daradagua bida.

<sup>7</sup> Ira ogonibi dedago iba odo hundia hole biyaguabi

iba li ibalu hundia hayaguabi nahundulebiraore.

Agali mbira ibugua walime ibu gubalini halu hame lelo lowa

ibunaga muni bibahende wali biago miai hayaguabi

ibu bo yagibano halu wali biagome ibu mege bu dai bulebira.

### *Wandari mbalinirume iba gana lalu ladai binigo ogo*

<sup>8</sup> Inanaga mbalini ibu wandari emene ogoni ibu andu naibi beda.

Ibu wandari mabuage bedaria igiri mbirame ibu dabu bule ibiragola

iname wandari biagohondo agi bia holeberemabe.

<sup>9</sup> Ibu tanonaga ege pabe bedayagua

ogorani iname silibame anda luni wa hondo biragane ale mbira ibunaga bia holeberema.

Ibu tano tole pabe panga hayagua

iname ibu pele mialu ira tamia hongoheme panga hongohe wabu heloleberema.

### *Wandarime iba gana lenego ogo*

<sup>10</sup> I tanonaga tole pabe halu

inaga andu tano pabe ogoninaga anda lu wa hondo birule kira bu helene haradagua bida.

I yamalila iya haru mandagi haribayagua

í mini dungulo haruligo ibu bayuwa manda bu kagoni.

### *Igirime iba gana lalu ladai binigo ogo*

<sup>11</sup> Kini Solomonu ibunaga gerebi mabu mbira dindi Bala Hamono lagagoha winigo nga.

Agali maru ti mabu ogoniha gerebi lini dole hame layagua

ibu muni siliba daosini (1,000) mbira mbira migi biaga.

<sup>12</sup> Solomonu ibu muni siliba daosini mbira (1,000) ogoni mo yilo.

Agali maru mabu ogoni yolo mule hongo hayaru ti tininaga muni siliba handari kira (200) ogoni mo yilo.

I aginaga mogo lolebe.

I ininaga gerebi mabu mbira bayale ngogodago.

<sup>13</sup> Inaga gubalini-o ina mabuha howa bi labelo hame ledi.

Ina bi labelo inaga nenegeru ti hale hole hondo kagoni.

### *Wandarigo ibugua iba gana lenego ogo*

<sup>14</sup> Inaga gubaliniore-o ina nogo mini dia aleme dai lagadagua lalu

nogo dia wangabe hongoheme dai lagadaguabi lalu



hari bare hambene mbirale ngabi buwi ngaruniha howa pogolama ibagadagua abale  
dai bibelo hame ledο.

## Aisaia

### Mbuga ogoha gilibu ngarunaga nemandi ogo

Ngode Datagaliwabe ibunaga bi mana latagi haga Aisaia ibu Yuda dindinaga Yarusaleme tanoha heangi Asirialime Isaraele dindi uyurahayagi ibuwa wai bialu mo ko howa bo podama ibalu heagola Yuda dindi unurahayagibi bo podama anda ibulene kaware wini. (2 Kini 17 howa ledago handabe) Aisaianaga mbuga ogoni bi halu tebira talebu nga.

Be 1-39 uruniha Asiria dindiha ami agalirume Yuda dindi bo podo wahole ibulene kaware ngelowa Aisaiahanda bi uruni gilibu wini. (Be 1-12) Ogoniha howa ibuni binirunaga garea lalu gilibu nga.

Yuda wali agalime wai kaware ibiyagola gi timbuni ho hearia waitigi ibiyagoni irane Aisaiahanda lalu, Títime ko birimigonaga Ngode Datagaliwabe ibugua pani ngiragoni, lalu lamialu hene. Ibugua lalu, Asirialirume bua halu ndo títime Ngode Datagaliwabe erembira mialu pirimigonaga ibugua nde tíha genda ogoni ibileda, lalu lamini. Aisaia ibugua Yuda wali agaliruhondo lalu, Tí agali haguane kamirubi wali agali bibahendebi ko bialu kamiruni wahalu mini beregedalu Anduane Homogo ibuni kagoha dai buwa ibuninaga andaneha holene nga. Ani birimiyagua tíha genda naibi bayale holeberemi. Anidagua nabirimiyagua Ngode Datagaliwabe ibugua tí pani timbuniore ngulebira, lene.

Aisaia ibugua mani bayale holene tagira ibulebiragonaga nde lamia dege bini. Ibugua mbiwia lalu, Maha Kini Debidi aguanene mbira kini holebirago ogoni ibirangi wali agali bayale hai holeberemi, lalu lene. (16.5)

Be 40-55 uruniha Yuda wali agali Babilono dindiha garabaya howa Aisaia ibugua mani bayaleore holene tagira ibulebira lalu lene. Bi te pigane (Be 1-39) biagoria layaruni lai lalu ai luore Babilono dindiha garabaya howa lenego gilibu nga. Yuda wali agaliru miniha genda timbuniore ho hearia hondowa mani turu lalu bayale holeberami lalu lamini. Bibahendenaga Aba Ngode Datagaliwabe kagome Pesianaga Kini Sairusi dabo helayagola kini ogoni ibugua biabe bayale bialu howa Yuda wali agali tininaga dindi dai bilo golope lalu pudaba lolebira, lene. Waitigi biarume nde dindi kaundiaoreha garabaya bu yalu íbu hayagoyu Ngode Datagaliwabe ibugua ti embeda nahe baya hanguore handayaho haabo hene. Ngode Datagaliwabe ibunime Habo Nalolene Bi bamba lo winigobi ibuninaga bi mana latagi haga agali heneruha howabi lowialu lalu, Wali agali dindi bibahendeha karu gi mialu haru dai bulene togo Isaraele wali agali tí kamigoni, lene.

Bi galonore mbira Be 52.13-53.12 dagalabe. Hobane niruniha howa Ngode Datagaliwabenaga biabe biahaga agali mbira ibuwa ibugua genda tandagala timbuniore nalu wali agali biamogo bulebira lalu gilibu winigo nga. Keriso hamewaneigini dewaoreme áyu mitangi bialu karia agali biamogo biaga ogoni Yasu manda bialu leneda lo manda bida.

Be 56-66 uruniha Aisaia ibugua wali agali tini dindi Yarusalemeni daibu holebirarunaga bi lowia henego nga. Bi polene marume Ngode Datagaliwabe ibugua ibunaga Habo Nalolene Bi ala lo winigome Yuda wali agali miniha mo hongo haga bini. Bi mendeme lalu, Ngode Datagaliwabe ibunaga andaneha haabo howa mana tigabi ngaru bialu howa ibuhondo bi laabo lalu howabi lomaru mialu howabi wali agali yagibano burupale karu mitangi bialu biamogo bilimu, lalu laminigo gilibu nga.

Bi galoneore mbira 61.1-2 howa gilibu wini ngagoni mani Yasu ibuni biabe bule pigane te hinalu howa wali agali hale helo dagalatagi hene. (Lugu Be 4.16-21 dagalabe) Aisaia ibugua bi lene ngarume Ngode Datagaliwabe ibunaga wali agaliru ti bu mini

mo hongo haga biaga. Irane Aisaia ibugua Ngode Datagaliwabenaga hongo ogobiore ka lalu mo walia howa latago haga biagagome ani biaga. Genda tara tara ngaru ibiyaguabi uruni bame degeda lowa Ngode Datagaliwabe ibunime ti baya hangu handayaho haga. Áyu ina Keriso hamewaneigini kamarume handalu kamaria bamba Aisaia ibugua mbiwia halu bi lo winidaruni inanaga Anduane Homogo Yasu Keriso ibuni íbu howa biabe biahalu ira bangani homayagoni henene lola helonaga Ngode Datagaliwabe ibugua ani binidane manda biai kamagoni. Aisaiahanda Yuda dindihabi Yarusalemehabi Ngode Datagaliwabenaga bi mana latagi halu hene.

**Bulu бага бува кuni gilibu ngago (1.1-12.6)**

Anduane Homogohanda ibunaga wali agali talinigobi biamogo bule lo winigobi lo ngago 13.1-23.18

Hameigini dindi tara tarani heneruhondo Anduane Homogo ibugua pani minigo 24.1-27.13

Anduane Homogohanda dindi bibahendeoreha mo ko holene wulebiragobi mani ibunaga wali agali biamogo bulebiragobi te ngago 28.1-35.10

Anduane Homogohanda ibunaga wali agali halu mende talinigobi biamogo bule lo winigobi ngago 36.1-39.8

Kini Hesegaia warago timbuni benegobi Asiria agaliru hongo henegobi ngago 40.1-55.13

Anduane Homogonaga biabe bhahaga mbirali ibulebiragome wali agalinaga miniha dunubia ho helalu pele mulebirago lo ngago 56.1-66.24

Anduane Homogohanda wali agali talinigobi biamogo bule lo winigobi maru ngago

<sup>1</sup> Mbuga ogha Emoso igini Aisaia ibugua bi gilibu winigo nga. Anduane Homogohanda Yuda wali agali Yarusalemeha hearu Aisaia ibugua lamilonaga de gandeba hondowa laminigo. Ogoningi Usiabi Yodamabi Ahasabi Hesegaiaibi ti Yuda dindiha kini hemingi Aisaiahanda bi ogoni lalu latagi hene.✧

*Anduane Homogohanda ibunaga wali agali talinigo ogo*

<sup>2</sup> Anduane Homogohanda ogodagua laya. Hari daliga-o dindi-o libu hale gogabu hale halu inaga bi larogo nde baya hangu hale harabine. Inaga waneigini inime handayaho harurunime ti anda halu puwa áyu inaga bi mo wahalu kagoni.✧ <sup>3</sup> Nogo bulumaga karume nde ti abaore ogo kalo manda bialu nogo dongi karumebi nde ti abahanda tomo ogoriaore ngiaga lo manda bidagoni. Anigo inaga Isaraele wali agali ti mini nawiore kagoni. Tigua manda bulenedagua nogo bulumaga dongirume manda bu bolangua kagoni, lalu lene.✧

<sup>4</sup> Wali agaliru-o tigua mana ko ngubiore beremigome tini koorene ko kamigoni. Bibahendengi tigua ko hangu biaabo halu kamigo ai ti ko hai holeberemi. Tini mana ko beremigome tini gililope halu kamigoni. Isaraele wali agali tigua Anduane Homogo tinaga Ngode Datagaliwabe tigabiore biaga kago yu wahowa erembira mialu kamigoni ndobe. <sup>5</sup> Ai irane aginaga tigua Ngode Datagaliwabenaga bi mo wahalu kamibe. Ti tandaga naabo halu holenegro manga nahe kamibe. Isaraele-o ti agali marume bo mbelelo wahene tinaga tinginiru mo ko halu hongo naheore haradagua bialu hagianeni dererume pipole haradagua bialubi ti bu miniha ko dege mitangi bu kamigoni ndobe. <sup>6</sup> Henge emene mbira wule ndo dere hagianeha howa bima pialu tingini bibahendeha dere biamehe kagoni. Dere biame halu tingini mbira henge nawiore pimbipambu lalu toha tagitagi bidagoni. Tigua dere uruni nde baya hangu domowa kabu bu dambi nahayada. Marasinirubi mbira nde haiha nabinidagoni.

✧ 1:1: 2 Kin 15.1-7, 15.32-38, 16.1-20, 18.1-20.21, 2 Bit 26.1-23, 27.1-9, 28.1-27, 29.1-32.33 ✧ 1:2: Yar 2.12, 22.29, Mai 1.2, 6.1-2 ✧ 1:3: Yar 9.3, 9.6

<sup>7</sup> Tí naga waitigirume dindi tano wimiruni bo labu halu giallo delai hayagoni. Tíni handayaho hemiore dege dindi tarali urunime t́naga dindiha mbirale wimiruni mo ko hai halu t́naga mabuha tomo hengemirubi tigua bialu nai hayagola ai dindi hangu ibira kagoni ndobe. <sup>8</sup> Yarusaleme tano dege darabi yu wa kagoni. Dindi ogoninaga hongo holene nawi yu waheneore ngagoni. Ibu mabu gibuniha agalime bame andira nemanda biraligobi ale ngagoni. Tano mbira waitigime ho yu mabu bupe howa bameore ngelenego ngagoni ndobe. <sup>9</sup> Anduane Homogo Hongo Haiheore ibugua wali agali maru karu yu wa nahedale Yarusaleme bo tangubagabu wahene ngale. Anigo nde heneneore ina mo koore henego bamba Sodom Gomora tanola bo mundulo wahenegodagua bidaleda.✧

<sup>10</sup> Yarusaleme wali agaliru agali haguane kamirubi tí bibahende ko biaga Sodom Gomorala wali agali henerubi dege kamigoni. Ani kamigo howa áyu Anduane Homogohanda bi larago hale hadaba. Inanaga Ngode Datagaliwabe ibugua t́hondo bi larago baya hanguore hale hadaba. <sup>11</sup> Anduane Homogohanda ogodagua lara. T́gua manda bialu kamiria ina t́naga mbirale mbira bo lomabu ngialu kamiruni turuho kobe toba kamibe. Ani ndoyago. T́gua nogo sibi bo loma bialu irani delai hole yalu ibirimirunibi nogo maru habahe bo lomabu yalu ibigi birimiruni bibahende hondowa i turu nahe kogoni. Nogo bulumaga wangabenaga daramabi sibi memebi igini hungubaluanaga daramabi urunime lomabu ngulene hame naleore kogoni.✧✧ <sup>12</sup> T́ bo lomabu ngule uruni i mitangi bialu lotu lole ibalu howa yalu ibalimu layadaru aiwabe. T́ i andagaha ibalu howa inaga wanakuini lile lalu giligele dewa lagayago ani bulene ngago aiwa layabe. <sup>13</sup> Ai t́naga bo lomabu ngulene urunibi bame mohole bu nayalu ibalimu. T́naga bo lomabu ngulene uruni hondowa turu naheore kogo. Hagua ngabilo delaga mini inisenesi ina nga holiya delalu kamiruni nga nabi bame dege delalu kamigoni. Urunibi inaga nguime nga halu hame naleore kogoni. T́gua Ege Pigane Ngabulo kagola lotu lagarubi Sabada horo bibahendengi lotu lagarubi horo timbuni marungi lotu tara tara laga ngamirunibi bibahende hame naleore kogoni. Irane t́nime mana ko nabulene ngaru hangu bialu kamigome t́naga lotu laga uruni mo mebia hai haya.✧ <sup>14</sup> Ege Pigane Ngabulo kagolabi lotu maru lole mo ngoai howa laga wirimirubi bibahende i turu naheore handabe manga ho kogoni. T́gua mana urunidagua bialu kamirunime i genda mo ngiragola ina mo yabe nahe kogoni.

<sup>15</sup> T́gua mbirungi t́naga gi yaraga howa ihondo bi laramigola ina tí de nahondolebero. Irane agi t́naga gime agali bo wahaga birimirunaga daramarume damu gobahe kami. T́gua gi yaraga howabi bi dewaore lalu harimiyaguabi ina hale naholebero laro.✧ <sup>16</sup> Ina tí dodohe kamine hendedogo. Ai pialu mana ko dodohe tíha para hayadagoni domo wahole pudaba. Ani domo wahaiho howa mana ko ngaru lone budai nabi wahai halimu. <sup>17</sup> Mana bayale tigabi bulene ngaru hongo howa manda bialu mana bayale uruni dege talialu bialu hole manda bilimu. Agali maru mendeali mo hondo haga karu mo hondo nahelo mini bayale talebu milimu. Wali agali maru genda yu karu biamogo bibe. Waneigini hono wahene karu handayaho halu wali dalo bedarubi baya hangu biamogo bigi bialu halimu. Wali agali burupale uruni marume mo ko hayagua t́gua biamogo bialu halimu, lalu Anduane Homogohanda lene.

<sup>18</sup> Anduane Homogo ibugua bi ogodagua larago, Ai mo le hayadaruni lotiga bimíya. Áyu tí ko birimigome mo dodo hayagola aga pele bayaleoreni darama para haragola mo ko hene wiagadagua bidamiruni ina ko domo wahai halu lone pele bayaleore hari beraliba peleore ale halu nogo sibi irini pele tara ngaligobi holeberemi.✧ <sup>19</sup> T́gua inaga bi larago hale halu birimiyagua nde t́naga maburuha tomoru bayale anda haragola bialu noleberemi. <sup>20</sup> Anigo ina bi ledogo mo wahalu manga harimiyagua nde t́naga

✧ **1:9:** Pig 19.24, Lm 9.29 ✧ **1:11:** Ais 66.3, Yar 7.21, Mai 6.7 ✧ **1:11:** Amo 5.21-22 ✧ **1:13:** Yol 1.13, 2.15, Md 15.9 ✧ **1:15:** Ais 59.3, Yar 14.12, 1 Ti 2.8 ✧ **1:18:** Iba 51.7, Ais 43.26, Mai 6.2

waitigi bu karume ibalu tí bo wahai holebira. I Anduane Homogo ina bi o ledogoniore, laya, lalu Aisaiahanda lene.

*Yarusaleme tano ko biaga dindi winigo Anduane Homogohanda mo tiga bule manda binigo ogo*

<sup>21</sup>Yarusaleme tano nde abale inaga bi hale haga winigo ai áyu wali ko biagame agali kayu bima ibaga bialu biraradagua bedagoni. Abale howa Yarusalemeha wali agali bayale hangume ho tolatagi hagago áyu nde wali agalirume mana ko bialu mendeali homelo bo wahagahaga biagarume tolatagihe ngagonida. <sup>22</sup>Yarusaleme-o abale í baya ngiringarale ege tole siliba ale wirigo ai áyu nde koore gaba yuni bamba tawe hagua tabule ale ngegonida laro. Abale nde í waini iba dendebe ale harigo áyu nde í bame dendene nahe iba damene dege ngegonida. <sup>23</sup>Inaga agali haguane karuni ti agali page biaga ko bu karu baba nenege howa inaga bi mo wahaga ka. Bibahendengi biamogo biahabe lalu ohowa muni dewa hana haga birarunaga dege bi laholene hame laga ka. Tigua godi hale halu biruwa waneigini hono wahene ibiraru biamogo nabiagabi wali dalo agalini homene bedarunaga genda ngaru baya hangu hale halu mo tiga nabiaga dege bu karuni.

<sup>24</sup>Ani bidago ai Yarusaleme-o bi ogo Anduane Homogo Hongo Haiheore kago ibugua larago hale habe. Anduane Homogo ibu Isaraelenaga Ngode Datagaliwabe hongo gibihe ogoniore kagome bi ogodagua lara. Inaga waitigi bu kamiruni inime tí pani nalimulo ngulebero. Ani bidogola tigua ihondo lone mine naholeberemi. <sup>25</sup>Yarusaleme-o ina biabe hongoheore buwa lehe bialu keruni bibahende lone mo tiga biai holebero. Ege tole silibani dodo para hayadago do taulo wahelo irani delagadagua ina í ira hongohe dedagoria dodo do taulo wahelo delolebero. <sup>26</sup>Ani buwa agali haguane bayale ala hagarubi hela aribia harogola tigua godi tigatiga hale haga bulebira. Ani bialu kagola wali agalirume Yarusaleme dindi mini lene timbuni mbira ngago lalu ogoniha mana bayale tigabiru hangu bialu Anduane Homogo ibuninaga bi hale howa talialu biai haga ngagoni lolebira, lene.

<sup>27</sup>Anduane Homogo ibu tigabiore kago ibugua mana bayaleore ngadagua Yarusalemenaga wali agalirume biyarunaga tigatiga tale bialu ti mo yu dai bulebira. Ani buwa ibunaga mana tigabi biaga ogonime dege Yarusaleme wali agali mini beregedowa tininaga ko biyaru dara halu nabule lalu karu bibahende pele mialu haru dai bulebira. <sup>28</sup>Anigo wali agali Anduane Homogonaga bi mo wahowa mine halu ko ngaru dege biaabo haga karu ibugua ti pani nelu mialu bo wahai holebira.

<sup>29</sup>Tigua ira timbuni hearuhondo bi pupu wialu dama mitangi bialu mabu gamaru hangalu harimiruni manda bialu ina nakarulape birima lalu taga timbuniore holeberemi. <sup>30</sup>Tiore ira timbuni karu gabu halu podagadagua mabu mbira dindi ibane naberani mbirale hingedemiru gauladaga halu ira gabu hai hagamaga tí homai holeberemi. <sup>31</sup>Datani gaule ngagoria ira hungume abaleore kulu lalu daralidagua wali agali hongohe mine haga kamiru tininaga mana ko birimirume tini mo ko holebira. Ani birangi tí biamogo biaga agali mbira naholebira, lene.

## 2

*Anduane Homogohanda awadaga holene ngulebira lenego ogo (Maiga 4.1-3)*

<sup>1</sup>Anduane Homogohanda de gandeba mbira Emoso igini Aisaia ibugua Yuda wali agali Yarusaleme tanoha hearuhondo lamilo mo walia hene. Bi laminidagoni ogodagua lamini.

<sup>2</sup>Horo mbirungi haragola Anduane Homogonaga harini ibunaga anda hene biago bibahendenaga daliga ibu bolanguahe hari bare ngaru waradai buwa ibu lina daligaore holebira. Dindi bibahendeni hameigini tara tara dewa palima pedaru ibalu ogoniha



iba yolaradagua bialu yolalu anda ibalu<sup>☆</sup> 3 wali agali uruniha howa ibirarume lalu, Anduane Homogonaga Hari Saiono iraga hama maibidaba. Isaraele wali agalinaga Ngode Datagaliwabe kago ibunaga anda kagoria ubanda hama. Ibugua hame ledu ale iname bulumaya lawai halu ina pialu holene hariga ibugua ba kagoria pialu holeberema. Irane Anduane Homogonaga lawai holene mana ngaru Yarusalemeni howa ibalu Saiononaga hari neneni howa ibugua wali agalihondo bi lamiaga, lalu ka.

<sup>4</sup> Hameigini tara tara tini dege dege wai bulene te lalu bi anda halu hongo ha ai nai bialu karu Anduane Homogo ibugua bi uruni dabalumu mo palia holebira. Tinaga wai biagane ayu tibu yidaruni tomo hongole dindi godagane wabulebira. Aeane yandare widi lini dedagola gandu lolene ale helo nguni mo garayabia helolebira.

Hameigini tara tara uruni lone wai bule tidu yu haga haga buwa manda manda nabuleorebira.<sup>☆</sup>

<sup>5</sup> Ai Yagabanaga aguanealiru-o Anduane Homogohanda wa holene hariga ina ngiyagoria pialu hamija ibidaba, lalu Aisaiahanda lene.

*Minehe holene ngaru mo ko hai holebira lenego ogo*

<sup>6</sup> Anduane Homogo-o inaga wali agali Yagaba aguane o bu karu erembira miridagoni. Ani mirigo irane ti tomia tara tara bulene manabi gamugamu tara tarabi Pilidia dindiha wiagobi tinaga dindini dege wiai kagonaga ani birida. Tinime ni tagira ibiragohayagi howabi mana ko uruni mo yu anda ibinigo nga. Ani bialu ayu inaga wali agali uruni ti dindi mana tara wiaru bialu ka. <sup>7</sup> Muni siliba ngolobi nogo hosibi hosime gili laga garo ale karisibi dewaore daga labe nahe Isaraele dindiha toleda. <sup>8</sup> Ani bialu mbirale dama mitangi bialu gime wabini dewaore ti daluha wu tolo tagi ho ngelowa mbirale tininaga gime wabini urunihondo bi pupu wialu ka.

<sup>9</sup> Anduane Homogo-o ina wali agali ti bibahende mo dindiha haregola ti taga timbuni ho holebira. Ai Anduane Homogo-o ina tigua ko biyaru domo wanahabe.

<sup>10</sup> Wali agali bu kamiruni ti ibida pialu egeanda karuha bira do hadaba. Dindi uli guabuwa gonene tombolo ngelo do howa uruniha bira do hadaba. Anduane Homogo ibuni wa tara holenehebi hongo timbuni holenebi heba ibirago hondowa ti mogo lalu mo ko holigo bira do hadaba.<sup>☆</sup> <sup>11</sup> Anduane Homogo ibuni ibirangi mana ko mine howa bialu tininaga mini hangu mo yaraga haga karu bope haragola ti taga timbuni ho holebira. Ani helowa horo ogongi Anduane Homogo ibuni hangu mini lene timbuni holebira. <sup>12</sup> Anduane Homogo Hongo Haiheore kago ibugua wali agali tininaga mini yaraga haga karuni horo ogongiore bope hole lowa horo pongo bo winigo ngelo ka. Ani bialu wali agali tinaga mbirale tini turu holenaga mo wigi bini ngarubi horo ogongi dege mo ko halu bo haealabagabu wahai holebira. <sup>13</sup> Ibugua ira tamia baya bebenabi luni Lebanono dindi howa anda hene karubi dindi hobane mbira Basana ngagoha howa ira mbira bai ale mini oga hongohe giambe anda hene karubi bibahende dugu wahai holebira. <sup>14</sup> Ibugua hari nene daligaore wedaru bo haealabaga biai halu <sup>15</sup> anda lu bu gimbu bu migi bima irigi hene karu bo haealabaga bialu tano ngarunaga ege pabe hongohe bu heledaru bo gialobaga biai holebira. <sup>16</sup> Iba sibi baya timbuni ngarubi bibahende bo gialobaga biai holebira. <sup>17-18</sup> Anduane Homogo ibuni ibirangi wali agali mana ko bialu mine hagabi tininaga mini mo yaraga halu haga karu bibahende mo ko halu bo haealabaga biai haragola uruni biagaru tini taga timbuni ho holebira. Ani bialu mbirale dama mitangi bialu gime wabini ngaru mo ereba hai haragola Anduane Homogo ibuni hangunaga mini mo yaraga halu mini lene timbuni holebira.

<sup>19</sup> Horo ogongi Anduane Homogo ibugua mbirale bibahende dindini karubi ngarubi mo gi hai helolebira. Ibugua dindi bibahende mo emabia hole ibirangi wali agali tigua Anduane Homogo ibuni wa holene timbuni hebabi hongo tara ho yalubi

☆ 2:2: Iba 72.8, Ais 27.13 ☆ 2:4: Iba 72.3, 72.7, Hos 2.18, Yol 3.10, Seg 9.10 ☆ 2:10: 2 Te 1.9, Mo 6.15

ibirago handalu ti ibida piai holebira. Ani puwa egeanda karuhabi dindi guabu wini ngaruhabi bira do hole ibida piai holebira. <sup>20</sup> Horo ogoningi wali agali tigua dama mitangi bialu bi pupu wule gime ngolo silibarume wabu wini biaruni bibahende uli ngaruhabi egeanda dalagamia paliaga karuhabi ba *ai nai* bialu tini ibida piai holebira. <sup>21</sup> Horo ogoningi Anduane Homogo ibugua mbirale dindini ngaru mo ema biai hole ibiragola wali agali ti gi timbuni holebira. Ani biragola Anduane Homogo ibuni wá tara holene heba hongo timbunihe ibirago de handalu ibida pole hari tene ngaruha pialu egeanda karuha bira do holebira.

<sup>22</sup> Ainde wali agali mbiralime ibalu ti biamogo bulubada lo manda nabilimu. Ani bulene nawi larogo irane ina wali agali bu kamaruniha galone mbira naheore dindini tigimandi hangu halu homoleberema.

### 3

#### *Yarusaleme wali agaliha mo ko holene wulebira lenego ogo*

<sup>1</sup> Hale hadaba. Anduane Homogo Hongo Haiheore kago ibugua Yarusalemeha howabi Yuda dindiha howabi wali agali karu ti hana ho hagaru wali agali karubi mbirale tara tara ngaru damenebi bibahende mo wahai holebira. Ibugua tinaga iba tomobi mo wahai holebira. <sup>2</sup> Tinaga agali wai biaga hongohe karubi ami agali maru karubi godi hale haga karubi bi mana tara tara latagi haga karubi halaga biaga karubi tanoha agali haguane maru karubi bibahendeore ibugua bo batagi hai holebira. <sup>3</sup> Ani buwa ami agali haru haga karubi gabumanenaga agali haguane karubi mini manda bayaleru kinihondo talebu miaga bu karubi bibahende bo taliatagi hai holebira. Ibugua agali biabe tara tara biaga mugubeyi bu karubi agali tomia hubibiru biaga karubi bibahende bo hilo batagi hai holebira. <sup>4</sup> Anduane Homogo ibugua dege wali agali Yuda dindihabi Yarusalemehabi bibahende bu karu igiri mini boga nabi karume haru helo yupe holebira. Ani yupe haragola tigua tininaga hameledadagua dindi handayaho halu mana tara ngaru bialu holebira. <sup>5</sup> Agali bibahendeme mendeali kago hingedape holenaga biabe hongo gagahaga buwa bialu holebira. Wandari igiri daliahe bu karume wali agali wahe biru ngaru yohandalu tihondo bi tandagabiru ladai bialu holebira. Wali agali habane nabulene karume wali agali mini lene karunaga bi mo wahalu holebira.

<sup>6</sup> Ogonidagua bialu kanggi agali maru ti hameigini mbirago karia puwa lalu, *í* dege aga karulo haridago ainde inanaga haru haga haguane *í* habe. Ani hariyagua horo ko tagira ibirangi *ina* ina biamogo bibe, lolebira.

<sup>7</sup> Ani laragola agali biagome ladai bialu lalu, *I* ndo. *Ina* tí biamogo bulene hariga nawida. *Inibi* nde tomo agarubi nawi dege kogonida. *Tínaga* haguane holiya dabo helolene nawigo nahelalimu, lolebira.

<sup>8</sup> Anioiredago Yarusaleme Yudala mo ko holene horo mbira lola halu mo ko haragoni. Anidagua biragoni irane tinime bi laragomebi biabe biragomebi Anduane Homogonaga deni howaibunaga mini timbuni lene kago mo nagalone halu mo yo handaragome bira. Tigua mana ko uruni ibuninaga wanakuihayagi howa bialu hagaya. <sup>9</sup> Tigua kiralinaga godi hale halu howa agali ti hamelo kago bime biamogo bialu mendego bope ho helaga ka. Tinime mana ogonibi bialu kagome tini godini íbu helolebira. Tigua wali agali bu karunaga deni howa mana ko bamba Sodomu wali agalime bialu henedagua taga nahe bialu haga ka. Tini bia ko hene ngagome tiha ko holene ogoni wulebira.

<sup>10</sup> Wali agali mana tigabi bialu haga karu ti turu holebira. Tigua biabe bayale bialu hayagonaga lini bayale nalu holebira. <sup>11</sup> Anigo wali agali ko biaga karu tigua mana ko bialu hayagonaga pani nalu maruhondo biyadagua tinihondo biadai bulebira.

<sup>12</sup> Inaga wali agaliru-o tíore daraho kogoni. Igiri daliahe karumebi wali bedarumebi tí handayaho haru howa hingedape halu kagoni ndobe. Haru haga uruni tigua tí mo hondo halu kagola tigua nde uruni talima hariga ko ngagoha pialu kamigonida.

<sup>13</sup> Anduane Homogohanda wali agali bibahendenaga godi hale haiore hole kagoni. <sup>14</sup> Ibugua ibunaga wali agali haru hagabi haguane bu karubi tigua ko biyarunaga tihondo lamialu lalu, Inaga wali agali uruni ti ininaga pu mbira lini daga mini gerebi mabu helewagola tigua inaga mabu ogoni mo ko harimigoni. Wali agali mbirale nawi burupale karunaga emene hangu yu karu tigua gingila mialu tinaga andagaha mo wiaga kamigoni. <sup>15</sup> Tigua inaga wali agali bu karu mo ko halu wali agali yagibano bu karu hangedape halu kamigo aiwa bilimu layagola bialu kamibe. Anduane Homogo Hongo Haiheore howa Bibahende Haru Haame Ho Haga i kogo ina bi o ledogoniore, lene.

*Yarusaleme wali mine haga biru ngaruha mo ko holene wulebira lenego ogo*

<sup>16</sup> Anduane Homogohanda lalu, Yarusaleme wali biru ngaru de handadaba. Tigua mitangi bialu tini bayaleore bedemabe toba haga bedagoni. Tigua harigani ibaga bialu howa tinaga geni ngilingelo laga aleru pongobia howa ngilingelo laga bima piaga kagoni. Tigua ma yuladaga howa deme agali bu kago de handa amu nana bima ibaga biaga bedagoni. <sup>17</sup> Anigo Anduane Homogo ina ti pani nelu mulebero. Tinaga emboneha dere bilarogola tinaga mandari kago dugu haeala piai helowa ti embonepe helolebero, lene.

<sup>18-19</sup> Horo ogonongi Anduane Homogohanda Yarusaleme wali bedarunaga yari baya bu bedaruni golo waholebira. Tinaga geni yari bidarubi ma gagua ngarubi hale ira dedarubi mandari mo yaribia karubi labolabo dengui yi haga bidarubi bibahende golo wahai holebira. <sup>20</sup> Ibugua tinaga gi pagida ngaru golo wahai halu labolabo mandari huba bidarubi labolabo tinaga tinginini bo bidarubi pausi emene nogo dongoneme wabiniha pauda nga biaga mini sanda berelo yidarubi nole emene mani pongobiaho bedarubi mo wahai holebira. <sup>21</sup> Gi magi gi hondoneni karuledarubi ngui ira dedarubi bibahende golo waholebira. <sup>22-23</sup> Ibugua tinaga aga bayale karuledarubi labolabo tara tarame aga tara tara biagimbu biaga wabini ngarubi nogo dongoneme pausi wabini ngarubi aga emene hangisibi ngarubi uruni ale yari biyaru bibahendeore mo wahai holebira.

<sup>24</sup> Horo ogonongi Yarusalemeha wali bedarume mo ngabia haga paudabi sandarubi nawi biruwa tinaga tingini ngu tara bialuhe birulebira. Ti aga bayale mandibu ale mo yari biahalu karulaganego nawi howa pu payini ko nogo hende ale karula aribia ho birulebira. Ani biruwa tinaga mandari ala mo yari biahalu baya hangu pingipongo biagadagua bibe nahe mandari waitigime podo mbololo wa kagola embone podo mbololo wahene birulebira. Ani bedagola tinaga aga bayaleore karulagadagua nakarule labolabo ko budini dege karula aribia holebira. Tinaga dengui baya biagoria waitigi bu karume garabaya biabe ale biahaganaga bage tinginini podaragola tagaho birulebira.

<sup>25</sup> Yarusaleme-o waitigime inaga ami agali hongohe bu karubi inaga agali maru bu karubi bo wahai holebira. <sup>26</sup> Inaga dabudabubi maru ale ngerubi mo yu piai holebira. Ani biragola i wali mbira aga bidaru minu golo wahai henego tibabe dindini birape kaligobi birulebere. Anidagua bidegola wai pabenaga panga timbuni kagome iha urunidagua bidago de hondowa dara halu dugu dalimu bialu holebira.

## 4

<sup>1</sup> Anidagua bidagola horo uruningi wali kariame agali mbiraoreli hangu harigani pialu karia minu yania howa agali ogonihondo lalu, Inanaga tomo noleneru aga buleneru inane taya bialu handayaho holeberemago. Ai ina agalini nahe birabe tagabago ina agalini i kegoni lolomaya e la, lolebira.

*Yarusaleme dindi lone bayaleore wia dai bulebira lenego ogo*

<sup>2</sup> Horo mbira mani tagira ibulebirago ogonongi Anduane Homogohanda ira karunaga gene mbira gahenge wayatagi halu anda helolebira. Ani bialu ibugua dindini tomo

bayale tara tara ngaru mo anda hai helolebira. Ani biragola Isaraele wali agali bo hilo wahai hayangi nahome yu wahene mbira mbira hangu karu tigua bayale urunidagua birago hondowa ti turu taraore holebira. <sup>3</sup> Wali agali yu wahene Yarusalemeni karu ti bayale helonaga Anduane Homogohanda dabeneru tinaga mini bibahende ibuninaga mbugaha gilibu wiai ka. Ani binigo ai áyu uruni ti ibunaga wali agali mini tigabi kami lolebira. <sup>4</sup> Anduane Homogo ibugua Yarusaleme mo ko haiore howa mani tano ogoni lone mo bayale taraore ngelole manda bu ka. Ibuninaga hongo holene timbuni kagome Yarusaleme wayawaya bo wahalu dodo emene mbira para nahe baya gibiore ngelolebira. Wali bedarume mana ko bialu birayarubi agalime ko bialu maru bo wahenagonaga darama ngarubi mana ko damene bibahende Yarusaleme tanoha ngaru domo wahai holebira. Ani bialu Yarusaleme tanonaga ko domo wahai hene bayale wiai holebira. <sup>5</sup> Ani buwa Hari Saiononi wali agali íbu ngoai ho howa lotu lalu kagoria Anduane Homogohanda horongi hari beraliba mbirame bu dambi hai helolebira. Ani helalu mbiragangi ira hagua hungu heba mandagi helolebira. Anduane Homogonaga yári wá taraore holene hari beraliba biagobi ira hagua hungu biagobi ale howa ogonime Yarusaleme tano bibahende wia dambi hai howa handayaho helolebira.✧

<sup>6</sup> Anduane Homogonaga wá taraore holene yári ogonime ni hongohe darangibi dalu timbuni ibirangibi Yarusaleme mo ko holilono bu dambi howa haru helo ani helolebira.

## 5

### *Gerebi mabunaga iba gana lenego ogo*

<sup>1</sup> Ina iba gana mbira inaga nenegenaga laharogo hale hadaba.✧✧

Iba gana ogoni ibuninagabi ibunaga pu mbira lini daga mini gerebi mabu ngagonagabi garea lalu lolebero.

Hari bare wiagoria dindi bayale benebere winiyagoria inaga nenege ibugua gerebi iraneru ogoriani hangayada.

<sup>2</sup> Ibugua ege tole wiaru ungu wahowa dindirubaya hangu aluwa pu mbira lini daga mini gerebi irane bayaleoreru hangayada.

Mabu dombeneha ibuni gerebi uruni mamage holenaga andira emene mbira daligani bu helayada.

Hari bare ogoniha dege gerebi lini dowaga geme hangedowa pingidalu waini iba wabulenaga ege tole mbirani uli guabupe ho wiyada.

Biabe uruni biai howa ibugua gerebi lini uruni bayale taraore dendebe delo mitangi buwa de hondo hene.

Ani mitangi bu hearia gerebi lini daga biagome lini bayale nade howa dalu nalu hearia ne harigaha kaubi dege deneya.

<sup>3</sup> Ani biyagola inaga nenege ibugua lalu, Wali agali Yarusaleme tanoha kamirubi Yuda dindiha kamirubi tigua la handadaba. O bidaruni nde inime binigo bidabe be inaga mabu ibuha howa binime bidabe. <sup>4</sup> Ina biabe bialu hangarugo pu urunime gerebi lini bayaleore delo lowa birugo irane aginaga lini dowaga kaubi dayadabe. Mbirale mbira bulene winigo ina nabirudabe be agua biyadabe.

<sup>5</sup> Aiore inaga gerebi mabu ogoniha mbira bule manda bidogo tihondo langero. Ina mabu ogoniha nogo gabua karume anda puwa pu gerebi lini daganeru nodugu payabu wahelonaga pabe gialope holebero. <sup>6</sup> Ina dindi ogoniore mo labu harogola mabu ogoni embera ibalu datani anihe ko karu andaho helolebero. Ani bidagola inaga pu gerebi lini daga uruni bayale helo lowa lone biabe nabulebero. Ina beralibaruhondo lalu, Iba dalu dindi ogoni gomba helonaga naibilalimu, lolebero, laya.

<sup>7</sup> Isaraele wali agalibi Yuda wali agalirubi ti bibahende Anduane Homogo Hongo Haiheore kagonaga pu mbira lini daga mini gerebi mabu ale kagoni. Yuda wali agalirubi ti ibunaga pu gerebi lini dagane hangayaru ale kagoni. Ibugua wali agalime mana bayale ngaru hangu bialu helo hamelo hearia tinime mana ko wiaru bialu wali agali homelo bo wahaga biaabo halu hene. Wali agali maru karume mana bayale tigabi ngadagua bilo hamelo hearia tinime wali agali maru hearu hangedope haga bialu waitigi haga bialu hene.

*Wali agali mana ko biagaru homolebira lenego ogo*

<sup>8</sup> Mo ko holeneore tíha wulebira. Agali anda dewa yolobu helalu dindi dewa yolobu wialu buwa dewa degeme t́ninaga mo tago halu kamiruni. Emene hangu howa dindibi mbirale ngarubi tí dege karulai haramigola maru karu ti mbirale nawi howa tini birulenebi heba henge nawiore kagola dindi ogoriani tí hangu holeberemida.

<sup>9</sup> Ina hale halu hewaria Anduane Homogo Hongo Haiheore kagome ogodagua layua, Heneneore larogo. Anda timbuni baya tara o hama pedaruniha mbirali palia nabi tabuanda bu karia giallo wahai holebira. <sup>10</sup> Pu mbira lini daga mini gerebi mabu timbuniore hangayagua lini emene hangu daragola waini iba emene dege wabuwa hambu wulebira. Tigua balawa wabiaga widi egene mbege nu pirani honowa hangayaguabi lini dedaha mbege nu mbiraore hangu do hanabehe dolebirago, layua.

<sup>11</sup> Tíha mo ko holene timbuniore wulebira. Egerebagi heyuwa t́gua waini ibabi lulu iba hongohe marubi naho wiaga kamiru. T́gua naho wia dege bialu mbi hanuni bolangua halu lulu yu haga kami.✠ <sup>12</sup> T́gua dawé tara halu howa waini iba dewa nolenebi ngida ale bolenebi irabitele kilingele lalu pilipe lalubi tabage balu hiliyula lalu bulenerunaga tíha manda bogala timbuni wua kamigoni. Ainde mbirale Anduane Homogo ibugua bialu kago manda nabioire kamigoni ndobe. <sup>13</sup> Anidagua bialu kamigonaga Anduane Homogohanda ogodagua leda. Heneneore inaga wali agali kamirume ini manda bua nahe kamigoni. Ani bialu kamigonaga dindi tarali t́naga waitigi karume ibuwa tí bo garabayabu yalu polebira. Agali haguane kamiru tomo noa halu homoleberemi. Wali agali bibahendebi tí iba nolene nawidagola hége lebola halu iba noa halu tongololebira. <sup>14</sup> Áyu t́gua turu ndoore howa tomo dawa payabu nalu howa dawé tara halu kamigo. Ai heneneore Yarusalemeni agali haguane kamirubi wali agali bibahende kamirubi homenerunaga humbirini andagaha t́naga homali tí bo gamu holenaga ne hariga timbuni hala howa manda mandabu ngagoni, laya.

<sup>15</sup> Wali agali bibahendeoreme taga hai holebira. Wali agali tininaga mini yaraga haga biaruni tí mo dindiha helalu mini lene ndo holebira. <sup>16</sup> Anduane Homogo Hongo Haiheore kago ibugua mana tigabi biragome wali agali urunibi karuhondo ibuni mini leneore ko lalu walia holebira. Ani bialu ibuni bayaleore howa mana ibugua biagaru tigabini bayale ngaru hangu biragome wali agali tigatiga dabaki holebira. <sup>17</sup> Tano ngaruni mo ko hai halu datani anda ho dambiho waholebira. Datani timbuni kagoa nogo sibi iginiru meme iginiru ti anda ibuwa tani uruni nalu holebira.

<sup>18</sup> Tíha mo ko holene timbuniore wulebira. Wali agali mendeali karu mo hondo halu ko biaga kamiruni t́gua ko uruni birimiru domo wahabe nahe t́niha paraho wiaabo kagoni. <sup>19</sup> T́gua lalu, Anduane Homogo ibugua bayale howa mana tigabi ngaru dege biraru ina de hondolomaya abale bilo. Isaraele wali agalinaga Ngode Datagaliwabe ibugua inahondo mbirale mbira bule mandabu heagua nde ina hondolomaya abale bulene nga. Ani biragola ibunaga mini tigabiwi howa ibugua mana bayale ogoni áyu biatagi haragoria handalu manda bulumaya, larimigoni.

<sup>20</sup> Tíha mo ko holene timbuniore wulebira. T́gua mana ko ngaruni bayale lalu bayale ngaru ko laga kami. Wá holene ngago aruma ka lalu aruma holene ngago wá hara

✠ 5:11: Min 23.29-30, Aga 10.16



lalu kami. Mbirale kaubi ngaru dendebe lalu dendebe ngaru kaubi nga lalu ani biaga kamiruni.

<sup>21</sup> Tíha mo ko holene timbuniore wulebira. Tígua agali marunaga manda timbuni bidaru dindiha lowa tí mini gigabiwi howa manda timbunibi kamago laga kamiruni.

<sup>22</sup> Tíha mo ko holene timbuniore wulebira. Agali lulu iba naga mini lene kamiruni. Tínaga mini manda bogaru lulu iba odo iriari bulenenaga dege timbuniwi kamigoni.

<sup>23</sup> Godi hale haga kamiru tígua mbiralime ke howa inaga godi lahabe lalu ohowa tihondo muni hana haragola ogoni ibunaga lahalu pu laramili. Ai henene godi lole ibirago tígua ibunaga bi baya hangu hale halu manani ngadagua daba nabiaga kamigoni ndobe.

<sup>24</sup> Anidagua bialu kamigome ira karunaga piniha togo bu wahene howa yuniru gaulalu gilopebe biralidagua bialu mo ko holene ogoni abaleore irame dangi yobi ngagoria kulu lalu dagadagua tíha tínaga pini togo bialu lini dogolope halu puyabume abalu pulo yalu piagadagua pu ereba holebira. Irane tígua Anduane Homogo Hongo Haiheore kagonaga bi mo waharimigonaga ani bulebira laro. Tígua Isaraele wali agalinaga Mbirali Tigabiore Kago erembira mialu pirimigonaga ani bulebira.

<sup>25</sup> Anduane Homogohanda ibunaga wali agaliru hondowa kebaho ka. Ibugua ti mana lalu pani mule ibunaga gi mbira yaraga holebira. Ani buwa gi yupe haragola hari timbuni karuni ema biai halu wali agali bu karuni dewaore homai holebira. Ani homai haragola uruninaga tinginiru hora nahe tanonaga hariga ngarunaga wima polebira. Ani bira tiraga Anduane Homogohanda ibunaga keba holene hada nabi wiaabo holebira. Wiaabo kagola ibunaga gi yaraga hayago yupe nahe pani miaabo holenaga yaraga ho wiaabo holebira.✧

<sup>26</sup> Anduane Homogohanda ibunaga wali agaliru belonaga ami agali kaundiaha karuhondo manane mo walia holebira. Ani walia haragola ami urunime abale gerai lalu ibulebira. <sup>27</sup> Ami agali uruni bibahende hongo tarahe degeru ibulebira. Ti mbirali gehi howa pilagabi mbirago ibu u paliagabi ndo ibulebira. Ti hongoheore howa tinaga mandibu baya hangu ndibulo wialu ge andane hongohe budubaga bibe naheore karule ibulebira. <sup>28</sup> Tinaga timuru de biaole yuwa wai bule ede yalu tungu lolebira. Tinaga wai biaga nogo hosiru hongo tarahe howa uruninaga ge gibaru hongoheni giambe ege tole alehe ibulebira. Tinaga wai biaga garo ale mini karisi nogo hosime gili laga gerai ledaria aube tobane humbirini wai biradagua bulebira. <sup>29</sup> Ami agalirume wai huaru ledaria gabua timbuni laionome nogoru nole bo yuwa ohalu yalu pole dua timbuni lagadagua lolebira. Wai tigiali urunime agali minuwa garabayabu yalu laionome ibunaga tomo bo yalu abale piagadagua polebira. Ogoniore biragola mbiralime ti gingila mibe naheore wulebira.

<sup>30</sup> Horo ogonongi ami agali tara urunime hongo howa huaru lalu Yuda dindi bibahende bo gialobaga bulebira. Ani bialu howa tigua hongo tara howa huaru laragome iba solowarame yaribu timbuni bialu howa u tugu lalu kilikulu timbuni lagadagua lolebira. Anidagua bidagola agali marume dindi ogoniha handa amu halu karia dindi ogoni mo ko ho waheneore wialu ni nade ginu hagua timbunime ge hai kagola arumahe wulebira, lalu Aisaiahanda Anduane Homogonaga bi latagi halu ani lene.

## 6

### *Anduane Homogo ibugua Aisaia ibunaga bi latagi haga helo dabeneo ogo*

<sup>1</sup> Mali mbiraore Kini Usia homayangí dege handalu hewaria Anduane Homogo ibuninaga kini biragane dagia wiagoria bereane handaru. Kininaga biragane ogoni daligaore wia. Kininaga aga biago timbuniore ibunaga anda ogoniha bibahende wua namu lai hea.✧ <sup>2</sup> Ani bereagoria dahuliyali dewaoreme ho mabubupe hea. Dahuliyali

uruni tinaga babagane waragaria dege dege haihe heane handaru. Ti bibahendeore-naga babagane kira dege degeme tininaga dengui dambi hai howa kira mende dege degeme tininaga tingini dambi halu kira teboneme yaga lalu pialu hea. Dahuliyali uruni ti ira hungu ale daradagua dalu bu hearia handaru.\* <sup>3</sup> Tigua tini dege dege bi ladene bialu lalu,✧

Anduane Homogo ibu baya burugule ibu baya burugule ibu baya burugule ka.

Anduane Homogo Hongo Haiheore kago ibu agiore loabe tobahe ibu baya buruguleore kagoni.

Ibunaga wá holene hongo holenebi dindi bibahendehe wiame kagoni, lalu hea.

<sup>4</sup> I Anduane Homogonaga anda haneni hewaria dege dahuliyali biaru mbira mbirame bi laga biyagome ege tole anda gene wayini dunini heago mo pirila gimbu biya. Ani bialu anda biagoha ira hagua timbuni do yulo paya biyane handaru.✧ <sup>5</sup> Ani biyago hondowa mogo lalu gi timbuni howa ogodagua laru. Aiore ina horo bibahendengi inaga ne harigaha howa bi ko ngubi hangu lalu haruli. Ani bialu ina wali agali bi ko hangu laga karu baba mandagi harugome aiore i yo pialu polene henge nawida laru. I koore biaga kogonigoyu ina Kini timbuni Anduane Homogo Hongo Haiheore kago ini deme handarugoni. Ani handarudago ai i homoleda laru.✧

<sup>6</sup> Ani lo hewaria dahuliyali biaru aria mbirame ira hungu dalu heaore pero mbirame ira punguane mbira tabo yalu i hewagohayagi ibiya. Ira punguane ogoni bo lomabu miaga dabu wiagoha howa hedo yiniya. <sup>7</sup> Ibugua ira punguane ogonime inaga ne hambuni ela halu howa inihondo langialu lalu, Ayu ina ira ogome inaga ne hambuni ela harogome ina ko biridaruni domo wahai harago ai iha ko mbira nawi domo wahene bayale kegoni, laya.

<sup>8</sup> Ani biyagola Anduane Homogohanda dahuliyali biaruhondo hale halu lalu, Bi aiwa lama pu lamabe. Inaga bi ogoni aiwa loyalu polobadabe, layuane hale haru. Ani layuagola ina lalu, Ina lama poliya pu la, laru.

<sup>9</sup> Ani larugola Anduane Homogohandaibunaga bi ogo wali agalihondo lamule pu lowa lalu, Tigua bi halu dewa hale haabo harimiyaguabi bi ogoninaga irane manda nabi haabo holeberemi. Tigua de handaya ho haabo harimiyaguabi mbirale biragonaga irane handa walia naholeberemiore labe, laya.✧✧ <sup>10</sup> Ani lowa ibugua ihondo lalu, Wali agali uruninaga minime irane manda nabilo mini mo ndibula halu haleme hale nahelo hale mo tulu helalu deme de nahendelo de mo ndibulalu bi labe. Tigua uruni bayale haihe howa irane manda bialubi hale halubi de handalubi ini koria dai biragola ina ti mo dabi holene wuligonaga ani bibe laro, laya.

<sup>11</sup> Ani layagola ina ibuhondo ogodagua hale haru, Anduane Homogo-o ina biabe ogoni angi biamaro buliyabe, laru.✧

Ani larugola ibugua ladai bialu lalu, Mana lalu kene dege tano ngaru bo giallo wahai halu dindiru mo ko hai halu anda bu karuha mbirali napaleore tabuanda hai helo.

<sup>12</sup> Anduane Homogo inime wali agali bibahendeore tini dindi yu wahalu dindi tara kaundiaoreha pelo waratagi halu tini dindiha mbiraoreali hangubi yu wahene mbira naholebiraore. <sup>13</sup> Wali agali dindi ogoria mbira mbira yu wahene heaguabi urunibi bibahendeore biba hai helolebero. Anigo wali agali dindi ogoria naheore wiyaguabi mani ira dibininaga tiliniha lone dongoria bialu anda hagamadagua ininaga wali agali mani ho aribia helolebero laya, lalu Aisaiahanda lene.

\* **6:2:** Dahuliyali babagane waragariahe uruni dahuliyali maru karu ale ndo. Ti mende ale kago Hiburu bi lalu uruni ti mini Serabimi lagago uruninaga bi te Baibolo mbuga ogoaha hangu nga. ✧ **6:3:** Mo 4.8 ✧ **6:4:** Mo 15.8 ✧ **6:5:** Hgn 6.22, 13.22, Yar 1.6 ✧ **6:9:** 2 Ko 3.14-15 ✧ **6:9:** Md 13.14-15, Mg 4.12, Lg 8.10, Yo 12.40, Ab 28.26-27 ✧ **6:11:** Mai 3.12

## 7

*Aisaiahanda Kini Ahasahondo Anduane Homogonaga bi lamule penego ogo*

<sup>1</sup> Kini Ahasa ibu Yodama igini howa Usia aguane henego ibu Yudanaga kini heangi wai bialu hene. Siria dindinaga Kini Lesinibi Isaraelenaga kini Lemalia igini Pegabi libugua Yarusaleme bo podolenaga wai bialu hene. Wai bialu hebiria libugua Yarusaleme tano karulole bo poda anda habe nahe hene.\*

<sup>2</sup> Yudanaga Kini Ahasa ibu hale halu hearia Siriali ami ibuwa Isaraele dindiha anda ibu ka layago hale howa kini ibunibi wali agali bibahendebi gi timbuniore howa puyabu pularagola ira yuniru ema biagadagua bialu ti bibahende duru timbuni lalu hene.

<sup>3</sup> Ani gi ho hearia Anduane Homogohanda Aisaiahondo lalu, Í igini Seayasubu haru halu Kini Ahasa lola hole pilibu. Libu harigani pialu howa iba dadabu yalu anda ibini ngagoria tagira pialu kabiria Kini Ahasa ibu labolabo wabiaga ngagoha pole pialu karia ogoriani lola holeberebi.\* <sup>4</sup> Lola howa Kinihondo ogodagua lalibu, Bi dewa lama ibaga bialu karuni hale howa mogo lalu gi nahe hongo howa habe. Kini Lesinihondobi ibunaga wali agali karuhondobi Isaraelenaga kini kagohondobi gi nahe embedaho habe, lalu lamilibu. Kini ogonilabonaga keba holene gibi ndogo ira hungu nabule hagua dege timbuni pau lalu wiralidagua bialu kagoni. <sup>5</sup> Henene dege Sirianaga kini kago ibugua Isaraelenaga kini heba bi lo mbira ho wialu lalu, <sup>6</sup> Iyame Yudanaga Kini Ahasaore bope habiya, lalu ka. Libugua lalu, Yuda dindiha wai bu ibalu wali agali karu iya baba mandagi hamaga holenaga ti mo gihalu dindi iyame karulabiya. Ani karulowa Tabele igini kini helo dabo helabiya, laragoni.

<sup>7</sup> Anigo Anduane Homogo ina larogo. O layadagonidagua nabulebira. <sup>8-9</sup> Ani nabulebirago irane Siria dindi ngagonaga hongo tininaga tano haguane Damasaga tano hongo ngagobi ndo nga. Ani bialu Damasaga tanonaga hongome Kini Lesininaga hongo kago bolangua habe nahe nga. Ani bialu Isaraele dindinaga hongome tininaga Samaria tanonaga hongo bolangua habe nahe halu Samaria tanonaga hongome tininaga Kini Pega kagonaga hongo bolangua habe nahe dege ngagoni. Anigo mali pira waragariani duria (65) uruniha howa Isaraele dindi ogoni mo ko halu wali agali uruniha karuni bo giligala lenego purugo lalu abogo ogoria hene lalubi mini mbira nawulebira. Ai Yuda wali agali tíguabi nde ihondo mini mbiraore nawirimiyagua mani tíbi nde ogonidagua dege pu ereba hai holeberemi, lalu Anduane Homogo ibugua laya, lalu Aisaiahanda lene.

*Anduane Homogohanda Emanuele ibulene manane Ahasahondo walia henego ogo*

<sup>10</sup> Anduane Homogohanda Kini Ahasahondo bi mende lawia hene. Ibugua Aisaiaha howa ogodagua lamini. <sup>11</sup> Anduane Homogo inaga Ngode Datagaliwabehondo manane mbira waliaha lalu inime hale habe lalu lamibe. Manane ogoni homonerunaga humbirini andagaha howa walia helo hame leayaguabi hari daligaha howa walia helo hame leayaguabi mbiragoha manane walia helo hame lededagua ibugua walia helonaga hale habe, lalu lamini.

<sup>12</sup> Ani lamiyagola Ahasahanda lalu, Ani ndo manane mbira mo waliaha lalu hale naholebero. Anduane Homogonaga hongo ina ba hondolene hame nale ko, lene.

<sup>13</sup> Ani layagola Aisaiahanda ladai bialu lalu, Kini Debidinaga aguanene kamiruni tíbi ogo baya hangu hale hadaba. Tígua mana bialu kamigome wali agali maru karu tigua tí handabe manga helo dege beremiligoni. Ai áyubi nde tígua inanaga Ngode Datagaliwabe ibuguabi tí handabe manga helo hame lowa beremibe. <sup>14</sup> Aniyagua Anduane Homogo ibunime manane mbira tihondo walia holebira. Manane ogoni agua bulebira. Wandari mabuage mbirame igiri mbira taba hanaragola igiri gali ogoninaga mini Emanuele

\* **7:1:** 2 Kin 16.5, 2 Bit 28.5-6      \* **7:3:** Ogoniha igiri mini Seayasubu ledagoni irane wali agali emeneko hangu mani dindi ogoriani hole dai bulebiraru lalu leda.

wulebira.† 15 Ai igiri ogoni ibu anda howa boga bialu mana ko bayalela tale bibehe harangi ibugua mone taranaga ibanebi nogo bulumaga sibirunaga andu ibane mo giambe howa tomo wabini mini sisibi nalu holebira. 16 Ahasa-o áyu ína kini agali kirali ogonilabo hondowa gi timbuni halu kegoni. Mani ogonidagua bulebira larogo nabi kangi kini ogonilabo libunaga tano ngarubi dindi anda ngarubi ala bo gialobaga biragola dindi hangu ibira hai holebira.

17 Anduane Homogohanda mo ko holene gendabi timbuniore ínihabi ínaga damenore karuhabi ínaga wali agali bibahende karuhabi ibilolebira. Mo ko holene horo ogoni tagira ibule biaruagoni bamba Yuda Isaraeela hameigini paligi paligi biangi howa genda wima ibini áyu ngaruni emene dege lowa mo ko holene ogoni timbuni gendabiore tagira ibulebira. Genda ibulebiragoni ogo. Anduane Homogohanda Asirianaga kini Yuda dindiha haru anda íbu helolebira.

18 Horo ogoningí Anduane Homogohanda do laragola Iyibi dindiha howa ami agali dewaore karume hale halu abaleore bunguna dewa ibiradagua ibulebira. Ai ibugua Asirialiru dome dege olaragola abaleore mone mbulo yalu ibiradagua ibulebira. 19 Ibalu Yuda dindini ho paya paya bulebira. Tigua dindi ko wali agali nahaga ngaruhabi dindi ko egeanda ngaruhabi dindi dataniruhe bayale ngaruhabi dindi ko agubandu deledeleru buhe ngaruhabi ti hangume ho karulo piai holebira.

20 Horo ogoni ibirangi Anduane Homogohanda agali mandari podaga mbira iba Yuberedisi ange ederayagi kago haru ibulebira. Haru ibiragola ogoni ibugua tínaga mandaribi tínaga angaribi tínaga tinginini iri karubi bibahende podo mbololo wahai holebira. Mandari podaga ogoni ibu Asirianaga kini lalu ibulebira.

21 Horo ogoningí tigua ani ibalu tínaga nogo sibiru bulumagarubi bo hilo wahai holebira. Ani bidagola agali mbirago ibunaga nogo bulumaga mbirabi nogo meme kirabi hangu helo wahayagua nde 22 tigua nogo andu ibane dewa hambu paya bulebira. Ani hambu payabu ngelowa nolene karulapeore wulebira. Wali agali yu wahene emene hadai biraru tigua tomo nogo andume wabini mini sisibi mone taranaga ibanebi karulapeore nalu holebira.

23-24 Áyu tínaga gerebi mabu uruniha gerebi irane daosini mbira (1,000) hongo howa gerebi irane mbira mbiranaga yolo muni daosini kina ale (1,000) mbira mbira taguabehe hongo kamigoni. Anigo mani horo larogoni ibirangi howa mabu bayale uruni ira tara tara anihe karume andaho aribia haragola embera tiagi timbuniore wialu agali ogoniha anda pobe naheore wulebira. Agalime danda timuru yalu ogoniha gabua taya polebira. 25 Agali marume hari bare ngaruha e hangaga wiyaruni bibahende embera ibalu agubandu deledele purume ibalu ha aribia holebira. Ani bidagola dindi ogoniha ani kenda karu hondowa agalime e ogoniha lone hanga nabulebira. Tigua nogo bulumaga sibiru hangu uruniha datani no pelo yupe holebira laya, lalu Aisaiahanda Kini Ahasa lamini.

## 8

### *Aisaia igini ibu wali agali hendelonaga manane henego ogo*

1 Anduane Homogohanda ì langialu lalu, Mbirale beba gili bibehe mbira taya buwa nguni daligani bi haguane ogodagua gilibu wibe. Abale mo pagebu yalu gerai pu, gili bibe. Wali agalirume bayuwa dagalelo wáleore gili bibe. 2 Ína bi gilibu ngegoni mo henene helonaga agali bayale kirali damu pialu mbirago ibu loma binigo mo miaga mini Uria mendego ibu Yaberegaia igini Segaraiala ogonilabo damu pobe, lalu langiya.

3 Mani ì one ibu yamu ko biraya. Ani biruwa igiri mbira taba hono bereagola Anduane Homogohanda ìhondo langialu lalu, Igiri ogoni ibu mini Abale Mo Pagebu Yalu Gerai

† 7:14: Emanuele ogoni inanaga bi lalu Ngode Datagaliwabe ibu ina heba kagoni laga. ✨ 7:14: Ais 9.6, Md 1.23, Lg 1.31, 1.34

Pu wibe. <sup>4</sup> Ai igiri ogoni ibugua bi lalu aba aiyā olabe nahe wene gali dege bedangi Asirialime abale ibalu mbirale bibahende Damasaga tanoha ngarubi Samaria tanoha ngarubi bibahende mo yalu puwa tinaga kini mo mulebira, laya.

*Asirianaga kinime Yuda bope hole ibulebira lenego ogo*

<sup>5</sup> Anduane Homogohanda ihondo lone ogodagua laya. <sup>6</sup> Yarusalemeni Iba Siloa hendore ema nabi yo lalu piagagobi Anduane Homogo ini kogoni. Ani bidogola Yuda wali agali o karume i hongo nahe kagoni lowa erembira ngialu tigua Kini Lesinila Isaraele wali agalinaga Kini Pegala libu hangu mitangi bialu libunaga hongo timbuniorehe kabe tobaho kagoni. <sup>7-8</sup> Anigo Anduane Homogo ina heneneore larogo. Iba Yuberedisi pedagoni iba li timbuni ibilalu dindi bibahende ngaruni ibame birame helolebero. Iba li ani ibilalu birame helarogome Yuberedisi angeni howa dindi anda maburu namulai haga bima ibaho wialu Yuda dindini anda ibulebira. Ani ibiragola iba uyuna daligaore agali ma pahabehe ibulebira. Ai iba Yuberedisi li ogoni Asiria dindiha kini kagome ibunaga ami karu haru halu ibuwa wai bulebiragonaga yobage lalu iba li ale ibulebira, lalu Anduane Homogo ibugua lene. Agali urunime ibalu Emanuele inaga dindi wiagoha ti karulai holebira.\*

<sup>9</sup> Ani bulebirago wali agali dindi kaundia kawarebi bibahendeha hameigini hama pedamiruni tigua bi ogo baya hangu hale hadaba. Tinaga hongo ho kamiruni bibahende mo ngoai howa wai bule harimadalo manda bialu gi ho halimu. Anigo wai berolo manda buwa bialu kamiria tinaga hongo podaragola ti mogo timbuni lowa luluyu ibagabu holeberemi. <sup>10</sup> Tigua bule parahō ngamigo ogodagua bimīya lalu bi lo mbira ho halimu. Ogonidagua bia buleberemigoyu henene halu biatagi naholeberemi. Ngode Datagaliwabe ibuni ina heba kagome tigua mbirale bule magoyu kamiruni lini nadolebira, laya lalu Aisaiahanda lene.

*Anduane Homogohanda Aisaiahondo lalu, I hanguhondo gi holene nga, lenego ogo*

<sup>11</sup> Aisaiahanda lalu, Anduane Homogonaga hongo iha karula hayagola hewaria ibugua ihondo ogodagua laya. Wali agali karuni heba mini mo mbiraore nahabe. Mana tigua bialu kadaguabi nabibe. <sup>12</sup> Wali agalirume lalu Yuda dindi mo ko hai hole laya lalu bame bi layalaya mbira lalu heagua inaga damenerubi inibi ti bibahendeme bi ogoni henene larabe toba nahalimu. Wali agali marume mogo lowa gi ho kadagua tibi gi hamaga nahalimu.\* <sup>13</sup> I Anduane Homogo Hongo Haiheore howa baya buruguleore kogonigo manda bilimu. Anigo tigua inihondo dege gi halu holene ngagoni. <sup>14-15</sup> Ai wali agali bira do holenenaga anda ini kogoni. Ani howa dege i Yuda Isaraelela wali agalirunaga hariga piaga ngagoria ge giba bo bidi laga biaga ege tole wiradagua bidogoni. Ani bidogoria maru ibalu karia ge giba mo ko howaore bo bidi laga biragola odo pilope haga bulebira. Ai Yarusaleme wali agaliru ini gono ale howa abale minu yaga bulebero. Ani berogola dewaliore gono ogoniha do wulebira, laya, lalu Anduane Homogohanda langiya.\*

*Homene dinini karuhondo mo bila holene nawi lenego ogo*

<sup>16</sup> Anduane Homogohanda bi i langiyadaruni ereba nahe wiaabo helobi inaga talima ibagarume bayuwa mamage helobi gilibiru. Ani buwa inimeore gili bini lalu ininaga gi magibi beba ogoriani gilibu wiru. <sup>17</sup> Anduane Homogo ibugua Isaraele wali agaliru erembira mialu ti handa dai bule ndo yu waore hayagonigoyu ina ibuhondo mini dunubia ho howa ibugua mbira bule layaru bilo malia ho kogoni.\*

\* **8:7-8:** Emanuele ogoni inanga bi lalu Ngode Datagaliwabe ibu ina heba kagoni. Aisaia ibugua lalu, Igiri mbira taba honolebirago ibu mini Emanuele holebira, layago (7.14) manda buwa ibu igiri emene ogoni mitangi buwa Yuda dindi ogoni Emanuele ibunaga dindi lalu manda bini. ✧ **8:12:** 1 Pi 3.14-15 ✧ **8:14-15:** 1 Pi 2.8 ✧ **8:17:** Hi 2.13



<sup>18</sup> Anduane Homogo Hongo Haiheore kago ibunaga haru hole biragane dagia Hari Saiononi ka. Ibugua waneigini uru ihondo ngiyaru ti baba kogoni. Ani bialu ibugua Isaraele wali agali mo ko hole ngagonaga manane inani walia ka.✠

<sup>19</sup> Wali agali marume tihondo, Homene dininiru mo bila haga biarumebi halaga biaga biarumebi tihondo bi langulebirago hale hadaba, lolebira. Wali agali uruni ti lulume laradagua bialu bi tara tara tinaga ne harigaha howa latagi haga ka. Tigua lalu, Wali agalirume wali agali homa nabi karunaga lahalu homene dininiruhondo hale holene nga, lolebira. Tigua ani nabi tininaga Ngode Datagaliwabe kagohondo hangu hale holene ngagoni.

<sup>20</sup> Wali agali urunime ani layagua tigua agua ladai bilimu. Anduane Homogo ibuninaga bi mana bayale lowini ngaru hale halimu. Ti halaga biaga karume agi larabe hale holene nawi. Tigua bi laragome ti biamogo nabulebira, lalu ladai bilimu.

<sup>21</sup> Anidagua biragome wali agaliru ti kagoria mo ko holene anda ibulebira. Tigua hina gari timbuni ho halu gendabi timbuni yu howa dindi bibahendehe ibaga bialu haabo holebira. Hina garime ti mo luluya haragola tigua tinaga kinihondobi Ngode Datagaliwabe ibuhondobi keba halu bi ko lalu holebira. Ani lalu howa hari daligaha handa daga halu kariabi <sup>22</sup> dindiha handa dindi halu kariabi mbirale bayale taya biyago ale mbira handa walia naholeorebira. Aruma holene timbuni ngagome budambi haradagua bialu genda yu holene ko ngaru dege dindini ngaria handa walia haabo holebira.

## 9

<sup>1</sup> Ogonidagua bidago yu wahalu tigua bolangua halu putara holene henge mbira ngane handa walia naholebira, lene.✠

*Anduane Homogohanda, Wali agali mo turu holenaga kini bayale mbira tihondo ngulebero, lalu bi lowinigo ogo*

Abale Anduane Homogohanda Nabadali hameiginibi Sebulunu hameiginibi bo gialobaga bu wahai halu mo ko hayagola wali agali bibahendeore taga timbuni hai ho hene. Ani binigo mani howa iba solowara timbuni Medidereniana bedagoha polene hariga timbuni pedagogia dindi ngarunagabi Iba Yodana doma edeyagi ngarunagabi Galili dindi bibahendehe wali agali tara tara bu karunihabi dindi uruniha bibahendeni genda yu hayaru wahai halu mini lene mbira wulebira.

<sup>2</sup> Abale wali agali uruni ti arumaoreha henego ai áyu tigua wá holene timbuniore handa walia haya. Abale ti aruma dindiha haabo henego ai áyu ti miniha wá holene anda ibiya.✠ <sup>3</sup> Anduane Homogo-o ínaga wali agaliru ho dame bilarigola ti turu timbuniore ho ka. Wali agalime tinaga mabuha tomo hengeneru nole bialu howa turu hagamadagua ami agalirume wai buwa wai labuha mbirale bayale ngaru mo yalu dai buwa tale bialu howa turu timbuni hagamadaguabi ina bayaleore biamogo birigo hondowa ti turu timbuniore ho kagoni. <sup>4-5</sup> Bambaore ina Midianalirunaga hongo bo podalu ini wayali haridagua áyubi tinaga waitigi ti mo genda ho hearunaga hongo bo podaridagonaga tigua turu timbuni ho kagoni.\* Ínaga wali agalirume genda timbuniore yu kago agalime nogo bulumaganaga erembirani ira gombedene timbuni ngago mo wia howa genda ogoni yu howa biabe bilonaga tibume erekuniha howa bo daila halu hagamadagua waitigi agalirume ínaga wali agaliruhondo ani bialu heneyagoni. Anigo ínime waitigi urunaga tibubi ira gombedene gendabi ogoni mo libulobagabu waharigola tinaga waitigi urunime ínaga wali agali ti kagoha lone ibalu mo ko naholebira. Waitigi ami agaliru tinaga wai biaga gesu karulo karubi wai biaga aga agali darama

✠ 8:18: Hi 2.13 ✠ 9:1: Md 4.15 ✠ 9:2: Md 4.16, Lg 1.79, Eb 5.8, 5.14 \* 9:4-5: Abale Midianalime Isaraele wali agaliru mo ko halu hearia Anduane Homogonaga hongome Gidiononaga giha howa tinaga hongo bo podenego leda. Haguane Heneru 6.1-6, 7.9-25 ngago hondolene nga.

healore bidaru heba bibahendeore irame daiore holebira. Genda wiyaruni ereba hai halu horo bayale holene wia aribia holebira.

<sup>6</sup> Ani bulebirago irane inanaga igiri mbira ngule wiyago taba hono ngiya. Inanaga igini ogoni inahondo ngiya. Ibu haru haga howa inanaga handame haga holebira. Ibunaga mini lolebirago uru Mini Gigabiwibi Tigatiga Talebu Ngiagabi Ngode Data-galiwabe Hongo Timbunihebi Haabobo Holenenaga Ababi Mo Palia Holenenaga Haru Hagabi ka lolebira.✧ <sup>7</sup> Haru Haga ogoni ibunaga hongo kago yu tago howa holebira. Ibugua wali agaliru haru haga buwa kagola wai bulene henge nawi embeda ho haabo holebira. Haru Haga ogoni ibugua Kini Debidi henegoria ho aribia halu Debidinaga biragane dagia ngagoriani bira aribia holebira. Ibugua mana bayale tigabi dege biaga kagonime ibu hongo timbuniheore holebira. Ibugua mana ogonibi biragome ibuni kini hongoheore áyubi awebi ibira nahe haho wiaaboboore bu holebira, lalu Anduane Homogo Hongo Haiheore kagome urunidagua biaiore holebira, lalu Aisaiahanda lene.✧

*Anduane Homogohanda Isaraele wali agali pani mulebira lenego ogo*

<sup>8</sup> Yagaba aguanene Isaraele wali agali karuni mana ko biragonaga pani mulene nga, lalu Anduane Homogohanda laya. <sup>9</sup> Horo ko ogo tagira ibirangi Isaraele wali agali kamirubi Samaria tano timbuni ngagoha bu karubi ti bibahendeme ogoniore Anduane Homogohanda inahondo henemane biyadalo manda biai holeberemi. Áyu ogoni ti dege mine howa balagala halu tininaga mini yaraga halu kagoni. <sup>10</sup> Tigua lalu, Inanaga waitigirume ege timenime anda bini hongohe hearu bo gialo delai hayagoyu iname ege tole timbuni ngaru minu podalu anda hongohe lone buleberema. Inanaga poge ira hengemaruni dibai hayagoyu iname uruni biyagonaga mogo nale kamagoni. Ogoni bame degeyago. Iname poge ira hene dibayagoria ira tamia bayale hanga aribia holeberema laragoni, lene.

<sup>11</sup> Ani layagola Anduane Homogohanda keba timbuniore howa tinaga waitigi hearume wai bu ibilonaga bu mini mo heya haya. <sup>12</sup> Ani bialu ni tagira ibiragohayagi Siriali hearunaga minibi Pilidiali ni paliragohayagi hearunaga minibi mo heya dege haya. Ani biyagola nde tigua Isaraele wali agali baba wai bialu howa tinaga ne halalu bo ereba hai holenaga wai hongo howa bialu hene. Ti ani biya tiraga Anduane Homogo ibunaga miniha keba ho hayago ereba nahe ti mana bialu kago bolenaga ibugua gi dogola amu ho haabo kagoni.

<sup>13</sup> Anduane Homogo Hongo Haiheore kago ibugua Isaraele wali agali ti mana ko bialu hayagonaga pani nelu miyagoni milowa tigua mini beregeda nabi haabo halu ibuni karia dai nabi kagoni. <sup>14</sup> Ani biyagonaga Anduane Homogohanda Isaraele dindi mo ko halu horo mbira hanguni ibugua Isaraele wali agalirubi tinaga agali haguenerubi pani nelu mulebira. Ibugua Isaraelenaga erene haguanela pugu waholebira. <sup>15</sup> Agali wahe mini lene karu ti haguane lalu mbiwia halu mana latagi haga agali hearume ke howa layaru ti erene lalu lene. <sup>16</sup> Agali haguane hearume wali agali bu hearuhondo mana bayalebi hariga tigabi wiadagua ndo lawai hayagola ti mini pu tara halu mo luluya hene. <sup>17</sup> Anigo wali agali dewaoreme Anduane Homogo yu wahalu puwa mana ko wiaru bialu howa tigua mana biyarubi bi layarubi bibahende ko hangu hai hene. Ani biyagonaga Anduane Homogohanda igiri daliahe karu aria mbirago yu wanahe bibahendeore pani miai holebira. Ani bialu wali dalo bedarubi waneigini aba aiyalame hono wahalu homene karubi ibugua bibahendeore koorene ko uruni dara nahe pani miai hole ibunaga gi dogola amu ho haabo holebira.✧

<sup>18</sup> Ira dene emene ko mbirame dama pialu irabu timbuni ngaru do yulalu bo timbuni dagimbu bialu howa hagua timbuni pau lagadagua wali agali urunime koorene ko biyaru bibahende da ho wiaabo halu ka. <sup>19</sup> Anduane Homogo Hongo Haiheore kago

ibunaga keba holene biba nahe wiaabo kagome wali agali dindi bibahendeni karu pani nelo miai holebira. Irame bo timbuni dalu mbirale mbira yu wanahe dai hagadagua pani miaiore holebira. Ani bulebirago wali agali uruni tini hangu hangu mitangi bulene nga. <sup>20</sup> Dindi ogoriani wali agali karume tinaga mbirale yu karu gingilo miaga kagoni. Ani biragola wali agalime tomo nolene hai bialu howa ngadagua nalu karia tombe nahe dege hagagobi mbirale gingilomu yayarume tinaga hame wiaru no karulapobe nahedagola haga biaga. Tigua tininaga waneigini karubi bo nalu haga biaga ka. <sup>21</sup> Manase hameigini karu tigua Eberaimi hameigini karu bope haragola Eberaimi hameigini karu tiguabi nde Manase hameigini karu bope haga kagoni. Ani bialu howa hameigini kira ogonilabo libu harume Yuda hameigini karu hangedope halu bo ma laga kagoni. Anduane Homogohanda libuni anidagua birago hondowa ibunaga keba holene biba nahe dege wiaabo kagola pani mule dege ibunaga gi dogola amu ho wiaabo ka.

## 10

<sup>1</sup> Tíha mo ko holene timbuniore wulebira. Mana tara tara gahenge ngaru mbira dege dege tigabi ndo tíni biamogo bilonaga wabu wirimi. Uruni lo ngarume inaga wali agali bope haga nga. <sup>2</sup> Tígua mana urunime yagibano karu bope howa tinaga mbirale ngaru tí mo yaga kamiruni. Wali agali yagibano urunibiru ti godi lole ibiragola tinaga mana uruni lo ngarume ti biamogo nabi howa mo hangedape haragola pugu biaga. Tigua mana tiga nabi ogonibi bialu howa Anduane Homogonaga wali agali darabi bu karu warape halu wali dalo bedarunaga mbirale ngaru mo page bialu waneigini aba aiyalame hono wahalu homene karunaga mbirale ngarubi mo page dege biaga kamigoni. <sup>3</sup> Ngode Datagaliwabe ibugua horo mbira tígua mana ko uruni bialu kamigonaga pani ngialu mana bule winigo horo ogoni tagira ibirangi tí agua buleberemibe. Agali tinaga waitigi hongohe dindi taraha karu haru anda ibuwa ti puyabu hongoheme ibalu pu laradagua bialu bo hilo wahayagua tí agua bule kamibe. Tí biamogo bialu gi milo ai karia poleberemibe. Ai tí mbirale mo bila ho ngamiruni agoha mo do holeberemibe. <sup>4</sup> Tí waitigirume bo hilo wahayaguabi ti dindi mbiraha minu garabaya bu yalu piyaguabi tígua mbira beregedalu bibe naheore kamigoni ndobe. Anduane Homogohanda tihondo uruni biai holebiragoyu ibunaga keba holene ngago ereba naholebira. Ani biragola tí pani dege mule ibunaga gi dogola amu ho wiaabo holebira, lalu Aisaiahanda lene.

### *Asiria dindi mo ko holebira lenego ogo*

<sup>5</sup> I Anduane Homogo kogoni ina bi mbira laro. Asiria dindi bibahende mo ko holene ibulebira laro. Áyu ina Asiria ininaga kango ale ini giha yuwa kogome wali agali i mo tandaga haga karuni ina keba howa pani nai helo minu bai holebero. <sup>6</sup> Wali agali uruni tigua i helo wahalu puwa gamugamu tara ngaru bialu karume i mo keba halu kagonaga ina Asiriali ami urunime ti baba wai bu pelo pelaru. Tinaga mbirale wu karuni page bialu mo yai halu ti hongo nahe bameore harigani waru hangedaradagua bilo ina Asiriali ami biaruru pelarugoni.

<sup>7</sup> Anigo Asirianaga kini kago ibunaga mini inaga mini ngogobi ndo wu ka. Iibunaga minime dindi maru tara tara ngaruha pialu bibahende bo podai halu ibugua bo biba hai hole hamelo ka. <sup>8-9</sup> Ibugua mine howa bi lalu, Ai dindi dewaore ina bo podai howa tinaga tano timbuni wiaruni karulo kogoni. Dindi Kagemisibi Kalanobi Abadabi Hamadabi Damasagabi Samariabi tano uruni bibahende ina bope hai howa dindi uruninaga kini hearu balu áyu inaga ami karunaga haguane tini kini helaga bidogoni. <sup>10</sup> Dindi dewa uruniha mbirale bi pupu wulenaga gime wabini bu wiarunibi bibahende bo hilo wahai harugoni. Aniore biwagola tinaga mbirale gime wabini urunime tini biamogo mbira nabiya. Tinaga uruni ngarume mbirale gime wabini

✧ 10:5: Ais 14.24-27, Nah 1.1-3.19, Seb 2.13-15

uru ale dewaore Yarusaleme Samarialani ngaru bolangua howa ngagoni. <sup>11</sup> Ai ina Samaria dindi ogoniha mbirale bi pupu wulenaga gime wabini wiyadaru bibahendeore bo haealabagabu waharugoni. Ani bialu Yarusaleme tanobi bi pupu wulenenaga gime wabini ngarubi ina ogonidagua bialu bo waholebero, lalu Asirianaga kini ibugua lene.

<sup>12</sup> Kini ogoni ibugua bi ogonidagua layagola Anduane Homogohanda bi ogodagua ladau bialu lalu, Ai ina Hari Saiono nenenibi Yarusaleme tanohabi ogodagua bibe lalu yupe harugoha biai howa ina kini o biago ibuni mo ko howa balu pani mulebero. Ibuni hangu mitangi bialu ibu mini lene daligaore kogoni lowa mine halu ibuninaga mini yaraga halu kagonaga aniore bulebero.

<sup>13</sup> Ibugua mine howa dege lalu ininaga hongo mandamebi urunidagua bulenenaga boga iha ngogome uruni biruruni. Ani bialu dindi tara tara wigi wigi biaga wiarunibi ina mo mbiraore halu ini andaneha hangu wiai heledogoni. Ogonidagua bialu tinaga mbirale bayale wiaruni bibahendeore i mo yai harugoni. I agali hongoheore bulumaga hongo timbunihe kadagua i hongoheore hewagome wali agali dindi uruniha hearuni bibahende bope halu hingedope hai harugoni. <sup>14</sup> Dindi bibahende wiaruni ega andaha ega haba miradagua ina tinaga mbirale bibahendeore bameore mo yu harugoni. Ai ega angibuni mbira ga lolebi ina ogonidagua bialu harugola ibunaga habane namibe lolebi lalu bo pelolebi mbira naheoreya, lene.

<sup>15</sup> Bi ogonidagua Asirianaga kini ibugua layagola Anduane Homogohanda ogodagua ladau bialu lalu, Ayu peleba mbira ibunime lalu iniore hongo timbunihe agali ayudago yuwa ira dibayagonaga hongo kagobi ndo bolangua kogoni, labehebe. Ira podagane so ibunime lalu, Iniore hongo daliga agali ibu gime yu howa ira podayagonaga hongo kagobi ndo bolangua kogoni, lolebirabe. Wai bu pole howa kango ngarume agali yalu pu nabiaga. Agalime dege kango uruni gime yalu wai bule piaga ndoyabe, lalu Anduane Homogohanda laragoni.

<sup>16</sup> Anduane Homogo Hongo Haiheore kago ibugua Asiriali hongohe bu heagola warago tara timbuni ti dindiha ibilowa pani mialu hongo timbuni hayadagoni bo ereba helolebira. Ani bialu tinaga mbirale bayale ngaruha ira hedope haragola irame dai hagdagua tiha warago ira ale da ho wiaabo helolebira. <sup>17</sup> Anduane Homogohanda ibu mbirale bayale hangu biagabi mana tigabi ngaru hangu biaabo haganebi ibu Isaraele wali agalirunaga wa hagane halebi kagoni. Ibu ani kago howa Asiria wali agaliruha ira hungu poboyogobi dagagobi dalu tinaga dindi anda ngaru dai helolebira. Horo mbira hanguni ibugua datani ko karubi mbuambua anda ho karubi delai holebira. <sup>18</sup> Ani do yulalu irabu timbuni ngarubi dai halu dindi benebere bayale e hanga ngarunibi bibahende do tauladaga helolebira. Agali mbira warago hongoheme heyabe nahe bopeore halu bo tongolo milagadagua Anduane Homogohanda Asiria wali agalinaga hongo bope halu bo ereba haiore helolebira. <sup>19</sup> Asiria dindiha winiru bibahende ereba hai howa ira mbira mbira hangu bame waneigini emene karume daga lolene karulape hangu yu wahene holebira, lene.

### *Wali agali emene hangu dai bulebira lenego ogo*

<sup>20</sup> Anduane Homogoha Yagabanaga aguanene Isaraele wali agali emene manda mandabi hangume ibuni mitangi buwa olalu helonaga horo mbira pongobu winigo nga. Isaraele wali agali tigua tinaga waitigi hearu gi howa dindi tarali hearuhondo ti biamogo bule ibu lalu hale haga biyago ai biamogo bilo hale hayadarume beregedowa Isaraele tini mo ko howa bolebira. Ani birangi tigua Anduane Homogo ibugua mana tigabi bayale hangu biaabo haga Isaraele wali agalinaga Ngode Datagaliwabe kagohondo ti biamogo bia helo lowa maliaho dege holebira. <sup>21</sup> Isaraele wali agali yu wahene emene hangu uruni ti Ngode Datagaliwabe hongo timbuniore ho kago ibuni

karia dai buleberemi.\* <sup>22</sup> Áyu Isaraele wali agali dewaore daga labe nahe ibaha ibamu wiarubi kagonigo mani howa emene hangu daga lene mbira dai bulebira. Tigua ko biyarunaga pani karulape nelo mo ko holene timbuniore tiha wulebira.\* <sup>23</sup> Anduane Homogo Hongo Haiheore howa Bibahende Haru Haame Ho Haga kago ibugua dindi bibahende ngaruni mo ko halu bo gialo wahai holebira layadagua aniore mo ko hai holebira. Aniore biragola tigua de handai holebira.

*Anduane Homogohanda Asiria bo gialo waholebira lenego ogo*

<sup>24</sup> Anduane Homogo Hongo Haiheore howa Bibahende Haru Haame Ho Haga kago ibugua lalu, Inaga wali agali Saiononi kamiru-o tígua Asirialiruhondo gi nahe halimu. Bamba Iyibialirume tíhondo ko binidagua Asirialirume tí mo ko halu bayaguabi gi nahe halimu. <sup>25</sup> Áyu inaga keba holene tí baba haabo ho kogonaga Asirialirume tí belo waharogoni. Emeneore howa tí baba keba ho kogo wahalu beregedowa Asiriali mana ko bialu mo koore howa dambulebero. <sup>26</sup> I Anduane Homogo Hongo Haiheore kogome bamba Midiana wali agali ege tole mini Orebe bereagoria tibume tongolo бага bialu bai henegodagua ai ina Asiria wali agali karu tibume bai holebero. Bamba ina Iyibialiru ibame nai helo helarudagua inaga gi dogola amu halu Asiria wali agali baiore holebero. <sup>27</sup> Asiriali tigua tí ira tigrini mbira nogo bulumaganaga erekunini mo paga howa biabe bilonaga bo daila hagadagua tí bo hingedape howa mo ko halu handape ho kogoni. Ai o tigua mana ogonibi bialu kagome i mo tandaga halu kagoni. Anigo horo mbira tagira ibulene dabo ngelarugoni tagira ibirangi ina tinaga hongo bo podarogola tíha lone genda mo ngibe nahe holebira, laya, lalu Aisaiahanda lene.

*Waitigirume Yarusaleme anda ibuwa wai binigo ogo*

<sup>28</sup> Waitigi abale anda ibalu Ai tanoha wai bialu karulo haya. Tigua Migirono tano wiadagua anda ibiya. Ani bialu tinaga tomo dabudabubi yiaru Migimasa tanoha ngelaya. <sup>29</sup> Ngelalu dalipe howa iba gana wiago pogalaede halu Geba tanoni pialu paliya. Ani biyago hondowa wali agali Lama tanoha palearume mogo lowa gi tara ho ka. Ani bialu Kini Solonaga tano Gibeá wiagoria wali agali bu hearume gi howa tano yu wahalu togolo yalu piái haya. <sup>30</sup> Galimi tano wali agaliru-o ga hongo howa ladaba. Laisa tanoha kamiru-o ga larago baya hangu hale hadaba. Anadodo wali agali tínagaore dara timbuni ho kogoni. <sup>31</sup> Ai wali agali Madamena howabi Gebimi tano howabi ti bibahende ha do holene hai bialu ibida purogo laragoni. <sup>32</sup> Áyu ogoni waitigi biaru kaware Nobo tano naina anda ibiragoni. Ani anda ibalu howa tigua Saiono nene handa amu howa ibuore bolomayago lowa tinaga gi hongo hongo bingibongo lagalaga bialu Yarusaleme bo podole manda manda bialu ka.

<sup>33</sup> Anduane Homogo Hongo Haiheore kagoibunaga hongo timbuni kagome agali hongohe mini lene timbuni kagonaga hongo bope holebira. Áyu ti ira magane dandole lowa wabia hene ale kago ibugua ti dandaragola abale podolebira. <sup>34</sup> Ti ira Lebanono dindiha ira hongohe hene ale hayaguabi irabu awaneha hene luni hongoheore haradagua biyaguabi Anduane Homogo ibugua ti bibahende dibalu podai helolebira, Aisaiahanda lene.

## 11

*Kini gahenge haragome bayale holene mo yu anda ibulebira lenego ogo*

<sup>1</sup> Yasi hameigini ogoni ira dibini tilini ale kagoni. Anigoyu ira tiliniha lone dongoria bialu anda hagadagua Yasinaga hameiginiha howa kini gahenge mbira tagira íbu

\* **10:21:** Bi ogoni Hiburu bi lalu wali agali emene hangu dai bulebiragonaga Aisaia igini mbiranaga mini ngagobi wini. Aisaia 7.3 de handalu daga labe. ☆ **10:22:** Lm 9.27



holebira.\*<sup>☆</sup> 2 Anduane Homogonaga Dinini ibugua ogoni ibuha íbu howa mini gigabi wialu ibu kini hongoheore howa ibunaga wali agaliru haru holene mini mandabi hongoheore wu holebira. Ibugua Anduane Homogonaga hame ledago mandabi howa ibu Anduane Homogo andaneha haabo holebira.\*<sup>☆</sup> 3 Ani biragome ibu turu taraore ho holebira. Ibugua wali agali manani dabalú howa dongone tagirahayagi hondowabi marume agua biya larago hale howabi ndo dablebira. 4 Ibugua ibuninaga mana tigabi biaga ngagoria howa godini tale bialu burupale yagibano karunagabi marume hangedope haragola dindiha haga karunagabi bi tigabi ngadagua lalu ti biamogo biaga holebira. Ibugua bi laragola wali agali ko biaga karu ti pani tandagala nalu holebira. Wali agali mine howa ko biaga karu homai holebira.\*<sup>☆</sup> 5 Kini ogonime mana bayale tigabi ngagome ibunaga wali agali haru holebira. Ibu mini bilinaheni tigabi hongohe haabo howa ibunaga wali agali bayuwa haru haabo holebira.\*<sup>☆</sup>

6 Biango dudu gabuame nogo sibi iginibi haya nabi bayale mandagi ho halu budi gabua ale timbuni mbira mini lebadibi meme iginibi mandagi paluebira. Laiono gabua iginiru bulumaga iginirubi tomo mandagi nalu wandari igiri emene karume ti haru holebira.\*<sup>☆</sup> 7 Biango dudu ale timbuni mini beabi bulumagabi tomo mandagi nalu tinaga iginiru mandagi paluebira. Laiono gabua karume tinaga tomo bulumagarume nagadagua datani dege nolebira. 8 Waneigini galirume wali agali tomia biaga puya ngagoria gini bialu kagola haya nabi wulebira. 9 Hari Saiono Anduane Homogonaga hari loma bia hene heagoria ko mbira nawi mbiralime mendeali mo ko holenebi mbira nawiore bayale dege dege wulebira. Iba solowara tolo tagi howa birame kadagua wali agali dindi bibahendeni karume Anduane Homogonaga mini daliga taraore ngagobi ibu hongo gibiorehe kagobi manda biame holebira.\*<sup>☆</sup>

*Anduane Homogohanda ibunaga wali agali lone mo mogo bulebira lenego ogo*

10 Horo mbira ibulebirago ogoningi Anduane Homogohanda Yasi aguane mbira kini helolebirago ogoni ibu wali agali bibahende mo mogo bulenenaga manane holebira. Tigua ibunaga tano ngagoria íbu ngoai howa ibu mini lene timbuni ka lalu ibu mini yaraga holebira.\*<sup>☆</sup> 11 Horo ogoni ibirangi Anduane Homogohanda ibunaga hongo halu mende walia halu ibunaga wali agali bibahende tinaga dindi henene wiyagoria haru dai bulebira. Wali agali emene maru yu wahene Asiriahabi Iyibihabi Sudanahabi Elamahabi Babilonohabi Hamadahabi iba timbuni Medidereniana bedago angehabi dombenehabi dindi uruniha yu wahene karu bibahende haru dai biai holebira. 12 Wali agali dindi bibahende ha garabaya bu yalu purogo lene hayaru bibahende Anduane Homogohanda tini dindiha haru dai bero lalu manane mbira walia halu wali agalime hendelo helolebira. Wali agali uruni Yuda wali agalibi Isaraele wali agalibi bibahende tinaga waitigime garabaya bu yalu pene biaruni dai bulebira. Áyu dindi bibahende ha hai kago mani Anduane Homogohanda haru dai bulebira. 13 Ani bu howa Isaraele hameigini tigua Yuda hameiginihondo miniha henge nale holebira. Yuda tiguabi Isaraele wali agali baba waitigi naholebira. 14 Isaraele Yudala libuni mandagi mo mbiraore howa ni paliragohayagi Pilidia hameigini padaru baba wai bia amu halu ni tagira ibiragohayagi padaru bababi wai biadai bialu wali agali uruniha karunaga dabudabu ngaru mo yu piái holebira. Libugua Idomo agali baba wai bialu Moaba bababi Amono bababi wai bia dege buwa libugua bo poda hana hai howa dindi uruni bibahende libugua handayaho hai holebira. 15 Anduane Homogohanda iba solowara timbuni mini Iba Daramabi bedago hundu tegelape helolebira. Ani bialu puyabu

\* **11:1:** Ogoniha howa agali Yasi ogoni Kini Debidi aba henego ira tene ogoniha howa lone andaha aribia holebira layadagoni hameigini ogoniha howa kini mbira holebira lalu leda. (1 Samuele 16.10-13 handabe) <sup>☆</sup> **11:1:** Ais 53.2, Yar 23.5, Seg 3.8, Ab 13.23, Mo 5.5, 22.16 <sup>☆</sup> **11:2:** Ais 61.1, Md 3.16, Yo 16.30, 2 Ti 1.7 <sup>☆</sup> **11:4:** Ais 9.7, 49.2, Mal 4.6, 2 Te 2.8 <sup>☆</sup> **11:5:** Eb 6.14 <sup>☆</sup> **11:6:** Ais 65.25 <sup>☆</sup> **11:9:** Iba 98.2-3, Ais 48.18, 52.10, Hab 2.14 <sup>☆</sup> **11:10:** Lm 15.12

poboyogobi hongohe mbira ibilowa ogonime iba Yuberedisi pedago mo hundia halu mo emene koore holebira. Ani biragola iba gene karia emene ko dege dege bame ganaruaha pialu kagola wali agalime doma ede habehe holebira. ✧ <sup>16</sup> Ani biragola hariga timbuni mbira Asiria howa pu ibu bulene bope holebira. Hariga ogoni bamba Isaraele wali agalirunaga mamalime Iyibi dindi wahalu tagira ibilonaga hariga ba henedagua ai Isaraele wali agali Asiria dindi yu wahene karu tagira ibilonaga hariga ogoni ba holebira, lalu Aisaiahanda lene.

## 12

### *Kai lalu iba gana lenego ogo*

<sup>1</sup> Horo mbira ibulebirago ogoningi Isaraele wali agali tigua iba gana ogodagua loleberemi.

Anduane Homogo-o ina inaga mini yaraga haro.

Ina ihondo keba ho harigoyu

ai inaga keba ogoni ereba hayagola ihondo mana bayale bialu kegome inaga miniha dungulo kogoni.

<sup>2</sup> Ngode Datagaliwabe ibu i gi mialu inaga pele ngiaga kagoni. ✧

Ina ibuhondo mini mbiraore hongohe wu halu gi nahe holebero.

Anduane Homogo ibuniore kagome i hongoheore heledagonagabi iba ganaru lalu kogonagabi ibu ka.

Ibugua i gi mialu inaga pele ngiaga kagoni lalu iba gana lolebero.

<sup>3</sup> Iba uli wa wini ngagoha howa iba gagahe noa kagome naragola bayale hagadagua ✧

Anduane Homogo ibugua ibunaga wali agali biamogo bialu pele ngiragola ibuni karia pole turuore halu poleberemi.

<sup>4</sup> Ani pialu howa tigua iba gana ogodagua loleberemi.

Anduane Homogohondo kai lalu biamogo bilonaga mini olalimu.

Ibugua biabe timbuni biyarunaga te wali agali bibahendeore hale helo latagi halimu.

Ibu mini leneore ka, lalu lamilimu.

<sup>5</sup> Anduane Homogohondo iba ganaru lalu,

Ibugua biabe bayaleore bigi biyarunaga ibu mini leneore ka, lalimu.

Hameigini tara tara dindi bibahendehe bu karume hale hai helo

bi bayale ogoni lamiai halimu.

<sup>6</sup> Isaraele wali agalinaga Ngode Datagaliwabe ibu mini bayale tigabiwi ka.

Ibu ibunaga wali agali ina heba haabo kagoni.

Anigo Hari Saiono wali agaliru-o iba gana bi ladaga halu

Ngode Datagaliwabe mini leneore kago lalu ibunaga mini yaraga hai halimu.

## 13

### *Ngode Datagaliwabehanda, Babilono bo gialobagabu wahi holebero, lenego ogo*

<sup>1</sup> Ngode Datagaliwabehanda Babilono dindi bibahendeore bo gialobaga biai holenaga ibugua bi ogo Emoso igini Aisaiahondo de gandebaha howa lamini. ✧

<sup>2</sup> Anduane Homogohanda lalu, Ami agali bu karume de handalu ibu ngoai helonaga hari nene ira mbira nahe ngagoria wai biagane pelagi helole ira homane mbira dibu hangabe. Ami agali karu olowa Babilono tanonaga wai pabe panga timbuni bu karu gi dolade howa walia halu tigua wai bule pelo pelabe. <sup>3</sup> Ina Babilono baba miniha tandaga timbuni ho howa inime inaga ami agali bayale hongohe bu hearu dabalul Babilono mo

✧ **11:15:** Ais 35.8, 40.3, Mo 16.12 ✧ **12:2:** Har 15.2, Iba 118.14 ✧ **12:3:** Yo 4.10, 4.13, 7.37-38 ✧ **13:1:** Ais 47.1-15, Yar 50.1-51.64

ko halu minu bole ibidaba laru. Ami agali uruni tigua Babilono baba wai bule turu timbuniore ho kagoni, laya.

<sup>4</sup> Hari nene ngaruha howa bi timbuni ladagadaga biaruago hale hadaba. Bi lada-gadaga biaruago ami agali dewaore dindi tara taraha howa ibu mogo biaruagoni. Anduane Homogo Hongo Haiheore kagome wai buleibunaga ami agali mo mogo biragoni ndobe. <sup>5</sup> Ti dindi kaundia tara tara wiaruha howa Anduane Homogoibunaga danda timu yandare wai biagane aleru yalu ibaruagoni. Anduane Homogohanda miniha keba timbuniore ho howa dindi tara tarani howa hameigini tara tara karu bibahende bo haealabagabu wahai holenaga ami agali o mo mogo biaruagoni.

<sup>6</sup> Anduane Homogohanda wali agali bibahende godini helowa dabaki bulene horo biago ibulene kaware hayadago tigua dugu dalimuore bidaba. Horo ogoningi Anduane Homogo Hongo Haiheore kagome mo ko holene timbuniore ibilolebira. <sup>7</sup> Anidagua biragola wali agali bibahende durulowa gedaore halu hongo nahe tingini pirilape hai holebira. <sup>8</sup> Bibahendeoreme gi timbuniore halu walime gali taba honolene tu haragola tandaga timbuni hagagobi halu holebira. Ani biragola wali agali ti gi timbuni howa tini degedege de handaya haga bialu bibahende gi hai holebira. <sup>9</sup> Horo ko tara ogoni abaleore ibulebirago ogoningi Anduane Homogohandaibunaga keba holeneme dindini mbirale nawilobi wali agali ko biaga bu karu nahelobi bo wahai holebira. <sup>10</sup> Horo ogoningi yakundi bibahende hundiai holebira. Ni tagira ibiragola wa nahe aruma halu egebi nadolebira. <sup>\*</sup>

<sup>11</sup> Anduane Homogohanda lalu, Wali agalime mana ko biragome dindi ogoria wua toledago mana ko ogoninaga ina dindi bibahendeni mo ko holene ibilolebero. Wali agali tininaga mini mo yaraga haga bu karu ina ti bope holebero. Marume tini mitangi bialu i duniniore ko lo mitangibu haga karubi maru mo ko halu haga karubi pani nelomialu bo wahai holebero. <sup>12</sup> Wali agali dewaore homai halu mbira mbira hangu helo yu waharogola ti abogoda lalu handabe nahe holebira. Ngolo bayale agoha ngabe hondole taya biagadagua agali taya bulebira. <sup>13</sup> Horo ogoningi Anduane Homogo Hongo Haiheore kogome inaga keba holene timbuniore heba ibulebero. Ani ibuwa ina hari daliga mo ema biai halu dindi dumbirumbi biagadagua bialu dindibi wulene henge nawidagola ema bialu pialu holebira. <sup>\*</sup>

<sup>14</sup> Ogonidagua birangi wali agali dindi tara taraha howa Babilono ibu heneru ti bibahende gi timbuni halu nogo gabua tara tara agalime bole biragola ibida piagadagua pialu nogo sibime ti haru haga mbira nahedagola luluyu ibagabu hagagobi holebira. Ani bialu tini dindi tene wiyadagoaha ibida dai biai holebira. <sup>15</sup> Anigo waitigirume agali maru minu yania hararu ti ayu tibu ne gadele ngarume nogoba halu homelo bo wahai holebira. <sup>16</sup> Ani birangi waneigini aiyabala de handayaho kaore dege waitigi ibiyarume waneigini gali aiyahanda gime taba yu karu gingila mialu dindini mo para haragola homolebira. Ani bialu waitigi urunime tinaga anda bu karu bo gialo wahai halu tinaga dabudabu bu ngaru mo page biai halu wali bedarubi kayu yai holebira.

<sup>17</sup> Anduane Homogohanda laabo halu lalu, Midiali karume Babilono bu karu baba wai bule pelonaga ina tinaga mini mo heya haru. Tigua Babilono wali agalinaga muni ngolo silibabi bu ngaru mitangi howa uruni mulenaga ndo wai bulebira. <sup>18</sup> Tigua Babilono dindiore bo haealabaga bialu mo ko holenaga wai bialu igiri daliahe karu timu yandarerume bolebira. Tigua waneigini wahebi emene galibi bibahendeore hondowa dara nahe bo wahai holebira.

<sup>19</sup> Babilononaga tano timbuni ngago baya tara moneheore tano maru ngarubi ndo nga. Babilono wali agali tinime tinaga tano ogoni mini lene taraore mbira nga lowa turuhu haga kagoni. Ani turuhu kagoyu Anduane Homogo ina tano ogoni bamba

<sup>\*</sup> 13:6: Yol 1.15    <sup>\*</sup> 13:8: Iba 48.6, Ais 21.3    <sup>\*</sup> 13:10: Ese 32.7, Md 24.29, Mg 13.24-25, Lg 21.25, Mo 6.12-13, 8.12  
<sup>\*</sup> 13:13: Hag 2.6

Sodomo Gomorala mo ko halu bo heda harudagua bo heda hai holebero. ✧ 20 Ani berogola wali agali lenego mbira dindi ogoriani lone naholebira. Ani nahedagola Arebiali bu karume dindi ogoriani tinaga balai andaru nabu holebira. Nogo sibi haru haga karumebi ti dindi ogoniha tinaga sibi datani nelo haru halu naibulebira. ✧ 21 Dindi ogoni bame labu hangu wiai kagola ema bialu piaga gabua biru karu ti dege bu holebira. Ega mbiraga biragane umi halangau bedaru ti anda bu karuha biraga bulebira. Ega yári ale bedarubi nogo meme gabua karubi ti tano wini hama ngagoria pigipogolo yu pu íbu bialu holebira. ✧ 22 Ani bialu kagola kini anda hene biagohabi agali haguane anda bu hene biaruhabi biango dudu bu karume gigau lagalaga bialu holebira. Babilono tano bo haeala togo lalu mo ko holene tu kaware hayada. Heneneore ibu holene hamaro biragoni, lalu Anduane Homogohanda laya lene.

## 14

### *Anduane Homogohanda ibunaga wali agali gi mialu haru dai bulebira lenego ogo*

<sup>1</sup> Anduane Homogohanda Isaraele wali agali lone dara howa ti ibunaga wali agaliore ho dai bilolebira. Ani bialu tininaga dindi henene wiyagoria haru daibu helolebira. Ani kagola wali agali dindi taraha howa ti baba mandagi íbu howa tibi nde Isaraele wali agali heba ho gimbu bu holebira. <sup>2</sup> Anduane Homogohanda wali agali dindi tarani bu karume Isaraele wali agali biamogo bialu yupe halu tini daluha hama dai bilelonaga ibugua ti mo manda bia holebira. Anidagua biragola Isaraele wali agali tinaga dindi Anduane Homogo ibunime tu wa mini biagoria hole daibu kagola wali agali tara urunime ti Isaraele wali agalinaga garabaya biabe ale biahaga holebira. Bamba wali agali uruni tigua Isaraele wali agalime tinaga garabaya biabe ale bilo helaga biaru ai tinime Isaraele wali agalirunaga garabaya biabe ale bialu ha aribia holebira. Bamba tigua Isaraele wali agaliru hingedape howa mo ko halu haga hayago mani Isaraele wali agalirume wali agali uruni haru howa handayaho holebira.

### *Babilononaga Kini homaragola turu howa mege bialu iba gana ogodagua loleberemi lenego ogo*

<sup>3</sup> Anduane Homogohanda Isaraele wali agali bu kamiru tínaga tandaga timbuni ngelo kamirubi ko damene bu ngarubi bibahende mo wahai haragola tí bayale holeberemi. Wali agali tara bu hearume tí mo ko hayagola tigua tinaga biabe biahalu howa erekuibiore bialu harimigoni. Anigo tínaga genda uruni ereba haiore holebira. <sup>4</sup> Anidagua biragola tigua Babilono wali agali bu karunaga kini kago mege bialu iba gana ogodagua loleberemi.

Kini hongohe heago pilo ibira hayago de handadaba.

Wali agali hingedape haga biagonaga hongo hamaro biyada.

<sup>5</sup> Wali agaliru mo gi halu mo ko haga kagonaga hongo Anduane Homogohanda mo ereba hai helaya.

<sup>6</sup> Kini ogoni ibugua bameore keba howa wali agaliru bope haabo haya.

Wali agali dindi tara tarani palima pearu hingedape halu mana ko dewa bialu uruni bibahende mo ko haga bialu haya.

<sup>7</sup> Áyu dindi bibahendeha wali agali bu karu tinaga bu miniha dungulo howa ti bibahendeme turu howa iba gana ladagadaga bialu haga ka.

<sup>8</sup> Lebanono hari ngaruha ira guraya tamiaru bu karumebi nde kini í homarida lalu turu timbuni halu ka.

Ira tigua lalu, Ina kamaru lone dibulene agali mbira nahedago tira, lalu ka.

<sup>9</sup> Humbirini andaga dinini bu karume í ibirida lolenaga ti manda manda bialu ka. Tigua lalu, Agali hagueneru-o tí heyadaba.

Wali agali dindi tara tara hearunaga kini ala heneru-o tínaga biragane dagia ngelo wahalu heyadaba.

Tí bibahende heyalu kini agali o ibirago lola hole ibidaba.

<sup>10</sup> Uruni ti bibahendeme íhondo bi ogodagua lolebira.

Ínaga hongo timbuniore ina bibahendenaga hongo bolangua hai hene kebe tobaho harimada.

Áyu ínaga hongo ereba hai hene ina kamarubi dege kegonida, lolebira.

<sup>11</sup> Abale í dindini haringi ínaga yári bayale tara tara karulo heru hondowa

wali agali bu hearume gawá ale lalu

ínaga mini yaraga halu lalu hayago ai ereba haya.

Áyu í homene dinini karuha howa ngoe bombo biru ngaru ínaga tamunguru howa dindiha paluebereda.

Ani bialu ngoe emene biru ngarume í balangiya dambi haradagua bulubada.

<sup>12</sup> Babilononaga kini-o✠

Í dahuliya andaga howa yakundi dindini hondo ibira henego ngegoni.

Abale í yakundi egabi naledaha huririle harini tagira ibagadagua howa

ína dindi bibahendeha wai bima ibaga bialu wayali haga harigo ai í mo dindiha henego ngegoni.

<sup>13</sup> Ína mitangi bialu, I dahuliya andaga pu holebero.✠✠

Ína kininaga biragane dagia Ngode Datagaliwabenaga yakundi bu kagoria mo ngelowa daligani biruliya.

Dindi abene uyurahayagi hari nene mbira dama mitangi bialu mbirale gime wabini ngaru ti ngoai haga ngagohabi biruliya dege.

<sup>14</sup> Ina hari beraliba ngaru bolangua halu puwa Daligaorene Daliga kagobi dege holebero,

lo manda bu harigoni.

<sup>15</sup> Ina ani lo manda birigoyu daraba

í pilope howa ibira harigoni.

Í homene dininiru haga humbirini andaga ngagoha pialu dindi andanehaore pu holebere.

<sup>16</sup> Dindi ogoniha pu kegola homene dinini maru bu karume í deme hongo howa handaya halu íhondo hale halu lalu,

Dindi bibahende mo durula hai halu

dindi timbuni maruha karu mo gi hai haga biagoni agali ogoni mbauleda.

<sup>17</sup> Agali mbira tano wiaru bibahende bo gialabagabu wahai halu dindi hangu ngelalu piaga biagoni agali ogoni bada.

Agali ogonime wali agali garabaya bu helayaru dara halu tini daluha hole dai bidaba nalaga biagoda, lolebira.

<sup>18</sup> Kini maru karu homaragola tinaga tingini homali bayale wabinigoha hangu hangu yu hora haga biagaya.

<sup>19</sup> Áyu í ani ndo biyada.

Tigua ínaga tingini agalime ira magane dandalu dindini togo bilo bape haralidagua bape hayada.



Ínaga tingini agali waime benego tingini ngarume wia dambi howa hariga teneni ngagoni.

Tinaga dinini dindi andaneha humbirini andaga ka.

Agali harigani bolangua haga bialu gerai porarume í angua haga bialu puíbu bialu kagoni ndobe.

<sup>20</sup> Ínaga tingini agali kini maru henerunaga tingini baya hangu hora hayadagua hora naholebira.

Anidagua bulubadago irane ína ínaga dindi wigo mo ko hai halu ínaga wali agalirubi bo wahai harigonaga ani bulebira.

Kini ko ogoni ibu waneigini bu karubi dindi ogoria nahe ereba hai holebira.

<sup>21</sup> Anidagua bilonaga kini ibuguabi ibu mamalirumebi mana ko bialu henegonaga pani mialu

ibu igini uruni bo wahai hole manda manda bu holene nga.

Ibu igini biarume kini ha aribia nahelo.

Tigua dindi bibahendeni tinaga tanoru lone bu aribia nahelobi ani bulene nga, lalu iba gana ogoni loleberemi, lene.

#### *Anduane Homogohanda Babilono bo gialobagabu wahai holebero lenego ogo*

<sup>22</sup> Anduane Homogo Hongo Haiheore kago ibugua lalu, Ína Babilonoali bu karu baba wai bialu ti mo ko howa bo biba halu ereba hai helolebero. Mbiraoreli hangubi mbira helo yu wa naholebero. Wali agali waneiginirubi mbira yu wa naholebero. Í Anduane Homogo ína bi o ledogoniore. <sup>23</sup> Ína Babilono wali agali bibahende bo wahai howa mburuma bialu hilu wahai holebero. Ani bialu Babilono mo iba puguua aribia ho ngeledogola ega iba puguaha biraga bedaru ale dege biru wulebira. Í Anduane Homogo Hongo Haiheore kogome ína bi o ledogoniore.

#### *Anduane Homogohanda Asiria wali agali bope holebero lenego ogo*

<sup>24</sup> Anduane Homogo Hongo Haiheore kagome bi hongohe mbira lo wialu lalu, Hene-neore larogo ína mbira bule mandabu henego biaore bulebero. <sup>25</sup> Asiriali bu hearu tigua Isaraeleali dindi wiwagoha ibalu ínaga wali agali dindi ogoniha hearu genda timbuni mo miya. Nogo bulumagame agalinaga biabe biahele ira mbalapeme mani dariba hamagamaga bini hagadagua Asiriali tigua Isaraele wali agali ani bu helaga kagoni. Anigo Asiriali uruni ti Isaraele dindi hari ngaruha kaore dege ína ti geme hangedalu tagadabagabu waholebero. Ani berogola Isaraele tiha genda timbuni winigo ereba hai holebira. <sup>26</sup> Anduane Homogo ína dindi mbira mbirani hameigini hongohe palima pedaruhondo urunidagua biai holebero. Anidagua bule lowa ínaga gi megela ho manda manda bu kogoni, lene. <sup>27</sup> Anduane Homogo Hongo Haiheore kago ibugua urunidagua bule kago aiwa mo wahabehebe. Ibugua pani mule gi megela ho kago mbiralime ibunaga gi bope halu waha labe nahe kagoni.

#### *Anduane Homogohanda Pilidialiru bope holebero lenego ogo*

<sup>28</sup> Kini Ahasa homayagola mali ogoningi Anduane Homogohanda bi mbira ogodagua lalu lamini. <sup>29</sup>

Pilidia wali agaliru-o bi ogo baya hangu hale halimu. Gewa mbira tí minu бага biago tagalaki hayagonaga tí bayale holeberemada lo mitangi bialu turu holomini nahalimu. Puya ko mbira winigo homaragola puya mende koore ngagome wini biagoria wia aribia holebira. Anigo puya koore biago koorene ko helo helaga bedago

✧ 14:24: Ais 10.5-34, Nah 1.1-3.19, Seb 2.13-15 ✧ 14:28: 2 Kin 16.20, 2 Bit 28.27

ibuni babaganehe howa yagalo yu ibaga biaga wulebira.\*☆ 30 Anduane Homogo ibugua yagibano mbirale nawi bu karu ti mo bayale haragola tinaga bu miniha mo palia holene karulo holebira. Anigo Pilidia wali agali tiha Anduane Homogoibunime hina gari timbuni ibilaragola hina gari ogonime ti mo homa halu bo biba helolebira.

31 Pilidia dindiha tano timbuni dunini wima pedemirubi wali agali tano uruniha haga bu kamirubi ti bibahendeme gi timbuni howa duguore hongo howa biadagadaga bidaba. Ani larogoni irane dindi abene uyurahayagi howa ami agali dewaore ibirago tinaga erembiraha ira hagua dagadaga bima ibiragonaga laro. Ami agali uruni ti agali dari mbira naibi wayali ogobi dege dege ibiragoni.

32 Pilidialime ti biamogo bule ibidaba lama inahondo hale ho ibiyagua nde iname agua ladai bimiyadabe. Ogodagua ladai bimija. Anduane Homogohanda Isaraele wali agalinaga ha do anda Saiono tano dabo ngeleda. Ibunaga wali agaliruha genda mbira tagira ibirangi ti tano ogoniha pialu ha do howa bayale holebira, lamija.

## 15

### *Anduane Homogohanda Moaba dindi mo ko hai holebira lenego ogo*

1 Anduane Homogohanda Moaba dindi bo haealo wahai holenaga Aisaiahondo bi ogo de gandebaha howa lamini.\*

Waitigirume mbiraga ibalu Moaba dindiha Ara tanobi Kiri tanobi bo haealabagabu waharagola Moaba mo ko holebira. 2 Anidagua biragola wali agali Dibono tanoha bu karume tinaga dama mitangi bialu gime wabini hari neneha ngaruhondo bi pupu wule puwa dugu bu mialu holebira. Moaba wali agali uruni tinaga Nebo tanobi Medeba tanobi bo gialobaga biai halu mo labu halu kagola tigua ogoninaga dara halu mitangi timbuni howa dugu bialu holebira. Tigua dara timbuni ho howa tinaga mandari angariru dogai holebira. 3 Wali agali tigua daraho howa aga karulagane ngaru mo karulalu tanonaga hariga pedadagua pugu bialu holebira. Tininaga anda dangini iragaho howabi wali agali ngoai ho haga hama ngagoria howabi tigua dugu hongo howaore bialu tinaga de iba timbuni iba pugu laradagua bialu holebira. 4 Ani bialu kagola wali agali Hesebono Elealela tanoha bu karu tiguabi yiya lalu dugu timbuni biaruagola Yahasa tano kaundiaha bu karume hale hai holebira. Ami agali hongohe bu karumebi dugu bialu howa Moabanaga hongo ereba hai hayada lolebira. 5 Ina Moaba wali agalinaga dugu biahalu kogoni irane tigua tini dalu yu wahalu Soara tanohabi Egelada Selisia tano ngagohabi hole ibida piai hayadagonaga dugu bia haro. Tigua dugu bima Luhidi tanoha polene hariga iraga halu pedadagua polebira. Ani bialu maru karu tigua dugu timbuni bima pialu Haronaimi tano ngagoha polene hariga pedadagua ibida pialu holebira. 6 Iba Nimirimi hundialu datani iba angeni henedarubi gaulai holebira. Dindi ogoriani ira dataniru mbira anda nahe wulebira. 7 Moaba wali agali tinaga dabudabu bayale mo mogobu wu henedaru bibahende mo yai halu tinaga tano yu wahalu polebira. Tigua hariga dindi ulini mini Ira Te laga hariga wiyadagua pialu dindi yu wahalu polebira. 8 Wali agali Egelaimi tanohabi Berelimi tanohabi Moaba dindiha tano emene timbunibi ngaru bibahendeha haga biaru Moaba yu wahalu pialu howa dugu bima polebira. Ani bialu tigua dugu timbuni biame holebira. 9 Moaba wali agalinaga daramame Dibono tanoni iba porago mo darama bia holebira. Anigo Anduane Homogo ibugua Moaba wali agaliru pani mialu bo wahaiore holebira. Ani biragola Anduane Homogohanda pudi gabua timbuni laiono bedaru ibilaragola wali

\* 14:29: Anduane Homogonaga bi mana latagi haga agali ogoni ibugua bi latagi henedagoni Asirianaga kini mbira henego homayangi lene. Ibugua lalu, Kini maru mani ho aribia holobadarume dindi tara tara bu ngaruha genda kini ogoni ibugua mo ya hayadagua ndo ibugua gendabiore mo ya holebira, lalu bi yobage mbira lo winiya. ☆ 14:29: Yar 47.1-7, Ese 25.15-17, Yol 3.4-8, Amo 1.6-8, Seb 2.4-7, Seg 9.5-7 ☆ 15:1: Ais 25.10-12, Yar 48.1-47, Ese 25.8-11, Amo 2.1-3, Seb 2.8-11

agali ibida pialu karuni balu nai helalu wali agali maru yu wahene Moaba dindini karubi balu nai helolebira, lalu langiya.

## 16

<sup>1</sup> Ina Moaba wali agali maru ibida ibini Idomo dindinaga tano dunini mbira Sela ngagoria kamarume nogo sibi iginiru Yudanaga kini Yarusalemeni kagohondo mimiya. Sibi iginini muleberemago ogoni iname kini biagohondo dagisi lone nguleberema lalu walia holebira. Agali sibi iginini uruni haru poraru tigua hariga dindi ko iba dalu naibaga ngadagua pialu Hari Saiono kagoria tagira pole polebira. <sup>2</sup> Ani puwa tigua kinihondo lamialu lalu, Kini-o waitigirume tanoha howabi inane daluha howabi bama ibalu bo taliatogo layagola ibida ibuwa Anono iba ange wiagoria kaware ibu howa ha ko kama. Ega iginini gali ibu andaha howa dindini ibira henego agoha polebe toba howa irabuha odahe bameore biragagobi kama, lalu ka.

<sup>3</sup> Ani lowa Yudali tigua inanaga bi laramago baya hangu mo tale bialu ina biamogo bilimulo hamelo kamagoni. Ti inanaga ha do hagane anda ale kamigola ina tinaga dindiha ibalu ni hongohe daragola wali agalime ira gumba kagoa bira do hagadagua mo ko holene inaha ibiragola ina ti daluha ibalu ha do holomaya hamelo kama. Waitigirume ina bama talima ibaga bialu kagola ina ibida pialu kamaria tigua lone ina mo ko holigo tigua ina yu wa nahalimu. <sup>4</sup> Ti dalu ngemiruha ina ibu hole hamelo kamagoni. Waitigi bu karume ina mo ko nahelo tigua ina haru howa handayaho halimulo, lalu lamini. Hengedape holenebi genda damenebi ereba hai holebira. Waitigi bu karume tini dindi dai biragola mo ko holene mbira dindi ogoriani nawulebira. <sup>5</sup> Anidagua birangi Debidinaga aguanene mbira ibu kini holebira. Ani howa kini ogoni ibugua ibunaga wali agaliru gubalini ho haabo howa mana bayale tigabi ngagoria baya hangu haru holebira. Ibugua wali agalirunaga genda abaleore mo tiga bigi buwa mana bayale bulenego hangu mo hongo haabo halu holebira.

<sup>6</sup> Moaba wali agalirume bi layiyago hale howa Yuda wali agali tigua tini degedege la la bialu lalu, Moaba wali agalinaga mine haga mana wiago layadane ina hale harimagoni. Tininaga mini yaraga halu tini duniniore maru karu bolanguahe kamabe toba ho haga ka. Ani howa tigua wali agali maru karu mege bialu kago bi uruni nagalone layidalo manda bidamagoni, lene.

<sup>7</sup> Moaba wali agali tigua genda tandagaru yu howa dugu bialu ka. Bamba tigua Kiriherese tano wiagoria howa pu mbira mini gerebi lini do gembe biniru nalu hagago mitangi bialu tiniore dara timbuni halu mbirale uruni mo ko hai hayagonaga dugu bialu ka. <sup>8</sup> Tigua gerebi mabu baya taraore Hesebono Sibimala tanoha winigobi mitangi bialu dara timbuni ho ka. Bamba dindi tara tara wiarunaga haru haga bu hearume waini iba gerebi mabu uruniha taweme wabini wiaru turu howa nalu no lulu yaga hene. Anigo gerebi mabu uruni dugua halu mo labu hai haya. Tinaga gerebi mabu dewaore uruni Hesebono tano howa wima pialu Sibima tanohabi wima pialu amura Yasere tano uyurahayagi winigoria howa wima puabo halu dindi abene ni tagira ibiragohayagi dindi ko iba dalu naibaga wiagoria wima tagira pene. Ogoniha howa pialu ni paliragohayagi iba kuyama mini Homene Iba laga bereagoria tagira pene. <sup>9</sup> Ina Yasere tanonagabi Sibima dindinaga gerebi mabu ngagonagabi dugu bia harogoni. Ani bialu inaga de iba Hesebono tanola Eleale tanolani ibira haragoni. Irane ti bibahende mo ko hai hene ngagome tinaga wali agali bu karu tigua gerebi mabuha puwa gerebi lini bogabi dedaru dalu mabuha howa ga la amunana nabulubadago ogonaga dugu bero. <sup>10</sup> Mabu uruniha howa wali agali tigua pu mbira mini gerebi lini daga dewaore do wigi bialu howa ti turu timbuni halu daga hene. Ani bialu hagago ainde ayu tigua turu howa gerebi lini dalu howa ga ladagadaga bialu haga hayadaruni ereba haya. Wali agalime turu ho howa iba gana lalu hagadarubi ereba haya. Gerebi lini uruni

dowa waini iba wabule geme hingedaga uli timbuni ege toleha howa gua bini wiaruha waini iba wabiaga wiarubi nawabi bame ngagoni ndobe. Tinaga ne hariga Anduane Homogohanda ndibulo wa helayagola tigua turu howa bi lalu ga ladagadaga bialu haga biaruni ereba hai helaya. <sup>11</sup> Ani biyago mitangi bialu inaga bu miniha Moaba wali agalibi Kiriherese tano wali agalirubi dara timbuni ho kogoni. Mbiralime wali agali mbirago homedagola dara howa ngida balu iba ganaru lalu kaligobi i kogoni. <sup>12</sup> Moaba wali agaliru tigua dama mitangi bialu gime wabini wiaruhondo bi pupu wule hari nene ngaruha pugu biaga ka. Ani bialu tinaga dama uruninaga anda karuha pialu bi pupu wiaga ka. Mbirale urunime bilo ti mo hongo halu biamogo nabiaga wini.

<sup>13</sup> Moaba wali agalirunaga bi mo ko hai hayadagoni Anduane Homogoibunime bule lo winidagua bini. <sup>14</sup> Ani bialu áyu Anduane Homogohanda laabo halu lalu, Horo mbira mbirani tigua bialu hayagonaga Moaba wali agalibi tinaga mbirale ngarubi bibahendeore mo ko hai holene mali tebira nga. Mali tebonegonaga horo mo ko holene inime mandabu henego tagira ibirangi mbirale tihondo bule mitangibu henego bulebero. Áyu Moaba dindiha wali agali dewaliore bu kagonigo mani dindi ogoni mo ko harongi wali agali emene hangu howa ti hongo naheore holebira, lalu lene.

## 17

*Anduane Homogohanda Siria wali agalibi Isaraele wali agalibi pani mulebero lenego ogo*

<sup>1</sup> Damasagasa tanonaga mbiwia halu Anduane Homogohanda bi ogo Aisaia lamini. Damasagasa tano mo ko holebira. ✧ <sup>2</sup> Waitigime Siria wali agalirunaga tano dunini timbuni áyu ngago bo haealabaga biragola bame be abalu dege ibira holebira. Aroe tanoru ngagoria nde wali agali lenego mbiraoreli hangubi mbira naholebira. Anidagua biragola dindi ogoni nogo bulumagaru sibiru hangu haga wulebira. Ani ngagola ti mo gi holene agali mbira nahedagola ti hada payabu holebira. <sup>3</sup> Waitigirume ibalu Isaraele wali agalinaga tano hongohe bu karu bo haealabaga bialu mo ko hai howa wali agali Damasagasa tanoha bu karu haru holebira. Áyu hameigini kira Siria Isaraelela mini lene wali agali dewaore padagonigo mani howa tinaga dindi mo ko harangi ti emene mbira dege paluebira. I Anduane Homogo Hongo Haiheore kogo ina bi o ledogioniore, lene.

<sup>4</sup> Anduane Homogo ibugua laabo halu lalu, Horo ogoningsi Isaraele hameiginiore mini lene kagoni biba hai holebira. Wali agali dewaorebi tinaga dabudabubi bibahende mo ereba hai helarogola tinaga dindiha mbirale mbira nawi dindi labuore wulebira. Manane agali hado timbuni mbira kago warago baragola tingini obi halu emene ho dai biagagobi wulebira. <sup>5</sup> Áyu nde Isaraele wali agali dewaore Lebaimi dindi ulini yu dindi bayaleore ngagoha widi bayale anda howa lini dewaore dagagobi kagoni. Anigo mani waitigi ibalu bo wahai harangi ti emene daga lene hangu agali widi gandulalu pene ngagoha iraneni mbira mbira yu wahaga bini kagome mbiraore daga biagagobi holebira. <sup>6</sup> Ani bialu ira olibe lini dewa dedago agalime kango yuwa lini dogolope helo baragola lini dogolope hai howa mbira mbira hangu magane puniruha do wahaga biraligobi Isaraele wali agali holebira. Anduane Homogo i Isaraele wali agalinaga Ngode Datagaliwabe ina bi o ledogioniore, lene.

<sup>7</sup> Horo ogoni ibirangi Isaraele wali agali ti mini beregedalu ti wabini Ngode Datagaliwabe mini tigabi kago mitangi bialu ibugua ti biamogo bilo hondo holebira. ✧ <sup>8</sup> Ani bialu howa tigua lomabu delaga dabu tinime bu helene ngagoriabi mbirale dama wali beda mitangi bialu gime ira dibu bage bigi buwa bigiya wabu heledaruhondobi bi pupu wialu naholebira. Ogoninaga lomabu delaga dabu ngagoria ira hagua ngabilo inisenesirubi

nadelolebira. Tininaga gime wabini ngaruhondo bi pupu wiaga winiru bibahende wahaiore holebira.

<sup>9</sup> Horo ogoningi tano hongohe winiru bo gialopaya biragola bame dindi ko mbirali nahe wulebira. Ala Hibiali Amoroaliru dindi ogoniha pigane henedaru tigua Isaraeleali anda ibuwa bo taliatogo laya handala pugu pugu biyagola wali agali mbira nahe hari wiaruha tano dege anda tabuandaru buhe wiagadagua wulebira.

<sup>10-11</sup> Isaraele wali agaliru-o tigua Ngode Datagaliwabe tinaga Pele Ngiaga ibugua ti haru dai bini kago embedaho wahene kamigonida. Ibu ege tole timbuni mbira haradagua kago ti mo ko holene anda ibirangi ibuha pu ha do haga kamigoni ndobe. Anigo heneneore tigua ibu embedaore harimi. Ani embeda howa tigua dama mitangi bialu mbirale bi pupu wulenaga gime wabini ngarume ti biamogo biragola bayale holeberemabe toba howa mbirale urunihondo bi pupu wialu harimi. Anigo mbirale urunime ti biamogo bibe naheore ngagola ti mo ko heneore mbirago howa mo bayale holene mbira nawiore holeberemi. Agalime gerebi mabuha gerebi hanga ho howa anda halu gini gene halu lini dewa delo maliaho kagola gerebi bayale hangayago anda nahe irane gabu hai haragola dindi hangu ona wiagagobi holeberemigo manda bilimu.

*Ngode Datagaliwabehanda hameigini hongohe tara tara hearu bope henego ogo*

<sup>12</sup> Dindi kulu timbuni laruago hale hadaba. Dindi tara tara ngaruha ami agali ibu mogo biragola dindi kulu laruagoni. Ti ibiragola dindi kulu mbari laruago iba solowara yaribu bialu tanguia amu nana biragola iba angeni hari kagoria baragola kulu nduga lagagobi laruagoni. <sup>13</sup> Waitigi agali timbuniore iba solowara tanguyu ibiraligobi ibiragoyu Ngode Datagaliwabehanda tihondo keba halu taliragola tini dalu ngagoha ibida dai bialu pugu pugu biaga. Puyabu ibalu ira yuni karu gilo yu purogo lagadaguabi puyabume humbirini wai bialu be abalu ira yuni dataniru dindini ngago puloyu piai hagadagua Ngode Datagaliwabehanda waitigi balu purogo lelolebira. <sup>14</sup> Alendo haragola waitigirume tano ngago ho hagira biragola wali agalime gi timbuni ho haga. Anigo horo mendengi gao laragola waitigi biaru nahedane hondolebira. Ogonidagua waitigi bu karume wali agali tinaga dindibi mbirale ngarubi mo ko hole ibiragola Ngode Datagaliwabehanda tinaga hariga damenego hapai haga ka.

## 18

*Anduane Homogohanda Sudana dindi mo ko holebira lenego ogo*

<sup>1</sup> Wali agali Sudana dindinaga iba angeha palima pedaru darabioveda. Mbirale babaganehe dewaore dindi ogoniha yagalo yu puibu biaruane hale habehe. <sup>2</sup> Tigua marunaga bi lo yalu bi lahaga hearu iba Naili pedagoria talu dambe aleme wabinigoria yalu daliape holebira. Sudanalirunaga bi lahaga bu kamiruni ti nde bi lowia harago lo yalu gerai laga bu kamiruni tigua bi mbira tini dalu yalu dai bidaba. Dindi ogoni hongohe iba dewape wali agali ti guruluni howa tinaga tingini peyobi bayaoreru bu kagoni. Hameigini dindi ogoniha padaru ti wai biagane hongohe kago hale howa wali agali maru dindi tara tarani padarume ti hondowa gi hai haga ka.

<sup>3</sup> Wali agali dindi bibahendeha palima pedemiru tigua bi ogo hale hadaba. Manane mbira hari nenen helolebirago hondole baya hanguore handaya ho halimu. Ani bialu mbiralime mbelo biguli pu laruagolabi bayuwa hale halimu. <sup>4</sup> Irane Anduane Homogohanda ihondo langialu lalu, Ini Anduane Homogo kogome ina dahuliya andaga howa de handa dali halu ema nabi bi nale hendore hondo holebero. Iba angeni ni tandagabi iba muni daba kagome poboyogo hendore bima irigi hagadagua mabuha iba dimba ibira halu tomo mo anda hole hendore ibira hagagobi bi nale hendore hondo holebero, lene. <sup>5</sup> Anigo wali agali dindi ogoniha karu ti hongo gibiorehe ka. Pu mbira lini daga mini gerebi bayale anda howa lini dolenaga pabua balu lini bayale dalu boga nabidaore agali



kebaheme gerebi irane ogoni abale gandulo wahai hagadagua Anduane Homogohanda dindi ogoni mo ko halu haealabaga bu wahai holebira. <sup>6</sup> Anduane Homogohanda dindi ogonila wai bilonaga waitigi bu karu ibilaga biragola waitigime ibalu ami agali bu karuni bo wahai haragola bo paya binigo tingini dindini wima polebira. Ani wima pedagola agali tingini uruni ega bedarumebi nogo gabua tara tara bu karumebi ibalu no waholebira. Ni dalu gaea birangi ega bedarume nolebira. Dagare birangi nogo gabua karume nalu holebira.

<sup>7</sup> Anidagua birangi Anduane Homogo Hongo Haiheore kago ibugua mbirale mbirale mule yu ibiraru mo yaga bulebira. Mbirale uruni wali agali hongohe dindi iba dewape ngagoria karu tigua yalu ibulebira. Wali agali uruni ti guruluni tinaga tingini peyobi bayaoreru bu karume ibuhondo ani mule yalu ibulebira. Hameigini dindi ogoniha padaru ti wai biagane hongohe kago hale howa wali agali maru dindi tara tarani padarume tihondo gi hai haga ka. Anigo wali agali dindi uruniha bu karume Hari Saiono Anduane Homogo Hongo Haiheore kago ibu mitangi bialu ibu mini yaraga howa lotu lole ibu ngoai holene ngagoria ibuwa tigua ibuhondo mbirale yalu ibiyaru mulebira.

## 19

### *Anduane Homogohanda Iyibi dindi mo ko holebero lenego ogo*

<sup>1</sup> Iyibi dindinaga lalu mbiwia henego bi ogo.✠

Anduane Homogo ibuni hari beralibani biralu gerai lalu Iyibi dindini ibulebira. Ani ibiragola Iyibi dindiha mbirale dama mitangi bialu bi pupu wule gime wabini ngarume ibu hondowa duru timbuni lalu Iyibi wali agali karumebi gi howa tinaga hongo pirilape halu ereba hai holebira. <sup>2</sup> Anduane Homogohanda lalu, Ina Iyibiali tini dege dege wai bilo tinaga bu miniha mo bua helalu wai bilo mo bia holebero. Tini hamene bababi tinaga nenege bababi bagabaga bialu holebira. Wali agali tano mbirani karume tano mendeni karu baba wai bialu agali haguane mbira kagome haguane mendela haru holenaga hongo yu holene wai bialu holebira. <sup>3</sup> Ina Iyibialirunaga mini mo luluya helalu tinaga hongo holene mo ereba harogola tigua mbirale mbira bulebira lalu mitangi bu hayaru nabulebira. Ani berogola tigua dama mitangi bialu bi pupu wule gime wabini ngaruhondo biamogo bia lalu holebira. Ani bialu tigua wali agali homene dinini baba bi laga karu karia puwa tihondo mani agi bulubadabe lama mo bila hole polebira. <sup>4</sup> Ani bialu kagola ina Iyibi wali agali ti kini ko mbira holebirago ogoni andanaha helo helolebero. Ani helarogola kini ogoni ibu hongohe tandagabiore howa wali agali haru holebira. I Anduane Homogo Hongo Haiheore kogome ina bi o ledogoniore, lalu lene.

<sup>5</sup> Iba Naili porago hundiai haragola dindi pani halu yo bialu lebola hai holebira. <sup>6</sup> Iba emene hundigi biragola ngu timbuni bulebira. Ngu anidagua biragome iba angeni dambe hawalia bu karuni bibahende gaulai holebira. <sup>7</sup> Ani bialu iba angeni mabu ngaruha tomo hangedaru gaulalu gabu hai haragola puyabume tomo lini dedaru pulo yu piai holebira. <sup>8</sup> Agali maru tinaga yolo mulenaga biabe iba Naili ogoniha wena balu numebi minaga karume ti wena minulene naberedagola tinaga bu miniha genda timbuni yu howa dugu bialu holebira. <sup>9</sup> Wali agali ti mabuha pu hongohe mbira mini palagasi ogonime aga labolabo bayale wabulenaga hangayaru lone anda naholobadagola tinaga bu miniha genda timbuni ho holebira. <sup>10</sup> Iyibi dindiha aga lebiaga bu karubi biabe biahaga wali agali karu tibi nde tinaga miniha genda timbuni dege ho holebira.

<sup>11</sup> Soana tanoha agali haguane bu karuni ti luluore bu ka. Agali mini bogaru talebu miaga karu tigua Iyibinaga kinihondo mini bogabi howa ndo bi ko liahe ngago lamulebira. Iyibi wali agalirunaga kini-o agali manda timbunibi uruni tigua ihondo

✠ 19:1: Yar 46.2-26, Ese 29.1-32.32

langialu lalu, Ina agali mini bogabi timbuni agali ala halu homenerunaga aguanene kamagoni, lolebira. Maru ti nde lalu, Ina agali kini manda timbunibi halu homenego aria kama, laga biaga ka. <sup>12</sup> Anigo agali mini gigabiwi kini mini talebu miaga biaru ti agoha kabe. Tigua tinaga mini bayale wiyaruni agiha mo do hayagola Anduane Homogo Hongo Haiheore kago ibugua Iyibi wali agalihondo bule ngago nalangiyadabe. <sup>13</sup> Soana Membisila tanoha agali haguane karu ti bibahende luluore hai ka. Agali haguane uruni tigua Iyibi dindini wali agali karu bayuwa haru holene winigoyu ani haru nahe hariga koha haru piaga ka. <sup>14</sup> Anduane Homogohanda Iyibiali agali haguane karunaga mini mo burugula henego bu ka. Anidagua bini ngagome Iyibi wali agali tigua bialu karu damenego bibahende bia ko hai halu agalime lulu iba nowa luluyu ibagabu howa ibuninaga magu tagu wiyagoria pilo wiagagobi ka. <sup>15</sup> Agali homogobi yagibanobi mini lene timbunimebi mini nalene bu karumebi Iyibi dindi bayale ngelonaga ti mbiralime biamogo nabibeheore ka.

*Anduane Homogohanda Iyibi wali agali pani nelu miragola tigua mini beregedo holebira lenego ogo*

<sup>16</sup> Horo uruningi Iyibi dindiha genda tara tara tagira ibiragola Anduane Homogo Hongo Haiheore kago ibugua ibunaga gi megela howa ti minu bole mandabu kago hondowa tigua mogo timbuni lalu walime gi howa duru lalu biragagobi birulebira. <sup>17</sup> Ani biragola marume Yuda dindi mini lalu laragola Iyibi wali agali tigua hale howa Anduane Homogo Hongo Haiheore kagome tihondo bule ngago mitangi buwa ti gi timbuniore ho holebira.

<sup>18</sup> Ani birangi Iyibi dindiha tano duria ngaruni aria bu karume Hiburu bi hangu lalu holebira. Ani lalu howa wali agali urunime Anduane Homogo Hongo Haiheore kagonaga andaneha holeberema lalu bi hongo howa lo wialu holebira. Tigua tano uruni aria mbirago mini Honaninaga Tano lalu mini wulebira.\*

<sup>19</sup> Horo uruningi Iyibi dindiha Anduane Homogonaga lomabu delaga dabu mbira bu helolebira. Ani bialu Iyibi dindi tubarini ege tole mbira Anduane Homogo mitangi bialu loma biaho helolebira. <sup>20</sup> Anduane Homogonaga lomabu delaga dabubi ege tole ogonibi kirabali Iyibi dindini kago hondowa wali agalime Anduane Homogo Hongo Haiheore kago ibu ti heba Iyibi dindiha kalo mitangi bu helonaga ani helolebira. Ani helo kagola waitigime ti balu hingedape hole ibiragola tigua Anduane Homogohondo biamogo bia lalu bi laragola ibugua hale howa agali mbira ti biamogo bialu haru dai bilonaga ibilolebira. <sup>21</sup> Ani biragola Iyibi wali agali tigua Anduane Homogo ibuore henego kalo manda biaiho helo tihondo ibuni mo walia holebira. Anidagua birangi Iyibi wali agali tigua Anduane Homogo ibuniore kalo manda biai howa ibu mitangi bialu lotu lalu ibuhondo mbiraleru lomabu mulebira. Ani buwa tigua mbira ogo buleore lowa bi hongoheore lo wialu bule lo wiradagua bulebira. <sup>22</sup> Anduane Homogohanda Iyibi wali agali pani mulebero lenego mulebira. Ani biragola tigua mini beregedalu ibu karia dai buwa ko biniru ibuhondo lapani haragola ibugua tinaga bi hale howa ti bayale helo biamogo bialu holebira.

<sup>23</sup> Horo uruningi hariga timbuni mbira Iyibi dindi Asiria dindila tubariha puibu bulene wulebira. Ani ngagoria Asiria wali agaliru Iyibi dindi pialu Iyibi wali agaliru Asiria dindiha polebira. Ani bialu howa wali agali dindi kira ogoniha karume Anduane Homogo ibuni hangu mitangi bialu lotu mandagi lalu holebira. <sup>24</sup> Ani birangi Isaraele ti Asiria Iyibila wali agaliru baba ti tebira uruni ti ho mbiraore ho holebira. Ani howa tigua Anduane Homogohanda tini biamogo bialu mo bayale hayadagua tigua wali agali dindi tara tarani bu karu bayale helo biamogo bialu mo bayale holene ti holebira.

\* **19:18:** Mbuga Hiburu bi gilibu wini maru ngagoha tano mini Honaninaga Tano lalubi mbuga maru ngagoha tano mini Mo Labu Holene Tano lalubi lo nga. ☆ **19:23:** Ais 27.13, 35.8, 62.10

<sup>25</sup> Anigo Anduane Homogo Hongo Haiheore kago ibugua ti mo bayale halu howa lalu, Ina Iyibi wali agali tí ininaga wali agali kamiru ina tí biamogo bulebero. Asiria wali agali bu kamiru tíbi inime wabini kamiru ina tí biamogo bulebero. Isaraeali wali agali tí nde ininagaore halimulo dabo helarugo tíbi biamogo bialu holebero, lalu Anduane Homogohanda laya, lalu Aisaiahanda lene.

## 20

*Asirialime bulebiragonaga manane Anduane Homogohanda Aisaia ibugua walia helo laminigo ogo*

<sup>1</sup> Asirianaga Kini Sagonohanda bia layadagua ibunaga ami haru haga agali haguane heagome Asiria ami hearu haru halu Pilidia dindiha Asadodo tano wiagoria wai bule pene. <sup>2</sup> Ala Asirialime wai ogoni bule ibulebira lalu manane Emoso igini Aisaiahondo mo walia henego mali tebira peagola ogoningi lola hene. Aisaia ibugua aga mbege nu ale daligani karulo heago golo wahalu ibunaga ge subu golo wahalu mbira nakarule ibagabu hene. Aisaia ibugua Anduane Homogohanda ibuhondo bi layago hale howa bibe lalu lamiyadagua ani bialu hene. <sup>3</sup> Asiriali tigua Asadodo tano karulo heagola Anduane Homogohanda lalu, Mali tebirani inaga biabe biahaga agali Aisaia ibu agabi ge subu mbira karu nale bame ibagabu hayagoni. Ani biyadagoni Iyibi wali agali bu karu tiha tagira ibulebirago mananebi Sudana dindiha bu karu tiha tagira ibulebirago mananebi walia hayagoni. <sup>4</sup> Asirianaga kini kagome pialu Iyibi Sudanala baba wai buwa wandari igiri daliahe bu karubi wali agali wahe bu karubi bibahende garabaya bu yalu dindi tara tara ngaruha haru piai holebira. Wali agali uruni ti garabaya haru pialu howa ge subu agabi mbira karu naleore polebira. Ti tibabeore howa poragome Iyibi dindini taga timbuni holene mo yu anda ibulebira. <sup>5</sup> Wali agali maru Sudanalime ti biamogo bilo lowa hana ho hagarubi Iyibi dindi mini lene timbuniore mbira ngagoni lo mandabu hagarubi tigua dindi timbuni ogonilabo mo ko harago de hondowa mogo timbuni lalu miniha genda holebira. <sup>6</sup> Horo ogoningi wali agali Pilidia dindiha iba solowara ange ange paluyu pedaru tigua tini laedene bialu lalu, Ayali-o Asirialime ina baba wai bule ibirangi agali hongohe dindi kira ogoniha karume ina pele ngule ibidaba lole mandabu harimago. Ai de handa mbirali ina biamogo bulene mbira naheda. Dindi hongohe kira biagolabo bo podo wahayadagoni ndobe. Anigo ina Asirialirunaga ayu tibu ne gadele ngagoria howa yo pialu polene nakarulape kamagoni ndobe, lolebira laya, lalu Aisaiahanda lene.

## 21

*Anduane Homogohanda Babilono tano timbuni ngago bo gialahole bulebira lenego ogo*

<sup>1</sup> Anduane Homogohanda Babilono tano mo ko holebira lalu Aisaiahondo de gandebaha howa mo walia hene.\*

Dindi ko yobi wali agali bibahende bu karu ti polene gi hai haga ngagoria howa genda holenebi mo ko holene timbunibi tagira ibulebira. Tagira ibalu dindi ko ogoni howa puyabu humbirini wai hongohe ibagagobi abaleore ibulebira. <sup>2</sup> Mbirale ko tara uruni Anduane Homogohanda ihondo de gandebaha mo walia haya. I hale ho hewaria Anduane Homogohanda lalu, Babilonoali karunime mendeali kagohondo ke halu mo hondo howa mo ko haga ka. Tigua mana ogonibi biagago bia timbuore halu ka.

Anidagua bialu kago ai Elamali ami karu aibe. Tigua Babilono karu baba wai bule ibidaba. Midiali ami karu aibe. Babilono tano ho hagara bialu bole ibidaba. Babilono

\* **21:1:** Hiburu bi gilibu wini ngagoha mini Babilono lalu nawigo dindi ko wali agali nahaga iba angeni bu ngago lalu gilibu ngago ogoni Babilono laluore gilibu nga lo manda bidama.

tigua wali agali dindi tara tarani paluyu pearuhondo genda mo miyaruni bibahende mo wahai holebero, laya.

<sup>3</sup> De gandeba ogonime ĭ mo gi bia hayagola ĭ mogo lowa duru lalu tandaga timbuniore walime gali taba hanarangi tandaga hagagobi ho haru. De gandebaha howa bi layago ĩna hale harugome ĩnaga bu miniha mo ko halu deme handarugomebi ĭ mini mo burugula hayagola gi timbuniore haru. <sup>4</sup> ĩnaga embone mo wangerere bialu gi timbuni harugome ĩnaga tingini mo durula haya. Ani biyagola abale alendo halu aruma helo hame laru. Ani hamelarugoyu de gandeba ogonime mbiraga ogoningi ĭ mo gi timbuniore henego ko.

<sup>5</sup> De gandeba dege handalu hewaria agalime tomo nalu biraga dagia wiagoria labolabo dungua howa tomo dawa manda manda biyago handaru. Ani bialu ti biruwa tomobi ibabi nalu bereagola abaleore bi mbira dalimuore layuago hale halu hewaria ogodagua laya. Agali hagianeru-o waitigi anda ibiyadago wai humbi wirimigo abale mo manda manda bidaba, laya.

<sup>6</sup> Ani layagola Anduane Homogohanda ĩhondo langialu lalu, Agali mbirame mamage helo ĩna agali mbira dabo helabe. Ibugua mamage howa mbirale birago damene handarago ĩhondo langule dai bilo. <sup>7</sup> Ibugua agali nogo hosini biralu duguni kira kira ibugu bialu ibirago hondowabi nogo dongini biralu ibirago hondowabi nogo kameleni biralu ibirago hondowabi tigua birago bibahende ibugua bayuwa deme hondolene nga, lalu langiya.

<sup>8</sup> Ani howa agali mamage haga ogoni ibugua ga hongo howa lalu laiono gabuame bi timbuni lagadagua lowa lalu, Anduane Homogo-o ĩna mbiraga horombebi mamage holene wiagoria howa mamage haabo haru, laya.

<sup>9</sup> Ani lalu heaore agali nogo hosini biralu duguni kira kira abaleore ibiyago de handaru. Agali mamage haga biagome lalu, Babilono bo gialobaga bialu ibiraho wahaya. Dindi timbuni ogoni mo ko heneore ngagoni ndobe. Tinaga dama mitangi bialu mbirale gime wabini bi pupu wiaga biaru dindini ibira halu gingirulopaya bini nga, laya.\*

<sup>10</sup> ĩnaga Isaraele wali agaliru-o waitigime tí mo ko howaore agalime widi iraneru lini hondo ibira ibira bilo bo taulagadagua ĩna bayadago ai Anduane Homogo Hongo Haiheore ĩna Isaraele wali agali bu kamagonaga Ngode Datagaliwabe kago ibugua bi bayale layadago ĩna tíhondo langerogoni.

### *Idomo dindiha bulebiragonaga mbiwia henego ogo*

<sup>11</sup> Anduane Homogohanda Idomo dindiha bulebiragonaga bi latagi henego ogo.

Wali agali Idomo dindiha karume mamage haga kagohondo hale halu lalu, Mamageali-o aruma ho wiaabo kagoni agongi ereba holebirabe. Angiore ereba holebirabe, laragoni.

<sup>12</sup> Ani larago hale howa ĩna ladai bialu lalu, Wá ha holebiragoyu aruma ha dege bulebira. Tigua lone hale holene hame ledemiyagua nde lone haleho dai bilimu, lalu laru.

### *Arebia dindiha bulebiragonaga mbiwia henego ogo*

<sup>13</sup> Anduane Homogohanda Arebia dindiha ko holene ngagonaga bi de gandebaha howa Aisaiahondo laminigo ogo.

Dedana wali agaliru-o tigua mbirale yolo bialu muni mima ibaga biaga kamiru tí ibida puwa Arebia dindiha dindi ko wali agali nahaga ngagoha ha do holeberemi. <sup>14</sup> Tí ani ha do kamiria iba noa timbuni bulebira. Ani biragola Tema wali agali kamiru tigua iba hinabi nelo hanalu puwa muleberemi. <sup>15</sup> Wali agali uruni ti ibida poragoni irane

\* 21:9: Mo 14.8, 18.2

waitigime danda timu ayu tiburu yuwa ti baba wai hongo howa bule kagonaga ibida poragoni.

<sup>16</sup> Ani biyagola Anduane Homogohanda ihondo langialu lalu, Keda tanoha wali agali hameigini padarunaga hongobi tinaga mbirale ngarubi mo ko halu bo haealo wahai holenaga mali mbira hangu nga. Ina mali ogoninaga horo mbira mbira baya hangu dagalalu ko. Horo ogoni manda bu winigo tagira ibirangi ina tihondo bule manda bu kogoni bulebero. <sup>17</sup> Kedali bu karu ti ami agali hongoheore howa tigua danda timume wai hongohe biaga ka. Anigo ti bo wahai haragola ami agali hongohe biaru ti emene mbira hangu holebira. I Anduane Homogo Isaraele wali agalirunaga Ngode Datagaliwabe kogome bi o ledogoniore, laya lene.

## 22

*Anduane Homogohanda Yarusaleme wali agalihondo keba ko lalu Aisaia laminigo ogo*

<sup>1-2</sup> Anduane Homogohanda dindi ulini yu dindi mini De Gandeba Dindi laga winigoria Aisaiaha howa bi lenego ogo.

Yarusaleme wali agali bu kamiru tigua irane aginaga turuho howa bi dewa lada-gadaga bialu kamibe. Tigua anda dangini irigi ho howa hoaro laramigo tano biba-hendehe hale haame harago agibe. Tinaga ami agali homayaruni ami agalime hongo howa wai bialu kaore homagadagua ndo homaya.\* <sup>3</sup> Ani biyagola tinaga ami agali haguane bu hearu kaundiaha ibida piai hene. Agali haguane ibida piyadaruni ti danda timu mbira nayi pialu hearia waitigi bu hearume talima pialu minu yania hai hene. <sup>4</sup> Anidagua binigonaga i dara ho kogo hondowa tigua inaga miniha mo palia hole manda bu nahalimu. Ini hanguore holiya helalimu. Irane inaga miniha genda yu howa dugu bialu kogoni ndobe. Inaga wali agali burupale darabi bu karubi homolobadane dara howa dugu bialu kogoni. <sup>5</sup> Anduane Homogo Hongo Haiheore Howa Bibahende Haru Haame Ho Haga kago ibugua dindi ulini yu dindi mini De Gandeba Dindi laga ngagoria horo mbiru manda bu winigo tagira ibirangi genda yu holeberemi. Tinaga waitigi dewaore ibalu tigua hongo howa ga ladagadaga bialu gerailo yu puibu bialu kagola tigua mogo lalu gi timbuni halu durulowa luluyu ibagabu holeberemi. Waitigi uruni tigua wai pabe bidaru bo gialopaya biragola tigua gi timbuni halu ga laramigola dindi kaundia hari nene ngaruha karume hale habehe loleberemi.

<sup>6</sup> Ami agali Elama dindiha bu karume danda timuru yalu nogo hosini bialu wai biaga garo ale karisiru heba ibiragoni. Ani bialu Kiri tanoha howa ami agali bu karu tigua wai humbi yalu ibiragoni. <sup>7</sup> Tinaga dindi ulini bayaleore ngamigoha wai biaga karisi hongohe dewa wu tolowa ami agali maru nogo hosini bialu tanonaga pabe haraba ngagoria manda manda buwa wai bule ibu kagoni. <sup>8</sup> Anduane Homogo ibugua Yuda dindinaga de handayaho naheore ngagome waitigi tigua anidagua biragoni. Tinaga waitigime wai anda ibiyangi tigua lo manda bialu wai biagane ale dewaru tinaga anda mini Lebanono Irabunaga Anda laga hemigoha wirimigome tini mo wialu bayale holeberemabe tobaho harimigoni. <sup>9-10</sup> Ani howa Yarusaleme tanoha wai pabe heago maruha giallo payabu wiago de hondowa dege ho harimigoni. Ani bu wiagola tigua Yarusaleme Debidinaga tanoha anda heago damene bibahende daga lai harimi. Ani daga lowa tigua anda maru hearu gialai howa tanonaga pabe uruni biatiga birimi. Ani bialu iba tagiraha bereago tanoha dadabu yu anda ibirimigoni. <sup>11</sup> Ani buwa iba hariga timbuni mbira tanonaga pabelabo gimbuni heagoha bo wialu iba biraga uli ala wini wiagoha howa iba tamuha berelonaga dadabu yu anda ibirimigoni. Tigua

\* **22:1-2:** Asirialime ibalu Yarusaleme ho mabu biyangi Yarusalemeali ami hearume gi timbuni howa tigua Asiriali biaru baba wai nabi hene. Agali maru ohalu ibida pole pialu hemiria Asiriali biarume harigani minalu bai hene. Maru tanonaga harigani minalu bai hene. Maru tanoha haabo hayaru waragome homalu tomo garimebi homene.



urunidagua birimigoyu Ngode Datagaliwabe kago ibuni mitangi nabioire harimigoni ndobe. Ibuguaore mbirale tiha ani bilo lalu bamba howa manda manda bu winigo ai uruni tiha tagira ibiyagoni ndobe.

<sup>12</sup> Horo ogoni tagira ibiyangi Anduane Homogo Hongo Haiheore howa Bibahende Haru Haame Ho Haga kago ibugua tini dara haga bu dugu timbuni bialu tinaga mandari dogo wahai halu daraho howa karulaga aga wiago mo karulo halimulo hamelo hayagoni. <sup>13</sup> Ani hayagoyu tigua ani nabi waho howa mbirale uruni biyangi turu howa oba halu harimi. Tigua nogo bulumaga sibiru bo dawalu dawo timbuni halu waini ibaru nalu harimi. Anidagua bialu howa lalu, Ainde yawi homamiyadago ayu tomo ibaru nalu turu hamiya ibidaba, larimi. ☆

<sup>14</sup> Anduane Homogo Hongo Haiheore howa Bibahende Haru Haame Ho Haga kago ibunimeore ihondo ogodagua layuane hale haru. Ibugua lalu, Tinaga ko urunidagua birimigo ina embeda nahe mandabu haabo halu tini homarami. I Anduane Homogo Hongo Haiheore howa Bibahende Haru Haame Ho Haga kogome bi o ledogoniore, lalu langiya.

*Anduane Homogohanda kini heagonaga biabe biahaga Sebena dugu waholebero lenego ogo*

<sup>15</sup> Anduane Homogo Hongo Haiheore howa Bibahende Haru Haame Ho Haga kago ibugua ihondo lalu, Ina kini andagaha bibahende ngaru handayaho hai haga kago agali mbira mini Sebena kago hondo puwa ibuhondo bi ogodagua labe, lene. <sup>16</sup> I dindi ogoriani agi bialu kebe. Inaga dindi mbira nawi i nabaile kegoni. I ariago mbira nahedago i aigo damene howa ina agali maruhondo ege tole hari bo tombe ladaba lowa ininaga homali bayale bu manda manda bialu kebe. <sup>17-18</sup> Ina mandabu handalu keria i agali hongohe kobe tobaho kebe. Ani ndoyago. Anduane Homogohanda i mo emeneore halu minu mbera buwa mbalo ale helowa dindi kaundiaore mbira ngagoha bape holebira. Ani biragola inaga karisi bayale ini gubalini hariliruni wahalu dindi kaundiaha pu homolebere. I kininaga biabe biahaga ho kegoni howa ina kini damene bu karuha taga holene mo yu anda ibaga kegoni ndobe. <sup>19</sup> Anduane Homogohanda inaga biabe bialu kegoni dugu waharagola i ko yagibano howa mini lene dege mbirago kegoni lone naholebere, labe laya.

<sup>20</sup> Sebena-o Anduane Homogohanda ihondo ogodagua laya. Ina mbirale uruni berongi inaga biabe biahaga agali Hiligaia igini Eliagimi olalu ibu lolebero. <sup>21</sup> Ibiragola aga lunibi mandibubi agali hagianeme karulagane ale i karulo haga biago ibu mo karula holebero. Ani bialu ina biabe bialu kegoni ibugua bia aribia helolebero. Ani helarogola ibugua Yarusaleme wali agalibi Yuda dindi bibahendeha haru halu baya hangu handayaho howa ibuni ti aba haradagua holebira. <sup>22</sup> Ani bialu Kini Debidi aguanene holebirarunaga panga gi inaibunaga giha mo ya holebero. Ani berogola ibugua panga dugua harago mendealime payabe nahe halu panga payarago mendealimebi duguabe nahe wulebira. ☆ <sup>23</sup> Pu nguni hongo howa dariba hene ngaligobi ina agali ogoni ibunaga biabe buleneore ngago bialu helo mo hongo howa helolebero. Ibugua biabe ogoni bialu holebiragome ibu damene bibahende mini lene dege hai holebira.

<sup>24</sup> Ani kagola ibu damene maru karu ti ibuni hana ho hene howa ibugua ti biamogo bia helonaga ibuhondo hale halu holebira. Nu todobene beru mbira ira gemboge hongoheni gerela hagadagua ti ibuni hana ho hene mbira holebira. <sup>25</sup> I Anduane Homogo Hongo Haiheore kogome bi ogodagua larogoni. Mbirale uruni birangi gerela hagane gemboge ale hongohe hayago genda halu podo ibira holebira. Ibiraharagola wali agali ogoriani hanaho howa genda mo mialu haga hayaruni bibahende ibira hai

halu mo ko holebira. I Anduane Homogo ina bi o ledogoniore, laya lalu Aisaiahanda lene.

## 23

### *Anduane Homogohanda Taia tano mo ko holebero lenego ogo*

<sup>1</sup> Anduane Homogohanda Taia tanoha mani bulebirarunaga bi ogo lamini.

Iba sibi timbuni iba solowaraha ibaga biaga agali kamiru-o Taia dindi tí dalu wirimigonaga andarubi iba sibi anda íbu wiaga iba bereagobi mo ko hayago ai dara halu dugu bidaba. Tígua iba solowara dege dombeneha dindi mini Saibarasa ngago wahalu dai beremingi ogoni biyadane handalu manda buleberemi.✧ <sup>2</sup> Wali agali iba solowara bedago angeange paluyu pedemirubi Saidono tanoali biyinaya biabe biaga bu kamirubi tí hendore holene nga. Iba sibime Saidono tano tínaga dabudabu dewaore mo yalu ibugu biyagoni. <sup>3</sup> Ani biyagola tí mbirale ngaru yolo bia muni tagua biaga dindi mini lene mbira wirimigoni. Iba sibiru iba Naili pedadagua pialu Iyibi dindiha howa widi dewaru mo yalu ibugu biyagola tígua uruni muni tagu wigi bialu tí homogoore harimigoni.

<sup>4</sup> Saidono tano-o í tagaho holene nga. Tano hongoheore iba solowara angeni mbira wirigo bo haealabaga biyago íore taga habe. Iba solowara bedarume bi ogo íhondo lalu bedagoni. I daraore kogoni. I waneigini nahe bedo. Ainde i wali waneigini mbira taba hanalu howa tandaga nahene ale biralu waneigini bayaleru mbira taba hana nabini biragadagua bedogonida, laragoni.

<sup>5</sup> Mbirale uruni Taia tanoha biya larago hale howa Iyibi dindini karume ti gi timbuni halu tinaga hongo pirilape halu ereba hai hene holebira.

<sup>6</sup> Wali agali solowara angeange paluyu pedemiru tígua dara timbuni howa dugu bima ibida togolo yalu Tasisi dindi ngagohayagi piai hadaba. <sup>7</sup> Taia tano bambaore hongohe winigo wali agali bibahendeme turu haga biagoha biyadago agi biyabe. Bamba tano ogoniha howa wali agali maru dindi tara taraha puwa tano gahenge maru lone mo wule biabe bima pelo purogo lelene. Anigo irane agome tano hongohe ogoni bo gialabagabu wahene ngabe. <sup>8</sup> Taia tano timbuniore ogoni tano maru ngarunaga kini wuwa ibugua maru ngaru handayaho haga wini. Ani wuwa agali biyinaya biaga hearu timbuniore heago hondowa wali agali dindi tara tarani bu karume tinaga mini yaraga halu haga biago mo ko hene ngago aiwa bi layagola mo ko henego ngabe. <sup>9</sup> Anduane Homogo Hongo Haiheore kago ibugua uruni mo ko hai hole ala howa manda mandabu wini ndobe. Anduane Homogohanda anidagua biyadagoni irane wali agalime tini hongohe kama lowa mine halu hearia tinaga hongo bope halu tinaga agali mini lene hearubi mo dindiha holenaga ani bini.

<sup>10</sup> Wali agali Tasisi tano pu kamiru tí iba Naili timbuni poragome ibuni poa biragoha pupe hagamadagua tígua dindi ngagoni alialu tomo hangalimu. Tínaga hame ledemigo hapai haga Taia tanoha haga biaruni nahego ani bilimu laro. <sup>11</sup> Iba solowara timbuni bedago angeni wali agali dindi wia para para bu palima pedaruni bo wahai holenaga Anduane Homogo ibunaga gi dogolalu megelaho ka. Ani kagola wali agali dindi uruniha bu karume gi timbuni howa duru lalu ka. Wali agali iba solowara bedago angeange tano wima pedaruha palima pedaru ti biyinaya biabe bialu karia mo ko holebero lalu bi lowini. <sup>12</sup> Ibugua lalu, Tano bayale Saidono-o ina í mo ko harogola ala í turuho harigoni ereba halu ínaga wali agali karu hangedape ho wulebere. Anigo Saidono wali agali togolalu Saibarasa dindi iba dege dombene ngagoha ibida pu harimiyagua nde dindi ogoniha bayale naholeberemi dege, laya lene.

<sup>13</sup> Kaladea wali agalinaga dindi ngaru de handadaba. Asirialime ibalu tinaga dindi mo ko halu bo gialabagabu wahenego áyu wali agali mbira nahe embera nogo ega gabuaru ti hangu haga ngagoni ndobe. Asirialime ibuwa wai pabe heagoria anda daliga

✧ 23:1: Ese 26.1-28.19, Yol 3.4-8, Amo 1.9-10, Seg 9.1-4, Md 11.21-22, Lg 10.13-14

bima iraga halu ogoriani howa wai bini. Wai bialu Taia dindinaga wai pabe hongohe heago bo gialabaga bialu mo ko hai hene.

<sup>14</sup> Tí agali iba sibi yalu solowara timbuni bedagoha ibaga bialu piaga kamiru tínaga tano hongohe biago bo gialabaga bialu mo ko hai hene ngagonaga dara halu dugu bia hadaba.

<sup>15</sup> Mbirale uruni tagira ibiragola mali pira kariani (70) wali agalime Taia tano embedaho holebira. Kini mbiraoreme mali pira karia (70) urunidagua hondo haga hene. Mali pira karia uruni piyai haragola agalime bayanda walinaga iba gana laga winigodagua Taia tanonaga lolebira. Iba gana agua laga wini,

<sup>16</sup> Bayanda wali-o í embedaho wahayagoni ndobe.

Gawa ale wiridago mo yalu tano ngaruha ibaga bialu polene nga.

Agali bu karume í lone mitangibu dai bilo gawa ale lalu iba gana lama polene nga.

<sup>17</sup> Mali pira karia (70) ogoni piyai kagola Anduane Homogohanda Taia tano lone mo bayale halu wali agalime mbirale yolo bia muni tagua biaga wulebira. Bayanda walime agali ibu bedaria ibilonaga ndole bialu biragadagua Taia tanome wali agali dindi bibahende ha howa ibuha ibalu mbirale yolo bia muni tagua bule ibilo ndole bialu holebira. <sup>18</sup> Anigo muni Taia wali agali tigua muni ilu wirago dewa wua to nalolebira. Mbirale uruni bibahende Anduane Homogo ibuninaga lomabu wiai holebira. Anduane Homogonaga wali agali bu karu tigua mbirale Taia wali agalime wini uruni mo yu howa ti dabudabubi tomo nolenebi aga karulolenebi burupale ngadagua karulapeore mo wigi bialu holebira.

## 24

### *Anduane Homogohanda dindi bibahende mo ko hai holebero lenego ogo*

<sup>1</sup> Anduane Homogohanda dindi bibahende ngaru mo ko hai haragola dindini mbirale mbira nawi dindi hangu bame wulebira. Ibugua dindi uruni hengedo tagadabagabu waharagola mbirale winirubi mo ereba halu wali agali henerubi bo purogola halu mbirale mbira nahe dindi koore wulebira. <sup>2</sup> Anidagua biragola wali agali bibahendeore yo pialu polene mbira nahe genda ogonime lola hai holene wulebira. Loma binigo mo miaga bu karubi wali agali damene bu karubi wali agali garabaya biabe ale biahaga karubi tinaga agali haguane karubi biyinaya biaga karubi wali agali tinaga mbirale ngaru yolo biaga karubi maru tinaga mbirale ngaru marume dano helo miagaru karubi dano haga karubi homogo karubi yagibano karubi heba bibahendeore genda ogoni lola hai holebira. <sup>3</sup> Dindi bibahendeore mo ko hai haragola bameore wiai holebira. Anduane Homogo ibugua aniore bule lalu lowinigo bulebiraore.

<sup>4</sup> Dindi yo bialu ibane piyai halu hari daligabi ko haragola ogoninaga dara howa dugu bialu wulebira. Ani biragola wali agali mini lene bu karu tinaga hongo ereba hai holebira. <sup>5</sup> Wali agali ti ko tara tara biragome dindi mo ko haragoni. Tigua Ngode Datagaliwabenaga bi mana lowini ngago pugualu ibunaga bi mo wahalu habo nalolene bi wiaabobo bu wilo lowinigo mo habo lai haragoni. <sup>6</sup> Anidagua biragome Ngode Datagaliwabehanda bi laragola mo ko holene dindini tagira ibalu wali agali dewaore bo wahai halu emene dagalene dege holebira. Wali agali tinime mana ko bialu kagonaga pani nalu genda ogoni yu helonaga ani ibilolebira. <sup>7</sup> Pu mbira lini daga mini gerebi gabu haragola gerebi lini wene boga nabi dedaru gau lolebira. Ani birangi waini iba naberedagola wali agali waini iba nole turuhu hagaru ti turu nahe miniha genda yu hai holebira. <sup>8</sup> Tigua turuhu howa bi ladagadaga bialu howa iba ganaru lalu mo ngilingele lahagaru mo wahai holebira. Gawa ale bi tara tararu lelo mo bila hagaru wahai holebira. <sup>9</sup> Tigua waini iba nalu biruwa turu halu iba gana laga winiru wahai holebira. Genda uruni ibiragola lulu iba hongohe ngaru dende biaga wiyago ndo dende nabi kau biragome ti noa nabulebira. <sup>10</sup> Mbirale bibahende tano timbuniha

ngaru mo ko hai holebira. Wali agali karume gi timbuni howa tini andagaha anda pu biruwa panga payatagi halu tamuha birulebira. <sup>11</sup> Wali agalime waini iba nolene mbira nawioiredagola howa tanoha hariga pugu bidagoria pialu howa waini iba mbira ngi lama polebira. Ti turu howa hadapayabu holene henge winigo ereba halu genda yu howa daraho holene dindi bibahendeni tagira ibiragola lola hai holebira. <sup>12</sup> Tano timbuni ngaru bo gialabaga biai halu wai pabenaga panga timbuni karu gialabaga bialu gingirulopaya bini hangu wulebira. <sup>13</sup> Mo ko holene horo ogoni wali agali dindi bibahendeni bu karuha tagira ibai haragola wali agali dewaore bo wahai halu emene dagalene hangu ira olibe lini dogolope halu gerebi linibi dai hene kagola mbira mbira hangu yu wahene dedaligobi wali agali ani holebira.

<sup>14</sup> Ani birangi wali agali emene dagalene holebiraru tigua turu howa iba gana lalu holebira. Wali agali dindi ni paliragohayagi karume Anduane Homogo mini timbuni lene kagonaga mini yaraga halu turu timbuni ho holebira. <sup>15</sup> Wali agali dindi ni tagira ibiragohayagi karu tiguabi iba solowara bedago ange angeha paluyu pedaru tiguabi Anduane Homogo Isaraele wali agalinaga Ngode Datagaliwabenaga mini yaraga halu ibu mini leneore ka lai holebira. <sup>16</sup> Wali agali dindi leneha palima pedarume turuhu howa iba gana laga ngaru lalu holebirago hale holeberemi. Tigua iba gana lalu howa, Anduane Homogo mini bayale tigabi kagonaga mini yaraga holene nga, laga bialu holebira.

Ai darabago ina ogodagua laro. Inaga miniha genda timbuniore yu howa turu nahe ini homo ereba habehe ko. Irane wali agali maru karu mo ko holenebi ke holenebi ho toledagome mendeali kago mo ko howa ke ho mialu karunaga i turu naheore kogoni. <sup>17</sup> Dindini wali agali bu kamiru ti dege darabida. Mo ko holenebi ti gonoha dolenebi uliha gundu polenebi wiai kagoria lola holeore kamigonida. <sup>18</sup> Maru ti mo ko holene tagira ibira handala ibida pialu karia gundu uli wini ngagoha uli polebira. Ani biragola gundu uliha howa heyalu lone ibida pole pialu karia gono ngagoha do wulebira. Hari daligaha howa iba ibilo panga duguape haragola iba timbuni ibulebira. Ani biragola dindinaga gene kago pini heba mo ema bulebira. <sup>19</sup> Dindi dumbirumbi bialu mo emabia haragola dindi gaibubaga bu wima polebira. <sup>20</sup> Agalime lulu iba no howa elola ainai biagadagua bialu puyabu hongohe ibiragola anda emene kagobi elola amunana biagadagua bialu dindi ogo elola amunana bialu wulebira. Wali agalime bia ko hene ngagonaga genda dindi ogonime yabe nahe gendabi wulebira. Ani yu habe nahedagola dindi ibu hongo nahe ibira halu lone heyabe naholebira, laya lene.\*

<sup>21</sup> Horo mbira pongo bo winigo tagira ibirangi Anduane Homogohanda hari daligaha hongo haga bu karuhondobi dindini kini bu karuhondobi pani mulebira. <sup>22</sup> Anduane Homogo ibugua kini uruni bibahende mo mogo buwa agali minu garabaya bialu gundu uliha helagadagua minu garabaya bu helolebira. Ibugua ti garabaya luore helowa mani ibuni hame ledagoale pani tihondo mulebira. <sup>23</sup> Ani biragola howa harini ege aruma halu ni nade wa holenebi ereba holebira. Ani bulebirago irane Anduane Homogo Hongo Haiheore kago ibugua bibahendeorenaga handame haga howa ibunaga wa holene hongo holenebi timbuni gibi heba ibalu Yarusaleme tano Hari Saiono hombeneni howa wa hadali halu ibunaga wali agali haru holebira. Ani kagola wali agali karunaga haru haga bu karume ibuninaga wa holene de hondolebira.

## 25

### *Anduane Homogonaga mini yaraga halu iba gana lenego ogo*

<sup>1</sup> Anduane Homogo-o i inaga Ngode Datagaliwabeore ke.\*

I mini yaraga holene hamelo kogoni.

I na biamogo bulenaga biabe nahendene ale birigoni.

\* 24:20: Ais 19.14    \* 25:1: Dag 23.19, Iba 98.1, 118.28

Ína mbirale buleore lalu bamba lo wiriruni biaiore harigoni.

<sup>2</sup> Ína tano timbuni wiaru bo gialapaya biri.✧

Tano maru wai pabe hongohe bu mabubi hearu bo giallo wahai hari. Waitiginaga tano timbuni hongohe wiaru bo haealabaga biai harigo tigua tano uruni lone biadai nabulebira.

<sup>3</sup> Wali agali tano hongohe timbuni ngaruha haga karume ínaga mini yaraga holebira. Dindi marunaga tano mo ko haga bu ngaruha wali agali bu karume íhondo giho holebira.

<sup>4-5</sup> Wali agali yagibano mbirale nawi karubi genda yu howa mini dege dindi ho karubi tinaga ha do holene í hegola ti embeda howa bayale haga hene.

Iba dalu puyaburu ibirangi ti bayale helonaga bira do holene anda íni hariligoni.

Ti ni poboyogo nahelonaga íni ho ge haga kegoni.

Agali ko biaga karunaga miniha tandaga holene timbuni hongoheore ngagome puyabu hongoheme wai pabe podope nahagagobi halu

dindi ko gaea hangu biaho wiaga ngagoha ni hongohe dedaligobi dalu bida.

Anduane Homogo ína agali waitigi bu karunaga ne hariga hangai harigoni.

Tigua ga lalu bi ko lalu kago wahalu bi nale haga.

Ni hongohe dedago beralibame ge haragola gumba hagagobi í kegoni.

#### *Anduane Homogohanda Hari Saiononi tomo manda manda bulebirago ogo*

<sup>6</sup> Anduane Homogo Hongo Haiheore kagome Hari Saiono ogoriani tomo timbuniore dawa wulebira. Ibugua nogo sibi bulumaga egarubi bayaleore tara tara dawa wialu waini iba bayaleru hambu wulebira. Ani bidagola wali agali dewaore dindi tara tara ngaruha howa tomo uruni nole íbu ngoai holebira. <sup>7</sup> Ogoriani wali agali dewaore dindi tara tarani ti ala bu miniha genda timbuniore yu hagahaga bu henedaru tinaga genda uruni bibahende ogoningi Anduane Homogohanda ti dara howa mo ereba hai helolebira. <sup>8</sup> Anduane Homogo Bibahende Haru Haame Ho Haga kago ibugua homolenebi mo ereba hai haragola lone homolene nawulebira. Ibugua wali agali bibahendenaga dugu bulene ngago mo ereba hai halu tinaga de iba domo wahai holebira. Ani bialu ibunaga wali agali dindi bibahendeni bu karu tinaga taga holenebi tandaga nolenebi ngaru mo wahai holebira. Anduane Homogo ibunioreme ani bulebero laya.✧

<sup>9</sup> Mbirale uruni tagira ibirangi wali agali bibahende karu tigua ogodagua lolebira, Anduane Homogo ibu inanaga Ngode Datagaliwabeore kagoni. Iname ibuhondo mini mbiraore wuwa ibuha hana ho hemagola ibunime ina mo wialu haru dai bini. Ibuni hangu Anduane Homogoore kagoni. Ai iname ibuhondo mini mbiraore wirimagola ibugua ina pele ngialu haru dai biyagonaga turu timbuniore ho kamagoni, lalu holebira, lene.✧

#### *Anduane Homogohanda Moaba dindi mo ko holebira lenego ogo*

<sup>10</sup> Anduane Homogohanda Hari Saiono de hondo mamage halu ai Moaba wali agaliru tinaga waitigime belo ibu handaya ho holebira. Nogo bulumagame tininaga ti to wini ngagoha datani hingedape hagadagua Moaba wali agali tinaga waitigirume ibalu bo hingedope hai holebira.✧ <sup>11</sup> Ani biragola Moaba wali agaliru ti iba hanuni yu wahenego angeha dolo dai bule hongo howa dolarilidagua bialu holebira. Ani bialu karia Anduane Homogohanda ti ala mine hayagonaga pani mialu ti mo taga halu dindiha ibira holebira. <sup>12</sup> Ibugua tinaga ege pabe daligaore hongohe bu heledaru bo giallo wahai halu podo bagabu ibira hai helolebira, lene.

✧ 25:2: Ais 21.9, 23.13, Yar 51.37 ✧ 25:8: 1 Ko 15.54, Mo 7.17, 21.4 ✧ 25:9: Pig 49.18, Iba 20.5, Ta 2.13 ✧ 25:10: Ais 15.1-16.14, Yar 48.1-47, Ese 25.8-11, Amo 2.1-3, Seb 2.8-11



## 26

*Anduane Homogohanda ibunaga wali agaliru wayali helolebira lenego ogo*

<sup>1</sup> Horo mbira tagira ibulebirago ogonongi wali agali Yuda dindiha holebirarume ibagana ogo lolebira.

Inanaga tano hongoheore ngama.

Ngode Datagaliwabe ibunime tano ogoninaga wai pabe mo hongo haga kagoni.

<sup>2</sup> Wali agali mana bayale tigabi biaga karu anda ibilo✧

tanonaga pabe panga timbuni payatagi hene karu dugua hadaba.

Wali agali uruni ti mini bilinahe howa

Anduane Homogo andaneha haabo hayaru anda ibilo.

<sup>3</sup> Anduane Homogo-o í andaneha haabo haga karu✧

tinaga mini íha hongohe pagaho haga ka.

Ani kagola ína tinaga miniha mo palia holene miaga ke.

<sup>4</sup> Anduane Homogo ibu inanaga ha do hagane anda kagoni.

Ibu ani haabobo holebira.

Ani kagonaga iname ibuhondo mini mbiraore wu haabo holene nga.

<sup>5</sup> Anduane Homogohanda wali agali mine haga heneru ti mo dindiho heledagoni.

Tinaga tano hongohe ngago ibugua gialo hole bialu

dindini haealabaga bu ngelai haga ka.

<sup>6</sup> Wali agali maru bu hearume yagibano hearu mo ko hayagola darabi uruni ti mbirale mbira nawiore hene.

Yagibano uruni tigua tano bo gialapaya bini bu wiaru áyu hangedalu pialu ka.

<sup>7</sup> Wali agali bayale karume hariga pialu helo✧

Anduane Homogo-o ínioreme hariga ogoni mo tigabu wiaga ke.

<sup>8</sup> Anduane Homogo-o ina bibahende ínaga mana lo ngedagua talialu ibule eberemagoni.

Iname í handaya howa dunubia ho kamagoni.

Íni mini lene timbuniore kego hame lalu kama.

<sup>9</sup> Mbiragabi ínaga gubalinioreme í hangu mitangi biaabo haruli.✧

Ína wali agali dindini karu ti godini dabaki beregola

tigua ínaga mana tigabi ngegome dabaganego ogo aleda lalu manda bulebira.

<sup>10</sup> Ína wali agali ko biaga karu ti dara hariligoyu

tigua ínaga mana tigabi bulene ngaru moya nabi holebira.

Ti wali agali tigabiwi karu baba mandagi howa dege

tigua mana ko ngaru bialu haabo haga ka.

Tigua ínaga mana bayale tigabi ngegobi hongo timbunihe kegobi mitangi nabi howa

íni andaneha holenegobi mangaore haga ka.

<sup>11</sup> Anduane Homogo ína wali agali ko bu karu pani mule ínaga gi dogola amu ho kegoni.✧

Í ani bu kegoni tigua de handa nabi ka.

Anduane Homogo-o ínaga wali agali bu karuni ínime biamogo biaga kegoni ti hendelo mo walia habe.

Anidagua beregola mana ko biaga karu ti taga timbuni holebira.

Ínaga waitigiru bo delole ira timbuni dela manda manda bu wirigome

ína wali agali ko biaga uruni dai helo.

<sup>12</sup> Anduane Homogo-o ínaga wali agali bayale hangu holomaya bayale holene ína ibilaga kegoni.

✧ 26:2: Ais 45.25, 60.11, 60.18, 60.21, 62.1-2 ✧ 26:3: Ais 27.5, 57.19, 66.12 ✧ 26:7: Iba 27.11, Ais 42.16, 57.2

✧ 26:9: Iba 63.1, 63.5-6, Ais 55.6, Lg 6.12 ✧ 26:11: Hi 10.27

Iname mbirale bibahende bayale bigi birimaru  
 ina biamogo birigola birimagoni.

<sup>13</sup> Anduane Homogo inanaga Ngode Datagaliwabe-o  
 agali haguane tara henerume ina handaya ho henegoyu  
 ini hangu inanaga Anduane Homogo timbuniore kegoni.

<sup>14</sup> Ayu agali haguane uruni tini mbira ha nabi homai hayagoni  
 manibi ti lone heya nabulebira.

Ina tinaga hongo heago bope halu  
 ti mo ko howa bo ereba hai helarigoni.

Wali agalime abogo hene lalu mani tinaga mini manda nabulebira.

<sup>15</sup> Anduane Homogo-o inime inanaga dindi tubari mo yanga lalu mo timbu harigoni.  
 Anidagua birigome ininaga mini timbuni mini leneore helarigoni.

<sup>16</sup> Anduane Homogo-o inaga wali agali bu hearu pani mialu barigola  
 tigua ini heria dara holene heba ibalu inihondo bi layagoni.

<sup>17</sup> Walime gali taba honole tandaga nalu pedere biagadagua  
 iname genda tandagala timbuniore nalu howa pedere bialu harimagoni.

<sup>18</sup> Tandaga ogoni narimagoyu iname mbirale bayale mbira tagira naibiya.  
 Waitigi hearu tinaga hongome ina bope hayago  
 inanaga dindi ogo iname mo bayale habe nahe harima.

<sup>19</sup> Inanaga damene homayaru ti mani lone heyu holebira.

Tinaga tingini heba heyu holebira.

Ayu homaliha padaruni tigua dengalalu heyuwa  
 mani turu halu kulo holenenaga iba gana lalu holebira.

Dindi ko yobi ngagoni mbiraga dadimba ibiragome datani mo gomba haragola anda  
 hagamaga

Anduane Homogohanda homene uruni tinaga holene lone miadai bialu mo heya hai  
 holebira,

lalu iba gana ogoni lolebira, lene.

*Anduane Homogohanda ibunaga wali agali pani mialu lone mo bayale holebero lenego  
 ogo*

<sup>20</sup> Inaga wali agali bu kamiru ti tini andaga anda puwa panga payatagi ho biralimu.  
 Anduane Homogonaga lembo holene ngago ereba helotagi ti ani bira do halimu.

<sup>21</sup> Anduane Homogohanda wali agalime ko biyarunaga pani mule ibuni dalu dahuliya  
 andaga wahalu dindini dalialu ibiragoni. Ani ibiragola wali agali bo wahenerunaga  
 darama dindime mo do habe naheore wulebira. Wali agali ohowa homelo bo wahaga  
 biyaru mo pana hai holebira.

## 27

<sup>1</sup> Horo ogonongi Anduane Homogohanda ibunaga hongo timbuni walia halu puya  
 timbuni mini Lebiadana solowaraha wiaga ngago mo ko howa minu bolebira. Puya  
 timbuni ogoni baragola biru beregeda beregeda bialu ibida piagago Anduane Homog-  
 onaga ayu tibu ne gadele ngagome dibalu dibu budubaga bulebira.\*☆

<sup>2-3</sup> Horo ogonongi iba gana ogodagua lolebira,

Gerebi mabu bayale ngagonaga iba gana lolene nga.

I Anduane Homogo kogo inime mabu bayale ogoni handayaho haruli.

Mabu ogoni inime iba mialu haabo haruli.

\* **27:1:** Lebiadana ogoni mbuga maruha ibu abagua ale nga lalu gilibu nga. Maruha ibu iba ibia ale gibi hiriribi  
 beda lalu gilibu nga. Yobo 41.1, Iba Gana 104.26 de handabe. ☆ **27:1:** Yob 41.1, Iba 74.14, 104.26

Mbirali ko biaga kagome ibalu mabu ogoni mo ko holilono mbiraga horombebi inime mamage haabo haruli.

<sup>4</sup>Áyu ina gerebi mabu ogonihondo keba nahe ko.

Mabu ogoniha bolage mamunali aniheru anda kale ina uruni minu dugu wahalu datani ko uruni dai helo bibahende irane delole kole.

<sup>5</sup>Inaga wali agali waitigi uruni tigua ina ti handayaho holiya hame layagua ti ini koria ibalu i heba bayuwaore hole lalu bi lowilo, Heneneore ini heba bayuwaore hole, lalu bi lo wilo hameledo, lalu Anduane Homogohanda lene.

<sup>6</sup>Horo maru mani ibulebirago ibirangi Yagabanaga aguanene Isaraele wali agali karu ti gerebi pini hongohe puwa irane anda halu lini dole pabua balu lini dewa dagagobi holebira. Tinaga ginigene kagome wali agali dindi bibahende bu karu mo bayale hai holebira.

<sup>7</sup>Anduane Homogohanda waitigi bu hearu mo ko halu bo wahaiore hayadagua Isaraele wali agali bo wahai nahene. Ani bialu waitigi biaru dewaore homayadagua Isaraele wali agali uruni nahome emene maru dege homene. <sup>8</sup>Anduane Homogohanda ibunaga wali agali garabaya piyagoha pani timbuni nalu helo mo mini. Ibugua ti baba keba timbuni halu ni tagira ibiragoha howa puyabu timbuni hongoheore ibalu datani mbirale ngaru hilo yalu piai hagamadagua ibunaga puyabu hongohe ibilalu ti hilo yu piai helene. <sup>9</sup>Anigo Isaraele wali agali tigua bia ko hene ngago damene mo tiga bule hamelo heagua nde tinaga dama mitangi bialu gime wabini ngarunaga lomabu delaga dabu bu ngeledago bibahende bo gialalu dambu gingirulo wahalu be abalu helolene nga. Ani bialu wali dama beda mitangi bialu gime wabini mini Asera laga irani bage buwa bigiya wabu heledarubi dibu gabu dangiala bagabu wahai halu ibunaga lomabu delaga dabu ngagobi ira hagua ngabilo inisenesi lomabu delaga dabu bu ngeledagobi bibahende bo gialabagabu wahai holene nga.

<sup>10</sup>Tanonaga wai pabe hongohe bu mabubi abale wini biago áyu bo gialahole bu wahenego dindi hangu nga. Ani bialu bameore wali agali mbira nahe dangi hangu wiagimbu bidagoni. Ani ngagoria nogo bulumagaru ibalu datanibi ira emene karunaga yunirubi naga bialu ti nabe manga bira handala u palu ngoai haga ngagoni. <sup>11</sup>Ani bialu ira uruninaga magane karu gabu halu podo ibira haragola walirume ti ira delole ilu yu pugu biaga. Tano ogoniha wali agali hagaru ti manda bulene manga howa mine halu hearia Ngode Datagaliwabe ibu ti wabiaga ibugua ti dara nahe howa biamogo nabulebira.

<sup>12</sup>Horo ogoningi Anduane Homogohanda o biyadagoni bialu ibunaga wali agali dindi tara tara ngaruha karu bibahendeore uyurahayagi iba Yuberedisi poragoria howa pialu unurahayagi Iyibi dindila tubari ngagoria pupe halu bibahende haru dai biai holebira. Agalime widi lini dowa aeane wahai halu lini bayale noleneo ibuni do wiagamadagua wali agali bayale kago dabalulu mbira mbira haru dai bigi bulebira.

<sup>13</sup>Horo ogoni ibirangi Isaraele wali agali darabi bu hearu bamba waitigime Asiria dindihabi Iyibi dindihabi garabaya bu yalu pu hene karu ibilo mbelo biguli hongo howa pu lalu ololebira. Ani olaragola ti lone Yarusaleme dai bialu Anduane Homogo ibuninaga hari loma bia hene kagoria ibu howa ibu mitangi bialu lotu lalu holebira.

## 28

### *Anduane Homogohanda Samaria tano mo ko helolebira lenego ogo*

<sup>1</sup>Isaraele wali agaliru Samaria tano baya gibi ngagoni Anduane Homogohanda mo ko holebiragodago daraba. Dindi ogonaga agali haguane karume waini iba dewa nayagome luluyu howa tininaga mini yaraga halu lalu, Samaria inanaga tano ogoni hongohe ngagoni, laga. Dindi bayale mabu dege dombeneha wialu palawaya tara tara

bayaleore dedago dalu agali haguancerunaga mandani yári bu howa lu nahe abale yogo bialu gau lagadagua tano ogoni mo ko hai holebira. <sup>2</sup> Anduane Homogohanda waitigi hongohe mbira tano ogoni bope helonaga manda mandabu heleda. Waitigi uruni ibirangi puyabu hongohe iba dalubi dalu dindi gunibi taraore ibiradagua bialu ibuwa dindini bo gingirulo бага bialu ibira ibira bilolebira. <sup>3</sup> Tigua ani bialu agali haguanceru lulu iba nalu howa tininaga mini yaraga haga karuni tinaga tano heba waitigi urunaga geme hingedalu pu íbu bulebira. <sup>4</sup> Agali haguane biaru ti mine hayagonaga palawaya ale bayale dedaligobi yogo bialu ko haralidagua mo ko helo ngagoni. Poge lini ala pigane denego ibirayadagola agalime do nagadagua ti abale mo ko halu bo gialobagabu waholebira.

<sup>5</sup> Horo ogoningsi wali agali emene yu waheneru Anduane Homogo Hongo Haiheore kago ibugua tihondo turu halu holebira. Anduane Homogo ibuni kininaga tangi ale karulalu palawaya bayale tara ale tininaga emboneni dugu bu mabu buwa yári bu holebira. <sup>6</sup> Anduane Homogohanda agali godi hale haga karuhondo mini bayale dege talebu miragola tigua godi lole ibiraru bibahende mana tigabi ngagoria howa tale bigi bulebira. Waitigi karume tanoha wai bima anda ibulene henge nawilo ibunaga ami karu gi nahelo tihondo hongo timbuni mulebira.

*Loma binigo mo miaga hearubi mana latagi haga hearubi tigua Aisaia mege binigo ogo*

<sup>7</sup> Loma binigo mo miaga karubi mana latagi haga karubi tigua waini ibabi mbiabi dewa nalu howa lulu timbuni yu halu tigabi ndo ibagabu haga ka. Tinaga miniha mo luluya kagola tigua biabe tigabi bulene ngaru nabiaga ka. Mana latagi haga karume Ngode Datagaliwabehanda mbirale mbira mo walia harago baya hangu nahandaga ka. Loma binigo mo miaga karume luluyu howa wali agalinaga genda lamule yalu ibiraruni ogo aleda lowa manda nabi haga ka.

<sup>8</sup> Tini bereagoria tebolo dagia ngaruni mbiraha bayale nawi magu tagu payapaya bidagome goba hai kagola ngu engengebiore ngelaga ka.

<sup>9</sup> Tigua inaga bi hale howa bi ogodagua laga ka. Agali ogoni ibu ai lawai hagago kabe. Iyunaga bi uruni aiwa hale helo lawai harabe. Ina waneigini áyu dege aiyu andu wahene ale ndo kamagoni. <sup>10</sup> Ai bibahendengi ibugua inahondo ogodaguaore bidaba lowa mini nawi waneigini biawai hagamaga halu bi mbira mbira ogoore labe duguni mbira mbira ogoore labe galone ogonagaore labe lalu haabo kagoni, laga kagoni, lene.

<sup>11</sup> Tigua inaga bi larogo hale naharamigodago Ngode Datagaliwabe ibugua wali agali dindi taranaga bi hale nahene karu mana lalu lawai holebira. <sup>12</sup> Anduane Homogo ibunime ibunaga wali agaliru miniha hada paya buwa gi nahe turu haga bu dindi ogoniha helayagoni. Maru manga halu erekui biraru erekui dogo lalu dindi ogoniha halimu laya. Ani layagola tigua bi ogoni hale hoa nahe harimigoni. <sup>13</sup> Ogonidagua biyagonaga Anduane Homogo ibunime baya hanguore ngadagua waneigini lawai haradagua bialu daga mbira mbira lalu bi mbira mbira ngadagua baya hangu labe lalu agalime waneigini lawai hagamaga lawai holebira. Ani bialu howa koore handa walia holeberemi. Tinaga waitigi karume ibalu dindi mendeha garabayabu yalu polebira, lene.

*Anduane Homogohanda, Saiononi ege tole dunini mbira anda gene honghe heledogo, lenego ogo*

<sup>14</sup> Agali haguane wali agali Yarusaleme ogoriani haru haga kamiru-o Anduane Homogonaga bi ogo hale hadaba. Tigua manda bialu kamiria Anduane Homogonaga bi ogoni bame galone nawida lowa <sup>15</sup> ogodagua lagaya. Ina Homa baba habo nalolene bi pongobo wialu Humbirini andagani bi lo ngamagome inaha mo ko holene nawulebira. Inaha mo ko holene tara tara anda ibiyaguabi inaha ke halu mo hondo holenebi yu

✧ 28:11: 1 Ko 14.21

kamagome inane pele ngiragola yo pialu puwa bayaleore holeberema lo manda buwa mini mbiraore wu kama lalu haga kami.

<sup>16</sup> Anigo Anduane Homogo Bibahende Haru Haame Ho Haga kagome ogodagua leda. Hale haramine. Ina Saiononi ege tole dunini mbira anda gene helo heledogo. Ege tole ogonime ibu bayaleni hongoheore howa anda hongohe helo mo hongo holebira. Wali agali ibuhondo mini mbiraore wu karu ti mogo lalu gi naholebira.\* <sup>17</sup> Ina mana tigabi buleberogome tigua mana bayale bulene ngagonaga ogobi labolabo helonaga bialu henene lolene ngagome tinaga henene lolenela ogobi labolabo helonaga ngo. Tigua manda bialu kamiria tinime ke halu biaga mana ngamigome tini yo pialu bayale holeberemabe tobaho kamigo. Ai ina tiha mo ko holene ibiloleberogo ogoni iba li ibiradagua bialu ti hilo yalu piyai holene ibiragola tini bira do holenebi ha do holenebi mbira nawulebiraore. <sup>18</sup> Ani buwa tinaga habo nalolene bi bamba Homa baba pongobo wirimigo ina mo habo lalu Humbirini andagani bi lo wirimigobi mo wahai halu ereba helolebero. Aniore bialu mo ko holene dewaore tiha ibilarogola ko mangabi ndelehe handalu holeberemi. <sup>19</sup> Mo ko holene urunime ti yupe nahe yani haho wiaabo holebira. Mo ko holene genda uruni horombe mbiragabi mbira ibugu bialu ti kamigoha ibaho wiaabo holebira, laya.

Ani layago ai tigua Anduane Homogonaga bi ogoni hale howa irane handa walia harimiyagua nde tini mogo lowa duru lalu habehe kamigoni.

<sup>20</sup> Mbiralime mbiraga u palue bialu karia dagia emene tubagini paluwa ge bolangua halu balangiya dambi hagane emene ko hangu yu paluwa tingini dambi hai nahabehedagola u napale yangeyangebu hagamadagua ti holeberemi. <sup>21</sup> Anduane Homogoibunaga hongo timbuni heba ibalu abale Hari Perasimihabi Gibeono dindi uliuli wiagohabi ibinidagua ibulebira. Ibalu ibunaga biabe bule winigo biragola tigua handalu kamiria ibunaga biabe ogoni taraoredane hondoleberemi.\*

<sup>22</sup> Aniore bule ngago ai tigua Anduane Homogonaga bi nahabane bu hinalu kamigoni wahalimu. Wa naharimiyagua tiha mo ko holene gendabiore wulebira. Anduane Homogo Hongo Haiheore kagome bi hongo howa lalu dindi ogo bibahende mo ko halu bo hilo waholebero layuane hale howa langero, lene.

*Agalinaga mini gigabi bayale ngaru Ngode Datagaliwabeha howa ibini ngago ogo*

<sup>23</sup> Tigua hale mia howa ina bi galone langerogo bayu hangu hale halimu. <sup>24</sup> Agali mbirame tomo hongole lowa dindi alu wiyagua dindi hangu ona alu wuwa tomo hanga nabi wahagabe. Anidagua nabiaga ndobe. <sup>25</sup> Agalime dindi baya hangu alu wuwa nde tomo mo dende bia hagane tara tararu anda helo hangagago ndobe. Ibugua widi duguni tigabu hangalu balibi nde ibuni hongolene ngatoria hangagane. Ani bialu mabu leneleneha widi ale maru ngaru hangai haga. <sup>26</sup> Agalime tomo hongolene manabi tomo bulene manabi bilo Ngode Datagaliwabe ibugua biawai hene. <sup>27</sup> Tomo mo dende bia hagane tara tararu hangayarunaga lini boga biai halu do nolene tu haragola agalime ira pelene mbalape ngagome lini bogabi dedago dambu wahaga ndo. Tomo mo dende bia haganenaga lini dambilo nogo bulumagame ira pelene mbalape ngago gililo yu ibaga biagadagua bilo helaga ndo dege. Agalime kango emene mbira yuwa ogonime ira lini emene dedaru do ibira helonaga linini pogolobaga biragola do ibira haga. <sup>28</sup> Widi linime balawa wabule lowa baya hangu dambu tagadabaga biaganego mana manda bu ka. Nogo bulumagame ira pelene mbalape ngago gililo yu ibaga bialu widi dambialu kangi widi hengedo tagadabaga buwa mo ko holilono agalime baya hangu handayaho haga ka. <sup>29</sup> Manda bayale uruni bibahende Anduane Homogo Hongo Haiheore kago ibuniha howa hangu ibinigo nga. Anduane Homogo ibu mini gigabiwi howa ibugua manda manda bu wini uruni bayaleore wiaabo holebira.

\* 28:16: Iba 118.22-23, Lm 9.33, 10.11, 1 Pi 2.6 \* 28:21: Yos 10.10-12, 2 Sml 5.20, 1 Bit 14.11



## 29

### *Yarusaleme tanoha ko holene timbuniore anda ibulebira lenego ogo*

<sup>1</sup> Anduane Homogohanda lalu, Yarusaleme íore inaga lomabu delaga dabu ale wirigoni ai íha mo ko holene wulebira. Debidi ibu kini heangi Yarusaleme tano íha howa hayagonigo ai áyu í mo ko holebira. Anidagua bulego mali mbira kira agima ala pelo. Ani bialu horo dunini maru lotu laga wiyaru pu bolangua haga bilo. <sup>2</sup> Ani piái kagola Anduane Homogo inime íha genda mo yu anda ibulebero. Í inaga loma biniru bo delaga dabu ale wia ngegonigo ai mani ga lalu dugu bulebere. Lomabu delaga dabuni darama tolo wiagadagua í daramame dohe wulebere. <sup>3</sup> Ina inaga waitigiru haru eberogola tigua í ho mabu bupe holebira. Tigua tanonaga pabe tagirahayagi heyu howa wai bulenaga dindi dugu yu wima irigi holebira. <sup>4</sup> Ani biragola Yarusaleme í dindini podo ibiraho ngegola dindime í bu dambi hai holebira. Ani wuwa í damame hu laradagua hu lama dalidali bialu wulebere.

<sup>5</sup> Agali inaga waitigi í baba wai bule ibulebiraru ti dewaore daga labe nahe be abalu alebi agalime widi gandulo ngelowa bo tau laragola widi aeane puyabume harini yu yigiyaga lo hagadagua holebira, lene. <sup>6</sup> Anigo abaleore Anduane Homogo Hongo Haiheore kago ibu puyabu hongohe hebabi dindi dumbirumbi hebabi hari kilikulu timbuni lalu ibulebira. Ibalu ibugua mbirale ngaru bibahende dai holene ira hongohe ko mbira hedo yalu ibulebira. <sup>7</sup> Ani biragola ami agali dindi tara tarani howa Ngode Datagaliwabenaga lomabu delaga dabu biago baba wai bule Yarusalemeni íbu hayaruni mbiraorebi naholebira. Tigua mbirale tano karulolenaga bialu hayaruni bibahende ereba hai holebira. Uruni bibahende Yarusalemeibunime emaga ko mbiraga hendenegobi tagira polebira. <sup>8</sup> Ani bialu ami agali dindi tara tara wiaruha howa Hari Saiononi wai bule ibiyaruni tigua mbirale mbira namo yulebiraore. Mbirali tomo garibi lo padaria emaga andaha tomo dewa nalu henego heyuwa handalu karia garibi laho wiagadagua bulebira. Mbirali iba noaho padaria emaga andaha iba dewa nalu henego heyalu karia iba noa halu kembobe lebolaho wiagagobi holebira.

### *Anduane Homogohanda wali agali mo luluya holebira lenego ogo*

<sup>9</sup> Yuda Yarusaleme wali agaliru-o tí áyu lulu yu haabo halu de kohe dege ani hadaba. Mbiralime waini ibaru mbiaru nowa lulu yu howa ge pu ko halu ilielo lalu hagadagua tí nane howa ani hadaba. <sup>10</sup> Anduane Homogoibunime tí de mo imula hayagola tí paliahondo hene ale kami. Anduane Homogonaga bi mana latagi halu mbiwia haga maru hearunaga de mo ndibulo waweledagola tigua mbirale bulebirarunaga de gandeba hondolene ngaru nahondolebira. <sup>11</sup> Ani bidagola Yarusaleme ina mbirale Anduane Homogohanda mo walia holebiraru de nahondolebere. Manane mbiralime mbuga mbira andane hadambihe ngialu ina dagala lolebira. Ani biragola mbirali beba dagalaga kagohondo dagala lalu ibuhondo mo mialu keria ibugua lalu, Mbuga andane hadambi hayadagome ina dagalabe naheda, lolebira. <sup>12</sup> Ani laragola ina agali mende beba daga nalaga kagohondo dagala lowa mo mialu keria ibu, I daga nalaruli, lolebira, lene.

<sup>13</sup> Anduane Homogohanda lalu, Wali agali tinaga ne hambu hangume inaga mini yaraga haga karuni tinaga bu mini ini kogoha ndo kaundia ka. Tigua i mitangi bialu lotu henene nalagaore ka. Agalime mana lowini gilibu wiaru hangu wali agali lawai halu haga ka. <sup>14</sup> Ani bialu karunaga ina tihondo mana nahendene tara mbira ngago mo walia harogola tigua mogo timbuni lolebira. Agali mini manda bayaleru talebu miaga karunaga manda bayale ngago mo waholebero. Ani bialu agali manda timbuniwi karu ti mini nawi lulu ale helolebero, lene.

### *Anduane Homogo ibugua mbira mo iriari bulebira lenego ogo*

☆ 29:10: Lm 11.8 ☆ 29:13: Ese 33.31, Md 15.8-9, Mg 7.6-7 ☆ 29:14: 1 Ko 1.19

<sup>15</sup> Wali agalime tinaga mana ko ngaru Anduane Homogonaga deni mo do howa bialu karu tiha pani nolene timbuniore wulebira. Tigua mana ko uruni ohowa bia do halu howa tinime mitangi bialu, Ina bialu koruni mbiralime handa nabi howa manda nabi ka, lo manda bida. <sup>16</sup> Tigua mo hondo halu mbirale ngaru mo beregedai haga ka. Agali todobene be dindime wabiaga kago ibuni duninibe be todobene be wabini ngago duninibe. Mbirale mbira agali gime wabini ngago ogonime agali wabiaga biagohondo lalu, Ina i wabini ndoyago, layagua bi ogoni henenedabe. Agali mbirame dindi duguwa todobene be wabialu heagola todobene be ogonime lalu, Ina mbirale mbira berego ogo ale bero manda nabioire beregoni, layagua bi ogonidagua larago waledabe.✧

<sup>17</sup> Ainde emeneore howa mbirale bibahendeore mo iriari biai holebira. Lebanonoha irabu timbuni ngaruni mani mabu hongolene dindi bayale wia aribia halu mabu hangaga dindi bayale ngaruni bibahende mani irabu timbuni wia aribia holebira.

<sup>18</sup> Horo ogoningi hale tuluhe karu tigua mbiralime mbugaha bi gilibu winigo daga laragola hale halu de kohe áyu arumaha ibagabu karu tiguabi de hondolebira. <sup>19</sup> Wali agali yagibano karubi maru tini mo dindiha haga karubi tigua Anduane Homogo Isaraelenaga Ngode Datagaliwabe baya burugule kago ibugua turu holene miragola yu holebira. <sup>20</sup> Anigo agali haguane ko bu karubi Ngode Datagaliwabenaga bi lo ngago nagalonedalo mitangi biaga karubi mana ko ngaru hangu bialu hole turu haga karubi ti bibahende mo ko halu bo ereba hai holebira. <sup>21</sup> Ani bialu agali maru godi hale howa dabaki biaga karu mbirali tigabi bialu haga karunaga bi henene larago mo wahalu ke haga karunaga bi mo wia halu lahaga bu karu tibi nde pani ogonibi dege nolene wulebira.

<sup>22</sup> Anigo áyu Anduane Homogo Isaraelenaga Ngode Datagaliwabe handa bamba horo ko wiangi Abarahama mo wialu haru dai biyago ibugua Isaraele wali agaliruhondo lalu, Ainde Yagaba aguaneneru-o ti taga halu tinaga denguiru aruma nahe holeberemi. <sup>23</sup> Ani bialu ina waneiginiru Isaraele wali agali tihondo ngerogola hondowa tigua i heneneore Isaraele wali agalirunaga Ngode Datagaliwabeore kogome mana tigabi bulene ngaru hangu biaabo haga henedane handa walia holeberemi. Ani handalu manda buwa tigua inaga mini yaraga halu ininaga andaneha holeberemi. <sup>24</sup> Wali agali maru áyu mini nawi howa luluyu ibaga bialu haga karuni mani ti mini tigabiwi holebira. Maru bi dewa lagalaga bialu inaga bi mo wahaga karuni mani inaga bi baya hangu hale halu birulebira, lalu Anduane Homogohanda laya, lalu Aisaiahanda lene.

## 30

### *Anduane Homogohanda Iyibialirume Yuda biamogo nabulebira lenego ogo*

<sup>1</sup> Anduane Homogohanda lalu, Inaga waneigini Yuda wali agali ti mine haga karuni tinaga pani nolene timbuniore wulebira. Tigua inaga mini talia nabi tinime hameledaru ale bialu dindi tara puwa mendeali karu baba nenege halu karume ani bulebira. Anidagua bialu karume tinaga ko dewaore mo wiatago halu haabo kogoni.

<sup>2</sup> Tigua inaga mini ala handa nabi puwa tiha mo ko holene anda ibirangi biamogo bilo Iyibi wali agalinaga kini kagohondo biamogo bule ibabe lama piya.✧ <sup>3</sup> Anigo tigua ogonidagua biyagome mo ko holene anda ibiragola Iyibinaga kini kagome Yuda wali agaliru biamogo nabulebira. Ogonidagua biragola tini taga emene ndo timbuniore ho holebira. <sup>4</sup> Iyibi dindini kini kagomeibunaga bi lahaga hearubi ami agali haguane hearubi tigua Yudaliru lola hole Soana tanonibi Hanese tanonibi pudaba layagola ibini. <sup>5</sup> Ibuwa Yuda wali agali biamogo nabiragola dara timbuni holebira. Iyibi tigua biamogo nabiragome Yuda wali agali tiha taga holene timbuniore mo yu anda wulebira, laya.

<sup>6</sup> Anduane Homogohanda gabua tara tara ema bialu piaga hearu dindi hobane unurahayagi wali agali nahaga wiagoha howa bulebiragonaga bi latagi halu lalu, Yuda

wali agalinaga agali haguane hearuni hariga ogoniha ibaga. Dindi ogoniha koore genda tara tara ngaru lola hagaore nga. Dindi ogoniha laionobi nogombi agali hayagabi abagua ale babaganehe yagalalu piagabi ema bialu piaga ko marubi dindi ogoniha wia dege bida. Ani bidaru gi nahe Yuda agali haguane uruni tigua tinaga dabudabu baya tara tara ngaru nogo dongi nogo kamelerunaga erekunini mo paga howa ti biamogo bulene nawi ngagoha Iyibi dindiha kini kago mo turu halu bameore mule yalu piaga. <sup>7</sup> Iyibiali tigua dindi mendealiru ani biamogo buliya lowa henene halu biamogo nabi lahondo haga ka. Ani biaga kagonaga ina Iyibiali ke haga uruni tinaga kai mini Abagua Ale Timbuni Bame Haga lo wiru, lalu Aisaiaha howa latagi halu lene.

*Wali agalime Anduane Homogonaga bi hale habe manga hagago ogo*

<sup>8</sup> Anduane Homogohanda ihondoibunaga bi ogoni wali agali koorene ko ogodagua bialu kami lalu bebani gilibu wialu ege tolenibi podowa gilibu wibe lalu langiya. Anidagua berogome bi ogoni ereba nahe wiaabo howa wali agalime ko ogobi bialu ka lalu walia helo. <sup>9</sup> Wali agali ti mine halu tinaga abaore Anduane Homogo kago manda nabiaga howa mine haga ka. Tigua ke howa ohalu bi mana bayale lawai harago hale habe manga haga ka. <sup>10</sup> Ani howa tigua Anduane Homogonaga mana latagi haga agali karume bi latagi halu kagola bi nale wahadaba laga. Iname ogo ale bidaba lowa mana lalu kamigoni langulene nawigo wahadaba laga. Ani lowa bi maru mani mbirale bayale holenenaga ndo inane hale hole hamelo kamaru ale dege langialu holene nga laga. <sup>11</sup> Ina bialu holene ngagoha ti hapai nahe kaundiaha holene nga. Iname Isaraele wali agalinaga Ngode Datagaliwabe baya burugule kagonaga mana ina hale haabo habe manga ho kamagoni laga ka.

<sup>12</sup> Ti ani laga kagoyu Isaraele wali agalinaga Ngode Datagaliwabe baya burugule kago ibugua ogodagua leda. Tigua inaga bi mana bayale langirugo mo wahowa erembira mialu ti tinaga mana mendeali mo hondo holenebi bo waholenebi ngago hangu mo tene howa ina bayale karulape holeberema laramili. <sup>13</sup> Ani larimigome tiha mo ko holene timbuni ngagome mani tini mo ko holene timbuniore wulebira. Ogoni manane gana neneni dindi emene mbira ala ibira ibira bialu emene timbu haga bialu maniore haragola gana podope hai haga nga. <sup>14</sup> Heneneore todobene be dindime wabini gingirulobaga bialu emene ko hangu ira dene hedo yabe nahebi iba emene hangu iba hambiaga uliha bape halu hambibe nahebi wiagadagua ti bibahende gingirulobaga bialu bo haealabagabu waholebira, laya.

<sup>15</sup> Anduane Homogo Bibahende Haru Haame Ho Haga howa ibu Isaraele wali agalinaga Ngode Datagaliwabe baya burugule kago ibugua wali agaliruhondo ogodagua laya. Ti bayale holenenaga hariga ogobi nga. Tini i kogoha dai bialu hendore hole ibidaba. Ini hangume ti baba ha paraho howa biamogo bibehe kogo. Inihondo yutiga bule ibidaba. Ani birimiyagua ina ti biamogo berogola ti hongohe holeberemi, lene. Ani layagoyu tinimeibunaga bi hale nahe mo wahowa <sup>16</sup> lalu, Waha inanaga nogo hosi gerai taraore yiru hinidamago. Nogo uruninaga erekunini bialu gerai lalu ibida poleberema, laga kamigoni. Tinaga hosini bialu ibida poleberema larimigoni henene degegoyu tinaga waitigi karunaga hosi karume gerai taraore laga kago urunime ti tali minulebira. <sup>17</sup> Tinaga ami agali daosini mbira (1,000) kagola ai tinaga waitigi agali mbiraoreli hangume wai hoaro lalu ibirago hongowa tinaga ami agalirume tano yu wahalu ibida piyai holebira. Waitigi agali durialime wai hoaro lalu ibiyagua wali agali bibahendeore tano yu wahalu mbiraoreli yu wanahe piyaiore holeberemi. Ani beremigola tanoha mbirali naheore bame hari neneni ira tili haradagua bulebira. <sup>18</sup> Anigo Anduane Homogo mana bayale tigabi dege biaga kagomeibunaga dara halu biamogo bulene timbuni ngago tihondo walia hole hondo kagoni. Wali agali ibunihondo

mini mbiraore wuwa biamogo bilo lowa karume turu holene handa walia holebira, lalu Aisaiahanda lene.✠

*Anduane Homogohanda ibunaga wali agali mo bayale holebira lenego ogo*

<sup>19</sup> Wali agali Yarusalemeha kamiru-o tíha dara halu dugu bulene nawulebira. Áyu Anduane Homogohanda tí dara halu mo bayale holebira. Tígua ibu olalu ina biamogo bia laramingi ibugua tínaga bi hale halu abaleore biamogo bulebira. <sup>20</sup> Áyunaga tí genda yu halimulo Anduane Homogo ibugua mo ngirago genda yalu iba hinaru garibi timbuni lo hagadagua holeberemi. Anigo tí genda yu kamingi tígua ibu tai bulene nawi ibuni tí heba mandagi howa tí biawai haga bialu holebira. Anidagua bialu kagola tígua ibu kaorego manda buleberemi. <sup>21</sup> Tí harigani pole pialu kamiria tí hariga ala handa nabini howa gi lehayagi ngago poabe be gi tigahayagi ngago poabe tobaho kamiria ibuni tínaga erembirahayagi ibalu howa lalu, Hariga ogodagua pu lalu, langulebira. <sup>22</sup> Ani biragola tínaga bi pupu wiaga dama mitangi bialu gime wabuwa ngolo silibarume para hadambi hene ko ngubi nagalone wu kamiruni yu wahalu howa lalu, Mbirale uruni ina lone de nahondolego i kogoria nawi pudaba, loleberemi.

<sup>23</sup> Tígua tínaga mabuha tomo hangalu kamigola Anduane Homogohanda iba daluru ibilaragola tomo dewa bayale anda holebira. Ani biragola tínaga tomo dewa bu payabu wulebira. Tínaga nogo bulumagarunaga tomo nolene tani dewa anda holebira. <sup>24</sup> Tínaga mabuha tani bayaleru dewa andaho kagola tígua bu manda mandabu ngelowa tínaga nogo bulumaga dongiru mabu dindi aliaga karume nalu helo karulape migi bialu holeberemi. <sup>25</sup> Anduane Homogohanda horo mbira mo ko holene ibulebira lowinigo ogoni tagira ibirangi tínaga waitigi bu karunaga ege pabe hongohe bu heledaru bibahende poda paya biai howa waitigi hearu homai holebira. Ani biragola tí kamigohayagi iba bayaleru hari nene ngagoha howa dugualu dalipe haragola tí iba nalu holene tai nabi bayale nalu holeberemi. <sup>26</sup> Horo ogoningi ege kagome ni daradagua bialu ni ibu hongoheore ibuni dalu haga ngadagua ndoore dolebira. Ninaga hongogo timbuniore horo karianaga dolene horo mbira ogoningi damaga helolebira. Anduane Homogo ibugua ibunaga wali agalirunaga genda tandaga bu ngaru mo wahai halu ti mo bayale heledangi horo ogoni tagira ibulebira.

*Anduane Homogohanda Asiria wali agaliru pani mulebira lenego ogo*

<sup>27</sup> Anduane Homogo ibuni kaundiaha howa heyalu hongo timbuni heba ibirago de handadaba. Ibu keba timbuni howa ibunaga bu miniha tandaga timbuni ho kago walia halu hagua hungula timbuni bialu kagoni. Iibunaga bi laragoha mbirale bibahende dai holene ira dene ale tagira ibaga. <sup>28</sup> Puyabu bamba helaragome mbirale ngaru bibahende iba li hongohe ibalu hilo yu piai haradagua biaga. Dindi bibahende ha hameigini tara tara bu karu Anduane Homogo ibunaga gime yu howa bibahende tandala hole bialu mo haealabaga biaga. Ani bialu wali agalinaga mini mo luluya halu agalime nogo hosinaga ne harigaha aeane mo bangabia halu tini pole manda bidagoha ndo agalime hendeho yalu piagadagua wali agali Anduane Homogohanda haru pubagi haga ka. <sup>29</sup> Ogoningi ai Ngode Datagalwabenaga wali agali bu kamiru tígua ibunime mbirale uruni birago de hondowa horo timbuni mbira tagira ibiragola turu howa ibu mitangi bialu lotu lalu iba gana laramilidagua lalu holeberemi. Tígua turu timbuniore howa Anduane Homogonaga hari kagoria marume iba gana lolenaga ngidaru mo yalu pialu howa hagagobi holeberemi. Anduane Homogo ibuni hongohe ege tole ale howa ibuni Isaraele wali agalirunaga ha do hagane anda ka.✠

<sup>30</sup> Anduane Homogohanda ibunaga bi hongo howa ladaga haragola wali agalime hale howa ibunaga keba holene ogobiore winida lalu manda biai holebira. Ibugua mbirale dai helolene ira dene hebabi puyabu timbuni hebabi iba dalu dindiguni

hebabi ibulebira. Ani bialu hari kilukulu timbuni laragola wali agalime Anduane Homogonaga keba holene hondolebira. <sup>31</sup> Anduane Homogohanda bi hongo howa ladaga haragola Asiria wali agalirume mogo lalu gi timbuni ho holebira. Ibugua gewa ale mbira yu howa Asiria wali agaliru mo ko howaore minu balu holebira. <sup>32</sup> Ai Anduane Homogohanda Asiria wali agali minu baragola ibunaga wali agali bu karu ti bibahendeme turu timbuni halu tabagebi ngidabi balu ngilingele lolene ale tara tara balu biragola urunime Anduane Homogo ibugua gewa aleme teliala pugu bialu barago lo biamaga helaga bulebira. <sup>33</sup> Asirianaga kini kago balu uliha bape halu iraha delole uli bambaore manda mandabu winigo nga. Uli ogoni unuraorebi arane yangaleorebi wa ngelowa ogoniha ira gabu manda mandabu ngeleda. Anduane Homogo ibunaga buhe lolene hongoheore ira hungu ale tagira ibaga ngago ogoni pu latagi haragola ogonime ira manda mandabu ngelayago kulu lalu dolebira.

## 31

*Anduane Homogohanda hongo walia hayagola dindi maru hongohe winiru ibira henego ogo*

<sup>1</sup> Iyibi dindiha biamogo bia lama piaga kamiruni tíha mo ko holene wulebira. Tígua handalu kamiria Iyibi ti nogo hosi dewa hinalu garo ale mini karisi hosime gili laga dewa wialu ami agaliru ogoriani heyu howa wai biaga dewa ngarume tí biamogo bulubadalo manda bu kami. Anigo Anduane Homogo Isaraele wali agalinaga Ngode Datagaliwabe baya burugule kago tígua ibuha mini dunubia nahe ibuhondo ti biamogo biabi nalaga dege kamigoni.\* <sup>2</sup> Ibuni mini gigabiwi kagome ibugua wali agali ko biaga karuhondo mo ko holene ngaru anda ibilolebira. Anduane Homogohanda horo bibahendengi bule lowiniru biaore biaga kagome agali ko biaga karubi uruni heba mandagi ibagabu haga karubi bibahende baba wai bulebira. <sup>3</sup> Iyibi wali agali ti Ngode Datagaliwabe ale ndo wali agali bu karubi dege ka. Tinaga nogo hosi wai biaga karu ti nde mende hongo tarahe ale ndo hosi maru karubi dege kagoni. Ai horo mbiru Anduane Homogohanda ibunaga hongo timbuni walia halu gi dogolo amu harangi hameigini hongohe maru biamogo biaga karubi hameigini maru hongo nahe biamogo bini karubi bibahende tanabi mo ko halu bo ibira hai holebira.

<sup>4</sup> Anduane Homogohanda ihondo ogodagua langiya. Laiono gabuame nogo sibi mbira bo yu puwa nalu karia sibi haru haga dewalime puwa laiono bo talu pelalu nogo sibi gingila mule lowa pa lalu haga. Ani bialu karia laiono biagome agali dewaliore ibinidagola ibu gi halu nogo sibi yu wahalu napiaga. Ogonidagua dege Anduane Homogo ini Hongo Haiheore kogome Yarusaleme tano Hari Saiono kagoha wai bule íbu kogola mbiralime ihondo nabibe lowa hapai naholebira. <sup>5</sup> Egarume tinaga igini habane ngaru daliga yagalo yu ibaga bialu howa mamage hagamaga agalime inaga Yarusaleme tano mo ko halu bo giallo hole nabilo Anduane Homogo Hongo Haiheore inime mamage baya hanguore holebero. Inime ibu handayaho haabo holebero, laya lene.\*

<sup>6</sup> Aisaia ibugua lalu, Isaraele wali agali tíore Anduane Homogonaga bi mo wahalu mine hagaore kamiru mini beregedalu ibuni kagoha dai bilimu. <sup>7</sup> Anduane Homogo ibulene horo kaware ngago ogoningsi mbirale ngolo silibarume wabuwa dama laga wu kamiruni yu wahai halu dai buleberemi. Mbirale uruni tininaga gime wabu wirimigome ko timbuore bialu harimigoni ndobe. <sup>8</sup> Anduane Homogohanda bi ogodagua lara. Wai biagane ayu tibu nene gadeleore mbirame Asiriali baba wai bialu Asiria wali agali bo waharagola ti ibida polebira. Ayu tibu wai biaga ogoni agalinaga ndo. Anduane Homogo inime wali agali dindi ogoniha pelolebero. Ayu tibu ogoni handalu Asiria

\* **31:1:** Ais 30.2, Ese 17.15, Dan 9.13, Hos 7.7      \* **31:5:** Bi ogoni ledadagua Anduane Homogohanda Yarusaleme baya hangu handayaho haga. Wali agalime mine howa ibunaga bi mo wahayagua nde 31.4 ledadagua Yarusaleme íla wai bibiya laga. 31.1-3 handabe



wali agaliru tinaga dindi wahalu dindi mendeha ibida pugu bialu karia tinaga igiri daliaheru dindi mende uruniha garabaya biabe ale bialu helolebira. <sup>9</sup> Ani biragola tiha gi holene timbuniore ngagola tinaga tano hongohe ngaru gialohole bulebira. Ina wai bulenenaga manane walia halu pelagi helarogola hondowa Asiriali ami haru haga karume hondowa mogo lalu ibida piai holebira, lalu Anduane Homogohanda bi ogodagua laya. Anduane Homogo ogoni mitangi bialu wali agalime Yarusalemeha Hari Saiononi howa lotu laga. Ogoriani ibunaga mbirale loma biniru bo delolene ira hongoheore daho wiaabo ka, lalu Aisaiahanda lene.

## 32

### *Kini bayale mbira ibulebira lenego ogo*

<sup>1</sup> Hale halu manda bidaba. Horo mbiru kini mbira ibulebirago ibugua henene hangu lalu tigatiga dege bialu haru holebira. Ibunaga agali hagueneru tibi mana bayale tigabi ngadagua bialu wali agali haru holebira. <sup>2</sup> Ani bialu agali haguane mbira mbirame wali agali ti biamogo bilo hangu hangu ibugu biragola tigua baya hanguore biamogo bigi bulebira. Agali haguane uruni ti iba dalu puyabu hongohuru ibiragola bira do hagane bododalu haradagua bulebira. Dindi ko ni daho wiaabo haga dindi yobi titaule ngagoha agali haguane uruni ti iba gagahe poradagua bialu holebira. Tigua dindi ogoni aleha howa agalime ege tole timbuni kagoha gumba handa walia howa ni poboyogobi dedaruni nade mbaule embedaho hagadaguabi holebira. <sup>3</sup> Ani howa wali agalinaga de ko nahe howa deme baya hangu handalu hale tulu nahe howa haleme bi baya hangu hale holebira.\*

<sup>4</sup> Agalime mini nawi howa mana ta nabi bupebe biaga heneru ai ti baya hangu minime bayale kola tale bialu holebira. Agali maru bi libilaba lowa la ko haga henerume baya hanguore lalu holebira. <sup>5</sup> Ani bialu howa agali ko karunaga mini yaraga halu mana ko lulu ale howa bialu haga karubi mini lene lalu kamiruni bibahende ereba hai holebira. <sup>6</sup> Agali mini nawi lulu aleme mana ta nabi bialu haga urunime bi ko hangu lalu mana ko ngaru dege manda bialu haga ka. Tigua bi ko laragomebi mana ko biragomebi Anduane Homogo yo handalu wali agali tomo garibilo karubi iba noaho karubi mbirago nelu natalebu miaga koore ka. <sup>7</sup> Agali ko uruni tinaga mini ko howa emboneha wu tole ka. Anigo tigua minime yagibano karu mo hondo howa tinaga dabudabu ngaru ti mo yulebi agali koale karu bime bope holenebi uruni ale bulenenaga dege wai hanalu haga ka. <sup>8</sup> Anigoyu wali agali bayale mini lene karume mana bayale dege bialu howa tigabi holene ngarunaga mo hongo haga ka.

### *Walirume dara howa dugu bulene ngago ogo*

<sup>9</sup> Yarusaleme waliru-o tigua manda bialu kamiria ti bayale awadaga birulumabe tobaho bedamibe. Ani ndoyago baya hangu hale kulu mia howa inaga bi o larogo hale hadaba. <sup>10</sup> Ayu karulapego ani turuho hadaba. Mani howa ege halene (13) dene (14) agima poragola nde tinaga pu mbira mini gerebi ira olibebi ogonime lini da nabiragola mogo lalu gi howa duru lalu holeberemi. <sup>11</sup> Ayu ti bayale howa mini dindiha nape awadaga ogonibi dege holomabe tobaho kamigo ai duru lalu gi ho halimu. Tigua aga bayale bu kamiru golo wahowa dara ho ko lalu walia holenenaga aga ngaru bia aribia hadaba. <sup>12</sup> Ai tinaga mabu e bayale wimiru uruniha gerebi irane bayale hengemirubi bibahende dugua hai hayagonaga dara howa gime galu kunini balu gi haguani yuwa dugu bidaba. <sup>13</sup> Inaga wali agalirunaga dindi bayale biago mo ko halu labu hai heagola datani koru mamunali aniheru ibalu ho aribia hayadagonaga dara howa dugu bia hadaba. Heneneore anda bayaleruha paliaga harimiru mitangi halu hama tano bayaleni ti turuho haramiligo mitangi bialu dara howabi dugu bidaba. <sup>14</sup> Irane

\* 32:3: ogoni 6.9-10 howa ngago handabe.

tano ogoniha wali agali dewaore tinaga biabe bule pu íbu daibu bialu haramilidagua naholeberemi. Bi laranebi mbira hale naholeberemi. Ba dindiore wulebira. Kini andagabi ami agali karunaga wai pabeanda hongohé karubi amime mamage haga anda timbuni karuhabi uruniha mbira yu wanahe mo ko howa bo gialobaga biragola dindi hangu ibira holebira. Ani ngagola nogo dongi gabua karu dindi ogoniha palu ngoaiho halu nogo sibirume datani dindi ogoniha nole íbu ngoai holebira, lalu Aisaiahanda mbiwia hene.

*Anduane Homogohanda ibunaga wali agali mo bayale helolebira lenego ogo*

<sup>15</sup> Anduane Homogohanda ibunaga Dinini inaha lone ibilolebira. Ani birangi dindi yobi ko mbirale anda nahabehe ngaruni mo ibane berela haragola tomo tara tara ngaru anda hai holebira. Mabu hangaga ngaruha tomo mbirale bibahende anda haghaga bialu taraore wulebira. <sup>16</sup> Mana bayale tigabi bulene hangu dindi bibahende wiai holebira. <sup>17</sup> Mana tigabi hangu biragome gi nahe hada payabu holene yu anda ibiragola wali agali ti elahe howa hongoho haabo holebira.

<sup>18</sup> Anduane Homogonaga wali agaliru ti tininaga dindiha turu hagabu kagola tiha mo gi holene mbira nawi bayale holebira. <sup>19</sup> Ai ti ani kagoyu irabuha iba dalu puyabula hongohé ibalu dindiguni timbuni ibira halubi ira timbuni bu karuni podopaya bulebira. Tanoha anda timbuni bu karubi podope howa dindini langulobagabu wulebira. <sup>20</sup> Anduane Homogonaga wali agali tí t́ni dindi mabu bayale ngaruha tomo hangarimigo bayale anda helo iba karulape biruwa t́naga nogo bulumaga dongiru t́naga dindi bibahende tani bayale andaho karu minana nama ibagabu holebira, lalu Anduane Homogohanda laya lene.

### 33

*Wali agalime Anduane Homogohondo biamogo bia lalu bi lenego ogo*

<sup>1</sup> Dindi mende baba wai bialu mo ko haga kamiru tíha mo ko holene wulebira. Áyu tí mo ko nahe ha kamigonigo ai t́gua hongoho howa dindi mendeha karu balu bo giala holebu wahaga hongo wirimiruni ibira halu biba hayagoni ndobe. Ai t́niha mo ko holene nga. T́gua henene letingi howa habo nalolene bi lo wirimiru pugualu wali agali uruni waitigi karunaga giha mo yahaga kami. Heneneore marume ti mo hondo nahagago t́gua maru karu mo hondo haga beramiligo áyu maro bulebira. Ani biradagola t́naga waitigirume dehe howa tí mo hondo halu minu mulebira.

<sup>2</sup> Anduane Homogo-o ína ina mitangi bialu dara habe. Inanaga mini íha paga howa dunubia ho kamagoni. Genda inaha anda ibuligo ína horo bibahendengi baya hangu handayaho haabo habe. <sup>3</sup> Ína ti baba wai bule manda berego hale halu agali dindi tara taraha wai biaga hongohé bu karume ibida bilibulu lalu pugupugu biaga ka. <sup>4</sup> Ani pialu tinaga dabudabu yu wahalu poraru agali marume abale íbalu pagaya ale wabuni ibuwa mabuha tomo hengedago aube tobane abale nai hagamaga mo yalu piai holebira.

<sup>5</sup> Anduane Homogo ibu mini lene gibi daligaore kago ai ibugua bibahende ngarubi karubi handaya ho kagoni. Ibunaga dalu Yarusalemeha howa mana tigabi bayale hangu bialu holeneme tolai helolebira. <sup>6</sup> Ani buwa ibugua ibunaga wali agali kamiru hongohé halimulo mo hongo halu holebira. T́ bolangua halu mini leneore halimulonga ibugua mbirale bayale ngaru damene bibahende tí ngialu mini mandala bayale tí ngialu bulebira. Anduane Homogo ibunihondo gi howa ibu andaneha karuhondo mini tigabi bayaleore ogoni turu halu ngidagoni.

<sup>7</sup> Ai Yarusalemeali hongohé timbuni hearume hariga tene wiarunaga haghaga buwa dugu bialu karuni handadaba. Agali maru mo palia holene ibu daluha haru anda ibule manda bu hearume dugu hongo howaore bialu ka. <sup>8</sup> Hariga dunini timbuni wiarunaga wali agali gi howa mbira pu íbu bulene hariga napiaga bame gumba ho nga. Waitigi hearume ogo ale bibiya lalu dindi mende baba bi hongohé lo wiribigo

wahalu mendealinaga tano wiaru mo ko howa mege bigibigi bialu ka. Tini degedege mini hana nahe mendealigo bame nagalone nai kagonida lowa yo handaga handaga bialu ka. <sup>9</sup> Ainde dindi ibu dugu bialu heane ibunaga hongo biba hayada. Irabu timbuni Lebanono dindiha wiago ibuha ira timbuni hearu homalu gabu hai hayada ibuni taga ho kagoni. Saroni dindi ulini panda panda bayale wiago yo bialu leboladaga howa mbirale mbira anda habe nahe hayada. Basana dindihabi Hari Kamelo tenehabi ira yuni hearuni gaulalu gilopebe biai hayada, lalu Aisaiahanda mbiwia hene.

*Anduane Homogohanda hameigini tara tarahondo ibunaga hongo walia holebira lenego ogo*

<sup>10</sup> Anduane Homogohanda hameigini tara tarahondo lalu, Áyu ina heyalu biabe berogola wali agalirume i timbuniore mini lene kagoni lalu inaga mini yaraga holebira.

<sup>11</sup> Inaga waitigi kamiru tigua mbirale galone nahe lini nadolene ngarunaga dege wai hanalu hagaya. Manane agali mbirame ibuni mabuha howa widi gabuni mbira gandulo yalu porobe toba karia datani hangu gandulo yinidane handagadagua bialu kamigoni. Ti biabe erekuibi bialu kamiruni bibahende ira dene delalu kamigo mani tini urunime dolebira. <sup>12</sup> Da dege bialu ira anihe ko karubi datani ko bu karu mbirani mo yu mogo buwa delaragola bibahende dalu be abalu hagadagua ti aniore bulebira. <sup>13</sup> Aniore bulebirago ai wali agali kaware oali hene kamirubi dindi kaundiani kamirubi bibahendeme ina biabe hongohe bialu kogo hale halimu. Hale howa tigua Anduane Homogo hongo taraorehe mini lene daligaore kagoni laga bialu holeberemi.

<sup>14</sup> Hari Saiononi wali agali mana ko bialu karume mogo lowa duru lalu howa lalu, Anduane Homogonaga lembo holene ira dene hongohe hundia nabiaga daho wiaga ngaligobi wuwa mbirale ngaru bibahende dai hagadagua biagayago. Ai ogoni ibu kagoha ina kamaru aria mbirali aiwa haparaho holeberemabe, laya. <sup>15</sup> Agali mana bayale tigabi ngadagua bialu bi henene dege laga lalu mendeali karu ke howa mo hondo nahaga karu ti dege yu wahene holebira. Agali mendeali kagohondo ina inaga ke howa bi la holiya muni ngi nalagabi mana ko ngubi ngaru biaha lowa muni ngilo henge namiagabi mana ko biaga karubi agali homelo bo wahaga karu baba mandagi nahagabi howa <sup>16</sup> uruni bibahende hogorale biaga karu ti bayaleore holebira. Agali ogonidagua biaga karu ti hari nene bare ngaruha agali napiaga peago teneha ha do haradagua bulebira. Ti bope lalu hingedape holene mbira naheha howa tomo ibabi karulapeore nalu holene ngelowa holebira.

*Anduane Homogohanda Yarusaleme mo bayale holebira lenego ogo*

<sup>17</sup> Kini mbira ibugua aga bayale ngaru karulowa tinaga dindi timbuni yangale ngane lone handayaho holebirago tigua de hondoleberemi. <sup>18</sup> Ani bialu horo ti mo ko holene genda tandagala abale tiha anda ibiyaru mitangi budai buwa lalu, Waitiginaga ami haru hagane agali haguane abale ogoria ibuwa inanaga muni wimaru mo daga lowa tale biaga hearuni agoha kadabe. Ami haru hagane haguane maru abale ogoria ibuwa inanaga amiru tinaga mamage haga anda luni biaru bibahende dagala ai haga biaru nde agoha kadabe loleberemi. <sup>19</sup> Tigua agali dindi tara tara howa ibiniru ti minehe tininaga mini yaraga haga o biaruninaga dengui lone nahondoleberemi. Tinaga bi tara ti hale nahene ladagadaga bialu haga biaru lone hale naholeberemi.

<sup>20</sup> Hari Saiononi inanaga horo timbuni ibirangi turu lalu lotu lole mo ngoai haga wirimago handadaba. Yarusaleme ogoni inanaga dindi bayale gi nahe hada payabu birulene o ngagoni handa naberemi. Agalime balai anda giallo yalu pole lowa gialalu karia ira dindiha wayago hongohe lalu pu daba heneru hongohe agalime hadabe nahe wiraligobi ngagola Yarusalemeore agalime bo gialabe nahe hongoheore haho wiaabo holebira. <sup>21</sup> Anduane Homogo ibuni wa taraore holenebi hongohe mini lene kagobi

✧ 33:15: Iba 15.2, 119.37, Ais 58.6-11 ✧ 33:17: Ais 6.5, 24.3, 26.15

inahondo walia holebira. Yarusaleme ibu dindi baya taraore ngagoria iba emene timbuniru ibuha howa dugualu purogolarago angeha holeberema. Iba uruni poragoha wai biaga iba sibiru anda naibabehe holebira. <sup>22</sup> Anduane Homogo ibuni inanaga haru haganebi mana bulene ngaru langiagabi inanaga kini howaibunime ina baya hangu handayaho holebira. Ani biragola inaha genda tandagaru mbira anda naibulebira.

<sup>23</sup> Waitigirume Yarusaleme tano karulole biyaguabi tigua karulabe nahe wulebira. Iba sibi yaga karume sibi yalu pole lowa puyabume pulo yalu pelo lowa aga yangale timbuni mbira iba sibini dariba haga biaru hadape halu karia pu aga uruni dariba henedaru hadapaya bidagola puyabume pulo yalu pobe nahe hilope hagamadagua holebira. Ogonidagua biragola waitigirume tinaga dabudabu wiyadaru yu wahai halu ibida piai holebira. Piaiore haragola wali agali Yarusalemeha karume gerai lalu puwa mbirale yu wahalu piyadaruni ti mo yulebira. Agali ge kohe maru karu tibi nde ibalu kamiria wali agali ti mo yalu pialu howa mbirale ibira heneru ti karulapeore mo yagayaga bulebira. <sup>24</sup> Horo ogoningi Yarusalemeha karu aria mbiralime lalu, I hagua warago beda, lalu nalolebira. Ani helowa inanaga Anduane Homogohanda ibunaga Yarusaleme wali agalirunaga ko bu hayadaru domo wahai holebira, lalu Aisaiahanda mbiwia hene.

## 34

### *Anduane Homogohanda Idomo dindi bibahende mo ko hai holebira lenego ogo*

<sup>1</sup> Wali agali hameigini tara tara kamiru bi ogo hale hole ibu ngoai hadaba. Dindi bibahendeni kamiru ti bibahendeme bi ogo baya hangu hale mia howa hale hadaba. <sup>2</sup> Anduane Homogohanda dindi bibahendehabi dindi uruninaga ami karu bibahendebi ibunaga keba holene timbuniore tiha wiaho kago. Ai tiore bibahende homai helolebero laya. <sup>3</sup> Homonerunaga tingini mbiralime mo hora nahe ona homo payapaya bima pedagola wialu dindini ngu timbuni bulebira. Tinaga darama hari ngarunaga talapayabu wulebira. <sup>4</sup> Nibi egebi yakundi bu karubi dugupebe bialu ereba hai holebira. Hari li ngago ibu beba bobu mabu biradagua bialu pu ereba holebira. Yakundi harini haga karuni bibahendeore gerebi yuniru poge yuniru gau lalu dogolope haralidagua dindini gilope holebira.✧

<sup>5</sup> Anduane Homogohanda lalu, Ininaga keba holene wai biagane ayu tibu ne gadele mbira hari daligaha manda mandabu wirugo ai inime abale Idomo wali agali biaru baba wai bu pole kogoni. Ani bidogo ayu agali uruni bole pelo yupe harogoni, laya.✧

<sup>6</sup> Ani biragola nogo sibi memerunaga darama habanerume loma bo delole bowa podalu hene agali karunaga gini budahaga biagamadagua Idomo wali agali uruninaga darama habaneru Anduane Homogonaga ayu tibu ogoriani budahaga bulebira. Anduane Homogohanda Idomo dindini Bosara tano ngagoha wali agali dewaore balu ibuninaga loma timbuniore bo delagamadagua delolebira. <sup>7</sup> Ani bialu Anduane Homogohanda uruni biragola nogo bulumaga wangaberu bo podo paya biralidagua wali agalinaga darama habanerume Idomo dindi goba halu holebira. <sup>8</sup> Ani birangi Anduane Homogohanda ibunaga tano Yarusaleme pele mulebira. Ani bialu wai tigurume Yarusaleme bo gialo wahalu mo ko hole manda biyagonaga horo ogoningi Anduane Homogo ibugua pani badai bulebira.

<sup>9</sup> Anduane Homogohanda Idomo dindiha iba pedaru mo wagaya ale halu dindini be abalu ngaru mo ege tole ale ambuabi mini soloba helalu dindi ngaruni irame wagaya ale daradagua bialu dolebira. <sup>10</sup> Ira ogoni hundia nabuleore mbiraga horombebi hagua paꝯ lalu hongo howa daho wiaabo holebira. Ani bidagola Idomo dindiha wali agaliru mbira napiaga dindi koorene ko mbira wiaabo holebira.✧ <sup>11</sup> Dindi ogoniha ega neneru

✧ **34:4:** Md 24.29, Mg 13.25, Lg 21.26, 2 Pi 3.10, Mo 6.13-14 ✧ **34:5:** Ais 63.1-6, Yar 49.7-22, Ese 25.12-14, 35.1-15, Amo 1.11-12, Oba 1-14, Mal 1.2-5 ✧ **34:10:** Mo 14.11, 19.3

ega umi ale tara tararu hangu birulebira. Dindi ogoni Anduane Homogohanda mo koore halu mbirale mbira naheore pigane ibuni dindi ogo nawabiangi winigobiore ngelolebira. <sup>12</sup> Idomo dindi handayaho holene agali haguanebi mbirali naholebira. Ani bidagola tinaga dindi ogoni handayaho hagane kinibi nahe wialu bidagola dindi dabulu naina wulebira. <sup>13</sup> Ani bidagola dindi ogoniha agubandu mamuni aniherumebi datani bolage timbunirubi anda howa timbu halu kini andagaru namulai halu anda maru bu karubi namulai dege holebira. Urunibi ngagola anda uruniha ega umi bedaru palu iriari bialu biango dudu ale bu karume titua lo holebira. <sup>14</sup> Ema bialu dindini piagaru wali agali nahaga ngaruha biraga bedaru dindi ogoniha ibu biralu dama wali bolomehe bedaru ti mbiraga ibagabu howa anda uruniha palialu pugu bulebira. <sup>15</sup> Ega umi mbiraga biraga bedaru tinaga igini habane anda tabuanda uruniha ngelowa mamage tininaga babaganerume yabula dambi howa paligi bulebira. Ani bidagola boda hariawe wangabe angibunibi anda uruniha ibalu bira dege dege bulebira.

<sup>16</sup> Anduane Homogonaga mbuga ngagoha daga lowa handalu keria bi ogodagua gilibu winigo nga. Ega bedarubi dindini ema bialu piaga bedarubi angibunibi wangabebi mbuga ogome layaru Idomo dindiha bibahendeore ibu birai holebira. Uruni aria mbirago naibu nabulebira. Anduane Homogohanda ibilole ledaru bibahendeore ibai holebira. Anduane Homogo ibuninaga Dininime uruni bibahende mo mogo bialu haru ibaiore holebira. <sup>17</sup> Dindini ema bialu piagarubi ega bedarubi ti dindi ogoni helonaga Anduane Homogohanda Idomo dindi bibahende ogobi degedege tale bialu mbira mbirahondo tahai holebira. Ani biragola dindi ogoni uruni tinaga wiaabo holebira. Bi ogoni ani gilibu winigo nga, lalu Aisaiahanda mbiwia halu lene.

## 35

### *Mbirale baya burugule wulebira lenego ogo*

<sup>1</sup> Dindi ko wali agali nahagaha mbirale anda habe nahe ngarume turu holebira. Palawaya tara tara dindi uruniha anda halu bayale dolebira.✧ <sup>2</sup> Dindi yobi koore ogonime turu howa ga lalu iba gana lolebira. Dindi ogoria Lebanono hariha irabu timbuni bayale ngagobi baya taraore wulebira. Saroni dindibi Kamelo dindibi benebere bayale ngagobi wulebira. Ani bidagola wali agali bibahendeme Anduane Homogonaga wa holene de hondolebira. Ibunaga mini timbunibi hongo holenebi ogoningi handai holebira.

<sup>3</sup> Ani bulebira go ayu tigua wali agali hongo nahe karu mo hongo halu wali agali bu miniha gi howa duru lalu karubi mo hongo halu halimu.✧ <sup>4</sup> Wali agali mini dege dindi howa burugulo karu lamialu, Ti gi nahe hongoho hadaba, lalimu. Ngode Datagaliwabe ibugua ti pele ngialu haru dai bule ibira. Tinaga waitigi karu bo hilo wahai hole ibiragoni, lalu lamilimu.✧

<sup>5</sup> De kohe karu ti de bayale hondolebira. Hale tuluhe karu ti hale bayale holebira.✧

<sup>6</sup> Ge kohe karu ge bayale howa pogolo daga halu mali liama ibaga bulebira. Bi nalaga karume bi bayale lalu turu halu bi ladagadaga bialu holebira. Dindi ko yobi ngaruha iba dugualu polebira. Dindi ko wali agali nahaga ngagoha iba bayaleore duguaga duguaga bulebira.✧ <sup>7</sup> Ala dindi yobi koore iba mu poboheore wini wiagoria iba kuyama timbuniore ibu birulebira. Dindi ko dalu naibaga ngaruha iba bayaleore duguaga duguaga bulebira. Biango duduru hangu haga wiagoria mani dindi bayale ibane bere halu datani gamberu andaho holebira.

<sup>8</sup> Dindi ogoniha hariga timbuni mbira polebirago ogoni mini Anduane Homogonaga Hariga Baya Buruguleore lalu wulebira. Wali agali mini kowi karu hariga ogoriani napolebira. Anduane Homogonaga mana tigabi bialu haga karu ti dege polebira. Wali

✧ 35:1: Ais 27.6, 27.10, 41.18-19, 55.12-13 ✧ 35:3: Hi 12.12 ✧ 35:4: Ais 32.4, 34.8, 61.2 ✧ 35:5: Md 11.5, Lg 7.22 ✧ 35:6: Lg 11.14, Yo 5.8-9, 7.38, Ab 3.8



agali mini nawi lulu ale karume wali agali maru hariga ogoriani pialu karu mo hondo naholebira.✠<sup>9</sup> Budi gabua ale timbuni mini laiono karubi napolebira. Nogo gabua tara tara maru karubi hariga ogoriani mbira napolebira. Wali agali Anduane Homogohanda pele mialu haru dai biniru ti dege hariga ogoriani pialu anda polebira.✠<sup>10</sup> Wali agali urunime ti turu timbuni howa iba gana dalimu ladagadaga bima hariga ogoriani pialu Yarusaleme anda polebira. Anda ibiraru tiha tandaga holenebi genda yu holenebi mbira nawiore howa ti bayale hangu howa turu hagabu haaboboore holebira, lalu Aisaiahanda mbiwia hene.✠

## 36

### *Asirialime Yarusaleme tano karulole manda bialu henego ogo*

*(2 Kini 18.13-27, 2 Bi Te 32.1-19)*

<sup>1</sup> Hesegaia ibu Yudanaga kini howa mali deria (14) heagola Asirianaga Kini Senageribi ibugua ibunaga ami agali hearu haru ibalu Yuda dindiha tano wai pabe hongohe bu mabu bini wiaru karulai hene. Anigo Yarusaleme dege nakarule wini. <sup>2</sup> Ani buwa Kini Senageribi ibugua Lagisi tanoni howa ibunaga ami agali haru haga haguane heago ami agali dewa hearu heba Yarusaleme pudaba lene. Ani pudaba laya handala puwa tigua Yarusaleme tanonaga pabe tagirahayagi iba dadabu yu anda ibini wiagoria pu hene. Iba dadabu anda hene ogoni abene aga wabiaga wiagoha pole hariga pu ibu biaga peagohayagi wini. <sup>3</sup> Ani ibu heagola Isaraelenaga agali haguane tebiralirume Asiriali hondole tagira pene. Hondo penedaru tinaga mini uru. Kini andaga mamage haga Hiligaia igini Eliagimi henegobi kininaga bi gili bia dagala biaga Sebenabi kini ibugua birago damene bibahende bebani gilibu wiai haga Asaba igini Yoa henegobi uruni tigua hondo pene. <sup>4</sup> Agali tebirali uruni ti Asiriali ibu hene biaru hearia piyagola Asiriali ami haru haga haguane mbira heneyagome bi hongo howa tihondo lalu,

Asirianaga kini hongohe biagonaga bi ogo Hesegaia lamule pudaba layago. Ibugua ogodagua laya, Hesegaia inaga hongo abialeore howa andaneha holene hame nale kebe. <sup>5</sup> Bi bame lo payapaya beregome wai bialu wayali hagabe. Ina ihondo mine harigo. I biamogo bulene mbira ai ibulubadalo manda buwa ihondo mine halu kebe. <sup>6</sup> Iyibiali karume ibalu i biamogo bialu wai bia hole ibilo malia howa handayaho kegoni i manda bido. Anigo ina ihondo langerogo Iyibiali uruni bame gambe hale podalaha ngaligobi ka. Gambe hale ogonibigome halimbu yulene karulapebe toba howa mo yu kegola gambe hale ogoni tagala puwa ininaga gi kenda piagadagua Iyibinaga kini kago ibugua mana biagago manane gambe hale ogonibi ka. Ani biaga kagome ibugua i pele ngialu wai bia hole naibulebira, lalu lamibe laya.✠<sup>7</sup> Asiriali haru haga haguane biagome laabo halu lalu, Anigo Hesegaia ina ina langialu, Iname Anduane Homogo inanaga Ngode Datagaliwabe kago yu tiga bu kamago ibugua ina biamogo bulebira, lalu languleberebe. Hesegaia inime Anduane Homogonaga lotu lolene anda hearu bo gialalu lomabu delaga dabu wiarubi giallo wahai harigoni. Ani bialu ina Yuda wali agali bu hearu bibahende Yarusaleme hangu ibai halu lomabu delaga dabu mbiraore ogoni hanguni lotu lole ibai hadaba, larigoni.

<sup>8</sup> Inaga kini ibugua bi marubi la dege bialu lalu, Kini Hesegaia ina agali nogo hosini biruwa wai bulene ami agali daosini kira (2,000) karulape taya bibeheyagua nde hosi daosini kira (2,000) bame ngulebira laya. Anigo ina manda bialu koria ina agali urunidagua naheore kegoni. <sup>9</sup> Ani howa ina mandabu handalu keria Iyibime nogo hosirubi wai biagane karisirubi heba ibuwa i biamogo bialu wai bulebirabe tobaho kegoni. Anigo ti naibulebira ndobe. Ani bulebirago ai ini hangu kegoni howa ina ami emene hangu hemayaguabi ina ina bope habe naheore kamagoni ndobe. <sup>10</sup> I ibu

✠ 35:8: Ais 11.16, Yar 14.8, Md 7.13, 1 Pi 1.15-16 ✠ 35:9: Ais 5.29, 13.22, 51.10, 62.12 ✠ 35:10: Ais 1.27, 65.19, Mo 7.17, 21.4 ✠ 36:6: Ese 29.6-7

kogoni ininaga minime í baba wai bialu inaga dindi ngego bo labu hole íbu kabe toba ho kebe. Ani ndoyago. Anduane Homogo ibunime í langialu í baba wai bialu dindi anda o ngaruni bo gialabaga bialu mo labu habe lalu í langiya, lalu ami agali haru haga haguane biagome lene.

<sup>11</sup> Bi ogoni layagola Eliagimibi Sebenabi Yoabi tigua hale howa Asiriali ami haguane biagohondo lalu, Ina Siria bi hale haga kamago ina bi ogoni larego Siria bi lalu langibe. Ina Hiburu bi laregola wali agali maru uyu ege pabe daligani bu karu tigua hale holigo nalabe, lene.

<sup>12</sup> Ani layagola ami agali haguane biagome ladai bialu lalu, Bi o larogoni inaga kini kagome tihondobi tinaga kinihondo hangubi lamule pu lene ndo laru. Maru uyu ege pabe daligani bu karuni tibi bibahende bi ogoni hale helo laro. Ani larogoni irane iname ibalu Yarusaleme wai bule ho hagirabu anda haramangi genda timbuni tí bibahende ha ibulubadane laro. Anigo maru uyu ege pabeni handape ho karuni ti tomo nolene nawidagola tininaga ti to wuwa nalu iba noa biragola pu to nolebira. Tí kamirunibi anidagua dege buleberemi, lene.

<sup>13</sup> Ani lowa Asiriali ami haguane biago ibugua agali maru ege pabe daligani handa daliho hearume hale helo Hiburu bi hongo howa ladaga howa lalu, Agali kini hongohé Asirianaga kini biago ibugua bi layago languliya baya hangu hale mia howa hale had-aba. <sup>14</sup> Hesegaia ibugua tihondo ke halu mo hondo helo nahalimu. Tí bayale halimulo mo wialu Hesegaia ibugua í bope habe nahe ka. <sup>15</sup> Ibugua lalu, Anduane Homogohanda tí biamogo biragola Asirialime tí mo ko halu tinaga tano Yarusaleme nakarulolebira, layagua bi ogoni henene ndo larago mo henene nahalimu. <sup>16</sup> Tigua Hesegaianaga bi larago hale nahalimu. Tigua íla wai bulene manda nabilimu. Asirianaga kini ibugua bi layago ogo, Tí bayale howa tininaga iba hambiağa iba uli ngamiruha howa hambu nalu tinaga mabuha pu mbira lini daga mini gerebi lini dedarubi poge lini dedarubi do nalu bayale holene manda bu kamiyagua nde tinaga tano í karuloliya wahalimu, laya. <sup>17</sup> Ani kamiria ina ibalu tinaga tano karulalu tinibi dindi mende baya gibiore tinaga dindi o kamigobi dege ngagoha haru pu heloliya, laya. Dindi mende bayaleore ogoniha waini iba wabule pu mbira mini gerebi lini daga mabu dewa wialu mberedi wabulenenaga nde widi maburu dewa dege nga, laya.

<sup>18</sup> Hesegaia ibugua tihondo lalu, Anduane Homogohanda tí biamogo biragola tigua ina bope holeberema, layagua ibunaga bi ogoni mo henene nahalimu. Tigua manda bialu kamiria dindi maru wiarume ina Asiriali baba wai biyagola tinaga dama tara maru hearume ti biamogo biyane handarimibe. Nabiore ndobe. <sup>19</sup> Iname pialu Hamada tanohabi Abada tanohabi Seabaimi tanohabi uruni baba wai birimangi tinaga dama henedaru agohayagi pu howa wali agali biamogo bialu hearia handarimibe. Ani bialu iname Samaria anda puwa wai birimangi tinaga dama henedarume ti mo wialu ina bope hayane handarimibe. Nabiore ndobe. <sup>20</sup> Iname dindi dewani tinaga dama henedaruni helowa ti baba wai birimagoni. Ani birimangi tinaga dindi bayale ngelo dama urunime ti biamogo bialu ina bope naheyago. Ai Yarusaleme wali agali tigua tinaga Anduane Homogohanda biamogo biragola ina bope holeberema lalu agua manda buwa larimibe, lene.

<sup>21</sup> Asirianaga ami agali haguane biago ibugua bi lai heagola agali ege pabe daligani handape ho hayaru tigua bi mbira ladai nabi handayaho haabo hene. Ani handayaho hayadagoni irane Kini Hesegaia ibugua tihondo bi mbira Asiriali urunihondo nalalimu lenego manda buwa ti bi nale hene. <sup>22</sup> Ani biyagola Asiriali biago ibugua bi layagome Eliagimi Sebena Yoa imarume bu miniha genda timbuni ho hene. Ani howa tininaga aga minu budalu Kini Hesegaia bereria puwa Asiriali biagome bi layaruni bibahende ibuhondo lamiai hene.

## 37

### *Hesegaia ibunaga genda wiago Aisaiahondo laminigo ogo (2 Kini 19.1-7)*

<sup>1</sup> Hesegaia ibugua Asirialime bi uruni layago hale howa ibu genda timbuni halu ibunaga aga minu lere lene. Ani bialu ibugua dara howa walía halu aga biaga wiago mo karulalu Anduane Homogonaga andaha anda pene. <sup>2</sup> Ani puwa Hesegaia ibugua kini andaga mamage haga Eliagimibi kininaga beba gili biahaga Sebenabi loma binigo mo miaga ala hene maru hearubi olalu ibidaba lene. Ibiyagola Anduane Homogonaga bi mana latagi haga agali Emoso igini Aisaia hondole pudaba lene. Agali uruni tibi nde dara howa walía halu aga biaga wiaru mo karulo hene. <sup>3</sup> Ani bialu Hesegaiahanda tihondo bi ogo Aisaiahondo lamilo lawia halu lalu, Horo áyu bu miniha genda yu holene wiyada. Asirialime ina mege timbuni biyagola taga timbuniore ho kamagoni. Ina walime gali taba honolene tu biruwa ibu hongo nakarulape howa taba hanabe nahedagola genda timbuni ho biragagobi ina bedamagoni. <sup>4</sup> Asirianaga kini kago ibugua ibunaga ami haru haga agali haguane heagome Anduane Homogo inanaga Ngode Datagaliwabe haluheore kagohondo mege bialu bi ko lole pu layada. Bi ko uruni hale howa Anduane Homogo ibunime agali bi ko lagadaru mana bilo hameledo. Ani hameledogo ina wali agali emene dagalene hangu kamaru biamogo bilonaga ina Anduane Homogohondo bi lahabe, lalu Kini Hesegaiahanda lawia hene.

<sup>5</sup> Aisaia ibu Hesegaianaga bi layadago hale howa <sup>6</sup> ibugua agali bi yalu ibiyadaruhondo lamialu lalu, Tígua Kini Hesegaia bedaria dai buwa Anduane Homogonaga bi ogo ibuhondo lamilimu. Anduane Homogohanda lalu, Ina bi o layadaruni miniha mo pehalu gi halu genda holeni. Ihondo bi ko layadaru Asiria kini kagonaga biabe biahaga agali nahabane damene bu hearume bi nagalone ogoni layadago wahabe. <sup>7</sup> Ani larogoni irane Anduane Homogo inime Asiria kini kago mo luluya helolebero. Ani berogola ibugua bi mbira hale halu ibuni dalu dai bulebira. Asiria dindini daibu kagola ina agali marume ibu homelo bo wahelolebero, laya lalu Aisaiahanda lene.

### *Asirialirume Yarusaleme boleberema lalu bi halu mende lenego ogo (2 Kini 19.8-19)*

<sup>8</sup> Asiria ami haru haga agali haguane biago ibugua Kini Senageribi ibu Lagisi tano yu wahalú piya layane hale hene. Ani layane hale halu ami haru haga agali haguane ogoni ibu Yarusaleme yu wahalú dai buwa hale halu hearia kini ibu Libina dindiha wai bialu ka layago hale halu ibu hondole pene. <sup>9</sup> Asirialiru ti wai bialu hearia agali maru ibuwa Kini Senageribihondo lamialu lalu, Idiobia dindinaga Kini Tihagahanda ibunaga amiru haru halu íla wai bule ibira, lene. Ani layago hale howa Senageribi ibugua Yarusaleme karulole mandabu heaorego beba mbira abale gili bialu Hesegaia hearia pelene. <sup>10</sup> Beba o gilibu wia henedagoniha bi ogodagua lalu gili bini. Tinaga mbirale hanaho kamigoni ibugua lalu, Ina tí bope halu Yarusaleme karuloliya yupe naholebero, layago bi ogoni henene ndo ké haya. Ibunaga bi ogoni mo dunubia nahabe. <sup>11</sup> Ina Asirialinaga kini bu kamarume biaga mana ini manda biai ho kegoni. Iname dindi mbiraha wai bu puwa uruniha ngaru bibahendeore bo haealabagabu waharamaligo í manda bide. Ina mitangibu handalu keria í daluha ogonidagua nabulubada lo manda bidebe. <sup>12</sup> Bamba inaga mamaliru tigua wai bialu Gosana tanobi Harana tanobi Lesebe tanobi bibahende bo haealabaga bialu Bededene hameigini Telasa tanoha plearubi bo wahi hene. Ani biyagola tinaga dama bu hearume ti bayale helonaga biamogo mbira nabiore. <sup>13</sup> Hamada tanonaga kini henerubi Abada tanonaga kinirubi Sebabaimi tanonaga kinirubi Hena tanonaga kinirubi Iba tanonaga kinirubi mbira áyu heabe. Mbira naheore ndoyabe. Iname uruni bo wahi harimagoni, lalu gilibu wia hene.

<sup>14</sup> Kini Senageribi ibugua beba gilibu wia halu yalu pu lenedarume yu ibiyagola Kini Hesegaia ibugua yamini. Yamialu bi bebani gilibu wiyadaruni dagalai howa ibugua beba ogoni Anduane Homogonaga andaha mo yu anda pene. Yu anda puwa ibugua beba ogoni Anduane Homogo ibuni hagani mo tiga buwa angalaho ngelene. <sup>15</sup> Ani ngelowa Hesegaia ibugua Anduane Homogohondo bi lalu, <sup>16</sup> Anduane Homogo Hongo Haiheore-o í Isaraele wali agali inanaga Ngode Datagaliwabeore kegoni howa dahuliyali bu karu bolangua halu íninaga biragane ngegoria bedegoni. Í hangu Ngode Datagaliwabeore henene howa ína dindi bibahende ngaruniha handameho haga kegoni. Dindibi hari daligabi ínime wabiai hene kegoni. <sup>17</sup> Anduane Homogo-o ínaga bi larogo baya hangu hale halu inaha mo ko holene o tagira ibiragoni ínime de handabe. Senageribi ibugua bi ko Ngode Datagaliwabe haluhe í kegothondo layadarunibi hale habe. <sup>18</sup> Anduane Homogo-o Asirianaga kini hearume dindi maru wiaruha anda puwa wai bialu wali agali dewaore bo wahai halu mo ko hai hayaruni manda bu kama. <sup>19</sup> Ani bialu tigua wali agali tinaga dama mitangi bialu gime wabini wiaru iraha delai haya. Dama mitangi bialu gime wabini uruni ti Ngode Datagaliwabe heneneore kegotho ndogome tini mo ko hai haya. Mbirale uruni agalime ira dibalu pelowabi ege tole poda tiga buwabi wabini wini. <sup>20</sup> Anduane Homogo inanaga Ngode Datagaliwabe-o ína ina áyu biamogo bialu Kini Senageribinaga giha howa yamibelo hame ledó. Wali agali dindi bibahendeni bu karume Anduane Homogo íni hanguore Ngode Datagaliwabe heneneore henedane manda bilo aniore bibelo hamelo kogoni, lalu Kini Hesegaiahanda lene.

*Aisaiahanda Anduane Homogonaga bi Kini Hesegaia laminigo ogo*  
(2 Kini 19.20-37)

<sup>21</sup> Anduane Homogonaga bi mana latagi haga Aisaia ibugua Hesegaiahondo bi lawia halu lalu, Anduane Homogo Isaraele wali agalinaga Ngode Datagaliwabeanda ínaga bi larigoni hale howa ibugua lalu, Ína tí biamogo bialu Asirialinaga kini kagome mo ko holigo biamogo bia, larigoni. <sup>22</sup> Anidagua larigo Anduane Homogohanda Asirianaga Kini Senageribihondo bi ogodagua laya, Senageribi-o Yarusalemeha karume íore mege bialu hondo oba haragoni. <sup>23</sup> Ína íninaga mini yaraga halu mege bialu bi ko lalu harigoni aihondo bero lalu biribe. Ína urunidagua bialu harigoni í Isaraele wali agalinaga Ngode Datagaliwabe baya burugule kogohondo yo handarigoni. <sup>24</sup> Ína ami haru haga agali haguane hearuhondo bi ogoni lole pu larigola tigua ínaga mini yaraga halu íhondo mege taraore biya. Tigua íhondo mine halu lalu, Ína íninaga karisi wirugoriani howa Lebanono dindini hari nene daligaore ngaru áyu dege iraga halu pirugoni, lari. Ani larigola tigua mine dege halu bi marubi íni ogodagua larigo lalu, Ina Lebanono irabu timbuni ngago dombeneha anda pu howa íra mini lene bayale luniore tamia hearubi guriya ale mini saiberesi hearubi íni dibai harugoni ndobe larigoni, laya. <sup>25</sup> Ína ogodagua larigo, Ina dindi maru taraha pirungi í iba noa nahe haru, lari. Dindi ko yobi iba nabere wiagoha ína iba uli tombo wiwagoha iba birayagola ínaga dameneru ti karulape naiore haya, lari. Ani lalu í Iyibi dindiha iba Naili timbuni pedago ínaga ami agali biarume domalu piyagola tinaga geme iba mo hundia haya larigoni, lalu Anduane Homogo ibugua bi ogoni Aisaiaha howa lene.

<sup>26</sup> Ibugua laabo halu lalu, Senageribi-o bambaore howa ínime manda bialu ína urunidagua bialu kego bibelo ína í dabenego í manda nabi kegoni. Tano wai pabe hongohe bu mabubi hearuni bo gialabaga bibelo ína hongo ngirugoni. Ani ngirugome ína ínaga mini wiwago hangu talialu tano biaruni bo gialabagabu wahai harigola áyu ege tole wiaruni gindulo payabu wialu nagalone bu hinu ngagoni. <sup>27</sup> Wali agali tano uruniha haga hearu ti gi timbuni hayagome tinaga mini ndibu lalu hongobi ereba

✧ 37:16: Har 25.22

haya. Ti hongo nahe ni tagira ibiragohayagi howa puyabu poboyogobi ibiragome datani dindini andaho karubi anda dangini andaho karubi hongo nahe gaulai hagadagua ogonibi wali agali uruni ti hene.

<sup>28</sup> Anigo ina inaga mini ngeru manda biai ho kogoni. Ina mbirale bialu kegonibi ibaga bialu kerabi bibahende i handaiore ho kogoni. Inaga miniha ihondo keba timbuni ho kegonibi i manda bu ko. <sup>29</sup> Ina miniha keba ho howa bi larigobi mine bi lalu ininaga mini yaraga hole bima ibaga bialu kegonibi i manda biaiho kogoni. Anigo áyu ihondo bi hongohe mbira laro. Ina aeane mbira wangobi ngagome inaga nguiha wango bialu nogo hosinaga ne harigaha banga bia helaga ngagome inaga ne harigaha bangabia helolebero. Anidagua buwa mani ini ibirigoha dai bibelo gililo yalu haru dai bulebero laya, lalu Aisaiahanda lene.

<sup>30</sup> Ani lowa Aisaiahanda bi mbira Kini Hesegaiahondo lalu, Anduane Homogohanda Senageribihondo bulebero layago heneneore layada manda bibelonaga manane mbira walia holeberogo ogo. Tigua mali áyu kamagonagabi mali edegonagabi tinaga mabuha tomo mbira hangabe nahe holeberemi. Widiru mabuha minana andaho kagola do nalu holeberemi. Anigo mali ederagonaga tinaga mabuha widi tinime hongowa bu noleberemi. Ani bialu pu mbira lini daga mini gerebi hongowa lini do nalu holeberemi.

<sup>31</sup> Ani biragola Yuda wali agali maru waitigime bo wahai nahe yu wahene biaru ti bayale howa ira pini dindihaore anda puwa lini bayale dewaore daga labe nahe dedaligobi ti dewaore ho damebu holebira. <sup>32</sup> Yarusalemehabi Hari Saionohabi waitigirume wali agali nabe yu wahene maru holebira. Ti ani helo Anduane Homogo Hongo Haiheore kago ibugua uruni biai hole mandabu henego ka, lalu lamini.

<sup>33</sup> Anduane Homogohanda Asirianaga kini kagome bulebira lalu lenego ogo. Ibugua ibunaga ami bu karu haru halu Yarusalemeha lone anda naibulebira. Tinaga timu mbira hangubi tano ogoha baanda naholebira. Ami agalirume wai humbi yalu tano ogoria kaware naibulebira. Tanonaga wai pabe kagoria ami uruni tigua wai bule lowa dindi dugu wima irigi habe nahe holebira. <sup>34</sup> Asirianaga kini ogoni ibu tano ogoniha anda ibalu karia naanda ibabehe lalu ibuni ibiyadagoa beregedalu dai bilolebero. I Anduane Homogo ina bi o ledogoniore. <sup>35</sup> Ina ogonidagua buleberogo irane ininaga mini timbuni leneore kogoni mitangi bialubi agali inaga biabe biahaga Debidila habo nalolene bi lo wirugo mitangi bialubi anidagua bulebero, laya lalu Aisaiahanda lene.

<sup>36</sup> Horo ogoningi mbiraga Anduane Homogonaga dahuliyali mbira Asiriali ami hearunaga balai anda bu hearuha puwa ami agali daosini dege handari mbirani pira halirani duria (185,000) bibahende bo wahai hayagola homai hene. Horo mendengi gao layagola Senageribi ibu heyuwa handalu hearia homayaruninaga tingini ona wima pearia hendene. <sup>37</sup> Ani biya handala Senageribi ibugua ibunaga ami agali maru yu wahene hearu heba heyalu hariga ibiyadagua dai bialu Niniba tanoha pu hene. <sup>38</sup> Ani pu howa ibugua horo mbirungi ibunaga dama mitangi bialu gime wabini mini Nisirogo laga wiagonaga bi pupu wiaga anda heagoha anda puwa o biagohondo bi pupu wialu berene. Ani berearia ibuni igini kira mini Adaramelege Sareselame ayu tibu wai biaga wiagome libu aba Senageribi dibayagola homene. Ani bialu libuni ibida pialu Ararada dindiha ha do hole pene. Ani biyagola mani Senageribi igini tebone mini Esahadono henegome ibu abanaga henge mialu ibuni Asirianaga kini ha aribia hene.

## 38

*Kini Hesegaia warago bo wiaria Anduane Homogohanda biamogo binigo ogo  
(2 Kini 20.1-11, 2 Bi Te 32.24-26)*

<sup>1</sup> Asirialirume Yudali baba wai bialu mo ko halu heangi Kini Hesegaia ibu warago timbuniore bowa homabeheore wini. Ani homabehe wiaria Emoso igini Aisaia ibu Anduane Homogonaga bi mana latagi haga heagome Kini Hesegaia warago bo wiago



hondo puwa lalu, Ínaga warago ogoni dabi nahe ani bo wiaho wialu homolebere. Ani homoleberego manda buwa ai wali agali í andagaha haga karuni lamialu, Tínaga biabe biaga wiyadagoni mo tiga biai hadaba, lalu lamibe, Aisaiahanda lamini.✧ <sup>2</sup> Bi ogoni layago hale howa Kini Hesegaia ibu beregedalu dengui anda hai heagoha handa ede ho wuwa ibugua Anduane Homogohondo bi lamialu lalu, <sup>3</sup> Anduane Homogo-o ina ini hanguore talima ibalu inaga biabe hangu biahalu harugoni. Ínaga hame wiru bibahende ina talialu biai harugoni manda bibe, lene. Ani lai howa ibugua dugu timbuni hongo howa bialu berene.✧

<sup>4</sup> Ani bialu bereagola Anduane Homogohanda Aisaiahondo lone lamialu lalu, <sup>5</sup> Hesegaiahondo bi ogodagua labe. I Anduane Homogo í mamali Debidinaga Ngode Datagaliwabe kogome ina bi larigo hale halu dugu bialu beregobi handaru. Ani birugo ainde í mali nguiria (15) lone halu homabelo helolebero. <sup>6</sup> Ani bialu ina Asirianaga kini kagome ibalu wai buwa Yarusaleme karulelo yupe naholebero, laya lalu Aisaiahanda lene.

<sup>7</sup> Aisaiahanda ladai bialu lalu, Anduane Homogo ibugua ihondo mbirale bulebero laragoni heneneoredalo manda bibelonaga manane mbira mo walia holebira.✧ <sup>8</sup> Manane ogobi. Bamba Kini Ahasa ibugua egageria mbira wabu wini biago í manda bidegoni. Egageria biagoria ni munini manane handaga biagoria kagola Anduane Homogohanda abaleore ni manane hobane pira dai bilolebira, laya. Ani layadagua ni manane hobane pirani dai biyaria hendene.

<sup>9</sup> Hesegaia ibu warago bo wiyago dabiho howa ibugua Anduane Homogonaga mini yaraga halu iba gana ogo gilibu wini.

<sup>10</sup> Ini mitangi bialu aiore nde i wene daliahe koore dege homalu nde homenerunaga dindi ngagoha pu holoboda.

I dindini holenenaga lu naholoboda mitangi biru.

<sup>11</sup> Wali agali dindini nahome karu baba howa ina Anduane Homogo de nahende holoboda.

Wali agali maru homa nabi karubi mbira nahondoleorebero mitangi bu haru.

<sup>12</sup> I homo tongolo mini ale kogoni.

Agalime balai anda gialo paulo ngagobi

labolabo wabialu henego podope hagamaguabi binigo kogoni.

Ngode Datagaliwabehanda inaga dindi ogoriani holene biba helolebiya mitangi bu harugoni.

<sup>13</sup> Laionome mbirale baragonaga kuniru gingiru lalu bialu gao lagadagua ina horombe mbiragabi i tandaga nalu homoliya abale bo waharegonidalo mitangi biru.

<sup>14</sup> Iha tandaga timbuniore biyagola

i ga lalu berewagola

inaga bi emeneore hagarerebi lalu tagira ibiya.

Ega umime u lalu wiagadagua dege lalu wiru.

Dahuliya andagaha howa i biamogo bulene mbira ibirabe hondole handadagaho bira dege biwagola

inaga deha de mborere bialu de iba ibiya.

Anduane Homogo-o genda o bu ngagoria howa

i biamogo bialu haru pubagi ha laro.

<sup>15</sup> Ai ina agi loabe.

Anduane Homogohanda i biamogo buleore layagoni o biragonidabe be agi loabe.

Ina genda timbuni yu harugo mitangi bigi bialu

áyu i dindini kongi inaga mini mo dindiha halu holebero.

<sup>16</sup> Anduane Homogo-o genda urunime wali agalinaga mini mo beregedalu bayale tigabi helonaga biamogo biaga winida manda bido.

Mbirale genda tandagabi iha ibiyagome holene gahenge ngiya.

Inaga warago bo wiwago ina mo wahalú i mo dabi harigoni.

<sup>17</sup> Mbirale genda iha ibiyaruni bibahende i biamogo bule ibinidane hendedo.

Ina i gubalini timbuni howa i wali agali homenerunaga dindiha polilono yu wanahe biamogo birida.

Ani bialu ina ko bibahende bialu harugo ina domo wahai harigoni.

<sup>18</sup> Wali agali homene dindiha karume inaga mini yaraga nahabehe.

Homene dindiha karume ina wali agali bayale helonaga biamogo biaga kego mo dunubia nahabehe ka.

<sup>19</sup> Ayu ina bi lalu inaga mini mo yaraga halu kodagua

wali agali homa nabi dindini bu karume anidagua bibehe ka.

Waneigini aba karume tinaga waneigini ogodagua lamialu

ina mbirale bayale bialu mini bilinahe kego lalu lamiaga ka.

<sup>20</sup> Anduane Homogohanda i mo dabi hayagoni.

Ai horo bibahendengi ibu andaga pialu iname ibunaga mini yaraga halu

ngida balu iba gana lalubi ibunaga mini mo yaraga hamiya.

Ina dindini nahome kamangi howa anidagua bialu haabo holeberama,

lalu Kini Heseгаiahanda iba gana ogoni lene.

<sup>21</sup> Ani lai hayagola Aisaiahanda kinihondo bi lamibe layadagua lamiai howa ibugua kininaga biabe biahaga agali hearuhondo lamialu lalu, Tigua poge lini maru do yalu ibule pudaba, lene. Tigua do yu dai biyagola ibugua tihondo lalu, Heseгаianaga moge hongohé bidagoriani poge lini dambuwa ibane biagome wai haramigola moge biago abale dabi holebira, lene. <sup>22</sup> Ani layagola Heseгаia ibugua Aisaiahondo hale lalu lalu, Ai i dabi halu horo tebira howa Anduane Homogonaga anda poleberodagoni henene lalu manane mbira ayunaga ihondo agi ale walia holebiradabe, lene.\*

## 39

*Kini Merodagahanda Babilono agali maru Yarusalemeha bi yalu pudaba lenego ogo (2 Kini 20.12-19)*

<sup>1</sup> Baladana igini Merodaga ibu Babilononaga kini hene. Ibugua hale halu hearia Kini Heseгаia warago timbuni bo nga layane hale hene. Ani hale howa ibugua beba mbira gili buwa mbirale bayale mbira heba Heseгаia mo turu halu mule manda bialu ogoni yalu piaga agali maru hearuhondo mialu lalu, Tigua Kini Heseгаia karia yalu pudaba, lene. <sup>2</sup> Yalu piyagola Heseгаia ibugua ibiyadarunaga bi hale howa agali uruni haru pialu ibunaga anda timbuni heagoha mbirale tara ale bibahende mo wiaga wiagoha walia hole haru pene. Haru puwa ibugua ibunaga muni siliba ngoloru dewaore wiarubi padua ale mini sanda tingini hai haga weli ngabiaga wiarubi wai biagane ale dewa wiarubi walia hai hene. Heseгаia ibugua mbirale mbira wiago mo do nahe bibahende kini andagaha wiaruni walia haiore hene. <sup>3</sup> Babilono agali biaru ti dai biaha Anduane Homogonaga mana latagi haga Aisaia ibu Kini Heseгаia hearia ibuwa ibugua hale lalu lalu, Agali o ibiyadaruni ti aniali ibiyabe. Tigua bi agi dege layabe, lalu hale hene.

Ani hale hayagola Heseгаia ibugua ladai bialu lalu, Agali uruni tini dindi kaundiaore uyura Babilono wiagoha howa ibiyagoni, lene.

<sup>4</sup> Ani layagola Aisaiahanda hale lalu lalu, Tigua i andagaha agile dege de handayabe, lene.

\* 38:22: ogoria gilibu ngago irane Heseгаia warago bayagonaga te lamaro ogoni.

Ani layagola Hesegaia ibugua ladai bialu lalu, Ina mbirale mbira mo do nahe inaga mbirale wiwaru ale bibahende tihondo mo walia hai haru, lene.

<sup>5</sup> Ani layagola Aisaiahanda Hesegaiahondo lamialu lalu, Anduane Homogo Hongo Haiheore kagome bi layago langero. <sup>6</sup> Anduane Homogo ibugua ogodagua lalu, Horo mbira tagira ibulebirago ogonongi agalime mbirale bibahende kini andagaha wini ngarubi bamba inaga mamalirume mo wigi bini dabudabu ngarubi mo yai halu Babilono dindiha yalu polebira. Tigua emeneore mbira yu wanahe bibahendeore Babilono mo yalu piai holebira. <sup>7</sup> Ani bialu igiri daliahe maru ini damene karunibi garabayabu yalu pu dege bulebira. Igiri uruni haru puwa tinaga pindu nogonaga miradagua bialu Babilono dindinaga kini andagaha biabe biahaga helo helolebira laya, lalu Aisaiahanda lene.✧

<sup>8</sup> Hesegaia ibugua bi uruni hale howa Aisaiahondo lalu, Anduane Homogonaga bi áyu ihondo langiriruni bayaleore langiri, lene. Ani lenedagoni irane genda uruni ibu kagolando mani ibulubayane manda buwa lene. Ibugua lo manda bialu, Áyu i kongi mbirale mo ko holene uruni naibulebirago ina wairu nabi bayaleore holeberema, lo manda bini.

## 40

*Ngode Datagaliwabenaga wali agaliru bayale helonaga haru dai bulebira lenego ogo*

<sup>1</sup> Inanaga Ngode Datagaliwabehanda lalu, Inaga wali agalirunaga bu miniha mo hongo habe.

Ti gi holene mo embeda howa elahe helo helabe, laya.

<sup>2</sup> Yarusaleme wali agaliruhondo bi ogodagua lamilimu,

Anduane Homogohanda lalu, Tígua ko bialu harimigonaga tandaga karulapeore nalu harimigoni.

Tígua mana ko wiaru bialu harimigonaga mana lalu ai áyu ko birimiruni domo wahai hene kamigoni, laya.

<sup>3</sup> Mbiralime galalu,✧✧

Dindi ko wali agali nahaga ngagoria Anduane Homogo ibilo hariga ba hole manda bialu halimu.

Inanaga Ngode Datagaliwabe kago ibilo hariga tigabiore ba halimu.

<sup>4</sup> Dindi ulini hambene ngaru mo dondelai halu✧

dindi hari emene timbunibi bibahende godogege biai halimu.

Hariga pidipodabi ngago tigatiga wilo bo tiga bialu

hariga ko ngago bayuwa mbaralalu mo tiga bilimu.

<sup>5</sup> Ani biragola ogonongi Anduane Homogonaga wá taraore holene hapani holebira.

Wali agali dindi bibahendeha karume wá taraore holene ogoni de handai holebira.

Bi ogoni Anduane Homogo ibunime aniore bulebero lalu lowini.

<sup>6</sup> Mbiralime galalu, Bi latagi ha, laya.✧

Ina ladai bialu lalu, Ina bi ago latagi hoabe, laru.

Bi biagome lalu, Bi ogodagua latagi habe,

Wali agali bibahende karu datani minana anda hagadagua anda haga ka.

Tinaga yári bulene ngaru palawaya lini ale nga.

<sup>7</sup> Anduane Homogohanda puyabu poboyogobi ibilarangi

datani gaulalu palawayaru abaleore dogolopebe biaga ka.

Ogonidagua dege wali agalibi heneneore tigi mbira hangu howa abaleore ereba haga.

<sup>8</sup> Datani gaulalu palawayaru abaleore dogolopebe biaga.

✧ 39:7: Dan 1.1-7, 2 Kin 24.10-16, 2 Bit 36.10 ✧ 40:3: Md 3.3, Mg 1.3, Yo 1.23 ✧ 40:3: Lg 3.4-6 ✧ 40:4: Ais 45.2 ✧ 40:6: Ya 1.10-11, 1 Pi 2.24-25

Anigoyu inanaga Ngode Datagaliwabe ibunaga bi mana ngago dege wiaabo haga winigo nga, lalu latagi habe, lene.

<sup>9</sup>Yarusaleme-o ína hari nene ngarunaga irigi howa bi mana debene latagi habe.

Saiono-o ína bi mana debene ogoni bi hongo howa ga lalu latagi habe.

Gi nahe howa latagi habe.

Yuda dindiha tinaga tano maru ngaruhondo lamialu,

Tínaga Ngode Datagaliwabe o ibiragonigo de handadaba labe.

<sup>10</sup>Anduane Homogo Bibahende Haru Haame Ho Haga kago ibugua ibuninaga hongo timbuni heba o ibiragonigo de handadaba.✠

Agalime wai bialu ibunaga waitigiru bo podalu uruninaga dabudabu bayale ngaru mo yalu dai biagadagua

ibugua ibunaga wali agaliru ibuni pele mialu haru dai biyaru heba ibiragoni.

<sup>11</sup>Nogo sibi haru hagarume tinaga sibiru haru hagamadagua ibuninaga wali agaliru baya hanguore haru holebira.✠

Ibugua nogo sibi iginiru mo mogo buwa

ibuninaga gime igrini emene biaru minu yalu bialu

angibuniru mandagi pelo baya hangu haru halu polebira.

*Isaraele wali agalirunaga Ngode Datagaliwabe ibu duniniore kago ogo*

<sup>12</sup>Agali mbiralime iba solowara bedago gi habeni hambu yai habehebe.

Hari li ngago luni tubagila ogobiore nga lalu manda bibebehe.

Mbiralime dindi bibahendenaga dindi abalu mo mogo bialu gabo beha mo gambirai habehebe.

Mbiralime dindi haribi dindi hari hambene bare ngarubi uruninaga genda magi ogobi lalu manda bibebehe.

<sup>13</sup>Wali agali mbiralime Anduane Homogohondo ogo ale mbira bia lalu lamulene karulape kabe.✠

Mbiralime ibuhondo ogodagua bibe lowa mbirale ibu biawai halubi bibehe ai kabe.

<sup>14</sup>Ibugua mana tigabi bayale ngaru bialu haabo helonaga pigane aiwa biawai henedabe.

Ibunaga mini mandabi baya burugule ngaruni agohayagi howa minidabe.

Uruni mbiralime biawai halu lawai henebi ndo ka.

<sup>15</sup>Anduane Homogo ibugua dindi tara tarani hameigini kamaruni hondowa ina emene koore kamane hendeda.

Ina datani karunaga dadimba bedaru alebi kamane hendeda.

Solowara hanuni dindi podene mbira wuape karunaga genda magi bame yabiabi be abalu ale dege mandabu ka.

<sup>16</sup>Lebanono dindi irabu timbuni ngagoha ema bialu piaga karu bibahendeore bai howa inanaga Ngode Datagaliwabe ibuhondo lomabu delolene nakarulape ka.

Irabu ogoni ira dewaore karubi bibahende dibai howa loma binirunaga dabuni delolene emene halu ndia holebira.

Uruni bame nahabane dege ngagoni.

<sup>17</sup>Dindi bibahendehe hameigini tara tara bu karuni bibahendeore Anduane Homogo ibugua handalu karia uruni emeneore nahabane bu kane hendeda.✠

<sup>18</sup>Ngode Datagaliwabe ibuore ai ale manda bibebehe.✠

✠ 40:10: Ais 62.11, Mo 22.12 ✠ 40:11: Ese 34.15, Yo 10.11, Hi 13.20, 1 Pi 2.25, 5.4 ✠ 40:13: Lm 11.34, 1 Ko 2.16

✠ 40:17: Iba 62.9, Dan 4.35 ✠ 40:18: Ab 17.29

Mbirale mbira ibu aleore agi ngabe.

<sup>19</sup> Ibu agali gime mbirale bi pupu wulenaga wabinigo ale ndo ka.

Mbirale urunibi wabuwa bayale helo ngolo silibarume hira dambi henego ngago ogoni ale ndo ka.

<sup>20</sup> Uruni bi pupu wulenaga wabule howa agali yagibano karume ngolo silibaru mibe nahe haga ka.

Anigo ibugua ira hongohe giambe togo nabiaga kago dabalu dibaga.

Ibugua dibalu bi pupu wulenaga ogoni ale wabiaga mandabi kago hai biaga.

Uruni ale wabiaga kagome mbirale ibira howa gingirulobaga nabilonaga ibugua wabiaga kagohondo wabia ha laga ka.

<sup>21</sup> Ai tí manda nabioire kamibe.✧

Mbiralime ti langiabi nabi halebi nahe dege kamibe.

Piganengiore mbirale bibahende karubi ngarubi dindi ogo ogodagua bialu winida lowa bi te layanebi mbira hale naheore henedabe.

<sup>22</sup> Uruni bibahende Anduane Homogo Kininaga biragane dagia hari daliga ngagoria biruwa ibunime uruni wabiai hene o bu ngaruni ndobe.

Ibugua hari li kagoni mo yanga lowa ibunaga balai anda ale helaga ka.

Ani biaga kagome ai wali agali dindini kamaru handa dali halu

ina bame uburuli emene ale kamaria hendeda ndobe.

<sup>23</sup> Anduane Homogo ibugua agali haguane karubi kini karubi bibahende hingedape howa

ti mini lene ndo nagaloneore helaga ka.

<sup>24</sup> Uruni ti tomo egene ale howa agalime áyu dege egene hingedagola dindiha pini nape wene ngaore dege

Anduane Homogohanda puyabu poboyogobi ibilaragola egene abale gaulalu bame galone nabulene ngaligobi kagoni.

<sup>25</sup> Anduane Homogohanda lalu, I mini tigabiwi baya buruguleore kogonibi mendeali ai kabe.

I aleore mbira ai kabe, laragoni.

<sup>26</sup> Tígua hariha handa daga halimu.

Yakundi bu kane hendedamiruni aiwaore wabu helenedabe.

Uruni Anduane Homogo ibunime wabini ndobe.

Ti bibahendeore ibunaga wai biaga ami ale howa haru halu

ibunime ti ogodagua ka lowa dagalai halu

tinaga mini wiai halu manda biai ho kagoni.

Ibunaga hongo timbuniore kagome

ti mbirago mini nawi daga nalene yu wa naheore hai kagoni.

<sup>27</sup> Yagaba waneigini Isaraele wali agaliru-o tí gomogomo lo kamigo agibe.

Tígua lalu, Anduane Homogohanda inanaga genda yu kamaru nahende bi marume inahondo ko biragola ibugua ina biamogo nabi kagoni, lalu kami.

<sup>28</sup> Ainde tí manda nabi kamibe. Halebi nahe dege kamibe.✧

Anduane Homogo ibu tínaga Ngode Datagaliwabe haluhe kagoni.

ibugua mbirale dindini ngarubi harini bu karubi bibahende wabiai henego ibuni hangu ka.

Ibunaga hongo holene emene mbira ibira nahagaore ka.

Mbiralime ibunaga mini ngaru handai habe naheore ka.



<sup>29</sup> Anduane Homogohanda mbirali erekui halu hongo nahe ngoēle karu mo hongo howa helaga ka.

<sup>30</sup> Igiri daliahe karuni tinaga tingini gedaore haga ka.  
Igiri hongohe karuninaga hongo biba halu ibira haga kagoni.

<sup>31</sup> Ai wali agali maru Anduane Homogohanda ti biamogo bilonaga mini mbiraore wuwa karu<sup>✧</sup>

ti ibira nahe hongo haho wiaabo holebira.

Ti ega hariawe ale babagane hongohe howa hari daligaore yagalagagobi ka.

Tigua gerai layaguabi ha nalolebira.

Hariga luore piyaguabi pobe manga naholebira,  
lalu Aisaiahanda lene.

## 41

### *Anduane Homogohanda Isaraele wali agali haru dai bulebero lenego ogo*

<sup>1</sup> Ngode Datagaliwabehanda lalu,

Dindi kaundiaha wali agali hameigini tara tara kamiru ti bibahendeme bi nale howa ina bi larogo hale hadaba.

Tigua mana tinime bialu harimirunaga kodi deni howa bi latagi haga bule manda manda bialu hadaba.

Bi ai ibunaga larago henedabe handamiya ina haru mandagi ibu ngoai ho hamiya.

<sup>2</sup> Mbirali dindi bibahende ibu poragoha wai bialu wayali helonaga agali ni tagira ibiragohayagi howa dabaluni kini heleneyago aiwabe.\*

Dindi tara tara wiaru ibunaga giha mo ya halu dindi odaruninaga kini hearubi bope helonaga hongo miniyago aiwabe.

Ibunaga wai biagane ayu tibu ne gadele yigome durumbu dibaradagua dibu budabaga biniru be abalu ale mo wiaruni.

Puyabume widi aeane hilo yalu purogo lagadagua ibunaga danda timurume ti bo purogo lo helene.

<sup>3</sup> Ibu ibalu howa geme dindi ela nahe bame puyabu poradagua gerai pialu abaleore ibuwa bo hilo waharagola

tigua mbirale mbira biadai bibe nahe holebira.

<sup>4</sup> Mbirale uruni bilonaga mo bia henego ai kabe.<sup>✧</sup>

Bambaore howa mbirale odaruni bima ibinigonaga miniha magoyu henego aibe.

I Anduane Homogo inime dindi ogo pigane wabirungi henego ko.

Mani hamaro birangibi nde i Anduane Homogo iniore dege haho wiaabo holebero, laya.

<sup>5</sup> Wali agali dindi kaundiaha karume mbirale ina biniru de hendene ka.

De hondowa uruni ti gi timbuni halu duru lalu ka.

Anigo ti mandagi hole ibu ngoai haragoni.

<sup>6</sup> Tigua biamogo bigi bigi bialu tininaga bu mini elahenaga mo hongo haga haga bima ibalu kagoni.

<sup>7</sup> Irame mbirale wabiaga agali heagome mbirale ngolome wabiaga heagohondo lalu, ina biabe bayale birida, lalu ka.

Bi pupu wulenaga mbirale ngolome wabiaga heagome aeaneru hiru gimbu biaga heagohondo lalu,

ina hiru gimbu bigi biridago bayaleoreda, laga.

<sup>✧</sup> 40:31: Iba 103.5    \* 41:2: Agali kini hongohe ogoni Pesia dindinaga Kini Sairusinaga lene. Bi te ogoninaga Aisaia 44.28, 45.1, 46.11 gilibu wigi bidago handabe.    ✧ 41:4: Ais 44.6-7, 46.10, Mo 1.8, 1.17

Ani wabiai howa gime wabini ogoni dindini ibira howa dodo gingirulo hole bulilono agali mili бага biagohondobi, Bayale birida, lalu tini hangu hangu mo hongo haga biaga.

<sup>8</sup> Anigo Isaraeali inaga biabe biahagaore kamiru tí Yagabanaga hameigini howa inime dabarugoni.✠

Inaga nenegeali Abarahama ibunaga aguanaliore tí kamigoni.

<sup>9</sup> Ina tíore dindi kaundiaore howa haru ibirugoni.✠

Tí dindi gibuni gibuni leneha howa haru halu ibirugoni.

Tí inaga biabe biahagaore kami lalu langiru.

Inime tíhondo manga howa erembira ngialu ndo tí inaga halimulo dabo helarugoni.

<sup>10</sup> I tí heba kogonigo tí gi nahe halimu.✠

Tínaga Ngode Datagaliwabe iore kogonigo mbirale ngaru hondowa gi holene nawi.

Inime tí biamogo bialu mo hongo halu holebero.

Ina ti baya hangu mamage halu ininaga hongo timbuni kogome tínaga waitigi karu bope haga bialu tí pele ngulebero.

<sup>11</sup> Marume tíhondo keba halu ti manani haru ibuwa helayagua tinaga bime tí bope habe nahedane hondowa tini taga timbuni holebira.

Tinaga bi lararuni bame nagalone halu tini mo ko halu homolebira.

<sup>12</sup> Marume ti baba wai bialu bo hangeda hole manda bialu karia uruni bame dege halu mo ereba hai holebira.

<sup>13</sup> I Anduane Homogo tínaga Ngode Datagaliwabe kogoni.✠

Ini tí heba kogonigo tí mo hongo halu bi ogodagua laro,

Ina tí biamogo buleberogo gi nahe halimu, laya lene.

<sup>14</sup> Anduane Homogo ibugua bi ogodagua laragoni.

Isaraele wali agaliru tí dewa ndo howa hongo nahe kamigo

inime tí haru dai biaga kogome tí biamogo buleberogo gi nahalimu.

I Isaraele wali agalirunaga Ngode Datagaliwabe mini tigabi baya buruguleore howa inime tí mo wialu pele ngiaga kogoni.

<sup>15</sup> Tí polene hariga hapai kago hangedope halu pilimulonaga

ina tí mo hongo halu widi lini hondo ibira ibira bilo bo taulaga nama mbalape gahenge wiagagobi helolebero.

Ina ani berogome tínaga hongo daligaorehe howa tígua hari timbuni wedaru bo haeal-abaga bialu

hari bare ngaru be abalu ale helabehe holeberemi.

<sup>16</sup> Tíha genda bu ngaru dabiabi bame be abalu taulo wahagadagua

puyabume yalu pu waholebira.

Tígua tínaga Anduane Homogo i kogonigo inihondo turu taraore holeberemi.

I Isaraele wali agalirunaga Anduane Homogo mini tigabi baya burugule kogonigo tígua inaga mini yaraga halu holeberemi, laya.

<sup>17</sup> Ibugua lalu, Inaga wali agali burupale howa iba nolene hai bialu

tí kembobe lebolaho howa i olaramigola

Anduane Homogo inime tínaga bi laramigo hale holebero.

I Isaraele wali agalirunaga Ngode Datagaliwabe ini kogome ti embeda halu yu wana-holebero.

<sup>18</sup> Hari bare dindi ko yobi iba nabiraga ngaruha ina iba dugualu

✠ 41:8: 2 Bit 20.7, Ya 2.23 ✠ 41:9: Man 14.2, Iba 135.4, Ais 5.1-7.25 ✠ 41:10: Yos 1.9, Ais 44.2, Lm 8.31 ✠ 41:13: Ais 42.6, 45.1

dindi ulini ngaruha iba bayale gagaheru uliha dugualu pelolebero.  
 Dindi ko yobi wali agali nahagaha iba kuyama timbuni ibalu berelolebero.  
 Dindi iba nabere winiruha iba bayaleru dewa dugualu pelolebero.\*

<sup>19</sup> Dindi ko yobi ogoni wiyagoria ira tamiaru bayale mo anda halu  
 ira hongohe timbuni tara tara maru mini agasiaru oliberu uruni mo andaho helolebero.  
 Dindi ko ngaruha ira ira mini yunibabi saibarasabi ira tara tara maru dewabi anda ho  
 helaga bulebero.

<sup>20</sup> Ani bidogo hondowa wali agali tigua manda bialu Anduane Homogo ina ani biyada  
 manda bulebira.

I Isaraele wali agalinaga Ngode Datagaliwabe mini tigabi baya buruguleore kogome  
 uruni binidane hondolebira, Anduane Homogohanda laya,  
 lalu Aisaiahanda lene.

*Mbirale gime wabiniru ti Ngode Datagaliwabe henene ndo kago ogo*

<sup>21</sup> Anduane Homogo Isaraele wali agalirunaga kini ibugua ogodagua laya,  
 Dindi maru ngarunaga mbirale bi pupu wulenaga gime wabiniru-o tí bibahende godi  
 deni howa tínaga bi hale halu dabelo íbu holene nga.

Bi loleberemiru baya hanguore lo manda mandabu yalu godini howa latagi hole  
 ibalimu.

<sup>22</sup> Tigua kodi deni howa bamba biniru ogodagua bini lalu iname hale halu irane manda  
 bulumaya latagi halimu.

Ani bialu mani bulebiragonagabi ogodagua bulebira lalu laramigo lola harangi ina  
 manda bialu heneda manda bulumaya lalimu.

<sup>23</sup> Ani bulebira laramigo henene tagira ibiyagua nde gime wabini biaru heneneore  
 henedalo hondoleberema.

Mbirale gibi mbira birimiyaguabi turubini mbira birimiyaguabi tí heneneore heneda  
 ina manda bulumayanaga mbirale mbira bilimu.

Ina gi howa handawa bulumayabi tínaga hongo walia halimu.

<sup>24</sup> Anigo henene halu tigua uruni ale mbira bibe naheore kamigoni.

Tínibi tigua beramilirubi irane nagalone bame dege ndodabe.

Wali agali urunihondo bi pupu wiaga karubi ti nde nagalone ko ngubi uruni ale dege  
 ka.

<sup>25</sup> Agali mbira ni tagira ibiragohayagi howa dabo heledogo.

Agali ogoni ibugua inaga mini yaraga haga heago ina ibu uyurahayagi howa haru  
 ibulebero.

Agalime todobene be wabule howa dindi waru duguwa geme hengedo tagada бага  
 biagadagua

ogoni ibugua kini bu karu bibahende bo hengedai hole ibiragoni.

<sup>26</sup> Ai mbirale bi pupu wulenaga gime wabiniru-o uru ale tagira ibulebira lalu tí mbirali  
 kamiru ariame latagi harimibe.

Tí kamiru aria mbirame bi uruni ale latagi halu mbiwia harimiyagua nde iname ibugua  
 bi heneneore laga ka loleberema.

Anigo tí kamiru aria mbiralime bi uruni lalu mbiwia nahe kamigoni.

Tigua bi uruni latagi henego mbiralime hale nahe dege kagoni.

<sup>27</sup> Anduane Homogo ina ala Saiono tanoni hearuhondo ogo ale bulebira lalu latagi  
 harugoni.

Ina agali mbirame bi mana debene Yarusaleme yalu pelo pelarugoni.

Ina ogodagua labe lalu, Tínaga wali agaliru andaga ibalu kagoni, labe lamirugoni.

<sup>28</sup> Mbirale gime wabini wiaruni ina handalu koria ti bi mbira layane nahende dege ko.

Ina tihondo ladai bilonaga bi hale harugolabi mbira ladai nabi dege wia.

\* 41:18: Iba 107.35, Ais 35.6-7, 43.19

<sup>29</sup> Mbirale gime wabini uruni tini nagaloneore wuwa mbirale mbira ema bialu nabulene ale ngaruni de handa nabere. Ke howa uruni bame agali gime wabini degeme mbirale mbira bibe naheore nga, lalu Anduane Homogohanda Aisaiaha howa latagi hene.

## 42

### *Anduane Homogonaga biabe biahaga agali kagonaga bi lenego ogo*

<sup>1</sup> Anduane Homogohanda lalu, ✠✠

Agali ogo inaga biabe biahaga mbira o kagoni.

Horo bibahendengi ina ibu mo hongo haabo haruli.

Ina ibu dabo helenego bibahendengi ibuhondo turu haabo haruli.

Ibuha inaga Dinini hela kogome

ibugua dindi tara tarani hameigini bibahende karuha mana tigabi ngaru hangu mo yalu anda ibulebira.

<sup>2</sup> Ibugua bi dalimu lalu hongo howa nalolebira.

Hariga teneni howa wali agalirume hendelonaga bi lalu naholebira.

<sup>3</sup> Gambe mbira podabehe ema bialu duru lalu kago podope naholebira.

Ira hale mbira hundibehe auhe dalu kago bahundiaore naholebira.

Ibugua mana tigabi bulene ngaru wiaabo helo mo hongo holebira.

<sup>4</sup> Ibugua genda yulene elahe kagola gendarume ibu bope naholebira.

Ibugua dindi bibahende ha mana tigabi bayale hangu bulene hongoheoreme bolangua hai helonaga mo bia holebira.

Wali agali bibahende dindi kaundiaha karume ibugua bi mana bayale ogoni lawai helonaga malia howa hondo ka, lene.

<sup>5</sup> Anduane Homogo Ngode Datagaliwabehanda hari daliga wabuwa yangalalu heleda. ✠ Ani helowa ibugua dindi wabialu dindini datani irabi bibahende andahai ho helo helene.

Ibugua dindini wali agalirubi ema bialu pelonaga holene gahenge buhe lolene pula anda hene.

Anduane Homogo Ngode Datagaliwabe ibugua ibunaga biabe biahaga agali biago-hondo lalu,

<sup>6</sup> Anduane Homogo inime inaga mana tigabi ngaru mo walia habelonaga í olalu hongo karulape ngirugoni. ✠

Ai ina í baya hangu kaware handayaho howa mamage holebero.

Wali agali dindi bibahendeni karu baba habo nalolene bi í togoni howa lo wulebero.

Ina wali agali bibahendenaga wá hagane haleore í helolebero.

<sup>7</sup> Agali de kohe karu lone de hendelo mo dengala holebere. ✠

Agali garabaya anda arumaha karu golope halu tagira pudaba lolebere.

<sup>8</sup> I hangu Anduane Homogo tinaga Ngode Datagaliwabe kogoni. ✠

Tigua inaga mini hangu yaraga halu holene nga.

Agalime mbirale tini gime wabini ngarunaga mini yaraga holene nawi larogo irane inaga wá holene mini yaraga holenebi mendeali heba tale nabulebero.

<sup>9</sup> Ina abale mbira ibulebira lalu mbiwia harugoni áyu tagira ibiragonigo de handadaba.

Áyu ina bi maru gahenge mani ibulebirago naibi ngatagi mbiwia halu lo ngelaro, Anduane Homogohanda laya, lalu Aisaiahanda lene.

### *Anduane Homogonaga mini yaraga halu iba gana lolene winigo ogo*

✠ 42:1: Ais 43.10, Md 3.17, 17.5, Mg 1.11, Lg 3.22, 9.35, Yo 3.34, Eb 1.6 ✠ 42:1: Md 12.18-21 ✠ 42:5: Ab 17.24-25

✠ 42:6: Ais 49.6, Lg 2.32, Ab 13.47, 26.23 ✠ 42:7: Ais 61.1, Lg 4.18, Hi 2.14-15 ✠ 42:8: Ais 48.11

<sup>10</sup> Anduane Homogohondo iba gana gahenge lalimu.  
 Wali agali dindi bibahendeha kamiru-o tígua ibunaga mini yaraga halu iba gana lalimu.  
 Wali agali iba solowarani pialu hagarubi  
 ema bialu piaga ale ibaha biraga bedamirubi  
 dindi tara kaundiaha kamirubi  
 tí bibahendeme Anduane Homogonaga mini yaraga halu iba gana lalimu.  
<sup>11</sup> Wali agali dindi ko lebolahe ngagoha karubi dindi ogoninaga tano ngaruha karubi  
 Ngode Datagaliwabenaga mini yaraga helo.  
 Keda dindi hameigini karume ibunaga mini yaraga hai helo.  
 Sela tanoni wali agali karu tigua hari nene ngarunaga irigiho howa turu halu ga lalu  
 helo hame ledó.  
<sup>12</sup> Wali agali dindi kaundiaha karubi ti bibahendeme Anduane Homogo ibu mini lene  
 kagonaga mini yaraga halu helo.  
<sup>13</sup> Anduane Homogo ibu wai biaga ami agali kago ale howa áyu ibu wai bule tagira  
 poragoni.  
 Ibu amirume wai bule manda manda bialu howa biagadagua bialu wai hoaro lalu  
 hongo howa ladagadaga bialu ka.  
 Ibugua waitigi biaru baba wai birangi ibunaga hongo walia howa ti bope halu ibuni  
 wayali haga.

*Anduane Homogohanda, Inaga wali agali biamogo bulebero, lenego ogo*

<sup>14</sup> Anduane Homogohanda lalu,  
 Luore ina bi mbira nale hendore haabo ho harugoni.  
 Inaga miniha tandaga ibiyago mo pehaga bialu mbirale mbira biatagi nahe haru.  
 Ani birugoyu ai walime gali taba hanalu howa ya yi lalu ga lalu hagamadagua bialu kogoni.  
 Ai haledagola buhe hongo howa ala laga bialu kogoni.  
<sup>15</sup> Ina hari timbunibi emene barebarebi karuni bo podope hai halu  
 datanibi irabu karubi gabu hai helolebero.  
 Iba timbuni porarubi mo hundia hai halu dindi ko wali agali nahaga helolebero.  
 Iba kuyama timbuni bedarubi bibahende hundu tegelowa helolebero.  
<sup>16</sup> Wali agali de kohe karu ina haru halu hariga ala ti napene ngagoria haru polebero.✧  
 Ina ti hariga manda nabinini haru holebero.  
 Ti de kohe howa arumaha haradagua bidago ina aruma holene ogoni mo wá holene  
 helolebero.  
 Dindi ko ngaru inaga wali agaliru ogoriani pelo ina bamba halu mo tiga bulebero.  
 Ogodagua bule laroruni bibahende biaiore holebero.  
 Uruni mbirago embeda halu yu wa naholeberoore.  
<sup>17</sup> Wali agali maru gime wabini ngaruhondo inanaga anduane uruni ka lalu bi pupu  
 wiaga karu  
 ti bibahende ina bo batagi hai harogola ti taga timbuniore holebira,  
 lalu Anduane Homogo ibugua lene.

*Isaraele wali agali hale tuluhe alebi de kohe alebi ka lenego ogo*

<sup>18</sup> Anduane Homogohanda lalu,  
 Isaraele wali agali hale tuluhe kamiru bi hale hadaba.  
 De kohe kamiru de ngala halu bayuwa de handadaba.  
<sup>19</sup> Inaga biabe biahaga harimigo tí de kohe maru karubi ndo tí de nahandabeheore  
 kami.  
 Ina tí inaga bi yalu pilimulo dabo helarugo ai tíore wali agali hale tuluhe maru karubi  
 ndo tí hale paiore kamigo hendedogo.

✧ 42:16: Iba 18.28, Ais 40.31, Md 3.3, Mg 1.3, Lg 3.5, Yo 1.23



<sup>20</sup> Tígua tara tara dewaore de handaramiligo hondowa  
ema nabi donge harimigoni.  
Bi dewaore hale haramiligo howa  
tígua mbira bayuwa hale ha nabi kamigoni,  
lalu laya.

<sup>21</sup> Anduane Homogohanda tihondo mbirale bayale tigabi ngaru dege bialu hayago howa  
ibunaga bi mana lo wiaru tihondo ngiya.  
Irane wali agali maru karume mana ogoni hondowa bayale tigabioroda lelonaga  
ngiyagoni.

<sup>22</sup> Ai áyu Isaraele tí koore kami.  
Tínaga waitigirume ibuwa tí bo wahalu tínaga dabudabu wimiru kayu bu yalu piai haya.  
Tínibi minu yalu puwa garabaya andaha dindi gundu uli tombo wiaruhabi minu bape  
howa panga payaanda haya.  
Mbiralime ti biamogo bialu wai buwa ti gingilo mialu haru dai bulene mbira naheya.

<sup>23</sup> Anigo tí kamiru aria ina bi larogo hale habehe mbirali ai kamibe.

Áyu ogoni howa tígua inaga bi ogo baya hangu hale holeberemibe.

<sup>24</sup> Waitigirume Isaraele wali agali tí mo ko ho balu dabudabu wimiru mo yalu pelo aiwa  
bia layagola biyabe.

O biyaruni Anduane Homogohanda mo bia hene ndoyabe.

Ani biyagoni irane iname ibu erembira mialu mana ko wiaru bialu harimagonaga biya.

Iname ibunaga mana wiaru mo wahalu

ibugua mana tigabi bialu holomaya hameleadagua ndo mana ko wiaru hangu bialu  
harimagoni.

<sup>25</sup> Anidagua birimagonaga ibunaga miniha keba halu tandaga ho kago ina manda  
bulumayanaga

ibugua inanaga waitigi urunime ina bo wahole ibilayagoni.

Ibunaga keba holene ira hungu ale deagome ina Isaraele wali agali dai helaya.

Anidagua biyago bilowa iname irane ogo ale biyadalo manda bialu mini beregeda nabi  
dege kamagonida,

lalu Aisaiahanda lene.

## 43

### *Anduane Homogohanda ibunaga wali agali pele mule lenego ogo*

<sup>1</sup> Isaraeleali Yagaba aguanene kamiru-o

Anduane Homogohanda tí wabu helowa ibugua tihondo bi ogodagua laragoni.

Ina tí pele ngialu haru dai bini kamigo gi nahalimu.

Tí inagaore dabo helowa ina tíninaga mini lalu olarugoni.✧

<sup>2</sup> Iba timbuni poragoria domalu pole domarimiyaguabi ini tí heba holebero.✧

Pialu kamiria ibame tí namu lai naholebira.

Ira hongohe timbuniore dedagoha anda pirimiyagua nde iramebi tí nadolebira.

Ira hungu biragome tí ela naholebira.

<sup>3</sup> Irane i Anduane Homogo tínaga Ngode Datagaliwabe kogonigo

Isaraele wali agalirunaga Ngode Datagaliwabe mini tigabiore kogome tínaga pele ngiaga  
kogni.

Ai tínaga waitigi karunaga giha kamingi Iyibiru Sudanaru Sebarubi urunime tí golope  
helo ina yolo bia dai bialu yupe harogoni.

✧ 43:1: Ais 42.6, 44.2, 44.6, 44.21, 45.4 ✧ 43:2: Man 31.6-8, Iba 91.3, Dan 3.25-27

<sup>4</sup> Ina wali agali hameigini tara tara dindi bibahende ha karuni tí haru dai bulenaga yolo ale yupe harogoni.

Urunidagua buleberogo irane tí inaga gubaliniore kamigonaga tí hameore lowa ina tínaga mini mo yaraga halu ani bulebero.

<sup>5</sup> I tí heba haabo kogonigo gi nahe halimu.✠

Tí damene bibahende maru ni tagira ibiragohayagi halu maru ni paliragohayagi pu giligalalo haruaruni

ina ti haru dai biai holeberogo tígua gi nahalimu.

<sup>6</sup> Wali agali uyurahayagi karuhondo, Inaga wali agali yupe halimu, lalu lamulebero. Unurahayagi karuhondobi, Tinaga dindi dai bilo yupe hadaba, lolebero.

Inaga wali agali maru kaundiaore amura dindi gimbuni ngaruha pu heaguabi uruni bibahendeore haru dai biai helo hame ledó.

<sup>7</sup> Inaga wali agaliore bu kamiruni tí ina wabirugoni.

Tígua ininaga wali agali heneneore hapani kamigola wali agali maru karume tí de hondowa inaga mini yaraga helonaga ani biru,

lalu Anduane Homogohanda lene.

*Isaraele wali agalirume Anduane Homogo ibuni ogobiore ka lalu latagi henego ogo*

<sup>8</sup> Anduane Homogohanda lalu,

Inaga wali agaliru olowa íbu ngoai hadaba.

Tínaga de kagome de nahandaga ka.

Tínaga hale kagome hale nahaga ka.

<sup>9</sup> Wali agali hameigini tara tara dindi bibahende ha karu godi deni íbu ngoai helo oladaba.

Tinaga mbirale gime wabini ngarume bi henene mani bulebirarunaga ogodagua bulebira lalu mbiwia habehe ka aibe.

Áyu bialu kagonaga ogodagua bulebira lalu mbirale gime wabini ngaru agome mbiwia hayabe.

Ainde gime wabiniru mbirame abale ibuwa bi ogodagua layago henene tagira piya lalu wali agali ai ina loleberebe.

<sup>10</sup> Anigo Isaraele wali agaliru tí ina berogobi larogobi mo henene halu tigatiga lara lagane tí kami.✠

Inaga biabe biahaga halimulonaga tí dabarugoni.

Ani birugo irane tígua ihondo mini mbiraore wialu tínaga Ngode Datagaliwabe i hangu kogoni manda bilimulo ani dabaru.

I kogoria mani ho aribia holene mendeali naholebira.

Ala henebi mani holenebi mbira naheore.

<sup>11</sup> Anduane Homogo i hanguore kogoni.✠

Tínaga pele ngiaga iore kogoni.

<sup>12</sup> Ina abale tí biamogo bialu haru dai bulebero larudagua tí haru dai birugoni.

Ina ogoni birugonidagua mbirale gime wabiniru ngagome ani nabi ini hanguoreme birugoni.

Ani birugonaga Anduane Homogohanda ogodagua biya lalu ina biruruni latagi haga tí kamigoni.

<sup>13</sup> Áyubi horo bibahendengibi i Ngode Datagaliwabeore haabo henego kogoni manibi nde ha ho wiaabo holebero.

Ina wali agali hameigini mbirago inaga gime yidogo mbiralime inaga hongo bope halu gingilo mia nabibehe ka.

Ina mbirale bialu kogobi mendealime ogo bibeheda lowa mo aribia naholebira, lalu Anduane Homogohanda lene.

*Wali agali Babilono dindiha garabaya biabe ale bialu heneru dai bulebira lenego ogo*

<sup>14</sup> Isaraele wali agaliru tínaga Ngode Datagaliwabe ibu Anduane Homogoore howa tí pele ngiaga kagome ogodagua lalu,

Inaga wali agaliru tí pele ngulenaga ami agali tara hongohe karu Babilonoaliru baba wai bule pudaba lolebero.

Wai biragola Babilono wali agali uruni ti tinaga iba sibini turu halu biraga biagoriani gi howa bialu

tinaga dindi andaru yu wahalu ibida polebira.

<sup>15</sup> Iniore Anduane Homogo kogoni. I tínaga Ngode Datagaliwabe howa mana bayale tigabi ngaru biaga kogoni.

Ina Isaraele wali agaliru tí wabu helowa iní tínaga Kini kogoni.

<sup>16</sup> Bambaore Anduane Homogo iní kogome iba solowara timbuni bereago dombeneha hariga bope harugoni.✧

Iba yaribu timbuni bialu bereagoha hariga ba harugoni.

<sup>17</sup> Ina inaga waitigi hearunaga ami haru pialu

nogo hosiru gili laga garo ale mini karisi wiaru yalu pialu

hariga ogonidagua dege haruru talima ibalu hemiria

kuni mibe nahe ibame naiore helarugoni.

Agalime arumaha ira hungu pula hundia haragola abale tegelo mina hagamadagua abaleore homai haya.

<sup>18</sup> Anigo áyu ina abale bima ibiruruni mitangi nabi embeda halimu.

Ina bamba bialu harugoni mitangi budai nabilimu.

<sup>19</sup> Mani ina gahenge mbira buleberogo tagira ibulebirago handalimu laro.

Mbirale uruni áyu dege bia pani harago helowa tígua de handa nabioire kamigonibe.

Dindi ko yobi mbirale anda nahaga ngaruha ina hariga ba halu

iba dadabu anda halu pelolebero.

<sup>20</sup> Ani berogola nogo gabua tara tara karume iní mini lene ka lolebira.

Biango dudu ale karubi ega yari ale karubi tígua inaga mini yaraga halu holebira.

Ani bulebirago irane wali agali ininaga dabo helene karume iba ogoni hambu nalu helonaga

dindi ko iba naibaga ngagoha iba pelarogola anidagua bulebira.

<sup>21</sup> Inaga wali agali helo lowa inime dabarurume

tígua turu timbuniore howa iní mini leneore kagoni lalu ladagadaga bialu holebira,

laya, lalu Aisaiahanda lene.

*Isaraele wali agalirume Anduane Homogo erembira mialu henego ogo*

<sup>22</sup> Anduane Homogohanda bi ogodagua laya.

Yagabanaga aguanaliru-o tígua i mitangi bialu lotu naleore harimigoni.

Isaraele wali agaliru-o tígua i handabe manga howa yu waore ho kamigo agileme mo bia hayabe.

<sup>23-24</sup> Tígua mbirale lomabu delalu howa tínaga bu minime inaga mini yaraga nahe bameore bupebe bialu harimi.

Tígua nogo sibiru ihondo bo loma bialu irani dai helonaga delalu howabi

mbirale ira hagua ngabilo delaga mini inisenesi yolo buwa lomabu delalu howabi

nogo barimirunaga habane abene dewaore inaga loma delalu howabi

i hewago manda buwa ogo ale bero lalu ndo bame bupebe bialu harimi.

✧ 43:16: Har 14.21-29

Irane i tí mo erekui bia howa inaga widi liniru ira hagua ngabilo delaga aleru yalu loma bule ibalimu larugo ogonime tí mo manga haruyabe.

Ani ndoyago.

Tígua mana ko dewa bialu ihondo erembira ngeramigonaga ina genda yu howa manga timbuniore halu kogoni ndobe.

<sup>25</sup> Ani birimi tiraga i Anduane Homogo mini leneore tínaga Ngode Datagaliwabe kogo manda buwa<sup>✧</sup>

tígua ko birimiru bibahende domo wahai harugo ai lone mitangi budai nabulebero.

<sup>26</sup> Anigo tígua ko mbira nabi kamalo manda birimiyagua nde tígua inaga mini mo tiga bilimulo bi lamiya.

<sup>27</sup> Tínaga mamali ala pigane henego ibugua ko binigo áyubi tínaga agali haguane karu tiguabi inaga bi mo wahalu kogoni.

<sup>28</sup> Ani biyago inaga deni loma binigo mo miaga agali hearuni ti bibahende mo dodohe helaru.

Yagaba aguanali Isaraele wali agali kamiruni bibahende ina tíha mo ko holene ngeledo. Ina wali agali tara karume inaga wali agaliruhondo mege bialu oba helo heledo, laya, lalu Aisaiahanda lene.

## 44

### *Anduane Homogo ibuni hanguore Ngode Datagaliwabe kago ogo*

<sup>1</sup> Anduane Homogohanda lalu, Yagabanaga aguanali Isaraele wali agaliru-o áyu hale hadaba. Tí inaga biabe biahaga halimulo inime tí dabo helenego kami. <sup>2</sup> Tí pigane wabinigo Anduane Homogo iniore kogoni. Tí dindi ogoria tí aiyahanda taba hana nabiha howa inime tí inaga wali agali daba bagi heneore halimulo lowa dabaru. Ani dabalu inime tí baya hangu halimulo handayaho hama ibinigo áyu kogoni. Inaga biabe biahaga tigabiore halimulo ina gubalini holeneme tí dabenegro kami. Ani binigo tí gi nahe halimu, lalu Anduane Homogohanda lene. <sup>3</sup> Inime dindi lebolahe ngaruha iba odope halu dindi yobi ngaru uruniha ina iba pialu helolebero. Ani bialu ina tínaga waneiginiruha inaga Dinini hela hai halu tínaga aguanenerubi mo bayale haga bulebero.<sup>✧</sup> <sup>4</sup> Ani berogola tínaga waneigini aguaneru ti dindi bayale datani mindibi anda haraligobi halu ira bayale iba angeni gumbile anda hagagobi holebira. <sup>5</sup> Ani heledogola wali agali tara bu karume ihondo mini mbiraore wialu yutiga bulebira. Marume lalu, I Anduane Homogonaga kogoni, laga bialu holebira. Marumebi, I Yagabanaga aguanaliore kogoni, lolebira. Marume inaga mini tinaga gi habeni gili bialu I Anduane Homogonaga Isaraeleali kogoni, lolebira.

### *Mbirale gime wabini uruni inaga biamogo biaga ka laga karu ti luluore ka lenego ogo*

<sup>6</sup> Anduane Homogo Hongo Haiheore kago ibu Isaraeleali heba mandagi haabo howa ti biamogo bialu haga kagome bi ogodagua laya, I Anduane Homogooore bambaore hene kogo manibi haabobo holebero. Ini hangu Ngode Datagaliwabe kogoni mende naheore.<sup>✧</sup> <sup>7</sup> Ainde i ale mende heagua nde ibuni ina kamagoria hapani howa ogobiore kogoni lalu walia holene ngabe. Ani buwa ina mbirale bibahende ala bambaore wabirugo ibugua ogodagua birugo lalu latagi holene nga. Ani lowa nde mani bulebiragonaga ogodagua bulebira lalu latagi holene nga. Henene o layagoniore biragonida lolomaya latagi holene nga. <sup>8</sup> Inaga wali agaliru-o tí mogo lowa duru nale halimu. Bambaore howa ogoale bulebira lalu ina tí langirugo ai áyu tí ina bulebira lalu laga birago henene lara lalu latagi haga tí kamigo. Ai ini ale mende ai kabe. Inime mende kadago manda nabi ko. Ini hangu tí ibalu bira do haga piagone ale kogoni.<sup>✧</sup>

✧ 43:25: Ais 1.18, 44.22, Ese 36.22, Ab 3.19 ✧ 44:3: Ais 35.7, Yol 2.28, Yo 7.38, Ab 2.18 ✧ 44:6: Ais 41.4, 48.12, Mo 1.8, 1.17, 22.13 ✧ 44:8: Man 4.35, 4.39, Ais 41.22, 43.10-12

<sup>9</sup> Mbirale gime wabiaga agali karu tiniore habane nabulene ka. Tinime tinaga gime wabini uruni hondowa turu timbuni hagago bame nagalone dege bialu ka. Wali agali tigua gime wabini ruhondo bi pupu wiaga karu tini uruni mo galone haga ka. Anigo gime wabini inanaga biamogo biaga laga urunime mbirale galone mbira nabiragola wali agali biaru tini taga timbuni holebira. <sup>10</sup> Wali agali tigua nde mini agua wuwa mbirale uruni wabiagadabe. Gime wabini inanaga biamogo biaga laga urunime ti biamogo nabulebiraore. <sup>11</sup> Ai nde mbirale agali gime wabini urunihondo bi pupu wiaga karu tini taga pani nalu holebira. Irane mbirale uruni bame nagalone agali gime dege wabini ngago. Gime wabini inanaga biamogo biaga laga uruni tini bibahende ibai howa urunime galone ogo ale dege biaga lole ibulene nga. Heneneore larogo ina ti mo gi harogola tini taga emene ndo holebira.

<sup>12</sup> Agali mbirale uruni wabiaga mandabi karume ege tole aeane irani delowa tinaga biamogo biaga laga uruni ale wabiaga. Tigua uruni ale wabialu howa aeane odaruni baya hangu tininaga hongome dambu tiga bigi buwa wabiaga ka. Tigua mbirale uruni wabialu tomo ibaru nane howa biabe ogoni bialu hayagua nde tinaga hongo ibira haga ka.

<sup>13</sup> Agalime irame mbirale wabiaga karu tigua ira giambe hongohe kago dibalu baya hangu pelowa luni tubagi lowa mandaru baya hangu bialu haga. Ani buwa tigabi bayaleore ngagola tigua mbirale gime wabini ogoni ale wabulenegobiore penisolorume magi ala bo manda biaga. Ani buwa tigabi ngagola mbirale nabi ale ne gadele ngagome ira ogoni magi helayadagua podama piaga. Ani podalu wabu ngeledagola wabini biago huliya igiri baya mangabiore maru kaligobi naina wabu ngelaga. Ani wabiai howa o biagoni mo yalu puwa tininaga bi pupu wiaga andaha huliya igiri bayale ale biago ogoniha mo helaga. <sup>14</sup> Biabe ogoni bule howa ira hongohe giambe mbira kago dibalu wabiaga. Tigua irabu ngaruha puwa ira mbira kago mani timbu kagola dibule lowa hada biaho helaga biaga. Mbirale uruni wabulenaga ira mbira mbira dugu hangaho howa dalu ibalu ira ogoni mo anda helonaga maliaho haga. <sup>15</sup> Ira uruni dibalu howa maru tini dagare dogo bule delalu maru nde tinaga tomo dawale gabialu delaga ka. Ira mbiraore ogoninaga tigilene maru bayale tigabi haragome mbirale agali mbaule gime wabuwa inanaga biamogo biaga laga ogonihondo bi pupu wialu haga ka. <sup>16</sup> Ira urunime biabe biagane mana ogobi nga. Tigua ira uruni dibalu gabini maru deledagome tomo nogoru hira dawa bialu nowa tombe ho haga ka. Ani bialu ira ogoni degeme tinaga tingini mo poboyogo bia haragola tigua lalu inaga tinginiha karulapeore poboyogo biaruago ira ogoni bayaleoreda laga ka. <sup>17</sup> Ani bialu howa dege ira uruni arianaga tigilene mbiragome tinaga biamogo biaga laga uruni ale gime wabuwa ogoni duniniore lagaya. Tigua mbirale uruninaga mini yaraga halu ge duli hanga howa bulu paligi bialu bi pupu wiaga biagaya. Tigua gime wabini urunihondo bi pupu wialu howa ogodagua lalu, Inanaga biamogo biaga i kegonigo ina biamogo bibe, lagaya.

<sup>18</sup> Ai heneneore wali agali mana urunibi biaga karu ti mini nawi luluore kagoni. Tinaga deni mbiraleme wiapai kagola tigua baya hangu handabe naheore ka. Tinaga minibi mbirale mbirame mo luluya heagola mana lehe uruni bialu haga ka. <sup>19</sup> Agali miniwi kagome nde mana urunibi bialu kago hondowa lalu, Ina ira mbiraore ogoni hangunaga gabini mbiragome ininaga tomo nogoru dawalu dagare dogo bule delalu birugo. Ainde ira ogoninaga gabini mendegome agali handalehe koorene ko mbira biamogo biaga laga gime wabuwa ogonihondo bi pupu wialu kamaru nde aguadabe, labehego. Ai wali agali lulu uruni biaga karu tini mini nawiore howa bi ogonidagua nalaga ka.

<sup>20</sup> Tinaga mini mo koore hai hene howa mana tigua bialu kago lulume ira punga beru dugualu naradagua bialu ka. Wali agali urunime lalu, Mbirale gime wabini inaga gime yu kogoni i biamogo bilo ndo yu harudago bame ira tigrini mbira wiago



dege yu harudagoni, lalu lolene hariga nawiore ka, Anduane Homogohanda laya, lalu Aisaiahanda lene.

*Anduane Homogo ibu ina Wabiagabi Pele Ngiagabi ka lalu lenego ogo*

<sup>21</sup> Anduane Homogohanda lalu, Yagabanaga aguanali Isaraele wali agali kamiru-o inaga biabe biahaga kamiruni tigua ani mitangi biaabo halimu. Inaga biabe biahaga wali agaliore tí halimulo ina ala wabu helarugoni. Tí bibahende kamiruni ina embe-daore naholebero. <sup>22</sup> Puyabume ginu hagua ngaru pulo wahagadagua tigua ko bialu harimiruni ina domo wahai haru. Egerebagi dadimba ngaru ni hongohe daragola mo ereba hagamadagua mana ko bimiruni ina domo wahaiore harugoni. Ina tí haru dai bialu pele ngirugoni manda bialu tigua i koria dai bilimu.✧

<sup>23</sup> Hari li kamiruni tigua turu howa iba gana ladaba. Dindi andaneha ngamiru tiguabi turu howa ga lalu hadaba. Mbirale bibahende dindini hari kamiru tiguabi irabuha ira bu kamiru tiguabi tí bibahendeme nde turu howa iba gana lai halimu. Anduane Homogohanda ibunaga hongobi ibuni mini lene timbuniore kagobi bibahende walia halu ibugua Isaraele wali agali haru dai biyagonaga aniore bulene nga.

<sup>24</sup> I Anduane Homogoore howa ina tí pele ngiaga kogoni. Ina tí aiyá tombeha howa wabu helarugoni. Anduane Homogo iore kogome bi ogodagua langero. Ina bibahendeore karubi ngarubi wabiai harugoni. Hari li kagoni ini hangume wabu helarugoni. Dindi o ngagobi ti halimulonaga wabirugo mbiralime i biamogo nabi inioreme wabiai harugoni.✧ <sup>25</sup> Agali marume mani bulebiragonaga mbiwia haga karu ina ti mo luluya harogola tigua ogoale mbira bulebira larago lola nahaga. Maru de gandeba handaga karubi mo luluya ha dege biruli. Agali mandabi karume bi larago ina mo lulubi ale dege lelaruli. Mini gigabiwi kama laga karu ti mini nawi ale helaruli.✧ <sup>26</sup> Anigoyu ininaga biabe biahaga agali karume mani bulebiragonaga mbiwia halu latagi haragolabi inaga bi yalu piaga karuha howa ina mbirale mbira mani buleberogo lalu latagi haragolabi tigua bi bibahende latagi hayadagua mo lola hai haruli. Ina Yarusaleme tanoha wali agali lone helolebero laro. Yuda dindinaga tanoru lone wilo biadai bilolebero. Tano bo giallo wahene ngaruni lone mo heya ho helolebero. <sup>27</sup> Ina iba solowara timbuni bedagohondo lalu, Hundia, laruyagua inaga bi hale halu hundulebira. <sup>28</sup> Ina agali mbira mini Sairusi kagohondo, Ina inaga haru holene kini habe, lowa biabe ina hame ledodagua bilo helolebero. Ibugua Yarusaleme lone biadai bidaba lolebira. Ani lowa ibugua inaga anda biagobi lone biadai bidaba lolebira, Anduane Homogohanda laya, lalu Aisaiahanda lene.✧

## 45

*Anduane Homogohanda Sairusi kini helo dabo helene go ogo*

<sup>1</sup> Anduane Homogohanda bi ogodagua lalu, Ina Sairusi ibu kini helo dabo helarugoni. Ibugua dindi tara tara baba wai bialu bibahende bo wahaiore holebira. Kini maru karubi ibugua tinaga hongo bo hangedope hai helonaga ina ibu hongo timbuni miru. Kini Sairusi ibugua tano mbiraha wai bialu bo poda anda hole karia inime ibu anda pelonaga tano ogoninaga panga dugua holebero, laya.

Anduane Homogohanda Sairusihondo ogodagua laragoni.✧ <sup>2</sup> I mani ibabelo ini ala bamba halu puwa hari emene timbunibi ngaru bope halu dindi ulini ngarubi mo dondole dege ngelolebero. Tanonaga panga hongohe ege tole boronisime wabu helowa aeane timbunirume hongo howa gedene hatagi karuni ina bo giallo wahowa panga dugua haga bulebero. <sup>3</sup> Dindi uruniha agalime muniru dabudabu bayaluru handabe nahe mo doho ngaru ina i mo ngerogola i Anduane Homogoore henedane ini manda

✧ 44:22: Ais 43.1, 43.25, 1 Ko 6.20, 1 Pi 1.18-19 ✧ 44:24: Ais 40.22, 43.14, 45.12 ✧ 44:25: 1 Bit 1.20 ✧ 44:28: 2 Bit 36.23, Esr 1.2 ✧ 45:1: Iba 107.16, Ais 40.4

bulebere. Isaraele wali agalirunaga Ngode Datagaliwabehanda í mini lalu olayadane henene hondolebere.\* 4 Ina í olalu ininaga biabe biahaga Isaraele wali agali karu biamogo bibelonaga í dabo helaru. Wali agali uruni inaga helo ina ti dabo helene ka. Heneneore ina í manda nabiha kegonigo nde ina ini miniore olalu í agali mini lene timbuni heledo, laya.\*

5 Ani lowa lalu, Anduane Homogo í hangu kogoni mende mbira í ale naheore. Ina í manda nabi kegoyu ina ihondo hongo karulape nguleberogoni.\* 6 Anidagua bialu kogoni irane wali agali dindi bibahendeoreha karume í ale mende nahe í hangu Anduane Homogoore henedane manda bilonaga anidagua bialu ko.\* 7 Inime bi larugola aruma holene wá holenela íbu hene. Wali agali ti bayale holenenagabi genda yu holenenagabi ini degeme yu anda ibaga kogoni. Anduane Homogo ini kogome ogonidagua bigi biruli.

8 Hari daliga li kamiru-o tigua mana tigabi bayale bulene beralibaha howa iba dalu ibira hagadagua mo ibira hadaba. Dindini wali agali bu karuni mo turu holenaga iba dalu ale odope hadaba. Dindini iba dalu ibiragola dindi ogo mo gomba halu tomo mbirale bayale anda hagadagua wali agali ti pele mialu mana tigabi ngaru dege bialu helo hame lowa í Anduane Homogoore ina ani buleberogoni, laya.

*Mbirale bibahende Anduane Homogohanda wabuwa handayaho kago ogo*

9 Agali mbirame ibuni Wabiaga Anduane Homogo kagohondo keba hayagua agali ogoni ibu mini nawiore ka. Ina wali agali nahabaneore kamagoni ndobe. Wali agali kamaruni todobene be dindime wabinigo dodobaga bini wiraligo ale kamagoni ndobe. Anigo dindime todobene be wabule agalime dugu wini ogonime todobene be wabiaga kagohondo lalu, Ina agile wabuleberebe. Ina mbirale waberegoni mugube nayi, lalu lagabe.\* 10 Ina dindini kamaru mbiralime ina aba aiyalahondo hale halu lalu, í ogonibi kogonigo libugua agibulenaga hono wiribibe, laga kamabe. 11 Anduane Homogo Isaraele wali agalirunaga Ngode Datagaliwabe mini tigabi baya burugule kagome bamba Isaraele wali agaliru ibunaga helo dabo helene ibugua lalu, Mani bulebiragonaga tigua inihondo hale holene nakarulape. Tigua inaga waneiginiru ogodagua handayaho holene nga lolenebi biabe ogobi bulene nga lolenebi í mo tiga bibe nahe kami. 12 Inioreme dindi bibahende wabiai howa wali agali dindi ogoriani helobi bibahende wabirugoni. Ininaga hongome hari li kago yangalalu ibuni holene henge ngagoria heledo. Ani helowa ni egebi yakundi bu karubi ti bibahende ina wabuwa tini holene helo haru haabo kogoni.\* 13 Anidagua biaga kogome Kini Sairusi ibugua galoneore mbira bilo ina mo bia holebero. Ibugua biabe tigabi bayale ini hame ledodagua bilo inime ibu dabo heledogoni. Ibu hariga polebiragoha inime bamba halu mo tiga biai holebero. Inaga tano Yarusaleme ibugua biadai buwa inaga wali agali garabayabu heledarubi golope hai holebira. Mbiralime ibuhondo ogonidagua bia lalu yolo biragola ndo ibunime manda bialu ani bulebira. í Anduane Homogo Hongo Haiheore ini kogome bi o ledogoniore, laya.

14 Anduane Homogohanda Isaraelehondo bi ogodagua laya. Iyibi dindihabi Sudana dindihabi muni dabudabu bibahende ngaruni tinaga wulebira. Waitigi karume Seba dindiha howa agali luni karu garabayabu yalu ibuwa tihondo ngiragola uruni tigua tinaga garabaya biabe ale biahaga holebira. Tigua tí kamiria ibalu ge duli hanga howa bulu paligi bialu howa latagi halu lalu, Heneneore Ngode Datagaliwabe ibu tí heba mandagi haabo kagoni. Mendeali ibu kagobi naheore ibu hangu kagoni. 15 Isaraele wali agalirunaga Ngode Datagaliwabe ibugua ibunaga wali agaliru haru dai bule pele miaga howa ibuni ha do haga kagoni.\* 16 Agali maru mbirale bi pupu wulenaga gime wabiaga karu tini taga timbuni holebira. Heneneore ti bibahendeme taga hai

\* 45:3: Har 33.12, 33.17, Ais 41.23, 43.1 \* 45:4: Ais 44.1, 1 Te 4.5 \* 45:5: Man 4.35, 4.39, Ais 44.8, 46.9 \* 45:6: Iba 102.15, Ais 37.20, Mal 1.11 \* 45:9: Ais 29.16, Yar 18.6, Lm 9.20 \* 45:12: Pig 1.26-27, Yar 27.5 \* 45:15: Iba 44.24, Ais 8.17, 57.17

holebira. <sup>17</sup> Anigoyu Anduane Homogohanda Isaraele wali agali ti pele miai kagola ti horo bibahendengi wayali haabo holebira. Ani biragola tigua wali agali maru karunaga wanakuini howa taga holene mbira nawi ti bayaleore haabo holebira, lolebira laya.

<sup>18</sup> Anduane Homogo ibugua hari daliga ngaru wabinigo ibuni hangu Ngode Datagaliwabe ka. Ibugua dindi ngarubi wabialu hongohe wiaabo helo wabini. Dindi ogo bame tayanda ale ngelo ndo mbirale bibahende dindini ngarubi karubi ogoriani hai helo wabini. Ogoni biyagome ibugua lalu, Anduane Homogo ini hangu kogoni. Mendeali i ale naheore. <sup>19</sup> Ina kaundia aruma de handabe nahe ngaruha howa bi latagi hene ndo. Ina mbira bulenaga manda bu harugobi mo do nahe kogoni. Inaga Isaraele wali agalirume ini dindi ko tayanda ale ngagoha i hai bialu erekuibi taya bima ibulene nga lene ndo kogoni. Ani nabi howa i Anduane Homogoore kogome bi bibahende larogo henene tigabi ngaru dege latagi haabo haruli, lalu Anduane Homogohanda Aisaiaha howa latagi hene.

*Wali agali dindi bibahendeha karu Anduane Homogonaga andaneha holebira lenego ogo*

<sup>20</sup> Anduane Homogohanda bi ogodagua laragoni. Dindi tara taraha wali agali bu kamiru-o ti bibahende ibu ngoai hadaba. Wai biaga kamiru-o ti wai birimigome ba nabi yu wahene kamiru tibi godi deni ibu holene nga. Wali agali marume mbirale gime wabini ngaru bi pupu wule yu ibaga biaga karubi ira dibu pelowa mbirale wabinihondo bi pupu wialu ina biamogo bibe lalu karubi ti mini nawi howa ogoni birago nagaloneyago mbirale wabini ogonime ti biamogo nabibehe ngagoni ndobe. <sup>21</sup> Wali agali kamiru ti tinime bialu henedaru godi deni latagi hole ibidaba. Ani bialu tini dege dege lala bialu ayu tagira ibiraruni bamba bi lo ngelenego mbirale gime wabini ago ibuguadabe handalimu. Anduane Homogo inioreme uruni tagira ibulebira lalu bamba latagi haru. Ini hangu Ngode Datagaliwabe kogoni howa ina inaga wali agaliru pele miaga kogoni. I ale mende naheore ini hanguore kogoni ndodabe.

<sup>22</sup> Wali agali dindi bibahendeha kamiru-o ina ti pele nguliya i kogoha ibai hadaba. Ngode Datagaliwabe mende nahe i hanguore kogoni. <sup>23</sup> I Anduane Homogo ininaga minini howa bi lo wirugo heneneore lalu lo wirugoni. Inime bi mbira lo wirugo ogoni lone lo mende naholeore lalu i heneneore laro. Bi ogodagua larugoni dindi bibahendeha wali agali bu karume ibalu ini kogoha bulu paluwa ge duli hanga halu inaga andaneha ti bibahende hai hole lalu bi hongohe lo wigi bulebira. \*

<sup>24</sup> Tigua lalu, Anduane Homogo ibu degeha howa mana tigabi bulenebi hongo holenebi walia hatagi haga ka, lolebira. Wali agali maru i handabe manga haga karume i kogoha ibuwa tini taga pani timbuniore nalu holebira. <sup>25</sup> Anigo Anduane Homogo i kogonime Yagabanaga aguanali karu pele mialu haru dai berogola tigua mini tigabiwi howa ihondo turu halu inaga mini yaraga halu holebira, lalu Anduane Homogohanda Aisaiaha howa latagi hene.

## 46

*Babilono wali agali hearunaga mbirale gime wabini ngaru ereba hai holebira lenego ogo*

<sup>1</sup> Anduane Homogohanda lalu, Babilono wali agali kamiru tigua dama mitangi bialu mbirale gime wabini mini Bele Nebola biagolabo bi pupu wiaga horo timbuni ibirangi tigua mbirale o biagolabo tininaga payani yu ibaga bigi beremili. Ayu tigua mbirale gime wabini ogonilabo nogo dongi erembirani pongo bialu dongi ogonime genda erekuibi manga howa darabiore yalu piaga. <sup>2</sup> Mani handalu kamiria gime wabini ogonilabonaga hongo nawi howa libugua ti biamogo bibe naheoredane hondoleberemi. Waitigi

\* 45:22: Iba 22.27, 65.5    \* 45:23: Pig 22.16, Lm 14.11, Pb 2.10-11, Hi 6.13

karume anda ibalu Babilono bo gialo waharangi tigua mbirale gime wabini biagolabo yalu polebira. Ani bialu Babilono wali agalirume bi pupu wulenaga ogonilabo ereba hai holebira.

<sup>3</sup> Inaga Isaraele wali agali Yagabanaga aguanaliru-o tí emene yu wahene kamiru ina bi larogo hale halimu. Tí aiyahanda taba hanayangi howa ina tí taba yalu baya hangu handayaho haabo ho harugoni. <sup>4</sup> Tí naga Ngode Datagaliwabe i hangu kogome ina tí handayaho haabo holebero. Ani handaya hama pialu kone dege tí dagua halu waheore haramigola ina handayaho haabo holebero. Ina tí wabirugoni ndobe. Anigo ina tí biamogo bialu i kogoha haabo halimulo haru dai bialu handayaho haabo holebero, laya.✧

<sup>5</sup> Anduane Homogohanda lalu, Tígua manda bialu kamiria i kogobi mende ai kabe. Ina birulidagua biai haga mendeali ai kabe. <sup>6</sup> Agali marume muni ngolo silibarubi dewaore mo ilowa tígua mbirale bi pupu wulenaga wabiaga karume wabia helo muni tale bialu tihondo karulape miaga. Mbirale ogoni ale wabiaga mandabi karume wabiai kagola tigua o wabiyagonihondo bulu paluwa ge duli hanga halu bi pupu wiaga ka. <sup>7</sup> Tigua gime wabini biago tininaga payani mo yalu ogoni ibu ngelole mandabu wiyagoria yalu puwa ngelaga. Ani ngelowa mbirale gime wabini ogoni ema bibe nahe wiyagorianiore wiaabo haga. Ani ngeledagoria mbiralime puwa ibuhondo bi pupu wiragola hale nahaga wia. Wali agali tiha genda ibu ngagola o biagohondo biamogo bia laragolabi ibugua biamogo nabibehe wia.

<sup>8</sup> Wali agali inaga bi mo wahalu ko biaga kamiruni tígua bi o larogo hale howa ina ala biruruni manda bilimu. <sup>9</sup> Tígua ina ala bialu haruruni mitangi budai bilimu. Ngode Datagaliwabeore i hangu kagonida lalu latagi halimu. I kogobi mende naheore ini hanguore kogoni.✧ <sup>10</sup> Ala bamba mbirale mbira ogoale bulebira lalu naibi wiaore latagi harugo mani henene larudagua tagira ibini. Mbirale mbira ina bule manda manda bu harugo habo nale mbiralime hapaibi nahe ina biaiore holebero larugoni. <sup>11</sup> Ina bule hamelo kogo bilonaga agali mbira ni tagira ibiragohayagi dabo heledogo olalu ibu larogoni. Ogoni ibugua ega nene abaleore yagalo yalu ibagadagua ibulebira. Ibuwa ina mbirale bule manda manda bu wirugobi biaiore holebira. Inime bule larugonibi nde biaiore holebero.

<sup>12</sup> Wali agali mini giambehe kamiru-o ina bi larogo hale hadaba. Tígua manda bialu kamiria ina tí haru dai bulenenaga horo pongobo wirugoni wene dege ngabe tobaho kamibe. <sup>13</sup> Ina horo ogoni kaware haru eberogoni. Abaleore ibu hapara kagoni ndobe. Inaga mana tigabi wayali holene ibilo emene hondoha nabi ibiragoni. Yarusaleme tano mo bayale halu wali agali karu pele mulebero. Isaraele wali agali tiha ininaga hongo holenebi mini lene kogobi ogoriani mo panaho ngelolebero, lalu Anduane Homogohanda laya, lalu Aisaiahanda lene.

## 47

### *Babilono mo ko holebirago, lalu Anduane Homogohanda lenego ogo*

<sup>1</sup> Anduane Homogohanda bi ogodagua lalu, Babilono-o áyu í kininaga biragane dagian bedego wahalu dindi abalu ngagoriani birape habe. Ala íore mini lene timbuniore biruwa í wandari mabuage agali nape biragagobi birarigoni. Anigo abale ina tingini baya taraore howa birarigobi ndo birulebere. Agali bu karume í yári bayaleru karulo yu ibaga bu bederia nahondolebira.✧ <sup>2</sup> Inaga haguani tangi hanaga ngago golo ngelalu inaga aga bayale karulederu golo wialu í wali garabaya biabe biahaga bedarume bialu biragadagua bialu birulebere. Widime balawa helo dambiagane ege tole beregedaga timbuni ngago mo beregedaga bialu holebere. Iba poraru domalu pole howa inaga agaru yaraga howa domalu polebere. <sup>3</sup> Wali agalime í handalu karia inaga agaru golo

wahene tibabe í taga howa handa dindiho bereria hondolebira. Ina íore mana lalu barogola nabe waha lalu hapai holene agali mbira naholebiraore, lene.

<sup>4</sup> Isaraele wali agalinaga Ngode Datagaliwabe ibu mini tigabiwi baya burugule ka. Ibugua ina biamogo bialu golope henego kama. Ibunaga mini Anduane Homogo Hongo Haiheore lene ka.

<sup>5</sup> Anduane Homogohanda Babilonohondo bi ogodagua lalu, Babilono-o íore bi nale aruma ngagoha birule pobe. Wali agali bu karume íore lalu í dindi bibahendenaga kuini wali beda nalolebira. <sup>6</sup> Ina ínaga wali agali bu hearuhondo keba timbuni halu ti ínaga wali agali hayadalo manda nabiore harugoni. Ani hewagola ina ti ínaga andaneha helalu ina ibalu ínaga wali agali urunihondo dara emeneorebi mbira naheore howa wali agali wahe bu hearubi genda timbuni mo ya haga bialu harigoni. <sup>7</sup> Ínime mitangi bialu howa í kuini wali biraabo holeberobe toba howa mani íniha tagira ibulubadagoha mitangi nabi hilahole bialu waharigoni.

<sup>8</sup> Í wali mbira íni awadaga holeneo hangu taya bialu biraabo haga mbira bedegoni ina bi o larogo hale ha. Ina mitangi bialu howa íha ko mbira anda naibulebirago í bayale dege biraabo holebero lowa ina lalu, Mbiraore í hangu í ale mende nahe bibahendenaga hongo bolanguahe bedo. Wali mbira agalini homene dalo mbira bereagobi í nabirulebero. Í waneigini bibahende homai haga binigobi naholebero, lo mitangibu hari.✧ <sup>9</sup> Anigo íha mbirale ogonilabo abaleore anda ibulebiragonaga dara haro. Íha mo ko holene koorene ko ibirangi í agalinibi í waneigini bu karubi bibahende horo mbiraorengi dege homai holebira. Ina íni bayale haabo holenaga palene wai hongohe tara tara dewa ngogo mandabu harigome biamogo nabulebira.

<sup>10</sup> Ínime mitangi bialu mana ko bialu kogome bayale holoboda lo mandabu hari. Ani bialu ina uruni bialu harigo marume í nahende kabe toba hari. Inaga mini ko bulenenaga gigabiwi kegome ínaga mini mo luluya hayagola ínime lo manda bialu, Í ale mende naheore bibahendenaga hongo bolanguahe bedo, larili. <sup>11</sup> Anigo mo ko holene timbuniore íha anda ibirangi íni yo pialu polenenaga hongo naheore holebere. Mo ko holene ogoni íha abaleore anda íbu ngagola ina ogoni anda naibilonaga gamu bulene mbira nawulebira. Ko mbirale mbira ala nahendene ale íha naibulebira lo mandabu harigo í kegoria abale anda ibalu íni mo ko holebira. <sup>12</sup> Í wandari mabuage biraringi howa palene wai nole tara tara bu manda bialu haga wirigo bia dege bialu birabe. Ani beregome í biamogo bulubada. Urunime ínaga waitigi ibiraru ti gi halu ibida polebira bada. <sup>13</sup> Agali manda timbunibi bu hearume í mini bayale talebu ngiyagola ínaga mini ndibulo wahene kegoni. Agali yakundi handaga manayi bu karu tigua íha ogoale bulebira lalu langilonaga ina ti ege mbira mbirani ibidaba lalu ti olaga birili. Anigo áyu íha ko anda ibiragola uruni tigua í mo wialu biamogo bule ibilo.

<sup>14</sup> Ani biamogo nabibahe holebira ndobe. Agali uruni tibi nde datani gabuni yobi ngaligobi dege kago irame ti do waholebira. Ira timbuni hungu bialu dedagome ti nadelonaga tinime biamogo bibe nahe holebira. Heneneore larogo í ira ogoni dedagoria puwa dagare dogo bialu biruleberobe toba holeni. Ani ndo ira ogonime í dalu do amo lolebira. <sup>15</sup> Heneneore bulebirago laro. Í wandari mabuage biraringi howa agali yakundi handaga manayi íha ibulebirago langilo hale hariliru tigua í biamogo nabulebira manda bibe. Tini nde kagua bialu luluyu ibaga bialu í yu wahalu poragola mbirali í biamogo bulene mbira naholebira, laya, lalu Aisaiahanda lene.

## 48

*Wali agalime Ngode Datagaliwabe ibu Anduane Homogoore kagoni lolene ngago ogo*



<sup>1</sup> Yagabanaga aguanealiru-o ina bi ogo larogo hale hadaba. Wali agaliru tí mini Isaraele howa tí Yuda aguane kamiru-o tihondo bi ogo larogo hale hadaba. Tígua Anduane Homogonaga minini howa habo nalolene bi hongo howa lo weramili. Tígua lalu, Iname Isaraele wali agalirunaga Ngode Datagaliwabe mitangi bialu lotu lalu kama, laramiligo ne harigaha howa bi hangu lalu mana bayale bulene ngaru nabi ibu andanehabi nahaga kami. <sup>2</sup> Ani berami tiraga tígua t́ninaga mini mo yaraga lalu ina tano dunini loma biaho ngelene biagonaga wali agali kama laga kami. Ani bialu howa tígua Isaraele wali agalirunaga Ngode Datagaliwabe ibu mini Anduane Homogo Hongo Haiheore kago ibugua ina biamogo bilonaga hanaho haga kama laramili.

<sup>3</sup> Anduane Homogohanda Isaraele tihondo bi ogodagua laragoni. Bambaore ina tihondo mbirale mbira ogodagua bulebira lalu latagi harugo ai abaleore ina laru-godagua tagira ibilarugola de handaramili.✧ <sup>4</sup> Mbira ina manda birugo t́naga mini giambe hongoheore aeanerubi ege tole boronosi alebi howa ina bi larogo hale lalu talialu bia nabiaga kami manda bidogoni. <sup>5</sup> Anigo ina ala howa tí kamigoria mbira ogoni bulebira larugo nabi howa latagi harugoni. Ina ani larugo irane tígua t́naga mbirale dama mitangi bialu bi pupu wulenaga aeaneru irarume wabini ngarume ani biya lolemini.

<sup>6</sup> Ina mbirale bulebira lalu tí ala langirugoni biai hayane de handarimigoni. Ani hondowa áyu tígua lalu, Anduane Homogohanda heneneore layada, lolene nga. Ai áyu ina tihondo ogoale ibulebira lalu ala langia nabi harugo tí handa nabini wia do henego gahenge ibulebiragonaga langero. <sup>7</sup> Áyu ogoni ina bi latagi harugo lola haragoni uruni ale bamba nabiniore. Abale binidale tígua de hondowa manda biai kama lalu kamile. <sup>8</sup> Inime tí inaga wali agaliore halimulo daba bagiho helarungi howa hama ibinigo tí mini bilinahe ndo áyubi tí mine lalu bi mo wahaga dege kami manda biai kogoni. Anigo ina tihondo mbirale uruninaga bi langia nabigo tígua bi ogoni ala nahaleheore harimigoni.

<sup>9</sup> Wali agali karume i mitangi bialu inaga mini yaraga helonaga ina tihondo keba hatagi nahe kogoni. Ina tihondo keba timbuni howa tí bo wahai holene winigo keba ho donge ho kogoni. <sup>10</sup> Ina t́ni ko para kago domalu mo bayale holene manda birugo agalime silibani dodo para kago do lagalo wahelo irani delagadagua ina tí tandaga ngeledogo ko wahalimulonaga ngeledogoni. <sup>11</sup> Ini mini lene timbuniore kogo mitangi bialu anidagua birugoni. Wali agali bu karume inaga mini mo dindiha lalu yo nahendelo inaga mini hangu yaraga helonaga anidagua birugoni, lalu Anduane Homogohanda Aisaiaha howa latagi hene.

*Anduane Homogohanda Sairusi dabalú ibu wayali helo biamogo binigo ogo*

<sup>12</sup> Anduane Homogohanda lalu, Isaraele wali agali Yagaba aguanali inime olo helene kamiru-o tígua ina bi larogo baya hangu hale holene nga. Ini Ngode Datagaliwabe kogoni. I piganeore henego mani hamarongibi ini dege haho wiaabo holebero. Mende i ale nahe ini hanguore kogoni.✧ <sup>13</sup> Ininaga gimeore dindinaga gene dunini wabu helalu hari daligabi yangalo helarugoni. Dindi harila inime olalu ibidaba larogola libugua abaleore ibalu ininaga wanakuini íbu holebira.✧

<sup>14</sup> Tí bibahendeoreme ininaga bi hale hole íbu ngoai hadaba. Agali mbira ina dabo helenegome ina bia larodagua bialu ibugua Babilonoaliru baba wai bialu bope holebiragonaga gime wabini mbirale wiaru ariame ani bulebira lalu latagi naheore. <sup>15</sup> Anigo agali ogoni ibulebira lalu inioreme latagi harugoni. Ina agali ogoni íbu lalu inime olowa haru ibalu ibu wayali helarugoni.

<sup>16</sup> Ainde tí ini kogoria kaware ibalu inaga bi larogo bayuwa hale hadaba. Bamba hama ibirugoningi howa ina ha do howa bi mbira nalaruli. Mbirale uruni bambaore

wia nabiangi ina ogodagua bulebira larugo bilo mo bia howa birangi i holebero, lalu Anduane Homogohanda lene.

Anduane Homogo Bibahende Haru Haame Ho Haga kagome ibunaga Dinini ihondo ngialu i mo hongo halu i pu laya handala ibinigo kogoni, lalu Aisaiahanda lene.

*Anduane Homogohanda ibunaga wali agali pele mule manda bu henego ogo*

<sup>17</sup> Anduane Homogo Isaraele wali agalinaga Ngode Datagaliwabe mini tigabi baya burugule ti pele ngiaga kago ibugua bi ogodagua laya. I Anduane Homogo tinaga Ngode Datagaliwabe kogoni. Ina ti bayale halimulonaga mana bayale ngaru taluwa bialu halimulo lawai haga kogoni. Tigua hariga tigatiga pilimulo haru piaga i kogoni.

<sup>18</sup> Tigua inaga bi mana hale halu bidamile nde ti bayale halu iba piaga harigaha iba hundia nabi pialu haabo hagadagua ti turu holeneha dege haabo kamile. Ani bidamile iba solowarame iba angeni hongo howa tala amu nana bima ibagagobi tinaga mana beremigo tigabi hongoheore bialu kamile. <sup>19</sup> Ani bu kamile nde ti waneigini dewaore iba mu daga labe nahe ngaligobi kale. Ani kale nde ina tinaga mini dindi ogoria ereba nahelo ina baya hangu handayaho kole, lalu Anduane Homogohanda laya.

<sup>20</sup> Tigua Babilono dindiha wali agali karu helalu dindi ogoni yu wahalu ibida piai hadaba. Puwa tigua turu timbuniore hama kiaulo yalu dindi bibahendeha bi loyogo lowa lalu, Anduane Homogohanda ibunaga biabe biahaga Isaraele mo wialu pele mialu haru dai biya, lalu latagi hama pilimu. <sup>21</sup> Bamba Anduane Homogohanda ibunaga wali agali dindi ko iba dalu naibaga wiagoha haru piyangi uruni ti mbira iba noa halu homa nabi hene. Anduane Homogo ibunime ege tole timbuni heagoha howa iba ibilene. Ibugua ege toleha howa iba duguatagi hayagola ti iba gagahe bayale karulape nalu hene.

<sup>22</sup> Anduane Homogohanda lalu, Wali agali mana ko biaga karu ti bayale howa mo palia holene handa walia naholebira, lalu Anduane Homogohanda laya, lalu Aisaiahanda lene.

## 49

*Dindi tara taraha hameigini karunaga wa hagane Isaraele holebira lenego ogo*

<sup>1</sup> Dindi tara taraha hameigini kamirubi dindi kaundiha kamirubi ti bibahendeme ina bi o larogo hale hadaba. Bamba i aiyahanda taba hana nabi ibu tombeha berewangi Anduane Homogohanda i ala mini lalu dabene. Ibugua biabe biahaga holiya ibugua i dabo helene. <sup>2</sup> Ibugua i ibunaga bi lahaga howa ina bi larogome mbira wai biagane ayu tibu nene gadeleme podagadagua wali agalinaga bu miniha nogoba helo i mo la hene. Ibuninaga giha i ya do howa timu yandareru baya hangu deho manda manda biagadagua ina biabe bayuwa buliyanaga i mo tiga bialu helene. <sup>3</sup> Ani buwa ibugua ihondo ogodagua laya. Isaraele-o iore inaga biabe biahaga kegoni. Iha howa wali agali bibahende bu karunaga deni inaga hongobi ini mini lene kogobi ti walia holebero, laya.

<sup>4</sup> Ani layagola ai inime dege bi ogodagua ladai biru. Ina biabe bialu harugo nagalone ale birudagoni. Ina hongo howaore biabe birugo ai inaga hongo biba halu birugonaga lini mbira nadole biabe bame bu waharuda larugoni. Anigo Anduane Homogo ibunime biabe ndelahe ina bialu harugo manda bida. Ogoni birugonaga yolo ibunime karulape ngulebira.

<sup>5</sup> Anduane Homogo ibugua i aiyana tombeha berewangi biabe ogoni buliyanaga i dabeneya. Anduane Homogonaga wali agali ina haru dai buliyanaga ibugua ibunaga biabe biahaga holiya i dabo helaya. Isaraele wali agaliru dindi tara taraha purugolo karu ina haru dai buliyanaga i dabo helaya. Anduane Homogo ibugua i mini lene laga kagoni inaga hongo holene tene ibuha kagoni.

✧ 48:18: Man 32.29, Iba 81.13, 119.165 ✧ 48:20: Mo 18.4 ✧ 48:21: Har 17.1-6, Dag 20.2-11 ✧ 48:22: Ais 57.21 ✧ 49:1: Yar 1.5 ✧ 49:2: Hi 4.12, Mo 1.16

<sup>6</sup> Anduane Homogohanda ihondo langialu lalu, Inaga biabe biahaga-o abale ina Isaraele wali agali yu wahene hearu ini kogoha ti hongohe helo haru daibule biabe bialu habe laru. Ai ina biabe tara hongoheore wiago ihondo bia laro. Ina wa holene hale ale howa dindi tara taraha hameigini tara bibahende karu ini kogoha haru dai biai habelo heledo. Ani beregome ti bibahende pele miai holebero, laya.✠

<sup>7</sup> Isaraele wali agalinaga Anduane Homogo ibu mini tigabi baya burugulebi inanaga pele ngiagabi kago ibuguaibunaga biabe biahaga biago mitangi bialu ogodagua laya. Wali agali dindi tara tarani karume ibu handabe manga hagabi ibu agali ko ngubiore mbira o kagoni lagabi ka. Agali ogonime ibu agali haguane karunaga biabe biahagabi kagoni. Anduane Homogohandaibunaga biabe biahaga o biagohondo lalu, Kini karume i hondowa ti heyu holebira. Kini igini haguane karume ge duli hanga halu bulu paluwa inaga mini yaraga haabo holebira. Tigua inaga mini yaraga holebiragonaga irane i Isaraele wali agalinaga Anduane Homogo mini tigabi baya burugulebi kogome ina bulebero laruru mbira pugua nabi biaiore haruligobi inaga biabe ina bibelo dabenege i kogoni, lalu Anduane Homogohanda lene.

*Anduane Homogonaga biabe biahaga kagome bulene winigo ogo*

<sup>8</sup> Anduane Homogohandaibunaga biabe biahaga biagohondo bi ogodagua laya, Ina i haru dai bialu pele ngulene horo mbira pongobo winigo ibiragola horo ogoningiore ina dugu berego hale howa dara halu biamogo bulebero. Ina i mamage howa baya hanguore handayaho halu i togoni howa wali agali dindi bibahendeha karu baba habo nalolene bi hongohe lo wulebero. Isaraele dindi mo ko hene ngagoni lone mo bayale howa inaga wali agali tini dindi ogoniha hadai bialu bayale holebira.✠

<sup>9</sup> Wali agali garabaya andaha karu ina golope halu pudaba lalu maru aruma dindiha karuhondobi wa kagoria tagira ibidaba lolebero. Ani larogola tagira ibalu ti nogo sibi datani nolene dewaore hariganibi hari ngaruha bu paya bidaria nama piagadagua tigua tomo karulapeore nalu holebira. <sup>10</sup> Ani ibalu kagola ti tomo ibabi karulape nalu garibi nalolebira. Poboyogo birangi nime tinaga tingini daba naholebira. Mbiralime ti gubalini howa bayuwa haru halu iba gagahe pedagoha nogo sibi haru piagadagua ti iba bayale nalu helo haru holebira.✠

<sup>11</sup> Dindi hari karu inime wabirugo ina bo haeala бага bialu mo tiga bulebero. Inaga wali agaliru pelonaga ina hariga bayale timbuni bope halu wulebero. <sup>12</sup> Ani bidogola inaga wali agaliru dindi kaundiaha howa ibalu dindi uyurahayagibi ni paliragohayagibi uruniha howa ibulebira. Maru nde Asawana tanoha karu tibi nde ibulebira, laya lalu Aisaiahanda lene.

<sup>13</sup> Hari daliga li kamiruni tigua turu halu iba gana ladaba. Dindi-o inabi nde turu halu mambolo balu habe. Hari wedamiru tiguabi nde turu halu iba gana lagimbu bidaba. Anduane Homogohandaibunaga wali agali biaru dara howa ti genda tandagaru yu heneru mo bayale halu tinaga bu miniha hadapayabu holebiragonaga turu halu ani bidaba.

*Anduane Homogohanda wali agali Yarusaleme tanoha haru dai binigo ogo*

<sup>14</sup> Wali agali Yarusaleme tanoha hearume ogodagua laya. Anduane Homogohanda ina erembira ngiya. Ibugua ina embeda halu yu wahayada, laya. <sup>15</sup> Ani layagola Anduane Homogo ibugua tihondo ladai bialu lalu, Wali mbirame waneigini gali ibuni taba henenege embedaho wahalubunimeore andu minigo gubalini nahagabe. Wali aiyameibunaga waneiginihondo ogonidagua biaga wiaguabi ina inaga waneigini embeda halu yu wanaholeberoore ndobe.✠ <sup>16</sup> Yarusaleme-o ina iore embeda naholebero. Ina i mini

✠ 49:6: Ais 42.6, Lg 2.32, Ab 13.47, 26.23 ✠ 49:8: 2 Ko 6.2 ✠ 49:10: Iba 121.6, Ais 33.16, 35.7, Mo 7.16-17

✠ 49:15: Mal 3.17, Md 7.11, Lm 11.29

inaga gi habe kiobalini gilibu yu kogoni ndobe. Ogoni handalu ina iniore mitangi biaabo haruli.\*

<sup>17</sup> Inaga waneigini biarume í mo bayale hole o dai biragoni. Maru abale í mo ko haga biaruni tini dai nabule puabo haragoni. <sup>18</sup> Ina handadaga howa handa amu nana bia nabere. Inaga waneigini biaruni mo ngoai halu ini keria dai birago de handa. I Anduane Homogo Haluhe kodagua heneneore laro. Wandari bedarume agali pole yári bialu howa turu taraore hagadagua ina inaga waneigini uruni ibirago hondowa turu taraore holebere.

<sup>19</sup> Heneneore inaga dindi mo ko hene bameore winigo ai áyu inaga waneigini dewaore urunime dindi ogoniha hole dai bialu ho tolatagi haragola dindi inime henge nawiore holobada. Wali agali maru í mo ko halu piaga biarume tí heba lone mandagi nahe nde dindi kaundiaha pu holebira. <sup>20</sup> Í waneigini uruni ti inaga wali agali biaru ti dindi kaundiaha garabaya bu heangi anda henego tigua awe ihondo lalu, Dindi ogo emene hangudago ina holene dindi timbuni hameledema, lolebira. <sup>21</sup> Ani laragola inime lalu, Waneigini dewa uruni aiwa nginidabe. Inaga waneigini biaru pu ereba hayagola ini waneigini maru hono wibe nahe biraragoni. Waitigi bu hearume i garabayabu yalu pu wahayagodago waneigini uruni anda helo handaya howa mondo bialu henedago aiwadabe. Ini hanguore biru wirugo ai waneigini uruni ti agoha howa ibinidabe, lolebere.

<sup>22</sup> Anduane Homogo Bibahende Haru Haame Ho Haga kago ibugua bi ogodagua ibunaga wali agalihondo laragoni. Dindi tara taraha hameigini karuhondo ina gibu mialu manane mbira walía holeberogo hondowa tigua inaga waneigini uruni haru halu dai bulebira. Tigua waneigini uruni maru payani berelalu maru gini babiho yalu ibulebira. <sup>23</sup> Kini karu ti í aba haradagua bialu kuini wali bedaru tibi nde í ajiya biragadagua birulebira. Tigua í keria ibalu bulu paluwa inaga mini yaraga holebira. Í kegoria ibalu tigua tini mo dindiha halu ge duli hanga haga bulebira. Ani birago hondowa jore Anduane Homogo henedane hondolebere. Wali agali ina ti biamogo buliya mini dunubia ho karume ti bame ndo dunubia holebira, laya.

<sup>24</sup> Waitigi hongohe karume tinaga mbirale bu ngaru mo yalu piyagua nde mbiralime dabudabu uruni lone gingila mu yalu dai bibehe kabe. Waitigi uruni degeme tinaga damene mbira minu yalu piyagua nde tigua agali ogoni haru dai bibehe kamibe.

<sup>25</sup> Anigoyu Anduane Homogohanda Yarusalemhondo lalu, Heneneore ina inaga waneigini garabayabu yalu piyarubi dabudabu mo yalu piyarubi bibahendeore waitigi kini hongoheore karunaga giha yu karuni mo yalu dai bulebero. Tigua í baba wai biyagua nde ina ti baba wai biadai bialu inaga waneigini uruni bibahende pele mialu haru dai bulebero. <sup>26</sup> Ani buwa inaga waitigi bu karu tini degedege wai bilo mo bia holebero. Tini degedege wai buwa mo ko halu waini iba hongohe nowa luluyu halu biagadagua bialu tini bo galipayabu wahaga haga bulebira. Ani birago hondowa wali agali dindi tara tarani bibahende karume ini hangu henene Anduane Homogoore henedane manda bulebira. Mbiralime í pele ngialu golope henego jore kogoni manda bulebira. I Isaraele wali agalirunaga Ngode Datagaliwabe hongohe taraore kogoni manda biai holebira, lalu Anduane Homogohanda laya, lalu Aisaiahanda lene.

## 50

<sup>1</sup> Anduane Homogohanda bi ogodagua laragoni. Tigua manda bialu kamiria agalime ibu one nogo dugu ngi lalu pu lagadagua ina inaga wali agaliruhondo pudaba layabe toba kamibe. Ani manda bu kamiyagua nde wali onene waharo lalu bi bebani gilibu winidago a yu kamigo. I baba agali mbiralila danobi nahe dege kogo. Irane agonaga ina ti muni dano henego hondolenaga minalu muni taguialu dindi taraha garabaya

\* 49:16: Har 13.9, Sol 8.6

biabe ale bialu helo pelayadalo manda bidamibe. Anidagua nabiorego. Tígua mana ko dewa birimigome i mo tandaga hayagonaga ina Yarusaleme erembira mialu waitigi hearunaga giha mo ya harugoni ndobe.

<sup>2</sup> Ina tí taya bima ibalu hewaria agali mbiraoreli mbira naheyago agua biyabe. Ina tí olalu hewariabi mbiralime ya nalarimigo agua biyabe. Tígua manda bu handalu hemiria ina tí pele ngulene hongo nahe kabe toba harimibe. Ina bi hangu larogome iba solowara timbuni bedaruni hundu tege lolebira. Ina bi dege larogome iba timbuni pedaruni hundialu iba piagarunaga be abalu titaulo wulebira. Ani biragola iba uruniha wena bedaru homai howa ngu bulebira.\* <sup>3</sup> Hari daliga li kagoni ina mo aruma halu wali agalime ti damene mbirago homaragola dara howa aga mindibi karulo kaligobi helabehe kagoni, laya lene.

*Marume Anduane Homogonaga biabe biahaga kagohondo handabe manga henego ogo*

<sup>4</sup> Anduane Homogo Bibahende Haru Haame Ho Haga kago ibugua ina bi bayaleore loliyanaga lawai hayagome ina wali agali maru hongo nahe karu mo hongo halu bi bayale tigabi ngadagua laga buliyanaga lawai haya. Egerebagi bibahendengi ibugua bi gahenge i lawai hararu hale holiya mo hale hoa haga ka. <sup>5</sup> Anduane Homogohanda ibunaga bi bayuwa hale holiya inaga hale mo dugua haga biaga. Ani bigi biragola ina nde biabe ogoni bibe manga howa ibu erembira mialu pu nabi bialu harugoni. <sup>6</sup> Ogoni bialu hewaria agali bu hearume i gewa tibume erembirani belo helalu agali urunime ihondo mege bialu i yo handalu inaga angari hewaru minu dugualu hearia ani bilo ina bi nale waharu. Tigua inaga denguiha hamiaga toloba haga biyagola wanakui handa tara nahe ani bilo waharugoni.\*

<sup>7</sup> Anduane Homogo Bibahende Haru Haame Ho Haga kago ibugua i biamogo bialu kagome agali ko urunime mana ko ihondo biragome i mo tandaga nahaga. Anigo inime hongo howa hibu lalu inaga biabe biaga wiyago bialu haruli. Ina biabe ogoni bialu kogome ini taga holene mbira nawulubada lo manda buwa biruli.\* <sup>8</sup> Ngode Datagaliwabe ibuni iha kaware haparaho kagome iha ko mbira nawida lolebira. Ila godi laba lole agali mbira kabe. Anigo mbirali heagua nde i manani haru pu helowa ibunaga bi yinidago latagi holene nga.\* <sup>9</sup> Anduane Homogo Bibahende Haru Haame Ho Haga kago ibugua i pele ngiagaore kagonidago agali ina ko mbira biri labehe mende ai kabe. Agali ina ko mbira birigo godi lama laga karuni ti agaru ngaria bombome no tidabagabu wiraligobi tiniha mo ko holene lola holebira.\*

<sup>10</sup> Wali agali Anduane Homogonaga andaneha howa ibunaga biabe biahaga kagome bi larago hale halu bialu kamiru tí gi naheore holene nga. Tí hariga poramigoni aruma ndibuleoreha pirimiyaguabi Anduane Homogo ibunime tí handayaho kago manda buwa ibunihondo mini mbiraore hongohe wuwa polene nga. <sup>11</sup> Anigo wali agali maru Anduane Homogohondo mini mbiraore nawi kamirume arumaha pole howa tininaga hale hedo yidamigome tíni hariga walia helo lowa hale yalu pilimu. Anduane Homogo ibugua tinaga dindi tu wia kago. Dindi ogoniha tandaga nalu haabo holene nga, lalu Aisaiahanda lene.

## 51

*Wali agalime Anduane Homogo kagohondo mini mbiraore hongo howa wulene winigo ogo*

<sup>1-2</sup> Anduane Homogohanda bi ogodagua lalu, Wali agali maru tígua inaga mana tigabi talialu howa ina biamogo buliya hame lowa i koría ibaga kamiru tí ina bi larogo hale halimu. Ani hale halu tinaga mamali aba aija Abarahama Sarala mandabu dai bilimu.

\* 50:2: Pig 18.14, Dag 11.23, Ais 59.1    \* 50:6: Md 26.67, Mg 14.65    \* 50:7: Ese 3.8-9    \* 50:8: Lm 8.33-34  
\* 50:9: Yob 13.28, Iba 102.26, Ais 51.6-8



Libu ege tole ale hebigoha bo tombe laradagua bialu ina tí yaminigo. Ina Abarahama olenedangi libu waneigini mbira nahe hearia olene. Ina libu mo bayale halu libuhondo waneigini mirugoni. Libunaga waneigini aguaneneru dewaore halu ho dame bia hene.\*

<sup>3</sup> I Anduane Homogo ina Yarusaleme tanoha ko hene ngaruni hondowa ina dara timbuniore howa biamogo bulebero. Ayu ibu dindi ko dalu naibaga yobi ngaligobi ngago mani ina ibu lone mo bayale halu dindi bayale benebere mo ngelalu mbirale bayaleru anda hai helolebero. Ina Idene mabu bayale hangarugobi ngelolebero. Ani ngeledogola dindi ogoniha turuho holene wialu wali agali karume i mini yaraga halu inihondo kaj lolene iba gana lalu holebira.

<sup>4</sup> Inaga wali agali kamiru tí ina bi larogo hale halimu. Ina hameigini tara tara dindi bibahendeni karu tini bayale helonaga bi mana lawai haruli. Inaga bi mana bayale ngogome dindi uruni bibahende ha wá holene hale ale wá holebira. <sup>5</sup> Inaga pele ngulene abale hapara haragoni ndobe. Inaga mana tigabi bulene kaware ibiragoni. Dindi tara tara ngaruha hameigini bibahende ininaga hongome haru hai holebero. Wali agali dindi kaundiaha palima pedarume ina ti biamogo bule ibuliya tigua ihondo mini dunubiaho holebira. <sup>6</sup> Tigua hari daligaha de handadaga halu dindihabi handape hadaba. Hari li ngagoni ginu hagua poradagua piai halu dindi ogo aga labolabo budabaga biradagua budabaga biai holebira. Ani biragola wali agali bame bunguna homaradagua homa paya bulebira. Ani bulebiragoyu ina pele ngulene inaga gini yalu eberogo ereba naholebira. Inaga mana tigabi bulenego mo ko nahe bayale wiaaboore holebira.\*

<sup>7</sup> Wali agali mana tigabi ngago manda biaihe howa inaga bi mana lowini ngago hongo howa yu kamiru tigua ina bi larogo hale halimu. Wali agali maru karume tihondo bi ko laragolabi mege biragolabi tí gi nahalimu. <sup>8</sup> Uruni ti bomborume labolabo no budabaga bialu wahagadagua ereba holebira. Ani bulebiragoyu ina pele ngulene inaga gini yalu eberogo ereba naholebira. Inaga mana tigabi bulenego mo ko nahe bayale wiaaboore holebira, lalu Anduane Homogohanda lene.

<sup>9</sup> Anduane Homogo-o í heyalu ina biamogo bibe. Ina bamba inaga hongome mbirale gibi biridagua hongo ogoni degeme ina pele ngibe. Inime dama puya timbuni iba solowaraha biraga mini Lahaba biago balu bo galibaga biri. <sup>10</sup> Ani bialu wali agali inime mo wialu biamogo biriru haru polenaga iba solowara timbuni bereago mo hundia halu dindi yobini pialu helo hariga pana helari. <sup>11</sup> Wali agali inime gini mialu haru dai bini biaruni tini dalu Yarusaleme turu howa dai bulebiraore manda bido. Tigua dai bialu howa iba ganaru lalu bi hongo howa ladagadaga bialu dai bulebira. Dai buwa tinaga bu miniha genda tandagabi ereba hai halu tinaga turu holene wirago ereba nahe turuho haabo holebira.\*

<sup>12</sup> Anduane Homogohanda ogodagua lalu, Ina tinaga bu miniha mo hongo halu genda yu kamiru mo waholene iniore kogonigo irane aginaga tigua agali maru bu karuhondo gi haramilibe. Uruni ti hongo naheore kagoni. Wali agali bibahende dataniru gaulalu abale ereba hai hagadagua ereba hai holebira ndobe. <sup>13</sup> Anigo tinaga Anduane Homogo iniore tí wabini kogonigo tigua embeda ho kamibe. Inime hari daliga wabuwa yangalo helalu dindi ogonaga gene dindiha kagobi mo hongo howa heledogoni ndobe. I ani kogodago irane aginaga tigua agali ko biaga karume tí mo ko halu bope holobada lowa gi ho kamibe. Agali urunime tihondo mbirale mbira nabibehe kagoni. Ti keba bameore ho waharagoni. <sup>14</sup> Wali agali garabaya pu karu ti abaleore golope holebira. Ti garabaya pu kagola homa nabulebira. Ti golope haragola tomo karulapeore nalu bayale holebira.

<sup>15</sup> I Anduane Homogo tinaga Ngode Datagaliwabeore kogoni. Ina iba solowara mo heya halu iba yaribu timbuni mo bia halu kulundugu timbuniore lelaga biaga kogoni.

Inaga mini Anduane Homogo Hongo Haiheore kogoni. <sup>16</sup> Ina t́naga ne harigaha howa inaga bi uruni latagi halu halimulo t́hondo langirugoni. Ani bialu ina tí inaga gihaore minu yado harugoni. Inime hari daliga wabuwa yangalo helalu dindi ogonaga gene dindiha kagobi mo hongo howa heledogoni. Ina Yarusaleme wali agali bu karuhondo bi ogodagua laro. T́iore ininaga wali agali kamigoni laro, lalu Anduane Homogohanda lene.

*Anduane Homogohanda Yarusalemehondo keba haabo nahenego ogo*

<sup>17</sup> Yarusaleme-o í heya. Í lone heyalu hongo hodai bia. Anduane Homogohanda ibunaga lembo holene waini iba gabo be mbira alego í nabelo ngiyago no biba harigoni ndobe. Ani nowa í luluyu ibagabu harigoni.✧ <sup>18</sup> Ani hegola í gini yalu hariga tigabini haru ibagabu holenaga í igini mbira naheya. <sup>19</sup> Genda timbuniore í heria ibira hayago í dara howa bu miniha mo palia halu biamogo bulene mbira ai kabe. Waitigirume ibalu inaga dindi bo gialahole bialu haealabaga biyagoni. Wai biaga ayu tibume inaga wali agali bo wahaya. Ani bialu inaga wali agali bu hearu tiha hina gari timbuni tagira piya. Íha genda ogoni wiyago mo wahalu biamogo bulene ai kabe.

<sup>20</sup> Inaga wali agali ti bibahende hongo nahe howa ti de mborere biyagola ti dindini odo ibira halu hariga gibuni ngaruha palu wima peda. Ti nogo gabua gonoha daradagua bidagoni ndobe. Tigua mbirale mbira bibe nahe. Anduane Homogonaga lembo timbuni holenebi t́naga Ngode Datagaliwabenaga bi hongohe lolenebi gabo be wiagoha howa nelu hambu miyago tiha tolo ngagoni.

<sup>21</sup> Yarusaleme-o íore genda dewaore yu howa walime lulu iba dewa nowa luluyu wia-gagobiore ngegoni. Anigo í waini iba nowa ndo luluyu nge. Anduane Homogonaga keba holeneme í mo luluya henego ngegoni. <sup>22</sup> Anduane Homogo Bibahende Haru Haame Ho Haga kago inaga Ngode Datagaliwabe ibugua waitigiru baba wai bialu wayali habelo biamogo biaga kagoni. Ibunime íhondo bi ogodagua lara. Í de handa. Inaga keba holene gabo be í giha yu howa nalu no luluyu harigo ogoni inime yamirugoni. Maniorebi ina gabo be ogoniha howa nabelo lone nangulebero. <sup>23</sup> Ina gabo be ogoni agali maru í mo ko hole bialu karunaga giha mo ya holebero. Agali uruni tigua í dindini mo pale lowa í bo hangedalu tigua dindini ge halu poradagua bialu inaga erekunini ge halu ibaga bu hayaru tihondo mo ya helolebero, lalu Anduane Homogohanda lene.

## 52

*Anduane Homogohanda wali agali Yarusalemeha haru dai bulebira lenego ogo*

<sup>1</sup> Yarusaleme-o hongo timbuni howa heya nabere. Í mini lene timbuni mbira kegoni. Ngode Datagaliwabenaga tano lomabia hene kego í yári bayale tara tara ngaru karulowa habe. Wali agali í manda nabi ko biaga karume ti bibahende Yarusaleme íha lone anda naibulebira.✧ <sup>2</sup> Yarusaleme íore áyu darabiore garabaya bu harigoni. Mani nde heyalu be abalu í tinginini para karuni taulo wahalu ini kininaga dagia biraganeni birabe. Wali agali Saiononi garabaya bu kamiru-o pu senime t́naga mani hende karuni hado wahalimu, laya.

<sup>3</sup> Anduane Homogo Bibahende Haru Haame Ho Haga Kago ibugua lalu, Agali mbi-rame íhondo yolo ngialu inaga waneigini uruni ibunaga garabaya biabe ale bialu helo haru pene ndoyago. Ani biyagome ina ti haru dai bule howabi nde mbirali yolo nabi bameore haru dai bulebero. <sup>4</sup> Ini nde Anduane Homogoore kogome bi ogodagua laro. Bambaore inaga wali agaliru tininaga hameme Iyibi dindiha pu hene. Áyuore nde Asirianaga kini kagome wali agaliru minu yalu ibunaga garabaya biabe ale bia helonaga piyangi íhondo yolo nabi bameore minu yalu piya. <sup>5</sup> Babilonoali hearu tiguabi nde anidagua dege bialu inaga wali agali hearu bame garabaya biabe ale bia helo minu

✧ 51:17: Mo 14.10, 16.19 ✧ 52:1: Mo 21.2, 21.27

yalu piyagome inaga agali haguane hearuni bameore dugu bialu bere laya. Anidagua biyagonaga ini yolo mbira mo ya nabi haru. Bibahendengi agali ti haru hagarume mine halu i mege hangu bialu inaga mini mo yo handalu haabo haga.\* 6 Anigo awe nde horo mbira ina mandabu wirugo ibirangi nde inaga wali agali uruni tigua inaga mini manda biai holebira. Ani manda bialu Anduane Homogo ini hangume mbirale uruale bulebira lalu langirugo i kogoni ti manda bulebira. Ai iniore kogonigo manda bilimu.

7 Wali agalirume bi mana bayaleore yalu hari karuha howa ibiragoni hondowa turu timbuniore holene nga. Urunime ibalu lalu, Saiono-o mo palia holene tagira ibira, lalu ti pele ngulene horo ibiragoni. Tinaga Ngode Datagaliwabe ibu bolangua heneore handayaho haga kini kagoni, lolebira.\* 8 Tanonaga pabe daligani mamage handa amu nana bu haga agali karu tigua turu timbuniore howa bi dalimu ladagadaga bialu kagoni hale hadaba. Anduane Homogo Saiono tanoha dai birane tininaga deme de handaragoni.

9 Yarusalemeha kamiru-o turu timbuniore howa iba gana ladaga hadaba. Anduane Homogohanda ibunaga wali agaliru Yarusleme haru dai bialu tinaga genda timbuni yu hearuni mo wahaiore holebira. 10 Anduane Homogohanda ibunaga hongo taraore kago waliala haragola wali agali dindi tara taraha karume de hondolebira. Iibunaga wali agali pele miragola dindi bibahendehe bu karume de handaiore holebira. 11 Ti bibahende Babilono yu wahai halu ibai holene nga. Ani ibule howa Anduane Homogonaga deni bayale ndo ngaruha tinaga bu mini dindini wini nagalone ngaruha bu mini pagaho yalu naibalimu. Ibalu howa ti marume ndisi belediru Anduane Homogonaga andaha wiagaru yalu ibalu kamiru ko mbira tiha para nahe holenaga mana biaga wiyaruni biai halu ibalimu.\* 12 Ti ibule howa bamba Iyibi dindi wahalu ibule abaleore tobane tungulo mialu ibirimigodagua Babilonobi yu wahalu ibida poradagua bialu ndo hendore ibuleberemi. Anduane Homogo ibunime ti haru bamba halu ibulebira. Israele wali agali tinaga Ngode Datagaliwabe ibunime ti maha ibalu baya hanguore mamage hama ibuni heba ibalu haru anda ibulebira, lalu Aisaiahanda lene.

*Anduane Homogonaga biabe biahaga agali ibugua wali agalirume ko biyagonaga pani na haya lenego ogo*

13 Anduane Homogohanda ogodagua laya. Inaga biabe biahaga agali kago ibugua biraru bibahendeore bia debe hai holebira. Ani birago hondowa wali agali bibahendeme ibunaga mini daligaore yaraga holebira. 14 Bamba agali maru hearume ibunaga dengui mo ko halu agali maru hearubi ndo ko taraore heagola wali agalime ibu de hondowa mogo lowa gi haya.\* 15 Ayu nde ani ndogo. Dindi tara tara bibahendehe hameigini hearume ibu handawa bialu kini bu karumebi ibu de hondowa mogo lalu bi mbira labe nahedane handayaho holebira. Anidagua bulebirago irane abale mbira ogonidagua bini layane hale nahenego hale holebira. Ala tigua ogo aledalo manda nabinigo manda bialu wálowa manda bulebira, lalu Anduane Homogohanda laya.\*

## 53

1 Ani layagola wali agalime lalu, Bi galone agibe tobahe o laragoni yutiga bibe nahedago aiwa yutiga bialu mini mbiraore wuleberemibe. Anduane Homogo ibugua biabe hongohe áyu bialu kagonidagua mbira abale biyane ai ina handaribe.\* 2 Anduane Homogohanda ibunaga hameme ibunaga biabe biahaga agali biago dindi ko yobi mbirale anda nahaga be titaule ngagoria ira mbiraore hangu andaho hagagobi helene. Agali ogoni ibu tingini bayale ndo heago hondowa wali agali bu hearume ibu de hondoa nabi hene. Wali agalime agali ogoni hondowa turu howa hame lelonaga mbira nawini tigua ibu hame naleore hene.\* 3 Wali agalirume ibu erembira mialu mege bigi bialu

\* 52:5: Lm 2.24 \* 52:7: Iba 93.1, Ais 61.1, Nah 1.15, Lm 10.15, Eb 6.15 \* 52:11: 2 Ko 6.17 \* 52:14: Ais 53.2-3 \* 52:15: Lm 15.21 \* 53:1: Yo 12.38, Lm 10.16 \* 53:2: Ais 11.1, 52.14

howa tigua ibu handabe manga hene. Ibuha dara holenebi genda yu holenebi tandaga ho holenebi tolaihe heneya. Ani heagola agali maru hearume ibu de hondolilono ti dengui handa tara haga buwa ibu bame nahabane ka mitangi bialu erembira mialu hene.\*

<sup>4</sup> Ibu ani henegoyu iname tandaga nolene winigo ibugua na heneya. Inanaga genda holenebi dara holenebi agali ogonime ya halu heneyane handarima. Ibugua tandaga nalu henegonaga iname manda bialu Ngode Datagaliwabe ibugua pani nelo ko uruni ibuha wia hayada lalu manda birima.\* <sup>5</sup> Iname ko bialu harimagonaga pani ibugua na heneya. Iname mana koorene ko birimarunaga ibu beneya. Ibugua pani tandagaru na hayagome ina mo bayale holene winiya. Tigua ibu minu bayagome ina bayale holomaya mo bayale heleneya.\* <sup>6</sup> Nogo sibirume tini poa kagotha pialu pu ereba hagagobi ale kama. Iname inane hame ledamagoha pugupugu bialu kama. Ani birimagome Anduane Homogohanda ina pani timbuniore ngulene winigo ina ngia nabi wahaluhala pani timbuni uruni ibugua ibunaga biabe bihaga biagome na helo mini.\*

<sup>7</sup> Agali bu hearume Anduane Homogonaga biabe bihaga agali biagohondo kagua biyagola ibugua ibuni mo dindiha halu harugo lowa hibu lene. Tigua ani bialu hearia ibugua bi mbira nale hene. Agalime nogo sibi igini bole haru poragolabi sabinaga irini podole kagolabi ti ema nabi hagadagua ibugua ne halalu bi mbira nale hene.\*\* <sup>8</sup> Tigua ibu bameore minu garabayabu yalu godi lole piyagola maname ibu homelo bolene nga layagola homelo haru pene. Ani biyagola hondowa wali agali bu hearume ibu dara howa mitangi nabi hene. Ina dindi wali agalirume ko birimarunaga homolene winigo agali ogoni ibugua homo aribia hene. <sup>9</sup> Homayagola ibunaga tingini agali mana ko tara tara biaga heagonaga homaliha hora holene winigo ai ani ndo agali muni dabudaburu dewawi hearunaga homaliha hora hene. Ani wini tiraga ibugua ko mbira nabioire howa bi tindule ke halubi nalagaore howa ibu ani hora hole winiya, lalu wali agalirume ani lene.\*

<sup>10</sup> Anduane Homogohanda bi ogodagua lalu, Ini hameme inaga biabe bihaga agali ogoni mo dindiha halu tandaga ogoni henemane mo yila hene. Ani binidagoni irane agali ogoni ibugua wali agalirume ko biyarunaga domo wahagane helo loma binigome ibunaga holene pela hene. Anigo ibu haho ngane dege ibunaga aguaneneru hondolebira. Biabe bihaga agali o biagome Anduane Homogohanda ini bule hame ledodagua bialu howa bayaleore biai haga bulebira.\* <sup>11</sup> Ibugua ibuninaga miniha tandaga uruni naho wiaabo howa mani mbirale bayale dewa tagira ibiraru hondowa ibuha turu holene timbuniore tolo holebira. Inaga biabe bihaga agali tigabi ogoni hondowa i turu ho kogoni. Ibugua wali agali bibahendeme ko biyarunaga pani na hayagome tigua ko biyaru ina domo wahaluhala mo tiga bu howa ti bayale helolebero.\* <sup>12</sup> Inaga biabe bihaga ogonime ibunaga holene pela howa wali agali ko biaga karu homolene winigo ibuni homene. Wali agali bu hearume ko biyagonaga pani nolene winigo ibugua no aribia hene. Ani homole howa ibugua wali agali mana ko biaga hearunaga bi lahalu tigua ko biyago domo waha laya. Ani biyagonaga ina agali haguane bu karunaga wanakuini howa ibunaga mini yaraga ho helolebero. Ani heledogola ami agali hongohe karume wai bialu mbirale wai labuha howa mo yalu ibagadagua inaga biabe bihaga biago ibugua wayali howa wali agali dewa haru dai bulebira, lalu Anduane Homogohanda lene.\*

## 54

### *Anduane Homogohanda Yarusaleme gubalini henego ogo*

\* **53:3:** Md 27.30-31   \* **53:4:** Md 8.17, 1 Pi 2.24   \* **53:5:** Lm 4.25, 1 Ko 15.3, Hi 5.8, 1 Pi 2.24   \* **53:6:** Ais 53.11, Ab 13.38-39, Lm 5.15, 5.18, 1 Pi 2.25   \* **53:7:** Md 26.62-63, Mg 15.3-5, Lg 23.9, Yo 19.9, Mo 5.6   \* **53:7:** Ab 8.32-33  
 \* **53:9:** Md 27.57-60, 1 Pi 2.22   \* **53:10:** Iba 22.30, Yo 1.29   \* **53:11:** Ab 13.38-39, Lm 5.15, 5.18   \* **53:12:** Ais 50.6, Mg 15.28, Lg 22.37, 23.34, Lm 3.25

<sup>1</sup> Anduane Homogohanda lalu, Yarusaleme-o í waneigini nahaga dalo wali ale birarigoni. Ai áyu one agalinila kirabali haabo howa waneigini hagadagua ndo ínaga waneigini dewaore holebiragonaga í turu howa ga lalu iba gana ladaga halu holene nga.✧ <sup>2</sup> Ina dindi timbuni mbira tu wiape howa ínaga balai anda ogoriani heledego mo yangalo helabe. Anda danginaga dariba haga pu nguni dariba haga bulene ibira helowa dindini pu nguni dariba haga bulene ira hongo howa wawa pu nguni biago hongo howaore dariba haga bulene nga. <sup>3</sup> Ani buwa ínaga dindi timbuni wu yangalalu ha amu nana bulene nga. Ani bulene irane ínaga waneigini tigua dindi maru ngaru bibahende ha wali agali karu bope hai howa karulolebira. Ani bialu tigua tano áyu wali agali nahe o ngagoriani ti haame halu ho tolai holebira, laya.

<sup>4</sup> Yarusaleme-o íha taga holene mbira nawulebirago gi nahabe. Agali bu karume í lone mege nabulebira. Abale wandari hibaria biraringi taga harigo embeda halu agalini homene dalo wali biraradagua birarigobi embeda dege holebere. <sup>5</sup> Í Wabini í kogome í agalini haradagua holebero. Inaga mini Anduane Homogo Hongo Haiheore kogoni. Í Isaraele wali agalirunaga Ngode Datagaliwabe mini tigabi baya burugule howa ina dindi bibahende ngaruni handayaho howa haru haame haga kogoni. Inioreme í pele ngulebero.

<sup>6</sup> Isaraeleru-o í wandari mabuage ayure dege agali penego agalinime yu wahalu piyagola mini burugulo biragadagua bedego. Ani bedegoyu Anduane Homogo ina ólalu ogodagua laro. <sup>7</sup> Ina tigimandi hangu í yu waharugoni howa áyu í dara howa gubalini timbuniore kogome í haru dai bulebero. <sup>8</sup> Abale ina íhondo keba howa de handa tara ho haru. Anigoyu maní ina í dara timbuni halu gubalini howa íhondo bayale dege biaabo holebero. Anduane Homogo í pele ngiaga iniore kogome bi ogoni larogoni.

<sup>9</sup> Bamba Noa heangi ina habo nalolene bi mbira lo wialu lalu, Ina dindi ogo ibame lone nanelolebero, larugo. Áyu nde íhondo lone keba naholebero lalu habo nalole lalu lo wero. Ina í mana lalu panibi lone nangulebero laro.✧ <sup>10</sup> Hari wedaru podo ibira hayaguabi hari barebare ngaru ereba hayaguabi ínaga gubalini holene timbuni íha ngogo embeda nahe wiaabo holebero. Ina habo nalolene bi lalu íha bayale hadapayabu habelonaga bi lo wirugoni habo nale wiaabo holebira.✧

Anduane Homogo í dara howa gubalini timbuniore haga iniore kogome bi ogoni larogoni.

### *Anduane Homogohanda Yarusaleme mo bayale holebira lenego ogo*

<sup>11</sup> Anduane Homogohanda bi ogodagua lalu, Yarusaleme-o í darabiore halu tandagabi nalu burupale hengi wali agalime í kegoria hapara howa biamogo bulene mbirali naheya. Aniyago ai ina ege tole muni dewaoreme yolo biaga bayaleore ngarume í lone biadai bulebero.✧ <sup>12</sup> Ege tole bayale tara ngarume dindini howa bima iraga halu mamage haga anda daligaha bayale taraore bialu helolebero. Ina ege tole bayale ngiringarale ngaru muwa ínaga tano pabe panga hongo timbuniorehe helalu pabebi ege tole baya gibi tara tara ngarume bia holebero.

<sup>13</sup> Anduane Homogo inioreme ínaga waneiginiru lawai halu ti kago ha bayale holenebi mo palia holenebi wiaabo holebira.✧ <sup>14</sup> Inaga mana bayale tigabiore ngagome í mo hongo haabo holebero. Ani berogola mbiralime í handape halu mo dindiha nahe howa íha giho holene mbira nawulebira. Íha gi holene ala winiru ereba hai holebira.✧ <sup>15</sup> Maru karume í baba wai bule ibiyagua ina pu larugola ndo tini hameme ibini. Í baba wai birarume ti bo ibira halu ina ínaga giha mo ya holebero.

<sup>16</sup> Ina agali maru ege tole aeane ngarume mbirale tara tara ngaru wablonaga wabu heledo. Tigua mbirale tara tara uruni wabialu howa ira hongohe poboyogobi dedagoha

✧ 54:1: Ga 4.27 ✧ 54:9: Pig 9.8-17 ✧ 54:10: Iba 46.2, 89.33-34, Ais 51.6 ✧ 54:11: Mo 21.18-21 ✧ 54:13: Yo 6.45, 1 Ko 2.10, 1 Te 4.9, 1 Yo 2.20 ✧ 54:14: Yar 30.20



delowa do gedaore kagola duguwa dambu tiga bigi bialu wai biaga ayu tibu timu yandareru wabigi biaga ka. Ami agali wai biaga karu tibi ina dege wabini ka. Urunime tinaga waitigi bu karu baba wai bule howa mbirale wai biaga wabu wiyaruni mo yalu piaga ka. <sup>17</sup> Anigo timu yandare uruni aria mbiraoremehi i bila halu ba nabulebira. Ina heyalu hongo ho howa tigua ihondo, Ina ko ogoni biridago, lalu karuni ladai bigi bialu inaga bime ti mo dindiha helolebere. Mbirale urunidagua bigi biragola inaga biabe biahaga karu mo hongo howa ina ti mo wayaliore helaga bulebero, lalu Anduane Homogohanda bi ogoni laya, lalu Aisaiahanda lene.

## 55

### *Anduane Homogohanda ibunaga wali agali dara howa biamogo biaga kago ogo*

<sup>1</sup> Anduane Homogohanda lalu, Wali agali iba noa howa tongo lalu kamiru-o ti ini kogoriani iba o bedago nole ibidaba. Wali agali muni nayi kamiru i koriamu ibalutomobi nole ibidaba. Waini ibabi nogo andu ibanebi ngago yolo nabi bame mialu nole ibidaba.\* <sup>2</sup> Mbirale tini pele ngia nabiga bu ngaruha muni bameore mohole bialu tombe nahagaore kamigoni aginagabe. Biabe birimigonaga yolo ngiyagome biba halu howa tomo garibi dege lo kamigoni aginagabe. Ani kamiruni bi o larogoni baya hanguhale mia howa ina larogodagua bialu halimu. Ani bialu harimiyagua tomo bayale dendebe tara tara ngaru karulape nalu tombe howa turu ho holeberemi.

<sup>3</sup> Inaga wali agali kamiru-o ina bi larogo hale hadaba. Ti ini kogoha ibidaba. Holene bayale ina nguliya mo ibidaba. Ina ti baba habo nalolene bi mbira lo werogo wiaabo holebira. Abale ina Kini Debidihondo aniore bule lalu lo winidagua bialu ina ti gubaliniore howa tihondo bayale dege biaabo holebero.\* <sup>4</sup> Ina Debidi mini mo yaraga howa mini lene agali timbuniore helewagola ibugua wali agali dindi tara tarani hearu heba handa gimbu bu hene. Ani helowa ibu togoni howa inaga hongo timbuni wiwago wali agali tihondo mo walia haru. <sup>5</sup> Ayu tigua dindi tara tarani hameigini bu karu ala manda nabi harimiru ololeberemi. Ani olaramigola nde hameigini tara tara uruni ti ala manda nabini karumehi hale halu abaleore gerai lalu ti kamiria ibulebira. Anidagua bulebirago irane i Anduane Homogo Isaraele wali agalirunaga Ngode Datagaliwabe mini tigabi baya burugule kogome ogoni mo bia howa ti mini mo yaraga halu mini lene timbuniore helolebero.

<sup>6</sup> Ai ayu Anduane Homogo ibuni ti kamigoha kagonigo tigua ibuni kagoha pialu holene henge ayu ngagoni. Ibugua ti kamigoha kawareore kago ibuhondo bi lalu halimu.\* <sup>7</sup> Wali agali mana ko biaga kamirume mana ko uruni wahalu miniha ko mitangi biaga kamirubi lone mitangi bayale bialu helo. Tigua mini beregedalu Anduane Homogo inanaga Ngode Datagaliwabe karia dai bilimu. Ibugua wali agali ibuni kagoha mini beregedalu dai biraru dara halu tinaga ko biyadaruni domo wahai haga ka.\* <sup>8</sup> Anduane Homogohanda lalu, Inaga miniha mitangi birulidagua wali agali tinaga ngamirubi ndo ngo. Inaga mana birulidagua tigua biaga kamigobi ndo dege taraore ngo.\* <sup>9</sup> Hari mindini li karu dindi ogo yu wahalu daligaore ngagonibi mbirale ina biaga ngogobi inaga miniha mitangi biaga ngogobi tinaga ngamigobi ndo ina bibahende bolangua haiho ngogoni.\*

<sup>10</sup> Iba dalu hariha howa ibiyago hari ligoniha bame dai nabiga ndobe. Ala iba dalu ibiragome dindiha anda pialu dindi mo gomba haragola tomo egene mbirale bayale mo anda helaga. Ani buwa tomo bayale anda kagola wali agalime tomo uruni bialu naga. Inaga bi laruligo ogonibi nga.\* <sup>11</sup> Ogonidagua dege ina bi o larogoni ibu ini koriamu bame

\* 55:1: Yo 4.14, 7.37, Mo 3.18, 21.6, 22.17 \* 55:3: 2 Sml 7.8, Iba 89.28, Ab 13.34 \* 55:6: Md 5.25, 25.11, Yo 8.21, 2 Ko 6.1-2 \* 55:7: Iba 130.7, Yar 3.12, Seg 8.17 \* 55:8: 2 Sml 7.19 \* 55:9: Iba 103.11 \* 55:10: 2 Ko 9.10

nadai bulebira. Ina bi larogonime mbirale ina bilo lalu laruruni bialu holebira. Ani bialu ogoale mbira bule lowa hamelo kogo inaga bigome bulebira.✠

<sup>12</sup> Tigua gi nahe howa Babilono yu wahalu turu hama tagira ibuleberemi. Tano ogoniha howa ina tí haru ibalu mo palia holene heba haru tagira ibulebero. Tí tagira ibalu kamiria hari wedarubi hari barebare ngarubi urunime turu howa iba gana lolebira. Irabuha ira bu karumebi turu tara howa gi habe balu holebira. <sup>13</sup> Áyu pu kuabu ale anihe damene bu karuniha mani ira bayale guraya aleru andaho aribia holebira. Áyu anipu agubandu anihe tara tara andaho kago mani ira hongone anda haga bulebira. Ira bayale uruni ale anda ho haabo kagola hondowa ogoni manane mbira wulebira. Anduane Homogo inime biabe hongohe bialu harugonaga wali agalirume handalu mitangi bilonaga manane ogoni wiaabo holebira, lalu Anduane Homogohanda Aisaiaha howa lene.

## 56

*Dindi tara tarani karu ti bibahende Anduane Homogonaga wali agali holebira lenego ogo*

<sup>1</sup> Anduane Homogohanda ibunaga wali agaliruhondo lalu, Ina tí pele ngialu haru dai bulene horo hapara haragonigo tigua mana bayale tigabi ngaru hangu bialu halimu.

<sup>2</sup> Wali agalime mana ko mbira nabi bayale hangu talialu bialu karubi Sabada horonaga mana ngadagua bialu karubi ina ti mo turu halu biamogo bulebero, lene.✠

<sup>3</sup> Dindi tarani wali agaliru ti Anduane Homogonaga wali agaliru baba íbu hene karu tigua tini degedege bi lalu, Anduane Homogohanda ina ibunaga wali agaliru baba mandagi howa lotu lolene nawi lolebira, lalu ani lolene nawi.

Agali mbirali ibu pindu mo wahene howa ibugua mitangi bialu, Inaga waneigini mbira nahe ira gabu hene kaligobi howa homarogola mani inaga mini nawiore halu ereba holobada, lolene nawiore. <sup>4</sup> Anduane Homogohanda agali ogonibihondo lalu, Ina Sabada horonaga mana lo ngadagua bialu hariyagua mana inime hame ledogobi bialu hariyaguabi inaga wali agaliru baba habo nalolene bi lo wirugo talialu bialu hariyaguabi <sup>5</sup> nde ininaga anda kago inaga mini lene mo wulebero. Horo bibahendengi wali agalirume inaga mini ngago de handaga bialu ti mitangi bigi bilonaga ani bulebero. Ani berogola inaga mini agali maru waneigini honowi karunaga mini ngarubi ndo ti miniore bolanguahe wialu mo embedaho wahene naholebere, laga ka.

<sup>6</sup> Anduane Homogo ibugua lalu, Wali agali dindi tara tara howa ibini inaga wali agali baba bu karuni tigua i andaneha howa ini gubaliniho halu ina bia larudagua bialu Sabada horonaga mana ngadagua bialu ina habo nalolene bi lowirugo talialu bialu hayagua nde <sup>7</sup> ti turu holebira. Ina inaga hari Saiono loma bia hene ngagoria haru porogola ti turu hagabu i andagani holebira. Ani howa tigua loma biniru inaga bo delaga dabu kagoria mbirale tara tara irani dai helo bo delaragola ina turu howa mulebero. Anigo inaga anda kago wali agali dindi tara tarani bu karume ihondo bi lagane anda kagoni lolebira, laya.✠

<sup>8</sup> Anduane Homogo Bibahende Haru Haame Ho Haga kagome lalu, Ina inaga Isaraele wali agali dindi tara tara ngaruha waitigime ibalu garabayabu yalu pene karu lone haru dai bialu kogome bi ogodagua laro. Ina wali agali dindi tara tara ngaruha karu aria tibi haru ibalu inaga wali agali uruni heba mandagi helolebero, lene.

*Anduane Homogohanda Isaraele agali haguane hearuhondo keba howa bi lenego ogo*

<sup>9</sup> Anduane Homogohanda dindi tara taraha wali agali bu hearuhondo lalu, Waitigiruo ai ibidaba. Nogo gabua biango duduru irabu hari ngaruha howa ibagadagua ibalu tigua Isaraeleali agali haguane bu karu bo wahai hole ibidaba. <sup>10</sup> Isaraele agali haguane

uruni tigua tinaga dindi ogo aleme mo ko holebira lalu inaga wali agalihondo mbirale uruninaga bi mana lamialu holene winigoyu ti anidagua nabi bame bu kagoni. Ani howa ti bameore waitigi mamage haga wai pabe nene ngagoria de kohe ale hagadagua bu hama peda. Ani bialu ti biango pageali ibirago hondowa dua nalaga kembobe ko hene mbira haraligobi kagoni. Tinaga emboneha manda emeneorebi mbira nawiore bu ka. Ti bame emaga tara tara ngaru hondolenaga u hangu paliaga bu ka. <sup>11</sup> Tigua biangome tomo dewaore nalu karia tombe nahe howa naabo haga kagobi ale ka. Anigo tigua nogo sibi haru haga howa haru holene tigabi bayuwa manda nabiore ka. Ti hangu hangume tini dege mitangi bialu hame ledadagua bialu tini mini mo yaraga holenaga biabe bigibigi biaga ka. <sup>12</sup> Ti mo ngoaiho kangi tigua ogodagua laga, Ina waini iba nendabu inane hame ledamagobi nole mimiya. Yawibi nde lone ibu ngoai howa dewa nendabuore namiya, laga ka, lene.

## 57

### *Isaraeleali tigua mbirale gime wabini wiaruhondo bi pupu wialu henego ogo*

<sup>1</sup> Wali agali mana tigabi biaga karu homarangi wali agali marume uruni ti mitangi nahaga ka. Wali agali mana bayale biaga uruni tiha mo ko holene mbira anda ibulino Anduane Homogo ibugua ti henemane homelaga ka. <sup>2</sup> Wali agali mana bayale ngago talialu biaga karu homaragola ti halo holene handa walia howa homaliha bayaleore palu wiaga.

<sup>3</sup> Anduane Homogohanda Aisaiaha howa lalu, Wali agali kayu yama ibaga biaganaga waneigini kamirubi bayanda wali bedamirubi tomia biaga kamirubi ti mana ogonibi biaga kamiru ogoria ibidaba. <sup>4</sup> Wali agali mine haga aria kamiru tigua ke halubi mege bialubi bi laramigo aihondo laramibe. Tigua mo guya howa yo handalu hambu gembo lalu hege domia bialu haramigo aihondo birimibe. <sup>5</sup> Tininaga hame kome ti mo yayala haragola tini ira timbuni bu karu andaneha bi pupu wiaga ngagoha pialubi wali agali kayu yalubi haga kami. Ani bialu howa tini waneiginiru dindi ulini egelabo hengebane ngaruha loma bialu bo delaga beremili. <sup>6</sup> Ani bialu ege tole dindi ogoniha ngago dugu yu puwa tinaga bi pupu wiaga ngelo mo yu pu weremili. Tinaga bi pupu wiaga ege tole uruni mo yu pu ngelowa tigua waini iba loma bialu odo delolenebi widi lomabi nde bu delalu haga kamigoni. Tigua mana ogoniale bialu kamigo helowa ina mini beregedalu tihondo dara holobadabe toba ho kamibe. <sup>7</sup> Tigua bi pupu wiaga uyura hari nene ngaruha puwa lomaru bu delalu wali agali kayuru yu haga kami. <sup>8</sup> Tini andaga panga haraba erembirahayagi dama mitangi bialu koorene ko mbirale gime wabiniru bi pupu wulenaga mo ngelo haga kamigoni ndobe. Tigua i erembira ngialu waore harimi. Ani bialu howa wali tinaga lawini bedaru tini kayu bule lowa muni mialu haru halu puwa dagia timbuni wabu ngelarimigoriani kayu bialu haga kamigoni. <sup>9</sup> Tigua weli baya ngabi mini sanda ngarume tinaga tinginini hai halubi tini mo yari bialubi dama mitangi bialu gime wabini mini Molege ngagohondo bi pupu wule piaga kami. Ani bialu tinaga bi pupu wiagane maru mo wulenaga tigua agali maru ti dindi kaundiaha dama mitangi bialu bi pupu wule gime wabiniru taya bima pudaba laga kami. Ani bialubi wali agali homayarunaga homali ngagoha mbirale dama mitangi bialu bi pupu wiaga uruniale mbira ngabe hondole taya beremili. <sup>10</sup> Tigua erekuibi bialu bi pupu wulene taya timbuniore bialu harimigome tinaga hongo ereba haya. Anigo tinaga hongo uruni ani ereba helo waha lowa tininaga hame dimagoliru timbuniore ngelo kamigome dege mo buahe haragola hibuore lalu kami.

<sup>11</sup> Anduane Homogo ibugua lalu, Tigua ihondo ke halu i erembira ngialu mo embeda halu pirimigo ai hondowa gi halu pirimibe. Luore howa ina tihondo keba nahe bi nale haabo harugome tigua i mo dunini halu mitangi nabi harimidago. <sup>12</sup> Anigo tigua

✧ 57:1: 2 Kin 22.20, Iba 12.1

mana ko bialu kamiruni panaga ngelo mo panaho ngelai harogola tigua mana bayale tigabi beremabe toba howa bialu kamirunime tini biamogo nabulebira. <sup>13</sup> Tiha mo ko holene mbira anda ibirangi dama mitangi bialu mbirale bi pupu wulenaga gime wabini yu ngoaiho ngamirunihondo tigua bi pupu wialu ina biamogo bia laramigola o biarume ti hale halu biamogo bulebirabe. Ani nabulebira ndobe. Tiha hongo holene mbira nawioiredagola puyabu emene hangu puloyu ibirarume uruni pulo yalu polebira. Anigo wali agali ini andaneha hole ibiraru ti ina biamogo bialu handayaho harogola tigua dindi inaga wali agalinaga mo wia hene ngogoria ti karulo halu Hari ininagaore lomabu ngelo mo wirugoriani ti holebira, lalu Anduane Homogohanda lene.

*Anduane Homogohanda wali agalinaga ko ngaru domo wahai halu bayale helolebira lenego ogo*

<sup>14</sup> Anduane Homogohanda lalu, Inaga wali agali karu ti ini koria dai bulene nga. Ani dai bulenenaga harigani ege tole ira ngarume tinaga ge giba bobidi lalu ti piloligo baya hangu ilu wahai halu hariga mo tiga bulene nga.

<sup>15</sup> Inagode Datagaliwabe daligaorene daliga haluhe haabo henego ko. Inaga mini baya buruguleore howa ina mana bayale tigabi ngaru biaabo hagaore kogoni. Ani howa ini dalu bayale daligaore ngogoha ko. Anigo dindihabi wali agali bu karume tini mo dindiha howa tininaga ko wiyadarunaga dara howa mini beregedene karu bababi nde ha dege biruli. Ani haruligo irane ina tinaga miniha mo hongo holebi mini dunubia holene tiha helolebi haruli. <sup>16</sup> Ina inaga wali agaliruhondo ti koore biaga kamigoni nale ti baba keba ho haabo naholebero. Ina ti baba keba ho haruyagua nde tiha holene bayale inime hela harugo mo ko holobadago keba naholebero. <sup>17</sup> Ina tihondo keba harugo irane tigua mbirale ngaru dimagoli howa mana ko marubi hamelalu bialu hearia keba haru. Anidagua bialu hearia ina ti pani nelu mialu inaga wanakui tinaga deni handa tara ho haru. Anigo tigua mine haabo halu tininaga hameledago ale dege bialu haabo hayagoni.

<sup>18</sup> Tigua mana ko bialu hayaru ina de handai haru. Anigo ina ti biamogo bialu tinaga ko wiyadaru domo wahalu ti bayale helolebero. Ani helowa ina ti haru halu mo tiga bialu tinaga bu miniha mo hongo howa wali agali dara howa dugu bialu karu tibi mo dungulo helolebero. <sup>19</sup> Tinaga dara holene wiyadaru mo wahai harogola tigua ihondo turu halu kai lolene dege mitangi bu holebira. In Anduane Homogo ina larogo inaga mo palia holene wali agali ini kawareni karuha helalu wali agali kaundiaha bu karuhabi wia dege holebero. Ina wali agali uruni mo bayale howa tiha bayale holene mo wia holebero. <sup>20</sup> Anigo wali agali maru mana ko biaga bu karu tigua iba solowara yaribu bialu haabo howa iba haingodabi iba ambi waru heba ngaru yu pialu iba angeni yu wahaga biragola iba ange bayale winigo mo ngubiaho wiagagobi ka. <sup>21</sup> Wali agali mana ko hangu bule mo tene halu haabo haga bu karu tiha mo palia holene mbira handa walia naholebira, lalu Anduane Homogo ibugua bi ogoni laya, lalu Aisaiahanda lene.

## 58

*Isaraele wali agalirume Anduane Homogo mitangi bialu tomo nane haga mana berema lalu ko dege bialu henego ogo*

<sup>1</sup> Anduane Homogohanda lalu, Hongo howa ga lalu olabe. Inaga Isaraele wali agaliru tigua mana ko bialu kago nabilimu lalu hongo howa ga lalu lamibe. <sup>2</sup> Tigua horo bibahendengi henene dege i mitangi bialu lotu lalu howa mana biaga wiago talialu ina agi hame lenedabe handalu taliaga. Ani bialu howa tigua ihondo hale halu lalu, I heba mandagi turu haga bu holomaya ina bayale dege bialu biamogo bigi bialu habe, laga bu

☆ 57:15: Iba 147.3, Ais 33.5, 40.28, 66.2 ☆ 57:16: Iba 85.5, 103.9, Mai 7.18 ☆ 57:19: Eb 2.17 ☆ 57:21: Ais 48.22, 59.8

ka. Anigo urunime ti henene ndo laga howa ke haga ka. Tigua inaga mana wiaruni mo wahai howa tinaga mana ko ngaru dege mo tene howa bialu haga ka, laga.

<sup>3</sup> Ani bialu howa wali agali uruni tigua hale halu lalu, Iname tomo nane wahalu inane mo dindiha ho kamagonigo ai irane agonaga Anduane Homogo ibugua ina biamogo bialu mbirale bayale mbira nabi kabe, laga ka.

Ani laragola Anduane Homogohanda bi ogodagua ladai bialu lalu, Ai tigua tomo nane kamingi tinaga biabe biahaga agali karu mo ko haga bialu tini hangu mo dunubiaho haga kami. <sup>4</sup> Tigua lalu i mitangi bialu lotu lalu tomo nane hamiya laramiligo lalu howa mana tigua bu walia halu kamiruni tara bialu kami. Tigua keba halu gungu bialu howa agali mende kagonaga dengui bo tugudalu gi bo tagalalu haga kami. Tigua mana ko urunibi bialu howa tomo nane kamigola ina tinaga bi laramiruni hale holeberobe tobaho kamibe. <sup>5</sup> Tigua manda bialu kamiria tomo waho haga horo ogoni kamigome tigua mana bialu kamiruni ina hondowa turuho kobe toba kamibe. Tigua daraho kama lalu walia haga aga bu kamirumebi ma podalu dindini emboneme ela helaga bialu gambe lini peroli puyabume pu laragola yu puibu bigi bialu kaligobi bialu kami. Ani bialu tigua be abalu tamuha dugupe howa beni padamirumebi mana maru tini mo dindiha halu bialu kamirumebi uruni bibahende ina de hondowa turu holeberobe toba ho kamibe. Ai ani ndoyago.

<sup>6</sup> Tigua mana urunidagua bialu kamiruni ina hame nale kogoni. Tigua mana bilimulo hameledogoni uru. Tigua ko tara tara bialu kamiruni yu wahai halu wali agali maru karu bo hangedalu ti mo ko halu kamiruni nabi wahai halimulo hamelo ko. Wali agali burupale darabi uruni mitangi nahe tigua pu senime ti daribaho ngelaradagua beremirubi nogo bulumagarume agalinaga mabuha biabe bilo ira tigini ngagome mani daba homaga howa biabe bialu helo handayaho hagamadagua bialubi kamigo. Ai urunidagua nabi wali agali burupale darabi uruni ti golope hene helo yupe holene nga. <sup>7</sup> Tigua mana bialu halimulo hame ledogo ogodagua. Wali agali tomo garibilo karu tomo nelu milimu. Wali agali yagibano tinaga anda nahe howa burupale karu ti andagaha palelo panga dugualimu. Mbirali aga bulene mbira nawiore howa dagareme duru lalu karu tigua aga ngamiru maru milimulo hameledo. Ani bialu howa ai tinaga dameneore darama mbiraore kamiru aria mbiraligo genda yu heane handarimiyagua nde de nahende tingi halu pu nabi baya hangu biamogo bialu halimu.\*

<sup>8</sup> Tigua ina o bilimu lalu langeroruni baya hangu bialu harimiyagua nde egerebagi ni tagira ibalu wa timbuni haragome aruma ala ho wiyago mo ereba halu poraligodagua tini genda yu kamiruni bibahende mo wahaiore halu ina ti mo bayale holebero. Anduane Homogo ini mini tigabi dege kogome ina bambaho haabo halu mahabi ini dege howa ti poramigoha pele ngialu wa haga bima pialu handayaho haabo holebero. <sup>9</sup> Tigua ihondo bi lalu olaramiyagua Anduane Homogo ina haleore holebero. Ani berogola ina ti heba mandagi henedane manda buleberemi.\*

Ainde tigua wali agali mende karu mo ko howa bo hangedalu kamiru wahalu mendealihondo gi dola haga bialu howa bi ko lalu kamirubi wahalu <sup>10</sup> wali agali maru tomo garibilo kane hendedemigo nelu mialu maru ti mbirale burupale karubi mialu harimiyagua nde egerebagi ni tagira ibalu wa haragome aruma ngagoha mo ereba haraligodagua tiha aruma ho winigo horombe ale ho aribia holebira. <sup>11</sup> Ani biragola ina ti handayaho howa tinaga tingini warago nabe mo hongo halu tiha mbirale tubagi halu burupale hararubi ti karulape yu halimulo inime ngialu haabo holebero. Ani heledogola ti dindi bayale mbirale bibahende anda hai holene dindi ibane bere wiagagobi halu iba hambiaga uliha iba gagahе hundia nabiaga iba biraho wiaga ngaligobi holeberemi. <sup>12</sup> Ani heledogola tano bo gialo wahayaruni tigua lone bia aribia howa anda abale hene gialo wahene gumuni ngarunaga lone bia aribia haga buleberemi. Ani bialu kamigola



wali agali tara karume tí hondowa tigua lalu, E e wali agali hongohe howa tanonaga pabe gialabaga biniru bu tiga biagabi anda giallo waheneru biadai biagabi hariga baya hangu bo tiga biagabi o karuni handadaba laga bulebira, Anduane Homogohanda laya, lalu Aisaiahanda lene.

*Sabada horo mana ngaru talialu harimiyagua ti bayale holeberemi lenego ogo*

<sup>13</sup> Anduane Homogohanda lalu, Inaga horo timbuni wiabagi hene Sabada horo ogonaga mana ngago napugualimu. Horo ogoningi t́nina biabe bulene wiaguabi nabuleore laro. T́gua iní gubalini timbuni howa horo ogoniore ina bayale holomaya Anduane Homogo ina wiabagi hene tara mbira ngagoni manda bialu holene nga. Horo ogoningi bame ibagabu holenebi biabe tara tara bulenebi bi tara tara habane nabulene lolenebi nawiore. ✧ <sup>14</sup> T́gua Sabada horonaga mana uruni baya hangu talialu i mitangi bialu beremiyagua turu holene bayaleore Anduane Homogo iniha ngogoni handa walia holeberemi. Ina bamba dindi t́naga mamali Yagabahondo ngulebero lene biagoria ibalu turu haga bu holeberemi. Dindi ogoriani t́gua tomo nalu holene dewa bu payabu ngagola turu timbuni howa tomo uruni nalu dungulo holeberemi. Ani ho kamiria dindi tara taraha wali agali bu karume tí mini lene lai holebira. I Anduane Homogo ina bi o ledogoniore, laya, lalu Aisaiahanda latagi halu hene. ✧

## 59

*Isaraele wali agalime mana ko biyagola Aisaiahanda hongo howa talialu bi lenego ogo*

<sup>1</sup> T́gua mitangi bialu Anduane Homogo ibu tí haru dai bulene hongo nahe kabe toba nahalimu. Ibhondo bi lamialu kamiru hale nahaga hale tulu kabe toba nahalimu. Ibu ogonibi ndo ka. ✧ <sup>2</sup> T́gua ko birimigome ibugua t́naga bi laramigo hale naholenaga ibunaga wanakui handa tara ho kagoni ndobe. T́naga ko ngamirume Ngode Datagali-wabela mo hangu hangu haga bida. ✧ <sup>3</sup> T́gua ke holene bi taratara lalu keba howa wali agali maru baba bagabaga bialu haga kami. Ani biaga kamigo t́gua wali agali homelo bo wahaga bialu harimirunaga darama t́naga giha para haabo kagoni ndobe.

<sup>4</sup> T́gua godi hale halu howa bi tigabi lolene ngadagua nale howa mbirali godi lole ibirago godini abale haru pu helaramili. Ani haru pu helowa t́gua ke howa bi galone ndo ngago dewa lo paya bialu mendego mo talola halu mo guya haga kami. T́naga bu miniha mana ko bulene hangu timbuni wua toledemigome t́gua mana liahe dewaore bialu kami. <sup>5-6</sup> T́naga mini ko ngamigo tomia biaga nogombi taranaga habane ale nga. Mbiralime nogombinaga habane ogoni nayagua nde ibu homolebira. Anidagua dege t́naga mini ko ngamigome mo ko holene taratara mo yu anda ibalu mendealinaga holene mo ko haramili. Gamuni anda biaga bedaru t́gua tinaga anda bia kagoria ema bialu piaga bedaru gunguni ogoriani do ngaria ibuni hadalu naga beda. Wali agalime gamuni anda bidago muwa ogonime labolabo wabialu mo karulo hagabe. Manane ogonidagua dege biabe t́gua bialu kamigome mendeali kago biamogo bule ndo beremi. T́gua bialu kamigome mendeali kago minu yania howa ti bope halu mo ko holenaga bialu kami. <sup>7</sup> Anigo t́gua bibahendengi mana ko ngaru dege bulene manda bialu abaleore bule hamelo haga kami. Ani bialu t́gua mbirali mana ko mbira nabi kago bameore homelo bo wahole hame timbuni lo haabo haga kami. Ani bialu t́gua wali agali maru bayale kago mo ko hole dege bima ibaga bialu haga kami. ✧ ✧ <sup>8</sup> T́ wali agali maru baba mandagi hendeore holene manda nabi howa t́gua mana tigabi bulene ngadagua nabia kago kami. Mana t́gua beremiliru bibahende tiga nabio ngago marume mana uruni talialu hayagua nde tiha bayale holene ngaria handa walia naholebira. ✧

✧ 58:13: Ais 56.2 ✧ 58:14: Pig 28.13, Man 32.9, 32.13, 33.29, Mai 4.4 ✧ 59:1: Dag 11.23, Ais 50.2 ✧ 59:2: Iba 18.41, Yar 5.25, 11.11, Ese 39.23, Yo 9.31 ✧ 59:7: Min 6.17, Mg 7.21-22 ✧ 59:7: Lm 3.15-17 ✧ 59:8: Ais 57.20-21, Hos 4.1, Lg 1.79

*Wali agalime ko biniru lapani henego ogo*

<sup>9</sup> Wali agalime lalu, Anduane Homogohanda ibu mini tigabi howa waitigime ina hingedape hayagola ibugua ina biamogo nabiyago irane ai manda bidama. Ina wá holene hai bialu kamaria wali agali arumaha gi wagalo hagagobi kama. Ina kamagoha ni poboyogobiore datagi helo hamelo kamaria genda tara tara inaha lola haragome ina arumaha haabo kama. <sup>10</sup> Genda urunime ina de koheme ibagabu haradagua heledagola iname polene hariga taya bialu haabo kama. Horombe ni dedagoria howa ina arumaha ibaga bialu haradagua bidamaria ege tole bu ngarume inanaga ge bidi laabo haragola kamagoni. Inaneme mitangi bialu ina bayaleore holomabe tobaho hemaria ani ndo ina homene ale harimada. <sup>11</sup> Ina mini dege dindiho howa iname biango dudu ale timbuni mini beame gururu laradagua bialu ega puyu bedarume howe dodowe laradagua bialu kamagoni ndobe. Ani kamago nde iname Anduane Homogonaga mana tigabi bayale ngago hai bialu howa handa walia habe nahe. Ibugua ina pele ngialu haru dai bilo hondo harimago ai ogoni kaundiaore nga.

<sup>12</sup> Anduane Homogo-o iname ko dewaore inaga deni birimarume inane yania hai henego kama. Anigo inaneme mana ko bibahende birimaru manda biaiho kamagoni. <sup>13</sup> Iname mana ko uruni Anduane Homogo ihondo birimagoni. Inanaga Ngode Data-galiwabe iname ini erembira ngialu inaga bi mo waharima. Iname maru bu hearu hingedape howa mine halu mana ko tara tara wiaru bialu harima. Iname mendeali kago mo hondo halu ke holene hariga tara tara mitangibu harima. <sup>14</sup> Mana ko inane bialu harimarume inaga mana bayale tigabi ngego amura hobamu helayagola ina ina biamogo bialu haru dai nabi harigoni. Ani bialu iname mana tigabi bulenebi bi henene lolenebi ina hemagoria kaware ndo kaundia ngelo harima. Iname mo ngoaiho harimangi mana irane kira ogonilabo nawi dege harima. <sup>15</sup> Heneneore lolene mbira inaha nawiore kama. Ani kamago howa mbiralime mana ko bulene ngago yu wahayagua agali maru karume agali ogoni lone mo ko holene henge taya bialu haga, lalu wali agalime laya, lene.

*Anduane Homogohanda ibunaga wali agali bayale helolebero lenego ogo*

Anduane Homogohanda ko uruni bialu hearu handalu hearia mana tigabi bulene mbira nawi heago hondowa ibunaga miniha turu naheore hene. <sup>16</sup> Ani bialu mbiralime mendeali heago mo ko halu heagola mbiralime ogonidagua nabiaga lalu mo ko hene biago biamogo bialu mo wulene mbira naheyane hondowa Anduane Homogo ibu mogo timbuni lo hene. Ani howa Anduane Homogohanda ibuninaga hongomebi mana tigabi bulene ngagomebi ti mo wialu bayale helolebero manda bini. <sup>17</sup> Ani manda buwa ibugua wai biagane aga ale ibunaga mini tigabi wulene galukunini mo karulalu ibunaga pele mulene manda ale karulolebira. Ibugua ko biagaru ba dai bulenego ibunaga aga ale karulalu ibu miniha lembo holene ogoni dagarenaga aga ale daligani karulolebira. <sup>18</sup> Ani bialu ibunaga lembo holene ngagome ibunaga waitigi bu karu pani nelu ko tinime bialu hayadagobi karulape biadai bigi bulebira. Ani bialu wali agali maru dindi tara kaundiaha karubi ti bibahende pani nelu mo miai holebira. <sup>19</sup> Anduane Homogo ibugua hongo timbuniore heba ibunaga puyabu hongoheme iba pulalu mo yaribu bia haragola hongo timbuni halu poraligobi ibulebira. Anidagua birago hondowa wali agali dindi ni paliragohayagi karume Anduane Homogonaga mini hale howa mogolo holebira. Ni ibiragohayagi karume Anduane Homogonaga hongobi wá holene tarabi hondolebira. Ani hondowa tigua handawa bialu gi howa ibu andaneha hai holebira. <sup>\*</sup>

<sup>\*</sup> 59:12: Esr 9.6, Yar 14.7, Hos 5.5    <sup>\*</sup> 59:16: Iba 98.1, Ais 63.5, Ese 22.30    <sup>\*</sup> 59:17: Ais 9.7, Seg 1.14    <sup>\*</sup> 59:19: Iba 113.3, Ais 11.9, 24.15, 30.28

<sup>20</sup> Anduane Homogohanda ibunaga wali agalihondo lalu, Ina tí heba mandagi haabo hole Yarusaleme ibalu Yagaba aguaneneru mana ko birimiru lapani halu mini beregedene karu ti pele ngialu haru dai bule ibulebero. ✧ <sup>21</sup> Ani ibalu ina tí heba habo nalolene bi mbira ogodagua lo wialu, Inaga Dinini ibu tíha helowa tínaga ne harigaha howa inaga bi mana latagi halu holeberemi. Tígua anidagua bialu haabo kamigola tínaga waneigini karumebi tínaga aguanene mani hama polobadarumebi ina bilimu larudagua bialu haabo holebira, lalu Anduane Homogohanda Aisaiaha howa bi ogoni lene. ✧

## 60

*Anduane Homogonaga hongo holenebi wá timbuni holenebi Yarusalemeha wulebirago lene ogo*

<sup>1</sup> Anduane Homogohanda lalu, Yarusaleme-o í heyalu ni daradagua bialu wá hagimbu bia naberego. Áyu ininaga hongo holenebi wá taraore holenebi íha wá timbuni hadali haragoni. <sup>2</sup> Dindi tara tara wiaruha ginu hagua mindibi wiarumebi aruma hagabu mindibi wiarumebi wali agali bu dambi haiho ngagoni ndobe. Anigoyu Anduane Homogo ininaga wá taraore holene íha hadali holebero. Ina íha haabo kogome ininaga wá taraore holene ogoni wiaabo helo heledogoni. <sup>3</sup> Íha wá timbuni holene ogonime wá harago handalu dindi bibahendehe howa hameigini tara tara í keria ibai holebira. Kini bu karu tiguabi íha wá holene hongohe ogonime wá hadali haragoni handalu tibi nde í keria íbu dege bulebira.

<sup>4</sup> Ina handa amu nana bialu o biragoni de handabe. Inaga wali agali biaru mogo bialu amu ibiraruni handa. Í iginiru ti dindi kaundiaha howa ibalu í waneru walime dindi taraha howa gime taba yalu ini keria ibiragoni. <sup>5</sup> Ani ibirago hondowa íha bu mini yangalo turu holene tolai holebere. Í kulalu turu taraore holebere. Iba sibi timbuni ibirarume dabudabu bayale dewaore mo yalu ibulebira. Dindi tara tara bibahendehe howa dabudabu baya gibiore ngaru í mo turu holenaga mo yalu íbugu bialu ngigi bulebira.

<sup>6</sup> Nogo kamele dewaore daga aulolebe tobahe uruni ti Midiana dindibi Eba dindibi howa ibulebira. Urunime tinaga erekunini dabudabu bayaleore wiaru mo paga howa yalu ibulebira. Ti Seba dindi ala pialu ogoniha howa ngolobi ira hagua ngabilo delaga mini inisenesirubi mo yu ibulebira. Ani ibirago hondowa wali agali bu karume Anduane Homogo ina birugonaga lamialu inaga mini yaraga halu holebira. <sup>7</sup> Nogo sibi dewaore Keda dindi howabi Nebaiodo dindi howabi haru halu ibulebira. Nogo sibi uruni inaga loma biniru bo delaga dabu ngagoria bo delaragola Anduane Homogo ini turu timbuni holebero. Turu howa inaga anda biago mo yáribia halu mini lene bayale taraore ngelebero.

<sup>8</sup> Iba sibi ibiraru hari beraliba puyabume pulo yalu ibagadagua ibiraruni agiledabe. Egarume alendo haragola andaga bululo yalu dai biagadaguabi ibiraruni agiledabe. <sup>9</sup> Iba sibi dindi tara kaundiaha howa ibiraruni urunime í hondo yalu ibalu inaga wali agaliru Yarusaleme ini keria haru dai biragoni. Tigua ngolo silibaru dewaore iba sibi uruniha yalu ibiragoni. Ogonidagua yalu ibirago irane ina í mo bayale halu mini leneore helewago hondowa tigua Anduane Homogo Isaraele wali agalinaga Ngode Datagaliwabe í mini tigabi kogonigo inaga mini mo yaraga holenaga ani ibiragoni. Ina dindi tara tarani hameigini bibahendeoreme inaga wali agali karu mini lene kagonida lelo mo la harugoni, laya.

<sup>10</sup> Anduane Homogohanda lalu, Yarusaleme-o dindi tara tarani agali karume inaga pabe lone biadai bule ibulebira. Tinaga kini bu karumebi nde inaga biabe bia holebira. Bamba ina íhondo keba howa mana lalu pani nabelo ngirugo. Ai áyu nde ina í dara

halu gubalini howa biamogo bule kogoni. <sup>11</sup> Dindi tara tarani hameiginirume tinaga muni dabudabu bayale ngaru í mo turu halu bame ngule yalu ibilo horombe mbiragabi inaga tano pangaru dugua ho wiaabo holebira. Tinaga kini karubi inaga garabaya biabe ale biahaga helonaga haru halu íbu dege bulebira. ✧ <sup>12</sup> Ani bulebiragoyu dindi tara maruha hameigini í andaneha nahe inaga biabe biahaga ndo karu ti bibahendeha ko timbuniore ibalu mo ko haragola ti ereba hai holebira.

<sup>13</sup> Agalirume Yarusaleme inaga tanoha anda dewa lone biadai bulebulenaga uyu Lebanono irabu timbuni ngogoha puwa ira guraya alerubi ira mende mini saibarasarubi ira bayale luni kilikulu lo karunibi inaga dibu yalu ibulebira. Inaga anda mo duniniore ho helarogo baya gibiore howa mini lene timbuni wulebira. Ininaga biragane dagia ngagoriani bedoria wali agalirume inaga mini yaraga hole ibulebira.

<sup>14</sup> Agali maru abale í mo ko haga henerume í keria ibalu bulu paluwa í mini lene timbuniore lolebira. Ala agali í mo yo hendene henerumebi í keria dai buwa tinaga ge duli hanga ho biruwa inaga mini yaraga halu holebira. Tigua í hondowa lalu, Tano ogoni Anduane Homogonaga ngagoni. Isaraele wali agalirunaga Ngode Datagaliwabe mini tigabi baya burugule kago ibunaga tano Saiono o ngagoni, lolebira. ✧

<sup>15</sup> Yarusaleme íore ala bame wialu yu wahene wirigo wali agali ogoriani pu íbubi nabiaga wahene wini. Ai áyu ina í mo bayaleore howa mo yári bia halu duniniho ngeledogoni. Wali agali dindi tara tarani áyu karumebi mani holebirarumebi ti bibahendeme í hondowa turu timbuni hai holebira. Ini ani haho wiaabobo holebere.

<sup>16</sup> Dindi tara tarani hameigini karumebi kini karumebi waneigini aiyahanda ibunaga waneigini andu mialu handayaho hagadagua tigua í burupale mbira nawilo handayaho haabo holebira. Anigo ina Anduane Homogo íore kogome inaga pele ngiaga kogoni manda bulebere. Isaraele wali agali Yagabanaga aguanalirunaga Ngode Datagaliwabe hongo timbunihe kogome í golope halu haru dai binigo kogoni manda bulebere.

<sup>17</sup> Ina inaga ege tole mini boronosi yu keruni ngolo aribia halu aeane yu keruni siliba aribia halu ngulebero. Inaga ira tome podene yu keruni ina ege tole mini boronosi aribia halu ege tole henene yu keruni aeane aribia helaga bulebero. Mo palia holene mo yu anda ibalu ogonime í haru helowa mana bayale tigabi hangu bialu holeneme inaga hariga ibaga bialu poleneruha haru holebira. Agalime ala haru haga howa í mo ko hayaru mani naholebira. <sup>18</sup> Dindi bibahende ina haru kegoha agalime ga lalu bo wahagahaga bialu bi laganego mani hale naholebere. Wai buwa mbirale ngaru bo gialahole bialu kariabi nahondolebere. Inaga wai pabe timbuni kagonaga mini Anduane Homogohanda Pele Ngiagane lolebere. Wai pabenaga panga timbuni kagonaga mini Anduane Homogonaga Mini Yaraga Hagane lolebere. ✧

<sup>19</sup> Í kegoha horombe nime wá holene henge nawulebira. Mbiragabi egeme wá holene henge nawulebira. Anduane Homogo inime inaga wá haabo holene haluhe kogonigo inaga wá timbuni holene íha wá haabobo holebero. ✧ <sup>20</sup> Ni lone napale egemebi dama dalidali biagadagua nabi Anduane Homogo inime inaga wá haabo holene haluhe kogonigo nde ani haabo holebero. Inaga genda ngelo keruni bibahende ereba hai holebira. <sup>21</sup> Inaga wali agali bu karume mana tigabi ngaru hangu biaabo halu tinaga dindi ina tu wa wia harugo karulowa ti ogoriani haabo holebira. Ininaga gioreme wali agali uruni mbiraore wabirugo ti ira mbiraore hangarugonaga gene magane dewaore haradagua ka. Ani helarudagoni irane wali agali tara tara karume ti hondowa ininaga mini yaraga helo ani wabu helarugoni. ✧ <sup>22</sup> Yarusaleme-o íha wali agali emene hangu heagua mani ti wali agali mini leneore holebira. Hameigini maru hongo nahe mini dindiha heaguabi mani ti waneigini aguaneru dewalinaga aba holebira. Ina bi o

✧ 60:11: Mo 21.25-26 ✧ 60:14: Mo 3.9 ✧ 60:18: Ais 26.1 ✧ 60:19: Seg 2.5, Mo 21.23, 22.5 ✧ 60:21: Iba 37.11, Ais 52.1, Md 15.13, Mo 21.27

larogoni abaleore horo inime pongobo wirugo tagira ibirangi lola holebira. Anduane Homogo iniore kogonigo ani bulebira larogoni, Anduane Homogohanda laya, lalu Aisaiahanda lene.

## 61

*Anduane Homogohanda ibunaga wali agaliru pele mulene horo tagira ibilolebira lenego ogo*

<sup>1</sup> Anduane Homogo Bibahende Haru Haame Ho Haga kagome iha ibunaga Dinini ho tolatagi heleda. Ibugua i dabalu wali agali yagibano burupale bu karuha ibunaga bi mana debene lamima pu laya. Ina wali agali genda yu howa mini burugulo karu mo waholiyabi maru garabaya andaha karu golope halu pudaba loliyabi ibugua, í pu, laya.✠✠ <sup>2</sup> Anduane Homogohanda ibunaga wali agali karu pele mialu haru dai bulene horo tagira ibiragoni lalu ina lamule pu laya. Tinaga waitigi karu pani nelo mulenebi horo ogoni tagira ibiragoni lalu ina lamima pu laya. Wali agali dugu bialu de iba heba beda u ina ti biamogo buliya pu laya.✠ <sup>3</sup> Saiononi tí dugu biaabo halu tínaga hongo bibaho kamiru tíha dara ho holene ngago turu holene wia aribia holebira. Tínaga emboneni dara hayagonaga be abalu dugu wiyadaruni taulo wahowa yári bayale taraore mo karulolebira. Tígua dugu bialu hayaru embeda halu weli bayale ngabiore ngarume mo hai howa turu holene wulebira. Tígua dara halu mini burugulowa iba gana lagaru la nabi wahowa Anduane Homogonaga mini yaraga halu turu howa iba gana tara ngaru ladaga halu lolebira. Bibahendeore karume mana bayale tigabi hangu bialu holebira. Ani biragola wali agali marume handalu karia ti ira hongohe ale kagoni lalu Anduane Homogo ibunime ira bayale hengene anda ho haradagua hongoheore kago hondolebira. Ani handalu karia urunime Anduane Homogohanda biyaruninaga ibu mini yaraga halu holebira.✠ <sup>4</sup> Anduane Homogonaga wali agali kamiru tígua anda gialobagabu wiane mali dewaore penego wiaho wini ngaruni lone bia aribia haga bialu holeberemi.

<sup>5</sup> Inaga wali agaliru-o dindi tara taraha wali agali bu karume ibuwa tínaga biabe biahaga holebira. Tínaga nogo sibiru hina halu tí mabu ngamiruha dindi tomba halu tomoru hanga ha tínaga pu mbira lini daga mini gerebi mabu ngamirubi handayaha mamage ha ani bigi bialu holebira. <sup>6</sup> Marume, Tí Anduane Homogonaga loma binigo mo miaga kami, lolebira. Inanaga Ngode Datagaliwabe kagonaga biabe biahagaore tí kamigoni, lalu manda bulebira. Dindi tara tara ngaruha hameigini tara karume tinaga dabudabu tara tara ngaru mo yalu ibalu tí talebu ngiragola tí turu taraore halu holeberemi. <sup>7</sup> Tí ala taga taraore howa tínaga dengui bu yi howa harimigoni ereba halu tíninaga dindini daibu howa mbirale dabudaburu abale yu harimigo bolangua howa dewaore yu halu turu taraore ho holeberemi. Anigo tínaga turu holene ogoni ereba nahe wiaabo holebira.

<sup>8</sup> Anduane Homogo ibugua lalu, Ina mana bayale tigabi ngaru dege hondowa turu haruli. Mana ko wali agali mende kago mo dindi halu holeneru page buleneru handabe manga ho kogoni. Inaga wali agalirume genda dewaore ala yu howa ndelahe wiaru handalu hayago ai i mini bilinahe kogome tihondo mbirale bayale ngaru yu helo mulebero. Habo nalolene bi hongohe wiaabo helonaga ti baba bi lowialu bulebero. <sup>9</sup> Inaga wali agalirunaga waneigini aguane holebiraru hondowa dindi tara tarani hameigini karume tiore mini lene timbuniore ka lelo helolebero. Ani heledogola wali agali tara karu uruni ti inaga wali agali handalu inime ti mo bayale halu helene kagonida manda biai holebira, laya.

✠ **61:1:** Ais 11.2-4, 42.7, 57.15, Md 11.5, Lg 7.22 ✠ **61:1:** Lg 4.18-19 ✠ **61:2:** Ais 13.6, Yar 31.13, Md 5.4 ✠ **61:3:** Iba 23.5, Ais 60.20-21, Yar 17.7-8



<sup>10</sup> Yarusaleme inime Anduane Homogohanda biyaruninaga turu timbuni halu kogoni. I miniha inaga Ngode Datagaliwabehondo turu taraore ho kogoni. Wali agali mani dabu bule lowa aga bayaleore luni ngaru biagimbu bialu yáribi bayale buwa turu ho hagadagua Anduane Homogohanda ini pele mulenebi mana tigabi wiagomebi i bu dambi heledagonaga turu taraore ho kogoni. ✧ <sup>11</sup> Dindime tomo egene tara tara hengeneru mo anda halu mabuha egene polenerubi mo anda hagadagua Anduane Homogo Bibahende Haru Haame Ho Haga kagome ibunaga wali agali karuha mana tigabi bulenebi ibunaga mini yaraga holenebi mo anda haga biragola hondowa dindi tara tarani hameigini tara karu tiguabi ibunaga mini yaraga holebira laya, lalu Aisaiahanda lene.

## 62

### *Yarusaleme mini gahenge winigo ogo*

<sup>1</sup> Saiono-o ina Anduane Homogohanda í pele ngilonaga bi hongo howa laabo holebero. Ina Yarusaleme mitangi bialu bi nale ndo ibunaga bi la haabo halu holebero. Ani laho kone dege egerebagi ni datagi haradagua Anduane Homogohanda Yarusalemeha mana bayale tigabi ngaru biatagi helo. Mbiraga hale hedo yaradagua ibugua pele mulene walia helo ina bi la haabo halu holebero. <sup>2</sup> Yarusaleme-o dindi tara tarani hameigini bu karume inaga mini tigabi bolangua ho ngago hondolebira. Tinaga kini bu karu tiguabi inaga hongo holenebi wá tara holenebi ngego hondolebira. Inaga mini gahenge tara Anduane Homogo ibunime ngulebirago tigua mini ogoni lalu lolebira. <sup>3</sup> Anduane Homogo ibuninaga manda yári baya gibiore ngolome wabini ale í holebere. <sup>4</sup> Ani kegola maru karume ala Anduane Homogohanda í yu wahene ka lenego mani nalolebira. Tigua lalu, Inaga dindi Anduane Homogohanda yu wahene darabiore ngagoni, lalu nalolebira. Tigua inaga mini gahenge ogodagua lalu, Anduane Homogohanda ihondo turu timbuni ho kagoni, lalu lolebira. Inaga dindihondo lalu, Wandari agali pene turuho bedagobi ngagoni, lalu lolebira. Anidagua lolobadagoni irane Anduane Homogohanda ihondo gubalini timbuni ho kagonaga ani lolebira. Agalime ibu one haru dai biagadagua Anduane Homogo ibugua inaga dindi ogonidagua haru dai bulebira. <sup>5</sup> Igiri daliaheme wandari berenego dabu biagadagua í wabini biago kagome íla mbiraore haga holebira. Ani bialu agalime wandari bayale dabu buwa ibu onela turu hagabu hagadagua Anduane Homogohanda ihondo baya hanguore turu howa handayaho holebira.

<sup>6</sup> Yarusaleme-o inaga pabeni inaga agalirume mamage helo dabo helarugo tigua horombe mbiragabi bibahendengi bi nale naholebira. Ina uruni tihondo lalu, Anduane Homogo olalu haga kamiru-o tí halo nahalimu. <sup>7</sup> Tigua hongo howa ibu olaabo halu kamine dege ibugua Yarusaleme lone mo hongo hadai bilo dindi tara tarani wali agali bibahendeore karume de hondowa tano ogoni duniniore kago lalu ibu mini yaraga helo Anduane Homogohondo bi la haabo halimu laro.

<sup>8</sup> Anduane Homogohanda buleore lalu bi hongohe mbira lowinigo ibunaga hongo timbuni ngagome bi lo wiyadagoni heneneore bulebira. Ibugua bi lo winidagoni ogodagua. I Anduane Homogo kogoni ina tinaga mabuha widi hengene ngamiru waitigi bu karume nole mo yalu pelo henge namulebero. Waini iba tigua biabe erekuibi bialu wabu wini ngamiru wali agali tara ibiragome naneore holebira. <sup>9</sup> Inaga wali agali tinime widi hongowa boga biraru gandulo wirimiru tigua mberediru wabu nalu Anduane Homogonaga mini yaraga halu holeberemi. Pu mbira lini daga mini gerebi hongowa bogabi dedaru dowa waini iba wabu berelarimiru tigua inaga anda kategoria hama ngagoriani howa inihondo turu haga bialu noleberemi, lalu Anduane Homogohanda bi ogoni lowini.

✧ 61:10: Mo 21.2

<sup>10</sup> Wali agali Yarusaleme tanoha kamiru tí tano ogoni wahalu tagira pialu pilimu. Tagira puwa tínaga wali agali tagira hene biaru lone daibirago ibilo tinaga hariga mo tiga bilimu. Hariga baya hangu mo tiga bialu ege tole harigani ngaru mo wahalu bilimu. Dindi tara tarani hameigini bibahende karume de hendelo manane mbira harigani helalimu. <sup>11</sup> Wali agali dindi tara tarani bu karume Yarusaleme íhondo lelo Anduane Homogohanda bi mbira lamiyago manda bibe. Tigua ogodagua lalu, Saiono-o de handa. Anduane Homogohanda í pele ngule ibiragoni. Ibugua ibalu wali agali waitiginaga giha hearia haru dai bini biaru tibi haru halu o ibiragonigo de handa, lolebira.✧ <sup>12</sup> Tigua lalu, Tí Anduane Homogonaga wali agali mini tigabiore ka, lolebira. Anduane Homogohanda wali agali pele mialu haru dai biniru ka, lolebira. Yarusaleme íhondowa lalu, Anduane Homogohanda tano ogoni ibu gubalini ho haga nga, lalu lolebira. Tano ogoni Anduane Homogohanda yu wahene ndo nga, lalu Anduane Homogo ibugua lamiyago, lalu Aisaiahanda lene.

## 63

### *Anduane Homogohanda ibunaga waitigiru bope halu ibuni wayali henego ogo*

<sup>1</sup> Agali mbira yári kinirume biagadagua bialu Idomo dindinaga dindi emene Bosara ngagoha howa ibiragoni aidabe. Mbirali aga daramabiore karule hongo timbuni walia halu amu ibiragoni aidabe. Ogoni ibu Anduane Homogo ibiragoni ndodabe. Ibugua wali agali karu pele mialu haru dai bulene hongo karulape yu howa ibiragoni.✧

<sup>2</sup> Iibunaga aga daramabihe waini iba wabiaga be timbuni ngagoha anda pu howa waini iba wabulenaga pu mbira mini gerebi lini geme hangedaga bialu hene mbauleda, laya.

<sup>3</sup> Ani layagola Anduane Homogohanda ladai bialu lalu, Dindi tara tara bibahende wiaruni ina geme bame gerebi lini hengedo tagadabaga biagadagua birugola marume í biamogo bule mbira naibiya. Ina keba timbuniore ho howa dindi uruniha hameigini hearuni geme hengedo tagadabagabu waharugola uruninaga daruma inaga agani wai haya, laya.✧ <sup>4</sup> Ibugua lalu, Inaga wali agaliru pele mialu haru dai bulene horo biago abale hapara hayadagonaga áyu ogoni howa tinaga waitigi bu karuni pani nelu mialu baru. <sup>5</sup> Ani balu hewagola agali mbirame í biamogo bialu wai biba lama mbirali íbu nabiyagola mogolo handaru. Ani howa ininaga keba timbuni harugome í mo hongo hayagola inime waitigi uruni bo wahai halu inaga wali agaliru haru dai biai haru.✧

<sup>6</sup> Ina keba ho hewagobiore dindi tara tarani hameigini bu hearu bibahendeore bo hengedo tagadabagabu wahai harugoni. Inaga keba holene gabo be yu hewagoha howa nelu mirugo nowa ti luluyu heagola ina tinaga holene daramaru dindini odo payabu ngeledo, laya.

### *Anduane Homogohanda Isaraele wali agaliruhondo bayale biaabo henego ogo*

<sup>7</sup> Anduane Homogohanda ibunaga dara holene timbuni wu howa mana bayale hangu biaga kago ina latagi holebero.✧

Ibugua ina pele ngialu bayale dewaore biyagonaga ina ibunaga mini yaraga halu holebero.

Iibunaga gubalini timbuniore holenemebi dara holenemebi ibugua Isaraele wali agaliruha paga ho howa mana bayaleore biyagoni.

<sup>8</sup> Anduane Homogo ibugua lalu, Wali agali uruni ti inaga wali agaliore kago tigua mine halu íhondo bi lalu ke naholebira, laya. Ani lowa ibugua ti pele mialu haru dai biya. <sup>9</sup> Wali agali ti genda tandagaru yu heangi Anduane Homogo ibunibi nde ti

✧ 62:11: Ais 40.10, Mo 22.12 ✧ 63:1: Ais 34.5-17, Yar 49.7-22, Ese 25.12-14, 35.1-15, Amo 1.11-12, Oba 1.14, Mal 1.2-5 ✧ 63:3: Mo 14.20, 19.13-15 ✧ 63:5: Iba 44.3, 98.1, Ais 59.16 ✧ 63:7: 1 Kin 8.66, Neh 9.25, 9.35, Iba 92.2

heba howa genda tandagaru yamaga ho haya. Anduane Homogo ibugua ibunaga wali agaliru dara howa bu miniha genda timbuniore howa ibunaga gubalini holeneme ti dara halu haru dai bini. Anduane Homogonaga dahuliyalime ndo ibunime ti hearia ibuwa pele mini. Bambaore howa ibunime ti taba yalu baya hangu handayaho hama ibini.✧ <sup>10</sup> Ibugua ani bialu heago helowa wali agali tigua ibu erembira miyagome ibunaga Dinini mo tandaga halu hene. Ani biyagola ibugua ti baba mo waitigi ho hene.

<sup>11</sup> Ani biyagola nde tigua bamba bialu heneru mitangi bu dai bini. Ala bamba Anduane Homogonaga biabe biahaga Mosese henengi howa bialu heneyaru mitangi bu dai buwa tigua hale halu lulu, Anduane Homogo ibu áyu agoha haruabe. Bamba nde ibugua ibunaga wali agalirunaga agali haguane haru halu iba solowara mini Daramabi bereagoha domalu bayuwa haru pialu heneyago nde áyu ogoni ibu agoha kadabe. Ala nde Anduane Homogo ibugua ibunaga Dinini ti baba mandagi helo helenego agoha haruabe. <sup>12</sup> Ibugua hongo timbuniore Mosesehondo mialu ibu bamba howa iba solowara timbuni bereago haluki bira li ni bilowa ibunaga wali agali iba ange mendehayagi ubaede halu piai helene. Ani binigome ibunaga mini yaraga halu ibu mini lene wiaabo hene.✧ <sup>13</sup> Iba ala berene hariga wiagoriani ibuni ala bamba halu pialu wali agali ti mama penego ibuni agoha kabe.

Wali agalirume hongo howa nogo hosi gabuame gerai pururu lulu piagadagua ti abale pialu pi mbira nale bayale pene. <sup>14</sup> Mbiralime nogo bulumagaru datani bayale dewa bu kagoha haru piagadagua Anduane Homogonaga Dinini ibugua wali agali uruni ti gi nahe bayale palelo mo wialu helene. Anduane Homogo-o ína biabe hongohe tara ogonidagua birigomebi ínaga wali agali baya hangu haru halu pirigomebi wali agali maru karume ínaga hongo holene ngegobi mini leneore kegobi manda biaiore holebira.

*Isaraele wali agalirume Anduane Homogohanda ti biamogo bilo ibuhondo bi lenego ogo*

<sup>15</sup> Anduane Homogo-o í íninaga wá taraore holenebi hongo holenebi tolaihe dahuliya andagani wu kegonigo ína ina kamaru de handa dali ho habe. Ína irane aginaga ina mitangi nabi ínaga hongo holene timbuni wirigo mo heya halu ina nahende kebe. Ínaga dara halu biamogo bulene wirigo inahondo mo walia nahe ina waore harigonida. Ína ina handa tara howa gubalini naheore kegonibe. <sup>16</sup> Inanaga aba í kegoni ndobe. Ina mamali Abarahama Yagaba imarume ina ai ima kamabe manda nabi henego ai í ina abaore howa inanaga Anduane Homogoore í kegoni. Bambaore howa ina heba haabo howa pele ngialu haru dai biagaore í kegoni. <sup>17</sup> Anduane Homogo-o irane aginaga ina lulu yu ibagabu holomaya yu waho kebe. Iname í erembira ngialu ínaga andaneha haabo nahe holomaya irane aginaga ínanaga bu miniha mo giambe ho ngeledebe. Ai ínaga biabe biahaga kamaru mitangi halu ina íninaga wali agaliore holomaya dabariruni mitangi bialu ina kamagoha lone hole dai bibe.

<sup>18</sup> Emene tigimandi hanguni ínaga wali agali kamarume anda íninagaore lulu dabene biagoni inanaga giha yu harimagoni. Ai mani howa inanaga waitigi bu hearume ibalu ínaga anda ogoni bo gialobaga bialu hengedo mbaraho wahayagoni. <sup>19</sup> Bambaore howa ina íninaga wali agaliore henego kamagoyu ai áyu ína handayaho nahe ina wali agali tara mbaule kamagoni mitangi bu kebe. Wali agali tara karu ti ínaga mini lulu hene ndo kagoni.

## 64

<sup>1</sup> Anduane Homogo-o ína hari li kagoni budalu dalibelo hame ledama. Ani dalidele hari wama pedaruni ínaga deni gi howa duru lulu ema biai ho ngale. <sup>2</sup> Hari urunime pogolodagaha dali bialu iba todobeneha hambu deledagola pobo howa kidikodo lulu

✧ 63:9: Hgn 10.16, Mal 3.1, Ab 9.4, 12.11 ✧ 63:12: Har 14.21

haralidagua bulebira. Anduane Homogo-o ina inaga hongo timbuniore ngego heba ibalu waitigi karume i mini manda biai helobi dindi tara tarani hameigini bu karu bibahendeme ti katoria i dalirego hondowa ti mogo lalu duru lai helobi abale ibulene nga. <sup>3</sup> Bambaore nde ini ibalu howa nahendene ale tara tara bigi birigola iname mogolo handaga birimagoni. Ini dalirigola hari wiarume gi timbuni howa duru lalu hayago. <sup>4</sup> Bambaore howa mendealime ibunaga wali agali ibuhondo mini dunubia ho karu ti biamogo bialu nahendene ale tara ina birigodagua biyane mbira handa nabi haleme hale nahebi naheneore nde ayubi nahe dege. Anduane Homogo-o anidagua biagane i hanguore kegoni ndobe. <sup>5</sup> Wali agali mana tigabi bayale hangu bule turu halu biagabi ini hame ledegobi talialu bialu haga karubi tihondo ina gubalini haga kegoni. Ai iname ko bulene ngaruha hongo howa haabo harimagonaga ina inahondo keba harigoni. Ani keba haabo harigoyu iname mana ko ala beremalidagua dege bialu mini beregeda nabiore kamagoni. Anigo iname haabo holene agua yu holeberemabe. <sup>6</sup> Ina bibahende ko birimagome inaga deni ko dodohe ngubiore kamagoni. Iname mbirale bayale beremabe toba howa bialu kamaria inaga deni ina aga ko dodohe ngubi ngaligobi kamagoni. Iname mana ko nabulene wiaru bialu haabo harimagome ina dangi yuni gaule ngaru puyabume pulo yalu poralidagua yalu pu wahabehe kamagoni. <sup>7</sup> Mbiralime nde ihondo bi lole i keria naibaga. Inaga mini olalu biamogo bia lolebi naibagaore kamagoni. Ina ina handa tara halu pu waore hene kamagoni. Iname nde ko dege biaabo harimagome ina mo ko hai howa tandaga pani nalu kamagoni.

<sup>8</sup> Anigoyu Anduane Homogo-o ina aba iore kegoni. Agalime dindi duguwa mbirale todobene be ale wabiaga hagadagua ini kego ina nde todobene be ale wabini kamagoni. Inanaga tingini bibahendeore ininaga gioreme wabirigoni. <sup>9</sup> Anigo Anduane Homogo-o ina iname ko bialu harimadarunaga keba haabo nahabe. Ina inaga wali agali kamaru mitangi bialu dara habe. <sup>10</sup> Inaga tano loma bini biaruni bame dindi ko wali agali nahaga ale nga. Yarusalemebi bo gialabaga bu wahene wali agali nahaga dege ngagoni ndobe. <sup>11</sup> Inaga anda inanaga mamali henerume i mitangi bialu lotu lole ogoniha puwa inihondo turu howa i mini yaraga haga anda o biagoni irame dalu bo gialabaga bialu mo ko hene ndobe. Dindi ogoriani bayale maru iname turuho haga winirubi bibahende gialabaga biai halu mo ko hai hene ngagoni. <sup>12</sup> Anduane Homogo-o ina o bidaruni handalu keria inaga bu miniha mogo lalu mbirale mbira bua nabiaruane kebe. Iname manda bu handalu kamaria mana ko dewa birimagonaga genda timbuni uruni yu haabo holomaya bi henemane ihondo lamaru hale nahe kegonibe, lene.

## 65

*Anduane Homogohanda wali agali mine hagaru pani mialu ibunaga biabe biahagaru biamogo bulebira lenego ogo*

<sup>1</sup> Anduane Homogohanda lalu, Ina wali agali ti biamogo bia lowa ihondo hale helo hondo harugoni. Anigoyu tigua ihondo bi mbira nale halehabi nabi ina ti biamogo bule manda manda bu harugo mitangi nabi hene. Ina i ogoria kogoni ti biamogo bulebero lo hewaria wali agali hameiginiru ti ini koria ibilonaga hondo ho haru. Hondo hewagola ai mbiralime i taya bima ibulene hame nale dege hayagoni. <sup>2</sup> Horo bibahendengi wali agali mana ko bialu tini hame ledagoha pu pebe bialu karuni haru dai bule lowa ina ininaga gi habe angala howa manda manda bu haabo haga ko. <sup>3</sup> Ani kogo helowa tigua inaga wanakuini howa mana ko tara tara ngaruni biaabo haga kagome tigua i mo keba haga bialu kagoni. Tigua wali agali Anduane Homogo kago manda nabi karume biagadagua mbirale gime wabinirohondo bi pupu wiaga mabu winiruha

✧ 64:4: Ais 30.18, 40.31, 1 Ko 2.9 ✧ 64:6: Iba 90.5-6, Ais 48.1, Yar 4.11-12 ✧ 64:8: Iba 100.3, Ais 45.9, 60.21

✧ 65:1: Ais 63.19, Lm 9.24, 10.20, Eb 2.12-13 ✧ 65:2: Lm 10.21

puwa bi pupu wialu mbirale loma biniru bo delaga dabuni bo mialu ira hagua ngabilo delaga inisenesiru delalu kagoni. <sup>4</sup> Anidagua bialu howa dege mbiraga tigua agali homenenaga homali karuha halaga bule homene dininihondo mani bulene bi wia do heneru langi lole piaga ka. Anidagua bialubi tigua nogo mbiriniru nalu ema bialu piaga maru inaga deni bayale ndo dodohe karu mbirale gime wabiniruhondo bo muwa uruni dawenerunaga iba bedarubi naga kagoni. <sup>5</sup> Urunidagua bialu howa tigua maru karuhondo lalu, Ina bayale taraore ilili biaga kamagoha hapara nahe ina ela holigo tí amura kaundiani halimu, laga ka. Anigo ina wali agali mana urunidagua biaga karuhondo turu naheore kogoni. Ina tihondo keba timbuni ho kogome ira hagua ale inaga ngui harigaha howa datagi halu kagoni. Inaga keba holene ogoni hundia nabi ira hungu ale daho wiagadagua wiaho wiaga, laya.

<sup>6</sup> Anduane Homogohanda lalu, Inime wali agali mana ko ngaru hangu mo tene howa bialu haga kamiru tinaga mana ko birimiruni bibahende inaga mbugani gilibu wiai kogo tí mbiraligo yo pialu napoleberemi. Ina tí bibahende ko tinime birimigonaga mana lalu pani ngiai holebero. <sup>7</sup> Tigua ko bialu kamirunagabi tinaga mamalirume biyarunagabi bibahende pani tigua nai halimulo ngulebero. Bamba tinaga mamalirume bi pupu wiaga uyu hari wiaruha puwa ira hagua ngabilo delaga mini inisenesiru delalu inaga deni howa mana ko tara tara wiarubi bia dege biya. Ani biyagonaga ina ti bibahendeore pani nai helo mule kogoni, laya.

<sup>8</sup> Anduane Homogohanda lalu, Agali mbirame pu mbira mini gerebi lini dewa dedaore do wahayagua nde agali mendealime lalu, Lini bayale maru dedaore do waholigo ina baya hangu handa hondoliya. Bayale maru deagua nde do pingidowa waini iba bayale wabuwa nabehe holebirago, laga. Anidagua dege ina Isaraele wali agali bibahende bo hilo wahai nahe wali agali maru inaga biabe biahaga karu ti dege helolebero. <sup>9</sup> Isaraele hameiginirubi Yuda hameiginirubi tinaga aguanenerubi biamogo bialu tihondo bayale dege bulebero. Ina ti wali agali dewaore palu yanga lelarogola tigua inaga hari wigi bidagoria karulowa tinaga wulebira. Wali agali uruni inime ti inaga biabe biahaga helo dabarugo ai dindi ogoriani ibalu holebira. <sup>10</sup> Saroni dindi ni paliragohayagi tigua nogo sibi dewaore hinu hama pialu dindi mende ni tagira ibiragohayagi mini Genda Biaga Guane ulini ogoniha nogo bulumagaru hinu holebira. Wali agali iniore mitangi bialu inaga mini yaraga haga karume ti dindi uruniha tani bayale dewa bu karuha howa ti ema nabi palu wigi bulebira.✧

<sup>11</sup> Anigoyu tí wali agali maru inihondo erembira ngialu ininaga hari Saiono tano wiyagoriani i mitangi bialu lotu lalu ininaga mini yaraga hole naibi haga kamiru tíha mo ko holene wulebira. Wali agali tigua mbirale gime wabini mbira mini Gada mende mini Meni libuhondo bi pupu wialu ogolabome tíha mbira bayale dege ibilaabo haragola inaore hongo bolanguahe kamabe toba howa kamigoni. <sup>12</sup> Ai ina horo tara mbira tíha ibilolene podo wia henego ngo. Horo ogoningi tinaga waitigirume ibalu tí baba wai bialu tinaga ayu tibu ne gadele ngarume tí bo wahai holebira. Waitigi urunime tí kamigoha ibiragola tigua tinaga ge duli hanga howa bulu paluwa hagianeme dindi ela ho bedamiore waitigirume tini ma pugualu бага bulebira. Ina tí olalu hewagola tigua inaga bi hale habe manga halu tihondo bi larugolabi bia nabi harimigonaga mbirale o langeroruni heneneore tíha anda ibulebira. Ani bulebirago irane tigua ina mana lowirugo mo wahalu mana ko i mo turu nahaga ngaru bulene dabalú inaga deni howa mana ko wiaru hangu bialu haabo harimigoni. <sup>13</sup> Anidago Anduane Homogo Bibahende Haru Haame Ho Haga ini kogome bi ogodagua laro. Wali agali inaga biabe biahaga karume ti tomo bayale nalu holebiragoyu tí ko biaga kamirume tomo nane garibilo holeberemi. Inaga biabe biahaga maru karume ibabi dewaore nalu holebiragoyu wali agali i erembira ngiaga kamiru tí ibabi nolene nawi howa iba noa timbuni

✧ 65:10: Yos 7.24-26



halu holeberemi. Inaga biabe biahaga wali agali uruni ti turu hagabu holebiragoyu ti kamiru dege taga pani naabo halu holeberemi. <sup>14</sup> Inaga wali agali urunime tinaga bu miniha turu holene tolaihe howa kai lalu iba gana ladaga halu kagola ti nde bu miniha dara holene wu tolowa tinaga mini pai halu bidagola dugu hongoheore bialu holeberemi. <sup>15</sup> Inaga wali agali ina dabo helene karume ti kamirunaga mini lalu ha halu bi lolebira. Anduane Homogo Bibahende Haru Haame Ho Haga kogome ti ko birimigonaga pani ngialu ti homelelebero. Ani buleberogoyu wali agali maru ininaga biabe biahaga howa ina bi laruruni talialu biai haga bu karume tihondo ina tinaga mini gahenge bayale mbira mulebero. <sup>16</sup> Wali agali dindi bibahendeha karume bi heneneore laga Ngode Datagaliwabe ini kogohondo bi lalu ina biamogo bialu mo bayale habe laga bulebira. Wali agali marume tinaga bi larago heneneore laro lalu inaga mini lalu heneneore laro laga bulebira. Ani howa tiha genda tandagaru ala wiyaruni Anduane Homogo inime mo embeda hai holebero, Anduane Homogohanda laya, lalu Aisaiahanda lene.

*Yarusaleme gahenge wia aribia halu bibahende bayale dege wiai holebira lenego ogo*

<sup>17</sup> Anduane Homogohanda lalu, Ina hari daligabi dindibi gahenge waberogo de handalimu. Wali agalirume ala bialu heneru mitangibu dai nabulebira. <sup>18</sup> Tigua ina ayu mbirale bibahende gahenge waberogonaga turu haabo halu holene nga. Yarusaleme gahenge wabuleberogoha wali agalirume gubalini haga haga buwa turu dege ho halu tinaga bu miniha mo palia holene wu tolai holebira. <sup>19</sup> Inime dindi gahenge Yarusaleme ogoni handalu inaga wali agaliru turu ho kago hondowa i miniha turu holene tolai ho holebero. Yarusaleme gahenge ogoniha howa mbiralime dugu biaruanebi mbiralime tandaga timbuniore howa ga laruanebi hale naholebira. <sup>\*</sup>

<sup>20</sup> Dindi ogoniha waneiginiru ti emene galini homolene nawulebira. Wali agaliru ti dindini holene mali dewaore haho wulebira. Ti marume mali pira pira mbira (100) heneyagua ti wandari igiri daliahe ale dege kagoni manda bulebira. Ti maru mali pira pira mbira nahe howa abale homayagua maru karume Anduane Homogo inime ti ko biyagonaga pani mialu abale bo homelayada manda bulebira. <sup>21</sup> Inaga wali agaliru ti dindi ogoniha andaru bu halu gerebi maburu timbuni hongowa lini dowu waini ibaru wabuwa karulape hambu nalu holebira. <sup>22</sup> Mani tinaga waitigirume inaga wali agalirunaga anda biniruha karulalu palia nabulebira. Tigua mabu ngarubi karulowa ira liniru dowu waini iba wabuwa hambu nalu naholebira. Ira hongohuru mbira luore haho wiagadagua inaga wali agaliru ti lu haabo holebira. Ani howa tinime biabe erekuibi bialu hayaru bayaledane hondowa uruninaga turu timbuni haga bialu holebira. <sup>23</sup> Biabe tigua biraruni aria bia ko hene mbira nawulebira. Ina tinaga waneiginiru biamogo bulebero lalu lowirugo uruni mbirago mo ko naholebiraore. Ina tinibi tinaga waneiginirubi tinaga aguanene mani holebirarubi mo bayale howa helolebero. <sup>24</sup> Tigua ihondo mbirale mbira ngi lalubi biamogo bia lalubi ani lalu kaore inime abale tinaga ngi larago mialu biamogo bia laragobi hale halu biamogo bulebero. <sup>\*</sup>

<sup>25</sup> Ani bialu biango duduru nogo sibi iginiru tomo mandagi nalu holebira. Nogo bulumagarume datani karuni nagadagua budi gabua timbuni mini laiono karume datani dege nalu holebira. Puya ngarume ti dindi himu ngaru dege nalu wiaabo holebira. Inaga hari Saiono loma bini wiagoha mbirale tara tara bibahende bayale dege howa ko mbirame maru mo ko naholebira, lalu Anduane Homogohanda laya, lalu Aisaiahanda lene. <sup>\*</sup>

## 66

*Anduane Homogohanda dindi tara tarani hameigini karu daba ki bulebira lenego ogo*

<sup>\*</sup> 65:17: Ais 66.22, 2 Pi 3.13, Mo 21.1    <sup>\*</sup> 65:19: Mo 21.4    <sup>\*</sup> 65:24: Iba 32.5, Ais 55.6, Dan 9.21-23    <sup>\*</sup> 65:25: Ais 11.6-9

<sup>1</sup> Anduane Homogohanda bi ogodagua laragoni, Dahuliya andaga inaga haru hole-nenaga biragane dagia wialu dindi bibahende ngaru inaga ge dogolope ho wiagane ngago ai tigua ini holiyanaga anda agi ale buleberemibe. I halo biruliya henge agoha ngelaho kamibe.✠✠ <sup>2</sup> Inime hari li kagobi dindi ogobi bibahendeore wabiai howa ani helo helarugoni ndobe. Anigo ina wali agali maru mini dindiha howa inihondo gi halu mana ko biyaru wahowa mini beregedalu ininaga andaneha haabo ho karu tihondo turu haruli.✠

<sup>3</sup> Anigo wali agalirume tininaga bu miniha mana ko ngaru hame lalu dimagoli holene tagira ibiragobi mana ko ngubi ngaru hangu bialu holenebi hame lalu ka. Ani bialu howa tinime manda bialu karia ihondo lotu tigatiga lalu kamabe tobaho ka. Anigo tigua ihondo loma bo ngialu karuni i turu nahe kogoni. Tigua nogo bulumagaru bowa ihondo lomabu ngiragola ina handalu koria agali bo lomabu ngiradagua birane handaruli. Tigua nogo sibi iginiru bo lomabu ngirangi ina handalu koria biango bo lomabu ngiradagua birane handaruli. Ai widiru lomabu ngiragola nogonaga darama hambu lomabu ngiradagua birane handaruli. Tigua ira hagua ngabilo inisenesi lomabu delaragolabi mbirale gime wabini ngaruhondo bi pupu wiragolabi ta nabi inaga deni ko dodohe ngubi dege biaga kagola hondowa i turu nahe kogoni. <sup>4</sup> Ani bialu kagonaga ina tiha genda ogobiore ibuli lowa giho hagagobiore tigua yu helo mulebero. Ina ti olalu hewagola tigua ya nalayagonagabi inaga bi tihondo lamialu hewaria hale nahayagonagabi genda yu helo mulebero. Tigua ina bi larugo mo wahowa inaga deni mana ko wiaru dege bule dabayagonaga ina tihondo gibi ogoni bulebero, laya.

<sup>5</sup> Wali agali Anduane Homogohondo gi halu mana ngaru talialu bialu haga kamiru ti ibugua bi o larago hale hadaba. Ibugua lalu, Tigua hongo howaore ini talima ibalu kamigo hondowa ti damenerume tihondo handabe manga howa erembira ngiaga kagoni. Wali agali urunime ti mege bialu lalu, Anduane Homogohanda ibuninaga hongo holenebi wa tara holenebi walia helo. Ani biragola hondowa ti turu haramigo ina hondolomaya, laga kago. Ai nde ina tihondo heneneore larogoni. Mani bi ogoni laragome tini taga timbuni holebira. <sup>6</sup> Bi timbuni ede tanoha laruagobi inaga andaha timbuni ua lo haruagobi hale hadaba. Bi ogoni laruago Anduane Homogo ininaga bi degedago hale kamigoni. Ina inaga waitigi bu hearume mana ko bialu hayagonaga pani nelu mulene winidagua mialu kogoni.

<sup>7</sup> Anduane Homogo inaga Yarusaleme tano ibu walime waneigini taba honolene tandaga nahe abale taba hanagagobi nga.✠ <sup>8</sup> Tigua abale ogonidagua bini lenebi mbira hale kamibe. Dindi hameigini mbira holene horo ayu degeni abale mo wini mbira ngabe. Horo ayu degeni wali agali dewaore ibu daga ho hagabe. Anigo Saiono ibu gahenge taba honole lo bedangi dege ibunaga waneigini abale aube tobane taba honolebira. <sup>9</sup> Anduane Homogo ini kogome wali ibu gali taba honole biruwa tandaga hendelo ngelarugodago ai waneigini nataba henelo tombeha berelowa agua holeda, lalu Anduane Homogohanda bi ogoni laya.

<sup>10</sup> Wali agali Yarusaleme gubalini ho haga kamiru-o ti Yarusaleme bayale kagonaga turu hamaga hadaba. Abale ibu dara howa ibuni heba mandagi dugu bialu harimiru ayu ibu heba mandagi turu hadaba. <sup>11</sup> Ibu bayale kagola tigua mbirale bayale damene ibuha howa ibiraru mo yu holeberemigo. Waneigini gali ibu aiyana andu no karulo puwa tombe halu turu hagadagua tigua Yarusalemenaga bayale wiaru no karulo puwa nolene embedaho holeberemi, laya.

<sup>12</sup> Anduane Homogohanda ogodagua lara, Yarusaleme mo bayale ho ngelarogola ibugua dindi tara tarani hameigini bu karunaga dabudabu bayale bu ngaru mo yu holebira. Iba porago hundia nabiaga duguaho wiraligodagua ibuha mbirale ndia nahe

wiaho wulebira. Ani biragola tígua mbirale bayale uruni mo yu howaore waneiginirume ti aiyá andu no karulape howa ti aiyahanda taba yalu pu íbu bialu aiyame bani berelowa mo ginibia halu bedagola turu hagadagua tí turu timbuni ho holeberemi. <sup>13</sup> Waneigini aiyarume tinaga waneiginiru mo turu haga buwa bi bayaleru lamigi bialu baya hangu haru hagadagua ina tí baya hanguore haru holebero. Ani bialu kogola tí Yarusalemeni bayale awadagaore holeberemi. <sup>14</sup> Tíhondo mbirale urunidagua birago hondowa tí turu taraore howa tını wali agali hameigini hongoheore mbira holeberemi. Ani howa tígua manda bialu Anduane Homogo iniore kogome inaga biabe biahaga kamiru inaga hongo holeneme tí biamogo biaga kogoni. Anigoyu inaga waitigi karu tiha inaga keba holene walia haga kogonigo manda buleberemi, laya.

<sup>15</sup> Tígua Anduane Homogo ibuni wai biaga garo mini karisi mbirani ira hungu heba gerai lalu puyabu ibiradagua ibiragola hondoleberemi. Ibunaga keba holene ira hungu ale bialu kagome ibunaga waitigi bu karu bo heda hai harane hondoleberemi. <sup>16</sup> Ani ibuwa ibugua mana ko bini lene karu pani mialu ibunaga keba holene ira hungu ale bialu kagome ti bo heda hai halu ibunaga wai biagane ayu tibu ne gadele yidagome uruni bo hilo wahai harane hondoleberemi.

<sup>17</sup> Anduane Homogohanda lalu, Wali agali maru mbirale gime wabini ngaruhondo bi pupu wiagabi tini ilili biaga mana bialu mabu ngaruha bi pupu wule piagabi tinaga gamugamu biaga karunaga mana lo ngaru talialu biagabi nogoru tia hururu uruninaga mbirini inaga deni dodohe ngaru nalu hagabi ko uruni bibahende biaga karu ti bibahendenaga homa maro bulene horo kaware ibiragoni.

*Anduane Homogohanda dindi tara tarani hameigini karu mo mogo bulebira lenego ogo*

<sup>18</sup> Anduane Homogohanda lalu, Ina wali agalinaga minibi mbirale tigua bialu kategoria handalu koria ina dindi tara tarani hameigini bibahende karu mo mogo bulenengidane handalu mo mogo bule eberogoni. Tigua mandagi íbu ngoai ho karia ininaga wá taraore holenebi hongo timbuni holenebi ngogo hondolebira.

<sup>19</sup> Ani íbu kagola ina manane mbira ti hendelo walia holebero. Ani buwa wali agali maru nahome karu tigua dindi tara tarani hameigini ininaga wá taraore holenebi hongo timbuni holenebi nahende karuha ini mini timbuniore lene ka laga bima pudaba lolebero. Ti Sebena hameigini karuhabi Libia hameigini karuhabi Lidia hameigini agali uruni tiore danda timu yaga mugube ka ti karuhabi pudaba lolebero. Ani bialu hameigini maru Tubala dindiha karubi Girigi dindiha karubi dindi maru kaundia wiaruha karubi karia purogo ladaba lolebero. <sup>20</sup> Ani larogola tigua pialu wali agali dindi uruniha tí kamirunaga hameiginiore ala haru pene karu inaga helo inihondo mo turu halu bame haru dai bulebira. Tigua wali agali uruni maru nogo hosibi dongibi kamelebi uruninaga erekunini berelalu maru garo ale mini karisi ngaruni berelalubi ti bibahende inaga hari Yarusalemeni i kogoria haru halu anda ibulebira. Isaraele wali agali tigua widi lini haealowa ndisi be bayale ininaga deni dodo nahe ngagoni ngelowa inihondo lomabu ngule i andaha yalu eberemilidagua wali agali tara uruni tigua tınaga dameneru ini koria haru ibulebira. <sup>21</sup> Ani haru ibiragola ina agali uruni maru loma binigo mo miaga helobi maru Libai aria helobi dabo helolebero, lalu Anduane Homogohanda laya.

<sup>22</sup> Ani lowa Anduane Homogo ibugua bi ogodagua laya. Ina dindi gahengebi hari daliga gahengebi wabuleberogo ininaga deni hongoheore wiaho wiaabo holebira. Anidagua dege tınaga waneigini aguaneru ereba nahe hongohe haho wialu tınaga minibi ereba nahe wiaabo holebira. ✧ <sup>23</sup> Ani howa ege pigane ngabulo kagonaga horo timbuni tagira ibirangibi Sabada horo bibahendengibi dindi tara tarani hameigini bibahende karume Yarusaleme ogoriani ibuwa ininaga deni ge duli hanga howa bulu palialu

✧ 66:22: Ais 65.17, 2 Pi 3.13, Mo 21.1

Anduane Homogo i mitangi bialu inaga mini yaraga halu lotu lole ibu ngoai holebira. <sup>24</sup> Ani buwa lotu ogoni lai halu i andaha howa tagira pialu karia wali agali ala ihondo mine howa erembira ngialu inaga bi larugo mo wahalu yo handaga biaruni homenego tinaga tingini li tagirani wima pedane hondolebira. Himirume homene tingini uruni nalu haabo howa himiru homa nabulebira. Iramebi tingini uruni dalu kago dai nahe daho wiaabo holebira. Wali agali pialu karume homenenaga tingini uruni ngubi taraore ngane engengebi hondowa mogo lalu magu tagu wibehe holebira, lalu Anduane Homogohanda laya, lalu Aisaiahanda lene.✧

## Yaremaia

### Mbuga ogoha gilibu ngarunaga nemandi ogo

Anduane Homogonaga bi mana latagi haga agali mbira mini Yaremaia henego ogoni ibu Babilono dindinaga Kini Nebugadenesa ibugua Yuda hameigini baba wai bulene kaware dege ngelowa Yaremaia ibu Yarusaleme tanoha haga hene. Yaremaia ibugua Yarusalemehabi Yuda dindi bibahendehabi de hondowa mamage halu halimu laga bialu hene. Ibugua lalu, Wali agali tigua damanaga biabe biagaru yu wahalu Anduane Homogo ibuni kagoha hole dai nabi haabo harimiyagua nde ibugua ti mana lalu pani ngulebira, lalu lamini. Ani lamiyago lelowa tigua ibunaga bi layago hale nahe ti biyago ale bialu haabo howa dama tara hearunaga mini yaraga halu bi pupu wialu hemiria bulebira layago henene tagira ibini. Ani biyago Yaremaia ibuni de hendene.

Yaremaia ibugua bi maru mbiwia halu lenego Anduane Homogohanda ti mani lone dara halu haru dai bulenaga lowini. Ibugua lalu, Anduane Homogohanda ti dara halu haru dai bialu Yuda wali agali bibahende tininaga dindi wiyagoria lone haru dai bulebira, lenego gilibu nga. Yaremaianaga mbuga ogo agali Anduane Homogonaga mana latagi halu mbiwia haga maru hearunaga mbuga wiaruni ale ndo ibu mende ale nga. Ibugua ibuninaga bite dewa lo nga. Yaremaia ibunime biabe ogoni bua nahe howa dege harugo lowa ibuninaga hame winigo mo wahalu Anduane Homogonaga bi hale halu ibugua bia layago talialu bini.

Anduane Homogohanda la layago mbirago mo wanahe bibahende latagi hai henego mbuga ogoha gilibu nga. Horo dewangiore ibu genda yu howa ibuni daraho haga hene. Anigo ibuninaga genda uruni mo do nahaga hene. Ibugua bidagobi tigatigaore latagi haga binidaruni mbuga ogoha wiai ka. Yaremaia ibugua Yuda wali agaliru gubalini timbuni ho howa Ngode Datagaliwabehanda wali agali urunihondo bi hongohe mbira lamule pu layagola ibu bu miniha genda halu lamua nahe howa dege lamialu hene. Ani lamiyago hale howa wali agalime ibu bo wahole biyagola ibugua Ngode Datagaliwabehondo gomogomo lowa bi dewa lalu haga hene. Be 20.9 handabe.

Yaremaiahanda bi bayale mbira latagi henego. Bi ogoni Be 31.31-34 ogoriani gilibu nga. Be hobane liruniha howa Ngode Datagaliwabehanda ibunaga wali agali baba habo nalolene bi gahenge lowinigo ogoni latagi hene. Habo nalolene bi gahenge ogoni beba mbuganibi ege tolenibi ndo gilibu wulebira. Bi ogoni ibu wali agali tininaga bu miniha hongowa tigua talialu bule turu holebira lene. Ina Keriso hamewaneigini kamarume habo nalolene bi gahenge ogoni Ngode Datagaliwabenaga Dinini ibunime walia haragola henene lenedane handaramali.

#### **Bulu бага бува кuni gilibu ngago (1.1-19)**

Anduane Homogohanda Yaremaia olo helenego 2.1-25.38

Yaremaiahanda mbiwia halu bi latagi henego 26.1-45.5

Yaremaia Anduane Homogonaga manani howa tandaga nalu henego 46.1-51.64

Hameigini tara tara mitangi bialu Yaremaiahanda mbiwia henego 52.1-34

Yaruseleme tano karulalu bo heda henego

*Anduane Homogohanda ibunaga bi mana latagi haga helo Yaremaia olenego ogo*

<sup>1</sup> Mbuga ogoha Hiligaia igini Yaremaianaga bi lenego nga. Hiligaia ibu hameigini loma binigo mo miaga hearu aria howa Beniyamini hameiginirunaga dindi mbira Anadodo winigoha haga hene. <sup>2</sup> Kini Yosaiya ibu Amono igini howa Yudanaga kini mali haleria (13) heagola horo ogoningi Anduane Homogohanda ibunaga bi mana Yaremaiahondo lamini. <sup>3</sup> Mani Yosaiya igini Yahoiaigimi ibu kini heangi Anduane

✧ 1:2: 2 Kin 22.3-23.27, 2 Bit 34.8-35.19



Homogo ibugua bi maru Yaremaia lamia dege bini. Horo ogoningi howa Anduane Homogohanda ibunaga bi Yaremaiahondo lamiaabo halu heane dege Yosaiia igini Sedegaia ibu kini heane mali bearia (11) pene. Mali beanegonaga ege dauni hayagola waitigime Yuda wali agaliru dindi taraha tinaga garabaya biabe ale bialu helo minu garabayabu yalu pene.\*

### *Yaremaia olenego ogo*

<sup>4</sup> Anduane Homogohanda Yaremaia ihondo bi ogodagua langiya. <sup>5</sup> Í aiya tombeha í nabereha ina í ala bamba dabenege kegoni. Mani í aiyahanda í taba nahe ibu tombeha berengi ina í dindi bibahendeni inaga bi mana latagi haga habelo dabaru.\*

<sup>6</sup> Anduane Homogohanda bi ogoni layago hale howa ina ladai bialu lalu, Anduane Homogo Bibahende Haru Haame Ho Haga-o ina bi mana ogoni latagi holene manda nawi igiri emene dege kogonidago agua loliyadabe, laru.\* <sup>7</sup> Ani larugola Anduane Homogohanda ladai bialu lalu, I igiri emene kogoni, nalabe. Inime wali agali maru karuhondo ina bi lamule pu larugoha polene nga. Ani bialu bi lamibe larogo lamiaiore holene nga. <sup>8</sup> Ina ti hondowa gi holene nawi. Ina í biamogo bulebero. I Anduane Homogo ina bi o ledogoniore, laya.

<sup>9</sup> Ani lai howa ibunaga gi iha dogola ede halu inaga ne hambuni ela howa ogodagua laya. Hale ha. Áyu inaga bi inaga ne hambuni wia harogo ogoni latagi habe. <sup>10</sup> Áyu howa ina wali agali hameigini dindi tara tarani bu karuni haru habelonaga ina hongo ngerogoni. Ina mbirale ngaru handayaho habelonaga hongobi bo gialo bagabu waha-belonaga hongobi bope halu mo ko habelonaga hongobi bulene ngaru bialu habelonaga hongobi hongolene ngaru hangabelonaga hongobi bibahende karulapeore ngerogoni, lalu Anduane Homogohanda laya, lene.

### *Yaremaiahondo de gandeba kira walia henego ogo*

<sup>11</sup> Anduane Homogohanda ihondo hale halu lalu, Yaremaia-o ogoni agile hendedebe, laya. Ani layagola ina ladai bialu lalu, Ira mini amononaga magane hendedogoni, laru.

<sup>12</sup> Ani larugola ibugua ladai bialu lalu, Tigatiga larigoni. Inaga bi lo wirugo bibahende tagira piiai helo de hondo holebero, laya.\*

<sup>13</sup> Ani lowa ibugua lone ihondo hale halu lalu, Ai lone mbira agi dege hendedebe, layagola ina ladai bialu lalu, Todobene be mbira uyugohayagi iba mbolia balu kane hendedogo ai orayagi odo dai bibehedane hendedo, laru.

<sup>14</sup> Ani larugola Anduane Homogo ibugua ihondo lalu, Mo ko holene timbuniore mbira uyugoniha howa ibalu wali agali dindi ogoha karu bibahende mo ko hai holebira.

<sup>15</sup> Anduane Homogo inime kini uyuruniha bu karu ibilarogo tigua tinaga ami agali de-waore haru ibulebira. Ibuwa kini uruni tinaga biragane dagiaru Yarusaleme tanonaga panga harabani wia parahon gelo bedagola wali agali tagira pobe naheore wara andaho birulebira. Wara anda howa ho mabubupe halu Yuda dindiha tano ngaru bibahendebi ani dege biai holebira. <sup>16</sup> Irane inaga wali agaliru tigua inaga bi mo wahowa mana ko ngaru hangu bialu ini erembira ngialu tigua dama karuhondo bi pupu wialu uruninaga mini yaraga halu lomaru miaga kamigonaga ani ibilolebero. <sup>17</sup> Anigo ai heyalu ina wali agaliru bi ogoni lamule pu nabere. Abale puwa gi nahe bi langiruruni bibahende lamiai habe. Í áyu ogoni gi hariyagua uruninaga deni howa í mogo lalu gi timbuniore habelo ina í mo gi bia holebero. <sup>18</sup> Yaremaia-o hale ha. Ina í mo hongo halu tano mbira pabe hongoheore bu mabubi ngaligobi howa aeaneme anda gene hene howa tole boronosime pabe bini hongoheore kaligobi í heledo. Ani bidogome Yudanaga kini karumebi agali haguane karumebi loma binigo mo miaga karumebi wali agali

\* **1:3:** 2 Kin 23.36-24.7, 24.18-25.21, 2 Bit 36.5-8, 36.11-21    \* **1:5:** Iba 139.15-16, Ais 49.1, 49.5    \* **1:6:** Har 4.10, 1 Kin 3.7    \* **1:12:** Ogoniha howa ira amono layadago inanaga bi lalu, De hondo haga, laga.

bibahende karumebi í bope naholebira. <sup>19</sup> Agali uruni tigua í baba waitigi bu hinu haho holebirago í bope habe nahe holebira. Inime baya hangu handayaho íla mandagi howa biamogo bialu holebero. I Anduane Homogo ina bi o ledogoniore, laya.

## 2

### *Bamba Isaraele wali agalime mana bayale binigo ogo*

<sup>1</sup> Anduane Homogohanda ihondo lalu, <sup>2</sup> Ina inaga bi ogoni Yarusalemeha karuhondo latagi halu lamibe. Bambaore tí waneigini ale harimingi tigua inihondo mini mbiraore wuwa hongo howa yu tiga bialubi tinaga bu mini iha pagaho harimigobi ina mitangi bido. Ani bialu wali agali pigane dabubu howa gubalini hagabu hagadagua harima. Ani bu howa dindi ko mbirale anda nahaga wali agalime mabu nahangaga wiagoria tigua ini hangu talima ibagabu harimigoni. <sup>3</sup> Isaraele-o horo ogoningini tí ininaga wali agaliore howa inaga mabuha tomo ala pigane hengeneru lomabu migi biraligobi harimi. Mbiralime tí mo ko haga biyagola ini ala pu bamba howa tigua ko biyagonaga pani migi bialu бага birugoni. I Anduane Homogo ina bi o ledogoniore, laya.

### *Isaraele wali agalinaga mamalirume ko binigo ogo*

<sup>4</sup> Isaraele wali agali Yagabanaga aguanali kamiru aibe. Anduane Homogohanda bi ogo lowia hayago tí hale hadaba. <sup>5</sup> Anduane Homogo ibugua lalu, Ina agi birugonaga tinaga mamalirume i helo wahalu ti kaundiaha pu waore hayabe. Tigua galone ndo wiaruhondo bi pupu wialu howa tinibi habane nabulene dege hene ndobe. <sup>6</sup> Ina ti pele mialu dewaore birugo mo embeda haya. Inibi embeda dege haya. Iyibi dindi howa haru tagira ibalu dindi ko wali agali nahaga wiagoria haru ibirugoni. Dindi ogoniha mbirale anda nahaga ege tole hangu pale dalubi naibaga wiagoria wali agali pu luluya haga dindi koore wiadagua haru halu ibirugobi uruni embeda hai haya. <sup>7</sup> Tinaga mamali uruni dindi ko ogoni wahalu dindi homogo mbirale bibahende anda hai holene o ngagoria haru ibirugoni. Ayu Isaraele wali agali tí dindi bayale ogoria howa tomo bayalebi mbirale bibahende bayale wiarubi karulapeore wuwa kamigoni. Anigo tigua dindi bayale ngirugoria howa mana ko ngubi nagalone wiaru biaabo halu dindi bayale inime tí ngirugobi ininaga deni mo nagalone bu hinalu mo ngubia harimi. <sup>8</sup> Loma binigo mo miaga hearume i embedaho wahalu mana mandabi hearu tiguabi i manda nabi dege haya. Dindi ogonaga agali haguane hearu tiguabi ihondo mine haya. Anduane Homogonaga mana latagi haga hearumebi dama Bala hearunaga minini howa mbiwia haga biya. Mbirale mbira ti biamogo bibe nahe wiagohondo bi pupu wiaga hene, lalu Anduane Homogohanda laya, lene.

### *Anduane Homogohanda ibunaga wali agaliru manani dabenego ogo*

<sup>9</sup> Anduane Homogo ina larogo, Tigua mana urunidagua birimigonaga ina tí ko biaga kami lalu manani dabaluni pani ngulebero. Tinibi tinaga waneigini aguane mani holebilarubi bibahendeore ko biaga kami lalu pani miaabo holebero. <sup>10</sup> Ai ni paliragoha dindi mini Saibarasa iba dege dombene ngagoha pialu dindi ogoniha mana biaga ngago handalimu. Ani bialu ni tagira ibiragoha pialu Arebia dindi ogoniha bialu kagobi handalimu. Mana ko ngubi tigua bialu kamirunidagua mbira dindi uruniha bialu hearia handarimibe. <sup>11</sup> Tigua mbirale henene ndo karu yu tiga buwa bi pupu wialu ogoni yu wahalu pu nabi hongo howa haabo haga ka. Anigo Ngode Datagaliwabe timbuni hongohe mini lene i kogo helo wahalu inaga wali agali kamirume dama ko habane nabulene tini biamogo bibe nahe karuhondo bi pupu wialu kami. <sup>12</sup> Anigo Anduane Homogo inime laro. Hari daligani bu kamiru aibe. Isaraele wali agali o karume mana ko bialu karuni hondowa mogo lalu duru nalarami. Tigua mana ko uruni biragonaga manga halu taga ho holene nga. <sup>13</sup> Ogoni irane inaga wali agali uruni tigua mana ko kira biyago. I haabo holene iba duguaho wiagagobi howa ina tí holene miaga kogo

helo wahalu ini erembira ngialu piaga kami. Ani puwa iba hambulenaga toleha iba berelo tinime guabu ngelo harimi. Ani guabu ngelo karia iba biraga tole uruni poda бага biragola iba nabirulebira, laya, lene.\*

*Isaraele wali agali tinime mana ko biyagonaga pani nene go*

<sup>14</sup> Anduane Homogohanda lalu, Isaraele hameigini ti marume hondo haga hene ndo ka. Ti mendealinaga garabaya biabe ale bialu haga ndo howa ti aba aiyarubi garabaya biabe bialu hagane howa hono winibi ndo dege kagoni. Anidago irane aginaga waitigirume ibalu ti mo ko howa bo hangedalu kabe. <sup>15</sup> Waitigi agali urunime gabua budi ale timbuni laionome ngororo laradagua bialu ti abale ibuwa tanoni anda hearunibi gialo wahai hayagola dindi ogoniha agali naheore nga. Dindi ogoni mo labu halu mbirale anda habe nahe ngelalu tano bayale winiru bo gialo wahai haya. <sup>16</sup> Isaraeleru tiore wali mbira Iyibi dindiha Membisi tano Tabanese tanolaha agali hearume mandari podu wahenegobi kamigoni.\* <sup>17</sup> Genda uruni tinime bia ko harimigome ibira. I Anduane Homogo tinaga Ngode Datagaliwabe howa ina ti baya hangu hariga walua hama haru ibirugola tinime i manga halu erembira ngirimu. <sup>18</sup> Ayu Iyibi dindiha dai buwa iba Naili hambu nole kamigobi Asiria dindiha pialu iba Yuberedisi hambu nole kamiru aginagabe. Anidagua beramigome ti biamogo bulene mbira nawiore ndobe.† <sup>19</sup> Tininaga mana ko bialu kamigome tini hayu dai bulebira. Ihondo erembira ngialu pirimigome tininaga ko ogonime tinihondo handabe manga haragoni. Anduane Homogo i tinaga Ngode Datagaliwabe hewago yu wahalu inaga andaneha nahe puabo harimigoni. Ai mana ogonidagua birimigome tini mo tandaga halu koore kaubi ngago minime baya hangu manda bulene nga. Anduane Homogo Bibahende Haru Haame Ho Haga howa Hongo Haiheore kogome bi o ledogoniore, laya lalu Yaremaiahanda lene.

*Isaraele wali agalime Anduane Homogo mitangi bialu lotu lole manga hene go*

<sup>20</sup> Anduane Homogo Bibahende Haru Haame Ho Haga kagome laabo halu lalu, Isaraele wali agaliru-o hale hadaba. Bambaore howa ti inaga biabe bialu halimulo helarugo yu wahowa lalu, Inaga biabe ogoni iname nabuleberema, larimi. Ani lalu walime agali kayu yama ibaga biagadagua puwa tigua hari nene wiaruha iraga halu puwabi ira timbuni hearu tenehabi dama hearunaga mini yaraga howa bi pupu wialu harimi.‡ <sup>21</sup> Ina ti pigane inaga pu mbira mini gerebi egene bayaleore dabaluhangarugo ai ayu abiale harimidabe tini handadaba. Ayu ti gerebi irane ko emberaha ho wahene kuabuore kamigoni agua biyabe. <sup>22</sup> Ani howa tinaga ko para karu sobo hongoheme wayawaya bo waharimiyaguabi doma nabulebira. Ina tinaga ko birimidaruni doma nabi wiaabo kane hendedo.\* <sup>23</sup> Tigua ihondo, Ina mana ko uruni nabi gime wabini mini Balahondo bi pupu nawi harima, lalu labe nahe kami. Isaraelealiru-o mana ko unu dindi ulini biagoha howa bialu harimigo manda bilimu. Nogo kamele angibunime egene bu howa wangabe taya bima dindi ngaru bibahendeha piagi hagadagua bialu

\* **2:13:** Ais 12.3, 65.11, Yar 17.13 \* **2:16:** Agali Iyibi dindiha Kini Negome Yuda wali agali genda timbuni mo mialu henegonaga lene bada. † **2:18:** Bi lo ngagoni irane Yuda dindiha agali haguane hearume mitangi bialu tinaga waitigi karume ti baba wai bule ibiragola biamogo bilonaga dindi timbuniha agali hongohe karume ti biamogo bilonaga Iyibiali kini kago nenege halu Asiriali kini kagobi nenege halu bule manda bialu hene. Manda bialu hemiria Yaremaia ibugua dege Ngode Datagaliwabe ibu hangu karulape biamogo bulebira lalu mo walua hene. Hameigini tara hongohe urunime biamogo nabulebira. Ngode Datagaliwabe ibugua holenenaga iba ngiaga ka. 2.13 handabe. Dindi kaundia ngaruha iba taya bima pialu kamiru agibe, lalu lene. ‡ **2:20:** Bi yobage ogoni ogodagua lalu leda. Isaraele wali agali ti Ngode Datagaliwabe one ale lene. Anigo ti agalini helalu walime agali kayu yama piagadagua bialu Ngode Datagaliwabe mitangi bialu ibunaga lotu nale yu wahalu dama hearuhondo bi pupu wima pene. Bi yobage lowa walime agali kayu yaga ogoni Yaremaia ibugua dewa lowinigo ai agali maru mbiwia haga henerume bi laga biniru gilibu nga. Damahondo bi pupu wiaga uruni hari nene wiaruhabi ira timbuni hearu teneha gumba bayale wiaruhabi wiaga hene. \* **2:22:** Yob 9.30, 14.17, Hos 13.12

harimi. <sup>24</sup> Nogo dongi gabua angibunime dindi ko wali agali nahaga ngagoha ibaga bialu nogo dongi gabua wangabe agoha haruabe hondole ngayaga bima piaga. Nogo urunime egene bu howa wangabe taya bima pole biragola mo dariba halu tinaga hame ngago mo batara habehebi mbira ai kabe. Ani pialu karia nogo uruni ale wangabe karume ti taya bulene erekui nabi abale lola halu handaga. <sup>25</sup> Anigo Isaraealiru tí dama tara tara karu talima polene nawi. Uruni bialu kamiria tínaga ge tandaga bialu iba noa howa kembobe lebola holani handalimu. Ani anigo tígua lalu, Bi uruni hale nahole ina dama uruniore hamelo kamago ti yu wanaholeberema laga kami, lalu Anduane Homogohanda laya lalu Yaremaiahanda lene.

*Anduane Homogohanda Isaraele wali agalirume mana ko biyagonaga dara henego ogo*

<sup>26</sup> Anduane Homogohanda laabo halu lalu, Agali page biaga kago handa walia halu minu yania hayagua agali ogoni ibu taga timbuni hagadagua dege Isaraele tí taga timbuniore holeberemi. Tínaga kini karubi agali haguane karubi loma binigo mo miaga karubi Ngode Datagaliwabenaga bi mana latagi haga karubi tí bibahende wali agali heba taga timbuni holeberemi. <sup>27</sup> Tí taga ogoni holeberemigo irane tígua ogodagua lalu, Ira bu karuni ina aba ka, lalu, Ege tole ngarume ina hono wiaga, laramili. Tígua ani bialu howa ini kogoha dai nabi i erembira ngialu pu wahaga kami. Ani howa dege genda mbira tíha tagira ibirangi tígua, Anduane-o ina biamogo bule íbu, lalu haga kami. §

<sup>28</sup> Anigo ai Yuda tínime dama mitangi bialu gime wabinirume tí biamogo bilonaga tano bibahendehe wu karulape wirimiruni agoha kabe. Mbirale uruni ti karulape heagua nde wali agali tíha genda anda ibirangi tigua tí biamogo bulebira ndobe, laya. ✧

<sup>29</sup> Ani lowa lalu, Tí bibahendeoreme ihondo mine harimigo howa dege lone aginaga ina tí yu wahaya laramibe. <sup>30</sup> Tí mo tiga bulenaga ina tínaga waneiginiru mana lalu minu barugo o barudaruni lini nade bame bu wahole birudane hendedo. Uruni bialu kogo holiya tígua inaga bi mana latagi haga agali hearu budi gabua ale timbuni mini laionome nogo karu bo nagadagua agali uruni homelo bo wahaga kami. <sup>31</sup> Isaraeali áyu kamirume tí hale mia howa Anduane Homogo ininaga bi larogo hale hadaba. Tígua mandabu handalu kamiria i daga nalene dindi ko lebolahe mbirale anda nahaga wiraligo ale kabe toba kamibe be dindi ko aruma ale kabe toba kamibe. Ani ndoyagua irane aginaga inaga wali agali bu kamiru tígua lalu, Inane hameledemaruha pugupugu buleberema. Ini kegoha dai nabuleberema, laga kamibe. <sup>32</sup> Ai tígua manda bialu kamiria wandari bedarume agali pole howa yári tara bialu piyago embeda holebirabe. Ani nabulebira ndobe. Anigo inaga wali agali kamiru horo dewa daga labenahe tigua i embeda ho waharimigoni ndobe.

<sup>33</sup> Isaraealiru tíore wali agali kayu yulenehayagi manda timbuni bolanguahe kamigoni. Ani kamigo howa tínaga mini bogaru agali kayu yama ibaga biaga wali bedarunaga manda bogala bidago bolanguahe kamigoni. Ani howa tígua maru karubi mana ko ogoni biawai holeberemida. <sup>34</sup> Agali yagibano hearume tínaga andagaha howa tomo dabudabubi mbira kayu nabioire bame agibelo hearu homelo bo waharimigoni. Uruninaga darama tínaga agani wai kagoni ndobe. Ai tígua mana ko urunidagua bialu kamigo <sup>35</sup> howa dege lalu, Ina ko nabi kamago Anduane Homogo-o inahondo keba holene irane nawi, laga kamigoni. Ani lalu kamigo ai hale hadaba. Bi ogonidagua laramigo henene ndo lalu kami. Ani lalu kamigonaga ina tí manani helowa dabilebero. <sup>36</sup> Hameigini tara marume mana birago talima pialu howa dege abaleore beregedalu mana mendego bia aribia haga kamigoni. Asirialirume tí biamogo nabiyagola taga harimigodagua ai Iyibialirume tí biamogo bule naibiragola taga timbuni holeberemi.

§ 2:27: Agalime ira ege tolerume mbirale dama mitangi bialu gime wabiaga hene. Ani wabuwa mbirale urunime tíha holene ngiaga ka lo manda biaga hene. ✧ 2:28: Man 32.37, Hgn 10.14, Ais 45.20



<sup>37</sup> Tígua Iyibialiruhondo genda timbuni howa taga timbuni holeberemi. Tígua, Agali urunime ina biamogo bulebiraore, lalu mini dunubiaho harimiru Anduane Homogo inime ti erembira midogonigo ai tigua tí biamogo nabuleorebira, laya lene.

### 3

#### *Isaraele wali agalime Anduane Homogo yu wahenego ogo*

<sup>1</sup> Anduane Homogohanda lalu, Agali mbirame ibu one waharagola wali biago ibugua agalini wahalu puwa ibu agali mendela piyagua agali pigane dabu bini biago ibugua ibu one wahayago lone haru dai bulene nawi. Ibugua wali ogoni ale haru dai biyagua inaga deni ibunaga dindi mo dodohe ngelalu mo ngubia holebira. Isaraelealiru-o tigua agali tara dewali baba kayu yu palima ibaga bialu harimigo ai ini koria dai beremibe.✧

<sup>2</sup> Hari nene amu ngaruha handa amu nana bidaba. Hari nene uruni aria mbiragoria tí puwa kayu nabini mbira ngabe. Arebialirume dindi ko wali agali nahaga ngagoria bira do howa wali agalinaga mbirale yalu poraru mo page bule yu biragadagua tigua hariga teneni tinaga nenegeru ibilo hondo biraga kamigoni. Tigua mana ko bialu harimigomebi kayu yalu harimigomebi inaga deni tinaga dindi mo ko halu mebia harimigoni ndobe.

<sup>3</sup> Tigua mana ogonibi bialu kamigonaga dindi ogoria iba dalu naibilonaga ina yaniaho kogoni ndobe. Anigo tigua taga emeneorebi mbira nahe howa bayanda walime mine halu agali kayu yama ibaga biagadagua bialu kamigoni.✧

<sup>4</sup> Ani kamigo howa ai áyu tigua ihondo agua larami, Anduane Homogo í inanaga aba howa ina waneigini emene hemangi ina gubalini ho haabo harigo áyu kegoni, lalu kami.

<sup>5</sup> Ani lalu, Ina inahondo keba ho haabo holeberebe. Inaga lembo holene ereba nahe wiaabo holebirabe, laga bialu kamigoni. Ani anigo Isaraelealiru-o tinaga bu miniha hamelo henego damene bibahende mana ko bialu harimigoha biba harimigoni ndobe, lene.

#### *Yuda wali agalibi Isaraele wali agalibi bu mini beregedolene winigo ogo*

<sup>6</sup> Yaremaia ibugua lalu, Ai Yosaia ibu kini heangi Anduane Homogohanda ihondo langialu lalu, Isaraele wali agali minehe o karunime mana ko bialu hearuni de handaribe be nahende dege kebe. Tigua i yu wahalu puwa hari nene ngaru bibahendehabi ira timbuni yuni gumbile hearu andanehabi pialu agali kayu yalu haya.✧ <sup>7</sup> Ainde Isaraele ibu mine halu mana ko uruni biai halu mani ini koria dai bulubada lo manda bu haru. Ani manda bu hewariabi dai nabiya. Ani biyagola ibu hagibuni minehe Yuda ibuguabi Isaraelehanda biyago ale dege biya. <sup>8</sup> Ai Isaraele ibugua ini yu wahalu puwa agali mendela kayu yama ibaga bialu hearia ina wali waholene beba mbira gili buwa ibu mialu ibu pelo yupe halu pu laru. Ainde ibu hagibuni Yuda ibu mbirale o birudagoni de handayagoyu ibu gi habehego nahe dege ka. Ai áyu Yuda ibu nde ibaga bialu agali kayu yalu bedane hondo ko. <sup>9</sup> Wali agali kayu yulene ogoni taga nabi bameda lowa ibugua ira ege toleruhondo bi pupu wialu ka. Mana ogoni bialu kagoni ibugua agali kayu yagadagua yaragoni ndobe. Ani biragome inaga deni ibugua dindi ogo mebia haragoni.

<sup>10</sup> Yuda ini yu wahalu puwa ibugua mana ko uruni bialu henego ai mini beregeda nabi ka. I Anduane Homogo ina bi o ledogoniore, lalu langiya.

<sup>11</sup> Anduane Homogohanda ihondo laabo halu lalu, Isaraele Yudala libu agalini wahalu pene bayanda wali beda. Anigo Isaraele ibugua ko bini ngaru nira dege lowa Yuda ibugua bia ko hene ngago timbuniore nga. <sup>12</sup> Anidagua bini ngago ai Yaremaia ina ga lalu uyurayagi ola uyu habe. Ani olowa Anduane Homogo ininaga bi ogodagua labe. Isaraelealiru-o tigua i yu wahalu pirimigo ai ini koria daibulene nga. I Anduane Homogo inimeore larogo ina tihondo keba naholego ini koria dai bidaba. Ani larogoni irane i wali agali dara holene irane nawini dara haabo haga kogo howa inaga keba holene wiaabo

✧ 3:1: Man 24.1-4, Yar 2.20, Ese 16.26-29 ✧ 3:3: Yar 6.15, 8.12, Ese 3.7 ✧ 3:6: 2 Kin 22.1-23.30, 2 Bit 34.1-35.27



naholebira. <sup>13</sup> Isaraealiruru tígua ihondo tigatiga langialu ogodagua lalimu. Iname kagua dewaore birima. Anduane Homogo inanaga Ngode Datagaliwabe ihondo dogu halu puwa ira timbuni hearu bibahende teneha pialu mbirale dama mitangi bialu bi pupu wule gime wabini wiaruha puwa mana ko biaga wiaru bialu howa inaga bi mo waharima, lapani halu tigatiga lolene nga. I Anduane Homogo ina bi o ledogoniore, lene.

<sup>14</sup> I Anduane Homogo inime larogo wali agali i yu wahalu pirimiruni ti inaga wali agaliore hene kamigo mitangi bialu ini koría dai bilimu. Ina tano mbiragoha howa wali agali mbira mbira haru halu hameigini mbiragoha howa wali agali kira kira haru ha bialu ininaga Hari Saiono kagoria haru daibu helolebero. <sup>15</sup> Ani helowa agali bayale ininaga bi mana lo ngogo talialu biaga karu tigua haru haga helo dabo helaga bulebero. Uruni tigua manda bayale buwabi mini gigabiwi howabi ti baya hangu haru holebira. <sup>16</sup> Ani bulebirago ai Anduane Homogo ina larogo mani tininaga dindini howa wali agali dewaore palia dame buleberemi. Ani bu howa tigua Anduane Homogo inaga Habo Nalolene Bi lo winigonaga Mbogoyi biago lalu bi mbira naloleberemi. Tigua Mbogoyi ogoni mbira mitangi bule ndo wahalu ogoni agua biyadabe lalubi bi naloleberemi. Tigua gahenge wabu aribiabi naholeberemi dege. <sup>17</sup> Horo ogoningi wali agalime Yarusaleme mini, Anduane Homogo ibunaga biraga dagia nga, holebira. Ani laragola wali agali hameigini dindi tara tarani karume Yarusalemeni ngoai halu i mitangi bialu lotu holebira. Ani bialu howa tigua mini giambe hayago wahai halu tininaga miniha mana ko bulene ngelo henerubi wahai holebira. <sup>18</sup> Horo ogoningi Yudalirubi Isaraealirubi mandagi biamaga halu dindi uyurayagi áyu tini kagoria howa daibulebira. Dai bialu tinaga dindi bamba ina tinaga mamaliruhondo tininaga dindiore ogoni wiaabo helo mirugoria daibu holebira lalu Anduane Homogohanda laya, lene.

*Isaraele tigua mbirale bi pupu wulenaga gime wabiniru waholene winigo ogo*

<sup>19</sup> Anduane Homogohanda laabo halu lalu, Isaraeleru-o ina ti inaga waneiginiore halimulo hame lowa dindi bayaleore mbira dindi tara ngarubi ndo ngirugoni. Ani birugonaga tigua i yu wahalu pu nabi i aba-o laga bima ini talima ibalu haabo halimulo hamelo haru. <sup>20</sup> Ainde ogonidagua nabi howa wali dabu binime ibu agalini helo wahalu piagadagua tigua i wahalu pirimigonaga laro. I Anduane Homogo ina bi o ledogoniore, lene.

<sup>21</sup> Dugu timbuni mbira hari nene uyu ngaruha howa biarua. Isaraele wali agalirume Anduane Homogohondo ti biamogo bia lalu dugu hongo howa bialu harua. Tigua Anduane Homogo tinaga Ngode Datagaliwabe mo embeda howa yu wahalu puwa mana koru hangu bialu henego ai ti dara halu biamogo bia lowa dugu biarua. <sup>22</sup> Anduane Homogo ibugua lalu, I waneigini mine hagaru-o ina baya hangu hamija tinaga mana ko liahe ngelo harimidaruni mo tiga buliya ini koría dai bidaba laya, lalu Yaremaiahanda lene. <sup>\*</sup>

Ani lowa lalu, Anduane Homogo ibugua ani layagola wali agali tigua ladai bialu lalu, Anduane Homogo-o i inanaga Ngode Datagaliwabeore kegodago áyu ina ini keria dai beramagoni. <sup>23</sup> Iname hari nene wiaruha puwa damahondo bi pupu wialu wali agali kayu yu palima ibaga bialu harimarunime inane biamogo nabini. Anduane Homogo inanaga Ngode Datagaliwabe ina hangu ina biamogo bialu haru dai beregoni. <sup>\*</sup> <sup>24</sup> Anigo iname dama mitangi bialu gime wabini mbirale tagabi mini Bala wiagohondo bi pupu wialu harima. Ani bialu harimadagoha howa inanaga nogo bulumaga sibirubi inanaga waneiginirubi inanaga mbirale bayale damene ina mamalime biabe ndelahe bialu ilu wigi bini ngelo henerubi Balahondo lomabu mialu biba haiore harima. Ina wandari igiri daliahe hemangi howa bialu henego áyu bialu haabo kamagoni.

<sup>\*</sup> 3:21: Ais 17.10, Yar 2.32, 13.25    <sup>\*</sup> 3:22: Yar 30.17, 33.6, Hos 14.4    <sup>\*</sup> 3:23: Iba 3.8, Yar 17.2, 17.14, 31.7

<sup>25</sup> Anduane Homogo inanaga Ngode Datagaliwabe-o inamebi inanaga mamalimebi bambaore wandari igiri daliaheni howa ihondo mana ko dege bialu haabo henego kamagoni. Iname inaga bi mo wahalu harimagonaga taga timbuniore halu wanakui dindiha handa daliho habeheore kama, lalu Isaraele wali agalirume bi ogoni lene.

## 4

*Anduane Homogohanda Isaraele wali agalihondo lalu, I koria dai bulene nga, lenego ogo*

<sup>1</sup> Anduane Homogohanda lalu, Isaraele wali agaliru tí dai bulene nga manda birimiyagua nde ininaga andaneha hole dai bilimu. Mbirale dama mitangi bialu bi pupu wiaga ko ngubi inaga deni ngelo kamigoni mo wahalu ini talima ibalu haabo halimu.

<sup>2</sup> Ani buwa tigua i Anduane Homogo haluhe kogonaga minini howa bi mbira heneneore larama lowa lo wirimiyagua nde ogoni mana henenebi bayalebi tigabibi ngadagua talialu bule lalu lalimu. Tigua anidagua birimiyagua hameigini dindi tara tarani bu karume ihondo lalu, Ina mo bayale halu biamogo bia, lowa inaga mini yaraga holebira, lene.

<sup>3-4</sup> Anduane Homogohanda wali agali Yuda dindiha hearubi Yarusalemeha hearubi lamialu lalu, Tí ini koria dai bialu agalime dindi alialu mabu gahengeha tomo bayaleru hangagadagua tigua mana ko bialu haga ngamigo wahalu mini tigabi bayale wia aribia halu bialu halimu. Tomo bayale ogoni mbirale anihe bu karu heba hangamaga holamini nahalimu. Yuda wali agalibi Yarusaleme wali agalibi tigua mini ko ala tawe ngemiru wahai halu ininaga wali agali heneneore hole tíni lomabu halimu. Tí anidagua nabi harimiyagua ina tigua mana ko bialu kamigonaga keba timbuni howa tíha pani nolene timbuni ibilolebero. Inaga miniha keba holene ira hungu ale biragola mbiralime mo hundia habe nahe wulebira, laya lene.\*

*Waitigime ibalu Yuda baba wai bulebira lenego ogo*

<sup>5</sup> Ina Yuda dindihabi Yarusaleme tanohabi bi latagi holiya Anduane Homogohanda ihondo bi langiya. Ibugua lalu, Tí dindi bibahendehe mbelo biguliru pu laga laga bima pilimu. Bi dalimuore ladaga halu lalu, Tí bibahendeore íbu ngoai halu tano wai pabe hongohe ngaruha ha do hai hole pudaba, labe. <sup>6</sup> Wali agali bibahendeore Saiono piai helonaga mo walia halu pelagi yaraga ho hadaba. Tí bame handayaho holene nawiorego bibahende abale ibida pialu ha do hole pudaba. Ina waitigi dindi abene uyurahayagi karu ti dindi wahalu tí baba wai bilimulo ibilarogoni. Tigua ibalu tí mo ko howa bo hilo wahai helo ibilarogonigo tí ha do hai halimu.\*

<sup>7</sup> Laiono gabua ha do haga ngagoha howa tagira ibiralidagua tinaga waitigi tini dalu wahalu ibilarogoni. Tigua hameigini dindi tara tara wali agalibi dindi wiarubi mo ko hai halu bo haealabagabu wahai haga kago tí baba nde ani dege bule ibiragoni. Tigua ibalu tinaga tano ngaruni bo gialabagabu wahai haragola wali agali lenego mbira naholebira. I Anduane Homogo ina bi o ledogoniore, laya lene.

<sup>8</sup> Anidagua bulebiragonaga tigua dara ho howa walia halu aga karulaga ngago mo karulo howa dara halu dugu bialu halimu. Anduane Homogohanda ina baba miniha keba timbuniore ho kago wa naholebirago ani bilimu labe, laya.

<sup>9</sup> Anduane Homogohanda lalu, Mbirale ogoni birangi kini karu heba agali haguane karubi gi hai halu loma binigo mo miaga karubi bi mana latagi haga agali karubi ti bibahendeore mogolo hai holebira, laya. <sup>10</sup> Ani layagola ina lalu, Anduane Homogo Bibahende Haru Haame Ho Haga-o inime ina Yarusaleme wali agali kamaru bayale holeberemi lalu larigo ina mo hondo harida. Áyu waitigime ibalu ina bibahende bo wahai holobada, lalu laru.

\* 4:3-4: Yob 41.20, Ais 1.31, Hos 10.12, Kl 2.11 \* 4:6: 4.21 de handabe.

*Waitigi hongoheore puyabu poboyogobi ale ibulebira, lenego ogo*

<sup>11</sup> Waitigiru ibulebiragonaga Anduane Homogohanda Yuda wali agalirubi Yarusaleme wali agalirubi tihondo bi ogodagua lene. Puyabu poboyogobiore dindi ko dalu naibaga wali agalibi nahaga ngagoha howa ibalu inaga wali agali bu karuha anda ibulebira. Anigo puyabu ogonime widi lini ngelalu yuni aeaneru hangu puloyu piagadagua ko ngago hangu pulo wahole ndo ibulebira. <sup>12</sup> Puyabu ogoni hongoheore ibalu bibahende mo ko haiore hole ibulebira. Ina puyabu ogoni ibiloleberogo irane inime wali agali uruni manani howa mo talebuki bialu ti pani nelo mulenaga ani ibilolebero, lalu laya.

<sup>13</sup> Anigo i Yaremaia ina wali agali bu hearuhondo lamialu lalu, De handadaba. Waitigiru arumahe ginu hagua mindibi mberane ale ibiragoni. Ami agalirunaga karisi puyabu hongohe humbirini wai ale ibalu ami agalinaga nogo hosiru gerai gibi ega bodo hariawe yagaloyu ibagadagua ndo gibiore ibiragoni. Ani birago mo ko holene anda ibiragonaga i daraore ho kogoni.

<sup>14</sup> Yarusaleme wali agaliru-o tinaga miniha ko bulene dege mitangibu kamiruni angi waholeberemibe. Anduane Homogohanda ti pele ngialu haru dai bilo tigua mana ko bialu harimigo wahai halu ibunaga deni tiha ko mbira para nahe bayale halimu.\*

<sup>15</sup> Dana hameigininaga tano wiagoha howabi Eberaimi hameigininaga dindi barebare wiaruha howabi agali marume mo ko holene horo tagira ibirago lalu bi yalu ibiragoni. <sup>16</sup> Anduane Homogohanda agali urunihondo lamialu lalu, Tigua wali agali dindi tara taraha bu karubi Yarusalemeha karubi lamialu, Tinaga waitigime ti baba wai bule abale anda ibiragoni lalu lamilimu, lene. Tigua anda ibuwa Yuda dindiha tano wima pedagogia ibalu wai huario lalu wali agali bu karuhondo bi hongo howa lalu holebira. <sup>17</sup> Anidagua bulebira irane Yarusaleme wali agali tigua i Anduane Homogo kogohondo erembira ngialu harimigonaga waitigi uruni tigua mabu anduaneme pabe bu yaanda hagamaga Yarusaleme ho hagira bulebira. I Anduane Homogo ina bi o ledogoniore.

<sup>18</sup> Tigua mana ko hangu biaabo halu hariga ko wiagoria pialu haabo harimigome tiniha genda timbuni ogoni anda ibulebira. Tinime ko timbuni bu kamigome tinaga gubalini nogoba henego genda yu howa tandaga timbuni nalu holeberemi, lene.

*Yaremaiahanda ibunaga hameigini bibahende dara henego ogo*

<sup>19</sup> Inaga bu miniha mo koore ka. Tandaga timbuni ogoni ina yabe naheoreda. Ogonime i bopeore halu inaga miniha mo ko timbuni ka. Ami agalirume mbelo biguli pulalu wai huario laga laga biaruane hale kogodago ina bi nale ne hariga ndibulo naholebero. <sup>20</sup> Tigua wali agalibi dindibi bibahende mo ko hai halu bo haealabaga biai hayagola mo ko hai henego nga. Abale ibalu tigua inanaga balai anda bu kamaruni bo gialo wahai haragoni ndobe. <sup>21</sup> Waitigi bu karuni wai wahalu tini dalu angiore dai bulubadabe. Biguli pulalu wainaga pelagi yaragaho yalu pialu angiore waholobadabe.†

<sup>22</sup> Anduane Homogohanda lalu, Inaga wali agaliru ti boga nabi mini bayale mbira nawiore kagoni ndobe. Tigua i manda nabioire kagoni. Ti mini nawi waneigini ale lulu anda ibagabu hagagobi ka. Tigua mana ko bulenenaga hangu manda bolanguahe wu howa mana bayale bulenego manda nabi ka, lalu Anduane Homogohanda laya, lene.

*Yaremaiahanda de gandeba hendenegro ogo*

<sup>23</sup> I Yaremaia ina handalu hewaria dindi ogo mo ko hene tara mbira wiaria de handaru. Hari daligaha handa daga halu hewaria wa mbira naheore wiaria handaru.\*

<sup>24</sup> Dindi hari timbuni wiaru de handalu hewaria uruni ema bigibigi bialu bare emene

\* 4:14: Ais 1.16, Ya 4.8 † 4:21: Tinaga waitigi ibirago de hondowa abaleore wali agali mo walia howa pelagi yaraga ha mbelo biguli pula biaga wini. Ani biragola wali agali ti tano pabe hongohe kagoha bira do hole ibida piai haga wini. 4.5-6 handabe. \* 4:23: Pig 1.2, Ais 5.25

emene wiarubi ula amunana bialu hearia de handaru. <sup>25</sup> Ina de handa amu nana bialu hewaria wali agali mbira ona hearia nahende. Egarubi yagalalu piai hayiya. <sup>26</sup> Ala dindi bene bere bayale winiyaru ai dindi ko be abalu tauladagahe wiaria handaru. Dindi ogoninaga tano wiarubi bo gialabaga biai ho winiya. Anduane Homogo ibugua keba timbuni ho hayagome mbirale uruni tagira ibilayiia.

<sup>27</sup> Anduane Homogohanda lalu, Dindi ogo bibahendeore mo ko hene mbirale nahe bameore wulebiragoyu ina mo ko haiore nde naholebero, lene. <sup>28</sup> Irane ogoninaga dindime dara howa kiabu dugu bialu hari ibu nde mindibi arumahe wulebira. Anduane Homogo ibugua ibunaga miniha mbirale uruni buleore lo mitangibu henego bulebi-raore. Lo beregedalu wanahe biaore bulebira.

<sup>29</sup> I Yaremaia ina de gandeba handa dege bialu hewaria ami agali dewaore nogo hosirunaga biralubi maru danda timuru yalubi ibaruagoni hale howa wali agali bibahendeoreme tinaga tanoru yu wahalu ibida piai haragoni. Maru ti irabuha ha do hole pialu maru ti hari bare wiaruha ha do hole poragoni. Tano bibahendeha wali agali lenego mbira nahe dindi hangu wiaria handaru. <sup>30</sup> Yarusaleme-o í mo ko heneore wuwa agua buleberebe. Íni aga daramabi bayaleru mo karulo kego aginagabe. Gurubu gele ale ngolome wabini bayale tara ngarume íni mo yáribia howa ínaga deni hare ambuaru birigo agi bulebe. Yári urunialeme í mo wia nabulebira. Ínaga lawini í kayu yaga biarume í handabe manga howa í bo wahole kagodago í yári damene nabibe laro.

<sup>31</sup> Walime waneigini gali taba honole howa dugu bialu yi laruane hale ko. Waneigini gali pigane taba hanalu howa tandaga timbuni handalu biraruabe tobaneda. Dugu o biaruago Saiono tanome bialu harua. Ibugua gi dogolo howa ga timbuni lalu, Iha mo ko holene íbu ngagonaga dara timbuni ho kogoni. Waitigi bu karume j bo wahole ibirago ainde homole kogonida, layuane hale haru, lene.

## 5

### *Yarusaleme wali agalirume Anduane Homogo erembira minigo ogo*

<sup>1</sup> Anduane Homogohanda lalu, Yarusaleme wali agaliru-o tanoha hariga pedadaguabi wali agali ngoaiho haga hama ngaruhabi baya hanguore taya bima pugu pugu bidaba. Tígua wali agali mbiraoreli ibu mana bayale tigabi ngadagua biagabi mana henene ngago hongo howa biagabi mbira kane handa walia harimiyagua nde j Anduane Homogo ina Yarusaleme wali agali tígua mana ko bialu harimiruni domo wahi holebero.\* <sup>2</sup> Tígua bi mbira heneneore bule lalu, Anduane Homogo haluhe kagonaga minini howa iname heneneore buleberema, lalu lo wirimigo bi hangu lalu wahalu piaga kami, laya.

<sup>3</sup> Anduane Homogo-o ina wali agali bibahendeme mana bayale heneneore ngaru taluwa bialu helo hamelo ke. Wali agali uruni ina minu ba barigoyu tigua tandaga howa nahe tingi halu ka. Ínime ti bope harigoyu tigua tinaga mana mo tiga bulene hame nale dege ka. Tinaga embone giambe ege tole ale halu tigua mini beregedolene hame naleore kagoni. <sup>4</sup> Ani bialu kago ainde ini mandabu handalu koria, Ti habane nabulene manda bayalebi mbira nabi dege ko bame kagonida Anduane Homogonaga mana bayale manda nabi howa Ngode Datagaliwabehanda tigua talialu bialu helo hamelo kago damene bibahende tini manda nabi dege ka, lo mitangi biru. <sup>5</sup> Ani mitangi buwa, Ina agali haguane karu hondo pialu ti baba bi lolebero. Tigua Anduane Homogonaga bi mana bayale bialu holenebi Ngode Datagaliwabehanda tigua talialu bialu helo hame ledagobi tiore manda biai haga ka, lo mitangi birugoni. Anigo ina ti hearia pu howa agali haguane uruni tihondo hale harugola tiguabi Anduane Homogonaga bi mo wahalu ibunaga hame leago talialu bia nabi mo waharaya. <sup>6</sup> Anidagua biyagonaga gabua timbuni budi ale mini laiono bu karume irabu timbuni ngagoha howa tagira

\* 5:1: 2 Bit 16.9, Ese 22.30

ibalu agali uruni bai holebira. Biango dudu karume dindi ko yobi ngagoha howa ibalu ti bo wahai holebira. Ani bialu wali agali uruni mbirago Yuda tanoha howa tagira pialu karia gabua timbuni budi ale mini lebadi karume ibalu bo lerele yu ibagabu ngelolebira. Urunidagua bulebirago irane tigua ko dewaore bialu Anduane Homogo erembira mialu haabo hayagonaga genda uruni ibulebira.

<sup>7</sup> Anduane Homogohanda Yarusalemehondo ogodagua leda, Inaga wali agali bu karume inihondo erembira ngialu puwa mbirale dama mitangi bialu gime wabini wiaruhondo bi pupu wima piyagonaga ko ogoni ina nadomolebero. Tigua bi mbira lalu howa gime wabini bi pupu wiaga uruninaga minini howa henene laro laga biya. Ina wali agali urunihondo tomo nalu helo dewaore mialu harugo helalu agalime ti one bedago berelalu bayanda wali taya bima poradagua bialu haya. <sup>8</sup> Agali uruninaga mini agali mendeali one bedagoha pialu nogo hosi wangabeme hosi angibuni kago taya biagadagua bialu haga ka. <sup>9</sup> Anduane Homogo i kogo ina tigatigaore larogo wali agali urunime mana ko bialu kagonaga pani nelu ina muleore ngo ndobe. Yuda hameigini uruni tigua ko biyarunaga ina tihondo biadaiore bule ngo.\*

<sup>10</sup> Isaraele wali agalirunaga waitigi kamiru-o tigua Isaraele wali agalinaga gerebi mabu mo ko hole ibidaba. Ibalu dugu wahai hole ndo. Gerebi ginigeneru inaga ndogo uruni hangu dando wahalimu. <sup>11</sup> Isaraele wali agalibi Yuda wali agalibi tigua ini erembira ngialu piya. I Anduane Homogo ina bi o ledogoniore, laya lene.

*Anduane Homogohanda, Isaraele wali agali mo ko helo waitigi ibilolebero, lenego ogo*

<sup>12</sup> Isaraele wali agalime ke howa Anduane Homogo talima pole tingi howa lalu, Anduane Homogohanda mbirale mbira nabulebira. Ibugua mo ko holeneru ina kamagoria naibilolebira. Waitigirume ibalu ina mo ko naholebira. Ani bialu ina daluha hina garibi naibilolebira, lalu ka.\* <sup>13</sup> Anduane Homogonaga bi latagi haga agali bu karume ogoale bulebira lalu latagi hararu puyabu ale pularadagua bi bame dege lalu ka. Bi uruni Anduane Homogohanda labe lene ndo bame lalu ka. Anidagua laragome mo ko holene tiniha wulebira, lalu tigua ani laga ka.

<sup>14</sup> Tigua bi urunidagua laga kamigo ai Anduane Homogo Hongo Haiheore kagonaga bi ogo hale hadaba. Ibugua ihondo langialu lalu, Yaremaia-o wali agali urunime bi ogoni layago hale howa ina bi mbira latagi habelo áyu langerogoni ira hungu ale holebira. Ani bialu wali agali uruni ti ira gabuni ale ngagola ira hungu ogonime do waholebira, lalu langiya. <sup>15</sup> Anduane Homogohanda lalu, Isaraele wali agaliru-o ina tihondo bi ogodagua laro. Ina agali hameigini tara mbira dindi kaundiaha howa tí baba wai bilimulo ibilolebero. Hameigini uruni ti hongoheore mbira howa tini dindini haabo hene ka. Tigua hameigini tara uruninaga bi lagago manda nabi kamigome hale naholeberemi. <sup>16</sup> Hameigini ogoninaga ami agali bu karu ti wai biaga hongohe howa tigua danda timume wai bialu agali homelo ba debe haga ka. <sup>17</sup> Tigua ibalu tinaga mabuha tomo hingedemirubi anda tamuha bu wini ngamirubi nai holebira. Ani bialu tinaga waneiginibi bo hilo wahai halu tinaga nogo bulumaga sibi bu karubi bibahende bo wahaiore holebira. Ani bialu tí mabuha gerebi irane bu karubi poge irane bu karubi bibahendeore dibu wahai holebira. Tinime mitangi bialu wai pabe hongohe tinaga tano buyu mabubi ngamigoha howa tí bayale holeberemabe tobaho harimigoyu waitigi agali urunime ibalu wai buwa tano uruni bo giallo wahai holebiraore, lalu laya.

<sup>18</sup> Anigo Anduane Homogohanda ihondo bi lone lalu, Waitigi uruni ibirangi Isaraele wali agali tí bo biba nahelolebero. <sup>19</sup> Mani inaga wali agali holebiraru tigua ihondo hale halu lalu, Yaremaia-o inanaga Anduane Homogo kagome inahondo mana ogonidagua biyago irane aginaga biyabe, lolebira. Ani laragola ina inaga bi ogo tihondo lamibe. Tigua ini hewago erembira ngialu puwa tíni daluni howa wali agali hameigini tara bu

\* 5:9: Man 29.24-26, 1 Kin 9.8-9    \* 5:12: Yar 14.13



hearunaga dama mitangi bialu mbirale gime wabini wiaruhondo bi pupu wialu harimi. Anidagua birimigonaga ai tí dindi taraha pu howa wali agali hameigini tara bu karu ti andaneha hama poleberemi, laya lalu Yaremaiahanda lene.

*Anduane Homogohanda ibunaga wali agalihondo bi hongo howa laminigo ogo*

<sup>20</sup> Anduane Homogohanda lalu, Bi ogo Yagabanaga aguaneneru Yuda dindiha bu karuhondo lamibe. <sup>21</sup> Wali agali tíore mini mandabi bayale nawiore kami. Tí dehe kamigo howa mbirale ngaru bayuwa handa nabiaga kami. Tí halehe kamigo howa bi bayuwa hale nahaga kami. Ani kamigo ina bi larogo bayuwa hale halimu. <sup>22</sup> I Anduane Homogooore kogonigo tigua ihondo gi howa mogo lalu i andaneha nahe kamigo agibe. Ina iba solowaranaga pabe dindi iba angeni ngarume bidogola biraabo haga nga. Iba solowara yaribu timbuniore bialu kulu nduga laga biyaguabi iba bedago birairi haga ngagoria bolangua naholebira. <sup>23</sup> Anigo tí wali agali tarale mbira kamiria hendedogoni. Tigua tinaga mini ndibulo wahene kamigome ihondo dogo tara halu kami. Ani buwa tigua ihondo erembira ngialu piái harimigoni ndobe. <sup>24</sup> Tinaga mabuha tomo hangalu kamigo anda helo ina iba dalu ibilarugobi nalimulo mo boga bia harugobi manda nabi dege harimida. Ina mali bibahendengi ani biaabo haruligonaga tigua nde Anduane Homogo tinaga Ngode Datagaliwabe kogo gi howa i andaneha hamiya nalarimida. <sup>25</sup> Anigo tigua mana ko tara tara bialu harimigome ina mbirale bayale tinaga bia haga wirugo hangai hene ndobe.

<sup>26</sup> Inaga wali agali karu aria maru ti mana ko biaga ka. Agalime ega gono wia howa delo handayaho hagadagua ko biaga urunime wali agali bu karu mo ko holenaga deme mamage ho haga ka. <sup>27</sup> Ko biaga uruni tigua mana ko bule ohowa mo hondo halu agalime ega dewa gonoha do ngagola hadowa nuha hono tolagadagua mbirale dewa ngaru tini andagaha wu tolo haga. Tigua mana ko ogonidagua biragome tinaga muni mbiraleru dewawi homogo timbuni haga. <sup>28</sup> Tigua ani bialu howa tomo dewa naabo haragome tombegene timbunihe ka. Mana ko bulene ngago gi nahe howa bia dege biaga ka. Agali uruni ale kagome waneigini aya abala homene hono wahene bu karu biamogo bulene ngadagua nabiaga ka. Ani bialu yagibano bu karubi genda yu kagola tigua biamogo nabiaga ka.

<sup>29</sup> I Anduane Homogo kogome heneneore larogo mana ko uruni bialu karunaga pani nelu muleore berogoni. Wali agali urunime ko biyarunaga ina pani biadai bulebero ndobe. <sup>30</sup> Ko mbira ale hiriribi mogole mbira dindi ogoria tagira ibiyada. <sup>31</sup> Bi mana latagi haga karume bi latagi halu howa mbiwia harago Anduane Homogonaga bi ndo ke halu tininaga bi dege laga ka. Loma binigo mo miaga karume wali agali haru kangi nde tiguabi bi mana latagi haga agali uruninaga bi larago dege talialu haga ka. Anidagua bialu kagola inaga wali agalirumebi nde mana ko ogoniore bayale lalu turu haga ka. Anigo ina tí pani emene ndo nalimulo mo ngerogola mana ko uruni ereba haiore holebira. Ani nalimulo ngerongi tigua agi buleberemibe, laya lene.

## 6

*Waitigirume Yarusaleme tano ho hagirabu holebira lenego ogo*

<sup>1</sup> Beniyamini hameigini bu kamiru tí homoligo Yarusaleme tano yu wahalu ibida piái halimu. Tí puwa Tegoa tano howa mbelo biguli pulalu dindi mende Bede Hagereme ngagoria howa wali agali bu karu ti ira hagua de handalu ibida pelonaga hagua delalimu. Anidagua bulene ngago irane mo ko holene gibiore dindi abene uyurahayagi howa ibulebirago tí bibahende ibida piái holenaga ani bilimu. <sup>2</sup> Saiono tanoore wandari mabuage ale biruwa ibuni hameledagoha pupe halu haabo haga ngagoni. Anigo Anduane Homogohanda tano ogoni mo ko halu bo haealabaga bu wahai holebira.

☆ 5:21: Ais 6.9-10, Ese 12.2, Mg 8.18 ☆ 5:22: Yob 38.8-11

<sup>3</sup> Waitiginaga kini karume ami agaliru heba wai bule Yarusaleme ibulebira. Tigua ibalu tano tagirahayagi balai anda bu palu howa tano ho hagirabu yaanda ho holebira. Ami agali uruni nogo sibi dewaore hagagobi íbu holebira. <sup>4</sup> Ami agali haru hagane karume bi ogodagua lolebira, Ai wai maliya manda manda bialu wai dagia bama. Horombe hanuniore Yarusaleme bo anda maliya, lolebira. Ani lowa dege mani nde tigua lalu, Ainde manda manda nabi hemaore dege abale alendo halu ni paliragonida. <sup>5</sup> Ai wahalw wai mbiraga anda puwa tinaga tano wai pabe hongohe bu heledaruni bo gialabagabu wahai hamiya, lolebira.

<sup>6</sup> Anduane Homogo Hongo Haiheore kago ibugua lalu, Ami agali kamiru tigua Yarusaleme kawareni irabu karuni dibu wi dindi dugu wima irigiha bialu wai pabe daligaore kago togo wialu ogoriani howa wai bilimu. Wali agali tano ogoniha bu karume tinaga damene bu hearu hingedape haga hene kago ina tano ogoniore bo haealabaga bialu mo ko hai holebero. <sup>7</sup> Dindiha iba dugualu haabo hagadagua tano ogoniha mana ko biaabo haga ka. Wali agali bu karu tigua tanoha ngaru mo ko halubi wali agali karu bameore minu baragola ti darabiore dere bu ha warago bo wigi bidagoni. <sup>8</sup> Yarusaleme ina bi hale holene nga. Bi hale nahariyagua nde ina í heba mandagi nahe yu wahalw polebero. Ani bialu ina í mo ko halu iba dalu naibile í abalu tauladaga ho wiagagobi ngelodogola wali agali mbira ini naholebira, lalu Anduane Homogohanda laya lene.

*Isaraele wali agalime mini giambe howa dogo tagi ho henego ogo*

<sup>9</sup> Anduane Homogo Hongo Haiheore kago ibugua ihondo langialu lalu, Agalime pu mbira lini daga mini gerebi mabuha puwa gerebi lini dedago bibahende dai hagadagua Isaraele wali agali yu wahene kago lone bo hilo wahai holebira. Anidagua bulebirago ina ti kagoha Yarusaleme pialu agalime gerebi lini dalu maru yu wahene dedago ilama piagadagua wali agali maru yu wahene karuhondo bi ogo lone lamule pobe, laya. <sup>10</sup> Ani layagola ina ibuhondo ladai bialu lalu, Anduane Homogo-o ina bi aihondo lamuliyadabe. Ina bi larogo aiwa hale holobadabe. Ti wali agali Anduane Homogo manda nabi bu karubi dege howa inaga bi hale nahaga hale tuluho wahene ka. Inaga bi ogoni nagalonedo lo manda bialu tigua i hondo oba haga ka. <sup>11</sup> Anigo Anduane Homogo-o inaga miniha keba timbuni ira hungu biagadagua biragola kegoni. Ihabi nde anidagua dege biragola inaga miniha keba holene ogoni mo hundia habe naheore kogoni, laru.

Ani larugola Anduane Homogohanda ihondo langialu lalu, Inaga keba holene ogoni waneigini hariga teneni bu karuhondo walia halu wandari igiri daliahe bu karuhondobi walia haga bibe. Ani bialu agali karubi ti one bedarubi wali agali wahe karu yu wahole ndo ti bibahendeme inaga keba holene ogoni handa walia holebira. <sup>12</sup> Ina dindi ogoni mo ko hai helalu tinaga anda bu heledarubi ti one bedarubi dindi ngarubi bibahende agali dindi tara howa ibiraru ti karulo helolebero.\* <sup>13</sup> Wali agali bibahendeme muni mbiraleru mo wulenaga mo hondo halu mana ko tara tara dewaore biaga ka. Agali damene karumebi agali haguane mini lene karumebi bibahendeme mana ogonidagua biai haga ka. Loma binigo mo miaga karubi Anduane Homogonaga bi mana latagi haga karubi tigua nde wali agalihondo ke halu mo hondo haga ka. <sup>14</sup> Ina handalu hewaria inaga wali agali dere timbuniore tiwa ale bu kago hondowa loma binigo mo miaga karubi inaga bi mana latagi haga karubi tigua dere uruni huba bia nahe bameda lalu waho haga ka. Tigua wali agalihondo lamialu lalu, Ina bayale karulape kamago tigua miniha genda nahe halimu, laga. Anigo tigua bi ogoni henene ndo laga ka.\*

<sup>15</sup> Isaraele wali agali tigua mana ko ngubiore uruni bialu hayarunaga tagaho kabe. Ndo ti taga naheore ka. Tigua mana ko uruni biyarunaga taga holene manda nabiore

\* 6:12: Yar 8.10-12    \* 6:14: Ese 13.10

ka. Anidagua bialu kagonaga ina ti pani nelo merogola wali agali dindi tarani bu hearu pani mirugola ko hai hayadagua dege tibi ko hai holebira. I Anduane Homogo ina bi o ledogoniore, laya lalu Yaremaiahanda lene.

*Isaraele wali agalime Anduane Homogonaga bi mo wahenego ogo*

<sup>16</sup> Anduane Homogohanda ibunaga wali agaliruhondo lamialu lalu, Hariga hagebage ngagoria howa hariga tigabi tí polene agodabe handadaba. Ani hondowa hariga bayale abale tínaga mamalirume pialu hene ngagoria pilimu. Ogoriani pirimiyagua tíha genda tandagaru anda ibulene henge nawi howa tínaga miniha dungulo holeberemi, laya. Ani layagola Isaraeleali tigua ladai bialu lalu, Iname hariga ogoriani napoleberema, laya. <sup>17</sup> Anduane Homogohanda lalu, Tí biamogo bialu haru bamba helonaga agali maru dabo heledogo ai waitigi mbira ibiyagua tigua mbelo biguli pu larugola hale halimu, laya. Ani layagola tigua ladai bialu lalu, Iname agali haguane uruninaga bi hale naholeberema, laya. <sup>18</sup> Ani layagola Anduane Homogo ibugua lalu, Wali agali dindi tara taraha kamiru inaga Isaraele wali agaliruhondo mana lalu minu bole ngogo tíhondo languliya hale hole íbu ngoai hadaba. <sup>19</sup> Dindi o ngego íbi nde hale habe. Inaga wali agali uruni tigua mana ko biyagonaga ina ti pani nelo muleberogo irane tigua inaga bi mo wahalu mana lo wiwago talialu bia nabiyagonaga ani bulebero. <sup>20</sup> Tigua Seba dindiha puwa ira hagua ngabilo delaga mini inisenesiru yolo bialubi gambe ale tara mbira ira hagua ngabilo delaga dindi tara kaundia wiaruha howa yolobu puwabi uruni bibahende inaga deni howa lotu lalu ihondo ngiagago ina turu harulibe. Uruni nakarulape bame biaga. Tigua mbirale inaga loma buwa irani bo delai hayaguabi maru tara ale lomabu ngiyaguabi urunidagua biraru bibahende bame dege bulebira. <sup>21</sup> Anduane Homogo inimeore larogo mana urunibi biaga karu ti bibahende mo ko henego pilai holebira. Aba karu ti igini heba homai halu wali agali karu tinaga nenege karu heba homamaga holebira, laya, lalu Yaremaiahanda lene.

*Waitigi uyugoha howa ibira, lenego ogo*

<sup>22</sup> Anduane Homogohanda lalu, Ami agali uyugohayagi howa ibule ka. Ti agali hongoheoreyago dindi kaundiahaore karu tigua áyu wai bule danda timu yandareru manda manda bialu ka. <sup>23</sup> Tigua wali agali bibahende karu dara nahaga koore howa bibahende homelo bo hilo wahai hole turu haga ka. Tigua danda timuru yalu nogo hosini biralu gerai lalu ibiragola dindi kulu mbari lama ibiragoni. Tidu yalu wabuni ibuwa Yarusaleme íla wai bule íbu kagoni, laya. <sup>24</sup> Ani layagola Yarusaleme wali agali tigua ladai bialu lalu, Uruni bulebiragonaga bi abale hale ho bolangua harimago ina gi timbuni howa duru lalu hongo nahe kamagoni. Ai mana ko iname bialu harimagonaga dara halu mini burugu lalu walime gali taba honolene tu haragola mini burugulo biragagobi kama. <sup>25</sup> Inanaga waitigiru dindi gibuni gibuni ngaru bibahendeha ho mabubupe howa ina baba hangu wai biai hole lowa mo giha hole hayada. Ani biyadago ai mabuhabi hariga harigabi ina ibagabu habe nahe kama, lene. <sup>26</sup> Ani layagola Anduane Homogohanda lalu, Inaga wali agaliru-o tínime daraho kamigo walia halu aga biagane ngaru ale buwa be abalu ngagoria palu pendege lalimu. Ko birimirunaga dara howa kiabu dugu taraore waneigini mbiraore hangu henego homaragola aba aiyarume dugu biagadagua bialu halimu. Irane tínaga waitigi urunime abale ibuwa tí mo ko halu bo hilo waholebiragonaga ani bilimu, laya, lene.

*Wali agali ege tole siliba ko ngaligobi ka lenego ogo*

<sup>27</sup> Anduane Homogohanda ihondo ogodagua laya. Yaremaia-o í tano pabe hongohe ngaligobi kego. Ai ina inaga wali agali uruni agalime siliba henededabe be tara aledabe hondole irani delagadagua ti ina ba handabelo helaro, laya. <sup>28</sup> Ti wali agali mine

✧ 6:16: Ais 8.20, Mal 4.4, Md 11.29, Lg 16.29 ✧ 6:27: Yar 1.18

halu doga haga howa bi hale nahaga ka. Ani howa wali agali tinaga nenege karubi mege bialu diburibu bi laga ka. Ti agali mbirale wabiaga karume ege tole siliba irani delaragola aeane dudu ibira ibira biagagobi ka. <sup>29</sup> Mbirale ira timbuni dedago pulaga ale ngagome pularagola ira hongoheore siliba delo deledagola dalu silibaha aeane emene para haga bidaru do taulope helonaga bialu karia anidagua dalu do taulope naharagola agali biabe biaga biago ibu biabe ndelahe ogoni bame bu wahaga ndobe. Manane ogonidagua dege inaga wali agaliru bayale helo mo tiga bialu wali agali ko biaga karu tale bialu bo batagi holene hariga nawidago. <sup>30</sup> Anduane Homogo inime ti erembira mirugola ti bibahende siliba ko hene ngaligobi dege hayada, laya, lalu Yaremaiahanda lene.

## 7

### *Anduane Homogonaga anda kagome Yuda wali agali mo bayale hela nabulebirago ogo*

<sup>1</sup> Anduane Homogohanda Yaremaiahondo lalu, <sup>2</sup> Ina inaga anda haraba ngogoria pu howa Yuda wali agali karuhondo ogodagua labe. Anduane Homogo mitangi bialu lotu lalimu laya, lole pu. Anduane Homogo ininaga bi o lawia harogoni baya hangu hale kulu mia howa hale halimu, laya lalu lamibe. Inaga bi ogodagua laro. <sup>3</sup> In Anduane Homogo Hongo Haiheore Isaraele wali agali tinaga Ngode Datagaliwabe inime larogo. Tinaga dindi biagoria bayale halimulo heloliyago ai mana ko wiaru bialu kamiruni yu wahai halimu. <sup>4</sup> Horo bibahendengi agali marume tihondo langialu lalu, Anda ogo Anduane Homogonaga ka, laga biagago. Ai anda ogonime ti mo bayale holebira lo manda nabilimu. Tinime tini dege dege mo hondo haga haga biaganego de hondo halimu.\*

<sup>5</sup> Ti mana ko bialu kamiruni wahalu tinaga damene karu baba baya hangu tigabi bulene ngadagua bialu halimu. <sup>6</sup> Wali agali dindi tara taraha howa ti baba ibu hene karubi waneigini aba aiya nahe hono wahene karubi wali dalo agalini homene bedarubi uruni warape nahe baya hangu hondo halimu. Tininaga nenege tini aria karume ko mbira nabi howa bame homelo bo wanahalimu. Dama manda bialu gime wabini ngaruhondo bi pupu nawilimu. Ani birimiyagua ko ogonime ti mo ko holebira. <sup>7</sup> Tigua inaga bi laroruni baya hangu hale halu biai harimiyagua nde ina bamba tinaga mamaliruhondo tinaga dindi henene ogoniore wiaabobo bu wiaho ngelo mirugoria ti holeberemi.

<sup>8</sup> Ai hale hadaba. Tigua bi henene ndo ngaru mo dunubiaho haga kamigo bi urunime ti pele ngia nabulebira. <sup>9</sup> Tigua page bialu wali agali homelo bo wahalu mendeali one baba kayu yalu wali ibubi nde agali mende baba kayu yalu biaga kamigoni. Ani buwa tigua habo nalolene bi lo wialu howabi ke haga dege kami. Tigua dama mitangi bialu gime wabini Balahondo ira hagua ngabilo delaga mini inisenesiru lomabu delalu dama maru abale urunihondo bi pupu nawiaga harimiruni ayu urunihondo bi pupu wialu kamigoni. <sup>10</sup> Mana urunidagua bialu howa ti i mitangi bialu inihondo lotu lalu halimulonaga anda helarugohabi nde anda ibu dege beramili. Ini kogoria kaware ibu howa tigua lalu, Ina bayale kama, lowa mani inaga anda yu wahalu puwa mana koorene ko ngubi ngaru bia timbu haga kamigo. Ai tigua mana ogonidagua bialu kamigoni bayaledabe. <sup>11</sup> Inaga anda ogoniha tigua inihondo lotu lalimulo helarugo ai tigua manda bialu kamiria pageali ha do holene anda piagone bayale ogoniha harabe. Anduane Homogo inime tigatigaore larogo tigua bialu kamiruni bibahendeore handalu handai ko, laya.\*

\* **7:4:** Wali agali tigua mitangi bialu Iba Gana mbugaha gilibu ngadagua Anduane Homogonaga anda Yarusalemeha ko gendabi mbira anda ibuligonaga ibugua baya hangu handayaho haabo holobabe toba haga hene. Iba Gana 132.13-14 handabe. \* **7:11:** Ais 56.7, Md 21.13, Mg 11.17, Lg 19.46

<sup>12</sup> Anduane Homogohanda laabo halu lalu, Ai Silo tano ogoniha puwa mbirale mbira birugo hondo pudaba. Bamba Silo ogoniha tigua i mitangi bialu lotu lalu helo ngelarugo mani Isaraele wali agali tinaga mana ko bialu hemigo hondowa ina tano ogoni mo ko harugoni.†<sup>13</sup> Ani birugo bilowa ayubi tigua mana ko tara tara ngaru dege bialu kami. Mana ko uruni wahadaba lowa langialu haabo harugobi hale howa nahale hetingi ho kamigoni. Ina ti olarugola tigua ladai nabi dege kamigoni.☆ <sup>14</sup> Heneneore mo ngoai howa inihondo lotu lalu halimulonaga anda ogoni helarugo ai ogoni kagodago ti ina biamogo bulubabe toba harimida. Ani ndoyago Anduane Homogo inime larogo ina Silo tano bamba bo giallo waharudagua anda ogoni bo giallo waholebero. Ani buwa tinaga dindi ina bamba ti mamaliruhondo mirugo lone mo ko holebero. <sup>15</sup> Anidagua buwa ti damene Isaraele wali agaliru bo talia tagi harudagua tibi nde anidagua bo talia tagi holebero. Ani bero handala tigua i yu wahalu poramigola ina tinaga dengui lone nahondolebero. I Anduane Homogo ina bi o ledogoniore, laya lene.

*Isaraeleali tigua Anduane Homogonaga bi mo wahenego ogo*

<sup>16</sup> Anduane Homogohanda lalu, Yaremaia-o ina inaga bi laregoni hale naholebero. Anigo ihondo tinaga bi lahalu biamogo bia lalu hongo howa lalu kegoni nalabe. Ihondo bi hongo howa lalu dugu bialu lolenebi nawigo wahabe. <sup>17</sup> Tigua Yuda dindini tano ngaruhabi Yarusalemeha hariga timbuni pedaruhabi bialu karuni i de nahende dege kebe. <sup>18</sup> Tigua biagago ogo. Waneiginirume ira bo yu ngoai haragola abaru tigua ira mo delaga. Ani deledagoria aiyaru tigua dama wali beda manda bialu gime wabini mbira mini Dahuliya Andanaga Kuini Wali laga ngagonaga mbisigediru hiru yalu puwa lomabu miaga kagoni ndobe. Tigua waini ibabi mbirale tara wabu heledagohondo loma bialu odo miaga ka. Tigua mana ogonidagua bialu kagome ihondo kooze bialu i mo tandaga halu ka.☆ <sup>19</sup> Anigo Anduane Homogo inime bi ogodagua laro. Tigua mana urunidagua bialu karume iore mo ko halu kabe. Ani ndo. Tigua mana ko uruni bialu kagome podene tiniha dai biragola taga timbuniore ho holebira. <sup>20</sup> Anduane Homogo Bibahende Haru Haame Ho Haga kogo inime bi ogodagua laro. Inaga tandaga holene ira hungu ale dedagola kogo agali mbirame ba hundia habe nahe kogoni. Ai tandaga timbuniore ho kogome dindi bibahendebe wali agali bibahendebe nogo tara tara hinidamirubi ira tara tara hingedamirubi tomo tara tara hingedamirubi bibahendeore bo hilo wahai holebero.

<sup>21</sup> Anduane Homogo Hongo Haiheore Isaraele wali agalinaga Ngode Datagaliwabe ini kogome bi ogodagua laro. Tigua mbirale ihondo lomabu ngialu irame dai helaga wirimigo wahalu loma maru delalu howa maru tini nagane wiyadagua dege urunibi nde tini nai holene nga. <sup>22</sup> Bamba ina tinaga mamaliru Iyibi dindiha howa haru tagira ibirungi tigua ihondo nogo irame dai helo lomabu delolenebi maru ogodaguaore bo delolenebi lalu langia nabi harugoni ndobe. <sup>23</sup> Ina tihondo lamialu lalu, Ti inaga wali agaliore howa inaga bi manaore bayuwa talialu bialu halimu. Anidagua birimiyagua nde i tinaga Ngode Datagaliwabe holebero. Ina bilimu larogo talialu biaiore harimiyagua nde ti bayale holeberemi lalu lamiru.☆ <sup>24</sup> Ani lamirugolabi tigua hale ha howa bia nabi mo wahaya. Mo wahowa tinime mine halu mana ko wiaru hangu mo tene howa biaabo halu haya. Ani biyagome ti bayale biaabo nahe tini mo pila haabo haya. <sup>25</sup> Bamba tinaga mamali Iyibi dindi yu wahalu haru tagira ibirugongi howa agali maru ininaga bi mana latagi halu helo ibilaga bialu haabo harugo kogoni. Ani birugola agali uruni tigua ibigi bialu inaga mana latagi halu haga biya. <sup>26</sup> Ani lalu heagola tinaga mamalirume inaga bi

† **7:12:** Bamba Yosua heneyangi Isaraelealiru tigua Silo tanoni Anduane Homogonaga Balai Anda bu helene. Yosua 18.1. Ani bialu loma binigo mo miaga ibu mini Eli heneyangibi bu helene. 1 Samuele 1.3. Ani headagoni tinaga waitigi Pilidiali hearume Isaraeleali baba wai bialu Isaraele bo poda hana halu Silo tano bo giallo wahayagola tanoha wali agali nahe bame dabulu wini. 1 Samuele 4. handabe ☆ **7:12:** Iba 78.60, Yar 26.6 ☆ **7:13:** 2 Bit 36.15, Ais 65.12, Yar 35.17 ☆ **7:18:** Yar 44.17-19 ☆ **7:23:** Har 15.26, LBM 26.12, Ais 3.10



latagi hayadaruni hale nahe mo wahaya. Ani mo wahalu howa tigua mine dewa halu mana ko wiaru biaabo haya. Mana ko biyadaruni abale henerume binirudagua ndo timbuniore bu bolangua haya.

<sup>27</sup> Yaremaia-o ina Isaraeleali bu karuhondo bi ogo latagi haregola tigua hale naholebira. Ina ga lalu olariyaguabi tigua hale howa, O ko, lalu ya nalolebira. <sup>28</sup> Ani biragola ina tihondo bi ogodagua lamibe. Tinaga mamalirume Anduane Homogo tinaga Ngode Datagaliwabe kagonaga bi layago hale halu talia nabi howaibunime ti mo tigua bilo maliaho habi nabiaga dege hene. Ai tigua bi henene lolene yu wahai howa tiha henene lolene mbira nawiore kami, lalu lamibe, lalu Anduane Homogohanda laya, lene.

*Hinomo dindi ulini wiagoha howa wali agalime mana ko bialu henego ogo*

<sup>29</sup> Yarusaleme-o inaga mandari podo mbololo wahowa dara holene walia halu holene nga. Inaga wali agalirume Anduane Homogo mo tandaga hayagonaga inime hari bare ngaruha iraga ho dugu bialu holene nga. Irane Anduane Homogohandaibunaga wali agali uruni handabe manga halu erembira mini kagonaga ani bulene nga. <sup>30</sup> Anduane Homogohanda lalu, Yuda wali agali hearume ko dewaore inaga deni howa biya. Tigua ininaga anda loma biaho helene biagoha dama mitangi bialu gime wabini ko ngubi galone nahe wiaru mo yalu ibu ngelowa urunihondo bi pupu wialu kagoni. Tigua mana ogonidagua bialu kagome ininaga deni inaga anda ogoni mebia halu mo ngubia hayada. <sup>31</sup> Anidagua bialu tigua damanaga anda mini Tobede ogoriani howa bi pupu wialu tinaga waneiginiru loma bialu irani bo delolenaga anda mbira Hinomo dindi ulini mbira wiagoha bu helayada. Ani buwa tinaga waneiginiru loma bia howa bo delalu ka. Anigo ina tihondo ogonidagua bulene mbira ngago bilimu nale. Tigua mana ogoni bulene nga lalu mo mini wiabi nahe dege haru. <sup>32</sup> Anigoyu Anduane Homogo inaore laro. Mani tigua dindi ulini Tobedebi Hinomobi mini lone nalalu holebira. Dindi ogoniha wali agali dewaore homelo bo wahayago mitangi bialu dindi ogoni mini Homelo Bo Wahaga lalu lolebirago irane waitigirume ibalu Yuda wali agali dewaore bo wahai holebira. Ani biragola Tobede dindi ogoni Yuda wali agalirunaga homali dindi lene wulebira. Bo paya binirunaga tingini dewaore au loabe tobahe wulebira. <sup>33</sup> Homene tingini dewa bu paya bu ngagola ega bodo hariawerumebi nogo biango gabua karumebi ibuwa nalu holebira. Nogo ega biangorume homene tingini uruni nalu kagola talu pelolene mbirali naholebira. <sup>34</sup> Yuda dindiha tano bu ngaruhabi hariga dunini timbuni Yarusalemeha ngarunagabi mini wali agali lenego mbira munini bialu porane nahondolebere. Inime urunidagua berogola wali agali miniha dungulo ibagabu hagarubi wandari igiri pigane dabu bialu howa tomo timbuniru dawalu turu hagabu hagarubi bibahende mo wahai harogola ereba hai holebira. Ani bialu Isaraele dindi bibahende mo ko hai hene wulebira, lalu Anduane Homogohanda laya, lalu Yaremaiahanda lene. <sup>\*</sup>

## 8

<sup>1</sup> Anduane Homogo ina bi maru ladege bero. Horo ogoningi waitigi bu karume ibalu homali ngaruha puwa kini homayarunagabi Yudanaga agali haguane homayarunagabi loma binigo mo miaga homayarunagabi inaga bi mana latagi haga homayarunagabi Yarusalemeni wali agali maru hene homayarunagabi bibahendeorenaga kuni minu duguai holebira. <sup>2</sup> Yuda wali agalirume ni ege yakundiru gubalini timbuni halu urunihondo bulu paligi bialu ge duli hanga haga bialu tini biamogo bilonaga bi pupu wialu haga hene. Ani biaga henego waitigirume uruninaga kuni duguayaru nagalone biango ti mo wahagadagua wahene ngaria ni ege yakundirume homa kui uruni hondolebira. Ani biragola kuni uruni lone mo hora holene agali mbira naholebira.

<sup>\*</sup> 7:31: LBM 18.21, 2 Kin 23.10, Yar 32.35    <sup>\*</sup> 7:34: Yar 16.9, 25.10, Mo 18.23

<sup>3</sup> Ani bialu Yuda wali agali emene hangu yu wahene holebirago uruni ina dindi tara tara ngaruha minalu garabaya piai helolebero. Ani bialu Yuda wali agali uruni tigua tini holeneo nagaloneoredane hondowa tini homarimayagua karulapeda lo mandabu holebira. I Anduane Homogo Hongo Haiheore kogo ina bi o ledogoniore, laya lene.

*Yuda wali agalime ko bialu taga nahaga henego ogo*

<sup>4</sup> Anduane Homogohanda bi ogo ina wali agali lamuliya ihondo langialu lalu, I Anduane Homogo kogo ina bi ogodagua laro. Wali agali mbira pilaragola ibu lone heya nabiagabe. Mbiralu ibu hariga pole piyagoha ndo mendehe pubagi hayagua lone beregedalu dai buwa polebiyagoha napiagabe. Nabiaga ndo aniore biaga ndobe.

<sup>5</sup> Anigo Yarusaleme wali agaliru tigua i yu wahalu piyago puwa beregedalu lone dai nabi i erembira ngialu haabo haga ka. Tigua ke holene mana ngago hongo howa bialu haabo halu ini kogohayagi dai buleneo hame naleore ka. <sup>6</sup> Tigua bi laga biyago ina bayuwa hale haga birugoyu tigua bi henene mbira nale dege ka. Mbiralime mini beregedo ko lalu, Ina mana ko timbuniore bialu haru, lalu lapani nahe dege ka. Ami agalime nogo hosini biruwa wai bule hongo timbuni halu piagagobi ti bibahendeme mana ko bule hongo hai haga ka. <sup>7</sup> Ega tara tara bedarume nde halo birulenengi tini biragane wiyagoria daibu bialu polene tu haragola yagalalu piaga. Anigo inaga wali agali bu karume nde Anduane Homogo ininaga bi mana lo ngogo bulene manda nabioire kagoni ndobe.

<sup>8</sup> Yuda wali agali tigua lalu, Inaha mini giga bulenebi manda timbunibi wiaihe kamagonigo Anduane Homogohanda ibunaga bi mana inahondo langinigo yu kama, lagago ti agua labehebe. Mana lawai haga bu hearu tigua bi mana henene lowini ngadagua langia nabi. Tigua ke howa tinime gilibu aribiaho winiru lawai haga hene.

<sup>9</sup> Agali manda timbuniwi karu tigua i Anduane Homogo kogohondo erembira ngialu pene kago ti manda timbunibi haruago agua binidabe. Agali uruni tini taga timbuniore howa nogo gabua uliha niao wedagoha pialu dagadagua ti ko ngagoha pialu dolebira. Ani biragola tinaga manda timbuniwi kama laganegome tini biamogo bulebirabe. <sup>10</sup> Ti ani binigo ina tinaga dindibi onebi agali tara ibilarugohondo milolebero. Wali agali bibahendeme muni mbiraleru mo wulenaga mo hondo halu mana ko tara tara dewaore biaga ka. Agali damene karumebi agali haguane mini lene karumebi bibahendeme mana ogonidagua biai haga ka. Loma binigo mo miaga karubi Anduane Homogonaga bi mana latagi haga karubi tigua nde wali agalihondo ke halu mo hondo haga ka.\*

<sup>11</sup> Ina handalu hewaria inaga wali agali dere timbuniore tiwa ale bu kago hondowa loma binigo mo miaga karubi inaga bi mana latagi haga karubi tigua dere uruni huba bia nahe bameda lalu waho haga ka. Tigua wali agalihondo lamialu lalu, Ina bayale karulape kamago tigua miniha genda nahe halimu, laga. Anigo tigua bi ogoni henene ndo laga ka.\* <sup>12</sup> Isaraele wali agali tigua mana ko ngubiore uruni bialu hayarunaga tagaho kabe. Ndo ti taga naheore ka. Tigua mana ko uruni biyarunaga taga holene manda nabioire ka. Anidagua bialu kagonaga ina ti pani nelo merogola wali agali dindi tarani bu hearu pani mirugola ko hai hayadagua dege tibi ko hai holebira. I Anduane Homogo ina bi o ledogoniore, laya lalu Yaremaiahanda lene.

<sup>13</sup> Anduane Homogo inaore larogo, Wali agali uruni ti pu mbira lini daga mini gerebibi pogebi lini nade yuni gilagilabi ko lini lone dabe nahe hagagobi ka. Ina tihondo mbirale bibahende mirugo tinaga waitigi karu haru ibalu ti bope hai helolebero.

<sup>14</sup> Ani berogola Yuda wali agali tigua ogodagua lolebira, Irane aginaga ina bame biru ngamabe. Ina bibahende mo mogo bialu tano wai pabe hongohe mbira kagoha pu kamaria ina bayagua nde tano ogoniha homamiya ai ma. Iname Anduane Homogo inanaga Ngode Datagaliwabe kagohondo mana ko bialu harimagonaga ibugua ina homaioire helole manda bu ka. Ibugua ina wali agali homolenenaga tomia ko mbira

mo ngiyagola ogoni naradagua binigo kamagoni. <sup>15</sup> Ina bayale holeberemabe toba harimago ai bayale ndo harimada. Ina bayale holene mbira mani tagira ibulubada lo mandabu hemaria ai waitigirume mo gi holene yu anda ibiyada. <sup>16</sup> Dindi abene uyurayagi Dana hameigini dalu ngagoria waitiginaga nogo hosime kurunu lalu buhe timbuniore laruago ti abale anda ibaruagoni. Nogo hosi urunime hongo howa koarana laruagola inanaga dindi bibahende birilalu ema biai haruagoni. Waitigime Yarusaleme tano bo gialabaga bulebi wali agali tanoha karu bibahende bo wahai holebi ina daluha mbirale ngaru damene bibahende bo haealahole bialu mo ko hai hole ibiragoni, lolebira.

<sup>17</sup> Anduane Homogohanda lalu, De hondo halimu. Ina nogombi ko mbira wali agali hayaga ngaru ti kamigoha ibilarogola ti hayulebira. Ani ibiragola tigua nogombi urunime ti nahayilonaga mo dambola howa berelolene hariga mbira nawulebiraore, laya lene.

*Yaremaiahanda lalu, Inaga wali agali daraho kogoni, lenego ogo*

<sup>18</sup> Ina dara timbuniore howa inaga miniha genda timbuni yu kogoni. <sup>19</sup> Inaga wali agali darabiore dindi tara tara ngaruha pu karume dugu timbuni biaruago hale ho ko. Tigua lalu, Anduane Homogo ibuni Saiono tanoha nahedabe. Saiono tanonaga kini nahedabe, lalu ka. Anduane Homogo tinaga kini ibugua ladai bialu lalu, Inaga wali agali bu karume dama mitangi bialu mbirale gime wabu heledaruhondo bi pupu wialu kago aginagadabe. Wali agali tara bu hearunaga mbirale ko habane nabulene wabu wiaruhondo tigua ge duli hangaho biruwa bi pupu wialu hayagome i mo genda harimigoni ndobe, laya. <sup>20</sup> Wali agali tigua lalu, Horo debenengi piaia lalu tomo bogabiru biai hayada. Anigo Anduane Homogohanda ina pele ngia nabi dege ka, laragoni. <sup>21</sup> I Yaremaia ina handalu hewaria inaga wali agali mo ko timbuniore hayadane hendedogoni. Inaga bu miniha daraore harogoni. Genda timbuni yu kogome i mini dege dindi ho kogoni. <sup>22</sup> Gileada dindiha marasini bayale wiagayago ayu nawidabe. Anogoda biabe biaga mbira nahe dege wiaruabe. Inaga wali agali tandaga hararu mo bayale holene nawidago aguaore buledabe.\*✧

## 9

<sup>1</sup> Waitigime inaga wali agali bibahende bo wahai hayagonaga ina mbiraga horombebi biruwa dugu bialu biraabo holiya inaga embone iba ale lalu de kogo iba duguadaga hagadagua bilo hameledo. <sup>2</sup> Inaga wali agali uruni ti helo wahalu i dindi kaundia mbiraha pu hole andira nemanda mbira dindi ko yobi ngagoha bu helaruyagua nde bayaleda. Ani pole hameledogoni irane ti bibahendeme biyago agalime ibu one henene bedago wahalu puwa bayanda wali bedaru talima ibaga biagadagua tigua Anduane Homogo wahalu pu ka. Ani puwa ti agali pagebibi dewaore bu kaligobi ka. <sup>3</sup> Anduane Homogohanda lalu, Inaga wali agali bu karume ke lalu bi lolenego agalime timu tegelalu bole edaho manda mandabu hagadagua kagoni. Ti dindiha bi henene lolenego emene lowa ke holenego timbuniore nga. Tigua mana ko tara tara dewa ngaru bima ibagabu haabo howa iniore tinaga Ngode Datagaliwabe kagonidalo mitangi nabi haga ka, laya.

<sup>4</sup> Wali agali bu kamiru tinaga damene karunime ti mege buligo de hondo halimu. Tini hamene mbaliniore bu karu ti ohe howa mo hondo hagane Yagaba ale bu ka. Tinaga nenege karume ndelalu bi lararu de hondo halimu.\*✧ <sup>5</sup> Agali bi henene laga mbira nahe bibahendeoreme tini damene bu karu mo hondo lalu ke hangu haga ka. Tiha ke lalu mo hondo holene mugube ka. Mana ko erekuibi ngago dege bua lalu biaabo haga

\* **8:22:** Yuda wali agali tigua marasini bayale Gileada dindi ogoniha howa mo yu ibaga wini. Anigo Yaremaia ibugua bi yobage lalu bi ogoni leda. Pigane Binigo 37.25 de handabe. ✧ **8:22:** Yar 14.19 ✧ **9:4:** Pig 27

kagoni. <sup>6</sup> Tigua agali mende kago bame bo hangedape hole hongo halu ke hagane mana ngago bialu haga ka. Iore tinaga Anduane Homogo kogo mitangi nabi erembira ngialu haga ka, lalu Anduane Homogohanda lene.

<sup>7</sup> Anigo Anduane Homogo Hongo Haiheore kagome lalu, Inimeore bule larogo ainde agalime ngolo silibaru bayale helo irame dodo para karu do taulope helo delagadagua inaga wali agali uruni bibahende ba hondolebero. Tigua mana ko biaabo hayagonaga ina tiha bulene mende agi ngabe. <sup>8</sup> Danda timume mendeali kago homelo bogo wahagadagua tinaga bi laragome tinaga damene bu karu mo ko hai haga ka. Tinaga ne harigaha howa ti dameneruhondo biamogo bulene bi lagagoyu tinaga bu miniha ti damene bu karu mo ko helolene hangu mitangi bialu haga ka. <sup>9</sup> Anduane Homogo i kogo ina tigatigaore larogo wali agali urunime mana ko bialu kagonaga pani nelu ina muleore ngo ndobe. Hameigini uruni tigua ko biyarunaga ina tihondo biadaioire bule ngo. I Anduane Homogo ina bi o ledogoniore, laya lene.

<sup>10</sup> Yaremaia ina lalu, Hari nene wiarubi dindi datani bayale buhe wiarubi bibahende mo ngubia hai halu koore wiago handalu ina dara howa kiabu dugu biru. Wali agali ibagabu haga wiarunaga mbirali naheore wialu nogo bulumagarume datani nalu haga wiaruha mbira munini buwa tani nalu naheore wiago handaru. Nogo ega tara tararubi dindi ogoniha biru haga winiru mbira naheore dindi ogoni yu wahalu piai hene embera wiago handaru.

<sup>11</sup> Anduane Homogohanda lalu, Ina Yarusaleme bo gialo waharogola ege tole hangu hilomogo bu wulebira. Ina mo koore harogola dindi ogoniha biango duduru ti hangu dalu wulebira. Yuda dindiha tano damene bibahendeore mo ko halu bo gialabaga bu waharogola ogoniha agali nahe embera labu dindi wulebira, laya, lene.

<sup>12</sup> Anigo ai Yaremaia ina bi ogodagua hale halu lalu, Irane aginaga dindi ogo mo ko halu wali agali mbiraorebi mbira yu wanahe dindi ogo mo labu halu embera ngelenedabe. Agali mini bogabi manda dingi dangiale mbirale uruni irane ogo alenaga biya lalu latagi holene mbirali ai kabe. Anduane Homogohanda mbirali mbirale uruninaga irane aihondo lamiragola wali agalihondo latagi holobadabe. <sup>13</sup> Ani lalu hewaria Anduane Homogohanda ihondo ladai bialu lalu, Mbirale uruninaga irane wali agali uruni tigua inaga bi mana lamirugo talialu bia nabi howa mo wahalu hariga ogoha pilimu lalu mo walia harugobi nape mo wa dege haya. <sup>14</sup> Tigua mine taraore halu tinime poa biyagoha pu pebe bialu haya. Ani buwa bamba tinaga mamalirume biawai hayadagua dege dama mitangi bialu gime wabini mini Balanaga bi pupu wialu haya. <sup>15</sup> Tigua ogonidagua biyagonaga Anduane Homogo Hongo Haiheore i Isaraele wali agalinaga Ngode Datagaliwabe kogome tigatigaore laro. Wali agali ko uruni biaga karu tandaga timbuniore nalu helo mo mulebero. Mbirale kaubi mundu ale nelu mialu iba kaubi tara tarabi nelu miradagua bulebero. <sup>16</sup> Ani nalu kagola dindi tara bamba tinimebi tinaga mamalirumebi de nahendene ngaruha hama purogo lelo wara tagi holebero. Ani pu kagola tinaga waitigi bu karume mbiraore hangu hangu bo wahaga bialu homa amo lelolebero, laya lene.\*

### *Yarusalemeni hearume dara howa dugu binigo ogo*

<sup>17</sup> Anduane Homogo Hongo Haiheore kagome bi ogodagua laya, Mbirale o biraruninaga irane baya hangu manda bilimu. Kiabu dugu baya hangu biaga wali bedaru olo ngoai halimu, laya. <sup>18</sup> Wali agalime lalu, Heneneore kiabu dugu birago hondowa inanaga de iba abale giligala lalu de tohe birulumaya abale ibalu tigua dugu bilo oladaba, larimi. <sup>19</sup> Tigua laabo halu lalu, Saionoha howa dugu biaruago hale hadaba. Tigua kiabu dugu bialu lalu, Ai ina mo ko haragoninaga taga timbuni ho kamagonida. Inanaga waitigi bu karume ibalu inanaga dindi andaru bo delaragonida. Ani biragome

\* 9:16: LBM 26.33, Man 28.64, Ese 5.2, 5.12

ina taga timbuniore ho kamagoni ndobe. Ainde ina dindi mendeha togolo yalu poleberemada, laya.

<sup>20</sup> Yaremaia inime lalu, Ai Yarusaleme waliru-o Anduane Homogohanda tihondo bi mbira ina tí lamibe layago langerogo baya hangu hale halimu. Tí wane wandari emene bedaru kiabu dugu bilo baya hangu biawai halimu. Wali hangu hangume kiabu dugu manda nabi maru bedaru baya hangu biawai halu biralimu. <sup>21</sup> Ogoninaga irane langerogo ogo, Homa ina kamagoria kaware íbu hapara kagodago ani bilimu. Agali haguane karunaga andagaha harimayaguabi yagibano karunaga andagaha harimayaguabi ta nabi homa anda íbu dege biya. Waneigini harigani gini bialu karunaga homa ibalu lola haya. Hamaga mo ngoaiho haga ngarunaga igiri daliatheru ngoaiho hearia homa íbu ibalu lola haya. <sup>22</sup> Homenerunaga tingini dindini ngubi biango ti mbaule ngu tarabi agalime widi gandulo hili mogobu wima poradagua bialu dindini wima pene. Homenerunaga tingini mo mogo bulene mbirali nahedagola bame wiagadagua wima polebira, labe lalu bi ogoni ina latagi habe lalu Anduane Homogohanda í langiya.

<sup>23</sup> Anduane Homogohanda lalu, Agali manda timbuniwi kamirume í manda timbuniwi haruda lowa tíni mini yaraga holene nawi. Agali hongohe kamirume í hongohe kogoda lowa tíni mini yaraga holene nawi. Muni dewawi kamirume muni dewa ngogonida lowa tíni mini yaraga holene nawi. <sup>24</sup> Mbiralime mbiralinaga mini mo yaraga hoa biyagua nde ibugua Anduane Homogo ini kogo ala manda buwa ininaga mini dege mo yaraga holene nga. Ogoni irane horo bibahendengi ina wali agali dindi bibahendeni bu karuni dara halu biamogo bialu ti bibahendehondo mana bayale tigabi dege biai haruli. Anduane Homogo inime mana urunibi hangu bulene turu haruli. Í Anduane Homogo ina bi o ledogoniore, lalu langiya, Yaremaiahanda lene.\*

<sup>25</sup> Í Anduane Homogo kogome ina bi ogodagua laro. Agali marume mana bulene nga layago talialu tinaga dongone podo mabu biagane mana binigoyu ininaga bi larogo hale halu bia nabiagaore ka. <sup>26</sup> Agali uruni Iyibialirubi Yudalirubi Idomoalirubi Amonoalirubi Moabalirubi agali dindi ko dalu naibaga wiagoha howa tinaga mandari podo tumagi haga karubi ti bibahende inaga bi larogo hale halu mbira nabiaga kagoni. Agali uruni tinaga miniha Ngode Datagaliwabe mitangi nabiaga headagua dege Isaraeleali karumebi mana ogonidagua dege talialu biaga ka. Urunidagua bialu kagodago Isaraele agali karuni tinaga dongone dege podo mabu buwa miniha galone manda nabi hene ka, lalu Anduane Homogohanda laya, lalu Yaremaiahanda lene.

## 10

### *Mbirale gime wabini ngaru bame lowa Anduane Homogo íbu kiniore ka lenego ogo*

<sup>1</sup> Isaraele wali agaliru-o Anduane Homogohanda tihondo bi larago hale hadaba. <sup>2</sup> Ibugua lalu, Tigua wali agali tara tara bu karunaga mana ko ngago talialu nabilimu. Mbirale nahendene ale hari daligani birago hondowa wali agali marume gi haga ka. Tigua mbirale uruni birago hondowa gi nahalimu.\* <sup>3</sup> Wali agali uruni tigua mana birago habane nabulene ngaru biaga ka. Tigua ayu mo yalu irabuha puwa ira mbira kago dibaga. Dibalu yu daibu ngagola mbirale irame wabiaga mandabi kagome ira ogonime agali ale wabu ngelaga ka.\* <sup>4</sup> Ani wabu ngagola agali mandabime ngolo silibaru mo yalu íbuwa ogonime mbirale biago parahó dambi halu yári biaho ngelaga. Yári bia hai halu mbirale ogoni íbira holilono baya hangu dagia mbirani nilime bapara howa ngelaga. <sup>5</sup> Dama mitangi bialu bi pupu wulenaga gime wabini ogonibi ngago nagalone bameore nga. Agalime tinaga mabuha egame tomo nolilono mbirali kabe toba halu ega íbida pelonaga agali ale mbira wabu helagagobi dege nga. Mbirale gime wabini urunime bi

\* 9:24: Mai 6.8, 1 Ko 1.31, 2 Ko 10.17    ✧ 10:2: Har 23.24, Ais 47.12-14    ✧ 10:3: Ais 40.19, 44.9-20



nalagabi tinime ge halu napiagabi ngagola agalime mo yalu piaga ndobe. Anigo dama mitangi bialu gime wabini ogoni alerume ko bayalebi mbira nabibehe dege nga. Ani ngago manda bialu tigua urunihondo gi holene nawi, lalu laya, lene.\*

<sup>6</sup> Anduane Homogo-o í ale mende naheore. Íni hangu hongo gibi daligaore ke. Í mini timbuni lenebi hongohebi kegoni. <sup>7</sup> Í wali agali bibahende bu karunaga kini kego manda bialu wali agali bibahendeme íhondo gi hai halu í andaneha hai holene nga. Dindi bibahendeha agali manda timbunibi mini gigabiwi karubi kini bu karubi ti bolangua hai howa í daligaore ke. Mendeali í kegobi nahe íniore kegoni.\* <sup>8</sup> Agali uruni mini nawi ale lulu howa mana ko nagalone hangu bialu ka. Uruni tigua mbirale irame wabini ngagoha puwa agi manda bule piagayabe. <sup>9</sup> Agalime Sebena dindiha howa siliba mo yu ibalu Ubasa dindiha howa ngolo mo yu ibalu ngolo siliba uruni mbirale wabiaga mandabi karuhondo mo miaga. Mo miragola tigua dama mitangi bialu bi pupu wulenaga mbirale irame wabuwa o biago ngolo siliba urunime daligani paraho dambi halu yári biaho ngelaga. Aga labolabo wabiaga kago tigua nde aga bayaleore daramabi tagalitaya alerume bu gombedagabi wabuwa mbirale wabu wini ngago mo karula haga biaga ka. <sup>10</sup> Anigo Anduane Homogo í Ngode Datagaliwabe heneneore kegoni. Í Ngode Datagaliwabeore haluhe howa kini haabobo hole kegoni. Ína keba harengi dindi ngaru dumbirumbi bialu ema biaga nga. Ínaga keba holene ogonime wali agali dindi tara tarani karunaga hongo mo pirilape haga ke.

<sup>11</sup> Isaraeleali tigua wali agali Anduane Homogo manda nabi karu ogodagua lamilimu. Tínga dama mitangi bialu mbirale bi pupu wulenaga gime wabini urunime dindibi haribi wabini ndoyago. Mbirale gime wabini dindini ngarubi hari li kago andaneha karubi uruni bibahende haealabagabu wahai howa mbira nawulebiraore lalu lamilimu, lene.\*

*Anduane Homogonaga mini yaraga halu iba gana lenego ogo  
(Yaremaia 51.15-19)*

<sup>12</sup> Anduane Homogohanda ibunaga hongome dindi wabini. Ibunaga mini bayale gigabiwigome dindi bibahende wabialu hari daliga mo yangala halu daligaha karu bibahendebebi wabini.

<sup>13</sup> Ibunime bi laragola hari kulukulu hongoheore lalu iba hariha bedagome ʘ timbuni laga.

Dindi bibahendehe howa beraliba pobo tara tara iraga howa mo mogo bilaga. Ibugua iba dalu dindini ibilalu hari daba bilaga.

Puyabu tara tara ibu andaha wia do ho winiru mo heya halu pulame helo pelaga.

<sup>14</sup> Ibugua ani birago hondowa wali agali karu ti lulu ale halu mini nawiore ho haga. Dama mitangi bialu mbirale ngolome wabiaga agali bu karu tibi nde mbirale tinime bialu kagonaga taga pani nolebira.

Mbirale bi pupu wulenaga gime wabini uruniha galone mbira naheore. Uruniha buhe lolenebi nawiore.

<sup>15</sup> Ti nagaloneore ngago hondowa wali agalime uruni mebia holene karulape nga. Anduane Homogo ibugua horo mbirungi ko bayalebi dabaki bule ibiragola dama mitangi bialu mbirale gime wabini uruni ti ko halu ereba hai holebira.

<sup>16</sup> Yagabanaga Ngode Datagaliwabe kago ibu urunibi ndo tara mende ale mbira kagoni. Mbirale ngaru karubi bibahende ibugua wabiai hene ka.

Ibugua Isaraele wali agaliore ibunaga helo lowa daba bagiho helene ka.

Ibunaga mini Anduane Homogo Hongo Haiheore kagoni.

*Anduane Homogohanda Yuda wali agali bo taliatagi holebero lenego ogo*

\* 10:5: Ais 41.23-24, 46.1, 46.6-7    \* 10:7: Mo 15.4    \* 10:11: Iba 96.5, Ais 2.18, 65.16

<sup>17</sup> Yuda wali agaliru-o t́naga waitigirume Yarusaleme ho hagira bu yaanda hai hayada. Ani biyadago t́gua t́naga dabudabu wirimidaru kabu biai halu yalu ibida pudaba. <sup>18</sup> Anduane Homogohanda lalu, Horo ogoningi ina wali agali Yuda dindiha bu kamiru bibahende bo taliatagi hai holebero. Ina t́ha genda timbuniore anda ibilarogola t́ mbirali yu wa nahe bibahende tandaga nai holeberemi. I Anduane Homogo ina bi o ledogoniore, laragoni. <sup>19</sup> Ani laragola Yuda t́gua ogodagua loleberemi. Ainde ina darabi mo ko haragonida. Inanaga genda timbuniore dere ale bidago dabi habe nahe bidaligobi wu kamagonida. Genda uruni inahaore ibini ngago nde iname harugo lowa yu habehe kamagoni, loleberami.

<sup>20</sup> Yarusalemeore bo gialahole bialu balai anda ko budubaga bini ngaligobiore ngag-  
oni. Balai anda ogoni mo heya halu bulene mbirali naheore. Inanaga waneiginirume  
ina helalu piaiore halu erebaho wahene. Wali agali bibahende Yarusaleme wahalu piai  
haya, lalu loleberemi. <sup>21</sup> Ina ladai ogodagua. Agali haguane wali agali haru haga dindi  
ogoniha hagaru ti mini nawi ka. Tigua Anduane Homogohondo tinaga mini haru habe  
lalu bi nalamiaga ka. Ani bialu tigua biabe bayale mbira nabi hearia waitigirume wali  
agali dindi tara taraha bo purogo lai heleneya. Nogo sibi haru hagame baya hangu haru  
nahe karia biango dudume ibalu bo taliatogo laradagua biniya.

<sup>22</sup> Hale hadaba. Agali mbirame bi abale yalu ibiya. Dindi abene uyurahayagi howa  
kilikulu timbuni laruagoni. Waitigiru tini dindi wahalu Yuda dindi tano bu ngaruniha  
wai bule ibarua. Tano uruni bo gialobaga biai haragola biango dudu bu karu ti dege  
haga wulebira.

*Yaremaiahanda Anduane Homogohondo wali agali biamogo bia lalu henego ogo*

<sup>23</sup> Anduane Homogo-o ina wali agali bu kamarume inanenaga holene bayuwa haru  
habe naheore kama. Ina hariga polene ngagoria inaneme haru pobe nahe kamago  
manda bido.\* <sup>24</sup> Anduane Homogo-o inaga wali agali kamaru inime mo tiga bibe.  
Ina keba howa mo tiga buleni nabibe. Keba howa ani biriyagua nde ina habe nahe  
holeberema. <sup>25</sup> Dindi tara taraha wali agali maru i mitangi nabiaga karubi i mini  
olalu ihondo bi nalaga karubi urunihondo inaga keba walia halu ina ti bo wahai  
holene karulape. Waitigi uruni tigua inaga wali agali Yagaba aguanene biaru bo wahai  
hayagoni ndobe. Tigua ina bo biba hai halu inanaga dindi andarubi mo ko halu bo labu  
hai haya.

## 11

*Isaraele wali agalime Anduane Homogonaga habo nalolene bi lowinigo mo habo lenego ogo*

<sup>1</sup> Anduane Homogohanda Yaremaia ihondo ogodagua laya. <sup>2</sup> Inaga habo nalolene  
bi lowinigo baya hangu hale mia howa hale habe. Ani hale howa ina Yuda wali agali  
Yarusaleme wali agalibi ogodagua lamibe. <sup>3</sup> I Anduane Homogo Isaraele wali agalinaga  
Ngode Datagaliwabe kogo ina bi ogo laro. Mbirali ibu inaga habo nalolene bi lowirugo  
mo habo laragome ibuha mo ko holene wulebira. <sup>4</sup> Ina habo nalolene bi ogoni t́naga  
mamaliru baba bamba ti Iyibi dindiha howa haru tagira ibirungi lowinigo nga. Ti  
Iyibi dindini heangi ira dene ale wiagola poboyogobiore wiagoria hemiria haru tagira  
ibirugoni. Ti ani hearia ina tihondo lalu, Tigua inaga bi larogo hale howa bilimu  
larudagua birimiyagua t́ inaga wali agaliore holeberemi. Ani kamigola i nde t́naga  
Ngode Datagaliwabeore holebero, lalu lamiru. <sup>5</sup> Ina tihondo lalu, Ani birimiyagua ina  
t́naga mamaliruhondo dindi bayale tomo mbirale anda hai holene mbira ngulebero lalu  
lowirugo nguleberoore, lalu lamirugoni. Anigo ai dindi ogoni t́naga mamaliruhondo  
ngulebero lo wirugoria t́ áyu ogoniha kamigoni, laya. Anduane Homogohanda bi ogoni

\* 10:23: Min 20.24, Ais 26.7

layagola ina ladai bialu lalu, Anduane Homogo-o heneneore inime larigonidagua bibe, lalu.

<sup>6</sup> Ani larugola Anduane Homogo ibugua ihondo langialu lalu, Ayu ogoni ina Yuda dindiha tano bu ngaruhabi Yarusaleme tanoha hariga pedadagua puwabi inaga bi ogodagua lamibe. Wali agaliru-o inaga habo nalolene bi lowini ngago bayuwa hale howa talialu bilimu. <sup>7</sup> Ina tinaga mamali Iyibi dindiha howa gi mialu haru tagira ibirungi ina tihondo bi hongohe mbira lamialu lalu, Inaga bi mana baya hanguore hale howa talialu halimu, lalu lamiru. Ani lamialu ina bi ogoni dege laabo halu harugo ayu ti kamiruhondobi lalu haabo ko. <sup>8</sup> Anigo tinaga mamalirume bi uruni hale habe manga howa talialu nabi haya. Tigua mana ko bulene ngago mitangi bialu mine halu tininaga hame leago hangu bialu haabo haya. Ina tihondo habo nalolene bi lowini ngogo ogoni taluwa bialu hadaba lalu lamirugoyu tigua ogoni bibe manga hai haya. Ani biyagola wahalu ai habo nalolene bi lowini wiagoha pani mulene nga lo wiadagua ina ti pani nelo migi biru, lamibe laya, lene.\*

<sup>9</sup> Anduane Homogohanda ihondo laabo halu lalu, Yuda wali agalirubi Yarusaleme wali agalirubi tigua inaga bi lowirugo nabimiya lalu ka. <sup>10</sup> Tigua i erembira ngialu tininaga mamalirume mana ko biaga wiaru lone talima pialu haabo haya. Ani bialu tigua dama mitangi bialu mbirale gime wabini wiaruhondo bi pupu wima piaga ka. Isaraele hameiginibi Yuda hameiginibi ti bibahendeme inaga habo nalolene bi tinaga mamaliru baba lowirugo puguai haya. <sup>11</sup> Ani biyagonaga i Anduane Homogo ina tiga tigaore larogo ti yo pialu polene nawiha wara hana howa minu baore bulebero. Anidagua berogola tigua i olalu, Ina biamogo bia, lalu ha haragola ina ti biamogo nabi waholebero. <sup>12</sup> Ina ti biamogo naberogola Yarusaleme wali agalibi Yuda wali agalibi tinime mbirale dama mitangi bialu gime wabini ngaruha pialu ira hagua nga bilo mini inisenesiru lomabu delaga wiyadagua pugupugu bulebira. Ani bialu mbirale gime wabini urunihondo bi pupu wialu, Ina biamogo bia, lalu holebira. Ani lalu holebiragoyu tiha mo ko holene ibu nganggi mbirale gime wabini urunime biamogo nabulebira. <sup>13</sup> Yuda wali agaliru tinaga dama mitangi bialu mbirale gime wabini ngaru tininaga tano dewa ngadagua gime wabini dewaore bu wigi biyada. Ani bialu tigua dama mitangi bialu mbirale bi pupu wulenaga gime wabini mini Balahondo ira hagua ngabilo inisenesi lomabu delolenaga dabu dewa bu ngelayada. Lomabu delaga dabu dewaore Yarusaleme tanoha hariga pedaru bibahendeore dagalai howa wu karula piyai heledagonida. <sup>14</sup> Yaremaia-o wali agali uruni tiha genda timbuni ibu nganggi tigua i olalu biamogo bia laragola ina tinaga bi ogoni hale naholebero. Anigo ina tinaga bi lalalu ihondo biamogo bia ha nalabe. Ina tinaga genda timbuni ngago mo waha lalu ihondo dugu bia halu bi hongo howa olaabo nahe wahabe laro laya, lene.

<sup>15</sup> Anduane Homogo ibugua bi laabo halu lalu, Inaga wali agaliru-o ina ti gubalini timbuore ho kogoni. Anigo tigua mana ko tara tara dewaore bialu kami. Ani bialu howa inaga anda kagoha ti agi bulenaga poramilibe. Tigua nogo inaga bo lomabu delole yalu eberemigome genda tara tara ina mo waharogola ti yo pialu poleberemabe tobaho kamibe. Ani ndoyago. Genda tandaga ko uruni tiha ibilolebero larugo naibiyagua ti turu holeberemibe. <sup>16</sup> Bamba ina Isaraele ti ira olibe lini bayale dagane kaligobi ka laruli. Ani laruligo ai ayu ina hari daba timbuni bilarogola Isaraele wali agali ira olibe ale kamigo bo haealabaga bialu barogola ira yuni maganeru bu lo togo lagadagua ti bilibulu purogo loleberemi.

<sup>17</sup> I Anduane Homogo Hongo Haiheore ina Isaraele Yudala ira ale hangarugo ai ayu inime dege ira ogonilabo gabu helolebero. Ani buleberogo irane Isaraele wali agali Yuda wali agalirubi tigua dama mitangi bialu mbirale gime wabini Bala wiagohondo bi pupu wialu ira hagua ngabilo delaga inisenesirubi lomabu delalu harimigonaga

\* 11:8: Yar 3.17, 7.24-26, 9.14

ko holene ogoni ibilolebero. Tigua mana ogonibi bialu harimigome i mo kebaore harimigoni ndobe, laya lene.

*Yaremaia bo wahole binigo ogo*

<sup>18</sup> Yaremaia ina Anduane Homogohondo bi ogodagua laru, Anduane Homogo-o agali maru hearume i mo ko hole bialu hearia ina ihondo ogoale bira lalu langirigoni. <sup>19</sup> Pigane biaore uruni ale bulubada manda nabi howa agalime nogo sibi igini bole haru halu poragola piagadagua pialu haruya. Agali uruni tigua ndinde lowa lalu, Ira mbira bayale howa liniru wene dalu kaore dege dibu wahagadagua wali agali mani holobadarume abogo hene lalu ibunaga mini manda nabilo agali ogoniore bo wahamiya, lalu heneya. Tigua anidagua lalu heago helowa dege ina lalu, <sup>20</sup> Anduane Homogo Hongo Haiheore kego i wali agali bibahendenaga bu miniha ngago damene handaore biaga howa ina manani lo tiga buwa mo tale biahaga kegoni. Ai inaga genda ogoni Anduane Homogo inaga giha mo ya harogoni. Anduane Homogo ina mana liahe biaga uruni mo ko howaore baregola hondole hameledo, laru.

<sup>21</sup> Agali Anadodoali bu hearume i bo wahole hame lowa tigua ihondo ogodagua laya. Anduane Homogonaga mana ina latagi nahabe. Lalu keria ina handarimayagua i homabelo bo waholeberema, laya. Ani layagola Anduane Homogohanda inaga bi larugo hale howa ibugua lalu, <sup>22</sup> I Anduane Homogo Hongo Haiheore kogome ina buleorego laro. Ina Anadodo wali agaliru bo wahai holebero. Tinaga waitigirume igiri daliahe bu karu bo wahai holebira. Ogoningi Anadodo wali agali ti tomo nolene biba hai halu nawi kagola tinaga waneigini homai holebira. <sup>23</sup> Ina Anadodo wali agaliru bo wahai holene horo mbira pongo bo winigo ngo. Horo ogoni tagira ibirangi ti mbiraore hangubi yu wahene mbira nahelole bibahende bo wahaiore holebero, lalu Anduane Homogohanda laya, lalu Yaremaiahanda lene.

## 12

*Yaremaia ibu genda yu howa Anduane Homogohondo hale henego ogo*

<sup>1</sup> Anduane Homogo-o ina mana tigabiore bialu haabo haga kego ina ila lai nalabehe. Anigo ina mana maru i wa nale kogo inihondo hale haro. Wali agali mana ko biaga karu ti bayale dege haabo kago irane agibe. Maru ke halu mo hondo hagane mana bialu karu tibi nde bayale dege kago agidabe. <sup>2</sup> Ina ti ira ale dindini hingedegola pini bayale dindiha piaga. Ti bayale andaho howa lini dewa dagagobi kagoni. Tigua ini mini lene kego lalu kago howa i mitangi nabi tinaga mini kaundiaha helowa ani laga ka. <sup>3</sup> Anigo Anduane Homogo ina iore mandabi ke. Ina mana bibahende berogobi i manda baiho kegoni. Ina inaga mini ngogo handai howa iha bu mini pagaho koria hendedegoni. Anigo agalime nogo sibi boleneru tale bialu haru pubagi hagadagua inaga waitigi bu karu taliabagi habelo hamelo ko. Ani bulene horo inime manda bu winigo tagira ibirangi uruni homelo bo wahai habelo hameledo. <sup>4</sup> Anduane Homogo-o ina inanaga dindiha genda ibilarigome dindi yobialu datani mbirale bibahende wiarubi gaulai haya. Mbirale uruni ereba hai harago dindi lone bayale angi holebirabe. Wali agali dindi ogoha karu tigua mana ko biaabo haragome nogo ega bu karuni homai harogoni ndobe. Ani bialu howa wali agali uruni tigua lalu, Mbirale inaha ibulebira lenego Yaremaia ibu de nahondolebira, laga ka, lalu Yaremaiahanda lene.\*

<sup>5</sup> Anduane Homogohanda ihondo ladai bialu lalu, Yaremaia-o ina genda ayu handalu kegoni mani timbuniore ibulebiragobi ndo handaregoni. I agali baba gerai lalu keria

\* **12:4:** Marume bi ogoni ogodagua lo beregedaga. Ngode Datagaliwabehanda mbirale iname beremago nahondolebira, laga. Anigo ai wali agalime Yaremaia ibunihondo leneyagua nde tigua mitangi bialu Yaremaia ala homolebira laluyaguabi tigua ibu homelo bo wahole mandabu howayaguabi mbira lene nga. Yaremaia 11.18-23 ngago de handabe.

ha lariyagua nde nogo hosi baba gerai agua loleberebe. Ini daluha bayale nganggi mini tumutumu wu hariyagua nde iba Yodanahayagi irabu timbuni ngagoha howa agua holeberebe. ✧ <sup>6</sup> Ini dameneore bu karume i bo wahole ndelayagoni. Tigua i talima ibalu minule ibiyagoni. I damene urunime bi bayaleore layagua ti henene lara lowa ina mo henene nahabe, lalu Anduane Homogohanda langiya lene.

*Anduane Homogohanda ibunaga wali agalime ko biyagonaga genda ho henego ogo*

<sup>7</sup> I Anduane Homogo ina bi ogodagua laro. Ina Isaraele wali agali wahalu piru. Ina ti ininaga wali agaliore helo dabo helarugo ai erembira mialu waharu. Ina wali agali uruni gubalini ho henego tinaga waitigirume ti bope helo yupe harugoni. <sup>8</sup> Inaga wali agali uruni tigua inihondo waitigi ho kagoni. Laiono gabua irabuha haga karume hongo howa ngororo lagadagua wali agali urunime ihondo ani lalu ka. Anidagua bialu kagonaga ina ti handabe manga ho kogoni. <sup>9</sup> Inaga wali agali ti ega igini ale beda. Ani bedagola ega bodo hariawe bedarume ibu mabu bialu bo nolebira. Nogo biango gabua maru bu karume olo mogo bialu tiguabi ega emene ogoni bo nole ibidaba lolene nga.

<sup>10</sup> Waitigi bu hearunaga agali haguane dewaore ibalu i mabuha gerebi irane bu hearu mo ko hai haya. Inaga mabu bayale wiwago geme hengedo wahayagola dindi mo ko halu ege kekeleke tagira piya. <sup>11</sup> Dindi ogoni ko mbirale anda nahaga wialu wali agali mbira naheore dindi dabulu wulebira. Ani wiragola mbiralime dindi ogoninaga genda ngago mitangi nabi kagola dindi ogoria ko dalu naibaga yobi wulebira. <sup>12</sup> Waitigi dewaore dindi ko dalu naibagahayagi howa ibalu mbirale ngaru mo ko hai holebira. Ina dindi ogonibi wali agali bibahende karubi mo ko hai holenaga waitigi ani ibilolebero. Ibiragola wali agali lenego mbiraoreli hangubi mbira bayale naholebira. <sup>13</sup> Inaga Isaraele wali agali tigua mabuha widi hengedaru lini nade datani anihe tara andaho aribia helolebero. Tigua biabe erekuibi bu wiyago lini mbira do na nabi biabe bame bu waholebira. I Anduane Homogo kogonaga keba timbuni kogonime tinaga widi lini nadedagonaga taga timbuni ho holebira, lene.

*Anduane Homogohanda Isaraelenaga waitigi hearu baba bi pongo bo winigo ogo*

<sup>14</sup> Anduane Homogohanda lalu, Ina wali agali maru Isaraeleali baba kaware ha-paraho karunaga lalu bi mbira yidogo lolebero. Ti agali koore howa dindi ina ininaga wali agalihondo mirugo tigua mo ko haya. Ani biyagonaga ina waitigi odaruni tini dindi ngagoria nahelo tani dugu wahagadagua ti dugu batagi holebero. Yuda wali agali tibi waitigi dombeneha karuni ina ti dugualu taliatagi holebero. <sup>15</sup> Ina tihondo ani buwa mani nde ti lone dara halu tininaga dindi tara taraha helo haru dai bigi bulebero. ✧ <sup>16</sup> Ani berogola wali agali tara bu karume inaga wali agali hearuhondo dama mitangi bialu gime wabini Balanaga mini lalu ibuhondo bi pupu wiawai henego wahalu inaga mana ngago lo manda biai holene nga. Ani manda bialu heneneore howa tigua Anduane Homogo i haluhe kogo lalu inaga minini howa lo wialu bi layagua nde tibi inaga wali agaliore holebira. ✧ <sup>17</sup> Anigo hameigini maru padaru ti inaga bi hale holene hame nale hayagua ina ti dindi ogoniha nahelo bo dugualu taliatagiore holebero. I Anduane Homogo ina bi o ledogoniore, laya lene. ✧

## 13

*Yaremaiahanda ibunaga agame manane mo walia henego ogo*

<sup>1</sup> Anduane Homogohanda i Yaremaiahondo langialu lalu, Ina áyu ogoni puwa labo-labo bayale mbira yolo bialu muwa karulo hole pu. I labolabo ogoni ibaha nangelabe, laya. <sup>2</sup> Ani laya handala ina puwa Anduane Homogo ibugua bibe lalu langiyadagua bialu labolabo biango mialu karularu. <sup>3</sup> Ani karulo hewagola Anduane Homogohanda

✧ **12:5:** Yar 49.19, 50.44 ✧ **12:15:** Yar 48.47, 49.6, 49.39 ✧ **12:16:** Yos 23.7, Ais 49.6, Yar 3.17, 16.19 ✧ **12:17:** Iba 2.8-12, Ais 60.12



lone langialu lalu, <sup>4</sup> Labolabo karulo harigoni yalu Iba Yuberedisi puwa egeanda mbira kagoha mo do habe, laya. <sup>5</sup> Ani laya handala Anduane Homogo ibunaga bi layago hale halu ina labolabo biago mo yalu puwa egeandaha mo do haru.

<sup>6</sup> Horo dewa peagola Anduane Homogohanda ihondo lone lalu, Áyu ogoni heyalu Iba Yuberedisi puwa labolabo ina mo doha larugola mo do harigoni mo pu, laya. <sup>7</sup> Ani laya handala puwa labolabo egeandaha mo do harugoria piru. Puwa labolabo biago handalu hewaria goba halu ogonime galone mbira bibe nahe wiaria handaru.

<sup>8</sup> Ai Anduane Homogohanda ihondo lone lalu, <sup>9</sup> I Anduane Homogo kogo ina bi ogodagua laro. I Yuda wali agalime mine hayagonagabi Yarusalemebi bope harogola libunaga mini timbuni mini lene wu hayagoni ereba halu labolabo ogoni mo ko hayadadagua ko holebira. <sup>10</sup> Wali agali mana ko ngago hangu mo tene howa bialu haga uruni ti inaga bi mana ngago hale holilono tinaga hale mo ndibulo wahene ka. Ti mine halu tininaga miniha buabirago ale bialu haga ka. Tigua dama mitangi bialu gime wabini ngaruhondo bi pupu wule piaga kago. Ani buwa wali agali uruni ti labolabo biago mbirale mbira bibe nahe ko halu budabaga biyadagua tibi ko hai holebira. <sup>11</sup> Bamba ina Isaraealirubi Yudalirubi agalime labolabo baya hangu bo bu hagadagua ti Anduane Homogo iniha hapara howa helo helaru. Ti inaga wali agaliore ka lene helobi tigua ininaga mini yaraga halu inihondo turu haga bu howa ini mini timbuniwioire ka lalu helobi dabo helarugoyu tigua inaga bi ogoni hale nahagaore kagoni, laya.

*Yarusalemeore iba be pambu laradagua bulebira lenego ogo*

<sup>12</sup> Anduane Homogohanda laabo halu lalu, Yaremaia-o ininaga bi ogo Yarusalemeni latagi habe. I Anduane Homogo Isaraele tinaga Ngode Datagaliwabehanda bi ogodagua laro. Agalirume waini iba be dindime wabini ngagoha hambu yaga, labe. Ai Yarusaleme wali agali tigua bi ogo hale howa ihondo lalu, Ina manda bu handalu keria ina bi ogoni manda nabi kabe toba kebe, lolebira. <sup>13</sup> Ani laragola ina tihondo ogodagua lamibe. I Anduane Homogo ina ogodagua laro. Dindi ogoniha wali agali bibahende bu kamiruni taha ina waini iba dewa hambu berela harogola tigua lulu timbuni yu ibagabu holeberami. Debidinaga aguanene kini hene karubi loma binigo mo miaga karubi Anduane Homogonaga bi mana latagi haga karubi wali agali bibahende Yarusalemeha kamirubi ti bibahendeha waini iba be dindime wabini ngagoha biru tolagadagua ina ti bibahendeha waini iba biru tolai helolebero. <sup>14</sup> Ani buwa agalime iba be dindime wabini ngaru tini mo tilitola lalu bo pambulobaga biagadagua ina ti bibahende mo ko hai helolebero. Wali agali lenegobi wandari igiri daliahebi waneigini galibi ti bibahendeore mo ko hai holebero. Ina ti dara howa mbiraore hangubi mbira yu wa nahelole bibahendeore bo hilo wahai holebero. I Anduane Homogo ina laro, lene.

*Anduane Homogohanda Yuda wali agali mo ko hole ngago ogo*

<sup>15</sup> Yuda wali agali tihondo Anduane Homogohanda bi layago tigua mine nahe baya hanguore hale hadaba. <sup>16</sup> Anduane Homogo tinaga Ngode Datagaliwabe ibugua ti hari nene ngaruha mana ko ngaru bule pialu kamiria tinaga dindi ogoria mo aruma helaragola ti piloligo tigua ibu mini lene timbuniore helalimu. Tinaga dindi ogoria wa kagola ibagabu hole lo manda bu kamiria Anduane Homogohanda wa holene ngago mo aruma holigo de hondo halimu. <sup>17</sup> Anigo tigua inaga bi hale nahe mine halu haabo harimiyagua tinaga waitigirume ibalu Anduane Homogonaga wali agali kamiruni dindi tara ngaruha bo garabaya bu yalu poligo de hondo halimu. Anidagua biragola Yaremaia ini hangu ogoria yu wahene howa dugu bialu kogola de iba inaga deha howa giligala lalu denguiha pugulope halu holoboda lo mitangi bu haru. <sup>18</sup> Ani mitangi bu hewagola Anduane Homogo ibugua ihondo langialu lalu, Kinibi ibu aiyabi libu haru

✧ 13:10: Yar 9.14, 11.8, 16.12

bedaria puwa bi ogodagua lamibe. Libunaga manda karulaga biago nagalone halu ko hayago libugua dindi ogo handayaho habe nahedago wahalu pilibu. <sup>19</sup> Yudanaga dindi emene mbira abene unurahayagi tano mini Negebe ngagonaga pabe panga payayagola ai pabe panga dugulene mbirali naheoreda. Mbirali nahedagoni irane Yuda wali agali bibahende tinaga waitigime ibalu dindi taraha garabaya bu yalu piai hayagome nahedagoni.

<sup>20</sup> Yarusaleme-o inaga de kegonime dindi gibuni uyurayagi howa agali tidini i keria ibaruago agi biaruabe handarene. Ai wali agali ina turu howa handaya ho hariliru ayu agohayagi kabe.\* <sup>21</sup> Wali agali maru ina nenege hinu harigonime mani beregedalu ini bope halu handayaho haragola ina bi agi loleberebe. Ina manda bu handalu koria walime gali taba honole howa tandaga timbuni nagadagua i tandaga timbuni nolebereda. <sup>22</sup> Tandaga uruni irane agime biaruadabe lo mitangi biriyagua ogoni inime mana ko wiaru bialu harigonaga pani naruda lo mitangi bibe. Inimeore bia ko halu hene ngegome inaga aga minu golalu ini mo ko haragonida lo manda bibe. <sup>23</sup> Mbirali ibunaga tingini mindibi heneyagua ibugua mo beregedalu honabi holebirabe be budi ale gabua mbira mini lebadi kago ibunaga tingini gilimugalimubi bedago mo tara ho aribia holebirabe. Anidagua bibe naheore nga. Anidagua dege ina mana ko biaga ngeru yu wahalu mana bayale bia aribia habe naheore wulebira. <sup>24</sup> Yarusaleme-o dindi ko wali agali nahaga ngagoha howa puyabu ibalu widi aeane puloyu piagadagua inaga wali agali bu karuni ina balu purogo lelebero. <sup>25</sup> Ina i embeda halu puwa mbirale dama mitangi bialu gime wabini wiaruhondo bi pupu wima pirigonaga anidagua bulebero. <sup>26</sup> Ina i taga timbuni habelonaga agali bu karume inaga pindu hendelo aga bu kegoni mo yaraga halu ininaga dengui bu dambi helolebero. <sup>27</sup> Ina mana ko ngubiore bialu heruni ina handalu manda bu ko. Ina hongo howa mbirale dama mitangi bialu gime wabini wiaruhondo bi pupu wule hari neneruhabi dangite wiaruhabi ibagabu harigoni. Ina walime ibu agalini wahalu puwa agali mende karu baba kayu yu palima ibaga biagadagua bialu kegoni. I nogo angibunime wangabe taya bialu goe lama ibaga biagadagua bialu kegoni ndobe. Yarusaleme i daraore ho kogoni. I ko kegoni howa i bayale dodo nahe domo waheneore hoa nahe kegonida. I ogonibi dege kene mali agira biruleberebe, lalu Anduane Homogohanda lene.\*

## 14

### *Yuda dindiha dalu naibi winigo ogo*

<sup>1</sup> Yuda dindiha dalu naibi wiangi Anduane Homogohanda Yaremaia ihondo bi ogo langini. <sup>2</sup> Yuda dindini wali agali karu ayu genda timbuni yu howa dugu bialu ka. Tinaga tano wiaruni mo ko hai haragoni. Ani birago dindi ogoriani wali agaliru bame henge wiagoria palu paya paya bima puwa dugu hongo howa bialu ka. Yarusalemeni karume dugu hongo howaore bialu ka. <sup>3</sup> Agali haguane karume tinaga biabe biagahondo iba biraga uli tombo wini ngaruha iba hambu pudaba learia iba nabere wiaria handalu iba be bame yalu dai biragoni. Wali agalime miniha genda timbuni howa taga halu tinaga wanakui handa dindi haragoni. <sup>4</sup> Yuda dindini dalu naibi dege wiane dindi yo bialu leboladaga haya. Ani biyagola wali agali maru tomo tini mabuha bialu naga hearu tibi nde genda timbuni yu howa wanakui handa tara haragoni. <sup>5</sup> Nogo gabua mini dia karume igini hono wiragolabi ti datani nolene nahe. Ani biragola tinaga igini hono wahalu poragoni. <sup>6</sup> Nogo dongi gabua karumebi hari nene ngarunaga howa biangome

\* **13:20:** Hobane uruniha Anduane Homogohanda Yarusaleme wali agaliruhondo bi leda. Anigo bi yobage lalu Yarusaleme ibuni wali mbira ale beda lowa wali ogonihondo bi tigatiga latagi hene. Wali agali tanoha bu karu ti wali ogoni ibu waneigini haradagua bida. \* **13:27:** Ais 65.7, Yar 5.8, Ese 6.13

biagadagua buhe ala laga bialu halo tongo lara. Ti datani nolene nahedagola de ále lalu homabehe ka. <sup>7</sup> Wali agalime ihondo bi ogodagua lalu ka, Anduane Homogo-o iname í erembira ngialu inaga deni mana ko dewaore bialu harimagome ai inane pani nolene ibiragonida. Anduane Homogo-o í mini lene timbuniore kegoni mitangi buwa ina dara halu biamogo bia. <sup>8</sup> Ina Isaraele wali agali kamarume ihondo mini mbiraore wialu ina biamogo bibelo hame lowa mini dunubia ho kama. Ani kamagola genda timbuni mbira anda ibirangi inime ina abaleore biamogo biaga kegoni. Anigo áyu urunidagua biaga ndo haradagua bidego aginagabe. Mbi mbiru hangu bame nenege íbu palialu poradagua berego aginagabe. <sup>9</sup> Agali nahende karia mo mogola hagamaguabi ami agalime ibuni hongo nahe howa mendeali biamogo bialu wai bibe nahe hagamaguabi kego agibe. Anigo Anduane Homogo ini ina heba mandagi haabo haga kegoni ndobe. Inime ina ininaga wali agaliore holomaya dabarigoni. Ani birigo manda bialu ina yu wanahabe, lalu ka.\*

<sup>10</sup> Isaraele tigua anidagua layagola Anduane Homogohanda ladai bialu lalu, Wali agali uruni ti mbirani hangu ho dambolo nahaga howa ibaga ibaga hangu bialu hole hamelaga ka. Ani ibaga bialu howa tinime birago mamage nahaga kagonaga ina tihondo turu nahe ko. Tigua mana ko biyago mitangi bialu ina pani mulebero, laya.

<sup>11</sup> Anduane Homogohanda ihondo langialu lalu, Yaremaia-o wali agali uruni ti bayale helo biamogo bia lalubi ihondo hale nahabe. <sup>12</sup> Tigua tomo nane haga howa ihondo bi lalu, Biamogo bia, layaguabi ina tinaga bi hale naholebero. Tigua loma mbirale ihondo irani bo delai hayaguabi widiru lomabu ngiyaguabi ina wali agali urunihondo turu naholeorebero. Tinaga waitigime ibalu ti bo wahai helolebero. Hina garibi timbuni ibilalu ti homai helolebero. Warago timbuni ibilarogola ti bo homelai helolebero, laya.

<sup>13</sup> Ani layagola ina ladai bialu lalu, Anduane Homogo-o ina bi lariruni henene dege lari. Anigo Anduane Homogo Bibahende Haru Haame Ho Haga-o inaga bi mana latagi haga agali karume bi mende ale ogodagua mbiwia halu wali agalihondo lalu, Tinaga waitigirume tí bo wa naholebira. Hina garibi napolebira. Anduane Homogo inime tí dindi ogoria bayale halimulo handayaho haabo holebero larigo dege latagi halu ka, lalu lamiru.

<sup>14</sup> Ani lamirugola Anduane Homogohanda ladai bialu lalu, Agali uruni tigua inaga minini howa lene ale tingi howa ke halu ka. Ina tihondo bi ogodagua lalimu lalu bi mbiraore hangubi nalamiore haru. Agali mbiwia haga uruni tigua tihondo bi lalu karuni ke howa tininaga miniha howa tagira ibiraru ale dege latagi haragoni. Tigua de gandeba handarima laga birarubi bibahende ke dege hara. Tigua mani ogoale mbira bulebira lalu mbiwia hararubi ke howa bame bi dege lalu kagoni. <sup>15</sup> Anigo Anduane Homogo ina heneneore larogo. Agali uruni tigua inaga minini howa bi ogoni lele ina dabalpu dabalpu lene ndome lara. Tigua lalu, Dindi ogoria wai nabulebira. Hina garibi napolebira, laga karu tini waitigirume ibalu bai holebira. Hina garimebi tini ala homai holebira. <sup>16</sup> Wali agali maru agali uruninaga bi larago hale haga karubi ti bibahende waimebi hina garimebi homaiore holebira. Waitigi ibirarume wali agali waneigini homenerunaga tingini mo yu ibuwa Yarusaleme tanoha hariga ngagoria mo ngelama polebira. Homene uruninaga tingini mo hora holene mbirali naholebira. Yarusaleme wali agalime mana ko ngubi wiaru hangu bialu hayarunaga ina ti bo wahai holebero, laya.

<sup>17</sup> Anigo Anduane Homogohanda ihondo lalu, Yaremaia-o ininaga bi hangu lamibelo hamelo ko. Ogodagua lamulene nga. I Yaremaia kogo inaga wali agaliru darabiore waitigirume bai hayadagonaga horombe mbiragabi dugu bialu de iba ibalu pugulopebe bialu haabo hole hamelo ko. <sup>18</sup> Ina tano tagirahayagi puwa handalu koria waime agali bo waheneru wiaria de hendedo. Tanoha ibaga bu howa handalu koria wali agali hina

\* 14:9: Iba 27.9, Ais 63.19

garime tingini mo kohe homole wima pearia hendedo. Loma binigo mo miaga hearubi Anduane Homogonaga bi mana latagi haga hearubi ti ogoale beramada manda nabi bame ibagabu karia hendedo labe, lalu Anduane Homogohanda ꝑ Yaremaiahondo ani lene.

*Yaremaiahanda Anduane Homogohondo wali agalinaga bi lahalu dalu ibila lenego ogo*

<sup>19</sup> Anduane Homogo-o Yuda wali agalinaga dindi ogo yu wahai haribe. Saiono tanobi manga halu yu waore harigonibe. Ina mani lone bayale agua holebe tobahe mo ko howa ina balu kegoni agibe. Ina bayale holeberemabe tobaho harimago ai bayale ndo kama. Ina mani bayale karulape holene henge wulebirabe tobaho harimago ai ani ndo inanaga waitigirume ibuwa ina mo ko howa balu mo gi haga bialu haabo kagoni ndobe. <sup>20</sup> Anduane Homogo-o heneneore inanaga mamalirumebi ina áyu kamarumebi ínaga deni mana ko biaabo halu harimagoni lapani harama. ✧ <sup>21</sup> Anigo ínini mini leneore kego manda bialu ina erembira nangibe. Ínaga tano íninaga haru howa biragane dagia ínini andaga biagobi waitigi karume mege bialu mo ko halu kagoni mitangi bialu ogonidagua bialu nahelabe. Ina baba habo nalolene bi lo wirigobi mitangi bialu mo habo nalabe. <sup>22</sup> Dama mitangi bialu gime wabini ko ngubi urunime iba dalu ibilagabe. Be hari ibuni hangume iba dalu ibilolebirabe. Ani nabibeheore ndobe. Anduane Homogo-o ꝑ hangu inanaga Ngode Datagaliwabe kegome mbirale uruni biai habehe kegoni. Í hangu mbirale uruni biai haga kegome ai ina biamogo bibelo hondo kamagoni laro, lalu Yaremaiahanda lene.

## 15

*Yuda wali agali mo ko holene wulebira lenego ogo*

<sup>1</sup> Ai Anduane Homogo ibugua ihondo lalu, Yaremaia-o hale habe. Mosese Samuele-lame ínini koria kaware ibuwa wali agali uru biamogo bia ledale ina dara halu biamogo nabi dege kole. Wali agali uruni tinaga dengui ꝑ lone nahondolego ogoria nahelo talu peladaba. ✧ <sup>2</sup> Ani laregola tigua ihondo hale howa lalu, Ina agoha polomayabe, layagua nde ogodagua labe. Anduane Homogo inime laro. Wali agali maru warago ko tara tara ngarume balu homelo dabo heledogo ti warago baragola homolebira. Maru waiha homelo dabo heledogo ti wai bu pialu karia wai tigime baragola homolebira. Maru ti hina garime homelo heledogo hina gari tagira ibirangi tibi nde homolebira. Maru garabaya andaha homelo heledogo ti wai bialu garabaya minu yalu polebira. ✧ <sup>3</sup> Anduane Homogo inime homolene ale mbirale maria urunime ti balu bo biba hole dabo ngeledo. Tínaga wai tigime bo paya bidagola biango dudu karume tinaga tingini ngaru gililo yu ibagabu helo. Ega tara tara bedarubi biango nogo gabua bu karumebi uruninaga tingini nalu no amo laragola mbirali yu wanaholebira. <sup>4</sup> Wali agali dindi tara tarani bu karume Anduane Homogo inime Yuda wali agalihondo mana ogonibi biya lalu bi larago hale howa tigua gi timbuni halu mogolo holebira. Hese gaia igini Manase ibu Yuda wali agalirunaga kini heangi mana ko timbuni Yarusalemeni bialu hayagonaga pani mialu ti ani bo wahai holebero, lalu Anduane Homogohanda laya. ✧ ✧

<sup>5</sup> Anduane Homogohanda lalu, Yarusaleme wali agaliru-o tí dara holobadagobi tíhondo dugu bu ngulubadagobi tí bayale henedabe be hako henedabe handama ibulubadagobi mbirali ai kabe. <sup>6</sup> Anduane Homogo ina henene tigatigaore langerogo tigua ꝑ erembira ngialu kaundiaha pu waharimigoni ndobe. Ani birimigonaga íninaga gioreme tí balu mo ko harogoni ndobe. Tíhondo dara haabo halu haruligonigo ai áyu tí baba manga timbuni ho kogoni. ✧ <sup>7</sup> Puyabume widi aeane pulo wahagadagua bialu ina wali agali Yuda dindini tano wiaruha hearu bibahende bo taliatagi hai harugoni.

✧ 14:20: Neh 9.2, Iba 32.5, Yar 8.14 ✧ 15:1: Har 32.11-14, Dag 14.13-19, 1 Sml 7.5-9 ✧ 15:2: Mo 13.10 \* 15:4: Bi ogoni 2 Kini 21.10-15 handabe. ✧ 15:4: 2 Kin 21.1-16, 2 Bit 33.1-9 ✧ 15:6: Yar 2.13, 7.24, Hos 13.14

Tigua mana ko biyaru wanahe biaabo halu hemiria wali agali bibahendebi tinaga waneiginirubi bo wahaiore harugoni. <sup>8</sup> Ami hearubi bo wahai harugola ti oneru áyu dalo birama peda. Wali dalo dagalabe naheore iba angeni iba mu ngaligobi beda. Horombe ami agali uruni aija berearu bo wahai helo lowa tinaga waitigi hearu ibilaru. Tiha tandaga timbuni abaleore ibilalu mo gi timbuni helaru. <sup>9</sup> Wali mbira waneigini karia aija bedayaguabi uruni bibahende homai helarogola waneigini aija dara tene handalu gi ge hongo nahe birulebira. Turu howa dungulo birulene winigo gendaho birulene ibu aribia haragola taga tene handa walia holebira. Manane alendo halu ni abale anda piagadagua Yuda maru yu wahene heagua abale bo hilo wahai helo tinaga waitigiru ibilolebero. I Anduane Homogo ina bi o ledogoniore, lene.

*Yaremaia ibugua Anduane Homogohondo ibunaga genda wiago latagi henego ogo*

<sup>10</sup> Yaremaia ibugua lalu, Aiore mini burugu ledogo i aiyahanda dindi ogoria holiya abule taba henededabe. Dindi bibahendeha agali bu karu baba keba ha lai la bialu kogo aginagadabe. Tigua i ngulenebi ina ti mulenebi dano mbira nahe kogodago bibahendeme Anduane Homogohanda i mo ko helo laga bialu kagoni, laro. <sup>11</sup> Anigo Anduane Homogo ibugua ihondo lalu, I miniha genda nayu habe. Ina i biamogo berogola i bayale holebere. Ani kegola inaga waitigi karume tiha genda anda ibirangi ina ti biamogo bia lama i keria ibilo ina mo manda bia holebero. <sup>12</sup> Anduane Homogohanda wali agalihondo lamialu lalu, Aeanebi boronosibi biamaga howa wabini hongohe ngaru agali aiwa minu gai bulebira. Waitigi uyurayagi howa ibulebirarunaga hongo taraore aeane alehe ibulebira, laya.

<sup>13</sup> Ani ibiragola tinaga munirubi dabudabu maru ngamirubi bibahende bame mo mulebero. Irane tinaga dindi bibahendeni mana ko wiaru bialu haabo harimigonaga ani bulebero. <sup>14</sup> Inaga miniha tandaga holene ira hungu ale dalu haabo kagome ti bibahende dai holebira. Ina Isaraele wali agali ti minalu agali mendenaga garabaya biabe bialu halimulo minu merogola tigua dindi ala ti handa nabini ngagoha garabaya haru puwa helolebira, lalu Anduane Homogohanda laya.

<sup>15</sup> I Yaremaia kogo ina ogodagua laru, Anduane Homogo-o inaga genda bu ngaruni hendedego ai ina i mitangi bialu pele ngibe. Agali maru i mo ko halu karuni inime ti pani mibe. Ti ba puda hariyagua tigua dai bialu i bo homeore lolebira. Inaga biabe bulene wiago bialu hewaria tigua ihondo bi ko lalu kagonigo manda bibe. <sup>16</sup> Tomo nolene mendealime ngiragola abale yamiagadagua ina bi ihondo langiriruni bibahende hale hai harugo. I Anduane Homogo Ngode Datagaliwabe Hongo Haiheore kegome inaga bu miniha turu howa dungulo holene tolaho kogoni. <sup>17</sup> Agali maru bame turu halu oba haga karu baba i hole turu nahe ini hanguore harugoni. Irane inaga hongo iha karula halu inaga keba holenebi iha karula dege kegoni manda buwa ani harugoni. <sup>18</sup> Anigo ai inaga miniha tandaga ngago ereba nahe wiaabo ho ngagoni irane aginagadabe. Inaga dere bidago dabi nahe timbu hayadago aginagada. Heneneore ina i biamogo nabadane hendedo. Agalime iba bedabe toba howa iba biraga uliha iba hambu pialu karia iba nabere hundiyaada handala iba nane wahalu piagagobi i haruda, laru.

<sup>19</sup> Ani larugola Anduane Homogo ibugua ihondo ladai bialu lalu, Ina mini beregedalu ini kogoha lone hole dai biriyagua nde ina i lone haru dai bialu ininaga biabe biaga wirigoha bialu helolebero. Inaga ne harigaha bi habane nabulene lalu kego wahalu bi bayale hangu latagi halu hariyagua nde inaga bi mana latagi haga howa bi lagane ne hambu i holebere. Ani howa wali agali tigua i talima ibilo ina ti talima napobe. <sup>20</sup> Wali agali uruninaga deni i ege tole mini boronosime pabe bini hongoheore kaligobi helolebero. Ani kegola tigua i baba waitigi ha holebirago ai ini i heba mandagi kogola i bope naholebira. Inime i biamogo bialu ila mandagi haabo holebero. Bi ogoni Anduane Homogo inime larogoni. <sup>21</sup> Wali agali mana ko biagabi mendeali dara halu mitangi



nahaga karunaga giha keriahi ina í biamogo bialu haru dai berogola tigua í mo ko naholebira, lalu Anduane Homogohanda Yaremaiahondo lamini.

## 16

*Anduane Homogonaga bi hongohe larago Yaremaia ibugua latagi holene nga lenego ogo*

<sup>1</sup> Anduane Homogohanda Yaremaia ihondo langialu lalu, <sup>2</sup> ina dindini kengi wali dabu nabi waneigini nahonowi habe. <sup>3</sup> I Anduane Homogo ina dindi ogoriani aba aiyahabi waneigini bu karuhabi mbirale tagira ibulebirago langero. <sup>4</sup> Ti bibahendeore homai holebira. Maru warago ko tara tarame homalu maru waitigime bo homelalu maru tomo nolene nawiore howa hina gari halu homolebira. Ani homai haragola ti dara halu dugu bulenebi mo hora holenebi mbira naholebira. Homene tingini uruni dindini ti wiradagua wima pedaria ega bodo hariawe bedarumebi nogo biango gabua karumebi ibalu no waholebira.

<sup>5</sup> I Anduane Homogo kogo ina lone ogodagua laro. Wali agali dugu bialu karia í duguanda napobe. Mbirali homaragola dara howa dugu nabibe. Wali agali uruni hondowa ina ti gubalini nahe holebero. Ina ti dara howa bayale helo biamogo nabulego ina dara halu dugu nabibe, lalu Anduane Homogo ibugua lene. <sup>6</sup> Agali homogo bu karubi yagibano bu karubi dindi ogoria henego ta nabi bibahendeore homai holebira. Ani homaragola uruni dara howa mo hora holene mbirali mbira naholebira. Mbirali homaragola dara howa gi dambia hale poda mandari angariru mia biagadagua bulene mbira naholebira. <sup>7</sup> Anigo marume mbiralinaga damene mbira homayago dara howa dugu bialu duguanda bedagola nde ibunaga iba tomoru ibu miniha mo paliaho biruwa nalu berelo yalu naibulebira. Mbirali ibu aba aiyagore homayagonaga daraho bedaria mbiralime ibu dara howa biamogo bule naibulebiraore.

<sup>8</sup> Agali marume tini andagaha tomo timbuni dawa nalu ibabi nalu kagoha í ti heba mandagi nalu birule napobe. <sup>9</sup> I Anduane Homogo Hongo Haiheore howa Isaraele wali agalinaga Ngode Datagaliwabeore kogo ina heneneore larogo hale habe. Ina wali agalinaga miniha dungulo holenebi turu howa bi lolenebi wali agali dabu bulenenaga turu holenebi urunialego bibahende mo ereba haiore holebero. Wali agali áyu kamiru tí kamioire dege mbirale uruni birane de hondoleberemi.✧

<sup>10</sup> Yaremaia ina bi ogoni wali agalihondo lamialu keria tigua agua ladai bulebira. Anduane Homogo ibugua inaha mbirale mo ko holene uruni damene ibilole biarugo irane agibe. Iname mana tiga nabi mbira ago birimagodabe. Anduane Homogo inanaga Ngode Datagaliwabe kagohondo mana ko mbira agi birimabe, lalu hale holebira. <sup>11</sup> Wali agali tigua bi anidagua laragola ina tihondo ogodagua ladai bibe. I Anduane Homogo ina tihondo bi ogo laro. Mbirale uruni buleberogo irane tinaga mamalirume i erembira ngialu puwa dama mitangi bialu mbirale gime wabini wiaruhondo bi pupu wima piyagonaga ani bulebero. Tigua inaga mana hale habe manga halu ibi wahalu piya.✧

<sup>12</sup> Mana ko abale tinaga mamali henerume bialu henedagua ndo tigua ko timbuniore bialu kamigoni. Tí bibahendeoreme mine gibi halu tinaga mini kome hame ledagoha piai halu kami. Ani bialu howa tigua inaga bi mana hale habe mangaho kamigoni.

<sup>13</sup> Anidagua bialu kamigonaga ina tí dindi ogoniha howa bo ba tagi halu dindi tara mbira bamba tiguabi tinaga mamalirumebi manda nabini ngagoha piai helolebero. Tí ani pu howa mbiraga horombebi dama mitangi bialu gime wabini ngaruhondo bi pupu wialu haabo holeberemi. Ani bialu kamigola ina tí dara halu biamogobi nabulebero, laya lene.

*Anduane Homogohanda wali agali tini dindiha lone haru dai bulebero lenego ogo*

14-15 I Anduane Homogo ina bi ogodagua laro. Ina wali agali uruni bo taliatagi ha holeberogo mani ina dindi tinaga mamaliru helo mini ngogoria lone haru dai bulebero. Wali agali uruni tigua henene larama lalu bi mo hongo howa Anduane Homogo haluhe haabo kagonaga minini howa ina Iyibi dindiha howa haru tagira ibiyagonaga henene larama lalu kagoni. Mani tigua Anduane Homogo haluhe haabo haga kagonaga minini howa henene larama lalu, Ibugua ina dindi tara dindi abene uyurahayagibi dindi tara wiaruhabi bo pelai henego ai lone inanaga dindi henene ngogoria holomaya haru daibu heledagoni, lolebira lene.

*Anduane Homogonaga deni wali agalime ko mbira binigo mo do habe nahe lenego ogo*

16 Anduane Homogohanda lalu, Agalime wena nu bu yalu puwa ibaha bape halu wena dewaore minagadagua waitigirume ibalu Yuda wali agaliru minu yalu piai helolebero. Ani buwa mani agalime nogo gabua tiaru irabuha taya biagadagua bialu wali agali taya bilo waitigi maru ina lone ibilolebero. Ani ibilarogola tigua wali agali maru ibida puwa hari bare ngaruhabi egeanda karuhabi bira do haga bidaru baya hangu ilalu minu yu piai holebira. 17 Irane Yuda wali agali tigua mana biaga damene ngago bibahende ina manda biai kogoni ndobe. Tigua ko bialu hene ngaruni inaga deni mo do habe nahe nga. ✧ 18 Tigua mana ko dama mitangi bialu mbirale bi pupu wulenaga gime wabini ko ngubiore dewa wiaru dindi inime ti helo mirugoha wu tolelowa tiha ko dewa ngelo ka. Anidagua bidagonaga ina ti pani dewaore nelo mulebero. Mbirale bi pupu wule gime wabini urunialego holenehebi buhe lagabi ndo bame ema nabiaga homenenaga tingini bame ngaligobi dege nga. Dama mitangi bialu bi pupu wulenaga gime wabini urunime dindi ogoni inaga deni mo dodo hai hene nga, laya lene.

*Wali agali dindi bibahendeha karume Anduane Homogo manda biai holebira lenego ogo*

19 Yaremaiahanda lalu, Anduane Homogo inime genda iha ibiragola i biamogo bialu ho hagirabu yaanda howa mo hongoho helaga ke. Ani kego ai wali agali dindi tara tara ngaruha howa i keria ibirarume ogodagua lolebira. Ina mamalirunaga bi pupu wiaga gime wabini ngarume ina biamogo bulene ale ndo bame nagalone winiya. 20 Agalime ibuni biamogo bilonaga mbirale gime wabibehebe. Wabibe naheore. Agalime mbirale ibuni biamogo bilonaga gime wabiyagua nde wabini ogoni ibu henene ndo biamogo nabibehe nga, lolebira, lene.

21 Anduane Homogohanda ladai bialu lalu, Ti ani lolebirago manda bialu bi ogoni larogo hale hadaba. Ina wali agali bu karuni bibahende halu mbira hangu lawai harogola tigua inaga hongo holene timbuni ngogo baya hangu manda biai holebira. Ani bialu inaga mini Anduane Homogo henego kadalo manda bu holebira, lalu Anduane Homogohanda laya lene. ✧

## 17

*Yuda wali agali tinaga mana ko biaga wiaruni wahabe nahe henego ogo*

1 Anduane Homogohanda lalu, Yuda wali agaliru-o tinaga ko ngaruni domo wahabe naheore kamigoni. Tinaga bu habaneha ege tole ale kami. Ani kamigola tinaga mini ege tole ale ogoriani mbirale mbira ayu tibu aleme tinaga ko birimigoni gilibu nga. Ani bialu tinaga ko uruni tininaga lomabu delolene dabu biarunaga nguni mariani nogo bulumaga ne gayane ale kagoria gilibu nga. 2 Horo bibahendengi tinaga wali agali bu karunime mbirale dama mitangi bialu bi pupu wiaga wiarubi dama wali beda mitangi bialu gime wabini mini Aserabi ogoni labonaga lomabu delolene dabu hari nene ngaruhabi ira timbuni bu karu tenehabi bu helaga birimigo mitangi biaabo haga kamigoni. 3 Tigua dindi uruniha pialu mbirale urunihondo ina tinaga muni ngamirubi mbirale bayale tara

tara ngamirubi bibahendeore t́naga waitigiruhondo mo miaiore holebero. T́gua dindi ogo bibahendehe mana ko bialu mo bia hai harimidago. Ainde t́naga waitigirume anda ibalu dindi t́naga bi pupu wiaga wirimidaruni bibahende karulai helolebero. <sup>4</sup> T́nime mo ko harimidagome t́ dindi bayale ina ngirugo yu wahalu poleberemi. Ina t́naga waitigi bu karunaga garabaya biabe ale bialu halimulo helolebero. T́ dindi manda nabini tara mbiraha pu holeberemi. Inaga keba holene ira dene ale wu hewaria t́gua pulo hungu bia harimigola ai hungu bialu daho wulebira.

*Agalime mana kira taliaga ogo*

<sup>5</sup> Anduane Homogo ibugua lalu, Mbiralime ini erembira ngialu agalinaga hongome ibu bayale holenaga biamogo biaga lo mitangi biyagua anidagua mitangi biaga kago ibuha mo ko holene wulebira. <sup>6</sup> Ogoni ibu dindi ko iba dalu naibaga ege kekeleke dindi ngagoha ira emene tilatila kaligo ale ka. Urunibi karu tiha bayale holene handa walia naholebira.

<sup>7</sup> Anigo mbirali ibu Anduane Homogo ihondo mini mbiraore wialu yu tiga bu howa ina hangu ibu biamogo bulubadalo manda bu karu ina ti biamogo bulebero. <sup>8</sup> Ogoni ibu ira iba angeni hengene bayale anda hagagobi holebira. Ibunaga pini ibaha dalipe kagome gaea timbuni birangi ira ogoni ibu gabu holigonaga gi nahaga. Ibunaga yuniru bayale gahenge haabo halu dalu naibirangi ibu gau holobada lowa gi nahaga ka. Horo bibahendengi ibunaga lini dolene tu haragola ibu lini bayale daabo haga ka, lalu Anduane Homogohanda lene. <sup>9</sup>

*Anduane Homogohanda wali agali bibahendeme mana bialu kago mo tale biai hagago ogo*

<sup>9</sup> Anduane Homogohanda ogodagua laya. Wali agali bibahendenaga bu miniha ke howa mana ko bulene dege mitangi biaabo haga ka. Wali agali tinaga mini koore kago ai tigua birago heneda aiwa lolebirabe. <sup>10</sup> Ai Anduane Homogo ini kogome wali agali bibahendenaga mini wu karu bibahende manda biai ho kogoni. Ani manda bu howa ina tinime bialu henedarunaga pani karulape miadai biruli. <sup>11</sup>

<sup>11</sup> Agali mbirame ohowa muni dibadaga howa mo wini ngaru ti ega mbirame habane wialu pedagola ega mendeme aribia howa kayu bialu ibunaga wini tingi howa palia aribia haganegobi ka. Muni ke howa mini uruni alego agali ogoni ibuni wahe nahe wene igiri daliahe kaore dege abale biba halu ereba hai haga. Ani bidagola mani agali maru bu karume ibu mini nawi luluore henedane handa walia haga.

*Isaraele ti Anduane Homogohanda biamogo bilo lowa malia ho henego ogo*

<sup>12</sup> Inanaga Anduane Homogonaga anda loma bia hene biago kininaga biragane dagia ale yári taraore biahe baya taraore mbira nga. Bambaore hari nene mini lene ogonibi dege winigo wiaabo ka. <sup>13</sup> Anduane Homogo-o ina ina Isaraele wali agali biamogo bibelo ihondo mini dunubia ho howa ina bibelo maliaho kamagoni. Mbiralime ihondo erembira ngialu piyaru ti taga timbuniore holebira. Mbiralime agali mbiranaga mini dindini gilibu ngago hondowa mani mini ogoni doma hole bidagola hondo embeda haramalidagua maru inihondo erembira ngiaga uruni ti embedaho waholebira. Ti ani holebirago irane Anduane Homogo-o i iba gagahе duguagagobi howa ina wali agalinaga holene gahenge ngiaga kegonigo tigua i yu wahalu piai hayadagome ani bulebira.

*Yaremaiahanda ibu biamogo bilonaga Anduane Homogohondo hale henego ogo*

<sup>14</sup> Anduane Homogo-o i dabi holiya inaga warago ngogo mo wahabe. I bayale holiyanaga ina i haru dai bibe. I inaga mini hangu yaraga halu haga kogoni.

✧ 17:5: Ais 30.1-2, 31.1-3 ✧ 17:7: Iba 2.12, 34.8, 146.5, Ais 30.18 ✧ 17:8: Iba 1.3 ✧ 17:9: Md 13.15, Mg 7.21-22, Lm 1.21, 7.11, Eb 4.22 ✧ 17:10: 1 Sml 16.7, Iba 62.12, Lm 2.6, 8.27, Mo 2.23

<sup>15</sup> Isaraealiruru tigua ihondo mege bialu ogodagua lalu, Anduane Homogohanda mbi-rale ko uruni bulebero layago aginaga layadabe. Ibugua mbirale uruni heneneore bule mitangibu heagua nde abale áyu ogoni bilo, laga ka. <sup>16</sup> Anduane Homogo-o ínaga wali agaliruru ina haru holiya dabo helarigonigo ínaga biabe ogoni wanahe bialu kogoni. Wali agali uruni kagoha mo ko holene mbira ibilabe lalubi ina ihondo hale naheore kogo ini manda bide. Ina bi lalu harugo damenebi ina baya hanguore manda biai kegoni. <sup>17</sup> Mbirale gi holene ko mbira anda ibirangi urunime i mo gi nahe howa ínaga ha do holene iniore kegoni manda bido. <sup>18</sup> Ani bialu áyu agali maru i mo ko hole bialu karuni tininaga mini mo batara halu mo taga habe. Ini dege mo taga nahabe. Ti gi timbuni helo hiriribi mbira tihondo bibe. I dege mo gi nahabe. Ti kagoha mo ko holene ibilalu tini bo wahaiore habelo hamelo kogoni.

*Yuda wali agaliruru tigua Sabada horongi bulene mana talialu holene winigo ogo*

<sup>19</sup> Anduane Homogohanda ihondo langialu lalu, Yaremaia-o ina tanonaga pabe panga haraba mini Wali Agalinaga Panga laga biagoria pu habe. Yudanaga kiniruru ti tano pabe bu ya anda henehayagi howa tagira polenebi anda ibulenebi hariga ogoninaga dege piagago ogoriani pu habe. Ani bialu Yarusaleme tanonaga panga haraba timbuni dunini maru ngaruhabi pu ha dege bibe. <sup>20</sup> Ani pu howa bi ogodagua labe. Yudanaga kini kamirubi Yuda wali agalibi Yarusaleme wali agalibi ti bibahende hariga pabe panga ogoha uba andatagi biaga kamiruru tigua tínaga hale mia howa Anduane Homogo ininaga bi larogo baya hangu hale hadaba. <sup>21</sup> Anduane Homogo ina ogodagua laro. Tini bayaleore holene hamelo kamiyagua Sabada horongi dabudabu damene bibahende Yarusaleme tano pabe ogoha yalu anda naibalimu. <sup>22</sup> Ani bialu tini andagaha howabi mbirale mbira yalu tagira napilimu. Sabada horo ogoninaga biabebi heba nabuleore laro. Bi ogoni mitangi bialu halimu lalu bamba ina tínaga mamaliruhondo lami-wadadagua bialu Sabada horo bayale helo ininagaore loma biaho ngeledogo mitangi bialu halimu. <sup>23</sup> Anigo tínaga mamalirume mana ogoni mo wahalu tigua nabioire hene. Ina ti mana bayale ngaru lawai holilono mine halu hale habe manga haga hene.

<sup>24</sup> Tigua ani bialu henego ai áyu tigua Anduane Homogo ininaga bi larogo hale halu Sabada horongi dabudabu damene Yarusaleme tanoha yu anda naibalimu. Sabada horo ininaga wu bagi heneore mbira ngago ai horo ogoninaga tigua biabe bulene damenego bibahende nabi halimu. Tigua ínaga bi larogo talialu birimiyagua <sup>25</sup> nde Debidi aguaneruru hangume kini ha aribia haga bialu Yarusalemeni kini holebira. Ani howa kini halu ibunaga agali haguane dabo helaga bini bu karubi tigua hosini biralubi karisini heyu halubi Yarusalemeha pu ibu bialu uba andatagi bialu holebira. Yarusaleme tanohabi Yuda dindihabi wali agali bu holebira. Ani kagome wali agali dewaliore tanoha pabe panga haraba ngagoria uba andatagi bialu holebira. <sup>26</sup> Ani biragola wali agalirume dindi tara tara ngaruha howa loma biniruru yalu Anduane Homogo ininaga anda ibugu bulebira. Wali agali Yuda dindiha tano wima pedaruha bu karumebi Yarusaleme tano kawareha bu karumebi Beniyamini hameiginiruru daluha howabi hari barebareha dindi wima pedaruha howabi ni paliragohayagi hari barebare emene wima pedaruha howabi wali agali maru Yuda dindinaga abene unurayagi padarumebi uruni bibahendeore ini koria ibai holebira. Ibalu tigua loma irani dai helolenebi nogo bo lomabu delolene marubi widi lomabu delolenebi ira hagua ngabi-aga mini inisenesi lomabu delolenebi Anduane Homogo inihondo kai lalu lomabu ngulene marubi yalu ibugu ibugu bulebira. <sup>27</sup> Anigo tigua ínaga bi larogo mo wahalu ininaga Sabada horo ngago ininagaore wu bagi hene ngela nabi howa dabudabu ngaru Yarusaleme tanonaga pabe haraba ngagoria Sabada horongi yu uba anda halu birimiyagua nde ina tanonaga pabe panga ogoriani ira hedape harogola pabe uruni dai halu

☆ 17:21: Neh 13.15-22 ☆ 17:22: Har 20.8-10, Man 5.12-14

kininaga anda timbuni Yarusaleme tanoha bu karubi bibahendeore dai helo ira da timbu helolebero. Ani dalu kane dege ira ogoni dalu hundia nabulebira, lalu Anduane Homogohanda lene.

## 18

### *Anduane Homogo ibu todobene be dindime wabiaga agali ale kago ogo*

<sup>1</sup> Anduane Homogohanda ihondo lalu, <sup>2</sup> Inaga bi mbira ihondo langero. Ina todobene be dindime wabiaga agali mbira kago ibu andaga pobe, laya. <sup>3</sup> Ani layago hale halu ina agali todobene be wabiaga biago andagaha pialu agali ogoni ibugua todobene be dindime wabialu hearia handaru. <sup>4</sup> Anigo todobene o wabialu hayadagoni wabia ko haya. Agali ogoni ibugua todobene be wabia ko hene biago budabaga buwa dindi mbiraore ogoni degeme lone mo gedaore howa mende ibuniore hameleagobi mbira wabiya.

<sup>5</sup> Ani biyagola Anduane Homogohanda ihondo lalu, <sup>6</sup> Isaraele wali agaliru tihondo bi mbira larogo. Agali todobene be wabiaga o kagome ibuni wabuabirago ale wabialu kadagua ina Isaraele wali agali ti inime buabirago ale bulene nakarulapedabe. Dindi todobene wabiaga agali biago ibunaga giha yu kadagua Isaraele ti inaga giha yidogoni ndobe.\* <sup>7</sup> Mbirungi nde wali agali maruhondobi hameigini dindi tara tarani bu karuhondobi lamialu ina ti mo ko halu bo hilo wahai holebero laruli. <sup>8</sup> Anidagua larogola wali agali uruni tigua mana ko bialu hayago wahalu mini beregedalu mana bayale biadai biyagua nde ti mo ko hole larugo waharuli. <sup>9</sup> Marungi nde wali agali marubi hameigini maruhondobi ina ti mo bayale halu mo hongo holebero lalu lamiruli. <sup>10</sup> Ani ledogola uruni tigua mana bayale tigabi bulene ngago wahowa inaga deni ko ngaru hangu bialu hayagua ti biamogo bulebero lalu lamirugoni wahalu biamogo nabiruli. <sup>11</sup> Anigo Yaremaia-o ina Yarusalemeha karubi Yuda wali agali bibahendehondobi bi ogodagua lamibe. Anduane Homogo ina bi larogo hale hadaba. Ai ina ti pani ngialu mbirale ti bolene ko tara mbira manda mandabu ngelo kogoni. Ani bidogo ti bibahendeme mana ko bialu kamiruni wahai halu mana bayale ngaruni talialu bidaba laya lalu lamibe. <sup>12</sup> Anigo Yaremaia-o wali agali tigua bi ladai bialu lalu, Iname ogonidagua bibe manga kamago wahalu waha. Ina inaneme buabirago ale buleberema. Ina bibahendeoreme mine hai halu inaneme mana ko ngaru bule dimagoli ho kamagoni ndobe, lolebira, lalu Anduane Homogohanda lene.

### *Wali agalime Anduane Homogo mo embeda ho henego ogo*

<sup>13</sup> Anduane Homogohanda laabo halu lalu, Wali agali dindi tara tarani bu karuhondo mana koore Isaraele wali agalirume bialu kagonidagua dindi mendeni mbira biya lene hale harimibe lalu tigua hale halimu. <sup>14</sup> Horo mbiru hangubi Lebanono hari nene ngagoha dalu dindiguni nawi lene mbira hale halu dindi ogoniha howa iba baya libule ibagaru horo mbiru hundiai haya lene mbira hale harimibe. <sup>15</sup> Urunidagua nabiaga ngagoni. Ai inaga wali agalirume ini kogo mo embeda halu puwa damarunaga dabuni ira hagua nga bilo delaga inisenesiru lomabu delaga ka. Anidagua bialu kagome mana tigabi bayale ala bialu haga winiru embeda halu yu wahai haga. Ayu koore ngagoha pupe halu ka. <sup>16</sup> Ani bialu kagome tinaga dindi mo ko halu mbirale anda nahaga wulebira. Wali agali dindi kaundiaha howa ibirarume dindi ko ogonibi ngago hondowa mogolalu gi timbuni ho holebira. <sup>17</sup> Waitigime inaga wali agaliru baba wai bule ibiragola ina ti mo gi halu puyabu unugohayagi howa hongohe ibalu widinaga aeaneru pulo yalu piagadagua ibida piai helolebero. Tiha mo ko holene ogoni ibirangi ina ti biamogo nabi erembira mialu waholebero, lalu Anduane Homogohanda laya lalu Yaremaiahanda lene.\*

\* 18:6: Ais 45.9, Md 20.15, Lm 9.21    \* 18:17: Yob 27.21, Yar 13.24, 46.21



*Wali agalime Yaremaia mo ko hole manda binigo ogo*

<sup>18</sup> Wali agali tigua lalu, Iname Yaremaia ibuhondo mbirale bulene mbira ngago abale bima. Ibugua bi lalu karuni henene ndo lalu ka. Loma binigo mo miaga karu tigua mana ina lawai haga wiyago yu wanahe lawai halu holebira. Agali mini timbuni gigabiwi bogabi karu tiguabi nde bi bayale ina langiaga wiyago biabe ogoni bialu langialu holebira. Ngode Datagaliwabenaga bi mana latagi haga karu tibi nde biabe ogoni bialu holebira. Anidagua bilo áyu iname agali Yaremaia biagonaga bi nahalehe wahalu ibu godi deni pu helamiya, laya.

<sup>19</sup> Ani layagola Yaremaia ina Anduane Homogohondo lalu, Anduane Homogo-o ina bi larogobi waitigi bu karunime i mini lalu bi laragonibi hale howa manda bibe. <sup>20</sup> Agali mbirame mendealihondo bayale biragola ko biadai biagabe. Agali uruni tigua i gundu pilelonaga uli tombaho kago ai mana ala ina biruligo manda bibe. Abale ini keria kaware ibuwa keba ho kegoni wahalu wali agali uruni biamogo bibe laruligonigo <sup>21</sup> ai wahalu wali agali uruni tinaga waneiginiru hina garime homai helabelo hameledo. Wali agali uruni tinaga waitigi karume ibalu maru bo hilo wahelo hameledo. Agali karu warago hongohe tara tara ngarume bo homelelo hameledo. Igiri daliahe karubi wai hamaha homelo. Wali bedaru ti waneiginibi nahe biralu ti agalinibi mbira nahe dalo wali berelo hameledo. <sup>22</sup> Waitigi karu ti ibalu uruni baba wai biragola mogo lowa gi timbuni halu dugu taraore bilo waitigi abale ibilabe. Inaga waitigi karume i minalu bole gono wiahama peda. <sup>23</sup> Anduane Homogo-o tigua i bole ndelalu kagoni i manda bide. Anidagua bialu kago ai ina ti dara halu ko biyago domo wa nahabe. Tihondo keba howa tinaga waitigi karume bo biba helo helabe, lalu Yaremaiahanda lene.

## 19

*Yuda wali agali todobene be dindime wabini pambulo waharadagua bulebira lenego ogo*

<sup>1</sup> Anduane Homogohanda ihondo lalu, Yaremaia-o todobene be dindime wabini mbira ina yolobu yalu puwa agali ala hene miniwi maru karubi loma binigo mo miaga maru karubi ti i baba mandagi ma lalu <sup>2</sup> Hinomo dindi biagoha pole hariga Yarusaleme tanoha howa tagira piaga pabe kawareni panga mini Todobene Be Dindime Wabini Pambu Lene laga ngago tagira pilimu. Ani puwa ina bi ogodagua lalu lamibe. <sup>3</sup> Yuda wali agalirunaga kini kamirubi Yarusaleme wali agali kamirubi ti bibahendeme bi o larogo hale hadaba. I Anduane Homogo Hongo Haiheore Isaraele wali agali tinaga Ngode Datagaliwabe ini kogome bi henene larogo. Mani ti dalu ogoria mo ko holene timbuni mbira ibilolebero. Ani ibiledogola wali agali mbirale ogoni ani ibilaya larane hale hararume mogo taraore lolebira. <sup>4</sup> Wali agali tigua ihondo erembira ngialu puwa dama karunaga dabuni ira hagua ngabiaga inisenesiru lomabu delalu kagonaga anidagua bulebero. Wali agali tinibi Yudanaga kiniru tibi tinaga mamali henerubi bibahendeoreme bamba dama uruni manda nabioire hene. Anigo áyu dege howa tigua dama tara tararuhondo bi pupu wialu kagome dindi ogo inaga deni mo ko halu dodohe ngelayada. Irane nawini ngagoria tigua agali mende homelo bameore bo wahalu kagonaga darama dindi ogoria odo paya bidagoni. <sup>5</sup> Dama mitangi bialu gime wabini mini Balahondo bi pupu wulenaga anda bia howa anda uruniha howa ti waneiginiru Bala odagonihondo loma bialu irani bo delaga ka. Anigo inaga mana ogoni ndo ina tihondo ogonidagua bilimu nale. Ti mana ogonidagua bulene nga lalubi mbira inaga mini ti natalebumi. <sup>6</sup> Anigo ai Anduane Homogo inimeore larogo maniore dindi ogoni mini Tobede lalubi dindi ulini Hinomo lalubi mbiralime nalalu holebira. Dindi ogoni mini Wali Agali Dewaore Bo Wahene lalu lolebira. <sup>7</sup> Dindi ogoniha Yuda wali agalirubi Yarusaleme wali agalirubi tigua mbirale tara tara bulene

para ho ngago ina hapai halu mo waharogola tigua mbira bibe nahe holebira. Waitigi agali karu ibalu tini abale bo hilo wahai helolebero. Ani berogola tinaga tingini homa payabu ngaru nogo gabuarumebi ega bedarumebi ti tomo halu nai helo mulebero. <sup>8</sup> Yarusaleme mo ko heneore wulebira. Ani ngagola wali agali dindi taraha howa ibirarume ko hiriribi uruniore Yarusalemeni tagira ibinidago hondowa hiriri halu gi taraore holebira. <sup>9</sup> Waitigirume Yarusaleme wali agaliru baba wai bule howa pigane Yarusaleme tano ala ho hagira bulebira. Ani biragome Yarusaleme wali agali tininaga tomo winiru no biba howa genda timbuni yu holebira. Ani howa nolene nawidagola tininaga waneiginiru balu nolebira. Nolene nawi degedagola tini balu naga naga bulebira, laya lamibe, Anduane Homogohanda lene.

<sup>10</sup> Anduane Homogohanda laabo halu lalu, Yaremaia-o ina bi ogoni lai howa todobene be dindime wabini yidegoni agali i heba ibiyaru ti handayaho kaore pambu labe. <sup>11</sup> Ani pambu lowa inaga bi ogodagua lamibe. Anduane Homogo Hongo Haiheore kogome Yuda wali agali mo ko hai halu Yarusaleme tano todobene be pambulo waharogola lone wabibe nahe wiagadagua ngelo ina Yarusaleme bo giallo wahai holebero. Ani bo giallo waharogola agalime lone biadai bibe nahe wulebira. Yuda wali agali homararunaga homali Tobede dindini ngagola homenerunaga tingini au lolebe tobahe wulebira. <sup>12-13</sup> Anduane Homogo ina tiga tigaore larogo dindi ogobi wali agali ogoria karuhondobi pani mialu bai holebero. Ani berogola inaga deni Yarusaleme dodohe ngubi Tobede dindi ale dege wulebira. Kini andagabi wali agali maru karu andagabi Yarusaleme tanoha anda bibahende karuni inaga deni dodohe ko hai hene dege holebira. Irane Yarusaleme wali agalirume tinaga anda dangini daligaha iraga howa yakundiruhondo mbirale lomabu mialu ira hagua ngabilonaga delaga mini inisenesiru delalu dama tara tara hearuhondo waini ibaru loma bialu odo wigi biyagonaga ina mo ko halu bo giallo wahai holebero, lalu Anduane Homogohanda lene.

<sup>14</sup> Ani langiya handala ina bi lamibe layadagua lamule Tobede dindi wahalu Yarusaleme dai buwa Anduane Homogonaga anda Yarusalemeha anda polene pabe panga haraba wiagoha anda puwa tamuha wali agali ngoaiho haga wiagoria pu haru. Ani pu howa wali agali bu hearuhondo bi ogodagua lamiru. <sup>15</sup> Anduane Homogo Hongo Haiheore Isaraele wali agalinaga Ngode Datagaliwabehanda bi lenego languliya baya hangu hale hadaba. Ibugua lalu, Wali agali bibahende Yarusaleme tanoha kamirubi maru Yarusaleme tano kawareni ha para parabu haga kamirubi ti bibahendeme mine halu inaga bi mana hale nahaga kamigoni. Ani bialu kamigonaga inime ti pani ngialu bo wahai holene ko hiriribi mbira yu ibule lalu lo wirugoni mo yu anda ibulebero, laya lalu Yaremaiahanda lene.

## 20

### *Yaremaiahanda loma binigo mo miaga Pasuahondo bi hongohe laminigo ogo*

<sup>1</sup> Yaremaiahanda bi ogonidagua lalu heagola loma binigo mo miaga mbira ibu hale ho hene. Agali ogoni ibu Ime igini mini Pasua howa ibu Anduane Homogonaga anda handayaho haga agali haguane mbira hene. <sup>2</sup> Ibugua Yaremaianaga bi hale howa agali maru bu hearuhondo lalu, Yaremaia tibume minu balu Anduane Homogonaga anda panga mbira mini Beniyamininaga Panga Daliga laga wiagoria pu senime dariba hadaba, layagola dariba hene. <sup>3</sup> Ani buwa horo mendeni Pasua ibugua Yaremaia golope hayagola Yaremaiahanda ibuhondo lamialu lalu, Anduane Homogohanda inaga mini Pasua ndo inaga mini Wali Agali Bibahende Mo Gi Hai Haga wero, leda. <sup>4</sup> Anduane Homogoibunime lalu, Ina ogodagua bulebero, leda. Ina iha ko mbira anda ibilo henge merogola anda ibirago hondowa inibi inaga nenegeali bu karubi bibahendeme mogo lalu gi hai holeberemi. Ina handayaho keore dege inaga nenegeali karuni waitigime ibalu ti bo wahai holebira. Ina Yuda wali agali bibahendeore Babilono

dindiha kini kagonaga giha minu ya hai holebero. Anidagua berogola ibugua maru homelo bo wahai halu maru Babilono dindiha garabayabu yalu dai bulebira. <sup>5</sup> Ani bialu tinaga waitigirume tano ogoha muni ngamiruni bibahende mo yai helalu yári bayale ngamiru bibahende mo yai helalu Yuda kininaga muni yárirubi bibahende mo yai dege helolebero. Waitigi agali urunime hongo howa wai buwa ti wayali halu mbirale uruni aria mbira ibira naheore Babilono dindiha mo yalu piai holebira. <sup>6</sup> Pasua-o hale harene. Ínibi ínaga damene í andagaha mandagi haga kamirubi tí bibahende Babilono dindiha garabayabu yalu piai holebira. Ína ke howa bi dewa ínaga nenegeru lamirigo ai ínaga nenege urunibi ínibi tí bibahende Babilono dindiha howa homai haramigola tínaga tingini Babilono dindiha hora holebira, lalu Yaremaiahanda lene.

*Yaremaia ibugua genda yu howa Anduane Homogohondo gomogomo bi lenego ogo*

<sup>7</sup> Anduane Homogo-o í ínaga biabe biahalu ha lowa mo hondo hariya. Ani birigola ina nde ínaga bi ogoni hale halu biruya. Ína ihondo hongooore harigola ina ínaga bi larigo mo wahabe nahe harugoni. Anidagua birugo ai áyu wali agali bu karu bibahendeme í mege bialu oba halu haabo ka. <sup>8</sup> Bibahendengi ínaga bi latagi halu koria ina bi hongo howa loliya ogodagua la lalu mo la hariligoni. Wai ibulebira tíha mo ko holene ibulebira loliya mo la haga í kegoni. Anduane Homogo-o ínaga bi lamerogola wali agali hale hararume ihondo bi kuru lalu mo taga haabo haragoni. <sup>9</sup> Ina lalu, Anduane Homogo í mitangi nabi waharo, lalu ínaga minini howa ina bi latagi nahe yu waharogoni, laruyaguabi ínaga bime ínaga kabanaha ira hungu ale kikiaulo dalu haabo ka. Ina latagi nahole lowa yu donge hole bialu koria anidagua bibe nahe ínaga kuniha howaore hongohe datagi haragome bi nale donge habe nahe kogoni. <sup>10</sup> Ina hale haga bialu hewaria agali hearume tini dege lagalaga bialu lalu, Yaremaia ibu agali bi laga howa ibugua bi laragome wali agali bibahende o karu mo gi hai halu kago agali ogoni godi deni íbu helamiya abaleore ibilo, laga biya. Agali ínaga nenege bu henerumebi mo ko holene mbira íha ibalu í bope halu hengedo wahelo hamelowa handaya ho ka. Tigua lalu, Iname Yaremaia mo hondo howa ibugua mana liahe biyagonaga pai pai biadai bimabe, lalu kagoni. <sup>11</sup> Anduane Homogo-o ainde í ami agali hongohe mbira haradagua buwa ina í mo wiaga kegoni. Anidagua kegola mbirale ko uruni tiniha dai biragola tigua í mo ko habe nahe holebira. Anidagua birago hondowa tini taga timbuniore holebira. Taga holene ogoni ereba nahe tíha wiaabo holebira. <sup>12</sup> Anduane Homogo Hongo Haiheore kego ina wali agali bibahendenaga miniha wu karuni ogoale nga lo manda biai howa godini íbu karu ti tigabi dabolene ngadaguaore dabaga kegoni. Ani kegonigo áyu ina ínaga genda ogo ínaga giha ya harogoni. Wali agali o karume mine halu ko biyagonaga pani ina merego hondole hameledo. <sup>13</sup> Anduane Homogohanda wali agali ko biaga karume burupale yagibano karu bo waholilonoibunime biamogo bialu haga kagonaga ina turu howaibunaga mini yaraga halu iba gana lama.

<sup>14</sup> Í aiyahanda horo í taba henenedangi Anduane Homogohanda í mo ko henedale nde karulapedale. Ibugua horo ogoningi mbirale tara bayale mbira binidale nde ogoni bayaleore kaleda. <sup>15</sup> Horo ogoningi agali mbirame í taba hanaya lama í aba turu helo lamule puwa lalu, Í oneme igiri taba hanayago ai í igini mbira ka, lalu lamiyagome agali ogoniore í aba mo turu hole napelo Anduane Homogohanda bo wahenedale nde karulapedale. <sup>16</sup> Anduane Homogohanda tano timbuni wiaru bo gialo wahayadagua agali ogoni mo ko halu bo wahelo hameledo. Anduane Homogohanda tano uruni dara emeneorebi naheore hene. Egabiore laragola wali agali tano uruniha karume waitigirume abale ibalu ho paya biraria handalu mogo lowa gi halu dugu timbuni bialu yiyi laragola agali ogonime hale helo hameledo. Horombe ni hanuni haragola waitigi biarume tanoha wai bule anda ibalu howa wai huario lalu kagola ibu hale helo

✧ 20:15: Yob 3.1-19

hameledogoni. <sup>17</sup> Ainde agali ogoni ibugua i aiyā tombeha berewaore dege ba nabinida. Ani binidale nde i aiyānaga tombe inaga homali bu hinalu aiyā tombehe biraabo kagola i aiyā ibu gali bere dege biraabo kaleda. <sup>18</sup> I aiyā tombeha biraabo hoa nale tagira ibirugome genda tara tara wiaru yu howa horo bibahendengi taga pani naabo halu homolobodago aginagadabe, lalu Yaremaiahanda lene.

## 21

### *Anduane Homogohanda Kini Sedegaianaga bi hale nahenego ogo*

<sup>1</sup> Kini Sedegaiahanda agali kirali Yaremaia i hewaria pudaba leneyago labo ibiyagola ogonongi Anduane Homogohanda ihondo bi langiya. Agali kirali ogonilabo Malagia igini Pasuru Masea igini loma binigo mo miaga Sebanaiāla libugua ibuwa ihondo langialu lalu, <sup>2</sup> Babilononaga Kini Nebugadenesahanda ina baba wai bialu kago ai Anduane Homogohanda ina biamogo bilo ina inanaga bi ibuhondo lahabe. Nebugadenesahanda ina baba wai nabi wahalu pelonaga Anduane Homogohanda bamba ina mamaliru biamogo bialu agalime nabiaga ale mbira biniyadagua buluba badago ani bilo ina Anduane Homogohondo bi lamibe, laya lene.✧

<sup>3</sup> Ani layagola ina agali kirali biago labohondo lamialu lalu, Libugua Kini Sedegaiahondo bi ogodagua lalibu. <sup>4</sup> Anduane Homogo Isaraele wali agalinaga Ngode Datagaliwabe kago ibugua bi ogodagua laya, Áyu Babilono kini kagomeibunaga ami agali haru halu ibuwa Yarusaleme tano ho hagira bidagoni. Ani biragola tí Isaraele wali agalinaga ami agalime wai bule tanoha howa tagira pialu karia ina Babilonoha howa Kaledeali bu karume tí Isaraeleru baba wai bialu tí bope helo ina uruni biamogo bulebero. Ani berogola tina ami agali karume wai biaga danda timu yu karu yalu dai bidaba laragola tano tamuha yalu dai bulebira. <sup>5</sup> Inime tihondo bu miniha keba timbuniore howa tandaga ho kogo tí baba hongo howaore wai bialu pani ngialu bolebero. <sup>6</sup> Wali agalibi nogo tara tara bu karubi bibahende bo wahaiore holebero. Tí kamigoha warago ko tara mbira ibilarogola ogonime tí homoleberemi. <sup>7</sup> Anduane Homogo ina lone ladege berogo. Wali agali dewaore warago ko ogonimebi waimebi hina gari ibiragomebi tí homoleberemi. Ani bidagola mani wali agali nahome yu wahene bu karu Kini Nebugadenesa haluibunaga ami agali bu karume ibalu Kini Sedegaia ibi inaga agali haguane bu karubi heba minu yu piai helolebero. Waitigi hiriribi urunime Isaraele wali agali bo wahai hole lo mandabu ka. Nebugadenesa ibugua bidaba lalu bi laragolaibunaga ami agali karume ayu tibu wai biagane nene gadele ngagome tí dibai holebira. Ibugua tí dara halu yupe naholebira. Tí kamiruni aria mbiraligo helo wa naholebira. I Anduane Homogo ina bi lo ledogoniore, laya lene.

<sup>8</sup> Anduane Homogohanda laabo halu lalu, Yaremaia ina inaga bi ogo wali agali lamibe. Anduane Homogo ina bi ogodagua laro. Áyu tihondo hariga kira tí dabolenaga mo walia haro. Hariga mbirago tí homa nabi bayale holene nga. Mendegoha tí homolene nga. <sup>9</sup> Wali agali tano ogoniha haga karu bibahende homai holebira. Maru waitigime bo wahalu maru hina garime homalu maru warago ko mbira ibiragome homalu urunidagua bialu homai holebira. Anigo ti homa nabi holene hamelo heagua nde Babilononaga ami agali tano ho hagirabu kagoha hole tano wahalu tagira polene nga. Tagira poragola Babilono ami agali bu karume minu yania haragola ti homa nabi holebira. <sup>10</sup> Ina Yarusaleme mo ko helo yu wahalu tano ogoniore mo ko halu bo gialahole biai helo mandabu henego ko. Babilononaga kini kagome tano ogoni karulowaibunaga ami agali karuhondo lamialu, Tano bibahende bo heda hadaba, lelo ina yupe holebero. I Anduane Homogo ina bi o ledogoniore, laya.

### *Anduane Homogohanda Yudanaga kinibi ibu damenebi pani mulebero lenego ogo*

✧ 21:2: 2 Kin 25.1-11, 2 Bit 36.17-21

11-12 Anduane Homogohanda laabo halu lalu, Yaremaia-o ina Yudanaga kini kagobi ibu damene darama mbiraore bu karuhondobi ogodagua lamibe. Debidi aguanene bu kamiru tigua Anduane Homogo inime bi larogo hale hadaba. Horo bibahendengi tigua godi hale halu howa bi tigatiga lolene ngadaguaore lalimu. Agali mbirame mendealinaga mbirale ngago mo page biniyagua nde anduane kago ibuni ya dai bia lalu ibu gendaho kago mo palia halimu. Anidagua nabirimiyagua nde ina tigua mana ko bialu kamigonaga keba timbuni halu ti pani ngialu mo ko holebero. Inaga bu miniha keba holene ira hungu ale bialu kago mbiralime bahundia habe nahe holebira. 13 Yarusaleme-o ina daligani howa handape halu dindi ulini panda panda ngaruha handa amu nana bialu i ege tole mbira daligaore wini wiradagua bide. Ani buwa Yarusaleme wali agali tigua bi ogodagua laga kami. Ina baba wai bibehe mbira ai kabe. Inanaga tano ogoha anda ibabehe mbirali ai kabe, lalu haga kami. Ani lalu kamigo Anduane Homogo inimeore tihondo henene larogo ina ayu ila waitigi harogoni. 14 Anduane Homogo ina tiga tigaore larogo tigua mana ko bialu harimigonaga pani ngialu ti minu bolebero. Ina Yarusalemeha ira hedope harogola dangiha bo dalu ira hungu timbuni kilikulu laradagua bialu Yarusalemeni kini anda kagobi anda damene bu karu bibahendebi daiore helolebero, lalu Anduane Homogohanda laya lene.

## 22

### *Yaremaiahanda Yudanaga kinihondobi wali agalihondobi bi latagi henego ogo*

1 Anduane Homogohanda lalu, Yaremaia ina Yudanaga kini kago andaga puwa 2 ibuhondo bi agua labe, i Debidinaga aguanene howa kininaga dagiani biruwa ina Anduane Homogonaga bi o larogo hale habe. Kini inibi inaga agali haguane karumebi inaga wali agali karumebi ti bibahendeme bi ogo hale holene nga. 3 Anduane Homogohanda lalu, Tigua mana bayale tigabiore ngaru talialu bilimu. Agali mbirame mendealinaga mbirale ngago mo page biniyagua nde anduane kago ibunaga mbirale page binidaru yadai bialu ibu gendaho kago mo palia halimu. Waneigini ti aba homene karuhondo mana ko nabi wali dalo ti agalini homene bedaruhondobi wali agali dindi taraha howa ti baba mandagi ibu hene karuhondobi uruni mo ko nahe bayuwa helo halimu. Dindi ogoria howa tigua wali agali ko nabi karu bame homelo bo wa nahalimu. 4 Tigua inaga bi larogo hale howa talialu bialu haabo harimiyagua nde mani tinaga Kini Debidi aguanene ti dege ha aribia haga bulene wulebira. Ani howa kini tini nogo hosime gililo yalu piaga mini karisini bialu nogo hosinibi bialu tano ogoninaga pabe haraba ngatoria puibu bigi bialu holebira. Ani bialu tinaga agali haguanerubi wali agali bu karubi ti kini heba puibu bigi bialu holebira. 5 Anigo tigua inaga bi larogo talialu nabirimiyagua nde ininaga minini howa larogo ina kini andaga ogoni mo ko halu bo gialabaga bulebero. I Anduane Homogo ina bi o ledogoniore, laya lene.\*

6 I Anduane Homogo ina Yuda kini kago hameigini holebiragonaga lalu bi ogodagua laro. Kininaga hameigini i bayaleore mbira ale kegoni. i baya dege lalu Gileada dindi alebi Lebanono hari alebi mbira kegoni. Anigo ina i mo ko harogola i ko ngubiore dindi ko yobi be abalu taule ngaligobi wialu wali agali lenego mbira naholebira. 7 Ina i mo ko helo agali maru ibilolebero. Tigua ayuru yalu ibuwa inaga anda ira tamia kambulo mbaraleme bideru bo gialobaga bialu gabuwa irani dai helolebira.

8 Ani bidagola mani wali agali dindi tara tara bu ngaruha howa dindi ogoriani ibalu bolangua haga bulebira. Ani ibalu tigua Yarusaleme mo ko hene ngago de hondowa tini lagalaga bialu lalu, Anduane Homogohanda tano timbuni ogoni mo ko henedago irane aginagadabe, lolebira. 9 Ani lowa tini degedege laedene bialu lalu, Mbirale o biyadagoni irane wali agali uruni tigua habo nalolene bi tinaga Ngode Datagaliwabela

\* 22:5: Md 23.28, Lg 13.35



lowinigo wahalu puwa dama mitangi bialu mbirale gime wabini wiaruhondo bi pupu wima piyagonaga mo ko henego nga lolebira, laya lene.

*Yaremaiahanda wali agalihondo Kini Yoahasana dugu bulene nga lenego ogo*

<sup>10</sup> Yuda wali agaliru-o Kini Yosai homayago tigua ibu dara howa dugu nabilimu. Tigua ibu igini Kini Yoahasana dara howa dugu timbuni bulene nga. Yoahasa ibu ina kamagoria howa tigua haru piyago ibu lone dai nabulebira. Ibugua ibuninaga dindi lone nahondolebiraore. <sup>11</sup> Yoahasa ibu mini mende Sulumu henegome ibu aba Yosai henegoria ibu kini ha aribia hene. Anduane Homogohanda Yoahasa mitangi bialu bi mbira ogodagua lene. Yoahasa ibu Yarusaleme yu wahalu puwa lone dai nabulebira.✧ <sup>12</sup> Waitigi bu hearume dindi taraha minu garabayabu yalu piyagoha halu homolebira. Ibuni dindi ogoria lone nahondolebiraore, laya lene.

*Yaremaiahanda Anduane Homogonaga bi Kini Yahoiaгимihondo laminigo ogo*

<sup>13</sup> Anduane Homogohanda laabo halu lalu, Agali mbiragome ibuni hangu mitangi bialu maru mo hondo howa mana tigabi ndo bialu anda timbuniore hobane dewa daligahayagi haga hagabi bu helayago ibuniha genda timbuniore wulebira. Ibugua damene bu hearume anda ogoni bia hadaba lowa ibugua tihondo yolobi mbira namiya. Agali urunime biabe bameore bu wahalu piya.✧ <sup>14</sup> Ibugua bi ogodagua laga biya. Ai ininaga anda timbuniore bu helolebero. Anda ogoni daligaha hobane dewa helolebero, laya. Ibugua wá anda ibilonaga diri tombelo wigi bialu anda hái ira tamia bayaleore wiaru bogo mbaralaga buwa hai para haya. Anda biago mo yári bia halu peni daramabime hiraya. Ani biyagonaga ibuha genda timbuniore wulebira.

<sup>15</sup> Kini-o inaga ira tamia bogo mbaralaga biniru dewaore mo ngelowa kegome í mo kini bayale helenego kobe toba ho kebe. Í aba ibu iba hinaru karulape nalu turu ho haga hene ndobe. Ibugua wali agalihondo mana bayale tigabi dege bialu hayagome ibuni holene bayale wini. <sup>16</sup> Ibugua wali agali yagibano hearunaga godi hale halu manani tigabi dabolene wiagoria howa mo tale biaga henegome wali agali bayaleore hai hene. Anduane Homogo inaore tigatiga larogo mbirali ini kogo baya hangu mandabi kagome biagane mana ngago ogoniore. <sup>17</sup> Anigo ina ini hangu mitangi halu mbirale ngaru dimagoli halubi mbirale uruni mulenaga ke halu ohowa biagabi ke. Mbirali ko mbira nabi bame kago ina homelo bo wahaga kegoni. Wali agali bu karu bope halu mo ko haabo haga mbira í kegoni ndobe. I Anduane Homogo ina bi o ledogoniore.

<sup>18</sup> Irane anidagua bialu kegome Anduane Homogohanda Yosai igini Yuda wali agalinaga Kini Yahoiaгимi mitangi bialu lalu, Yudanaga Kini Yahoiaгимi homarangi wali agali mbirame dara howa lalu, Ai i hameneore-o i mbaliniore-o, lalu mbirame dugu bialu naholebira. Mbiralime, Inaga agali haguane-o inaga kini-o, lalubi dugu nabulebiraore.✧ <sup>19</sup> Agalime nogo dongi homaragola mo wahagadagua ibu homaragola ibunaga tingini bameore mo waholebira. Tigua Yarusaleme tanonaga pabe tagirahayagi ibunaga tingini gililo yalu tagira puwa mo waholebira, laya, lene.

*Anduane Homogohanda Yarusalemehondo bi hongheore lenego ogo*

<sup>20</sup> Anduane Homogohanda lalu, Yarusaleme ina Lebanononaga hari ngaruha irigi howa bi dalimuore labe. Basana dindinaga hari ngagoria inaga bi hale helobi Abariminaga hari bu ngagoria howabi ina dara halu kiabu dugu hongo howa bialu habe. Agali inaga nenege bu hayaruni homai hayagonaga ani bibe. <sup>21</sup> Abale í bayale howa mbirale dewa wu hengi ina ihondo bi langirugoni. Inaga bi laruruni ina hale habe manga hari. Bamba í igiri daliahe hengi howa inaga bi larogo mo wahaabo haga harigo áyubi ina anidagua biaabo haga kegonida.✧ <sup>22</sup> Waitigi agaliru puyabu ale ibalu inaga agali haguane karu puloyu piai holebira. Waitigi agalirume inaga nenege bu karu dindi

✧ 22:11: 2 Bit 36.1-4 ✧ 22:13: Yar 17.11, Mai 3.10, Hab 2.9 ✧ 22:18: 2 Kin 23.36-24.6, 2 Bit 36.5-7 ✧ 22:21: Yar 19.15, 32.30

kaundiaha garabayabu yalu piai holebira. Inime mana ko biaga wirigo mitangi budai bialu tagaho holebere. <sup>23</sup> Tigua Lebanononi ira tamia bayale bu hearu aria dibu pelowa anda bia hayagola í bayaleore ko manda bu kebe. Tandaga hondolene timbuniore walime gali taba hanalu biruwa tandaga handalu biragagobi ina ga lalu dugu bialu holebere, laya lene.

*Anduane Homogohanda Kini YahoiaGINIHONDO bi lenego ogo*

<sup>24</sup> I Anduane Homogo haluhe haabo haga kogome Yudanaga Kini YahoiaGIMI igini YahoiaGINI ihondo bi tigatiga mbira langero.\* Í baya taraore howa inaga gi tigayaginaga hondone magi i gubalini haga ale keyaguabi ina nde í yu wahole kogoni.☆ <sup>25</sup> Waitigi agalirume í mo ko hole manda biragola ti hondowa gi hariliruhondo ina í ti giha minu ya holebero. Agali uruni Babilononaga Kini Nebugadenesa halu ibunaga ami agali biaru tigua í bo wahole karu tihondo ina í minu mulebero. <sup>26</sup> Íbi í aiyabi libu haru dindi tara ngagoha minu yu pu waholebero. Dindi ogoni libu dalu ndogo libu dindi ogoniha halu homoleberebi. <sup>27</sup> Libugua libuni dindi ogoria lone hondole dai bulene hame timbuni lo ha holeberebigu nde dai bibe naheore wulebira, lene.

<sup>28</sup> Yaremaiahanda lalu, Kini YahoiaGINI ogoni ibu iba be dindime wabinigo pambu lene wali agalime hame nale ngaligobi hayadabe. Anduane Homogo ibugua YahoiaGINI halu ibu one waneiginiru dindi tara ti manda nabini ngagoha pelolebero layadago irane agibe. <sup>29</sup> Isaraelenaga dindi-o Isaraelenaga dindi-o ina Anduane Homogonaga bi larago bayuwaore hale harene. <sup>30</sup> Anduane Homogohanda ogodagua lara. Agali ogoni ibu waneigini mbira hono wia nabi daloali ale ka lalu gilibu wibe. Ibugua birago damene bibahende bayale mbira naholebira. Ibu igini bu karu aria mbirame ibunaga henge mialu kini ha aribia halu Kini Debidinaga biragane dagia ngagoria bira aribia howa Isaraele dindi handayaho howa ha aribia haru naholebira. I Anduane Homogo ina bi o ledogoniore, laya lalu, Yaremaiahanda lene.

## 23

*Kini bayale mbirame Isaraeleali haru holebira lenego ogo*

<sup>1</sup> Anduane Homogohanda bi ogodagua laya, Agali haguane bu kamiruni tigua inaga wali agali karu mo ko halu kamigonaga tíha genda timbuniore ibulebira. Tí nogo sibi baya hangu hinu haga agali bayale ndo howa bo talia togo laga kamigoni. <sup>2</sup> Anduane Homogo Isaraele wali agalirunaga Ngode Datagaliwabe inime inaga wali agaliru haru haga agali haguane kamiru tihondo bi ogo larogo. Tigua inaga nogo sibi bu hearu talia togo lalu baya hangu handayaho naharimi. Ani birimigonaga Anduane Homogo inime heneneore bulego larogo. Tigua mana liahe birimigonaga ina mana lalu pani nalimulo handayaho holebero. <sup>3</sup> Ani bialu inaga nogo sibiru inime dindi tara taraha talia togo laruruni bibahende lone mo mogo bialu haru dai biai howa tini haga pabeha helolebero. Heledogola tigua waneiginiru dewaore hono wialu ho dame bulebira.☆ <sup>4</sup> Ani kagola Anduane Homogo inime ti haru helo agali haguane dabo helaga berogola tigua haru holebira. Ani kagola nogo sibiru ti gi holene mbira nawi howa hada payabu holebira. Ti aria mbira pu ereba naholebira. I Anduane Homogo ina bi o ledogoniore, lene.

<sup>5</sup> Anduane Homogo inime larogo. Ira dibini tene kagoria dongoria bialu anda hagadagua mani ina agali bayaleore mbira Kini Debidinaga aguaneneme hondo helole horo pongo bo winigo ngelo ko. Agali ogoni ibu mini tigabi mana bayale bulene ngagonaga haru haga kini holebira. Ani howa ibugua wali agali dindi bibahendeha karuhondo mana bayale dege bialu haabo holebira.☆ <sup>6</sup> Agali ogoni ibalu ibu kini kang

\* 22:24: Kini YahoiaGINI ibunaga mini mende Konia hene. ☆ 22:24: 2 Kin 24.8-15, 2 Bit 36.9-10 ☆ 23:3: Yar 32.37, Ese 34.13 ☆ 23:5: Yar 33.14-16

Yuda Isaraelebi bibahende genda mbira nawi bayale dege holebira. Tigua lalu, Kini ogoni ibunaga mini ogo Anduane Homogo Ibu Inanaga Mini Tigabi Wulene Teneore Ka, lolebira.

<sup>7-8</sup> Anduane Homogo inime larogo, Ina wali agali dindi ogoha heneru bo batagi haru-runi lone haru dai bulenaga horo mbira pongo bo winigo ngeledo. Horo ogoningi ina ti lone haru dai bialu tininaga dindi ogoria helarogola bayuwa turu hagabu holebira. Tigua tinaga bi larago heneneore lowa mo hongo halu ogodagua laga, Heneneore Anduane Homogo haluhe kago ina Iyibi dindiha howa haru tagira ibiyagonaga minini howa larogoni, laga heneya. Ai ti haru halu dai berogola tigua bi lo aribia lalu, Heneneore Anduane Homogo haluhe kago ibunaga minini heneneore larogo. Ibugua ina Isaraele wali agali uyurayagi howabi dindi tara taraha howa abale bo talia togo layaru lone inane dindiore wirimagoria haru dai biragonida lolebira, lalu Anduane Homogohanda lene.

*Bi mana henene ngadagua ndo latagi haga hearuhondo Yaremaiahanda bi lenego ogo*

<sup>9</sup> Yaremaia ina lalu, Agali bi mana henene ngadagua ndo latagi haga karuni mitangi bialu inaga miniha gi timbuni howa duru lalu kogoni. Ina Anduane Homogo ibunaga bi mana tigabi bayaleore ngago baya hangu manda biai howa kogome i agali lulu iba dewa nowa luluyu ibagabu hagadagua kogoni. <sup>10</sup> Yuda wali agali dindi ogoriani karu tigua Anduane Homogo yu wahalu onene agalini karume tinaga one agaliniru yu wahowa tini bame kayu yama ibaga biagadagua bialu ka. Ani bialu kagome Anduane Homogohanda bi layago mitangi bialu koria dindi ogo mo ko haragoni. Dangi dataniru bibahende bu karuni gau lai lalu dindi ogo hangume kiabu dugu bialu kagoni. Wali agali bu karume hariga tiga nabi ngagoha pupebe bialu howa mana ko ngubi ngaru hangu mo tene howa biaabo lalu kagoni, lalu.

<sup>11</sup> Ani larugola Anduane Homogohanda lalu, Loma biniru mo miaga karubi inaga bi mana latagi haga karubi ti bibahendeme i manda nabi karume biagadagua dege bialu kagoni. Ti inaga andaha biabe bialu ha howa dege mana ko ngaruni bule gi nahe elaha howa bialu kagoni. <sup>12</sup> Ani bialu kagonigo ai ti hariga pialu karuni ina mo gondola holebero. Ani buwa ina ti arumaha pelo helape harogola ti pilolebira. Inime ti mo ko holene horo pongo bo winigo ngeledogo horo ogoni tagira ibiragola ina ti mo ko howaore bole ngo. I Anduane Homogo ina bi o ledogoniore, lene.

<sup>13</sup> Ibugua laabo lalu, Samariaha bi mana latagi haga agali hearume bamba mana ko ogodagua bialu hearia handaru. Tigua dama hearu mitangi bialu bi pupu wule gime wabini Balanaga minini mbiwia lalu howa inaga Isaraele wali agali heneru hariga ko ogoniha haru piai haya.\* <sup>14</sup> Anigo ina Yarusalemeha bi mana latagi haga karume mana koore ngubi nabibehe ngaru bialu heane handaru. Tigua wali agali dabu binigonaga mana pugualu ke dewa lalu ka. Maru karume mana ko ngaru bilonaga tigua mo hongo haga ka. Mbiraorelimebi mana ko uruni erembira mialu pubagi nahe bibahendeme biai haga ka. Yarusaleme wali agali koore Sodomo Gomorala wali agali henegobi kane hondo ko.\*

<sup>15</sup> Anigo Anduane Homogo Hongo Haiheore kogo ina bi mana latagi haga Yarusalemeni karu uruni mitangi bialu bi ogodagua laro. Ina tiha tandaga nolene timbuniore ibilolebero. Tandaga ogoni tomo mbirale nabe nahe kaubi alebi iba ko tomia binigobi nelu mo nela holebero. Ani buleberogo irane bi latagi haga urunime ti Anduane Homogo manda nabi howa bialu hagadagua bialu wali agali dewaore ti talima pelo biawai hayagola mana ko ogoni dindi bibahendeha biame hayagonaga ina ani bulebero, lalu Anduane Homogohanda laya, lalu Yaremaia ibugua lene.

\* **23:13:** Samaria ogoni Isaraele wali agali tinaga tano dunini timbuni mbira uyurahayagi wini. Ani winigo Yaremaia ibu wene naheha waitigi ibuwa Samaria tano bo gialabagabu wahalu Samaria wali agali dindi taraha garabayabu yalu pene. ✨ **23:14:** Pig 18.20, Ese 16.49

<sup>16</sup> Anduane Homogo Hongo Haiheore kago ibugua Yarusaleme wali agaliruhondo lamialu lalu, Bi mana latagi haga karume mbiwia halu bi larago hale nahalimu. Urunime tí mo hondo howa ke halu tí bayale holeberemi lolebira. Tigua de gandeba hendene tingi howa tininaga miniha winiru dege latagi haga ka. Tigua bi uruni latagi helo ina nalami ko. <sup>17</sup> Agali urunime ti mine howa wali agali inaga bi mo wahalu karuhondo ke howa lalu, Anduane Homogo ibugua tí bayale haabo holeberemi, laya lalu laga bialu ka. Wali agalirume mine howa tinime hameleda ale bialu haga karu tihondo bi mana latagi haga biaru tigua mbiwia halu lalu, Mo ko holene mbira tíha nawulebira, lalu haga ka laya, lene.

<sup>18</sup> Ani layagola Yaremaia ina lalu, Bi mana latagi halu mbiwia haga agali biaruni aria mbiralime Anduane Homogo ibugua ogo ale bule lomanda bu kago ti namandabi ka. Ti mbiraoreli hangumebi Anduane Homogonaga bi larago hale hene nahe. <sup>19</sup> Ai hale hadaba laro. Anduane Homogonaga lembo holene ngagome puyabu iba dalu heba ibagadagua daliga howa dalialu puyabu timbuniore humbirini wai ibiradagua bialu agali ko biaga uruninaga embone dambigi bulebira. <sup>20</sup> Anduane Homogohanda keba haho ngane mbirale bule mitangi biyaruni biaiore halu waholebira. Maha wali agali tigua mbirale uruni áyu langerogo wále howa manda biai holebira laro, lalu Yaremaiahanda lene.

<sup>21</sup> Anduane Homogohanda lone lalu, Ina bi mana latagi haga agali uruni pudaba nalewaore tinime abale porabupe halu bi latagi hole piya. Ina tihondo bi ogo lalimu lalu lamia nabiwaore tinime inaga minini howa mbiwia halu mani bulebiragonaga bi latagi haya. <sup>22</sup> Ti ibuwa inaga miniha mitangi bidodagua manda buwa lamidale nde tigua inaga wali agali íbu ngoai halu inaga bi mana heneneore ngago tihondo lamule pedale. Ani lamidale wali agali uruni tigua nde hariga ko ngagoha pupebe bialu karuni wahalu beregedalu mana ko ngaru bialu karunibi wahai kale.

<sup>23</sup> Anduane Homogo ina tíhondo hale harogo. Tígua manda bialu kamiria i dindi mbiraore hangunaga Ngode Datagaliwabe kabe tobaho kamibe. Ani ndoyago i dindi bibahendeha haame howa Ngode Datagaliwabe kogoni. I degeme kawarebi kaundiahabi haga ko. <sup>24</sup> Agali mbira handabe nahe ha do heagua Anduane Homogo ina handabe nahe kobe. I Anduane Homogoore howa dindiha harihabi haame kogome ha do karuni handa walía hai holebero.✠ <sup>25</sup> Agali ke howa mbiwia haga karuni tigua ke howa inaga minini howa latagi halu hayaruni hale harugo ai tigua lalu, Emaga mbira handarugo Anduane Homogohanda hondo ngiya, laga biaga ka. <sup>26</sup> Ainde agali uruni tigua wali agalihondo bi henene ngadagua ndo lamiaga kago horo agongi mini beregedalu waholobadabe. <sup>27</sup> Tini lomanda bialu iname emaga uruni wali agalihondo lamirimayagua nde bamba tinaga mamalirume i yu wahalu dama mitangi bialu gime wabini Balahondo bi pupu wialu henedagua dege áyubi nde inaga wali agalirume i embeda halu pelo tigua ani bialu kagoni. <sup>28</sup> Anduane Homogo ina heneneore larogo. Mbiwia haga karume emaga mbira handayagua nde bame emaga handayago latagi holene nga. Ai ina agali mbiraligohondo inaga bi mana latagi helonaga lamiruyagua nde ibugua inaga bi ogoni tigatiga latagi holene nga. Inaga bi ogoni tomo nolene widi lini bayaleore ngaligobi nga. Agali mbiwia haga uruninaga bi bame widi puni ale nga. <sup>29</sup> Anduane Homogo inime bi heneneore larogo. Inaga bi ogoni hongoheore ira hungu alebi ege tole timbuni hari neneha ngaruni bo podobaga biaga hama timbuni wiagagobi nga. <sup>30</sup> Anigo hale hadaba. Anduane Homogo inime tigatigaore larogo. Mbiwia halu inaga bi mana latagi haga ko lalu karuni tigua inaga bi henene ndo lalu ka. Agali karunaga bi mo pagebu yu howa lalu ka. <sup>31</sup> Heneneore larogo agali mana urunidagua biaga karuni tigua lalu bi ogoni Anduane Homogonaga larama lowa ke haga karuni baba ini waitigi ho kogoni ndobe. <sup>32</sup> Agali uruni tigua emaga nagaloneru Anduane

✠ 23:24: 1 Kin 8.27, Iba 139.7, Amo 9.2-3

Homogonaga bi ogoni lalu ke howa inaga wali agali karuhondo latagi haga bu karuni Anduane Homogo i ti baba waitigi ho kogoni. Tigua ke howa bi tara tara dewaore lalu kagome inaga wali agali heneru kaundiaha haru pu tara haya. Ina tihondo bi ogoni latagi hole pudaba nale. Anigome tigua wali agali uruni biamogo nabiaga ka. I Anduane Homogo ina bi o ledogoniore, laya lene.

*Yuda wali agalime Anduane Homogo mo genda henego ogo*

<sup>33</sup> Anduane Homogohanda Yaremaia ihondo lalu, Wali agali mbiramebi inaga bi mana latagi haga mbiramebi loma binigo mo miaga mbiramebi ihondo hale halu lalu, Anduane Homogohanda bi gendabi mbira ihondo layabe be nalebe,† laragola ina tihondo bi ogodagua lamibe. Tigua Anduane Homogo ihondo genda mo ngialu kamigoni. Ani bialu kamigonaga ina ti bo batagi holebero, lalu lamibe. <sup>34</sup> Inaga bi mana latagi haga mbirameyaguabi loma binigo mo miaga mbirameyaguabi agali damene karu aria mbirameyaguabi bi mbira lalu, Anduane Homogonaga bi ogoni gendabioreda layagua agali ogoni ibunibi ibu damene bibahende karubi mana lalu bo waholebero. <sup>35</sup> Tigua tinaga nenegebi ti hamene karu bababi bi lalu howa Anduane Homogohanda bi agua ladai biyabe lalu hale haga bilimu. <sup>36</sup> Anigo tigua Anduane Homogonaga bi ogoni gendabida lalubi mbira nalalimu. Tinaga bime dege tini mo genda haga kami. Anduane Homogo Hongo Haiheore i Ngode Datagaliwabe haluhe kogome bi larogo tinime mo libilaba laga kami. <sup>37</sup> Agali mbirame bi mana latagi haga karuhondo bi mbira hale hoa biyagua nde ogodagua lolene nga. Anduane Homogohanda ladai agua biyabe lariyaguabi ndo Anduane Homogohanda bi agua layabe lolenebi nga. <sup>38</sup> Anigo tigua lalu, Anduane Homogonaga bi gendabioreya, larimiyagua inime tihondo heneneore larogo. Tigua bi ogonidagua lalu langirugo hale nahe tingi howa lone Anduane Homogonaga bi gendabioreya larimidago mine harimida. <sup>39</sup> Ai tigatigaore larogo bi anidagua laga karuni heneneore ini kogoria nahelo dindi kaundiaha bo pelolebero. Ina tinaga mamaliruhondobi tinihondobi dindi bamba ngini biago heba mo waholebero. <sup>40</sup> Ani berogome ina ti mo taga harogola tiha taga holene wiaabo kagola tigua embeda naholeberemi, lalu Anduane Homogohanda lene.

## 24

*Yaremaia ina poge lini do henearia handaru, lenego ogo*

<sup>1</sup> Kini Nebugadenesahanda Yarusaleme bo haealabaga biai halu Yuda wali agali bu hearu Babilonoha garabaya haru piai hene. Ibugua Kini Yahoiaigimi igini Kini Yahoiaigini ibu mini mende Konia henegobi Yuda dindiha agali haguane hearubi agali mbirale tara tara wabiaga mandabi hearubi haru pene. Ani biyagola mani howa Anduane Homogohanda de gandeba mbira i Yaremaiahondo walia haya. Ani walia hayagola ina handalu hewaria mbasigedi nu kiraha poge lini dewaore do henearia handaru. Mbasigedi nu kira ogonilabo Anduane Homogonaga anda panga haraba wiagoria winiya.\* <sup>2</sup> Mbasigedi nu mbiragoha poge lini bayaleore pigane denego boga biragola do wiagagobi henearia handaru. Nu mende wiagoha poge lini ko tagaraga mbiralime nabe nahe hono wiaria handaru. <sup>3</sup> Ani hondo hewagola Anduane Homogo ibugua ihondo langialu lalu, Yaremaia-o ina mbira agi hendedebe, laya.

Ani layagola ina ibuhondo ladai bialu lalu, Nuha poge lini do hono ngaria hendedo. Poge lini maru baya taraore do wialu maru tagaraga ko ngubi mbiralime nabe naheore do ngane hendedo, laru.

<sup>4</sup> Ani larugola Anduane Homogo ibugua ihondo bi mende lalu, <sup>5</sup> I Anduane Homogo Isaraele wali agalirunaga Ngode Datagaliwabe kogome ina Yuda wali agali maru bo

† **23:33:** Hiburu bi lalu Genda Bila kirabali irane mbiraore dege manda biaga. Yarusaleme wali agalirume bi ogoni manda buwa mo ginibia halu ogodagua, Anduane Homogonaga bi gendabiore, laga hene. \* **24:1:** 2 Kin 24.12-16, 2 Bit 36.10



taliatagi halu dindi tara Babilono dindiha garabayabu yalu pu helenego ini mitangi bialu koria wali agali uruni ti poge lini bayale do wiyagobi ka. <sup>6</sup> Ani kagola ina ti baya hanguore handayaho howa ti biamogo bialu tihondo bayale dege bialu haabo holebero. Ani bialu ti dindi ogoriani helo lone haru dai bulebero. Haru dai buwa ina ti hingedape nahe baya hangu mo hongo halu holebero. Ina ti bayale anda helo hangaradagua bialu lone dugu wa naholebero. <sup>7</sup> Ani helowa ina tinaga bu miniha mini gahenge mo wia harogola tigua iniore Anduane Homogo henedalo manda bulebira. Ani manda buwa tigua iniha mini hanaho howa i koria dai bialu ti inaga wali agaliore howa i nde tinaga Ngode Datagaliwabe holebero.

<sup>8</sup> Ani buwa Anduane Homogo ina Yudanaga Kini Sedegaia halu ibu damene karubi ibunaga agali haguane bu karubi Yarusaleme wali agali tini dalu ogoniha karubi maru Iyibi dindiha pu karubi ti poge lini tagaraga ko ngaru agalime nabe nahedagola mo wahagadagua ina ti bibahende wahi holebero. <sup>9-10</sup> Wali agali dindi tara tarani padarume Yuda wali agaliruhondo ina mbirale uruni biya larane hale howa ti mogo timbuni lo holebira. Wali agali uruni maru waitigime bo wahalu maru hina garime homalu maru warago ko tara tara ngarume balu homelolebira. Ani biragola ina ti minalu dindi tara tara ngaruha purogo lelolebero. Anidagua bialu ina ti dindi tinaga mamalirubi tinibi helo mirugoria nahelo bo talia togolai holebero. Wali agali dindi tara tara Yuda wali agali pu helaga berogoha hene dindi aba bu karume Yuda wali agali mege tara bialu bi kuru lalu ti hondo oba halu holebira. Wali agali tara uruni tigua mendeali kagohondo ha halu howa lalu, Yuda wali agali mo ko hayadagua i ko habe, laga bulebira, lalu Anduane Homogohanda laya lene.

## 25

### *Kini Nebugadenesahanda Yuda wali agali mo ko holebira lenego ogo*

<sup>1</sup> Yosaia igini Yahoiaigimi ibu Yudanaga kini mali tebira henego mali mane hayagola Anduane Homogohanda bi mbira Yuda wali agalihondo lole manda buwa bi ogoni i Yaremaiahondo langini. Mali ogoningi Babilonoha Nebugadenesa ibu kini pigane hene.\* <sup>2</sup> Anduane Homogonaga bi mana latagi haga Yaremaia ihondo bi ogo langiyago ina Yuda wali agalibi Yarusaleme wali agalibi ti bibahende hale hai helo tihondo latagi halu haru. Ina tihondo lamialu lalu, <sup>3</sup> Amono igini Yosaia ibu Yudanaga kini mali haleria (13) hene lowa hama ibalu mali áyu kamago pira kirani tebira (23) kama. Mali pira kirani tebira (23) uruniha howa Anduane Homogohanda bi mana langiyago ina ti hale halimulo latagi halu haabo harugo nde tigua hale habe mangaho harimigoni ndobe. <sup>4</sup> Anduane Homogohanda ibunaga bi mana latagi haga agali dewaore ibilaga biyarume bi latagi hayagola tigua mine halu bi hale nahe haabo harimi. <sup>5</sup> Anduane Homogonaga bi mana latagi haga agali uruni tigua lalu, Wali agali ti hangu hangume bu mini beregedalu hariga koha pialu kamigo wahalu mana ko bialu kamirubi wahi halimu. Tigua mana ko uruni wahi harimiyagua nde dindi ogoni Isaraele wali agali tinagaore wiaabo helo bamba Anduane Homogohanda ti mamaliruhondo mini ngagoria bayale haabo halimulo helolebira.\* <sup>6</sup> Tigua dama mitangi bialu mbirale gime wabini ngaru talima pialu urunialehondo bi pupu wialu uruninaga biabe bialu holene nawiore. Tigua tininaga gime mbirale mbira wabirimigome Anduane Homogo mo keba nahalimu. Tigua Anduane Homogonaga bi layago talialu bialu kamidale nde ibugua tiha ko holene naibile kale, lene.

<sup>7</sup> Anduane Homogo ibugua tihondo ogodagua lara. Tigua inaga bi hale nahe howa dama mitangi bialu bi pupu wulenaga mbirale tinaga gime wabirimirume i mo keba harimi. Mana ogonidagua bialu harimigome tiha ko holene ogoni tinime mo wirimigoni, lara laya.

\* 25:1: 2 Kin 24.1, 2 Bit 36.5-7, Dan 1.1-2    \* 25:5: 2 Kin 17.13, Yar 18.11

<sup>8</sup> Anidagua birimigome Anduane Homogo Hongo Haiheore kago ibugua tihondo lalu, Tígua inaga bi mana talialu nabi harimigonaga <sup>9</sup> ina agali dindi abene uyurahayagi padaru bibahende olai halu inaga biabe biahaga agali Babilononaga Kini Nebugadeneza kago ibubi ola dege bulebero. Ani olarogola agali uruni tigua dindi ogonibi wali agali padarubi dindi maru kaware palia paraho padarubi bibahendeore mo ko hai helo ibilolebero. Dindi ogoni mo ko haiore halu labuore ngelonaga bibahendeore bo gialo wahai hole agali dindi abene uyurahayagi karu ibilolebero. Anidagua dindi labu ho ngaria hondowa wali agali tara bu karume ti mogo timbuniore lo holebira. I Anduane Homogo ina bi o ledogoniore, lene. <sup>10</sup> Ina anidagua bialu bu miniha dungulo holenebi turuho holenebi agali karume wali dabu bulene manabi bibahende biba hai helolebero. Agali marume widi dambialu ege tole mo beregedaga ngago mo beregedaga bialu widi lini tilitola lalu dambiaga agali mbira nahedagola biabe ogoni biaga wiyago nabi bame wulebira. Ani bialu dindi uruniha weli nawiyagola tinaga wá holene halebi mbira nadolebira. ✧ <sup>11</sup> Dindi ogoni bibahende bo labu halu mo ko hai hene bameore wulebira. Ani bialu wali agali karu tigua Babilono kini kagonaga garabaya biabe ale bialu mali pira karia (70) haabo holebira. ✧

<sup>12</sup> Mali pira karia uruni piyai kagola Anduane Homogo ina Babilono dindinaga kini kagobi ibunaga wali agali bu karubi bibahende tigua mana ko biyagonaga pani nelu mulebero. Anidagua bialu Babilono dindi timbuni Kaladia dindiha ngago mo ko howa bo labu harogola dindi bameore wiaabo hene wulebira. <sup>13</sup> Ina Babilono dindibi kinibi pani nelu dindi bibahendeha mo ko holene ibilolebero lalu Yaremaia lamirugo ibugua latagi hai hayaruni bibahende mbuga ogoha nga. <sup>14</sup> Ina Babilono dindiha bu karume ko bialu hayarunaga yolo pani nelu mulebero. Kini hongohi dindi tara taraha bu karume ibalu Babilono bo haealabaga bialu wali agali garabaya biabe ale bialu helolebira, laya.

*Anduane Homogohanda wali agali dindi tara taraha karu pani nelu mulebero lenego ogo*

<sup>15</sup> Anduane Homogo Isaraelenaga Ngode Datagaliwabe ibugua ihondo lalu, Yaremaia-o ina gabo beha waini iba berelo yu kogoni inaga keba holene ngagonaga manane yu ko. Waini iba gabo be ogoniha bedaore wali agali dewaore bu kagoha yalu pobelo ngulebero. Ani ngerogola tigua waini iba gabo be ogoniha howa nelu ina mo na habe. <sup>16</sup> Tigua waini iba ogoni nalu luluyu holebirago irane aginagabe. Ina tinaga waitigi ti mo ko halu bai helo ibilarogome ani bulebira.

<sup>17</sup> Ani laya handala ina gabo be waini iba bere biago Anduane Homogonaga giha howa yamialu wali agali dindi tara taraha hearia puwa ti nelu mirugoni.\* <sup>18</sup> Ina Yarusaleme ala pialu Yuda dindiha tano maru wiaruhabi pialu kini heagobi agali haguane bu hearubi hearia puwa Yuda dindiore mo kooore hene wilonaga ina ti waini iba ogoni nelu miru. Wali agali tara tara bu karume uruni bidago de hondowa ti mogo lalu gi timbuni holebira. Ani hondowa wali agali uruni tigua wali agali mende kagohondo ha halu howa tigua lalu, Yuda wali agali mo ko hayadagua í ko habe, laga bulebira. Mbirale uruni ayubi ani dege bialu ka. <sup>19</sup> Ani bialu ina gabo beha waini iba bedago Iyibi kini karubi tinaga agali haguane karubi wali agali bibahende bu karumebi ti nai helo yu pu mulebero. <sup>20</sup> Iyibi wali agalibi dindi tara tara wali agali Iyibi dindiha ibu karu tibi nelu mulebero. Ani bialu Usu dindiha kini bu karubi Pilidia dindiha kini bu karu tihondobi nelu mulebero. Pilidianaga tano Asegelonobi Gasabi Egeronobi Asadodonaga mendehayagi karubi tigua waini iba ogoni nelu mulebero.

✧ **25:10:** Ais 24.7, Yar 7.34, 16.9, Ese 26.13, Hos 2.11, Mo 18.22-23 ✧ **25:11:** 2 Bit 36.21, Yar 29.10, Dan 9.2

\* **25:17:** Bi Yaremaia ibugua wali agalime waini iba gabo beha nelu mo yalu piya ledago waini ibuni henene ndo ogoni manane dege leda. Manane ogoni Ngode Datagaliwabehanda wali agali tigua mana ko bialu hayagonaga pani mialu bolebero lalu lene nga. Yaremaia 46.51 handabe.



<sup>36</sup> Anduane Homogohanda nogo sibi datani nalu haga dindi bayale ngaru heba mo ko hai holebiragonaga nogo sibi hinaga karume dugu biaruago hale hadaba. Haru haga karubi tinaga sibi datani nalu helolene mbira nahedagola mini burugulalu kiabu dugu biaruago hale hadaba. <sup>37</sup> Anduane Homogohanda miniha keba timbuniore ho howa dindi bayale nogo sibiru ti paliaga dangite timbuni wiago heba mo ko hai hene. <sup>38</sup> Anduane Homogo ibuni ibiraha laiono gabuame ibuni haga ngagoha howa tagira ibagadagua ibulebira. Anduane Homogohanda keba timbuniore howa Yuda dindi mo ko halu bo haealabagabu wahelonaga waitigiru abale ibilolebira. Ani ibiragola dindi mo labu ho wahene mbirale mbira nawi bame dindi hangu ibira holebira, lalu Yaremaiahanda latagi hene.

## 26

### *Wali agalime Yaremaia homelo bo wahole manda binigo ogo*

<sup>1</sup> Yosaiia igini Yahoiaigimi ibu Yuda wali agalinaga kini heangi Anduane Homogohanda Yaremaiahondo bi lamialu lalu, <sup>2</sup> Anduane Homogo inime langerogo Yarusaleme tano ha wali agali ibu ngoai haga hama ngagoria pu habe. Pu howa wali agali Yuda dindi bibahendeha howa i mitangi bialu lotu lole inaga andaha anda ibiraruhondo inaga bi mana latagi habe. Ina bi langiruruni mbira yu wanahe bibahende lamiaiore habe. <sup>3</sup> Wali agalime inaga bi uruni lameregola hale halu tigua mana ko bialu hayaru wahai halu bu mini beregedalu holebira badago nde ani lamibe. Tigua bi uruni hale halu mini beregedayagua nde ti mo ko halu pani mule laruruni wahalu mini wiadai bialu biamogo bulebero, laya. <sup>4</sup> Anduane Homogohanda ina tihondo bi ogodagua labe laya. Tigua inaga bi mana langirugo hale halu baya hangu talialu bialu halimu laya lalu lamibe. <sup>5</sup> Agali maru ininaga bi mana latagi halu mbiwia haga biarume bi langiyarubi baya hangu hale halimu labe. Bibahendengi agali maru inaga bi mana latagi hole pudaba laga birugolabi tigua uruni hale nahagaore kamigoni. <sup>6</sup> Tigua inaga bi mo wa haabo harimiyagua bamba inaga anda Silo tano bo giallo waharudagua inaga anda ogobi bo giallo waholebero. Ani berogola wali agali mani holebirarume tini ha halu howa lalu Anduane Homogohanda Yarusaleme tano bo giallo wahayadagua i mo ko hene koore ngubi holebere laga bulebira, labe laya. <sup>\*</sup>

<sup>7-8</sup> Ani laya handala Yaremaia ibu heyalu puwa Anduane Homogohanda bi lamibe layaruni wali agalihondo lamule pene. Ani puwa lamiyagola loma binigo mo miaga hearubi mana latagi halu mbiwia haga hearubi wali agali bibahende bu hearu tibi bibahendeme bi ogoni hale dege hene. Tigua Yaremaiahanda bi layago hale hai howa Yaremaia minu yania howa lalu, Ayu i homolene nga, lene. <sup>9</sup> Tigua lalu, Bi ko ayu Anduane Homogonaga minini howa laro lowa bamba Silo tano mo ko hayadagua Anduane Homogonaga anda ogo mo ko holebira larigo agibe. Ina bi ko ogonidagua lolene nawi. Dindi ogo mo ko haragola dindi ogoriani wali agali lenego mbira munini bu naholebira laridagua lolene nawi, lene. Tigua ani lai howa wali agali bibahende Anduane Homogonaga andaha biru hayarubi abale tagira ibai howa Yaremaia heagoria ho mabu bini.

<sup>10</sup> Ogoningi Yuda wali agalinaga agali haguane maru kini andagaha berearume bi ogoni layago hale halu abale puwa Anduane Homogonaga anda daligaha tini biragane mbira panga haraba mini Panga Gahenge laga winigoria pialu berene. <sup>11</sup> Ani biruwa loma binigo mo miaga hearubi mana latagi halu mbiwia haga hearubi ti bibahendeme wali agali bu hearubi agali haguane hearubi tihondo lalu, Agali ogo ibugua tano ogo mo ko holebira lalu mbiwia halu layago ti bibahendeme hale hai harimigo ai ibuni homelo bolene nga, lene.

<sup>\*</sup> **26:1:** 2 Kin 23.36-24.6, 2 Bit 36.5-7    <sup>\*</sup> **26:6:** Yos 18.1, Iba 78.60, Yar 7.12-14

<sup>12</sup> Ani layagola Yaremaia ina ladai bialu lalu, Anduane Homogo ibunime tano ogobi ibunaga anda ogobi kirabali mo ko holebira lalu ina latagi hole pu layaru bibahende latagi hai harugoni. <sup>13</sup> Ai mana ko áyu bialu kamiruni wahai halu tí áyu kamiruni lone ho beregedai halu dai buwa Anduane Homogo inanaga Ngode Datagaliwabe mini yaraga halu holene nga. Tínaga bu mini beregedalu dai buwa ibugua ledago talialu bialu harimiyagua nde ibugua tí bai halu mo ko holene yu anda ibule layagoni naibulebira.✠  
<sup>14</sup> Anigo áyu i tínaga gini kogonigo tínime iha bulene tigabi ngago mitangi bidamidagua bia dege bidaba. <sup>15</sup> Anigo tígua i barimiyaguabi nde i Anduane Homogohanda ogodagua bulebero lalu ibunaga bi uruni yalu pu layagola ibirugo ai irane ogoninaga agali mbira ko nabi kago homelo barimiyagua nde tini pani nolene wulebira. Pani nolene ogoni tano ogobi wali agali tano ogoha haga karu bibahendemebi nai holeneore wulebira, lalu Yaremaiahanda lene.

<sup>16</sup> Yaremaiahanda bi ogoni lai hayagola agali haguane hearumebi wali agali bibahende hearumebi tigua loma binigo mo miaga hearubi bi mana latagi halu mbiwia haga hearubi tihondo lamialu lalu, Agali ogo ibugua bi Anduane Homogo inanaga Ngode Datagaliwabenaga minini howa latagi halu kagoni. Ani biragome iname ibu bo waholene irane mbira nawidago ibu ba nabimiyá, lene.

<sup>17</sup> Ai Yuda wali agalinaga agali ala hene miniwi maru hearume heyuwa wali agali ngoaiho hearuhondo lalu, <sup>18</sup> Bamba agali Hesegaia ibu Yuda dindini kini heangi bi mana latagi halu mbiwia haga Moresede tanoha agali mbira mini Maiga henego ibugua mbiwia halu Yuda wali agali hearuhondo lalu, Anduane Homogo Hongo Haiheore kago ibugua Yarusalemeore balu bo gialohole bialu Saionoore bame godo mende mende buwa kagola e hangabehe wulebira. Anduane Homogonaga anda kagoria irabu tegi aribia holebira, lalu latagi heneyago.✠ <sup>19</sup> Ai Maigahanda bi ani layago hale howa Kini Hesegaiahandabi Yuda wali agali hearumebi ibu homelo bo wahenebe. Bo wanaheyago. Kini Hesegaia ibugua ani nabi howa Anduane Homogo ibunaga andaneha íbu dai buwa Anduane Homogohanda ibu dara habe lalu hene. Ani layagola Anduane Homogohanda wali agali uruni mo ko halu bole hayago nabe wahene. Anigo áyu iname Yaremaia bo wahole bialu kamagonime inaneha genda timbuniore mo yu anda ibuleberema, lalu hene.

<sup>20</sup> Mani howa agali mbira mini Uria ibu Semaia igini howa tano mini Kiriada Yarimi howa íbu henegome lalu, Heneneore Yuda dindibi Yarusaleme tanobi Yaremaiahanda layadaguaore mo ko holebira, lene. <sup>21</sup> Kini Yahoiaigimibi agali haguane bu hearubi ami agali bu hearubi tigua Uriahanda bi ogonidagua layago hale howa ibu homelo bo waholene hariga mbira taya bialu hene. Tigua bi ogonidagua lowa kinihanda Uria ibu homelo bo wahole taya bialu ka layago hale halu ibu gi howa Iyibi dindiha ibida pene. <sup>22</sup> Ani ibida pu hearia Kini Yahoiaigimihanda Agabo igini Elenadanabi agali marubi heba Iyibi dindi Uria damu pudaba lene. <sup>23</sup> Ani laya handala tigua puwa Uria Kini Yahoiaigimi berearia minu yalu dai bini. Minu yalu dai biyagola kinihanda ibu homelo ayu tibume ma pugulene nga layagola tigua balu homelayagola ibunaga tingini wali agali daga nawini ko karu homaragola hora haga wiagoha bape halu hora hene.

<sup>24</sup> Anigo wali agali tigua Yaremaia homelo bo wahole bialu hemiria agali mbira Sabana igini mini Ahigama henegome Yaremaia mo wiyagola tigua Yaremaia mo ko nahe helo wahene.

## 27

*Yuda wali agalime Kini Nebugadenesa andaneha holene winigo ogo*

<sup>1</sup> Yosaiá igini Sedegaia ibu Yudanaga kini heangi Anduane Homogohanda Yaremaia ihondo langialu lalu,✠ <sup>2</sup> Ira mbalape mbira mo ya nogo dongoneru mo ya bigi bialu puwa



nogo bulumagame biabe bilonaga mani dariba hamagamaga bu haga ngaligobi mbira wabuwa ininaga mani mo paga howa yu habe. <sup>3</sup> Ani buwa ina inaga bi mbira languleberogo kini uruhondo pelabe. Idomo kini kagobi Moaba kini kagobi Amono kini kagobi Taia kini kagobi Saidono kini kagobi ti bibahendehondo inaga bi lamibe. Kini uruni tinaga agali dabo helene haguane maru Yarusalemeha Kini Sedegaia baba bi lole ibu karu tigua tinaga kini urunihondo lamule pelo lamibe. <sup>4</sup> Agali urunihondo bi ogodagua labe. I Anduane Homogo Hongo Haiheore Isaraele wali agalinaga Ngode Datagaliwabe kogome tinaga kini karuhondo bi ogodagua laro. <sup>5</sup> Ini hongo timbuniheore kogome dindi wabialu wali agalibi mbirale dindini ngarubi karubi ema bialu piaga bedarubi wabiai hene i kogoni. Ini hameme wali agali dindi tu wa muabirago miruli. <sup>6</sup> Ayu dindi uruni bibahende inaga biabe biahaga Babilononaga Kini Nebugadenesahondo mo miai haru. Ani bialu nogo gabua bu karubi ibugua handaya howa haru hai holebira. <sup>7</sup> Ayu hameigini dindi tara tarani karu bibahende ibu andaneha halu mani ibu igini aguanene holebirarunaga andanehabi ha dege bulebira. Ti Babilononaga andaneha haho ngamine dege Babilono mo ko halu bo haealatogo lolene horo ina mbira wubagiho ngogo ogoni tagira ibulebira. Horo ogoni tagira ibirangi kini hongoheore karume ibalu Babilono bope halu tinaga garabaya biabe ale biahalu holebira.

<sup>8</sup> Anigo wali agali dindi mbirahayagi padarume Babilono kini kagonaga biabe biaha ira mbalapeme nogo bulumaganaga mani daribaho helagadagua nahelayagua nde ina wali agali dindi ogoniha padaru bo haealabaga bu wahai holebero. Anduane Homogo inime tinaga waitigi bu karu ti baba wai bilo ibilarogola ti tomo nolene tubagi hai halu warago ko tara ngaru anda ibulebira. Anidagua bialu ina Kini Nebugadenesahanda wali agali dindi ogoniha padaru bibahendeore bo wahai helo helolebero. <sup>9</sup> Aniore bule ngogo tigua bi latagi halu mbiwia haga karumebi de gandeba handaga karumebi emaga hendenegonaga galone dabaga karumebi damahe karumebi hubibi biaga bu karumebi tigua bi larago hale nahalimu. Agali uruni ale biaga karume bi ogodagua lolebira, Ti Babilono kini kago andaneha naholeberemi, lalu kago <sup>10</sup> henene ndo ke halu ti mo hondo hara. Ani bialu karu tigua agali uruninaga bi larago mo henene harimiyagua ina ti dindi tara ngagoha bo talupe lolebero. Ani berogola ti mo ko heneore holeberemi. <sup>11</sup> Ani anigo agali hameigini dindi mbirani padaru tigua Babilononaga kini kagome ti handayaho helo yupe ho kagola Babilononaga kini kago ibugua agali uruni haru holebira. Ani haru howa nogo bulumagame biabe bilonaga ira mbalapeme mani dariba hamagamaga biagadagua tigua biabe bialu hole ani bilo wahayagua nde ina wali agali dindi ogoniha karu ti helo wahalu tininaga mabu ngaruha tomo hangalu helo waholebero. I Anduane Homogo ina bi o ledogoniore, laya.

<sup>12</sup> I Yaremaiahanda bi ogonidagua dege Yudanaga Kini Sedegaiahondo lamialu ogodagua laru. Yuda wali agali tiore tinaga ma Nebugadenesa andaneha podape halu Nebugadenesa halu ibunaga wali agalirubi tigua ti handaya ho helo halimu. Tigua ani haru helo harimiyagua nde bayale holeberemi. <sup>13</sup> Anduane Homogo ibugua lalu, Hameigini mbiragome Babilono kini kago andaneha habe manga hayagua nde uruni ti waitigime bo wahai halu hina garime homalu warago ko tara ngarumebi balu homelolebira. Inibi inaga wali agali bu karumebi mine halu ogonidagua bialu kamiria tiha mo ko holene ogoni anda ibuligo de hondo halimu, laya. <sup>14</sup> Anidagua bulene ngago manda bialu mbiwia haga agali karume, Ti Babilono andaneha nahalimu, laragola bi ogoni hale halu mo henene nahe halimu. Bi uruni ke hangu howa lalu holebira. <sup>15</sup> Anduane Homogo ibugua tigatigaore lalu, Agali uruni tigua bi ogoni lole pudaba larugola ibini ndo tini miniha howa loabirago ale hangu lalu ka ndobe. Tigua agali ke haga uruninaga bi hale halu mo henene harimiyagua nde Anduane Homogo ina tinaga dindiore ngamigoria howa ti bo batagi harogola homoleberemi. Ani bialu ke howa mbiwia haga karuni tibi homolebira, laya laru.

<sup>16</sup> I Yaremaiahanda Anduane Homogonaga bi ogoni loma binigo mo miaga hearuhondobi wali agali bu hearuhondobi lamialu, Anduane Homogo ina tigatigaore larogo agali mbiwia haga karume lalu, Anduane Homogonaga andaha wiaga mbirale wiaru mo yalu puwa Babilonoha ngaru uruni Yarusalemeni ngelo lone mo yu dai bulene kaware dege ngagoni, laragola tigua tihondo ke howa larago mo henene nahalimu. <sup>17</sup> Tano ogo mo ko halu bo gialabagabu wahaiore holigo agali urunime bi larago hale nahalimu. Ti bayale holenaga Babilono kini kago andaneha holene nga. <sup>18</sup> Agali uruni ti bi mana latagi halu mbiwia haga henene heneyagua Anduane Homogohanda ibunaga bi tihondo laminiyaguabi nde mbirale maru Anduane Homogonaga andaha wiaga wiarubi kini andagaha wiaga wiarubi Yarusaleme bibahendeha wiaga wiarubi waitigirume abale mo yalu Babilono pu nabi ngelayago mo yalu napelonaga tigua Anduane Homogo Hongo Haiheore kago ibunihondo bi lamulebirabe.

<sup>19-21</sup> Kini Nebugadenesahanda Yarusaleme ibalu ibugua Yuda wali agalinaga Kini Yahoiagimi igini Kini Yahoiagini minu yalu agali haguane Yarusalemenagabi Yudanagabi bu hearu bibahendeore Babilono dindiha garabaya bu yu piai hene. Ani buwa ibugua mbirale bayale maru Yarusalemeha ngelo wahene. Ibugua ege tole boronosime anda gene wabu helearubi iba biraga dange be timbuni boronosime wabu wini wiagobi iba dange be mo paga howa berelaga gene boronosime wabu heleagobi mo ya nabi ngelo wahalu pene. Ani bialu inaga andaha mbirale bayale damene wiarubi kininaga andaha wiarubi Yarusaleme bibahendeha wiarubi mo yai nahe dege. Ani binigonaga i Anduane Homogo Hongo Haiheore Isaraele wali agalinaga Ngode Datagaliwabe kogo ina tihondo bi ogodagua laro. <sup>22</sup> Waitigi ibulebirarume mbirale uruni Babilono mo yu piai holebira. Mbirale uruni Babilonoha ngane dege horo mbira inime wiabagiho ngeledogo tagira ibirangi inaga mbirale uruni lone mitangi bulebero. Horo ogoningi mbirale uruni lone mo yu dai bialu Yarusalemeha ngelolebero. I Anduane Homogo ina bi o ledogoniore, laya lalu Yaremaiahanda lene.

## 28

### *Hananaiahanda wali agalihondo ke henego ogo*

<sup>1</sup> Sedegaia ibu Yuda dindiha kini heane dege mali maria hene. Mali ogoninaga ege dauni hayagola Anduane Homogonaga bi mana latagi haga agali mbira mini Hananaia Gibeono tanoali Asura igini henego ogoni ibu Anduane Homogonaga andaha ibini. Ibuwa loma minigo mo miaga hearunaga deni howabi wali agali maru bu hearunaga deni howabi ibugua ke halu bi latagi howa mbiwia halu hene. <sup>2</sup> Ibugua lalu, Anduane Homogo Hongo Haiheore ina Isaraele wali agalinaga Ngode Datagaliwabe kago ibugua bi ogodagua laya, Babilononaga kini kagome ti agalime nogo bulumaga kira tinaga biabe bilo ira mbalapeme nogo kiranaga mani dariba hamagamaga biagadagua buwa ti handayaho howa haru ka. Ani heagola ina hende ogoni minu tungulo hole birugo ai ibugua ti naharu holebira. <sup>3</sup> Mali kira ngago andaneha howa dege ininaga andaha wiaga damene Kini Nebugadanesahanda Babilono mo yu pene biaruni bibahende Yarusaleme mo yu dai biai holebero. <sup>4</sup> Ani bialu Yahoiagimi igini Kini Yahoiagini Babilono garabaya bu yalu piyagobi Yuda wali agali piyarubi bibahende haru dai bulebero. Anidagua larogoni irane Anduane Homogo inime ira mbalapayabi bulumaganaga mani hende hamagamaga biaga ngagome ti hende hamagamaga buwa haru kago golope holebero lalu laro. Ai Anduane Homogo inaga bi lai harugoni, lene.

<sup>5</sup> Ani layagola Anduane Homogonaga bi mana latagi haga Yaramaia ibugua loma binigo mo miagarubi wali agalirubi bibahende Anduane Homogonaga andaha bu hearunaga deni howa bi ladai bini. <sup>6</sup> Yaremaia ibugua lalu, Heneneore Anduane Homogo ibugua Hananaia inime ayu laridagua bilo hameledo. Ayu ina mbiwia harigoni

henene ani biai helo hameledo. Ibugua mbirale ibuninaga andaha wini biaru mo yu dai biai halu wali agali Babilonoha bu karubi bibahende Yarusalemeha haru dai biai helo. <sup>7</sup> Anigo áyu ínibi wali agali hale ho kamirubi tígua bi mende larogo hale hadaba. <sup>8</sup> Abaleore howa hama ibinigo áyu kamagoniha howa Anduane Homogonaga bi mana latagi haga agali ala hama ibinirume lalu wai bulenebi mo ko holenebi warago ko tara tara bolenebi wali agali dewaore bu karuha ibalu dindi timbu wima pedaruhabi tagira ibulebira lalu lo wigi bini. <sup>9</sup> Anidagua lenego ai agali mbirame mbiwia halu Anduane Homogonaga bi mana latagi haga áyu karume latagi halu wali agali bayale holene ibulebira lalu mbiwia hayagua iname bi ogoni henene larabe be ke harabe tobaho holeberema. Anigo mani howa tinaga bi larago henene hayagua nde heneneore agali ogoni ibu Anduane Homogohanda bi ogoni latagi hole pu layagola ibinidalo manda buleberema, laru.

<sup>10</sup> Yaremaiahanda bi ogoni lai hayagola Hananaiahanda ira mbalape Yaremaianaga mani mo paga howa yayago yamini. Yamuwa Hananaiahanda ira mbalapayabi biago bo kambulobaga bini. <sup>11</sup> Ani buwa ibugua wali agali bu hearunaga deni howa lalu, Anduane Homogohanda bi ogodagua laya. O berogonidagua dege ina Nebugadenesahanda wali agali dindi bibahendehe hearunaga mani ira mbalapayabi mo paga halu mo ya kago ina ani bo kambulo wahai holebero, laya. Mali kira napedaha dege howa ani bulebero laya, lene. Bi uruni layago hale halu Yaremaia ibu pene.

<sup>12</sup> Hananaiahanda ira mbalape nogo bulumaga biabe bilonaga hende hamagamaga biaga Yaremaianaga mani mo paga howa yu hene biago bo kambulobaga bu wahalu puwa horo dewa dege hemigola Anduane Homogohanda Yaremaiahondo ogodagua lamini. <sup>13</sup> Ibugua lalu, Ina áyu ogoni Hananaia karia puwa bi ogo lamibe. Anduane Homogohanda lalu mbirale irame bulumaganaga mani dariba hamagamaga biaga biago bo kambulo waharigonigo ai mani ina aeaneme wabu aribia holebere. <sup>14</sup> I Anduane Homogo Hongo Haiheore Isaraele wali agalinaga Ngode Datagaliwabe kogome bi larogo. Inimeore wali agali bibahende dindi bibahendehe bu karu tigua tinaga mani dariba hamagamaga buwa yu helonaga aeaneme wabinigo mo merogola ai tigua Babilononaga Kini Nebugadenesa ibugua garabaya biabe ale bialu helonaga heledo. Nogo biango gabua bu karubi ibugua dege handayaho helo heledo, lene.

<sup>15</sup> Yaremaia ibugua bi urunidagua lai howa Hananaiahondo laabo halu lalu, Hananaia-o bi ogo hale habe. I Anduane Homogohanda pu laya handala ndo ibiriya. Inime wali agali ke howa la hondo harigola tigua inaga bi larigo mo henene hai haya. <sup>16</sup> Anidagua biyago Anduane Homogo ibugua ogodagua laya. Heneneore ina i dindi ogoria nahabelo i biba helolebero. Inaga bi larigome wali agali dewaore inaga bi larogo hale nahelo lowa haru pubagi harigonaga mali mbira ogo piai nakaore dege i abale homolebere, laya lalu lamiru.

<sup>17</sup> Ani leaha mali ogoninaga dege ege kane hayagola Hananaia ibu homene.

## 29

### *Yaremaiahanda Yuda wali agali Babilono hearuhondo bi gilibu wia henego ogo*

<sup>1</sup> Yaremaia ibugua Yarusalemeni howa beba mbira agali haguanebi loma binigo mo miaga hearubi bi mana latagi haga hearubi Yuda wali agali hearubi uruni ti ala Nebugadenesahanda Babilono dindiha garabayabu yalu pu helene biaru hearia beba gilibu pelene. <sup>2</sup> Yaremaiahanda beba gilibu pelenedagoni Babilono amirume Yarusalemeni ibalu Kini Yahoiaginibi ibu aiyabi ibu anda handayaho haga agali hearubi agali haguane hearubi Yuda dindiha Yarusalemeha hearubi mbirale bayale tara tararu wabiaga mandabi hearubi bibahende garabaya minu yalu peha beba ogoni gilibu pelene.

✧ 29:1: 2 Kin 24.12-16, 2 Bit 36.10

<sup>3</sup> Horo ogoningi Yudanaga Kini Sedegaiahanda agali kirali Sabana igini Elasa Hiligaia igini Gemariala Kini Nebugadenesa Babilono hearia pole piyaria Yaremaiahanda beba gili biyago Yuda wali agali Babilono dindiha hearu mule libugua yu pudaba lalu mini. Beba ogoniha bi gilibu winidago ogodagua.

<sup>4</sup> Anduane Homogo Hongo Haiheore Isaraele wali agalinaga Ngode Datagaliwabe kago ibugua bi ogodagua lara. Yuda wali agali Yarusalemeha hemiria ina tí bo batagi halu Babilono pelene kamiru tihondo bi laro. <sup>5</sup> Babilono ogoniha howa tigua anda bialu e hangalu tomoru bialu nalu halimu. <sup>6</sup> Agali tigua waliru dabu bialu waneigini hono wialu halimu. Ani bialu mani tinaga waneiginirume dabu bigi bialu waneigini hono wia aribia helo ani bilimu. Tí hameigini palia timbuore halu wali agali emene hangu hole lowa mo emene nahalimu. <sup>7</sup> Inime tí dindi ogoniha henemane haru pu heledogo ai tigua dindi ogoni bayale ngelonaga biamogo buwa biabe bialu mo bayale halu halimu. Ani bialu ina dindi ogoni mo bayale holiyanaga ihondo bi lalu halimu. Ani larogo irane dindi ogoni bayale wiayagua tibi nde bayale dege holeberemigonaga larogoni. <sup>8</sup> I Anduane Homogo Hongo Haiheore Isaraele wali agali tinaga Ngode Datagaliwabe kogome tigatigaore larogo. Agali ke howa mbiwia halu bi mana latagi haga karumebi de gandeba handaga karumebi tihondo ke halu mo hondo holigo de hondo halimu. Agali maru emaga handaga karume emaga handaragola emaga galone dabaga karume galone latagi haro larogola mo henene nahalimu. <sup>9</sup> Tigua inaga minini howa mani bulenenaga henene larama lalu ti ke halu mbiwia haga ka. Inime tigatiga larogo tigua anidagua lole pudaba lalu ina lamini ndoore lalu ka. I Anduane Homogo ina bi o ledogoniore, laya.

<sup>10</sup> Anduane Homogohanda bi ogodagua laya. Ina Babilonome mali pira kariani (70) mo ko mbira nahe bayale helo heledo. Mali ogonidagua hai kagola Babilono mo ko holebira. Mo ko harangi ina buleore lalu bi lo wirugo lola helo tí mitangi bialu Yarusaleme haru dai bulebero.\* <sup>11</sup> Tíore biamogo bulenego Anduane Homogo inime ogoale buleda lalu manda bu ko. Tíore mo ko holene hame nale howa mo bayale holene manda bu kogoni. Ina tí mo bayale hole larogoni mitangi bialu horo ogoni tagira ibilo malia ho halimu.\* <sup>12</sup> Horo ogoningi tigua ini koria kaware ibalu ini olalu halimu. Ani lalu kamigola ina tinaga bi laramigo hale holebero.\* <sup>13</sup> Horo ogoningi tigua tinaga minimebi gubalinimebi hongo howa i taya birimiyagua i handa walia holeberemi.\* <sup>14</sup> Ini Anduane Homogo ina heneneore larogo tigua ini koria ibuleberemi. Anidagua bialu ini koria dai beremigola ina tí mo bayale holebero. Ina tí dindi bibahendeha garabayabu yalu pelaruruniha kamiria howa haru dai biai holebero. Haru dai bialu abale dindi tini haga wirimigoha helai holebero. I Anduane Homogo ina bi o ledgoniore, lene.\*

<sup>15</sup> Tigua lalu, Anduane Homogohanda ina Babilono dindini hemagola ibunaga bi mana latagi haga inahondo ngiya, laga kami.\* <sup>16</sup> Anigo Anduane Homogohanda agali mbira Yuda dindini áyu ibu kini howa Debidinaga biragane dagia wiagoria bedagonagabi tí damene maru garabaya nape yu wahene karunagabi ibugua bi larago hale halimu. <sup>17</sup> I Anduane Homogo Hongo Haiheore kogome ina ogodagua laro. Yuda dindiha wali agali maru yu wahene bu karu baba wai bilo waitigi ibilolebero. Ani bialu ina ti tomo noleneo biba helalu warago ko tara tara ngaru ibilaga bulebero. Ani berogola ti poge lini tagaraga ngago wali agalime nabe nahe ngaligobi wulebira. <sup>18</sup> Anidagua bini ngago wali agali dindi tara tarani bu karume ina o birudagoni hale howa tigua mogo lalu gi timbuni ho holebira. Ani bialu ina

☆ 29:10: 2 Bit 36.21, Yar 25.11, Dan 9.2 ☆ 29:11: Ais 40.9-11, Yar 30.9-10, 30.18-22 ☆ 29:12: Iba 50.15, 145.19, Yar 33.3 ☆ 29:13: Man 4.29, 1 Bit 22.19, 2 Bit 6.37, Yar 24.7 ☆ 29:14: Ais 43.5-6, Yar 16.15, 23.8, 30.3

\* 29:15: Hobane ogonibi hobane 21-23 ogonihabi Anduane Homogohanda bi mana latagi haga agali ledago agali kira ogonilabonaga bi lowia dege bida.



Yuda wali agali uruni dindi tara tara ngaruha piai helolebero. Ani peledogoha wali agali dindi anduane karume Yuda wali agali uruni mege bialu bi koru laede halu hondo oba haga bulebira. Ani lalu howa tigua dege wali agali maru karuhondo ha halu howa tigua lalu, Yuda wali agali mo ko hayadagua íore mo ko helo, laga bulebira. <sup>19</sup> Tigua inaga bi mo wahayagonaga Anduane Homogo inime mo ko holene tara tara uruni tagira ibilolebero. Ina inaga biabe bialu bi mana latagi haga maru ibilaga birugome bi layagola tigua hale habe manga haya. Tí Babilono dindiha garabaya bu kamiru tíbi agali uruninaga bi hale naharimi. <sup>20</sup> Anigo ina wali agali Yarusalemeha howa bo batagi halu Babilonoha pelene kamiru tigua Anduane Homogo ina bi áyu larogo bayuwa hale halimu.

<sup>21</sup> I Anduane Homogo Hongo Haiheore Isaraele wali agalinaga Ngode Datagaliwabe kogome ina agali kira bi latagi halu mbiwia haga henene ndo laga kago Kolaia igini Ahaba Masea igini Sedegaijala mitangi bialu bi ogodagua laro. Libugua inaga minini howa laraba lowa ke haga ka. Libugua anidagua biyagonaga ina libu Babilononaga Kini Nebugadenesa giha minu ya holebero. Ani minu ya kogola ibugua agali bu karume tininaga deni howa homelo badaba laragola libu homelo bo waholebira. <sup>22</sup> Anidagua biragola Yuda wali agali Babilonoha kamiru tigua mendeali kago ha halu lalu Anduane Homogohanda íore Sedegaia Ahabala mo ko howaore Babilononaga kini heagome irani bo delayadagua delelo loleberemi. <sup>23</sup> Ina agali kirali ogonilabo mo ko holeberogo irane libugua Isaraele wali agali tiniha mana ko dewa bialu hayagonaga ani bulebero. Libugua wali agali libu damene hearu one kayu bialu inaga minini howa bi henene laro lowa ke halu bi laga biya. Libugua bi uruni latagi halibu lalu ina mbira nalamiore ko. Anduane Homogo inime mana libugua biaga ngago manda biai howa laro. I Anduane Homogo ina bi o ledogoniore, lalu lene.

### *Yaremaiahanda Semaiahondo bi hongohe lenego ogo*

<sup>24</sup> Anduane Homogohanda lalu, Yaremaia ina bi ogo Nehelama dindi ngagoria agali mini Semaia kagohondo lamibe. <sup>25</sup> I Anduane Homogo Hongo Haiheore Isaraele wali agalinaga Ngode Datagaliwabe kogome bi ogodagua laro. Semaia ina beba mbira gili bialu Yarusalemeha hearuhondobi loma binigo mo miaga Masea igini Sebanaiahondobi loma binigo mo miaga maru hearuhondobi pelalu howa bi ogodagua lariya.

<sup>26</sup> Anduane Homogo ibugua Sebanaia í ibunaga loma binigo mo miaga Yahoiada henegoria ha aribia howa Anduane Homogonaga anda handayaho habelonaga ibunime í dabo helaya. Anigo ina agali lulu mbira ona howa bi mana latagi haga tingiho heagua nde ibunaga gi geru minu kabu bigi buwa dariba holene nga. Ani bialu ibunaga mani aeane mbira dariba ho helolene nga. <sup>27</sup> Ani bulene wiaruago ina Anadodoali Yaremaiala bi lo tiga nabiriyago irane aginagabe. Agali ogoni ibugua bi mana latagi halu tí kamigoha laabo haga ndo kabe. <sup>28</sup> Ibugua beba mbira gili buwa ina Babilono dindiha hemaruhondo ibilowa lalu, Tí garabaya luore haabo holeberemigo tigua anda bialu e hongowa mabuha tomo bialu nalu halimu, lalu bi lowia hayiyago ndobe, lene.

<sup>29</sup> Loma binigo mo miaga Sebanaia ibugua Semaiahanda beba gilibu wia hayadagoni mo yalu Yaremaia hearia puwa dagalene. <sup>30</sup> Ibugua bebani bi gilibu wiyadago dagalai hayagola Anduane Homogohanda Yaremaiahondo lamialu lalu, <sup>31</sup> Yaremaia ina Yuda wali agali Babilono dindini garabaya pu karuhondo bi ogo lo pelolene nga. Anduane Homogohanda Nehelamali Semaia kagonaga lalu, Semaia ibugua inaga bi mana latagi helo dabalulu tí hemigoha ina pu nalene kogoni. Ibutime mitangi bialu bi mana latagi haga tingiho howa tihondo ke halu tigua ibunaga bi larago mo henene halimulo lalu haga kagoni ndobe. <sup>32</sup> Anduane Homogo ina tigatigaore larogo Nehelamali Semaiahanda wali agali bu hearume inaga bi mana hale nahe wahalu pelonaga haru pubagi haya.



Anidagua biyagonaga ina ibubi ibu aguanene mani holebirarubi tihondo pani mulebero. Ani bialu mani inaga wali agaliru lone bayale helarongi ibu aria lenego mbira howa mbirale uruni handa nabulebira. I Anduane Homogo ina bi o ledogoniore, lalu Anduane Homogohanda laya, lene.

### 30

#### *Anduane Homogohanda ibunaga wali agaliru mo bayale holebero lenego ogo*

<sup>1</sup> Anduane Homogohanda Yaremaiahondo lamialu lalu, <sup>2</sup> Anduane Homogo i Isaraele wali agalinaga Ngode Datagaliwabe kogome inaga bi langirugo bibahende beba mbirani gilibu wibe. <sup>3</sup> Anduane Homogo inaga Isaraele wali agalibi Yuda wali agalibi bibahende horo mbira pongo bo winigo tagira ibirangi ti lone mo bayale helolebero. Ina dindi tinaga mamaliruhondo bamba minigoria haru dai bialu tinaga dindi ogoniore ngelo lone mo ngulebero. I Anduane Homogo ina bi o ledogoniore, lalu lamini.

<sup>4</sup> Anduane Homogohanda Yuda wali agali Isaraele wali agalila mitangi bialu lalu, <sup>5</sup> Anduane Homogo inaore larogo. Wali agali tiha mo palia holene karulo howa hendore holene henge nawiore howa tigua gi timbuniore halu dugu bigibigi bialu kago hale harua. <sup>6</sup> Agua biyabe agalime waneigini gali taba hanagabe. Tinaga tinini gime minu yaniaho hama pedago irane agidabe. Tigua walime waneigini gali taba honolene tu kaware biruwa tandaga timbuni handalu biragadagua bedaria hendedo. Tinaga dengui mo tara halu gi haiho kago irane agidabe. <sup>7</sup> Mo ko holene timbuniore tagira ibulebiragonaga dara timbuniore ho kogoni. Ayu mo ko holene ogoni ale ibiraligobi ndo mo ko holene timbuni gibi mbira tagira ibulebira. Inaga Isaraele wali agali bu kamiru horo ogoningsi tiha genda timbuniore tagira ibulebira. Ani ibiragola inime ti mo wialu haru dai bulebero. <sup>8</sup> I Anduane Homogo Hongo Haiheore kogo ina bi ogodagua laro. Horo ogoni tagira ibirangi ina Isaraele wali agali tinaga waitigirume ira mbalapeme tinaga mani dariba hamagamagabu howa garabaya heledagoni bo tongola hole bialu ti golope holebero. Ani bialu tinaga waitigi bu karunaga garabaya biabe ale lone bialu holene henge nawulebiraore. <sup>9</sup> Tigua Anduane Homogo tinaga Ngode Datagaliwabe ini kogo andaneha haho wiaabo kane dege haabo halu tinaga kini mbira Debidi aguanene ti handayaho helo ina dabo heledogo ogoni ibu andaneha hai holebira, lene.

<sup>10</sup> Anduane Homogohanda lalu, Yagabanaga aguanene inaga biabe biahaga Isaraele wali agaliru-o tiore gi halu duru nale halimu. Ina heneneore larogo ti dindi taraha garabaya helene kamigoria howa ina ti golope halu haru dai bulebero. Tininaga dindi wirimigoria howa lone haru dai berogola bayaleore holeberemi. Ani daibu kamigola ti mo gibia holene mbirali naholebira. <sup>11</sup> Anduane Homogo ini ti heba howa ti biamogo bialu haabo holebero. Wali agali ti garabaya biabe ale bialu harimigoha haga biaruni bibahende bo wahai holebero. Anigo ti dege bo wa naholebero. Ina ti birimigonaga mana lalu ina mana tigabi bialu ti bo wahai naholebero. I Anduane Homogo ina bi o ledogoniore, laya lene.

<sup>12</sup> Anduane Homogohanda lalu, Isaraelealiru-o ti minu bayagoni dere dabi habe naheore timbuni bu kamigoni. <sup>13</sup> Ina biamogo bia, lalu ihondo bi langulene mbirali naheore. Tinaga dere bidaru lone dabi helonaga hai holene marasinibi nawi dege. <sup>14</sup> Tinaga nenege agali maru abale hayaruni tigua ti mitangi nahe mo embeda hai haya. Ti mana ko dewaore bialu harimigome tiha bia ko hene tiga nabi dewaore ngelo kamigoni. Ani ngelo kamigola ina tihondo mana urunibi birugoni ndobe. <sup>15</sup> Ai tinaga dere ogoni dabi naholebirago dugu dewa biaabo nahe wahadaba. Tigua mana ko dewa bialu harimigome tiniha mo ko hene kamigoni. Anidagua birimigonaga ina tiha dere ogoni ibilaru. <sup>16</sup> Ani ibilarugoyu maru ti mo ko haga uruni tiniha mo ko holene wulebira. Uruni tibi nde dindi yu wahalu dindi mendeha garabaya bu yalu polebira.

Maru tí mo ko halu tínaga tomo hangedamiru mbirale ngamirubi mo page biaga biarubi nde tini mo ko halu tinaga mabuha tomo hangedaru bu kayu bialu mbirale ngamiru mo kayu biaga biaru tinihabi nde anidagua dege bulebira. <sup>17</sup> Tínaga waitigi uruni tigua lalu, Saionoha galone mbira naheore bame ko ngubi o ngagoni ndobe. Tano mo ko holilono mbiralime mitangi nahaga ngagoni lolebira. Anigo Anduane Homogo ina bi ogodagua laro. Tínaga dere bu kamigoni mo dabi halu tínaga tinginibi mo dabi dege holebero. I Anduane Homogo ina bi o ledogoniore, laya lene.\*

<sup>18</sup> Anduane Homogohanda lalu, Ina Yagaba aguaneneru dara holene irane nawi ngagoria howa dara halu biamogo bulebero. Ani berogola tini dindi ngagoria lone daibu howa tininaga andaru bu holebira. Ani bialu Yarusaleme ala wini biagoria wiadai bulebira. Kininaga anda ala hene gumuni wiagoria lone biadai bulebira. <sup>19</sup> Ani buwa Isaraele wali agali tigua ihondo turu howa kai lalu holebira. Ainde turu howa iba gana dalimu laragaraga bialu holebira. Ani bialu kagola ti emene hangu karuni mo dewa helarogola ti dewaore halu palia timbu holebira. Ani palia timbu kagola ina wali agali tara tara bu karume ti mo ko halu haga karu mo wahalu uruni tigua Isaraele wali agalirunaga mini mo yaraga halu helolebero. <sup>20</sup> Ani heledogola Isaraele ti hongohe abale hagagobi helolebero. Ani bialu tininaga dindi wini biagoriani bayale karulape helo helolebero. Ani heledoria wali agali tara tara bu karume ti mo ko hole bialu karu ina tibi nde mo ko holebero. <sup>21</sup> Isaraele wali agali karu aria agali mbiragome tinaga haru haga agali haguane howa ibugua ti haru holebira. I Anduane Homogo kogome ina bulegobiore larogo. Agali haguane ogoni ini kogoha kaware haru daibu helolebero. Ina ani bulebero larogoni irane agalinaga hame hangume ini kogoha kaware ibabe nahe kago manda bialu ani bulebero. <sup>22</sup> Ani berogola Isaraele ti inaga wali agaliore halu ini tinaga Ngode Datagaliwabeore holebero. I Anduane Homogo ina bi o ledogoniore, lalu lene.

<sup>23</sup> Wali agali mana ko ngubi ngaru hangu mo tene haga bu karu bibahendeha Anduane Homogonaga keba holene timbuniore iba dalu puyabu heba ibagagobi ibalu puyabume ti bo elo lope hai hagadagua bialu holebira. <sup>24</sup> Ibugua tandaga haho ngane dege bule lo mitangi bu wiyaru biai halu waholebira. Horo hamaro bulene tagira ibirangi uruni bibahende manda biai holeberemi, lalu Yaremaiahanda lene.\*

## 31

### *Isaraele wali agali daibulebira lenego ogo*

<sup>1</sup> Anduane Homogohanda lalu, Inaga horo mbira dabo wiabagiho wini ngago tagira ibirangi Isaraele hameigini bibahende ti inaga wali agaliore kagola ini tinaga Ngode Datagaliwabeore holebero. <sup>2</sup> Anduane Homogo inimeore henene larogo inaga Isaraele wali agaliru tinaga waitigiru ibiya handala dindi ko wali agali nahaga dindi lebolahe ni hangu daho wiaga wiaruha ibida pu henego ka. Ai ina ti gubalini howa dara timbuni halu ti hada payabu halo birulene ngagoria birule pelolebero, laya lene.\*

<sup>3</sup> Anduane Homogo ibu i Yaremaia hewaria dindi kaundiaha howa ibuwa lalu, Isaraeleru-o ti ini kogoria daiore bilimulonaga ina ti gubalini halu mana bayale tigabi ngaru bialu kogoni.\* <sup>4</sup> Isaraele wali agaliru ti hongohe halimulo ina mo hongo

\* 30:17: Yar 33.6    \* 30:24: Yar 23.19-20, 25.32    \* 31:2: Be 31.1-22 howa lairi karuni Isaraele wali agali maru Yuda dindi mendenaga uyurayagi haga henego wali agali urunime Ngode Datagaliwabenaga bi mo wahalu mana ko wiaru dege bialu hemiria ibugua uruni dindi mendehayagi garabaya bu yalu pelene. Be 31.8 ti dindi ogoniha luore henego Ngode Datagaliwabehanda tininaga dindi biagoria lone haru dai buwa ibuni andaneha hai helolebero lene. Be 31.5 Isaraele wali agalinaga tano timbuni Samaria wini. Be 31.6,9,18,20 handabe. Eberaimi hameigini timbuniore howa Isaraele dindi gibuni uyurahayagi paliaga karu hameigini Eberaimi ibu paliaga hene. Ai Anduane Homogohanda bi lalu howa hameigini Eberaimi lalu layagua bi ogoni Isaraele wali agali dindi gibuni uyurahayagi karu manda bialu lolebira.    \* 31:3: Man 4.37, Iba 25.6, Yar 24.6

holebero. Ani berogola tígua wandari mabuagerume wali agali hondo bedaru mo turu holenaga irabitele kelengele lalu iba gana lalu mali liagadagua tínaga bu miniha ogonibi holeberemi. <sup>5</sup> Ani howa tígua Samaria dindiha hari barebare ngaruha gerebi iraneru hangalu lini daragola do naga bialu t́ni lone turu ho holeberemi. <sup>6</sup> Horo uruningi Eberaimi dindi barebareha agali haguane karume hongo howa olalu, Ai Anduane Homogo inanaga Ngode Datagaliwabe karia Saiono nene dai bima, lalu holebira, lene.

<sup>7</sup> Anduane Homogohanda laabo halu lalu, Yagabanaga aguanene karunaga turu howa tinaga mini yaraga halu iba gana la hadaba. Uruni ti wali agali maru karu bagihene lowa ti duniniore ka. Inihondobi turu halu iba gana ogodagua ladaba. Anduane Homogohandaibunaga Isaraele wali agali heneru haru dai biya lalu turu howa iba gana ladaba. <sup>8</sup> Anduane Homogo inime heneneore larogo. Inaga Isaraele wali agali uyurahayagi karubi dindi bibahende ha ho giligala lo karubi bibahende haru dai biai holebero. De kohe karubi ge kohe karubi wali tombeha gali bere bedarubi wali gali áyu dege taba hanabehe bedarubi tanabi bibahendeore ti haru ibaiore holebira. Isaraele ti ho timbu halu ho damebi howa tininaga dindi henene wiyagoriani hole dai biai holebira. <sup>9</sup> Inaga wali agaliru ti inime haru dai berogola horo ogoningi tigua dugu bimabi ihondo bi lamabi dai bulebira. Ina ti iba nolene bayale gagahe bedagoria haru ibulebero. Hariga tigabinibi haru eberogola ti pilolene henge mbira nawulebira. Anidagua bule larogoni irane ini tinaga aba howa Eberaimi ibu i igini waheneore kagonaga ani bulebero, lalu Anduane Homogohanda lene.

<sup>10</sup> Hameigini dindi tara tarani kamiru-o Anduane Homogo ina bi larogo hale mia howa baya hangu hale hadaba. Hale howa wali agali dindi tara tara kaundiaha iba solowara timbuni bedago ange mendehayagi karuhondo lamima puwa ogodagua lamilimu. Anduane Homogo ina inaga Isaraele wali agali ala bo talia tagi haruru ai áyu lone haru dai bulebero. Nogo sibi hinaga karume tinaga nogo sibiru baya hangu haru hagamadagua inime inaga wali agali baya hanguore haru howa handayaho holebero. <sup>11</sup> Anduane Homogo ini Yagabanaga aguanali áyu tinaga waitiginaga giha karu bibahende gi mialu haru dai bulebero. <sup>12</sup> Ani haru dai berogola ti ibalu Hari Saiono nenenini howa turu halu ga laragaraga bialu holebira. Anduane Homogo inime tihondo mbirale bayale ogobi dege dege meroru yu howa ti turu timbuni ho holebira. Ina widiru gerebi lini ibaneru olibe lininaga welirubi dewaore tihondo mialu nogo sibiru bulumagarubi dewaore tihondo merogola tigua turu timbuni ho holebira. Ti bayale dege lalu manane mbira dindi ibane bereha mabu gumbile ngaligobi holebira. Tiha mo tandaga holene mbira nawiore holebira. <sup>13</sup> Horo uruningi wandari mabuage bedarume turu ho howa mali lialu holebira. Igiri daliahebi agali wahebi bu karume turu timbuni ho holebira. Tigua ala tandaga howa kiabu dugu bialu hayaruni ina turu holene mo aribia holebero. Tinaga bu miniha dara holene wiarubi mo wahai howa mo palia holenebi mo wia halu turu halu dungulo holenebi mo aribia holebero. Ani berogola ti turu taraore howa hadapayabu holebira. <sup>14</sup> Wali agalirume inaga loma dewaore yalu ibiragola loma binigo mo miaga karume tomo dewa bu payabu ngelo howa tomo garibi nale holebira. Inaga wali agali uruni ti tomo dewaore mialu kogola ti karulape nalu tombe howa holebira. I Anduane Homogo ina bi o ledogoniore, lene.

*Anduane Homogohanda Isaraele wali agali dara henego ogo*

<sup>15</sup> Anduane Homogohanda bi ogodagua lalu, Lama tanoha bi mbira laruago bi ogoni gibi yiyi lalu dugu biaruago hale ho ko. Lama tanoha kiabu dugu timbuni biaruagoni irane Leselohanda ibu waneigini biaru bibahendeore mbira nahe homai hayadagonaga bialu ka. Ibu waneiginiru bibahende homai hayagola wali agalime ibunaga bu miniru mo palia holenaga bi la debodebo bilobi hame naleore beda, lalu

✧ 31:8: Man 30.4, Ais 42.16, Ese 34.16, Mai 4.6

gilibu nga.†☆ 16 Anigo Anduane Homogo inime larogo, Leselo-o ina dugu beregoni wahalu inaga de iba domo wahabe. Ina i waneigininaga bayale biaharigo embeda nahe ihondo bayale biadai bulebira. Inaga waneigini biaruni tinaga waitigirunaga dindi yu wahalu ini bederia dai bulebirago ai lone dugu nabi wahabe. 17 Inaga waneiginiru ti ogonidagua bialu tininaga dindiore wiyagoria birule dai bulebirago. Mbirale uruni heneneore tagira poragola hondole mini dunubiaho birabe. I Anduane Homogo ina bi o ledogoniore, lene.

18 Isaraele hameigini hearume kiabu dugu biayuarubi nde hale haru. Tigua kiabu dugu bialu howa lalu, Anduane Homogo-o agalime tinaga nogo bulumaga daluaru gabua haragola tibume waralu mo tiga bialu hagadagua iname bia laredagua bulumaya mo tiga bialu harigoni. Ai Anduane Homogo-o ini hangu inanaga Ngode Datagaliwabe kego ina ini keria dai biai holomaya ina ina haru dai bibe. 19 Abale iname i yu wahalu pirimago ai ayu ina bu mini beregedo kama. Iname ko birimaru mitangibu dai buwa ayu taga timbuni howa ma podalu de handa dindiho kama. Ina wandari igiri daliahe hemangi howa mana ko wiaru bialu harimago ai ayu uruni birimagonaga taga timbuniore kamagoni layua.

20 Anduane Homogo ina larogo I igini Isaraeleore kago ndobe. Inime ibu gubalini timbuni ho kogoni laro. Bibahendengi ibunaga mini lalu ibuniore mitangi haabo haruli. Inaga bu miniore ibuha ngelo haruli. Ani biruligo ai ayu ina ibuore dara halu biamogo bulebero, laya lene. 21 Isaraele wali agaliru-o tinaga dindi wahalu ibirimigoni hariga ogoha howa ibirimada manda bialu ai ogoha dai buleda lalu mo walia hagane manane mbira heladaba. Ani bialu tininaga tano biagoriani hole dai bidaba. 22 Ti i wane mabuage ale birarimigo biruwa ini erembira ngirimigoni. Ani lenedangi howa mini burugu lalu tombene hondoki ho kamiruni wahalu ini koria agoangi dai buleberemibe. Anduane Homogo inime dindi ogoria mana gahenge talialu bulene mbira ogobi mo wero. Walime agali minu yania howa agali-o iore gubalini ha lolene wulebira, lalu Anduane Homogohanda laya, lalu Yaremaiahanda lene.

### *Anduane Homogo ibunaga wali agali ti bayale holebira lenego ogo*

23 Anduane Homogo Hongo Haiheore Isaraele wali agalirunaga Ngode Datagaliwabehanda lalu, Ina Yuda dindi lone mo bayale howa Yuda wali agaliru ti tinaga dindini tano ngaruha bayale helo helai holebero. Ani helarogola tigua ogodagua lolebira, Anduane Homogo ibunioreme ibunaga hari nene loma bia hene ngago mo bayale helo. Ibu hari ogoniha howa ibugua wali agalime mana bayale tigabi hangu biaabo helo, lalu lolebira. 24 Nogo sibi hinaga karubi mabu e hangaga karubi ti bibahende ta nabi Yuda dindini tano bu ngaruha hai holebira. 25 Mbiralinaga tingini hongo nahe ibira hayagua inime ibu lone mo hongo holebero. Ani bialu mbirali ibu miniha genda yu heagua ina ibunaga bu miniha mo palia halu karulape helolebero, lalu Anduane Homogohanda lene.

26 Ani layago hale howa i Yaremaia ina heyuwa handa amu nana bialu howa i u bayaleore paliruda lo mitangi biru.

27 Anduane Homogo inime ogodagua laro, Agali tomo hangaga karume ti mabuha tomo dewa hangedaru bayale anda hai hagadagua ina horo mbira pongo bo winigo tagira ibirangi Yuda hameiginibi Isaraele hameiginibi nogo tara tarabi dewaore helo mo dewa holebero. 28 Bamba ina ti bo dugu wahelobi bo gialabaga bilobi mo ko helobi tiha ko anda ibilobi handayaho haruli. Ani handayaho harudagua ayu ti lone bayale

† 31:15: Leselo ogoni Yagaba one berenego Isaraele wali agali tigua ti mamali aija tene ogoni manda biaga. Leselonaga homali dindi Lama tano ogoriani nga. Ani binigo manda buwa wali agali uruni tigua mitangi bialu Leselo ibuni tano ogoniha biruwa ibunaga waneigini aguane aguanaliru nahedagola dara howa dugu bialu bedabe toba howa bi ogoni lene. ☆ 31:15: Pig 35.16-19, Md 2.18

helonaga biabe biadai bilobi tomo hangadai bilobi inimeore handayaho holebero.✠  
 29 Horo uruningi wali agalirume bi yobage lalu, Aba aiyarume gerebi lini boga nabi dedaru do naragola waneiginirunaga ne gi lolebira, laga winigo mani nalolebira.✠ 30 Bi yobage ogoni nale mendego lolebirago ogo, Agali mbira ibugua gerebi lini boga nabi dedago do nayagua ibuninaga ne gi lolebira. Horo ogoningi agali mbirame mana ko biyagua ogoninaga ibuni homolebira, lene.✠

31 Anduane Homogohanda laabo halu lalu, Hale hadaba. Horo mbira pongo bo winigo ogoni tagira ibirangi ina Yuda wali agaliru bababi Isaraele wali agaliru bababi habo nalolene bi gahenge lo wulebero.✠✠ 32 Habo nalolene bi mbira bamba ti Iyibi dindiha howa tinaga mamaliru gini yalu ina haru tagira ibirungi howa lo wirugoni ale ndo taraore lo wulebero. Ala ini ti agalini ale harugoyu ai tigua ko bialu habo nalolene bi ogoni lowinigo mo habo laya. 33 Ayu ina Isaraele wali agali ti baba habo nalolene bi gahenge lo wuleberogo ogo. Tinaga bu miniha inaga mana hela halu inaga bi tinaga bu habaneha gilibu wia holebero. Ani buwa i tinaga Ngode Datagaliwabe holebero. Ti nde inaga wali agaliore holebira.✠ 34 Horo ogoningi agali mbirame ibu damene mende kagobi ibuni hameneorehondobi lamialu lalu, Anduane Homogo kago manda bulene nga, lalu lamulene nawulebira. Irane agali haguane karubi agali damene bu karubi ti bibahendeoreme i manda biai hene holebero. Ina tinaga ko binidaru bibahende domo wahai howa lone mitangibu dai nabuleorebero. I Anduane Homogo ina bi o ledogoniore, lene.✠

35 Anduane Homogohanda horombe wa helonaga ni helalu mbiraga wa helonaga ege yakundiru heleda. Ibugua iba solowara timbuni bedaru mo emabia haragola ue timbuni lalu mo kulu ndugu laga bilo mo la haga ka. Ibutaga mini Anduane Homogo Hongo Haiheore lenego kagoni. 36 Isaraele wali agaliru tiore ni ege yakundiru kadagua haabo holebira. Anigo ni ege yakundiruni biabe ina tigua bilo mo mirugo nabiyagua nde horo ogoningiore Isaraele wali agali bo amolo wahai holebero, lalu ibugua bi ogoni lowini. 37 Agalime hari li kago luni tubagiru arane yangalenaga abidabe hondole manda nabibehe ngadaguabi dindi unura kabaneha anda puwa uruniha ngaru bibahende ha handai nahabehe ngadaguabi Anduane Homogo ibugua Isaraele wali agaliru tinaga ko biyagonaga erembira mialu Isaraele bibahende pani nelu miai nahabeheore kagoni. Anduane Homogo ibugua bi o layagoniore, lalu Yaremaiahanda lene.

38 Anduane Homogohanda laabo halu lalu, Horo mbira tagira ibulebirago ogoningi Yarusaleme inaga tano wilu lone biadai bulebira. Yarusalemenaga pabe uyugohayagi timbuniore bima pialu agali mamage handa amu nana bu haga mini Hananele Anda Daliga laga kago ogoniha howa amu pialu pabe pauledagoria panga haraba mini Pau laga kagoria biatagi holebira. 39 Bima pialu tubaria amuraore ni paliragohayagi hari nene mini Garebe kagoria howa pu paululu dindi emene mini Goa ngagoria tagira polebira. 40 Ai uyurahayagi dindi ulini homa hora haga homalibi ira punga yu wahagabi ngago ibu tano pabe bu yanda hene tamuha wulebira. Amu ni tagira ibiragohayagi pialu amuraore Kidirono dindi uli uli ngaruni bibahende pabe bu ya anda hene tamuha wiai holebira. Timbuniore pialu uyurayagi mini Nogo Hosi Panga Haraba laga ngagoria tagira polebira. Ani bidagola tano pabe bu yanda hene ogoniha bibahende loma biahalu Anduane Homogo ininaga hangu wulebira. Ani ngagola waitigirume lone ibalu tanobi tanoha mbirale ngarubi bibahende abale bo gialobagabu wahayadagua lone nabulebira. Tano ogoni ibu hongoheore wiaho wiaabo holebira, lalu Anduane Homogohanda laya Yaremaiahanda lene.

✠ 31:28: Yar 1.10, 44.27, Dan 9.14 ✠ 31:29: Ese 18.2 ✠ 31:30: Man 24.16, Ais 3.11, Ese 18.4, 18.20 ✠ 31:31: Md 26.28, Mg 14.24, Lg 22.20, 1 Ko 11.25, 2 Ko 3.6 ✠ 31:31: Hi 8.8-12 ✠ 31:33: Yar 24.7, 32.40, Hi 10.16 ✠ 31:34: Ais 11.9, Mai 7.18, Hab 2.14, 1 Te 4.9, Hi 10.17



## 32

### *Yaremaiahanda dindi mbira wiago ibu yolo binigo ogo*

<sup>1</sup> Sedegaia ibu Yuda dindiha kini heane mali pini hayagola Anduane Homogohanda Yaremaiahondo bi ogo lamini. Babilononaga Kini Nebugadenesa ibubi nde kini heane dege mali pira mbirani halini hayagola (18) Anduane Homogohanda bi ogo Yaremaia lamini. <sup>2</sup> Ogoningi Babilono ami agali hearume Yarusaleme tano ho hagirabu heagola bi mana latagi haga agali Yaremaia ibu kininaga anda tagirahayagi Yarusaleme ami agaliru ti haga wiagoria ibu garabaya hene. <sup>3-5</sup> Yaremaiahanda mbiwia halu Anduane Homogonaga bi mana latagi halu lalu, Anduane Homogohanda agua laya. Heneneore larogo ina Babilono kini kagome tano ogo karulelo yupe holebero. Ani berogola Babilono ami ibiragola Sedegaia ibu yo pialu napolebira. Anduane Homogo ina Kini Sedegaiaore Babilono kini kagome minilo yupe harogola Sedegaia ibugua Kini Nebugadenesa wanakuihayagi heyu howa ibuhondo bi hale haga birago ladai bialu holebira. Ani bialu Nebugadenesahanda Sedegaia Babilono dindiha garabayabu yalu polebira. Ani pu kane dege ina ti lone mitangi bulene horo manda bu harudago tagira ibilo holebero. Ani berogola tigua Babilono baba wai biyagua ti wayali naholebira. I Anduane Homogo ina bi o ledogoniore, laya, lene. Sedegaia ibu bi ogoni hale howa ibugua Yaremaiahondo keba halu lalu, Ina bi ogoni aiwa langiyagola mbiwia howa latagi halu kebe, lowa Kini Sedegaiahanda Yaremaia garabayabu haabo helene.

<sup>6</sup> Yaremaia ibugua lalu, I garabaya andaha hewangi Anduane Homogohanda ihondo bi ogodagua laya. <sup>7</sup> Hale kebe. I aba hamene heyogone Salumu igini Hanamele ibu i keria ibulebira. Ani ibuwa ibugua ihondo dindi mbira Anadodo tano ngagoria ibunaga ngago ogoni ina yolo bia lolebira. I ibu aba hamene howa dindi ogoni ina yolo bulene karulape kego manda bialu ani lolebira.\* <sup>8</sup> Ani lole ibulebira lalu Anduane Homogohanda langiyadagua Hanamele ibu ami agali ti haghayagi i garabaya hewaria hondo ibalu Hanamele ibugua ihondo lalu, I i hameneore howa inaore bibehe kego manda bialu inaga dindi mbira Beniyamini hameigini daluha Anadodo tano kawareni wiwago yolo bibelo hameledo. Dindi ogoni ininagaore ngelo yolo bia, lene. Hanamele ibugua bi o layadagoni hale howa Anduane Homogohanda ina ani buliya hamelayada lo manda biru. <sup>9-10</sup> Ani manda buwa agali maru bu hearu hendeaore ina dindi ogoni henene yolo bule lalu habo nalolene bi gilibu wialu ininaga gi magi wiru. Ani buwa ina muni siliba genda magi handari kira (200) handalu dindi ogoninaga yolo Hanamele miru. <sup>11</sup> Ina beba kirani dindi ogoninaga habo nalolene bi gili binigo bi uruni mbira mo habo nalole lalu lo mbira haribadago gilibu wiru. Beba ogoni paulo ndibu lalu mendego bame ngelaru. <sup>12</sup> Ani bialu beba kira ogoni ina agali mbira Mahasea aguane Neria igini Baruguhondo miru. Ina dindi ogoni yolo bule bialu hewago agali maru bu hearume de handaya. I hamene Hanamelebi agali maru beba tinaga mini gilibu wiyarubi Yudali dindi ogoniha hearubi ti bibahendeme dindi ogoni yolo bule bialu hewago de handai haya. <sup>13</sup> Agali uruni tigua handayaho heaore dege ina Baruguhondo lamialu lalu, <sup>14</sup> Anduane Homogo Hongo Haiheore Isaraele wali agalinaga Ngode Datagaliwabe kago ibugua ogodagua lalu, Barugu ina beba kira dindi yolo bini lalu bi lo winidagoni mende ndibuleda mende ndibu naleda ogonilabo ina yamialu be dindime wabini ngagoha ko nahe bayale lu wiaabo helonaga mo do habe. <sup>15</sup> Ani larogo irane Anduane Homogo Hongo Haiheore Isaraele wali agalinaga Ngode Datagaliwabe kago ibugua lalu, Mani howa dindi andabi gerebi maburubi bibahende dindi ogoriani ngago lone yolo bulene wulebira, layagonaga ina ani gilibu wiru.

### *Yaremaiahanda Anduane Homogohondo bi lenego ogo*

☆ 32:1: 2 Kin 25.1-7 \* 32:7: Loma Binigo mbuga lowinigo ngago ogoha Be 25.25 gilibu ngago handabe.

<sup>16</sup> I Yaremaia ina Neria igini Baruguhondo beba habo nalolene bi gilibu wini biago mo muwa ina Anduane Homogohondo bi ogodagua laru, <sup>17</sup> Anduane Homogo Bibahende Haru Haame Ho Haga-o ininaga hongo timbuniore ho kegome dindi harila wabiniyago ina bibe nahe mbira nawiore.✧ <sup>18</sup> Wali agali bibahende dara hai haga howa ina mbiralime ko biragonaga dege tinibi tinaga waneigini aguane karubi bibahende pani nelo miaga kegoni. Ngode Datagaliwabe i hangu dunini bolanguahebi hongoheorebi inaga mini Anduane Homogo Hongo Haiheore kegoni. <sup>19</sup> Ina bayale bulenego dege manda bialu haga ke. I hongo gibihe howa mbirale timbuni gibiore ngaru ina biai haga ke. Wali agali bibahendeme bialu karuni handai ho haga kegoni. Ina mana tinime bialu karu hondowa tini biyadagua pani karulape nelo talebu ta haga ke.✧ <sup>20</sup> Bamba ina Iyibi dindini nahendene ale dewa birigoni. Ayubi nde ina Isaraele wali agali bu kamagohabi wali agali dindi tara tarani bu karuhabi nahendene ale bialu haabo haga kegoni. Ani bialu kegonaga wali agali bu karu bibahendeme i mini leneore kegoni lai haga ka. <sup>21</sup> Ininaga hongo timbuniore hegome ina agalime nabigane ale hongohe tara tara mogole hiriribi wiaru bialu Iyibi wali agaliru mo gi bia hari. Anidagua birigome ina Isaraele hameigini inaga wali agali haru tagira pialu ogoria holomaya haru ibiri. <sup>22</sup> Ani haru ibuwa inime bamba inanaga mamaliruhondo dindi ogo inahondo ngulebero lalu bi lo wiridagua ina mo ngiri. Dindi ogo bene bere mbirale bayale anda hai holene wiago ina ngiri. <sup>23</sup> Ina dindi ogoriani karulole ibu howa iname inaga bi larigo hale nahe howa mana inahondo langirigobi nabi mo wahalu pugualu harimagoni. Iname anidagua birimagola ina inaha mo ko holene uruni ibilaga biriyagoni.

<sup>24</sup> Ayu nde Babilono amime Yarusaleme ho hagira bu yaanda howa ina baba wai bialu kagoni. Tigua tano karulolenaga tini heyu howa wai bule lowa tanonaga pabe tagirahayagi dindi dugu hono wima irigi halu kagoni. Waitigi urunime ina ho hagira bu yaanda howa ina baba wai bialu kagola ina hina gari timbuni bialu warago ko timbuni balu haabo kama. Anidagua bidagome Babilonoali tigua Yarusaleme karularagoni. Mbirale tagira ibulebira lalu bi lo wirigoni ayu tagira ibirago i de hendedegoni ndobe. <sup>25</sup> Heneneore Babilonome tano ogo karularagoni. Anigo Anduane Homogo Bibahende Haru Haame Ho Haga-o inime ihondo langialu ina dindi ogo yolo bialu agalime habo nalolene bi lo wirugoria gi magi wia larigo ndobe, lalu Yaremaiahanda Anduane Homogohondo bi ogoni lene.

<sup>26</sup> Ani layagola Anduane Homogohanda Yaremaia lamialu lalu, <sup>27</sup> Ini Anduane Homogo wali agali bibahendenaga Ngode Datagaliwabeore kogoni. Mbirale mbira ina nabibehego nawiore.✧ <sup>28</sup> Anigo Anduane Homogo ina dindi ogo Kini Nebugadenesabi Babilononaga ami agali Kaladia hameigini urunibi ti mo merogoni ndobe. Tigua tano ogoni karulalu✧ <sup>29</sup> irame bo heda holebira. Yuda wali agali tigua anda daliga danginihayagi iraga howa dama mitangi bialu mbirale gime wabini mini Bala wiagonaga mini yaraga halu ibuhondo ira hagua ngabi mini inisenesiru lomabu delalu waini ibabi odo loma birimigobi bo heda hai holebira. Tigua urunibi bialu hayagome i mo keba timbuni hayagoni. <sup>30</sup> Yuda wali agalibi Isaraele wali agalibi ti piganeore hemingi howa tigua mana ko dege bima ibalu haabo henego kagoni ndobe. I Anduane Homogo kogome ina tigatigaore larogo horo bibahendengi tinaga mana ko ogonime i mo keba halu haabo ka. <sup>31</sup> Yarusaleme tano ogoni pigane biyangi howa Yarusaleme wali agalime i mo keba hama ibalu haabo henego ka. Ani biyagonaga tano ogoni i lone de nahondoleorego ina bo gialabaga biai holebero. <sup>32</sup> Yuda wali agalibi Isaraele wali agalibi tigua i mo keba holenaga mana ko tara tara wiaru bialu haabo harimi. Wali agali bu hearubi kini bu hearubi agali haguane bu hearubi loma binigo mo miaga hearubi mbiwia halu bi

✧ 32:17: Pig 18.14, 2 Kin 19.15, Lg 1.37 ✧ 32:19: Yob 34.21, Iba 33.13, Ais 28.29 ✧ 32:27: Dag 16.22, Yar 32.17

✧ 32:28: 2 Kin 25.1-11, 2 Bit 36.17-21

mana latagi haga hearubi ti bibahendeoreme mana ko dege bialu haya. <sup>33</sup> Tigua ihondo erembira ngialu i koriabi naibagaore hene. Ina tihondo lawai haabo harugola tigua inaga bi hale habe manga howa ina ti mo tiga buliya naibagaore. ✧ <sup>34</sup> Ani howa Isaraele wali agali tigua i mitangi bialu lotu lalu helonaga anda helarugoha tigua dama mitangi bialu mbirale gime wabini ko ngubiore wiaru mo wu haya. Tigua ogonidagua biyagome inaga anda ogoni mebia haya. ✧ <sup>35</sup> Ani bialu dindi ulini Hinomo wiagoha dama mitangi bialu bi pupu wiaga mini Balanaga dindi mo ngelaya. Ani mo ngelowa dama mini Molegehondo tini waneigini bo lomabu migi bialu haya. Anigo ina tihondo ogoniale bilimu lalu mbira nale haru. Tigua mana ko ngubi uruniale bialu Yuda wali agalimebi ko bilo mo bia holobada lo manda nabioire henego ko, laya lene. ✧

*Anduane Homogohanda ibunaga wali agalihondo bayale bulebero lenego ogo*

<sup>36</sup> Anduane Homogo Isaraele wali agalinaga Ngode Datagaliwabe kagome ihondo au laya. Yaremaia-o wali agalime ogodagua lalu ka. Waitigime ina baba wai bule ibirago ai hina gari timbunibi tagira ibalu warago ko tara ngagomebi ina minaragoni. Anidagua bialu helowa Anduane Homogohanda tano ogoni Babilono kini kagome ibalu karulelo waholebira, lalu kagoni. Anigo ina tano ogoni mitangi halu bi mende larogo hale habe. <sup>37</sup> Ina heneneore buleberogo ogo. Inaga bu miniha keba ho hewangi ina wali agali bibahende bo talia togo larugola ti dindi tara tara wiaruha pugu pugu binigo ai lone haru dai biai holebero. Ani haru dai bialu ti bayaleore helo dindi ogoria helolebero. ✧ <sup>38</sup> Ani daibu helowa i tinaga Ngode Datagaliwabe kogola ti nde inaga wali agaliore holebira. ✧ <sup>39</sup> Tigua mini dewa nawilo ina tinaga mini mo mbiraore harogola ti hariga mbiraore degeni pialu holebira. Tigua ini andaneha haabo haragola ina tibi tinaga waneigini aguanene mani holebirarubi uruni bibahende mo bayale hai ho helolebero. <sup>40</sup> Ani bialu ina ti baba habo nalolene bi gahenge lo wulebero. Ani berogola habo nalolene bi gahenge ogoni ereba nahe wiaabo holebira. Tihondo mana bayale bialu ina ti mo bayale ho helaga mana wirugoni wa nahole lalu habo nalolene bi ogoni lo wulebero. Tigua i helo wahalu lone napelobi ini andaneha haabo helobi ina mini bayale tihondo talebu mulebero. ✧ <sup>41</sup> Ani bialu ina tihondo bayale dege biaabo holebero. Inaga minimebi gubalinimebi tihondo turu timbuni halu ti dindi ogoriani bayale haabo helo mo bayale ho helolebero.

<sup>42</sup> Anduane Homogo ina bi laabo halu ogodagua laro. Pigane ina tiha genda tandaga tara tara wiaru ibilarugoni. Anigo ayu ina tihondo bulebero lalu lo wirudagua ti bayale helo mbirale bayale holene hangu mo wia holebero. <sup>43</sup> Wali agali karu tigua bi ogodagua larago, Anduane Homogo ibugua dindi ogo Babilono mo miyagome dindi bibahendeore mo ko hai halu wali agalibi nogo biangobi mbira muninibu naheore ngagoni ndobe, laga ka. Anigo Anduane Homogo ina ogodagua laro. Mani Yuda wali agali ti tini dalu ogoniha lone daibu howa tinaga dindi ngaru maru muni mia marume munime dindi yolo bia bialu holebira. <sup>44</sup> Dindi ogoni heneneore yolo bini lalu habo nalolene bi lo wiragoria gi magihe wulebira. Ani bialu wali agali dewalinaga deni howa muni aba dindi abalame henene dobo berabagoni lalu bi gilibu wulebira. Tigua Beniyamini hameigini dindi ngagoria dindi yolo bialu Yarusaleme kawareni anda emene emene bu karuhabi yolo bialu Yuda dindiha tano maru ngaruhabi dindi hari bare bare wuyu pedaruhabi Yuda dindinaga abene unurayagibi ni paliragohayagi dindi hambene baragahe wima pedaruhabi dindi uruni bibahendeha muni mia munime dindi yolo bia bulebira. Ina ti dindi ogoriani haru dai buwa mo bayale harogome ti turu halu ani bulebira. I Anduane Homogo ina bi o ledogoniore, laya lalu Yaremaiahanda lene.

✧ 32:33: Yar 2.27, 7.13, 7.24 ✧ 32:34: 2 Kin 23.10, Yar 7.30-31, 19.1-6 ✧ 32:35: LBM 18.21, 2 Kin 23.10, Yar 7.31

✧ 32:37: Man 30.3, Yar 23.6, Ese 37.21 ✧ 32:38: Yar 30.22, 31.33 ✧ 32:40: Ais 55.13, Yar 31.31-33

### 33

#### *Anduane Homogohanda bulebero lowinigo bilonaga mini dunubiaho holenego ogo*

<sup>1</sup> Yaremaia ibu kini andaga ami agali ti hangu haga wiagohayagi garabaya dege haabo heagola Anduane Homogohanda ibuhondo bi mbira lone lole ibini. <sup>2</sup> Anduane Homogo ibugua dindi bibahende wilonaga wabiaga bayale kago ibunaga mini Anduane Homogoore howa bi ogodagua i Yaremaiahondo leda. <sup>3</sup> Ina i olariyagua bi larego damene ina hale halu biai holeberogo ihondo bi la dege bibe. Mbirale baya gibi i nahendene wia do hene ngarubi ina i mo walia haga bulebero. <sup>4</sup> I Anduane Homogo Isaraele wali agali tinaga Ngode Datagaliwabe kogo ina bi au laro. Yarusalemeni anda bu karubi Yuda kininaga anda karubi bibahende waitigime ibalu wai pabe tagiraha ho hagira buwa dindi dugu wima iraga halu ogoriani howa wai bulebira. Ani biragola Yarusaleme wali agali tigua tininaga anda gialalu ira ege tole ngaru yalu puwa tanonaga wai pabe mo hongo hole giallo yalu polebira. <sup>5</sup> Ani bialu tigua Babilonoaliru baba wai bule polebira. Yarusaleme wali agalirume mana ko dege bialu kagonaga keba ho kogo howa ina ti biamogo bulene hame naleore kogoni. Ani kogola tano ogoniha tinaga waitigirume ibalu bo wahaga birarunaga tingini tini andaga karuha homene bu payabu wulebira.

<sup>6</sup> Ani bidagola mani ina tano ogoni biamogo berogola wali agali ogoniha holebiraru lone bayale halu tano ogonibi lone bayale dege wulebira. Ina tinaga holene bayale mo wia harogola tinaga waitigirume ti baba wai bulene henge nawi howa tini bayale holebira. <sup>7</sup> Horo ogoningi Isaraele hameiginirubi Yuda hameiginirubi bibahende bayale hai helolebero. Ani buwa ti hongohe ala hayagobi dege heladai bulebero. <sup>8</sup> Tigua mine halu ihondo mana ko timbuni bialu hayadaruni ina domo wahai halu ininaga deni tiha ko mbira nawi bayale dege hai helolebero. <sup>9</sup> Ani helarogola hameigini dindi tara taraha bu karume Yarusaleme wali agaliru ina mo bayale halu mana baya hangu biaabo harogo hondowa tigua i baba dungulo howa inaga mini yaraga halu i mini leneore ka lolebira. Wali agali tara uruni tigua Yarusaleme wali agali bayale kago hondowabi ina ti mbirale bayale tara tara ngaru mo miruligo hondowabi mogo lalu de handawabu wulebira, lene.

<sup>10</sup> Anduane Homogohanda lalu, Wali agalime ayu ogodagua lalu ka. Tano ogoni ko hai haragoni. Ogoniha wali agalibi nogo biango tara tarabi mbira naheore ngagoni. Yuda dindinaga tano ngaruhabi Yarusalemeha hariga pedaruhabi mbirali naheore ngagoni, lalu kago henene laragoni. Ani laragoyu mani ogorianiore wali agali dindi uruniha ibu hai holebira. <sup>11</sup> Ani howa tigua turu taraore ho howa wali agali dabu birarunaga tomoru dawa nalu holebira. Ani bialu howa tigua ihondo kai lalu loma biniru mo yalu Anduane Homogo ininaga andaha iba gana lama ibulebira. Tigua ibalu howa iba gana ogodagua lolebira, \*

Iname Anduane Homogo Hongo Haiheore kagohondo kai lamija.

Ibu bayaleore howa inahondo mana bayale hangu biaabo halu haga ka.

Ibugua ina gubalini ho haabo haga kagonaga kai lamija, lolebira. Horo ogoningi Anduane Homogo ina dindi ogo ala bayale wiyagobi lone wiadai bilolebero. I Anduane Homogo ina bi o ledogoniore, lene.

<sup>12</sup> Anduane Homogo Hongo Haiheore kago ibugua lalu, Dindi ogoninaga tano ngaru bibahende mo ko hai henego wali agali nogo biangobi mbira naheore ngagonigoyu mani tano uruniha wali agali dewa bu holebira. Dindi ogoniha datani bayaleru andaho kagola nogo sibi haru haga karume dindi bibahendeha tinaga nogo sibiru datani nelo haru haame holebira. Anidagua biragola nogo sibiru datani bayale bu karu naga bialu palu wima polebira. <sup>13</sup> Ani padagola sibi anduane tinime nogo sibiru bayuwa

\* 33:3: Ais 48.6, 55.6-7, Yar 29.12, 32.17    \* 33:11: 1 Bit 16.34, 2 Bit 5.13, 7.3, Esr 3.11, Iba 100.5, 106.1, 107.1, 118.1, 136.1

dagalaga bialu holebira. Tigua biabe uruni hari emene bare bareni tano ngaruhabi hari uruni tene teneha tano ngaruhabi dindi emene mbira Yuda dindinaga abene unurayagi dindi emene mbira mini Negebe ngagoha howabi Beniyamini hameigini dindihabi Yarusaleme tano kaware ngaruhabi Yuda dindi tano bu ngaru bibahendehabi nogo sibiru hinalu haga haga bulebira. **I** Anduane Homogo ina bi o ledogoniore, lene.

<sup>14</sup> Anduane Homogohanda lalu, Ina bi lo wialu Yudali Isaraelealibi tihondo mbira bulebero lalu lo wirugo bulene horo biagoni tagira ibiragoni. ✧ <sup>15</sup> Horo ogoningi ira dibini teneha hongone de lalu andaho aribia hagadagua Debidi aguanene mbirame kini ho aribia holebira. Agali ogoni ibugua dindi bibahendeha wali agali bu karu bibahendehondo mana bayale tigabi ngaru hangu bialu holebira. <sup>16</sup> Ani bialu kangi Yuda wali agalibi Yarusaleme wali agalibi tiha genda mbira nawi bayale hangu holebira. Ani howa tinime Yarusaleme mini lalu, Anduane Homogo Ibu Inanaga Mini Tigabi Wulene Tene Ka, lolebira. <sup>17</sup> Anduane Homogo ina ogodagua lo wero. Debidi aguaneneru hangume Isaraele wali agalinaga kini ho aribia haga bulebira laro. ✧ <sup>18</sup> Ani bialu mendebi nde loma tara tara inihondo bu ngialu irani dai helolenebi widi lomabu delolenebi nogo tara tara bo lomabu ngulenebi uruni bibahende Libai hameigini ariame hangu mo miaga haga bulebira, lalu lene. ✧

<sup>19</sup> Ani lowa Anduane Homogohanda Yaremaiahondo lamialu lalu, <sup>20</sup> **I** Anduane Homogo ina heneneore larogo mbiraga horombebi libunaga holene henge mo ngelaru-dangiore libu heba habo nalolene bi lo wirudagoni mbiralime mo iriari nabibeheore. <sup>21</sup> Anidagua dege ina inaga biabe biahaga Debidi ibu aguanenerume hangu kini ho aribia haga biaabo holebira lalu habo nalolene bi lo wirudago mbiralime mo habo labe naheore. Ani bialu agali maru inaga biabe biaga Libai hameigini aria loma binigo mo miaga karu baba habo nalolene bi lo wirugobi mbiralime mo habo nalabeheore. <sup>22</sup> Mbiralime harini yakundi karubi iba angeni iba mu bu ngarubi dagalabe naheore. Ogonidagua inaga biabe biahaga Debidi ibu aguanenerubi Libai hameigini loma binigo mo miaga bu karu ti ariarubi ina mo dewaore helarogola mbiralime dagalabe naheore holebira, lene.

<sup>23</sup> Anduane Homogohanda **i** Yaremaiahondo au laya, <sup>24</sup> Wali agalime bi ogodagua lalu kago hale haribe. Bamba Anduane Homogohanda Yuda Isaraelela ibuninaga wali agaliore helo dabo helene. Ani helenego ai áyu ibugua ti erembira mialu handa tara hayada, lalu ka. Wali agalime bi ogonidagua lalu inaga wali agaliru mo ko halu mege bialu, Ti biamogo bulene mbira nahe ti burupale kagoni ndobe, laga ka. <sup>25</sup> Ani lagago **i** Anduane Homogo inaore tigatiga larogo mbiraga horombelahondo habo nalolene bi lowialu dindi harila libuhondobi mana mialu binigo bialu kagoni. <sup>26</sup> Ina heneneore larogo Yagaba hameigini bu karubi inaga biabe biahaga Debidibi ti erembira mialu handa tara nahe ti baba habo nalolene bi lo wirugo wiaabo holebira. Abarahama aguanenerubi Aisaga aguanenerubi Yagaba aguanenerubi bibahende handame ho helonaga Debidi aguaneneme kini helolebero. Ina ti dara holene irane nawini howa inaga wali agali karu dara halu ti lone bayale helonaga biamogo biaabo holebero, lalu Anduane Homogohanda laya, lalu Yaremaiahanda lene.

## 34

### *Anduane Homogohanda Kini Sedegaiahondo bi laminigo ogo*

<sup>1</sup> Babilononaga Kini Nebugadenesa ibugua ibunaga ami agalirubi dindi maru ibugua handayaho haga wiaronaga ami agalirubi haru ibuwa Yarusalemenibi Yuda dindiha tano maru wiagoriabi wai bialu heangi Anduane Homogohanda Yaremaiahondo bi ogo lamini. ✧ <sup>2</sup> Anduane Homogo Isaraele wali agalinaga Ngode Datagaliwabe kago ibugua

✧ **33:14:** Yar 23.5-6 ✧ **33:17:** 2 Sml 7.12-16, 1 Kin 2.4, 1 Bit 17.11-14 ✧ **33:18:** Dag 3.5-10 ✧ **34:1:** 2 Kin 25.1-11, 2 Bit 36.17-21



Yaremaiahondo lalu, *Ína* Kini Sedegaia karia puwa bi ogodagua lamibe. *I* Anduane Homogo kogome *ina* tano ogoni Babilononaga kini kagohondo merogola ibugua tano ogoni bo heda holebira. <sup>3</sup> Ani biragola Sedegaia *í* yo pialu ibida napolebere. Tigua *í* Nebugadenesa karia minu yalu pu heledagola libu bi loleberebi. Ani bialu tigua *í* Babilono minu yalu polebira. <sup>4</sup> Anigo ai Yudanaga Kini Sedegaia-o Anduane Homogo *ina* *ihondo* bi mende larogo hale habe. Waitigirume *í* bo wa naholebira. <sup>5</sup> *Í* hodagua halu homolebere. *Í* homaregola bamba *í* mamalime Yudanaga kini homeneru hora halu howa ira hagua nga bilo inisenesiru delagadagua tigua *inaga* tingini hora halu howa *í* mini yaraga halu inisenesi delolebira. Tigua dara timbuni howa kiabu dugu bialu lalu, Inanaga agali haguane homayada, laga bialu holebira. *I* Anduane Homogo *ina* bi o ledogoniore, lalu Anduane Homogohanda Yaremaiahondo lene.

<sup>6</sup> Ani layagola Yaremaia ibugua Kini Sedegaia ibu Yarusalemeni hearia puwa bi ogoni lamini. <sup>7</sup> Ogoningi Babilononaga kini heagoibunaga ami agalirume Yarusaleme tanohabi Lagisi tanohabi Asega tanohabi wai bialu hengi bi ogoni lamini. Waitigime Yuda dindi bibahendeni tano hongohe wai pabe timbuni bu mabubi hearu bo podohana haga bialu ti karulai halu tano tebira Yarusaleme tano Lagisi tano Asega tano uruni dege karulole wai bialu hene.

*Yudalirume tinaga garabaya biabe ale biahaga hearuhondo mana ko bialu henego ogo*

<sup>8</sup> Kini Sedegaiabi Yarusaleme wali agalirubi tigua tinaga garabaya biabe ale biahaga wali agali hearu golope hamiya lalu bi lowini. <sup>9</sup> Tigua ogodagua bimiya lowa lalu, Israele wali agali mbira tinaga damene dege bu karunaga garabaya biabe ale biahaga heagua nde ogoni ibu golope halu pu lamiya. Yuda wali agali dege kago garabaya biabe ale bialu helolene nawi, lalu lowini. <sup>10</sup> Agali haguane dewali bu hearumebi bi ogoni karulapeda lowa e lai hene. Tigua bi lo wialu wali agali garabaya biabe ale biahaga hearu golope halu pudaba lene. <sup>11</sup> Ani lowa dege mani howa ti mini mende wialu wali agali golope hene biaruni lone haru dai bialu tinaga garabaya biabe ale bia helo helene. <sup>12</sup> Anidagua biyagola Anduane Homogohanda Yaremaiahondo bi ogodagua lamini. <sup>13</sup> *I* Anduane Homogo Israele wali agalinaga Ngode Datagaliwabe *ina* tinaga mamaliru Iyibi dindiha garabaya biabe ale bialu hearia golope halu haru tagira ibuwa mani ti baba habo nalolene bi mbira lo wirugoni au laru. <sup>14</sup> *Tígua* tinaga damene degeme garabaya biabe ale biahaga heledemiru ti mali waragaria biabe bialu hayagua nde mali kane tagira ibugu biragola golope halu pudaba lalimu lalu langirugoni. Ani larugola tinaga mamali bu heneru tigua *ina* bi o larudagoni hale howa talialu bia dege nabiaga hene. <sup>15</sup> *Tígua* áyu dege mini beregedo howa *inaga* deni mana bayale tigabi wiaru bialu harimi. Ani bialu *tí* hangu hangume tinaga wali agali garabaya biabe ale biahaga hayaruhondo lamialu, *Tí* garabaya biabe ale biahaga ndo golope hene hole pudaba, larimigoni. *Tígua* *inaga* anda loma biahene heagoha *inaga* wanakuini heyu howa, Wali agali garabaya biabe ale biahaga bu karu golope halu pudaba lamiya, lalu habo nalolene bi lo wirimi. <sup>16</sup> Anidagua larimigo lowa dege wali agali golope halu pudaba larimiru lone minuyu dai bialu tinaga garabaya biabe ale biahaga helo heladai bidami. *Tígua* mana ogonibi bialu kamigome *inaga* mini timbuni leneore kogo mo dindiha halu kamigonida. <sup>17</sup> Ani birimigonaga *i* Anduane Homogo *ina* *tíhondo* bi ogodagua larogo hale hadaba. *Tígua* *inaga* bi mo wahalu tini damene biaru pelo golope naharimigo *ina* *tí* golalu yupe harogoni. *Ina* *tí* yupe harogola tini pialu homai holeberemi. Maru waitigirume bo waharagola homalu maru warago ko ngagome baragola homalu maru hina garime homalu buleberemi. Anidagua bialu kamigola wali agali dindi tara tara ngaruha padarume *tíha* birago hale howa ti gi timbuni halu mogolai holebira. <sup>18</sup> *Tígua* *inaga* deni heyu howa habo nalolene bi mbira lowialu

☆ 34:14: Har 21.2, Man 15.12

buleore larimigo mo habo larimigonaga ina tihondo mana mbira buleberogo ogo. Mana ogoni nogo bulumaga mbira bowa bo daga birimi. Ani buwa dagane lene labo labo ngelowa tini hanuni pu ibu birimigoni ndobe. Ani bu howa mani tinaga wali agali bu hearu dewaoreme habo nalolene bi lo wiyago mo habo lai harimi. Anidagua bialu kamigonaga ina tini nogo bulumaga bo daga birimidagua bulebero. <sup>19</sup> Ayu ina wali agali nogo bulumaga dagane lene labo labo ngelowa dombeni bolangua halu pu ibu biyaruni Yudanaga agali haguane karubi Yarusalemenaga agali haguane karubi kini andagaha haga agali haguane karubi loma binigo mo ngiaga bu karubi wali agali maru bu karubi tigua bulumaga biago biyadagua ina tihondo bulebero. <sup>20</sup> Wali agali uruni ina waitigi karunaga giha minu ya harogola tigua bo wahai holebira. Anidagua biragola tinaga tingini egaru nogo biango gabua biru karume ibalu nai holebira. <sup>21</sup> Ani bialu ina Kini Sedegaiabi ibunaga agali haguane maru bu karubi bibahende ti waitigiali Babilononaga kini kago ibunaga ami agali bu karu giha minu ya holebero. Ani berogola Babilononaga ami agali uruni tigua ti yupe halu pudaba lolebiragoyu\* <sup>22</sup> ai i Anduane Homogo kogome agua bulene nga lalu tihondo lamerogola tigua lone Yarusaleme dai buwa wai bo anda pialu tano bibahende irame bo heda hai holebira. Ani bialu ina Yuda dindiha tano ngaru bo gialabaga bu wahai harogola tano bameore wialu wali agali lenego mbira naholebiraore. I Anduane Homogo ina bi o ledogoniore, lalu lene.

## 35

### *Legaba hameiginirume tinaga mamalinaga bi lo wiadagua bialu henego ogo*

<sup>1</sup> Yosaia igini Yahoiagimi ibu Yuda dindiha kini heangi Anduane Homogohanda i Yaremaiahondo bi langialu lalu,\* <sup>2</sup> Ina Legaba hameigini bu karu hondo puwa ti baba bi lalu Anduane Homogo inaga anda hobane mbira kagoha ti haru anda ibabe. Ani ibuwa ina ti waini iba nelu hambu mibe, laya. <sup>3</sup> Ani laya handala ina agali mbira Legaba hameigini aria Yaremaia mendenaga igini Yasaia heago ibu Habasinia aguane mbira henego hondo piru. Hondo puwa ibu hamene bu hearubi ibu igini hearubi ibu aria maru hearubi haru ibai haru. <sup>4</sup> Ani ibalu Anduane Homogonaga anda heagoha bi mana latagi haga Hanana talima piaga aria Igidalianaga anda hobane heagoha haru anda ibirima. Hanana ogoni ibu Ngode Datagaliwabenaga bi mana bayuwa hale halu biaga mbira hene. Anduane Homogonaga agali haguane hearunaga anda hobane heago kaware dege daligaha Salumu igini Masea ibunaga anda hobane henegoha anda ibirima. <sup>5</sup> Ani buwa ina waini iba beha berelowa agali Legaba hameigini uruni ti nelu mialu howa lalu, Waini iba o bedago nadaba, laru.

<sup>6</sup> Ani larugola tigua lalu, Iname waini iba ogoni nanoleberema. Ina mamali Legaba igini Yonadabahanda mana mbira wabu wialu ina hameigini kamarubi ina igini aguanene mani holebirarubi bibahendeme waini iba nanalimu lene. <sup>7</sup> Ani lowa ibugua inahondo bi marubi langialu, Tigua e andabi nabi gerebi mabubi nahangalimu, lalu mana lene. Ina horo bibahendengi balai andaha dege haabo holene nga lene. Iname mana ogoni talialu harimayagua nde ina dindi ogoni nabaile howa ogoriani lu haabo holeberema lene. <sup>8</sup> Ina mamali Yonadabahanda bi mana o lenedagoni iname talialu bialu haabo haga kama. Inanebi ina one waneiginirubi bibahende waini iba nanaga kama. <sup>9</sup> Iname andabi nabiaga gerebi mabubi nahangaga mabu marubi nahangaramali. <sup>10</sup> Ani nabi ina balai anda hangu bu haabo haramaligome Yonadabahanda mana langinidagoni taluwa biaiore halu haabo haramali. <sup>11</sup> Ani hemaria Nebugadenesa Babilononaga kini kagome ina baba wai bule Kaladia ami Siria amibi ibiyangi urunime

\* **34:21:** Yaremaia mbugaha bi gilibu ngagoni mbirale uruni biyangi howa gilibu wini ndogo uruni biyangiore gilibu winigo tiga tigaore Yaremaia 37.5,11 ogoniha gilibu ngago de handabe. \* **35:1:** 2 Kin 23.36-24.6, 2 Bit 36.5-7

ina bo wahalilono gi halu ina bi lo mbira howa Yarusaleme tanoha hamiya ma lenego ibu kama. Ani buwa áyu Yarusaleme haabo kamagoni, lalu ladai biya, lene.

<sup>12</sup> Tigua bi ogoni lai hayagola Anduane Homogohanda Yaremaiahondo lamialu lalu, <sup>13</sup> I Anduane Homogo Hongo Haiheore Isaraele wali agalinaga Ngode Datagaliwabe kogo ina bi o larogo. Ina Yuda wali agalibi Yarusaleme wali agalibi tihondo ogodagua lamibe. I Anduane Homogo inaga mana lo ngogo wali agali tigua talialu bialu helo mana lawai holene hamelo ko. <sup>14</sup> Bamba Legaba igini Yonadabahandaibunaga waneiginirubi hameigini mani holobadarubi tí waini iba nane halimu lene. Anidagua lenedangi tinaga mamalinaga bi hale howa nane dege hama ibinigo áyubi ogoni dege haabo ka. Anigo ina tihondo bi mana langiaabo ha harugoyu tigua hale nahe harimigobi dege haabo kami. <sup>15</sup> Inaga mana latagi haga agaliru pu larugo ibugu biya. Tigua ibuwa ogodagua laya, Tí bibahendeme bu mini beregedowa mana ko wahai halu mana tigabi bialu halimu. Ani bialu tigua dama mitangi bialu mbirale gime wabu ngaruhondo bi pupu nawilimu. Tigua inaga mana taluwa bialu harimiyagua nde tí halimulo dindi bayale tinaga mamaliruhondobi tñihondobi ngirugoria holeberemi, lalu langini. Agali bi mana latagi hagane ibiyarume bi uruni lalu hayagoyu tigua inaga bi mana uruni hale naharimi. <sup>16</sup> Legaba igini Yonadabaibunaga waneigini aguanene hama ibinidaru tigua nde ti mamalinaga bi mana yu howa baya hangu taluwa bialu haga. Anigo wali agali áyu kamiru tigua inaga bi hale nahagaore haabo kamigoni. <sup>17</sup> Anigo ai i Anduane Homogo Hongo Haiheore Isaraele wali agalinaga Ngode Datagaliwabe kogo ina Yuda wali agalibi Yarusaleme wali agalirubi tigua hale halimulo bi ogo laro. Bamba tihondo ina bi mana langirugo tí hale naharimigonagabi ina tí nde olalu harugoyu tí ya nale harimigonagabi ina tíha mo ko holene ibilole lalu lo wirugo ibilarogoni, laya lalu Yaremaiahanda lene.

<sup>18</sup> Mani Yaremaia ibugua Legaba hameigini biaru lamialu lalu, Anduane Homogo Hongo Haiheore Isaraele wali agalinaga Ngode Datagaliwabe kago ibugua layago langero lowa lalu, Tigua tinaga mamali Yonadabanaga bi hale halu ibugua bilimu layadagua bialu haga kami. <sup>19</sup> Anigo i Anduane Homogo Hongo Haiheore Isaraele wali agalinaga Ngode Datagaliwabe kogo ina bi larogo Legaba igini Yonadaba ibu igini aguaneneru aria mbirame inaga anda kogoha biabe bu aribia haga bialu haabo holebira, laya lalu Yaremaiahanda lene.

## 36

### *Barughanda Anduane Homogonaga andaha howa mbuga dagalene go*

<sup>1</sup> Yosaiia igini Yahoiaigimi ibu Yuda dindinaga kini heane mali maria peagola Anduane Homogohanda Yaremaiahondo bi ogodagua lamini. <sup>2</sup> Ibugua lalu, Anduane Homogo ina Yuda dindihabi Isaraele dindihabi hameigini dindi tara tara ngaruhabi ogodagua bulebira lalu langiruruni bibahende mbuga mbirani gilibu wiai habe. Inaga bi bambare Kini Yosaiia heangi langirugoria howa ala gili bialu áyu ogoria langerogobi gili bibe. <sup>3</sup> Yuda wali agali bu karuha tandaga bulene tara tara dewa ina mo yu anda ibiloleberogo lalu langerogoni hale howa tigua mana ko bialu karuni wahai halu bu mini beregedelo. Ani biyagua nde ina tinaga ko wiyaru domo wahai holebero laya, lene.

<sup>4</sup> Ani layagola Yaremaiahanda Neria igini Barugu olalu ibu lowa Anduane Homogohanda bi lene biaru bibahende layadagua latagi hai hayagola Barughanda mbuga mbirani gilibu wiai hene. <sup>5</sup> Mani Yaremaia ibugua Barughondo lalu, Inime Anduane Homogonaga andaha pobe nahe kogonigo <sup>6</sup> Barugu ina Anduane Homogonaga bi áyu mbugani gili birigoni Anduane Homogonaga andaha yalu puwa bi uruni wali agali bu karu hale helo dagalo mibe. Horo mbira wali agali ti tomo nane haga heangi Anduane Homogonaga andaha ibu ngoai haragola ogonongi ina mbuga ogoni mo yalu puwa wali

☆ 36:1: 2 Kin 24.1, 2 Bit 36.5-7, Dan 1.1-2

agali Yuda tano bibahende ha howa íbu karume hale helo daga latagi habe. <sup>7</sup> Anduane Homogohanda wali agali urunihondo keba timbuniore ho kago howa ibugua wali agali uruniore mo tandaga holene gibiore ibilolebero laya. Anigo tigua mana ko bialu hayaru wahalu mini beregedalu Anduane Homogohondo biamogo bibe lalu bi layagua nde ti bayale holebira, laya.

<sup>8-9</sup> Yahoiagimi ibu Yuda dindinaga kini heane mali daunigonaga ege dini hayagola Yuda wali agalirume tomo nane wahowa Anduane Homogo mitangi bialu lotu lolene horo mo wini. Ani buwa wali agali Yarusaleme tano howabi Yuda dindi bibahende ha howabi Anduane Homogonaga andaha íbu ngoai hene. Ani ngoai ho heagola horo ogoningi Barugu ibugua Yaremaia andaha bibe lalu lamiyadagua bialu mbuga mbirani bi gilibu wiyago Anduane Homogonaga andaha yalu pene. <sup>10</sup> Yalu pialu anda tamu ha pu howa ibugua Anduane Homogonaga bi mbuga mbirani gilibu wiyago daga layagola wali agali bibahende hearume hale hai hene. Barugu ibu mbuga ogoni dagalalu howa anda tamu hobane heagoha ubanda tagi biaga panga haraba wiagoria howa dagalalu hene. Tamu hobane ogoni Sabana igini Gemaraia mbira henego ibu tamu wini. Sabana ogoni ibu bamba kininaga bi larago beba gili biaga hene. Anda tamu hobane ogoni daliga wali agali íbu ngoaiho haga wiagoria Anduane Homogonaga anda haraba panga mini Panga Gahenge laga wiagoria hene.

*Baruguhanda kininaga agali haguane hearuhondo mbuga biagonaga bi dagalo minigo ogo*

<sup>11</sup> Sabana aguane Gemaraia igini Migaia ibu Anduane Homogonaga andaha howa Baruguhanda Anduane Homogonaga bi mbuga biagoria gilibu wini dagalayago haleho hene. <sup>12</sup> Ani hale halu ibu kini andaga pole dalipe halu pene. Puwa anda hobane mbira kininaga beba gili biaga biragane wiagoha pialu kininaga haru haga hearu ngoai ho berearia anda pene. Haru haga agali berearu ti kininaga beba gili biaga Elisamabi Semaia igini Delaiabi Agabo igini Elenadanabi Sabana igini Gemaraia Hananaia igini Sedegaiabi agali marubi mandagi ngoai ho berene. <sup>13</sup> Ti berearia Migaia ibuwa ibugua Anduane Homogonaga bi mbugani gilibu winiru wali agali bu hearume hale hai helo Baruguhanda dagalayaruni bibahende garea lomiai hene. <sup>14</sup> Agali haru haga biarume Migaia andaha bi layago hale howa agali mbirame Barugu ibilo haru ibule pu lene. Agali Barugu damu piyadagoni Selemaia aguane mini Yahudi ibu Nedania igini hene. Selemaia ibu Kusi igini hene. Yahudi ibugua Barugu hearia puwa lalu, Mbuga ína wali agali hale helo daga latagi harigoni mo yalu íbu, lene. Ani layagola Barugu ibugua mbuga biagoni agali haru haga biaru ngoaiho berearia mo yalu ibini. <sup>15</sup> Mo yalu ibiyagola agali haru haga biarume lalu, Mbuga ogoriani bi gilibu ngaruni ina hale holomaya dagalole birabe, lene. Ani layagola Baruguhanda ti hale helo mbuga biago dagalalu berene. <sup>16</sup> Tigua bi mbugani gilibu wiaru dagalayago hale howa ti mogo timbuni lalu gi howa tini handaya haga haga bini. Ani buwa tigua Baruguhondo lamialu lalu, Heneneore kini ibu bi ogoni hale helo lamule porama, lene. <sup>17</sup> Ani lowa tigua hale halu lalu, ína bi uruni agua bialu mbuga ogoriani gili binibe. Yaremaia ibugua bi uruni gili bia lalu langigi biyagola ína gili bigi biribe ina hale holomaya langi, lene.

<sup>18</sup> Ani hale hayagola Baruguhanda ladai bialu lalu, Ogoni henene. Yaremaia ibugua langiyagola ína gili biaga wiagome mbuga ogoria bi layago gilibu wirudagoni, lene. <sup>19</sup> Ani layagola haru haga biarume lalu, Áyu ogoniore Yaremaia karia abale dai bialu libu haru ibida pialu mbiraha ha do hole pudaba. Agali haguane karume bi ogoni hale hayagua libu bo waholebirago dindi piagone mbira libu ha do kabigo agali marume hondolani hondowa halibu, lene.

*Mbuga biago daga layagola kini ibugua hale halu keba howa budu delenego ogo*

<sup>20</sup> Agali haru haga biarume mbuga biago muwa kininaga beba gili biaga Elisamanaga tamu wiagoha mo ngelene. Ani mo ngelowa kini biago wali agali ngoai haga wiagoha berearia pialu tigua mbirale o biyaruni lamiai hene. <sup>21</sup> Lamiai hayagola kini ibugua bi uruni hale howa Yahudihondo mbuga ogoni mo pu lene. Yahudi ibugua mbuga ogoni Elisama tamuha wini biago mo yalu kini berearia ibini. Mo yalu ibuwa ibugua kinibi ibunaga agali haguane hearubi ti hale helo dagalo mini. <sup>22</sup> O binidagoni ege dini hayagola dagare bulene horo tagira ibiyangi kini ibu ibuni andaga hobane mbira biragane wiagoha ira deagoria dagare dogo bialu berearia mbuga biago mo yalu ibini. <sup>23</sup> Yalu ibuwa Yahudi ibugua mbuga biago dagalalu hene. Wene obeneni dagalalu heaore dege kini biagome ayu tibu emene mbirame mbuga Yahudihanda dagalayagoyagi poda muwa iraha delene. Dagalaga biyagola emene podo delaga bialu kini ibugua mbuga biago budalu bibahende irani delai hene. <sup>24</sup> Ani delai howa kinibi ibunaga agali haguane biarubi ti bibahendeme bi mbuga biagoria wini dagalayago hale hai howa tigua ko biyarunaga taga halu daraho kama lalu walia halu tinaga aga buda nabi halu gi naheore hene. <sup>25</sup> Agali maru Elenadanabi Delaiabi Gemaraiabi tigua kinihondo mbuga ogoni nadelole lowa hongo howa lamiyagolabi kini ibugua tinaga bi uruni hale nahe howa budu delaiore hene. <sup>26</sup> Ani bialu kini ibugua ibu igini Yaramelebi Asariele igini Seraiabi Abadele igini Selemaiabi tigua agali kirali bi mana latagi haga Yaremaiabi beba gili biaga Barugubi minu yalu ibule pudaba lene. Ani layagola agali uruni tigua ogonilabo minule taya bima pialu hearia Anduane Homogohanda agali ogonilabo mo do heagola tigua nahende tayabu wahene.

*Yaremaiahanda mbuga mende gilibu aribia henego ogo*

<sup>27</sup> Kini Yahoiagimi ibugua Anduane Homogonaga bi Yaremaiahanda Barugu lamiyagola ibugua gilibu wigi bini biago budu delayagola mani Anduane Homogohanda Yaremaiahondo lalu, <sup>28</sup> Mbuga mende muwa Yudanaga Kini Yahoiagimihanda budu delayagoni bi o biaruni dege lone gili bibe. <sup>29</sup> Ani bialu Kini Yahoiagimihondo bi mbira ogodagua gilibu pelabe. I Anduane Homogo inioreme larogo. Kini Yahoiagimi ina mbuga biago irani delalu Yaremaiahondo bi ogodagua lari. Babilononaga kini ibuwa inanaga dindi ogo bo gialobaga bialu mo labu halu wali agali bibahendebi nogo tara tara karu bibahendebi bo hilo wahai holebira, lalu gilibu winiyago ihondo ani bulebira lalu aiwa langiyabe, lalu hale harigoni. <sup>30</sup> Ai áyu Anduane Homogo inaore Kini Yahoiagimi ihondo larogo, Inaga waneigini aguaneneoremebi Kini Debidinaga biragane dagia ngagoria biruwa haru ho haga kini mbira naholebira. Kini Yahoiagimi í homarengibi nde inaga tingini mbiralime mo yu hora nahe dindini ngelowa kagola nime do yogo bialu mbiraga dagare bialu pibira ibira haragomebi libulo waho wulebira. <sup>31</sup> Inabi inaga waneigini aguanenerumebi inaga agali haguane karumebi tí bibahendeoreme ko birimigonaga ina bo hilo wahaiore holebero. Ina abale tihondo bi langirugoni tí hale nahe harimigo ai ani bulebero larudagua genda timbuniore Yarusaleme tanohabi Yuda dindi bibahendehabi ibai helolebero, lalu Anduane Homogo ibugua lene.

<sup>32</sup> Anduane Homogohanda bi ani layagola Yaremaia ibugua mbuga gahenge mbira gili biaga agali Baruguhondo lone gili bilo mo mini. Ani muwa Yaremaiahanda bi abale kini ibugua delayagobi lone ladai bini. Ani bialu bi marubi ogonibi dege latago halu Baruguhanda gili bilo lamini. Ani lamiyagola Barugu ibugua bi uruni bibahende mbuga gahenge ogoriani gilibu wiai hene.



<sup>1</sup> Babilono dindinaga Kini Nebugadenesahanda Yahoiaigimi igini Yahoiaigini ibu Yuda dindinaga kini henego mo aribia halu Yosaiia igini Sedegaia ibu Yuda dindiha kini helo dabo helene.\* <sup>2</sup> Sedegaia ogoni ibuguabi ibunaga agali haguane hearumebi ibunaga wali agali bibahende hearumebi Anduane Homogonaga bi Yaremaiaha howa latagi haga biyago hale nahagaore hene.

<sup>3</sup> Horo mbirungi Kini Sedegaiahanda agali kirali Selemaia igini Yahugalabi Masea igini loma binigo mo miaga Sebanaiabi libuhondo lalu, Libugua Yaremaia karia puwa au lalibu. Kini ibugua lalu ina bayale holomaya biamogo bia lalu Anduane Homogo inanaga Ngode Datagaliwabhondo bi lahabe laya, lole pudaba, lene. <sup>4</sup> Ogoningi tigua Yaremaia garabaya nabi heangi howa ibunime ta nabi poa biyagoha puibu bialu ibaga biai haga hene. <sup>5</sup> Horo ogoningi Babilononaga ami henerume Yarusaleme ho hagira bu hearia tigua Iyibi dindinaga ami dewaore Iyibi dindiha howa Yarusaleme ibule harigani ibira layago hale howa Babilono ami biaru ti wahalu dai bini.

<sup>6</sup> Ti ani bialu heangi Anduane Homogohanda bi mana latagi haga Yaremaiahondo bi maru laminigo ogo. <sup>7</sup> I Anduane Homogo Isaraele wali agalirunaga Ngode Datagaliwabe ina larogo. Yuda wali agalirunaga Kini Sedegaia ibugua ina ti biamogo buledabe nabuledabe hondole hale ho pudaba layadago. Ani biyadago ai dai buwa kinihondo ogodagua lamibe. Iyibi dindiha kini kagonaga ami ti biamogo bule tagira ibalu hariga obeneni howa ti beregedalu tininaga dindi dai bialu ti kamiria anda naibulebira. <sup>8</sup> Ani biragola Babilononaga ami biaru lone dai buwa ti baba Yarusalemeni wai bialu tano ogoni ti karulowa irame bo heda hai holebira. <sup>9</sup> Anduane Homogo inaore larogo. Tigua lo mitangi bialu, Babilono ami biaruni Yarusaleme lone nadai bulebira, lolamini. Ani larimiyagua tini mo hondo haramigoni. Babilono ami ti ibulebira larogo heneneore ibulebira. <sup>10</sup> Tigua Babilono amiru baba wai bialu uruni bibahende bo podahana harimiyaguabi tinaga ami agaliru dewaore bo homelai harimiyaguabi maru timu heba homabehe yalu dai buwa wai hamani anda karuha wiyaguabi tigua hibu lalu ibuwa Yarusaleme tano bo heda halu delolebiraore laro, laya lene.

### *Yaremaia garabaya binigo ogo*

<sup>11</sup> Babilono ami biarume Iyibi kininaga ami harigani ibira layago hale howa ti Yarusaleme wahalu pialu tini dalu dai bini. <sup>12</sup> Horo ogoningi Yaremaia ibu Yarusaleme wahalu Beniyamini hameigini dalu wiagoha dindi mbira ibu damenerunaga wiago ibuni mo wule pene. <sup>13</sup> Ani pole lowa Yarusaleme tano wahalu tano pabe panga mbira mini Beniyamininaga Panga laga winigoria tagira pole pene. Ani tagira pialu hearia Yaremaia ibugua ami haru haga haguane mbira Hananaia aguane ibu Selemaia igini mini Iriya henego ibu wali agali panga haraba ogoniha ubandatagi ai birabe hondole lowa mamage ho hearia ibini. Ibiyaria Iriya ibugua Yaremaia abale minu yania howa lalu, I Babilono wali agaliru baba Babilono dindiha hama polenaga ohalu pialu heria handa walia kogoni, lene.

<sup>14</sup> Ani layagola Yaremaiahanda ladai bialu lalu, I ke haregoni. I Babilonoaliru karia pole ndo poro, lene. Ani layagola Iriyahanda Yaremaianaga bi layagoni mo henene nahe howa ibugua Yaremaia agali haguane berearia minu yalu pene. <sup>15</sup> Agali haguane biarume Iriyahanda bi layago mo henene howa tigua Yaremaiahondo keba timbuniore hene. Keba howa tigua Yaremaia tibume minu balu beba gili biaga agali mbira Yonadana henego ogoni andaga mo garabaya anda buhinu winigo ogoniha Yaremaia garabaya helo helene. <sup>16</sup> Garabaya anda ogoni hobane dindiha henego ai Yaremaia ibu garabaya anda ogoniha luore hene.

<sup>17</sup> Mani howa Kini Sedegaiahanda, Yaremaia i koria ibilo agali maru nahendelo ohalu damu pudaba, lene. Ani layagola tigua Yaremaia damu puwa haru dai biyagola

\* 37:1: 2 Kin 24.17, 2 Bit 36.10

kini libuni hanguore biruwa kini biagome Yaremaiahondo hale halu lalu, Anduane Homogohanda ihondo bi mbira langiyabe nalangibe, lene. Ani layagola Yaremaia ibugua kinihondo ladai bialu lalu, E Anduane Homogo ibugua bi mbira ogodagua langiya. Mbiralime í minalu Babilononaga kini bedago ibunaga giha minu ya holebira laya, lene. <sup>18</sup> Ani lowa Yaremaiahanda kinihondo hale halu lalu, Ina ihondobi inaga agali haguane karuhondobi wali agali maru karuhondobi ko mbira agi birugonaga í garabaya heledamibe. <sup>19</sup> Inaga bi mana latagi haga agali biarume mbiwia halu lalu, Babilonoalime í baba wai nabulebira, laga bialu hayaru uruni tini áyu agoha kabe. <sup>20</sup> Aiore agali haguane-o ina ihondo bi mbira hale hole hameledogo. Ina í dara halu beba gili biaga agali Yonadana ibunaga garabaya anda biagoha hole daibia nalabe. I garabaya anda ogoniha pu koria homoligo, laro lene.

<sup>21</sup> Ani layagola Kini Sedegaiahanda biabe biaga hearu lamiyagola tigua Yaremaia ibu kininaga anda pabe tamuhayagi helo ami agaliru heba helene. Ani helowa kini ibugua ibunaga mberedi hiraga andaha howa horo bibahendengi mberedi mbira Yaremaia mo migi bilimu lene. Ani miaabo halu howa tano ogoniha mberedi biba hayagola tigua mbira mulene nawiyagola howa Yaremaia ibu ami agali biaru heba garabaya hayagoha haabo hene.

## 38

### *Yaremaia iba biraga gundu uli mbiraha minupe henego ogo*

<sup>1-3</sup> Yaremaiahanda wali agali bu hearuhondo bi ogodagua lalu hene. Anduane Homogohanda lalu, Wali agali tano ogoha kamiru bibahende homai holeberemi, laya. Tínga waitigirume balu home layaguabi hina garime homarimiyaguabi warago ko tara tara ngarume homarimiyaguabi uruni mbira mbiragome homolene wulebirago ai tí bayale nahome hole hame larimiyagua nde Babilonoali amiru karia tagira pialu polene nga. Tagira pialu poramigola Babilono amirume tí abale minalu ba nabulebira. Anduane Homogohanda lalu, Tano ogo Babilono kini kagonaga amirume karulelo yupe holebero laya, lene. Ani layagola hale hene agali haguane uru. Madana igini Sebadaia Pasua igini Gedalaia Selemaia igini Yahugala Malagaia igini Pasua imaru agali mariali uruni ti hale hene.

<sup>4</sup> Agali haguane uruni tigua hale halu puwa kinihondo lalu, Yaremaia ibugua bi laragome ami agali tano mamage haga karunaga hongo bo podalu wali agali bibahende karunaga hongobi bo poda dege birago ibuni homolene nga. Agali ogoni ibugua wali agali bayale helo biamogo bulene hame nale howa bibahende homai helo hamelo kagoni, lalu kini lamini.

<sup>5</sup> Tigua anidagua layagola Kini Sedegaia ibugua ladai bialu lalu, Ogoni tini hame ledamidagua bilimu. Ina nabadababe lalu hapai naholebero, lene. <sup>6</sup> Ani laya handala agali haguane biaru tigua Yaremaia iba biraga uli mbira wiagoha haru puwa pu luni mbirame Yaremaia minu hende howa iba uli biagoha yupe hene. Uli ogoniha iba nabere dindi waru dege wini. Yaremaia ibu iba biraga gundu uli ogoniha hearia ibunaga ge waru timbuni wiagoha namu lai hene. Uli ogoni kini igini Malagaia mbira henego ibunaga winigo ai ogoni kini ibunaga anda pabe tamuhayagi ami haguane haga wiagoha wini.

<sup>7</sup> Agali mbira Sudanali kininaga agali haguane dege mini Ebedemelege henego ibu hale halu hearia tigua Yaremaia iba uli ogoniha minupe ka layago hale hene. Horo ogoningi kini ibuni tanonaga pabe panga mini Beniyamininaga Panga laga winigoria wali agalinaga godi hale halu berene. <sup>8</sup> Ani bereagola Ebedemelege ibugua kini andagaha howa tagira pialu kini berearia puwa lalu, <sup>9</sup> Agali timbuni-o agali urunime Yaremaiahondo mana ko liaheore bialu iba uli ko wiagoha minupe harimiya. Ai ibu ogoniha ngelo waharimayagua ibu tomo naneore wialu homolobada. Ai tano ogoha

tomo nawi biba hayadago í manda bidegoni, lene. <sup>10</sup> Kini ibugua bi ani layago hale howa Ebedemelegehondo lalu, Ai Yaremaia homoligo ína agali í heba kamaruni aria pira tebira (30) haru halu puwa Yaremaia iba uli ogoniha howa dugu yamule pudaba, lene. <sup>11</sup> Ani laya handala Ebedemelege ibugua agali uruni haru halu kini andagaha hobane mbira dindiha henego ogoniha anda puwa labolabo haragaya wiaru mo yalu iba uli wiagoha Yaremaia berearia yalu pene. Mo yalu puwa pu mbirani dariba howa Yaremaia bereagoha bape hene. <sup>12</sup> Bape halu howa Yaremaiahondo lamialu lalu, Labolabo uruni ínaga adogeha ala mo yuwa pu luni bape harogo ínaga gi adogeha magui habe. Iname í pume hendeho yameramagola pume í noligonaga ani bia, lene. Ani layagola Yaremaia ibugua Ebedemelegehanda bia layadagua biai hene. <sup>13</sup> Ani biai heagola tigua Yaremaia iba uli wiagoha howa dugu yamialu kininaga anda pabe tamuhayagi ami agaliru ti haga wiagoha garabaya helo helaabo hene.

### *Kini Sedegaiahanda Yaremaiala bi lone lenego ogo*

<sup>14</sup> Mani howa Sedegaiahanda, Yaremaia í koría ibilo damu pudaba, lene. Damu puwa haru dai biyagola Anduane Homogonaga anda panga haraba tebone wiagoria Yaremaia ibu kini lola hene. Libuni hanguore biruwa kini ibugua Yaremaiahondo lalu, Ina íhondo bi mbira hale hoa kogo ínabi nde yu donge nahe tigatigaore latagi habelo hameledo, lene. <sup>15</sup> Ani layagola Yaremaiahanda ladai bialu lalu, Ai ína íhondo bi heneneorego langiruyagua ína í homoliya bo waholebere. Ai íhondo mini maru bayale talebu ngialu bi langiruyagua nde ínaga bi ogoni ína hale naholebere, lene. <sup>16</sup> Ani layagola Kini Sedegaiahanda Yaremaiahondo lalu, Heneneore larogo Anduane Homogo haluhe kago ibuni wali agali bibahende bu kamarunaga holene tene howa ibuni daligaore kagonaga minini howa heneneore larogoni. Ina í bo wanaholebero. Agali ko í mo ko holene karunaga gihabi mo ya nahole larogoni, lene.

<sup>17</sup> Ani layagola Yaremaiahanda Sedegaia lamialu lalu, Anduane Homogo Hongo Haiheore howa ina Isaraele wali agalinaga Ngode Datagaliwabe kago ibugua ogodagua laya. Ina wai biadai nabi wahalu íni Babilononaga ami ibirarunaga giha ya hariyagua nde tigua í ba nabi wahalu tanobi bo heda naholebira laya. Ani biragola ínibi í one waneigini damenerubi bibahende homa nabi bayale holeberemi. <sup>18</sup> Ai íni Babilono amirume minilo wa nahariyagua ína tano ogo ti milo wahalu bo heda helo yupe holebero. Ínibi nde ti helalu yopialu napolebereore lalu, Anduane Homogohanda ani laya, lalu lamini. <sup>19</sup> Ani layagola Sedegaiahanda Yaremaiahondo lalu, Ainde Babilono amirume Yudali maru ti bamba ibida puwa Babilonoha hene karunaga giha minu ya hayagua tigua í mo ko holigonaga giho kogoni, lene.

<sup>20</sup> Ani layagola Yaremaiahanda ladai bialu lalu, Babilono amiru tigua í Yudaliruhondo minu mia nabulebira. Anduane Homogohanda íha howa bi íhondo langirago bibahende ína hale halu buleneore nga. Ani biriyagua tigua í homabelo bo wanahe bayale helolebira. <sup>21</sup> Íni Babilono amirume minilo wa nahariyagua ko uruni íha ibulebiragonaga Anduane Homogohanda íhondo de gandebaha mo walia haya. <sup>22</sup> Ina de gandeba ogoniha handalu hewaria wali kini andaga berene biaru bibahende Babilono dindiha haru puwa tigua ami haru haga agali haguane hearu migi biya. Ina hale halu hewaria wali biarume agua layua, Kini Sedegaia-o ínaga nenege biarume í mo guya halu mo hondo hayago nahende tigua íhondo henene larabe toba harigoni. Áyu mo ko holeneme íla lola kagola ínaga ge waru tabuha anda pialu namu lai hene ale kegoni. Ani hegola ínaga nenege biarume í yu wahalu ibida piaí haya, layuago hale haru. <sup>23</sup> De gandeba handarudagoni hondowa manda bialu hewaria heneneore Babilono amirume ibalu ínaga one waneigini bibahende ogonidagua bialu minu yalu piaí holebira. Íni yo pialu íbida polene henge nawulebira. Babilononaga kini kagome í minu yania holebira.

Anduane Homogonaga bi larago mo wahariyagua Babilono amirume tano ogo bo heda halu delolebiraore laro, lene.

<sup>24</sup> Ani layagola Sedegaiahanda Yaremaiahondo ladai bialu lalu, Iya bi laribagoni mendeali nalamibe. Mbirali hale helo lamiriyagua ini homolene wulebira. <sup>25</sup> Agali haguane bu karume iya bi lalu biraribago hondowa libu agi dege laribibe lalu ihondo hale halu lalu, Ina kinihondo agi laribe. Ina hale holomaya bi ogoni yu donge nahe langi. Bi bibahende langiai hariyagua nde iname i homabelo bo wa naholeberema, lalu lolebira. Tigua anidagua layagua nde <sup>26</sup> ina tihondo lamialu lalu, Mbira nalego bi mbira hangu kinihondo i Yonadana andaga biagoha garabaya lone nahole lalu hale haru. Ogoniha lone garabaya dai bu haruyagua nde i homoloboda lalu kini lamiru, labe lalu kini biagome Yaremaiahondo lamini. <sup>27</sup> Mani howa agali haguane biarume Yaremaia berearia ibuwa agi laribe lalu hale hene. Ani hale hayagola ibugua kinihanda labe layadagua ladai bini. Agali mbirame kini ibu Yaremaiala bi laribigo hale naheore. Ani biyagola agali haguane biarume Yaremaia homelo bolene hariga mbira nawiyagola tigua Yaremaia helo wahalu pene. <sup>28</sup> Ani biyagola Yaremaia ibu kini anda pabe tamuhayagi amiru haga wiagoha garabaya haabo heane dege tinaga waitgirume ibalu Yarusaleme karulene.\*

## 39

### *Babilono ami agalime ibalu Yarusaleme karulene go*

*(2 Kini 25.1-12, Yaremaia 52.1-11)*

<sup>1</sup> Sedegaia ibu Yuda dindini kini henego mali dini hayagola ogoninaga ege pini layagola Babilono Kini Nebugadenesahandaibunaga ami agali haru halu Yarusaleme ibuwa tigua tano ho hagira bialu wai bialu hene. <sup>2</sup> Tigua wai dege bialu howa Sedegaia ibu kini henego mali beane (11) hayagola mali ogoninaga ege mane horo diningi Babilono ami uruni tigua tanonaga gibuni mbirahayagi wai pabe bo podabaga bialu Yarusaleme tanoha anda pene.

<sup>3</sup> Ani buwa Babilononaga kini heagonaga agali haguane bu hearu tigua tanoha anda puwa wai pabe panga mbira mini Panga Dombeni laga wiagoria puwa ina tano ogoni handaya ho haru kamagoni lowa pu berene. Agali haguane uruni tinaga mini Negala Sarese imaru Samaga Nebo imaru Sasegimi imarubi Negala Sarese mendebi uruni berene.

<sup>4</sup> Kini Sedegaia haluibunaga ami agaliru tigua handalu hearia Babilono ami anda ibiya handala ti ibida pole manda bini. Mbiragaore ti heyalu puwa kini mabu wiagoria pabe bu gimbu bini heagoria hariga wia do henego ogoniha pora bialu tagira pole pene. Ani pialu Iba Yodana peagoha pole hariga peadagua pene. <sup>5</sup> Ani pole pialu hearia Babilono ami agali biarume talima pugu pugu bialu dindi tigabi panda panda Yarigo tano kaware wiagoria Kini Sedegaia minu yania hene. Minu yania halu tigua ibu Kini Nebugadenesa hearia haru dai bini. Horo ogoningi Kini Nebugadenesa ibu Hamada dindiha Libila tano wiagoria hene. Ani hearia tigua Sedegaia haru ibiyagola de hondowa Nebugadenesa ibugua ibu mana ko biyagonaga pani nolene nga lene. <sup>6</sup> Babilonoali biarume Sedegaia igini hearubi Yuda wali agalinaga agali haguane hearubi bibahende Libila tanoni minu yalu pu heagola Kini Nebugadenesa ibugua bidaba layadagua tigua Sedegaia ibu deni handaya helowa ibu igini biaru homelo bo wahai hene. Ani bialu Yuda wali agalinaga agali haguane biaru tibi homelo bo wahai hene. <sup>7</sup> Ani bialu kinime bidaba layadagua tigua Sedegaianaga de kirabali halu wahalu gi geru seni pume minu daba howa Babilono haru pene. <sup>8</sup> Ani bialu heatambu Yarusaleme tanoha Babilono ami agali biarume kini anda heagobi wali agali marunaga anda bu hearubi bibahende bo heda hai hene. Ani bialu Yarusaleme tanonaga wai pabe

\* 38:28: Ese 33.21

hongohe bu hearuni bibahende bo gialopaya biai hene. <sup>9</sup> Babilononaga ami agali haru haga haguane mini Nebusaradana ibugua ami agali haru halu Yarusaleme dai buwa wali agali maru yu wahene hearu minu garabayabu yalu Babilono piai hene. Ani bialu Yuda wali agali maru ibida pialu ti heagoha pu hene hearubi heba minu garabayabu yalu Babilono dege piai hene. <sup>10</sup> Ani bialu wali agali maru mbirale nawi yagibano hearu dege Yuda dindiha helo yupe ho helene. Wali agali helo yupe hayadaruni ti tininaga dindi mbira nawi heneyagola ibugua gerebi mabu wiarubi mabu tara wiarubi wali agali uruni ti karulo helo mo mini.

*Yaremaia garabaya golope henego ogo*

<sup>11</sup> Kini Nebugadenesa ibugua Yaremaia mitangi bialu ibunaga ami agali haru haga haguane Nebusaradana Yarusaleme hearia bi lo pelalu lalu, <sup>12</sup> Ina Yaremaia damu puwa bayuwa haru habe. Ibuha mo ko hole mbira buleni nabibe. Ibugua ibunaga hame ngago talialu bia lalu ihondo hale harago ina bibe, lalu bi lawia hene. <sup>13</sup> Ani layagola haru haga agali haguane Nebusaradanabi agali haguane kirali ibu andaneha haga Nebusabanabi Negala Saresebi Babilonoali agali haguane maru bu hearubi <sup>14</sup> tigua agali maru Yarusalemeha ami agali haguane haga wiagoha Yaremaia garabaya hearia damu pudaba lene. Damu pialu haru dai buwa tigua agali mbira Sabana aguane ibu Ahigama igini Gedalaia heagome Yaremaia handayaho helo ibu andaga haru pu lene. Anidagua biyagola Yaremaia ibu Yuda wali agaliru heba Yuda dindiha hene.

*Anduane Homogohanda Ebedemelegehondo bi laminigo ogo*

<sup>15</sup> Ala Yaremaia ibu ami agali haga wiagoha garabaya heangi Anduane Homogohanda bi ogodagua lamini. <sup>16</sup> Ina Sudanali mbira mini Ebedemelege kagohondo bi ogodagua labe. Anduane Homogo Hongo Haiheore Isaraele wali agalinaga Ngode Datagaliwabe kago ibugua ihondo ogodagua laya. Bamba ina dindi ogo mo ko holene ibilolebero lalu lowirugo áyu tagira ibilarogoni. Ina tano ogoni bayale ngela nabi mbira bule lowirugo berogola ina de hondolebere. <sup>17</sup> Anigo Anduane Homogo ina uruni berongi í biamogo bulebero. Ina agali maru ti hondowa í giho haga harigonaga giha í minu ya naholebero. <sup>18</sup> Inime í baya hangu mamage howa haru kogola tigua í bo wa naholebira. Ina ihondo mini mbiraore wu haga kegome í nahomolebere. I Anduane Homogo ina bi o ledogoniore, laya, lene.

## 40

*Nebusaradana ibugua Yaremaia golope henego ogo*

<sup>1</sup> Nebusaradana ibugua Yaremaia garabaya heago golope hayagola Anduane Homogohanda Yaremaiahondo bi lamini. Yaremaiabi Yuda wali agali Yarusaleme wali agalirubi ala seni pume hende hamagamaga bialu Babilono garabaya bu yalu pene. Ani yalu harigani pialu hearia Lama tano wiagoria ami haru haga agali haguane Nebusaradana ibugua Yaremaia heba garabaya haru heneyane de hendene.

<sup>2</sup> Horo ogoningi ani hondowa Nebusaradana ibugua Yaremaia emene habagi howa lamialu lalu, Anduane Homogo inaga Ngode Datagaliwabe ibugua dindi ogoriani ko holene ibulebira lalu layadagua ibiyadagoni. <sup>3</sup> Ko holene uruni áyu o birane ini de hendedegoni. Isaraele wali agalime mana ko wiaru bialu haabo howa Anduane Homogonaga bi mo waharimi. Irane ogonimeore ko holene ogoni tíha ibiragoni ndobe. <sup>4</sup> Anigo bi o larogo hale halu áyu ina seni pume inaga gini dariba hayadago golope harogo í golope hene habe. Ani berogola ina í porodagua Babilono ibua biyagua nde ina í baya hangu handayaho holeberogo ai ma. Manga biyagua nde wahalu hondo habe. Ani bialu dindi tara tara ngaruha inime poa biragoha ta nabi pobelo golope hene kegoni, lene.



<sup>5</sup> Yaremaia ibu Nebusaradanahanda bi layaruni hale howa pu nabi hondo hene. Ani heagola Nebusaradana ibugua lone lalu, Ani poa nabiyagua nde Sabana aguane Ahigama igini Gedalia karia dai bibe. Babilononaga Kini Nebugadenesahanda agali ogoni ibugua Yuda dindiha tano ngaru handayaho helo heleda. Ibu wali agali maru karu baba holebirago íbi nde ibula mandagi habe. Ani hoa nabiyagua nde dindi maru ngaruha ínime hoa biragoha hole pobe, lene. Ani lalu nde Nebusaradana ibugua mbirale mbira Yaremaia mo turu halu mialu tomo marubi talebu mialu Yaremaia ibu pelo yupe hene. <sup>6</sup> Ani biya handala Yaremaia ibu Gedalia hearia Misiba tano pole pene. Puwa Yaremaia ibu wali agali yu wahene Yuda dindiha hearu baba mandagi hene.

*Gedalia ibu Yuda dindinaga gabumane haguane henego ogo*  
(2 Kini 25.22-24)

<sup>7</sup> Yudanaga ami agali marubi agali haguane marubi Yuda dindi gibuni wiaruha haga haga bu hene. Tigua hale halu hearia Babilono kini kagome Gedalia ibu gabumane haguane Yuda dindiha howa wali agali yagibano Babilono dindiha garabaya nape yu wahene hearu handayaho helo dabo heleda layago ti hale hene. <sup>8</sup> Ani hale howa agali haguane uruni tigua tinaga ami agaliru haru halu Misiba tanoha Gedalia hearia pene. Agali haguane penedaruni Nedania igini Isimalebi Karea igini kirali Yohanana Yonadanalabi Tanahumede igini Seraiabi dindi Nedobali mbira mini Ebai igini bu hearubi Maga dindi wiagoali Yasaniabi uruni ti pugu bini. <sup>9</sup> Gedaliahanda agali uruni ibiyago hondowa tihondo lalu, Ina tihondo heneneore larogo tigua Babilonoali karu andaneha hole gi nahe halimu. Tigua dindi ogoria kamingi Babilono kini kago andaneha howa tí bayale holeberemi. <sup>10</sup> Ini Misiba dindi ogoria kogola Babilonoali tigua oali hondo ibirangi ina Yuda wali agali tínaga bi lahaga holebero. Tigua tano tini halu ibirimidaruha hama dai bialu ira liniru do wialu gerebi liniru dowo waini iba wabialu olibe lini weliru maninaga hambu wigi bule dai bidaba, lene. <sup>11</sup> Horo ogoningi Yuda wali agali maru Moaba dindihabi Amono dindihabi Idomo dindihabi dindi tara tara wiaruha hearumebi hale halu hearia Babilono kini heagome wali agali maru Yuda dindiha helo wahalu ibugua Gedaliahanda wali agali uruni haru helo dabo heleda layago hale hene. <sup>12</sup> Ani layago hale howa Yuda wali agali waime ba togolaya handala dindi maruha ibida pu haga biniru ti Yuda dindiha dai bigi bini. Dai bialu tigua Gedalia ibu Misiba tanoni hearia hondo pugu bini. Ani bialu mani mabu wiaruha tomo bayale tara tara wiarubi gerebi lini dearubi bu wialu tomo dewaore bu payabu wini.

*Isimalehanda Gedalaia bo wahenego ogo*  
(2 Kini 25.25-26)

<sup>13</sup> Horo mbirungi Karea igini Yohananabi Yudanaga ami agali haru haga marubi ti Gedalia hearia Misiba dindi ibini. <sup>14</sup> Tigua ibuwa Gedaliahondo lalu, Amononaga Kini Balisi kagome agali mbira Nedania igini Isimale ibugua í bo wahole pu lene ibirago í manda nabi kebe, lalu lamini. Ani layagola hale howa Gedalia ibugua bi ogoni mo henene nahe wahene. <sup>15</sup> Ani biyagola Yohanana ibu Gedalia emene haru pu bagi howa ibugua lalu, Ina Isimale bo wahole poliya ina í pu lolene karulapedabe be waha larebe. Ani bo waharuyagua mbiralime de nahende howa aiwa bo wahayabe toba holebira. Agali ogonime í belo wahariyagua Yuda wali agali í andaneha bu karuni purogo laragola inanaga wali agali emene bu karuni mo ko holene wulubadago, lene. <sup>16</sup> Ani layagola Gedaliahanda Yohananahondo ladai bialu lalu, Ina mana ogonidagua bulene nawi. Isimalehanda í bo wahole ka laregoni henene ndo lare, lene.

## 41

1-2 Isimale ibu Elisama aguane Nedania igini howa ibu Yudanaga kini heneru aria mbira hene. Ani howa ibu kini aria agali haguane mbira howa ibugua mali ogoningi

✧ 40:7: 2 Kin 25.22-24

dege ege kane layagola agali pirali haru halu Babilononaga gabumane agali haguane Gedalaia hearia Misiba tano ibini. Ibu Gedalaia heba mandagi tomo nalu birama lo biruwa Isimale halu agali pirali biarume tinaga ayu tibume Gedalaia homelo bo wahene.✧ <sup>3</sup> Ani bialu Isimalehanda Yuda wali agali maru Misiba dindiha Gedalia heba haga bu hearubi homelo bo wahalu Babilono ami agali maru horo ogoningi Misibani bu hearubi homelo bo wahalu bini.

<sup>4</sup> Horo mendengi wali agali bu hearume Gedalia homaya manda nabi heaore <sup>5</sup> agali pira halira (80) Segeme tanoalibi Silo tanoalibi Samaria tanoalibi Misiba tano kawareni hariga wiadagua ibini. Tigua lomabu mulenaga widirubi ira hagua ngabilo lomabu delaga inisenesi wiarubi Anduane Homogohondo lomabu mule Yarusaleme yalu pole pialu hene. Agali uruni tigua daraho kama lowa mo walia halu tinaga aga budabaga bini karuleru tinaga angari minu dogaiheru tininaga tingini darama ibilo minu podagabiru ibini. <sup>6</sup> Isimale ibugua agali uruni ibira layago hale howa Misiba yu wahalu ti harigani lola hole pene. Agali urunime ibubi nde ti baba daraho kabe toba helonaga dugu bima harigani lola hole pene. Ibugua puwa tihondo lalu, Tigua Gedalia hondo ibidaba, lene. <sup>7</sup> Ani laya handala ti tanoha anda pialu hearia Isimale haluibunaga agali biarume agali ibiyaru maru homelo bo waha tinaga tingini tanoha iba berelo uli tombo wini wiagoha bape haga bini.

<sup>8</sup> Ani biyagola agali o bayadaru aria pirali hangu yu waheneyago tigua Isimalehondo lalu, Iname tomo dewaore widirubi balirubi olibe lini welibi mone ibanebi dangi teha do kamago í mo ngulumaya ina ba nabi wahabe, lene. Ani layago hale howa Isimale ibugua agali pirali uruni nabe wahene. <sup>9</sup> Iba uli ogoni bamba Misiba tanoha Isaraeleali Kini Basanaga ami agalime wai ibalu ho hagirabu yaanda hayagola wali agali tano ogoniha hearu ti iba biraabo helonaga Yudali Kini Asahanda tombo wini. Isimalebiibunaga agali biarumebi Gedalia halu wali agali bo paya biyaru bibahendenaga tingini mo yu puwa iba biraga uli ogoniha wu tolelene. <sup>10</sup> Ani biai halu mani Isimalehanda Yudanaga kini biago wane berearubi wali agali maru Misibaha bu hearubi minu yalu pene. Wali agali uruni Babilononaga ami haru haga agali haguane Nebusaradana-handa ti garabaya helo yalu nape yu wahalu Gedaliahanda Misibani handayaho helo helene. Isimalebiibunaga agali biarubi ti Misiba yu wahalu hariga Amono dindihayagi peadagua pole pialu hene.

<sup>11</sup> Ani pialu peagola Karea igini Yohananaami Yuda ami haru haga agali haguane marubi Isimalehanda mana ko ogoni biya layago hale hai hene. <sup>12</sup> Tigua hale howa tinaga ami agali bu hearu haru halu Isimale baba wai bule haruru talima pene. Talima pugu pugu bialu Gibeono tanoha iba kuyama timbuni bereagoria pialu hearia tali minini. <sup>13</sup> Ani tali minayagola wali agali Isimalehanda Misiba howa minu yalu ibiyarume Yohanana halu agali haguane maru biaru ibiyago de hondowa turu timbuni hene. <sup>14</sup> Tigua ani hondowa Isimale yu wahalu Yohanana hearia gerai lalu ibida dai biai hene. <sup>15</sup> Ani biyagola Yohanana haluibunaga agali biarume Isimale minule bialu hearia Isimale ibuibunaga agali halirali hangu haru halu ibida pialu Amono dindiha pene.

<sup>16</sup> Ani biya handala Yohananaami agali haru haga biarubi tigua Misiba wali agali Isimale giha hearia minu yu dai biyaru haru halu Gibeono tano wahalu pene. Ami agali marubi agali marubi wali waneiginirubi kini aria bu hearunaga biabe biahagarubi uruni ti haru pene. <sup>17-18</sup> Wali agali waneigini piyaru tigua manda bialu hearia Babilono kini heagome keba howa ina bo waholilono ti gi howa Iyibi dindiha hama polenaga harigani pialu hene. Ani penedagoni irane Isimalehanda agali mbira Gedalia dabalu Yuda dindi handayaho helo helayago bo wahayagonaga tigua kinihondo gi howa ani pialu hene. Ani puwa tigua Bedeleheme tano kawareni Gerudu Kimihama dindi wiagoria anda puwa ogoriani emene hene.

✧ 41:1-2: 2 Kin 25.25

## 42

*Wali agali hearume Yaremaiahondo, Ina Anduane Homogohondo inanaga bi la habe, lenego ogo*

<sup>1</sup> Ani howa mani Karea igini Yohanana halu Hosaia igini Yasaniabi\* ami agali haguane hearubi wali agali mini lene nalene hearubi bibahendeoreme <sup>2</sup> Anduane Homogonaga bi mana latagi haga Yaremaia hearia pene. Puwa tigua ibuhondo lamialu lalu, Ina wali agali emene yu wahene bu kamaru biamogo bilonaga ina Anduane Homogo inanaga Ngode Datagaliwabe kagohondo bi lahabe. Abale ina dewaore harimago áyu nde ina emeneore o kamagonidago de hendedegoni. <sup>3</sup> Áyu Anduane Homogo inanaga Ngode Datagaliwabehanda inahondo ogoale bia ogoha pu lalu bi langilo hamelo kama, lene.

<sup>4</sup> Anidagua layagola Yaremaia ibugua tihondo ladai bialu lalu, Tigua bi laramigoni e laro. Ina Anduane Homogo inanaga Ngode Datagaliwabehondo tigua bi larimidagua hale haro. Ani hale harogola Anduane Homogo ibugua ladai birago mbira yu donge nahe bibahende tihondo langiai holebero, lene.

<sup>5</sup> Ani layagola wali agali biarume Yaremaiahondo lamialu lalu, Heneneore laramago Anduane Homogo inanaga Ngode Datagaliwabehanda bia laradagua iname biaiore holeberema. Anduane Homogo ibu mana heneneore tigabi bulene ngadaguaore biaga kagome mbirale mbira bilimu lenego iname nabirimayagua nde ibugua ina baba godi lalu ko birimi lelo. <sup>6</sup> Anduane Homogohanda inahondo turu holene bi ladai biyaguabi ina hale hoa nabigo ladai biyaguabi ihondo langiradagua iname talialu biai holeberema. Iname Anduane Homogo inanaga Ngode Datagaliwabenaga bi hale halu birimayagua nde ina bayale holeberema, lene.

*Anduane Homogohanda Yaremaianaga bi layago ladai binigo ogo*

<sup>7</sup> Yaremaiahanda bi lo heane dege horo pira peagola Anduane Homogohanda Yaremaiahonda ladai bialu lamini. <sup>8</sup> Ani lamiyagola Yaremaiahanda Yohananabi ami haru haga agali haguane hearubi wali agali mini lene nalene hearubi bibahendeore olalu, Ibai hadaba, lene. <sup>9</sup> Ibiyagola ibugua tihondo lamialu lalu, Tigua Anduane Homogo inanaga Ngode Datagaliwabehondo hale habe lalu ihondo langirimigoni Anduane Homogohanda ogodagua laya. <sup>10</sup> Tí oali Yuda dindini harimiyagua nde ina tí bope nahe mo hongo halu holebero. Ina tihondo genda tandagabi ngirugoni mitangi bialu inaga miniha gendaho kogoni. Anigo ina tí ira hangagadagua hongoleberogo mani dugu wa naholebero.\* <sup>11</sup> Tigua Babilononaga kini kagohondo gi timbuni ho harimigo ai gi nahe halimu. I Anduane Homogo kogo ina tigatiga larogo ini tí baba mandagi haabo kogonigo tí gi holene nawi. Tí ibunaga giha yu karia ina biamogo bialu haru dai bulebero. <sup>12</sup> Ina tihondo dara holene nawini dara ho kogodagua kini ibuguabi tí hondowa dara helo ibuha dara holene mo wia holebero. Ani berogola ibugua tí tininaga dindi dai bilolebira. I Anduane Homogo ina bi o ledogoniore, lene.

<sup>13-16</sup> Anigo tigua Anduane Homogo tinaga Ngode Datagaliwabe kagonaga bi mo wahalu lalu, Ina Yuda dindiha habe manga kamagoni. Ina Iyibi dindiha hole pu kamagola waitigime ina baba wai nabulebira. Ani bialu iname wai bu polenaga mbelo biguli hale nahe tomo nolenebi tubagi nahe bayale holeberema, lalu larimiyagua nde Anduane Homogo Hongo Haiheore Isaraele wali agalinaga Ngode Datagaliwabe kagome tihondo ogodagua lara. Ina tí Yuda wali agali emene kamiruhondo bi larogo hale hadaba. Tigua harugo lalu Iyibi dindiha hole pirimiyagua nde tigua áyu gi ho kamiruni Iyibi dindiha pu kamiria henene talima ibulebira. Tí waitigime bo homelalu hina garimebi homelolebira. <sup>17</sup> Wali agali Iyibi dindi pole hongo howa lalu karu bibahende homai holebira. Maru waitigime bo wahai halu maru hina garime homalu maru warago ko

\* 42:1: Yasania mini mende Asaria. 43.2 de handabe. ☆ 42:10: Yar 1.10

tara ngagome bo homelolebira. Ina mbirale ko uruni tíha mo ibilaga berogola tí damene lenego mbira yu wahenebi ibida pu henebi mbira naholebira. Tí bibahende ereba hajore holeberemi.

<sup>18</sup> I Anduane Homogo Hongo Haiheore Isaraele wali agalinaga Ngode Datagaliwabe kogo ina tigatigaore larogoni. Abale ina Yarusaleme wali agalihondo keba ho howa ti bo hilo wahaiore harugoni. Ani birudagua tíguabi nde mine halu Iyibi dindiha pirimiyagua ina tí bibahende bo hilo wahai holebero. Ani berogola wali agali dindi tara taraha karume ina tíhondo anidagua biya larago hale howa ti mogolalu gi holebira. Tí hiriribi kamigo de hondowa tigua tí mege bialu mo ngubia halu tinaga waitigi bu karuhondo ha halu howa, Yuda wali agali mo ko hayadagua tí mo ko helo, laga bulebira. Ani bialu tínaga dindi o ngago mani lone de nahondoleberemiore, laya lene.

<sup>19</sup> Yaremaiahanda Anduane Homogonaga bi ogoni lai howa ibugua tihondo lalu, Yuda wali agali emene hangu kamiru tigua bi ogo hale hadaba. Anduane Homogohanda tí Iyibi dindi napilimu laya. Anidagua layago mitangi bialu áyu ina tíhondo bi hongo howa langerogo hale halimu. <sup>20</sup> Tigua ihondo Anduane Homogo inanaga Ngode Datagaliwabehondo inanaga bi lahabe larimigonaga laro. Tigua ihondo ogodagua larimi. Anduane Homogo inanaga Ngode Datagaliwabehanda inahondo bi langiraru ina langiai habe. Ibugua ogo ale bia ogoha pu lalu ladai birago iname talialu buleberema, larimi. Ani larimigo lowa áyu tigua mana ko tara mbira beremigo langero. <sup>21</sup> Anduane Homogo inanaga Ngode Datagaliwabehanda bi tíhondo lamibe layago damene ina áyu o langirugoyu tigua bi ogoni hale halu bia nabi kami. <sup>22</sup> Anigo tigua mbira manda bilimulo langero. Dindi tí pole hamelo kamigoha pu kamiria tí maru waitigime baragola homalu maru hina garime homalu maru warago ko tara tara baragome homalu homai holeberemigo manda bilimu laro, lalu lene.

## 43

### *Yaremaia halu wali agali bibahende Iyibi dindi haru penego ogo*

<sup>1</sup> Anduane Homogohanda Yaremaiahondo bi wali agali lamibe layaru bibahende latagi hene. Ibugua bi lai heagola <sup>2</sup> Hosaia igini Asariabi Karea igini Yohananabi mine haga agali maru hearubi tigua Yaremaiahondo lalu, Ina bi ogoni ke howa lare. Ina Iyibi napobe lalu Anduane Homogo inanaga Ngode Datagaliwabehanda lama pobe lalu ihondo langiyago ndo langiri, lene. <sup>3</sup> Bi ogoni Neria igini Baruguhanda ina hangedape holenaga í mo mini wia hayagola lama ibirida. Babilono amime ibalu ina bo waha Babilono garabaya bu yalu pu bigi bilonaga ina madane birida, lene.

<sup>4</sup> Tigua bi ogonidagua layagola Yohananabi agali haguane maru hearubi Yuda wali agali bu hearubi tigua Anduane Homogohanda bi layago wahalu ti Yuda dindini ha nabini. <sup>5-6</sup> Yohananabi agali haguane biarubi tigua Yuda wali agali bu hearu haru halu pole pene. Ibu Yuda wali agali waneiginirubi bamba waitigime bo garabayabu yalu dindi tara taraha pu howa lone Yuda dindini daibu hene hearu bibahende haru halu pole pene. Ani bialu wali agali marubi Yudanaga kini wane berearubi Babilono ami haru haga haguane Nebusaradana ibugua Gedaliahanda handayaho habe lalu piyarubi heba Yuda wali agali bibahende bi Yaremaia bi Neria igini Barugubi <sup>7</sup> ti bibahendeore Yohananahanda Anduane Homogonaga bi layago wahalu Iyibi dindiha haru pene. Ani pialu tigua Iyibi dindiha Tabanese tano wiagoria anda pene.

<sup>8</sup> Ti Tabanese tanoni pu hemigola Anduane Homogohanda Yaremaiahondo lalu, <sup>9</sup> Iyibi kini kagonaga anda mbira tano ogoniha kago Yuda wali agali marume de hendedaore ina ege tole maru dugu yuwa kini anda haneni timeni ngagoriani hangama pobe. <sup>10</sup> Ani bialu howa Yuda wali agali karuhondo ogodagua labe. Anduane Homogo Hongo Haiheore Isaraele wali agalinaga Ngode Datagaliwabe kago ibugua lalu, I

✧ 43:5-6: 2 Kin 25:26

Anduane Homogo ina agali inaga biabe biahaga Babilonaga Kini Nebugadenesa dindi ogoha ibilolebero. Ani ibilalu ege tole o hangayagoria ina kininaga dagia mo ngelaluibunaga balai anda biragome dindi ege tole uruni dangila dambi holebira. <sup>11</sup>Ibugua Iyibi dindi bo haealabagabu wahole ibirangi ina wali agali maru tinde warago ko tara ngarume ti balu homelole dabo helenego waragome homolebira. Maru ti dindi mendeha garabaya pelo dabo helenego waitigime ti garabayabu yalu polebira. Maru ti waiha bo wahelo dabo helenego waima ti bo waholebira. <sup>12</sup>Ani bialu ina Iyibi wali agalinaga dama anda bu karu bo heda holebero. Anda uruniha dama mitangi bialu bi pupu wulenaga gime wabini ogoniha ngaru Kini Nebugadenesahanda maru ibu daluha mo yu pialu maru iraha do taulo pelolebira. Ani bialu nogo sibi haru haga agalime nogo e ibunaga agani irigi harago minu bo wahai hagamada ibugua Iyibi dindiha ngaru bibahende bo hilo wahaiore holebira. Anidagua bialu ibugua Iyibi bope halu wayali howa Iyibi dindi wahalu polebira. <sup>13</sup>Nebugadenesa ibu Iyibi dindiha harangi howa ibugua Iyibi wali agalinaga nihondo bi pupu wulenaga ege tole timbuni luni hingedago bo gingirulobagabu wahai halu Iyibi wali agalinaga bi pupu wule gime wabini ngarunaga anda bu karubi bo heda hai holebira, lalu Anduane Homogohanda laya lalu Yaremaiahanda lene.

## 44

### *Anduane Homogohanda Yuda wali agali Iyibi dindini hearuhondo bi lenego ogo*

<sup>1</sup>Anduane Homogohanda ibunaga bi Yaremaia ibugua Yuda wali agali Iyibi dindiha hearuhondo latagi helonaga lamini. Wali agali uruni ti Iyibi dindini Migidolo tano wiagohabi Tabanese tano wiagohabi Membisi tanohabi Iyibi dindi abene unurayagi wiaruhabi hene. <sup>2</sup>Anduane Homogo Hongo Haiheore Isaraele wali agalinaga Ngode Datagaliwabe kago ibugua ogodagua laya. Ala Yarusaleme tanohabi Yuda dindiha tano wiaru bibahendenibi ina mbirale bigi biruru ti de handai harimigoni. Ayu tano uruniha mbirali naheore mo ko hai hene ngagoni. <sup>3</sup>Yuda wali agali tigua mana ko dewa biaabo hayagome i mo keba hayagola ina ti mo ko halu bo hilo wahai haru. Tigua dama mitangi bialu mbirale gime wabini wiaruhondo bi pupu wialu uruninaga dabuni ira hagua ngabilo inisenesiru lomabu dela bigi biya. Bamba ti mbirale gime wabini urunihondo bi pupu wulene manda nabio hene. Yuda wali agali ayu kamirumebi tinaga mamali ala henerumebi dama mitangi bialu mbirale bi pupu wulenaga gime wabini ogoni manda nabi dege hene. <sup>4</sup>Yuda wali agali ti hemigoha inaga biabe bialu bi mana latagi haga agali dewa ibilalu haabo haru. Ani ibilarugola tigua inaga bi mana latagi halu lalu, Tigua mana ko ngubi ina turu naharuligo ale bialu kamigo wahai hadaba, laabo haya. <sup>5</sup>Ani lalu heago helowa Yuda wali agali bu hearume hale habe manga haya. Tigua mana ko bialu hemigo wa nahe howa dama mitangi bialu mbirale gime wabini wiaruhondo bi pupu wialu lomaru bi mialu haabo haya. <sup>6</sup>Tigua anidagua bialu hayagonaga ina ti baba keba timbuniore howa ti pani nelu mialu Yuda dindiha tano wiarubi Yarusalemeni hariga wiarubi bibahende bo haealabaga bialu mo ko hai harugo ngagoni.

<sup>7</sup>Anigo i Anduane Homogo Hongo Haiheore Isaraele wali agalinaga Ngode Datagaliwabe kogome ina tihondo hale haro. Tigua tini mo ko halu kamigo aginagabe. Tigua anidagua bialu kamigome Yuda wali agali bibahende bi tinaga waneiginirubi bibahende bo hilo wahai halu ti aria lenego mbira nahelo hamelo kamibe. <sup>8</sup>Ayu nde tigua Iyibi dindini ibu howa dama mitangi bialu mbirale gime wabu wialu urunihondo bi pupu wialu ira hagua ngabilo delaga inisenesiru lomabu delalu kamigoni agibe. Tigua mana ogonidagua bialu kamigome i mo kebaore harimigo tiha mo ko holene wulebira. Anidagua biragola hameigini dindi tara tarani bu karume ti mege bialu wali agali mendego ha halu howa tihondo lalu, Yuda wali agali mo ko hayadagua ibi mo ko helo, laga bialu holebira. <sup>9</sup>Tinaga mamali ala henerumebi Yudanaga kini henerumebi



tinaga one berenerumebi mana ko dewa bialu henego tí embeda kamibe. Anidagua dege tíguabi tí one bedarumebi mana ko dege bialu kami. Tígua mana ko uruni Yuda dindi bibahendehabi Yarusaleme tanoha hariga pedaru bibahendenibi bialu harimigo embeda ho waharimibe. <sup>10</sup>Tígua mana ko bialu harimigonaga taga nahe tını mo dindiha howa ĭ andaneha naharimigoni. Ina bi larugobi hale habe manga halu ĭnaga mana tihondobi tınaga mamaliruhondobi laabo halu harugo hale nahagaore kamigoni ndobe.

<sup>11</sup> Anidagua bialu harimigonaga ĭ Anduane Homogo Hongo Haiheore Isaraele wali agalinaga Ngode Datagaliwabe kogome tí baba waitigi halu Yuda wali agali tí bibahendeha mo ko holene ibilole mitangi bu kogoni. Tí aria lenego mbiraore hangubi mbira yu wa naholeberoore. <sup>12</sup>Yuda wali agali emene hangu dagalene ti Iyibi dindiha pole hongo halu karu ti bibahendeore biba helo bo hilo wahai helolebero. Ti Iyibi dindini howa maru waitigime bo wahai halu maru hina garime homaga bulebira. Agali haguane bu karubi agali damene bu karubi bibahende ta nabi homaiore holebira. Hameigini dindi tara taraha bu karume ti hondowa mogo lalu mege bialu hondo oba halu holebira. Ani lalu howa tigua tinaga waitigiru ha halu lalu, Yuda wali agali mo ko hayadagua tibi mo ko helo, laga bialu holebira. <sup>13</sup>Ina Yarusaleme wali agali pani nelu mialu bo wahai harudagua Iyibi dindini pu karu tiore bo hilo waholebero. Ti maru waitigime bo waharagola homalu maru hina garime homalu maru warago tara tara ngagome balu homaga bulebira. <sup>14</sup>Yuda wali agali emene hangu yu wahene Iyibi dindiha hole ibini kamiru tí bibahendeme Yuda dindiha hama dai bulene hamelo kamigoyu tí dai nabuleberemi. Tí pani nalu mo ko holene ngagoria pu tara halu tını daluha ibida dai bulene mbira nawulebiraore. Tí bibahende homai harami handala mbira mbira hangu dai buleberemi, lalu lene.

<sup>15</sup> Wali agali dewaore íbu ngoaiho heagola Yaremaiahanda bi ogoni latagi halu hene. Yuda wali agali maru Iyibi dindi abene unurahayagi haga hearu tibi nde íbu ha dege bini. Agali ogoriani íbu hendaru ti onerume dama mitangi bialu mbirale gime wabini ngaruhondo ira hagua ngabilo inisenesiru lomabu delaga beda manda bu henerubi ti onerubi wali marubi bibahendeme Yaremaiahondo ladai bialu lalu, <sup>16</sup>Ina Anduane Homogonaga minini howa bi inahondo langialu ha kegonigo iname bi ogoni hale naholeberemaore. <sup>17</sup>Mbirale inane hameme buleore lalu bi lo wirimadaru buleberema. Iname ira hagua ngabilo delaga inisenesiru dama wali beda mitangi bialu bi pupu wiaga mini Dahuliya Andaganaga Kuini Wali laga bedagonaga dabuni lomabu delalu waini ibabi odo lomabu muleberema. Bamba inanaga mamalirumebi inamebi agali haguane henerumebi kinirumebi dama wali beda mitangi bialu mini Dahuliya Andaganaga Kuini Wali laga ogonihondo lomaru mialu haga kama ndobe. Iname Yuda dindiha tano wiaruhabi Yarusaleme tanoha hariga timbuni pedaruniha howabi loma uruni ale bu mialu haabo haramali. Iname mana ogonidagua bialu hemagola inane bayale halu inanaga tomo dewaore wialu inaha mo ko holene mbira anda naibi bayale harimagoni. <sup>18</sup>Anigo iname Dahuliya Andaganaga Kuini Walihondo lomabu mialu haganego wa harimangi howa hama ibinigo áyu o kamangi ina mbirale tubagi hai halu maru waitigime bo wahai halu maru hina garime homaga biya, lene.

<sup>19</sup> Ani lowa wali berearume bi lagimbu bialu lalu, Iname Dahuliya Andaganaga Kuini Wali ogonihondo lomaru mialu biruwa ina balawame mbisigedi wabialu howa wali ogoninaga bigiya wabu hiruwa iname waini iba loma bialu odoba harimago ina agalini bu karume bayaleda lowa turu naholobadabe, lene.

<sup>20</sup> Tigua bi layaru Yaremaia ibugua hale hai howa wali agali bibahende bu hearuhondo ladai bialu lalu, <sup>21</sup>Tíguabi tınaga mamalirumebi agali haguanerumebi kinirumebi tí bibahendeme Yuda dindiha tano wiarunaga howabi Yarusalemeha hariga timbuni pugu biaruha howabi tígua ira hagua ngabiaga inisenesiru lomabu delalu hemigola Anduane Homogohanda mana ogonibi birimigonaga miniha genda

nahe ibu manda nabi kabe toba ho kamibe. Ani ndoyago ibugua bu miniha mo pehowa mitangi bu henego ka. <sup>22</sup> Tígua mana ko ngubi uruni bialu haabo hemigola Anduane Homogohanda tínaga mana ko uruni manga timbuni haya. Ani manga ho howa ibugua tínaga dindi bo labu halu mo ko hene wiaabo helalu wali agali mbira munini bu nahe áyu wiaabo kagoni ndobe. Ani bini ngago mitangi bialu wali agali tara karume tinaga waitigiru ha halu lalu, Íore Yuda dindi mo ko hene ngagobiore habe, laga bialu kagoni.\*  
<sup>23</sup> Tígua dama mitangi bialu mbirale tarahondo ira hagua ngabiaga inisenesiru lomabu delaga birimigo Anduane Homogonaga deni mana ko ngubiore birimi. Ani bialu tígua ibunaga bi mo wahalu puwa ibunaga bi mana lo wiarubi talialu nabi dege harimi. Anidagua bialu harimigome mo ko holene tíha wiyago wiaabo kagoni ndobe, lene.

<sup>24</sup> Ani lowa Yaremaiahanda Yuda wali agalihondo bi maru lalu walime biyagonagabi ladege bialu lalu, Yuda wali agali oali Iyibi dindiha íbu kamiru tígua Anduane Homogohanda bi larago bayuwa hale hadaba. <sup>25</sup> Anduane Homogo Hongo Haiheore Isaraele wali agalinaga Ngode Datagaliwabe kago ibugua lalu, Tíguabi tí one bedarumebi mbirale mbira bule lalu bi lo wirimigo henene tagira pelonaga bialu harimi. Tígua buleore lowa bi lo wialu lalu, Iname Dahuliya Andaganaga Kuini wali bedagohondo ira hagua ngabilo inisenesiru lomabu delolebi waini iba odo lomabu mulebi lalu lo wirimigo ogoni heneneore tagira pelo buleberema, larimi. Ai tígua bule lalu lo wirimigo tagira pelo nde biaore bilimu laro. <sup>26</sup> Anigo Isaraele wali agali oali Iyibi dindini kamiruni tígua í Anduane Homogo inime bi larogo hale hadaba. Ininaga mini timbuni mini leneore kogoni howa heneneore laro. Yuda wali agali Iyibi dindiha bu kamiru tígua mbirale mbira buleore lalu inaga minini howa lone naloleberemi. Tígua Anduane Homogo Bibahende Haru Haame Ho Haga kagonaga minini howa heneneore buleogo larogoni lalu mbira naloleberemi. <sup>27</sup> Í Anduane Homogo ina tigatigaore larogo tíhondo bayale mbira ina nabuleore laro. Ina tí mo ko hai holenaga handayaho kogoni ndobe. Yuda wali agali Iyibi dindiha bu kamiruni bo wahai helonaga tínaga waitigi bu karu ibilarogola tí maru bo wahalu maru hina garime homalu tí aria lenego bibahendeore homaiole holeberemi. <sup>28</sup> Tí kamiru aria mbira mbira hangu Iyibi dindi yu wahalu Yuda dindiha dai buleberemi. Anidagua birangi Yuda wali agali emene hangu Iyibi dindiha íbu harimiru tígua bi larimigo henededabe be ina bi larugo henededabe tígua hondoleberemi.

<sup>29</sup> Í Anduane Homogo ina tigatigaore larogo tíhondo manane mbira walia holebero. Tí Iyibi dindini kamiore dege mo ko halu bo hilo wahai holebero. Tígua mbirale uruni tagira ibirangi inaga bi ledogo habo nalagada lo manda bilimu. Ina tíhondo bule lalu bi lo wirugo biaiole holebero. <sup>30</sup> Anduane Homogo ina mbirale buleberodaruni ogodagua bulebero. Ina Yudanaga Kini Sedegaia Babilononaga Kini Nebugadenesanaga giha minu yaharudagua Iyibinaga Kini Hobora kago ibu bo waholene waitigi kagonaga giha minuya holebero, lalu Anduane Homogohanda Yaremaiaha howa latagi hene.\*<sup>☆</sup>

## 45

### *Yaremaiahanda Anduane Homogonaga bi mana Baruguhondo laminigo ogo*

<sup>1</sup> Yosaiia igini Yahoiaigimi ibu Yuda dindiha mali tebira kini howa mali mane heagola Yaremaiahanda Neria igini Baruguhondo bi lamini. Yaremaiahanda Anduane Homogonaga bi ibuhondo lamiyago damene Barugu lamiyagola Barugu ibugua mbuga mbirani gilibu wiai hene. Libugua biabe ogoni bialu biruwa Yaremaia ibugua Baruguhondo lamialu lalu,\*<sup>2-4</sup> Anduane Homogo Isaraele wali agalinaga Ngode Datagaliwabe ibugua

☆ **44:22:** Yar 25.11, 25.18, 25.38 \* **44:30:** Yaremaianaga bi te ogoniha howa bibahende Iyibi henedagoha biba haya. O henedagoningi Yaremaia ibu agali waheore miniwi henego ai agali mandabi hearume manda bialu Yaremaia Iyibi dindiha halu homeneda lo manda biya. ☆ **44:30:** 2 Kin 25.1-7 ☆ **45:1:** 2 Kin 24.1, 2 Bit 36.5-7, Dan 1.1-2

ihondo bi ogodagua lara, Barugu-o ina bi agua lari, I genda tandagabi timbuniore handalu kogoha Anduane Homogohanda genda dewaore lone mo tago halu ka. Ina dugu dege bialu haabo halu ainde manga ko. Iha genda damene ngago ereba nahe wiaabo ka, larigoni. Ani larigo ai Barugu-o Anduane Homogo ina ihondo bi ogo ladai berogo hale habe. I Anduane Homogo ina mbirale bini ngoru bibahende bo gialahole bero. Ani bialu ina hangarugo damene bibahende dugu wahai haro. Mbirale bo giallo wahai halu dugu wahai holeberodaruni dindi bibahendeha ani biaiore holebero. ✧<sup>5</sup> Ani buleberogo ai iha bayale dege ngelo hamelo kego agibe. Ina mini ogonidagua wu kegoni wahabe. Ina dindi bibahende mo ko hai harogola dindi i poleberegoha tigua i bo wa nahelo ina biamogo bialu i homa nabi ibida pobelonaga hariga waliala holebero. I Anduane Homogo ina bi o ledogoniore, laya lalu Yaremaiahanda lene.

## 46

### *Waime Iyibiali bope holebira lenego ogo*

<sup>1</sup> Anduane Homogohanda dindi tara tara ngarunaga lalu bi mana latagi haga Yaremaia ibuhondo lamini. <sup>2</sup> Yosaia igini Yahoiagimi ibu Yuda dindiha mali tebira kini howa mali mane heagola Babilono Kini Nebugadenesahanda ibunaga ami agali haru ibuwa Iyibi baba wai bini. Iyibinaga Kini Nego heagonaga ami agali bu hearu ti Kagemisi tano Iba Yuberedisi pedago kawareni hearia Babilono amime Iyibi ami bope hene. Anduane Homogohanda bi mbira Yaremaiahondo lamiyadaruni Iyibi dindinaga lalu lenego ogo. ✧

<sup>3</sup> Iyibinaga ami agali hagianeme bi dalimu lalu, Iyibi ami agali kamiru tigua tinaga wai humbi wirimiru mo manda manda bialu wai pole hadaba. <sup>4</sup> Nogo hosi harimiru haru ibu manda manda buwa hosini irigi howa biradaba. Ege manda wirimigo mo karulalu wai bule tidiyu hadaba. Tinaga yandareru de hadaba. Wai biagane aga gabame wabini ngamiru mo karuladaba, laya.

<sup>5</sup> Anduane Homogohanda lalu, I agi hendedobe. Iyibiali urunime gi halu ibida dai birane hendedogo agua biyabe. Ami agali hongohe karuha mbirale mo gi holene ale wiai howa tigua de handadai nabi gerai lalu ibida dai biragoni hendedo. <sup>6</sup> Agali gerai gibi laga karu ibida pobe nahe. Wai biaga pari wayali karu yo pialu polene nawi. Dindi abene uyurahayaginaga Iba Yuberedisi porago angeni ti odopebe bu ngagoni.

<sup>7</sup> Hameigini timbuni iba Naili poragobi halu hongo timbuni iba Naili li ngaligobi irigiho kago aibe. <sup>8</sup> Ogoni Iyibiali ndobe. Iyibiali ti timbuniore iba Naili ale howa tinaga hongo timbuni iba li wiagagobi ka. Iyibi ibugua lalu, Ina hameigini palia timbu halu dindi bibahendeha ho dame biai holebero. Dindi bibahendenaga tano ngaru bo giallo wahai halu wali agali tano uruniha bu karubi bo hilo wahai holebero. <sup>9</sup> Inaga nogo hosini bedemiru gerai lalu pudaba. Inaga wai biaga karisini kamiru ti gerai hongo howa ladaba. Inaga ami agali hongohe bu kamiru tibi Sudana dindi Libia dindilanaga ami agali wai humbi yaga kamirubi Lidia dindinaga ami agali danda timume wai biaga kamirubi ti bibahendemeore wai bule piailu halu pudaba, laya lene.

<sup>10</sup> Wai timbuni ogoni Anduane Homogo Hongo Haiheore kago ibugua bulebira. Badai bulene horo ogoni ibunaga nga. Ibugua waitigi karu pani nelo mulene horo ogoningi tagira ibulebira. Iyunaga ayu tibu nene gadele yidagome agali dewaore bo homai helolebira. Ayu tibu ogonime agali tingini nalu darama heba na dege bialu tombehe wulebira. Horo ogoningi Anduane Homogo Hongo Haiheore kagome agali uruni bo wahai halu dindi abene uyurahayagi Iba Yuberedisi poragoria loma ogoni bu mulebira.

<sup>11</sup> Iyibi dindi iore wandari mabuageni ko dere dururume no homahe ko bedaligobi ngegoni. I dabi helo Gileada dindiha pialu marasini mbira taya bu pobe. Erekuu bini

marasini uruni taya bialu holeni. Marasini mbira í dabi holenenaga nawulebirago habane nabulene dege nga. <sup>12</sup> Ínaga ami agali biarume ibida pialu karia tini dege dege pilo bahaga binigo dindini wiai ka. Í wai wayali nahe ibira harigome íni taga timbuni ho kegoni. Í tagaho kego dindi tara ngaruha karume te hale holebira. Dindi bibahendeha karume ínaga dugu berego hale hai holebira, lalu Anduane Homogohanda laya lalu Yaremaiahanda lene.

*Kini Nebugadenesahanda Iyibini wai bule ibulebira lenego ogo*

<sup>13</sup> Babilono Kini Nebugadenesa ibugua Iyibi baba wai bule ibiyangi Anduane Homogohanda Yaremaiahondo bi laminigo ogo, <sup>14</sup> Migidolo tanohabi Membisi tanohabi Tabanese tanohabi Iyibi dindiha tano maru ngaruhabi bi ogo lamiai habe. Waitigi bu karume tí bo hilo wahaiore holebirago Iyibiali kamiru hongo halu heyu howa wai bule manda manda bu halimu. <sup>15</sup> Tíngaga bi pupu wiaga gime wabini Abisi biago ibu hongo howa heyu ha nabi ibira helolebirago aginagabe. Irane Anduane Homogohanda mbirale gime wabini ogoni mo podobagabu ibira helelelebira. <sup>16</sup> Iyibiali dewaore tini pilo yahaga bilelelebira. Tini degedege laedene bialu lalu, Ai ina hameigini karia dai bialu inane dindi pugupugu bialu ma nalarami. Waitigime dindi ogo bo haealabaga bialu mo labu haragonidago inane daluha dai bima, lolebira. <sup>17</sup> Iyibinaga kini kago ibunaga mini ogo wilimu. Mine Howa Bi Dege Kulukala lalu Bulene Wirangi Nabi Wahaga wilimu.

<sup>18</sup> Anduane Homogo Hongo Haiheore íni Kini heneneore kogoni. Anduane Homogo haluhe haabo haga í kogome ína tigatigaore laro. Hari maru bibahende Hari Tabo ibuni bolanguahe kagobi iba solowara bedago angeni Hari Kamele daligaore kagobi agali mbira tí baba wai bule ibulebiragonaga hongo gibiore ogonibihe ibulebira. <sup>19</sup> Iyibi wali agali tí dindi taraha garabaya poleberemigo títaga dabudabu wirimidaru hubua bu manda manda bidaba. Membisi tano ngago waitigime bo haealabagabu wahai holebira. Tano ogoniha mbirale mbira nawi wali agalibi mbira nahe dindi hangu ona wulebira, lene.

<sup>20</sup> Iyibi ibuore nogo bulumaga angibuni dalua ale kagobi ngagoyu bunguna ko mini badaru mbirame dindi abene uyurahayagi howa ibalu hayulebira. <sup>21</sup> Iyibiali tigua agali dindi tara tara hearu ami agali helonaga yolo biniru ti nogo bulumaga habatigi ale ka. Tigua hongo howa wai bialu haabo naholebira. Wai ibirangi agali uruni ti wai nabi Iyibi ami agalime ibida piai hagadagua tibi pora bialu ibida piai holebira. Tiha mo ko holene timbuni anda ibirane handalu ibida piai holebira. Mana ko tinime bialu hayagonaga pani nolene horo ogoningi wulebira.

<sup>22</sup> Waitigi timbuniore kaware ibalu kagola Iyibiali karume gi timbuni howa ti giligele nale hendore nogombime heyolalu piagadagua polebira. Agalime ayu payani yalu ira kago dibule ibagadagua waitigi ibulebira. <sup>23</sup> Iyibiali ti nde dewaore irabuha ira dewa bu hagagobi kagoyu waitigime ti bibahende bo wahai holebira. Anigo waitigi ti pagaya dewa biragagobi ndo ti dewaore halu Iyibiali bolangua howa ibulebira. Títaga ami agali dewaore daga labe nahe ka. <sup>24</sup> Ína dindi abene uyurahayagi howa agali ibilarogo ti giha minu ya hai harogola Iyibi wali agali bibahende taga timbuni hai holebira. Í Anduane Homogo ína bi o ledogoniore, laya, lene.

<sup>25</sup> Anduane Homogo Hongo Haiheore Isaraele wali agalinaga Ngode Datagaliwabe kago ibugua lalu, Ína Tebese tanonaga dama mitangi bialu bi pupu wulenaga gime wabini mini Amono ngago bo gingirulobaga bulebero. Ani bialu Iyibi dindibi Iyibi wali agali karubi títaga kini karubi títaga dama mitangi bialu gime wabini ngarubi mo ko helo helolebero. <sup>26</sup> Ína Iyibinaga kini kagobi wali agali maru karu tigua kini biagome ti biamogo bulebira mitangi bialu hana ho haga karubi ti bibahendeore homelo bole

✠ 46:13: Yar 43.10-13

hamelo karunaga giha minu ya holebero. Kini Nebugadenesa halu ibunaga ami agali bu karume Iyibi bo haealabaga bialu Iyibialibi homai helo hamelo kagoni. Ani kago nde ina Babilonoali uruninaga giha Iyibi mo ya holebero. Ani buleberogoyu mani Iyibi dindini wali agali dewaore ala hagagobi lone holebira. I Anduane Homogo ina bi o ledogoniore, laya lalu Yaremaiahanda lene.

*Anduane Homogohanda ibunaga wali agali haru dai bulebero lenego ogo*

<sup>27</sup> Anduane Homogohanda lalu, Yagaba hameigini inaga biabe biahaga kamiru-o ti mogo nalalimu. Isaraele wali agaliru-o gi nahe halimu. Heneneore larogo ina ti dindi kaundiaha pu kamiria haru dai bulebero. Ina ti aguaneneru garabayabu yalu pene karia golalu ti pele mialu haru dai bulebero. Tini dindini daibu howa bayale holeberemi. Ti mo gi holene mbira naholebirago ti dungulo holeberemi. <sup>28</sup> Isaraele wali agali inaga biabe biahaga kamiru ti gi nahe halimu. Anduane Homogo ini ti heba mandagi haabo kogoni. Dindi tara tara ti bo purogolo helarugoha wali agali karu bibahende bo biba halu ereba hai helolebero. Anigo ti kamiru dege ina bo biba naholebero. Ina ti minu ba nde boleberogo ogoni ti mana lalu bolene ngadagua bolebero. Ti nabeore yo pialu pe nalolebero. I Anduane Homogo ina bi o ledogoniore, laya lalu Yaremaiahanda lene. <sup>\*</sup>

## 47

*Anduane Homogohanda Pilidia wali agalinaga bi laminigo ogo*

<sup>1</sup> Pilidia dindiha Gasa tano wiagoria Iyibinaga kini heagome anda pialu wai nabi wiangi dege Anduane Homogohanda Pilidia dindiha bulebiragonaga bi ogo Yaremaiahondo ala lamini. <sup>\*</sup> <sup>2</sup> Anduane Homogo ibugua lalu, Dindi abene uyurahayagi howa iba ibirago de handadaba. Iba ogoni ibalu li timbuni hongoheore wulebira. Iba li timbuni ogonime dindi andabi mbirale ngaru karubi bibahende namulai holebira. Tano ngarubi wali agali karubi bibahende namulai holebira. Wali agali tano uruniha haga bu karume ga timbuni lalu holebira. Ti gi timbuni howa dugu bialu holebira. <sup>3</sup> Nogo hosiru gerai lalu tinaga ge ngilinguli laruagola waitiginaga garo ale mini karisi ibirarume dindi kilikulu laruagolabi geme kilingele laruagolabi hale howa gi timbuni holebira. Waneigini aya abala bu karume ti waneigini biamogo bule handa daibu ha nabulebira. Tinaga gi hongo nahe pirilape holebira.

<sup>4</sup> Pilidia wali agali bo wahi holene hapara haragoni. Wali agali yu wahene karume Saidono wali agalibi Taia wali agalibi biamogo nabilo harigani hapai haragoni. Pilidia wali agali tinaga dindi mini Kiridi iba dege dombenaha ngago yu wahene karu Anduane Homogo ina Pilidia wali agali uruni bo wahole kogoni. <sup>5</sup> Gasa wali agali bu hearume miniha genda yu howa tinaga mandari dogo wahi holebira. Asagelono tanoha karunaga dara howa bi lolene nawulebira. Pilidia wali agali yu dindi ngagoha haga bu kamiru tigua dara ho howa tinaga tingini podaga bialu kamiruni angi waholeberemibe. <sup>6</sup> Tigua galalu, Anduane Homogo inaga ayu tibu nene gadele ngegome ina dibalu kegoni angi waholeberebe. Ayu tibu nene gadele-o yaga nu biagoha yadai bialu biabe ogoni berego nabi waholene nga, lalu kami. <sup>7</sup> Anduane Homogo inime biabe ogoni inaga wai biaga ayu tibu nene gadeleme bibe lenego wahabe nahe nga. Inaga ayu tibu wai biaga ogonime Asagelono tanohabi dindi iba solowara bedago ane ha wali agali bu karuhabi bo wahelo heledogoni, lalu Anduane Homogohanda lene.

## 48

*Moaba dindi mo ko holebira lenego ogo*

<sup>\*</sup> 46:27: Ais 41.13-14, 44.2    <sup>\*</sup> 46:27: Yar 30.10-11    <sup>\*</sup> 46:28: Yar 10.24, 30.11    <sup>\*</sup> 47:1: Ais 14.29-31, Ese 25.15-17, Yol 3.4-8, Amo 1.6-8, Seb 2.4-7, Seg 9.5-7



<sup>1</sup> Anduane Homogo Hongo Haiheore kago ibunime Moaba dindinaga bi ledago ogo. Waitigi bu karume ibalu Nebo tanoore mo ko halu bo giallo wahai holebiragonaga dara bira. Kiriadaimi tano ngagobi karulalu tanonaga wai pabe hongohe bu mabubi ngago bo giallo wahai holebira. Wali agali tano ogoniha haga bu karume taga howa mini dege dindi ho holebira. ✧ <sup>2</sup> Moaba dindi mini lene wiyago ibira holebira. Waitigime Hesebono tano anda pialu Moaba dindi mo ko holenaga bi lalu wai hanalu ka. Tigua lalu, Moaba dindi nga lene wiyago mani lone nawilo wali agali dindi ogoniha bu karu bo wahai hamiya ma, laragoni.

Madamene tano wali agali bu kamiru-o waitigi agali ibirarume tí bo wahai haragola tí bibahende homaliha piái holeberemi. <sup>3</sup> Horonaimi tano ha karume dugu timbuni biaruago hale hadaba. Mbirale bibahende mo ko hai haragonaga ga lalu dugu bialu haruagoni. <sup>4</sup> Moaba dindi mo ko haragola tinaga waneiginirume dugu hongo howa bulebira. <sup>5</sup> Moaba wali agali tigua Luhidi tano polene hariga pedadagua dugu bima pialu Horonaimi tano polene hariga pedagoha daliape halu howa kiabu dugu biaruago hale hadaba. <sup>6</sup> Tigua lalu, Tí homoligo abale ibida pudaba. Tí dindi ko iba dalu naibaga ngagoha pialu ha do hole gerai lalu ibida pudaba, lolebira.

<sup>7</sup> Moaba wali agali tígua tíninaga hongobi muni ngamirubi mo tene ho howa urunime tını bayale holomabe tobaho harimigoni. Waitigi bu karume wai bialu tibi bope holebira. Bope halu tígua damahondo bi pupu wulenaga mbirale gime wabini mini Kemoso ngemigo ibunaga loma binigo mo miaga bu karubi agali haguane bu karubi heba garabaya bu yalu dindi tara ngagoha polebira. ✧ <sup>8</sup> Waitigi bu karume ibalu tano ngaruni bo giallo wahai holebira. Tano mbiraore hangubi mbira yu wa nahe bibahende mo ko hai holebira. Anduane Homogo ina larudagua dindi ulini yu dindi ngarubi dindi bare hambene ngarubi bibahende bo labu hai holebira.

<sup>9</sup> Moaba wali agali bu karuha genda timbuni mo ko holene ogoni tagira ibiragoni. Ti ega ale babagane halu yagalalu ibida pole tinaga babagane helalimu. Moabanaga tano ngaru bo gialabaga bialu bo labu hene wulebira. Tano winigoria wali agali lenego mbira munini bu naholebira, laya lene.

<sup>10</sup> Anduane Homogonaga biabe biahaga kagome biabe nabi bame hayagua ibuha mo ko holene ibu wilo. Mbirali ibugua ayu tibu yidagome mendeali homelo dibabe lenego nadibayagua o biago ibuha mo ko holene ibu wilo.

*Moaba dindiha tano ngaru bibahende mo ko hai holebira lenego ogo*

<sup>11</sup> Anduane Homogohanda lalu, Moaba dindi ogoni pigane winidangi howa wima ibalu áyubi ibula dindi mende baba wai bialu ibunaga wali agali dindi mende ha garabayabu yalu pene mbira nawiore. Moaba ibu baya taraore agalime gerebi lini pingidowa waini iba be mende ha yoromabu berelaga nabini ngaligobi nga. Ani ngagola ibunaga dende ngabi ereba nahe bayaleore wiaabo ka.

<sup>12</sup> Anigo Anduane Homogo ina tigatigaore laro. Ina horo mbira pongo bo wirugo tagira ibirangi agali marume Moaba dindini anda ibalu waini iba bayale birayago odo wahalu be hangu pambulo waharadagua bialu Moaba dindi bo haealabaga bialu mo labu helo ibilolebero. <sup>13</sup> Horo ogoni tagira ibirangi Isaraele wali agali tigua dama mitangi bialu mbirale gime wabini mini Bedele wiagohondo bi pupu wialu biamogo bulubabe toba howa hana ho heagola biamogo nabiyadagua áyu Moaba wali agali tibi nde mbirale bi pupu wulenaga gime wabini mini Kemoso ibugua ti biamogo nabiragola taga holebira. <sup>14</sup> Moabali tígua balagala howa bi ogodagua lalu, Ina ami agali hongoheore howa wai biagane manda timbuni inaha nga, laramiligo irane aginagabe.

<sup>15</sup> Waitigirume Moaba bo haealabaga biai halu ibunaga tano ngaru karulai holebira. Moaba dindini igiri bayale daliahe karu bibahende bo wahai holebira. I kiniore kogoni.

I mini Anduane Homogo Hongo Haiheore ina bi o ledogoniore. <sup>16</sup> Moaba dindi bo haealabaga bulene horo kaware nga. Ibuha ko holene horo abaleore tagira ibiragoni. <sup>17</sup> Wali agali Moaba dindi kawareni ha parapara bu kamirubi Moaba mini leneore nga lo mandabi kamirubi tigua dara halu ogodagua lalimu, Ainde Moaba mini lene hongohebi wiyago ereba halu Moaba bo haealabaga biyadago daraba, lalimu.

<sup>18</sup> Dibono tanoha wali agali bu kamiru tigua ti mini lene harimigo yu wahalu wali agali maru mini nalene karu dindi abaluni biragadagua tibi birape holene nga. Moaba bo haealabaga bialu mo ko hole kagome tinaga tano wai pabe hongohe bu mabubi ngamigoni bo gialabaga bule ibulebira. <sup>19</sup> Aroe tano wali agali bu kamiru-o tigua hariga gibuni ngaruha howa de hondo halimu. Wali agali ibida togolalu ibiraruhondo hale halu lalu, Ti aginaga ibida togolalu poramibe, lalimu. <sup>20</sup> Tigua ogodagua ladai bulebira, Moaba dindi bibahendeore bo haealabaga bialu mo ko hayagonaga ibu ayu taga timbuni ho kagoni, lolebira. Anigo tigua ibu dara halu dugu hongo howaore biadaga hadaba. Tigua Iba Anono porago kawareni pialu wali agali ogoniha bu karuhondo, Moaba dindi mo ko halu bo haealabaga bialu mo labu hayada, lalu lama pilimu.

<sup>21-24</sup> Dindi bayale ngagoha tano wiarunaga ko pani nolene winigo miragoni. Tano uruni Holonobi Yasabi Mebadabi Dibonobi Nebobi Bede Dibiladaimibi Kiriadaimibi Bedegamulubi Bedemeonobi Keriodobi Bosorabi tano uruni bibahendeore bo gialapaya bialu bo labu hai holebira. Ani bialu Moabanaga tano lenego bibahendeore kaundiaha wiaguabi kawareni wiaguabi bibahende bo gialo wahaiore holebira. <sup>25</sup> Waitigirume Moaba dindi bo poda hana haluibunaga hongo bope halu ibugua mbirale mbira bibe naheore ngagoni. I Anduane Homogo ina bi o ledogoniore, laya lalu Yaremaiahanda lene.

### *Anduane Homogohanda Moaba mo dindiha holebira lenego ogo*

<sup>26</sup> Anduane Homogohanda lalu, Moaba ibugua ihondo doga hayagonaga lulu iba nowa luluyu haradagua mo luluya helo hameledo. Ibuninaga magu tagu ngagoria palu pendege lalu ngagola wali agali bu karume hondo oba helo hamelo ko. <sup>27</sup> Bamba Moaba ina Isaraele wali agali hondo mege bialu oba hariligo mitangi bibe. Isaraele ti pagebibi baba mandagi heane hondowa ina mege bialu oba halu mo nagalone howa hangedope harigoni.

<sup>28</sup> Moaba wali agali kamiru ti egeanda ngaruha bira do hole pudaba. Ega bedarume tinaga anda dindi ko wali agali pobe nahe ngagoha anda bia do hagadagua tigua anda bule pudaba. <sup>29</sup> Moaba wali agalime mine halu balagala bi lalu hayago ina bibahendeme hale ho ko. Tigua tininaga mini mo yaraga halu mine hama ibaga biaga ka. Moaba ibuni mo duniniore helowa ngagoni. <sup>30</sup> Anigo Anduane Homogo ina Moabanaga mine halu mana biaganego manda biai ho ko. Moaba dindi ogoniha karume bi bame dege lopayapaya biragola mbirale biraru damene nahabane bu hinalu bame haga. <sup>31</sup> Ani kago manda bialu ina Moaba dara halu dugu bia haro. Ina Kiriherese tanoni wali agali bu karubi dara ho kogoni. <sup>32</sup> Yase tano bo gialahole biragoni handalu ina dugu bialu Sibima tanoha ko ngarunagabi ina dugu hongo howa bulebero. Sibima tano inaga pu mbira lini daga mini gerebi mabu timbuni dewaore wua yu pialu iba kuyama timbuni mini Homene Iba bedagoria pialu Yase ngagoria wia dege bima tagira peda. Anigo waitigirume inaga gerebi lini dewa ngerubi ira lini dagane ale tara tara hengerubi bibahende dugu wahai hole ibulebira. <sup>33</sup> Moaba dindiha dindi bayale benebere wiagoria wali agalime tomo damene hongowa anda haiore haragola bu nalu howa turu ho haramiligoni ereba hai holebira. Tigua waini iba wabule gerebi ibane berelo geme hangedalu howa lini iba be timbuni ngagoha berelaga beramiligo lone nabulebira. Ina ogoni waharugome tigua gerebi lini ibane berelo geme hangedalu howa turu halu bi ladagadaga biagadagua mani nabulebira. Tigua bi ladagadaga bialu ha haramiligo turu howa ndo dara howanaga bi ladagadaga bialu holeberemi.

<sup>34</sup> Moaba wali agalime Hesebono tano ngagoria howa dugu bialu Eleale tanohabi Yahasa tano dindi abene uyurahayagi ngagoriabi dugu biagimbu birago hale hai holebira. Ani bialu dindi abene unurahayagi pudai bialu Soa tano ngagoha howa bima pialu Horonaimi tano ngagoria tagira pialu Egelada Selisiya tanoha pu bolangua halu dugu biagimbu birago hale hai holebira. Ani birangi dindi bibahende mo ko halu Nimirimiha iba bedarubi hundiai holebira. <sup>35</sup> Moaba wali agali hari nene ngaruha pialu dama mitangi bialu mbirale gime wabini bi pupu wiaga ngaruhondo ira hagua ngabilo delaga inisenesiru lomabu dela loma maru dela nabilo ina gialo waholebero. I Anduane Homogo ina bi o ledogoniore, laya lene.

<sup>36</sup> Ani bialu kagonaga ina Moaba wali agali Kiriherese tanoha hagabu karu mitangi bialu bu miniha dara ho kogoni. Mbiralimeibunaga dabudabu bayale mo wigi biyaruni ereba hai haragola dara timbuniore ho howa pilipe lama ibagabu hagagobi ko. <sup>37</sup> Moaba wali agali tigua dara timbuni ho howa tinaga mandari angariru minu dogalu holebira. Tinaga gi pugualu dara ho howa aga karulaga ngaru karulo holebira. <sup>38</sup> Agalime todobene be dindime wabini galone bibe nahedagola pambulo wahagadagua Anduane Homogo ina Moabaore bo haealabaga bulebero. Anidagua berogola Moaba dindi bibahende ha dugu timbuni bialu holebira. Tinaga anda dangini heaguabi wali agali ngoai haga hamani heaguabi dugu timbuniore biame halu holebira. <sup>39</sup> Heneneore Moaba bo haealabaga biragola wali agalime taga ho howa wanakui mo hiladali halu kiabu dugu gibi bulebira. Wali agali Moaba dindi kawareni handa ainai padarume mbirale uruni birago de hondowa ti gi timbuni halu Moaba mege bulebira. I Anduane Homogo ina bi o ledogoniore, lene.

*Mo ko holene ogoni ibiragola Moaba wali agali yo pialu napolebira lenego ogo*

<sup>40</sup> Anduane Homogohanda bi ogodagua lara. Ega bodo hariaweme yagaloyu irigi halu puwa ema bialu poraru minulenaga babagane abale yulupe hagamadagua waitigime Moaba bole gerai hongo howa lalu ibulebira. <sup>41</sup> Waitigime tano ngaru karulalu wai pabe hongohe karubi karulai holebira. Ani karulai haragola Moaba ami agali bu karu tigua gi timbuni halu walime gali taba honolene tu kaware ibiragola mogolalu gi timbuni ho biragagobi holebira. <sup>42</sup> Moaba dindiha karume Anduane Homogo ihondo dogo henegonaga ai Moaba dindiha wali agali mini lenego mbira nahe ereba haiore holebira. <sup>43</sup> Moaba wali agaliru-o ti gi timbuni taraore halimulonaga gundu uli timbunibi gono tara tarabi ti delonaga wiai ho ngagoni. Anduane Homogo ina bi ogoni laru. <sup>44</sup> Agali mbirame gibi mbira ngago handalu ibida pialu karia gundu uli ngagoha pilolebira. Pilaragola heyalu pialu karia nde gono ngagoha do wulebira. Anduane Homogo ina Moaba wali agali bo wahai holene horo manda bu winigo tagira ibiragoni. <sup>45</sup> Moaba wali agali ibida pialu Hesebono tanoha bira do holene manda biyagobi ani bibe naheore holebira. Tigua bamba Kini Sihono heangi Hesebono tano dayaria de hendenegobi ayu darane hondowa tano ogoniha napolebira. Ani biragola ira ogonime Moaba dindi bibahendeore lenehabi hari bareha ngarubi bibahende daiore haragola ti ibida polene henge mbira nawulebira. <sup>46</sup> Moaba wali agali kamiru ti darabiore mbira kamigoni. Ti dama mitangi bialu bi pupu wiaga mbirale gime wabini mini Kemosonaga wali agali bu kamiruni ti mo ko halu waitigirume ibalu tinaga waneiginiru dindi taraha minu garabaya bu yalu polebira.

<sup>47</sup> Anigo mani horo pongo bo wirugo tagira ibirangi ina Moaba wali agali ti lone mo bayale helolebero. I Anduane Homogo ina bi o ledogoniore, laya lene. Anduane Homogohanda Moaba wali agalime ko birimi lalu tiha ko holene tagira ibulebiraru damene uruni lalu lai hene.

✧ 48:42: Iba 83.4, Ais 7.8

## 49

### *Anduane Homogohanda Amono dindi mo ko holebero lenego ogo*

<sup>1</sup> Anduane Homogo ibugua Amono wali agalihondo bulebiragonaga bi Yaremaia laminigo ogo. Isaraele wali agali tinaga iginiru agoha kabe. Dindi ti aba henedagoria ho aribia holene waneigini nahedabe. Tinaga waneigini heagua nde Amono wali agali dama mitangi bialu mbirale gime wabini mini Molege ngagohondo bi pupu wiaga karume Isaraele hameigini Gadanaga dindi ngago ti karulayadago irane aginagabe. Ani bialu Amono wali agali uruni tigua Gada hameigininaga tano ngaruha pu kago agibe.✧ <sup>2</sup> I Anduane Homogo inaore laro. Horo mbira ina pongo bo winigo tagira ibirangi tinaga waitigiru ibilarogola tigua tano timbuni mini Laba ngagoria anda ibalu wai bulebira. Laba tano ogoni Amono dindinaga tano dunini mbira ngago ogoriani wai bialu holebira. Wai bialu waitigime tano ogoni bo giallo wahai haragola giallo paya bini dege wulebira. Ani bialu waitigime tano ogoni anda dewa kaware hapara para bidaru bibahende bo heda hai holebira. Ani biragola mani howa Amono tigua dindi karulo henedagoni Isaraele wali agali tini lone karulo dai bulebira. I Anduane Homogo ina bi o ledogoniore. <sup>3</sup> Hesebono wali agali kamiru-o Ai tano bo giallo wahai hayagonaga tigua dugu dalimu bidaba. Wali agali Laba tanoha haga kamiru tibi nde dara howa walia halu aga karulagane ngago mo karulo howa kiabu dugu bialu hadaba. Waitigirume tinaga dama mitangi bialu mbirale gime wabini mini Molege ngamigo mo yalu Molegenaga loma binigo mo miaga agali bu karubi agali haguane bu karubi bibahende dindi taraha garabaya bu yalu polebira. Ani bulebirago tigua mini burugu lowa ibida pole gerai lalu wai pabe tamuhayagi pu ibu bialu holeberemi. <sup>4</sup> Amono wali agali tiguaore tinaga dindi ulini bayale ngamigoria mabuni tomo henge demirume lini baya gibi dewaore daga kagonaga mine howa bi lalu kamigo irane aginagabe. Tigua munibi mbirale dabudabu ngamirubi hana howa lalu, Mbirali ina baba wai bima labehe mbira ai kabe, laramiligo agibe. <sup>5</sup> Ina heneneore laro. Inime waitigi kaware hama pedaru ibilarogola ti kamigoha mo gi hole ibulebira. Ani ibalu tigua ti waratagi haragola ti dindi tara tara ngaruha ibida piai holeberemi. Anidagua beremigola ti lone mo mogo bialu haru dai bulene mbirali naholebiraore.

<sup>6</sup> Ani biragola mani ina Amono tinaga holene lone mo bayale helolebero. I Anduane Homogo ina bi o ledogoniore, laya lalu Yaremaiahanda lene.

### *Anduane Homogohanda Idomo wali agali mo ko holebero lenego ogo*

<sup>7</sup> Anduane Homogo Hongo Haiheore kago ibugua Idomoalihondo mani bulebiragonaga bi Yaremaia laminigo ogo. Agua biyabe. Temana dindihayagi wali agali bu ka aibe. Tinaga mini bayale gigabi ala winigo ereba hayadabe. Agali manda bayale dewawi karume bi lamiaga wiyago nalami wahayadabe. Tinaga mini bayale gigabi tiha wiyago ereba hayadabe.✧ <sup>8</sup> Dedana tanoha wali agali bu kamiru tibi tinaga tano yu wahalu ibida pialu ege andaha bira do halimu. Iso aguanene kamirume mana ko birimigonaga pani nalimulo ngulene horo tagira ibirangi ina tiha mo ko holene anda ibilolebero. <sup>9</sup> Agalirume gerebi lini bogabi dedaru dalu howa tigua lini bibahende do yai nahe maru delo wahaga. Ogonidagua dege pagealime mbiraga ibuwa tini mo yule hameleda alego dege mo yalu piaga. <sup>10</sup> Ani biagadagua ndo ina Idomo wali agali Iso hameigini bu kamiru ti pani nalimulo ngerongi ina tinaga mbirale ngamiru bibahende bo haealo wahaiore holebero. Tinaga ha do haga ngemiru bibahende bo haealo wahai harogola tinaga ha do holene dindi mbira bayale nawulebira. Idomo wali agali tinibi wali agali maru ti heba haga kamirubi hameigini ti baba kaware haga kamirubi ti bibahendeha mo ko holene anda ibulebira. Ani ibiragola Idomo wali agali lenego biba halu ereba haiore holebira.✧ <sup>11</sup> Anigo Idomo wali agali tinaga waneigini mitangi

✧ 49:1: Ese 21.28-32, 25.1-7, Amo 1.13-15, Seb 2.8-11 ✧ 49:7: Ais 34.5-17, 63.1-6, Ese 25.12-14, 35.1-15, Amo 1.11-12, Oba 1.14, Mal 1.2-5 ✧ 49:10: Pig 36.8



holomini nahalimu. Waneigini abaru tí waneiginiru helalu homarimiyagua waneigini uruni inime handayaho holebero. Ani bialu tí one bedarubi dalo biruwa ti iha hana ho birulebira, laya lene.

<sup>12</sup> Anduane Homogohanda lalu, Wali agali lene karu bibahende mo ko hai holebira. Maru ko nabi heaguabi ti pani na dege bulebirago manda bialu Idomo wali agali tigua mitangi bialu kamiria ina tí helo wahalu bolangua holobabe toba kamibe. Ani ndoyago. Ina tí mbira yu wa nahe tí bibahende pani nai holene wulebiraore laro. <sup>13</sup> Ina Bosora tano ngago bo haealabaga bialu mo ko haiore hole lo ngogo tagira ibiragola dindi hangu bame ona wulebira. Anidagua berogola dindi tara tara ngaruha wali agali bu karume ina Bosora wali agali tihondo bi ogonidagua biya larago hale howa tigua mogolalu Bosora wali agali mege bialu hondo oba holebira. Ani bialu howa tigua wali agali tara karuhondo ha halu lalu, Tíore Bosora wali agali mo ko hayadagua mo ko helo, lalu holebira. Ina Idomo dindiha tano ngaru bibahende mo ko halu bo haealabagabu wahai harogola tano uruni mo ko hene wiaabo holebira. I Anduane Homogo ina bi o ledogoniore, laya lene.

<sup>14</sup> Anduane Homogohanda Yaremaia ihondo au laya. Ina agali mbira bi yalu hameigini tara tara karu lamule pu ledó, laya. Agalidagoni ibugua hameigini tara tara karu bibahende mo mogo buwa Idomo hameigini karu baba wai bule abale heyalu manda manda bu hadaba labe ledó, laya. <sup>15</sup> Anduane Homogohanda Idomoalihondo lalu, Hale hadaba. Ina tíore hameigini tara tara bu karunaga deni mo nagalone halu mo ngubia hene mbira helolebero. <sup>16</sup> Hameigini tara tara bu karume tihondo gi helo mo gi halu tíni hangu mitangi bialu ina timbuni duniniore mbira kamabe toba haga kamigoni. Urunidagua bialu kamigome tíni mo hondo halu kamigoni ndobe. Tínga tano timbuni mini lene dunini ngago hari bare daligani nga. Ani ngago uyuraore irigi halu hari nene daligaoreni ega bodo hariaweme igini wu palue anda biagadagua birimiyaguabi ina ogoni bo haealabaga bialu bope holebero. I Anduane Homogo ina bi o ledogoniore, laya lene.

<sup>17</sup> Anduane Homogohanda lalu, Idomo dindiha mo ko holene gibi hiriribi ibulebira. Wali agali maru Idomo dindiha bolangua halu porarume Idomo dindi koorene ko hene ngago de hondowa ti mogo timbuni lalu mege bialu hondo oba holebira. <sup>18</sup> Bamba ina tano kira Sodom Gomorala heba tano marubi bo haealabagabu wahewagola ai dindi uruni ibira hene mbirale mbira nawí bame ngagoni. Anidagua dege ina Idomo dindibi mo ko harogola wali agali mbira dindi ogoriani nahe dindi hangu wulebira. I Anduane Homogo ina bi o ledogoniore.✧

<sup>19</sup> Laiono gabuame Iba Yodana angeha irabu timbuni ngagoha howa tagira pialu nogo sibi datani bayale karu nalu karia talia togo lagadagua Anduane Homogo ina Idomo wali agali karia abaleore ibalu tinaga dindi ngatoria howa bo batagi holebero. Ina agali mbira dindi ogoniha karu haru helo dabo helolebero. Ina ani berogola mbirali ila lai lolene ai holebirabe. Mbirali hongohe i kogobi ai kabe. Agali haguane ila wai bibehe ai kabe. <sup>20</sup> Ina Idomoalihondobi Temana tanoni wali agali bu karuhondobi bule mandabu kogo langerogo hale habe. Laionome nogo sibi balu bo gililo yu ibagabu ngelagadagua ina Idomo wali agali waneiginirubi bibahende bo payapayabu ngelolebero. Mbirale uruni bule ngogonaga Idomoaliru tini mogo lalu karuni ndobe. <sup>21</sup> Idomo dindi mo ko halu kulu timbuni lalu ibira holebira. Ani biragola Idomo wali agalime dugu dalimu bima pialu haruago unuraore Iba Daramabi bedagoria wali agali bu karume hale holebira. <sup>22</sup> Ega bodo hariaweme yagaloyu irigi halu puwa ema bialu poraru minulenaga babagane abale yulupe hagadagua waitigime Bosora tano bo gialabaga bialu mo ko holenaga gerai lalu ibulebira. Horo ogonangi Idomonaga ami agali bu

✧ 49:18: Pig 19.24-25



karume gi timbuni halu walime gali taba honolene tu kaware ibiragola mogolalu gi timbuni ho biragagobi holebira, lene.

*Anduane Homogohanda Damasagasa dindi mo ko holebira lenego ogo*

<sup>23</sup> Anduane Homogohanda Damasagasa dindiha bulebironaga Yaremaiahondo bi laminigo ogo. Ibugua lalu, Wali agali Hamada tanoha karubi Abada tanoha bu karubi bibahendeme mo ko holeneore tiha anda ibira laragola hale howa ti mogo timbuni lo holebira. Iba solowara ema bialu yaribu bigi biragagobi ti mini dege dindi howa halo birulene nawulebira. <sup>24</sup> Wali agali Damasagasa tanoha bu karu bibahende hongo naheore howa gi halu ti gerai lalu ibida poragoni. Tiha genda tandagala timbuniore wialu walime gali taba hanalu biruwa tandaga handalu biragagobi ka. <sup>25</sup> Tano ogoni ibu mini lene timbuniore mbira winigo hondowa i turu ho haruli. Anigo tano ogoniha waitigi anda ibiyagola wali agali mbira nahe ibida piai hayadago. <sup>26</sup> Horo ogoningi igiri daliahe Damasagasa tanoha bu karu ti harigani pialu karia waitigime bo waharagola uruninaga tingini ibira hayagoria wima polebira. Damasagasanaga ami agali bu karubi waitigirume ti bo wahai holebira. <sup>27</sup> Damasagasa tanonaga wai pabe hongohe karu ira hedape harogola irame wai pabe dai halu Kini Benehadadanaga anda timbuni hongohe kagobi dai dege holebira. I Anduane Homogo Hongo Haiheore kogo ina bi o ledogoniore, laya lene.

*Anduane Homogohanda Keda hameiginirubi Haso dindibi ko holebira lenego ogo*

<sup>28</sup> Keda hameiginibi Haso dindiha hameigini bu karubi Babilononaga Kini Nebugadene-nesa ibugua ibalu wali agali uruni baba wai bialu bope hene. Anduane Homogohanda ani binigonaga Yaremaiahondo bi laminigo ogo. Ibugua hameigini uruninaga waitigihondo lalu, Ti heyalu Keda hameigini baba wai bule pudaba. Wali agali ni tagira ibiragohayagi karu baba wai bialu bibahendeore bo wahai halimu. <sup>29</sup> Tinaga balai anda bidago bo gialalu balai andaha labolabo ngarubi tinaga dabudabu maru ngarubi bibahendeore mo yai halimu. Ani bialu tinaga nogo sibi hinidarubi tinaga nogo kamele karubi haru pilimu. Ani buwa tihondo ogodagua lalimu. Mbirale ti mo gi holene damene ti kamigoha wiame ka, lalimu, lene.

<sup>30</sup> Anduane Homogo ina Haso tanoha wali agali bu kamiru tihondo larogo. Babilononaga Kini Nebugadenesahanda ibalu tihondo ko bulene manda mandabu kago ti ibida piai halu ha do halimu laro, lene. <sup>31</sup> Anduane Homogo ibugua Babilonoali hearuhondo lalu, Tigua abale heyalu wali agali mbiralihondo gi nahe hadapayabu karu baba wai bule pudaba. Tinaga tanoha wai pabe nahe nga. Ani bialu hameigini mende ti heba paliapara nahe dege nga.

<sup>32</sup> Tinaga nogo kamele bulumaga sibirubi hinu kago uruni bibahende ti haru piai halimu. Ina agali tinaga mandari poda tubagi haga uruni bibahende bo talia togolai holebero. Ina ti waitigi bibahendeme Haso hameigini ho hagira bialu bo haealabaga biai helolebero. <sup>33</sup> Anidagua berogola Haso dindi labu halu ko biango dudu bu karu ti dalu wialu mo ko hene wiaabobo bu wulebira. Ani bialu tano ogoniha wali agali mbira napale wiaabo holebira. I Anduane Homogo ina bi o ledogoniore, laya, lene.

*Anduane Homogohanda Elama dindi mo ko halu bolebero lenego ogo*

<sup>34</sup> Sedegaia ibu Yuda dindinaga kini heangi Anduane Homogo Hongo Haiheore kago ibugua Elama dindiha ko holene ibulebiragonaga lalu bi mana latagi haga Yaremaiahondo lamini. <sup>35</sup> Anduane Homogo Hongo Haiheore kago ibugua lalu, Elamali bu karu tinaga galone danda timuore yaga howa tigua tinaga waitigi bope halu ti wayali holeberema lo manda bu haga ka. Ani bu kagoyu ina tinaga danda timu bo podai holebero. <sup>36</sup> Ina Elamalinaga waitigi bu karu bibahende mo heya hai helarogola tigua puyabu hongohe ibagadagua gibuni mariaha howa ibilarogola Elamali baba wai

✧ 49:23: Ais 17.1-3, Amo 1.3-5, Seg 9.1

bule anda ibulebira. Anidagua ibiragola ina Elamali dindi tara tara ngaruha minalu purogo lelarogola dindi mbira mbirani Elama wali agali lenego mbira ha dege bulebira. <sup>37</sup> Waitigime ibalu Elama wali agali ayu tibume dibule kago hondowa ti gi helonaga ina ti mo gi timbuni holebero. Inaga bu miniha keba timbuni ho kogome ina tiha ko taraore ibilolebero. Ina tinaga waitigi bu karu ibilalu ti balu kane dege mbiraore yu wa nahe bo wahai helolebero. <sup>38</sup> Ina Elamalinaga kini kagobi tinaga agali haguane karubi bo wahai holebero. Ani buwa ina kininaga biragane dagia Elama dindini mo ngelowa inime haru holebero. <sup>39</sup> Ani buleberogo biaiore howa mani ina Elama wali agali tinaga holene bayale lone helolebero. I Anduane Homogo ina bi o ledogoniore, laya lalu Yaremaiahanda lene.

## 50

### *Anduane Homogohanda Babilono dindi mo ko holebira lenego ogo*

<sup>1</sup> Anduane Homogohanda Babilono tanobi wali agali bu hearubi uruniha bulebirago ibunaga bi mana latagi haga Yaremaiaha howa latagi hene. Ibugua bi ogodagua lalu, <sup>2</sup> Wali agali hameigini dindi tara tara bibahende bu karuha pialu bi ogo latagi hole pu. Wali agalime de handalu bi ogoni hale hole ibilonaga pelagi yaraga habe. Ibiragola bi ya do nahe bibahende lamiai habe. Waitigirume Babilono dindi karulayagoni. Babilononaga mbirale bi pupu wulenaga gime wabini mini Bele biago taga timbuni ho nga. Bi pupu wiaga mende mini Madugu winigo mo dindiho nga. Babilono wali agalinaga dama mitangi bialu gime wabini tara tara ko ngubi wiaru tibi nde mogo lalu taga timbuni ho nga, lene.\*

<sup>3</sup> Hameigini mbirame dindi abene uyurahayagi howa wai anda ibalu Babilono baba wai bialu bo haealabaga bulebira. Ani biragola Babilono dindi bibahendeha mbirale mbira munini bu naheore dindi hangu ibira halu wali agali mbira naheore ona wulebira. Wali agali lenego bibahendebi nogo tara tara bibahendebi Babilono wahalu ibida piai holebira.

### *Isaraele wali agali tini dindi lone dai bulebira lenego ogo*

<sup>4</sup> Anduane Homogohanda lalu, Mbirale uruni ibirangi Yuda wali agali Isaraele wali agalibi bibahendeme Anduane Homogo tinaga Ngode Datagaliwabe ini koria dai bule dugu bima ibulebira. <sup>5</sup> Tigua Hari Saiono kagoria polenaga wali agali maru karuhondo hariga agohabe lalu walia hadaba laga bima pialu holebira. Ani bialu tigua Anduane Homogo i baba habo nalolene bi mbira lo wulebira. Habo nalolene bi ogoni lo wuwa tigua mbira embeda halu mo habo naloleore wiaho wiaabo holebira.

<sup>6</sup> Inaga wali agaliru ti nogo sibi pu ereba hagamaga haya. Haru haga hearume ti hariga tigatiga ibagabu holene mo batara hayagola hari wiaruha luluyu haga haga bida. Ti hari bare wiaruha pialu pu luluya halu tini hagane henene biago embeda hai haya. <sup>7</sup> Agali bu hearume ti de handaga bialu minu бага biya. Waitigi uruni tigua lalu, Iname wali agali uruni bo wahaga birimago mana ko ndo bidama. Tinime Anduane Homogohondo mana ko biyagonaga pani nolene winigo naragoni. Tinaga mamali ala henerume Anduane Homogohondo mini mbiraore hongohe wu howa ti biamogo bilo mini dunu bia haga hene. Ani binidagua tibi ani bulene winigo nabirimidagoni, lolebira, laya.

<sup>8</sup> Anduane Homogohanda laabo halu lalu, Isaraele wali agalibi Yuda wali agali kamirubi ti bibahende Babilono abale wahalu ibida piai hadaba. Nogo meme wangabeme meme maru mani ibilo ti bamba halu piagamaga garabaya wali agali maru bu karuni mani ibilo ti ala bamba halu pialu halimu. <sup>9</sup> Ina agali hongohe maru

☆ **50:1:** Ais 13.1-14.23, 47.1-15    \* **50:2:** Mbirale bi pupu wiaga gime wabini uruni ema bialu pu nabiagabi bi nalagabi tiha holene nawibi winigo uruni ti taga halu mogo timbuni lo nga lalu bi yobage hangu leda.    ☆ **50:6:** Ais 53.6, 1 Pi 2.25    ☆ **50:8:** Mo 18.4

dindi abene uyurahayagi howa haru halu Babilono baba wai bilo haru ibuleberogo tí abale ibida pilimu. Ani haru eberogola tigua tidiyu howa wai bialu Babilono bope halu ti wayali holebira. Waitigi uruni ti wai biaga mandabi howa tigua timu barago bako nahaga kagoni. <sup>10</sup> Ani bialu Babilono dindiha mbirale bayale damene ngaru mo yai holebira. Agali mbira mbirame dabudabu ngaruni tini hameledago ale karulape mo yaga bulebira. I Anduane Homogo ina bi o ledogoniore, laya, lene.

*Babilono mo ko halu bo haealabaga bini wulebira lenego ogo*

<sup>11</sup> Anduane Homogohanda lalu, Babilono wali agaliru-o tigua inaga dindi wiwago bo haealabagabu wahai halu inaga wali agali hearunaga mbirale wiaru bibahende mo yai harimi. Anidagua buwa tinaga turu holene timbuniore nogo bulumagame widi iraneru lini hondo ibira ibira bilo geme hangedalu howa maru nalu turu hagagobi halu nogo hosi wangabeme bi hongo howa lalu hagadagua harimi. <sup>12</sup> Ani kamigoyu nde Babilono mini lene ngago bibahende bo haealabaga biragola tini taga ho holeberemi. Anidagua biragola dindi ko mbirale mbira nawibehe wali agali hameigini tara tara padarunaga deni Babilono mini nalene mbira wulebira. Ani bialu dindi ko yobi mbirale mbira anda habe nahe dindi hangu ona wulebira. <sup>13</sup> Anduane Homogo ina tí baba keba timbuni howa ina mo ko helarogola tinaga dindi mo labu halu wali agali lenego mbira dindi ogoniha munini bu naholebira. Ani bini ngagola wali agali tara tara dindi ogoriani bolangua halu porarume mbirale o biyadaruni de hondowa mogo timbuni lalu mege bialu hondo oba holebira, lene.\*

<sup>14</sup> Anduane Homogohanda Babilonoalinaga waitigi hearuhondo lalu, Agalime danda yuwa wai bayuwa biaga mandabi kamiru tigua Babilono tano ngago ho hagira buwa tidiyu howa wai bilimu. Tigua danda edalu timu dewa baanda halu balimu. Babilonoalime Anduane Homogo inihondo mana ko dewaore biyagonaga tigua tano ogoni emeneorebi nawilo bo haealabaga bilimu. <sup>15</sup> Ani bialu tigua tano ogoninaga ege pabe hongohe kago bo gialahole beremigola tigua tí badai bulene hongo nahe holebira. Tano ogoni tí karulole ibalimulo yupe harongi tigua hoaro hongo howa ladagadaga bialu dindi bibahendeha ga laame halimu. Babilonoalime dindi maruha pialu bo haealabaga biai hayadagua tinaga dindi ngago nde ani dege bilimu. Anduane Homogo inime mbirale uruni berogola tigua pialu dindi bibahende mo labu haiore halimu. <sup>16</sup> Agali mbira hangu tomo hongolenebi tomo boga birago bu mogobu ngelolenebi mbira Babilonoha naheloore bibahende bo hilo wahai halimu. Ani beremigola wali agali dindi taraha howa Babilonoha íbu hene karu tigua dindi andabi bo haealabaga bialu mo labu harimigo de hondowa ti gi timbuni holebira. Gi howa tini dalu ibida piai halu tininaga wali agali hayadaru baba holebira, lene.

*Isaraele wali agali tini daluha dai bulebira lenego ogo*

<sup>17</sup> Anduane Homogohanda lalu, Isaraeleali nogo sibi ale kagola wali agali dindi tara taraha padarume laiono gabua ale howa tigua Isaraeleali balu mo ko hole talima ibaga bialu ka. Pigane Asirianaga kini heagome bo naya. Neaha mani Babilononaga Kini Nebugadenesahanda kuni wiago dudu naya. <sup>18</sup> Anidagua biyagonaga i Anduane Homogo Hongo Haiheore Isaraelenaga Ngode Datagaliwabe kogome ina Babilononaga kini kagobi ibunaga dindi ngagobi bibahende Asirianaga kini biago minu balu ibunaga dindi bo tangu waharudagua bulebero. <sup>19</sup> Ani bialu ina nogo sibi haru hagadagua Isaraeleali ti tini daluha haru dai bulebero. Ani berogola tini dalu Hari Kamele kago andanehabi Basana dindihabi Eberaimi hameigini dalu hari barebarehabi Gileada dindi ngagohabi datani bayale karu nalu helo haru dai bu helolebero. Dindi uruniha howa tomo dewa karulape nalu bayale holebira. <sup>20</sup> Horo ogoningi Isaraele wali agali Yuda wali agalibi inime helo yu wahene emene karu uruni tiha ko wiyadaru domo

\* 50:13: Yar 25.12, 49.17

wahalu ti bayale helo helolebero. Anidagua berogola tiha ko mbira para nahe holebira. Marume tihondo ko mbira birimi lalu bi hangume laede habe naheore holebira. I Anduane Homogo ina bi o ledogoniore, laya, lene.✧

*Anduane Homogohanda Babilonoali pani mulebero lenego ogo*

<sup>21</sup> Anduane Homogohanda Babilonoalinaga waitigi hearuhondo lamialu lalu, Tigua Babilonoali karu baba wai bule pudaba. Meradaimi dindiha wali agali karu bababi Pegodo dindiha wali agali bu karu bababi wai biai halimu. Ina bilimu larogo mo wa nahe ti mo ko halu homelo bai halimu. I Anduane Homogo ina bi o ledogoniore. <sup>22</sup> Wai bialu hoaro laragolabi dindi bo haealabaga biragonaga kulu laragolabi dindi bibahende ha hale hai holebira. <sup>23</sup> Ala Babilonoalime dindi bibahende bo haealabaga biaga hama ale wiyagoni. Ani binigo áyu ibunaga waitigi kamirume ibuni bo haealabagabu wahalimu. Anidagua beremigola wali agali tara bu karume Babilonoha ko ogoni anda ibiyago de hondowa ti mogo timbuni lolebira, lene. <sup>24</sup> Anduane Homogohanda lalu, Babilono-o ina ila waitigi harigonaga í gonoha delo gono wiwago ha í de handa nabi howa do ngegoni, lene.✧ <sup>25</sup> Anduane Homogohanda Babilono baba keba timbuni ho howa ibunaga wai biagane anda timbuni heago panga dugua halu wai biagane ale wiaru bibahende mo batagi biai haya. Anduane Homogo Hongo Haiheore howa Bibahende Haru Haame Ho Haga kago ibugua biabe timbu gibi mbira Babilono dindi bibahende ha bulebira. <sup>26</sup> Ibugua lalu, Dindi bibahende ha waitigi bu kamiru tí bibahendeme Babilono dindiha wali agali bu karu baba wai bule ibidaba. Tinaga tomo wiagane anda timbuni bu karu bo giallo wahai halimu. Agalime widi lini do mogo bu wiagadagua dabudabu Babilono dindiha ngaru mo mogobu wiai halimu. Ani buwa mbirale uruni bo haealabagabu wahai halimu. Uruni aria mbira hangubi yu wa nahalimu. <sup>27</sup> Agalime nogo bulumaga homelo abale bagadagua Babilononaga ami agali bu karu ala homelo bo wahai halimu. Anduane Homogo ina ti pani nelu mialu bo wahai holene horo winigo áyu o íbu ngagonigo bibahende mo ko halu bo wahai halimu, laya, lene.

<sup>28</sup> Isaraele wali agali Yuda wali agalibi maru Babilono wahalu ibida pialu Saiono dindi daibiyaru tigua lalu, Anduane Homogo inanaga Ngode Datagaliwabeanda agali ibunaga anda bo giallo wahai hayaruhondo pani nelu miya, laya lene.

<sup>29</sup> Anduane Homogohanda Babilonoalinaga waitigi bu hearuhondo lamialu lalu, Agali danda yuwa wai biaga mandabi kamiru tigua Babilono baba wai bule ibidaba. Tigua ibalu Babilono tano ho mabu bupe howa hagirabu yaanda halimu. Ani buwa Babilonoali mbira pora bialu ibida napelo de hondo halimu. Babilono tinime wali agali tara palearu mo ko howaore bo wahai hayadagua tigua tini mo ko howa bo wahai halimu. Ina ani larogoni irane Babilonoali uruni tigua Anduane Homogo Isaraele wali agalinaga Ngode Datagaliwabe baya buruguleore ini mana bayale tigabi hangu biaabo haga kogohondo mine halu ko dewa biyagonaga ani bilimu.✧ <sup>30</sup> Horo ogoningi tigua Babilono dindini igiri daliahe bu karu bo wahai haramigola uruninaga tingini wali agali ngoai ho haga hama ngagoria wima polebira. Ani bialu Babilononaga ami agali bu karubi bibahende bo wahai holeberemi. I Anduane Homogo ina bi o ledogoniore, laya, lene.

<sup>31</sup> Anduane Homogo Hongo Haiheore howa Bibahende Haru Haame Ho Haga kago ibugua lalu, Mine hagane Babilonoaliru-o ina tihondo heneneore larogo i tinaga waitigiore kogoni. Ina tí pani nalimulonaga minu bolene horo biago kaware hapara hayada.

<sup>32</sup> Mine haga wali agaliru o kamigo ina tí mo ko harogola tí pilalu ibira holeberemi. Ani ibiraho ngemigola tí biamogo bialu lone mo heya holene mbirali naholebira. Ina ira dene tinaga tano bu ngamiru bibahende ha hedope hai harogola ira ogonime tinaga mbirale ngemiru bibahende daiore helolebero, lene.

<sup>33</sup> Anduane Homogo Hongo Haiheore kago ibugua lalu, Waitigime Isaraele wali agali Yuda wali agalibi bope hai haya. Waitigime ti garabaya bu yalu piaai howa uruni ti golope halu pudaba lolene manda nabioire howa bayuwa mamage ho ka. <sup>34</sup> Anigo wali agali mo wialu haru dai biagane hongo gibihe mbirali kago ibu mini Anduane Homogo Hongo Haiheore ka. Ibunime ibunaga wali agali biamogo bialu tinaga waitigi bu karu bope holebira. Ani bialu ibugua wali agali dindi bibahende ha bu karu ti bayale helo biamogo bialu Babilonoha ko holene dege yu anda ibilolebira.

<sup>35</sup> Anduane Homogohanda lalu, Babilono dindi mo ko helo hameledo. Babilonoha wali agali bibahende karubi tinaga agali haguane karubi tinaga agali mini gigabiwi karubi homaioire helo hameledo. <sup>36</sup> Agali ke howa bi mana latagi halu mbiwia haga karu tibi homelo hameledo. Agali uruni ti mini nawi lulu ale kagoni. Babilononaga ami agali bu karu ti gi timbuni hai kagonigo tibi homai helo hameledo. <sup>37</sup> Babilononaga wai biagane garo ale mini karisi ngarubi nogo hosi karisi gili laga karubi bibahende mo ko hai helo hameledo. Ami agali maru dindi taraha howa ibu karu ti Babilono biamogo bilo yolo bini karu ti hongo nahe kagonigo homelo bo waholene hameledo. Babilono wali agalinaga dabudabu ngaru bibahende mo ko hai holene nga. Waitigirume ibalu dabudabu bayale ngaru mo yu piaai holene nga. <sup>38</sup> Babilono dindiha iba dalu naibi wiaho ngane dege iba emene bedaru hundiai helolene karulape nga. Dindi ogoniha dama mitangi bialu mbirale gime wabini dewaore ngagoni. Mbirale uruni ngarume wali agali karu tini mo lulu ya hayagonaga mo ko holene nga. <sup>39</sup> Ani biragola Babilono dindiha wali agali mbira naheore wialu wiaabo holebira. Ani bidagola budi gabua tara tararubi biango dudurubi ega umirubi uruni ale dege birulebira. <sup>40</sup> Bamba ina Sodom Gomora tanobi tano maru wiapara para biarubi bibahende bo haealabaga bialu mo ko hai henego ayubi wali agali mbira nahe bame dindi dege nga. Anidagua bini dege wialu Babilono dindibi nde wali agali mbira naheore dindi hangu wulebira. I Anduane Homogo ina bi o ledogoniore, laya lene. ✧

<sup>41</sup> Ami agali dindi abene uyurahayagi howa ibira. Ti hongo gibihe howa tinaga kini dewaore heba dindi kaundiani howa ibiragoni. Tigua wai biagane aleru mo manda manda bialu ka. <sup>42</sup> Agali uruni tigua dara haga ndo ibulebira. Tigua danda timu yandareru yu karume agali maru mo ko halu bo waholene dege hamelo haga ka. Tigua nogo hosini bialu ibalu howa tidiyu ibiraha dindi kulu laruago iba solowarame tangua amunana bialu kulu nduga lalu ibagagobi ibaruagoni. Tigua tidiyu ho dugubu howa Babilono baba wai bule ibiragoni. <sup>43</sup> Babilono kini kagome waitigi uruni ibaruago hale howa gi halu ibunaga hongo bibahende pirilape halu hongo nahe birulebira. Ibu gi howa mogo timbuni lalu walime gali taba honole biruwa giho biragagobi birulebira.

<sup>44</sup> Laiono gabuame Iba Yodana ange irabu timbuni ngagoha howa tagira ibalu nogo sibi datani bayale karu nalu karia talia togo lagadagua Anduane Homogo ina Babilono wali agali karia abaleore ibalu tininaga dindi ngagoria howa bo batagi holebero. Ina agali haguane mbira dindi ogoriani haru helo dabo helolebero. Ina ani berogola mbiralime ila lai lolene ai holebirabe. Hongohe mbirali i ale ai kabe. Agali haguane ila wai bibehe ai kabe. <sup>45</sup> Ina Babilono dindibi wali agali dindi ogoniha bu karubi tihondo bule mandabu kogo langerogo hale habe. Laionome nogo sibi balu bo gililo yu ibagabu ngelagadagua ina Babilono wali agali waneiginirubi bibahende bo paya-payabu ngelolebero. Mbirale uruni bule ngogonaga Babilono dindi ibuni mogolalu ngagoni ndobe. <sup>46</sup> Babilono dindi mo ko halu ibira helarogola dindi kulu timbuni lalu pirilagimbu bulebira. Ani biragola Babilono wali agalime dugu dalimu biarugola unuraore dindi tara tara kaundiaha karume hale hai holebira, laya lene.



## 51

### *Anduane Homogohanda Babilono dindiha ko holene ibilolebero lenego ogo*

<sup>1</sup> Anduane Homogohanda lalu, Ina agali tara maru wali agali mo ko haga bu karunaga mini mo heya harogola tigua abale gerai lalu puyabu ibiradagua ibalu Babilono wali agali baba wai bule ibulebira. <sup>2</sup> Ina agali tara bu karu Babilono baba wai bule ibilarogola tigua ibalu wali agalime widi lini aeane taulo wahagadagua Babilononaga dabudabu ngaru bibahende mo wahai holebira. Horo ogoni harangi waitigi dindi bibahendeha howa ibalu Babilono baba wai bialu dindi mo ko halu bo labu ho wulebira. <sup>3</sup> Babilononaga waitigi bu kamiru-o tigua Babilononaga amime wai biagane yári karulelobi tinaga danda timu tegelape helobi henge nami abaleore Babilono ami karu bogalimu. Mbira hangubi pora bialu napelo bibahende bo wahaiore halimu. <sup>4</sup> Tíngaga timume Babilono ami bu karu bila hai halu homararunaga tingini Babilono dindiha harigani wima polebira. <sup>5</sup> Isaraele wali agali Yuda wali agalibi tini daluni heangi tigua Isaraeleanaga Ngode Datagaliwabe baya buruguleore howa mana bayale tigabi hangu biaabo haga kagonaga deni howa mana ko dewaore biya. Ani biyago bilowa Anduane Homogo Hongo Haiheore Ngode Datagaliwabe ina Isaraele wali agali Yuda wali agalibi erembira mialu yu wa nahe harugoni.✱ <sup>6</sup> Isaraele wali agali Yuda wali agaliru tí Babilono abale yu wahalu ibida piai halimu. Tí hangu hangu nahome hole manda bialu ibida pugu pugu bilimu. Babilono wali agalime mana ko bialu hayagonaga pani nelu mulene áyu ogoni. Ti pani naragola tí heba namaga holigo pilimu. <sup>7</sup> Abale howa Anduane Homogohanda wali agali dindi bibahendeha hearu pani nelu mialu ibugua Babilonoha howa pani miai hayagola Babilono ibugua biabe ogoni biya. Babilono ibu Anduane Homogonaga giha gabo be ngolome wabini ale mo yu hayagola Anduane Homogohanda wali agali dindi bibahendeha bu hearu gabo be ogoniha howa waini iba nelu miradagua biya. Ani biyagola ti lulu iba nowa luluyu howa ibagabu kagoni.✱ <sup>8</sup> Anigo áyu Babilono ibuni abale mo ko halu ibira holebira. Anidagua bulebiragonaga dara halu dugu bia hadaba. Ibunaga dere bidaruni dabi holobabadago marasini mbira abale mia hadaba. <sup>9</sup> Yuda wali agali Isaraele wali agalibi tigua ogodagua lolebira. Ina wali agali garabaya hene kamarume Babilono mo bayale helo biamogo bia harimago nakarulape haragonida. Anigo ina Babilono wahalu inane dalu wirimagoha hama dai bima. Anduane Homogohanda Babilono koore biyagonaga pani emene ndo timbuniore wima irigi halu hari mindini ela habehe winigo miai haya, lolebira, lene.✱

<sup>10</sup> Anduane Homogohanda lalu, Inaga wali agali karume ogodagua lolebira. Anduane Homogo ibugua Babilono mo ko hayagome ibunaga wali agali ina kamagonaga mana bayale ngago mo panaho ngeleda. Anidagua bidago ai iname Saiono tanoha dai bialu inanaga Anduane Homogohanda inahondo biyago damene latagi hamija abale ma, lolebira, laya.

<sup>11</sup> Babilononaga waitigi bu kamiru títaga yandare baya hangu de halu wai humbi mo manda manda bidaba. Anduane Homogohanda Babilonoalime bo gialahole bu wahene ngago mitangi bialu ibugua Babilono pani tandaga nelu mo mulene hamelo ka. Ibugua Babilono mo ko halu bo haealabaga biai holenaga Media dindiha kini karunaga mini Babilono baba wai bilo mo heya halu wai bule ibilolebira. <sup>12</sup> Waitigi bu kamiru-o ami agali bu karume wai hongo howa bialu Babilono tanonaga wai pabe hongohe kago bo gialapaya bilonaga galalu pelagi yaraga hadaba. Ami agali marume tano mamage helo dabo helalimu. Ani heledemigola tigua tinaga biabe bialu helo. Ami agali marume ohowa lamima pialu tigua Babilono baba wai bule manda manda bu halimu lalu lamilimu.

Anduane Homogohanda, Babilono wali agali mo ko howa bolebero, lenego áyu bolebira. <sup>13</sup> Babilono í daluha iba dewa pialu mbirale bayale tara tara dewa ngegoni.

✱ 51:5: Ais 54.7-8, Yar 33.24-26, Hos 4.1-2 ✱ 51:7: Mo 17.2-4, 18.3 ✱ 51:9: Mo 18.5

Anigo íha mo ko holene kaware íbu ngagoni ndobe. Ínaga holene pudini alego ai áyu tungulaki holebira.\* 14 Anduane Homogo Hongo Haiheore kago ibugua ibuninaga minini howa bi heneneore ogodagua laya. Babilono í baba wai bilo agali dewaore ibilolebero. Ani ibilarogola í balu tigua í daluha mone dewaore biru tolaradagua bulebira. Ani bialu tigua í bope howa wayali halu mambolo balu holebira, lene.

*Anduane Homogonaga mini yaraga halu iba gana lenego ogo  
(Yaremaia 10.12-16)*

15 Anduane Homogohanda ibunaga hongome dindi wabini.

Ibunaga mini bayale gigabiwigome dindi bibahende wabialu

hari daliga mo yangala halu daligaha karu bibahendebi wabini.

16 Ibunime bi laragola hari kilikulu hongoheore lalu iba hariha bedagome u timbuni laga.

Dindi bibahendeha howa beralibaha pobo tara tara iraga howa mo mogo bilaga.

Ibugua iba dalu dindini ibilalu hari daba bilaga.

Puyabu tara tara ibu andaha wia do ho winiru mo heya halu pulame helo pelaga.

17 Ibugua ani birago hondowa wali agali karu ti lulu ale halu mini nawiore haga.

Dama mitangi bialu mbirale ngolome wabiaga agali bu karu tibi nde mbirale tinime bialu kagonaga taga pani nolebira.

Mbirale bi pupu wulenaga gime wabini uruniha galone mbira naheore.

Uruniha buhe lolenebi nawiore.

18 Ti nagaloneore ngago hondowa wali agalime uruni mebia holene karulape nga.

Anduane Homogo ibugua horo mbirungi ko bayalebi dabaki bule ibiragola

dama mitangi bialu mbirale gime wabini uruni ti ko halu ereba hai holebira.

19 Yagabanaga Ngode Datagaliwabe kago ibu urunibi ndo tara mende ale mbira kagoni.

Mbirale ngaru karubi bibahende ibugua wabiai hene ka.

Ibugua Isaraele wali agaliore ibunaga helo lowa daba bagiho helene ka.

Ibunaga mini Anduane Homogo Hongo Haiheore kagoni.

*Anduane Homogohanda, Babilono í ínaga tole бага hama ale nga, lenego ogo*

20 Anduane Homogohanda lalu,

Babilono í ínaga tole бага hama ale halu mbirale wai bule howa gi pehalu yamulene ale kegoni.

Ina í yamialu wali agali dewaore bo dambu wahai halu dindi timbuni hongohe wiaru bo gindirulo wahai harugoni.

21 Ina í heba howa wai biagane hosi hearubi ami agali hosini biraga hearubi bo wahai halu birugoni ndobe.

Ina í yu howa garo ale wai biaga karisi wiaru bo pambulo wahai halu

ami agali karisini heyu howa wai biaga hearubi bo wahai halu birugoni ndobe.

22 Ina í heba howa wali agali dewaore bo wahai halu

wali agali wahebi waneiginibi wandari igiri daliahebi bibahende bo wahai harugoni.

23 Ina í yu howa nogo sibi hearubi nogo sibi haru haga agali bu hearubi bo wahai haru.

Ina mabu biabe biaga bulumaga hearubi bulumaga biabe bilo haru haga agali hearubi bo wahai halu biru.

Ina gabumane agali hearubi agali haguane hearubi bo wahai halu birugoni ndobe, lene.

*Babilono wali agali pani neneo ogo*

24 Anigo Anduane Homogo ina larogo, Ina Babilono pani nelo muleberogo irane Babilonoha mana ko dewa bialu Saiono tano mo ko howa bo gialabaga bialu mo labu hayagonaga bolebero. Babilono pani nelo mialu minu barogola Isaraele wali agali

\* 51:13: Mo 17.1

Yuda wali agalibi tígua de hondoleberemi. <sup>25</sup> Babilono-o ínaga hongo timbuniorehe hari nene timbuni kagobi howa dindi bibahende bo haealabagabu wahai halu biri. Anigo heneneore ĩ Anduane Homogo ĩna ĩla waitigi halu gi hongo howa dogolalu ĩ minu yuwa dindini bape harogola irame ĩ dalu do amo lolebira. <sup>26</sup> ĩ daluha ege tole bayale agalime hamelowa anda bibehe mbira ibira naholebira. ĩ mo ko halu bo haealabaga biaiore henego ani wiaabo holebira. ĩ Anduane Homogo ĩna bi o ledogoniore, lene.

*Waitigime Babilono anda ibalu wai binigo ogo*

<sup>27</sup> Babilonoali baba wai bule ibilonaga dindi tara tara bu ngaruha wali agali bu karu dombeneha howa galalu pelagi yaraga halu mbelo biguli pu lalimu. Agali Ararada dindiha bu karubi Mininaga hameiginibi Asagenasa hameiginibi uruni bibahende ibai helo olalimu. Ani ibai halu tigua agali wai haru halu bamba holene agali haguane mbira dabo helalimu. Ani bialu ami agali wai bulenaga nogo hosini biralu mone tidiyu ibiradagua ibilo. <sup>28</sup> Ani bialu Midia dindiha kini bu karu olalu gabumane agali karubi tinaga agali haguane karubi heba tigua Midia dindini wali agali hendedaru ibai halimu lalu olalimu. Wali agali dindi ngaruha bu karu bibahende Babilono baba wai bule ibai halimu ololene nga. <sup>29</sup> Anduane Homogohanda Babilono mo ko hai halu dindi hangu wialu wali agali mbira nahe bameore wulebira, lalu Anduane Homogohanda bi abale lo winigo nga. Anduane Homogohanda mbirale uruni birangi dindi dumbirumbi bialu birilagimbu bulebira. <sup>30</sup> Babilono ami bu karume wai nabi ibida pialu tini andaga bira do hai holebira. Ani bialu hongo naheore wali ale birulebira. Waitigi bu karume ibalu Babilononaga anda hongohe bu karu bo heda halu wai pabenaga panga hongohe karu gialapaya biai holebira. <sup>31</sup> Agali bi yalu piagarume Babilononaga kini karia waitigime Babilono tano bibahende karulai haya lalu lamule pugupugu bulebira. <sup>32</sup> Waitigime iba doma edene biaga ngago karulalu iba pugua ngago ha tola bu karu bo heda hai holebira. Anidagua biragola Babilono ami agali bu karu bibahende gi howa luluyu hai holebira. <sup>33</sup> Waitigi bu karume ibalu Babilono dindi agalime widi iraneru lini hondo ibira ibira bilo geme hingedagadagua hingedalu bo haealabaga biai holebira. Biabe ogoni bulene horo kaware ĩbu ngagoni ndobe, lalu ĩ Anduane Homogo Hongo Haiheore Isaraele wali agalinaga Ngode Datagaliwabe kago ĩna bi o ledogoniore lene.

<sup>34-35</sup> Yarusaleme tanoha hearume lalu, Babilononaga Kini Nebugadenesahanda ina bo nalu naiore haya. Ibu dama tara mbira ale howa ĩna balu mbedogo biya. Inanaga dabudabu wimarume ibu tombe ho kagoni. Ibugua naiore hayagola inaha mbirale mbira nawi ndisi be bame ngaligobi ngama ndobe. Ani bialu mani inaha mbirale mbira para nahelo baya hangu domo wahai haya. Babilono tigua inanaga tingini bo budabaga biyagola inanaga darama bame odopaya bidagoni. Anidagua biyagome tiha ko ngago Anduane Homogohanda tigua mana ko biyagonaga paniore milo, laragoni, lene.

*Anduane Homogohanda Isaraele baba waitigi heneru pani mule lenego ogo*

<sup>36</sup> Anduane Homogohanda lalu, Yarusaleme wali agaliru-o hale haramine. Hene-neore bule larogo Babilono ibugua tihondo mana ko biyagonaga ĩna tí biamogo bialu pani nelu mulebero. Babilono dindiha iba pedaru damene bibahende mo hundia hai holebero. <sup>37</sup> ĩna Babilono bo labu harogola dindi hangu ibira halu ege tole dudu paya bini ale ona alugumu wulebira. Ani ngagola dindi ogoniha wali agali mbira nahe nogo gabua tara tara ti hangu dalu wulebira. Wali agali dindi taraha howa bolangua haga bialu porarume de hondowa mogo timbuni lalu gi hai holebira. <sup>38</sup> Ani biragola Babilonoalirume ti laiono gabuame ngororo laradagua lolebira. <sup>39</sup> Anigo Anduane Homogo ĩna tigatigaore larogo tinaga minime ko bulene bolangua ho kangi ĩna tinaga tomo timbuni dawa halu badi bia harogola tigua lulu iba dewaore nalu luluyu howa turu timbuniho holebira. Ani bialu howa mani ti paluwa lone heyabe nahe paliahondo haabo holebira. <sup>40</sup> Agalime nogo sibi memeru bolene ngagoria bole haru

halu piagadagua ti balu homelolene ngagoha haru polebero. I Anduane Homogo ina bi o ledogoniore, lene.

<sup>41</sup> Anduane Homogohanda lalu, Wali agali dindi bibahende bu karume Babilono dindi mini mo yaraga haga ngago ai waitigime ibalu wai buwa ti karulolebira. Anidagua birago hondowa hameigini tara tara karume mogo lai holebira. <sup>42</sup> Iba solowarame yaribu timbuni bu yu ibalu iba angeni dindi ngago bo dambi hai hagadagua waitigi ibalu Babilono dindi bo dambi hai holebira. <sup>43</sup> Babilonoha tano ngaru bibahende bo gialo wahai haragola dindi dege wialu wali agalibi mbira nahe wulebira. Wali agali mbira dindi ogoniha bolangua halubi napolebira. <sup>44</sup> Ina Babilono wali agalinaga dama mitangi bialu bi pupu wiaga gime wabini mini Bele ngago bo pambulo haealabaga bu waharogola ibugua mbirale mbedogo bu birayadaru magu tagudai bilolebira.\*

Ani biragola wali agali dindi tara tara ngaruha howa Babilono naibulebira. Babilononaga wai pabe timbuni bu mabu bidago bo gialapaya biai holebira. <sup>45</sup> Inaga wali agali bu kamiru ti Babilono dindi wahalu ibida piai halimu. Ti homa nabi hole hangu hangu ibida pugu pugu bilimu. Anduane Homogo ina Babilono wali agali baba keba timbuniore ho kogo ti baroha ti heba bamaga holigo gerai lalu pilimu. <sup>46</sup> Tigua bi diburibu laya laya maru ogoale bira lalu laga birane hale harimiyagua nde ti gi halu miniha mogo nale halimu. Mali áyu kamagoria bi diburibu mbirago tagira ibalu mali mendegoria bi diburibu mendeale tagira ibalu dindi mbira mbiraha wai bialu бага бага biarua lalu kini mbiralime kini mendela waitigi haruago lalu laga laga bialu holebira. <sup>47</sup> Ina horo mbira wiabagiho ngeledogo tagira ibirangi Babilono dindiha dama mitangi bialu bi pupu wule gime wabini bu ngaruni bibahende gingirulo wahai holebero. Ani berogola Babilono wali agali bibahendeme taga hai holebira. Ani bialu waitigime Babilono wali agali bibahende bo wahai hararunaga tingini Babilono dindi bibahendeni bu payabu wima polebira. <sup>48</sup> Babilono tano bo haealabaga bini dindi hangu ibiraho nganggi hariha karumebi dindini karu ngarumebi turu timbuni hai holebira. Mbirale bu ngaru mo ko hai hole dindi abene uyurahayagi howa agali ibirarume ani bulebira.\* <sup>49</sup> Ani bulubadagoni Babilonoibunime Isaraele wali agali tihondo biyadaguabi wali agali tara tara bu karubi dindi wiarubi mo ko hai hayadagua ibunibi nde mo ko holebira. I Anduane Homogo ina bi o ledogoniore.\*

*Anduane Homogohanda Isaraelealihondo, Babilono dindi wahalu ibida piai halimu, lenego ogo*

<sup>50</sup> Anduane Homogohanda lalu, Isaraele wali agali ti homa nabi yu wahene pu kamiru áyu ogoni Babilono yu wahalu ibida piai halimu. Ti dindi kaundiaha pu kamigonigo tigua Anduane Homogo i mitangi biaabo halu Yarusaleme embeda nahalimu. <sup>51</sup> Áyu tigua bi ogodagua laga kami. Ina taga timbuni ho kama. Agali dindi tarali bu hearume Anduane Homogonaga anda tamuha tamu hobane Loma Biaheneore heagoha anda puwa yo handayagonaga ina taga timbuniore ho kama, lalu kamigoni. <sup>52</sup> Anigo Anduane Homogohanda lalu, Horo mbira ina manda manda bu wini ngogo ogoni tagira ibirangi Babilono dindiha mbirale dama mitangi bialu bi pupu wulenaga gime wabini bu ngamiru bibahende bo gingirulo wahai holebero. Ani bialu Babilono dindi bibahende bu agali wai pialu karia bene timuhe bu howa dugu bigibigi bialu holebira. <sup>53</sup> Ainde Babilono ibu hari mindiniha iraga howa wai pabe hongoheore bu habeheyaguabi harugo lowa ina mbirale mo ko haga bu heledaru pelarogola tigua tano

\* **51:44:** Babilonoaliru tigua dindi tara tara wiaruha howa dabudabu tara tara wiaru mo yu piai henego Be 34.35 ngago de handabe. Ogoni bibahende tinaga mbirale bi pupu wiaga gime wabini wiago ogoninaga loma mo yu puwa migi bini. Anidagua binigo ai hameigini tara tara uruni tini wai anda pialu mbirale uruni mo yu dai bilonaga Anduane Homogohanda magu tagudai bilolebira. \* **51:48:** Mo 18.20 \* **51:49:** Mo 18.24

hongohe ogoni bo gialabaga bialu dindini bope holebira. I Anduane Homogo ina bi o ledogoniore, lene.

<sup>54</sup> Anduane Homogohanda lalu, Babilono dindiha dugu timbuniore biarua. Waitigi bu karume ibalu Babilono bo giallo wahai hayagonaga bi pudagadaga bialu ngilingolo timbuni laruagoni. <sup>55</sup> Anduane Homogo ina Babilono bo gialabaga bialu ibunaga ne hariga timbuni ngago bo hangai holebero. Iba solowarame yaribu bialu ege toleni baragola kulunduga laga biagadagua waitigime Babilono tanoha ibalu wai bialu kangi kilikulu timbuni lolebira. <sup>56</sup> Mbirale agali mo ko haga bu karume Babilonoha ibalu Babilonoali bope halu ti wayali holebira. Tigua Babilononaga ami agali bu karu minu garabaya bialu tinaga danda timu yidaru bo podo бага biai holebira. Anduane Homogo inime emena tigabi mulene ngadagua miaga Ngode Datagaliwabeore kogoni. I ogonibiore kogome Babilonome ko biyagonaga paniore mulene ngadagua miadai bulebero. <sup>57</sup> Ina Babilono agali haguane bu karu bibahende lulu iba mo na howa luluyu helolebero. Ami agali bu karubi tinaga haru haga bu karubi agali manda timbunibi karubi gabumane agali bu karubi ti bibahende mo luluyu helai holebero. Uruni ti mbirali lone heya nabi dindini palia ho wiaabo holebira. I Kiniore howa i mini Anduane Homogo Hongo Haiheore kogo ina bi o ledogoniore.

<sup>58</sup> Babilono tanonaga wai pabe hongohe homabu bidago waitigime bo gialapaya bialu emene yu wahene mbira naholebira. Tano ogoninaga wai pabe hongohe kagonaga panga irani giallo delolebira. Wali agali bibahendeme biabe ogoni erekuibini bame bu wahaya. Tigua binigo damene bibahende irani dai holebira. I Anduane Homogo Hongo Haiheore kogo ina bi o ledogoniore, lene.

### *Yaremaiahanda Babilono dindiha bi lo pelene go*

<sup>59</sup> Sedegaia ibu Yuda dindini kini heane mali mane hayagola Yaremaia ibugua Babilono dindiha bi mbira lo pelene. Horo ogoningi Kini Sedegaia ibu Babilono pole manda biyagola agali haguane mini Seraia libu haru polene manda bini. Seraia ibu Neria igini Masea aguane hene. Ani heagola Yaremaia ibugua Seraiahondo bi lowia hene. <sup>60</sup> Yaremaiahanda Babilono mo ko holebira lalu Anduane Homogohanda bi lamiyago bibahende gilibu wia hene. <sup>61</sup> Ani bialu Yaremaiahanda Seraia lamialu lalu, I Babilononi anda puwa wali agali karume mbuga ogoni bi gilibu ngaru hale hai helo bibahende dagalai habe. <sup>62</sup> Ani bialu ina Anduane Homogohondo bi ogodagua labe. Anduane Homogo-o ina dindi ogo bibahende mo ko hai halu wali agali nogo biangobi mbira naheloleore lalu dindi hangu ibira helo larigoni, lalu labe. <sup>63</sup> Seraia-o ina mbuga ogo dagalalu Anduane Homogohondo bi ogonidagua lai howa mbuga ogoria ege tole mbira pongobia howa Iba Yuberedisi pedagoha bape habe. <sup>64</sup> Ani bialu Anduane Homogonaga bi ogodagua labe. Anduane Homogo ina Babilono mo ko hole ngogo mbuga ogo ibaha pu ereba halu lone dai nabulebiradagua Babilono lone iraga naholebira, lalu laya labe. Yaremaia ibugua bi ogoni lairi hene.

## 52

### *Babilono amirume Yarusaleme tano anda ibuwa wai binigo ogo*

*(2 Kini 24.18-25.7, Yaremaia 39.1-10)*

<sup>1</sup> Sedegaia ibu mali pira kirani mbira (21) hayagola ibu kini pigane henego ai kini heane dege mali bearia (11) pene. Ibu aija mini Hamudala ibu Libina tanoha agali mbira mini Yaremaia dege mende henego wane berene. <sup>2</sup> Kini Sedegaia ibugua Kini Yahoiaigimihanda mana ko wiaru Anduane Homogonaga deni biyadagua dege bialu haga hene. <sup>3</sup> Anduane Homogohanda Yuda wali agalirumebi Yarusaleme tanoni wali agali hearumebi mana ko wiaru dege mo tene howa biaabo hayago hondowa ibugua

☆ 51:63: Mo 18.21



handabe manga timbuniore howa keba halu ti bibahende tinaga dindi ngelo wahalu dindi mendeha hama pelo wara tagi hene.

Kini Sedegaia ibugua Babilono dindiha Kini Nebugadenesa heagome ibu handayaho helowa holonego manga halu hame nale ha tara hene. <sup>4</sup> Ani heagola Sedegaia ibu kini heane mali dininaga ege pinini horobi pini dege hayagola Babilono dindinaga Kini Nebugadenesahanda ibunaga ami bibahende haru ibuwa Yarusaleme tano karulole lowa ho hagira buwa wai bialu hene. Tigua dindi dugu yu tone buwa tini howa wai bule ge holenenaga pabe hai heagonaga tagiraha wima wima iraga halu hene.✧  
<sup>5</sup> Tigua ani buwa Yarusaleme tano ho hagirabu heane dege mali mbirani ege waragaria pene. Sedegaia ibu kini heane mali bearia (11) peagola <sup>6</sup> mali ogoninaga ege mane hayagola horo dinini Yarusaleme wali agali bibahende tomo nolene nawi ndia hayagola hina garime mo ko hene. <sup>7</sup> Ani heagola Babilonoali ami biarume pabe mbirahayagi gialo wialu Yarusaleme tanoha anda ibini. Anda ibiyagola Kini Sedegaiabi ibunaga ami bu hearubi ti bibahende ibida piai hene. Ti kini mabu mbira wiagodagua pialu pabe bu paulene gimbuni wiagoha panga mbira winigoha tagira pole mbiraga ohalu pene. Babilono ami dewaore Yarusaleme tanonaga pabe tagirahayagi ho mabubupe howa mamage hai heago helalu Yudanaga ami biaru ti ohalu hendore tagira pialu unu Iba Yodana angehayagi dindi ulini mbira wiagoha pole pene.✧ <sup>8</sup> Ani pole pialu hearia Babilonoali ami biarume Kini Sedegaia talima pugupugu bialu harigani Yarigo tano kaware degeni abale minu yania hene. Ani biya handala Sedegaianaga ami agali biarume kini biago minilo yu wahalu ti ibida pugupugu bialu piai hene. <sup>9</sup> Ani biyagola Babilonoali ami biarume Kini Sedegaia minuwa Babilononaga kini hearia yalu pene. Odagoningi Babilononaga kini ibu Hamada tanonaga dege tano emene mbira Libila winigoria hearia tigua Yudanaga Kini Sedegaia minu yalu pene. Babilononaga Kini Nebugadenesahanda Kini Sedegaia minu yalu ibiyago hondowa ibugua lalu, Kini Sedegaia ibunime ko biyagonaga paniore nolene nga, lene. <sup>10</sup> Babilonoali ami biarume Kini Sedegaia iginirubi Yudali agali haguane hearubi bibahende Libila tanoni minu yalu ibini. Horo ogoningi dege Kini Nebugadenesahanda bidaba layadagua bialu ami agali hearume Yudanaga Kini Sedegaia ibuninaga deni ibu igini biaru bibahende homelo bo wahai halu Yudali agali haguane biarubi bibahende homelo ma pugu wahai dege hene. <sup>11</sup> Ani buwa Kini Nebugadenesa ibugua bidaba layagola Kini Sedegaianaga de kirabali bo halu wahalu ibuni gi geru pu senime hende howa Babilono dindiha haru pene. Ani haru puwa Babilono dindiha garabaya helayagola ogoniha ha dege bialu garabaya andaha halu homene.✧

*Babilonoali amirume Yarusaleme bo gialo wahenego ogo  
(2 Kini 25.8-17)*

<sup>12</sup> Kini Nebugadenesa ibu kini heane dege mali pira mbirani dira (19) henego mali ogoninaga ege dauni hayagola horo piningi kininaga ami haru howa Babilononaga kini mamage haga agali haguane mbira mini Nebusaradana henego ibu Yarusaleme puwa Babilononaga kini heagonaga biabe bulene wiaru handayaho haga hene. <sup>13</sup> Ani pu howa ibugua Anduane Homogonaga andabi Yuda wali agalinaga kini biago andagabi Yuda wali agalinaga agali haguane biaru andagabi bibahende mbiraorebi mbira yu wa nahe bibahendeore bo heda hai hene.✧ <sup>14</sup> Ami agali haguane Nebusaradana heba ibini biarume Yarusaleme tanoha ege pabe bu mabu bini hearu bibahende gialope hai hene. <sup>15</sup> Ani bialu ami haru haga Nebusaradana ibugua Yuda wali agali maru yu wahene hearu bibahende minu garabayabu yalu Babilono dindiha piai hene. Yuda wali agali maru wai biyangi ibida pialu Babilononaga ami hearuha ho bitago ho hene hearubi bibahende garabayabu yalu pu dege bini. Agali maru mbirale tara tara ngaru

✧ 52:4: Ese 24.2 ✧ 52:7: Ese 33.21 ✧ 52:11: Ese 12.13 ✧ 52:13: 1 Kin 9.8

wabiaga mandabi Yarusalemeha hearubi minu yalu pu dege bini. <sup>16</sup> Anigo Yuda wali agali maru yagibanore howa mbirale yalu polene nawi hearu ami haru haga haguane Nebusaradana ibugua uruni ti gerebi maburu mabu tara tara wiarunibi handayaho helo lowa helo wahalu pene.

<sup>17</sup> Babilonoali biarume Yarusalemeha Anduane Homogonaga anda biagoha anda puwa ege tole boronosime anda gene helo helene heago bo giallo yalu iba hambu yu pu ibu biaga wilibaro ale wiagobi mo yu pialu bini. Iba dange timbuni ege tole boronosime wabu wini wiagobi bo pambulo бага buwa mo yalu pu dege bini. Uruni damene ege tole boronosime wabini Yuda dindini wini wiaruni bibahendeore Babilonoha mo hilo yalu piai hene. <sup>18</sup> Ogoningi dege Anduane Homogonaga andaha biabe biaga todobene bebi mbirale hilaga nama tabulibi lamu hale hundia haga alebi nogo darama lomabu mule hambu yaga ndisi bebi ira hagua ngabilo mini inisenesi delo delaga be wiagobi mbirale tara tara ege tole boronisime wabini Yuda dindini wini wiaruni bibahendeore Babilonoha mo hilo yalu piai hene. <sup>19</sup> Ani bialu ami agali haguane Nebusaradana biagome dege mbirale ngolo silibarume wabini pelediru ndisi berubi loma delolene ira hedo yagabi ndisi be nogo darama hambu yaga wiarubi todobene be wiarubi mbirale lamu hale delaga wiarubi ira hagua ngabilo inisenesi delaga be wiarubi waini iba hambuwa loma wiaga ndisibe wiarubi bibahendeore mo yalu piai hene. <sup>20</sup> Bambaore Kini Solomononaga biabe biaga agali henerume anda pigane bialu howa ege tole boronosime anda gene kira wabu helene heagobi iba dange timbuni mbira winigobi mbirale nogo bulumaga ale homberia (12) wabuwa iba dange timbuni biago wiagonaga dabu biago andane dindiha winigobi iba dange emene emeneru hambuwa wilibaro ale ogoriani hambu yalu pu ibu biaga wiarubi bibahende Kini Solomonohanda Anduane Homogonaga andaha ngelo agalime ani wabu ngeladaba lenego. Uruni bibahende ege tole boronosi paleago mule lowa bo dudubaga biai hene. Ege tole boronosi uruninaga genda agalime magi handabe nahe dewaore mini. <sup>21-22</sup> Anda gene kira boronosime wabu helenedagoni luore ogobi labolabo hene. Libu kirabali luninaga magi manda mida halira. Ogoni timbuni mabubinaga arane mida duriani howa emene bolanguahe sendimida pira tebira (30) wini. Tigua wabinidangi boronosime baibo timbuni wabu henego ogoni ibuha boronosi dewaoreme wabini. Boronosi palia gengeda tagi henego magi manda sendimida karia howa bolangua hene. Nguni daligahayagi boronosi padago magi manda mida kirani sendimida pira kira (20) wini. Tigua boronosi degeme mbirale yari wena nu alebi ira mbira mini pomegaranadenaga lini alebi wabuwa anda gene boronosime wabini biagonaga nguni daligahayagi yari bia ho helene. <sup>23</sup> Anda gene mbira mbiranaga mbirale ira pomegaranade lini ale pira dege pira (100) wabuwa anda gene biago labonaga nguni daligahayagi yari bia haga bu helene. Uruninaga pira dirani waragaria (96) anda gene ogoninaga ira gubane maria biarunihayagi helai hene.

*Yuda wali agali Babilonoha garabayabu yalu penego ogo*

<sup>24</sup> Babilononaga ami haru haga agali haguane Nebusaradanahanda loma binigo mo miaga haguane Seraiabi biabe ogoni ale dege biaga agali mende Sebanaiabi agali tebirali Anduane Homogonaga anda biagonaga panga haraba wiago mamage haga hearubi bibahende minini. <sup>25</sup> Ani bialu Nebusaradanahanda Yudanaga ami haguane agalibi kininaga bi lamogo biaga agali kariali hearubi ami agali haguane mende ibu ami agali mo mogo buwa tinaga mini bebani gili biaga ibubi agali haguane pira waragaria (60) hearu tibi agali uruni bibahende minu garabayabu yalu pene. <sup>26-27</sup> Nebusaradana ibugua uruni ti Babilononaga kini biago Hamada dindiha Libila tano wiagoria ibu hearia minu yalu pene. Tano ogoriani kini ibugua agali uruni bo wahadaba layagola bibahende bo wahai hene.

☆ 52:17: 1 Kin 7.15-47

Ani bo wahai halu Yuda wali agali maru tininaga dindi yu wahalu Babilono dindiha garabayabu yalu piai hene. <sup>28</sup> Nebugadenesahanda garabayabu yalu pendaruni daga ogodagua. Nebugadenesa ibuni kini heane mali karia hayagola Yuda wali agali daosini tebira pira kirani tebira (3,023) garabayabu yalu pene. <sup>29</sup> Ai Nebugadenesa ibu kini heane mali pira mbirani halira (18) hayagola Yarusaleme wali agali handari halira pira tebirani kira (832) garabayabu yalu pene. <sup>30</sup> Nebugadenesa ibu kini heane mali pira kirani tebira (23) peagola ibunaga ami haru haga haguane Nebusaradana ibugua Yuda wali agali handari karia pira mariani duria (745) garabayabu yalu pene. Ani garabayabu yalu pendaruni daga lamaga halu daosini mariani handari waragaria (4,600) bibahende pene.

*Yudanaga Kini Yahoiagini garabaya golope henego ogo*

<sup>31</sup> Yuda wali agalinaga Kini Yahoiagini Babilono dindiha garabaya dege heane mali pira tebirani karia (37) penego ai mali ogoningi agali mbira ibu mini Ebili Merodaga ibu Babilononaga kini gahenge ha aribia ho hene. Mali ogoninaga ege hombeanenaga (12) horo pira kirani duria (25) hayagola Kini Ebili Merodagahanda Yudanaga Kini Yahoiagini dara howa garabaya hayago golope hene. <sup>32</sup> Kini Ebili Merodagahanda mana bayaleore walia halu kini maru Babilono dindiha garabaya hene hearunaga deni Yudanaga Kini Yahoiagini ibu mini lene lowa mo daliga helene. <sup>33</sup> Ani helayagola Yahoiagini ibu garabayanaga aga nabi aga tara bu howa ibu kini andagaha tomo nalu haga haabo halu nde ibuni homene. <sup>34</sup> Kini Ebili Merodagahanda Yahoiagini ibu bayale karulape helonaga wali agalihondo tomo mbiraleru munirubi tale bialu Yahoiagini miaabo halimu laga hene. Wali agali tigua ani talebu migi bialu haabo hearia dege Yahoiagini ibuni homene.

## Yarusalemenaga Dugu Binigo Mbuga ogoha gilibu ngarunaga nemandi ogo

Babilono ami hearume ibalu Yarusaleme bo gialo haealabagabu wahayagola wali agali bu hearume dara timbuniore howa tano ogoninaga dugu darabiore bia henego gilibu winigo nga. Tigua dugu dau halu bu podaga bini. Yarusaleme tanomebi Anduane Homogonaga anda henegomebi Isaraele wali agalihondo Anduane Homogo ibuni ti heba haabo kagoni lalu pigiya ale walia haga wini. Anigo tano bo gialabaga biyagola Isaraele wali agalinaga mini mbiraore wulene haealabagabu wahalu tinaga mini mo ko hai ho hene. Ani howa tigua dugu darabiore biaabo halu hene. Wali agalime tinaga Yarusaleme mitangi howa dugu bialu henegonaga mbuga ogonaga be mbira mbiraha gilibu wigi bida. Yuda wali agali tigua Yarusaleme tano mo ko halu bo gialabagabu wahenedago mitangi bu dai bulene horo tagira ibirangi iba gana lalu dugu uruni biaga wini. Ani bialu tigua Anduane Homogoha hana ho harimayagua mani bayale holeberema mitangi binigobi gilibu nga.

### **Bulu бага бува кuni gilibu ngago (1.1-22)**

Yarusaleme tanonaga wali agalime genda timbuni henego 2.1-22

Yarusaleme tano bo gialabagabu wahenego 3.1-66

Anduane Homogonaga biamogo bia holene mitangi binigo 4.1-22

Yarusaleme bo gialabagabu waho ngelenego 5.1-22

Tigua Anduane Homogohondo, Ina dara halu biamogo bibe, lenego

### *Yarusaleme wali agalime dara howa kiabu dugu binigo ogo*

<sup>1</sup> Yarusalemeni wali agali dewaore ala bu henego ai áyu naheore ngago darabioreda. Ala nde wali agali dindi tara tarani palu ngarume Yarusalemenaga mini yaraga haganego

áyu nde ibu wali mbira agalini homene dalo biraradagua bida.

Ala nde ibu kuini wali biragadagua biruwa dindi dewa handa gimbu bu biragago

áyu nde ibu waitigirume bope hayagola habane nabulene garabaya biabe biahaga ale ho bedagoni.

<sup>2</sup> Ala dindi bibahendeme ibula nenege henego

ai áyu dindi mbiragome ibula dara hamogo bia ho nabereore.

Ibunaga nenege biaru ti ibu mo hondo haluibunaga waitigi bu hinaya.

Ani biyagola mbiraga bibahendengi Yarusaleme ibu dugu biaabo haragola de iba giligala laabo haragoni.

<sup>3</sup> Yuda wali agaliru waitigime mo ko howaore

ti dindi mendeha garabaya helo minu yalu pene.

Ti dindi taraha hameigini tara tara hearu dombeneha pu howa bayale ndo hene.

Ani bu howa ti ibida pobe naheyagola

waitigirume ho mabu bupe howa minu yalu pene.

<sup>4</sup> Saiono tanoha hariga pedagogia wali agali mbira Anduane Homogonaga horo timbuni pongo bo winiangi napiaga.

Ani bialu tano pangaru bame duguaho wialu loma binigo mo miaga biarume genda howa

gomogomo lalu dugu darabi bialu hea.

Saionoha wandari biru wiarume genda timbuniore howa

Saiono tanoha hearu bibahendeme tandaga timbuni halu dugu bialu hea.

<sup>5</sup> Waitigirume Yarusaleme hondo howa  
 tigua Yarusaleme ibugua ti bope naholebira manda buwa ti mogo nale hene.  
 Yarusaleme ibu ko dewa biaabo hayagonaga Anduane Homogohanda genda tandagabi  
 timbuni nelo miniya.  
 Waitigi biarume Yarusaleme waneiginiru dindi kaundiaha minu yalu puwa garabaya  
 bu helene.

<sup>6</sup> Saiono tano mini lene hayago ereba hai haya.  
 Ibunaga agali haguane hearu ti nogo gabua mini diame tani nolene nawidagola  
 garibi lowa hongo ibiraho hagadagua tinaga hongo ibira halu ibida pobe nahe ka.

<sup>7</sup> Yarusaleme bo gialabagabu wiagola ibunaga wali agaliru dindi bibahende ha hama  
 purogolo heangi  
 ibu mbirale bayale bayale ala wiyaru mitangibu dai biragoni.  
 Waitigiru ibuwa Yarusaleme wali agaliru minu yalu piyangi hameigini marume ibu  
 biamogo nabio.  
 Waitigi biarume Yarusaleme bo gialabagabu waheagola ti hondo oba haya.

<sup>8</sup> Yarusaleme ibu ko dewa biaabo hayagome mbirale ko ngubiore wiaganegobi wini.  
 Bamba hameigini marume ibunaga mini yaraga haganego  
 áyu ibu ti babe ale heago hondowa mege biyagoni.  
 Anigo Yarusaleme ibu wali mbirame tandaga timbuni nalu biruwa dengui buyi howa  
 dugu bialu biragadagua beda.

<sup>9</sup> Ala ibugua ko biyaru mo paniho wiagola  
 mani marume ibu bo gialabagabu waholobada manda nabi hene.  
 Ani bu hearia ibu bo gialobagabu waore hayagola  
 wali agali mbiramebi ibu dara naheore hene.  
 Ani biyagola ibugua lalu, Anduane Homogo-o inaga genda ogoni handa.  
 Waitigirume i hingedape halu bo gialobagabu waore hayago de handabe, lalu hea.

<sup>10</sup> Waitigirume Yarusalemenaga mbirale bayale bibahende wiaru mo page biai haya.  
 Wali agali tara Anduane Homogo mitangi nabiaga hearume  
 ibunaga andaha anda polene nawi lo winigoha anda puwa  
 ko ogoni biyagola Yarusaleme ibu de hendene.

<sup>11</sup> Yarusaleme wali agaliru tomo nolene nawiyagola  
 garibi gibiore lowa ti tomo taya bialu howa dugu taraore bialu hea.  
 Ti homa nabi holenaga tomo yolo bialu nole lowa  
 tinaga mbirale bayale wiaru baba iriari bialu haga.  
 Yarusaleme ibugua lalu, Anduane Homogo-o tigua i mo ko hene bedogo de handa,  
 laragoni.

<sup>12</sup> Yarusaleme ibugua hariga kaware wigi biagoriani wali agali pugu biyaruhondo olaga  
 bigi bialu,  
 Ina genda timbuni yu bedogo handadaba.  
 Anduane Homogo ibu ila keba taraore howa ihondo tandaga timbuniore noliya ngiya.  
 Ina manda berogola genda ogonibi mbira agali ala henerume nane.  
 Anidago tigua manda beremigola ogoni bame mbira biyadabe toba kamibe.



- 13 Anduane Homogohanda daligaha howa ira hedope hayagome  
 inaga hongo bope halu kuniru do gedaore helo ibilaya.  
 Ibugua gono mbira winiyagoha i dalu erembirahayagi mo paraho ibira helaya.  
 I yu waore hayagola i homaore birugoni.
- 14 Anduane Homogohanda ina ko biruru bibahende mo yu ngoai howa pongo buwa  
 ininaga mani wia haya.  
 Ko biruruni genda gibiore yabe naheyago inaga hongo biba haya.  
 Anduane Homogohanda i waitigirunaga giha minu ya hayagola ina ti baba wai bibe  
 nahe harugoni.
- 15 Anduane Homogohanda inaga ami hongohe hearuni hondo oba halu erembira miya.  
 Inaga igiri daliahe hearu bo hilo wahole waitiginaga ami ibilaya.  
 Pu mbira mini gerebi lini pingidalu hangedagadagua  
 inaga Yuda wali agaliru hangedo mbaralo wahaya.
- 16 Ani biyagome ina dugu darabiore bialu inaga deha de iba giligala lalu ibaabo  
 harugoni.  
 I pele ngialu mini mo hongo holenebi mbirali naheoreda.  
 Waitigi hearume i bo gialobagabu wahalu  
 inaga wali agalirunaga mbirale mbira yu wa naheore,  
 lalu Yarusaleme ibugua lene.
- 17 Saiono ibu mbiralime biamogo bilo ibunaga gi dogolo amu heagola  
 biamogo bulene mbira naheoreya.  
 Anduane Homogohanda hameigini maru dindi tara kawareha hearu  
 Yagaba hameigini baba waitigi helo ibilaya.  
 Ani ibilayagola waitigi biarume Yarusaleme hondowa  
 mbirale ngubi mbira handaradagua biyagoni.
- 18 Yarusaleme ibugua lalu, Anduane Homogo ibu mini tigabi howa  
 ihondo biyagoni irane ina ibunaga bi mo waharugonagada.  
 Wali agali dindi bibahendeni kamiru  
 tigua ina bi larogobi hale halu  
 tandaga narogobi de handadaba.  
 Inaga wandari igiri daliahe hearu waitigime dindi kaundiaha garabayabu helole minu  
 yalu piyagoni.
- 19 Inaga nenegerume i biamogo bilo olarugola  
 ti i waitigi bu hinaya.  
 Loma binigo mo miagabi agali ala hene miniwi hearubi ti homa nabi holenaga erekui  
 biabe bialu  
 tomo nolene taya bialu hearia hariga wiarunaga homo payapaya biya.
- 20 Anduane Homogo-o i genda timbuniore yu bedogo de handabe.  
 Ina inaga bi lo wirigo bibahende mo wahalu doga harugome  
 inaga miniha mitangi bulene bibahende mo talola hai kagola bedogoni.  
 Tagirahayagi waitigirume inaga wali agaliru harigani bo paya bialu  
 ai andagaha biru wiarubi homaiore haragonida.
- 21 I tandaga nalu dugu bialu wirugoni hameigini maru hearu ti hale howa  
 i dara hamogo bulene mbirali naheya.

Ína genda timbuni ihondo ngiriruni i waitigi biaru ti hale howa turuho kagoni.  
Ala ina mana bule lo wirigo lola helo hameledo.  
Ani lola harangi i waitigi biaru i bedogobi helo  
tihondo mana mbiraore ogonibi dege mibelo hameledo.

<sup>22</sup> Ina ko biruru ina mitangi bu howa pani ngirigoni.  
I waitigi biarume ko bibahende biyaru mitangi bialu pani i ngirigobi dege mibelo  
hameledo.  
I miniha genda halu hongo nahe biruwa dugu timbuni bialu bedogoni,  
lalu Yarusalemena dugu darabiore binigo uruni Yaremaiahanda lene.

## 2

### *Anduane Homogohanda Yarusaleme bo gialabagabu wahenego ogo*

- <sup>1</sup> Anduane Homogohanda ibunaga keba holeneme Saiono tano ginu haguame bu dambi  
haradagua biyagola  
mo aruma hai helayago daraba.  
Bamba Yarusaleme tano Isaraele dindiha bayaleore mbira winigo  
áyu Anduane Homogohanda bope hayagola ai ko ngubiore ngagoni.  
Anduane Homogohanda ibunaga keba holene walia hayangi  
ibunaga andabi Yarusaleme tanoha heago mitangi nahe tano heba bo haealabaga  
bini.
- <sup>2</sup> Anduane Homogohanda Isaraele dara nahe howa tinaga anda bu hearu bibahende bo  
gialo wahai helene.  
Ibugua Yuda tanoha wai pabe hongohe hearu bo gialabagabu wahene.  
Tanobi agali haguane ogoniha hearubi bibahende bope hai howa  
ibugua ti mo taga timbuni hene.
- <sup>3</sup> Anduane Homogohanda lembo timbuniore howa Isaraelenaga hongo bo pirilapeore  
helene.  
Ti waitigi bu hearume wai bule ibiyagola ibugua ti biamogo nabi wahalu  
irame bo daradagua bilalu Isaraele wali agali bo wahaiore hene.
- <sup>4</sup> Ibugua waitigime biradagua Yarusaleme bole timu edaho hene.  
Ibunaga hongome Yarusaleme wali agali turu haga hearu bo wahai hene.  
Ibunaga keba holene ira hungu ale bialu heagome Yarusaleme tano daiore helaya.
- <sup>5</sup> Anduane Homogohanda ibu waitigi ale howa Isaraele wali agali bibahende bo home-  
lai hene.  
Ibugua tinaga wai pabe bo haealabaga bialu anda hongohe bu helearubi bo  
gialabaga biya.  
Wali agali Yuda dindi bibahende ha bu hearu ibugua ti genda timbuni mo miyagola  
ti dugu timbuniore bialu hene.
- <sup>6</sup> Agalime anda andira mbira bu helenego gialo wahagadagua  
Anduane Homogohanda ibunaga anda heago gialabagabu wahaya.  
Isaraele wali agalime ibu mitangi bialu lotu lole íbu ngoai haga anda heago gialo  
wahaya.  
Anidagua bialu Anduane Homogohanda horo timbuni tinaga mo ngoai haga wiarubi  
Sabada horongi bialu haga winigobi bibahende mo wahai howa  
ibunaga wali agali hearunaga horo timbuni uruni mo embeda hene.  
Anduane Homogohanda ibunaga keba holene ogonime

kini hearubi loma binigo mo miaga bu hearubi tinaga biabe biaga wiarubi mo wahalu bo duguai hene.

- <sup>7</sup> Anduane Homogohanda ibunaga lomabu delaga dabu biagobi  
 ibunaga anda loma bia hene heagobi erembira mialu wahaya.  
 Waitigime Yarusaleme tanonaga anda pabe hongohe wiarubi bo gialo wahelo ibilene.  
 Ibilayagola Anduane Homogonaga anda biagoha anda puwa  
 ala horo timbuningi wali agali ibu ngoai howa turu howa iba gana lagalaga bialu haga  
 biagoha  
 waitigime wayali howa bi hongo howa la dagaraga mambolo bagadagua balu  
 hayua.
- <sup>8</sup> Anduane Homogo ibugua Saiono tano bayale ngagonaga wai pabe bo gialo wahole  
 manda bu hene.  
 Ibugua wai pabe ogoni ogodagua bialuore gialo waholebero lo manda bu howa  
 pabe gialo waholenego mogo nale howa gialo wahene.  
 Ibugua mamage hagane anda lu bu heagobi tanonaga pabe bibahendeorebi mandagi  
 bo gialo wahai heagola  
 mo ko hene ngagoni.
- <sup>9</sup> Tanoha wai pabenaga panga timbuni hearu bo gialapaya bialu  
 panga bengena haga aeane timbuni helearuni gialo wahai haya.  
 Uruni dindini gialapayabu wiagola ege tole gingirulopaya bini wiarume wiadambi  
 hayiya.  
 Agali haguane bu hearubi kini ibunibi dindi tara wiagoha minu garabaya bu yalu  
 piyiya.  
 Anidagua biyagola loma binigo mo miaga hearu tigua Anduane Homogonaga bi mana  
 lowini ngago lawai nahe wahalu  
 Anduane Homogonaga bi mana latagi haga hearumebi de gandeba nahende  
 heagola mbiwia halu latagi nahe hayiya.
- <sup>10</sup> Saiononaga agali ala hene miniwi heneru tigua bi mbira nale bame dindini biru wima  
 pedagoni.  
 Tinaga hagianeni be abalu dugu wialu dara howa walia halu aga karulo bedagoni.  
 Wandari Yarusaleme tanoha biraga berearume genda timbuni howa de handa  
 dindi halu ma podope ho bedagoni.
- <sup>11</sup> Yarusaleme tanoha mbirale ko uruni biyago mitangi bialu inaga bu miniha genda  
 howa  
 dugu bia dege bialu hewaria de tandagame tongo ledogoni.  
 Inaga wali agali bu hearu darabi mo ko hai hene heago hondowa inaga bu miniha genda  
 ho kogoni.  
 Wandari igiribi waneigini galibi bu hearume tanonaga hariga teneni homo paya  
 payabu wima peago hondowa i mini burugu lo kogoni.
- <sup>12</sup> Wandari igiri urunime hina garibilo howa ibabi noa halu ti aiya olalu dugu dege bialu  
 hearia handaru.  
 Wai hamani wai bialu howa bo waharagola abale homabehe harigani wima pia-  
 gadagua pialu  
 waneigini biaru ti aiyahanda taba yamiyagola hendore ti aiya giha homo ya haga  
 biya.

- 13 Yarusaleme-o í dara timbuniore ho kogoni.  
Tano mendeha ína genda áyu yu kegonidagua mbira yu hearia handa nabi kogoni.  
Ainde ínaga bu miniha dungulo habelonaga ína bi mbira ago loabe.  
Ína tandaga harego timbuniore iba solowara bira amu nana bidagobi ngagoni.  
Anigo nde mani í aiwa mo bayale holobadabe.
- 14 Ínaga bi mana latagi haga agali hearume de gandeba handarima layago tigua ke howa í mo hondo hayada.  
Í bayale habelonaga tigua ínaga ko ngelo kego yu wahabelonaga mo walia nahayada.  
Ani nabi howa tigua Anduane Homogonaga bi larama lowa tininaga bi hangu layagome í mo hondo hayagoni.
- 15 Yarusaleme-o wali agali hariga ogoriani bolangua halu pugu birarume í de handaragoni.✧  
Tigua íhondo ke halu mogole tingi howa í mege bialu lalu,  
Wali agalime tano dunini bayaleore mbira nga layago ogonidabe.  
Wali agali dindi bibahendehe bu karume tano ogo dege hamelai hagadabe, laga bialu kagoni ndobe.
- 16 Í waitigi bu karume í hondo oba halu mege bialu howa lalu,  
Agaliore ina kamagoniyago ai iname Yarusalemeore bope harimagoni ndobe.  
Abale iname horo ogoni tagira ibilo maliaho harimago ai horo ogoni tagira ibiyadagoni de hendedama, laga kagoni.
- 17 Anduane Homogohanda buleore lo mitangi bu henego áyu tagira ibiyagoni.✧  
Bamba Anduane Homogohanda lo wialu lalu, Isaraele wali agalirume ínaga bi mo wahayagua ína ti dara nahe bo wahai holebero, lalu lowini.  
Anidagua lowinigo mitangi bialu áyu Anduane Homogohanda Yarusaleme íhondo ani biyadagoni.  
Ibugua í waitigirume í baba wai bule ibilo mo hongo halu ibilaya.  
Ibilayagola tigua wai bialu wayaliore howa í hondo oba halu ti turu ho haya.
- 18 Ínaga wali agali bu karume ti biamogo bia lowa Anduane Homogo olalu ka.  
Yarusaleme-o mbiraga horombebi ína dugu hongo howa bialu ínaga deha howa de iba pigipugu lalu iba hongohe poradagua pialu helo hãlo ha nabi dugu bialu haabo holene nga.
- 19 Mbiraga í paliahondo nahe howa heyigi bialu Anduane Homogo olalu ibuhondo bi laabo haga bibe.  
Bi lalu ínaga genda ngelo keruni ibuhondo lamiai holene nga.  
Bi loleberedagoni irane í waneiginiru hina garime hariga teneni homa ainai bidagonaga ínaga gi yaraga halu dara howa biamogoore bia lalu bi lolene nga.
- 20 Yarusaleme tanome lalu,  
Anduane Homogo-o mbirale íninaga waneiginiruhondo biridaruni áyu íni handa.  
Waneigini aiyarume ti waneigini gubalini hagaore wiyaru ai tinaga tingini tini nalu kagoni de handa.  
Waitigi bu karume ínaga andaha anda pialu

✧ 2:15: Iba 48.2, 50.2 ✧ 2:17: Man 28.15, 28.43-44, Iba 89.42, Ese 5.11

ínaga loma binigo mo miaga karubi  
bi mana latagi haga karubi bibahendeore bo wahai haragoni.

<sup>21</sup> Inaga waneigini bu hearubi wali agali wahe bu hearubi uruninaga tingini ininaga hariga teneni homo payapayabu wima pedagoni ndobe.  
Waitigime wandari igiri daliahe uruni bibahende bo wahai hayagola ani wima pedagoni.

Anduane Homogo-o ina inaga wali agali uruni dara holene irane nawigo nde harugo lalu dara nahe howa inaga keba timbuni holene tagira ibiyangi ti bo wahai harigoni.

<sup>22</sup> Ina keba timbuniore ho howa i waitigi dindi bibahende ha bu hearu olomogo bialu i bo gialabaga bialu mo labu helo ibilarigoni.  
Galoneore bulene horo timbuni tagira ibiragola wali agali dewaore ibu ngoai hagamadagua ina waitigi dewaore ibu ngoai helarigoni.

Inaga keba holene timbuni ogoni tagira ibiyangi waitigi ibiyarume wali agali bu hearu aria mbiraore hangubi mbira yu wanahe bibahendeore bo wahai hayagoni ndobe.

Inaga waneiginiru inime ti gubalini timbuniore ho howa haru haruligo ainde waitigime ibalu bo wahai haya, lene.

### 3

#### *Pani nolenebi mini beregedolenebi mini dunu bia holenebi ngago ogo*

<sup>1</sup> Anduane Homogohanda ihondo keba timbuni howa i minu bayagola ina tandaga timbuniore nalu haru.

<sup>2</sup> Ibugua i warape halu wa kagoha polilono ko arumaha puabo holiyanaga warape haya.

<sup>3</sup> Ibugua i hanguore minu balu haabo kagoni.  
Horo bibahendengi anidagua biaabo halu kagoni.

<sup>4</sup> Ibugua i baabo hayagome inaga kuni bibahende podabaga biai halu inaga tingini bibahende gedaore hai halu pirilabaga biai ka.

<sup>5</sup> Ibugua genda tandagabi tara tara mo ngidagome i mo dariba henego kogoni.

<sup>6</sup> Ibugua i abale halu homayarunibi dege bu hinu helalu arumaha i ibagabu holiya heledagoni ndobe.

<sup>7</sup> Ibugua i dariba ho heledagola golalu ibida pora bialu pobe naheore kogo.

Ibugua inaga gi geru pu senime minu daribaho ngeledagola heyalu ibagabu holenebi nakarulapeore kogoni.

<sup>8</sup> Ina Anduane Homogohondo i biamogo bia lalu kogola ibugua inaga bi larogo hale nahaga kagoni ndobe.

<sup>9</sup> I ibaga bialu porogohabi ibu hapai halu ibuni hai ka.

Ibugua i hariga poleberogoha ege tole wia pai haradagua biragoni.

<sup>10</sup> Anduane Homogohanda biango handalehe timbuni mini beame nogo tara karu ibiragola bo nole ohowa harigani yu biragamadagua

budi gabua timbuni laionome mbirale bo nole nendebu hagamadaguabi

<sup>11</sup> i harigani pialu hewaria ibugua i minu balu hariga gibuniha gililo yalu pubagi howa

inaga tingini budubaga buwa i biamogo bulene mbira naheha ngelalu piya.

<sup>12</sup> Anduane Homogohanda i timume bogole edaho haya.



- 13 Ani edaho howa ibugua tegelape halu inaga gubalinini baya.  
 14 Anidagua biyago hondowa inaga wali agali bu karume i hondo oba halu mege bi lalu iba gana lalu ka.\*
- 15 Ibugua i genda dewaore mo ngidagome iha wu toleda.  
 Inaga tomo nolenebi iba nolenebi kaubi ale dege ngiaga kagoni.
- 16 Ibugua inaga dengui dindiha mo guya howa  
 ma mo nigi biragola ege toleme inaga ne hondo biba haradagua bidagoni.  
 Ani bidagome i mo ko henego kogoni.
- 17 Ainde inaga bu miniha mo palia howa turu ho holenege henge nawiore kogoni.  
 Bayale holenege mana damene bibahende embeda hai harugoni.
- 18 Anidagua bidogome manda bu handalu koria Anduane Homogohanda ihondo mbi-  
 rale bayale ngulebiragonaga mini dunubia ho harugo ai mbira nangulebirada.  
 Ani bialu i dindi ogoria ho lu nabi abale homolobodane hendedo.
- 19 Agalime dindi andabi ibuninagaore lenego mbira nahe bame hopebe dege biaga  
 mbira kaligo ale i harudane hendedo.  
 Iha tandaga uruni damene mo ngirago nalu koria mbirale kaubi ngaligobi neha  
 nalu kogoni ndobe.
- 20 Horo bibahendengi ina genda uruni mitangibu haabo kogome inaga bu miniha genda  
 timbuniore ho kogoni.
- 21 Anigo ai mende nde mitangi bu kogome mini dunu bia ho kogoni.
- 22 Ina mende mitangi bidogo ogo.  
 Anduane Homogohanda ina gubalini ho haabo haga kagoni.  
 Ibugua ina dara howa biamogo biaabo holebira.  
 Ibunaga mana ogoni ereba nahe wiaabo holebira.
- 23 Ibugua ina dara holene irane nawinigoyu  
 ibunaga dara holene horo bibahendengi gahenge ibaho wiaabo haga kagoni.\*  
 Anduane Homogo-o egerebagi bibahendengi ni tagira ibaabo hagdagua  
 inaga dara holene inahondo walia haabo haga i mini bilinahe kegoni.
- 24 Ina mbirale ngarunaga mini dege dindiho nahe  
 Anduane Homogo ibu hangu karulape kagoni lo mitangi bialu holenege bay-  
 aledane hendedo.\*  
 Ani mitangi bidogo ai ibugua i biamogo bilonaga ina mini dunu bia ho kogoni.
- 25 Wali agali tinime Anduane Homogo taya bialu ibunihondo mini dunu bia ho haga  
 karu tihondo ibugua bayale biaga kagoni.\*
- 26 Anigo Anduane Homogohanda wali agali ti mo wialu pele milonaga tigua ema  
 nabi hondo holene nga.
- 27 Ti wandari igiri daliahe wene kangi howa genda tandaga uruni yu hayagua nde  
 karulapeore holebira.
- 28 Anduane Homogohanda mbiralihondo genda mo miyagua nde bi nale wahalu ibu  
 pubagi howa ema nabi ibuni hangu holene nga.
- 29 Ani biragola Anduane Homogo ibugua ibu biamogo bulebira badago lowa ibuni  
 mo dindiha howa ema nabi hondo holene nga.
- 30 Maru karume ibuhondo bi ko lalu minu bayaguabi nde harugo ani bilo ibu ema nabi  
 holene nga.\*

\* 3:14: Yob 30.9, Iba 69.12, Yar 20.7    \* 3:23: Har 34.6, Seb 3.5    \* 3:24: Iba 16.5, 119.57, Yar 10.16    \* 3:25: Iba 33.18, Ais 30.18, Mai 7.7    \* 3:30: Ais 50.6, Md 5.39

- 31 Anduane Homogohanda wali agali dara howa biamogo biaga kago  
ibugua ti erembira mu haabo naholebira.✧
- 32 Anigo Anduane Homogohanda wali agalihondo genda yilo mo muwa dege  
mani ibugua ti dara ho dai biaga.✧  
Ibugua wali agali gubalini timbuniore haabo haga kagome ani biaga ka.
- 33 Ibugua wali agali mbirago bame genda yuwa tandaga nalu helo mo ya holenego ibu  
hame nalaga ka.✧
- 34 Maru karume garabaya biabe biahaga bu karu bo hangedayaguabi Anduane Homogo  
ibu manda bu ka.
- 35 Mbiralime Anduane Homogo Daligaorene Daliga kagonaga deni bulene ngago mbira  
bialu karia  
ogoni nabilonaga mendealime hongo howa bope hayaguabi ibuni manda bu kag-  
oni.
- 36 Mbiralime ibunaga nenege kagohondo ke howa bameoreni godi laba layaguabi  
mbirale mana uruniale damenego hondowa Anduane Homogo ibu manda biai  
howa turu nahaga ka.
- 37 Mbirale bibahende ngaru ibu ha lalu ai ibugua bi laragola hale halu ibu hai habehebe.  
Anduane Homogo ibugua hangu ogoni lolene karulapeore kagoni.
- 38 Anduane Homogo Daligaorene Daliga kago ibugua bi laragola mbirale ko holene  
bayale holenebi bibahende tagira ibaga.
- 39 Wali agalime ko biyagonaga pani nayagua nde bi gomogomo lolene henge nawigo  
aginaga lelebe.
- 40 Iname mana bialu harimaru manda bialu dabolene nga.  
Dabalu mana ko bialu harimaru yu wahalu Anduane Homogo ibuni karia dai  
bulene nga.✧
- 41 Iname gi dogola daga halu bu miniha mbira do nahe howa Ngode Datagaliwabe  
dahuliya andaga kagohondo bi lalu,
- 42 Anduane Homogo-o iname ihondo mine halu mana ko dewa bialu harimago  
ina ko ogoni domo wa nahe kegoni.
- 43 Ina inaore talima ibaga bialu bo homa hai harigoni.  
Ina inahondo keba timbuniore harigome inaga dara holene mo yi harigoni.
- 44 Ina inahondo lembo timbuni ho howa inanaga bi hale naholenaga hale hangaiho  
kegoni.✧  
I hari beralibame kabu bupe haradagua bu kegola inanaga bi laramago i keria anda  
naibagabe tobaheda.
- 45 Ina ina bopeore ho heledegome wali agali dindi tara tarani bu karume handalu karia  
ina wali agali ko habane nabulene dodohe kamaria hondo kagoni ndobe.
- 46 Ina waitigi bu karuni bibahendeme ina yo handalu mo nagaloneore halu ka.
- 47 Mbirale tara tara tagira ibirarume ina mo gi timbuni halu  
ina mo pila haga bialu kagome mo ko heneore kamagoni.
- 48 Inaga wali agali burupale darabi bu karuni hondowa ina dugu bialu inaga de iba pugu  
lalu iba pora biradagua pigipugu lalu kogoni.
- 49 Ina dugu berogoni haru biru lalu wa naholebero.

✧ 3:31: Iba 94.14 ✧ 3:32: Iba 78.38, 106.43-45, Hos 11.8 ✧ 3:33: Ese 33.11, Hi 12.10 ✧ 3:40: Iba 119.59,  
139.23, 1 Ko 13.5 ✧ 3:44: Iba 97.2, Dug 2.1, Seg 7.13

- Inaga de iba pugu lalu pialu haabo holebira.
- 50 Anduane Homogo ibunime dahuliya andagaha howa handa dali halu  
i dugu bialu haabo koria dege de handaragola dugu nabi waholebero.
- 51 Inaga tanoha wali bedaru tiha mo ko holene bu ngaru dege ngola halu biraabo  
kagonaga de hondowa  
inaga bu miniha tandaga timbuniore nalu kogoni.
- 52 Agali maru karume ila mo waitigi halu i bameore bo wahole hene.  
Agalime ega bole taliagadagua i bo wahole talima ibaga bini.
- 53 Tigua i gundu uliha minu bape howa i homelo bole lowa ege tole dugualu uli biagoha  
ba pebe biya.
- 54 Ibame i namu lai hole biyagola ai i homalu ereba harogonida mitangi biru.
- 55 Ani biyagola ina gundu uliha howa Anduane Homogo i olarugoni.  
Ina humbirini andagaha haradagua buwa inaga mini lalu i gini mialu biamogo bia  
laru.\*
- 56 Ina ihondo ogodagua bia lalu olarugola Anduane Homogo-o inaore nde hale hariya.
- 57 Hale howa ina i hewaria kaware ibuwa ihondo lalu, Gi nahe habe, lalu langirigoni.\*
- 58 Anduane Homogo-o ina i pele ngialu i waitigi bu hearume i nabelo hapai harigoni.  
Ina i pele ngirigola ayu i bayale kogoni.
- 59 Anduane Homogo-o agali i mo ko hole bialu hayaruni i manda bidegoni.  
Anigo i waitigi uruni bope halu i wayali holiya biamogo bibe.
- 60 I baba waitigiore ho karunime ihondo keba haga kago i manda bu kegoni.  
Tigua ihondo mana ko ngaru bule manda manda bialu kagoni ndobe.
- 61 Urunime i hondo oba halu mege biyago i hale harigoni.  
Anduane Homogo-o tigua ihondo bule manda birago i manda biai ho kegoni.
- 62 Horo bibahendengi tigua i mini lalu bo waholenaga bi lala bialu hariga taya bialu  
kagoni.
- 63 Tigua heyu howabi halo biruwabi iba gana i bo waholenenaga mege bi hangu lalu  
laabo halu ka.
- 64 Anduane Homogo-o tigua mana ko o biyaruni handalu ina ti pani nelu mibe.
- 65 Tinaga mini mo luluya halu ti koorene ko helo ha habe.
- 66 Ti mbiraoreli hangubi mbira dindini yu wa nahelo ina keba timbuniore howa talima  
ibaga bialu bo wahai habe, laro.

## 4

### *Waitigirume Yarusaleme bo gialabaga biyagola ogobi wini*

- 1 Ngolo bayale ngiringarale ala winigo ayu wa ereba halu mo ko hayada.  
Ogonidagua Saiononaga wali agali ti tole tara tara Anduane Homogonaga anda  
bulenaga loma bia heneru bayale wiaganegobi henego  
ai ti tanonaga harigani tole gialobagabu ngadagua ti bo haealobagabu wahayadago  
daraba.
- 2 Ala Saiono wandari igiri daliaheru ngolo bayaleore muni timbunime yolo miagane-  
gobi henego  
ai uruni ti ayu mini lene ndo howa agalime todobene be koru dindime wabu bila  
haganegobi kagoni.

\* 3:55: Yar 38.9, Yna 2.2, Ab 16.24-25    \* 3:57: Iba 145.18, Ais 41.10, 41.14

- <sup>3</sup> Biango dudu angibuni karume tinaga igini wiaru mitangi buwa andu miaga ka.  
Anigoyu inaga wali agali karume mana bayale biango dudu biarume biagadagua nabiaga.  
Tigua tinaga waneiginiru dara nahe ega yarime ti iginiru wahalu piagadagua piaga ka.
- <sup>4</sup> Saiononaga wali agalime tinaga waneigini emene uruni andu noa halu kembobe lebole howa tomo noa halu homelo wahaga.  
Waneigini urunime wali agali hearuha tomo ngidaba lalu hale hama ibaga biragolabi ti tomo mulene mbira nahaga.
- <sup>5</sup> Ala ti tomo nolene bayaleru bu payabu wiagago ai áyu homogo hearubi tomo nolene nawi burupaleore ka.  
Ti tomo garibilo howa tanonaga hariga bu wiarunaga homo paya paya bigi bida.  
Ala ti mbirale dewa buwi howa yári bayaleru bu henego ai ti yagibano howa mburuma uli wiaruha tomo budini ibira kabe hondole taya bialu haga.
- <sup>6</sup> Sodomu wali agalime ko biyagonaga pani mialu Ngode Datagaliwabehanda tinaga tano bayale winigo abaleore bo heda hene.  
Tinaga pani ogoni bagi hene lowa inaga wali agalime ko biyagonaga pani timbuni taraore nalu hea.✠
- <sup>7</sup> Yarusalemeni agali haguane maru ala heneru tinaga tinginini ko mbira para nahe bayaleore hene.  
Ti agali hongohe do mbarale halu tole bayale mbira ngarale muni timbunime miaganegobi bu hene.
- <sup>8</sup> Ti harigani homo payabu wima peagola tinaga dengui mindi toai leagola mbiralime abogoda lowa handabe nahe wini.  
Tinaga tingini obialu kuni hangu wini.
- <sup>9</sup> Agali maru waime bayagola homayaru ti yo piyagonigo karulapeda.  
Wali agali marume ti tomo nolene nawidagola garibi lalu lu howa homarago nakarulape.  
Wali agali uruni ti tomo garibi lowa luore haabo halu tingini kunila para halu homai haga biaga.
- <sup>10</sup> Walirume tinaga waneigini daraore henegoyu homayagola tinaga tingini mo yalu puwa tini dawa nene.✠  
Ogoni binidagoni waitigi hearume inaga wali agali baba wai bule ibiyangi ani bini.
- <sup>11</sup> Anduane Homogo ibugua Saionohondo keba taraore howa bo gialobagabu wahaya.  
Ibugua Saiononi ira timbuni hedo dela haradagua buwa tano bibahende dai helaya.
- <sup>12</sup> Kini hearumebi wali agali tara tara dindi bibahendeha bu hearumebi waitigirume Yarusaleme pabe panga harabani anda puwa bope halu tano karulolobadalo manda nabi haya.
- <sup>13</sup> Tigua ani nabibehe manda bu henego ogodagua biniya.  
Yarusalemeni loma binigo mo miaga hearumebi bi mana latagi haga hearumebi mana ko bialu

- tigua Yarusalemeni wali agali mini tigabi hearu bo wahai haya.  
Ani biyagola Anduane Homogo ibugua waitigi hearume Yarusaleme bo gialobaga bu wahelo ibilene.
- 14 Loma binigo mo miaga biarubi bi mana latagi haga biarubi tinaga agani wali agali homelo bo wahayarunaga darama para hayagome ti Anduane Homogo deni dodohe howa nakarulape hene.  
Haru haga urunime ti harigani pialu de kohe hagadagua luluyu ibagabu heagola wali agalime ti heagoria kaware hapara habe nahe haga biniya.
- 15 Wali agalime tihondo bi dalimu lalu, Tí dodohedago ina kamagoria kaware naibi habagi hadaba, lalu hayiya.  
Haru haga biarume ti dindi tara taraha pugu pugu biya.  
Dindi uruniha piyagola wali agali hearume ti íbu helo hame nalaya.
- 16 Anduane Homogo ibunime ti bo purogo lelalu ti mitangi nabi wahene.  
Loma binigo mo miaga hearubi agali ala hene miniwi hearubi ti wali agali bu hearu deni mini lene ndo hene.
- 17 Ina agali hameigini mbirame ibalu pele ngialu haru dai bilo lowa hariga wiaruha de handalu bu wimaria inanaga de tandaga biya.  
Mbiralime ina biamogo bule naibiyagola ina bame harima.
- 18 Waitigirume ina bo wahole lowa harigani yu biraabo hayagola ina hariga ibaga nabibehe harimagoni.  
Inanaga hamaro bulene horo kaware hayada manda bialu ina bo waholene winiya.
- 19 Ina ibida pirimagola waitigime ina talima íbuore biyagoni.  
Tigua geraiore lalu ega bodo hariaweme ega minule lowa ge dogolape ho yalu ibagadagua daiore ibiyagoni.  
Tigua ina hari wiaruha talima dalialu  
dindi ko dalu naibaga wiagoha pu hemariabi ina tagira ibilo lowa ti bira do howa minu yani hayagoni.
- 20 Tigua inanaga kini Anduane Homogohanda ina de hondo helo dabo helene biago minalu biya.  
Iname mitangi bialu hemaria ina kini ogoni andaneha dindi maru ti bayale headagua dege holeberemada lo manda bu hemaore tigua ibu minaya.
- 21 Idomoaliru-o tí Usu dindini kamigoni howa Saiono bo gialobaga biyagonaga turu howa oba halu aea kaea bialu hadaba.  
Anduane Homogohanda ibunaga keba holene waini iba ale gabo beha hambu wiradagua binigo Saiono nelo mo na haya.  
Ani biyadagua ibugua tíbi nalimulo ngiragola no luluyuore howa tínaga tinginini aga bide miru golo wahalu ti babe howa taga taraore ho holeberemi.
- 22 Saiono-o ina ko birigonaga Anduane Homogohanda íhondo pani ngiadai biyaruni ngia maro bialu  
ibugua ínaga wali agali garabayabu wiyaru golope helolebira.  
Idomo-o Anduane Homogohanda ani bulebiragoyu ibugua ínaga ko birigo mo pani halu íhondobi ibunaga hongo holene walia holebira.



## 5

*Yarusaleme wali agalirume Anduane Homogohondo, Ina dara howa biamogo bia, lenego ogo*

- <sup>1</sup> Anduane Homogo-o genda tara ina kamaria tagira ibiyago mitangi bialu ina dara habe. Wali agali hameigini tara karunaga deni ina ko nakarulape habane nabulene kamagonigo de handa.
- <sup>2</sup> Inanaga dindi andarubi agali tara karu tigua karulo aribia ho kagoni.
- <sup>3</sup> Ina aba waitigirume bo wahai hayagola ina waneigini hono wahene ale halu ina aiyaru wali dalo bedagoni.
- <sup>4</sup> Ala ira gabunibi iba nolenebi minana miagane winigo áyu iname ira bolenebi iba hambulebi yolo bulene hangu ngagonida.
- <sup>5</sup> Waitigirume ina nogo dongi kamelerunaga biruyu ibaga biagadagua biyagola ina erekui taraore handalu kamagoni. Tigua ina halo birulumayabi henge nangiagaore.
- <sup>6</sup> Ina tomo nolene nawi buru paleoreyagola nahome holomaya ina Iyibiali Asirialirumebi biamogo bilo lowa hale harima.
- <sup>7</sup> Inanaga mamalirume ko bialu tini homeagola ai iname tigua ko biyagonaga genda yu kamagoni.
- <sup>8</sup> Babilonaga garabaya biabe ale biahagane bu karume ina handayaho halu tinaga giha howa ina pele ngialu haru dai bulene agali mbira naheda.
- <sup>9</sup> Agali homelo bo wahaga biaruni inanaga dindiha wai taya ibagabu haame howa ina tomo taya bu poramagola bo wahole yu biraga.
- <sup>10</sup> Ina hina garibi timbuniore lalu tingini ngoe lowa warago baradagua biaga. Garibi dege lalu inanaga tingini poboyogo bu yolo mialu ege tole kundibi ale haga.
- <sup>11</sup> Hari Saiono weagoria waitigime ina one berearuni ti kayu yai halu Yuda tanoruha ina wane biru wiarubi kayu ya dege biya.
- <sup>12</sup> Tigua ko taraore bialu inanaga agali haguane hearuni bame gini minu daba howa gerelaho ngelaya. Inanaga agali wahe miniwi hearubi yo handalu mo taga haga biya.
- <sup>13</sup> Inanaga igiri daliahe hearu garabaya biabe ale bialu widi lini dambiaga helalu igiri emene hearuni ira gendabiore timbuni wiaru mo ya haga bialu helaya.
- <sup>14</sup> Agali hagianeru tanonaga pabe haraba ngagoriani nabiraga. Wandari igiri daliahe karumebi ngida balu iba gana lalu nahaga.
- <sup>15</sup> Inanaga turu holene winigo ereba hai hayagola iname iba gana lalu mali leremaliru dara holene ibu aribia hayada.
- <sup>16</sup> Mbirale ina mo turu haga winigo damene ereba hai hayada. Inane ko birimagome ina darabiore kamagoni.

17-18 Hari Saiono bo gialabaga biyagola  
biango duduru hangu hagane bu hinayada.  
Ogonidagua bidago hondowa ina dugu biaabo haramagome  
inanaga gubalini mo ko halu de tandaga biarua.

19 Anigoyu Anduane Homogo í kini haabobo halu  
handame ho haabo holebere.

20 Ina aginaga erembira ngialu yu wahowa haabo kebe.  
Ina lone angi mitangi buleberebe.

21 Anduane Homogo-o ina haru dai bia.  
Ina haru dai bialu mini yaraga holene ala wiagane biagobi wia dai bila.

22 Be ina yu wahalu handabe manga halu erembira ngiaabo holeberebe.  
Ínaga keba holenego maro bulene nawialu nawioiredabe.

## Esegiele

### Mbuga ogoha gilibu ngarunaga nemandi ogo

Isaraele wali agalinaga waitigi Babilono agalime Yarusaleme balu karulai halu wali agali maru hearu Babilono dindiha garabayabu yalu pene. Ani piyangi tigua Esegiele ibubi ti haru garabaya bu yalu pene. Ibu Babilono dindini haru pu hearia Ngode Datagaliwabenaga mana latagi haga howa ibugua wali agali ibu heba mandagi garabayabu hearuhondo bi mana lamialu hene. Ibu ani hearia dege wali agali maru Yarusalemeni yu wahene hearu ti heagoha mani bulebiragonagabi mbiwia halu latagi halu hene. Mbuga ogoniha bi galone waragaria gilibu wigi bidago uru

Mbira

Ngode Datagaliwabehandaibunaga wá taraore holenebi mini baya buruguleore holenebi de gandebaha howa Esegielehondo walia hene. Ani walia howa ibugua Esegieleibunaga mana latagi haga helo dabo helene.

Mende

Ngode Datagaliwabehanda Yuda wali agali tiha mo ko holene timbuni wulebiragobi Yarusaleme gialobagabu waholebiragobi lalu de hondo halimu lenego nga.

Tebone

Dindi tara tarani wali agali marume Yuda wali agali mo hondo hayagonaga Ngode Datagaliwabehanda uruni ti pani mule lenego gilibu wini nga.

Mane

Esegiele ibugua lalu Ngode Datagaliwabehanda mani wali agali bu miniha mo palia holene yu holebiragobi bayale holene wulebiragobi lo nga lenego gilibu nga.

Dauni

Dindi tara taranaga haru haga agali haguane Gogohondo mo ko holene wulebirago mbiwia halu latagi hene.

Waragane

Isaraele wali agali tininaga dindi mo tigabu dai bialu Ngode Datagaliwabenaga anda lomabia hene timbuni biago lone bulebira lene.

Yuda wali agali Babilono dindini hayadarume tinaga dindini Ngode Datagaliwabenaga anda loma bia hene biago helalu ibuwa dindi taraha pu kamagonida mandabu hene. Ani howa ti Ngode Datagaliwabe heba kamabe be tini hangu howa kamabe toba howa ti wá nale hope hene. Ani heagola Esegiele ibugua wali agali biarume Ngode Datagaliwabe ibu ti heba haabo kago manda bilobiibunaga mana yutiga bilobi mo hongo halu hene. Ani lalu howa ibugua wali agali mbira hangu hangu hearunaga mini mo hongo halu mana tigabi ngaru hangu bialu halimu laga bialu hene.

Horo mbiru mbirungi Ngode Datagaliwabehanda Esegielehondo galone de gandebaha mo walia haga bini. Ani biyagola Esegiele ibugua de gandeba uruni garealalu wali agali lamigi bini. Horo marungiibunaga bi uruni ogo ale layada lalu wále ngagola iname hale halu howa turu haramali. Anigoibunaga bi maru irane agibe tobahe galone taibi ngagola iname galone baya hangu handa walia naharamali.

#### **Bulu бага бува кuni gilibu ngago (1.1-3.27)**

Ngode Datagaliwabehanda Esegiele dabalulenenego *4.1-24.27*

Yarusaleme mo ko holebirago mbiwia henenego *25.1-32.32*

Hameigini dindi tara tarani karu mo ko holebira lenego *33.1-37.28*

Ngode Datagaliwabehanda Isaraele wali agali mo bayale holebero lenego *38.1-39.29*

Kini Gogonaga hongo bo podolebirago mbiwia henenego *40.1-48.35*

Esegielehanda de gandeba handalu hearia Ngode Datagaliwabenaga anda bayaleore bulebiragonaga hendenegro

## Esegiele ibugua de gandeba mbira hendenege (1.1–7.27)

*Esegiele ibugua Ngode Datagaliwabenaga haru howa biragane dagia wiaria hendenege ogo*

<sup>1</sup> Esegielehanda lalu, Babilono agalirume ina bo garabaya buwa Iba Keba peagoha mali pira tebirani (30) ege mane hayagola horo dauningi ina de gandeba handalu hewaria hari daligaha panga dugua hayagola Ngode Datagaliwabe hearia handaru.\*

<sup>2</sup> Horo ogoningi Babilonoalirume Yarusaleme lone puwa wai bialu tigua Yudanaga Kini Yahoiagini minu yalu ibinigo mali duria nigonihayagi howa de gandeba ogoni handaru.\* <sup>3</sup> I Busi igini Esegiele loma binigo mo miaga howa Iba Keba peago angeni hewaria Anduane Homogohanda i olayuago hale halu ibunaga hongo holene iha karula hayuane handaru.

<sup>4</sup> Ina handa daga ho hewaria dalu puyabu beraliba heba timbuniore uyurahayagi howa ibiyago handaru. Hari beraliba ogoni hongo taraore howa hari daba bialu ira hungu ale deaore dege ibuwa kilikulu lalu purogo laya. Ogoni dombeneha mbirale ege tole mini boronosi ngiringarale ale mbira hoaille wiaria handaru. <sup>5</sup> Ira hungu ale deagoha ina agali handalehe maria hearia handaru. Tinaga tingini agali handalehe dege howa\* <sup>6</sup> tinaga dengui maria degedege howa tinaga babaganebi maria degedege hearia handaru. <sup>7</sup> Tinaga ge tigabi degedege howa ge giba nogo bulumaganaga ale hearia handaru. Ai tinaga ge giba uruni ngaraleore ege tole mini boronosi baya hangu domowa mbirale hai howa ngelene mbauleyane handaru. <sup>8</sup> Tinaga babagane hearu andaneha gi agalinaga ale hearia handaru. <sup>9</sup> Uruni ti bibahendeme tinaga babagane yanga lowa tini handa edene buwa babagane mendehayagi mo gimbu buwa nguni mo maria howa ti pole howa ho beregeda nabi ani kaore dege ibaga bialu tigatiga piagaya.

<sup>10</sup> Ti bibahendenaga haguane mbiraoreni dengui maria degedege howa uruni ti mbira taratara dege hea. Mbirago agali handaleheya. Dengui gi tighayagi heago ibu budi gabua timbuni laiono handaleheya. Tebone gi lehayagi heago ibu nogo bulumaga dengui handalehe halu ere mbirahayagi heago ibu ega bodo hariawe timbuninaga dengui handalehe hearia handaru.\* <sup>11</sup> Tinaga dengui ogonibi haga winiyago ai tinaga babagane kiragome yanga lalu nguni mo gimbu gimbu buwa babagane kira mende degedegeme tininaga tingini dambi hagaya. <sup>12</sup> Tinaga de maria degedege hayarume de kagohayagi handai hagaya. Ani howa ti mbirahayagi pole manda biyagua ti beregedolene henge nawi howa ta nabi pupe hagaya. Uruni tigua ogonidagua biagaya.

<sup>13</sup> Agali handalehe uruni ti heago dombeneni ira hungu ale mbira pu ibu bialu hari daba ale biyaria handaru.\* <sup>14</sup> Ani handaga bialu hewaria agali handalehe uruni ti gerai lalu pu ibu biragola abaleore handabe nahe hari daba mege lalu poralidagua piagaya.

<sup>15</sup> Ina handalu hewaria uruni ti heagoria dindini tinaga ge haga wiagoria garo ge ale mbira mbira wiaria handaru.\* <sup>16</sup> Tinaga garo ge ale maria uruni bibahende ogobi degedege wuwa ege tole uruni ambuabi ale ti bayaleore ngiringarale dedaibi muni dewame miaga wia. Garo ge ale maria uruni wiago andaneha nde garo ge ale maria mende wiago uruni handa amu nana bu polenedagua wia. <sup>17</sup> Ani biyadagome garo ge ale uruni tigua gibuni maria wiago bibahendehe pu ibu biai helonaga ani wia. <sup>18</sup> Ainde garo ge ale uruni timbuni gibiore wiagola hondowa i gi timbuniore haru. Ani handalu hewaria garo ge ale uruninaga aeane heago bibahendehe handai holene de emene emene dewaore hearia handaru.\*

<sup>19</sup> Agali handalehe uruni ti pu ibu biragola garo ge ale uruni tibi heba pu ibu biagaya. Agali handalehe uruni ti yagalo yalu piyagua garo ge ale uruni tibi nde yagalo yalu uruni poradagua piagaya. <sup>20</sup> Uruni ti poabirago bibahendehe piyai hagaya. Ti piyadagua garo

\* 1:1: Mo 19.11   \* 1:2: 2 Kin 24.10-16, 2 Bit 36.9-10   \* 1:5: Mo 4.6   \* 1:10: Ese 10.14, Mo 4.7   \* 1:13: Mo 4.5   \* 1:15: Ese 10.9-13   \* 1:18: Mo 4.8

ge ale biaru tibi nde ani piyago irane agali handalehe mariali biaru tigua handaya howa haru hagaya. <sup>21</sup> Ainde ti poragoha ti haru mandagi ibaga biai halu ti mbirani hondo haragoria ti haru mandagi hondo haga. Ai uruni ti yagalalu daliga iraga hayagua nde garo ge ale uruni tibi yagalalu ti haru piaga. Irane agali handalehe mariali urunime ti haru kagome ani biaga.

<sup>22</sup> Ani hondowa dege handalu hewaria ndisibe ale timbuni mbira mo beregedowa tibinihayagi yaraga hayaria handaru. Ai ndisibe ale ogoni ngarale iba wayu aleyagola hondowa gi timbuniore haru. Iba wayu ale ngarale ogonime agali handalehe mariali biaru daliagani heago handaru. <sup>23</sup> Agali handalehe mariali biaru ti ndisibe handalehe wagororo timbuni biagonaga andaneha howa tinaga babagane yanga lowa hea. Ani howa tinaga babagane nguni bibahende mo gimbu bu helowa ela hagahaga biagola handaru. Ani howa babagane kira mende hayadagome tininaga tingini dambi hea.

<sup>24</sup> Ai tigua yaga layagola hale halu hewaria tinaga babagane pilipala layagome iba solowara yaribu biyagola u timbuni kulunduga laga biyabe toba howa wai biaga ami agali dewaore wai bule manda manda buwa tidiyu hene mbaulaya. Ani bialu tigua babagane yibiyabu lalu piyagola hale halu hewaria Anduane Homogo Hongo Haiheore kagonaga bi layuabe toba haru. Ti mbirani pu nabi howa tinaga babagane paulo haya. <sup>25</sup> Ani heagola agali handalehe mariali biaru togoni ndisibe ale timbuni wiyagoha howa bi lalu hayuago hale haru.

<sup>26</sup> Ndisibe ale biagoria daligaha kininaga biragane dagia ale mbira wia. Dagia ogoni baya dege lalu mindibinaga hari mindini ale ege toleme wabiniya. Kininaga dagia ogoriani mbirale mbira agali handalehe berea. <sup>27</sup> Ogoniibunaga tingini daligaha ege tole boronosi iraha deledagola ngarale wiraligobi hea. Dindihayagi wa hagane hale ale howa wa hangume mabu bupe hea. <sup>28</sup> Wa ogoniibunaga yari tara tara ni domo harini ngaligobi hea. Wa holene timbuni o handarudagoni Anduane Homogo ibuni hea manda biru.

## 2

### *Anduane Homogohanda ibunaga bi mana Esegiele latagi haga helo dabene go*

<sup>1</sup> Ina uruni hondowa i ge duli hanga howa ma podalu dindini bulu paliru. Ani wiwaria mbiralinaga bime i olowa lalu, Dindiali-o fla bi lole kogo heya, layuago hale haru. <sup>2</sup> Ai bi layuagome leaore dege Ngode Datagaliwabenaga Dinini ibugua iha karula howa i abale mo heya haya. Ani heyu howa ibugua bi lone layuago hale halu hewaria ogodagua layua. <sup>3</sup> Dindiali-o ina ayu inaga Isaraele wali agali karia pobelo ina dabo helaro. Tigua inihondo manga howa mine halu erembira ngialu tinaga mamalirume binidagua dege bialu kagoni. <sup>4</sup> Tinaga embone giambe mini ndibulo wahene howa tigua i mo yo handalu heagome ina bi larugo nahale hayago ai ina ti karia inaga bi yalu pobelo hameledo. Ina tihondo i Anduane Homogo Bibahende Haru Haame Ho Haga kogome bi larogoni, labe. <sup>5</sup> Anigo inaga bi ogo hale hayaguabi nahale hayaguabi wali agali uruni tigua inaga bi latagi haga agali mbira ibilayago ti heba ibu henego manda bulebira, lene.

<sup>6</sup> Anigo dindiali-o tigua ihondo bi laragolabi gi nahabe. Tigua inaga bi larego mo hangedalu ini tinaga bime mo ko holebira. Ani biragola i ti dombeneha howa tinaga bime i mo tandaga holene alipiago dibidabulo ngagoha yupeho haradagua bulebere. Ani howa ti de hondowabi tinaga bi lararu hale howabi gi nahe habe. <sup>7</sup> Tigua inaga bi hale habe manga halu i erembira ngiaga kago i manda bibe. Ina inaga bi larego tigua hale hayaguabi nahale hayaguabi harugo lowa ina bi ogo la larudagua bibahende lamiai habe. <sup>\*</sup>

<sup>\*</sup> 1:22: Mo 4.6    <sup>\*</sup> 1:24: Mo 1.4-15, 19.6    <sup>\*</sup> 1:26: Ese 10.1, Mo 4.2-3    <sup>\*</sup> 1:27: Ese 8.2    <sup>\*</sup> 2:2: Ese 3.24, Dan 8.18    <sup>\*</sup> 2:7: Yar 1.7, 1.17, Ese 3.10-11, 3.17



<sup>8</sup> Dindiali-o ina bi larogo baya hangu hale ha. Ina Isaraele wali agali karume i erembira ngialu hagadagua nahabe. Ai ina ne halalu mbirale o ngerogo na, lalu bi lai hene. <sup>9</sup> Bi ogoni lai heagola handalu hewaria gi mbirame beba ale mbira i hewagoha kaware yaede hayago handaru. <sup>10</sup> Beba ale ogoni handalu hewaria lunioreyago tigua mo bo bigi buwa kabu biniya. Ai gi biagome beba ale biago anga layagola handalu hewaria bi halu kirani gilibu wiaria handaru. Bi gilibu wiyadagoni handalu hewaria agalime bu miniha genda yu howa dugu taraore biniru dara howa iba gana dara holenenaga laga biniru gilibu wia. Beba ale biagoni bi hangume tolatagi hearia handaru.

### 3

<sup>1</sup> Ani handalu hewaria Ngode Datagaliwabehanda ihondo lalu, Dindiali-o ina beba ale ogoni nabe. Nowa mani Isaraele wali agali karuhondo beba ale ogoniha bi gilibu ngaru lamule pobe, laya. <sup>2</sup>

Ani layagola inaga ne halarugola ibugua beba ale biago noliya ngiya. <sup>3</sup> Ani ngialu howa lalu, Dindiali-o beba ale o ngerogoni tombeore helo nendabu nabe, laya. Ani layagola beba ale biago ina nalu hewaria dendebiore mone ibane aleya. <sup>4</sup>

No hewagola Ngode Datagaliwabehanda ihondo ogodagua layago, Ai dindiali-o Isaraele wali agaliru karia puwa ihondo ina bi langiruruni bibahende lamiai hole pobe. <sup>5</sup> Pialu wali agali bi tara laga karuha ndo Isaraele wali agaliru hanguhondo lamule pobe larogoni. <sup>6</sup> Ai dindi timbuni ngagoha wali agalirume bi tara i ala hale nahene ale laga laga biaga bu karuha pobe ledole nde wali agali dindi odaruniha karume inaga bi bibahende hale hai kale. <sup>7</sup> Anigo Isaraele wali agali ti mbiraorealime ina bi larego hale naholeorebira. Tigua ininaga bibi hale nahagadago inaga bi agua hale helodabe. Irane tinaga mini giambe ho kagome inaga bi hale habe manga howa ti bibahendeme bi mo wahaga dege bu karuni. <sup>8</sup> Ani anigo ayu ina inaga embonebi tinaga mini giambe ogonibi dege helarugola ina inaga bi mana hongo howa gi nahe elahe howa lamialu holebere. <sup>9</sup> Ina i ege tole baya tara mbira muni dewaoreme miaga mini daimono giambe hongo tarahe ngagobi helarogola inaga hongome tinaga hongo emene yu kago bope holebere. Aniore buleberogo tigua inaga bi mana mo wahaga kago manda bialu ina tihondo gi nahabe, lalu lene.

<sup>10</sup> Ani lowa Ngode Datagaliwabehanda laabo halu lalu, Dindiali-o ina bi larogo baya hanguore hale howa mbira embeda halu yu wanahabe. <sup>11</sup> Ai inaga damene Isaraele wali agali Babilono dindini tinaga waitigirume bo garabayabu yalu ibini biaru karia puwa Anduane Homogo Bibahende Haru Haame Ho Haga i kogome inaga bi langerogoni tihondo lamibe. Bi ogoni tigua hale hayaguabi nahale hayaguabi harugo inaga bi ogoni tihondo latagi halu lamibe, lene.

<sup>12</sup> Mani howa Ngode Datagaliwabenaga Dinini ibugua i mo yaragaore haya. Ani biyagola i erembiraha bi mbira hongo howa layuago hale halu hewaria bi ogonime lalu, Anduane Homogo dahuliya andaga kago ibunaga hongo timbuni holenebi wa timbuniore holenebi ngagonaga ibu mini yaraga hadaba, layuago hale haru. <sup>13</sup> Ani hale halu hewaria agali handalehe mariali biaru yagalo yalu piyagola tinaga babagane biarume pilipala lama pialu tininaga babagane ngunime ela hagahaga biaore piayuago hale haru. Garo ge ale timbuni biarubi piayuane hale haru. Ai uruni ti pialu howa kulu timbuni lalu dindi dumbirumbi ale biayua. <sup>14</sup> Ani biyagola Anduane Homogonaga hongo holene iha karula howa ibunaga Dinini ibugua i mo yaraga halu yalu piyagola i genda howa keba haru. <sup>15</sup> Ai Anduane Homogonaga Dinini ibugua i haru halu Telabibi taono Iba Keba angeni Isaraele wali agaliru garabaya biabe ale bialu bu heagoria haru ibiya. Ina mbirale tara tara o handarudarunime inaga bu mini mo tara howa genda

bialu miniha biabe bulene hongo nahayagola ema nabi horo karu dindi ogoniha biraru, lalu Esegielehanda lene.

*Anduane Homogohanda Esegiele ibugua Isaraele wali agaliru mamageho helo dabo helenego ogo*

*(Esegiele 33.1-9)*

<sup>16</sup> Horo karu ogoni piai heagola Anduane Homogohanda ihondo bi lone ogodagua laya. <sup>17</sup> Dindiali-o ina í Isaraele wali agali mamage habelo dabo helarogoni. Inaga bi hongoheore tihondo lamibelo ina ihondo langigi bulebero. <sup>18</sup> Agali mbirame mana ko ngaru biragonaga ibu homolebira laruyagua bi ogoni ina agali ogonihondo ogodagua laya lalu lamialu, Ai í nahome holeyagua mana ko bialu haridagoni wahalu mini beregedabe, lalu lamibe. Ani nalamiriyagua nde tinaga ko biyadagoni ngaore homolebira. Anigo ibu homayagonaga irane ininaga deni ina nalamirigome hale nahe homayagoni manda bulebero. <sup>19</sup> Ai ina agali ko biaga kago lamidegola ibugua ko biyago wa nahayagua nde ibuni mo ko howa homolebira. Anidagua biyagua ogoni iha bi nawi pani í nahomolebere.

<sup>20</sup> Agali mbira mini tigabiwi kagome mana ko lone bia dai bialu kagoha ina ibu agi birabe hondole ba hondolene mbira ibilo warogola agali ogoni ibugua mana ko biyagua ina ibuhondo mana ko birago wahalu mini beregedabe lalu nalamiriyagua ibu ho ko halu homolebira. Homaragola ina mana bayale ibugua abale bialu hayago manda nabulebero. Ibugua mana ko áyu birago hondowa ibuni mo ko howa pani mialu home lelebero. Anigo ibu homayagonaga irane ini inaga deni agali ogoni lamia nabirigome homaya manda bulebero. <sup>21</sup> Ai ina agali tigabi mbira kagohondo mana ko nabi habe laregola ibugua nabi howa tigabi dege bialu haabo hayagua ogoni ibu nahomolebira. Ani biragola íbi ibuhondo bi lamirigome nde nahome bayale dege holebere, lene.

*Anduane Homogohanda Esegielenaga bi ndibulo wa helenego ogo*

<sup>22</sup> I dindi ogoniha hewaria Anduane Homogonaga hongo iha ibayuane handaru. Ani ibuwa ibugua ihondo lalu, Ai heyalu dindi ulini unu ngagoha pobe. Dindi ogoniha pu kegola ina ihondo bi languliya, laya.

<sup>23</sup> Ani laya handala ina dindi uliuli wiagoha pu howa handalu hewaria Anduane Homogonaga wá holene timbuni Iba Keba peagoha angeni ala hendenegobi dege handaru. Ani hondowa ai í ge duli hanga howa ma podalu bulu paliru. <sup>24</sup> Ani bialu hewaria Ngode Datagaliwabenaga Dinini ibugua ibuwa í hongo ngialu mo heya haya. Ani heyu hewagola Anduane Homogohanda lalu, Dindiali-o ini dindi pialu andaga tamuha puwa panga payatagi howa birabe. <sup>25</sup> Ani bederia mani agali marume pu yalu ibuwa í minu daba holebira. Ani biragola ina andaga yu wahalu tagira pialu wali agali hondo pobe nahe holebere. <sup>26</sup> Ani bedegola wali agali inaga bi mana mo wahaga karuhondo bi mana nalamibelonaga ina inaga hége ema nabibehelo helolebero. <sup>27</sup> Anigo ai horo marungi wali agaliruhondo inaga bi mana lamibelo hamelo kongi bi baya hangu lamibelonaga ina inaga hége mo bayale halu bi lelebero. Bi lalu howa bi ogoni Anduane Homogo Bibahende Haru Haame Ho Haga í kogome laro lolebere. Ina ani laregola marume hale holebira. Marume ina bi larego hale howa donge halu erembira ngialu polebira. Ani bulebirago irane ti wali agali bi galone mo wahaga kagome ani bulebira, lalu lene. <sup>\*</sup>

## 4

*Yarusaleme bo gialo wahai holebira lalu latagi henego ogo*

<sup>1</sup> Ngode Datagaliwabehanda lalu, Dindiali-o ina ege tole ale dindime wabini podene mbira mo ngelowa ogoriani Yarusaleme tano ngago handalehe bigiya podalu gili bibe.

<sup>\*</sup> 3:20: Ese 18.24, 33.12-13    <sup>\*</sup> 3:26: Ese 2.5-7, 24.27, Lg 1.20-22    <sup>\*</sup> 3:27: Ese 12.2-3, 24.27, 33.22

<sup>2</sup> Ani buwa gili birigoria kawareni mbirale ami agalime wai bialu tano ho mabu bule biagadagua bibahende wabiai habe. Gana mbira tano ogoni wa mabu bialu pabe kategoria ami agali heyu howa wai bule dindi hono wima irigi hagadagua helalu bibe. Ami agalinaga balai anda tano ogoni kaware bu helalu mbirale hongohe guruyagu bule lowa pu pongo biagadagua buwa ege tole timbuni pu nguini pongobia howa wai pabe bo gialaga ngagonaga bigiya wabu ngelalu bibe. <sup>3</sup> Ani bialu parabane mbira muwa inila tanonaga bigiya wabu wirigola hengene ngatoria ngelabe. Ani bialu ini tanoha handade howa wai bule nendebu haradagua bu habe. Wali agali bu karume ina berego de hondowa mani ami agali ibalu tinaga tano ngago karulolobada manda bilo manane ani bibe.

<sup>4-5</sup> Ani bialu mani inaga gi lehayagi paluwa wali agali Isaraele dindiha bu karume ko bibahende biyarunaga genda yu palibe. Ani paliaho ngene dege horo handari tebirani pira dira (390) bibahende palibe. Horo handari tebirani pira dira (390) uruni mali handari tebirani pira dira (390) Isaraele wali agali bibahende ko tinime biyagonaga genda yu holebiragonaga walia halu ani bibe. <sup>6</sup> Horo ogonidagua ina gi leha palialu horo ogoni piai haragola beregedalu gi tigahayagi palibe. Ani paluwa Yuda wali agalime ko biyagonaga horo pira mariani (40) genda yu palibe. Horo pira maria (40) ogoni mali pira mariani (40) Yuda wali agali tigua mana ko bialu hayagonaga pani genda yu holebiragonaga walia halu ani bibe.

<sup>7</sup> I ani paluwa mbirale bigiya ami agalime wai bialu Yarusaleme karulole bialu helarigo handaya habe. Ani bialu ini wai bule nende biaho haradagua bu howa lalu, Tano ogo bo haealabaga bialu mo ko harogoni, laga bialu habe. <sup>8</sup> Ina i pume minu daba harogola i hongo halu tingini beregedabe nahe holebere. Anidagua bialu kene dege inaga horo langirugo piai helabe.

<sup>9</sup> Ani bialu ina widi marubi bali marubi paboro tara tara kirabi tomo tara tara kira dege widi alebi uruni bibahende biamaga howa mo beregeda beregeda bialu mberedi wabuwa ogoni dege horo handari tebirani pira dira (390) nalu gi lehayagi palirigoria paliaho wiaabo habe. <sup>10</sup> Ina mberedi uruni genda magi emene dege gi mbira hangu (garama 230) horo bibahendengi nalu bolangua howa nanabe. <sup>11</sup> Iba naregobi nde manda buwa horo mbiru gabo be kira dege naga bibe. No bolangua nahabe. <sup>12</sup> Ani bialu wali agali ti to wahene lebolehe ngago mo wibe. Ti ogoni ira delowa mberedi ogoriani hirabe. Mberedi uruni hirarego wali agali bu karume de hendelo nalu habe, lalu lene.

<sup>13</sup> Anduane Homogohanda lalu, Ina mbirale uruni bu walia holeberego mani Isaraele wali agali tigua bialu holebira. Mani waitigime Isaraele dindi wai bialu karulai helo ina yupe harogola tigua ibalu dindi bo podai halu Isaraele wali agali dindi tara tara ngaruha garabaya bu yalu polebira. Tigua dindi tara uruniha pu howa tomo ko tara tara inaga deni dodohe nanolene ngago lo wirugoni nalu holebira, lalu lene.

<sup>14</sup> Bi uruni layagola hale howa ina ladai bialu lalu, Anduane Homogo Bibahende Haru Haame Ho Haga-o ina mana urunidagua nabulebero. Ani nabuleore. Ina deni ini mo dodohe nahagaore ndobe. Bamba i igiri emeneni howa hama ibinigo ayu kgonibi ina nogo minana homenebi gabua marume bo wahene ngarubi mbira nanagaore kgoni. Mbirale nanolene lo winiru inaga deni dodohe lene ngago nanaruli, lalu.\*

<sup>15</sup> Ngode Datagaliwabehanda lalu, Aniyagua nde mberedi hirarego wali agali time nahiri wahalu nogo bulumaga time hirabe, laya.\*

<sup>16</sup> Ibugua lalu, Dindiali-o ina Yarusaleme wali agali hina garime mo ko hai helolebero. Ani berogola wali agali bibahendeme mogo lai halu miniha genda yu hai holebira. Ani biragola wali agali tigua hina ibabi horo mbira mbirani nolene bayuwa mo tawe howa

\* 4:14: LBM 17.15, Ais 65.4, Ese 20.49, Ab 10.14 \* 4:15: Esegiele ibu wali agali heba waitigime dindi taraha garabaya bu yalu pu heagoria ira delolene nawidagola tigua wali agali dindi ogoria hearume biagadagua bialu nogo bulumaga time ira delaga hene.

nalu holebira. <sup>17</sup> Tinaga hina ibabi mo ndia harogola tinaga bu miniha genda timbuni ho howa mana ko biyarunaga ti tingini obiore holebira, laya.

## **Esegielehanda de gandaba handalu hearia Ngode Datagaliwabenaga anda bayaleore bulebirago hendedenego (40.1–48.35)**

### 5

#### *Esegielehanda ibunaga mandari podenego ogo*

<sup>1</sup> Anduane Homogohanda laabo halu lalu, Dindiali-o ina ayu tibu ne gadeleore ngago mo yuwa inaga mandari angaribi podai habe. Ani bialu mandari angari uruni genda magi handagane ngagoria magi handalu halu tebo mo tale bibe. <sup>2</sup> Ala ina horo ogodagua palibe lalu langirugo bolangua halu piai hayagua heyabe. Manane ogoni Isaraele wali agali bu karuhondo waitigime Yarusaleme ibalu karulaya lalu mo walia holebere. Pialalu heyuwa inaga mandari halu tebo talebu wirigo halu mbirago Yarusaleme mitangi bialu bigiya ege tole ale dindime wabu wirigoriani delabe. Halu mende podo wirigo ege tole ale mbalape wirigoha pu mabu bialu mendehayagi puwa inaga ayu tibu ne gadele biagome podopaya bibe. Halu tebonego puyabume pulo yalu pelo daliga baraga habe. Ani beregola ina inaga ayu tibu ne gadele ngago mo yalu mandari puyabume yalu porago talima poliya. <sup>3</sup> Anigo mandari emene mbira ngelo howa ininaga aga ngunime paulo dambi habe. <sup>4</sup> Ani bialu mandari mbira mbira inaga agaha paulo dambi harigo yamigi bialu irani delaga bibe. Ani bulebereroni Isaraele wali agali dai holebiragonaga manane walia holebere, laya, lene.

<sup>5</sup> Ani lowa Anduane Homogo Bibahende Haru Haame Ho Haga kago ibugua ihondo langialu lalu, I Yarusaleme tano ngago de handa. Dindi bibahende wuyu mabu bidarunaga hanuniore Yarusaleme ngeledogoni. <sup>6</sup> Ani ngeledogoyu Yarusaleme wali agali tigua doga halu inaga bi mo wahalu ti koorene ko haya. Wali agali dindi tara taraha bu hearunaga mana ko wiago emene nira lowa Yarusaleme wali agalime ko timbuniore bialu ka. Yarusaleme wali agalime inaga bi larogo hale habe manga howa mana bulene nga lo wirugo pugualu haabo kagoni. <sup>7</sup> Ani bialu kago manda bialu ina tihondo bi ogodagua laro, Yarusaleme wali agali tigua bi o larogo hale halimu. I Anduane Homogo Bibahende Haru Haame Ho Haga kogo ina tihondo laro. Tigua inaga bi hale habe manga howa inaga bi mana lo ngogobi mo wahalu puwa hameigini tara tara dindi ti baba wiapara para bima pedarunaga mana ko ngago taluwa bialu kamigoni. Ani bialu tigua mine halu mana ko bialu kamigoni koorene ko wali agali dindi uruniha karume mana ko bialu karu bolangua howa bialu kami. <sup>8</sup> Anidagua bialu kamigo mitangi bialu Anduane Homogo Bibahende Haru Haame Ho Haga kogo ina tihondo bi laro. Ina tihondo turu naheore howa ti baba waitigi ho kogoni. Anigo ina wali agali tara tara bibahende bu karunaga deni howa ti manani helolebero. <sup>9</sup> Tigua mana ko dewaore ina hame nalewago birimigonaga pani ala nginidaguabi ndo mani nguleberodaguabi ndo ayu ogoria timbuniore timbu nalimulo ngulebero. <sup>10</sup> Ina ti pani nalimulo mo ngerongi aba aiyalame tinaga waneigini bo nalu waneiginime ti aba aiyalabi bo nalu holebira. Ina ti pani nalimulo ngule ngogo ngerongi wali agali dewaore homai holebira. Ani bialu maru homa nabi yu wahene karu ti minalu dindi tara tara ngaruha purogo lelelebero.\*

<sup>11</sup> I Anduane Homogo Bibahende Haru Haame Ho Haga Ngode Datagaliwabe haluhe kogome tihondo heneneore bulego larogo ina ti pani nalimulo ngialu mo koore holebero. Anidagua buleberogo irane tigua mana ko ngubiore wiaru biaabo halu ininaga deni inaga anda hewago mo mebia helarimigonaga pani ngulebero. Ani birimigonaga ina tihondo dara nahe howa agalime tani pudu wahagadagua ti pani nalimulo ngialu pudu

\* 5:10: LBM 26.29, Dug 4.10, Ese 6.8, Amo 9.9, Seg 7.14

waholebero. <sup>12</sup> Ina tí pani nolene ogoni halu tebo mo talebia holebero. Wabuni halu mbirago ti hina gari howa warago timbuniore balu tanoha homo wulebira. Wabuni halu mendego ti waitigi ibalu wai biagane ayu tibume tano pabe tagirahayagi dibu wulebira. Wabuni halu tebonego ti tininaga dindi wahalu dindi tara tara ngaruha hama pugupugu bilo taliatogo lelarogola waitigi bu karume talima pugupugu bialu bai helolebero.

<sup>13</sup> Ani biragola inaga miniha keba tandagala nalu kogo ereba helonaga tíha biba helolebero. Mbirale o bulebira laroruni tagira ibirangi tigua ina bi áyu larogoni mitangi bialu i Anduane Homogo mbirale bi pupu wulenaga gime wabini ngaru aria mbirame inaga henge aribia helo yupe nahaga henedane hondoleberemi. <sup>14</sup> Ainde tí mo ko hai hene ngamigola hameigini tara tara tí baba mandagi handa ainaj padarume tí de hondowa lalu, Bo haealabaga bini o ngago de handa nabere. Anduane Homogohanda tinaga mana ko bialu heago hondowa ti pani nelo minida, lalu handa tara haga bulebira.

<sup>15</sup> Ina tí baba tandaga timbuni ho kogo tí pani nalimulo mo ngiaore bulebero. Anidagua berogola hameigini tara tara bu karume tí pani naramigo hondowa ti gi timbuni holebira. Tigua tí ko ngubida lalu hondo oba halu mege bulebira. <sup>16</sup> Ina hina gari tíha anda ibilarogola tomo mbira nolene nawi dege wiaabo holebira. Wali agali bu kamiru tí homai halimulonaga hina gari ogoni ibilarogola timume bogaragola tandaga biagadagua tí hina garime tandaga naabo halu homoleberemi. <sup>17</sup> Ina hina gari ibilalu nogo biango gabua bu karubi ibilarogome tinaga waneigini bu karu bo gililoyu ibagabu ngelolebira. Ani bialu ina tíha warago timbunibi waitigi bu karume tí baba wai bialu bo wahi helobi ibilolebero. I Anduane Homogo ina bi o ledogoniore, laya.✧

## 6

### *Mbirale gime wabini wiaruhondo bi pupu wiaga hearu baba keba henego ogo*

<sup>1</sup> Anduane Homogohanda ihondo lalu, <sup>2</sup> Dindiali-o ina Isaraele dindinaga hari wedaruha handa amu nana bialu inaga bi ogo tihondo lamibe. <sup>3</sup> Hari wedarubi dindi ulini panda panda ngarubi tihondo lamialu lalu, Anduane Homogo Bibahende Haru Haame Ho Haga kogo ina waitigi ibilarogola tigua dama mitangi bialu mbirale gime wabini bu ngaruhondo wali agalime bi pupu wule piaga ngaru bo gialabaga bilolebero. <sup>4</sup> Waitigi urunime ibalu nogo tara tara bo lomabu delaga dabu bu heledaru bo gialo wahi halu ira hagua ngabilo inisenesi lomabu delaga dabu bu heledarubi bo gialo wahi holebira. Ani bialu tigua Isaraele wali agali bu karu tinaga mbirale dama mitangi bialu gime wabu ngaruhondo bi pupu wialu karia ti bo waholebira. <sup>5</sup> Ani bo wahowa tinaga tingini mbirale gime wabu ngagoria ngelowa Isaraele wali agali uruninaga kunibi tinaga lomabu delaga dabu kagoha wuyu mabu bu wima polebira. <sup>6</sup> Waitigime ibalu Isaraele dindinaga tanoru bo haealabaga biai halu wali agalime bi pupu wiaga anda bu heledarubi mo ko halu bo gialo wahi holebira. Tigua lomabu delaga dabu bu heledarubi mbirale dama mitangi bialu gime wabu ngarubi bo gingirulo wahi halu ira hagua ngabiaga inisenesi lomabu delaga dabu heledarubi bo gialo wahiore holebira. Anidagua bilarogola Isaraele wali agali tigua mana ko bialu gime wabigi biyaru bibahende ereba hai holebira. <sup>7</sup> Waitigime Isaraele dindi bibahende ha pai halu Isaraele wali agali bu karu dewaore homelo bo wahaga bulebira. Anidagua biragola Isaraele wali agali maru homa nabi yu wahene bu karu tigua ini Anduane Homogoo henedane manda bulebira.

<sup>8</sup> Ani bialu waitigime wali agali maru ba nabi helene karu ina ti hameigini tara tara dindi ngaruha purogo lelolebero.✧ <sup>9</sup> Ani purogo lelarogola ti dindi kaundia uruniha garabaya pu howa tigua i mitangi bu dai bialu tinime kagua bialu harimagome i mo genda harimada lo manda bulebira. Tigua i erembira ngialu mbirale gime wabini wiaru



hamelo aribia howa o biaruhondo bi pupu wialu harimagobi iname mana ko ngubiore bialu harimadalo manda bialu taga timbuniore holebira. <sup>10</sup> Ani taga howa i Anduane Homogo ina bi hongohe áyu larogoni bame ti mo gi halu ndo lenedane hondolebira, lalu Anduane Homogohanda lene.\*

<sup>11</sup> Anduane Homogo Bibahende Haru Haame Ho Haga kagome ihondo laabo halu lalu, Bu miniha genda halu geme dindi hongo howa hangedabe. Isaraele wali agalime mana ko ngubi dewaore biyarunaga dara howa dugu bibe. Heneneore tigua mana urunidagua bialu hayarume maru waitigime bo wahai halu maru hina garime homalu ti marubi warago tara baragome homai holebira. <sup>12</sup> Bibahendeore homai holene wulebira. Anigo maru dindi kaundiaha karu ti nde warago balu home lelebero. Kawareni karu waitigi ibiragome bo wahalu yu wahene maru karu ti hina garime home lelebero. Ina urunidagua bialu inaga keba ho kogo tiha biba helolebero. <sup>13</sup> Waitigi tigua Isaraele wali agali homararunaga tingini maru mbirale gime wabu ngaruha waho ngelalu maru lomabu delaga dabu bu heledagoria wu mabu bu wialu maru hari nene ti bi pupu wiaga ngaruhabi dindi bare barenibi ira timbuni bu karu tenehabi ira maru yuni dewahe kagohabi tinaga tingini wahaga bulebira. Isaraele wali agalime gime wabini ngaruhondo bi pupu wialu mbirale bo lomabu delaga kago bibahendeha tinaga tingini uruni kaware wigi bulebira. Horo ogoningi Isaraele wali agali bibahende karume ini Anduane Homogo henedalo manda biai holebira. <sup>14</sup> Aniore bulebira. Ina tinaga dindi mo ko halu labu hai helolebero. Tinaga dindi lenego bibahendeore unurahayagi dindi ko wali agali nahaga ngagoria howa ibalu uyurahayagi Libila tano ngagoria mo ko hairi helalu labu hai helolebero. Dindi Isaraele wali agali haganego gibunihabi mbira yu wa nahelolebero. Anidagua berogola wali agali karu bibahendeme ini Anduane Homogo heneneore henedalo manda biai holebira, lalu Anduane Homogohanda ihondo laya, lene.

## 7

### *Isaraele wali agali ti hamaro bulene kaware nga lenego ogo*

<sup>1</sup> Anduane Homogohanda ihondo langialu lalu, <sup>2</sup> Dindiali-o i Anduane Homogo Bibahende Haru Haame Ho Haga kogo ina Isaraele wali agalihondo bi ogodagua laro. Áyu ogoni Isaraele wali agali dindi bibahendeha karu tinaga horo hamaro ogonida.

<sup>3</sup> Isaraele wali agaliru-o tí bi ogo hale halimu. Hamaro bulene horo tagira ibiragoni. Tigua mana ko birimirunaga pani nguleberogo ngerogola inaga bu miniha keba timbuniore ho hene kogo tí hondoleberemi. Tigua mana ko uruni bialu harimigonaga ina tí manani howa birimidaguaore mo tale bulebero. Ani bialu tigua mana ko ngubi bialu harimigonaga pani ngulebero. <sup>4</sup> Ina tí mbirali yu wa nahe dara howa biamogo nabulebero. I Anduane Homogooore henedane kogo handalimulo tigua mana ko urunidagua bialu harimigonaga ina pani ngulebero, laya lene.

<sup>5</sup> Anduane Homogo Bibahende Haru Haame Ho Haga kago ibugua lalu, Tíha mo ko holene nahendene ale taraore tí bo waholenaga ibugu ibugu bulebira. <sup>6</sup> Áyu tínaga horo hamaro bulene kawareore tagira ibiragoni. Áyu ogoniore tagira íbu ngagoni ndobe. Ai tínaga holene áyu ereba haragoni. <sup>7</sup> Wali agali Isaraele dindiha bu kamiru tí bi ogo hale haramine. Horo biago tagira ibiragonigo ai tí mo ko holobada. Ainde tigua turu hagabu howa hari nene bu ngaruha pialu bi pupu wigi beremili biaru nawuleberemida. Áyu tíni dege mo ngoaiho howa gi halu luluyu ibagabu holeberemida.

<sup>8</sup> Ina tihondo keba timbuniore halu tandaga harudago hadelo tí minu baore bolebero. Tigua mana ko uruni bialu harimigonaga ina tí manani helolebero. Ani helalu tigua mana ko ngubiore wiaru bialu harimigonaga pani karulapeore nalimulo ngulebero.

\* 6:10: Yar 5.12-14, Ese 6.7

<sup>9</sup> Ina tihondo dara howa biamogo nabi tí bayale halimulo helo wanaholebero. Tígua mana ko uruni bialu harimigonagaore ina pani ngulebero. Anidagua berogola tígua ñ Anduane Homogo kogonigo mo ko holene uruni ñimeore ibilenedane hondoleberemi, laya lene.

<sup>10</sup> Ani lowa Anduane Homogohanda ihondo laabo halu lalu, Mo ko holene horo timbuni biago kaware áyu o ibiragoni ndobe. Isaraele wali agali bu karume ti damene bu karu mo ko halu haga ka. Ani bialu mine hagane mana ngago hangu bule hongo haabo haga ka. <sup>11</sup> Tigua mendeali bo waholene mana birarume mana ko dewaore mo yu anda ibaga nga. Anidagua bini ngagonaga ina tinaga mbirale bayale damene ngaru bibahende bo haealo wahai holebero. Tinaga munibi mbirale bayale damene ngarubi ti mini lene karubi ina tinaga mini mo dindiha halu hangedape harogola tinaga bayale winiru ereba hai halu mbira nawulebira.

<sup>12</sup> Mo ko holene horo ko biago kaware o ibiragoni ndobe. Horo ogoningi mbiralime mbirale yolo bialu karu ti turu holene nawi. Mbirale muni mialu karu tinaga bu miniha genda holene nawi. Irane tigua biraru habane nabulene wulebirago ina ti bibahende pani mialu minu baiore holebero. <sup>13</sup> Agali mbirame ibunaga mbirale yu kago mendealihondo dano helo lowa miyadagua dano hanga dai nabi dano ogoni ho kaore dege ibu homolebira. Ani bulubadagoni irane ñaga keba holeneme ti bibahendeni ibira holebira. Ina ti homelo bo wahai holebero lalu bi lo wirugo lone mo iriari nabulebero. Wali agali bibahendeme mana ko biyarunaga homai holebira. <sup>14</sup> Tigua wai bulenaga mbelo biguli pu laragola ami agali bibahende wai bule mo manda manda bu holebirago ai mbiralime abale pora bu ade halu wai bule napolebira. Ani bulebirago irane ñaga keba holeneme agali uruni mo gi hai haragola ti wai napolebira, laya lene.

*Isaraele wali agalime ko biyarunaga pani mulebero lenego ogo*

<sup>15</sup> Anduane Homogohanda laabo halu lalu, Waitigime ibalu Yarusaleme ho mabu bupe hayada. Tanonaga pabe tagirahayagi wai birarume bo homelalu maru tanonaga pabe tamuhayagi karu ti hina garimebi warago tara tara baragomebi homai holebira.

<sup>16</sup> Maru ti ibida polene henge handa walia hayagua nde ibida gerai lalu puwa hari tene ngaruha ha do holebira. Wali agali uruni tigua tinime ko bialu hayaru mitangi halu ega puyume bi laradagua ti dugu bialu howe dodowe laga bialu holebira. <sup>17</sup> Ani bialu howa tinaga gi geru hongo pirilape halu diriduru lalu holebira. <sup>18</sup> Tigua dara ho howa walia halu karulagane aga ngago mo karulo howa duru timbuni lalu holebira. Ani bialu tinaga mandari podo mbololo wahai haragola ti bibahendeme taga timbuni holebira.

<sup>19</sup> Anduane Homogohanda tihondo ibunaga keba holene walia haragola tigua tinaga ngolo siliba urume tini mo wialu biamogo nabulubadane hondowa muni uruni ti nole ndodago lowa tigua hariga teneni ba ainai bialu yu wahai holebira. Tigua ngolo silibaru dimagoli timbuni ho heagola ogonidagua biyagome ti ko bilo mo bia henego mitangi bulebira. <sup>20</sup> Bamba tinaga yári ngolo silibarume wabu winigo karulo howa ti turuho haga hene. Ani bu howa tigua ngolo siliba urunime mbirale bi pupu wulenaga gime wabu wiaga hene. Tigua mana ogonidagua biyagola ina hame naleore howa tinaga ngolo siliba uruni tininaga deni mo nagaloneore hai helolebero, laya lene.

<sup>21</sup> Anduane Homogohanda laabo halu lalu, Ina dindi tara agali koorene ko bu karu tí kamigoria íbu helarogola tigua Isaraele wali agalinaga dabudabu ngaru mo page biai holebira. Mo page bu yalu puwa mbirale ko tinime hameledaru ale bialu holebira.

<sup>22</sup> Ani bialu agali uruni ñaga anda bayale biagoha anda pialu tinime hameledago ale bialu ñaga deni anda ogoni mebia halu mo ko holebira. Ina tigua uruni nabilo hapai nahe helolebero.

<sup>23</sup> Isaraele wali agali tigua mbirale bibahende libilaba lalu mo ko hama ibaga bialu kagoni ndobe. Isaraele dindi bibahendeha tigua wali agali dewaore homelo balu

tanoha mendeali kago bameore bo wahaga bialu ka. Anidagua bialu kagonaga horo áyu ti minu dariba holenaga pu seni wabulene karulape. <sup>24</sup> Anidagua bialu kagonaga ina agali i mitangi nabiaga koorene ko karu ti kamigoha haru ibuleberogo tigua Isaraele dindiha ibalu wali agali tini andagaha howa bo taliatagi halu anda uruni ti karulolebira. Ani bialu tigua Isaraele wali agalime Anduane Homogo mitangi bialu lotu laga anda karu bo giallo wahai helarogola Isaraele agali hongohe bu karu tigua gi timbuni halu tinaga mine holene ereba holebira. <sup>25</sup> Mo ko holene ko taraore mbira áyu Isaraele dindiha anda ibiragoni ndobe. Tigua mo palia holene hamelo karia handa walia naholebiraore. <sup>26</sup> Tiha mo ko holene dewaore tagira ibugu ibugu bialu bi diburibu ko tara tara laragobi hale holebira. Ani birago hondowa tigua gi timbuni howa Anduane Homogonaga bi mana latagi haga agali kago hondo pialu inaga hame agua winidabe hondole hale haragola ina tinaga bi uruni hale howa ladai nabulebero. Ani bialu loma binigo mo miaga bu karume ti lawai holene bi mbira nawulebira. Ani bialu agali ala hene miniwi bu karume wali agali mini gigabi wulenebi bogabi holenebi talebu mulene mbira nawulebira. ✧ <sup>27</sup> Anidagua biragola tinaga kini kago ibugua dara timbuniore halu kini igini kagome mini burugu lalu bu miniha mo ko hene holebira. Wali agali bu karume gi timbuni halu durulalu holebira. Tigua mana ko bialu hayaru bibahende mitangi bialu ina ti pani nelo miaiore holebero. Tigua wali agali maru karu manani ibu helowa mo dabaki birimidagua dege ina tinni dabaki bulebero. Anidagua berogola tigua ini Anduane Homogoore henedalo bayuwa manda buleberemi, laya lene.

## **Esegiele ibugua de gandeba mende hendene (8.1–10.22)**

### **8**

*Yarusalemeni Isaraele wali agalime mbirale gime wabu wiaruhondo bi pupu wialu henego ogo*

<sup>1</sup> Ina Babilono dindiha garabaya hemane mali waraganegonaga ege waraganeni horo dauni hayagola i nde ini andagaha berewaria Yuda agali haguane maru ibiniyagola i baba mandagi birarima. Ani beremaria Anduane Homogo Bibahende Haru Haame Ho Haga kagonaga hongo iha karula haya. <sup>2</sup> Ani karula hayagola i handadaga halu de gandeba handalu hewaria agali handalehe mbira ira hungu bialuhe hearia de handaru. Ibunaga tingini mandibu nirayagi ira hungu ale bialu heagola ibunaga tingini lirayagi ege tole boronosi bayale ngiringara lelo mbirale hai hene handalehe hearia de handaru. ✧ <sup>3</sup> Mbirale mbira ogonime ibunaga gi handalehe mbira dogola amu halu inaga mandarini yania hayane handaru. De gandeba dege handalu hewaria Ngode Datagaliwabenaga Dinini ibugua i minu yalu hariha yagalalu Yarusaleme haru piya. Haru puwa Yarusaleme tanoni Ngode Datagaliwabenaga anda pabe buyu mabu bini hayagonaga panga haraba anda abene uyurahayagi heagoria helaya. Panga haraba ogoriani tamu hobane ogonihayagi Isaraele wali agalime mbirale dama mitangi bialu bi pupu wulenaga gime wabini mbira mo wiago Ngode Datagaliwabe ibugua ogoni hondowa ibu keba halu miniha tandaga timbuni haga.

<sup>4</sup> Ani pu howa ina Isaraele wali agalinaga Ngode Datagaliwabe ibu kago walia hole-naga wa holene taraore hearia handaru. Wa tara ogoni abale mbira Iba Keba poragoria hewaria hendeneobi dege handaru. ✧ <sup>5</sup> Ani handalu hewaria Ngode Datagaliwabe ibugua ihondo bi lalu, Dindi agali-o dindi abene uyurahayagi de handa uyu habe, laya. Ani layagola i de handa uyu halu hewaria lomabu delaga dabu panga haraba kawareni heleagoha mbirale dama mitangi bialu bi pupu wulenaga gime wabu wiarua handaru. Ngode Datagaliwabehanda mbirale ogoni hondowa keba halu tandaga timbuni hagago handaru.

✧ 7:26: Man 32.23, Yar 4.20, Dug 2.9 ✧ 8:2: Ese 1.27 ✧ 8:4: Ese 1.28

<sup>6</sup> Ngode Datagaliwabehanda ihondo lalu, Dindiali-o Isaraele wali agali bu karume mana ko bialu karuni de hendedebe. Tigua mana ko o bialu kagonime inaga andaha nahe wahalu puwa kaundiaha habagiho heledagoni ndobe. Ani bialu mani tigua mana ko áyu bialu kadagua ndo ko timbuniore birane hondolebere, laya.

<sup>7</sup> Ngode Datagaliwabehanda bi ogoni lai halu ibugua ibunaga anda ege pabe bu mabu biago wahalu tagira pialu pabe timbuni heagonaga panga haraba heagoria i haru piya. Haru puwa ibugua pabe ogoniha diri mbira wiago walia haya. <sup>8</sup> Ani mo walia howa ibugua ihondo lalu, Dindiali-o ina pabe ogoni bo gialole diri ogoni ala ba timbu ha, laya. Ani layagola ina diri biago ba timbu halu hewaria o biagoha panga mbira wiaria handaru. <sup>9</sup> Ibugua ihondo lone lalu, Ai ogoniha anda puwa mana ko ngubiore bialu kagoni handabe, laya. <sup>10</sup> Ani layagola ina anda ogoniha anda puwa handaru. Handalu hewaria nogombinaga bigiyaru ema bialu piaga tara tara Ngode Datagaliwabenaga deni dodoheru bibahendenaga bigiya damene anda tamu hobane ogoninaga hái heago bibahendeni gilibu wiame hearia handaru. Ani handalu Isaraele wali agalinaga dama mitangi bialu gime wabinigonaga bigiyabi wiaria handaru. <sup>11</sup> Ani handalu hewaria Isaraele wali agalinaga agali hagueneru pira karia (70) bereagoha Sabana igini Yasanaia ibu halu berearia handaru. Ti bibahendeoreme ira hagua ngabilo inisenesiru delaga mbira mbira yu heago lomabu delayagola ira hagua irigi hayane handaru. <sup>12</sup> Ani biyagola Ngode Datagaliwabehanda ihondo lalu, Ainde Isaraele wali agalinaga agali haguane biaru tigua ohowa mana ko o bialu kagoni de hendedebe. Ti bibahende tamu hobane ogoniha anda pialu anda háini bigiya ko o ngarunihondo bi pupu wialu ka. Tigua lalu, Ogoni beremago irane Anduane Homogohanda mbirale iname bialu kamago nahandagaya. Ibu ina dindi yu wahalu piyagoni ndobe, laga ka. Tigua bi ogonidagua lalu mana ko uruni bialu haga ka, laya.

<sup>13</sup> Anduane Homogohanda ihondo laabo halu lalu, Ai tigua mana ko áyu bialu karuni bolangua halu ko timbunioreru bialu holebirago hondolebere, laya. <sup>14</sup> Ani lowa ibugua Anduane Homogonaga anda pabe bu mabu biago panga haraba uyurahayagi heagoria i haru piya. Ani haru puwa ogoniha wali maru tigua dama mitangi bialu mbirale bi pupu wulenaga gime wabini mbira mini Tabusu wiago homaya lo mitangi buwa kiabu dugu bialu berearia handaru.

<sup>15</sup> Ani hondo hewagola Anduane Homogohanda ihondo lalu, Dindiali-o mbirale o biragoni hendedebe. Ogoni handa hendedegonigo áyu mana o bialu kagoni bolangua hene koorene ko bialu kanebi hondolebere, laya. <sup>16</sup> Ani lalu ibugua anda heagonaga panga haraba heago kawareni haru piya. Anda haraba ogoriani pangala lomabu delaga dabu heagola hengene wiagoria agali pira kirani duria (25) agima bereane de handaru. Tigua anda heagoha erembira muwa ni tagira ibiragohayagi de handa amuho biruwa ti ge duli hanga howa nihondo ma podalu bi pupu wialu berea.

<sup>17</sup> Ani biyagola Anduane Homogo ibugua ihondo lalu, Dindiali-o ina mbirale o bialu karuni de hendedebe. Yuda wali agali uruni ti mana ko ngubi uruni ale dege ndo bialu kagoni. Tigua Isaraele dindi bibahendehe wali agali bu karu mana ko tara tara mo bia haga bialu ko dewa biame halu kagoni. Tigua anidagua buwa i mo keba halu mana ko uruni bame dege beremabe toba howa inaga andaha ibuwa áyu o bialu karuni biaabo haga ka. Tigua inaga anda ogoniha ko urunibi bialu kagome i yo handalu mo tandaga timbuni haga kagoni. <sup>18</sup> Ani bialu kago ina keba timbuni ho kogoni tiha biba helolebero. Ina ti dara howa biamogo nabulebero. Tigua i hongo howa olalu ihondo bi lolebiragoyu ina tinaga bi larago hale naholebero, lalu langiya.

<sup>1</sup> Ngode Datagaliwabehanda bi hongo howa huario lalu, Wali agali tano bu ngaruha homelo bo wahaga kamiru tí bibahende wai biaga ayu tiburu mo yalu ibai hadaba, layuago ina hale haru. <sup>2</sup> Ani layuagola agali waragariali Anduane Homogonaga anda panga haraba uyurayagi wiagoha howa abale ibini. Ti bibahendeme wai biagane ayu tibu ne gadele wali agali bo wahaga ale marubi yalu anda ibiya. Ani anda ibiyagola agali mbira nde ti haru mandagi anda ibiyago ibu aga bayale tara mbira mo karule howa pausi nu emene mbira ibunaga mandibuha yu hea. Beba gili biaga aleru nu ogoniha henearia handaru. Agali uruni bibahende ibalu bo lomabu delaga dabu boronosime wabu wini wiagoria kaware ha para ho hearia handaru.

<sup>3</sup> Ani heagola Isaraelealinaga Ngode Datagaliwabe ibu wá hongohe taraore howa agali handalehe maria biaruha howa tagira ibalu Anduane Homogonaga anda haneni wá hatagi haya. Ai Anduane Homogo ibugua agali aga bayale karule heago olowa <sup>4</sup> ibuhondo lamialu lalu, Ina Yarusaleme tanoha ibaga biai lalu wali agali maru ti damenerume mana ko biragola handabe manga lalu genda yu haga karunaga wanakuini magi mbira helaga bibe, laya.\*

<sup>5</sup> Ani layuago hale ho hewagola Ngode Datagaliwabehanda agali waragariali biaruhondo lamialu lalu, Tigua agali o poragonidagua pialu wali agali bibahende bo wahole pudaba. Tigua wali agali dara nahe howa mbiraoreli hangubi helo yupe nahalimu. <sup>6</sup> Wali agali wahe karubi wandari igiri daliahe karubi waneigini gali biru ngarubi waneigini aiya bedaru bibahende bo wahai halimu. Agali haguane inaga andaha haga karu ala bo wahalu bama pialu marubi bo wahai halimu. Anigo wali agali tinaga wanakuini inaga magi mbira wiagua uruni dege nabe helalimu, lalu lamini. Ani laya handala tigua pialu agali haguane maru Anduane Homogonaga anda heagoha kaware haparaho haga hearu ala bo wahai hene.

<sup>7</sup> Ngode Datagaliwabe ibugua agali waragariali biaruhondo lamialu lalu, Wali agali inaga anda pabe bu yaanda henegohayagi haga karu bo wahai halimu. Ini deni inaga anda ko dodohe helonaga anidagua bilimu. Biabe ogoni biai lalu tigua tanoha ibaga biai lalu wali agali bibahendeore homelo bo wahaiore halimu. Ai biabe ogoni bule abale pudaba, lene. Ani laya handala ti abale pene.

<sup>8</sup> Puwa tigua wali agali bo wahole piyaru balu heagola i hangu Anduane Homogonaga anda kaware heagoriani haru. Ani howa i ge duli hanga lalu dindini bulupalu wuwa ina bi dalimu lalu, Anduane Homogo Bibahende Haru Haame Ho Haga kego-o ainde ina Yarusaleme wali agali bu karunihondo keba timbuniore harida. Anidagua bialu ina Isaraele wali agali yu wahene maru Isaraele dindiha karu bibahende bo wahai holeberebe, lalu.

<sup>9</sup> Ani hale harugola Ngode Datagaliwabe ibugua ladai bialu lalu, Yuda wali agali Isaraele wali agalibi tigua mana ko dewaore bialu hayagome tiha mo ko hene dewaore ngelo kagoni ndobe. Tigua manda bu handalu hearia Anduane Homogo i ti dindi ngago wahalu piyada lo manda bialubi ina ti mitangi nabi embedaho wahayada lo manda bialubi ina ti handa nabi ka bada manda bialu hayiya. Ani manda bu howa tigua mana ko dewaore bialubi wali agali Yarusalemeha bu hearu bame bo wahalubi Yuda dindi bibahendeha hearu bo wahai haya. <sup>10</sup> Anidagua bialu hayagonaga ina ti dara lalu mbiraoreli hangubi mbira helo yupe naholebero. Tigua wali agali maru heneruhondo mana biyadagua nde ina tihondobi biadai bulebero, lene.

<sup>11</sup> Ibugua bi lai hayagola agali aga bayale karule biago Anduane Homogo hearia ibu dai biyaria handaru. Dai buwa ibugua Anduane Homogohondo ibugua lalu, Ina biabe bia laridagua biaiore haru, layago hale haru.

\* 9:4: Mo 7.3, 9.4, 14.1



## 10

*Anduane Homogonaga wá holene hongohe biagome ibunaga anda wahalu piyago ogo*

<sup>1</sup> Ina mbirale ndisibe ale timbuni agali handalehe maria biagoria daliga mo pagaho wiago handa amu haru. Handa amu halu hewaria mbirale ndisibe ale timbuni biagoria daligaha kininaga biragane dagia handalehe mbira ege tole mindibi muni timbunioreme miaga ale mbirame wabini wiaria handaru. <sup>2</sup> Ani handalu hewaria Ngode Datagaliwabehanda agali aga bayale karule biagohondo lalu, Agali handalehe mariali biaru andanehayagi garo ge ale maria ngago dombeneha pialu inaga gi kirabalime ira hedo yule pobe. Hedо yuwa tano ngagoha ira dene ba ainai bima pobe, lalu lamiya. <sup>3</sup>

Ani lamiyagola agali aga bayale karule biagome ani bule piyago handaru. <sup>3</sup> Agali o biago anda pu hearia agali handalehe maria biaru ti Anduane Homogonaga anda heagonaga abene unurayagi hearia de handaru. Ani heagola ginu hagua timbuni mbirame Anduane Homogonaga anda pabe bu yaanda hene wiago bibahende dambi hai haya. <sup>4</sup> Ani biyagola agali handalehe mariali biaruha howa wá taraore holene hongo tagira pialu Anduane Homogonaga anda haneni wá hadali hayagola ginu haguame anda biagoha tolatagi hai haya. Ani biyagola wá timbuni holene biagome anda pabe bu yaanda hene wiagohayagibi wá timbuni hongoheore haame ho heago handaru. <sup>5</sup> Ani heagola agali handalehe mariali biarunaga babaganeme pilipala layuago wali agali tanoha hearume hale hai habehe dege layua. Agali handalehe biarume pilipala layadagoni Anduane Homogo Hongo Haiheore kagonaga bi ale o layadagoniya.

<sup>6</sup> Anduane Homogohanda agali aga bayale karule biagohondo ira hedо yule pu layagola agali ogoni ibu puwa garo ge ale biarunaga mbirago heagoria pu haya. <sup>7</sup> Ani pu hearia agali handalehe biaru aria mbirago ibugua ira tini heago dombeneha deago ibunaga gime ira hedо yalu agali biagonaga gi kirabaliha hedо ya haya. Ani biya handala agali biago ibu ira hedо yalu piya.

<sup>8</sup> Ani piyagola handalu hewaria agali handalehe maria biarunaga babagane hearu andaneha agalinaga gi mbira mbira pani hearia handaru. <sup>9</sup> Ai mbirale garo ge ale biaru ti bibahende ogonibi dege dege howa garo ge ale uruni hoale de daibi ege tole ambuabi yolo dewaoreme miaga ngaligobi wiaria handaru. <sup>10</sup> Garo ge ale maria uruni wiago andaneha garo ge ale maria mende wiago uruni polenedagua handa amu nana bu wia. <sup>11</sup> Ani howa mbirale uruni ti mbira poa biragohayagi pole howa beregeda nabi kagoria howa pupe hagaya. Ani bialu agali handalehe maria uruni mbirahayagi pole howabi ti wanakui ho beregeda nabi kagoria howa pupe hagaya. <sup>12</sup> Ani bialu agali handalehe uruni tinaga tingini bibahende erembirahabi gihabi babaganehabi tinaga garo ge ale mbira mbira biarunaga bibahendeni de hondolene dewa hai hearia handaru. <sup>13</sup> Ani hondo hewagola bi mbirame, Garo ge ale uruni ibaga bialu howa mabu mabu bialu haga, layuane hale haru.

<sup>14</sup> Agali handalehe maria uruni ti hangu hangunaga dengui maria howa tara tara dege hea. Dengui mbirago nogo bulumaga handalehe howa mendego agali handalehe tebonego budi gabua timbuni laiono handalehe manego ega bodo hariawe handalehe dege dege hearia handaru. <sup>15</sup> Mbirale maria uruni de gandeba hondowa handarudagoni ala Iba Keba peago angeni howa hendenego dege lone handaru. Tigua heyalu harini dai dolope halu pialu howa <sup>16</sup> garo ge ale biarubi nde ti haru mandagi piagaya. Tigua babaganeme yagalalu poragola garo ge ale biarubi ti haru yagalalu mandagi dege piagaya. <sup>17</sup> Agali handalehe maria uruni ti ema nabi hondo heagola garo ge ale tibi ema nabi wiagaya. Ani biagadagoni irane agali handalehe maria biaru tigua garo ge ale urunime bulenego mo bia howa haru haga kagome ani biagaya.

☆ 10:1: Ese 1.26, Mo 4.2 ☆ 10:2: Mo 8.5 ☆ 10:9: Ese 1.15-21 ☆ 10:12: Mo 4.8 ☆ 10:14: Ese 1.10, Mo 4.7

<sup>18</sup> Uruni de hondo hewagola Anduane Homogonaga wá holene hongohe ibuninaga anda haneni hadali hayago dai bialu agali handalehe maria biaruni heagoria daligani pu haya. <sup>19</sup> Ani biyago handayaho hewagola agali handalehe biarume tinaga babagane yanga lowa yagalalu hariha iraga halu pialu hearia garo ge ale maria biaru tibi nde o piyagoha mandagi pumaga halu piya. Puwa Anduane Homogonaga andaha pabe bu yaanda hene pabe mende heagonaga panga haraba amu ni tagira ibiragohayagi wiagoria kaware pu haya. Ani pu heagola Anduane Homogonaga wá holene hongohe taraore ti heagoria daligaha hearia handaru. <sup>20</sup> Ani handalu hewaria agali handalehe maria uruni ina ala Iba Keba angeni Isaraele wali agalinaga Ngode Datagaliwabe kago andaneha hearia handarugo degeyane mandabu dege haru.

<sup>21</sup> Agali handalehe maria biaru mbira mbirago ibunaga dengui maria dege degehe halu tinaga babagane maria dege degehe hearia handaru. Ani bialu tinaga babagane maria hayadaru andaneha agalinaga gi handalehe maria dege dege haihe hea. <sup>22</sup> Abale ina Iba Keba peagoha hewaria mbirale maria handarudaruni tinaga dengui o uruni dege lone ibu hearia handaru. Mbirale uruni ti mbira poa biragoha pole howa tinaga tingini ho beregeda nabi kagoria howa tigatiga pupe halu piagaya, lalu Esegielehanda lene.

## 11

### *Isaraelenaga haguane hearume ko biragonaga pani nolebira lenego ogo*

<sup>1</sup> Ani bialu heago handalu hewaria Ngode Datagaliwabenaga Dinini ibugua i minu yaraga halu Anduane Homogonaga anda pabe bu mabu bini heagonaga panga haraba ni tagira ibiragohayagi heagoria yalu pu helaya. Ani biyagola agali pira kirani duria (25) panga haraba heagoria kawareni berearia de handaru. Ani hondowa uruni aria agali kira Isaraele wali agalinaga haguane henego ti heba berearia handaru. Agali kirali ogonilabo Asu igini Yasanaiabi Benaia igini Peladaiaabi berearia handaru.

<sup>2</sup> Ani hondo hewagola Ngode Datagaliwabehanda ihondo lalu, Dindiali-o agali o bedaruni tigua mana ko dege bulenaga hariga taya bialu haabo haga ka. Ani bialu howa tigua wali agali bu karuhondo bulene ngagonaga bi ko hangu lamialu haga ka. <sup>3</sup> Tigua lalu, Inaore wali agali bayaleore kamagonigo inanaga andaru abale biadai bulene nga ndobe. Tano ogoni todobene be tomo dawaga ale nga. Ina wali agali nogo mbirini ale howa todobene beha wiagadagua ina tano ogoha bayale kamagoni, laga ka. <sup>4</sup> Anigo dindiali-o ina tihondo bi ogodagua lolene nga. Tí wali agali bayale ndo kamigome tiniha mo ko holene anda ibulebira, labe laya.

<sup>5</sup> Anduane Homogonaga Dinini ibugua iha karula howa Anduane Homogohanda ihondo lalu, Isaraele wali agalihondo bi ogodagua lamibe, laya. Isaraele wali agali tigua bi laramirubi tinaga miniha midagi bu kamirubi bibahende ina manda biaiho kogoni ndobe. <sup>6</sup> Tigua wali agali dewaore tano ogoha bo wahai harimirunaga tingini tanonaga hariga pedaruha wu toledagoni hendedo.

<sup>7</sup> Anigo i Anduane Homogo Bibahende Haru Haame Ho Haga kogome ogodagua laro. Heneneore tano ogo ibu todobene be aleore ngagola nogo mbirini baya ngabioreru todobene beha dawa ngago agibe. Nogo mbirini baya ngabi ale ogoni wali agali tigua bo wahai harimirunaga tingini ndobe. Ani birimigo tinibi nde ina tano ogoniha howa bo taliatagi holebero. <sup>8</sup> Tí waitigi bu karunaga wai biagane ayu tibu ngago hondowa tigua gi timbuni ho kamibe. Anigo waitigi bu karume tí bo wahole wai biagane ayu tibu mo yalu ina ibilolebero. <sup>9</sup> Ina tí tano ogoniha howa haru tagira pialu agali dindi taraha howa ibirarunaga giha minu ya holebero. Ina ogonidagua berogome tí pani nalimulo ngialu bo wahai helolebero. <sup>10</sup> Tigua ibalu tini dindi tubaria ngamigoria howa bo waholebira. Anidagua biragola tí bibahendeme i Anduane Homogo heneneore henedane manda buleberemi. <sup>11</sup> Todobene beni nogo mbirini dawedagola irame

dapu nabi bayale wiagadagua tano ogonime tí bayale halimulo biamogo nabulebira. Isaraele dindi bibahende t́naga tubaria wirimidagoha kamiria ina ko birimirunaga pani ngulebero. <sup>12</sup> Ina ani berogola t́gua ini Anduane Homogoore henedalo manda biai holeberemi. T́gua inaga mana wiago damene bia nabi ina bulene nga lo wirugobi talialu nabi puguaioire harimi. Ani birimigo t́gua wali agali tara tí baba handa ai nai padarunaga mana ngago andaneha harimi, laya lene.

<sup>13</sup> Anduane Homogonaga bi ogoni mbiwia halu latagi halu hewagola agali haguane Peladaia heago homo ibira haya. Ani homayagola ina ge duli hanga ho biruwa ma podalu bi dalimu lalu ogodagua laru. Anduane Homogo Bibahende Haru Haame Ho Haga-o wali agali Isaraele dindiha yu wahene karu bo wahai hole hamelo kebe, laru.

*Ngode Datagaliwabehanda Isaraele wali agali tini dindiha haru dai bulebero lenego ogo*

<sup>14</sup> Anduane Homogohanda ihondo lalu, <sup>15</sup> Dindiali-o Isaraele wali agali Yarusaleme tanoha bu karume í lalubi Isaraele wali agali maru garabaya bu yalu dindi taraha pene karu lalubi tigua bi ogodagua laga ka. Wali agali garabaya minu yalu dindi taraha pu karume ti kaundiaore howa Anduane Homogo mitangi bialu lotu nalabehe kagoni. Anduane Homogo ibuni ti baba naheore. Ibugua dindi ogoni ina kamarume karulolomaya ngiyagoni, lalu ka, laya.

<sup>16</sup> Anigo ina wali agali garabaya yalu pene í heba kamiruhondo ina bi o larogo lamulene nga. Anduane Homogo inime ti dindi tara tara wiaruha hama purogo lelaru. Heneneore ti dindi taraha tigimandi hangu garabaya kago howa ihondo bi lolene anda mbira nahe harimigola ini ti heba haabo haga kogome tigua i mitangi bialu lotu lalu helarugoni, laya lamibe.

<sup>17</sup> Anigo inaga wali agali í heba garabaya kamiru ti hale helo ina bi o larogo latagi habe. Anduane Homogo Bibahende Haru Haame Ho Haga kogo ina Isaraele wali agali dindi tara tara wiaruha purogo lelarugo haru dai bialu dindi ala t́ni harimigoria lone helolebero. Isaraele dindi ogoni t́ninagaore wilimulo ngulebero. <sup>18</sup> Lone dai beremingi tigua mbirale dama mitangi bialu bi pupu wulenaga gime wabini ngarubi mana ko ngubi tara tara bialu harimigobi bibahende dindi ogoniha ngaru mo wahai holeberemi. <sup>19</sup> Ani beremigola ina mini gahengebi manda bulene gahengebi ngulebero. Abale t́naga mini giambe ege tole ale harimigoni ndobe. Anigo áyu ina t́naga mini ko ngamiru mo wahai halu ina bi larodagua bilimulonaga mini bayale gahenge ngulebero.✧ <sup>20</sup> Ani berogola t́gua inaga bi mana lowini ngogobi ina bulene nga lowirugobi hale halu taluwa bialu holeberemi. Ani bialu howa tí inaga wali agaliore holeberemi. I nde t́naga Ngode Datagaliwabeore holebero.✧ <sup>21</sup> Ani buleberogoyu wali agali maru dama mitangi bialu mbirale gime wabini ngaruhondo bi pupu wialu mana ko ngubi ngaru bialu haga karu dege pani mialu bo wahai holebero, lalu lamibe. I Anduane Homogo Bibahende Haru Haame Ho Haga kogo ina bi o ledogoniore, laya lene.

*Ngode Datagaliwabenaga wá holene Yarusalemeni winigo ereba henego ogo*

<sup>22</sup> Ani biyagola emene howa mbirale agali handalehe mariali yagalo yu piyagola garo ge aleru ti heba mandagi piya. Ani piyagola Isaraele wali agalinaga Ngode Datagaliwabe kagonaga wá holene honghe biagome ti daligani wá hadali haya.✧

<sup>23</sup> Anidagua bialu wá holene timbuni ogonime Yarusaleme tano wahalu puwa ni tagira ibiragohayagi hari mbira wiagoria pu haya. <sup>24</sup> Ani bialu i de gandeba dege handalu hewaria Ngode Datagaliwabenaga Dinini ibugua i Isaraele wali agali Babilono dindi garabaya harimagoha lone haru dai biya. Ani biyagola de gandeba biago ereba haya.

<sup>25</sup> Ani bialu mbirale bibahende Anduane Homogohanda ihondo mo walia hayaru ina Isaraele wali agali garabaya bu hearuhondo lamiai haru, lalu Esegielehanda lene.

✧ 11:19: Iba 51.10, Yar 31.33, 32.39, Seg 7.12 ✧ 11:20: Iba 105.45, Yar 24.7, Ese 14.11 ✧ 11:22: Ese 43.2-5

## 12

### *Esegielehanda garabaya howa binigo ogo*

<sup>1</sup> Anduane Homogohanda ihondo ogodagua laya. <sup>2</sup> Dindiali-o áyu wali agali í baba mandagi bu kamiruni ti inaga bi mo wahalu erembira ngiaga bu ka. Tinaga de kagoyu tinaga deme baya hangu handa nabiaga ka. Tinaga hale kagoyu inaga bi hale habe manga howa mo wahalu í erembira ngiaga kagoni.✧

<sup>3</sup> Anidagua biaga bu karunigo ai dindiali-o áyu ina mbiralimeibunaga dindi yu wahalu dindi taraha garabaya biabe ale bu pole lowa manda manda bu hagadagua mbiraga nakaore tininaga deni ani bule pu. Ina ani berego wali agali karume de handalu irane ogo ale bira lo manda bilonaga mbira naledaore dege abale ti bu kagoria bolangua haga bialu ibaga bialu hole pu. Ani bialu porego hondowa ti mine haga bu karume ina mo walia halu berego tinaga minime manda nabulebira bada. <sup>4</sup> Horombe ni kaore inaga dabudabu mbirale uruni wali agali ti de hendelo kabubu manda manda bibe. Ani bialu alendo haragola ti handayaho kaore dege inaga dabudabu mo yalu dindi taraha garabaya biabe ale bu piagadagua pobe. <sup>5</sup> Wali agali bu karunaga deni ininaga anda hái bo tidalu mbirale wiriru diri ogoniha howa mo yu tagira pobe. <sup>6</sup> Ani bialu ne laragola ti de hondo kaore inaga mbirale kabubu wiriruni payani mo yalu dindi kaundiaha garabaya pole piagadagua ini andaga yu wahalu harigani pialu habe. Harigani porego pialu howa wali agalime hendelo inaga dengui kabu biai howa hariga nahende arumaha piagadagua pobe. Ina anidagua beregome wali agalinaga miniha mo heya halu manane mbira mo walia holeberegog anidagua bibe, laya.

<sup>7</sup> Anduane Homogohanda bi ogoni langiya handala puwa ina ibugua bibe layadagua biai haru. Horombe dabudabu wirudaru mo kabubu wialu howa alendo hayagola ini andaga biagonaga háiha diri mbira tombelo wiru. Anda hái ayu namarume ndo gi hangume gialaru. Ani bialu diri emene ogoniha howa tagira piru. Alendo ne lolene tiga biyagola inaga dabudabu kabubu wirugo payani mo yalu piru. Ani bialu pirugola wali agali bu hearume ti de handai haya.

<sup>8</sup> Horo mendengi egerebagi hayagola Anduane Homogo ibugua ihondo bi langialu lalu, <sup>9</sup> Dindiali-o Isaraele wali agali inaga bi mo wahaga bu hearunime ina birigoni agile biribe lalu ihondo hale haragola <sup>10</sup> ina Anduane Homogo Bibahende Haru Haame Ho Haga kogome inaga bi ogo ihondo langerogo lamibe. Bi o larogo kini igini kagobi wali agali Yarusalemeha haga bu kamirubi tí bibahende hale helo mbira mani bulebi-ragonaga bi ogo yido labe. <sup>11</sup> Ina wali agali í baba kamirunihondo ogodagua lamibe. Mbirale inime ti hendelo mo walia harigoni irane Yarusaleme wali agali bu kamiruha ogonibi ibulebiragonaga manane mo walia haru. Ai tinaga waitigirume ibalu wai buwa tí dindi tara ngagoha garabaya haru pole ibulebira. <sup>12</sup> Ani ibiragola tinaga kini kago iginimeibunaga dabudabu kabu bu ngaru mo yalu mbira ibida polebira. Agali marume tanonaga pabe kago bo tombelo wiragola kini igini ibu tanoha howa hariga ogoniha tagira pialu polebira. Pialuibunaga dengui buyi howa pupe haragola ibugua hariga ogoha poroda lo manda nabi polebira. <sup>13</sup> Ani pialu karia ina gono baya hangu mo manda manda bu ngeledogoria pialu dolebira. Do ngagola hada yalu Babilono dindiha haru polebero. Haru pu heledogola ibugua dindi ogoni ogobiha pu haruda lalu manda nabioire bame hope holebira. Ani bialu ibu Babilono dindini halu homolebira.✧ <sup>14</sup> Wali agali ibu heba mandagi haga bu karu ti ina giligala lalu purogo lelolebero. Uruni tiibunaga agali haguane dabo helene bu karubi ami agali ibuni mamage haga bu karubi ani bulebero. Ani bialu tinaga waitigime ibalu bo wahai helonaga ina ti poragoha talima pelolebero.

✧ 12:2: Ais 1.23, 6.9-10, Yar 5.21, Md 13.13-14, Mg 8.18, Yo 9.39-41 ✧ 12:13: 2 Kin 25.7, Yar 52.11

<sup>15</sup> Anigo ina ti hameigini tara tara karuhabi dindi kaundiahabi garabaya bu yalu purogo lelarogola tigua i Anduane Homogoore kogoni manda bulebira. <sup>16</sup> Anigo waimebi hina garimebi waragorumebi Yuda wali agali bibahende bo wahai naholebero. Ti mbira mbira hangu nahomelo yu waholebero. Anidagua berogome mani Yuda wali agali tigua dindi taraha pu howa inaneme mana ko bialu harimadago lalu holebira. Te uruni larago hale howa wali agali tara karume Anduane Homogo heneneore ini henedalo manda bilonaga ani bulebero, Anduane Homogohanda lalu Esegiele lamini.

*Esegielehanda manane walia halu duru lenego ogo*

<sup>17</sup> Mani howa Anduane Homogo ibugua ihondo langialu lalu, <sup>18</sup> Dindiali-o ina tomo nalu howa duru lalu nabe. Iba nalu howabi gi howa mogolalu nabe. <sup>19</sup> Anidagua bialu howa ina wali agali dindi taraha bu karu lamialu i Anduane Homogo Bibahende Haru Haame Ho Haga kogome Isaraele wali agali Yarusalemeni bu karu tiha mani bulebiragonaga ogodagua bulebira lalu bi larogo lamibe. Wali agali uruni tigua ti damene karu mo ko halu haabo hagayago ai tini tomo nalu howa duru lalu nolebira. Ibabi nalu bedaria tinaga waitigime ibalu tinaga mbirale bibahendeore dindi andabi bo labu haiore haragola tini gi howa mogolalu birulebira. <sup>20</sup> Tinaga tano áyu wali agali dewa bu kagoha bo gialo wahai haragola dindi bibahende mo ko hai hene embera ibalu wai labu dindi ona wulebira. Anidagua birangi Isaraele wali agali tigua ini Anduane Homogoore henedalo manda bulebira, lamibe, lalu Anduane Homogohanda Esegielehondo lene.

*Anduane Homogonaga bi mana latagi haga agalime mbiwia hararu abaleore tagira ibulebira lenego ogo*

<sup>21</sup> Anduane Homogohanda ihondo bi langialu lalu, <sup>22</sup> Dindiali-o Isaraele wali agalime bi lalu haabo haga mbira ngago ogo, Agalime mbiwia halu mbirale mbira bulebira larago lola harabe hondole dege kamaria lola nahe mali dewaore hondo haabo kamagoni, lalu haga. <sup>23</sup> Áyu Anduane Homogo Bibahende Haru Haame Ho Haga kogome bi laro. Ina tinaga bi henene ndo laga uruni lone nalelo mo ereba hai helolebero. Bi uruni lalu hagamadagua bi mende gahenge mbira la aribia halu helo ti lamibe. Bi gahenge ogo. Anduane Homogonaga bi mana latagi haga agali kago ibugua ogoale mbira bulebira lalu mbiwia hararu áyu ogoni dege tagira ibulene nga.

<sup>24</sup> Anidagua biagago ai agali maru Isaraele dindiha ti Anduane Homogonaga bi mana latagi halu mbiwia haga kama lalu tigua de gandeba mbira handaru lowa wali agali ke howa latagi haga mbirali naholebira. Ina bi urunialego mo ereba hai helolebero. <sup>25</sup> Ani bialu Anduane Homogo inime Isaraele wali agaliruhondo bi lamulebero. Ani lamialu mbirale ibulebira lalu lo werogo abaleore tagira ibulebira. Inaga bi mo wahalu i erembira ngiaga kamiru-o bi o larogo hale hadaba. Ti áyu kamiruni hondo kamiore dege ina bulebero larugo bibahende tagira ibilolebero. I Anduane Homogo Bibahende Haru Haame Ho Haga kogo inaga bi o lai harugoni, lalu Esegiele lamini.

<sup>26</sup> Anduane Homogohanda ihondo laabo halu lalu, <sup>27</sup> Dindiali-o Isaraele wali agali bu karu tigua lalu, Esegielehanda de gandeba handalu howa ogoale bulebira lalu mbiwia halu mani aweore bulebiragonaga laga ka, lalu karuni. <sup>28</sup> Anigo Anduane Homogo Bibahende Haru Haame Ho Haga kogo ina Isaraele wali agali tinaga bi uruni ogodagua ladai bero. Ina emene mbira hondo ha nabi mbirale bulebira lalu langirugo bi larudagua áyu ogoni abale tagira ibilolebero. I Anduane Homogo Bibahende Haru Haame Ho Haga kogo ina bi larugoni agua laya lalu lamibe, Anduane Homogohanda ihondo ani lene.



## 13

*Agali ke howa bi mana latagi haga hearuhondo Anduane Homogohanda keba henego ogo*

<sup>1</sup> Anduane Homogohanda ihondo lone lalu, <sup>2</sup> Dindiali-o ina Isaraelenaga agali bi mana latagi haga bu karuhondo lai labe. Agali uruni tigua mani bulebiragonaga mbiwia ho wia hagago ogoni henene ndo tini hangu mitangi bialu laga ka. Tigua bi uruni tininaga miniha tagira ibirago bame dege lo paya biaga ka. Tigua Anduane Homogo ina bi larogo baya hangu hale helo lamibe.

<sup>3</sup> I Anduane Homogo Bibahende Haru Haame Ho Haga kogo ina bi ogodagua laro. Agali mini nawi howa tini hangume bi mana latagi haga o bu karuni tiha mo ko holene ibu wulebira. Ti de gandeba henene nahandaga howa bi tininaga miniha tagira ibirago hangu latagi haga ka. <sup>4</sup> Isaraele wali agali kamiru tigua bi ogo hale hadaba. Anduane Homogonaga bi mana latagi haga kama lowa bi henene ngadagua ndo lalu karuni ti tano bo labu hene ngagoha biango dudu ibagabu hagagobi ka. <sup>5</sup> Tigua tanonaga wai pabe kago emene gialaho wigi bidagoha mamage nahaga. Tigua wai pabe lone bia aribia nahe dege ka. Ani bidago ai Anduane Homogo ina Isaraeleali pani mialu waitigi ti baba wai bule ibilarogola ti hongo halu heyu howa wai bibe nahe holeberemi. <sup>6</sup> Ani bialu agali uruni tigua de gandeba handarima layago henene ndo ti ke howa mbiwia hayagobi henene tagira naibulebira. Tigua lalu, Iname Anduane Homogonaga bi mana latagi harama, laga kagoyu ina tigua bi ogo lalimu lalu mbira naleore. Anigo ai tininaga bi larago henene tagira polobabe tobaho howa latagi agua holedabe. <sup>7</sup> Ina bi mana ke howa latagi haga agali uruni tihondo bi ogodagua laro. Tigua de gandeba handarimigo ai mbirale mbira tagira ibulebira laramiligo tinaga bi ogoni henene ndo ke howa laga kami. Tigua wali agali bu karuhondo lamialu lalu, Bi ogo Anduane Homogonaga bi larama lalu latagi haramiligo ina bi uruni tigua latagi halimu lalu nalangi ndobe.

<sup>8</sup> Anigo i Anduane Homogo Bibahende Haru Haame Ho Haga kogo ina tihondo bi larogo hale hadaba. Tigua bi mana latagi halu wali agalihondo lamialu de gandeba handarima lalu kamiru henene ndo lalu kamigoni. Tigua wali agalihondo ke harimigonaga ina ti baba keba timbuniore ho kogoni. <sup>9</sup> Bi mana latagi haga kama lowa ke halu laramiligo de gandeba handarima lalu henene ndo laramiligobi ina ti pani nai halimulo ngule kogoni. Inaga wali agali mo ngoaiho kangi ti heba mandagi naholeberemi. Ani bialu Isaraele wali agali bibahendenaga mini mbugaha gilibu ngagoria tinaga minibi nawulebiraore. Ti bo taliatagi harogola Isaraele dindiha lone dai nabuleberemi. Ani beremingi tigua i Anduane Homogo Bibahende Haru Haame Ho Haga kogo henedane manda buleberemi, laya lene.

<sup>10</sup> Agali ke howa bi mana latagi haga karume inaga wali agali bu karu mo hondo haga ka. Tigua wali agalihondo lamialu lalu, Mbirale bibahende bayale dege wiai kagoni, laga ka. Anigo mbirale bayale nawiore ndobe. Inaga wali agalime pabe biyago nde hongo nahe haradagua bida. Anidagua bidagoria agali ke howa bi mana latagi haga karu tigua wai pabe ogoni beni pele hiradambi halu howa lalu, Pabe hongoheoreda, laga ka. ✧ <sup>11</sup> Ani laga kago ai agali ke howa bi mana latagi haga uruni tihondo ogodagua labe. Wai pabe o kagoni gialapaya bulebira. Ina iba dalu timbuni ibilalu dalu dindi kuni timbuni pabe ogoriani ibira halu puyabu hongoheme pabe bo gialope helolebero. <sup>12</sup> Ani biragola wai pabe kago podope haragola wali agali bibahendeme tihondo lalu, Tigua wai pabe ogoni hongoheda larimigo hongo naheda. Tinaga beni pele hirarimigome ina wali agali mo hondo heneda, lolebira laya lene.

<sup>13</sup> Anduane Homogo Bibahende Haru Haame Ho Haga kagome bi ogodagua laragoni. Ina keba timbuniore ho kogome ina iba dalu timbunibi dindi kuni puyabu hongohedi ibalu wai pabe ogoni bo gialabaga biai helonaga anidagua ibilolebero. <sup>14</sup> Ani bialu ina

agali ke howa bi mana latagi haga biarume wai pabe beni pele hirini kago bo gialo wahai harogola wai pabe gialabaga bu wulebira. Ani bidogola pabe henegoria dindi dege wulebira. Pabe podope harangi tí bibahende podo bai holebira. Anidagua birago hondowa tígua Anduane Homogo iniore henedane hondoleberemi larogoni, laya lene.

<sup>15</sup> Isaraele wali agaliru-o i keba timbuniore kogo ainde ina wai pabe ogoni bo gialo wahai halu bi mana ke howa latagi haga agali hearume pabe beni peleme hiradambi haga karu tinibi pani nelu mialu bo wahai holebero. Ani buwa ina tihondo langero. Ai pabe biago bo gialapaya biai halu pabe ogoni beni hiraga biarubi homai haya lalu langulebero. <sup>16</sup> Ke howa bi mana latagi haga agali uruni tigua Yarusaleme wali agali hearuhondo lamialu lalu, Mbirale bibahendeore bayale wiai ka, layago bibahende bayale ndo wiagola howa leneya. Ani wiagola ina mo ko hai harugoni. I Anduane Homogo Bibahende Haru Haame Ho Haga kogo ina bi o ledogoniore, laya lene.

*Wali hubibi biaga berearu Anduane Homogohanda talinigo ogo*

<sup>17</sup> Anduane Homogohanda lalu, Dindiali-o Isaraele wali maru bedarume tini hangume manda bialu mbirale ogoale bulebira laga bedaruni talibe. Tigua bi laradaruni tininaga miniha howa tagira ibirago dege latagi haga bedagoni. <sup>18</sup> I Anduane Homogo Bibahende Haru Haame Ho Haga kogome bi ogo ina wali urunihondo lamibe. Wali uruni tí ko biagaore bedamigo tíha mo ko holene íbu wulebira. Tigua hubibi nu emene mbira aga pume buwa wali agalinaga gi pagida ngagoha ya do helaga beremili. Ani bialu agame nu tangi buwa hubibi ogoniha wia haga beremili. Tigua hubibi o beremidagoni irane tí honghe halu mendealigo bope howa tí andaneha bedagola tígua handayaho holenaga hubibi ani biaga bedami. Wali bedemiruni tígua tíni dege mitangi bialu inaga wali agali maru mo ko halu maru mo bayale halu bulene hamelo bedemigoni ndobe. Títime mandabu handalu kamiria mana ogonibi bialu bedemigo bayaledabe. <sup>19</sup> Tigua wali agali bu karuhondo ke howa ti mo hondo halu, Iname Ngode Datagaliwabenaga bi mana latagi halu kama, laramili. Anigo bi ogoni henene ndoyago. Tigua i yo handalu inaga mini mo dindiha holenaga laramili. Tigua hubibi bialu wali agali maru homolene nawini homelo bo wahalu maru bayale ndo ko biaga karu nahome bayale helo biamogo beremili. Anidagua beremigola wali agalime tinaga mana ogoni hondowa ti turu howa tihondo mberedi emene gaibini mbira balawa balime wabini mende lowa ogoni labome ti yolo biragola tígua nde mana ko uruni biaabo haga bedami.

<sup>20</sup> Anidagua biaga kamigo ai i Anduane Homogo Bibahende Haru Haame Ho Haga kogo ina bi ogo laro. Tigua wali agali mende kago bope halu handaya ho holenaga hubibi gi pagidaha yaramiligo hondowa i turu nahe ko. Wali agalime ega gono wiagadagua tígua wali agali mendeali kago hubibime bope ho helowa handayaho haga kamigonaga i manga ho kogoni. Wali agali tígua handayaho kamiruni tí andaneha haabo nahelonaga ina tinaga gi pagida budu waholebero ndobe. <sup>21</sup> Ani bialu hubibi biaga nu tangi haguani dambi haga biago bibahende mo wahai holebero. Ani berogola inaga wali agali tí andaneha hayaruni ibida pelonaga ina tinaga hongo bope ho helolebero. Anidagua berogola tígua i Anduane Homogo heneneore henedane manda buleberemi.

<sup>22</sup> Tigua ke howa bi dewa lalu haramigome wali agali bayale bu hearunaga mini mo luluya harimi. Ani birimigo wali agali uruni mo ko helo hame naledogo tígua mo ko harimi. Ani bialu tígua wali agali ko biaga bu karu bayale helo biamogo nabirimigo tinaga mana ko biaga wiaru yu wanahe biaabo halu kagoni ndobe. Tigua mana ko bialu hagaru yu wahenedale nde tini bayale kale. <sup>23</sup> Anigo tígua wali agali karuhondo ke howa mani bulebirationaga mbiwia haramilirubi de gandeba handarima lalu henene ndo laramilirubi uruni mani nabilimulo áyu biba helarogoni. Inaga wali agali inime haru dai berogola tí andaneha naholebira. Ani berogola ini Anduane Homogooore henedane manda biai holeberemi, laya lene.

## 14

### *Mbirale gime wabini ngaruhondo bi pupu wulene nawi lenego ogo*

<sup>1</sup> Isaraeleali agali haguane maru hearu tiha genda mbira wu howa tigua iha birapara howa lalu, Anduane Homogonaga hame ngago hale ha, laya. <sup>2</sup> Ani layagola Anduane Homogohanda ihondo langialu lalu, <sup>3</sup> Dindiali-o agali uruni tigua dama mitangi bialu mbirale gime wabini ngaruhondo bi pupu wiaabo haga kagome tiha ko timbuni wu ka. Anigo tigua mbirale gime wabini uruni gubalini timbuni ho howa yu waholene hame nale ti bame dege ibu bedago tigua ihondo bi hale harago ina ladai bulebero mitangi bu bedabe.

<sup>4</sup> Anigo áyu agali haguane uruni tihondo Anduane Homogo Bibahende Haru Haame Ho Haga kogo ina bi o larogo tihondo lamibe. Isaraeleali mbirame dama mitangi bialu mbirale gime wabini ngagohondo bi pupu wulene mo tene howa ibuha ko ngago yu waha nahe Anduane Homogonaga bi mana latagi haga kagohondo inaga hame ngogo hale ha lama ibiyagua nde ina ibuhondo bi mbira lamulebero. Ibugua dama mitangi bialu gime wabini dewa ngaruhondo bi pupu wulene mo tene hayagonaga ina hongo howa ladai bulebero. <sup>5</sup> Isaraele wali agali bu karu tigua dama mitangi bialu mbirale bi pupu wule gime wabini ngarume ti mo koore hayagola i erembira ngialu piai hene. Ti ani biyagoyu ina inaga hame ngodagua ladai berogola tigua manda biyagua nde gime wabini ngaru wahalu puwa ini hangu mitangi bialu holoba bada.

<sup>6</sup> Anidagua bulebirago áyu nde ina Isaraele wali agalihondo bi ogodagua lolene hameledo. I Anduane Homogo Bibahende Haru Haame Ho Haga kogo ina tigua dama mitangi bialu mbirale gime wabini ko ngubi ngarunihondo bi pupu wirimigo wahalu ini koria dai bilimu laro.

<sup>7</sup> Agali mbira ibu Isaraeleali heaguabi dindi tarali tí heba ibu hene heaguabi mbi-ragome i erembira ngialu mbirale gime wabini wiaruhondo bi pupu wialu ibu mana konaga tene ngago yu waholene hame nale howa inaga bi mana latagi haga kagohondo inaga hame ngogo hale hole ibiyagua nde i Anduane Homogo ini hameore ngogo ibuhondo walia holebero. <sup>8</sup> Ina nde ibula waitigi halu Isaraele wali agali tí heba nahelo bo taliatagi helolebero. Ina o biagohondo ani berogola tí bibahende kamirume ini Anduane Homogo henene henedane hondoleberemi.

<sup>9</sup> Anigo agali inaga bi mana latagi haga kagome inaga hame ogobi nga lalu ke halu latagi helo mbiralime ibuhondo bime ladebodebo biyagua ogoninaga irane inime ibunaga mini mo libilabalo heledogola ibugua bi ogoni latagi holebira. Ani latagi haragola inaga wali agali bu karu heba mandagi nahelo ina ibu bo taliatagi halu mo ko holebero. <sup>10</sup> Ina agali bi mana latagi haga biagobi agali mende bi hale hole ibaga biagobi libu haru pani ogobi labolabo nelu mulebero. <sup>11</sup> Ina ogonidagua bialu Isaraele wali agali tigua ihondo erembira nangilimulobi mana ko nabilimulobi inaga deni tí dodo nahe halimulonagabi hariga hangai halu anidagua bulebero. Anidagua berogola tí inaga wali agaliore holeberemi. I nde tinaga Ngode Datagaliwabeore holebero. I Anduane Homogo Bibahende Haru Haame Ho Haga kogo ina bi o ledogoniore, laya lene.

### *Anduane Homogohanda wali agali mbira mbiranaga ko ngaru hendedago ogo*

<sup>12</sup> Anduane Homogohanda ihondo langialu lalu, <sup>13</sup> Dindiali-o wali agali dindi mbira mbiraha haga karume mana ko bialu ihondo erembira ngialu mbirale tara mitangi bialu mo dununi hayagua nde ina dindi uruniha bu karu tinaga tomo nolene bereba halu hina gari pelolebero. Ina wali agalibi tinaga nogo tara tara bu karubi bibahende tomo nolene bereba halu homai helolebero. <sup>14</sup> Noa Daniele Yobo imaru agali tigabi

uruni dindi ogoriani kale tigua mana bayale biyagome tini hangu nahome kale. Anduane Homogo Bibahende Haru Haame Ho Haga kogo ina bi o ledogoniore, laya lene.\*

<sup>15</sup> Anigo ina wali agalinaga tomo nolene bereba holene ndo waharuyagua nde nogo gabuame wali agali dindi ogoniha karu bo wahai helo ibilolene manda bulebero. Anidagua berogola wali agali mbira dindi ogoniha polene gi howa napolebira. <sup>16</sup> Noabi Danielebi Yobobi dindi ogoniha henedale ti ani helowa tigua tinaga waneigini bu karubi mo wia nabi homai dege kale. Tebirali uruni tini hangu pele midale. Anidagua biragola dindi hangu ibira halu embera timbuni ngale. I Anduane Homogo Bibahende Haru Haame Ho Haga howa Ngode Datagaliwabe haluhe heneneore kogobi ina bi ogoni heneneore ledogoni.

<sup>17</sup> Ani ndoyagua nde ina waitigi bu karu ibilalu waitigime wali agalibi nogo tara tara bu karubi bibahende bo wahai helo ibilolene manda bulebero. <sup>18</sup> Ani berongi Noa Daniele Yobo imaru ti dindi ogoriani henedalebi tinaga waneigini mo wialu biamogo bibe nahe dege kale. Agali tebira urunime tini hangu bayuwa helalu wali agali bibahende homai holene ngale. I Anduane Homogo Bibahende Haru Haame Ho Haga howa Ngode Datagaliwabe haluhe heneneore kogobi ina bi heneneorego o ledogoni.

<sup>19</sup> Ani ndoyagua nde inaga miniha tandaga timbuniore ho kogo ereba helonaga warago ko taraore dindi ogoniha ibilalu wali agalibi nogo tara tarabi bibahende bo wahai holene manda bulebero. <sup>20</sup> Agali tigabi Noa Daniele Yobo imaru ti dindi ogoniha henedalebi nde tinaga waneigini mo wialu biamogo bibe nahe dege kale. Agali tebirali uruni ti mana bayale biyagome tini hangu nahome kale. I Anduane Homogo Bibahende Haru Haame Ho Haga howa Ngode Datagaliwabe haluhe heneneore kogobi ina bi heneneorego o ledogoni.

<sup>21</sup> Anduane Homogo Bibahende Haru Haame Ho Haga kogome ina bi ogodagua laro. Ina mbirale mo ko holene koorene ko tara tara maria uruni Yarusalemeha ibilalu wali agali bu karu pani mialu bo wahai helo ibilaga bulebero. Ina waitigi ibilalubi hina gari ibilalubi gabua tara tara bu karume bo nelu ibilalubi warago ko ngaru ibilalubi urunime wali agali bo wahai helo ibilaga bulebero. Ina uruni ale ibilarogome wali agalibi nogo hinini tara tarabi bibahende bo wahai holebero. <sup>22</sup> Anigo ai horo ogoningi Yarusaleme wali agali maru homa nabi heagua nde ti i kegoria ibiyagua tigua mana ko bialu haga ngago inime panigi hondolebere. Ani hondowa ina ti dara nahabe. Yarusalemeni wali agali tigua mana ko taraore bialu haga wiago hondowa ina ti pani mialu mo ko holene ibilarugo ogoni tigatigaore binida lo manda bulebere. <sup>23</sup> Ani bialu ina ti mo ko howaore pani nelu muleberogo bame ndo irane wiagola pani nelu minida lo manda bulebere. I Anduane Homogo Bibahende Haru Haame Ho Haga kogo ina bi o ledogoniore, lalu Anduane Homogohanda Esegiele ihondo laya, lene.

## 15

*Anduane Homogohanda pu mbira lini daga mini gerebi iranenaga bi yobage lalu lenego ogo*

<sup>1</sup> Anduane Homogo ibugua ihondo bi lalu, <sup>2</sup> Dindiali-o pu mbira lini daga mini gerebi kagoni ira mbira ogobi kabe. Gerebi pu ogoni ira maru irabuha bayale karubi kabe. <sup>3</sup> Gerebi irane ogonime mbirale galone mbira bibebebe. Gerebi gene mbirago dibalu todobene be delolenaga gemboge hangubi wabibe naheore. <sup>4</sup> Pu gerebi lini daga ogoni dibalu ira delo irani delolene hangu karulape nga. Ani bialu irani deledagola nguini labolabo dowa dombeni tigrini nade wiagua nde ogonime yamialu galone mbira

\* **14:14:** Noanaga te mbuga Pigane Binigo 6-9 wialu Yobonaga tebi Danielenaga tebi libuninaga mbuga ngagoha gilibu nga. Ai te ogoriani gilibu ngago agali marume agali timbuni mini lene mende henego ibu mini Danele ogoni ibunaga te gilibu nga bada manda biaga. ☆ **14:21:** Mo 6.8

bibehebe. <sup>5</sup> Pu ogoni irame da nabi wiagolabi galone nabulene dege wini. Anigo irame dayagola ai mo koore hene galone mbira bibe naheore wiaga ndobe.

<sup>6</sup> Anduane Homogo Bibahende Haru Haame Ho Haga kogo ina bi ogodagua laro. Ina ira maru irabuha karu helowa gerebi irane hangu ira delolene manda birudagua ina Yarusaleme tanoha wali agali bu karuhondo pani mulebero. <sup>7</sup> Ina ti baba waitigi halu ti minu bai holebero. Ira pigane dayagome ti da nabigo ainde ira halu mende daragome ti daiore holebira. Ina ti pani nelo miai harogola ibi Isaraele wali agali maru karu tiguabi ini Anduane Homogo heneneore heneda lo manda buleberemi. <sup>8</sup> Yarusaleme wali agali tigua i erembira ngialu ihondo mini bilina naheore hayagonaga ina tinaga dindi ngago mo ko halu dindi yamo embera hangu ngelolebero. I Anduane Homogo Bibahende Haru Haame Ho Haga kogo ina bi o ledogoniore, laya lene.

## 16

### *Yarusaleme ibu walime agalini yu wahalu piagagobi nga lenego ogo*

<sup>1</sup> Anduane Homogohanda ihondo laabo halu lalu, <sup>2</sup> Dindiali-o ina puwa Yarusaleme ibu mana ko ngaru bialu hayarunaga lamialu bi hongo howa lamibe. <sup>3</sup> Anduane Homogo Bibahende Haru Haame Ho Haga kogo ina Yarusalemehondo bi larogo ogodagua lamibe.

Yarusaleme iore wali ko aba aiyala mana ko biaga wane biragagobi i ngegoni. I aba ibu Amoroali halu i aiyala ibu Hidi wali berene. Ini Kenana dindi howa taba henenege ngegoni. <sup>4</sup> I aiyahanda taba hanayangi inaga lumbipu napode helene. I ibame wayawaya balu doma nabi wahalu tinginini marasiniru ibimebi hai nahe wahalu agame mo kabu nabi ngelo wahalu biniya. <sup>5</sup> Mbiralime i dara halu o larogoni damenego mbira nabioire winiya. I taba hanayangi howa tigua i gubalini naheore howa bameore taniha hono wahalu piyaya.

<sup>6</sup> I hariga ibalu handalu hewaria i ona wiaria handa walia haru. I ayu dege aiyahanda hono wahalu pene darama bagabi ema bialu wiria handaru. Ina i homabelo hame nale howa ina lalu, <sup>7</sup> iore homa nabi bayale anda halu mbirale eganeru bayale taraore anda hagadagua i anda halu timbu luni halu wandari bayaore birabelo handayaho howa biamogo biru. Ani biwagola wandari mabuage halu andu ibalu mandari bayale anda ho birari. Ani bira biruwa dege aga mbira nabi i ti babe biraabo harigoni.

<sup>8</sup> Ai i dai buwa handalu hewaria i agali pobehe berego handaru. Ani berego hondowa inaga aga tohe dagarenaga biaga mbirame i ti babe berego bia dambi helaru. Ani buwa ina ila habo nalolene bi mbira lo wialu i i one birabelo dabu buliya lalu lo wiru, lalu Anduane Homogo Bibahende Haru Haame Ho Haga kago ibugua bi ogoni lene.

<sup>9</sup> Ibugua lalu, Ina iha darama heago ibame waya waya bo wahalu ira olibe lini ibane baya wiago yuwa inaga tingini hai haru. <sup>10</sup> Ani buwa aga bayale tara gime yari bialu wabu wiagobi inaga ge su nogo dongone bayaleme wabini wiagobi mo karula haru. Ina i mo yari bia halu aga bayaleme inaga emboneni heda ale wialu inaga aga luni bayaleore wiwago mo ngialu biru. <sup>11</sup> Ani bialu yari bulene tara tara wiaru mo ngiaiore haru. Gi pagida gurubu geleme bene mo ngialu ma gagua wiarubi mo ngiru. <sup>12</sup> Ani bialu nguira dolenebi hale ira dolenebi mo ngiai halu biru. Ani buwa kuini walinaga manda baya tara wiagobi inaga hagianeni mo karula halu biru. <sup>13</sup> Ani birugola ini yari bulene ngolobi silibabi dewaore wuwa inaga aga baya taraore pu bayale mbirame wabinigoria yari tara tararuhe wirigobi ina dege mo ngiru. Ani bialu tomo nabelo mberedi balawa bayalerume wabini wiarubi mone taranaga ibane dendebiorebi ira olibe lini ibanabi i tomo uruni nalu birabelo ngiai harugome i wandari baya taraore mbira biruwa kuini wali birarigoni. <sup>14</sup> Ani bereria wali agali dindi bibahendeha hearume hale halu hearia i wandari baya taraore mbira beda lene birari. Inime i mo yari bia harugome ani



birarigoni lalu Anduane Homogo Bibahende Haru Haame Ho Haga kago ibugua bi ogoni lene.

<sup>15</sup> Ani birugola ina mitangi bialu heria i bayaleore ani berene bedolo mitangi bu bedegoni. Ani mitangi bu bedegola agali bu karume iore hame laiho kagoni. Ani kagola i nde baya tingi howa mine halu agali i bederia ibiraru baba tanabi kayu yu paliai hariya. <sup>16</sup> Ani bialu howa inaga aga bayale wiriruni mo yalu puwa mbirale dama mitangi bialu bi pupu wiaga gime wabini ngaru mo yari bia hari. Anidagua birigome agali maru ta nabi hearu ti ini baba kayu yu palue dindi ogoniha ibilonaga ndole bialu harigo mana ogoni ko ngubiore bialu bayanda wali harigoni. <sup>17</sup> Ani bialu muni ngolo silibaru ini yari bibelo ngirugo mo yalu puwa ogonime mbirale dama agali ka mitangi bialu wabu helowa ogonila mana ko wiaru bialu birari. <sup>18</sup> Ani buwa ina i aga yari tarahe mo karula harugo mo yalu puwa mbirale dama agali ka mitangi bialu bi pupu wule wabu helene biago aga uruni mo karula hari. Ira olibe lini ibanebi ira hagua nga bilo delaga inisenesiru ina ngirugobi mo yalu puwa mbirale gime wabini urunihondo bi pupu wialu lomabu delole piri. <sup>19</sup> Ina i tomo bayaleru nalu birabelonaga balawa bayalerubi olibe lini ibanerubi mone taranaga ibanebi ngirugoni. Ai tomo uruni mo yalu puwa ini mo turu helonaga mbirale dama mitangi bialu gime wabini wiarunaga lomabu mule mo yalu piriya, lalu Anduane Homogo Bibahende Haru Haame Ho Haga kagome bi ogoni lene.

<sup>20</sup> Anidagua bialu iyanaga waneigini hono wiribaru haru halu puwa mbirale dama mitangi bialu gime wabini wiaruhondo bi pupu wialu bo lomabu mule pugu birigoni. Wali agali kayu yulene mana ko ngubiore ngago ini manda birigo buwa inaga bu miniha ogonime nakarulape degedagola ini mo ko timbuniore holenego garibilo bedegoni. <sup>21</sup> Ai mana ko ngubiore ogoni bialu birulene hamelo biruwa inaga waneiginiru bu hearubi mbirale dama mitangi bialu gime wabini wiaruhondo bi pupu wialu bo lomabu delai harigoni. <sup>22</sup> I galiore hono wahene burupaleore ona wiria ina ogodagua mo mondo bialu hene lalu ini langirugo hale howa nahalehe tingi halu puwa agali kayu yama ibaga bialu mana ko ngubiore ngarubi bialu biraabo haga bedegoni. Horo ina i handa walua harudangi i daramame dohego ona ema bialu wiria handa walua haru lalu langirugo mitangi nabi dege bedebe, lene.

### *Yarusaleme bayanda wali ale lenego ogo*

<sup>23</sup> Anduane Homogo Bibahende Haru Haame Ho Haga kagome laabo halu lalu, i keria mo ko holene ibulebira laro. Ina mana koorene ko uruni biai halu <sup>24</sup> hariga tene wiaruha pialu mbirale dama mitangi bialu gime wabiniruhondo bi pupu wulenaga anda bu helowa anda uruniha wali agali kayu yu paliaga bule bu helarigoni. <sup>25</sup> Inime i wali bayaore bedogonida lowa ina agali i bedegoria pu bolangua hole poraru olalu ibu laga bialu inila kayu yu paliaga biruwa iha mana ko ogoni bulene bolanguaheore bedegoni. <sup>26</sup> Iyibiali tiha mana ko bulene miniha didi halu bolanguahe kaware hearu tigua ibalu inila kayu yu palelo hadape ho bedegoni ndobe. Ina i mo keba holenaga agali kayu yama ibaga bialu biraabo kegoni.

<sup>27</sup> Abale ina ani dege bialu berenego ai ina inaga mbirale bayale damene inime ngini yu bereru bibahendeore mo wahai haru. Ani bialu Pilidialirume i hame nale halu inaga mana ko bialu biraga wirunibi handabe manga timbuni haga karu tigua i mo ko helo ina ti ibilarugoni.

<sup>28</sup> Agali i baba kayu yu paliaga biaruni bibahendeme inaga hame wigo nakarulape degeyagola ainde Asiriali hearu baba kayu biri. Ani bialu bereria Asirialiru tiguabi inaga hame biba nahe dege. <sup>29</sup> Ani dege wigola ai Babilonoali agali biyinaya biaga hearu baba kayu biaga wali iore birarigoni. Ani bialu heriabi inaga hame wigo biba nahe dege wiaabo ho nga.

<sup>30</sup> Anigo Anduane Homogo Bibahende Haru Haame Ho Haga kogo ina ihondo bi mbira langero. Ina mana ko uruni dege bialu biraabo kegome ai mana ko ogoni bulenego i bayanda wali taga nahaga elaheore bedegoni. <sup>31</sup> Hariga tene wiaru bibahende ha mbirale dama mitangi bialu bi pupu wiaga wiaruhondo bi pupu wulebi wali agali kayu yu paluenebi anda dewaore bu helama pede. Ani bialu i bayanda wali maru bedarubi ndo bede. Marume agali kayu biragome muni mbiraleru migi birago mo yagago ina ogonidagua agali kayu yalu howa tihondo muni mbiraleru ngi lalu mo yulene hame nale bede. <sup>32</sup> I walime ibu agalini gubalini nahe yu wahalu puwa agali tara bu karu baba kayu yama ibaga bialu biragagobiore bede. <sup>33</sup> Bayanda wali bibahende bedarume tinaga yolo mirago mo yaga beda. Anigo i ogonidagua nabiaga biruwa agali dindi bibahende ha bu karume i baba kayu yu palue ibilonaga ina ti mo turu halu mbirale bayaleru bame mo miriliya. <sup>34</sup> I agali mbirame mo bayanda wali berelayagola berene ndo i taraore bede. Inimeore biraro lalu mbira ani bedane nahendene ale tara mbira i biruwa agali kayu yaregonaga yolo mo ya nabiaga biruwabi agalime i kayu bilonaga inime agali yolo biaga bedegoni. Heneneore bayanda wali nahendene ale taraore mbira i bedegoni, lalu Anduane Homogohanda lene.

*Anduane Homogohanda Yarusaleme bo haealabaga bialu mo ko holebira lenego ogo*

<sup>35</sup> Anduane Homogohanda laabo halu lalu, Bayanda wali Yarusaleme-o ina bi larogo baya hangu hale habe. <sup>36</sup> Anduane Homogo Bibahende Haru Haame Ho Haga kogo ina bi ogodagua laro. Ininaga aga golo wahalu ini tingini agali i dimagoli haga bu hearuha ya edede bima ibaga bialu birariya. Ina mana ko ngubi uruni bialu biruwa mbirale dama mitangi bialu gime wabini wiaruhondo bi pupu wialu ini ti mirigoni. Ani buwa inaga waneiginirubi balu dama mitangi bialu gime wabini urunihondo bo lomabu mirigoni. <sup>37</sup> Ai inaga agali nenege uruni bibahende ina gubalini ho henebi maru hame nale hearubi bibahende mo mogo bialu ini bedegoria ho mabu bule ibilolebero. Ani ibilalu ti i bederia ho mabu bu helalu tinaga deni howa inaga aga bibahende golo wahai harogola aga nabiore bame ti babe holebere. <sup>38</sup> Ina dabu binigo mana pugualubi wali agali dewaliore homelo bo wahai harigonibi uruni bialu harigonaga ina ihondo keba timbuniore halu i manani ibu helowa dabaki halu ko bialu haridagonaga i homabelo bo waholebero. <sup>39</sup> Inaga agali nenege uruni tigua i mo ko holebira. Tigua ina dama mitangi bialu mbirale gime wabiniruhondo bi pupu wulenaga anda i agali kayu yu paliaga bu helariruni bibahendeoreme bo giallo wahai holebira. Ani bialu tigua inaga aga bayale bu bederubi ma gagua wu bederubi gi pagidarubi ina yari bu bederuni bibahende minu golo wahaiore haragola ina lone mo karulolene mbira nawi ti babe ona birulebere.

<sup>40</sup> Inaga agali nenege uruni tigua wali agali bu karuhondo ndelo miragola tigua i ege toleme balu wai biaga ayu tibume dibalu inaga tingini poda bagabu waholebira. <sup>41</sup> Ani buwa tigua inaga anda bu helederu bibahende bo heda hai haragola wali dewaore biru ngarume iha mbirale o bulubadaruni hondolebira. Ina mana urunidagua bialu agali bu karu i andagaha i la yu paliaga bilo ndole bialu mbirale mbirale tihondo mialu ala birilidagua lone nabibelo ina yupe naholebero. <sup>42</sup> Anidagua berogome ina keba ala harugo mo ereba halu inaga bu miniha mo palia halu inaga keba holenebi henge lolenebi lone nawulebira.

<sup>43</sup> Ina i wandari mabuage berengi howa biamogo bialu handayaho hama ibirugo ina uruni birugo mo embeda halu mana ko dewaore bialu biraabo harigoni. Anidagua birigome ina i mo keba hari. Anigo ina mana ko timbuniore bialu harirunaga pani nabelo ngirugoni. Ina mana ko dewaore uruni dege ndo ina agali bu hearu baba kayu

yu palima ibaga bialu harigome biatago harigo aginaga biribe, lalu Anduane Homogo Bibahende Haru Haame Ho Haga kagome lene.✧

*Wandarime ibu aiyana mana ngago taliaga lenego ogo*

<sup>44</sup> Anduane Homogohanda laabo halu lalu, Yarusaleme-o wali agali mani holebiraru tigua í mo ko hene ngago de hondowa, Wandari ibu aiyana mana hangu talialu biraga o bedagoni, lolebira. <sup>45</sup> Heneneore ínaga mana berego handalu karia í aiyaga hagirume bialu biraga ngagobi dege bialu bederia hendedogoni. Í aiyaga ibu agalini waneiginirubi hame nalaga berene. Í hagibunirume ti agalini waneiginirubi handabe manga ho biragadagua í bedegoni. Í aiyaga ibu Hidi wali biralu í aba ibu Amoroali halu binigo libu wane í bedegoni.

<sup>46</sup> Dindi abene uyurayagi Samaria tano ngagoni ibu í hagibuni wahene nga. Tano emene maru wu mabu bidaru ti ibu waneru ale nga. Ani bialu dindi abene unurayagi Sodomo tano ibu í hagibuni heyogone ale wialu tano emeneru ti ibu waneru ale nga. <sup>47</sup> Abale í hagibuni kira ogonilabo libugua mana ko ngaru hangu bialu biraabo hagadagua ínabi nde ogoni talialu birida. Anigo ai ínaga mana ko biaga ngegome ínaga hame wigo biba nahayagola ina mana ko timbuniore ngaru abaleore lone biatago halu í hagibuni ogoni labome bialu berene ngarubi nira dege lowa bu bolangua harida.

<sup>48</sup> Í Anduane Homogo Bibahende Haru Haame Ho Haga kogo ina Ngode Datagaliwabe haluhe heneneore kogobi íhondo bi heneneore ogodagua laro. Í hagibuni Sodomo halu ibu waneiginirume mana ko áyu ini heba í waneiginirume bialu bedamigonidagua ndo bialu berene. <sup>49</sup> Ibunibi ibu waneiginirubi ti tomo dewa karulape nalu howabi ti wai nabi bayale biragabi henegoyu tigua mine halu maru hearu mbirale nawi tubagiho hearia handayaho nahagabi mbirale mia nabiagabi hene. <sup>50</sup> Tinaga miniha giambe howa mine tara haga hene. Tigua mbirale ina hame nalaga wiaru bialu haga hene. Tigua mana ko uruni bialu heago hondowa ina ti bo wahai harugo í manda bu ke.

<sup>51</sup> Samaria ibuguabi nde mana ko dewaore áyu ina bialu bedarunidagua nabiaga hene. Ai mana ko ina bialu bederuni ko ngubiore í hagibuniru tigua bialu hayago bolangua howa bialu bedegoni ndobe. Mana ko ina bini í hagibuniru tigua binirubi mo mandabu handalu keria ina binigo ko timbuni ngubiore bialu tigua biniru bame degedane hondolebere. <sup>52</sup> Ai ina mana ko damene bini ngeru baba í hagibuniru tigua bini ngaru baba mo manda bu handalu koria íha ko timbuniore í hagibuniru tiha ko mbira nawi beda labehedane hendedogoni. Anigo ina birirunaga taga timbuniho birulene nga. Inime mana ko tagabi wiaru bialu birarirunaga pani áyu noleberegó ini miniha genda yuwa tagaho birabe, lene.

*Sodomo Samariala lone mo bayale holebira lenego ogo*

<sup>53</sup> Anduane Homogohanda laabo halu lalu, Yarusaleme-o áyu í hagibuni kirali Sodomo Samariala libu waneiginirubi heba bibahende mo ko hai hene ngagoni. Anigo mani ina libu lone mo bayale holebero. Ina íbi mo bayale dege helarogola tí haru mandagi bayale holeberemi. <sup>54</sup> Ani howa inime mana ko bialu birarirunaga taga halu birulebere. Ani bedego hondowa í hagibuni kirali biagolabo libunaga ko genda wiyaru bame degedane hondolebira. <sup>55</sup> Ina libubi libunaga waneiginirubi biamogo berogola ti bayale abale haraligobi lone hadai bulebira. Inibi í waneiginirubi tinde abale bayale haramiligobi dege lone hadai buleberemi. <sup>56</sup> Abale í wali bayale bedobe toba howa mine ho biralu ina Sodomo ibu wali ko bedago mitangi bialu oba ho birarigoni. <sup>57</sup> Í ani mine ho berengi mana ko ina bialu wiriru mo pani nahe birari. Ai mana ko bialu birarigo uruni pani ho ngagola ina Sodomohondo oba haridagua wali agali maru bu karume í de hondowa oba halu ka. Idomo wali bedarubi Pilidia wali bedarubi wali maru kaware

✧ 16:43: Iba 78.42, Ese 9.10, 22.31

bedarubi tigua í wali ko ngubi mbira o bedagoni lowa hondo mege bialu beda. <sup>58</sup> Ani biragola ina mana ko bialu agali kayu yama ibaga bialu birarigonagabi mana ko maru bialu birarigonagabi taga pani nalu genda yu birabelo mo ngulebero, lalu Anduane Homogohanda bi ogoni lene.

*Anduane Homogonaga habo nalolene bi gahenge wiaabo holebirago ogo*

<sup>59</sup> Anduane Homogo Bibahende Haru Haame Ho Haga kagome laabo halu lalu, Yarusaleme-o ina ihondo bi mende langule yidogo. Abale í wandari mabuage berengi inaga habo nalolene bi mbira íla lo wirugoni. Anigo bi ogoni lo wirugo ina mo nagalone halu puguarigoni. Anidagua birigonaga ina ihondo mana ko ini birigonaga pani nabelo karulapeore ngulebero. <sup>60</sup> Ani bialu ala í boga nabi wandari hibaria berengi ina íla habo nalolene bi lo wirugoni embeda nahe bulebero larudagua biaiore holebero. Ina habo nalolene bi gahenge íla lo werogola bi ogoni wiaaboboore wulebira. ✧ <sup>61</sup> Ani bialu í hagibuni wahene heyogonebi kirabali ogoni labo ini bedegoha haru daibu berelarogola ini wane aleore bu hinu birulebere. Bi áyu larogoni habo nalolene bi lo wirugoha nale winigo ai ininaga hameme ani bulebero. Ina ani berongi ina mana ko bialu birariruni mitangi bu dai buwa ini taga timbuni halu birulebere. <sup>62</sup> Ina habo nalolenenaga bi gahenge lo wia aribia harogola ina i Anduane Homogoore henedane hondolebere. ✧ <sup>63</sup> Ani hondo bedegola ina inaga mana ko bialu birariruni bibahende mo embeda halu wahai holebero. Ani berongi ina inime mana ko biaga wirigo mitangi bu dai bialu taga timbuni howa bi lolene mbira labe nahe bi biba hene birulebere. Anduane Homogo Bibahende Haru Haame Ho Haga kogo ina bi ogoni larugoni, lene.

## 17

*Ega bodo hariawe kirala gerebi iranella bi yobage lalu lenego ogo*

<sup>1</sup> Anduane Homogohanda ihondo lalu, <sup>2</sup> Dindiali-o ina Isaraele wali agali bu karuhondo bi yobage mbira lamibelo hameledo. <sup>3</sup> Bi ogo Anduane Homogo Bibahende Haru Haame Ho Haga kogome tihondo larogo manda bilo lamibe. Ega bodo hariawe timbuniore mbira bereago ogoni ibunaga babagane timbuni yula amunana bialu iriniru yári baya taraorebi berea. Ega odagonime Lebanononaga hari wiaruha yagalo yu pialu ira tamia mbira heagonaga mane puguaya. <sup>4</sup> Pugu yalu agali biyinaya biaga hearu daluha puwa tano mbira wiagoria ngelaya. <sup>5</sup> Ani ngelalu ega biagome lone yagalalu Isaraele dindiha puwa pu mbira lini daga mini gerebi egene emene anda halu heago dugu yaya. Dugu yalu puwa dindi bayale ira anda holene iba dewa bere wiagoha hangaya. <sup>6</sup> Ani hengeagola pu mbira lini daga mini gerebi biagoni anda halu ginigene yuloyu pugu pugu biya. Ginigene uruninaga maneme ega bodo hariawe biago bereagoha anda hadaga haya. Ani bialu ibunaga pini dindiha hongohe anda piai hayagola gerebi irane ogoninaga ginigene yunibi dewaore haya.

<sup>7</sup> Ai ega bodo hariawe timbuni mende berene. Ogoni ibunaga babagane lu timbuni irini dewahe berea. Ani bereagoria pu gerebi biago dindi ibu hayago turu nahe howa ibunaga pinibi gene maganebi ega bodo hariawe mende ogoni bereagohayagi handa dai biai helaya. Gerebi o biagome manda bialu hearia ega mende ogoni ibugua iba dewaore ngulubabe toba haya. <sup>8</sup> Anigo pu ogoni ibuni henedagoha dindi bayaleore wini. Dindi ogoniha iba dewa bialu dindi ibane bere bayaleore wiagoria ibu bayale anda halu gene magane dewaore halu gerebi linibi dewa dalu ibu duniniore mbira habehe wini.

<sup>9</sup> Ani winigo ai Anduane Homogo Bibahende Haru Haame Ho Haga kogo ina mbira ogodagua hale haro. Pu lini daga mini gerebi irane ogoni ibu anda halu bayale holebirabe. Naholebira ndobe. Ega bodo hariawe pigane berene biagome keba timbuni

halu pu ogoni irane heba dugualu gerebi lini dedaru do hilu wahai halu mane anda hama polene kago ni dedagoria mo yogobia holebira. Agali hongo nahemebi hameigini emene karumebi gerebi irane ogoni duguabehe bame holebira. <sup>10</sup> Pu ogoni ibu dindi bayaleoreni hangayagoyu ainde ibu bayale anda halu timbuni hoa nahaya. Ani biyago puyabu poboyogobiore hongohe ni tagira ibiragohayagi howa ibiragome pu gerebi lini daga biago irane ogoni puloba haragola ibuni ngagoria dege wialu gabu holebira, laya lene.

*Bi yobage layagonaga garea lo minigo ogo*

<sup>11</sup> Anduane Homogohanda ihondo laabo halu lalu, <sup>12</sup> Wali agali dogo halu bi hale nahaga bu karunihondo gerebi ira ogoninaga bi yobage irane manda bidamibe lalu hale habe. Bi yobage o larugonaga irane ogo. Babilonoalinaga kini heagome Yarusalemeni ibalu Yuda kini heagobi ibunaga ami agali haguane bu hearubi bibahende garabaya bu yalu Babilono piai haya. <sup>13</sup> Ibu Yuda dindiha heangi Babilono kini heago ibugua Yuda kini aria mbira heagola habo nalolene bi mbira lowini. Ibugua lalu, Agali ogo ibu Yuda dindiha kini gahenge helo, laya. Ani lowa ibugua kini gahenge ogonihondo ibu Babilono kini kago andaneha haabo hole lalu bi hongohe mbira lowia halu mo lahaya. Ani bialu Babilono kini biago ibuni dalu Babilono dai bialu howa ibugua Yudanaga agali haguane maru hearu garabaya bu yalu haru piai hene. <sup>14</sup> Ibugua ani binigo irane Yuda dindi hongo halu lone irigi nahelobi Yuda kini biagola habo nalolene bi lo wiyago habo nale wiaabo helonagabi ani bini. <sup>15</sup> Ani binigoyu Yuda kini biago ibugua bule lalu bi lo wiyago nabi habo lene. Ibugua Iyibi kini heagohondo bi lo pelalu nogo hosiru haru halu ami agali dewaorebi haru halu i biamogo bule ibalimu, lene. Ani layagome kini ogoni ibu hongo holebirabe. Ibugua Babilono kininaga bi mo wahayagonaga Babilono kini kagome ibalu ibuni pani nelo mialu bolebira.

<sup>16</sup> I Anduane Homogo Bibahende Haru Haame Ho Haga kogo i Ngode Datagaliwabe haluhe heneneore kogobi bi tigatiga larogo. Yuda kini ogoni ibu Babilono garabaya pialu ogoniha homolebira. Ani bulebiragonaga irane ogodagua. Babilono kini kagome ibu kini helo dabo helayagoyu ibugua habo nalolene bi lo wiyago habo lalu Babilono kini kagohondo ogoaleore bule lalu bi hongohe lo wiyagobi habo lalu biya. <sup>17</sup> Ani biyagonaga Babilono ami agali bu karume ibalu Yarusaleme wai pabe kawareni heyu howa wai bulenaga dindi dugu wima irigi halu Yarusaleme ho hagira bulebira. Ani buwa tigua Yarusaleme baba wai bialu wali agali dewaore bo wahai holebira. Ani birangi Iyibi kininaga ami agali hongo gibiorehe bu karume ibalu Yuda biamogo nabibehe holebira. <sup>18</sup> Yuda kini kago ibunime habo nalolene bi lo wiyagobi ogoale buleore lalu bi lo wiyagobi pugualu mo habo layagonaga ibuni pani noleneore wulebira. Pani ogoni nanolenaga ibu ibida polene henge nawulebira.

<sup>19</sup> I Anduane Homogo Bibahende Haru Haame Ho Haga kogo i Ngode Datagaliwabe haluhe heneneore kogobi bi tigatigaore larogo. Ina kini ogonihondo pani mulebero laro. Ibugua habo nalolene bi hongohe lo wialu howa lalu heneneore laro lalu inaga minini howa lo wiyago lo wuwa talialu bulene wiago nabiya. <sup>20</sup> Anidagua biyagonaga ina ibu gono hongohe mbira ngogoha do ngaria hadoleberogo ani hela. Ina ibu Babilono haru puwa pani nelo muleberogo irane ibugua buleore lalu habo nalolene bi inaga minini howa bi lo wiyago wuwa ihondo mini bilina naheore haya. <sup>21</sup> Ani bialu waitigi ibirarume ibunaga ami agali wai mana mandabiore karu ti bo wahai holebira. Ani biragola ami agali maru homa nabi yu wahene hayadaru ti ibida pugupugu bialu piai holebira. Anidagua biragola Isaraele wali agali tigua bi ogo Anduane Homogo inimeore lenedane manda buleberemi, laya lene.

*Anduane Homogohanda Isaraele biamogo buleore lowinigo ogo*

✧ 17:12: 2 Kin 24.15-20, 2 Bit 36.10-13



22-23 Anduane Homogo Bibahende Haru Haame Ho Haga kagome lalu, Ina ira tamia luniore mbira kagonaga mane podowa Isaraele dindiha hari nene daligaore maru karu bolangua haihe kagoria hongolebero. Ani hangarogola ira ogoni ibu anda halu timbuni holebira. Gene magane luni purogole howa liniru dewa dolebira. Ani biragola ibu ira tamia duniniore mbira holebira. Ega tara tara bedarume ira ogoniha ni gumba birule ibu ngoai holebira. Ani ibu ngoaiho biruwa tinaga andaru ira ogoni maganeni bulebira. 24 Anidagua birago hondowa ira dindi bibahendeni karume i Anduane Homogo inaore ira luore karu tubagi helo mane gaibu wahalu tubagi bu karu mo lu helaga henedalo hendelo anidagua bulebero. Ani bialu ira yunihe karu mo gabu halu ira gabuni karu mo gahenge haga kagonidalo manda bulebira. I Anduane Homogo ina bi o ledogoni buleore lalu larugo biai holebero, lalu Anduane Homogohanda laya lene.

## 18

### *Wali agalime ko biyagonaga pani tini hangu hangu mulene nga lenego ogo*

1 Anduane Homogohanda ihondo lalu, Isaraele wali agalihondo bi ogodagua latagi habe laya. 2 Isaraele wali agaliru tigua bi yobage mbira ogodagua laramili.✧ Aba aiyarume pu mbira mini gerebi lini emene gani dedaru do nagagoyu ai waneigini tigua wene gani uruninaga lini nolene kau haga, lalu laramiligo irane aginaga laramilibe.

3 Anduane Homogo Bibahende Haru Haame Ho Haga koho i Ngode Datagaliwabe haluhe heneneore kogobi howa tihondo heneneore laro. Tigua bi ogoni laramiligo lone nale wahaiore holeberemi. 4 Wali agali bibahendenaga holene inime yu kogoni. Aba aiyalabi waneiginirubi bibahendeorenaga holene inimeore yu kogoni. Ani bidogo mbiralime ko ngago biyagua biagago ibuniore homolebira.✧

5 Agali mbira ibu tigabiore howa ibunaga manabi tigabi dege biaga heagua ogoni ibu bayaleore ka laramali. 6 Agali ogonibi kago ibugua Isaraele wali agalinaga mbirale gime wabiniruhondo bi pupu nawiagabi urunihondo mbirale bo lomabu miyago nanagabi ka. Agali tigabi ogonibime hogorale buwa agali mendeali one kayu nayagabi wali egengi biruwa ililibu bedangibi mandagi nahaga ka.✧ 7 Ibugua agali mende mo hondo nahe ibunaga mbirale ngarubi mo page nabiaga ka. Agali mbirala dano heneyagua o biago ibuniore yamialu maru tagoha nalaga ka. Ani bialu howa maru tomo nawi karu tomo nelo mialu aga nabi karu aga bilo talebu miaga.✧ 8 Ibunaga nenegerume ibunila dano mbira ho heneyagua emene tago halu ngi nale miyagobiore mo yalu dai biaga ka. Wali agali maname dabaki helo ibiraru bibahende tigabi ngadaguaore tiga biaga ka.✧ 9 Agali ogonibi ka ibugua inaga bi mana ngogoore talialu baya hanguore biaga ka. Agali mana urunibi biaga kago ibu mini tigabiore howa bayale haabo holebira, lalu Anduane Homogo Bibahende Haru Haame Ho Haga kagome laya, lalu Esegielehanda lene.✧

10 Ai agali tigabi ogonibi kago ibu igini mbira hayagua ogoni ibugua anda howa agali mendealinaga mbirale ngaru mo page bialu agali homelo balu mana ko ngaru 11 ibu abahanda nabiagadagua biyagua nde ibuni homolene wulebira. Agali igini ogoni ibugua mbirale gime wabiniruhondo bo lomabu miniru naga howa agali mendeali one bedaru kayu yagabi howa 12 yagibano karu mo hondo hagabi agali mendealime ibuhondo dano hole miraru maru mo do hagabi mbirale gime wabiniruhondo bi pupu wiagabi uruninaga andaha puwa mana ko ngubi ngaru biagabi 13 ibunaga dano henerume miadai biragola bolangua howa ngi lagabi kayagua ibu bayale holebirabe. Ani ndoyago ibunime mana ina hame naledogo bialu kagome ibuni homolene wulebira laro.

✧ 18:2: Yar 31.29 ✧ 18:4: Ese 18.20, Lm 6.23 ✧ 18:6: LBM 20.18 ✧ 18:7: Har 22.25 ✧ 18:8: LBM 19.15  
✧ 18:9: LBM 18.5, Ese 20.11, Amo 5.4

<sup>14</sup> Anigo ai agali mende ko biaga kago ibu igini heagua ogonime anda halu wahe howa ibu abahanda mana ko ngaru biagadagua nabiyagua ogoni ibu bayale holebira. <sup>15</sup> Agali ogonibi kagome Isaraele wali agalinaga mbirale gime wabiniruhondo bi pupu nawiaga howa urunihondo mbirale bo lomabu mini ngaru nanagabi agali mende one kayu nayagabi ka. <sup>16</sup> Ibugua agali mendeali mo ko nahagabi tinaga mbirale ngaru mo page nabiagabi mbiralime mbirale dano hene tingi howa ohalu mbira namo yagabi ka. Ibugua mendeali tomo garibilo karu talebu mialu aga nawi karu talebu mialu biagabi ka. <sup>17</sup> Ibugua mana ko ngaru mbira nabiagabi muni dano heneru bolangua howa ngi nalagabi ibugua ininaga bi mana ngoru talialu biaiore haga kayagua ibu bayaleore holebira. Heneneore ibu abahanda mana ko ngaru dewa biai hayagonaga ibu igini homolene nawulebira. <sup>18</sup> Ibu abahanda wali agali dewa mo ko howa tinaga mbirale wiaru mo kayu bialu mana ko dewa biaga henego ai ibuni urunidagua biyagome ibu homolene karulape wini.

<sup>19</sup> Anigo tí Isaraele wali agalime ihondo bi ogodagua hale halu ai abame ko biyagonaga pani iginime no aribia naharagoni agidabe laramili. Ai ina tihondo ogodagua ladai bero. Igin ibugua mana tigabi ngago bialu howa inaga mana ngoru talialu biyagua ibu bayale holebira. <sup>20</sup> Agali ko biaga karu dege homolene wulebira. Aba ibugua kagua biragonaga iginime pani na aribia holene nawi. Igin ibugua kagua biragome ibu abahanda pani na aribia holenebi nawi dege. Agali mana tigabi biaga karu ti nde tinaga mana tigabi biyarunaga yolo bayale ngaru mo yu holebira. Mana ko ngaru biaga karu ti nde tini mana ko biyarunaga yolo pani nolene ngaru nalu genda yu holebira.✧

<sup>21</sup> Anigo agali mbirame mana ko ngaru yu wahalu mini beregedalu dai buwa inaga mana tigabi ngaru talialu biadai biyagua nde agali ogonidagua birago ibu nahome bayaleore holebira.✧ <sup>22</sup> Ibugua ko bibahende biyaru Anduane Homogohanda domo waharagola mana tigabi biaabo hayagonaga ibu holene gahenge yu holebira. <sup>23</sup> I Anduane Homogo Bibahende Haru Haame Ho Haga kogome tihondo hale harogo. Tigua manda beramigola agali ko biaga karu mbira homayagua ina turu haga kobe toba kamibe. Ani ndoyago agali ko biaga mbira kago mini beregedowa ko biaga biago wahayagua ina ogoni hondowa turu haruli.✧

<sup>24</sup> Anigo agali bayale biaga mbirame mana bayale bialu hayago wahalu mana ko ina hame naledogo biyagua agali ogoni ibu bayale holebirabe. Ani ndoyago ina ibu mana bayale abale bialu hayago mitangi nabulebero. Ibugua i erembira ngialu mana ko biragonaga ibuni homolebira.✧

<sup>25</sup> Anigo tigua ogodagua laramili. Anduane Homogo ibugua o biragonidaguago lehe bira laramiligoni. Anigo Isaraele wali agaliru-o ina bi larogo baya hangu hale hadaba. Tigua manda beramigola ina berogo lehedabe. Ani ndoyago tini mana beramigo lehe bialu kami. <sup>26</sup> Ai agali mbira mana bayale bialu hagame lone mana ko ngaru biadai biyagua nde agali ogoni ibugua mana ko uruni biyagonaga ibu homolene wulebira. <sup>27</sup> Ani bialu agali ko biagame mini beregedalu mana bayale biadai biyagua ogoni ibu mani bayale biyagome nahomolebira. <sup>28</sup> Irane ibunime handalu hearia mana ko bialu hayaru leheyane handalu mana ko uruni wahalu tigabi ngaru bialu hayagonaga ogoni ibu homa nabi bayale holebira. <sup>29</sup> Ina nde mana ogonidagua berogola Isaraele wali agali tigua lalu, Mana ogonidagua birago tigabi ndo bira laramiligo. Ai tigua manda bialu kamiria inaga mana ogoni tiga nabitabe. Ndo yago tininaga mana tiga nabi kooreyago.

<sup>30</sup> I Anduane Homogo Bibahende Haru Haame Ho Haga kogo ina Isaraele wali agali tihondo bi ogo langero. Ina tinaga mana hangu hangu birimigodaguagore dabaki bulebero. Aniore bule ngogo ai tigua mana ko bialu kamiru wahai halu mini beregedolene nga. Tigua mana ko birimiru wahalu mini beregedarimiyagua nde ko birimigome tí mo

✧ **18:20:** Man 24.16, Ais 3.10-11, Ese 18.4, Lm 2.9 ✧ **18:21:** Ese 18.27, 33.12, 33.16-19 ✧ **18:23:** Ese 33.11, 1 Ti 2.4, 2 Pi 3.9 ✧ **18:24:** Ese 3.20, 33.12-13, 33.18, 2 Pi 2.20

ko naholebira. <sup>31</sup> Isaraele wali agali tí aginaga homole hamelo kamibe. Tígua mana ko bialu kamiru wahalu mini ala tawe ngamirubi wahalu mini gahengebi gubalini holene gahengebi karulo holene ngagoni. <sup>32</sup> I Anduane Homogo Bibahende Haru Haame Ho Haga kogoni howa ina wali agalibi waneiginibi mbirali homelo hame nale kogoni. Anigo nde tíni mana ko bialu kamiru wahalu mini beregedowa mana bayale ngaru bialu halimu, lalu Anduane Homogohanda laya lalu Esegielehanda lene.

## 19

### *Esegielehanda dugu daraore bia henego ogo*

<sup>1</sup> Anduane Homogo ibugua ihondo lalu, Isaraele kinibi Yuda kinibi libunaga dugu daraore bia halu iba gana ogobi labe, laya.

<sup>2</sup> I aiyá ibu gabua laiono timbuniore hene.

Ibugua laiono wangabe dewa bu hearu ti dege dombeneha howa ibu iginiru bayuwa handayaho hayagola ti bayale anda hai haya.

<sup>3</sup> Ibu igini mbiraore wangabe timbuni anda hayagola ibugua igini ogoni nogo tara tara gabua taya helo biawai haya.

Ibu laiono hongoheore howa agalibi bo nagane helo biawai haya.

<sup>4</sup> Hameigini tara tara dindi tarani bu hearume laiono ogonime mana biaga ngago hale hai haya.

Tigua ibalu laiononaga gundu uli tombo wiyagola laiono uli ogoniha pilaya.

Tigua ibu ne harigaha wena langame helowa Iyibi dindiha gililo yalu piya.

<sup>5</sup> Aiyahanda ibu igini dai bilo maliaho biraabo heagola igini biago dai nabiya.

Dai nabiya handala ibu igini dege mende heago ibu laiono dalua bayale dege helo dabo helene.

<sup>6</sup> Laiono igini ogoni andaho heagola ibu laiono maru hearu baba mandagi ibaga bu haya.

Ibugua nogo tara tararu bolene mana bu manda bialu howa nogo gabua tara tara taya bialu agalibi bo nagane dege hene.

<sup>7</sup> Ibugua tinaga wai pabe anda hongohe hearubi tano wiarubi bo giallo wahai haga bialu hene.

Ibugua bi hongo howa layagola wali agali bibahende hearume gi hai haga hene.

<sup>8</sup> Hameigini tara tara dindi tara wiaruha howa laiono ogoni baba wai bule ibu ngoai hene.

Tigua gono wiago mo tigabu ngelo howa gonoha dayagola hadene.

<sup>9</sup> Tigua ibu wena langame hende howa mbogoyi mbiraha minu berelowa Babilono kini hearia yalu pene.

Ibu pora bialu tagira napelo ibu garabaya anda hongohe wiagoha helo helene.

Wali agali Isaraele dindi hari ngaruha hearume ibunaga bi hongo howa laruane lone hale nahelo ani bini.

<sup>10</sup> Kini ogonilabo libu aiyá ibu pu mbira lini daga mini gerebi iba angeni hengene mbira haraligobi bereneya.

Pu gerebi ogoni iba bayale bereagoria hengenego timbuni anda howa gene maganeni yuni dewahe gerebi linibi dewaore deneya.

<sup>11</sup> Pu gerebi ogoninaga gene magane hongoheore halu kininaga halimbu hongohe ngaligobi haya.

Irane ogoni luniore halu hari beraliba ela habehe haya.

Ibu luniore halu magane yunibi timbuni dewaorebi heago  
 bibahende hearume de handai hene.  
<sup>12</sup> Pu gerebi ogonibi heagola agali bu hearume keba howa  
 irane ogoni minu dugualu dindini bape haya.  
 Tigua ani biyagola ni tagira ibiragohayagi howa  
 puyabu poboyogobi ibiyagome gerebi lini deago bibahende yogo bialu gaulai haya.  
 Agali urunime ira magane hearu dandape hai halu  
 magane bibahende irani delai haya.  
<sup>13</sup> Mani tigua pu gerebi ogoni dugu yalu puwa  
 dindi ko yobini iba nabiraga wiagoha hangaya.  
<sup>14</sup> Ogoninaga teneha howa  
 ira datagi halu gene magane yuni linibi irame dai haya.  
 Ibunaga magane bayale mbira hongohe ndo howa  
 kininaga halimbu wabibehe mbira naheneya.  
 Bi ogoni dugu daraore binigo tigua iba gana lalu haabo haga winigo nga.

## 20

### *Isaraele wali agali ti doga howa Anduane Homogo talima nape henego ogo*

<sup>1</sup> Ina Babilono pu hemagola mali kanegonaga ege daunini horo pini hayagola Isaraelealinaga agali haguane bu hearu i berewaria kaware ibu biraya. Tiha genda mbira wiagola Anduane Homogonaga hame hale hole ihondo haleha laya. <sup>2</sup> Ani layagola Anduane Homogohanda ihondo langialu lalu, <sup>3</sup> Dindiali-o i Anduane Homogo Bibahende Haru Haame Ho Haga kogo ina agali haguane urunihondo bi o larogo tihondo lamibe laro. Tigua inaga hame ngogo hale holenaga ibirimibe. I Ngode Datagaliwabe haluhe heneneore kogobi ina tihondo tigatigaore larogo bameore ibirimida laro. Tigua bi hale haramiru aria mbiraore hangubi mbira ladai nabulebero. I Anduane Homogo Bibahende Haru Haame Ho Haga kogo ina bi o ledogoniore, laya.

<sup>4</sup> Dindiali-o agali o bedaruni manani helai habelo hameledo. Agali uruni ti mamalinaga mana ko ngubi bialu haga wiyaru mo mitangi bia habe. <sup>5</sup> Tihondo bi o larogo lamibe. Ina bamba tinaga mamali Isaraele hearu ti ininaga wali agaliore helo dabarungi ina mbirale mbira tihondo buleore lalu bi hongoheore lo wirugoni. Ti Iyibi dindini heangi ini ogobi ko lowa mo walia halu Anduane Homogo tinaga Ngode Datagaliwabe kogoni lalu lamiru. <sup>6</sup> Ogoningi howa ina ti Iyibi dindi yu wahalu dindi mbira ti mule lalu bi hongohe lo wirugoria haru halu ibule laru. Dindi ogoni ibane bere baya tomo mbirale ngaru anda hai holene nga laru. Dindi tara tara bu ngaruha dindi ogonibi mbira nawi baya gibiore mbira nga laru. <sup>7</sup> Ani bialu ina tihondo ogodagua lamiru. Tini hangu hangu kamigoha howa Iyibi wali agalinaga dama mitangi bialu mbirale gime wabinigohondo bi pupu wulenaga hame lalu ngelo kamiruni wahai halimu. Tigua mbirale ko urunihondo bi pupu nawilimu. Anidagua bialu kamigome Anduane Homogo tininaga Ngode Datagaliwabe inaga deni mo dodo nahalimu, laru. <sup>8</sup> Ina tihondo ogonidagua lamirugoyu tigua dogu halu bi ogoni hale nahaya. Ti bibahendeme ina bi larugo mo wahalu Iyibi wali agalinaga dama mitangi bialu gime wabini wiaru wahoa nahaya. Anidagua bialu hayagonaga ti Iyibi dindiha heangi ina i miniha keba timbuni halu tandaga harudago tiha biba helole manda birugoni. <sup>9</sup> Ainde ani nabi waharudago irane ina ala Isaraele wali agali lamialu, Ina ti Iyibi dindi yu wahalu dindi ogoha haru ibulebero, lalu lo wirugola wali agali Isaraeleali baba mandagi haga hearunaga deni howa larugoyane bulebirugo nabi waharu. Ina buleore lalu bi lo wirugo mo habo laruyagua nde inime tinaga deni inaga mini mo dindiha holilono waharu.

✧ 20:5: Har 6.2-8

<sup>10</sup> Ani larugoyane ina Isaraele wali agali Iyibi dindi wahalu haru tagira pialu dindi ko iba dalu naibaga wiagoha haru ibiru. <sup>11</sup> Ani haru ibu helowa ina mana buleneru lamialu inaga bi mana lowini ngorubi lawai halu biru. Wali agali bu karume bi mana ogoni hale halu taluwa bialu hayagua tiha bayale holene wulebira. ✧ <sup>12</sup> Ani bialu ina ti baba habo nalolene bi lo wirudagonaga manane mbira walia halu Sabada horo mo ngelaru. I Anduane Homogo inime ti mo dabobagi howa inaga wali agaliore helayadalo manda bilonaga horo ogoningi ti biabe tara tara nabi halo halu i mitangi bialu holene wini. ✧ <sup>13</sup> Anigo ai dindi ko iba dalu naibaga wiagoha howabi nde tigua dogu halu inaga bi hale nahaya. Dindi ko wali agali nahaga wiagoha howa tigua inaga bi hale habe manga halu tini bayale holenaga mana ngago taluwa bialu holene biago puguvalu Sabada horonaga manabi puguaya. Anidagua biyagola inaga bu miniha keba timbuni halu tandaga harugo tiha biba hole manda biru. <sup>14</sup> Ainde ogonidagua nabirudago irane wali agali bu karunaga deni inaga mini mo dindiha holobada manda bialu ti bo wa nahe waharu. Wali agali tara tara uruni ti handayaho heaore ina Isaraele wali agali Iyibi howa haru tagira ibirugo mitangi bialu ti pani mialu bo wahai nahe waharu. <sup>15</sup> Anigo Isaraele wali agali dindi ko iba dalu naibaga wiagoha ibu heangi ina tihondo bi hongo howa lamialu, Ina ti dindi ibane bere bayale dindi maru ngaru ogonibi mbira nawiore larugo dindi ogoniha halimulo haru pole larugoha ai haru napolebero, laru. ✧ <sup>16</sup> Ina bi ogoni larugo irane tigua ina mana bulene nga laruru talialu bia nabi hayagonagabi inaga bi lo winigo ngoru puguayagonagabi laru. Tigua dama mitangi bialu mbirale gime wabini wiaruhondo bi pupu wulene dege hamelo howa inaga bi mana puguvalu Sabada horonaga manabi pugua dege bialu hene.

<sup>17</sup> Ina ani larugoyu ti dindi ko iba dalu naibaga wiagoria howa homai helo bo wahai holene winigo ai ina ti dara hodai bialu bo wanahe waharu. <sup>18</sup> Ani nabi howa ina tinaga waneigini daliahe hearuhondo lamialu lalu, Tinaga mamalirume mana bialu haga wiyaru nayalimu. Ani bialu wali agali tara bu karunaga dama mitangi bialu mbirale gime wabini ngaruhondo bi pupu wialu inaga deni tini dodohe nahalimu. <sup>19</sup> I Anduane Homogo tinaga Ngode Datagaliwabe kogo tigua inaga bi lowini ngoru hale halu mana bulene ngorubi baya hangu taluwa bialu halimu. <sup>20</sup> Ina Sabada horo ogoni inaga wiabagi ho wirugo mitangi bialu tigua horo ogoniore inaga nga manda bialu halimu. Horo ogoni ina habo nalolene bi lo wirugonaga manane ngelalu tigua horo ogoningi biabe nabi halo howa ini Anduane Homogo tinaga Ngode Datagaliwabeore henedane manda bilimulo wirugoni, laya lene.

<sup>21</sup> Ina wali agali urunihondo anidagua larugoyu tinimebi ihondo dogu haabo halu hene. Tigua inaga bi lowinigo wahalu tini bayale holenenaga inaga mana bulene ngaru taluwa bialu nahe puguvalu haabo hene. Ani bialu tigua Sabada horonaga mana lo wirugo puguaore bialu heagola inaga bu miniha keba timbuni howa tandaga harugo tiha biba halu dindi ko wali agali nahaga wiagoria howa bo wahai holene winigo waharu. <sup>22</sup> Ogonidagua manda bialu waharudagoni irane wali agali tara tara bu hearunaga deni inaga mini mo dindiha holobayane mitangi bialu bia nabi waharu. Wali agali tara uruni ti handayaho heaore ina Isaraele wali agali Iyibi dindini howa haru tagira ibirugoni mitangi bialu ti bo wa nahe waharugoni. <sup>23</sup> Anigo ina bi mende hongohe lo wiru. Ina ti bo talia togolalu dindi tara tara wiaruha hama purogo lelebero manda biru. ✧ <sup>24</sup> Ina bi ogoni larugo irane tigua inaga mana bulene ngoru mo wahayagobi inaga bi lowiniru puguayagobi Sabada horonaga mana lowinigo puguayagobi tinaga mamalinaga dama mitangi bialu gime wabini wiaruhondo bi pupu wialu hayagobi tigua ko uruni biyarunaga ina bi ogonidagua lo wirugoni.

<sup>25</sup> Ani buwa ina bi mana tarabi lo wialu mana bulene tara alebi lamirugo urunime ti bayale helonaga ndo lo wirugoni. <sup>26</sup> Tigua dama mitangi bialu mbirale gime wabini



wiaruhondo bi pupu wialu mbirale lomabu mule hame ledadagua bilaru. Ani bialu tinaga igiri wahene hayago dama mitangi bialu gime wabini urunihondo bo lomabu migi bilo helaru. Tigua mana uruni bialu helo waharudagoni irane ti mogolo handalu tinime mana ko bialu hayarunaga pani nalu helobi iní Anduane Homogo heneneore henedane hendelobi ani biru, laya lene.

<sup>27</sup> Anduane Homogohanda ihondo laabo halu lalu, Dindiali-o i Anduane Homogo Bibahende Haru Haame Ho Haga kogo ina Isaraeleali karuhondo bi larogo lamibe. Tinaga mamali biarume mana ko tara mende ale bialu tigua inaga bi larugo mo wahalu inaga minibi mo yo handalu biya. <sup>28</sup> Ina dindi tihondo ngulebero lalu lo wirugoria haru ibu helewagola tigua ira timbuni hearubi hari timbuni wearubi de hondowa dindi ogoniha dama mitangi bialu mbirale gime wabini wiaruhondo bi pupu wialu lomaru bu mialu holene bayale mbira winidalo manda biya. Ani manda bialu tigua nogo dewabi waini iba dewabi yalu ibuwa tigua lomabu miyagome i mo keba timbuniore haya. <sup>29</sup> Anidagua bialu heagola ina tihondo ogodagua hale haru. Tigua irane aginaga hari nene daligaore ngagoha puwa dama mitangi bialu mbirale gime wabini ngaruhondo bi pupu wule aginaga pialu kamibe, laru. Ani larugoni irane Isaraele wali agali tigua hari neneha bi pupu wule piaga uruni mini Hari Neneha laga wini. <sup>30</sup> Ogoni manda bialu ai Isaraele wali agali tihondo bi la larogo lamibe. Tinaga mamalirunaga dama mitangi bialu mbirale gime wabini ngaru hangu bi pupu wule tiguabi talima pialu kamigonida. Tigua mana ko uruni talialu bialu haabo kamigo irane agibe. <sup>31</sup> Ayu bi tigua dama mitangi bialu mbirale gime wabini urunihondo lomaru bu mialu haabo kami. Ani bialu tinaga waneiginirubi mbirale gime wabini urunihondo bo lomabu mialu irani delaga kamigoni. Tigua mana ogonibi bialu kamigome tinibi nde inaga deni dodohe dege kami. Anidagua bialu howa Isaraele wali agaliru ti i koría inaga hame ngogo hale ho ibulene nawi howa ti bame dege eberemili. I Anduane Homogo Bibahende Haru Haame Ho Haga kogo i Ngode Datagaliwabe haluhe heneneore kogobi ina ayu tihondo tigatigaore laro. Ina tigua hale haramigo ale mbira ladai nabulebero. <sup>32</sup> Tíore hameigini tara dindi tara taraha bu karu ale dege hoa howa ira karuhondo bi pupu wia ege tole ngaruhondo bi pupu wia bigi bialu holene hamelo kamigoni. Anigo ina ti urunidagua kamigo bialu halimulo yupe naholebero.

*Isaraele wali agalime mana ko bialu hayarunaga pani mulene winidagua nami wahenego ogo*

<sup>33</sup> I Anduane Homogo Bibahende Haru Haame Ho Haga kogo i Ngode Datagaliwabe haluhe heneneore kogobi ina tihondo bi heneneore hongohe mbira ogodagua laro. Ina tihondo keba howa inaga hongo timbuni kogome ti minu balu tandaga mo ngulebero. <sup>34</sup> Ayu ti dindi tara tara bu ngaruha garabaya pu haga haga bu kamigo ina haru dai bialu dindi mbiraoreni mo mogobu helolebero. Ani heledogola tigua inaga hongobi bu miniha keba howa tandaga holenebi panigi handa walia holeberemi. <sup>35</sup> Ina dindi mo mogobu heloleberodago ko yobi iba dalu naibaga ngago ogoni mini Hameigini Tara Taranaga Dindi Yobi laga nga. Dindi ogoriani kamiria ina ti dengui handade halu tigua mana ko bialu harimigonaga manani helalu pani ngulebero. <sup>36</sup> Bamba tinaga mamaliru Sainai dindi ko iba dalu naibaga wiagoria howa ina ti manani helowa pani mirudagua ngulebero. I Anduane Homogo Bibahende Haru Haame Ho Haga kogome ina bi ani laro.

<sup>37</sup> Dindi ogoniha ibu kamigola ina ti haru howa habo nalolene bi lo wirugo tigua talialu bialu halimulo mo bia holebero. Ani bialu mana ti hangu hangume bialu harimidadagua mo dabaki bulebero. <sup>38</sup> Ina maru mana ko biaga karubi dogo haga karubi bibahende ti kamiru baba mandagi nahelo ti dindi ayu kagoria ina bo taliatagi hai holebero. Dogo halu mana ko biaga bu karu ti Isaraele wali agalinaga dindi dai

naibilolebero. Ina anidagua berogo hondowa tígua i Anduane Homogoore henedane hondoleberemi.

<sup>39</sup> Anduane Homogo Bibahende Haru Haame Ho Haga kogome Isaraele wali agali tihondo ina bi ogoni laro. Tíni hame ledamidagua bidaba. Tígua dama mitangi bialu mbirale gime wabini ngaruhondo bi pupu wule talima polene mitangi bu kamiyagua nde ogoni talima pilimu. Anigo tígua ogoni talima pirimiyagua nde inaga wali agali bu karu baba mandagi naholeberemi. Tínaga dama mitangi bialu mbirale gime wabini ngaruhondo bi pupu wialu mbira lomabu mialu hemiyagua nde mana ogoni beremigome inaga mini tigabi ngogo yo handaganego ani bulene nawiore. <sup>40</sup> Inaga wali agali tí bibahende tíninaga dindi ngagoria dai biai howa tígua inaga hari timbuni loma biahene Isaraele dindini wedagoria pialu i mitangi bialu lotu lalu holeberemi. Ani kamigola ina tihondo turu timbuni holebero. Ani howa tígua inihondo tínaga loma bayaleru bu yu ibalu ihondo mbirale bayaleru i mo turu halu yu ibugu buleberemi. <sup>41</sup> Ainde tí dindi tara tarani purogolo kamiria howa bibahende ina mo mogo bialu ininaga hari kagoria haru dai buwa ihondo loma bayale ngabiore bu yu ibuwa delaramigola turu harulidagua tihondo turu howa inaga bu miniha dungulo holebero. Anidagua berogola hameigini tara dindi tara taraha bu karume ti de hondowa i mini baya burugule tigabioredalo manda biai holebira. <sup>42</sup> Ina tí bamba tínaga mamaliruhondo dindi ngulebero lalu bi lo wirugoria daibu kamingi tígua i Anduane Homogo henene henedane hondoleberemi. <sup>43</sup> Ani hondowa tígua mana ko ngubiore wiaru bialu harimigome tíni mo ko henedane mitangi bu dai buleberemi. Ani buwa mana koorene ko uruni bialu harimigonaga taga timbuni ho holeberemi. <sup>44</sup> Ininaga mini bayale mini leneore kogo mitangi bialu tí mana koorene ko bialu harimigonaga ina pani ngulene winidagua nangi tí dara howa waharudane hondoleberemi. Ani hondowa tígua ini Anduane Homogo heneneore henedane hondoleberemi. I Anduane Homogo Bibahende Haru Haame Ho haga kogo ina bi o ledogoniore, laya lene.

### *Dindi abene unurahayagi ira datagi holebira lenego ogo*

<sup>45</sup> Anduane Homogohanda ihondo langialu lalu, <sup>46</sup> Dindiali-o ina dindi abene unurahayagi handa daliho howa ibuhondobi ibunaga irabu karuhondobi lai lalu habe. <sup>47</sup> Irabu ngaruhondo lalu, Anduane Homogo Bibahende Haru Haame Ho Haga kago ibugua bi o larago hale ha, labe. Ina ira mbira delarogome inaga irabu ngeruha ira gahengeyaguabi gabuniyaguabi bibahende dai holebira. Ani dalu kagola mbirame ba hundia habe nahe holebira. Ira ogoni dama pialu dindi abene uyurahayagibi dama polebira. Ani daragome wali agali bibahendenaga tingini poboyogo holebira. <sup>48</sup> Ani darago hondowa wali agali mbirame iba odo hundia habe nahedagola tigua ira ogoni Anduane Homogo ibunime hedope heneda lowa wali agali bibahendeme manda biai holebira, laya lene.

<sup>49</sup> Anduane Homogohanda bi ogoni lai hayagola ina ibuhondo ladai bialu lalu, Anduane Homogo Bibahende Haru Haame Ho Haga-o ainde ina bi ogoni latagi ha nalabe. Wali agali bu karume i mini lalu ina bi yobage ogoni ale dege laabo haruligonaga ti hale habe manga haga ka, lalu ladai biru.

## 21

### *Anduane Homogohanda ayu tibume Yarusaleme wali agali dibai holebero lenego ogo*

<sup>1-2</sup> Anduane Homogohanda ihondo langialu lalu, Dindiali-o ina Yarusaleme ha de handa dai bu howa tigua ko biyagonaga godini dabaki halu tihondo, Tí mana ko biagaore kami, lalu lamibe. Tigua dama mitangi bialu mbirale gime wabini ngaruhondo bi pupu wule ibu ngoai haga dindi ngaru hondowa ina turu naharuligo ina tihondo, Mana koorene ko ogoni, lalu lamibe. <sup>3</sup> Ina Isaraelealihondo bi hongo howa lalu Anduane Homogo ina bi o larogo lamibe. I Isaraele wali agali tí baba waitigi howa tí wali

agali bayale biaga hemiyaguabi ko biaga hemiyaguabi tanabi ina inaga wai biaga ayu tibu ngagome tí bo wahai holebero. <sup>4</sup> Ina ayu tibume tí dindi abene unurahayagi howa bo wahama pialu uyurahayagi tagira polebero. <sup>5</sup> Anidagua berogola wali agali bibahendeme i Anduane Homogo inaga wai biaga ayu tibu yupe nahe yaragaho haabo koria hondolebira. Ina tí pani ngialu bo wahai holebero, laya.

<sup>6</sup> Ani lowa Anduane Homogo ibugua laabo halu lalú, Dindiali-o wali agali bibahendena deni howa inaga gubalinini tandaga timbuni howa dugu biradagua bibe. <sup>7</sup> Wali agali tigua ihondo irane aginaga dugu bialu kebe layagua nde ina tihondo ogodagua lamibe. Genda timbuniore ibulubadagonaga dugu bialu ko. Genda ogoni tagira ibirangi tinaga bu miniha gi timbuni halu tinaga gi hongo nahe halu tí mini burugu lalú gebi duru lalú holeberemi. Ogonidagua bulene horodagoni abale tagira ibiragoni ndobe. Bi ogoni Anduane Homogo Bibahende Haru Haame Ho Haga kago ibugua bi o ledagoni laro, lene.

<sup>8</sup> Ani lowa Anduane Homogohanda ihondo laabo halu lalú, <sup>9</sup> Dindiali-o bi manane mbira áyu langerogo ti hale helo latagi habe. I Anduane Homogo ina bi larogo tihondo lamibe. Ayu tibu mbira wiago ne gadelelo tigua nage wuwa mbiraleme baya hangu hai heneya. <sup>10</sup> Ayu tibu ogonime bo wahelonaga baya hangu nage wiagola ne gadeleore wialu ngiringarale hari daba ale helo tigua hai heneya. Inaga wali agali ti turu haga bialu bayale holeberemabe toba ho kabe. Ani ndoyago. Ina tihondo bi hongohe lamialu gewa tibume barugoyu tigua doga halu haabo kagoni.

<sup>11</sup> Wai biagane ayu tibu ne gadele ogoni mbiraleme hai howa agali dibule manda manda bu nga. Tigua ayu tibu nage wialu hai ho ngelowa bo wahaga kagonaga giha mo ya holebira. <sup>12</sup> Dindiali-o ayu tibu ne gadele ogonime Isaraeali haguane bu karubi inaga wali agali bu karu bibahendebi bo wahai holebirago ina dara halu dugu daraore bibe. Wali agalime dara ho hagadagua howa dugu bialu habe.

<sup>13</sup> Ina inaga wali agaliru ba handalu kogola ai tigua mana ko bialu kago wahalu mini beregeda nabiyagua nde mbirale o larogoni bibahende tiha tagira ibulebira, laya lene.

<sup>14</sup> Dindiali-o inaga bi ogo tihondo latagi halu ina gi habe babe. Ani baregola ayu tibu ogonime wali agali mo gi halu tini bagabaga bialu dewaore bo wahai holebira. <sup>15</sup> Ayu tibu ogonime wali agali mo gi hagabi dewa bo wahagabi nga. Anigo ina tanonaga pabe panga haraba ngaru bibahende ngatoria ayu tibu ogoni hari daba ale ngiringaralegome wali agali bo wahai hole manda manda bu ngo. <sup>16</sup> Ayu tibu ne gadele ngego ina dindi bibahendeha pialu gi tigahayagibi gi lehayagibi bama pialu wali agali bo wahai habe. <sup>17</sup> Anidagua berogola ina gi habe balu inaga miniha keba harugo biba holebero. I Anduane Homogo ina bi o ledogoniore, laya lene.

### *Babilono kinime Yarusalemela wai bule ibulebira lenego ogo*

<sup>18</sup> Anduane Homogohanda ihondo laabo halu lalú, <sup>19-20</sup> Dindiali-o i hariga dindi mbirahayagi howa ibalu hariga pu gebage bidago manda bibe. Hariga gebagane mbirago ibu Amono dindiha tano timbuni Laba ngagoha polene nga. Hariga mendego Yuda dindiha tano timbuni wai pabe hongohe bu mabubi tano hongohe biagoha polene nga. Ani purogo lolene ha gebage ngatoria mo walia hagane manane kira helabe. Mo walia hagane manane mbirago Laba polene hariga pedagohayagi mo walia howa helalu mende Yarusaleme polene hariga pedagohayagi mo walia ho helabe. Ai Babilono kini kago ibugua ibunaga ami agaliru heba ayu tiburu yalu hariga ibidadagua ibalu ha gebage ngatoria tagira ibulebira. <sup>21</sup> Ani ibalu ogoriani howa kini ibu hariga agoha poledabe manda nabi howa halaga bulebira. Pigane ibunaga timu yidaru mo gigia lolebira. Ibugua halaga uruni bialu howa ibunaga dama mitangi bialu mbirale gime wabini ngaru bi pupu wialu hale halubi nogo lomabu mule bo ngagonaga buni ngago begelo hondolebira. <sup>22</sup> Ani bialu howa timu gi tigame yamiyagome Yarusalemehayagi polene walia holebira. Ani manda bialu tigua Yarusaleme puwa wai pabe panga kago

bo gialalu tanoha anda puwa wali agali tanoha karu bo wahai holenaga mbirale mbira guruyagu ale wabulebira. Wabiai howa ami agali bu karume hongo howaore hoaro lalu mbirale mbira guruyagu ale biagome wai pabenaga panga kago bo gialole hongo howa yupe haragola panga biago bo haealabaga bulebira. Ani bialu tigua Yarusaleme tano bo gialopaya bule gana walu tini heyu howa wai bulenaga dindi dugu wima irigi holebira. <sup>23</sup> Ina Isaraele wali agaliruhondo bi ogoni latagi haregola tigua bi ogoni hale nahe bame degeda lo manda bialu, Babilono kini kago andanaha hole lalu habo nalolene bi lo wirimago ai ibugua ina baba wai nabulubadalo, manda bulebira. Anigo tigua mana ko dewaore bialu hayagonaga Babilono kini kagome ti garabaya bilo ibilolebero. Ani ibirago de hondowa tigua mitangi bu handalu karia tinime mana ko bialu harimagonaga mbirale uruni anda ibiyadalo manda bulebira. <sup>24</sup> Ai Isaraele wali agaliru-o Anduane Homogo Bibahende Haru Haame Ho Haga kogo ina tihondo bi mbira ogodagua laro. Tigua mana ko dewa biaabo halu kamigo ina embeda naholebero. Tigua mana ko panigi bibahende handai hene bialu kamigome tiha ko ngelo kamigo wali agali bibahendeme manda biaiho ka. Tigua ko birimirunaga pani nolene ngelo kamigo ina ti waitigi bu karunaga giha ya holebero.

<sup>25</sup> Isaraelealinaga kini kego ina inaga mana pugualu mana ko ngaru bialu haga kegoni. I mana ko bialu harigonaga pani nabelo ngulene horo biago kaware ibu ngagoni ndobe. <sup>26</sup> I Anduane Homogo Bibahende Haru Haame Ho Haga kogo ina bi o ledogoniore. Ai ina kininaga manda karulo kegoni golo wahalu labolabo inaga emboneni bo bidegonibi golo ngelalu bibe. Ala wiyadagua mani nawulebira. Ayu ina bibahende mo iriari bialu agali haguane bu karu mo dindiha halu agali mini nalene bu karume agali haguane ha aribia halu mo yaraga helolebira. <sup>27</sup> Mbirale tara bamba nahendeneru ale bialu ina Yarusaleme bo giallo wahai halu mo ko hole manda bu ko. Ani bialu dindi mo ko hene wiaabo kane dege agali mbira ibilolebero. Ina agali ogoni dabenegro ibugua Yarusaleme tano handayaho howa haru helo ibuhondo mulebero, laya lene.

*Ayu tibu ne gadeleme Amono wali agali dibu waholebira lenego ogo*

<sup>28</sup> Anduane Homogohanda ihondo laabo halu lalu, Dindiali-o Amono wali agali karume Isaraele wali agalihondo bi ko laragonaga ina mbiwia halu tihondo bi ogo latagi habe. I Anduane Homogo Bibahende Haru Haame Ho Haga kogome tihondo bi ogodagua laro.\*

Wai biagane ayu tibu ne gadele ngagome mbirali bo waholenaga nga. Ayu tibu ogoni baya hangu nage wialu mbiraleme hai hayago ngiringaralalu hari daba ale migimege laradaguabi ngagome agali dibule manda manda bu nga.

<sup>29</sup> Amonoali tigua mbirale de gandebaha hondo bolangua howa lalu, Ayu tibu ogoni iname yuwa wali agali inaga bi mo wahalu mana ko biaga karu homelo bo wahai holeberema, lalu kami. Anigo tigua de gandeba handarimigobi mbiwia halu kamigobi bibahende ke dege halu kami. Heneneore wali agali uruni pani nelu mulene kaware ibu ngagonigoyu pani nelu bo waholenedagoni tigua nableberemi.

<sup>30</sup> Ayu tibu ibuni andanaha yadai bidaba. Tini dindiniore kamigola ina tigua bialu harimidadagua ti manani helolebero. <sup>31</sup> Irame dangi bo daralidagua ina ti baba keba halu miniha tandaga ho kogome ti dolebira. Agali ko mendeali kago mo ko dege haga karume ti mo ko helo ibilolebero. <sup>32</sup> Ira dedagoria ira gabuni karu balu delaragola irame dalu do mundu lagadagua bialu ti bo wahai helolebero. Tinaga darama tini dalu ngamigoria polebira. Ani homaramigola wali agali mani holobadarume tinaga mini abogo dindi ogoria hene lalu mbira nalolebira. I Anduane Homogo ina bi o ledogoniore, laya lene.

\* 21:28: Yar 49.1-6, Ese 25.1-7, Amo 1.3-15, Seb 2.8-11

## 22

### *Yarusaleme wali agalime mana ko dewa bialu henego ogo*

<sup>1</sup> Anduane Homogohanda ihondo langialu lalu, <sup>2</sup> Dindiali-o ina Yarusaleme wali agali bu karume wali agali dewaore bo wahai hayarunaga manani dabaki habe. Tigua mana ko ngubiore biaabo hayarunaga manani helalu bi hongo howa lamibe. <sup>3</sup> I Anduane Homogo Bibahende Haru Haame Ho Haga kogo ina bi o larogo lamibe. Yarusaleme wali agali tigua wali agali tini aria bu hearu dewaore homelo bo wahai harimigobi dama mitangi bialu mbirale gime wabini wiaruhondo bi pupu wialu harimigobi inaga deni ti dodoheore kamigoni. Ani bialu harimigonaga pani ngialu tini mo ko holene horo biago kaware hapara haragoni ndobe. <sup>4</sup> Tigua mana ko uruni bialu harimigonaga tini pani nolene nga. Tigua dama mitangi bialu mbirale gime wabu wirimigome tini mo ko halu inaga deni dodohe kamigoni. Anigo ai tigimandi dege howa tiha mo ko holene ibulebirago nde kaware ibiragoni ndobe. Irane ogoninaga ina hameigini tara tara dindi taraha bu karume tiore hondo oba halu mege bialu helo heledo. <sup>5</sup> Wali agali kaundiaha karumebi kawareni bu karumebi tigua ti hondowa manda bialu tiore wali agali mana ko tara tara ngaru bialu haga kamigo lalu mege gibi bulebira.

<sup>6</sup> Isaraele wali agali tinaga agali haguane bu karu tigua mitangi bialu mbirale tinime hameledago ale damene bibahende biai habehe kama lo manda biaga ka. Ani manda buwa tigua wali agali homelo bame bo wahaga bialu kagoni ndobe. <sup>7</sup> Wali agali Yarusalemeha bu kamiru aria mbiraoreli hangumebi aba aiyalanaga bi hale haga naheore. Tigua wali agali dindi taraha howa ti baba ibu hene karu mo hondo haga kami. Tigua wali agalini homene dalo bedarubi waneigini aba aiyala homene karubi mo ko halu biaga kami. <sup>8</sup> Tigua i mitangi bialu lotu lole loma bini ngagoha bame nagalone lalu mo yo handaga kami. Ani bialu tigua Sabada horonaga mana ngago puguaire harimi. <sup>9</sup> Agali ti kamiru aria marume wali agali bame karu godime ibu homelo bo waholene nga lelo ke halu ibugua mana ko biya laga kami. Ani bialu ti marume dama mitangi bialu mbirale gime wabini wiaruhondo bi pupu wialu nogo loma bialu bo mini ngarunaga mbirininu nagane kami. Maru ti wali agali kayu yama ibaga biaga kami. <sup>10</sup> Maru tigua ti aba one kayu yaga kami. Maru tigua wali egengi bedago haru palue hongo timbuni haga kami. <sup>11</sup> Marume agali mende one baba ko biaga ka. Marume ti igini one bedaru bababi ti aba one mende wane bedarubi haru paliaga kami. <sup>12</sup> Marume ti damene bu karu bo wahelonaga ndelalu muni mo yaga kami. Marume dano ho henego dano hangalu maru bolangua howa ngi lalu mo yaga kami. Ani bialu marume ti damene karu mo gi howa muni gingila miaga ka. Ani bialu harimigome tigua i embedaho waharimi, lalu Anduane Homogo Bibahende Haru Haame Ho Haga kagome bi ogoni layagoni.

<sup>13</sup> Ibugua laabo halu lalu, Agali mbirale page biaga kamirubi wali agali bame homelo bo wahaga bu kamirubi ti baba ina keba timbuni ho kogoni. Ani howa ina gi habeme hongo howa tola balu ti pani ngulebero. <sup>14</sup> Anidagua berongi tigua gi timbuniore halu hongo ereba haragola heyabe nahe holeberemi. I Anduane Homogo kogo ina bi o ledogonidagua buleore bero. <sup>15</sup> Ina ti dindi tara tara ngaruha pilimulo taliatogo lolebero. Ani bialu tinaga mana ko biaga ngamiru bibahende mo wahai helolebero. <sup>16</sup> Hameigini tara tara dindi taraha karunaga deni ti koorene ko howa tininaga mini mo dindiha haragola tigua ini Anduane Homogo henedaneore manda biai holeberemi, laya lene.

### *Anduane Homogonaga keba holene ira hungu ale bialu ka lenego ogo*

✧ 22:7: Har 20.12, 22.21-22, Man 5.16, 24.17 ✧ 22:8: LBM 19.30, 26.2 ✧ 22:10: LBM 18.7-20 ✧ 22:12: Har 22.25, 23.8, LBM 25.36-37, Man 16.19, 23.19



<sup>17</sup> Anduane Homogohanda ihondo laabo halu lalu, <sup>18</sup> Dindiali-o Isaraele wali agalime mana ko bialu kago i manga ho kogoni. Tiore agalime ira timbuniore bo delowa ege tole irani delalu do gede halu iba harago siliba yamialu ko ale ngaru wahaga ngaligobi ka. <sup>19</sup> Ainde i Anduane Homogo Bibahende Haru Haame Ho Haga kogo ina Isaraele wali agalihondo bi o larogo hale hadaba. Wali agali bu kamiruni ti siliba bayale yamulenaga irani delowa maru ko ale ngaru habane nabulenego wahagagobi ti kami. Ani kamigonaga ina ti bibahende Yarusaleme haru piai halu mo mogo bu helolebero. <sup>20</sup> Inaga bu miniha lembo timbuni ira hungu ale bialu kagoni ndobe. Ani buwa ina ti irani agali ege tole siliba yamulenaga ege tole tara tara maru irame do taulope helo ira timbuniore dedagoha delagadagua delolebero. Agalime ira dene dedagome ege tole elaragola ira hungu hongohe daragome siliba ibu do iba halu piagadagua inaga lembo holene ogonime ti dolebira. <sup>21</sup> Anigo ina ti Yarusalemeni mo ngoai ho helowa irani delolebero. Inaga bu miniha keba holene ira hungu ale bialu kagome ti bibahende daiore holebira. <sup>22</sup> Ti Yarusalemeni howa siliba irani delaragola elagadagua tibi inaga keba holeneme elaragola tigua Anduane Homogo kagonaga keba holene ogobiore winidalo manda biai holeberemi, laya lene.

*Isaraele agali haguane hearume mana ko bialu henego ogo*

<sup>23</sup> Anduane Homogohanda laabo halu lalu, <sup>24</sup> Dindiali-o Isaraele wali agali tigua mana ko hangu bialu haabo kagome tinaga dindi inaga deni ko dodohe ngagonigo lamibe. Ani bialu kagonaga ina keba timbuniore howa ti pani nelu mialu ti dindiha iba dalu naibaga dindi ko wilolebero. <sup>25</sup> Laionome nogo gabua mbira bowa minu budu migimigi bialu bi hongo howa ngororo lalu hagamadagua tinaga agali haguane karume ani bialu ka. Agali uruni tigua tinaga damene bu karu bo wahowa dindi anda ngaru ti ho aribia halu muni ngarubi ti aribia haga ka. Anidagua biragola agali dewa bo wahayarunaga one dalo bedaru mbiralime handayaho holene nahe tini hangu birulebira. <sup>26</sup> Loma binigo mo miaga karume mana tigabi bulene ngago pugualu i mitangi bialu lotu lalu howa biagane ngago bame nagalone degeda lo manda bialu yo handaga ka. Mbirale ininaga wubagi helene ngarubi bame wini ngarubi ta nabi nagalone degeda lo manda biaga ka. Ani bialu howa tigua wali agalihondo inaga deni mbirale ogo dodohe ogo dodo nahe nga lalu lawai nahaga ka. Ani bialu tigua Sabada horo mana ngago nagalonedago lalu yo handaga ka. Tigua mana urunidagua bialu haga kagome Isaraele wali agali bibahendeme inaga mini mo dindiha helaga ka. <sup>27</sup> Gabumane agali haguane bu karuni ti biango dudume nogo balu budu migimigi bialu nalu hagamagobi ka. Agali haguane urunime muni dabudaburu dewaore wulene hamelo howa ti damene bu karu bame homelo bo wahalu uruninaga dabudabu wiaru ti aribia halu karulo haga ka. <sup>28</sup> Ani bialu kagola bi mana latagi haga agali bu karu tigua wali agalime mana ko bialu karu hondowa donge halu dago nabiaga ka. Pabe hongo nahe gedaore kago wali agalime pabe bayale hongohe kabe toba helo beni peleme hiragadagua tigua wali agalime ko biraru mo yihaga ka. Tigua ke howa de gandeba handarima laragobi ke howa mbiwia halu mbirale bulebira laragobi tagira naibaga. Agali uruni tigua bi lalu, Anduane Homogo Bibahende Haru Haame Ho Haga kagonaga bi latagi harama, lagago ai i Anduane Homogo kogo ina tihondo bi ogo latagi halimu lalu mbira nalami ko.

<sup>29</sup> Agali mbirale dewawi karume tini damene bu karu mo hondo howa muni mbirale emene yu karuni mo page biaga ka. Ani bialu howa tigua yagibano karubi wali agali dindi taraha howa Isaraele dindiha ibu hene karubi tihondo ko biaga ka. <sup>30</sup> Wai pabe bo gialo wahenego lone hongohe biadai bilo ina agali mbira taya bialu haru. Agali ogonime ibu waitigi anda ibulilono wai pabe gialo ngatoria howa wai hongo howa bialu helo taya biruria mbira naheya. Inioreme Isaraele wali agali ti baba waitigi halu ina tinaga Isaraele dindi bibahende bo haealabaga bule ngogo ai agali ogonibi mbira heagua

nde anidagua nabulebero. Anigo agali ogonibi bulene mbira naheya. ✧ <sup>31</sup> Anidagua biyagonaga ina ti baba keba timbuni ho kogo howa ti pani nelu mialu irame dangi bo daraligobi delo pani mulebero. Mana ko tinime biyagonaga pani nelu mulebero. I Anduane Homogo Bibahende Haru Haame Ho Haga kogo ina bi o ledogoniore, lalu Anduane Homogohanda laya lene.

## 23

### *Wali hagibuni kirame agali yama ibaga biya lalu bi yobage lenego ogo*

<sup>1</sup> Anduane Homogohanda ihondo lalu, <sup>2</sup> Dindiali-o bamba wali kira berenego libu hagibunila bereneya. <sup>3</sup> Libu wandari mabUAGE bereangi Iyibi dindiha bereneya. Ani biruwa igiri agali bu hearu baba mandagi ibagabu biruwa libu agali kayu biaga bayanda wali bereneya. <sup>4</sup> Wandari wahenedago ibu mini Ohola bereneyago ogoni ibu Isaraele dindiha tano timbuni Samaria ngago manda bialu leda. Ibu hagibunigo mini Oholiba berenego ogoni ibu Yuda dindiha tano dunini Yarusaleme ngago manda bialu leda. Ani bereagola kirabali ina dabu binigo ai libugua inaga waneigini hono wiya.

<sup>5</sup> Ohola ibu i one biruwa ibugua agali kayu yama ibaga bialu ibu lawini Asiriala dimagoli hama ibaga bu biragaya. <sup>6</sup> Ibu lawini uruni ti agali haguanebi ami agali haru haga haguanebi howa tigua aga tagalitayabi handalehe bayale wiaru karulo haga hene. Ami agali uruni tigua nogo hosini biruwa wai biagaya. Ohola ibugua ti igiri daliahe bayale biaru de hondowa ibunaga miniha dimagoli timbuni ho bereneya. <sup>7</sup> Ani biruwa ibu Asiria ami agali uruninaga bayanda wali biruwa ibugua Asirianaga dama mitangi bialu mbirale gime wabini wiaruhondo bi pupu wialu berearia ibuni inaga deni dodoheore bereneya.

<sup>8</sup> Ibugua bayanda wali Iyibi dindini wandari mabUAGE bereangi agali yama ibaga biaga winidagua bialu biraabo heneya. Ogoningi agali bu hearu ti hameleadagua bima haru ibagabu haga heneya. <sup>9</sup> Ani biaabo halu berearia ina nde Asirialiru ibuni dimagoli ho berene biaru tigua ibu mo ko helonaga tiha ibilarugoni. <sup>10</sup> Ani ibilarugola tigua ibalu ibunaga labolabo minu golo wahai howa tibabe bereleneya. Ani bereagola tigua ibunaga waneigini bu hearu haru piai halu Ohola ibuni ayu tibu ne gadele wiagome homelo dibu waheneya. Ani biyagola wali maru biru wiarume Oholanaga te hale howa lalu, Ibunime mana ko biyagonaga pani nedagoni ndobe, laga biya.

<sup>11</sup> Ainde ibu hagibuni Oholiba ibugua Oholaha genda tagira piyaru de hondowa ibu mogo nale bereneya. Ibugua agali baba kayu gibi yama ibaga bialu ibu hagibuni Oholahanda biyagobi ndo bu bolangua haga bereneya. <sup>12</sup> Oholiba ibuguabi nde agali haguanebi ami haru haga agali haguane bu hearubi bibahende hondo dimagoli timbuni haya. Agali uruni ti bibahende igiri daliahe dege howa aga baya ogobi dege dege karulowa tigua nogo hosini biruwa wai biagaya. Ainde Oholiba ibunaga bu miniha birabe nahayagola abale heyalu puwa igiri biaru baba mandagi paliyiya. <sup>13</sup> Ai ina deme hondo hewagola ibu hagibunime ko biyago ale dege bialu berearia handaru. Mana libugua bialu biraga wiago ko dodoheore biaga winiya.

<sup>14</sup> Anigo Oholiba ibugua mana ko timbuniore bu bolangua ho berene. Ibugua Babilonoali agali haguane timbuni bu hearunaga bigiya gilibu wiago hendeneya. Agalime tanonaga ege tole pabe hegoria bage tara tara podalu bigiya wabu helowa beni daramabime hiriniya. <sup>15</sup> Agali haguane uruni tigua mandibu wialu aga bayale mo yari biahene mbirame tinaga emboneni bo biniya. <sup>16</sup> Ainde Oholiba ibugua Babilono agali haguane de hondowa agali bayaleoreyagola ibu dimagoli timbuni ho berene. Ani biruwa ibugua agali hearia Babilono bi lo pelalu ibu baba palimiya ibalimu lalu lowia hene. <sup>17</sup> Ani layiya handala agali biaru tigua ibu bereria ibuwa tinaga hame wiago Oholibaha biba howa Oholiba mo koore hayagola ibuni inaga deni ko dodoheore

✧ **22:30:** Iba 106.23, Yar 5.1, Ese 13.1-7

berene. Tigua ibu yagayaga bialu heagola mani nde Oholiba ibugua ti handabe manga hene. <sup>18</sup> Oholiba ibu wali koorene ko berene. Ibugua mana ko biyago ha do howa ndo tanabi bialu wali agali bibahendenaga deni ko biyago hondowa tigua ibu bayanda walida lo manda biai hene. Ani biya handala ina ibu hagibuni biago handabe manga harudagua ibuhondobi handabe manga timbuni harugoni. <sup>19</sup> Ani mangaho hewago helowa ibugua agali kayu yaabo haga berene. Bamba ibu Iyibi dindiha bereangi bayanda wali biruwa agali kayu yama ibaga bialu biraga wiyago manda bu bereneya. <sup>20</sup> Ani biruwa ibu miniha ibunaga agali Iyibi dindini hayaru mitangi bu biraabo heneya. Agali uruni ti dimagoli gibi howa tinaga tingini nogo donginaga ale halu ibane timbuni nogo hosinaga ale ibagaya. <sup>21</sup> Oholiba í wandari mabuage bereangi Iyibi dindini biruwa bialu biraga wirigo dege biaabo holene hame lo bedegonida. Ani beregola agalime í mo gini bia haga haga bialu mandagi haru palirigoni, laya lene.

*Anduane Homogohanda wali mini Oholibahondo pani minigo ogo*

<sup>22</sup> Anduane Homogohanda laabo halu lalu, I Anduane Homogo Bibahende Haru Haame Ho Haga kogo ina Oholiba íhondo bi ogo laro. Í nenege agali uruni manga ho bedegoni í manda bidogo ainde harugo ina ti í baba mo keba halu íhondo koore bilo ibilolebero. <sup>23</sup> Ina agali haguanebi ami agali haru haga timbunirubi igiri daliaherubi minalu ibiloleberogo Babilono howabi Kaladia howabi Pegodo hameigini karubi Soa howabi Koa howabi Asiria howabi dindi uruni bibahendeha howa tinaga nogo hosini biralu ina ti haru halu ibulebero. Bamba ina agali uruni baya taraore heago de hondowa dimagoli ho biraga birarigoni. <sup>24</sup> Ainde áyu tigua dindi abene uyurayagi yu wahalu ini baba wai bilo ibilolebero. Tigua ami agali heba ibalu wai biagane garo ale nogo hosime gili laga mini karisibi tinaga tomobi wai biagane ale yaga garo ale karisi heba dewaore ibulebira. Tigua wai biagane dabudabu marubi yalu wai pole mo karulagane gaba manda karulalu wai humbibi mo yalu ibuwa tigua í ho hagira bu holebira. Ani bidagola ina tinaga giha minu ya harogola tigua í bope halu tinaga mana ngagoria howa í godini dabalumu minu bolebira. <sup>25</sup> Í í erembira ngirigonaga ina íhondo keba timbuni ho kogoni. Ani birigonaga ina agali ibilaroru tigua í minu belolebero. Tigua inaga nguibi halebi minu podalu í waneiginiru minu yu piyai holebira. Wali agali maru inaga dindiha yu wahene karu nde agali urunime ayu tibu ne gadele yidagome dibalu maru irani bo delolebira. <sup>26</sup> Ani buwa inaga aga karulo keru golo wai halu ma gagua alemebi inaga gi pagidabi bibahende golo yai holebira. <sup>27</sup> Ina mbirale urunidagua berogola ina bamba Iyibi dindiha biruwa koorene ko bialu agali kayu bima ibaga bialu biraga wirigo áyu bialu biraabo kego nabibelonaga ina mbirale uruni biaiore holebero. Ani berogola ina dama mitangi bialu mbirale gime wabini ngaruhondo bi pupu wulenaga hame nale Iyibi dindibi lone mitangi nabi holebere.

<sup>28</sup> I Anduane Homogo Bibahende Haru Haame Ho Haga kogome bi ogodagua laro. Agali ina handabe manga harirubi hame nale erembira mirirubi ina tinaga giha í minu ya holebero. <sup>29</sup> Agali urunime í hame nale handabe manga howa tigua ina biabe bialu mbirale mo wini ngeru page bu yalu polebira. Ani biragola í mbirale mbira nayiore bame bayanda wali aga nabi tibabe bedaria biragagobi birulebere. Ina mana ko dewaore bialu biraabo harigo <sup>30</sup> ainde íha genda urunibi ibirane hondolebere. Ina hameigini tara tara dindi taraha karu dimagoli howa tinaga dama mitangi bialu mbirale gime wabini wiaruhondo bi pupu wialu harigome inaga deni ini mo dodohe bayanda wali bedarume tini mo dodohe biragagobi bede. <sup>31</sup> Í í hagibuninaga mana ko bini wiago taluwa bialu birarigodago ina í hagibuni pani nelo mirudagua í nabelo ngulebero.

<sup>32</sup> I Anduane Homogo Bibahende Haru Haame Ho Haga kogo ina bi ogodagua laro. Ina í hagibuninaga gabo beha nenegobi nalu holebere. Gabo be ogoni uli timbuniwi

ngagoni. Ina gabo be ogoniha waini iba hambu tolo ngerogola nowa í luluyu ibagabu kego hondowa wali agali tara tara bu karume í mege bialu hondo oba holebira. <sup>33</sup> Waini iba ogoni í hagibuni Samaria ibu nalu no luluyu hayagobi dege nabelo ngulebero. Gabo be ogoniha bedago naregome inaga bu miniha genda yu howa luluyu ibagabu holebere. Gabo be ogoniha gi timbuniore holenebi mo ko holenebi nga. <sup>34</sup> Ina be ogoniha bedago no biba holebere. Nai howa ina gabo be bo pambu lowa gingirulo paya bini dodene ngago mo yuwa ogonime dege ininaga andu podalu birulebere. I Anduane Homogo Bibahende Haru Haame Ho Haga kogome bi o ledogoniore, laya lene.

<sup>35</sup> I Anduane Homogo Bibahende Haru Haame Ho Haga kogome ihondo bi ogodagua laro. Ina j embeda halu erembira ngialu puwa dimagoli halu bayanda walinaga biabe bialu harigonaga pani nalu genda ya tandaga na bialu birulebere, laya lene.

*Anduane Homogohanda wali ko kira ogonilabo manani howa pani minigo ogo*

<sup>36</sup> Anduane Homogohanda ihondo langialu lalu, Dindiali-o ina wali kira mana ko ngubiore ngaru biaga Oholabi Oholibabi manani howa libuhondo ko biribi labe. <sup>37</sup> Libu wali ko bayanda wali biruwa agali kayu bu ibaga biaga wali agali homelo bame bo wahagabi beda. Libugua dama mitangi bialu mbirale gime wabini ngaru baba kayu biaga beda. Libugua inaga waneigini taba honowa mbirale gime wabini ngaruhondo ti bo lomabu migi biribi. <sup>38</sup> Libugua ogoni hangu ndo mana ko marubi bia dege biya. Libugua inaga anda hewagobi mo mebia haya. Ani bialu ininaga Sabada horo wiabagi henegonaga mana wiwagobi puguaya. <sup>39</sup> Libunaga waneiginiru dama mitangi bialu mbirale gime wabini wiaruhondo libugua bo lomabu mialu dai buwa inaga anda hewagoha anda ibini. Ani biyagome inaga anda mo dodo halu mebia ho helaya.

<sup>40</sup> Ani bialu libugua mana ko ngubi marubi bini wia dege bida. Libugua agali dindi tara kaundiaha hearuhondo bi lo pelalu ibalimu layagola hale halu agali biaru ibigi ibiniya. Wali biago labome wayawaya balu libunaga deni ambua hare bialu mani magaguaru wialu gi pagidaru wialu bini. <sup>41</sup> Ani bialu libugua dagia mbira mo yári biaho ngelowa libuni berene. Ani buwa libugua tomo baya dendebe maru tebolo mbira libuni dagia birayago kawareni mo wiapara ho ngelowa ogoriani tomo uruni mo wini. Libugua ira hagua ngabilo delaga inisenesirubi olibe lini ibaneru ina libu mirurubi tebolo ogoriani mo ngelaribi. <sup>42</sup> Ani biyagola agali lulu iba naga dindi ko iba dalu naibaga wiagoha howa haru ibiniru badi balu tomoru nalu biruwa tigua turu halu bi ladadaga birmi. Agali uruni tigua wali biago labonaga gini gi pagida wia halu kuini walinaga manda muwa libunaga haguani mo karula haya. <sup>43</sup> Ina deme hondowa mitangibu handalu hewaria bambaore howa wali kira ogoni labome dabu binigo pugualu puwa áyu bayanda wali berearia agali uruni ti libu andaga peneya. <sup>44</sup> Agali uruni tigua bayanda wali kira Oholi Oholibala baba mandagi palue puabo haga heneya. <sup>45</sup> Libugua dabu bini mana pugualu wali agali bame homelo bo wahalu biaga bedago ainde agali mini tigabi karu tigua libu ko bialu birayagonaga manani helowa libuni homolene karulape lelebira.

<sup>46</sup> I Anduane Homogo Bibahende Haru Haame Ho Haga kogo ina bi ogodagua laro. Libu pani mialu minu bole agali dewaore haru ibidaba. Tigua ibuwa wali kira ogonilabo mo gi halu libunaga mbirale ngaru gingila miai helo. <sup>47</sup> Ani bialu agali ibirarume libu ege toleme balu wai biagane ayu tibu ne gadele ngagome dibalu homeleladaba. Tigua libu waneiginiru bo wahai halu libunaga anda bu karu bo heda hai heladaba. <sup>48</sup> Ina anidagua berogola wali maru bedarume de hondowa tigua mitangi bialu wali kira ogoni labome agali kayu bialu birayadagua nabule lelo hameledo. Ani bialu dindi ogoha wali agali kayu yaga mana ngago mo wahai holebero. <sup>49</sup> Ogolabo hagibunila-o libugua agali kayu dewaore bialubi dama mitangi bialu mbirale gime wabini wiaruhondo bi pupu wialubi biraribigonaga pani nalibulo ngulebero. Anidagua berogola libugua



ini Anduane Homogo Bibahende Haru Haame Ho Haga henedalo hondoleberebi, lalu Anduane Homogohanda laya lalu Esegielehanda lene.

## 24

### *Yarusaleme todobene be ale nga lenego ogo*

<sup>1</sup> Ina garabaya hemaria dege mali dininaga ege pini hayagola ege ogoninaga horo pini dege ogoningi Anduane Homogohanda ihondo langialu lalu, <sup>2</sup> Dindiali-o horo áyu ogoni howa Babilononaga kini kagome Yarusaleme tano ho hagira bialu ka. Ani bialu ka larogoni Isaraele wali agali bu karume inaga bi larego henedalo manda bilonaga horo egebi ogongiore lalu bebani gilibu wibe. <sup>3</sup> Isaraeleali mine haga bu karunihondo bi yobage ogo Anduane Homogo Bibahendenaga Haru Haame Haga kogo inime bi o larogoni lamibe. Todobene beha iba berelalu irani delabe. <sup>4-5</sup> Nogo sibi bayale mbira bowa payane mbirini modawane ge kuni mbirinirubi be ogoniha bayuwa dawabe. Kuni mbirinibi dende biaga alego todobene ogoniha dawa tolalimu. Kuniru baya hangu do golelo be tibiniha dawalu iba pobo halu kidikodo laga bilo ira timbuni delaga bibe.

<sup>6</sup> Anduane Homogo Bibahendenaga Haru Haame Haga kogome ina bi ogodagua larogoni. Yarusaleme wali agalime wali agali bameore homelo bo wahaga kamigonaga tíha mo ko holene timbuniore wulebira. Yarusalemeore todobene be boronosime wabini ale wuwa tibiniha ko dodohe mbiralime wayawaya bialu domabe naheore ngaligobi ngegoni. Nogo mbirini kuniru bayale damene beha dawayago mbira mbira dugu yamigi bialu mbiraore hangubi berelo wa nahabe. <sup>7</sup> Tígua mana ko birimada lalu gi nahe howa hariga teneni ta nabi howa bialu haga ka. Agali bo wahene ngagonaga darama dindi dugu dambi nahe bame ege tole ngagoria odo payabu ngelo wahagadagua mana ko ta nabi bialu haga ka. <sup>8</sup> Anigo darama ina henemane ani ege toleni odo payabu ngelo waharuli. Darama ogoni hondowa ina tígua mana ko birimida lowa keba halu tí mo ko holenaga ani biruli, laya.

<sup>9</sup> Anduane Homogo Bibahende Haru Haame Ho Haga kogome ogodagua laro. Yarusaleme wali agalime wali agali bameore homelo bo wahaga kamigonaga tíha mo ko holene timbuniore wulebira. Tano ogoni ina bo heda hole ira dewa bo alugumu bu wima irigi holebero. <sup>10</sup> Ira bo alugumu bu wirugo ira hedope howa todobene be daligani delolebero. Todobene ogoniha iba bedago dalu kidikodo laho ngane dege beha iba bedago do hundialu nogo mbirini kunibi beha dawedago da dege bialu do dapialu mbirale todobeneha bedaru do ereba hai helolebero. <sup>11</sup> Ani bialu todobene be ogoni ibuni hangu irani daho ngane dege do kundi bialu daramabiore wulebira. Ani ngagola todobene ibu ko dodohe ala wiyago ai irame dodo uruni dapialu daiore howa todobene be ogoni dodo mbira para nahe wilonaga delo hameledo. <sup>12</sup> Anigo irame beha dodo karu dai naholobadago ina biabe ogoni erekuibini bameore bialu haruda. <sup>13</sup> Yarusaleme wali agaliru-o be hagua binidagoni manane tínaga mana ko damene dodohe ngelo kamigoni. Ina tínaga ko uruni domo wahole bialu hewaria tínime domo waholene manga harimi. Anigo inaga keba holene timbuniore ngogome tíha mo tandagaore haragola ti lone ko dodo nahe holeberami. Ani birangi inaga keba holene ogoni ereba holebira. <sup>14</sup> Anduane Homogo inimeore bi ogoni larogoni. Ina tihondo bulene ngogo áyu berogoni. Tígua mana ko dodohe birimigoni ina mo embeda naholebero. Tí darabi naholebero dege. Ina tí manani howa dabaki halu ko tínime bialu harimidagonaga pani karulape nalimulo ngulebero. I Anduane Homogo Bibahende Haru Haame Ho Haga kogo ina bi ogoni larogoni, laya lalu Esegielehanda lene.

### *Esegiele one homonego ogo*

<sup>15</sup> Anduane Homogohanda ihondo lalu, <sup>16</sup> Dindiali-o ina í one dara halu mitangiho kegoni í manda bia bidogoni. Anigo ai harugo lowa ini hanguore helalu ina í one

✧ 24:2: 2 Kin 25.1, Yar 52.4



mo ereba helolebero. Ani berogola ína bi nale í one dara howa dugu nabibe. <sup>17</sup> Wali agali maru bu karume ína dugu berego hale nahelo. Mbirali homaragola walia hole biaga mana damene wiyaruni bibahende nabi wahabe. Ani bialu ínaga aga hagianeni karulaga wirigo wa nahe ge subi karulalu bibahende mo karulagadagua karulo habe. Denguibi bu yi nahabe. Duguanda howa tomo naga mana ngadagua nane wahabe. Mana wiyadagua ínaga damenerume tomo yalu ibiyagua nayalu ibalimu labe, lene.

<sup>18</sup> Ani layagola howa egerebagi wali agaliru baba bi lamiai ho hewane dege horo ogoni alendo hayagola í one ibu homaya. Homayagola horo mendengi ogodagua bibe lalu Anduane Homogohanda langiyadagua biru. <sup>19</sup> Ína urunidagua bialu hewaria wali agali bu hearu tigua íhondo hale halu lalu, Ína dara halu duguanda howa biaga mana wiyago nabi kegoni irane agibe. Ína inahondo mbirale mbira mo walia holenaga bialu kebe, laya lene.

<sup>20</sup> Ani hale hayagola ína tihondo ladai bialu lalu, Anduane Homogo ibugua íhondo lalu, <sup>21</sup> Bi ogo Isaraele wali agali tihondo Anduane Homogo ibugua ogodagua laya labe. Tígua íninaga anda kago handaya howa turu halu anda ogoni hongoheore ka laramili. Anigo ína anda ogoni bo gialo waholebero. Ani bialu tínaga waneigini Yarusalemeha yu wahene karu waiha bo waholebira. <sup>22</sup> Ani biragola manane Esegiele ibugua biyadagua buleberami. Tígua tínaga dengui bu yi nahe wahalubi duguandaha daraho biruwa tí damenerume tomo nagadaguabi nanoleberami. <sup>23</sup> Agame hagianeni karulalu ge subi bialu ibaga bialu poleberami. Wali agali homaragola uruninaga dara halu dugu biagadaguabi nabuleberami. Irane tínaga mana ko bialu hene ngamiru hangu mitangitangi bialu haabo howa tínaga miniha genda yu kamigome tínaga tingini biako halu obiore holeberami. Ani howa tíninagabi nde dugu bigibigi bialu holeberemi. <sup>24</sup> Ani beramigola Esegiele ibugua manane walia halu biyadagua tígua bialu holeberemi. Tíha mbirale uruni tagira ibirangi íni Anduane Homogoore henedane hondoleberemi laya, lalu Esegielehanda lene.

<sup>25</sup> Anduane Homogohanda íhondo laabo halu lalu, Dindiali-o ínaga anda ti dege dombeneha kagome tí bayale hongohe kamabe toba haga kami. Tígua anda ogoni gubalini timbuni howa turu halu ogoni hangu mitangi biaabo haga kamigoni. Anigo ínaga anda ogoni gialo wahi halu ti waneiginirubi bo wahi holebero. <sup>26</sup> Ani berogola horo ogoningi agali mbira homa nabi yu wahene kagome abale gerai lalu í keria mbirale uruni biyagonaga te langule ibulebira. <sup>27</sup> Ai horo ogoningi dege ínaga ne hariga ndibulo haabo harigo ína mo karulape helarogola bi lone lolebere. Ani berogola ína agali bi yalu ibiragohondo bi latagi halu lamulebere. Ína bi lalu kego hondowa Isaraele wali agali tigua íni Anduane Homogoore henemane henedane hondolebira, laya lalu íhondo lene.

## 25

### *Amono dindi mo ko holebira lenego ogo*

<sup>1</sup> Anduane Homogohanda íhondo lalu, <sup>2</sup> Dindiali-o ína Amono dindiha handa amu howa mbiwia halu, Tí mo ko holebira, labe. <sup>3</sup> Amono wali agali tihondo ína bi ogodagua lamibe. Anduane Homogo Bibahende Haru Haame Ho Haga kago ibugua bi larago hale halimu, labe. Ínaga anda hewago mebia hayagobi Isaraele dindi bo haealabaga biyagobi Yuda wali agali bu hearu dindi kaundiaha garabaya bu yalu piai hayagobi hondowa tígua turu timbuni ho harimi. <sup>4</sup> Ani bialu harimigonaga ína agali maru ni tagira ibiragohayagi howa ibilalu tí baba wai bialu tínaga dindi ngamigo karulo helolebero. Tínaga mabuha tomo henedemiru ti aribia howa bu nalu holebira. Ani bialu nogo bulumaga angibuni karunaga andu ibane tínaga winigo tigua hambu naga bulebira. <sup>5</sup> Ína Laba tano timbuni ngago mo labu halu datani timbuni andaho

✧ 25:1: Yar 49.1-6, Ese 21.28-32, Amo 1.13-15, Seb 2.8-11

ngeledogola dindi ogoni nogo kamele bu karume datani nalu holene wulebira. Ani bialu Amono dindi bibahende nogo sibi hangu hinalu holene wulebira. Ani ngelarogola tigua ini Anduane Homogoore henedane hondoleberemi.

<sup>6</sup> I Anduane Homogo Bibahende Haru Haame Ho Haga kogo ina bi ogodagua laro. Tigua Isaraele wali agali handabe manga timbuni ho howa Isaraele dindi bo haealabaga bialu bo labu hayangi tigua turu timbuni howa gi habe balu mali ligiligi bialu harimi. <sup>7</sup> Anidagua bialu harimigonaga ina hameigini tara tara dindi taraha karu ti daluha ibilarogola tigua tinaga mbirale ngamiru page bialu ti minu bai holebira. Ina tiha mo ko holene ibilarogola tinaga dindiha hameigini abogo padagoni lene napalueberemi. Ani berogo hondowa tigua i Anduane Homogo heneneore henedane hondoleberemi, laya lene.

### *Moaba dindi mo ko holebira lenego ogo*

<sup>8</sup> I Anduane Homogo Bibahende Haru Haame Ho Haga kogo ina bi ogodagua laro. Moaba wali agali bu karubi Sia wali agali bu karubi tigua mitangi bialu Yuda wali agali bu karu ti hameigini maru kagobi dege ka lene.\* <sup>9</sup> Ani lenego ina tinaga waitigi bu karu ibilalu tigua Moaba dindiha dindi tubarini tano timbini dunini ngamigoria wai bilo ibilolebero. Ani ibilarogola tigua tano hongohe uru Bede Yasimodobi Balameonobi Kiriadaimibi tano bayale uruni bibahende bo hilo wahai halu bo labu holebira. <sup>10</sup> Agali waitigi uruni ni tagira ibiragohayagi howa ibalu Moaba dindiha karubi Amono dindiha bu karubi uruni baba wai bialu ti bope halu tinaga dindi ngago karulo holebira. Anidagua biragola Moaba dindiha Amono dindihabi hameigini abogo padagoni lene napaluebira. <sup>11</sup> Anidagua bialu ina Moabali bo haealabagabu wahai kogola tigua ini Anduane Homogo henene henedane hondolebira, laya lene.

### *Idomo dindi mo ko holebira lenego ogo*

<sup>12</sup> I Anduane Homogo Bibahende Haru Haame Ho Haga kogo ina bi ogodagua laro. Idomo wali agali tigua Yuda wali agalihondo mana ko wiaru biadai biyagonaga pani nolene nga.\* <sup>13</sup> Ani nolene ngagonaga ina laro. Ina Idomo dindi bo haeala hole bialu wali agali bibahende bi tinaga nogo tara tara bu karubi bibahendeore bo wahai holebero. Temana tano ngagoria howa bama pialu uyura Dedana tano ngagoria bama tagira pialu wali agali bibahende waitigime bo wahai halu dindi labu wulebira. <sup>14</sup> Ina Idomo tinaga mana ko biyagonaga pani nelu mialu inaga Isaraele wali agali bu karume ti baba wai bule pudaba lolebero. Anidagua berogola Idomo wali agali tigua inaga keba holene timbuni tiha ibira manda bulebira. Anidagua bialu Idomo wali agali tigua ko biyagonaga pani nelu inime minidalo manda bulebira. I Anduane Homogo Bibahende Haru Haame Ho Haga kogo ina bi o ledogoniore, lene.

### *Pilidia dindi mo ko holebira lenego ogo*

<sup>15</sup> I Anduane Homogo Bibahende Haru Haame Ho Haga kogo ina bi ogodagua laro. Bambaore howa Pilidiali tigua Isaraeleali handabe manga halu waitigi haabo haga ka. Tigua Isaraelealime ko biyagonaga paipai bialu mo ko haga bialu haabo ka.\* <sup>16</sup> Anidagua bialu kagonaga ina ogodagua laro. Ina Pilidia wali agali pani nelu mialu iba solowara ange ange paluyu pedarubi bo hilo wahai holebero. <sup>17</sup> Tigua mana ko bialu hayaru bibahendenaga paipai biadai bialu pani timbuniore nelu merogola ina ti baba keba timbuni ho harugo ti miniha manda bulebira. Anidagua berogola tigua i Anduane Homogo henene henedalo manda bulebira, laya lene.

\* 25:8: Ais 15.1-16.14, 25.10-12, Yar 48.1-47, Amo 2.1-3, Seb 2.8-11    \* 25:12: Ais 34.5-17, 63.1-6, Yar 49.7-22, Ese 35.1-15, Amo 1.11-12, Oba 1-14, Mal 1.2-5    \* 25:15: Ais 14.29-31, Yar 47.1-7, Yol 3.4-8, Amo 1.6-8, Seb 2.4-7, Seg 9.5-7

## 26

*Taia tano mo ko holebira lenego ogo*

<sup>1</sup> Ina garabaya pu hemane mali beanenaga horo mbira\* layagola Anduane Homogohanda ihondo ogodagua laya.✧ <sup>2</sup> Dindiali-o Taia wali agali bu karume turu howa bi ladaga halu lalu, Yarusaleme tanoore bo haealabaga bialu bo labu helayago ainde wali agali dindi tara tara ngaruha howa ti baba biyinaya bule mbirali naibulubada. Ogoniha piagaru ai ina kamaria hangu ibiragola muni dabudabubi dewa wu holeberema ndobe, lalu ka.

<sup>3</sup> Ani lalu kago ai ini Anduane Homogo Bibahende Haru Haame Ho Haga kogo ina bi ogo laro. Taia wali agaliru ti baba waitigi i haro. Ani howa ina hameigini tara tara dindi taraha howa waitigi dewaore iba solowara bedago angeni iba yaribu timbuniore bu yalu ibuwa dambi hagadagua bialu ti baba wai bule ibilolebero. <sup>4</sup> Ani ibilarogola tigua ibalu tinaga tano wai pabe hongohe ege pabe bu mabubupe kamiru bo gialopaya bialu wai pabe daligani mamage haga anda bu heledemiru bo giallo wahai halu bulebira. Ani biragola ina tinaga tanoha dindi ngago dugu wahai harogola ege tole kekelele hangu tagira ibu wulebira. <sup>5</sup> Ani ngagola agali wena бага bu karume tinaga wena nu yobilonaga dindi ege tole kekelele ogoriani yalu ibuwa yobia haga bulebira. I Anduane Homogo Bibahende Haru Haame Ho Haga kogo ina bi o ledogoniore. Hameigini tara tara dindi taraha bu karume ibalu ti minalu mo ko howa bai holebira. <sup>6</sup> Ani buwa tigua Taia tano iba dege dombeneha ngago kawareni dindi timbuni iba angeni wuyu pedagoha tano dewa bu ngaruha wali agali bu karu bibahendeore bo hilo wahai holebira. Anidagua biragola hondowa Taia wali agali tigua i Anduane Homogo henene henedane hondoleberemi.

<sup>7</sup> I Anduane Homogo Bibahende Haru Haame Ho Haga kogo ina ogodagua laro. Ina kini mbira hongohe daligaore kago haru ibulebero. Kini ogoni ibu Babilononaga kini Nebugadenesa kago ina haru eberogola ibugua Taia wali agali ti baba wai bulebira. Ibugua agali dewaorebi nogo hosi dewaorebi wai biagane garo nogo hosime gili laga mini karisi dewaorebi ami agali nogo hosini biruwa wai biagane dewabi dindi abene uyurahayagi howa haru ibulebira. <sup>8</sup> Ani ibalu tigua Taia dindi timbuninaga tano kaware iba ange bu ngaruha wali agali kamiru bo wahai holebira. Ani buwa tigua gana walu tano pabe kagoha heyu howa wai bulenaga dindi dugu wima irigi holebira. Ani bialu howa tinaga wai humbiha tini hage howa wai bulenaga wai pabe haradagua bilowa ogoniha wai bulebira. <sup>9</sup> Ani bialu howa tigua wai pabe bo gialolenaga mbirale mbira hongohe guruyagu ale mo yu ibu pongo bia howa yupe haragola tanonaga wai pabe kago bo gialolebira. Ani bialu kuluba hongohe ngagome wai pabe daligani mamage haga anda bu heledemirubi gialolebira. <sup>10</sup> Ani bialu tinaga nogo hosi urunime tanoha hariga ngadagua gerai lalu pugupugu biragola tanoha be abalu timbuni taularagome anda bu karu dambi hai holebira. Ami agalime nogo hosini biralubi hosime gililaga garo ale karisini heyu halubi tanoha abale anda piai holebira. Wai pabenaga panga kagoria anda pialu howa dindi kulu lalu hongo howa bi ua laga biragola wai pabe ema bialu holebira. <sup>11</sup> Ami agali nogo hosini biralu pialu howa tigua wai biagane ayu tibu ne gadele yigome wali agali tanoha bu karu diba amu nana bima polebira. Anda gene hongohe tanoha bu karu dindini dugu ibira hai holebira. <sup>12</sup> Waitigi urunime tinaga muni mbirale ngamirubi biyinaya bulenaga dabudabu ngamirubi bibahende mo yai holebira. Ani bialu tinaga wai pabe hongohe karu bo gialapaya biai halu tinaga anda hongohe karubi bo giallo wahai holebira. Ege tolebi ira bayale podene ngarubi dindi ngarubi bibahende iba solowara bedagoha bape hai holebira. <sup>13</sup> Anidagua biragola tigua ngida ale бага kamiru nabe iba gana laga

\* 26:1: Hiburu bi lo ngagoha ege ogoalene lalu gilibu wia nabiniya. ✧ 26:1: Ais 23.1-18, Yol 3.4-8, Amo 1.9-10, Seg 9.1-4, Md 11.21-22, Lg 10.13-14

kamirubi nale dege holeberemi. ✧ <sup>14</sup> Tí naga dindini ege tole dege ibira halu dindi mbira nawulebira. Ege tole ogoni ngagoria agali wena бага karume tinaga wena nu yobia haga wulebira. Ani biaga ngagola mani tano ogoriani lone biadai bibe nahe wulebira. I Anduane Homogo Bibahende Haru Haame Ho Haga kogo ina bi o ledogoniore, laya, lene.

<sup>15</sup> I Anduane Homogo Bibahende Haru Haame Ho Haga kogo ina Taia wali agali bu karuhondo bi ogodagua laro. Waitigi urunime tinaga tano ngago bo gialabaga bialu howa hoaro laragobi kilingulu laragobi bibahende wali agali iba angeni paluyu pedarume hale holebira. Ani bialu waitigime tí minu baragola yiya lalu dugu bigibigi beremigobi tigua hale howa mogo timbuniore lowa duru lagalaga bialu holebira. <sup>16</sup> Tí ha mo ko holene ogoni anda ibirago hale howa hameigini tara tara dindi tara iba solowara bedago ange ange ngagoria paluyu pedarume mogo timbuni lalu tinaga kini karume biragane dagia ngago ngelalu daluwa kininaga aga bayale karulo bedaru golo wahai halu dindini biruwa duru lalu birulebira. ✧

<sup>17</sup> Ani biruwa tinaga tano bo giallo waharagonaga dara howa duguore bialu iba gana ogodagua lolebira.

Tano mini lene timbuni winigo ai bo giallo wahai hayada.

Ibunaga iba sibi timbuni biaru ibani puibu biyaru tinaga biyinaya biabe nabi ngagoni.

Wali agali tano ogoniha hearu ti bamba iba solowara bedagoria ibuwa

iba sibi dewa wialu ti iba solowara biabe bulene mugube tara tara yu howa ti duniniore haya.

Wali agali tara tara iba solowara angeha palima pedarume inaga wali agali mo gi timbuni haya.

<sup>18</sup> Tano bo gialabaga biai hayagola horo ogoningi

wali agali iba dombeneha paliaga bu hearu

tigua gi timbuni howa tini duru lagalaga bialu holebira,

lalu wali agalime dara howa dugu bigi bialu iba gana ogonibi lolebira, lene.

<sup>19</sup> I Anduane Homogo Bibahende Haru Haame Ho Haga kogo ina bi ogodagua laro. Taia íore tano wali agali mbira nahe ngaligobi ngelolebero. Ani bialu iba solowara timbuni bedagome bira dambi helarogola í iba andane dindihaore wulebere. <sup>20</sup> Ani bialu ina í dindihaore homayarunaga andagaha bape harogola í wali agali ala homaga biyaru heba mandagi holebere. Ina í tano maru bo giallo wahai hayaru heba dindi andaneha wuwa homayaru heba wiaabo holebere. Ani biragola wali agali mbira íha lone nahe íbi nde dindi ogoria lone nawulebere. <sup>21</sup> Ina íore bo haealabaga bu waharogola wali agali tara bu karume ina íhondo birugoni de hondowa gi timbuni holebira. Ina í bo gialabagabu wahai harogola wali agalime í de hondole taya bialu karia de nahondolebira. I Anduane Homogo Bibahende Haru Haame Ho Haga kogo ina bi o ledogoniore, laya, lene. ✧

## 27

### *Esegielehanda Taia tano ko holebiragonaga dugu daraore binigo ogo*

<sup>1</sup> Anduane Homogohanda íhondo lalu, <sup>2</sup> Dindiali-o Taia tano ngago bo gialopaya biai holebiragonaga ina dugu daraore bialu iba gana lolene nga. <sup>3</sup> Tano ogoni iba solowara bedago kawareni ngagome dindi tara tarani hameigini tara tara padaru baba biyinaya bialu haga nga. I Anduane Homogo Bibahende Haru Haame Ho Haga kogo ina bi o larogo latagi halu iba gana labe.

Taia ina lalu,

I duniniorebi tano bayaleorebi mbira ngo, laga ngegoni.

- <sup>4</sup>Ínaga dalu iba solowara ngegoni. Agali tano í wabiagarume í baya taraore iba sibi ale wabu wini.
- <sup>5</sup>Tigua ira bayale guraya aleru Hari Hemono weagoha howa dibalu kambu laga buwa iba sibi ale ogoni wabiya.  
Ira tamia Lebanono dindiha howa dibu yalu ibuwa iba sibi helo yalu pelonaga labolabo pongobia hole helaga biya.
- <sup>6</sup>Basana dindiha howa ira bai ale hearu dibu pelowa iba talu tanguiaga ira mbalape wabu wiya.  
Ira bayale tara mbira dindi Saibarasa ngagoha howa dibu yu ibalu ogonime iba sibinaga dagia dindiha pelowa dunguaya.  
Nogo elebana kagonaga ne gayane mo wuwa ogonime iba sibinaga tamuha mo yáribia haya.
- <sup>7</sup>Labolabo baya taraoreru Iyibi dindiha howa mo yu ibuwa ogonime iba sibi helestonaga labolabo helaya.  
Labolabo uruni bayale helo mo yáribia halu aga tara tara lebu para hagabi wiaru mo yu ibugu biya.  
Labolabo ogoni pongobia heago kaundiaha howa handaga wini.  
Aga bayale mindibi tagalitayabi dindi Saibarasa iba dombeneha ngagoria howa mo yu ibuwa iba sibiha agali biabe biagaru holene wiagohayagi dariba haga biya.
- <sup>8</sup>Agali iba sibi ogoni yu ibaga biagaru ti Saidono tanoalibi Abada tanoalibi hene.  
Taia ínaga agali manda timbuniwi karu ti iba sibiha biabe biaga helene.
- <sup>9</sup>Agali maru iba sibi ogoninaga tamuha ira maru goba halu diri wigi birago wagaya haga ti Bibiloso tanoali mandabi hene.  
Iba sibi ogoni manane Taia tano í manda bialu nga.  
Iba sibi dindi tara tara ngaruha howa í daluha ibalu tinaga biabe biaga agaliru ínaga tanoha biyinaya anda heagoha anda pialu mbirale tara tara ngaru yolo migi biaga hene.
- <sup>10</sup>Agali maru Pesia dindi howabi Lidia dindi howabi Libia dindi howabi ti ínaga ami agali hayagoni. Ani howa tinaga wai biaga humbiru ami agalinaga gaba mandaru ami agali hagaha golo derela ho haga bu haya. Agali uruni tigua wai bialu í mini lene habelo mo hela haya. <sup>11</sup>Abadali ami bu hearu tigua ínaga wai pabe bu mabu bini kagoria mamage halu ami agali maru Gamadali hearu tigua wai pabe daligani mamage haga anda bima iraga hene heagoria howa waitigi ibulilono mamage haga hene. Ani howa tinaga wai humbi biaru ami agali hagaha golo derela ho haga bu haya. Agali uruni tigua í mo bayale heagola í tano baya taraore mbirago wirigoni ndobe.
- <sup>12</sup>Ína Sebena wali agali baba biyinaya bialu harigoni. Ani bialu howa tigua silibarubi aeanerubi gabarubi sodarubi dewaore ínaga mbirale dewa ngeruni yolo bialu ngigi biya. <sup>13</sup>Wali agali Girigi dindiha howabi Tubala dindiha howabi Mesege dindiha howabi ibugu biyaru í baba biyinayaru bialu ínaga mbirale wua heru tihondo mialu tigua wali agali garabaya biabe ale bia hagaru helalu mbirale tara tara boronosime wabini wiaru ngigi biya. <sup>14</sup>Ína Togama tano wali agali bababi nde biyinaya bialu ínaga mbirale wiru ibu mialu nogo hosi biabe biaganebi agali biralu wai bu piaganebi nogo dongibi yolo bigi birigoni. <sup>15</sup>Dedana wali agali bu hearu bababi nde biyinaya bialu harigoni. Wali agali hameigini tara tara iba solowara bedago ange ange palima pedarubi biyinaya bialu tigua nogo elebananaga ne gayanebi ira mindibi mini ebonibi bibahende ína ngeru ti hameledago ale yolo bialu ngigi biya. <sup>16</sup>Siria wali agali bu hearume nde labolabo mindibi tagalitaya ale marubi labolabo mbiragoria aga yári tara tara bayaru lebu para howa mo yáribia haga binirubi aga pele bayaleorebi ege tole tara tara emeralabi koralabi lubibi muni dewame miaga wiarubi ínaga mbirale



tara tara bayale wiaru yolo bialu ihondo ngigi biya. <sup>17</sup> Yuda wali agali Isaraele wali agalirubi tigua nde widi dewabi mone taranaga ibanebi olibe lini welibi tomo mo dende bia haga tara tara wiarubi yalu inaga ngeru tini hameleda ale yolo bule ibugu biya. <sup>18</sup> Damasagasa tanoha wali agali bu hearume í baba biyinaya bialu tigua waini iba Helebono tanoha howa wabinigobi nogo sbinaga irini Sahara dindi wiagoha hearumebi yalu ibalu ihondo ngigi biya. <sup>19</sup> Wali agali Dana hameigini bu hearumebi Girigi wali agali Usala dindiha bu hearumebi í baba biyinaya bialu tigua aeanerubi tomo mo dende biahaga tara tararubi pauda mbira mini sanda wiarubi ira mini kasianaga ibanebi yunibi linibi tara tara wabini wiarubi gambe tara mbira ngabi baya tara mbirabi tigua yalu ibalu ina ti hameledago ale mo mibelo ibugu biaga hene. <sup>20</sup> Ani bialu Dedana wali agali bu hearume balangiya tara nogo hosinaga erekunini bialu howa mo wiagaru yalu ibalu tini hameledago ale ina ngeru yolo bule yalu ibugu biaga hene. <sup>21</sup> Arebia agali bu hearumebi Keda dindiha howa agali haguane bu hearumebi nogo sibi iginibi sibi wangaberubi nogo memerubi haru ibalu tinaga hameledaru ina ti mibelo yolobu ibugu biaga hene. <sup>22</sup> Agali biyinaya biaga Seba dindiha howabi Lama tanoha howabi tigua ngolobi pauda tara tara nga bayale biaga tara tara wiarubi ege tole tara tara muni dewame miaga wiarubi yalu ibalu tini hameleago ina wu heru mibelo yolo bule yalu ibugu biaga. <sup>23</sup> Agali Harana tanoha howabi Kane tanoha howabi Idene tanoha howabi biyinaya biabe biaga agali Seba dindiha howabi Asuru tanoha howabi Kilimada tanoha howabi tigua í baba biyinaya biabe biaga hene. <sup>24</sup> Tigua aga baya taraorebi labolabo tagalitaya alebi labolabo maru yári tara tara lebu para henebi pu payini timbuni tarabi balangiya anda tamuha biraganeni dungua hagane alebi yalu ibugu biya. Balangiya uruni taraore mo yaribia haga bini wiarubi yalu ibalu ina ti hameledaru ale ngago yolo bule mo yalu ibugu biya. <sup>25</sup> Ani bialu iba sibi timbuni wiarume inaga dabudabu tara tara wiaru mo yalu dindi tara tara wiaruha pugu biya.✠

Ini nde iba sibi timbuni ale ibani wuwa dabudabu tara tara dewaore wu toledagoni. <sup>26</sup> Agali iba talu yaga hearume í hongo howa yalu iba solowara bereago hanuni pu wigola puyabu hongohe ni ibiragohayagi howa ibalu í bo haealabagi halu mo ko hai haya. <sup>27</sup> Í mo ko hayangi inaga munibi dabudabubi yári tara tarabi inaga iba sibiha biabe biaga agalibi iba sibiha gabenda biabe biaga agalirubi biyinaya biabe biagarubi inaga ami agalirubi agali maru ini heba haga heneru bibahende ibaha homai harimida. <sup>28</sup> Agali iba sibiha biabe biaga bibahende bu hearume ga hongo howa layuagome iba angeni dindi wiaru birilagimbu biya.

<sup>29</sup> Agali iba sibiha biabe biaga hearu tigua iba sibi ibani ngelalu tagira piai halu iba angeni pu haya. <sup>30</sup> Ti bibahendeme inaga daraore halu dugu timbuni bialu haya. Tigua dara ho kama walia halu biagane mana ngadagua dindi abalu tinaga haguani dugu hiralu be abalu wiagoria palu beregedaga bialu haya. <sup>31</sup> Tigua inaga dara howa tinaga mandari podo mbololo wahai haya. Tinaga bu miniha tandaga timbuni howa dugu tara bialu daraho howa karulagane agaru karulo haya. <sup>32</sup> Tigua agali homenenaga dara howa dugu biaga wiadagua dugu bialu ogodagua iba gana lene.

Taia-o tano mbira í mo ko haradagua mende agoha mo ko hene ngabe.

Í iba solowara bedago dombeneha wialu bi nale ngegoni.

<sup>33</sup> Inaga dabudabu wiruni iba sibime yalu dindi tara tara ngaruha piai helarigola hameigini tara tara ala burupale hearume mbirale uruni mialu mo yu howa turu haya.

Kini karume mbirale inaga wirume biyinaya biabe bialu ti mo homogoore haya.

<sup>34</sup> Ai áyu ini iba solowaraha mo ko ho wialu

✠ 27:25: Mo 18.11-19

ibaha namu lai haya.  
 Agali íha biabe biaga hearu bibahendebi  
 ínaga dabudabu wiaru bibahendebi  
 íni heba iba solowaraha ereba hai harimi.

<sup>35</sup> Wali agali iba solowara ange ange paluyu pearume í mo ko haya layago hale howa ti mogo timbuniore laya. Tinaga kini hearubi mogolo howa gi timbuni ho hayago tinaga denguini mo walia haya. <sup>36</sup> Í dindini nahe bo haealabaga bialu pu erebaore hai helaya. Anidagua bialu agali biyinaya biabe biaga dindi bibahendeha bu hearume í mo ko hene wiago de hondowa ti gi timbuni howa lo mitangi bialu, Inabi nde ogonidagua buligo giba, lalu ka, laya lene.

## 28

### *Taianaga kini kago mo ko holebira lenego ogo*

<sup>1</sup> Anduane Homogohanda íhondo bi lalu, <sup>2</sup> Dindiali-o Anduane Homogo Bibahende Haru Haame Ho Haga kogome ína bi o langerogo Taianaga kini kagohondo ína lamibelo hameledo. Ínaga bi ogodagua laro. Taianaga kini-o ína íninaga mini mo yaraga halu lalu, Íni daliga timbuniore wali agalime í mitangi bialu bi pupu wiaga mbira kogoni, laga ke. Ínaga dindibi nde mbirale mitangi bialu bi pupu wiagaru dindi mbaule iba solowara dege dombeneha wu kegoni. Ína bi henene anidagua la larigonigo henene í mbirale bi pupu wiaga uruni ale ndo í bame agali dege kegoni. <sup>3</sup> Ínime manda bu handalu keria ínaga mini gigabi ngego Danielenaga wu henego bolangua halu timbuniore wu howa mbirale wia do hene ngaru manda biaihe kobe tobaho kegoni. <sup>4</sup> Ínaga mini gigabi ngegome muni ngolo silibaru hangu dewa mo wu howa ai homogo kegoni. <sup>5</sup> Ani mo ngelo howa muni urunime biyinaya bialu muni igini wiyagola dewaore wu kegoni. Ani howa ínaga muni dewa wu kegonaga balagala howa mine timbuniore halu kegoni.

<sup>6</sup> Anigo í Anduane Homogo Bibahende Haru Haame Ho Haga kogome íhondo bi langerogo. Ína mine howa mitangibu handalu keria ínaga mini gigabiwi mbirale gime wabini mitangi bialu bi pupu wiaga karu aria mbira í kobe toba ho kegoni. <sup>7</sup> Ani mitangi bialu kegonaga ína ínaga waitigi koore bu karume íni baba wai bilo ibilolebero. Ani ibilarogola tigua ínaga manda timbuni ngegome mo wini ngeruni bibahende bo gialabaga bialu mo yu piai holebira. <sup>8</sup> Ani bialu íni mo ko howa íninaga dindi iba solowara dege dombeneha ngegoria homolebere. Ani homalu íni homenerunaga dindi humbirini andaha pu holebere. <sup>9</sup> Anigo tigua í bole ibirangi ína tihondo lamialu, Wali agalime íhondo bi pupu wiaga mbirale mbira í kogoni, loleberebe. Anigo ogonidagua nalolebere. Ína í bo wahaga biaru de handade halu í bame agali damene bu karuni ale dege harudane hondolebere. <sup>10</sup> Ínaga waitigirume ibalu í bo waharagola í agali urun-ínaga giha howa biango homaradagua bulebere. Anduane Homogo Bibahende Haru Ho Haame Haga kogome ína tí ani bidaba lalu lamirugoni laro, laya lalu Esegielehanda lene.

### *Taianaga kini mo ko holebira lenego ogo*

<sup>11</sup> Anduane Homogo ibugua íhondo laabo halu lalu, <sup>12</sup> Dindiali-o ína Taianaga kini kagonaga dugu bialu ibuhondo bi ogodagua lamibe. Taianaga kini-o Anduane Homogo Bibahende Haru Haame Ho Haga kogome bi ogo íhondo larago hale habe. Ala í agali tigabi bayaleore wali agali maru bolangua hene mbira harigoni. Ínaga mandabi timbuniore bu howa í agali bayaleore mbira harigoni. <sup>13</sup> Í Ngode Datagaliwabenaga Idene mabu ale bayale biagotha harigoni. Ani bialu ínaga yári bayale ege tole tara yolo

✧ 28:2: Iba 9.20, Ais 14.13, 31.3, 2 Te 2.4

timbunime miaga mini ngoloru ngibingabu lo helaga bini wiaru mo karulo hari. Ege tole uruni mini lubiru tobasaru daimonoru beriliru kanelianaru yasabaru sabaearu emeralaru ganederu ege tole uruni bibahende í dindini nahengi ina inaga mo manda manda bu wiru. <sup>14</sup> Kini-o ina í dahuliyali mamage haga haradagua helowa ina inaga hari loma bia hene wiagoria pu howa ege tole ngiringarale tara tara wiagoria ibagabu harigoni. <sup>15</sup> Ina í dindi ogoria pigane helarungi í bayale ko mbira íha nawiore helaru. Ani helewagola mani inaga deni howa mana ko dewaore bialu hari. <sup>16</sup> Ina dindi dewaoreha biyinaya biame halu howa wali agali bu hearu baba biyinaya uruni timbuni helonaga bia hamiya ibidaba lowa mana ko bialu wali agali bo wahaga kegoni. Í dahuliyali mamage haga ale harigoni hegola inaga deni í ko dodoheore hayagola ina inaga hari loma bia hene biagoria howa í bo taliatagi harugola í taga halu pirigoni. Ani birugola í ege tole baya ngiringarale biaru ngagoria lone naholebere. <sup>17</sup> Ini manda bu handalu heria inaga dengui bayaleyagola inime balagala halu ini mini mo yaraga halu harigoni. Ani bialu inaga manda timbuni wu howa ainde manda timbuni ogonime ininaga mini mo yaraga holene ngabe tobaho harida. Irane ogoninagaore ina í bope harugola dindini wiria kini maru karume í hondo oba halu helonaga biru. <sup>18</sup> Taianaga kini-o ina biyinaya biabe bialu howa mana ko dewa bialu harigome lotu anda bu hearu inaga deni mo dodoheore helari. Ani birigola ina tano uruniha ira hedope halu bo heda hewagola tano uruni dai halu be abalu hangu ibira hene ngaria wali agalime hendedagoni. <sup>19</sup> Í mo ko hai hene kegonigo ai dindini naholebereore. Dindi tara taraha wali agali í mandabi bu karume íha ogonidagua biya larago hale howa tihabi buligo lowa ti mogo timbuniore lo kagoni, Anduane Homogohanda laya, lalu Esegielehanda lene.

*Saidono tano mo ko holebira lenego ogo*

<sup>20</sup> Anduane Homogohanda ihondo lone lalu, <sup>21</sup> Dindiali-o ina handa amu ho howa Saidono tanohondo íha mo ko holene wulebira lalu lamibe. <sup>22</sup> Anduane Homogo Bibahende Haru Haame Ho Haga kogome ina Saidono wali agali bu karuhondo mbirale buleberorunaga bi lamibe. Saidono-o inime tí baba waitigi halu mo ko hai halu tíha inaga mana tigabi bayale biaga ngoru mo walia halu berogola tigua inaga mini yaraga halu holeberami. Wali agali tara tara bu karume ina Saidono wali agalihondo ogonidagua berogo hondowa tigua ini Anduane Homogooore henedalo manda biai holebira. <sup>23</sup> Inime warago ko timbuniore tara tararu tí kamiruha ibilolebero. Ani bialu tinaga waitigi bibahende ibai helarogo tigua Saidono baba wai bialu wali agali dewaore bo wahai holebira. Ani biragola bo wahenerunaga darama tanoha harigani iba poradagua pialu holebira. Ani berogo hondowa Saidono wali agali tigua iniore Anduane Homogooore henedane hondoleberemi, laya lalu lamibe, lene.

*Anduane Homogohanda Isaraele wali agali mo bayale holebero lenego ogo*

<sup>24</sup> Anduane Homogo ina bi laabo halu ogodagua laro. Isaraele wali agalinaga waitigi bu karuni ti igibu ani ale howa wali agali kenda poradagua biaga bu ka. Anigo mani lone ani nabulebira. Horo ogoningi Isaraele wali agalibi waitigi bu karubi ti bibahendeme í Anduane Homogo Bibahende Haru Haame Ho Haga kogo iniore henene henedane hondolebira, lene.

<sup>25</sup> Anduane Homogo Bibahende Haru Haame Ho Haga kogo inaore larogo, Ina Isaraele wali agali dindi tara tara ngaruha garabaya pu helaruruni bibahende haru dai bialu tininaga dindi tene wiyagoria helolebero. Ani berogo hondowa hameigini tara tara bu karume í taraore howa mana bayale tigabi biaga kogoni manda bulebira. Isaraele wali agali tininaga dindi henene ngelo lowa ina inaga biabe biahaga Yagabahondo mirugoria ibalu haabobo bu holebira. <sup>26</sup> Ani howa tinaga anda bialu tinaga

gerebi maburu hangalu ti bayaleore helo helolebero. Ani kagola tinaga waitigi abale Isaraele wali agali ti mo ko halu haga bu hayaruni pani mialu ti minu bolebero. Anidagua berogola Isaraele wali agali tigua iní Anduane Homogoore tinaga Ngode Datagaliwabe henedalo manda bu holebira, lalu Anduane Homogohanda lene.

## 29

### *Iyibi dindi mo ko holebira lenego ogo*

<sup>1</sup> Ina garabaya hemane mali pininaga ege nde pini dege layagola ege ogoninaga horo hombene (12) hayagola Anduane Homogohanda ihondo bi ogodagua laya. ✧ <sup>2</sup> Dindiali-o ina Iyibinaga kini kagoha handa amu howa ibuhondo inaga bi hongo howaore la halu, Ina ibi inaga wali agalibi Iyibi dindini hai kamiru tí bibahendehe mo ko holene ibilolebero. <sup>3</sup> Ina i Anduane Homogo Bibahende Haru Haame Ho Haga kogo ina bi o larogo ibuhondo lamibe. Iyibinaga kini-o í waitigi i kogoni. Íore Iyibini iba pugua ngagoha guru abagua timbuni mbira palu wiradagua bide. Ina iba Naili timbuni porago inime wabirigo ininagaore pora laga ke. <sup>4</sup> Ani bidego ai ina inaga neha wena hugume hende howa wena bedaru inaga dongone o ligilaga ledagoha hanaho ngeloliya hondo habe. Ani buwa ina í gilila mialu ini heba wena íha para haga bidaru heba ibaha howa gilila mulebero. ✧ <sup>5</sup> Ani bialu ina ini heba wena urunibi dindi ko iba dalu naibaga ngagoha bape holebero. Ani berogola inaga tingini dindini bame ibiraho ngagola mbiralime mo hora nahe wiaabo holebira. Ani ngagoria nogo gabua bu karumebi ega bedarumebi ibuwa inaga tingini nalu birulebira. <sup>6</sup> Ani birago hondowa Iyibi wali agali bibahendeme iniore Anduane Homogo henene henedane hondoleberemi. ✧

Anduane Homogo ibugua lalu, Isaraele wali agali karume mitangi bialu Iyibiali tigua ibalu wai biamogo bialu mo wulebirabe tobaho hemiria ai wai biamogo bule naibirimi. Kini-o í halimbu hongohe ale ndo kegoni. <sup>7</sup> Isaraele agalirume í halimbu yalu ibaga bule handalu hearia í gambe hale gabuni ale heneyago ai tigua halimbu yamialu poramalo manda bialu hearia poda pialu tininaga adogeha nogoba haya. Tigua í hongo howa yu ha hearia ai habola pialu pilowa tininaga erene podaya. <sup>8</sup> Ani biyagonaga i Anduane Homogo Bibahende Haru Haame Ho Haga kogo ina laro. Ina waitigiru ibilalu tigua Iyibi tí baba wai bule ibuwa wali agali bu karubi nogo tara tara bu karubi bibahende bo wahai holebira. <sup>9</sup> Ani biragola Iyibi dindi mo ko howa bo labu hai harago de hondowa tigua ini Anduane Homogo heneneore henedane hondoleberemi.

Kini ina lalu iba Naili porago inime wabialu pelene pora larigo iba ogoni ininagaore lalu kegoni. <sup>10</sup> Bi ogoni ko mbira larigo ai ina íla waitigi halu iba Naili poragobi waitigi dege haro. Ani howa ina Iyibi dindi bibahende mo ko howa bo labu hai halu Migidolo tano uyurahayagi ngagoria howa pialu unurahayagi Asawana tano ngago Sudana dindila tubari ngagoria tagira pelolebero. <sup>11</sup> Anidagua berogola mali pira mariani (40) Iyibi dindiha wali agali lenego mbira naholebirago nogo tara tarabi pialu karia nahondolebere. <sup>12</sup> Ina Iyibi dindi balu bo haealabaga biai halu Iyibi dindini tano wima pedarubi bo haealabaga biai halu berogola dindi hangu wiaho ngane dege mali pira maria (40) polebira. Ani bialu ina Iyibi wali agali balu bo taliatogo larogola ti wali agali tara tara bu karu dombeneha purogo lalu piai holebira, laya.

<sup>13</sup> I Anduane Homogo Bibahende Haru Haame Ho Haga kogo ina bi ogodagua laro. Mali pira maria (40) piai haragola ina Iyibi wali agali dindi tara tara wiaruha minalu purogo lelarugoria howa lone tini dindiha helo haru dai biai holebero. <sup>14</sup> Ti lone daibu howa Iyibi dindinaga abene unurahayagi dege helolebero. Ani bialu Iyibi dindi abale hongohe wiagagobi ndo wulebira. <sup>15</sup> Ti ina mo nagalone ho helarogola tigua hongohe howa dindi mende ngaru ala handayaho howa haru hagane wiyadagua nahe

ti hongo nahe holebira. <sup>16</sup> Anigo Isaraele wali agalime Iyibiali o biraruni hondowa tigua mitangi bialu Iyibime ti biamogo bule ibabe larimagonaga mana ko birimada lo manda bialu Isaraele tigua ogonidagua lone nabulebira. Ani bialu Isaraele tigua ini Anduane Homogo Bibahende Haru Haame Ho Haga henedane hondolebira, laya lene.\*

*Kini Nebugadenesahanda Iyibi bope holebira lenego ogo*

<sup>17</sup> Ina garabaya dege hemane mali pira kirani karia (27) hayagola mali ogoninaga ege mbiranaga horo mbira layagola Anduane Homogo ibugua ihondo langialu lalu, <sup>18</sup> Dindiali-o Babilononaga Kini Nebugadenesahanda ibunaga ami agaliru haru ibalu Taia tanoha wai bialu haya. Kini ibugua ibunaga ami agali bu hearu mbirale wai biagane aleru gendabi wiaru ya hadaba layagola tigua yu hearia tinaga haguani mandari piai halu paya gondolalu darama ibiya. Anigo kinibi ibunaga ami agali biarubi tigua biabe erekuibi ogoni biyagoyu ti mbirale bayale mbira mo ya nabi biabe bame dege bu wahole bialu hayiya. <sup>19</sup> Anidagua biyago ainde Anduane Homogo Bibahende Haru Haame Ho Haga kogo ina bi ogo laro. Ina Iyibi dindi ngago Nebugadenesahondo mo mulebero. Ani berogola ibugua Iyibi dindi bo haealabaga bu wahalu Iyibi dindiha mbirale bayale ngaru ibubi ibunaga ami agali biarubi tigua biabe erekuibi bialu hayagonaga yolo ale mo yalu polebira. <sup>20</sup> Kini Nebugadenesabi ibunaga ami agali bu karubi tigua wai bialu hayago inaga biabe bia hayagonaga yolo biadai bialu ina tihondo Iyibi dindi mo mulebero. I Anduane Homogo Bibahende Haru Haame Ho Haga kogo ina bi o ledogoniore.

<sup>21</sup> Mbirale uruni birangi ina Isaraeleali ti lone hongo helo mo hongo holebero. Ani bialu Esegiele ina Isaraele wali agali bu karuhondo bi latagi habelo helarogola tigua ini Anduane Homogo henene henedane hondolebira, lalu Anduane Homogohanda laya lene.

## 30

*Anduane Homogohanda Iyibi mo ko holebira lenego ogo*

<sup>1</sup> Anduane Homogo ibugua ihondo lalu, <sup>2</sup> Dindiali-o i Anduane Homogo Bibahende Haru Haame Ho Haga kogo ina bi ogo larogo ina mbiwia halu bi dalimu latagi habelo hameledo. Mo ko holene timbuni gibi ibulebirago daraba. <sup>3</sup> Horo ogoni kaware ibiragoni. Anduane Homogo ibugua wali agali bibahendeme ko biyarunaga pani nelu miai holenaga abale tagira ibiragoni ndobe. Harini aruma holenebi wali agali mo ko holenebi horo ogoni tagira ibiragonida. <sup>4</sup> Horo ogoningi waitigime Iyibi dindiha ibalu wai bulebira. Sudana dindini wali agali karuha genda timbuniore tagira ibulebira. Iyibi dindiha waitigime wali agali dewaore bo wahai halu tinaga mbirale dabudabu ngaru bibahende mo yalu pialu dindi ogoni bibahende bo haealabaga biai holebira.

<sup>5</sup> Wai ogoni birangi ami agali dewaore Sudana dindiha howabi Libiaha howabi Lidiaha howabi Arebiaha howabi Kubuha howabi homalu ininaga wali agali karu aria Isaraelealibi wai ogoniha homolebira.

<sup>6</sup> I Anduane Homogo ina ogodagua laro. Iyibi agali mo wialu wai bialu karia waitigime uruni tini abene uyurahayagi Migidolo tano ngagoria howa bama pialu unurahayagi Asawana tano ngagoria bairi holebira. Iyibialiru tigua hongo howa mine halu parali ho haga winigo ai tinaga hongo ogoni biba halu ereba holebira. I Anduane Homogo Bibahende Haru Haame Ho Haga kogo ina bi o ledogoniore. <sup>7</sup> Ina Iyibi dindi bo haealabaga biai halu tano ngarubi bo gialahole bialu bo labu helolebero. <sup>8</sup> Ina Iyibi dindiha ngago damene bo heda hai halu hameigini tara tara Iyibi biamogo bialu karubi bo wahai halu berogola Iyibi wali agali tigua ini Anduane Homogo heneneore henedalo hondolebira.

\* 29:16: Ais 30.2-3, 36.4-6



<sup>9</sup> Horo ogoningi ina Iyibi balu howa Sudana wali agali tigua tiha mo ko holene mbira ibuluba ndoda lowa hope karia agali maru bi lo yalu iba sibi poragoria pelolebero. Ani pelarogola tigua bi te Iyibi dindiha bialu ka lalu larago hale howa Sudana wali agali bu karu ti gi halu mogo lowa duru lalu holebira. Emene tigi mbira hangu howa ina urunidagua bulebero.

<sup>10</sup> I Anduane Homogo Bibahende Haru Haame Ho Haga kogome ogodagua laro. Babilonoalinaga Kini Nebugadenesa kago ibugua Iyibi dindiha munibi mbirale ngarubi bibahende mo yu piai helo ina ibuninaga ami agaliru haru halu ibilolebero. <sup>11</sup> Babilonoali kini biagobi ibunaga ami agali koore urunibi tigua ibalu Iyibi dindi mo ko halu bo haealabaga bu wahai helolebero. Tigua Iyibi wali agali ayu tibume dibu gaibu paya bidagola homene tingini dewaore Iyibi dindini bu wulebira. <sup>12</sup> Ani bialu ina iba Naili porago mo hundia hai howa agali mini koore karume Iyibi dindi karulelo tinaga giha ya holebero. Agali uruni ti dindi taraha howa ibalu Iyibi bo haealo wahai holebira. I Anduane Homogo ina bi o ledogoniore.✧

<sup>13</sup> I Anduane Homogo Bibahende Haru Haame Ho Haga kogo ina bi ogo laro. Iyibi dindini Membisi tano ngagoha dama mitangi bialu mbirale bi pupu wulenaga gime wabu ngaru bibahende ina bo haealo wahai holebero. Ani bialu Iyibinaga kini kago bo taliatagi harogola Iyibi wali agali haru holene mbirali nahedagola ti gi timbuni ho helolebero. <sup>14</sup> Ina Iyibi dindi abene unurahayagi wai labu dindi ngelolebero. Ani bialu dindi abene uyurahayagi Soana tano ngagobi bo heda hai holebero. Tebese tano timbuni ngago ko biyarunaga pani mulebero. <sup>15</sup> Ina Pelusiumu tano Iyibi dindinaga wai pabe hongohe bu mabu bidagoha wali agali karu inaga keba timbuni holene ti manda bilolebero. Tebese tanoha munibi mbirale tara tara ngarubi bibahende mo wahai holebero. <sup>16</sup> Ina Iyibi dindi bo heda hai howa Pelusiumu tanobi genda tandagala timbuni yu holebira. Tebese tanonaga wai pabe bidago bo giallo wahai howa tano ogoniha iba li timbuni ibulebira. Membisi tano ngagohabi genda tandagala yu haabo holebira. <sup>17</sup> Ani bialu Heliobolisi tanohabi Bubasidisi tanohabi igiri daliahe bu karu bibahende waitigirume bo wahai holebira. Wali agali maru tano kira ogonilaboha haga karu ti dindi taraha garabaya bu yalu piai holebira. <sup>18</sup> Iyibiali tigua hongo howa mine halu parali ho haga winigo ai tinaga hongo ogoni mo wahai harongi Tabanese tanoha aruma hai holebira. Ani bialu beraliba mindibi timbunime Iyibi dindi dambi hai holebira. Anidagua biragola waitigiru ibalu wali agali Iyibi dindiha karu minu garabaya bu yalu dindi tara tara ngaruha purogo lolebira. <sup>19</sup> Ina Iyibi wali agali pani nelu ogonidagua merogola tigua iniore Anduane Homogo heneneore henedalo manda bulebira, laya lene.

### *Iyibi kininaga hongo ereba henego ogo*

<sup>20</sup> Ina Babilono dindiha garabaya hemane dege mali beane (11) hayagola ege mbiragonaga horo kane layagola Anduane Homogohanda ihondo bi ogodagua laya. <sup>21</sup> Dindiali-o ina Iyibinaga kini biagonaga gi bo polaru. Ani birugola ibugua hongo howa wai biagane ayu tibu ngago yu howa wai lone bilo ibunaga gi dabi helonaga kabu bulene mbira naheore. <sup>22</sup> Ani kago i Anduane Homogo Bibahende Haru Haame Ho Haga kogo ina bi ogo larogo, I Iyibi kini kagola waitigi kogoni. Ina ibunaga gi bo tagalene kago heba gi mende bayale kagobi kirabali bo tagalolebero. Ani berogola wai biagane ayu tibu ibu gini yidago ibira holebira. <sup>23</sup> Anidagua bialu Iyibi wali agali balu dindi tara tara ngaruha purogo lelebero. <sup>24</sup> Ani bialu ina Babilono kini kagonaga gi kirabali lone mo hongo howa inaga wai biagane ayu tibu ibunaga giha mo ya holebero. Ani buleberogoyu Iyibi kini kagonaga gi kirabali bo tagalarogola tandaga timbuni nalu holebira. Ani nalu howa ibuni Babilono kini kagonaga wanakuihayagi howa dugu timbuniore bialu homolebira. <sup>25</sup> Ina heneneore larogo Iyibiali kini kagonaga hongo mo

wahai halu Babilonoali kini kago mo hongo holebero. Inaga wai biagane ayu tibu ngogo Babilono kini kagohondo mo merogola ibugua Iyibihayagi ya amu haragola nde Iyibi wali agali karu tigua ini heneneore Anduane Homogo henedane hondolebira. <sup>26</sup> Ina Iyibi wali agali bibahende bo taliatogo larogola ti dindi tara tara bu ngaruha purogo lai holebira. Anidagua berongi tigua ini Anduane Homogoore henedalo manda biai holebira, laya lene.

## 31

### *Anduane Homogohanda lalu Iyibi kini ira tamia ale lenego ogo*

<sup>1</sup> Ina garabaya hemaria mali beane (11) hayagola ege tebonegonaga horo mbira layagola Anduane Homogo ibugua ihondo lalu, <sup>2</sup> Dindiali-o ina Iyibi kini kagobi ibunaga wali agali bu karubi tihondo bi ogodagua lamibe. Iyibialiru tiore hongo gibihe kamigoni. Hongohe ti kamigobi mende ai kabe. <sup>3</sup> Iyibi hongo timbunihe howa ira tamia Lebanono irabuha kaligobi hene. Ira ogoni ibunaga gene magane timbuniruhe ibu andaneha bayale gumbahe wini. Ira ogoni ibu luore li beraliba daligaore ela howa ira tara tara karu bolanguahe hene. <sup>4</sup> Iba bayale bereagome ira ogoni mo anda halu dindi andaneha howa iba duguadaga halu puwa ira timbuniore anda hene. Iba urunime ira maru hearu mo anda haga biaga berene. <sup>5</sup> Iba dewa bereagome ira ogoni mo anda hayagola ibu andaho timbuore halu ira maru hearubi ndo lu timbuniore hene. Ibunaga gene magane timbuni luni yunibi dewahe hene. <sup>6</sup> Ira ogoninaga maganeha ega tara tara berearume tinaga anda bigibigi biagaya. Nogo gabua bu hearubi ema bialu piaga tara tara berearubi ira ogoninaga gumba bayale wiagoha ti igini wu ngoai hagaya. Hameigini tara tara dindi tara ngaruha hearume ira timbuni ogoninaga andaneha biru ngoai hagaya. <sup>7</sup> Ainde ira ogoni duniniore mbira heneya. Ira ogoni timbuniore howa ibunaga gene maganeru lu andaho hene. Ibunaga piniru dindiha unuraore pialu dindi iba dewa bereagoria piyagola lu timbuni amura pugupugubi haya. <sup>8</sup> Ira tamia bayale timbuni ogonibi mbira Ngode Datagaliwabenaga mabu Idene dindi biagoha naheore. Ira tamia ogoninaga gene maganeru ira maru mabuha hearunaga gene maganeru hearubi ndo ibu timbuni luore heneya. Mabu ogoniha ira bayale maru hearu nira dege lowa ira tamia mbiraore ogoni ibu timbuniore hene. <sup>9</sup> Inime ira ogoninaga gene magane mo dewaore harugola ira baya burugule mbira hene. Ngode Datagaliwabenaga mabu Idene dindiha ira maru bu hearume ira mbiraore ogoni de hondowa ti hengelo hene.

<sup>10</sup> Ira maru bu hearu nira lowa ira tamia ogoni ibu luniore halu li beraliba ela howa mine haga hene. Ani henego i Anduane Homogo Bibahende Haru Haame Ho Haga kogo ina ira ogoni timbu bayaleore henego ibuha mani tagira ibulebiragonaga laro. <sup>11</sup> Ira o biago ibu mine hayagola ina ibu erembira mialu kini hongohe mbiranaga giha mo ya haru. Ani birugola ainde kini o biago ibugua ira ogoni ibunime ko bialu hene wiagonaga pani nelo mulebira. <sup>12</sup> Dindi tara agali ko bu karume ibalu ira tamia timbuni ogoni dibu ibira haragola dindini wiaabo holebira. Ira ogoni podarangi gene magane timbuni biaru hari bibahende ngaruhabi dindi ulini ngaruhabi podo ibira haga bialu gingirulobaga biai holebira. Ani bidagola hameigini tara tara dindi taraha howa ibu heneru ti ira ogoninaga andane gumba heagoha biraga biaru ti ibida pugupugu bulebira. <sup>13</sup> Ira tamia ogoni dindini dibupe hene ngagoria egaru ibalu birulebira. Nogo gabua karubi ema bialu piaga maru bedarubi ibalu ira ogoni ngagoria obenenibi gene magane ngarunagabi birama ibulebira. <sup>14</sup> Mani ira lu timbuni ogonibi mende naholebira. Ira maru holobadaru tenaha mo anda holene iba bayale bereaguabi luore ogonibi anda halu li beraliba daligahaore elahe mbira naholebira. Ira bibahende ti

abale agali homagadagua pola hole bialu homene dinini andaga peneru heba piai holebira.

<sup>15</sup> I Anduane Homogo Bibahende Haru Haame Ho Haga kogo ina bi ogo laro. Ira timbuni ogoni ibu homalu homene dininiru hagaha porangi iba dindi andaneha bedarume ira homayagonaga dara howa bira dambi ho helolebero. Ani bialu iba poraru tagira napelo hariga hangai holebero. Anidagua bidogola iba dindini biraga bedaru hundiai holebira. Ira ogoni homayagonaga Lebanono dindiha hari wedarume daraho kago mo walia halu aruma hai helolebero. Ira maru bu karubi nde ira mbiraore ogoninaga dara ho halu tinibi gabu hai holebira. <sup>16</sup> Ina ira timbuni ogoni homene dininiru hagaha bape harogola dindi bibahendeha ema bialu dumbirumbi biame holebira. Ani berogola ira bayale maru Idene mabuha hene biarubi ira bayale maru Lebanono dindiha hene biarubi ti homene dininiru hagaha pu karume ira luni ogoni bape harogo de hondowa tinaga bu miniha dungulo holebira. <sup>17</sup> Agali ira timbuni ogoninaga andane gumba heagoha biraga howa agali ira ogoni biamogo bigi biaga heneru tibi nde ira ogoni ibuni heba homene dininiru hagaha hole piai holebira. Ti puwa agali maru ayu tibume dibayagola homaga bini biaru heba mandagi pu holebira.

<sup>18</sup> Iyibi dindinaga kini kagobi ibunaga wali agali bu karubi ti ira tamia lu timbuni ogonibi ka. Idene mabuha ira bayale luni henerubi ibu ale mbira naheore. Anigo ira timbuni ogoni ibu ira maru Idene mabuha heneru ale dege halu ibu homene dininiru hagaha hole polebira. Ibu puwa agali mini kowi hene homenerubi agali waiha hearia bene homenerubi ti heba mandagi hole polebira. I Anduane Homogo Bibahende Haru Haame Ho Haga kogo ina bi o ledogoniore, lene.

## 32

### *Iyibi kini ibu abagua ale lowa ko holebira lenego ogo*

<sup>1</sup> Ina garabaya hemaria mali hambene (12) hayagola mali ogoninaga ege hambeneni (12) horo mbira layagola Anduane Homogo ibugua ihondo lalu, <sup>2</sup> Dindiali-o ina Iyibi kini kagonaga dara howa ibuhondo bi darabi ogodagua labe. Kini-o ina mitangi bialu hameigini tara tara bu karu bibahende dombeneha howa i laiono gabua ale hetingi hariligoni. Anigo i laiono ale ndogo i abagua ale timbuni mbira ibaha biruwa ibaga bialu ge dege dindi halu bedaria iba bayale bedago mo ganguluma bia hagagobi kegoni ndobe. <sup>3</sup> Anigo ai Anduane Homogo Bibahende Haru Haame Ho Haga kogo ina ihondo bule ngogo ogo. Hameigini tara tara dewaore dindi taraha howa ibu ngoai haragola ina haru ibalu inaga wena nu ngogo bape harogola wena nu ogoniha i do ngeria wali agali urunime nu heba ibaha howa dindini gililo mu ngelolebira. <sup>4</sup> Ani ngeledagoria ina i nuha howa dindini tagupe ho ngelaragola ega bedarumebi nogo gabua bu karumebi ema bialu piaga tara tara biru ngarumebi dindi bibahendeha howa i nai helonaga olo ngoai holebero. Anidagua berogola tigua i nalu no karulape howa bibahende tombe hai holebira. <sup>5</sup> Ani bialu inaga tingini togo bidago podowa maru hari ngaruha bape halu maru dindi ulini ngaruhabi mo bape harogola wu toladaga holebira. <sup>6</sup> Ani bialu ina inaga darama dindi uli uli ngaruhabi hari bare bare ngaruhabi odo paya biai helolebero. <sup>7</sup> Ina i bo homa howa hari daligaha buyi hai howa yakundinaga wa holenebi mo hundiai holebero. Ni nadelo hari beralibame ni mo gehai harogola egebi nadolebira.\* <sup>8</sup> Anidagua bialu ina wa holene hariha haga bu karu bibahende mo hundiai helarogola inaga dindi ngego bibahendeha aruma hai holebira. I Anduane Homogo Bibahende Haru Haame Ho Haga kogo ina bi o ledogoniore.

<sup>9</sup> Ina i mo ko haiore haya lalu te ogoni dindi bibahende ini manda nabini ngaruha lo yogo larogola hale hararume gi howa mogo timbuni lalu holebira. <sup>10</sup> Ina ihondo buleberogo hondowa hameigini tara tara dindi taraha karu dewaoreme mogolai

\* 32:7: Ais 13.10, Md 24.29, Mg 13.24-25, Lg 21.25, Mo 6.12-13, 8.12

holebira. Ininaga wai biagane ayu tibu yidogome í mo ko howa dibidogola kini karume gi timbuniore howa mogo lolebira. Í ko howa dindini ibira harengi kini karu tigua lo mitangi bialu inahondobi nde o biyadadagua buligo lalu gi holebira.

<sup>11</sup> Iyibi kini-o i Anduane Homogo Bibahende Haru Haame Ho Haga kogo ina íhondo bi ogodagua laro. Babilono kini kagome í baba wai bule ibulebira. <sup>12</sup> Ami agali kooreru dindi odagoniha howa ibalu ínaga wali agali bibahende bo hilo wahai helolebero. Iyibi wali agaliru tínaga turu haga ngamiru bibahende mo ko hai helolebero. <sup>13</sup> Tínaga nogo bulumaga bu karu bibahende tini iba naga bedaruha nalu karia bo hilo wahai helolebero. Anidagua bidogola agalibi nogo bulumagabi ibaha pialu karia iba bedaru geme mo gangulumu bulene mbira naholebira. <sup>14</sup> Ani bidogola iba bibahende gagahe bayaleore lone berelo mo ema bia nahe berelolebero. Iba porarubi yaribu nabi hendore pialu pelo pelolebero. I Anduane Homogo Bibahende Haru Haame Ho Haga kogo ina bi o ledogoniore. <sup>15</sup> Ina ínaga wali agali bibahende bo wahai halu ínaga dindi ngaru bibahende mo ko hai helarogola ogoniha mbirale nawi wai labu dindi ngago de hondowa Iyibi wali agali tigua ini Anduane Homogoore henedalo manda biai holeberemi. <sup>16</sup> Ina bi ogoni laroru dindi tara tara ngaruha wali bedarume hale halu í dara howa ínaga dugu ogonidagua bia holebira. I Anduane Homogo Bibahende Haru Haame Ho Haga kogo ina bi o ledogoniore, laya lene.

*Wali agali homene dininiru pu hagagoha kagonaga bi lenego ogo*

<sup>17</sup> Ina garabaya hemaria mali hambene (12) ogoninaga ege hambene (12) dege horo nguini (15) hayagola Anduane Homogohanda íhondo lalu, <sup>18</sup> Dindiali-o Iyibi wali agali dewaore daga labe nahe o bu karuninaga dugu bia habe. Ani bialu wali agali dindi tara tara hongohe ngaruha howa homayaru baba homene dininiru hagagoha ti mandagi hole pelo warape habe. <sup>19</sup> Iyibialiruhondo bi ogodagua labe. Tigua manda bu handalu kamiria tini wali agali bu karu bolangua howa tí bayale duniniore kamabe tobaho kamibe. Wali agali mana ko bialu howa homayaru heba mandagi hole tí homene dininiru pu hagagoha abale daliape halu pudaba, labe.

<sup>20</sup> Dindiali-o ai Iyibi ami agali bu karu bo wahai holenaga wai biagane ayu tibu manda manda bu wia. Ti baragola agali maru waime bene homayaru baba mandagi hole pelo waha. <sup>21</sup> Ani pu kagola agali wai biagane haguane homene dininiru pu hagagoha abale pu hene biarume Iyibi wali agaliru ti biamogo biaga biaru ibirago de hondowa turu holebira. Tigua turu howa Iyibi agaliruhondo bi dalimu lalu, Agali mini kowi heneru tinaga waitigime bayagola homene dininiru hagagoha o íbu kagoni ndobe, lolebira.

<sup>22</sup> Asiria dandinaga ami agaliru bibahende waime benerunaga dinini ti homene dinini pu hagagoha pu hea. <sup>23</sup> Asiriali nahome howa wali agali tara tara bu hearu bibahende mo gi hai haga heneya. Ani heneyago ai ami agali uruni ti waime beneru tinaga dinini unuraoreha pu hea.

<sup>24-25</sup> Elama dandinaga ami agali waime benerunaga dinini ti dindi ogoniha dege pu hea. Ami agali uruni ti waitigi agalime bo waheneru tini homa nabi heangi tigua wali agali dewa mo gi haga heneya. Ani heneyago ai ti homalu agali dongone podo mabu biagane mana wiago nabiaga heneru heba homene dininiru pu hagagoha pu hea.

<sup>26</sup> Mesege dandinaga ami agaliru Tubala dandinaga ami agalirubi ti waime benerunaga dinini pu hagagoha dege pu hea. Ami agali uruni ti nahome heangi tigua wali agali bu hearu mo gi haga heneya. Ti ani bialu henego ai ti dongone podo mabu biagane mana winigo nabiaga heneru heba homene dininiru pu hagagoha pu hea. <sup>27</sup> Agali maru ami agali uruni hora haga hayadaruni tigua ami agali uruni baya hangu hora ha nabi agali yagibano bu karu hora hagadagua yu hora haya. Tigua bamba agali tara henerume tinaga ami agali hora hagadagua naheneya. Bamba agali henerume tinaga agali hagianeru homaragola tinaga wai biagane ayu tibu ngago ibuni

homaliha mo haguanda ho ngelalu humbibi tinaga tinginini dambi howa horo haga wini. Mesege hameigini Tubala hameiginila homa nabi heangi wali agali dewaore mo gi timbuni haga henegome libuha pani nolene wiaabo holebira.

<sup>28</sup> Iyibiali ti nde mo ko halu bo haealabaga birangi ami agali ti waime benerunaga dinini pu hagagoha dege pu holebira. Agali uruni ti dongone podo mabu biagane mana nabiaga heneru aria tibi nde waime bene.

<sup>29</sup> Idomo hameigininaga agali haguanerubi kinirubi bibahende homene dininiru pu hagagoha pu ha dege bia. Bamba Idomo hameiginiru ti wai biaga ami agali hongoheore henego ainde ti homalu ami agali dongone podo mabu biagane mana winigo nabiaga heneru heba homene dininiru pu hagagoha pu hea.

<sup>30</sup> Dindi abene uyurahayagi kini agali haga henerubi Saidono hameiginirubi ti dindi ogoniha dege pu hea. Bamba ti hongoheore heangi tigua wali agali tara tara bu hearu mo gi hai haga hene. Ani bialu haga henego áyu ti homalu ami agali maru waime bene biaru baba mandagi pu howa tini taga pani timbuni nalu hea. Agali homene uruni ti dongone podo mabu biagane mana winigo nabiaga dege hene. Uruni tibi wali agali maru homene dininiru pu hagagoha pu hene karu heba howa taga pani nalu hea.

<sup>31</sup> Iyibialinaga kini biago ibugua ibunaga ami agali waime bo wahenego hangu ndo ami agali maru waime beneru tibi homene dininiru pu hagagoha pu kago hondowa ibunaga bu miniha emene dungulo holebira. **I** Anduane Homogo Bibahende Haru Haame Ho Haga kogo ina bi o ledogoniore.

<sup>32</sup> Inime mo heya hewagola Iyibi kini kagome wali agali hameigini tara tara padaru dewaore mo gi ho helaru. Anigo ai kinibi ibunaga ami agalirubi waitigime bo wahai haragola ti homalu homene dininiru pu hagagoha pu howa agali maru waime beneru heba mandagi holebira. Agali uruni bibahende ti dongone podo mabu biagane mana winigo nabiaga dege heneru aria pu hea. **I** Anduane Homogo Bibahende Haru Haame Ho Haga kogo ina bi o ledogoniore, laya lalu Esegielehanda lene.

### 33

#### *Anduane Homogohanda Esegiele ibu mamage helo dabene go (Esegiele 3.16-21)*

<sup>1</sup> Anduane Homogohanda ihondo bi ogodagua langiya. <sup>2</sup> Dindiali-o ina wali agal-ihondo mamage holenenaga mana ogobi nga lalu lamibe. Ina dindi mbiraha howa waitigi baba wai bule ibilarogola hale howa tigua agali mamage helonaga dabo helaga. <sup>3</sup> Ai waitigi ibiragola agali mamage haga urunime mbelo biguli mbira wai ibira lalu pu lolebira. <sup>4</sup> Mbiralime mbelo biguli ogoni pularago hale halu ha do hole ibida pu nabi karia waitigime ibu bo wahayagua nde ibuninaga koyane. <sup>5</sup> Ibu ibida nape donge ho hayagome homaya. Agali ogonime donge nahe biguli pulayago hale halu ibida pedale nde ibu nahomedale. <sup>6</sup> Anigo mamage ho haga kagome waitigi ibirago hondowa biguli pu nalayagua nde wali agali bibahende bo wahai holebira. Anidagua biyagua nde tini kagua biyagonaga pani homolene winigo homolebira. Ani bialu inaga deni howa agali mamage haga biago ibugua bia ko hayagome ibubi pani nolene wulebira. <sup>\*</sup>

<sup>7</sup> Anigo ai dindiali-o ina í Isaraele wali agalirunaga mamage habelo dabo helarogoni. Ina wali agalihondo bi hongohe mbira ihondo ala langerogo ina ti hale helo latagi habe. <sup>\*</sup>

<sup>8</sup> Ina handalu koría agali mbirame ko mbira biyagonaga ibu homolebira laruyagua o biagohondo ina lalu, Bayale holene yu habelo mana ko bialu kegoni wahalu mini beregedabe, lalu ibu nalamiriyagua nde ibunaga ko ngago wiaabo kaore homolebira. Ani ngaore homayagua nde bia ko hagabi madane biagabi tene í holebere laro. <sup>9</sup> Anigo agali ogoni ina lameregola ibu mini beregeda nabi howa homayagua nde ibuninaga

<sup>\*</sup> **33:4:** Har 9.19-21, Hi 11.7 <sup>\*</sup> **33:6:** Ais 56.10-11, Ese 3.18, 18.20, 18.24 <sup>\*</sup> **33:7:** Yar 1.17, 26.2, Ese 3.17, Ab 5.20



koyane. Ibuni mana ko biyagome homolebira. Anidagua biyagua íha bi dai bulene henge nawi howa í homolene nawulebira, lalu lene.✠

*Anduane Homogohanda mbirali mana ko biagaru homelo hame nalagago ogo*

<sup>10</sup> Anduane Homogohanda íhondo lone lalu, Dindiali-o ínaga bi ogo Isaraele wali agali karuhondo tígua bi ogodagua laramili lalu lamibe. Tígua lalu, Iname ko birimagome bu miniha genda timbuni ho halu inanaga tingini obiore kamagoni. Ai ina agua bialu bayale holeberemadabe, lalu laramiligoni labe. <sup>11</sup> Isaraele wali agaliruhondo bi ogodagua lamibe. Í Anduane Homogo Bibahende Haru Haame Ho Haga Ngode Datagaliwabe haluhe heneneore kogobi agali mana ko biaga karuni aria mbira homayagua í turu naharuli. Agali ogoni ibu mana ko ngaruha handa tara ho howa homa nabi bayale helogo turu haruli. Ai Isaraelealiru-o hale hadaba. Tígua ko beremiligo wahalu íni koria dai bidaba. Tí aginaga tíni homolene hariga tai bialu kamibe.✠

<sup>12</sup> Dindiali-o ai Isaraele wali agaliru bi ogo lamibe. Agali mbira ibu abale bayale henego mani ko biadai biyagua ínaibunaga mana bayale abale bialu hayago mitangi nabulebero. Ibu biamogo bulene mbira nawulebira. Ai agali mende ibu abale ko bialu henego mani ko biyaruni erembira mialu mana bayale biyagua ogoni ibu paninelo namulebero. Anigo agali mbira bayale henego lone mana ko biyagua ína abale bayale biyaruni mitangibu dai bialu ibu bayale helo wa naholebero. <sup>13</sup> Ína agali tigabi kagohondo í bayale holebere laruyagua agali tigabi ogoni ibuni lo manda bialu ína mana tigabi birurunime íni yopialu poleberogodago lowa mani mana ko ngaru lone biyagua nde ibugua mana bayale abale biyaru í manda nabuleberoore. Ibugua mani mana ko bu aribia hayagua ibuni homolene wulebira.✠ <sup>14</sup> Ai ína agali ko biaga kagohondo í homolebere laruyagua agali o biagome mana ko bialu henego wahalu mini beregedalu bayale biadai biyagua nde <sup>15</sup> ibu nahomolebira. Ibugua mbirale mbira dano hole lowa mendealinaga mo yinibi mbirale mo page binirubi lone yadai bialu ínaga mana ngago baya hangu talialu biyaguabi mana ko ngaru wahayaguabi ogoni ibu nahomolebira. <sup>16</sup> Ibugua kagua bialu hayaruni ína domo waholebero. Ani bidogola mani ibunime mana tigabi biyagome yopialu nahome bayale holebira.

<sup>17</sup> Anigo ai dindiali-o í damene bu karunime lalu, Anduane Homogo ibugua mana lehe ko biaga ka lagago ai ani ndoyago. Isaraele wali agali tínime bia ko haga kami. <sup>18</sup> Agali mbirame ala mana tigabi buwa mani mana ko bialu hayagua nde ibuni homolene wulebira. <sup>19</sup> Ani buwa agali mana ko biaga mbirame mini beregedalu mana tigabi bayale ngaru bialu hayagua ibu bayale holebira. <sup>20</sup> Anigo tí Isaraele wali agalirume lalu, Anduane Homogohanda mana birago lehe bira laramiligo ai hale haramine. Mani tínime mana bialu harimirunaga manda buwa ína tí dabaki buleorebero, lalu Anduane Homogohanda lene.

*Yarusaleme bo gialo wahaya layane hale henego ogo.*

<sup>21</sup> Mali homberiani (12) ina garabaya biabe bialu henego ai mali hombeanegonaga ege pini hayagola ege ogoninaga horo dauningi agali mbira í hewaria ibuwa lalu, Yarusalemeore bo gialabagabu wahaya, lalu langiya. Waitigirume ibuwa Yarusaleme bo gialo wahalu hea handala agali ogoni ibu í langule pora bialu ibida ibiniya.✠ <sup>22</sup> Ege pinigonaga horo mane layagola alendo Anduane Homogonaga hongo holene íha karula hayuane handaru. Ani hondo hewaria horo mendengi egerebagiore agali ogoni í hewaria anda ibiyagola Anduane Homogohanda ínaga hége mo tiga biyagola bi bayale labehe haru.

*Isaraele wali agalime ko biniru ogo*

✠ 33:9: Ese 3.19-21, Ab 13.40-41, 13.46 ✠ 33:11: 2 Sml 14.14, Ese 18.23, 18.31, 2 Pi 3.9 ✠ 33:13: Ese 3.20, 18.24  
✠ 33:21: 2 Kin 25.3-10, Yar 39.2-8, 52.4-14

<sup>23</sup> Anduane Homogohanda ihondo ogodagua laya. <sup>24</sup> Dindiali-o Isaraele wali agalirunaga tano wiaru bibahendeore bo gialabaga biaiore hayago ai wali agali uruniha bu karume bi ogodagua lagaya. Abarahama ibu agali mbiraoreli howa dindi timbuni ogoni ibu karulai hene. Ai áyu ogoni ina wali agali dewaore bu kamago nde heneneore dindi ogoni bibahende inanaga wilo nginioreda, laga ka.

<sup>25</sup> Ti ani lalu kago ina tihondo bi ogo lamibelo hameledo. Anduane Homogo Bibahende Haru Haame Ho Haga kogome bi ogodagua laro. Tigua mana ko wiaru dewaore bialu nogo egaru nole bo dawalu howa darama pelo wa naharamili. Ani bialu mbirale gime wabiniruhondo bi pupu wialubi agali homelo bo wahalubi haramili. Anigo tigua agua bialu dindi ogo tí karulolene mitangi bu kamibe. <sup>26</sup> Tí wai hangu bialubi mana ko ngubi ngaru dege bialubi haga kamigoni. Tí damene one bedarubi kayu yalu beremiligo ai agua bialu tigua dindi ogoni karulo holeberemibe. Tigua nakarulo holeberemiore ndobe, laya.

<sup>27</sup> Ani lowa lalu, **I** Anduane Homogo Bibahende Haru Haame Ho Haga Ngode Datagaliwabe haluhe heneneore kogobi tinaga waitigi agalirume tano bo gialobagabu wahene biaruha wali agali bu karu bo hilo wahai hole ibulebira. Wali agali maru yu wahene tanoha ndo tagiraha karu ema bialu piaga gabua karume bo nai halu maru ibida puwa egeanda ngaruha ha do haga bidaria warago koore ngarume balu homelai holebira. <sup>28</sup> Aniore bidagola dindi uruniha mbirali mbira naheore ngelalu dindi ogoni mo koore holebero. Isaraele wali agali tí hongoheore howa mine hagago ai tinaga hongo ogoni maro bilolebero. Aniore bidogola Isaraele dindini hari nene ngaruha irabu teha polene gi timbuni tagira ibilarogola wali agalime uruniha lone ibaga bibe nahe holebira. <sup>29</sup> Tigua mana ko ngubi wiaru hangu bialu hayagonaga ina pani mialu tinaga dindi ogoni mbirali nahe labu dindiore ngelarogola ogoningi tigua **i** Anduane Homogoore henedane manda biaiore holebira, laya lalu Esegielehanda lene.

*Anduane Homogonaga bi mana latagi haga heagome bi layagola wali agalirume hale nahe henego ogo*

<sup>30</sup> Anduane Homogo ibugua ihondo lalu, Dindiali-o **i** damenerume tano biagonaga paberuhabi tini andaga haraba ngaruhabi lola howa tini degedege lagalaga bialu **i** mitangi bialu lalu, Iname bi mana latagi haga agali biago karia puwa Anduane Homogohanda áyu bi agi layadabe hale hole ma, laga ka. <sup>31</sup> Ani lowa wali agali uruni tigua inaga bi hale hole ibu ngoai haga bialu howa galone manda bule ndo bame haleme hale hangu holebira. Tigua **i** bi mana larego talialu nabiaga. Tinaga ne hambume mo turu holene bi lalu tinaga bu miniha muni dewa yu holeneru dege manda biaga. <sup>32</sup> Ina bi larego dege agalime gawa hiliyularu laragola baya hangu ema nabi biruwa haleho wiagadaguabi agalime wandari lawule iba gana bayale laragola hale hagadaguabi hale haga. Hale howa tigua bi ogoni emeneorebi talialu bia nabiagaore ka. <sup>33</sup> Anigo mani bi larego heneneore tagira piyai harago hondowa bi o larigoni mana heneneore ininaga bi wiago lenedane hondolebira, lalu Anduane Homogohanda laya lene.✠

## 34

*Anduane Homogohanda Isaraele dindiha haru haga hearu manani helenego ogo*

<sup>1</sup> Anduane Homogo ibugua ihondo ogodagua laya. <sup>2</sup> Dindiali-o ina Isaraele wali agali haru haga karu manani haru pu helowa mbiwia halu ogodagua labe. Isaraele wali agali haru hagaru-o **i** Anduane Homogo Bibahende Haru Haame Ho Haga kogome tihondo bi larogo hale hadaba. Tíha mo ko holene timbuniore wulebira. Tí nogo sibi haru haga ale howa Isaraele wali agali ti sibi ale karu tigua baya hangu tiga handalu biamogo nabi howa tini hangu mitangi bialu harimigoni. <sup>3</sup> Tigua sibi andu iba nalu sibi irinime aga

wabini ngarubi bialu sibi bayale habatigi karu balu naga kami. Ani bialu howa tígua sibi uruni baya hangu handayaho ha nabiağa kamigoni. <sup>4</sup> Tígua sibi hongo nahe karu biamogo nabiağaore kamigoni. Tígua sibi warago bo ngaru biamogo bialu dere bu karu marasini hai nahaga howabi mbira pu ereba hayago taya bima ibaga bialu haru dai nabiağa tí kamigoni ndobe. Tígua tínaga hongome sibi tandaga nelo balu holene dege manda biagaya. <sup>5</sup> Sibi uruni tinaga haru haga nahedagola ti giligala lalu pugupugu bidaria mbirale ema bialu piaga gabua karume balu nai haga.✱ <sup>6</sup> Anigo inaga sibiru ti pialu hari wiaruha pu wandialu dindi bibahende wiaruha purogo layagola agalime sibi dara halu hai bulenebi handa walia halu haru dai bulenebi mbirali naheya.

<sup>7</sup> Haru haga agali kamiru-o ina tihondo bi o langerogo hale hadaba. <sup>8</sup> Anduane Homogo i Ngode Datagaliwabe haluhe heneneore kogonibi bi larogo hale haramine. Heneneore inaga sibi bu karuni tinaga haru haga mbira naheore howa mbirale ema bialu piaga gabua karume balu nai hayagoni. Ai agali maru inaga sibiru haru helo dabo helarurunime sibi maru pu gabua hayaru handa walia nahaya. Irane tini hangu mitangi bialu sibiru haru nahe wahayagome. <sup>9</sup> Anidagua birimidago ai haru haga kamiru-o ina bi larogo haleore hadaba. <sup>10</sup> Hale naharimiyagua Anduane Homogo Bibahende Haru Haame Ho Haga ini kogome larogo ti baba áyu waitigi ho kogoni. Ani howa inaga sibiru ini kogoha haru dai bulebero. Ani buwa ina tihondo inaga sibi haru hagane harimigo nahe wahalu pudaba lolebero. Ani larogola tígua inaga sibiru bo nolene mbira naholebira, lalu Anduane Homogohanda lene.

*Anduane Homogo ibuni nogo sibi haru haga tigabi bayaleore kago ogo*

<sup>11</sup> Ani lowa lalu, Anduane Homogo Bibahende Haru Haame Ho Haga kogo ina ogodagua laro. Inime nogo sibi pu ereba hayadaru taya bialu handa walia howa lone haru dai buwa baya hangu handayaho holebero. <sup>12</sup> Sibi haru haga agalime ginu hagua timbuni wialu aruma harangibi sibi pu ereba hayadaru taya dege bialu haru dai biagadagua ina inaga sibi dewa pialu ho giligalalo hagahaga bidaru haru dai bulebero.✱ <sup>13</sup> Ti puwa dindi tara ngaruha hagahaga bidago inime damu pialu tini dalu Isaraele dindiha haru dai bulebero. Ani berogola tini daluni howa dindi bayale iba angeange ngaruhabi hari barebare ngaruhabi turu hagabu haabo holebira.✱ <sup>14</sup> Ani howa Isaraele dindiha hari barebarebi dindi ulinibi tani bayale andaho karu nalu holebira.✱ <sup>15</sup> Ani helowa inaga sibi haru haga iniore holebero. Ti halo berelonaga henge bayale ngaruha haru polebero. I Anduane Homogo Bibahende Haru Haame Ho Haga kogo inime bi o ledogoniore.

<sup>16</sup> Nogo sibi maru pu ereba hayago inime taya bima pialu handa walia howa haru dai bulebero. Maru tinaga tinginini dereme bogo pailo waheneyaguabi uruni inime marasini hai halu hubua bulebero. Maru warago bo wiaguabi nde inime mo dabi holebero. Anigo ai sibi timbuni maru hongoheni habahe karu ina bulebero. Irane i sibi haru haga tigabi howa mana biaga ngadagua ani bulebero.✱

<sup>17</sup> Ai inaga sibiru-o i Anduane Homogo Bibahende Haru Haame Ho Haga kogome tihondo bi ogodagua laro. Tígua mana beremigo ko bayalebi ina hangu hangu dabolebero. Dabalu talebuki buwa nogo meme tí mendehayagi helalu nogo sibi tí mendehayagi helolebero. <sup>18</sup> Tí marume tani bayale karu tini nalu tombe ho howa maru karu nanelonaga hengedo hole beremiligo irane aginagabe. Tígua iba bayale gagahe bedaru tini nalu mani ibaha dalipe howa iba bayale gagahe bedago mo ganguluma bia haga beramiligo aginagabe. <sup>19</sup> Ai inaga sibi maru karume tígua tani nalu hengedo waharimigo nalu iba tí nowa mo ganguluma bia haramigobi naga ka. Tígua mana urunidagua bialu kamiruni liahe beramigoni.

✱ **34:5:** Dag 27.17, 1 Kin 22.17, 2 Bit 18.16, Ais 56.9, Yar 12.9, Md 9.36, Mg 6.24 ✱ **34:12:** Ais 40.11, Ese 30.3, Yol 2.2

✱ **34:13:** Ais 65.9-10, Yar 23.3, Ese 28.25 ✱ **34:14:** Iba 23.2, Yar 33.12 ✱ **34:16:** Mai 4.6, Md 18.11, Mg 2.17, Lg 5.32

<sup>20</sup> Ani bialu kamigodago ai Anduane Homogo Bibahende Haru Haame Ho Haga kogo ina sibi hongohe timbuni habahe kamirubi sibi hongo nahe kamirubi heba talebuki buwa mana tinime beremigoria howa dabaki holebero. <sup>21</sup> Ai sibi hongohe kamiru tigua sibi hongo nahe karu amu dindi gibuniha hengeda amu ho helowa sibi maru karu heba mandagi henego nahelonaga waratagi haga kami. <sup>22</sup> Ani birimigoyu ina sibi uruni ini kogoha haru dai bulebero. Ani berogola mbiralime ti lone mo ko naholebiraore. Ina inaga sibi memeru ani helowa mana tinime bialu kagoria ko bayalebi talebuki holebero. Tale bialu bayale karu ti mendehayagi helalu ko karu ti mendehayagi helolebero. <sup>23</sup> Ani helowa inaga biabe bia haga agali Debidi aguanene mbira dabowa inaga sibi uruni baya hangu handayaho helo dabo helolebero. <sup>24</sup> Ani helowa Anduane Homogo ini tinaga Ngode Datagaliwabe holebero. Ani kogola Debidi aguanene ogoni ibu tinaga handame howa haru haga kini holebira. Anduane Homogo inime bi ogoni lo werogoni. <sup>25</sup> Ani bialu ti bayale helonaga habo nalolene bi hongohe ti baba lo ngelolebero. Ani buwa ina ema bialu piaga gabua inaga sibi bo naga karu ti dindi ogoniha nahelo bo taliatagi hai holebero. Ani berogola dindi koore wali agali habe nahe irabu tiagi ko wiyaruni inaga sibi uruni ti dindi ogoni bu hinu bayaleore howa irabu urunihabi bu holebira.

<sup>26</sup> Ani buwa ina ti mo bayale hole inaga hari loma bia hene biagonaga ni uliuli wia banga bidarubi bibahende ti mo bayale hai helolebero. Iba dalu ibirangi dindi uruniha iba dalu dewa ibilalu dindi bayale helo mo gomba holebero. <sup>27</sup> Ira lini daga karume dewaore dolebira. Tinaga mabuha tomo dewaore anda holebira. Inaga wali agaliru garabaya biabe ale dindi taraha bialu hayaru inime golalu haru dai biai harogola tininaga dindi henene wiyagoha dai buwa turu timbuni ho holebira. Ani daibu hai kagola tigua ini Anduane Homogoore henedane manda biai holebira. <sup>28</sup> Ani kagola dindi tarali i mitangi nabiaga karume ti lone mo ko halu ba nabulebira. Mbirale ema bialu piaga gabua karu tibi lone naibulebira. Tinaga waitigi karume ti mo gi nahe bayaleore holebira. <sup>29</sup> Ina tinaga dindi ngaru mo gumbila harogola dindi bene bere bayale howa tomo bayale dewa anda haga bulebira. Tinaga dindini hina gari lone napolebira. Wali agali dindi taraha karume tomo dewa bu payabu ngago hondowa lone mege nabulebira. <sup>30</sup> Ani berogola Isaraele wali agali karume Anduane Homogo ini heneneore ti baba howa biamogo bialu henedane handalu ti inaga wali agaliore kago manda biai holebira. Anduane Homogo Bibahende Haru Haame Ho Haga kogo ina bi ogoni larogoni.

<sup>31</sup> Inaga wali agaliru-o ti sibi ale howa ti tomo nalu halimulo karulape ngiaabo haruli. Ti inaga wali agaliore kamigoni. I nde tinaga Ngode Datagaliwabe kogoni, lalu Anduane Homogo Bibahende Haru Haame Ho Haga kagome bi ogoni lene.

## 35

### *Anduane Homogohanda Idomo wali agali pani mulebero lenego ogo*

<sup>1</sup> Anduane Homogohanda ihondo lalu, <sup>2</sup> Dindiali-o ina Idomo dindiha handa amu howa, Iha mo ko holene wulebira, lalu lamibe. <sup>3</sup> I Anduane Homogo Bibahende Haru Haame Ho Haga kogo ina bi ogo Idomohondo laro. Idomo dindiha hari wedemiru ti waitigi i kogoni. Ina ti pani ngialu dindi labu hangu ngelolebero. <sup>4</sup> Tinaga tano ngamirubi bo haealabaga bialu tinaga dindibi labu hangu ibira holebira. Ogonibi ngagola tigua ini Anduane Homogoore henedalo manda biai holeberemi.

<sup>5</sup> Bamba howa Idomo wali agali tigua Isaraele wali agali baba waitigi ho harimi. Ani hemigola Isaraelealime ko biyarunaga pani nolene winingi tigua Isaraele waitigiru

☆ 34:23: Mo 7.17 ☆ 34:24: Ese 37.24 ☆ 34:25: Ais 11.6-9, Yar 23.6, Hos 2.18 ☆ 34:30: Ese 34.24, 37.27

☆ 34:31: Iba 100.3, Yo 10.11 ☆ 35:1: Ais 34.5-17, 63.1-6, Yar 49.7-22, Ese 25.12-14, Amo 1.11-12, Oba 1-14, Mal 1.2-5

biamogo bialu Isaraeleali baba wai bialu harimigoni. <sup>6</sup> Anidagua bialu harimigonaga i Anduane Homogo Bibahende Haru Haame Ho Haga howa Ngode Datagaliwabe haluhe henemane kogobi ina bi ogodagua laro. Ina ti waitigime bo wahai helo ibilarogola ti mbirago yo pialu napoleberemiore. Tigua waitigiru homelo bo wahole gi nahe bo wahaga bialu haga harimigo ainde waitigime tini homalimulo bo wahole gi nahe howa bo waholebira. <sup>7</sup> Ina Idomo dindi bo haealabaga bialu labu hangu ngelalu wali agali Idomoha puibu biraru bibahendebi bo wahaiore holebero. <sup>8</sup> Ina Idomo wali agali waime bo wahenerunaga tingini bu ngarume hari karu dambi hai halu dindi ulini ngaruhabi homene tingini wu tolai helolebero. <sup>9</sup> Ina tinaga dindi ngagoria mbirale mbira nahelo bo labu hai harogola dindi ogoniha wali agali mbira lone naholebiraore. Anidagua berogola tigua ini Anduane Homogo henene henedalo manda biai holeberemi.

<sup>10</sup> I Anduane Homogo kogo ina Isaraele wali agaliru Yuda wali agalirubi tinaga Ngode Datagaliwabe howa ti heba haabo haga kogoni. Ani kogola tigua hameigini kira urunibi tinaga dindibi karulamiya larimi. <sup>11</sup> Anidagua larimigo ainde i Anduane Homogo Bibahende Haru Haame Ho Haga howa Ngode Datagaliwabe haluhe henemane kogobi ina laro. Tigua inaga Isaraele wali agali karuhondo keba howa henge lalu harimigobi handabe manga timbuniho harimigobi ogoni birimigonaga pani nalimulo ngulebero. Ina tihondo pani ogoni mo ngerogo de hondowa Isaraele wali agalime tinihondo ko birimirunaga pani ngerogo manda biai holebira. <sup>12</sup> Anidagua berogola Idomo wali agali tigua Isaraele dindi ngagonaga bi ko lalu, Isaraele dindiha hari wedaru mo ko hai hayago ai iname dindi ogoni karulo hamiya, larimigo Anduane Homogo inime hale haru. <sup>13</sup> Idomo tigua mine howa ihondo mege bialu bi ko lalu harimigo i manda bu kogoni.

<sup>14</sup> I Anduane Homogo Bibahende Haru Haame Ho Haga kogo inaore bi ogo laro, Wali agali dindi bibahende bu karume i hondowa turu helonaga ina i mo ko hai holebero. <sup>15</sup> Tigua Isaraele wali agali ti ininaga wali agaliore heago waitigime mo ko halu bo haealabaga biyagola de hondowa turu timbuni harimi. Anidagua birimigonaga inabi nde Idomo wali agali tiniha mo ko holene ogonibi dege anda ibilolebero. Tinaga Hari Sia kagobi dindi bibahende ngamigobi mo ko halu labu wiai holebira. Anidagua birago de hondowa Isaraele wali agali tigua ini Anduane Homogo henene henedalo manda bulebira, lalu Anduane Homogohanda laya lene.

## 36

### *Anduane Homogo ibunime Isaraele wali agali mo bayale holebero lenego ogo*

<sup>1</sup> Anduane Homogohanda ihondo lalu, Dindiali-o ina Isaraele dindiha hari wedaruhondo ina bi o larogo hale helo lamibe. <sup>2</sup> I Anduane Homogo Bibahende Haru Haame Ho Haga kogo ina bi ogodagua laro. Isaraele wali agali ti waitigi bu karume ti mege bialu lalu, Bayaleoredago ai hari Isaraele dindiha karuni inanaga kagoni ndobe, laga bialu kagoni.

<sup>3</sup> Anidagua lalu karume iniore Anduane Homogo Bibahende Haru Haame Ho Haga kogo ina bi o larogo ina mbiwia halu latagi habe. Agali waitigi dindi tara tara wiaruha howa ibalu tigua Isaraele baba wai bialu dindi bibahende mo ko halu bo labu halu dindi karulai howa ti mege bialu bi ko lalu haya. <sup>4</sup> Anidagua lalu hayago ainde Isaraele dindiha hari wedemirubi dindi ulini bugubugu ngamirubi iba emene emene pugupugu bialu poramirubi tigua i Anduane Homogo Bibahende Haru Haame Ho Haga kogo ina bi o larogo hale halimu. Isaraele dindiha tano ngamirubi dindi maru wima pedemirubi waitigime balu mo labu hai hene ngamiru tiguabi ina bi o larogo hale halimu. Hameigini dindi kawareni palia para para biarume ti mo ko halu bo labu ho ngelowa mege bialu haya. <sup>5</sup> Ani lalu hayagonaga i Anduane Homogo Bibahende Haru Haame Ho Haga kogo ina Idomo hameigini karu bababi hameigini dindi maruha karu bababi keba timbuni



ho ko. Tigua i mo nagalone halu inaga dindi wiwagoha mo ngubia halu inaga dindi ngogoha nogo bulumaga sibiru hinalu holene dataniru bayale andaho kago hondowa karulai haya.

<sup>6</sup> Anidagua biyago ai dindiali-o ina mbiwia halu inaga bi ogodagua latagi habe. Isaraele dindiha hari wedemirubi dindi ulini bugubugu ngamirubi iba emene emene pugupugu bialu pedemirubi tigua inaga bi ogo hale halimu. Wali agali tara uruni tigua inaga dindi ngogo mebia howa inaga wali agali hondo oba halu mege biyagonaga i Anduane Homogo Bibahende Haru Haame Ho Haga kogo ina tihondo keba timbuni ho kogoni. <sup>7</sup> Ani biyagonaga i Anduane Homogo Bibahende Haru Haame Ho Haga kogo ina heneneore larogo hameigini uruni hingedape halu mo taga holebero. <sup>8</sup> Anigo ai Isaraele dindiha hari wedemiru taha ira dewa andaho howa yuni mabialu lini dewaore dalu holeberemi. Emeneore howa inaga Isaraele wali agali ti tini dindiha hole lone dai bu harangi ira ogoninaga lini bayale dedaru do naga bialu holebira. <sup>9</sup> Hari wedemiru tihayagi i kogo ina tinaga dindi lone alialu eru hangalu helo handaya holebero. <sup>10</sup> Ina Isaraele wali agali hameigini bibahende mo dewa howa Isaraele dindi iha helai helolebero. Ani howa tigua iha tano bo gialapaya bini ngaruni lone bia dai buwa karulai holebira. <sup>11</sup> Ani bialu Isaraele dindi iha wali agalibi nogo tara tarabi mo dewa holebero. Ani berogola Isaraele dindinaga tano bibahendeni wali agali abale hagadagua ndo dewaore howa waneiginibi dewa holebira. Ani kamigola ina wali agali dindi ogoriani abale henedarume mana bayale bialu hayaru bolangua howa ti bayaleore bialu helolebero. Anidagua berogola tigua ini Anduane Homogo henene henedalo manda biai holeberemi. <sup>12</sup> Ani bialu inaga Isaraele wali agali bu karu inaga dindi ngoruha helo ti haru daibulebero. Ani haru daibialu dindi ogoni bibahende Isaraele wali agali tinaga dindi wialu waneigini bu karu ti lone tomo garibi nale bayale helolebira.

<sup>13</sup> I Anduane Homogo Bibahende Haru Haame Ho Haga kogo ina bi ogodagua laro, Wali agali bu karume lalu, Ina daluha dindi ngagome inanaga agali haguane karu bo ereba hai halu inanaga waneigini bu karubi bo wahai hagaya, laga ka. <sup>14</sup> Tigua ogonidagua lagagoyu ainde ina lalu ayu ogoni howa Isaraele dindi ngagome agali haguane karubi tinaga waneigini bu karubi mo ko naholebiraore. I Anduane Homogo Bibahende Haru Haame Ho Haga kogo ina bi o ledogoniore. <sup>15</sup> Ai wali agali tara tara bu karume Isaraele dindi ngamiru hondowa oba halu mege bialu mo taga holene mbira nawulebira. Dindi o ngamiru tigua inaga wali agaliru lone mo ko halu mana ko ngagoha mo pila mbira holene nawulebira. I Anduane Homogo Bibahende Haru Haame Ho Haga kogo ina bi o ledogoniore, laya lalu Esegielehanda lene.

*Anduane Homogohanda Isaraele wali agali mo gahenge holebero lenego ogo*

<sup>16</sup> Anduane Homogohanda ihondo ogodagua langialu lalu, <sup>17</sup> Dindiali-o Isaraele wali agali tini dindi ogoria heangi tigua mana ko ngubiore dodohe nabulene wiaru hangu biaabo halu hayagome dindi ogo mo ko hayagoni. Ininaga deni walime egengi ilili bu biruwa taga ho biragagobi ti hayagoni. <sup>18</sup> Tigua agali dewa homelo bo wahalubi mbirale gime wabini wiaruhondo bi pupu wialubi howa Isaraele dindi inaga deni mo dodo halu mo ko hayagoni. Ani biyagonaga ina tihondo keba timbuni howa pani miadai bialu minu barugoni. <sup>19</sup> Ani buwa tigua mana ko bialu hayagonaga ina tinaga dindi yu wahalul dindi taratara wiaruha purogo lelarugoni. <sup>20</sup> Isaraele wali agali ti dindi taratarani pugupugu biyagoha tigua mana ko bialu hayago hondowa wali agali taratara hearume inaga mini bayale tigabi mo dindiha halu hene. Tigua i habane nabulene nagaloneore kagonilo manda buwa mo yo handalu lalu, Isaraele wali agali ti Anduane Homogonagaore karuni howa irane aginaga tinaga dindi andaru wahayadabe. Tinaga Anduane Homogo ibugua ti biamogo nabiyadabe, laga bialu hene. <sup>21</sup> Ina hale halu

hewaria dindi bibahende Isaraele wali agaliru pu heagoha wali agali hearume bi urunidagua lalu heago ai bi layaruni aleme inaga mini bayale tigabiorego tigua mo dindiha halu helaga binigo mitangi bialu i genda yu harugoni.

<sup>22</sup> Anigo ina Isaraele wali agali bu karuhondo bi ogodagua lamibe. Anduane Homogo Bibahende Haru Haame Ho Haga kogo inime bi ogodagua larogo bayuwa hale halimu. Isaraele wali agali tigua mana ko bialu kamigo hondowa wali agali taratara hearume inaga mini bayale tigabi mo nagalone halu kagoni. Ani bialu kago ina mbira bule ngogo Isaraele wali agali ti mitangi bialu ndo inaga mini bayale tigabi tigua mo dindiha harimigo ini miniore ogoni mitangi bialu mo yaraga helonaga bulebero.

<sup>23</sup> Ani berogome wali agali taratara uruni tihondo inaga mini bayale tigabiore kogo manda bilo walia holebero. Ani walia harogola tigua inaga mini ogoniore yaraga holebira. Isaraele wali agali tigua mana ko bialu i mini mo dindiha halu mo nagalone harimigo mani ina mini bayale tigabibi biabe hongoheru berogobi hondowa wali agali taratara karume i Anduane Homogoore henedalo manda bulebira. Ai bi ogoni Anduane Homogo Bibahende Haru Haame Ho Haga kogome larogoni.

<sup>24</sup> Ina tihondo urudagua bulego ti dindi tarataraha ho giligalalo kamiruni tinaga dindini halimulo haru dai biai holebero.\*

<sup>25</sup> Haru dai bu helowa ina iba gagaheoreme ti dodo mbira para nahe halimulo dodo doma holebero. Tigua mana ko ngubi ngaru bialu harimirubi mbirale gime wabirinuhondo bi pupu wialu harimirubi wahi howa inaga deni ti dodo mbira para nahe domeneore halimulo ani bu helolebero.

<sup>26</sup> Ani buwa mini ala tawe mo wahi halu mini gahenge wia aribia howa helolebero. Ina tinaga mini ege tole giambehe ale ala winigo mo wahalu mini gahenge ina bia larodagua bilimulonaga wia aribia helolebero.\*

<sup>27</sup> Ani buwa inaga Dinini tinaga bu miniha haabo helo helolebero. Ani helowa tigua inaga bi mana ngaru talialu bialu halimulo ina tinaga bu mini mo heya holebero.

<sup>28</sup> Ani berogola dindi ina bamba tinaga mamaliruhondo mirugoria daibu holeberemi. Ani daibu kamigola i tinaga Ngode Datagaliwabeore holebero. Ti nde inaga wali agaliore holeberemi.\*

<sup>29-30</sup> Ani kamigola ina ti biamogo bialu kogola tigua mana ko dodohe ngaru lone nabuleberemi. Ani beremigola tinaga mabu ngamiruha tomo bayaleru anda hai helolebero. Ira lini daga ale karume dewaore dolebira. Ani dedagola tigua tomo nolene mbira tumagi nahe kamigo hondowa wali agali tara tara karume ti mege nabulebira.\*

<sup>31</sup> Ani howa tigua abale mana ko ngubi bialu harimiru mitangibu dai buwa, Iname koorene ko bialu harimadago, lalu tini taga timbuniore halu holeberemi.

<sup>32</sup> Ai Isaraele wali agaliru-o Anduane Homogo Bibahende Haru Haame Ho Haga kogome ina bi ogo larogo baya hangu hale hadaba. Ina mbirale bigi bule ngogo ti biamogo bialu bayale halimulonaga ndo bulebero. Tinime ko bialu harimiru bibahende mitangi bialu taga timbuni halimulonaga bulebero, lalu lene.

<sup>33</sup> Anduane Homogo Bibahende Haru Haame Ho Haga kogo inime bi ogodagua laro. Ina tinaga ko birimigo domo waharogola ti bayale dodo nahe howa nde tinaga waitigirume abale tinaga mabu anda paberu bo gialo wahalu labu hayaru daibu howa lone biadai bilimulo helolebero.

<sup>34</sup> Agali tara marume ibaga bialu howa handalu heria tinaga dindi embera ibai heneyane handayagoni. Anigo ai ina tinaga maburu lone hangadaba lolebero.

<sup>35</sup> Ani berogola dindi tarali karume ogodagua lolebira. Abale dindi ogo ko embera labu hene wiyago ai nde ayu bayaleore Idene mabu ale hayada, lolebira. Abale tano uruni gialo bagabu wahene wiyago ai ayu Isaraele wali agali tinaga tano biaruni pabe hongohere lone bu yu mabu biyada. Isaraele wali agali ti tano uruniha lone daibu hayada, lolebira.

<sup>36</sup> Ai Isaraele wali agali ti tinaga dindini daibu kamigo hondowa wali agali maru ti kamigoha mandagi hapara ho karume manda bialu Anduane Homogo inime tano uruni bo gialo wahayago lone biadai bialu mabu embera

\* 36:24: Ais 43.5-6, Ese 34.13, 37.21    \* 36:26: Seg 7.12    \* 36:28: Ese 11.19-20    \* 36:29-30: Ese 11.20, 37.14

labuore wiyaru lone hangadai biyada, lolebira. Anduane Homogo inime aniore bule lo wirugo buleorebero, lene.

<sup>37</sup> Anduane Homogo Bibahende Haru Haame Ho Haga kogo inime bi ogodagua laro. Ainde inaga Isaraele wali agalirume ihondo ina biamogo bia larimiyagua ina t'naga bi laramigo hale howa t'naga waneiginiru nogo sibi haradagua mo dewa ho helolebero.

<sup>38</sup> Ani berogola nogo sibi ale dewaore halu horo inime wiabagi helenengi Yarusalemeni inihondo bo lomabu delole haru ibiraligobi ti holeberemi. Ani howa t'naga tano lone biadai bini biaruha wali agali dewaore palu tolelebira. Ai urunidagua heneneore tagira ibai haragola t'gua Anduane Homogo iniore henedalo manda buleberemi, laya lalu Esegielehanda lene.

## 37

### *Esegielehanda homa kuni gigialo wiaria hendenego ogo*

<sup>1</sup> Anduane Homogo ibunaga hongo iha karula howa ibu Dinini ibugua i dindi ulini mbiraha homa kuni dewa bu wiaruha haru puwa helaya. <sup>2</sup> Ibugua i dindi ulini ogoniha haru ibaga biyagola handalu hewaria homa kuni dewaore bu wiaria handaru. Agali kuni wiyadaruni bamba tawe gigialeoreyane de handarugoni. <sup>3</sup> Ani handalu hewagola Anduane Homogohanda ihondo bi ogodagua laya. Dindiali-o ina manda bialu keria agali kuni nai ngaruni lone agali hodai bibehebe be nabibehebe, lalu hale haya.

Ani layagola nde ina ibuhondo ladai bialu lalu, Anduane Homogo Bibahende Haru Ho Haame Haga kego-o bi uruni larigo i manda nabidogo inime hangu mandabu kegoni ndobe, laru.

<sup>4</sup> Ani larugola Anduane Homogo ibugua ihondo ogodagua langiya. Ainde ina homa kuni o bu ngarunihondo mbiwia halu bi ogodagua lamia. Tihondo lalu, Anduane Homogonaga bi ogo hale hadaba. <sup>5</sup> Anduane Homogo Bibahende Haru Haame Ho Haga kogo ina bi ogo larogoni. Inime tiha buhe pulaanda harogola ti lone wali agali deore holeberemi.\* <sup>6</sup> Heneneore ina t'naga gungubunirubi tingininaga mbirininirubi helai howa dongoneme hadambi helolebero. Ani buwa tiha buhe pulaanda halu ti deore ibagabu hai helolebero. Ani bidogola nde t'gua i Anduane Homogooore henedane manda buleberemi, lalu ani labe laya.

<sup>7</sup> Anduane Homogo ibugua labe layadagua laru. Ani lalu hewaore dege mbira ngilingele layuane hale haru. O layadagoni homa kuni bu wiyadarunime leneya. Ani hale howa handalu hewaria homa kuni bu wiyadaruni tini henedadagua hadai bigibigi bialu kirikaru lowa naina agali tingini howa wima pearia handaru. <sup>8</sup> Ani handalu dege hewaria kuni biarunaga gungubunirubi mbirininirubi hai howa dongoneme hadambi helegola agaliore wima peagoyu ai buhe dege nale wima pearia handaru.

<sup>9</sup> Ani handalu hewaria Anduane Homogohanda ihondo ogodagua laya. Dindiali-o ina ininaga bi ogo puyabuhondo ogodagua lamia. I Anduane Homogo Bibahendenaga Haru Haame Haga kogo inime lalu, Puyabu ina bibahendeha howa pulame halu ibuwa agali bo wahene o ngaru lone heyu helonaga buhe pulaanda ha, labe. Ani biragola ti lone deore halu ibagabu helo, laya.

<sup>10</sup> Ani layagola ina Anduane Homogohanda bi labe layago latagi harugola puyabu bibahendeha howa agali biaruha buhe pulaanda hayagome agali biaru mo deore halu heyuwa naina heyu hama piya. Ai uruni ti dewali mandagi howa wai biaga ami agali haradagua biane handarugoni.\*

<sup>11</sup> Ani heagola Anduane Homogo ibugua ihondo ogodagua langiya. Ai dindiali-o Isaraele wali agali ti homa kuni gigiale urunibi howa t'gua lalu, Inanaga kuni gabuho wahene kamagonidago ina lone bayale holene henge nawi kamago ainde pu ereba hene ina harimadagoni, lowa t'naga bi ogonibi lalu kamigoni. <sup>12</sup> Anigo Anduane Homogo

\* 37:5: Iba 104.30    \* 37:10: Mo 11.11

Bibahende Haru Haame Ho Haga kogo inaga bi ogo Isaraele wali agaliruhondo mbiwia halu bi ogodagua latagi labe. Anduane Homogo inime tí homaliha ngamiria dugu yalu tininaga dindi tene biagoha haru dai bulebero. <sup>13</sup> Ai inime tí homaliha ngamiria duguarogola inaga wali agali tigua Anduane Homogo inio reda lowa manda buleberemi. <sup>14</sup> Ani bialu inaga Dinini tíha helarogola tinaga holene hadai bialu dére holeberemi. Ani kamigola ina tininaga dindiha haru dai berogola bayaleore holeberemi. Ina tí ani haru dai bu helarogola tigua inime bulebero lalu lo wirugo heneneore biyada lalu manda buleberemi. I Anduane Homogohanda bi ogonidagua larogoni, lene.\*

*Yudali Isaraelealibi ti mo mbiraore holebira lenego ogo*

<sup>15</sup> Anduane Homogo ibugua ihondo lalu, <sup>16</sup> Dindiali-o ina kanogo mbira mo yalu ibuwa ogoriani bi ogo gili bibe. Yuda hameiginibi Isaraele hameigini maru Yuda dindini mandagi karubi, ogoni gili bibe. Ani bialu kanogo mende yalu ibuwa ogorianibi gii bialu, Yosebe igini Eberaimi hameiginibi Isaraele hameigini maru ti heba mandagi karubi, ogoni gili bibe, lalu laya. <sup>17</sup> Ai bi ogoni gili biai howa kanogo ngunigo laboni kanogo mbiraore ale helo mo gimbu bu yu habe. <sup>18</sup> Ani yu kegola inaga dameneru tigua hale halu, Manane ogoni aginaga yu kebe, layagua ina tihondo ogodagua lamibe. <sup>19</sup> Anduane Homogo Bibahende Haru Haame Ho Haga kogome ina Yosebenaga kanogobi Yudanaga kanogo ogola mo mbiraore hole yu holebero. Ani buwa ininaga gime kanogo mo mbiraore howa yagadagua kirabali ogoni inaga giha yu holebero, ani laya labe.

<sup>20</sup> Dindiali-o ina kanogo ogonilabo kirabali wali agalime hendelo gime yu ibagabu habe. <sup>21</sup> Ani yu howa bi ogodagua lamibe. I Anduane Homogo Bibahende Haru Haame Ho Haga kogome Isaraele wali agali dindi tara tara bibahende ngaruha pu giligalalo karuni mo mogo bialu tini dindini helo haru dai biai holebero, laya labe.\* <sup>22</sup> Ani haru dai berogola ti mo mbiraore halu damenebi mbiraore hangu howa ti Isaraele dindi hari ngaruha mandagi helo helolebero. Ani helalu tinaga haru haga kini mbiraore dege helo helolebero. Ani howa ti dindi kirani haru haga kini kira ala hayadagua naholebira. <sup>23</sup> Tigua mbirale gime wabini ngaruhondo bi pupu lone nawi wahalu mana ko ngubi bialu haga wiyarunibi wahai holebira. Anidagua biragome ti inaga deni dodo mbira lone para nahe bayale holebira. Tigua mana ko wiaru ala bialu hayaruni ina domo wahai halu mo bayale hai holebero. Ani berogola ti inaga wali agali halu ini nde tinaga Ngode Datagaliwabe holebero. <sup>24</sup> Ani howa inaga biabe bia haga Debidinaga aguanene mbirame tinaga handame haga kini holebira. Ti mo mbiraore ho kagola agali mbiraore ogoni ibugua hangu ti haru holebira. Ani bialu ti mini bilinahe howa tigua inaga bi mana baya hangu talialu bialu holebira.\* <sup>25</sup> Ani bialu howa ina dindi bamba tinaga mamali ala henego inaga biabe bia haga Yagabahondo mirugoria dai buwa tibi tinaga waneigini aguanenerubi ogoniha haabo holebira. Ani kagola Debidinaga aguanene mbirame tinaga handame haga kini haaboore holebira. <sup>26</sup> Ani howa ina ti bayaleore haabo helonaga habo nalolene bi hongoheore mbira ti baba lo wulebero. Ina tininaga dindini haru daibu helarogola ti palia timbu halu dewaore holebira. Ani kagola inaga anda ti karia dombeneha haaboore holebira. <sup>27</sup> Inibi ti haru mandagi howa ti inaga wali agali halu i nde tinaga Ngode Datagaliwabe holebero.\* <sup>28</sup> Ina inaga anda Isaraele wali agaliru dombeneha kago hondowa wali agali dindi tarataraha karume Isaraele wali agali karu ti ininagaore helayadalo manda bulebira, lalu Anduane Homogohanda laya lene.

## 38

*Anduane Homogohanda Kini Gogohondo bi lolene nga lenego ogo*

\* 37:14: Ese 36.27    \* 37:21: Ese 36.24    \* 37:24: Ese 34.24    \* 37:27: 2 Ko 6.16, Mo 21.3



<sup>1</sup> Anduane Homogohanda ihondo lalu, <sup>2</sup> Dindiali-o ina Magogo dindiha Gogo karia de handa amu habelo hameledo. Gogo ibu Mesege dindi Tubala dindilana kini timbuni ka. Ina Gogo ibu mo ko holene nga lalu bi latagi habe. ✧ <sup>3</sup> Ibhondo bi ogodagua labe. Mesege hameigini Tubala hameigini kago labonaga kini timbuni dunini kego ina bi ogo hale habe. I Anduane Homogo Bibahende Haru Haame Ho Haga kogo ina ila waitigi ho kogoni. <sup>4</sup> Ina i mo beregedalu inaga ne hanganeha wena hugume hende howa inaga ami agali heba gililo yu dai bulebero. Inaga ami agaliru dewaore karubi nogo hosirubi ami agali maru nogo hosini biralu piagaru ti aminaga agaru mo karulalu wai humbi yalu wai biagane ayu tiburu yu karubi ti bibahende gililo yu dai bulebero. ✧ <sup>5</sup> Pesiali amirubi Sudanali amirubi Libiali amirubi bibahende tigua ege manda karulalu humbiru yu howa i heba mandagi holebira. <sup>6</sup> Ani bialu Gome dindinaga ami agali wai hongo howa biaga karubi Bede Togama dindi abene uyurahayagi tanonaga ami agali bu karubi i heba dege holebira. Dindi tara taranaga ami agalirubi i heba holebira. <sup>7</sup> Kini Gogo i wai bule manda manda bu habe. Inaga ami agali ina haru haga bu karu tibi nde wai bule manda manda bu helo ina ti bayuwa handayaho habe. <sup>8</sup> Mali dewaore howa wai bu pole mo mogo bule manda manda bu habe. Mali dewaore pedagola dindi mbira bamba mo ko ho winigo ai ayu tinaga tano lone mo tiga bialu biadai buwa waitigiru gi holene ereba halu dungulo kago ti baba wai bu pobelo pu lolebero. Wali agali uruni ti dindi taraha garabaya pu henego ayu ina ti lone haru dai binigo ai Isaraele dindi hari bare bare ngaruha daibu heledogoni. <sup>9</sup> Kini Gogo inibi inaga ami agali bu karubi ami agali maru dindi taraha howa haru ibu hene karubi tigua wali agali tinaga dindi dai bu karu baba wai bule poleberemi. Ani poramingi ti dewaore howa iba dalu timbuni puyabu heba ibagadagua ibalu dindi bibahende karulai halu ginu hagua aleme tinaga dindi ngago bibahende bu dambi hai holeberemi.

<sup>10</sup> I Anduane Homogo Bibahende Haru Haame Ho Haga kogo ina Gogo ihondo bi ogo laro. Ina ti baba wai bule porengi inaga bu mini abaleore heyalu ohalu bulene mbira manda manda bulebere. <sup>11</sup> Wali agali uruni ti baba wai bulene mbira nahebe toba howa tiha mo ko holene mbira naanda ibulebirabe tobaho karia ina wai bule anda polebero, lo mitangi bulebere. Tinaga tano ngagoha mbirali ibuligonaga wai pabe bu mabu nabi kagoni manda bulebere. <sup>12</sup> Ani manda bialu ina wai bule anda puwa tinaga dabudabu bayale tara tara ngaru i karulole manda bulebere. Wali agali uruni ti dindi taraha pu henego ai lone dai buwa tinaga tano lone biadai biai halu tinaga nogo sibi bulumagarubi mbirale bibahende bayale dameneru wua ka. Ani bialu tinaga dindi maru ngaru ti dege dombeneha nga. <sup>13</sup> Tigua dindi ogoni bole eberemingi hameigini maru Seba dindiha padarubi Dedana hameigini padarubi Sebena dindiha biyinaya biabe biaga bu karumebi ti eberemigo de hondowa tihondo hale halu lalu, Inaga ami agali bu karu mo mogo bialu wai bule ibuwa tinaga mbirale ngaru karulai holeberemibe. Ngolo dewa ngarubi siliba ngarubi nogo bulumaga bu karubi mbirale maru tara tara ngarubi tigua mo yai holeberemibe. Anidagua bulenego bayaleoreda, lolebira.

<sup>14</sup> Ai dindiali-o ina Kini Gogohondo inaga bi ogodagua lamibelo hameledo. Kini Gogo ina bi ogo hale ha. Anduane Homogo Bibahende Haru Haame Ho Haga kogo inaga Isaraele wali agali ti tininaga dindiore ngagoria bayale kang i ina ogodaua manda bulebere. <sup>15</sup> Ina ami agali dewaore haru halu inaga dindi uyurahayagi wahalu tigua wai bule ibuleberemi. Ami agali uruni ti dindi tara tara ngaruha howa ibu hene karu bibahende nogo hosini biralu ini heba mandagi ibuleberemi. <sup>16</sup> Tigua inaga Isaraele wali agali baba wai bule ibuleberemi. Eberemingi ti dewaore hari beraliba aleme dindi bibahende ha ho namulai kamiria ti hondolebira. Kini Gogo-o ina ani bibelo mo bia holeberogo irane hameigini tara tara dindi taraha padarume inaga mini tigabi mana



bayaleoredane hondowa i kogoniore manda bilo ani bulebero. Hamaro bulene horo kaware ngelowa mbirale uruni tagira ibulebira. <sup>17</sup> Bamba inaga biabe biahalu bi mana latagi haga Isaraeleali bu hearume mani buleberogonaga mbiwia helo ina lamigi bialu lalu, Mani howa ina tinaga waitigi mbira haru halu ibulebero, laga bialu harugo waitigi ogoni Kini Gogo i kegoni manda bialu larugoni. Ani birugola tigua mali dewaoreni biabe ogoni bialu howa bi latagi halu hene. Anduane Homogo Bibahende Haru Haame Ho Haga kogo ina bi o ledogoniore, laya lene.

*Anduane Homogohanda Kini Gogo pani mulebero lenego ogo*

<sup>18</sup> I Anduane Homogo Bibahende Haru Haame Ho Haga kogo inaore laro. Kini Gogo ibugua Isaraele baba wai bule ibirangi ina ibula keba timbuniore holebero. <sup>19</sup> Inaga miniha keba timbuniore howa ina bi ogo laro. Horo ogonongi Isaraele dindi bibahendeni dumbirumbi bialu dindi ema biai holebira. <sup>20</sup> Anidagua biragola ibaha wena bedarubi ega bedarubi nogo tara tara emene timbuni bu karubi wali agali dindi bibahendeni karubi i ogonibi kogonaga mogolalu durulo haiore holebira. Hari wedaru podai halu dindi ngaruni gaibu baga bialu mo ko haiore holebira. Tanonaga wai pabe egeme bu mabu bini hongohe karu podai halu dindini haealapaya biai holebira. <sup>21</sup> Ina Kini Gogo mo gi halu ko holene dewa ibuha ibilolebero. I Anduane Homogo Bibahende Haru Haame ho haga kogo ina bi ogodagua laro. Ina Isaraele dindini hari bare bare ngaruha wai timbuni mo bia halu ibunaga ami agalirume tinaga ayu tibume tini degedege bagabaga bialu homelaga bulebira. <sup>22</sup> Ina Gogo ibuha warago tara tara ibilalu waibi nde ibila dege bialu ibu pani nelu mulenaga ani bulebero. Ina iba dalu dindiguni heba timbuniore ibilalu ege tole do kundibiore hariha howa ibira helalu urunime ibubi ibunaga ami agali karubi agali dindi taraha howa ibu biamogo bule ibu karubi ti bibahende bo wahai holebero. <sup>23</sup> Ina ogonidagua berogome hameigini tara tara dindi taraha karu bibahende ini tinaga hongo haihe howa mini tigabi mana bayaleore biaga kogo mo walia holebero. Ani berogola tigua ini Anduane Homogo henene ogobiore henedalo manda bulebira, lene.

## 39

*Anduane Homogohanda kini agali mini Gogo bope henego ogo*

<sup>1</sup> Anduane Homogo ina Bibahende Haru Haame Ho Haga kogo laro, Dindiali-o ina Mesege dindibi Tubala dindibi ogonilabonaga Kini Gogo timbuni kago ibu mo ko holene nga hongo howa lalu ogodagua latagi habe. Kini Gogo-o ina ila waitigi ho kogoni. <sup>2</sup> Ina i mo beregedalu dindi abene unurahayagi handadai bilolebero. Ani bialu ini dindi abene uyurahayagi ngago wahalu ina haru ibalu Isaraele dindiha hari bare bare ngaruha haru eberogola ina Isaraele baba wai bulebere. <sup>3</sup> Ani buwa ina inaga danda timu gi leha yu kegoni bo haealabaga bialu inaga yandare gi tigaha yu kegonibi bo haealabaga berogola dindini ibira hai holebira. <sup>4</sup> Inibi inaga ami agali bu karubi ami agali maru i biamogo biaga haru ebererubi ti bibahende Isaraele dindiha hari bare bare ngagoha homai holeberemi. <sup>5</sup> Homai haramigola tinaga tingini dindini bame wima pedaria ega bodo hariawe bedarumebi nogo gabua tara tara bu karumebi ibalu nai holebira. I Anduane Homogo Bibahende Haru Haame Ho Haga kogo ina bi o ledogoniore. <sup>6</sup> Ani bialu ina Magogo dindi ngagohabi wali agali iba solowara bedago ange ange wai nabi palima pedagogabi ira hedope holebero. Anidagua berogola wali agali urunime ini Anduane Homogo heneneore henedalo manda bulebira. <sup>7</sup> Inaga Isaraele wali agali karume inaga mini baya buruguleorewi kogo manda biai helo ina mo walia holebero. Ani walia harogola tigua inaga mini ogoniore lone bope halu mo dindiha habe nahe holebira. Ani biragola hameigini tara tara dindi taraha karu tigua i Anduane Homogo

kogo iore Isaraele wali agalinaga Ngode Datagaliwabe mini tigabi baya buruguleore kalo manda biai holebira.✧

<sup>8</sup> I Anduane Homogo Bibahende Haru Haame Ho Haga kogome ogodagua laro. Mbirale mbira bulebira larugoni bibahende horo mbiru tagira ibai holebira. <sup>9</sup> Anidagua biragola wali agali Isaraele dindi tanoha haga karume tagira pialu waitigime wai biagane ale yu wahene dindini ngaru ira delolenaga mo ilu wima polebira. Tigua wai humbibi danda timurubi yandarerubi wai biaga kangorubi uruni bibahende ira delole mo wulebira. Tigua uruni delalu kane dege mali karia polebira. <sup>10</sup> Wali agali ti mali karia uruniha irabuhabi dangite ngaruhabi ira taya nabi howa ti ira karulape mbirale wai hamani mini biaruni delalu holebira. Ogonidagua bialu Isaraele wali agalinaga waitigi bu karume ala tininaga mbirale bayale wiaru mo pagebu yu piai henedagua ai Isaraele wali agali tigua nde waitiginaga mbirale wiaru mo page bialu ogoningi pani miadai bulebira. I Anduane Homogo Bibahende Haru Haame Ho Haga kogo ina bi o ledogoniore.

*Kini Gogobi ibunaga ami agalirubi tinaga homali winigo ogo*

<sup>11</sup> Anduane Homogo ibugua bi ogodagua lalu, Mbirale uruni tagira ibirangi ina Isaraele dindiha dindi hobane mbira Kini Gogo halu ibunaga ami agaliru hora hole tu wiabagi howa ngelolebero. Dindi podene ogoni mini Ibagu Biagarunaga Dindi Ulini laga winigo ogoni Homene Iba bereago ni ibiragohayagi dindi winigo ti ogoriani hora holebira. Hora howa mani dindi ogoninaga mini tara wialu Gogo Ami Agalirunaga Dindi Ulini laga wulebira. <sup>12</sup> Isaraeleali tigua ami agali uruni mo hora halu kane dege ege karia polebira. Tigua agali homene tingini uruni mo hora hai kagola dindi ogoni inaga deni dodo nahe bayale wulebira. <sup>13</sup> Isaraeleali bibahendeme biabe ogoni biamogomogo bulebira. I wai wayali harugonaga wali agalime inaga mini yaraga harangi agali biabe ogoni bini karunaga minibi yaraga holebira. I Anduane Homogo Bibahende Haru Haame Ho Haga kogo ina bi o ledogoniore. <sup>14</sup> Ege karia uruni piai kagola Isaraeleali tigua agali maru Isaraele dindi bibahendeha ibaga biai halu agali bo wahenedaru arianaga kuni maru ngabe hondole taya bima pelo dabo helolebira. Handa walia hayagua dindi ogoni inaga deni dodo nahe ngelonaga mo hora holebira. <sup>15</sup> Agali uruni tigua taya bima pialu karia homa kuni maru handa walia hayagua tigua nga lalu mo walia halu hada bu wima polebira. Agali marume maha ibalu kuni uruni mo yalu dai bialu dindi mini Gogo Ami Agalirunaga Dindi Ulini laga wiyagoha hora holebira. <sup>16</sup> Tigua agali waime bene uruninaga kuni wu giallo ngaru mo hora hai haragola Isaraele dindi inaga deni lone dodo nahe bayale wulebira. Mani tano timbuni mbira wulebirago ogoni mini Ami Agali Tidini Dewa laga wulebira.

<sup>17</sup> Anduane Homogo Bibahende Haru Haame Ho Haga kagome ihondo ogodagua laya. Dindiali-o ina ega biru ngarubi nogo gabua tara tara karubi urunime ina loma mbira bo ngerogo nelo ti bibahende olo mogo bibe. Loma ogoni timbuniore Isaraele dindiha hari nene bu ngaruha ega nogorume mbirinibi daramabi dewaore wulebirago nelo olo mogo bibe.✧ <sup>18</sup> Ami agali dewaorenaga mbirinibi dindi bibahendenaga kini henerunaga daramabi dewaore nolebira. Ami agali urunibi kinirubi ti nogo sibi meme bulumaga habaheru bagadagua bo waholebira. <sup>19</sup> Ami agalirubi kinirubi uruni ina ti loma ale bo ngerogola nogo ega biru karume habane ngaru nalu no karula pialu nabe manga holebira. Uruninaga darama na dege bialu lulu iba naradagua bialu no luluyu haradagua bulebira. <sup>20</sup> Inaga tomo nagane dagiani biruwa tigua nogo hosirunaga mbirini dewaore nalu agali nogo hosini bialu penerunaga mbirinibi nalu ami agali wai biaga hongo gibihe bu henerunaga mbirinibi nalu tiore tombeho holebira. I Anduane Homogo Bibahende Haru Haame Ho Haga kogo ina bi o ledogoniore, laya lene.

*Anduane Homogohanda Isaraele wali agali biamogo bulebero lenego ogo*

<sup>21</sup> Anduane Homogohanda laabo halu lalu, Ina mana tigabini howa inaga hongo kogome wali agali bibahendeoreme mana ko biyarunaga pani nelu mulebero. Ogonidagua berogo hondowa hameigini tara tara dindi taraha karume ininaga mini yaraga holebira. <sup>22</sup> Ani berogola horo ogoningi howa Isaraele wali agali tigua ini Anduane Homogo tinaga Ngode Datagaliwabeore henedalo manda bulebira. <sup>23</sup> Hameigini tara tara dindi taraha bu karu tigua Isaraele wali agalirume inaga bi mo wahalu mana ko dewaore biyarunaga ina ti dindi taraha garabaya pelarugo manda biai holebira. Ani buwa ina Isaraele wali agali erembira miwagola waitigi bu hearume ti baba wai bialu bope howa homelo bo wahai helo ibilarugoni. <sup>24</sup> Tigua mana ko dewa tara taraore bialu mana maru inaga deni dodohe wiaru bialu hayagobi pani nelu mialu ti erembira mirugoni.

<sup>25</sup> I Anduane Homogo Bibahende Haru Haame Ho Haga kogo ina bi ogodagua laro. Ina Yagabanaga aguanene Isaraele wali agali bu hearu pani nelu mialu harugo ai dara howa ti bayale helo biamogo bulebero. Anidagua berogola mbiralime i mini lene kogo bope halu mo dindiha naholebira. <sup>26</sup> Isaraele wali agali ti tininaga dindi ngagoria dai buwa mini dungulo kangi ti kagoha mbiralime mo gi naholebira. Anidagua biragola tigua mana ko tinime ala bialu hayarunaga taga timbuni ho henego embeda holebira. <sup>27</sup> Hameigini tara tara dindi taraha karume i mini tigabi baya burugule kogo hendelo ina inaga wali agali ti waitiginaga dindi tara ngagoha garabaya pu karia lone haru dai bialu tini dindioreni helolebero. <sup>28</sup> Ani berogola inaga wali agali Isaraele tigua ini Anduane Homogo tinaga Ngode Datagaliwabeore henedalo manda bulebira. Tigua ani manda bulebirago irane ina ti dindi taraha garabaya bu yalu pelarugo mitangi bu dai bialu tini dindi winigoria helo lone haru daibu helarogonaga manda bulebira. Ti mbirali embedaho wahalu haru dai nabi ndo bibahendeore haru dai biai holebero. <sup>29</sup> Ani bialu ina Isaraele wali agalihondo inaga Dinini mialu lone ti erembira namulebero. I Anduane Homogo Bibahende Haru Haame Ho Haga kogo ina bi o ledogoniore, laya lalu Esegielehanda lene.

## 40

*Anduane Homogohanda de gandebaha Esegiele Yarusaleme haru penego ogo*

<sup>1</sup> Ina garabaya hemane dege mali pira kirani duria (25) hayagola mali ogoningi ege mbira ogonaga horo pini layagola Anduane Homogonaga hongo iha karulayuane handaru. Waitigime Yarusaleme tano karulenedangi howa mali pira mbirani maria (14) pene. Horo ogoningiore Anduane Homogohanda i haru halu piya. <sup>2</sup> De gandebaha Anduane Homogohanda i Isaraele dindiha hari nene daligaore mbira wiagoria haru pu helaya. Hari nene ogoriani howa dindi abene unurahayagi de handa dai bialu hewaria anda dewa buhe tano ale mbira wiaria handaru. <sup>3</sup> Anduane Homogo ibugua anda buhe ogoniha i kaware haru piyagola handalu hewaria agali mbira ege tole boronosi handalehe ngiringarale hearia handaru. Agali ogoni ibu tanonaga ege tole pabe heago panga harabani howa ibugua pu mbira mida magi manda biagane labolabome wabinibi mende mida magi manda biagane dege irame wabinibi ogonilabo yu hearia handaru. <sup>4</sup>

<sup>4</sup> Ani handalu hewaria agali ogoni ibugua ihondo langialu lalu, Dindiali-o ina ihondo mbirale mo walia haga bulenaga i ogoria haru ibiru. Anigo ayu ina mbirale mo walia harogo bayuwa de hondowa bi larogobi hale howa mani ina Isaraele wali agali karume hale helo lamiai habe.

*Esegiele ibugua ege pabe haraba ni tagira ibiragohayagi wiago hendeneo ogo*

☆ 40:2: Mo 21.10 ☆ 40:3: Mo 11.1, 21.15

<sup>5</sup> Ina Anduane Homogonaga anda heago de handalu hewaria anda ogoni ege pabe bu mabu bupe hearia de handaru. Ani hondo hewagola agali biago ibugua mbirale mida magi manda biagane irame wabini biago yamiya. Mida magi manda biagane ogoni lunaga magi mida tebirahe winiyago mo yalu agali biago ibugua ogonime Anduane Homogonaga anda ege pabe heagonaga mida magi manda biya. Ani manda buwa handalu hearia daliganaga mida magi tebira halu aranenaga mida magi tebira dege hayane handaru. <sup>6</sup> Ege pabe ogoninaga haraba tebira dege wia. Ani bialu haraba mbira mbira wiadagua hobane mbira mbira tamuha howa haraba wiagoha bu gimbu bigi biaria handaru. Mbiralu ibu Anduane Homogonaga anda kagoha anda pole pialu hobane odaruni bolangua halu puwa nde Anduane Homogonaga andaha anda polebira. Agali biago ibu ege pabe heago ni tagira ibiragohayagi pialu haraba mbiragonaga egageria wiagoria irigi halu piya. Ani puwa ibugua haraba o wiagonaga arane yangale mida magi manda biaga yu hayagome manda bu handalu hearia mida magi tebira wia. <sup>7</sup> Haraba ogoriani anda pialu howa mendehayagi hobane tebira mendehabi hobane tebira dege agali mamage haga biarunaga heneyago handa edene bima peagola hanuni bugu hama bame wali agali puibu bulene henge wia. Ani wiagola agali magi manda biaga biagome tamu hobane uruni mida magi handalu hearia bibahende mida tebira dege dege haya. Ani bialu anda tamu hobane mbira mbiranaga anda hai heago mida manda bialu hearia mida kirani tebone habehe dege wia. Hanuni bugu hama wali agali ti puibu biaga wiadagoni wuyu pialu tamu hobane timbuni mbira wiagoha tagira pea. Ani wiagoria agali mbirale mida manda bu handaga biagome anda tamu hobane timbuni biagonaga haraba heagoria hai heago mida manda bu handalu hearia mida magi tebira dege wiane handaya. <sup>8-9</sup> Ani handalu anda tamuha hobane timbuni ogoniha anda puwa hobane ogoni mida manda bu handalu hearia arane timbuninaga magi mida maria wia. Hobane ogoninaga abene mbiraha haraba mbira wiago ogoni Anduane Homogonaga anda tamuhayagi anda polene haraba wia. Ani wiagola agali biagome puwa haraba wiaria ege pabe ogoni mida manda bu handalu hearia mida magi mbira hangu haya. <sup>10</sup> Tamu hobane harabani hayaru uruni agali mamage haga biarunaga hayaruni hobane waragaria howa tamuha mbiraore ogobi dege dege hea. Hanuni bugu hama wali agali puibu biaga biago tubari wuwa mendehayagi hobane tebira mendehabi tebira dege hea. Ani bialu anda hobane hearu magi mbiraore ogobi dege dege hea.

<sup>11</sup> Ani biai halu agali biago ibugua ege pabe timbuni heagonaga haraba wiagoria puwa haraba mida magi manda biya. Haraba yangalenaga mida magi waragariani bolanguahe haya. Anigo ege pabe panga dugua amu nana biyagola emene hodai bialu mida magi duria hangu haya. <sup>12</sup> Ani bialu tamu hobane agali mamage haga biarunaga heagoha haneni ege pabe emene tubagi maru bu helea. Ani heagola agali biagome ogoninaga magi manda bialu hearia luninaga magi emene tubagi dege sendimida pira duria (50) halu aranebi nde sendimida pira duria (50) dege haya. Tamu hobanehabi nde lunagabi arane yangalenagabi mida magi tebira dege dege hea. <sup>13</sup> Ani bialu agali biagome mamage haga hearunaga tamu hobane heagonaga tibiha windo heagoria howa handama pialu tamu hobane mendehayagi windo heagoria puwa lunaga mida magi manda bu handaya. Ani handalu hearia anda ogoninaga mida magi homberiani (12) maru bolanguahe haya. <sup>14</sup> Ani bialu mani ibugua tamu hobane timbuni heago mida magi manda bule piya. Manda bialu hearia lunaga magi mida pira hea. Haraba erembirahayagi wiago wali agali mo ngoaiho haga Anduane Homogonaga anda heago tagirani wu mabu biago pole tagira piaga wia. <sup>15</sup> Anduane Homogonaga anda ege pabe heago bugu hama hayagonaga luni magi mida pira kirani duria (25) bibahende hea. <sup>16</sup> Ege pabe ogoninaga anda hobane bibahende heagoha windo mbira mbira wiai hea.

☆ 40:5: 1 Kin 6.1-38, 2 Bit 3.1-9

Ani bialu hobane hoba amunana bini heagohabi windo wia dege bia. Ani bialu ayage ale yunihe kagonaga bigiya windo kawareni wabu wigi bia.

*Ege pabe bu yaanda heneha wali agali ngoai haga hama timbuni winigo ogo*

<sup>17</sup> Agali biago ibugua i haru halu ege pabe timbuni Anduane Homogonaga anda ege pabe bu yaanda hene wiagoha wali agali ngoaiho haga wiagoria haru piya. Ani piyagola handalu hewaria anda hobane pira tebira (30) bibahende wali agali ngoaiho haga wiagoria ege pabe timbuni heagoha bu gimbu bini hearia handaru. Ege pabe andane ogoniha wali agali ibaga bu holene wiagoria ege tole dugu wima pea. Hariga poleneni ege tole dugu wiyadagoni anda hobane emene biarunaga hanehayagi wia.

<sup>18</sup> Ege pabeha bu gimbu bini biaru heagoria ani wima puabo hea. Hariga ibaga bu holene ege tole dugu wima piyadagoni lunaga mida magi hobane tebira biaru tamuha bugu hama dombeni wiagobi dege wia. Wali agali mo ngoai ho holene hama timbuni ogoni dindiha ngelowa Anduane Homogonaga anda daligani hea.

<sup>19</sup> Wali agali ngoai hagane hama timbuni ogoni ege pabe mende Anduane Homogonaga anda bu mabu biago tagirahayagi wia. Ege pabe mende ogoni andaneha ngoai hagane hama mendebi wiago ogoni ibu emene daligani wia. Ege pabe mende ogoninaga abene ni tagira ibiragohayagi ege pabe biagonaga haraba mbira wia. Haraba wiago labo dombeneha hama wiago agali biagome mida magi manda biya. Ibugua ege pabe timbuni dunini heagonaga haraba wiagoria howa manda bialu mendehayagi haraba ege pabe emene tamuha heagonaga haraba wiagoria tagira pialu handalu hearia hama biago mida magi pira duria (50) wiaria handaya.

*Ege pabe haraba abene uyurahayagi wiago hendenego ogo*

<sup>20</sup> Ani bialu agali biago ibu abene uyurahayagi puwa ege pabe timbuninaga haraba wiago mida magi manda biya. <sup>21-22</sup> Ani manda bu handalu hearia ogonibi mida magi tamuha tagirahabi bugu hama wali agali puibu biaga biago agali mamage haga biarunaga tamu hobane mende mendehabi tebira dege dege hea. Uruni magi mbiraore abale ni tagira ibiragohayagi ege pabe dunini heagonaga ege pabe panga heagobi tamu hobane hearubi mida magi ogobi dege dege hearia hendene. Uruninaga magi lunaga mida pira kirani duria (25) hea arane yangalenaga magi mida homberiani (12) emene bolanguahe handaya. Anda polenenaga haraba egageria ge halu iradali bulene karia wia. <sup>23</sup> Abene ogoniha dege Anduane Homogonaga anda heagoria ege pabe panga mende dugu wiyagobi dege wiaria handaru. Panga ogonibi mende ni tagira ibiragohayagi wiagobi dege wiaria handaru. Ani wiago hondowa agali biago ibugua ege pabe ogonilabo hengeneha wiago mida magi handaya. Abale mende ni tagira ibiragohayagi wiago manda biyadagua dege manda bialu hearia ogonihabi mida magi mbiraore dege pira duria (50) wiaria handaya.

*Ege pabe haraba abene unurahayagi wiago hendenego ogo*

<sup>24-26</sup> Ani bialu agali ogonime lone haru halu ege pabe haraba wiago abene unurahayagi heagoha haru piya. Haraba ogoninaga hobane timbuni heagoha pole ge halu anda polene egageria karia wiaria handaru. Ani buwa ibugua haraba biagoha anda pialu anda hobanebi bugu hamabi bibahendenaga magi handalu hearia magi mbiraore abale handayagobi dege wiaria handaya. Lunaga magi mida pira kirani duria (25) halu arane yangalenaga magi mida pira mbirani kira (12) wiaria handaya. <sup>27</sup> Abene unurahayagi pabe haraba mende wiaria handaru. Ani handalu hewaria agali biago ibugua haraba ogonilabo hengeneha bugu hama wiago abale ni tagira ibiragohayagi mida magi manda biyadagua dege manda biya. Ani manda bu handalu hearia hama ogoni mida magi mende abale handayagobi dege mida pira duria (50) wiaria handaya.

*Ege pabe mende tamuhayagi heagonaga haraba hendenego ogo*



<sup>28</sup> Ani bialu agali biago ibugua ĩ haru halu ege pabe mendenaga haraba tamuhayagi bu mabu bini wiagoha anda pialu hama timbuni mende wali agali Anduane Homogonaga anda heago hanehayagi ngoaiho haga wiagoria piriba. Ege pabe mende ogoninaga haraba ubanda tagi biaga wiagoriabi anda bini degeya. Ani heagoria ai agali biago ibugua ege pabe haraba abene unurahayagi wiago mida magi mandabu handalu hearia ogoniha magi bibahendeore abale tagirahayagi handayarubi dege hearia handaya. <sup>29-30</sup> Mamage haga agalinaga tamu hobane hama pearubi hobane hanuni wiagobi tamu hobaga bini biarubi bibahende hobane halu mende pigane tagirahayagi hayagobi dege hai hearia handaru. Tamu ogoniha windo marubi dugu wigi bia. Ogoninaga mida magi luni pira kirani duria (25) wialu arane yangalenaga mida magi pira mbirani (12) emene bolanguahe wia. <sup>31</sup> Anda ogoninaga hobane timbuni heago wali agali ngoai haga hama wiago tagirahayagi ngelowa agali mamage haga biarunaga hobane hearu ti Anduane Homogonaga anda heago hapara howa hea. Ani bialu mamage haga agali uruninaga tamu hobane uruniha anda hobaki haga bini headagua anda gene ale mbira wabu helaga bia. Ani bialu anda hái heagoria gene ale wabu helaga biyadagoria ayage ale yuniruhe bigiya wabu helaga bia. Ani bialu anda ogoniha howa ge halu wali agali ngoai haga hama timbuni wiagoha iradali bigi bialu polene egageria halira wabu wigi bia.

<sup>32-34</sup> Ani bialu agali biago ibugua ĩ haru halu ni tagira ibiragohayagi Anduane Homogonaga anda heago kawareni wali agali ngoaiho haga hama timbuni wiagoria piya. Ani buwa ege pabe halu mende tamuha heago haraba wiagonaga mida magi manda biya. Anda ogonibi hobane bu hearubi bibahendenaga mida magi maru biarunaga heagobi dege hea. Anda ogoninaga bugu hama wali agali ngoaiho haga timbuni wiago kawareni wialu mamageali bu hearunaga tamu hobane wiaru Anduane Homogonaga anda heago kawareni hapara ho hea. Ani heagoria hobane hobaki henenaga anda gene aleru wabu helaga bia. Ani bialu anda hái heagoria gene ale wabu helaga biyadagoria ayage ale yuniruhe bigiya wabu helaga bia. Anda ogoniha howa ge halu wali agali ngoai haga bugu hama wiagoria iradali bigi bialu polene egageria halira wabu wigi bia.

<sup>35-37</sup> Ani bialu agali biago ibugua ĩ haru halu ege pabe mende tamuha heagonaga harabani anda abene uyurahayagi heagoha haru piya. Ani puwa ibugua anda ogoni mida magi handalu hearia anda tamuhabi tagirahabi abale manda biyagobi dege hearia handaya. Anda ogoninaga bugu hama wali agali ngoaiho haga wiagohayagi mbirale anda gene aleru wabu helaga bia. Ani bialu anda hái heagoria gene ale wabu helaga biyadagoria ayage ale yuniruhe bigiya wabu helaga bia. Ani bialu mamageali bu hearunaga hobane Anduane Homogonaga anda heago kawareni hapara howa hea. Anda ogoniha howa ge halu wali agali ngoai haga bugu hama wiagoria iradali bigi bialu polene egageria halira wabu wigi bia.

*Lomabu mule manda manda biaga dabu bia hearia Esegiele ibu hendenego ogo*

<sup>38</sup> Pabe mendegonaga uyurahayagi haraba wiagoria anda mbira damini bu hea. Ani bialu anda damini ogoninaga panga haraba hobane timbuni heagoria duguatagi hea. Anda damini ogoniha mbirale loma irani delole howa wayawaya bu manda manda biaga hea. <sup>39</sup> Ani bialu anda damini ogoniha dabu maria heago kira abene mendehayagi halu kira abene mendehayagi halu bia. Ani bialu lomabu delaga dabu ogoriani loma irani dai helo delolenebi ko biniru domo wahelonaga lomabi mana ko bero mitangi nabi howa binigonaga mo tiga bialu lomabu delolenebi bibahende ogoriani balu manda manda bu wiaga dabu hea. <sup>40</sup> Anda damini ogoni tagirahayagi hayadagoria lomabu delaga dabu maria mende anda polene egageria wiagoria kawareni dabu kira egageria mendehayagi kira mendehayagi lowa bu helea. <sup>41</sup> Lomabu delole bo manda manda bulene dabu halira bu helea. Dabu maria anda damini tamu heagoha halu maria mende tagirahayagi halu bia. <sup>42</sup> Ani bialu lomabu delaga dabu maria lone ha dege biago ogoni ege toleme wabiniya. Dabu ogoni daliganaga sendimida magi pira duria

(50) halu lunagabi aranenagabi sendimida magi pira kariani duria (75) halu bia. Dabu ogoriani nogo egaru lomabu delolenaga bo podole howa daba nabiru manda manda bu wiagaya. <sup>43</sup> Anda damini ogoniha mbirale garayabi anda hái heagoria helama pea. Mbirale garayabi ogoni luninaga sendimida magi karia howa emene bolanguahe helea. Ani bialu nogo bo loma binirunaga mbirininu dabuni podo wiagaya.

*Esegiele ibu loma binigo mo miaga agali hearunaga tamu hobane hendene go*

<sup>44</sup> Ani handalu hewaria agali biago ibugua i haru halu Anduane Homogonaga anda haneni wali agali ngoai haga hama wiagoria haru piya. Ogoniha agali iba gana laga hearunaga anda hobane kira hearia handaru. Hobane mende ege pabe haraba anda polenenaga abene uyurahayagi heagonaga dege hane unurahayagi handa daibu hea. Ani bialu hobane dege mbira ege pabe haraba ni tagira ibiragohayagi howa anda ibaga wiagonaga anda heago hane dindi abene uyurahayagi handa daibu hea. <sup>45</sup> Ani hondo hewagola agali biago ibugua ihondo langialu lalu, Anda hobane abene uyurahayagi kago loma binigo mo miaga agali Anduane Homogonaga andaha biabe biaga karu tinaga ka. <sup>46</sup> Ani bialu anda hobane mbira abene unurahayagi kago loma binigo mo miaga agalime lomabu delaga dabu kagoria biabe biaga karu tinaga hea. Loma binigo mo miaga agali uruni ti bibahende Libai hameigini Sadogo aria dege hagaya. Loma binigo mo miaga agali Sadogo hameigini hangume Anduane Homogonaga andaha kaware puwa ibunaga biabe bialu holene nga, laya lene.

*Libu Anduane Homogonaga andaha anda penego go*

<sup>47</sup> Agali biago ibugua Anduane Homogonaga anda haneni wali agali ngoaiho haga wiagonaga mida magi mandabu handalu hearia lunagabi aranenagabi mida pira duria (50) dege haya. Ani bialu lomabu delaga dabu biago Anduane Homogonaga anda haneni wali agali ngoai haga hama wiagoria dombeneni hea. <sup>48</sup> Ibugua i haru halu Anduane Homogonaga anda tamuha haru anda pialu tamu hobane mbira heneyagoha anda piriba. Ani puwa ibugua hobane ogoninaga haneni howa tamu ogoninaga mida magi manda biya. Ani mandabu handalu hearia mida kirani bolanguahe haya. Ani bialu harabani mida magi manda bialu hearia mida kariani emene bolanguahe haya. Ani bialu ege pabe haraba nebone tohe wiagonaga mida magi manda bu handalu hearia mida mbirani bolanguahe dege dege hea. <sup>49</sup> Ege pabe haraba wiagoria anda hobane timbuni heagonaga magi luninaga mida pira wialu arane yangalenaga mida duriani maru bolanguahe hea. Ani bialu Anduane Homogonaga anda hobane ogoniha howa egageria wali agali ngoai haga hama wiagoha daliape ho wia. Haraba ogoni wiagoria anda gene timbuni kira lene labolaboha hea.

## 41

<sup>1</sup> Anda hobane ogoninaga erembirahayagi Hobane Loma Bia Hene hea. Ani bialu ibugua bugu hama wiagonaga arane manda bialu hearia mida tebira halu <sup>2</sup> luninaga magi mida duria hea. Ani bialu ege pabe emene mbira haraba wiagoria howa bima pialu anda hobanenaga gimuni pauleagoria howa magi mida kirani bolangua hene hea. Ege pabe mende haraba mendehayagi wiagobi nde magi mida mbiraore ogonibi dege hea. Ani hondowa tamu hobane Loma Bia Hene biago magi mandabu handalu hearia luninaga mida pira kira (20) halu arane yangalenaga magi mida pira hea.

<sup>3</sup> Ani handalu puwa Hobane Loma Bia Heneore anda tibihaore heagoha anda puwa haraba magi mandabu handaya. Haraba biagonaga magi manda bialu hearia magi mida tebira hea. Ani bialu Loma Bia Heneore hobane ogoniha anda polenaga mida mbira hangu hea. Ani bialu ege pabe wiagoria howa pialu anda hobane hairi heagonaga magi mida tebirani bolanguahe hea. Ani bialu ege pabe mende panga mendehayagibi nde magi mida mbiraore ogonibi dege hea. <sup>4</sup> Ibugua anda hobane uruni mida magi ogoni mandabu handalu hearia bibahendeha mida pira dege dege wia. Ani

manda buwa ibugua ihondo lalu, Tamu hobane ogoni Hobane Loma Bia Heneore, laya lene.

*Anduane Homogonaga anda heagoha hobane dewa bu gimbu bu migi biaria hendene go*

<sup>5-6</sup> Anduane Homogonaga anda heagoha anda hobane emene dewa Hobane Loma Bia Hene heagobi Hobane Loma Bia Heneore heagobi kirabaliha ho mabubupe hea. Agali biago ibugua anda hobane emene urunibi Hobane Loma Bia Hene Loma Bia Heneorela tubariha anda hobane heago mida magi manda bu handaga bini. Ani manda bialu hearia anda manda dindihayagi magi mida tebira haya. Anigo manda dombeni daligahayagila anda bu gimbu gimbu biradagua buwa bu yulatagi henegome libu ogobi labolabo ndo hea. Anda hobane emene uruni ti anda bu gimbu bima irigi henegonaga dabu tebone wiagoria hangu hene. Anda hobane dindihayagi hayadarunaga dabu dindini dege heneya. Ani bialu anda daliga bia dambi henedagonaga gene anda hobane dindiha hayago ibunaga tamu dindini hope hene hea. Ani bialu hobane dombeni hayadago ibunaga dabu tamu hobane hayadagonaga gene dindiha heagonaga anda gene heagoria bu paga hea. Gene uruni anda dindiha pigane heago dangini hengene hea. Ani bialu anda tebone daligaore bia dambi hene heago ibu gene mende dombeni heago dangini hongowa anda bu gimbu bima irigi heneya. Tigua Anduane Homogonaga anda heago mandaha hariga tombelo wuwa dabira baedene buwa bu gimbu bigi nabulenaga ogonidagua biniya. Anda pigane dindihaore heagobi dombeni heagobi daligaore bia dambi heagobi bibahendenaga hobane pira tebira (30) dege dege hea. <sup>7</sup> Anda hobane dindiha heagonaga tamuha dabu biago tohenaga magi mida kira hea. Ani bialu daliga anda mende tebonela bia dambi hene heagonaga ge haga hama wiago timbuni toheore wialu anda daligadagoha irigi halu polenebi nde dabu egageria bima irigi hene hea. <sup>8-11</sup> Ani bialu Anduane Homogonaga anda ogoniha hobane maru heagohayagi hobane timbuniore heagoha wali agali ogonihayagi puibu bilonaga panga kira dugua ho wia. Anda manda ogoni ibu tohenaga magi mida kirani bolanguahe hea. Panga haraba ogoni mendego anda abene uyurahayagi dugua uyu halu mendego abene unurahayagi dugua unu hea. Ani bialu wali agali ibagabu holene Anduane Homogo anda heagonaga manda manda hama wu mabu bia. Hama ogoni arane yangalenaga magi mida kirani bolanguahe wialu ogoni daligani Anduane Homogo anda heago wali agali ibagabu haga wiagoria handa li ni wia. Ani bialu ogoninaga magi mida tebira hea. Ani heagola Anduane Homogonaga anda ogoni dindihayagi manda manda hama bayale wu mabu bupe ho wia. Hama arane yangale timbuninaga magi mida pira halu anda marubi gibugibu hama pea.

*Anda mende Anduane Homogonaga anda ni paliragohayagi hearia hendene go*

<sup>12</sup> Anda timbuni mbira ni paliragohayagi heago hane orayagi Anduane Homogonaga anda hane hama wu mabu biagoha handa daibu hea. Anda ogoni luninaga magi mida pira mariani duria (45) halu arane magi mida pira tebirani duria (35) hea. Anda hai timbuni tohe heagonaga mida kirani bolanguahe hea.

*Anduane Homogonaga anda mida magi manda biai hene go*

<sup>13</sup> Agali ogoni ibugua Anduane Homogo anda heagonaga luni magi manda bialu hearia mida pira duria (50) hea. Ani bialu dindi hama biagobi anda ni paliragohayagi heagobi magi manda biya. Ibugua Anduane Homogonaga anda mandahayagi howa magi manda bialu anda mende biago mandahayagi magi manda biya. Ani manda bu handalu hearia hama ogoninaga magi mida pira duria (50) dege haya. <sup>14</sup> Ani bialu Anduane Homogonaga anda haneni dindi henge wiago magi mida pira duria (50) dege wia. <sup>15-16</sup> Ani buwa anda timbuni abene ni paliragohayagi heago lunaga mida magi

manda bialu anda tamu hobane luni kira heagobi mida magi manda bialu hearia bibahende mbiraore ogobi dege dege pira duria (50) hea.

*Anduane Homogonaga andaha yári tara tara wiaria hendenego ogo*

Anduane Homogonaga anda heagonaga panga harabanibi Hobane Loma Bia Hene heagonaga panga harabanibi Hobane Loma Bia Heneore heagonaga panga harabanibi uruninaga anda hái ira pelo mbaraleme para halu windo emene emene bu heagoha hái para halu bibahendeni irame para hai hea. Ira degeme anda hái para hama irigi halu windo heagoria paraho iri hea. Ani bialu windo bu hearu para hodambi holenebi ira maru wia dege bia. <sup>17</sup> Hobane Loma Bia Hene heagonaga anda háinibi Hobane Loma Bia Heneore heagonaga hái heagoriabi bigiya tara tara wabu helea. Ani bialu anda tamu hobane kira ogoni labonaga panga daligahabi bigiya tara tara wabu hela dege bia. <sup>18</sup> Bigiya uruni ayage ale yunihe mbira mbira heago dombeneha dahuliyali babaganeheru wabu helaga bia. Dahuliyali mbira mbiranaga dengui kira dege degehe hea. <sup>19</sup> Dahuliyalirunaga dengui mbirago agalinaga dengui handalehe ayage ale wabu heleagoha gi lehayagi handa edeho helea. Mendego laiononaga dengui handalehe ayage ale mende wabu heleagoha gi tigahayagi handa ede ho helea. Bigiya ogoni ale anda hái bibahendeha <sup>20</sup> dindi wali agali haga wiagoria howa wabu helaga bima irigi halu panga hairi heagoria wiari hea. <sup>21</sup> Panganaga anda gene timbuni heago abene bibahendeha ogobi dege dege hea.

*Lomabu delaga dabu irame wabini handalehe wiaria hendenego ogo*

Hobane Loma Bia Heneore heagonaga haraba kawareni mbirale mbira <sup>22</sup> lomabu delaga dabu irame wabini handalehe wia. Dabu ogoni daliganaga magi mida mbirani bolanguahe howa arane timbuninaga magi mida mbirani emene bolanguahe wia. Dabu ogoninaga dindihayagibi lene lenebi bibahende ira peleneme dege wabiniya. Ani handalu hewaria agali biagome ihondo langialu lalu, Dabu irame wabini ogoni Anduane Homogonaga deni wiaga ngagoni, laya lene.

*Anduane Homogonaga anda pangaru hendenego ogo*

<sup>23-24</sup> Anduane Homogonaga andaha Hobane Loma Bia Hene heagoha anda polene panga kira dugua ainai biaga wia. Ani bialu Hobane Loma Bia Heneore heagonaga panga harababi nde ogonibi dege wia. <sup>25</sup> Hobane Loma Bia Hene ogoninaga pangani ayage alenaga bigiyabi dahuliyalinaga bigiyabi anda háini wabu helayagobi dege wabu helaga biaria handaru. Ani bialu Anduane Homogonaga anda tamuha anda polene haraba wiagoria anda emene mbira ira peleneme dangilene hea. <sup>26</sup> Ani bialu anda ogoninaga manda mende mendehabi windo dugu wiago kaware anda háini ayage alenaga bigiyabi wabu helaga biaria handaru.

## 42

*Loma binigo mo miaga agalirunaga anda hearia hendenego ogo*

<sup>1</sup> Uruni handalu agali biagome i haru halu Anduane Homogonaga anda heago abene uyurahayagi wali agali ngoai haga hama timbuni mbira wiagoria puwa handalu hewaria anda mbira ogonihayagi hea. Anda odagoni Anduane Homogo anda biagonaga erembirahayagi anda mende ni paliragohayagi hayago kaware dege hea. <sup>2</sup> Anda ogoninaga panga dindi abene uyurahayagi dugu uyu heagonaga luni magi mida pira duria (50) wialu yangalenaga magi mida pira kirani duria (25) hea.

<sup>3</sup> Anda ogoninaga tibi Anduane Homogonaga anda heago leneha hage helowa hanehayagi wali agali ngoaiho hagane hama timbuni wiagoria hapanaho howa hariga puibu biaga wiagoria handa tagi hea. Anda ogoni halu tebo daliga bu gimbu bima irigi heneya. Tigua anda ogoninaga daligahayagi bu gimbu bini mende heago mo emene howa bini halu tebone daligaore bu gimbu bini heago mo emeneore howa biniya. Anidagua bini

heago anda ogoni ge halu irigi hagane egageria handaleheya.✠ 4 Anda ogoninaga be tebone dindiha pigane hayadagonaga erembirahayagi dindi hanguni wali agali puibu bulene hama luniore wia. Hama ogoni wali agali puibu bulene arane yangalenaga magi mida duria wia. Hama ogoninaga luni magi mida pira duria (50) wia. Ani bialu hama ogonibi dege abene uyurahayagi panga dugua uyu heagoria tagira pea. 5 Anda be tebone daligaore bu gimbu bini biagonaga tamu hobane anda beki biagolabonaga timbuni heagobi ndo emene doroge hea. 6 Anda be tebo bima irigi hene biaru anda maru wali agali ngoai haga hama wiagoria bu hearu gene daligani dagia buwa bini headagua ndo hobane uruni binidago dindi hambene daligani buwa bame dindini bupe heneya. Anidagua binigome anda bu gimbubu migi bima irigi hene kiragolabo mo emene howa biniya. 7-8 Anda pigane be mbira kagonaga tamu hobaneha luninaga magi mida pira kirani duria (25) hea. Anigo anda marunaga tamuha luninaga magi mida pira duria (50) hea. Anda hobane mbiragonaga haneni ege pabe mbira bia. Pabe ogoni luni magi anda ogoni ale dege mida pira kirani duria (25) hea. 9-10 Ege pabe ogonila anda hayadagola hengeneha wali agali puibu bulene hama wia. Mbiralali ibu anda ogoniha anda polenaga hariga ni tagira ibiragohayagi howa anda mandaha hariga ngadagua ibalu anda ogoniha anda piagaya. Ani bialu Anduane Homogonaga anda heago abene ni tagira ibiragohayagi anda mbira ogonibi dege hea. Ani bialu anda ogoni Anduane Homogonaga anda heago erembirahayagi anda timbuni heagobi dege hearia handaru. 11 Anda abene unurahayaginaga haneni wali agali puibu bulene hama wiago anda timbuni uyurahayagi heago haneni wiagobi dege wia. Anda ogoni kirabali ogobi labolabo howa yaribi mbirale maru marubi ogobi labolabo hea. Panga haraba wiarubi mbiraore ogobi dege dege hea. 12 Mbiralali ibu anda unurahayagi hayadagoha anda pole hariga ni tagira ibiragohayagi howa anda puwa manda manda ibalu anda piaga wia. Anda mende uyurahayagi heagoha anda pole pialu howa piagadagua piagaya.

13 Agali biago ibugua ihondo langialu, Anda kira ogonilabo Anduane Homogo ibuninagaore loma biahene ka. Loma binigo mo miaga karu ti anda kira ogoniha anda puwa Anduane Homogo kagoha kaware piagaru tigua nogo egaru wali agalime Anduane Homogonaga loma biniru yalu ibiragoni ti nagaya. Anda ogoni labonaga tamu hobaneru Anduane Homogo ibuninagaore kago loma binigo mo miaga karume loma bayale duniniore yalu ibugu biraru hobane uruniha mo wigi biagaya. Loma uruni widi lomabu delaga lomabi wali agalime ko biyaru domo wahelonaga lomabi mana ko bero mitangi nabi howa biyarunaga mo tiga bulenaga lomabi uruni anda ogoniha yu piaga wia. 14 Loma binigo mo miaga Anduane Homogonaga andaha biabe bialu heneru ti tagira polenaga tigua biabe bialu howa aga karulagane anda ogoninaga tamu hobaneha golo iriari biaga. Loma binigo mo miaga hearunaga aga urunibi nde Anduane Homogonaga biabe bulenaga wiabagi hene dege wini. Ani bialu tigua aga golo iriari bialu aga tara ngaru mo karulalu wali agali ngoaiho haga hama timbuni ngagoria tagira piaga, laya, lene.

*Anduane Homogonaga anda ege pabe bu mabu biago mida magi manda binigo ogo*

15 Agali biago ibugua Anduane Homogonaga anda heago tamuha wiaru bibahende mida magi mandabu handai haya. Mandabu handai halu ibugua i haru halu ni tagira ibiragohayaginaga ege pabe haraba heagoria tagira piriba. Puwa ibugua ege pabe tagirahayagi ogoriani hayadagonaga mida magi manda bialu handaya. 16 Ibugua magi manda bu handagane yiniyagome ege pabe ni tagira ibiragohayagi heagonaga mida magi manda bu handaya. Ani manda bu handalu hearia mida handari kirani pira duria (250) yiaria handaya. 17-19 Ani bialu ibugua ege pabe abene uyurahayagi heagobi unurahayagi heagobi ni paliragohayagi heagobi bibahende magi mandabu handai hayagola mida magi mbiraore ogobi dege dege mida handari kirani pira duria (250)

✠ 42:3: Ese 40.17, 41.10



haya. <sup>20</sup> Ege pabe timbuni Anduane Homogonaga anda bu mabu binidagoni bu mabu bini ndo tiga tiga tungulo pugu bialu uyurahayagi bu banga bialu unurahayagi daliape halu amurayagi pu amu halu unurayagi pu uyu halu tigatiga tungu laga bini maria hea. Ani heagonaga magi mbiraore ogobi dege howa bibahendenaga mida handari kirani pira duria (250) dege dege hea. Ege pabe timbuni ogonime mbirale Anduane Homogonaga loma biahene ngarula wali agali tagirahayagi tanabi bu karunaga ngarula tubari hea.

## 43

### *Anduane Homogo ibuni andagaha daibu henego ogo*

<sup>1</sup> Ina de gandeba handalu hewaria agali handalehe ogoni ibugua wai pabe timbuni heagonaga panga ni tagira ibiragohayagi dugua amu heagohayagi i haru puwa helaya. <sup>2</sup> Ani howa handalu hewaria Isaraele wali agalinaga Ngode Datagaliwabe kagonaga wá taraore hongoheore ni tagira ibiragohayagi howa wá hadali hayane handaru. Ani hondo hewagola wá taraore ogoni wá heaore dege Ngode Datagaliwabenaga bi timbuni kilikulu lalu iba solowara tanguia amu nana biradagua bialu layuane hale haru. Ani layuagola wá taraore biagome dindi bibahendehe wá hongoheore haame hayane handaru. <sup>3</sup> Ina de gandeba o handarudagoni ala Yarusaleme mo ko halu bo gialobagabu wahole ibiyaria hendenegobi dege handalu iba Keba peagoria hewaria hendenegobi dege lone handalu biru. Wá taraore ogoni ibiyago hondowa ina ma podalu dindiha dengui ela helo ge duli hanga howa bulu paliru. <sup>4</sup> Ani biwagola Anduane Homogonaga wá hongohe taraore ogoni ibalu tanonaga pabe panga haraba amu ni tagira ibiragohayagi howa tanoha anda pialu Anduane Homogonaga anda biagoha wá haanda hayane handaru.

<sup>5</sup> Ani hondo hewagola Anduane Homogonaga Dinini ibugua i haru pialu Anduane Homogo anda haneni wali agali ngoaiho haga wiagoria helaya. Ani helayagola Anduane Homogo anda biagoha handa anda halu hewaria wá taraoreme anda tamu biagoha wá ho tolatagi hearia handaru. <sup>6</sup> Agali handalehe biago ibu i hewagoria kaware helowa Anduane Homogo ibugua anda tamu biagoha howa bi mbira layuane hale haru. <sup>7-8</sup> Bi ogoni Anduane Homogonaga bi leneyago ibugua ihondo langialu lalu, Dindiali-o inaga dagia kini biragane anda ogoha ngago ai wali agalime anda ogoha ibalu inihondo mitangi bialu lotu lele ibulebira. Ini Isaraele wali agali baba anda ogoha ibalu mandagi haabo kogola mani Isaraele wali agalibi tinaga kinirubi tigua inaga mini timbuni mini lene kogo mo dindiha naholebiraore. Tigua mbirale dama mitangi bialu gime wabini ruhondo lone bi pupu wialubi naholebira. Kini ti andabi i anda kogoria bia para naholebira. Ala kini ti anda i andala kawareore pabe mbira hangume ho tu wuwa hayagoni. Ani heagola tigua kini maru homayarunaga tinginiru tini anda ogoniha hora haga biyagome i anda ininaga deni mo ko halu mo dodo helaga biya. Ani bialu tigua anda ogoniha howa mana ko ngu piagle wiaru bialu heagola ogonime inaga mini timbuni mini lene hewago mo dindiha helaga biya. Anidagua biyagonaga ina tihondo tandaga timbuni halu ti bo wahai harugoni. <sup>9</sup> Ani birugo Isaraele wali agali tigua mbirale dama mitangi bialu gime wabini ngaruhondo bi pupu nawi wahalu tinaga kini homenerunaga tingini kaware hora haga biagago waholene nga. Tigua ina bi larogo hale howa talialu biyagua nde i ti baba mandagi haabo holebero, laya, lene.

<sup>10</sup> Anduane Homogohanda ihondo laabo halu lalu, Dindiali-o Isaraele wali agaliruhondo i andaga biago ogobiore hea lalu lamibe. Ani lameregola tigua uruni manda bialu tinime mana ko bialu hayaru mitangi bu dai bialu taga helo ani lamibe. <sup>11</sup> Tigua taga ho kagola i andagaha bibahendeore ogobi nga lalu ti hale helo lamiai habe. Ani bialu anda ogoninaga magi tara tara ogobiore ngelo lalu lamibe. Anda panga

☆ 43:2: Ese 10.3-4, 10.18-19, 11.22-23, Mo 1.15

helolenebi anda ogobiore helo lalu bulenegobi lamiai habe. Anda ogoni ibu bialu howa manani talialu bulenego manabi bebani gilibu mibe. Ani bidegola tigua mana ogoni bibahende bebani gilibu ngago hondowa talialu inaga anda ogoni bayuwa bialu anda ogoninaga mana ngagobi bibahende taluwa bialu helo ani bibe. <sup>12</sup> Inaga anda ogoninaga mana ogodagua. Anda ogoni ibu abale ibuni haga hari nene biagoriaore bialu anda kagoria dindi kaware ngaru ininagaore ngelo loma biaho ngelalu bilimu. Ai i andanaga mana uruni, lalu Anduane Homogohanda laya, lene.\*

*Lomabu delaga dabu mida magi mandabu hendenego ogo*

<sup>13</sup> Anduane Homogonaga anda mida magi manda biyadagua lomabu delaga dabu heago ogonibi magi manda biya. Lomabu delaga dabu heago gene dindiha ganarua bu mabu bia. Ganarua ogoni dindiha wape heagonaga magi sendimida pira duria (50) wialu arane sendimida pira duria (50) dege wiagoni. Ganarua biago neneni hagira ale emene bu mabu biago ogoninaga daliga magi sendimida pira kirani duriaya (25).\* <sup>14-15</sup> Dabu ogoni halu tebo heago hobane mbiragonaga magi mida mbira hangu hea. Ani bialu mende dombeni heagonaga magi mida kira halu tebone daligani heago lomabu delaga howa ogoninaga magi mida kira dege heagoni. Dabu dindiha heagonaga nguni tagirapu heago arane magi sendimida pira duriaya. (50) Ani bialu hobane dombeni ogoni nguni tagirapu heagonaga arane magibi hobane tebone daliga heagonagabi magi sendimida pira duria (50) dege degeya. Ani heago lomabu delaga dabu ogoninaga daligani gimbuni mariani nogo bulumaga ne gayane ale maria hea. <sup>16</sup> Dabu ogoni daligani luninaga magibi arane yangalelanaga magibi mbiraore ogobi dege mida waragaria hea. <sup>17</sup> Dabu nira obeneni heagonaga lu magi arane yangalela mbiraore ogobi dege mida karia hea. Dabu neneni hagira emene bu mabu bupehe heagoni. Hagira emene neneni bu mabu binidago daliganaga magi sendimida pira kirani duriaya (25). Hagira emene biadaga henedagoni lomabu delaga daligadagonaga ganarua biradagua bia. Lomabu delaga dabu daligani ganarua ale wiago arane magi sendimida pira duriaya (50). Lomabu delaga dabu ogoriani irigi holenenaga egageria mbira dabu ogoni abene ni tagira ibiragohayagi howa wiadaga heagoni.

*Anduane Homogonaga lomabu delaga dabu loma bia henego ogo*

<sup>18</sup> Anduane Homogo Bibahende Haru Haame Ho Haga kagome ihondo langialu lalu, Dindiali-o inaga bi larogo baya hangu hale ha. Tigua lomabu delaga dabu ogonibi bu helowa dabu ogoriani mbirale bo lomabu delowa nogo baragonaga darama dabuni odo tandala paya bialu howa mana ogore bilimu.\* <sup>19</sup> Nogo bulumaga wangabe mbira haru puwa loma binigo mo ngiaga agali Sadogo aria karuhondo meregola tigua ko biyago ina domo waholiyanaga nogo ogoni loma bialu ihondo bo ngilo mibe. I Anduane Homogo Bibahende Haru Haame Ho haga kogo ina ogo bibe larogoni. Libai hameigini Sadogonaga aguanene ti hangume loma binigo mo ngiaga howa ini kogoha kaware ibalu inaga biabe biahaga habehe kagoni. <sup>20</sup> Ani bialu howa nogo ogoninaga darama ngago hambu yuwa dabu kagonaga gimbuni mariani bulumaga ne gayane ale kago darama hai halu dabu obeneni kagonaga gimbuni maria ngagoha odo hai halu dabu dombeni ogoni neneni hagira emene bidagobi hai halimu. Tigua ogonidagua beremigola dabu ogoriani dodo para kago domo wahalu inaga deni dabu ogoni inaga loma biahene bayale wulebira. <sup>21</sup> Ani bialu ko biyago ina domo waholiyanaga nogo bulumaga ogoni yalu puwa nogo bo delaga dindi henge mbira i anda kago tagirayagi ngagoria delalimu. <sup>22</sup> Ani bialu horo mendengi nogo meme dere durubi mbira nabioire wangabe kago haru ibuwa ko biyago domo waholenenaga loma bialu bo ngilimu. Ani bialu meme ogoninaga daramame lomabu delaga dabu kago dodo nahe helonaga abale bulumaga daramame birimidagua dege bilimu. <sup>23</sup> Ogonidagua biai halu nogo sibi

\* 43:12: Ese 40.2    \* 43:13: Har 27.1-2, 2 Bit 4.1    \* 43:18: Har 29.35-37

wangabebi bulumaga wangabebi dere durubi mbira nabi habetigiore kago ini koria haru ibalimu. <sup>24</sup> Ani haru eberemigola loma binigo mo ngiaga agali karu tigua nogo ogonilabo balu ibi howa irani dai helo inaga loma ogoni delolene nga. <sup>25</sup> Anidagua biai howa horo karu nogo memebi bulumagabi sibibi wangabe mbira dege dege ko biyago domo waholenenaga loma bialu bo delole haru ibalu irani dai helo delalimu. Nogo uruni lomabu yalu eberemigo dere durubi mbira nabioire bayale kago hondowa haru ibalimu. <sup>26</sup> Horo karu loma binigo mo ngiaga agali karu tigua lomabu delaga dabu kago dodo nahe inagaore bayale helonaga loma uruni bo delolene nga. Tigua ogonidagua biragome lomabu delaga dabu ininaga loma bia heneore holebira. <sup>27</sup> Sarere mbira ogoni piyai halu horo halini laragola loma binigo mo ngiaga agali karu tigua Isaraele wali agalinaga loma yu poramigo mo loma bia halu holene horo wulebira. Irani dai helonaga lomabu delolenebi Anduane Homogoinila ho gimbu bulenaga lomabi delaga bialu holebira. Tigua ogonidagua bialu kangi ti baba inaga miniha dungulo holebero. I Anduane Homogo Bibahende Haru Haame Ho Haga kogo ina bi o ledogoniore, laya lalu Esegielehanda lene.

## 44

### *Panga haraba ni tagira ibiragohayagi wiago payaho wiaabo holebira lenego ogo*

<sup>1</sup> Agali biago ibugua i haru halu panga timbuni ni tagira ibiragohayagi wiagoria piyagola handalu hewaria panga timbuni wiago paya ho wia. <sup>2</sup> Ani paya ho wiagola Anduane Homogohanda ihondo langialu, Panga ogo ibu payaho wiaabo hene ngagola mbiralime dugua nabulebira. Irane i Anduane Homogo ti Isaraele wali agalinaga Ngode Datagaliwabe kogo hariga ogoniha anda ibinigome panga ogoni ibu payaho wiaabobo bu wulebira. <sup>3</sup> Kini ibugua hangu panga haraba ogoniha anda ibalu inaga wanakuini tomo nalu birulebira. Ani biruwa anda hobane timbuni kagoha ibu panga haraba maru ngaruha ubaanda tagi bulene karulape, laya, lene.

### *Anduane Homogonaga wali agali karu ti dege ibu andaga anda polene nga lenego ogo*

<sup>4</sup> Ani bialu agali biago ibugua tanoha anda polene panga haraba abene uyurahayagi wiagoha i haru anda puwa ibu Anduane Homogonaga wanakuihayagi pu haya. Ani pu heagola Anduane Homogonaga wa taraore holeneme anda biagoha wa hagimbu biya. Anidagua biyagola i ge duli hangaho biruwa ma podalu dengui dindini elaho biraru. <sup>5</sup> Ani berewagola Anduane Homogohanda ihondo langialu lalu, Dindiali-o ina ihondo mbirale mbira mo walia harogo damene handai halu bi languleberogo bayuwa hale hai habe. Inaga anda o kagonaga mana ngagobi mbirale bulene ngagobi bibahendeore langiai holebero. I anda ogoniha ogo ibu anda polene karulape ogo ibu anda polene nakarulape lalu langulebero. Ani loleberogo bi ogo bayuwa hale habe.

<sup>6</sup> Isaraele wali agalime inaga bi wahalu dogo ho karunihondo ogodagua lamibe. I Anduane Homogo Bibahende Haru Haame Ho Haga kogo ina tihondo bi ogodagua laro. Tioire mana ko ngubi ngaruore bialu haga ngamigo wahai halimu. <sup>7</sup> Tigua nogo habane daramaru inaga lomabu delalu howa agali dindi tarali hearu inaga andaha anda ibu helarimi. Agali i manda nabiaga uruni tinaga dongone podo mabu biagane mana nabi howa tigua ihondo mini mbiraore nawi haya. Tigua inaga anda hewagoha anda ibiyagome inaga deni i anda mo mebia haya. Tigua mana ko ngubi urunibi bialu kamigome inaga habo nalolene bi lo wirugo mo habo lalu kami. <sup>8</sup> Tinime inaga anda ogoniha biabe bulene ngago bialu haga ndo kami. Tigua agali ihondo mini mbiraore nawi bu karume tinaga biabe ogoni bia aribia helo mo biahaga kamigoni ndobe.

<sup>9</sup> I Anduane Homogo Bibahende Haru Haame Ho Haga kogo ina ogodagua laro. Agali dindi tarali tinaga dongone podo mabu biagane mana nabi howabi inihondo mini

✧ 44:4: Ais 6.4, Ese 1.28, 3.23, 43.5

mbiraore nawiagabi bu karu tigua inaga anda kagoha anda polene nawi. Ti Isaraele wali agali baba mandagi ibagabu ha hagayaguabi inaga andaha anda polene nawiore, laya lene.

*Libai hameiginime loma binigo mo miaga agalinaga biabe biaga winigo bulene nawi lenego ogo*

<sup>10</sup> Anduane Homogohanda ihondo langialu lalu, Isaraele wali agalime i erembira ngialu piyangi Libai hameigini hearu tiguabi nde ihondo erembira ngialu puwa dama mitangi bialu mbirale gime wabini wiaruhondo bi pupu wialu haya. <sup>11-14</sup> Libai hameigini tigua wali agali bu hearume mbirale gime wabini wiaruhondo bi pupu wialu helo biawai hene. Ani biyagome wali agali tigua mana ko bilonaga tinaga bu mini mo heya hayagola tigua ko biya. Anidagua biyagonaga i Anduane Homogo Bibahende Haru Haame Ho Haga kogo ina heneneore laro. Ina Libai hameigini uruni pani nelo miaore bulebero. Ina Libai hameigini karu tigua loma binigo mo ngiaga agali howa biabe nabilolebero. Tigua inaga Hobane Loma Bia Heneore kaware ibulene nawi. Ani bialu mbirale inaga wiabagi hene ngagoriabi ti kaware ibulene nawi. Tigua mana ko ngubiore wiaru bialu hayagonaga taga timbuni ho holebira. Anigo inaga ege pabe kagoha mamage howa handayaho helobi biabe maru ege pabe andaneha bulene ngaru tigua bialu helobi helolebero. Tigua nogo bo loma bialu irani dai helolenaga loma ngaru mo manda manda bulene handayaho halu wali agalime loma maru yu ibiraru yamigi bulebira. Ani bialu i mitangi bialu lotu lolene horongi tigua wali agali lotu lelo biamogo bulebira.

*Loma binigo mo miaga agali hearu tinaga biabe ogodagua bulene nga lenego ogo*

<sup>15</sup> I Anduane Homogo Bibahende Haru Haame Ho Haga kogo ina ogodagua laro. Libai hameigini Sadogo aria karu ti dege loma binigo mo ngiaga agali howa biabe bialu holebira. Isaraele wali agali tigua i erembira ngialu piyangi hameigini mbiraore Sadogo aria hangume inaga biabe bialu i andaga haabo hene. Anidagua binigo ai hameigini Sadogo aria ti hangu i kogoria kaware ibalu inaga biabe bialu howa nogo habane daramaru yalu ibalu inihondo lomabu ngulebira. <sup>16</sup> Sadogo hameigini karume inaga andaha anda pialu inaga dabu kagoria kaware puwa biabe bialu mbirale ngaru handayaho holebira. <sup>17</sup> Loma binigo mo ngiaga agali karu tigua inaga andaha anda polene ege pabe mendehayagi anda pole howa tinaga aga karulaganego pu bayaleme wabini wiaru mo karulolebira. Ani puwa tamuha howa ti aga nogo sibi irinime wabini ngago karulo holene nawiore. <sup>18</sup> Tigua aga darasiru karulalu agame embone dambi holene labolabo bayaleme wabini ngagome dambiho holene nga. Anigo tinaga tingini poboyogo bulebiragonaga mandibu wulene nakarulape. <sup>19</sup> Ani bialu ti wali agali ngoaiho haga hama ngagoria tagira pole howa inaga biabe bulenaga karulagane aga biago golowa anda damini hobane kira kagoha ngelolene nga. Aga ogoni ininaga wiabagi henego wali agali bu karume ela hayagua nde tibi ininagaore habagi holebira. Ani buwa aga mende bame tanabi karulagane ngago karulo aribia halu tagira polene nga. <sup>\*</sup>

<sup>20</sup> Loma binigo mo ngiaga agali uruni tinaga mandari bibahendeore podo mbololo waholene nawi. Tinaga mandari luni helo waholenebi nakarulape dege. Tigua mandari podo emene tubagi holene nga. <sup>\*</sup> <sup>21</sup> Loma binigo mo ngiaga agali karume i andaha anda polene ege pabe mende kagoha anda pole howa waini iba nolene nawiore. <sup>\*</sup> <sup>22</sup> Tigua wali mbira ibu agalinime wahene bedago dabu bulene nawi. Loma binigo mo ngiaga agali karu ti Isaraele wandari agalila mandagi palia nabini bedagobi loma binigo mo ngiaga mbira homenagonaga one dalo bereaguabi nde ogoni dabu bulene karulape. <sup>\*</sup>

<sup>\*</sup> 44:17: Har 28.39-43, LBM 16.4    <sup>\*</sup> 44:19: LBM 16.23, Ese 42.13-14    <sup>\*</sup> 44:20: LBM 21.5    <sup>\*</sup> 44:21: LBM 10.9

<sup>\*</sup> 44:22: LBM 21.7, 21.13-14

<sup>23</sup> Loma binigo mo ngiaga agali karu tigua inaga wali agalihondo mbirale ogo ininaga wiabagi hene nga mbirale ogo ininaga wiabagi hene ndo nga lalu lawai holene nga. Ani lawai halu mbirale inaga deni dodo nahe ogo nga dodohe ogo nga lalu lawai holene nga. ✧ <sup>24</sup> Wali agalime keba howa lai lalu heagua nde loma binigo mo ngiaga agali bu karu tigua manani howa wali agali biaru inaga bi mana lo ngadagua tigabi dabaki bulene nga. Loma binigo mo ngiaga karu tigua inaga horo timbuni i mitangi bialu lotu lalu halimulo dabo wirugo tagira ibirangi bulene lo ngadagua bialu holene nga. Sabada horo ibirangibi horo ogoni ininagaore wiabagi hene nga lowa i mitangi bialu holene nga.

<sup>25</sup> Loma binigo mo ngiaga agali karume mbirali homene tingini ngago ela holene nawiore. Tigua homene tingini ngago ela hayagua tini inaga deni dodohe holebira. Anigo ti dameneore aba aiyayaguabi tini waneiginiyaguabi hameneyaguabi mbalini dabu nabi bereneyaguabi nde tinaga homene tingini ngago ela holene karulape nga. Ani biragome tini inaga deni dodo nahe holebira. ✧ <sup>26</sup> Loma binigo mo ngiaga mbirame ibu inaga deni dodohe kayagua lone dodo nahelonaga mana ngadagua bulene nga. Ani bialu o biagome ibuha dodo nahe howa horo karia bame tagira hondo holene nga. <sup>27</sup> Ani bialu mani ibugua inaga andaha anda polene ege pabe mende hayagoha anda puwa ibunaga ko ngago domo wahelonaga loma ala bo delalu mani inaga biabe bulene ngago bule anda pobehe holebira. I Anduane Homogo Bibahende Haru Haame Ho Haga kogo ina bi o ledogoniore.

<sup>28</sup> Isaraele wali agali hameigini maru karu ti Isaraele dindi podo ta haga biyagua loma binigo mo ngiaga karu ti dindi lenego mbira nawulebira. Tininaga mbirale bayale yu haabo holene ini kogoni. ✧ <sup>29</sup> Loma binigo mo ngiaga karu tigua widi loma delolenebi ko biniru domo wahelonaga lomabu delolenebi mana ko bero mitangi nabi howa binirunaga lomabu delolenebi uruni wali agalime yalu ibiragola loma binigo mo ngiaga ti hangume nalu holebira. Isaraele wali agalime mbirale inagaore lalu wiabagi ho ngarubi loma binigo mo ngiaga ti hangume mo yulebira. ✧ <sup>30</sup> Wali agalime mabuha tomo hengeneru pigane boga birago loma binigo mo ngiaga agali karu tinaga bu yalu ibulebira. Ani bialu wali agali karume loma tara tara inaga yalu ibirarubi loma binigo mo ngiaga agali ti mo yaga bulene karulape. Ani bialu wali agalime mberedi pigane hirinigo inihondo loma bialu loma binigo mo ngiaga karu ti nelu mulene nga. Wali agalime mana ogonibi biyagua ina wali agalibi waneiginirubi bibahende mo bayale hai holebero. <sup>31</sup> Nogo egabi minana homene mbira wiaguabi nogo gabuarume bo wahene wiaguabi urunidagua homene ngaru loma binigo mo ngiaga karume nolene nawiore laya, lalu Esegielehanda lene. ✧

## 45

### *Isaraele wali agalime dindi mbira Anduane Homogonaga tu wiabagi ho ngelenego ogo*

<sup>1</sup> Anduane Homogohanda ihondo laabo halu lalu, Tigua Isaraele dindiha daibu howa dindi hameigini kamidagua tuwu ta haramingi dindi timbuni mbira ini Anduane Homogo kogonaga tu wiabagiho ngelalimu. Dindi ogoni luninaga magi kilomida homberia (12) bolangahe howa arane yangalenaga magi kilomida pira ngelalimu. Dindi ogoni bibahende ininagaore wiabagi hene ngelo ngelalimu. <sup>2</sup> Anidagua buwa dindi ogoni hanuniore ininaga anda bule tuwu ngelalimu. Dindi ogoninaga gibuni maria ngagoha ogobi dege dege magi manda bialu mida handari kirani pira duria (250) ngelo ngelalimu. Ani bialu dindi hobane ogoni waraanda ho mabu bialu ogoninaga magi manda bialu mida pira kirani duria (25) ngelo tu wiabagiho ngelalimu. Dindi hobane mende ogoni bame ngelalimu. <sup>3-5</sup> Ani bialu dindi ininaga tu wiabagi howa



ngelarimigo ogobi labolabo ngelo haluki tu wiabagi ho ngelalimu. Ani ngelowa tu hanuni podoki halu kirabalinaga magi manda bialu luninaga kilomida homberia (12) emene bolanguahe wialu arane yangalenaga magi kilomida duria hangu ngelalimu. Dindi podene mendego loma binigo mo ngiaga agali inaga biabe bialu haga karu tinaga ngelo. Ani bialu dindi hobane mendego inaga anda bu holebira. Agali maru loma binigo mo ngiaga howa inaga wanakuini kaware ibuwa inaga anda kagoha biabe bialu haga karu tinaga anda dindi ina tu wu merogoha bu holebira. Dindi hobane inaga anda kagoha ininaga wiabagi heneore wulebira. Inaga dindi ogoniha halu mende tu wiabagi harogo Libai hameigini bu karu tinaga ngelolebero. Libai hameigini uruni ti maru inaga andaha biabe bialu haga bu karu tigua tinaga tano dindi hobane ogoniha bu holebira.

<sup>6</sup> Ani bialu dindi tu tebone timbuni dege luninaga magi kilomida homberia (12) bolanguahe wialu arane yangalenaga magi kilomida kirani bolanguahe tu wiabagiho ngelolene nga. Ani ngeledemigoria Isaraele wali agali tinaga tano timbuni dunini ogoni ngelo ngelalimu, lene.

*Isaraeleali kininaga dindi podene kira ngelalimu lenego ogo*

<sup>7</sup> Anduane Homogohanda ihondo laabo halu lalu, Tigua kininaga dindi podene kira ngelalimu. Dindi mbirago inaga anda kagobi tinaga tano dunini ngamigo tagiraha ni tagira ibiragohayagi milimu. Ibunaga dindi wuyu pialu hameigini tara padago baba tubari ngagoria tagira pelo tu wu milimu. Ani bialu kininaga dindi mendego abene ni paliragohayagi ngelo tu wu milimu. Ibunaga dindi wima pialu ni paliragohayagi dindi mende hameigini tara padaru baba tubari ngagoria tagira pelo milimu. Anidagua beremigola inaga dindi ngogomebi tinaga tano dunini ngamigomebi kininaga dindi ogoni bibahende dindi dombeni ngago ni tagira ibiragohayagi howa pialu ni paliragohayagi tagira poragola dindi ogoni ti hai holene wulebira. Ani beremigola dindi ogoni timbuni mbira Isaraele hameigini marunaga ngagobi dege wulebira. <sup>8</sup> Ani bidagola Isaraealinaga kini ibugua ibuninaga dindiore wu howa kini ala ina tihondo dabo ngirurume wali agali hingedape halu henedagua holene manda nabulebira. Ani bialu kini ibugua Isaraele wali agalinaga dindi ngaru karulolene manda nabiore holebira.

<sup>9</sup> I Anduane Homogo Bibahende Haru Haame Ho Haga kogo ina ogodagua laro. Isaraeleali haru haga bu kamiru tigua mana ko bialu haabo harimigo ai wahai halimu. Tigua wali agali bu hearuhondo mana ko bialu ti bope halu harimigoni. Ai áyu tigua mana ko uruni alego wahai halu mana bayale tigabi ngago taluwa bialu halimu. Ani bialu inaga wali agali tininaga dindi ngagoria karu bo taliatagi ala haramilidagua nahalimu. I Anduane Homogo Bibahende Haru Haame Ho Haga kogo ina bi o ledogoniore, laya, lene.

*Isaraele tigua mbirale ngaru tigatiga tale bulene nga lenego ogo*

<sup>10</sup> Anduane Homogohanda laabo halu lalu, Isaraele wali agali tigua tinaga mbirale yolo mulenenaga genda handagane ngamiru lu magi handagane ngamirubi tigabi dege handalu manda bilimu.\*

<sup>11</sup> Mbirale yobi ngaru genda magi handagane mini eba nga. Mbirale iba ale ngaru magi handagane mini bada nga. Ai ebala badala ogobi labolabo wulene karulape. Anidagua bulene ngago eba pirame home mbira wialu bada pirame home mbi-rayaguabi koro mbi-rayaguabi mbira dege dege wulene nga.\*

<sup>12</sup> Mbirale genda magi handaga ogobi nga. Genda magi mini gera ngago pira kirame (20) manda bialu genda magi mende mini segelenaga mbira hangu manda biaga nga.

\* 45:10: LBM 19.36 \* 45:11: Genda magi handagane mini kira homela korola ngagonaga magi mbiraore lida magi handari mbirani pira kariani duria (175) nga. Ani bialu ebala badala magi mbiraore ale dege pira mbirani karia (17) ale nga.

Genda magi segele ngago pira waragaria (60) manda bialu genda magi mini mina ngago mbira hangu manda biaga nga.†

13 Tígua inaga loma tomo mbiraleru yalu ibalu howa mbirale uruninaga genda magini howa ogodagua mo tale bulene nga. Widibi balibi genda magi handalu pira waragaria (60) ngayagua nde ogoninaga homane mbira ihondo ngulene nga. 14 Tínaga ira olibe hingedemiru lini ibane handari mbiranaga (100) mbiraore hangu i ngulene nga. 15 Ani bialu nogo sibi tí daluha datani nalu helo handari kira (200) hinu kamigo aria mbiraore hangu ihondo lomabu ngulene nga. Tígua mbirale uruni widi lomabu delolebi irani dai helo bo delolebi Anduane Homogo inila ho gimbu bulenenaga loma bo delolebi yalu ibalimu. Ina tínaga ko bu kamiru domo wahai holiya urunidagua bilimu. I Anduane Homogo Bibahende Haru Haame Ho Haga kogo ina bi o ledogoniore laya, lene.

16 Wali agali bibahendeme loma uruni Isaraele wali agalinaga kini karia yalu ibulene nga. 17 Nogo sibi irani dai helonaga lomabi widi lomabu delolenebi waini iba odo lomabu delolenebi uruni bibahende ege pigane ngabulo kagola horo timbuni tagira ibirangibi Sabada horo mbira mbirangibi horo timbuni tí Isaraele wali agalinaga wiabagiho ngelaga birugo tagira ibirangibi lomabu mulene uruni milimulo kini ibugua tí mo ngulene nga. Ani bialu Isaraele wali agalime ko biniru domo waholenaga lomaruhi delolene nga. Loma uruni ko domo waholenaga lomabi widi lomabu delolenebi irani dai helo lomaruhi Anduane Homogola ho gimbu bulenaga lomaruhi kini ibugua tí mo ngigi bulebira.

*Anduane Homogo mitangi bialu lotu lolene horo timbuni winiru ogo*

18 Anduane Homogo Bibahende Haru Haame Ho Haga kagome bi ogodagua lalu, Ege piganenaga horo mbira laragola nogo bulumaga wangabe mbira dere durubi nabi kago hondowa loma bialu bo ngilimu. Inaga anda kago dodo nahelonaga loma ogoni bo ngilimu. 19 Loma binigo mo ngiaga kago ibugua ko biniru domo waholenaga loma nogo bulumaga ogoninaga darama hambu yuwa inaga anda kago panga harabani gene karu odo hai halu lomabu delaga dabu kagonaga nguni maria ngagoriabi inaga anda haneni wali agali ngoai haga ngagonaga ege pabe harabani gene kagobi bibahende darama ogonime odo hai halimu. 20 Ani buwa ege ogoninaga horo kane laragolabi ani dege bilimu. Mbiralime ibu ko berogo mitangi nabi howa ko biyaguabi mana ko ngago manda nabi howa bu heaguabi ko ogoni biyagonaga loma binigo mo ngiaga kagome bulumaga ogoni loma bialu bo ngiragome inaga anda kago dodo nahe bayale helolebira.

21 Ege mbira ogoninaga dege horo dene (14) laragola tígua horo timbuni mbira mini Bolangua Halu Penegonaga Horo ogoni mitangi bialu holene nga. Ani bialu ogoninaga horo karu bibahendengi tí kamirume mberedi yidi nahe hirinigo nolene nga.✱ 22 Horo timbuni ogoninaga tí pigane ibu ngoai haramingi kini kagome nogo bulumaga bayale mbira haru ibuwa ibuni ko binirubi ibunaga wali agalime ko biyarubi domo waholenaga bulumaga ogoni loma bialu loma binigo mo ngiaga kagome bo delelo mulene nga. 23 Mberedi yidi nahe hirinigo nolene horo tagira ibiragola horo karu bibahendengi kini ibugua nogo sibi wangabe kariabi nogo bulumaga wangabe kariabi Anduane Homogo inihondo loma bialu irani dai helo bo delolene nga. Kini ibugua nogo meme mbira mbira horo karia bibahendengi wali agalirume ko biniru domo waholenaga loma bialu bo delolene nga. Ibugua nogo uruni dere durubi nabi bayaleore kago hondowa bolene nga. 24 Kini ibugua nogo sibi bulumagaru mbira mbira uruni heba balawa bayale genda magi manda nu kira ale kilogarama deria (14) lomabu mialu olibe lini ibanebi be timbuninaga magi lida tebira ale lomabu mulene nga. Ani miragola

† 45:12: Genda magi handalu howa genda magi mini segeledago hayagua nde garama bearia (11) karulape wiaga. Genda magi mini mina heagua nde genda magi daliga garama handari waragariani pira halirani maria (684) wiaga nga. ✱ 45:21: Har 12.1-20, Dag 28.16-25

loma binigo mo ngiaga bu karu tigua nogo bulumaga sibi uruni loma bialu bo delalu howa balawa urunibi olibe ibane urunibi heba lomabu delolene nga.

<sup>25</sup> Horo timbuni dege mbira Anda Nemandaha Palu Holene Horo tagira ibirangi ege kanegonaga horo nguini (15) laragola horo ogoingi kini ibugua ala horo karu nogo bulumagarubi sibirubi haru ibalu ko biniru domo waholenaga lomabi irani dai helonaga lomabi balawabi olibe lini ibanebi mo yalu ibuwa loma uruni ala miyagobi dege lomabu ngialu holene nga, lalu Anduane Homogohanda laya, lene.\*

## 46

### *Anduane Homogohanda Kinime loma ogodagua bulene nga lenego ogo*

<sup>1</sup> Anduane Homogo ina Bibahende Haru Haame Ho Haga kogo ogodagua laro. Inaga anda haneni wali agali ngoai haga ngagoha polenaga panga haraba ni tagira ibiragohayagi kago horo waragaru biabe bialu hagane horongi panga ogoni payaho wiaabo holene nga. Anigo Sabada horo harangibi Ege Mbira Ngabulo kagonaga horo pigane tagira ibirangibi panga ogoni duguaho ngelolene nga. <sup>2</sup> Horo uruni tagira ibirangi kini kago ibugua inaga andaha anda ibulenaga panga haraba ogoniha anda ibulene nga. Ani bialu kini ibu wali agali ngoaiho haga hama timbuni ngagoha ege pabe mende kagonaga haraba ni tagira ibiragohayagi howa anda polene wulebira. Anda puwa tamuha harabani howa lomabu delaga dabu ngagoha handa amu ho holene nga. Ani ngagola loma binigo mo ngiaga karume mbirale kini ibugua lomabu yalu ibiyaru mo mulebira. Loma uruni irani dai helolene lomabi Anduane Homogo inila ho gimbu bulene lomabi bu delolebira. Ani bialu kini ibuni ge duli hangaho biruwa ma podalu i mitangi bialu lotu lolebira. Ani bialu mani wali agali ngoaiho haga hama timbuni wiyagoha tagira polebira. Anigo loma binigo mo ngiaga karu tigua panga ogoni paya nabi alendo halu ne lelo panga duguaho ngelolebira. <sup>3</sup> Sabada horongibi Ege Mbira Ngabulo kagonaga horo ibirangibi ege pabe mende kagonaga panga ni tagira ibiragohayagi dugua dai bidagonaga haneni wali agali bibahendeme ngoaiho haga hama timbuni ngagoriani ge duli hangaho biruwa i mitangi bialu lotu ogonibi lalu holebira.

<sup>4</sup> Sabada horo harangi kini ibugua nogo sibi igini hongolo waragaria sibi wangabe mbira lowa irani dai helonaga loma bo delole haru ibulene nga. Nogo sibi uruni dere durubi nabi bayaleore kago hondowa haru ibulebira. <sup>5</sup> Nogo sibi wangabe bayale ogoni haru halu balawa widime wabini genda magi manda nu kira ale kilogarama deria (14) lowa yalu ibulene nga. Ani bialu nogo sibi igini waragaria biaru heba balawaibunime hame ledadagua yalu ibulene nga. Ani bialu olibe lini ibane balawa yidagobi dege yulene nga. Ibugua yulubadagoni balawa genda magi manda nu kira ale kilogarama deria (14) hanalu ibiyagua nde olibe lini ibane be timbuninaga magi manda lida tebira ale heba hambu yalu ibulebira.

<sup>6</sup> Ege Mbira Ngabulo kagonaga horo harangi kini ibugua nogo bulumaga wangabe mbirabi sibi igini hongolo waragaria hebabi sibi wangabe timbuni mbira laga buwa lomabu yalu ibulene nga. Nogo uruni dere durubi nabi bayale kago hondowa haru ibulene nga. <sup>7</sup> Ani bialu ibugua nogo bulumaga wangabe biago heba balawa widime wabini ngago aria genda magi manda nu kira ale kilogarama deria (14) heba yu ibalu nogo sibi wangabe biago heba balawa ogonibi dege lomabu yalu ibulene nga. Ani bialu nogo sibi igini hongolo biaru heba balawa kini ibuni hame ledadagua yu ibulene nga. Ibugua balawa kilogarama deria (14) ale hanalu ibiyagua nde olibe lini ibane karulape timbuninaga magi manda lida tebira ale hambu yalu ibulene nga. <sup>8</sup> Ani bialu kini ibugua i mitangi bialu lotu lole ibalu panga haraba ni tagira ibiragohayagi wali

\* 45:25: LBM 23.33-36, Dag 29.12-38

agali ngoai haga hama ngagoria howa haraba kagoha anda ibiyadagua ibu lotu lai halu hariga ogoniha dege dai bialu tagira polene nga.

<sup>9</sup> Wali agali karumebi nde horo timbuni uruningi Anduane Homogo i mitangi bialu lotu lole ibuwa tigua ege pabe haraba abene uyurahayagi ngagonaga anda ibirarume ti lotu lai halu panga haraba abene unurahayagi ngagoha tagira polene nga. Ti marume i mitangi bialu lotu lole panga haraba abene unurahayagi anda ibirarume nde ti lotu lai howa panga haraba abene uyurahayagi ngagoha tagira polene nga. Ti anda ibiragoha lone dai nabi ege pabe haraba mende ngagonaga harabaha dai bialu tagira polene nga.

<sup>10</sup> Kini ibu wali agaliru ege pabe harabani anda ibirangi ibu ti heba anda ibulene nga. Ani bialu wali agali tagira porangi nde ibu ti heba dege tagira polene nga. <sup>11</sup> Horo timbuni uruni harangi wali agali tigua lomabu ngule nogo bulumaga wangabe mbira mbira haru ibalu balawa widime wabini genda magi manda nu kira ale kilogarama deria (14) hanalu ibuwa nogo sibi wangabe mbira mbira haru halu balawa genda magi kilogarama deria (14) ogonibi dege hanalu ibulene nga. Ani bialu sibi igini hongoloru haru halu balawa hanalu ibiragome genda magi tini hame ledadagua hanalu ibulene nga. Tigua balawa kilogarama deria (14) ale hanalu ibiyagua nde olibe lini ibane karulape timbuninaga magi manda lida tebira ale hambu yalu ibulene nga.

<sup>12</sup> Kinidagome Anduane Homogo inaga lomaibunime hame ledadagua irani dai helonaga lomabi inila ho gimbu bulene lomabi haru halu ibiyagua nde loma binigo mo ngiaga bu karu tigua ege pabe mende kagonaga panga ni tagira ibiragohayagi ngagoha anda ibilo dugupe holene nga. Ani dugua haragola kini ibu anda ibalu loma haru ibiyago loma binigo mo ngiaga karume lomabu ngialu kagola kini ibuni Sabada horongi biagadagua bialu tamuha panga haraba kawareni hondo holebira. Ibugua i mitangi bialu lotu lai halu tagira poragola loma binigo mo ngiaga bu karume panga lone payatagi holene nga, lalu Anduane Homogohanda laya, lene.

### *Horo bibahendengi egerebagiore lomabu ngulene mbira nga lenego ogo*

<sup>13</sup> Anduane Homogohanda laabo halu lalu, Horo bibahendengi egerebagi nogo sibi igini hungubalua mali mbira hangu pene dere durubi nabi bayaleore kago hondowa haru ibalu Anduane Homogo inihondo loma irani dai helonaga bo delole haru ibalimu. Loma ogoni horo bibahendengi ogonidagua biaabo halimu. <sup>14</sup> Horo bibahendengi loma ogoni delolene heba balawa widime wabini ngaru lomabu dela dege bilimu. Balawa ogoni lomabu delole howa genda magi manda kilogarama kirabi olibe lini ibane lida mbira heba odo biamaga howa lomabu delalimu. Egerebagi loma delolene mana ogoni horo bibahendengi wiaabo helo ani bilimu. <sup>15</sup> Egerebagi bibahendengi irani dai helonaga lomabu delole nogo sibi igini haru ibalu balawabi olibe lini ibanebi yalu ibugu biaabo holene nga.

### *Kininaga dindi lalu te lenego ogo*

<sup>16</sup> I Anduane Homogo Bibahende Haru Haame Ho Haga kogo ina bi ogo laro. Kini ibugua ibunaga dindi mbirahayagi ngago ibu igini kago tu wu miyagua nde dindi ogoni ibu igini biagonaga wiaabo halu ibu waneigini aguanene mani holobadarunagabi wia ai hene wulebira. <sup>17</sup> Anigo kini ibugua dindi mbira agali ibunaga biabe biahaga karu mbirago tu wu miyagua nde mani mali pira duria (50) howa dano henego Yada Bulene Mali ogoning dindi ogoni kini ibuni mo yu dai bulebira. Ani bialu dindi ogoni kini ibu halu ibu waneigini mani holobadarunaga wiaabo hene wulebira. Dindi ogoni kini ibu igini aguanerunaga dege wiaabo holebira. <sup>18</sup> Ani bialu kini ibugua wali agali maru karunaga dindi page karulolene nawi. Ibu igini karu dindi tu wu mulene manda biyagua nde ibuninaga dindi winigo dege tu wu mulene nga. Inaga wali agali bu karu ti

☆ 46:17: LBM 25.8-17

dindi karulape tininaga dindiore wiaabo helonaga anidagua bulene nga, lalu Anduane Homogohanda laya, lene.

*Esegiele ibu tomo loma biniru dawaga anda hearia hendenego ogo*

<sup>19</sup> Agali biagome i haru halu puwa loma binigo mo miaga hearunaga anda habagi hene heago haneni hariga piagane Anduane Homogonaga anda heago abene uyurayagi wiagoria haru pu helaya. Ani helayagola i ogoriani howa handalu hewaria hariga wali agali ibagabu haga hama ogoni pialu ni paliragohayagi pupe hea. <sup>20</sup> Agali ogoni ibugua ihondo langialu lalu, Dindi ogoria loma binigo mo miaga karu ti ibalu ko biniru domo wahelonaga lomarubi mana ko bero mitangi nabi howa bialu hayarunaga lomabi aria podo wini maru loma binigo mo miaga ti nole dawagane henge ngagoni. Ani bialu balawa lomabu mini biaru aria podo wini maru ti nole hirulebira. Loma binigo mo miaga karu tigua wali agali bu haga hama ngagoria mo yalu tagira polene nawi. Tigua yu tagira piyagua nde wali agali bu karubi ininaga habagi hene karu ale dege holebira.

<sup>21</sup> Ani lowa agali ogoni ibugua i haru halu hama timbuni wali agali ngoai ho haga wiagoria tagira puwa hama ogoninaga gibuni maria wiagoha haru piyagola dindi hobane mbira mbira wiaru handai haru. <sup>22</sup> Hama timbuni ogoninaga gibuni maria hama emene maria ogobi dege dege wia. Hama emene uruni luninaga mida pira kira (20) wialu yangalenaga mida nguira (15) wia. <sup>23</sup> Ani bialu hobane maria ogoniha ege pabe bu mabu bini wia. Ege pabe ogoni gibuniha ira delaga henge mbira wia. <sup>24</sup> Ani wiago agali biago ibugua ihondo langialu lalu, Anduane Homogonaga andaha biabe bialu haga agali karume wali agalime nogo loma bule haru ibiniru barago aria podo wini maru ngaru mo yalu puwa ti nole dindi hobane ogoriani dawaga bulebira, laya, lene.

## 47

*Anduane Homogonaga andaha howa iba dugualu pialu hearia hendenego ogo*

<sup>1</sup> Ina de gandeba handalu hewaria agali handalehe biagome i lone Anduane Homogo anda haraba biagoria haru dai biya. Ani haru dai biyagola handalu hewaria iba mbira anda biago harabaha howa dugualu ni tagira ibiragohayagi pupe halu pea. Iba o piyadagoni panga abene unurayaginaga loma biniru delaga dabu heagonaga andane dindiha ibalu piya.✧ <sup>2</sup> Ani handalu hewaria dege agali handalehe biago ibugua i haru halu Anduane Homogonaga anda pabe bu mabu bini heagonaga panga abene uyurayagi dugu wiagoha tagira pialu pabe headagua piriba. Puwa pabe headagua tagirahayagi pu mabu bialu panga haraba mende ni tagira ibiragohayagi puabo hariba. Ani pialu howa handalu hewaria iba peago abene unurayagi ege pabe heagonaga andane dindiha howa tagira pialu hearia handaru. <sup>3</sup> Ani peagola agali handalehe biagome mbirale mita magi manda biagane mbira yu howa iba peago lunaga mita magi handari duriani (500) manda biya. Manda buwa ibugua ihondo, i iba ogoni domaedeha, laya. Ani layagola domaede halu hewaria ibame inaga ge ayuende hangu namulaya. <sup>4</sup> Ani bialu emene iba tigida ubadaga halu lunaga mita magi handari duria (500) ale mende puwa ibugua ihondo iba lone domaedeha laya. Ani layagola domaede halu hewaria iba biagome inaga ge dulini namulaya. Ani biya handala lone unura mita magi handari duria (500) tebone lone puwa iba domaedeha layagola i lone dege domaede halu hewaria inaga tombeni namu laya. <sup>5</sup> Ani bialu lone dege mita magi handari duria (500) ale puwa iba uli wiagoria ina domabe nahe iba do lolene ale karulapeya. <sup>6</sup> Ani wiagola agali handalehe biago ibugua ihondo langialu lalu, Dindiali-o mbirale uruni bayuwaore de handai haribe, laya. Ani lalu iya haru iba angeha lone dai biriba.

✧ 47:1: Seg 14.8, Yo 7.38, Mo 22.1



<sup>7</sup> Ani dai buwa iba ange mende mendehabi ina ira dewa andaho hearia handaru. <sup>8</sup> Handalu hewaria agali handalehe biagome ihondo langialu lalu, Iba ogoni ni tagira ibiragohayagi howa pialu iba Yodana poragoha pupe halu iba kuyama mini Homene Iba bedagoha pupe haga. Iba kuyama Homene Iba ogoni ibu ibi dewawi berenego ai iba ogonime ibalu biramogo biragome iba bayale gagahe bira aribia haga. <sup>9</sup> Iba ogoni poragoha ema bialu piaga dewa karubi ibu ngoai halu wenabi iba ogoniha dewaore birulebira. Iba ogonime iba kuyama mini Homene Iba bedagoha puwa mo gagahe bayale berelolebira. Ani bialu dindi bibahende iba ogoni poragoha mbirale bibahendeore bayale holene yu hai holebira. <sup>10</sup> Iba ogoni poragoha ange angeha agalime wena minule wena nu yuwa Engedi dindi howa hama hama pialu Enegelaimi dindi ngagoria hairi holebira. Ani bialu howa tinaga wena nuru iba angeni nime yobilonaga mo yobia haga bulebira. Iba ogoniha wena bayale tara tara dewaore solowara timbuni Mediderenianaha bedarubi dege birulebira. <sup>11</sup> Anigo iba kaware maru puguaha berene bedaru bayale naholebira. Waru pugua uruniha iba berene bedaru ibi iba dege biraabo holebira. <sup>12</sup> Anduane Homogonaga andaha howa iba tagira piyagonaga ange mende mendehabi ira lini daga tara tararu anda haga bulebira. Ira uruni karunaga yuniru gau nale liniru ege bibahendengi daabo holebira. Wali agalime ira uruninaga liniru do nalu yunirume wali agaliha warago tara tara ngaru mo dabi haga bulebira laya, lalu agali handalehe biagome i de gandeba handalu hewagoha ihondo lene.\*

*Isaraele hameigini tinaga dindi tubari winigo ogo*

<sup>13-14</sup> Anduane Homogo Bibahende Haru Haame Ho Haga kago ibugua lalu, Ina tinaga mamali Isaraelela bi hongohe mbira lo wialu Isaraele dindi ngagoni tinaga dindi ogoniore wiaabo helo ngulebero lo wirugoni. Ai dindi ogoni Isaraele wali agali hameigini homberia (12) kamidagua tu wu tahalimu. Tinaga hameigini kamidagua dindi hobane mbira mbira dege dege tahaga bilimu. Anigo Yosebe aguaneru ti dege dindi kira tu wu milimu. Dindi tubari ogodagua wulebira. <sup>15-16</sup> Dindi tubari uyurayaginaga iba solowara timbuni Medidereniana bedagoria howa pu banga bialu ni tagira ibiragohayagi pupe halu Hedelono tano tagira peda. Ogoriani howa pialu Hamada tano polene hariga ngagoria tagira pialu Sedada tano pialu Beroda tano puabo howa Sibiraimi tano anda peda. Sibiraimi tano ogoni ibu Damasagasa tanola Hamada tanola hengeneha nga. Ai tinaga dindi tubari Tigoni tano ngagoria pu bolangua ka. Tano ogoni ibu dindi hobane mbira mini Haurana ngagonaga tubari ngagoria peda. <sup>17</sup> Anidagua dege Isaraelenaga dindi tubari uyurayaginaga iba solowara timbuni mini Medidereniana bedagoria howa ni tagira ibiragohayagi pialu Enono tano ngagoria peda. Dindi abene unurayaginaga tubari ogoni ibu Damasagasa dindibi Hamada dindibi dombeneha bolangua halu peda.

<sup>18</sup> Ani bialu dindi tubari ni tagira ibiragohayaginaga Damasagasa Haurana dindila dombene ngagoria howa wu yu pialu Yodana iba tigida puabo halu unurayaginaga Isaraele baba Gileada dindinaga abene mbirahayagi tagira peda. Abene unurayaginaga tubari iba kuyama mini Homene Iba bedagoria tagira peda.

<sup>19</sup> Tubari unurayaginaga Tama tano ngagoria howa pialu ni paliragohayagi dindi mini Kadese Meriba wiagoria tagira peda. Ani bialu Iyibila tubariyagibi iba emene mbira pedago tigida iraga halu iba solowara Medidereniana bedagoria tagira peda.

<sup>20</sup> Ani bialu ni paliragohayaginaga tubari iba solowara Medidereniana bedagoria uyurayagi pu banga bialu amura Hamada tanoha tubari piyagoria gimbu bida.

<sup>21</sup> Ani ngago dindi ogoni tini hameigini harimidagua baya hangu tu wu tahaga bilimu. <sup>22</sup> Hameigini mbira ibu dindi tu wu harago ibu aguanene holebiraru tigua ogoriani ha ai holebira. Ani bialu dindi tu wu tahalu howa agali maru dindi tara howa ibuwa ti baba mandagi hene karu dindi tu mialu ti onerume tinaga dindi ogoriani howa waneigini

taba hanarago helonagabi dindi tu wu mialu bilimu. Agali uruni tibi nde Isaraeleali dege ka lo manda bialu dindi tu wu tahalu howa tigatiga bilimu. <sup>23</sup> Isaraele hameigini mbira mbira tí kamidagua dindi tarali haru kamiru dindi tínime tu wu migi migi bilimu. Anduane Homogo Bibahende Haru Haame Ho Haga kogo ina bi lai harugoni laya, lene.

## 48

### *Isaraele hameiginiru ti dindi podo ta henego ogo*

<sup>1</sup> Anduane Homogohanda laabo halu lalu, Isaraelealinaga dindi tubari abene uyurahayaginaga amura iba solowara timbuni mini Medidereniana bedagoria howa pu banga bialu ni tagira ibiragohayagi polenaga tubari Hedelono tano ngagoria bolangua halu pialu Hamada tano polene hariga tagira piaga ngagoria bolangua halu pialu amura Enono tano timbuni ngagoria puabo halu pialu Damasagasala Hamadala hengene ngagoha bolangua halu pupe haga bida. Dana hameigini ti dindi ogonihayagi mulebira. Tinaga dindi gibuni ni tagira ibiragohayagi howa wima pialu ni paliragohayagi iba solowara timbuni Medidereniana bedagoria tagira polebira. <sup>2-7</sup> Ase hameigini ti Dana hameigininaga dindi ngagonaga abene unurahayagi podo wulebira. Nabadali hameigini tinaga dindi Ase hameigini dindi ngagonaga abene nirayagi podo wulebira. Ani bialu daliape howa nira Manase hameigini ti podo wulebira. Ani bialu nira dege Manase hameigini erembirahayagi Eberaimi hameigini ti podo wulebira. Ani bialu nira dege Eberaimi hameigininaga erembirahayagi Lubene hameigini ti podo wulebira. Ani bialu Lubene hameigini dindi ngago abene nirayagi Yuda hameigini ti podo wulebira. Tinaga dindi tubari ni tagira ibiragohayagi howa pialu ni paliragohayagi iba solowara timbuni mini Medidereniana bedagoria pupe haga bida, lene.

### *Dindi mbira hanuni winigonaga bi lenego ogo*

<sup>8</sup> Anduane Homogohanda laabo halu lalu, Yuda hameigini dindiha abene unurahayagi ngago galone bulenaga wiabagi ho ngelolene nga. Dindi ogoni yangalenaga magi kilomida homberiani (12) bolanguahe nga. Dindi ogoninaga tubari ni tagira ibiragohayagi ngagoria howa pialu mendehayagi amu iba solowara Medidereniana bedagoria tagira peda. Dindi ogoni hameigini maru tinaga dindi lunaga magi ngagobi dege ngago Anduane Homogo inaga anda dindi ogoniha dombeniore bu holebira.

<sup>9-10</sup> Dindi ogoni dombeneha ininaga dindiore ngelo tu wiabagiho ngelalimu. Dindi ogoninaga haguane uyurahayagi pu paga halu herene unurahayagi pupe haga bida. Ani bialu lunaga magi kilomida homberiani (12) emene bolangua hene labolabo ngelo tu wilimu. Ani bialu arane ogobi labolabo kilomida duria helo tu wilimu. Dindi ogoni loma binigo mo ngiaga karu tinaga wulebira. Anduane Homogo inaga anda dindi ogoniha hanuniore bu holebira. <sup>11</sup> Dindi ogoni inaga wiabagi heneore wulebirago Sadogo hameigini bu karu tinagaore wulebira. Bamba Isaraele wali agali maru tigua ihondo erembira ngialu piyangi Libai hameigini tiguabi i erembira ngialu piai hayago pelowa Sadogo hameigini ti dege i wahalu nape haabo haya. Loma binigo mo ngiaga uruni tigua inaga biabe bialu mini bilinahe howa i talima ibalu baya hangu bialu haya. <sup>12</sup> Ani bialu hayagonaga ina dindi bayaleore ogoni ti mo turu halu tihondo mulebero. Ani merogola dindi ogoni wiabagi heneore mbira wulebira. <sup>13</sup> Libai hameigini karu ti dindi loma binigo mo ngiaga biarunaga dindi ngagoria dege gibuniha wulebira. Tinaga dindi ogoni luninaga magi kilomida homberiani (12) bolanguahe wialu aranenaga magi kilomida duria wialu bida. <sup>14</sup> Tigua dindi Anduane Homogo ininaga tu wiabagiho ngelaramigo dindi maru ngagobi ndo bayaleore wiabagi heneore wulebira. Anidagua wulebirago manda bialu Libai hameigini bu karu tiguabi loma binigo mo ngiaga karu tiguabi dindi ininaga ogoni agali mendeali helo mulenebi yolo bulenebi nawiore laro, lene.

<sup>15</sup> Ani bialu loma binigo mo ngiaga karunaga dindi ngago mendehayagi henge ngago luninaga magi kilomida homberiani (12) bolanguahe wialu arane yangalenaga magi kilomida kirani bolanguahe ngelo tu wilimu. Dindi ogoni ininaga wiabagi helo ndo wali agali tinaga wuwa dindi dombeni tano ogoriani wulene nga. Dindi ogoriani tinaga anda bialu dindi henge maru wulebira. <sup>16</sup> Tano ogoninaga lene lene maria ngagoha ege pabe bu mabu bidagola ege pabe ogoni bibahendehe luninaga mida magi daosini kira handari kirani pira duria (2,250) holebira. <sup>17</sup> Tano ogoni tagirani dindi henge bame wia mabu bidagoria hama ogoni aranenaga mida magi handari mbirani pira kirani duria (125) wulebira. <sup>18-19</sup> Ani bidagoria wali agali tinaga tano dombeni wiragola hama ogoni podaki halu hama timbuni mende ni tagira ibiragohayagi wialu mende ni paliragohayagi wulebira. Dindi bame ngagoriani wali agali tano ha bu karu ti eru hongolene wulebira. Dindi ogonilabo luninaga magi mbiraore ogobi labolabo kilomida duria wulebira. Isaraele hameigini dindi bibahendehe howa ibalu tano ogoniha biabe bialu e hongolene wulebira.

<sup>20</sup> Wali agalinaga dindibi ininaga dindibi emene mbira yami yami buwa Libai hameigini ti haragobi dindi timbuni dege mbira wulebira. Dindi ogoni timbuni magi gibuni maria ngagoria howa manda bialu kilomida homberiani (12) bolanguahe dege dege wulebira, laya.

<sup>21-22</sup> Dindi ogoni ni tagira ibiragohayagibi ni paliragohayagibi ngagolabo kininaga wulebira. Kininaga dindi ogoni ininaga dindi ngogoria kawareni howa wuyu pialu ni tagira ibiragohayagi hameigini tara baba tubari ngagoria tagira polebira. Kininaga dindi mende ni paliragohayagi ngago ogoni ininaga dindi ngogoria kawareni howa wuyu pialu iba solowara timbuni mini Medidereniana bedagoria tagira polebira. Ani bidagola kininaga dindi lene labolabo ngelowa Isaraele wali agali tinaga dindi nirayagi Libai hameigini loma binigo mo ngiaga agaliru tinaga dindi lirayagi ngelowa ininaga dindi dombeneha wulebira. Ani bialu wali agali tinaga dindiha nirayagi tano timbuni wulebira. Yuda hameigininaga dindi abene uyurahayagi ngagola Beniyamini hameigini tinaga dindi abene unurahayagi wulebira, Anduane Homogohanda laya, lene.

### *Isaraele hameigini maru dindi tu wu ta henego ogo*

<sup>23-27</sup> Anduane Homogohanda ihondo laabo halu lalu, Isaraele hameigini maru bu karu tinaga dindi Beniyamini hameigini tinaga dindi biabe tara bulene o ngagonaga kaware dege dindi unurahayagi mulebira. Ani miragola unurahayagi Simiono hameigini ti holebira. Ani halu Isaga hameigini ti Simiono hameigininaga dindi ngago abene unurahayagi dege mulebira. Ani bialu Sebulunu hameigini ti Isaga hameigini dindi ngago unurahayagi ngago mulebira. Gada hameigini ti dindi Sebulunu hameigini dindi ngago abene unurahayagi mulebira. Anidagua bialu tinaga dindi tubari ni tagira ibiragohayagi dindi tara baba tubari ngagoria howa wuyu pialu ni paliragohayagi iba solowara timbuni Medidereniana bedagoria tagira pugu bulebira.

<sup>28</sup> Dindi abene unurahayagi howa hameigini tara baba tubaribi Gada hameigini baba tubaribi Tama tano ngagoria howa ni paliragohayagi pu dai bialu iba Kadese Meriba laga bedagoria tagira polebira. Ani bialu emene ubadaga howa iba biruyu pedadagua Iyibiali baba tubari piaho wialu iba solowara timbuni mini Medidereniana bedagoria tagira polebira.

<sup>29</sup> Anduane Homogo Bibahende Haru Haame Ho Haga kogome bi ogo larogoni. Isaraele hameigini tini dege dege dindi ogoni tininaga wilo anidagua tu wu ta halimu, lalu Anduane Homogohanda laya lene.

### *Yarusalemenaga ege pabe panga homberia (12) wulebiragonaga bi lenego ogo*

30-34 Anduane Homogohanda laabo halu lalu, Tano anda polenaga ege pabe bu mabu bidagonaga haraba homberia (12) wulebira. Ege pabe ogoninaga lene uyuyagibi unuyagibi ni ibiragohayagibi ni paliragohayagibi haraba tebira dege dege wigi bulebira. Ege pabe ogoninaga haraba mbira mbirani Isaraele hameigini homberia (12) biarunaga mini mbira mbira gilibu wigi bulebira. Ege pabe abene uyurahayagi haraba tebira ngagoria hameigini Lubenebi Yudabi Libaibi tebirali uruni tinaga mini wulebira. Ani bialu Yosebebi Beniyaminibi Danabi tinaga mini haraba abene ni tagira ibiragohayagi gilibu wigi bulebira. Ani bialu Simionobi Isagabi Sebulunubi tinaga mini haraba abene unurahayagi gilibu wigi bulebira. Ani bialu Gadabi Aserabi Nabadalibi tinaga mini haraba ni paliragohayagi gilibu wigi bulebira. Ege pabe ogoni luninaga magi lene bibahendeha mbiraore ogobi dege dege mida magi daosini kira handari kirani pira duria bolanguahe (2,250) holebira.☆ 35 Ege pabe tano bu yaanda kagonaga mida magi daosini dira (9,000) bibahende holebira. Mani howabi laabo halu tano ogoniha mini Anduane Homogo Ogoniha Ka lolebira, lalu Anduane Homogohanda ogodagua bigi bulebira lalu Esegielehondo de gandebaha howa uruni bibahende walia hai hene.☆

## Daniele

### Mbuga ogoniha gilibu ngarunaga nemandi ogo

Danielenaga mbuga ogoha bi te dunini waragara lo wialu emaga hendenenaga bi te maria lo wialu bida. Bi te ogoni Yuda wali agali ti genda heba heangi tini mo hongo helonaga mbuga ogoni gili bini. Bi ogonime wali agali ti Ngode Datagaliwabe heba mandagiore haabo haga kago manda bilonagabi mani Ngode Datagaliwabe handa tinaga genda yu karu mo wahai halu ti biamogo biaga kago manda bilonagabi gilibu nga.

Danielenaga mbuga ogoniha bi irane kiranaga gilibu winigo nga.

Mbira

Be 1-6 Be uruniha howa Danielebi ibunaga nenegerubi tinaga waitigi hearume ti mo ko halu bo wahole bialu hene. Ani biyaria tigua Ngode Datagaliwabeore hongo howa yu tigabu haabo halu mini mbiraore hongohe wu hene. Tigua mana lehe mbira nabi hogorale bialu heagola tinaga waitigi biarume ti mo ko hole bialu henedaruni bibe nahe hene.

Mende

Be 7-12 Be uruniha Daniele ibugua emaga hendeneru garea lo nga. Horo uruni henedangi dindi timbuni wali agali dewa pale Ngode Datagaliwabe mitangi nabiga hearume ti hongoheore hene. Tigua Ngode Datagaliwabenaga wali agali balu bo biba habehe hene. Anigo de gandeba walua hayadagome nde Ngode Datagaliwabe handa waitigi uruninaga hongo bope halu ibunaga wali agali haru tagira poragola ti bayale holebira lalu walua hene.

#### **Bulu бага бува кuni gilibu ngago**

1.1-6.28

Danielebi ibunaga nenegerubi 7.1-12

Daniele ibugua emaga hendeneru

7.1-28

Nogo ale tara tara maria hendenego

8.1-9.27

Nogo sibi wangabebi meme wangabebi hendenego

10.1-11.45

Dahuliyali mbiralime Danielehondo lamigi biniru

12.1-13

Hamaro bulene tu holebiragonaga

#### **Danielebi ibunaga nenege tebirarubi bi te ngago (1.1-6.28)**

*Yuda igiri maru kini andagaha henego ogo*

<sup>1</sup> Yahoiaigimi ibu Yuda wali agalinaga kini mali tebira heagola Babilono dindinaga Kini Nebugadenesa ibugua Yarusaleme tano wiagoria ibunaga ami agalirume waranda howa wai bule ho mabu bupe hene. <sup>2</sup> Anduane Homogohanda Kini Nebugadenesa ibugua Yudanaga Kini Yahoiaigimibi Yuda wali agali dewalibi minalu gabo beru beledirubi Anduane Homogonaga andaha winiyaru bibahende mo yai helene. Ani biyagola Kini Nebugadenesa ibugua wali agali minayaru haru pialu mbirale mo yayaru bibahende ibunaga damaru andaha wule mo yalu Babilono dindi pene. <sup>3</sup>

Ani bialu howa Kini Nebugadenesa ibugua ami agali haguane Asabenasa ibuhondo lalu, Yuda igiri karuni aria maru Kini Yahoiaigimi andaga henebi agali haguane andagaha henebi uruni aria maru dabaluharu ibabe, lene. <sup>4</sup> Ibugua lalu, Huliya igiri tingini denguiru mo ko nahe bayale do mbaraleni howa sigulu bene manda maru

☆ 1:1: 2 Kin 24.1, 2 Bit 36.5-7 ☆ 1:2: 2 Kin 20.17-18, 24.10-16, 2 Bit 36.10, Ais 29.7-8



abale mibehego handalu dababe, lalu lamini. Igiri uruni kini andagaha biabe bialu helolenaga ani dabene. Dabo helowa Asabenasa ibugua igiri uruni Babilono bi lalu bebaru daga lelobi gili bilobi lawai hole dabene. <sup>5</sup> Ani heagola kini ibugua lalu, Igiri uruni ti agali ibunaga biabe bialu ibu andagaha hagane hearu heba ti iba tomobi mandagi nagadagua nalu helo. Igiri uruni ti mali tebira sigulu bialu howa biai haragola kini ibu andagaha ibunaga biabe bia halu helo, lene.

<sup>6</sup> Asabenasa ibugua igiri dabayaru aria Yuda igiri mariali dabo helene. Tinaga mini Daniele mbira Hananaia mende Misaele tebone Asaraia mane uruni dabo helene. <sup>7</sup> Ani heagola Asabenasa ibugua tinaga mini gahenge wia aribia haga bialu uru wigi bini. Daniele ibu mini Beledesasa wini. Hananaia ibu mini Sadaraga wialu Misaele ibu mini Misaga wialu Asaraia ibu mini Abedenego wigi bini.

<sup>8</sup> Kini andaga howa tomo ibabi migi biyagola Daniele ibu nanaga hene. Ibugua mitangi bialu tomo waini ibaru nayagua ogonime Ngode Datagaliwabenaga deni ibu dodohe holigonaga ibu ilili bialu nanole manda bini. Daniele ibugua tomo waini ibaru nanaga henedago irane agali kini ogoni dindiha dama hearunaga loma binibi mende nde ibugua tomo uruni nayagua ibugua kininaga bi larago bibahende hale hai hole lalu walia holeyane nane wahene bada. Ani howa ibugua agali haguane Asabenasahondo ibu tomo tara maru ngaru noliya ngibehebe lalu hale hene. ✧ <sup>9</sup> Ani hale hayagola Ngode Datagaliwabehanda Asabenasa ibugua Daniele dara helo biamogo bini. ✧ <sup>10</sup> Ani biyagola ibugua gi howa Danielehondo lalu, Kini ibunime tomo uruniore nalimu lalu dabo ngiyago i giho kogoni. Irane kini ibugua handalu karia igiri maru ti haru mandagi ibini biaru tinaga tingini bayale halu hondowa tinaga ko hayagua nde i homoliya bo waholobadago, lene.

<sup>11</sup> Ani lowa Asabenasahanda Daniele Hananaia Misaele Asaraia imaru handaya ho helonaga agali mbira dabo helene. Ai Daniele ibugua agali ogoni hearia puwa lalu, <sup>12</sup> Ina inahondo ogodagua bia handabelo hame ledi. Ina tomo tara nemaru iba ibuniru hangu nalu holomaya horo pira hangu henge ngi. <sup>13</sup> Ani kamagola inanaga tinginibi igiri tomo kini andagaha nagane karubi inanaga tingini handa handa beregola inabi nde ti ale degedabe be inanaga tingini obiyadabe handabelo. Ani hondowa mani ina inahondo bule winidago biai habelo, lene. <sup>14</sup> Kininaga haru haga agali biagome Danielehanda bi ogoni layagoni karulapeda lowa anidagua bini. <sup>15</sup> Anidagua buwa ai horo pira biago howa agali haru haga biagome igiri mariali biarunaga tingini bayaleore hongohi igiri maru kinihanda tomo nalimu lene nalu hagarubi ndo bolangua ho hearia hendene. <sup>16</sup> Ani hondowa agali haru haga biagome tomo bayale tarabi waini ibabi kinihanda mibe lene biaru nami wahalu Danielebi ibunaga nenege tebirali biarubi ti tomo nelo nema wiarubi iba henene wiarubi mialu hene. <sup>17</sup> Ai Danielebi ibunaga nenege tebirali biarubi ti Ngode Datagaliwabehanda biamogo bialu mini manda bayale talebu miyagola tinaga sigulu biyago bayale hangu bialu tinaga manda timbuniwi hene. Tinaga manda tara tara lawai hayaru bibahende manda biai hene. Anibi heagola Ngode Datagaliwabehanda emaga hendeneru baya hangu tale bilo manda bogaru mugube Danielehondo mini.

<sup>18</sup> Ai igiri bibahende biaru kinihanda mali tebira sigulu balu halimu layaru bai hayagola Asabenasa ibugua kini ibuni hearia haru piau hene. <sup>19</sup> Ani piyagola kini biagome handalu hearia Daniele Hananaia Misaele Asaraia imarunaga manda timbuni igiri maru biarunaga manda bolanguahe heago hendene. Ani hondowa kini ibugua igiri uruni ibunaga biabe bialu helo dabo helene. <sup>20</sup> Ani buwa ibugua igiri biaruhondo bi maru hale haga buwa ba handalu hearia igiri mariali biarunaga manda timbuniore howa ibunaga Babilono dindiha agali manda timbunibi hearunaga manda biaru bibahende bolangua hai hearia hendene. Igiri uruninaga manda ti baba nakarulapeore

hearia hendene. ✧ <sup>21</sup> Daniele ibugua kininaga biabe bialu luore ho wahene. Ani bialu heane dege Babilononaga kini gahenge mbira mini Sairusi ibu kini ho aribia hene.

## 2

### *Nebugadenesa ibugua emaga hendenego ogo*

<sup>1</sup> Nebugadenesa ibu kini howa mali mendengi emaga mbira hendene. Emaga ogonime ibuni mo mini burugula hayagola ibu u baya hangu palibe nahe hene. <sup>2</sup> Ani biyagola ibugua agali maru de gandeba hendenegonaga irane mandabi hearubi gamugamu biaga hearubi mbirale mani bulebiragonaga ala hondo bamba haga hearubi bibahende olo ngoai hene. Ani mo ngoai howa ibugua tihondo lalu, Tígua inaga emaga handarugo irane langule ibidaba, lene. Uruni ti ibuwa kininaga wanakuini hemigola <sup>3</sup> ibugua tihondo ogodagua lene. Ai ina emaga mbira handaragome i mo mini burugula kagoni. Ani bidagola emaga ogoninaga iraneore manda bua kogoni, lene. <sup>4</sup> Ani layagola tigua kinihondo Arama bi lowa ogodagua ladai bini. Kini-o i luore haabo habelo. Ai ina emaga handaridagoni iname irane ogo aleda lalu dabolomaya inahondo latagiha, lene.\*

<sup>5</sup> Ani layagola kini ibugua tihondo ladai bialu lalu, Heneneore larogo ina emaga handarudagoni tigua ogo aleda lalubi ogo ale bulebira lalu iranebi latagi hadaba. Latagi naharimiyagua nde inaga ami agali karuhondo tinaga gi geru minu dogo wahadaba larogola ti homai holeberami. Ani bialu tinaga andarubi bo giallo bagabu wahadaba lolebero. <sup>6</sup> Anigo tigua ina emaga handarudagoni latagi halu ogoninaga irane langirimiyagua nde ina mbirale dewaore ngialu ti agali mini lene timbuni helolebero. Ai áyu tigua ina emaga handarudagobi ogoninaga iranebi langidaba, lene. <sup>7</sup> Ani layagola tigua kinihondo lone hale halu lalu, Iname emaga ogoni irane ogo aleda lolomaya ina emaga hendenedago inahondo langi, lene. <sup>8</sup> Ani layagola kini biagome ladai bialu lalu, Tígua ohalu kamigo i manda bidogoni. Ina bi lone lo beregedoliyanaga emene lu hondo hole laramigo anidagua nabulebero. <sup>9</sup> Tigua ina emaga handarudago latagi halu irane langidaba larogo nalangirimiyagua nde pani uruni ti bibahende ogo dege dege noleberami. Irane tigua bi lo mbira howa inaga mini beregedoliya ohowa horo lu bolangua helonaga lalu harimidago. Ai tigua inaga emaga ogoni latagi habehe kamiyagua nde ti emaganaga iranebi langibehe kami ina manda bulebero, lene.

<sup>10</sup> Ani layagola agali biaruru tigua kininaga bi layago hale howa ladai bialu lalu, Kini-o ina áyu inahondo langidaba laregoni dindini hene agali bibahendeoreme nalabehe taibi taraore wiago langidaba laregoni. Kini-o dindini hene kini hongohoghe bogabioremebi ibunaga agali manda timbuniwi karuhondobi ibunaga de gandeba hendenegonaga irane mandabi karuhondobi ogonidagua langidaba lalu mbira hale hene nawi. <sup>11</sup> Ai kini-o bi áyu inahondo langidaba lalu laregoni gendabiore agali mbirame galone langibe nahedago dama bu karume dege karulapego. Anigo ai dama uruni ti agali baba mandagi nahaga ka. ✧ <sup>12</sup> Tigua bi uruni layago hale howa kini ibu keba timbuniore howa ibunaga ami agali Babilono dindi bibahendehe purogo lowa agali manda timbuniwi hearu bo wahai halimu lene. <sup>13</sup> Ani layagola tigua Danielebi ibunaga nenege igiri tebirali biarubi heba mandagi bo wahole hondo pene.

### *Ngode Datagaliwabehanda emaga biagonaga irane Danielehondo laminigo ogo*

<sup>14</sup> Ami haru haga haguane henego Ariogo ibugua agali Babilono dindinaga manda timbuniwi hearu bo wahole pene. Ai Daniele ibu Ariogola bi bayale lolene mbira taya bialu hene. <sup>15</sup> Ani buwa Daniele ibugua Ariogohondo lalu, Kini ibugua irane aginaga

✧ **1:20:** 1 Kin 10.1      \* **2:4:** Pigane ogoria howa gili bima pialu Be 7.28 Arama bi lalu gilibu wini. Tigua Hiburu bi lowa ndo gilibu wini.      ✧ **2:11:** Pig 41.39, Ais 57.15, Dan 5.11

agali manda timbuniwuru bo wahole bialu kabe, lalu hale hene. Ani hale hayagola Ariogo ibugua mbirale biyaruni bibahende Danielehondo lamiai hene.

<sup>16</sup> Layago hale halu Daniele ibugua kini berearia gerai lalu puwa ibuhondo lalu, Inaga agali manda timbuniwi bogabi uruni abale bo wanahe emaga ogoninaga irane ina latagi holeberogo hondo habe, lene. <sup>17</sup> Ani layagola kinihanda ogoni karulapego ani bia laya handala Daniele ibu abale andaga dai buwa ibunaga nenege tebirali Hananaia Misaele Asaraia imaruhondo o layadaruni lamiai hene. <sup>18</sup> Ibugua lalu, Ngode Datagaliwabe dahuliya andaga kago ibuhondo mbirale wia do hene uruninaga irane ina dara halu langilonaga ibunihondo bi lamia. Ani biragola ina Babilononaga agali manda timbuniwi bogabi uruni heba mandagi nahomamiya, lene. <sup>19</sup> Ai horo ogoningi dege mbiraga hayagola Ngode Datagaliwabeanda emaga ogo ale lalubi irane ogo ale lalubi Danielehondo de gandebaha walia hene. Ani walia hayagola Daniele ibugua Ngode Datagaliwabenaga mini yaraga halu ogodagua lene. <sup>20</sup> Ngode Datagaliwabe-o manda bulenebi hongo holenebi iha hangu ngegonaga ina inaga mini yaraga haabo hole. <sup>21</sup> Iba dalu ibilolenenaga hongobi gaea bilolenenaga hongobi ina yu halu agali mbirago ibu kini helo dabolenebi ibu bo dugu waholenenaga hongobi ina dege yu kegoni. Ani buwa ina dege agali maruhondo mini gigabibi manda boga timbunibi miaga kegoni. ✧ <sup>22</sup> Wia do hene dewaore agalime handa mandabi biai habe nahe nga. Anigo Ngode Datagaliwabe inime mbirale wia do hene uruni agalihondo walia haga biriligoni. Iha wa holene haihe kegome mbirale arumaha wia do karu handa walia haga kegoni. ✧ <sup>23</sup> Inaga mamalirunaga Ngode Datagaliwabe-o ina mini gigabibi hongo holenebi ihondo ngialu iname bi lalu emaga biago waliaha larimagola ina hale halu kinihanda emaga hendene biagobi galonebi ogo ale lalu walia harigonaga ina inaga mini yaraga halu kai laro, lalu Danielehanda lene.

*Danielehanda kininaga emaga hendenegonaga irane latagi henego ogo*

<sup>24</sup> Kinihanda agali manda timbuniwuru Babilono dindiha hearu bibahende bo wahelo dabo helene ami agali haguane Ariogo hearia Daniele ibugua puwa lalu, Agali manda timbuniwi karu bo wanahabe. Ina kininaga emaga biagobi ogo aleda lalu iranebi lamuliya i kini bedaria haru mba, lene. <sup>25</sup> Ani layagola Ariogo ibugua Daniele abaleore kini berearia haru puwa kinihondo lalu, Ina Yuda igiri o haru eberogo ibugua ina emaga handaridagoni latagi holebira, lene. <sup>26</sup> Ani layagola kini ibugua Daniele mini mende lalu, Beledesasa-o ina emaga handarudagobi ogoninaga irane ogo lalubi ina karulapeore languleberebe, hale halu lene.

<sup>27</sup> Ani layagola Daniele ibugua kinihondo lalu, Kini-o agali mini gigabiwibi manda dingi dangialebi bogabiorebi uruni aleme mbirale mbira wia do hene ogoni alego manda bibehe mbirali nahe. <sup>28</sup> Anigo Ngode Datagaliwabe dahuliya andaga kago ibugua dege mbirale wia do ho ngarunaga irane ogo ale lalu mo walia haga ka. Ai Kini-o Ngode Datagaliwabeanda mani urudagua bulebira lalu ihondo ala walia ho ngeleda. Ina ayu mbiraga paleria emaga handaridago ina languliya.

<sup>29</sup> Kini-o i palia hondo heria Ngode Datagaliwabe ibugua mbirale bibahende wia do karu handalu manda biaihe kagome mani bulebirago ihondo walia hayada. <sup>30</sup> Ai Ngode Datagaliwabe ogoni ibu degeme ihondobi mbirale wia do hene ogoni ogo ale lalu walia hayago. Ainde ina agali manda timbuniwi bu karuni bibahende bolangua howa ina manda timbuniore bidogonaga walia halu ndo. Ngode Datagaliwabeanda ina emaga handaridago ogoninaga irane ogo ale lalu ihondo mo walia hayago languliya. ✧ <sup>31</sup> Kini-o agali ale mbirale timbuni mbira gime wabini heane handaridagoni. Ai ogoni ibuni ngiringarale de daibiore heane hondowa gi timbuniore harigoni. <sup>32</sup> Ogoni ibunaga

✧ **2:21:** 1 Bit 29.30, Esd 1.13, Yar 27.5, Ya 1.5 ✧ **2:22:** Iba 139.11-12, Dan 2.28-29, Hi 4.13, Ya 1.17 ✧ **2:30:** Pig 41.16, Dan 2.47, Ab 3.12

haguane ngolome wabini ngaraleore halu gi payanego labobi galu hombehayagibi ege tole silibame wabiniyane handaridagoni. Ai dombeni ege tole boronosime wabialu binigo handaridagoni. <sup>33</sup> Ai ge kirabali aeaneme wabini howa niraore dindi dongoma aanelame biamaga howa wabini hearia handarida. <sup>34</sup> Ai ani handaho heria dege hari bare mbiraha howa ege tole timbuni mbira minana ibuni podalu ibu daluwa agali ale gime wabini biagonaga ge kirabali dindi dongoma aanelame wabumaga hene biagoria gingirulo бага bialu bo tagadabaga biyagola haeala togolayane handarigoni. <sup>35</sup> Ani hondo heria aeanebi dindibi boronosibi silibabi ngolobi bibahendeore gingirulo hole bialu abalu ale hayane hondo heria emene hingiluni mbira ibira nahe puyabume pulu wahai hayagoni. Ani biyago hondo heria ege tole mbira ibalu gime wabini biagonaga ge heagoria ibira hayago biagome timbu halu yanga lowa ona hari timbuni ibu howa anda halu dindi bibahende karulai hayada.

<sup>36</sup> Kini-o ina emaga handarigoni o langirugoni. Ai ogoninaga irane ogo ale lalu langero. <sup>37</sup> Kini-o i agali kini timbuniore howa kini maru karu bolangua hai howa i daligaore kegoni. Ngode Datagaliwabe dahuliya andagaha kago ibugua i dabalu kini hongohe timbuniore daliga mini lene heledagoni. <sup>38</sup> Ibugua ihondo ibunaga wali agalibi dindini ema bialu piaga bedarubi bibahende handayaho hai habelo dabo heleda. Ai gime wabini agali ale biagonaga haguane ngolome wabini handaridagoni ayu ini kegoni. <sup>39</sup> Ai kini mende mani ha aribia holebirago ibu timbuni i kegobi ndo ibu emene ale howa nira holebira. Ai nira ege tole boronosime wabini handaridagoni irane agali kini tebone mani holebira. Ogoni ibugua dindi bibahende handa gimbu bu howa haru holebira. <sup>40</sup> Maniore howa kini mane holebirago ogoni ibunaga manane gehayagi aeaneme wabini handaridagoni. Aeaneme mbirale bayagua bibahende dudubagabu waharaligoni. Anidagua dege dindi maru ala winirunaga kini karu bibahende bo haeala bagabu waholebira. <sup>41</sup> Ai ge ha nira ge hondonehayagi dindi dongoma aanelame wabini handaridagoni irane ogo. Ai agali kini ogoni ibugua handayaho karu buda hole bialu haga haga bulebira. Anigo ti emene hongohe dege holebira. Aeaneme ge kirabaliha heane handaridagoni irane ogo. Kini uruni tinaga hongo abale biba halu ibira naholebira. <sup>42</sup> Ai ge hondoneha dindi dongoma aanelame wabini handaridagonaga irane ogo. Dindi ogoninaga mendehayagi aeaneme ale hongohe kagola mendehayagi hongo nahe gede dindi dongoma ale holebira. <sup>43</sup> Gime wabini agali ale ogoninaga ge dindi dongoma aanelame biamaga howa wabini handaridagoni irane ogo. Agali kini urunime kini maru ho giligalalo karu mo mogo bialu lone ho mbiraore hole lowa kini mbira mbirago wane bedaru dabu bule damu pialu holebira. Anigo manane dindi dongoma aeanela bayuwa paraho ndibu nalagadagua uruni tibi baya hangu mo mogo bialu mandagi habe nahe holebira.

<sup>44</sup> Ai kini uruni ti kaore dege Ngode Datagaliwabe kago ibugua bibahende ha ibunime handayaho howa haru hai holene tu haragola ibulebira. Horo ogoni ibu wirangi ibugua handame howa haru haho wiaabo holene wulebira. Ani kagola kini maru karume ibugua handayaho kago bo podabe nahe holebira. Ngode Datagaliwabe ibugua dege tigua haru karu bo gialohole bialu ibugua haru halu handame ho holene wiaaboboore wulebira. <sup>45</sup> Ai agali ale aeanemebi boronosimebi dindi dongomamebi silibamebi ngolomebi wabini biago ege tole mbirame podalu ibuwa bo dudubaga biyane handaridagoni irane ogo. Ege tole ogoni ibu manane Ngode Datagaliwabenaga howa handagimbu bu holenenaga manane handarida. Ai Ngode Datagaliwabe mini lene kago ibugua ihondo mbirale mani bulebiragonaga walia hayadagoni. Ai ina emagaha handariyagoni ogo lalubi bulebiragonaga mo walia halubi langiai harugoni, lalu Danielehanda Kini Nebugadenesahondo lamini.

*Kini ibugua Danielenaga mini mo yaraga henego ogo*

<sup>46</sup> Kini Nebugadenesa ibugua Danielehanda bi layago hale hai howa ibu Danielenaga buha ge duli hanga halu bulu paluwa lalu, Ai t́naga dama karuhondo mbirale bo lomabu miagadagua Danielehondo bo mulene nga, lene. <sup>47</sup> Ani lowa kini ibugua Danielehondo lalu, Ínaga Ngode Datagaliwabe ibugua dama karu nagalone lowa bolanguahe dali-gaore heneda. Ibu kini bibahende karunaga haru haga haguane howa ibugua mbirale wia do hene ngarunaga irane ogo ale lalu latagi haga kagoni. Áyu ína mbirale wia do hene biagonaga galone ogobi bulebira lalu tigatigaore langirigome ibuore baya hangu kago manda bidogoni, lalu kini ibugua lene. <sup>48</sup> Ani lowa kini ibugua Daniele ibu Babilono dindinaga haguane howa kini ibu mini mandaru mo boga bia haga agali hearu bibahende handayaho helo helene. Ani heagola kini ibugua mbirale dewaore Danielehondo miyagola Danieleore agali homogo mini lene mbira hene.✧ <sup>49</sup> Ani howa Daniele ibuguaibunaga nenege tebiralí Sadaraga Misaga Abedenego imaru Babilono dindiha biabe wiaru handayaho helo kini hale hayagola kini ibugua ti dabowa helene. Ani bialu Daniele ibuni kini andagaha haga hene.

### 3

*Nebugadenesahanda, Agali ale ngolome wabini kagohondo bi pupu wialu hadaba, lenego ogo*

<sup>1</sup> Nebugadenesa ibugua bidaba layagola tigua ngolome agali ale mbira wabu heleneya. Agali ale ogoni ibu lunaga mida magi pira kirani karia (27) wialu timbuninaga mida magi tebira wabu helene. Ogoni Babilono dindi gunguni tigabi mbira mini Dura wiagoria wabu helene. <sup>2</sup> Ani wabu helowa kini ibugua lali, Inaga agali haguane bibahende dindi ogoriani íbu ngoai halimu lamule bi yalu purogo ladaba, lene. Ani layagola agali haguane hearubi gabumane biabe biaga agali hearubi tinaga biamogo biaga hearubi muni handayaho haga hearubi godi dabaga hearubi bibahendeore íbu ngoai hene. Uruni ti bibahendeore Kini Nebugadenesahanda mbirale ngolome wabini loma bia ho helole íbu ngoai hene. <sup>3</sup> Ti íbu ngoai halu tigua mbirale ngolome wabini biagonaga buhayagi hondoho hene.

<sup>4</sup> Ani hondo ho heagola gabumanenaga bi laga mbirame hongo howa bi laraga halu lalu, Ai wali agali bi tara tara lagaru dindi tara tarani howa hameigini mbira mbira bibahende íbu ngoai ho kamiru-o <sup>5</sup> t́gua pilipe ale bigulibi ngida tara tara alerubi bibahende mo bila haruagola t́ bibahendeoreme bulu paliai halu ge duli hanga hai halu Kini Nebugadenesahanda agali ale ngolome wabu heledagohondo bi pupu wilimu. <sup>6</sup> Ai mbiralime ge duli hanga halu ngolome wabini ogonihondo bi pupu nawiyagua ogoni ibu ira timbuni poboyogobiore daabo kagoha delo minu bape holeberema, lene. <sup>7</sup> Ani layagola pilipe alebi bigulibi ngida tara tara alebi mo bila hayuago hale howa wali agali dindi bibahende bi tara tara laga hameigini tara tara íbu hearume bulu palialu Kini Nebugadenesa ibugua mbirale ngolome wabini biagohondo bi pupu wiai hene.

*Yuda igiri tebiralí biarume Kininaga bi mo wahenego ogo*

<sup>8</sup> Babilonoali marume kinihanda, T́ bibahendeore ngolome wabini biagohondo bulu palialu bi pupu wiai halimu, layago hale howa tigua Yuda igiri tebira biaru kini berearia manani helole puwa ogodagua lene. <sup>9</sup> Agali timbuni-o í luore haabo habelo. <sup>10</sup> Kini-o ína bi mbira ogodagua lo wirigoni. Ai pilipe aleru bigulibi ngida tara tara alerumebi bi laragola wali agali bibahendeme bulu palialu ge duli hanga howa kinihanda agali ale ngolome wabu helene biagonaga mini yaraga halu bi pupu wilimu. <sup>11</sup> Ai wali agali mbirame ogonidagua nabiyagua ira timbuni dedagoha minu bape halu bo delole larigoni. <sup>12</sup> Anigo Yudali tebira ína Babilono dindi handayaho helo helarigo Sadaraga Misaga Abedenego imarume ínaga bi larigoni mo wahaya. Uruni tigua ínaga

✧ 2:48: Dan 2.6, 4.9, 5.11



damahondo bi pupu nawiaga hene. Áyubi ína agali ale ngolome wabu helarigonaga bulu palialu bi pupubi nawi haya, lene.

<sup>13</sup> Ani layagola kini ibugua keba timbuniore howa, Agali tebirali uruni ti ì bedoria haru ibule pudaba, lene. <sup>14</sup> Agali tebirali biaru ibiyagola kini ibugua tihondo ogodagua hale hene. Sadaraga Misaga Abedenego imaru-o tígua ìnaga dama kagohondo bi pupu nawiaga kami layane hale haru. Ai áyubi mbirale agali ale ngolome wabu helewagohondo bulu palialu bi pupu nawi kami layago henenebe. <sup>15</sup> Tígua pilipe ale biguli aleru ngida tara tara alerumebi bi layuago hale halu bulu paluwa ngolome wabini ogonihondo bi pupu wilimu larugoni. Anidagua nabirimiyagua nde ira timbuni dedagoha delo minu bape hadaba lolebero. Ani berogola tí pele ngulene mbirali mbira kabe, lene.✠

<sup>16</sup> Ani layagola Sadaraga Misaga Abedenego imarume ladai bialu, Kini-o inahondo bule mandabu wiridagoni bulenego inanaga bi nawi. <sup>17</sup> Iname Ngode Datagaliwabe heneneore kagonaga mini yaraga halu ibu hangu mitangi bialu lotu laga kamagoni. Ai ì inahondo bule mandabu ngo laridagua biriyagua nde inanaga Ngode Datagaliwabe ibugua ìnaga hongome ina ira hongohe deledegoha howa yo pialu polomaya biamogo bulebira. <sup>18</sup> Ibugua ina biamogo nabiyagua nde karulape degego iname ìnaga dama kagohondo bi pupu nawuleberama. Ngolome wabini agali ale biagonaga bulu paliabi nabuleberama, lene.

#### *Sadaraga Misaga Abedenego imaru ira deagoha minu bape henego ogo*

<sup>19</sup> Nebugadenesa ibu Sadaraga Misaga Abedenego imarume bi ogonidagua layago hale howa keba timbuniore haluibunaga dengui daramabu hene. Ani bu howa agaliibunaga biabe bia haga hearuhondo lalu, Ira hongo howa dewaore delalimu, lene. Abale tigua ira nendebu hongo howa ogonidaguaore nadelaga winigo ogoningi dege delene. <sup>20</sup> Ani dalu heagola kiniibunaga ami agali hongohe hearuhondo, Sadaraga Misaga Abedenego imaru pu hongohe wiarume gi geru minu kabu buwa ira timbuni dalu kagoha delo bape halimu, lene. <sup>21</sup> Ani layagola igiri uruni tinaga agaru biaore gi geru minu kabu buwa ira timbuni dalu heagoha bape hene. <sup>22</sup> Kini ibugua ira hongo howaore dewa deladaba layadagua delenego. Ai ami agali biarume Yuda igiri tebirali biaru iraha delo baede hole yalu pialu hemiria ira hungu hegene timbuni do kiaulatagi hayagome dayagola ti homene. <sup>23</sup> Sadaraga Misaga Abedenego imaru ede ira timbuni kilikulu lalu heago dombeniore tinaga gi ge kabu biyaore minu bape hene.

<sup>24</sup> Ai Nebugadenesa ibugua hondowa mogo timbuni lalu naina heyu hene. Ani howa agali maru ibu mini bayale talebu mialu mo bogabia haga hearuhondo lalu, Iname agali gi geru minu kabu buwa tebirali ndo bape harimagoda, lene. Ani layagola tigua ibuhondo lalu, Agali timbuni-o ani birimagoni, lene. <sup>25</sup> Ani layagola ibugua lalu, Aniyagua agali mariali ira deago dombeneha ibaga bialu karia hendedogo agua. Pume tinaga gi geru minu kabu birimaruni naheda. Irame ti da nabi kagoni. Agali manego dahuliyali mbira handalehedago, lene.

#### *Sadaraga Misaga Abedenego imaru irame da nabi henego ogo*

<sup>26</sup> Ira deleagoria Nebugadenesa ibugua haneni pu howa Sadaraga Misaga Abedenego imaru olowa lalu, Tí Ngode Datagaliwabe Daligaore kagonaga biabe bia hagaore henedago tí tagira ibidaba, lene. Ani layagola uru ti ira timbuni deagoha howa tagira ibini. <sup>27</sup> Tagira íbu heagola kininaga biabe bia haga agali timbuni bibahende íbu hearu tigua Yudali tebira biaru irame da nabi hearia hondole kaware ibini. Tigua handalu hemiria tebirali biarunaga mandari agarubi emeneore da nabi howa ira hagua ngubi mbira tiha para naheore hearia hendene.

✠ 3:15: Har 32.32, 2 Kin 18.35

<sup>28</sup> Ani hondowa kini ibugua hongo howa lalu, Áyu iname Sadaraga Misaga Abedenego imarunaga Ngode Datagaliwabe kagonaga mini yaraga hama. Ibugua ibunihondo mitangi bialu mini mbiraore hongohe wialu lotu laga agali tebirali uru biamogo bilonaga dahuliyali mbira ibilayadago. Uruni tigua homolene gi nahe howa inaga mana lo wirugo mo wahaya. Tigua dama maru bu karuhondo bi pupu nawiaga howa tininaga Ngode Datagaliwabe kago mitangi bialu mo dunini howa lotu laga kagoni. <sup>29</sup> Áyu Sadaraga Misaga Abedenego imarunaga Ngode Datagaliwabe ibunaga wali agali biamogo biaga kagobi maru tinaga wali agali biamogo biaga naheore. Ai ina bi ogodagua lo wero. Wali agalime Ngode Datagaliwabe ogoni mege nabuleore laro. Dindi mbiraha howabi bi tara laga karumebi hameigini tara tara kamiru ariamebi Ngode Datagaliwabe ogonihondo mege birimiyagua ogoni ibu homelo bo budabagabu waholebero. Tinaga dindi andaru heba bo gialobagabu wahalu labu helolebero.

<sup>30</sup> Kini ibugua bi lai howa Sadaraga Misaga Abedenego imaruhondo Babilono dindiha biabe ala bialu hayaru nira lowa ai biabe timbuni bilo mo mini.

## 4

### *Nebugadenesahanda emaga halu mende hendenego ogo*

<sup>1</sup> Kini Nebugadenesahanda wali agali dindi bibahendehe hearubi bi tara tara laga hearubi hameigini dindi mbira mbiraha hearubi ti bibahendehondo bi lawia haga bialu lalu, Tí bibahende bayuwaore halimu. <sup>2</sup> Ai áyu Ngode Datagaliwabe Daligaore kagome ihondo taraore walia hayago langerogo. <sup>3</sup> Ngode Datagaliwabehanda nahendene alebi agalime nabibehe ngaru tara dewaore walia hayago ibuni hongohe taraore kagoni. Ibuni hangume handame howa kini haaboboore holebira.

<sup>4</sup> Ai i Nebugadenesa ina andagani hendore bayale biruwa ininaga dabudabu wiruru handalu uruni bayale degeyane hondowa turuho haru. <sup>5</sup> Anigo horo mbiru inime emaga gibi hondowa mogo timbuni laru. <sup>6</sup> Ani hondowa Babilono dindini agali manda timbuniwi hearuhondo emaga ogoninaga irane langidaba laru. <sup>7</sup> Ani larugola agali manda tara tarawi hearu ibu ngoai haya. Ti ibiyagola ina emaga handarudagoni irane langidaba lalu hewaria tigua ogoni langibe naheore laya. <sup>8</sup> Ani lo hearia mani Daniele anda ibiya. Daniele mini mende Beledesasa inaga dama mbiranaga mini wini. Ai dinini hongohe taraore mbira ibuha hearia hondowa inaga emaga hendedagoni latagiha lowa ogodagua laru. <sup>9</sup> Agali manda timbuniwi bu karunaga haguane Beledesasa-o. Ai dinini hongohe taraore kagome ihondo manda bayale ngiyagola mbirale mbira do nahe i manda biai kegoni. Ai ina emaga handarudago larogo ogoninaga irane langule hale habe laru.

<sup>10</sup> Ai ina palia hondo hewaria emaga mbira ogodagua handaru. Dindi bibahende dombeni ira timbuni mbira hearia handaru. <sup>11</sup> Ira ogoni ibu anda howa timbu halu guru luore uyuna hari damindini ela heagola wali agali dindi bibahendehe hearume ira ogoni handai habehe hearia handaru. <sup>12</sup> Ira ogoni ibunaga yuniru bayale mbiri mbarale howa ibunaga liniru dindi bibahendehe ema bialu piagarumebi wali agali bibahendemebi nalu no karulapobehe deane handaru. Nogo gabua tara tara karume ira ogoni teneha ni gumba palu ngoai halu ega bedaru tibi nde ira geha anda bu ngoai haga bialu ema bialu piaga tara tara bedaru tibi bibahendeme tomo ira ogoninaga lini dege nagaya.

<sup>13</sup> Ani hondowa dege emaga ogoninaga mitangi bialu hewaria dahuliyali handayaho haga heneyaru aria mbiragome dalipe halu dindiha daliya. <sup>14</sup> Daluwa ibugua bi hongo howa ladaga halu lalu, Ira ogoni podelo dibuwa ginigene bibahende dando wahai halu yuni bibahende gilo wahai habe. Lini dedaruni bibahende do giligololo wahai habe. Nogo tara tara ira ogoni tene gumba kagoha palu ngoai karuni bo talia togolalu ega ira ogoni maganeha bedaruni bo talia togolabe. <sup>15</sup> Ani bialu ira tenedago datani bu kagoria

pu seni ege tole aeane boronosirume wabini ngagome dariba holene nga. Nogorume datani nagadagua tani karu nelo helowa mbiraga dalu pibiya ibira hararume damilo ani helolene nga. <sup>16</sup> Ibu agali mini nawi howa nogorume dataniru nalu hagadagua tani nalu mali kariaore holebira. <sup>17</sup> Dahuliyali mbirale bibahende ngaru handayaho haga hearume lalu mbirale uruni bibahende anidagua biai helo. Anidagua biragola wali agali karu bibahendeoreme Ngode Datagaliwabe Daligaore henedane hondolebira. Ibugua agali mini lene karubi yagibano karubi ta nabi ibunime kini heloa biraruhondo kini helaga ka, lene.

<sup>18</sup> Ani lowa ina Danielehondo ogodagua laru. Ina emaga hendenego langirugonigo ai Beledesasa-o áyu ina emaga ogoni irane ogo ale lalu langibelo bedogoni. Inaga agali manda timbuniwi bogabi karu tigua irane langibe nahe dege bu karudane í langerogoni. Langerogo irane dinini hongohe taraore kagome íha mini giga bulene dewa ngidane hondo kogoni, lalu lamini.

### *Emaga hendenegonaga irane latagi henego ogo*

<sup>19</sup> Ani layagola Daniele ibugua kinihanda emaga hendenedagoni irane manda biai howa ibugua kinihondo lamule turu nahe hene. Ai kini ibugua lalu, Beledesasa-o emaga ogonime íha genda ngulene nawigo ina bu miniha genda nahabe. Agali mendeme inaga emaga langulene nahego, layagola Daniel ibugua ladai bialu lalu, Kini-o genda timbuni uruni íha ibilo turu nahe kogoni. Inaga waitigi agali karuhaore genda uruni anda pelo hame ledogoni.\* <sup>20</sup> Ira timbuni mbira mane luniore hari damindini elahé hearia dindi ngaru bibahendeni howa handai haga heane handaridagoni. <sup>21</sup> Ani hearia yuniru bayale howa wali agali dindi bibahende ngaruha howa ira ogoninaga liniru do nole íbu ngoai haga. Ani bialu nogo gabua tara tara karume ira ogoni andane gumba kagoha palu ngoai halu egarume anda bu ngoai hagada.

<sup>22</sup> Kini-o ira ogoni ini kegonaga manane ale hayada. Wali agali dindi bibahende karunaga deni í agali mini lene timbuniore howa ina dindi bibahende ha haru kegoni. <sup>23</sup> Dahuliyali mbirale handayaho haga heneru aria mbira dahuliya andagaha howa dalialu ibuwa lalu, Ira ogoni diba. Dibuwá ira tene dege datani bu karuni heba helo helabe. Ani helowa aeane boronosirume wabini pu seni timbuni mbirame dariba habe. Ani helowa mbiraga dalu pibiya ibirarume damilo nogoru kadagua mali karia tagira helabe layadagoni.

<sup>24</sup> Ai kini-o emaga ogoni irane ogodagua Ngode Datagaliwabe Daligaore kagome mbirale iniha mani bule ngagonaga walia haya. <sup>25</sup> Ai í wali agali kagoria howa wara tagi haragola nogo gabua tara tararu heba holebere. Mali kariani nogo bulumaga tigua datani naga ale nalu howa tagira palu kegola dalu pibiyame í damulebira. Ani buwa ina Ngode Datagaliwabe Daligaore dindi bibahende ngaru hondo hai kago ibunime kini helonaga hameledago dabo helaga ka manda bulebere. <sup>26</sup> Ina hale halu heria dahuliyalime ira tene dindini helo wahabe layadagoni irane ogo. Mani handalu keria ina Ngode Datagaliwabe ibu bibahendenaga handame haga kiniore kagoni manda bialu latagi harengi ini lone kini holebere. <sup>27</sup> Ai ina lone kini howa bi áyu languleberogo biaore bibe. Í mana ko ngaru nabi wahai howa mini beregedalu mana bayale ngaru bialu howa wali agali karu dara howa ti tumagiho karu biamogo bulene nga. Ina ogonidagua bialu hariyagua nde ini bayaleore howa mana ina bereruni bayale hai holebira, lalu lamini.†

\* **4:19:** howa 4.33 uruniha Kini Nebugadenesa ibugua wali agali hearuhondo bi lo pelenego nga 4.1 handabe. Uruniha kini ibuniha tagira ibinirunaga bi te nalene. † **4:27:** Agali marume manda bialu hearia 4.27 ogoniha layadagoni Daniele ibugua agali mendeme kini holebira lalu ndo Kini Nebugadenesa ibunime áyu howa ko ngaru wahalu mini beregedayagua genda uruni ibuha naibulebira leneda manda bini.

<sup>28</sup> Mani Kini Nebugadenesaha Danielehanda ogodagua bulebira layaruni bibahende tagira piai hene. <sup>29</sup> Ai ege homberia (12) hai howa horo mbirangi Nebugadenesa ibu Babilono dindiha ibuni andaga haneni dagia wiagoria ibaga bialu hene. <sup>30</sup> Ani howa ibugua ibuninaga mini yaraga halu lalu, Babilono biagoni tano timbuniore halu mini leneore hayada. Tano ogoni ininaga mini timbuni ngogobi hongo timbuni kogobi wali agali bibahende karuhondo walia hole ina wabido, lene.

<sup>31</sup> Bi lalu heaore dege dahuliya andaga howa bi mbira layuane hale hene. Bi layuagome lalu, Kini Nebugadenesa-o ina bi larogo hale ha. Ai dindi ina handaya howa haru kegoni áyu ina mo waharogoni. <sup>32</sup> Ani berogola tigua í tinaga kini nahabelo wara tagi haragola í nogo gabua tara tara karu heba hole polebere. Ani howa mali kariani nogo bulumaga karume datani nalu kadagua íbi datani nalu holebere. Ani dege howa ina Ngode Datagaliwabe Daligaore kago ibugua wali agali bibahende haru hai hagaore henedane hondolebere. Ibuninaga hameme agali mbira kini heloa birago helaga kagoni manda bulebere, layuane hale hene.

<sup>33</sup> Ani leagola bi layuagome, Kini Nebugadenesa í ogodagua bulebira, layadagua biai hene. Wali agali bu hearume ti heagoha kini nahelo bo batagi haya handala puwa nogo bulumagarume datani nalu hagadagua datani nalu hene. Ani nalu heagola mbiraga iba dalu pibiya ibiyarume kini biago damigi biyagola mandari ibalu ega boda hariawe bedarunaga irini haradagua bini. Ani bialu gi gibaru íbu dege bialu luni ega ge giba ale ibini.

#### *Nebugadenesa ibugua Ngode Datagaliwabenaga mini yaraga henego ogo*

<sup>34</sup> Nebugadenesa ibugua lalu, Ani hewane mali karia piai hayagola inime hari daligaha handa daga halu hewaria inaga mini lone bayale tigabi ibiya. Ani biyagola ina turu timbuniore halu Ngode Datagaliwabe Daligaore kagoni manda buwa ibunaga mini yaraga halu kogoni. Ngode Datagaliwabe ibu kiniore haluhe haaboboore haga kagoni laro. <sup>35</sup> Ibugua dindini wali agali karunime mbirale mbira bibe nahedane hendeda. Dahuliya andagaha dahuliyali karubi wali agali dindini karubi bibahende ibugua handayaho haga howa mbirale bule ngago mbiralime hapai halu nabibe labe nahe ka. Agali mbirame ina agile bule kebe lalubi mbira hale habe nahe dege kagoni, lene.

<sup>36</sup> Ani lowa lalu, Ai bi ogoni lai hewagola inaga mini bayale lone wia dai biyagola ini hongo halu dindi abale ini handayaho haga biaru lone handayaho haru. Ina agali haguane helo dabo helene biarubi inaga agali mini bogabi biarubi ti lone ini heba mandagi hole dai biya. Ani biyagola í kini timbuniore mini lene abale harugobi ndo áyu bolangua howa daligaore haru. <sup>37</sup> Áyu Nebugadenesa ina turu timbuni howa Dahuliya andagaha Kini kago ibuninaga mini yaraga halu ibu timbuni mini leneore ka laro. Ibugua biagaru bibahende bayale tigabi dege biaga howa agali marume tininaga mini yaraga halu karu ibugua ti bope haga ka, lalu Nebugadenesahanda lene.

## 5

#### *Kini Belesasahanda tomo timbuni dawenego ogo*

<sup>1</sup> Babilono dindini agali mbira mini Belesasa ibu kini howa ibugua tomo timbuniore dawawa ibunaga agali haguane dewaore daosini mbira (1,000) bibahende íbu ngoai howa tomo waini ibarubi nalu berene. <sup>2</sup> Ani nalu biruwa Kini Belesasahanda ibunaga biabe bia haga agali hearuhondo lalu, Gabo be ngolo silibarume wabini wiaru mo yalu ibidaba, lene. Gabo be uruni Yarusalemeni Ngode Datagaliwabenaga andaha wiagani wini. Ibu aba Nebugadenesahanda Babilono dindiha mo yalu íbu winigo odaruni, Mo yalu ibidaba, lene. Kinihanda ibunaga agali haguane biarubi ibu one henene berenerubi ibu one dege halu mende berenerubi ti bibahende gabu be uruniha waini iba hambialu nole lowa, Mo yalu ibidaba, lene. <sup>3</sup> Ani layagola agali biabe bia haga

biarume gabo be ngolome wabiniru mo yalu ibiyagola wali agali uruni tigua gabo be uruniha waini iba hambuwa nalu berene. <sup>4</sup> Ti waini iba nalu biruwa tinaga dama laga ngolomebi silibamebi aeanemebi iramebi wabigi bini wiarunaga mini yaraga halu berene.

<sup>5</sup> Ani bialu beremiria tamu hobane ti bereagoha lamu haleme wá hongoheore deagoria gi mbira aube tobane pana howa anda háini bi mbira ona gili biyaria hendene. <sup>6</sup> Kini ibugua ani hondowa ibuni mogo lowa ibunaga dengui mo tara halu hongo holene biba howa ibunaga kuni bibahende durula gimbu bini. <sup>7</sup> Ani biyago hondowa kini ibugua agali manda timbunibi hearubi agali de gandeba handaga hearubi bibahende olowa, Ibu ngoai hadaba, lene. Ai ti ibu ngoai heagola kini ibugua tihondo lalu, Agali mbirame bi amu gilibu ngagoni irane ogo aleda lalu latagi hayagua nde ina agali ogoni ibu aga tagalitayabi bayale kini ibuni biaga ngago mo karula holebero. Ani buwa ibunaga mani magagua pu seni bayale ngolome wabini kininaga ngagobi mo karula holebero. Ani bialu wali agali maru karunaga deni agali ogoni ibu mini lene timbuniore halu ibu inaga gabumane haru haga haguane tebone helolebero, lene.

<sup>8</sup> Kini ibugua ani layagola agali timbuni biarume bi gilibu wiago mbira dagalabe nahe howa kini biagohondo galone latagi habe nahe hene. <sup>9</sup> Ani biyago hondowa Kini Belesasa ibu genda timbuniore howa ibunaga dengui mo tara hayagola agali haguane biaru tigua mbirale mbira bibe naheoreyagola tibi genda timbuni ho hene.

<sup>10</sup> Ai kini aija ibu hale halu hearia kinibi ibunaga agali haguane biarubi tigua bi timbuni pu dagadaga biayuago hale howa abaleore anda hobane kini heba tomo nalu bereagoha anda pene. Anda puwa lalu, Kini-o í luore haabo habelo. Áyu nagalone emene bame o biyadagonime inaga bu miniha genda nahabe. <sup>11</sup> Ina bi larogo hale ha. Agali mbira dinini tara hongohe heagome mini wulene dewa talebu miyagola miniru gigabiorewi inaga dindiha kagoni. Abale í aba ibu kini heangi agali manda timbuni bialu mini gigabiwi ogoni dinini bu kago bidane hondowa ibu hondo pugu biaga henego kagoni. Ani heago hondowa í aba Kini Nebugadenesa ibugua agali ogoni ibu agali manda timbunibi hearubi de gandeba handaga bu hearubi bibahende hearunaga haguane ibu helo dabo helenego ka. Í aba ibugua ogonidagua binidagoni. <sup>12</sup> Irane agali ogoni ibunaga manda timbuni taraore howa emaga hendenerunaga iranebi bi manane lagarunagabi mbirale wia do hene ngarubi bibahende ogo aleore lalu lai hagago ka. Ai Kini Nebugadenesa ibugua agali Daniele ogoni ibu mini Beledesasa wialu dabo helenego kagohondo bi lawia halu ibabe labe. Ibalu ibugua anda háini bi gilibu wiyadaruni ogo ale lalu langulebirago langilo ibu labe, lene.

*Danielehandanda bi gili biyagonaga irane ogo aleda lalu latagi henego ogo*

<sup>13</sup> Ai tigua Daniele haru ibuwa kininaga wanakuini ibu helene. Ani ibu heagola kinihandanda lalu, Yuda agali Daniele ka layago íbe. Í aba Kini Nebugadenesa ibugua Yuda agali haru ibiniyaru aria mbira í kegonida. <sup>14</sup> Ina hale halu hewaria dinini tara bu kagome mini dingi dangia lolene íha wia heagola inaga mandaore daliga nge layane hale haru. <sup>15</sup> Ai inaga agali manda timbuniwi hearu bibahende ibai hadaba lowa bi amu anda háini gilibu ngagoni daga ladaba lalu hewaria tigua daga labe nahe haya. <sup>16</sup> Agali marume ihondo lalu, Ina bi tara tara ngarunaga irane latagi halu mbirale wia do karu handa walia hagaore ke layane hale haru. Ainde ina bi amu gilibu ngagoni latagi hariyagua nde ina aga tagalitayabi kininaga ngago í mo karula halu magagua pu seni ngolome wabini ngago inaga mani wia halu bulebero. Ani berogola wali agali bibahendenaga deni í agali mini lene timbuniore inaga gabumane haru haga haguane tebone í helolebero, lene.

<sup>17</sup> Ani layagola Danielehandanda ladai bialu lalu, Inaga yári dabudabu bayale uruni agali maru karu ina mua biyagua nde mibelo. Ina yári dabudabu bayale uruni



mo ya nabulebero. Anigo kini-o bi gilibu wiyadago dagalalu ogoninaga irane dege languliya. <sup>18</sup> Ai hale ha. Í aba Nebugadenesa ibu Ngode Datagaliwabe Daligaore kagome kini timbuni hongoheore helene. Ani helayagola ibu agali timbuni bibahende hearu dindiha lowa ibu daligaore bolangua hai hene mbira helene. <sup>19</sup> Ibu hongoheore heagola wali agali dindi bibahendehe hearubi hameigini bi tara tara lagalaga hearubi tigua ibu hondowa mogo timbuni lowa duru lagalaga bialu hene. Ani howa ibugua agali mbirago bo waho biyagua ogoni homelo bo wahaga hene. Agali mbirago bo wanahe helo waho biyagua nde helo wahaga hene. Ibugua dege agali mbiralinaga mini mo yaraga hoa biyagua nde agali ogoninaga mini yaraga haga. Agali mbirago warape halu mo ko hoa biyagua nde ani biaga hene. <sup>20</sup> Ani biaga henegoibunime manda bialu ibu gibiore kobe toba howa mana ko wiaru bialu mine halu hearia Ngode Datagaliwabehanda ibu bope halu kini hayagoni bo duguini. <sup>21</sup> Ngode Datagaliwabehandaibunaga mini mo nogo ale helayagola wali agalime ibu wara tagi hene. Ani biyagola ibuni nogo dongi gabuaru baba dataniru naga bialu nogo bulumaga haradagua bini. Mbiraga dalu pibiya ibiyarume ibu damigi bini. Mani howa ibugua Ngode Datagaliwabe Daligaore kagome wali agali bibahende handaya ho haga heneda lalu handa walia haluibunime agali mbiraligo kini heloa biyagua kini helaga heneyane handa walia hene.

<sup>22</sup> Ai íbi nde Nebugadenesa igini kego ína uru bibahende manda biai ho kegoni. Ani manda buwa íni mo dindiha nahole haabo kegonida.✧ <sup>23</sup> Ani bialu howa dege ína Anduane Homogo dahuliya andaga kago mo dindiha halu íni hangunaga mini yaraga halu kegoni. Agali ínaga biabe biaga hearuhondo Ngode Datagaliwabena anda wini í aba ibugua mo yalu ibini wiyaru yalu ibidaba lowa ínaga agali haguane hearubi í one henene berenerubi í one dege halu mende berenerubi uruni baba waini iba gabo uruniha howa nalu kami. Anidagua nalu howa tigua dama mitangi bialu mbirale agali gime ngoloru silibaru boronosiru aeaneru iraru ege tolerume wabini wiarunaga mini yaraga halu kamigoni. Ainde dama mitangi bialu gime wabini urunime de nahandaga bi hale nahaga minibi heba nawialu nawiore ngagoni. Ngode Datagaliwabe ibuni hangume í bayale habelo handayaho howa ína bialu keruni bibahendeoreibunime handayaho hai ka. Ani helowa ínaibunaga mini yaraga nahaga kegoni. <sup>24</sup> Ani bialu kegonaga Ngode Datagaliwabe ibugua gi ogoni ibilowa bi ogoni gili biyada.

<sup>25</sup> Bi ogoni ogobi gilibu wiya. Mene Mene inanaga bi lalu Dagala Dagala. Tegele inanaga bi lalu Genda Magi Manda. Ubasini inanaga bi lalu Tu Waki. <sup>26</sup> Dagalamaro layadagoni irane ogodagua. Ai Ngode Datagaliwabeibunime í dindi ogoria ína kini howa horo ogodagua holebere lalu dagalo winigo maro bira. <sup>27</sup> Genda magi manda layadago irane ogo. Ngode Datagaliwabe ibugua mana ína bini wiru genda magi handalu hearia ína mana bayale mbira nabiagaore hearia handaya. <sup>28</sup> Tu waki gilibu wiyadagoninaga irane ogodagua. Dindi ínaga ngegoni Ngode Datagaliwabehanda tu waki howa hobane mbiraha Midialiru ti tu wa mialu hobane mendehe Pesialiru tu wa mulebira, lalu Danielehanda lamini. <sup>29</sup> Kini Belesasa ibugua bi ogonidagua layago hale howa agali bu hearuhondo kininaga aga tagalitayabi bayale wiagobi magagua ngolome wabini wiagobi Daniele mo karula hadaba lowa kini ibuguaibunaga gabumane haru haga haguane tebone Daniele ibu helo dabo helene. <sup>30</sup> Ani bialu hearia dege ogonangi mbiraga Midiali hearume wai anda ibalu Babilono dindi haru haga Kini Belesasa bo homelene. <sup>31</sup> Ani buwa Midia dindinaga Kini Dariusi ibuni ibalu Babilono dindi haru howa kini hene. Dariusi ibu aiyahanda taba henenegoria howa mali henego lamaga howa mali pira waragariani kira (62) hayagola ibugua Babilono dindi pigane karulowa haru haga kini hene.

## 6

✧ 5:22: 2 Bit 33.23, 36.12

*Tigua Daniele gundu uli budi gabua laiono heagoha minupe henego ogo*

<sup>1</sup> Dariusi ibu kini howa agali handari mbirani pira kira (120) ibunaga dindi hobane mbira mbira wiaru haru helonaga dabo helene. <sup>2</sup> Ani helowa Daniele halu agali kiralibi tigua agali haguane biaru haru halu kininaga biabe bulene wiaru bibahende handayaho hai helo dabo helene. <sup>3</sup> Ani dabo helenego kini ibugua handalu hearia Danielehanda biabe biyaru bibahende bayaleore halu agali dabene bibahende biarubi haguane kirali ibula biabe mandagi biaga biago labobi bolangua howa biyago hendene. Ani heago hondowa kini ibugua dindi bibahende handayaho haga agali haguane Daniele ibu helo dabo helole manda bini. <sup>4</sup> Ani manda bialu hearia agali haguane biarubi agali Danielela biabe mandagi biaga kirali biago labomebi tigua ogonidagua bilo hame nale hene. Ani howa tigua Daniele ibu ko mbira biya lowa manani ibu helonaga hariga taya bialu hene. Ani bialu hemiria Daniele ibu agali tigabiore howa ibugua biabe tigabi hangu bialu heagola tigua ibu ko mbira biya labe nahe hene. Ibu ke nahaga howa mana tigabi ngaru hangu biaga hene. <sup>5</sup> Ani heagola tini hangu lo manda bialu lalu, Ibugua ko mbira handa nabi kamagonidago. Ainde ibunaga Ngode Datagaliwabe kagonaga mana biaga ngagohayagi dege iname hariga taya buwa ibu manani ibu helamiya, lene.

<sup>6</sup> Bi ogonidagua lo ngelalu tigua kini berearia puwa ogodagua lene. Kini Dariusi-o í luore haabo habelo. <sup>7</sup> Ai inaga biabe biaga agali haguaneerubi agali haguane dindi hobane mbira mbira ngaru haru haga bibahende kamarubi ina bibahendeme lo mbiraore halu ina mana hongoheore mbira wabibelo hamelo kamagoni. Mana ogoni ogodagua lolene nga. Wali agali bibahendeoreme horo pira tebirani (30) dama mbirahondobi agali mbirahondobi ibunaga mini yaraga halu bi pupu wulene nawi. Kini ininaga mini hangu yaraga halu bi pupu wulene nga labe. Ani ledegola wali agali mbirame bi ogoni mo wahayagua ogoni ibu budi ale gabua laiono timbuni kagotha minu bape hamiya, lene. <sup>8</sup> Ani lowa lalu, Kini-o ai bi ogoni mana wilo bebani gilibu wuwa manaore wialu mo hongo helonaga ininaga mini beba ogoriani gili bibe. Ani bidegola wali agali bibahendeme mana ogoni talialu bulebirago bilo. Mana ogoni dindi timbini Midia bibahendehabi Pesia bibahendeha karumebi talialu biai holene nga. Mendeali mbira mana ogoni mo iri ari bulene naheore, lene. <sup>9</sup> Ani larimigola Kini Dariusihanda mana ogonidagua bebani gili bidaba lowa gilibu wiagola bi ogoni karulape lalu beba ogoriani ibuninaga mini gili bini. <sup>10</sup> Daniele ibugua bi ogoni hale halu ibuni andaga pene. Puwa andaga ogoniha hobane mbira daliga henegotha puwa windo Yarusaleme handa amu howa heagoria duli hanga ho biruwa Ngode Datagaliwabehondo horo bibahendengi bi laga winidagua lalu berene. Ibugua horo mbirani Ngode Datagaliwabehondo bi halu tebira laga wini.

<sup>11</sup> Ai emene howa agali haguane biarume Daniele andaga pialu hemiria Daniele ibu ibunaga Ngode Datagaliwabehondo bi lalu berearia handa walia hene. <sup>12</sup> Ani hondowa tigua kini berearia puwa lalu, Kini-o ina horo pira tebirani (30) wali agali bibahendeoreme ini hangu mitangi bialu hale holene nga. Wali agali mbirame ogonidagua nabi howa dama mbirahondobi agali mbirahondobi bi lalu heagua ogoni ibu gundu uli budi ale gabua laiono timbuni kagotha minu bape hole larigoni, lene. Ani layagola kinihanda lalu, Bi ogoni henene. Mana hongoheore ogoni ina Pesia wali agalibi Midia wali agali bibahendenaga ngago mbiralime mo iri ari bulene nawiore, lene. <sup>13</sup> Ani layagola tigua kinihondo lalu, Yudali Daniele biagome ina bi larigo mo wahowa mana biago talialu nabi hea. Ibugua Ngode Datagaliwabehondo horo mbirani halu tebira bi laga biagaya, lene. <sup>14</sup> Ani layago hale halu kini ibu miniha genda timbuni howa Danieleore biamogo bule lowa hariga tai bini. Mitangi dege bialu bereane alendo hayagola ibugua hariga bayale mbira handa walia nahe dege hene. <sup>15</sup> Alendo hayagola agali haguane biarume kini berearia lone dai buwa lalu, Kini-o ina Midiali Pesialirumebi biagane

mana wirimagoni í manda bide. Kini ibugua mana mbira wabu wiyagua mana ogoni mo aribia nahaga wiyagoni ndobe, lene.

<sup>16</sup> Ani layagola kinihanda lalu, Daniele laiono haga gundu uli ngagoha minu bape hole pudaba, lene. Ani lowa kini ibugua Danielehondo lalu, Ngode Datagaliwabe ínime horo bibahendengi ibuhondo bi laabo halu mini mbiraore wiriligoni ibunime í biamogo bilo, lene. <sup>17</sup> Tigua Daniele gundu uli biagoha minu bape howa tole timbuni mbira uli biagoha panga paya anda hene. Paya anda howa wali agalime Daniele biamogo bulilono kinibi ibunaga agali haguane hearubi tigua hada bu ngelene. <sup>18</sup> Ani bu ngelalu kini ibu andaga pene. Horo ogoningi mbiraga kini ibu tomo nolenebi u paluenebi wahi howa napale hene. Wali agali maru ibu mo turu hagabu birule ibidaba laga winiru ibilo onale wahalu ibu mbiraha nape yange yangebu wiaho wini.

<sup>19</sup> Egabi layagola egerebagiore panga dugu wahalu abaleore unu gundu uli biago wiagoria pole pene. <sup>20</sup> Pu howa ibugua bi hongo howa olowa lalu, Ngode Datagaliwabe haluhe kagonaga biabe biahaga Daniele-o Ngode Datagaliwabe ina horo bibahendengi ibuhondo bi laabo halu mini mbiraore hongo howa wialu hariligoni ibugua laiono biarume í bo nane wahelo biamogo biyabe, lene. <sup>21</sup> Ani layagola Danielehanda uliha biruwa bi ladaga halu lalu, Kini-o í luore haabo habelo, lene. <sup>22</sup> Ani lowa lalu, Ngode Datagaliwabe ibunime ibunaga dahuliyali mbira ibugua laionome í bo nanelo tinaga ne hariga mo hangai helo ibilayagola tigua í balu nane o kogoni. Ina íhondo ko mbira nabi halu ko bulene mana mbira para nahe hewago hondowa ibugua í baya hanguore handayaho haya, lene. <sup>23</sup> Ani layagola kinihanda turu timbuniore howa agali bu hearuhondo, Daniele iraga helo yamidaba, lene. Tagira ibiyagola tigua handalu hearia Daniele ibu Ngode Datagaliwabe yu tiga bialu mini mbiraore hongohe wu heagome laiono biarume ibu bo nane wahalu ibunaga tingini motudu emeneorebi mbira nawiore heago hendene. <sup>24</sup> Ani hondowa kinihanda lalu, Agali Daniele homelo ndelaga biarubi uruni tinaga one waneigini bibahendebi haru ibuwa laiono gabua haga biagoha minu bape hai hadaba, lene. Ani minu bape hayagola laiono biarume wali agali uruni ibira nahe wene ibalu heore dege porabu daga howa abale minu lerela migimigi bialu no garere bu wahene.

<sup>25</sup> Ani buwa Kini Dariusi ibugua beba gili bialu dindi tara tara wiaru bibahendehe wali agali hearubi tara tara laga biaga hearubi hameigini mbira mbira hearu bibahendehe bi ogodagua gilibu pelene. Ai tíore bayuwa halimu. <sup>26</sup> Wali agali ina handayaho kogoha kamiru tigua bi ogo hale hadaba. Tí bibahendeoreme Danielenaga Ngode Datagaliwabe haluhe haabo haga kagonaga mini yaraga halu ibunaga andaneha haabo halimu. Ngode Datagaliwabe ogoni ibu haabo haga howa haru haga kini hongo haihe haaboboore holebira. Iibunaga hongo ibira nahe haho wiaga kagoni. <sup>27</sup> Ani howa ibunaga wali agali heneruha mo ko holene mbira anda ibiragola ibunime abale mo wahaga ka. Ibugua dahuliya andagahabi dindihabi biabe hongohe nahendene ale ngaru biai haga ka. Ai Ngode Datagaliwabe ogoni ibugua laionome Daniele balu nolilono baya hangu handayaho hayadagoni, lalu gilibu wini.

<sup>28</sup> Dariusi ibugua kini heangibi Pesiali Sairusi ibu kini heangibi Daniele ibu bayaleore howa agali timbuni mini lene haabo hene.

## **Danielehanda emaga hendeneru garealo minigo (7.1–12.13)**

### **7**

#### *Danielehanda emaga mbirale nogo tara tara ale maria hearia hendene go*

<sup>1</sup> Belesasa ibu Babilononaga kini howa mali mbira piyagola Daniele ina mbiraga mbirungi mbirale emaga mbira handaru. Ani hondowa ina emaga ogoninaga te mbuga mbirani ogodagua gilibu wiru.

<sup>2</sup> Mbirungi puyabu bibahendeha howa pulame hayagola iba solowara bereago puyabume pulo tangubaga biyane handaru. <sup>3</sup> Ani hondo hewaria nogo tara tara ale maria iba biagoha howa irigi halu tagira ibiyane handaru.✧ <sup>4</sup> Mbirago ibu budi ale timbuni gabua laiono aleni howa ibunaga babagane ega bodo hariawe alenaga hearia handaru. Ani handaya howa dege hewaria mbiralime ibunaga babagane heago podo wahayagola ai agali hagadagua dindini geme heyu haya. Ani heagola ibu agalinaga mini wiaga ale wilo miya.✧

<sup>5</sup> Ani hondowa dege nogo ale mende handalu hewaria ibu biango dudu ale timbuni mbira mini bea laga bedago ogoni agali haradagua naina geme heyu heane handaru. Biango ale bea ogoni ibugua nogonaga kuabene kuni be tebira ibunaga ne harigaha hayaho heane handaru. Ani yu heagola bi mbirame lalu, Ai mbirini nendebu nabe, layuane hale haru.

<sup>6</sup> Ogoni hale howa hayahe hewaria nogo tara ale tebone budi ale dege gabua timbuni mbira mini lebadi kago ogoni ale mbira naina ibu heane handaru. Ogoni ibunaga erembirani babagane mariaheyago lina egame yagalalu pialu haradaguabi howa ibunaga haguanebi maria dege heane handaru. Odagoni ibugua mbirale wiaru bibahendeore haru helonaga hongo yu heane handaru.

<sup>7</sup> Ani handaho wiwane dege ai nogo tara ale mane ha pani haya. Ogoni ibu gibi hiriribioreni denguiru handabe nahe hongo taraheni ibunaga neru aeane nehe hiriribi heagome mbirale wiaruni bibahende no dangialo ba *ai* hayane handaru. Nai howa hingiluni ibira hayago geme hengedo wahaya. Nogo tara ale ogoni ibu maru biaru ale ndo ibunaga embone hagianeni ne gayane pira hearia handaru.✧ <sup>8</sup> Ai nogo tara ale ogoni ibunaga hagianeni ne gayane pira hayadagoni handayaho hewaria dege ne gayane emene ko mbira odaruni hengeneha tagira ibiya. Emene ogoni ibugua abale pira hayago aria tebira dugu wahaya. Ai emene biago ibuni agalinaga dengui heane handaru. Ani howa ai ibu mine halu ibuninaga mini yaraga halu haya.✧

*Danielehandanda mbirali haluhe haabo hene kago hendene go*

<sup>9</sup> Ai emaga dege handalu hewaria kininaga biragane dagiaru mo yalu ibuwa naina ngelaya. Ani wiagoria mbirali haluhe haabo hene kago ibalu dagia mbira wiagoriani biraya. Agali odagoni ibunaga aga biago pele dege lalu hari beraliba ale howa ibunaga mandaribi nde peleore lalu nogo sabinaga irini aleyago naina ibu biraya. Kininaga biragane dagia ogoni garo ge aleheyago ai dagia ogoni ira hungu degeme mabu bupehe howa✧ <sup>10</sup> ira hungu hegeneme uyuna kikiaula tagi tagi biya. Ani biyagola wali agali daosini dewaore agali ogoninaga biabe bia halu heagola wali agali daga labe nahe milini dewaore haparaparabu heago handaru. Ani howa marume godi lolenaga beba mbuga yiniyaru angalalu hearia handaru.✧

<sup>11</sup> Ani handalu hewaria ne gayane emene ko nogo tara ale mane biagonaga hagianeni hayagome mine dege haabo halu ibuninaga mini yaraga halu balagala hayuane hale haru. Ani bialu heaore nogo tara ale mane biago balu iraha delaya. Iibunaga ne gayane biaru heba iraha bape hayagola do gindulo wahaya. <sup>12</sup> Ani buwa nogo tara ale maru tebira biarunaga hongo holene mo wahayagola tigua handayaho howa haru haga biaru yu wahaya. Ani buwa uruni ti abale homelo bo wa nahe emene tigi mbira hangu helowa haya.

<sup>13</sup> Emaga handarudangi dege handalu hewaria agali mbira ina agali henene dindini kamaruni ale dege heane handaru. Agali ogoni ibu hari beralibaha howa *i* hewagoria ibule ibiya. Ani ibiyagola tigua mbirali haluhe haabo hene biago berearia ibu haru

✧ 7:3: Mo 13.1, 17.8 ✧ 7:4: Mo 13.2 ✧ 7:7: Mo 12.3, 13.1 ✧ 7:8: Mo 13.5-6 ✧ 7:9: Mo 1.14, 20.4 ✧ 7:10: Mo 5.11, 20.12

halu piya.\* ✧ <sup>14</sup> Ani biyagola mbirali haluhe haabo hene biago ibugua agali ogoni ibu agali mini lene handame haga kini helo dabo helaya. Agali ogoni ibu kini haho wiaabo kagola mani agali mendeme ibu henegoria ho aribia naholebira. Ani kagola wali agali dindi bibahende ha howabi bi tara tara laga karubi hameigini tara tara bu karunibi bibahende agali kini mbiraore ogoni ibunaga andaneha ibu hai holebiragonaga emaga ogoni handaru, lene.\* ✧

*Emaga hendegonaga irane ogo*

<sup>15</sup> Ai ina emaga ogoni hondowa mogo timbuni lalu mini dege dindiho haru. <sup>16</sup> Ani howa ina kini biraga dagia wiagoria agali bu hearu aria mbira heagohondo, Emaga ogoninaga irane langi laru. Ani larugola ibugua lalu, <sup>17</sup> Ai nogo tara tara ale hongo holenehe maria uruni dindi hongohe maria wulebirago handarigoni. <sup>18</sup> Anigo mani Ngode Datagaliwabe Daligaore kago ibuninaga wali agalirume handame haga kininaga hongo holene yu howa ani haabobo holebira, lalu langiya.\* ✧

<sup>19</sup> Ani layago hale howa dege ina nogo tara ale mane hiriribi gi tele aube tobahe biagonaga irane baya hangu manda bule hamelaru. Ogoni ibunaga ne aeane howa ibunaga ge gibaru ege tele boronosime wabini hearia handaru. Ogoni ibugua mbirale bibahende wiaru no gindulo wahalu hingiluni ibira hayaru geme hengedo wahalu himu helaya. <sup>20</sup> Ani bialu ibunaga hagianeni ne gayane pira hayarubi ne emene mbira mani anda howa ne tebira ala hene biaru dugu wahalu ibu agalinaga dengui howa mine halu ibuninaga mini yaraga halu hayago o biagobi handarugonaga irane manda bua haru. Ne maru hayarunaga ina gi emene harugo ai nigoni ibu hondowa gi timbuniore haru.

<sup>21</sup> Ina handalu hewaria ne gayane emene ko ogoni ibugua mine howa Ngode Datagaliwabenaga wali agali hearu baba wai bialu ibu wayali haya.\* ✧ <sup>22</sup> Ani bialu hearia mbirali haluhe haabo hene biagome ibalu ne gayane emene denguihe ogoni manani godi lole ibu helowa ibugua ne ogonihondo lalu, Ngode Datagaliwabe Daligaore kagonaga wali agali karu mo ko halu mana yoleore bialu harigoni, laya. Ai Ngode Datagaliwabenaga wali agali uruni tigua handame haga kininaga hongo holene yu holenengi kaware ibu ngagoni, laya.\* ✧

<sup>23</sup> Ai agali ina hale harugo ibugua ladai bialu ogodagua laya. Emaga ogoninaga irane ogo. Nogo tara ale mane hongo holenewi handaridagoni ibu dindi kini timbuni mbiraha wulebirago. Dindi ogoni ibu maru ngarubi ndo wali agali ogoniha karu koore holebira. Ani howa tigua wali agali dindi bibahendeni karu baba wai timbu bialu dindi wayali howa bo podalu hongoheore holebira. <sup>24</sup> Ne pira hayadaruni agali kini pira dindi ogoria holebiraru handarida. Mani kini mbira holebirago ibu kini maru bu karunibi ndo ibu taraore howa kini tebira bope holebira.\* ✧ <sup>25</sup> Kini ogoni ibugua Ngode Datagaliwabe Daligaore kagohondo bi ko lalu ibunaga wali agali karu mo ko halu holebira. Kini ogoni ibugua lotunaga lolene ngarubi horo timbuningi lotunaga mana bibahende bulene ngarubi mo iri ari bua howa ibugua Ngode Datagaliwabenaga wali agali karu mali tebirani ege waragaria agima haru holebira.\* ✧ <sup>26</sup> Horo uruni piai kagola Ngode Datagaliwabe handa godi lalu agali ogoni ibunaga hongo bope howa mo koore halu bo gialobaga bulebira. <sup>27</sup> Ani buwa Ngode Datagaliwabe Daligaore kagome kini bibahendenaga hongo timbuni yu hayaruni ibunaga wali agali karuhondo miragola ti yu holebira. Ani biragola tigua haru haga kini haabobo kagola wali agali dindi bibahende ha karume Ngode Datagaliwabenaga wali agali karu tinaga bi hale halu ti andaneha hai holebira, lalu langiya.\* ✧

\* **7:13:** Agali inane ale layadagoni hameigini Arama bi lalu lenego ai Yasuhanda ibuni manda bialu Agali Hole Ibiyago mini laga hene. ✧ **7:13:** Md 24.30, 26.64, Mg 13.26, 14.62, Lg 21.27, Mo 1.7, 1.13, 14.14 ✧ **7:14:** Mo 11.15 ✧ **7:18:** Mo 22.5 ✧ **7:21:** Mo 13.7 ✧ **7:22:** Mo 20.4 ✧ **7:24:** Mo 17.12 ✧ **7:25:** Mo 12.14, 13.5-6 ✧ **7:27:** Mo 20.4, 22.5



<sup>28</sup> Ai Daniele ina emaga mbira gibiore ogoni hondowa mogo lalu gi timbuni howa uruni bibahende miniha yu haru, lalu Danielehanda lene.

## 8

### *Danielehanda nogo sibibi memebi wangabe labolabo emaga hendene go*

<sup>1</sup> Mali tebira Belesasa ibu kini heagola ina emaga mende handarugo ogobi. <sup>2</sup> I abale puwa Elama dindiha tano Susa wiagonaga pabe tamuha anda puwa Ulai iba pedago angeni pu haruyane handaru. <sup>3</sup> Ogoriani pu howa handalu hewaria nogo sibi wangabe mbira iba angeni hearia handaru. Nogo sibi ogoni ibunaga hagianeni ne gayane luni kira howa mendego ibu emene mani heneyago ogoni ibu luniore heane handaru. <sup>4</sup> Ani handayaho hewaria nogo sibi ogoni ibugua ma buli halu gerai puwa mbirale wiaruni bibahende bai hayane handaru. Nogo ogoni ibu gerai lalu amu ni paliragohayagibi unurayagi uyurayagibi ibugua gerai lalu piaia haya. Nogo tara tara karu bibahendeoreme ibu napelo hapai habe naheore howa marumebi nde ibu handalu ibida pobe nahe haya. Ani bialu ibu hongo taraore howa ibunime hame leadagua bialu hea.

<sup>5</sup> Ani hondowa ina ogoni irane agiledabe manda bialu hewaore dege nogo meme wangabe mbira amu ni paliragoha howa gerai lalu ibiya. Gerai gibi lalu ibiyagoni dindini ge nahe aube tobane ibiya. Nogo ogoni ibunaga hagianeni ne gayane timbuni mbiraore hangu de kiranaga hengene wiagoria anda hatagi heneya. <sup>6</sup> Ai meme ogonime nogo sibi wangabe mbira iba ange biagoria heago hondowa ogoni hondo yalu abale gerai tungu laya. <sup>7</sup> Ani puwa ibugua hongo taraore howa nogo sibi biagonaga ne kira biago bo gaibu wahayagola nogo sibi biago ibugua gungu bia dai bibe nahe haya. Ani beagola meme biagome hongo taraore howa nogo sibi biago dindini bo hangedape howa lerelo yu ibagabu wahaya. Ani bialu heagola nogo sibi ogoni biamogo bulene mbirali naheya.

<sup>8</sup> Ai nogo meme biago ibu hongohe howa mine taraore haya. Ani bialu howa hongo timbuniore halu hearia ibunaga ne gayane biago gaibu wahaya. Ani biyagola ne mbiraore ala hene biagoria ne maria anda ho aribia haya. Ne mani ha aribia hayadaruni ti ala hayagobi ndo timbuniore haya. Ti ani howa mbirago ibugua uyurahayagi handa uyu howa heagola mendego ibugua unurahayagi handa unu howa hea. Tebonego ibugua amu ni ibiragoha handa amu howa halu manego ibugua ni paliragoha handa dai buwa heane handaru. <sup>9</sup> Ne maria hayadaruni mbiranaga parane mbira anda howa ibugua hongo taraore halu wali agali unugohayagi hearubi amu ni tagira ibiragohayagi hearubi bibahende bope hai halu dindi Ngode Datagaliwabehanda ibunaga wali agaliru minigo biagobi bope haya. <sup>10</sup> Ani bialu ne biagome hongo timbuniore howa dahuliya andagaha ami dewa yakundi tini heneyago uruni ti baba wai bibehe hayagola wai bialu hemiria ne biago ibugua yakundi biaru maru dindini bope howa hangedo mbaralo wahaya. <sup>11</sup> Ani buwa dahuliya andaganaga ami hearunaga kini heagobi bope hole wai bialu haya. Ani bialu howa kini ogoni ibuhondo horo bibahendeni mbirale mbira bo lomabu delagane wiago ne biagome mo wahaya. Ani buwa ibugua wali agalirume Ngode Datagaliwabe mitangi bialu lotu lele mo ngoai haga anda heagobi mo mebia haya. <sup>12</sup> Wali agalime mana ko wiaru biyagome ne biago ibu hongo hayagola dahuliya andaganaga ami hearu bope halu horo bibahendengi mbirale bo lomabu delaga mana henene wiaru mo mebia hai haya. Ngode Datagaliwabehanda bi bibahende heneneore lowini ngaru wali agalime talialu nabilo lowa ne ogoni ibugua bi ogoni mo nagalone halu wali agalime hale howa talialu bulilono mo wahaya. Ani bialu howa ibunime buabiya alego bibahende biaia halu haya.

✧ 8:10: Mo 12.4

<sup>13</sup> Anigo ina dahuliyali mbirame bi lalu heagola mendeali heagome hale halu ogodagua layuane hale haru. Áyu mbirale koorene kome mo mebia ho ngaruni angi howa ereba holobadabe. Agongi howa wali agalime Ngode Datagaliwabehondo bo lomabu mulene dai bulubadabe. Mana ko mbirale bibahende mo mebia haga ngarubi biba halu ne ogoni ibugua ibunaga anda mo mebia haga bialu nabilobi dahuliya andaga ami karu dindini bope halu geme hangedowa nahelobi ibunaga hongo angi ibira holobadabe, layuane hale haru.

<sup>14</sup> Ani hale hayagola dahuliyali bi lalu hayadago ibugua ihondo lalu, Ogonidagua ngane dege horo daosini kirani handari tebira (2,300) polebira, laya. Horo uruniha howa abale biagadagua tigua egereba alendobi bo lomabu mialu haga winidagua nabulebira. Horo uruni piai kagola nde tigua Ngode Datagaliwabenaga anda mo tiga bialu mbirale bo lomabu muleneru lone mialu holebira, laya.\*

<sup>15</sup> Daniele ina emaga handarugo ogonaga irane dege agiledabe lowa mitangitangi bialu hewaria dege abaleore mbirali agali handalehe ona i hewagoria kaware íbu heane handaru.

*Dahuliyali Gaberelohanda Daniele ibu emaga handayagonaga irane latagi henego ogo*

<sup>16</sup> Handalu hewaria ina Iba Ulai pedagogia howa bi mbirame ola ede halu lalu, Dahuliyali Gaberelo-o ina Daniele ibugua emaga handayagonaga irane ogo ale lalu lamia, laya.\* <sup>17</sup> Ani layagola Gaberelo ibu ibalu i hewagoria kaware íbu hayagola ina gi timbuni howa dindini pilo ibira haru. Ani birugola Gaberelo ibugua ihondo lalu, í dindiali dege kegonigo mbirale emaga handarigoninaga irane manda bulene ngalo manda bido. Ogoni mani horo hamarohayagi bulebirarunaga manane handarigoni, laya. <sup>18</sup> Ibugua bi lalu heaore dege i de mborere bialu dindini pilope ho wiaabo haruya. Ani pilo wiwaria ibugua i lone mo heya hayagola heyu haru. <sup>19</sup> Ani heyu hewagola ibugua lalu, Ina Ngode Datagaliwabe ibunaga keba tandagala holene ngago biba holene horo tagira ibiragola bulebirago í walia haro.

<sup>20</sup> Nogo sibi hagianeni ne kirahe handaridagoni Midia dindi Pesia dindila handari. <sup>21</sup> Ai nogo meme handarigoni Girigi dindi ogoni howa ne mbiraore de labo hengenaha hanunini heane handaridagoni Girigi wali agali tinaga kini mbira holebirago manane handari. <sup>22</sup> Ina mani ne timbuni mbiraore biago gaibu wahalu maria andaho aribia hayane handaridagonaga irane Girigi dindi mahalumu wigi bialu dindi hobane maria wulebirago handarida. Anigo dindi maria uruni abale dindi mbiraore hangu howa hongo ho hayagobi ndo holebira, laya.

<sup>23</sup> Dindi uruni mo ko howa hamaro bulene kaware ngagolabi wali agalirume ko ngaru hangu mo tene halu kagolabi agali kuyama ko mbira kini holebira. Ibu koore howa mine halu wali agali bo wahagabi mo hondo hagabi holebira. <sup>24</sup> Ibu hongooore timbunihe howa ibugua mbirale ngaru mo ko halu holebirago uruni ibuninaga hongome ndo bialu holebira. Ibugua mbirale bule hame ledago biaiore habehe howa agali hongoge karubi Ngode Datagaliwabenaga wali agali karubi mo koore hai holebira. <sup>25</sup> Ibu wali agalihondo ke haga howa mo hondo hagane mana timbuni ibuha ngagome ibuni timbuni bolanguahe holebira. Ibuninaga minime ibu timbuniore kogonida mandabu holebira. Ani howa wali agali ti bayale kamalo mandabu karia ibugua ti dewaore bo haealo wahi holebira. Ani howa ibugua mine halu kini karu bibahendenaga kini timbuni bolangua hene mbira kagola wai bule bialu karia ibuni agalinaga hongome ndo bo waholebira. <sup>26</sup> Ai bo lomabu mulene egereba alendola handarigonaga irane langirugoni. Mbirale handaridaruni bibahende tagira piai holebira. Anigo uruni abale

\* **8:14:** Hiburu bi lalu (2,300) ngago. Ai horo mbira mbiranaga manda bialu leneyagua o karulape lo nga. Ai horo mbiranaga lomaru halu kira migi biaga winigo manda bialu layagua nde horo ibuni (1,150) hangu holebira. ☆ **8:16:** Lg 1.19, 1.26

áyu ogoni tagira íbu nabulebirago wali agali maru karu nalami íni miniha yu habe, lalu langiya.

<sup>27</sup> Bi ogoni hale howa ína bu miniha gendaho howa horo marungi warago bo wiru. Warago dabi haya handala Kini Belesasa ibugua biabe mo ngiyago bule dai biru. Ani howa emaga handarugonaga irane handa walía nahabehe howa mini burugulo haru.

## 9

### *Danielehandá Ngode Datagaliwabhondo Isaraele wali agalinaga bi la henego ogo*

<sup>1</sup> Dariusi Segesisi igini Midia dindiali henego ibu Babilono dindiha kini hene. <sup>2</sup> Ai Dariusi ibu mali mbira kini hene lowa Daniele ína Ngode Datagaliwabenaga mbuga wiago dagalaru. Ani daga lalu hewaria mali pira kariani (70) Yarusaleme bo gialobaga bu wulebira lalu Ngode Datagaliwabhenda ibunaga bi mana latagi haga agali Yaremaiaha howa mbiwia hene wiago dagalowa mitangi bialu haru. <sup>3</sup> Ani dagalowa ína miniha dara timbuniore howa tomo nane wahalu aga daraho howa biaga ale bialu be dugu hiru biruwa Anduane Homogo Ngode Datagaliwabhondo bi lalu haru. <sup>4</sup> Anidagua bu biruwa Anduane Homogo ínaga Ngode Datagaliwabhondo bi hongo howa lalu Isaraele wali agalirume mana ko biniru lapani haru.

Ína bi uruni ogodagua lalu, Anduane Homogo Ngode Datagaliwabe í daligaore kegonaga mini yaraga haramagoni. Bibahendengi ínaga habo nalolene bi ina baba lo wirigoria ína talialu haabo howa wali agali íni gubalini howa ínaga bi hale halu karuhondo gubalini haga kegoni.

<sup>5</sup> Ainde ina wali agali koore kamagoni. Iname mana ko bialu liahe dewa birimagoni. Iname ína mana bayale tigabi bilimu lalu langiriruni mo wahowa nabi harimada. <sup>6</sup> Agali ínaga biabe bia halu bi mana latagi haga hearunaga bi iname mo wahalu harimagoni. Tigua kini hearubi agali haguane hearubi inanaga mamali hearubi inanaga wali agali bibahende hearubi uruni bibahendehondo bi ína langiriruni hale howa bia nabi mo waharimagoni. <sup>7</sup> Anduane Homogo í mana tigabi ngaru hangu biaga íniore kegola inane Isaraele wali agalime mana ko ngaru birimagome inaneha taga holene mo yu anda ibirimagoni. Ina Yudiaha harimayaguabi Yarusalemeni heneyaguabi iname ko bialu hemaria dindi tara maruha hole pelarigoha howabi iname ínaga bi mo habo lalu harimagonaga taga holene timbuniore inaha wiaabo kagoni.

<sup>8</sup> Anduane Homogo inanaga kinirumebi agali haguane hearumebi ina mamali henerumebi bibahendeore mana ko wiaru bialu íhondo kagua dewa bini. <sup>9</sup> Iname ínaga bi mo wahalu mana ko biagada lowa ina yu wanahe bibahende ína dara hai haga kegoni. <sup>10</sup> Anduane Homogo inanaga Ngode Datagaliwabe-o ína agali ínaga biabe bia halu mana lowinigo latagi hearuha howa onahondo bi langiriruni iname hale nahe mo waharimagoni. <sup>11</sup> Ina Isaraele wali agali bibahende kamarume ínaga bi lariruni pugualu mo wahai harimagoni. Anigo ínaga biabe bia haga Mosesehondo bi mana lamiriruni inahondo langinigo bi urunime lalu, Ínaga mana lowini ngego iname talialu nabirimiyagua ina mo ko halu bolebero lariyagoni. Ai iname íhondo ko birimagonaga ina pani ngule laridagua ngiridagoni. <sup>12</sup> Ai ína inahondobi inanaga agali haguanageruhondobi bule lariyadagua birida. Yarusalemebi nde mo ko halu bo gialobaga biriyagoni. Ína Yarusaleme mo ko halu bo gialobaga biridagua dindi mende mbira ani bini nawi. <sup>13</sup> Mosese heneyangi bi mana lo wiyagoha howa genda bibahende ibulebira lariruni inaha ibai haya. Áyubi nde iname mana ko uruni wa nahe bialu haabo howa ínaga mana henene ngaru baya hangu talialu bia nabi kamagoni. <sup>14</sup> Anduane Homogo inanaga Ngode Datagaliwabe-o iname mana ko birimagonaga pani ngule harigoni. Í

☆ 9:2: Yar 25.11, 29.10 ☆ 9:11: LBM 26.14-39, Man 28.15-68

mana tigabi dege biaga kegome áyubi nde ina pani ngialu kegoni. Ani bialu kegola iname ínaga bi mana hale naholeore harimagoni ndobe.

<sup>15</sup> Anduane Homogo inanaga Ngode Datagaliwabe-o íninaga hongo walia halu abale inanaga mamaliru Iyibi dindiha garabaya biabe bialu hearia golope halu haru tagira ibiriyago. Áyubi nde í ogonidagua biaga ke lowa wali agali dindi maruha karume ina biabe hongohe biriruni manda biaiho howa ínaga mini yaraga halu kagoni. Ai heneneore iname mana ko tiga nabi wiaru dewa bialu harima. <sup>16</sup> Inamebi inanaga mamalirumebi mana ko wiaru bialu heago hondowa ina pani inane mo ko halu inanaga tano Yarusalemebi bo gialahole birigoni. Ani birigo wali agali dindi maruha karumebi wali agali tano ogoniha kaware karumebi Yarusalemebi íninaga wali agali kamarubi mege taraore bialu kagoni. Anigo áyu ínaga tano Yarusaleme ogoni ínaga hari loma bia hene o biagoria ngago hondowa keba haabo nahabe. Bamba ina biamogo bule howa biabe dewaore biriyago áyubi nde anidagua dege lone bibelo hame ledama. <sup>17</sup> Ngode Datagaliwabe-o ina bia lalu hale halu kogo biaore bibe. Wali agali dindi bibahendeha karume ini mini lene harigo mandabu dai bilo ínaga anda loma bini tigua ala bo giallo wahayago lone biadaire bibelo hameledo. <sup>18</sup> Ngode Datagaliwabe-o iname dugu bialu kamaru handalu bi lalu kamaru hale ha. Genda timbuniore inahabi ínaga tano biago-habi ngaruni handabe. Ina wali agali tigabi bayale howa ndo í Ngode Datagaliwabe dara howa biamogo biagaore kegodane bia lalu hale haramagoni. <sup>19</sup> Anduane Homogo-o inanaga bi laramago hale halu ina biamogo bia. Anduane Homogo-o ko bibahende birimagoni domo wahai habe. Yarusaleme tano biagobi wali agali ogoniha karubi ínagaore kagoni. Anigo hondo ha nabi íninaga mini timbuni yaraga hene kego manda bialu abaleore biamogo bibe, lalu Danielehanda Ngode Datagaliwabehondo bi ogoni lene.

### *Dahuliyali Gaberelohanda Yaremaiahanda mbiwia henegonaga irane latagi henego ogo*

<sup>20</sup> Daniele ina Ngode Datagaliwabehondo bi lalu howa inime ko birurubi íninaga Isaraele wali agalirume ko biyarunagabi lahalu biru. Ani bialu Anduane Homogo ínaga Ngode Datagaliwabehondo ibunaga anda hari ibunaga loma bia hene biagoria haga biago lone biadai bibe laru. <sup>21</sup> Ai Ngode Datagaliwabehondo bi lalu berewaria dahuliyali Gaberelo emaga ala pigane handarugo lone í hewagoria daliape haya. Horo ogoni alendonaga lomabu mulenengi wini.\* <sup>22</sup> Ibugua ínaga mini mo wála holenaga bi ogodagua laya. Daniele-o í agali mini gigabiwiore habelonaga ínaga mini mo wála hole íbu kogoni. <sup>23</sup> Daniele-o Ngode Datagaliwabehanda í gubaliniore ho howa ínaga bi lariruni hale halu ibugua bi mbira layago íhondo langule ibirugoni. Ai ina emaga handariruninaga irane languliya baya hangu hale habe.

<sup>24</sup> Gaberelohanda lalu, Ngode Datagaliwabehanda mali pira karia dege kahalu (490) pedagola ínaga wali agalibi ibunaga Yarusaleme tanobi biamogo bialu mo heya holebero, laya. Ibugua wali agalirume ko biyaru domo wahai halu embeda haragola wali agali mana tigabi bayale ngaru hangu bialu holebira. Ani bialu kagola ibunaga anda loma bia hene lone helolebira. Emaga handayagobi agali Ngode Datagaliwabehanda bi mana latagi haga biagoaha howa mbiwia ho winigo latagi hayagobi henene lola helonaga ani bulebira. <sup>25</sup> Ai ina hale halu manda bulene ngago Yarusaleme tano lone bule lowa mali karia dege kahalu (49) ala bolangua pedagola agali timbuni haru haga haguane helo dabo helene Ngode Datagaliwabehanda ibilole lene biago ibulebira. Ani bidagola tigua Yarusaleme tanoha hariga bayaleru mo pehalu ege pabe timbunirume bu mabu bupe holebira. Anigo Yarusaleme tano mali pira waragariani kira dege kahalu (434) holebirago ai mali uruniha genda tandagala hangu handaho wiaabo

\* 9:21: Lg 1.19, 1.26

holebira. <sup>26</sup> Mali pira waragariani kira dege kahaludago (434) piyai kagola Ngode Datagaliwabehanda agali dabalubira ibilene ogoni agali maru karume irane nawini howa ibu bo waharagola ibunaga lenego mbirale mbira nawulebira. Agali kini hongohe mbiranaga ami agalirume ibuwa Yarusalemibi Ngode Datagaliwabenaga andabi bibahende bo giallo wahai holebira. Wai timbuni ogoni bialu mbirale uruniha ngaruni iba lime mbirale ngaru hilo yalu poralidagua bialu polebira. Wai timbuni ogoni bialu kane dege Ngode Datagaliwabehanda aniore bulebira lalu bi layadaguaore henene ngola lalu horo hamaro bulene tagira ibulebira. <sup>27</sup> Ai kini ogoni ibugua wali agali karume ibunaga bi lo ngaru talilonaga habo nalolene bi pongo bu wialu hongohe lo wigi bulebira. Ibugua habo nalolene bi hongohe ogoni lo ngelowa kane dege mali karia dege polebira. Mali tebirani ege waragaria pedagola wali agalirume tinaga loma tara tara Ngode Datagaliwabehando miaga winiru namilo kini biagome mo waholebira. Ani buwa ibugua Ngode Datagaliwabenaga anda daliga lumbuniore ngagoria mbirale koore Hiriribi Hondolene Gibiore mbira mo ngelolebira. Ani ngelowa agali ko mbirale mo ko haga biago ogoniha bedane dege Ngode Datagaliwabehanda ibu mo ko holene horo pongobu wiyago tagira ibalu ibunibi mo ko holebira, lalu dahuliyali Gaberelohanda Danielehondo lamini.\*

## 10

### *Daniele ibu Iba Taigirisi angeni howa emaga hendenego ogo*

<sup>1</sup> Sairusi ibu Pesia dindiha kini heane mali tebone hayagola Ngode Datagaliwabehanda Danielehondo bi mbira lamini. Daniele ibu mini mende Beledesasa wini. Bi lamiyagoni heneneore lamialu bi taibioreyagola Daniele ibu bayuwa manda bilo ibugua irane de gandebaha howa mo walia hene. Mo walia hayadagoni mo ko holene timbuni gibiore mani ibulebiragonaga mo walia hene.

<sup>2</sup> Mali ogonongi dege i Daniele inaga bu miniha genda timbuniore ho howa sarere tebirani dugu dege bialu haabo haru. <sup>3</sup> Sarere tebira o genda yu harudagoniha i tomo bayalebi nogo egarubi waini ibabi mbira nane dege howa inaga mandabi gumu nabi haru.

<sup>4</sup> Ani howa ina mali ogonongi ege mbiranaga horo pira kirani maria (24) hayangi iba timbuni Taigirisi mbira peagoria angeni pu haru. <sup>5</sup> Ani pu howa handadaga lalu handalu hewaria agali mbira aga labolabo pele baya mbira karuleni nogo dongone mandibu ngolo baya tara mbirame wabini mo karulowa heago handaru.\* <sup>6</sup> Agali ogoni ibunaga tingini ege tole baya wa tara holenehe wiagagobi hearia handaru. Ibugua wanakui wa taraore hari daba waga loralidagua waga laga biya. Ibugua de ira hungu ale hearia handaru. Ibugua gi geru ngiringarale ege tole boronosime wabinini mbiraleme hai hene ngaligobi hearia handaru. Ani howa ibunaga bigo timbuniore wali agali dewalime laradagua biayuane hale haru.

<sup>7</sup> Mbirale de gandeba ogoni ini hanguore howa handaru. Agali i heba mandagi harimadaru ti mbirale ogoni de handa nabi howa dege ti gi lalu ibida pialu ha do hai haya. <sup>8</sup> Ani piyai heagola ini hangu howa mbirale taraore mbira ogoni de gandebaha handaru. O handarudagoni hondowa inaga hongo holene pirilape lalu inaga dengui mo tara haya. Mo taraore ho hewaria mendealime i de hondowa ioreda manda bibe nahe haru. <sup>9</sup> Ani howa ina agali biagonaga bi hale lalu hewaria i aube tobane buwa dindini pilape howa dengui bulu paluwa agali homo tongolo mini wiradagua biru. <sup>10</sup> Ani wiwaria mbiralinaga gime i mo heya hayuane handaru. Ani mo heya hayagola inaga gi ge lagolirume heyu biraru. Ani bira biruwa gi haabo howa inaga tingini duru lalu haabo haruya.

\* 9:27: Dan 11.31, 12.11, Md 24.15, Mg 13.14    \* 10:5: Mo 1.13-15, 2.18, 19.12



<sup>11</sup> Ani biyagola dahuliyali mini Gaberelo ibugua ihondo langialu lalu, Daniele-o Ngode Datagaliwabehanda iore gubalini timbuni ho ka. Ani kago ai abale heyalu ina bi languleberogo bayuwa hale habe. Ngode Datagaliwabe ibunime i i heria pu laya handala ibiru, laya. Ibugua bi ogoni layagola ina heyu hewaore inaga tingini duru dege laabo haruya.

<sup>12</sup> Ani duru lalu hewagola ibugua laabo halu lalu, Daniele-o i gi nahabe. Ina mbirale Ngode Datagaliwabehanda biagaru hondo manda buleore lowa ini mo dindiha ho haringi Ngode Datagaliwabe ibugua inaga bi hale hayago o larigonaga i i keria ibu kogoni. ✧ <sup>13</sup> Ina abale ibulene winigo ai Pesia dindinaga dama hondo haga heagome i ibulilono horo pira kirani mbira (21) hapai howa haabo hayagola i naibabehe haru. Pesianaga dama haguane biago baba i hangu hewagola i biamogo bulene mendeali naheyane hondowa dahuliyalinaga haguane mbira mini Maigelo ibugua i hewaria ibalu biamogo biyagola ibiru. ✧ <sup>14</sup> Horo hamaro bulene kaware haragola inaga wali agaliruhondo ogoale bulebira lalu ina langule ibiru. Mbirale mani bulebirarunaga ogoale bulubada lalu handa hondowa manda bu harigonigo ai marubi mo walia ha dege buliya, laya.

<sup>15</sup> Ibugua anidagua layagola ina handa dindi halu inaga bi lolene ereba haya. <sup>16</sup> Ani biyagola ai dahuliyali agali handalehe biagome ibunaga gime inaga ne hambuni ela hayagola i lone bi labehe haru. Anidagua biyagola ina ibuhondo lalu, Agali haguane-o ina mbirale de gandebaha mo walia hayago handarugome i gi timbuni howa mogo larogome inaga hongo pirilape halu duru lalu kogoni. <sup>17</sup> Ani biyagome inaga hongo ereba hai halu biabe bia haga agalime ibunaga agali haguane kagonaga deni heyu howa bi labe nahe giho hagagobi kogoni. Anigo ina ihondo bi agua loabe. Inaga buhe lolenebi taiore bira, lalu lamiru.

<sup>18</sup> Ani lewaore agali handalehe biago ibunaga gime i yania hayagola inaga hongo lone hadai biya. <sup>19</sup> Ani biyagola ibugua ihondo langialu lalu, Ngode Datagaliwabehanda i gubaliniore ho kago ina mbirale uruni hondowa gi nahe hongo ho holene nga, laya. ✧

Ibugua ani layagola i lone hongo timbuniho howa ina ibuhondo lalu, Agali haguane-o ina i mo hongo harigonigo ai ihondo bi langule wiridaru langi, laru.

<sup>20-21</sup> Anidagua larugola ibugua lalu, I áyu i keria ibirudagoni irane manda bidebe nabi. Ina ibirudagoni Henene Lolene Mbuga ngagoha bi gilibu ngarunaga ogoale lalu lo wala holenaga ibiru. Anidagua binigo ai i dindi ogoria lu habe nahe kogoni. I abale dai bialu dama haguane Pesia dindiha handayaho haga kago baba wai bule dai bulebero. Wai ogoni biai kabagola Girigi dindinaga dama haguane kagobi ibulebira. Ibiragola i biamogo bulene mbirali nahe ti Isaraele wali agalinaga mamage haga dahuliyali mini Maigelo kago ibugua dege i biamogo biaga ka. ✧

## 11

<sup>1</sup> Anidagua biyadagonigo Midia dindinaga Kini Dariusi ibu Babilononaga kini heangi ina nde dahuliyali Maigelo biago biamogo bialu mo hongo harugoni, lalu dahuliyali Gaberelo ibugua laya.

*Iyibialinaga kini Sirialinaga kinila wai binigo ogo*

<sup>2</sup> Ani lowa dahuliyali Gaberelo biagome laabo halu lalu, Daniele-o mbirale ogoale bulebira lalu langerogoni damene heneneore tagira ibai holebira. Mani Pesia dindini kini tebirame ha aribia haga bialu haru haga bulebira. Ani bialu maniore kini mane ha aribia howa haru holebirago ibugua kini ala henerume muni dabudaburu dewawi henedagua ndo ibu ti bolangua howa homogo timbuniore holebira. Ani ho kagola ibunaga muni dabudabu ngaru dewa haragome ibu mo hongoheore haragola Girigiali

✧ **10:12:** Dan 9.3-4, 9.22-23, Ab 10.4 ✧ **10:13:** Dan 10.20-21, 12.1, Yu 9, Mo 12.7 ✧ **10:19:** Hgn 6.23 ✧ **10:20-21:** Mo 12.7

bibahendeme ibu handabe manga holebira. Ani biragola ibugua ti baba wai mo bua helolebira.

<sup>3</sup> Mani kini hongohe mbira ha aribia harago ibugua dindi timbuni ngaru handayaho halu wali agali dewaore haru holebira. Ani haru howa ibunime bua birago ale bialu haabo holebira. <sup>4</sup> Ani howa ibunaga hongo timbuniore kagola dindi ibugua handayaho hayaruni ma halu tu wigi bialu ibu iginirume ndo agali marume handayaho aribia holebira. Ani kagola agali kini tara uruninaga hongo ibuninaga hongo hayagobi ndome haru holebira.

<sup>5</sup> Ogonidagua birangi dindi abene unurahayagi Iyibinaga kini kago ibu hongoheore holebira. Anigo kini ogoninaga ami haru haga agali haguane mbira Iyibini haga kagome kini biagonaga hongo bolanguaore howa ibuninaga dindi timbuniore haru haga holebira. <sup>6</sup> Mali maru howa Iyibinaga kini kago wane dindi uyurayagi mini Sirianaga kini kagome dabu bulebira. Libugua dindi kirabali mo mbiraore holenaga ani bulebira. Anidagua biragola wali ogoni ibunaga hongo lu haho wiaabo naholebira. Mani howa ibu agalininaga hongobi ibira dege holebira. Tigua wali ogonibi wali agali biabe biahaga maru ibu heba pendarubi ibu ababi agalinibi iginibi bibahende homelo bo wahai holebira. <sup>7</sup> Emene howa wali ogoninaga damene dege mbirame kini ha aribia howa Iyibi dindi haru holebira. Ani ho aribia howa agali kini ogoni ibugua Siria dindiha pialu tanonaga wai pabe hongohe karu bo podaga bima anda pialu wai bialu bo poda hana holebira. <sup>8</sup> Ani buwa ibugua mbirale dama mitangi bialu gime wabini ngarubi dama uruninaga dabudabu bayale tara tara ngolo silibarume wabini lomabu ngarubi bibahende Iyibi dindiha mo yu dai bulebira. Anidagua bidagola mali maruni wai nabi howa <sup>9</sup> mani Sirianaga kini kagome Iyibi dindi wai bule ibulebira. Wai bialu wayali habe naheyane ibuni dalu dai bulebira.

<sup>10</sup> Sirianaga kini igini bu karume ami agali dewaore wai bu polenaga mo manda mandabu holebira. Ani howa kini igini mbirago ibugua ami agaliru haru halu wai bule abaleore tagira polebira. Ani bialu dindi dewani pialu wai buwa bo poda hana haga bima iba li timbuni piagadagua polebira. Ani pialu tigua Iyibinaga kinime handayaho haga tanonaga ege pabe hongohe bu mabu bini karu bo podama polebira. <sup>11</sup> Ani biragola Iyibinaga kini ibugua nde keba timbuniore howa Siria dindinaga kini kago baba wai bulebira. Wai bialu tigua bo poda hana howa Siria ami agali dewaore biaru minalu garabaya hai helolebira. <sup>12</sup> Ani buwa ibugua ogoni biyadagonaga turu timbuni howa ami agali daosini dewaore bo wahai hayagoyu mani ibuni hongo nahe howa wayali haabo naholebira.

<sup>13</sup> Ani biragola Sirianaga kini ibugua ami agali abale wai bule haru halu piyaru bolangua howa mani agali dewaore mo mogo bu holebira. Mani wai lone bu polene wirangi ibugua ibunaga ami agali hongohe uruni haru halu Iyibinaga kini kago baba wai bule polebira. Tigua ani pialu wai biagane danda timu yandareru yalu tomo nolene dewaore bu hanalu polebira. <sup>14</sup> Ani birangi agali tara tara bu karume Iyibinaga kini kago baba waitigi hai holebira. Ani biragola ai Daniele-o í damene maru ami agali bu karu tigua de gandeba ale handayagonaga lola helo ti wai bule pialu karia Iyibinaga kini kagome ti bo podara handala dai bulebira. <sup>15</sup> Ani biragola Sirianaga kini kagome ibunaga ami agaliru haru halu Iyibi dindi tanonaga ege pabe hongohe bu mabubi kagoha hagira bialu wai buwa pabe bo podalu tano anda pialu karulo holebira. Ani biragola Iyibi ami agali hongohe pari wayaliore bu karume wai bule bialu karia bibe nahe halu tinaga hongo ibira holebira. <sup>16</sup> Ani buwa Sirianaga kini ibugua Iyibi dindini howa ibunime bua biradagua biai halu kagola agali mbirame agi berebe lolene mbira naholebira. Ibugua Ngode Datagaliwabehanda dindi Isaraele wali agaliruhondo mini ngagoriani howa dindi ogoni bibahende bo haealabaga bulenenaga hongo ibuni yu hai holebira.

<sup>17</sup> Mani howa Sirianaga kini ibugua ibunaga ami agaliru bibahende haru halu Iyibi dindiha wai bu pole manda manda bu holebira. Ani manda bialu ibugua dindi Iyibi kinime haru ho kagoria bope halu karulolenaga ibu wane Iyibinaga kinime dabu bilo mulebira. Ani bialu kariabi ibugua manda bu hayago kobaragola ibuni mbirale mbira nayiore polebira. <sup>18</sup> Anidagua bialu ibugua dindi dewani hameigini tara tara iba solowara timbuni bedago angeangeha palima pedaru baba wai buwa ibu wayali holebira. Anidagua bialu ha holebirago mani howa dindi taranaga agali haguane mbirame Sirianaga kini biagola wai bialu Sirianaga mine holene ereba holebira. Ani biragola Sirianaga kinime ala mine howa biyagonaga ibuni tandaga nelo badaai bulebira. <sup>19</sup> Ani bira handala Sirianaga kini ibuni daluha wai pabe hongohe kagoa dai buwa ha holebira. Mani howa kini ogoni ibira halu wali agalime ibu lone nahondolebira.

<sup>20</sup> Mani Sirianaga kini mbira ha aribia haragome agali haguane mbira dabalumu dindi bibahende ibunime hondo haga ngaruha wali agali hearu mo genda halu dagisi muni mima ibaga bia lalu lamulebira. Ani bulebirago irane ibuninaga mbirale mbirale ngaru mo timbuni helo dagisi muni mulene nga lolebira. Ani bialu kini ogoni ibuni lu nahe abale homolebira. Ibu wai bialu karia waime bene ndo homolebira. Anidagua dege mbiralime ibuhondo keba howa bene ndo homolebira, lalu bi ogoni dahuliyali biagome mbiwia halu Daniele lamini.

*Siria dindiha kini koorene ko henego ogo*

<sup>21</sup> Dahuliyali agali handalehe biagome i Danielehondo bi laabo halu lalu, Mani Siria dindiha kini mbira ha aribia holebirago ogoni ibu agali koorene ko holebira. Agali ogoni ibu kini holene wini ndogo ibugua ke howa bi ladeborebo bialubi wali agali mo guya howa bime dege lalubi ibuni pu daga halu Siria dindinaga kini holebira. <sup>22</sup> Ani howa dindi mendenaga ami agalirume ibu baba wai bule ibiyaguabi Ngode Datagaliwabenaga Loma Binigo Mo Miaga Haguane Timbuni kagome kini biago ibuni hameledadagua nabilo hapai hayaguabi tanabi ibugua ti bope hai holebira. <sup>23</sup> Ibugua dindi emene koore haru haragoyu ibu dindi mendenaga kini karu baba habo nalolene bi lo wialu, Iya wai nabi mandagi habiya, lalu ke howa mo hondo haga bulebira. Ani buwa ibu kini hongo timbuniheore holebira. <sup>24</sup> Ibugua dindi maru ti muni dabudaburubi dewawi homogo karu manda bialu ohalu ti baba wai bule polebira. Ani bialu ibunaga mamali henedaru tigua ala ogonidagua nabiaga henego ibugua bulebira. Ani buwa wai bialu wayali howa ibugua dabudabu ngaru mo yu dai bialu ibu talima piaga karuhondo talebu ta haga bulebira. Ani bialu ibugua tano mbira mbiranaga ege pabe hongohe bu mabubi karu bo podama pialu maru karulowa marubi karulole manda manda bialu kaore karulolene henge nawulebira.

<sup>25</sup> Kini ogoni ibugua Iyibinaga kini kagohondo gi naholebira. Gi nahe howa ibugua Iyibi baba wai bule ami agali dewaore mo mogo bu holebira. Ani biragola Iyibinaga kini kago ibuguabi nde Sirianaga kini baba wai bule ibunaga ami agali dewa hongoheore haru howa wai bule manda mandabu holebira. Anigo agali marume Iyibinaga kini kagohondo ke halu mo hondo hamiya lalu bi lo mbira howa kagola Iyibinaga kini ibugua Siriali baba wai birangi Sirialime ibu bope holebira. <sup>26</sup> Ibugua ami agali haguane bu karume ibuni mo ko haragola Sirianaga kini kagomebi Iyibinaga ami bu karu dewaore bo wahai holebira. <sup>27</sup> Ani buwa mani kini ogonilabome tomo mandagi nalu birulebira. Ani bira birulebiragoyu libunaga bu miniha ko mitangi bu biruwa bi damene ngago ke howa lo payapaya bialu libuni mo hondo haga haga bialu birulebira. Libugua ogoale bibiya lalu lo werabigo bame la hole bialu galone nabulene wulebira. Ani bulebirago irane Ngode Datagaliwabehanda mbirale bulene lo winigonaga horo ngago wene dege tagira naibidangi lo wulebira. <sup>28</sup> Ani bialu Sirianaga kini ibugua wai bialu dabudabu mo wiyaruni ibuni dalu mo yalu dai bulebira. Ani dai bialu ibugua Ngode Datagaliwabenaga wali agalime Ngode Datagaliwabe mana lowinigo ngaru mo

ko halu bo gialabaga bu wahai holeore lo manda bialu hongo tara ho holebira. Ani manda buwa ibugua mbirale ibunime bulene hamelo kago damene bibahendeore biai halu ibuni dalu dai bulebira.

<sup>29</sup> Ngode Datagaliwabehanda horo mbira pongo bo winigo tagira ibirangi Sirianaga kini ibugua Iyibi dindiha dai bialu Iyibialiru baba wai buwa abale wayali hayadagua lone wayali naholebira. <sup>30</sup> Ani biragola dindi amu ni paliragohayagi howa Lomoalirume iba sibini ibalu Iyibialiru baba wai bialu kagola Sirianaga kini biago gi timbuni holebira. Gi bira handala wahalu dai bialu howa keba timbuniore hama dai bulebira. Ani dai bialu howa ibugua Ngode Datagaliwabenaga wali agali bu karume Ngode Datagaliwabe mana lowinigo ngaru mo ko haga bulebira. Ibugua wali agali maru Ngode Datagaliwabe mana erembira mialu tagira pene karume bi lararu hale halu anidagua bulebira. <sup>31</sup> Iibunaga ami agali marume Ngode Datagaliwabenaga anda kago mebia halu ibuninaga deni mo ko holebira. Ani buwa tigua Isaraele wali agalirume Ngode Datagaliwabhondo mbirale lomabu namilo hangai howa Hiriribi Gibiore Hondolene ngago Ngode Datagaliwabenaga andaha mo yu ibu ngelolebira.✧

<sup>32</sup> Ani ngelowa kini ibugua wali agali Ngode Datagaliwabe erembira mialu pubagi hene karu ibu talima ibilonaga lahondo howa la deborebo bialu holebira. Anigo wali agali maru Ngode Datagaliwabenaga bi hale howa ibu andaneha haabo haga karu tigua ema nabi hibu lalu hongo ho howa kini ogoninaga bi mo wahaga bulebira.✧ <sup>33</sup> Ani bialu kagola Isaraele agali haguane mini gigabiwi karume wali agali maru mo mini wia halu biamogo bialu holebira. Anigo agali haguane uruni aria maru ayu tibume dibalu maru irani bo delaga biragola homaga bulebira. Agali haguane uruni aria maru karunaga andagaha mbirale ngaru mo page bialu garabaya helaga bulebira. Anigo tigua ogonidagua bialu lu haabo naholebira. <sup>34</sup> Waitigime agali haguane uruni bo wahaga bialu kaore dege agali marume agali haguane uruni biamogo bialu holebira. Anigo agali biamogo birarume mo hondo howa tini hangu mitangi bialu tininaga mini yaraga helonaga hame lowa bulebira. <sup>35</sup> Ani biragola waitigirume agali haguane maru bo wahaga biragome maru karu tibi nde Ngode Datagaliwabenaga deni ko mbira para nahe bayaleore bialu helonaga mo hongo holebira. Mana ogonidagua biaabo halu kagola Ngode Datagaliwabehanda horo mbira pongo bo wini ngago tagira ibiragola biamaro bulene wulebira.

<sup>36</sup> Sirianaga kini ogoni ibugua mbirale bibahende ibunime hame ledadagua dege bialu haabo holebira. Ani bialu mine howa ibuninaga mini yaraga lalu lalu, I mbirale damaru mitangi bialu bi pupu wule gime wabini ngaru bibahende bolangua howa ini daligaore kogoni, lolebira. Ani lowa ibugua bi tara tara lalu Ngode Datagaliwabe Daligaorene Daliga kagonaga mini mo ko halu mo nagaloneore helalu holebira. Anidagua bialu kane dege Ngode Datagaliwabehanda ibu pani mulene horo winigo tagira ibiragola pani karulape mulebira. Ngode Datagaliwabehanda buleore lalu lowinigo horo ogoninaga biaiore holebira.✧ <sup>37</sup> Kini ogoni ibugua ibu mamalirunaga dama mitangi bialu bi pupu wulenaga gime wabini ngago handabe manga hai halu dama mende walime gubalini haga ngagobi wahai holebira. Ibuni hangu daligaore dama karu bolangua hai howa duniniore kogoni lo mitangi bialu holebira. <sup>38</sup> Ani bialu howa mbirale dama lalu gime wabini mbiraore ngago ogonime tano ege pabe hongohe bu mabubi kago handayaho haga nga laganego ogonihondo dege ibugua bi pupu wialu holebira. Ani bialu howa ibugua muni ngolo silibaru dewaore dama ogonihondo lomabu mialu ege tole tara tarabi dabudabu tara tara ngarubi lomabu migi bulebira. Ibu mamali bamba henerume dama ogonihondo bi pupu nawiaga hene. <sup>39</sup> Ibugua wai puwa tanorunaga ege pabe hongohe bu mabubi kago handayaho helo dindi tara bu karunaga damahondo bi pupu wialu biamogo bia lalu holebira. Ani bialu ibugua agali maru ibuni kini helo

✧ **11:31:** Dan 12.11, Md 24.15, Mg 13.14 ✧ **11:32:** Dan 11.21, 11.34, Mai 5.7-9, Seg 10.3-6 ✧ **11:36:** 2 Te 2.3-4, Mo 13.5-6

hamelo karunaga mini yaraga halu holebira. Ani buwa ibugua agali uruni ti agali hagueneru helo dabo helaga bialu ibunaga dindi maru ngaru ti tu wa migi bulebira.

<sup>40</sup> Sirianaga kini ogoni hamaro bulene horo hapara haragola Iyibinaga kini kagome ibu baba wai bule ibulebira. Ani ibiragola Sirianaga kini biagome nde wai polenaga garo ale karisirubi nogo hosirubi iba sibi wai bu piaga ngarubi bibahende mo manda manda bialu wai hongo howa biadai bule abale polebira. Ibugua wai hongo howa bu pialu iba li timbuni pialu mbirale ngaru hilo yai halu piagadagua dindi dewaoreha hameigini tara tara karu bibahende bo hilo wahai holebira. <sup>41</sup> Ani bialu ibugua Ngode Datagaliwabehanda ibunaga Isaraele wali agaliruhondo dindi bayale mini biagoha anda ibalu wali agali dewaore daga labe nahe bo wahai holebira. Anigo ami uruni tigua Idomo dindibi Moaba dindibi wahalu Amonoali yu wahene karu tibi yo pialu polebira. <sup>42</sup> Kini ogoni ibugua dindi dewaoreha hameigini tara tara padaru baba wai bialu bo poda hana hai halu Iyibi dindiore bayale ngelo yu wa naholebira. <sup>43</sup> Ibugua Iyibi dindiha muni ngolo silibarubi dabudabu tara tara muni dewame mibehe ngarubi mo yalu piyai holebira. Ibugua Libia dindi Sudana dindibi ti bope hai halu karulolebira. <sup>44</sup> Ani bialu karia bi te maru mani ni tagira ibiragohayagi bialu karubi dindi abene uyurayagi bialu karubi uruni bibahende ogoale bialu ka lalu te lama ibirago hale halu ibu gi timbuniore ho holebira. Ani gi howa ibugua ibunaga bu miniha lembo timbuni halu wai hongore howa bialu wali agali dewaore bo hilo wahai haga bialu holebira. <sup>45</sup> Ani bialu ibugua iba solowara Medidereniana bedagoha hari loma bia hene Ngode Datagaliwabenaga anda bu kagola hengene ngagoria kininaga balai anda timbuniru bu helaga bulebira. Ani bialu kagola ibu biamogo bia halu mo wulene mbira nahe howa homolebira, lalu dahuliyali agali handalehe biagome bi ogoni Danielehondo lamini.

## 12

### *Hamaro bulene horo ogo*

<sup>1</sup> Dahuliyali agali handalehe biago ibugua Daniele ihondo langialu lalu, Horo ogoningini dahuliyalirunaga haguane mini Maigelo tí Isaraele wali agaliru mamage haga biago ibulebira. Ani ibiragola genda timbuniore dewa tagira ibulebira. Genda o ibulubadaruni abale dindi bibahende ngaru wabiningi howa tagira naibini aleore ibulebira. Genda uruni tagira ibirangi wali agali í aria bu karu tinaga mini Ngode Datagaliwabenaga mbugaha gilibu ngaru ti haru dai bulebira.✧ <sup>2</sup> Ani bialu Ngode Datagaliwabe ibugua wali agali ala homayaru mo heya hai holebira. Ani birangi maru ti haabobo holene yu holebira. Maru ti nayi howa taga pani nalu haabo holebira.✧ <sup>3</sup> Horo ogoningini wali agali maru mini gigabiwi howa manda bayalebi karu tiha harini wá timbuni haraligobi ho holebira. Ani kagola marume wali agali mana tigabi ngaru bialu helo biawai haga karu tiha wá yakundinaga kagobi ho haabo holebira, lalu lene.✧

<sup>4</sup> Ani lalu ibugua ihondo lone lalu, Daniele-o marume mbuga ogoniha bi gilibu wini ngaru daga nalelo mbuga ogoni paulowa wagaya aleme mo ndibu lowa ngelabe. Mbuga ogoni ibu horo hamaro bulene ibilo ngelo waho holene nga. Horo ogoni naibi howa wali agali dewalioreme bi ogoninaga irane manda bulenaga tai dege biaabo holebira, laya.✧

<sup>5</sup> Ani layagola ina de handalu hewaria agali kirali iba peagoria angeni ibu hearia handaru. Mendego ibu iba ange í hewagohayagi hea mendego ibu iba ange ederahayagi hea. <sup>6</sup> Mendego ibugua agali handalehe aga bayale karule iba manehayagi heagohondo hale halu lalu, Mbirale nahendene ale uruni bulebiraru angiore biai halu ereba holebirabe, laya.

<sup>7</sup> Ani hale hayagola agali handalehe aga bayale karule biago ibunaga gi kirabali hariha dogoladaga howa bi lalu, Ngode Datagaliwabe Haluhe kagonaga minini howa

✧ **12:1:** Md 24.21, Mg 13.19, Mo 7.14, 12.7 ✧ **12:2:** Ais 26.19, Md 25.46, Yo 5.29 ✧ **12:3:** Dan 11.33-35, Md 13.43, 1 Ko 15.41-42, Ya 5.20 ✧ **12:4:** Mo 22.10



heneneore laro. Mbirale uruni biaho ngane dege mali tebirani ege waragaria polebira. Ani biragola Ngode Datagaliwabenaga wali agali loma bia henerunaga hongo ereba hai ho kagola mbirale uruni biaiore holebira, lene.✧

<sup>8</sup> Ibugua bi uruni layagola ina hale harugoyu ai bi irane ago layabe tene manda nabi haru. Anigo ina ibuhondo lone hale halu lalu, Agali haguane-o mbirale uruni agua bialu ereba holebirabe, laru.

<sup>9</sup> Ani larugola ibugua ladai bialu lalu, Daniele-o áyu í pamia. Mbuga ogoniha bi gilibu ngaruni horo hamaro bulene horo ibirangi angalalu daga lolene wulebira. Áyu mbuga ogoni ibu payu ngelo waholene nga. <sup>10</sup> Genda áyu tagira ibiraruni mani wali agali dewa tigua mana bayale tigabi ngaru hangu bialu howa Ngode Datagaliwabenaga deni tiha ko mbira para nahe helonaga ibira. Wali agali manda bayalebi mini gigabiwi karu ti hangume mbirale uruninaga irane manda bu holebira. Anigo wali agali mine howa mana ko biaga karu tigua mbirale uruninaga irane manda nabi howa tigua mana ko dege bialu haabo holebira.✧

<sup>11</sup> Horo bibahendengi Ngode Datagaliwabehondo lomabu mulene wiyarunaga mana waharangi Hiriribi Hondolene Gibiore mbira Ngode Datagaliwabenaga andaha íbu ngagola horo daosini mbirani handari kirani pira dira (1,290) ala pu bolangua holebira.✧ <sup>12</sup> Ai wali agali maru mini bilinahe halu hongo ho haabo howa horo daosini mbira handari tebirani pira tebirani duria (1,335) bolangua halu pelo handayaho karu ti turuore ho holebira.

<sup>13</sup> Ani bulebirago ai Daniele-o í horo hamaro bulene biago ibilonaga mini bilinahe halu hongo ho haabo habe. Í homa homoleberego mani horo hamaro bulene ogoni wirangi í homaliha howa heyulebere. Heyalu Ngode Datagaliwabe ibugua mbirale damene í ngule layaru ngiragola yu holebere, lalu agali handalehe biagome í Daniele-hondo langiya, lene.

## Hosea

### Mbuga ogoha gilibu ngarunaga nemandi ogo

Ngode Datagaliwabenaga mana latagi haga agali homberiali (12) henerunaga bi mbuga emene dege dege gilibu wigi bini ngarunaga Hoseanaga mbuga ogo ngagoni. Mbuga maru mana latagi haga Aisaianagabi Yaremaianagabi Esegiele imarunaga luni wigi bida.

Mana latagi haga Hosea ibu Isaraele dindi uyurahayagi mani bulebirarunaga mbiwia halu bi mana latagi haga bialu heagola ogonongi Asirialime Isaraele dindiha wai bialu wali agali dindi andabi bo gialo bagabu waholene kaware wiagola genda tandagabi timbuniore ngelo dege hene.

Hosea ibugua bi irane kiranaga gilibu winigo nga. Bi mbiragome lalu Isaraele wali agalime Ngode Datagaliwabe yu wahalu gime wabini wiaruhondo bi pupu wialu mana ko dege mo tene halu pirimiruni wahalu mini beregedalu dai bidaba lowa bi hongo howa lenego gilibu nga. Bi mendegome lalu wali agali mbiralime ko bialu piyagua Ngode Datagaliwabe ibugua dara halu haru dai bule manda biaga ka leda.

Hosea ibuniha Ngode Datagaliwabe ibugua biagane mana ogoni ogobi lalu manane walia ka. Hosea oneme ibu agalini helalu agali mendela kayu yama penego irane Isaraele wali agalirume Ngode Datagaliwabe ibuni helalu puwa gime wabini wiaruhondo bi pupu wialu piyagobi Hosea oneme biyagobi dege ani bini. Ani biyagola mani howa Hosea ibugua ibu one lone haru dai binigo ogoni Ngode Datagaliwabe handa ibunaga wali agaliru dara halu haru dai bulebirarunaga manane walia hene. Ngode Datagaliwabe ibugua ibunaga wali agaliru gubalini timbuniore howa ti yu wanahaga ka lalu gilibu nga.

Be 11.8 Isaraelealiru-o ina tí yu wanaholebero. Tí helo wahalu napolebero ... Ina tí gubalini timbuniore ho kogome tí mo ko nahole, Ngode Datagaliwabe handa ani lene.

#### **Bulu бага бува кuni gilibu ngago (1.1-3.5)**

Hosea ibugua Gome dabu buwa waneigini henego 4.1-13.16

Isaraele wali agalime ko bialu hearia Hoseahanda talinigo 14.1-9

Isaraele wali agalime mini beregedalu Anduane Homogo ibuni karia dai bulebira, lalu Hoseahanda mbiwia halu lenego

<sup>1</sup> Usia Yodama Ahasa Heseгаia imaru ti Yuda dindiha kini haga binidangi Yahoasa igini Yaroboama ibu Isaraele dindiha kini hene. Ogonongi Anduane Homogohanda Beri igini Hoseahondo bi ogo lamini.✧

#### *Hosea oneme waneigini taba heneneго ogo*

<sup>2</sup> Piganeore Anduane Homogohanda Isaraele wali agali bi lamilonaga Hoseahondo ogodagua lene. Inaga wali agalirume inihondo bi lalu ha nabi tigua gime wabini ngaruhondo bi pupu wialu uruninaga mini yaraga halu karuni agali onerume ti agalini helalu agali mendela kayu yama poralidagua bialu kagoni. Ogodagua bulebira lalu walia holenaga ai ina wali mbira dabu bule pu. Mani í one ogoni agali mendela kayu yama polebira. Ani biragola ibunaga waneiginirume nde ogonidagua dege bialu wali agali kayu yaga holebira, lalu lene.

<sup>3</sup> Ani laya handala Hosea ibugua Dibilaimi wane Gome dabu buwa mani Gome ibugua igiri mbira taba henene. <sup>4</sup> Ani biyagola Anduane Homogohanda Hoseahondo lalu, Ina igiri ogoni ibu mini Yaserili wibe. Irane Yihu ibugua Isaraelenaga mamali kini kira bamba dindi ogoniha bo wahenego manda bialu dindi mini ogoni wibe.

✧ 1:1: 2 Kin 14.23-29, 15.1-7, 15.32-38, 16.1-20, 18.1-20.21, 2 Bit 26.1-23, 27.1-8, 28.1-27, 29.1-32.33

Ai ina áyu Yihunaga aguanene Isaraelenaga kini karunihondo mana lalu pani mule ngo. Ani berogola maniorebi Yihunaga aguanene uruni aria mbira Isaraele wali agalinaga kini lone naholebiraore.✠ 5 Wai birangi ina Isaraele ami agali wai bule dindi Yaserili ogoriani tidiyu pialu karia ina tinaga hongo bo podai holebero, lalu Anduane Homogohanda ani lene.

6 Emene howa nde Gomehanda wandari mbira taba henene. Ani taba hono berearia Anduane Homogo ibugua Hoseahondo lalu, Wandari ogoni mini Ina Gubalini Nahe wibe. Ani larogoni irane ina Isaraele wali agaliru gubalini nahe howa tinaga ko biyaruni lone nadomoleore lalu laro. 7 Anigo ina Yuda wali agaliru dege gubalini ho kogoni. Ini Anduane Homogo tinaga Ngode Datagaliwabe kogo inime ti biamogo bulebero. Ina ti wai bialu danda timu ayu tiburumebi nogo hosini ami agali wai biagarumebi ndo. Ina ti biamogo bulene hariga tara mende ngelowa kogoni, lene.✠

8 Emene howa wandari Ina Gubalini Nahe biago ibu emene anda halu andu wahayagola Gome ibugua igiri mende taba henene. 9 Ani taba hono bereagola Anduane Homogohanda Hoseahondo lalu, Ina igiri gali ogoni ibu mini Inaga Ndo wibe. Irane Isaraele wali agali ti inaga ndo kagoni. Ibi tinaga Ngode Datagaliwabe ndoore kogoni, lalu lamini.

### *Isaraele wali agaliru mani bayale holebira lalu mbiwia henego ogo*

10 Mani howa nde Isaraele wali agali dewaore daga labe nahe ibamu ngaligobi holebira. Áyu Ngode Datagaliwabehanda tihondo lalu, Tí inaga wali agali ndo kamigoni, leda. Anigo horo mbira tagira ibirangi ibugua tihondo lalu, Tí Ngode Datagaliwabe haluheore kagonaga waneigini kami, lolebira.✠ 11 Ani bialu Isaraele hameigini Yuda hameiginila mani mo mbiraore halu hameigini mbiraore holebira. Mo mbiraore halu tinaga haru haga agali mbiraore hangu dabo helalu manabi biabebi tigua bulebiraru bibahende bayale hai holebira. Ti bayaleore Ngode Datagaliwabe ibunime mabu hengene ale holebira. Heneneore Anduane Homogohanda biabe ogoni birangi Yaserili ibunaga horo ogoni timbuni gibiore holebira.

## 2

1 Ani howa Isaraele wali agali ti aria karuhondo bi ogodagua lalimu. Tí Ngode Datagaliwabenaga wali agali kami. Tí Anduane Homogohanda Gubaliniore Henego kami, lalimu.

### *Gomehanda Hosea wahalu penedagua Isaraele wali agalime Ngode Datagaliwabe yu wahenego ogo*

2 Inaga waneiginiru-o. Tí aija ibu i one ndo beda. Ibi nde ibu agalini ndo kogoni. Anigo ai ibugua agali kayu yama ibaga bialu bedagonaga wahabe lalu hongo howa lamilimu. 3 Ibugua mana ogonibi bialu bedago wa nahayagua nde ina ibunaga aga bidaru tongolo wahai howa ibu aiyahanda taba hanayangi aga nabi taba hanayadagua ina ibu tibabe ibagabu berelarogola taga timbuniore halu birulebira. Ani buwa ibu mo ko halu dindi koore mbirale mbira anda habe nahe wiraligobi wialu dindi ko yobi iba nolenebi nawiha berelolebero. 4-5 Iibunaga waneigini bedaru ti agali kayu yule taga nahaga wali ogoninaga waneiginidagola ina ti dara howa biamogo nabulebero. Wali biagoni ibugua lenego ogo, I agali maru ini hameledoru talima polebero. Agali uruni tigua i tomo ibabi aga bulenebi ngialu ira olibe lini ibanebi waini ibabi hambu ngiaga, lene.

6 Ani biragola ina wali ogoni ibu ira anihe karu dibuwa urunime pabe bu yandaho berelolebero. Ibu hariga polobadagoha pabe bu pai harogola ibugua agali uruni karia pole tagira pobe nahe holebira. 7 Ibugua gerai lalu agali uruni karia pole puwa ti kagoria

✠ 1:4: 2 Kin 9.1-10.36 ✠ 1:7: 2 Kin 19.35, Seg 4.6 ✠ 1:10: Pig 32.12, Hos 2.23, Yo 1.12, Lm 9.26, 1 Pi 2.10, 1 Yo 3.1

napolebira. Wali ogoni ibugua ti taya bima pu polebirago handa walia naholebira. Ani buwa ibugua lalu, Abale i bayaleore berenego. Ai áyu bira ko kogonidago i agalini pigane pirugo ibuni karia dai buliya, lalu lolebira, lene.

<sup>8</sup> Ai inime ibu tomo nolenebi waini ibabi olibe lini ibanebi muni ngolo silibabi dewaore miai harugo ibugua yu howa i mitangi nabi ibu mbirale uruni bibahende gime wabini mini Balahondo bi pupu wima poragoni. <sup>9</sup> Ai nde mabuha tomo nolene tu haragola tomobi waini ibabi bibahende ina mirugo mo yu dai bialu ibu aga bilo mirurubi bibahende mo yu dai biai holebero. <sup>10</sup> Ina ibunaga aga bu henedaruni agali ibuni dimagoli haralirunaga deni howa golo wahai howa aga nabi tibabe pelolebero. Ani berogola agali mbirame ibu mo wialu biamogo nabibehe holebira. <sup>11</sup> Ina ibunaga horo tara ibuni turu howa tomo nalu biragadaru bibahende mo wahai holebero. Horo timbuni ibu turu ho hagadaruni lotu lagane horo timbuni mali mbira mbirangi hagarubi ege mbira mbirangi hagarubi Sabada mbira mbirangi hagarubi ibunaga lotu laga horo bibahendeore mo wahai holebero. <sup>12</sup> Pu mbira lini daga mini gerebi karubi poge karubi uruni bibahende agali ibugua dimagoli howa kayu yaga biarume ini tihondo mirugonaga yolo ngini lene karu mo ko holebero. Ibunaga mabuha pu ogoni gerebi lini daganebi lini dagane ira tara tara karubi bibahende nogo gabua karume dugua hai halu embera ibilolebero. <sup>13</sup> Ibugua i embeda halu bi pupu wule gime wabini mini Bala anda heagoha puwa ira hagua ngabilo mini inisenesi delayagonagabi aga karulalu yári tara tara bialu agali ibuni dimagoli hagaru heagoha piyagonagabi ina ibu mana lalu genda timbuniore ngago yu helo mulebero, lalu Anduane Homogo ina bi o ledogoniore, lene.

*Anduane Homogohanda ibunaga wali agali gubalini henego ogo*

<sup>14</sup> Anduane Homogo ibugua bi yobage laabo halu lalu, Ai ina wali ogonihondo bi bayale lamialu dindi ko wali agali nahaga ngagoha lone haru dai bulebero. Ani buwa ibu mo gede howa bi lalu ina iore gubalini ho kogoni lolebero. <sup>15</sup> Ibunaga mabuni gerebi lini dagane ala heneru lone ibuni helo mia dai bulebero. Ani bialu dindi mini Ulini Genda Tagira Ibagu biagoria ai mbirale bayale dindi ogoniha howa tagira ibule biarua lowa mini dunubia howa hondo holene wulebira. Dindi ogoniha howa ibugua inaga bi abale ibu wandari emeneni Iyibi dindi howa haru tagira ibirugola hale halu berenedagua lone hale howa talialu holebira. <sup>16</sup> Ani howa ihondo lalu, I agaliniore i kegoni, lolebira. Ibugua i dama mini Bala ale degedalo manda buwa lalu, Bala i timbuni inaga anduaneore kegoni, nalolebira. Ibugua embeda halu wahai holebira. <sup>17</sup> Ibu Balanaga mini lone lelo ina ibu yupe naholeberoore.

<sup>18</sup> Ani bialu ogoningi dege ina ema bialu piaga bedaru bibahendebe ega bedarubi urunime inaga wali agali bu karu mo ko nahelo inime ti heba habo nalolene bi mbira wiaabo helo lo wulebero. Inaga wali agaliru tinaga wai biaga ayu tibu ne gadelebi timu yandarebi bibahende mo wahai halu ti gi nahe embeda howa bu miniha dungulo holebira.

<sup>19</sup> Isaraele-o iore i one henene biraabo habelo berelolebero. Ina i gubalini halu ihondo mana bayale tigabi ngaru dege bialu haabo kogola i ininaga biraabo holebere. <sup>20</sup> Ina habo nalolene bi hongohe wiaabo helonaga lo wirugo manda bialu i ininagaore biraabo habelo berelolebero. Ina Anduane Homogo i hangu henedane hondolebere. <sup>21-22</sup> Ogoningi ina inaga Isaraele wali agalirume ihondo bi larago hale holebero. Ina tinaga dindiha iba dalu ibilarogola tomo bayale anda haga bialu ladi ale mini widibi gerebi linibi olibe linibi lini do naga uruni dewaore dolebira. <sup>23</sup> Ina inaga wali agali dindi ogoniha helarogola ti mabu bayale inime hengene ale holebira. Ala bamba ti Gubalini Nahe kogoni laruligo ai mani howa ina ti gubaliniore holebero. Bamba ina ti Inaga Ndo kamigoni laruligo. Mani ti inaga wali agaliore kamigoni, lolebero. Tigua

nde, Inanaga Ngode Datagaliwabe íore kegoni, lolebira, lalu Anduane Homogohanda lene.✠

### 3

#### *Hosea ibu one ko biaga biagola binigo ogo*

<sup>1</sup> Anduane Homogohanda íhondo lone ogodagua langiya. Ai í one agali mendela kayu bima ibaga bialu bedagoni ibuhondo lone gubalini hole pobe. Inaga Isaraele wali agali tigua í yu wahalu gime wabirinuhondo gerebi lini do gembe biniru loma mule yalu piagaru ti ina gubalini haho wiaabo kogonidagua í oneore gubalini habe, lene.

<sup>2</sup> Ani layagola ina muni kina ale handari mbirani pira duriabi (K150) ladi ale mini bali mbege nu waragariamebi wali ogoni lone yolo biru. <sup>3</sup> Ani buwa wali ogonihondo ogodagua laru. Ai í oneore bedegonigo iya haru mandagi napalibiya. Í agali taya bima nape yamo luore birabe. Ina nde í ago berebe hondole mamage holebero, lalu wali í one biago lamiru. <sup>4</sup> Ai ogonidagua dege Isaraele wali agali tinaga kinirubi haru hagarubi mbira nahe howa ti luore maliaho holebira. Tigua bi pupu wule lowa ira mbira hanga ho helowabi ege tole mbira hanga ho helowabi urunihondo bi pupu nawulebira. Tigua gime wabini urunihondo mani bulebiraru hondole halaga biaga winirubi áyu nabulebira. <sup>5</sup> Isaraele wali agali tigua urunidagua bialu howa Anduane Homogo tinaga Ngode Datagaliwabe kahayagi dai buwa ibu mitangi bialu lotu lolebira. Tigua Kini Debidinaga aguanene mbira holebirago ibu kagohabi dai bulebira. Ani bialu howa tigua Anduane Homogonaga andaneha howaibunaga bi hale halu kagola ibugua nde ti bayale helonaga mbirale tara tararu migi bulebira.✠

### 4

#### *Anduane Homogohanda Isaraele wali agaliru manani helowa dabeneo ogo*

<sup>1</sup> Isaraelealiru-o Anduane Homogohanda wali agali dindi ogoniha karuhondo bi hongohe laede hole kago ibugua bi larago baya hangu hale hadaba. Bi ogodagua lara. Wali agali dindi ogoniha karume bi henene loleneo tiha manda nabi howa ke timbuni halu tinaga damene karuhondobi gubalini nahaga kagoni. Tinaga Anduane Homogo í hangu kogoni manda buwa la nabiaga ka. <sup>2</sup> Tigua buleore lalu hongo howa lo winiru talialu bia nabiaga kagoni. Tigua ke halu puwa agali homelo ba mendealinaga mbirale ngaru mo page bia wali agali kayu bigi bialubi wali agali maru karu homelo bame bo wahaga bialu kagoni. Mana ogoni bia timbu haragonime <sup>3</sup> dindi ogo lebola halu ko holebira. Ani ko haragola dindini ema bialu piaga bedarubi ega bedarubi iba wena bedarubi bibahende homaioire holebira, laragoni, lalu Hoseahanda lene.

#### *Anduane Homogohanda loma binigo mo miaga hearuhondo keba howa ti baba manani dabeneo ogo*

<sup>4</sup> Anduane Homogohanda laabo halu lalu, Agali mbirame wali agali manani helolene irane nawini howa áyu ti godini kagoni tene loma binigo mo miaga kamiruni tíha nga. <sup>5</sup> Horo bibahendengi tigua biabe bialu howa bayuwa nabi bia ko haabo harimi. Ngode Datagaliwabenaga bi mana latagi haga karume tibi nde ani dege biaga. Ani birimigome Isaraele wali agali bibahende tinaga aiyá biraradagua bedamigo ina mo ko holebero. <sup>6</sup> Inaga wali agali tigua í manda nabi kagome tiha mo ko holene wulebira. Loma binigo mo miaga kamiruni tíguabi nde inaga bi mana hale nahe mo waharimigoni. Anidagua birimigonaga ina tí talia tagi halu tinaga iginiru inaga biabe bia halu loma binigo mo miaga naholebira.✠



<sup>7</sup> Loma binigo mo miaga kamirume mana ko ngaru dewaore bialu kamigoni. Áyu tí mini lene kamigonigo mani ina tí bope harogola tígua taga timbuniore halu holeberami.\* <sup>8</sup> Inaga wali agalirume ko biyaruni tinaga tomoya. Aniyagola tígua wali agalime mana ko dewa bilo hame laga kami. <sup>9</sup> Ai wali agali ti genda timbuni yu halu loma binigo mo miaga kamiru tíbi nde wali agali heba pani namaga holeberamiore. Mana ko nabulene wiago tígua birimidagonaga ina pani tíhondo ngule kogoni. <sup>10</sup> Ngode Datagaliwabhondo tomo bayale minigo tíni nolene ngaru nalu kamiria tombe naholebira. Ani bialu howa tígua gime wabiniruhondo bi pupu wialu waneigini dewa helonaga werama lalu howa wirimiyagua tinaga waneigini naholebira. Irane tígua i helo wahalu puwa gime wabiniru talima pirimigonaga anidagua bulebira, lalu Anduane Homogohanda lene.

*Anduane Homogohanda mbirale gime wabiniruhondo bi pupu wiaga hearu tandaga nelo minigo ogo*

<sup>11</sup> Anduane Homogohanda lalu, Lulu iba hongohe tara tara bu ngarume inaga wali agalinaga mini mo ba tara halu mo luluya kagoni. <sup>12</sup> Anidagua bialu howa tigua ira tilini karuhondo bi wia do hene mbira langi lowa hale haga ka. Ayaliore-o tigua manda bialu karia ira gaibu wahene uruni aleme heneneore bi do hene mbira ti hale hoa kago langulubadalo manda biaga ka. Tigua i yu wahalu puwa walime agali kayu bima ibaga biagadagua ti mbirale tara tarahondo bi pupu wima pene. <sup>13</sup> Tigua hari nene wali agali ta nabi napiaga ngaruha puwa ira timbuni karunaga teneha gumba bayale kagoria turu howa tigua lomarubi ira hagua ngabilo mini inisenesirubi ogoriani delaga bialu ka.

Anidagua bialu kamirume tí wane bedaru habane nabulene hariga wali biralu tí aruni bedaruni agali kayu biaga wali birulebira. <sup>14</sup> Anigo tigua urunidagua biragonaga ina ti pani namulebero. Irane tinibi nde agali kayu biaga wali bedaru baba mandagi agali gime wabinirunaga anda kagoha puwa lomaru mialu hemigoni ndobe. Ai bi tigabi mbira ogodagua gilibu ngago. Wali agali mini nawiore kamiru tíha mo ko holene timbuniore wulebira, lalu gilibu nga.

<sup>15</sup> Isaraele wali agali tíore walime agali kayu bima ibaga biaga ale halu i yu waharimigoni. Anigo ai Yuda wali agali kamiru tíbi nde pani noligo mana ogonidagua nabilimu. Tigua Giligala dindinibi Bedabene dindinibi lotu ke howa lole napilimu. Dindi kira ogoniha howa Anduane Homogo haluhe ininaga minini mbirale mbira bule lalu bi nalo wilimu.\* <sup>16</sup> Isaraele wali agali tinaga embone giambe hayago áyu ti nogo dongime mine halu gabua hagagobi kagoni. Ai ina ti agalime nogo sibi igini tani bayale nelu bayuwa haru hagadagua agua haru holiyadabe. <sup>17</sup> Isaraele wali agalirume ti mbirale tara gime wabini uruni talima piaga kago wahalu ani helo waha. <sup>18</sup> Wali agali marume tigua birago handayadalo manda nabiaga ka. Ti mini lene hearume abale mana ko ngubi tagabi ngaru hangu bule hame lalu pora biaga. Ogonidagua bule howa lulu iba dewa nalu lulu yalu puwa wali kayu bima ibaga biaga.

<sup>19</sup> Anigo hale hadaba. Uruni bialu karia puwa puyabu hongohe ibalu durumbu ngaru hilo wahagadagua ina ti balu purogo lelarogola mo ko henego purogo lolebira. Ani biragola tigua gime wabini biaruhondo loma mialu hayaru mitangibu dai bialu tini taga emene ndo halu holebira, lalu Anduane Homogohanda lene.

## 5

<sup>1-2</sup> Loma binigo mo miaga kamiru-o bi o larogo hale hadaba. Isaraele wali agaliru-o tíbi bayuwa hale hadaba. Kini aria kamiru tíbi hale hadaba. Tigua wali agali manani tigabi dabolene wiadagua ndo dabalu kamigo. Ani birimigome tíni manani holene

\* **4:7:** 1 Sml 2.30, Hos 13.6, Mal 2.9, Pb 3.19      \* **4:15:** Bedabene mini ogoni inanaga bi lalu, Mana konaga anda, leda. Dindi ogoni mini tene Bedele winigo inanaga bi lalu, Ngode Datagaliwabenaga anda, wini. Anigo Isaraele wali agalirume ko biyagola Bedele dindi mini wia aribia halu Bedabene wini.

nga. Loma binigo mo miaga kamiru tigua Misiba tanonibi Hari Tabo nenenibi Sidimi tanonibi lotu henene letingi howa wali agali mo guya harimigoni. Tíore mini ohe bogabi howa wali agali minule gono alebi wena nu alebi kamigoni. Ogonidagua bialu kamigonaga ina tí bibahendeore pani ngiai hole ngogoni. <sup>3</sup> Isaraele wali agaliru tigua beremiligo ina manda biai kogo. Ai ina de nahondoliyanaga tíore bira do holene mbira nawiore kamigoni. Tí walime agali kayu bima ibaga biaga bedaligobi howa inaga deni tí dodohe koore kamigoni, lalu Anduane Homogohanda lene.

*Isaraele wali agalime Anduane Homogo heba lone mandagi habe nahe henego ogo*

<sup>4</sup> Isaraele wali agali tigua mbirale gime wabiniruhondo bi pupu wialu howa Anduane Homogo yu wahenego ka. Mana ogonidagua bialu piyagome tininaga Ngode Datagaliwabe ibuni karia lone dai bibe nahe kagoni. <sup>5</sup> Isaraele wali agali tini mine haragome tini pani nolene nga. Mana ko tigua birarume tini mo pila halu Yuda wali agalibi ti heba pilamaga halu ka. <sup>6</sup> Tigua nogo sibi bulumagaru Anduane Homogohondo bo lomabu delagago urunibi bame dege mialu ka. Irane Anduane Homogohanda ti yu wahenego ibu heba mandagi habe nahe ka. <sup>7</sup> Walime ibu agalini wahalu agali kayu bima ibaga biagadagua Isaraele wali agali tigua Anduane Homogo yu wahenego ka. Anidagua biragome tinaga waneiginiru tibi tinaga aba Ngode Datagaliwabe kago manda nabiaga ka. Anigo ai emene howa ege pigane ngabu laragola tinaga waitigirume ibuwa wai bialu ti mo ko halu tinaga dindi anda bo giallo bagabu wahalu mo labu holebira, Hoseahanda lene.

*Isaraele Yudala wai binigo ogo*

<sup>8</sup> Beniyaminialiru-o tí hameigini Gibeaa dindibi Lama dindibi Bedabene dindibi uruniha karu heba tí bibahendeme mbelo biguli pu lalu hongo howa wai huario ladaga halu wai bule gerai lalu pudaba. <sup>9</sup> Ani beramigola horo ogoningi dege Isaraele wali agali tí mo ko howa balu bo poda hana holebira. Ani bulebira lalu ina tihondo heneneore langerogoni, lalu Hoseahanda lene.

<sup>10</sup> Anduane Homogohanda lalu, Hale hadaba. Yuda wali agali haru haga karume Isaraele dindiha anda ibuwa dindi maru ti page bialu karulo kagonaga ina keba ho kogoni. Tigua anidagua biyagonaga ina iba li timbuni ibalu mbirale bibahende ngaru hilo yalu piagadagua ti mo ko halu bo hilo waore holebero. <sup>11</sup> Isaraelealiru ti mini dege dindiho kagoni irane Yudalime Isaraele bo hilo wahayagola tigua kini tara maru hearume ti biamogo birabe toba howa pialu hearia kini uruni ti hongo naheyagola biamogo bibe nahe hene. <sup>12</sup> Timamume mbirale nagadagua ina Isaraelealibi Yudalibi bibahende mo ko holene ibilolebero, lalu Anduane Homogohanda lene.

<sup>13</sup> Anduane Homogohanda lalu, Isaraelealiru tiha warago timbuni tagira ibiyangibi Yuda tiha dere tara tagira ibiyangibi Isaraelealirume Asiria dindiha puwa kini timbuni heagohondo ti biamogo bia lole pene. Ani pialu hearia Asiria dindinaga kini timbuni ogoni ibugua tinaga warago bayarubi dere biarubi mo dabi habe nahe hene. <sup>14</sup> Ai áyu hongohe mbira budi gabua timbuni laiono ale howa ina Isaraele Yudala baba wai bialu ti bo giallo bagabu wahai holebero. Ani bialu ina ti bo gililo yalu pu waharogola mbiralime ti biamogo bulene naholebira.

<sup>15</sup> Inaga wali agali uruni tigua ko biyarunaga pani tandagabi nalu ka handala ti wahalu ini dalu dai bulebero. Tigua i hai bialu talima ibilo ani bulebero. Ani biragola ti tandaga ndelaheore nalu howa ini kogoria dai bulebira, Anduane Homogohanda lene. ✧

## 6

*Isaraele wali agali tigua Anduane Homogo karia dai bule lalu bi henene ndo lenego ogo*

✧ 5:6: Ais 1.15, Yar 14.12, Ese 8.6, Mai 6.6-7 ✧ 5:15: Iba 50.15, Ais 64.7-9, Yar 2.27, 3.13-14

<sup>1</sup> Isaraele wali agali tigua lalu, Abaleore Anduane Homogo karia lone dai bima nalarami. Ibugua ina mo ko hayagoni howa dege ai ina lone biamogo bulebira. Ibugua ina ba nde bayagonigo ai lone inanaga dere bidaru kabu bia holebira ndobe. ✧ <sup>2</sup> Horo kiru tebiru agima pedagola nde ibugua ina lone mo heya haragola howa ibunaga wanakuini mandagi bayale holeberama. <sup>3</sup> Anduane Homogo ibuniore ka manda bule iname hongo hamiya. Egerebagi ni tagira ibiraligo manda bialu iba dalungi dalu dindini ibira haraligo manda bidamagoni. Ai manane ogonidagua dege Anduane Homogohanda ina biamogo bule ibulebiraorelo manda bidamagoni, lene. ✧

*Anduane Homogohanda wali agalihondo bi ladai binigo ogo*

<sup>4</sup> Anduane Homogohanda bi ogodagua ladai bini. Ai Isaraele wali agalibi Yuda wali agalibi ina tihondo agi buliya hamelo kamibe. Tigua i gubalini howa dege gubalini haho wiaabo nahe ginu hagua egerebagi wialu emene howa pu ereba haralidagua bialubi datani karunaga egerebagi dadimba bedaru ni daragola yo biralidagua bialubi tigua abale i yu waharamiligoni. <sup>5</sup> Tigua ani birimigola ina inaga bi mana latagi haga maru dabalu tigua ko birimirunaga tigua maname dabowa pani tiniha genda tagira ibalu mo ko holebira lole pudaba laga biruligoni. Ai ina bi laruruni bibahende hale hai howa tigua ogoale bulumaya ina hamelo heneda lalu tinime manda biai kamigoni. Uruni waleore langiru. Galone uruni ogodagua bulene nga laro. <sup>6</sup> Tigua mbirale loma buwa bo delaramiligo ina turu nahe kogoni. Anigo tigua iniore hondowa manda bialu gubalini haabo halimulo dege hamelo kogoni, lene. ✧

*Anduane Homogohanda wali agalihondo bi ladai binigo ogo*

<sup>7</sup> Anduane Homogohanda Hoseaha howa latagi halu lalu, Wali agali uruni tigua iba Yodana Adama tano wiagoria howa domalu orayagi dindi ina mirugoha ibini. Ani ibu howa ila habo nalolene bi pongo bo wiribago habo laya. <sup>8</sup> Gileada tanoha agali ko biagabi mendeali homelo bo wahagabi bibahende tano ogoniha ho toleda. <sup>9</sup> Loma binigo mo miaga karu ti mo mogo buwa pagealime biagadagua bialu hariga obeneni bira do howa mbirali harigani bolangua halu poraru minu balu mbirale yalu poraru mo page biaga ka. Ani bialu tigua wali agali Segeme tanoha Anduane Homogo mitangi bialu lotu laga ngaruha pole poraru harigani yu biruwa homelo bo wahaga biaga ka. Anidagua biagago ti agali koore ka. <sup>10</sup> Mana ko engengebiore mbira Isaraele dindiha tagira porane ina hendedogo ogo. Inaga wali agali bu karume mbirale dama mitangi bialu gime wabini ngaruhondo bi pupu wialu kagome ininaga deni ko ogoni biragome tini mebia halu kagoni.

<sup>11</sup> Yuda wali agali tibi nde mana ko ogonibi dege bialu kamigonaga pani nalimulo ngule lowa horo manda manda bu wirugo tagira ibilo kogoni.

## 7

<sup>1</sup> Ina Isaraele wali agaliru lone biamogo buleberogolabi ti mo bayale holeberogolabi tigua mana ko hangu bialu karia handalu haabo kogoni. Tigua tininaga damene karu mo hondo haga bialu tinaga anda bangulalu anda puwa dabudabu ngaru mo page biaga ka. Ani bialu tigua wali agali tinaga dabudaburu yalu tanoha hariga pedadagua pialu karia uruni minu balu mo page biaga ka. <sup>2</sup> Ina tigua mana ko bialu hayadaruni embeda naholebero. Anigo ina ogoni bulobodago ti manda nabiaga ka. Mana kome tini bu dambiho ngagola tinaga ko ngagoni hondo dege ko, lalu Anduane Homogohanda lene. ✧

*Tigua mana ko bulenaga bi lo ngago ogo*

<sup>3</sup> Anduane Homogohanda lalu, Wali agali marume mana ko tara tara ngaru bulenaga bi lo mbira halu tinaga kinibi tinaga agali haguane bu karubi bibahende mo hondo halu

✧ 6:1: Man 32.39, 1 Sml 2.6, Yar 30.17 ✧ 6:3: 2 Sml 23.4, Iba 72.6 ✧ 6:6: 1 Sml 15.22, Yar 22.16, Mai 6.8, Md 9.13, 12.7, Yo 17.3 ✧ 7:2: Iba 9.16, 90.8, Yar 17.1

ke haga ka. <sup>4</sup> Ti ke hagane agali howa tigua kini baba mini mbiraore ho hetingi haga ka. Ira dene emene mbira hungu bialu hagagobi tinaga miniha keba holene wia do howa tingini daligaha bayale hetingi haga ka. Mberedi hiraga agalime mberedi iraga halu timbu helo wabu ngelowa ira dene delo manda manda biaga. Mberedi ibu timbu halu iraga haragola ira dene delo manda manda biyago pulope haragola ira da timbu haga. Tinaga keba holene manane ogonibiore nga. <sup>5</sup> Kini ibugua tomo timbuni dawarangi agali uruni tigua kinibi ibunaga agali haguane bu karubi waini iba dewa nelu hambu miaga ka. Ani miragola kinibi ibunaga agali haguane biarubi waini iba dewa nowa luluyu biraga. <sup>6</sup> Agali uruni tinaga miniha mana ko bulene ege tole kundibi ale do ho biraga. Mbiraga u padaha agalime mberedi hiraganeha ira delayago emene dege dowu hagua bu wiagadagua tinaga mini ogonibi wiaga. Ani wuwa egerebalene egabi laragola tinaga mini lone hungu bialu da timbu hagagobi wiaga.\* <sup>7</sup> Agali ko biaga urunime kini mbira mbira karubi tinaga agali haguane karubi bibahende bo wahaga biaga. Mana ko ogoni ti daluha ngelo howa mbiraore hangumebi ihondo bi lalu biamogo bia naleore haabo harimi, lalu Anduane Homogohanda lene.\*

*Dindi tara taraha hearume Isaraeleali ti biamogo bulubada manda bu henego ogo*

<sup>8</sup> Anduane Homogohanda ogodagua laya. Isaraele wali agali ti wali agali dindi tara taraha karu baba hamagamaga bu howa tinaga mana tara uruni biaga wiago dege biaga ka. Ani bialu kagome tinaga mana ko mberedi dindiha dapene daligahayagi nade gahenge ngaligobi biaga ka. <sup>9</sup> Mana ko urunime Isaraele wali agali tininaga hongo bope hene kago manda nabi bayale dege kamabe tobaho haga ka. Ti wali agali abale wahe halu hongo nahe bu karubi dege howa manda nabi dege kagoni.\* <sup>10</sup> Isaraele wali agali tinaga mine holene ngagome tini godini helaga ngagoyu tini bu mini beregedalu Anduane Homogo tinaga Ngode Datagaliwabe ini kogoha dai nabi haabo ka.\* <sup>11</sup> Isaraele wali agali ti ega odahe pogola ai nai bima piagagobi ka. Pigane Iyibialirume ti biamogo bilo hale hole pirimigo pialu mani Asirialirume ti biamogo bilo ibu lole pirimiya. <sup>12</sup> Ani bialu ti ega ale howa yagalalu porangi ina ti gono bape halu minu yania holebero. Ani birangi tigua mana ko ala binirubi ayu bialu karubi ogoninaga ina mana lalu abale bolebero.

<sup>13</sup> Hale haramine. Tíha mo ko holeneore wulebira. Tígua i erembira ngialu yu wahalu pu kamigo tí homalimulo boleneore wulebira. Pigane ina tí biamogo bulene manda bu hewaria tígua ihondo ke dege halu pirimi. <sup>14</sup> Tígua ihondo bi ke howa lalu kami. Ani buwa tígua i ka manda nabiaga karume lagadagua dindini bulu paluwa dugu bialu bi laraga halu biaga kami. Tígua ihondo tomo waini ibaru ngi lalu bi lole howa Anduane Homogo manda nabiaga karume biagadagua tinaga tingini daruma ibilo podaga kami. Ani bialu i erembira ngialu piaga kami. <sup>15</sup> Heneneore inime tí mo bayale halu hongohe helewagola tígua ihondo mana ko dege bule manda bu haga harimi. <sup>16</sup> Tíha mo ko holene anda ibirangi tígua ihondo biamogo bia lole naibaga kami. Tígua mbirale damanaga hongo nahe biamogo nabibehe ngagoha dege piaga kami. Danda kome timu bako haga ngaligobi kami. Tinaga agali haguane karume mine howa bi lalu, Iname inane biamogo bialu inanaga waitigiru bope holene hongohe karulape kama, laga ka. Anigo ti waiha homai haragola Iyibiali karume ti hondo oba holebira, lalu Anduane Homogohanda Hoseaha howa ani lene.

\* **7:6:** Bi te ogoria gilibu ngagoni agali ko biaga marume bialu heago hondowa lene holebira. Anigo ayu iname ogoale binida lo manda bibe nahe kamagoni. Mberedi wabiaga layago agali uruninaga haru bamba haga heago lalu manane lene holebira. ☆ **7:7:** Iba 14.4, Ais 9.13, Hos 7.16, Seb 1.6 ☆ **7:9:** Ais 1.7, Hos 4.6 ☆ **7:10:** Hos 5.4-5, 7.7, 7.14

## 8

*Isaraealirume mbirale gime wabini wiaruhondo bi pupu winigonaga Anduane Homogohanda pani mulebero lenego ogo*

<sup>1</sup> Anduane Homogohanda lalu, Wai bu polenaga mbelo biguli puladaba. Ega bodo hariawe bedarume ibu naga ale bedagola minule abale yulope hagadagua ti waitigiru abale ibalu inaga andaha wai bule ibiragoni. Inaga wali agali tigua ina habo nalolene bi ti baba lo wirugo mo habo lalu inaga mana lo ngogobi mo wahai harimi. <sup>2</sup> Isaraele wali agali tigua ihondo lalu, I inanaga Ngode Datagaliwabeore kegoni howa ina nde inaga wali agali howa i manda bu kamagoni, laga kami. <sup>3</sup> Anigo tigua nde mana bayale tigabi ngaru yu wahai halu pirimigonaga waitigirume nde ti bo taluebira.

<sup>4</sup> Inaga wali agali tigua ihondo hale nahe howa tini hangume agali kini helo dabo helaga biya. Tigua tinaga agali haguanebi dabalulu ina karulape nakarulape loliya ihondo hale nahe howa dabo helaya. Tigua ngolo siliba wiarume dama mitangi bialu mbirale gime wabu ngelo ka. Anidagua biyagome tini bo waholene mo yuanda ibiya.

<sup>5</sup> Samaria wali agali tigua dama mitangi bialu bi pupu wulenaga nogo bulumaga wangabe ale ngolome wabu heledago i turu nahe howa tihondo keba timbuniore ho ko. Tinaga mana ko uruni abale yu wahelo hameledogo ai tigua angi waholobadabe.

<sup>6</sup> Isaraele agali mbira biabe ogoni biaga mugubeyi heagome mbirale dama mitangi bialu bi pupu wiaga ogoni wabu helaya. Ani biyago ai mbirale gime wabini ogoni ibu Ngode Datagaliwabe ndo bame bigiya ale hangu nga. Samarianaga dama ogoni nogo ale ngolome wabu ngago ina bo gingirulobaga berogola be abalu dege wulebira.

<sup>7</sup> Tinaga mana ko ngago emeneore puyabu pu laraligobi ngagoyu mana ogoniha howa tagira ibirago puyabu timbuniore humbirini wai ale hongohe ibalu wali agali bo paya biagagobi holebira. Ti mabuha widi egene hingedago lini bayale nade kuabu haragola mberedi wabulene balawa nawi ngaligobi holebira. Anigo widi ko urunime lini ko maru daga biyagua nde agali dindi taraha howa ibirarume do nelo waha. <sup>8</sup> Isaraele wali agali ti lone bayale holene nawiore. Ti hameigini maru dindi tara tarani bu karubi dege haya. Ti iba be pambulo wahene mbirale mbira bibe nahe ngaligobi hayagoni.

<sup>9</sup> Nogo dongime gabua halu pupe haralidagua bialu tinime hameledadagua bima pupe haya. Ani buwa ti biamogo bule ibidaba lalu Asirialiruhondo hale hole pialu dindi tara tara wiagoha kini bu hearuhondobi ti biamogo bule ibilonaga muniru migi biya.

<sup>10</sup> Anigo ina ayu ti haru mandagi mo mogo buwa minu baiore holebero. Emeneore howa Asirianaga kini kagome ti genda timbuni mo ya halu bope haragola Isaraeali ti emene mbira hangu holebira.

<sup>11</sup> Isaraeali tigua ko domo waholenenaga lomabu delaga dabu dewaore bu helolebi-rago nde tinaga lomabu delolobadaruni tiga nabiore wulebira. Ani wiragome tigua ko dewaore mo bia halu holebira. <sup>12</sup> Ina tihondo mana dewaore gilibu mirugoni. Anigo tigua ina mana gilibu mirudaruni de hondowa mana ogoni tara ale mbira wali agali tara karunaga winida lo manda bialu tigua talialu bia nabiya. <sup>13</sup> Tigua loma dewa ihondo bo lomabu delowa loma bo delayadarunaga mbirini tini naga biya. Anigo Anduane Homogo ina tinaga loma uruni hondowa turu nahe haru. Ani henego tigua ko bialu hayadaruni mitangi bialu ina pani mialu tiha mo ko holene ibilolebero. Ti Iyibi dindiha garabaya lone helo minu pelolebero.

<sup>14</sup> Isaraeali tigua tinaga kini bu karume ti biamogo bialu pele mulene hongo karulape yu kabe toba howa kininaga anda timbuniru bialu kagoni. Ani buwa tigua mbira dege i Anduane Homogo wali agaliru wabiaga kogo embeda ho wahaya. Yuda wali agali tiguabi wai pabe hongohe beremagome ti karulape holeberemabe toba howa tinaga tanoru wai pabe bu mabu biya. Ani biyagoyu ina tinaga tano ogoniha ira dene

✧ 8:7: Min 22.8, Hos 7.9, 10.12-13



hedope halu tanobi kininaga anda bu heledarubi bo heda hai holebero, lalu Anduane Homogohanda laya lalu Hoseahanda lene.✠

## 9

### *Anduane Homogohanda, Isaraealirume ko biyagonaga pani mulebero, lenego ogo*

<sup>1</sup> Hoseahanda bi ogodagua laya. Isaraele wali agaliru-o Anduane Homogo manda nabi karume biagadagua tígua ngoai holene horo wiabagi henego tagira ibirangi tí tomo dawa nalu lotu ke howa lalu turu haga beremiliru wahai halimu. Tígua Anduane Homogo tínaga Ngode Datagaliwabe kagohondo erembira mialu ibu talima nape waharimigoni. Ani buwa bayanda wali harigani bedarume agali kayu yama ibaga biagadagua tígua Ngode Datagaliwabe wahalu puwa dama mitangi bialu mbirale gime wabini mini Bala ngagohondo bi pupu wialu kamigoni. Ani beremigome wali kayu yayagonaga yolo mo yagadagua Bala ibugua tínaga maburuha tomo bayale mo anda holobabe toba haga kami. <sup>2</sup> Anigo tigimandi hangu howa tínaga tomobi olibe lininaga ibanebi biba halu waini ibabi ereba holebira. <sup>3</sup> Ani bialu Isaraele wali agali tí Anduane Homogonaga dindi ngiyagoria lu haabo naholeberemi. Tí Iyibi dindihabi Asiria dindihabi lone garabaya hole poleberemi. Dindi uruniha pu howa tígua tomo mbirale Ngode Datagaliwabehanda nanabe lene ngaru tanabi nalu holeberemi. <sup>4</sup> Tígua dindi taraha pu kamingi waini ibabi nogo ega taratarabi Anduane Homogohondo lomabu namuleberemi. Tínime dindi ogoniha howa tomo nanolene lo winigo naramigome mbirali homaragola dugu bialu howa tomo tanabi nanolene ngarubi na dege bialu Anduane Homogonaga deni ko ogoni bialu holeberemi. Tomo uruni tínaga tombe karulape helonaga dege nalu holeberemi. Tigua tomo uruni aria mbira Anduane Homogonaga andaha lomabu yalu napoleberemi. <sup>5</sup> Ani buwa Anduane Homogo mitangi bialu ngoai holene horo wiabagi henego tagira ibirangi tígua bulene mbira nawulebirago tí agi buleberemibe tobara. <sup>6</sup> Mani mo ko holene timbuni tagira ibirangi tí ibida piai halu purogo loleberemi. Ani beremigola Iyibiali bu karume ibalu tí Iyibi dindiha garabaya bu yalu piai holebira. Ani biragola tí Iyibiha haabo halu homaramigola tinaga tingini Iyibi dindiha tano timbuni mini Memebisi ngagoria hora haga bulebira. Ani biragola tí lone dai bulene henge nawi. Tínaga andabi muni silibabi dabudabu tara tara bayale ngamirubi bibahende mbiralime karulolene henge nawi uruni ngagoria ani tara tara timbunirume andaho dambi holebira.

<sup>7</sup> Anigo Anduane Homogohanda tígua ko birimigonaga pani ngulenengi hapara harago ai tígua ko bialu harimigonaga pani nolene wulebira. Mbirale uruni tagira ibirangi Isaraele wali agali tígua mitangi bialu tínaga yolo ko biago ibiyadalo manda buleberemi. Tígua ihondo langialu lalu, Anduane Homogonaga bi mana latagi haga ogoni ibu mini nawi ka loleberemi. Agali Ngode Datagaliwabenaga Dinini karule ogoni ibu luluda loleberemi. Wali agali tínaga ko timbuniore dewa bialu kamigome ihondo handabe mangaho kamigoni.✠ <sup>8</sup> Ngode Datagaliwabeibunimeibunaga wali agali tí kamirunihondo bi mana latagi hole i dabalulu pu laya. Ani pu laya handala ibirugoyu i dindi bibahendeha ibaga berogola ega gonoha ge dagadagua i hapai haabo halu kami. Ngode Datagaliwabenaga andaha pu kogola tí ihondo waitigi halu kamigoni. <sup>9</sup> Bamba tínaga mamalirume Gibeatanoha howa mana ko bialu henedagua tíguabi mana ko dewaore bialu kamigoni. Ani bialu kamigoni Ngode Datagaliwabe ibugua tínaga ko birimigo mandabu haabo howa pani ngulebira, lalu Hoseahanda lene.

### *Isaraealirume mana ko biyagobi konaga pani nolene ngagobi ogo*

<sup>10</sup> Anduane Homogohanda ogodagua laya. Bamba ina Isaraele wali agali tí handa walia harungi dindi ko iba dalu naibaga ngagoha pu mbira lini daga mini gerebi

bayale andaho howa lini dedaligobi hemiria handaru. Tínga mamali ala henedaru de hondowa ina ti poge lini dolene tu haragola lini pigane denego ale hearia handaru. Anigo mani Hari mini Peo heagoria pu howa tigua dama mitangi bialu bi pupu wiaga Balahondo turu halu bi pupu pigane wialu heagola tinibi nde ko Bala ogonibi dege haya.✧ <sup>11</sup> Egaru yagalo yu piagadagua Isaraele wali agali tinaga hongo ereba hai holebira. Tinaga wali bedarume waneigini gali taba nahonolebira. Wali gali bere nabirulebira. Waneiginibi nahono wulebira. <sup>12</sup> Anigo mbirali ibu waneigini mbira haga biyagua uruni homelo inime bo wahaga bialu mbira hangubi yu wa naholebero. Ina wali agali uruni yu waharongi ko tara tara nahendene ale ti kagoha ibulebira, lalu Anduane Homogohanda laya.

<sup>13</sup> Hoseahanda Anduane Homogohondo lalu, Anduane Homogo-o bamba Taia tano baya tara mbira winigo ainde áyu waitigirume ibalu mo ko hayiya. Isaraele dindihabi nde anidagua dege bulubada. Waitigi bu karume ibalu waneigini bu karu bo wahai holobada. <sup>14</sup> Ani bulubadago ainde ina Isaraele wali agali o biaruhondo agi buleberebe lalu hale haro. Ai wali bedarume waneigini taba honolilono mo wahalu maru waneigini andu mialu bedarunaga andu ibane mo ereba helabe laruyaguabi bayaledabe, laya.

<sup>15</sup> Anduane Homogohanda lalu, Bamba ti Giligala dindiha heangi howa tigua mana ko uruni tehinalu bialu haya. Ina ti handabe manga pigane ogoningi haru. Wali agali tigua mana ko dewaore bialu hayagonaga ina ti inaga dindi ogoria howa bo batagi holebero. Ina tihondo gubalini naholebero. Tinaga agali haguane bu karumebi inaga bi mana mo wahaga bialu ka. <sup>16</sup> Isaraele wali agali karu ti ira mbira pini gabu hai hene lini dabe nahe kaligobi tinaga waneigini nataba honolebira. Anigo mbirali ibu waneigini mbira taba hanayagua nde ina tinaga waneigini gubaliniore howa taba hono bedaru bo wahai holebero, laya lene.

*Hoseahanda lalu, Ngode Datagaliwabe ibugua wali agalihondo erembira mulebira, lenego ogo*

<sup>17</sup> Hoseahanda lalu, I Ngode Datagaliwabenaga biabe biahaga howa ibunaga wali agali ibu talia nabi karu ibugua ti erembira mialu waharagola ti dindi tara taraha purogo lalu bame ibagabu holebira.

## 10

<sup>1</sup> Ala Isaraele wali agali ti pu mbira lini daga mini gerebi bayale liniru dewa daga kaligobi howa mbirale dewa wu hene. Tinaga dabudabu bayale uruni dewaore wia tago haabo halu gerebi lini bayaleru dewa dedaligobi hene. Ani howa tigua mine halu lomabu delaga daburu mbirale dama mitangi bialu gime wabinirunaga gene dewaore toleme wabu helalu gene uruni yári taraore bia howa helaga bini. <sup>2</sup> Ti ke hangu haga howa tinime ko bialu hayagonaga pani nolebira. Ngode Datagaliwabe ibugua tinaga lomabu delaga dabu bu heledarubi tinaga bi pupu wiaga gene wabu heledarubi bo gialo wahai halu mo koore holebira.

<sup>3</sup> Emeneore howa Isaraele wali agali tigua agua lolebira. Inaneme Anduane Homogonaga bi hale naharimagome ai ibugua inanaga kini dugu wahayada. Ani biyadago inanaga kini henene kalebi nde ibugua ina biamogo agua bidaledabe. Biamogo bibe naheore ndodabe. <sup>4</sup> Kinirume ina biamogo bule ale tingi howa bi hangu bame lo payapaya biaga ka. Tigua mbirale bule ale howa bi bame lo paya bialu dindi mendenaga kini bu karu baba bi pongo bame bo wiaga, lene. Isaraele wali agalirume mana tigabi bialu holene wiaru yu wahai halu tigua mana ko wia aribia ho ngaru dege mo tene howa bialu ka. Tinaga mana ko uruni dindi bayale alu ngagoria tani ko tomia pale andaho haradagua bida.

✧ 9:10: Dag 25.1-5

<sup>5</sup> Wali agali Samaria tanoha bu karume gi howa nogo bulumaga wangabe ale ngolome wabini Bedele dindini wiyagonaga dara timbuniore ho holebira. Asirialirume ibalu bulumaga ale ogoninaga yári ngolome bia hearu gialo wahai haragola Isaraele wali agalibi tinaga loma binigo mo miaga bulumaga ale ogoninaga biabe bialu haga bu karubi tigua dara timbuni howa dugu bialu holebira. <sup>6</sup> Asirialiru tigua mbirale ogoni Asiria dindiha mo yalu puwa tinaga kini kagohondo dagisi ale mo mulebira. Ani biragola Isaraele wali agali tigua mbirale bi pupu wule gime wabini ngarunagabi agali manda timbunibi hearume bi lenedaruni hale howa biyagonagabi tini taga timbuniore ho holebira. <sup>7</sup> Samarialirubi tinaga kini kagobi ira ongoba dabiabi ibame yalu piagadagua tini pu ereba helolebira. <sup>8</sup> Isaraele wali agali ti dama mitangi bialu gime wabini ngaruhondo bi pupu wule hari nene karuha piagago uruni mo ko hai holebira. Ani mo ko hai kagola datani ko anisherume lomabu delaga dabu bu heledaru andaho dambi holebira. Ani kagola wali agali tigua gi timbuni howa hari wedaruhondo bi laraga halu olalu, Ina hage hadaba, lalu hari barebare ngaruhondobi lalu, Ina poda dambi hadaba, lalu holebira, lene.✧

*Anduane Homogo ibugua Isaraele wali agali pani mulene nga lenego ogo*

<sup>9</sup> Anduane Homogohanda lalu, Isaraele wali agalime Gibea tano wiagoria howa ihondo ko bialu henego áyubi nde wa nahe ko dege bialu haabo kamigoni. Ani bialu kamigonaga Gibea tano wiagoriani waitigime ibalu agali ko uruni baba wai bialu bope hayadagua dege bima puabo holeberami. <sup>10</sup> Anigo ina wali agali ko biaabo haragonaga pani mulene pongo bo wirugo tagira ibiragola pani mulebero. Tigua mana ko dewaore bialu hayagonaga ina waitigi dindi tara tarani bu karu mo mogo bialu ti baba wai bilimulo ibilolebero.

<sup>11</sup> Abale nde Isaraele ibu nogo bulumaga angibuni baya hangu biawai hene howa widi iraneru lini hondo ibira ibira bilo geme hengeda helo helagagobi howa ibu biabe bulene turu howa hangu biaga hene. Abale piganengi ibu biabe gendabi bilo mo mia nabi henego ai áyuibunaga biabe ndelaheore bialu helo mo mido. Áyu Yuda Isaraelela libu haru nogo bulumaga mabuha dindi aliaga ngago libunaga mani dariba hamagamaga buwa gililo yu ibagabu hagadagua bialu heledo. Libugua hongo howa dindi aliaga biago gililo yalu pu nabi heagola ira mani hende hamagamaga biaga heagome libuninaga mani bungu lalu ma hibunaya. <sup>12</sup> Ina ala Yuda wali agalirubi Isaraele wali agalirubi tihondo lamialu lalu, Agalime e ima hengedagola tomo damenego bibahende bayale dege anda hai hagadagua tigua mana ko bialu kamiruni dugu wahai halu mana bayale tigabigo hangalimu. Ani birimiyagua nde lini bayale dewa do noleberami. Tigua i mitangi bialu lotu heneneore lole tinaga Anduane Homogo ini koria dai bulene horo áyu ngagoniore. Tigua ini koria dai birimiyagua nde ina tí biamogo bialu mo bayaleore holebero, larugoni.✧ <sup>13</sup> Anigo tigua anidagua bulene mitangi nabioore harimi. Tí agali e ima henge dege harimigoni. Anigo tí mabuha mana ko bulenebi mine halu ke holenebi hongo harimi. Ani hongowa ko uruninaga lini tini dege do nalu harimigoni.

Ainde tigua manda bu handalu hemiria tinaga hongo karulapeda manda bialu ami agali dewa bu karume tí biamogo bialu mo wulebirabe toba harimigoni. <sup>14</sup> Ani bu kamigome tinaga waitigirume tí baba wai bule anda ibalu tinaga tano ege pabe hongohe bu mabu bini ngaruni bo gialabaga bialu mo ko hai holebira. Wai bialu mbirale mo ko hai holene ogoni bamba Kini Salamana ibugua Bedabele tanoha hearu baba wai buwa tano mo ko hai halu bo gialabagabu wahenedagua waholebira. Ibunaga ami agali bu hearume tanoha wali waneiginiru lola hayago bame mo para halu ba aī naī binidagua bulebira. <sup>15</sup> Bedele wali agaliru-o tigua mana ko dewaore bialu harimigonaga genda o tagira penedagonibi tíhabi nde ani tagira ibulebira. Egerebagi ni tagira ibule manda biragola Isaraelenaga kini kago ala bo waholebira, lene.

## 11

*Wali agali tigua mine halu helowa Ngode Datagaliwabe ibugua ti gubalini haabo henego ogo*

<sup>1</sup> Anduane Homogohanda laabo halu lalu, Isaraele ibu ala bamba waneigini gali ale heangi ina ibu gubalini halu ini iginiore lowa turu halu Iyibi dindi howa haru tagira ibu helarugoni. <sup>2</sup> Ina ibu ini koria dai bilonaga olalu hewaria ibu hale nahe tingi howa erembira ngialu piya. Inaga wali agaliru tigua mbirale gime wabini mini Balahondo bi pupu wialu mbirale loma buwa bo delalu maru wiaruhondobi uruninaga lomabu delaga dabuni ira hagua ngabilo mini inisenesi wiaru delalu biya. <sup>3</sup> Isaraele ibu hariga tigabi ngagoria pialu helonaga biawai haga iniore kogoni. Ina inaga wali agali ini gime taba yalu baya hanguore handayaho harugo helowa tigua ani biyadalo manda buwa dege la nabi hayagoni. <sup>4</sup> Inime ti gubalini howa turu halu inaga gubaliniha minu yamuwa ti mo turu howa tomobi baya hangu nelu mialu harugoni.

<sup>5</sup> Tigua ini kogoha daibua nahe kagodago nde ti Iyibi dindi daibuwa Asirianaga haru hagame ti handayaho helo polene nga. <sup>6</sup> Ani bilonaga wai timbuniore bialu tinaga tano timbu ngaruninaga pabe panga hongohe karuni bo giallo wahai halu tinibi bo biba hai holebira. Irane inaga wali agali uruni tigua ini yu wahalu puwa tini hame leago bima piyagome urunidagua bulebira. <sup>7</sup> Ini helo wahalu piyagonaga ina pani timbuni merogola ti yo pialu mbira napolebiraore. Tiha genda timbuniore tagira ibiragola tigua dugu timbuniore bulebira. Dugu bialu kagola agali mbirame ladebodebo bialu mo wahabe tobahe wulebira.

<sup>8</sup> Isaraelealiru-o ina ti yu wanaholebero. Ina ti helalubi napolebero. Ina Adama dindibi Seboimi dindibi mo ko halu bo giallo waharudaguabi nabule dege. Ina ti gubalini timbuniore ho kogome ti mo ko nahole. <sup>9</sup> Ina tihondo keba howa pani nangulebero. Ina ti lone mo koore naholebero. Ini Ngode Datagaliwabe kogome inaga mana agalinaga ngaru ale ndo inaga mana taraore ngogoni. I Mbirali Loma Bia Hene kogo ti yu wanahe ti baba holebero. I ti kamiria keba howa ndo ibulebero, lalu Ngode Datagaliwabehanda lene.

<sup>10</sup> Anduane Homogohanda laabo halu lalu, Ina budi gabua ale laionome bi hongo howa ngororo laradagua bialu ti waitigi bu karu olarogola inaga wali agali ti gi howa dindi ni paliragohayagi ngaru yu wahalu abale ini talima ibulebira. <sup>11</sup> Tigua Iyibi dindi howa abale egame yagalo yalu ibiradagua bialu Asiria dindi howa ega malibu ale ibiradagua bulebira. Ani biragola tininaga dindi wiyagoriaore helo haru dai bulebero. I Anduane Homogo ina bi o ledogoniore, lene.

*Anduane Homogohanda Isaraelealiru Yudalirubi tigua ko birimi lenego ogo*

<sup>12</sup> Anduane Homogohanda laabo halu ogodagua laya. Isaraele wali agali tigua ihondo ko dewa bialu ke tara halu haabo ka. Anigo Yuda wali agali tibi i erembira ngialu tinaga Ngode Datagaliwabe mana tigabi bayale hangu biaabo haga kogo ini andanaha ibu nabi ti mana ko dege biaabo halu kagoni.

## 12

<sup>1</sup> Isaraele wali agali tigua mbiraga horombebi bialu karuni koore habane nabulene tini mo ko holenego dege bialu haabo ka. Ke holene manabi bo waholenebi ti kagoha pigane emene dege ibugu bialu mani howa bia timbu haga biaga nga. Tigua Asiriali baba biabe mandagi bulenaga bi lo wirimi. Ani bialu tinaga olibe lininaga ibaneru Iyibi baba biyinaya bialu hambu pelaragola Iyibi tigua yolo miaga ka.

<sup>2</sup> Anduane Homogohanda Yuda baba bi lole yu ka. Ani bialu mana ko Isaraele wali agalirume biyagonagabi pani nelu mulebira. <sup>3</sup> Tinaga mamali Yagabahanda ibu

☆ 11:1: Har 4.22, Md 2.15 ☆ 11:3: Man 1.31, Iba 107.20, Hos 7.15 ☆ 11:4: Har 16.32, Yar 31.2-3 ☆ 11:8: Man 29.23 ☆ 11:9: Dag 23.19

ajya tombaha biruwa ibu hamene Isola gungu bialu berene. Mani ibugua agali howa Ngode Datagaliwabela gungu bini.✧ 4 Ogoni biyadangi ibugua Anduane Homogonaga dahuliyalilabi gungu buwa ibugua dahuliyali biago bope hene. Ani bialu Yagaba ibuni dara halu Ngode Datagaliwabehondo biamogo bia lowa dugu bialu hene. Mbirungi nde Ngode Datagaliwabe ibuni Yagaba hearia Bedele dindini hapani howa ibuhondo bi lene.\*✧ 5 Ngode Datagaliwabe Yagabala bi lalu henedagoni ibu Anduane Homogo Hongo Haiheore ka. Iname ibunaga mini Anduane Homogo lolene nga. 6 Ani kago manda bialu Yagabanaga aguanene kamiru tinaga Ngode Datagaliwabe ogonihondo mini mbiraore wialu ibuni karia dai bulene nga. Ani bialu tigua heneneore ibu talima pialu mini bilinahe howa mana tigabi ngaru hangu bialu ibugua ti haru dai bilonaga mini dunubiaho holene nga, lene.

*Isaraele wali agalime ko binigo dewaore nga lenego ogo*

7 Anduane Homogohanda lalu, Isaraeleali tigua tinaga biyinaya biabe bialu howa baya hangu bulene tigabi ngadagua nabiaga ka. Ti Kenanali biyinaya biabe biaga bu karume biagadagua tigua ke halu agali mende kagome mbirale ngaru munime milo hangu hamelaga ka. Ani bialu howa tigua tinaga mbirale uruni genda magi tigatiga tale bulene ngadagua ndo biaga ka. 8 Mana ogonidagua buwa tinime lalu, Ina mbirale dewa wuwa abale homogo kamagoni. Mbiralime inahondo ke howa muni page binime homogo kagoni labe nahe holebira. Iname mana ko ndo birima, laga ka. 9 Anigo Anduane Homogo tinaga Ngode Datagaliwabe i kogo ina ti Iyibi dindiha howa haru tagira pialu haru ibirugoni. Ani birugo ainde tinaga anda bayale bu kamiru wahalu dindi ko wali agali nahaga wiagoha howa balai andaha palirimidagua lone palueberemi.✧

10 Inaga bi mana latagi haga hearuhondo bi lalu de gandebaha howa mbirale tara tara dewaore walia halu lamiai haga biru. Inaga bi mana latagi haga uruniha howabi ina tinaga mana ko bialu harimigo erembira mialu wahai halimu lalu lamiai haru. 11 Anigo tigua bi ogoni hale nahaya. Gileada tanoha howa tigua dama mitangi bialu mbirale gime wabini wiaruhondo bi pupu wialu mana ko dewaore bialu harago ti homai holebira. Giligala tanoha karume nogo bulumagaru lomabu delaga dabu ngagoria bo lomabu delalu haga ka. Ani bialu kago dabu uruni gialabaga bialu ege tole dabu binidaru dindini hama ngagoria bu wulebira, lalu Anduane Homogohanda lene.

12 Bamba inanaga mamali Yagaba ibu Mesobodemia dindiha ibida pole pene. Puwa ibugua wali mbira dabu bule lowa wandari abanaga nogo sibi hina halu biabe bia halu hene.✧ 13 Isaraele wali agali Iyibi dindiha garabaya biabe ale bialu heangi Anduane Homogohanda ibunaga bi mana latagi haga mbira ti hearia pelalu ti Iyibi dindi wahalu haru tagira pole pu lene. Ani pu layagola ibunaga bi mana latagi haga agali ogoniha howa ibugua ti baya hangu handayaho hene.\*✧ 14 Ani heagola Isaraele wali agali tigua mana ko dewa biyagome Anduane Homogo mo keba timbuni halu hene. Anidagua biyagonaga pani tini homolene wini. Tigua Anduane Homogo mo yo handayagonaga ibugua tini pani nelu mulebira, lalu Hoseahanda latagi hene.

## 13

*Anduane Homogohanda Isaraeleali dabaki bumaro bulebero lenego ogo*

1 Bamba Eberaimi hameigini bu hearu tigua bi layagola Isaraele hameigini maru hearuhondo gi halu bi ogoni hale haga hene. Anigo Eberaimi hameigini uruni tigua mbirale dama mitangi bialu bi pupu wule gime wabini mini Balahondo bi pupu wialu

✧ 12:3: Pig 25.26, 32.24-26 \* 12:4: Isaraele wali agalinaga mamali Yagaba henego ibu waneigini mani ho aribia henedaru ti horo ogoningibi ti aba ajya heba mandagi Ngode Datagaliwabela bi lalu hene dege. Anidagola tigua lalu, Ngode Datagaliwabehanda ina heba bi laya, laga wini. ✧ 12:4: Pig 28.10-22 ✧ 12:9: LBM 23.42-43 ✧ 12:12: Pig 29.1-20 ✧ 12:13: Har 12.50-51



heagome tigua mana koore biyagoni. Ani biyagome tini homoleneore nga. <sup>2</sup>Áyubi nde tigua mana ko dewa dege bialu ka. Tigua bi pupu wulenaga mbirale silibame wabu ngelowa ogonihondo bi pupu wialu ka. Agali tinime manda bialu ogobiore helo wabero lalu wabu ngelowa agali mende kagome gime wabini ogonihondo loma biniru mo mialu helo dabo helaga. Tigua mbirale nogo bulumaga ale gime wabini ogoni nunu lalu hagayago gibiore biraya. Uruni ti agile wali agalida. <sup>3</sup>Anidagua biagayagome wali agali uruni ti egerebagi ni tagira ibiragola ginu ngago ereba halu piai hagadagua ti ereba hai holebira. Ti egerebagi dadimba tanini ngaligobi howa ni daragola yo bialu abale ereba haralidagua ereba holebira. Ti widinaga aeane puyabume yu pu wahagagobi holebira. Ani bialu ira deledagola hagua hariha iraga halu pu ereba hagagobi holebira, lalu Hoseahanda lene.

*Anduane Homogohanda Isaraele wali agali daba maro bulebero, lenego ogo*

<sup>4</sup> Anduane Homogohanda lalu, I Anduane Homogo tinaga Ngode Datagaliwabe ti Iyibi dindiha howa haru tagira ibaga harugo kogoni. Tinaga Ngode Datagaliwabe ini hanguore kogo tara mende naheore. Tinaga pele ngiaga ini hanguore kogoni.\*

<sup>5</sup> Ti dindi ko dalu naibaga wiagoria pu hemigola inime ti baya hanguore handayaho harugoni.\* <sup>6</sup> Ani bialu mani dindi bayale wiagoria anda pialu nde tomo nolene dewaore bu payabu wialu maru alebi karulape yu harimigoni. Tigua mbirale dewa uruni yu howa nde tininaga hongome minibe toba harimigo. Anidagua birimigome i mo embeda harimigoni. <sup>7</sup> Ani birimigonaga budi gabua ale timbuni laionome mbirale porabu para howa bo nagadagua ina ti bolebero. Tinaga hariga piaga ngagoria budi gabua ale timbuni tara mini lebadime mbirale ema bialu poraru bole nende buwa biragadagua ina ti bole yu birulebero. <sup>8</sup> Biango ale timbuni mbira mini bea bedagome ibunaga igini pu ereba hayadagola keba howa mbirali abale porabu ede halu gi gibame galu kuni abale minu lere lagadagua ina tibi ani dege bulebero. Ani buwa laionome mbira minuwa abale nai hagadagua ina ti ani bulebero. Gabua tara tara timbuni irabuha hagane kagome mbirale bo lerela бага bialu nagadagua ina ti ani bulebero.

<sup>9</sup> Isaraelealiru-o ina ti biamogo bibehe kogoni helowa tinime manga halu kamigome genda tandagala tinime mo yu anda eberamigoni. Irane ani beramigome tini mo ko holene timbuniore wulebira. <sup>10</sup> Ai tigua ihondo tinaga kinirubi agali hagianerubi ti haru helonaga ngi larimigola nde ngirugoni. Anigo ayu urunime agua bialu ti biamogo bulebirabe. Heneneore tigua ti biamogo bibe nahe ndodabe.\* <sup>11</sup> Tigua ngi larimigola nde ina hale howa keba halu dege ngirugo ai ayu ina urunihondo keba timbuniore halu bo batagi kogoni, lalu Anduane Homogohanda ani lene.\*

<sup>12</sup> Anduane Homogohanda laabo halu lalu, Ina Isaraele wali agalinaga ko ngago bibahende inaga mbugani gilibu wiai howa ngeledo. <sup>13</sup> Isaraele wali agali ti bayaleore holene winigo tini lulu ale hayagome bayale holene manga haya. Ani biyadagoninaga manane waneigini aya tombaha berenego ibu aiyahanda taba honolebiragola waneiginime abale tagira naibagago ale ti ani bini. <sup>14</sup> Anigo ina ti homonerunaga dindiha pu kamiriabi homaganenaga hongome yu kariabi ina ti lone gi mia nabulebero. Homa-o ina i mo ngubiore halu bo ereba holebero. Homonerunaga dindi-o ini warago timbuniore bu hinuwa ti bo biba holebero. Ina Isaraele wali agali uruni lone dara howa biamogo nabulebero. <sup>15</sup> Eberaimi hameigini ti ho damebi dewaore Isaraele hameigini maru padarubi ndo padagoni. Ai ina puyabu poboyogobi ni tagira ibiragohayagi howa pulo ibilarogola tinaga iba nagane duguararu bedarubi hundia hai helolebero. Ani bialu tinaga mbirale bayale damene wu karuni puyabu hongohe ogonime pulo yalu piai helolebero. <sup>16</sup> Samaria wali agalirume ihondo keba halu doga hayagonaga ti pani timbuniore nolebira. Waitigirume ibuwa tini balu tinaga waneigini galiru dindini mo

\* 13:4: Har 20.3, 2 Kin 18.35, Ais 45.21-22 \* 13:5: Man 8.11-17 \* 13:10: 1 Sml 8.5-6 \* 13:11: 1 Sml 10.17-24, 15.26

para ho waharagola homai holebira. Wali ko gali bere bedaru tini balu waneigini tombeha bedaru bo haeala bagabu waholebira, lalu Anduane Homogo ibugua ani lene.

## 14

### *Hoseahanda Isaraealiruhondo, Anduane Homogo karia dai bidaba, lenego ogo*

<sup>1</sup> Isaraele wali agaliru-o tígua ko birimirume t́ini mo pila hayago ai Anduane Homogo t́inaga Ngode Datagaliwabe karia dai bulene nga. <sup>2</sup> Tígua Anduane Homogo ibuni karia dai buwa ibunihondo bi ogo loma ale lomialu lolene nga. Tígua ibuhondo bi ogodagua lalimu. Anduane Homogo-o iname mana ko birimaru bibahende domo wahai halu inanaga bi lamaru loma ale lo ngeramago ína áyu hale habe. Ai iname abale íhondo mana bayaleore bule lalu bi pongobo wirimaru bi ogoni larimadagua bialu ínaga mini yaraga holeberama. <sup>3</sup> Asiriali karume ina gi mialu pele nangibehe ka. Nogo hosini biruwa wai bu piaga karume ina mo wiabi nabibehe dege ka. Iname mbirale gime wabiniruhondo inanaga Ngode Datagaliwabe kamigoni lalu bi pupu nawuleberama. Anduane Homogo-o ina biamogo bulene mbira naheore waneigini aba aiyala nahe hono wahene ale kamago ína dara howa biamogo birilidagua bibe lalimu, lalu Hoseahanda lene.

### *Anduane Homogohanda, Isaraele wali agali holene gahenge yu holebira, lenego ogo*

<sup>4</sup> Anduane Homogohanda lalu, Inaga wali agali í yu wahalu pene uruni lone haru dai bulebero. Ininaga bu minime ti gubaliniore howa tihondo keba lone naholebero. <sup>5</sup> Dindi ko yobi iba dalu naibaga ngagoria dalu ibilalu dindi mo gomba hagamadagua bialu ína Isaraele wali agali mo bayale holebero. Ti ira lini baya tara daraligobi halu Lebanono dindiha ira timbuni karu tinaga pini dindiha anda pialu unuraore pu wahagagobi ti holebira. <sup>6</sup> Ti ira yuniru bayale mbirimbarale howa ira olibe bayale kaligobiore holebira. Ira tamia Lebanono dindi taweme bayale nga biraligobi bialu wali agalime ti turu taraore holebira. <sup>7</sup> Ti ibalu íni baba kagola ína ti handayaho holebero. Tinaga mabuha tomorubi gerebi lini daganebi bayale anda haradagua bialu nolene liniru dewa dedaligobi dege holebira. Waini iba Lebanonoha howa dendebiore berelowa mini lene wiraligobi tiore holebira. <sup>8</sup> Isaraele wali agaliru-o tígua mbirale gime wabiniruhondo lone bi pupu nawuleberami. Inime t́inaga bi laramigo hale howa bayuwa handayaho holebero. Ira timbuni yuni dewahe kago andaneha ni gumba biragamadagua íni kogoha ibai holeberami. Tígua bayale bibahende yu kamigonaga tene iniore kogoni ndobe, lalu Anduane Homogohanda Hoseaha howa bi ogoni lai hene.

### *Bi lamaro binigo ogo*

<sup>9</sup> Wali agali mini gigabiwi karume mbuga ogoha bi lo wini gilibu ngaru daga lalu manda buwa bu miniha yu tiga bialu talima polene nga. Anduane Homogonaga mana bibahende tigabi dege ngago wali agali mini tigabi karume manda bialu biaga ka. Anigo wali agali mana ko biaga karume bi uruni hale halu donge howa nabiagamome tini pilaga ka.✧

## Yoele

### Mbuga ogoha gilibu ngarunaga nemandi ogo

Mbuga ogoha Anduane Homogonaga bi mana latagi haga Yoele ibuni dege agali ogobi ko lalu garea nale. Agali ogoni ibu Pesialime hongo howa haru heangi howa Isaraele wali agali ti Babilono dindi ngelalu Yuda dindini daibu hai heangi howa bi ogoni gili bini.

Yoele ibugua handalu hearia gaea timbuniore bialu pagaya aleme tomobi datanibi ira lini daga ale bu hearubi bibahende nai haya handala dindi ogoniha mo ko holene timbuniore tagira ibule biyuane hondowa ibugua bi ogoni lene. Ani bule biyane hondowa wali agali Anduane Homogola waitigi ho kamiru ti de handalu mamage ho halimu lalu lene. Áyu tinime mana ko ngaru bialu mine halu karuni nde mani Anduane Homogohanda Horo Mbira manda mandabu winigo tagira ibirangi wali agali tini hangu mo tene halu mine haga uruni pani mulene horo tagira ibulebira lalu lene.

Anidagonaga nde Anduane Homogohanda ti dara helo Yoele ibugua ibu dameneru lamialu bu mini beregedadaba lalu lamini. Mbiwia halu bi timbuni mbira lene ngago ai ogoni Ngode Datagaliwabehandaibunaga wali agaliruhaibunaga Dinini wali agali wahe karuhabi wandari igiri daliahe karuhabi ngulebero lenego 2.28-32 uruniha howa gilibu nga. Anduane Homogohanda Abosolo mbuga biaruhaibunaga Dinini dalilayangi howa Pidahanda lalu, Anduane Homogonaga mana latagi haga agali Yoeleha howa bi abale lo winigo lola haragoni, lene. Bi ogoni Abosolo Be 2.1-42 howa gilibu ngago handabe.

#### **Bulu бага бува кuni gilibu ngago (1.1-2.17)**

Pagaya ale ibalu tomo nai henego 2.18-27

Anduane Homogohanda tomo lone anda ho helenego 2.28-3.21

Anduane Homogohanda ibu Horonaga manane walia henego

*Pagaya aleme mabuha tomo nai hayagola wali agalime dugu daraore binigo ogo*

<sup>1</sup> Anduane Homogohanda Peduele igini Yoelehondo bi ogodagua lamini.

<sup>2</sup> Wali agali wahe kamiru-o tí hale hadaba.

Yuda wali agali kamiru-o tíguabi hale hadaba.

Áyu ogoni dege mbirale bulebirarunaga tíhondo hale harogoni.

Mbirale uruni ale mbira áyu tí kamingibi abale tínaga mamali heneyangibi tagira ibinibe be naibibe.

Ina manda bialu koria naibiniore lo manda bido.

<sup>3</sup> O biraruninaga tígua tínaga waneiginiru lamilimu.

Tigua nde mani tinaga aguanene hama polebiraruhondo bi te ogoni la ai ai bialu helo lamilimu.

<sup>4</sup> Pagaya ale dewaoreme tidi yalu ibalu mbirale yuni damenego bibahende naiore hene. Pagaya ale pigane ibiyarume nai nahe yu wahayaru wabuni halu mende ibiyarume nene.

Halu tebone mane halubi tidi yalu ibugu biyarume lone naga bialu mbira yu wanahe naiore hene.

<sup>5</sup> Agali lulu iba nowa lulu yu haga kamiru-o ai heyu howa dugu bidaba.

Waini iba hambu nowa lulu yaga kamiru-o tínaga waini iba hambia aribia holene pu mbira mini gerebi lini do aribia hayago pagaya aleme nai hayagonaga tí dugu bidaba.

- 6 Pagaya ale tidini dewaore ami agali ibiradagua ibalu inanaga dindi nahandabeheore dambi ho wa kagoni.✧  
Ti dewa hongoheoreni ami agalime daga labe nahe.  
Tinaga neru gadeleore budi gabua laiononaga ne alehe kagoni.
- 7 Tigua inanaga pu mbira lini daga mini gerebi irane mo ko halu pogebe bibahende naiore hayagoni.  
Ira uruninaga nagane hearu nai halu dongonebi heba bu nai hayagola irane pele hangu pana halu gabu hai hayagoni.
- 8 Wandarime igiri ibu poleore lalu lawinigo homaragola dara timbuniore halu dugu biagadaguaore dugu biai hadaba.
- 9 Lomabu mulene tomobi waini ibabi nawida.  
Loma binigo mo miaga karume Anduane Homogonaga andaha puwa ibunihondo lomabu mulene nawidagola dugu biragoni.
- 10 Mabuha mbirale mbira nahe bameore dindi hangu ngagoni.  
Ani bidagonaga dindi ibubi nde dugu bialu ka.  
Dugu biragonaga irane mabuha tomo anda hagane damenego gerebi lini gau lalu olibe irabi bibahende gau lai hayagonaga dugu biragoni.
- 11 Agali mabuha biabe bialu e hangaga kamiru-o dara holene nga.  
Gerebi lini daga pu ale hondo hagaru-o tí dugu bidaba.  
Tínaga mabuha balowa wabiaga widi balirubi tomo damene bibahende ereba hai hayadago ai dugu daraore bidaba.
- 12 Pu mbira lini daga mini gerebibi pogebe bibahende gau lai hayada.  
Ira lini naga ale daga hearunibi bibahende gau lai hayadagoni.  
Ani biyadagome wali agalinaga turu holene ereba hayada.
- 13 Loma binigo mo miagaru-o tí lomabu mulene dabu biabe biaga kamiru-o tígua yayawi dindi dugu hiruwa dara halu dugu bidaba.  
Tígua daraho kamigo walia halu yayawi dindi dugu hiralu Anduane Homogo andaha puwa dugu dege bialu egabi lelolene nga.  
Waini ibabi tomobi tinaga Ngode Datagaliwabhondo lomabu mulene mbira nawidagonaga ani bulene nga.
- 14 Tígua wali agali lamialu agali haguane karubi Yuda wali agali karubi bibahendeme tomo nane wahalu tí bibahende Anduane Homogo tínaga Ngode Datagaliwabenaga andaha mo ngoai howa ibuhondo bi lalu dugu bialu holene nga.
- 15 Anduane Homogo ibugua Horo ibunaga pongobo winigo áyu kaware ibiragonaga aniore bulene nga.✧  
Horo ogoningi Anduane Homogo Hongo Haiheore kagome mo ko holene timbuniore ibilolebira.  
Horo ogoningi inaha genda holene koore yu anda ibulebiragonaga i dara ho kogoni.
- 16 Tomo mbirale ngaru mo koore harago hondowa iname mbirale mbira bibe nahe kamagoni.  
Anduane Homogo inanaga Ngode Datagaliwabe andaga pu poleberamago ogonihabi turu holene mbira nawi dege.
- 17 Dindiha yobi iba nabere ngagome tomo egeneru hengederia anda naholebira.  
Anigo tomobi mani nolenenaga do holene nawi.  
Ani biragome tomo bu yu mogobu ngelaga anda karubi tabuanda hai holebira.
- 18 Nogo bulumaga karu tibi nde datani nolene nahedagola haꞗ lama lulu yalu ibaga bialu ka.

Nogo sibi karubi nde tomo garibi lowa obi ona bu hama pedagoni.

<sup>19</sup> Anduane Homogo-o ira datani karubi bibahende irame bo daradagua bialu gau lai hayadagonaga ina í olarogo.

<sup>20</sup> Ainde datani karubi gau lai halu iba bedarubi hundiai hayagola ema bialu piaga karume ihondo dugu bu ngialu kagoni.

## 2

*Anduane Homagonaga Horo ogobi ibulebira lalu manane pagaya ale ibinigo ogo*

<sup>1</sup> Anduane Homogohanda Horo pongo bo winigo abaleore ibiragoni.

Ani bidago tigua Hari Saiono biagoriani puwa mbelo mini biguli pu ladaba.

Ngode Datagaliwabenaga hari loma bia hene ngagoria mbelo bolene nga.

Horo ogoningi Yuda wali agali ti bibahendeore gi howa duru laga bialu holene nga.

<sup>2</sup> Anduane Homogonaga Horo ogoni tagira ibirangiore ko arumahe mbira ngagola dara holene wulebira.✧

Horo ogoningi ginu hagua mindibime bu dambi holebira.

Ani biragola pagaya ale biarunime hari nene ngarunaga abale tidu yalu egerebagi ni tagira ibiralidagua bialu ami agali ibiradagua bialubi tagira ibulebira.

Áyu biragoni ale nabinigo manibi nde nabulebira.

<sup>3</sup> Ani ibuwa dangiha bo daralidagua tomobi datani karubi abaleore nai haragoni.

Ti ge napeni ngaruha Idene mabu ale baya taraore ngagoni.

Ti anda pialu nai hene ngaruha mbirale bibahendenaga yuni damene nai kagola dindi yobi hangu ona taulodaga ho ngagoni.

Pagaya ale urunime mbirale yuni lenego mbira yu wanahe naiore holebira.

<sup>4</sup> Pagaya ale ibiraruni nogo hosi handalehe ibiragoni.✧

Ti wai biaga ami agalinaga hosi ibiradagua ibiragoni.

<sup>5</sup> Ti hari bare ege tole ngarunaga poragola wai biagane garo ale nogo hosime gililaga mini karisi pora biagadagua bialu dangi gabuni yobu wahe ngaruha bo daragola tilitola lalu lirilere lalalidagua laragoni.

Ti naina tidu yalu ibiraha ami agali wai bule ibiralidagua ibiragoni.

<sup>6</sup> Ani bialu kaware hapara halu ibirago hondowa wali agalime gi taraore halu amburiho howa hiririho wima peda.

<sup>7</sup> Pagaya ale biaruni abale ibalu ami agalime biagadagua tanonaga pabe karunaga iraga iraga bialu ka.

Iralu mendehayagi dalialu puwa ami agalime tidu yalu piagadagua tidu yalu mandagi duguni pialu howa maru putara halu nape mandagi duguniore pialu ka.

<sup>8</sup> Maru ti polene ngagoha pu pugua nabiaga.

Pabe karu gialalu anda poragola mbiralime harigani hapai habe nahe.

<sup>9</sup> Tigua tano ngarunaga gerai anda puwa pabe karu pora bialu anda pialu tano tamuha anda piaga.

Ani anda puwa wali agali andaga karunaga windoha pagealime anda poralidagua bialu tamuha anda pugu bira.

<sup>10</sup> Ti pialu kagola dindi harila ema biaga.✧

Ni egela aruma halu yakundibi wá nahaga.

<sup>11</sup> Anduane Homogohanda ibunaga ami olaragola tinaga bi hari kulu laradagua laga.✧

Ani laragola ami agali hongohe dewaoreme ibunaga bi larago hale halu ibugua bia laradagua biaga.



Ayaliore-o Anduane Homogonaga Horo ogoningi mo ko holene timbu gibiore tagira ibulebirago mbirali ogoni lola nahe yopialu ai ibu polobadabe.

*Anduane Homogohanda wali agalihondo, Mini beregedalimu, lenego ogo*

<sup>12</sup> Anduane Homogohanda lalu,

Aniore biai holebirago ai tigua heneneore mini beregedalu ini kogoha dai biai hadaba. Tigua tomo nane wahalu ko birimigonaga dara howa dugu bima ini koria dai bidaba.

<sup>13</sup> Ko birimigonaga darahe tingi howa ke halu aga bidamiru bame budulene nakaru-lape.\*

Ani ndo tinaga bu miniha howa ko birimigonaga dara heneneore halimu, lene.

Anduane Homogo tinaga Ngode Datagaliwabe karia dai bulene nga.

Ibuha dara holene tolaihe howa tihondo mana bayale ngadagua dege biaga kagoni.

Ibugua inaore gubalini ho howa bibahendengi inahondo mana tigabi bulene ngaru dege biaabo halu haga kagoni.

Bibahendengi ibugua ina mana lalu pani ngulene hame lowa ha ndo ibugua iname ko birimaru domo waholene hamelo ka.

<sup>14</sup> Anigo tigua Anduane Homogo tinaga Ngode Datagaliwabe karia dai birimiyagua nde ibugua halu mende mitangi bialu tihondo bayale bialu tomo dewa lone mo anda holebira.

Ani biragola nde iname tomoru waini ibarubi ibuhondo lomabu mulene karulapeore yu holeberama.

<sup>15</sup> Hari Saiono neneni howa mbelo biguli pu lolene nga.

Ti bibahende tomo nane ti ibu ngoai holene nga, lalu wali agali lamilimu.

<sup>16</sup> Wali agali dewaliore olalu mo ngoai howa Anduane Homogohondo mitangi bialu ibuhondo lotu lolenaga manda manda bilimu, lalu lamilimu.

Wali agali wahebi wandari igiribi waneigini gali wene andu nalu bedarubi bibahende-ore ibu ngoai hadaba, lalimu.

Wandari igiri wene dabu bu hene heaguabi uruni bibahende tini andaga yu wahalu ibaioire holene nga, lalimu.

<sup>17</sup> Loma binigo mo miaga karu tibi nde Anduane Homogonaga anda tamuha biabe biahagaru tigua anda harabani lomabu delaga dabu ngago hengeneni howa dugu bialu bi ogodagua lolene nga.

Anduane Homogo-o inaga wali agali kamaru dara habe.

Wali agali hameigini dindi tara tara howa ibu karu tigua ina erembira ngialu mege bialu lalu, Tinaga Ngode Datagaliwabe agoha kabe, loligo ina biamogo bia lolene nga, lalu Yoelehandu lene.

*Anduane Homogohanda tomo mo anda ho helenego ogo*

<sup>18</sup> Anduane Homogohanda wali agalime mini beregedayago hondowaibunaga dindi mitangi haluibunaga wali agali dara howa biamogo bini.

<sup>19</sup> Ibugua tihondo lalu,

Ayu ina tomo dewabi waini iba dewabi olibe lini ibane dewabi tihondo ngerogola tomo nolene dewaore nalu holeberami.

Ani berogola wali agali hameigini dindi tara taraha bu karume ti erembira nangulebira.

<sup>20</sup> Pagaya ale unurayagi howa ibini bedaruni bibahende ti ina wara pelalu maru dindi ko dalu naibaga ngagoha wara pelolebero.

Wabuni mbira ala ibu berene bedaru ti iba solowara mini Homene Iba bedagoha warape halu maru mani ibu bedaru ti iba solowara mini Medidereniana bedagoha warape holebero.

Maru biru wahene bedaru homaragola ngu taraore bulebira.

\* 2:13: Har 34.6-7, 2 Sml 1.11, Iba 86.5, 86.15, Yna 4.2

Pagaya ale biarume tihondo ko biyagonaga ina ti pani mulebero.

21 Dindi-o í gi nahabe.

Áyu í miniha hadape howa turu howa dungulo holene nga. Irane Anduane Homogo ini kogome biamogo birudagonaga ani bulene nga.

22 Ema bialu piaga biru kamiru-o

Datani dewaore lone anda haragoni ti gi nahalimu.

Ira lini daga karume lini dewa dalu pogerubi pu mbira mini gerebirubi lini dewaore deda.

23 Wali agali Saiononi kamiru-o

Anduane Homogo tínaga Ngode Datagaliwabe ina tí biamogo timbuniore bialu harugonaga turu halu dungulo hadaba.

Tígua tomo hongolene tu hayangibi ege pigane hayangibi tomo anda helonaga iba dalu karulapeore ibilarugoni.

24 Widi gandulo yu mogo buwa iraneru yuniru bu wahaga ngatoria widi lini dewa ibira heneru bu paya paya bu wulebira.

Ani bialu gerebi lini pingidagane uli wene ngaruha hingedalu pingidaragola ibane dewaore biru tolowa pugula tagi tagi bialu holebira. Oilbe linibi dambiragola ibane dewaore biru tolowa pugula tagi tagi bialu holebira.

25 Inime pagaya ale uruni ti ami agali ibiradagua ibilarurume tínaga tomo hengemiruni bibahende nai helarugo ai mali dewa niruniha howa nalu hayarunaga áyu ngia dai biai holebero.✧

26 Tomo nolene dewaore wu kamigola tolatagiore holebira.

Ani howa tihondo bayale bialu harugonaga ihondo turu halu Anduane Homogo tínaga Ngode Datagaliwabe i kogo inaga mini yaraga halu holeberami.

Ani bialu kamigola wali agali dindi tara taraha haga karume Yuda tí handape naholebira.

Ani biragola inaga wali agali kamiruni tí lone taga naholeberami.

27 Ani biragola Isaraele wali agaliru-o tígua ini tí kamigoha mandagi ho kogoni manda bialu i Anduane Homogo tínaga Ngode Datagaliwabeore kogo i ale mendeali nahedane manda biai holeberami.✧

Ani bialu kamigola wali agali dindi tara taraha haga karume tí handape nahe inaga wali agali kamiruni tí lone taga naholeberami,

lalu Anduane Homogohanda lene.

*Anduane Homogohanda lalu, Inaga Dinini wali agali bibahendehondo mulebero, lenego ogo*

28 Anduane Homogohanda laabo halu lalu,✧✧

Mani ininaga Dinini wali agali bibahendeha odope hai holebero.

Ani berogola tínaga waneigini karume inaga bi mana latagi halu holebira.

Tínaga agali wahe karume emaga handalubi tínaga igiri daliahe karume de gandeba handalubi holebira.

29 Horo uruningi inaga biabe biahaga wali bedaruhabi agali bu karuhabi ti bibahendeha ininaga Dinini odope hai holebero.✧

30 Anduane Homogo ibugua laabo halu lalu,✧

Dindinibi hari daliganibi Horo ogoni ibulebiragonaga manane tara tara ina mo walia holebero.

✧ 2:25: Yol 1.4 ✧ 2:27: Ais 45.5, Ese 37.26-28, 39.22, 39.28, Yol 3.17 ✧ 2:28: Seg 12.10, Yo 7.39 ✧ 2:28: Ab 2.17-21 ✧ 2:29: 1 Ko 12.13, Ga 3.28, Kl 3.11 ✧ 2:30: Md 24.29, Mg 13.24, Lg 21.11, 21.25

Bo wahenerunaga darama timbuni dindini bu payabu wialu ira hungu haguala emene ndo bulebira.

<sup>31</sup> Anduane Homogonaga Horo mani ibule ngelowa ni ala hundu ereba halu ege daramabi darama ale dolebira.✠

Uruni biai kagola nde Anduane Homogonaga Horo tagira ibulebira.

Horo ogoningi wali agali dindini karume gi taraore halu holebira.

<sup>32</sup> Anigo maru karume Anduane Homogo i mini lalu ihondo,✠

Ina biamogo bialu gi mia, lalu olalu karu ina ti biamogo bulebero.

Anduane Homogo inime larudagua wali agali Yarusalemeni karu aria mbirago yu wa naholebero.

Wali agali inime dabo heleneru ti bayaleore holebira,

lalu Anduane Homogohanda lene.

### 3

#### *Anduane Homogohanda wali agali bibahende dabaki bulebirago ogo*

<sup>1</sup> Anduane Homogohanda lalu,

Horo ogoningi wali agali Yarusalemeha karubi Yuda dindiha karubi ti bibahendeore ina mo bayale hai helolebero.

<sup>2</sup> Ani helowa dindi ulini mbira mini Mana Ko Birago Dabaki Biaga laga ngagoria wali agali hameigini bibahende dindi tara tarani bu karu ina haru ibai howa mo mogo bu helolebero.

Ani ibu kagola tigua inaga wali agali hearuhondo mana ko biyagonaga ina ti dabaluni mulebero.

Agali uruni tigua inaga Isaraele wali agali hearu dindi tara tara kaundia wiaruha waratagi halu purogo lelowa inaga dindi wirurubi ti dege karulai hayagonaga ani bulebero.

<sup>3</sup> Agali uruni bibahendeme Isaraele wali agaliru ai ibu mirabe hondole tigua tadu bialu tadume mbira mbira migi migi biya.

Tigua Isaraele wali agalirunaga waneigini bu hearu garabaya biabe ale biahaga helo muni muwa muni urunime wali kayu yaga berearu kayu yule yolo bialu waini ibaru yolo bigi bini.

<sup>4</sup> Taia tano wali agali kamirubi Saidono tano wali agali kamirubi wali agali Pilidia dindi bibahendeha kamirubi tigua ihondo mbira agi bule beremibe. Ina birugo ko ale biruyane tigua ihondo pani ngule mandabu kamibe. Ani mandabu kamiyagua nde tigua birimigonaga ina tihondo pani ala biadai bulebero.✠ <sup>5</sup> Tigua inaga mbirale bayale muni ngolo silibarubi wiwaru bibahende mo yalu puwa tinaga gime wabini biarunaga andaha yalu puwa mo wiai kamigoni. <sup>6</sup> Tigua Yarusalemeha howabi Yuda dindiha howabi wali agali bibahende dindi tara kaundiaha haru puwa Girigiali hearume yolo ngilo muni taguialu uruninaga garabaya biabe ale biahaga helo pelarimigoni. <sup>7</sup> Ani birimiruni ti dindi uruni wahalu dai bilo inime haru dai biai holebero. Tigua urunihondo birimidadagua ina tiniha bia dai bulebero. <sup>8</sup> Ai tigua birimigodagua Yuda wali agali tigua nde tininaga waneigini karu minalu kaundiaore Sabea dindiha howa ibirarume muni ngiragola tinaga garabaya biabe ale biahaga helo dindi kaundia uruniha pelai holebira. I Anduane Homogo ina bi o ledogoniore, lene.

<sup>9</sup> Yoelehanda Anduane Homogonaga bi ogodagua lamialu,

Bi ogo wali agali dindi tara tara bibahendeni karu lamialu

Wai bule manda manda bu halimu.

Ami agaliru wai bu pole olo mogo buwa manda manda bu hadaba lalimu.

✠ **2:31:** Ais 13.9-10, Mal 4.5, Md 24.29, Mg 13.24-25, Lg 21.25, Mo 6.12-13 ✠ **2:32:** Ais 11.11, 11.16, Oba 17, Mai 4.7, Lm 9.27, 10.13, 11.26 ✠ **3:4:** Ais 14.29-31, 23.1-18, Yar 47.1-7, Ese 25.15-28.26, Amo 1.6-10, Seb 2.4-7, Seg 9.1-7, Md 11.21-22, Lg 10.13-14

- 10 Dindi aliaga aeane ngamiru hiruwa bo tiga bialu wai biagane ayu tibu wabilimu.✧  
Tomo gandu laga ayu tibu yu kamiru hiruwa bo tiga bialu yandare wabilimu.  
Agali hongo nahe mbira kayagua ogoni ibunde wai bule hongo howa holene nga.
- 11 Wali agali dindi tara tarani kamiruni bibahende abaleore ibalu dindi ulini unu  
ngagoria mo mogo bu hadaba laya,  
lalu Yoelehanda lene.
- Ai Anduane Homogo-o inaga wai biaga ami agali biaru abale agali uruni baba wai bilo  
ibilabe, laro.
- 12 Anduane Homogohanda lalu,  
Wali agali hameigini dindi tara tara bibahendeha bu karu abale ibalu dindi ulini mbira  
mini Mana Ko Birago Dabaki Biaga laga unu biagoria mo mogo bu hadaba.  
Ani ibu kamigola tigua mana birimigonaga Anduane Homogo inime dabaki buliya.
- 13 Wali agali o karuni ti ko ngubiore kagoni.✧  
Ti ani kago manda buwa wali agalime tomo widi boga bialu gandu lagadagua bialu  
agalime pu mbira mini gerebi lini waini iba wabiaga ege tole uli timbuni ngagoha  
ngelowa pingidole geme hengeda hagadagua halimu.  
Waini iba biru tolatagi halu piagadagua uruni tiha mana ko tolai howa koorene ko  
henego kagoni, lene.
- 14 Wali agali daosini dewa dagalabe naheore dindi ulini mbira mini Mana Ko Birago  
Dabaki Biaga laga ogoria godi lolenaga ibu ngoai ho ka.  
Dindi ogoriani Anduane Homogonaga Horo haragolaibunime dabaki bulene kaware  
ngagoni.
- 15 Ani ibiragola ege nibi hundiai halu yakundibi lone nadolebira.  
*Anduane Homogohandaibunaga wali agaliruhondo bayale bulebirago ogo*
- 16 Anduane Homogo ibugua Hari Saiono biagoria howa bi timbuni lowa Yarusaleme  
howaibunaga bi laragome hari kilikulu laradagua bialu bi laruagome dindi  
haribi ema bialu birila gimbu biai holebira.✧  
Ani biragola Anduane Homogohandaibunaga wali agali karuibunime handayaho  
kagola ti mo ko nahe bayale holebira.
- 17 Ibugua lalu, Isaraealiru-o ina ani berogola tigua ini Anduane Homogo tinaga Ngode  
Datagaliwabeore henedane hondowa manda biai holeberami.  
Hari Saiono ininaga loma bini ngagoriani kogoni.  
Yarusaleme ininaga tano loma biniore ngelolebero.  
Ani ngeledogoria waitigirume Yarusaleme ogoni lone ibalu karu nalolebira.
- 18 Ani berongi hari bibahendeni gerebi lini daganenaga irane karume anda haame  
holebira.  
Hari bare bare ngaruha nogo bulumagarume dewaore haame holebira.  
Yuda dindiha dalu karulape ibalu iba bayaleore piaho wiaabo holebira.  
Ogoningi iba mbira Anduane Homogo andaga biagoha howa dugua tagi halu unurayagi  
dindi ulini mini Ira Agasia Buguni laga bu ngagoha pupe halu dindi ogoni mo  
gomba halu polebira.
- 19 Iyibi dindi ko howa gaea timbuni bialu Idomo dindibi wali agali mbira nahe dindi  
dabulu wulebira.  
Dindi kira ogonialime Yuda wali agali ko mbira tiha nawi hearu baba wai buwa  
bameore bo wahai hayagonaga ani bulebira.

20-21 Anduane Homogo ina agali uruni tigua irane nawini wali agali bameore bo wahayagonaga ina tihondo pani mialu paipai biadai bulebero.  
Agali mana yole biaga uruni aria mbirago yopialu napelolebero.  
Anigo Yarusalemenibi Yuda dindiruhabi wali agali haabo holebira.  
Ani bidagola Anduane Homogo ini Hari Saiononi haabo holebero,  
lalu Anduane Homogohanda ibunaga mana latagi haga Yoeleha howa bi ogoni latagi hene.



## Amoso

### Mbuga ogoha gilibu ngarunaga nemandi ogo

Ngode Datagaliwabenaga bi mana latagi haga agali marunaga bi Anduane Homogonaga mbugaha gilibu wini ngaru ti maha Amoso ibunaga ala pigane gilibu wini. Amoso ibu Yuda dindiha tano emene mbira wiagoha howa pigane ibu nogo sibi hinalu haga hene. Ani hearia Ngode Datagaliwabehanda ibunaga bi mana Isaraele dindiha wali agali hearuhondo latagi hama pelo olene. Odagoningi Isaraele tiha genda anda ibulene mbira nawi bayale dege hene.

Isaraele wali agali ti bayale dege kamabe toba howa hearia Amosohanda lalu, Ngode Datagaliwabenaga deni ti bayale ndo kamigoni. Tigua wali agali yagibano ti heba kamiru bababi wali agali ti damene kamiru bababi mana ko dege bialu kamigoni, lene. Amosohanda ibunaga damene hearuhondo lalu, Tigua ko bialu kamiruni wahadaba, lalu bi hongo howa lamigi bini. Ani lalu howa, Wali agalirume mini beregeda nabirimiyagua Ngode Datagaliwabehanda ti pani ngulebira, lalu lamini. Isaraele wali agalirunaga agali haguane hearume bi ogoni layago hale howa ibuni dalu Yuda dindihayagi bo talia dai bini. Ani bialu hemiria Amosohanda lalu, Ngode Datagaliwabehanda mana ogo ale biyada lalu manda nabiaga kagome biagadagua áyu tigua birimiyagua nde ti Ngode Datagaliwabe kago manda nabiore kamagoni lalu walía kami. Ai tigua Anduane Homogo ibu timbuniore howa ibugua mbirale bibahende biai habehe kago ti pani ngialu mo ko holene ngago manda bulene nga, lalu lamigi biniru gilibu wigi bida.

#### **Bulu бага бува кuni gilibu ngago ogo (1.1–2.5)**

Anduane Homogohanda wali agali tara tara manani dabenego 2.6-6.14

Anduane Homogohanda Isaraele wali agali manani dabenego 7.1-9.15

Amosohanda de gandeba dau halu hendene

#### *Anduane Homogohanda Amosohondo bi laminigo ogo*

<sup>1</sup> I Tegoa tanoali nogo sibiru hinalu haga Amoso kogoni. Ani hewagola Anduane Homogohanda de gandeba mbira ihondo mo walía haya. Odagoningi Usia ibu Yuda dindiha kini heagola Yoasa igini Yaroboama ibu nde Isaraele wali agalinaga kini heangi bi ogo langiya. De gandeba ogoni hondowa mali kira hewagola dindi dumbirumbi timbuni biya.\*

#### *Anduane Homogo ibugua wali agali mo ko holene hongo timbuni yu kago ogo*

*(Amoso 5.8-9, 9.5-6)*

<sup>2</sup> Amosohanda ogodagua lene.\*

Anduane Homogo ibuni Hari Saionoha howabi

Yarusaleme tano wiagoria howabi

bi hongoheore hari kilikulu laradagua biayua.

Ani biyagome datani Hari Kameloha hearu bibahende gau lai halu kabu gimbu biya.

#### *Anduane Homogohanda Siria wali agali hearu manani dabenego ogo*

<sup>3</sup> Anduane Homogohanda lalu, Damasagasa wali agali tigua mana koore dewa biaabo harimi laya. Ani biaabo halu howa Gileada wali agali hearu mo ko halu harimigonaga henemaneore ina ti pani ngulebero.\* <sup>4</sup> Kini Hasaelenaga anda kagoria ira hedo bape harogola Kini Benehadadanaga andarubi dalu wai pabe hongohe bidarubi bibahende dai helolebero. <sup>5</sup> Damasagasa tano timbuni ngagonaga wai pabe panga hongohe bidaru bo giallo wahai holebero. Ani buwa Abene dindi ulini ngagoaha wali agali karu bo purogo

\* 1:1: 2 Kin 14.23-29, 15.1-7, 2 Bit 26.1-23    \* 1:2: Yol 3.16    \* 1:3: Ais 17.1-3, Yar 49.23-27, Seg 9.1

lalu Bededene dindinaga kini bedagobi bo batagi holebero. Ani bialu Siria wali agaliru Kie dindi ni tagira ibiragohayagi garabayabu yalu pelolebero, lene.\*

*Anduane Homogohanda Pilidia wali agaliru manani dabene go*

<sup>6</sup> Anduane Homogohanda lalu, Wali agali Gasa tanoha kamirume mana ko dewaore bialu harimigoni. Emene halo hole ndo bibahendengi Gasa wali agali tigua wali agali maru Idomo dindiha garabaya biabe ale bialu helo minu yalu pirimigoni. ✧ <sup>7</sup> Tigua ani bialu harimigonaga heneneore ina Gasa wali agali pani mulebero. Tinaga tano ngagoha ira hedo bape harogola irame tano ogoniha anda hongohe karuni do baeala hole bilolebero. <sup>8</sup> Ani buwa wali agali Asadodo tanoha karu bo batagi halu Asagelono dindiha kini kagobi bo batagi holebero. Ogonidagua bialu ai Egerono tano ngago bo gialo wahalu Pilidia wali agali yu wahene maru hayadaru bo wahai holebero, lene.

*Anduane Homogohanda Taia wali agali manani dabene go*

<sup>9</sup> Anduane Homogohanda lalu, Taia wali agali tigua horo bibahendengi ko nabi nahe biaabo halu hayagonaga wali agali maru Idomo dindiha garabayabu yalu pelayagoni. Bambaore howa ti ko mbira nabi baya hanguore hamiya lalu bi hongo howa lo winigo ogoni habo lalu biyagonaga ina Taia wali agaliruore pani emene ndo mulebero. ✧ <sup>10</sup> Taia tano ngagoria ira hedo ibira helarogola tanonaga anda hongohe karuni do gindulo ba ai holebira, lene.

*Anduane Homogohanda Idomo wali agali manani dabene go*

<sup>11</sup> Anduane Homogohanda lalu, Idomo wali agalime horo bibahendengi ko wiaru biaabo halu howa tinaga damene Isaraele wali agali hearu dara naheore howa ayu tibume dibalu homelaga bialu harimigoni. Tigua hendore ndo keba timbuniore howa ani bialu harimigoni. Tinaga keba ogoni ereba nahe wiaabo kagonaga Idomo wali agali uruni tibi pani emene ndo mulebero. ✧ <sup>12</sup> Ina tinaga tano Temanabi Bosara tano ngagobi kirabaliha ira hedo bape harogola tano ogoni laboha anda hongohe karu dai holebira, lene.

*Anduane Homogohanda Amono wali agali manani dabene go*

<sup>13</sup> Anduane Homogohanda lalu, Amono wali agalime mana ko biaabo hayagonaga ina ti mana lalu genda mo mulebero. Tigua ani bialu howa dindi dewa mule hame lalu Gileada dindiha wali gali tombeha bere berearu bibahende bo togodo bagabu wahaya. Ani biyagonaga ina Amono wali agali karu pani emene ndoore mule ngogoni. ✧ <sup>14</sup> Tinaga Laba tano ngagoria pabe hongohe bu kagoria ira hedo bape harogola tinaga anda hongohe bu karuni dai helolebero. Ami agali bu karume wai bule howa wai-o hongo howa lalu wai biagadagua bialu horo kongi puyabu hongoheore ibiradagua bulebira. <sup>15</sup> Ani biragola Amono dindinaga kinibi agali haguane karubi bibahende dindi mendeha garabayabu yalu polebira, lene.

## 2

*Anduane Homogohanda Moaba wali agali manani dabene go*

<sup>1</sup> Anduane Homogohanda lalu, Moaba wali agalime mana ko hangu biaabo halu kagonaga ina ti pani timbuniore mulebero. Tigua Idomo wali agalinaga kini bo wahalu ibunaga kunibi irani do abalu helayagonaga ina Moaba wali agaliruore pani timbuni

\* **1:5:** Dindi ulini Abenebi Bededene dindi ledagobi ogoni labonaga irane ogo. Dindi kira ogonilabo Damasagasa dindiha dege wini. Anigo Hiburu bi lalu Abene dindi uli ogoni irane mana konaga dindi uli manda bialu manane lalu Bededene ogoni irane turuhu dege haga dindi laga. Dindi kira ogonilabonaga mini ogoni gilibu winidagoni irane Ngode Datagaliwabahanda dindi ogoni mo ko hole nga lalu gilibu wini. ✧ **1:6:** Ais 14.29-31, Yar 47.1-7, Ese 25.15-17, Yol 3.4-8, Seb 2.4-7, Seg 9.5-7 ✧ **1:9:** Ais 23.1-18, Ese 26.1-28.19, Yol 3.4-8, Seg 9.1-4, Md 11.21-22, Lg 10.13-14 ✧ **1:11:** Ais 34.5-17, 63.1-6, Yar 49.7-22, Ese 25.12-14, 35.1-15, Oba 1-14, Mal 1.2-5 ✧ **1:13:** Yar 49.1-6, Ese 21.28-32, 25.1-7, Seb 2.8-11

mulebero.☆ 2 Moaba wali agalirunaga tano timbuni Keriodo ngagoria ira hedo bape howa tano ogoniha anda hongohe bu karuni bibahende dai helolebero. Ami agalirume wai bialu howa mbelo biguli hongo howa pu lalu wai huario hongo howa lalu holebira. Horo ogonongi Moaba wali agali homai holebira. 3 Ina Moaba wali agalinaga kini kagobi agali haguane bu karubi bibahende bo wahai holebero, lalu Anduane Homogohanda lene.

*Anduane Homogohanda Yuda wali agali manani dabenego ogo*

4 Anduane Homogohanda lalu, Yuda wali agali tigua mana ko hangu biaabo halu kagonaga ina ti pani timbuniore mulebero. Tigua inaga bi mo wahalu mana ngago talialu bia nabi kagoni. Tini mo koore halu inaga mana mo wahai haya. Tinaga mamalirume binidagua dege gime wabini wiaru hangu talima piya. Ani biyagonaga ina heneneore Yuda wali agali ti pani emene ndoore mulebero. 5 Ina tinaga tano Yarusaleme ngagoria ira hedo bape harogola tano ogoniha anda hongohe bu karuni dai holebira, lalu Anduane Homogohanda ogonidagua lene.

*Anduane Homogohanda Isaraele wali agali manani dabenego ogo*

6 Anduane Homogohanda lalu, Isaraele wali agali tigua mana ko hangu biaabo halu kagonaga ina ti pani timbuni mulebero. Irane Isaraele wali agali tini damene karu baba dano howa yadai nabiragola uruni ti minalu agali mendenaga garabaya biabe ale bia haga helo muni ngi laga ka. Muni miragome tinaga dano hayago mo aribia haga ka. Wali agali darabi uruni tigua nde muni dano timbuni ndo emene ko ge su hangu yolo mulene karulapego nde muni anduanerume tinaga damene uruni dara nahaga ka. 7 Tigua wali agali yagibano burupale uruni dara nahe howa hangedape halu waratagi haga ka. Agali ko uruni tinibi tinaga iginirubi bibahendeme garabaya biabe ale bia haga wandari mbiraore bedago dege kayu yu iri ari biaga kagome ini mini lene kogo mo yo handaga ka. 8 Wali agali yagibano burupale dano hene biarunaga aga ti mo yalu puwa lotu anda karuha ti aga ogoni yu paliaga ka. Tigua ti damene urunime tinaga dano hayadago yadai bulenaga ani biagago nde yagibano urunime dano biago yadai bibe naheore kagola nde tinaga labolabo yadai bulene ngago yadai nabiaga. Ani bialu godi yolo bibe nahe kagola yagibano uruninaga waini iba hambu ngaru godi yolo ale lowa ti Ngode Datagaliwabenaga anda kagoha mo yalu puwa nalu haga biaga kagoni.\*

9 Ai inaga wali agaliru-o ina ti mitangi buwa biamogo bialu ina Amoroali ti luore ira tamia ale howa hongoheore ira bai ale hearuni handape howa bo hilo wahai harugoni.☆ 10 Ina ti iyibi dindiha howa haru tagira ibirungi dindi ko wali agali nahaga wiagoha inime haru bamba halu mali pira mariani (40) haru howa Amoro hameigini palearunaga dindi ti karu lalimulo mo ngirugoni. 11-12 Ti igini hearume ininaga bi mana latagi haga helo dabaluhelarugola tigua nahole lalu larimigoni. Igiri daliahe maru Nasa aria helo dabo helaruru hongo howa waini iba nelo mo nahalu birimigoni. Ina manda bialu koria bi ogoni heneneore. I Anduane Homogo ina bi o ledogoniore, lene.

13 Anigo ina ti dindiha hangedopeore holebero. Ani berogola agalime mbirale gendabi mbira yaraga halu karia darama tungulowa e lalu homaraligobi hondoleberemi. 14 Agali gerai hongo howa laga karu ti yo pobe nahe holebira. Agali hongo tarahe karu hongo habe nahe holebira. Ami agali karume tini pele mibe nahe holebira. 15 Agali wai biaga karume hongo howa wai bibe nahe halu agali gerai hongo howa laga karu ti gerai lalu yo pobe nahe halu agali nogo hosini biruwa wai biaga karu ibida pobe nahe holebira. Ti bibahende yo pialu napolebiraore. Ti waitigime bo hilo wahaiore holebira. 16 Horo ogonongi ami agali gi nahaga pari wayali heneru bibahende danda timu wahalu ibida piai holebira, lalu Anduane Homogo inime aniore ledogoni, lene.

☆ 2:1: Ais 15.1-16.14, 25.10-12, Yar 48.1-47, Ese 25.8-11, Seb 2.8-11 \* 2:8: Mana ogoni Haru Tagira Penego 22.26-27 howa ledago handabe. ☆ 2:9: Man 3.8-11

### 3

<sup>1</sup> Isaraele wali agaliru-o tí Anduane Homogohanda Iyibi dindi howa haru tagira ibalu ogoha ibini kamigo ai ibugua tíhondo bi olarago hale hadaba. <sup>2</sup> Ibugua lalu, Wali agali dewaore dindi bibahende ngaruha bu hearu helowa ai tí hangu inaga wali agaliore halimulonaga ina tí dabo helarugoni. Ani birugo ai tigua mana ko dewa i hondo hewagola birimigome ko dewaore tíha to layadagonaga ina tí mana lalu pani timbuni ngulebero, lene.

*Anduane Homogohanda bi larago agali ibunaga bi latagi haga kagome lamulene ngago ogo*

<sup>3</sup> Agali kiralime ogoha mbaliya ala nalowi howa hariga mandagi piagabe. <sup>4</sup> Budi gabua ale laionome tomo naga ale irabuha taya pialu bo ya nabi biruwa ngororo lagabe. Laiono iginime ibuni paliaga ege kabaha paluwa tomo nolene mina nabi howa ngororo lagabe.

<sup>5</sup> Ega gonoha delo ndole bialu ibilonaga ibunaga tomo nagane ale mbira nawiyagua agua bialu gonoha dolobadabe. Ega timbuni ge gono wialu pedaria ega nade howa bame pini hangume do wiagabe.

<sup>6</sup> Mbiralime wai ibira lalu tanoha howa mbelo biguli hongo howa pu layagua nde wali agali tanoha karume gi nahe holebirabe. Anidagua dege tano mbirago mo ko hayagua genda ogoni Anduane Homogohanda ibileneda naloleberemibe.

<sup>7</sup> Anduane Homogo Bibahende Haru Haame Ho Haga kagome mbirale bule mandabu ngaru ibunaga bi latagi haga agali karuha howa ala latagi howa mani ibugua bule lalu lo wiyago heneneore biaga ka.

<sup>8</sup> Agalime budi gabua ale timbuni laionome ngororo laruago hale howa ti gi nahagabe. Ai Anduane Homogo Bibahende Haru Haame Ho Haga kagome agali mbiragohondo bi layagua nde agali ogoni ibugua bi layago latagi habe nahe kabe be ibugua latagi holebirabe.

*Samaria tano mo ko holebira, lalu Amosohanda latagi halu mbiwia henego ogo*

<sup>9</sup> Amosohanda lalu, Tigua wali agali Asadodo tanoha karu olalu Iyibi dindiha karubi olowa ogodagua lalimu. Samaria dindi hari hombeneni mo ngoai howa wali agali bibahende tano ogoniha karu luluyu howa mana ko ngaru bialu kago handadaba, lalimu.

<sup>10</sup> Anduane Homogohanda ogodagua leda, Samaria wali agali urunime mendeali mo hondo howa gungu bialu mini ngaru mo yuwabi mendealinaga mbirale ngaru mo page bini ngarume ti andagaha wu tolo tagi kago handadaba. Tigua mana tigabi bulene ngaru manda nabiagaore ka. <sup>11</sup> Ani bialu kagonaga waitigime tano ogoniha anda ibuwa anda timbuni hongohe karu bo gialo wahalu mbirale bayale anda tamuha ngaruni mo yu piai holebira, lene.

<sup>12</sup> Anduane Homogohanda laabo halu ogodagua leda. Budi gabua ale laionome nogo sibi mbira bo yalu puwa nalu heagua nogo sibi anduaneme gingila mule haruru pialu karia ge kuni kira hangu ibira halu hale yuni mbirago dege ibira karia handaga. Manane ogonidagua dege Ngode Datagaliwabehanda Isaraele wali agalinaga dindiha tano timbuni Samaria wiyagoni ogonidagua bulebira. Wali agali tano ogoniha turuho haga biaru mo ko halu homolebira. Wali agali emene yu wahene dege bayale holebira. Manane anda bibahende gialo yu piai henenaga dagia gene dege ibira haradagua bulebira, lene.

<sup>13</sup> Anduane Homogo Hongo Haiheore howa Bibahende Haru Haame Ho Haga kago ibugua lalu, Tigua bi larago baya hangu hale halu bi ogoni Yagabanaga aguanene bu karuhondo lamilimu. <sup>14</sup> Isaraele wali agalirume mana ko bialu hayagonaga pani merongi howa tinaga tano Bedeleha bo lomabu miaga dabu bu heledaru bo gialo wahi helolebero. Ani bialu dabu ogoninaga gibuni mariani nogo bulumaga ne gayane kaligobi wabu heledaru bibahende bo gingirulo paya bialu dindini ibira hai

helolebero.\* ☆ 15 Tinaga anda bayale dagare birangi paliaga poboyogobi bu heledarubi poboyogo birangi birulene nemanda bu heledarubi bibahende bo gialo wahai holebero. Anda bayaleore tara nogo elebananaga ne gayanerume yári bia howa bu heledarubi bibahende bo gialabagabu wahalu anda timbuni bu karu bibahende bo gialobaga biai holebero, lalu Anduane Homogohanda lene.

#### 4

<sup>1</sup> Samaria wali bedemiru-o bi ogo hale hadaba. Tí nogo bulumagarume tani dewa nowa habatigihe hagagobi tí bame biruwa tígua wali agali yagibano karubi burupale karubi dara halu biamogo nabi howa ti genda yu helonaga mo ya haga bedemigoni. Tígua tí agalinihondo lulu iba dewa noliya ngi lalu haya haabo hagaore bedemigoni. <sup>2</sup> Anduane Homogo Bibahende Haru Haame Ho Haga kago ibugua mana tigabiore biagago bi hongo howaore lo wialu lalu, Heneneore horo mbira tagira ibulebira. Horo ogoni ibirangi tí wena hugume bibahende bolo magamaga buwa pume hende howa gililo yalu polebira. Wena hugume bo ledagola agalime gililo yamiagadagua tí gililo yalu polebira. <sup>3</sup> Pabe gialo wini wiagoria minu yalu puwa Hamono dindihayagi batagi holebira.

*Anduane Homogohanda Isaraele wali agaliru pani minigo milowa tinaga embone giambe henego ogo*

<sup>4</sup> Anduane Homogo Bibahende Haru Haame Ho Haga kago ibugua ogodagua leda, Ai Isaraele wali agaliru-o tí áyu ogoni pudaba. Amu Bedele dindiha i mitangi bialu lotu laga biagoha mana koru bima pudaba. Giligala tanohabi lotu laga biagoria mana ko ngaru biato hama pudaba. Egerebagi bibahendengi nogoru inihondo lomabu ngule yalu ibalimu. Ani bialu horo tebone bibahendengi mbirale ngamiru pi halu tale bialu pinigo inihondo loma ngule yalu ibalimu. <sup>5</sup> Ani bialu mberedi loma buwa ihondo kaj lalu ngia naberemi. Tígua mbirale pi halu tale buwa pinigo ihondo ngia naberemi. Ani buwa tinaga mini yaraga halimu. Mana ogonidagua bule tí hamelo hagayagonaga laro, lene.

<sup>6</sup> Anduane Homogohanda ogodagua lara, Inime tinaga tano bibahendeha hina gari timbuniore ibilarugola tomo naneore harimigoni. Inime binidalo manda bialu mini beregeda nabioire kamigoni. <sup>7</sup> Ai tomo anda helonaga dalu ibaga wiyagoni naibilo payarugoni. Tano maruha dalu ibilalu maruha naibile waharu. Mabu maruha gomba helonaga iba dalu ibilarugo maruha naibilarugola dindi lebola daga hayagoni. <sup>8</sup> Wali agali tano mbirahayagi hagaru ti tano mendeha iba taya bima piyago nabereyane handarimigoni. Ina urunidagua birugola tígua ini kogoha mini beregedalu dai nabi kamigoni, lene.

<sup>9</sup> Anduane Homogohanda ogodagua lara, Ina puyabu poboyogobiore ibilarugola tinaga mabuha tomo hengemiruha mo ko holene tagira ibiyagoni. Pagaya aleme tinaga mabuha tomo hengemirubi gerebi lini dagane mabu hengemirubi tinaga poge irane hearubi olibe irane hearubi bibahende naiore hayagoni. Ani biyago hondowa tini mini beregedabehego naberegedeore kamigoni, lene.

<sup>10</sup> Anduane Homogohanda laabo halu lalu, Warago koorene ko mbirame abale Iyibi wali agali bo waharudagua tíbi ani bulebero. Ani bialu wai birimingi howa waitigi agalime tinaga igiri daliha hearu bo wahai halu tinaga nogo hosi hemiruni waitigi agali hearume haru halu piai helarugoni. Ani buwa wai bialu agali bo payapaya bini tí hemigoria wiarume ngu timbuni bialu wiyaru manda bibehego tí namandabi dege howa mini beregeda nabioire kamigoni, lene.

\* **3:14:** Isaraealime tinaga lomabu miaga dabu helenegoria nogo bulumaganaga ne gayane ale wabuwa gibuni maria winigoria helaga hene. Haru Tagira Penego 27.2 handabe. ☆ **3:14:** 2 Kin 23.15



11-12 Ani lowa Anduane Homogohanda lalu, Abale Sodomo Gomorala mo ko howa bo waharudagua tí maru mo ko halu bo waharugoni. Ani birugo ai wali agali maru áyu kamiruni tí ira timbuni dene daba tebo dugu wini ngaligobi kamigoni. Tí anidagua bini harimadalo manda bibehe kamigo howa mini beregeda nabioire kamigonida. Ani bidamigonidago nde ina Isaraele wali agali tí mo ko howa boliyago ani bialu hadaba. Ai bi ogoni Anduane Homogo inime heneneore tagira pelogoria lo werogo tí bibahende manani howa tale buliya íbu hai hole kamigoni, lene.\*

*Anduane Homogo ibu mbirale bibahendenaga hongo haiheore kago ogo*  
(Amoso 5.8-9, 9.5-6)

13 Hari timbuni karu wabialu puyabu poraru pelaga Ngode Datagaliwabe ibuore kagoni.

Ibugua ibuninaga bu miniha mitangi bu karu wali agalihondo lapani haga ka.

Horombenaga wá holene ngago mo arumaho helaga kagoni.

Ibu dindi hari ngaruha ibagabu haga kagoni.

Ibunaga mini ogo,

Anduane Homogo Ngode Datagaliwabe Hongo Haiheore kagoni,

lalu lolene nga.

## 5

*Anduane Homogonaga bi mana latagi hagame dara halu dugu bia henego ogo*

<sup>1</sup> Isaraele wali agaliru-o mbirali homaragola dara howa dugu biagadagua tínagaore dugu bia harogo hale hadaba.

<sup>2</sup> Wandari mabuage ale Isaraele pilayago ai nde ibu lone heyabe naheore.

Ibu dindini pilo ibiraho nga.

Mbiralime lone mo heya habe nahe ngagoni,

lalu larogoni.

<sup>3</sup> Anigo Anduane Homogo Bibahende Haru Haame Ho Haga kago ibugua lalu, Isaraele dindi tano mbiraha howa ami agali daosini mbira (1,000) wai bule tagira piyaru ai handari mbira (100) hangu dai biya. Tano mendeha howa agali handari mbira (100) wai bule tagira piyaru ai pirali hangu dai biya, lene.

*Isaraele wali agalime Anduane Homogo kagoha dai biyagua ti holene bayale mulebira, lenego ogo*

<sup>4</sup> Anduane Homogohanda Isaraele wali agaliruhondo lalu, Ini kogoha holene bayale mule dai bidaba. <sup>5</sup> Tí Beaseba tanoha lotu lole napilimu. Tígua j Bedele tanoha kabe toba howa tai nabilimu. Tano ogoni mo ko halu bo gialo hole bu waholebira. Giligala dindihabi lotu lole napilimu. Dindi ogoniha wali agali karu dindi mendeha garabayabu yalu polebirago tí Giligala dindi napilimu, lene.

<sup>6</sup> Tí Anduane Homogo ibuni karia dai bialu holene bayale ibuha howa mo yule dai bidaba. Ai tígua ibu karia dai nabirimiyaguaibunime hariha howa ira hedo ibira haradagua bialu tí Isaraele aria karuni dai holebirago. Ira ogonime Bedele dindibi da dege bulebira. Ani dalu kagola agali mbirame ira ogoni ba hundia habe nahe holebira.

*Wali agali mana ko biaga karu mo ko holene wulebira, lenego ogo*

<sup>7</sup> Agali manani howa tigabi dabolene ngadagua ndo ke howa mo hondo haga kamiru tíha pani nolene emene ndoore timbuni wulebira.

8-9 Anduane Homogohanda yakundirubi wá haga ale marubi harini wabu heleda.\*

Ibugua wá kagoha mo aruma halu aruma haga ngago mo wá haga ka.

Ibugua iba solowara timbuni bedaru íbu lalu dindini haealame ha layagua ani biaga ka.

\* 4:11-12: Pig 19.24    ☆ 5:8-9: Yob 9.9, 38.31

Ibugua agali hongo gibihe karu mo ko howa pani mialu tinaga anda hongohe bu heledaru bo gialo wahalu biaga kagoni.

Nahendene ale tara uruni biaga kago ibuninaga mini Anduane Homogoore kagoni, lalu iba gana lene.

*Amoso ibugua Isaraele wali agalime mana ko biyagonaga bi laminigo ogo*

<sup>10</sup> Agali tigabi mbirame manani dabalulu howa tigabi ngadagua dabalulu ko biaga kago taliragola tígua agali ogoniburu handabe manga haga kamigoni. <sup>11</sup> Tígua agali yagibano karunaga dabudabu emene yu karu gingila mialu tomo mbirale ngaru mo page biaga kamigoni. Ani buwa ai tí anda hongohe ege tole anda buwa kamigonigo tíni anda ogoniha napalueberemi. Tínaga mabu ngamiruha gerebi lini hingedamirunaga ibaneme waini iba hambialu nanoleberemi. ✧ <sup>12</sup> Tígua bia ko hene dewaore ngamigome tíha ko bini dewaore ngagoni manda bido. Tígua agali mana tigabi ngaru biaga karu mo ko haramili. Agali ko biaga karume tinaga bi lahabe lalu muni ngirago mo yuwa yagibano karunaga bi henene larago yula dambi halu muni ngiyagonaga ke howa lahaga kamigoni. <sup>13</sup> Wali agalime mana tiga nabi ogonidagua mbira biyagua agali mana mandabi kamiru tígua bi mbira nale ne hambu ndibu lowa ema nabi holene karulape nga.

*Mana tigabi ngaru bialu kamigola Ngode Datagaliwabehanda ibuni tí heba haabo holebirago ogo*

<sup>14</sup> Tígua mana ko ngaru wahai howa mana bayale ngaru hangu bialu halimu. Ani beramigola tíni bayale holeberami. Tígua Anduane Homogo Ngode Datagaliwabe Hongo Haiheore kago ibuni tí heba haga ka laramiligo ai tígua mana bayale ngaru bialu harimiyagua nde heneneore ibuni tí heba mandagi haabo holebira. <sup>15</sup> Mana ko ngaru yu wahalu mana tigabi ngaru hangu bialu howa godi laramiru lalu manani tigabi dabolene ngadagua dabalulu halimu. Tígua anidagua bialu harimiyagua Anduane Homogo ibugua wali agali emene yu wahene kamiruni baya hangu handayaho holebira. ✧

*Isaraele wali agalirume yilalu dugu bulebira lenego ogo*

<sup>16-17</sup> Anigo tígua mana ko urunibi beremiligonaga Anduane Homogo Hongo Haiheore howa Bibahende Haru Haame Ho Haga kago ibugua lalu, Ina tí pani nguleore ngogoni. Ani berogola tígua tanonaga hariga pugupugu bidarunaga yilalu dugu bigibigi bialu holeberemi. Ogonidagua bialu howa mbirali homaragola yilalu dugu biaga karubi agali nogo sibi haru haga tano tagirahayagi karubi olowa yilalu dugu biamogo bule ibidaba lalu ololeberemi. Ani berogola agali maru waini iba wabiaga gerebi mabuha karume yilalu dugu tara bima bima ibalu holebira, lene. Anduane Homogohanda ina bi o ledogoniore.

*Anduane Homogonaga Horo ibirangi bulebira lenego ogo*

<sup>18</sup> Tí bibahendeme Anduane Homogonaga Horo abale ibilo hamelo kamigoni. Anigo tí darabiorada. Horo ogoni tagira ibiragola tígua mbirale mbira bayale agile mo yu holeberemibe. Horo ogoningi wá holene nawi tíha aruma holene wulebira. <sup>19</sup> Horo ogoningi ogodagua bulebira. Agali mbira ibu laionome bo nolebiragola ibida pialu karia habolo puwa ibu balu nolene dege mende biango ale gabua timbuni bea ngola holebira. Agali mbira ibu tagira howa andaga dai bialu anda pole pialu karia puya anda haiha wuwa hayaradagua bulebira. <sup>20</sup> Anigo Anduane Homogonaga Horo ogoningi aruma hai howa wá holene emeneorebi nawulebira. Turu holene mbira nawi mo ko holene dege wulebira.

✧ 5:11: Man 28.30, 28.38-40, Mai 6.15, Seb 1.13 ✧ 5:15: Iba 97.10, Yol 2.14, Mai 5.3, 5.7-8

<sup>21</sup> Anduane Homogohanda lalu, Tínga horo timbuni mo ngoai howa lotu laga ngamiruni i turu nahe howa hame naleore kogoni.✠ <sup>22</sup> Tígua mbirale bo lomabu de-larimiyaguabi balawa wabiaga widi lini lomabu ngirimiyaguabi ina yamia nabulebero. Nogo bulumaga hinidemiru tomo baya hangu nelu muwa habatigiore kagola ihondo kai lalu lomabu ngule haru ibirimiyaguabi ina nayamulebero. <sup>23</sup> Tígua ngida ale balu iba gana laramiligo iore hale naholego nalalimu. <sup>24</sup> Anigo tígua bilimulo hame ledogo mbira ogo. Tígua mana bayalebi tigabi bulene ngarubi bialu halimu. Tígua ogonidagua bialu kamigome iba timbuni hundi nabiaga poraligobi wulebira.

<sup>25</sup> Ai Isaraele wali agaliru-o. Mali pira mariani (40) ini tí heba mandagi wali agali napale dindi ko wiagoha ibagabu harimago howa ina tihondo loma mbira bo ngidaba nale haruligoni.✠ <sup>26-27</sup> Anigo ai áyu howa tígua i yu wahalu puwa mbirale ko tígua kini lalu gime wabinigo mini Sagudu wirimigobi mende yakundinaga lalu mini Kaiwana wabu wirimigobi ogoni labohondo bi pupu wialu kamigoni. Ani birimigome ina dindi mbira Damasagasa tano ngagohayagi garabayabu yalu pelarogola pialu howa tígua gime wabini ogonilabo mo yalu poleberemi, lalu Anduane Homogo ibu mini Ngode Datagaliwabe Hongo Haiheore kago ibugua bi ogoni lene.

## 6

### *Isaraele wali agalime tini biamogo bulene nakarulape henego ogo*

<sup>1</sup> Wali agali Yarusaleme tanoha kamirubi Samaria tanoha kamirubi tí bibahende awadaga bayale kamagodago lowa tíha mbira agi bulubadabe lowa hadapeho kamiruni dara ho kogoni. Isaraele dindinaga agali haguane tí kamiria wali agali tígua ti biamogo bilimulo ibaga wiyago ai dara ho kogoni. Tí bibahende mo ko holene wulebiragonaga dara ho kogoni. <sup>2</sup> Tígua Kalene tano ngago hondo pudaba. Ani bialu tano timbuni Hamadabi hondo pialu Pilidia dindiha tano Gede ngagobi hondo puabo halimu. Isaraele dindi Yuda dindila bayale ndo lowa dindi hondo pirimiruni bayaleyabe. Ani bialu dindi uruni timbuni tígua dindi timbuni ngamigobi dege wiabe. <sup>3</sup> Tígua manda bialu kamiria tíha mo ko holene mbira naibulubadabe. Ai tini ko ngaru bialu kamigome mo ko holene yu anda eberemigonaga dara ho kogoni. <sup>4</sup> Wali agali homogo kamiru tí nogo bulumaga sibirunaga mbirini bayale ngaru nowa dagia bayale ngarunaga paliaga kamiru tíha mo ko holeneme ngola holigo de hondo holene nga. <sup>5</sup> Kini Debidihanda iba gana lo winidagua tígua iba gana gahenge dewa lo wule manda buwa ngida ale tara tara balu iba gana laga kamiruni. <sup>6</sup> Tígua emene halo ha nabi howa gabo beha waini iba dewaore hambialu naho wiaga kamigoni. Tínga tinginini welibi nga biaga tara mini sandabi hai haga kamigoni. Anigo Isaraele dindini mo ko holene tagira ibiragola tígua dara nahagane kamigoni. <sup>7</sup> Ani bialu kamigome dindi mendeha garabaya bamba holene tíore holeberemi. Ani beremigola tomo dewa dawa nagimbu bialu tígua turu ho holene henge nawiore holebira.

<sup>8</sup> Anduane Homogo Hongo Haiheore howa Bibahende Haru Haame Ho Haga kagome buleore lalu bi hongohe mbira ogodagua lo ngeleda. Isaraele wali agalirume mine halu kago ina turu naheore kogoni. Tínga anda timbuni karuha yári bayale ngamirubi hame naleore kogoni. Ani bidogo ai uruni bibahendeore tí waitigi dindi taraha karu giha mo ya holebero, lene.

<sup>9</sup> Ani lowa lalu, Ai agali pirali hangu anda be mbiraha yu wahene heagua uruni bibahende homai holebira. <sup>10</sup> Mbiraligo homedagola ibuni damene mbirameibunaga tingini mo ibulebira. Ani buwa ibugua anda ogoniha mbira yu wahene bira do kago-hondo lalu, Mendeali bedabe naberebe, lolebira. Ani laragola agali bira do hene biago ibugua ladai bialu lalu, Nabereore, lolebira. Ani laragola agali homenenaga tingini mo ibini biagome lalu, Bi nalabe. Anduane Homogonaga mini nalamiya, lolebira, lene.

<sup>11</sup> Amoso ibugua lalu, Anduane Homogohanda ogodagua lara, Anda bu karuni emene timbunibi bibahende bo gialabaga bialu gingirulo payabu wahadaba, laragola gingirulo bagabu waholebira. <sup>12</sup> Tígua manda beremigola nogo hosime ege tole timbuni ngaruni gerai polebirabe be agalime e hongole lowa ege tole ngagoria nogo bulumagame dindi tombelo haru gililama polebirabe. Ani nabiagago manda buwa tígua mana ogonibi bialu kamigoni. Tígua mana tigabi ngago agali homelo tomia bialu mana bayale ngago tígua degeme mo beregedalu mo ko haga kamigoni.

<sup>13</sup> Tígua wai bialu Lodeba tano bo poda hana halu tini karularima lowa mine halu kamigoni. Ani bialu howa lalu, Inane hongome Karinaimi dindibi bo poda hana halu karularima, lalu kami. <sup>14</sup> Anigo Anduane Homogo Ngode Datagaliwabe Hongo Haiheore kago ibugua ogodagua lara, Ina agali dindi tara howa tí baba wai bilimulo ibilolebero. Uruni tigua tí mo ko howa bo podama pialu uyurahayagi Hamada tanoha bama puabo halu unurahayagi dindi ulini Araba ngagoria bo poda hana holebira, lene.

## 7

### *Amoso ibugua de gandeba handalu hearia pagaya ale mbira hendene go*

<sup>1</sup> Anduane Homogo Bibahende Haru Haame Ho Haga kagome ihondo de gandeba mbira mo walia haya. Ina handalu hewaria pagaya ale wabuni timbuni mbira ibilaya. Agali biabe biahaga hearume datani hearu gandulo yu pialu kininaga nogo bulumaga hearu nelu minigo ai mani teneha howa pudu lalu andaho aribia halu heaore dege pagaya ale uruni tibi nde tagira ibiya. <sup>2</sup> Ani handalu hewaria pagaya ale uruni tigua datani dindi bibahende ha hearu nai hayane handaru. Ani biyago hondowa ina lalu, Anduane Homogo Bibahende Haru Haame Ho Haga-o inaga Isaraele wali agali karuninaga ko ngaru domo wahai ha. Ti dewali ndo emene ko hangu howa hongo naheore karunidago ina ti mana lalu pani miriyagua nde ti mani agua bialu bayale holobadabe, laru. <sup>3</sup> Ani larugola Anduane Homogo ibugua mini wiadai bialu lalu, Ai áyu de handariruni tagira naibulebira laya, lene.

### *Amoso ibugua de gandeba handalu hearia ira dayaria hendene go*

<sup>4</sup> Anduane Homogo Bibahende Haru Haame Ho Haga kagome de gandeba mende ogobi walia haya. Anduane Homogohanda ibunaga wali agali pani mule lowa ira timbuni delo manda manda biago handaru. Ira ogonime iba kuyuma timbuniore dindiha bereago dalu do hundi lowa ai dindini dama irigi hayane handaru. <sup>5</sup> Ani biyago hondowa ina lalu, Aiore Anduane Homogo Bibahende Haru Haame Ho Haga-o anidagua nabuleore. Inaga wali agali ti dewa ndo emene ko hongo nahe karunidago ina ti mana lalu pani miriyagua nde mani ti agua bialu bayale holobadabe, laru. <sup>6</sup> Ani larugola nde Anduane Homogo ibugua mini wiadai bialu lalu, Áyu handarigoni tagira naibulebira laya, lene.

### *Amosohanda de gandeba handalu anda biaganaga pu tiga handaga mbira de hendene go*

<sup>7</sup> Anduane Homogohanda de gandeba tebone walia hayagola handalu hewaria Anduane Homogo ibuni anda hái mbirani hapara ho hearia handaru. Agalime anda bialu howa pu tiga handaga emene mbiraha aeane emene dege mbira pu ngunini pongo biaho helowa anda háidago tigabi kabe hako hayadabe hondole tiga handaga pu heleneyago Anduane Homogohanda yaniaho hearia handaru. <sup>8</sup> Ani yaniaho howa ibugua ihondo lalu, Amoso-o o hendedegoni agiledabe, laya. Ani layagola ina ibuhondo ladaí bialu lalu, Pu mbira ngunini aeane pongo biahedago hendedo, laru. Ani larugola ibugua ihondo ogodagua laya. Pu ogonime inaga wali agaliru ti tigabi henedabe be yole henedabe hondolenaga yarugo. Ai anda hái hako hene ula amuhe kaligobi henedane hendedogoni. Ina mini wiadai bialu dara nahe howa ti pani nelu mulebero. <sup>9</sup> Isaraele

wali agali Aisaganaga aguanene karu tinaga lotu lo ngoai haga dindi wiyadaruni bibahendeore bo gialobagabu wahai holebero. Kini Yaroboamanaga damene karu mbiraore hangubi yu wanahe bo wahaiore holebero laya, lene.

*Amosohanda loma binigo mo miaga Amasaia mo keba henego ogo*

<sup>10</sup> Bedele tanoha agali mbira mini Amasaia henego ibu loma binigo mo miaga howa ibugua Isaraele wali agalinaga Kini Yaroboamahondo bi ogodagua lo pelene. Ibugua lalu, Kini-o Amosohanda inaga bi hale nahe wahalu ila waitigi helo lowa Isaraele wali agaliha ndelope hama ibaga bialu ka. Ina ibu ani lalu helo wahariyagua nde ibunaga bi ogonime inanaga dindi ogo mo ko timbuniore holebira. <sup>11</sup> Amoso ibugua bi ogodagua laga bialu ka. Kini Yaroboama wai bialu karia agali waime bo wahalu Isaraele wali agali bibahende dindi mendeha garabayabu yalu polebira, lalu kagoni, lene.

<sup>12</sup> Ani lowa Amasaiahanda Amoso hearia puwa ibuhondo lalu, Ngode Datagaliwabenaga bi latagi haga-o í Bedele dindi ogoria nahe áyu ogoniore pialu Yuda dindiha hama dai bibe. Ngode Datagaliwabenaga bi Yuda dindiha howa latagi hama poregola Yuda wali agalime í yolo bilo ani bule pu. <sup>13</sup> Bedele dindi ogoria howa ina bi labelo ina turu nahe kamagoni. Irane dindi ogohayagi kini ibuni lotu haru haga kagoni. Ani bialu Ngode Datagaliwabenaga anda kago Isaraele wali agali bibahendenaga kagoni, lene.

<sup>14</sup> Ani layagola Amosohanda ladai bialu lalu, I Ngode Datagaliwabenaga bi mana latagi haga howa maru yolo mialu karuni ale ndo kogoni. I nogo sibi haru hagabi poge irane karu handayaho hagabi kogoni. <sup>15</sup> Ai ininaga biabe uruni bialu hewaria Anduane Homogohanda i dabo helalu bi ogodagua langiya. í pialu inaga Isaraele wali agali karuhondo bi ogodagua lamule pu laya handala ibinigo kogoni. <sup>16</sup> Ani birugo ai ina Anduane Homogohanda bi langiyago larogo hale habe. Ibunaga bi Isaraele wali agaliru lamulene yidogo lamuliya nale wahalu pu larigoni. <sup>17</sup> Amasaia-o ina ani larigonaga Anduane Homogohanda ibunaga bi podene íha ngeleda. Ani bidagome í one ibu tano ogoha agali page yama ibaga biaga birulebira. Ani bialu bedagola waitigirume ibalu í waneigini bu karuni bibahende bo wahai holebira. Waitigime inaga dindi ngeruni karulai howa ti tuwa ta holebira. Tigua í dindi tara Ngode Datagaliwabe manda nabiaga karunaga dindiha garabayabu yalu poragola dindi ogoniha í homolebere. Waitigi uruni tigua Isaraele wali agalirubi dindi taraha garabayabu yalu polebira laya, lalu Amosohanda lene.

## 8

*Amosohanda de gandeba handalu hearia mbasigedi nuha tomo tara tara henearia hendene go*

<sup>1</sup> Anduane Homogo Bibahende Haru Haame Ho Haga kago ibugua de gandeba walia hayago handalu hewaria tomo bayale tara tara dewa mbasigedi nuha hono tolo wiaria handaru. <sup>2</sup> Ani hondo hewagola Anduane Homogohanda ihondo lalu, Amoso-o agi dege hendedebe, laya. Ina lalu, Mbasigedi nuha tomo bayale tara tara hono tolo ngago hendedogoni, laru. Anduane Homogo ibugua lone lalu, Ai agalime tomo bogabi bayaleru buyu ngoai howa nagadagua ininaga Isaraele wali agaliru pani mialu bo waholene kaware ibiyada. Áyu ina mini wiadai nabi ti pani timbuniore mule ngo. <sup>3</sup> Ani berogola horo ogoningsi wali agali kini andagaha iba gana lalu hagarume lone nale tigua dugu daraore bia aribia holebira. Wali agali homonerunaga tingini wu paya paya bu wima polebira. Ani bidagola tigua dugu dege bialu holebira. Homonerunaga tinginiru mo batagi haga biragola wali agali bi mbira naleore ona hama polebira, lene.

*Isaraele dindiha mo ko holebira lenego ogo*

<sup>4</sup> Isaraeleali tigua wali agali mbirale nawi yagibano karu handape howa tí mo ko hole hame laga kamiruni tíore hale hadaba. <sup>5</sup> Tigua tíni dege dege laedene bigi bialu lalu,



Lotu laga horo uruni abale piai helo. Ani biragola inanaga tomoru wali agalime yolo bilo magedi hamaha abale yalu polomaya. Ai inanaga tomo magedi yalu polomaya Sabada horo piai hayabe be wene dege ngabe. Inanaga tomo ngamaru ke howa yolo diba daga halu genda magi handagane ngaru ke howa mo hondo holomaya. <sup>6</sup> Balawa wabiaga widi lini ko hene ngamaru muni daliga mulumaya. Ani bialu agali yagibano muni nawi mbira kagohondo dano harimago ti muni emeneorebi ge su hangu mulenebi nawiore dano harimago yadai bibe nahe karu minalu agali mendenaga garabaya biabe ale biahaga hole pelo muni mimiya. Agali ogoni ibugua muni yolo ngiragome inanaga dano harimagonaga pani ngilo ani bimiya, lalu kamigoni.

<sup>7</sup> Anduane Homogo Isaraele wali agalinaga Ngode Datagaliwabehanda bi hongohe mbira lo wialu lalu, Isaraele wali agali tinaga mana ko bialu kamigoniore ina embeda naholeore bero. <sup>8</sup> Ina dindi ogo mo ema bia halu dumbirumbi bilarogola wali agalime gi taraore howa dugu bialu holeberemi. Isaraele dindi ogo bibahendeha dumbirumbi timbuniore bulebira. Dindi ogo irigi halu ibira howa pandu laragola iba Naili tulala daga howa ibira haradagua bulebira. <sup>9</sup> Horo ogoningi dege horombe hanuni ni anda pelarogola abale mbi lolebira. Anduane Homogo Bibahende Haru Haame Ho Haga kogo inime bi o ledogoniore. <sup>10</sup> Horo timbuni uruni tagira ibirangi lotu lalu kamiria turu howa iba gana laga ngamiru mo beregedalu genda yu howa homa duguanda haradagua dugu bialu holeberemi. Tigua bu miniha gendaore howa aba aiyame libunaga igini mbiraore hangu henego homaragola dugu biagadagua bialu holeberemi. Aiore daraho bedago walia halu aga mbege nu ale biaga ngago bu howa mandari podo mbolo lowa halu bulebira. Tigua ogonidagua biai halimulo mo bia holebero. Horo ko ogoningi genda tandagabi luore wiaabo helolebero, lene.

<sup>11</sup> Anduane Homogo Bibahende Haru Haabo Ho Haga kagome laabo halu lalu, Mani howa ti dalu ogoha hina gari timbuni pelolebero. Tigua gari timbuni lalu holebirago hinanaga ndo hege lebolaho holebirago iba noa howa ndobi bulebira. Gari timbuni ogoni iba hina henene ndo inaga bi manaore hale hoa howa garibi timbuni lo holebira. I Anduane Homogo Bibahende Haru Haame Ho Haga kogo inime bi o ledogoniore. <sup>12</sup> Wali agali tigua inaga bi mana hale hole lowa Homene Iba bedagoha howa Medidereniana iba bedagoria dindi bibahende dombeni ngaruha taya bialu ha holebirago howa ti hale naholebira. <sup>13</sup> Horo ogoningi wandari igiri baya hongohe daliahe karu iba noa howa de mborere bialu dindini odo paya paya bulebira. <sup>14</sup> Wali agalirume heneneore bi hongohe mbira lo wialu Samaria wali agalirume dama mitangi bialu mbirale bi pupu wulenaga gime wabini ngaru mini lalu ogodagua laga ka. Heneneore Dana tanonaga dama mbiranaga minini howabi Beaseba tanonaga dama mendenaga minini howabi henene laro laga kami. Anidagua lagaru bibahendeore homai halu lone heya nabulebiraore, lene.

## 9

### *Anduane Homogohanda Isaraele wali agali manani helenego ogo*

<sup>1</sup> Anduane Homogo ibu lomabu delaga dabu ibuni andagaha wiagoria hapara howa hearia ina handaru. Ibugua bi ogodagua laya. I andagaha wali agali haga dagia ngaruni ema bialu birila gimbu bilo anda gene daliga bolangua kagoria nduli badali ha. Anda gene hongohe karuni bo podo paya bialu wali agali karuni bibahendenaga emboneni poda dambi halu bo homelai hela. Uruniha bo dambi nahe hayadaru waitigime ibalu wai buwa bai helolebero. Ani berogola mbiraore hangubi ibida pialu ha do naholebira. <sup>2</sup> Mbiralime ini heneda handala dindiha gua bima pialu humbirini andaha tagira puwa ha do heaguabi ogoni ibu inime haruru puwa handa walia halu minulebero. Mbiralu ibu pialu dahuliya andagaha iragaho heaguabi ogoni ibu dindi ogoria minu gililope

holebero.✧ <sup>3</sup> Maru amu Hari Kamelo kagoha puwa ha do heaguabi ina handa walia halu minaore bulebero. Maru ti ibida puwa iba solowara timbuni bedagoha anda pialu unuraore bira do hayaguabi nde ibaha abagua timbuni bedagohondo, Haya, lolebero.✧ <sup>4</sup> Waitigirume ibuwa garabayabu yalu piyaguabi nde tihondo homelo bo wahalimu lalu lamulebero. Ina ti biamogo nabi homelo bo wahai holebero, lalu Anduane Homogohanda lene.

<sup>5</sup> Anduane Homogo Bibahende Haru Haame Ho Haga howa Hongo Haiheore kago ibugua dindi ogo ela haragola

dindi bibahende ema biai halu wali agali dindini karume mogo lowa dugu biaga ka.

Iba Naili poragome tulala ladaga howa ibira hagamadagua

dindi bibahende ngaru porabu daga halu ibira haga nga.

<sup>6</sup> Anduane Homogohanda dahuliya andagaha howa ibunaga anda bu helalu

hari mindini karume dindi ogo dangila dambi halu anda mbira bia haradagua bida.

Ibugua iba solowara bedaru ibidaba lowa

dindi bibahendeni odo paya bia laragola ani biaga.

Ogoni biaga kago ibuninaga mini Anduane Homogoore laga kagoni.

<sup>7</sup> Anduane Homogohanda lalu, Isaraele wali agaliru-o ina ti handaya ho haruligodagua dege Idiobia wali agalirubi nde ani dege handayaho haruli. Ina Pilidia wali agali karubi nde Kiridi dindiha howa haru ibu helalu Siria wali agali bu karunibi Kia dindi howa haru ibirugoni. Abale Isaraeleali ti Iyibi dindiha howa haru tagira ibirudagua dege tibi haru ibinigo ka. <sup>8</sup> Anduane Homogo Bibahende Haru Haame Ho Haga kogo ina Isaraele wali agali tigua mana bialu kamiruni handalu koria mana ko dewaore tiha toledane hendedo. Anidagua bidamigodago ai ina Isaraele wali agali ti bo hilo wahai helolebero. Ina bo wahaiore nahe howa Yagabanaga aguaneneru maru nde yu waho helolebero.

<sup>9</sup> Ina bi larogome ladi ale mini widi lini aeanela tale biagamadagua Isaraele wali agali inime dabaki holebero. Isaraele wali agali ko biaga karuni dindi mendeha widi aeaneru yalu pu wahagamadagua bialu dindi tara ngaruha ho bilibolo lelelebero. <sup>10</sup> Marume lalu, Ngode Datagaliwabehanda inaha mo ko holene mbira naibilolebira, lalu haga karu bibahende waitigirume ti bo wahai helolebero, lalu Anduane Homogohanda lene.

### *Isaraele dindi lone mo bayale holebira lenego ogo*

<sup>11</sup> Anduane Homogohanda lalu, Horo mbira tagira ibulene ngago ogoni ibirangi ina Isaraele wali agalinaga kini mbira tinaga mamali Debidi henegobi helalu anda mbira podo ibira ho wiradagua bidaruni lone mo heyaho helolebero. Anda ibu abale bayale hongohe hayagobi helo hadai bilolebero.✧ <sup>12</sup> Ani bidogola Isaraeleali ti hongohe howa Idomo agali karu baba wai bialu howa bo podalu dindi ti karulolebira. Dindi marubi ininaga ala wini ngaru bibahende tigua karulai holebira, lene. Bi ogoni Anduane Homogo ibunime bule layago biaiore holebira.

<sup>13</sup> Anduane Homogohanda lalu, Horo mbira ibulebirago

ogonongi tomo bayale abale anda howa

lini dewaore wali agali abale nai habe nahe dolebira.

Pu mbira lini daga mini gerebi karume lini dewaore abale daragola

waini iba wabiaga karume lini pingidalu waini iba wa biai habe nahe dolebira.

Waini iba bayaleru dindi hari ngaruha howabi hari bare emene ngaruha howabi

dugua tagi hene ale hambu paya biradagua bulebira.✧

<sup>14</sup> Ininaga wali agaliru tini dindi wiyagoha haru dai bulebero.

Tinaga anda paberu gialobaga bini wiyaru

lone bu aribia halu hayagobi dege helolebira.

✧ 9:2: Iba 139.8, Yar 51.53, Oba 4 ✧ 9:3: Yob 34.22, Iba 139.9-12, Ais 27.1, Yar 16.16 ✧ 9:11: Ab 15.16-18

✧ 9:13: LBM 26.5, Yol 3.18

Tinaga mabu hangaga wiyagoha gerebi irane hongowa  
gerebi lini dedagola dagadagua waini iba wabialu hambu nalu tomo marubi  
hangalu dewa nalu holebira.✧

<sup>15</sup> Inaga wali agali uruni ti tinaga dindi inime mirugoha bayale kagola  
mbiralime ti lone bo batagi habe nahe holebira.

Anduane Homogo tinaga Ngode Datagaliwabehanda bi ogonidagua laya,  
lalu Amosohanda lai hene.✧

## Obadaia

### Mbuga ogoha gilibu ngarunaga nemandi ogo

Anduane Homogonaga bi mana latagi haga agali Obadaia ogoni ibunaga bi mana latagi halu henedagoni Babilonoalirume Yarusaleme tano bo gialo wahai halu mo labu hene wiangi howa latagi halu hene. Abale Idomoali tigua Isaraele baba waitigi ho haga henego ainde Babilonoalime ibalu Yarusaleme bo gialobaga bialu mo labu hayagola Idomoali tigua nde turu timbuni ho hene. Ani howa tigua Babilonoalirume Yarusaleme mo ko helonaga tigua Babilonoaliru biamogo bialu wai bini.

Ani biyagola Obadaia ibugua mbiwia halu, Anduane Homogohanda Idomo dindi mo ko holebira. Idomo wali agalirubi wali agali hameigini dindi tara tara ngaruha karubi Isaraele wali agali baba waitigi haga hama pedaru bibahendeore mo ko halu homo ereba haiore holebira, lalu mbiwia hene.

Idomo wali agalirume mana ko wiaru bialu heagola Anduane Homogohanda tinime biyagonaga pani nelu mini.

#### **Bulu бага бува кuni gilibu ngago**

1-14

Idomo wali agaliru pani nenego

15-21

Dabaki bulene horo wulebira lenego

<sup>1</sup> Anduane Homogo Bibahende Haru Haame kago ibugua Idomo wali agalinaga dindihaore ogodagua bule ngeledo lalu Obadaia ibugua latagi helo lamini.✧

#### *Anduane Homogohanda Idomo wali agali pani nelu minigo ogo*

Anduane Homogohanda ibunaga bi lamiaga agali mbira dindi bibahendeha piai hole pu layagola bi latagi hama penego ogoni ibugua bi layago ina hale harima.

Ibugua lalu,

Idomo baba wai bu maliya manda manda bu halimu, laya.

<sup>2</sup> Anduane Homogohanda Idomoali hearuhondo lalu,

Ina tínaga hongo bo podalu bope holebero.

Anidagua berogola wali agali hameigini tara tara palu karume tí erembira ngialu yo hondolebira.

<sup>3</sup> Tínaga balagala haga mana ngamigome tíni mo hondo henego kamigoni.✧

Tínaga tano wai pabe ege toleme bu yu mabu bini kagoni.

Tí hari neneha haga kami.

Ani howa tíni laga bialu lalu,

Ina bope habehe ai haruadabe mbirali naheore ndobe, laga kamigoni.

<sup>4</sup> Anigo ina tihondo langerogo ega bodo hariaweme hari nene daligaoreha pialu hari bareore ngagoria anda bu paliagadagua tigua daligaore yakundi bu karuha anda bu ha kamiyaguabi nde horo mbiru ina tí dindini bo haealape holebero.

<sup>5</sup> Pagealime mbiraga ibalu mbirale ti hameleda alego mo yu pialu maru ngelo wahaga ndobe.

Ani bialu wali agalime pu mbira mini gerebi lini do wialu howa maru delo wahaga.

Anigoyu tí waitigi bu karume ibiragola tí balu bo bibaore hai holebira.

<sup>6</sup> Iso hameigini kamiru tínaga munirubi dabudabu tara tara ngamirubi bibahende mo yu piai holebira.

<sup>7</sup> Hameigini maru tí haru mandagi haga biarume tihondo ke halu mo hondo holebira.

✧ **1:1:** Ais 34.5-17, 63.1-6, Yar 49.7-22, Ese 25.12-14, 35.1-15, Amo 1.11-12, Mal 1.2-5 ✧ **1:3:** 2 Kin 14.7, Ais 14.13-15, Mo 18.7

Urunime tí bo batagi haragola tínaga dindi yu wahalu tagira piai holeberami.  
Hameigini maru tí haru mandagiore haga biarume t́ni baba wai bialu tí bope holebira.  
T́naga nenegeore tí baba mandagi biruwa tomo naga hayarume tí gonoha dalimulo  
gono wu holebira.

Anidagua gono wedagoha tí do ngamigola uruni tigua lalu,  
Idomoalirunaga mini giga bulene biago ai agoha ngabe, lolebira,

<sup>8</sup> Ina Idomo wali agali pani merongi tinaga agali manda timbunibi karuni bibahende  
bo wahai halu tinaga mini gigabi ngaruni mo ereba hai holebero.

<sup>9</sup> Ani berogola nde Temana tanoali wai bulenenaga manda timbunibi howa bogabiore  
karuni bibahende gi hai holebira.

Ani bialu Iso hameigininaga dindini ami agali honghe bu karuni ti bibahendebi bo  
wahai holebero,  
lalu Anduane Homogohanda laya, lene.

*Idomo tini biyagonaga pani nolene winigo ogo*

<sup>10</sup> Anduane Homogohanda laabo halu lalu,

Idomoali t́gua tí hamene Yagaba hameigini bu karunaga mbirale wiaru mo pagebu yu  
piaí halu tini homelo bo wahai harimigoni.\*

Ani birimigonaga ina tí mo taga timbuniore halu t́naga mini mo ko hai holebero.

<sup>11</sup> Yudanaga waitigi bu hearume ibalu Yarusaleme tanonaga wai pabe heago bo gialalu  
anda puwa tanoha munibi dabudabu wiarubi mo yai howa talebu ta haga  
bialu hearia t́gua nde mbirale uruni aria mbira mo ya nabi bame howa Yudabi  
biamogo bialu mo wia nabi dege harimigoni.

Ani birimigome t́bi nde pageali o hayadarubi dege harimigoni ndobe.

<sup>12</sup> T́ hamene Yudahondo mana ko liahe dewaore bialu harimi.

Yuda mo ko hayagola t́naga bu miniha turu halu dungulo harimigoni.

Ti mo ko hene heagola t́gua mine halu handape ho harimi.

<sup>13</sup> Inaga wali agaliru genda yu heagola tigua tanoha anda puwa tandaga nalu wiagola tí  
turu haga birimi.

Ani bialu tinaga dabudabu bayale wiaru mo yarimi.

<sup>14</sup> T́gua hariga gebaga wigi biagoria handayaho howa Yuda wali agali ibida pole  
pugu biyaria t́gua minu yania haga buwa tinaga waitigi hearuhondo minu migi  
birimigoni.

T́gua mana urunidagua bialu harimigo mana koorene ko birimigoni, lene.

*Anduane Homogohanda wali agali bibahendeore pani mulebirago ogo*

<sup>15</sup> Anduane Homogohanda laabo halu lalu,

Horo mbira ina wali agali bibahende dabaki bulene winigo ai ibulene kaware haragoni.  
Idomo wali agaliru-o t́gua maruhondo birimidagua t́nihondo nde anidagua dege  
bulebira.

T́gua mana ko birimigonaga pani t́nihondo biadai bulebira.

<sup>16</sup> Ainde inaga wali agali bibahende ininaga Hari Saiono loma bia hene biagoria bu haga  
hearuhondo pani iba kaubi ale nelu mirugoni ndobe.

Ani birudagua wali agali hameigini dindi tara tarani bu karuni tibi nde pani nelu iba  
kau timbunibi ale hambu mulebero.

Ani merogola ti iba ogoni nai halu bibahende biba haiore helolebero, lene.

*Isaraealime wai bialu wayali holebira, lenego ogo*

<sup>17</sup> Anduane Homogohanda laabo halu lalu,

\* **1:10:** Yagaba Isola libu aba mbiraore Aisaga hangu igini hene. Isaraele Yudabi libunaga mamali Yagaba hene.  
Idomo hameigini ti Iso aguane hene.



Wali agali maru Hari Saiononi yu wahene karu ti mo ko nahe bayale halu ininaga Hari Saionobi loma bia hene bayale haabo holebira.

Yagaba aguanene bu karu tinaga dindi ina mirugobi tinime mo yu dai bialu karulo holebira.

<sup>18</sup> Ani howa wali agali Yagaba aguanene bu karubi ibu igini Yosebe aguanene bu karubi ti gibiore ira hungu bialuhe ale howa irame dangi gabuni yobi ngagoha ira hedope haragola hungu kiau lalu emene hangubi mbira ibira nahe do mundulo ai hagamadagua bialu tigua Iso hameigini mbiraore hangubi mbira yu wanahe bo hilo wahai holebira.

I Anduane Homogo ina bi o ledogoniore.

<sup>19</sup> Isaraele wali agali Yuda dindinaga abene unurahayagi dindi hobane mini Negebe ngagoria karu tigua Idomo dindiha Isonaga hari ngaru karulo holebira.

Ani bialu Yuda wali agali ni paliragohayagi hari bare bare ngaruha haga bidaru tigua Pilidia wali agalinaga dindi ngago karulo holebira.

Ani bialu Isaraele wali agali marume Eberaimi hameiginirunaga dindi ngago karulalu Samaria dindibi karulolebira.

Beniyamini hameiginirume dindi iba Yodana doma edeyagi ni tagira ibiragohayagi Gileada dindi hobane ngagobi karulai holebira.

<sup>20</sup> Isaraele wali agali dindi abene uyurahayagi haga karu ti nde dindi taraha garabaya pu hayago golaragola tini dalu dai bulebira.

Dai buwa tigua Ponisia hameiginirunaga dindi ngago karulaga bima pialu uyuraore Sarebada tano ngagoria puabo holebira.

Yarusaleme wali agali Sadisi tanoni garabaya pu hayaru ti garabaya golalu dai bialu Negebe dindiha tano bu ngaru karulai holebira.

<sup>21</sup> Yarusaleme agali wai bialu wayali hayarume Idomo dindiha pialu wai buwa Idomo wali agalirunaga dindi hari ngaru ti karulo howa tigua handayaho holebira.✧

Ani kagola i Anduane Homogo ini tinaga kini holebero, lalu Anduane Homogohanda Obadaiaha howa latagi hene.

✧ 1:21: Iba 22.28, 47.9, 66.4, Dan 2.44, Seg 14.9, 14.16, Mal 1.14, Mo 11.15

## Yona

### Mbuga ogoha gilibu ngarunaga nemandi ogo

Ngode Datagaliwabenaga bi mana latagi haga maru henerume bi mana laminiru gilibu ngarubi ndo mbuga ogoniha Yona ibugua Ngode Datagaliwabenaga mana latagi haga howa lamia nabi wahalu ibida pole manda binigo te ogoni gilibu nga.

Dindi timbuni Niniba winigo ogoniha wali agali hearu ti Isaraealeali waitigi ho howa ti koorene ko bialu heago hondowa Ngode Datagaliwabehanda Yonahondo lalu, Wali agali uruni pani muleberogonaga ina bi mbiwia halu lamule pu, lene. Ani layagola Yona ibugua Ngode Datagaliwabehanda wali agali bibahendeore dara howa biamogo biaga ka mitangi buwa Niniba wali agalihondo pani namulebadago manda buwa bi lamule pobe manga hene. Ani manda bu hearia mbira tara tara nahendene ale Yonahondo binirunaga te gilibu nga. Mani Yonahanda bi mbiwia hayago lola naheyagola ibu keba henego te gilibu nga.

Bi ogoniha gilibu ngarunaga tene Ngode Datagaliwabe ibugua bibahende wabini ngaru anduane ibuni ka, lalu walia ho nga. Ibugua wali agali bibahendeore ta nabihondo gubalini halu dara howa biamogo biaga kago walia ho nga. Ibunaga wali agali karunaga waitigi karu bo wahole hame nale tibi gubalini howa biamogo bule hamelo kago walia halu gilibu nga.

#### **Bulubaga buwa kuni uru gilibu ngago**

*1.1-17*

Ngode Datagaliwabehanda Yona olenenagabi Yona ibugua wahalu pole binigonagabi gilibu nga. *2.1-10*

Yona mini beregedenegonagabi Ngode Datagaliwabehanda ibu pele minigonagabi gilibu nga. *3.1-10*

Niniba dindi pialu Yonahanda bi latagi henegonaga gilibu nga. *4.1-11*

Ngode Datagaliwabehanda Niniba wali agali dara henegonaga gilibu nga.

#### *Yonahanda Anduane Homogonaga bi layago hale howa mo wahenego ogo*

<sup>1</sup> Horo mbirungi Anduane Homogohanda Amidai igini Yonahondo bi mbira lamini.✧  
<sup>2</sup> Ibugua lalu, Niniba dindi timbuni amugoria wali agali ogoriani karume mana ko ngubiore bialu kago i manda bu ko, laya lalu ga lalu lamule pobe, lene. <sup>3</sup> Ani layago hale howa dege Yona ibu Anduane Homogonaga bi mo wahalu ibida polenaga hariga tara mendeha pudai bini. Ibu Yoba dindi dalipe halu hearia iba sibi mbira Sebena dindi pole lowa piyaria handa walia hene. Hondowa muni mialu maru berearu heba birule iba sibi biagoha ubanda hene. Ogoni Anduane Homogo yu wahalu pole manda buwa ani bini.✧

<sup>4</sup> Ani bialu hearia Anduane Homogohanda puyabu hongoheore iba solowarani ibilene. Ani biyagola dalubi puyabubi iba yaribubi hongohe gibiore biyagome iba sibi biago podobaga bibahe wini.✧ <sup>5</sup> Ani biyago hondowa iba sibi biagoria berearume gi timbuniore howa tini hangu hangunaga damame ti biamogo bilo lowa olagalaga bini. Ani bialu howa iba sibi biago yabia bilonaga mbirale maru ibaha mo ba pebe bini. Maru ti ani bialu heaha Yona ibu iba sibi tamu habaneha dalipe howa u palia hondo hene.✧

<sup>6</sup> Ani biaria iba sibi hondo haga biagome puwa lalu, O biragoni nde ogo ale bira lole ndo kalo padebe. Ai heyalu inaga dama olole pu. Ibugua ina dara halu nahomolomaya biamogo bulebira badago, lene.✧

✧ **1:1:** 2 Kin 14.25 ✧ **1:3:** Yos 19.46, 2 Bit 2.16, Iba 139.7-10, Iba 139.7-10, Yna 4.2, Ab 9.36 ✧ **1:4:** Iba 107.25

✧ **1:5:** Ab 27.18-19, 27.38 ✧ **1:6:** Iba 107.28

<sup>7</sup> Iba sibini biabe biaga biaru tini lamigimigi bialu lalu, Ai ina mogo lene gibi o biragoni nde ai hondowa binidabe handamiya tiari yama, lowa yarimiya. Yalu hemiria tiari Yona ibuha yagi pene.\* <sup>8</sup> Ani piyago hondowa tigua Yonahondo lalu, Ai o biragoni langi naberego. O biragoni tene aiwa binigomedabe. Í biabe agi biaga kebe. Í dindi ani aligo kebe. Í hameigini ago ariabe, lalu hale hene.

<sup>9</sup> Ani layagola Yonahanda ladai bialu lalu, I Hiburu tene ko, lene. Anduane Homogo hari daligabi dindibi iba solowarabi wabini dahuliya andaga kago mitangi bialu ibu mini yaraga haruli, lene. <sup>10</sup> Ani lowa Yona ibugua, I Anduane Homogo wahalu pole pialu hewariago o biragoni i hondowa bira, lalu lamini. Ani layagola hale howa iba sibi biagoria berearume gi timbuniore howa Yonahondo lalu, Ogoni hiriribiore bialu harida, lene.

<sup>11</sup> Ani lalu heagola dalu puyabubi iba yaribubi biyagoni bia timbuore hayagola tigua Yonahondo lalu, Gibiore o biragoni nabilo iname íhondo agi bulene ngabe, lene.

<sup>12</sup> Ani layagola Yonahanda ladai bialu lalu, Ai uru-o dalu puyabubi iba yaribubi gibi o biraruni tene i hondowa bialu ngago uruni nabilo tí bayale pole i iba solowara nigoniha minu bape hadaba, lene.

<sup>13</sup> Ani layagoni hale howa dege agali biarume nde iba sibi biagoni hongo howaore tanguima pialu iba angeni ubade hole manda bini. Ani bule lowa biyariabi nabibeheore halu dalu puyabubi iba yaribu biyagobi gibiore halu iba angeni ubade habe naheore bini. <sup>14</sup> Ani dege bialu ai hongo piai hayagola ai wahalu Anduane Homogohondo bi lalu au lene. Anduane Homogo-o iname agali ogo homelo ibaha minu bape haramagonaga ína ina nde homolomaya pani ngia dai buleni. O beremagoni bibahende tene ína howa beregoni iname ndo berama, lamini. <sup>15</sup> Ani lowa tigua Yona minu muwa iba solowaraha bape hene. Aniore biagola dalu puyabubi iba yaribubi timbu gibi o bialu wiyagoniore nabi nimulope hene. <sup>16</sup> Ani biyago hondowa agali biarume Anduane Homogo hondowa gi timbuniore howa ibuhondo mbirale bo lomabia howa delalu tigua Anduane Homogo ibunaga biabeore bialu hole lalu bi lo wini.

<sup>17</sup> Anduane Homogohanda wena timbuniore mbira dabowa ogonime Yona mo mbedogo bilene. Ani biyagola Yona ibu horo tebiru mbi tebiru lowa wena tombeha wiai hene.\*

## 2

### *Yonahanda Anduane Homogohondo wena tombeha wuwa bi lenego ogo*

<sup>1</sup> Unuraore wena tombeneni wuwa Yonahanda Anduane Homogo ibunaga Ngode Datagaliwabhondo bi lamini.

<sup>2</sup> Anduane Homogo-o ai mini burugulo wuwa ina í olarugo hale halu ladai biri. Unuraore homa dindiha hewaria ina i biamogo bia lalu yi lalu kogoni i hale ho kegoni.\*

<sup>3</sup> Ína i iba solowara uli gibiore unuraha nalene hiriribi wiagoria minu bape harigoni. Ogoriani iba gibi berearume i biruyu mabu bialu iba yaribu timbuni hongohe ibilarirume i yu mabu bu hinaga bialu hayagoni.\*

<sup>4</sup> Ina manda bialu hewaria ainde ínaga wanakui nahondoleniore minu wahalu ínaga anda baya burugule biagobi hondo dai nabuliyanagaore birida, lene.\*

<sup>5</sup> Ai iba berearume i berewagoria ibalu namu lalu solowara berearume i bira dambiore ho wahayagoni. Iba gagua wiarumebi ibalu ínaga haguane hubabu mabu biyagoni.\*

\* 1:7: Yos 7.14-16, 1 Sml 10.20-21, Ab 1.26 \* 1:17: Md 12.40 \* 2:2: 1 Sml 30.6, Iba 18.4-6, 22.24 \* 2:3: Iba 42.7, 88.6 \* 2:4: 1 Kin 8.38, Iba 31.22 \* 2:5: Iba 69.1, Dug 3.54

<sup>6</sup> I dindi nalene hari pini panga paya tagiho wiaho wiaabo haga mbiraha pupe ho harugoni. Ani bu hewago hondowa Anduane Homogo inaga Ngode Datagaliwabe-o ina i unura homoleneha hewaria haru dai bu helarigoni.

<sup>7</sup> I homolene anda ibayuago hondowa ai Anduane Homogo ihondo bi langirugoni. Ani birugola ina inaga anda baya burugule biagoria howa hale harigoni.✧

<sup>8</sup> Maru ti mbirale nahabane bi pupu wule gime wabinigohondo bi pupu wiaga karume tinaga galone mbira bia holiya larego bia naholebira manda buwa inaga bi mo wahaga.

<sup>9</sup> Anigo ina inaga mini yaraga halu iba gana lalu mbirale mbira ihondo bo lomabia ho ngulebero. Ani bialu ina mbirale bule laruru biaore bulebero. Gini miaganebi biamogo biaganebi haru halu tagira ibaganebi pele miaganebi Anduane Homogo ibuha nga, lalu lene.

<sup>10</sup> Ani layagola Anduane Homogohanda wena timbuni biagohondo, Yona ede iba angeni puwa magu tagu batagiha, lene. Ani laya handala wena biagome puwa Yona iba angeni magu tagu batagihe lene.

### 3

#### *Yonahanda Anduane Homogohanda bi layago hale halu binigo ogo*

<sup>1</sup> Anduane Homogohanda Yonahondo bi ala layadagua dege lone lamini. <sup>2</sup> Ibugua lalu, Ayu Niniba dindi timbuni nai ngatoria puwa ina bi abale lo yalu pobelo langirugoni ayu wali agali ogoriani karuhondo lamule pu, lene. <sup>3</sup> Ani laya handala Yona ibu Anduane Homogohanda bi layago hale halu Niniba dindi pene. Dindi ogoni timbuni gibiore ogoriani pu banga bialu pialu heane horo tebiru pene. <sup>4</sup> Yona ibu dindi timbuni ogoriani pu banga bialu pialu heane horo mbira piai haga bini. Pialu howa ibugua, Niniba dindi horo pira maria (40) piai haragola bo heda hai holebira laya, lalu lamini.✧

<sup>5</sup> Ani lamiyagola Niniba wali agali hearume Ngode Datagaliwabenaga bi mana lamiyago henene layadalo manda bini. Ani manda buwa tigua tini hangu hangu hina tomo nane wali agali emenebi timbunibi ta nabi bibahendeore tigua ko ngubi ogobi bialu harima lalu walia hole danga dugu hiruwa birama polene nga, lo manda bini.

<sup>6</sup> Niniba wali agali kini heago ibu hale halu hearia Niniba wali agali bibahende emenebi timbunibi hearu danga dugu hiralu tomo nane birai ka layago hale howa ibubi ibunaga haru hagane dagia ngelalu ibunaga aga biaganebi golo wahowa danga dugu hiralu beha berene. <sup>7</sup> Ani bialu ibugua Niniba wali agali bibahendehondo lo yogo lene. Bi ogo kinibi ibunaga biabe biaga karubi tigua lo wia harago, Mbiralime mbirale mbira nanoleore bira, lalu, wali agali bibahendemebi nogo bulumagamebi nogo sibimebi mbiraligome mbira hina ibabi nanoleore bira, lene. <sup>8</sup> Wali agali bibahendebi nogo damene bibahendebi danga dugu hirai holene nga, lalu lamini. Bibahendeoreme tini hangu hangume mana ko bu walia halu hayarubi bi ko ngubi ogobiore kama lalu bu walia haga hayarubi uruni wahai harama lalu Ngode Datagaliwabehondo bi laho wulene nga, lene. <sup>9</sup> Aguanu beramigola Ngode Datagaliwabehanda mini wiadai bialu tihondo kebaho wiyago hadadai bialu ti nahome helolebira badago, lalu lamini.

<sup>10</sup> Ngode Datagaliwabehanda handalu hearia wali agali tigua tininaga mana ko ngubi bu walia haga biaruni yu wahai halu mini beregedai hayago hondowa ibugua ti bo heda hai holebero lalu lo wiyagoni mini wiadai bialu wahene.✧

### 4

#### *Yonahanda keba holenebi Ngode Datagaliwabenaga dara howa biamogo bulenebi winigo ogo*

<sup>1</sup> Ani biyago hondowa Yonahanda bu miniha genda timbuni howa keba holene tagira ibini. <sup>2</sup> Ani biyagola ibugua Anduane Homogohondo bi agua lamini. Anduane Homogoo ina abale pigane andaga yu wahalu nape howa ina ogonidaguaore bulebere ndo laruyabe, lene. Ogonidaguaore bulebere manda buwa ina Sebena dindi ibida pora bialu pole lowa pialu haruyagoni. Ina manda bialu hewaria í Ngode Datagaliwabe gubalini holenebi dara howa biamogo bulenebi tolo tagihe harigo manda biru. Ani bialu horo bibahendengi keba abale nahe howa bayale dege bialu horo bibahendengi mini wiadai bialu pani namule birili. ✧ <sup>3</sup> Áyu Anduane Homogoo i homoliya waharene. I ha ndo homaruyagua nde haru, lene. ✧

<sup>4</sup> Anduane Homogohanda ibuhondo ladai bialu lalu, Ina keba haregoni í ai howa keba harebe, lene.

<sup>5</sup> Ani laya handala Yona ibu uyu ni tagira ibiyagohayagi dindi timbuni biago yu wahalu pu tagi howa bira do hene. Ibu Niniba dindini agi birabe hondo birule lowa ibugua andira ale emene mbira abale buwa berene. <sup>6</sup> Ani buwa berearia Anduane Homogohanda ma tumbu ale mbira Yona ibu andane gumbaha turu howa berelo lowa andaho daga helene. Yonahanda aguani biyago hondowa turu howa kai timbuni lo wini. <sup>7</sup> Ani biaria horo mendengi egerabagiore egabi lole muna biyagola Ngode Datagaliwabehanda tonge mbirahondo, Ma tumbu ale o kagoni no podo peha, layagola no podope halu gaulene. <sup>8</sup> Ai ni tagira ibalu dayagola Ngode Datagaliwabehanda puyabu poboyogobiore mbira uyu ni tagira ibiyagoha howa ibilene. Ani biyagola ogonime Yonanaga hagianeni tandagabigome daba hayagola Yona odo ibira hole bini. Ani biyagola ibugua lalu, Homolene karulape. I ha ndo homaore biruyagua karulapeda, lene.

<sup>9</sup> Anigo Ngode Datagaliwabehanda ibuhondo lalu, Ma tumbu ale ogoninaga ina keba holene nawigoria keba harebe, lene.

Yonahanda ladai bialu lalu, Ina keba holene irane dewa ngane hondowa keba harogo keba halu homolene haru, lene.

<sup>10</sup> Anduane Homogohanda Yonahondo lalu, Ma tumbu ale anda hayago mbi mbirani hangu anda halu mbi mendeni ereba hayago ina ogoninaga mbirale mbira nabigo, lene. Ani bialu ina mo anda henebi ndo biagoria í dara bame aginaga harebe, lene. <sup>11</sup> Dara ogoni emene lowa dara timbuniore ina Niniba wali agali dindi timbuni karunaga agua holobodabe, lene. Maniore handalu hewaria dindi ogoriani wali agali daosini dege handari mbirani mendegonaga pira kira (120,000) agima nira lowa bolangua howaore waneiginiru tinaga gi tiga ogo gi le ogo lowa bayuwa manda nabi lowa tibi nogo damenerubi dindi ogoriani kagoni, lene.



## Maiga

### Mbuga ogoha gilibu ngarunaga nemandi ogo

Ngode Datagaliwabe mana latagi haga mbirali mini Maiga ibu Yudali howa Aisaia heangi hene. Yuda wali agali hearume mana tigabi ndo bialu henego Maiga ibugua manda bialu hearia Ngode Datagaliwabehanda ti pani mulebirago lalu mbiwia halu howa Maiga ibuni genda ho hene. Ngode Datagaliwabehanda Maigahondo bi mana lamiyagola hale howa bi ogoni lamiyagome Maiga mo dunu bia hene. (4.1-4)

Dindi bibahendehe mo palia holene wulebirago Ngode Datagaliwabehanda ani lenego, lalu mbiwia halu gilibu nga. 5.2-5

Debidi aguanene mbiralime mo palia holene mani yu anda ibulebirago, lalu mbiwia halu gilibu nga.

Galoneore mbira iname bialu holomaya ogo

Bulene tigabi ngadagua bialu howabi gubalini haho wulene walia halu howabi inane mo dindiha howa Ngode Datagaliwabela ho gimbu bu howabi holene nga, lalu gilibu nga. (6.8)

### Bulubaga buwa kuni gilibu ngago (1.1-3.12)

Isaraele Yudahondo pani mulene lo winigo gilibu nga. 4.1-5.15

Mo gahenge holenebi mo palia holenebi lo winigo gilibu nga. 6.1-7.20

Awe bulebiragonaga de hondo halimu lalu mo dunu bia holene bi lalu gilibu nga.

<sup>1</sup> Anduane Homogonaga bi ogoni Moresia dindi tano wiagoali Maiga hearia ibilene. Horo uruningi Yudanaga kini maru henego ti mini Yodama Ahasa Hesegeia imaru haga biniya. Anduane Homogo ibugua Maigaha howa latagi halu Samaria Yarusalemelani bibahende bulebiraru mbiwia hene.✧

*Samaria Yarusalemela hearuni darabi henego ogo*

<sup>2</sup> Wali agali dindi bibahendeni kamiru ogo hale hadaba. Dindi ogoria ho kamiru ogo hale ho biradaba.

Anduane Homogo Bibahende Haru Haame Ho kagome kago ibugua tigua ko birimiru aqua birimi lalu latagi halu pani ngulebira.

Anduane Homogo ibugua dahuliya andaga ibunaga andani howa bi larago hale ho hadaba.

<sup>3</sup> Anduane Homogo ibuninaga dindi baya buruguleni howa ibiragoni. Ibuni ibu dalialu li hari nenerunaga ibaga bu holebira.

<sup>4</sup> Ani biragola hari karuni ibunaga andaneha irani wagaya do elo pebe biradagua bialu dindi guane ngarunaga pu heyolope halu hari bareni iba pora biradagua bulebira.

<sup>5</sup> Urunidagua bulebirago irane Isaraele wali agalirume Ngode Datagaliwabehanda hame leadagua nabi howa mana ko hame naleadagua biyagome ani bulebira. Isaraele wali agalime mana naleadagua uruni bilo mo bia hayadagoni tene ai lolebadabe. Uruni Samaria dindi haguane í mo bia harigoni lolebira. Yuda wali agalime gime wabini wiaruhondo bi pupu wialu hadaba lene ai lolebadabe. Ogoni Yarusaleme í mo bia harigoni lolebira. <sup>6</sup> Anigo Anduane Homogohanda lalu, Samaria dindi timbuni ogoni bo giallo holo bialu do hama ngagola ogoriani pu mbira mini gerebi lini doleneru taniru hongo aribia holene wulebira. Ani bialu ege tole do gingirulo бага bini ngaruni ina ni hari guane ngaruha mo haealo bape halu dindi timbuni wiyaruni bame dindi hangu ibira helolebero. <sup>7</sup> Dindi ogoriani bi pupu wule gime wabini damene wiyaruni mo gingirulo бага bialu mbirale gime wabinirunaga andaha wali agali yaga bedamiru tihondo mbirale mini ngarubi irame do haealope holebira. Ani bialu mbirale bibahendeore

✧ 1:1: 2 Kin 15.32-38, 16.1-20, 18.1-20.21, 2 Bit 27.1-7, 28.1-27, 29.1-32.33

gime wabini biaruni do haealodaga ho wulebira. Samarialiru ti Anduane Homogo erembira mialu bayanda walinaga yolo mbiraleru bibahende mo mogo bialu hayago áyu waitigi karu ti tininaga bi pupu wiaga anda ngaruha wule mo yalu piai holebira, lene.

<sup>8</sup> Ogoninaga Maigahanda lalu, Ina dugu bialu dara ho holebero. Ina dara ogobiore ho ko lalu ge gamu agabi nabi bame ibaga bu haradagua bu holebero. Ani bialu ina biango gau lo haradagua bialubi ega yarime hoelo haradagua bialubi holebero.

<sup>9</sup> Samaria dindini biyaruni mbira lone bayale ho dai nabulebira. Ani bialu Yudani karubi Samariani biyadagua dege hiriribi biago bule ai Yarusalemeni panga payuwa inaga wali agali bu kagoria íbu hapara kagoni, lene.

### *Waitigi Yarusalemeni hapara henego ogo*

<sup>10</sup> Inanaga waitigiru Gada dindini karume hiriribi inani biraru ogodagua biya lalu nalalimu ti de hendelo yiya lalu dugubi heba nabilimu. Wali agaliru Beda Leabada tanoni kamiru tíni hiriribi ogobiore bira lalu dindi himu ngagoriani palu pendegelo yu ibaga bulene nga. <sup>11</sup> Tí wali agali Sabia tanoni kamiru ti babe howa taga hama dindi mendeha garabaya hagadagua hole pudaba. Sanana dindini karu ti tinaga dindi timbuni yu wahalu porabu tagi halu ibida polene hame nale kago. Wali agali Bedeselo dindi ogoriani pu kamiria waitigime gialo baragola tígua yiya lalu dugu beramigola ogoriani tí ha do holene mbira nawulebira. <sup>12</sup> Irane Anduane Homogohanda mo ko holene Yarusalemeni kaware íbu hapara ho ngeleago hondowa Maroda wali agali tiore aiwa pele mulebadabe lowa giore halu hene. <sup>13</sup> Wali agali nai Lagisi tanoni kamiru ai tínaga biralu piagane garo ale biaru nogo hosime gililelo pongobia ha naberami. Tígua mana ko ngubiore Isaraele wali agalime biyaru hondo wia dege buwa bialu hemigo Yarusaleme wali agali karume handalu mana ko ngubi uruni bilo mo bia hagane tí harimida. <sup>14</sup> Ani binidago áyu Yuda wali agali kamiru tígua wali agali Moresia Gada tanoni karuni áyu waitiginaga giha andapu paliai haragonigo ai nde aniore bilimu ladaba. Isaraelealinaga kini kamiru tí Agasibi tanoni karume mbira ibalu pele mulebadabe toba holemini namuleorebirago.

<sup>15</sup> Wali agali Maresa tanoni kamiru tí Anduane Homogohanda minuwa waitigi mbira tínaga dindi karulole ibiragonaga giha minu ya holebira. Isaraele wali agali haru haga baya hayadaruni Adulama ege andaha puwa ha do holebira. <sup>16</sup> Yuda wali agaliru tínaga waneigini gubalinioire ho kamiru manda bialu daraore howa dugu biahalu tínaga mandariore nahe birule podo mbolo lo waore ho halimu. Podo hegabu waore halu mbaube aleore helalimu. Ogoni irane tinaga waneigini uruni dara howa aiya yilo ngamiore minalu dindi taraha pelolebiragonaga ani bilimu.

## 2

### *Marume wali agali burupale hearu mo genda hole manda binigo ogo*

<sup>1</sup> Marume ko bule lowa tene aguaore bialu buadabe lalu palia nabi mini tumutumu bu wialu egabi ledaru nde gibioedago de handabe. Abale egerabagi egabi laragola heyalu ko bule mitangi tangi bu wiyagoni bulene henge ngane handalu puwa tigua o biagoni biaga. <sup>2</sup> Tigua mabu dindi hame lowa dindi ogoriani pialu yani haga. Tigua anda hame lowa andani yani haga. Agali mbiraibunaga one waneigini dameneyaguabi mbirale maruibunaga ngaruyaguabi uruni mbira de nahendene wia do hene nawi.

<sup>3</sup> Ogonidago Anduane Homogohanda lalu, Ina tí kamigoria mo ko holene timbuni yu anda ibilole manda bialu kogo tí yo pialu napoleberamigo hondoha. Mo ko holene timbuni uruni tí kamigoria ibinidane tíni handa walia halu ai mani tígua mine ho yu ibaga bialu haramilidagua naholeoreberami. <sup>4</sup> Horo ogoni tagira ibirangi wali agali karume mo ko holene timbuni tihondo ngiraruni tigua bi puromo lelo manane biyagoni

holebira. Ani bialu tigua tihondo mo ko holene timbuni tara bima piyarunaga dede bi lalu iba gana ogo lolebira,  
Ina mo koore henego kamagoni.  
Anduane Homogohanda inanaga dindi yamialu  
ina garabaya holomaya minu yalu piyaru  
tihondo mo miya,  
lalu Anduane Homogohanda, lene.

<sup>5</sup> Ani biyago horo mbirungi dindi ogoni Anduane Homogo ibunaga wali agali tihondo yadai birangi homogo bi laga uruni ti mbira dindi page karulo hayagoria helo henge namuleorebira.

<sup>6</sup> Wali agalime ihondo mege bialu lalu, Bi ogoni galone napaledago hale naholego inahondo langiaabo nahabe, laga. Ina uruale bulebira lalu langia ho wiaabo nahabe. Ngode Datagaliwabehanda ina mo dindiha lalu ina mo taga holobadalo manda nabidama, laga. <sup>7</sup> Ina manda beregola Isaraele wali agali ha henego kabe. Anduane Homogo ibu keba abale hayadabe. Ibugua urunidagua biai haga kabe. Ibugua wali agali maru bayale tigabi biaga karuhondo bi bayale turubi laga ndobe, laga.

<sup>8</sup> Tigua ani layagola Anduane Homogohanda agali homogo biaruhondo ladai bialu lalu, Tigua inaga wali agaliru waitigi baradagua bialu bai harimigoni. Agali wai bialu heneru gi nahe karulupe andaga dai beramalo manda bigi bima dai bialu karia tigua harigani yu biruwa mo mogola haga bialu tinaga aga erembirani biaru golo page yamigi bule kamigoni. <sup>9</sup> Tigua inaga wali agali hewarunaga wali dalo ale biru wiaru tinaga andaga hamelo wiaore haru gililo yalu tagira pirimi. Ani bialu tinaga waneigini tihondo turu lalu ina miwaru ti minu page bu yalu pirimi. <sup>10</sup> Ogoria bira do holene mbira nawigo. Tigua mana ko ngubiore birimigome dindi o kamigoni mo ko holene timbuni wiyadago ai heyalu pu naberami, lene.

<sup>11</sup> Ani lowa lalu, Wali agali ke lalu mo guya hole waini iba hongohebi iba mbiabi dewaore tinaga bu paya bulebira lalu mbiwia haro lalu kago wali agalime mana latagi haga ogonibi hame laga ka, lene.

*Ngode Datagaliwabehanda ibunaga wali agali maniore ibuni haru dai bulebira, lenego ogo*

<sup>12</sup> Ani lalu howa Anduane Homogohanda lalu, Ina ti bibahende Isaraele wali agali yu wahene karu heba mo mogo bu helolebero. Ina ti bibahendeore nogo sibi mo mogo biradagua bialu pabe tamuha waranda holebero. Ani bidogola ti tani gahengeni nogo sibi bu haradagua bialu tinaga dindi ogoriani lone wali agali aulolebe tobaheme ho tolo tagi holebira, lene.

<sup>13</sup> Ani layagola Maigahanda lalu, Ngode Datagaliwabehanda tinaga hariga ba lalu ti dindi tara minu pelayagoha howa ibunime haru lalu dai bulebira. Tigua dindi timbuni ogoriani pabe payaru bulalu yola lalu daibulebira. Tinaga handame haga kini Anduane Homogo ibuni lalu ibugua ti haru lalu daibulebira, lene.

### 3

*Maigahanda Isaraele wali agali haru haga hearu tigua mana ko birimi lalu talinigo ogo*

<sup>1-2</sup> Maigahanda lalu, Isaraele wali agali haru haga kamiru ti hale hadaba. Tigua mana tigabi ngago gubalini howa bulene wiago wahowa mana ko nabulene wiago gubalini howa bialu harimida. Tigua inaga wali agali dere helowa tingini minu laga lo miradagua bialu mbirini tinaga kunini hearu minu didu miradagua mirimida. <sup>3</sup> Tigua inaga wali agali balu nowaore haradagua birimida. Tigua inaga wali agalinaga tingini minu laga lalu tinaga kuni minu podalu ani bialu todobeneha dawale nogo bo podo baga biradagua birimida. <sup>4</sup> Ogoni birimigonaga horo mbira ibirago ogoningi Anduane

Homogohondo dugu bu mialu kamiria ibugua hale halu ladai nabulene wulebira. Tígua ibuhondo bi laramigobi hale naholebira. Tígua mana ko gibi wiaru bialu harimigonaga ani bulebira.

<sup>5</sup> Ke howa mana latagi haga karume inaga wali agaliru mo hondo halu mo guya howa muni ngirimiyagua mo palia holene nguleberama lalu nangirimiyagua mo ko holene yu anda ibuleberama, laga ka. Ke howa mana latagi haga uruni tihondo Anduane Homogohanda lalu, <sup>6</sup> Ke howa mana latagi hagaru-o, tinaga horo piai halu ni paule daliyaha harimida. Irane tígua inaga wali agaliru mo guya halu hariga koha pelo haru pialu harimigonaga áyu tígua mani bulebiraru de gandeba mbira nahondoleberami. Ani bialu tígua mbirale mbira mani agua bulebira lalu lo wulene mbira naloleberami, lalu lene. <sup>7</sup> Marume mbirale mbira mani agua bulebira lalu lo wiyaru mbira nabiragola tini taga howa mini dege dindiho holebira. Ngode Datagaliwabehanda tigua bi layaru mbira ladai nabinigoria tinaga ne hambuni genda bialu taga biragola ne hariga ndibulo hama polebira.

<sup>8</sup> Anigo ihondo Anduane Homogohanda ibunaga Dininibi hongobi iha tolo tagihe ledagome mana tigabi bulenenaga mini dingidangiale ngidagoni. Ani bidagome ina Isaraele wali agali tinaga mana ko uru ale lalu tinihondo gi nahe howa lamulene karulape ko. <sup>9</sup> Isaraele wali agali haru haga kamiru-o ina larogo hale hadaba. Tígua mana tigabi bulene ngaru bilo haru nahe manga halu bayale bulene ngaru wahalu ko bu aribia haga kami. <sup>10</sup> Tígua Ngode Datagaliwabenaga dindi timbuni Yarusaleme wabule lowa gene agali balu daramala mana ko bulenelame warimida. <sup>11</sup> Dindi timbuni ngago haru hagaru tigua mbirale mbira lahole lowa yolo ngi lalu lahaga. Loma binigo mo miaga karu tibi Mana lowini ngago ogodagua lalu lamiragola dimagoli howa yolo mo yaga. Ngode Datagaliwabe mana latagi haga karu tibi mani ogo ale bulebira lalu lamiragola dimagoli howa muni mo yaga. Ani bialu howa dege ti, Anduane Homogonaga andaneha berama, laga. Tigua lalu, Anduane Homogo ina heba kago tandaga bulene mbira ina kamagoria naibulebira, laga.

<sup>12</sup> Irane tigua ani laga bigi birimigome Yarusaleme mini mende Saiono godo ibira halu dindi godo wiradaguabi lalu Yarusaleme ibuni giallo бага bialu naina ungu бага bu wima polebira. Ani bialu hari bareni Anduane Homogo anda bini biarunaga yagua dagiru tagira ibilolebira.✧

## 4

### *Anduane Homogohanda dindi bibahendeni mo palia howa haru holebirago ogo (Aisaia 2.1-4)*

<sup>1</sup> Horo mbirungi haragola Anduane Homogonaga harini ibunaga anda hene biago bibahendenaga daliga ibu bolanguahe hari bare ngaru waradai buwa ibu lina daligaore holebira. Dindi bibahendeni hameigini tara tara dewa palima pedaru ibalu ogoniha iba yo laradagua bialu yo lalu anda ibalu <sup>2</sup> wali agali uruniha howa ibirarume lalu, Anduane Homogonaga hari Siaono iraga hama maibidaba. Isaraele wali agalinaga Ngode Datagaliwabe kago ibunaga anda kagoria ubanda hama. Ibugua hame ledaru ale iname bulumaya lawai halu ina pialu holene hariga ibugua ba kagoria pialu holeberama. Irane Anduane Homogonaga lawai holene mana ngaru Yarusalemeni howa ibalu Saiononaga hari bareni howa ibugua ibunaga wali agalihondo bi lamiaga, lalu ka.

<sup>3</sup> Hameigini tara tara tini dege dege wai bulene te lalu bi anda halu hongo ha ai nai bialu karu Anduane Homogo ibugua bi uruni dabalumu mo palia holebira. Tinaga wai biagane ayu tibu yidaruni tomo hongole dindi godagane wabialu aeane yandare yidaruni widi lini dedagola gandu lolene ale helo nguni mo garayabia helolebira. Hameigini tara tara uruni lone wai bule tidu yu haga haga buwa manda manda

nabuleorebira.✠ 4 Bibahendeore t́inaga gerebi mabu bu hingedemigohabi tininaga poge hingedemigonaga gumbahabi bira palia bu holeberami. Uruninaga ho hama pedaria mbiralime ti mo gi holene nawialu t́inaga bu miniha mo palia holene karulowa turu haga buwa dungulo holeberami lalu Anduane Homogo Hongo Haiheore kagome ani buleore, lalu lo wini.✠

5 Hameigini tara tara tini hangu hangunaga damahondo bi pupu wialu tigua lo ngadagua bigibigi biaga ka. Anigo ina nde Anduane Homogo inanaga Ngode Datagaliwabenaga minini howa lotu lalu ibugua lo ngadaguaore biaho wiaabobo bialu holeberama.

*Isaraele wali agaliru tini dindi wahalu tagira pu heneru dai bulebirago ogo*

6 Anduane Homogohanda lalu, Inaga wali agali dindi kaundia tarani tandaga nalu helo helaruru ai mo mogo bialu haru íbudai biai holene horo biagoni ibiyada. 7 Uruni tinaga dindi andaru yu wahalu kaundiaoreni pu henego dai bulenego ge paule ka. Ani bidago wali agali yu wahene uruni heba ina tinaga holene gahenge mbira ina wabialu ti hameigini hongohe mbira helolebero. Ani bialu ti Saiono hari bareni ogoningi howa inime haru haho wiaaboboore bialu holebero, lene.

8 Ai tí Yarusalemeni kamiru-o Ngode Datagaliwabe kago ibu nogo sibi haru hagadagua howaibunaga wali agaliru de handame ho kagoni. Ani bialu Yarusaleme dindi lone dindi timbuni mini lene ala tininaga wiyagobi wia aribia helolebira. 9 Ani bulebirago tigua dugu hongo howaore bialu kamiru irane aginagabe. Tigua walime waneigini taba hanalu tandaga nalu biragadagua bedamigoni irane agibe. Ogonidagua bidamigoni irane t́inaga kini nahe t́ini hangu kama lowabi t́inaga ganisorubi homai hayago lowabi bidamibe. 10 Yarusaleme wali agali kamiru-o tí áyu dindi timbuni ogoriani nahe yu wahalu tagira puwa bame dindi degeni yu dindi mbira nga li aleni pu holeberami. Ogoninaga wali waneigini hono wule lowa tandaga nalu elo pedere bu yu ibaga biagadagua bialu hadaba. Ani bialu tí Babilono dindi polene nga. Ani beramigola ogoriani Anduane Homogohanda t́inaga waitigi karume nabelo pele mulebira. 11 Hameigini tara tara dewa karume tini mo mogo bialu tí minalu bole biragoni. Tigua lalu, Yarusaleme bo giallo paya bulene nga. Dindi timbuni biagoni bo giallo paya bu ngagola ina de hondoleberama, lalu ka. 12 Ani ledagoni hameigini tara tara uruni ti Anduane Homogonaga miniha mandabu wiago tigua namandabi ka. Uruni ti widi gandulo yu mogo buwa lini hondo ibira ibira bilo dambiagadagua tandaga nelodambule mo mogobu heledago tini namandabiore ka.

13 Anduane Homogohanda lalu, Yarusaleme wali agali kamiru-o tigua puwa t́inaga waitigi karu tandaga nelobodambule pudaba, lara. Ina tí mo hongo halu nogo bulumaga aeane ne hagianenihe alebi ge habeni boronosi alebi helolebero. Ani bidogola tigua puwa hameigini tara tara bu karu bodambialu tinaga mbirale dabudabu wai bialu mo ngelo karu mo yalu ibuwa dindi bibahendenaga Anduane Homogo ini kogohondo loma bu nguleberami, lene.

## 5

1 Yarusalemealiru-o t́inaga wai biaga ami agaliru mo mogo bidaba. Ai ina ho mabu bialu minayaha harimadago. Isaraelenaga haru haga heago abale tigua minalu kangomeibunaga yangane dambira.

*Ngode Datagaliwabehanda haru haga mbira Bedelehemeha howa tagira íbu holebira lalu bi lo winigo ogo*

2 Anduane Homogohanda Bedelehemeni dindi hobane mbira Ebarada ngagoria hearuhondo lalu, T́inaga tano emene ngaru aria mbirago Yuda dindini wia para kago ogoni tíha howa Isaraele wali agalinaga haru haga mbira haru tagira ibulebero.



Ogoni ibunaga mamali hameigini amuraore íbudai buwa ala pigane tehininigoria howa ibulebira, lalu ka.✠

<sup>3</sup> Ani bulebirago emene tigi mbira hangunaga wali mbirame igiri mbira taba honolebirago henelotambu howa ibunaga wali agali uruni tinaga waitigi karume haru helo yupe howa helolebira. Ani bu kagola tinaga aria damene maru dindi tarani tagira pu hayaru lone wali agali tini aria damene hayaru heba ho gimbubu hole dai bulebira. <sup>4-5</sup> Ani bu kagola ibu ibirangi ibunaga wali agali uruni haru holene hongo Anduane Homogoha howa ibalu Anduane Homogo ibunaga Ngode Datagaliwabenaga mini lene holene daliga ibuniore howa ibunaga wali agali haru holebira. Ani bidagola ibunaga wali agali uruni ti gi nahe bayaleni helo ibugua mo palia holene yu íbu kagola wali agali dindi bibahendeni karume ibu daligaore kagoni lolebira.

### *Golope holenebi tandaga nolenebi ogo*

Asirialirume inanaga wai biaga ami agaliru bo podama ina dindini anda ibirangi inanaga haru haga hongoheoreru ti baba wai bilo ibiloleberama. <sup>6</sup> Tigua wai bialu Asiria dindi mini mende Nimirodi wiago helalu bo podo pelowa tigua karulolebira. Ani bialu Asirialiru ina kamagoria anda ibalu karia mbirali haru haga biago ibugua ina pele ngialu hapai holebira.

<sup>7</sup> Isaraele wali agali maru ti dindi tara tarani pu howa nahome haho wiaru tanini iba dadimba gahenge Anduane Homogohanda hameigini tara tara dewaore bu hearuhondo ibu berelagadagua biralu irani dadimba biragadagua beda. Tigua agalini ndo Ngode Datagaliwabeni hanaho holebira. <sup>8</sup> Hameigini maru tara tara karu hengenaha yu wahene karu ti laiono pudi timbuni ale ira taniru teha tomo taya bialu biragadagua taya bialu ka. Ibu nogo sibi karu hengenaha íbu iragaho howa abale nogo sibi deni karu porabudaga halu bo didubaga biaga. Ani biragola nogo sibi uruni yu wahalu ibida pelo pele mulene mbira naholebira. <sup>9</sup> Isaraealirume tinaga waitigi hayaru bope halu ti wayali howa bo gialo payabu waore holebira.

<sup>10</sup> Anduane Homogohanda lalu, Horo ogoingi ina tinaga nogo hosi karu haru tagira pialu wai biaga garo ale mini karisi nogo hosime gililaga ngamiru mo gialo bagabu waore holebero. <sup>11</sup> Ina tinaga tano dewa bu haame karuni bo gialo бага bu wahalu tinaga wai pabe payidamiruni gialo бага bu waore hai helobero. <sup>12</sup> Ani bialu tigua tomia hamburume bagane wirimigoni áyu ina mo ko holebero. Ani bialu mani bulebiragonaga mbiwia hadebe hagane wirimiru áyu mbira nahelolebero. <sup>13</sup> Ina tinaga bi pupu wule gime wabini ngamirubi gebeanda tole gebe minaga karubi mo ko halu gialo бага bulebero. Ani berogola tigua tini gime wabini urunihondo bi pupu wialu holene mbira nawilo. <sup>14</sup> Tinaga minime manda bialu irame wabini dama wali beda mini Asera wali biraradagua berelo dindini wawa heledamiruni ina gialope halu tinaga anda dewa bu hama pedaruni gialo бага bu waore holebero. <sup>15</sup> Ani bialu ina keba gibiore kogobi hameigini tara tara karu bibahendeme ina larudagua ndo mo wahowa bialu karu tihondo tandaga nelo mulebero, lalu Anduane Homogohanda ani lalu ka.

## 6

### *Anduane Homogo heba Isaraealiruru baba mbira dabo hondolene wulebirago ogo*

<sup>1</sup> Isaraele wali agali kamiru Anduane Homogohanda bi mbira tí baba dabole larago hale hadaba. Anduane Homogo-o heyalu dabo hondolene wiridago dabo handabe. Ani beregola hari li karumebi hari bare wima pedarumebi ina bi larego hale helo.

<sup>2</sup> Hari li wedamiru tí dindi ngarunaga pini bamba haho wini kamiru Anduane Homogohanda dabo hondolene bi larago hale hadaba. Anduane Homogohanda dabo

✠ 5:2: Md 2.6, Lg 2.4, Yo 7.42

hondolene ogoni ibunaga wali agali tiha nga. Ibugua Isaraele wali agali tígua kagua birimida lalu dabo hondolene mbira yalu ibulebira.

<sup>3</sup> Anduane Homogohanda lalu, Inaga wali agaliru-o ina tíhondo agi bialu haruyabe. Ina tíhondo agua bialu mo genda haruyabe ihondo ladai bidaba. <sup>4</sup> Ina tí Iyibi dindi garabaya biabe bialu hemiria gini mialu haru tagira pirugoni. Ani bialu tí haru halu pelo Mosese Erono Miriama imaru ibilarugoni. <sup>5</sup> Inaga wali agaliru-o Kini Bailaga Moabaali heagome tíhondo mbira bule manda bialu hearia Beo igini Bailamahanda ibuhondo agua ladai biya lo manda bidamibe. Ani bialu Giligolo dindi pole Agasia hariga obeneni mbira biyaru manda bidaba. Uruni bibahende bima piyaru manda bima poramigola ina tí pele mule agua bialu harudabe manda bu handadaba, lalu ka. <sup>6</sup>

### *Anduane Homogohanda wali agalime bilimulo hame ledaru ogo*

<sup>6</sup> Anduane Homogo Ngode Datagaliwabe dahuliya andaga kago ibu mitangi bialu lotu lole ibu karia ibalu howa ina agi yalu ibuledabe. Ina nogo bulumaga igini daula mali mbira pene bayaleoreru hondowa yalu ibuwa bo lomabia howa delolenego karulapedabe. <sup>7</sup> Ina nogo sibi dewa daosini aulolebe tobahe bo yalu olibe lini ibane weli iba ale duguaho wulene hambu yalu Anduane Homogo ibu karia piruyagua ibugua ogoninaga turu holobadabe. Ina mana ko birurunaga emena inaga waneigini wahene mbirago bo lomabu ibuhondo mulene harudabe. <sup>8</sup> Ani ndoyago Anduane Homogohanda lalu bayale bulenego hangu bilimulo langiya. Ibugua iname bilimulo ledago ogo. Bulene tigabi ngadagua bialu howabi gubalini haho wulene walia halu howabi inane mo dindiha howa Ngode Datagaliwabela ho gimbu bu howabi holene nga. <sup>9</sup>

<sup>9</sup> Mini gigabiwi howa Anduane Homogohanda hondo kaore lo manda buwa gi ho holene nga. Ibugua Yarusalemeni wali agali bu karu olalu, Wali agali hameigini tara tarani howa Yarusalemeni mo ngoai ho kamiru hale hadaba. <sup>10</sup> Mana ko ngubi ngaru biaga karu anda tamuha mbirale dabudabu ngaru wali agali mo hondo howa hangu mo winime anda toleda. Tigua mbirale yolo mirago magi tiga tiga handalu mulene ngagodagua ndo mo hondo howa mialu kago ale j handabe mangaore haruli. <sup>11</sup> Agali genda magi tiga tiga handalu ndo mo hondo howa mulene ngadagua ndo mo dindiha howa mialu karu tinaga mana ko ogoni ina agua doma habehedabe. <sup>12</sup> Tí homogo kamiru wali agali yagibano karunaga ti dege mo tolele henge tai bialu kami. Ani bialu tí bibahendeore ke timbuni haga kami. <sup>13</sup> Irane tígua mana ko ngubiore bialu kamirunaga ina mo ko holene ngaru tí kamirunaga anda ibilalu tí mo koorene ko halu turu nahe halimulo ina manda manda bido. <sup>14</sup> Tigua tomo emene hangu ngago noleberamigo tombe naholebira. Tínga tombeha garibi laho wiaabo holebira. Tínga mbirale dabudabu ngamiru do hole mo yu ibaga bialu kamiria mo do holene bayale mbira ngaria handa walia naholeberami. Tigua mbirale bibahende mo do haramiruni ina waime mo ko helolebero. <sup>15</sup> Tigua ladi ale mini widi egene mabuni hanga hongoleberamigo boga bidagola gandulo howa na nabuleberami. Tigua ira olibe lininaga ibane tagira ibilo lini dambuleberamigo ogonime mbira galone nabuleberami. Tigua waini iba wabuleberamigo na nabuleberami. <sup>16</sup> Urunidagua bigi bulebirago irane tígua Kini Omerila ibu igini Kini Aihalame mana ko ngubi biyadagua bialu harimigome ogonidagua bulebira. Tigua uruni ti mana lo wiago talialu biaho wiaabo halu harimigonaga ina tí mo koore helarogola wali agali hameigini tara tara karume tí handabe manga henego holeberami. Wali agali bu haame karume tí mo dindiha halu holebira, lalu Anduane Homogohanda ani leda. <sup>17</sup>

✧ 6:4: Har 4.10-16, 12.50-51, 15.20 ✧ 6:5: Dag 22.2-24.25, Yos 3.1-4.19 ✧ 6:8: Man 10.12, 1 Sml 15.22, Ais 1.17, Hos 6.6 ✧ 6:15: Man 28.30, 28.38-40, Amo 5.11, Seb 1.13 ✧ 6:16: 1 Kin 16.23-24, 21.25-26

## 7

*Isaraele wali agalime mana bayale bialu holenego podo ibiraho winigo ogo*

<sup>1</sup> Ai koore hayadago i agali tomo garibi lowa pogeni pogeli dedabe hondole handalu karia nade dai hayadane handagadagua pu mbira mini gerebi lini dedabe handalu karia nade dai hayadane handaganego ale ko. Gerebi lini bibahendebi pogeli ibiri dendebe bibahendebi nade do hondo waore hayada. <sup>2</sup> Dindi ogoriani wali agali henene tigabi bulene mbira yuwa naheda. Ngode Datagaliwabehondo henene mini bilinahe mbiraorebi naheda. Karu ti bibahendeme mbirali darama ibini balu homelole lowa henge wilo hondo ho hama peda. Bibahendeme tini dindi mandagiali karu aria mbira au homelabehedabe hondole lowa taya bialu ka. <sup>3</sup> Ti bibahendeoreme ko ngubi ngaru bulenenaga tigua bu debeore haga ka. Haru haga karubi dabaganeali karubi tigua mbirale mbira la hole lowa muni ngi lolene nga lalu ka. Agali hongohe dunini kagome mbirale ibu hame leda ale tigua bilo ibugua ogo ale hame ledole laragola tigua bule mo manda manda biaga. <sup>4</sup> Hongebi ale lalu agali maru bayale tigabiore karubi heba habane nabulene emberaha mamunali ho wahene anihe kaligo ale ka.

Horo mbirungi wali agali uruni tandaga nelu Ngode Datagaliwabehanda mulebero lalu ibunaga mana latagi haga hearuha howa mbiwia halu laminigo horo ogoni áyu tagira ibiyada. Ai wali agali uruni ti áyu agua bimabe toba howa mini dege dindi ho ka. <sup>5</sup> Inaga haparali karu mbiragohondoyaguabi nenegeali turubi karu mbiragohondoyaguabi ogonime larago henene lara lowa yutiga bialu mini pagaho nahabe. Mbirale mbira larego ini onehondo lariyaguabi de hondowa bayuwa mitangi buwa labe. <sup>6</sup> Horo uruningi igininirume abaru mo guya howa mini nawi alehondo biradagua biaga. Wanenerume ti aiyarunaga bi larago hale halu bia nabi howa bi haya dai biaga. Wali daliahe bedarume ti agalini aiyaru baba gungu lai biaga beda. Agalinaga waitigi hiriribiore ibuninaga onene waneiginibi ti holebira.

<sup>7</sup> Anigo ina Anduane Homogo ibugua bilo handayaholebero. Ngode Datagaliwabe ibugua i holiya biamogo bulebiragonaga inaga miniha dungulo holebero. Inaga Ngode Datagaliwabe ibugua ina larogo hale holebira, Maigahanda ani leda. <sup>\*</sup>

*Anduane Homogohanda pele mulene yu anda ibulebirago ogo*

<sup>8</sup> Inanaga waitigi karu ti mini ko wu howa mine holenego irane nawi. Ina pilo wia ngamagoyu lone wialu heyuleberama. Áyu ina arumaha kamagola Anduane Homogo ibuni inanaga wá holene holebira. <sup>9</sup> Iname Anduane Homogohondo mana koore birimago ogoninaga ibugua inahondo keba habehedagua ka. Ani bidago ibugua inahondo tandaga tigi mbira hangu nolomaya ngidagoni karulape. Ani bidago inanaga waitigi hearume inahondo mana ko bima piyaru maniore ibugua mo bayale halu lone ko ngaru buligonaga ibugua ho hangai holebira. Ibugua ina wá kategoria haru halu tagira polebira. Ani bu howa ibugua ina pele ngirago de hondole holeberama. <sup>10</sup> Ani birago hondowa inanaga waitigi urunime taga ndo taraore holebira. Waitigi urunime dege ala ina mege bialu agua lalu, Anduane Homogo tinaga Ngode Datagaliwabe ibu agoha kabe, lalu hale hene. Urunidagua lalu karuni tinaga waitigime ibalu bo podaragola tigua heyalu mbira bibe nahe harigani waru wima poradagua bulebira.

<sup>11</sup> Wali agali Yarusalemeni kamiru-o dindi timbuni ngarunaga pabe bu aribia holene horo áyu ibiragonida. Horo ogoningi dindi áyu kamiru emene dorogonedago lone mo yanga lolebira. <sup>12</sup> Wali agali tí aria tagirani ibida pu hama piyaruni tini hama piyaruha howa ibugu ibugu bialu tini kamiria dai biai holebira. Asiria ni tagira ibiragoha howabi iyibi dindi leneha howabi Yubaraidisi iba poragohayagi howabi amuraore iba solowara bedaruha howabi hari kaundiani wedaruha howabi ibu dai biai holebira. <sup>13</sup> Ani bilowa dege dindi ogoni mo beregedalu tomo tani iraru mbira anda naholene bu

hinulebira. Ogoni irane wali agali ogoriani karu tigua mana tigabi ngaru nabiyagonaga ani bulebira.

*Anduane Homogohanda Isaraele wali agalihondo dara henego ogo*

<sup>14</sup> Anduane Homogo-o ínaga wali agali ínini dabarirunaga nogo sibi haru hagadagua ínini haru habe. Wali agali uruni ti dindi bayale tomo anda holene wia mabu bidaruni bilowa dege irabu tayanda wali agali nahe dindi ko wiagoha pubagi howa ka. Tigua mabu bayale ala bambaore nalu harimidagua áyu Basanila Giliadalani mabu gahenge bayaore karu nalu hela.

<sup>15</sup> Anduane Homogo ínana nahendene ale ina Iyibi dindi howa haru tagira ibalu howa bima ibirilidagua maru áyu inanaga bia habe. <sup>16</sup> Hameigini tara tara karume ogoni handalu karia ti hongo gibiorehe harimigo ndo tinaga hongo nawidane hondowa tini taga holebira. Tigua giho howa tininaga ne harigabi hale harigabi gi habeme panga payu pai helolebira. <sup>17</sup> Ani bialu tini dindini yu lama nogombime poradagua bialu tininaga ha do haga wai pabe anda biagoha howa gi howa duru lama ibulebira. Ani bialu tigua mini beregedalu Anduane Homogo inanaga Ngode Datagaliwabe kagoria gi howa porabu anda holebira.

<sup>18</sup> Anduane Homogo-o maru í ale mbira nahego ínana hangu ínaga wali agali nahome haho wiaabo karunaga mana ko biraru doma hariligoni. Ína keba haho wiaabo nahariligo ogoni irane ínaga gubalini holene ogobiore wu haho ngo lalu inahondo walia harili. <sup>19</sup> Áyu nde lone ínana dara hodai bulebere. Iname mana ko ngubiore birimaru ínana geme hengedo dambi halu kaundiaore unura iba solowara uliha mo yalu puwa bape holebere. <sup>20</sup> Ani buwa ínana mini dunubiaho holenebi gubalini haho wulenebi ínana wali agali Abarahamanagabi Yagabanagabi aguanene karuhondo walia holebero lalu ala inanaga mamali heneyaruhondo lo wiridagua walia holebere, lalu Maigahanda gili bu winigo nga.

## Nahumu

### Mbuga ogoniha gilibu ngarunaga nemandi ogo

Anduane Homogonaga bi mana latagi haga agali Nahumu ibugua bialu henedarunaga te iname dewa manda nabitama. Ibugua mbuga ogoni gilibu winidago irane Niniba tano timbuni wiago mo ko hayagonaga turu howa gili bini. Niniba tano ogoni Asiria dindinaga tano duniniore timbuni wini. Asirianaga ami hongoheore howa dindi bibahende wiaruha wai biai halu tigua wali agali dindi uruniha hearu bope hai halu ti wayali hene. Tigua dege lone ibalu Isaraele wali agali dindi abene uyurayagi palaru bo garabayabu yalu piai howa dindi tara tara wiaruha purogo lelene.

Ani pu henego ai Isaraele wali agali tigua Niniba tano dunini wiago tinaga waitigi maru hearume ibalu bo giallo бага bialu mo labu hai hayagola ti ogoninaga turu timbuni ho hene. Asirialirume mine halu mana ko dewa bialu ti mo ko halu bo wahai hayagonaga Anduane Homogo ibunime Niniba pani mialu bo gialahole biyada lalu Nahumu ibugua mbuga ogo gili bini.

#### **Bulu бага бува kuni gilibu ngago (1.1-15)**

Anduane Homogohanda Niniba wali agalihondo keba henego 2.1-3.19  
Niniba tano bo labu henego

*Anduane Homogohanda Niniba wali agalihondo keba henego ogo*

<sup>1</sup> Anduane Homogonaga bi mana haga agali Nahumu ibugua de gandeba handalu hearia Anduane Homogohanda bi lamini. Nahumu ibu Elegosoali henego howa tano dunini timbuni Niniba wiagonaga de gandeba hendene.✧

<sup>2</sup> Anduane Homogo ibuni Ngode Datagaliwabeore howa wali agalime mbirale dama mitangi bialu gime wabini bu ngaruhondo bi pupu wialu helo ibugua henge namiaga ka.✧

Ibugua wali agali ibuhondo mine haga karu pani mialu minu багаore ka.

Ibugua uruni biaga karuhondo keba howa tini ko biyagonaga yolo miaga ka.

<sup>3</sup> Anduane Homogo ibu keba abale tongolope nahaga ka.✧

Anigo ibu hongoheore howa ibugua wali agali mana ko biaga karu pani nelu miagaore ka.

Anduane Homogo ibu poragoha iba dalubi puyabu dalu dindigunibi ti haru piaga.

Beraliba ibunaga geha be abalu tau laradagua biaga.

<sup>4</sup> Ibugua iba solowara bedagohondo hundia laragola bibahende hundu tegelaga.

Iba timbuni pedarubi hundiai helaga ka.

Mabu bayale Basana dindini ngarubi Hari Kameloha ira bayale karubi palawaya bayaleru Lebanono dindini anda ho karubi uruni bibahende Anduane Homogohanda mo gaula hai helaga.

<sup>5</sup> Anduane Homogonaga deni howa hari timbuni wedarume ema biai halu hari emene ngaru do elai halu iba poradagua biaga. Anduane Homogo ha pani haga birangi dindi bibahende ema biagimbu bialu wali agali bibahendeore mogo lalu duru lai haga.

<sup>6</sup> Anduane Homogohanda keba ho kangsi mbirali ai ibu bayale habehebe.

Ibugua mo ko holene ibilarangi mbirali ai ibu yo pobehebe.

Ibugua keba howa ibunaga de daramabi ira hungu ale kagola ege tole ngaru dodahole bialu be abalu haga.

✧ **1:1:** Ais 10.5-34, 14.24-27, Seb 2.13-15    ✧ **1:2:** Har 20.5, Man 32.35, 32.41, Iba 94.1    ✧ **1:3:** Har 34.6-7, Iba 104.3, Ais 29.6, Amo 1.14



<sup>7</sup> Anduane Homogohanda inahondo bayaleore biaga ka.✧

Genda tagira ibirangi ibunaga wali agali bu karunaga ha do anda ibuni kagoni.

Wali agali ibuni karia poraru ibugua ti biamogo biaga ka.

<sup>8</sup> Ibu iba li hongohe poraligobi howa ibugua Niniba tano bo gialahole bialu mo ko hai holebira.

Mbirali ibunaga bi mo wahaga karu homelo bo wahai haga ka.

<sup>9</sup> Waitigi kamiru tigua Anduane Homogohondo agile bulene paraho bi lalu kamibe.

Tí bibahende bo wahai holenego dege manda bu halimu.

Mbiralime ibuhondo ko haluki bulene nawiore.

<sup>10</sup> Tí lulu iba nowa luluyu haradagua kamiria ibugua tí bibahende mbirale anihe kenda polene ale ngaru irani delagadagua delalu dangi yobi ngaru delaradagua bialu tí bo delai holebira. <sup>11</sup> Ninibali kamiru aria mbirame mini ko wu howa ibugua Anduane Homogo mo ko hole lowa bi lalu hea. <sup>12</sup> Ani layagoyu Anduane Homogohanda ibunaga Isaraele wali agaliruhondo lalu, Asiria wali agali áyu hongohe dewaore ha kagonigo mani ina ti bo biba halu erebahai helolebero. Inaga wali agaliru tíha genda timbuni inime mo wia harugo ai uruni bibahende mani lone nawulebira. <sup>13</sup> Asirialime tí handayaho ha hayagonigo ainde áyu ina tinaga hongo bope harogola tigua tí lone garabaya nabulebira, laya.

<sup>14</sup> Anduane Homogohanda Asirialiruhondo bi hongohe mbira lo wialu lalu, Tínaga aguaneneru yu wahene mbiraore hangubi mani naholebiraore. Tínaga bi pupu wiaga anda bu karuha mbirale dama mitangi bialu bi pupu wule gime wabu ngamiruni bibahende bo gingirulo bagabu wahaiore holebero. Tí koorene ko dindini habe nahedago tínaga homali ina manda manda bu wia kagoni.

<sup>15</sup> De handadaba. Agali mbira bi bayale galoneore mbira yalu amu hari nene ngagoria howa dalipe halu ibiragoni. Ibugua lalu, Iname wai biai halu wayali harimagoni, lalu lama ibiragoni. Anigo Yuda wali agali tigua horo dunini mbira íbu ngoai haga wirangi ngoai halu Ngode Datagaliwabe ibunihondo mitangi bialu lotu lalu halimu. Ani bialu mbirale maru ibuhondo mule lalu lo wirimiruni ibuhondo milimu. Ani beramigola agali ko biaga karume tínaga dindi lone karulole naibulebira. Ngode Datagaliwabehanda ti bo wahaiore haya.✧

## 2

### *Niniba tano bo labu henego ogo*

<sup>1-2</sup> Waitigirume ibalu tí mo ko hai halu tínaga mbirale wimiru mo yu piái hayagoyu ai Anduane Homogohanda Isaraele lone mini lene ala haraligobi heladai bilolebira.

Ninibaliru-o tínaga waitigime tí baba wai bule ibiragoni.

Tí mo ko halu bo wahai haga biaru kaware ibiragoni.

Tanoha ami agali mamage haga karume tanonaga wai pabe andani mamage helo heladaba.

Hariga tene ngaruha mamage haga haga bidaba.

Ani bialu wai bule hongo howa manda manda bu hadaba.

<sup>3</sup> Waitigirume wai humbi daramabi yalu tinaga wai yáribi daramabi dege mo karulai halu tí baba wai bule ibiragoni.

Tínaga waitigi biaru gerai lalu ibiragola tinaga wai biaga garo ale karisiru ngiringara lalu ira hungu ale bialu tinaga yandareru ira guraya aleme wabini luni yidarume kilingele lalu wai huario laruagoni.

<sup>4</sup> Tinaga wai biaga garo ale hosime gililaga karisi biarume hariga wiadagua gerai lalu wali agali ngoai haga hama wiagoria gerai galuyu puibu bialu ka.

Tini ira hungu ale howa gerai lalu hari daba ale biradagua biya.

<sup>5</sup> Ami haru haga haguane hearume ami agali bu hearuhondo pudaba layagola ami agali o biaru abale pialu hearia ege toleme tinaga ge bobidi laya.

Tigua tanonaga wai pabe heagoria abale anda pialu tanonaga wai pabe heago bo gialolenaga mbirale mbira guruyagu ale wabuwa pabe heagoria wiapara haya.

<sup>6</sup> Guruyagu ale biagome tanonaga wai pabe panga abene iba poragohayagi kaware heago bo gialo wahayagola panga dugua haya.

Anidagua biyagola wali agali kini andagaha biru wiaru bibahende gi halu mogolai ho haya.

<sup>7</sup> Waitigime Asirianaga kini heago minuwa heyu helaya.

Ani bialu kuini wali bereagonaga aga baya karulo bereago golo wahai halu ibuni garabayabu yalu piya.

Ani biyagola ibunaga biabe biaga wali berearume tinaga bu miniha gengedai howa mini burugu lowa dugu biai haya.

Tigua dara timbuni halu tininaga gi homame galu kunini balu haya.

<sup>8</sup> Niniba tano bambaore howa iba kuyama hundia nabi biraho wiaga ngaligobi wini.

Ani biaga winigo ai iba pelo gana bia haragola iba pora bialu poralidagua wali agali pora bialu tanoha howa purogo laya.

Wali agali marume hongo howa ga ladaga halu lalu,

Ibida pu nabi hondo hadaba. Hondo hadaba, lalu haya.

Ani lalu heagola mbiraoreli hangumebi mbira dai nabi bibahende ibida piyai haya.

<sup>9</sup> Ani piyai hayagola tinaga waitigi ibiyarume tini aria ibiyaruhondo lalu,

Muni siliba ngolobi bibahende mo yai hama.

Tinaga tanoha mbirale bayale dewaore winidago mo yai hama, laya.

<sup>10</sup> Niniba mo ko howa bo gialabaga biyagola tanoha anda pabe bu hearu bo gialabaga bini wiaru ona alugumu wima pea.

Wali agali bu hearume tano yu wahalu ibida piyai haya.

Tigua gi timbuni halu tinaga gi geru diri duru lalu haya.

Anidagua biyagome tinaga hongo pirilape hai hayagola tinaga dengui gade bugimbu biai haya.

<sup>11-12</sup> Ala tano ogoni budi ale gabua timbuni laiononaga anda ale hongoheore winigo ai ayu mo ko henego ngagoni.

Ala Niniba tano hongoheore laiono dalua ale wialu laiono wangabebi angibunibi iginibi bibahende mo mogobu haga wiagola waitigime anda pobe nahe ngaligobi wiaga wini.

Laiono wangabe kagome nogoru bo yalu ibirago igini angibunibuni karu bibahende nai helo budu ta haga biaga.

Ani bialu nogo tara tararu bo yalu ibalu anda tolagaga.

Urunidagua biaga anda biago agoha kabe.

Bo gialo wahayadago.

<sup>13</sup> Anduane Homogo Hongo Haiheore kago ibugua Niniba wali agalihondo lalu, Tinaga waitigi iore kogoni. Ina tinaga wai biaga karisi ngamiruni irani mo delai holebero. Tinaga ami agali bu karubi bibahende waime bo wahai haragola homolebira. Tigua dindi tara tara ngaruha howa mbirale tara tara mo yu ibu wirimiru bibahende ina mo yu

dai biai holebero. Wali agali dindi tara taraha bu hearuhondo tinaga bi lo yalu pudaba larimirunime bi larago tigua hale naholebira laya, lene.

### 3

- <sup>1</sup> Niniba wali agalime ke taraore halu wali agali homelo bo wahaga ka. Wali agalinaga dabudabu bayale tara tara wiaru mo yalu ibuwa tinaga tanoha wu to ka. Anidagua bu kagonaga Anduane Homogohanda wali agali uruni bo wahaiore holebira.
- <sup>2</sup> Nogo hosi bo daila haragola tibu tolia lalu nogo hosi gerai laragola ge ngilinguli lalubi wai biaga karisinaga ge harigani kilingele lama ibaruagobi hale hadaba.
- <sup>3</sup> Wai biaga ami agaliru nogo hosini biralu gerai ibiragola tinaga wai biaga ayu tibu yandareru iba wai ale ngiringaraleda. Ani bialu tigua wali agali dagalabe nahe dewaore bo wahai hayagola homenerunaga tingini mo mogo buwa alugumu wiyagola dagalabe naheore wiya. Agali tigua pialu howa homene tingini wiaru hangedalu pugu biya.
- <sup>4</sup> Niniba tano ogoni ibu bayanda wali ale winigo ibugua mana ko biyagonaga pani mo ko holene timbuniore mo yu anda ibiya. Ibunaga dengui baya taraore biruwa ibugua agali tara tara bu karunaga bu mini ibuha ibilo ba mulenaga ndole tara tara bialu biragaya. Ibugua mana urunibi bialu wali agali dewaore ibu daluha haru ibu tolai howa wali agali kayu yalu ibunaga garabaya biabe ale bialu helaga ka.

- <sup>5</sup> Anduane Homogo Hongo Haiheore kago ibugua lalu, Niniba-o ina í mo ko halu minu bolebero. Bayanda wali-o inaga aga bideruni bibahende minu golo wahai harogola í tibabe birulebere. Hameigini dindi tara taraha bu karume í aga nabi tibabe bederia handaya haragola taga timbuniore ho birulebere.
- <sup>6</sup> Ina í handabe manga howa mbirale ko ngubi ngarume í bu dambi ho ngelolebero. Ani berogola wali agali dindi tara tarani bu karume í de hondowa ti mogo lalu gi timbuni holebira.
- <sup>7</sup> Maru í de handararume ti mogo lalu tiga bebege dai bulebira. Ani dai buwa tigua lalu, De handadaba. Niniba biago mo ko hai hayada. Mbiralime ibu dara nahayada. Mbiralime ibunaga bu mini mo palia halu bi lolenebi naheda, lolebira.

<sup>8</sup> Niniba-o ina manda bu handalu keria í mini lene timbuniore Iyibi dindiha tano timbuni mini lene Tebese wiyago bolangua hene ngobe toba kebe. Tano ogoni ibubi nde ibunaga tigi pabe iba timbuni Naili peda. <sup>9</sup> Tebese tano ogonime Iyibi dindi bibahende handameho howa Sudana dindibi ibugua dege handameho henego. Ani heagola dindi mendeha ibunaga waitigi hearume ibunaga hongo bope habe naheore wini. Ani wiagola dindi mende Libia paleagola libu mo mbiraore halu wai tagira piaga hene.

<sup>10</sup> Ani henego horo mbirungi ibunaga waitigime ibuwa Tebese tanoha wali agali hearu bope howa tinaga garabaya biabe bialu helo haru halu piai hene. Tinaga waneigini bu hearu hariga gebage wiaru bibahendeni bo payapaya bini wiaria hendene. Ani bialu tinaga waitigime Tebesenaga agali haguane hearu pu senime minu hende howa waitigi tini talebu tahalu tinaga garabaya biabe bialu helo haru halu piai hene.

<sup>11</sup> Niniba-o tibi nde lulu iba nowa luluyu haradagua bialu Iyibi wali agali biyadagua biai holebira. Tinaga mini mo lingilungu bia haragola tini dindini odopebe biai holeberami. Ani bialu tí waitigiru helalu ibida pole manda buleberemi. <sup>12</sup> Ani poramigola ti waitigi ibiragome tano ngamigo hinahe abale karulolebira. Tinaga tano ngamiruni

ira lini ibire daradagua bidago. Ai tí waitigime ira iraneni howa yu ema biragola ira lini ibirego damene dogolope haradagua biragola ira teneha ne h̄ala ho ngagoha dogolope haradagua bialu tigua tano ogoni karulai holebira. <sup>13</sup>Tínaga ami agali bu karu ti bame wali ale dege kagome hongo halu wai biadai nabulebira. Tinaga wai pabenaga panga irame bengena бага hongohe kago do taga laragola tanonaga panga dugua holebira. <sup>14</sup>Niniba wali agaliru-o tí waitigime tano ho hagira bule ibulebiragonaga manda manda bialu iba nalu hole tanoha iba dadabu yalu anda ibilelalmu. Gade dindi dugu puwa ege timeni wabulenaga geme hengedo waru howa timeni wabiaga mbogoyi ngagoha ngelalmu. Ani bialu ege timeni ogonime tanonaga ege pabe kago arema bilimu. <sup>15</sup>Anigo tigua uruni beremigolabi mbirale urunime tí biamogo bialu mo wia nabulebira. Waitigime ibalu tínaga tanobi tíni heba irame bo heda haragola homai holeberami. Bamba tí dewaore pagaya ale tidiyu biragadagua tidiyu harimigoni. Ani birimigo ai pagaya aleme datani karu nai hagadagua waitigirume tí bo wahai holebira.

<sup>16</sup>Ani howa tínaga biyinaya dewaore dagalabe nahe harini yakundi bu kagobi wirimi. Anigo áyu tínaga biyinaya uruni pagaya harane howa yagalalu purogo lalalidagua pu ereba hai haya. <sup>17</sup>Tínaga agali haguane hayaru ti dagare biaga horo tagira ibirangi wai pabe andaneha pagaya bira do hagadagua bira do ka. Ani binigo ai ni daragola pagaya uruni ti yagalalu agoa piyabe tobahe pugupugu bialu pu ereba hai hagadagua piya.

<sup>18</sup>Asirianaga kini kego ína bi ogo hale habe. Ínaga agali haguane biarubi agali timbuni hayarubi bibahende homai henego tinaga tingini bu payapaya bidagoni. Í waitigi biarume ínaga wali agali biaru bibahende hari wiaruha bo purogo lai helayago ai uruni lone mo mogo bialu haru dai bulene mbirali naheoreda. <sup>19</sup>Ínaga dere bu keruni dabi helo h̄aj holene marasinibi mbira nawiooreda. Abale ína agali maruhondo mana ko bialu harigola ti ibida pobe nahe hayago. Ai áyu í mo ko hene ke laga biyaru hale howa ti turu halu gi habe balu holebira, Anduane Homogohanda laya lalu Nahumuhanda lene.

## Habagugu

### Mbuga ogoniha gilibu ngarunaga nemandi ogo

Bi mana latagi haga Habagugu ibugua Anduane Homogonaga mana lalu henedagoni Babilonoali ti hongoheore heangi lalu hene. Babilono wali agali tigua Isaraele wali agaliruhondo mana koore bialu maru bo wahaga bigi biyago hondowa Habagugu ibugua genda timbuniore howa Anduane Homogohondo lalu,

- wali agali ko timbuni biaga karume mana bayale biaga karu bo wahelo henge muwa í handa tara ho kego aginaga kebe, lene. 1.13b

Habagugu ibugua Anduane Homogohondo bi ogoni hale henedagoni bambaore hale hene. Anduane Homogo ibu bi ogoni hale howa dege horo mbiru ibuni pongo bo winiangi lola helo mana ko birago mo tiga buliya lo manda bu hene. Ibugua bi ladai binigo ogo.

Wali agali mini tigabiwi Anduane Homogohondo mini mbiraore wu karu ti haabo holebira, lalu gilibu nga. 2.4b

Bi bibahende lo wiaruagoni wali agali mana ko biaga karunaga ko ogobi anda ibulebira lalu lo nga. La maro bialu iba gana mbira lenego ogodagua lo nga. Anduane Homogo nahendene ale biaga hongohe gibi kagonaga mini yaraga halubi Habagugu ibunaga mini mbiraore ogobi ngo lalubi walia ho nga.

#### **Bulu бага бува кuni gilibu ngago (1.1-2.4)**

Habaguguhanda Anduane Homogohondo lai lalu maru hale hayagola Anduane Homogo ibugua bi ladai binigo 2.5-20

Mana ko biaga hearuha ko anda ibulebira lenego 3.1-19

Habaguguhanda Anduane Homogohondo bi lenego

<sup>1</sup> Anduane Homogohanda ibunaga bi mana latagi haga Habaguguhondo mana walia halu bi laminigo ogo.

#### *Habaguguhanda genda ho howa Anduane Homogohondo bi lenego ogo*

<sup>2</sup> Habaguguhanda lalu, Anduane Homogo-o í biamogo bibelonaga olaabo harugo ina agira halu lone ololiyadabe. Ko biaga karume ina bo waholilono íhondo biamogo bia lalu dugu bialu agira halu ololiyadabe. <sup>3</sup> Mana tigatiga ndo o biragoni agi bulenaga í deni mo ngeledebe. Mana tigatiga ndo urunibi biragola ina handayaho kegoni mbira bia nabi aginaga handayaho kebe. Í kogoria howa handalu koria wali agali mo ko holenebi tinaga mbirale ngago mo ko holenebi lai lalu bagabaga bulenebi wiame kane hendedo. <sup>4</sup> Mana lo wini ngago hongo nahe gedaore halu mana tigabi bulene wiagoria bia nabi wahaga biya. Wali agali ko biagame mana lo winigo dabaga hearu mo yo handalu wali agali bayale biaga karu hingedope halu mana biagoni tini hame ledago hangu bule mo beregedo nga, lalu lamini.

#### *Anduane Homogohanda bi ladai binigo ogo*

<sup>5</sup> Bi ogoni hale howa Anduane Homogohanda ibunaga wali agaliruhondo lalu, Wali agali dindi maru tí kamiruha palia mabu bidaru bayuwa de handaya halimu. Handayaho kamiria ina tihondo mbirale mbira berogola tigua ogoni hale halu mogo timbuni loleberami. <sup>6</sup> Ina Babilono wali agali hongo gibihe karuhondo hongo mia tago holebero. Dindi tara tara karulole tigua wai hanalu tagira pora. <sup>7</sup> Wali agali dindi tara tarani karume ti de hondowa gi timbuniore haga. Ani biradagome mana lo ngago mitangi nabi mine tara halu tininaga hame ledago biaga ka, lalu lene.

☆ 1:5: Ab 13.41 ☆ 1:6: 2 Kin 24.2



<sup>8</sup> Ibugua laabo halu lalu, Tinaga wai biagane hosime gerai budi gabua ale timbuni mini lebadime lagadagua ndo bolangua hai howa gerai gibiore laga ka. Biango tara dudu aleme garibi lo howa biaganego emene lowa tinaga wai biagane hosime wai tandagabiore biaga ka. Agali hosini biralu ibiradaruni dindi ona kawareni howa ndo ibaga. Hosi urunime poa halu tinaga gi gindibame dindi godalu haga. Tinaga hosi ega bodo hariaweme mbirale balu nole ibira hagadagua ti abaleore bo ibaga.

<sup>9</sup> Babilononaga ami agali ti mini mende nawi dindi ti karulalu wali agalibi minu ibiragola wali agalirume gi timbuniore ho haga. Tigua wali agali abale balu minu garabaya binidaruni dagalabe nahe ibani iba mu wiraligobi ka. <sup>10</sup> Tigua dindi uruninaga kiniru hondo yo handalu kininaga agali haguane karubi hondo oba haga kagoni. Ege tole wai pabe wedaruni dindi alu yu tono buwa togo wialu bagane agali ibaga. <sup>11</sup> Agali ko uruni tinaga hongo timbuni kama lalu hongo ogoni mo dunini howa balagala hagaruni tigua wai biraha gialope halu puyabu poradagua puabo holebira, lalu lene.

### *Habaguguhanda genda ho howa Anduane Homogohondo bi halu mende lenego ogo*

<sup>12</sup> Habaguguhanda lalu, Anduane Homogo-o í Ngode Datagaliwabe haabo henego kegoni. Í inaga Ngode Datagaliwabe baya burugule haluhe haabobo henego kegoni. Anduane Homogo inaga bi Ngode Datagaliwabe bi inaga humbibi kego howa ina Babilonoali hearu dabowa iname ko birimagonaga tigua ina belo hongo mialu dabariya. <sup>13</sup> Anigo Babilonoali uruni agali ko ke hagabi mana ko timbuni biagabi biaru ti inaga biabe ogoni bilo dabaribe. Inaga deme ko ngago nahandaga howa wali agalime ko biraruhondo handa tara haga harigo howa dege wali agali ko timbuni biaga karume mana bayale biaga karu bo wahelo henge muwa í handa tara ho kego aginaga kebe.\*

<sup>14</sup> Wena ibaha puibu biaga bedaru alebi honabi mone dewaore wabuni piaga bedaru alebi hondo haga nahe hagadagua wali agali ogonibi ka mitangi bu kego aginagabe. <sup>15</sup> Babilonoalirume wali agali wena pume baradagua bialu nume daba howa minagadagua minalu buwa turu timbuni halu mambolo bama ibaga. <sup>16</sup> Tigua wena nume wena dewa minu ya heneyago lalubi nu o biarunime ti mo homogo ho haga lalubi ka. Ani laga karume wena nu mo dunini halu urunihondo bi pupu wiaga ka.

<sup>17</sup> Tigua tinaga wai biagane ayu tibu ne gadelehe ngago yuwa wali agali tara tara paluyu pedaru dara nahe howa bame bo paya bialu haabo helo heloleberebe, lalu Habaguguhanda Anduane Homogohondo ani lene.

## 2

<sup>1</sup> Anduane Homogohondo ina genda ho howa bi lamirugoni ibugua agi ladai birabe hondolebi mani bi agi lolianaga langirabe hondolebi ina inaga mamage holenaga anda mbira luni daliga bu kagoria iraga howa hondo harogoni.

### *Anduane Homogohanda Habaguguhondo bi halu mende ladai binigo ogo*

<sup>2</sup> Anduane Homogo ibugua ladai bialu lalu, Manane ihondo walia hole kogo ina dindi dongoma mbaraleni bayuwaore gilibu ngelabe. Dagalaragome hai nabi abale dagalelo wale tigatiga gilibu ngelabe. <sup>3</sup> Ayu ogoni ndo awe lola holebiragonaga manda buwa gilibu ngelabe. Anigoyu horo langeroru bulubadagoni abale ibalu walia harogo damene bibahende larodagua lola hai holebira. Hendore bigi bini mbau lolebiragoyu mbira pugu wanahe biaiore holebira.\* <sup>4</sup> Bi o larogo gilibu wia. Ko biaga karu yo pialu napolebira. Anigo wali agali mini tigabiwi Anduane Homogohondo mini mbiraore wu karu ti haabo holebira, lalu, Bi kira ogoni gilibu wia, lene.\*

### *Ko biagaru kagoria ko anda ibulebira lenego ogo*

\* 1:13: Iba 5.5, Yar 12.1    \* 2:3: Hi 10.37    \* 2:4: Lm 1.17, Ga 3.11, Hi 10.38

<sup>5</sup> Homogorume dewaore wulenaga kē halu miaga ka. Agali urunime dimagoli halu mine howa tini hangu mitangi bialu homogo hole hai hangu bialu kane homa ibugua harula nalagadagua tigua homogo timbuniore hole hame dege laga ka. Babilonoali uruni ti ogonidagua biaga karume wali agali tara tara paluyu pedarunaga dindi ngaru karulama puabo haga ka. <sup>6</sup> Dindi karulenegonaga wali agali karume ti handaya ho haga karuhondo mo yo hondowa mege bialu bi ogobi lolebira. Tigua agali ko biagaruhondo lalu, Tíninaga wini ndo mendealinaga winiru page biaga kamiru ko timbuni tí kamigoria tagira ibulebira. Tí dano ho hene karuhondo hongo howa ngiadai bialu ngia tago halu ngidaba laabo halu tíni kē howa mali agira halu mo homogo ho holeberamibe, lolebira.

<sup>7</sup> Tí ala dano ho harimirume ti abaleore wayali ha aribia holebira. Ani wayali howa dano aribia halu danoali biaru tigua tíhondo abaleore yadai bialu ngia tago hadaba, lolebira. Tí naga waitigiru abaleore ibuwa ti mo mogola howa tína mbirale wirimiru heba mo yalu piai holebira. <sup>8</sup> Wali agali dindi tara tarani paluyu pedaru tína mbirale wiaru tí karulai halu wali agali ogoriani hearubi bo wahai halu tano wiarubi bo haealo bagabu wahai harimi. Ani birimigoyu wali agali ogoningi yu wahene biarume tíbi balu mbirale wirimidaruni ti karulalu mo yalu piai holebira.

<sup>9</sup> Ko timbuni tí kamigoria tagira ibulebira. Agali maru homelo bo wahalub mbirale dewaore page bialu mini wirimirume tína dameneru mo homogo ho heledami. Ani bu heledamigo tí kamigoria ko mbira anda ibulani hondowa tí bayaore awadaga holenaga andarubi hagirarubi hongoheore bu heledamigoni. <sup>10</sup> Anigo tigua koorene ko urunibi birimigome taga gibi holene tína dameneru heagoha yu anda ibirimi. Wali agali dindi tara tarani paluyu pearu bo mburi lalu birimigome tınıbi nde bo mburi lolebira. <sup>11</sup> Anda hongo timbuniore helo anda hai pabe ege toleme bima irigi harimi. Ege tole pabe birimirume, Tí koore bialu harimi, lalu anda dabira karumebi ani dege lambare bulebira.

<sup>12</sup> Ko timbuni tí kamigoria tagira ibulebira. Tagira ibulubadago irane tigua tano timbuni bulenaga wali agali garabaya biabe ale bilalu dewa homayagonaga daramani bialu harimi. Tína tano hongohe helo mana ko timbuni birimigome tano ogoni bu helarimi. <sup>13</sup> Dindi tara tara karularimigo wali agali hearume tína garabaya biabe ale bia hayago biabe ogoni nagalone holebira. Tigua bibahende biyaruni hagua hungula bialu do mundu lai holebira. Anduane Homogo Hongo Haiheore kagome ani bulebira. <sup>14</sup> Iba solowara tolo tagi howa birame kadagua wali agali dindi bibahendeni karume Anduane Homogonaga mini daliga taraore ngagobi ibu hongo gibiorehe kagobi wali agali bibahendeme manda biai holebira.✧

<sup>15</sup> Ko timbuniore tí kamigoria tagira ibulebira. Hameigini tara tara kaware bu hearu tihondo lembo timbuni howa mo ko halu ogodagua birimi. Tigua wali agalime waini iba mo na howa lulu yu halu agaru golo wahowa taga nahe hagadagua tınıbi ogonibi dege howa handaya ho harimi.✧ <sup>16</sup> Ogonidagua dege Anduane Homogohanda tíbi taga halimulo mini lene timbuni kamiruni bame halu mo dindiha haragola tınıbi pani nalu taga ho holeberami. Taga holene ogonime tí ala mini lene harimigo mo wahalub tí mo dindiha helolebira. <sup>17</sup> Tigua Lebanono dindini irabu timbuni wiaru dibu ibira harimidagua Anduane Homogo ibugua tíbi nde dibu ibira helolebira. Nogo gabua tara tara irabu ogoniha ibaga bialu piaga biaru barimi. Ani barimigo nogo uruni ariame tí halu mbira mo gila halu bolebira. Uruni bulubadaruni irane tigua wali agali dewaore dindi bibahendeni hearubi bo wahaga bialu tanobi mo ko harimigome ko ogonibi tí kamigoria tagira ibulebira.

<sup>18</sup> Tigua tína dama lowa gime wabinigome mbirale mbira agi biagabe. Bame agali gime wabini ogonime mbirale mbira nabiaga. Mbirale gime wabini bi nalaga ogonibime wabiagane kego í biamogo agua bulebirabe. <sup>19</sup> Ko timbuni tí kamigoria

tagira ibulebira. Ira gombedo minibi tole gaibu mini ngaruhondobi hale holebada lowa bi hongo howa lalu, Heya, laga kami. Mbirale irame wabini ngarume, Galone ngaruni ogo ale nga, lalu tí walia hagabe. Ngolomebi silibamebi yári biaho berelagago ogoniha holenenaga buhe nawiaga ndobe.

<sup>20</sup> Anigo Anduane Homogo ibu ogonibi ndo ka. Ibu ibuninaga anda loma bia henegoha kago wali agali dindi bibahendeni kamirume ibu kagoria howa ema nabi bi nale halimu, lalu Anduane Homogohanda Habaguguhondo lamini.✧

### 3

#### *Habaguguhanda iba gana lalu Anduane Homogohondo bi lenego ogo*

<sup>1</sup> Bi mana latagi haga Habaguguhanda Anduane Homogohondo bi lalu iba gana lole howa ngida ale balu lenego ogo.

<sup>2</sup> Anduane Homogo-o ina bini layaru hale howa✧

í timbuni gibi taraore ke manda buwa ina bi agi ale loabe toba ho ko.

Bamba ina biabe hongohe tara tara bialu hariru áyu ina kamangi biabe urunibi lone bibe.

Inahondo keba holene irane ngagoyu ai ina dara halu biamogo bibe.

<sup>3</sup> Ngode Datagaliwabe ibu Idomo dindihayagi howa lone ibira.

Ibu baya buruguleore howa Parananaga dindi hambene hambene ngaruha howa ibira.

Ibunaga wá holene timbuniore hari daligaha dungame halu

ibunaga mana baya buruguleore buleneme dindini mbirale bibahende ngarumebi karumebi ibunaga mini yaraga haralo handabeheore nga.

<sup>4</sup> Ibunaga wá holene egerebagi ni tagira ibiraligobi howa

ngiringarame ibunaga gi hongo ya do kagoha howa tagira ibaga.

<sup>5</sup> Ibugua warago tara tararu ala bambaha lalu homa ina maha talima ibabe laga.

<sup>6</sup> Ibu hondo kagola dindi dumbirumbi bialu

ibugua emene de leneme hangu handaragola wali agali dindini karu bibahende duru lai haga.

Hari haabo hole mbaule wedaruni podobaga bialu

dindi hambene bambaore wini o ngaruni ibuni ibalu penego áyu ogoni dindiha anda pu bereba helolebira.

<sup>7</sup> Kusana dindini wali agali hearuni giho hearia handaru.

Midiana dindini wali agalibi gi howa durulo heane handaru.

<sup>8</sup> Anduane Homogo-o ina puyabu ibilalu

puyabume iba porarubi iba solowarabi hongo howa mo yaribu bia helarigoni.

Ani birigoni iba urunihondo keba howa biribe.

Beraliba porarunaga biru yalu piaga harigo kegoni.

Ínaga wali agali karunaga wai bia hole howa iba dalu timbuni ibule

beraliba mindibi ngarunaga mo garo ale mini karisi bu hinalu ibuwa

ínaga wali agali mo wayali helariligoni.

<sup>9</sup> Ína danda yamuwa timurume bogole manda manda buwa harigoni.

Ínaga timu hari dabaha howa ibiyagola dindi gaibu бага buwa

iba timbuniru uruniha pelo mo ibira harigoni.

<sup>10</sup> Hari timbuni wedarume í hondowa duru lalu mogo timbuni lowa

iba timbuni hariha howa dalidali biyagoni.

Iba dindiha berearumebi tula lalu hegene damindini bo laya.

<sup>11</sup> Ínaga timuru ala pugupugu buwa hari daba ale piyaru handalubi

ina yandare didone piyago handalubi  
ni egela libu ema nabi hondo hene.

<sup>12</sup> Ina dindi bibahendeni hearu baba lembo timbuni howa  
ami wai bule poradagua pialu  
wali agali ina dindi tara tarani hearu hengedo paya bu hari.

<sup>13</sup> Anidagua birigome ininaga wali agalibi  
kini ina dabenegobi heba pele mialu biamogo biri.  
Mini kowi hearunaga haru haga kooore timbuni biaga heagobi ibunaga talima piaga  
hearubi bo hilo bagabu wahari.

<sup>14</sup> Puyabu hongo howa ibagadagua ami agali hagianeme ibuninaga ami haru halu  
ibuwa ina balu purogo lelole ibalu hearia  
ina ibuninaga yandare yiniyago yamuwa emboneni yandare harigoni.  
Tigua mine halu ina mo ko howa balu bo purogo lelole hearia ina ani biri.

<sup>15</sup> Ina iba solowarani nogo hosirunaga biru yalu pirigola  
iba mbolia baragaraga biya.

<sup>16</sup> Ina bi uruni hale howa mogo timbuni lo ko.  
Ani buwa bi hai bialu ne hambu duru lalu  
inaga dongone gimbu binihayagi homowa amburi biyagola  
ge ibubi nira duru lalu ka.

Ngode Datagaliwabe ibunaga horo harangi inahondo ko biraru ibugua ti pani mialu  
belo  
i ema nabi hendore hondo holebero.

<sup>17</sup> Pogeru lini da nabiyaguabi  
Pu mbira mini gerebi lini nade hayaguabi  
Ira mini olibe lini ko hai hayaguabi  
Mabuni tomo bibahende gau lai hayaguabi  
Nogo sibiru homai hayaguabi  
Nogo bulumagaru nahe tinaga anda bame tabuanda hayaguabi

<sup>18</sup> Uruni bibahende ani biyaguabi waha i turu halu holebero.✧  
Irane inaga Anduane Homogo Ngode Datagaliwabe ibugua i pele ngiaga ka manda  
buwa turu halu holebero.

<sup>19</sup> Anduane Homogo Bibahende Haru Ho Haame Haga kago✧  
ibugua i hongo ngiaga.  
Ibugua nogo tara mini dia ge hongoheme hagamaga i mo heleda.  
Ani bialu dindi hari daliga neneni pialu koria  
ibugua i pi naloliya haru haga ka,  
lalu Habuguguhanda bi ogoni Anduane Homogohondo lai hene.

## Sebanaia

### Mbuga ogoniha gilibu ngarunaga nemandi ogo

Sebanaia ibu Anduane Homogonaga bi mana latagi halu henedagoni Kini Yosai-handa Yuda wali agalime mana ko bialu hearu mo tiga bialu Anduane Homogonaga mana bayale hangu laga winidagua lalu helayago naheha Sebanaia ibugua ala latagi halu hene. 2 Kini 22-23 handabe.

Sebanaia ibugua Yuda wali agali hearuhondo lalu, Tigua mana ko bialu kamiruni wahadaba. Mana ko bialu haabo harimiyagua nde Anduane Homogohanda tí kamigoha genda timbuniore ibilolebira, lalu latagi hene.

Sebanaiahanda bi mende latagi halu lalu, Wali agali dindi tara tarani bu karu tigua Yuda wali agaliruhondo genda mo miaga karu ti mana ko bialu kagonaga Anduane Homogohanda pani nelo mulebira, lalu latagi hene. Yarusaleme mo ko halu gialabaga bulebirago mani wali agali tini mo dindiha howa bu mini beregedalu mana tigabi ngaru talialu bialu karu ti dege bayale holebira, lalu mbiwia henego gilibu nga.

#### **Bulubaga buwa kuni gilibu ngago (1.1-2.3)**

Anduane Homogonaga Horo ibirangi ko holene wulebirago 2.4-15

Dindi tara tara Yuda dindi kaware ngaru mo ko hai holebirago 3.1-20

Yarusaleme pani nalu mani mini beregedowa bayale holebirago

#### *Anduane Homogonaga Horo ibirangi wali agali dabaki bulebirago ogo*

<sup>1</sup> Amono igini Yosai ibu Yuda wali agalinaga kini heangi Anduane Homogohanda Sebanaiahondo bi mbira ogo lamini. Sebanaia ibu Kini Hesegeaianaga damene ti darama mandagi hene. Sebanaia aba Kusi howa Kusi aba Gedalaia halu Gedalaia aba Amaria hene. Amaria ibu aba Hesegeia hene.\*

<sup>2</sup> Anduane Homogo ibugua Sebanaiahondo lamialu lalu, Ina dindi bibahende mbirale ngaru bibahendeore mo ko hai holebero. <sup>3</sup> Ani bialu wali agalibi nogo biango tara tara bu karubi ega bedarubi ibaha wena bedarubi bibahende wali agalinaga mana ko bilo haru pubagi haga ngago damene mbira yu wahene nangelo bibahendeore mo wahaiore holebero. I Anduane Homogo ina bi o ledogoniore.

<sup>4</sup> Wali agali Yuda dindihabi Yarusalemehabi karu bibahende homelo bo wahai holebero. Ani bialu mbirale dama mitangi bialu bi pupu wulenaga gime wabini mini Bala ngaru bibahende mbirale uruninaga loma binigo mo miaga agali bu karubi bibahendeore bo wahai holebero. Wali agali mani holobadarume agali abogo mbira ogoria hene lalu manda nabilo balu bo mundulo wahaiore holebero. <sup>5</sup> Ani bialu wali agali tini anda dangini irigi howa ni ege yakundirunaga mini yaraga halu ge duli hanga howa bi pupu wiaga karubi bibahende bo wahai holebero. Ani berogola wali agali marume ihondo bi lalu howa heneneore iname Anduane Homogo talima pialu kamagoni lolebira. Ani lalu ha howa mani ti beregedalu puwa mbirale dama mitangi bialu gime wabini bi pupu wiaga mini Molege laga ngagoha puwa lalu, Iname heneneore laramago iname Molegeore talima poleberema laga ka. Ani laga karu bibahende bo wahai holebero. <sup>6</sup> Wali agalime i erembira ngialu ini talima ibu nabi wahalu puabo howa tigua ihondo langialu, Ina haru bamba habe, lalu halebi naheore puabo haya. Ina wali agali uruni tibi mo ko hai holebero laya, lene.

<sup>7</sup> Ainde Anduane Homogonaga Horo kaware hapara hayada. Ani manda buwa tigua ibu karia ibuwa mogo lalu bi nale halimu. Anduane Homogohanda wali agali nogo sibiru bo lomabu delagadagua ibunaga wali agaliru bo wahai hole manda manda bu kagoni ndobe. Ibugua anidagua bule kago wali agali maru de hondo ibilonaga ibugua

\* 1:1: 2 Kin 22.1-23.30, 2 Bit 34.1-35.27



ti lamialu lalu, Tí Anduane Homogo ibuninaga deni howa maname tíha ko mbira para nahe holenenaga biaga wiago ala bialu ibalimu, lene. <sup>8</sup> Anduane Homogohanda lalu, Inaga wali agali bo wahai holene horo ogoni tagira ibirangi kininaga agali dunini karubi kini ibuni igini bu karubi wali agali Anduane Homogo ibuni kago manda nabi karume biaga mana ngaru bialu haga karubi ti bibahendeore pani nelu miai holebero. <sup>9</sup> Wali agali maru i manda nabi bu karume lotu lagadagua lalu howa mbirale page bigi bialu wali agali homelo bo wahalu mbirale dama mitangi bialu bi pupu wule gime wabiniru andaha mo wiaga karubi ti bibahende pani nelu mialu minu bai holebero laya, lene.

<sup>10</sup> Anduane Homogohanda laabo halu lalu, Horo ogoni tagira ibirangi wali agali bibahende Yarusaleme tanonaga panga haraba mini Wena Panga laga kagoria íbu ngoai howa dugu bialu bu karia hale holeberemi. Yarusalemenaga tano gahenge ngagohayagibi dugu bialu karia dege hale holeberemi. Hari nene ngaruha howa tula hongohe lagalaga biaruanebi hale ha dege buleberemi. <sup>11</sup> Ani hale howa wali agali Yarusaleme tanonaga nira uliulihayagi kamiru tínaga agali haguane biyinaya biabe bialu haga biaruni homai hayadane hondoleberemigo mitangi bialu uruni tinaga dugu bu wia halimu.

<sup>12</sup> Ogoningi ina hale hedo yalu Yarusaleme tanoha ibaga bialu wali agali inaga mana ngogo hame nalaga howa hope haga karu ti taya bulebero. Tigua manda bu handalu karia mbirale bibahende tinime biai habehe kamabe tobaho karunigo anidagua nabibeheore ka. Tigua lalu, Anduane Homogohanda wali agali bayale karu biamogo bulene ngago nabiagaya. Wali agali ko biaga karu pani nelu mialu mo ko nahagaya. Anidagua bulene ngago nabi ibu bameore hagaya, ani laga beremiligo ai wali agali uruni ina bo wahai holebero. <sup>13</sup> Agali tara tara bu karume ibalu agali bi uruni laga karunaga mbirale ngaru mo yu piái halu tinaga anda bu karuni bo gialo wahai holebira. Tinaga anda gahenge bu helaga bidaruha tini napaluebira. Tinaga gerebi mabuha gerebi hanga hangedago ai lini dalu pingidowa waini iba hambialu na nabulebira, lalu Anduane Homogohanda lene.✧

<sup>14</sup> Anduane Homogohanda wali agali bibahende mo dabaki bulene Horo biago tagira ibulene kaware hapara haragoni. Horo ogoningi ami agali hongoheore ha heaguabi bibahendeore gi howa duru lalu dugu biai holebira. <sup>15</sup> Horo ogoni tagira ibirangi Anduane Homogonaga keba gibi holene wiapani haragola wali agali bibahendeoreme genda yu hai holebira. Ani bialu tinaga bu miniha mo ko hai kagola mbirale ngarubi mo ko hai holebira. Beralibame ni ge haragola dindiha aruma timbuni holebira. <sup>16</sup> Horo ogoningi pilipe biguluru pipe lalu ami agalime wai bule wai huaru laga laga bima tanoha anda ibalu wai bigi bigi bulebira. Tigua tanonaga ege pabe hongohe bu mabu bini karuha anda puwabi ami agali handa amu nana bu mamage haga anda pabe nenení bu heledaruha anda pu howabi wai hongo howa bulebira.

<sup>17</sup> Anduane Homogo ibugua ogodagua laya, Wali agali bibahendeme ihondo mana ko biyagonaga ina ti mo ko holenaga ko tara tara ti kagoria íbu ngelolebero. Ani berogola tinaga de kohe ale howa arumaha hariga taya bialu hagagobi holebira. Ani bialu kagola tinaga darama iba pora biradagua bialu homaga bulebira. Ani homaga birarunaga tinginirubi dindini wu togo bialu biango ti to wahene ngaru ngu biradagua ngu bialu wulebira, laya lene.✧

<sup>18</sup> Horo ogoni tagira ibirangi Anduane Homogonaga keba holene timbuni winigo tagira ibiragola muni ngolo silibarume biamogo bialu tini mbira mo wibe naheore wulebira. Ibunaga keba holene ira hungu ale bialu dindi anda bibahendeore dai helolebira. Ani bialu wali agali dindini bu karubi bibahende bo wahaiore holebira, lene.

## 2

### *Isaraele wali agali tí mini beregedolene nga, lenego ogo*

<sup>1</sup> Wali agali dindi ogoria bu hene kamiruni tìnime mana tara tara bialu kamirunaga taga nahagaoreya. Tini nde manda bialu ko birimirunaga taga ho holene nga. <sup>2</sup> Taga nahe kamiria Anduane Homogohanda ibunaga tandaga holene mo heya haragola tí balawaya bayale dedago lu dahó wiaabo nahe abale do taulope hagadagua tí mo ko halu ibunaga tandaga holene ngagome tí irame bo heda haradagua buligo de hondo holene nga. <sup>3</sup> Wali agali mine nahe tini mini mo dindiha howa Anduane Homogonaga bi mana hale howa mo wa nahaga kamiru tí ibuni karia ibulene nga. Tíni mo dindiha howa mana tigabi ngaru hangu bialu holene nga. Ani bialu harimiyagua nde Anduane Homogohanda wali agali keba halu ti pani neló mirangi tí heba mandagi namaga naholeberemi.✠

### *Dindi maru Yuda dindi kaware wia para para bu ngaru mo ko hai holebira lenego ogo*

<sup>4</sup> Anduane Homogohanda Pilidia dindi mo ko harangi Gasa tanoha wali agali mini lenego mbiraore hangubi mbira naholebiraore. Asagelono tanohabi naholebiraore. Wali agali Asadodo tanoha karu tinaga waitigime horo mbiru hanguni balu bo togolalu Egerono tanoha karubi bo taliatagi hai halu bulebira.✠ <sup>5</sup> Pilidia wali agali maru iba solowara bedago angeangeha paluyu pedamiru Anduane Homogohanda tí mana ko biagaore ka lene kamigo ai ibugua tí mbiraoreali hangubi mbira yu wanahe bo wahaiore holebira. <sup>6</sup> Tíninga dindi bayale iba angeange wima pedamiruni mani dangi anda holebira. Anda ani ho ngagola agali nogo sibi hinalu haga karume tinaga andira emeneru dindi ogoriani bu howa tinaga nogo sibiru hinalu holebira. <sup>7</sup> Ani bialu ai Yuda hameigini emene yu wahene karume tínaga dindi ngamiruni maruhayagi ti karulo holebira. Ani karulo howa Yudalirunaga nogo sibiru dindi uruniha hinalu tini Asagelono tanoha palu holebira. Ani bialu Anduane Homogo Yuda wali agalirunaga Ngode Datagaliwabehanda tini mo bayale halu ibuni ti heba mandagi howa ti tininaga dindi ngagoria helo lone mo bayale ho helolebira.

<sup>8</sup> Anduane Homogo Hongo Haiheore kago ibugua lalu, Ina hale ho hewaria wali agali Moaba dindiha padarumebi Amono dindiha padarumebi tigua inaga wali agaliru mege bialu hege lalubi hemiru hale haru. Ani lalu howa bi hongo howa lalu, Tíninga dindi ngamigo karuloleberema, laya.✠ <sup>9</sup> Ani layago ai Anduane Homogo haluhe i Isaraele wali agalirunaga Ngode Datagaliwabe kogo inimeore larogo, Moaba wali agalirubi Amono wali agalirubi bibahendeore Sodomó wali agali Gomora wali agalirubi homayadagua homai holebira. Ani homai haragola dindi uruniha nigi hangu andaho holebira. Ani bialu dindiha ibi duguagane uli hangu wialu dindi ogoni mo koore henego ogonibi dege wiaabo holebira. Ai inaga wali agali yu wahene emene dagalene hangu karume ti baba wai buwa tinaga mbirale yu karu balu gingila mialu tinaga dindi ngarubi karulai holebira, laya lene.✠

<sup>10</sup> Moaba wali agali Amono wali agalirubi tigua mine halu ti hangu hongo hetingi hayagonagabi tigua Anduane Homogo Hongo Haiheore kagohondo bi ko layagonagabi ibugua tini pani neló mialu bulebira. <sup>11</sup> Anduane Homogohanda ti mo gi taraore holebira. Ibugua dindi bibahendenaga dama mitangi bialu bi pupu wiaga ngaru bibahendeore mo nagalone hai helolebira. Ani biragola wali agali dindi bibahendea bu karume tininaga dindi hangu hangu ngaruha haga haga buwa Anduane Homogo hangu mitangi bialu ibuhondo lotu lalu holebira.

<sup>12</sup> Wali agali bibahende Sudana dindiha kamiru tí bibahendeore Anduane Homogohanda bo wahai holebira.✠

✠ **2:3:** Ais 26.20, Amo 5.6, 5.14-15 ✠ **2:4:** Ais 14.29-31, Yar 47.1-7, Ese 25.15-17, Yol 3.4-8, Amo 1.6-8, Seg 9.5-7

✠ **2:8:** Ais 15.1-16.14, 25.10-12, Yar 48.1-47, 49.1-6, Ese 21.28-32, 25.1-11, Amo 1.13-15 ✠ **2:9:** Pig 19.24 ✠ **2:12:** Ais 18.1-7

<sup>13</sup> Ani bialu Anduane Homogo ibuninaga hongo timbuniore kagome wali agali dindi abene uyurayagi Asiria ngagoha padarubi mo ko hai holebira. Ani bialu tinaga tano dunini timbuni Niniba ngagobi mo ko halu bo gialabaga biragola mo ko hene dindi ko ege kelekele mbirale mbira anda naholene wialu wali agali mbira nahe wulebira.✧

<sup>14</sup> Ani ngagola nogo sibi bulumaga memerubi hangu halu ema bialu piaga tara tara maru bu karubi ti palu ngoai haga wulebira. Waitigime ira tamia dibu pelo mbara lowa anda bini ngaru bibahende bo gialabagabu wahai haragola dindini podope hene wiagoriani ega maru bi lalu birulebira. Anidagua bini ngagoria ega umi tara tara mbiraga biraga bedarume anda giallo wahene kagoria ibu biralu windo haga ngagoria biruwa bi lagalaga bialu birulebira. <sup>15</sup> Ninibali tigua mitangi bialu ina mo ko holene nawi hongohe wayali kamagonida manda bialu turuho haga ka. Ani bialu dindi maruha tano ngaru bame dege lowa tinaga tano ogoni timbuni duniniore ngabe toba haga ka. Ani manda bu ha kagonigo ai mo ko holene tara tara Ninibaha anda ibulebira. Ani bialu dindi mo ko halu mo labu hene mbira ngagola mbirale ema bialu piaga damene dére biru karu ti hangu dindi dege ho wulebira. Ani ngagola dindi ogoniha bolangua halu pole maru porarume dindi ogoni hondowa tini mogo lalu duru timbuniore lolebira.

### 3

#### *Anduane Homogohanda Yarusaleme wali agalinaga ko domo wahenego ogo*

<sup>1</sup> Yarusaleme-o í mo ko hene mbira o ngegoni. Inaga wali agali bu karunaga mana koore Anduane Homogonaga deni ko ngubiore bialu ka. Tigua ibunaga bi mo wahalutininaga damene bu karu mo ko halu ka. <sup>2</sup> Tigua Anduane Homogonaga bi hale holene mangaho howa ibugua ti mo tiga bilobi hame nale dege ka. Tigua Anduane Homogohondo mini mbiraore nawi howa ibuhondo ti biamogo bilonaga bi nale haga. <sup>3</sup> Yarusalemenaga agali haguane hearu ti laiono gabuame tomo garibi lo howa bi hongo howa lalu kaligobi halu agali godi hale haga karu tibi nde biangome nogo ega kuniru nalu howa ai maru yawi nole ngela nabi noa dege howa nalu haraligobi ka. <sup>4</sup> Mana latagi haga agali karume biabe bialu hararu henene tiga tiga bia ndo tigua maru karuhondo ke howa mo ko holenaga dege bialu haya. Ani bialu kagola loma binigo mo miaga agali bu karumebi nde mbirale lomabia howa wubagi hene wiaru ilili biaga wiadagua nabi mo hilahole bialu Ngode Datagaliwabenaga bi mana ngagome tini biamogo bilonaga dege mo tiga bialu haga. <sup>5</sup> Ani anigo Anduane Homogo ibu Yarusalemeha haabo ka. Ibugua mana bayale ngaru hangu biaabo haga ka. Mana ko ngaru ibu nabiagaore ka. Ibunaga wali agalime birago tiga tiga howaore mo tale biaga ka. Anigo wali agali ko tano ogoniha bu karume mana ko tiga nabi ngaru bialu haabo howa tini taga nahagaore bu kagoni.

<sup>6</sup> Anduane Homogohanda lalu, Hameigini dindi tara taraha hearu bo ereba hai halu ina tinaga tano hongohe wiarunaga wai pabe hongohe hearu bo giallo wahai haru. Tinaga ami agalirume mamage howa handa amu nana bu haga anda wai pabe neneni bu helearu bo giallo wahai harugola áyu mo ko hai hene nga. Tanoha wali agali yu wahene mbiraore hangubi nahe wialu tanoha hariga timbuni pepadagua mbirali mbira pialu kariabi nahondoleberemi. <sup>7</sup> Ainde inaga wali agali bu karume ina mana bayale tigabi bialu kogo hondowa tigua i andaneha halu inime ti mo tiga buliya holebira mitangi bu haru. Tigua inaga bi mana lamirugo baya hangu minime manda bu kale nde ina ti mo ko nakole. Anigo tigua inaga bi mana lowini wiaruni mo wahai halu mana ko ngubi wiaru abale bialu haga wiago bolangua howa ko bia timbuore haga, lalu laya.

<sup>8</sup> Anduane Homogohanda wali agali ibunaga bi mana talialu karuhondo lalu, Ti mini dege dindiho nahalimu. Ina wali agali dindi bibahendeha bu karu dabaki buleberogo

✧ 2:13: Ais 10.5-34, 14.24-27, Nah 1.1-3.19

hondole halimu. Irane ina wali agali dindi tara tara bibahende ha bu karuhondo keba howa mo ko hai holene manda bu henego ko. Ina wali agali dindi tara tarani bu karu bibahende haru ibu mogo bialu ti mo ko hai helolebero. Inaga keba holene ira hungu daradagua biragome dindi bibahende dai holebira.

<sup>9</sup> Ani bialu horo ogonongi ina wali agali dindi bibahende ha bu karunaga mini mo beregedai holebero. Ani berongi tinaga mini gahenge wia aribia ho howa i hangu mitangi bialu inihondo bi lalu holebira. Tinaga mini mo mbiraore howa inaga bi mana lowini ngaru talialu holebira. <sup>10</sup> Ani bialu inaga wali agali inime Sudana dindi ngagoha pu heledorubi dindi maruha pu heledorubi tigua ininaga lomaru mo yalu ibulebira. <sup>11</sup> Heneneore inaga wali agaliru tigua inaga bi mo wahalu ha harimigonigo ai ina mbirale uruni berongi tigua mana ko bialu harimigonaga taga ho holene nawulebira. Inime wali agali mine halu balagala haga bu karu bo pelai holebero. Anidagua berogola tigua inaga hari nene biagoriani Yarusaleme tano ngogoria howa inihondo lone mine naholeberemi. <sup>12</sup> Ina wali agali maru Yarusalemeha helo waholeberoru ti mbirale dewa nawi howa tini mo dindiha ho holebira. Ani howa tigua ini koria ibalu ina ti biamogo bia lalu hale halu holebira. <sup>13</sup> Isaraele wali agali yu wahene emene dagalene hangu karuni tigua wali agali tara karuhondo ko mbira nabi holebira. Ani howa wali agali tini damene bu karuhondo ke halu mo hondo naholebira. Ti bayale holene hanguha kagola tinaga waitigime ti mo gi holenebi mbira nawulebira, lalu Anduane Homogo ibugua laya lene.✠

*Turu holenenaga iba gana ngago ogo*

<sup>14</sup> Isaraele wali agaliru-o tigua turu halu iba gana hongo howa ladaba.

Yarusaleme wali agaliru-o tinaga bu miniha dungulo howa turu hadaba.

<sup>15</sup> Anduane Homogohanda lalu, Ti mo ko holebero, layago

ayu bi ani layagoni wahalu wahaiya.✠

Ibugua tinaga waitigi bu hearu bo taliatagi hai hayada.

Anduane Homogo Isaraele wali agalinaga kiniore kago

ibu ti heba mandagi haabo kagoni.

Ani kago ai tigua mbirale mbirahondo gi ho holene nawiore.

<sup>16</sup> Horo mbira tagira ibulebirago

ogoni ibirangi tigua Yarusalemehondo lalu,

Yarusaleme wali agaliru-o tigua gi nahe halimu.

Tigua bame mogo lalu gi holene nawulebiraore.

<sup>17-18</sup> Anduane Homogo tinaga Ngode Datagaliwabe ibuni ti heba mandagi haabo ka.✠

Ibunaga hongo gibiore kagome ti biamogo biragola

tigua wai bialu wayali holeberemi.

Wali agalirume tinaga horo timbuni wigi binigo tagira ibirangi turuho howa iba gana lagadagua

Anduane Homogohanda tihondo turu howa iba gana lolebira.

Ibugua tihondo gubalinioire ho howa mo palia holene bi lolebira, laya lalu lene.

Anduane Homogohanda lalu,

Ina Yarusaleme wali agali ti mana lalu minu barugola

tinaga horo timbuni lotu lole mo ngoaiho haga wimiru talialu bibe nahe kamigoni.

Tigua inihondo lotu lone lalu habe nahe kamigome tini mo tagaore henego kamigoni.

Anigo ayu ina ti lone haru dai bulebero.

<sup>19</sup> Horo ogonongi ti bope haga waitigi biaruni ina mo ko hai holebero.

Isaraele wali agali ti nogo sibi pugu pugu biagadagua pugu pugu binigo

tinaga ge ko henego tini kagotha haga haga biagadagua  
Isaraele wali agali dindi tara tara ngaruha pu haga haga bidamigo  
ina tininaga dindi henene ngagoria halimulo haru dai bulebero.  
Áyu wali agali bu karu bibahendenaga deni howa tí taga timbuni ho kamigonigo  
mani ina tinaga taga holene uruni mo wahai halu tí mini lene helolebero.  
Ani heledogola wali agali dindi bibahendeha karume tinaga mini mo yaraga holebira.  
<sup>20</sup> Horo ogoningsi tí dindi tara tara ngaruha pu haga haga bidamigoria howa  
ina tí lone gi mialu tininaga dindini halimulo haru dai bulebero.  
Haru dai buwa tí mini leneore heledogola  
wali agali dindi bibahendeha bu karume tinaga mini mo yaraga holebira.  
Horo ogoningsi tinaga biabe buleneru bibahende mo bayale hai helarogola  
tinaga holene bayaleore wulebira.  
I Anduane Homogo ina bi o ledogoniore, lalu Anduane Homogohanda laya lalu Sebana-  
iahanda lene.



## Hagai

### Mbuga ogoha gilibu ngarunaga nemandi ogo

Hagai ibugua Anduane Homogonaga bi mana latagi henedagoni Yuda wali agali Babilono dindiha garabaya heneru golalu dai buwa Yarusalemeha heagola latagi halu hene. Ti dai buwa mali maru Yarusalemeha heane dege Anduane Homogonaga anda biago biadai nabi dege haabo hene. Ani howa bi mana latagi haga agali Hagai Segaralame Serubabele Yosualanaga mini mo hongo halu libugua Anduane Homogonaga anda bo giallo wahene biago lone biadai bialu lotu lalu howa mana ko biaga wiaru mo wahai helonaga lene.

Hagaihanda lalu, Yuda wali agalime biabe ogoni birimiyagua nde biabe ogonime tını baya hanguore mo mbiraore ho holeberemi. Ani beremigome Anduane Homogonaga bi mana latagi halu mbiwia haga ala heneruha howa bulebero lalu Anduane Homogonaga ibunime laga biniru heneneore tagira pugu bilonaga, lalu hene. Anduane Homogonaga tını mo bayale helaragola tını holene bayale winidane handa walia holeberemi, lalu latagi halu hene.

#### **Bulu бага бува кuni gilibu ngago (1.1-15)**

Anduane Homogohanda ibunaga anda bia halimu lenego 2.1-23  
Biamogo bulenebi mini mo dunu bia holenebi lalu laminigo

#### *Anduane Homogohanda ibunaga anda abaleore bia halimu lenego ogo*

<sup>1</sup> Kini Dariusi ibu Pesia dindiha kini heane mali mendegonaga ege waraganenaga horo mbira layagola Anduane Homogohanda ibunaga bi mana latagi haga agali Hagaiha howa bi ogo lamini.\*✧ Ibugua bi ogoni agali Yudanaga gabumane haguane Serubabelebi agali loma binigo mo miaga haguane timbuni Yosua bi libuhondo lamini. Serubabele ibu Sealadiege igini hene. Yosua ibu Yahosadaga igini hene.

<sup>2</sup> Ani heagola Anduane Homogonaga Hongo Haiheore kago ibugua Hagaihondo bi lamialu lalu, Wali agalime bi ogodagua laga, Anduane Homogonaga anda biago lone bulene wene dege nga, lagaya lamini.

<sup>3</sup> Ani lamialu Anduane Homogonaga Hongo Haiheore kago ibugua wali agalihondo ibunaga bi mana latagi haga agali Hagaiha howa bi latagi hene. <sup>4</sup> Ibugua ogodagua lene. Inaga wali agaliru-o tını andaga bayaleruha paluwa inaga anda mo ko hene ngelo kamigo aginagabe. <sup>5</sup> Tíha ko tara tara tagira ibulene ngaru mitangi bialu holene nga. <sup>6</sup> Tígua tomo dewa hangarimi tiraga emene hangu anda haya. Tí tomo maru ngami tiraga tí no karulapu nabulebira. Tínaga waini ibabi nalu holene wia ngami tiraga tígua naramigola no karulapu nabuleberemi. Tínaga aga bu holene dewa wu kamigo ai dagare birangi tınaga aga urunime tí bu karulapu nabulebira. Muni biabe biaga maru karume muni dewa yu ka tiraga tinaga muni yaga paudi nu diriwiha hanaragola tagu wahai haradagua bialu abale ereba haga biaga.\*<sup>7</sup> Anduane Homogonaga i Hongo Haiheore kogome tihondo bi ogodagua laro. Mbirale wali agali tíha ibirarunaga irane agidabe manda bulene nga. <sup>8</sup> Ai bi ogo hale hadaba. Tígua hari ngaruha puwa inaga anda lone biadai bule irabuha ira dibu pilimu. I turuho holiya inaga anda ogoni lone bia halimu. Ani bialu inaga mini yaraga hene howa mini leneore holiya tígua inihondo lotu lalu holeberemi.

\* **1:1:** Ogoniha gilibu ngagoni Yasu ibu dindini ibulenego mali handari duriani pira kira (520) ngelo howa lene. Ogoni mali inanaga dagalalu howa ege halininaga horo pira kirani dira (Ogasa 29) hayagola lene. ✧ **1:1:** Esr 4.24-5.2, 6.14 ✧ **1:6:** Man 28.38-40, Hos 8.7, Hag 2.16

<sup>9</sup> Tígua mabuha howa tomo dewa bu yalu íbu wulene manda bu kamiria tomo dewa nawiya. Tí tomo andaga bu yu íbu ngamiria inaga puyabume pulo wahai harugola tomo abale biba hayiya. Anidagua birudagoni irane tígua inaga anda giala holebu ngelo wahowa tigua tíninaga anda hangu hangu kamidagua bigibigi bialu kamigoni. <sup>10</sup> Irane ogonidagua beremigome iba dalu naibi gaea biaho wiaabo haya. Ani biyagome mabuha tomo dewa anda nahe ngagoni ndobe. <sup>11</sup> Inime iba dalu naibilonaga minu yu kogoni. Hari bare ngaruhabi widi mabu ngamiruhabi gerebi mabu ngamiruhabi ira olibe mabu ngamiruhabi iba dalu naibilonaga ina hapai ho ko. Dindini tomo tara tara hingedamigohabi wali agali bu kamiruhabi nogo bulumaga bu karuhabi tínaga tomo tara tara hingedamiru bibahendehabi iba dalu naibilonaga henemane inime hapai ho kogoni, laya lene.

*Wali agalime Anduane Homogonaga bi hale halu binigo ogo*

<sup>12</sup> Yuda wali agali ti Serubabele Yosuala heba mandagi heagola bi ogo lamiyago ti bibahendeme hale hai hene. Ani hale howa Anduane Homogo tinaga Ngode Datagaliwabehanda bi layago hale howa gi timbuni halu ibuninaga bi mana latagi haga agali dabo helene Hagaihanda bi layago hale howa talialu bialu hene. <sup>13</sup> Ani heagola Hagai ibugua wali agali bu hearuhondo Anduane Homogonaga bi mana lamialu lalu, Anduane Homogohanda bi ogodagua leda. I Anduane Homogo ini tí heba mandagi haabo holebero, laya. <sup>14</sup> Ani layagola Anduane Homogohanda wali agali bibahendenaga mini mo heya hayagola tigua Anduane Homogonaga anda bialu hene. Serubabele Yosualabi wali agali libu heba mandagi bu hearu tigua Anduane Homogo Hongo Haiheore kagonaga anda ogoni bule bialu hene. <sup>15</sup> Tigua anda pigane tenialu binidagoni Dariusi ibu kini henego mali mendenaga ege waraganegonaga horo pira kirani maria (24) heagola tigua anda ogoni pigane bialu hene.†

## 2

*Anduane Homogonaga anda bayale taraore holebira lenego ogo*

<sup>1</sup> Mali ogoninaga dege ege kanenaga horo pira kirani mbira (21) hayagola Anduane Homogohanda ibunaga bi mana latagi haga Hagaiha howa lone latagi hene. <sup>2</sup> Ibugua Hagaihondo lamialu lalu, Tínaga gabumane agali haguane Serubabelehondobi loma binigo mo miaga haguane timbuni Yosuahondobi wali agaliruhondobi ogodagua lamibe. <sup>3</sup> Bamba inaga anda bayaleore henego tí marume mitangibu kamibe. Anigo áyu tigua handalu kamiria anda ogoni mo ko halu gialabaga bini nagaloneore ngaria hendedamibe.✧ <sup>4</sup> Ani ngaria hondowa tínaga bu miniha genda dege dindiho holene nawi. Ini tí heba haabo kogonigo biabe ogoni bialu halimu. <sup>5</sup> Bamba tí Iyibi dindi yu wahalu tagira ibalu ibirimingi i tí heba mandagi haabo holebero lalu lo wirugoni. Áyubi nde inaga Dinini ibu tí heba haabo kago tí gi nahe halimu.✧

<sup>6</sup> Anduane Homogo Hongo Haiheore kogome lu nahe emeneore howa mbirale bibahende ngarunaga dindi haribi iba solowara timbuni bedarubi ina mo ema bia hai holebero.✧ <sup>7</sup> Dindi bibahendeha gabumane haru haga agali haguane bu karubi mo durula hai holebero. Ani berogola wali agali hameigini dindi tara taraha bu karume tinaga munibi mbirale bayale tara tara ngarubi bibahende mo yalu ibalu inaga andaha wialu wu tololebira.✧ <sup>8</sup> Muni ngolo silibabi dindi bibahendeha bu ngarubi inaga dege wiai ka.✧ <sup>9</sup> Inaga anda gahenge ogoni ala hayagonibi ndo baya taraore mbira ona holebira. Ani kagola inaga wali agali dindi ogoniha karu mbirale bayale tara tara bu

† 1:15: Mali ogoni Yasu Keriso dindini ibulenege mali handari duriani pira kira (520) ngelowa bini. Áyu kamangi manda bialu ege dini mini Sebedembanaga horo pira kirani mbira (21) hayagola pigane bialu hene. ✧ 2:3: Esr 3.12, Seg 4.10 ✧ 2:5: Har 29.45-46 ✧ 2:6: Yol 3.16, Hag 2.21, Hi 12.26 ✧ 2:7: Ais 60.4-9, Dan 2.44 ✧ 2:8: 1 Bit 29.14-16

ngaru mo mialu tinaga bu miniha mo palia holenebi mo karula holebero. I Anduane Homogo Hongo Haiheore kogonigo ina bi o ledogoniore, laya lamibe, lene.

*Mana ko ngubi wiarume wali agalinaga lomabu mulene wiaru mo ko henego ogo*

<sup>10</sup> Kini Dariusi ibu kini henego mali mendegonaga ege dininaga horo pira kirani maria (24) hayagola Anduane Homogo Hongo Haiheore kago ibugua ibunaga bi mana latagi haga agali Hagaihondo bi ogo lamini. <sup>11</sup> Ibugua lalu, Ina loma binigo mo miaga bu karuhondo tinaga bu miniha agua wu henedabe hondole tihondo bi ogo hale habelo hamelo ko. <sup>12</sup> Mbiralime nogo lomabu miniru bo delene ngagonaga mbirini mbira ibunaga agame mo kabu bu yalu piyagua aga ogonime mberedibi tomo dawa wini ngarubi waini ibabi olibe lininaga welibi tomo marubi uruni mbirago agame ela hayagua ela harago mo lomabu miniru aria dege halu ininaga wiabagi heneore wulebirabe lalu hale habe, lene.

Ani laya handala Hagai ibugua loma binigo mo miaga bu hearuhondo bi ogoni hale hayagola tigua ladai bialu lalu, Ndo anidagua bulene karulapeore, lene.

<sup>13</sup> Ani layagola Hagaihanda tihondo bi mende hale halu lalu, Ai mbiralime homene tingini ngago ela hayagua nde wali agali ogoni ibu Anduane Homogonaga deni mebia hene dodohe kago ina manda bidamagoni. Anigo agali homa tingini ela hayagome ibugua tomo maru ngago ela hayagua tomo ogonibi nde mebia hene dodohe dege ngabe, lalu hale hene. Ani hale hayagola loma binigo mo miaga agali biaru tigua ladai bialu lalu, E tomo urunibi nde dodo hene dege wulebira, lene.✧

<sup>14</sup> Ani layagola Hagaihanda lalu, Anduane Homogohanda au laya. Yuda wali agali bibahende bu karunime mbirale bialu karuni ti ogonibi dege ka. Tininaga minibi mana tigua bialu karubi bibahende dodo hai hene dege bialu ka. Anidagua bialu kagome tigua lomabu delaga dabuni loma damene bibahende bu yalu ibiraru inaga deni mebia hene dodohe dege bu yalu ibaga.

*Anduane Homogohanda, Isaraele wali agali biamogo bulebero, lalu lowinigo ogo*

<sup>15</sup> Anduane Homogohanda ogodagua laya, Tigua inaga anda biago lone bia dai nabi hemingi biyago damene bayuwa mitangi budai ala bilimu. <sup>16</sup> Tigua tomo dewaore alugumu bu wiagoria puwa nu mariaore honoleberemada lo mitangi bu yalu pialu hemiria nu maria biago nahene nu kira hangu hanarimigoni. Tigua waini iba biraga iba be timbuni wabu peho berelaga wiagoha puwa waini be pira mbira bibahende hambiai hole lo manda bialu hemiria be pira uruni hambiai habe nahe be maria hangu hambirimi.✧ <sup>17</sup> Ina puyabu poboyogobi mbira ibilalu mabuha tomo mo ko holene tara tarabi ibilalu biru. Ani bialu dalu dindiguni heba ibilarugola mabuha tomo hengemigo damene bibahende mo ko hai haya. Ani birugo hondowa tigua mini beregeda nabir-imigoni. <sup>18</sup> Ayu ogoni ege dininaga horo pira kirani maria (24) hayagola inaga anda bule dindi mo tiga bialu gene mo manda manda bu wirimigoni. Ani birimigome ai ayu ogoni howa agi birabe hondole bayuwa de hondo halimu. <sup>19</sup> Heneneore tomo wiaga anda timbuni bu heledamigoha tomo nabuwibi pu mbira lini daga mini gerebirubi ira lini maru pogerubi pomegaranederubi oliberubi bibahendeore lini nade dege hai ka. Ani bidagoyu ti biamogo bulenaga ina ayu howa bialu holebero, lalu Anduane Homogohanda lene.

*Anduane Homogohanda lalu, Serubabele mini lene helolebero, lenego ogo*

<sup>20</sup> Horo ogoningi dege Anduane Homogohanda bi halu mende Hagaihondo lamini. <sup>21</sup> Anduane Homogo ibugua lalu, Yuda wali agalinaga agali haguane Serubabelehondo lamialu, Ina mbirale bibahende dindiha ngarubi hariha karubi bibahende mo emabia hai holebero. <sup>22</sup> Ina kini bu karunaga hongo bope hai harogola tinaga hongo holene

mbira nawulebira. Tinaga wai biaga garo ale nogo hosime gililo yalu piaga karisi ngarubi tinaga ami agali karisini heyu howa wai bu piaga karubi bibahende bo haealabaga biai holebero. Ani bialu tinaga nogo hosi karu bo wahai harogola ami agali nogo hosini biralu wai bu piaga karume tini dege dege homelo baga baga bulebira. <sup>23</sup> Anidagua birangi ina inaga biabe bia haga agali Serubabele í dabalú ininaga agaliore mbira í howa inaga wali agaliru haru haga habelo dabo helolebero. Ina í hangu dabo helarogola í inaga gi hondoneni gi magi ale holebere. I Anduane Homogo Hongo Haiheore kogo ina bi o ledogoniore, lalu Anduane Homogohanda Hagaiha howa lene.

## Segaraia

### Mbuga ogoha gilibu ngarunaga nemandi ogo

Anduane Homogonaga bi mana latagi haga agali Segaraia ibu Hagaila biabe mbi-raorego ale dege biaga hene. Ibunaga mini hongohe howa Yuda wali agalime Anduane Homogonaga anda biago lone biadai bialu wali agalime mana bayale tigabi ngaru hangu bialu haga helo hamelo hene.

Anduane Homogohanda ti bayale holene mo wia holebira lalu Segaraia ibugua latagi halu hene.

Be 1-8 ngagoha howa mbirale mani bulebirarunaga mbiwia halubi Anduane Homogonaga bi mana latagi halubi ibugua bamba Anduane Homogonaga bi mana latagi haga agali Esegiele Danielelame latagi hene ngagobi dege nga. Segaraia ibugua de gandeba tara tara handaga binigoha manane tara tara dewaore mo walia haga biniru latagi halu hene.

Be 9-14 ngagoha howa mani Anduane Homogohanda wali agali bibahendeme tinaga mana bialu hayadagua mo talebu ki holebiragonagabi agali mbira Anduane Homogohanda ibunaga biabe bialu helo ibilolebiragonagabi ibugua mbiwia halu latagi hene. Bi manane maru mbuga ogoha gilibu wini ngaru Yasuhanda dindini howa bialu hayaru ibugua ogodaguaore bulebira lalu lo bambaho ngelenego nga.

#### **Bulu бага бува кuni gilibu ngago (1.1-8.23)**

Mo ko holenebi biamogo bulenebi mana ngago 9.1-8

Hameigini dewa dindi tara taraha Isaraele dindi kaware palima pedaruhondo pani mulene nga lenego 9.4-14.21

Pele Miaga Mbirali ibulebiragobi mo palia holene wulebiragobi mbiwia halu lenego

#### *Anduane Homogohanda ibunaga wali agali ibuni karia dai bulene nga lenego ogo*

<sup>1</sup> Kini Dariusu ibu Pesia dindiha kini heane dege mali mbira howa mendegonaga ege halini<sup>☆</sup> hayagola Anduane Homogohanda ibunaga mana latagi haga Segaraiahondo bi ogo lamini. Segaraia ibu Beregaia igini howa Ido aguane hene. <sup>2</sup> Anduane Homogo Hongo Haiheore kago ibugua Segaraiahondo lalu, Bi ogo inaga wali agali bu karuhondo lamibe, lalu lamini. Ibugua lalu, I Anduane Homogo kogoni howa ina tinaga mamaliruhondo keba timbuniore ho haru. <sup>3</sup> Anigo áyu ina tihondo ogodagua laro. Ina tí mo wialu biamogo buliyanaga ibalu tigua ini kogoha dai bilimu.<sup>☆</sup> <sup>4</sup> Tinaga mamalirume bialu henedagua nabilimu. Inaga bi mana latagi haga agali hearume inaga bi mana lamialu, Tigua mana ko bialu kamiruni wahai halimu, lalu langiya tiraga tigua inaga bi mana ogoni hale naharimi. <sup>5</sup> Ai tinaga mamali uruni tini homai halu inaga bi mana latagi haga agali urunibi homai dege haya. <sup>6</sup> Anigo ogoaleore bulebirago lalu inaga bi mana latagi haga agali uruni tigua mbiwia hayadaruni tinaga mamali heangi tagira piyane de handai haya. Tigua inaga bi mana larugo hale nahayagome tiniha mo ko holene wiai haya. Ani biyagola mani lone tinaga bu mini beregedo howa lalu, Anduane Homogo Hongo Haiheore kago ibugua bule lalu lo wiyadaguaore henene mo ko halu minu bai hayagoni irane inaneme hadowa ho hemaria biya, laya lene.

*Anduane Homogonaga bi mana latagi haga agali heagome de gandebaha howa nogo hosi hendene ogo*

<sup>7</sup> Kini Dariusu ibu kini heane mali mendegonaga ege beane (11) hayagola ogoninaga horo pira kirani maria (24) tinaga ege mini Sebada laga winigo ogoningi Anduane Homogo ibunaga bi ihondo langiya. <sup>8</sup> Mbiraga de gandeba handalu hewaria Anduane

☆ 1:1: Esr 4.24-5.1, 6.14 ☆ 1:3: Yar 25.5, Mai 7.19, Mal 3.7, Lg 15.20, Ya 4.8



Homogonaga dahuliyali mbira nogo hosi hone mbirani berearia handaru. Nogo hosi ogoni ibu dindi ulini panda panda wiagoha irabu dombeneha heagola nogo hosi maru ibunaga erembirahayagi bu hea. Hosi maru hone halu maru pagabua halu maru honeni pagabua bu ngibingabule hea. Ani bu heagoria dahuliyali maru hosi uruninaga erekunini birai hea. ✧ 9 Ani bereagola ina dahuliyali haguane heagohondo hale halu lalu, Inaga Anduane-o de gandeba áyu hendedogonaga hosi biaru irane agibe lalu hale haru.

Ani hale harugola ibugua lalu, De gandeba ogoninaga irane langerogo ogo. 10 Anduane Homogohanda uruni dindi bibahende de handama ibaga biai helo pelene, laya.

11 Ani layagola dahuliyali biarume Anduane Homogonaga dahuliyali mbira biagohondo lamialu lalu, Iname dindi bibahende pia harimago ai wali agali dindi tara taraha bu hearu de handaiore howa tiha genda mbira nawi bayale dege hai hearia handarima, lalu lamiya.

12 Anidagua layagola Anduane Homogonaga dahuliyali biagome lalu, Anduane Homogo Hongo Haiheore kego-o ina mali pira karia (70) bibahendeni wali agali Yarusalemeha karubi tano maru Yuda dindiha bu karubi ti bibahende baba keba haho wiaabo kego ainde ti lone dara howa biamogo angi buleberebe, laya.

13 Ani layagola Anduane Homogohanda dahuliyali biagonaga bu miniha mo paliaho helonaga bi bayale lamiya. 14 Ani lamiyagola dahuliyali biagome ihondo lalu, Anduane Homogo Hongo Haiheore kago ibugua bi layago ina latagi habe lalu langiai haya. Anduane Homogohanda lalu, Inaga tano timbuni Yarusalemebi Hari Saionobi hondowa ina dara ho howa mini dege dindiho kogoni. 15 Ani kogonigo ai hameigini dindi tara taraha bu karume tiha genda nawi bayale kago ina dege tihondo keba timbuni ho kogoni. Abale inaga wali agaliruhondo keba emene dege ho hewagola hameigini dindi tara taraha karu tigua inaga wali agali uruni mo tandaga nde emene dege holene winigoria ibalu bibahende bo hilo wahai halu mo ko timbuniore haya. Anigo ina tihondo keba timbuni ho kogoni. 16 Anigo áyu ina Yarusaleme wali agali bu karu dara howa biamogo bulenaga daibu kogoni. Inaga anda biago lone biadai bialu Yarusaleme tanobi lone mo tiga bialu arema bulebira laya, lene.

17 Ani lowa dahuliyali biagome ihondo bi mende langialu lalu, Anduane Homogo Hongo Haiheore kago ibugua lalu ibunaga tano ngaruha mbirale bayale damene ngago hangume mo tolai helarogola wali agali ti bayaleore holebira. Ani bialu Yarusaleme tano lone ibunaga tanoore ngelalu Yarusaleme wali agaliru tinaga bu miniha mo palia holene karulo howa ema nabi holebira laya, lene.

*Segaraiahanda de gandebaha howa nogo bulumaganaga ne gayane ale hendenego ogo*

18 Segaraia ibugua lalu, Ina de gandeba mende handalu hewaria nogo bulumaganaga ne gayane ale maria hearia handaru. 19 Ani hondowa ai dahuliyali abale ila bi lalu haribago ibiyagola ina ibuhondo hale halu, Mbirale áyu hendedogoni irane agibe, laru.

Ani hale harugola ibugua ladai bialu lalu, Nogo bulumaganaga ne gayane ale maria uruni abale Yuda dindibi Isaraele dindibi Yarusalemebi bibahende mo ko halu bo gialahole biaga hongo maria biarunaga manane heleda, lalu langiya.

20 Ani layagola Anduane Homogohanda biabe biaga agali marialime hama timbuni yu hearu mo walia haya. 21 Ani yu hearu hondowa ina ibuhondo hale halu lalu, Agali uruni tigua biabe agi bule ibirabe, lalu hale haru. Ani hale harugola ibugua ladai bialu lalu, Agali uruni tigua dindi tara taraha bu karume Yuda wali agali mo ko howa bo wahai halu maru dindi tara taraha bo giligalalo purogo lelaga biaru mo gi howa mo durula halu tinaga hongo ngaru bo ereba hai helole ka laya, lene.

✧ 1:8: Mo 6.2-4

## 2

### *Segaraia ibugua mbirale magi handagane pu wiaria hendene go*

<sup>1</sup> Ina de gandeba dege handalu hewaria agali mbira magi handagane pu ona yuwa mbirale luni tubagi lalu mo manda bule yu hearia handaru. <sup>2</sup> Ani hondowa ina ibuhondo hale halu lalu, <sup>1</sup> ani porebe, laru. Ani larugola ibugua ladai bialu lalu, Ina Yarusaleme tano ngagonaga lunaga magibi aranenaga magibi ogobida lo manda bulenaga magi hondole poro, laya.

<sup>3</sup> Ani layagola handalu hewaria dahuliyali ila bi lalu haribago ibu emene amura pialu hearia dahuliyali mende ibu piyagotha ibalu lola haya. <sup>4</sup> Lola hayagola dahuliyali ala ibiyago ibugua dahuliyali mende mani ibiyago lamialu lalu, Ina gerai lalu puwa agali mbirale magi handaga pu yu haragohondo lamialu, Yarusalemeha wali agali dewaorebi nogo bulumaga dewaorebi ho dame bu holebirago ai tano ogoni timbunio redagola tigua tanonaga pabe bibe nahe holebira. <sup>5</sup> Ani bu holebirago ai Anduane Homogo ibuni ira hungu ale bialu Yarusaleme tanonaga wai pabe kagotha howa ibunime tano ogoni handayaho holebira. Ani howa ibuni Yarusalemeha haabo kagola ibunaga wa taraore holenebi hongo timbuni holenebi wiame hai holebira lamibe, lalu lamini.✧

### *Anduane Homogohanda Yuda wali agali tini daluha lone dai bidaba lenego go*

<sup>6-7</sup> Anduane Homogohanda ibunaga wali agaliruhondo lalu, Ina ti dindi tara tara wiaruha talu purogo lelarugonigo ai ayu Babilono tano ngago yu wahalu Yarusaleme dai bidaba, laya. <sup>8</sup> Ani lowa lalu, Mbiralime ti bolene manda biyagua nde i bole manda biragoni, lene. Hameigini dindi tara taraha karume Anduane Homogo ibunaga wali agali mo ko hayaru tihondo ina bi ogodagua lamuliya Anduane Homogo Hongo Haiheore kago ibugua ihondo langialu lalu, <sup>9</sup> Tigua inaga wali agali bu karu mo ko halu barimiyagua inime nde ti baba wai bulebero. Ani bialu wali agali ala tinaga garabaya biabe biaga biarunime ti mo ko halu bo wahai holebira laya lalu lamibe, lene.

Ai mbirale uruni bulebira layagoore birangi wali agali bibahendeme Anduane Homogo Hongo Haiheore kago ibunime i dabalalu ibunaga bi ogoni latagi hole henemane pu lenedane hondolebira.

<sup>10</sup> Anduane Homogohanda laabo halu lalu, Yarusaleme wali agaliru-o ini ibalu ti heba mandagi haabo holeberogonaga tigua turu howa iba gana lalu halimu, laya.

<sup>11</sup> Horo ogoningi wali agali dindi bibahendeha bu karu tibi nde Anduane Homogo kagotha ibalu ibunaga wali agali dege hai holebira. Ani bialu ibuni ti heba mandagi haabo kagola tigua heneneore ibunime i dabalalu ti kamiria ibileneoreda lo manda buleberemi.✧ <sup>12</sup> Ani bialu Yuda wali agali ti Anduane Homogonaga dindi wiabagi hene ngagoria howa ti ibunaga deni duniniore holebira. Ani bialu Anduane Homogo ibugua tano maru ngaru gubalini hagago emene nira lowa Yarusaleme tano gubalini timbuniore ho holebira.

<sup>13</sup> Anduane Homogo ibu ibuni haga ngagotha howa ina kamaria ibulebirago iname ibunaga deni howa bi mbira nale ema nabi dungulo hamiya, lalu Segaraiahanda lene.✧

## 3

### *Segaraiahanda de gandebaha howa Loma Binigo Mo Miaga Haguane Timbuni hearia hendene go*

<sup>1</sup> Anduane Homogohanda ihondo Loma Binigo Mo Miaga Haguane Timbuni Yosua heago de gandebaha mo walia haya. Yosua ibu Anduane Homogonaga dahuliyali mbira heago heba mandagi hebiria handaru. Ani hebiria dama Heyolabe ibubi Yosuanaga gi tigahayagi hearia howa ibugua Yosuahanda ko ogo biya lole manda bu

hearia handaru. ✧ <sup>2</sup> Ani hebigola Anduane Homogohanda dama Heyolabehondo lalu, I Anduane Homogo ina ihondo bi mbira larogo. Ina bi mbira lole kegoniore nalabe. Ina Yarusaleme gubalini timbuniore ho kogome i langerogo inaga ne hariga hangai howa bi naleore habe laro. Mbiralime ira dateboni ira dalu kagola ba hundia halu duguaede hagadagua bialu agali Yosua ogoni mo wialu haru dai birugo ndobe, laya. ✧

<sup>3</sup> Yosua ibu dahuliyali biago heagoria kaware hapara howa ibunaga aga ko dodohe bu heneyagobi bu haabo hea. <sup>4</sup> Ai dahuliyali ogoni ibugua dahuliyali maru hearuhondo lamialu lalu, Agali ogoni aga ko karulo kago golo wahadaba, laya. Ani lowa ibugua Yosuahondo lalu, Ai bi o larogo hale habe. Iha ko ngaru aga dodohe ogo heba ina mo wahai harogoni. Ani bialu aga gahengeru mo karula holebero, laya.

<sup>5</sup> Ani lowa ibugua dahuliyali maru biaruhondo lalu, Ainde tigua labolabo bayale mbira Yosuanaga hagianeni bo bialu manda ale mo karula halimu, laya. Anduane Homogonaga dahuliyali biago ibu kaware heagola maru tigua labolabo bayale Yosuanaga hagianeni bo bialu mo karula haya. Ani bialu ibunaga aga gahengebi mo karula haya.

<sup>6</sup> Mani howa dahuliyali biagome Yosuahondo lamialu lalu, <sup>7</sup> Anduane Homogo Hongo Haiheore kago ibugua bi ogodagua lara. Ina i hame ledodagua bialu inaga bi mana lo ngagobi baya hangu talialu howa ina biabe bialu habelo ngerogobi bialu hariyagua nde inaga andaha biabe bialu mbirale ngaru bibahende handayaho habelo helolebero. Ani helarogola dahuliyaliru tigua ini kogoria kaware ibugu bialu hagadagua ibi nde i kogoria kaware ibu holebere. <sup>8</sup> Yosua i Loma Binigo Mo Miaga Haguane Timbuni kegonigo ai ina bi larogo hale harene. Loma binigo mo miaga agali maru bu kamiru tibi nde hale halimu. Mani mbirale bayale tagira ibulebiragonaga manane ti kamigoni. Ai hale hadaba. Inaga biabe biahaga agali mbira ibiloleberogo ibunaga mini Ira Dibini Tilinini Andaho Aribia Hene lolebira. ✧ <sup>9</sup> Ina ege tole mbira de kariahe Yosuanaga wanakuihayagi werogo de handadaba. Ina bi mbira ege tole ogoriani gilibu wulebero. Anidagua buwa inaga dindi ogoriani wali agali karunaga ko ngaru bibahende horo mbiru hanguni domo wahai holebero. ✧ <sup>10</sup> Horo ogoni wubagiho ngeledogo tagira ibirangi tinaga nenege mbira mbira handa ainai bu padaru tini haru mandagi hole ololeberemi. Olowa tinaga gerebi mabu bu hingedemigohabi tinaga poge hingedemigonaga gumbahabi bira palia bu holeberemi. Ani howa tinaga bu miniha mo palia holene karulowa turu haga buwa dungulo holeberemi, lalu dahuliyali biagome laya lene. ✧

## 4

### *Lamu hale wiagane irane wiaria hendenego ogo*

<sup>1</sup> Dahuliyali ala ila bi lalu haribagome i hewaria ibalu i paliahondo haradagua biwaria barila haya. <sup>2</sup> Ani buwa ibugua ihondo hale halu lalu, Ina agile dege hendedebe, laya. ✧

Ani layagola ina ibuhondo ladai bialu lalu, Ina lamu hale wiagane irane mbira ngolome wabini ngaria hendedo. Lamu hale wiagane ogoninaga nguni daligahayagi ndisi be weli bedaore mo paga howa ngane hendedo. Lamu hale wiagane irane mbiraore ogoriani howa lamu karia ho gebaga bigi bidago odaruni ti hale delole iba be mbiraore ogoniha howa dege purogo lagadane hendedo. <sup>3</sup> Ai weli be wiaga biagonaga lene mende mendehabi ira olibe kira kane hendedo, lalu dahuliyali biagohondo ladai biru. ✧ <sup>4</sup> Ina uruni hondowa ai irane agibe lalu ibuhondo hale haru.

<sup>5</sup> Ani hale halu hewaria ibugua ladai bialu lalu, Ina uruni manda nabi kebe, layagola ina ibuhondo ladai bialu lalu, Agali haguane-o i manda nabioire kogoni, laru.

✧ 3:1: Esr 5.2, Mo 12.10 ✧ 3:2: Yu 9 ✧ 3:8: Yar 23.5, 33.15, Seg 6.12 ✧ 3:9: Seg 4.10 ✧ 3:10: Mai 4.4  
✧ 4:2: Har 25.31-40 ✧ 4:3: Mo 11.4

*Anduane Homogo ibugua mbirale mbira buleore bero lalu Serubabelehondo bi mbira lowinigo ogo*

<sup>6</sup> Ani larugola dahuliyali biago ibugua ladai bialu, Bi ogo agali haguane Serubabele kagohondo lamibe, laya. Bi ogoni Anduane Homogohanda lalu, Ína biabe berego bialu ínaga ami agali kegonaga hongonibi ínínaga hongonibi ndo bialu holebere. I diníninaga hongo íha kagome biabe berego bayale bialu holebere. ✧ <sup>7</sup> Í porego ha mbirale taibi hari timbuni wedarubime hapai hayaguabi ínime mo waholebero. Ani bialu kogola ína ínaga anda gialo wahene biago lone bia dai bulebere. Anda ogoni bule pigane bialu howa anda háinaga ege tole dunini wia maro bialu kegola wali agali tigua hondowa lalu, Anda ogoni bayaleoreda, laga bialu hongo howa ga ladagadaga bialu holebira, laya.

<sup>8</sup> Ai Anduane Homogohanda bi mende langiyago ogo. <sup>9</sup> Ibugua lalu, Serubabelehanda ínaga anda ogoni bulenaga dindi gumuni godo tiga bialu gene wedago ibunioreme biai holebira. Inaga anda ogoni biai kagola ínaga wali agaliru tigua ínime í ti karia pu layada lo manda biai holebira. <sup>10</sup> Biabe ogoni biai nahedagola ínaga wali agalirume tinaga bu miniha genda ho holebira. Anigo Serubabele ibugua anda pigane tenialu bulenaga pu luni anda magi manda bulenaga yu howa bialu kago hondowa wali agali tigua turu timbuni ho holebira, laya lalu dahuliyali biagome lene. ✧

*Lamu hale wiaganebi ira olibe kirabi de hendenegonaga irane laminigo ogo*

Dahuliyali biagome ihondo lalu, Lamu karia uruninaga manane Anduane Homogonaga de karia howa dindi bibahendeore ibugua handame haga ka, laya.

<sup>11</sup> Ani layagola ina ibuhondo hale halu lalu, Lamu hale wiagane gene mende mende-hayagibi ira olibe kira kago irane agibe. ✧ <sup>12</sup> Ira olibenaga magane kira olibe lininaga weli piagane baibo harigawi ngolome wabinigoha mandagi kago ogoninaga iranebi langibe, laru.

<sup>13</sup> Ani hale halu hewaria ibugua ladai bialu lalu, Í uruni manda nabi kebe, layagola, ina ibuhondo ladai bialu lalu, Agali haguane-o i manda nabioke kogoni, laru.

<sup>14</sup> Ani larugola ibugua lalu, Ira olibe kira ogoni libu agali kira dindi bibahendenaga Anduane Homogo kagomeibunaga biabe bilo dabalulibunaga hagianeni olibe weli odo wialu helenego ka, lalu langiya.

## 5

*Mbuga mbira yagalo yu piyaria hendenego ogo*

<sup>1</sup> Ina lone dege handalu hewaria mbuga mbira yagalo yu piyaria de handaru. <sup>2</sup> Ani hondo hewagola dege dahuliyali biagome ihondo hale halu lalu, Ina mbirale mbira agile ngane de hendedebe, laya. Ani layagola ina ladai bialu lalu, Ina mbuga timbuni mbira yagalo yu porane hendedo. Lunaga magi mita pira yangalenaga magi mita duria aledane hendedogoni, laru.

<sup>3</sup> Ani larugola ibugua ihondo lalu, Mbuga ogoniha Anduane Homogohanda wali agali Yuda dindiha bu karu ko helonaga ha holene bi gilibu nga. Mbuga ogoninaga mbirahayagi gilibu ngago ogo pageali dindi ogoriani karu bibahende bo batagi hai holebero lalu gilibu nga. Mendehayagi gilibu ngago ogo wali agalime ogoale bule lalu ke howa lo wiaga karu tibi bo batagi holebero lalu gilibu winigo nga. <sup>4</sup> Anduane Homogo Hongo Haiheore kagome lalu, Ina ha holene bi ogoni wali agali page biaga karubi ínaga minini howa bi lo wialu ke howa lo wiaga karubi uruni ti andagaha mo yaanda hai holebero. Anidagua berogola bi ogonime ti andagaha howa page biagabi ke hagabi bu karu bibahende mo ko hai holebira, lalu laya.

*Wali mbira mbasigedi nuha berearia hendenego ogo*

✧ 4:6: Esr 5.2, Hos 1.7 ✧ 4:10: Mo 5.6 ✧ 4:11: Mo 11.4

<sup>5</sup> Dahuliyali biagome i hewaria lone ibuwa lalu, Ai mende ibirago de handa, laya.

<sup>6</sup> Ani layagola ina ibuhondo lalu, O ibiragoni agilebe, laru. Ani larugola ibugua ladai bialu lalu, Mbasigedi nugo ogonime wali agali dindi ogoriani bu karume ko biyagonaga manda bulene manane ogoni, laya.

<sup>7</sup> Mbasigedi nu ogoninaga panga aeaneme payini wia. Ina handayaho hewagola tigua mbasigedi nu biagonaga panga duguayagola wali mbira ogoniha berearia handaru.

<sup>8</sup> Ani handarugola dahuliyali biagome lalu, Wali o bedagoni wali agali bibahendeme mana ko bialu kamigonaga manane beda. Ani lalu wali biago mbasigedi nu biago ha lone helaanda halu panga payaanda haya. <sup>9</sup> Ani biya handala ina handadaga halu hewaria wali kira babagane hongoheore ega bodo hariawenaga babagane alehe i hewaria yagalo yu ibiya. Ibalu libugua mbasigedi nu wali bereago heba mo yalu piyago handaru.

<sup>10</sup> Ani piyago hondowa ina dahuliyali biagohondo hale halu, Libugua mbasigedi nu ogoni agohayagi yalu porabe, laru. <sup>11</sup> Ani larugola dahuliyali biagome ladai bialu lalu, Libugua Babilono dindiha damanaga anda timbuni mbira bulenaga mo yalu pora. Libugua damanaga anda ogoni biai howa tigua mbasigedi nu ogoni Babilono wali agalirume tinaga bi pupu ogonihondo wialu helo mo ngelolebira, laya.

## 6

### *Garole karisi maria wiaria hendenego ogo*

<sup>1</sup> De gandeba lone handalu hewaria wai biagane garole mini karisi maria ege tole boronosi hari kira heago hengeneha ibiyane de handaru. <sup>2</sup> Nogo hosi hone hearume karisi mbirago gililalu hosi mindi hearume karisi mendego gililalu hearia handaru.✧

<sup>3</sup> Ani bialu nogo hosi pagabua hearume karisi tebonego gililalu nogo hosi honeni pagabua ngibingabule hearume karisi manego gililalu hearia handaru.✧ <sup>4</sup> Ani biyago hondowa ina dahuliyali biagohondo hale halu lalu, Agali haguane-o garole karisi uruni irane agibe, laru.

<sup>5</sup> Ani hale harugola dahuliyali biagome ladai bialu lalu, Karisi maria uruni ti dinini mariali dahuliya andagaha hagago nde ayu ogoni dindi bibahendenaga Anduane Homogo kagoria howa ibiragoni.✧ <sup>6</sup> Karisi mbira nogo hosi mindirume gililo yu porago ogoni abene uyurahayagi Babilono dindi pole pora. Karisi mende nogo hosi pagabuarume gililo yalu porago ogoni dindi ni paliragohayagi pole pora. Ani pialu karisi tebone nogo hosi honeni pagabua ngibingabule karume gililo yu porago ogoni dindi abene unurahayagi pole poragoni. <sup>7</sup> Nogo hosi hongo gibe urunime tagira ibalu ti dindi bibahende ala pugu bule biyagola dahuliyali biago ibugua lalu, Ai karulape ti dindi bibahende abi ngabe hondole pudaba, laya handala hosi biaru abale piai haya. <sup>8</sup> Ani piyagola dahuliyali biago ibugua i olowa ihondo lalu, Nogo hosi uyurahayagi piyarume Anduane Homogohanda keba ala hayago mo palia hayagoni, laya.

### *Anduane Homogohanda Segaraiahondo lalu, Kininaga manda Yosua mo karula ha, lenego ogo*

<sup>9</sup> Anduane Homogohanda ihondo bi ogo langialu lalu, <sup>10</sup> Ina agali mini Heledai Tobiya Yadaia imaru Babilono dindi wahu Yarusalem daibu karia i pialu tigua mbirale ngolo silibaru mo turu halu bame ngule yidago mo yabe. Mo yalu Sebanaia igini Yosua andaga abale pu, laya. <sup>11</sup> Pialu tigua ngolo silibaru ngiragome ina kininaga manda mbira wabibe. Wabu yalu puwa Yahosadaga igini Loma Binigo Mo Miaga Haguane Timbuni Yosuanaga hagianeni mo karula habe. <sup>12</sup> Ani karula halu howa ibuhondo bi au lamibe. Anduane Homogo Hongo Haiheore kagome lalu, Agali mbira mini Ira Dibini Tilinini Andaho Aribia Hene kago ibu dindi ibuni kago ha bayaleore haabo howa



ibugua inaga anda lone biadai bulebira, lamibe. ✧ <sup>13</sup> Ibugua inaga anda bialu kini mini lene howa ibunaga wali agaliru baya hangu haru howa handayaho holebira. Ani bialu ibugua loma binigo mo miaga agalibi ibu dege howa kininaga biragane dagia ngagoria biruwabi ibugua biabe kira mo mbiraore howa bayaleore bialu holebira, laya lalu lamibe, lene.

<sup>14</sup> Kininaga manda ogoni Anduane Homogonaga andaha wiaabo holebira. Ani ngago hondowa wali agali bibahende tigua Heledai Tobiya Yadaia imaru Sebanaiia igini Yosaiabi mitangibu dai bialu turuore ho holebira.

<sup>15</sup> Agali dindi kaundiaha haga haga bidaru tibi nde ibalu Anduane Homogonaga anda ogoni lone biadai bule lowa bialu karu tigua biamogo bialu holebira. Anda ogoni biai harangi Anduane Homogo Hongo Haiheore kago ibunime i heneneore dabalu ti kamiria pu laya handala ibinida lo manda buleberemi. Tigua Anduane Homogo tinaga Ngode Datagaliwabe kagonaga bi ledago baya hangu talialu biai harimiyagua nde mbirale uruni heneneore tagira ibai holebira, lalu Segaraia ina larogoni.

## 7

*Anduane Homogohanda tomo nane haga mana ke howa biaga heagohondo keba henego ogo*

<sup>1</sup> Dariusu ibu kini heane mali tebira howa manegonaga ege dini mini Kisilebe lagago ogoni hayagola ege ogoninaga horo manengi Anduane Homogohanda ihondo bi mbira langiya.

<sup>2</sup> Bedele tano wali agali tigua agali kirali Sarese Legemelegela tinaga agali maru hearu haru halu Anduane Homogo Hongo Haiheore kagonaga anda pudaba lalu lamini. Agali biaruni tigua Anduane Homogohondo wali agali uruni biamogo bia lalu tinaga bi lahole pene. <sup>3</sup> Tigua loma binigo mo miaga agali hearuhondobi Anduane Homogonaga bi mana latagi haga hearuhondobi bi mbira hale hole piyago ogo. Anduane Homogonaga anda mo ko ho wiane dege mali dewaore piyada. Anigo iname ogoninaga kiabu dugu bialubi ege dauni haragola tomo nane hagabi wirimagonigo ai ogonidagua bialu haabo hamiyabe, lalu hale hole pene.

<sup>4</sup> Ani piyagola mani Anduane Homogo Hongo Haiheore kago ibugua ihondo lalu, <sup>5</sup> Ina wali agali bibahende dindi ogoha karuhondobi loma binigo mo miaga agali bu karuhondobi bi ogodagua lamibe. Mali pira karia (70) uruni harimagoni tigua ege dauningibi ege kanengibi kiabu dugu bialu tomo naneore harimigoni. Ani bialu ha harimigonigo uruni tigua Anduane Homogo inaga mini yaraga howa ndo bialu harimigoni. <sup>6</sup> Tigua tomoru nalu howabi tininaga tombe hangu tolelonaga nalu haramiligoni ndobe laya, lalu lamibe, lene.

<sup>7</sup> Bamba Anduane Homogonaga bi mana latagi haga hearuha howa bi ogonidagua dege lamialu haga hene. Yarusaleme bayale wialu uruniha mbirale bibahende bayale dege wiangi howa latagi halu hene. Horo uruningi Yarusalemeni wali agali dewaore heagolabi Yarusalemeha tano emene kaware ngaruha wali agali dewaore bu heangibi tano abene unurayagi dewaore paleangibi ni paliragohayagi hari bare emene wima pedaruha wali agali dewaore palu heangibi bi ogoni dege latagi halu hene.

*Anduane Homogohanda Yuda wali agali garabaya bu yalu pelenagonaga irane Segaraia laminigo ogo*

<sup>8</sup> Anduane Homogo ibugua Segaraiahondo bi ogodagua laya. <sup>9</sup> Ala ina inaga wali agali bu hearuhondo bi ogo lamirugoni. Tigua mana bayale tigabi ngaru dege bialu halimu. Tinaga damene karu dara halu biamogo bialu halimu. ✧ <sup>10</sup> Wali maru agalini homene dalo bedarubi waneigini ti aija abala homene biru karubi wali agali dindi tara

howa tí baba íbu hene karubi wali agali maru mbirale tubagi howa burupale karubi bibahendehondo mo ko nahalimu larugoni. Ani bialu tíni dameneore karu mo ko nahalimu lalubi abale langiru.

<sup>11</sup> Anidagua larugo lelowa dege wali agalime ì erembira ngialu ìnaga bi hale nahaya. Tinaga mini ndibu lalu <sup>12</sup> tinaga bu habaneha giambe ege tole ale haya. Tigua Anduane Homogo Hongo Haiheore kagonaga bi hale nahaya. Ala ìna ìnaga bi mana latagi haga agali ibilarugoni tiha howa ìnaga Dinini ibugua bi latagi hayagola wali agali tigua hale nahayagonaga ì keba timbuniore ho harugoni. <sup>13</sup> Tigua ìnaga bi hale nahayagonaga ìnabi nde tigua ìhondo bi layago hale naharu. <sup>14</sup> Ani biyagonaga puyabu hongohe ibalu datani mbirale ngaru puloyu piagadagua ìna ti dindi tara taraha garabayabu yu piai helarugoni. Anidagua birugola tinaga dindi bayale wiago mo ko halu wali agali mbira ogoniha naheore ngelarugoni, laya lalu Segaraiahanda lene.

## 8

### *Anduane Homogo Yarusaleme mo bayale hole lalu bi lowinigo ogo*

<sup>1</sup> Anduane Homogo Hongo Haiheore kago ibugua bi ogo Segaraiahondo lamini. <sup>2</sup> Ibugua lalu, ìna Yarusaleme wali agali gubaliniore ho kogo howa ìna ti biamogo bua ho haabo harugoni. ìna ti gubalini ho haore bidogome tinaga waitigi bu karuhondo keba timbuniore ho kogoni. <sup>3</sup> ìnaga tano loma bia hene Yarusalemeni daibu holebero. Wali agali tara bu karume ìnaga wali agali Yarusaleme tanoni bu karuni de hondowa lalu, De handa naberego. Yarusaleme wali agali bu karume Anduane Homogo heneneore talima pialu kagoni ndobe, lolebira. Hari Saiono Anduane Homogo Hongo Haiheore kogonaga ngago wali agali bibahendeme hari ogoni Anduane Homogonaga lomabia heneore nga lolebira. <sup>4</sup> Tano ogoniha wai bulenebi genda tara maru ngaru ariabi mbira naibulebiraore. Wali agali tano ogoniha haga karu ti hadege bialu hodagua halu halimburu yu howa tanoha hariga ngarunaga birulebira. Tano ogoniha ti bayale dege hai holebira. <sup>5</sup> Waneigini dewaore andaho howa tano ogoninaga harigani gini bialu bu holebira.

<sup>6</sup> Wali agali yu wahene emene hangu bu karume ìna ogo ale mbira bulebira larogoni nabibeheore lo manda bu holebira. Anigo ì Anduane Homogo Hongo Haiheore kogome mbirale mbira nabibehe nawi. ìna mbirale bibahende biai habehe kogoni. <sup>7-8</sup> Ainde waitigirume ibalu ìnaga wali agaliru minu garabaya bu yalu maru dindi ni tagira ibiragohayagi pialu maru nde ni paliragohayagi pialu biya. Ani yalu piyagoha howa ìna ìnaga wali agali uruni lone haru dai berogola ti Yarusalemeni holebira. Ani kagola ti ìnaga wali agali helalu ìni tinaga Ngode Datagaliwabe howa ìna mana tigabi ngaru hangu bialu holeneme handayaho halu haru haabo holebero.\*

<sup>9</sup> Tígua biabe hongo howaore bialu holene nga. ìnaga anda biago pigane bialu hemingi ìnaga bi mana latagi haga agali biarume bi latagi hayaru manda bilimu. Áyubi nde tí bi mbiraore ogoni aria dege hale haramigoni. <sup>10</sup> Anduane Homogonaga bi mana latagi haga agali uruni tigua bi latagi nahe heangi marume wali agali garabaya biabe ale bialu helo yolo bulenebi nogo bulumagame biabe bilonaga yolo bulenebi uruni nawiyagola bame hene. Tinaga damene dege hearuni mo waitigi haga birugola tini baya hangu ha nabi gi ho harimi. <sup>11</sup> Anigo áyu ìna wali agali yu wahene emene bu karuni baba mana tara mende ale bialu holebero. <sup>12</sup> Tinaga bu miniha mo palia holene karulo helo merogola tigua tini mabuha tomoru hangalu haga haga bulebira. Iba dalu ibilarogola ti mabuha pu kuabu ale mbira lini daga mini gerebiru anda halu lini bayaleru dalu tomo tara tararubi anda hai holebira. ìnaga wali agali yu wahene emene karu baba howa mbirale bayale urunidagua bialu holebero. <sup>13</sup> Yuda wali agalirubi Isaraele wali agali bu kamirubi tígua bi larogo hale hadaba. Hameigini dindi tara taraha hearume tí mo ko

\* 8:7-8: Yar 3.17, Ese 11.20, Seb 3.20, Seg 10.10

hene wiago hondowa tini ha halu lalu, Tíore bayale ha ndo Yuda wali agaliru Isaraele wali agalirubi homo da hai hayadagua tíbi homo ereba halimu, lalu ha haga biya. Anigo ai ina Yuda wali agalibi Isaraele wali agalibi haru daibu heledoru mo bayale holebero. Ani heledogola hameigini dindi tara taraha haga o biarume tí hondowa ogodagua tini laga laga bialu lalu, Tíore Yuda wali agalibi Isaraele wali agalibi ti bayale kagobi dege bayale halimulo hameledema laga bulebira. Ani lolebirago ai tígua gi nahe howa hongo ho halimu, laya lene.

<sup>14</sup> Anduane Homogo Hongo Haiheore kago ibugua lalu, Bamba tínaga mamalirume j mo keba hayagola inaga miniha mo iriari bulene manda nabi howa ina ti mo ko holene manda birudagua ti mo ko halu bo wahai haru. <sup>15</sup> Anigo áyu Yarusalemebi Yuda bibahendebi mo bayale hai hole manda manda bu kogoni. Anidagua buleberogo ai tí gi nahe hongo ho holene nga. <sup>16</sup> Ani howa tígua bialu holene ngago ogo, Mendeali kagohondo bi henene hangu laabo holene nga. Godi lole bi hale halu howa tiga tiga kirabalinaga hanuni howa mbirago ibu bi manda bu yu haabo nahelo abale mo tiga bulene nga. <sup>17</sup> Wali agali mende karu mo ko holene mitangi nabi holene nga. Tígua godi lole pu howa ke howa nalalimu. Bi ke howa lolenebi godi lalu howa tiga tiga ndo mendeali mo hondo howa lolenebi keba halu guraga bulenebi uruni aleru bibahende ina hame naleore kogoni, laya lene.✧

<sup>18</sup> Anduane Homogo Hongo Haiheore kago ibugua Segaraiahondo bi mende lamini. <sup>19</sup> Ibugua lalu, Tígua ege maneru dauniru kaneru piniru tagira ibugu biragola ege uruninaga horo mbiru mbirungi tíha genda tagira ibiyago mitangi howa tí tomo nane haga wirimigo. Ai mani horo uruni Yuda wali agali tínaga horo tini mo ngoaiho howa turu hagabu holene mbira wia aribia holebira. Ani bu holeberemigo mitangi bialu áyu howa tígua bi henene lolenegobi wali agali mende kago baba turu hagabu hangu holenegobi manda bialu gubalini ho halimu, lalu lamini.

<sup>20</sup> Anduane Homogo Hongo Haiheore kago ibugua laabo halu lalu, Mani howa wali agali tano dewaore bu ngaruha howa Yarusaleme ibu ngoai holebira. <sup>21</sup> Wali agali tano mbiraha haga karu tigua wali agali tano mendeha haga karuhondo ogodagua lalu, Iname Anduane Homogo Hongo Haiheore kago mitangi bialu lotu lalu ibuhondo ina biamogo bia lole Yarusaleme poromago tíbi nde ina haru mandagi maibidaba, laga bulebira. <sup>22</sup> Wali agali dewaore hongohe dindi timbuni tara tara ngaruha howa Yarusalemeha ibuwa tigua Anduane Homogo Hongo Haiheore kago mitangi bialu lotu lalu ibuhondo ina biamogo bibe lole ibugu bulebira.

<sup>23</sup> Horo ogoningi hameigini dindi tara tara ngaruha howa agali pitali ibalu tigua Yudali mbira kago minu yania howa ibuhondo lalu, Ngode Datagaliwabe ibu tí Yuda wali agali baba ka layane hale harima. Ani hale howa inabi nde tí baba ho mbiraore hoa biragonaga ibirima, lolebira lene.

## 9

### *Anduane Homogohanda hameigini dindi tara tarani padaru pani mulebira lenego ogo*

<sup>1</sup> Anduane Homogo ibugua Segaraiaha howa mbiwia halu bi au laya. Anduane Homogohanda dindi mbira mini Hadaraga ngagobi Damasagasa tano ngagobi hondowa ti pani mule manda manda bu ngelowa hondo ka. Ani ngelowa Isaraele hameigini dindi tara taraha bu karubi ti Anduane Homogohanda pani agi mirabe hondole handayaho ka.✧ <sup>2</sup> Ani hondo howa dindi Hadaraga ogoniha dege dindi emene mbira mini Hamada ngagobi Taia tanobi Saidono tanobi wali agali dindi uruniha bu karume Anduane Homogohanda tihondo pani agi mirabe hondole handayaho holebira. Taia wali agali Saidono wali agalibi tinaga mini manda bogarubi mugube taratara ngaru ngelowa

✧ 8:16: Eb 4.25 ✧ 8:17: Min 3.29, Seg 5.3-4, 7.10 ✧ 9:1: Ais 17.1-3, Yar 49.23-27, Amo 1.3-5

dege tibi Anduane Homogohanda handayaho holebira. <sup>3</sup> Taia tano ogoni ege paberu bu mabubi hongohe mbira nga. Tigua ngolo silibaru dewaore dindini abalu wiame kadagua wu kagoni. <sup>4</sup> Ani bidagoyu Anduane Homogohanda mbirale uruni bibahende mo wahai holebira. Ibugua Taia wali agalinaga mbirale ngaru bibahende iba solowara bedagoha mo bape hai halu tinaga waitigime tano ngago bo heda hai helo holebira.

<sup>5</sup> Wali agali Asagelono tanoha bu karume mbirale uruni birago hondowa ti gi timbuniore ho holebira. Mani tinaga tanobi bo heda dege haragola tano ogoniha wali agali mbira naholebira. Gasa tanoha wali agali bu karu tiguabi nde mbirale uruni birago hondowa ti tandaga timbuniore holebira. Ani bialu tinaga kinibi nde homolebira. Egerono tano wali agali tiguabi nde mbirale uruni birago handaya ho karia mani tiniha genda uruni ale dege tagira ibulebira. Tigua mitangi bialu Taia wali agali bu karume ti biamogo bulubadago manda bialu mini dunubia ho henego ai ereba holebira.\* <sup>6</sup> Wali agali dindi tara tara bu ngaruha howa ibugu bialu Asadodo tanoha dege ibu holebira. Anduane Homogohanda lalu, Pilidiali uruni mine hagaore bu kago ina ti mo dindiha halu bope holebero. <sup>7</sup> Bope howa tigua Isaraele wali agalime ilili biaga mana ngago talialu nogo egaru darama bedaore nanaga howa Yuda wali agalirume tomo nolenebi nanolenebi mana biagadagua tibi nde anidagua bulebira. Ani bu howa Pilidia wali agali yu wahene emene hangu hearu ti inaga wali agali karuha hatago howa ti Yuda hameigini aria dege holebira. Bamba Yabusu hameiginime inaga waneigini baba hamaga halu ho mbiraore henedagua Egerono wali agali karu tibi inaga wali agali baba ho mbiraore holebira.\*

<sup>8</sup> Inaga dindi inime handaya ho kogola ami agali bu karume dindi ogoniha pu ibu bialu holene nawulebira. Inaga wali agaliru ti tandaga nalu henego manda buwa marume ti lone mo ko halu bope holilono inime handayaho haabo holebero, laya lene.

### *Kini mbira mani ibulebira lenego ogo*

<sup>9</sup> Saiono tano wali agaliru-o turu hadaba.\*

Yarusalemeni kamiru-o

  turu halu bi hongo howa ladaga halu hadaba.

  Tinaga kini ti kamiria o ibiragonigo de handadaba.

Ibugua ibunaga waitigiru bope howa ibu mini lene timbuniore kagoyu

  ibuninaga mini mo yaraga nahaga howa

ibu mini mo dindiha halu nogo dongi mbirani bialu ibiragoni.

  Nogo dongi hungubalua mbirani bialu ibiragoni.

<sup>10</sup> Anduane Homogohanda laabo halu bi ogodagua laya.\*

Wai bu piaga nogo hosime gili laga karisiru ina mo wahai holebero.

  Wai biaganaga nogo hosi Yarusalemeni karubi Isaraele dindiha nahelo ina mo wahai holebero.

  Tinaga wai biagane danda yu karu bibahendeore podo wahai holebero.

  Tinaga kini ogoni ibugua hameigini tara tara dindi bibahendehe bu karu

  wai nabilo mo palia hai halu turu hagabu bayale helo holebira.

Kini ibunime dindi haru holobadagoni

  solowara iba ange mende mendehayagibi bibahende handame howa haru holebira.

Dindi timbuniore Iba Yuberedisi poragoha pu bolangua halu

  amuraore dindi wiamaro bidaruha heba haru haame holebira, lene.

### *Anduane Homogohanda ibunaga wali agali pele mialu haru dai bulebira lenego ogo*

<sup>11</sup> Anduane Homogohanda lalu,\*

\* **9:5:** Ais 14.29-31, Yar 47.1-7, Ese 25.15-17, Yol 3.4-8, Amo 1.6-8, Seb 2.4-7   \* **9:7:** Yabusu hameigini ogoni ti Yarusaleme dindi aba hene. Mani Debidihanda Yarusaleme tano karulayang Yabusu hameigini ti Isaraele wali agali baba mandagi haga hene. Yosua 15.63 handabe.   \* **9:9:** Md 21.5, Yo 12.15   \* **9:10:** Iba 72.8   \* **9:11:** Har 24.8

Yuda tí baba habo nalolene bi mbira ina lo wirugo  
 tínaga mamalirume bulumagaru bo loma biyarunaga darama pugulalu piyarume  
 habo nalolene bi ogoni lowirugo mo hongo haya.

Ani biyagome ina tí dindi mendeha  
 tagira pialu pobe nahe garabayaore kamiria gololebero.

Gundu uliha biruwa tagira pobe naheore wiagoha  
 iba noa halu hége lebola howa tongolalu kamiria golope haga bulebero.

<sup>12</sup> Ina ani buleberogo tí mini dunubia hodai bialu  
 i andaneha hole tíni dalu wiyadagoha daibu halimu.

Tí ani birimiyagua bayale holeberemi.  
 Tí genda timbuniore yu harimigonaga bi ogodagua laro.

Ina tínaga genda uruni mo wahai halu  
 tí biamogo timbuniore bolangua howa bulebero.

<sup>13</sup> Ina Girigiali karu baba wai bule  
 Yudali karu mo danda halu  
 Isaraeali karu mo timu halu buwa wai bulebero.  
 Yarusalemeali karu wai biaga mo ayu tibu ne gadeleore ngaligobi helalu  
 urunime ina Girigiali karu baba wai bulebero,  
 lalu Anduane Homogohanda lene.

<sup>14</sup> Anduane Homogohandaibunaga wali agali karuha deme hendeneore hapani howa  
 ibugua danda timu tegelalu waitigi kagoha bo pelalu  
 ibunaga timuru hari daba ale bima wigiwaga lalu abale polebira.

Anduane Homogo Bibahende Haru Haame Ho Haga kago ibugua mbelo mini biguli  
 pulolebira.

Unurahayagi howa puyabu hongoheru iba dalu heba ibulebira.

<sup>15</sup> Anduane Homogo Hongo Haiheore kagome ibunaga wali agali mamage howa baya  
 hangu handayaho holebira.

Handayaho halu tigua tinaga waitigi karu bibahende bo hangedai holebira.

Tigua wai huario laraha lulu iba no howa laradagua hongo howa lama pialu  
 tinaga waitigiru bo payapaya biai holebira.

Waitigirunaga darama pelolebira.

Tinaga darama ogoni lomabu delaga dabuni mbirale bo mialu  
 darama hambuwa odope hagadagua bulebira.

<sup>16</sup> Horo ogoningi nogo sibi haru hagame ibunaga sibiru nogo gabuame balu nole  
 ibiragola pele miagadagua

Anduane Homogohandaibunaga wali agali pele mialu haru daibulebira.

Kinina mandani ege tole ngarale tara tararume ngiringaralo wiagadagua

ti Anduane Homogonaga dindini bayale holebira.

<sup>17</sup> Dindi ogoni nde baya taraore abi wulubada.

Wandari igiri daliaheru nde ti dindi bayale ogoniha howa

widuru waini iba bayale ngaru nalu howa bayaleore hongo howa anda haga  
 bulebira,

lalu Anduane Homogo ibugua Segaraiaha howa mbiwia halu lene.

## 10

*Anduane Homogohandaibunaga wali agaliru biamogo bulebero lenego ogo*

<sup>1</sup> Tínaga mabuha tomo hangedemiru anda holene tu haragola Anduane Homogo-  
 handa iba dalu ibilelo ibuhondo ibila lalimu. Anduane Homogohanda hari beraliba  
 ibilaragola ogoniha howa iba dalu ibira haga. Anidagua biragome tomo mbiraleru wali



agali bibahendenaga anda hai haga. <sup>2</sup> Wali agali marume mbirale dama mitangi bialu gime wabini ngaruhondobi maru halaga biaga karuhondobi mani ogoale bulebira lalu langi laga biaga. Ani bialu karia urunime ke howa bi tindule dege lalu ladai biaga. Marume emaga hendenegonaga irane latagi howa bi dewa ke halu laga. Ani lalu ti bayale holeberemi laragola ogoni henene ndo laragome ti genda yu haabo haga. Wali agali ani genda yu howa nogo sibi haru haga nahedagola sibiru ti pugupugu bialu hagahaga biagadagua bialu haga. Ti haru haga mbira nahedagola ti genda yu haabo haga.✧

<sup>3</sup> Anduane Homogohanda lalu, Dindi taralime inaga wali agali haru kagonaga keba timbuni ho kogo ina ti pani mialu bolebero. Yudali ti inaga wali agaliore kago i Anduane Homogo Hongo Haiheore kogonigo ina ti baya hangu handayaho holebero. Yudali ti inaga wai biaga nogo hosi hongohe kaligobi holebira. <sup>4</sup> Yuda hameigini uruniha howa kinirubi haru haga agali hagianerubi ami agali haru bamba hagarubi tagira ibu hai howa tigua inaga wali agali bayuwa haru holebira. <sup>5</sup> Ani howa Yuda wali agali tigua tinaga waitigiru balu wayali holebira. Tigua ami agalirume wai bialu tinaga waitigiru tanonaga hariga piaga waru ngagoria bo hengedo wahene ngaligobi ngelolebira. Anduane Homogo ibuni ti heba howa hongo karulape miragola Yudali tigua tinaga waitigi nogo hosini bialu wai ibiraru bibahende bo hilo wahaiore haga bulebira.

<sup>6</sup> Anduane Homogohanda lalu,  
Ina Yuda wali agaliru mo hongoho helalu  
Isaraele wali agaliru haru dai bulebero.  
Tiore dara timbuniho kogodago  
ina ti bibahendeore tininaga dindi wiyagoria lone helo haru dai biai holebero.  
Ina ani bu heledogola ti bo batagi hene ale ndo holebira.

I Anduane Homogo tinaga Ngode Datagaliwabeore kogonigo  
ina tinaga bi lararu hale haga bulebero.

<sup>7</sup> Ainde Isaraelealiru ti hongohi ami agali ale howa  
agalime waini iba nowa turu hagagobi turu timbuni hai holebira.  
Tinaga aguanene mani holebirarume o binidagoni hondowa  
Anduane Homogohanda tinaga mamaliru biamogo timbuni ogoni biyadago  
mitangi bialu turu timbuniho holebira.

<sup>8</sup> Ina inaga wali agaliru bibahende olalu  
mo mogobu helolebero.  
Ina ti haru dai bialu  
wali agali dewaore abale hagadagua dege mo dewa ho helolebero.

<sup>9</sup> Ina ti dindi tara tara kaundia wiaruha garabaya bu helarugoyu  
tigua dindi kaundia uruniha howa ini kogo embeda nahe mitangi biaabo holebira.  
Wali agali uruni tinaga waneigini heba bayale howa  
ti bibahende mo mogo bialu tininaga dindi tene ngagoria dai bulebira.

<sup>10</sup> Wali agali Iyibi dindiha pu karubi Asiria dindiha pu karubi bibahende ina haru dai  
biai holebero.  
Haru dai buwa ina tininaga dindiore ngagoria helolebero.  
Ina tinaga dindi mo yangalalu Gileada dindi ngagohabi Lebanono dindi ngagohabi wu  
dogola amu helolebero.  
Dindi uruniha wali agali ho tolowa holebira.

<sup>11</sup> Tigua mani genda yu howa iba li aleme wiapai hayagua  
Anduane Homogo ina ti biamogo bialu ibame namu nalelo bope holebero.

✧ 10:2: Md 9.36, Mg 6.34

Iba Naili porago hundiradagua bialu tinaga genda ina mo ereba holebero  
Asiriali bu karunaga mine holene go ina bo ibira dege holebero.

Iyibiali tinaga hongo timbuni holenebi mo ereba holebero.

<sup>12</sup> Ina inaga wali agaliru bayale helonaga mo hongo holebero.

Tigua ini andaneha haabo howa inaga mini yaraga halu  
bi mana lo ngadagua biaiore halu haabo holebira.

I Anduane Homogo ina bi o ledogoniore.

## 11

### *Kini ko hearu ira gabuni ale ka lenego ogo*

<sup>1</sup> Lebanono wali agaliru-o

tinaga ira tamia bu karuni irame dai helo wahadaba.

<sup>2</sup> Ira tamia biaru podo ibira hai ho nga.

Ira mini lene uruni podalu mo ko hai ho ngagoni.

Ira guraya ale kamiru tigua dugu bia hadaba.

Irabu wiago dibai hayadagonaga

Basana dindiha ira mini oga kamiru tiguabi nde dugu bia hadaba.

<sup>3</sup> Haru haga bu karu tinaga hongo holene biba halu

mini lene timbuni ala henego ereba hayago

dugu hongo howa biaruago hale hadaba.

Iba Yodana angeha budi ale gabua timbuni mini laiono ti irabuha ha do haga ngaru dibu  
wahai harago

ha do holene taya bialu ngororo lama ibaruago hale hadaba.

### *Haru hagane kira ka lenego ogo*

<sup>4</sup> Anduane Homogo inaga Ngode Datagaliwabeanda ihondo ogodagua laya. Nogo  
sibi anduaneme sibiru bole biagadagua ina ani bialu habe. <sup>5</sup> Nogo sibi anduane karume  
sibi baramago mana liahe ndo berema lomanda biaga. Tigua sibi bayago podalu muni  
muwa lalu, Ina muni dewawi kamagonigo Anduane Homogo kagonaga mini yaraga  
hama, laga ka. Nogo sibi uruninaga haru haga karu tiguabi nde sibiru dara nahaga ka.

<sup>6</sup> Anduane Homogohanda lalu, Wali agali dindini bu karu ti ina dara naholebero. Ina  
ti bibahende hangu hangu tininaga kini giha minu yahaga bulebero. Ani berogola nogo  
sibi anduaneme sibiru bagadagua haru haga karume ti mo ko haga bialu kagola ina ti  
biamogo nabulebero, laya.

<sup>7</sup> Nogo sibi bolene bu karunaga haru haga i harugoni. Ina nogo sibi haru haganaga  
halimbu kira yu harugoni. Halimbu mendego mini Dara Holene Irane Nawini Dara  
Holene. Mendego mini Mandagi Mo Mbiraore Holene. Ina halimbu kira ogonilabo yu  
howa inaga nogo sibiru haru harugoni. <sup>8</sup> Haru haga agali tebirali i heba biabe mandagi  
biaga hearume i handabe manga hayagola ina ti ege mbirago dege andaneha howa bo  
duguaru. <sup>9</sup> Ani bialu ina nogo sibi urunihondo lalu, I tinaga haru haga naholebero. Nogo  
sibi homelo dabo helene karu ti homelo. Maru mo ko helonaga dabo helene karu tibi mo  
ko helo. Maru yu wahene karu tibi nde tini bo wahagahaga bilo, larugoni. <sup>10</sup> Ani lowa  
ina halimbu mendego mini Dara Holene Irane Nawini Dara Holene laga biago podaki  
haru. Ani podowa hameigini dindi tara taraha karu baba Anduane Homogohanda  
habo nalolene bi lowinigo ina habo larugoni. <sup>11</sup> Ani birugoningi habo nalolene bi  
ogoni biba hayagoni. Agali maru nogo sibi muni taguialu hinulene yolo bialu hayaru  
tigua i hondowa mandabu handalu hearia Anduane Homogohanda mbirale inime  
bialu harugonaga bi langiragoni lo manda biya. <sup>12</sup> Ani buwa ina tihondo lamialu,  
Tigua ihondo yolo nguleyagua nde ngialu nanguleyagua nde wahalu tinime hame

ledamidagua bilimu, laru. Ani larugola tigua ina biabe birugonaga yolo muni siliba pira tebira (30) hangu ngiya.✠✠

<sup>13</sup> Ani biyagola Anduane Homogohanda ihondo langialu lalu, Muni ogoni mo yalu agali dindime mbirale tara tara wabiaga kagohondo mo mibe, laya. Ani laya handala muni ogoni agali bu hearume i habane nabulene kabe toba howa i yolo ngiyago yalu puwa ina Anduane Homogonaga andaha agali mbirale wabiaga heagohondo miru.

<sup>14</sup> Ani buwa ina halimbu mendego mini Mandagi Mo Mbiraore Holene laga biago podaki harugola Isaraele Yudala hameigini mandagi ndo hangu hangu paligi paligi bu hene.

<sup>15</sup> Ani biwagola Anduane Homogo ibugua ihondo langialu lalu, Ai i nogo sibi haru haga halu mende hole habe. Ani howa sibi haru haga agali bayale ndo habane nabulene ale hole habe. <sup>16</sup> Ina inaga wali agali nogo sibi ale karu haru helonaga agali mbira dabo heledogoni. Ani helarugola ibugua inaga wali agali uruni bayuwa haru nahaga. Ibugua sibi ti ko haragola biamogo nabiagabi nogo sibi pu ereba hararu olalu taya nabiagabi sabinaga dere bidaru dabi helo kabu nabiagabi ti bayale helonaga tomo namiagabi haga. Ani nabiaga howa ibugua sibi haba tigi karu balu mbirini damenego nai halu gi hondone ge hondonebi budalu mbirini karu bibahende nai holenaga ani biaga holebira. <sup>17</sup> Nogo sibi haru haga agali ogoni ibugua nogo sibi haru hayaru bibahende yu wahai hayagonaga ibuni mo ko holeneore wulebira. Ibu waitigirume ibalu ibunaga hongo bope hai holebira. Anidagua biragola ibunaga gi homalu ibunaga de tiga ko halu ndibulo wahene holebira, lalu Anduane Homogohanda laya, lene.

## 12

### *Anduane Homogohanda mani Yarusaleme biamogo bulebira lenego ogo*

<sup>1</sup> Anduane Homogohanda dindi haribi wabialu wali agali bibahende bu kamarunaga holene ngiaga kago ibugua Isaraele wali agali karunaga mbiwia halu bi ogodagua laya. Ibugua lalu, <sup>2</sup> Ina Yarusaleme waini iba gabo beha hambu berelenege ale helolebero. Ani heledogola hameigini tara tara dindi Yarusaleme kawareni bu karume ibuwa waini iba be biagoha howa naradagua biragola tini lulu iba nowa luluyu hagadagua holebira. Waitigi o ibirarume Yarusaleme ho hagira bialu Yuda dindiha tano maru ngarubi heba ho hagira biai holebira. <sup>3</sup> Horo ogoni tagira ibirangi ina Yarusaleme mo yaraga habe nahe ege tole gendabi ale ngelolebero. Dindi bibahendeha wali agali hameigini tara tara paluyu pedarume mo mogo bialu Yarusaleme baba wai bule ibalu karia agalime ege tole gendabi yaraga habe nahe wiagadagua ngagome tini mo koore howa pugu bulebira. <sup>4</sup> Horo ogonangi ina waitigirunaga nogo hosiru mo gi hai harogola agali nogo hosini bedaru lulu yalu purogo lolebira. Ina Yuda wali agali bayuwa handayaho howa waitigirunaga nogo hosi karunaga de mo ndibulai helolebero. <sup>5</sup> Ani berogola Yuda hameigininaga agali haguane bu karu tigua mbirale uruni birago de hondowa tini dege dege laga laga bialu lalu, Anduane Homogo Hongo Haiheore Ngode Datagaliwabe kago ibugua ibunaga wali agali Yarusalemeha bu karuhondo hongo miaga kagoni, lolebira.

<sup>6</sup> Horo uruningi ina Yuda dindiha agali haguane bu karu ira hungu bibehe dangi yuni gaule alebi widi bogabinaga yuni gabuni ngagoria ira hungu abale kulu lalu hundia habe nahe dai haraligobi ti holebira. Ani howa tigua hameigini tara tara tinaga waitigi dindi kawareni palia para para bidaru bibahende bo wahai holebira. Ani biragola Yarusaleme tano ibuni ngagoria bayale wiaabo holebira.

<sup>7</sup> Anduane Homogo inime Yudanaga ami agali bu karu tigua wai bialu wayali howa helolebero. Ani berogome ti mini lene timbuni Debidi aguanene hama ibinirubi Yarusalemeali hama ibinirubi tigua Yuda maru uruni mini lene bolangua naholebira.

<sup>8</sup> Horo ogonangi Anduane Homogo ina wali agali Yarusalemeha karu inime hapai halu humbi haradagua bulebira. Ina agali maru wai bulene hongo nahe bu karu mo

hongo harogola tibi nde wai biaga hongohe howa pari wayali Kini Debidi ale dege holebira. Ani kagola Debidi aguanene mani holebirarume ti nde Anduane Homogonaga dahuliyali ale howa tigua Yarusalemeni karu haru halu Ngode Datagaliwabe ibugua haru hagadagua haru holebira. <sup>9</sup> Horo uruningi ina hameigini dindi tara tarani howa Yarusaleme baba wai bule ibiraru mo ko halu bo wahai holebero, laya lene.

*Agali bowa mani dara howa dugu bulebira lenego ogo*

<sup>10</sup> Anduane Homogo ibugua laabo halu lalu, Ina Debidi aguanene bu karubi Yarusaleme wali agali bu karubi tiha dara howa biamogo bulenebi inihondo bi loa holenebi tolai ho helolebero. Tigua agali mbira tinime bo wiyagoria ngago hondowa agali ibu igini mbiraore hangu henego homaragola dugu hongo howa bialu hagadagua tigua bialu holebira. Agalime ibu igini wahene hono winigo homaragola dugu timbuniore biagadagua tiguabi ani bulebira. <sup>11</sup> Ani bialu horo uruningi Yarusaleme ha dugu timbuniore bulebira dama mitangi bialu bi pupu wule gime wabini mini Hadadarimononaga dugu dindi tigabi Megido ngagoriani dugu biagadagua bialu holebira. <sup>12</sup> Wali agali bibahende tini damenema andaga hangu hangu padadagua dugu bigi bigi bialu holebira. Debidi aguanene bu karu ti onerubi Nadana aguanene bu karu ti onerubi <sup>13</sup> Libai aria bu karu ti onerubi Simei aria bu karu ti onerubi <sup>14</sup> maru hama ibinirunaga aguanene bu karu ti onerubi ti bibahendeme dugu bialu holebira. Anda mbira mbiraha paliaga bidadagua mo mogo buwa wali ti tini kadagua handa edene bu howa dugu bialu agali nde tini hangu anda mendeha bu howa dugu bialu holebira, lalu Anduane Homogohanda Segaraiaha howa mbiwia halu lene.

## 13

<sup>1</sup> Anduane Homogo Hongo Haiheore kagome lalu, Horo uruni tagira ibirangi iba tara mbira dugualu piagobudaga halu helolebero. Wali agali Debidi aguanene bu karubi wali agali maru Yarusalemeni haga bu karubi tigua mana ko timbuniore biyarubi dama mitangi bialu gime wabini wiaruhondo bi pupu wiyarubi iba duguaraga haragonime mana ko uruni biyago bibahende domo wahai holebira, laya lene. <sup>\*</sup>

*Ke howa mbiwia halu bi mana latagi haga karu mani ereba hai holebira lenego ogo*

<sup>2</sup> Anduane Homogohanda laabo halu lalu, Horo uruniangi mbirale dama mitangi bialu bi pupu wule gime wabini dindi bibahendeha ngaru ina mo wahai harogola mbiralime uruni mitangi bu haabo nahe embedaho wahaiore holebira. Ani bialu ke howa mbiwia halu bi mana latagi haga bu karu bibahende biba hai helolebero. Wali agalinaga mini ko ngaru mo wahai harogola tigua dama mitangi bialu bi pupu wule gime wabini ngaruhondo bi pupu wua nahe wahai holebira. <sup>3</sup> Ani kagola mbiralime ke howa mbiwia halu bi mana latagi haabo hayagua ibu aba aiyalame ibuhondo lalu, Ina bi ogoni Anduane Homogonaga bi larogo lalu henene ndo tindule lalu ininaga bi hangu laregome i homolebere, lolebira. Agali o biagome ke howa mbiwia halu ibuninaga bi latagi hayagua nde ibuni aba aiyalame ibu homelo nabime nogoba halu bo waholebira. <sup>4</sup> Horo uruningi bi mana latagi haga agali mbiragome de gandeba handarago latagi hole taga holebira. Anduane Homogonaga bi mana latagi hagame aga karulo hagadagua ibugua wali agali mo hondo holenaga aga ogoni karu nale holebira. <sup>5</sup> Agali ogoni ibugua lalu, I Anduane Homogonaga bi mana latagi haga agali ndo i mabuha biabe bialu haruli. I igiri emeneni howa mabu biabe biaabo haga hene kogoni,

<sup>\*</sup> **12:10:** Md 24.30, Mo 1.7    <sup>\*</sup> **12:11:** Dindi Kenanabi Siriabi wali agali hearume dama mitangi mbirale gime wabini mbira mini Hadadarimono ogoni ibu mini mende Bala wini. Tigua dama ogonime tomo tara tara mo anda haganaga dama ka laga hene. Mali mbirani tomo tara tara anda nahe gau lai hayagua nde wali agali maru hearume dama o biagobi homaga biaga lalu ibunaga dugu hongo howa yiyi lalu haga. Ani bialu mani ibu holene mo karulalu heyaya manda biaga wini.    <sup>\*</sup> **13:1:** Iba 51.2, 51.7, Ais 1.16-18, Ese 36.25, Yo 1.29    <sup>\*</sup> **13:3:** Man 18.20

laga bulebira. <sup>6</sup> Ani laragola mbiralime ibuhondo hale halu lalu, Inaga galu kunini motudu ngagoni agua binibe, lalu hale hayagua ibugua tihondo ke howa ladai bialu lalu, I nenege mbira andaga pu hewaria nogoba henego motudu ogoni, lolebira, laya lene.\*

*Anduane Homogohanda nogo sibi haru haga kago bolene nga lenego ogo*

<sup>7</sup> Anduane Homogo Hongo Haiheore kago ibugua lalu,\*

Wai biagane ayu tibu ne gadele-o i heya.

I heyalu agali inaga biabe bia halu haru haga kago babe.

Nogo sibi bu karu ibida purogo lelo nogo sibi haru haga kago bo wahabe.

Ina inaga wali agaliru baba wai bulebero.

<sup>8</sup> Dindi ogoha wali agali bu karuni halu tebira mo tale buwa haluki kago bo hilo wahai halu tebonego yu waholebero.

<sup>9</sup> Ina wali agali halu tebone talebu helarugo tiha ko mbira ngabe hondole ngolo silibaru bayale dodo mbira para nahe ngelonaga irani delaradagua bulebero.

Ina ani bu helowa tigua i mini olaragola

ina tinaga bi lararu hale holebero.

Hale howa ina tihondo lamialu lalu,

Ti inaga wali agaliore kamigoni, lolebero.

Tigua nde, I Anduane Homogo inanaga Ngode Datagaliwabeore kegoni, lalu latagi holebira, lene.

## 14

*Waitigirume Yarusalemeni wai bulebira lenego ogo*

<sup>1</sup> Anduane Homogonaga horo mbira tagira ibulebira. Horo ogoni tagira ibirangi Yarusaleme wali agali inaga muni mbirale ngamiruni waitigime ibalu mo yulebira. Mo yuwa ini handaya ho kamiore dege ininaga deni howa talebu yagayaga bulebira.

<sup>2</sup> Anduane Homogohanda dindi bibahende ha howa hameigini tara tara haru ibalu ti Yarusaleme baba wai bulebira. Tigua Yarusaleme bope howa i andagaha mbirale ngamiru bibahende mo yai halu wali bedaru minade halu kayu yaga bialu holebira. Wali agali karu bibahende halu ki mo tale buwa wabuni mbirago garabaya haru pialu wabuni mendego Yarusalemeni helo waholebira. <sup>3</sup> Ani biragola Anduane Homogo ibugua ala wai birangi biaga wiyadagua dindi bibahende ha howa ibiyaru uruni baba wai bulebira. <sup>4</sup> Horo uruni tagira ibirangi Anduane Homogo ibuni Yarusaleme tano kaware ni tagira ibiragohayagi Hari Olibe nene ngagoria holebira. Ani kagola Hari Olibe kago hanuni kambuluki howa amura haga haga biragola dindi ulini panda panda ona wu yu polebira. Hari hanuni kambuluki haragola mendego uyurayagi ha uyu halu mendego unurayagi ha unu holebira.\* <sup>5</sup> Ani kagola dindi tigabi panda panda hanuni wupe kagoria i ogonidagua pialu ibida yo pialu poleberemi. Bamba Yuda dindi ha Kini Usia heangi dindi dumbirumbi biyagola inaga mamaliru ibida penedagua áyu dindi ulini panda panda ogoni wu yu pialu dindi mini Asala mbira ngagoria tagira pedago i ogonidagua puabo holeberemi. Ani poramigola horo ogoningi Anduane Homogo inaga Ngode Datagaliwabe kagome ibunaga dahuliyaliru haru hai halu ibulebira.

\* **13:6:** Agali marume ke howa bi mana latagi haga tinaga tingini nabime minu podene motudu wi haga. 1 Kini 18.28 ngago handabe. Anidagua bidagola wali agali maru karume o biarunaga galu kunini nabime podene motudu ngago hondowa ibu bi mana latagi haga agali mbirada laga biaga. Ani hendeda tiraga ibugua ke howa ibu agali ogoni ndo laga. \* **13:7:** Md 26.31, Mg 14.27 \* **14:4:** Ese 47.1-10, Mai 1.3-4, Hab 3.6, Seg 4.7, 14.8



<sup>6</sup> Ani bialu horo uruni ibiragola dagare bulenebi kewaro ibira holenebi nawulebira. <sup>7</sup> Alendohayagi aruma naholebira. Anidagua biragola horombe mbiragada lolene nawi wá haabo holebira. Mbirale uruni tagira ibulene ogoangilo Anduane Homogo ibuni hangu manda bu ka.✠

<sup>8</sup> Horo ogoningi iba gagahe bayaleore Yarusalemeha howa dugualu pialu holebira. Iba gene kira pu tale bialu gene mende iba kuyama mini Iba Homene bedagotha pupe halu mendego pialu solowara timbuni Medidereniana bedagotha pu mogo bulebira. Iba ogonime hundia nabi dalungibi gaea timbuni birangibi duguahó wialu pialu haabo holebira.✠ <sup>9</sup> Ani bialu Anduane Homogo ibugua dindi bibahendenaga handameho haga kini holebira. Wali agali bibahendeoreme ibu Anduane Homogoore ka lowa ibunaga mini mbiraore hangu lalu ibu hanguhondo mitangi bialu lotu lalu holebira.✠

<sup>10</sup> Yarusalemeni dindi ngago dondole tigabiore Yarusalemenaga tano abene uyu-rayagi Geba tano ngagoria howa wu yu pialu unurayagi Limono tano ngagoria tagira polebira. Yarusaleme tano ibu dege hari hombeneni wiaabo holebira. Yarusaleme tanonaga pabe dege ala pene wiyago wiaabo holebira. Tanonaga pabe panga mini Beniyamininaga Panga laga ngagoria howa pialu pabe panga mini Paulaga kagoria panga ala dugu wini ngagoria tagira polebira. Amuna pabe nenení mamage haga agalinaga anda daliga bini mini Hananelenaga laga kagoria howa pialu kininaga waini iba wabiaga gerebi lini pingidaga ege tole uli ngagoria tagira polebira. <sup>11</sup> Ani pedagola Yarusaleme wali agali tiha mo ko holene mbira nawi howa ti gi nahe bayale haabo holebira.✠

<sup>12</sup> Dindi bibahendeni hameigini tara tara karu Yarusaleme wali agali baba wai biaga bu karuha Anduane Homogohanda warago ko taraore ibilolebira. Warago ko ogonime ogodagua bulebira. Wali agali tini heyu kaore tinaga de hégeru tingini bibahende togo biai holebira.

<sup>13</sup> Anidagua bialu Anduane Homogohanda wali agali uruni mo luluya holebira. Ani mo luluya ho heledagola tini dege dege mandagi karu minu yania halu bo wahaga bulebira. <sup>14</sup> Ani birangi Yudali bu karume Yarusaleme wali agali bolilono mo wialu wai bulebira. Ani bialu tigua hameigini dindi tara tara ngaruha wali agali bu karunaga muni ngolo silibabi aga bayale ngarubi mo yai holebira.

<sup>15</sup> Waitiginaga balai anda bu kagoria nogo hosiru kameleru dongiru bibahende yani timbuni biame halu homai holebira.

*Dindi bibahendehe hameigini tara tara karume Anduane Homogo mitangi bialu lotu lolebira lenego ogo*

<sup>16</sup> Yudali tinaga waitigi bu karu bo wahai kagola mani yu wahene emene karu tigua mali bibahendeni Yarusaleme ibaabo halu holebira. Anduane Homogo Hongo Haiheore kago ibuni tinaga kini ka lowa tigua ibuhondo mitangi bialu lotu lalu holebira. Ani howa tigua Anda Nemandaha Palu Holene Horo tagira ibirangi bulene mana wini ngadagua talialu bialu holebira.✠ <sup>17</sup> Ani bialu hameigini tara tara marume dindi mbiraha howa Anduane Homogo Hongo Haiheore kago ibu inanaga kini kago mitangi bialu lotu lole naibaga heagua tinaga dindiha iba dalu naibulebira. <sup>18</sup> Anigo Iyibi wali agalirume Anda Nemandaha Palu Holene Horo tagira ibirangi bulene mana wini ngadagua Anduane Homogo mitangi bialu lotu lole naibiyagua dindi maru ngaruha wali agali lotu lole naibaga bu hearuha mo ko helonaga ibugua warago ko ibilagadagua Iyibi wali agali tihabi nde ani ibilolebira. <sup>19</sup> Tigua Anduane Homogo mitangi bialu lotu ogoni labe manga hayagua Iyibi wali agalibi hameigini tara tara dindi bibahendehe bu karubi bibahendeore pani tandaga mbiraore ogoni ale dege nai holebira.

✠ 14:7: Ais 60.19, Md 24.36, Mo 21.23, 22.5 ✠ 14:8: Ese 47.1, Yol 3.18, Yo 7.38, Mo 22.1 ✠ 14:9: Ais 2.2-4, 45.21-24, Seg 9.9, 14.16-17 ✠ 14:11: Mo 22.3 ✠ 14:16: LBM 23.39-43

<sup>20</sup> Ani birangi tinaga nogo hosi mani mbelo emene mbira pongobia ho ngaruni bi ogo gilibu wulebira. Ogo Anduane Homogonaga loma bia ho nga, lalu gilibu wulebira. Anduane Homogonaga andaha todobene be bu ngarubi dunini dege wialu ibuninagaore ndisi be loma bininaga nogo darama hambu wiaga timbuni lomabu delaga dabuni ngaligobi dege wulebira.✧ <sup>21</sup> Ani bialu Yarusalemeha Yuda dindi bibahende-habi todobene be damene ti andagaha ngaru bibahendeore Anduane Homogo Hongo Haiheore kago ibunaga lomabu wiai holebira. Mani howa wali agalime tinaga nogo sibi bulumagaru bo lomabu miragola nogo mbiriniru todobene be tininaga ndo Anduane Homogonaga loma bia hene uruniha dawalebira. Horo ogoningi howa mbiralime mbirale yolo bilo Anduane Homogonaga andaha yalu polene nawulebira, lalu Anduane Homogohanda Segaraiaha howa bi ogoni mbiwia halu latagi hene.✧

## Malagai

### Mbuga ogoha gilibu ngarunaga nemandi ogo

Ngode Datagaliwabenaga anda Yarusalemeha ala podo wahenego lone biadai biyangi howa Malagai ibu Ngode Datagaliwabenaga mana latagi haga hene. Malagai ibunaga genda ogo.

Loma binigo mo miaga hearubi Isaraele wali agali hearubi tigua ala Ngode Datagaliwabehondo habo nalolene bi lowinigo yu puguini. Ai lone lo wilo ibugua hamelo hene. Isaraele wali agali hearume Ngode Datagaliwabenaga deni howa bayale ndo mangahebi mo kohebi ho hene. Loma binigo mo miaga hearubi wali agali hearubi tigua Ngode Datagaliwabehondo lomabu mulene winidagua nami gurunagabi holene mana lo winigoria nahagabi hene.

Anduane Homogo ibugua ibunaga wali agali dabaki bulebi ko para kago domo waholebi dai bulebira. Dai nabi howa ibugua ibunaga bi yalu piagame ala manda manda bilobi habo nalolene bi lowinigo latagi helobi bamba halu ibilolebira lalu gilibu nga.

#### **Bulu бага бува кuni uru gilibu ngago (1.1-2.16)**

Isaraele wali agalime ko binirunaga te gilibu nga. 2.17-4.6

Ngode Datagaliwabehanda dabaki bialu dara howa binirunaga te gilibu nga.

#### *Anduane Homogohanda Isaraele wali agali gubaliniho henego ogo*

<sup>1</sup> Anduane Homogohanda ibunaga bi ogo Isaraele wali agali lamilo Malagaihondo lamini. <sup>2</sup> Anduane Homogohanda ibunaga wali agalihondo lalu, Ina tí gubalini haho wiaabo ho harugoni, lene.\*\*\*

Ani layagola tigua ladai bialu lalu, Ina ina gubalini haridago agini walia haribe, lalu ladai bini.

Ani layagola Anduane Homogohanda ladai bialu lalu, Iso Yagabala libu hamenela hayago ina Yagababi ibunaga aguanenebi gubalini halu, <sup>3</sup> Isobi ibunaga aguanenebi gubalini nahe harugoni. Iso ibu dalu bare ngarunaga mbirale mbira anda habe nahe ko kede pugubu ngeledogoni. Ibunaga dindiru nogo biango gabuaru ti hangu bu helo embera ibilo ngelo wa kogoni, lene.

<sup>4</sup> Ani layago hondowa Iso aguanene Idomo hameigini tigua lalu, Inanaga tano dewa bu hayaru giallo bagabu wahayagodago lone daibu bimija, loleberemi. Ani lowa lone mo ngoai howa birimiyaguabi nde Anduane Homogo ibugua ladai bialu, Tigua ani bia handadaba. Bidamigola lone giallo waholiya, ladai bulebira. Ladai bialu lalu wali agali maru karume, Dindi ogoni mini dindi ko, lalu, Hameigini o padagoni Anduane Homogohanda handabe manga halu hondo wahene, lolebira, lalu Anduane Homogohanda ani ladai bulebira.

<sup>5</sup> Ogonidaguaore biraria Isaraele wali agali tininaga deoreme hondolebira. Hondowa lalu, Anduane Homogo ibu Isaraele hameiginihondo hangu ndo hameigini maru dindi taraha karuhondobi hongoho dege harada, lalu lolebira.

#### *Anduane Homogohanda loma binigo mo miagaru mo ko howaore talinigo ogo*

<sup>6</sup> Anduane Homogo Hongo Haiheore kagome loma binigo mo miagaruhondo lalu, Waneiginime ti aba ka manda biagadaguabi biabe bia hagarume ti anduane ka manda biagadaguabi i tinaga Aba harugo tigua inaga mini mo yaraga naharamiligo aginagabe. I tinaga Anduane harugo tigua i hondowa mogo nale kamigo aginagabe. Loma binigo mo miagaru-o tiguaore inaga mini mo yo handalu kamigo howa, Ina inaga mini agua mo yo

✧ 1:2: Pig 25.21-26 ✧ 1:2: Lm 9.13 ✧ 1:2: Ais 34.5-17, 63.1-6, Yar 49.7-22, Ese 25.12-14, 35.1-15, Amo 1.11-12, Oba 1-14

handarimayabe, lalu kamibe. <sup>7</sup> O agua birimi lalu langero. Tomo ko mebia hene wiaru í ngerama lowa inaga lomabu miagane dagiani bu wirimigome i mo yo handarimigoni. Ani larogola tigua, Iname inaga tomo agua mebia harimayabe, loleberemi. O abini Anduane Homogonaga lomabu miagane dagiani tomo ta nabi wulene nga manda buwa tí miniha mo yo handarimigome mebia harimi laro. <sup>8</sup> Nogo ega de koheru tingini koheru ge ibira heneru homabehe de mbomboleru yu ngoai howa i ngeremigo ogoni ko ndo karulape beremalo manda bidamibe. Nogo ega i o ngeremirunibi tinaga gabumane haguane kagohondo yupu milimu. Tinaga nogo ega urunibigo de hondowa ibugua tihondo turu halu tigua mbirale mbira hale haramigola ngulebadago ngilo, lalu Anduane Homogohanda ani lene.

<sup>9</sup> Ogonigo loma binigo mo miaga kamiru tigua Ngode Datagaliwabhondo bi lamialu, Inahondo turu halu bayale bibe, lalu lamilimu. Gi yobi ko ogonibi muwa ai Ngode Datagaliwabe ina ina biamogo bia laramigola ibugua hale halu tí biamogo bulebirabe. <sup>10</sup> Anduane Homogo Hongo Haiheore kagome lalu, Inaga lomabu miagane dagiani ira bame dela holo bialu kamigo wahalimulo tí mbiragome inaga anda panga payaore nabira mandabu ko. I tí baba turu nahe ko. Tigua mbirale inaga lalu yalu ibirimidaruni i nayamulebero, lene. <sup>11</sup> Ni tagira ibiragoria karume inaga mini dege mo yaraga hama penego amu ni paliragoria karume mo yaraga ho maro biragoria ko. Dindi bibahendeha karume mbirale ira hagua ngabilo mini inisenesi i nga holiya delalu nogo ega goaile mebia naheneru bo ngiraria ko. Hameigini o paluyu piaruaruni bibahendeme inaga mini daligaore lowa yaraga halu ani biaga ka, lene. <sup>12</sup> Ani biagago loma binigo mo miaga kamiru tigua inaga lomabu miagane dagia nagalonedanda manda bialu tomoru ko tíni manga haramigo aleru inaga lalu lomabia haramigome tigua i mo yo hondowaore kamigoni. <sup>13</sup> Anidagua larogola tigua ai ogoni erekuibidago wahabeheda lalu ihondo ngui yogo buleberemi. Nogo ega mbiralinaga heago tí bime hongo halu gingila mirimigo ogoni i ngule lowa yalu eberemi. Marume kuduguru de mbombolo áyu dege tongolo mule ngaru i ngule lowa mo yalu eberemili. Urunibi ngeremiruni hondowa ina tihondo turu halu yamulebadalo manda bidamibe. <sup>14</sup> Nogo inaga lalu lomabiaha helene bayale biago ibu mo halu ko homo wahene biago i mo aribia halu ngirago inaga gurunaga ogoni áyu homabe. I ibu aleme mo yo handabe nahe handame haga kini gibiore dindi bibahendeni hameigini tara tara palu ngarume i hondowa gi hai haga hene kogo, lalu Anduane Homogohanda ani lene.

## 2

<sup>1</sup> Anduane Homogo Hongo Haiheore kagome loma binigo mo miagaruhondo lalu, Ai o larogo tigua bilimulonaga laro, lene. <sup>2</sup> Tigua beramigo inaga mini yaraga helo hangu bilimu. Tigua ina bi larogo hale halu nabirimiyagua nde ina tí ha holebero. Mbirale tí hanaho haga bidamigo ina mo ko haga bulebero. Tinaga pini ina minu tongo lolebero. Tinaga gelo minu habo lolebero ndo abale minu habo larugoni. Ani birugo irane tigua inaga bi larogo bu gubaliniha mo pe nahe mo yo hondowa bame dongone degeme hale halu kamigonaga. <sup>3</sup> Tinaga waneiginiru minu balu ti nogo kumburayubi i bo ngirimirunaga ti to ngagoha tininaga dengui ogoniha minu guyulebero. Ani bialu tinibi nogo ti to ngagoha halimulo minu helolebero. <sup>4</sup> Ani berogo hondowa ina tihondo bilimu lalu laruyagua henene bulene winida manda buleberemi. Ina loma binigo mo miaga Libai aguanene karu lamialu buleore lowa habo nalolenebi lo wirugo ereba naholebira, lalu lene. <sup>5</sup>

Ina tihondo habo nalolene bi lo wialu bulebero larugo ti dindini mbira mo ko nahe miniha dungulo holeberemi. Tigua i hondowa gi helonaga ina tihondo bi ogobi lowiru. Horo odaruningi tigua i hondowa gi halu mogo laya. <sup>6</sup> Tigua i denibi ko

✧ 1:10: Ais 1.11, Yar 6.20, Amo 5.21 ✧ 2:4: Dag 3.11-13 ✧ 2:5: Dag 25.12

mbira nabi i baba girigura nabi bayaleore harima. Tini hangu mana bayale bia ndo maru ko bialu hearubi nabilo mana bayale buleneha haru dai biya.✧ 7 Wali agalime Ngode Datagaliwabe bayuwa manda bilo lawai holonego loma binigo mo miaga tinaga biabe nga. Wali agalime inaga hame ledogo manda buleyagua loma binigo mo miaga ti Anduane Homogo Hongo Haiheore kagonaga bi yalu piaga kago wali agalime ibunaga ne harigaha howa latagi harago agi larabe hale holene nga, lalu lene.

8 Ani bulene winigo loma binigo mo miaga ti kamirume hariga tigatiga wiago ngelalu naleagoha pubagiho kami. Tigua mana lawai harimigome wali agali dewa ko bilo mo bia harimi. Ina tihondo habo nalolene bi lo wirugobi puguarimi. 9 Tigua ina hame ledodagua naberemili. Ani bialu tigua inaga wali agalihondo mana lawai halu howa maruhondo turu halu maruhondo manga haramili. Wali agali bibahendehondo ta nabi ogobi degedege naberemili. Ani beremiligonaga ina Isaraele wali agalime ti mo yo hendelo lalu tinaga ge waraha ti berelolebero, lalu Anduane Homogo Hongo Haiheore kagome lene.

### *Wali agalime Ngode Datagaliwabe wahalu penego ogo*

10 Ina bibahende kamago Aba mbiraore hangu ndoyagoda. Ngode Datagaliwabe mbi-raorehanda ina wabini ndoyagoda. Ani bini kamayagua nde habo nalolene bi inane lo wigi birimago puguaga bialu kamago aginagabe. Ani bialu Ngode Datagaliwabehanda inanaga mamali heba habo nalolene bi lowini wiago mebia halu mo yo handalu pugua dege bialu kamago aginagabe. 11 Yuda wali agalime Ngode Datagaliwabehondo bi lowinigo pugualu mana ko taraore Yarusalemenibi dindi bibahendenibi biame halu ka. Tigua Anduane Homogonaga anda ibu gubalini ho kago mebia haya. Yu agalimebi dindi tara wali tinaga damahondo bi pupu wiaga berearu dabu biya. 12 Mana ko urunibi biaga karu Anduane Homogohanda ne dugu waharadagua bilo. Ani biragola ti wali agali marume Anduane Homogo Hongo Haiheore kagonaga lomabia hene yu ngoai haradagua tigua nahelonaga ani dugu waholebiraore.

13 Ai tigua ko mendebi ogo beremili. Tigua mbirale lomabia hene yu ngoai haramigo Anduane Homogo ibu turu halu yamia nabiya. Nabiya gola tini gendani deiba ibu dugu bia kiabu dugu bia bigi beremigoni. Deiba bondolopebe beremigome iba goroyane birama iraga haragome Anduane Homogonaga lomabu miagane dagia namu laragoni. 14 Ani nayamiragola ai aginaga nayami manga halu waharuadabe laramigoni. O waharuagoni irane ti igirini howa ti one pigane dabu birimingi ti onehondo bi lo wirimigo puguarimigonaga wahaya. Libu nde mini mbiraore halu pialu ti onehondo bi napugulene lo wirimiru puguarimi. Wali mende mitangi nahole lalu Ngode Datagaliwabe deni howa larimiru puguarimi. 15 Ngode Datagaliwabehanda i i onela libu tingini dininila mo mbiraore ndo hayagoda. Ibugua libu ogonidagua mo mbiraore hayago irane aginaga biyabe. O biyadagoni irane libu waneigini haragola ti Ngode Datagaliwabenaga waneigini henene helonaga bini. Anigo ti mbiralime ibu onehondo bi lowinigo pugulamini de hondo halimu. 16 Isaraele wali agalinaga Anduane Homogo Ngode Datagaliwabe kagome lalu, Onene agalinila wahalu pugupugu bulenegoore i handabe mangabali, lene. Agalini mbiragome mana ko handabe mangabi ogonibi birago hondowa i handabe mangabali. Wali mbiraore i one ogoni hangu mitangi halu hole lalu lowirigo puguleni de hondo habe, lalu lene.

### *Godi lolene horo hapara hayada lenego ogo*

17 Tinaga bime Anduane Homogo mo erekui bia halu kami. Ani larogola tigua, Iname Anduane Homogo agua bialu mo erekui bia halu harimabe, loleberemi. Tigua, Anduane Homogo Hongo Haiheore kagome ko biaga kamaru bibahende bayale dege leda. Ibugua

✧ 2:6: Man 33.10, Yar 23.22, Ya 5.20



ina bibahende hamelai ka, lalu kamigome mo erekui bia halu kamigoni. Mana tigabi biaga Ngode Datagaliwabe hayuago a kagobe, lalu kamigome mo erekui bia halu kami.

### 3

<sup>1</sup> Ani larimigonaga Anduane Homogo Hongo Haiheore kagome agua lara. Inaga bi yalu piagame ini maha ibuliyana iga ibugua ala manda manda bule bamba helolebero. Ani buwa ti Anduane Homogo hai bialu kamigoni ibuni abale ibunaga andaha ibulebira. Bi yalu ti de hondoaho kamigo ibu ibalu ina habo nalolene bi lo ngagonaga mana langulebira, lalu ka.\*

<sup>2</sup> Ibu ibulebirago ibiragola horo ogoningi heyu haabo habehe ibu ai holebirabe. Ibu hapani haragola dere haabo habehe mbirali holebirabe. Ibiragola ibu dodo domaga sobo hongohe ale holebira. Ege tole aeaneru hiru tiga biaga ira hongohe daganegobi holebira.\* <sup>3</sup> Ibu godi hale halu daboki biragola muni siliba irani delowa ko para kago dai halu bayaleorego do ibira helo delagadagua dabilebira. Ngolobi silibabi irani delowa ko para kago irame do ereba helo delagadagua Anduane Homogonaga bi yalu piagago ibugua Libai hameigini loma binigo mo miaga karu ogonidaguaore bi maname hiru tiga bulebira. Anduane Homogohondo mbirale yu ibalu mulene alego ngadagua milonaga tigua ani bulebira. <sup>4</sup> Anidagua biragola Yuda wali agalibi Yarusaleme wali agalibi tigua mbirale mbirale Anduane Homogohondo mule yalu ibiragola Anduane Homogo ibu turu halu yamulebira. Ala ani biaga wiyadagua bulebira.

<sup>5</sup> Anduane Homogo Hongo Haiheore kagome lalu, I ti kamigoria ibuwa ti bibahende hangu hangu baba godi lamiya ibulebero. Ibuwa wali agali tomia biagarubi wali agali kayu biagarubi tindule lalu ndinde lagarubi biabe bidagola yolo bulene ngadagua ndo emene badane biagarubi wali dalorubi waneigini hono wahenerubi dindi kaundi-alirubi urunibinaga ngaru mo hondo howa gurunaga karume tibi i hondowa gi nahaga karubi bibahende i baba godi lai holeberema, lene.

#### *Mbirale pini dege dege damenego mulenenaga lenego ogo*

<sup>6</sup> I Anduane Homogo kogo ho mende haga nabiaga kogoni. Ani kogo Yagaba aguanene kamiru ti ina yu waore ndo ko. <sup>7</sup> Ti tinaga mamali ti nahemiha ala henerume inaga mana lo wiwago pugualu tini hame layadagua biyagobi dege tiguabi ani bialu kamigoni. Tigua i kogohayagi de handa daibu halimu. Ina nde tiha de handa daibu holiya. Anidagua larogola tigua, Iname i keria dai bulenaga agi bulene ngabe, loleberemi. <sup>8</sup> O larogo hale halimu, Mbiralime Ngode Datagaliwabenaga ngago ohowa guru nolene karulapebe lowa hale haro. Ogonidagua nabibehego tigua inaga guru nalu kamigoni. Ani larogola tigua, Ina agua guru narimayabe, loleberemi. Mbiralime pini dege dege ngulenebi lomabia ho ngulenebi ogonihayagi inaga ti guru nalu kamigoni. <sup>9</sup> Ti wali agali bibahendeme inaga guru nalu kamigo ti bibahende ha hai haro. <sup>10</sup> Inaga andani tomo dewa bu wilo tomo pini dege dege wirimidaru bibahende mo yu ngoai howa wilimu. Tigua i abidabe hondole bahanda bia handalimu. Ina dahuliya andaganaga haraba panga windo dugupe howa mbirale tara tara bayale bayale bu ngoru ti bu payabu wu halimulo hombedape haroria hondoleberemigo ani bia handalimu, lene.\* <sup>11</sup> Tinaga tomo hingedemiru timamume nolani hondo holebero. Pu mbira lini daga mini gerebi hingedemirume lini do ndili ndulilo gogobelopeho wulebira. <sup>12</sup> Ani bidago hondowa hameigini tara tara dindi bibahendeha karume hondowa tiore baya turubi haramida lolebira. Tinaga dindi bayaore hoabidane hondowa ani laga bulebira, lalu lene.

#### *Anduane Homogohanda, Inaga wali agali dara howa biamogo bulebero, lenego ogo*

\* 3:1: Md 11.10, Mg 1.2, Lg 1.76, 7.27    \* 3:2: Ais 33.14, Seg 13.9, Yol 2.11, Md 3.10-12, 1 Ko 3.13-15, Mo 6.17    \* 3:10: LBM 27.30, Dag 18.21-24, Man 12.6, 14.22-29, 2 Kin 7.2, 1 Bit 26.20, 2 Bit 31.10, Neh 10.38, 13.12

<sup>13</sup> Anduane Homogohanda lalu, Tígua í lahiralu bi hiriribiru maru laga birimiria hale haru. Ani larogola tígua, Iname í lalu mbira agi larimayabe loleberemi. <sup>14</sup> Agua larimigo. Ngode Datagaliwabenaga biabe bia holene ogoni galone nawiyago wahabeheya, lalu hemigoni. Iname ibugua bia laradagua hangu biaaboha ai Anduane Homogo Hongo Haiheore kagohondo inanaga ko birimaruni lapani halu uruni kagua birimaya lolene uruni nde galone nawiyago wande habeheya, lalu hemigoni ndobe. <sup>15</sup> Tígua lalu, Iname handaga birimagola wali agali minehe karu ti turuhe haga bia. Agali mini kowi karu tigua mbirale bigi birago bu debe haga bialu ko biraru hondowa Ngode Datagaliwabehanda ti pani mia nabiragola hayaho yu pugu bialu hea, lalu ani laga bialu hemigoni, lene.

<sup>16</sup> Ani layagola wali agali Anduane Homogohondo giho haga hearu tini dege dege laedene bialu heago Anduane Homogo ibu haleho hene. Ibunaga deni mbuga mbira winiyago ogoriani wali agali Anduane Homogohondo giho halu ibugua laradagua biaga hearunaga mini gilibuwi winiya. <sup>17</sup> Anduane Homogo Hongo Haiheore kagome lalu, Uruni ti inaga wali agali holebira. Horo mbiru ina tagira ibuwa biabe berongi uruni ti ininaga wali agaliore holebira. Abame ibu igini ibunila howa biabe bia hagago dara halu biamogo biagadagua ina inaga wali agali uruni dara howa biamogo bulebero, lene. ✧ <sup>18</sup> Ani berogola inaga wali agalime lone hondowa mini tigabiwi karuhondo agua biaga winida mini kowi karuhondo agua biaga winidalo hondolebira. Ani bialu inaga biabe bia haga karuhondo agua biaga winida inaga biabe bia nahaga karuhondo agua biaga winida lalu horo ogoningi handaga bulebira, lene.

## 4

### *Anduane Homogonaga Horo biago tagira ibira lenego ogo*

<sup>1</sup> Anduane Homogo Hongo Haiheore kagome lalu, Horo mbira biago tagira ibirangi wali agali mineherubi ko biagarubi bibahende irame gambe aea daradagua do mundu lolebira. Horo ogoningi ti bibahende do munduore lalu mbiraligo yu wanaholebira.

<sup>2</sup> Ani bulebirago ai ina bi larogo hale halu biaga kamigo tí inaga pele mulene hongome tını nime daba haradagua daba halu ni doroneme mo dabi holene yu anda ibulebira. Ani birago hondowa ti nogo bulumaga igini hungubalua hara pai henego panga dugupe haragola turu howa aea kaea bu hagamaga holeberemi. ✧ <sup>3</sup> Horo mbiru ina tagira ibuwa biabe bulubodangi tígua wali agali ko biaga karu bope halu holeberemigo uruni tınaga ge habeme abalu hengedaradagua buleberemi, lene.

<sup>4</sup> Inaga biabe bia hagane Mosesehanda mana langigi biyago manda bilimu. Ina Hari Sainaini howa mana lowinigobi bulene nabulenebi Isaraele wali agali tígua bilimulo Mosesehondo lamirugo ibugua tí langiyago baya hangu manda bilimu, lene.

<sup>5</sup> Anduane Homogonaga Horo timbuni hiriribi ogoni tagira naibidaha bi mana latagi haga Elaya tí kamiria pu lolebero. ✧ <sup>6</sup> Elaya ibugua ibuwa igini taribunilabi wane angibunilabi mandagi lone mo biamagaho helolebira. Ani mo biamaga nahe ngaore horo ogoni tagira ibiyagua tınaga dindi bibahende bo mburi lolene wuligonaga ala ani mo biamagaho helolebira, lene. ✧

✧ 3:17: Man 7.6, Iba 103.13, Ta 2.14, 1 Pi 2.9 ✧ 4:2: Mal 3.16, Lg 1.78, Eb 5.14, 2 Pi 1.19, Mo 2.28 ✧ 4:5: Md 11.14, 17.10-13, Mg 9.11-13, Lg 1.17, Yo 1.21 ✧ 4:6: Ais 11.4, Seg 5.3, 14.12, Lg 1.17, Mo 19.15

## **Tobidi**

### **Mbuga ogoha gilibu ngarunaga nemandi ogo**

Mbuga ogoha howa Yuda agali bayale mbira mini Tobidi henego ibu one mini Ana berenegola libunaga te gilibu nga. Libu igini mini Tobaiasa henego ogoni ibu wali nadabubi heangi tini haru mandagi hene. Ai Asiria dindi Kini Salamanese heangi ti tano timbuni Niniba wiago kawareni garabaya hene.

Agali wahe Tobidi ibu kininaga giha howa genda tara tara dewaore howa ibunaga de kohe hene. Anigo ibugua Anduane Homogohondo bi lolenebi mana bayale tigabi bulene ngaru manga nahe bialu haabo haga hene. Ai Tobidi ibu homolene kaware hayagola ibu igini Tobaiasa Media dindi wiagoha pu laya handala pene. Ani pialu dahuliyali mbira mini Labaele ibu heba mandagi pole pene. Libugua harigani pialu howa wali mbira mini Sara harigani ngola hayagola ibu dabu bule manda bini. Anigo dama heyolabe mbirame wali biago mo ko hene bereagola libu dabu bulene nakarulape berene. Ani bereagola dahuliyali Labaele ibugua Tobaiasahanda wali ogoni biamogo bilobi ibu aba Tobidinaga de mo bayale helobi biamogo bini.

Tobidi mbuga ogome ina mo walia kago mbira Ngode Datagaliwabehanda wali agali ibunaga mana baya hangu taluwa bialu karu ibugua ti biamogo bialu haga ka. Mbiralime ibu aba aija baya hangu handaya ho halu mendeali karu mitangi halu biamogo bialu ha tini Ngode Datagaliwabehondo bi la dabu bininaga mana ngago baya hangu handaya ho ha mana bayale maru Anduane Homogohanda hame ledago biaabo halu ha biaga karu tiha Ngode Datagaliwabenaga dahuliyalime uruni ti baya hangu handaya ho haga ka lalu lamini.

### **Tobidi Sarala genda timbuni yu howa Ngode Datagaliwabehondo bi lenego**

*(Be 1.1-3.15)*

<sup>1</sup> I Tobidi kogo ina i henego ogodagua bialu haruli lalu te lolebero. I aba Tobiele howa Tobiele aba Ananiele howa Ananiele aba Aduele hene. Aduele aba Gabaele halu Gabaele aba Labaele howa Labaele aba Laguele hene. Laguele ibu Asiele mbira henego aria howa Asiele ibu Nabadali hameigini hearu aria mbirago hene. <sup>2</sup> Kini Salamanese ibu Asiria wali agalinaga kini heangi tigua i aba dindi Tisibeni I garabaya helaya. Dindi ogoni Galili dindinaga abene uyurahayagi nga. Gendese tano ngagonaga abene unurahayagi wialu dindi ogoni Nabadali hameigini dindiha wini. Ani bialu tano kira Haso Pogosala kawareni nga.

*Tobidi ibu igiri daliahe howa Niniba dindiha garabaya pu henego ogo*

<sup>3</sup> I Tobidi kogo ina mana bayale tigabiore ngago bialu haabo holenaga bialu haga kogoni. Ina i dameneru muni mbirale burupale howa tubagi ho karuhondo tale bu miruli. Ani bialu wali agali maru ini heba mandagi garabaya Asiria dindiha tano timbuni Niniba ngagoria bu karuhondobi nde talebu mia dege biruli.

<sup>4</sup> Ngode Datagaliwabe ibunime Isaraele dindiha tano maru wiaru ngelowa Yarusaleme tano wali agalime ibunaga loma anda ogoriani bilonaga dabene. Loma anda ogoni Ngode Datagaliwabe ibuni andagaore haabo helonaga ani bini. Isaraele wali agali tigua anda ogoniha pialu Anduane Homogohondo lomaru bu migi bialu helonaga anda ogoni Ngode Datagaliwabe ibunioreme dabo helene. Ani buwa i igiri emene hewangi i mamalinaga dindini hewagola Nabadali hameigini bibahendeoreme Yarusaleme erembira mialu Debidi igini aguaneru kini hearubi erembira mialu bini. <sup>5</sup> Anidagua bialu Isaraele hameigini bibahendemebi i aba aija hamene mbalini

bibahendeme bi pupu wulenaga gime wabini nogo bulumaganaga bigiya mbira mini Bala laga wiago yu tiga bialu ogonihondo bi pupu wialu hene.✧

*Tobidi ibu Ngode Datagaliwabehondo bi lalu loma biaga wiadagua taluwa bialu henego ogo*

<sup>6</sup> Mosesenaga mana lowini ngagome lalu mana ogo wiaabo helo ledagome Ngode Datagaliwabehondo bi lolene horo timbuni tagira ibirangi Isaraele wali agalime Yarusaleme dege piai holene nga lalu lo winigo nga. I damene bu hearu aria mbiraore ini hangume mana ogoni taluwa bialu haruli. Horo bibahendengi ina Yarusaleme puabo halu Ngode Datagaliwabehondo lomaru mialu haruli. I mabuha tomo pigane boga biragobi maruale ngaru pihalu tale buwa pinigo Anduane Homogohondo loma bu migi biruli.✧ <sup>7</sup> Mbirale uruni yalu Yarusaleme puwa loma uruni Arono aguane agali loma binigo mo miagaru Anduane Homogonaga lomabu delaga dabu kago kawareni karuhondo miruli. Ina horo bibahendengi widi lini mbirale maru tale binirubi waini ibabi olibe lini ibanebi ira lini tara tarabi yalu puwa Libai hameigini Yarusalemeni howa Anduane Homogonaga biabe bialu haga bu karu migi biruli. Ani bialu mbirale uruni aria halu mbira talebu bagi henego muni muwa muni uruni yalu turu howa Yarusaleme pialu tomo nolene ngago nalu haruli.✧ <sup>8</sup> Ani bialu halu mbira talebu bagi henego i aguane Deborahanda biawai henedagua yagibano karu migi biruli.

*Tobidi ibu ibuni dindini nahe wahalu pu layangibi ibu agali tigabi dege haabo henego ogo*

<sup>9</sup> Ani bialu i anda howa wali mbira ini aria dege mini Ana berenego dabu biru. Ani bialu iya igini mbira mini Tobaiasa hene. <sup>10-11</sup> Ani bialu henego horo mbiru hayagola ibi i damene bu hearubi wali agali maru hearubi bibahende minu yalu Niniba piya. Ina Niniba pu howa tomo ina Isaraele wali agalime nanagane ale wiaru Isaraele wali agalime ta nabi nai halu hene. Ani biragola i dege nane haruli. Ani berodagoni irane <sup>12</sup> ina Ngode Datagaliwabe daligaore kago mitangi hongoheore bialu ibugua mana lowini ngago mitangi bialu nanaruli. <sup>13</sup> Ani bialu hewagola Ngode Datagaliwabehanda Kini Salamanesenaga bu mo dambola hayagola ibugua i mo turu halu ibu one waneiginirunaga tomo yolo biaganeru handaya howa haru haga holiya dabo helaya. <sup>14</sup> Ani bialu ina Media dindiha pialu kininaga mbirale tara tara ngaru muni yalu yolo bule piruli. Horo mbiru lene Media dindiha tano timbuni Lagese wiagoria pu haru. Tano ogoriani howa muni siliba genda kilogarama handari tebira (300) nuha honowa agali mbira Gabariasa hamene mini Gabaele heago ibugua muni uruni mo wia howa handaya ho helo ibuhondo miru. <sup>15</sup> Salamanese ibu homayagola ibu igini Senageribihanda ibu abanaga henge mialu ibuni kini aribia haya. Ani biyangi agali pagebibi Media dindiha hariga wiaru bibahendeha hai heagola ina dindi ogoniha lone pobe nahe haru.

*Tobidi ibugua agali homene wiaru mo hora halu henego ogo*

<sup>16</sup> Ai Kini Salamanese heangi wali agali i dameneruha genda wiaru inime handaruli. <sup>17</sup> Ti tomo nane garibilo kagola ina ti tomo nelo miruli. Ti aga nabi kagola ininaga aga ti karulelo golo miruli. I hame waneigini mbirago homaragola tingini Niniba tano tagirahayagi mo batagi haragola inime mo yalu puwa baya hangu hora haruli.✧

<sup>18</sup> Senageribi ibu Yuda dindiha wai bu puwa ai ibida Media dindi dai bialu howa harigani Isaraele wali agali bu hearu bo wahai haga bima dai biyiya. Ani biyagola ina homene uruninaga tingini mo yalu pu do howa hora haga biru. Mani Senageribihanda homene tingini biaru ngabe hondole pialu hearia nawiyane hendene.

✧ 1:5: 1 Kin 12.26-32 ✧ 1:6: Man 16.16 ✧ 1:7: Man 14.22-29 ✧ 1:17: Yob 31.16-20, Ais 58.7, Ese 18.7, Md 25.35-36

<sup>19</sup> Mani howa Niniba agali mbirame ohowa kini lamialu ina agali tingini uruni mo hora haya lalu lamini. Abaleore handalu hewaria kinihanda i bo wahole taya bialu hearia handa walia haru. Ani handa walia halu ai gi timbuni biyagola i ibida puwa mbiraha ha do haru. <sup>20</sup> Kini ibugua inaga dabudabu wiwaru damene bibahende mo yai halu ibu andaga yu piyaya. I one Ana i igini Tobaiasala hangu bereneya.

*Tobidi hamene iginime Tobidi biamogo binigo ogo*

<sup>21</sup> Horo karia agima howa Kini Senageribi igini kiralime libu aba homelo bo wahaya. Ani bo wahalu libuni hari mini Ararada weagoha ibida puwa ha do hene. Ani biyagola kini igini mbira mini Esahadono ibu kini aribia hene. Ani howa ibugua igiri mbira i hamene Anaele heago igini mini Ahiga ibugua kininaga gabumane biabe bulene wiarubi gabumanenaga muni wiarubi bibahende handame ho howa haru helo dabo helene. <sup>22</sup> Abale howabi nde Ahiga ibugua kininaga tomo iba wainiru bibahende bi muni dabudabu bibahende bi ibugua handaya ho haga hene. Ai ayubi nde Kini Esahadono ibugua Ahiga ibu biabe ogoni bialu helo helene. Ainde Ahiga ibu i hamene igini howa ibu kini hendore lamiyagola nde kini ibugua i Niniba daibu habe laya.

## Tobidi bayale henego ogo

*(Be 10-12)*

## 2

*Tobidi ibu damenerume tomo dewa dawa manda manda binigo ogo*

<sup>1</sup> Ani laya handala ini andaga lone dai bialu i one Anabi i igini Tobaiasabi heba mandagi harima. Ani daibu hewagola horo timbuni mini Pendigosi layagola tigua inaga tomo timbuni dawa hene. <sup>2</sup> I biruwa handalu hewaria tomo tara tara dewaore wiane handaru. Ani hondowa ina Tobaiasahondo lamialu, Ina mbirali yagibanoore howa ibu ko nabiaga tigabiore mbira taya bialu haru halu ibule pu. Tomo ina haru mandagi namiya haru halu dai bibe. Ina libu ibalibulo hondo biragua.

*Ninibani agali mbira homelo bo wahenego ogo*

<sup>3</sup> Tobaiasa ibu pu piyago ibugua abale ga lama daibialu howa lalu, Aba aba-o ina damene mbira ayu ogoniore homelo bo wahaya. Tigua agali ogoni golowa homayagola ibunaga tingini magedi hamani bai heneya, lene. <sup>4</sup> Anidagua layagola i mogo timbuni lalu tomo emeneorebi mbira nane. Ina heyalu abale puwa agali homene ogoninaga tingini anda emene mbira heagoha mo do haru. <sup>5</sup> Ani mo do halu ini Ngode Datagaliwabenaga deni dodo para nahe bayale holenaga ibaha wayawaya biru. Biai halu tomo nalu berewaria inaga bu miniha genda timbuni biya. Ani biyagola i dugu bialu biruwa agali Anduane Homogonaga bi mana latagi haga Amosohanda <sup>6</sup> wali agali Bedele tanoha hearuhondo mbiwia halu mani tagira ibulebiragonaga bi lowinigo mitangi biru. Amosohanda mbiwia halu lalu, Ina Ngode Datagaliwabhendo bi lolene horo timbuni tagira ibirangi wali agali homenerunaga dara ho holene mo wia aribia helolebero. Tinaga turu holene horo ngemiru mo genda ho holene wia aribia helolebero lalu mbiwia ho wini. <sup>7</sup> Alendo halu ni paliyagola ina puwa homali bialu agali biago mo hora haru. <sup>8</sup> Anigo ainde agali i andaga mandagi handa ainai hearume i hondowa mege bialu lalu, Agali ogoni ibu mbirale ngaru lo manda nabiagabe tobaneda. Bamba ibugua agali homene tingini wiaru mo hora halu hearia tigua ibu bo wahole talima ibaga bialu hayagoni ndobe. Ai ayu ogoni dege bialu kagonida, laga bialu mege bialu hene.

*Tobidinaga de ko henego ogo*



<sup>9</sup> Ainde ina agali homene mbira mo hora harugome ini Ngode Datagaliwabenaga deni dodohe haru. Ani haruyagola horo ogoningi dege mbira ini Ngode Datagaliwabenaga deni dodo nahe holenaga ibame wayawaya biru. Ani bialu mani tagira puwa anda hai heago kawareni mandaha paliru. Mbiraga ogoningi poboyogo timbuni biyagola inaga embone agame dambi nahe paliru. <sup>10</sup> Ega emene maru nde i palirudagoriani anda hai daligahayagi biragayago i manda nabi paliru. Ani palewaria ega biagome ti inaga deni tope hayagola mbirale pele mbirame inaga de pai haya. Ani biyagola ina anogoda heria biamogo bilo pialu hewaria tigua inaga de mo bayale nahaya. Ahiga ibugua mali kirani i handaya ho henego ainde ibu dindi tara Elama dindiha hama piya.\*

### *Tobidi ibu onela lai lenego ogo*

<sup>11</sup> Ahiga ibu peaha i one ibugua aga wali marume muni mule wabialu bedadagua dege wabialu berene. <sup>12</sup> Ibugua aga uruni wabiai halu yalu poragola agalime muni miaga hene. Horo mbirungi ibugua aga dewaore wabialu agali yolo bule wabibe layadago hearia wabu yalu piya. Ani yalu piyagola agali biagome aga tigatiga yolo bulene winidagua yolo bialu ibugua biabe bayale biyadagonaga mo turu halu nogo meme igini hongolo mbira bame minu miniya.

<sup>13</sup> Ani biya handala i one ibu andaga dai biyagola nogo meme igini mbira gu layuane hale haru. Ina bi hongo howa ladaga halu Ana ibuhondo hale halu lalu, i nogo meme ogoni agoha hearia haru ibiribe. Nogo meme ogoni page haru haribe. Ai nogo ogoni anduane karia haru dai bibe. Mbirale page binigo nolene nawiore ndobe, laru.\* <sup>14</sup> Ani larugola Ana ibugua ladai bialu lalu, O ndo tigua inaga aga biago yolo muni karulape ngialu nogo ogoni i mo turu halu bame minu ngiya, laya. Ani layagola ina Ana ibunaga bi ogoni mo henene nahe howa, Nogo ogoni yalu daiore bibe, laru. Ina taga howa keba ha dege bialu inaga dengui darama biya. Ani bu hewagola Anahanda bi hongo howa ihondo lalu, Ayu i agali ogobiore heneda lalu handarogoni. Ina wali agali maru bu karu mitangi halu biamogo bulene manda bu hariligo ainde i biamogo bulenego manda nabiore kegonida, laya.\*

## 3

### *Tobidihanda Anduane Homogohondo bi lenego ogo*

<sup>1</sup> Ani layagola i miniha mogo lalu taga haru. Ina dugu bialu howa Ngode Datagaliwabehondo bi ogodagua laru. <sup>2</sup> Anduane Homogo i tigabiore kegoni. Ina dara holene nawi ngagoria howa dara haabo haga ke. Iname biabe bialu kemaru tiga tigaore mo tale biaga ke.\* <sup>3</sup> Ayu ina ihondo hale halu ihondo bayale bibe laro. Ina ko bialu harugonagabi mana ko damene ina ko biruda lo manda nabi howa bialu harugonagabi pani nangibe laro. I mamaliru tigua mana ko bamba bialu henerunaga ihondo pani nangibe. <sup>4</sup> Heneneore tigua inaga bi mo wahalu inaga bi mana lo ngagohondo mine halu hene. Ani bialu heagola ina waitigime inanaga mbirale wimaru mo kayu yalu inane garabaya mini yu pialu ina aria maru bo wahai halu biya. Ina ina taliatagi halu dindi tara wiaruha purogo lelalu wali agali tara bu hearu ti dege dombeneha heledegoni. Anidagua birigola ainde tigua inahondo gi do lalu mege timbuni bialu kagoni. <sup>5</sup> Halu dewaoreni ina i mamalirume ko biyaru tale bialu ko ina binirubi tale bialu harigoni. Iname ihondo mana bayale nabi harima. Iname inaga bi mo waharima. Anidagua bialu harimagome ina mana inahondo bialu hariruni tigabi bulene wiadagua biri.

<sup>6</sup> Ayu ina ihondo bulene ngago biai habe. Inaga holene ayu ogoni biba helalu inaga tingini dindiha daibilabe. Heneneore i homolene karulapeda. Tigua ihondo bameore mege bialu karunagabi genda tara tara ihondo mo ngialu kagonagabi inaga bu miniha

mo ko henego ko. Anduane Homogo ina bi dege lalu iha genda ngaruni mo wahai habe. Bayale haabobo bu holene ngagoria i holiya helabe. Ainde inaga bi larogo hale hole inaga hale pai nahabe, lalu Tobidihanda Ngode Datagaliwabehondo bi lene.✠

### *Sarahanda genda yu berenego ogo*

<sup>7</sup> Horo ogoningi Media dindiha Egebadana tano wiagoria biabe bia haga wali mbira berenegome Laguele wane Sara bereago mege bini. <sup>8</sup> Ai Sara ibu agali kahalu penego ainde agali uruni Sara heba horo mbiru hangubi mbira mandagi palia nabi heaore dege dama mbira mini Asamodeusu laga heagome agali uruni homelo mbira mbira bo wahaga bialu bo wahai hene. Anidagua bini bereagola wali biabe biaga berearume Sarahondo lalu, Ina agali i agalini biaruni bibahende homelo bo manogo bia haga biriya. I agali kariali uruni baba mandagi paliai harigo yu ainde mbirago ibugua i yamu ko bere nalayiya. <sup>9</sup> Ina bame keba halu ina balu kego irane agibe. I agalini ti homeneyagua nde inibi ti haruru talima polene nga. Iname i waneigini lenego mbira dengui nahondolomaya i aniore bulene nga, lene. <sup>10</sup> Sara ibugua bi gendabi uruni hale howa ibunaga bu miniha genda timbuni halu ibuni pu nogo dalu homolene kaware manda bu berene. Anigo ainde ibunaga mini iriari bialu ibuni lo manda bialu lalu, I aba wane nde mbiraore i hangu birarugo i pu nogo dalu homaruyagua nde i aba agali waheore kagoha dara holene timbuniore mo anda ibilolebada. Anidagua berogola ibu abale homaliha warape holeberoda. Anidagua buledago ai wahaluni manogo bialu homa nabi waholiya, lo manda bini.

### *Sarahanda Ngode Datagaliwabehondo bi lenego ogo*

<sup>11</sup> Sara ibu windo wiagoria kaware heyu howa ibugua Ngode Datagaliwabehondo bi lamialu lalu, Inaga Anduane Homogo Ngode Datagaliwabe inaga mini yaraga holene hameledo. Iname horo bibahendengi inaga mini yaraga haabo halu holomaya. Mbirale bibahende ina wabini ngarumebi karumebi ininaga mini yaraga haabo halu holene nga. <sup>12</sup> Ina i de handaya howa ina i biamogo bibelonaga maliaho bedogoni. <sup>13</sup> Ina bi hangu laregola inaga holene ogoni ereba holene nga. Anidagua biragola bi ko lalu karuni lone hale naholebero. <sup>14</sup> Anduane Homogo-o ina agali baba mana ko mbira nabioire bedogo i manda bide. <sup>15</sup> Ina dindi ogoha garabaya ibu harimago howa ina halu mbira hangubi inaga mini mo nagalone halu mo ko naheorebi i abanaga mini mo ko nahebi biraru. I aba ibunaga paluni ngaru holene ibu waneigini mende nahebi inane dameneore mbira i dabu bulenebi naheore. I aba ibu wane mbiraore i hanguore bedogoni. Agali i agalini karia biaru homai haya. Ainde ibi homolene ngago agi bialu biruliyada. Anigo ainde Anduane Homogo inime inaga holene hamarobi naloleyagua nde ina i dara halu baya hangu handaya ho holene nga. Mege bialu bi ko lalu karuni lone hale holene hame naledo, lene.✠

## **Ngode Datagaliwabehanda dahuliyali mini Labaele ibugua Tobidi Sarala biamogo bilo ibilenego ogo**

(3.16-6.17)

### *Ngode Datagaliwabehanda Tobidi Saralanaga bi hale henego ogo*

<sup>16</sup> Ai horo ogoningi Ngode Datagaliwabehanda dahuliya andaga howa Tobidi Saralanaga bi layago hale hene. <sup>17</sup> Ibugua ani layago hale howa Tobidinaga deni mbirale pele ira hagua aleme dambi heago mo wahole dahuliyali mbira mini Labaele ibilene. Ani bialu Labaele ibugua Tobidi igini Tobaiasa ibu Laguele wane Sara dabu bilonaga bi mo tiga bule ibalu bini. Tobaiasa ibu Sara damene hameigini mbiraore dege howa libu dabu bulene karulape hene. Ani hayagola nde Ngode Datagaliwabe ibugua dahuliyali

Labaelehondo dama mini Asamodeusu Saraha karulo heago taliatagi helo ibilene. Ai ogonongi dege Tobidi ibu tagiraha howa andagaha ibiyagola Sara ibu nde Egebadana tanoni ibuni andaha hobane daligahayagi heagoha howa tagira ibalu hene.✠

## 4

### *Tobidihanda bi bayale Tobaiasa laminigo ogo*

<sup>1</sup> Horo ogonongi dege Tobidinaga mini wálayagola ibunaga muni mbira bamba agali mbira mini Gabaele Media dindiha Lagese tano wiagoria heago minigo mitangi bini. Gabaele ibugua muni ogoni mo ngelowa handaya ho hene. <sup>2</sup> Tobidi ibugua mitangi bialu ina Ngode Datagaliwabhendo lamialu, I homoliya yupe habe, larugoda. Ainde anidagua larugodago i igini Tobaiasa olowa íbu lalu muni ogoninaga te lamuliya lo mitangi bini.

<sup>3-4</sup> Ani mitangi buwa Tobidihanda Tobaiasa olalu íbu lowa ibuhondo lamialu lalu, I igini-o i homaroangi baya hangu hora holene ngadagua hora habe. I ani homedoha í aiyahondo mana bayale hangu bialu haabo habe. Ina ibu baya hangu handaya ho haabo halu ibu homaragola inaga homali kagoria kaware dege hora habe. Ibugua genda tandaga handalu biruwa í taba henenegobi í handaya ho berenegobi embeda nahabe. Ina ibunaga bu miniha turu ho biraabo helo berelalu ibu mo genda nahabe.✠

<sup>5</sup> I igini-o ina horo bibahendengi Anduane Homogo inaga Ngode Datagaliwabe kago embeda nahe habe. Ani bialu mana ko nabiore habe. Ngode Datagaliwabenaga mana ngago pugua nabi habe. Ina mana bayale tigabi ngaru bialu haabo howa mana ko biaga karu baba mandagi nahabe. <sup>6</sup> Mbirale ina bialu kego damene bibahende bayale hai helo ini tigabi holene ngadagua haabo habe. <sup>7</sup> Mbirale bayale ina yu kego aria maru tale bialu wali agali maru Ngode Datagaliwabenaga hariga ngagoria pialu haga karu talebu migi bialu habe. Wali agali maru karuhondo mbirale talebu mialu howa hame nale mibe. Wali agali yagibano karuhondo biamogo bialu miriyagua nde Ngode Datagaliwabehanda inibi biamogo bulebira.✠ <sup>8</sup> Inime mbirale agua wirudabe hondole dagalo manda ala buwa talebu mibe. Dewaore wiriyagua nde dewaore mibe. Emene wiriyagua nde harugo lowa hanuni talebu ki howa mende mibe.✠ <sup>9</sup> Ina ogonidagua biriyagua nde inaga mbirale mo do haradagua berego mani íha genda tagira ibirangi ibugua í biamogo bulebirago ani bibe. <sup>10-11</sup> Mbiralime yagibano karu biamogo bialu kago Ngode Datagaliwabehanda dahuliya andaga kagome mana ogoniore loma baya gibiore ogonida lowa ibu turu haga ka. I homeneru haga humbirini andaga arumahe ngagoha pialu mo ko naholenaga mana urunidagua bialu habe. <sup>12</sup> I igini-o ina wali bedaru baba mana ko nabibe. Ina Ngode Datagaliwabenaga biabe bia haga kemago ai ina wali inane aria bedaru aria dege dabu bibe. Wali tara bedaru aria mbira dabu bulene nawiorego nadabu bibe. I igini-o Noa mitangi bialu Abarahama Aisaga Yagababi mitangi bibe. Agali uruni ti ina mamali bamba hene. Tigua wali tini damene berearu dege dabu bigi bini. Ani biyagola ti waneigini tini Isaraele dindiha helonaga Ngode Datagaliwabehanda waneigini tihondo migi bini.✠ <sup>13</sup> I igini-o ina í damene bu karu gubalini ho habe. I mine halu daliga timbuni hene tingi howa ti wane bedaru mira dabu nabi wa nahabe. Mana ogoniale beregome genda erekuibi ngaru mo yu anda ibuleberegona nabibe. Mana ogoni ogobi nga. Biabe bulene manga ho heagua nde mo ko holenebi hina garibilo holenebi mo yu anda ibagagobiore nga.✠

<sup>14</sup> Agali biabe biaga karu tinaga yolo horo biabe birangi dege abale mibe. Yolo horo mendengi mule ngelo nahabe. Inaga mana bayale tigabi bialu kegoni. Ngode

✠ 3:17: Dag 36.6-9, Tob 6.10-12 ✠ 4:3-4: Har 20.12, Sir 3.16 ✠ 4:7: Man 15.7-8, Min 19.17, Sir 3.30-4.6, 1 Yo 3.17

✠ 4:8: Sir 35.12, 2 Ko 8.11-13 ✠ 4:12: Iba 37.9 ✠ 4:13: Min 16.18

Datagaliwabe andaneha kegola ibugua íhondo yolo bayale biadai bulebira. I igini-o íniore baya hangu haru halu ínaga hame baya hanguore haru hai habe. <sup>15</sup> Mendealime ínihondo mbira bilo hame nalariligo damene ína mende kagohondo nabibe. Í lulu yu holigo waini iba dewa nanabe. Lulu iba naabo holeni nahabe.✧

<sup>16</sup> Wali agali tomo garibilo karu tomo nelu mialu aga nabi karu íninaga aga golo mibe. Mbirale dewa wua hariyagua nde tale bialu maru yagibano karu mibe. Mbiralihondo mbirale talebu mialu howa ínaga bu miniha hamelalu genda nahe howa mibe.

<sup>17</sup> Agali tigabi kago homaragola ína ibu one waneigini homa duguanda bedaria tomo dawa hanalu puwa mibe. Anigo agali ko biaga kago homaragola anidagua bulene nawigo ani nabibe.✧

<sup>18</sup> Agali manda timbuniwi kagohondo ibunaga mini ngago hale hole taga nahe howa hale habe. Ani bialu mbirali mini gigabiwi kagome í biamogo bule bialu kago erembira muleni namibe.

<sup>19</sup> Ína horo bibahendengi Anduane Homogo ínaga Ngode Datagaliwabenaga mini yaraga halu holene nga. Mbirale ína buleberegó damene bibahende bayale helonaga í heba mandagi haabo halu í biamogo bia lalu Ngode Datagaliwabehondo bi laabo habe. Hale ha. Dindi tara tara ngaruha agali bu karu tiha manda bayale tininaga wini mbira nawiore ka. Ogonidagua bidago irane Ngode Datagaliwabe íbuni manda bayalenaga tene ka. Ibunaga hameme mbirale bayaleru mo talebu tahaga biaga hene. Ani bialu maru ibugua turu nahe karu bo wahai habehe ka. Bi mana bayale ína íhondo langigi berogoni baya hangu manda biaabo habe.✧

<sup>20</sup> Tobaiasa-o áyu bi mbira íhondo langerogo, Bamba ína muni timbuni mbira Gabarisa igini Gabaele íbuhondo minigo ibugua ngelowa dindi mini Lagese tano Media dindi ngagoria wu ka. <sup>21</sup> Ani ngogo ainde íni yagibano holobada lowa miniha genda nayi habe. Ína Ngode Datagaliwabenaga bi ledago talialu howa ko bulene ngaruhondo wandialu hariyagua nde ibugua íhondo miniha turu ho kagola í agali mbirale dewawi holebere, lalu Tobidihanda Tobaiasa mana lene.✧

## 5

### *Tigua dindi kaundiaha palenaga mbirale mo manda manda binigo ogo*

<sup>1</sup> Tobaiasahanda ibu abahondo bi ladai bialu lalu, Ína mbirale íhondo bibe lalu langiriruni bibahende biai holebero. <sup>2</sup> Anigo Gabaelehanda muni yu haruago agua mo poliyadabe. I ibu handa nabidogo. Ibugua í abogoda lo manda bialu muni íhondo agua ngulubadabe. Ayubi nde ína Media dindi polene hariga manda nabi kogoni ndobe, lene.

<sup>3</sup> Tobidihanda ladai bialu lalu, Ina beba mbira bamba Gabaele iyame iyanaga mini gili binigo ai ína buda ki binigo ai budini mendego Gabaele ibu yalu mendego íni yu kogoni. Beba Gabaele íbunagago í yu hewane mali pira kira (20) piya. Ai áyu ína agali bayale tigabi hongohe mbira í heba hariga pialu libu haru mandagi dai bulene bayale mbira taya bialu haru dai bule pu. Libugua pialu dai berebigola ibu yolo bimiya. Anigo ai ína muni Gabaelehanda hondo helo miwadago ala mo yalu ogoria dai bule pudaba, lene.

### *Tobaiasahanda Labaele ngola henego ogo*

<sup>4</sup> Ai ibugua agali mbira Media polene hariga manda bi íbula Media polenaga mbirali taya bima pene. Ibu andaga howa wene pole pialu hearia abaleore Labaele ngola hene.✧ <sup>5</sup> Agali ogoni Ngode Datagaliwabehanda íbileneda lowa Tobaiasa ibu manda nabi hene. Ani howa Tobaiasa ibugua Labaelehondo hale halu lalu, Í aniali kebe, lene. Ani layagola Labaelehanda ladai bialu lalu, I Isaraeleali kogo. I í damene dege mbirago í Niniba tanoha howa íbinigo ai biabe taya bero, lene. Ani layagola Tobaiasa ibugua

✧ 4:15: Md 7.12, Lg 6.31 ✧ 4:17: Man 26.14, Sir 12.4-7 ✧ 4:19: Min 3.6, 16.3, SMG 16.13, Lg 1.52-53 ✧ 4:21: Sir 1.16-17, 2.8-9, 1 Ti 6.6-8 ✧ 5:4: Hi 13.2

hale halu lalu, Media dindiha polene hariga í manda bidebe, lene. <sup>6</sup> Ani hale hayagola Labaelehanda ladai bialu lalu. Ina pialu agali í damene Gabaele kago andaga pialu paligi biruli. Ibu andaga Lagese tano mbira ngagoria ka. Egebadana tano timbuni ngagoria howa pialu Lagese tano polenaga handa halu kira paliaga. Lagese tano ogoni hari hombeneni nga, lene.

<sup>7</sup> Ai Tobaiasa ibugua Labaelehondo lamialu lalu, Hambi-o ína í aba lamule porogo ína ogoria hondo habe. Ina iya haru Media dindi mbaliya hame ledogo pialu dai buwa í yolo nguliya, lene. <sup>8</sup> Ani layagola Labaele ibugua lalu, Karulapego ína ogoria kogo ína pialu lu nahe abale dai bibe, lene. <sup>9</sup> Ai Tobaiasa ibugua puwa ibu abahondo lalu, Agali íla Media dindi polene mbira hearia handa walia haru, lene. Ani layagola Tobidihanda ladai bialu lalu, Ina puwa agali ogoni haru halu ibule pu. Ina agali ogoni ibu hameigini emene ai ariadabe dabo hondoliya. Ani bialu ibu agali bayale íla haru hariga mandagi pobehegabe hondoliya haru halu ibule pu, lene.

### *Tobidi Labaelela ngola henego ogo*

Ai Tobaiasa ibugua puwa Labaele olowa lalu, I abahanda í ibu bedaria ibabelo hamelo beda, lene. Labaele ibu andaga tamuha anda ibiyagola Tobidila ibiribe lalu mo bila hene. Ai Labaele ibugua Tobidi hale halu lalu, Í bayale holedabe, lene. Ani layagola Tobidihanda ladai bialu lalu, I agua bialu karulape bayale holeda. Inaga de ndibulo wahene mbirale mbira deme handabe nahe bedogoni ndobe. Ina wali agalime bi larago hale holeberogo ai deme nahondolebero, lene. Ani layagola Labaelehanda ladai bialu lalu, Mbirale ogoninaga mini burugu nalabe. Emene howa Ngode Datagaliwabehanda lone í mo bayale holebira, lene. Ani layagola ai Tobidihanda Labaele lamialu lalu, I igini Tobaiasa ibu Media dindiha polebirago ína ibu hariga mo walia haga bima libu haru mandagi polene karulape kebe. Pialu dai berebigola nde ína í yolo nguliya, lene. Ani hale hayagola Labaelehanda ladai bialu lalu, Ina dewa haluore dindi ogoniha hariga hari bare bare wiagoha pearubi dindi ulini panda panda dangi pale wiaruhabi ibaga biai henego hariga baya hanguore handalu manda biaore kogo ína ibu heba mandagi polene karulape, lene. <sup>10</sup> Ai Tobidihanda hale ha dege bialu lalu, Aiore í nenege-o í nde hameigini timbuni ai aria howa aba igini emene ai aria kebe, lene. <sup>11</sup> Ani layagola Labaele ibugua ladai bialu lalu, Irane aginaga ína mbirale uruni hale howa manda buleberebe, lene. Ani layagola Tobidihanda lalu, Inaga minibi í aba igini emene minibi tiga tiga langibelo hame ledó. <sup>12</sup> Ani layagola Labaelehanda ladai bialu lalu, I Ananaiasa igini Asaria kogoni. Ananaiasa ibu í damene dege mbira ka, lene.

<sup>13</sup> Ani layagola Tobidihanda Labaele lamialu lalu, Ina í andaga ibirigo bayuwa ibiridago ainde í igini-o Ngode Datagaliwabehanda tawe helo. Aiore ínibi í aba aiyabi baya hangu daba hondolenaga hale ha dege buleberogo ína ihondo keba nahabe. Ina handalu koria ai íni damene dege howa damene bayaleha howa ibiridane hendedo. Ananaiasa Nadanala libu Semaia igini kago í manda bido. Ina Ngode Datagaliwabehondo lomabu mule Yarusaleme pole mandagi poromali. Í hameigini tiore wali agali bayaleore howa í damene uruni hongogheore mbira ka. Ainde libu harigani porabigoha Ngode Datagaliwabeibunime libu baya hangu handaya ho helo laro, lene.

<sup>14</sup> Tobidihanda laabo halu lalu, Ina í horo mbira mbira bibahendenaga yolo ngialu libu tomo nalibulobi muni ngia dege bulebero. <sup>15</sup> Ainde í Tobaiasala baya hanguore ibaga bu hariyagua nde yolo muni maru lone tago halu ngulebero, lene. <sup>16</sup> Ani layagola Labaelehanda ladai bialu lalu, Í miniha gi nahabe. Iya harigani pialu howabi dai bialu howabi waitigi mbira ngola nahe bayale dai bulebereba. Harigani áyu iya mo ko holene mbira nawu hariga bayale nga, lene. Ani layagola Tobidihanda ladai bialu lalu, Ai Ngode Datagaliwabe í heba mandagi pelo laro, lene. Ani lowa ibugua Tobaiasa olowa lalu,



Igini-o ai libu pilibulo. Ngode Datagaliwabe ibunaga dahuliyali bayale kagomebi libu baya hanguore haru pialu lone haru halu dai bilo laro, lene. Ai Tobaiasa ibu pole pialu howa ibu aba aiyala nunu lene. Ai Tobidihanda lone lalu, Mo ko holene mbira ngola nahe bayale ibagabu halu dai bilibu, lene.✧

<sup>17</sup> Anigo ai Tobaiasa aiyahanda hongo howa dugu bialu howa lalu, I igini ogoni aguanaga pu larebe. Iya handaya ho holene iya igini mbiraore ogoni hangu ndobe. Iyanaga tomobi maruale iya burupale ngago damene aiwa taya bulubadabe.✧ <sup>18</sup> Ai ina muni biago mo yu dai bulenego hame timbuni lo kego ainde i igini pu ereba hayagua hame nalolebere bada. <sup>19</sup> Ainde Ngode Datagaliwabehanda inahondo mbirale bayale dewaore ngiyaru yu howa turu hagabu holene abida, lene. <sup>20</sup> Ani layagola Tobidihanda ibu onehondo ladai bialu lalu, Inaga bu miniha genda nahe waha. Tobaiasa ibu bayale pialu bayale dege ibagabu halu lone dai biragola inaga deme lone hondoleberego nale waha. <sup>21</sup> Libunaga ina genda holene nawigo miniha genda nahabe. Dahuliyali bayale mbira Tobaiasa heba mandagi biaga bu holebira. Ibu ibaga bu haragoha bayale halu ibu lone dai bulebira. Ibu bayale karulape ayu kagobi dege holebira, lene. Ani layagola ibu dugu nabi berene.✧

## 6

### *Tobaiasahanda wena minigo ogo*

<sup>1</sup> Ai Tobaiasala dahuliyali biagola Media dindi pole pialu Tobaiasanaga biango heagobi ti haru mandagi pene. Libu pu dege bialu alendo ni anda pialu paliyagola libu Iba Taigirisi peago angeni haanda palene. <sup>2</sup> Tobaiasa ibu ge wayawaya bolenaga ibaha daliape hene. Ani biyagola wena timbuni mbirame ibaha howa pogoladaga halu Tobaiasanaga ge mendego nole bini. Ani biyagola Tobaiasa mogolalu ya lene. <sup>3</sup> Ani layagola dahuliyali biagome olowa lalu, Wena ogoni yupe halu peloleni hongo howa minu yania habe, lene. Ani layago hale howa Tobaiasahanda wena biago minu yania howa iba angeni gililo yu irigi hene.

<sup>4</sup> Ani biyagola dahuliyali biagome Tobaiasahondo lamialu, Wena ogoninaga buni gubalini lilinibi baya hangu dugu wiai habe. Wena buni gubalini lilini uruni marasini bayaleorego iya pialu yalu dai bibiyago baya hangu mo ngelabe. Tini maru maru bu karu dugu wahai habe, lene. <sup>5</sup> Ani layagola Tobaiasahanda dahuliyali biagome bibe layadagua bini. Ani biai halu wena biago hirini. Hiruwa dagane mende libuni nalu mende harigani nole Tobaiasa ibugua nuha henene. Libu pu dege bialu Media dindi anda pene. <sup>6</sup> Tobaiasa ibugua dahuliyali biagohondo hale halu lalu, I hambu Asaria-o ai wena bunibi gubalini lilinibi dugu hanaribagome warago agialego mo dabi holebirabe, lene.

<sup>7</sup> Ani hale hayagola dahuliyali biagome ladai bialu lalu, Wena buni gubalini lilinibi irani delaregola dama wali agali mo ko haga karu ibida piai holebira. Wali agali mo ko halu henego yu wahalu ibida piai howa mani lone wali agaliha hole dai nabulebira. <sup>8</sup> Ai wena buni dugu yidegonime mbirali de ko halu deha hagua paleaguabi mbiraleme de andane halu nde handabe nahe heagua nde ina mbirali de kohe bedagonaga de wena buni ogonime domalu mbiraleme de dambu kago pulo waharegola de lone bayale halu handabehe holebira, lene.

### *Tobaiasa Labaelela libu Egebadana tano polenaga harigani pialu henego ogo*

<sup>9</sup> Tobaiasa Labaelela Media dindini anda pialu ai Egebadana tano ngago kaware dege anda pole pene. <sup>10</sup> Ani puwa Labaele ibugua lalu, I hamene Tobaiasa-o, lene. Ani layagola Tobaiasahanda ladai bialu lalu, Ayu mbiraga haragola iya agali i damene Laguele andaga palibiya. Agali ogoni ibu wane mbira mini Sara beda.

✧ 5:16: Pig 24.7, 24.40 ✧ 5:17: Pig 24.7, Har 23.20, Iba 91.11 ✧ 5:21: Tob 6.16, 10.6

<sup>11</sup>Ini ibu dameneore kegoni. Inanaga mamali mana ngagome wali ogoni dabu bulene karulape íore kegoni. Ani bialu ina mamali mana mende ngagome wandari abanaga paluni ngago damene bibahende mo yai holene karulape ini dege kegoni. <sup>12</sup>Wandari ogoni ibu baya taraore mbirani ibu gi nahaga mbira beda. Ibu ababi agali bayale dege mbira ka. Ani kago ainde áyu mbiraga ina wandari abala bi lalu ina ibu wane ogoni dabu bulene karulapebe lalu hale holiya. Ina manda bu handalu koria ibugua wandari ogoni íore ngiragola dabu bibelo. Ai Lagese howa dai berebangi dabu bialu tomo timbuniore dawalu tomo namiya. Laguele ibugua wandari ogoni agali mendeme damu ibiragola e nalolebira. Ani bialu ibugua Sara í dabu bibelo ngulebira. Ibu wane ogoni agali mende dabu bilo miyagua Mosesehanda mana lowini ngagome lalu wandari aba homelo bo waholene nga leda. Í hangu ibu wane ogoni dabu bulene karulape howaibunaga paluni ngago karu lolenebi karulapeore kego manda bida. Ani bidago ai ina bi larogo baya hangu hale habe. Áyu mbiraga ina Sara dabu bibelogo Laguele iyame bi lo tiga bialu mo tiga biai holobaya. Ani bialu Lagese dai berebangi Sara haru halu dai bibiya, lene.

<sup>13</sup>Ani layagola Tobaiasahanda Labaelehondo ladai bialu lalu, I hamene Asaria-o Sara ogoninaga te maru agali marume layane hale haru. Tigua lalu agali karia bibahendeme wali ogoni dabu bigi binigo ainde agali uruni ti mbiraga mbira mbirani tini dabu bigi biyadangi wandari ogoni baba mandagi palia nabi howa wandari ibu tamuha wene anda pialu hearia agali uruni homaga biniya. <sup>14</sup>Te tigua layane hale harugo agua laya. Dama ko mbirame agali uruni bo wahaga biaga laya. Dama ogonime Sara bo wanahe agali ibu padagoa pole kaware porago bo wahaga, laya. Ani layago ainde í aba aiyala waneigini mende nahe í hangu kogo ainde í giba. I homaruyagua nde í aba aiyalame dara timbuni howa libubi homaragola mo hora holene libu igini mende nahe, lene.

<sup>15</sup>Ani layagola dahuliyali biagome lalu, Ainde í abahanda bi galone lawai hayago embeda haribe. Í wali mbira ini dameneore bedago dabu bulene nga laya. Ai bi o larogo baya hangu hale habe. Dama ko ogoninaga ina gi nahabe. Í Sara dabu bule pu dege bia. Áyu mbiraga Laguelehanda Sara í dabu bibelo ngulebira. <sup>16</sup>Ai ina Saraibunaga tamu hobane kagoa anda pialu howa wena gubalini lilinibi hanarigo yalu anda puwa irani delaregola dalu hagua biragola tumutumu biragome anda tamu hobane ogoniha danguame holebira. ✧ <sup>17</sup>Dama ibu tumutumu birago ngu halu ibida puabo halu Sara bedaria lone dai nabulebira. Anigo ai libu mandagi palia nabi dege biruwa pigane libugua dahuliya andaganaga Anduane Homogo kagome libu dara halu baya hangu handaya ho haabo helo ibuhondo bi ala lalibu. ✧

Hale harene. Gi nahabe. Ngode Datagaliwabehanda dindi pigane wabiangi howa Sara ibu í one berelo manda buwa berelene. Ina dama Sara ibuha kago taliatagi halu Sara í dindiha haru halu polebere. Sara libunaga waneigini dewa haragola libunaga waneiginiruhondo turu howa miniha dungulo holeberebi. Mini dege dindi nahabe, lene.

Ani layagola Tobaiasa ibugua Labaelehanda bi layago baya hanguore hale hai hene. Ai Tobaiasa ibu aba dameneha Sara libu hameigini mbiraore kago manda bu hene. Ani manda buwaibunaga miniha Sara gubalini timbuniore ho howa ibugua Sara dabu bulene hamelo hene.

## **Tobaiasa Sarala libu turu ho henego ogo**

*(Be 7-9)*

### **7**

*Tobaiasa Labaelela Laguele andaga anda penego ogo*

<sup>1</sup> Ai Tobaiasa dahuliyali Labaelela Egebadana tano anda pialu howa Tobaiasahanda lalu, I hamene Asaria-o ina i abaleore Laguele andaga haru pobe, lene. Ani lalu dahuliyali biagome ibu Laguele andaga abale haru piyagola Laguele ibuni andahane tagirayagi pabe bu mabu biago tagira haneni berearia hendene. Labaele Tobaiasala libugua bi ala lalu, I bayale bedebe, lene. Ani layagola Laguelehanda ladai bialu lalu, Libu bayuwa ibiribidago ai andaga tamuha anda ibidaba. I andaga ibiribidago bayuwa ibiribida, lene. Ani lalu Laguele ibugua ogolabo ibu andaga haru anda puwa ibu one Edena olene. <sup>2</sup> Ibugua Edenahondo lalu, De handa. Igiri ogo ibu dengui i damene Tobidi handalehedago be ani ndodabe, lene. <sup>3</sup> Ani layagola Edenahanda libuhondo hale halu lalu, Libu ani howa ibiribibe, lene. Ani layagola Tobaiasa Labaelela libugua ladai bialu lalu, Iya Isaraeleali Nabadali hameigini aria ibu henego. Ai áyu iya Asiria dindiha tano timbuni Niniba tano ngagoria minu yu henego ogoreni howa ibiriba lene. <sup>4</sup> Ani layagola Edenahanda libuhondo hale halu lalu, Ina damene Tobidi mbira kago libu manda bidabibe, lene. Ani layagola libugua lalu, E iya manda bidaba, lene. Ani layagola wali biagome hale halu lalu, Ibu bayale karulape kabe be agua kabe, lene. <sup>5</sup> Ani hale hayagola libugua ladai bialu lalu, Ibu bayale karulape ka, lene. Ani lowa Tobaiasahanda lalu, Tobidi ibu i aba, lene.

<sup>6</sup> Ani layago hale howa Laguele ibu mogo lalu ibunaga deha de iba abale pugulopebe bini. Ibugua turu timbuni halu Tobaiasa nunu lene. ✧ <sup>7</sup> Ani buwa ibugua lalu, I igini-o Ngode Datagaliwabehanda i mo bayale helo. I aba ibu agali tigabini bayaleore mbira ka, lene. Anigo ai Tobidi ibu de kohe beda layago hale howa ibugua hale halu lalu, Irane agime agali tigabi bayale ogonibigo ibugua wali agalihondo mana bayale tigabi hangu biaabo halu haga kagonaga denaga hongo ereba hene howa de handabe nahe haruada, lene. Ani lowa ibugua Tobaiasa yu hurubale bialu dugu bini. <sup>8</sup> Ani biyagola ibu one Edenabi ibu wane Sarabi ti haru Tobidi mitangi bialu dugu biai hene. Ani bialu Laguele ibugua nogo sibi wangabe mbira balu tomo timbuniore dawa manda manda bini. Ai Tobaiasa Labaelela libu wayawaya bai halu tomo nole manda manda bu biruwa Tobaiasa ibugua Labaelehondo lalu, I hamene Asaria-o Sara i dabu buliyanaga ina Laguele angi hale holeberebe, lene. <sup>9</sup> Bi ogoni hale howa Laguele ibugua Tobaiasahondo lamialu lalu, <sup>10</sup> Tomo nalu iba ala nabe. Ani bialu áyu alendo dege turu holebere. Ina Sara mulene agali mende nahe Sara dabu bulene i damene aba igini mbiraore íore kegoni ndobe. Anigo ai ina ihondo tigatigaore laro. <sup>11</sup> Abale i wane ogoni agali kariali mini. Tibi nde ina hameigini mbiraore dege. Anigo ai ti dabu bigi binidangiore mbiraga Sara tamuha pole wene anda pugu biyagola abale homaga bini. Anigo uruni wahalu Ngode Datagaliwabe ibunime libu biamogo bulebirago i áyu tomo ibaru na, lene.

<sup>12</sup> Anigo ai Tobaiasahanda ladai bialu lalu, I tomobi ibabi ala nane bedoore i Sara i nguleore labe, lene. Ani layagola nde Laguele ibugua karulapedalo manda bialu lalu, Heneneore larogo ina ibu i ngulebero. Mosesenaga maname bibe ledadagua i ngulebero. Dahuliya andaganaga Ngode Datagaliwabe ibunime dabu bulene ogo manda mandabu heneda. Ai áyu Sara ibu i one berelo libu mandagi halibu. Ai Sara ibu áyu howa inaga biraragoni manibi biraabo helo laro. Dahuliya andaganaga Anduane Homogo kago ibunime áyu mbiraga libu handaya ho holebira. Ani bialu libu dara halu biamogo bilo laro, lene. ✧

### *Tobaiasa ibu Sara dabu binigo ogo*

<sup>13</sup> Laguele ibugua ibu wane olene. Ibiyagola Laguelehanda ibu wane gini gi yalu Tobaiasa berearia puwa Anduane Homogohanda libu mo bayale helonaga bi la halu lalu, Wandari ogoni gini yamia. Ai Mosesenaga mana lowini ngadagua wandari ogoni ibu i oneore berelo. Emene howa nde i aba libu dalu haru pialu harigani

baya hanguore haru pobe. Libu haru bayale howa turu hagabu haabo halibulonaga Ngode Datagaliwabehanda libu biamogo bulebira, lene. <sup>14</sup> Laguelehanda ibu onehondo lalu, Beba mbira libu one agaliniore lalu dabu bini lalu gilibu wulenaga mo yalu íbu lene. Edenahanda beba biago mo yalu ibiyagola Laguele ibugua libu dabu binigo habo nalolenenaga bi beba ogoriani gili bialu lalu, Ina Mosesenaga mana ngagome ledadagua Sara Tobaiasala libu dabu bilo merogoni, lalu gilibu wini. <sup>15</sup> Tigua uruni biai howa tomo nalu berene. <sup>16</sup> Mani Laguelehanda ibu one olowa lalu, Tamu hobane mbira mo manda manda bu ngelowa Sara ibu tamu ogoniha haru pobe, lene. <sup>17</sup> Ani laya handala Edena ibugua tamu hobane mbira mo manda manda bu ngelowa Sara ogoniha haru puwa berelene. Ani berelowa Edenahanda ibu wane dara timbuniore howa dugu bini. Mani ibunaga deha de iba ibiyago domalu howa lalu, <sup>18</sup> Sara-o miniha genda nahabe. Áyu dahuliya andaga haga Ngode Datagaliwabehanda í mo turu halu í miniha daraho bere nalolebira. Ani bulebirago ínaga mo palia holene karulo birabe, lene. Ani lalu Edena ibu tamu hobane wahalu tagira pene.

## 8

### *Tobaiasahanda Saraha dama heago bo taliatagi henego ogo*

<sup>1</sup> Ai tomo naiho biruwa paluengi hayagola wandari aba aiyalame igiri biago paluene anda hobane heagoha haru anda pene. <sup>2</sup> Ai Tobaiasa ibugua bi mbira Labaelehanda layago baya hangu manda biaabo ho howa ibugua wena bunibi lilini biagobi nuha henene tagu yalu puwa ira delaga wiagoria delene. <sup>3</sup> Ani delayagola dama biagome wena buni lilini biago dalu hagua tumutumumu biyago ngu halu ibida tagira pialu dindi abene unurahayagi Iyibi dindi wiagoha yagalalu pene. Labaelehanda haruru talima pugupugu bialu minu yania howa dama biago pu hongoheme gi geni dariba ho ngelene.✧

### *Tobaiasahanda Ngode Datagaliwabehondo bi lenego ogo*

<sup>4</sup> Ai anda tamu hobane biagoha mbirali nabere Sara Tobaiasala libu hangu biruwa panga paya tagi hene. Ani biruwa Tobaiasa ibugua ibu onehondo lalu, Yamali-o ai Anduane Homogoibunime iya baya hangu biamogo bialu handaya ho helo ibuhondo bi labiya heya, lene. <sup>5</sup> Ani layagola Sara ibu heyalu libugua Ngode Datagaliwabehondo libu baya hangu handaya ho howa mamage habe lalu bi lene. Tobaiasahanda Ngode Datagaliwabehondo bi lalu, Ina mamalirunaga Ngode Datagaliwabe-o iyame ínaga mini yaraga holene karulape. Mbirale bibahende dindini ngarume karumebi dahuliya andagaha ngarume karumebi ínaga mini dege yaraga holene nga.✧ <sup>6</sup> Ina Adama wabu helowa ibuni hangu holene nakarulape heagola wali Iba Adama ibu one berelo Adamala mandagi ibagabu helobi ibu biamogo bilobi Iba Adamahondo miriya. Ani mirigola dindini wali agali bu karu bibahendenaga mamali libu hene. Inime lalu, Agali ogo ibuni hangu helo nakarulapedago ai ibuni ale dege mbira ibula mandagi helonaga wabule manda bimiya, lariya.✧ <sup>7</sup> Anduane Homogo-o áyu Sara ibu dabu biaga mana tigatiga ngagoria howa ina ibu dabu berogoni. Ina ibu de hondowa ínaga miniha dimagoli hayagola bame haru pu ndo bero. Ani berogo ainde inime iya dara halu iya dindini lu howa mandagiore birudagua hagahaga bulubaya biamogo bibe, lene. <sup>8</sup> Ani lowa libu harume lalu, Aniore bilo, lene. Ani lalu libu mandagi palialu egabi lene.

### *Sara aba aiyalame gi henego ogo*

<sup>9</sup> Mbiraga ogoningi dege Laguele ibugua agali biabe biaga agali palearu barila howa tihondo lalu, Agali hora holene homali uli mbira abale tombole pudaba, lene. <sup>10</sup> Ani layagola Laguele ibugua irane mitangi bialu ai Tobaiasabi homa dege biragola wali

✧ 8:3: Md 12.43, Ab 20.2 ✧ 8:5: IT 3 ✧ 8:6: Pig 2.18-22

agali maru karume ibuhondo oba halu mege buligonaga ani bini. <sup>11</sup> Agali biaru tigua homali manda manda bu wiagola Laguele ibu anda tamuha dai buwa ibu onehondo lalu, <sup>12</sup> Ai Tobaiasa homayabe nahomebe tobahedago ina biabe biaga wali mbirame de hondo pu bi la. Tobaiasa ibu homayayagua nde wali agali tara bu karu nahendedaha abale hora hamija, lene. <sup>13</sup> Ani laya handala Edenahanda wali biabe biaga mbirame lamu hale hedo yalu de hondo pu lene. Ani laya handala wali ogonime tamu hobane biagoha anda puwa handalu hearia libu palebiria hendene. <sup>14</sup> Wali biago ibugua handalu dai buwa Laguele Edenala lamialu lalu, Tobaiasa bayale pada, lene.

### *Laguelehanda Anduane Homogohondo bi lenego ogo*

<sup>15</sup> Ani layago hale howa Laguelehanda dahuliya andagaha haga Ngode Datagali-wabenaga mini yaraga halu lalu, Ngode Datagaliwabe-o bibahendengi iname inaga mini yaraga halu haabo holene karulapeore kamagoni. Inaga wali agalirume inaga mini yaraga halu haabo holomaya, lene. <sup>16</sup> Ina inaga mini yaraga harogo irane ina inaga bu habaneha turu holene tolatagi heledegonaga. Ina ina dara timbuni harigola mbirale inaha anda ibulilo giho hemago naibiya. <sup>17</sup> Anduane Homogo-o iname ihondo bi turubi tigabiore langulene karulape kama. Ani larogo irane inime wandari igiri ogolabo dara ho haridagonaga laro. Libu aba aiyala waneigini mende nahe libu mbira mbira hangu hene. Ainde libu dindi ogoria homa nabi kebiangi turu ho ibaga bu helobi miniha mo palia holene karulo helobi ina libu dara ho haabo habe, lene. <sup>18</sup> Gao nale dege wiangi Laguelehanda agali biabe biaga biaruhondo lalu, Homa uli biago lone abale mogo bidaba, lene.

### *Dabu bulenaga manda manda binigo ogo*

<sup>19</sup> Laguelehanda ibu onehondo lamialu, Mberedi dewaore karulapelo hirabe, lene. Ani lamialu ibuni nogo bulumaga wangabe kira sibi wangabe maria lowa ibunaga biabe biaga agali hearuhondo, Bo bodobaga bialu dabu biragonaga tomo timbuni nole dawa manda manda bilimu, lene. <sup>20</sup> Ibugua Tobaiasa olowa ibu lalu ibugua gi dolalu heneneore bulego laro lowa Tobaiasa abale pu nale Sarere kira helo helene. Ani helowa ibugua Tobaiasahondo lamialu lalu, I tomo nalu ibabi nalu ila habiya. Ina Sara ibu abale agali pendaruha genda timbuniore yu berenego ayu ibu mo turu holebero. <sup>21</sup> Ani buwa mani inaga mbirale ngogo damene hanuni tale buki howa mende yalu i aba karia dai bibelo. Ai Edena iya homedebagola inaga paluni maru ngago i hai habelo. Iyame i gubalini timbuniore ho kabago ini manda bidego. Ai ayu i iya iginiore Sara ibu iya waneore bedagobi dege kegoni. I igini-o i gi nahabe, lalu Laguelehanda lene.

## 9

### *Labaele ibu Lagese tano penego ogo*

<sup>1</sup> Mani Tobaiasahanda Labaele olalu ibu lowa lalu, <sup>2</sup> Asaria-o ina agali biabe biaga maria haru ha nogo kamele kira haru ha bialu Lagese tano Gabaelenaga andaga pobe. Puwa ina Gabaele ibuhondo beba ogo bamba Tobidi libuni mandagi howa gilibu winiyago mo walia halu muni ogoni mo yalu dai bibe. Ani bialu Gabaele ibubi nde dabu bialu tomo timbuni nalu kamagobi nelo mba lalu haru halu ibabe. <sup>3</sup> I manda bidegoni i aba Tobidi ibu i ibinidago horo ogodaguaore ibagabu halu dai bulebira lo manda bialu horo daga lalu ka. <sup>4</sup> Ina horo mbira bolangua halu dai biruyagua nde ibunaga miniha mogolo holebira. Ani bialu bi ogodagua bulene lalu bi honghe Laguele ibugua layagobi i manda bide. Ina bi ogoni mo wahalu ibunaga miniha genda yu nahelolebero, lene.

<sup>5</sup> Ani laya handala ai Labaele halu agali mariali biaru ti pialu Lagese tano anda pialu Gabaele andaga anda pu berene. Ani biruwa Labaele ibugua muninaga beba

✧ 8:20: Pig 24.54-55



yayago Gabaele mini Tobaiasabi wali áyu dege dabu biya lalu Gabaele ibu dabu bialu tomo timbu dawalu kamago namiya ibabe laya lalu lo wini. Ani laya handala Gabaele ibugua abale puwa muni wiyadagoaha handalu hearia muni biago abale nuha dagalo winidagobiore wiaria mo yalu puwa nuha honowa nogo kamele ere kunini mo paga hene. <sup>6</sup> Ani bialu egerebagiore gao layagola ti abale dabu bialu tomo narago mandagi nole manda bialu abale anda pole pene. Labaele Gabaelela Laguele andaga anda pialu hebira Tobaiasa tomo nalu berearia hendene. Ai Tobaiasahanda abale heyuwa Gabaelehondo, Ibirida, lalu mo bila hene. Ani mo bila hayagola Gabaele ibugua Tobaiasahanda bi layago ladai bialu hearia Gabaele de iba abale ibiyagola ibugua Tobaiasahondo lalu, Í agali bayalebi tigabiorebi howa í aba ibuni aleoredago. Ainde Anduane Homogo dahuliya andagaha haga kago ibugua íbi í onebi libu haru mo bayale helo. Ani bialu ibugua í imane wandari aba aiyá kirabali mo bayale helo laro. Ainde Anduane Homogohanda í hameigini Tobaiasa dengui hondoliyanaga í abale homa nabi helayagonaga ina Ngode Datagaliwabenaga mini yaraga haro. Ibutaga dengui ibu abanaga denguiore handaleheda, lene.

## 10

### *Ana Tobidila miniha genda yu berenego ogo*

<sup>1</sup> Ai Tobaiasa dai nabiaore dege Tobidi ibugua Tobaiasa ibu Lagese pialu dai bulene horo ogodaguaore piya lowa daga lalu hene. Ani lalu howa ibunaga miniha ibu igini biago pialu dai bulene horo piai hayabe toba howa mitangi tangi bini. Ani biyagola Tobidihanda ibu onehondo lamialu lalu, <sup>2</sup> Ainde mbirale mbirame iya igini emene mo luma hayagola ibu abale dai nabiaruabe tobaneda. Ainde Gabaele ibuni homayagola agali mendeme Tobaiasahondo muni namiyagola ka bada, lene. <sup>3</sup> Ani layagola Tobidi ibu tiniha mini burugu lama irigi hene. <sup>4</sup> Ani biyagola Anahanda lalu, í igini homayada. í mandaore bido, lene. Ani lowa ibugua Tobaiasa dara howa kiabu dugu bialu lalu, <sup>5</sup> í iginiore-o í inaga gubalini haabo heneore ndobe. Irane aginaga í yupe halu pu laruyabe, lene.

<sup>6</sup> Ani layagola Tobidihanda ibuhondo lamialu lalu, Tobaiasa ibu bayale karulape holebirago dugu nabi waha, lene. Libu abale dai bulenego mbirale mbirame mo luma haragola kabada laro. Agali libu piribigo ibu ina hameigini mbiraoreni agali bayaleni hongohela piribigo í manda bide. Í mogolalu mini burugu nale waha. Ina manda bialu koria Tobaiasa áyu ogoni dai bialu harigani ibira lo manda bido, lene.\*

<sup>7</sup> Ani layagola wali biagome ladai bialu lalu, Wahalu waha. í dugu bialu biruliya í ani heyu harene. Ina í mohondo nahabe. í igini homaore biyada, lene. Ani bialu howa horo bibahendengi Ana ibu egerebagiore gao laga biragola puwa hariga Tobaiasa piyagoria pu haga biaga. Ani hondo haga dege bialu alendo halu ni anda pugu bini. Ibu tomo nane dege haabo heane alendo dai bigi bialu ibu igininaga dugu bima daibu palialu egerebagi gao laragola heyalu pugu bigi biaga. Ibu u emeneorebi napale haabo haga hene.

### *Tobaiasa Labaelela Egebadana tano wahalu penego ogo*

<sup>8</sup> Ai Laguelehanda ibu wane Sarahondo buleore lowa gi dolalu dabu bininaga tomo timbuniore dawale lalu bi lenego tomo ogoni nalu hemine sarere kira piya. Ani piyagola ainde Tobaiasa ibugua Laguele berearia puwa ibuhondo hale halu lalu, Ainde ini dalu dai buliya ina karulapego pu loleberebe. Ainde í aba aiyalame mini burugu timbuniore lalu libugua í dengui lone nahondoleda lowa genda timbuni yu biraruago. Ainde Laguele-o í aba aiyala karia dai bia la. Ai ina ibalu abale íhondo ibunaga de kirabali ndibulo wahalu ibunibi nde agali waheore beda lalu í langirugoni, lene. Ani layagola

\* 10:6: Tob 5.21

Laguelehanda ladai bialu lalu. Igini-o ina agali maru bi yalu í aba karia puwa í karulape ka lalu lama pudaba loliya ai í inila holene karulape, lene.✧

<sup>9</sup> Ani layagola Tobaiasahanda hondo howa lalu, Ani ndo j anidagua nabuleorego ainde j aba karia dai bia larene, lene.

<sup>10</sup> Ani layagola Laguele ibugua emene hondo ha nabi Sara Tobaiasa ibu mini. Ani bialu ibunaga mbirale bibahende hanuni talebu ki howa mendehayagi Tobaiasa mialu bini. Wali agali garabaya biabe ale biaga hearubi nogo bulumagabi sibi hearubi dongi hearubi kamele hearubi yári tara tara wiarubi muni wiarubi hanuni talebu ki howa mendeha Tobaiasa mini. <sup>11</sup> Laguelehanda Tobaiasa nunu lowa ibuhondo bi bayale lamialu lalu, I igini-o ainde pobe. Dahuliya andaganaga Ngode Datagaliwabe ibunime Sara libu baya hangu mamage howa handaya ho holebirago libu bayale pialu anda pilibu. Ainde libunaga waneigini harago ini de ngui hondolene hamelo kogoni, lene.✧

<sup>12</sup> Ani lowa Laguele ibugua Sarahondo lamialu lalu, Áyu í agalinila pamia. Puwa ibu aba aiyá andaga kagoha biraabo habe. Í aiyá iya í aba aiyála hama ibinigo áyu kabagonidagua dege igiri ibu aba aiyála í aba aiyála ho birabe. Libugua ihondo bi bayale dege langialu lene hale halu biraabo howa homalu waholene hameledo, lalu Laguelehanda ibu wane Sarahondo lamini. Ibugua libuhondo, Pilibu, lalu bi lai howa, Ai libu pudaba, lene.

Ai Edena ibugua Tobaiasahondo lalu, Tobaiasa íore j igini bayale. Anduane Homogohanda í baya hangu ini andaga haru dai bulebira. Ani bialu ibi nde í waneigini harago de hondoliya Anduane Homogohanda baya hangu handaya ho helo laro. Ai Anduane Homogo ibugua inaga bi larogo hale holebira. I waneore í baya hangu handaya ho habelo ngero. Aiore nde halu mbira hanguorebi ibunaga miniha mo ko holene ale mbira nabibe. Áyu libu harigani bayale pilibu. Áyu Sara ibu í one bedagoni. I í aiyá biraro. Ina haga haga bu kamaha bayale howa turu ho haabo hamíya Ngode Datagaliwabehondo bi lolebero, lene. Ani lai howa Edenahanda ogolabo nunu lalu, Ai pudaba, lene.

## 11

<sup>1</sup> Ai Tobaiasa ibu pialu howa ibunaga bu miniha turu halu pene. Ibugua Anduane Homogo ibu dindi ngagonagabi dahuliya andaganagabi Ngode Datagaliwabeore howa bibahende karubi ngarubinaga kiniore kagonaga mini yaraga hama pene. Ibu ibaga bialu tagira pu hayagoha bibahende bayale dege hayagonaga ibugua Ngode Datagaliwabehondo kaj lene. Ibugua Laguele ibu onelanaga mini yaraga halu haabo halu libu homara handala wahole lalu bi lo wini.

### *Tobaiasa ibuni andaga dai binigo ogo*

Tobaiasa halu piyaru ti dindi Kaserini Niniba tano kaware dege ngelowa wiagoria anda pialu howa <sup>2</sup> Labaelehanda lalu, Tobaiasa iya tagira pialu piribangi í aba ogobi berelalu piribalo ini manda bide. <sup>3</sup> Ai í one ibu mani ibilo iyame mo bamba halu puwa anda tamuru mo tiga bialu hole polene karulapeda. <sup>4</sup> Ani bialu wena buni dugu hanarigo yalu polene embeda holeni, lene. Ani lalu libugua mo bamba halu piribigola Tobaiasanaga biango biagobi ti haru dege pene.

<sup>5</sup> Horo ogoniangi Ana ibu lone puwa de ibu igini piyago dai birabe hondole handa amuhu berene. <sup>6</sup> Ani biruwa ai deme Tobaiasa ibiyago hondowa abaleore ibugua Tobidi olowa lalu, De handa. Iya igini ibalu ibu nenege libu haru piribigobi ibira, lene.

<sup>7</sup> Ai libu Tobidi heagoria kaware naibi wene ibalu heaore Labaele ibugua Tobaiasa lamialu lalu, Í aba ibu de lone hondolebira. <sup>8</sup> Ina wena buni dugu hanarigo ibunaga de kirabalini palada para haradagua bibe. Wena buni ogoninaga marasinime mbirale

labolabo aleme de buyi kago lagalope haragola ína gime mo waholebere. Ani beregola í aba ibu lone de hondolebira, lene. <sup>9</sup> Ana ibugua gerai pialu ibu igini gi kirabalime yu hubi lowa lalu, Áyu í igini lone dai beregonidago ainde inaga miniha mo palia holene karulo biralu nde homoliya, lene. Ani lalu howa ibuha turu timbuni hayagome de iba deha howa pora bini.✠

### *Tobidinaga de lone bayale henego ogo*

<sup>10</sup> Ainde Tobidi ibu heyalu hendore tagiraha pabe bu mabu biagonaga panga haraba wiagoria tagira pene. <sup>11</sup> Ani heagola ai Tobaiasahanda wena buni biago gime tagu yalu Tobidi heagoria pene. Ibugua ibu abanaga deha pulaba halu ibu aba bayuwa helo mo tigabu helene. Ani heagola ibu abahondo lalu, Aba-o í gi nahabe, lene. <sup>12-13</sup> Ani lowa Tobaiasa ibugua marasini biago ibu aba deha hai howa mani mbirale pele deha para heago lagalo wahene.✠ <sup>14</sup> Ani biyagola Tobidi ibugua Tobaiasa payani ibunaga gi kirabali paga howa turu timbuni halu dugu bini. Ibugua hongo howa lalu, I igini í áyu lone de hendedogonida. Í inaga denaga wá holene hale de kegoni. Áyu iname Ngode Datagaliwabenaga mini yaraga holene nga. Iname ibunaga mini timbuni mini lene ka lamíya. Ibugua dara holene timbuni ngagome inahondo baya dege biaabo holebira.

<sup>15</sup> Ibunime inaga de mo ko holene ogoni iha ibilenego ainde áyu lone i igini Tobaiasa de hendedogoni, lene. Ainde Tobaiasanaga bu miniha turu holene tolaire hayagola ibuni andaga tamuha anda pialu howa Ngode Datagaliwabehondo iba gana hongo howa lalu ibunaga mini yaraga halu iba gana lamalama anda pene. Ani bialu ibu piyagoha mbirale bayale tagira bigi biyago bibahende ibu aba lamiai hene. Ibugua lalu, Ina muni hangu ndo mo yido. Wali i one haru halu bido. Ibu mini Sara. Ibu Laguele wane. Ibu wene harigani ibalu haruago ai emene howa ogoria anda ibulebira, lene.

### *Sara anda ibinigo ogo*

<sup>16</sup> Ai Tobidi ibu tanonaga pabe heago panga harabani ibu igini Tobaiasa one ngolaho pole pene. Ai ibu bu miniha kiau lalu yagalo howa ibugua Ngode Datagaliwabenaga mini yaraga hene. Ai Niniba wali agalime Tobidi hondowa ti mogo timbuni lalu ibu mbiralime hariga mo walia halu gini yalu piaga mbira napiyagola mogolene. <sup>17</sup> Anigo Ngode Datagaliwabehanda ibu dara halu ibunaga de mo bayale hayago wali agali bibahende lamialu ibugua Ngode Datagaliwabenaga mini yaraga halu hene.

Ai Tobidihanda Sara ngola howa ibiridago bayaleore lowa lalu, I wane-o bayaleore ibirida. Ngode Datagaliwabe ibunime í ina hemagoha haru ibiyadagonaga ibunaga mini yaraga hamíya. Ai Ngode Datagaliwabehanda í aba mo turu halu inibi í igini Tobaiasabi libu haru mo bayale helo. Ai ina anda hamíya andaga anda íbu, lene. Horo ogoni Yuda wali agali bibahende Niniba dindiha hearu tinaga turu holene horo tagira ibiniangi. <sup>18</sup> Agali kirali Tobidi damene Ahiga Nadabala libu ibalu Tobidi heba mandagi turu hamaga hole ibini.

## 12

### *Dahuliyali Labaelehandu Tobidi Tobaiasalahondo bi laminigo ogo*

<sup>1</sup> Ai tigua dabu bialu tomo nalu berenego nai howa Tobidihanda Tobaiasa olalu íbu lowa ibuhondo lalu, I igini-o igiri íla hariga mba lalu piribigo ibu yolo mulenego embeda nahabe. Ani bialu mbirale marubi ibunaga yolo meregoria paga halu mulene karulape nga, lene.

<sup>2</sup> Ani layagola Tobaiasahanda hale halu lalu, Aba-o ina yolo ogoni agira muliya hame ledebe. Ina mbirale inane yalu ibirimaru hanuni mo talebu ki howa mendehayagi ibu yolo buliya karulapeda. <sup>3</sup> Ibugua i haru hayagola i bayale halu dai biru. Ibugua Gabaele

andaga muni mo pialu yu daibu ngiya. Ibugua dege i oneha dama heago waratagi halu inaga de mo bayale haya. Anidagua biyago ainde ina ibu yolo agira mibehebe, lene.

<sup>4</sup>Tobidihanda ladai bialu lalu, Ina manda biridago tigabioedago. Ai mbiraleibunime mo yalu ibiyadago aria talebu ki howa halu mendego ibu mibe, lene.

<sup>5</sup>Ai Tobaiasahanda Labaele olalu ibu lowa lalu, Mbirale i biamogo bialu mo yalu ibiribago hanuni talebu ki howa halu mendego i mo yabelo. Mbirale uruni inaga yolo mo yabelo. Ani bialu ini andaga dai beregoha Ngode Datagaliwabehanda i harigani baya hangu handaya ho helo laro, lene.

<sup>6</sup>Ani layagola Labaele ibugua Tobidi Tobaiasala haru pubagi howa libuhondo lamialu lalu, Ai libugua Ngode Datagaliwabenaga mini yaraga halu ibuhondo iba ganaru lalu halibulo. Ibugua libuhondo biabe bayale biyaru wali agali hale helo latagi halu halibu, lalu lamini. Libugua anidagua berebigola wali agali bibahendeme Ngode Datagaliwabehanda biyadaru manda biai holebira. Libugua Ngode Datagaliwabenaga mini yaraga halu haabo halibu, lalu lene.

<sup>7</sup>Heneneore mbira wali agalime kininaga mini wiado kago latagi habe nahe ka. Anigo dindi bibahendehe wali agali bu karume Ngode Datagaliwabhondo kai laluibunaga mini yaraga helo ibugua tihondo biabe timbuni biyaru latagi halu holene nga.✧

Mbirale ko ngagome i warape nahelo ina mana bayale ngago hangu bialu haabo holene nga.

<sup>8</sup>Ngode Datagaliwabhondo bi bayuwa lolenebi ibunaga hame ngago taluwa bialu holenebi wali agali yagibano karu baya hangu biamogo bulenebi mana uruni ngagome agali homogo mbirale dewawi howa mana ko ngaru hangu mo tene howa bialu haga karu bolangua hene nga. Mbirali yagibano kago muni miagagome mbirali ngolo dewaore ibu andaga mo ngoai howa haga kago bolangua hene ka.✧<sup>9</sup>Mendeali kagohondo mbirale dewa talebu miaga kago ibuha homolene anda naibilo hagira bianda haga nga. Anidagua beregome iha ko ngagobi domo wahai holebira. Wali agali bibahendeore yagibano biamogo biaga kago ibu bayale haga.✧<sup>10</sup>Anigo maru mana ko bialu mana bayale ndo tara tara ngaru bialu haga kagome ibuniha ko holene haru anda ibaga nga.

<sup>11</sup>Ina libuhondo bi mbira aguadagua laro. Wali agalime kininaga mini wiado kago latagi habe nahe ka. Anigo iname Ngode Datagaliwabhanda biyaru dindi bibahendehe hale hayogo lelo latagi halu holene nga laru. Ai ayu ina mbirale mbira yado nahe libuhondo bi heneneorego langiai holebero. <sup>12</sup>Tobidi inabi Sarahandabi Ngode Datagaliwabhondo bi laribigo inime mo yalu Ngode Datagaliwabenaga wanakuihayagi pu haru. Ani bialu mende homayagola ina hora halu hariruni mbira mbiranaga bi dibudibu ogoale bialu ka lalu abaleore mo yalu pugu biruli.✧<sup>13</sup>Horo ogonigi ina tomo nane wahalu agali homene biago hora hole pirigola Ngode Datagaliwabeibunime ihondo i bahondole pu layagola ibiru. <sup>14</sup>Anigo ai ayu ibugua ihondo i lone mo bayale hole pu laya. Ani bialu dama i aruni Saraha heagobi taliatagi halu bule pu laya. <sup>15</sup>Ai i mini Labaele kogoni. I dahuliyali karia Ngode Datagaliwabenaga wanakuiha haabo howa horo bibahendengi Ngode Datagaliwabenaga biabe bule manda manda bu haabo haga karu aria mbirago i kogoni, lene.✧

<sup>16</sup>Tobidi Tobaiasala libu bi ogoni hale howa libu mogo timbuni lalu libu dindini bulu palialu palipe hene. Libu gi timbuni howa duru lalu hene. <sup>17</sup>Anigo Labaelehandalibuhondo lalu, Libu gi nahalibu. Bayale holene ngago libu heba haabo helo. Libugua Ngode Datagaliwabenaga mini yaraga haga ngebigo wanahe haabo halibu. <sup>18</sup>Ngode Datagaliwabeibuninaga hame leagome i ti biamogo bule ibinigo kogoni. I ininaga hameme ibini ndo ko. Ai libu horo bibahendengi dindi ogoriani howa Ngode Datagaliwabhondo iba gana lalu ibuhondo kai laabo halu halibu. <sup>19</sup>Libugua handalu hebira i

✧ 12:7: 1 Pi 3.13 ✧ 12:8: Sir 29.8-13 ✧ 12:9: Min 11.4, Dan 4.27, Sir 3.30 ✧ 12:12: Yob 33.23-24, Ab 10.4, Mo 8.3-4 ✧ 12:15: Seg 4.10, Lg 1.19

tomo nara lo manda biribi. I tomo nane bame nene tingi haru. <sup>20</sup> Horo bibahendengi libu dindini kebingi howa Ngode Datagaliwabenaga mini yaraga halu ibuhondo kaj lulu haabo halibu. Ai áyu i Ngode Datagaliwabe i pu layago ibuni karia dai bero. Ai mbirale libuha biyaru bibahendenaga bi te gili bilibu, lene.

<sup>21</sup> Ani lalu Labaelehanda libu helalu ibu pene. Ani piyagola Tobidi Tobaiasala libugua Labaele lone nahendene. <sup>22</sup> Ani biyagola libugua Ngode Datagaliwabhondo iba gana lalu ibunaga mini yaraga hene. Ani bialu libugua Labaele libu heba howa biabe timbuniore libuhondo bialu hayagonaga Ngode Datagaliwabhondo kaj timbuni lene.

## **Tobidi ibu bayaleore henego ogo**

*(Be 13-14)*

### **13**

*Tobidihanda iba gana lalu Ngode Datagaliwabenaga mini yaraga henego ogo*

<sup>1</sup> Ai Tobidihanda Ngode Datagaliwabhondo iba gana ogo lalu, Ngode Datagaliwabe haluhe kagonaga mini yaraga haabo holene nga. Ibugua bibahende baya hanguore handaya ho haga kagoni.

<sup>2</sup> Ibugua ina minu ba nde balu mani nde ina dara haga ka.

Ibugua ina homeneru dindiha pelowa.

Ani bialu mani homaliha howa ina lone mo heya haya.

Henene o mbirali ibunaga giha howa pora bialu napolebira.

<sup>3</sup> Isaraele wali agali kemiru-o tí wali agali tara dege dombeneha kemingi howa tígua Ngode Datagaliwabhondo kaj lulu holene nga.

Ngode Datagaliwabhanda ti wali agali tara bu hearu ti dege dombeneha garabaya helayago.

<sup>4</sup> Ani bialu dindi ogonihabi nde ibunaga hongo timbuni mo walia hayagoni.✧

Iname Ngode Datagaliwabenaga mini yaraga hama.

Ibu Anduane Homogoore howa inanaga abaore kagoni.

Ani kago manda bialu wali agali bibahendeme

ibu inanaga Ngode Datagaliwabeore karulape haabo haga kago heneneore hale halu manda bulene nga.

<sup>5</sup> Heneneore ibugua tí tandaga ngiyago

irane tígua ko tara tara wiaru bialu harimigonaga ngiya.

Anigo genda uruni waha mani ibugua tí wali agali tara dege dombeneha hemiria ibugua tí lone taya bialu haru dai bialu tininaga dindini helolebira.

<sup>6</sup> Tígua Ngode Datagaliwabhondo bu mini mo beregedalu

ibunaga bi ledago talialu kemigola

ibugua tí kemigoha handa dai bialu tí biamogo bulebira.

Tígua ibunaga dengui nahandalimulo ha do kagola

ibunaga dengui lone nahondoleberemi.

Ngode Datagaliwabhanda tihondo mbirale biyaru bibahende mo embeda nahalimu.

Tínaga bu minime Ngode Datagaliwabhondo kaj laabo halu halimu.

Ngode Datagaliwabe ibunaga mini tigabiore ngago mo yaraga halu halimu.

Kini haluhe haabo haga kagonaga mini yaraga halu halimu.

I dindi taraha garabaya ha kogonigoyu

ainde ina ibuhondo kaj lulu haabo holene hameledo.

✧ 13:4: Ais 63.16, Yar 3.4, SMG 14.3, Sir 23.1-4, Md 6.9



Wali agali mana ko biaga karunihondo

Ngode Datagaliwabenaga hongo taraore ngago lamulebero.

Mana ko hangu mo tene howa bialu kemiru wahi halu

Ngode Datagaliwabehanda hameledaru bialu haabo halimu.

Anidagua beremigola ibugua tihondo miniha lone gedaore halu tí dara holebira.

<sup>7</sup>Ina inaga Ngode Datagaliwabe kagonaga mini yaraga halu

ibunaga hongo timbuni gibiore ngagonaga turu taraore ho ko.

Dahuliya andaganaga kini-o inaga hongo holene bibahendeme inaga mini yaraga halu ko.

<sup>8</sup>Wali agali bibahendeme ibunaga hongo timbuni gibiore kago

mendeali hale helo latagi halu Yarusalemeni howa Ngode Datagaliwabenaga ibagana la holene nga.

<sup>9</sup>Yarusaleme-o í Ngode Datagaliwabenaga tanoore ngegoni.

Wali agali íha karume mana ko dewaore bialu hayagonaga Ngode Datagaliwabehanda í pani ngulebira.

Anigo wali agali mana bayale biaga karu Ngode Datagaliwabehanda tí dara holebira.✧

<sup>10</sup>Ani biaga kago manda bialu

Ngode Datagaliwabhondo kají lalu harimiyagua ogoni bayale.

Kini haluhe haabo haga kagonaga mini yaraga halu holene nga.

Tigua inaga bi lolene anda lone bia haragola

inaga wali agali tigua lone turu timbuniore holebira.

Anduane Homogohanda inaga wali agali garabaya karu lone mo turu holebira.

Wali agali áyu tandaga timbuni nalu karu

ibugua tí luore handaya ho haabo holebira.

<sup>11</sup>Yarusaleme inaga wá timbuniore dindi ngaru bibahendeha piai haragola

wali agali dindi kaundiaha karu bibahende íha ibai holebira.

Wali agali hameigini tara tara padaru bibahendeme ibalu

Anduane Homogo inaga Ngode Datagaliwabe kagonaga mini yaraga hole ibalu

tigua Ngode Datagaliwabe ibu dahuliya andaga kini kagonaga lomaru yalu ibulebira.

Íha hariga pedaru bibahendeha wali agalime Ngode Datagaliwabhondo turu halu ibagana lagalaga bulebira.

Ani bialu inaga mini daliga mini lene wiaabo holebirago irane

Ngode Datagaliwabehanda í ibuninaga tanoore ngelo dabayagome ani wulebere.

<sup>12</sup>Maru íhondo bi ko laga karubi í hangedope halu bope haga karubi

inaga wai pabe bo gialaga karubi

inaga anda pabe nenení mamageali mamage haga anda daliga kago bo gialope haga bu karubi

inaga pabe andaneha anda hearu bo giallo delaga bu karubi

bibahende Ngode Datagaliwabehanda tini pani mialu mo ko holebira.

Anigo agali maru í mo bayale haga karu

tí Ngode Datagaliwabehanda mo turu halu haabo helolebira.

<sup>13</sup>Yarusaleme inaga wali agali tigabi bu karuhondo turuore holene nga.

Mani tigua garabaya wahalu dai buwa inaga pabe andaneha íbu ngoai howa

Anduane Homogo haluhe haabo haga kagonaga mini yaraga halu holebira.

<sup>14</sup>Wali agali í gubalini haga karu ti tinaga bu miniha turu ho howa bayale holebirago

irane í bayale kego hondowa ani bulebira.

✧ 13:9: Ais 60.1-22, Mo 21.9-22.5

Wali agali í genda yu kego hondowa dara timbuni ho karu  
 ti mani í de hondowa turu holebira.  
 Ani bialu ína turu holeneme bayale holene mo yu anda ibalu bayale wiaabobo bu  
 wulebira.

<sup>15</sup> Ina Ngode Datagaliwabe ibu kini timbuniore kagonaga mini yaraga halu kogoni.

<sup>16</sup> Tigua Yarusaleme lone arema biadai biragola  
 Ngode Datagaliwabe ibu dalu wiabobo bu wulebira.

Yarusaleme-o ínaga waneiginirume ínaga yári bayaleore bidego de hondowa  
 dahuliya andaganaga kiniore kagonaga mini yaraga halu kangí  
 ína turu timbuni holebero.

Tigua ege tole bayaleore ira yuni dongomabi hari mindini handalehebi ngarume  
 ínaga pangaru wabialu ínaga wai paberu bibahende ege tole muni timbunime  
 miaga ngarume biai holebira.

Tigua wai pabe nenení mamageali handa ainai bu haga anda ngolome bulebira.

Tigua ngolo bayaleoreru mo yuwa ínaga wai pabe bu mabu bulebira.

<sup>17</sup> Tigua ege tole baya daramabimebi ege tole ngiringaralerumebi hariga wabulebira.

<sup>18</sup> Ínaga panga bibahendeni turu holenenaga iba gana laruane hale holebira.

Ani bialu ínaga anda bu karuha howa wali agalime ibagana ogodagua lolebira.

Agua agua, lalu baya gibiore Isaraelenaga Ngode Datagaliwabenaga mini yaraga holene  
 nga.

Yarusaleme-o Ngode Datagaliwabehanda ínaga wali agali mo bayale haragola

tiguaibunaga mini baya buruguleore ngago yaraga halu haabobo holebira,

lalu Tobidihanda iba gana ogoni lene.

Bi ogoriani howa Tobidihanda iba gana lalu Ngode Datagaliwabenaga mini yaraga  
 halu layago lamaro bini.

## 14

### *Tobidihanda mana halu mbira lone lenego ogo*

<sup>1-2</sup> Ai Tobidinaga de ko halu mbirale handabi nahe hayangi ibu mali pira waragariani  
 kira (62) hene. Mani de lone bayale hayagola ibu luore hene. Ani howa ibugua abale  
 biaga wiyadagua yagibano hearuhondo mbirale dewaore talebu migi bialu haabo hene.  
 Ani bialu howa ibugua Ngode Datagaliwabenaga mini yaraga halu mbirale bayale  
 biyaru damene latagi halu hene. Ani bialu howa ibu mali handari mbirani kira (112)  
 halu homene. Tiguaibunaga tingini Ninibani hora halu tigua Tobidi dara timbuni howa  
 dugu bini.

<sup>3</sup> Tobidi ibu mani dege homole lo biruwa ibu igini Tobaiasa olowa paluni bi lamialu  
 lalu, <sup>4</sup> I igini-o áyu ogoni í waneigini bu karuni bibahende haru halu Media dindi pobe.  
 Ani larogoni irane Ngode Datagaliwabenaga bi mana latagi haga agali Nahumuhanda  
 pani nolene koore mbira tagira ibulebira lalu bamba mbiwia henego áyu tano ogoha  
 tagira ibule biarugo í pobe laro. Bamba Isaraele dindiha agali Ngode Datagali-  
 wabenaga bi mana latagi haga hearume mbiwia halu mo ko holene taraore Niniba  
 tanohabi Asiria dindihabi tagira ibulebira lenego heneneore tagira ibulebira. Inaga  
 miniha manda bu bedogome mbirale mbira bulebira lalu Ngode Datagaliwabehanda  
 lenego damene bibahende tagira ibulebira lo winidangiore ibulebira lo manda bido.  
 Inaga miniha manda bidogome bi bibahende Ngode Datagaliwabe ibugua langiyaru  
 damene heneneore tagira ibulebira. Ngode Datagaliwabe ibugua buleore lalu bi lo  
 winigo wanahagaore ka. Ani biagago ainde í Asiria dindibi Babilonobi yu wahalu Media  
 dindiha hole pobelohameledo.\*

\* 14:4: Nah 1.2-3.19

Waitigime ina aria Yuda wali agali Isaraele dindiha karu talima pugu pugu bialu minuwa dindi taraha garabaya minu yalu polebira. Isaraele dindi bibahende labu wiai holebira. Samariabi Yarusalemebi wali agali naheore labu dege wulebira. Ngode Datagaliwabenaga anda kago bo heda haragola do podope haragola tigi mbira hanguni bame dindi dege wulebira. <sup>5</sup> Anigo mani howa Ngode Datagaliwabehandaibunaga wali agali lone dara ho dai bialu Isaraele dindiha lone haru dai bulebira. Ani haru dai biragola tigua Ngode Datagaliwabenaga anda ogoni biadai bulebiragoyu ainde anda baya pigane bini ala hayagobi ndo holebira. Anda ogoni emene tigi mbira hangu holenenaga bulebira. Mani Ngode Datagaliwabehanda horo mbira pongo bo ngago ogoni tagira ibirangi Isaraele wali agali bibahende garabaya golalu lone dai buwa Yarusaleme lone mo heya haragola Yarusaleme tano baya taraore ala wiagagobi wulebira. Ani bialu Isaraele agali Ngode Datagaliwabenaga bi mana latagi haga hearume mbiwia halu lo winidagua tigua Ngode Datagaliwabenaga anda lone bulebira.

<sup>6</sup> Horo ogoningi dindi bibahende ngaruha wali agali bibahende bu karu Ngode Datagaliwabe karia dai bulebira. Tigua dama tara tararuhondo bi pupu karula nape wiaga ngaru wahai halu Ngode Datagaliwabe ibunihondo bi lole dai bulebira. <sup>7</sup> Wali agali dindi bibahende bu karume Ngode Datagaliwabe haluhe haabo haga kago ibunihondo bi lai halu mana bayale tigabi Ngode Datagaliwabeibunime hame ledago bialu haabo holebira. Horo ogoningi Ngode Datagaliwabehanda Isaraele wali agaliibunaga mana baya hangu talialu hayaruhondo tinaga holene bayale mope holebira. Ibugua ti Yarusalemeni mo ngoai haragola ti Abarahamanaga dindi ngagoria howa ti bayale haabo holebira. Wali agali tinaga miniha Ngode Datagaliwabe gubalini ho haga karu ti turu ho holebira. Anigo wali agali mana ko biaga karubi wali agali ko karubi ibu deni nahelo kaundiaha talia pelolebira. <sup>8</sup> I waneigini bu kemiru ti ina bi larogo baya hangu hale halimu. Tigua tinaga bu minimeore Ngode Datagaliwabehondo bi lalu howa tigua beremiru bibahendeibunime hame ledadagua dege bialu haabo halimu. <sup>9</sup> Tigua tinaga waneigini karuhondo mana tigabi bayale bulene ngago baya hangu lawai halu halimu. Ogodagua lawai halimu. Bibahendengi wali agali mbirale dewa nawi karu biamogo biaabo halu Ngode Datagaliwabenaga mini yaraga halu haabo halimu.

<sup>10</sup> I igini Tobaiasa íore Niniba tano yu wahalu puore bibe. Íore dindi ogoha nahabe laro. Ainde í aiyá inaga homali kagoria dege kaware hora halu horo ogongiore heyalu pobe larogoni. Mbi mbira hangubi tano ogoria napalibe. Ko tara tarabi mana lehe binigobi timbuniore dindi ogoha toleda. Wali agali dindi ogoha bu karume mana ko tinime bialu kagonaga taga nahaga ka. Mana lehe mbira Nadaba ibugua ibu aba hamene heyogone Ahigahondo biyago mitangi bibe. Ahiga ibuniore Nadaba anda halu agali helo baya hangu mondo bu wiagola mani agali howa Nadabahanda Ahiga homelo bo waholene manda biya. Ani biyagola Ahiga ibu ibida pora bialu puwa homali mbira wiagoha birado haya. Anigo ai Ngode Datagaliwabehanda Nadaba ibugua Ahigahondo bule paraho wiyagonaga pani nelo mini. Ainde Ahiga ibu wá holene wiagoha lone dai biyagola Nadaba ibu arumaha haabobo halu ho ereba hayago irane ibugua mana ko tara tara bialu hayagome biya. Nadabahanda Ahiga uli pelo uli tombo wiyagoyu ibu uli nape habo lalu pubagi hayada. Ibugua uli wandialu pubagi hayago irane ibugua yagibano karuhondo mbirale ngaru dewaore talebu migi biaga henegome bini. Anigo Nadaba ibuniibunaga uli tombo wiyagoha pilaya.

<sup>11</sup> Anigo ai áyu inaga waneigini kemiru tigua agali yagibano biamogo biaga bayale biago ibuha mini bayale tigabi wua howa mendeali biamogo biaga henedago handadaba. Anigo agali mende kago mo ko holene manda bu kagome ibuni hariga homagane hariga ngagoria pialu hagane ka. Ai áyu inaga hongo holene nawi ereba hai hayada, lene.

Ani layagola tigua Tobidi dagiani hendore mo palia hayagola ibu ogoningi abale homene. Homayagola tigua dara halu dugu timbuni bini. <sup>12</sup> Emene howa nde Tobaiasa

ajya homayagola tigua ibu agalini homali wiagoria dege mandagi kaware hora hene. Hora halu Tobaiasabi ibu onebi heyalu Media dindiha Egebadana tano wiagoha pole pene. Puwa Tobaiasa ibu imane Laguelele baba hene. <sup>13</sup> Ani howa Tobaiasahanda ibu imane Edena Laguelele baya hangu handaya ho hene. Libu waheore bereagola ibugua baya hanguore biamogo biaga hene. Ani howa libu homayagola ibugua Egebadana dindiha hora hene. Ani bialu Laguelenaga mbirale paluni wiaru bibahende abale Tobidinaga karulayadagua Tobaiasa ibuni dege karulai hene.

<sup>14</sup> Ainde Tobaiasa ibu ha dege bialu wahe halu ibunaga mali handari mbirani pira mbirani karia (117) hayagola homene. <sup>15</sup> Tobaiasa ibu mali luore howa waitigime tano timbuni Niniba wiago bo gialahole bialu bo heda haya layane te hale hene. Ani bialu Medianaga Kini Siasarese heagome Niniba wali agali tini garabaya biai haya layane hale hene. Ai Ngode Datagaliwabehanda Asiria wali agali Niniba wali agalibi mo ko halu pani nelo miyagonagada Tobaiasa ibu turu halu Ngode Datagaliwabenaga mini yaraga hene. Tobaiasahanda Anduane Homogo Ngode Datagaliwabenaga mini yaraga halu haabo haga hene. Ai heneneore ogoni. Habo nalolene bi lo winigonaga mbuga wabuni halu mende.

## **Yudidi**

### **Mbuga ogoha gilibu ngarunaga nemandi ogo**

Yudidi mbuga ogoha howa te gilibu ngagome Yuda wali agali bibahende bo wahai halu amo lelebiyagobi waitigi giha howa ti bo wahai holebiyagobi nga. Ani bule biyagola wali bayale mbira mini Yudidi berenego ibugua hongo howaore Ngode Datagaliwabenaga hame ngago talialu biraabo haga berene. Ai ogoni ibugua mini mbiraore hongo howa wialu Ngode Datagaliwabe ibugua ibunaga wali agali dara halu ti heba mandagi howa waitigi giha haru dai bulebira lo manda bu berene. Ani biruwa Yudidi ibugua waitigi bope halu wayali holiya hongo ngibe lalu Ngode Datagaliwabehondo bi lene.

Mbuga ogoha howa te ledagome wali agali lawai halu leda.

### **Yuda wali agali homai holene kaware winigo**

*(Be 1.1-7.32)*

*Nebugadenesahanda Kini Abagasadala wai binigo ogo*

<sup>1</sup> Nebugadenesa ibu kini henego mali homberia (12) Asiria dindiha Niniba tano timbuni wiagoria heagola Kini Abagasada ibugua tano timbuni Egebadana wiagoria howa Midia dindi handaya ho hene. <sup>2</sup> Kini Abagasadahanda wai pabe timbuni Egebadana tano bu mabu bini. Tigua ege tole podaganeme hariha ege tole hearu podaga bini. Ege tole podenego timbuninaga manda mida tebira wialu leneha manda mida mbirani bolanguahe podo wini. Ege pabe ogoni bima irigi halu daliganaga mida manda pira tebirani duria (35) wialu pabe tohenaga manda mida pira kirani duria (25) wini. <sup>3</sup> Pabe nenenami ami agali mamage howa handa ainai holene emene daligabi gimbu bima irigi howa helaga bini. Anda daliga ami bu helaga biyago andane dindiha tanonaga wai pabe panga timbuni dugua haga bini. Mamagealinaga anda daliga ogoninaga manda mida pira duria (50) wialu manda arane timbuninaga manda mida pira tebira (30) wini. <sup>4</sup> Ai tanoha panga haraba daliganaga manda mida pira tebirani duria (35) wialu arane yangalenaga ami agali mandagi tidiyu tagira pelo manda buwa arane timbuni manda mida pira kira (20) wini.

<sup>5</sup> Ai horo ogoningsi Asirianaga Kini Nebugadenesa ibugua Abagasadala dindi tigabi Lagese tanonaga gibuni wiagoria wai bini. <sup>6</sup> Wali agali dewaore hari bare wiagoha paliaga hearuhabi iba tebira Taigirisi Yuberedisi Hidasabeseru ange ange paliaga hearubi dindi tigabi Kini Ariogo Elama dindi haru haga heago ibugua handaya ho haga hearubi tigua Kini Abagasada biamogo bialu wai bini. Ami agali dewaore Kaladea ami agali pelemule ibu ngoai hene.

<sup>7</sup> Ani biyagola Nebugadenesa Asiria wali agalinaga kini ibugua Pesia dindiha hearubi wali agali amu ni paliragoha hearubi tihondo bi lo pelene. Bi ogoni dindi Silisiaha hearubi Damasagasaha hearubi Lebanono dindiha hearubi Lebanono mendehayagi hearubi iba solowara timbuni bedago ange ange paluyu pedarubi <sup>8</sup> Hari Kamelo kago andaneha paluyu pedarubi Gileada dindiha palarubi Galili Daligaha palarubi Yaserili dindi tigabi wiagoha palarubi ti bibahendehondo bi lo pelai hene. <sup>9</sup> Ani bialu Samaria dindiha hearubi wali agali maru Yodana iba doma mendehayagi hearubi unura puabo halu Yarusalemeha hearubi Bedaniha hearubi Kelesaha hearubi Kadeseha hearubi ti bibahendehondo bi mbira ogobi dege dege lo pelai hene. Ani bialu Iyibi iba pedagoria bi puiri halu unura Tabanese tano ngagoria puabo halu Lamese ngagoria bolangua halu Gesono dindi hobane ngagoria anda pene. <sup>10</sup> Ani bialu bi wai-o ogoni pu dege bialu Tanisi tano tagira pialu Membisi tano ngago bolangua halu Iyibi dindiha bibahende piai halu Idiobia dindila tubari ngagoria wai-o bolangua hene. <sup>11</sup> Anigo ai wali agali



dindi uruniha palearume ti bi ogoni hale halu Kini Nebugadenesa biamogo bialu wai bu pu nabi wahai hene. Tigua mitangi bu handalu hemiria ibuni hangume wai bialu wayali naholebirago manda bialu tigua ibuhondo gi nahe howa wai nape wahai ho hene. Ani manda bu howa agali bi yalu wai-o ibiyaru mo ko howa mo ngubia halu bameore daibilaga bini.

<sup>12</sup> Anidagua biyayagola Nebugadenesa ibugua wali agali dindi uruniha hearuhondo keba ho hene. Ibugua lalu, I agali timbuniore kogo heneneore ininaga minini howaore larogo ina wali agali dindi uruniha karu pani nelu mialu ininaga hongome bo wahai holebero. Ina Silisia dindi bibahendeni karu bo wahai halu Damasagasa dindiha karubi Siria dindiha karubi bo wahai halu Moaba dindihabi Amono dindiha karubi Yuda dindiha karubi Iyibi dindiha karubi bibahende bo wahai hama puabo halu iba solowara kira bedago labo angeni bama tagira polebero, lene.

<sup>13</sup> Ai Nebugadenesa ibu mali pira mbirani karia (17) kini henego ai mali ogoninaga ibugua kini Abagasadala wai bini. Wai bialu ibugua kini Abagasada heba ibunaga ami agali nogo hosini biruwa wai biaga hearubi maru garo nogo hosime gililagani howa wai biaga hearubi bibahende bope halu bo wahaiore hene. <sup>14</sup> Nebugadenesahanda Kini Abagasada dindiha tano wiaru damene bibahende ibu karulaiore hene. Ani bialu tano timbuni Egebadana wiagoria anda puwa ami agali mamage haga anda daliga bima irigi hene heagoha ti anda pialu karulai hene. Ani bialu mbirale magedi hamani wiaru page mo yai halu bini. Ani bialu ibugua tano ogoni mo ko halu bo giala holebiyagola tano biago ko hai halu mo ngubia ho ngelene. <sup>15</sup> Nebugadenesahanda Kini Abagasada Lagese tano kawareni hari bare mbira wiagoha warahana howa minu yania hene. Minuyu howa ibunaga yandare luni yiagome Abagasada nogoba howa bo home lalu anidagua biyagome Abagasadanaga hongo bo ereba hai halu bini. <sup>16</sup> Ani biai halu Nebugadenesa halu ibunaga ami agali dewaore biaru heba tano timbuni Niniba dai bini. Dai bu howa tigua turu halu tomo timbuni dawa nadege bialu horo handari mbirani pira kira (120) hene.

## 2

### *Nebugadenesa ibugua wai bule manda bu henego ogo*

<sup>1</sup> Asiria dindiha Nebugadenesa ibu kini henego mali nguirani tebira (18) hayagola mali ogoninaga ege mbira horo pira kirani kira (22) layagola bi dibudibu mbira kini andagaha howa lo yu tagira ibiyagome lalu, Ibunaga bi mbira buleore lowa lowialu dindi maruha bi mo wahalu ibu biamogo bule naibiyaru pani mialu bo wahai holebero, lo wini. <sup>2</sup> Ani lalu kini ibugua ami agali haguane bu hearubi haru bamba haga hearubi agali haguane maru hearubi bibahende olalu, Bi lo manda bimija ibalimu, lene. Ani lowa ibu ngoai heagola ibugua dindi maruha ibunaga bi lo yalu pudaba laga biyaru mo wahayagohondo pani nelu mulenaga miniha yadoho henego latagi hene. <sup>3</sup> Tigua bi lo mbira halu lalu, Agali ibunaga bi hale nahayaru ti bibahende homelai holene nga, lalu lo mbira hene.

<sup>4</sup> Bi lo mbira hai howa agali haguane mbira ami agali bibahende handaya ho howa haru haga mini Holoberenese ibuni kini biamogo biaga hapara hene heago olene. Ani lowa kini ibugua lalu, <sup>5</sup> I dindi bibahendeha kini maru karu bolangua haihe kini timbuniore kogo ina larogo. Ina ayu ogoni puwa agali wai bayale biaga mandabi karu hondo pu. Ami agali damene karu daosini dege handari mbirani pira kira (120,000) haru halu ami agali nogo hosini biruwa wai biagane daosini homberia (12,000) haru halu ibabe. <sup>6</sup> Ai wali agali amu ni paliragoha haga hearu tigua ina bi larugo mo wahayago ainde tigua dindi uruni bibahendeha piaiore halimu. <sup>7</sup> Puwa tigua ini andaneha holeore lalu manane dindi ogoniha howa iba mbira hambu wia halu dindi himu mbira dugu wia hadaba labe. Ani larogoni irane inaga miniha ti baba tandaga timbuni ho kogo ti bo wahai hole pole berogodane laro. Ani bialu inaga ami agali karume tinaga

dindi bibahende hengeda hai halu mbirale mbira dindi uruniha nawilo hilo wahai holeberogodane laro. <sup>8</sup> Wali agali bo waharagola tingini dindi ulini ngagoha wu toľalu iba emene pedarubi timbuni pedarubi bibahendeore homa tinginime payadai biaiore holebira. <sup>9</sup> Ani bialu wali agali maru bo wanahe heagua nde ina uruni minalu dindi kaundiaore dindi wiamaro ngagoha garabaya hole pelolebero, lene.

<sup>10</sup> Holoberenese-o ina dindi uruni bibahende karulai hole pu. Ai tigua tini inaga giha ya hayagua nde ini eberongi ina ti pani muliya helo wahabe. <sup>11</sup> Anigo tigua i baba wai biyagua ina ti dara holene nawiore. Bo hilo wahai halu tinaga dabudabu ngaru mo yai habe. <sup>12</sup> Inaga bi ogoni hangu. I kini timbuni daligaore kogo ininaga dindi timbuni ngagonaga hongome bulenego larogo. Ina bule lalu bi lo wirugo buleorebero. <sup>13</sup> Ai Holoberenese-o ina bi ogo baya hangu hale habe. Ina bi o larogo mbira wa nahabe. Bi langirugo damene talialu ayu ogoniore bule pu, lene.

### *Holoberenese ibugua wai bule penego ogo*

<sup>14</sup> Kini ibugua bi ogoni laya handala abale tagira puwa Holoberenese ibugua ami agali wai hanalu mo ta haga hearubi ami agali mini lene hearubi ami agali mini lene hearubi ami agali haru bamba haga hearubi bibahendeore Asiria ami henego. Ibai hadaba, lene. <sup>15</sup> Ibugua kinihanda bibe lalu lamiyadagua mo tale bigi bialu ami agali damene hearu daosini dege handari mbirani pira kira (120,000) dindi dindi pelo dabo helalu ami agali daosini homberia (12,000) nogo hosini biruwa danda yuwa wai biaga dabo helene. <sup>16</sup> Ibugua wai bulenedagua manda manda bu helai hene. <sup>17</sup> Ani buwa tomo noleneru dabudaburu dewaore nogo kameleru dongirunaga erekunini mo paga ho yalu nogo balu nolene sibi bulumaga memeru dewaore haru halu pene. <sup>18</sup> Ibugua ami agali ti burupale holobadago damene bibahendeore karulape mo yai halu kininaga muni wiagoha howa siliba ngolobi dewaore mo yini.

<sup>19</sup> Anidagua bialu kini ibu mani ibilo Holoberenese halu ami agali biaru ti ala bamba halu pene. Garo nogo hosime gililagaru nogo hosini agali bialu ami agali geni pialu bibahendeore heyalu dindi amu ni paliragohayagi bibahendeore ti ho karula piai hole pene. <sup>20</sup> Wali agali dewaore ami agali biaru haruru talima mani pene. Ani piyagola dagalabe naheore niminamu lalu be abalu tau laradagua bini.✧

<sup>21</sup> Ami agali uruni Niniba tano yuwahalu puwa horo tebira pialu dindi tigabi mini Begeđilede dindini tagira pialu tigua balai anda Begeđilede tano kawareni bini. Tano ogoni Silisia Daliga laga ngagonaga abene uyurahayagi hari bareni tano Begeđilede ogoni wini. <sup>22</sup> Ani bialu Holoberenese ibugua dindi ogoni wahalu ibunaga ami agaliru haru halu hari bare bare wiagoha tagira pene. <sup>23</sup> Ani puwa tigua dindi kira mini Pudu Ludula bo gialahole bu wahai hene. Tigua ani bialu puwa wali agali Lasisi tanoha hearunaga dabudabu wiaru balu gingilo mialu Isimale wali agali hearunagabi gingilo mia dege bini. Isimale wali agali ti dindi ko iba dalu naibaga Kelusi dindi abene unurahayagi kaware haga hene.

<sup>24</sup> Holoberenese halu ibunaga ami agali biaru iba Yuberedisi piyadagua pupe halu puwa dindi hobane mbira Mesobodemia tano hongohe iba Abarono ange ange wima pearu bo giallo wahai hama pialu iba solowara timbuni bereagoria tagira pene. <sup>25</sup> Tigua Silisia dindi karu lai halu agali maru Holoberenesela wai bulene manda biyaru homelo bo wahaga bini. Ani bima pialu tigua dindi abene unurahayagi Yabede Arebiala dindi tubari wiagoria tagira pene. <sup>26</sup> Tigua Midiana dindi agali nogo hinalu hearu bo talu pelalu tinaga nogo sibi ti page haru halu balai anda hearu heda haga bima pene.

<sup>27</sup> Ai widi boga bini gandu lolene tu hayagola tigua Damasagasa dindiha dindi bayale tigabi wiagoha pupe halu pene. Ani puwa tigua widi mabuha bo hedope haga bialu nogo sibi meme bulumagabi bibahende bai haga bima pene. Ani bialu

✧ 2:20: Hgn 7.12, Yol 2.2-11

tigua tano bibahende bo giallo wahai halu mabu dugua hai halu igini daliahe hearu bibahende ayu tibume homelo dibu wahai halu bini. <sup>28</sup>Wali agali iba solowara bedago angeha paluyu pearu ti gi timbuniore ho howa duru laga laga bialu hene. Wali agali bibahende Taia tanoha hearubi Saidono tanoha hearubi Su tanoha hearubi Ogina tanoha hearubi Yabane tanoha hearubi Asadodo tanoha hearubi Asagelono tanoha hearubi bibahendeoreme gi ho hai hene.

### 3

#### *Dindi tara wali agalime Holoberenese ladebodebo binigo ogo*

<sup>1</sup> Tano maru Holoberenese ibugua wai bule mandabi howa agali haguane bu hearume agali maru dabalu Holoberenesenaga bu mini mo gede halo pudaba laga bini. Tigua lalu, <sup>2</sup> Ina bibahende kini timbuni Nebugadenesanaga biabe biaga kema. Ina inaga geha handadagaho bedama. Inime mbirale inahondo bule manda bu kego bibahende biai habe. <sup>3</sup> Ai inanaga anda karu bibahendebi dindi widi mabu ngemarubi nogo sibi karubi meme karubi bulumaga karubi nogo bibahende pabeha karubi inagaore hai ka. Uruni bibahende inime bua birago ale bibe. <sup>4</sup> Inanaga tano ngaru bibahendebi wali agali tano uruniha karubi bibahende inagaore hai ka. Inaga uruni bibahende inime mo ibabe lalu bi lo yalu pudaba, lene.

<sup>5</sup> Tigua bi uruni lo yalu piyagola <sup>6</sup> Holoberenese ibugua ami agali biaru haru halu iba solowara bereago angeha daliape halu puwa ami agali maru tano page hongohe bu mabubi hearu handaya ho helo dabo helalu agali hongohe maru tano uruniha hearuibunaga ami agali heagoha hela tagohalu wai bule pelo minu helaga bini. <sup>7</sup> Wali agali tano uruniha hearume yari karulowa ngidaru balu iba gana lalu ibu ibiyagola mo turu halu mali lima ibini. <sup>8</sup> Ani biyagola darabiore bialu hayadaruni bame bu hole bini. Holoberenesehanda tinaga damahondo bi pupu wiaga anda bu helearu bo giallo wahai halu ira mbirale nadibaga hada bini hearu bibahende dibu wahai hene. Ibugua mbirale o biyadagoni Kini Nebugadenesaibunime bibe lalu layadagua bini. Nebugadenesa ibugua bi lalu, Dama mitangi bialu bi pupu wiaga gime wabini wali agalime bi pupu wiaga wiaru bibahende bo gialalu dambu gingirulo haealabagabu wahai habe. Ani beregola wali agali dindi tara tarani bi tara tara laga bu karu bibahendeme Nebugadenesaibunihondo hangu bi pupu wialu helo ani bibe, lene.\*

<sup>9</sup> Ai Holoberenese ibugua Dodana tanonaga gibuni mbiraha dindi tigabi Yaserili wiagoria anda pene. Tano ogoriani howa wa handa amu halu Yudia dindihayagi dindi bare hambene wiagoha handa amu haga wini. <sup>10</sup> Ibugua balai anda tano kira Geba Bedesanala hengene wiagoria bu hene. Ani buwa ibugua dindi ogorianiibunaga ami agalinaga tomoru mo manda manda buwa ege mbira agima hondo hene.

### 4

#### *Isaraele tigua wai bule manda manda bu henego ogo*

<sup>1</sup> Ogoningi dege Isaraele wali agali Yudia dindiha hearume Kini Nebugadenesanaga ami agali haru haga haguane Holoberenesehanda dindi maruha biya layago hale hai hene. Te layane hale henedago agali ogoni ibugua bi pupu wiaga anda hearuha mbirale wiaru mo pagebu yai howa mani bi pupu wule ngoai haga andadago bo gialahole biaga layago hale hene. <sup>2</sup> Ani hale howa tigua ibuhondo gi timbuni ho hene. Ani howa Yarusaleme tanobi Anduane Homogo Ngode Datagaliwabenaga anda kagobi agua bulubadabe lowa miniha genda yu hai hene. <sup>3</sup> Ani manda binidago irane Isaraele wali agali ti garabaya henego golalu ayu dege tini dindiha daibu henego mitangi bialu gi hene. Ayuore dege Isaraele wali agali dindi taraha garabaya henego

\* 3:8: Har 34.13, 2 Bit 17.6

golalu tini dindi Yudiaha dai buwa bayale hene. Ani dai buwa áyuore dege andabi lomabu delaga dabubi gabobi beledibi anda ogoniha biabe biaga wiarubi bibahendeore abale waitigime Ngode Datagaliwabenaga deni mo dodohe ngelene ai lone mo loma bia hai halu bayale wiabagiho ngelo hemiria howa hale hene. <sup>4</sup> Ai Yudia wali agali ti Holoberenesehondo gi timbuniore ho howa tigua wali agali Samaria tanoha hearuhondobi Kona tanoha hearubi Bedehorono tanoha hearubi Belemaini tanoha hearubi Yarigo tanoha hearubi Koba tanoha hearubi Aisora tanoha hearubi Saleme dindi tigabi wiagoha haga hearubi ti bibahendehondo bi lo pelai hene. <sup>5</sup> Ani biai howa tigua hari nene wiaruha mamageali dele bu hai helowa tigua tano hari bareha wiarunaga wai pabe hongo helo lone biaru hene. Ani bialu howa tomorubi mo manda manda bini. Widi mabuha hengearu áyuore dege boga biai hayagola tigua mabuha tomo boga biyaru bu wiai hene.

<sup>6</sup> Yoagimi ibu Yarusalemenaga loma binigo mo miaga agali haguane howa ibugua beba mbira gilibuwa wali agali bibahende tano kira Bedulia tano Bedomesedaimi tanola wiagoha hearuhondo wia hene. Bedomesedaimi ogoni dindi Yaserili ngagoha dindi tigabi ngagohayagi handadai biragoha Dodana tano kawareni wini. <sup>7</sup> Ibugua tihondo lalu hari bare ngaruhayagi waitigi uruni irigi halu agua ibirabe hondole hariga ibugu bidagoria mamage hai halimu. Yudia dindiha ibulene hariga ogoni degego manda bialu mamage ogoniha halimu. Hariga ogoniha hariga doroge agali kirali hangu mandagi dabudabu hoyu ibulene karulape nga. Ani ngagome waitigi anda ibulilono hapai holene karulape nga. <sup>8</sup> Isaraele wali agali tigua bi agali loma binigo mo miaga haguane Yoagimi halu agali haguanebi ganisolobi Yarusalemeni ngoai howa bi lo mbira howa ibilayago hale howa talialu bini.

*Ngode Datagaliwabhondo Isaraele ti dara habe lalu bi lenego ogo*

<sup>9</sup> Isaraele wali agali tigua Ngode Datagaliwabhondo hongo howa laluibunaga deni tini mo dindi ho hene. <sup>10</sup> Wali agali tinibi ti waneginirubi tinaga bulumagaru wali agali tara ti baba ibu hene hearubi agali biabe biaga hearubi garabaya biabe ale biaga hearubi bibahendeore aga dara ho howa karulo haga ale karulo hene.✧ <sup>11</sup> Isaraele wali agali waneiginirubi bibahende Yarusalemeha hearu bibahende Ngode Datagaliwabenaga anda heago haneni kaware puwa tinaga hagianeni be abalu dugu hiralu dindini paliai hene. Dara ho howa mo karulaga aga wiaru Anduane Homogo deni mo dabadabaho ngelene. <sup>12</sup> Daraho howa karulagane aga maru lomabu delaga dabu heagoria mo pagaho ngelowa wali agali ti bibahendeoreme Isaraelenaga Ngode Datagaliwabe hongo howaore olene. Ti one waneiginiru garabaya lone napelonaga bi lalu ti mamalinaga tano ngaru bo giallo wahai nahelonaga bi laluibunaga anda kago mo ko haragola wali agali Ngode Datagaliwabe mitangi nabiaga karume turu howa ibu andaga kagoha mana ko nabilonagabi bi lalu hene. <sup>13</sup> Ani lalu heago de hondowa Ngode Datagaliwabhenda tinaga genda wiagonaga dara timbuni ho henego irane Anduane Homogo Hongo Haihe kago ibugua handalu hearia wali agali Yudia dindi bibahende ha howabi Yarusalemeha howabi bibahendeibunaga anda heago haneni kaware ibu ngoai ho howa tomo nane horo dewaore heago hendene.✧

<sup>14</sup> Loma binigo mo miaga agali haguane Yoagimibi loma binigo mo miaga marubi ti bibahende Ngode Datagaliwabenaga deni heyu howaibunihondo bi lalu haga hearume aga dara ho howa karulaga wiaru karulo hene. Ani howa tigua loma tara tara irame dai holene lomabi loma Anduane Homogo turu howa mule lalu wali agalime loma biaho winirubi loma tini hameme lomabu mule yalu ibinibi bibahende mo lomabu migi bialu hene.✧ <sup>15</sup> Tigua be abalu tininaga emboneni labolabo huba biago daligani golo ngelowa Anduane Homogohondo Isaraele wali agali dara howa biamogo bibe lalu bi lene.

✧ 4:10: Esd 4.1-3, Yna 3.7-8 ✧ 4:13: Esd 4.16 ✧ 4:14: Yol 2.17

## 5

*Holoberenese ibugua Isaraele wali agali abidabe manda bule manda binigo ogo*

<sup>1</sup> Asiria aminaga agali haguane Holoberenese ibu tigua te layago hale halu hearia Isaraeleme wai bule manda manda biai ho howa tigua hari neneha hariga wiarubi dindi tigabi wiagoha hariga wiarubi hangai hai halu biya layago hale hene. <sup>2</sup> Ani hale howa ibugua tandaga timbuni halu howa Moaba dindiha haru bamba haga agali haguane hearubi Amono dindiha agali haguane hearubi iba solowara ange ange wali agali hearunaga agali dabo helene hearubi bibahende olalu ibidaba lene. Ti íbu ngoaiho heagola ibugua tihondo lalu, <sup>3</sup> Kenanali kemiru tígua i áyu ogoni langidaba. Hari neneha wali agali palima pedago ti abigo padabe. Ti tano agoria dege hagabe. Tinaga ami agali dewa kabe nde emene dege kabe. Ti hongohe kabe nahe ka. Kini aiwa ami agali uruni haru hagabe. <sup>4</sup> Irane aginaga wali agali hameigini dindi ogohayagi ni paliragoha karu aria mbira ogonime ihondo ti dara habe lalu i hewaria íbu nabi howa mine hayago irane agibe, lene.✠

<sup>5</sup> Ani layagola Amono wali agalinaga haguane Agiohanda ladai bialu lalu, Aiore agali haguane-o inaga biabe bia haga ina bi larogo baya hanguore hale habe. Wali agali haru nene uruniha bare bare padaruninaga te ina langulebero. Ina ke naholebero. <sup>6</sup> Wali agali uruni ti Kaladea dindiha howa tagira ibinigo ka. <sup>7-8</sup> Ai tinaga mamali Kaladea dindiha heangi tigua bi pupu wiaga dindi ogoniha wiago wahai halu ti dahuliya andaganaga Ngode Datagaliwabhondo bi lalu hene. Ai ti damene hearume bo taliatagi haya handala puwa Mesobodemia dindiha puwa ogoniha luore hene.

<sup>9</sup> Lone mani howa tinaga Ngode Datagaliwabhanda lamialu, Dindi Mesobodemia wahalu puwa Kenana dindi ogoria hole pobe, lene. Ani laya handala ti ibuwa bayaleore hene. Ani howa ti hongoheore halu tigua ngolobi silibabi dewaore wialu nogo bulumaga dewaore hinu hene.✠ <sup>10</sup> Emene howa mani Kenana dindiha tomo gari timbuniore tagira ibiyagola ti togolo yalu Iyibi dindiha pialu tigua luore dindi ogoniha henego irane Iyibi dindiha tomo dewaore wiagola ani hene. Ani heagola ti hono dame bialu dewaore daga labe naheore hene.✠ <sup>11</sup> Ani heagola Iyibi kini heagome ti baba waitigi howa ti bo hengeda halu ibunaga garabaya biabe bialu helowa biabe erekuibiore mbirigi wabialu helo helene.✠ <sup>12</sup> Tigua biabe ogoni bialu howa tinaga Ngode Datagaliwabhondo dugu bialu heagola Ngode Datagaliwabe ibugua Iyibi dindi bibahendeha genda timbuni tara tara ibilene. Ani ibilayagola Iyibiali tigua, Isaraele wali agali Iyibi wahalu tagira pudaba, lene.✠ <sup>13-14</sup> Tinaga Ngode Datagaliwabhanda iba solowara Iba Daramabi laga bereago hanuni hariga mo wia halu iba ange mendehayagi haru bolangua halu puwa Hari Sainai pu halu dindi mini Kadese Banea dindini pu hene.

Isaraele tigua wali agali dindi ko ogoniha ala hene hearu bo taliatagi howa ti ho aribia halu✠ <sup>15</sup> ani puwa Amoro dindi wiagoria pu berene. Tigua Hesebono tanoha hearu bibahende bo wahai halu Iba Yodana domalu ibalu dindi hari bare bare uruni ti karulai hene. <sup>16</sup> Tigua hameigini Kenanabi Peresebi Yabusubi Segemebi Gigasabi bibahende bo taliatagi hai hene. Ai tigua ogonidagua bialu bambaore íbu henego ka.

<sup>17</sup> Tinaga Ngode Datagaliwabe ibugua ti mana ko birago turu nahaga howa wali agalime mana ko nabi baya tigabi kangi ti bayaleore haga ka.✠ <sup>18</sup> Anigo ainde ogo bialu halimu lalu tinaga Ngode Datagaliwabhanda lamiyago nabi hayagua nde tinaga waitigi ibalu wai timbuni bialu wali agali uruni bo wahai halu maru dindi tara tara ngaruha garabaya bu yalu piaga hene. Waitigime Isaraele wali agali tinaga Ngode Datagaliwabenaga anda kago bo giallo wahai halu tano wiago karulo hene. <sup>19</sup> Anigo mani Isaraele tigua mini beregedalu tinaga Ngode Datagaliwabe karia dai biaga hene. Ani biragola tigua dindi kaundiaha haga haga bu henedaru wahalu dai biaga hene. Ani

✠ 5:4: Esd 3.8 ✠ 5:9: Pig 11.31-12.5 ✠ 5:10: Pig 42.1-5, Har 1.7 ✠ 5:11: Har 1.8-14 ✠ 5:12: Har 7.1-12.46  
✠ 5:13-14: Har 14.21-22 ✠ 5:17: Man 28.1-68



dai bialu ti Yarusaleme lone karulo howa tigua Ngode Datagaliwabenaga anda heagoria hene. Ani bialu hari bare bare tini hagane wiyadagoria daibu hai haga bini.

<sup>20</sup> Ani binigo ainde agali haguane-o iname dabo handalu kamaria wali agali uruni tigua mana ko mbira bialu Ngode Datagaliwabenaga bi mana lo winigo mo habolo heagua nde iname puwa wai bialu ina wayali holeberemago maliya. <sup>21</sup> Anigo iname handalu kamaria tigua ko bini mbira nawiyagua nde ti helo waholene karulapego irane Ngode Datagaliwabe tinaga Anduane Homogo kagome ti baya hanguore handaya ho kagola ina wali agali dindi bibahendeha bu karunaga deni taga tene handa walia holene dege wulebirago helo wahamiya, lene.

<sup>22</sup> Agiohanda bi lai hayagola agali maru Holoberenesenaga balai anda tamuha heyu homabu bu hearume bi lagalaga bialu keba hai hene. Ani lalu howa Holoberenesenaga ami agali haru haga hearumebi agali iba solowara angeha haga hearumebi Moabali bu hearumebi bi hongo howa lalu, Agio ibu homolene karulape, lai hene.

<sup>23</sup> Ani lowa lalu, Irane agome Isaraele wali agali gi haramabe. Tinaga hongo nawiore howa tigua ina baba wai nabulebira. <sup>24</sup> Agali haguane-o inaga ami agalime abaleore bope holebirago ai ina abaleore áyu ogoni ma, lene.

## 6

### *Holoberenese ibugua Agionaga bi layago ladai binigo ogo*

<sup>1</sup> Agali ho mabu biaru tigua keba howa bi lai heagola Asirianaga ami hearunaga agali haguane Holoberenesehanda heyuwa Agiohondo keba howa agali tara hearunaga denibi Amononaga ami agali hearunaga deni howabi lai lene.

<sup>2</sup> Ibugua lalu, í Agio kegonibi tí maru Isaraelenaga biabe bia haga kemirubi tigua manda bialu kemiria ti ai kemada lo manda bidegabe. Ina lalu, Tinaga Ngode Datagaliwabehanda tí baya hangu handaya ho holebirago iname Isaraele baba wai nabimiya, laribe. Ai Ngode Datagaliwabe ogoni ibu ai kabe. Nebugadenesa ibu inanaga Ngode Datagaliwabe kagoni ndobe. Ibugua ami agali karu ibilalu Isaraele bibahende bo wahaiore holebirago ndobe. Tinaga Ngode Datagaliwabe kagome ti biamogo nabulebira.

<sup>3</sup> Ina Nebugadenesa ibunaga biabe bia haga kemarume ti bo wahai holene erekui nabi ti yamo daga nawini mbira ka. Tigua inanaga ami agali nogo hosini biruwa wai biaga hongo gibihe karunaga hongo bope habe nahe ka. <sup>4</sup> Iname balu bo hedaore holeberema. Ani beremagola tinaga daramame hari bare ngaru bu dambi hai halu homene tinginime dindi tigabi ngaru ereba hai holebira. Tí ina baba hongo karula nape ka. Tí aria lenego mbiraoreli hangubi yu wahene nahe loleberema. Bi o larogoni dindi bibahendenaga agali haguane timbuniore kago Kini Nebugadenesanaga bi laro. Ai ibunaga bi ogoni lo wa naholebiraore. <sup>5</sup> Anigo Agio í Amonoali ami ko mbira kegoni. Ai inaga waitigi mbira henedane áyu handa walia ko. Ina inaga dengui nahende keore dege ina hameigini Iyibi dindiha howa ibida ibini uruni bo wahaiore holebero. <sup>6</sup> Ina dai berongi ami agali tigua í ayu tibume dibaragola inaga tingini agali bo wahene ngaru dege dombeneha wulebere.

<sup>7</sup> Áyu í inaga biabe biaga agali tigua haru halu hari bare ngagoha puwa tano mbira harigani kaware ngagoria helolebira. <sup>8</sup> í áyu ogo homabelo ndo mani Isaraele wali agali baba mandagi homabelo. <sup>9</sup> Ina manda bialu keria iname ti babe nahe ko lo manda bu heagua nde inaga miniha genda aginaga yu kebe. Ai ogoni hangu inaga bi lai haru. Inaga bi ogoni bame lo waholene nawiore, lene.

### *Tigua Agio Bedulia tano haru penego ogo*

<sup>10</sup> Ai Holoberenesehanda agali ibunaga biabe biaga hearuhondo lamialu, Tigua Agio gi geru minu daba haga bialu yalu puwa Bedulia tano ngagoria Isaraele bu karu milimu, lene. <sup>11</sup> Ani layagola tigua Agio gi geru minu daba haga buwa yalu dindi tigabi wiagoha

pupe halu pene. Ani pu dege bialu hari bare wiagoha puabo halu Bedulia tano wiago andaneha iba uli wiagoria anda pene.

<sup>12</sup> Ani piyagola agali tano ogoniha hayadarume ami agali ibiyago tinaga danda timu yandere wiaru mo yalu haru bare wiagoha piai hene. Ani pu howa agali maru ege tole timbuni pume hendeho yuwa бага mugube hearume waitigi ibiyaru hari bareha irigi halu naibilo hariga handai halu hene. <sup>13</sup> Ani piyagola ami agali biaru ti ege tole timbuni heagoha birado hene. Tigua pume Agionaga gi geru minu kabu buwa hari heago teneha ngelene. Ngelalu tinaga agali haguane hearia dai bini.

<sup>14</sup> Ti Isaraele tano yu wahalu ti daliape howa handalu hearia Agio ibu palearia hendene. Ani hondowa pume gi geru daba heago hadape halu Bedulia tano haru pene. Puwa tanonaga agali haguane berearu deni heyu helene. <sup>15</sup> Horo ogoningi Simeono hameigini aria Maiga igini Usiabi Odoniele igini Kabarisibi Melegiele igini Kamisibi ti agali haguane hene. <sup>16</sup> Tigua tanonaga agali hearu ibidaba layagola urunibi igiri daliha hearubi wali berearubi mo ngoai hagane wiagoria ibu ngoai hene. Agio ibu agali biaru dombeneha heagola Usiahanda ibuhondo, Bibahende biyadarunaga te la, lene. <sup>17</sup> Ani layagola Agiohanda ladai bialu mbirale bibahende abale ti Holoberenese baba mo ngoai howa bi lene biago lamiai hene. Ani bialu bi ibunime Asiria biaruhondo layarubi lamia dege bini. Ani lalu mine halu bi mbira Holoberenese ibugua Isaraele mege bialu layagobi lamia dege bini. <sup>18</sup> Wali agalime Agiohanda bi layago hale howa tinaga dengui dindini paliape howa Ngode Datagaliwabhondo bi lalu hene. <sup>19</sup> Tigua Anduane Homogo dahuliya andaganaga Ngode Datagaliwabe olowa lalu, Waitigime inahondo tiga nabi ngago bialu kagoni de handalu ina taga timbuni ho kamarubi de hondowa biamogo bibe. Ani bialu ina inaga wali agali kemaruhondo bu mini gubaliniha daraho haabo habe, lene. <sup>20</sup> Ani lowa tigua Agionaga bu miniha mo hongo halu mo turu howa <sup>21</sup> bi lo mbira hai howa Usiahanda Agio haru halu ibu andaga puwa ibugua agali haguane bu hearunaga tomo timbuniore dawa manda manda bini. Ai horo ogoningi mbiraga tigua Isaraele wali agalinaga Ngode Datagaliwabhenda ti biamogo bilonaga bi lene. Tigua Ngode Datagaliwabhondo bi lalu heaore dege gao lene.

## 7

### *Holoberenese halu ibunaga ami agali biarume Bedulia tano ho hagira binigo ogo*

<sup>1</sup> Horo mendengi Holoberenese ibugua ibunaga ami agali hearubi ami agali tara ibu biamogo bialu wai mogo ibini hayarubi bibahendehondo ogodagua bidaba lalu wai hono miai hene. Tihondo lalu, Tigua egerebagi gao laragola abale heyalu puwa Bedulia tano ho hagira bialu hariga uyura hari neneha irigi halu piaga ngago hapai howa tanoha Isaraele wali agali baba wai bilimu, lene. <sup>2</sup> Horo ogoningi dege ami agali uruni ti heyalu abale pene. Ami agali geni piaga bibahende daosini dege handari mbirani pira karia (170,000) bibahende hene. Ami agali nogo hosi erekunini biruwa wai biagaru daosini homberia (12,000) hene. Ani bialu ami agali dewaore nu dabudabu wiaru yilo helene. Uruni bibahende biamaga hayagola daga labe naheore hene. <sup>3</sup> Tigua puwa Bedulia tano wiagonaga dindi ulini iba hambiaga bereagoria balai anda bini. Tigua anda bu henedago timbuniorenaga arane mendehayagi Bedulia tano howa pialu amuraore Siamono wiagoria tagira pene. Mendehayagi nde Dodana tano ngagoria howa bima pialu Balabaimi ngagoria tagira pene. Siamono ogoni Yaserili tanohayagi handa dai biaga wini.

<sup>4</sup> Isaraele tigua ami agali daga labe nahe dewaore ibu heago hondowa ti gi timbuniore ho howa tini dege dege ladene bialu lalu, Ami agali dewaore kagome tomo ngago damene bibahende nai holobada. Hari timbuni wedarubi dindi tigabi ngarubi hari emene wedarubi tinaga genda nayulubada, lene. <sup>5</sup> Ani lalu agali mbira mbira bibahendeme wai bulene ale yagayaga bialu pabe neneni mamage haga anda heagoria ira

delowa mamage halu egabi lene.✧ <sup>6</sup> Ani bialu egerebagi Holoberenesehanda ami agali nogo hosini biruwa wai biaga hearu bibahende dindi tigabi hamama bayale wiagoria haru tagira ibuwa wai dagia bayago Isaraele wali agali Bedulia tanoha hearume hari bare wiagoria howa handabe halu hendene. <sup>7</sup> Ibugua tanoha hariga irigi halu polene wiago baya hangu handalu iba hambiaga uli wiarubi baya hanguore deme handaiore hene. Iba hambiaga uli wiaru bibahendeore ibu karulai howaibunaga ami agalirume mamage howa handaya ho helaluibunaga balai anda hayadagoha dai bini.

<sup>8</sup> Ani biyagola Idomo agali haguane hearubi Moaba agali haguane hearubi wali agali iba solowara bedago ange ange paluyu pedarunaga agali haguane hearubi bibahende Holoberenese hearia ibuwa tigua ibuhondo lamialu lalu, <sup>9</sup> Agali haguane-o ina mini iname ngemago taliriyagua nde inaga ami agali karuni bai naholebira. <sup>10</sup> Isaraele tinaga hongo holene danda timuha nawi hari bare timbuni ngagoha ngelo ka. Ani laramago irane ayu hari bare ngagoha irigi halu wali agali ti kagoha anda polene nakarulape kemagoni ndobe. <sup>11</sup> Anigo agali haguane-o ina wai tiga tiga nabiriyagua inaga ami agali maru bo biba holebira. <sup>12</sup> Wahalu inaga ami agaliru haru howa tinaga balai anda kagoria hondo holene nga. Anigo agali inaga biabe biaga karume iba hambiaga uli hari teneha ngaru dege baya hangu mamage howa handaya ho holene nga. <sup>13</sup> Ani laramago irane wali agali Bedulia tanoha karu ti iba ogoniha dege hambu ibagaya. Tigua iba noahalu homabehe ngagola tinaga tano ngago inanaga giha ya holebira. Inanaga agali karu heba iname hari nene ngago irigi howa balai anda kaware biapara howa wali agali maru ibida tagira poligonaga mamage hole polomaya. <sup>14</sup> Wali agalibi waneiginibi bibahende hina garime homai holebira. Iname bo polene henge nawi. Tini minana homalu tinaga tingini hariga tene ngaruha homo wima polebira. <sup>15</sup> Tigua inaga bi mo wahalu tini inaga giha ya nahayagonaga pani ogoni, lene.

<sup>16</sup> Ani layagola Holoberenese haluibunaga ami agali haru haga bu hearu tigua hariga ogoni bayaleoreda lowa tini lo mbira halu tigua, Agali maru mamage hole pudaba, lene. <sup>17</sup> Ani laya handala Moaba ami agali hearu heba Asiria ami daosini duria heba (5,000) ti haru mandagi hole pene. Tigua puwa balai anda hari tene wiagoria bialu Isaraele wali agali iba hambu piaga hariga wiagoria hapai hene. <sup>18</sup> Ani helalu Idomo amibi Amono amibi tigua hari bare wiagoria Dodana tano handabe howa balai anda bu hene. Ani bialu maru dindi abene unurahayagi pelalu maru amu ni tagira ibiragohayagi iba Mogomu poragoha dindi mini Kusi dindi kawareni Agaraba tano ngagoha hole pelene. Asiria tini dindi tigabi bayale wiagoria balai anda bu hene. Ti dindi ogoniha wiago bibahendeni haiore hene. Tinaga balai anda heagobi tinaga dabu dabu wialubi bibahende daga labe nahe dewaore wini.

*Isaraele tigua tinaga agali haguane hearuhondo keba halu lai lenego ogo*

<sup>19</sup> Isaraele wali agali ti waitigime ho hagira biyagola tigua ibida pora bialu polene hariga nawiore howa mogo timbuni lalu gi howa tigua Ngode Datagaliwabe tinaga Anduane Homogo olalu ti biamogo bia lowa bi lalu hene. <sup>20</sup> Asiria ami agali hearume ami agali damene hearubi ami agali nogo hosini biruwa wai biaga hearubi garo nogo hosime gililagani heyu howa wai biaga hearubi bibahendeme Isaraele wali agali ho hagira bu heane dege horo pira tebirani maria (34) hene. Ani heagola Bedulia tano wali agalinaga iba be todobene wiaruha iba nabere bameore wiai hene. <sup>21</sup> Ani bialu tanoha iba hambiaga uli wiarubi iba nabere iba biba hai habeheore wini. Ani biyagola tigua horo mbira mbiranaga iba emene ogoni tale bigi bialu wali agali bibahende nai helo manda bialu tale bigi bialu hene. <sup>22</sup> Ainde waneigini galiru mo ko halu homabehe wiai hene. Ani bialu wali berearubi igiri daliahe hearubi bibahende de mborere bialu hariga timbuni pearuhabi tanonaga wai pabe heagonaga pabe panga heago kawarenibi odopeho wima pene. Ani bialu ti hongo naheore wini.

✧ 7:5: 1 Mag 12.28-29

<sup>23</sup> Anidagua biyagola wali agali bibahende bu hearubi waneigini bu hearubi bibahende ibalu Usia halu agali haguane biaru bereagoria ho mabu bu howa bi hongo howa ladagadaga bialu lai lalu hene. Tigua lalu, <sup>24</sup> Ngode Datagaliwabe ibunime tinaga miniha ngemigobi inanaga miniha ngemagobi mo tale bulebira. Ai tigua Asiria ami bialu baba bi lalu mo palia holene wiago waharimigome ko timbuniore inahondo birimi. <sup>25</sup> Áyuore ina pele ngulene mbira naheore. Ngode Datagaliwabehanda ina waitiginaga giha minu ya hayagoni ndobe. Ami agalirume tanoha anda ibuwa handalu karia ina bibahende iba noa howa homai halu tingini dindini wima pedaria hondolobada. <sup>26</sup> Ainde wahalu Holoberenesenaga ami agali biaru heba ami agali marubi tanoha ibidaba lowa tano bibahende ti mialu mbirale tanoha ngarubi mo ko halu mo page yai hole ibidaba lalu oladaba. <sup>27</sup> Ina garabaya hangu biragola garabaya biabe ale bia haga howa biabe bialu holene karulape wialu ina abale homolenego nakarulapeda. Iname ogonidagua birimayagua nde ina homa nabi holeberema. Ina waneigini gali bu karu homaragola inane de hondolene nakarulapebi ani bialu walibi waneiginibi mo ko heneore bedago hondolene nakarulapeore holobada. <sup>28</sup> Iname heneneore laramago ai Ngode Datagaliwabe ibunime ti maname mo daba ki bulene karulape. Ibuni Ngode Datagaliwabe ina mamalirunaga Anduane Homogo kago ibugua mana ko iname bialu kemagonaga pani ngialu inanaga mamalirume ko biyagonaga pani ngia dege biaga kago ainde mbirale ko uruni inaha anda naibilo ibunihondo bi lama, lene.

<sup>29</sup> Ani lowa wali agali bu hearu bibahendeme dugu bialu bi hongo howa ladaga halu Ngode Datagaliwabe tinaga Anduane Homogo kagohondo bi lalu hene. <sup>30</sup> Ani lalu heagola Usia ibugua tihondo lamialu lalu, Hameneru-o áyu tigua hongo ho ala holene karulape nga. Abale gede holene nawigo harugo lowa horo duriane agima hondo hamiya. Horo ogoningi Ngode Datagaliwabe inanaga Anduane Homogo kagome ina wahalu napolebirago harugo lowa malia howa holene nga. <sup>31</sup> Ai horo dauru ogoni piai haragola ina mo wialu biamogo bulene mbira nawiyagua nde tigua laramigonidagua bimiya, lene. <sup>32</sup> Ani lalu Usiahanda wali agali uruni tini biabe bialu hagaruha hole pudaba lene. Agali ti wai pabe nenenani mamage agalirunaga anda mamage helo biama irigi hene hearuha hole pudaba lalu, Wali waneiginiru ti nde tini andaga dai bidaba, lene. Anigo tano ogoniha wali agali bu hearunaga bu miniha genda timbuni ngelo hene.

## **Yudidihanda waitigi giha howa ibunaga wali agali mo wialu haru dai bini**

*(Be 8.1-15.7)*

### **8**

*Yudidi ibu Ngode Datagaliwabhondo bi lalu biraabo hagago ogo*

<sup>1</sup> Horo ogoningi mbirale uruni bira layagola Yudidi ibu hale hene. Yudidi ibu Merari wane berene. Merari ibu Oso igini howa Oso ibu Yosebe igini hene. Yosebe ibu Osiele igini halu Osiele ibu Elegia igini halu Elegia ibu Ananaiasa igini hene. Ananaiasa ibu Gideonon igini hene. Gideonon ibu Labaimi igini hene. Labaimi ibu Ahidubu igini hene. Ahidubu ibu Elaya igini hene. Elaya ibu Hiligia igini halu Hiligia ibu Eliaba igini hene. Eliaba ibu Nadaniele igini halu Nadaniel ibu Selumiele igini hene. Selumiele ibu Surisadai igini halu Surisadai ibu Yagaba igini hene. <sup>2</sup> Yudidi agalini mini Manase henego ibu nde Yudidila libu hameigini mbiraore damenela pene. Ainde agali ogoni ibu mabuha balawa wabiaga mini bali mabuha howa lini dearu gandu lowa mo mogobu wigi bialu hearia homene. <sup>3</sup> Ai agali Manase ogoni ibugua agali maru bali lini deago gandulo mogo bialu heago haru heagola nime ibunaga haguani hongoheore daba hayagola ibu andaga pialu Bedulia tanoha ibuni dagiani palearia homene. Ai ibunaga tingini ibu aba mamaru hora heagoria dege Dodana tano Balamono tanola hengene wiagoria hora hene.



<sup>4</sup> Ani bialu Yudidi ibu dara howa duguanda mali tebirani ege maria ibuni daluha biraabo hene. <sup>5</sup> Ibu anda dangini tigabi mbarale wiagoria hobane mbira bia howa ibugua ogoriani dara howa biagane aga karulo biraga berene. ✧ <sup>6</sup> Ibu dara ho birayadagoha biruwa tomo dewa nane wahowa berene. Anigo ai Sabada horo mendengi hole lowa horo pigane harangibi horo Sabada ibuni tagira ibirangibi horo timbuni malinaga ege pigane ngabulo mbiraga piganengibi horo ogoni ibuni tagira ibirangibi horo Isaraele tinaga Ngode Datagaliwabe bi lolene tagira ibirangi tinaga horo timbuni turu ho haga winigo tagira ibirangibi horo uruni bibahende ibirangi Yudidi ibu tomo wanahe nolene ngadagua naga berene. <sup>7</sup> Ai Yudidi ibu wali baya tara mbira ibunaga dengui bayaore wali maru berearubi ndo ibu bayaore mbira berene. Ainde ibu agalini Manase homayagola muni ngolo dewaorebi wali agali biabe biaga hearubi nogo bibahendebi maburubi dindibi ibuni karulai hene. Ani karulai howa Yudidi ibuni handaya ho haga berene. <sup>8</sup> Bi wahalu wali agalibi mbiralime ibuhondo bi ko mbira lade habe naheore ibu Ngode Datagaliwabe andaneha biraabo howa bi lalu biraga berene.

*Yudidihanda agali haguane hearuhondo keba halu lai lenego ogo*

<sup>9</sup> Wali agali bu hearume ti iba nalu holene nawidagome tiha mo ko holene timbuniore wiyada lowa tigua keba howa Usiahondo lai lalu heago Yudidi ibu hale ho berene. Ani bialu Usiahanda bi layago leagola horo duria howa tano ogoni Asiria ami agali karuhondo mimiya lalu gi dolalu lo wiyagobi Yudidi ibu hale hadege bini. <sup>10</sup> Ani hale howa Yudidihanda wali mbira ibunaga mbirale ngago damene bibahende handaya ho hai haga bereagohondo lamialu, Usiabi Kabarisibi Kamasibi tanonaga agali haguane tebirali uruni i bedoria ibidaba laya lalu lamule pu, lene.

<sup>11</sup> Agali tebirali uruni ibiyagola ibugua tihondo lamialu lalu, Tí Bedulia tanonaga agali haguane bedemiru tigua bi ina larogo hale hadaba. Tigua wali agalihondo bi áyu lamirimigo nakarulape larimi. Tigua mbirale buleore lowa Anduane Homogonaga deni howa gi dolowa lalu Anduane Homogohanda horo duria ogoniha ina biamogo nabiyagua nde tigua tano ogo waitigi giha mo ya hamiya larimiya. <sup>12</sup> Anigo tí ai howa tigua horo duria ko tagira ibirangi Ngode Datagaliwabe kago bahondolene manda birimibe. Tigua Ngode Datagaliwabe bolangua halu tí daliga holene manda bu kemibe. ✧ <sup>13</sup> Tigua Anduane Homogo Bibahendenaga Hongo Haihe kago bahondolene manda birimida. Tí mini nawiore harimida lo manda bido. <sup>14</sup> Tigua agalinaga bu habaneha manda bu kago ogoale bu ka lalu manda biade habe naheore kemigoni ndobe. Ani bialu agalinaga miniha yado kago handabe naheore kemigoni ndobe. Ani ngago ai tigua Ngode Datagaliwabe ibu mbirale ngago wabiai haga kagonaga miniha wu kago agua handa walia holeberemibe. Mbaliniru-o darabioridago tigua Anduane Homogo inanaga Ngode Datagaliwabe kago ibugua ina baba keba helo tigua mo keba nahalimu. ✧ <sup>15</sup> Ibugua ina horo duria uruni andaneha howa biamogo bua nahayagua nde horo tara mendengi biamogo bulene hongohe karulape ka. <sup>16</sup> Ina Anduane Homogo inanaga Ngode Datagaliwabenaga mini hamelo ngago handaya ho hagane ndo kema. Iname mo giha ladebodebo bia bulene Ngode Datagaliwabe ibu ina wali agali kamago ale ndo ka. <sup>17</sup> Ani kago manda bialu iname hondo howa ibugua ina dara halu biamogo angi birabe hondole ema nabi howa biamogo bia lowa ibunihondo olalu haabo holene nga. Inanaga dugu bialu kemago ibunaga hameme hale hoa biyagua nde hale holebira. <sup>18</sup> Bamba ina mamaliru howa hama ibinigo áyu kemagoni howa hameigini mbiralimebi dindi gibuni podenehayagi habagi ho henemebi aba igini emene mbiramebi mbirale dama mitangi bialu bi pupu wule gime wabini wiaruhondo bi pupu nawi hama ibinigo áyu kemagoni ndobe. Bambaore inanaga mamali alaore headarume nde dama mitangi bialu bi pupu wule gime wabini wiaruhondo bi pupu wialu heneya. <sup>19</sup> Anidagua bialu hemiria

✧ 8:5: Hgn 3.20, 2 Kin 4.10 ✧ 8:12: Man 6.16, Yob 38.2 ✧ 8:14: Lm 11.33-34, 1 Ko 2.11



Ngode Datagaliwabehanda tí waitigi giha pilopaga helayagola bibahende tini homai halu mbirale wiarubi mo page biai helalu biyagola ti bibahende ko hai hene. <sup>20</sup> Ani binigo áyu iname bi pupu wule gime wabini urunialehondo pupu nawi wahai halu iname Anduane Homogo ibuni inanaga Ngode Datagaliwabe kago ibu hanguhondo bi lalu kema. Ani bialu haga kemago manda bialu ibugua ina bame handaya naholebirago iname ibuhondo mini mbiraore wu holene nga.✧

<sup>21</sup> Hale hadaba. Waitigime anda ibalu ina balu wayali hayagua nde Yudia wali agali bibahende bo hana hai holebira. Ani bialu Ngode Datagaliwabenaga anda kago heba bo giallo wahai holebira. Ani biragola Ngode Datagaliwabehanda ibunaga anda barago pani inanaga darama poragome holebira. <sup>22</sup> Ina damene bo wahayaguabi maru garabaya yalu piyaguabi uruni iname bia ko hene mbira ngane hondowa bulebira. Ani bialu dindi inanaga mamalirunaga hiha howa bame ngini yu harimago bo giallo wahai halu bo labu hayagobi nde iname bia ko haramagome dege bulebira. Ani bialu ina garabaya biabe ale bialu kemagola tigua ina mo taga haragola waitigime ina mo taga timbuni halu kagome ina tinaga deni ko galone nabulene mbirago holeberema. <sup>23</sup> Ani birangi mbiralime dara holene nawulebira, lalu Yudidihanda lene.

*Yudidihanda mini bayale gigabi wiago latagi henego ogo*

<sup>24</sup> Yudidi ibugua laabo halu lalu, Ani bulebirago ai mbaliniru-o ina damene bu karuhondo mana bayalego bu walia hamiya. Ai tinaga holene bibahende inanaga giha ngagoni ndobe. Ani bialu Ngode Datagaliwabenaga andabi ibunaga lomabu delaga dabubi inanaga giha dege nga. <sup>25</sup> Iname Anduane Homogo inanaga Ngode Datagaliwabe kagome bamba ina mamali bahandalu henedagua áyu inabi bahandaragoni. <sup>26</sup> Ibugua Abarahamahondo biyagobi Aisagahondo genda mo miyagobi Yagaba ibugua ibu hanini Labananaga nogo sibi hinalu Mesobodemia heangi biyarubi iname manda budai bulene nga.✧ <sup>27</sup> Ngode Datagaliwabehanda agali uruni tinaga miniha agile ngabe hondolenaga ti henemane bahandaga binigo. Ai áyu inahondo ogonidagua bahanda ndo bira. Inaha genda mo ngiyaruni mana ko iname bialu harimago pani karulape ndo ngiya. Ai Ngode Datagaliwabehanda wali agali ibuni kagoria kaware hapara ho kagohondo lawai halu genda holene mo miaga ka, lene.

<sup>28</sup> Ani layagola Usiahanda Yudidihondo ladai bialu lalu, Ína bi lariruni bibahende henene ngago lai hari. Mbiralime ína bi lariruni mo nagalone naholebira. <sup>29</sup> Áyu ínaga mini manda bayale latagi haregoni áyu pigane ndo latagi hare. Bamba í wandari berengi howa mini manda bayale íha ngago latagi halu mana bayale ngago bu walia halu biraga bedegoni. <sup>30</sup> Anigo ainde wali agalime iba noleneore nawidagola tigua lo hongo halu iname buleore lalu habo nalolene bi ogoni lo widaba lalu ka. Ani bialu iname buleore lalu gi dolalu lo widaba lara. <sup>31</sup> Í wali mini mbiraorewi bedegola íore birarigonigo ainde Anduane Homogohondo inanaga bi lahabe. Bi halu mende Anduane Homogohanda iba dalu ibilalu inanaga iba hambiaga uli ngaru iba biru tolaragola ina iba nalu hongohe holomaya iba biru tolelo bi labe, lene.

<sup>32</sup> Ani layagola Yudidihanda ladai bialu lalu, Hale harene. Ai inanaga waneigini aguane aguanalioremebi embeda naholene mbira ina bule manda bido. <sup>33</sup> Áyu mbiraga wali inaga biabe biaga bedago iya tagira polobaya tigua wai pabe panga dugupe hole manda manda bu halimu. Ína horo manda bialu tano ogo waitigi giha ya hole lalu bi lo wirigo tagira naibi ngaore dege Ngode Datagaliwabenaga hongoni howa inime ina Isaraele wali agalinaga genda timbuni ngagoni mo wahai holebero. <sup>34</sup> Ína agile bulebe lalu inihondo hale nahalimu. Ina tíhondo ogoale bule lalu langia nabi howa buledago bupe harogola handalimulo, lene.

<sup>35</sup> Usia halu agali haguane hearume bi ogoni hale howa tigua Yudidihondo lamialu lalu, Ngode Datagaliwabe ibunime í handaya ho holebirago í pu. Anduane Homogo í heba kago ibunime waitigime inahondo mana ko bialu karuhondo pani mulebira, lene. <sup>36</sup> Ani lalu ti Yuididi andaga wahalú tini mamage hagane wiyagoria hole pene.

## 9

### *Yudidihanda Ngode Datagaliwabehondo bi lenego ogo*

<sup>1</sup> Ani lalu Yuididi ibu pialu anda tamu biragane wiagoria bulu palu wini. Ibugua aga dara howa karulolene wiago karulaabo ho biruwa be abalu ibunaga hagianeni dugu hiruwa berene. Ani biruwa ai tigua Yarusaleme ira hagua ngabi biaga lomabu delalu howa Yuididi ibugua Ngode Datagaliwabehondo bi hongo howa ladaga halu lalu, <sup>2</sup> Anduane Homogo-o í inaga mamali Simeononaga Ngode Datagaliwabeore kego ina agali dindi tarali hearume mana ko ina nabulene nga lalu lo wirigo biyagola ina Simeonohondo tiga bule pu lalu ayu tibu nene kirabaliha gadele wiago ibuhondo mirigoni. Agali tara urunime Simeono halu ti mbalini wandari mabuage bereagonaga aga minu budalu mana ko bule bialu hene. Ani buwa tigua aga budu wahai howa wandari ogoni kayu minalu mo ko hene. <sup>3</sup> Ani biyagola ina agali uruni tinaga agali haguane hearu tini dagia wali kayu biyagoria howa dege bo wahai harigoni. Ina agali biabe bia haga hearu heba tinaga agali haguane hearubi bo wahai halu handaya ho haga hearu bo wahai halu tinaga garabaya biabe ale bia halu haga hearubi heba bo wahai harigoni. <sup>4</sup> Inime tinaga one wane berearu garabaya piai helalu tinaga dabudabu damene wiaru bibahende í waneigini bayale bu hearu mo tahaga birigoni. Waneigini uruni tigua inaga mana lo ngago baya hangu taluwa bulene hame lo haga hene. Tigua mana ko tagabi ti dameneha biyadagonaga tandaga timbuni ho howa ina ti biamogo bia lowa ini olalu hayagoni.

Inaga Ngode Datagaliwabe-o í agalini homene í wali dalo abogo beda lalu daga nalene nagalone bedogonigo ainde harugo lowa inaga bi larogo ina hale habe. <sup>5</sup> Mbirale áyu tagira ibirarunibi abale ibinirubi mani mbira ibulubadarubi bibahende inime haru howa handaya ho kegola ibaga. Áyu ngaru bibahendebi mani bulubadaru bibahendebi inime manda biai ho kegoni. Heneneore ina ogoale ibulebira lo manda bu harigo damene bibahende ibai haya. <sup>6</sup> Mbirale mbira ina bule manda bidego abaleore aube tobane tagira ibaga. Ina bule ngeru bibahende bambaore howa manda bu halu mbirale uruni bule ngego ini minime mo tale bialu manda baya hangu biaga ke. <sup>7</sup> Ngode Datagaliwabe-o Asiria ti ami agali dewaore daga labe nahe kagoni de handa. Tigua tinaga ami agali damene dewaorebi ami agali nogo hosini biruwa wai biaga dewabi kago mitangi bialu ti agali daga labe nahedagola turu halu mine haga ka. Tinaga danda timubi humbi yandarerubi pume ege tole бага yidarubi uruni damenenaga hongo manda bialu ti mine haga ka. Anigo tigua í manda nabioire ka. Ini degeme wai emene timbuni birago mo palia habehe kegoni. Anduane Homogo iniore ke. <sup>8</sup> Inaga hongo gibioire ngegome tinaga hongo bo podabe. Tigua dindi ininaga loma biahe wiabagi hene biago mo ko halu mo dodohe ngelole ai inaga tandaga holeneme uruni balu bo bibaore habe. Tigua inaga andabi inaga lomabu delaga dabu kagobi bo gialo wahai hole ibu kagoni ndobe. <sup>9</sup> Tinaga mine hagane mana ngago de handalu inaga tandaga holeneme ti balu bo biba habe. I mini nahe bame wali dege bedogome ina hameledogo ale buliya ina í hongo ngibe. <sup>10</sup> Inaga bi dege larogome agali biabe biahaga karubi tinaga anduane karubi bole pelo ina biamogo bibe. Tinaga mine hagane mana ngago walinaga giha howa wiamaro bilabe. <sup>11</sup> Inaga hongo ami agali dewanaga hongoni howa ndo ibaga. I wali agali tini mo dindiha ho haga karunaga Ngode Datagaliwabeore howa ina mbirali daga nalene mini nawi karu biamogo biaga ke. Ina mbirali hongo nahe

karu handaya ho halu darabi yagibanoore kagoha ti baba mandagi kaware haga ke. Ani bialu maru homolene kaware ngagoria karia ina haru dai biaga ke. <sup>12</sup> I mamali Simeononaga Ngode Datagaliwabe-o inaga bi áyu ogoni hale ha. Isaraelenaga ngaru bibahende aba kegoni. Ini dahuliya andaga dindilanaga timbuni daligaore kegoni. I iba pedaru wabiaga howa uruni abaore kegoni. Mbirale bibahende inime wabirirunaga kini iniore kegoni. Ina bi larogo abale hale habe. <sup>13</sup> Bi ohowa ina loleberogome waitigi agali karu bo wahelo mo bia helabe. Irane tigua manda bialu bi lo kago inaga habo nalolene bi ina baba lo wirigo mo habo lelelebi inaga anda kago bo gialo wahai holebi Hari Saiono nene ngago mo ko halu mo ngubia holebi i waneiginirunaga dindi ngago mo ko hai holebi manda bialu ibu ka. <sup>14</sup> Ainde inaga wali agali bu karumebi wali agali maru bu karumebi ini tinaga Ngode Datagaliwabeore heneda lo manda biai helo ani bibe. I Ngode Datagaliwabe Bibahendenaga Hongo Haiheore howa kegoni. Ani howa Isaraele wali agali handaya ho haga ini hanguore kegoni, lalu Yudidi ibugua Ngode Datagaliwabehondo bi lene.

## 10

### *Yudidi ibugua Bedulia tanoha howa tagira penego ogo*

<sup>1</sup> Yudidi ibugua Isaraelenaga Ngode Datagaliwabehondo bi lai howa <sup>2</sup> ibu paliyagoria howa heyalu wali ibunaga biabe bia haga bereago ibilo olene. Ani bialu anda hobane mbira horo Sabadangibi bi lagane horo timbuni tagira ibirangibi ibuni biragadagoha daliape halu anda pene. <sup>3</sup> Puwa aga dara ho howa karulagane karulo birayagobi ibu agalini homayagola dalo tangi karulo birayagobi golo wahai hene. Ibu waya balu tingini mbugua ngabi mbira mini sanda laga wiagome hai hene. Ani buwa ibunaga mandari gumu bialu aga bayale tara mbirame mandari hubabu dambi halu agali bayale ibu agalini Manase heangi karulagane wiago mo karulalu bini. <sup>4</sup> Ani buwa ge su mo karulalu ge hala gi pagidaru mo karulai halu haleira dalu gihondeneni gi da wialu ibunaga yari wiago damene mo karulai halu biyagola wali biago wali maru baba tabe nabi baya dege lalu agibe tobahe ona berene. Ani bereagola agali ibu de handararume dimagoli timbuni habeheore berene. <sup>5</sup> Ai waini iba be mbirabi olibe lini ibane be mbirabi ibunaga biabe bia hagane wali biagome henelo mini. Ani bialu bali lini hirini wiagobi mberedi hirini bayale wiarubi kegi maru ira lini do gembeme wabini wiarubi bibahende nuha hangu hanai hene. Baya hangu hubabu ndagi laga buwa wali biabe bia haga bereagome nuha henelo mini. <sup>6</sup> Ani biai halu libu tanonaga wai pabe panga haraba heagoria pialu hebiria Usia halu Bedulia tanonaga agali kirali Kabarisi Kamisila ti haru mandagi howa tanonaga wai pabe panga dugua hene. <sup>7</sup> Ani buwa handalu hemiria Yudidi wali baya dege lalu agi loabe tobaheni ibunaga dengui baya tara howa ibunaga agabi tara dege biaria hendene. Tigua turu halu bi ogodagua lamini. <sup>8</sup> Ina hame ledegobi mini ngegobi bibahende inaga mamalirunaga Ngode Datagaliwabehanda mo karulape helo. Ani biragola Isaraele ti lone wayali haragola Yarusaleme mini lene ngelo laro, lene.

<sup>9</sup> Yudidi ibugua Ngode Datagaliwabehondo bi lai howa ibugua ladai bialu lalu, Ai ina mbirale bule lalu larugoni bule poliya agali biabe biaga karuhondo tano pabe panga dugua ladaba, lene. Ani layagola tigua igiri daliage bu hearuhondo pabe panga duguadaba lene. <sup>10</sup> Panga dugua hayagola Yudidila wali ibunaga biabe bia haga bereago libu haru tanoha howa tagira pialu hari bare wiagoha daliape halu dindi tigabi wiagoha puabo halu pene.

### *Asiriali hearume Yudidi hapai henego ogo*

<sup>11</sup> Libu dindi tigabi wiagoha puabo halu heberia Asiria ami agali bu hearu mamage ibagabu hearia ngola hene. <sup>12</sup> Tigua hapai howa Yudidi hale halu lalu, Libu dindi timbuni agoha howa ibalu hameigini ai aria eberebibe, lene.

Ani layagola Yudidi ibugua ladai bialu lalu, <sup>1</sup> Hiburu wali bedogonigo tigua wai bialu bo podanda holeberemigo manda bialu <sup>2</sup> dindi yu wahalu ibida poro. <sup>13</sup> Ai <sup>3</sup> ami agali t'naga agali haguane Holoberenesehondo bi bayale maru lolego ibu hondo polene hame ledó. Ibu dindi barebare ngaru bibahende bo podai holene hame leagua nde <sup>4</sup> ina ibuhondo ogodagua bibe lalu bi lamerogo hale holene nga. Anidagua biyagua nde <sup>5</sup> ibunaga ami agali bu karu bope halu ti wayali holeberemi, lene.

<sup>14</sup> Ami agali biaru tigua handalu hemiria Yudidi baya taraore heagola tigua handaya hai hene. Ibugua bi layago hale hai howa tigua ladai bialu lalu, <sup>15</sup> <sup>6</sup> íore wali oheme hariga baya handarida. <sup>7</sup> Ina abale ibalu inanaga agali haguane Holoberenese hondole abale ibiridagome <sup>8</sup> í homolene nawi. Ai gi nahabe. <sup>9</sup> Ayu ogoni ibunaga balai anda kagoha abale pu. Inanaga ami agali bu karume <sup>10</sup> í heba pialu haru halu inanaga agali haguane karia haru polebira, lene. <sup>16</sup> <sup>11</sup> Ina ibu deni pu howa gi nahe howa bi bibahende <sup>12</sup> áyu inahondo langirigo damene ibuhondo lamiai habe. Ani beregola ibugua <sup>13</sup> í baya hangu handaya ho holebira, lene. <sup>17</sup> Ani lalu tigua ami agali handari mbirame (100) Yudidila wali ibunaga biabe bia haga biagola haru halu Holoberenese ibunaga balai anda heagola berearia haru halu pene.

<sup>18</sup> Ami agali balai andaha bu hearume hale halu hemiria wali baya taraorene tara mbira ibiya layago hale halu ti de hondole gerai ibugu ibugu bini. Tigua Holoberenese berearia wali mbira ibira lalu bi lo yalu piyagola Yudidi ibu balai anda haneni hondo hene. Agali ibu heagoria ho mabu bu howa <sup>19</sup> wali baya taraore heago hondowa mogo lowa tigua bi dewaore laga laga bialu hene. Tigua manda bialu Isaraele wali agali maru karu aria ndo tara mbira harua lo manda bini. Tigua lalu, Hameigini wali baya biraga uruni wali agali abime mege bibehedabe. Iname wali uruni agalini kago damene bo wahai holene karulapeda. Hameigini wali baya biraga tigua wali agali dindi bibahendeha palima pedaru mo hondo hai holigo, lene.

<sup>20</sup> Ani lalu hemigola ami agali Holoberenese mamage haga hearubi agali ibunaga biabe bia haga hearubi bibahendeme tagira ibalu Yudidi minu yalu anda ibini. <sup>21</sup> Holoberenese ibu andaga tamuha palene. Ibugua paliaga dagia ogoni aga mindibi hari mindini handalehemebi ngolo pume wabini wiagome hinabibi anda bu dambihe wini. Aga ogoni pu tara taramebi ege <sup>2</sup> tole muni timbunime miaga tara taramebi mo <sup>3</sup> yári bia ho wini. <sup>22</sup> Agali biarume Yudidi ibiya lalu bi lamiyagola Holoberenese ibu balai anda haneni tagira ibu heagola agali marume lamu silibame wabini wiagome hale hedo yalu tigua bamba halu ibini. <sup>23</sup> Yudidi ibu heyu heagola Holoberenese halu agali ibunaga biabe bia haga ibiyadaru ti de hondowa Yudidi dengui baya taraoreyago hondowa ti hame timbuni lene. Wali biago ibugua Holoberenese wanakuihayagi howa ibunaga mini yaraga halu ge duli hanga howa bulu palialu hearia agali hearume mo heyu howa heyu helene.

## 11

### *Yudidi ibugua Holoberenesela bi lenego ogo*

<sup>1</sup> Holoberenese ibugua Yudidihondo lamialu lalu, Wali-o <sup>2</sup> í mini burugu lolene nawi. <sup>3</sup> <sup>1</sup> gi holenebi nawi. Wali agali Kini Nebugadenesa dindi bibahendenaga kini timbuni handame ho bedago andaneha holeore lalu anda ibiyaru aria mbiraoreli hangu halu mbiraorebi <sup>2</sup> ina uruni mo ko halu bo wa naharuli. <sup>2</sup> Ani bialu <sup>3</sup> í damene uyu hari bareha paluyu pedaru tigua <sup>4</sup> ihondo erembira nangidale nde <sup>5</sup> ina ti baba wai nabitole. Anigo ai tinime bia ko haya. <sup>3</sup> Anigo <sup>4</sup> ina ti helalu <sup>5</sup> í pora bialu ibida ina hemaria ibiridago irane

agibe. Í ibiridago bayale biridago ani ibiridagome íni bayale biruleberegó í gi nahabe. Áyu mbiraga ogoni howa mani birama poleberegoha í mo ko naholebira. <sup>4</sup> Agali o karu bibahendeme wali agali ínaga agali haguane Kini Nebugadenesanaga bi hale halu ibu andaneha karu baya hangu handaya ho hagadagua í baya hangu handaya ho holebira, lalu Holoberenesehanda Yudidi lamini.

<sup>5</sup> Ani layagola Yudidihanda ladai bialu lalu, Aiore agali haguane-o i wali ínaga biabe bia haga bedogoni. I bi maru lolene karulapebe. Ai mbiraga kamangi ínaga agali haguane kagohondo ke halu bi nalolebero. Anidagua bulene nawiore. <sup>6</sup> Ina bi loleberogo ína hale halu biriyagua nde Ngode Datagaliwabehanda ínaga giha howa biabe timbuni tara bulebira. Mbirale ínaga agali haguane ibugua bulene ngago mbiralime mo habo nalolebira. Ibugua birago tigabi dege piaho wulebira.\* <sup>7</sup> Ina heneneore gi dolalu Nebugadenesa ibu dindi bibahendenaga kini howa agali haguanebi ibuore howa ibugua dindi bibahendeha pialu wali agali baya hangu helo tigua mo tiga bule pudaba layadago ibunaga mini lalu larogo Holoberenese ína biabe timbuniore birigome wali agali hangu ndo dindini ema bialu piaga bibahendebi ega bedarubi bibahendeore ibunaga hongo timbuni ngago andaneha hai ka.\* <sup>8</sup> Iname abale hale harimago í agali manda bayaleorebibi mini bayalewibi mbira ke laya. Wali agali dindi tarani haga haga bidaru bibahendeoreme manda biai kago Asiria dindiha í biabe beregome bu bolangua holenebi manda timbuni bolangua henebi wai puwa bo podahana halu wayali holenebi í ale mende nahe layane hale hai harima. <sup>9</sup> Ani bialu Agio ibugua íhondo bi maru layayago ina hale hai harima. Beduliali hearubi tigua ibu bo wanahe heleagola ibugua bi íhondo langiniyaru bibahende layane hale hai harima.\* <sup>10</sup> Agali haguane-o ibugua bi langiyago mo wanahabe. Ibugua bi ogoni heneneore layago ínaga miniha yu haabo habe. Inanaga wali agali bu karu tigua Ngode Datagaliwabenaga deni howa ti mana ko mbira nabi heagua nde ti ayu tibu nene gadele ngagome nadibulebira. Ani bialu tiha mo ko holenebi nawulebira.

<sup>11</sup> Anigo ínaga agali haguane-o ínaga biabe bulene ngago bia ko halu ibira holobadalo manda nabibe. Mana kome Isaraele wali agali dariba hene kagome tiha mo ko halu homoleneore nga. Tigua mana ko ngaru damene bialu kagome Ngode Datagaliwabenaga bu miniha tandaga nolene ngago mo yu anda ibaga. <sup>12</sup> Áyu dege tinaga tomo nalu holene ndia halu ibabi nai habehe nga. Ani biyagola ai tinaga nogo bulumaga karu bo nai halu tomo maru Ngode Datagaliwabehanda nolene nawi leneru balu nai hole ka. <sup>13</sup> Ani bialu tigua tinaga mabuha widi pigane boga bini dedarubi waini ibabi olibe lini ibanebi Anduane Homogohanda ibunagaore leneru tini nole lalu bi lo mbira hai haya. Tomo uruni agali loma binigo mo miaga Yarusalemeni Anduane Homogonaga tano loma biaho helene biagoria biabe bialu karu tinaga wiaga wini. Tomo uruni agali mendeme ela nahaga loma biahowa wiabagi hene wiaga nga.\* <sup>14</sup> Anigo ainde tigua tomo ogoni narama lalu agali maru bi yalu ganisolo agali Yarusalemeni hearu lamule pudaba laya. Wali agali Yarusalemeni hearu tiguabi nde ogonidagua dege biya. <sup>15</sup> Ainde ganisolo agali Yarusaleme karu tigua karulapego nalimu lalu ladai biragola tigua tomo ogoni nayayagua nde horo ogoningiore Ngode Datagaliwabehanda ti ínaga giha mo ya haragola ína ti bo wahaiore holebere. <sup>16</sup> Ai í wali ínaga biabe biaga ína bi ogoni hale halu ína ti yu wahai halu ibida pora bialu ibiru. Ngode Datagaliwabehanda í mbirale timbuniore mbira iyane buleberegago ogoni dindi bibahendeha wali agali bu karume hale hai holebira. Ani hale howa ti mogo timbuni lolebirago ai ína

\* **11:6:** Yudidihanda lalu, Mbirale ínaga haguane ibugua birago tigabi dege bulebira, layago Ngode Datagaliwabe manda bialu lowa lene. Anigo Yudidi ibu bi lalu howa Holoberenese ibu manda bialu larabe toba helonaga lene. Anidagua dege hobane 16 howabi ogonidagua leda. Ai mbirale timbuniore ledago Yudidi ibugua Ngode Datagaliwabehanda bulebirago laragoyu ai Holoberenese ibugua Yudidihanda bi larago ibuhondo larua lo manda bu henego manda bia ko hene. ☆ **11:7:** Yar 27.6, Dan 2.38 ☆ **11:9:** Yud 5.21 ☆ **11:13:** Har 23.19, LBM 27.30



mbirale timbuni ogoni buliya Ngode Datagaliwabehanda ibilaya. <sup>17</sup> I inaga biabe biaga biruwa Ngode Datagaliwabe dahuliya andaga kagonaga bi hale haga bedo. Ani biruwa horo bibahendengibi mbiraga bibahendengibi ibunaga mini yaraga halu biraga bedo. Agali haguane-o horo bibahende i ɩla biraabo howa mbiraga i unu dindi ulini tigabi ngagoha Ngode Datagaliwabenaga mini yaraga hole pugu bulebero. Ani berogola Ngode Datagaliwabe ibugua Isaraele wali agalime ko ogongi biya lalu i langulebira. <sup>18</sup> Ibu bi langirago hale howa i langerogola ina inaga ami agali bu karu haru halu puwa wai beregola i hapai halu ɩla wai bulene Isaraeleali mbira naholebira. <sup>19</sup> I Yarusaleme pobelonaga hariga Yudia dindiha pedadagua pialu pobelo ina hariga walia holebero. Ani bialu tano i karulalu i kini halu Yarusaleme tano dombeneha birulebere. Ani bialu ina wali agali uruni nogo sibi haru haga nahe yu wahalu pene haru haradagua haru kegola biango ko karume ihondo dua nalolebira. Bambaore howa mbirale uruni bulebira lalu Ngode Datagaliwabehanda ihondo langiyagola i manda bu berene. Ai ayu Ngode Datagaliwabehanda i lamule pu laya, lene.

<sup>20</sup> Yudidihanda bi layagome Holoberenese mo turu halu agali bu hearu bibahende mo turu hai hayagola tigua wali ogoninaga mini baya taraore winiyago hondowa ti mogo timbuni lo hene. Tigua lalu, <sup>21</sup> Dindi amu ni tagira ibiragoha howa pialu ni paliragoha wali ogobi mbira berearia handa nabirima. I bunaga dengui baya taraore mbirani ibunaga manda ngagobi wali maru bedarunaga manda ngago bolangua heneda, lene.

<sup>22</sup> Ai Holoberenese ibugua Yudidihondo lalu, Bayaleore Ngode Datagaliwabehanda inaga wali agaliru helalu i ala ibilayada. Ayu ina hongoheore howa wali agali inaga agali timbuni Nebugadenesa mege biaga karu tiha mo ko holene ngago ngola holebira.

<sup>23</sup> Ainde i wali baya taraore mbira bedegoni. Inaga dengui baya burugule mbirani bi ina larigobi dendebiorada. Mbirale ina bule lariruni biai hariyagua nde inaga Ngode Datagaliwabe kago ibu inaga Ngode Datagaliwabe holebira. Ani bialu ini Nebugadenesa andaga pu bedegola inaga mini dindi bibahende ngaruha hale hayago lalu mini lene birulebere, lalu lene.

## 12

### *Yudidihanda mana bayale binigo ogo*

<sup>1</sup> Holoberenesehandanda agali biabe biaga hearuhondo lalu, Yudidi anda tamuha tomo nolene beledi silibame wabini ngagoria haru pu berelalimu, lalu lamini. Ani bialu ibugua agali biabe biaga bu hearuhondo lamialu, Tomo bayalebi waini ibabi ini nagane ale maru mo milimu, lalu lamini. <sup>2</sup> Ani layagola Yudidihanda lalu, Ina tomo uruniale nanolebero. Tomo nolene ini hanalu ibinidaru karulape nolebero. Tigua ngeremigo naruyagua mana ngago puguligonaga nanolebero, lene.\*

<sup>3</sup> Ani layagola Holoberenese ibugua Yudidihondo lamialu lalu, Tomo ini hanaridago nai kegola inaga tomo iname agoha ngaria taya bulumayadabe. Yuda wali agali mbira ina baba mandagi nahedago agua taya buledabe, lene.

<sup>4</sup> Ani layagola Yudidihanda bi layago ladai bialu lalu, Heneneore ina ihondo tigatiga langerogo. Anduane Homogohanda iha howa biabe bule ngago bu maro biragola tomo i nolene wiaabo holebira, lene. <sup>5</sup> Ani lalu agali Holoberenese ibunaga biabe biaga hearume Yudidi balai anda mbira heagoha haru piyagola ibu anda ogoniha paleaore mbi hanuni hene. Pialu egabi lolene kaware ngelowa ami agali mamage haga hearu bu heaore heyuwa Yudidihanda <sup>6</sup> Holoberenese hearia bi lama pudaba lowa lalu, I tagira pialu dindi ulini tigabi ngagoha pialu Ngode Datagaliwabehondo bi lole poabe lalu inihondo hale haro laya lalu lamule pudaba, lene. <sup>7</sup> Ani lama piyagola Holoberenese ibugua ami agali hearuhondo lalu, Ibu polebiragoha napobe. Hapai nahe mamage dege baya hangu halimu, lalu lamini. Ai Yudidi ibu horo tebira ami

\* 12:2: Dan 1.8, Esg C.18

agali balai anda bu heagoha howa mbiraga bibahendengi Bedulia tanonaga dindi ulini wiagoha pialu iba bereagoha wayawaya biaga berene. <sup>8</sup> Wayawaya bai howa ibugua Anduane Homogo Isaraelenaga Ngode Datagaliwabhondo lalu, Isaraele tigua wayali halu waitigi bope helonaga hariga maru mo walia habe, lalu bi lalu berene. <sup>9</sup> Ibu Ngode Datagaliwabenaga deni dodo ko mbira para nahe holenaga biaga mana ngago biaabo halu berene. Ani biai halu ibunaga balai anda kagoha pu biraabo halu alendo tomo nolene tu haragola tagira ibaga berene.\*

*Holoberenesehanda tomo timbuni dawenego ogo*

<sup>10</sup> Horo maneni hayagola Holoberenesehanda agali ibunaga biabe biagane hearunaga tomo timbuni dawa hene. Anigo agali ami agali haru halu bamba haga maru hearu ti ibalimu nalene. <sup>11</sup> Ani bialu howa Holoberenese ibugua agali mbira ibunaga mbirale wiaru bibahende handaya ho haga mini Bagoasa heagohondo lamialu lalu, Ina áyu ogoni puwa Hiburu wali ina handaya ho haga biaga tomo ibabi ina haru mandagi nalu inaga balai andaha biramiya haru halu ibabe. <sup>12</sup> Iname wali ogonibigo ibu heba te lalu mandagi bira nabi howabi ibula mandagi palia nabi howabi bameore biralu pelarimayagua nde ina mege gibiore bialu ina hondo oba holebira, lene.

<sup>13</sup> Ani laya handala Bagoasa ibugua Holoberenese berelalu Yudidihondo pene. Ibugua puwa lalu, Wali baya-o inaga agali haguane baba bialu tomo namiya ibuleberebe. Ibugua í iba wainiru nalu ina baba turu hagabu biramiya hame layago. Ainde ina Asiria walirume Kini Nebugadenesa andaga biruwa biagadagua bule íbuore bibe laya, lene.

<sup>14</sup> Ani layagola Yudidihanda ladai bialu lalu, I aigo biruwa inaga agali haguane kagohondo naibule loabe. Ina ibalu mbirale bibahende inaga agali haguane kago ibugua ina buliya hame ledago biai holebero. Ani bialu mbiraga ogoniore embeda nahe manda biaho biraabo howa homalu waholeberoda lo manda bido, lene.

<sup>15</sup> Ani laya handala Yudidi ibugua puwa aga bayaleru mo karulalu yári tara tararu bialu bini. Ani bialu heagola wali ibunaga biabe bia haga biagome nogo sibi dongone wiago mo yalu puwa Holoberenese bereago kaware dindiha dunga hene. Nogo sibi dongone ogoni Yudidi ibu tomo nalu biruwa dungaho berelonaga Bagoasahanda minigo ogoni mo yu puwa ogoni ala dungua hene. <sup>16</sup> Ani buwa Yudidi ibu anda ibalu berene. Ani ibiyagola Holoberenese ibunaga bu miniha wali biago dimagoli timbuni halu mandagi paluenaga ladebodebo bialu biraabo hene. Yudidi ibu pigane ibiyangi howa Holoberenesehanda hame lowa mini burugu timbuni lalu mandagi paliba lolenaga hariga taya bialu haabo hene. <sup>17</sup> Ani bialu howa Holoberenese ibugua Yudidihondo lalu, Ina waini ibaru abale nalu ina baba turu ho biramiya, lene.

<sup>18</sup> Ani layagola Yudidi ibugua ladai bialu lalu, Agali haguane-o áyu ina iba íla mandagi noleberogo irane horo áyu ogoni inaga horo timbuniore ngago manda bialu nolebero, lene.\* <sup>19</sup> Ani lalu Yudidi ibugua tomobi ibabi wali ibunaga biabe bia haga biagome manda manda biyadaru nalu berene. <sup>20</sup> Ani nalu bereagola Holoberenese ibugua Yudidi de handaya halu hearia dimagoli timbuni tagira ibiyagola ibu waini iba dewaore nagimbu bialu berene. Ibu iba abale nanagadagua dewaore áyu ogoingi nowa mo ko howa lulu yu berene.

## 13

<sup>1</sup> Mbi hanuni hayagola agali Holoberenesenaga biabe bia haga biaru ti abale heyalu piai hene. Ani biyagola Bagoasahanda Holoberenesenaga balai anda heagonaga panga payanda howa agali biabe biaga maru hearu ibunaga agali haguane padagoha anda napole lalu bi lamiai hene. Tomo nalu luore biru wahayagome agali bibahende de

\* **12:9:** Yudidi ibu Ngode Datagaliwabe mitangi nahaga baba hayagome ibu Ngode Datagaliwabenaga deni dodohe berene. ☆ **12:18:** Esg 5.4

umu lai hene. <sup>2</sup> Yudidi ibu hangu Holoberenesela balai anda biagoha biraabo hene. Ani bereagola ai Holoberenese ibu lulu timbuni yalu mo ko hayagola ibuni tamu dagia wiagoria ibira halu palene. <sup>3</sup> Yudidihanda wali ibunaga biabe bia haga biago balai anda tagirahayagi haneni abale biagadagua ibu tagira ibuliya hondo habe lene. Wali ibunaga biabe bia haga biago lamialu ibu, Anduane Homogohondo bi lone lole porogo, lene. Ani bialu Bagoasahondobi ani dege lamini.

<sup>4</sup> Agali mini lene birayarubi agali bame biabe bia haga birayarubi bibahende tomo nai halu pugu pugu biai hene. Ani piai hayagola Yudidi ibu Holoberenesenaga dagia kawareni heyu howa ibugua Anduane Homogohondo ibuni bu miniha bi ogodagua lene. Ngode Datagaliwabe iore Anduane Homogo Hongo Haiheore kegoni. Horo áyu ogoingiore ina Yarusaleme mini yaraga halu biabe buleberogo buliya inaga gi mo hongo habe. <sup>5</sup> Inaga wali agali bayale helo biamogo bulenebi ina bope halu bo hingedolenaga waitigi áyu ibu karu bo haealabaga bialu mo habo lai holenaga biabe bule manda bu birarugobi bulene horo áyu ngagoni, lene. <sup>6</sup> Ani lalu Yudidi ibugua Holoberenesenaga haguandahayagi ayu tibu ale ogoni mo pehowa <sup>7</sup> yalu dagiani kaware hapara hene. Ibugua Holoberenesenaga mandarini yania ho howa lalu, Isaraele wali agalinaga Ngode Datagaliwabe ini kego i áyu ogoni mo hongo habe, lene. <sup>8</sup> Ani lowa Yudidi ibunaga hongo bibahendeoreme Holoberenesenaga mani halu kira dibalu haguane pugu bai hene. <sup>9</sup> Ani bialu ibunaga tingini dindini pendegelope halu dagiani hina bibime hayulino dambi haga labolabo baya tara heago hadowa gini yu hene. Emene howa Holoberenesenaga haguane biago yalu tagira puwa wali ibunaga biabe bia haga biagohondo mini. <sup>10</sup> Miyagola wali biago ibugua agali haguane biago tomo hanagane nuha henene.

### *Yudidi ibu Bedulia dai binigo ogo*

Ai Yudidila wali ibunaga biabe biaga biagola Ngode Datagaliwabehondo bi lole piaga wiyadagua pene tingi halu puwa ai balai anda bu hearu yu wahai halu dindi tigabi wiagobi wahai halu pialu hari bare wiagoha irigi halu puwa Bedulia tanonaga wai pabe panga heagoria kaware anda pene. <sup>11</sup> Libu wene kaundiani dege wene pialu howa Yudidihanda agali maru wai pabe panga handaya ho howa mamage haga hearu olowa lalu, Panga duguadaba panga duguadaba. Inanaga Ngode Datagaliwabe ibuni inane heba mandagi haabo kago. Áyu dege inahondo ibunaga hongo ngago ina Isaraelehondo lone mo walía halu ibunaga hongome waitigi hearu bope haya, lene.

<sup>12</sup> Agali tanoha hearume bi layuago Yudidihanda layuane hale halu ti abale gerai wai pabe heagoria puwa tanonaga agali haguane hearu ibilo olene. <sup>13</sup> Wali agali daliahebi wahealebi wandari igiribi bibahende Yudidi dai bulubada manda nabi howa gerai lalu wai pabe panga heagoria piai hene. Pialu tigua panga duguayagola anda pene. Anda piyagola wali agali tigua hale hedo yuwa ho mabu bini. <sup>14</sup> Ani heagola Yudidi ibugua bi hongo howa ladaga halu lalu, Ngode Datagaliwabenaga mini yaraga holene nga. Ibunaga mini daligaore kago yaraga holene nga. Ngode Datagaliwabehanda ina Isaraele wali agali dara haga kagonaga ina ibunaga mini yaraga holene nga. Áyu mbiraga dege Ngode Datagaliwabehanda inanaga waitigi inaga giha howa bo haeala hole biai haya, lalu latagi hene. <sup>15</sup> Ani lalu agali haguane nuha pugu hanayago ti de hendelo yaraga halu lalu, De handadaba. Agali haguane o yidogoni Holoberenese Asiria ami agali haguane biagonaga haguane o pugu yidogoni. Ani bialu aga ogo Holoberenese iba nowa luluyu wiagola ibu dambi hene. Anduane Homogohanda agali haguane ogoni wali mbiranaga giha howa bo wahaya. <sup>16</sup> Ina heneneore gi dolalu howa larogo ina mbirale uruni buliya Anduane Homogo ibunime i baya hangu handaya ho haya. Inaga dengui baya tara handalu Holoberenese mo luluya henego homaya. Anigo ibugua ila mana ko nabi bayale halu i mo ko halu mo tagabi nahe, lene.

<sup>17</sup> Wali agali tigua mogo timbuni lalu tigua bulupaluwa Ngode Datagaliwabehondo bi lene. Ti bibahendeme bi lo mbira halu hongo howa ladagadaga bialu Ngode Datagaliwabenaga mini yaraga halu lalu, Iname Anduane Homogo inanaga Ngode Datagaliwabe ínaga mini yaraga harama. Áyu ínaga wali agali kemarunaga waitigi hearu mo taga harida, lene.

<sup>18</sup> Ai Usiahanda Yudidihondo lalu, I wane Yudidi-o Ngode Datagaliwabehanda dindi bibahendeha wali biru ngaru berelowa ínaga mini timbuni mini lene berelayada. Anduane Homogo inanaga Ngode Datagaliwabe ibugua dindi harila wabini kagonaga mini yaraga hama. Ibunime ina bibelo mo bia hayagola ina inanaga waitigi hearunaga agali haguane heagonaga haguane puguarida. <sup>19</sup> Horo bibahendengi mani wali agaliru Ngode Datagaliwabenaga hongo ngago te lalu howa tigua ínaga mini mbiraore hongohe wiridago te lalu holebira. <sup>20</sup> Ina mbirale uruni biridagonaga Ngode Datagaliwabehanda ihondo bayale biaabo helo laro. Wali agali mo ko holene kawareni hemagola ina ibunaga deni tigatiga ibagabu biruwa ini homolene mo embeda halu birigonaga ibugua ihondo mbirale bayale damene ngaru ngiai helo laro, lene. Ani layagola wali agali bibahendeme bi lo mbira halu lalu, Henene heneneore, lai hene.

## 14

### *Yudidihanda ibunaga mini wiago latagi henego ogo*

<sup>1</sup> Ai Yudidihanda wali agalihondo lamialu lalu, Hagibuni mbaliniru-o ina bi larogo ala hale hadaba. Tigua agali haguane ogo mo yalu puwa wai pabe neneni mo paga hadaba. <sup>2</sup> Egabi lalu gao laragola tigua agali haguane mbira dabo helalimu. Agali hongohe kemigo damene bibahende danda timu yandareru yai halu tano wahalu tagira piai halimu. Asiriali mamage haga karu baba wai bule tagira peneale tingi halimu. Tigua henene wai bule daliape halu napilimu. <sup>3</sup> Ani beremigo hondowa Asiriali tigua wai biagane ale mo yai halu gerai lalu balai anda kagoha aminaga agali haguane barila hole polebira. Ani biragola agali haguane uruni tigua gerai lalu Holoberenese andaga balai andaha pialu karia tigua Holoberenese nahondolebira. <sup>4</sup> Ani biragola gi timbunioreme ami agali uruni bope haragola tí bibahendeme talima pugupugu bialu harigani bai halimu. <sup>5</sup> Ani bule dege tigua Amonoali Agio dege i kogoria haru ibule damu pudaba. Ibugua ibalu haguane ogo Holoberenese haguanedabe taradabe hendelo damu pudaba. Agali ogonimeore Isaraele wali agali mo taga halu Agio ibubi nde ina Isaraele wali agali baba mandagi homelo ibilenego agali ogoniodabe be tara mendedabe hendelo, lene.

### *Agio ibu mini beregedalu Yudali hatago henego ogo*

<sup>6</sup> Tigua Yudidihanda layago hale halu Agio ibu Usia andaga berearia hondo pene. Ai Agio ibu ibuwa handalu hearia wali agali dewa ho mabu bu hearu aria agali mbirame Holoberenesenaga haguane pugu yu heago hondowa ibu mogo timbuni lalu de mborere biyagola dindini odope hene. <sup>7</sup> Tigua ibu lone mo heya haya handala puwa Yudidi geha ge duli hanga howa mo bulu paluwa lalu, Wali agali Yudia dindiha bu karume ínaga mini yaraga hai holebira. Ani bialu wali agali dindi bibahendeha bu karume ínaga mini hale halu ti gi timbuniore holebira. <sup>8</sup> Ainde ina biridaru bibahende i hale holiya te langi, lene.

Ani layagola Yudidi ibugua wali agali bu hearunaga deni heyu howa ibu tagira piyangi howa bialu henedago lama ibalu dai biyagoria te lamaro bini. <sup>9</sup> Yudidihanda te lai hayagola wali agali tigua hale hai halu tanoha howa turu timbuni howa bi ladaga daga bialu hene. <sup>10</sup> Ainde Agio ibugua Isaraelenaga Ngode Datagaliwabehanda bibahende biyago damene bibahende de hondowa ibugua Ngode Datagaliwabehondo

✧ 13:18: Hgn 5.24, Lg 1.28, 1.42

mini mbiraore wialu hongo howa yutiga bu hene. Ani bialu ibu Isaraeleali dege hatago hayagola tigua ibunaga tingini dongone boda mabu bialu Isaraeleali helo helenego ai ibu waneigini tibi Isaraele wali agali dege hatago halu hama ibini áyu ogoniha haabo kagoni.\*

*Asiria ami agali biaru luluyu yu ibaga biai henego ogo*

<sup>11</sup> Egerebagi hayagola Isaraele tigua Holoberenesenaga haguane biago tanonaga pabe nene heagoria mo paga halu tini wai biaga danda timuru yaga bialu tanoha howa hariga pugu biadagua harigani hama pene. <sup>12</sup> Asiria ami biarume Isaraeleali biaru tagira ibiyago de hondowa tinaga agali hagianeru abale lama pene. Ani lama piyagola agali haguane biaru tigua ami agali haru bamba haga hearubi haru howa handaya ho haga hearubi lamini. <sup>13</sup> Ani lamiyagola tigua agali bibahendenaga haguane Holoberenese andaga balai anda heagoria puwa Bagoasahondo lamialu lalu, Isaraele agali ko galone nabulene hearume inanaga hongo tinaga hongola manda bulenaga tinaga tanoha howa tagira ibalu ede bareni dalidali bialu ibira. Ai iname ti abale bo biba holomayanaga ibaruago ai inanaga agali haguane barila hole pu, lene.

<sup>14</sup> Ani laya handala Bagoasa ibugua abale puwa Holoberenese ibu wene dege Yudidila mandagi padabe toba howa ibunaga tamu hobane panga ngelo ngelo bene. <sup>15</sup> Ani bayagola Holoberenese ibugua bi ladai nabiyagola Bagoasahanda panga dugua anda halu tamuha anda puwa handalu hearia Holoberenesenaga tingini dindini ibiraho wialu ibunaga haguane nawiyane hendene. <sup>16</sup> Ani wiago hondowa Bagoasahanda ga lowa dugu bialu ibunaga aga lerelene. <sup>17</sup> Ani bialu Yudidi andaga balai anda heagoha puwa handalu hearia Yudidi nabereyane hendene. Ani bialu ibu abale gerai lalu ami agali biaru hearia tagira ibuwa lalu, <sup>18</sup> Agali hameigini ko ngubi hearume ina mohondo hayada. Hiburu wali mbirame Nebugadenesanaga dindini wali agali bu hearu bibahende mo taga timbuni hayada. Ai uru-o handadaba. Holoberenesenaga tingini dindini ngago ibunaga haguane agoha ngabe tobaheda, lene. <sup>19</sup> Asiria ami agali haru haga hearubi haguane hearubi tigua ogoni layago hale howa ti mogo timbuni lene. Tigua ani hale howa balai anda bu haga haga biadagua dugu bigibigi bialu tinaga aga budu lerelai halu bini.

## 15

*Isaraele ti wayali henego ogo*

<sup>1</sup> Ami agali maru hearu ti tinaga balai anda heagoha biraga biraga buwa hale halu hemiria Holoberenese homayada layago hale howa tibi nde mogo timbuni lene. <sup>2</sup> Tigua gi howa duru lagalaga bialu ti hayadagua pugu pugu bialu maru dindi ko hari nene wiaruha pialu maru dindi tigabi wiagoha pugu pugu bialu piyai damene hene. <sup>3</sup> Ami agali maru Bedulia tano kaware hari bareha hapare howa balai anda bu hayago tibi nde ibida piyai hene. Ani biyagola ai Isaraele ami hearu abale daliape halu ti talima pugu pugu bini.

<sup>4</sup> Ani biyagola Usiahanda Bedomasadaimi dindiha bi lo pelalu Bebai dindihabi Koba dindihabi Kola dindihabi Isaraele dindi bibahendeha layago lalimu lene. Ibugua mbi-rale o biyarunaga te lo pelalu agali ibida poraruni baba wai bialu bibahende bo wahai halimu, lene. <sup>5</sup> Isaraele tigua bi uruni hale howa tigua waitigi baba bibahendeha wai biai hene. Tigua talima pugu pugu bialu Koba dindiha talima puabo halu bibahende bo wahaiore hene. Ai agali Yarusalemeha howabi agali hari bare bareha paliaga hearubi bibahende waitiginaga balai anda bu heagoha biya layaru hale halu tibi íbu ngoai hene.

\* **14:10:** Mana te ngagoha 23.3-4 howa lalu Amono wali agaliore Isaraele wali agali baba hatago halu mandagi nahole lenego gilibu winigo nga. Agio ibu Amonoali mbira henego yu ainde ibugua mini mbiraore hongohe wiyagola tigua ibu Isaraele wali agali dege halu hatago helo haru anda ibini. Hobane 5 li ngago de handabe.



Ai Isaraele agali Gileada dindiha hearumebi Galiliha hearumebi bibahendeme tinaga waitigi Asiria ami agali pora bialu ibida pole piyaru baya hangu ho hagira buwa bo wahaiore hene. Tigua talima pugu pugu bialu Damasagasa tano wiagoria tagira pialu uyuraore puabo hene.

<sup>6</sup> Wali agali Bedulia tanoha hearume Asiria ami agali balai anda bu hene biagoha puwa ami agali biarume mbirale bayale ngelo wahalu pene wiaru mo yini. Tigua dabudabu dewaore mo yalu tanoha dai bini. <sup>7</sup> Isaraele agali biarume Asiria ami biaru baba wai biai halu dai buwa tibi balai anda bu hene biagoha puwa dabudabu dewaore wiaria mo hilu yini. Dabudabu baya tara tara Asiria ami agali balai anda bu hene biagoha wiagola wali agali hari bare bare paliaga hearubi dindi uliniha paliaga hearubi bibahende ibalu mo hilu ya dege bini.

## **Isaraele wali agalirume Yudidi ibu wali mini lene lai hene.**

*(Be 15.8-16.25)*

### *Isaraele wali agali turu henego ogo*

<sup>8</sup> Agali loma binigo mo miaga haguane Yoagimi bi Isaraele wali agalinaga agali haguane bu hearubi bibahende Yarusaleme wahalu Ngode Datagaliwabehanda mbirale bayale Isaraele wali agali biamogo bialu biya layaru hondole pene. Ani bialu tigua Yudidi mo turu hole ibalu bini. <sup>9</sup> Ani pialu agali uruni tigua Yudidi ngola howa bibahendemeibunaga mini yaraga halu lalu, Ina Yarusalemenaga mini mo yaraga halu daligaho ngelarida. I Isaraele wali duniniore mbira mini lene bedegoni. Iname inaga mini yaraga harama. <sup>10</sup> Mbirale uruni bibahende ini hangumeore bidegoni. Ina dege Isaraele lone mo wayali harida. Ani bialu Ngode Datagaliwabehandabi ina biabe ogoni biridago hondowa turu timbuni ka. Ngode Datagaliwabe Bibahendenaga Hongo Haihe kagome i mo turu haabo helo larogo. Heneneore laro.

<sup>11</sup> Horo pira tebirani (30) Isaraele wali agalime dabudabu Asiria ami biarume balai anda bu hayagoria yu wahalu piyago mo yu tone bialu hene. Ainde dabudabu Holobere-nesenaga damenego bibahende balai andabi ndisi be belediru silibame wabini wiarubi dagia paliaga wiagobi gabo be wiagobi dagia wiagobi biragane dagia wiagobi maruale wiarubi bibahende mo yai hene. Ani bialu Yudidihanda mbirale uruni mo kabu bigi buwaibunaga nogo dongi erekunini mo paga halu ibugua garo nogo hosime gililagane mo manda manda bu ngelowa mbirale uruni mo paga howa gililo yalu tini dalu hari nene biagoha irigi hene. <sup>12</sup> Isaraele wali bibahendeme Yudidi hondole ibai ho hene. Tigua ibu mini leneore beda lowaibunaga mini yaraga halu marume ibu mani ibilo ti turu halu mali lima bamba hene. Yudidihanda ira yuni bu yuwa maru ibu heba pirimigo mini. <sup>13</sup> Iibunibi wali maru ibu heba piyarubi tigua ira olibe magane yuni heaore mabu buwa tinaga emboneni tangi mo karulene. Ani bialu tigua iba gana lalu mali lima piyadagoha ibu lu bamba hene. Ani biyagola Isaraele ami agali tigua danda timu yandarebi wai biaga ale yai howa ira yunirume tinaga emboneni yari biai halu turu holenenaga iba ganaru lama walini piyadagua mama pene.

## **16**

### *Yudidihanda Ngode Datagaliwabhondo bi lenego ogo*

<sup>1</sup> Yudidi ibugua Isaraele wali agali bibahende mandagi howa turu halu kai lolenenaga iba gana ogo layagola wali agali tigua talialu layadagua lene.

<sup>2</sup> Iname inaga Ngode Datagaliwabe- hondo iba gana lalu kaboga wialu tabaga balu Anduane Homogo mini yaraga hama.

Iba gana gahenge laluibunaga mini yaraga hama.

Ibunaga mini timbuniore mini lene ka lalu

inameibunaga mini olalu, Ina biamogo bibe, lalu lama.

- <sup>3</sup> Uruni irane Anduane Homogo ibu wai mo palia haga Ngode Datagaliwabeore kago  
 manda buwa  
 ibugua waitiginaga giha howa i mo wialu haru dai bialu  
i ibunaga wali agali heagohayagi haru dai bu helaya
- <sup>4</sup> Asirialiru uyurayagi howa daliape halu abaleore ibiya.  
 Tinaga ami agali dewaore howa dindi tigabi wiagoha ho namulai haya.  
 Ami agali nogo hosini biruwa wai biaga bu hearume  
 hari nene wialu ho karulai haya.
- <sup>5</sup> Tigua ina mo gi holenaga bi ogodagua laya  
 Inanaga dindi andaru bo heda holeberema, laya.  
 Tigua, Igiri daliahe karu ayu tiburume dibai holeberema, laya.  
 Tinaga waneigini gali bibahende dindini mo paraho waholeberema, laya.  
 Waneigini garabaya yalu poleberema, laya.  
 Tinanaga wandari mabuage bedaru bibahende mo ko holeberema, laya.
- <sup>6</sup> Anidagua bule layagola  
 Anduane Homogo Bibahendenaga Hongo Haihe kago  
 ibugua wali mbiranaga giha howa ti bope hayagoni ndobe.
- <sup>7</sup> Tinaga agali haguane ogoni igiri daliaheme ndo bayiya.  
 Agali hongohe mbirame ndo baya.  
 Merari wane Yudidi ibugua hangu  
 ibunaga dengui baya heagome agali mo luluya hayaya.
- <sup>8</sup> Ibugua ibunaga dara howa aga karulayago golo wahalu puwa  
 Isaraele wali agali darabi hearu bibahende mo yaraga hayiya.  
 Ibunaga dengui mbagua sandame hai howa  
 ibunaga mandari aga baya mbirame kabu bialu  
 aga bayaleru karulalu agalime hondowa dimagoli helo piyiya.
- <sup>9</sup> Agali haguane timbuni heagome Yudidinaga ge hondowa  
 dimagoli halu ibu wali baya taraoreyago handaya.  
 Ani bialu hearia Yudidi ibugua  
 wai biagane ayu tibume ibunaga ma puguayiya.
- <sup>10</sup> Pesia wali agali hearume wali biagonaga hongo wiago hondowa  
 ti mogo lowa durulalu haya.  
 Midiali hearu tigua handalu hearia  
 wali ogoni ibu gi nahaga heago de hondowa ti mogolo hendene.
- <sup>11</sup> Inanaga damene ala mo ko hene hearume  
 ti turu howa hoaro layagola  
 waitigi hayaru mogo lai haya.  
 Tigua hongo howa hoaro laga laga biyagola  
 waitigi agaliru mogolalu ibida piai haya.
- <sup>12</sup> Ina wali galone nahe biabe biaga waneiginirume  
 ti homelo bo wahai harima.  
 Iname garabaya agalime ibida poragola bagadagua bialu  
 ti homelo bo wahaiore harima.  
 Anduane Homogonaga ami agali giha howa ti ereba hai haya.
- <sup>13</sup> Inaga Ngode Datagaliwabe kagohondo  
 ina iba gana gahengeru lolebero.  
 Anduane Homogo-o i gibiore kegoni.  
i bolangua heneore kegoni.

Í bibahendenaga hongo haihe howa  
mendealime í bope halu ti wayali habe nahe ka.✠

14 Ina wabini ngaru bibahendeme  
íni andaneha haiore holene nga.  
Ína bi dege larigola mbirale uruni bame hai hene.

Ínaga buhe pulanda harigola  
abaleore aube tobane buwa  
mbirale uruni baya gibi haya.  
Mbiralime ínaga bi mo wahabe nahe.

15 Hari timbuni wedarubi iba solowara bedarubi tigua durulaga ndobe.  
Í kaware eberegola ege tole timbuni ngarume mo iba bu hinaga.  
Ínaga wali agalime ínaga bi hale haga karuhondo  
dara haga kegoni.

16 Loma ngabi dendebiore wiaguabi ogoni bame dege holebira.  
Nogo bulumaga habane lomabu delaga dabuni delayagua  
ogoni bame dalu biba haga.✠  
Mbiralime Anduane Homogonaga bi hale hayagua ibu galoneore holebira.

17 Dindi mbiraha padarume wali agali í damene baba wai bule ibiyagua nde  
ti de hondowa ibulene nga.  
Anduane Homogo Bibahendenaga Hongo Haihe kagome  
godi hale holene horo timbuni tagira ibirangi  
tihondo bi hale holebira.  
Ibugua ti kagotha ira hedape halu  
tinaga tingini ngoeme hai helolebira.  
Ani biragola tigua tandaga handaabo halu howa  
dugu bialu haabo holebira,  
lalu iba gana ogoni lai haya.

### *Yudidi mini lene berenego ogo*

18 Ani bialu wali agali Yarusaleme dai buwa tigua Ngode Datagaliwabhondo bi lalu hene. Wali agali tini Ngode Datagaliwabe deni dodo nahe hole mana biaga wiago biai howa tigua loma irani dai helonaga lomabu delalu wali agali tinime Ngode Datagaliwabe loma turu halu mule lalu bi lo winirubi tini hameme hangu hangu yalu ibiyaru bibahende loma uruni bu migi bialu hene. 19 Mbirale Holoberenesenaga dabudabu mo yayaruni wali agali tigua Yudidi mo miai henego ainde Yudidi ibugua Ngode Datagaliwabe mo mini. Ani bialu labolabo hinabibi hagira biaga Yudidi ibuni Holoberenesenaga mo yini biagobi Anduane Homogo dege mini. 20 Ege tebiraru bibahende howa wali agali ti turu halu Ngode Datagaliwabenaga anda Yarusalemeni heago kawareni haabo henego ai Yudidi ibubi nde ti haru hene.

21 Turu ho holene horo uruni hai halu wali agali bibahende tini dalu dai biai hene. Yudidi ibu nde Bedulia tano dai buwa ibunaga dindi wiyadagoria berene. Horo ogonongi howa ibu Isaraele dindiha mini lene mbira biraabo halu homalu wahene. 22 Yudidi ibu agalini Manase homayagola tigua ibu mamaliru homali heagoria mandagi hora halu Yudidi dalo bereagola agali marume dabu dabulene manda bialu hemiria ibu agali nape biraabo halu homene. 23 Ibugua mini loyogo lai hene. Ibu agalini andaga heagoha biraabo halu ibunaga mali handari mbirani duria (105) berene. Ani

✠ 16:13: Iba 144.9 ✠ 16:16: Iba 51.16-17, 1 Sml 15.22, Hos 6.6

biruwa wali ibunaga garabaya biabe ale bia haga biago yupe halu pu lene. Ani bialu ibu homayagola Bedulia tanoha ibu agalini Manase hora heagoha dege hora hene. <sup>24</sup>Yudidi ibu homayagola Isaraele wali agalime dara howa horo karu dugu bialu duguanda ho hene. Ibu homa nabi dege biruwa ibunaga paluni wiaru bibahende tale buwa maru ibu agalini Manase damene hearu talebu mialu maru ibuni damene mini. <sup>25</sup>Yudidi ibuni bereangibi mani Yudidi ibu homeagolabi waitigime Isaraele wali agali mo gi holene henge mbira nawiore bayale haabo hene.

## **Eседа Girigi Bi**

### **Mbuga ogoha gilibu ngarunaga nemandi ogo**

Esedanaga te ledagoni Isaraele wali mbiranaga te nga. Eседа ibu waitigime Isaraele wali agali garabaya bu yalu dindi taraha pu heangi berene. Ti dindi tara ogoniha heangi waitigi mbirame Isaraele wali agali mo ko hole manda bini. Ani biyadangi Ngode Datagaliwabe ibunime Isaraele wali agali Esedahanda biamogo bilo manda buwa biamogo bulenaga Eседа ibu dindi ogoniha kini heago one berelo ibu ala dabo bere lene. Anidagua biyagola Eседа ibugua nde ibu agua bulubada lo manda nabi ibugua Ngode Datagaliwabehanda hame leago dege talialu bini. Ibugua wali agali ibuni damene hearu biamogo bulene dege manda bini. Anidagua biyadagome nde Ngode Datagaliwabehanda Isaraele mo ko nahelo mo wialu haru dai biyagola waitigime Isaraele mo ko halu bo wahai nahene.

Mbuga Baiboloha Esedanaga mbuga kirani Esedanaga te leda. Pigane tigua mbuga ogo Hiburu bi lowa gilibu wialu mani howa Girigi bi lo beregedo winigo nga. Anigo tigua Girigi bi lalu gilibu wiyadagoaha bi emene lo iriari buwa gilibu winiya. Ani bialu bi gahange maru gili biatago hayiya.

Ai Eседа mbuga Girigi bi lowa gilibu wini ngagome bi hongohe mbira ledago minime hongo howa Ngode Datagaliwabe mitangi bialu ibuhondo bi lolene nga lalu mo walia ho nga. Eседа mbuga Hiburu bi lalu gilibu wini ngagoha be waragara bibahende nagilibuwi. Hiburu bi gilibu ngagoha Be pira hangu nga. Ai Be gahange mo tago hene uruni Be A howa pialu Be G ogoriani wiamaro bida. Ani bialu gahange uruni ti Be mbira howa pira ngago dombeneha wiatago haga bini nga. Ani bialu Be B ibu Be 3.13 wialu 3.14 nga. Ani bialu Be E ibu Be 8.12 wialu 8.13 ogonilabo hengeneha nga. Ani bidagome Be 3 Be 8 kirabali mbuga kirabaliha nga.

#### *Modegaihanda emaga hendenego ogo*

(1-3) Babilono Kini Nebugadenesa ibugua Isaraele bai halu wayali hayangi agali mbira mini Modegai ibu Beniyamini hameigini henego ibubi Yuda kini Yahoiajinibi heba garabaya bu yalu pene. Modegai ibu Yairi igini howa Simai aguane hene. Simai ibu Kisi igini hene. Ibu puwa Susa tano wiagoria pu berene. Susa tano ogoni Pesia dindiha tano timbuni dunini mbira wini. Ani howa ibu kini Segesisinaga biabe timbuni dunini timbuni mbira bialu haga hene.

Ai Segesisu ibu kini hearia mali mendeni ege Nisana heagola ogoninaga horo mbiru Modegai ibugua emaga mbira hendene. <sup>☆</sup> (4) Ibugua emaga handalu hearia dindini wiaru damene bibahende mo lingilungu lai howa dindi kili kulu lalu hari kulu kala lalu dindi dumbidumbi bialu mbirale bibahende mo lulu ya hayane hendene. (5) Ani biyagola puya timbuni kirame wai bule manda manda bu wiaria hendene. (6) Libugua bi hongo howa ladaga hayagola wali agali dindi bibahendehe hearume Ngode Datagaliwabenaga wali agali tigabi ibunihondo lotu lalu haga hearu baba wai bule manda manda bu hai hearia de hendene. (7) Horo ogoniangi horo koni arumahe wuwa genda yulene mbira wiaria de hendene. Ogoni dugu bulene horobi ko tara tara ngola holene horobi mo ko holene horobi wiaria hendene. (8) Ngode Datagaliwabenaga wali agali tigabi hearu tiha ko tara tara ogoni anda ibule wiagola ti gi timbuniore ho hea. Ani howa ti homole manda manda bu hea. (9) Ani howa ai Ngode Datagaliwabhondo ti biamogo bia lalu Ngode Datagaliwabe olaya. Ai Modegai ibugua emagaha handalu hearia tinaga Ngode Datagaliwabehanda tinaga bi layago hale hayago hendene. Ibugua handalu hearia iba emene mbira dindiha howa dugatagi howa pialu unura emeneore timbu

☆ 1:1-3: 2 Kin 24.10-16



haga bima pialu mani unuraore timbuni gibiore piyago hendene. <sup>(10)</sup> Ai gaolopaya bialu ni tagira ibiyane hendene. Ani biyagola wali agali ko mini nahe uruni tigua waitigi ko mine haga uruni balu bo wahaiore hene.

<sup>(11)</sup> Ani hondowa Modegai ibu heyuwa ibugua emaga Ngode Datagaliwabehanda mo walia hayago irane aginaga daba hondole miyago miniha mo tale bialu berene.\*

*Modegai ibugua kini pelemnigo ogo*

<sup>(12)</sup> Horo mbiru hayagola Modegai ibu kini anda hane tagira yagi berene. Agali kininaga biabe bia haga kirali Gabada Tarala libu nde mamage haga henego ai libu libuni biabe biagadago bialu hene. <sup>(13)</sup> Modegai ibu biruwa hale halu hearia libugua ko bule bi lalu hebira hale hene. Ibugua baya hangu hale halu hearia libugua lalu, Kini homelo bo wahabiya, layago hale hene. Ani layago hale halu Modegai ibugua kini hearia puwa layane hale hayaru bibahende lamiai hene. <sup>(14)</sup> Libugua godi laribigo hale halu hemiria libuha bi mbira nawiore hebiria hendene. Ani hebigo hondowa libu homelo bo wahene.

<sup>(15)</sup> Kinihanda agali beba gili biaga heagohondo bia layagola tigua agali kira biago labome biyago te kininaga binigo gilibu wiaga mbuga wiagoria gilibu wia layagola gilibu wini. Modegai ibuguabi nde te ogoni ibuninaga mbuga wiagoha gilibu wia dege bini. <sup>(16)</sup> Ai Modegaihanda kini ibu homolene mo wahayagonaga kini ibugua mbiraleru dewaore bame hilo mialu ibu agali haguane mbira howa ibu andagaha handaya ho haga helo dabo helalu bini.

<sup>(17)</sup> Anigo agali mbira Bugai hameigini aria Hamedada igini Hamana ibubi nde kininaga deni mini lene agali haguane dege mbira hene. Ani howa ai agali kirali biago labo Modegaihanda libu ko biya layagome bo wahayagonaga Hamanahanda Modegai halu Yuda wali agali bu hearu mo ko hole ndelene.

*Kuini wali Basidihanda Kini Segesisihondo mine henego ogo*

<sup>1-2</sup> Mbirale uruni biyagola Pesia dindiha Segesisi ibu kini heangi bini. Ibu kini howa Pesia dindiha dindi timbuni Susa tanoni kini biragane dagia wiagoria handame ho howa haru hene. Ani howa ibugua dindi hobane handari mbira pira kirani karia <sup>(127)</sup> bibahende India dindiha howa wima pialu amuroaore Sudana dindiha wiairi hene.\*

<sup>3</sup> Ibu kini henego mali tebone howa ibugua dindi bibahendenaga agali bu hearubi agali manda timbuni bi hearubi bibahendenaga tomo timbuni dawa hene. Pesia dindi howabi Midia dindiha howabi nde tomo ogoni nalu berene. Ani bialu dindi hobane emene mbira mbiranaga agali haguane bu hearubi bibahende ibu birai hene. <sup>4</sup> Ani howa ege waraganeni ibunaga muni yaribi bayale wiaru damene bibahende agali haguane bu hearu wanakuini mo walia hai hene.

<sup>5</sup> Ani bialu mani howa kini ibu dalu andagaha pabe bu mabu bini wiagoha yagi tomo timbuni lone dawene. Tomo ogoni agali taraha howa ibu hene tanoha hearunaga dawa hene. Tigua tomo nalu horo karia bibahende hene. <sup>6</sup> Pabe bu mabu binidago aga peleme mo yari bia howa pu mindibi hari mindini handaleheme dariba hene. Aga ogoni nguni bibahendeha silibame wabini mabubime daba haga buwa ege pabe heagoria mo paga howa mo yaribia haga bini. Ai pabe andaneha ege tole baya tara pelebi daramabi wiarubi mindibi hari mindini handalehe wiarubi ege tole tara iba waj handalehe wiarubi urunime dindini dunga ho wini. Ani wiagoria biragane dagia ngolome wabini silibame wabiniru pabe andaneha ege tole dunga henedagoria wiai hene. Ani bialu dagia uruni aga baya tara tara wiarume dunga halu mo dambi howa mo yari bia halu bini. <sup>7</sup> Ani bialu agali gabo be ngolome wabinirubi silibame wabini wiarume iba nalu berene. Ani biruwa gabo be mbira yolo timuni daligaore kina dege daosini pira tebirame (K30,000) miaga wiago ti mo walia hene. Ani bialu kini ibugua

\* **1:11:** Emaga ogonaga irane galone G1-6 nagago hondolene nga.    ✧ **1:1-2:** Esr 4.6

agali uruni waini iba dewaore nelo mini. <sup>8</sup>Waini iba ogodagua nalu karulape lo manda nabi agali bedaru ti iba tini hame ledadagua karulape nelo mia dege bilimu lalu agali waini iba odo tale biaga ibu andagaha haga hearuhondo lamini.

<sup>9</sup>Horo ogoningi dege kuini wali Basidi ibugua nde kini andagaha dege walinaga tomo timbuni dawa nalu berene. Tomo ogoni walinaga hanguore wini.

<sup>10</sup>Tomo ani nalu biruwa horo kane hayagola kini ibu waini iba nowa emene lulu yu berene. Ani biruwa ibu andagaha biabe biaga agali karia hearu olalu ibidaba lene. Agali uruni mini Hamana Basana Tara Borase Sadoloda Abadasa Taraba layaru henego uruni ibini. <sup>11</sup>Ani ibiyagola kinihanda lalu, Kuini wali Basidi haru ibidaba, lene. Kini ibugua Basidi haguane kuini walinaga tangi mo karula holenaga ani lene. Kuini wali ogoni bayaleore tara wali maru baba tabe tabe nabi berenego ai kini ibugua ibu one baya ogoni agali maru tomo nalu berearu mo walia hole manda bini. <sup>12</sup>Ani manda bialu layaria ai kuini wali ogoni ibu ibulene hame nalene. Ani biyagola kini ibu keba timbuniore hene.

<sup>13</sup>Ani howa ibugua agali mana mandabi bu hearuhondo lamialu, Kuini wali Basidihanda bi mo wahayago ayu ibuhondo agi buabe, lalu hale hene. <sup>14-15</sup>Ani hale hayagola agali haguane timbuni tebirali kini ibuniale dege henego ibini. Agali tebirali uruni tigua kinihondo ti daluha mana wiago lawai halu, Ai mbirale kuini Basidihanda biyadagonaga ogodagua bulene nga, lalubi lamialu bini. Agali tebirali uruni ti mini Ageseusu Sasadeusu Malesea layaru hene. Agali tebirali uruni ti Pesia dindibi Midia dindibi howa ibu hene.

<sup>16</sup>Ai kini ibugua ibunaga agali haguane Pesia dindialibi Midialibi hearuhondo mbirale kuini wali Basidihanda ibuhondo biyaru lamiai hene. Ani lamiyagola agali mbira mini Mugeusu heago ibugua agali haguane hearuhondo lamialu lalu, Kini-o bi ogo hale harene. Ai kuini Basidihanda ko ogoni ihondo hangu ndo biyada. Ibugua ina bibahendehondo biyida. <sup>17-18</sup>Ainde inanaga wali bedaru bibahendeme kuini wali Basidihanda ogonidagua biya larago abale hale hayago lolobada. Ani bialu wali bedaru bibahendeme kuini wali Basidihanda biyadadagua dege ti agalininaga bi mo wahalu mine holobada. <sup>19</sup>Anidagua bulubadago ai kini-o ina manda bialu keria bi ogoni bayaleda lo manda bideyagua nde bi ogoni wali agali bibahende kagotha piai helolene karulapeda. Ina bi ogoni lo pelalu howa tihondo lalu, Ai Basidi ibu i bedoria ibulene nawiore lolene nga. Ani lalu bi ogoni Pesia dindi Midia dindilanaga mana mbuga ngagotha gilibu wulene nga. Ani bialu wali bayale mbira taya buwa Basidi kuini wali berenegeria bira aribia helo taya bulene nga. Ai ogoni hangu. <sup>20</sup>Ai ŋaga bi ogoni dindi ŋa hondo kego bibahendeha wali agali bu karume hale hai harangi wali lenego bibahendeore agali haguane one bereaguabi agali damene one bereaguabi bibahendeme ti agalini bi hale hai holebira, lene.

<sup>21</sup>Ani layagola kinibi ibunaga agali haguane biarume bi ogoni karulapeda lowa ai kini ibugua Mugeusuhanda lamiyadagua bini. <sup>22</sup>Ibugua beba gili bialu dindi ibugua wiaru bibahendeha wali agali bi tara tara laga laga biaga wiagodagua gili bialu pelai hene. Kini ibugua beba ogoniha gilibu wialu lalu, Agali ibu hangume ibu one waneigini bibahende handaya ho hai ka, lalu gilibu pelene.

## 2

### *Eседа Kuini wali berenego ogo*

<sup>1</sup>Mani howa nde kini ibu keba hayago wa hene. Anigo ainde ibugua Basdi kuini naberele bo duguayago mitangi biaabo ho haga hene. <sup>2</sup>Ani heagola agali manda timbunibi hearume ibuhondo lamialu lalu, Ai wandari bayaore mbira taya bulene karulapeda. <sup>3</sup>Agali haguane dindi hobane mbira mbira ngaruha karu bibahendehondo wandari baya bedaru gabumanenaga tano dunini Susa tano haru ibalimu lolene

karulapeda. Ani haru halu ibiragola ínaga wali anda kagoha bere lowa ínaga wali bedaru handaya hagane agali Hegai kago ibugua handaya ho helo. Ani handaya ho kagola wali bayale helonaga tinaga tingini yari bia weliru haj ha bilo. <sup>4</sup> Anidagua biragola wali mbira ínimeore hame ledego dabaregola ogoni ibugua Basidi berenegoria bira aribia howa kuini wali berelo, lene.

Kini ibugua bi uruni karulapeda lowa bi layago talialu bini.

<sup>5</sup> Ai tano timbuni Susa tano wiagoria Yudali mbira mini Modegai hene. Ai Modegai ibu Yairi igini howa Simai aguane halu Simai ibu Beniyamini hameigini aria Kisi igini heago aguane hene. <sup>6</sup> Bamba Babilono kini Nebugadenesahanda Yuda wali agali garabaya yalu piai hene. Ani piyadangi Modegai heba garabaya yalu pene. <sup>7</sup> Modegai ibu wane emene mbira mini Eseda berenego ti haru dege pene Eseda ogoni ibu Aminadaba Modegai aba hamene heyogone henego wane berene. Ainde Eseda aba aiyala homayagola Modegai ibu waneore biraradagua berene. Eseda wandari baya taraore mbira bereagola Modegaihanda ibuni dabu bulene manda bu hene.

<sup>8</sup> Ai kini ibugua bi lo yu porogo lelayagola tigua wandari baya berearu haru halu Susa tano ibai hene. Ai Esedabi nde ti haru mandagi ibini. Haru ibuwa kini daluha yagi anda wali anda heagoha bere lene. Ani bereagola agali mbira mini Hegai henegome handaya ho hene. <sup>9</sup> Hegaihanda Eseda wali baya bereago hondowa ibu hame lo hene. Ani howa ibugua aga bayalerubi weli baya tara tara wiarubi Eseda yari bilo mo mini. Ani bialu tomo bayaleru nalu berelo mialu bini. Ani bialu howa ibugua wandari kira kininaga wali andaha berearume Eseda handaya ho berelo dabo bere lene. Ani bialu Hegaihanda wandari uruni hondo bayale dege bialu haabo hene.

<sup>10</sup> Abale howa Modegaihanda Esedahondo bi ogodagua lene. Ibu Yuda wali bedo lalu nalabe, lalu lamini. Ani layagola Eseda ibugua ibu aba hamene biagome bi layago baya hangu manda bu berene. <sup>11</sup> Ainde horo bibahendengi Modegaihanda kininaga wali anda heagonaga haneni bolangua halu pugu biaga hene. Ibugua Eseda agua biraruabe hondolebi tigua Esedahondo agi bulubadabe hondolebi ani puibu biaga hene.

<sup>12</sup> Mali mbirani wandari haru ibiyaru bibahende bayale berelonaga mo yari bia ha tomo bayaleru nelu mia bialu haabo hene. Ani bialu ege waragariani tigua weli baya tara ira mue ibaneme wabini baya ngabi wiarume wandari uruni tingini bayale helo haj halu hene. <sup>13</sup> Ani bialu howa mani tigua wali uruni horo mbiru wali mbira haru pugu bialu kini Segesisi berearia haru pugu bini. <sup>14</sup> Wali ti kini andaga alendo ne ledegola pialu egerebagi gao laragola dai bigi biaga wini. Ani dai biragola tigua wali uruni kininaga anda mende wali ibu one wabuni halu mende laga biraga anda kagoha bere lowa Hegaihanda handaya ho helo haru puwa bere laga hene. Ani bialu wali uruni lone kini andaga dai bulene nawi. Ai kini ibuni hameme wali mbirago mini olalu kini ibu andaga ibabe layiyagua nde pugu biaga wini. Tigua tini hameme kini andaga polene hariga nawi.

<sup>15</sup> Eseda ibugua kinihondo polene horo tagira ibiyagola Eseda ogoni ibu Modegai aba hamene heyogone mini Aminadaba mbira henego wane berene. Ibugua Hegaihanda bi mana lalu lawai harago bibahende baya hangu hale howa talialu bereagola wali agali bibahendeme ibu gubalini timbuni halu turu hai haga berene. <sup>16</sup> Horo ogoni kini Segesisi ibu kini heane mali karia hene. Ai mali ogoninaga ege hambene (12) mini Ada layagola tigua Eseda kini berearia haru anda pene. <sup>17</sup> Ani haru anda piyagola kini ibu hondowa ibugua Eseda gubalini timbuni hene. Wali mende kininaga gubalini podene Eseda ale mende nabere ibu hangu berene. Ani biyagola ai kinihanda Eseda hagianeni kuini walinaga tangi mo karula hene. <sup>18</sup> Ani bialu horo kariani kini ibugua tomo dawa nalu biraabo hene. Ani bialu howa ibugua agali haguane hearubi agali manda timbunibi bu hearubi bibahende Eseda libu dabu bialu howa tomo dawalu turu

✧ 2:6: 2 Kin 24.10-16, 2 Bit 36.10

haga bu biramiya ibidaba laga bini. Ai horo ogoningi ibu dindiha wali agalime dagisi muni wiaga wiadagua nami gadiape howa dagisi milimu lalu kinihanda latagi hene.

*Modegaihanda kini biamogo biyagola tigua kini nabeneo ogo*

<sup>19</sup> Horo ogoningi dege kinihanda Modegai kini ibu andaga handaya ho helo dabo helalu bini. <sup>20</sup> Bamba howa Modegai ibugua Esedahondo lamialu ibu Yuda wali bedo lalu mbirali nalamibe lalu lamini. Eseda ibunaga mana Modegaihanda bi larago baya hangu hale halu biai haga biruwa ibugua layago hale halu nale berene. Ibugua Ngode Datagaliwabehondo bi laabo halu biraga biruwa ibugua Ngode Datagaliwabenaga bi mana baya hangu talialu biraga berene. Ani bialu ibugua mana Yuda wali agalime biaga wiaru mbira wanahe berene.

<sup>21</sup> Ai Modegai ibugua kini Segesisinaga biabe bialu heagola agali haguane kininaga biabe bialu kini hadaya ho haga heagolabome kinila keba ho howa libugua kini bo wahole bi lalu lo manda bini. <sup>22</sup> Ani lalu hebigo Modegai hale howa ibugua kuini Eseda lamini. Mani howa Eseda ibugua bi Modegaihanda hale howa lamiyaru kini hale helo lamini. <sup>23</sup> Ani lamiyagola kini ibugua dabo handalu hearia bi uruni henene leneyane handa walia hene. Ani hale howa tigua agali kira ogoni labo irani bo derela hayagola homene. Ai mani kini ibugua Modegainaga mini mo yaraga holenaga lalu, Ai wali agalime biabe baya gibiore Modegaihanda biyago embeda nahelonaga te gabumane mbuga ngagoha gilibu widaba, layagola tigua te ogoni gilibu wini.

### 3

<sup>14</sup> Ai bi ogo wali agali bibahendeme hale holene nga. Ai horo ogoni tagira ibirangi tí bibahendeme wali agali uruni homelo bo wahai hole manda manda bu halimu.

<sup>15</sup> Ani lalu bi ogoni tano timbuni dunini Susa wiagoria howa latagi hayagola wali agali bu hearu bibahendeore hale hai hene. Ai kini ibunibi Hamanabi libu hangu turu howa bu miniha dungulo howa waini iba dewa nalu lulu yu berene.

### 4

*Esedahondo Yuda biamogo bia lalu Modegai ibugua Eseda hale henego ogo*

<sup>1</sup> Ai Modegai ibu bi o layadagoni hale howa ibu gi timbuni ho hene ibunaga bu miniha genda timbuni ho howa ibunaga aga bu heago lerelo wahowa be abalu haguani dugu wu berene. Anidagua bialu tanoha anda pole pialu howa kiabu dugu bialu lalu, Wali agali ko mbira bini nawi karu homelo bameore bo wahole biragonida, lene. <sup>2</sup> Ani lama pialu kini andaga haneni pu hene. Mbirali kini andaga tamuha anda polenaga aga bayale karu lalu anda piagane wiagola ibu aga bayale nabi ibuwa tagirani berene. <sup>3</sup> Ai tigua kininaga bi biago dindi bibahende ha hale hai howa Yuda wali agali bibahende gi halu mogo timbuni lowa bu miniha genda timbuni yu hai halu ga laga laga bialu hene. Ti tomo nane wahalu dugu bigi bigi bialu kiabu dugu bialu haga haga bini. Yuda wali agali dewaoreme aga ko budabagabi wiaru mo karu lai halu be abalu wiagoria paliai hene.

<sup>4</sup> Wali Esedanaga biabe biaga berearumebi agali Esedanaga biabe biaga hearubi tigua Modegaihanda anidagua bira layago hale howa Eseda ibunaga bu miniha genda timbuni howa mini burugu lo berene. Ainde Modegaihanda aga ko biyadago golo wahalu bayale karu lelonaga aga bayale yalu pelo mbirali heagohondo mo mini. Ani yalu ibiyagola Modegai ibu manga hene. <sup>5-6</sup> Ani layayago hale howa Esedahanda agali mbira mini Hadaga heago olalu ibu lene. Hadaga ogoni ibu agali kininaga wali bedaru handaya ho haga howa ibu Esedanaga biabe biaga agali mbira helonaga kinihanda dabo helene. Ani henego ai Esedahanda Hadaga abale Modegai bedaria puwa í agua biyabe lalu hale hole pu laya handala puwa hale hene. <sup>7</sup> Ibugua puwa hale hayagola Modegai ibugua mbirale biyarunaga te bibahende lamiai hene. Ani lalu Yuda wali agali

bibahende bo wahai hayagua Hamanahanda siliba dewaore genda handari tebirani pira kariani duria (375) bibahende kininaga muni andaha ngelole laya. <sup>8</sup> Ani lalu Modegai ibugua Hamananaga beba ogoni aria mbira yu henego Eseda hendelo yalu pelo mini. Ani bialu Eseda ibunime kini bedaria puwa Yuda wali agali dara halu nabelonaga kini la debodebo bule pobe lalu bi lamini. Ani lowa Modegaihanda bi mbira Hadaga ibugua Eseda bedaria lamule pelonaga agua lamini. Eseda í wandari emene berengi inime baya hangu handaya ho harugo embeda nahabe. Ai ayu Hamana ibu kininaga haguane bedago biruwa ina mo ko halu bo wahai hole bi layadago. Ainde ina Anduane Homogohondo bi ala lalu mani kinila bi lole pobe. Ina ina mo wialu haru dai bulene karulape nga, lalu lawia hene.

<sup>9</sup> Ani laya handala Hadaga ibugua bi uruni Eseda lamule pene. <sup>10</sup> Ani lama piyago hale halu Eseda ibugua bi mbira Modegai bedaria lama dai bilonaga Hadaga lamini. <sup>11</sup> Ibugua lalu, Ina kini hondole polene nakarulapeda. Kinihanda mbirali ibu ibabe layagua nde hondo anda piaga. Ai mbirali ibu ibabe naledaha ibuni anda piyagua ogoni ibu homelo bo wahaga mana ngago bibahende manda biai ka. Mana ogoni ba lalu polene hariga mbiraore hangu ngago ogo. Mbirali ibu bame anda pialu karia kininaga halimbu ngolome wabini ngagome ibu lalu yaraga hayagua nde ogoni ibu nahomolebira. Ai kini ibugua i ibabe nale dege heane ege mbira poragoni, lene.

<sup>12</sup> Modegai ibugua Esedahanda bi layayago hale howa <sup>13</sup> ibugua ladai bialu lalu, Heneneore í kini andaga bedegome ini karulape biruleberobe tobaho bede. Anigo ai íbi nde Yuda wali agali maru kamaru homaramadagua mandagi homolene wulebira. <sup>14</sup> Ai ayu ina bi nale ne ndibulo birariyagua nde mendeale mbirame ibalu ina biamogo bulebira. Anigo ai ini homariyagua nde ini damene lonego mbira nahe ereba hai haragoni holebira. Anigo ai mo ko holene ibu nganggi ina Yuda wali agali biamogo bulenaga í kuini wali biraribe tobahego handamiya, lene.

<sup>15</sup> Ani layiyago hale howa Eseda ibugua Modegaihondo ladai bialu lalu, <sup>16</sup> Ai ayu ogoni í Susa tanoha puwa Yuda wali agali bibahende lamialu tigua tomo nane howa i mitangi bialu Anduane Homogohondo bi lalimu. Ani bialu howa tigua iba hinabi nane horo tebira mbi tebira lowa halimu. Inibi nde wali inaga biabe biaga bedaru baba ani dege bialu biruleberema. Ani bialu horo ogonidagua piai haragola ina kini bedaria polebero. Mana ngago mo wahalu harugo polebero. Anidagua berogola i homaruyagua nde bi nawi karulape degego poliya, lene.

<sup>17</sup> Modegai ibu Esedanaga bi layiyago hale hai halu ibu kini anda haneni birayago wahalu Esedahanda bilimu layago bule pene.

### *Modegai ibugua Anduane Homogohondo bi lenego ogo*

(1) Modegai ibu mbirale Anduane Homogohonda biyaru mitangi bu dai buwa ibugua Anduane Homogohondo bi lalu biruwa lalu, (2) Anduane Homogo ini mbirale bibahende dindini ngarunaga handaya ho haga kegoni. Bibahende karumebi ngarumebi inaga bi hale haga. Ina ina Isaraele wali agali kemaru biamogo beregola nabibe lowa hapai holene mbira naheore. (3) Inime dindi harila wabialu mbirale bayale uruniha karubi ngarubi wabiai haga ke. (4) Ini mbirale uruni haru hai haga kegola mbirale mbirame inaga bi mo wahabe nahe ka. (5) Ina mbirale bibahende manda biai ho kegoni. Ai ina agali mine haga Hamananaga mini yaraga halu bulu palialu ge duli hanga nahe harugoni ini mine howa ininaga mini yaraga halu ndo biru. (6) Anidagua birugo irane ina Anduane Homogonaga mini yaraga halu bulene ngago bame agali dege kagoha mini yaraga holene nawi. Ina inaga mini yaraga hole hangu ma podalu bulu paliruli. (7) Ainde ina handalu koria iname mana ogonidagua beremagome ina Isaraele wali agali biamogo bilonaga bulene ngale nde ina Hamana geha bulupalialu ibunaga ge hondene nunu ledole.



(8-9) Anduane Homogo í Ngode Datagaliwabebi kinibi íni hangu howa í Abarahamanga Ngode Datagaliwabe kego ina ínaga wali agali kemaru baba mandagi haabo habe. Inanaga waitigi bu karume ina mo ko nahelabe. Tigua ina bo wahai holenaga bi lo mbira halu lo nga. Ai horo ina bo wahai hole pongo wiyadago tagira ibilonaga maliaho ka. Bambaore howa ina ina íninaga wali agali holomaya dababagiho helalu ína ina Iyibi dindi howa haru tagira pialu haru ibiri. Ayu ina yu wanahabe.☆ (10) Ina ínaga wali agali hene biaruore kemagoni. Ani kemago manda bialu ína ina dara halu ina íhondo bi larogo hale halu biamogo bibe. Genda holene horo ogoni mo aribia halu turu holene horo mo wibe. Iname iba ganaru lalu ínaga mini lalu bi lolomaya ani bibe. Ina homelo yupe nahabe. Ina íhondo bi lalu haabo holene hame lo kema, lene.

(11) Horo ogonungi Isaraele wali agali ti homoleore harimada lo manda bialu Ngode Datagaliwabehanda ti biamogo bia lowa bi hongo howa ladaga daga bialu hene.

*Kuini wali Esedahanda Anduane Homogohondo bi lenego ogo*

(12) Ainde kuini wali Eseda ibubi bu miniha genda ho biruwa ibugua Ngode Datagaliwabehondo bi lalu berene. (13) Ibunaga aga bayale biaru golo ngelowa aga ko dara ho biruwa karu lagane wiago mo karulo berene. Ibugua wayawaya nabi biralu ibuni tingini weli mini sanda bayale ngabi wiarubi hai nahe berene. Ibugua be abalubi nogo bulumaga tibi ibunaga hagianeni mo ngelo berene. Ibunaga yari bayale karulo biraga wiaru golo wahai howa aga ko wiaru koru lowa wali maru berearubi dege berene. Abale ibunaga mandari luni baya heago here buwa mo yaribia ho biraga berene. Anigo ayu howa mandari baya ogoni hadapaya bialu bame helo berene (14) Ani bialu ibugua Anduane Homogo Isaraelenaga Ngode Datagaliwabehondo bi lalu berene. Ibugua lalu, Anduane Homogo íni hangu Ngode Datagaliwabebi kiniorebi kegoni. Ainde ayu ogoni í biamogo bia. I biamogo bulene mbirali nahe íni hanguore kegoni ndobe. Ai i biamogo bulene íni hanguore kegoni. (15) Ainde ínaga holene wahalu i homoligo ayu ogoni abale biamogo bia. (16) Anduane Homogo-o abale i wandari emene berewangi i damenerume mbirale ína biagago damene bibahende te lai haya. Tigua lalu, Ina Isaraele wali agali ínaga ho bamba ho holomaya ínime ina Isaraele dabene laya. Bambaore inanaga mamaliru dabalulu ina ínaga wali agali haabo holomaya dabene laya. Ani bialu ina ogoale bule lalu ti baba bi lo wiriru biai hariya.

(17) Anigo ainde iname íhondo ko bialu harima. Iname mbirale dama mitangi bialu bi pupu wiaga gime wabini wali agali tara hearunaga wiagohondo bi pupu wialu hemaria ina inahondo keba halu ina waitigi bu hearu giha minu ya hari. (18) Anidagua birigola inaha bi lolene mbira naheore kemagoni ndobe. Ína ina pani ngulene tigabioreni ngiri. (19) Ai ayu waitigi tigua ina tinaga garabaya biabe ale bialu holenebi karulapeoredane hondowa inahondo manga ho ka. Ani howa tigua tinaga bi pupu wiaga gime wabini wiarunaga mini lowa henene buleore lalu bi lo wialu (20) ina wali agali íhondo bi lalu haga kemaru bibahendeore bo wahaiore holeberema lalu bi hongohe lo wiya. Tigua ínaga bi mana lo wini ngago mo wahole manda bu halu tigua dege ínaga andabi loma bu delaga dabu kagobi bo gialohole bule manda bu ka. (21) Tigua hame lo kago wali agali dindi bibahende ha karu bibahendeme mbirale bi pupu wule gime wabini ko ngubiore wiaruhondo bi pupu wialu tinaga kini dindini hene agali dege kagonaga mini yaraga helo hame lo ka.

(22) Anduane Homogo-o mbirale bi pupu wulenaga gime wabini bu ngaruni ko ngubi galone nabulene bameore ngago ndobe. Tigua í bope helo yupe nahabe. Waitigi karume ina mo ko howaore homaramago ti de hondowa oba helo nahelabe. Tininaga mini ko ogonime beregeda dai bialu tiniha dai bialu tini mo ko helo helabe. Ani bialu

☆ 4:8-9: Har 3.6

agali ko ina mo ko halu bo wahole manda bu kago ibuni homelo ibuni manda manda bu ngago ha mo dela habe.

(23) Anduane Homogo-o inaore mitangi bibe. Genda timbuni ogoni inaha tagira ibirangi ini ina baba mandagi haabo habe. I mbirale bi pupu wule gime wabini ngarunaga kiniore kego howa mbirale dindini ngaru bibahendenaga handaya ho haga ini hanguore kegome inaga bu mini ayu ogoni mo hongo ha. (24) Ai ina tamuha anda puwa Segesisila bi larogola inaga bi dendebiore inaga ne hambu hegeni mo wia habe. ✧ (25) Anduane Homogo-o ina biamogo bule ibalu inibi biamogo bia. I biamogo bulene mbira nahe ini hangu kogo biamogo bia. I biamogo bulene i hangu kegoni.

(26) Anduane Homogo ina bibahendeore manda biai ke. I wali agali inaga mana ngago baya hangu talia nabiaga bu karume ihondo turu howa bi lalu inaga mini yaraga halubi karunihondo ina turu naheore birarugo ini manda bide. I agali tinaga dongone napoderu baba mandagi paluene manga halu agali hameigini tara baba palibe manga haruligo ini manda bide. (27) Anigo ainde uruni ininaga hameme ndo bidogo ini manda bide. Horo marungi nde tinaga turu holene horo tagira ibirangi nde ina kuini walinaga manda karulo bira biruleberogo ainde inaga miniha turu naheore bedo. Ina kuininaga manda karulo biragago irane maname lalu mandaore karu lo birulene nga lalu mana hongoheore wini nga. Inime mbirale uruni mo galone naheore bedo Ina handalu hewaria manda ogoni galone ndo bame aga labolabo budu lerelo wahene mbira wiaru ale degeyane handaru. (28) I Hamanala tomo nole palene turu nahe howa ai kinilabi nde mandagi nalu birulene turu nahe bedo. Tigua waini iba tinaga bi pupu wiaga gime wabini wiagohondo mo loma bini ngago nanaruli. ✧ (29) I oali hewangi mbiraore mbirame dege i mo turu hagane. Mo turu hagane ogoni Anduane Homogo Abaramanaga Ngode Datagaliwabe hongo haihe kego inaga mini yaraga halu ihondo bi lolenego hame lalu biraruli.

(30) Ngode Datagaliwabe i hongo haiheore kegoni inaga wali agali bu karu tigua ihondo dugu bialu karuni hale harene. Agali ko bu karunaga giha kemago haru dai bialu ina gi naholiya i biamogo bibe, lalu Esedahanda lene

### *Eseda ibu kini berearia penego ogo*

(1) Kuini Eseda ibu horo tebiriani anduane Homogohondo bi lalu berene. Ani biruwa mani aga ko dara howa karu lo haga biyago golo ngelalu aga bayale kuini walinaga wiyago mo karu lai hene.

(2-3) Ani biai howa ibu wali baya tarore hene. Ani howa ibugua Anduane Homogo bibahende ngarubi karubi manda biaihe kagohondo bi lene. Ani lai howa baya hanguore kuini walime heyu hagadagua heyu halu mani ibunaga biabe bia haga wali kira haru halu tagira pene. (4) Wali mendeme Eseda gi yalu piyagola mendeme Esedanaga aga luni dindini gililapehe kuini wali aga karu leago yaraga ho yalu pene. (5) Esedanaga dengui waleore howa bayaore hene. Ibuha genda mbira nawi bame biruwa poradagua bini. Anigo ibunaga bu miniha gi timbuni howa duru lama pene. (6) Ibugua pialu anda hobane dewa wahalu anda pialu kini ibuni biragane anda hobane timbuni wiagoha anda pene. Ani anda puwa kininaga deni heyu hene. Kini ibu nde kininaga yari biaga ngolome wabini tara tara wiaru karu lalu ege tole tara tara yolo muni dewaoreme miaga wiaru mo karu lowa ibuni biragane kininaga dagia wiagoria berene. Ani bedaria de handariyagua i de mborere bialu ge duru lolebere. (7) I bunaga dengui wale hadapayabiore berene. Ai Eseda tamuha anda ibiyagola ibunaga dengui aruma hai hene. Ani bu bereagola Eseda ibu mogo timbuni lene. I bunaga dengui hageraia biai halu ibu de mborere bini. Ani biyagola ibunaga embone wali biabe bia haga kaware heagonaga payani palu paga hene.

✧ 4:24: Yud 9.13 ✧ 4:28: Dan 1.8, Yud 12.2

(8) Ani biagola Ngode Datagaliwabehanda kini biagonaga bu mini mo beregedene. Kini ibugua Eseda de hondowa ibu mogo lalu mini burugu lo berene. Ani buwa kini ibu abale heyalu puwa Eseda pilolino gini abale yania hene. Ani bialu Eseda mo hongo halu bi bayale maru lamigi bini. (9) Ibugua lalu, Eseda-o ina irane aginaga gi ho kebe. I í agalini ndo kobe. Inaga miniha genda yuleni nayabe. (10) Tamuha anda naibule lalu mana winidagoni wali agali maru bu karu bibahendenaga lo winigo nga. Í homolene nawiore. (11) Ini koria abale íbu, lene. (12) Ani bialu kini ibunaga halimbu ibunaga hongo ngago manda bialu yagane wiago yaraga halu Esedanaga mani wia hene. Ani buwa ibugua Eseda nunu lowa ibugua lalu, Ai í mbirale agile hame lalu ibiribe. Ayu ogoni abale langi, lene.

(13) Ani layagola kuini ibugua ladai bialu lalu, Kini-o ina handa amu halu í dengui handalu hewaria í Ngode Datagaliwabenaga dahuliyali mbira bedabe toba haru. Ani hondowa i mogo timbuni lalu durubi lalu hewaria (14) Í tara mbira handalu inaga dengui wá tarahe berearia handaru, lene.

(15) Ai Eseda bi lalu heaore dege ibu de mborere bialu odope hene. (16) Ani biyagola kini ibu mogo timbuni lalu mini burugu lene. Ani biyagola agali kini handaya ho haga hearume Eseda mo heya hene.

## 5

### *Eseda ibugua kinila Hamanala tomo namiya ibalibu lenego ogo*

1-3 Kini ibugua Esedahondo lalu, Kuini Eseda-o íore agile hame ledebe. Ina íhondo mbirale timbuniorebi inaga dindi timbuni ngogo mendehayagi í tuwua ngi lariyagua nde nguliya langi, lene.✧

4 Ani layagola Esedahanda ladai bialu lalu, Kini-o ayu mbiraga Hamana libu tomo timbuni namiya ibulene karulapedabe. Tomo timbuni ayu noledago irane inaga horo timbuni mbira tagira ibiragonaga namiya laro, lene.✧

5 Ani layago hale halu kini ibugua Hamana lamialu tomo nole Eseda andaga mbaliya abale ibabe lalu lamini. Ai kini Hamanala Esedahanda tomo dawa manda manda bialu bereagoha pene. 6 Ani puwa ti waini iba nalu biruwa kinihanda Esedahondo hale halu lalu, Eseda-o íhondo mbirale ngi larego ta nabi nguleberogo ai inaga hame ledego abale langi, lene.

7 Ani layagola Esedahanda kinihondo ladai bialu lalu, 8 Kini-o ina íhondo hale harogo bibahende e lai holeyagua nde Hamana libunaga tomo halu mende manda manda bu wiaguago yawi lone ibalibu, lene.

### *Hamanahanda Modegai bo wahole manda manda binigo ogo*

9 Hamana ibu tomo nalu berenego nai halu andaga pole tagira pialu howa ibunaga bu miniha dungu lalu turu hama tagira pene. Ibu tagira puwa handalu hearia Modegai ibu nde kini anda haneni berearia hendene. Ani hondowa Hamana ibu miniha tandaga timbuni hama pene. 10 Ani puwa Hamana ibugua ibu damene hearu íbu ngoai hadaba lowa ibu one Seresebi ti haru mandagi biramíya íbu lowa ti haru berene. 11 Ti bibahende íbu ngoaiho bereagola tinaga deni Hamanahanda ibuninaga mini yaraga halu hene. Ibugua tihondo lamialu ibunaga muni dabudabubi dewaore ngo lene. Ani bialu kinihanda ibu agali dunini timbuni mbira helalu biabe timbuni mbira mo ngialu kininaga agali haguane bu hearu bibahende ibu andanaha helaya lalu lamini. 12 Ani bialu Hamana ibugua laabo halu lalu, Ai Kuini Esedahanda Kini iya hangunaga tomo timbuniore dawa haya. Ibugua agali maru hearu tomo namiya ibalimu naleore. Ani bialu yawibi nde lone namiya ibalibu laya. 13 Anigo ai Yudali Modegai heago kini anda

haneni bereago handarugola inaga bu miniha tandaga timbuniore ira daradagua biya. Anidagua biyagome mbirale bayale ayu larogoni bame nagalone haya, lene.

<sup>14</sup> Ani layagola ibu one biagomebi ibu damene berearu tiguabi lamialu lalu, Miniha genda halu mini burugu nale waha. Ai ina agali karuhondo ira luni manda mida pira kira (20) dibu hongowa yawi egerebagi ina kini hale halu Modegai abale ira ogoriani bo derela helo lamibe. Ani bialu mani inaga miniha dungulo howa tomo no pole ani bibe, lalu tigua lamini. Hamana ibugua bi hale howa agali bu hearuhondo lalu, Ira luni mbira Modegai pume manogo bia buwa bo derela helonaga dibu hongole pudaba, lene.

## 6

### *Kinihanda Modegai agali mini lene timbuni helenego ogo*

<sup>1</sup> Ai horo ogongi mbiraga kini ibu baya hangu palibe nahe hene. Ani biyagola ai mbuga mbira dindi ibugua handaya ho kagoa binigo te gilibu wiaga wiago mo yalu ibu lene. Ani biyagola agali biabe biaga hearume te gilibu wiaru daga ladaba lene. <sup>2</sup> Ani layagola tigua agali kini andaga mamage haga kirali biago labome kini bo waholebiyago te wiago daga lene. Agali kira ogoni labome kini homelo bo wahowa kalego ai nde Modegai heagome handa walia howa libu manani haru pialu ko biniyago handa walia hene. <sup>3</sup> Ani bialu kinihanda lalu, Ai iname Modegai ibu biabe bayale biyagonaga iname ibu yolo mbira agi mirimabe, lene.

Ani layagola agali berearume lalu, Ina ibuhondo mbirale mbira nami henego ke, lene.

<sup>4</sup> Kini ibugua agali biaruhondo hale halu, Ai Modegaihanda biabe bayale biyagonaga iname agi bimabe lowa wene lole lalu bereaore dege Hamana ibugua Modegai ira dibu hongowa bo manogo bia hole poro lalu kini hale hole anda ibini.

Ani anda ibiyagola kini ibugua agali biaruhondo hale halu lalu, Agali ibaruago aibe, lene.

<sup>5</sup> Ani layagola agali biabe bia haga hearume ladai bialu lalu, Hamana ibuwa i hondole manda bu ka, lene. Ani layagola kini ibugua lalu, Tamuha haru anda ibidaba, lene.

<sup>6</sup> Ai Hamana anda ibiyagola kini ibugua Hamanahondo lalu, Ina agali mbira kagoga mini yaraga holene hame lo ko. Anidagua bule manda bidogo ai agua buledabe i miniha manda baya hangu nabi bedogo. Ai ina bayale buliyago mbira ina manda bedebe, lalu hale hene.

Ani layagola Hamana ibu miniha manda bialu lalu, Ai kinihanda agali mini mo yaraga holene mbirali aida. Agali mende nahego. Ainde ihondo bule layago, lo mitangi bini.

<sup>7-8</sup> Ani manda buwa ai Hamana ibugua kinihondo ladai bialu lalu, Agali biabe biaga karume aga bayale ini karu lagane ngego agali ogoni mo mulene nga. Ani buwa ininaga nogo hosi kago haru ibulene nga. <sup>9</sup> Ani buwa inaga agali haguane mbira kagome inaga aga biaruni agali ogoni mo karula halu agali haguane ogonime agali ogoni nogo hosini bere lowa wali agali ngoai haga tano hama ngagoria haru polene karulape. Libu ani pialu howa agali haguane timbuni ogoni ibugua lalu, Agali ogo de handadaba kinihanda ibu mini lene mbira heleda. Kinihanda ibuhondo bayale biyadagoni handadaba lalu wali agali hale helo galalu lolene nga, lene.

<sup>10</sup> Hamanahanda bi ani layago hale howa kinihanda ibuhondo lamialu lalu, Mini ogoni baya gibioedago. Ai ina abale puwa Yudali Modegai i andagaha biabe timbuni biaga agali haguane biagohondo anidagua bule pu. Ayu inime laridagua biai habe, lene.

<sup>11</sup> Ai Hamanahanda kininaga nogo hosibi agarubi mo yalu ibuwa aga Modegai mo karula hene. Ani mo karula halu Modegai kininaga nogo hosini bere lalu tanoha wali agali ngoaiho haga wiagoria haru halu pene. Libu pialu howa Hamanahanda bi hongo howa ladaga halu lalu, Agali ogo de handadaba. Kini ibugua agali ogonaga mini yaraga haya. Ani buwa ibugua agali ogohondo mana bayale ogoni biya, lene.

<sup>12</sup> Ani bialu mani Modegai ibu kini andaga dai bini. Anigo Hamana dege taga timbuni howa miniha genda timbuni halu bini. Ani howa ibunaga dengui agame bu dambi halu ibuni andaga dai bini. <sup>13</sup> Daibuwa mbirale biyaru bibahende ibu onebi ibu damene hearubi bibahende lamiai hene. Ani layagola ibu onebi ibu damenedarubi ti manda timbunibi howa tigua ibuhondo lamialu lalu, Ayu í timbuni mini lene kego mo wahalu Modegai ibu ho aribia holobada. Ibu Yudali kago ainde ina ibu nahelo hapai holene henge nawida. Ibu nde Ngode Datagaliwabe heba haga kagome í homolene dege nga, lalu tigua Hamana lamini.

<sup>14</sup> Ti wene bi lalu bereaore dege agali kininaga biabe biaga hearume Hamana kuini Esedahanda tomo timbuni dawayago nolenaga haru pole abale damu ibini.

## 7

### *Hamana homelo bo wahenego ogo*

<sup>1</sup> Ai kinila Hamanala kuini wali Eseda andaga tomo <sup>2</sup> halu mende nole pene. Puwa ti waini iba nalu biruwa kinihanda Esedahondo hale lalu, Ai kuini Eseda ina agileore hame ledebe. Ngi larego ina í nguliya latagi ha. Ina dindi bibahende ina handameho kogo tu wu ngi lariyagua nde nguleberogo langi, lene.

<sup>3</sup> Ani layagola kuini Esedahanda ladai bialu lalu, Kini-o aiore nde ina ihondo bayale bule manda bideyagua nde ina ihondo hale holeberogo e labelo hame ledogo. Ainde inaga wali agali heba ini homolene ngago hame naledo. <sup>4</sup> Tigua ina wali agali mendenaga garabaya biabe ale bia haga helalu ina bibahende homelo bo wahai hole ka. Genda ogoni inanaga waneiginihondobi mia dege biya. Abale howa inaga genda ogoni latagi nahe harugo ai ayu inanaga waitigi ogoni ibu kini andagaha biabe timbuni biaga kagola ai ina ogoni tiga nabido lo manda bido, lene.✧

<sup>5</sup> Ai kini Segesisi ibugua bi ogoni hale howa ibugua kuini wali Esedahondo hale lalu, Agali ogoni ai ibugua gi nahe howa mana ko uruni bialu hayadabe, lene.

<sup>6</sup> Ani layagola Eseda ibugua ladai bialu lalu, Agali mana ko o bialu hayadagoni Hamana o bedagoni ibugua biyiya, lene.

Ani layagola hale howa Hamana ibu mogo timbuni lowa duru lalu hene. <sup>7</sup> Ai kinihandabi nde keba lalu tandaga timbuni hene. Ibu tomo nane wahalu tagira puwa ibu andaga mandamanda gama wiagoha ibaga bu hene. Ani biyagola ai Hamana kinihanda ibu bo waholebada lo manda bini. Ani manda buwa ibugua ai kinihanda ibu bo wanahelo kuini Esedahondo ibu dara ha lole andaga tamuha biraabo hene. <sup>8</sup> Ai kini ibu andaga tamuha lone anda ibuwa handalu hearia Hamana ibu tamu Eseda biruwa tomo nalu bereagoria bulupalu wiaabo hearia hendene. Ai hondowa kini ibugua lalu, E agali ogonime ini andagaoreha howa ini oneore bedago ininaga deni howa kayu bule bedabe tobaneda, lene.

Hamana ibu bi ogoni layago hale howa ibunaga hongo ereba lalu tingini bibahende gedeore hai hene. <sup>9</sup> Ai agali biabe biaga mbira mini Bugadana heagome lalu, Hamana ibu andaga mandaha kaware dege ira luninaga mida pira kira (20) dibu hengeda. Ibugua ira ogoriani Modegai bo derela holenaga ani heleda. Waitigime í bo wanahelonaga Modegai ogoni ibugua í biamogo biyagome tigua í nabaya, lene.

Ani layagola kinihanda lalu, Tigua Hamana ibuni haru lalu puwa ibunime ira dibu hangayadagoriani homelo bo derela hole pudaba, lene.

<sup>10</sup> Ani laya handala tigua Hamana haru puwa ibunime Modegai bo derela hole ira dibu hangayagoria bo derela hene. Ani biai hayagola kini ibunaga mini lone karulape bayale hene.



## **Solomononaga Mini Gigabi**

### **Mbuga ogoha gilibu ngarunaga nemandi ogo**

Yuda agali mbirame mbuga Mini Gigabi Wulene ogoni Girigi bi lowa gili biniyago agali ogoni aiwa gili binibe iname ibu mini manda nabitama. Ibugua gili bialu howa bambalinaga mini wiaga wiaru gilibu wialu ai Girigiali agali manda timbuni bi hearunaga mini wiarubi mo biamaga howa gilibu winiya. Mbuga ogonime Ngode Datagaliwabehanda wali agalime Ngode Datagaliwabenaga bi larago hale halu mana bayale ngago talialu biaga kago ibu Ngode Datagaliwabehanda mo bayale haga lalu wali agali lawai haga nga.

### **Mbirali tigabi biaga kago ibu homalu erebaore naholebirago ai nde ko biaga karu ereba holebira leda.**

*(Be 1-5)*

*Tí mana tigabi ngago gubalini ho holene nga, lenego ogo*

<sup>1</sup> Dindini agali homogo kemiru tígua mana tigabi ngago gubalini ho holene nga. Tígua Ngode Datagaliwabe kago mitangi bialu ibu taya bialu kemigo howa t́ninaga mini tigabiore howa taya bilimu.✧ <sup>2</sup> Ai wali agalime Ngode Datagaliwabe kago ibu abi henedabe hondole bahandaga karu tigua Ngode Datagaliwabe karia handa walia naholebira. Anigo wali agali Ngode Datagaliwabehondo mini mbiraorewi karu ibuni tihondo mo walia holebira. <sup>3</sup> Mohondo halu ohagane mana ngagome wali agali Ngode Datagaliwabe yu wahalu kaundiaha haru halu pu wahaga. Wali agali mini bayale ndo wua howa Ngode Datagaliwabenaga hongo abidabe hondolenaga bahandalu karia Ngode Datagaliwabehanda tini mo taga haga ka. <sup>4</sup> Mini gigabi ibu wali agali mana ko bulene ngagoaha haga kago baba mandagi nahaga.✧ <sup>5</sup> Wali agali mini tigabi talialu haga kago ibugua ke holene mana ngago erembira miaga ka. Ani bialu wali agalime bi tiga nabi lulu bi lalu kagoria ti nahe ibida pialu wali agali mbirame mende kagohondo mo ko hayagua ti mogo timbuni laga.

*Iname bi laramago Ngode Datagaliwabehanda hale hai haga lenego ogo*

<sup>6</sup> Mini gigabi ibu Ngode Datagaliwabenaga Dinini ka. Ibugua wali agali gubaliniore haga kago mbiralime Ngode Datagaliwabe mege biyagua nde ibugua ko ogoni mo wanahaga ka. Anidagua biagago irane Ngode Datagaliwabehanda wali agalinaga miniha hame ngagobi mini ngagobi manda biaiho howa tinaga bi larago bibahende hale hai haga ka. <sup>7</sup> Ai Ngode Datagaliwabenaga Dinini dindi bibahendeha ho tolai kago ani howa ibugua mbirale ngaru bibahendeore mo mandagi hiamaga howa yu haga ka. Ani howa wali agalinaga bi larago manda biai ho haga ka. <sup>8</sup> Ani howa wali agalime bi ko layagua ibu hale hai haga kago tigua lado habe nahe. Ani bidagome Ngode Datagaliwabehanda tini ko biya lenegonaga pani nolebira. <sup>9</sup> Ngode Datagaliwabe ibugua baya hanguore begelo handai howa wali agali ko biaga karunaga mini wu karu baya hangu mo talebu ki bulebira. Anduane Homogohanda tigua bi latagi hararu baya hanguore ogoale laragoni lalu mo tale buwa ko birida laragola tigua beregedalu dai bulene nawulebira. <sup>10</sup> Ngode Datagaliwabehanda wali agali tigua ibuni kago helalu kaundiaha pelo hame naleore howa ibugua tinaga bi larago damene bibahendeore baya hangu hale haiore haga ka. Bi hale habe nahe ohowa layaguabi ibugua hale haiore haga ka.

✧ 1:1: SMG 6.1-11 ✧ 1:4: Yo 8.34, Lm 7.14-24

<sup>11</sup> Ani kago ai tígua Ngode Datagaliwabehondo keba howa lai lalu bi loligo de hondo holene nga. Mana ogonibi ngagome tíni biamogo bulene mbira nawulebiraore. Ngode Datagaliwabehondo bi nagalone ngago lolene nawiorego irane bi emene ohowa lalu kego damene bibahendeme íniha genda mo yu anda ibulene wulebira. Tígua ke halu haga hemigua nde mana ogonibi beremigome tí mo ko holene wulebira.

*Ngode Datagaliwabehanda homolene hariga mo wia nabiore lenego ogo*

<sup>12</sup> Tíha mo ko holene wuligo tí lulu ale howa hopebe bu nahalimu. Tínaga mana ko biaga ngemigome tíni homagane kemi. <sup>13</sup> Irane Ngode Datagaliwabehanda homolene mo yu anda naibaga ka. Ani kagome ibu mbirale homene ngaru hondowa turu nahaga ka.✧ <sup>14</sup> Mbirale ngarubi karubi ibugua wabiai hene. Mbirale uruni bibahende bayale hai helo hame lo ka. Mbirale bibahende ibugua wabini ngaru bayale dege ngelonaga wabini. Mbirale uruniha tini mo ko halu homagane mo yu anda ibulene ale mbira nawabini. Homa ibugua dindi ogo handaya ho ha nabigo. <sup>15</sup> Irane mana tigabi bulene ibu Ngode Datagaliwabe ibunaga ngagome ibu ereba holenebi homolenebi ibuha nawi.

<sup>16</sup> Anigo wali agali ko bu karu tinime bi ko lalu mana ko bialu kagome homolene mo yu anda ibaga. Tigua homa ibu bayalebe toba howa tigua homa heba mandagi hole hongo haabo haga ka. Tigua homa baba habo nalolene bi lowini ngagome tini homa heba ho mbiraore ho haga ka.✧

## **Mini gigabi wuleneme wali agali Ngode Datagaliwabenaga hearu biamogo bialu waitigi bu karu mo ko hai haga.**

*(Be 10-12)*

### **2**

*Wali agali ko biaga karume mitangi biagaya ogo*

<sup>1</sup> Wali agali ko bu karume lulu kariane ogodagua mitangi biagaya. Inanaga holene emene tubagi hangu ngagoria genda tara tara ngaru wua toleda lo mitangi biagaya. Ina bibahende homai hole kema. Homa iname habagi ha lalu ina pubagi holene henge nawiore. Wali agali mbirali ibu homeneru dalu humbirini andaga howa dai binigo nahende kema. <sup>2-3</sup> Ina bameore irigiho hene kemago mani homalu nde ina dindi ogoria nakemalegobi dege nga. Inanaga holene ogoni irane nawi nagaloneore. Inanaga holene ibu ira hagua darago abale ereba haraligobi emene hangu halu abale homaga kema. Inanaga mini ibubi ira dene emene dedago pulole bialu keria abale hundia tegeledaligobi ina emene hangu howa lone holenaga holene yu dai bibe nahe abale homaga kema. Inaha buhe lolene nawiyagua nde ira dene emene hoai dedago hundiagadagua holene ibu ereba hayago ai ira hundini be hangu bame tambehe ngaligobi inanaga homa tingini bame amburibi wiaga. <sup>4</sup> Ina homedemagola mbirale iname bialu harimaru abaleore embeda holebira. Inanaga minibi abale embedaho waholebira. Inanaga holene egerebagi ginu pobo wiagagobi kemago ai ni tagira ibiragola mbirale uruni ereba hagadagua inanaga holene abale ereba holebira. <sup>5</sup> Dindi ogoria inanaga holene emene tigi mbira hanguore puriabu pulo yu ibalu abale bolangua hagagobi kema. Iname homolene ngago wandialu pubagi holene nakarulapeore. Ina bibahendenaga homolene horo mbira mbira wiai kago ogoningi ina homoleneore wini nga. Mbiralime ibuninaga homolene horo ngago mo yamu holene nakarulapeore ndobe.

<sup>6</sup> Marume ogodagua lolebira ai holene ogonibi wiagua nde mini burugu nale waha. Ina wandari igiri daliaheme hagadagua howa bibahende ngaruha inanaga hame ledago biba hama ibaga bimija.✧ <sup>7-8</sup> Iname waini iba bayaleru dewa naabo halu pauda baya ngabi mini sanda muni dewaoreme miaga ngarume tingini hai halu bimija. Yári

✧ **1:13:** Ese 18.32, 33.11, 2 Pi 3.9 ✧ **1:16:** Min 8.36, Ais 28.15, Sir 14.12 ✧ **2:6:** Ais 22.13, 1 Ko 15.32

biagane baya tara dedaru bame dalu dogolo wanahe iname dowa mandariha yari bialu hamiya. <sup>9</sup> Ina bibahende mo ngoai ho hai howa mali lialu tomo timbuni nalu mali ligimbu bimiyi. Wali agali bu karume ina turu ho kemago hendelo ina ibaga bialu dindi ngaruha piai hamiya. Mana ogonibi bialu holene baya tara mbira nga.

<sup>10</sup> Wali agali yagibano bu karu ko heaguabi bayale heaguabi ta nabi bo hengedo wahai hama maliya. Wali ti agalini homene bedaru dara nahamiya. Ani bialu wali agali waheale karubi daga peleore bu karubi daga nawinigo waha. <sup>11</sup> Ina hongohe kamagoni ndobe. Ani kamagonaga ai mana inanenaga tara wabialu inanenaga hame ngemago biba halu holene karulape kema. Wali agali hongo nahe karu ti daga nawini habane nabulene bame ka. <sup>12</sup> Wali agali mana tigabi talialu hagane bu karuni mo ko holene hariga handa walia harimagoni. Uruni tigua inanaga hariga hapai haga ka. Tigua inanaga mana bialu kemago hondowa inahondo keba howa lalu iname Mosesenaga manabi ina mamalirunaga manabi puguaga kemi laga ka. <sup>13</sup> Tigua Ngode Datagaliwabe baya hangu manda bialu ibunaga waneigini karubi manda bidema laga ka. <sup>14</sup> Mana tinaga ngago damene bibahende inanaga mana ngemago bibahende baba waitigi haga nga. Wali agali uruni ale bu karuni manga timbuni ho kemagoni ndobe. <sup>15</sup> Ti wali agali tara maru bu hama pedaru ale ndo tinaga mana tarore nga. <sup>16</sup> Tigua handalu karia mana iname bialu kemago ko dodohe beremago handalu ti kaundiha haga ka. Tigua lalu, Wali agali mana bayale bialu haga karu ti mani turu ho holebira, laga ka. Ani lowa tigua kudaga bi lalu Ngode Datagaliwabe ti aba ka laga ka. <sup>17</sup> Anigo hondo ha hadaba mani tinaga bi ogoni henenedabe be bame lenedabe handa handamiya. Ainde mani tiha agile tagira ibulubadabe. <sup>18</sup> Ainde wali agali tigabi bu karu ti heneneore Ngode Datagaliwabe waneiginiore heneyagua nde tiha mo ko holene tagira ibirangi Ngode Datagaliwabeibunime ti waitiginaga giha howa haru dai birane handamiya. <sup>19</sup> Ai ti agua birabe handamiya ai ti bahandalu tandaga mo mima nalaremi. Tigua tandaga agira nelo mulene karulapeda. Tinaga bu mini mo palia howa hendore ha holebadabe naholebada. <sup>20</sup> Ai ayu howa bimiyago lo wima. Wali agali maru karunaga deni ti mo taga halu bo wahamiya. Tinime lalu ti Ngode Datagaliwabeibunime ti handaya ho holebira layago ai tiha gi holene nawulebira.

<sup>21</sup> Ai ogoni hangu wali agali ko biaga bu karu tigua tinaga miniha ngago latagi haga ka. Anigo ti luluore ka. Tininaga mana ko ngagome tini mo hondo henego ka. <sup>22</sup> Ngode Datagaliwabehanda wali agali mana bayale ngago talialu biaga karuhondo yolo bayale miaga kago ti manda nabioire ka. Ngode Datagaliwabenaga mini timbuni ngago manda nabioire ka. <sup>23</sup> Tinaga miniha mini putara halu mo libilaba lai heneore ka. Ngode Datagaliwabenaga mini ngago ogo. Ibugua wali agali homelo hame naleore ka. Irane ibuni haluhe haabobo haga kagome wali agali ibuniale helo wabini. <sup>24</sup> Anigo ai dama heyolabeme wali agali heago dimagoli timbuni hayagome dindini homolene yu anda ibiyagoni. Ani binigome wali agali dama ibu aria bu karu bibahende homai halu pu ereba hai holebira.

### 3

#### *Wali agali bayale karu ti Ngode Datagaliwabe heba mandagi birulebirago ogo*

<sup>1</sup> Dama damene karu ti homalu pu ereba hai holebirago ainde wali agali tigabi karu ti homalu Ngode Datagaliwabenaga giha howa ti lone tandaga hondolene nawulebira. <sup>2-3</sup> Wali agali lulu bu karume lo manda bialu wali agali tigabi uruni ti mo ko timbuniore henego ai ti pu ereba hai halu biba hayagoni lo manda biaga ka. Ai ani ndoyago. Wali agali bayale uruni ti ayu mo palia holene karulalu bayale ka. <sup>4</sup> Ai wali agalinaga deni howa tiha yolo ko miyagoni. Ani ndo wali agali tigabi howa mini mbiraore hongohe wua haga karu ti bayale haabobo bu holebira. <sup>5-6</sup> Heneneore tigua tandaga

✧ 2:23: Pig 1.26-27 ✧ 3:2-3: SMG 4.17

nalu hayagoni. Anigo Ngode Datagaliwabehanda tihondo bayaleore helo helolebira. Tigua tandaga nalu hayangi Ngode Datagaliwabehanda tinaga ko wiago domo wahai hayagola ti lone bayaleore halu ai ti Ngode Datagaliwabe heba mandagi birulebira. Agalime ngolonaga mana ogonidagua dege biaga nga. Tigua ngolo ira timbuni hongohe dedagoha delalu ngoloni dodo para kago domo waharagola ngolo bayale ngago yamiaga. Ai Ngode Datagaliwabe ibugua wali agali tigabi bu karuhondo miniha dungulo howa wali agali uruni loma bayale irani dai hene loma yamiagagobi dege yamiaga ka.✠

<sup>7</sup> Ai Ngode Datagaliwabe ibugua wali agali bayaleru mo tale bule ibirangi ti ira hungu timbuniore dangiha bo daraligobi holebira. <sup>8</sup> Wali agali bayaleru tigua wali agali bibahendeore bu karu handaya ho hai halu dindi tara tara ngaru bibahende bi handaya ho howa haru hai kagola Anduane Homogo ibuni tinaga kini howa haru halu haabobo bu holebira. <sup>9</sup> Wali agalime mini mbiraore hongohe wialu Ngode Datagaliwabehanda ti baya hangu handaya ho ka lo manda bu karu tigua ibunaga mini ngago bibahende manda biai holebira. Ani bialu wali agali Ngode Datagaliwabenaga mana lowini ngaru baya hangu talialu haga karu ti ibuni heba mandagi howa ibuni gubalini ho haabo holebira. Irane Ngode Datagaliwabe ibu bayale taraore howa ibugua wali agali dara holene irane nawini howa dara haga kagome wali agali ibuninaga dabo heleneore bu karu dara haga ka.

*Wali agali ko karu pu ereba holebira lenego ogo*

<sup>10</sup> Wali agali ko bu karume mana tigabi bulene ngaru mitangi nabiaga howa tigua Anduane Homogohondo erembira miaga. Ani bialu kagome mini ko tiniha ngagonaga mini lene holebira. <sup>11</sup> Tigua manda bu handalu karia manda bayalebi lawai haragobi bibahende galone ndoda lo manda bialu kagome tininaga holene koore hagaya. Tigua mbirale bayaleru mani tagira ibilonaga maliaho hagago ogoni bameore maliaho hagaya. Tinaga biabe birago lini nadole bameore bu wahole biaga. <sup>12</sup> Ti one bedaru lulu yu halu tinaga waneigini karu pagebibi halu biragola <sup>13</sup> mani ti waneigini aguane holobadaru Ngode Datagaliwabenaga deni nahe pu ereba hai holebira.

*Mana bayale ibu bolangua hene ngago ogo*

Wali agali one mbirame mana bayale ngago talialu biruwa ibugua dabubini mana ngago pugua nabiagua nde ibu waneigini nahe birayaguabi ibu turu ho birulene nga. Ngode Datagaliwabehanda wali agalime bialu henedaru koda bayaleda lalu mo tale bule ibirangi wali ogoni ibu bibahende bolangua hene bayaleore birulebira. <sup>14</sup> Ai agali mbira kago ibunaga tingini podo wahene howa dabubini mana ngago bibenahe heaguabi ani howa ibugua Ngode Datagaliwabenaga mana ngago baya hangu talialu howa ibugua Ngode Datagaliwabela keba nahe heagua nde Ngode Datagaliwabehanda ibuhondo yolo timbuniore dunini ngago ibugua mana bayale bialu hayagonaga yolo mulebira. Ani bialu ibu dahuliya andagani Ngode Datagaliwabe andaga kagoha holene bayale ngagoria henge mbira mulebira.\* <sup>15</sup> Wali agali mana tigabi ngaru biaga heagua nde ti ira lini bayale dewaore de hagagobi ka. Ani bialu mini tigabi ngagome ira pini dindiha bayale pialu ira parane anda halu haabo haga kago ale ka.

<sup>16</sup> Anigo ainde waneigini tinaga aba aija libu dabubini mana pugualu pugupugu bini bu karu ti bayale lu naholebira. Ti abale homolebira. <sup>17</sup> Anigo ai uruni aria maru ti mali luore ho bolangua howa ho dagua halu waheore hayagua nde ti mini lene timbuni naholebira. Ti habane nabulene bame karule dege holebira. <sup>18</sup> Ai ti wene igiri daliahe kaore dege homayagua nde Ngode Datagaliwabehanda godi larangi ti pu ereba holebira. <sup>19</sup> Heneneore wali agali mana ko biaga karu tiha mo ko holene timbuni gibiore wulebira.

✠ 3:5-6: Lm 8.18, 2 Ko 4.17 \* 3:14: Man 23.1 gilibu ngagome lalu, ... agali ogonibi kago ibu Anduane Homogonaga wali agali kagoha hatago howa mandagi holene nawi, lo nga. Anigo Aisaia 56.3-5 ngago handabe.

## 4

<sup>1</sup> Ai one agalinila libu waneigini mbira naheore heagua nde libu ogoninaga genda holene nawi. Tigua mana bayale ngago bulenaga dege mini burugu lalu holene nga. Ani larogo irane Ngode Datagaliwabehandabi wali agali bu karumebi tigua mana bayale birago dege turu howa handaragome tinaga mini ereba nahe wiaabobo bu wulebira.✠

<sup>2</sup> Mbirali ibu mana bayale ngago talialu hayagua nde mendeali kagome mana bayale ibugua birago talialu bulebira. Anigo mbirali ogonidagua bulene naheyagua nde tigua dugu bialu howa taya bulene nga. Mana bayale bulene ngago ibu dewali gerai lagalaga buwa bolangua harago ibu yolo bayale mo ko naholene ngago mo yu hagagobi nga.

<sup>3</sup> Wali agali mana ko biaga bu karume waneigini dewaore hono wu ha hayaguabi waneigini uruni habane nabulene bame yagibano bu holebira. Waneigini hono wahene hariga bame holebadaruni ti ira mbiraibunaga pini dindiha anda nape howa hongo nahe bame ula *ainai* bu hagagobi holebira. <sup>4</sup> Marungi nde ira ogoni alego yuni dewaore karia puriabu ibalu pula amu nana biragola yuni genda halu iradago podagane. <sup>5</sup> Ira ogoni wene podape haragola gene magane maru ira wene gahange ngaore lebolahole biagane nga. Lini nolene ale dedagobi boga nabi wene dedaore podaragola lini dedago bayale nabehe ndo bame gilahole bulene daga. <sup>6</sup> Ainde mana wali agalime bialu hayaru mo tale bulene harangi waneigini harigani bu holobadaruni tigua ti aba aiyalame mana ko ogodagua biya lalu lapani hagane holebira.

<sup>7</sup> Wali agali tigabi biaga kago ibu wene wandari igiri daliahe kangi homayaguabi ti pialu Ngode Datagaliwabela mandagi halo birulebira. <sup>8</sup> Agali waheore karu ti mini lene kago irane agimedabe. Ti mali dewaore hayagome dabe. Ani ndoyago. <sup>9</sup> Wali agalibi mbirago ibuha mini manda baya wu howa mana tigabi ngago talialu hayagua nde ibubi agali wahe mali dewaore biralu homayagobi dege holebira. Wali agali ogonibi kago ibu mini lene holene karulape ka.

*Ngode Datagaliwabehanda wali agali tigabi karu handaya ho haga kago ogo*

<sup>10</sup> Bambaore agali mbira heneya. Ibugua Ngode Datagaliwabenaga bi hale howa talialu haga heagola Ngode Datagaliwabehanda ibu gubalini timbuni ho haga hene. Ani howa agali ogoni ibu wali agali ko biaga bu hearu ti dege dombeneha hearia Ngode Datagaliwabehanda ibu dahuliya andagaha helo haru pene.\* <sup>11</sup> Ngode Datagaliwabehanda wali agali ko biagabi ke hagabi hearu baba helo hame nalene. Mana tigua biragomeibunaga mini mo luluya habeheyane hondowa ani bini.✠ <sup>12</sup> Ainde wali agali bayale kagome tinaga mini mana ko bulene dewa bu ngaruha haru ibaga bilo hayagua nde tigua mana bayale tigabila ko bulenela mo tale bibe nahe haga. Ani howa tinaga mini libilabale hai haga. <sup>13</sup> Tigi mandi hanguni agali ogoni ibu bayale tigabiore hene. Ani howa agali waheore maru ti bayale tigabiore holenenaga li hama ibini wiaru ibugua bolangua hai hene. <sup>14</sup> Mana ibugua biaga wiaru Anduane Homogohanda hondowa karulapeoreda lo manda bu hene. Ani heago hondowa Ngode Datagaliwabehanda ibu dindi kaundia wali agali nahaga wiagoha haru puwaore hene. <sup>15</sup> Wali agali bu hearu tigua de handa hondowa dege tigua ogoale biyada lalu galone manda nabi howa tinaga gubaliniha nogoba nahe hene. Ainde Ngode Datagaliwabehandaibunaga wali agalihondo gubalini ho howa ti dara holene irane nawini howa dara halu handaya ho haga kago ti manda nabioire hene.

<sup>16</sup> Wali agali bayale homayaru tigua ko biaga dindini karu tigua ko biya lalu tigua mana ko bialu ka lalu godini lapani holebira. Wali agali ko biaga karu ti waheore haragola mana bayale tigabi wandari igiri daliahe bu karu tigua mana bayale tigabi bialu kago hondowa ti taga timbuni holebira. <sup>17</sup> Marungi nde wali agali mini gigabi

✠ 4:1: Sir 16.3 \* 4:10: Agali hene ledagoni Inogo manda bialu lene. Te ogoninaga mbuga Pigane Binigo ngagonaga Be 5.21-24 ngago handabe. ✠ 4:11: Pig 5.21-24, Sir 44.16, Hi 11.5



wu howa tini wene daliahe dege kaore homaga. Ai wali agali ko karu tigua wali agali tigabi uruni homarago Ngode Datagaliwabehanda urunihondo ogoale bule ka lo manda nabioire ka. Anidagua birago Anduane Homogo ibunaga mana ngagome wali agali tigabi uruni ibu dalu dindi bayale genda tandagabi nawiore ngagoria haru polenaga biaga ngago ti manda nabioire ka. <sup>18</sup> Wali agali mana ko biaga bu karume wali agali tigabi karu homaragola tigua mege bialu oba halu haga ka. Anigo ai hondo harene. Mani Anduane Homogohanda wali agali ko biaga bu karu ti homaragola ibugua ti hondo oba haragola ti taga tene hondolebira. <sup>19</sup> Ngode Datagaliwabehanda ti dindiha bope haragola tinaga bi lone lolene nawulebira. Ibugua ti helo waharagola ti mo ko howaore pilo gingirulobaga bu wulebira. Ani wuwa tandaga tara nalu wulebira. Ti homaragola wali agalime dara howa dugu nabulebira. Wali agali maru homayaru tiguabi nde uruni hondowa hondo oba halu haabobo bu holebira. Ti homedaha wali agali maru bu karume ti mitangi bu haabo naholebira. <sup>20</sup> Ai Ngode Datagaliwabehanda mana ko tigua bialu hayago manani howa mo tale birangi tiha ko wiyago panaga ona angalo payabu ngagola tini hondowa gi timbuni howa durulalu holebira.

## 5

### *Wali agali ko biaga karu mogolowa durulalu holebira lenego ogo*

<sup>1</sup> Horo ogoningi wali agali mana bayale ngago talialu haga karu tigua abale wali agali ti mege bialu handape manga haga biarunaga deni heyu holene gi nahe holebira.

<sup>2</sup> Wali agali ko biaga tigua agali uruni ti bayale holobada manda nabi hene. Ai ti bayale henedago hondowa mogo lowa tini duru lalu holebira. <sup>3</sup> Ani howa ko tini biyago dara howa mini burugu timbuni lalu ti dege dege laedene bialu lalu, <sup>4</sup> Wali agali iname abale mege bialu tiha galone naheda lo manda bu harimagoni. Ainde ina lulu timbuni yu harimada. Tigua mana bialu karu iname leheoreda lo manda birima. Ani bialu ti homayagola iname uruni ti dara halu dugu nabi harima. <sup>5</sup> Anigo áyu ti kago de handadaba. Ti Ngode Datagaliwabe waneiginioire howa ti wali agali Ngode Datagaliwabenaga karu heba mandagi kago handadaba. <sup>6</sup> Áyu ina manda bidamagoni. Iname bia ko howa mana tigabi wiago talialu naharima. Ina ko aruma holene wiagoha pupe halu harima. Mana tigabinaga hariga polene wá ibiyagola mo walia hayagohayagi nape harima. <sup>7</sup> Iname mana ko bulene hariga tara tara wiaruha pu pebe bialu howa mbirale wiaru dewa mo ko hai harima. Hariga piaga ndo wiagoha ina pialu harima. Anduane Homogohanda hariga ina polomaya hamelo heagohayagi nape haabo harima. <sup>8</sup> Ina mbirale dewa wu howa karulape kemabe toba howa taraore kemagoni lo manda birima. Anigo ainde mbirale urunime áyu ina biamogo nabioire ngagoni ndobe. <sup>9</sup> Ai mbiralime bi laruago áyu dege hale halu embeda haramalidagua mbirale yu harimaru abale ereba hai hayagoni ndobe.

<sup>10</sup> Mbirale uruni agoha piyabe tobane pu wahalulala ibani iba sibi pu porane handa hendedemago pu ereba halu agoha piyabe toba hagadagua mbirale yu harimaru ereba hai hayada. Ibu piyago ge ngane nahondolebereore. <sup>11</sup> Ti ega mbira harini yagaloyu piagadagua piya. Egame pilipulu lalu yagaloyu porane handarego agohayagi piyadabe hondole ge handabe nahe haga. <sup>12</sup> Ani bialu yandare bo pelalu bole manda biyagoha bo pelagane. Bo pelalu ibu hariga agua piyabe ge handabe nahaga nga. <sup>13</sup> Inabi nde mbirale manane o larurunibi harima. Ina aiyahanda taba hanayangi howa hama ibininaga ina dindini tigi mbira hangu howa ho lu naberemali. Mana ko bulene inaha wua to leagola iname mana bayale bulene wiago nabi harima. Ani birimagome ai wali agali tigua hendelonaga inaha manane bayale mbira nawiore kemagoni, lolebira.

<sup>14</sup> Maru ko biaga karume mani mbirale bayale mbira tagira ibilonaga malia ho nahaga ka. Anigo tigua mbirale mbira tagira ibilo malia ho hayago bame malia ho wahaga ka. Tigua hamelo hagane ngago damene galone nabulene bame datani

puriabume puloyu ibagabu hagagobibi iba hangodo iba solowara yaribu biragola bame titalahole biagagobibi ira hagua puriabume puloyu purogo lagagobibi ka. Mbirali dindi kaundiaha howa ibu henego ibuni dalu dai biragola mbiralime manda biaho wia nabi embedaho wahagagobi ka.

<sup>15</sup> Ai wali agali tigabi heneru ti haabobo bu kagola Anduane Homogohanda ti mo turu halu yolo mulebira. Ngode Datagaliwabe daligaore kago ibugua ti baya hanguore handaya ho haga ka. <sup>16</sup> Ani bialu ibu ti heba mandagi haabo howa ibunaga gi hongo gibihe kagome biamogo biaga ka. Ibugua ti dababagi ho helowa yolo baya taraore mulebira. <sup>17</sup> Anduane Homogohanda waitigi bope holenaga hongo timbuni howa bope haga ka. Ani bialu howa mbirale bibahende ibunime wabini ngaru bibahendehondo ibuni biamogo bialu wai bule ibidaba laga ka. <sup>18</sup> Mana bayale bulene ngago ibunaga aga giambe hongohe wabini ngago ale halu mana tigabi bulene ibunaga manda giambe hongohe wabini karulo haga ka. <sup>19</sup> Mana dodo nahe hogorale bulene ngago humbi ale yu haga ka. <sup>20</sup> Ibunaga bu miniha keba holene wai biagane ayu tibu nene kirabaliha gadele nga. Ani kago ai mbirale bibahendeore ibugua wabini ngaru damene ibuni baba mandagi tidiyu howa waitigi lulu mana bialu haga karu baba wai biaga ka. <sup>21</sup> Timu bolebirago baya hangu bilina howa agalime bagadagua ibunaga timu hari daba waga laradagua bialu waitigi karu bai haga ka. <sup>22</sup> Anduane Homogohanda keba timbuniore howa ibugua dalu dindiguni timbuni ege tole ale hariha howa bape halu waitiginaga embone tuguda hole bialu бага ka. Ani bialu iba solowara timbuni bedarume yaribu timbuni hongohe bialubi iba pedaruni iba li timbuni wialubi waitigi bibahende karu bu dambi hai helaga ka. <sup>23</sup> Puriabu timbuni hongohe mbira ibalu waitigi bame datani yobi ngaru hilo yu piagadagua bilolebira. Wali agalime mine howa Ngode Datagaliwabenaga bi mana mo wahaga karu pani nelo mulenaga uruni bulebira. Tininaga mana ko biaga ngagome dindi bibahendeha mo ko holene yu anda ibiragola dindi hobane tara tara bi tara tara lagalaga biaga ngaru bibahende bo haelatogo lai holebira.

## **Mana bayale tigabi ngagonaga kini bu karu ti turu holene nga**

*(Be 6-9)*

### **6**

*Ngode Datagaliwabehanda agali haguane ti hangu hanguhondo biabe mo minigo ogo*

<sup>1</sup> Ai áyu agali haguane dindi bibahende ngaru handaya ho haga kemiru tigua inaga bi larogo hale halu manda bayale bi ogoni ngago mo yadaba. <sup>2</sup> Tigua dindi dewaore handaya ho howa wali agali dewaore ti andaneha kagola tini turu timbuni ho haga kemi. Anigo ai baya hangu hale hadaba. <sup>3</sup> Ngode Datagaliwabe daligaore kago ibugua handaya ho howa haru holene hongo ogoni tinaga giha mo ya hene. Ani bialu biabe tigua birimigo damene mo tale biai haya. Ani buwa mani bulene tigua miniha yu kemigo handa walia hai haya. <sup>4</sup> Ainde Ngode Datagaliwabe ibuni kini timbuniore kago howa ibugua biabe timbuni tihondo mo ngiyago yu howa tigua mana tigabi ngago talialu bulene manda nabi haga kemi. Tigua Ngode Datagaliwabenaga mana ngagobi hame ledagobi talia nabi kemigoni. <sup>5</sup> Ani bialu kemigonaga Ngode Datagaliwabehanda ti bo wahai holebira. Heneneore Ngode Datagaliwabehanda wali agali hongo timbuni yu karu pani timbuniore nelo miaga ka. <sup>6</sup> Ibugua wali agali daga nawini karu dara halu tiha ko ngaru la nabi wahaga ka. Anigo agali haguane bu karu pani nelo miralo hendene timbuniore nelo mulebira. <sup>7</sup> Ngode Datagaliwabe ibu Anduane Homogoore howa ibugua bibahende karubi ngarubi handaya ho hai howa mbiralihondo gi nahagaore ka. Mbirali ibu haguane handame haga heaguabi haguane ndo heaguabi gi nahaga

ka. Ngode Datagaliwabe ibunime wali agali bibahende wabiai hene. Ibugua wali agali daga nalene bu karu wabialu wali agali mini lene karubi ibugua dege wabini. Ani bialu ibugua ti ogobi dege dege handaya ho haga. <sup>8</sup> Ani howa wali agali mini lene hongohe karume bialu karu baya hanguore mo tale bulebira. <sup>9</sup> Bi o laroruni ina agali timbuni kini kemiru tí lawai halu bi laro. Tígua hale howa mana bayale tigabi bulene ngago yu howa mana ko bulene ngago nabi wahai halimulo laro. <sup>10</sup> Tí kemiru aria mbirame Ngode Datagaliwabenaga mana ngago mana tigabi ngagoria howa talialu hayagua nde ogoni ibuni Ngode Datagaliwabenaga wali agali kagoha hatago ho holebira. Tí kemiru aria mbirame Ngode Datagaliwabenaga mana ngago baya hangu manda bu heagua nde ibu dabolene harangi ibu hongo howa heyu kagola ko birida lolene mbira ibuha nawulebira. <sup>11</sup> Ani bulebirago manda bialu bi ina tihondo lawai harogo baya hangu gubalini ho holene nga. Ani beremigola tígua manda bayale ngago mo yu holeberemi.

### *Mini gigabi wulene ngago ibu baya gibiore mbira nga*

<sup>12</sup> Mini gigabi wulene ibu wáholene hale hongohe hundia nabiaga ale nga. Wali agalime ibu mo yule howaore taya bialu kago ibugua abale mo yulene erekui nabi ngagoria mo yulebira. <sup>13</sup> Mini gigabi ibuni wali agalime ibu gubalini howa taya bialu karuhondo abale mo walia haga ka. <sup>14</sup> Wali agali egerebagiore panga dugualu mini gigabi wulene taya bima pole tagira pialu karia ibuniore abale anda haneni ngola haga. <sup>15</sup> Wali agalibi mbirago ibu mamage howa mini gigabi wulene ogoni taya biyagua nde ogoni ibuha mini bayale wialu ibunaga miniha mo palia holene karulo holebira. <sup>16</sup> Mini gigabi wulene ogoni ibugua wali agali bayale karu taya bialu mbirali handa walia hayagua ogoni ibula baya hangu mandagi haga nga. Wali agali ti kagoria ta nabi howa ngola halu tihondo bayale biaga. Ani bialu tinaga mini ngago bibahendeha ngola hai haga. <sup>17</sup> Wali agali mini gigabi wulene mo yu hole hamelo heagua nde tigua ogoni mo yulenaga lo manda bulenego hameore lo kagome mo yaga. Wali agali ogoni mo yulenaga hongo howa lo manda bialu kago ibuha mini gigabi mini bayalebi ibaga. <sup>18</sup> Wali agali ibuhondo turu ho karume mana bayalebi mana tigabibi biaga ngagobi ogoninaga mana lo ngagobi mo walia harago talialu haga. Wali agali ti ogoninaga bi ledagobi mana ngagobi talialu haga ka. Wali agali mana uruni talialu kago ibu haabobo bu holene bayale ngago mo yu holebira. <sup>19</sup> Ai wali agali tinaga holene bayale mo yu heneru ti Ngode Datagaliwabela mandagi haabobo bu ka. <sup>20</sup> Anidagua biagago ai wali agali bibahende mini bayale mule hamelo karu ti mani Ngode Datagaliwabenaga handame howa haru holene ngagoria ti haguane holebira. <sup>21</sup> Ani biagago ai kini timbuni bu kemiru-o ainde tí t́inaga hongo timbuni ngemirubi yári baya ngamarubi gubalini ho hemiyagua nde tígua mbirale uruni baya hangu yu howa agali haguane haabo holenaga tí mini bayale wulene hongo howa yu dungu lo holene nga.

### *Solomono ibu mini gigabi wulenenaga biabe bulene henego ogo*

<sup>22</sup> Áyu ina tihondo mini bayale ogoni ogoale lalubi ibu ogodagua tagira ibaga lalubi languliya. Ina bi mbira tihondo ya do naholebero. Ina bi ogoninaga mbira tihondo mo do naholebero. Ina ibunaga biabe biaga ngago mo pana hai holebero. Iyunaga biabe ogoni pigane Ngode Datagaliwabe ibugua mbirale bibahende wabiniyangi howa biniya. Ai ina tihondo ke howa nalolebero. <sup>23</sup> I wali agali mendenaga manda timbuni ngago hondowa dimagoli haga karu baba mandagi naholebero. Anidagua larogoni irane mini bayale ngago baba biamaga nahaga nga manda bialu naholebero. <sup>24</sup> Wali agali dewaoreme mini bayale mo yu heagua nde dindi ogo baya taraore mbira wulebira. Ani bialu kini ibu mini bayale wu howa wali agali handaya ho howa haru hayagua nde ibunaga wali agali bayale holebira. <sup>25</sup> Ai áyu ina tihondo lawai harogo baya hangu mo yalimu. Bi ina tí lawai harogome tí biamogo bulebira.

## 7

*Wali agali haabobo holene mo yulene hariga mbira hangu nga lenego ogo*

<sup>1-2</sup> I nde wali agali maru bu karuni ale dege howa homole kogoni. I nde dindi agali pigane heneyago Adama igini dege ko. I aba aiyalame iha holene hela heneya. Ege dirani inaga tingini i aiya tombeha anda halu bereneya. <sup>3</sup> I aiya ibugua i taba hanayagola nde i dindi ogoria waneigini maru bu hearubi dege hene. Wali agali maru bu karu ti buhe laga yadagua dege laru. Ina bi pigane waneigini gali bibahendeme biagaya ale dege dugu biru. <sup>4</sup> Ai i labolabome huba buwa baya hangu handaya ho haya. <sup>5</sup> Ainde kini bu karu ti bibahende ani dege bini ka. Tinaga hariga mende nawiore ndobe. <sup>6</sup> Ai wali agali bibahendeore holene mo yulene hariga mbiraore hangu wialu homolenebi hariga mbiraore hangu nga.

*Solomono ibu mini gigabi wulene hamelo henego ogo*

<sup>7</sup> Inime handalu hewaria i bame agali bu karu ale dege haruda lo manda bialu ina Ngode Datagaliwabehondo bi laruli. Ani larugola ibugua mini gigabi ngiya. <sup>8</sup> Mini gigabi ogoni ibugua timbuni hongohe holenebi kininaga yari baya tara tara karu lolenebi uruni bibahende bolangua hai halu ibu dunini daligaore ka. <sup>9</sup> Yari bayale tara tara ngarumebi ngolomebi mini gigabi wulene ngago bolangua habe nahe nga. Dindini ngolo ngaruni bibahende bame nagalone iba mu bu wiaruni ale wialu siliba bame dindi waru ngaru ale dege nga. <sup>10</sup> Mini gigabi ogonime wali agali tingini hongohebi bayalebi bolangua hene ibu daliga nga. Ibu wa holene maru bolangua hene wa holene timbuni hongoheore mbira ale nga.

<sup>11</sup> Ina mini gigabi mo yu howa mbirale bayale wiaru heba mo yu haru. Ani bialu i mbirale dewa wua howa homogo timbuni mbira haru. <sup>12</sup> Mini gigabi wulene biagome mbirale uruni mo ngiai heneyagola ina turu timbuni haru. I abale henedago howa manda nabi henego ainde ayu mini gigabi wulene ibu mbirale bayale uruninaga teneore winiyane hendedo. <sup>13</sup> Mini giga buleneme ihondo bayale tara tara wiaru biawai haya. Ani biyago ai mbirale uruni ininaga yu habura bulene nakarulape. Ina wali agali maru karu lawai hole turu ho kogoni. <sup>14</sup> Mini gigabi wulene ibugua wali agal hondo mbirale bayale talebu miaga ngago tigua biba habe nahe dewaore miaga. Ani biragola wali agali tigua mbirale bayale tara tara mini gigabi wulene mo talebu mirago yu haga. Wali agali tigua mbirale bayale uruni mo yu howa uruni baba biabe bialu howa tini Ngode Datagaliwabe baba nenege haga. Ani biaga ngago irane mini gigabi ibugua wali agali biawai harago ibu turu haga howa ani nenege ho haga ka.

<sup>15</sup> Ai nde Ngode Datagaliwabeibunime i lawai hayadagua ina ibunihondo bi inaga mini baya hanguore tigabi ngagoria pelo haru howa mo tiga bilonaga bi lolebero. Ani bialu bi ina loleberogo damene Ngode Datagaliwabeibunaga hame ngagoria talialu loliya haru helonaga bi lolebero. Ani loleberogo iraneibunime mini gigabi ibu hariga ogoha polene nga lalu mo walia hayagonagabi wali agali galone manda bi hearu mo tiga biyagonagabi ibuhondo bi lolebero. <sup>16</sup> Inanebi inanaga bi laramago bibahende bi Ngode Datagaliwabenaga giha hangu hai ka. Ani bialu mini wulene bibahende bi Ngode Datagaliwabeibunime haru hai karu bibahende manda bulenebi bibahende ibuni giha nga. <sup>17</sup> Bibahende ale karunaga ngarunagabiibunime ihondo baya hangu lawai haya. Iibunime dindi ibu pigane agua winigo nga lalubi lawai haya. Ani bialuibunaga manabi ira deneibunaga manabi puriabu pulo yu ibagabu kagonaga manabi ihondo langiai haya. <sup>18-19</sup> Ibugua iba dalu ibulene horobi gaea bulene horobi dagare bulene horobi horo tara taranaga mana langialu ni tagira ibiragonaga ni paliragonaga manabi langiya. Ani bialu mali mbira mbiranaga manabi horo daganaga manabi gaeanginaga manabi iba dalungi ibiragonaga manabi langiya. Ani bialu yakundinaga manabi hariga

✧ 7:7: 1 Kin 3.6-9, SMG 9.1-18

ibuni puibu biaga ngagonaga manabi langiya. <sup>20</sup> Ani bialu mbirale ema bialu piaga bedaru tinaga ibagabu biru haga manabi ti talialu biraga manabi langiya. Ani bialu puriabunaga hongobi agalinaga mini ngagobi ogoale lalu lawai haya. Mbirale mabuha andaho hagabi irabu tagiraha anda ho hagabi uruni bibahendenaga mana wiagobi i lawai haya. Ani bialu irabuha irabu karu aria marasini wabulene bayale ogo lalu lawai haya. <sup>21</sup> Mbirale agalime hendene bu ngarubi agalime de nahendene wia do ho wiaga ngarubi i lawai hai haya. <sup>22</sup> Ainde mini gigabi wulene ibu i lawai haga inaga lawai haga kagome ina manda dewaore bu kogoni. Mbirale bibahendeibunime wabini ngagome uruni bibahende ibuni manda biai ka.

### *Mini gigabi ibunaga mana ngago ogo*

Mini gigabi wulene ibu dinini ale dege mbira ka. Ibu minibi mandabi waleore wiaihe nga. Ibu mana bayaleore ngago talialu biaga. Ibu ibuni hanguore haga ka. Ibu ale mende naheore. Ani howa ibugua wali agalihondo ibuni mo walia holebi ibuninaga biabe bulene ngagohabi hariga tara tara nga. Ibu dindini wali agali tinginihe kemaru ale ndo ibu dinini ka. Ani bialu ibugua bia ko hene mbira nawi. Ibu bibahendeha piai haga ka. Ibu mo ko holenego mbira nawiore. Ibunaga bi waleoreni wali agalinaga gubaliniha nogoba haga. Ibu mbirale bayaleru dege hamelaga. Ibugua mbirale ngaru bibahende hondo bolangua hai kagola ibunaga biabe bulene ngago mbiraleme wu pai habe naheore. <sup>23</sup> Ibugua wali agali gubalini halu biamogo biaga. Ibu gi halu duru nale hongo ho haga. Ibu gi nahaga howa ibu bibahendenaga hongo haihe ka. Ibugua bibahende ale deme hendedago mamage hai halu ibugua dinini maru karu kabaneha howa biabe biaga ka. Ibu dinini mini bogabi mandabi karu bibahende bolanguahe daliga howa ibugua dinini maru miniha wale bogabi tiha ko mbira nawi tingini nahe karu ogodagua bidaba lalu haru bamba haga ka.

<sup>24</sup> Mini gigabi wulene ibu maru bibahende bolangua hai howa ibu biabe abale bigi biaga. Ibugua mbirale ngaru bibahendeha abaleore anda piai haga. <sup>25</sup> Ibu Ngode Datagaliwabenaga hongome helene go howa ibu wa holene au nahe bayaleore mbira Ngode Datagaliwabenaga wa holene timbuni kagoha howa ibini ka. Ani kagome ai mbirale ko tara tara ngago aria mbira ibuha para holene nakarulapeore ka. <sup>26</sup> Ibu Ngode Datagaliwabeha howa wa hole ibaga ngagonaga manane ale howa wa holene hundia nabiaga ka. Ibu Ngode Datagaliwabenaga biabe biaga ngagobi dara holene irane nawini dara haga ngagobi mo walia haga baya tara iba waj ale ka. <sup>27</sup> Ibugua mbirale bibahende ibunaga hongome biai holebira. Ibugua mbirale bibahende lone gahenge wabu helai habehe ka. Anigo ibu tara ale ho iriari nabiaga. Bambaore howa hama ibaabo henego ibu wali agali tigabi bayaleru baba dege haabo haga. Ani howa ibugua ti maru Anduane Homogonaga bi mana latagi halu mbiwia hagaru mo hela maru Ngode Datagaliwabenaga nenegeru mo hela bini. <sup>28</sup> Ngode Datagaliwabehanda turu hagago wali agalime mini gigabi wulene mana ngago baya hanguore talialu kagohondo turu haga. <sup>29</sup> Mini gigabi wulene ibu bayaleoreni ibu ni yakundirubi bolanguahe ka. Ibu ninaga wahalene kago bolangua hene ka. <sup>30</sup> Ni kago ibu nde nime wa hongoheore ha kago ai alendo halu mbi laragola ni ibu ereba halu aruma holeneme bolangua hagane nga. Anigo ainde mbirale ko ngaru dameneme mini giga bulene bolangua habe naheore.

## 8

<sup>1</sup> Mini gigabi wulene ibugua biabe hongo howaore bialu ibu dindi ngaru bibahendeha piai haga bialu dindi anda bu kagoria irigi haga biaga. Ani irigi halu mbirale ngaru bibahende mo tiga bigi biaga.

*Mini gigabi wulene ibugua mbirale bayale ngaru mo anda haga biaga lenego ogo*



<sup>2</sup> Ina mini gigabi wulene hamelo haru. Abale igiri daliahe hewangi i ibula haru mandagi haabo haru. Ibu inaga gubaliniore hene. Agalime wandari bayaore mbira bedago gubalini ho hagadagua ina ibu gubalini timbuni ho haru.\* <sup>3</sup> Ibu Ngode Datagaliwabe howa ibalu mini lene timbuni haya. Ibunaga mini daligaore ngago irane ibu Ngode Datagaliwabela mandagi haabo haga kagome. <sup>4</sup> Mbirale bibahendenaga Anduane Homogo Ngode Datagaliwabehanda ibu gubalini ho haga ka. Mini gigabi ibugua Ngode Datagaliwabenaga biabe bulene ngago bialu ibunila haru mandagi haga ka. Mini gigabi ibugua Ngode Datagaliwabenaga mini ngago damene bibahende manda biai ho kagome libu haru biabe bialu haga ka.\* <sup>5</sup> Wali agalime dindini wini ngaru dewaore mo mogo bu wu hayagua nde karulape dege. Anigo mini gigabi bayale wu holene ngago ibu baya taraore mbira dindini wini ngaru bolangua howa ngago irane ibunime mbirale ngaru bibahende wabiai hene kagome nga. <sup>6</sup> Wali agalime mbirale ngaru tininaga mandame wabiyagua nde karulape dege. Anigo mini gigabi wulene ngago ibugua agalinaga manda ngaru bolangua haiho ngago irane ibuni wabiai hene ka. <sup>7</sup> Wali agalime ti tigabi holene hamelo heagua nde mana bayale mini gigabi ibugua biagago mitangi bulene nga. Wali agali tigua tininaga mini hamela haru howa mini ngagobi biabe bulene ngagobi baya hangu mo tale bilonaga mini gigabi ibugua ti lawai haga ka. Ani bialu wali agali tigua mana tigabi ngago talialu howa wali agali gi nahe hongo ho hagadagua howa helonaga mini gigabi ibugua dege lawai haga nga. Mana bayale uruni bibahendeme wali agali dege biamogo biaga. Holene uruni aria mbira hangumebi mini gigabi ibugua biamogo biagadagua nabulebira. <sup>8</sup> Wali agalime biabe tara tara bulene taya biyaguabi mini tara tara wulene taya biyaguabi uruni bibahende mini gigabi wulene ibugua biamogo bulebira. Ibugua bambaore bini ngagobi mani bulubadarubi bibahende manda biai ho kagome mini gigabi ibugua ti biamogo bulebira. Ibugua wali agalinaga bi tara tara larago mo tiga buwa mo wala halu bi latagi nahe ngagonaga irane mo walia halu latagi haga ka. Ngode Datagaliwabehanda manane mbira mo walia hole ngagobi agalime nabiagane ale bule ngagobi manda biai halu mbirale bibahende maniore ibulebiragobi manda biaho ka.

*Kini bibahende mini gigabi wu holene ngago ogo*

<sup>9</sup> Ai mini gigabi ibugua ibunaga manda wiago bibahendeme i biamogo bialu iha genda bulenebi mini burugu lolenerubi anda ibirangi i biamogo bulubada lo manda bido. Ani bulebirago manda bialu ina ibu gubalini timbuni ho howa ainde ibu i heba mandagi haabo helo hame timbuni lo ko. <sup>10</sup> Ininaga mini giga bulene wu hewagome wali agalinaga deni i mini lene timbuni henego kogoni. Heneneore i igiri emene ha kogonigo ainde agali haguane ala hene bu karu tigua inaga mini yaraga haga ka. <sup>11</sup> Ai wali agali tigua handalu karia i manani tigatigaore mo tale bialu tigatiga laga henedane hondolebira. Ani hondowa agali haguane bu karu tigua ihondo turu timbuni holebira. <sup>12</sup> Ina bi la nabi kogola wali agali tigua bi nale nimulo hagahaga biaga. Ai ina bi larogola tigua baya hangu hale hai ho haga. Ina bi lu lalu kogola wali agali ti hale ho habe manga nahaga. <sup>13</sup> Mini gigabi wulene ibugua binime inaga mini yaraga henego ainde ani wiaho wiaabo holebira. Ai wali agali mani holebiraru tigua inaga mini embeda nahe mitangi biaho wiaabo holebira. <sup>14</sup> Ina dindi tara tara ngaru dewaore haru howa handaya ho kogola wali agali dindi uruniha bu karu inaga hongo gibi kogo andaneha hai holebira. <sup>15</sup> Ani kogola wali agali tigua i tinaga kini bayalebi wai biaga agali hongohebi i henedalo hondolebira. <sup>16</sup> Ai ini andaga dai berogola mini gigabime inaga bu miniha mo palia holene karula haga. Anidagua biagago irane ibu inaga nenegeore kagome iha genda ho holene mbira anda naibaga. I ibu heba mandagi howa iha mo ko nahe haruli. I turu ho haabo haruli.

\* 8:2: Sir 15.2    \* 8:4: Min 8.27-30

*Mini gigabi ogoni Anduane Homogohanda bame mo turu halu ngingo ogo*

<sup>17</sup> Ina mbirale uruni inaga miniha tombehabi ngelo howa ogodagua laro. Mbirale ibu mini gigabi ngago baba mini mbiraoreho hayagua nde ibuha haabobo bu holene yu holebira. <sup>18</sup> Maru ti nde agali ogoni nenege hayagua ti turubiore ka. Mbirale tinaga biabe bia haga kago ibu mbirale bayale ngaru mo yu holebira. Ani bialu mini gigabi ibuha howa mbirale bayale dewaore tagira ibulebira. Wali agali ibu heba te lalu bedago ti mini leneore holebira. Ani bulene wiago hondowa ina mini gigabi bayale ogoni ngola howa inila mandagi holenaga hariga tara tara wiaru taya biru. <sup>19</sup> I waneigini galioreni inaga tingini Ngode Datagaliwabehanda ngiya. Ani bialu mana bayale bulene iha ngelalu biya. <sup>20</sup> Ai wahalu ini bayaore ko lolene karulapeda. Ani bialu inime tingini baya tara mbiraha anda piru. <sup>21</sup> Anigo ai inime manda bido. Ainde inime mini gigabi bayale ngago mulenego Ngode Datagaliwabehanda nangiyagua nde mo yulene nakarulapeore. Ai Ngode Datagaliwabehanda ihondo mbirale ogoni bameore i mo turu halu ngiyago ai manda ogonime i mo walia kagome inaga miniha waleore kogo mo walia ka. Ani bidago manda bialu inaga miniha dege Anduane Homogohondo bi lalu holebero.

## 9

*Solomono ibugua mini gigabiwi mulego Ngode Datagaliwabehondo bi lenego ogo*

<sup>1</sup> I mamalirunaga Ngode Datagaliwabebi dara holene irane nawini dara holene Ngode Datagaliwabebi kego inaga bi degeme mbirale bibahende ngaru wabiai hariya. ✧  
<sup>2</sup> Ininaga mini gigabi ngegome mbirale ngaru bibahende handaya ho howa haru hai helonaga wali agali wabiriya. <sup>3</sup> Ani bialu tigua mini gigabi wulenebi mini bayale wulenebi wu howa mbira ngaru bibahende handaya ho howa mo tale bialu helonaga wabiriya. <sup>4</sup> Ngode Datagaliwabe-o mini gigabi wulene i heba mandagi ka. Ani bialu libu haru mandagi mbirale ngaru handaya ho kebigi ainde mini gigabi ogoni i ngibe. I inaga waneigini bu karuha hatago hole anda ibulino naibule nalabe. <sup>5</sup> I inaga garabaya biabe ale biaga kogoni ndobe. I wali inaga biabe biaga biago igini ko. Ani howa i agali hongo naheore kogo dindi ogoria tigimandi hangu holebero. Ina tigabiore lolenaga mana tigabi ngadagua lolene manda nabiore kogoni. <sup>6</sup> Ai wali agali mbira ibu mana bayale ngago bibahende taluwa bialu howa ibuha mini bayalebi mini gigabi wulenebi iha howa ibini nawi heagua nde wali agalibi ogoni ibu habane nabulene mbira holebira. <sup>7</sup> Ngode Datagaliwabe-o ina i inaga wali agalinaga kini holiya dabo helalu i waneigini uruni ti mana larago hale howa mo tale biaga holiya dabo helede. <sup>8</sup> Inaga hari nene biagoria i anda buliyabi loma bu delaga dabu mbira Yarusalemeni bia holiyabi ani bibe lalu ihondo langiri. Yarusaleme ini biragane tano timbuni ngagola anda kago ibu dahuliya andanaga manane ka. Inime Yarusaleme bambaore howa manda manda bu winiya. <sup>9</sup> Mini gigabi wulene ibu ila haabo haga. Bamba ina dindi harila wabiringi ibu ila mandagi hene. Ani howa ibugua i hame ledego manda biai halu mbirale inaga mana lo ngago talialu bialu holene tigabi wiagobi manda biai hene. <sup>10</sup> Mini gigabi wulene inila dahuliya andagaha kago ibu ibilabe. Ibugua mbirale ina hamelo kego damene bibahende i lawai helo ibu inaga wa timbuni taraore holene ngego wahalu dalialu ibilabe. <sup>11</sup> Ibuha manda bayale bialu mbirale bibahendenaga mini wale bayale ngago ainde ibugua mbirale bibahende ina bule manda bidogo damenenaga mini baya hangu haru hai helo. Ani bialu ibunaga hongome i haru helo. <sup>12</sup> Anidagua biragola inaga biabe berogo damene bibahende inaga deni bayale hai helo ani bibe. Ina wali agali inaga karunaga dabolene tigabi lolene ngadagua lalu tinaga bi larago bibahende baya hangu mo tale buliya. Ani bialu ini kini bayale holiyabi i aba Debidinaga henge muliyabi ibugua haru helo ibi labe.

<sup>13</sup> Ainde mbiralime Ngode Datagaliwabenaga mini mandala ngago baya hangu manda biai habehebe. Ndo manda biai habe naheore. <sup>14</sup> Nahabehedago irane agalinaga mini bayaleore ndo howa mbirale bulebirago damene bibahende biako hai haga. <sup>15</sup> Anidagua biagago irane wali agalinaga tingini dindi kagome abale mo ko hai hagaya. Tingini ogonime wali agalinaga holene ngagoha genda mo ngialu mini abale pugua-gaya. <sup>16</sup> Ai iname manda bialu mbirale dindini ngaru damene bibahendenaga manda bulenego ndelaheda lo manda beremali. Ani bialu mbirale inanaga deni kaware ngaru baya hangu handa tiga naberemali. Anidagua beremaligo ainde mbirale wiado hene dahuliya andaga ngaru baya hangu manda bibehe ai kabe. <sup>17</sup> Ngode Datagaliwabe-oinaga hame ngego mbiralime manda nabioire ndobe. Ainde inime inaga mini gigabi wulene wali agalihondo mialu inaga dinini dindini dalilalu miriyagua nde wali agalime baya hangu manda bibehe ka. <sup>18</sup> Anidagua dege dindini wali agali bu karume talialu helonaga hariga baya hangu mo tiga biriya. Ina mbirale ini hamelo keru wali agali lawai haregola mini gigabi wulene ibugua ti biamogo biaga, lene.

## 10

### *Mini gigabi wuleneme Adama handaya ho henego ogo*

<sup>1</sup> Agali pigane Ngode Datagaliwabehanda wabu helayago ibu mini gigabime ibu haru hene. Ani bialu ibugua inanaga mamali ogoni ibu nde ibuni hangu heangi mini gigabi ibu libu haru mandagi hene. Ani howa Adama ibu koha pilayangi ibugua lone mo heya hene.\* <sup>2</sup> Ani mo heya howa dindini ngarubi karubi bibahende Adama ibugua handaya ho howa haru hai helo ibuhondo hongo mini.

### *Keni ibu mini bayale talia nabinigo ogo*

<sup>3</sup> Anigo ainde agali ko mbira ona heneya. Ibu keba taraore haga mbira heneya. Ani howa ibugua mana bayalebi mini gigabi wulenebi talialu nabiaga heneya. Ibu ibunime mo ko heneya. Anidagua biaga howa ibu hamene heago homelo bo wahaya.\*

### *Mini gigabi wuleneme Noa haru henego ogo*

<sup>4</sup> Ko timbuni Keni ibugua binigome iba li timbunime dindi namu lai hene. Anigo mini gigabi ibugua dindi lone mo bayale hene. Ibugua agali mbiraibunaga iba sibiha bereaore ira tigini mbira ibame yu ibagabu haradagua bialu iba sibi ogoni ibame yu ibagabu heagola mini gigabi wulene ogonime baya hangu handaya ho hene.\*

### *Mini gigabi ibugua Abarahama biamogo bini lenego ogo*

<sup>5</sup> Ko tara tara wiagome wali agali bibahendeore mo ko hai heneore hai heagola ti lulu yu ibaga bialu heangi mini gigabi ibugua Abarahama mana tigabi wiago bialu haga heago hondowa ibu gubalini howa dabene. Abarahama ibugua ibu igini kago gubalini ho heaguabi harugo lowa ibuha ko mbira para nahe Ngode Datagaliwabenaga deni ko mbira ibuha para nahe bayale helonaga mini gigabi wulene ibugua Abarahama biamogo bini.\*

### *Mini gigabi wuleneme Lode biamogo binigo ogo*

<sup>6</sup> Lode ibu mana bayale tigabi wiago hangu biaabo haga heagola mini gigabi ibugua Lodela mandagi howa biamogo bialu henego irane Lode ibu wali agali ko biaga hearu heba mandagi nahomelo ani bini. Tano timbuni duria wiagoria ira dene hariha howa ibira hayagola Lode ibu ibida pene.\* <sup>7</sup> Bamba howa hama ibinigo ayu kegoniha wali agali uruninaga mana ko binidago mo walia holene tara tara wiaabo kagoni ndobe. Dindi tinaga winidago ayu wiaabo kagoria dindiha kaba ngaruha ira haguaru datagi halu haabo ka. Ira lini do naganealerume lini da nde dagagoyu baya hangu boga bialu

\* 10:1: Pig 1.26-28    \* 10:3: Pig 4.8-13    \* 10:4: Pig 7.1-8.22    \* 10:5: Pig 11.1-9, 12.1-3, 22.1-19    \* 10:6: Pig 19.1-29

bayale nolene nadagaya. Ani bialu ege tole timbuni ibi kui mbira kago ogoni ibu Lode one ibugua Ngode Datagaliwabehanda bi layago mini mbiraore nawiyagonaga manane henego ka. <sup>8</sup>Wali agali tano timbuni duria uruniha haga bu henedaru tigua mini bayale gigabi wualene ogoni galone ndoda lowa mo nagalone ho hene. Ani heagome tinaga mini ndibulo wahene howa tiha mbirale bayale wiaru mbira wá naleore heneya. Ainde wali agalime mbirale tara tara irame dene ngaru de hondowa tigua wali agali urunime mana lehe bia ko halu henedaru mitangi budai bulebira. Ani bialu mana ko timbuniore wali agali tano timbuni duria uruniha hagadarume binidaruni embeda naholebira.

*Mini gigabi Yagabala henego ogo*

<sup>9</sup> Mini gigabi ibugua wali agaliha ti mo ko holene mbira ibuligonaga ibugua hame ledago bialu helo biamogo biaga ka.

<sup>10</sup> Yagaba ibu agali mana tigabi biaga howa ibu hameneme keba timbuniore haya handala ibu ibida pene. Mini gigabi wulene Yagaba mana tigabi bilo biamogo bini. Ibugua dahuliya andaga mo walia halu bini. Dahuliya andaga ogoni Ngode Datagaliwabe ibu andaga baya buruguleore ka. Mini gigabi wulene ibugua Yagabahondo mbirale Ngode Datagaliwabenaga ngago lawai haya. Ibu biabe bilo biamogo bini. Ani biamogo biyagola ibugua biabe bayale dewa bini. Ibugua biabe erekuibi bialu hayagome lini bayale maru dene. <sup>11</sup> Agali tara maru hearume Yagabanaga mbirale wiaru dimagoli ho howa mo page bule manda bialu hearia mini gigabi wulene Yagabala haru mandagi haga heagome biamogo biyagola ibu mbirale bayale dewaore wia tago haga bini. <sup>12</sup> Yagaba waitigi kagome bolino mini gigabi ibugua Yagaba handaya ho hene. Waitigirume Yagaba hariga porago ha bo waholino ibugua baya hangu mamage haga hene. Mini gigabi ibugua Yagaba biamogo biyagola Yagabahanda mbiraga mbirangi Ngode Datagaliwabenaga dahuliyali mbirala gungu timbuni bialu Yagoba ibugua dahuliyali bope hene. Mbiraga dahuliyalila gungu timbuni biyadagoniha mini gigabi wulene ibugua Yagoba lawai henedago ogo. Mbirali Ngode Datagaliwabenaga hame ledago taluwa bialu haga kago ibu hongo timbuniore agali wai biaga pari wayali kagonaga hongo kago bolanguahe ka, lalu lawai hene.

*Mini gigabi wulene ibugua Yosebe biamogo binigo ogo*

<sup>13</sup> Bamba agali tigabiore mbira mini Yosebe hene. Ibu baba hamene ho hearume ibu agali tara ibiyaru minu mialu yolo taguini. Ani binigoyu mini bayale gigabi ibugua Yosebe yu wa nahene. Ibugua Yosebehanda mana ko bulino Yosebela mandagi howa biamogo bialu hene. Tigua Yosebe garabaya andaha heleagolabi mini bayale gigabi ibu libu haru haabo hene. <sup>14</sup> Ibugua Yosebe wahalu pu napeore. Nape libu haru howa ibugua Yosebe Iyibi dindiha gabumanenaga agali haguane helo mo helene. Ani bialu waitigi maru abale Yosebe bope halu hayaru Yosebehanda lone handaya ho howa haru helo hongo mini. Ibugua agali maru tigua bi ke howa Yosebehanda ko biya laga hearu ke henedalo panaga hendelo ibugua mo panaho ngelene. Ani bialu ibugua Yosebenaga mini timbuni mini lene wiaabo helo mo hela hene.

*Mini gigabi ibugua Isaraele wali agali Iyibi dindi wahalu tagira pelo biamogo binigo ogo*

<sup>15</sup> Ngode Datagaliwabehanda Isaraele wali agali ibuninaga wali agaliore helo dabo helene. Ani heagola ainde Iyibi wali agali tigua Isaraele bope howa mo ko halu hearia mini bayale gigabi ibugua Isaraele haru dai bialu helene. <sup>16</sup> Mini gigabi ibu agali Ngode Datagaliwabenaga biabe bia haga Mosese hearia dalialu ibini. Mini gigabi ibu agali kini ko hearunaga deni gi nahe hongo howa heyu hene. Ani hongo ho howa ibugua agalime nabiagane aleru dewa bialu hene. <sup>17</sup> Mini gigabi ibugua Ngode Datagaliwabenaga wali agali bu hearume biabe erekuibiore bialu heago hondowa yolo bayale tihondo mini.

Tihondo ibugua hariga bayaleore mo walia hene. Horombe ibuni hari beraliba ale howa ti bu dambi ho haga hene. Mbiraga yakundi timbuni heagobi howa wá hadali halu ti hariga mo walia haga bialu hene. <sup>18</sup> Ani bialu ibugua tinaga hariga iba uli timbuni bereago hanuni bope hene. Ani bialu ibugua ti iba solowara mini Iba Daramabi bereago domaede halu pelo biamogo bini. <sup>19</sup> Ani bialu waitigi ibiyagola iba yaribu timbuni bialu li ibiyagome waitigi uruni bo namu lai hene. Ani biyagola waitigi agali biaru iba nalu homai helene. Ani bialu Iyibi waitigi uruninaga tingini ibame iba angeni yaragaho ngelama pene. <sup>20</sup> Wali agali bayale hearume wali agali ko biaga hearunaga mbirale dabudabu tara tara bayale wiaru ti karulai hene. Isaraele wali agali tigua Ngode Datagaliwabe ihondo inaga mini yaraga halu ihondo iba gana lalu haya. Ti bibahendeme ihondo turu howa iba gana lagimbu bialu lai haya. Inaga hongome ti mo wialu pelarigonaga ani biya. <sup>21</sup> Ai mini gigabi bayale wulene ibugua wali agali bi nalaga bu hearunaga hége mo tiga bialu lone bi lelaya. Ani bialu waneigini galirume bi layaru mo beregedalu galone lene helaya.

## 11

### *Mini gigabi ibu ti heba dindi ko wiagoha mandagi ibaga bu henego ogo*

<sup>1</sup> Mini gigabi ibu Ngode Datagaliwabenaga bi mana latagi haga Moseshe heba mandagi haabo haya. Mosesenaga giha mini gigabi ibu howa Isaraelenaga biabe biyago bayale biaabo halu hene. <sup>2</sup> Isaraele ti dindi ko yobi iba dalu nabiaga wali agali nahaga wiagoha ibaga bialu hene. Ani bialu hariga mbira nawiore wiagoha balai anda bu haga bima pene. <sup>3</sup> Tinaga waitigi baba wai bialu hongo ho hene. Ani bialu waitigi hearu baba wai bialu bo hela dai bigi bini. <sup>4</sup> Isaraele wali agali ti iba noa halu dendebe lebola hayagola tigua ihondo iba ngi lalu olayagola ina ti iba nelo migi biri. Iba ogoni ege tole hongohi timbuni heagoha howa gudulatagi hayagola ti nalu hene. <sup>5</sup> Ibame tinaga waitigi bai hene. Ai horo kongi ibame dege Isaraele tini biamogo bini.

### *Mini gigabi wuleneme Iyibi benego ogo*

<sup>6-8</sup> Bamba Isaraele waitigi tigua mana mbira wabialu mana ogonime, Isaraele waneigini bu karu bibahendeore homelai holene nga, lene. Ai tigua mana ko bialu karu biadai biaga Ngode Datagaliwabe ina iba timbuni pialu haabo haga peago mo ko harigola iba biago daramabi haya. Ani bialu ai ti dindi ko iba dalu naibaga wiagoha heangi inaga wali agali tinaga dendebe lebola halu iba noa howa tungulo handalu haya. Inime waitigi genda mo mirigo Isaraele tiguabi nde genda ogoaleda lo manda bilonaga biriya. Anidagua helo howa ai Isaraele ti homaramagonida lo manda bu hearia nde ti iba dewaore nelo miriya. <sup>9</sup> Waneigini abame ti waneigini tigatiga mana lalu biagadagua ina inaga wali agaliru bahandariya. Ainde kinime ibu waitigi baba keba halu homelo bo wahagadagua wali agali ko hearu daba bagi hariya. <sup>10</sup> Wali agali ko karu kinime ti baba keba halu dabowa deni helagadagua ina nde wali agali tigua bialu heago bahandalu mo tale biriya. <sup>11</sup> Isaraele ti Iyibi wali agali baba mandagi Iyibi dindiha heangi ina Iyibi wali agalihondo tandaga timbuni mo miriya. Ani bialu Isaraele ti Iyibi wahalu puwa kaundiha heangi nde Iyibi wali agalihondo genda timbuni lone mo miriya. <sup>12</sup> Genda timbunime Iyibi wali agali halu ki mo ko hayiya. Tiha mo ko holene genda timbuni halu ki anda ibiyago labo mitangi bialu howa tigua dugu timbuni biya. Agali timuheme tandaga howa dugu biagadaguaore biya. <sup>13</sup> Anidagua binigo genda timbuni Iyibi tigua yu hayadagoni irane Isaraele biamogo bulenaga ani ibilene. Iyibi tigua mbirale o biyadagoni hale howa tigua manda bialu biabe ogoni Anduane Homogohandaibunaga biabe dege biya lolebira. <sup>14</sup> Moseshe ibu bamba emene galini tigua mo bagi howa nu mbiraha ngelowa mo panaho ngelene. Ai Moseshe ibu anda halu agali heagola Iyibi

✧ 11:1: Har 15.22-17.16



wali agalime mege bialu ibu erembira mialu hene. Mani howa mbirale tara tara tagira ibiyagola ibunaga biabe timbuni taraore yu heago hondowa ti mogolo hene. Ani hondowa ai Isaraele wali agalinaga Ngode Datagaliwabehanda mana kirani hagayane hendene. Ngode Datagaliwabehanda Isaraele wali agali iba dewaore mialu Iyibi wali agali namiyane hendene.

<sup>15</sup> Ani biyago hondowa wali agali ko uruni tigua mini ko dewaore wialu hene. Tininaga mini ko ogonime mo luluya hayagola tigua puya mini nawi wiagohondobi ema bialu piaga maru berearuhondobi bi pupu wialu hene. Ani bialu hearia ina ema bialu piaga tara tara biru hearu ibilalu ti mo ko hariya. <sup>16</sup> Ina anidagua bialu mbirale ema bialu piaga tinime bi pupu wiaga biarume tini mo ko holene yu ibaga lalu Iyibi wali agali tini mo walia hariya. <sup>17</sup> Ngode Datagaliwabe inaga hongo timbuniore nge. Ininaga hongome dindi ogo wabiriya. Ani bialu mbirale wia ko hearu inime baya hangu mo dabadabaho ngelariya. Ani bialu biango dudu tara tarabi gabua laionobi wali agali mo ko halu bo wahai helo ibilabehe kegoni. <sup>18</sup> Ina ema bialu piaga gabua taraoreru wabulene hongo karulapeore ke. Ani bialu maru nde tinaga ngui harigaha ira datagi haluhebi wabibehe ke. Ani bialu ema bialu piaga maru nde bi dalimuore hongo tara howa ladaga haragola ira hagua ne harigaha timbuni datagi helalu maru nde tinaga deha howa ira hungu datagi hagaru wabibehe karulapeore ke. <sup>19</sup> Ai ema bialu piagane urunibi dindini hayagua nde urunime wali agali abale balu tongolo milolebira. Ani bialu wali agalime urunibi de handayagua ti gi timbuni howa mogo lalu abale tungulo mu wulebira. <sup>20</sup> Anidagua bulene ini karulape kegonigo ina ema bialu piaga ko urunialego wali agali bo wahai helonaga naibilabe. Inaga dabolene tigabi ngegoria haru polene hamelo heagua nde ina bame inaga ne harigaha pu laregome wali agali ko bu karu bame odopebe bialu homai habehe ke. Anigo ainde inime mbirale bibahende dewaore helobi daga lowaore manda buwa holene karulape ngadagua helobi wabiriya.

*Ngode Datagaliwabe bibahendenaga hongo haihe kagome ibuni wabini ngaru gubalini haiho kago ogo*

<sup>21</sup> Ngode Datagaliwabe-o inaga hongo bibahendengi walia haabo habehe kegoni. Mbiralime inaga hongo mo bagi habe naheore. <sup>22</sup> Inaga deni dindini ngago ibu emeneore dabiabi iba mu alebi mbiraga pibiya ibira haragome egerebagi handalu keria dadimba dindini ngaligobibi nga. <sup>23</sup> Anigo ainde inime mbirale bibahende wabiai habehe kegome wali agali bibahende dara holene irane nawi ngatoria howa dara hai haga ke. Ina mbirali ko biaga kago abale bo waholene ngago nabe kegoni irane ti mini beregedelo henge mialu handaya ho haga ke. <sup>24</sup> Ina dindini karubi ngarubi bibahende gubalini hai ho haga ke. Mbirale bibahende inime wabini bu ngaru aria mbirago ko ngada lo manda nabi kegoni. Ani manda bidego irane mbirale bibahende wabialu howa ina ko ini manga holene ale mbira nawabini. <sup>25</sup> Ina mbirale mbirago helo hame nalariyagua nde ogoni ibu bayale naholebira. Mbirale mbira dindini helo wa nabiriyagua ogoni ibu dindini bame anda ho habe nahe ka. <sup>26</sup> Anduane Homogo-o mbirale bibahende karubi ngarubi inaga dege ngaru bibahende uruni inime gubalini hai howa handaya ho haga ke.

## 12

<sup>1</sup> Inaga dinini haabobo haga kago ibu bibahendeha ho tolai ka. <sup>2</sup> Ani kagome i mbirali ko birago hendore tiga biaga ke. Anduane Homogo-o wali agalime ko mbira biyagua tinime handalu tiga bulene ngadagua mo tiga bilo ina mini mo wia haga ke. Ina tihondo bi hongo howa lamialu ko bialu kemigo wahai halu ininaga biamogo biaga ngego manda bialu yutiga bilo ani biaga ke.

✧ 11:15: Har 8.1-24, 10.12-15

*Ngode Datagaliwabehanda Kenana wali agali abale bo wahole lo manda nabinigo ogo*

<sup>3-4</sup> *Ína wali agali hameigini tara bamba ínaga dindi ngegoria hearuhondo turu nahe hene. Tigua mana koore wiaru dewa biaabo halu tomia bialu dama togo wialu mbirale gime wabini wiaruhondo bi pupu wialu hene.✧* <sup>5</sup> *Tigua dara naheore howa tinaga waneigini homelo balu wali agalinaga tingini daramarubi nalu hene.* <sup>6</sup> *Wali agali dindi ogoniha haga hearume mana ko bulenaga bi pupu wiaga howa ai aba aija hearume tinaga waneigini galiru homelo бага hene. Ani bialu haga heago hondowa ínime inanaga mamaliruhondo lamialu, Wali agali dindi ogoniha hene karu homelo bo wahai halimu, lariya.* <sup>7</sup> *Ani bialu dindi ogoni íni gubalini timbuni howa dindi maru ngaru gubalini anidagua nahe ke. Ani howa ínaga wali agali ti dindi bayale ogoniha helo hame lede.* <sup>8</sup> *Anigo dindi ogobi ínime gubalini ho hariyago irane wali agali dindi ogoria hene hearubi nde ínime wabini dege heagola biriya. Ainde ína ema bialu piaga berearu ala bamba halu wali agali waitigi bu hearu hendore mbira balu homelaga bule pudaba lowa ínaga mamage agali hearu mani pelariya.✧* <sup>9</sup> *Agali mana ko biaga karu bo wahai helo agali bayale biaga karu biamogo biaga ínaga hongo gibi nge. Ína bi hongohe mbira laregomebi mbirale ema bialu piaga biru karu íbilalubi waitigi bu karu abaleore homai helo bo wahai holene karulape ke.* <sup>10</sup> *Anigo ína ogonidagua nabiaga. Tigua bu mini beregedelonaga hendore dege mo tandaga haga biaga ke. Heneneore ti wali agali ko biaga waneigini howa ti wene waneigini gali heangi ko biawai hene kago í manda bide. Ani bialu tigua mini beregedabe nahe kagobi í manda bu ke.* <sup>11</sup> *Ani bialu kago irane bambaore howa wali agali bibahende ínaga deni nahe pu ereba hai hene kagome ani biaga ka. Heneneore tinime ko biyago karulape pani nelo nami hari. Ína ti pani nelo nami harigo irane ína agali mbira gi howa ndo ína ti dara ho howa pani nami wahariya.*

*Ngode Datagaliwabe ibu Anduane Homogo kago ogo*

<sup>12</sup> *Ngode Datagaliwabe-o íhondo o beregoni agile berebe labehe ai kabe. Ani bialu ínaga bi mo wahabehe mbirali ai kabe. Ani bialu wali agali bibahende ínime wabini bu karu bibahende bo wahai hariyagua ko birida lalu íhondo laba lolene mbira ai kabe. Ani bialu wali agali ko biaga bu karunaga bi lamogo bia hole mbirali ínaga deni ai ibu holebirabe.* <sup>13</sup> *Mbiralime urunidagua bibe nahego irane mbirale bibahende ínime handaya ho howa haru hai haga ke. Ani bialu ogoale biru ogoale laru lalu ína lamulene bi pupu wiaga wiarualebi mbira naheore.* <sup>14</sup> *Ani bialu ína wali agali bo wahai hariyagua agali haguane mbiramebi kini mbiramebi ína ko birida lalu bi ladai bulene mbira naheore.* <sup>15</sup> *Í tigabiore howa ína mbirale ngaru mana tigabi handaya ho holene ngadagua handaya ho haga ke. Ína mbirali ko nabiaga kago bame laede halu ko birida nalaga ke.* <sup>16</sup> *Anidago irane mana tigabi ína biaga ngegome ínaga hongo gibi ngego mo walia haga nga. Íni tinaga Anduane Homogo howa wali agali bibahendehondo dara hai haga ke.* <sup>17</sup> *Wali agalime í hongo naheda lo manda bu kangí ínaga hongo ngego mo walia haga ke. Mbirali ínaga hongo ngego manda bu howa mine haga karu ína ti pani nelo mialu minu бага kegoyu tinime mine halu í erembira ngiaga ka.* <sup>18</sup> *Hongo damene bibahende íninaga giha yu howa ina wali agali pani ngulene ngangí ngialu minu бага ke. Anigo ina baba daba ki lolene ngangí ina wali agali dara holene irane nawini dara haga kegoni. Ína ina wali agali mana tigabi ngagoria howa hendore haru haga ke.*

*Ngode Datagaliwabehanda Isaraele dara henego ogo*

<sup>19</sup> *Ína mana ogonidagua birigome mbirali tigabi kago ibugua wali agali tigabi bu karu mini turuho haga lalu biawai hari. Ínaga waneigini tigua ko bialu hayaru erembira mialu íni keria dai bilo hondo haga kegonaga tigua íhondo mini mbiraore hongohe wua*

ka. <sup>20</sup> Ína keba abale tungu nale howabi ínaga wali agali waitigi karu abale nabagabi kegoni. Heneneore ko tinime biyagonaga tiniore homolene nga. Anigo ainde mana ko tinime bialu henedaru yu wahai helo henge miaga ke. <sup>21</sup> Ínaga waneigini tinaga mamaliru baba habo nalolene bi lo winiyago ngelowabi tihondo mbirale bayaleru nguliya lalu bi lo winiyago ngelowabi uruni ani ngela lowa ínaga waneiginirume ko biyaore lalu mo ko howaore dabariya.

<sup>22</sup> Heneneore ínime ina pani ngiaore biri. Anigo ina baba waitigi karuhondo pani nelo dewaore daosini dege pihalu (10,000) agima mo miaga ke. Ína ogonidagua birigo irane ina wali agalime mo tiga bialu larago hale halu howa ínaga mana dara holene irane nawini howa dara haga kego manda bu howa hale halu mo tale bulumaya biri. Ai ko iname bidemangi tigua ina mo tiga bilo anidagua pu howa nde tigua ina dara helo malia ho holeberema.

*Ngode Datagaliwabehanda wali agali mbirale ema bialu piagahondo bi pupu wiaga bu karu mo tandaga hagago ogo*

<sup>23</sup> Ani bialu ínaga maru lulu yu howa mana ko wiagoha talima pialu hearu tandaga nelo migi biriya. Anidagua biriyago irane tinime mbirale ema bialu piaga ko hearuhondo bi pupu wima pialu hearia tandaga nelo mo miriya. Ainde mbirale ema bialu piaga urunime ti tandaga nelo mo miya. <sup>24</sup> Tigua bi henene lolenenaga hariga ngago wahai halu puwa mbirale ema bialu piaga ko bu hearuhondo bi pupu wima piya. Ti waneigini gali mini nawiore hagagobi howa lulu yu ibaga bu ka. <sup>25</sup> Ínaga deni wali agali uruni mini bayale nawiore waneigini ale kagola ínaga ti baba daba ki bialu pani nelo mo meragobi nde mo ko holeneore ndo bame wali agali tara tara bu karume de hondowa oba halu mege bilo manda buwa mo miaga ke. <sup>26</sup> Pigane ti mini beregedelonaga genda emene hangu mo mirili. Anidagua beregola tigua ínaga dara howa biamogo bulene ngago manda nabi kagome ai tiha ínaga manani tigatigaore mo tale bulene ngadagua mo tale bulebere. <sup>27</sup> Mbirale ema bialu piaga uruniale tinaga bi pupu wiaga hearume tinihondo tandaga taraore nelo miya. Anidagua biyagome tinaga miniha mo wála hayagola abale howa Ngode Datagaliwabe tigua manda bulene manga ho heneyago hendene. Anidagua bialu tiha mo ko holene timbuniore mo yu anda ibini.

## **Wali agali mbirale gime wabini ngaruhondo bi pupu wiaga karu ti luluore ka**

*(Be 13.1-15.13)*

### **13**

*Wali agalime mbirale dindini wini harini wini ngaruhondo bi pupu wiali henego ogo*

<sup>1</sup> Wali agali Ngode Datagaliwabe manda nabi karu ti luluore ka. Wali agali urunibi karume mbirale bayale tini deni kaware ngaru hondolebirago ainde Ngode Datagaliwabe ibuni haore biarua lalu taya buwa handa walia naholebira. Biabe bu wini ngago baya hangu bigibege lalu handalu howa biabe ogoni biaga kago ibuni baya hangu taya bialu handa walia nahaga ka. <sup>2</sup> Tigua mitangi bialu howa ira dene dedagobi puriabu pu laragobi iba solowara timbuni bedagobi yakundi karubi iba li timbuni poragobi ni kagobi ege kagobi ti timbuni howa tigua dindi ogo handaya ho ka lo manda biaga ka. <sup>3</sup> Wali agalime mbirale urunihondo turu timbuniore howa tigua mbirale uruni bi pupu wiagane ale ka lo manda bu haga ka. Anigo Anduane Homogo mbirale uruni wabiaga kago ibuni mbiraleibunime wabinidaru bolangua hene daligaore ka. Ani bialu Anduane Homogo ibuni mbirale bayale damene ngaruni abaore ka. <sup>4</sup> Wali agalime mbirale uruninaga hongo ngago hondowa mogo timbuni lalu biabe hongohe birago de hondowa mogo timbuni laga ka. Anigo ainde mbirale uruni wabini aba ibuni kago ibu mbirale uruni bolangua hene howa ibu hongo gibiorehe ka. <sup>5</sup> Wali agalime

mbirale baya taraorebi timbuniorebi mbira ti kagoria ngaria hondowa ai mbirale baya ogoni aba baya taraore halu mbirale timbuni ngaru aba timbuniore harua lo manda bulene nga. <sup>6</sup> Anigo ai tinaga miniha wá nale heagua nde tigua henemane manda buwa bero lalu bialu hene ndo dege holebira. Tigua Ngode Datagaliwabe ibuni taya bule bialu karia pu luluya howa bulebira. <sup>7</sup> Anidagua bulebira ngo irane Ngode Datagaliwabe manda mbirale bayale wabiyago damene bibahende tinaga deni panaga bu payabu wiai kagola tigua Ngode Datagaliwabe ibuni taya bialu hene holebira. Mbirale ibugua wabini uruni baya taraoreru bu ngagola tinaga bu mini uruniha ha holebira. <sup>8</sup> Anigo ainde ti luluyu kago daraba. <sup>9</sup> Tigua mbirale bu ngarunaga mana ogodagua biaga agua piaga agua haga lalu manda timbuni uruninaga wu ka. Anigo ainde mbirale bayale uruni aba kago ibuni abale handa walía nahaga kago irane agimeda.

*Wali agalime ira dibalu gime wabini wiaruhondo bi pupu wialu henego ogo*

<sup>10</sup> Wali agali darabiru tigua manda bialu mbirale holene nayi ngarume ti biamogo bulebirabe toba howa urunialehondo mini mbiraore wu karu dege daraba. Tigua mbirale agali tininaga gime wabini ngaruhondo bi pupu wiaga ka. Agali mbira mandabi kagome ema bialu piaga biru ngarunaga ngolo silibarume wabu wini ngagohondo bi pupu wialu haga ka. Ani bialu ege tole bamba agalime podo wini ngagohondo bi pupu wialu haga ka. <sup>11</sup> Agali anda biaga kagome biabe biagago baya hangu manda bulene nga. Ibugua ira mbira dibalu ongoba bu wiaga. Ani buwa ogonime wali agali biamogo bulene ale bayale mbira gime wabiaga. <sup>12</sup> Ani wabialu howa ira ogoninaga duni haraneru tomo hirule ira delowa ibuni turu ho biraga. <sup>13</sup> Anigo ira bogu wahene harene ngarume biabe bulene mbira nawi. Ira ogoni ibu yiyoleni howa de habane bere bada. Anidagua bini mbira wiagua nde agali biabe biaga biago ibu biruwa ira ko galone nabibehe ogoni tigi haga buwa tigni urunime wali agalinaga bigiyaru <sup>14</sup> ema bialu piagarunaga bigiyaru wabiagaya. Ani wabuwa maruhayagi bayale ndo ngaru daramabi lo budambi haga. <sup>15</sup> Ani biai howa ogoni ibu mo ngelolenaga tamu bayale mbira anda hai kagoria wiapara ho ngelowa mbirale irame wabiyago mo yalu puwa pume dariba howa mo ngelaga. <sup>16</sup> Mbirale irame wabini ogoni puriabume mo ibira haragola ibira howa gingirula hole bulino baya hanguore waya pume daba haga bu ngelaga. Baya hangu mo dariba haga biagadago irane ira dibalu bame agalime wabini wuwa ibuni pelemialu hongo naholobada manda bialu baya hangu agalime dege mo daba haga buwa helaga. <sup>17</sup> Ani helowa agali ogoni ibuni taga nahe howa mbirale ibunime wabu wiyagohondo bi pupu wialu ibu one baya hangu handaya ho habe lalu ibu waneiginibi ibunaga mbirale ngarubi baya hangu handaya ho habe lalu bi lamiaga. <sup>18</sup> Ibugua mbirale irame wabu wiyagome ibuni tingini mo hongo habe lalu bi pupu wiagagoyu mbirale irame wabini ogoni ibuninaga hongo nawi. Agali biago ibu holene ngibe lalu bi pupu wiagagoyu irame wabini ogoni ibuniha holene mbira naheore. Agali biago ibugua mbirale ogonihondo ibu biamogo bia lalu bi pupu wiaga. Anigo irame wabini ogoni ibuni biabe mbira bibe naheore ka. Agali biago ibugua irame wabini ogonihondo ibu baya hangu ibagabu holiya biamogo bibe lalu bi lagagoyu irame wabini ogoni ibaga bialu napiaga. <sup>19</sup> Agali biago ibugua irame wabu wiyagohondo bi pupu wialu lamialu ibunaga biyinaya biabe bialu kago biamogo bialubi biabe maru ibugua bialu karubi biamogo bibe lalu bi lagago ainde mbirale gime wabini ibuninaga ema bialu hongo holene mbira nawiore ndobe.

## 14

*Ngode Datagaliwabe handa Noanaga iba talu mo bayale halu mbirale irame wabini wiaru ho gingiru lo wahai hene*

✧ 13:10: Ais 44.9-20, Yar 10.1-16, Bar 6.8-73

<sup>1</sup> Agali mbira ibugua iba li timbuniore wiyagola iba taluha anda pole hene. Ani howa pigane ira tigrini mbira wiagohondo ibu bayale holiya biamogo bia lalu bi lamini. Anigo ai ira tigrini ogoni ibu hongo nahe. Ibugua hongo iba sibi agali ogoni ibu yalu polebiragobi ndo nga. <sup>2</sup> Agali mbira ibu yolo mulenaga iba sibi wabulenenaga bebani wabu wini. Ani bu wiagola agali manda bayalewi heago ibugua iba talu wabini. <sup>3</sup> Anigo ainde Aba-o ina iba sibi ibu iba hanuni hariga ogodagua pelo lalu baya hanguore handaya ho haga ke. <sup>4</sup> Agali manda nabi heaguabi ibugua iba sibi baya hangu yalu polebirago irane ina ibu biamogo beregola yalu polebira. <sup>5</sup> Ainde mbirale bibahende inaga mini gigabi ibugua wabini ngago damene bibahendeme tinaga biabe bulene ngago bigi bigi bialu helo hamelo ke. Ani manda bidegome wali agali tigua gi nahe bameore ira mbalapayabi ngagoria biralu iba solowara timbuni bedagoria pialu mo ko halu iba nai nahe bayale ange mendehayagi anda piaga. <sup>6</sup> Bamba bambaore agali luoreni timbu gibiore heneya. Ti mine halu balagala halu heagome tini homai halu ereba hai henego mbiraore hangu homa nabi bayale heneya. Ibu hangu bayale howa wali agali hameigini tara tara mani henerunaga mamali ho aribia heneya. Ibu iba sibi inime handaya ho heneyagoha biruyu ibagabu heneya. <sup>7</sup> Ngode Datagaliwabe-o ina iba sibi ogoni agalime irame wabiyago mo bayale harigola ai iba sibi ogonime biamogo biyagola mana tigabi bulene ibu bolangua heneya. <sup>8</sup> Heneneore mbiralime bi pupu wulenaga irame bigiya wabu wiyagua nde ibugua gime wabu wiyago mbiralime mo ko harangi ibuni heba mo ko holene wulebira. Ibuni heba mo ko holene wulebirago irane agali ogoni ibugua gime wabinihondo bi pupu wiaga ogoni wabu wiyagome ibu mo ko holebira. Ai mbirale abale mo ko halu goba haga ngago bi pupu wiaga bayale lalu kemigome ibubi mo ko holebira. <sup>9</sup> Ngode Datagaliwabehanda wali agali ko biaga karubi tigua biabe ko bu ngarubi hame nalagaore ka. <sup>10</sup> Ani howa ibugua wali agali uruni heba tinaga biabe ko bini ngarubi bibahende bo haealabaga bu wahai holebira. <sup>11</sup> Anidagua bialu Ngode Datagaliwabe ibuni ibalu wali agali Ngode Datagaliwabe yutiga nabiaga bu karu heba tinaga bi pupu wiaga ngaru heba bo haealabaga biai holebira. Heneneore Ngode Datagaliwabehanda mbirale bibahende ngaru wabiai henegoyu ainde wali agali tigua mbirale uruni mo ko hai halu mo nagalone halu ka. Mbirale urunime wali agalinaga mini mo luluya haga nga. Mbirale uruni wali agalime ibaha wena minule wena nu wiagadagua ngago urunime wali agali lulu karu minai holebira.

*Gime wabinigohondo bi pupu wulenenaga tene ogo*

<sup>12</sup> Agalime bi pupu wulenaga irame wabiyangi Ngode Datagaliwabe erembira mulene mana heyini. Wali agali tiniha mo ko holenebi ogoningi dege anda ibu wini. <sup>13</sup> Bambaore mbirale bi pupu wule gime wabini uruni ale nawini. Ani bialu manibi ani wiaabo naholebira. <sup>14</sup> Wali agali tinaga mine hagane maname mbirale bi pupu wiaga uruni dindi ogoria wabu winiya. Heneneore mbirale bi pupu wiaga gime wabini uruni abaleore ereba hai holebira.

<sup>15</sup> Horo mbirungi agali mbira heneyago ibu igini abaleore homo tungulo miyiya. Ani homayagola igiri aba biagome ibu iginiore dara timbuni howa igiri ogoninaga mbirale mbira gime wabiyiya. Ani wabuwa ibu igini abe dege homayagohondo bi pupu wiyiya. Ani buwa ibu ilili bulene manabi bi pupu wulene manabi tara tara wabuwa ibu waneigini aguaneru mani holobadaru tigua taluwa bialu helo wabu wini. <sup>16</sup> Maniore howa mana ko ogoni pu hongo halu mo mana helene. <sup>17</sup> Wali agalime gime wabini uruni ale ngagohondo bi pupu wilimu lalu agali haguane bu hearume bi hongo howa laga hene. Ai tinaga agali haguane dindi kaundiaha kagola wali agali tigua dengui handalu ibunaga mini yaraga hole ibabe nahe kaundiaha haragola tigua gime wabini agali ogoni handalehe wabu wiaga. Ani wabu ngelowa tigua agali haguane ogonihondo bi laradagua ibunaga bigiya ogonihondo bi lalu mini yaraga holenaga gime wabini ogoninaga mini yaraga halu hagaya. Agali haguane tigua ogonidagua bilimu lowa



hongo haabo haga winiya. <sup>18</sup> Agali gime uruni wabiaga karu tigua nde ogoni tinaga gi biyinaya winidagola tiguabi hongo howa wabu bila howa yolo migi biagaya. Ai tinaga biyinaya manda bialu wabiragola ogonime bi pupu wiagane mana ogoni pu timbu hene. Anidagua biragome wali agali maru tinaga agali haguane kago manda nabi bu karume bi pupu wiagane mana ogoni talialu haga hene. <sup>19</sup> Agali deme hondolene uruniale wabiaga kago ibugua ibunaga agali haguane kagonaga wabero lowa ibunaga agali haguane kagome hondowa turu helonaga bayaleore wabiaga. <sup>20</sup> Anigo áyu wali agali bibahende deme hondolene baya uruni turu hai ho ka. Bamba howa tigua tinaga agali hagianerunaga mini yaraga haga winigo ai áyu uruni tinaga bi pupu wulene nga. <sup>21</sup> Anidagua biragome wali agali mohondo halu genda tara tara mo miaga nga. Ani bialu agali haguane bu karunaga bi laragome wali agali mo luluya halu ege tole ngarubi ira tigini ngarubi tinaga bi pupu wulene urunihondo lolene nga lagane ka. Tigua ogonidagua binidago bamba Ngode Datagaliwabe handa tihondo lamialu mbirale mbira bi pupu wule gime nawabibe lenego mo wahene.

*Mbirale gime wabini ngagohondo bi pupu wialu kago mana ko ngagonaga tene ngago ogo*

<sup>22</sup> Wali agalinaga miniha mo luluya hai heagola tigua Ngode Datagaliwabe ibuni ai kabe manda nabioire ka. Mani howa ti pu luluyaore halu tinaga lulu mana ogonime tininaga minibi holenebi mo libilaba lalu mo luluya dege henego ka. Tinaga embone gengedai henego howa tigua lalu, Mana ko bulene ngagome holene bayale awadaga mo yu anda ibaga, lalu ka. <sup>23</sup> Tigua bi pupu wiaga maru ngaruha tinaga waneigini homelo bagane ka. Ani bialu tigua bi pupu tara tara lalu iba gana ko tagabi tara tara ngarubi mana ko tara nahendene ale tara ngarubi bialu haga ka. <sup>24</sup> Ani bialu howa tininaga dabubini mana ngagobi holene bayale ngarubi mitangi nahaga ka. Ani howa agalime agali mende kago mohondo halu ohowa homelo bo wahaga ka. Agali ko biaga urunime agali mendeali one bedago ti kayu bialu haru paluwa wali ogoni ibu agalini kago mo taga haga ka. <sup>25</sup> Wali agali uruni ti daluha mana ko tara tara wu toleda. Tigua agali bameore homelo bo wahaga bialu mbirale mendealinaga ngaru mo page bialu maru karu mohondo haga bialu haga ka. Tigua mana bayale bialu holene ngago wahalu habo nalolene bi lowini ngaru pugualu piyai haya. Tigua agali maru karu wai bilo mo bia halu mbirale mbira bule lalu bi lo wiyago nabi wahalu piaga ka. <sup>26</sup> Tigua agali bayale karu gililo yu pialu agali mende ibugua biabe bayale bini ngago mo embeda haga ka. Wali agali tigua mana bayale bini ngaru geme hengedo wahai haga ka. Agali dege dege mana ko tagabi ngaru bialu howa dabubini mana ngago puguaga ka. Dabubini mana pugualu puwa wali agali kayu bima ibaga dege biaga ka. <sup>27</sup> Mbirale bi pupu wule gime wabini ngagohondo bi pupu wiagane mana ngagome ko damene ngago mo yu anda ibagane hariga ogoni nga. Mana ogonialeme ko tara tara ngaru mo anda halu mana ogoni aleme wali agali ko mana ko uruni talima piaga karu biba helalu ereba helaga nga. <sup>28</sup> Wali agali mbirale bi pupu wule gime wabini urunihondo bi pupu wiaga karu ti lulu taraore yu ibaga bu haga ka. Tigua mbiwia harama lowa ke dewa halu mana nabulene lehe ngaru bialu haga ka. Ani bialu howa tigua mbirale mbira buleore lalu bi lo wiyagua nde bule layago henene bule ndo nabi wahalu piaga ka. <sup>29</sup> Tigua mbirale bi pupu wule gime wabini uruniha holene nahe ema nabiaga bameore ngarume tiha genda nangulubada lo manda bialu tigua mbirale mbira buleore lalu gi dolalu lo wirago nabi wahalu piaga ka. <sup>30</sup> Anigo tigua Ngode Datagaliwabe kago manda nabi tinaga miniha mo luluya hene kago ainde horo mbirungi tiha genda anda ibulebira. Tigua mbirale gime wabini dama mitangi bialu bi pupu wiaga ngaruhondo bi pupu wialu howa mana tigabi ngago bame dege nga lo manda biaga. Ani manda buwa tigua wali agali karu mo hondo howa mbirale mbira buleore lalu gi dolalu ke howa lo wulene karulape lo manda biaga. <sup>31</sup> Agali uruni tigua mbirale dama mitangi bialu bi pupu wule

gime wabini uruninaga minini howa henene ore bulego laro lowa gi do lalu bi lo wiaga. Mbirale bi pupu wiaga urunime tigua mana ko biragonaga pani namiagago ainde mo ko holene ngagome tiha ngola haabo holebira. Ani bulene ngago irane wali agali mana ko biaga bu karu tiha pani nelu mulene tigabi ngadaguaore miaga ngagome ani mulebira.

## 15

*Mbiralime Ngode Datagaliwabe baya hangu manda bu heagua ibuha haabo holene yu holebirago ogo*

<sup>1</sup> Anigo í inanaga Ngode Datagaliwabeore kegoni howa ínaga miniha mo palia holene karulo halu mana tigabiore ngago talialu haga ke. Ínaga miniha keba abale tungulope nahaga ke. Ína dara holeneme mbirale bibahende karubi ngarubi haru howa handaya ho hai haga ke. <sup>2</sup> Ínaga hongo holene ina manda bidamagome ina mana ko birimayaguabi ina ínaga wali agaliore kema. Anigo ina nde íninaga dabe-neore holomaya daba bagiho heledego ainde iname mana ko bulene hame naledema. <sup>3</sup> Mbirali baya hangu íniore manda biai ho kago ibu bayale tigabiore ka. Mbirali ínaga hongo timbuniore gibiorebi ngego hondowa manda bu kago ibuha haabobo holene yu ka. <sup>4</sup> Ainde mbirale agali tinaga manda wiadagua gime wabu wini bu ngaruni aria mbiragome ina wali agali kemaru haru pubagi naholebira Agali ira dibu bogo wahaga bialu gime wabini ngarumebi deme hondolene yári tara tara hiru wini ngarumebi uruni aria mbiragome Ngode Datagaliwabe helalu ina haru halu kaundiaha pubagi naholebiraore. <sup>5</sup> Wali agali lulu mini nawi karume mbirale irame wabinibi baya urunibi de hondowa tinaga bu miniha mo kiaula haragola tigua mbirali ema nabiaga holene nahe uruniale ngagohondo bi pupu wialu haga ka. <sup>6</sup> Wali agalime mbirale uruniale wabiyaguabi deme hondolene urunialego hame layaguabi urunihondo bi pupu wiyaguabi wali agali urunidagua biaga kago ti mana ko ngago turu haga ka. Anidagua biaga karu ti mani howa tininaga mana ko ngubi uruni yu tiga bu hayagonaga pani tandaga koore ngago nalu holebira.

*Agali mbirame bi pupu wulenaga dindime wabu ngelowa ogonihondo bi pupu wialu henego ogo*

<sup>7</sup> Agali be dindime wabiaga kago ibugua dindi waru gedaore ngago dugu mbera bigi buwa baya hanguore mo beregeda beregeda bialu ibuninaga gime beledi tara tarabi be tara tarabi wabu wiaga. Maru biabe bayale ngago bulenaga wabu wialu maru biabe damene bulene ngaru bule wabu wiaga. Ibu be uruni wabialu howa dindi mbiraore ogoni degeme wabialu wabiagane manabi mbiraore biagadagua dege bialu wabiaga. Agali be wabiaga kago ibunime be mbirago ogoale bule lalu mo daba bagi haga biaga. <sup>8</sup> Ani bialu agali ogoni ibugua dindi mbiraore ogoni aria dege duguwa mbirale dama mitangi bialu bi pupu wiaga wabiaga. Agali ogoni ibuninaga horo bame mohole biaga. Ainde agali ogoni ibuni dindi agali howa ibuni áyu dege dindiha howa ibinigo ibunaga horo mohole biaga ka. Ani bialu dindini lu nahe abale homalu ibunaga tingini lone dindi ho dai bulebira. Iyunaga holene bame dano howa mo yu hayago lone miaga kagohondo mia dai bulebira. <sup>9</sup> Agali ogoni ibunaga dindini holene emene tigi mbira hangu halu abale homolene ngago ainde ibugua uruni mitangi nabiaga ka. Ibu agali mini lene holenaga ibugua agali maru ngolo silibarume mbirale wabiaga karu baba bolangua haga haga bulene manda biaga. Ibugua agali maru boronosime mbirale tara tara wabiaga karubi dege holene manda biaga ka. Ai mbirale ibugua wabiniru handalu keria ngolo siliba boronosirume wabini handalehe wabu ngagoyu ai henene ani wabini ndo ke howa dindi hangume wabu wiaga. <sup>10</sup> Agali ogoninaga gubalini be abalu ale howa ibunaga yu tiga mini mbiraore wulene dindi himu bame ngago ale howa ibunaga holene kagonaga yolobi nagalone daga nawini halu bida. Ibu yolo bulenego dindime

be wabule yolo biagagobi nakarulape dege ibu nagalone ka. <sup>11</sup> Ainde ibuni wabiaga Ngode Datagaliwabe kago emeneorebi manda mbira nabioire ka. Ani bialu ibunaga holene Ngode Datagaliwabehanda ibunaga buhe pulaanda hayagola ibuha holene mo karula hayagobi Datagaliwabehanda agali ema bialu piaga helo wabu helayagobi manda nabioire ka. <sup>12</sup> Tigua manda bialu karia inanaga holene yu kemago mo gini bia holene alebi mbirale mbira yolo mulene alebi mbirago kemabe tobaho ka. Tigua mitangi bialu hariga tara tara ngaru ko bayaleyaguabi tanabi taya bialu yolo mulene dege manda biaga ka. <sup>13</sup> Ani howa ibugua dindi duguwa mbirale dama mitangi bialu bi pupu wiagaru wabialu be abale pambu lagane ngaruale wabiaga ka. Agali mana uruniale biaga karu tigua mbirale uruni mana ko berema lo manda bu howa dege bialu haga.

## **Ngode Datagaliwabehanda Iyibi mo ko howa minu balu Isaraele wali agali biamogo bini**

*(Be 15.14-19.22)*

*Ngode Datagaliwabehanda wali agali mbirale gime wabini wiaru bi pupu wiaga hearu pani nelu minigo ogo*

<sup>14</sup> Wali agali dewalime mana lehe luluale mana ngaru bialu hagago ainde waitigime ibalu inaga wali agali bu hearu bibahende bope hai hayago ti luluore haya. Ti mini nawi howa biya. Ainde waneigininaga mini ngagome tinaga mini wu bolangua howa ngabada. <sup>15</sup> Anigo irane tigua deme hondolene wabu ngaru bibahende Ngode Datagaliwabe dege ka lo manda bidagome nakarulape. Ainde gime wabini uruninaga de kagome mbirale karu ngaru handa nabiaaga ka. Tinaga ngui kago ai nguiha buhe namiaga ka. Tinaga hale heledago ai bi larago hale habe nahe ka. Tinaga gi hondone kagome ema bialu mbirale ela halu ogoaleda labe nahe ka. Wabini uruni tinaga ge kagome ge ogoni howa ibaga bialu pobe nahe ka. <sup>16</sup> Agali mbirale wabiaga kago ibunaga holene bame dano ho kago howa dege ibugua wali agali Ngode Datagaliwabe yutiga nabiaaga karunaga bi pupu wiagane nabiaagaru wabiaga ka. Anigo mbiralime bi pupu wulene mbira ibunialeore wabibe nahe ka. <sup>17</sup> Wali agali bibahendeore tinaga homolene horo mbira ngelowa dege ka. Ai mbirale mana ko bialu wabini ngaru bibahende tinaga ema bialu holene naheore nga. Agali tiniha buhe lalu holenehe howa tini mbirale bi pupu wiaga ngaru bolanguahe daliga ka. <sup>18</sup> Ngode Datagaliwabe-o inaga wali agalinaga waitigi karume, ema bialu piaga ko tara tara bu karuhondo bi pupu wialu haga ka. Ema bialu piaga maru tiha mini mbira nawioregome ti emene bayale lowa ema bialu piaga tigua bi pupu wiaga uruni koorehondo bi pupu wiaga ka. <sup>19</sup> Ani bialu ema bialu piaga wali agalinaga bi pupu wiaga uruni wali agalime de handalu bayaledago hondowa bi pupu wibehe ndo. Ai Ngode Datagaliwabehanda mbirale ibuni wabiniruni bibahendehondo bi bayale lamialu howa ani buwa ema bialu piaga ko uruni tihondo mo turu halu bi lamia nabi berelo wahene.

## **16**

<sup>1</sup> Anidagua biyagome wali agali uruni tiha pani karulape mialu ema bialu piaga ko tara tara berearume pani mialu tandaga tara tara karulape mo mini.

<sup>2</sup> Anigo Ngode Datagaliwabe-o ina wali agali inaga bu hearume mana ogoniale dege bialu hayaruhondo pani nelu namiriya. Ani nabi howa inaga bu miniha ti emene dambi ho howa ti tomo nelu ti heagoha egaru ibilariya. Tiha gari bilo kago biba helonaga tomo dendebiore miriya. <sup>3</sup> Anigo wali agali ini mitangi nahaga bu hearuhondo tomo dendebiore wiaguabi tomo garibi timbuni ho howa tomo nolenege mbira hame nalego miriya. Tigua hame nalego irane ti tomo nelonaga ema bialu piaga ko berearu tihondo miriya. Anigo inaga wali agali ti garibilo howa tigimandi hangu helowa tomo bayaleore abale miriya. <sup>4</sup> Heneneore inaga waitigi hearu pani nelu mialu hina gari timbuni mo

✧ **16:2:** Har 16.11-13, Dag 11.31-32

miriya. Anigo íninaga wali agali tihondo waitigi bu karu mana ogodagua bialu pani nelo miaga ko lalu mo walia hariya.

<sup>5</sup> Ainde ínaga wali agali bu heagoha nogombi ko wiaru mo ibilariya. Puya uruni ko gabuaore howa pedere bialu heneya. Ani bialu howa ínaga wali agali bu hearu hayalu homelaga biyiya. Anigo ínaga miniha keba holene lu wiaabo naheneya.✧ <sup>6</sup> Ínaga wali agali tigua íninaga manaore nga manda bilonaga pani emene tigimandi hanguni nelo mo miriya. Ani muwa mani ti mo karulape helo boronosime nogombi ale wabu ngelariya. <sup>7</sup> Mbirali nogombime hayaragola abale puwa nogombi ale wabu wiyago de handaya hayagua ogoni ibu homa nabi bayale haga biniya. Anigo ti biamogo binidagoni agalime nogombi wabu wiyadagome biamogo bini ndo. Ínime wali agali bibahende biamogo biriya. <sup>8</sup> Anidagua bialu ínaga waitigi bu hearuhondo ína mbirale ko tara tara ibirago mo wahai holene karulapeore ko lalu ti mo walia hariya. <sup>9</sup> Pagayabi bunguna tawalina bedarubi ibalu waitigi wali agali biaru balu homelai helarigola ti biamogo bulene marasini mbira nawiore hene. Heneneore pagaya tawalina bedarubi ibilalu wali agali bo wahai harigo henemane tinaga ko biyagonaga pani mialu ibilariya. <sup>10</sup> Anigo nogombi biaru tigua ínaga wali agaliru mo koore halu haya nabini. Ínime ínaga wali agali dara howa biamogo bialu mo dabi haga biriya. <sup>11</sup> Ínime tihondo bi lamigi birigo mo mitangi bia holenaga nogombime hayilariya. Ani bialu íha dara holene ngago tigua embeda nolenaga abale mo karulape helariya. <sup>12</sup> Ai ti mo bayale helayadagoni ira yuni irabuha hearu ariabi marasini ngarumebi ti mo dabi hene ndo. Anduane Homogo ínaga bime wali agali bibahende mo dabi hene. <sup>13</sup> Wali agalinaga holenebi homolenebi ínime dege yu kegoni. Wali agali homeneru dalu humbirini andagaha hai hearia ti mo wialu haru dai biai hariya. <sup>14</sup> Agali ko mbira kagome mendeali kago homelo bo waholene karulape dege bolebirago ainde ibuninaga holene mo yu dai bulenego nakarulapeore. Ani bialu agali ogoninaga dinini humbirini andagaha pu kago haru dai bulene nakarulape ka.

*Puriabu hongohebi ira hungulame wali agali bo wahai henego ogo*

<sup>15</sup> Wali agali mbirame í helalu ibida pobe naheore kago <sup>16</sup> irane wali agali ko biaga bu karu tigua í baya hangu handa nabi kagome bida. Ani kago manda bialu ína tihondo ínaga hongo timbuni ngego mo walia halu tihondo tandaga holene timbuni mo miaga ke. Ína dalu dindiguni timbunimebi puriabu heba ira dene ibilalubi ti minu бага ke. Ani bialu irame wali agali ko biaga uruni bo wahai haga ke. <sup>17</sup> Ani bialu nahendene ale tara mbira tagira ibini. Ibame ira ba hundia nahene. Ibani ira hongo howa hundiabe nahe dayago irane hongo holene dindini wiaru damene bibahendeme wali agali bayale dindini bu hearu biamogo biyagola ira ibu ibani dene. <sup>18</sup> Horo mbiru howa ira ibugua ema bialu piaga wiaru Ngode Datagaliwabehanda wali agali ko hearu bo wahai hole ibilayaru bolino ibunaga hongo emene halu hundiale hene. Ani biyagola wali agali ko biaga bu hearu tigua mbirale uruni biyago hondowa tigua mitangi bialu Ngode Datagaliwabehanda tihondo ko birida lalu ti minu baore biyada lo manda bu hene. <sup>19</sup> Ani bialu mbirungi ira biago iba biradambi heago berelowa ira hongoheore dalu hene. Ani bialu ira ogonime wali agali ko hearunaga mabu hengearu bibahende dai hene.

*Ngode Datagaliwabehanda Isaraele mena nelo minigo ogo*

<sup>20</sup> Wali agali ko biaga bu hearu genda emene ndo yu hayadagua ínaga wali agali ti nayi dege hene. Ína ti tomo nelonaga dahuliyalinaga tomo wiago ínaga wali agali ti nelo mo miriya. Ína dahuliya andaga tawe mberedi horo bibahendengi ibilalu haabo harigo ai mberedi dawa manda manda binigo nelo hangu mope hariliya. Mberedi

✧ 16:5: Dag 21.6-9

ogoni dendebiroredagola wali agali tigua hame timbuniore laga hene.✧ 21 Tomo ogoni í waneiginiru ti nelo miriyagome ína ti gubalini timbuniore ho ko lalu tini mo walia hariya. Ai mberedi ogoni wali agali bibahendeore nai halu no karulapelo manda bialu mirigola tigua nalu hearia dendego taraore wali agali bibahendeoreme dende hai halu nene. 22 Irame tomo ogoni dabe naheore halu dindiguni kerane hongohe ngago delaregola iba halu piagagobi winiya. Anigo irame waitigi wali agali mabuha tomo hengearu bibahende dai hayaya. Anidagua biyago ínaga wali agali ti hondowa tigua manda bialu ira ogonime tinaga tomo mo ko halu da nabulubada lo manda bini. 23 Ína wali agali tigabi hearu ti tomo nolene milo manda bialu ira abale hongohe dayagobi ndo emene do dai bilariya.

24 Ína hongo tara tara holene dindini mo hela harigola bibahendeme ínaga hame ngego taliai hagaya. Ai ínaga hongo dindini wiyagome wali agali mana ko biaga karu pani nelo mialu bo wahaga biagaya. Ani bialu wali agali maru ínaga hongo ngago yutiga bu kagohondo tinaga yutiga bu kago mo hongo holenaga ínaga hongo ibu emene ibirahalu gedaore hagaya. 25 Anidagua dege horo ogoningi ínaga hongo bibahende tara tarani iriari bialu ínaga wali agaliru íni olalu karuhondo biamogo bule ogodagua biruli lalu mo walia haga biriya. 26 Ani bialu ína í waneigini hearu gubalini ho howa ína tihondo tomo mabuha hengene kagome ti mo hongo naholebira. Ínaga bime dege wali agali ínaga biamogo biaga ngego yutiga bu kago mo hongo haga lalu ínaga wali agali mo walia halu tihondo lawai halu biriya. 27 Ai tomo maru irame nade wiaru nime daba hayagola do gedaore halu iba hayiya. 28 Anidagua biyadagome wali agalihondo ogodagua lawai hariya. Ni tagira naibidaore ti abale heyalu ínihondo kaj ala lolene nga. Ani bialu gao naledaore ínihondo bi ala lolene nga lalu tihondo lawai hariya. 29 Wali agalime Ngode Datagaliwabehanda ti biamogo biaga ka lowa mini mbiraore wu howa ainde tigua ibunihondo kaj nalayagua nde tinaga yutiga emene bu kago dindi guni ni daba haragola iba halu piagadagua ereba holebira lalu mo walia haya.

## 17

### *Iyibi dindini aruma tara nahendene ale hayagola gi timbuniore henego ogo*

1 Ínaga godi laga mana ngego tigabiore ngegoyu ainde ínaga mini ogobiore nga lalu lo wála holenego ndelaheore nga. Ani ngagome wali agali tigua ínaga mini ngego baya hangu manda nabi howa tini pu luluya haga biya. 2 Wali agali ko biaga ko hearume mitangi bialu ínaga wali agali garabaya hai heledemagoni lo manda biyagoyu ainde mbinaga aruma holene lo wiaho wiyagome tini minu yaniaho wiyagola garabaya haabo haya. Ani heagola mbirale ngaru bibahende handaya ho haabo haga Ngode Datagaliwabe ibugua wali agali uruni ti tini andaga tamuha garabaya heagola ibu mini dege dindi nahe haya. 3 Agali mana ko biaga karume mitangi bialu tiha ko do kago mbiralime handa nabi wia do kagoni lo manda biaga. Anidagua biagago irane marume tinaga ko ogoni embeda halu wahayago ai nahendeda lo manda biaga. Anigo ai áyu howa ti mogolalu luluyu ibaga bu haga ka. Mbirale tara tara aruma biagoha ibiyago hondowa gi timbuniore haya. 4 Tigua tamu piagone arumaorehe wiagohabi birado hayagoyu ai nakarulapeore haya. Ani bialu mbirale tara tara wiaruha kilikulu lagalaga biyagola gi timbuni hene. Ani heagola ai dama tara tara dengui koherume ti talima pene. 5 Ani biyagola wali agali urunime hale hedo yulenenaga ira hongohe mbira nadaya. Yakundi mbiraga wá timbuni haga heagome mbiraga koore ogoningi wali agali uruni wá nahamiya. 6 Ira mbiraore dege taraore dearia hendene. Ira ogoni wali agali mbirame bo delene ndoya. Ai tigua mitangi bialu mbirale ko uruni emaga hendedemabe be bame miniha dege mbirale ko tara tara uruni tagira ibaruabe lo

✧ 16:20: Har 16.1-36



manda bini. Ani bialu howa tininaga deme heneneore handayago ogoni gibi tara nahendene aleyagola tini mogo lowa duru lalu hene. <sup>7</sup> Agali marume mendealinaga de mo luluya howa nahendene ale tara tara biaga hearubi heba tigua mendeali mo hondo howa nabiaganeale biatingi hagadarubi mo ereba hai haya. Bambaore howa tinaga manda tara tara wiarunaga bi nagalone lagimbu bialu henego ainde tinaga manda tara tara uruni nagaloneore hayagola tini taga timbuni ho hene. <sup>8</sup> Bamba abale howa tigua gi holene ngago mo wahai halu wali agalinaga lulu mini ngaru karulapeore mo wahaiore holeberema lalu henego áyu ogoningi tini gi timbuni howa luluyu ibaga bini. <sup>9</sup> Mbirale mbira ti mo gi holene ale mbira nawigoyu tigua mbirale handayaru bibahendehondo mogo dege lalu hene. Mbirale ema bialu piaga berearu pugu biyago hondowa mogo dege lalu hene. Ai puyame bi layuago hole howa ti mogo dege lene. <sup>10</sup> Ti gioreme homalu hene. Ti mo gi holene mbirale mbira nawigoyu tinaga de muguore lalu gime homalu hene.

<sup>11</sup> Wali agali tigua mana ko tinime bialu hayagonaga pani nolene wiagola ti gi timbuni ho hene. Maru tiha mo ko holene taraore ibulene wiayuagola tinaga bu miniha genda timbuniore yu hene. <sup>12</sup> Maru gi timbuniore hayaru ti mini tigabi nawi mo luluya haiore haya. <sup>13</sup> Wali agalime mini kira wu halu tini biamogo bibe nahe howa ti gi timbuniore halu holebirago irane tinime manda bialu karia ti mo gi hagane ngago irane agibe agilemeore mo gi harabe manda nabi howa tigua gi timbuniore haga.

<sup>14</sup> Ani biagago ai mbiraga ko ogoningi wali agali ti aruma timbuni hayago gi hai howa u baya hangu napale hene. Anigo mbiraga ogoningi aruma henedagoni ibunaga hongome ndo mo ko hene. Aruma ogoni ibu homeneru dalu humbirini andagaha howa ibinigo ainde ibuninaga hongo nawi dege ibini. <sup>15</sup> Dama ko tara tara bu hearume ti bo taliatogo lai heneya. Anidagua biyagola ti gi timbuni halu ti u baya hangu palia ndo bame homene wiradagua bima peneya. Gi timbuniore nabiagagobi biyagome bibahende minai hayagola ani biniya. <sup>16</sup> Ani biyagola wali agali bibahende gi timbuni ogonime minai henego dindini odoepe bu wima peneya. <sup>17</sup> Wali agali uruni aria maru mabu anduane heneyaguabi nogo sibiru hinalu haga heneyaguabi mabuha biabe biaga heneyaguabi gi timbuni biagome ti mbirago wanahe bibahendeore minai henego irane arumanaga garabaya hai heleagome ani bini. <sup>18-19</sup> Wali agali bibahendeore gime homa handai hene. Tigua puriabume pu layuago hale howabi egame ira timbuni heago magane daligaha biruwa bi layuagolabi iba piyagome ue layuago hale howabi ege toleme ibira halu kulu nduga layuago hale howabi tigua gi timbuniore halu hene. Ani bialu ema bialu piaga maru birado howa giligele layago hale howabi nogo biango timbuni hearume bi hongo howa gigaḡ layagola egeandaha howa bi dodone ibayuago hale howabi gi timbuniore hene. <sup>20</sup> Dindi bibahende ha wá timbuni heagola wali agali bibahende tininaga biabe biala hene wiyadagoha bialu hai hene. <sup>21</sup> Anigo aruma timbunime wali agali ko uruni bu dambi ho wiaabo hene. Aruma ogoni homanaga aruma ti ibilo maliaho kagonaga manane wini. Aruma ogoni genda timbuni tinaga payani padago manane nga. Anigo mini burugu timbuni tininaga ko biyagonaga ngagome mbiraga aruma ogoninaga genda bolangua haya.

## 18

### *Wá holene timbunime Isaraele wali agali hariga mo walia henego ogo*

<sup>1</sup> Anigo ínaga wali agali ira hungume hariga mo walia hariya. Ínaga wali agalime bi layuago tinaga waitigime hale henego ainde deme nahendene. Ínaga wali agali ti tandaga nane heago hondowa waitigi biaru ti dimagoli ho hene. <sup>2</sup> Ínaga wali agali tigua waitigi biarume ko bialu haga wiagonaga pani badai nabiagonaga waitigi uruni tigua ínaga wali agali kaj lene. Ani bialu tigua ínaga wali agali hale halu mana ko tigua bialu

harimago mitangi nabilimu lene. <sup>3</sup> Inaga wali agalihondo wáholene timbuniore mbira miriya. Ani bialu wá timbuni ogonime wali agali uruni ti hariga ala napene manda nabi wiagoha ibugua hariga mo walia haga bima bamba hayiya. Wá holene ogoni ibu ira hungu hongohe timbuni mbira binigo ogonime wali agali tini tingini da nabini. <sup>4</sup> Anigo waitigi biaru ti heagoha wá nahende arumaha haabo hene. Ti arumanaga garabayaha haabo henego irane tigua í waneigini abale garabaya helayagonaga helene. Ai inaga waneigini tigua inaga mana ngago wali agali bibahendehondo lamiai holebira. Mana ogoni ibu ani wiaabobo bialu wali agali tihondo wá holene hale miagane holebira.

*Ngode Datagaliwabehanda Iyibi igini wahene bibahende bo wahai henego ogo*

<sup>5</sup> Tinaga waneigini bu karu bo wahai hamiya lalu waitigi bu hearu tigua bi lo wiya. Tigua waneigini mbira homelo lowa nu mbiraha honowa ibu homelo panaga mo panaho ngeleneya. Anigo igiri gali ogoni ibu homa nabi bayale winiya. Ani binigo manda bialu pani ina tinaga waneigini dewaore bo wahai hariya. Iba li timbuniore ibilalu wali agali ko uruni bo wahaiore hariya.\* <sup>6</sup> Mbiraga ogoni horo mbiru tagira ibulebira lalu ina mamaliruhondo lamiriya. Ina tihondo lamialu lalu, Mbirale ogoale buleore, lalu bi lo werego bulubada lowa ti mini dunubia ho helobi ti hongo ho helobi lamiriya. <sup>7</sup> Ainde inaga waitigiru bo wahai halu wali agali tigabi karu biamogo buleberegó inaga wali agali ti manda bu howa mini mbiraore wu haya. <sup>8</sup> Inanaga waitigi hearu homelo bo hilo wahai howa anidagua birigome inanaga mini mo yaraga halu ina inaga wali agaliore holomaya dabo helariya.

<sup>9</sup> Wali bayale igini tigabi hearu tigua ohalu wali agali nahaga ngagoha puwa inihondo lomabu nginiya. Ai bibahendeme buleore lowa bi lo mbira halu tigua inaga mana lowini ngago baya hangu talialu bule lowa bi lo mbira halu inaga wali agali ti turu ho holene horongibi genda yu holene horongibi mo ngoai hamiya lalu bi lo winiya. Ani bialu tigua inaga mini yaraga halu inanaga mamalirume iba gana bamba lawai heneyago lalu hene. <sup>10</sup> Anigo ai tinaga waitigi biaru homo togo layago wali agali bibahende hale hai hene. Ai tinaga waneigini homayagonaga dara howa kiabu dugu timbuni bigibigi bialu hene. <sup>11</sup> Agali haguane bu hearu tibi nde genda tinaga biabe biahaga hearu yu heagobi dege mandagi yu hene. Ani bialu wali agali damene bu hearu waneigini homayadagua kini ibu igini mbiraore heagobi homa dege bini. <sup>12</sup> Anidagua bialu waneigini dewaore aba aya bibahendenaga waneigini homaiore hene. Abaleore aube tobane buwa aba aya tinaga waneigini gubaliniore haga hearu horo ogonangi dege homai heagola homa yu hora holene mbira nahene. <sup>13</sup> Bamba pigane howa wali agali uruni tigua tinaga agali maru halaga biaga gamugamu biagabi bu hearuhondo mini hana ho howa inaga bi mo wahaya. Ai mani ti igini wahene damene hearu homai hayagola tigua manda bialu inaga wali agali bu karu ti Ngode Datagaliwabe waneiginiore heneda lo handaya.

<sup>14</sup> Giligele emene mbira naleore wiangi abaleore mbi timbulo mina hene. <sup>15</sup> Ani binigo inaga bi bibahende hongo haiheore howa inaga kini biragane dagia dahuliya andaga yu wahalu dalini. Dindi mbira ina mo ko hai hole birigoria dalini. Ibu mamage haga agali ale howa ibugua wali agali pani mule ibini. <sup>16</sup> Ibugua inaga hame leadagua tiga tigaore talialu inaga bi ayu tibu ne gadeleore ngaligobi hene. Ibu dindini heyu hene. Ibu agali luniore howa dahuliya andaga elaho hene. Ibugua mbirale bibahende wiaru bo wahai hayagola mbirale homayarunaga tinginime dindi bibahende tolatagi haiore hene. <sup>17</sup> Anigo abaleore emaga kome wali agali mo talola halu gi timbuniore buleneme wali agali minai hene. <sup>18</sup> Bibahendeha wali agali dindini odope halu homo wiradagua bima pene. Ani bialu o biyadagoninaga tene ogoale biya lalu hene. Tigua manda bialu ti homolene nga lo manda binigo irane <sup>19</sup> tigua emaga ko hendene ai emaga ogoniha

\* 18:5: Har 1.22-2.10, 12.29-30, 14.26-28

mbirale biyarunaga galone mo manda bia hayagola ai ti homoligo irane aginaga tigua tandaga ogoni nalu harimada lo manda bini.

*Aronohanda Ngode Datagaliwabehondo bi layagome Isaraele biamogo binigo ogo*

<sup>20</sup> Wali agali bayale tigabi bu hearubi dindi ko iba dalu naibaga wiagoha hemiria homaga biyagome tihabi nde homanaga genda anda ibu dege biya. Anigo inaga miniha keba ho holene lu wiaabo nahene. <sup>21</sup> Agali mini tigabi mbira ibugua wali agalime olayagola biamogo bule abale heyini. Ibuni tinaga loma binigo mo miaga agali hene. Ani howa wali agalinaga minini howa ibugua tinaga ihondo bi tara tara layaru bibahende mo loma bialu ihondo ibilene. Ibugua ira hagua nga bilo ihondo lomabu delalu howa wali agalinaga ko ngaru domo wahabe lalu bi lene. Ibugua inaga miniha tandaga ho hearu gi nahe howa warago ko wiaru mo wahai halu ibuni inaga biabe bia haga agaliore henego mo walia haya. <sup>22</sup> Ibugua inaga miniha tandaga holene bolangua hayago ibuninaga hongome ndo. Ani bialu wai biagane aleme ndo bolangua haya. Ibugua inihondo bi lolene hongome bolangua haya. Ibugua ihondo bi lalu, bamba ina mamaliruhondo bi hongo howa lo wirigobi habo nalolene bi lo wirigobi mitangi bibe, laya. <sup>23</sup> Wali agali dewaore homayarunaga tingini ona bu wiai heneya. Ani biyagola agali tigabi ogoni ibugua inaga wali agaliru biamogo bule ibiniya. Inaga miniha tandaga holene wigome wali agali homa nabi hearubi bo wahai habeheyane ibugua mo wahole ibiniya. <sup>24</sup> Ibugua aga luore mbira biagimbu bulene karulalu ibiniyago aga ogoniha mbira dahuliya andagaha ngaru manda bialubi dindi ngaru manda bialubi hai heleneyago ogoni karulalu ibiya. Ibugua galu kunini mbira mbira ibu mamalirunaga mini lene henego manda bialu gilibu wima wabuni daligibigo ege tole muni yolo timbunime miaga wiarume wabiniyago ogoni mo karuleneya. Ani bialu emboneni agali loma binigo mo miaga haguane kagonaga manda karu leneya. Manda ogoni inaga hongo timbuniore ngego manda bialu karulaga wini. <sup>25</sup> Wali agali homelo baga dahuliyali ibiyago ibugua mbirale uruni de hondowa ibu gi halu ogoriani handaya ho hene. Inaga wali agali ti inaga miniha tandaga holene ogoni emene dege handayago ogoni karulape dege.

## 19

*Iyibi wali agali mini lulu anda heagola mo ko henego ogo*

<sup>1</sup> Inaga miniha tandaga holene biago ereba nahe wiaho wialu wali agali ko biaga hearu tigua mani ogoale bule ka lo manda biriru bo amo lariya. <sup>2</sup> Tigua inaga wali agali ala pudaba lalu bo daila hayagoyu mani tinaga mini beregedalu talima mama puwa bolobada lo manda biriya. <sup>3</sup> Ainde tinaga waneigini homayarunaga homalini dugu bialu heyu howa ainde tigua lone lulu mini mbira wiyiya. Pigane howa tigua lalu, Ngode Datagaliwabenaga wali agali dindi ti henedago wahalu pudaba, lalu bi hongohe layago lowa peaha tigua talima pialu lone haru halu dai bule pene. <sup>4</sup> Tiha mo ko timbuniore hene. Anidagua biyagome mbirale tiha tagira ibiyaru mo embeda hene. Ani bialu ti tandaga tara tarabi genda tara tarabi handa nabi dege hayago ai uruni ayu ngola hayagola ti mo ko howa bai hene. <sup>5</sup> Wali agali ko uruni ti homolene hariga tara tarani ko tara tara ngagoria homai holebira. Anigo ainde inaga wali agali ti hariga tara mbiraha yupe halu piya.

*Ngode Datagaliwabehanda ibunaga wali agali mo tiga bialu haru henego ogo*

<sup>6</sup> Inaga waneigini bu hearu mo ko nahelonaga ina bi larigola dindi ogoria mo ko hagane tara tara wiarunaga hongo iriari biya. <sup>7</sup> Tigua handalu hearia tinaga balai anda bu heagoha ginu haguame ge hai heago handalu dindi abale ibame namulai ho wiaria hendene ai dindi pana halu yobi iba nabere wiaria hendene. Ani bialu

✧ 18:20: Dag 16.41-50

hariga tigabiore iba solowara mini Iba Daramabi laga bereago hanuni pearia hendene. Abale dindi mbira iba solowara birame hearia hendene ai ogoriani dataniru andaho hearia hendene. <sup>8</sup> Inaga wali agali tigua mbirale nahendene ale tara timbuni uruni hondowa miniha mogolo hene. Ina ti baya hangu handaya ho heagola ti bayale pialu iba ange mendehayagi ubaede hai hene. <sup>9</sup> Tigua turu howa nogo hosime gerai ibaga biagadagua bialu nogo sibi iginime porabu dagadaga bialu te biagadagua bialu hene. Ina ti anidagua biamogo birigola tigua Anduane Homogo inaga mini yaraga halu iba gana lalu hene. <sup>10</sup> Tigua mbirale mbirale dindi tarani hemigoha bini wiaru bibahende manda biai hene. Ainde dindime bulumagabi marualebi anda ho helo mondo bialu wia nabi hinabibi hangu mondo biniya. Ibame nde wenaru mondo bialu wia nabi iba yago biru wiaru dege magu taguatagi haya. <sup>11</sup> Ainde inaga wali agali ti tomo bayaleru noa ho heagola nde mana gahenge tarale mbira handa walua haya. <sup>12</sup> Tinaga hina gari timbuni wiago biba helonaga ega biaru iba solowara beregoha howa tagira ibiyaria hendene.

### *Ngode Datagaliwabehanda Iyibi pani nelu minigo ogo*

<sup>13</sup> Manane tara tara harini haya. Ngode Datagaliwabehanda wali agalime ko tara tara bialu hayagonaga pani nelu mulene tigabi ngadagua mulenaga harime kulukala lalu hari dabame mo walua haya. Ti pani nelu mulubadagoni irane tigua wali agali tara bu hearuhondo mana ko bialu hayagonaga nelu mulebira. <sup>14</sup> Wali agali tara uruni tini dalu wahalu dindi tara wiagoha ibu hearia wali agali dindi aba hearume tinaga dindini helo hame nale hene. Ani bialu wali agali tara dege halu mende dindi ogoniha ibu henego ainde dindi aba hayadaru tigua wali agali tara urunime tihondo bayale bialu hayago mitangi nabi hene. Tigua wali agali tara uruni tinaga garabaya biabe ale bialu helo helene. <sup>15</sup> Heneneore wali agali dindi anduane uruni tigua wali agali tara uruni turu nahe howa tinaga dindiha helo hame nale hene. Wali agali mana ogonidagua bialu hayaru ti yolo ko wiaru mini. <sup>16</sup> Ai wali agali halu mende ti daluha haru hene biaru baba tomo bayale timbuniore dawa nalu mali lialu iba ganaru lalu turu howa tinaga dameneore haru haradagua haru hene. Ani howa mani tigua wali agali tara turu howa haru hayaru lone garabaya hai helene. <sup>17</sup> Ngode Datagaliwabehanda tinaga de mo ndibulo heleagola ti de nahe Sodomu wali agali henegobi dege hene. Sodomu wali agalime wali agali tigabi hearunaga panga haraba wiago handabe nahe hene. Ainde wali agali ko uruni Sodomu wali agali henegobi dege hene. Ti aruma timbuniore heagoha howa bibahendeoreme tinaga anda panga taya bialu hene.

### *Ngode Datagaliwabenaga hongo timbuni ngago ogo*

<sup>18</sup> Ainde ngida tara tara ngaru tinaga pu dewa hibu howa agali ngida bagame balu howa bi tara tara mo lela halu bagane nga. Bamba manane ogonibi dindini mbirale tara tara wiaruha tagira ibini. Mana dindini bialu haga wiago bibahende iriari bialu ai mana gahenge tagira ibu nga. Iname mbirale ala wini ngaru baya hangu manda biai harimayagua nde áyu iriari dewaore bidane hondoleberema.

<sup>19</sup> Ainde ema bialu piaga irabuha biragaru andaga biru aribia halu ibaha biragaru dindini bira aribia halu dindiha biragaru ibaha biru aribia haga bini. <sup>20</sup> Ira iba andaneha dalu kagoyu hundia nabiagaya. Ai iba ibu mo beregdaluibunaga hongo ira ba hundia haga wiago wahaya. <sup>21</sup> Abale irame mbirale ibu dedagoha anda porago bibahende dai hagago ainde áyu ogoningi irame nadayagola ema bialu piaga uruni nahomaya. Ai tomo dahuliya anda howa ibiniyago dindi guni aleya. Anigo ainde iranaga hongome tomo ogoni mo iba habe naheya.

### *Bi lamaro binigo ogo*

<sup>22</sup> Anduane Homogo-o bibahende ngaru togoni howa ínaga wali agali bu karunaga mini yaraga hagaya. Ína ti horo mbirangi yu wahene nawiore. Bibahendengi dindi bibahendeha ínna ti biamogo bialu haabo hagaya.



## **Siraga**

### **Mbuga ogoha gilibu ngagonaga nemandi ogo**

Ainde Siraga mbuga ogoni mini dewa dege nga. Mo tubagi howa Siraga ngagoni. Luni lolene ngadagua mini tigabi wulene mini giga bulenebi Siraga igini Yasunaga manda winigobi laga. Ani bialu lone dege mini mende Egelisiasigasa lagago ogoni Siosinaga mbuga lalu laga. Bamba Siosi pigane henedangi howa tigua mbuga ogoni daga laabo halu mini giga bulene mbuga ogoniha wiago hamelo haga hene.

Ainde agali mbira ibu mini kira Yosua lalu Yasu lalu biaga henego ibugua mbuga ogoni Hiburu bi lowa gili bini. Mani howa ibu aguane mbirame Girigi bi lowa lo beregedene.

Ai mbuga ogoniha mini mandabi bayale tigabi wulene Yuda tinaga wiago heba biamaga howa gili bini. Ai Ngode Datagaliwabe ibunime mini bayale tigabibi manda bayalebi ngini lalu mo walia ho nga. Mbuga ogoha bi dewaore Ngode Datagaliwabe bi lolenenaga bi lalu bayale holenenaga bi gilibu nga. Ani bialu bi bayale marubi nga.

*Agali bi lo beregedenedago ibunaga bi ogo*

Ina manda bayale dewaore mana mbuga wiagoha howabi agali Anduane Homogonaga bi mana latagi haga hearunaga mbugaha howabi agali manda timbuniwi mani heneruha howabi migi biru. Anigo ainde Isaraele tiniha mini bayale manda bayaleru wu kagonaga iname tinaga mini yaraga holene nga.

Ainde mbirali ibu mbuga ogoha ngaru daga lalu mini manda bayale tigabiru manda bulene hame lo heagua nde ibuni hangunaga mitangi bialu daga lowa lo manda bulene nakarulape. Ani ndo ibugua daga lalu manda biai howa maru karu lawai holene bayaore nga. Mbirali ibu mbuga mbira gili biragoha biamogo bilobi bayaleore nga.

Inaga mamali Yasu Siraga ibu ogonidagua biaga hene. Ibugua hongo howaore Ngode Datagaliwabenaga mana mbuga wiagobi agali Ngode Datagaliwabenaga bi mana latagi haga hearunaga mbugabi ina mamalirunaga mbuga maruhabi baya hangu hongo howa lo manda bini. Ibu mbuga uruniha baya hangu lo manda biaiore howa ibu agali manda timbunibi hene. Ani howa ibugua nde mbuga mbira agali mini bayale wulene mini gigabi bayale tigabi bulene ngago manda bule hame lo karu lawai holonaga mbuga mbira ibugua gili bulene hame lene. Ibugua ibunaga mbuga ogo wali agalime daga larago ibuha mana ngago baya hangu talialu holene biamogo bulebira.

Ina ibunaga mbuga ogoni lo beregedarugo ainde tigua inaga mbuga ogoni baya hangu daga lalu hondo manda bilimulo hame ledi. Bi maru ina baya hangu lo beregeda nabiruyagua nde tigua ihondo miniha genda nahalimu. Ani larogo irane ina baya hanguore ngadagua lo beregedai holene hamelo howa birugo ainde bi galone maru Hiburu bi gilibu ngago ogonidagua bi tara lalu lo beregedolene ndelaheore nga. Genda ogoni ale mbuga ogoninaga hangu ndo nga. Bi mana gilibu ngaruhabi Anduane Homogonaga bi mana latagi haga henerunaga mbugaha gilibu wigi bidarubi mbuga maruha gili bu ngaruha genda ogoni ale wiai ka. Marungi nde agalime bi mbira lowa gilibu ngago bi tara mende lowa lo beregedolene awedaga ndo ngagola bi ledadaguaore ndo gili bu wiaga nga.

Ainde i Iyibi dindiha ibu hewangi Uegedese ibu mali pira tebirani haliria (38) bibahende kini hene hearia ibiru. Ai i Iyibi dindiha hewagola i lawai halu biamogo bulene ale tara tara wiaria handa walia haru. Ani wiago hondowa ainde i mbuga ogoniore baya hangu lo beregedoliya lowa hongo haru. Ani bialu ogoningi howa halo emene nahe biabeore hongo haabo haru. Ina manda tara tara yu hewago mo ilu mogo bialu biabe ogoni abale bu maro bulene manda biru. Ina mbuga ogoni wali agali dindi

tara tarani bu hearu biamogo bialu ti mule lo manda biru. Ani manda birudago tigua Mosesenaga mana ngago talialu holene hame timbuni lalu howa ti manda bulene hame lalu heagola mule manda biru.

## **Mini gigabi wulanela manda bayale bulenelame mana bayale Ngode Datagaliwabehondobi mana bayale bialu holomaya biamogo biagane.**

(Be 1.1-4.10)

*Mini gigabi wulene ngagohondo turu halu bi lenego ogo*

<sup>1</sup> Mini gigabi wulene ibu Anduane Homogo ibuha howa ibinigo ibunila haabobo bu hagane nga. <sup>2</sup> Iba angeni iba mu ngaru aiwa daga lai habehebe. Iba dalu ibiyaru daga lai habehe ai kabe. Horo piyago bibahendebe horo mani ibule ngagobi ogodaguaore lalu daga lai habehe ai kabe. <sup>3</sup> Ai hari damindiniha manda biadaga holenebi dindi ogo yangalenaga manda bulenebi iba solowara timbuni bedago andane dindiha manda biadali holenebi uruni bibahende ogodagua nga lole manda bibehe ai kabe. Ani bialu mini bayale ibu baya hangu begelo handabehe ai kabe. <sup>4-5</sup> Mbirale bibahende nawiha mini gigabi wulene ibu ala ibalu bambaore henego ka. <sup>6-7</sup> Ngode Datagaliwabehanda mini gigabi wualenaga tene aihondo mo walia hayabe. Mini bayale ibunaga biabe tara tara biaga ngaru damene ai ibugua manda bidabe. <sup>8</sup> Mbiraoreli hangu mini gigabiwi ka. Iname ibuhondo gi halu ibu andaneha haabo halu ibunaga mini timbuniore mini lene ngago yaraga halu holene nga. <sup>9</sup> Anduane Homogo ibunime mini gigabi wulene ogoni helene. Ibugua baya hangu begelo handalu ibu baya hangu talebu handalu ibugua ibunime wabini wiaru bibahendeni odope hai helene. <sup>10</sup> Anduane Homoghanda mini gigabi wulene wali agali bibahende tini hangu hanguhondo tini karulape headagua mo ta haga bialu ibuhondo gubalini ho haga hearuhondo dewaore mini.

<sup>11</sup> Wali agali Anduane Homogo gi halu ibuni andaneha haga bu karu ti mini lene timbuni halu yari bayale bu holebira. Ani howa tinaga bu miniha dungulo howa turu taraore ho holebira. <sup>12</sup> Wali agali Anduane Homogo andaneha karu ti turu howa tinaga bu miniha obaho haga. Ani bialu tinaga dindini holene luore haga. <sup>13</sup> Wali agali ogoniale karu tinaga holene kaware biba hole tu ngagola ti bayaleore halu homolene horo tagira ibirangi tiha mini burugu nale biralu homolebira. <sup>14</sup> Mbiralime Anduane Homogohondo gubalini ho howangi hayagua ibuha mini gigabi wulene tagira ibulebira. Ibu mini gigabi bamba ibu ajiya tombeha bereangi howa mo yu hene ka. <sup>15</sup> Bambaore howa mini gigabi wulene ibu wali agali heba mandagi hama ibinigo haabo mani tinaga waneigini aguane aguanali hama polobadaru heba haabore holebira. <sup>16</sup> Mini gigabi wule bibahendeore wali agali Anduane Homogo ibuniha haga karu tiha tolai ho kagola mini bayale urunime lini bayale tagira ibiraru yu howa turu ho holebira. <sup>17</sup> Mini gigabi ibugua wali agali tini hame lo karu ale ti andagaha wu toltagi halu tinaga tomo anda ngagoha tomo tara tara ngaru dewaore wu toltagi hai holebira. <sup>18</sup> Anduane Homogonaga mana hale hagane mana ngagome mini gigabi wulene mo yaribia halu bayale holenebi miniha mo palia holene karulo holenebi hongo holenebi mo wia haga nga. <sup>19</sup> Mini gigabi wuleneme manda buwa mo yulenebi iba

✧ **1:1:** Min 2.6 \* **1:4-5:** Abale howa mbuga maru alatawe wini ngagoha bi marubi hobane ogoniha wini nga. Bi ogoni ogodagua leda. Ngode Datagaliwabenaga bi ibu daligaore ngago ogoni ibu mini bayalenaga tene haganebi mana wiaabo holene ngagobi uruni bayale bulene ngago damenenaga hariga ogoni nga, lalu gili wini nga. † **1:6-7:** Abale howa mbuga maru alatawe wini ngagoha bi marubi hobane ogoniha wini nga. Bi ogoni ogodagua leda. Ainde wali agalibi mbirali ibu mini bayale wulene ngago baya hanguore manda biaheore walaihe mbirali kabe. Ani bialu ibunaga biabe tara ngago aiwa hendedabe, lalu gili bu winigo nga. ✧ **1:9:** Min 8.22-31, Sir 24.9 ✧ **1:17:** SMG 7.11

dalú ibiradagua ibilaga. Aní ibilowa ibunaga wali agali gubalini ho mini lene helo helaga. <sup>20-21</sup> Aní ibiragome ira pini hongohe dindiha piagadagua polebira ibuni lu dindini holene ginigene lu hagagobi holebira. ‡ ✧

*Mini la haru holene mana bayaleore ngago ogo*

<sup>22</sup> Wali agali keba timbuni haga kago ibu wali agali tigabi ndo ka. Keba abale haganeneme wali agali abale mo pila hagane nga. <sup>23</sup> Wali agali hendeore haga kago ibu deme hondo kagola mani tiha turu holene tagira ibaga. <sup>24</sup> Tigua abale latagi nahe deme hondo howa laragola mani wali agalime ibunaga manda bayale ngagonaga te lalu holebira.

*Mana tigabi howa bulene tara tara ngago ogo*

<sup>25</sup> Mini gigabi wulene ibu tomo wiaga anda alehowa biawai holene baya tara tara wu tolatagi ka. Anigo ainde Anduane Homogo gi howa ibuni andaneha hagane mana ngagome wali agali mana ko biaga karu ti mana bayale nabilo manga haga ka. <sup>26</sup> Ainde mini gigabi wu holene hame lo keyagua Anduane Homogonaga bi mana lo ngago taluwa bialu kegola ibugua íha mini gigabi wulene mo tola hai holebira. <sup>27</sup> Heneneore ína Anduane Homoghondo gubalini ho howa gi hariyagua nde mini gigabi wulenebi biawai holenebi mo yu holebere. Anduane Homogohanda wali agali tini mo dindiha halu ibu talima piaga karuhondo turu haga ka. <sup>28</sup> Í ibu poleyagua mini kira wu yalu na polebere. Anduane Homogonaga bi ledago mo wanahe holene nga. <sup>29</sup> Ína wali agali mohondo howa ínaga mini mo yaraga halu bi tara tara ke howa lalu wali agalinaga bu mini tiha yamule nalalimu. Ínaga ne harigaha bi larego mamage howa lalimu. <sup>30</sup> Mani íni pilalu howa taga pani nolene wuligo íninaga mini yaraga howa nalalimu. Ai Anduane Homogohanda ínaga miniha yadoho kego wali agalinaga deni mo pana ho ngelowa í guruligo ína íninaga mini yaraga nahabe. Aní buleberegó irane íni Anduane Homogo karia ibalu howa íni ibunaga deni mo dindiha nahe eberegome ke hagane mana íha emene ndo wu toleda.

## 2

*Ina ba hondolene wirangi hongo ho holene nga lenego ogo*

<sup>1</sup> Í waneigini-o Anduane Homogo talima polene manda biriyagua íha ba hondolene anda ibulebirago manda manda bu habe.\* <sup>2</sup> Íninaga mini baya hangu mo tiga buwa hongo ho habe. Aní kegola íha ko mbira ibirangi í abale mogo lalu duru nale holebere. <sup>3</sup> Anduane Homogoha haparaore ho howa ibu yu wanahabe. Aní beregola maniore íha mbirale mbira tubagi holene nawulebira. <sup>4</sup> Mbirale íha ibirago damene ibilo ha dege bibe. Mo iriari bulene tara tara ibalu í bope hayagua nde í ema nabi ha dege bibe. <sup>5</sup> Irame ngolo dedagola dodo ngoloni para haga bidago do taulo waharagola ngolo ibuni dodo nahe bayale wiaga. Anidagua dege wali agalinaga mini mo dindiha holene ngagome wali agali tigabi karu ba handaga nga. ✧ <sup>6</sup> Anduane Homogohanda í biamogo biragola í bayale howa ibunihondo mini mbiraore wu hole ibuni kagoha hapara howa habe.

<sup>7</sup> Wali agali Anduane Homogo gi howa ibuni andaneha haga kemiru ti ibunaga dara holene irane nawini dara hagane ngago malia ho halimu. Tí pi loligo ibuni wanahalimu.

<sup>8</sup> Wali agali Anduane Homogonaga bi ledago talialu haga kemiru tí ibuni kagoha hapara

‡ **1:20-21:** Mbuga maru alatawe ngagoha bi marubi nde hobane ogoniha gilibu nga. Bi ogoni ogodagua. Wali agali Anduane Homogonaga bi mana hole haga karu ti mana ko bulene ngago hondo wandialu haga ka. Tigua anidagua bialu heagua keba holene ti ngola naholebira. ✧ **1:20-21:** Min 3.16, 4.10 \* **2:1:** Siragahanda waneigini ledago irane waneigini emene ibugua lawai haga bu hearu lawai halu lene. Bi ogoni ale dege Mini Bayale Gigabi 1.15, 2.1, 3.1, uruniha bi mbiraoregobi dege ngago hondolene nga. ✧ **2:5:** SMG 3.5-6, 1 Pi 1.7

ho halimu. Ani harimiyagua nde tí yolo bayale muleberemi. <sup>9</sup> Ainde wali agali Anduane Homogo ibuni andaneha haga kemiru tí mbirale bayale ibulebirago maliaho halimu. Mbirale bayale ogoni turu holenebi dara holene irane nawini dara ho haabo holenebi ibulebira.

<sup>10</sup> Tinaga mamali ala heneru mitangi bu dai bialu minime baya hangu mo tale bilimu. Ainde mbirali Anduane Homogo heagoha kaware hapara ho kagola Anduane Homogohanda mo taga hene mbira ai henebe. Mbirali ai ibu Anduane Homogonaga bi baya hangu hale halu helowa Anduane Homogohanda yu wahene ai heneyabe. Ainde mbirali ai ibu Anduane Homogo lalu heagola Anduane Homogohanda ibu erembira minibe. <sup>11</sup> Heneneore Anduane Homogohanda dara holene nawioreni ína dara timbuni haga ka. Ibugua ínaga ko wiyadago domo wahalu íha mo ko holene anda ibirangi hongo ho habelo helaga ka. <sup>12</sup> Wali agali hariga mende mendebi kirabali pu handalu haga howa mogo lalu duru lole kemiru tíore daraba. <sup>13</sup> Ti wali agali gi hagabi tiha yutiga nabiagabi kemigo Anduane Homogohanda tí handaya ho naholebiragonaga dara kogoni. <sup>14</sup> Ainde daraore kogoni ndobe. Wali agali manga hene kemiru tí baba Anduane Homogohanda godi lalu ko birimi larangi agua buleberemibe.

<sup>15</sup> Ai wali agali Anduane Homogo gi halu ibuni andaneha haga karu tigua ibunaga bi ledago mo wanahaga ka. Ani bialu wali agali Anduane Homogo gubalini ho haga karu tigua ibunaga hariga piagane ngagoria pialu holebira. <sup>16</sup> Wali agali Anduane Homogonaga bi ledago baya hangu hale halu biaga kagome Anduane Homogohanda ibu biamogo bilo bulene ngago hongo howa bialu haga. Wali agali Anduane Homogo gubalini ho haga karu tiha ibunaga bi mana ho tole ka. <sup>17</sup> Wali agali Anduane Homogo andaneha haga karu tigua ibuni talima pule manda manda bu howa Anduane Homogo deni tini ala mo dindiha haga ka. <sup>18</sup> Ani howa tigua lalu, Ina wali agalinaga giha howa pi loligo inane Anduane Homogo ibuni giha mo ya holene karulapeda. Hongo gibiorebi dara holene irane nawioreni bame dara hagabi timbuniore ngago manda buwa ani bulene nga, lene.

### 3

#### *Aiya abalahondo mana bayale bulene nga lenego ogo*

<sup>1</sup> Waneigini bu kemirume tí aba aiyalanaga bi baya hangu hale halimu. Ani bialu harimiyagua tí baya karulape holeberemi. <sup>2</sup> Irane Anduane Homogohanda tinaga aba ibu waneigini bolangua howa ibu daliga heleda. Ani bialu aiya ibu nde ibunaga waneiginiru handaya ho haga helo mo hongo howa bereleda. <sup>3</sup> Waneigini ti aba andaneha haga karu tinaga ko domo waholebira. <sup>4</sup> Ani bialu waneigini ti aiyana mini mo yaraga haga karu ibuha mbirale bayaleru dewaore wu tole kagobi ka. <sup>5</sup> Waneiginime aba andaneha baya hangu hayagua nde mani ibuni waneigini holobadarume ibu mo turu holebira. Ani bialu Anduane Homogohanda ibunaga bi laragobi hale holebira. <sup>6</sup> Waneigini ibu abanaga mini yaraga haga kago ibu dindini luore holebira. Waneigini Anduane Homogonaga bi hale haga kagome ibu aiya mo turu haga ka. <sup>7</sup> Aba aiyala libugua libu waneigini handaya ho haga kago mana bialu waneigini tigua aba aiyalanaga bi larago hale holene nga. <sup>8</sup> Waneigini kemiru tí abanaga mo turu holene ngago tíha wia helo tigua bi laremigomebi biabe beremigome tí abanaga mini yaraga halu halimu. <sup>9</sup> Anidagua bulebirago irane abanaga mo turu holeneme waneigininaga anda kago mo hongo haga. Anigo ti aiyana keba holeneme anda gene bibahende dugu wahai haga.

<sup>10</sup> Í aba andaneha nahariyagua Í aba ibu dindiha halu í daliga haruda lo manda nabibe. Anidagua biriyagua í aba mo taga haregome í mini lene naholebere. <sup>11</sup> Heneneore waneiginime ti abanaga mini yaraga halu ti aba andaneha haga hayagua nde mani ti timbuni mini lene mbira holebira. Anigo ti aiyana mini mo dindiha

hayagua tinaga mini mo ko hene holebira. <sup>12</sup> Waneigini tígua ti aba waheore bedangi baya hangu handaya ho halimu. Ibu homa nabi wene bedaore ibuha genda yulene namilimu. <sup>13</sup> Ai aba ibu lolongo yayagua tígua ibu dara holene nga. Ini hongohe ha kegonigo ani howa ibuhondo mege bulene nawiore. <sup>14</sup> Anduane Homogo ibugua ina dara halu biamogo bulene mana í abahondo biriruni embeda naholebira. Ibugua inaga ko domo wahelu í andaga mo hongo holebira. <sup>15</sup> Iha mo ko holene ibu ngangí Anduane Homogohanda í mitangi holebira. Ni hongohe daragome dagare bulene ngago mo wahagadagua inaga ko ngago Anduane Homogohanda domo waholebira. <sup>16</sup> Waneigini ti aba mo embedaho haga heagua nde ti wali agali Anduane Homogo mege biaga holebira. Waneigini ti aiyahondo lai laga karu ti genda yu holebirago irane Anduane Homogohanda tihondo keba haragola genda yu holebira.

*Ini mo dindiha ho howa maru karu dara halu biamogo bulene nga lenego ogo*

<sup>17</sup> Waneigini tígua biabe tara tara bialu kemiru bialu howa tını mo dindiha howa bialu halimu. Ani beremigola wali agali tigabi bayale karume tihondo gubalini ho holebira. <sup>18-19</sup> Inaga mini timbuni mini lene hariyagua nde ini mo dindiha holenebi anda halu timbunioire haragola í mo turu holene Anduane Homogo ibu deni yu holebere.\*<sup>†</sup> <sup>20</sup> Ngode Datagaliwabenaga hongo daligaore kagola wali agali tını mo dindiha ho haga karume ibunaga mini yaraga haga ka. <sup>21</sup> Ainde mbirale inaga manda ngegola karulanape wiarunaga ina manda buleore lowa wiaede nahabe. Ani bialu mbirale ina baya hangu goaru handabe nahe ngaru goaru hondolene manda nabibe. <sup>22</sup> Tigua biabe ina bibelo mo ngirago hangu mitangi bialu mbirale inaga deme handabe nahe mo do ho ngarunaga mini burugu nalabe.\*<sup>†</sup> <sup>23</sup> Biabe ina bulene nakarulape ngago bule mitangi bulene nawiore. Biabe ini bialu kego karulape ogonigo bialu habe. <sup>24-25</sup> Wali agali dewaore luluyu hagago irane tininaga mini ngago hangu talialu karia biaga. Tinaga embone mini kome wu tolatagi hene ka.†

<sup>26</sup> Wali agali mine harago ibu mbirale ko ngaru mo yulebira. Ani bialu wali agali ko hame laga karu tını ogoniha homanda holebira. <sup>27</sup> Wali agali mine hagane bu karunaga genda ngago damene ereba naholebira. Anidagua dege wali agali ko mine hagane bu karunaga ko ngaru timbuni holebira. <sup>28</sup> Wali agali lai lalu bi poboyogobi laga karunaga genda mo yu anda ibirago mo ereba holene marasini mbira nawiorego irane dindiha ira pini hongohe piagadagua konaga pini tiha hongohe anda peda. <sup>29</sup> Wali agali mini bayalewi karu tigua manda bayale bulene ngago abale yamiaga ka. Ani bialu mini bayalewi karu ti lawai haga karume lawai harago turu howa hale hagane ka.

*Wali agali yagibano karuhondo dara habe lenego ogo*

<sup>30</sup> Wali agali yagibano bu karu dara ho halimu. Anidagua buleberemigo irane ibame ira dedago ba hundia hagadagua dara holeneme wali agali tınıha ko ngago domo wahaga nga. <sup>31</sup> Wali agalime mendealihondo dara holene walia haga karu ti mani tını pilarangi mendealime abale biamogo bule kago handa walia haga ka.

## 4

<sup>1</sup> Waneiginiru-o tígua wali agali yagibano karu ti mbirale buru padaru ale milo hapai halimu. Tigua deme í hongo howa handaya ho kagola ti bahame handaya ho helo wanahalimu. <sup>2</sup> Wali agali ti genda halu mini burugu timbuni lo holebirago ina ti mo

\* **3:18-19:** Mbuga alatawe gilibu wini ngagohabi nde hobane ogoniha bi marubi gilibu wini nga. Bi ogoni ogodagua nga. Wali agali dewaoreme mini lene karuhondo Anduane Homogohanda ibunaga mini tihondo mo wala nahagane ka. Anigo wali agali tını mo dindiha hagane mana yu kagohondi mbirale wali agali deni doho ngaru mo walia haga ka. <sup>†</sup> **3:18-19:** Pb 2.3 <sup>†</sup> **3:22:** Man 29.29 <sup>†</sup> **3:24-25:** Mbuga alatawe gili bu wini ngagohabi nde hobane ogoniha bi marubi gili bu wini nga. Bi ogoni ogodagua gilibu nga. Wali agali de nahe karu tigua deme mbirale handabe naheore ka. Ani bialu mbirali manda nabi heagua nde bi ogoninaga lolene nawi.



garila holeni. Ani bialu maru mbirale tubagiho karuhondo keba halu lai nalabe. <sup>3</sup> Wali agali genda yuwa mini burugu lo kagoha genda dewa lone mo tago nahabe. Ani bialu wali agali yagibano bu karume ihondo mbirale mbira hale hayagua ina hapai nahabe. <sup>4</sup> Wali agali darabi bu karu tigua ihondo mbirale mbira hale haragola ti erembira mialu napobe. Ani bialu wali agali mbirale nawi tubagiho karuhondo erembira namibe. <sup>5</sup> Wali agali mbirale nawi karume ihondo bi ko loligo ina ti helalu putara halu napobe. <sup>6</sup> Ani lebirago irane tinaga bu miniha genda timbuni tagira ibiyagua tigua ihondo bi ko laragola mbirale bibahende wabiaga kago ibugua tinaga bi larago hale holebira.

<sup>7</sup> Ina mana ogoriani ibagabu hariyagua nde wali agalime ihame lai holebira. Agali haguenerunaga deni pialu howa ma podalu pobe. <sup>8</sup> Wali agali yagibano bu karunaga bi larago baya hangu hale hai halu marume ihondo mo bi la hayagua nde ini ale dege dege bi bayale laga wiridagua wali agali uruni baba bi bayale dege ladai bibe. <sup>9</sup> Wali agali mana ko biaga bu karu giha howa wali agali darabi bu karu tigua mo ko halu kago haru dai bibe. Ani bialu manani godi lalu mo tale bulenaga wali agalihondo gi nahe tigatigaore mo tale bulene ngadagua mo tale bibe. <sup>10</sup> Waneigini ti aba homene bu karu baya hangu handaya ho halu wali ibu agalini homene dalo bedaru baya hangu handaya ho halimu. Anidagua bialu ih Anduane Homogo Daligaore kago ibu waneiginiore holebere. Heneneore waneigini aiya ibugua ina anidagua beregonaga gubalini holebirago ainde Anduane Homogohanda ih gubalini timbuniore holebira.

### **Mini mandala bayale wule ibugua mbirale ko bu ngaru hondo wandialu holomaya ina biamogo biaga nga**

(4.11-6.17)

*Mini gigabi wulene ibu lawai haga bayaleore nga lenego ogo*

<sup>11</sup> Mini gigabi wulene ibugua ibu waneigini karuhondo ti miniwi bayaore ka lagabi wali agali ibu taya bialu karu baya hangu handaya ho hagabi ka.\* <sup>12</sup> Wali agali mini bayale wulene hame lalu tini bayale holenebi hame lo howa tigua aba taya biyagua tiha turu holene timbuni tolatagi holebira. <sup>13</sup> Wali agali hongohe mini bayale wiaga karu ti mini lene halu mini bayale ibu poragoha Anduane Homogohanda mo turu holebira. <sup>14</sup> Wali agali mbirame mini gigabi wulenemeibunaga mini yaraga hayagua tigua Ngode Datagaliwabe baya buruguleore kagonaga mini mo yaraga haga. Ani bialu wali agali mini gigabi wulene ngago gubalini haga bu karu ti Ngode Datagaliwabehanda gubalini holebira. <sup>15</sup> Wali agaliibunaga bi hale haga karu ti wali agalinaga haguane holebira. Ibugua bi larago hale haga karu ti bayale holebira. <sup>16</sup> Wali agalime mini gigabi wulene ngago mo galone halu yu tiga biyagua nde tigua mini gigabi mo yu holebira. Ani bialu tinaga waneigini mani holobadarumebi yu haabo holebira. <sup>17</sup> Pigane mini bayale wulene ibugua wali agali hariga tiga nabi yole ngagoha haru pialu mo luluya halu ti mo gi halu mo durula haga. Mini bayale wulene ibugua bi tandagabi ngarume minu heda halu wali agalinaga mana biaga ngago damene bayale tigabi hai helonaga lawai haga. Ani mo hongo kagola tiguaibunaga bi bayale manda bulene lawai harago talialu biai habehe karulape helaga. <sup>18</sup> Ani biragola mini gigabi wulene ibu wali agaliha hariga tigabi ngatoria ibalu ti mo turu haluibunaga bi wiado hene ngaru tihondo mo walia hagane. <sup>19</sup> Anigo wali agali ti pu luluya hayagua nde mini gigabi wulene ibugua ti yuwa halu tini mo ko halu homolene ngagoha pelo yupe haga.

*Bi henene lolene ngatoria hongo ho holene nga lenego ogo*

<sup>20</sup> Horo bayalengi ina henge bayale ngago bame mo holebu nahabe. Anigo ko ngagome ih minalu mo taga holigo mamage ho habe. <sup>21</sup> Taga holene wali agaliha mana ko bulene mo yu ibalu taga holene wali agali bu karunaga deni mini lene

\* **4:11:** Mini bayale wulene ibu wali aiya bedaligobi howa ibugua waneigini mana bayale ngaru bialu helonaga lawai haga nga.

helaga nga. <sup>22</sup>Ína mendeali kago helo la debodebo bialu keria íni pi loligo handabe. Íni pilagane tene ogoniha nga. <sup>23</sup>Ínaga bi lolene henge ngangí í ne hariga ndibulo holeni nahabe. <sup>24</sup>Ani lolene ngago irane ínaga bi larengi mini gigabi wulene ibu pana haragola ínaga bime íha manda bayale bidego latagi holebere. <sup>25</sup>Bi ke howa lama ibaga nabibe. Ína bi tigatiga í bibahende manda biai naheme lolene ngadagua lolene karulape. <sup>26</sup>Ína iba porago payabe nahe kego manda bialu íha ko ngago latagi hole taga nahabe. <sup>27</sup>Ínime í wali agali lulu mini nawi karu andaneha holene nawi. Ani bialu mbirali mini lene timbuni bu karu ladebodebo bialu ti kagoaha hadede nabibe. <sup>28</sup>Í homoleneore wiaguabi harugo Anduane Homogohanda í biamogo bule wai bulebirago í hongo howa bi henene loleneme í bolangua helo hongo habe.

<sup>29</sup>Í kudaga halu bi nagalone ngaru dewa laabo holeni nahabe. Ani bialu biabe bialu kegoaha manga halu gedeore holeni nahabe. <sup>30</sup>Íni andaga tamuha howa laionome ngororo laradagua nabibe. Ani bialu wali agali ínaga biabe bia haga bu karu talialu bi hongo howa loleni nalabe. <sup>31</sup>Mbirale ngaru yamule ínaga gi dogo nalabe. Ani bialu ínaga mbirale mbiralihondo mialu howa ínaga gi pau nalabe.✧

## 5

### *Ínime karulape kobe toba nahabe lenego ogo*

<sup>1</sup>Íninaga muni mbirale ngegoha mini hana ho howa ínaga lalu, Ai í karulapeore kogoni, lolene nawigo nalabe. <sup>2</sup>Ína hame ngego bibahende mbirale íni dimagoliho kego ha biba halu howa <sup>3</sup>lalu í aiwa handaya ho holabada, loleni. Irane ogoninaga Anduane Homogohanda í pani ngialu minu baore bulebira. <sup>4</sup>Ína mbirale bia ko harugo ainde mo ko holene mbira íha naibiya, lolene nawigo nalabe. Anduane Homogo ibugua la nabi luore hondo haga ka.✧ <sup>5</sup>Ínime lo manda bialu, Anduane Homogohanda ko biniru domo wahagayago waha, lalu mana ko ngaru bialu haabo holeni nabibe. <sup>6</sup>Anduane Homogoibunaga dara holene irane nawini howa dara timbuni hagane kago ínaga ko ngago bibahende domo wahaiore holebira, nalabe. Heneneore ibugua dara holebirago kebabi timbuni dege haga ka. Ani howaibunaga keba holene timbuni wali agali mana ko biaga bu karuha ibira holebira. <sup>7</sup>Anduane Homogo kagoaha abaleore dai bulene nga. Horo yawiore dai buliya lowa horo mo baedede nabibe. Anidagua biriyagua Anduane Homogonaga keba holene abaleore ibalu í mini baragola í homalu ereba holigo abale dai bibe. <sup>8</sup>Ínaga biabe ko buwa muni mo wirigoria mini paga howa holene nawiore. Muni ogonime horo hamaro bulene ngangí í mo wialu biamogo nabulebira.

### *Bi tigabi lolene ngaru dege labe lenego ogo*

<sup>9</sup>Puyabu puloyu iriari biragola mabuha ira hedape holene nawi. Ani bialu hariga tara tara pugupugu bulene ngagoaha tanabi pupe nahabe. Wali agali mini kirawi howa mana ko biaga karu tinaga mana ogonigo í polene nawiore. <sup>10</sup>Ínaga mini mo iriari bialu mo beregedaga nabibe. Ínaga bi laregobi bayale tigabi ngaru lalu habe. <sup>11</sup>Bi larago abale hale halu ladai nabi emene hondo habe. <sup>12</sup>Bi ladai bulene ínaga manda bu hariyagua bi larago ladai bibe. Manda nabi hariyagua nde ne hariga ndibulo holene karulape. <sup>13</sup>Bi ibugua wali agalinaga mini mo ko halu mo bayalebi haga dege nga. Ani biagago irane wali agalinaga hegeme dege mo ko haga nga.

<sup>14</sup>Wali agali bu karume í bi dibudibu hale ho page bialu ínaga ne hariga ngegome wali agali mende kago mo ko haga ka nalelo holene nga. Ani larago irane page biaga karu ti taga haga wialu wali agali bi haluki laga karu tiha godi ko tara ngago handa walia holebira. <sup>15</sup>Mana ko ngago dameneore bibabahende emene timbuniyaguabi nabibe.

## 6

<sup>1</sup> Ai mbiralila nenege hariyagua lone waitigi holene manda nabibe. Lone waitigi haregome ínaga mini mo ko haragola taga timbuni holebere. Wali agali bi lo mende halu bi kira laga ko bu karunaga yolo ogoni mo yaga ka. <sup>2</sup> Miniha dimagoli ko ngegome í haru helo nahabe. Miniha dimagoli holene ogonime í nogo bulumagame hangedaradagua bialu í balu home loligo hondo habe. <sup>3</sup> Miniha dimagoli holene ogoni ibugua ínaga yuni linibi bibahende nai haragola í ira gabuni ale holebere. <sup>4</sup> Heneneore mbirali ibu miniha dimagoli ogoni ale ngelo kago ibu mo ko haragola waitigi bu karume ibu hondo oba holebira.

### *Nenegela biagane mana ngago ogo*

<sup>5</sup> Bi dendebe laregome nenege dewaore hinalu bi hendore lalu bedegome hadapaya bu holene mo yu anda ibaga. <sup>6</sup> Wali agali dewaoreme íla mini hana haga bu hene heaguabi ai daosini mbira (1,000) bu karu aria mbiraoreli hangume í baya hanguore mo tiga biaga holebira. <sup>7</sup> Ínaga nenege holene mbira taya bialu hariyagua ína mbirali kagohondo abale mini mbiraore nawibe. Ína ibu abidabe hondole baya hangu begelo hondolene ngago <sup>8</sup> irane nenege mbiraore ndo nenege tara tara dewa hagane ngagonaga ani hondolene nga. Nenege mbirago ibu í bayale kengi nenege howa íha genda ibirangi í heba mandagi naholebira. <sup>9</sup> Nenege mendego ibugua ínaga nenege ha howa dege mani íla waitigi halu bi ohowa libuni hangu howa laga wiribigo bibahende hale hai helo latagi haragola í taga ho holebere. <sup>10</sup> Maru ína tomo merengi libu nenege howa mani íha genda anda ibirangi í biamogo nabulebira. <sup>11</sup> Nenege uruni aleme í bayale kengi nenege halu íla mini mbiraore ho holebira. Ani howa ibunaga mini bayaleru í andaga ibuwa latagi haga bulebira. <sup>12</sup> Anigo tigua ínaga mini mo guya harangi nenege biagome í erembira ngialu ibunaga wanakui mo do holebira.

<sup>13</sup> Wali agali íla waitigi bu karu kaware nahe kaundiaha halu ínaga nenege karu baya hangu minime ti mo tale bialu de hondo habe. <sup>14</sup> Ainde ínaga nenege henene kago ibu anda hongohe kaligobi ka. Wali agali mbirale yolo dewame miaga ngaligobi nenege bayale ogoni ibu holebira. <sup>15</sup> Nenege heneneore wali agalime yolo nabulebira. Nenege bayaleoredagola ibunaga yolo ogo aleria lade naholebira. <sup>16</sup> Nenege henene he kago ibuha holene bayaleore holebira. Ani bialu mbirali ibu Anduane Homogo gi howa ibuni andaneha haga kago ibu nenege uruni ale handa walia holene nga. <sup>17</sup> Heneneore Anduane Homogo andaneha kago ibu nenege bayale karia handa walia holebira. Ani bialu libunaga mini mbiraore ogobi degedane hondolebira.

### **Mini gigabi wulene manda bayale bulenelame iname wali agali mende kago baba bayale holene mo yu anda ibaga (6.18-14.19)**

#### *Mini gigabi wulenenaga galone manda bulene nga lenego ogo*

<sup>18</sup> Waneigini-o í wene daliahe kengi ína mbirale lo manda bule hongo halu í waheale biruwa mini gigabi wulene taya bule manda bibe. <sup>19</sup> Wali agalime mabuha biabe erekuibiore bialu dindi tombalu tomo hongowa mani lini bayale delonaga maliaho hagadagua tigua mini gigabi wulene taya bialu haabo halimu. Heneneore ína mabuha biabe bulenengi emene tigi mbira degeni birigo ai mabuni tomo liniru bayale dedagola abale do nolebere. <sup>20</sup> Ainde wali agali manda nabini bu karu tihondo mini bayale wulene ibu erekuibioredagola wali agali kuni naheru baba ibu lu haabo naholebira. <sup>21</sup> Mini gigabi wulene ibu ege tole gendabi ngaligobi ngagome wali agali gendame bope hagane. Ani bope haragola tigua mini gigabi wulene ogoni abale yu wahagaya.

☆ 6:19: Ya 5.7-8

<sup>22</sup> Ainde wali agali dewalime mini gigabi wulene ibunaga mini lolene hame lariyagua nde mbirale tara tara bayale handa walia nahaga ngaru mini lolene karulape nga.

<sup>23</sup> Waneigini-o bi hale halu ínaga mini ngogo baya hangu taliabe. Bi ina langerogo mo embeda holeni. <sup>24</sup> Ínaga ge mini gigabi wulene ege pu ngagome dabaho ngelalu ínaga ma mini gigabi wulenenaga pume dabaholene nga. <sup>25</sup> Mini gigabi wulene ibunaga genda gibiore ngago ínaga payani yu pialu ibunaga ege pume daba hayagobi ogoninaga mini burugu nale yu pobe. <sup>26</sup> Ínaga bu mini bibahendeme mini gigabi wulene taya biaabo halu ínaga hongo bibahendeme ibunaga hariga ngagoha pialu habe. <sup>27</sup> Ayu ogoni handa walia holeberegogo taya bima pialu handa walia halu minu yania hariyagua nde pelo yupe habe. <sup>28</sup> Ani beregola mahaore miniha mo palia holene mini gigabi ibugua ngiaga ngago handa walia halu turu holebere. <sup>29</sup> Ani beregola ege pume í dariba hayago ibugua ayu í handaya ho halu pu alatawe biaru ti ínaga tolenda ge hala gi pagida aleru holebira. <sup>30</sup> Iibunaga genda mo yarigo ínaga ngolo manda halu ege pume í dariba haga biyaru baya taraore girilimame dedaru ale holebira. <sup>31</sup> Ani bialu ínaga mini gigabi wulene aga lu bayale karula gimbu biaga ale ngago taya buwa ínaga embone mo yari bia howa ibaga bu holebere.

<sup>32</sup> Waneigini-o hame layagua nde biwai harago baya hangu manda bibe. Manda biriyagua nde í nde í bayaleore holebere. <sup>33</sup> Bi larago baya hangu hale hole hongo ho hariyagua nde ina manda bayale bulebere. Ínaga wiaho biraga hariyagua nde wali agali mini bayalewi mbirago í holebere. <sup>34</sup> Agali wahe mo ngoaiho biruwa bi lalu biraga ngagoha pobe. Ani pu biruwa wali agali mini bayalewi mbira bereagua í ogonila birabe. <sup>35</sup> Ngode Datagaliwabenaga bi te larago í hale nahe bederia í helalu pubagi holigo baya hangu hale ho birabe. <sup>36</sup> Ina handalu keria wali agaliyaguabi manda bayalebi mbira bedaria handariyagua nde gao laragola egerebagi heyalu gerai lalu puwa ibu andaga haraba ge halu ubaanda hagane dagia bidagoria ge habe.

<sup>37</sup> Anduane Homogonaga bi langiyago baya hangu mitangi biaabo halu ibunaga bi manabi mitangi bibe. Ibugua í mo hongo halu ibugua mini bayale ínime yulene hame ledegobi ngulebira.✧

## 7

### *Bayale holenenaga bi tara tara lo ngago ogo*

<sup>1</sup> Íha mo ko holene ibuligo mana ko ngaru nabibe. <sup>2</sup> Ína mana ko ngaru hondo wandialu habe. Anidagua biriyagua nde íha pani nolene nawulebira. <sup>3</sup> Waneigini-o mana ko ibu mabuha tomo hangarimagobi nga. Ína mabuha hengederia dewaore anda holigo handabe.

<sup>4</sup> Í timbuni haguane holiya biamogo bia lalu, Anduane Homogohondo bi lolene nawigo nalabe. Ani bialu kinihondo ínaga mini yaraga hene holiya í mini lene hela lalu hale nahabe. <sup>5</sup> Ína Anduane Homogo bime ladebadebo bialu ibugua í mana bayale bialu hagada lelo manda buwa bi nalabe. Ani bialu kini ibugua í agali manda bayalewida lelonaga ina kini mohondo halu bi nalabe. <sup>6</sup> Godi hale halu manani ngadagua mo tale biaga karu tinaga biabe bialu kago dimagoli nahabe. Ína bu aribia holene manda nabi howa wali agalime mana ko bini ngago baya hangu mo tiga nabibehe holigo ani nabibe. Ína agali haguane mbira godi lole ibirago hondowa ini mogo laregola íninaga mini mo ko holene wuligo ina biabe ogoni bule hame loleni nalabe. <sup>7</sup> Wali agali ini daluha bu karuhondo ko nabi halu wali agali deni lulu ale howa bulene ngago nabibe.

<sup>8</sup> Mana ko halu mbira berego halu mende nabibe. Ko mbira mbira beregonaga yolo hangu hangu nga.

✧ 6:37: Yos 1.8, Iba 1.2

<sup>9</sup>Ína lalu Ngode Datagaliwabe Daligaore kagome ínaga mbirale bayale bame mulene bu ngoruni handape halu hondowa ínna ibu mbirale loma bu merogo yamulebira nalabe.

<sup>10</sup>Ínaga mini mbiraore wulene hongohe wu kego heba howa Ngode Datagaliwabehondo bi lalu howa bibahendengi yagibano bu karu biamogo bulene ngago hondowa wahalu pu nabi.

<sup>11</sup>Wali agali taga timbuniore ho kago hondowa ibuhondo oba holene nawigohondo oba nahabe. Wali agalinaga mini bope holenagabi mo yaraga holenagabi Ngode Datagaliwabe ibugua hangu biaga ka.

<sup>12</sup>Í hamene kago mo ko holenaga te ke howa nale wahalu ínaga damene kagohondobi anidagua dege nabibe. <sup>13</sup>Ína ke holeni nahabe. Ke holene mana ngago ha howa mbirale bayale mbira tagira naibaga.

<sup>14</sup>Agali haguane ngoaiho bedagoria bi nagalone kudaga bi nalabe. Ani bialu Ngode Datagaliwabehondo bi nagalone ngago lu laabo nahabe.

<sup>15</sup>Mabu biabe bulene erekuibi ngagola wahalu ibida napobe. Ai biabe otoni Ngode Datagaliwabe Daligaore kago ibuguaore mo winigo nga.

<sup>16</sup>Wali agali mana ko biaga karu baba mandagi holeni nahabe. Anduane Homogonaga miniha keba holene abale tagira ibaga ngago manda bialu habe.

<sup>17</sup>Íni mo dindiha howa holene nga. Ira denela ngoelame wali agali ko biaga karu nai holebirago manda bialu ani habe.

*Ínaga anda handaya ho holene mana ngago ogo*

<sup>18</sup>Ai muni hangu mule ínaga nenege wanahabe. Ani bialu dindini wini ngolo ngaru mulenaga ínna hameneore kago wanahabe.

<sup>19</sup>Í wali mbira manda bayalebi bedago taya bulene ngago irane wali bayaore bedago ibu dindini ngolo ngaru bibahende bolangua hene beda.

<sup>20</sup>Wali agali í andaga handaya ho haga bu karuhondo mo ko nahabe. Ani bialu ínaga biabe ndelahe erekuibi ngaru bialu haga wali agali bu karuhondo mo ko nahabe.

<sup>21</sup>Agali ínaga biabe bia haga mbira biabe baya hangu biaga kago gubalini ho holene nga. Ani howa horo mbirungi ibuni andaga poa hayagua ínna napobe lolene nawi.\*

<sup>22</sup>Í nogo bulumagaru hinu hegua nde baya hangu handaya ho holene nga. Ai nogo urunime ínaga biyinaya berego biamogo biagayagua nde muni mia nabi helo wahabe.

<sup>23</sup>Í waneigini hayagua nde ti wene waneigini emene kaore biawi halu otoningi howa dege bayale helo mo tiga bibe.

<sup>24</sup>Í waneru bereagua nde ínna ti baya hangu mamage ho howa ti baame berelo wanahe hongo howa handaya ho habe. <sup>25</sup>Ai wandari mbirago agalime dabubilo miriyagua nde ínaga biabe timbuni biaiore harigoni ndobe. Anigo í wane agali manda bayalebi kago hondowa mibe.

<sup>26</sup>Í one gubalini ho keyagua nde wahalu pu nalabe. Anigo ibugua mini kira wu biruligo dege de hondo habe.

<sup>27</sup>Ína hongo holene bibahendeme í aba mitangi halu í aiyahanda nde í taba hanayangi tandaga gibiore nenego mitangi bibe.\* <sup>28</sup>Aba aiyalame í habelo holene ngini kego baya hangu mitangi bibe. Mbirale tigua í ngiyago damene miadai bibe nahe kego manda bialu holene nga.

*Ina Ngode Datagaliwabenaga mini yaraga halu biabe tara tara bulene ngago ogo*

<sup>29</sup>Ínaga bu mini bibahende Anduane Homogonaga andaneha haabo howa agaliibunaga biabe bialu haga agali loma binigo mo miaga bu karuhondo mana bayale bulene

\* 7:21: Har 21.2, Man 15.12-15    \* 7:27: Har 20.12



ngadagua bialu halimu. <sup>30</sup> Ínaga hongo holene ngego bibahendeme Ngode Datagali-wabe kago gubalini halu wali agali haru bamba haga kago baya hangu mitangi halu halimu. <sup>31</sup> Ína Anduane Homogo ibunihondo gi ho howa agaliibunaga biabe bia haga agali loma binigo mo miaga bu karunaga mini yaraga halu holene nga. Bulene nga lalu maname ledadagua bialu t́gua mbiraleru agali loma binigo mo miaga agali karu mo mialu bulene nga. Mbirale mulene uruni mabuha tomo hingedego pigane boga birarubi ko domolenenaga loma ngarubi nogo ega ge loma bu mulene ngarubi loma maru loma bia hene ngarubi loma marubi bu mulene nga.\*

<sup>32</sup> Anduane Homogohanda í mo bayale helo ína mbirale ngeru maru yagibano bu karu talebu migi bulene nga. <sup>33</sup> Wali agali homayaru mitangi ho howa wali agali nahome karu mo turu halu mbirale bame migi bulene nga. <sup>34</sup> Wali agali dara ho bedaru baba mandagi dara ho bialu dugu bialu bedaru baba dugu bialu birulene nga. <sup>35</sup> Ainde wali agali warago bo ngaru embeda nahe hondo polene nga. Ína ogonidagua biaga hariyagua wali agalime í gubalini ho holebira. <sup>36</sup> Íni mbirale bule manda bu wiridago ngelowa homolene ngago ala mitangi bibe. Anidagua beregola ína mana ko mbira nabi holebere.

## 8

### *Bayale hole bulene mana maru ngago ogo*

<sup>1</sup> Wali agali mini lene karu baba hongo manda nabibe. ani bialu keria í tinaga giha pilo yaholigo nabibe. <sup>2</sup> Wali agali muni mbirale dewawi bu karu baba lai loleni nalabe. Tigua agali biyinaya dewawi karu yolo bu heledago nahende lalu keria í bope holene wuligo nalabe. Ani larogo irane ngolome wali agali dewaore mo ko hai halu kini karunaga minibi mo talola haga nga. <sup>3</sup> Wali agali bi nagalone laga karu baba lai nalabe. Ani lalu keria í mbiralime gambe hale iraha delo bape haraligobi holigo nabibe laro. <sup>4</sup> Wali agali mini nawi lulu karu baba bi tabirene holeni nahabe. Ínaga mamali hendaru mege buligo tabirene nabe laro. <sup>5</sup> Wali agali mana ko bulene ngago hondo wandialu heagua ogoni mege buleni nabibe. Ina bibahendeore bialu harimagonaga pani nolene ngadagua noleberemago baya hangu mitangi bu habe. <sup>6</sup> Inabi nde mani wali agali wahe ayu biru ngarubi dege holeberemago ai wahe urunihondo mege nabibe. <sup>7</sup> Ani bialu wali agali mbirago homayagua ogonihondo turu holeni nahabe. Ainde mani inabi homole dege kemago baya hangu mitangi bibe.

<sup>8</sup> Agali manda timbuni bi karume te larago nagalone larabe toba holeni. Ani ndo. Tigua lawai harago baya hangu hale howa mo yai holene ngago irane tigua í tigabi howa agali haguane tinaga biabe bulene ngago biamogo bia habelonaga lolebira. <sup>9</sup> Agali wahe bedaru tigua te bamba tinaga mamali bu heneruha howa lawai hene ngago lalu birulebirago ainde ína tinaga te lalu bedago wahalu napobe. Ainde ína te anidagua lalu bedago baya hangu hale hariyagua nde íha genda tara tara anda ibugu biraru ogoale ibiyida la dai bulene holebere.

<sup>10</sup> Wali agali mana ko biaga bu karunaga bu mini dimagoli holene ira hungu ale hedope holeni nahabe. Ani bialu keria ínibi dolene wuligo nabibe laro. <sup>11</sup> Wali agalime í mo keba howa bi laba lowa lalu heagua nde ína abale lungulope halu ladai buleni nabibe. Tigua bi ína tigabi larego mo beregedalu í mo ko halu mo yobia holebirago nalabe laro. <sup>12</sup> Wali agalime hongo halu íha dano dewaore holiya ngi larago hale halu muleni namibe. Anigo ainde dano helo miriyagua ínaga muni pu ereba haragoniore

\* **7:31:** Bi maru tomo pigane boga birago bu loma bu mulene nga ledago mbuga mini Dagalene 18.11-18 nga. Ko domalenenaga loma ledago mbuga mini Loma Binigo Mo Miaganaga Biabe laga ngagonaga 5.5-6 nga. Nogo egarunaga ge loma bu mulene ledago Haru Tagira Penego 29.17 wialu Loma Binigo Mo Miaganaga Biabe 7.31, Mana Lowinigo Loyane 18.3 nga. Ani bialu loma maru ledago Loma Binigo Mo Miaganaga Biabe 2.1-16 uruniha wigi bidago leda nga.

ndobe. <sup>13</sup> Ina muni ngego emene dege ngelowa mbiralinaga dano henego abale nguliya lalu latagi holeni nahabe. Anigo nguliya lalu abale latagi hariyagua nde dano abaleore mibe. <sup>14</sup> Agali godi hale halu mo tale biaga kago godi laba lole haru poleni napobe. Irane ibunaga hongo tara ngagome ibunaga mini haru helowa bi lolebirago. <sup>15</sup> Wali agali mine haga bu karume í genda dewa mo nguligo í ti heba mandagi ibagabu holeni nahabe. Tigua mana ko tinime hame ledago bialu lulu ale howa biagadaru bialu kagola í heba mandagi mo ko holene wuligo ti heba mandagi nahabe.

<sup>16</sup> Wali agali keba haga kago baba gungu nabibe. Ani bialu agali ogoniale baba dindi ko wali agali nahaga ngagoha mba lalu napobe. Agali ogoniale kagome holene mo galone nahaga kago ndobe. Tigua dindi ko wali agali nahaga ogoniha howa í bo waholebiyagua í biamogo bulene mbirali ai kabe. <sup>17</sup> Wali agali lulu karu baba mandagi biruwa bi nalabe. Irane aginaga tigua bi wali agali bu kagoria lo paya bulebirago nalabe. <sup>18</sup> Mbirale do howa lolene ngago wali agali dindi taraha howa ibini bu karu hale helo lolene nawigo nalabe. Mani agi bulebirabi í manda nabi kego nalabe. <sup>19</sup> Wali agali bu karume í abogo keda lo manda nabi kago inaga mini ngego wali agali bu kagoria lama ibaga nabibe. Anidagua biriyagua inaga turu holene emene ngago mo waholobere.

## 9

### *Wali baba mandagi birulene mana ngago ogo*

<sup>1</sup> Í one bedagohondo ko birabe toba howa mini ko nawibe. Inime biawai haregola ibuguabi nde ihondo ko bialu keba toba holebirago nabibe. <sup>2</sup> Wali mbira bedagome inaga hongo bope holigo ini ibuhondo namibe. <sup>3</sup> Wali mbira inenege birule hamelo bedagome í gili lolebirago ibu hangu karia ngola nahabe. <sup>4</sup> Wali mali liaga iba gana lalu dawé haga bedagome inaga mini mo batara howa í mo hondo holigo ibu heba mandagi nabirabe. <sup>5</sup> Wandari mabuage bedago ina yolo buligo deme hongo howa handaya nahabe. <sup>6</sup> Inaga muni mbiraleru bibahende wahi holeberego í bayanda wali baba mandagi holeni nahabe. <sup>7</sup> Tanoha howa hariga bibahende de handama ibaga buleni nabibe. Ani bialu hariga wali agali nahe ngagoha hangu pupe halu poleni napobe. <sup>8</sup> Wali bayaleore mbira ibiyagua ina ibu deme handaya nahe de handa tara halu pobe. Agali mendeali one baya bedago deme handaya nahabe. Agali mbira ibu one bayale bedago deme hongo howa handaya nahabe. Heneneore agali maru tinaga bu miniha dimagoli holene ira hungu ale bialu kagola ti wali maru bedaru baba ibaga bu haga ka. <sup>9</sup> Wali mbira agali one bedagola mandagi birulene nawigo ibu heba mandagi tomo bayaleru dewa dawa nalu lulu ibaru dewa nalu luluyu biruleni. Ani bederia inaga bu mini hongohe ibuha poragola í mo ko halu pi loligo nabirabe.

<sup>10</sup> Nenege ala hene biago mani hene kagome bolangua hene ndo holebirago nenege ala hene kago yu wanahabe. Nenege mani hene kago ibu waini iba gahange wabini ngagobi ka. Anigo waini iba lu ngelowa mani nariyagua baya dendebiore wiaga. <sup>11</sup> Wali agali mana ko biaga kagonaga mini yaraga halu mo ko holene mbira agi ibulebirabe í manda nabi kego ainde tinaga mini timbuni yaraga hene kago hondowa dimagoli holeni nahabe. <sup>12</sup> Wali agali tigua turu haga ngagohondo í turu holeni nahabe. Baya hanguore manda bibe. Ti homeneru dindi humbirini andagaha pu nabi wene kaore pani nolene koore ngago abale ngola holebira. <sup>13</sup> Mbiralime í bo waholobada lo manda nabi hole wali agali homelo bo wahaga bu karu baba mandagi holeni nahe putara halu kaundia habe. Anigo ti kagoha kaware piriyagua nde inime poro lalu penedago ini mamage ho habe. Ogo dege manda bibe. Í mbirali mbira gabua uli dewaore ngagoha handa nabi howa pupe halu piagagobi howa wai bialu kagoria bamba halu timu deneni pu hagagobibi holebere.

<sup>14</sup> Inaga nenege bu karu baya hangu minime mo tale buwa wali mini gigabi bedarunaga mini bayale ngago hale halu mo yabe. <sup>15</sup> Bibahendengi wali agali mini bayalewi bu karu baba te lalu biraga kegoni howa dewangiore te laabo halu Ngode Datagaliwabe Daligaore kagonaga bi mana ngago lolene nga. <sup>16</sup> Wali agali bayale tigabi karu ti dege í andaga tomo namiya ibidaba lalu ini Anduane Homogo ibu andaneha haabo howa ibuni hanguhondo gi ho haabo holene nga.

<sup>17</sup> Agali anda biaga kago ibu biabe bayale ibuni biragome ibunaga mini mo yaribia ho halu agali haguane bu karu ti tinaga bi bayale laragome tinaga mini timbuni mini lene ka lene haga. <sup>18</sup> Wali agali tini dindi anda wiyadagoha haga karu ti wali agali bameore bi kulukala lalu kudaga haga kago gi halu wali agali bi galone ndo ngago lalu karia ti handabe manga haga ka.

## 10

### *Gabumane biabe bayale bulene ngago ogo*

<sup>1</sup> Agali haguane kago mini gigabiwi heagua nde ibunaga wali agali baya hangu haru halu wali agali manda bayalebi karume haguane howa wali agali baya hangu haru holebira. <sup>2</sup> Wali agalinaga agali haguane kago ibu bayale heagua nde wali agali tibi bayale dege holebira. Ani bialu agali haguane dindi mbira mbiraha haga bidago bayale heagua nde ibunaga wali agali bu karubi bayale karulape dege holebira. <sup>3</sup> Kini ibu mini nawi heagua nde ibunaga wali agali mo ko hai hagane nga. Anigo agali timbuni haguane hayadago ibuni manda bayale bi heagua nde ibugua ibunaga dindi bayale ngelo mo heya hagane nga. <sup>4</sup> Dindi handaya ho holene hongo Anduane Homogo ibuniha ngago ainde ibugua wali agali bayale karu mo heya holengeni mo heya haga ka. <sup>5</sup> Anduane Homogo ibunime wali agalinaga biabe bulene ngago mo bayale halu kininaga beba gilibia dagala biaga agali kagonaga mini yaraga haga ka.

### *Anduane Homogohanda wali agali mine haga karu bo wahai holebira lenego ogo*

<sup>6</sup> Inaga nenege kagome ko emene mbira biragola ibuhondo keba halu hongo howa lai lolene nawigo nalabe. Wali agali mbiragome íla mine hayagua nde bialu helo habe. Mbirale mbira abale bulene nawiorego nabibe. <sup>7</sup> Mine hagane ngagobi wali agali mende kago mo ko holene mana ngagobi ogoni Anduane Homogonaga denibi wali agali maru karunaga denibi mana koore nga. <sup>8</sup> Gabumane agali tara tara bu karume mana ko lehe ngago taluwa bialu mine halu page dewa biaga ka. Anidagua biagane ngagome horo ayu marume gabumane haru kagola horo mendengi agali marume gabumane haru haga ka. <sup>9</sup> Wali agali dindini hene bame dege kago ai tininaga mini mo yaraga halu holene nawiore. Ti dindini kangi dege homabi ti heba nahe dege ka. <sup>10</sup> Anogodame warago lu balu wirago manda bibe nahe haga bialu kagoni. <sup>11</sup> Ayu í kini kegoni yawi í homale dege ke. Wali agali homene ngago ngoebi bunguna bedarubi himi ngarubi tigua homa tingini ngago handaya ho haga nga.

<sup>12</sup> Wali agali mine haga karume Anduane Homogo wahagaya. Tigua tinaga bu miniha Ngode Datagaliwabe mitangi emeneorebi mbira nahagaore ka. <sup>13</sup> Mana ko bulene ngago ibunime mine holene yu anda ibaga nga. Ainde wali agali kome dariba hene karu tigua mana koorene ko tara tara ngaru bialu haga ka. Ani bialu kagonaga Anduane Homogo ibugua wali agali tara tara bu karu pani mialu bo wahai halu erebaore helolebira. <sup>14</sup> Anduane Homogohanda kini hearu bope hai halu wali agali damene bu hearu minalu kininaga henge wiagoria bira karu lelaya. <sup>15</sup> Anduane Homogohanda wali agali dindi anduane hearu bo taliatagi hai howa wali agali daga nolene bu hearu minalu ti hene wiagoria ho aribia helaya. <sup>16</sup> Anduane Homogohanda tinaga dindi mo labu hai helalu ti dalu wiaru bo haealahole bilaya. <sup>17</sup> Hameigini maru

✧ 10:14: 1 Sml 2.8, Lg 1.52

bo haealahole biai helayagola wali agali uruni aria mbirali abago ogoria heneya lalubi mani te nalolebiraore. <sup>18</sup> Anduane Homogohanda wali agali ti ibaga biai halu mine halu keba howa bi hongo howa lama ibaga bu helo ndo wabini.

*Mini lene daligaore ai kabe lenego ogo*

<sup>19</sup> Mbirali ai ibuore mini lene holobadabe. Wali agali degeme mulene nga. Ai ibu mini lene holene ngabe. Wali agali Anduane Homogonaga bi hale haga karu ti dege mini lene holebira. Wali agali mini lene habe nahe ai kabe. Wali agali dege holebira. Ai ibu mini lene holebirabe. Wali agali Ngode Datagaliwabenaga bi mana lo ngago hale nahaga bu karu ti mini lene naholebira. <sup>20-21</sup> Wali agalime tinaga haguane kagonaga mini yaraga haga ka. Anidagua dege Anduane Homogohanda wali agali ibunaga bi hale halu haga karunaga mini yaraga haga ka.\*

<sup>22</sup> Wali agali Anduane Homogo gi halu ibu andaneha haga karu ti homogo mbirale dewaorewi heaguabi wali agali mini lene heaguabi mini nalene heaguabi bibahende mini lene hai holebira. <sup>23</sup> Mbirali yagibano howa manda bayalewi kago bo hingedope holene nakarulape. Wali agali mana ko biaga karunaga mini yaraga holenebi koore nga. <sup>24</sup> Ainde heneneore wali agali tigua agali timbuni karubi agali haguane karubi godi hale halu manani mo tale biaga bu karubi uruninaga mini yaraga haga nga. Anigo wali agali uruni aria karu ti mbirame wali agali maru Anduane Homogonaga bi hale haga karu bolangua habe naheore ka. <sup>25</sup> Anda anduane kagome biabe bia haga mini mandaru bayalewi kago talima piagane nga. Ainde wali agalime mini bayale wu heagua nde ogoni wu kago taga holene nawi.

*Bayale mini lene holene ngago ogo*

<sup>26</sup> Ai biabe mbira bialu hariyagua kudaga bi lama ibaga nabibe. Ani bialu í yagibano hariyagua nde ke howa íninaga mini yaraga halu holeni nahabe. <sup>27</sup> Wali agali biabe bialu howa tiha mbirale tubagi nahe karume wali agali kudaga bi dewa laabo halu tomo nolene nawi gariho karu bolangua hene ka.

<sup>28</sup> Waneigini-o íni mo dindiha ho hariyagua nde í mini lene bayale holebere. Ani howa bi ína larego galone hayagua nde íninaga mini yaraga holene karulape ke. <sup>29</sup> Wali agali tini handaya ho habe nahe karu aiwa biamogo bialu holobadabe. Ani bialu wali agali tini taga ho haga karu mini lene helo aiwa mo yaraga holobadabe. <sup>30</sup> Yagibano karu tinime tinaga mini bayale ngago latagi halu kagome tinaga mini mo yaraga hene mini lene haga. Anigo homogo bu karu ti tininaga mbirale dewa wu karume ti mo mini lene helaga ka. <sup>31</sup> Yagibano mbira ibu mini lene hayagua ibu muniru dewawi harangi ibunaga mini yaragaore halu ibu mini lene daligaore mbira holebira. Muni mbirale dewawi homogo karu ti mini lene ndo heagua nde mani ti yagibano harangi tinaga mini nawi erebaore holebira.

## 11

<sup>1</sup> Agali yagibano ibu mini bayalewi heagua nde ibu agali haguane karu baba mandagi birulebirago ibu turu ho holene nga.

*Wali agali tinaga miniha yagi ína mitangi ho lene nawi lenego ogo*

<sup>2</sup> Wali agali tingini hangu bayale karunaga mini yaraga holene nawigo nahabe. Ani bialu wali agali koale karu mo guya nahabe. <sup>3</sup> Mone tara mbira bedago ibu emene dege bedagome habane ngago ibane dendebioreni ibu duniniore mbira wiaga beda. <sup>4</sup> Tigua ínaga mini yaraga haragola ína mine howa aga bayale ngaru mo karulo holene nawigo ani nabibe. Ani larogoni irane mbirale Anduane Homogohanda biagago bayaleore

\* **10:20-21:** Mbuga alatawe ngagoha hobane ogoninaga bi marubi winigo nga. Bi uruni ogodagua gilibu nga. Wali agali Anduane Homogo gi ho haga karu ti bayale holebira. Wali agali mine haga karu ti pu ereba hai holebira, lalu gilibu wini nga.

biaga kago ainde wali agalime biabe ibugua biaga ngago damene ti manda nabi ka. <sup>5</sup> Agali haguane dewaore tinaga biabe biaga wiaru wahai howa tini dindini bedagola agali mbira daga nawini heago ibugua tinaga henge ibu miai haya. <sup>6</sup> Agali haguane dewaore bu hearunaga mini mo ngubia halu mo ko hai hayagola wali agali mini lene bu heneru ayu wali agali tara hearunaga giha henego ka.

*Mbirale ínime bialu keru mamage howa bialu habe lenego ogo*

<sup>7</sup> Wali agali mbirago godini haru polene manda biriyagua nde ti wali agali ogobiore kagoda lalu baya hangu mo tale ala bibe. Tihondo keba halu lai loleyagua nde ínini miniha mitangi ala bibe. <sup>8</sup> Wali agali mbirame bi lalu heagua ina lapugua bulene nawigo lapugua nabibe. Baya hangu hale hai howa bi ladai bibe. <sup>9</sup> Wali agali tigua í mitangi nabioire kago ina tinaga mbirale ngaru mitangi holene nawigo nahabe. Ani bialu wali agali mana ko biaga karu ti godi lalu bedagoha í ti heba mandagi nabirabe.

<sup>10</sup> Waneigini-o biyinaya biabe tara tara ngaru dewa nabibe. Tara tara dewaore ngaru biai holene manda biriyagua nde ínini mo ko holebira. Abale bu bolangua naholeberegó gerai lalu ala bigi nabibe. Mbiraha ibida pu haraiyagua nde ínaga biabe biagane uruni ereba naholebira. <sup>11</sup> Wali agalime biabe erekuibiore ngaru hibu lowa hongo howa bialu haabo haga. Anigo tiha dewaore tubagiho haabo ka. <sup>12</sup> Wali agali marume nde biabe nabiaga kagola maru karume urunibi karu biamogo biaga ka. Ti hongo nahe howa tiha mbirale dewa tubagiho haga ka. Ani kagola Anduane Homogonaga deme handape halu ti de hondowa ti biamogo bialu haga ka. Ani bialu wali agali mo ko hene uruni lone mo heya halu <sup>13</sup> tinaga emboneha yagi mo yaraga haga ka. Ani biyagola wali agali dewame hondowa ti mogo lo hendene.

<sup>14</sup> Anduane Homogohanda mbirale ko bayalebi ngia dege biaga ka. Ibugua holene ngialu holene lone mo yu dai biaga ka. Ibugua wali agali mo yagibano halu lone mbirale dewa mialu mo homogo haga ka.

<sup>15</sup> Anduane Homogo ibugua mini gigabi wulenebi lawai halu ibunaga bi manabi ngiaga ka. Ani bialu mendeali kago gubalini howa biamogo bulene mo wia haga ka. <sup>16</sup> Anigo ainde mana ko lehe ngago damene aruma holene mana bulenebi uruni wali agali mana ko biaga karuha howa ibaga. Ani bialu mana ko uruni wali agali mana ko turu haga bu karu baba haabo halu tini homalu wahaga.\* <sup>17</sup> Anduane Homogohanda wali agali tigabi karuhondo mbirale miaga ngago damene bibahende mo ko nahagaore. Biabe mbira Ngode Datagaliwabe ibu hame ledago bialu heagua nde biabe ogoni mo ko nahe bayale bialu haabo haga. <sup>18</sup> Agali muni dewaorewi karume mbirale dewaore mo ngoaiho wu hayagua nde ibu yolo agile mulubadabe.\* <sup>19</sup> Ibugua lalu, Ainde ema nabi halo biruwa tomo mbirale bayale ngaru nalu biruliya, lagane. Anigo ibunaga tomo bayale uruni nalu holene horo agira ngabe ibu manda nabi kago ainde ibuni homaragola wali agali tara bu karume ibunaga tomo bayale uruni no aribia holebirago ibu manda nabi ka.

<sup>20</sup> Habo nalolene bi lo wirigo baya hangu yu habe. Waore nahabe. Yu haabo halu ínini waheore howabi yu haabo habe. <sup>21</sup> Wali agali mana ko biaga karume biabe biaga ngago ina dimagoli nahabe. Ininaga biabe biaga wiridago yu howa Anduane Homogoha kaware haabo habe. Anduane Homogohanda yagibano bu karuhondo mbirale bayale ngaru abaleore mo miaga kago manda bialu ibuha haabo habe. <sup>22</sup> Ani bialu ibunaga mo turu holene ngago abaleore mo dewa haga ka. <sup>23</sup> Ainde ina lalu, Iha mbirale agilego tubagiho kobe. Mani bayale mbira agigo mo yuledabe lolene nawigo nalabe. <sup>24</sup> Ina lalu, I karulapeore kogodago i mo ko holene mbirale mbira agigo ibulobada, nalabe. <sup>25</sup> Wali agalime bayale kangí ko ibulebirago mo embeda ho haga. Ani bialu kongi

\* **11:16:** Agali maru mandabi hearume bi hobane ogoni laboha ngago mbuga ogoniha abale nawinigo agali mendeme mani gilibu aribia hene bada, laya. ☆ **11:18:** Iba 49.10, Lg 12.16-21



howa bayale ala hayago mitangi bu dai nabiaga. <sup>26</sup> Heneneore Anduane Homogohanda wali agalihondo yolo mulenego erekui nabioire ndobe. Wali agali tini homaga birangi Anduane Homogohanda mana tinime bialu hayagonaga yolo mulene winigo migi bulebira. <sup>27</sup> Wali agali tiha mo ko holene ibu ngagola mbirale bayale damene ngago abaleore embeda hai hagaya. Wali agali mbirago homaragola tigua bialu hagadago panaga wiai haga. <sup>28</sup> Wali agali mbirago nahome kangi ibunaga mini yaraga holene nawigo mini yaraga nahabe. Tinaga waneigini kago baya hangu lawai halu howa aba aiya tininaga mana ogobioireda lo manda biai holebere.

*Ínaga nenege karu baya hangu dabo hondolene ngago ogo*

<sup>29</sup> Wali agali tara tara bu karume tinaga ohaga boga gibi bidagome í mo hondo holigo í andagaha wali agali ta nabi ibai hadaba loleni nalabe. <sup>30</sup> Wali agali mine haga uruni ti wali agalime mbirale ega henene ndo ega henene bedago mo hondo holenaga berelaga ka. Tinaga miniha oholene ogonibiore ka. Tigua ohowa í pilabelo hondo haga ka. <sup>31</sup> Tigua biabe bayale ína biniru mo beregedalu biabe bia ko haya lole ka. Mana bayale biaga ngeru tigua mo ko howa te ko ngaru lalu holebira. <sup>32</sup> Ira dene emene mbirame ira datimbu haga ndobe. Anidagua dege wali agali mana ko biaga bu kagome í homolene ngagoria pialu homabelo mo hondo haga ka. <sup>33</sup> Wali agali ko biaga bu karume mbirale ngago damene mo ko hole dege manda biaga bu kago deme handalu mamage ho habe. Tigua íha mo taga holene ngago mo para haragola íha taga ho haabo holene mbira mo bade holigo hondowa holene nga. <sup>34</sup> Ína wali agali dindi taraha howa ibu hene karu í andaga haru piriyagua tigua í ko tara tara ngagoha haru poragola í mo luluya holebira. Ani biragola íni dameneru baba mandagi howa í dindi tara howa ibu hene mbira haradagua bulebere.

## 12

<sup>1</sup> Wali agali bu karu mo turu halu bayale bulene manda biriyagua nde wali agali ína ti biamogo bulene manda bu haridaruni tinaga mana agobi biagadabe hondole mo talebu handabe. Ani buwa ínaga biabe bayale beregonaga turu halu í kai loleberegó ani bibe. ✧  
<sup>2</sup> Wali agali tigabi bu karuhondo biriyagua nde tinime íhondo emena bolebira. Ani nabiyagua nde Anduane Homogo Daligaore kago ibugua í emena ngulebira. <sup>3</sup> Wali agali mana koha haabo haga kagoha howabi wali agali burupale yagibano bu karu biamogo nabiyagua karuha howabi mbirale bayalego mbira tagira naibaga ndobe. <sup>4</sup> Wali agali tigabi karu biamogo bialu mana ko biaga bu karu biamogo nabibe. <sup>5</sup> Wali agali ko mini nalene karu biamogo bialu, Wali agali ko biaga karu mbiralebi tomobi mulene nawigo namibe. Ani miriyagua í mo ko holene hariga handa walia holigo nami waholeneore nga. Ína tihondo mana bayale bini wiaguabi uruni ani bi lowa íhondo ko bule manda bu holebira. <sup>6</sup> Anduane Homogo Daligaore kagome wali agali mana ko biaga uruni baba keba taraore ho howa ibugua ti pani neló miaiore holebira ndobe. <sup>7</sup> Wali agali tigabi bu karuhondo bayale bulene ngadagua bialu wali agali mana ko biaga karu biamogo bulene nawigo nabibe.

<sup>8</sup> Horo bayalengi ínaga nenege bayale abogo ka lalu manda bibehego nabulebere. Anigo horo kongi ínaga waitigi bu karu ti hado naholebira. <sup>9</sup> Ínaga mbirale ngeru bayale ngangí waitigi karu tinaga bu miniha genda ho haga. Ínaga mbirale ngeru mo ko halu ereba hai harangi ínaga nenege bu hayarubi í wahalu piaí holebira. <sup>10</sup> Í waitigi karuhondo mini mbiraore wulene nawigo nabibe. Ibugua í mo ko halu mbirale hagua biagaléme gaba hagua biagadagua í mo ko ibuni helolebira. <sup>11</sup> Nenege ko uruni aléme ké howa tini mo dindiha halu íha bi gedaoreme ladebodebo bialu holebirago ainde wali agali uruniale bulene kagohondo mamage howa oha habe. Mana tinaga

ngago baya hangu handa walia hole hongo howa agalime ibawai dodohe ngago baya hangu domalu karia dodohe dege ngane de handagadagua tinaga mana ogonibidane hondolebere. <sup>12</sup> Tigua í bope halu ínaga henge ti muligo íni bedegoria mandagi haru biruleni na birabe. Ínaga biabe ti mo yu pu bagi holigo ai ínaga gi tigaha yagi naberelabe. Ainde bi ina larogoni heneneore leneda lalu tagira ibirangi handa walia halu manda bulebere. Ani birangi bi ina larugome ínaga gubaliniha nogoba harane hondolebere. <sup>13</sup> Wali agali mbirago ibu puya hinu karia puya ogonime ibuni hayiyagua nde ibu dara aiwa holebirabe. Mbiralí ibunime nogo gabua kagoha piyagua nde ibu dara aiwa holobadabe. <sup>14</sup> Anidagua dege wali agali mbirago ibu wali agali mana ko biaga bu karu baba hayaguabi tigua biabe ko biaga ngaruha handa handayaguabi nde tigua ibu dara naholebiraore.

<sup>15</sup> Ínaga waitigi karu tigua í baba tigi mbira hangu howa handalu karia í hariga mendeha yagi pole keria handayagua nde tigua í wahalu polebira. <sup>16</sup> Waitigi tinaga ne harigaha nde la debodebo bi baya lalu holebirago ai henene ndo tinaga miniha í uliha minu bape hole howa lalu holebira. Waitigi tinaga de pora dugu bialu ha holebiragoyu tigua í wene balu homelo lene hariga taya bialu holebira. <sup>17</sup> Mo ko holene genda timbuni mbira íha anda ibiyagua nde waitigi abaleore kaware íbu howa í biamogo bule hetingi howa hondo holebira. Anigo ibugua ínaga ge poregoha hana howa pilolene mbira mo ngelalu í mo pila holebira. <sup>18</sup> Ibu agali bu karuale ndo taraore mbira tagira íbu holebira. Ibugua ma tanda lalu wanganerere bialu gi habe balu íha gi dola howa mege taraore bialu holebira.\*

## 13

<sup>1</sup> Mundu kalaro ndobabi ngago í gime yidegola ínaga giha para haga bulebira. Anidagua dege wali agali mana ko biaga bu karu baba mandagi haga hariyagua nde íbi wali agali ko biaga uruni ale dege holebere. <sup>2</sup> Mbiralé ina yaraga holene gendabi ngago yaraga holene manda nabibe. Ani bialu wali agali í dindiha lowa daligaore howa muni mbiraleru ina ngego wu bolanguahe kago baba mandagi nahabe. Todobene be dindime wabini ngago todobene be ainime wabini ngagola mandagi ngeria dindime wabini biago pambu lolebirago mandagi nawibe. <sup>3</sup> Muni mbiralé dewawi homogo kagome mana lehe ngago bialu howa mana lehe biyagonaga bi nagalone mine howa bi ngago lalu holebira. Tigua wali agali yagibano karuhondo mana ko biyagua nde yagibano uruni tigua ko bini ndo ngagoyu ai tini genda yidago dambi halu tigua dege daraba lolene nga laga. <sup>4</sup> Homogo karume ínaga mbiralé ti hame layagua la nabi bame yamiaga. Ani bialu íha mbiralé tubagiho kegola ibugua í erembira ngulebira. <sup>5</sup> Íha muni mbiraleru yu hariyagua ibugua uruni mo hole bialu nai holobada manda nabi howa mo holebi nai ha bialu í heba mandagi holeberebi. <sup>6</sup> Ani howa íhondo ibu biamogo bia layagua henene ndo ke halu í mo hondo howa lolebira. Ani lowa ibugua íhondo bi bayaleore langialu lalu, Ina í mbiralé mbira biamogo bulene ngabe lalu hole holebira. <sup>7</sup> Ibugua ohowa í mo taga holenaga tomo dewa nabelo ngulebira. Anigo o bulubadagoni ínaga mbiralé ngeru nai holenaga ani bulebira. Ibugua halu kiru tebirubi ani dege bialu howa mani íhondo oba holebira. Ani bialu í lone ngola hayagua nde íha tawe mbiralé mbira hale halu manda bulene hame nalolebira. Ibunaga ma ema bima polebira.

<sup>8</sup> Tigua í mo hondo harago nahende howa í lulu mini nawi howa bialu keria íni mo taga holenego de hondo habe. <sup>9</sup> Agali haguane mbira kagome í olalu ibu layagua ibu hongo howa ibuore lelo emene hondo habe. <sup>10</sup> Ibugua í bo taliatagi holigo í abale polene nawi. Ani bialu ibugua í embeda holigo í kanduiaha nabirabe. <sup>11</sup> Agali uruni

\* **12:18:** Mbiralime hagua tanda lalu gi habe bolene ogoni mendeali kago hondo mege bialu ani biaga. Te ogoni aria maru Yobo 16.4 handabe. Iba Gana 22.7, 109.25 handalu Esegiele 25.6 handalu Nahumu 3.19 handabe. Ani bialu Madiu 27.39 ngago handaga bulene nga.

ale kago ínaga nenege mandagiore ibagabu holenebi libu te lo holenebi bayale kabe tobaho holenebi nahabe. Ani bialu bi dewaore ibu degeme lalu holebirago henene larabe toba nahabe. Ibugua bi te dewa lalu í abidabe hondole bahandalu bi lolebirago manda bu habe. Libu bi lalu oba harabigo ínaga mana abidabe hondolenaga biagago manda bulene nga.

<sup>12</sup> Mbirali ibugua te libuni hangu howa lenego wali agali hale helo lo yu ibaga bialu heagua ogoni ibu mendeali dara nahaga ka. <sup>13-14</sup> Ani biaga kagome í mo ko halubi garabaya helolenebi ibugua gi nahe howa tanabi bulenego biai holebira.\*

<sup>15</sup> Gabua tara tara bu karu ti dameneru baba mandagi haga kago ainde wali agali ti damene heba mandagi haga dege hene. <sup>16</sup> Mbirale ema bialu piaga bedaru tigua nde ti aria bedaru baba mandagi haga. Anidagua dege wali agali tiguabi nde tini ale dege dege mandagi haga. <sup>17</sup> Ai biango dudu irabuha hagane bu karume nde nogo sibi igini bu karu baba mandagi ibaga bu holobadabe. Anidagua dege wali agali ko biaga bu karu tibi nde wali agali ko nabiaga bayale karu heba mandagi ibaga bu naholebira. <sup>18</sup> Ai biango gabua irabuha haga kagome biango maru hinini andaga haga kago baba mandagi bayale holebirabe. Anidagua dege homogo kagome yagibano heba mini mo mbiraore howa mandagi naholebira. <sup>19</sup> Dindi ko wali agali nahaga iba dalu naibaga ngagoha dege timbuni laiono gabua kagome nogo dongi igini kago balu naga. Anidagua dege homogo bu karume yagibano bu karunaga mbirale ngaru nai haga ka. <sup>20</sup> Wali agali mine haga bu karunaga deni íni mo dindiha ho holenege koorene ko nga lo manda bu hagaya. Anidagua dege homogo bu karu tigua tinaga miniha yagibano bu karu ko galone nabulene ka lo manda bu haga ka. <sup>21</sup> Homogo karu pilabehe kagola ibu aria karume mo hongo ho helaga. Anigo yagibano karu pilaragola ti damene karume pilelo wahalu ti piaga. <sup>22</sup> Homogo kago piledagola wali agali dewaoreme ibu biamogo biaga. Ibugua ti baba ogoale bimiya lalu habo nalolene bi lo wiragola wali agali tigua bi ogoni karulapeda lo manda biaga. Anigo wali agali homogo ndo karu piledagola wali agalime ogonihondo keba halu lai lo miaga. Yagibano pilayagome bi bayale lamirago lelowa tiguabi ogoni hale nahaga. <sup>23</sup> Anigo ai homogome bi larangi wali agali tigua ema nabioire baya hangu hale ho howa tigua bi ogoni bayale duninida lagane ka. Anigo homogo ndo karume bi laragola ti hale nahe howa lalu, Ogoni í ai kebe laga ka. Ani bialu yagibano mbirago bi layagua wali agali tigua ge perege бага ka.

<sup>24</sup> Muni mbiraleru mana ko bulene ngagoha howa ndo mini wiagua ogoni ko ndo bayale nga. Anigo wali agali mana ko biaga bu karu tigua lalu, Wali agali yagibano holenege mana ko nga lagane ka. <sup>25</sup> Mini wali agaliha ngagome tini turu ho kema keba ho kema lalu tinaga wanakuime latagi haga ka. <sup>26</sup> Ai wali agali tinaga bu miniha dungulo heagua nde tinaga wanakuí bode wále holebira. Anigo tigua mini bayale wu karu latagi hole howa tinaga embone tandaga haga.

## 14

<sup>1</sup> Wali agalime tinaga bi ledagoha bi ko mbira nale heagua tini turubiore ka. Tinaga ko mitangi halu dara howa genda holene nawiore ka. <sup>2</sup> Heneneore wali agali uruni tigua ko bini mbira tinaga miniha wu howa ogonime tiha ko nga lalu latagi nahe heagua nde tigua bayale mbira mani ibulebirago ngola holene manga nahe maliaho holebira.

### *Muni mbiraleru handaya ho holene mana ngago ogo*

<sup>3</sup> Wali agali muni habura buwa mo do ho hagayagua nde muni ogoni bayale ndo nga. Muni mo doho hayagua nde muni ogonime tini biamogo agua bulubadabe.

<sup>4</sup> Wali agalime muni mo do howa tomo nolene ngaru yolo nabi heagua nde galone

\* **13:13-14:** Mbuga alatawe gilibu wini ngagoha bi marubi hobane ogoniha gili bu wini nga. Bi ogoni ogodagua gilibu wini nga. Ína bi uruni u paluwa hale hariyagua nde abale heyabe. Bibahendengi ína Anduane Homogo gubalini halu ibugua í mo karulape halu haabo helo bi lolene nga.

nabulene bameore mo doho holebira. Ani ngelo karia mani wali agali maru karu ti mo yuwa turu holebira. <sup>5</sup> Mbiralime ibu biamogo bulene mana bayale nabiaga hayagua ibugua mendeali ai kagohondo nde mana bayale agua bulubadabe. Ibuni turu holene emeneorebi mbira nayi holebira. <sup>6</sup> Wali agali tininaga tingi baya hangu handaya ho nahaga karu tiha mo ko timbuni holebira. Ai tinime mana ko biyagonaga pani nolene ogoni holebira. <sup>7</sup> Tigua wali agali mende kago biamogo biyagua nde bero lalu ndo embeda ho howa biamogo bulebira. Maniore howa mana ko tigua bialu kago panaga tagira polebira. <sup>8</sup> Wali agalime tinaga de bu yiho howa mendeali kago biamogo bialu mia nabi heagua nde mana ko leheore ogoni nga. Tigua ma ema bialu yagibano bu karu erembira mialu piyagua nde mana tiga nabi ogoni. <sup>9</sup> Wali agali uruniale bu karu tigua mbirale emene ngaru yule turu naholebira. Tiniha dimagoli holene ngagome ti mo mini burugula haga. <sup>10</sup> Wali agali urunibi biaga karume mberedi yolobu wia nabi howa ti andagaha tomo nolene nawi haga.

<sup>11</sup> Waneigini-o í karulape hariyagua nde íni baya hanguore handaya ho habe. Ani bialu loma bayale Anduane Homogo ibu hame laga ngaru loma bu yalu pu mibe. <sup>12</sup> Homa ibu hondo holenaga henge emene mo yadai nabiaga. Ani bialu í homeneru dindiha pobelo horo ogoangiore lalu tigua manda bu kago í manda nabi ke. <sup>13</sup> Í homa nabi kengi ínaga nenege bu karuhondo mana bayale bialu habe. Ani bialu ti mo turu halu mbirale bame mulene karulape hariyagua nde migi bialu habe. <sup>14</sup> Mali lulene horo wiagua í waho nahabe. Tomo nolene bayale wiagua waha nalabe. <sup>15</sup> Íni biabe bialu harigonaga yolo mo yarigo wali agali maru karuhondo tale bialu migi bulebe. Ani meregola ina erekui biabe bialu yolo mo mirigo mo yuwa tigua gadi taduru bilobe. <sup>16</sup> Ina mbirale ngeru wali agali migi bibe. Ani bialu maru nde í hondowa turu ho hole ngelabe. Irane homenerunaga dindi humbirini andaga ngagoha í turu holene mbira nawulebirago ani bibe. <sup>17</sup> Aga yariru wialu ko goba hagadagua wali agalibi ha dege bialu waheale haga. Anidagua biagadagoni bambaore mana lo winidagome lalu wali agali lenego homolene nga lalu bi lo wini ngagome homaga nga. <sup>18</sup> Heneneore wali agali ogonidagua buleneore winigo nga. Abale hene karu ti homaragola mani holene ho aribia haga nga. Ira yuni ala henego dogolope haragola yuni gahange lone andaho aribia haga ndobe. <sup>19</sup> Wali agali tigua wabini ngaru ko halu ereba hai hagane. Wali agalibi tinaga mbirale uruni ereba haradagua tinibi nde tinaga biabe uruni heba homaga wini nga.

## **Wali agali tigua Ngode Datagaliwabe mo tandaga holigo mana tigua bialu kago mamage howa bulene nga**

*(Be 14.20-23.27)*

*Wali agali mini gigabiwi karu ti turu ho holene nga ogo*

<sup>20</sup> Wali agali mini bayale taya bialu haabo howa bi bayale latagi haga karu ti turubiore ka. <sup>21</sup> Heneneore wali agalime mini gigabi wulene tene ngago manda bulenaga baya hangu taya bialu hayagua nde mini gigabi wulenenaga tene ngago handa walía howa ti turu ho holebira. <sup>22</sup> Wali agalime tia gabuaru taya hagadagua mini gigabi wulene ngago talialu ibilo baya hangu hariga doroge ngagoria yu holene nga. <sup>23</sup> Ibunaga windo ngagoha de handanda halu ibunaga panga haraba ngagoha hale wia howa hale holene nga. <sup>24</sup> Ibu andaga kago kawareni halo biralu anda gene maru ibu andaga kagoha wa gimbu bialu ibu andaga hai kagoha wa gimbu buwa <sup>25</sup> balai anda bu gimbu heledegola í birulene bayale mbira handa walía holebere. <sup>26</sup> Ira timbuni gene magane timbuni pu amunanabi kago andanaha halo birulene henge mo wibe. Ani mo wu bedegola ira gene magane urunime í waneiginiru yuladambi halu <sup>27</sup> ni tandagabi

✧ 14:20: Min 8.32-35

hongohe daragome dolino yuladambi halu gumba hai holebira. Ani beregola tí mini bayale wulenenaga hongo heba biruleberemi.

## 15

<sup>1</sup> Ainde ína Anduane Homogo gi howa ibu andaneha hariyagua nde ína mana tigabi bialu holebere. Ani bialu ína Anduane Homogonaga bi mana ngago baya hangu talialu hariyagua nde mini bayale wulene handa walia holebere. <sup>2</sup> Wali ajiya bedagome ti waneigini lone ngola hagadagua bialubi wandari mabuageme igiri ibu agalini holene biago ngola hagadagua bialubi mini gigabi wulene ibugua í abaleore ibu lalu haga nga. <sup>3</sup> Ani poregola mini gigabi wulene ibugua manda bayale tomo ale ngialu mini bayale iba nolene gagahe ale ngiagane nga. <sup>4</sup> Í pilolino ibugua baya hangu haru haga ka. Íha taga holene ngaru anda ibulino ibugua baya hangu haru holebira. <sup>5</sup> Wali agali íni damene bu karu ti dege dombeneha í keria mini gigabi wulene ibugua í mini lene mbirago helolebira. Ani bialu wali agali ibu ngoai ho kagoria ína bi bayale tigabi ngago latagi habelo mini gigabi wulene ibugua í lamogo bulebira. <sup>6</sup> Í turu halu turu holene yu howa ínaga mini timbuniore mini lene mbirago holebere.

<sup>7</sup> Wali agali lulu bu karume mini bayale ogoni taya nabulebira. Ani bialu wali agali mana ko biaga bu karume mini gigabi wulene nahondolebira. <sup>8-9</sup> Mini gigabi wulene ibu wali agali mine haga karuha kaware nahaga. Wali agali ke haga bu karume ibu mitangi naholebira. Mini gigabi wulenehondo wali agali mana ko biaga bu karume bi bayale lamiyagua ogoni henene ndo lehe lolebira. Tigua mini gigabi wulene mo turu holene bi lelonaga Anduane Homogohanda tinaga ne hambuni mo wia nahaga ka. <sup>10</sup> Anigo wali agali mini gigabiwi bu karuha dege bi anidagua layagua ogoni karulapego irane Anduane Homogo ibunime bi ogoni tinaga ne hambuni mo wia haragola lolebira.

### *Wali agali tini hameme mbirale bero lalu biaga lenego ogo*

<sup>11</sup> Anduane Homogo Ngode Datagaliwabehanda mbirale ibu hame naledago nabiaga kago ai wali agalime lalu Anduane Homogohanda i mohondo haya lolene nakarulape.✧ <sup>12</sup> Wali agalime mana ko ngago bilo Anduane Homogohanda mo bia nahagago ai Anduane Homogohanda í mo luluya haya lolene nawigo nalabe. <sup>13</sup> Anduane Homogohanda wali agali mana ko bialu kagonaga tandaga timbuni haga kagola wali agali ibuni andaneha haga bu karu tiguabi mana ko bulene hame nalolebira. <sup>14</sup> Bambaore Anduane Homogohanda wali agalila wabini. Ani wabu helowa ibugua libuhondo mbirale bibahende ko bayalela libuni miniha mo tale bilo mo tale bulene hongo libuhondo mini. <sup>15</sup> Mbirali ibu hangu hangu hameme mana bayale talialu bulene ngago ainde heneneore ína Anduane Homogonaga bi mana lo ngago talialu bulene karulape. <sup>16</sup> Ira dedaorebi ibabi kirabali Anduane Homogohanda ínaga giha mo ya ho heledagoni ndobe. Ai ínime mo tale bialu í hame ledego mo yarene. <sup>17</sup> Anidagua dege holenebi homolenebi kirabali Anduane Homogo ibuni yu kago wali agali mbirago ibu mule hame laragoale mo mulebira. <sup>18</sup> Anduane Homogonaga manda timbuni daligaorene daliga nga. Anduane Homogo ibu bolangua hene daligaore kagolaibunaga deni mbirale mbira mo do hene nawiore ndobe. <sup>19</sup> Anduane Homogo ibunaga de mbirale wali agali tigua bialu kagoha ibagabu hai ka. Tigua mbirale bialu kago damene Anduane Homogo ibuni handai ho ka. <sup>20</sup> Wali agalime mana lehe bia ko holene ngarubi mana ko nabulene ngarubi bialu halimu lalu Anduane Homogohanda ti laminigo ndo bialu ka.

## 16

*Ngode Datagaliwabehanda wali agali mana ko biaga bu karu pani nelo mulebira lenego ogo*



1 Waneigini dewaore hono wiriyagua ogoninaga turu holeni nahabe. Ti mine hayagua nde tigua Anduane Homogonaga mana ngago talialu nabulebira. 2 Tigua Anduane Homogo kagohondo gi howa ibuni andaneha ha nabi heagua nde waneigini dewaore hono wiruda lowa ti turu nahabe. 3 Waneigini uruni tigua ina biabe erekuibi bialu ti handaya ho harigonaga mani nde tigua aribia halu i handaya ho holobada lo manda nabibe. Heneneore waneigini mine haga daosini mbira (1,000) kagoha bayale mbira hangu holebira. Ainde agali mbira ibu waneigini dewaore howa bibahendeoreme Anduane Homogonaga bi mana ngago hale nahaga heagua nde agali ogoni ibu waneigini hono wianabi heangi homedale nde karulape.

4 Wali agaliyaguabi mini gigabi mbira heagua nde tinaga dindi ngagobi bayale dege wiaga. Anigo wali agali dewame mana ngago talia nabiyagua nde dindi mo ko haiore hagane nga. 5 Mbirale uruni dewaore biyane ininaga deme handaga biru. Ani bialu dewaorebi ani biya laga biyane hale haru. 6 Wali agali Anduane Homogonaga bi mana hale nahaga bu hearuha ibuninaga tandaga holene ira hungualego tiha tagira pugu biagaya.\* 7 Bamba wali agali hongohe hearume Anduane Homogo bolangua hole manda bialu hearu ibugua nde ti dara nahene.† 8 Anduane Homogohanda wali agali Lode daluha haga hearuhondo keba timbuniore hene. Tigua mine howa mo ko holene wiaru dewaore bialu heagola ibugua ti dara naheore hene. 9 Anduane Homogohanda wali agali Kenana dindiha dindi anduane bu hearu ti ko buleneme mo ko hai hene heagola ibugua ti dara nahe bo taliatagi hai hene.‡ 10 Ani bialu ibugua wali agali daosini dege handari waragaria (600,000) dindi ko wali agali nahaga iba dalu naibaga wiagoha pialu hearu dara nahene. Tigua ibunaga bi mana lo wiaga mo wahayagola anidagua bini.† 11 Ani bialu wali agaliyaguabi mine haga mbira heagua ogoni ibubi pani nalu ibuha mo ko holene ngola ha dege bulebira. Ani bulebirago irane Anduane Homogo ibu dara holene irane nawini dege dara haga kagoyu ibugua kebabi haga dege ka. Ibugua dara halu keba timbunibi ha dege biaga ka. 12 Ibunaga dara holene timbuni ibalu ibunaga kebabi timbuni dege haga. Ani bialu wali agali tinime bialu hayadadagua manani howa mo tale bigi bulebira. 13 Wali agali mana ko biaga karu ti mbirale mo page buwa yu haga bidaru tigua mbirale uruni yalu ibida yopialu polene hariga nawiore ka. Ani bialu wali agali bayale bu karu tiguabi nde tinaga yolo bayale mani mulene ngago mulenaga maliaho hole manga habe naheore. 14-16 Yolo bayaleaore dara holene irane nawini dara hagane ngagoha howa tagira ibaga nga. Wali agali tinaga yolo tinaga mini timbuni mini lene holene biabe tinime bialu henedago karulape mo yu holebira.‡

17 Ina ogodagua lalu, I Anduane Homogonaga deni hado kogodago ainde mbirali dahuliya andagaha kagome inaga miniha ngogo hendedabe. Wali agali dewa dege bu karu dombeneha i kogo baya hangu aiwa hendedanebe. Anduane Homogohanda mbirale timbuni wabini ngaru dege dombeneha i imaru aidanebe. 18 Anduane Homogohanda godi lole ibirangi dindibi haribi dahuliya andagabi dindi andaneha iba timbuni pedarubi bibahende duru lalu ema biaiore holebira. 19 Anduane Homogo ibu ibalu dindiha de handadali haragola hari timbuni wedarubi dindinaga hongo irane

\* **16:6:** Te ogoniale mbira Kora halu ibu damene bu heagoha tagira ibini nga. Te ogoninaga mbuga mini Dagalene ngagoha 6.33 handalu mbuga mini Iba Gana ngagoha 78.21-22 ngago handabe. † **16:7:** Pig 6.4, SMG 14.6 ‡ **16:9:** Har 23.23-33, 33.2, Man 7.1, SMG 12.3-7 † **16:10:** Be ogoninaga te mbuga mini Haru Tagira Penego ngagoha 12.37 handalu Dagalene 11.21 ngago hondolene nga. Wali agali daga ogonidagua dindi ko wali agali nahaga iba dalu naibaga wiagoha homai halu Kenana dindi gahange mule wiyagoria anda naibini. Te maru Haru Tagira Penego 14.20-23 ngago hondolene nga. ‡ **16:14-16:** Mbuga alatawe ngagoha bi marubi hobane ogoniha gilibu winigo nga. Bi ogoni ogodagua leda. Anduane Homogohanda Iyibi dindiha kini heagonaga mini ndibulo heleagola kini ibu mbirale mbira manda nabiore hene. Ai wali agali dindi bibahende bu hearume Anduane Homogonaga hongo timbuni ogonibi winida lo hendelo walia hai hene. Anduane Homogohanda wa holenebi aruma holenebi tihondo miaga kago irane ibugua ti dara holene irane nawini dara haga kago manda biai helonaga ani biaga ka, lene, leda.

ngarubi mogo lalu gi howa ema biai holebira. <sup>20</sup> Anigo wali agalibi mbirame ogoni bulebirago mitangi nabioire ka. Anduane Homogohanda biaga ngago mitangi ho haga mbirali ai kanebe. <sup>21</sup> Puyabu hongohe puloyu porago ogobida lalu wali agalime handa nabiaga ngadagua Anduane Homogonaga biabe bulenebi dewaore ogonibi handabe naheore nga. <sup>22</sup> Godi tigabiore lagane Anduane Homogonaga ngago ogodagua nga lalu mbirali aiwa latagi holebirabe. Ani bialu Anduane Homogonaga godi amura kaundiaha wiarua lalu aiwa maliaho holeberemibe, lalu bi ogonidagua lolene nawi. <sup>23</sup> Ai wali agali manda nabi mini nawi bu karume anidagua manda biaga ka. Heneneore wali agali lulu howa mbirale bia ko halu bi la ko halu haga karu tigua anidagua manda bu haga ka.

*Ngode Datagaliwabehanda mini gigabi wulene howa mbirale bibahende ngaru wabinigo ogo*

<sup>24</sup> Waneigini-o hale baya hangu mia howa ina bi larogo hale halu manda bu yalimu. <sup>25</sup> Ina inaga manda bulene bayaleore ngaru langialu ti baya hanguore lawai holebero.

<sup>26</sup> Anduane Homogohanda mbirale bambaore bialu heneyaru ibuninaga minime hangu ogodagua bule wini lalu bulene wiago biai hene. Ibugua mbirale mbira wabule howa ogoni ibu ogoriaore helobi ngelobi waberogoni lo manda ala bu bambaho ngelowa wabigi bini.

<sup>27</sup> Ibugua bibahendenaga tigabi bayaleorebi wiabo howa biabe bialu haabo helo mo tale bigi bialu tini holene wiagoria helaga bini. Gari lolenebi manga holenebi tiha ngola naheore howa tinaga biabe manga halu wanahagaore ka.

<sup>28</sup> Bibahendeore tini daluha holene wiyadagoria haga haga bida. Ani bialu uruni ti mbirago ibugua Anduane Homogonaga bi mo wanahaga.

<sup>29</sup> Ani bialu mani Anduane Homogo ibugua dindi bibahende ha handa amunana biai halu dindi bibahende ha ibunaga mbirale wiaru degeme wu tolai helene.

<sup>30</sup> Anduane Homogo ibugua dindi bibahende ha mbirale bayaleru wu tolai helenego ainde mani mbirale uruni homalu lone dindi hai holebira.

## 17

<sup>1</sup> Ngode Datagaliwabehanda wali agali dindini wabu helowa mani lone dindi helene.✧

<sup>2</sup> Tinaga dindini holene hengebi horobi emene tigi mbira hanguni helo mo mini. Ani bialu henge emene tubagi ogoriani howa mbirale ibugua wabini dindini ngaru bibahende handaya ho howa haru helo ani helene.

<sup>3</sup> Mbirale uruninaga hongo gibiore wia halu wali agali ibunaga bigiya ale helo helene.

<sup>4-5</sup> Wali agalime ema bialu dindini biru karubi ega bedarubi haru howa handaya ho hai helo ani helene. Ani helenegome ema bialu piaga bibahendeme wali agali handalu tigua gi hai haga beda.\*

<sup>6</sup> Wali agali tinaga de halu hale halu hege helalu mini wialu manda wialu buwa mbirale ko bayalela ngaru mo tale bilo mini.

<sup>7</sup> Anidagua binigome mini mandala tara tara wali agaliha wu toleda. Anidagua bidagome wali agali tigua mbirale ko ogo nga bayale ogo nga lalu mo tale bulebira.✧

<sup>8-9</sup> Ani bialu tigua Anduane Homogonaga biabe timbuniore bini ngago damene bibahende handa walua helo ibugua wa holene wali agaliha mo wia hene.†

✧ **17:1:** Pig 1.26-28, 2.7 \* **17:4-5:** Hobane ogoniha bi maru mbuga alaore wini ngagoria gili bu winigo nga. Bi ogoni ogodagua leda. Mbirale ema bialu piaga bedaru tinaga biabe duria mo minigo yu beda. Anigo Anduane Homogo ibugua wali agalihondo kira lone mo tago halu mia dege bini. Wali agalihondo waragane mini wulene mo mialu kane wali agali ti bi lagane howa Anduane Homogohanda biabe bini ngaru latagi haga bialu helonaga bi mo mini. ✧ **17:7:** Pig 2.17 † **17:8-9:** Hobane ogoniha bi maru mbuga alatawe gilibu wini ngagoha nga. Bi ogoni ogodagua leda. Ani bialu tigua mbirale urunihondo turu ho haabo helo helene, leda.

<sup>10</sup> Ai wali agali tigua ogodagua lolebira. Anduane Homogonaga mini baya burugule-ore ka, lolebira. Ani laragola wali agali maru bu karume biabe ibugua binidaru manda bilonaga ani lolebira.

<sup>11</sup> Wali agali tiha holene mo yu helonaga Anduane Homogohanda tiha manda bayale bulenebi ibunaga bi manabi tihondo mini.

<sup>12</sup> Anduane Homogohanda ti baba habo nalolene bi wiabo helo lo wialu ibunaga mini wiago wali agalihondo mo walia halu bini.‡

<sup>13</sup> Tinaga deme Anduane Homogo handalu haleme ibunaga bi hongo howa layago hale hene.

<sup>14</sup> Ti wali agali mana ko biaga bu karu baba mandagi nahalimu lalu Anduane Homogohanda lawai hayago hale halu wali agali tini damene bu karu biamogo bialu halimu layagobi ti hale hai hene.

<sup>15-18</sup> Anduane Homogohanda mana iname bialu kamago manda biai kagola ibunaga deni mbirale mbira wiado naheore.§

Anduane Homogohanda hameigini mbira mbira kadagua tinaga agali haru bamba holene haguane dabo helaga bida. Anigo Isaraele ti ibuninaga wali agaliore ka.\*\*

<sup>19</sup> Biabe iname bialu kemago dame bibahendeore hona ni ale howa wáleore bere-mali. Ani beremagola Anduane Homogonaga deme biabe bialu kemaru bibahendeore handai haga ka. <sup>20-21</sup> Mbirale iname bi ko henebi mana ko bialu kemarubi ibunaga deni do naheore.Ibu manda biai ho ka.†† <sup>22</sup> Wali agalime dara halu bame biamogo bulene biabe bialu heagua nde Anduane Homogohanda mana ogoni ale birago turu timbuniore yari bayaleru hondowa turu hagamaga turu haga ka. Ani bialu tinaga biabe bayale ogoni mitangi biaabo ho haga ka. <sup>23</sup> Anigo wali agali mana ko biaga bu karu Anduane Homogohanda ti pani nelo mialu mo ko hai holebira. Mana konaga yolo ko ngagome tini nogoba holebira. <sup>24</sup> Anigo wali agali tigua ko biaga ngago wahalu mini beregedayagua nde Anduane Homogohanda ibuni kagoha kaware ibulene karulape lolebira. Ani bialu ibugua wali agali hongo nahe karu gini yalu piaga ka.

### *Wali agalihondo mini beregedadaba lenego ogo*

<sup>25</sup> Mana ko bialu kemiru wahai halu Anduane Homogo ibuni karia dai biai halimu. Ibuninaga deni howa ibuhondo bi lalu ko birimiru wahai halimu.☆ <sup>26</sup> Mana ko ngaru erembira mialu mana lehe nakarulape ale ngaru hogorale bialu Anduane Homogo karia dai bulene nga. <sup>27</sup> Wali agali homa nabi karu tigua Anduane Homogo Daligaore kagonaga mini yaraga halu holebira. Anigo ainde homeneru dalu humbirini andaga ngagoha howa turu halu iba ganaru lalu holebadago aibe.☆ <sup>28</sup> Wali agali homayaru lone ho dai bule ndoore homayagoni. Ani biyagome tigua lone dai bialu Anduane Homogonaga mini yaraga holene nawiore. Wali agali homa nabi dindini hongohe karu tigua dege Anduane Homogohondo kaj lalu holebira. <sup>29</sup> Heneneore Anduane Homogohanda wali agali dara timbuniore howa wali agali mini beregedalu dai biragonaga ko biyaru

‡ **17:12:** Habo nalolene bi lo winidagoni bamba Anduane Homogohanda Isaraele wali agali baba hari Sainai heagoria howa lo winiya leda. Te ogoninaga mbuga mini Haru Tagira Penego ngagonaga bi 19.16–24.18 ngagobi de hondolene nga. § **17:15-18:** mbira dunini 17.15-18 ogoni leda. Hobane ogoniha bi mbira mbuga alatawe gilibu wini ngagome bi marubi lo wia dege bida. Bi ogoni ogodagua leda. Ina waneigini gali hemangi howa mana ko wiago talialu bialu hene kema. Ani bini kemagome mani lone beregedalu mana bayale biada bibe nahe kema. Dindi tara tara ngaru bibahendehabi anidege nga, lalu gilibu winigo nga. \*\* **17:15-18:** mende hobane ogoniha dege leda 17.15–18. Mbuga alatawe gili bini ngagoha mendebi hobane ogoniha gili bu nga. Bi ogoni ogodagua leda. Ogoni ibu Anduane Homogo igini wahene kago ai Anduane Homogo ibunime kango yu howa ibu balu mo tiga bialu haga ka. Anduane Homogohanda ibu gubalini timbuniore ho howa horo mbiru hangubi ibu wanahagaore ka, lalu gilibu wini nga. †† **17:20-21:** Hobane ogoniha bi maru mbuga alatawe ngagoha gilibu winigo nga. Bi ogoni ogodagua leda. Anigo Anduane Homogo ibu keba abale tongolope nahaga howa ibunaga biabe ngaru ibuni manda biaiho ka. Ani bialu ibugua ina yope howa bame nahelaga ka. Ibugua ina dara halu haabo haga ka. ☆ **17:25:** Yar 3.12 ☆ **17:27:** Iba 6.5, Ais 38.18, Bar 2.17-18

domo wahai haga ka. <sup>30</sup> Anigo wali agali ti tara mbirale ka. Ti dindi ogoria haabo howa Anduane Homogonaga mini yaraga halu haabo naholebira. <sup>31</sup> Nime wá timbuniore haganegoyu arumabi haga dege nga. Anigo wali agali tigua arumanaga mana ngago dege hame lo haabo haga ka. <sup>32</sup> Anduane Homogonaga hongome mbirale hongohe hari daligaha ngarunaga hongo timbuni ngago bolangua ho ka. Ai wali agali galone nahe bame dindi himu abalu ngaruale dege bu kagoni ndobe.

## 18

### *Ngode Datagaliwabe ibu Anduane Homogoore kago ogo*

<sup>1</sup> Anduane Homogo ibu haluhe haabo kagome mbirale bibahende karubi ngarubi ibugua wabiai hene. <sup>2-3</sup> Ani bialu mana bayale tigabi ngago talialu haga ibu hanguore ka. Mbirali ibugua bolangua hole howa ibula pugupugu biaga mbira naheore.\* <sup>4</sup> Ibugua biabe biaga ngago damene ogodagua lalu latagi habehe ai kabe. Ani bialu mbirale bibahende ibugua wabini ngaru bibahendenaga tene handa walia habehe ai kabe. <sup>5</sup> Anduane Homogonaga hongo gibi ngago ogobiore ka lolenaga magi manda bule mida yuwa manda bibehe mbirali ai kabe. Ani bialu ibugua dara holene henge nawini dara howa bialu haga ngago damene daga lolene karulape ai kabe. <sup>6</sup> Ainde Anduane Homogo ibugua biabe bini ngagobi mendealime bope holenebi bu bolangua holene mbirali naheore Anduane Homogo ibugua biabe bini ngago damene bibahende wali agali mbiragome baya hangu goaru handabe naheore nga. <sup>7</sup> Wali agalime mitangi bialu tigua daga lai harima layagua nde tigua daga lai nahe wene pigane daga lalu ka. Daga lamaro bule biragoha tinaga de mborere bulebirago daraba.

<sup>8</sup> Wali agali bu karuru agilego kabe. Ani bialu tinaga biabe agigo biaga kabe. Wali agali mo ko holene agigo wialu biamogo bulene agile ngabe. <sup>9</sup> Wali agali dindini mali handari mbira (100) hayagua nde ogoni ibu mali luore hayabada. <sup>10</sup> Anigo tinaga mali ogoni iba solowara timbuni bedagonaga emene gibuni angeha bedagobi hangu halu tini iba angeni iba mu ngagobi dege nga. Ainde haabobo holenenaga lu mida manda beregola tinaga mali lu ndoni bame nagalone holebira. <sup>11</sup> Ani ngagola Anduane Homogohanda ibunaga dara holene dewaore odope halu ti baba hendore dege haga ka. <sup>12</sup> Ibugua ti de handalu mo ko holene timbuni mbirame tiha anda ibulubada lo manda bini. Ani biago manda bialu Anduane Homogohanda mana ko bini wiaru bu yi halu mo wahai hene. <sup>13</sup> Wali agalime tini damene bu karu dara haga. Anigo Anduane Homogohanda wali agali bibahende dara hai haga ka. Ibugua wali agalihondo lai lalu ti mo tiga bialu baya hangu lawai haga ka. Ani bialu nogo sibi haru hagame nogo sibiru haru ibagadagua ibugua wali agali haru dai biaga ka. <sup>14</sup> Tigua ibunaga mana lawai harago talialu bialu howa ibunaga bi mana baya hangu taluwa bialu holeore lowa hongo howa bialu karu dara timbuni ho haga ka.

### *Burupale kago hondowa biamogo bulene ngago ogo*

<sup>15</sup> Waneigini-o bi keba howa lolene ngarume inaga biabe bulene bayale ngaru mo ko holeni hondowa habe. Ani bialu wali agali mbira kagohondo biamogo bialu howa ibu mo taga halu bi mbira loleni nalabe. <sup>16</sup> Mbiragoha baya gombahe ngago ibu ni dedagome poboyogo bu ngaligo bolanguahe ngagobi dege bi bayale lolene ngagome mbirale mendeali kago biamogo bialu mulene ngago bolangua hene nga. <sup>17</sup> Heneneore bi bayale lolene ogoniale baya mbirale bame biamogo bialu mendeali mulenenego bolangua heneore nga ndobe. Anigo wali agalime dara holene mo walia halu miragome

\* **18:2-3:** Hobane ogoha mbuga alatawe gilibu wini ngagoha bi marubi gilibu wini nga. Bi ogoni ogodagua leda. Bibahendeore ibunaga gime mo tiga bialu haabo kagola bibahendeme ibuninaga bi hale hai haga. Ibu kini howa ibugua bibahende handaya ho hai haga ka. Anduane Homogo ibugua mbirale bibahendeore wali agalinaga ogo ibuninaga ogo lalu mo dabaki ho haga ka.

ogoni labo kirabali miagaya. <sup>18</sup>Wali agali lulu bu karume dara nahe lai lo miagaya. Wali agali mendeali kagohondo biamogo bialu mbirale bame mia nabiağa karume mendeali kago mo turu holene ti ha nawi ka.

*Í holenenaga mana biagadago baya mitangi bialu mo tale bulene ngago ogo*

<sup>19</sup>Ína bi nagalone ngaru bameore ona lopaya bialu holigo mendealiha howa manda ala mo yabe. İha warago bolene ngaru anda ibuligo ínaga tingini baya hangu handaya ho habe. <sup>20</sup>Ainde Anduane Homogohanda í godi lolene ngagoria íbu helowa mana ko birida loligo mana ína berego damene mamage howa bayale bulene ngago bialu habe. Godi lolene ngangı ko birida nalelo mana bayale ayu ogoni howa bialu habe. <sup>21</sup>Warago bolene ngagome í ela holigo íni mo dindiha ho habe. Mana ko mbira biriyagua abaleore mini beregedabe. <sup>22</sup>Anduane Homogohondo ogoale mbira bule lalu bi lo wirigo tigabi bule kego mo habo lolene mbira ibu wuligo baya hangu de hondowa mamage ho habe. Ani bialu homa abale íha ibalu bi lo wirigo mo habo loligo bule dege lowa lu ho wanahabe. <sup>23</sup>Miniha tale ala buwa mbirale buleore lalu bi lo wulene karulape nga. İna bule lalu bi lo wirigo nabi wahalu poregola Anduane Homogonaga keba holene ngago mo timbuniore holigo manda bibe. <sup>24</sup>Baya hangu manda ala bia handa. İni homarengi Anduane Homogohanda íhondo keba ho helo hame lo kebe. Ibugua íla miniha tandaga timbuni halu í erembira ngilo hame ledebe. <sup>25</sup>Tomo dewa ngelowa nalu kengi mbiru íni tomo nawi harigo mitangi bibe. Muni mbiraleru dewaore wu kengi abale yagibano harigo mitangi bibe. <sup>26</sup>İnaga mbirale wu keruni horo mbiru hanguni mo tara halu iriari biaga nga. Anduane Homogohanda ani bilo hame layagua iriari bulene ogoni abaleore anda ibulebira. <sup>27</sup>İha mini gigabi wu keyagua nde mbirale ínime bialu keru mamage howa bialu habe. Wali agali marume mana ko bialu heagua nde tigua bialu kago í talima poligo hondowa hongo howa de hondo habe. <sup>28</sup>Wali agali manda bayalewi karume wali agali mini gigabiwi ogo ibuore kagoda lalu abale handa walia haga. Ani bialu mo turu holene bi abale laede haga. <sup>29</sup>Ani bialu tigua bi bayale í lawai harago baya hangu mo yai hariyagua íbi nde mini dingi dangiale dege mbira holebere. Ani howa ínabi wali agali maru karu lawai habehe dege holebere.

*İnaga hame ngego baya hangu haru holene nga lenego ogo*

<sup>30</sup>İninaga miniha hame ko ngago natalibe. İnime hame uruni baya hangu haru hai habe. <sup>31</sup>İnaga hame ko urunime í haru helo hariyagua waitigi bu karume í hondowa ti oba holebira. <sup>32</sup>İnaga hame ngego damene mo karulape lolenaga mbirale bayale ngaru yolobu wiai nahabe. İnaga muni ngeru bibahende bameore biba holeberego nabibe. <sup>33</sup>Í muni nawi hariyagua nde í tomo timbuni mbira dawalu nolenaga agali mende kagoha muni dano holene nahabe. Í mo yagibanoore holigo dano nahabe laro.

## 19

<sup>1</sup>Wali agali lulu iba dewa nalu lulu yaga bu karume mbirale bayale ngaru dewa nayulebira. Ani bialu wali agali mbirale emene ngago baya hangu handaya ho nahaga karu tinaga biabe bialu karu bayale naholebira. Ani ndo bibahendeore mo ko haiore holebira. <sup>2</sup>Wali bedarumebi lulu iba hongohe ngagomebi agali manda bayalewi kago mo luluyaho helolebira. Agali mbira ibu bayanda wali bedago nenege ho hayagua nde wali ogonime mana lehe tara tara ngago ibuhondo bialu holebira. <sup>3</sup>Mana ogonibi biragome ibu mo ko holebira. Ani bialu ibu homolebira ibunaga tingini homaliha ngagola himi ngoerume handaya ho birulebira.

<sup>4</sup>Wali agali mendeali kagonaga bi larago mo henene haga karu tinaga miniha tiga nabiore ka. Mana ko ína biriyagua nde íni mo ko holebere. <sup>5</sup>Mana ko bulene ngago



туру ho hariyagua nde Anduane Homogohanda í godini haru pu helowa mana ko birida lolebira.

*Bi larago haleho page buwa dibudibu nalabe ledago ogo*

<sup>6</sup> Bi larago hale ho kayu nabiaga hariyagua nde íha mo ko holene timbuni nawulebira. <sup>7</sup> Bi mbira larane hale hariyagua mendeali kagohondo dibudibu nalabe. Ani beregome í miniha mini dege dindi nahe holebere. <sup>8</sup> Ínaga nenege heaguabi waitigi heaguabi dibudibu lalu lamulene nawigo nalabe. Anigo bi ogonime í mana ko bulene ngagoha mo pila hayagua nde harugo latagi holene karulape nga. <sup>9</sup> Bi dibudibu hale howa mende kago lamiriyagua nde mbira kago ibu hale halu ína lalu kego de hondoligo ohowa labe. Handayagua nde í mo ko holene henge tagira ibilo hondo holebira. <sup>10</sup> Bi dibudibu mbira larane halu hariyagua íha halu bibahe helabe. Latagi bi nahabe. Bi ogoni latagi nahariyagua nde í mo ko holene nawulebirago hongo ho habe. <sup>11</sup> Walime gali taba honole tu haragola tandaga nalu biraga wini nga ndobe. Agali mini nawi lehe bu karu ti nde bi dibudibu hale hayagome tinaga miniha andanda biragola habe nahelo haga kago ndobe. <sup>12</sup> Bi ogonime ibunaga miniha bilina halu agali geni timu bilina hagagobi ho hagane ka.

<sup>13</sup> Wali agali mbiragome ínaga nenege biagome ogodagua laya lalu dibudibu íhondo langiyagua nde ínime puwa ibuhondo hale holene nga. Ani beregola bi ogoni henene ndo holebira. Anigo ainde ínaga nenege biagome bi ko leneyagua nde mani halu mende nalole lalu ibuni mini wiadai bulebira. <sup>14</sup> Bi dibudibu lalu bi laribe lalu ínaga damene kagohondo hale habe. Ibugua leneyagua nde ai lone halu mendengi naloliya lo manda bulebira. <sup>15</sup> Bi dibudibu wali agalime ína ogodagua lari laya lalu ínaga nenege biago ibunihondo hale habe Wali agalinaga bi dibudibu ogoniale henene ndo dewaore laga ngago. Ani naleyagua nde wali agalime bi dewa layago mo henene naholebere. <sup>16</sup> Wali agali dewaoreme mini nawi howa bi bame lo paya biaga ngago ndobe. Mbirali ogonidagua nabiaga ai kabe. <sup>17-19</sup> Ína í damene hayadagohondo ko larida lalu keba holeyagua nde ibunila bi ala labe. Ani lalu Anduane Homogo Daligaore kago ibunaga godi tigabi ngagome tiga bilo wahabe.\*

*Mbirali mini gigabiwi ai kabe lenego ogo*

<sup>20-21</sup> Wali agali Anduane Homogonaga bi hale halu talialu karu ti dege mini gigabiwi ka.† <sup>22</sup> Wali agalime mana ko tara tara ngaru bulene manda tara tara wu heagua manda urunime tini mini gigabi wilo biamogo nabulebira. Wali agali mana ko biaga karunaga mini ngago talialu holene bayale ndo. <sup>23</sup> Wali agali mini bayalewi howa ai mana ko bialu heagua nde wali agali ko orene ko ti kagoni ndobe. Ai wali agali mana lehe ngago bialu karu tiha mini tigabi nawiore ka. <sup>24</sup> Wali agali manda timbuni nawi howa ti Anduane Homogonaga bi hale halu heagua nde tigua mbirali manda timbuniwime Anduane Homogonaga bi mana pugualu karu bolangua hene ka. <sup>25</sup> Wali agali maru nde mini gigabiwi kago howa tinaga mana bialu kago ko biaga ka. Wali agali marume nde tini godi deni howa pora bialu polenaga bime baya hangu ladebodebo biaga ka.

\* **19:17-19:** Mbuga maru alatawe ngagoha bi maru hobane ogoniha gilibu wini nga. Bi ogoni ogodagua gilibu nga. Anduane Homogonaga bi ledago hale habe. Ani beregola ibugua í handaya ho holebira. Ani bialu íha mini bayale wiagua nde ibugua í gubalini holebira. Anduane Homogonaga bi mana lo wini ngaru baya hangu lo manda bu yabe. Ína baya hangu lo manda biriyagua nde íha holene mo yu holebere. Wali agali Anduane Homogonaga hame ngago talialu haga karu ti tomo bayale ngaru mialu hole turu timbuni haga ka. Tomo ogoni haabobo holene ira kagoha howa miaga nga, leda. † **19:20-21:** Mbuga maru alatawe ngagoha hobane ogoha bi maru gilibu wini wia dege bida. Bi ogoni ogodagua leda. Biabe bia hagane kagome ibunaga agali haguane kagonaga bi hale nahayagua nde ibunaga agali haguane kagome ibuhondo keba holebira. Agali biabe bia haga bi mo wahaga biago ibugua mini beregedayaguabi ibunaga agali haguane biago ibuha keba hayago ereba nahe haabo ho holebira, leda.

<sup>26</sup> Wali agali maru ko bu karume dara nahagaore ka. Tigua ke hangu haga ka. Tigua í mo hondo holene dege manda bida. <sup>27</sup> Tigua ma ema biragola ínaga bi larigo hale nahe kabe toba holebere. Íni baya hangu mamage nahe hariyagua nde tigua í mo hondo timbuni halu mo luluya holebira. <sup>28</sup> Tigua mana ko ayu nabi hayagua nde yawi ko bule taya bialu holebira. <sup>29</sup> Ína wali agali bu karu baya hangu mo tale bu handaya haga beregola ti ogobiore heneda lo panaga handa walía haga bulebere. Ai wali agali mbirago ngola haga bialu tiha mini gigabi ngabe nawidabe hondole baya hangu daba handaga bibe. <sup>30</sup> Wali agali mbirago ibu abidabe hondolene manda biriyagua nde ibugua yari mo karu ledarubi bi oba hararubi ibuni ibagabu karubi baya hangu mo tale bialu handabe.

## 20

<sup>1</sup> Ai wali agali mbira kagohondo keba halu lai lolene manda biriyagua nde ibu abiale kabe ala dabo handabe. Ani handaregola ibuhondo lai labe naheda lo manda biriyagua nde wahalu í bi nale waholene nga. <sup>2</sup> Ainde ínaga keba ogoni wia ho wiaabo holigo ayu ogoni abale la tagi holene karulape. <sup>3</sup> Ína bia ko hene ngago latagi hariyagua nde ínaga mini mo ko holene nawulebira. <sup>4</sup> Ínaga godi larego lo bolangua haga kago pani mialu bulene nawi. Í agalime wali mbirago ibugua í hame leaguabi nale bereaguabi harugo lowa agalime ibu dabu bule manda bu hagadagua habe. <sup>5</sup> Wali agali maru ti bi nale hondo haganego irane ti mini gigabiwime haga. Wali agali maru bi dewa lagimbu bialu hagago maru bu karume tihondo turu nahe haga ka. <sup>6</sup> Marume bi nale hagago tigua lolene mbira nawidagola haga. Marume bi nale hagago tigua henge bayale tigua bi labehe wilonaga hondo haga. <sup>7</sup> Wali agali mini gigabiwi karu tigua bi nale hondo howa tigua bi lolene henge ngagola tinaga bi latagi haga. Anigo lulu mini nawi karume kudaga bi lo paya bialu tinaga bi lolene henge nawini bame lo pebe bialu haga. <sup>8</sup> Agali bi dewa laabo halu nabulene wali agali mende kago bi lelo henge namiaga karu wali agalime handabe manga haga ka.

### *Mbirale wali agalinaga winigo abale iriari biai haga nga lenego ogo*

<sup>9</sup> Horo kongi wali agalime mbirale bayale ngaru mo yu halu horo bayalengi ko ngaru mo yu haga.

<sup>10</sup> Ína agali mbira biamogo beregola ibugua í yolo nabi polebira bada. Agali mende biamogo beregola ibugua í yolo halu kira bulebira bada.

<sup>11</sup> Agali mini lene timbuni kago mana agali damene maru karubi dege holebira. Ani bialu agali damene bame karu horo mbiru mini lene timbuni holebira.

<sup>12</sup> Ína muni emene mbira wahalu mbirale emene ngago bayalebe toba howa yolo bulebere. Anigo mani howa muni dewaore wahalu ogoniale dege yolo bulebere.

<sup>13</sup> Wali agalime tihondo bi bayalego hangu lamilo hame laga. Anigo wali agali lehe karume bi nagalone ngaru lalu ladebodebo biaga karu ti turu nahaga ka. <sup>14</sup> Wali agali mbirame mbirale mbira í mo turu halu bame ngiyagua nde ogonime í biamogo nabulebira. Ibunime íhondo mbirale ngerobe toba howa ngiragoyu ai ogoni bayale ndo nagalone dege nga. <sup>15</sup> Emene bame galoneale ndo ngago ngulebira. Ani bialu ibugua bi ko ngago lalu wali agalime de hendelo bi hongo howa huario lalu lama ibaga bulebira. Ayu dano helo mialu yawi lone mo yu dai bulebira. Wali agali mana urunibi biaga karu í hame nale ke bada. <sup>16</sup> Ibugua lalu, Ínaga nenege mbira naheore. Wali agali bu hearume ina bayale birugo ngiadaí nabiya. <sup>17</sup> Ti tomo nolene ina wiwago dege nalu howa mani tigua í mege biya, lolebira. Henene larogo wali agali bibahendeme ibu hondowa oba haabo haga ka.

### *Mendeali ibu bi larago hale howa tiga nabiaga ngago ogo*

<sup>18</sup> Í harigani pilariyagua nde í mo ko hene nga. Anigo ína ke howa mo ha halu te lariyagua í mo ko timbuni holene nga. Anidagua dege wali agali ko biaga bu karu mo ko holene abaleore ibulebira.

<sup>19</sup> Wali agali te laga galone nabulene karu te laragola wali agali bu karu ti hale holene manga halu pugu biagago irane te wali agali ti hale hole hame naledago laabo haragola ti manga haga ka. Anidagua dege wali agali tigua bi irane galone ogoale laro lo manda nabi howa bi lo pebe bialu karu manga holebere.

<sup>20</sup> Mbiralí bi la ko haga kagome bi bayale lalu heagua wali agali ti hale habe manga hai holebira. Hale habe manga hai holebirago irane ti bi ogoni hale hole manda nabi kago bame bi dege lopaya biragola tiha anda napolebira.

<sup>21</sup> Wali agali maru ti yagibano kagome tigua mana ko bulene henge nawiore ka. Tiha genda halu mini burugu lolene mbira nawi howa ti u baya hangu paluebira.

<sup>22</sup> Wali agali marume agali mana lehe biaga bu karu deni howa tini mo ko haga biagaya.

<sup>23</sup> Wali agali marume ti aria kagohondo bi ko lolene taga howa tigua mbirale mbira buleore lalu bi lo wiagaya. Anigo daraba. Tigua buleore lalu ti damenhondo bi lo wiyago bame bi dege lenedagola tinaga nenege biarume keba timbuni howa ti baba lone mo waitigi ho hagaya.

<sup>24</sup> Ke hagane mana wali agali tininaga mini heba haabo hagane nga. Anigo mana lehe bialu haabo haga karu tiha mana ogoni bialu haabo haga nga. <sup>25</sup> Wali agali bu karume maru mbirale page biaga karubi ke haabo haga karubi ti hame nalagaore. Mana kira ogoni biaga karu bibahende mo ko holene wulebira. <sup>26</sup> Wali agali ke haga karu tinaga mini wali agalime mo ko haragola ti bibahendengi taga ho haabo holebira.

<sup>27</sup> Wali agali mini gigabiwi karu tigua bi bayale dege laga kagome ti bayale holebira. Agali haguane bu karume wali agali urunibi kago turu haga ka. <sup>28</sup> Wali agali e baya hangu hingedago ibu tomo dewa nalu haga ndobe. Wali agali biabe bayale biaga kago agali haguane kagome ti turu ho haga. Haguane kagome wali agali uruni tigua ko emene bini ngago mitangi naholebira.

<sup>29</sup> Wali agali mini baya wi ha heneyaguabi mendeali kagome ibu mo turu halu mo gede howa mbirale bayale tara tara ngaru bame miyagua nde mini gigabiwi hayago ndo ibu mo luluya halu de kohe ale ibagabu helaga. Anidagua bidagola ai ibugua wali agali uruninaga hame ngago talima pialu maru karume ibuha mana lehe ngago mo tiga bule manda biragola tigua mo tiga bule karuni erembira mialu piaga ka.

<sup>30</sup> Mini bayale wulene wali agalime latagi nahe ngago wali agalime muni mbogoyiha ngelowa mo doho ngaligobi nga. Ani wuwa ibugua wali agali mbirago biamogo bulene henge nawiore bame wu wahene wulebira. <sup>31</sup> Ainde wali agalime tinaga lulu mini wu kago anidagua mo doho holene bayale. Tigua mini gigabi wulene ngago mo doho holene bayale ndo nga.

## 21

### *Mana ko ngaruha nahe ibida polene nga lenego ogo*

<sup>1</sup> Waneigini-o mana ko mbira biribe. Ai ko lone bulene nawigo ko nabibe. Ani bialu ko ala birigo domo wahabe lalu Anduane Homogohondo bi labe. <sup>2</sup> Puya ngagola handalu ibida piagadagua mana ko bulene ngago handalu ibida pobe. Ko ngagoria kaware piriayagua kome í hayulebira. Mana konaga ne laiononaga ne ale ka. Ani howa tigua wali agali hayu homa haga ka. <sup>3</sup> Anduane Homogonaga mana ngago puguayagua nde ibu tinginini dere ko tiwa ale bu kago ai dere ogoni dabi nahagane ale bu ka.

<sup>4</sup> Mbiralime wali agali maru karu mo gi halu mana lehe ngago biaede hayagua nde ibugua bayale ngago bibahende mo ko hai haga ka. Ani biaga ngago manda bialu wali

agalime mine holene mana ko ngago talialu heagua nde tininaga mbirale bayale ngago damene mo ko hai holebira.

<sup>5</sup> Yagibano bu karume Anduane Homogohondo bi larago ibuninaga haleha abale anda piaga. Ani anda porago hale halu Anduane Homogohanda ibunaga genda wiyadago abale mo tiga biaga.\*

<sup>6</sup> Wali agalime mbirali ibu mo tiga bule bi laragola ibugua abale keba tungu layagua nde ibu ko bulene hariga ngagoha pupe halu piaga. Ai wali agali Anduane Homogo gi ho haga karu ti mini beregedo haga ka.

<sup>7</sup> Wali agali dewaore bi larago damene bibahende hale ho bira biragonego ai wali agali manda bi kago tigua dege bi larago henene laragoda ke hara lalu abale mo tale biaga.

<sup>8</sup> Mbirali ibugua page munime anda biyagua nde ogoni ibu iba dalu ibalu toelo ngagoha e hiralu hagagobi ka.

<sup>9</sup> Wali agali mana ko biaga bu karume tini mo mogo biagago bame datani gabuni ngaligobi galone napole bame ngoai haga. Ira datani gabuni ogoriani dayagua abale do gidi lalu dai haga nga. <sup>10</sup> Mana ko biaga karu ti hariga bayale gundu uli nawi ngagoha piyaguabi maniore wali agali dewa pialu homagane gundu uli ngagoria pialu homolebira.

*Wali agali lulu ale bu karu ti mini gigabiwi karubi ndo ka lenego ogo*

<sup>11</sup> Wali agali Anduane Homogonaga bi mana hale halu bialu haga karume tininaga hame baya hangu haru haga ka. Ani bialu tini Anduane Homogo andaneha hayagua ti manda timbunibiore holebira. <sup>12</sup> Mandabi kago ibu manda timbuni mo tago howa manda bu holebira. Anigo wali agali dewame mandabi howa mende kago keba helo mo keba halu hagane ka. <sup>13</sup> Wali agali mini gigabiwi bu karunaga manda timbuniore iba li timbuni hongohe piagagobi holebira. Tinaga bi larago bayaore iba uliha dendebe gagahe nolene dugaho wiaga ngaligobi nga.

<sup>14</sup> Wali agali lulu ale mini nawi bu karunaga embone iba be pambu lene tibiniha diriwi ngaligobi ka. Emboneha manda emene hangubi mbira mo yabe naheore ka.

<sup>15</sup> Wali agali mandabi karu ti bi bayale mbira hale hayagua ti turu howa bi marubi latago haga. Anigo wali agali lulu mini nawi karume bi bayale hale hayagua nde ti hale habe manga howa erembira mialu piaga. <sup>16</sup> Kudaga bi bame lo paya paya biragome genda timbuni mbira wali agalime yu haga nga ndobe. Anigo bi bayale laragome wali agali mo turu haga. <sup>17</sup> Wali agali mo ngoai ho biruwa ti mbirali mandabi kagonaga bi hale holene hame lowa hale halu bi uruni baya hangu miniha mitangi bu haga.

<sup>18</sup> Wali agali lulu mini nawi bu karume lalu, Manda bulene henene ogoni anda ko kaligo ale nga, laga. Anigo wali agali bi ogoni laga kagonaga manda ngagome bi ko uruni latagi haga. <sup>19</sup> Wali agali mini nawi bu karu tinaga miniha manda bialu karia manda bulene bayale ogonime wali agali gi ge minu kabubu ngelaga nga lo manda biagaya.

<sup>20</sup> Wali agali lulu mini nawi uruni ale karume oba timbuni kuakua lalu holebira. Anigo mandabi kagome oba hendore holene ngadagua haga. <sup>21</sup> Agali mandabi karu tinaga miniha bi lawai harago yari baya tara ngolome wabini ngagobi gi ndola baya tara gi tigaha wiagagobi haga. <sup>22</sup> Wali agali mini nawi lulu urunialeme mendeali andagaha bame la nabi gialaanda haga. Anigo wali agali mendeali andagaha pialu biagane mana mandabi kago ibugua anda haneni hondo haga. <sup>23</sup> Wali agali mini gigabi nawi kagome harabani howa tamuha ma yulanda haga. <sup>24</sup> Wali agali ti ohowa bi lalu bedago i hado howa hale ho page bulene nawiore. Wali agali bayale kagome mana ogonibi bulene taga halu miniha genda haga.

<sup>25</sup> Wali agali kudaga karume bi mbiraorego dege laragola ainde wali agali miniwi karunaga bi larago bayale dendebiore laga. <sup>26</sup> Wali agali mini nawi karume tinaga mini

\* 21:5: Sir 35.17-19

ngago abale latagi haga. Ai wali agali mandabi karume tinaga miniha mo tale ala buwa latagi haga.

<sup>27</sup> Wali agali mana ko biaga bu karu tigua waitigihondo bi ko lagago bi ko laragome dai bialu tini nogoba haga.

<sup>28</sup> Ai tigua bi dibudibu lama ibaga biyagua nde bi ogoni dai bialu tini nogoba haga. Ai tinaga damene maru bu karumebi ti hame nalaga ka.

## 22

### *Wali agali lulu mangaheme biagago ogo*

<sup>1-2</sup> Wali agali mangahe bu karu ti ege toleni ti to ngagola wali agalime ngu hagagobi ka. Wali agalime handa nabi howa ege tole ogoni ela hayagua ti keba timbuni haga.

<sup>3</sup> Waneigini mbira mine halu haga heagua ogonime aba kago mo taga haga. Anigo ainde waneigini ogoni ibu wandariyagua nde aba ibu taga timbuniore haga. <sup>4</sup> Wanene bedago ibu bayale bereagua nde bialu agali polebirago ainde mine haga bereagua ibu aba kago genda mo mulebira. <sup>5</sup> Wanene bedago ibu mine haga bereagua nde ibu ababi ibu agalinibi mo taga haragola libugua wandaridago mo ko halu mo ngubia haga.

<sup>6</sup> Waneigini aba ibugua waneiginime ko mbira nabi karia bame keba hayagua ogoni bayale ndo, ko bira. Anidagua birago manane homa duguanda dara ho biruwa ai dawenda iba gana turu howa laradagua bulebira. Anigo abame waneigini mana lalu tibume bayagua karulape ogoni.

### *Wali agali mini nawi lulu ale bu karu lawai haregola manda nabulebira lenego ogo*

<sup>7</sup> Ina wali agali lulu mini nawi karu lawai hale manda biriyagua nde i agalime todobene be pambu lenego mo gimbubu dai biradagua mendeali paliahondo kago mo barila haradaguabi bulebere. <sup>8-10</sup> Heneneore mbirali de umu lalu palua ho bedago lawai haradagua bulebere. Erekuibi lawai kegola mini pu tara ho biruwa ihondo lone hale halu, i agi larebe lolebira.

<sup>11</sup> Wali agali homararu tigua ni kago lone de nahondolebirago manda bialu ti dara howa dugu bulene nga. Anidagua dege wali agali mbirale manda bibe nahe karu ti nde ogonibi dege manda bibe naheore kago dara halu dugu bulene nga. Wali agali homayaru ti ayu halo kago tinaga dara howa dugu dewa bulene nawi. Anigo wali agali mini nawi lulu bu karu tinaga holene ko darabiore kagonaga dara halu dugu bia holene nga. <sup>12</sup> Wali agali mbirago homaragola dara howa dugu bialu horo karu duguanda haramalidagua wiyago. Wali agali mini nawi lulu ale karuhondobi wali agali mine haga bu karubi dara holene nga.✧

<sup>13</sup> Ina wali agali mini nawi lulu ale karu baba bi te nale wahalu wali agali mbirale manda nabi karu bedaria polene nawigo. Iha mo ko holene anda ibuligo de handalu mamage ho habe. Ani hariyagua nde tigua ihondo bi ko larangi iha mo ko holene anda naibulebira. Ti helalu i pubagi halu poregola tinaga bi ko larago hale howa i manga nahe halu i bayale holebere. <sup>14</sup> Ege tole mini aeane tigi hope hene ngagonaga genda agileme bolangua holebirabe. Wali agali mini nawi lulu ogoni ale ti ka. <sup>15</sup> Iba mu ngagobi ibi ngago nuha hanaga bu ngela aeanebi ngela buwa yaraga ho handalu keria ti gendabi dege dege nga. Anigo wali agali mini nawi lulu bu karume genda timbuniore mo ngiaga nga.

<sup>16</sup> Ira kambu lene mbirago anda bialu anda haini bapara heagua nde dindi dumbidumbi birangi gialope naholebira. Anidagua dege wali agalime mana tigabi bialu holenenaga galone baya hangu lo manda bu heagua nde tiha ba hondolene anda ibirangi ti hongohe ogonibi holebira. <sup>17</sup> Wali agali mini gigabi wulene hongo howa yu haga karu ti agali irani bage giligili bayaru wabu helaga bini ngaligobi ka. <sup>18</sup> Hari



bare ngagoha agalime ira dibuwa hagira bidago puyabu timbuni pu larangi hongo nahe hagagobi dege wali agali mini gigabi nawi lulu bu karuni ti ogonibiore ka. Mo gi holene tiha anda ibirangi ti hongo ho habe naheore ka.

### *Nenege bu karume hagane ngago ogo*

<sup>19</sup> Wali agalinaga de nogoba hariyagua nde deiba abale ibaga nga. Ína bime wali agalinaga bu miniha nogoba hene lariyagua nde miniha ngago panaga tagira ibai helaga nga. <sup>20</sup> Ega bedagoha tole bariyagua nde egame gi halu ibida polebira. Anidagua dege ínaga nenegehondo nabini ngago biri lalu ke howa bime mo baede hariyagua nde ínaga nenege ibugua í wahalu pu waholebira. <sup>21</sup> Ainde ayu tibume ínaga nenege biago nogoba holebiryagua nde haru dege. Mani bime libu mo tiga bulene karulape nga. <sup>22</sup> Ínaga nenege lai lalu bi dewa lariyaguabi nde mani bi lalu libu mo tiga bialu gi tigani bulene hariga wiadege bida. Anigo ainde ínaga ibuhondo bi ko bialu hege lalu ibu mege bialu biriyaguabi ani bialu bi libuni hangu ohowa lenego ína latagi halubi ínaga ibu mo hondo halubi uruni alego biriyagua nde ínaga nenege ibugua í wahalu pu wahelo talia pelolebere.

<sup>23</sup> Ína ínaga nenege kebigo ibu mbirale dewa nawi tubagiho kebingi ibu wahalu pubagi ho howa ibu mbirale dewa wu kangi ibu heba mandagi turu ho nahabe. Ibu mani bayale kangi ibunaga mbirale ngago tubagi howa maru í mo yulene wulebirago ai ibu mbirale nawi ko kangi libu haru mandagi holene nga.

<sup>24</sup> Ira hibunaregola ngu haguala ala bialu ira mani daga. Anidagua dege wali agalime pigane keba ala howa mani wali agali mbirago homelo bo wahaga.

<sup>25</sup> Ínaga nenege mbira kago ínaga haru holene taga nahe handaya ho holebero. Ani bialu í ibunaga deni hado naholebero. <sup>26</sup> Anigo ai ínaga nenege ibugua bia ko hene ngagome íha mo ko holene ngago anda ibiragola wali agali maru bu karume hale hayagua nde tigua ibuhondo gi ho hai holebira.

### *Bi ko ngaru hogorale bulenaga Anduane Homogohondo bi lolene ngago ogo*

<sup>27</sup> Ainde ayu ínaga ne harigoha howa bi mbira la ko harogome iniha bi lolene ngago ínaga hegeme ini mo ko hene wuligo ai ínaga ne harigoha bi larogo haru habe lalu ínaga haru haga mbira kagohondo bi laro.

## 23

<sup>1</sup> Anduane Homogo-o íniore í Ababi ínaga Haguaneore kego í waholeni wanahabe. Ínínaga bi latagi harogome ini mo luluya halu mo pila holigo í wanahabe. <sup>2</sup> Mbirale gewa tibu yu kagome ínaga hame ngogo damene haru hai kagola mini gigabi wulene í lawai haragome í handaya ho helo ínaga bi laro. Ína mana ko berongi libugua í dara naholebira. Ani bialu ínaga ko bidogo handalu pubagi naholebira. <sup>3</sup> Anidagua biragola ínaga ko binibi mana lehe binibi timbuni dewa nawiragola í waitigi bu karunaga deni í bi lolene nawulebira. Í mo ko haragola ti oba holigo handabe.

<sup>4</sup> Anduane Homogo-o í í Ababi ínaga Ngode Datagaliwabebi kegonigo ina mine holigo í baya hangu handaya ho habe. <sup>5</sup> Íha hame ko dimagoli holene ngaru mo wahai habe. <sup>6</sup> Ínaga miniha tomo dewaore nalu holenebi miniha dimagoli holene ngago talialu holenebi hongo holigo hame ko íha howa ini bope holene tagira ibirago mo wahai habe.

### *Buleore lalu gi lolene ngago ogo*

<sup>7</sup> Í waneiginiru-o gi dolalu ínaga tíhondo bi tigabi bayale ogodagua lolene nga lalu tí lawai harogo baya hangu hale halimu. Bi ínaga langirogo hale howa tí pu luluya nahalimu. <sup>8</sup> Wali agali mana ko biagane bu karu ti tinínaga ne hariga ngagoha howa tini mo ko hagane ka. Ani bialu wali agalime mendeali kago mege bialu mo taga haga kago ti pi lolebira.

<sup>9</sup> Ina mbirale mbira buleore lowa gi doladaga halu bi lo wulene nawi. Ani bialu bibahendengi Anduane Homogonaga mini bame laabo holene nawigo nalabe. ✧ <sup>10</sup> Agali inaga biabe bia haga kago gewa tibume balu haabo hariyagua nde ibu tingini bibahendehe dere biai holebira. Anidagua dege wali agalime mbirale mbira buleore lalu gi doladaga halu bi dewa lo wiyaguabi Anduane Homogonaga mini bame laabo halu heaguabi tinaga ko ngago ereba nahe wiaabobo bu wulebira. <sup>11</sup> Wali agalime mbirale mbira buleore lalu gi doladaga halu bi dewaore lo wuwa mana pugulu karia ti damene bibahendeore mo ko holene ngago ngola hai holebira. Tinaga bi henene ndo ke howa larago mo hongo howa gi doladaga halu buleore lalu lo wiyagua nde tiha ko ngago timbuniore holebira. Tigua buleore lalu gi dolalu layago bame dege bule tingi howa leneyagua nde ti koore ka lalu mini lene mbira halu tinaga onene waneiginirubi ti bibahende genda tara tara yu holebira.

*Bi ko lolene nawiore ngago ogo*

<sup>12</sup> Bi marubi nde Yagaba hameiginime lolene nawiore. Wali agali mbirame bi ogoni layagua tini homolene hangu lene nga. Wali agali bayale tigabi karu ti bi ogoni ngagoria kaware nahe kaundiaha kagola mbirale bia ko henenaga ko dodohe ngagome tiha pialu bu dambi naholebira. <sup>13</sup> Bi tagabi ngago lolene mana koorego bi tagabi lolene mana ngago mo ya nabibe. <sup>14</sup> I agali haguane bedaru dombeneha biruwa i aba aiyala ala mitangi bibe. Ina bi mbira tinaga deni howa la ko haregola tigua i luluda loligo. Ani laragola mani ina taga howa lalu, I aiyahanda i aginagaore taba henededabe loligo, manda bibe. <sup>15</sup> Wali agali bi ko hangu laabo halu haga bu karu ti lone beregedalu bi bayale lolene nawiore.

*Wali agali kayu ko tagabi birarume mana ko mo wia haga nga lenego ogo*

<sup>16</sup> Dimagoli holeneibunaga hongo ira deneale nga. Ibu hundia nabi daho wialu wali agali dalu damaro biaga nga. Dimagoli holene kirame mana ko mo wia halu tebone ngagome Anduane Homogo mo keba timbuniore hagane nga. Dimagoli holene mbirago ibugua wali agali tini tinginime mana ko bulene ngago biaabo halu manga nahole dimagoli ira hungu ale dayago hundira handala wahagane nga. <sup>17</sup> Dimagoli holene mendego bayanda wali agalime kayu biagane nga. Mana ogonigo wali agali kayu biaga karu tigua dendeore howa bialu haabo halu tini homalu wahaga.

<sup>18</sup> Ai dimagoli tebonego dabu bini mana puguarago. Wali agali tinaga miniha dimagoli ogoniale ngagome lalu, I mbirali aiwa henededabe. Arumame i mo ge halu anda hai ho mabubupe kagome mo ge halu bidagome mbiralime i de handabe nahe kagoni. I agihondo gi holobada. Anduane Homogo Daligaore kago ibugua inaga ko ogoni mitangi nabulebira ndobe, lagaya. <sup>19</sup> Wali agali mana urunibi bialu haga karume Anduane Homogonaga deme bibahende handai holene hona ni dedago ladali hene waleore kago helowa tigua wali agali maru kagonaga de gi halu mo ohagaya. Anduane Homogohanda bira do holene ngago baya hanguore wale panaga ngaria handai halu mana wali agalime bialu karu bibahende handai halu bida. <sup>20</sup> Biabe bulene damene ngago Anduane Homogo ibu manda biahe howa ibini ngago bibahende manda bialu bule ogo nga lalu manda biai ho ka. <sup>21</sup> Heneneore wali agali dabu bini mana pugualu piyago ibu wali agali bibahendenaga deni howa pani nolebira. Ti taya bialu handawalia naholebira lo manda bialu bira do karia puwa minu yu tagira polebira. ✧

<sup>22</sup> Wali mbira ibu agalini helalu puwa agali mende kago baba waneigini hono wialu heneyaguabi nde mana ogonibi dege bulebira. <sup>23</sup> Wali ogonime ko dene tebira biya. Mbiragome Anduane Homogo Daligaore kagonaga mana lo wini ngago pugua. Mendegome ibu agalinihondo mana lehe biya tebonegome agali kayu yama ibaga biyagome dabu bini mana ngago pugualu agali mendela waneigini hono wialu haya.

<sup>24</sup> Tigua wali agali ngoai ho kagoria ibu helowa ko birida lalu ibu wane igini bu karu pani nelo mulebira. ✧ <sup>25</sup> Ani biragola ibu waneigini uruni tinaga holene bayale nawulebira. Ira mbira pini dindiha bayale anda nape howa lini nadaga kagobi waneigini uruni ti holebira. <sup>26</sup> Wali agalime bi ko mbirago lalu howa tigua wali ogoninaga mini lalu lolebira. Ainde ibugua beregedalu ibunaga mini lone mo bayale naholebiraore. <sup>27</sup> Ainde wali agali maniore hama polobadarume Anduane Homogohondo gi holene timbuni duniniore mbira winida lo manda biaiore holebira. Anidagua bulene bolangua hende mende nawiore. Ani bialu mana mbira Anduane Homogonaga bi mana lo wini ngago taluwa bialu holene baya dendebiore nga.

## **Mendeali baba mandagi bayale holenenaga bi bayale mbira lawai henego nga**

*(Be 24.1-32.13)*

### **24**

#### *Mini gigabi wulenenaga kai lenego ogo*

<sup>1</sup> Mini gigabi wulene ibuninaga mini mo yaraga halu ibunaga wali agali bu kagoha ibu mini lene timbuni mbira holebira. <sup>2</sup> Isaraele wali agalibi dahuliyali hongo gibe bu karubi ti bibahende Anduane Homogo Daligaore kagonaga deni mo ngoaiho kagola mini gigabi wulene ibugua ibunaga ne ha lowa ibugua turu holene bi lalu,

<sup>3</sup> I Anduane Homogo Daligaore kagonaga ne harigaha howa ibinigo ai ina dindi bibahendeore egerebagi ginu haguame dambi haradagua bido.

<sup>4</sup> I dindi bare ngagoha bedogo ai inaga kininaga biragane dagia daliga ginu hagua dege dombeneha nga. ✧

<sup>5</sup> Ina dahuliya andaga ibaga biai halu iba solowara bedago andaneha hariga pedagoha piai hene ko.

<sup>6</sup> Iba solowara bibahende dindi ngago bibahende wali agali dindi bibahende bu karubi dindi hobane tara tara ngaru bibahende ina handaya ho howa haru hai ko.

<sup>7</sup> I halo birulene mbira agoha ngabe hondolenaga ina uruni bibahende ibaga biai haruli. I birulene dindi taya bialu ko.

<sup>8</sup> Anduane Homogohanda mbirale bibahende wabiai hayangi ibugua ibi nde wabu helalu i holiya ibugua i dalu mbira wabu ngelene. Ani buwa ibugua ihondo langialu lalu, i anda Yagaba kagoha yagi bialu i dindi Isaraele daluha podene hobane mbira mo wibe, laya.

<sup>9</sup> Ibugua i bamba bambaore wabinigo ainde i lu haabobo bu haho wulebero.

<sup>10</sup> Ina ibunaga anda loma bihe kagoha biabe bialu haga howa i dalu hari Saiono nene nga.

<sup>11</sup> Anduane Homogohanda dindi i halo biruliya tano ibuniore gubalini ho haga biago i ngiyagola ai Yarusaleme tano ina haru howa handaya ho ka.

<sup>12</sup> Ani howa ai i wali agali mini lene bu hearu ti dege dombeneha bedo. Ai Anduane Homogo ibunime dindi ibuninagaore mo wiagoria ko.

<sup>13</sup> Ai i guru lu dege lalu Lebanono dindiha ira tamia karubi halu hari Hemono kagoha ira guraya alebi karubi kogoni.

<sup>14</sup> I guru lu dege lalu Engedi dindiha pibi ayage kagobi halu baya dege lalu Yarigo dindiha dambe tara kagobi ko. Ani bialu inaga hongo timbuniore mabuha ira olibe bu karubi halu timbuninaga ira timbuni howa luni iba angeni hagagobi ko.

<sup>15</sup> Inaga baya taraore irabuha balawaya dedaru nga biagagobi ko. I nga baya taraore bulene ira mini kasia dongoneme pauda wabini ngagobi howabi sinamonome pauda wabini nga biagagobibi pauda mini muwe nga biagagobibi nga bayaore balawaya mini

galabanumume nga biagagobibi pauda mbirale tara mbirame wabini ngagobibi pauda ira mini balasama ibaneme wabini ira hagua nga bilo Ngode Datagaliwabe andagaha delaga ngagobibi ko.\*

<sup>16</sup> Ira lini daga mini guyaboli ibu gene maganeru luore amura pu wahalu hongohe howa baya tara kagobi kogoni.

<sup>17-18</sup> I pu mbira mini gerebi irane kagonaga mane baya anda howa ina pabua bayale dewa balu lini bayaleru do girigere ledagobi ko.\*

<sup>19</sup> Wali agali i hame lo kemiru ini koría ibilimu. I lini dedogo tí do nalu no karulapeore noleberemigo ibalimu.

<sup>20</sup> I mitangi bilimu. I dende taraore mone taranaga ibane ngago bolangua henebi mbirale mo turu halu bame miaga ngogo baya taraore mone ibane mini hani bolangua hene ngo.

<sup>21</sup> Wali agalime i tomo ale nayagua dende taradane hondowa lone noa dege holebira. Ani bialu i iba ale nayaguabi lone dege noa holebira.

<sup>22</sup> Wali agali inaga bi hale halu kago ibuha taga holene nawulebira. Ani bialu wali agali inaga hongo heba biabe bialu haga kago ibu mana ko ngago nabulebira, laya lene.

*Mini gigabi wulene ngago Anduane Homogonaga bi mana ngagobi dege ogo*

<sup>23-24</sup> Mbirale uruni Anduane Homogo Daligaore kagonaga habo nalolene bi gilibu wini mbuga ngagoha wiai hene nga. Bi ogoni damenego Mosesehanda ina Yagaba hameigini bu kemarume mo mana howa talialu holomaya ngini.† <sup>25</sup> Mabuha tomo ala hengene kago abale boga birangi iba Pisono biru tolatagi halu pugu lalu piagadaguabi iba Taigirisi pedagoha iba hangu tolatagi hagadaguabi mini gigabi wulene bi mana mbuga ngagoha gili bu wiai henego nga. <sup>26</sup> Iba Yuberedisiha iba tolatagi kadaguabi widi lini gandulo yu mogobu wulene horongi iba Yodana ibame tolatagi hagagobibi bi mana lo wini ngagome wali agaliha mini gigabi wulene bayale wu tolatagi ka. <sup>27</sup> Bi maname wali agali baya hanguore lawai haragola, lawai harago nde baya gibi waholene hale ale lawai haga. Baya gibiore iba Gihono mabuha gerebi hingedago do wulene horongi iba biragagobi lawai haga.‡

<sup>28</sup> Wali agali abale hendarume mini gigabi wulene bayale ngago baya hangu manda nabi henego ainde mani holobadaru tiguabi baya hangu manda nabulebira. <sup>29</sup> Mini gigabi wulene ngagonaga lawai hagane ngago timbuniore iba solowara bedaru bolangua hai halu iba kuyama unurahaore bedarubi bolangua haihe ngagome manda bibe naheore.

<sup>30</sup> Agalime iba timbuni pedagoha howa iba emene mbira mabuha dadabu yu piagagobi i kogoni. <sup>31</sup> Ani howa ina ogodagua laro. Ina iba maru i mabuha bedago aria maru hambuwa ira lini dedagoha odo ba holebere. Mabuha ibaga buwa dadabu yu anda ibinidagoni abaleore timbu halu iba solowara timbuni bedagobi holebira. <sup>32</sup> Ani bialu ina mbirale lawai harogome egerebagi ni dagagobi helalu inaga wá holene dindi bibahendeni piái helolebere. <sup>33</sup> Ani bialu inaga bi ogoni agali Anduane Homogonaga bi mana latagi halu mbiwia hagarume lawai hagadagua dege lai holebero. Anidagua

\* **24:15:** Har 30.22-28 \* **24:17-18:** Ai mbuga alataweore gilibu wini ngagoha bi marubi hobane ogoniha gilibu wini nga. Bi ogoni ogodagua leda. I mbirale bayale ngaru gubalini hagane aija bi larago hale hagane aiyabi bedo. Mbirale bayale ibilo malia ho holenenaga manda mana lo mo heya hagane i kogoni. I haluhe haabo haga kogome howa ina mbirale uruni Anduane Homogohanda ibu waneigini ibuni gubalini ho haga karu ina mo muliya hame lo ka, lenego gilibu nga † **24:23-24:** Mbuga alatawe ngagoha bi maru hobane. Bi ogoni ogodagua leda. Ti Anduane Homogola haabo halu mandagiore haabo kemigola ibugua ti biamogo bialu mo hongo helo. Anduane Homogo Daligaore kago ibu hangu Ngode Datagaliwabe ka. Ti mo wialu haru dai bulene mendeali naheore. ‡ **24:27:** Iba maria Pisonobi Gihonobi Taigirisibi Yuberedisibi iba maria uruni dene mabuha howa dugutagi halu ibira. Te ogoni ibunaga mbuga mini Pigane Binibogo laga ngagoha be 2.10-13 ngago hondolene nga. Iba Yodana ibu Isaraele dindi ibu timbuni mbiraore ogoni hangu pedago leda.

berogola wali agali mani holobadaru tibi nde hale halu manda milo lawai holebero. <sup>34</sup>Heneneore ini hangu manda bulenaga erekuibi bialu hene ndo ina wali agali manda bayale bule hame layaru bibahende biamogo bialu lawai holenaga bialu haru.

## 25

### *Wali agali ko bayalelame mana biaga ngago ogo*

<sup>1</sup>Inaga bu miniha irane tebiranaga turu ho ko. Irane tebira ogoni Anduane Homogonaga denibi wali agalinaga denibi bayale dege nga. Hamene kagola mini mbiraore ho holenebi nenege kagola mandagiore holenebi onene agalinila mandagi baya hangu birulenebi nga.

<sup>2</sup>Inaga bu miniha wali agali tebira uruni haga haga bu kagonaga manga ho ko. Mana tigua bialu kagome i mo taga halu ka. Uruni mbirago yagibano bu karu tigua mini lene timbuni hetingi haga ka. Ani bialu homogo kagome ke timbuni hagane ka. Wali agali waheore bu karume dabubinigo mana puguaga ka.

<sup>3</sup>Ini daliahe keangi howa mbirale manda nabi hariyagua nde i wahe howa agua manda buleberebe. <sup>4</sup>Wahe halu dagua hariyagua miniha ko bayalela baya hangu mo tale bulene karulapeore nga. Waheore bedarume mana bayale ngago lawai hayagua bayale tigabiore bira. <sup>5</sup>Waheale karume ti mini gigabi wu bialu agali haguane bu karume wali agali ti daluha haga karu lawai hayagua nde galoneore mbira ogoni nga. <sup>6</sup>Manda bayale tara tara bidaru waheale karu tinaga yari nga. Ani bialu tigua Anduane Homogo gi halu ibu andaneha haga heagua ti mini lene timbuni holebira.

<sup>7</sup>Inaga bu miniha mo turu hagane irane pira ngago ai uruni aria mbirago ibugua i mo turu timbuniore hagane ngagola ina ogoni hongo howa latagi halu lolebero. Irane pira uruni ogo.

Mbira: Wali agalime tinaga waneigini mo turu haga.

Mende: Wali agalime tinaga waitigi karu mo ko halu homelo hame lagane.

<sup>8</sup>Tebone: Agalime wali ti one bedago manda bayale bi berelo hame lagane.

Mane: Wali agalime bi tigabi bayale ndo ngago latagi nahagane.\*

Dauni: Wali agali ti agali ko kagonaga biabe bia haga holene hame nalaga.

<sup>9</sup>Wali agali tinime mini tigabi ngago taya bialu mo yaga.

Waragane: Wali agali bu karume tinaga bi lawai harago hale hoa harago baba howa bi lole turu haga.

<sup>10</sup>Kane: Wali agalime mini giga bulene mo yu howa ti turu timbuni haga.

Halini: Anigo wali agali Anduane Homogo kago gi halu tini ibu andaneha haga.

Dini: Ani biaga kago ibugua wali agali maru karu bolangua hai hene ka.

<sup>11-12</sup>Pini: Heneneore Anduane Homogohondo gihalu ibuni andaneha haga kago ibu bolangua hai hene ka. Ani bialu wali agali mana ogoni latagi halu kago ibu duniniore mbira ka.†

### *Wali ko biaga bedurunaga mana ko biaga ngago ogo*

<sup>13</sup>Iha genda tara tara ibiyagua i mini burugu nale dege holeberogo ai inaga nenege bayaore mbira kagome i wahalu piyagua nde genda timbuniore yu holebero. Wali agali maru karume ihondo mana ko dewa biyagua i genda nahe dege holeberogo ainde i one bedagome ihondo ko biyagua nde dara timbuniore ho holebero. <sup>14</sup>Wali agali bu karume i bayagua nde i genda nahe dege holeberogo ainde waitigi ibalu i mo ko hayagua inaga

\* **25:8:** Mbuga alatawe gilibu wini ngagoha bi marubi hobane ogoniha gilibu winigo nga. Bi ogoni ogodagua leda. Nogome mabuha biabe bialu helonaga nogo bulumaga dongila mandagi hende hamagamaga bu henalaga, leda.

† **25:11-12:** Mbuga alatawe gilibu ngagoha hobane ogoha bi marubi gilibu wiadege bida. Bi ogoni ogodagua leda. Wali agali Anduane Homogo gi haga kago ibugua Anduane Homogo gubalini holene hariga manda bida. Ani bialu wali agali Anduane Homogohondo mini mbiraore wu howa tigua ibu yu wahalu napolebira, leda.



miniha dara timbuniore holebero. Ina bialu harugonaga pani nolene ona ibiyagua nde i genda nahe holeberogo ainde waitiginaga giha howa i mo ko holene anda ibiyagua nde inaga miniha dara holebero. <sup>15</sup> Puyanaga tomia ko ngago bolangua hene tomia hongohe mende nawiore. Walinaga keba holeneme keba holene bibahende ngaru bope hai haga nga.

<sup>16</sup> Laiono gabua karu bababi puya gaulaga timbuni ngaru bababi mandagi birulene karulape degego ai wali ko bedago baba mandagi nabiruleorebero. <sup>17</sup> Walime miniha tandaga timbuniore ho bereagua ibunaga dengui mo tara halu biango gabua ale. <sup>18</sup> Ibu agalini kagome tomo ibuni nolene ibu damene andaga taya bu nalu ibunaga miniha genda wu kago yado naholebira.

<sup>19</sup> Genda damene bu ngaru bame degego ai wali tinime genda mo wia hayagua nde darabiore nga. Ani biyagua nde wali agali mana ko biaga bu karu pani nolene ngadagua nolebira.

<sup>20</sup> Agali waheore karume dindi ko iba dalu naibaga dindi be tauladagahe ngaruha hari kago irigi holene nakarulape nga. Anidagua dege agali mo palia holene karulo haga kagome ibu one keba timbuni halu lai hongo howa laabo haga bedago baba mandagi birulene ndelaheore nga.

<sup>21</sup> Wali dengui baya bedagome i mo talola holigo de hondo holene nga. Ani bialu wali muni mbiraleru dewawi bedago hondowa ogoni dimagoli holigo hondo holene nga. <sup>22</sup> Ai biabe bulene ngago wali ibu hangu bialu bedagola ibu agalini bameore ibaga bu heagua nde walime keba halu mine haragola agalini kago taga pani nolebira. <sup>23</sup> Wali ko bedagome ibu agalini kagohondo mini tara tara mo wia halu genda mini burugu ngaru mo miaga beda. Wali ogoni ale biaga bedagome ibu agalini kago mo turu nahaga beda. Anidagua biragola ibu agalininaga hongo ereba hai halu gi himbi gedeore halu ge duli hiamagamaga bialu tingini durule hagane. <sup>24</sup> Piganeore mana ko walime mo yu anda ibiyagome ina bibahendeore homai holene winigo nga. ✧ <sup>25</sup> Inaga iba beha bedago bame odo payubu ngelalu pu nabiaga. Anidagua dege wali ko kudaga bedagome bi nagalone ngago lo payapaya bialu helo wanahabe. <sup>26</sup> Ibugua inaga bi larego hale nahayagua pelo talitagi halu pu labe. ✧

## 26

### *Wali bayale bedagome mana bayale biagago ogo*

<sup>1</sup> Agalime wali bayale bedago dabu biyagua ibu bayale turu ho halu dindini luore howa ho dagua halu mali dewaore holebira. <sup>2</sup> Wali ogonibi bedagome ibu agalini kago mo turu haragola agali ibu turu dege ho howa miniha mo palia holene karu lo haabo halu homalebira. <sup>3</sup> Anduane Homogohanda agali ibu andaneha haabo haga karu mo turu halu wali bayale bedago hado miaga ka. <sup>4</sup> Agali ogoniale kago ibu turu ho haabo holebira. Ibu muni mbirale dewawi homogo heaguabi mbirale mbira nawiore howa yagibano heaguabi ta nabi howa ibu bayale turu ho haabo holebira.

### *Wali ko bedaru de hondowa mamage howa ohalu holene nga lenego ogo*

<sup>5</sup> Iore mo gi hagane irane maria ngago ai mbiragome inaga miniha mo duru la hagane nga. Ai homolenego ko mangabiore mbira ngagoni ina bibahende manda biai kema. Anigo tebira wiaruago koorene ko nga. Wali agali bu karunaga mege biaga mana ngagobi wali agali keba timbuni haga tinaga mo ngoai haga ngagobi godi lalu howa bi ke howa laganebi nga. <sup>6</sup> Anigo irane mane ngagome mini burugu timbuni mo ngialu genda timbuniore mo wia hagane nga. Ogoni wali mbirame wali mende bedago dimagoli holeneme mo wiaga.

✧ 25:24: Pige 3.1-24, Lm 5.12, 2 Ko 11.3, 1 Ti 2.14 ✧ 25:26: Mg 10.1-12

<sup>7</sup> Nogo bulumaga biabe bilo irame mani daribaho magamaga bu heledaria irame nagonaga mani kedaragola tandaga hagagobi wali ko bedagome ibu agalini bime hayalu biraga nga. <sup>8</sup> Ina wali ogoni ale bedago mo tiga bule bi lalu keria ibugua í moneme hayaradagua bulebira. <sup>9</sup> Walime lulu iba nowa ibuni taga nahe karia wali agalime ibuhondo keba haga nga. <sup>10</sup> Bayanda wali bedagome ibuha mini dimagoli ngago miniha ogoale wu bedo lalu deme hendene panaga mo walia holebira. Ina ibu denguni handaede halu ibunaga hame ngago panaga handa walia holebere.

<sup>11</sup> Í wane bedago baya hangu handaya ho habe. Ibu mine holigo ina ibuhondo bialu helo wanahabe. <sup>12</sup> Ibugua de dimagoli hama ibaga bialu biruwa í mo taga holigo ina ibu baya hangu mamage ho habe. <sup>13</sup> Wali ogoniale bedago ibu mbirali iba noa timbuniore howa iba emene ge mugu ibabi iba emene bedago ta nabi nai damene holene bidaligobi beda. Wali ogoniale bedagome agali bu kago damene hai yadege bule taya bialu biraabo haga beda.

*Agali one wali bayale bedago mo turu halu bi lenego ogo*

<sup>14</sup> Mana bayale agali one bedago ibugua biagagome ibu agalini mo turu halu tomo dendebe ibugua dawaragome agali mo hongo haga. <sup>15</sup> Wali agali one bedago ibu bi nale ne hariga ndibulo biragago mugube baya tara mbirago Anduane Homogohanda mini yu beda. Wali bi dewa nalagane bedago bolangua hene daliga mbirale mbira nawiore. <sup>16</sup> Wali agali one bedagome ibunaga hame ngago damene baya hangu haru hai haga bedago mana bayale duniniore biaga beda. Mana ogonibi bulenaga mbirale mbirame yolo bu yulene nawiore ndobe. <sup>17</sup> Agali tigua nde ti oneme waneigini baya hangu handaya ho bedago de hondowa ti turu haga. Agalime ibu one turu timbuniore hari nene ngatoria egerebagi ni bayale daba harago hondowa wali agalime turu hagagobi kagane ka. <sup>18</sup> Walinaga dengui baya kago Ngode Datagaliwabe andagaha hale hongohe dedagome wá timbuni hagagobi ka.✧ <sup>19</sup> Tinaga ge bayale kago anda gene hongohe ngolome para hadambi howa silibame mbogoyi wabuwa ogoniha mo karu ledagola hongohe kagobi ka.✧

<sup>20</sup> Waneigini-o í daliahe keangi howa inaga tingini baya hangu handaya ho habe. Ina mana tara tara ngago bima ibaga bialu keria inaga hongo ereba holigo de hondowa habe. <sup>21</sup> Dindi ngago baya hangu deme handama ibaga ala buwa bayaleore ngago ininaga dindi mo wibe. Ani bialu tomo eganeru dindi mabu ogoniha hangedegola í damene lenego hongohe bayale holebira. <sup>22</sup> Ani beregola í waneigini aguane mani holebiraru ti dindi holene mo ko naholebira. Ani bulebirago irane í damene kago ti hongo timbunihe bayale holebira. <sup>23</sup> Bayanda wali agali kayu yama ibaga biaga bedaru ti hamiaga tolo wahene dindini ngaligobi beda. Ani bialu agali oneme ibu agalini kago wahalu agali mende kayu biagagome ibuninaga homolene mo yu anda ibaga. <sup>24</sup> Wali ko biaga bedaru agali mana ko biaga karu tinaga yolo beda. Wali ko nabiaga bedaru ti agali Anduane Homogo andaneha haga bu karunaga yolo bayale bame mo turu halu mini beda. <sup>25</sup> Wali taga nahaga bedaru ti tinaga mini mo ko holobadago mitangi nahaga beda. Anigo wali bayale bedagome ibu agalini andaga mandagi biruwabi taga ho biraabo hagane nga. <sup>26</sup> Wali mine haga bedaru ti biango ko kilayubi hagagobi bedago ai wali taga haga bedago ibugua Anduane Homogo gi halu ibu andaneha biraga beda. <sup>27</sup> Wali agalime bi lalu, Wali ogome ibu agalini baya hanguore handaya ho biraga ibu mini bayalewi beda laga. Anigo wali ibu agalini nahandaya ho haga bedago wali agalime lalu, Wali ogoni ko ngubiore beda laga. Agalini one bayale dabubi kago ibu turu ho howa mali dewaore holebira. <sup>28</sup> Wali mbira ibugua bame laiore laabo halu bi nagolone ngago hongo howa latagitagi bialu bedago ibu nagaloneore bame wai bialu howa agalime waitigi bu karu gi howa mogo lalu ibida piai helonaga pilipe biguli hongo

✧ 26:17: Har 25.31-40 ✧ 26:18: Har 26.32

howa pu lagagobi beda. Wali ogonibi agalini kago wai bialu karia abale timula ngola halu homolebira.\*

*Genda maru ngago ogo*

<sup>28</sup> Irane tebiranaga i genda timbuniore ho kogo ai mbiragome i mo keba timbuniore haga. Ainde agali mbira ibu mbirale nawi buru pale howa ayu ibu yagibano heaguabi wali agali manda timbuniwi maru bu karume erembira miyaguabi wali agalime hariga tigabi ngago wahalu puwa mana ko ngago bialu hayaguabi uruni ko tiga nabiore nga. Wali agali ko urunibi karu ti Anduane Homogo giha homo ya holebira.

*Biyahaya biabeme wali agali mo luluya habehe holebirabada lenego ogo*

<sup>29</sup> Agali biyahaya biaga karume tigabi bulene ngadagua bialu habe naheore ndobe. Wali agali tidugu anda handaya ho haga kagome mana ko bulene ngagoria hogorale bialu pobe nahe nga.

## 27

<sup>1</sup> Wali agali dewaoreme muni bolangua ho mule manda biragome mana ko biaga nga. Wali agali mini dewawi homogo hayagua tinaga biabehe yagi ko biruda bayale biruda lo manda nabulebira. Ti biyahaya biabe dege bialu holebira. <sup>2</sup> Ege t-ole ngagoha nduli baanda hariyagua nde lone dugu yamibe nahe hongo halu ndibulo wahaga nga. Anidagua dege mana ko ngago biyahaya biabe biaga kagoha hongohe para ho wahene nga. <sup>3</sup> Wali agalime Anduane Homogonaga bi mana lo ngago hongo howa talialu holene manda nabiyagua nde tini heba tinaga damene kago bibahende abaleore mo ko hai holebira.

*Wali agali tininaga mini wulene mo wia haga bi laga ngago ogo*

<sup>4</sup> Iba hambu yuwa ibaha dodo bedago mo wahole biyahaya nde ibaha dodo maru berenedane handa walia hagane nga. Anidagua dege wali agali mbira kago baba lai larebingi ko ibuha padago panaga tagira ibagane nga ndobe. <sup>5</sup> Be gahange dindime wabini ngagonaga hongo ira deneme bahandagane nga. Anidagua dege agali ngoai ho biruwa tininaga mini bahandaga tandaga biaga. <sup>6</sup> Ira tara tara kagobi tinaga linibi tara tara dagane ka. Anidagua dege wali agali bu karu tinaga mini ngadagua latagi haga haga biaga ka ndobe.\* <sup>7</sup> Ina wali agali mbira kago mo turu halu bi bayale loleyagua nde tinaga mini ngago ala begelo hondolene nga. Wali agali ko bayale lalu mo tale bulene hariga urunibi nga.

*Mana tigabi heneneore ngago ogo*

<sup>8</sup> Ina mana tigabi mo yulenaga taya bialu hariyagua nde henene larogo handa walia holebere. Ani mo yu kegola ibugua i aga bayale ngagome yaribia haradagua bulebira. <sup>9</sup> Ega mbiraorego ale ti mo mogo buwa mbiraoreni biragone. Anidagua dege mana tigabi bulene ngago wali agali tigabi biaga bu karu ti baba hagane nga. <sup>10</sup> Laiono gabua bedaru tigua nogo bolenaga ohowa ibulubadagoria yu biragane nga. Anidagua dege mana ko bulene ngagome wali agali mana lehe biaga bu karu minule ohowa harigani yu biraga ngago ndobe.

*Wali agali mini tiga nabi karunaga bi lenego ogo*

<sup>11</sup> Wali agali Anduane Homogonaga bi mana hale haga karume tinaga bu mini bayale ngagobiore latagi holebira. Anigo wali agali mini tiga nabi karu tigua egeme ho iriari biagadagua bulebira. <sup>12</sup> Wali agali bayale ndo mana lehe biaga bu karu baba haga

\* **26:27:** Agali mandabi bu hearu dewaoreme manda bu handalu hearia hobane yakundi kira kago dombeneha gilibu ngago mbuga alatawe bambaore winidagoha nawinigo ayure dege agali marume gilibu wiatago hene ngabe tobaheda leda. \* **27:6:** Md 7.17, 12.33, Lg 6.44

hariyagua ti wahalu polene hariga taya bialu habe. Anigo wali agali mini bayale gigabiwi baba birariyagua nde karulapego birabe.

<sup>13</sup> Wali agali mini tiga nabi karume bi ko nalolene ngago laabo halu tininaga mana ko biragonaga te lalu oba halu haga ka. <sup>14</sup> Wali agali ko uruni aleme bi laragola wali agalinaga tingini pandi hinalu agali ko kagome keba howa lai larangi wali agali maru bu karume bi hale holino tinaga hale paiho haga ka. <sup>15</sup> Wali agali mine haga bu karume lai laabo halu mbirago darama dalira handala wahaga. Tigua lai larago bi ko ngubiore laragola wali agali maru karu ti hale habe manga halu piaga.

*Bi ohowa lenego latagi nahabe lenego ogo*

<sup>16</sup> Wali agali mbirame bi ohowa lene ngago bibahende hale hai helo latagi hayagua nde wali agali bu karume ibuhondo henene laga ka lo manda nabulebira. Ani bialu ibu nenege holene mbira lone mani handa wali naholebira. <sup>17</sup> Inaga nenege kago gubalini halu kaware haabo holene nga. Anigo ina bi libuni hangu ohowa lene ngago hale hai helo latagi hariyagua nde ibu kago ha lone talima napobe. <sup>18</sup> Agalimeibunaga waitigi kago homelo bo wahagadagua ina libu mani bayale hama polene wiago ina mo ko harigoni ndobe. <sup>19</sup> Wali agalime ega bedago giha pogo lalu minu yanigo poragola lone bedaria handa nabiagadagua inaga nenego biago lone dai bule ndo pu wahayagoni ndobe. <sup>20</sup> Ainde inaga nenege biago nogo gabua timu ho yalu ibida pu wahagadagua ibu ibida puabo hayago ainde ina ibu lone haruru talima napobe. <sup>21</sup> Dere bidago kabu bulene karulape wialu keba haribigo hadalu gi tigani bulene ngago ainde bi ohowa laribigo hale hai helo latagi hariyagua nde ogoni lone mo tiga bulene nawiore.

<sup>22</sup> Wali agali mbira kagome bi nale ihondo debia hayagua nde ogoni galone tara ndo mbirale ko bule hangu debia holebira. Ani biaga kago mbiralimeibunaga mini ngago mo beregedabe naheore ka ndobe. <sup>23</sup> Wali agali ogoniale kagome ila haru mandagi te lalu ila bi bayaleru lalu biruwa inaga bi larego damene baya hangu mo yari bia howa lalu birulebirago ainde mani howa ibu te taraale lalu bi ina larigo mo beregedalu ini mo ko holene bi ngago lo aribia holebira. <sup>24</sup> Ina handabe manga hagane dewaore ngago ngelowa wali agali uruniore handabe manga timbuni haruli. Ani bialu Anduane Homogohandabi ti handabe manga ho ka.

*Bi lo beregedaga kago pani nolene nga lenego ogo*

<sup>25</sup> Ege tole mbira baraga hariyagua lone dai bialu ininaga emboneni bedelabaga bulubira. Ani biragola dere timbuniore bu holebere. <sup>26</sup> Mbiralime dindiha gabua uli tombayagua nde tini uli ogoniha pilolebira. Mbiralime gono wiyagua nde ibuni gono wiyago ha dai bialu ibuni do wulebira. <sup>27</sup> Wali agali mbirame mendeali kago mo ko hole karia ibugua bule wiyago lone beregedalu ibuniha dai bialu mo ko haragola mo ko holene ogoni ago ha howa ibiyabe toba halu handa nabulebira.

<sup>28</sup> Wali agali mine haga bu karume mege dewa bialu bi ko ngaru ta nabi laabo halu haga ka. Anigo tiore laiono nenda biaho berelalu nogome pogolalu pu nabiaga ngadagua tigua yolo ko taraore mo yulene ngago ngelalu napolebira ndobe. <sup>29</sup> Wali agali maru ti wali agali bayale tigabi bu karu pi larago hondole karu tinibi nde yo pialu pu nabi tihabi mo ko holene anda ibulebira dege. Ti homa nabi kangii dege tandaga timbuniore nalu holebira.

*Mana lihe birago mo embeda holene nga lenego ogo*

<sup>30</sup> Mana ko ngubiore kira wali agali mana ko biaga bu karu tiha nga. Ogoni keba holene bu miniha tandaga holenela kira nga.

✧ 27:16: Min 20.19, 25.9

## 28

<sup>1</sup> Mbiralime wali agali bu karuhondo yolo ko miaga bu karu tini nde Anduane Homogo giha howa ko ngago mulebira. Ani bialu Anduane Homogohanda tinaga ko biyago embeda naholebira. <sup>2</sup> Wali agali maru bu karume ihondo ko birago mo embeda halu biadai nabi wahariyagua nde ko iha ngago Anduane Homogohondo mo embeda halu domo wahai habe lalu bi larego ibugua hale halu domo waholebira. <sup>3</sup> Wali agali maru karu baba keba ho hariyagua Anduane Homogohanda í biamogo bia laregola í mo bayale holebirabe. <sup>4</sup> Inaga damene karu dara nahaga hariyagua nde Anduane Homogohanda ko ina bini ngago domo waholebirabe. <sup>5</sup> Í bame agali dege kegoni howa inaga miniha tandaga timbuni ho kego hadalu wanahariyagua nde inaga ko ngago aiwa domo waholebirabe. <sup>6</sup> Baya hangu mitangi bia. Inaga dindini holene ngago biba haragola homalu mo ko holebira. Anidagua bulebirago mitangi bialu ininaga miniha waitigi holene hongo kego wahai halu Anduane Homogonaga mana ngago baya hangu talialu holene nga. <sup>7</sup> Anduane Homogonaga habo nalolene bi timbuni lo wini ngago mitangi bialu ibunaga bi mana ngini ngagobi mitangi bialu holene nga. Ina wali agali bu karu baba keba howa lai lolene ngago wahalu tigua ihondo lulu mana ale bialu karunaga miniha genda nahe habe.

### *Lai laganenaga mana ngago ogo*

<sup>8</sup> Mbiralime lai laragola ina bime lai lagalaga bialu irigi irigi beregola inaga ko ngago timbuniore holigo lai nalabe. Irane wali agalime keba howa lai lalu gungu biaga ka. <sup>9</sup> Wali agali mana ko biaga bu karume tinaga nenega bayale holene ngago mo ko halu wali agali bayale holene ngago waitigi holene mo yu anda ibalu mo ko hai haga ka. <sup>10</sup> Ira dene emene dedagoria ira dewa bo wima irigi haregola ira datimbu halu timbuniore haga nga. Anidagua dege wali agalime mine hayagua nde wai ogonime mo heyaga. Heneneore wali agali ti hongohe heagua nde tinaga keba holene pu timbu dege hagane nga. Anigo ti muni dewawi homogo heagua tinaga miniha tandaga timbuni ngago hongo howa latagi haga ka. <sup>11</sup> Wali agali keba abale tongo laga kagome mo ko halu bagabaga bulene mo wia halu biragola mbirali kago abale bope hagane nga. <sup>12</sup> Ira dene hagua bialu ngago pulope haregola ira datimbu hagane nga. Anigo ira dene emene hoailo ngago hamiaga toloba haregola ira hoailo wiyago abale hundu tegelo mina haga nga. Manane ogonibi dege kirabali inaga ne harigaha howa tagira ibagane nga.

<sup>13</sup> Tí wali agali mege bialu hagabi ke howa bi lagabi kemiru tíha pani nolene ko ngago anda ibulebira. Ani bulebirago irane tigua wali agali maru karunaga bayale holene wiago mo ko halu kemigonaga noleberemi. <sup>14</sup> Mege beregome wali agali bo taliatogo lalu dindi tara tara ngaruha purogo lelagane nga ndobe. Ani bialu tano timbuni ngago bo gialahole bialu gabumane kago biba helaga nga. <sup>15</sup> Megenaga lini agali one wali bayale bedago ibu andagaha howa bo batagi halu tinaga biabe erekuibi bialu hayagonaga yolobi nami piaga. <sup>16</sup> Wali agali mende kagome ibu mege biyadago hale howa henene ledada lo manda biyagua nde ti kago ha hendore holenebi hadapaya bu holene nawigo. <sup>17</sup> Mbirali kago gewa tibume bayagua nde tinaga tinginini to halu dere biaga nga. Anidagua dege wali agali bi ko laga bu karume wali agali maru kagonaga hongo bope hai halu mo ereba hai helaga ka. <sup>18</sup> Wai biagane ayu tibu mini bainademe wali agali dewa homelo dibaganego ainde bi kome bolangua halu dewaore home laga nga. <sup>19</sup> Wali agali bi ko larago hale nahe baya hangu hogorale bu haga karu ti turu ho holene ngago irane tigua bi larago baya hangu manda nabi kagome turu holene nga. Tíha keba halu lai lene ngagonaga genda mbira yu ha nabini ka. Ani bialu ke holenenaga ege pume gono ngago ha halu mbira do wianabini ka.



<sup>20</sup> Mege biragonaga miniha genda timbuniore aeane gendabi ngagobi wialu hongo timbuniore ege pu hongohe ngagobi nga. <sup>21</sup> Mege biaganeme wali agali homelo bo waore haga. Ainde mbirale uruni nahondole ina ayu dege homolene karulapeda. <sup>22</sup> Bi ko ogonialeme wali agali tigabi karu bope halu irani da nabulebira. <sup>23</sup> Anigo wali agali Anduane Homogo yu wahalu piyaru minu yania halu ira hundia nabiaga dedagoria dai helolebira. Heneneore mege biaga mana ogonime laiono gabuame wali agali talima poradagua bialu biango dudume balu naradagua biagane nga.

<sup>24</sup> De handaluore holene nga. Í daluha yagi baya hangu gewa agubandu anihe ngarume pabe hagira hongohe bu yaanda howa, ínaga muni ngolo siliba ngeru baya hangu mo do ho wibe. <sup>25</sup> Bi lararu bibahende miniha baya hangu mo tale biai halu ínaga ne harigaha bi mbira loligo panga gedeni ho ndibulo wiagadagua ndibulo habe. <sup>26</sup> Ína bi ko mbira laregome íni waitigi giha pilo ya holigo baya hangu mamage howa de hondo holene nga.

## 29

### *Dano hangalu mia dai bulene nga lenego ogo*

<sup>1</sup> Wali agali mende kago dara haga bu karume wali agali tini dindi mandagi haga karu biamogo bialu dano helo mialu biaga. Tigua ogoni Anduane Homogonaga mana ngago talialu anidagua biaga. <sup>2</sup> Wali agali mende kago tubagi ho kangi mbirale bame tale bu mulene nga. Ani bialu dano ho hariyagua abale miadai bulene nga. <sup>3</sup> Ínaga nenegela ogoale bibiya lalu bi lo wirigo mo aribia nahe bule larigo abale bibe. Anidagua beregola íha tubagi ho kego ibugua biamogo biaabo halu holebira. <sup>4</sup> Wali agali dewaoreme dano hole mirago bame ti mo turu halu bame mini mo yaradagua bialu tigua mbirale anduane ti biamogo biaga kago genda mo miaga ka. <sup>5</sup> Wali agali marume dano holenaga bi bayale hadalu bime mo adogoda bialu mbirale dano howa mo yu piaga. Anigo ai dano hongolenenaga abale miadai nabi howa tigua lalu, Nguliya degego emene hondo habe, laga. Ani buwa bi la tara haga bialu howa lalu, Ai horo hapara hayadago dano nahongolebero, laga. <sup>6</sup> Ainde dano anduane kagome lo hongo haluibunaga dano ngi laragome muni emene dege mbira miragola mo yarago ibu karulape holebira. Anigo dano hayadagome dano hongolene mbirale mbira nayi hayagua nde darabaibunaga muni dano hayago homa anda haragola hako holene ona ibira holebira. Tigua bi ko larago ladai bulene dege ndo wulebira.

<sup>7</sup> Anidagua biragome wali agali bayale karume dano helo lone mulene turu nahaga ka. Ogoni irane wali agalime tihondo lone ke holigonaga namiaga.

### *Dara howa biamogo bialu bulene nga ogo*

<sup>8</sup> Anigo ai wali agalibi mbirago ibu mbirale nawi tubagiho kane handariyagua ína ibu biamogo bulene nga. Ibu í malia howa bame ho waholigo abale biamogo bibe. <sup>9</sup> Anduane Homogonaga mana lo ngagome bibe ledago talialu yagibano karu biamogo bialu mbirale ibuha tubagi ho kago mibe leda. Bameore halu pe nalabe leda. <sup>10</sup> Í dameneru ínaga nenegeru biamogo bialu ínaga muni pelolene karulape. Ínaga muni bame wialu ege tole andanaha wu hagua dalu ereba holigo abale galone bulene nga. <sup>11</sup> Ínaga muni ngeru Anduane Homogohanda pelabe ledagoha pelaregola ínaga yolo mani mo yu holeberego ngolo ngago bolangua howa mo yulebere. <sup>12</sup> Ína wali agali yagibano bu karu dara haabo haga hariyagua nde íha mo ko hene keangi tigua í heba holeberemi. <sup>13</sup> Wali agali biabe bia haga bu karu tinaga hongo gibiore yandare alebi wai humbi hongohe waingi yagane ngagobibi ka.

### *Wali agali danohe kago biamogo bulene nga lenego ogo*

✧ 29:1: Har 22.25, LBM 25.35-38

<sup>14</sup>Wali agali bayale kagome ibu damene mbirame mbiralinaga dano howa ya dai bibe nahe kagola nde ibugua biamogo bialu dano hanga haga. Anigo wali agali ti damene karu mitangi nahaga kagome dano hayadago ibugua hanga naholebira. <sup>15</sup>Ínaga nenege mbira kagome ínaga dano ho henedago ibugua hanga hayagua nde ínaga nenege bayale ogoni ibu howa ibunaga mbirale bayale winiru yuwahai halu ínaga dano hanga hayago mitangi bialu ínaga nenege ogoni wanahabe. <sup>16</sup>Ai wali agali mana ko biaga karume ti dameneme dano hangabe lalu muni mirago ti biamogo biyada lo manda nabi howa tigua muni uruni galone nawiha bame baainai bialu wahalu piaga. Ani biragola ibu damene biagome nde ibu helalu wahalu piaga. <sup>17</sup>Wali agali bayale bu hearu nde iba sibi solowara bedagoha pialu karia mo ko hagadagua bialu mo ko hai haya. Ani biyadagoni ti damene bu hearunaga dano hangalu hearia tini mo ko holene ngola haya. <sup>18</sup>Mana ogonialeme dege agali haguane bu hearubi mo ko dege henego tini dalu wahalu dindi taraha pu wahaga biya. <sup>19</sup>Wali agali ko biaga karume ibu damenenaga dano hongoliya lowa ti muni bolangua hene ngago hangu mule manda biyagua nde ti darabiore bialu ka. Ti godi larangi pani emene ndo nolebira. <sup>20</sup>Ína mo ko holene wuligo de handa ala hondowa karulape hariyagua nde ínaga damene kago biamogo bibe.

*Wali agali anda tininagaore helowa karu ti turubiore ka lenego ogo*

<sup>21</sup>Wali agalime dunini mariago tininaga ngelowaore holene nga. Iba mbira tomo nolene mende aga karulolene tebone tini paluene andabi helowa holene karulape. <sup>22</sup>Yagibano kago ibu anda ibuni andagaha paliaga heagua ibu turubiore ka. Ibu wali agali maru ti damene andaga puwa tomo bayale tara tara ngaru nalu u paulene anda nahe bu hearubi ndo ka. <sup>23</sup>Í mbirale dewawi hariyaguabi nawi hariyaguabi í ta nabi howa turu ho holene nga. Wali agali dindi mandagi haga karume íha bi maru ke halu laede hayagua í genda nayi habe. <sup>24</sup>Í wali agali mende andaga paliaabo holeyagua í turu naholebere. Ani bialu ínaga mini ngego hale helo latagi naholebere. <sup>25</sup>Ti andagaha bame biabe bialu haga kadagua holebere. Ína wali agali ibiraru tomo ibabi nelu meregola tigua íhondo kai ladai nabulebira. Ani bialu tigua í handaya ho howa í ti andaneha helowa lalu, <sup>26</sup>Igiri-o tomo nalu birulene tebolo dagia ogo mo tiga bu ngelabe. Ani bialu tomo dedagola abale dugu yalu ogoria ibabe lolebira. <sup>27</sup>Ani bialu biragola tigua lalu, í tagira pialu pobe lolebira. Agali haguane mbira ibiyada. Ayu dege í hamene mbira ibalu anda hobane mbira í padego mulebira.

<sup>28</sup>Heneneore wali agali manda dewawi karu irane kirame ti mo ko holebira.

Wali agali í ti andagaha palibelo turu nahe bu karume í mege biragomebi

Ína dano haridago hanabe, lalu bi hongo howa keba ho howabi olalu kagome tinaga miniha mo ko hai hene holebira.

## 30

*Waneigini baya hangu handaya ho holene ngago ogo*

<sup>1</sup>Abame ibu waneigini gubalini ho heagua nde waneigini bolebira. Ani biragola mani waneiginime ibu aba mo turu holebira. <sup>2</sup>Abame waneigini mani turu helonaga ayu baya hangu lawai haga ka. Ani bialu damene dewa biru ngagoria wane igininaga te dewa laga ka. <sup>3</sup>Waitigirume waneigini kago de hondowa ti dimagoli ho helo waneigini aba ibugua baya hangu mana laga ka. Ani biragome aba ibuni ibu nenege bu karunaga deni mini lene mbira holebira. <sup>4-5</sup>Aba ibuni nahome kangu ibu waneigini bu karu hondowa turu ho birulebira. Ani biruwa ibu homolene horo tagira ibirangi ibuni miniha genda nayi homolebira. Ibu homedeha waneiginime ibu hene ngagoria ho aribia holobada lo manda bialu genda naheore homolebira. <sup>6</sup>Heneneore ibu waneigini

ha aribia haragome ti waitigi abala hayaru pani ba abala nenege howa mbirale ti aba biamogo biagaru tigua biamogo bigi bialu holebira.

<sup>7</sup> Aba kagome ibu waneiginihondo hendore howa ibunaga dere emene bidaru kabu bia hayagola waneiginime dugu emene biyagua aba ibu manga haga ka. <sup>8</sup> Nogo hosi kago baya hangu biawai nahayagua nde ibu mine halu gabua holebira. Anidagua dege waneigini mana nahale hene heagua nde ibuni hame ledagoha pupebe bialu haga holebira. <sup>9</sup> Inaga waneiginime ihondo hale harago e dege laga hariyagua nde horo mbirungi í mo durula holebira. Libu haru gini bialu haga haribiyagua nde horo mbirungi í mo genda holebira. <sup>10</sup> Í igini kagola oba nahabe. Ibugua í genda mo ngiragola mani ini dara ho howa keba halu birulene wuligo nahabe. <sup>11-12</sup> Ibu igiri emene dege kangi ibuni hame ledagoha helo wanahalimu. Wene igiri emene kangi mana lalu tibume bolene nga. Mani anda halu puwa inaga bi larego hale nahe mine hama ibaga bulebirago ayu wene kangi bo gangu lolene nga.\* <sup>13</sup> Í igini kago baya hangu handaya ho howa mana bayale bulene ngago lawai holene manga nahe baya hangu lawai habe. Mani ibugua í mo taga holene wulebirago ayu howa mo tiga bialu holene nga.

### *Inaga tingini baya hangu handaya ho holene nga lenego ogo*

<sup>14</sup> Yagibano tinaga tingini hongohe agali homogo karunaga tingini gedeore howa warago tara tara balu haga ka. <sup>15</sup> Tingini ibu galoneale mbira muni ngolo ngaru nagalone lowa bolangua hene nga. Tingini hongohe maruale ngaru bibahende bolangua hene nga. <sup>16</sup> Heneneore tingini ibuha warago mbira nawi howa hongohe heagua ibu galone duniniore mbira kagola wali agali turu ho haga. <sup>17</sup> Ainde inaga tingini ibu warago tara tara balu mo ko halu haabo hagayagua nde abale homalu homaliha baya hangu halo haabobo bu holene nga. <sup>18</sup> Ai mbirali warago bo ngagonaga tomo yu pialu keria ibugua tomo ogoni nabe naheyagua nde tomo ogoni wali agali homayaru tinaga loma bu yalu homaliha pialu yu wahalu dai biradagua bulebere. <sup>19</sup> Dama wabu heledagohondo ira lini bayaleru aginaga do loma bu mialu harilibe. Ibugua mbirale mbira nabe nahebi nga yabe nahebi ngago ndobe. Wali agali warago timbuni Anduane Homogoha howa ibini mo yu karu tibi nde tomo nolenebi nga yulenebi nakarulapeore holebira. <sup>20</sup> Tomo bayale ngaru tinaga deme handa hondowa tinaga bu miniha noa halu nabe nahedagola genda timbuni holebira. Agalime wandari baya bedago de hondowa ibu daubulene hame lowa miniha dimagoli halu mini burugu lo hagagobi holebira.

### *Wali agali turu ho karu ti bayale holebira ledago ogo*

<sup>21</sup> Genda bu ngarume í bope nahelo halu ininaga hame ngegome í mo ko halu bope helo nahabe.\* <sup>22</sup> Wali agali turu ho haga karu ti bayale halu ti mali luore dindini holebira. <sup>23</sup> Ini hendore hole inaga miniha mo turu howa habe. Bu miniha genda halu mini burugulo holeneme wali agali dewa mo ko hai halu ti biamogo nabiagaorego manda buwa inaga bu miniha genda ngago mo wahalu habe. <sup>24</sup> Mana kira dimagoli holene keba holenelame wali agali abale balu home laga ndobe. Bu miniha genda yu kagome wali agali abale mo wahe haga nga. <sup>25</sup> Heneneore wali agali turu ho karu ti tomo damene bibahende hame lai haga ka.

## 31

### *Dindini homogo holene ngarume wali agali mo genda haga nga lenego ogo*

\* **30:11-12:** Mbuga alatawe gilibu wini ngagoha bi maru hobane ogoniha gilibu winigo nga. Bi ogoni ogodagua leda. Ibu wene igiri emene kangi ibuninaga hame ledago talialu helo yupe nahabe. Ani bialu ibu ko birago bialu helo inaga de paiho holene nawi. Ini wene igiri dalihe kengi ibu baya hangu handaya ho halu ibu wene gali kangi tibume minu babe. Mani ibu mine halu inaga bi hale naharagola í genda halu tandaga holene tagira ibulebirago ayu mo tiga bibe, leda. ☆ **30:21:** Aga 11.9-10

<sup>1</sup> Wali agalime tinaga muni ngago hangu mitangi bialu mini burugu lo hayagua tini u baya hangu napale halu tinaga tingini o bialu kuni hangu ona holebira. <sup>2</sup> Heneneore wali agali tinaga biyinaya hangu mitangi ho haga karu ti u baya hangu napaliagaore ka. Ogoni wali agali warago timbuni bo wuwa u napale hagamadagua haga nga.

<sup>3</sup> Muni dewawi homogo kagome biabe ndelaheore bialu muni mbiraleru mo ngoai ho wialu hagane. Ani bialu howa ainde horo mbiru ibu halo bedangi mbirale bayale ilo wiyagome ibunaga hame ngago biba helo biraga. <sup>4</sup> Yagibano kago ibubi nde erekui biabe bialu muni mbiraleru emene dege ilomogo bu ngelo haga. Anigo ai ibu halo bedangi ibuha dewaore tubagi ho wiai karia handaga.

<sup>5</sup> Wali agali ngolo dege hame lo haga karu ti wali agali bayale tigabi ndo holebira. Ani bialu wali agali muni hangu mo wialu haabo haga kago ibu mbirungi mo luluya holebira. <sup>6</sup> Wali agali dewame muni ngoloru dewaore wule hame lalu karia tiniha genda tandagala timbuni ngago ngola howa tini mo ko haga nga. <sup>7</sup> Muni dimagoli haragome wali agali dewaore mo pila halu wali agali lulu karu mo hondo hagane nga.

<sup>8</sup> Homogo muni mbirale dewawi kago ibugua muni hangu hame lowa biabe bia ndo ibugua biabe tigatiga bialu heneyagua nde ibu turu ho holene nga. <sup>9</sup> Wali agali ogonibi bialu haga heagua nde iname ogoni ale kagohondo mo turu halu bi bayale lamialu holene ngago irane ibugua mana bayaleore ibunaga wali agali karu mo walia halu kagonaga mo turu holene nga. <sup>10</sup> Munime ba handayagola bi nalene ai kebe. Ibu munime bahandayagola handalu ibu pora bialu pene heagua nde ibu turubiore kagoni ndobe. Mbirali mana ko nabiaga ai kagome munime bahandayagola pora bialu pene kabe. <sup>11</sup> Ibugua holene bayale ngago ibu abale ereba naholebira. Ani bialu wali agali ti mo ngoai ho biruwa ibunaga mana bayale biaga ngago hangu te lalu birulebira.

### *Tomo nalu birulenenaga mana bayale ngago ogo*

<sup>12</sup> Í agali haguane mbirago andaga tomo nole dagia ngagoria biruwa tomo baya dagiani ngago deme hondo biruwa lalu, Ayaliore-o tomo baya taraoreda, loleni nalabe. <sup>13</sup> Baya hangu manda bibe. De ibugua dimagoli hagago ko nga. Mana ogoni bolangua hene mende nawiore. Anidagua biagagome de ibu dugu biaabo haga nga. <sup>14</sup> Dagiani ngane hendedego mo yai holeni nahabe. Tomo í ala mulenaga wali agali hela amunana nabibe. <sup>15</sup> Íni mitangi birilidagua wali agali bu karu ala mitangi bibe. Mbirale mbira bule manda bidego minime mo tale ala bibe. <sup>16</sup> Tomo nolene tu haragola tomo minila haru agalime tomo naga ngadagua nabe. Nogo biangome nagadagua nalu keria wali agali biru ngarume íhondo oba holigo manda bialu nabe. <sup>17</sup> Mana bayale mbira í tomo emene nalu maru ti wene dege nole nalu bedagola í abale nai hariyagua bayaleore. Tomo dewaore í mo yariyagua wali agali bedaru bibahendeme íhondo mini ko wialu birulebira. <sup>18</sup> Wali agali dewaore bereagua nde garere bialu tomo dewa í mule manda buleni nabibe. <sup>19</sup> Wali agali mana bayale bulenenaga manda mini bedarume tomo emene dege nalu biraga. Ani bialu mani ti buhe bayale karulape mialu u bayale paliaga. <sup>20</sup> Wali agali tomo dewa nane kagome u bayale paliaga. Wali agali tinaga tombeha tomo palu toleledago ibu u baya hangu napaliaga. Buni timbuni nalu magu tagua ho biraga. <sup>21</sup> Ai tomo dewaore nariyagua nde heyalu bu he bayale mialu ibagabu kegola mani karulape holebira. <sup>22</sup> Igini-o ina bi larogo baya hangu hale habe. Mineore holene nawigo mine nahabe. Ani larogoni mani howa inaga bi ogo henene galoneore lenedane hondolebere. Mbirale ina berego damene bibahende mendeali kago baba irigiirigi bialu bolangua haga haga bulenaga nabibe. Warago ngago íha ngola holigo nabibe laro.

<sup>23</sup> Wali agali bu karume mbirali kago ibugua tomo timbuni dawa ngago hondowa turu halu tigua bi dewa ogoninaga lalu hagaya. Tigua ani lolene bayale <sup>24</sup> Anigo wali agali andagaha haga karume tomo emene ko miriyagua nde tigua keba abale holebira. Ani bialu tinaga bi larogo tiga tiga ngadagua lara.

*Mana ko lulu iba nowa lulu yu howa mana lehe biaga ngago ogo*

<sup>25</sup> Í lulu iba nalu howa wali hongohe bedo agali hongohe ko lowa maru kago walia nahagago nahabe. Waini ibame wali agali dewaore mo ko hai hene ngago manda bulene nga. <sup>26</sup> Ibame aeane irame dene ngago mo hongo haga nga. Anidagua dege waini ibame wali agali mine haga bu karu ti gungu bialu kangi tinaga mini ngago mo pana hagane nga. <sup>27</sup> Waini iba ti nolene ngadagua nayagua nde wali agali mo turu holene bayale nga. Wali agali waini iba nolene nawi hayagua nde agua bulubadabe. Bambaore howa wima ibinigo ayu kemangibi waini ibame wali agali mo turu hagane winigo nga. <sup>28</sup> Wali agali ti waini iba nolene tu naluibunaga nolene magi ngago karulape nayagua wali agali tini turu haga. <sup>29</sup> Anigo waini iba dewaore nayagua nde tigua keba abale tungulope halu gungu bialu pilope hama ibaga biagane nga. <sup>30</sup> Wali agali mini nawi lulu bu karu iba nowa luluyu kangi tiha keba abale halu gungu bule hamelowa homa handalu biraga. Ani bialu karia tinaga hongo ereba hai haragola tinaga tinginiha dere dewaore bu hagane nga.

*Tomo nalu baya hangu biragane ngago ogo*

<sup>31</sup> Dawe halu tomo nalu biruwa ínaga damene mbira kagohondo ínaga dano hanga lalu ibuhondo lai lolenebi ibu mege bulenebi dano hangabe lalu bi hongo howa nalabe.

## 32

<sup>1</sup> Ína tomo nolene ogoni mo tiga bialu haru habelo dabo helayagua nde ínaga mine halu ínina mini yaraga holeni nahabe. Í wali agali tomo nole ibiraru ti dombenaha ti tomo nelu baya hangu haru howa ti tomo nalu birai kagola ínibi nde ti haru mandagi birabe.

<sup>2</sup> Ínaga biabe bulene ngago biai howa ti heba mandagi turu ho biralimu. Anidagua beregola ínaga biabe bayale birigonaga te dewa lalu birulebirago berelo ani bibe.

<sup>3</sup> Agali wahe-o ínaga mbirale bibahende manda biai kego ainde ínaga te maru lolene bayaleda. Anigo ínaga iba gana mo ko holigo hendore mini wiadai buwa dege labe. <sup>4</sup> Wali agali tingini maru bialu kago ínaga bi hendore dege labe. Horo ogoni ínaga mine howa manda ngego mo walia holonengi ndo. <sup>5-6</sup> Waini iba dendebe ngago heba ibagana lalu iba bayale heba mandagi birabe. Ogoni baya gibiore ngolome wabini ege pume mo yari bia hene ale wialu ege tole bayale tara yolo dewaoreme miaga ngarume mo yaribia hene ngaligobi nga.

<sup>7</sup> Igiri daliahe kego ínaga bi mbira lole heya layagua ogoni bayalego ainde tigua íhondo bi lole heya lalu halu kira olelo birabe. <sup>8</sup> Bi dewa nale howa bi kuni dunini lolene ngago dege labe. Manda timbuni bi hariyaguabi bi dewa nale ne hariga ndibulo habe. <sup>9</sup> Í agali haguane bedaru baba mandagi birariyagua nde íbi agali haguane ti bedagobi dege kobe toba nahabe. Ani biruwa wali agali mbirago ibu bi laragola í bi nale ne hariga ndibulo birabe. <sup>10</sup> Hari kulu nale wene dege lole ngelowa hari daba ala waga larane handaga. Anidagua dege wali agali mbirago ibu wali agali bu kagoria ibu ha nabi ngaore ti mini bayale mini lene ka lalu hale ho bamba haga nga.

<sup>11</sup> Dawe halu tomo nalu birarimigo nai halu ínaga andaga abale pobe. Maru ti piyai kagola í hangu biru waholigo abale pobe. <sup>12</sup> Ínaga andagaha biruwa biradagua birulene karulape dege. Anigo mine howa kudaga bi dewa lalu bedegome íha ko wuligo ala manda buwa bi labe. <sup>13</sup> Mbira ngago ladege bero. Anduane Homogohanda í wabu helalu ibugua íhondo mbirale dewaore yu habelo nginigo ínaga ibuhondo kai lalu holene nga.

**Ngode Datagaliwabenaga mini bayalebi wali agali ibunaga  
mana bayale bulene ngago bialu ibunihondo bi laga  
karunaga mini bayalewi kagonagabi te leda**

*(Be 32.14-42.14)*



*Anduane Homogonaga maname wali agali baya hangu lawai haga ngago ogo*

<sup>14</sup>Wali agali Anduane Homogo gi halu ibu andaneha haga karu tiguaibunaga bi lawai harago hale halu talialu haga ka. Ani kagola Anduane Homogohanda wali agali ibu gubalini ho haga karu mo bayale haga ka. <sup>15</sup>Wali agali Anduane Homogonaga bi mana lo wini ngago baya hangu lo manda biaga karu tigua mana ngago manda timbuniore bulebira. Anigo wali agali ke howa mana talialu haga tingi haga bu karu ti pi lalu pu ereba holebira. <sup>16</sup>Wali agali Anduane Homogo andaneha haga karu tigua mana tigabi ogoda lalu handa walia holebira. Ani bialu tigua biabe bayale biragome arumaha ngago mo wa haga. <sup>17</sup>Wali agali mana ko biaga kagome maru karume ti mo tigua bule bi lalu karia tigua uruni hale nahe bi larago mo wahaga ka. Ani bialu tigua mana mo beregedalu tinime hame ledago mo ngelaga ka.

<sup>18</sup>Wali agali manda bayalebi kagome wali agalinaga mini ngaru bibahende mo tale biaga ka. Anigo wali agali mine haga bu karu tigua mbirale mbira gi nahaga ka. <sup>19</sup>Ini mbirale mbira bule manda bu hariyagua wali agali maru karu tinaga miniha ngago ala hale habe. Anidagua beregola biabe berego biai howa iha mini burugu lolene mani nawualebira. <sup>20</sup>I pi loligo hariga ege tole dewa uliwi ngagohabi napobe. <sup>21</sup>Hariga bayale wiagua nde mo ko holene nawulebirabe toba nahabe. <sup>22</sup>Anigo deme mamage baya hangu habe. Ini waneigini karu tigua genda mo yu anda ibulene nga ndobe. <sup>23</sup>Ini kegoha baya hangu mamage halu mbirale ina berego damene mamage howa bialu habe. Wali agali mana ogonidagua biaga kago ibugua Anduane Homogonaga bi mana lo wini ngago talialu hagane ka.

<sup>24</sup>Wali agali Anduane Homogonaga bi mana hale halu taluwa bialu haga kago ibu baya holebira. Wali agali Anduane Homogohondo mini mbiraore wu kago ibuha mo ko holene naibulebira.

### 33

<sup>1</sup>Wali agali Anduane Homogo gi haluibunaga bi hale haga kago tiha mbirale ko ngaru naibulebira. Bahondolene ibiragome bope nahe ti bolangua halu pelo Anduane Homogohanda ti biamogo bulebira. <sup>2</sup>Wali agali mini gigabiwi kago ibu Anduane Homogonaga bi mana lo ngago angua halu pubagi nahaga ka. Anigo wali agali Anduane Homogonaga bi mana talialu haga tingi ho kago ti iba sibi solowara hanini puyabume pulo yolu pu amunana biagagobi ka. <sup>3</sup>Wali agali mini tigabiwi kagome mana lo wini ngago yutiga bu haga ka. Ani yutiga biagadago irane bi mana lo wini ngagoha helaga biagane ege tole kira Anduane Homogonaga hame hale hagane ngagome bi ledago heneneore laga ngago manda bialu ti mini mbiraore wiaga nga.\*

<sup>4</sup>Wali agalime inaga bi baya hangu hale helonaga inaga bi lolenego baya hangu manda manda bu yabe. Bi tigua ihondo bi hale harago tigatiga ladai bulenaga miniha baya hangu mitangi bialu manda manda bu dege holene nga. <sup>5</sup>Wali agali lulu karume mbirale lawai henego baya hangu manda nabiaga ka. Tinaga miniha bame garo ge poragola pedere biyadagua bialu helowa haga ka. <sup>6</sup>Wali agalime tinaga nenege bu karu mitangi nahaga karu ti nogo hosime tinaga erekunini biraruago abogoda lo manda nabiaga kagobi ka.

*Mbirale bibahende ogobi degedege ndo nga lenego ogo*

<sup>7</sup>Ni ibugua wa horo bibahendengi ngiaga ka. Irane agome horo maru duniniore wiagabe. <sup>8</sup>Anduane Homogo ibuninaga hameme horo marungi ogonibi ngelaga ka. Ibugua malinaga horo pongo wialu horo timbuni marunagabi pongo wini. <sup>9</sup>Ai Ngode Datagaliwabehanda ibuninaga horo maru mo bagiho ngelalu binigome horo wiabagiho ngelene uruni horo damene maru bu ngarunibi ndo ti horo timbuni nga. Ani bialu horo maru emene dege horo damene wilo ngelene.

\* 33:3: Har 28.30, Sir 45.10

<sup>10</sup> Ina wali agali kemago dindime wabini ogobi dege dege kema. Adama ibu dindini henegodagua ina wali agali bibahende dindini holene wini nga. <sup>11</sup> Anigo Ngode Data-galiwabe ibuninaga manda timbuni ngagome wali agali tara tara dindini wabu helai hene. Ani wabu helowa tinaga dindibi tinaga mana bi lolenebi tara tara tini heagoha ta haga biniya. <sup>12</sup> Anduane Homogohanda wali agali maruhondo bi bayale lamialu tinaga mini mo yaraga heneya. Ani bialu ibugua maru ibuninaga helo dabo bagiho helalu ibuni heagoha kaware heleneya. Anigo maru hearu Anduane Homogohanda tihondo erembira mialu ti bope halu tinaga dindi wiyadagoha hearia bo taliatogo leneya. <sup>13</sup> Wali agali tigua dindi dongoma emeneru tinaga gime dugu mberabu yuwa ogonime beru tinime hame ledagobi wabiaga nga. Anidagua dege Anduane Homogohanda wali agali wabu helowa tinaga biabe ibunime hame leadagua bialu helo mo migi bini.

<sup>14</sup> Mana bayale ibu mana konaga waitigi ngagola holene ibu homolenenaga waitigi ka. Anidagua dege wali agali mana bayale biaga karu ti mana ko biaga karuale ndo ti tara mbira ka. <sup>15</sup> Baya hangu deme handabe. Anduane Homogo daligaore kago ibugua wabini bibahende kira kira dege dege wabiyagola bibahende hangu hangu helo ndo bibahende ibunialela mandagi haga bu helo wabini.

<sup>16</sup> I Siraga kogo ainde agali maru haru haga bu heneru aria i hamaro bini ko. Ani bialu agali marume gerebi lini dedago do yu piai heneha mbirali mahaore ibalu dai heneha emene do wahene dedaru dalu piagagoale i kogoni. Anduane Homogohanda i biamogo biyagola gerebi dewa dedagola agalime do ngoai hagadagua ina biabe bayale bialu kogoni. <sup>17</sup> Heneneore ina ini biamogo bulenega erekui nabi bialu haru. Wali agali manda bayale bua ho hearu baya hangu lawai halu haru.

<sup>18</sup> Agali biabe bialu haga kemiru tigua i bi larogo baya hanguore hale halimu. Agali haguane wali agali ibu ngoai howa bi lelo haru haga kemiru ti ina bi larogo baya hangu hale halimu.

### *Ini hangu hangume handaya ho holene nga lenego ogo*

<sup>19</sup> Agali mende kagome i ogoale bia lowa horo bibahendengi mende kagome i handaya ho helo nahabe. Ani bulene nawiore. Ini waneigini kagomeyaguabi i onemeyaguabi ini hamenebi damenebi mbira kagome i handaya ho helo holene nawiore. <sup>20</sup> Ani bialu inaga mbirale ngago wali agali mendeali kagohondo bame muwa mani ina tihondo dano hanga loligo bame namibe. <sup>21</sup> Mbirali inaga henge milo yupe nahe ha dege bialu homalu wahabe. <sup>22</sup> I waneiginime i biamogo bia lolene tiga nabi nga. I waneigini tigua ina ti biamogo bia lalu ihondo hale holene karulape nga. <sup>23</sup> Inaga biabe berego damene inime haru hai holene nga. Anidagua beregome inaga mini bayale mini lene kego mo ko naholebira. Ini homole kaware biruwa dege inaga mbirale wiridaru i damene bu karu paluni talebu tahabe.

### *Inaga garabaya biabe ale bia haga kago baya hangu handaya ho holene lenego ogo*

<sup>24</sup> Inaga dongi ibu muleberego tomo nelo mialu gewa tibu mialu pindu ngago mulebere. Anidagua dege tomobi biabe uruni bulenebi inaga garabaya biabe bia haga kago ibu karulape nga. <sup>25</sup> Inaga biabe bia haga kagohondo biabe dewaore mo miriyagua nde inaga miniha dungulo holebere. Anigo ina ibu bameore berelo wahariyagua nde ibugua i wahalu polene manda bulebira. <sup>26</sup> Biabe ndelahe hongohe ngago bialu tibu tandaga nayagua nde bulumagame bi hale hagane. Anidagua dege inaga garabaya biabe ale biaga kagome mine hayagua tibu tandaga bulene ngagome tandaga helo minu balu garabaya helolene nga. <sup>27</sup> Ibu bame naberelo biabe dewa mo mibe. Bame biruwa wali agalime mana ko bulene ngago miniha giga bialu biragane nga. <sup>28</sup> Bi ogoni henene orengo biabe mo mibe. Bi larego hale nahayagua tandaga hendelo mibe.

<sup>29</sup> Anigo ibuhondo miniha tandaga nahabe. Ani bialu ibuhondo mana tiga nabi ngago nabibe. <sup>30</sup> Inaga garabaya biabe bia haga agali mbira heagua nde ibu erekuibi inaga yolo wahalu yolo bu helene kago manda bialu baya hanguore ini tingini haru harilidagua haru habe. <sup>31</sup> Ininaga holeneore ibu kago manda bialu i hameneore haru haradagua bibe. <sup>32</sup> Ina ibuhondo koale bialu hariyagua nde ibugua i wahalu ibida polebirago mani ina ibu lone handawalia agua holeberebe.

## 34

### *Emaga hendenego mo dunubia nahabe lenego ogo*

<sup>1</sup> Wali agali mini nawi ibu lulu karunaga yutiga biaga kago lehe tiga nabioire biaga. Tigua emaga handaragome tini mo durula haragola tigua mbirale henene tagira naibulebirago bameore maliaho haga nga. <sup>2</sup> Wali agali emaga mo dunu bia ho haga karu ti ni dedago tininaga munini kago minu yania halu holenedaguabi puyabu pu larago haruru talima polenedagua pialubi haga ka. <sup>3</sup> Mbirale emagaha handarigo ibu mbirale iba waiha handarigo ale dege nga. <sup>4</sup> Mbirale dodohe ngagome mbirale dodo nahe ho aribia naholebira. Mbirale henene ndo ngagome mbirale henene ngago ona ibu he nalolebira. <sup>5</sup> De gandeba handaga karume de gandeba hondowa bi laragobi egame bi tara laragobi emaga tara tara handoragobi uruni bibahendeore henene ndo ke hagane nga. Mana ogoni walime waneigini taba hanalu howa mini tigabi ndo lehe ngago wu biragagobi nga. <sup>6</sup> Anduane Homogo Daligaore kagome ihondo emaga ogoni nahondo ngiyagua i mini burugu lo holene nawi. <sup>7</sup> Emagame wali agali mo luluya hagane nga. Wali agali emaga ogoniale talialu haga heneru mo ko hai hene nga. <sup>8</sup> Mbirale ke holene tara tara uruni aleme maninaga wali agali baya hangu bi mana ngago talialu helo biamogo nabulebira. Ani bialubi wali agali bayale tigabi karu tigua tinaga mini bayale wua kago latagi helo biamogo bialu mo hongo haga ndo nga.

### *Dindi tara taraha puwa lawai holene ngago ogo*

<sup>9</sup> Wali agali dindi tara tara ngaru handama ibaga bu hene kago tiha manda tara tara dewaore bi ka. Ani bialu wali agali biabe tara tara bialu hene karume lawai bayale holebira. <sup>10</sup> Wali agali tiha bahondolene mbirame tiha anda naibini karu ti mbirale ngarunaga manda timbuni nawi ka. Anigo wali agali dindi tara tara ngaruha handama ibaga bini karu tiha biabe tara tara ngaru bulene hondo manda bu yai ho ka. <sup>11</sup> Heneneore ina dindi maruha de handama ibaga bialu howa dewaore hondo manda biru. <sup>12</sup> Anigo mbirale dewaore de handarugo uruni bibahende te lai holeneo nakarulape. Ai mbirale manda birudagome ini dege biamogo dewa biya.

### *Biamogo bulene ibuniore Ngode Datagaliwabe ibuniha howa ibaga lenego ogo*

<sup>13</sup> Wali agali Anduane Homogo gi halu ibunaga bi hale halu kago ti haabo holene yu holebirago irane tigua Anduane Homogohanda hangu ti biamogo bulebira lowa mini mbiraore wu kamogo ti haabo holene yulebira. <sup>14</sup> Wali agali Anduane Homogo andaneha haga karu ti ibugua mbirale bayale ngaru mo miragola ti mogo lowa duru nale holebira. <sup>15</sup> Wali agali Anduane Homogo kago gi halu ibuni andaneha haga karu ti turu holene ngago irane Anduane Homogo ibuni ti heba mandagi holebira lo manda bidagome turu holebira. <sup>16</sup> Anduane Homogonaga deme wali agali ibu gubalini ho karu handaya ho haga ka. Ibugua ti baya hanguore handaya ho halu mo hongo halu haga ka. Puyabu timbuni ibalu ni hongohede dalu birangi ibugua ti mo do haga ka. Ti pi nale bayale ibaga bu helonaga ibugua ti baya hangu handaya ho kaga ka. <sup>17</sup> Ibugua ti mo yaraga halu tinaga de mo wa helaga ka. Anduane Homogohanda ti mo dabi halu holene tiha helo mialu buwa ibuni ti haru mandagi ore haabo haga ka.

✧ 34:1: Man 13.1-5, 18.9-14

*Loma bo mulenaga turu haabo howa mialu habe lenego ogo*

<sup>18</sup> Wali agali mbirame nogo egaru bo page buwa Anduane Homogohondo loma bo miyagua nde Anduane Homogo ibu wali agali tinaga loma ogoni alego hame nalaga ka.

<sup>19</sup> Anduane Homogo Daligaore kagome wali agali ibunaga bi mo wahaga bu karunaga loma ngago ibu hame nalaga ka. Wali agali mana urunibi biaga karume loma dewa mialu hayaguabi ibugua tinaga loma ngago hondowa turu naholebira. <sup>20</sup> Wali agalime loma bo mulenaga nogo yagibano kagonaga bo kayu biyagua mana ogonibi birago koorene ko nga. Tigua ogonidagua birago manane waneigini mbira ibu aba handaya ho helowa agali mende kagome waneigini ogoni homelo bo waharadagua bira. <sup>21</sup> Wali agali yagibano bu karu tinaga holene tomo emene ngelo kagoria hangu paga ho kagoni ndobe. Ai wali agali mbirame tomo emene ogoni mo page biyagua nde yagibano mbira kago homelo bo waharagoni ndobe. <sup>22</sup> Wali agali mbira ibugua ibu damenenaga tomo mbira ngago ohowa mo yalu biabe biaga kago yolo nabi piyagua nde tibi wali agali mbira kago homelo bo wahaga karubi dege ka.

<sup>23</sup> Agali mbirame anda bialu kagola mendealime gialalu heagua ogoniha galone naheore libugua biabe erekuibini bameore bialu kebi. <sup>24</sup> Agali mbirago ibugua mbirale mbira hame larago mendego ibu manga hayagua nde Anduane Homogohanda libu harunaga hame natalulebira. <sup>25</sup> Wali agalime homene tingini mbira ngago gime yania howa gi wayawaya bo howa lone ela hayagua nde gi wayawaya bayago bame dege holebira. <sup>26</sup> Anidagua dege wali agalime tinaga ko biyagonaga dara howa ti tomo dewa nane henego ainde mani howa tigua mana ko lone biyagua nde Anduane Homogohanda tinaga bi larago hale naholebira. Heneneore tinaga dara hayago bame yu wahayagoni ndobe.

## 35

<sup>1</sup> Wali agali mana bayale ngago talialu haga bu karu tibi nde loma bayale tara tara karu bo delo miaga kagobi dege ka. Ani bialu wali agali Anduane Homogonaga bi mana hale haga karu ti Ngode Datagaliwabela mini mbiraore holene loma bo delaga bayale ngagobi dege ka. <sup>2</sup> Wali agali tigua mana bayale birago bia dai biaga kago ibu widi lini bayaleru loma bu miaga ngagobi nga. Ani bialu wali agali yagibano kagohondo tomo mbiraleru tale bu miaga kago ibu Ngode Datagaliwabehondo kai lulu loma bu miagagobi ka. <sup>3</sup> Ngode Datagaliwabe ibugua wali agali mana ko bulene ngagoha hogorale bialu haga karuhondo turu ho hagane ka. Ani bialu wali agali mana tiga nabi ngago wahalu piaga karunaga ko ngago domo wahaga ka. <sup>4</sup> Maname ogodagua leda. <sup>1</sup> Anduane Homogo andagaha ibalu loma mbira manda bu yalu ibulene nga lalu lo wini nga. <sup>5</sup> Wali agali bayale tigabi bu karume nogo bo loma bu mulenaga nogo bayale habe tigi kago bo loma bu miaga ka. Anidagua biragola loma bo deledagome tumutumumu baya ngabiore biragome Anduane Homogo Daligaore kago mo turu hagane nga. <sup>6</sup> Anduane Homogo ibu wali agali bayale karume loma bu mirago turu haga howa ibugua ti embeda nahagaore ka. <sup>7</sup> Anduane Homogonaga mini yaraga hole turu ho howa inaga mabuha tomo hangedego piagane boga birago ibunihondo bu loma bu mulene nga. <sup>8</sup> Inaga lomaru bu yalu ibalu howa inaga denguiha keba howa aruma holene nawi. <sup>9</sup> Anduane Homogo Daligaore kago ibugua ihondo mbirale dewa ngiyago manda bialu ina nde ibuhondo miadai bulene nga. <sup>1</sup> mbirale dewawi karulape hariyagua nde ibuhondo dewa dege mulene nga. <sup>10</sup> Anidagua bulebereggo irane Anduane Homogohanda ina mbirale ibuhondo mo turu halu mialu kego damene baya hangu ngiadai biai haga ka. Heneneore dewa haluore ngiadai biai holebira.

*Ngode Datagaliwabe ibu manani howa tigatigaore mo tale biaga kago ogo*

<sup>11</sup> Anduane Homogo ína bime ladebodebo nabibe. Ibugua mbiralime mana ogonibi birago manga haga ka. Ani bialu loma ko ngaru bu merogome íni biamogo bulubabe toba nahabe. <sup>12</sup> Anduane Homogohanda wali agali lenego timbuni haguane heaguabi ko yagibano heaguabi bibahende manani howa tinime bialu hayagonaga mo tale bulene ngadagua mo tale biaga ka. <sup>13</sup> Ibugua wali agali yagibano bu karu ibu mini turu howa ibugua wali wali ko uruni wali agali maru bu karunaga giha howa tandaga nalu howa tigua ibuhondo bi lalu kago hale hagaore ka. <sup>14</sup> Waneigini aba aiyá nahe hono wahene bu karunaga bi larago erembira nami baya hangu hale haga ka. Ani bialu wali dalo ibu agalini homene bedarume bi larago hole haga ka. <sup>15</sup> Wali dalo bedagome dugu timbuni bialu wali agali ibuhondo mana lehe biyadago manani helaga ka.

<sup>16</sup> Wali agali Anduane Homogonaga biabe baya hangu bia halu haga bu karunaga bi baya hangu hale halu ibugua tihondo turu holebira. <sup>17</sup> Wali agali manda nawi karunaga bi larago Anduane Homogo karia tigatiga puabo haga. Wali agali uruni ti turu nahe haabo halu Anduane Homogohanda tinaga bi larago hale haragola wahaga.

<sup>18</sup> Wali agali mini lene timbuni bu karu ti halo hole ndo Anduane Homogohondo bi lalu haabo halu Anduane Homogo ibuni tiheba kaware kagola wahaga ka. Ani bialu wali agali bayale tigabi bu karume wali agali ko biaga karu bo wahai helo hongo mialu haga ka. <sup>19</sup> Anduane Homogo ibu hondo ha nabiaga ka. Ibu ti kagoha abaleore ibuwa <sup>20</sup> wali agali mende kago dara halu biamogo nabiaga karunaga hongo bo podalu wali agali ibuhondo mini mbiraore nawiaga bu karu pani nelu mialuore wahaga ka. <sup>21</sup> Anduane Homogohanda wali agali mine haga karu bo hilo wahai halu wali agali ko karunaga hongo timbuni ngago bo haealo wahai haga ka. <sup>22</sup> Ani bialu ibugua tininaga mini wu kagoria howa mo tale bialu biabe tinime bialu hayadagua yolo miadai bulebira. <sup>23</sup> Ani bialu wali agaliibunaga heneru godini howa biamogo bialuibunaga dara holene irane nawini dara hagane mana ngagome ti mo turu timbuni holebira. <sup>24</sup> Heneneore wali agali tigua hondole turu holebirago ni hongohe dedagola beralibame ni dedago mo ge hagadagua horo ko mangabi tiha anda íbu ngangí Anduane Homogonaga dara holene panaga ibu ngagola hondole turu ho hagane.

## 36

### *Isaraeleme Anduane Homogohondo bi lenego ogo*

<sup>1</sup> Ngode Datagaliwabe-o í dindinaga dahuliya andaganagabi Anduane Homogo kego ina kemaru de handalu ina dara halu wali agali hameigini tara tara paluyu pedaru bibahende ínihondo gi helo mo gi habe. <sup>2</sup> Wali agali íhondo mini mbiraore nawiaga karu ti ínaga hongo ngego handa walia helo pani nelu mialu minu bai habe. <sup>3</sup> Bamba íni ina heba mandagi howa biabe bialu hegola wali agali bu hearume ínaga mini timbuni mini lene hego de handaya. Ai ayubi ína tiha biabe beregola ínaga hongo tara ngego mo walia haregola ina hondoleneore hame ledema. <sup>4</sup> Ani beregola iname mini mbiraore wulene mbirali nahe Ngode Datagaliwabe í hangu kego hondo ina mini mbiraore wu haga kagoni í ale mende nahe lalu wali agali maru karume hondo manda bilo ani bibe. <sup>5</sup> Ínaga hongo lone mo walia halu agalime nabiganeale maru bibe. Ani bialu ínaga hongo timbuni ngego lone mo walia halu ti hendelo mo pana ho ngelabe. <sup>6</sup> Ína keba holene ngego mo heya halu ína miniha tandaga holene ngego inanaga waitigi kagoha mo batagi habe. Bibahendeore bo wahai halu mbiraoreli hangubi mbira helo yupe nahabe. <sup>7</sup> Buleore lalu bi lo wiriru abaleore mitangi bibe. Ai wali agalime biabe timbuni ína birirunaga te dewaore lalu helo manda buwa bibe. <sup>8</sup> Waitigi homa nabi ngaru homelo irame bo heda halu tungulomi labe. Wali agali tara ínaga wali agaliru mo ko haabo halu haga karu bo haealabaga bu wahaiore habe. <sup>9</sup> Waitigi agali haguane bu karunaga haguane karume haguane timbuni mende mbira nahe ti hangu kama lalu



haga kago ai agali haguane uruninaga emboneore bo gingirulo wahai habe. <sup>10</sup> Yagoba hameigini bu karu ti hameigini mo mbiraore howa helo bibahende mo mogo bialu tininaga dindi inime mini ngagoria helo mo mbiraore habe. <sup>11</sup> Anduane Homogo-ina Isaraele inaga mini inanaga mini mo wialu ina inaga waneigini mo waheneho helalu birigo kemago ainde ina ina dara habe. <sup>12</sup> Ininaga dindiore Yarusaleme ngago dara habe. Ani bialu dindi iniore biragane ngago mitangi bialu dara habe. <sup>13</sup> Ininaga mini yaraga holene iba ganarume Saiono tolatagi helalu ini andaga kagoha inaga mini mo yaraga halu mo timbuni habe. <sup>14</sup> Inaga wali agali abale inime wabu helene biaru baba mandagi kaware habe. Ani bialu agali inaga bi mana latagi halu mbiwia haga bu heneruha howa mbiwia halu bi laga birigo ayu mo walia haga bia. <sup>15</sup> Wali agali i malia ho karuhondo yolo bayale mialu agali inaga bi latagi halu mbiwia haga henerume biwia ho winiru heneneore helo mo pana halu tagira pelalu haabo habe. <sup>16</sup> Inaga wali agali kemarunaga bi laramago hale halu agali inaga biabe bia haga Aronohanda ina mo bayale habelo ibugua ihondo bi layago mo karulape helabe. <sup>17</sup> Ani beregola wali agali dindi bibahende ha bu karume ini hangu Ngode Datagaliwabe haluhe haabo haga kego manda biai helo ani bibe.

*Mbirale ngaru tale bulene mana ngago ogo*

<sup>18</sup> Wali agalime tomo tara tara dewa mialu naganego ainde tomo maru bayale dendebiore ngaru mialu naga. <sup>19</sup> Ne hegelame nogo egaru bayale dende bi ogoale lalu mo tale biagane nga. Manane ogonidagua dege wali agali mandabi kagome bi henene lara ogo ke howa laragoni lalu abale mo talebu lai haga nga. <sup>20</sup> Wali agali manda bayale nawi karume genda dewa mo yu anda ibagane nga. Anigo wali agali manda bayalewi karu tigua bi ko larago baya hangu ladai bibehe ka.

*Wali mbira i dabubule manda bu kego ibunaga mana baya hangu dabo handabe lenego ogo*

<sup>21</sup> Agali ibunime wali taya bulene nga. Anigo pigane wali ibu dabubule hame ledago ibuni abidabe hondole ala daba hondolene nga. <sup>22</sup> Walinaga dengui baya ho bedagome agali mo turu halu agali maru karunaga dimagoli holene mo heya hagane nga. <sup>23</sup> Wali bi hongo howa wali agali maru karu baba nalagane bereagua nde wali ogoni agalini kago ibu turubiore ka. <sup>24</sup> Agali wali ogoni dabubini kago ibu mbirale bayale duniniore mbirago mo wu haradagua bidago irane wali bedago ibu biamogo biagabi ibula mandagi hagabi bedagome ibu turubi ka.

<sup>25</sup> Mabu mbira ngago pabe nabi hangayagua nde nogome mabu duga holebira. Anidagua dege agali mbira kago ibu wali nabere heagua ibu mabu pabe nabi ogonibi bame ibagabu haga ka. <sup>26</sup> Wali agalime agali mine haga karu tanoha ibagabu helo hame nalaga ka. <sup>27</sup> Ani bialu maru tini anda nahe bame paliaedede bima ibaga bialu haga karu hame naleda.

## 37

*Inaga nenege bu karu tinaga mana baya hangu mo tale bu handabe lenego ogo*

<sup>1</sup> Wali agali dewalime ihondo ti inaga nenege kema lolebirago ai marume ke howa lolebira. <sup>2</sup> Ainde inaga nenege bayale mbira kebigome i wahalu piyagua nde inaga bu miniha genda timbuni yu holebere. <sup>3</sup> Aiore nde darabago irane aginaga mbirale uruniale tagira ibalu dindi mo ko harabe. <sup>4</sup> Ke halu nenege tingi ho kago howa bayalengi i heba mandagi haabo howa genda yu kengi i erembira ngu holebira. <sup>5</sup> Ke howa nenege ogoni ale kagome dawé halu tomo bayaleru dewa nalu birulene horo nganggi libu haru mandagi tomoru nalu biruleberebigi ai wai porengi libu haru mandagi nape ibu birado holebira. <sup>6</sup> I nenege heneneore mbira heagua nde ogoni mitangi ho haabo holebere. I mbirale dewa wu kengi ibu embedaho wanahabe.

*Wali agalime í mini talebu ngirago baya hangu mo tale bulene ngago ogo*

<sup>7</sup> Wali agali dewame í biamogo bialu mini maru tale bu ngulebirago ai dewa uruni marume í mitangi halu ndo bame dege lalu holebira. Ti tininaga mitangi howa lolebira.

<sup>8</sup> Wali agali uruniale bu kagotha mamage ho habe. Tigua mini agua wu howa lenedabe hondole baya hangu daba handabe. Tigua í biamogo bulenaga lenedabe bame lenedabe handabe. Tigua í bope holenaga ohowa lalu holigo baya hangu handabe. <sup>9</sup> Wali agali urunibi kagome ke howa íhondo lalu, ínaga biabe karulapeda, loligo handabe. Ani lalu íha mo ko holene ngagoria ti bame de dege hondo holene wuligo manda bibe.

<sup>10</sup> Wali agali í heba biabe bua nahe kagohondo í biamogo bia lolene nawigo nalabe. Wali agali ínaga mbirale ngego dimagoli ho kagohondo ínaga mini ngego hada walia nahabe.

<sup>11</sup> Heneneore larogo wali mbira wali mendela hongo haga haga bialu bedagohondo wali mendedagonaga te í langi nalabe. Ani bialu agali mbira wai napiaga dule kagohondo wai ogodagua biagane lalu í lawai helo hale nahabe. Agali biyinaya biaga kagohondo ínaga mbirale ngeru ibu yolo bilonaga ina lone ibuhondo agira mibehedabe lalu hale nahabe. Ani bialu agali ínaga mbirale yolo bulebiragohondo muni agirame yolo bulebe lalu hale nahabe. Agali ína ibu kai labelonaga lawai haga kago bi nalamibe. Ani bialu wali agali dara nahaga howa dara holene mendeali mo walia nahaga kago baba bi nalabe. Agali mangahe kagohondo biabe biagane lawai ha lalu hale nahabe. Ani bialu wali agalime biabe abale biai holenaga abale biai nabi hendore bigi bialu kagohondo bi hale nahabe. Agali biabe biaga mangahe kagohondo biabe timbuni ngago mo muleni namibe. Agali uruni ale biaga kagonaga bi hale holeni nahabe.

<sup>12</sup> Horo bibahendengi wali agali tigabi karu baba dege ibaga bu holene nga. Ani buleberago irane íni manda bidegoni ti wali agali Anduane Homogonaga bi mana hale howa talialu hagane howabi tigua í baba mini mbiraoreho howabi í pi lolene kaware kegola tigua miniha ínaga genda ha halu hagabi ka ndobe. <sup>13</sup> Ainde í íninaga mini gigabi ngego talialu bialu holene ngago irane ínaga manda bayale bidego ibu íla mandagi haabo holene bayale mbira bu kego manda bialu anidagua bulene nga. <sup>14</sup> Mbirungi nde agali mini gigabi timbuni bi laga bu karu ína bolangua howa kego ani bu helowa mbirale mbira í hangume mo tiga bulene wulebirago bulebere. <sup>15</sup> Anigo dunini timbuniore mbira ngago Anduane Homogo Daligaore kago ibugua í hariga henene ngago mo walia ha lolene nga.

*Mini gigabi ngego mo tale bulene ngago ogo*

<sup>16</sup> Biabe mbira bule ngego bame bupe nahabe. Baya hangu manda ala buwa bi lolene nga. <sup>17</sup> Wali agalinaga miniha howa irane maria tagira ibaga mbirago bayale bulene mendego ko bulene <sup>18</sup> tebonego homolenenaga manego holenenaga. Ai hege ibugua irane maria uruni haru hagane ka.

<sup>19</sup> Wali agali maru mini bayaleru wu howa mendeali kago baya hangu lawai hagago ainde tininaga biabe bayale bibe nahe haga. <sup>20</sup> Wali agali maru bi bayaleru lalu holebirago garime tini homa handalu wiaga. Ani birago hondowa wali agalime tinaga bi larago hale holene manga haga. <sup>21</sup> Wali agali uruninaga mini ngago Anduane Homogohanda mini ndo wu howa tinaga bi laragotha lini bayale mbira tagira naibaga. <sup>22</sup> Wali agali maru mandabi kagome tini biamogo bialu howa bi bayale dege laga ka. <sup>23</sup> Wali agali maru ti mandabi howa tigua wali agali maru biamogo biaga. Wali agali ogoni ale kagonaga mana bayale ngagome lini bayale tagira piagane nga. <sup>24</sup> Wali agali maru kagome wali agali mini gigabiwi uruninaga mini yaraga hagane nga. Wali agali mandabi kagome ibu ngola halu howa tigua lalu, í bolangua heneore kegoni, laga ka. <sup>25</sup> Wali agali dindini lu haabo nahaga nga ndobe. <sup>26</sup> Anigo wali agali maru karume

tinaga manda bayale biago mo galone ho kagome tinaga mini ereba nahe wiaho wiaabo haga.

*Tomo dewaore nolene nawigo ogo*

<sup>27</sup> Waneigini-o mana ina bialu kego baya hangu handaya ho holene nga. Ani bialu deme baya hangu hondolene nga. Mbirale mbira ini mo ko holene ngago mo yulene nawi. <sup>28</sup> Wali agali bibahendenaga hame mbiraoregobi ndo nga. Anidagua ngagome mbirale tara tara ngago wali agali mbiraoreli ibu hangu karulape ndo nga. <sup>29</sup> Tomo dendebiore ngago miniha bolangua timbuni ho biruwa dewaore nagimbu bulene nawigo <sup>30</sup> irane tomo dewaore nariyagua inaga tiniha mo ko halu mini burugu lalu magu taguadai bulebere. <sup>31</sup> Wali agali dewaore homenego irane tomo dewaore nalu hearia homene. Anigo wali agali tomo nolene karulape ngadagua nalu heagua nde ti bayale howa lu dindini holebira.

## 38

*Warago marasinlanaga biabe biagago ogo*

<sup>1</sup> Dogoda biabe biaga karunaga mini mo yaraga holene nga. Ani bulene ngago irane ibugua i baya hanguore handaya ho hagabi Ngode Datagaliwabe ibunime dabo helenebi kagonaga ibu mini yaraga holene nga. <sup>2</sup> Anduane Homogo Daligaore kagome wali agali warago bo ngaru mo dabi helonaga manda dogoda tihondo talebu biyagola gabumane kagome ti yolo biragola biabe bialu haga ka. <sup>3</sup> Dogoda ibu ibunaga manda ngadagua ibunaga henge mo wu kagola agali haguane karume ibu bayale baba bialu haga ka.

<sup>4</sup> Datagaliwabehanda marasini tara dindini wini ngarume wabini ngagome wali agali tigua marasini mo nagalone habe naheore. <sup>5</sup> Bambaore howa ira mbirame iba ko kaubi bereago nolene bayale helene. Ani mo dende bia hayagola wali agali bu hearume ira ogoninaga hongo tara winiyane hendene. <sup>6</sup> Wali agalime Anduane Homogo ibuninaga mini mo yaraga halu mini leneore kagoni lelonaga ibugua ti manda bulene mo mini. <sup>7</sup> Ibugua wali agali warago bo ngaru mo dabi halu tinaga tinginiha tandaga ngaru mo wahai haga ka. Ainde dogoda bu karu tigua ira yuni tara tara bu karu yuwa marasini tara tara ngaru wabiaga nga. <sup>8</sup> Ani bialu kagome Ngode Datagaliwabenaga biabe bu hawia nahe bialu haabo kagoni howa wali agalinaga holene bayale ngelo mo tiga biaga nga.

<sup>9</sup> Waneigini-o warago bayagua ogoni bame bira lowa mo nagalene holeni nahabe. Ani nabi howa i biamogo bialu mo dabi habe lalu Anduane Homogohondo bi lolene nga. <sup>10</sup> Mana ko bulene ngaru handalu hogorale bialu puwa mana bayale ngago talialu bialu howa mana ko inaga miniha hangedego dugu wahai halu buwa holene nga. <sup>11</sup> Loma bu merego nde balawa bayaleni olibe lini ibaneme wabini weli bayale ngaru odoba howa loma ngabioreru bu mulene nga. <sup>12</sup> Ani biai halu mani howa dogoda Ngode Datagaliwabe ibunime dabo helene kagohondo i biamogo bia lalu lamulene nga. Dogoda kago ibu i biamogo bulene ngago manda bialu ibu i wahalu pelo yupe nahabe. <sup>13</sup> Heneneore marungi warago timbuni ngago biamogo bulene dogodameore biamogo bialu mo dabi holebira. <sup>14</sup> Anidagua biaga ngago irane dogoda tiguabi warago bo ngagonaga tandaga nalu ngago mo wahalu warago mo dabi holene hariga maru mo walua ha lalu tigua Anduane Homogohondo bi laga ka. <sup>15</sup> Wali agalime Ngode Datagaliwabenaga deni howa mana ko biyagua nde tiha warago anda ibiragola ti dogoda hondolene nga.

*Mbirali homaragola dara howa duganda holene ngago ogo*

✧ 38:5: Har 15.23-25

<sup>16</sup> Waneigini-o wali agali mbirago homaragola ina ibuhondo dara halu dugu bialu howa dara ho kego mo walia halu kiabu dugu bulene ngadagua bulene nga. Homa tingini ngagonaga mini mo yaraga hole baya hangu mo manda manda bu ngelowa hora holene nga handala wahalu napobe. <sup>17</sup> Mbirali homo ngagola tinaga biagane mana ngadagua bialu dara howa dugu bilimu. Hora howa nde wali agali maru bu karume í mege buligo duganda hagadagua hora howa halu mani nde latara halu haga haga bulene nga. <sup>18</sup> Dara holene ngagome wali agalinaga hongo bope haga ngago dara haho wiaabo holene nawigo tigi mbira hangu dara ho holene nga. <sup>19</sup> Heneneore mbirali homarago hora halu purogo lowabi dara ho haabo hagago ainde ani dara ho haabo keria inaga holene ngagoha yagi mo ko holigo manda bibe.

<sup>20</sup> Luore dugu bialu haabo holene nakarulape nga. Inaga biabe bialu haga wirigo ini abale ibabelo maliaho ngago manda bibe. <sup>21</sup> Mbirali homarago lone mo heya halu haru dai bulene nawiorego baya hangu manda bibe. Iniha dara holene ngagome ini dege mo ko holene nga ndobe. <sup>22</sup> Hale harene. Inibi nde homole dege kegoni ndobe. Abe mbirago ibu homayago ayu henge inaga ngelo kegoni ndobe. <sup>23</sup> Mbirali homarago hora halu howa inaga miniha genda hui hame ngego damene bibahende hora hamaga habe. Iibunaga dinini pedaha ina ibuhondo lone mitangi halu holene nawigo mitangi nahabe.

*Wali agalime biabe bulene tara tara ngago ogo*

<sup>24</sup> Wali agalime mbirale mbira baya hangu manda bule hame lo heagua nde ti lo manda bialu birulene henge ngelolene bayale. Wali agali tinaga biyinayaha mini piai hene kagome mbirale mbira lo manda bibe nahe ka. <sup>25</sup> Agali dindi aliaga kago ibubi mbirale lo manda bibe nahe nga. Iibunaga bulumaga karume dindi tombelo bo daila halu howa ibunaga mini biabe ogoniha piai helowa ibugua bi mende tara ngagonaga bi lolene henge nawiore kagome mbirale uruniale lo manda bibe naheore ka. <sup>26</sup> Iibunaga mini mabu biabe bulene ngagoha piai helalu ibunaga nogo bulumaga hungubalua kagonaga tomo nelo mule taya bulenego dege mitangi bu haga ka.

<sup>27</sup> Uruni ti agali irame wabiaga karubi bebani wabiaga karubi ogonidagua dege biaga ka. Tigua mbiraga horombebi biabe dege bialu haabo haga ka. Tigua irame wabialu howa ogoriani yari tara tara bia holenenaga aguaore berogola karulapedabe hondole ogoni hangu mitangi tangi bialu haga ka. Ani bialu biabe ogoni dege bialu haabo howa bu maro bialu wahaga ka.

<sup>28</sup> Agalime aeanebi mbirale gahange ngaru wabiaga bu karu tiguabi anidagua dege biaga ka. Ira hongohe dedagome tini dalu do poboyogo bia hagane nga. Aeané hamame baragola hale poboyogo birago bilowa tinaga mini biabe ha hangu piai helowa aeané hongohe ngaruni hamame bo dambigi bialu mbirale wabialu haga ka. Ani bialu ibunaga mini mbirale wabialu wabu maro buleneru hangu mitangi buwa wabiai halu wahaga.

<sup>29</sup> Agali be dindime wabiaga kagomebi anidagua dege biaga ka. Ibugua biruwa ibunaga geme garo geale dindiha ngago mo beregedaga nga. Iibunaga miniha biabe baya hangu bulenego hangu mitangi bialu daga ogodagua wabibe lalu lamiyadago abale wabiai holene mitangi biagane nga. <sup>30</sup> Ibugua dindi dongoma ngago dugu ngelowa geme hengedo waru wia hagane. Ani biai howa gime be wabiaga. Ani wabiai howa mo yaribia holene mitangi bialu howa biabe bu maro bialu ibunaga biabe uruni bialu haga anda kago baya hangu mo tiga biai howa mburuma bu wahai halu u palue piagane ka.

<sup>31</sup> Wali agali tinaga gime biabe bialu haga karu tinaga biabe bulene ngago baya hangu manda biaihe ka. <sup>32</sup> Agali biabe biaga uruni ale mbira naheyagua nde tano bu ngaru timbu habe naheore. Ani bialu wali agali tanoha nakale dege. <sup>33</sup> Anigo agali biabe

✧ 38:16: Sir 22.11-12

biaga uruniale karu ti ganisolo karu aria mbirago holenebi ti gabumaninaga agali haguane holene ngarubi nahaga. Ti godi hale halu mo tale biaga karu ale holenebi <sup>34</sup> tigua mana lo wini ngago baya hangu manda nabibi ka. Tigua lawai helo napene howa tinaga manda bayale nawi ka. Ani bialu tigua bi bayale wále mbira nalolebira. Anigo agali uruniale kago ti dindi ogoninaga hongo holene pini howa tigua Anduane Homogohanda tinaga biabe bialu karu mo hongo helo bi laragola ibugua tinaga bi larago hale haga ka.

## 39

### *Mana lo ngago manda biaihe kago ibu duniniore ka lenego ogo*

<sup>1</sup> Wali agali biabe erekuibi hongo howaore bialu Anduane Homogo Daligaore kago-naga bi mana lo wini ngago baya hangu lo manda bialu kago ti wali agali maru karu ale ndo mendeale ka. Tigua manda bayale mamaliru tigua wu henedaru hondowa manda bialu mbiwia halu bi lo winidaru baya hangu ogoaleore leneda lalu handalu holebira. <sup>2</sup> Tigua agali hagianeme bi latagi hayaru manda bu halu bi yobage lalu layarunaga galone manda biai halu biaga ka. <sup>3</sup> Bi mbiwia halu layarunaga galone baya hangu taya buwa hondo manda biai halu bi yobage lalu layarunaga irane baya hangu manda biai holebira. <sup>4</sup> Tigua agali haguane karu baba biabe mandagi bialu howa ai wali agali tigua handalu karia ti kini heba mandagi bedaria hondolebira. Tigua dindi tara tara ngaruha ibaga biai halu wali agali mo ko hagane agilemedabe handalu wali agali biamogo biagane agilemedabe hondo manda bulenaga handama ibaga biai holebira. <sup>5</sup> Tigua egerebagiore abale heyalu Anduane Homogo tinaga Abaore kagohondo bi ala lolebira. Tigua Anduane Homogohondo bi lalu tinaga ko ngaru mo wahai habe lalu bi lolebira. <sup>6</sup> Ani laragola Anduane Homogohanda tinaga bi larago hale hayagua manda bayale bulenenaga dinini kago tiha ho tolaragola wali agali uruni tigua mini gigabi wulene bayale ngaru tigua latagi halu holebira. Ani bialu tigua Anduane Homogohondo bi laragome Anduane Homogo kaj lolebira. <sup>7</sup> Ani bialu tigua wali agali bu karu tinaga mini gigabi ngagomebi manda bayale bidagomebi ti bayale helo mo tiga buwa haru bamba halu Anduane Homogonaga bi do ho wini ngaru bigi bege lalu handa walia hagane ka. <sup>8</sup> Tigua manda bayale tını lo manda bu yayago mo walia halubi tigua Anduane Homogonaga bi mana lo wini ngagobi habo nalolene bi lo wini ngagohondobi ti turu ho hagane ka. <sup>9</sup> Wali agali maru bu karume tinaga manda bayale ogobi wini lowa te lalu howa ti embeda nahe manda biaabo holebira. Ani bialu wali agali abogo hene lalu tinaga mini ereba nahe wiaabo holebira. <sup>10</sup> Wali agali dewaoreme tinaga manda binigonaga te dewa lolebira. Ani bialu wali agali dewa ngoaiho bedagoria ti mo turu halu bi ngaru lolebira. <sup>11</sup> Ainde wali agali uruni ale karu ti dindini lu hayagua nde tinaga mini timbuni halu tigua wali agali maru abale henedaru bolangua hene holebira. Ani howa ti homayagua nde tinaga mini timbuni mini lene howa homarago karulape dege holebira.

### *Biabe Anduane Homogohanda biaga ngago damene bayale dege ngago ogo*

<sup>12</sup> Mbirale bulene ngago ina manda biai ko. Heneneore larogo ege bayaleore do mbara lalaligobi mini bayale wulene tara tara iha wu tolatagi ko. <sup>13</sup> Inaga waneigini bayaleru-o baya hangu hale hadaba. Iba angeni yari biagane bayaleoreru dedaligobi tíore bayale andaho hai halimu. <sup>14</sup> Tíha nga baya taraore bulene gabitugu ale howa mabuha yari bulene bayale hangaradagua bilimu. Tíhaga nga baya taraore buleneme dindiha piyai halu tolai helalimu. Tíhaga biabe bialu kemigo bibahende bialu howa turu holene iba ganaru lalu Anduane Homogonaga mini mo yaraga halu halimu. <sup>15</sup> Tígua ibunaga mini timbuniore mini lene helalu ibuhondo turu halu hongo howa huario lalu halimu. Ngita tara tara ngaru bowa iba ganaru lalu ibuhondo kaj ogodagua lalimu.



<sup>16</sup> Anduane Homogohanda mbirale bibahende karubi ngarubi wabiai henego bibahende bayale nga. Ani bialu mbirale mbira ibilo ibu hame lo kago ogoangi ibilo lalu horo ibunime pongo winidangi tagira ibulebira. Ogoni agiledabe lalu wali agalime hale holene nawiore. Mani howa mbirale bibahende panaga handai hene ibu wiai holebira. Ani ibu ngagola bi hale ho wirigonaga ladai biradagua ogoni hondolebere.

<sup>17</sup> Bamba Anduane Homogohanda bi layagola iba ema bialu nape wini. Ibugua bi layagola ibame gana nene haradagua mende mendehala haga haga bu hene.✧

<sup>18</sup> Mbirale mbira Anduane Homogo ibu hame layagua ogoni ibu wia dege bulebira. Wali agali bayale helonaga mo bayale holebira. Mo waholene mbirali naheore.

<sup>19</sup> Wali agali tigua biagane ngaru Anduane Homogo ibu hondowa kagola ibunaga deni wia do holene ale mbira nawiore.

<sup>20</sup> Heneneore bibahendengi Anduane Homogo ibu bibahendeore manda biaihe haabo howa ibu manda nabini gahange mbira nawiore.

<sup>21</sup> Wali agali tigua lalu, Mbirale ogo agiledabe nalolebirago irane Anduane Homogohanda wabu wini ngago damene bibahende tinaga biabe wiai ka.

<sup>22</sup> Anduane Homogonaga mo turu halu mo gumbila holene timbuniore iba li timbuni dindi ko iba dalu naibaga ngagoha peagagobi nga ndobe.

<sup>23</sup> Anigo bamba iba bayale nagane bereago mo kaubia henedagua ibunaga miniha tandaga holene timbuniore wali agali ibuni manda nabiaga bu karu ti kagoha odope holebira.

<sup>24</sup> Wali agali tigabi bayale bu kagoha Anduane Homogo ibunaga hariga bayale dege wiai ho ka. Anigo wali agali mana ko biaga karu ti polene hariga ngagoha gundu uli dewaore nga.

<sup>25</sup> Bibahendengi Anduane Homogohanda wali agali bayale tigabi karu tihondo mbirale bayale ngaru mialu haabo halu wali agali mana ko biaga bu karu tihondo mbirale ko ngago mo miaga ka.

<sup>26</sup> Wali agali ti wu holene ngago ibabi ira delolenebi aeanebi ibibi nogo andubi mone tara mbiranaga ibane gerebi ibane waini ibabi olibe lini ibame wabini welibi tomo nolenebi aga karu lo holenebi bibahende wiai howa holene nga.

<sup>27</sup> Mbirale urunime wali agali tigabi bu karu biamogo biaga nga. Anigo wali agali mana ko biaga bu karu tinaga mbirale urunialego ko galone nabiagane ale mbira buhinaga.

<sup>28</sup> Anduane Homogohanda marungi puyabu hongohe ibilaga bialu ibunaga tandaga holene ngelo kago wali agalihondo mo walia halu ibilaga bini. Ainde mbirale bibahende homaioire kagola puyabume ibunaga hongo bibahende odope haragola Anduane Homogonaga miniha keba holene ngago ereba haiore holebira.

<sup>29</sup> Dindi mo ko halu bo haealabagabu wahai holene maru wia dege bidago mbira ira dene mende dalu dindiguni heba ibalu tebone hina gari mane homa lagabiyaru ngagoni ndobe. <sup>30</sup> Ani bialu nogo gabua tara tara biango duduru laiono gabu karubi uruninaga ne gadele bu karubi puya ngarunaga ne kagobi tandagabi hayaga ko biru karubi wali agali mana ko biagaru dibaga ayu tibu nene gadele ngagobi

<sup>31</sup> uruni ti bibahendeme Anduane Homogohanda bia lalu lamirago hale halu bule turu timbuni holebira. Ani bialu biabe bia larago bule abale manda manda bu holebira. Ai tigua biabe bialu howa Anduane Homogohanda bi larago mo wanahaga ka. <sup>32</sup> Heneneore ina mbirale uruni bibahende bamba howa inaga miniha mitangi dewa bu henego ai mbugani gilibu wero.

<sup>33</sup> Anduane Homogonaga biabe bulene ngago bibahende bayale dege wialu mbirale ibugua ina ngiaga ngaru ibunime ngulene horo manda bu henedangiore ngiaga ka.

✧ 39:17: Har 14.21-22, Yos 3.16

<sup>34</sup> Ína mbirale bibahendeore ngaruni mbirago ko lolene nawigo ko nalabe. Horo mbira Anduane Homogohanda manda bu winigo tagira ibirangi bibahende bayale dege holebira.

<sup>35</sup> Ai ayu tígua turu holenenaga iba ganaru lalu Anduane Homogonaga mini yaraga hadaba, lene.

## 40

### *Wali agali holene ngago genda heba dege nga lenego ogo*

<sup>1</sup> Wali agali bibahendeme biabe ndelahe ngaru bialu kemigola Adama hamewaneigini bibahendenaga genda tini karulapeore ngago bulene nga. Genda ndelahe uruni aiyahanda taba hanayanghi howa ngola halu winigo ainde wiaho wiaabo halu ti aijaore dindi ngago ai tini homalu lone dindiha dai birangi waholebira.\* <sup>2</sup> Wali agalinaga miniha mo luluya kagola ti mini burugu timbuni lalu ti homolenego giho ka. <sup>3</sup> Mbirago ibu kini howa kininaga dagia ngagoria biragane heaguabi bame wali agali damene dege howa dindini biaga heaguabi <sup>4</sup> wali agali aga baya tara ngaru mo karulo howa kininaga yari ngaru mo karulo heaguabi maru labolabo ko ngaru mo bobu heaguabi bibahendeore genda yaiho haga tene keba holenebi dimagoli holenemebi mo ko holene anda biragolabi genda ibiragolabi miniha tandaga holene abale tungulope haragomebi hongo haga haga bialu irigi irigi bulene ngagomebi homolene gi haga ngagomebi bibahende urunime miniha genda holene mo anda ibi lai hagane nga. <sup>5</sup> Wali agali dagiaha padaria miniha genda uruni ale anda ibiragome tinaga mini ibu halo helowa u padago mo yangayanga bia haga nga. <sup>6</sup> Ti halo howa u emeneore palua karia ainde palibe nahaga nga. Ti u pada tiraga tinaga de ibu de ngilaho wiaga nga. Tininaga emagoha ti mo luluya harago nahende agali mende kagome ibu bo wahole dege kabe tobaho haga nga. <sup>7</sup> Anigo ti karulape harimada lo manda biragola ti u palenedago heyuwa handalu karia gi harigo bame dege gi henedalo handa walia haga ka.

<sup>8-9</sup> Bibahendeale ema bialu piagane damenego homa dege bulene nga ndobe. Tigua ngola holebirago wai bulenebi ayu tibu nene gadele wai biaga ngagobi horo ko ngarubi hina garimebi genda timbuni ngarumebi warago ko ngarumebi ngola hai holebira. Ema bialu piaga biru ngarubi wali agali bu karubi ti bibahendeore mo ko holene uruni ngola hai holebirago ainde wali agali ko biaga karu ti dege kahalulu degedege ngola haga bulebira. <sup>10</sup> Heneneore mbirale ko uruni damenego Anduane Homogo ibunime wali agali mana ko biaga bu karu tandaga nelu mialu pani nelu mule winigo nga. Mana konaga lini koore iba li timbuni mbira bamba ibini nga. <sup>11</sup> Mbirale bibahendeore dindi ogoria andaho hene karu bibahende lone dindiha dai biai holebira. Ani bialu mbirale bibahende ibaha howa ibini ngaru lone ibaha dai biai holebira.

### *Mana ko biagane maname lini bayale nadaga nga lenego ogo*

<sup>12</sup> Mbiralime wali agali muni ngilonaga bime lo adogoda biaga mana ngago bibahende ereba hai halu wali agali mende kagohondo mana tiga nabi biaga ngago ereba hai holebira. Anigo mini mbiraore wulene ngago ibu wiaabobo holebira. <sup>13</sup> Muni page mini ngaru lu yu haabo nahe abaleore aube tobane bialu gaea bialu ni hongohe darangi iba emene bedago abale hundialu ereba hagadagua bialubi iba dalu ibirangi hari daba abale bialu ereba hagadagua bialu ereba haga. <sup>14</sup> Wali agalime maru dara halu biamogo biaga karu ti turu holene timbuni handa walia holebirago ainde wali agali bi mana lo wini ngago pugualu haga karu ti dege pu ereba hai holebira. <sup>15</sup> Wali agali ko biaga waneigini bu karu tiha lini bayale galone mbira tagira napolebirago irane ira dindi ko ege kekekele ngagoha kaligobi ka. <sup>16</sup> Wali agali uruni iba angeni iba gagua ngaligobi kago iba hundiragola datani maru karu mani gaulalu homelo iba gaguame ibu abale

\* **40:1:** Wali agali ti aijaore dindi nga ledago irane Ngode Datagaliwabehanda wali agali pigane wabiyangi dindime agali wabinigo manda bialu leda.

gaulalu homaga ka. <sup>17</sup> Anigo mana bayale wali agali biamogo bulene ngago mabu bayaleha tomo tara tara anda hai holene ngaligobi howa wali agali yagibano bu karu dara halu biamogo bialu haabo holebira.

*Anduane Homogohondo bi lolenego galone duniniore nga lenego ogo*

<sup>18</sup> Wali agalime biabe bialu tininaga biyinaya biabe bialu haga karu ti turubi ka. Anigo mbira ibu muni ngolaru dindiha hora karia handa walia howa duguarago ibu turubiore bolangua heneore ka.

<sup>19</sup> Agali mbira ibu waneigini honowi howa ibugua tano timbuni mbira mo heya hayagua nde ibu agali timbuni mini lene holebira. Anigo agali mbira ibu wali bayale mbira dabubu hayagua nde ogoni ibugua agali kira ogoni labo bolangua hene ka.

<sup>20</sup> Waini ibala ngita baya baragolame agali mo turu haga nga. Anigo manda bayale bulene ngagome ogoni labo bolangua halu daligaore nga.

<sup>21</sup> Be tabage baragola ngita baragolanaga bi biamaga haragola baya tara mbira laruane hale haga nga. Anigo wali agalinaga iba gana baya laragome kira ogoni bolangua hene nga.

<sup>22</sup> Wali agalinaga deme mbirale bayalebi monehebi ngago hondole turu haga nga. Anigo yari biagane gahange baya dedagome kira ogonilabo bolanguahe deda.

<sup>23</sup> Mende kagola nenege ho holenebi mandagi ibagabu holenebi bayale mbira nga. Anigo wali agali dabubuwa onene aglinila mandagi birulenego bayaore bolangua hene nga.

<sup>24</sup> Iha genda nganggi í hamenebi í damene kagobi íni heba mandagi holene bayaleore. Anigo ínime wali agali maru karu dara halu biamogo biaga keyagua nde bayaleore ogoni biri.

<sup>25</sup> Ngolo silibarume wali agali bayale helonaga biamogo biaga nga. Anigo mini giga bulene ínaga nenege ibugua ngiragome kira ogoni labo kirabali bolangua hene nga.

<sup>26</sup> Muni dewa ngagomebi tingini hongohe kagomebi wali agali ti bayale dunini mbira kemabe toba ho haga kago ndo. Wali agali Anduane Homogo gi halu ibunaga mini yaraga halu haga kago ibu dunini bolangua hene bayale ka. Heneneore mbirali Anduane Homogonaga bi hale halu haga kago ibu mbirale mbira burupalia nabiaga ka. <sup>27</sup> Mbirali ibunaga mana Anduane Homogo andaneha haabo haga kago ibu mabuha tomo hingedago damene bayale anda howa lini bayale dai hagagobi howa mbirali mana ogoni talialu haga kago ibu mini lene timbuni mbira holebira.

*Ngi laabo holenege mana bayale ndo lenego ogo*

<sup>28</sup> Waneigini-o wali agalime mendeali kagoha mbirale mbira ngilonaga ngi ngi lalu hagadagua lolene nawigo nalalimu. Anidagua lolene manda biriyagua nde wahalu ayu ogoni humbirini andagaha hama polene nga. <sup>29</sup> Wali agalime tomo bayaleru mendenaga dabuni ngaru dimagoli ho hagago ibu nde ibuninaga holene naheoreme biradagua biaga. Tigua tomo wali agali mende kagome mirago dege nalu haabo hayagua nde ti tagabiore ka. Anigo wali agali ti biwai baya hangu hene manda bayale bu heagua nde tigua mana ogonidagua nabulebira. <sup>30</sup> Wali agali taga nahaga bu karu tinaga ne harigoha ngi ngi lalu haga karu ngi lolene dendeore howa ngi laga ka. Anigo mana ogoni tinaga bu habeneha mo kaubia hagane nga.

## 41

*Wali agali bibahende homolene wini nga lenego ogo*

<sup>1</sup> Homa-o wali agalime tinaga muni mbirale ngaru mo dunubia ho kanggi ínime ti mo gi haga ke. Ani bialu tinaga biyinayaru bayale anda hai haragola tinaga miniha genda holene mbira nawi hadapaya bu howa tinaga tomo bayale ngaru gubalini ho bedagola ína tinaga miniha mo luluya hagaya.

<sup>2</sup> Homa-o wali agali yagibano karu ti mbirale mbira nawiore howa ti hongo naheore kangí ina ti mo turu hagaya. Ani bialu ti waheore biruwa ti mbirale ngaru bibahendenaga miniha genda yu kangí ina tinaga miniha mo palia hagaya. Tigua manga halu irane nawini bameore keba halu bedagola ina ti baya hangu halo holene miaga ke.

<sup>3</sup> Heneneore homome horo mbiru í olaruagola í gi holene nawigo gi nahabe. Baya hangu mitangi bibe. Wali agali ala henedaru ti halu homenego mani holebirarubi halu homolebira. <sup>4</sup> Anduane Homogoibunime mana ogoni wialu mbirale ema bialu piaga damenego bibahende homelo lenego ina Anduane Homogo Daligaore kagonaga bi ogoni mo bagi naholebere. Í homa nabi mali pira mbira ha dege biriyaguabi mali handari mbira (100) homa nabi hariyaguabi mali daosini mbira (1,000) hariyaguabi urunidagua halu humbirini andagaha homeneru dalu ngagoha poregola mbiralime í hale halu dabo hondolene nawi.

*Wali agali tinaga mini baya hangu handaya ho holene ngago ogo*

<sup>5</sup> Wali agali mana ko biaga karu waneigini bu karume mine tara halu wali agali mana ko biaga bu kagoha pialu haabo hagane ka. <sup>6</sup> Mbirale bayale ti aba aiyaha howa mo yu hayago yu wahalu tinaga mini ko halu tinaga waneiginiha ha helolebira. <sup>7</sup> Ani ha henego howa ti aba ko henedago ibugua binime tinaga mini mo ko hayada lowa bi ti abahondo wiaabo helolebira.

<sup>8</sup> Wali agali ko biaga kemiru tígua Anduane Homogo Daligaore kagohondo mana ko bialu ibuni erembira mirimigo manda bialu de hondo holene nga. <sup>9</sup> Tí aiyahanda taba hanayangí howa tinaga mini ko ko biaga lene tíha ha henego kemi. Ai tí homaramingi mini ko ogoni tíha haabo holebira. <sup>10</sup> Bibahende dindi ogoria anda ho henego bibahende dindiha lone dai biai holebira. Anidagua dege bialu wali agali tinaga mini mo ko hene karu bibahende mo ko hai hene wulebira.

<sup>11</sup> Wali agali mbirago ibu hamarangi wali agali maru bu karume dara howa dugu bialu haga. Anigo mbirali hamarago ibu mana ko biaga heneyagua nde wali agali karume tinaga mini abale embeda holebira. <sup>12</sup> Inaga mini bayale ngelo baya hangu handaya ho habe. Mani í homaregola muni mbirale ngego ibu abale ereba holebirago ainde inaga mini ibu bayale wiaabo holebira. <sup>13</sup> Í wali agali bayale heneyaguabi dindi ogoria holene biba holebirago ai inaga mini bayale wiaabo holebira.

*Mbirale taga bulene mana nabulene ngago ogo*

<sup>14</sup> Waneiginiru-o tígua mbirale ina lawai harogo baya hangu hale halu taluwa bialu harimiyagua nde tinaga miniha mo palia holene karulo holebira. Mini giga bulene bayale ngago wali agalime latagi nahe miniha yadoho heagua nde mbogoyi muni wiado hene wiagagobi nga. Ani ngagome wali agali biamogo bulene henge nawi bame nagalone dege nga. <sup>15</sup> Ainde wali agalime mini bayale ndo lulu mini wu karu yado ho heagua bayaleore ogoni. Anigo mana bayale bulene ngago yadoho hayagua bayale ndo bira.

<sup>16</sup> Ani ngago manda bialu ina tí langerogo baya hangu hale halimu. Ainde marungi í taga ho halu marungi í taga nahe holebere. Wali agali maru karu tiha mini ina ngobobi nawi ka.

<sup>17</sup> Tigua mana ko dodohe ngago bialu harimiyagua nde tí aba aiyalanaga deni taga holene nga. Ani bialu tígua bi ke howa larimiyagua nde kinihondobi agali haguane kagohondobi taga ho holene nga.

<sup>18</sup> Tigua mana pugualu harimiyagua nde agali godi hale haga kagohondo taga ho holene nga. Ani bialu tígua mana ko bialu harimiyaga nde wali agali ngoai ho kagoria tí taga ho holene nga.

<sup>19</sup> Tinaga nenege kagohondobi tí damene karuhondobi ke howa bi lariyagua nde uruninaga deni howa í tagaho holene nga. Ani bialu wali agali tí baba dindi mandagi

haga karunaga mbirale ngago mbira mo page biriyagua nde tinihondo taga ho holene nga.

<sup>20</sup> Tígua habo nalolene bi bayale Ngode Datagaliwabenaga lo wini ngago pugulene tagaho halu tígua wali agali yagibano bu karunaga tomo mulino hapai haga hariyagua nde taga holene nga.

<sup>21</sup> Tígua mbirale mbira tí mo turu halu bame ngiragola yamialu howabi tígua mendeali kago mo turu halu bame mialu howabi tínaga dengui arema holene nawi. Ani bialu wali agali mbira kagome íhondo mo bi la haragola ína ladai nabi hariyaguabi nde í taga holene nga.

<sup>22</sup> Wali bayanda bedago deme hongohe handaya hariyagua í taga holene nga. Ani bialu í dameneme íhondo mbirale mbira íhondo hale haragola ína bi ko ladai biriyagua nde í taga holene nga.

<sup>23</sup> Mbiralinaga mbirale bame mo turu halu wia harago aria mo page biriyaguabi wali agali tinaga mbirale ngago maru mo page biriyaguabi nde íni taga ho holene nga. Mendeagali ibu one bedago deme hondowa dimagoli hariyagua nde í taga ho holene nga. <sup>24</sup> Wali agali mende kagonaga biabe bia haga wali bedago baba mine hama ibaga bu hariyagua í taga ho holene nga. Tamu hobane ti paliaga ngagoha polene nawiore. <sup>25</sup> Tínaga nenege kagohondo bi ko lariyagua nde tíni taga holene nga. Mbiralí kagohondo mbirale mbira ibu turu helo bame mialu howa ibu mege biriyagua nde íni taga holene nga. <sup>26</sup> Mbirale hale haregonaga bi la yogo lariyaguabi bi lado hene ngago latagi hariyaguabi nde tíni taga ho holene nga. <sup>27</sup> Heneneore tígua mbirale tagabi uruni dameneru ngago nabi haabo harimiyagua nde wali agalime tínaga mini bayale mini lene ka lolebira.

## 42

### *Mana í taga holene nawi ngago ogo*

<sup>1</sup> Ayu mbirale í taga naholenebi wali agali mende kagome ínaga mini ngego tigua mo tiga bialu helo yupe naholenebi ngago langiro.

<sup>2</sup> Anduane Homogo Daligaore kagonaga bi mana lo wini ngagobi ibunaga habo nalolene bi lo wini ngagobi manga nahabe. Ani bialu mana í damenerume bialu kago mo tale bulenebi wali agali dindi taraha howa ibu hene karume bialu kagobi baya hangu mo tale bulene ngagobi degedege mo tale bialu habe.

<sup>3</sup> Ínaga dano í damene baba henego mo tiga bulene taga nahabe. Ani bialu í abanaga paluni ngago í damene bu karu tale bu mulene ngago taga nahe howa tale bulene nga.

<sup>4</sup> Mbirale genda handagane bayale tigabi ngago yu howa genda baya hangu handalu emene timbuni yaguabi ta nabi yolo bia muni taguia bule taga nahe bibe.

<sup>5</sup> Ai ínaga biyinaya biabe bialu howa muni bolangua hene tigatiga mulene ngadagua mule gi nahabe. Ani bialu í waneigini tibume minu bolenebi wali agali garabaya biabe ale bialu hagame mine haragola tibume minu bolenebi taga holene nawiore.

<sup>6</sup> Ínaga muni ngego í one bedagome hondo page biagayagua nde ínaga muni ngego mo do holene taga holene nawi. Wali agali í anda kegoha uba andatagi bu hagayagua nde ínaga mbirale ngeru baya hangu gedene howa mo do habe. <sup>7</sup> Ína mbirale wali agalihondo miridago agira minidabe hondole daga lo hondolenebi í mo yu anda ibini ogodaguada lalu tagira penego ogodaguada lalu mbugani gili bulene ngago taga holene nawi. <sup>8</sup> Ani bialu wali agali manda dewa nawi lulu karu baya hangu lawai holenebi wali agali waheore bedaru ti mini nawi waneiginime bialu hagagobi bialu karu mo tiga bulenebi taga nahe howa biai habe. Heneneore larogo ína mana baya hangu talialu biriyagua nde wali agalime í bayale biaga ka lolebira.

### *Abahanda ibu wane bedago mitangi holene ngago ogo*



<sup>9</sup> Wandari bedagome ibu aba mo genda haruda lo minime baya hangu manda nabulebira. Mbiraga ibu abahanda ibu wane bedagonaga genda ya halu ibu u baya hangu napale de ngalaho wiaabo haga kago ibu manda nabi beda. Wandari ibu emene dege bedangi ibu waneore bayale bialu agali polobadabe be agua bulubada. Ibu baya hangu bialu agali piyagua nde ibu agalinime baya hangu handaya ho holobadabe nde naholobada, lalu mitangi tangi bialu biraabo haga. ✧ <sup>10</sup> Wandari ibu agali nape wene bedangi ibu wane bedago agali maru karume mo ko holino miniha genda ho hagane ka. Ai ibu agali nape tini andagaha biruwa waneigini aba aiyalame miniha genda yu haga ka. Ani bialu ibu agali pu bedagola waneigini naholigo lowa aba ibu giho haga.

<sup>11</sup> Í wane bedagome mine hayagua nde andagaha bo payanda ngelabe. Ibugua mine hama ibaga bialu kagome í waitigi bu karume íhondo oba halu wali agali tanoha karubi í daluha haga bu karubi tigua ngoai ho biragane ngagoria biruwa tigua í bime lo ginibia halu mo yobia haragola wali agali dewa bu karunaga deni taga timbuni holene wuligo ainde í wane baya hangu handaya ho habe. <sup>12</sup> Ibu wandari baya ibunaga dengui bayale bedago hondowa agali bu karume dimagoli holigo ibu bame ibaga bu helo yupe nahabe. Ani bialu wali maru agali one bedaru baba bi nagalone ngaru ta nabi loligo andaga berelo baya hangu handaya ho holene nga. <sup>13</sup> Ani larogoni irane hurume aga bayale ngago no budagabu wahagadagua walime wali mende bedago mo ko haga beda.

<sup>14</sup> Agalime mine haga ngago ko nga. Anigo walime de dimagoli hayagua ko timbuniore nga ndobe. Ibugua ogonidagua biragome í mo taga halu ínaga mini bayale kego mo ko hagane nga ndobe

## **Mbirale Ngode Datagaliwabehanda wabini bu ngaru bibahendeme ibuninaga mini timbuniore mini lene kago mo walia haga nga**

*(Be 42.15–43.33)*

*Ngode Datagaliwabehanda mbirale bibahende wabinigome ibunaga mini yaraga holene nga lenego ogo*

<sup>15</sup> Ayu ina Anduane Homogohanda bini ngaru mitangi bu dai bialu ina de handarugo damene latagi holebero. Anduane Homogo ibunime bi lalu mbirale ibu ha layago hai hene.

<sup>16</sup> Ni ibugua wá bibahendeha hame haga ka. Anidagua bialu ai Anduane Homogohanda mbirale bibahende karuhabi ngaruhabi ibuninaga hongobi ibunaga holenebi ho tolatagi heleda.

<sup>17</sup> Anduane Homogohanda ibunaga hongo timbuni dahuliyali bu karuhondo mia mini heaguabi tigua Anduane Homogonaga biabe timbuni bini ngaru latagi hai naholebira. Ani bidago irane Anduane Homogo Daligaore kagome mbirale bibahende uruni wabia halu bibahende dindiha ngarumebi dahuliya andagaha karumebi bayaleore wuwa ibuninaga mini dege yaraga helo wabini nga.

<sup>18</sup> Ibugua iba solowara timbuni bedago andaneha ngaru baya hangu manda biai halu wali agalinaga bu miniha wiado karu baya hangu manda biai ka. Ibugua deni mini wiado hene mbira nawiore. Anduane Homogo Daligaore kago ibugua bibahendeore manda biai ho howa ibugua mbirale horo tara tara tagira ibirangi biaga ngaru manda biahe kagome bibahendeore ibu hondo manda biai ka.

<sup>19</sup> Anduane Homogohanda mbirale ala bambaore bini ngaru manda biai howa latagi halu mani bule ngarubi manda biai ho howa bibahende mo do ho ngaru mo panaho ngelai holebira.

<sup>20</sup> Ibugua wali agalinaga mini ngaru manda biai ho kagome bi mbira ibu deni mo do hene nawulebira.

---

✧ **42:9:** Sir 7.24-25, 26.10-12

<sup>21</sup> Biabe ibugua bini ngaru bayaleore wialu urunime ibunaga manda timbuni ngago mo walia ho nga. Ibuni dege haluhe haabo haga ka. Anduane Homogo ibu bolangua hene timbuniore kagola ibugua mbirale mbira mo yulenebi yupe holenebi mbirale mbira nawiore. Mbiralime ibu mbirale mbira lawai holene nakarulapeore ka.

<sup>22</sup> Anduane Homogohanda bini ngaru bibahendeore bayale taraorebi monehebi manane ira hungu ale nga.

<sup>23</sup> Mbirale uruni tigua tinaga biabe ngago bialu haga haga bialu haabo howa tigua Anduane Homogonaga mini ngago talialu haga nga.

<sup>24</sup> Mbirale bibahende kira kira mandagi ibaga bu helonaga wabini.

<sup>25</sup> Ani binigo ainde mbirale mbira ibuni hanguore holene nawabini. Mbira mbira tiniale dege dege kago bayale helo biamogo bigibigi biaga ka. Ainde mbiralime Anduane Homogohanda biabe bayale bialu hene ngago de hondowa handabe manga holene naheda lo manda bido.

## 43

### *Ngode Datagaliwabehanda ni wabinigo ogo*

<sup>1</sup> Hari daligaha wá hongohe wáleoreme bibahende wá hame kagola yari baya taraore hondoabi ngaligobi nga.

<sup>2</sup> Nime egerebagi harini tagira iba lu ibugua Anduane Homogohanda biabe baya taraore binidaru ibunaga wá baya taraore kagome latagi hagane.

<sup>3</sup> Ni ibu ibalu lina hanuni howa dindini ngaru baya hangu yo biai halu ibunaga hongome ira deneale ngagome wali agalinaga tingini daga ka.

<sup>4</sup> Agalime ira daga ngagoha ira dedago pu lalu karia iranaga hongo poboyago biragome walia harago handaga. Anigo ni ibunaga hongo timbuniore hari ngaru dope haga ka ndobe. Ni ibunaga hongo gibiore ngago wali agali kagoha ba amunana biragome wali agalinaga de baiore helaga ka.

<sup>5</sup> Heneneore Anduane Homogo ibuni ni wabiaga howa ibu timbuni daligaore ka. Ainde ni ibugua Anduane Homogonaga bi ledago talialu gerai lalu ibunaga piaga hariga ngatoria abale bolangua halu piaga ka.

### *Ngode Datagaliwabehanda ege wabinigo ogo*

<sup>6</sup> Ege ibubi nde ibu tagira ibulene horo nganggi baya hangu talialu ege mbira mbira tagira ibugu bulene hengebi mali mbira mbira tagira ibilonaga henge wulenebi

<sup>7</sup> Ngode Datagaliwabhondo bi lolene horo timbuni ngaru tagira ibilo henge wialubi ibunaga ani haga biaga ka.\* Egenaga wá hatimbu hama pialu mani lone emene hama dai biaga.

<sup>8</sup> Ege li hari daligani kagome dege malinaga egebi daga lagane nga. Anigo hari daligaha howa mo emene ha mo timbuni ha bialu nahendene taraore uruni ibunime dege biagaya. Ibugua dahuliyali bu karunaga wá hadai biaga ka. Ibugua hari daligaore howa wali agali mbiraga ibagabu karuhondo wá hadali hagane ka.

### *Ngode Datagaliwabehanda yakundiru nidomoru wabu helenego ogo*

<sup>9</sup> Yakundinaga wá haragome hari daligaha mo yaribia halu baya taraore ngelalu Anduane Homogonaga dahuliya anda mo yaribia haga nga.

<sup>10</sup> Ngode Datagaliwabe ibugua bi layadagua yakundi ti tini habe lenedagoriaore haga ka. Tigua de handaya ho holene manga nahaga ka.

\* **43:7:** Israeli wali agali tinaga lotu timbuni lolene timbuni kira ege datimbu haragoha beane (11) hambeneru (12) tagira ibiragola hagane. Horo timbuni Ngode Datagaliwabehanda Isaraele wali agali nabe Bolangua Halu Penegonaga Horo ege piganenaga horo dene (14) laragola tagira ibaga. Loma Binigo Mo Miaganaga Biabe ngagoha (23.34) ngago hondolene nga.

<sup>11</sup> Ai nidomo harini kago de handalu Anduane Homogonaga mini yaraga holene nga. Irane Anduane Homogo ibunime yari tara tarame ibu kau wabaga bialu de daibi baya tara mbira ka.

<sup>12</sup> Anduane Homogohanda hari daliga mo yaribia holenaga mbirale mabubi yari baya tara mbira wabini ka.

*Ngode Datagaliwabehanda tara tara timbuni maru wabinigo ogo*

<sup>13</sup> Anduane Homogohanda bi laragola dindiguni hariha howa ibira haga ka. Ani bialu ibunaga miniha tandaga ho kago walia halu hari daba abale wigiwaga lalu ibilaga.

<sup>14</sup> Ani bialu dahuliya andaga timbuni kago panga dugupe haragola hari beraliba dewaore tagira pialu ega poradagua pugu pugu bialu purogo lagane nga.

<sup>15</sup> Ibuninaga hongo timbuniore ngagome hari beraliba karuni mo mogobu ngelowa mo dindiguni haga ka. Ani buwa mani minu ngirulo бага buwa dindiha ba amunana bialu ibilaga ka.

<sup>16</sup> Tigua handalu karia Anduane Homogo ibiyagua hari timbuni wedago ibu mogo lowa duru lalu hagane ka. Ani bialu ibugua bia larago hale halu puyabu dindi abene unuraha yagi howa abale pu lo yalu piaga ka.

<sup>17</sup> Ibunaga ne harigaha howa bi hongo howa kulu kala lalu latagi haragola dindi ngago ibu mogo lowa duru lalu ngagola dindi uyuraha yagi howa puyabu heba puyabu tara humbirini wai ale heba ibalu biaga.

<sup>18</sup> Ainde ibugua ega yagaloyu ibiradagua bilalubi pagaya dindini ibira haradagua bilalubi dindini dalu dindiguni ibilaga ka. wali agalime handalu karia dindiguni ngago bayaleorebi dendebiorebi ngago hondowa ti turu ho kagola dindi guni ibu daligaha howa hendoreore ibira haga biaga nga.

<sup>19</sup> Egerebagi handalu keria dindiguni ogoni ibu tara mbira ti tande ibi mbaule gewa ani alebi ngaria handaga.

<sup>20</sup> Ibugua dindi abene uyuraha yagi howa puyabu dagarebi ibilalu iba bedago mo dindiguni helaga nga. Ani bidagola iba biaru dindigunime dambi hai ho ngagola handape halu keria iba ibu wai polenaga wai humbi yidabe toba holebere.

<sup>21</sup> Anduane Homogonaga hongome hari dalu dindi ko iba dalu naibaga ngaru dai halu datani emene bu karu dalu do aulai helaga nga.

<sup>22</sup> Ani bialu mani howa iba dalume mbirale uruni mo karulape hai halu pibiya ibira haragome datani bayale anda helagane.

<sup>23</sup> Anduane Homogo ibunaga hongome iba solowara bedagonaga hongo minu podalu iba hanuni dindi emeneru wupe helo ibugua hangaga bida.

<sup>24</sup> Agali iba sibi ngagoria iba solowara bedagoha pugu bini hearume iba solowaraha mbirale kooreru nga laga biyagola ina mini dege dindiho haramali.

<sup>25</sup> Tigua lalu iba solowara ngagoha mbirale taraale dewaore beda laya. Iba wena timbuni tararu puya timbuni taraorerubi nga laya.

<sup>26</sup> Anduane Homogo ibunime tihondo tininaga biabe bilo hongo miyagola ti karulape bayale ibagabu ka. Ibugua bi laragome bibahende tigabi hai ka.

<sup>27</sup> Ainde iname te luore lalu holene ngagonigo ainde iname te ogoni lai habe nahe-oreda. Ai wahalu mo tubagi howa ogodagua lama. Anduane Homogo ibu bibahende karubi ngarubi uruninaga tene ibuni ka.

<sup>28</sup> Ibu mbirale ibunime wabiniru bibahendeore bolangua haihe kago ainde ibunaga mini yaraga holene inanaga hongo karulape kemadalo manda bidemabe.

<sup>29</sup> Anduane Homogo ibu daligaore kagola bibahendeme ibuhondo gi hai haga ka ndobe. Ibunaga hongo timbuni gibiore nga ndobe.

<sup>30</sup> Tigua ibunaga mini yaraga halu howa ibu daligaore kago manda bialu ibuhondo mo turu howa bi ngago laga bilimu. Anduane Homogonaga mini yaraga holenaga tinaga hongo bibahende bibaoare halimu. Tigua ibuhondo mo turu halu bi larimigo

nakarulapego ainde tígua ibunaga mini yaraga holene manga nahe yaraga haabo halu halimu.

<sup>31</sup> Anduane Homogohanda biaga ngago baya hangu latagi hai hole Anduane Homogo de hendene mbirali ai kabe. Anduane Homogonaga mini yaraga holene manda ogodagua karulape lalu hondo manda bi mbirali ai kabe.

<sup>32</sup> Heneneore Anduane Homogonaga biabe bini maru de handarimaga ainde maru wiado karu ina handa nabi kemagoni ndobe.

<sup>33</sup> Ainde mbirale bibahende Anduane Homogo ibunime wabiai howa wali agali bayale tigabi biaga bu karuhondo manda bayaleru talebu tahalu miai haya.

## **Wali agali bamba heneyarume mana bayaleru bialu hene**

*(Be 44.1-50.26)*

### **44**

#### *Mamali ala henerunaga turu howia halu bi lenego ogo*

<sup>1</sup> Ayu iname agali haguanebi inanaga mamali heneruhondobi kai lo wia holene nga.

<sup>2</sup> Anduane Homogohanda tinaga mini mo timbuni howa mini lene helalu bambaore howa ibunaga hongo tihondo mo walia halu heneya.

<sup>3</sup> Maru ti hongohe heagome ti agali mini lene timbuniru haga bialu maru kiniru heneya. Maru ti manda bayalebi howa baya hanguore lawai haga hene. Ani bialu Anduane Homogonaga bi mana latagi halu mbiwia hagaru hene.

<sup>4</sup> Maru ti nde wali agali ibu ngoai ho kago baya hangu mo tiga bialu haru howa wali agali ti hale helo bi bayaleru latagi halu haga hene. Tigua mana lo wini ngagobi tinaga mamali manabi baya hanguore manda biaihe howa ani latagi haga hene

<sup>5</sup> Maru tigua iba gana gahangeru wabu wiyagola marume bi teru baya hangu gilibu wigi biniya.

<sup>6</sup> Maru ti muni mbiraleru dewaorewi howa tini daluni agali haguane howa bayaleore haga biniya.

<sup>7</sup> Wali agali uruni tini daluha heangi mini lene timbuni halu ti homa nabi heangi tini damene bu hearume tinaga mini yaraga haga bialu haga hene.

<sup>8</sup> Maru henedarunaga mini timbuni ayu wiaho wiaabo ho ngagola wali agalime tinaga mini yaraga halu haabo ka.

<sup>9</sup> Anigo maru henedarunaga mini nawi erebaore heneya. Ti homayagola nde ti mitangi holene mbirali naheneya. Ainde tinibi tinaga waneiginibi mbira naheore mbauleya.

<sup>10</sup> Ai ayu iname wali agali abale mana bayale bialu haga homeneru wali agalime embeda nahe manda biaho haabo heneru mitangi budai bialu turu hama.

<sup>11</sup> Mana bayale tigua bialu hene ngago heba tinaga mini heba ti waneiginime yu henego mani yu yobialu waneigini aguanerume yu hama ibinigo nga.

<sup>12</sup> Waneigini tigua Anduane Homogonaga habo nalolene bi lo wini ngago hongo ho yu kagola waneigini aguane maha ho aribia hararume ti abanaga bi lo ngago talialu holebira.

<sup>13</sup> Hameigini ti ariago biba nahe haabo halu tinaga mini ereba nahe wiaabo holebira.

<sup>14</sup> Ti homalu tinaga halo holene baya wiago handa walia halu tinaga mini ereba nahe wiaho wiaabobo bu wulebira.

<sup>15</sup> Wali agali bibahendeme mamalinaga manda bayale abale bamba wu henedaru latagi halu kagola wali agali ngoaiho bedarume ti mo turu halu bi lolebira.

#### *Inogo Noala henego ogo*

<sup>16</sup> Inogo ibu Anduane Homogo heba mandagi ibagabu haga henego ainde Anduane Homogohanda dahuliya andaga haru halu pene. Ibugua wali agali mani holebiraru bu mini beregedo halimu lalu mini beregedolene mana biawai hene.\*

<sup>17</sup> Anduane Homogohanda handalu hearia Noa ibu hangu agali tigabi hearia de hendene. Ai wali agali maru hearu mo ko hai hayagola ibu hangu bayale hene. Ani bialu iba li timbuni ogoni hundiayagola wali agali emene dege maru dindini hene.\* <sup>18</sup> Ani heagola Anduane Homogohanda wali agali iba lime halu mendengi bo wahai nahole lalu Noala habo nalolene bi lo wini.

### *Abarahama henego ogo*

<sup>19</sup> Abarahama ibu wali agali bibahendenaga mamali timbuni mini lene mbira henego ibu ale mende naheore.\* <sup>20</sup> Ibugua Anduane Homogo Daligaore kagonaga bi mana hale howa talialu heagola Anduane Homogohanda ibula habo nalolene bi lo wini. Anduane Homogonaga habo nalolene bi lo winidagoninaga Abarama ibuni tinginini mo wialu ibuha bahondolene ibu wiangi ibugua Anduane Homogonaga bi hale howa talialu haga hene. <sup>21</sup> Ani bialu heagola Anduane Homogohanda heneneore bulego Abarahamahondo lamialu ibu damene mani hama polebirarunaga minini howa wali agali bibahendeore dindi bibahendehe karu ti mo turu holene wulebira. Ani bialu ibu waneigini aguaneru dewaore iba angeni iba mu ngaligobi holebira. Ani bialu ti ibugua mo yaraga halu hari daligani yakundi kadagua helolebero. Ani bialu dindi timbuni mbira ti mulebero lalu bini. Dindi ogoni iba solowara kira bedago dombeneha ngago ai tubari uyuraha yagi iba Yuberedisi porago tubari wialu pialu dindi wimaro bidagoria tagira polebira, lalu lamini.

### *Aisaga Yagabalanaga te ogo*

<sup>22</sup> Anduane Homogohanda Aisaga ibu Abarahama iginiyagola habo nalolene bi ibula lo wia dege bini.\* <sup>23</sup> Ani bialu mani wali agali mo turu halu mo gumbila holenebi habo nalolene bi lo winigo ogoni Yagabaha lone mo ba unu hene. Anduane Homogo ibugua Yagaba mo turu holeore ngo lalu ibugua dindi tuwu merogola hameigini homberia (12) howa dindi ogoni tuwu ta holebere lalu lamini.

## 45

### *Mosese henego ogo*

<sup>1</sup> Anduane Homogohanda agali mbira Yagaba hameigini heago aria dabo heleagola wali agalime ibu gubalini ho hene. Ibu Ngode Datagaliwabe nenege halu wali agalibi nenege dege henego ibu mini Mosese hene. Iname turu howa ibu mitangi ho holene nga.\* <sup>2</sup> Anduane Homogohanda ibunaga mini timbuniore mini lene dahuliyaliru mini lene heledagobi dege helene. Ani helowa mo hongo ho heleagola waitigi bu hearume ibu hondowa gi timbuni hene. <sup>3</sup> Mosese ibugua agalime nabiagane ale dewa ibunaga neha mbuha howa bilo Anduane Homogohanda mo bia hayagola hongo timbuni ogoni kini bu hearunaga deni howa mo ya hene. Anduane Homogohanda Mosese ibu wali agali haru hagane helo dabo helalu Mosesehanda ibunaga dengui hendelo mo walia halu bini. <sup>4</sup> Mosese ibu bi hale haga howa ibuni mo dindiha ho haga howa mana tigabi ngago bialu haga heago hondowa Anduane Homogohanda ibu wali agali bu hearuha ibu agali ho bamba hene helo helene. <sup>5</sup> Anduane Homogo ibuni Mosesela bi laedene bialu hari beraliba arumahe wiagoha haru anda pene. Ani bialu Anduane Homogohanda ibuni dengui Mosese mo walia howa ibunaga bi mana Mosese giha mo ya hene. Bi mana urunime agali holene mialu mini gigabi wulene miaga mini.

\* 44:16: Pig 5.24, Hi 11.5, Yu 14    \* 44:17: Pig 6.9-9.17    \* 44:19: Pig 15.1-17.27, 22.1-18    \* 44:22: Pig 17.19, 26.3-5, 27.28, 28.14    \* 45:1: Har 6.28-11.10, 20.1-21



Anduane Homogohanda Yagaba hameigini bu hearu ibunaga habo nalolene bi ngago lawai holenaga mini. Isaraele wali agaliru ibunaga bi mana lawai holenaga mini.

*Arono henego ogo*

<sup>6</sup> Libai hameigini aria agali mbira Anduane Homogohanda Mosese hamene Arono dabo helene.✧ <sup>7</sup> Anduane Homogohanda ibula habo nalolene bi lo wialu ibugua wali agalinaga loma bu mirago mo loma bu mule loma binigo mo miaga agali hene. Ani helowa Anduane Homogohanda labolabo bayaleore wiarume mo yari bia halu labolabo luni biagimbu biaga yolo dewaoreme mulene wiago mo karula halu bini.✧ <sup>8</sup> Anduane Homogohanda ibu yari baya taraore wiarume mo karula halu agali loma binigo mo miaganaga aga tara tararu mo karula halu bini. Yari uruni agalinaga aga giha karulolene mbirabi mende karula gimbu bulenebi wabu mini. <sup>9</sup> Labolabo luni ogoni yari taraore ira taranaga lini baya dedaligobirume mo yari bia helowa mo karula hene. Ani bialu ngilingelo lolene emeneru ibu poragola ngilingelo lelonaga helene. Anduane Homogohanda ogoni ngilingelo larago hale howa ibunaga andaha wali agali bedaru mitangi bilonaga helene. <sup>10</sup> Agali aga wabiaga manda bi bu hearume aga loma binigo mo miaga tinaga karulolene ogoni ngolomebi pu daramabi mindibirume mo yaribia halu buwa wabini. Agali mandabi maru hearume ege tole kira Anduane Homogonaga hame ngago hale hole badaga haga mini Urimu Tumimula wiago honolene nu baya mbira wabini. Tigua nu ogoni pu daramabime lebini. <sup>11</sup> Agali maru ngolome biabe biaga hearume nu biago ege tole baya tara tara wiarume mo yaribia halu lebu para haga bini. Tigua ege tole uruni podaga bialu ha helaga bialu Isaraele hameigini homberiali (12) hearunaga mini ege tole ogoriani gilibu wiai hene. <sup>12</sup> Ani bialu agali mbira mbirale wabulene mandabi heagome Arononaga labolabo tangi hanaga wiago karula dambi holene mabubi mbira ngalome wabini. Ani buwa mabubi ngolome wabini ogoriani bi mbira gilibu winigo ogodagua, Anduane Homogonaga Loma Biaho Nga, lalu ogoni ibu mo yari bia hene baya taraore mbira deme hondolene baya nga. <sup>13</sup> Arono ibu naheha yari baya urunibi mbira nawini. Ani bialu yari ogoni agali maru karume bulene nawiore. Mana wiaabo halu Arono ibunibi ibu igini aguanerumebi tigua dege karulolebira. <sup>14</sup> Horo bibahendengi Arono ibunaga biabe loma irame dai helonaga loma bu delolene egerebagi alendobi delalu haabo haga hene.

<sup>15</sup> Arono ibu agali loma binigo mo miaga helonaga ibunaga hagianeni weli taraore mbirame odo wini. Anduane Homogohanda ogonidagua bialu Arono halu ibu damene mani holebirarubi ti baba habo nalolene bi lo wialu habo nalolene bi ogoni ibu habo nalole dahuliya andaga ngadagua wiaabo holebira. Ainde Anduane Homogohondo bi lolebi loma binigo mo miaga agalinaga biabe bulene ngago bulebi Anduane Homogonaga minini howa wali agali mo bayale helo lalu bi lolebi bibahende Arono ibugua dege haru bamba howa bialu holene wini.✧ <sup>16</sup> Mosesehanda agali maru bu hearu helowa Arono ibu hangume lomarubi ira hagua nga bilo loma bu delolenebi Anduane Homogonaga loma bu delole yalu pugu bilo dabene. Anidagua biragola Anduane Homogohanda ibunaga wali agalime ko bini ngaru embeda halu wahai holebira. <sup>17</sup> Ani bialu Mosese ibugua Aronohondo lamialu lalu wali agalinaga godi hale howa haru holene hongo mialu Yagaba hameigini bu karu Anduane Homogonaga bi mana lawai halu mana lo wini ngago baya hangu lawai halu mo wala halu helo mini.

<sup>18</sup> Ani heagola ainde agali maru Datanabi Abiramabi ti damene bu hearubi Kora halu ibu damene bu hearubi tigua ibalu Aronohondo keba timbuni halu hene. Dindi ko iba dalu naibaga wiagoria howa tigua Arononaga biabe biyago dimagoli halu hene. Ani howa tigua bi mbiraore halu Arono bope hole manda bialu hene.✧ <sup>19</sup> Anduane Homogohanda tigua uruni bialu heago hondowa ibu turu nahe hene. Ibugua ti baba

keba timbuniore halu bibahende bo hilo wahai hene. Ibugua tara nahendeneale bialu agali uruni ira timbunime bo heda hai hene. <sup>20</sup> Ani bialu Anduane Homogohanda Arononaga mini mo yaraga howa mo timbuniore halu ibugua mana mbira ogodagua ngelene. Wali agali bibahendeme tomo hengedaru aria bayale kago Arono aria karu bu mialu bibahendengi mberedi dewaore hiru yu ibuwa Arono aria karu nelu mialu halimu lene. <sup>21</sup> Anduane Homogohanda mana ogoni Arono halu ibu igini bu hearu biamogo bialu wali agalime tinaga loma Anduane Homogonaga yalu ibirago ti nelonaga wabini. <sup>22</sup> Anigo Arono aria ti dindi hobane mbira Isaraele hameigini maru ti tuwu ta hayadagua ti nawi howa ti dindi hobane mbirago aba ndo hene. Anduane Homogo ibuni tinaga abaore howa ibuni tinaga dindiore wiradagua bialu ibugua ti handaya ho hene.✧

### *Piniasa henego ogo*

<sup>23</sup> Agali mini lene timbuni tebone Eliasa igini Piniasa hene. Ibuore Anduane Homogonaga bi hale hole turuore halu ibu mana bayale ngago baya hangu taluwa bialu haabo haga hene. Wali agali tigua Anduane Homogo erembira mialu poragola Piniasa ibu hongo howa haabo haga hene. Anidagua biragome Anduane Homogohanda Isaraele wali agali lone dara ho dai biaga hene.✧ <sup>24</sup> Anidagua bialu heagola Anduane Homogohanda ibunaga nenege agali bayale Piniasala haabo nalolene bi lo wialu ibugua mbirale loma bu mulene andaha ngaru bibahende baya hangu handaya ho halu wali agali haru bamba helo helene. Ani bialu agali loma binigo mo miaga haguane helo dabo helalu ibu igini aguaneru hangume loma binigo mo miaga haabo helo lalu lo wini. <sup>25</sup> Anduane Homogohanda Yuda hameigini hearu aria Yasi igini Debidila habo nalolene bi lo wialu Yudanaga kini Debidu halu ibu damene degeme kini haabo holebira lalu lamini. Anidagua dege agali loma binigo mo miaga Arono igini aguaneneru tigua hanguore haabo holene wini.

<sup>26</sup> Tigua wali agali baya hanguore mo tiga bialu haru halimulonaga Anduane Homogohanda mini bayale tihondo talebu ngilonaga ina Anduane Homogohondo bi la haro. Anidagua bialu tinaga holene bayale ngago ereba nahelobi tinaga mini bayale mini lene timbuni ngemigo ani wiaabo helobi ina bi laharogoni.

## 46

### *Yosua Kalebela henego ogo*

<sup>1</sup> Ai Nana igini Yosua ibu wai biaga pari wayali hongoheore howa ibugua agali Anduane Homogonaga bi mana latagi halu mbiwia haga Mosesenaga henge mialu ibu ho aribia hene. Ibugua ibunaga mini Yosua ngagonaga galone Anduane Homogohanda biamogo biaga lalu mini wini ngago baya hanguore taluwa biaga henego irane ibugua Anduane Homogonaga wali agaliore haru kogoni lo manda buwaore haga hene. Waitigi Isaraele baba wai biyaru ibugua balu bope haga bini. Tigua wai bialu bope halu dindi Isaraele dindi ti karulo haga bini.✧ <sup>2</sup> Ibugua ayu tibu nene kirabali gadele wai biagane ngago yalu tano mbira ngagoha anda pialu wai birangi ibunaga mini mo yaraga halu ibu mini lene timbuniore haga biaga hene. <sup>3</sup> Agali ala henedaru hongohe Yosua ale mbira nahe. Irane aginaga. Anduane Homogonaga wai bamba hagane hongohe mbira ibu hene. <sup>4</sup> Horo mbirungi Yosuahanda ni abale anda napelo, Yania ha, layagola ni abale anda pialu mbi nale horo luore horo kira ale wini. <sup>5</sup> Ai waitigime bibahendeha ibugu ibugu bialu Yosua halu ibunaga wali agaliru ho hagira biai hayagola ibugua Anduane Homogo Daligaore kago olalu ibu biamogo bialu mo hongo ha, lene. Ani layagola Anduane Homogo Daligaore kagome bi layago hale halu dalu dindi guni timbunioreru waitigi heagoha yagi bape halu waitigi bai hene. <sup>6</sup> Yosuahanda agali uruni bai halu

hari bare wiagoha daliape halu puwa halu mende hearume wai bialu hearia urunibi bo hilo wahai dege hene. Anidagua bialu heagola wali agali bibahendeme manda biai halu Yosua ibu wai biaga agali hongohe pari wayaliore howa ibu Anduane Homogo Bibahende Hongo Haiheore kagonaga hame ledago talialu haga ka lo manda biai hene.

<sup>7</sup> Mosese heangi Yosuala Yabune igini Kalebelame Anduane Homogonaga bi larago baya hanguore hale haga hene. Wali agalime mine halu kagola libu hongo ho halu wali agalime mana ko nabilo libugua hongo howa mana lalu tigua keba harangi bi nale wahadaba lowa wali agalinaga ne hariga ndibu lalu biaga hene. <sup>8</sup> Agali wai biaga pari wayalioreru handari waragara iyibi dindi wahalu tagira ibinigo aria agali kirali ogoni labo hangu nahome hene. Ani howa libugua Isaraele wali agali tinaga dindi gahange Anduane Homogohanda ngulebero lalu lo wini wiagoria haru anda ibini. Dindi ogoniha tomo bayaleore mone taranaga ibanebi nogo andu ibanebi tomo tara tara dewaorebi wiaihe wini. <sup>9</sup> Anduane Homogohanda Kalebe hongo timbuni minigo hongo ogoni ho haabo halu homene. Ibu dindi hari bare mbira wiagoha pu berenego ainde ibu waneigini aguanene hearu ti ogoriani ho aribia halu dindi ogoni aba ti hene. <sup>10</sup> Te ogonime Isaraele waneigini bu hearu tihondo Anduane Homogonaga bi hale holene bayaleore nga lalu lawai hene nga.

### *Agali haguane ru henego ogo*

<sup>11</sup> Agali haguane mbira mbira hama ibiniru bibahendeore tigua Anduane Homogo erembira mialu napebi tigua mbirale dama mitangi bialu bi pupu wiaga gime wabini waruhondo bi pupu nawibi bayale hene. Ainde agali haguane uruni mitangi ho haga karu ti turubiore ka. <sup>12</sup> Ainde mana agali haguane uruni tigua bialu henedaru wiaabo helonaga ina Anduane Homogohondo bi laro. Ani bialu tinaga waneigini aguanene bu karumebi mana mbiraore ogoni taluwa bialu helonaga ina Anduane Homogohondo bi laharo.

### *Samuele Henego ogo*

<sup>13</sup> Anduane Homogohanda Samuele gubalini timbuni ho hene. Samuele ibu agali Anduane Homogonaga bi mana latagi halu mbiwia hagane ibugua kini holene pigane agali haguane ru helo tinaga haguane ni mbagua odo wialu kini holene hama pelo pigane ibugua dabo helene. <sup>14</sup> Ibugua Anduane Homogonaga bi hale halu wali agali baya hangu haru heagola Anduane Homogohanda Yagaba hameiginiru baya hangu haru hene. <sup>15</sup> Samuele ibu agali Anduane Homogonaga bi mana latagi halu mbiwia hagane heneneore howa ibunaga emaga larago henene tagira piaga lalu wali agalime manda biai ho hene. <sup>16</sup> Waitigi ibalu bibahendeha ho hagira biai kagola Samuelehanda ibu biamogo bule ibu lalu Anduane Homogo Bibahende Hongo Haiheore kago abale olaga. Ani bialu nogo sibi igini hongolo mbira abale bo loma bu miaga hene. <sup>17</sup> Ani biragola Anduane Homogohanda dahuliya andagaha howa bi hongo howa ladali haragola wali agali bibahendeme bi ogoni hale hai haga. <sup>18</sup> Samuelehanda Taia agali haguane bu hearu bo hilo wahai halu Pilidia agali haguane bu hearubi bo hilo wahai halu bini. <sup>19</sup> Ai Samuele ibu homole howa ibugua heneneore Anduane Homogonaga deni howabi kininaga deni howabi gi doladaga halu lalu, Ina mendealinaga mbirale mbira mo page nabioore haabo hene, lene. Ani layagola mbiralime í ke harego agibe nalene. <sup>20</sup> Ibu homeaha howa mani ibunaga dininime lamialu howa lalu mbi wia halu bi lalu haabo howa kinihondo waitigime kini ibu bo waholebira lalu lamini. Ibu homene dindi humbirini andagaha howa wali agalinaga ko wiaru domo wahalu bi mbiwia halu ogoni lene.

✧ 46:7: Dag 14.6-10, 11.21, Yos 14.6-11 ✧ 46:11: Hgn 1.1-16.31 ✧ 46:13: 1 Sml 3.19-20, 7.9-11, 10.1, 12.3, 16.13, 28.18-19

## 47

*Nadana Debidila henego ogo*

<sup>1</sup> Samuele homeaha Debidi kini heangi Nadana ibu Anduane Homogonaga bi mana latagi halu mbiwia haga ho aribia hene.✠

<sup>2</sup> Wali agalime nogo balu Anduane Homogohondo bo loma bu mulenaga nogo bayale habetigi kago bowa habane abene baya kago loma bu miagane nga. Anidagua dege Anduane Homogohanda agali bayale mbira mini Debidi heago ibu dabalu Isaraele waneigini bu hearunaga agali haguane helo helene.✠ <sup>3</sup> Debidila laiono gabua bu karubi biango handalehe timbuni mini bea karubi ibu baba hongo nakarulapeore. Laiono gabua bea gabua hongohe uruni Debidihanda mo emene halu nogo sibi memeru igini taliradagua biaga hene. <sup>4</sup> Ibu wene igiri emene dege howa ibugua agali hongohe timbuni gibiore pari wayali mbira tinaga waitigi heago balu bo homa hene. Ibugua ege tole puha yuwa bope lalu Golaidinaga embone dambiyagola Golaidi abale ibira halu ibugua bi ko lalu hagadago ogoningi biba helene. <sup>5</sup> Debidihanda ibuha hongo holene ngibe lalu Anduane Homogo Daligaore kagohondo bi lowa ibugua hongo ogoni mo yu howa agali hongohe wai biaga pari wayali heago balu ibu wayali hene. Anidagua bialu Debidihandaibunaga wali agalinaga mini timbuni mini lene daligaore lone wiadai bilo mo yaraga hene. <sup>6</sup> Ibugua waitigi daosini dege pira (10,000) bayagola tiguaibunaga mini yaraga hene. Ani bialu Anduane Homogohanda ibuhondo bayale biyagome ibu kini hayangi wali agalimeibunaga mini yaraga hene. <sup>7</sup> Ai Debidihanda waitigi bu hearu baba wai biai howa bibahende bope hai halu ibugua Pilidianaga hongo bopeore halu biba helene ayu ogoni wiaabo henego ngagoni ndobe.

<sup>8</sup> Horo bibahendengi Debidihanda bialu henego damene bibahende Ngode Datagaliwabe baya burugulene howa daligaore kagohondo kai laluibunaga mini timbuniore mini lene helonaga bialu haabo haga hene. Ibugua Anduane Homogohondo turu timbuni ho howa turu holene iba gana lalu haga hene. <sup>9</sup> Agalime ngitaru balu Anduane Homogonaga mini yaraga halu iba gana leloibunaga anda tamuha loma bu miaga dagia heago kawareni agali maru dabo helaga bini. <sup>10</sup> Ibugua horo timbuni maru Ngode Datagaliwabehondo bi lolene dabo wialu horo uruni mo timbuni howa mo bagiho wigi bini. Ani wiagola wali agalime Anduane Homogonaga mini baya burugule ngago mo yaraga halu howa egerebagiore gao laragola wali agali abaleore Ngode Datagaliwabe andaha ibu ngoai howa iba ganame gialo yu helaga hene. <sup>11</sup> Anduane Homogohanda Debidinaga ko wiaru mo wahai haluibunaga mini timbuniore mini lene wiaabo helo helene. Anduane Homogohanda habo nalolene bi Debidila lo wialu ibuni kini helalu biyagola ainde Isaraele wali agalinaga deni Debidi ibu mini lene timbuni hene.

*Solomono henego ogo*

<sup>12</sup> Debidi halu homayagola ibuni igini Solomonohanda ibu abanaga henge ibuni mo aribia hene. Mini gigabi wulenebi manda bayalebi ibuha tole howa ibu abahanda biabe bayale bu wahene wiagoria ibu bayale hene. <sup>13</sup> Solomonu ibu kini heangiibunaga holene baya gibiore wialu Anduane Homogohanda miniha mo palia holene mo karula ho helene. Ani helayagola ibugua Anduane Homogonaga anda mbira haabobo hene howa Ngode Datagaliwabenaga andaore helo lowa ibugua bia hene.✠ <sup>14</sup> Solomonu-o í wene igiri emene dege hengi inaga manda timbuni daligaore wia heneya. Iba timbuni poragoha iba tolatagi hagadagua mini giga bulene manda bayalebi iha tolatagihe heneya. <sup>15</sup> Ina wali agali dindi bibahende ha karu bi te bayale larigomebi manane bayale mo walia harigomebi ti manda bayale waleore wiai haya. <sup>16</sup> Inaga mini mo yaraga halu mini lene timbuniore ka lenego dindi bibahende ha purogo lai halu dindi

✠ 47:1: 2 Sml 7.2-3, 12.1 ✠ 47:2: 1 Sml 17.34-18.7, 2 Sml 5.7, 8.1, 12.13 ✠ 47:13: 1 Kin 4.21-32

kaundiaore iba dege dombeneha wiaruhaba anda piai henego hale hai haya. Hale howa ina mana bayale bulene ngago mo heya howa bialu ke layago hale hai howa ti turu timbuniore hai ho ka. <sup>17-18</sup> Ainde ina biagago damene iba gana lo ngagobi ina lawai bayale haga ngegobi bi yobage laga ngegobi wali agalime ihondo bi maru hale haragola i ladai biriligobi Ngode Datagaliwabe ibu Isaraele wali agalinaga Anduane Homogo kagonaga minini howa ina ngoloru silibaru dewaore mo mogo bu wu hariya.✧

<sup>19</sup> Anigo ina dimagoli holeneme i haru heagola walime i mo pila hayaya.✧ <sup>20</sup> Ininaga mini bayalebi i waneigini aguane mani hama polobadarunaga mini bayale lolenebi inime ko mo hai hariya. Lulu mana ale inime bialu hariyagome i igini bu hearunaga miniha mo genda harigo ainde tiha ko holene anda ibiya. <sup>21</sup> Ani bialu inaga dindi mbiraore wiyago lone tuwuki halu Eberaimi hameigini ti mine haga mbirago hayaya.✧ <sup>22</sup> Anigo Anduane Homogohanda i dameneruhondo dara ho haabo howa ibugua ihondo buleore lalu bi lo wiyago mo habo nalayaya. Anduane Homogoibunime Debidi ibuninaga biabe bia haga helo dabo helene biago mitangi bialu ibugua ibunaga nenege Debidi aria balu biba helolene hame nale hayaya. Ani hame lowa ibugua Yagaba hameigini maru helo wahalu Debidi aria nde maru helo karulapeda lo manda biniya.✧

### *Lehoboama Yoroboamala henego ogo*

<sup>23</sup> Ai Solomono ibu homalu ibu mamaliru baba halo paleagola ibu igini Lehoboama henegome henge mialu ho aribia hene. Agali ogoni ibu lulu mini nawiore hene. Ibugua gabumane biabe bia ko hayagome wali agali mo pila hai hene.✧ <sup>24</sup> Mani howa agali mende Nebada igini Yaroboama ibu ho aribia howa ibugua Isaraele wali agali mana ko bulene hariga ngagoha haru halu pubagi halu ibugua Eberaimi wali agali hariga koha haru pupe hene. Ani binigome wali agalinaga ko timbuniore wu tole layagola Anduane Homogohanda tihondo handabe manga halu tinaga dindiha nahelo bo batagi hai hene. <sup>25</sup> Heneneore tigua mana ko tara tara wiaru bima pu dege bialu pani nolene ko tara ngola hene.

## 48

### *Elaya henego ogo*

<sup>1</sup> Horo ogoniangi agali mbira Anduane Homogonaga bi mana latagi halu mbiwia haga mini Elaya hene. Ibu agali hongoheore howa ibunaga bi ira hunguale lene.✧ <sup>2</sup> Ibugua hina gari timbuni mo bia hayagola ibunaga biabe ogonime wali agali dewaore hina garime mo homa hai hene. <sup>3</sup> Ibugua bi hongo howa Anduane Homogohondo layagola iba dalu naibi wiaabo hene. Ani bialu ibugua ira dene halu tebira ibilo olene. <sup>4</sup> Elaya-o i agali haguaneore agalime nabiaga aleru bia heneya. Agali mende i bolanguahe nahe. <sup>5</sup> Ina Anduane Homogo Daligaore kago olalu agali mbira homo tongolomini wiago mo heya heneya. <sup>6</sup> Ina agali kini hearubi agali haguane bu hearubi bibahende waragome homalu hearu homelo wahaga biriya. <sup>7</sup> Hari Sainaini howa Anduane Homogohanda ihondo lai layago hale halu hari Horebeni howa Anduane Homogohanda waitigi karu bo wahai holebero layane hale hariya. <sup>8</sup> Kini ko hearu bo wahelonaga kini ogo ina bo pu lalu dabariya. Ani bialu agali mende ina henge mialu Anduane Homognaga bi mana latagi halu mbiwia haga helo dabo helariya. <sup>9</sup> I dahuliya andaga pole howa nogo hosime garo ale garisi gili laga wiago ira hungu heba ibiyagome i mo yalu puyabu humbirini wai bialu hongohe mbirame dahuliya andaga mo yalu piya. <sup>10</sup> Ngode Datagaliwabenaga bi mbugaha ngagome lalu Anduane Homogohanda horo manda bu winigo ngago ogoni tagira ibirangi i dai bulebere.

✧ 47:17-18: 1 Kin 10.21, 10.27 ✧ 47:19: 1 Kin 11.1 ✧ 47:21: 1 Kin 12.15-20 ✧ 47:22: 2 Sml 7.15 ✧ 47:23: 1 Kin 11.43, 12.10-30, 2 Kin 17.6, 17.18 ✧ 48:1: 1 Kin 17.1-24, 18.38, 19.15-16, 2 Kin 1.10-16, 2.11, Mal 4.5-6



Anduane Homogonaga keba holene pu timbu holigo ai ina ibunaga miniha mo tabila holebere. Ani bialu abahanda waneigini baba lone mini mbiraore helalu ina Yagoba waneigini lone haru dai bulebere. <sup>11</sup> Wali agali i de handayaru ti turu ho helobi wali agali ina biamogo biaga karu tigua miniha mo palia holene karulo helobi inabi nde bayale holene handa walua holeberema.

### *Elaisa henego ogo*

<sup>12</sup> Puyabu hongohe ibiyagome Elaya pulu yalu piyagola ibunaga dinini Elaisaha ho tolatagi hene. Elisa ibu henedago howa ibugua kini mbira kagohondo gi nahaga howa agali mbirame ibuhondo ogoale bia lowa ibu handaya ho haga mbira nahene.✧

<sup>13</sup> Ibugua biabe bulene damenego bibahendeore genda naheore bialu howa mani ibu homeaha ibunaga biabe Anduane Homogonaga bi mana latagi halu mbiwia hagadago bialu haabo hene.✧ <sup>14</sup> Ibu nahome heangi agalime nabiaganeale dewaore biaga henego ibu homowabi mbirale tara tarabi bini.

<sup>15</sup> Wali agali bu hearume mbirale tara tara uruni handa hondowa dege tigua mini beregedalu mana ko biyago wanahe haabo hene. Ani biyagola Anduane Homogohanda tinaga dindi wiago wahalu bo taliatagi howa dindi tara tara wiaruha purogo lelene.✧

<sup>16</sup> Ani bialu hayadaru ti nde emene hangu howa tinaga agali haguane Debidi aria dege haabo hene. Agali haguane uruni marume mana bayale bialu haga halu marume nde mana ko wiaru bialu hene.

### *Hesegaia henego ogo*

<sup>17</sup> Hesegaiahanda ibunaga tano mo hongo holene hame lo hene. Ani howa ibugua iba tanoha dadabu yu anda polenaga biabe bialu gana walu hene. Ibugua ege tole wiaru aeaneme bo dodo wahai howa iba berelonaga uli dewa tombo wigi bini.✧ <sup>18</sup> Ogoningi kini Senageribihanda Isaraele baba wai ibalu agali mbira Labasage heago ibilene. Agali Labasage ogoni ibugua Saiono bo gialahole bule ibu howa ibugua ibuninaga hongo timbuni heago mitangi bialu wai bi lalu bi ko tara tara hongo howa lalu hene.✧

<sup>19</sup> Ani layagola wali agalime gi timbuni howa tinaga gi duru laga laga bialu miniha tandaga timbuni walime gali taba hanalu howa tandaga hagagabi ho hai hene. <sup>20</sup> Ani howa Anduane Homogohanda ti dara helo Anduane Homogo olalu hene. Tinaga gi yaragadaga bialu Anduane Homogohondo bi lene. Anduane Homogo baya buruguleore kagome tinaga bi ogoni hale halu ti biamogo bilo Aisaia abaleore ibilene.✧ <sup>21</sup> Ai Anduane Homogohanda Asiria wai biaga agali biaru mo ko howa minu balu ibunaga dahuliyalirume ibalu balu bo amo lai hene.

### *Aisaia henego ogo*

<sup>22</sup> Anidagua binidago irane agali Anduane Homogonaga bi mana latagi halu mbiwia haga Aisaia ibugua de gandeba handarago bi heneneore ngago handa walua haga kago Hesegaia ibu mini mbiraore wialu bi layago talialu heagome bini. Hesegaia ibugua Anduane Homogonaga bi hale halu ibu mamali Debidihanda biaga wiago talialu bialu hene. <sup>23</sup> Ainde Aisaia ibu Anduane Homogonaga bi mana latagi halu mbiwia haga heangi ibugua ni abale anda nape hondo ha lowa bi lalu ai ibunaga bi Anduane Homogohondo layagome kini ibu mali dewaore dindini halu bini.✧ <sup>24</sup> Ibugua dinini hongoheore howa mbirale mani ibule wiago hondo bamba halu ibugua wali agali Saiononaga dara timbuniore howa dugu bialu hearunaga mini bayale helo motiga bini. <sup>25</sup> Ibugua mbirale bibahende mani bule ngago damene bibahendeore dindi ogo ibu biba holene tagira ibirangi waholene bi lai halu mbirale wiado hene ngarubi lai halu mbirale tagira naibi ngarubi lai haga hene.

✧ 48:12: 2 Kin 2.9-13 ✧ 48:13: 2 Kin 13.20-21 ✧ 48:15: 2 Kin 18.11-12 ✧ 48:17: 2 Kin 20.20 ✧ 48:18: 2 Kin 18.13-17 ✧ 48:20: 2 Kin 19.15-20,35 ✧ 48:23: 2 Kin 20.10-11

## 49

### *Yosaia henego ogo*

<sup>1</sup> Yosaianaga mini lolene baya dendebiore. Dendebi bayaleore lalu ira hagua nga biaga delole agalime baya hangu manda manda bu wiagagobi halu mone ibane dendebiore wali agalime nagane ngagobi halu tomo tara dawa nalu tabage balu wali agalime ngita bayaru balu iba ganaru lagagobi hene.\* <sup>2</sup> Wali agalime mini beregedelonaga ibugua mana bayale tigabi wiaru bialu howa ibugua mbirale dama mitangi bialu bi pupu wiaga bigiya bu wiaru bo pambulabaga bialu bo giallo wahai halu bini. <sup>3</sup> Ibugua Anduane Homogonaga biabe bulenego dege mitangi bu hene. Wali agali tigua mana ko bule hongo halu piai hayagola ibuni hanguoreme Ngode Datagaliwabenaga mana ngago talialu hole hongohe hene.

### *Yaremaia henego ogo*

<sup>4</sup> Debidibi Hesegaiabi Yosaiabi tigua Anduane Homogohondo erembira nami bayale henego ainde kini maru henedarume mana ko dewaore wiadambi dambi bima irigi helene. Ani binidago irane tigua Anduane Homogo daligaore kagonaga bi mana wahayagome ani bini. Ani binigome Yuda wali agalinaga kini naheore hene. <sup>5</sup> Hongo Yuda tinaga holenego wali agali tara tara hearuha piai halu tinaga mini daliga mini lene holenego dindi tara tarani wali agali bu hearu tiha piai hene. <sup>6</sup> Anidagua biyagome dindi taraha hameigini tara tara palearume ibalu tanobi Anduane Homogonaga anda heagobi bibahende bo gialahole biai halu wali agali lenego mbira tano ogoniha munini bialu hariga pugu biagoria nape wini. Mbirale uruni bulebira lalu Yaremaiahanda mbiwia halu bi lo winigo ngola hene.\* <sup>7</sup> Yaremaia ibu biabe ogoni bulene agali mbira helo lalu Anduane Homogohanda bamba ibu aiya tombeha bereangi howa dabene-goyu ainde wali agalime Yaremaia mo ko halu haabo hene. Anduane Homogohanda Yaremaia ibu agali Anduane Homogonaga bi mana latagi halu mbiwia hagane helobi mbirale ko ngaru minu dugalu bo gialahole bialu mo ko hai helobi maninaga mo heya halu lone hongo aribia helobi Anduane Homogohanda ibu dabo helene.

### *Esegiele henego ogo*

<sup>8</sup> Esegiele ibugua degandaba mbira hendene. Ibugua handalu hearia Ngode Datagaliwabe ibuni kini biragane dagiani bereagola dahuliyaliru ibuni heba mandagi hearia hendene.\* <sup>9</sup> Ibugua puyabu hongoheore wali agali waitigi bu hearuha piai helalu wali agali ibunaga bu heagoha yagi nabi bayale helene.\*

### *Mbiwia haga agali homberia (12) henego ogo*

<sup>10</sup> Agali mbiwia haga homberiali (12) tinaga kuni ayu homaliha ngaru mani lone heyalu holene gahange karu lelo hame lowa Anduane Homogohondo tinaga bi laharo. Ani larogo irane tigua Yagaba hameigini mo hongo halu tinaga holene henge bayale mbira mani ibilonaga malia ho helo biamogo bialu hai haga hene.

### *Serubabele Yosuala henego ogo*

<sup>11</sup> Ainde iname aguaore bialu Serubabelenaga mini yaraga holene karulapeda. Ibuore Anduane Homogonaga giha yari baya taraore bida.\* <sup>12</sup> Ani bialu Yosadaga igini Yosubi nde ogonibi dege hene. Libu dindini heangi howa Anduane Homogonaga anda bayale mbira ibuninaga mini yaraga halu holenaga bia howa anda ogoniha yari baya tara tara wiaru mo wiai howa mo yaribia ho ngelene.\*

### *Nehemaia henego ogo*

\* 49:1: 2 Kin 22.1, 22.11-13, 23.3,23,25    ✧ 49:6: Yar 1.4-10, 39.8    ✧ 49:8: Ese 1.3-15, 14.14-20    \* 49:9: Hobane ogoniha Girigi bi lalu gilibu wini bayale wále ndo gilibu wia.    ✧ 49:11: Esr 3.2, Hag 2.23    ✧ 49:12: Hag 1.1, 1.12

<sup>13</sup> Wali agalime Nehemaianaga miniore embeda holene nawigo irane ibugua tano timbuni wiagonaga ege pabe gialahole bu wiaru lone arema bu dai bialu tanonaga wai pabe panga gialopaya bu wiaru lone wabu helai halu inanaga anda damene lone biai henegonaga iname ibu embeda holene nawiore.\*

### *Mamali ala heneru ogo*

<sup>14</sup> Anigo ainde dindini hene agali bu karu mbirame Inogo bolangua habe naheore hene. Ibu dindi ogo wahalu Anduane Homogohanda dahuliya andagaha haru pene. <sup>15</sup> Ani bialu Yoseba henego ai Yoseba ale agali mbira nahe. Ibu hamene bu hearuibunime mo tiga buwa baya hangu haru halu ibu damene hearu mo hongo halu haga hene. Anidagua bialu henego manda bialu tiguaibunaga kuniru baya hanguore handaya ho howa yu ibaga bu hene. <sup>16</sup> Wali agalime Siemela Sedelanaga mini yaraga halu haga hene. Anigo mini daliga timbuniore mini lene howa mbirale ema bialu piaga maru ti dege dombeneha agali pigane henego Adama henegonaga mini timbuni daligaore yaraga holene nga.

## 50

### *Saimono henego ogo*

<sup>1</sup> Oniasa igini Saimono ibu loma binigo mo miaga agali haguane timbuni heangi Anduane Homogonaga anda lone mo tiga buwa arema buwa ibugua anda ogoni lone mo bayale helene. <sup>2</sup> Ibugua Ngode Datagaliwabe anda heagonaga pabe hagira lone arema bialu ege pabe ogoninaga nenani mamagealinaga anda emeneru lone bima irigi halu bini. <sup>3</sup> Ai Saimono ibu heangi ibugua iba berelonaga uli timbuni mbira tombo winigo ogoniha iba timbuni iba kuyama biraradagua berene. <sup>4</sup> Ani bialuibunaga wali agali bu hearu mo ko holigonaga mini burugu lo hene. Ani howa waitigime ibalu tanoha abale anda ibulino tanonaga pabe baya hangu arama bialu mo hongo howa bialu hene.

<sup>5</sup> Ai Saimono ibu Anduane Homogo andaga tamu Hobane Loma Biaheneore laga heagoha howa tagira ibiyagolaibunaga dengui wáleore tagira ibiyago hondowa wali agali dewaore ibu ngola hole ibai hene. <sup>6</sup> Tigua handalu hemiria ibu yakundi egabi laragoha kaligobi ege datimbu haragola wá timbuni hagagobibi hearia hendene. <sup>7</sup> Tigua handalu hearia ibu de daibi ni hongohe dalu Anduane Homogonaga anda dangini daba hagagobi halu ni domo yari tara tara bi hari beraliba pele kagoria wu paga hagagobi hearia hendene. <sup>8</sup> Tigua Saimono de handalu hearia yari biagane baya dedaligobi halu iba angene datani baya taraore bu kaligobi hearia hendene. Ani bialu ira hongone Lebanono hari ngagoha andaho hagagobi hene. <sup>9</sup> Ibu bayaore ira denela ira hagua nga bilo loma bu delaga dabu kagoria ngaligobi halu ngolome wabini gabo be baya ege tole yolo dewame miagane tara tara ngarume mo yaribia howa ngaligobi hene. <sup>10</sup> Ibuore ira olibe lini dewa daga kagobi halu ira mende guraya ale anda halu lu holene wiadege bialu anda howa hari mindini ela habehe piagagobi hene.

<sup>11</sup> Saimono ibuguaibunaga aga bayale ngago mo karulalu yari tara tara ngaru mo karula bialu Anduane Homogonaga loma biaga dabu kagoria porangi baya taraore mbira haga hene. <sup>12</sup> Loma emene agali loma binigo mo miaga karunaga giha yidaru yamu yuwa agali ibu damene karu baba mandagi nogo egaru loma bu deloledagoria pu haga. Ibuore ira tamia baya taraore Lebanono irabuha hagagobiore hene. <sup>13</sup> Ibu dombeneni helowa loma bu minigo mo miaga Arono aguane bu hearume ibu ho mabu biyagola ibu pibi ayage ale yuniru ha amunanabi haradagua biniya. Tigua Anduane Homogonaga lomaru giha yaga yaga buwa tinaga aga bayaleru karulai damene howa Isaraele wali agali bibahende deni heyu hai haga heneya. <sup>14</sup> Ai Saimoni ibugua bo lomabu miaga dabuni Anduane Homogohondo bi howa ibugua Anduane Homogo

\* 49:13: Neh 6.15

Bibahende Hongo Haiheore kagonaga loma mo manda manda biaga. <sup>15</sup> Ibugua iba be mo yamuwa waini iba loma ngago odo loma bu ngelaga. Lomanaga nga baya taraore birago pialu Anduane Homogo Daligaore Bibahende Hongo Haiheore kagoa pelonaga ibugua waini iba loma ogoni loma bu wiagane dabu heago gene dindiha odo baede haga bini. <sup>16</sup> Ani biragola Arono aria bu hearume bi hongo howa ladaga daga bialu tinaga pilipe bigulibi pu lalu biaga hene. Ani biragola wali agalime Anduane Homogo Daligaore kago mitangi bilonaga mo mitangi bia halu bi hongo howa ladagadaga biaga hene. <sup>17</sup> Anidagua biragola wali agali bu karume abaleore dindini bulupalu ibira howa tigua iba gana larago hale hoabi darabi mbira lagane wini. <sup>18</sup> Ani biragola wabuni halu mbira henedagome tinaga ngitaru balu turu holene iba ganaru laragola tinaga iba gana larago hale howabi turubi mbira laga wini. <sup>19</sup> Ani laragola wali agalime Anduane Homogo Daligaore kagohondo olalu Ngode Datagaliwabe dara hagane kagonaga deni howa bi lalu howa lolene winidago lai halu purogo laga wini. <sup>20</sup> Ani bialu Saimono ibugua dalipe howa ibunaga gi Isaraele wali agali bu karu bibahende ha dogola angua halu ibugua Ngode Datagaliwabenaga mini loleore turu howa mini lalu Anduane Homogonaga mo turu holene tiha helo miaga hene. <sup>21</sup> Anidagua biragola wali agali ti dindini halu mende lone bulupalialu Anduane Homogonaga mo turu holene miaga wini.

*Anduane Homogohondo turu holene bi lagago ogo*

<sup>22</sup> Ai tigua Ngode Datagaliwabe ibu wali agali bibahende aba kagohondo turu holene bi ladaba. Ibugua mbirale timbuni ngaru biaabo haga ka. Ibugua ina aiyahanda ina taba hanayanghi howa ina dara howa handaya ho hama ibalu henego haabo kagoni. Ani howa ina dara halu inahondo mbirale bayale ngago dege bialu haga ka. <sup>23</sup> Anduane Homogohanda ina mo turu helobi ibugua bamba biaga winidagua ayu Isaraele wali agali bayale holene ibilelobi ina ibuhondo bi laro. <sup>24</sup> Ani bialu ibugua ina dara halu mbirale ko damene inaha ngaru mo wahai helo ina bi laro.

*Hamewaneigini tebira ko biaga henego ogo*

<sup>25</sup> Wali agali í hame nalene halu tebira kago ainde tebonego ko ngubiore ka. <sup>26</sup> Halu mbirago ibu hari Sia kagoa ka halu mendego ibu Pilidia hameigini bu kagoa ka. Ani bialu wali agali luluorene luluru Segeme tano ngagoa bu karu ti ka.

## Siragahanda bi lamaro binigo ogo

(50.27-51.30)

<sup>27</sup> I Yasu Siraga Eleasa aguane mbira Yarusalemeali kogoni. Ina wali agalihondo inaga mini gigabi manda bayalebi ngago lawai holene hame lo howa mbuga ogo gili biru. <sup>28</sup> Wali agali bi ogo baya hangu manda biyagua tigua manda bayale mo yu holebira. <sup>29</sup> Tigua bi uruni talialu hayagua tinaga biabe bulene ngago biai holenenaga hongo karulape yu holebira. Ti Anduane Homogonaga wáholene ngagoria ibaga bu howa ani holebira.

## 51

<sup>1</sup> Inaga Anduane Homogobi inaga kinibi í kegohondo i kaj lalu Ngode Datagaliwabe howa inaga biamogo biaga kegonaga í mo turu halu bi laro.

<sup>2</sup> Ina i baya hanguore mamage howa handaya ho halu i biamogo bialu hegola i mo ko nahe bayale haabo haru ai uruninaga ihondo kaj lalu inaga mini yaraga haro. Ke holenemebi bi dibudibu lalu bedago hale ho kayu bulenemebi i mo pila nahe harugo ko. Wali agalime i talima ibaga biyagola ina i baya hanguore handaya ho halu i biamogo bialu harigoni.

✧ 50:20: Dag 6.24-27

<sup>3</sup> Inaga dara holene irane nawini dara halu biamogo bulenemebi inaga mini bayale mini lene kegomebi biamogo bialu harigoni. Wali agalime i balu noleore heagola ina i biamogo biri. Inime iheba mandagi ibagabu hebagola wali agalime i bo wanahebi bahondolene bu wiarume i mo ko nahebi haru.

<sup>4</sup> Wali agali tara hearume ira hagua bo delalu i bo wahole bialu hearia ina i nahomoliya hapai harigoni.

<sup>5</sup> Inime i handaya ho heagola i homeneru dindi nape kogoni. Ina i baya hanguore mamage ho haabo hegola waliagali bi ko lalu ke haga bu hearume i mo ko halu kininaga deni i ko biya lalu ke howa godini helole haru nape wahaya.

<sup>6</sup> Heneneore i homeneru dalu humbirini andaga abale penego habo laya.

<sup>7</sup> Wali agalime i biamogo bialu mo wulene mbira nahe bibahendeme i talima ibaga biai haya. Mbirali nde i biamogo bilo taya bialu hewaria i biamogo bulene mbira naheoreya.

<sup>8</sup> Anduane Homogo-o i ayu inaga dara holene ngegobi biabe maru ala ina bini ngagobi mitangi bialu ko. Wali agali ina ti biamogo bibelo i malia ho hearu biamogo bialu waitiginaga giha hearu golope halu haru dai biriya.

<sup>9</sup> I abale nahomolenaga ina Anduane Homogo Daligaore kago olalu ibuhondo bi larogoni.

<sup>10</sup> Horo ko tagira ibirangi ibugua i wanahelobi i wali agali ko bu karunaga hongo bolangua habe nahe kongibi biamogo bule kaware helonaga ina Anduane Homogo i abaore kagohondo dugu bu mialu kogoni. Ina inaga mini yaraga holenebi ihondo turu holene bi lalu kai lolenebi halo ha nabi lalu haabo holebero.

<sup>11</sup> I bi lalu mo ko holene wiangibi ko bu wiaru iha anda ibulene wiangibi ina inaga bi larogo hale halu biamogo bialu haga ke.

<sup>12</sup> Anduane Homogo ina ihondo uruni bialu haga kegonaga ina inaga mini yaraga halu ihondo kai lalu haabo holebero.

<sup>13</sup> I bamba igiri daliahe hewangi howa dindi tara tara wiaruaru de nahende howa ina Anduane Homogo tigatiga hale halu mini giga bulene bayale ngago ngibe lalu hale haru. <sup>14</sup> I ibu andaga porogo puwa i mini gigabi ngibe lalu bi laabo haruligo ai ani bialu haabo halu <sup>15</sup> ini daliahe hewangi yari biagane gauni baya dedaligobi henego hama ibalu ayu agali wahe howa i ira boga biai halu ibiraihe ale kogonigo mini gigabi bayale ogonime inaga bu miniha mo turu haabo haga nga. I igiri emene hewangi howa ina ibu talima pialu howaibunaga hariga wiagoria pialu haru. <sup>16</sup> Inaibunaga bi emene hanguhale ho berewagola ibugua i dewaore lawai haya. <sup>17</sup> Anidagua binigome i mini gigabi wulene ngola halu haabo ko. Ani howa Anduane Homogohanda ihondo mini gigabi wulene ngiyagonaga kai lalu haabo ko. <sup>18</sup> Inaibunaga mini gigabi wulene ngago talima polenaga mini paga haluibunaga mana bayale tigabi ngago bialu holene taga naholebero. <sup>19</sup> Heneneore larogo ina mini gigabi wulene ngago baya hanguyu ndibulo howa mana bayale tigabiruhangu bialu hole hame laru. Inaga miniha mini bayale gigabi wulene ngago dara ho haabo howa inaga gi daligaha dogoladaga halu dugu bialu kogoni. <sup>20</sup> I mini gigabi wulene yamuleore lalu hongo howa mana bayale wiago taluwa bialu howa ai ina ayu mo yu kogoni. Mini gigabi wule i pigane ngola halu ina mbirale bayaleru lo manda birugome i karulape holebero. <sup>21</sup> Ina bu miniha hameore timbuni lowa mini gigabi wulene taya bialu henego ainde mini bayale ogoni mo yu ko. <sup>22</sup> Anduane Homogohanda ihondo mbirale bayale mbira i mo turu halu bameore nginigo ogoni bi bayale latagi holene ngiya. Ani ngiyagome inaga turu holene ngogo bibahende latagi hai holebero.

<sup>23</sup> Wali agali manda nabi bu kemiru ti iha mini bayale gigabi ngago manda bule i koria kaware ibidaba. <sup>24</sup> Irane aginaga tigua mbirale uruni nayi kemibe. Ani bialu irane aginaga ibu olalu dugu bialu kemibe. <sup>25</sup> Ina tihondo langialu ogodagua laru. Yolo



buleneha yagi wahalu mbirale ogoni bame yamidaba larugoni ndobe. <sup>26</sup> Mini gigabi wulenaga tí kaundiaha taya bima polene ndo nga. Ibunaga genda ngago yamialu tínaga payani mo yu howa manda bayale ngago mo yu halimu. <sup>27</sup> Ainde de handadaba ina bu miniha mo palia holene biabe erekuibi bialu ndo mo yini. <sup>28</sup> Ai tígua mini gigabi wulene yolo birimiyagua nde mbirale bayale tara tara ngaru mo yu dai buleberemi. <sup>29</sup> Tígua Anduane Homogonaga dara holene ngagohondo turu halu ibuhondo taga nahe howa ibunaga mini yaraga holene taga nahe halimulonaga ina tínaga bi la haro. <sup>30</sup> Ai biabe bulene ngida. Ngode Datagaliwabehanda horo yolo mulene pongo winigo tagira ibiragola tí yolo bayale ngaru mule ayu abale bigi bialu biabe biala harimidago bumaro bilimu, lalu Siragahanda lene.

## Barugu

### Mbuga ogoha gilibu ngarunaga nemandi ogo

Barugunaga mbuga ogoniha bi hobane tebira tubagiru gilibu nga. Tigua mitangi bialu agali Barugu bi tubagi irane tebira gili binidagoni ibu agali Anduane Homogonaga bi mana latagi halu mbiwia haga Yaremaianaga beba gili bia dagala biaga hene lo manda bini. (Yaremaia 32.12 ngagobi 36.4 ngagobi de hondolene nga) Ai mbuga ogoni abale Hiburu bi lowa gili bu winigo mani Girigi bi lowa mbugani mandagi gili bu wini ngabe tobane nga. Bi Barugunaga mbuga ogoniha gili bu ngago irane Isaraele wali agali Babilono dindiha garabaya pu hayagoha howa bialu hayaru irane ogoale biya lalu galone mo walia halu gili bu nga. Ibugua Yuda wali agali ti garabaya pu hayadagoha genda yu henedago irane ogoaleme yu harimi lalu mo walia howa gili bu nga. Ani bialu ibugua Yuda wali agali tihondo Ngode Datagaliwabehanda bulebero lalu bi hongo howa lo wini ngagobi Ngode Datagaliwabehanda Yarusaleme mo palia holene karulo helo mulebero lalu bi lo winigobi ti manda bilonaga gili bu wini. Ani bialu mbuga ogo me tinaga bu miniha mo hongo helonaga gili bu winiya.

### Mbuga ogoni Barugu ibugua Babilono howa gili bini.

(Be 1.1-14)

*Mo walia halu bi lenego ogo*

<sup>1</sup> Mbuga ogo Baruguhanda gili bini. Barugu ibu Masea aguane howa Neria igini hene. Ani bialu ibu hameigini Sedegaiabi Hasadiabi Hiligiabi uruni aria hene.\*

<sup>2</sup> Ibugua Babilonoha howa ege mbiru horo kane layagola Babilononaga kini heagome Yarusaleme bo gialo wahai halu wali agali garabaya bu yalu Babilono pu henego mali dauni hayagola mbuga ogo gili bini.\*<sup>3-4</sup> Baruguhanda mbuga ogo Yudanaga Kini Yahoigimi igini Yahoigininaga deni howa daga lene. Ani bialu ibugua mbuga ogoni Babilono wali agali dewaore iba Sudu angeni bu hearu bibahende deni howa daga lene. Wali agali Baruguhanda beba daga layago hale hole ibinidaru agali mini lene timbuni bu hearubi kini damene bu heneru waneigini hearubi agali timbuni mini lene hearubi bi ogoni hale hole ibu ngoai ho hene. Wali agali dunini bu hearubi dunini ndo bame hene hearubi bibahende bi ogoni hale hole ibu ngoai hene. \*

<sup>5</sup> Barugu ibugua mbuga ogoni gili bialu heagola wali agalime dugu timbuni bialu tomo nane waho halu tigua Anduane Homogohondo bi lalu hene. <sup>6</sup> Ani bialu howa tigua muni tinime mule karulape hame leadagua <sup>7</sup> ilomogo bialu tigua muni uruni loma binigo mo miaga agali haguane Yahoigimi hearia Yarusaleme yalu pelene. Yahoigimi ibu Hiligia igini howa Salumu aguane hene. Muni uruni maru agali loma binigo mo miaga maru hearu talebu mialu maru nde wali agali maru Yahoigimi heba mandagi haga Yarusalemeni hearuhondo migi bini.

<sup>8</sup> Ege mini Sibananaga horo pini (10) hayagola Baruguhanda gabo mbiraleru Ngode Datagaliwabenaga andaha Yarusalemeni wiaru abale Babilono ami agalime mo pagebu yalu pene biaru lone yu dai bialu Yuda dindiha daibilene. Gabo mbirale uruni abale Yudanaga kini Yosaiia igini Sedegaiahanda wabidaba layagola tigua silibame wabu wini.† <sup>9</sup> Tigua gabo uruni Babilononaga Kini Nebugadenesahanda Yudanaga Kini Yahoigini Yarusalemeni hearia minu yalu agali haguane hearubi gabumane haru haga hearubi agali timbuni hearubi wali agali damene bu hearubi wali agali tara tara bu

\* **1:1:** Yar 36.4 \* **1:2:** Agali mandabi hearume bi ogoni mali dauni ledago ege dauni lowa leda lo manda bini. Ege ogoningi dege Babilono ami agali hearu Yarusaleme tanoha anda pene. 1 Kini 25.8 ngago handabe. \* **1:2:** 2 Kin 25 \* **1:3-4:** 2 Kin 24.8-17 † **1:8:** Isaraele wali agali tinaga ege mini Sibana ogoni inanaga ege dauni waraganela haragola ibagane.

hearubi bibahende garabaya haru halu Babilono penego ogoni peaha mani gabo be uruni wabu wini.

*Wali agalime beba Yarusaleme gilibu pelenego ogo*

<sup>10</sup> Wali agali tigua beba gili buwa Yarusaleme pelalu howa lalu, Iname muni tihondo ibilaramago tigua muni urunime lomabu delolene ale nogo irani dai helo loma bo delolenebi loma bame mo turu halu ko domolenenaga miagaru ale yolo bialu ira hagua nga bilo loma delolene widi lomabu mulenerubi yolo bigi bilimulo wia harama. Tigua uruni bibahende yolo buwa Anduane Homogo inanaga Ngode Datagaliwabe kagonaga lomabu delaga dabu kagoria wu haealadaga helalimu. <sup>11</sup> Ani bialu tigua Babilononaga Kini Nebugadenesabi ibu igini Belesasa kagobi libu luore howa mali dewaore helonaga Ngode Datagaliwabe kagohondo bi la halimu. <sup>12</sup> Anduane Homogohanda ina baya hangu mo hongo helobi haru kagola ibaga bu holomayabi ibugua ina biamogo bilo tigua inanaga bi la halimu. Ainde Nebugadenesabi ibu igini Belesasabi libugua ina handaya ho howa haru kagola iname libunaga mini yaraga ho haabo halu homalu waholeberema. Ani beremagola libunaga miniha ina baba turu ho holebira. <sup>13</sup> Ainde iname mana ko birimagonaga ibugua inahondo keba ho kago wahalu ina dara helo Anduane Homogohondo inanaga bi lahalimu. <sup>14</sup> Iname bi mbugani gili bu wia haramago handalu horo timbuni Ngode Datagaliwabehondo bi loleneru tagira ibirangi inanaga ko ngaru ibunaga andaha puwa latagi hai halimu, lene.

**Wali agali garabayaha howa tinaga ko wiago latagi halu  
Anduane Homogohondo bi lene.**

*(Be 1.15-3.8)*

*Ko binigo latagi halu bi lenego ogo*

<sup>15</sup> Beba ogoniha bi maru ladege bialu ogodagua leda. Ainde tigua Anduane Homogohondo bi ogodagua lalimu. Ngode Datagaliwabe ibu inanaga Anduane Homogooore ka. Ibu tigabiore ka. Ani kagonaga deni ina taga timbuniore ho kemagoni. Ina Yudia wali agali bibahendebebi Yarusaleme wali agalibi <sup>16</sup> kini kemarubi agali haguane bu kemarubi loma binigo mo miaga agali kemarubi Anduane Homogonaga bi mana latagi halu mbiwia haga kemarubi inanaga mamali henerubi bibahendeore taga hai haramagoni. <sup>17</sup> Irane iname mana ko bialu <sup>18</sup> Anduane Homogonaga bi mo waharima. Iname ibunaga bi hale nahe howa ibunaga mana lo wini wiagobi baya hangu talia nabi harima. <sup>19</sup> Bambaore hama ibinigoha howa áyu kemagoni iname Anduane Homogo kago mo erembira mialu harima. Mana ogoni Anduane Homogo inanaga Ngode Datagaliwabehanda ina Iyibi dindiha howa haru tagira ibiyangi howa bialu henego haabo kema. <sup>20</sup> Ainde Bambaore Ngode Datagaliwabehanda inanaga mamaliru Iyibi dindiha howa haru tagira ibalu dindi bayale mbira tomo baya nogo andu ibane dewawibi mone taranaga ibane dewawibi wiagoha haru íbu helene. Ani bialu ibugua bi hongohe mbira agali ibunaga biabe bia haga Mosesenaga ne harigaha howa lalu iname ibu andaneha naharimayagua ibugua ina pani ngialu mo ko holebero, lalu bi hongoheore lene. Anidagua lenego ainde áyu iname genda Anduane Homogohanda keba halu mo ngiyago yu kema. <sup>21</sup> Anduane Homogo Ngode Datagaliwabehanda agali ibunaga bi mana latagi halu mbiwia haga marume ibunaga bi ina langule yalu pu lene ibugu biyaru iname hale nahe mine halu bi mo wahalu haabo harima. Ina hangu hangu hame wimagoha pupebe bialu hariga ko wiagoha pialu harima. Ani puwa iname mbirale bi pupu wulenaga gime wabini wiaruhondo bi pupu wule pialu harimago Anduane Homogonaga deni mana ko bialu harima.

☆ 1:20: Man 28.15-68

## 2

<sup>1</sup> Anidagua bialu hemagola Anduane Homogohanda ko bialu harimiyagua pani nalimulo ngule lenego henene tagira pelaya. Ibugua bi ogoni Isaraele wali agalinaga agali haguane hearuhondobi kini hearuhondobi agali timbuni bu hearuhondobi Isaraele wali agali bu hearuhondobi Yuda wali agaliruhondobi bi lo wini. <sup>2</sup> Mosesenaga bi mana lowini ngagome ledadaguaore ina genda timbuniore mo ya henego kema. Ainde genda timbuni Yarusalemeha anda ibiyago timbuniore dindi maruha genda ogonibi naibini. <sup>3</sup> Ina mo ko halu inanenaga waneiginirunaga tingini inaneme narimagoni ndobe.\* <sup>4</sup> Anduane Homogohanda ina bo taliatagi howa wali agali hameigini tara ina baba handa ainai kaware howa ina mege bialu ina ko ngubiore tara handale haga bu hearunaga hongo andaneha heledagoni. <sup>5</sup> Iname inanaga Anduane Homogo kagohondo mana ko bialuibunaga bi hale nahe harima. Anidagua birimagonaga Anduane Homogohanda ina mo heyaha ndo ina bopeore henego kema.

<sup>6</sup> Anduane Homogo inanaga Ngode Datagaliwabe ibu bayale tigabiore kago helowa inabi inanaga mamali henedaru tibi bibahendeore mana ko inane bialu harimagonaga genda yu kemagoni. <sup>7</sup> Anduane Homogoibunime bule lalu lo winidaguaore bialu ina pani nolene mo ngiya. <sup>8</sup> Anigo ainde iname mini beregedalu ibuni karia dai bialu inanaga mini ko wu harimadaru wahai halu dai bulumaya ina mo hongo habe lolene wiago nale harima. <sup>9-10</sup> Inaibunaga bi layago hale naheore howa inaibunaga mana lo ngagobi talia nabi harima. Anidagua dege Ngode Datagaliwabe handa lalu, Tigua mana baya bulene ngago nabi harimiyagua tiha mo ko holene ibilolebero, lalu bi lo wiyago ngola helo ibugua uruni inaha ibilaya.

<sup>11</sup> Ngode Datagaliwabe iore Anduane Homogo Isaraele wali agalinaga Ngode Datagaliwabeore kegoni. Inaga hongo timbuniore ngegomebi inaga biabe timbuniore bialu agalime nabiaganeale birigomebi inaga wali agali iyibi dindi wahalu haru tagira pialu oali haru ibirigoni. Inaga hongo timbuni mo walia harigome inaga mini timbuniore mini lene henego ayu haabo ke. <sup>12</sup> Anduane Homogoinanaga Ngode Datagaliwabe-o iname mana ko timbuni bialu harima. Ina wali agali ko kema. Iname inaga mana lo wini ngaru aria mbiraore hangubi mbira talialu nabiore harima. <sup>13</sup> Ainde ina baba keba ho haabo holeni nahabe. Inime ina dindi tara tara wiaruha pugu pugu bulumaya bo taliatogo larigola ainde ina dege dombeneha mbira mbira hangu haga haga bidegoni ndobe. <sup>14</sup> Anduane Homogo-o inaga mini timbuni mini leneore kego manda bialu ina biamogo bibe. Ainde agali ina dindi ogoha garabaya bu yalu ibiyaru tibi nde ayu ina baba turu haga bu helo helabe larama. <sup>15</sup> Wali agali tara tara karume i inanaga Ngode Datagaliwabeore howa ina Isaraele wali agali ininaga helo inime dababagiho heleneoreda lo manda biai helo ani bibe larama.

<sup>16</sup> Anduane Homogoini dahuliya andagaha howa de handadali halu ina de handalu mitangi habe larama. Inanaga bi laramagoni hale habe. <sup>17</sup> Inaga dengala halu ina de handa. Ai wali agali homalu humbirini andagaha pu karu tigua bu he lolene lone mibe nahe kago ai tigua ihondo bi turubi langulenebi inaga mana tigabi ngeru latagi holenebi nakarulapeore. <sup>18</sup> Wali agali homa nabi karume dege lolene karulape. Ti tandaga timbuni nalu howabi ti bo hangeda hene hongo naheore howabi ti hina garime tungulo mibehe de mborere bu howabi harugo lowa tigua ini Anduane Homogoore kegonaga mini yaraga halu mana bayaleore ina biaga ngego latagi halu holebira.

<sup>19</sup> Anduane Homogoinanaga Ngode Datagaliwabe-o ina inaore dara halu biamogo bibelonaga bi lalu kema. Ina mamalirumebi inanaga kinirumebi mana bayale bialu henego mitangi bibe lalu ndo larama. <sup>20</sup> Ainde bamba inaga bi mana latagi halu

\* **2:3:** Mbirale uruni Babilono amime ibalu Yarusaleme ho hagira biyagola wali agali tanoha bu hearu tomo nolene mbira nawiore howa gari timbuni hene Dugu 2.20 ngago de handabe.

mbiwia haga hearuhondo bi lamirigola tigua latagi halu hene. Tigua lalu <sup>21</sup> Anduane Homogohanda lalu, Tí Babilononaga kini kago andaneha halu ibugua tí handaya ho helalimu. Ani howa dindi ina tínaga mamaliruhondo mirugoha ema nabi hendore halimu. ✧ <sup>22</sup> Anigo ainde tigua bi ina larogo mo wahowa Babilononaga kini kago andaneha holene manga harimiyagua <sup>23</sup> nde Yuda dindiha tano bu ngaru bibahendehabi Yarusaleme tano ngagohabi wali agali lenego mbira naholebiraore. Wali agalinaga bu miniha turu ho hagabi wali agali dabu bialu howa tomo bayaleru nalu turu haga bu hagane ngarubi bibahende mo wahai halu ereba helolebero. Ani berogola dindi ogo bibahendeha labu dindi hangu wulebira. Dindi ogoha dabulu labu wialu wali agali lenego mbira naholebira.

<sup>24</sup> Agali Anduane Homogonaga bi mana latagi halu mbiwia haga bu hearume bi ogonidagua layagoyu iname ínaga bi larigo mo wahalu Babilononaga kini kago andaneha holene hame nale harima. Anidagua birimago hondowa ina bi hongohe agali ínaga biabe biaga biarunaga ne harigaha howa bule lalu latagi harigo biriya. Ina lalu, Waitigime ibalu homali bu karuha puwa inanaga kini homenerunaga kuni ngarubi ina mamalirunaga kuni ngarubi bibahende ✧ <sup>25</sup> dindini bainaj bima polebira lariya. Ai wali agali kuni áyu dindiha wiaruni nime dalu do gialalu mbiraga dindi guni ibira howa wiadambi halu biaga nga. Agali uruni tandaga timbuniore nalu howa homaga bini. Hina gari halu homenebi waitigime bayagola homenebi warago ko tararu ibalu bo homolenebi nga. <sup>26</sup> Isaraele wali agalibi Yuda wali agalibi bibahendeme ko bialu heagome ínaga anda ínaga wali agali ti ini kegoria kaware ibilonaga bu helarigo bo gialahole bu ngelo waharigoni áyu wiaabo kagoni ndobe.

<sup>27</sup> Anigo Anduane Homogo-o ínaga dara holenewigo inahondo mo walia halu inahondo hendore dege bialu harigoni. <sup>28</sup> Abale agali ínaga biabe bia haga Mosesehondo latagi ha lari. Bi ogoni ina ibuhondo Isaraele wali agalinaga deni howa ínaga bi mana gili bibe lalu lamiringi howa latagi hene. Inime latagi halu lalu, ✧ <sup>29</sup> Áyu tí wali agali dewaore padamigoni. Anigo tigua ínaga bi larogo hale naharimiyagua nde ina tí bo haeala togo lalu dindi tara tara ngaruha purogo lelelebero. Ani berogola wali agali emene daga lene dege ona holeberemi. <sup>30</sup> Ai tíore wali agali mine hagaore bu kemigoni howa ínaga bi larogo hale naholeberemida lo manda bido. Anigo tí dindi mendeyagi garabaya pu harimiyagua nde tigua mini beregedo holeberemi. <sup>31</sup> Ani pu kemigola i Anduane Homogo tínaga Ngode Datagaliwabeore kogo ina tínaga mini dungula halu hale paiho kemigo dugua halu berogola tigua ínaga bi baya hanguore hale holeberemi. <sup>32</sup> Tí dindi kaundia ogoniha pu howa tigua i lone mitangi ho dai bialu ínaga mini timbuni mini yaraga hene ngago yaraga halu holeberemi. <sup>33</sup> Tíha mini ko mine holene ngago wahai halu mana ko biaga ngemigo wahalu buleberemigo irane tínaga mamaliru tigua Anduane Homogonaga bi mana lo wini ngago mo wahalu pialu hemiria bini ngaru manda biadai buleberemi. <sup>34</sup> Ani manda bu kemigola ina tí lone haru dai bialu tínaga dindi ina tí ngule lalu tínaga mamali Abarahamahondobi Aisagahondobi Yagabahondobi bi lo winigoria halimulo lone haru dai bulebero. Ani berogola dindi ogoni tínaga dindiore wialu tini ogoniha howa wali agali emene áyu kadagua ndo palia timbu holeberemi. Ani howa mani wali agali lone palia emene naholebira. <sup>35</sup> Ani bialu ina tí baba habo nalolene bi gahenge mbira wiaabobo bu ngelonaga lo wulebero. Ani bialu i tínaga Ngode Datagaliwabe kogola tí ínaga wali agali holeberemi. Ani bialu Isaraele wali agali tí dindi ina tí ngirugoria kemiru lone bo taliatagi naholebero, lene. ✧

### 3

<sup>1</sup> Isaraele wali agalinaga Ngode Datagaliwabe-o i Anduane Homogo Hongo Haiheore



kegoni. Inanaga miniha genda tara tara yu howa ihondo olalu kema. <sup>2</sup> Anduane Homogo-o iname inaga deni howa mana ko dewaore bialu harimago ainde ina ina dara habe. <sup>3</sup> I kiniore howa haabo haga kegola ina wali agali homalu ereba hagane kemagoni ndobe. <sup>4</sup> Anduane Homogo Hongo Haiheore howa i Isaraele wali agalinaga Ngode Datagaliwabe kego ina wali agali ko biaga bu heneru aguane kemarume ihondo bi lalu kemago hale habe. Tigua inaga bi mo wahalu penegome tinaga genda iname yu aribia ho kemagoni. <sup>5</sup> Ainde mana ko inanaga mamalirume bialu hene ngarunaga mo wiaho haabo nahabe. Ininaga mini yaraga hene timbuni kegobi inaga hongo timbuniore ngegobi mitangi bibe. <sup>6</sup> I inanaga Ngode Datagaliwabebi Anduane Homogobi i hanguore kego manda bialu mo yaraga halu holeberema. <sup>7</sup> Iname i olalu holomayanaga inime inahondo mo gi halu haga ke. Ai ina mamalirunaga mana ko biniru wahai ho kemagome ainde garabaya andaha kemago howa inaga mini yaraga halu holeberema. <sup>8</sup> Ainde ina de handa dali halu wali agali darabi garabaya bu kemaru nde de handabe. Wali agali tara dindi taraha bu hearume hondo mege bialu tigua inahondo bi ko ngaru laedede bialu helonaga ina dindi taraha pelariya. Anduane Homogo inanaga Ngode Datagaliwabe-o inanaga mamali tigua ihondo mine howa i erembira ngialu piyagome ko timbuni biya. Anidagua binigome ko uruni inaha wua dambi hai kagola ina wali agali ko biaga mini leneore kemagoni ndobe.

## **Wali agalinaga bu miniha mo palia ho holenenaga bi lo nga.**

(3.9-5.9)

*Mini gigabi wulene ibu galoneore nga lenego ogo*

<sup>9</sup> Isaraele wali agali bu kemiru tigua mana lo wini ngagome bi ledago baya hangu hale hadaba. Mana lo ngagoha howa bi laragome ti haabo holene hariga ngagoria haru halu polebira. Ani bulenaga tigua bi larago baya hanguore hale halu lo manda bialu halimu.\* <sup>10</sup> Isaraele wali agali ti dindi tara waitigi ti dalu ngagoha ibu howa hodagua hene kemigo irane agibe. <sup>11</sup> Ti Ngode Datagaliwabena deni wali agali ko dodohe homene ngaligobi kemigo irane agibe.\* <sup>12</sup> Tigua Ngode Datagaliwabe kago wahalu pirimigoni irane tiha mini gigabi wulenebi manda bayale bulenebi nawi kemigome piri. <sup>13</sup> Tigua ibunaga hariga ngagoria ibagabu kemile nde tinaga holene baya gibiore ngagoria kemile. <sup>14</sup> Tigua hongo holene tene ngagobi manda bayale bulene ngagobi mini bayale ngagobi mo yu holenaga hongo howa taya bilimu. Anidagua beremigola ti dindini luore holenebi hariga mo walia holene halebi ngialu kagola tinaga holene baya gibiore ngagoria holeberemi.

<sup>15</sup> Ti henedagoha howa mini gigabi bayale wu holene nga ai ina handa walia haribe. Mini gigabi wulene anda timbunioreha ngago anda ogoniha mbirali ai anda pirimibe.\* <sup>16-17</sup> Agali hariga uruni pu manda bialu haga heneru tini ayu nahe. Agali hariga uruni pu manda bialu henedaru agali dindi mbiranaga haguane henerubi agali maru gabua tara tararubi ega irabuha minana biru ngarubi uruni baba gini bialu talima ibaga bialu haga henerubi agali maru ngolo silibaru dewaore wule hamelo howa biabe erekuibiore bialu ilu wia dege bialu haga henerubi <sup>18</sup> agali marume biabe ndelaheore bialu silibame mbirale yari bulene ale tara tara wabiaga bu henerubi ti pialu hene. <sup>19</sup> Ai agali ala hene uruni ti agoha yagi pu kabe. Ainde ti homeneru dalu humbirini andagaha piyagola maru mani ho aribia halu homayarunaga henge karulo ho aribia haya. <sup>20</sup> Uruni ti halu homeaha wali agali daliahe maru dindini ho aribia henego ainde tiguabi mini gigabi wulene hariga ngago handa walia nahe dege howa tigua hariga

\* **3:9:** Min 4.20-22 \* **3:11:** Agali manda timbunibi hearume bi ogoni irane ogodagua leda laya. Isaraele wali agali wali agali tara bu hearu ti dege dombeneha bu karu ti Ngode Datagaliwabena deni dodohe kemi leda. Isaraele Anduane Homogo manda nabiaga karu heaba mandagi ela hagabu kago ti dodohe ka, lalu leda. \* **3:15:** Yob 28.12, 28.20

ogoriani kaware nape hene. <sup>21</sup> Ani bialu ti waneiginimebi pu manda bialu henego pobe nahe dege hene. <sup>22</sup> Kenanalimebi Idomoali bu heneru tiguabi mini gigabi wulene taya bialu henego ainde tiguabi nakarulape dege hene. <sup>23</sup> Agali Merane dindiha biyinaya biaga hearumebi Tema dindiha hearumebi pu manda bialu henego tiguabi mini gigabi wulene ogoni handa walia nahe hene. Ani bialu agali bi te laga bu henerumebi manda taya bialu haga bu henerumebi mbira handa walia holene nakarulape dege hene.

<sup>24</sup> Isaraele wali agaliru-o baya hangu hale haremene. Ainde Ngode Datagaliwabe ibunaga dindi ngago wu maro nabiore wuyu pu dege bialu timbuniore nga ndobe. <sup>25</sup> Ibu dalu ogoni wu maro nabiagabi mbiralime dindi ogoni luninaga manda bulenebi arane yangalenagabi mbiralime ogobi nga lalu manda buwa latagi habe naheore nga. <sup>26</sup> Dindi ogoni bambaore agali wai biagane mana mandabi howa agaliha tabetabe nabi timbuniru taba heneneyago dindi ogoniha taba henene.✧ <sup>27</sup> Anigo Ngode Datagaliwabe handa agali uruni ti ibunaga wali agali helo daba nabini. Ani bialu ibugua tihondo mini gigabi wulenenaga hariga mo walia nahe hene. <sup>28</sup> Wali agali uruni tiha mini bayale wulenebi manda bayalebi tubagi ho howa abale homai halu biba hene.

<sup>29</sup> Agali mbirame mini gigabi wulene ogoni hari beraliba kagoha irigi halu puwa taya bu yalu dai bini ndo. <sup>30</sup> Agali mbirame iba solowara timbuni bedagoha iba sibini biralu ibaga biai halu mini gigabi wiaria handa walia halu ngolo baya yolo dewaoreme mulene ngagome yolo bu yalu dai bini ndo nga. <sup>31</sup> Mbirali hangume pialu mini gigabi bayale taya bima puwa ibu ngagoria ngola halubi ibu kagoha polenaga hariga handa waliabi nahe dege hene.

<sup>32</sup> Mini gigabi wulene ibu nde mbiraorego Ngode Datagaliwabela haabo hagane nga. Ibugua ibuninaga manda bayale ngagoha ngaria handa walia hagane nga. Ibugua dindi ogo ani wiaabo helonaga wabialu ema bialu piaga tara tararubi dindini ibagabu helo wabia dege bini. <sup>33</sup> Ibugua wá holene bibahendeha hame helaga ka. Ani bialu wá holene ibuni karia abale dai bia laragola hale haga. <sup>34-35</sup> Ibugua yakundi bu karu olaragola tigua abaleore hale halu ladai biaga ka. Yakundi tigua tini haga ngagoria haabo halu tigua tini wabu helaga Ngode Datagaliwabe kagonaga mini yaraga holene turu howa wá ha amunana bialu haga ka. <sup>36</sup> Ogoni ibu inanaga Ngode Datagaliwabe kago ibu mendealila nakarulapeore ka. <sup>37</sup> Mini gigabi bayalenaga hariga ibuni hanguore taya biaga. Ani bialu ibunaga wali agali ibunaga biabe bia haga ibunime gubalini ho haga Isaraele bu karuhondo manda bayale mo mini <sup>38</sup> Horo ogoningi mini gigabi wulene ogoni ibu dindini ibalu ina heba mandagi ka.

## 4

<sup>1</sup> Mini gigabi wulene mbuga Ngode Datagaliwabenaga mana lowini ngagoha ngago mana ogoni wiaho wiaabobo bu wulebira. Mbirali bi mana ogoni yu kago ibu holene yu holebira. Anigo mbirali mana lo winigo waho kago ibu homolebira.✧ <sup>2</sup> Isaraele bu kemiru tigua mini gigabi wulene taya bialu baya hangu minu yania halimu. Tí hariga wá holene ogoniha yagi pialu halimu. <sup>3</sup> Tigua inanaga mini bayale ka lolene ogoni yu wahalu wali agali tara bu karume mo yu pelo wanahalimu. <sup>4</sup> Ainde Ngode Datagaliwabe ibu hame laganego ogoale nga lalu ina Isaraele wali agalime manda bu hai kemago ainde iname turu holene nga.

### *Yarusaleme ibunaga genda latagi henego ogo*

<sup>5</sup> Inaga wali agali bu kemiru tí hongo ho holene nga. Tigua mini Isaraele yu kemigo howa tí gi nahe halimu. <sup>6</sup> Tigua tí wali agali Anduane Homogo manda nabiaga hearume tí bo wa hai helonaga ndo pelaya. Tinime Ngode Datagaliwabe mo keba halu harimigonaga Anduane Homogo ibunime tinaga waitigi bu heagoha tí minu ya haya. <sup>7</sup> Ngode Datagaliwabe ibunime tí wabiniore heago helalu puwa tigua mbirale dama

mitangi bialu bi pupu wiaga gime wabini wiaruhondo bi pupu wialu lomaru bu mialu Ngode Datagaliwabehondo ndo bu mialu hemigola ibugua tíhondo keba helo mo keba harimi. <sup>8</sup>Tí wene galiore hewingi baya hanguore handaya ho hene Ngode Datagaliwabe ibuni haluhe haabo haga heago embeda halu pirimi. Wali aiyame waneigini handaya ho howa haru biragadagua Yarusaleme ibugua tí baya hangu handaya ho birayagoyu tígua Yarusaleme mo genda harimi. <sup>9</sup>Ngode Datagaliwabehanda tí baba keba halu tí pani mo ngiyago Yarusaleme ibu de hondowa ibugua tano maru kaware wiaruhondo lamialu lalu, Tí de handadaba. Ai Ngode Datagaliwabehanda genda timbuniore íha ibiledagoni ndobe. <sup>10</sup>Ngode Datagaliwabe Haluhe Haabo Haga kagome í waneigini dindi taraha garabaya bu yalu piyago de handaru. <sup>11</sup>Inaga waneiginiru handaya ho harungi howa ina tíhondo turu timbuni ho harugo ainde tigua í yu wahalu piyangi ti dara timbuni howa dugu bialu haru. <sup>12</sup>Mbiralime íha genda ngago hondowa turu hayagua nde mana nakarulape bulebira. Í wali dalo agalini homene ibu handaya ho holene mbirali nahe hagagobi kogoni. Í waneiginime Anduane Homogonaga bi mana bayale lo wiago mo wahalu mana ko bima piyagola tinaga ko ogonime í bameore ege tole hangu ngaligobi kogoni. <sup>13</sup>Tigua Ngode Datagaliwabenaga bi mana lo wini wiaru mo wahai halu tigua dindini heangi howa talialu holene manga haya. Ti Ngode Datagaliwabehanda mana bayale tigabi bialu holene ngagoria haru howa mo tiga bialu helo hame nalaya.

<sup>14</sup>Tano kaware ngemiru-o tí ibalu í waneiginiru mitangi hamíya ibidaba. Ngode Datagaliwabe Haluhe kago ibugua í waneigini uruni garabaya piaí helaya. <sup>15</sup>Ibugua agali hameigini tara dindi taraha hearu ibilo olayiya. Agali uruni ti hameigini ko ngubi taraore howa tinaga bi tara hale nahene lagaya. Tigua wali agali waheore bedarunaga mini mo yaraga nahagabi waneigini bu karu dara nahagabi heneya. <sup>16</sup>Ainde agali tara urunime ibuwa inaga waneigini bu hearu haru halu piaí haya. Í waneigini uruni hame ledago lelowa ainde ini hanguore bedogoni.

<sup>17</sup>Inaga waneigini áyu garabaya kemiru ina tí biamogo bibe naheore kogoni. <sup>18</sup>Mbiraore hangu tí biamogo bibehe kago ibu tígua mana ko bialu hemiria tí pani ngialu ibugua tí waitigi giha minu miyago ibuni hangu karulape ka. <sup>19</sup>Inaga waneiginiru-o í nde ini hanguore bedogo tí nde tíninaga biabe wiyadaru bima pudaba. <sup>20</sup>Ina inaga aga baya horo debenengi karulo biraga wirugo golo wahai halu aga ko dara ho howa karulagane ko wiaru mo karulowa walime dugu bialu biragagobi bedogoni. Ina Ngode Datagaliwabe Haluhe Haabo Haga kagohondo olalu bedogo ainde ani olalu haabo halu ini homalu waholebero.

<sup>21</sup>Inaga waneiginiru-o tígua tíninaga miniha mo hongo ho howa Ngode Datagaliwabehanda tí biamogo bilonaga ibuhondo olalu halimu. Ibugua tí waitiginaga gi hongohe kagoha howa minu yu dai bulebira. <sup>22</sup>Ainde Ngode Datagaliwabe Haluhe Haabo Haga kago ibugua tí garabaya kemigo golope holebira lo manda bialu ibuhondo mini mbiraore wu bedo. Ngode Datagaliwabe baya buruguleore kago ibugua tí haru dai biaga ka. Ibugua tí lone dara harangi ogonidagua biragome í lone mo turu holebira. <sup>23</sup>Tí minu garabaya bu yalu piyangi ina tí dara halu dugu bialu biraru. Anigo ainde Ngode Datagaliwabehanda tí lone haru halu dai bulebirago ani haru dai birangi ina turu haabobo bu holebero. <sup>24</sup>Ai tí garabaya bu yalu piyagola tano kaware ngaru ti de handai hayago ai anidagua dege Ngode Datagaliwabe Haluhe Haabo Haga kago ibuni wá taraore holene timbuniorebi ibunaga hongo taraore holenebi heba ibalu tí biamogo birago de hondolebira. <sup>25</sup>Í waneigini bu kemaru tíguaore Ngode Datagaliwabehanda genda tandaga timbuni mo ngidago hongo ho howa baya hangu yu halimu. Ani kemigola ibugua tí ala waitigi howa tí bama talima ibaga bialu haga hayaru áyu dege uruni ti mo ko hai henego bibahende ibalu tínaga giha ya harane hondoleberemi. <sup>26</sup>Tí í waneigini kemiru-o ina tíhondo gubalini ho haabo harugoni. Anigo waitigi bu hearume

tí hariga ko wiagoha pialu halimulo mo pela halu tí minu yu piai halu nogo sibi igini kago minu pagebu yu piagadagua piya.

<sup>27</sup> Waneiginiru-o tígua heyu howa Ngode Datagaliwabehondo biamogo bia lalu bi hongo howa lalu halimu. Ibugua tíhondo pani ngialu minu ba bayagonigoyu ainde ibugua tí embedaore halu wanaheore ka. <sup>28</sup> Ala bamba howa tígua Ngode Datagaliwabe yu wahalu pole hongo taraore ho haga harimigo ainde áyu howa tínaga mini beregedalu hongo howa hado pongo bialu ibuni kago lone taya bialu halimu. <sup>29</sup> Agali tí genda uruni yu halimulo mo ya haga biago ibugua tí lone biamogo bialu turu ho haabobo helolebira, lene.

*Ngode Datagaliwabehanda Yarusaleme biamogo buleore lalu bi lenego ogo*

<sup>30</sup> Yarusaleme-o Ngode Datagaliwabe ibunime í mini mo yaraga hene ngelalu ínaga miniha mo palia holene karulo habelo mo yu ibulebira. <sup>31</sup> Wali agali í pilarigola turu ho howa í genda mo ngiaga bu karu tini pani nalu mo ko holebira. <sup>32</sup> Dindi ínaga waneiginiru garabaya pu hayago ibuni mo ko halu bo haealahole bini wulebira. Í waneiginiru genda miaga Babilono ngago ibuni gendame bope holebira. <sup>33</sup> Bamba í pilalu mo ko haringi ibugua iba ganaru lalu turu ho hayago ainde áyu ibunibi í mo ko hayadagua mo ko holebira. <sup>34</sup> Ina tinaga mege bialu bi layaru mo beregedalu dara holene bi lolene ngago lo aribia helalu tinaga wali agali bu karuni bo taliatogo lai helalu mine hagane mana ngago wiamaro bilolebero. <sup>35</sup> Ini Ngode Datagaliwabe Haluhe Haabo Haga kogo ina ira dene bape halu irame dai helolebero. Anidagua berogola ira ogoni horo dewaore daho wiaabo holebira. Ibu mo ko halu bo giallo wahai halu bo labu hai hene ngagoria dama ko bu karu ti ogoniha ho gengeda tago bu holebira.

<sup>36</sup> Yarusaleme-o amu ni tagira ibiragoha yagi handa dai bialu Ngode Datagaliwabehanda turu holene mo yalu ibulene wiyago yalu ibirago de handa. <sup>37</sup> Ainde í waneigini dindi kaundiaha minu yu piyaru amu ibirago de handa. Ai Ngode Datagaliwabe baya burugule kagome ti olalu amu ni tagira ibiragoha wahalu dai bialu ni paliragohabi wahalu dai bialu dindi hanuni íbu ngoaiho hadaba lole olaya. Áyu tigua turu halu Ngode Datagaliwabehondo turu ho kagoni.

## 5

<sup>1</sup> Yarusaleme ínaga aga dara halu dugu bialu biruwa karulagane ko biago golo wahalu aga gahenge Ngode Datagaliwabenaga wá taraore holenebi hongo tara holenebi ngago karulabe. <sup>2</sup> Ngode Datagaliwabenaga mana tigabi ngagome ini mo yári bia halu bu dambi habe. Ani bialu kininaga yári ngago ínaga hagianeni mo karu labe. Ngode Datagaliwabe Haluhe Haabo Haga kago ibugua ínaga mini daliga mo yaraga howa mini lene helolebira. <sup>3</sup> Ani bialu Ngode Datagaliwabehanda ínaga yári baya karulo kego wali agali dindi bibahende ngagoha bu karu de handai helo mo walia holebira. <sup>4</sup> Ibugua ínaga mini gahenge wialu ínaga mini ogoniore wiaho wiaabobo bu wulebira. Ina mini gahenge ogoni ogodagua, Mana bayale tigabi bulene ngagome ínaga mini mo palia holene mo karulo haabobo bu ini andaneha holene mana ngadagua holenebi ogoni labome í mini lene mo helaga nga, lene. <sup>5</sup>

<sup>5</sup> Yarusaleme í abale heya. Hari nene ngagoria abale heyu habe. Ani howa í waneigini biaru de handape halu handa. Ngode Datagaliwabehanda ti dindi abene amu ni tagira ibiragoha yagi howabi ni paliragoha yagi howabi bibahende Ngode Datagaliwabe baya burugule kagome bibahende olo mogo biai halu ibu ngoai ho heledagoni ndobe. Ngode Datagaliwabehanda ti mitangi ho howa biamogo biyagonaga ti turu ho ka. <sup>6</sup> Yarusaleme ínaga waneigini biaru tigua í yu wahayagola waitigi bu hearu ibalu ti haru halu piai haya. Anidagua biyago ainde áyu Ngode Datagaliwabehanda

✧ 4:30: Bar 5.4 ✧ 5:1: Ais 52.1, 61.3, 61.10, Mo 21.2 ✧ 5:4: Ais 1.26, 60.14, 62.4, Yar 33.16, Ese 48.35

íni bedegoria haru halu dai biai ho heleda. Wali agalime kini yalu piagadagua wali agali uruni Ngode Datagaliwabehanda yu íbu heleda. <sup>7</sup> Ngode Datagaliwabehanda hari nene timbuni wedarubi hari emene wedarubi bibahende dindini podope hai halu dindi ulini ngaru mo dondolope helalu bidaba lalu mana hongohe mida. Ani bidagola dindi tigabibi dondolope ngagoria Isaraele wali agali ti Ngode Datagaliwabenaga wá taraorebi hongo timbunibi heba ibulebira.☆ <sup>8</sup> Ngode Datagaliwabehanda bi laragola ira bayale nga bulene aleru andaho kagola Isaraele wali agali ira ogoni andane gumba kagoha birulebira. <sup>9</sup> Ngode Datagaliwabe ibuni Isaraele wali agali ibilo bamba halu poragola tigua ibunaga wá timbuni kago de hondowa turu timbuni holebira. Ani bialu Ngode Datagaliwabenaga dara holenebi mana bayale tigabi bulenebi ti heba haabo holebira, lene.



## Yaremaiahanda beba gilibu pelenego

*(Be 6.1-73)*

<sup>1</sup> Ai beba ogo Babilononaga kini heagome Yarusaleme wali agali garabaya bu yalu polene kaware dege ngelo howa Yaremaiahanda wali agali Yarusalemeni bu hearunaga gilibu wia hene. Ngode Datagaliwabenaga bi Yarusaleme wali agali bu hearuhondo gilibu pelelonaga Yaremaiahanda beba gilibu pelelonaga lamini.\*<sup>☆</sup>

*Yarusaleme wali agali garabaya polebira lenego ogo*

<sup>2</sup> Tígua Ngode Datagaliwabehondo mana koru bialu harimi. Anidagua bialu harimigonaga ainde Kini Nebugadenesahanda ibalu tí garabaya haru hai halu Babilono haru polebira. <sup>3</sup> Tí dindi kaundiaha kamine dege mali dewa pialu ka daba agima halu homoleberemi. Ani kemigola mani Ngode Datagaliwabehanda tí baba miniha lone dungulo howa tí Babilonoha howa haru tagira pialu Yarusaleme haru dai bulebira.

<sup>4</sup> Tí Babilono pu howa mbirale dama mitangi bialu bi pupu wulenaga gime wabiniru dewaore irame wabinibi silibame wabinibi ngolome wabinirubi dewaore ngane hondoleberemi. Agalime mbirale uruni payani yalu ibaga bialu kagola wali agali tigua mbirale urunihondo gi haga ka. <sup>5</sup> Tígua wali agali tara uruninaga mana ko ogoniale ngago talialu holigo baya hangu de hondo halimu. Agali dewame mbirale gime wabini uruni payani yalu duguni ibiragola wali agalime mbirale urunihondo bi pupu wialu holebirago ani bialu kagola tigua mbirale gime wabini galone nahe uruniale ngagohondo gi nahe halimu. <sup>6</sup> Ani howa tigua lalu, Anduane Homogo í dege Ngode Datagaliwabe henene kegoni. Iname íni hanguhondo bi loleberema, lalimu. <sup>7</sup> Ngode Datagaliwabenaga dahuliyali tí heba mandagi dindi tara ogoniha howa tí mamage howa haru holebira.

*Mbirale dama mitangi bialu bi pupu wule gime wabini uruni aleme biamogo bulene nawiore nga, lenego ogo*

<sup>8</sup> Agali anda biaga manda bayalebi hearu tigua ngolorume mbirale bi pupu wule gime wabini uruni ira baya hangu bogu mbara lowa mbirale uruninaga hége wabu helaga. Anigo mbirale uruni ti Ngode Datagaliwabe ale dege ndo wuwa tigua bi nalaga nga. <sup>9</sup> Wali agalime manda ngolome wabuwa yári tara tara helowa wandari mabuage bedarume hame lagagobi wabuwa gime wabini bi pupu wiaga uruninaga mo karula haga biaga nga. <sup>10</sup> Horo marungi nde agali dama mitangi bialu bi pupu wiaga uruninaga muni siliba ngoloru maru ti mo pagebu yaga ka. <sup>11</sup> Tigua ogoniale hangu ndo mo kayu biaga hene. Tigua mbirale bi pupu wiaga uruninaga yári bu ngaru mo kayu buwa wali maru anda ogoniha biabe bialu agali yalu biraga bedaru mo miaga ka. Wali agali bu karume mbirale bi pupu wiaga iramebi silibamebi ngolomebi wabini ngago wali agali yári biagadagua agaru baya hangu mo karula ho ngelaga biaga. <sup>12</sup> Tigua agali mindibi hari mindini handalehe kininaga yári ngaru mo karula howa ngeledagola ainde agali bayale urunibiibunibi be abalu baga bialu dodo hayaguabi ugurulime no timbitombe layaguabi tinime mo tiga bibe nahe ka. <sup>13</sup> Andagaha be abalu ngago tinaga denguiha para haga biyagua tinime doma nabiaga nga. Agali mbirame ibalu dege domaga nga. <sup>14</sup> Tinaga giha godi hale haga agali hagianeme kango yu biragadagua yu bira biruwa ainde mbiralime tihondo ko biyagua nde agali ogoni ko biyagonaga pani nelonamiaga. <sup>15</sup> Tinaga giha ayu tibu emeneru ayu gamia emeneru yu biragago agali ibalu ti bo gingirulo waholebiragolabi mo page yu polebiragolabi tinime mo wialu

\* **1:1:** Agali mandabi ala heneru tigua Yaremaianaga bi gilibu wia henedagoni Barugunaga mbuga ngagoha dege be waragane howa ngelaga wini. Marume ogoni ibu haluni tara ngelowa Yaremaianaga mbuga, lalu ngelaga wini.

<sup>☆</sup> **1:1:** Yar 29.1

pani babe naheore nga. <sup>16</sup> Tigua urunibi biagane ngagome tini Ngode Datagaliwabe ale ndo nga lalu mo walia ka. Ani ngago manda bialu tigua mbirale gime wabini uruniale ngagohondo bi pupu wulene nawiore.

<sup>17</sup> Wali agali uruni andaga tamuha mbirale dama mitangi bialu gime wabini ngaru ko ngubi nagaloneore nga. Be pambu lene ngaligobi nga. Wali agalime mbirale bi pupu wiaga uruni de hondole ibiragola tinaga geme be abalu titau laragome mbirale uruninaga de hariga beme ndibulo wahaga. <sup>18</sup> Ai pagealime mbirale uruni mo yalu polino agali mbirale uruninaga loma binigo mo miaga bu karume anda panga hongo howa paya anda halu piagane ka. Tigua mbirale bi pupu wiaga uruni baya hanguore mbiralime kinihondo mana lehe bidagola godi lole panga baya hangu paya anda howa helagadagua baya hanguore hagira buwa mo do howa ngelaga nga. <sup>19</sup> Agali loma binigo mo miaga bu karume hale lamu dewaore anda mbirale ogoni ngagoha ngelaga. Anigo mbirale bi pupu wule gime wabini uruni tigua deme mbirale ngaru deme nahandabehe nga. <sup>20</sup> Ani ngagola tinaga agabi tinginibi ugurilime anda ira nalu no podelagadagua biagago yu tinime handa nabiaga. <sup>21</sup> Andagaha ira hagua deledagome tinaga dengui dodohe mindibi ko mbira wiaga. <sup>22</sup> Dumania emene bedarubi ega emenerubi busirubi ibalu mbirale bi pupu wiaga ogoriani biralu pugu biaga. <sup>23</sup> Anidagua bidagome mbirale bi pupu wule gime wabini uruni ti bame nagalone ngago manda bialu tigua ibuhondo bi pupu wulene nawigo nawilimu.

<sup>24</sup> Wabiaga agali karu tigua deme hondolene uruni wabu ngelowa ngolome paraho dambi helaga. Anigo ai mbiralime ngolo ogoni baya hangu domo mbara nalayagua nde ngolo ogoni hoai lalu ngiringare nalaga. Agali mbirale uruni wabiaga karu tigua aeaneme wabialu howa irame delaga biragola tandaga nahaga nga. <sup>25</sup> Mbirale bi pupu wulenaga gime wabini uruni muni dewaoreme yolo bu wiaguabi tiha bu he nawiore. <sup>26</sup> Tinime ge halu napolebirago de handalimu. Ani bialu tigua gi ema bialu mbirale mbira nabulebiraore. <sup>27</sup> Ai agalime bi pupu wule gime wabini uruni yu pialu karia dindini ibira hayagua nde agali biabe biaga maru karume lone mo yaraga howa berelelodagola payani yaga biago ibuni taga timbuni haga nga. Ani bialu mbiralime bi pupu wiaga gime wabini mbira dindi mbirani ngelo heagua nde ibuni ema bialu pubagi halu napolebira. Agalime ibu baya hangu nawi wua ula howa ngagolaibunime mo tigabu ha nabulebira. Wali agali marume bi pupu wiaga urunihondo mbirale mbira ibu mo turu halu bame miyagua nde mbirali homo tungulomini ngagohondo miradagua bira. <sup>28</sup> Mbirale bi pupu wule gime wabini uruninaga loma binigo mo miaga agali karu tigua wali agali bu karume nogo lomabu migi biraru mo yu puwa tini yule muni miaga. Ani buwa muni ogonime mbirale tini hame ledaruale yolo biaga. Agali loma binigo mo miaga uruni one bedarume nogo bo loma bini uruni abale ko halu ngu bulino baya hangu ibi ho ngelowa tini dawalu nai haga ka. Tigua nogo uruni podalu maru yagibano karubi waragobe karu mulene ngago namiaga ka. <sup>29</sup> Ani bialu wali ege ngola ho bedarumebi waneigini gali aiya bedarumebi loma uruni ilili bialu birulene ngago nabi tigua ta nabi ela haragome mebia hagaya. Mbirale urunidagua biagadaru bibahendeme gime wabini ogoni ibuha galone naheore ibu Ngode Datagaliwabe kago ale ndo bame agali gime wabiniore ngago panaga mo walia haga. Ani ngago manda bialu mbirale gime wabini urunihondo bi pupu wulene nawigo nalalimu.†

<sup>30</sup> Ainde bi pupu wiaga iramebi silibamebi ngolomebi wabini ngagonaga lomaru walime bu miaga wiagua nde agalime lalu ogoni ibu tinaga bi pupu wiaga galone nga lagayago irane agome lagabe. <sup>31</sup> Dara ho holene horongi agali mbirale bi pupu wiaga uruninaga loma binigo mo miaga karu tigua mbirale gime wabini uruninaga

† **1:29:** Yudanaga mana ngagome wali bedaru tigua loma bu mini ngago ela nahaga wini. Ani bialu wali ti ege ngola ho bereaguabi waneigini gali áyu dege taba hono bereaguabi ti Ngode Datagaliwabenaga deni dodohe beda laga wini. Mana ogoni Loma Binigo Mo Miaganaga Biabe 12.1-5 wialu 15.19-23 ngago hondolene nga.

anda kagoha pu biruwa tinaga angaribi agaru minu budalu mandaribi dogalu bira biruwa tinaga haguane agame bu yi nahe biragaya. <sup>32</sup> Mbirale gime wabu wini bi pupu wiaga uruninaga agali loma binigo mo miaga bu karu tigua tinaga bi pupu wiaga uruninaga deni howa bi hongo howa ladaga halu homa duguanda hai halu purogo lole howa lagadagua lalu hagaya. <sup>33</sup> Tigua mbirale bi pupu wiaga gime wabini uruninaga aga bidago agali loma binigo mo miaga karu tigua golowa ti one wane bedaru miagaya. <sup>34</sup> Wali agalime mbirale bi pupu wiaga urunihondo mana bayale biyaguabi ko biyaguabi bi pupu wiaga gime wabini uruni tigua mbirale mbira nawiore nga. Ani bialu ibugua agali mbira kago kini helo dabo helolenebi kini kago bo dugu waholenebi hongo nawi nagaloneore nga. <sup>35</sup> Tigua muni dewabi yári tara tara bayale ngarubi wali agalihondo namiaga ka. Mbiralime mbirale mbira bule lowa bi lo wialu puwa layago nabi wahalu piyagua tigua ibuhondo pani nelo namiaga ka. <sup>36</sup> Tigua wali agali mbiranaga homolino haru nahaga. Ani bialu wali agali hongo nahe bu karu agali hongohe kagonaga giha howa mo wialu haru dai nabiaga nga. <sup>37</sup> Tigua mbirali de kohe kago biamogo bialu de mo ngala habe nahebi maru ko gendabi ngagoha pialu karu haru dai bibe nahebi nga. <sup>38</sup> Tigua wali dalo ti agalini homene bedaru dara habe nahe nga. Ani bialu waneigini ti aba aiya homene bu karu biamogo bulene nakarulapeore nga. <sup>39</sup> Mbirale bi pupu wiaga uruni bameore irame wabini ngago siliba ngolorume para hadambi howa ngaruni bame nagalone hari ngagoha puwa ege tole ngaru dugu ngelo haradagua bida. Ani ngagohondo bi pupu wialu haga karu tini tagabiore ka. <sup>40</sup> Irane mbira agi ngagome mbirale uruni bi pupu wiagabi ibu bi pupu wulene alebi nga lalu wali agalime lolene karulape ngabe.

*Wali agali mbirale gime wabini ngagohondo bi pupu wiaga bu karu luluore ka lenego ogo*

Babilono wali agali tinime tinaga bi pupu wiaga gime wabini ngaru mo yobia halu mo taga haga nga. <sup>41</sup> Tigua mbirali bi nalaga kago tinaga bi pupu wiaga Belenaga anda kagoha haru puwa Belehondo agali ogoni lone bi lelo mo karulape hela lalu bi lamiagaya. Tigua Bele ogoni bi hale haga ngabe toba hagaya. <sup>42</sup> Ainde tinaga bi pupu wiaga urunime tinaga bi larago hale halu biamogo nabiagaore ngago manda bia buwa dege tinime harugo lowa hongo halu mbirale gime wabini urunihondo bi pupu wialu haabo hagaya. <sup>43</sup> Tinaga mana mini nawi howa lulu mana ogoni bialu haabo haga. Wali bedaru tigua pume tini daba howa hariga tene ngagoria biru wima piaga. Ani biruwa tigua widi alenaga irane ngaru ira hagua nga bilonaga delalu biruwa tinaga tingini agali ibiragohondo miaga. Ani miragola agali ibiragome wali mbirago kayu yule haru piyagua nde wali ogoni ibu agali biagola palialu dai buwa wali mende ibula haru mandagi birayagohondo mege bialu oba halu ibuhondo lamialu lalu, í wali bayale ndoyago hondowa agalime í mba nalayagoni ndobe, lagaya. <sup>44</sup> Mbirale bi pupu wulenaga gime wabini uruninaga mana dewaore ko leheru nga. Ani ngagoyu ainde tigua ogoni bayaleore nga lo manda biagayago irane agome. Agalime bi ogonidagua lagayago aginagada.

<sup>45</sup> Agali mbirale iramebi ngolomebi mbirale wabiaga karu tigua bi pupu wiaga uruni tini hameme wabua biragobi wabiaga. <sup>46</sup> Agali mbirale bi pupu wiaga uruni wabiaga bu karu tini dindini lu nahe abale homaga. Ainde tigua tini biamogo bulenaga hongohe kago tininaga gime agua wabuledabe. <sup>47</sup> Agali biabe biaga uruni tini homalu ti damene karunaga mbirale bayale mbira paluni nangele homolebira. Tigua tinaga ke hagane manabi taga holenebi ogonilabo hangu ngelalu homolebira. <sup>48</sup> Ainde wai biarua handala mbirale bi pupu wiaga uruninaga loma binigo mo miaga karume mbirale uruni mo yalu abale hado holene ngagoha hado hole ibida piaga ka. <sup>49</sup> Wai ibiyaguabi genda tara ngaru anda ibiyaguabi mbirale bi pupu wiaga agali gime wabini urunime

mbirale mbira bibe naheore nga. Ani ngago manda bialu wali agali tigua gime wabini ogoni ibuha galone ndo bame nagaloneore ngago baya hangu handa nabiagayago agidabe.

<sup>50-51</sup> Mbirale wali agalinaga bi pupu wiaga uruni bame agali gime ira hanguni siliba ngoloru dambu para haga buwa wabini nga. Horo mbiru nde wali agali Ngode Datagaliwabe manda nabiaga bu karubi tinaga kini karubi tigua mbirale bi pupu wule gime wabini uruni bayale galone ndo bame agali gime dege wabinidalo manda biai holebira. Ani bialu mbirale uruniha hongo holene mbira tiha nawidane hondolebira. <sup>52</sup> Ainde bi pupu wiaga uruni ti galone ndo nga lalu manda bibe nahe ai kabe.

<sup>53</sup> Mbirale urunime agali mbira kini helo dabo hela nabulebira. Ani bialu iba dalu dindini ibi nalolebira. <sup>54</sup> Mbirale urunime tinaga biabe ngago tinime mo tiga bibe nahe nga. Mbirali kagome mendealihondo ko biyagua nde ogonime pani nelu namulebira. Tigua mbirale mbira bibe nahe ka. Ti bame ega yagombe harini yagalo yu ibagabu hagagobi dege ka. <sup>55</sup> Ai mbirale gime wabini bi pupu wiaga uruninaga anda kago dayagua nde agali loma binigo mo miaga bu karu tini irame dolino ibida pora bialu piaga. Anigo ainde mbirale dama mitangi bialu bi pupu wiaga iramebi silibamebi ngolomebi ira biago para haga buwa agali gime wabini ngaru ira maru anda ogoninaga gene bu karu daradagua damaga haga ndobe. <sup>56</sup> Mbirale ogoni kini bu karu bababi waitigi bu karu bababi wai bibe naheore nga. Ogonibi ngagohondo wali agalime mo galone halu ibu bi pupu wulene bayale mbira ngago agua loleda.

<sup>57</sup> Ainde pageali ibiyagaua mbirale bi pupu wiaga irame wabuwa siliba ngolome para haga bialu wabini biagome mbirale mbira bibe naheore bameore wiaga nga. <sup>58</sup> Ani ngagola pageali tigua bi pupu wiaga gime wabini uruninaga siliba ngoloru lagalo yai halu aga mo karula ho ngagobi golo yalu piaga. Ani biragola gime wabini ogoni ibunime mbirale uruni namilonaga mbirale mbira bibe naheore wiaga. <sup>59</sup> Mbirale bu ngaruni bibahendeme bi pupu wiaga gime wabini ngago bolangua howa nga. Agali kini gi nahaga mbira ai kabe lo manda bia handa. Ani bialu todobene be bayale mbira mitangi bia. Anda mbiranaga hobane mbirale mo do hagane ngagonaga panga haraba ngago mitangi bia. Anda timbuni kago taba yu hagane anda gene kago mitangi bia. Mbirale uruni ti galone wialu tigua bi pupu wule gime wabini nagalone ogoni bolangua halu ti dunini nga.

<sup>60</sup> Ngode Datagaliwabehanda nibi egebi yakundirubi tigua ina kemagoha wáhadali helo harini heledagola tigua ibunaga bi larago hale hai haga ka. <sup>61</sup> Hari beraliba kagonaga wáholenebi puriabu pu lo yu poragobi ani dege biaga nga. Hari beralibanaga wáholene timbuniore howa wá kaundiaha piái halu puriabume dindi bibahendeha piái hagane nga. <sup>62</sup> Ngode Datagaliwabehanda hari beralibahondo lamialu dindi bibahende wiadambi ha layagua nde hale halu dindi wiadambi hai haga. <sup>63</sup> Ainde Ngode Datagaliwabehanda dahuliya andagaha howa ira dene bape halu hari wedarubi irabu timbuni ngarubi dai ha layagua nde tigua Ngode Datagaliwabenaga bi larago hale halu dai holebira. Anigo mbirale bi pupu wulenaga gime wabini ngarume mbirale urunibi nabibehe nga. <sup>64</sup> Ainde mbirale nagalone gime wabini urunime inahondo bayale bulenebi mo ko holenebi hongo naheore ngagohondo wali agalime mo galone howa uruni bi pupu wulene galoneore lagayago aginaga biagabe. <sup>65</sup> Mbirale uruni ti Ngode Datagaliwabe ndo ngago tí manda bidemi. Ani manda buwa tigua mbirale ko nagalone urunihondo bi pupu nawilimu.

<sup>66</sup> Mbirale bi pupu wiaga uruni tigua kini bu karu handaya ho haga ndo ka. Tigua bi ko lolenebi ti mo bayale helo bi lolenebi nawiore nga. <sup>67</sup> Tigua wali agalime de hendelo manane mbira harini mo walia harane nahondoleberemi. Tigua ni egelame wáhagagobi mbira naholebiraore. <sup>68</sup> Gabua tara tara irabuha karubi ema bialu biaga biru maru bibahendeme bi pupu wiaga ogoni bolangua haihe beda. Ema bialu piaga uruni ti balu

nolene tara tara kago ibirane handayagua nde ti ibida piaga ndobe. Anigo bi pupu wule gime wabini uruni ti ibida polene nakarulapeore nga ndobe. <sup>69</sup> Tiha galone naheore ngago ti manda biai kemi. Ani ngago manda buwa tigua mbirale uruni gi nahe halimu.

<sup>70</sup> Wali agali tara bu karu tinaga bi pupu wiaga uruni agali tigua irame wabuwa siliba ngoloru para haga bini ngago ogoni ko ngubiore nga. Ogoni ibu galone nahe bame agalime ega mabuha ira lini dedaru do nole ibirago gi halu naibilonaga agali handalehe wabu heledagola tigua mamage howa mbirale mbira bibe nahe bameore wirigoria wiagago ale dege nga. <sup>71</sup> Ti ira anihe mbira mabuha hagagobi ka. Ira ogonime ega emene ibirago mo gi nahe ibunaga ginigene kagoria ibu berelo wahaga kagobi nga. Mbirale bi pupu wiaga gime wabini uruni ti homene tingini ngago arumaha bape halu yu wahagagobi nga. <sup>72</sup> Mbirale bi pupu wiaga uruninaga aga baya hari mindini iba kuyamaru handalehe mo karula ho ngeledaru mo ko halu togo biai haga. Ani biragola mbirale uruni ugurulime nai kagola wali agali mbirali urunihondo bi pupu wiaga bu karu tini taga timbuni ho haga nga. Ani biaga nga manda bialu mbirale gime wabini urunialego bi pupu wiaga ale ndo ngago manda bulene nga. <sup>73</sup> Mbirali tigabiore howa ibu mbirale bi pupu wiaga gime wabini uruniale ngagohondo bi pupu nawiaga kago ibu bayale bolangua heneore ka. Ibu mo taga holene ale mbira nawiore howa tigabi ka.



## **Danielenaga mbuga maru Girigi bi gilibu ngagoni Mbuga ogoha gilibu ngarunaga nemandi ogo**

Ai tigua Daniele mbuga ngago Girigi bi lo beregedo wialu howa bi irane halu tebirago mo mbiraore howa gilibu wini nga. Bi timbuni halu tebira uruni Hiburu bi (Arama bi) lalu ala gilibu winigo ai bi tebira uruni ti mbuga haluni tebira wigi wigi bialu Hiburubi Aramabi bi lalu gilibu winidago mbuga uruni Daniele mbuga ngago mbuga biamaga nahe hangu hangu wini.

### *Mbuga tebira uruni aria mbirago*

Asariahanda Anduane Homogohondo bi lenego wialu Igiri Tebiranaga Iba Gana nga. Ai Daniele mbuga Girigi bi lowa gilibu wini ngago mbuga ogoni ibu Daniele Be 3 lalu biamaga howa gilibu winigo nga. Bi ogoni ibu Daniele 3.23 wialu 3.24 nga. Asaria halu ibu aria uruni tigua Anduane Homogohondo bi lalu iba gana lenedagoni Kini Nebugadenesa ibugua igiri uruni ira timbuni deago mbuga minu bape hayagola ti da nabi halu tagira puwa mani iba gana lalu Anduane Homogohondo bi uruni lene.

### *Mbuga tebira uruni mendego*

Susana ibu wali baya tara mbira berene. Ani bereagola agali godi hale haga ko kiralime Susannahanda dabubini mana ngago puguaya lalu manani haru pu helene. Godi lalu wali agalime Susana homelo bo wahole bialu hemira Danielehanda ibunaga mini bayale gigabi wiagome Susana homolene wiago mo wahalu bayale berelo mo wini. Ainde Baibolo mbuga maruha Susannahanda te ogoni Daniele mbuga ngago be haleneni (13) gilibu nga.

### *Mbuga tebira uruni tebonego*

Belenaga gilibu ngagobi dama Puya timbuninaga te lo nga. Belenaga te lo ngago Danielehanda agali Belenaga loma binigo mo miaga bu hearunaga ke hagane mana wiago mo walia holene mini bayale waleore mo walia henego lo nga. Te halu mende lo ngago puya timbuni mbira Babilono wali agalime bi pupu wiaga winigonaga te leda. Ai Danielehanda puya timbuni ogoni bo wahene. Ani biyagola agali puya timbuni ogoninaga loma binigo mo miaga hearume Daniele godi lama lole kini berearia haru halu pene. Ani buwa agali uruni tigua kinihondo hongo howa Daniele gabua laionome balu nelu laiono pai haga gundu uli wiagoha minu bape ha lalu hene. Tigua laiono heagoha minu bape hayagola Daniele laionome balu na nabi Ngode Datagaliwabeanda ibu baya hangu handaya ho hene.

Ai Baibolo mbuga maruha te Belenaga gilibu ngagobi Puya timbuninaga gilibu ngagobi dege Daniele Be 14 lalu gilibu maga howa mo mbiraore ho nga.

## **Asariahanda Anduane Homogohondo bi lenegobi Igiri Tebiralime Iba Gana Lenegobi nga**

### *Asariahanda Anduane Homogohondo bi lenego ogo*

<sup>1</sup> Ani biyagola igiri tebirali Hananiabi Misaelebi Asariabi ti haru ira gibi do wiagoha ibagabu hene. Tigua Anduane Homogohondo tinaga Ngode Datagaliwabe kagonaga mini yaraga halu iba ganaru lalu hene.<sup>\*</sup> <sup>2</sup> Ani howa Asaria ibugua ira timbuni deago dombeneha howa ibugua ne ha lalu Anduane Homogohondo bi ogodagua lene. <sup>3</sup> Anduane Homogohondo ina mamalirunaga Ngode Datagaliwabeore kego manda bialu iname inaga mini yaraga halu ihondo kai lalu kema. Inaga mini timbuni mini lene

<sup>\*</sup> 1:1: Dan 1.6-7, 3.23

daliga wiabobo bu wilo larama. <sup>4</sup> Inime mbirale inahondo biriruni bibahende tigabi bulene wiago biri. Ani bialu ina manani howa mo dabaki bialu inahondo ko birimi lariyagua bi ogoni tigabiore holebira. <sup>5</sup> Ina mana bayale tigabi bulene wiadaguaore bialu inanaga mamaliru tinaga tano loma bia hene Yarusaleme wiago bo giallo wahai halu mo labu helarigoni. Ogoni mana ko iname bialu harimagonaga pani ngialu karulapeore biriya. <sup>6</sup> Iname inaga bi mo wa howa ini erembira ngialu pirimagola inaha mbirale bia ko hene dewa wialu mana ko inaha dewaoreme inani bu dambi hai haya. <sup>7</sup> Biabe iname bialu halimu lariruni nabioire harima. Heneneore iname inaga bi mana ngago taluwa bialu kemale nde ina bayale kemale. <sup>8</sup> Anigo ainde inane bia ko hene ngamagome pani nolene ngingo ayu iname genda yu kamagonida. <sup>9</sup> Ina ina waitigi hearunaga gihabi mana puguaga bu hearunaga gihabi kini ko hearunaga gihabi minu ya kegonida. <sup>10</sup> Ayu ina ihondo bi lalu haga kemaru nde taga halu kema. Ina taga timbuniore ho howa bi nale kemagoni ndobe.

<sup>11</sup> Anduane Homogo-o inaga mini daliga mini leneore kego mitangi bialu ina baba habo nalolene bi lo wirigo mitangi bibe. Ina ina yu wahowa nahabe. <sup>12</sup> Ina dara holene irane nawini dara haga ngego mo wanahabe. Agali inaga nenege Abarahamahondo buleore lalu bi lo wirigobi agali inaga biabe bia haga Aisagahondo lo wirigobi ina inaga Isaraele wali agali Isaraele bu kemarunaga mamali Yagabahondo bi lo wirigobi mitangi bialu bibe. <sup>13</sup> Ina bi lo wialu ina wali agali dewaore palia timbu halu harini yakundi kagobi halu ibani iba mu ngagobi dewaore holeberemi lariya. <sup>14</sup> Anigo Anduane Homogo-o ayu ina damenego emene halu wali agali tara bu karu ti palia timbu ka. Ina ko biagaore lalu wali agali dindi bibahendeni bu karume ina bope halu mo nagalone halu kagoni ndobe. <sup>15</sup> Ayu inanaga kinibi agali Anduane Homogonaga bi latagi hagabi agali haguanebi mbira naheore. Ai iname loma tara tararu bu yalu ibulenebi mbirale bame mo turu halu ngulenebi ira hagua ngabilo loma bu delolenebi ainde inanaga anda biago naheore ngagoni ndobe. Ainde inaga dara holene ngego taya bulenenaga lomaru bu yu ngoai holene dindi henge mbira nawiore kema. <sup>16</sup> Ayu ina i kegoha iberemagola inanaga bu mini ndibulo kema. Inanaga ma iha podalu ina biamogo bia lalu bi larama. Ainde heneneore iname i loma bu ngulene nogo bulumaga dewabi sibi igini hongolo habetigi daosini dewabi nahiniore kemagoni ndobe. <sup>17</sup> Anigo ayu inanaga bu mini beregedo kemago loma ale i keria yu eberema. Ainde iname inaga hame ngego damene bibahende lone talialu howa ini talima ibalu holomaya inanaga loma ogoni yamia. Mbirali ini hondo mini mbiraore heneneore kago ibu taga naholebira. <sup>18-19</sup> Ayu inanaga hongo bibahendemebi inanaga hame bibahendemebi i lone talima ibalu holeore larama. Iname ihondo bi lalu laabo holeore larama. Ainde ina baba miniha bayale howa ina dara habe. Ina wali agali bu karume lone mo taga nahelabe. <sup>20</sup> Ainde Anduane Homogo inaga mini lone daliga mini yaraga hene wilo agalime nabiaganeale bialu ina lone haru dai bia.

<sup>21</sup> Tinaga hongo kagobi mine haga mana hongohe ngagobi bibahende mo wahai ha. <sup>22</sup> I hangu Anduane Homogobi Ngode Datagaliwabebi heneda lo hendelo ti pani nelu mialu bo wahai ha. Ani bialu ininaga hongoni howaore dindi tara tara bu ngarubi bi tara tara laga laga biaga paluyu pedaru bibahende handaya ho howa haru hai haga kegoni, lene.

<sup>23</sup> Agali kininaga biabe bia haga bu hearume igiri tebirali biaru ira timbuni deagoha minu ba anda howa tigua weli wiarubi golota wiarubi dangi yuni wiarubi ira bo wiarubi ira hongohe delonaga irani delai hene. <sup>24-25</sup> Ani delayagola ira hungu hongohe datagi halu timbuniore magi mandanaga mita pira kirani duria agima do bolangua halu Babilonoali kaware bu hearu daya. <sup>26</sup> Anigo ainde Anduane Homogonaga dahuliyali

mbira abale daliape halu ibuwa ira timbuni deago dombeneha agali tebirali biaru baba mandagi howa irame ti dolino ira heladai bini.✧ 27 Ani biyagola agali tebirali biaru tiha puyabu gahenge dagarebi bayaleore ibayuane hendene. Ai ira ti heagoria kaware naibi. Ani bialu ti irame emeneorebi mbira nadeore hene.

*Igiri tebiralinaga iba gana ngago ogo*

28 Ai igiri tebirali biaru ti ira hongoheore timbuni dayagoha howa Anduane Homogonaga mini yaraga halu iba gana lalu hene.

Tigua iba gana ogodagua lene.

29 Iname ina mamalirunaga Anduane Homogo Ngode Datagaliwabe kego inaga mini yaraga harama.

30 Inaga mini yaraga holene daligaore baya buruguleore haabo holene nga.

Wali agali bibahendeoreme inaga mini daligaore ngago mo yaraga halu holene nga.

31 Tigua iba ganaru lalu inaga mini yaraga halu inaga mini bayaleore ngago mo turu haabo halu inaga anda kagoha ihondo ani lalu holene nga.

32 Ina kininaga biragane dagia ngagoria biruwa i dahuliyali karu bolangua ho howa ina de handadali halu humbirini andaga hondo bolangua haga kegoni.

Iname ini andaneha howa inaga mini yaraga halu haabo holene karulape kama.

33 Inaga haru howa biragane dagia ngagoria bedegola wali agalime inaga mini yaraga holene nga.

Horo bibahendengi tigua i mo turu halu iba ganaru lalu holene nga.

34 Tigua i dahuliya andaga kegoha i mo turu holene nga.

Horo bibahendengi tigua i mo turu halu iba ganaru lalu holene nga.

35 Mbirale bibahende wabini dindini ngarumebi karumebi Ngode Datagaliwabenaga mini yaraga holene nga.

Tigua turu holene iba gana lalu ibunaga mini yaraga halu haabo holene nga.✧

36 Hari daliga bibahende kamirume Ngode Datagaliwabenaga mini yaraga holene nga.

Tigua turu holene iba ganaru lalu ibunaga mini yaraga haabo halu holene nga.

37 Anduane Homogonaga dahuliyali bu kamiru ti bibahendeme Anduane Homogonaga mini yaraga hadaba.

Tigua turu holene iba ganaru lalu ibunaga mini yaraga halu haabo holene nga.

38 Iba hari daligaoreha bedemiru tigua Anduane Homogonaga mini yaraga hadaba.

Tigua turu holene iba ganaru lalu ibunaga mini yaraga halu haabo holene nga.

39 Hongohe damene bibahende ngemiru

- tígua Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.
- 40 Ni egela libugua  
 Anduane Homogonaga mini yaraga hadaba.  
 Libugua turu holene iba ganaru lalu  
 ibunaga mini yaraga haabo halu holene nga.
- 41 Yakundi harini bu kemiru  
 tígua Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.
- 42 Iba dalubi iba dalu pibirabi  
 tígua Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.
- 43 Puyabu tara tara kemiru  
 tígua Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.
- 44 Ira denebi ni hongohe dedagobi  
 tígua Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.
- 45 Dagare timbuni biaga ngagomebi  
 puyabu poboyogobi ngagomebi  
 Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.
- 46 Iba dalu dadimba ngemirubi  
 dalu dindi guni ngemirubi  
 tígua Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.
- 47 Horo ngemirubi mbiraga ngemirubi  
 tígua Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.
- 48 Wáholene ínabi aruma holene ínabi  
 Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.
- 49 Dindigunimebi dagaremebi bulene ngegobi  
 Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.
- 50 Dindiguni mo iba halu dalu ibira haremuru  
 Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.
- 51 Hari beraliba kamirubi hari daba kulukala lararumebi

- tígua Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.
- 52 Dindi bibahende wiame ngamiru  
 tígua Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.
- 53 Hari nene ngemiru emene timbunimebi  
 tígua Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.
- 54 Dindini andaho hene bu kemiru  
 tígua Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.
- 55 Iba solowara bedegobi iba maru bedemirubi  
 tígua Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.
- 56 Iba dindiha howa duguadaga halu piagaru  
 tígua Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halimu.
- 57 Wena timbuni bedamirumebi  
 mbirale iba solowaraha biraga bedamirumebi  
 tígua Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.
- 58 Ega hariha yagaloyu ibaga biaga bedemiru  
 tígua Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.
- 59 Nogo bulumagarumebi nogo tara tara gabua bu karumebi  
 tígua Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.
- 60 Wali agali dindi bibahende ha bu karu  
 tígua Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.
- 61 Isaraele wali agali bibahende  
 tígua Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.
- 62 Ngode Datagaliwabenaga agali loma binigo mo miaga kemiru  
 tígua Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.
- 63 Agali Ngode Datagaliwabenaga biabe biaga kemiru  
 tígua Anduane Homogonaga mini yaraga hadaba.



Tígua turu holene iba ganaru lalu  
 ibunaga mini yaraga haabo halu holene nga.  
 64 Wali agali tigabi halu homene dinini kemiru  
 tígua Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.  
 65 Wali agali ko mbira nawiore  
 bayale howa tíni mo dindiha ho haga kemiru  
 tígua Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.  
 66 Honaniabi Asariabi Misaelebi  
 tígua Anduane Homogonaga mini yaraga hadaba.  
 Tígua turu holene iba ganaru lalu  
 ibunaga mini yaraga haabo halu holene nga.  
 Ibugua ina homeneru dalu humbirini andagaha howa haru dai bialu  
 homanaga giha howa gingilo mialu haru dai biya.  
 Ibugua ira deagoha howa haru tagira pialu  
 ira timbuni deago dombeneha demaria duguaya.  
 67 Anduane Homogonaga dara holene wiaabobo howa  
 ibugua bayale biaabo haga kagonaga  
 iname ibunaga mini yaraga halu kai lamiya.✧  
 68 Wali agali Anduane Homogo andaneha haga kemiru  
 tígua ibuhondo iba ganaru lalu  
 ibunaga mini yaraga halimu.  
 Ngode Datagaliwabe ibugua mbirale bi pupu wulenaga gime wabini ngaru  
 bolangua hene howa  
 ibu daligaore kagonaga  
 tígua ibu mo turu halu iba gana lalu halimu.  
 Anduane Homogo ibugua ina dara holene nawioreni howa dara haabo haga kagonaga  
 iname ibuhondo kai lolene nga,  
 lalu iba gana lene.

---

✧ 1:67: Iba 106.1, 136.1-2

## Susana Te

### *Agali godi hale hagane kiralime Susana dimagoli henego ogo*

<sup>1</sup> Babilono dindiha agali mbira mini Yoagimi hene. <sup>2</sup> Ibugua Hiligia wane Susana bereago dabu bini. Susana ibu baya tara mbira biruwa ibunaga mini Ngode Datagaliwabenaga mana ngagoha pagaho biraabo haga berene. <sup>3</sup> Susana ibu aba aiyala Yuda wali agali bayale howa Susana ibu wandari emene bereangi libugua Mosesenaga bi mana lo wiaru baya hangu talialu habe lalu libugua lawai haga berene. <sup>4</sup> Susana ibu agalini Yoagimi ibu mbirale dewawi homogo mbira howa ibunaga mabu bayaluru anda mandaha wia mabu biaihe hene. Ainde Yoagimi ibu agali bayale ka lo manda bialu Yuda wali agali tigua ibu andagaha ibu ngoai haabo haga wini. <sup>5-6</sup> Wali agali godi hale holenaga ti Yoagimi andaga dege ibu ngoai haga henego irane agali godi hale haga ogoni libugua anda ogoniha biruwa godi hale haga hene. Agali kirali ogoni libu Yudali henego ayu dege gahange godi hale holene biabe ogoni bule hene. Ai Ngode Datagaliwabehanda agali ogoniale kago manda bialu bi abale lo bamba halu lalu, Agali godi hale haga bu hearume wali agali baya hangu haru nahe wiagola mo ko holene taraore Babilono dindiha tagira bini nga, lalu bi lo wini, lene.

<sup>7</sup> Horo bibahendengi horombe hanuni haragola wali agali ti tomo nole piai haragola Susana ibu mabuha ibaga bialu piaga hene. <sup>8</sup> Ainde agali godi hale haga kirali ogoni libu Susana hondowa dimagoli ho haga hene. <sup>9</sup> Ai libunaga miniha dimagolime habe nahayagola libu Anduane Homogohondo bi lolenebi libunaga biabe godi hale haga wiagobi embeda hai hene. <sup>10</sup> Libu kirabali Susana dimagoli haga haga bu howa libuni mendealigo lamia nabi haabo henego <sup>11</sup> irane libuni taga haga haga bu howa nale hene. <sup>12</sup> Ani howa horo bibahendengi libugua Susana hondole hariga taya bialu haabo hene.

<sup>13</sup> Ainde horo mbirungi horombe tomo nolene tu hayagola libugua lalu, Ai horombe tomo nolenengidago ainde andaga tomo nole mba nalare, lene. <sup>14</sup> Ani bialu libu pugupugu bialu pene. Ani pialu libunaga miniha mende mendemebi Susana dege taya bima peneyago mbirani ngola hene. Ani ngola howa libuni bi hale haga haga bialu lalu, Í lone dai binidago agibe lene. Ani lowa libuni ladai bigi bigi bialu, I Susana dimagoli ho henedago latagi haga haga bini. Ani latagi halu libugua Susana ibuni hangu ngola holene horo mbira wilo hondo haba lene.

### *Godi hale haga kiralime Susana bahendenego ogo*

<sup>15-17</sup> Horo mbiru hayagola Susana ibu horo bibahendengi piaga wiadagua ibunaga biabe bia hagane kira heba mabuha ibaga bu hene. Ani heagola godi hale haga agali kirali biago labo hado howa Susana hearia de hendene. Ai ni do tandaga biyagola Susana ibu wayawaya bolene hame lene. Ai Susanahanda ibunaga biabe bia haga wali kiralihondo welibi pauda mini sanda baya ngabi wiarubi andaga winigo mo pudaba lene. Ani pialu howa agali mbira ibalu ibu waya waya bialu kogo hondoligo pabe panga payadai bialu pilibu lalu lamini. <sup>18</sup> Ani lamiya handala wali kira biago labo abale puwa pabe panga payatagi halu libuni hariga emene mbiraha tagira pialu pene. Libu Susanahanda mbirale mo pudaba layaru mo yu dai bule abale pene. Anigo ai agali kirali hado ho heago libu nahende pene.

<sup>19</sup> Ai wali kira biago labo piyagola agali godi hale haga biago labolabo hado hayago abale tagira pialu gedailalu Susana hearia pene. Puwa libugua Susanahondo lalu, <sup>20</sup> Pabe panga paya tagi kagola mbiralime ina handabe nahe kamagoni. Iyaore í dimagoli timbuni ho kebagó ainde ina iyahondo e lalu iyame hame ngebago bibelo hame ledeba. <sup>21</sup> Ina e nalariyagua iyame godi larabangi í igiri mbirala kayu bule wali

kirali ínaga biabe bia haga biago labo andaga pudaba lari lalu godini heneneore laraba lalu gi dololebereba, lene.

<sup>22</sup> Ainde i pogolalu polene diri nawiore hapai hai kebigoni ndobe. Ina libunaga hame ngebigo e laruyagua nde wali agalime i homoliya bo waholebira. Ani bialu ina ndo laruyagua nde libugua i mo ko holebere bida.\* <sup>23</sup> Anigo ainde libugua i ko biya lalu godini latagi holene karulapeda. ina Ngode Datagaliwabenaga deni howa mana ko nabulebero ndobe lene. <sup>24</sup> Ani lalu Susannahanda kuaba hongo howa ladaga hayagola agali biago labomebi hongo howa ga lagalaga bini. <sup>25</sup> Ani lalu agali mendego ibugua mabuha pabe panga payatagi hene heago ge dai puwa duguape hene.†

<sup>26</sup> Bi ladaga daga biayuago wali agali andagaha berearume hale halu gerai ibalu mabu pabe panga emene payiyago dugualu mabuha anda piai hene. Susana mbira agi biyadabe hondolenaga abale piai hene. <sup>27</sup> Ani piyagola agali godi hale haga biago labome ke howa te layago wali agali tigua hale howa ti mogo timbuni lalu taga hai ho hene. Abale henedagoha howa Susana ibugua mana ko ogoniale mbira biya lene hale nahaga howa ti taga hai ho hene.

### *Agali godi hale haga kiralime Susana ko biya lowa manani helenego ogo*

<sup>28</sup> Horo mendengi wali agali Yoagimi andaga ibu ngoai hayagola agali kirali godi hale haga biago labobi ibini. Susanaore homelo lalu libu bi lo manda bialu ibini. <sup>29</sup> Ai wali agali dewaore bu hearunaga deni libugua latagi halu lalu, Hiligia wane Yoagimi one Susana haru ibidaba, lene. Tigua Susana olayagola <sup>30</sup> Susana ibu ababi ibu aiyabi waneigini bibahendebi ibu damenerubi ti haru mandagi ibai hene. <sup>31</sup> Ibu heagola Susana ibu wali bayaore mbira berene. <sup>32</sup> Ani ibu heagola agali godi hale haga ko biago labome lalu, Libugua wali ogoni ibu aidabe dengui hondolobaya agaibunaga dengui bu yi kago mo wahadaba, lene. <sup>33</sup> Ai Susana damene biarubi wali agali marubi dugu bialu bai hene.

<sup>34</sup> Ai agali kirali godi hale haga biago labome wali agalinaga deni heyu howa libugua godi lolenaga gi dogola amu halu Susananaga hagianeni wia hene.\* <sup>35</sup> Ani biyagola Susannahanda dugu bialu ibu Ngode Datagaliwabehanda biamogo bulebira lo manda buwa de hari daligaha handadaga hene. <sup>36</sup> Ani biyagola agali godi hale haga kirali biagome godi latagi halu lalu, Iya mabuha hebagola wali ogo ibu wali biabe bia haga kira heba mabuha anda ibirimigo handariba. Ani bialu mabu pabe panga payadai bialu wali kira biago labo andaga dai bidaba laya. <sup>37</sup> Wali biago labo tagira peagola igiri mbira mabuha hado heneyago abale tagira ibalu libu mandagi paliribi. <sup>38</sup> Iya mabu gibuniha yagi howa anidagua biyago handariba. Ani hondowa iya gerai lalu puwa <sup>39</sup> handalu hebaria libu mana ko bialu heneya. Agali ogoni minu yania holebialu hebaria agali ogoni hongo gibioreyayago ibu gerai pialu panga dugualu ibida piya. <sup>40</sup> Ani biyagola iyame wali ogo minu yania howa agalidago mini langi lalu hebaria ibu donge haya. Ai iyanaga te ogoni hangu, lene. <sup>41</sup> Agali ogoni labo tinaga agali hagianebi godi hale hagabi henegome wali agali bu hearume libunaga bi layago mo henene hai ho hene. Ani lowa ainde tigua bi lo mbira hai halu lalu Susana homelo laiore hene.

### *Danielehanda Susana mo winigo ogo*

<sup>42</sup> Ani layagola Susannahanda bi hongo howa ladaga halu lalu Ngode Datagaliwabe haluhe haabo haga-o ínaga deni mbirale bibahendeore wiado hene mbira nawiore. Mbirale mbira tagira naibi wene ibule ngago ini manda bu bolangua ho kegoni.\* <sup>43</sup> Agali

\* **1:22:** Israelenaga mana ngagome lalu, Wali mbira agali one bedagome agali mendela kayu biyagua nde wali ogoni homelo bo waholene nga leda. Ogoninaga te mbuga mini Loma Binigo Mo Miaga agalinaga biabe ngagoha 20.10, Mana Loyane 22.22 ngago handabe. † **1:25:** Panga duguape henedagoni libugua igiri mbira panga dugualu ibida piya lolenaga ohowa dugua hene. Libugua bi ogoni hobane 39 ngagoria ledago handabe. \* **1:34:** LBM 24.14  
 \* **1:42:** Iba 33.13-15, Min 15.11

kira o kago libugua ke kagobi í manda bide. Ani bialu ina mana ko mbira nabiore bedogobi í manda biai ho kegoni. Ainde i irane aginaga homoledabe, lene.

<sup>44</sup> Ani layagola Ngode Datagaliwabehanda Susananaga bi layago hale hene. <sup>45</sup> Ai tigua Susana bole haru halu pialu heagola Ngode Datagaliwabe dininime igiri daliahe mbira mini Daniele heago mo mini wia hayagola Danielehanda hongo howa lalu, Wali ogoni homaragonaga genda i yu holene hameore nale ko. <sup>46</sup> Tigua wali bameore bo wahole haru poremigonigo ainde ibu homaragola ina bia ko hene ndo wulebira, lene.

<sup>47</sup> Wali agali bibahendeme de handadai biai howa tigua Daniele hale halu lalu, Bi ogoni agialego larebe, lene.

<sup>48</sup> Ani hale hayagola Danielehanda wali agali tinaga deni howa lalu, Isaraele wali agali bibahende luluyu hai harimida. Tigua te emeneha yagi dege hale howa Isaraele wali mbira bereago bame homelo bo wahole bialu harimida. <sup>49</sup> Ai wahalu godi ogoni lone hale hole dai bidaba. Agali godi hale haga kirali ogoni libu ke hayadago lene.

<sup>50</sup> Ani laya handala wali agali ti godi laga wiagoria abale dai buwa tigua Danielehondo lalu, Ngode Datagaliwabehanda inaga mali dewa ndo wene igiri dege kegola í manda timbuni ngiyada. Ai ina mini ngego baya hangu latagi hole ina haru ma. Ainde í wene igiri emene dege helowa Ngode Datagaliwabehanda manda bayale mo ngiyadago, lene.✧

<sup>51</sup> Ani layagola Danielehanda tihondo lamialu, Ina agali godi hale hagane ogoni libunaga bi hale holiya libuni kaundiaha haga haga biladaba, lene. <sup>52</sup> Ani lowa Danielehanda agali godi hale haga mendego ala ibu lowa ibuhondo lalu, í agali waheore ko o kegoni inaga ko ngelo kego ayu panaga tagira ibiragoni ndobe. <sup>53</sup> í godi lako haga kegoni ndobe. Mbiralí ko nabiago kago ko biya lalu tinaga mini mo ko halu mo yobia haga kegoni. Ani bialu mbiralí mana ko bini kago ina mo dambi halu wahalu pu laga ke. Anigo Ngode Datagaliwabehanda ledagome mbiralí ko nabi kago bameore homelo bo wanahabe leda.✧ <sup>54</sup> Anigo ainde heneneore Susana ibu agali mbiralí heneyagua nde í tigatiga langi. Ai libu ira agile teneha paleneyabe, lene. Ani hale hayagola agali biagome ladai bialu lalu, Ira, dugu heago andaneha heneyabe, lene.

<sup>55</sup> Ani layagola Danielehanda lalu, í ke haregoni ndobe. Ini ke haregome í ayu biba hene kegoni. Ngode Datagaliwabenaga dahuliyalime ayu tibu nene gadele yu kagome í dibu dagabu ki holenaga handaya ho kagoni, lene.

<sup>56</sup> Ai agali godi hale haga mbira biago pu lalu godi hale haga agali mende biago ibu lene. Ibiyagola Danielehanda ibuhondo lalu, íore Kenana dindiha puya ko ngagonaga igini kegoni. í Yudali ndo kegoni. Wali baya berearume inaga mini mo luluya hayada. Ani bialu mini dimagoli wu heagome inaga embone mo ko hayada. <sup>57</sup> Isaraele bedarume ihondo gi haragola ina ti mo guya halu mo hondo haga ke. Ai Yuda wali mbira birayadagome inaga dimagoli ko wiridago mo hengedo waharagoni. <sup>58</sup> Ai libugua hendenedago wali agali ogoni libu ira agile teneha ko bialu heneyabe, lene. Ani hale hayagola agali godi hale haga biagome ladai bialu lalu, Ira hale timbuni heago teneha kayu bialu haribiya, lene.

<sup>59</sup> Ani layagola Danielehanda lalu, í ke haregoni. Inaga ke ogonime ini bo waharagoni ndobe. Ai ayu Anduane Homogonaga dahuliyali mbira í dibu dagabuki holenaga ayu tibu nene gadele giha yu kagoni ndobe. Ai libu kirabali biba holeberebi, lene.

<sup>60</sup> Ani layagola wali agali bibahendeme bi hongo howa ladagadaga bialu Ngode Datagaliwabehanda wali agali ibunihondo mini mbiraorewi kago biamogo biaga kagonaga mini yaraga halu hene. <sup>61</sup> Ani bialu agali godi hale haga kirali biagolabome bi henene letingi howa ke halu gi do lalu laribigo keore haya lalu Danielehanda ti mo walía hayagola wali agali tigua libuhondo keba timbuni hene. <sup>62</sup> Mosesenaga mana lo

ngagoha bi ogodagua leda. Mbiralime ke howa godi lalu mendeali kago pani nelu mule lalu karia handa walia harimiyagua nde mende ali pani nelu mulene manda biyago ibuni nelu mulene nga, lalu gilibu nga. Anidagua bialu tigua agali kirali godi hale haga biagolabo homelo balu wali Susana ko mbira nabi biago mo wialu haru dai bini. <sup>63</sup> Ai Hiligiabi Susana aiyabi Susana agalini Yoagimibi Susana damene bibahende ibu hayarubi tigua Susanaha ko bini mbira nawiyago hondowa ti turu timbuni halu tigua Ngode Datagaliwabenaga mini yaraga halu hene. <sup>64</sup> Horo ogoningi howa Daniele ibu agali mini lene timbuni mbira ka lalu hatagi ho hene.



## **Dama mitangi bialu bi pupu wiaga Belela Puya mbiralilanaga te nga**

*Belenaga loma binigo mo miaganaga ohaga mana Daniele ibu manda binigo ogo*

<sup>1</sup> Ai Kini Asadiagese homayagola Pesia dindi howa agali mbira mini Sairusu henego ibu kini ha aribia hene. <sup>2</sup> Daniele ibu Kini Sairusunaga nenegeore howa kinihanda Daniele gubalini timbuni haga hene. Kini ibugua Daniele gubalini timbuniore ho hagagobi ibunaga nenege maru bu karu nahaga hene. Danielenaga biabe kini mini bayaleru talebu miaga hene.

<sup>3</sup> Babilono wali agalinaga bi pupu wiaga gime wabini mbira mini Bele laga wini. Horo bibahendengi wali agalime balawa bayaleoreru mbasegedi nuha honowa nu homberibi (12) nogo sibi pira mariabi (40) waini iba dewaore genda magi manda lida handari kirani pira duria (250) lowa urunidagua Belenaga loma wiaga wini. <sup>4</sup> Ainde Kini Sairusu ibugua Bele ogoni galoneorebe toba ho howa horo bibahendengi ogonihondo bi pupu wu piaga hene. Anigo ainde Daniele ibu ibunaga Ngode Datagaliwabe kagohondo bi lalu haga hene.

<sup>5</sup> Ainde horo mbirungi kini ibugua Danielehondo hale halu lalu, Ína Belehondo bi pupu nawi kego irane agibe, lene. Ani hale hayagola Danielehanda ladai bialu lalu, Ína mbirale bi pupu wulenaga agali gime wabini urunialehondo bi pupu nawiaga ko. Í Ngode Datagaliwabe ibuni holeneyi howa ibugua hari daliga dindibi wabialu wali agali bibahende handame ho howa haru haga kago andaneha haga ko, lalu ladai bini.

<sup>6</sup> Ani layagola kini ibugua lone hale halu lalu, Ína inanaga bi pupu wiaga ngago ibuha holene nayi nga larego irane agome. Mbirale horo bibahendengi loma bu mialu kemaru naiore haga ngago nahendedebe, lene.

<sup>7</sup> Ani layagola Daniele ibugua oba halu lalu, Kini-o í tigua mohondo halu helo waholene nakarulape mbira kegoni. Mbirale bi pupu wiaga mini Bele ogoni dindime wabuwa daliga mboronosime para hadambi howa ngago ogonime tomobi ibabi mbira nolene nakarulapeore ndobe, lene.

<sup>8</sup> Kini ibugua bi ogoni hale howa ibu tandaga emene ndo howa ibugua Belenaga loma binigo mo miaga agali bu hearu ibidaba lene. Ibiyagola ibugua tihondo hongo howa lamialu, Tígua bi pupu wiaga Bele ogonime tomo loma bu mialu kemagonaga lalu heneneore mo walia naharimiyagua nde tí homalimulo bo wahai holebero. Anigo ainde bi pupu wiaga Bele ogoni ibugua loma wialu kemaruni bibahende heneneore naiore haga ngago mo walia harimiyagua nde Danielehanda inanaga bi pupu wiaga baya ngago mege biyago ainde ibuni homelo, lene. <sup>9</sup> Ani layagola Daniele ibugua kinihanda bi layadago karulape lene. Agali Belenaga loma binigo mo miaga pira karia (70) bibahende howa ti one waneiginibi bere hene. <sup>10</sup> Ai Daniele ibu kini heba bi pupu wiaga Belenaga anda heagoha pene.

<sup>11</sup> Piyagola Belenaga loma binigo mo miaga agali hearume lalu, Kini-o ina bibahende tagira piai haramagola ínime tomobi waini ibabi tebolo dagia ngagoria mo manda manda bu wiai habe. Ani wialu íni tagira pialu panga baya hangu paya dai bialu kininaga magi pangani helabe. Ani bialu egerebahagi dai bibe. Dai buwa handalu keria Bele ibugua tomo uruni nai nahe wiagua nde ína ina bibahende bo wahai habelo. Anigo tomo uruni nai hayiyagua nde Daniele ibugua inahondo bi ko layagonaga ibuni homelo, lene. <sup>12</sup> Anigo ainde agali loma binigo mo miaga uruni tigua anda ogoni tamuha panga wia do hene mbira dagia wiago andaneha ngelo howa ti mogo nale hene. Ani ngelowa

---

✧ 1:3: Ais 46.1, Yar 51.44

mbiraga bibahendengi tigua panga wia do hene ogoniha anda puwa tomo ngago nai halu piaga hene.

<sup>13</sup> Ai agali loma binigo mo miaga biaru ti peagola kini ibugua tomobi waini ibabi dagiani mo manda manda bu wiai hene.

<sup>14</sup> Ani wiai heagola Danielehanda agali ibunaga biabe bia haga hearuhondo lamialu, Be abalu dewaore dugu yalu ibuwa anda tamuha wali agali ge haga wiagoria dugu paya bu ngeladaba, lene. Mbirale ogoni biyago kini ibu hanguhendene. Ani biai halu ti tagira puwa panga payadai bini. Payalu kininaga magi pangani de hondo wialu ti andaga pene.\*

<sup>15</sup> Anidagua bialu peagola mbiraga urumaha agali Belenaga loma binigo mo miaga hearubi ti one waneigini bu hearubi bibahendeore horo bibahendengi biaga winidagua panga haraba wia do hene biagoha anda puwa tomobi waini ibabi dagiani manda manda bu wiyago naiore hene.

<sup>16</sup> Egerebagiore kini Danielela heyalu Bele bi pupu wiaga andaha tomo wiyago hondole pene <sup>17</sup> Puwa kini ibugua Danielehondo lalu, Inaga gi magigo hondole pangani helarugo budayadabe nabudidabe, lene. Ani layagola Danielehanda ladai bialu lalu, Agali haguane-o nabudida, lene.

<sup>18</sup> Ai kini ibugua panga dugualu anda puwa handalu hearia tomo dagiani manda manda bu wiyago nawiyagola ibugua lalu, Bele í timbuniore. Í ke nahaga kegoni, lene.

<sup>19</sup> Ani lole lalu heaore dege Danielehanda oba halu kinihondo hondo ha hondo ha lowa lalu, Ai dindi ge haga ngagoria de ala handa. Ai j hale holiya ge hayadago ogonaga ge lalu langi, lene.

<sup>20</sup> Ani layagola kinihanda ge biago hondowa lalu, Walibi agalibi waneiginibi hai hayadane hendedo, lene. <sup>21</sup> Ani lalu kini ibugua keba timbuni howa, Agali loma binigo mo miaga biarubi ti one waneigini heba ibaiore hadaba, lene. Ai tigua ibalu anda tamuha panga haraba wiado hene ngagoha anda ibalu tomo nai haga wiago kini hendelo mo walia hene. <sup>22</sup> Ani biyiyagola kini ibugua badaba layagola agali loma binigo mo miaga biaru homelo bo wahai hene. Ani bialu kinihanda wali agalinaga bi pupu wiaga Bele wiago Danielehanda Bele heba ibunaga anda timbuni heagobi bo gialabaga bialu mo ko hai hene.

### *Danielehanda puya timbuni dama lagane wiago benego ogo*

<sup>23</sup> Babilono wali agalinaga bi pupu wiaga puya timbuni mbira wini. <sup>24</sup> Ainde mbirungi kini ibugua Danielehondo lalu, Ainde ina bi pupu wiaga puya timbuni ngago ibuha holene nayi nalolebere. Ibu holene yiore ngago ai ina ibuhondo bi pupu wulene karulape, lene.

<sup>25</sup> Ani layagola Danielehanda ladai bialu lalu, Ina Anduane Homogo ibu hanguholenehe kago ibunaga mini hanguharaga haruli. <sup>26</sup> Ai kini-o ina karulape lariyagua nde ina puya timbuni ogoni bo waholebero. Ina ogoni bole howa ina ayu tibu wai biagane nene gadele ngagobi kangobi mbira nayi howa bameore homelo bolebero, lene. Ani layagola kinihanda ladai bialu, Karulapego ina babehedabe hondole pu, lene.†

<sup>27</sup> Ani laya handala Daniele ibugua puwa mundu kalaro ale mbirale mindibi ndobabi wiagobi nogo habene wiarubi wali agalinaga mandaribi mo biamaga howa todobenaha hiruwa deagola mo molo molo bigi buwa puya biago nelo mini. Puya biagome mbirale uruni nai hayagola ibunaga tombene timbu halu pururu lalu tulalaki hene. Ani homayagola Danielehanda tihondo lalu, Tinaga bi pupu wiaga wiyuago ogonibe, lene.

\* **1:14:** Tigua panga payadai bialu kininaga magi pangani delene. Anidagua biyadagoni irane agali mbira kagome ti pedaha aribia howa panga duguayagua nde kininaga magi helayago panaga budalu panga duguayada lo hondolebira. † **1:26:** Henene dege puya ogoni ibu holene ya ema bialu piaga winigo ai nde Daniele ibugua mitangi bialu ina puya ogoni baruyagua nde ogonime kini mo mini wia halu puya ogoni ibuhondo bi pupu wulene nagaloneore nga lalu mo walia howa bolene manda bini.

<sup>28</sup> Ani biyago Babilono wali agali bibahendeme hale hai howa tigua keba timbuni howa tinaga kini bope hole manda biai hene. Tigua hongo howa lalu, Ai inanaga kini biago ibu ai Yudali hayada. Abale inanaga bi pupu wiaga Bele bo pambulabaga bu wahai halu agali Belenaga loma binigo mo miaga hearu bo wahai hayago. Ani bialu mani inanaga puya dama bi pupu wiaga wimago bo wa hayada, lene. <sup>29</sup> Tigua kini berearia puwa kinihondo lalu, Daniele ibu inanaga giha minu ya habelo hame ledema. Anidagua layagola iname ínibi í one waneiginibi í damene bibahende bo wahai holeberema, lene.

<sup>30</sup> Tigua genda timbuniore kini mo ya hene. Anidagua biyagola ibugua gi timbuni howa Daniele tinaga giha minu ya hene. <sup>31</sup> Ani biyagola tigua Daniele minu yalu puwa gundu uli laiono heagoha bape hene. Ani buwa tigua horo waragaria uli laiono haga wiagoha ngelo hene. ✧ <sup>32</sup> Gundu uli laiono haga ogoniha laiono karia hene. Horo mbira mbirani laiono ti wali agali kira nalu nogo sibi kira naga hene. Anidagua biaga henego ai horo ogoningi laiono urunime Daniele balu nelonaga tigua laiono tomo nami hene.

### *Daniele laiono uliha winigo ogo*

<sup>33</sup> Horo ogoningi agali Anduane Homogonaga bi mana latagi haga agali mbira mini Habagugu Yudiaha hene. Ibugua agali maru mabuha biabe bialu widi gandulo mogo bialu hearunaga tomo dawa yalu polenaga nogo mbiriniru todobeneha iba heba dawa yalu mberediru ogoniha budu ibira haga buwa yalu pole pialu hene. <sup>34</sup> Harigani pialu hearia dahuliyalime ibuhondo lamialu lalu, Ína tomo ogoni Daniele nelo Babilono yalu pu. Daniele ayu ogoni Babilono dindiha uliha laiono haga wiagoha minu bape henego beda, lene.

<sup>35</sup> Ani layagola Habaguguhanda ladai bialu lalu, Í Babilono nahendene kogoni. Ani bialu laiono uli ogoni agoha ngabe í manda nabi kogoni, lene.

<sup>36</sup> Ani layagola dahuliyali biagome Habagugunaga mandari heagoria yaraga howa yalu harini puyabu poradagua bialu Babilono yu pene. Yalu puwa Babilononi laiono uli wiagoria kaware yu ibira hene. ✧ <sup>37</sup> Ani biyagola Habaguguhanda lalu, Daniele Daniele-o Ngode Datagaliwabehanda ínaga tomo maru wia hayago mo ibu, lene.

<sup>38</sup> Daniele ibugua Habaguguhanda bi layago hale howa Ngode Datagaliwabhondo bi ogodagua lene. Ngode Datagaliwabe-o ína í mitangi bu haga kegoni. Wali agali í gubalini haga karubi embeda nahagaore kegoni, lene. <sup>39</sup> Daniele ibu abale heyuwa tomo nalu berea handala Ngode Datagaliwabenaga dahuliyali biagome Habagugu yalu ibuni dalu yu dai bini.

<sup>40</sup> Ai horo kaneni kini ibugua Danielenaga dugu bulenaga laiono uli wiagoria pene. Puwa uli biagoha handape halu hearia Daniele laionome balu na nabi berearia hendene. <sup>41</sup> Ani hondowa kini ibugua hongo howa ladaga howa lalu, Danielenaga Ngode Datagaliwabe í hangu Anduane Homogo kegoni. Í hangu Ngode Datagaliwabeore kegoni, lene. <sup>42</sup> Ani lalu agali bu hearu hondo lamialu Daniele uliha bedago irigi halu ibilo yamidaba lene. Ani bialu kini ibugua Daniele bolene manda biaga hearu tini laiono uli biagoha minu bape hadaba layagola tigua minu bape hene. Ani bape hayagola kini ibuni de hondo heaore dege laiono biarume agali biaru abale balu buda migimigi bialu nai hene.

## 1 Magabi

### Mbuga ogoha gilibu ngarunaga nemandi ogo

Ai Magabi mbuga mbira ngagoha howa Andiogusu Ebipanese ibu kini heangi howa pialu Yone Higanusu heangi Yuda dindiha bialu heneru te lo nga.

Ogoningi agali mbira ibuni halu ibu one waneiginirume binigo te lo nga. Damene mbira uruni tinaga mini Magabi hene. Mbuga ogonime Isaraele dindiha genda timbuni wiangi Ngode Datagaliwabehanda Magabi dameneha howa Isaraele wali agali biamogo bialu henego te gilibu nga.

Mbuga ogoniha mini hongoheore Ngode Datagaliwabehanda ibunaga wali agali baya hangu handaya ho haga ka. Ani bialu Ngode Datagaliwabehanda wali agali mana ngago baya hangu talialu mana bayale tigabi ngago bialu haga karu biamogo biaga ka. Ani bialu ibunaga biamogo bulene ngago heba howa tigua waitigi karu bope halu tini wayali haga lalu mo walia ho nga. Mbuga ogoha howa mali daga lama pialu Keriso taba henegoria tagira polenaga pigane Siria dindi mo winidagoria howa daga lagago mali pira maria (40) wini. Ogoni Keriso dindini ibulene mali handari mbira pira tebirani karia (137) Siria dindini howa daga ladai bini. Ani bialu ogoningi Keriso dindini bulenego mali handari mbira pira kariani duria (175) ngelowa bialu henego bima pialu mali handari mbira pira kariani karia (177) biairi hene. Mali ogoningi Keriso dindini ibulenenaga mali handari mbira pira tebirani maria (134) agima ngelowa bialu hene.

### Andiogusuhanda Yuda wali agali baba wai bialu minu bayago Madadiasahanda wai biadai binigo te leda

(Be 1-2)

*Alegesanda kini timbuni henego*

<sup>1</sup> Alegesanda ibu Masedonianaga Kini Pilibi igini howa ibugua ami agaliru haru halu Masedonia dindi wahalu Pesia dindi Midia dindilanaga Kini Dariusula wai bule pene. Ani bialu Alegesanda ibugua Dariusu bope halu ibu Pesia dindinaga kini ho aribia hene. Pigane Girigi wali agali hangunaga kini hene. <sup>2</sup> Alegesanda ibugua wai dewaore bialu tano hongohe wiaru balu bo bodahana haga bini. Ibugua dindi kaundia tara tara wiaruha wai bialu kini bu hearu bo wahai halu dabudabu bayale tara tara wiaru mo page bigi bialu dindi anda bo labu haga bini. <sup>3</sup> Ani bialu ibugua dindi bibahende wiaru handame hai ho howa ainde ibu gibiore mbira kogoni lo mitangi bu hene. <sup>4</sup> Ibunaga ami agali hongoheore dabo helowa ibugua dindi tara tara bu wiarubi wali agali uruniha hearubi kini hearubi handaya ho heagola tigua ibu dagisi migi bialu hene.

<sup>5</sup> Mani howa Alegesanda ibuni warago timbuni bayagola ibuni homeleda lo manda bini. <sup>6</sup> Ani manda bialu ibugua agali maru ibuni baba mandagi igiri emeneni howa hama ibalu ayu ti ami agali haru bamba haga heneru bibahendehondo dindi ibugua handaya ho heneru ti mo tahaga bini. <sup>7</sup> Alegesanda ibu mali homberia kini halu homene. <sup>8</sup> Homayagola mani agali haguane biaru ti mbira mbirame dindi tini wai bialu mo wiyaru handaya ho haga haga bialu <sup>9</sup> tini dindi uruninaga kini haga haga bini. Ani bialu mani howa ti igini aguanerume tini henegoria henge mialu ho aribia haga bialu mali dewaore hene. Ani howa tigua wali agali dindini hearu genda timbuni dewaore mo migi bialu hene.

*Andiogusu Ebipanesebi Yuda wali agalibi ti Ngode Datagaliwabe mitangi nahaga hearu nenege henego ogo*

(2 Magabi 4.7-17)

<sup>10</sup> Andiogusu Ebipanese ibu Kini Andiogusu tebone henego ogoni igini howa ibu kini agali ko henedaru aria mbira hene. Ibu tano timbuni Lomo wiagoria garabaya henego ai Giriginaga mali daga handari mbira pira tebirani karia (137) layagola ibu kini hene.✠

<sup>11</sup> Horo odaruningi Isaraele dindiha wali agali Anduane Homogonaga bi mana mo wahaga maru howa tigua wali agali mo luluya halu lalu, Ai wali agali tara Anduane Homogo mitangi nabiaga kaware karu baba mandagi biabe biamaga halu holene nga. Inane hangu hemagola genda tara tara wiaru inaha anda ibugu biyagonaga ani bulene nga, lene. <sup>12</sup> Wali agali dewaoreme bi ogoni bayaleda lalu <sup>13</sup> marume turuore howa tigua wali agali tara Anduane Homogo mitangi nahaga tara karunaga mana ngago talialu bulenaga tigua kinihanda bule pudaba larabe hondole gerai lalu kini hale hole pene. <sup>14</sup> Ani bialu tigua gini biagane hama timbuni mbira Girigi dindiha wabu wigi biadagua Yarusalemeni wabu wini.\* <sup>15</sup> Ani bialu Isaraeleali tinaga tingini podene heago lone heladai bini. Tigua anidagua binigome habo nalolene bi Ngode Datagaliwabehanda ti baba lo wiyago pugini. Ani bialu ti wali agali tara tara Anduane Homogo mitangi nahaga hearubaba nenege halu howa tigua mana ko tara tara wiaru bialu hene.✠

*Andiogusuhanda Iyibi baba wai bule penego ogo*

<sup>16</sup> Andiogusu ibunaga gabumane biabe bulene wiago buwa mo hongo hai howa ibugua Iyibi baba wai bialu Iyibinaga kinibi ibu dege howa ibugua dindi kirabali handaya ho holene hame lene. <sup>17</sup> Ani manda buwa ibunaga ami agali hongohe hearu haru halu Iyibi pene. Ibugua wai biaga garo ale nogo hosime gililaga karisi wiarubi nogo timbuni tara mini elepana hearubi haru halu nogo hosirubi haru halu sibi dewabi heba pene.† <sup>18</sup> Pialu Iyibinaga Kini Tolemi heago baba wai bini. Wai bialu howa Tolemi ibu gi halu ibida dai bialu pu waore hayagola ibunaga ami agali bu hearu bibahende bo wahai hene. <sup>19</sup> Andiogusuhanda Iyibi dindiha tano hongohe wiaru bo poda anda howa ibu karu lai halu wali agali tinaga dabudabu wiaru damene bibahende mo hilo yai halu bini.

*Andiogusuhanda Yuda wali agali benego ogo*

<sup>20</sup> Ai mali handari mbira pira mariani tebira (143) hayagola ibu lone dai buwa ami agali dewaore haru halu Isaraele dindihabi Yarusaleme tanohabi wai bule pene. <sup>21</sup> Ibugua mineore tara howa Ngode Datagaliwabenaga anda heagoha anda puwa mbirale lotunaga wiaru damene mo yai hene. Anduane Homogonaga lomabu delaga dabu ngolome wabini heagobi lamu hale hedo wiaga gene hearu heba biabe ogoninaga biaga wiarubi <sup>22</sup> tebolo dagia mbira mberedi Anduane Homogo lomabu minigo wiaga heagobi waini iba hambu lomabu miaga gabo be wiarubi ira hagua ngabilo delaga mini inisenesi lomabu delaga ndisibe beledirubi labolabo timbuni Anduane Homogo anda tamu Hobane Loma Bia Heneore hoba amu heagoha panga paya amu haga heagobi mo yalu yári tara tara ngolome wabini wiarubi mo yai halu bini. Ani bialu anda biago haneni ngolome yári bia hearu giallo yai hene. <sup>23</sup> Ani bialu silibabi ngolobi gabo be tara tara muni dewaoreme yolo bu wini wiarubi muni bibahendeore mo do hearubi mo yai halu pene. <sup>24</sup> Mbirale uruni bibahende ibu dalu mo yu pi ai hene. Ibugua wali agali dewaore bo wahai halu mbirale o biyadaruninaga ibu wayaliore timbuni tingi howa ibuninaga mini yaraga halu hene. <sup>25</sup> Ani biyagola Isaraele dindi bibahendeha kiabu dugu dewa bialu hene.

<sup>26</sup> Agali haguane hearumebi agali haru bamba haga hearubi

✠ **1:10:** 2 Mag 4.7 \* **1:14:** Mbirale ogonidagua bialu Girigi tigua ohowa wai hanalu Isaraele wandari igiri bu karume tinaga mamali manabi lotu mana ngagobi wahai halu wali agali tara Ngode Datagaliwabe mitangi nahaga bu karunaga biaga mana ngago dege talialu helonaga ani bini. ✠ **1:15:** 1 Ko 7.18 † **1:17:** Isaraele dindi kawareha nogo elepana ogoniale nahagago ai agali maru Andiogusu ibu aria bu hearume wai biamogo bulenaga India dindi howa haru ibiniya.



tigua dugu timbuniore bini.

Wandari igiri dalihae bu hearunaga hongo pirilope halu wali baya biragaru dengui mo koheru berene.

<sup>27</sup> Agali maru ti wali aidege daubu hearume kiabu dugu bialu haga haga bini.

Wandari maru agali andaga ayudege pene berearu dugu bialu biru wima pene.

<sup>28</sup> Ainde wali agali dugu biyagome dindi dumbidumbi biyagola

Isaraele hameigini bibahendeore taga hai hene.

<sup>29</sup> Mali kira piyagola kini ibugua ami agali haguane mbira ami agali dewaore haru halu Yarusaleme wali agaliha dagisi muni mule pudaba lene. <sup>30</sup> Agali ami haru haga ogonime bi bayale lalu howa ke halu ibunaga miniha ko mo hondo holene mana palia tole hene. Wali agalime ibunaga bi bayale layagoha mini pelai howa hale ho wai heagola wai abale hedope halu wali agali bu hearu bai hene. Ibugua ti bope halu Isaraele wali agali dewaore bo wahai hene. <sup>31</sup> Ibugua Yarusalemeha mbirale bayale wiaru mo yai halu tano bibahende bo heda haiore hene. Anda bu hearubi tanonaga wai pabe hongohe egeme bini heagobi bibahende irame bo heda hai hene. <sup>32</sup> Wali waneigini bu hearu garabaya helai halu nogo bulumaga bu hearu kayu haru hai halu bini.

<sup>33</sup> Ani bialu mani howa tinime Yarusaleme tanonaga hobane mbira mini Debidinaga Tano laga wiagohayagi hagira bu mialu ege pabe daligaore biadaga howa pabe neneni ami agali mamage howa handapugu bu haga andaru bu helaga bini. <sup>34</sup> Ani buwa tigua agali maru mana ko ngago bialu mana puguaga hearume tinaga anda hongohe ogoniha mamage howa handaya ho helo helene. <sup>35</sup> Tini holonego mo hongo hai howa tini tomo nolenebi wai biaga alerubi mo mogo bu wiai hene. Ani bialu tigua mbirale Yarusalemeha page mo yayaruni anda ogoniha mo do howa wiai hene.

<sup>36</sup> Tigua Isaraele wali agali baba waitigi timbuniore halu maru Anduane Homogonaga andaha pole piyaru mo gi haga bialu hene.

<sup>37</sup> Wali agali bayaleru Anduane Homogonaga anda biagoha berearu homelo bo wahai haga bini. Mana ko tigua biyagome Anduane Homogo anda loma biahe baya heago mebia halu mo dodohe helene.

<sup>38</sup> Wali agalime gi timbuni howa ti Yarusaleme wahalu ibida piai hene. Ani piai hayagola Yarusaleme wali agali tara hearu ti dege dalu wini. Wali agali tara dindi taraha howa ibini hearu tinaga tano buhinu wini. Yarusaleme wali agali tini tano ogoni wahalu piai hene.

<sup>39</sup> Ngode Datagaliwabenaga anda biago wali agali naheha bameore ho wahene mbira ani hene. Horo timbuni turu ho haga winingi dara howa dugu bialu holene wini. Sabada horongi tagaho holene horo wia aribia hene. Ani wiagola wali agali tigua anda biago bayale mini lene ka lalu mini yaraga nahene. Ani nabi tigua anda ogoni mege bialu bi ko hangu lalu hene.

<sup>40</sup> Bamba Yarusaleme mini lene daliga winigo ai ayu ibu tagabiore nga. Abale ibu turu ho hene. Ai ayu ibuha turu holene biago beregedalu dara holene wia aribia ka.

<sup>41</sup> Ai kini ibugua mana mbira wabialu lalu, Wali agali bibahende dindi ibugua haru howa handaya ho kago bibahende bu kamiru tigua tini dindinaga mana ngago wahai halu mana mbiraore hangu biame halu dindi mbira wali agali haradagua bialu halimu, lene. <sup>42</sup> Wali agali bibahende dindi bibahende bu hearume kininaga mana ogoni karulape lai hene. <sup>43</sup> Ainde Isaraele wali agali dewaoremebi kininaga bi layadago talialu howa mbirale bi pupu wiaga gime wabini wiaruhondo bi pupu wialu lomaru bu mialu howa Sabada mana lo ngago wahaiore hene.

<sup>44</sup> Ai kini ibugua beba mbira gili buwa agali marume yalu Yarusalemehabi Yuda dindiha tano maru ngaruhabi piyai helene. Ibugua beba ogoni gilibu wia howa lalu, Mana gahenge ngago talialimu, lowa pelene. <sup>45</sup> Ibugua tihondo lawia halu, Loma damene bibahende loma irame dai helolenebi widi lomabu delolenebi waini iba odo lomabu delolenebi uruni bibahende wahai halimu. Ani bialu Sabada horongi biabe bialu lotu laga horo timbuni tagira ibirangibi biabe bilimu. <sup>46</sup> Tí Anduane Homogonaga anda kagobi agali anda ogoniha biabe bialu loma binigo mo miaga karubi bibahende mo nagalone hai helalimu. <sup>47</sup> Ani bialu tigua mbirale bi pupu wule gime wabini ngagonaga andaru bia halu lomabu delaga daburu bia halu dindi wiabagi heneru mo ngelaga bilimu. Loma bo delole howa nogoru ema bialu piaga marubi tinaga maname nabiaga ngago bo lomabu delalimu. <sup>48</sup> Tí igini taba hanaragola dongone podo mabu bulene nawiore. Ani bialu tinaga maname tini Ngode Datagaliwabenaga deni dodohe holino nabiagane ngago bialu halimu. <sup>49</sup> Tigua mana bamba Anduane Homogohanda Mosesehondo mini yu kago wahai holene nga. Ani bialu mana ogoni mo bagi halu waore holene nga, lene. <sup>50</sup> Ani lowa kini ibugua lalu, Wali agali mana ogoni talia nabi kago ibu homelo bo waholene wulebira.

<sup>51</sup> Ani lalu ai kini ibugua bi ogoni dindi ibugua handaya ho howa haru hene wiago bibahende ha piyai helene. Ibugua agali haguane maru wali agali haru helo dabo helaga bialu howa lalu, Yuda dindiha tano ngaru bibahendeni mbirale bi pupu wule gime wabini ngagohondo loma mialu halimu, lene. <sup>52</sup> Ainde Yuda wali agali dewaore agali haguane uruninaga bi hale howa talima pialu Anduane Homogonaga bi mana lo wini ngago erembira mialu piyai hene. <sup>53</sup> Anigo mana ko ogoni bialu howa Yuda wali agali maru dindi tara tara wiaruha ibida pugu pugu binigo ai dindi tara uruniha hadoho haga haga biai ka.

<sup>54</sup> Ainde ege mini Kisilebenaga horo nguini (15) mali handari mbira pira mariani duria (145) hayagola Kini Andiogusuhanda bidaba layagola mbirale ko taraore ogoni Anduane Homogonaga anda kagoha lomabu delaga dabu heagoria, Mo wilimu, lene. ‡ Ani bialu tigua Yuda dindi maru wiaruha loma bu delaga dabu bu helai hene. <sup>55</sup> Ani bialu anda harabanibi hariga pedago bibahendenibi ira hagua nga biaga inisenesiru delaga biaga wini. <sup>56</sup> Ani bialu howa tigua Mosesenaga bi mana lo wini mbuga mbira ngane handayagua tigua budabaga buwa iraha delaga hene. § <sup>57</sup> Mbirali ibu habo nalolene bi lo winigonaga mbuga yu howa Ngode Datagaliwabenaga mana taluwa bialu heagua ogoni ibu homolene nga lalu kini ibugua bi hongohe ogoni lo wini. <sup>58</sup> Ege dewaoreni Isaraele wali agali tinaga tanoha hearia minu yania hene biaru mo ko timbuni halu hene.

<sup>59</sup> Ai ege mini Kisilebenaga horo pira kirani duria (25) hayagola tigua mbirale bi pupu wiaga gime wabini biarunaga lomabu delaga dabu Ngode Datagaliwabe ibuni kagonaga lomabu delaga dabu heagoria wiadambi haga biagoria lomabu delene. <sup>60</sup> Tigua kininaga mana lo wiago talialu walime ibu igininaga tingini agalime podamabu bidaba lene bedaru bo wahai hene. Waneigini gali henedago aija ibuni mani pongobia howa libu haru homelo bo wahaga bialu hene. ☆ <sup>61</sup> Ani bialu tinaga damenerubi agali waneigini galinaga tingini podaga hayadagobi bibahende homelo bo wahai hai haga bini. <sup>62</sup> Ani bialu heago helowa Isaraele wali agalime kininaga bi mo wahalu Anduane

‡ **1:54:** Girigi tigua tinaga bi pupu wiago mini Susunaga bigiyabi be lomabu delaga dabube tobane mbira Yarusalemeha Anduane Homogonaga andaha lomabu delaga timbuni wiagoria mo ngelene. 2 Magabi Be 6.2 ngago hondolene nga. Yuda wali agali tigua mbirale ogoni ko tara mini Hondolene Hiriribi Gibiore laga wini. Ai te ogoninaga hondolene maru Daniele 9.27, 11.31, 12.11; 1 Magabi 6.7 wialu Madiunaga 24.15 Maga 13.14. Ai ege mini Kisilebe ogoni mali inanaga ngagoha malinaga ege beane hombenelaha haga nga. (Nobemba Ndisembala kanggi haga wini.) § **1:56:** Mbuga budu delaga binidaruni Pigane Binigo Tebi Haru Tagira Penegobi Loma Binigo Mo Miaga Biabebi Dagalenegobi Mana Lo Winigo Loyanebi mbuga uruni budu delai halu hene. ☆ **1:60:** 2 Mag 6.10

Homogonaga maname tomo nanolene leago damene bibahendenaga hene. <sup>63</sup> Isaraele wali agali tigua habo nalolene bi Ngode Datagaliwabela lo winigo pugualu tomo tara tara maname nanolene lo ngaru nanole howa tini homolene karulape lalu homole manda manda bu hene. Anidagua bialu hayagome wali agali dewaore homai hene. <sup>64</sup> Ai ogoningi ti genda timbuniore yu hene.

## 2

### *Madadiasahanda hongo howa yutiga bu henego ogo*

<sup>1</sup> Horo ogoningi Madadiasa ibu Yarusaleme wahalu Modeini tano pu hene. Madadiasa ibu Yone igini howa Yone ibu Simeono igini hene. Ani bialu Simeono ibu agali loma binigo mo miaga Yahoiaribi aria mbira hene. <sup>2</sup> Madadiasa ibu igini duria hene. Igiri mbirago mini Yone henego ibu mini mende Gadi laga hene. <sup>3</sup> Igiri mende Saimono henego tigua ibu mini Tasi laga lalu <sup>4</sup>tebone mini Yudasa henego mini mende Magabeusu laga lalu <sup>5</sup>manego mini Eleasa henego mini mende Abarana lalu dauni mini Yonadana henego mini mende Abusu laga hene.

<sup>6</sup> Ai Madadiasa ibugua handalu hearia wali agalime Yuda dindi bibahendenibi Yarusalemenibi tigua Ngode Datagaliwabenaga bi mana lo wini ngago bibahendeore puguai lalu heago hondowa ibugua lalu, <sup>7</sup> Ainde mbirale ko ayu íbu ngaruni hondoliya í aiyahanda í aginaga taba henenedabe. Ainde Ngode Datagaliwabenaga tano loma biahe wiago bo gialahole biai hene wialu wali agali í damene bu heneru bibahende homai hayago ini deme hendedogoni. Ai horo tano ogoni waitigi heago mo miyangi wali agalime de hangu handaya ho bereagola agali tara tagira howa ibini biarume Ngode Datagaliwabenaga anda kago ti karulalu handaya ho kagonida.

<sup>8</sup> Agali mini nawi daga nawi mbira kaligobi Anduane Homogonaga anda biago mo ko lalu mo ngubia hene kagonida.

<sup>9</sup> Mbirale lotunaga biabe biaga wiaru bibahende waitigime mo yu piaiore hayagonida. Waneigini bu hearu tano gibuni wiagoha bo wahi haya. Igiri daliahe hearu wai biagane ayu tibu nene gadele ngagome dabalulu bo wahi haya.

<sup>10</sup> Ainde ayu wali agali dindi tara tara wiaruha howa Isaraelenaga tano wiaruha íbu hai howa tinaga mbirale wiaru mo pagebu yai haragonida.

<sup>11</sup> Tanonaga yári tara tara wiaru bo giallo yai haya. Ayu ibuha mbirale mbira nawi bameore garabaya biabe bia haga agali hagagobi nga. Ani bialu ibuni hameledago bilo golope hene ndo nga.

<sup>12</sup> Anduane Homogonaga anda baya taraore kago de handa. Bamba ibu inanaga yári biahe taraore mbira hayago ai ayu agali tara bu hearume ibalu bo gialohole binigo ibuha mbirale bayale lenego mbira nawi bameore ngagoni ndobe.

<sup>13</sup> Ainde inabi homai holene ngago nahome ibagabu kemago agua buleda, lene.

<sup>14</sup> Ai Madadiasa lalu ibu iginiru tinaga miniha genda timbuni yu howa tinaga aga bu hearu minu lerelai lalu dara ho howa karu lagane aga ko wiaru karu lo howa dugu bialu hene.

<sup>15</sup> Ainde kininaga biabe biaga agali haguane wali agalime Ngode Datagaliwabe erembira mialu helo mo bia haga bu hearume Modeini tanoha wali agali bu hearume mbirale bi pupu wiaga gime wabini wiagohondo bi pupu wilo mo bia hole ibini.

<sup>16</sup> Isaraele wali agali dewaore agali haguane uruni heba mandagi heagola Madadiasa hangu ibu dameneru heba mandagi gibuniha hene. <sup>17</sup> Ani heagola agali haguane kininaga biabe biaga biarume Madadiasahondo hale lalu lalu, í agali tano ogonaga haguane howa ogoha mini lene timbuni mbira í kegoni. Ani kegola í igini bu karubi í damene bu karu tibi nde í talima ibaga kagoni. <sup>18</sup> Ai ina kininaga bi ledago talialu ho bamba howa bialu ha nabi kego agibe. Wali agali tara tara bu karume Yuda wali agali heba maru Yarusalemeha karubi tigua taluwa bialu kago. Ainde inabi ogonidagua bialu

hariyagua nde ínibi í iginibi tí mini kininaga nenege laga karu aria dege holeberemi. Ani howa ti mini lene timbuni howa muni silibabi ngolobi yári tara tarabi bame mo turu halu ngulebira, lene.

<sup>19</sup> Ani layagola Madadiasa ibugua hongo howa bi ladai bialu lalu, Wali agali bibahendeore dindi bibahende kini ibugua handaya ho kagotha bu karume ti mamalinaga bi pupu wiaga mana ngaru wahai halu kininaga mana ngago talialu hai heaguabi ina anidagua bulene nawiore. <sup>20</sup> Inibi iginini bu karubi í damene bu karubi ina bibahendeore Ngode Datagaliwabehanda habo nalolene bi inanaga mamaliru baba lo winigo hongo howa yu haabo holeberema. <sup>21</sup> Heneneore gi dolalu larogo iname Ngode Datagaliwabenaga bi mo wahalu polenebi mana lo wini ngago pugualu polenebi nawiore. <sup>22</sup> Iname kininaga bi hale naholeberema. Ani bialu inanaga lotu laga ngago mo aribia naholeberema ndobe, lene.

<sup>23</sup> Madadiasa ibugua bi ogoni lai hayagola Yuda agali mbirame wali agalinaga deni heyu howa mbirale dama mitangi bialu bi pupu wiaga gime wabini wiagonaga lomabu delaga dabu wiagoria heyu howa lomabu mule bialu hene. <sup>24</sup> Ani biyago Madadiasa ibu de hondowa ibunaga miniha tandaga timbuniore ira hunguale bialu tingini bibahende durula gimbu bini. Ani biyagola abale pogolalu pua agali lomabu delole bialu hayago ayu tibume gaibu dibuwa lomabu delaga dabu ibuni hayagoria ngelene. <sup>25</sup> Ani buwa kininaga biabe biaga agali haguane wali agalihondo loma ogoniale bu deladaba lowa bi lalu hayagobi o heagoriani heaore abale tibume burulaki ho ngelene. Ani buwa bi pupu wiaganaga lomabu delaga dabu bu heleagobi bo gialo wahai hene. <sup>26</sup> Ainde Madadiasa ibugua o biyadagoni Ngode Datagaliwabenaga bi mana lo wini ngago yu tiga ogobi bido lalu mo walia hene. Bambaore Piniasahanda Salu iginini Simiri ogonidagua dege bialu bo wahene.✠

*Madadiasahanda waitigi bu hearu baba wai binigo ogo*

<sup>27</sup> Ani bialu Madadiasa ibu hariga pugu biagoha pialu howa bi ladaga halu lalu, Wali agali maru Anduane Homogonaga bi mana lo ngago mitangi bu haabo howa ibunaga habo nalolene bi lo ngago talialu haga kemiru tí ayu ogoni í talima ibidaba, lene. <sup>28</sup> Ani lalu Madadiasa halu ibu iginini biaru tinaga mbirale wiyadaru bibahende tanoha ngelalu tini hari bare wiagoha ha do hole ibida pene.

<sup>29</sup> Horo ogoni Isaraele wali agali dewaore Ngode Datagaliwabenaga mana ngago talialu hole hame lene. <sup>30</sup> Ai tí genda tandagala dewaore yu henegome ai tinaga walibi waneiginibi tinaga nogo bulumagarubi dabudabu wiarubi mo yai halu dindi ko wali agali nahaga wiagoha hole pene. <sup>31</sup> Ani peaha ami haru hagabi ami agalibi Yarusaleme Debidinaga tano wiagoha anda hongohe biagoha hayaru ti hale halu hearia wali agalime kininaga bi mo wahalu tini ha do hole ibida piya layago hale hene. <sup>32</sup> Ani hale halu ami agali dewaore wali agali uruni haruru talima pene. Pialu wai Sabada horongi bulenaga ti heago hondowa tinaga deni balai anda abale bini.✠ <sup>33</sup> Ami agali haru haga agali haguane bu hearume Isaraele wali agali bu hearuhondo laamu halu lalu, Ayu ogoni tinaga henge emeneore ngagonigo ainde tí ha do harimidagoha howa tagira ibalu kininaga mana ngago talialu harimiyagua nde tí homolene nawulebira, lalu laamu hene.

<sup>34</sup> Ani layagola wali agali biarume ladai bialu lalu, Ndo ina naibuleberema. Kininaga bi ogoni hale naholeberema. Ani bialu Sabada horo mana ngago napuguleberema, lene.

<sup>35</sup> Ani laya handala ami agali biarume wai abale tungulope halu pene. <sup>36</sup> Anigo ainde Yuda wali agali tigua wai biadai nabini. Tigua ege tole wiarume dugualu bolenebi tinaga bira do hagane wiago hagira bulenebi bibahende nabiore bame handaya ho hai hene. <sup>37</sup> Ani howa tigua lalu, Karulapego ina homolomaya waha. Inaha ko bini nawi bameore hene kemago bame bo waharamigo mana ko timbuniore beremi. Ai ko birimi

lalu latagi holene dindi ngagola dahuliya andagala libu ngagoni ndobe, lene. <sup>38</sup> Ainde waitigi biarume Sabada horongi wai bini. Ani buwa tigua wali agalibi waneiginibi bibahende daosini mbira (1,000) homelo bo wahai halu tinaga nogo bulumaga bu hearu heba bo wahai hene.

<sup>39</sup> Ai te Madadiasa halu ibu damene biaru ti hale howa dara timbuni hene. <sup>40</sup> Ani howa ai tini dege bi la la bialu lalu, Ina damene urunime biyadadagua nabimiya. Tigua waitigi baba wai bialu badai nabiyadagome tininaga holenebi mana lo wini ngagobi kirabali yu wahai hayada. Ainde inamebi ogonidagua dege birimayagua nde ina damene lenego mbira dindini nahe hameigini mbirago erebaore holobada, lene. <sup>41</sup> Ani lalu horo ogonigi dege tigua bi pongo wialu lalu, Ai waitigime ina baba wai Sabada horongi biyagua nde inamebi wai biadai bimiya. Inabi nde ina damene maru tinaga ha do haga wiagoha homayadagua dege homoligo wai biadai bimiya, lene.

<sup>42</sup> Ai Isaraeleali agali wai biaga hongohe pari wayali Hasidi hameigini laga heneru ibalu Madadiasa heba hatago hene. Ainde Ngode Datagaliwabenaga mana lo wini ngago baba waitigi ho karu baba wai bulenaga ibini. <sup>43</sup> Ani bialu Isaraeleali abale ibida pialu ha do ho heneru ibalu Madadiasanaga ami heagoha hatago hai hene. <sup>44</sup> Agali uruni hatago hayagola ami agali hongohe mbira tagira pene. Ani howa tigua Isaraele agali mana pugualu piaga biaru baba keba ndo howa ti baba wai bini. Isaraele agali ko uruni aria maru ibida pora bialu puwa wali agali Anduane Homogo mitangi nahaga bu hearu baba pu hene. <sup>45</sup> Ai Madadiasa halu ibu nenege agali biarume dama mitangi bialu gime wabini bi pupu wiaga biarunaga lomabu delaga dabu bu helearu bibahende bo gialo wahai hene. Tigua Isaraele igiri emene ngola haga biyaru minu yania howa <sup>46</sup> tinaga dongone abale poda mabu nabi heneyagua tigua podaga bini. <sup>47</sup> Tinaga waitigi mine haga biaru bama talima pialu ai wai bayaleore bialu hene. <sup>48</sup> Tigua agali haguane bu hearumebi agali kini hearumebi Anduane Homogonaga bi mana Mosesehanda lo wini ngago tigua mo nagalone howa pugualu helo hame nale hene. Ani howa tigua agali mana ko biaga bu hearunaga hongo bope hai hene.

### *Madadiasa homenego ogo*

<sup>49</sup> Ai Madadiasa ibu homole biruwa ibu iginiruhondo lamialu lalu, Mine holene mana hongoheore tagira ibalu ina bibahendeore bahandai haya. Ayu kemagoni genda timbuni bu nganggi kema. <sup>50</sup> Anigo ti i igini bu kemiru tigua Anduane Homogonaga bi mana lo ngago hongo howa yu halu tigua Ngode Datagaliwabenaga habo nalolene bi ina mamaliru baba lo wini ngago hongo howa talialu kemigonaga harugo lowa homole manda manda bu haabo halimu. <sup>51</sup> Ina mamaliru ti dindi ogoria heangi howa bialu henerubi biabe tigua bialu hene ngarubi baya hangu mitangi bialu halimu. Baya hanguore talialu halimu. Ani bialu kemigola tinaga mini yaragaore hene timbuni howa mani holobadarume tinaga mini manda biaho haiore holebira. <sup>52</sup> Abarahama henego mitangi bilimu. Ibugua Ngode Datagaliwabehondo mini mbiraore hongohebi henego ai Ngode Datagaliwabehanda ibu bahandayanggi ibu pi nale hene. Ani heagola Ngode Datagaliwabehanda ibu agali tigabiore ka lene.✧ <sup>53</sup> Ani bialu Yosebe ibu nde genda ibuha anda ibiyangi ibu Ngode Datagaliwabenaga mana baya hanguore talialu heagome ibu Iyibi dindiha agali haguane hene.✧ <sup>54</sup> Inanaga mamali Piniasa ibugua nde lotu mana baya hanguore hongo howa talialu heagola Ngode Datagaliwabehanda ibu damene hangume Anduane Homogonaga loma binigo mo miaga haabobo holebira, lalu lamini. <sup>55</sup> Yosua ibugua Mosesenaga mana wiago hongo howa yu heagome ibu Isaraele wali agalinaga agali haguane hene.✧ <sup>56</sup> Kalebehanda dindi hondo wialu dai buwa dindi ogobi wia lalu te lama dai biyagome dindi timbuni mbira ibu yolo ale tigua ibu tu wa mini. <sup>57</sup> Debidi ibu dindi Ngode Datagaliwabenaga nenegeore heagome Ngode Datagaliwabehanda ibuhondo bi lo wialu lalu ibu damene hangume kini haabo

✧ 2:52: Pig 15.16, 22.15-18 ✧ 2:53: Pig 39.1-45.28 ✧ 2:55: Dag 13.1-14.12



holebira lalu bi lo wini. <sup>58</sup> Elayahanda Ngode Datagaliwabenaga bi mana lo wiago hongo howa yu haabo henegome Ngode Datagaliwabehanda ibu mo yalu dahuliya andagaha pene. <sup>59</sup> Agali tebirali Hananiabi Asariabi Misaelebi ira timbuni de agotha bo delearia Ngode Datagaliwabehanda tigua ibuhondo mini mbiraore hongohe wua heago hondowa ibugua ti dugu eda halu pelene. <sup>60</sup> Daniele ibu agali bayale tigabiore heago hondowa laiono hearume balu nelu Anduane Homogohanda ibu yupe nahene. <sup>61</sup> Tigua ina mamalirunaga mana bayale bialu hene uruni baya hangu mitangi bialu mana uruni baya hangu mo yalimu. Mbirali ibu Ngode Datagaliwabehondo mini mbiraore wua haga heagua nde ibu pi nalaga. <sup>62</sup> Agali ko karunaga bi hongohe lalu kago hondowa ti gi nahalimu. Tinibi homalu tinaga dabudabu baya tara tara mo ngoaiho kago ereba hai haga ngago manda bilimu. Ani howa mani tinaga tingini dindiha padagola ngoe bedaru tinaga tomo holebira ndobe. <sup>63</sup> Heneneore ayu ti mini lene timbuni bu karunigo ainde yawi ti dindi ogoria naholebira. Tinaga tingini dindiha poragola mbirale tigua bule manda bu hayaruni tini heba mandagi ereba hamaga holebira. <sup>64</sup> Anigo i igini kemiru ti Ngode Datagaliwabenaga bi mana lo ngagome agali mini lene helaga ngago manda buwa ti Ngode Datagaliwabenaga bi mana ogoniha hongo mialu halimu.

<sup>65</sup> Ti hamene Saimono kago ibu agali manda timbunibi ka. Ani kago manda bialu ibu ti aba haradagua helo tigua ibunaga bi larago hale halimu. <sup>66</sup> Yudas Magabeusu ibu wene igiri emene heangi howa ibu agali hongohe henego ka. Ani kago manda bialu ina ibu tinaga agali haguane helo dabo helarogo ibugua ti haru halu wai bamba holebira. <sup>67</sup> Agali Ngode Datagaliwabenaga mana ngago baya hangu talialu haga bu karu olalu ti heba mandagi mo ngoai ho halimu. <sup>68</sup> Wali agali tara tara Anduane Homogo mitangi nahaga bu hearume inahondo mana ko biyaru mitangi bialu pani migi bilimu. Ani bialu Anduane Homogonaga bi mana lo wini ngago baya hangu talialu haabo halimu, lene.

<sup>69</sup> Ai Madadiasa ibugua ibu iginiru Anduane Homogohanda mo bayale helo bi lalu ibu homene. <sup>70</sup> Mali handari mbira pira mariani waragoria (146) layagola ibu homene. Homayagola ibunaga tingini ibu mamalirunaga homali Modeini tanoha heagoha hora hene. Ainde Isaraele wali agalime dara timbuni howa dugu bialu howa hora hene.

## **Yudas Magabeusuhanda wai haru bamba haga hene.**

*(Be 3.1-9.22)*

### **3**

*Yudasahanda wai maru bialu bo podahana haga binigo ogo  
(2 Magabi 8.1-7)*

<sup>1</sup> Yudas Magabeusuhanda ibu aba Madadiasanaga henge mialu ibu aba henedagoria ho aribia hene. <sup>2</sup> Ani heagola ibu hamene bu hearumebi wali agali ibu aba heba mandagi haga bu hearumebi bibahende mo mogo bu howa ibu biamogo bialu hene. Ani bu howa tigua Isaraelenaga wai bu winigo tigua bu gilila mialu wai bule manda bini.

<sup>3</sup> Yudas ibugua bialu heagome ibunaga wali agali bibahende mini lene hene. Iibunaga yari wai pole karulaga wiaru mo karulowa agali timbuniore haradagua hene. Ibugua danda timu yandarerume waitigi bu karu bo wahaiore haga hene. Ibugua ayu tibu wai biaga ngago giha yu howa ibu damene bu karunaga dindi anda bu kago mamage ibuni haga hene.

<sup>4</sup> Ibu laiono gabua hongohe hagadagua howa nogo meme sibiru balu nole hame lalu haabo hagagobi hene.

<sup>5</sup> Ibugua wali agali Ngode Datagaliwabenaga mana mo wahalu pene karu taya bima ibaga bialu haabo haga hene. Ani bialu wali agali marume ibu aria heneru balu iraha bo heda haga hearu baya hangu taya bialu haga hene.

<sup>6</sup> Agali ko bu hearume ibu hondowa gi halu tini mbirani mo mogo bu biruwa duru lalu haga wini. Anigo ainde agali ko biaga uruni mbira ibida palene henge nawioreni hene. Ainde Yudasahanda wali agali golope hene bayale helonaga biabe bayale ogonidagua bialu hene.

<sup>7</sup> Ibugua kini dewaorenaga miniha mo tandaga halu haga hene. Anigo ibugua Isaraele wali agali mo turu halu haga heagome Isaraele tigua ibu mo turu haluibunaga mini yaraga halu haga hene.

<sup>8</sup> Ibugua Yuda dindiha tano wiaru bibahende ha ibaga biai halu wali agali ko biaga bu hearu bo wahai hene. Isaraele dindini genda timbuni bu wiaru bibahende mo wahaiore hene.

<sup>9</sup> Ibugua mini timbuni mo yaraga hene dindi wiaru bibahende ha wali agali bu hearume hale hai hene howa ibugua wali agali pu ereba holene hearu haru dai bialu hene.

<sup>10</sup> Ani bialu heagola Aboloniushanda ami agali dewaore Ngode Datagaliwabe mitangi nahaga bu hearubi Samaria agali bu hearubi bibahende ore haru halu Isaraele baba wai bule ibini. <sup>11</sup> Ani ibira layago Yudas ibu hale halu ibugua Aboloniushala wai bule abale puwa ibugua ti bogo hana hai halu Aboloniushubi homelo bo wahalu bini. Waitigi agali uruni aria maru homai haya handala maru ti ibida piai hene. <sup>12</sup> Tigua wai biai halu waitigi bo wahene wiarunaga mbirale wiaru mo ngoai halu howa Aboloniushunaga ayu tibu wai biaga wiago Yudas ibu mo yini. Ani mo yuwa ibu yu haabo halu homalu wahene.

<sup>13</sup> Ai Yudasahanda ami agali dewaore haru ka layago Sirianaga ami agali haguane mbira mini Serono heago ibu hale hene. Ti Ngode Datagaliwabe hondo mini mbira ore hongohewi howa ti wai baya hangu hongo howa biaga agali hongohewe ka layane hale hene. <sup>14</sup> Ani layago hale howa Serono ibugua mitangi bialu agali kininaga bi mo wahaga Yudasahanda ami uruni baba wai bialu bo wahai holiya. Ani buwa dindi bibahende kini ibugua hendene ngaruha i mini yaraga hene timbuniore holiya lo mitangi bini. <sup>15</sup> Ani bialu ibugua Yudasala wai bule piyagola Yuda agali ko bu hearume ami agali Isaraele baba wai bule ibiyaru biamogo bialu wai Isaraele baba bule pene. <sup>16</sup> Ani puwa ti hariga Bedehorononaga hari bare wiago iralu daulene hari bare wiagoria ibalu heaore Yudas haluibunaga ami agali emene dege daga lene hearume abale Serono haluibunaga ami agalidaruni ngola hole pene. <sup>17</sup> Ani puwa handalu hemiria ami agali dagalabe naheore ibiyago hondowa tigua Yudasahondo lalu, Ainde inanaga ami agali emene dege kemagonime ami agali dewaore ibirago bope agua holedabe. Ani bialubi ina horo ayu hina tomo nane kemagome ina hongo nahe kemagoni ndobe, lene.

<sup>18</sup> Ani hale hayagola Yudasahanda tihondo ladai bialu lalu, Emene hangume ami agali dewaore kago bope holene erekuibi ndo nga. Ami agali dewaore heaguabi emene hangu heaguabi Ngode Datagaliwabenaga deni ogobi degedege holebira. <sup>19</sup> Wai beremagola ami agali dewaore kagome ndo wayali holene nga. Ani ndo ami agali Ngode Datagaliwabenaga minini hongo ho howa birago ibu wayali holene nga. <sup>20</sup> Waitigi uruni ti mine haga howa mana ko dewa bialu hagabi howa ai ina baba wai bule ibira. Tigua inanaga wali waneigini biru karu bo wahai halu inanaga dabudabu tara tara bayale ngemaru mo yu polenaga ibulebira. <sup>21</sup> Ani biragola iname nde inanaga dindi ngagonagabi inanaga yutiga bu haga mana ngagonagabi wai buleberema. <sup>22</sup> Anidagua beremagola Ngode Datagaliwabe handa inanaga waitigi bu karu bo wahaiore holebirago iname gi nahe wai hongo howa bimija.

<sup>23</sup> Ai Yudasahanda bi ogoni lai halu abale pora bialu Serono haluibunaga ami agaliru baba wai bule pene. <sup>24</sup> Ani puwa Isaraele tigua waitigi biaru Bedehorono hari

bare wiagoria howa bama talima pialu dindi ulini tigabi wiagoria talima tagira pene. Anidagua bialu tigua waitigi uruni handari halira (800) bibahende bo wahai hayagola maru pora bialu Pilidia dindiha piai hene. <sup>25</sup> Anidagua biya layago hale howa Ngode Datagaliwabe manda nabiaga bu hearu bibahendeme Yudasaha halu ibu hameneru gi timbuni ho hene. <sup>26</sup> Yudasahanda galone timbuni uruni bialu ka layago kinimebi hale hene. Wali agali dindi tara tara wiaruha bi tara tara laga bu hearumebi Yudasahanda waitigi karu bo podahana halu wayali haga lalu te layago lai hene.

*Kini ibugua Lisiasa gabumane agali haguane helo dabo helenego ogo*

<sup>27</sup> Ai Kini Andiogusu ibugua mbirale Yudasahanda bialu ka layago te hale howa ibu tandaga timbuni hene. Ani howa dindi ibugua haru howa handaya ho hene wiaruha ami agali hearu bibahende olomogo biai howa ami agali dewa daga labe naheore hene. <sup>28</sup> Ani heagola kini ibunaga muni anda heago panga duguwa ami agali biaru bibahende mali mbiranaga karulape yolo miami hene. Ani mialu ibugua tihondo lalu, Wai bule manda manda bu haabo halimu, lalu lamini. <sup>29</sup> Anidagua buwa handalu hearia ibunaga muni bibahende biba holene tiga bialu dagisi munibi tubagi hene. Anidagua binidagoni irane ibunaga mana abale wiagadago mo iriari bialu mana wabu aribia hayagome genda timbuni ogoni dindi bibahendeni tagira ibai hene. <sup>30</sup> Anidagua biyagola abale bini ngadagua ibunaga muni biba holilo manda bini. Ani tubagi haragola ibugua mbirale gahenge munime yolo bulenebi mbirale tara tara bayale muni dewaoreme miaga ngaru wali agali mo turu halu migi biagadagua nabulubada lo manda bu hene. Ibugua wali agalinaga gubalini ba mialu ibuha hatago helo mbirale bame ta hagamome kini maru karubi ndo ibu daliga bolangua hene mbira hene. <sup>31</sup> Ibugua bu miniha genda wiagome mo heya hayagola mini burugu timbuni lo howa ainde ibugua agali dewa lone mo mogo bulene manda buwa ai Pesia dindiha dagisi muni mo palene manda bini.

<sup>32</sup> Andiogusu ibugua agali mbira ibuni damene dege agali haguane mini Lisiasa heago dindi bibahende iba Yuberedisi poragola Iyibi dindila hengeneha wiaru handame ho howa gabumane haguane helo dabo helene. <sup>33</sup> Ai kini ibu Pesia dindiha pole howa ibugua Lisiasahanda kini igini Andiogusu bayale halu dai bilo handaya ho habe lalu dabo helene. <sup>34</sup> Ibugua Lisiasahanda ibunaga ami agali nogo elepana heba kagohayagi haru howa handaya ho helo dabo helene. Mbirale ogoale bibe lalu bi baya hanguore lamiai hene. <sup>35</sup> Ani bialu Yudia dindihabi Yarusalemebi pialu wai buwa dindi anda bo heda hai halu bo gialo wahai habe lalu Lisiasa lamini. Wali agali dindi bibahendeha bu karume Isaraele wali agali Yarusaleme wali agalibi mbira hene lo manda nabi embeda ho wahai helo bo hilo wahaiore habe lene. <sup>36</sup> Ani lowa tinaga dindi ngagoria wali agali tara tara bu karu haru puwa dindi ogoriani ho aribia helo tuwia ta hai habe lalu kini ibugua Lisiasa lamini. <sup>37</sup> Ani lalu kini ibugua ami agali halu mende hearu haru halu dindi dunini timbuni Andiogo tano wiagoria howa pene. Mali ogoni handari mbira pira mariani karia (147) layagola tagira pene. Iba Yuberedisi peago domalu Pesia dindiha pole pene.

*Yudasahanda wai bialu wayali haga binigo ogo  
(2 Magabi 8.8-29, 8.34-36)*

<sup>38</sup> Lisiasa ibugua agali maru ami agali haru helonaga Dorimenese igini Tolemibi Niganobi Gogiasabi tigua haru helo dabene. Agali tebirali ami agali wai biaga pari wayaliru howa ti mini Kininaga Nenege laga hene. <sup>39</sup> Ti mbira mbirame ami agali daosini dege pira maria (40,000) geni ibaga bialu wai biaga daosini karia (7,000) nogo hosi erekunini biruwa wai biagaru haru haga haga biaga hene. Ani mo taho helowa Lisiasa ibugua ami agali urunihondo lamialu Yudia dindi bibahendehabi Yarusaleme tano ngagoriabi anda pugu bialu kinihanda bilimu lalu langiyadagua bibahendeore bo

hilo wahai hole pudaba lalu lamini. <sup>40</sup> Ani laya handala tigua abale pialu dindi tigabi bayale Emaiasa tano kaware dindi wiagoria balai anda bini. <sup>41</sup> Ani bialu ami agali tidi mbira Idumia howa tidi mende Pilidia howala ibalu hatago hene. Agali biyinaya biaga tano kaware haparapara hearu tigua hale halu hearia ami agali wai biaga hongo gibihe ogoni ibira layago hale howa tigua lo manda bialu ami agali hongohe urunime ibalu Isaraele bo podahana halu maru garabaya biabe ale biaga helo muni taguirangi tigua maru yolo bule manda bu hai hene. Ani howa tigua muni siliba ngolobi dewaore hanalu wali agali hendeho yalu polenenaga senipubi yalu ami agali balai anda bu heagoria ibu dege bini.

<sup>42</sup> Ai Yudasa halu ibu damene bu hearu tigua handalu hemiria balai anda ti daluha biyagola ai tiha mo ko holene waitigi abale anda ibiyadalo manda biai hene. Ani bialu kinihanda lalu, Isaraele wali agali bibahendeore bo hilo wahai halimu, laluibunaga ami agali hearu lamiya layago ti hale ho dege hene. <sup>43</sup> Ani hale ho howa ai Isaraele wali agalinaga mini mo hongo halu tinaga dindibi Anduane Homogonaga anda kagobi wai hongo howa bimija lalu hongo ho hai hene. <sup>44</sup> Ai wali agali bibahende ibu ngoai ho howa wai bule manda manda bialu Ngode Datagaliwabehondo ti dara howa biamogo bibe lalu ibuhondo bi lalu hene.

<sup>45</sup> Yarusaleme tanoha bame dindi hangu wini. Wali agali mbira hamani puibu nabioire wini. Agali Ngode Datagaliwabe mitangi nahaga hearume anda hongohe hearu ti mo wialu tigua ta nabi Anduane Homogonaga anda hamelo howa anda mebia halu biya. Isaraele wali agalinaga lone turu ho holene nawini. Ani bialu ngidaru balu iba gana baya laga winiru ereba hene.

<sup>46</sup> Ai Yudasa haluibunaga ami agali biaru tigua Yarusaleme abene be tagiraha bamba tinaga mamali Isaraelerume lotu laga dindi mini Misiba wiagoria mo ngoai ho hene. <sup>47</sup> Tigua horo mbira tomo nane hai halu dara ho howa karulagane aga ko wiago mo karulalu be abalu tinaga emboneni dugu wialu tininaga aga bayale biaru lerelo wahai halu bini. <sup>48</sup> Ainde wali agali Anduane Homogo mitangi nahaga bu karu tigua mbirale mbira bule howa tinaga bi pupu wule gime wabini wiagohondo hale haga wini. Anigo Isaraele wali agali tigua bi mana gilibuwi mbuga ngago anga lowa Ngode Datagaliwabenaga hame ngago hale haga nga.\* <sup>49</sup> Tigua agali loma binigo mo miaga bu karunaga aga karulaga ngaru yalu ibalu widi lomabi yu ibalu mbirale ngarunaga pini lomabu mulenebi yalu ibugu biaga nga. Ani bialu agali maru tinaga bule lalu bi lo winigo biaiore hene mini Nasa laga kago ibu lalu biaga hene. <sup>50</sup> Ani buwa tigua Anduane Homogohondo bi lalu, Ngode Datagaliwabe-o iname Nasa o karuhondo agua beremabe. Ani bialu mbirale o ngelo kemaru agua beremabe. <sup>51</sup> Agali bu hearume inaga anda mo ko halu mebia hayagola ayu mebia hene ko dodohe kagoni ndobe. Ani bialu inaga agali loma binigo mo miaga biaru ti dara timbuni howa tinaga nawioire bame bu kagoni ndobe. <sup>52</sup> Agali tara Anduane Homogo mitangi nahaga bu hearume ina balu bo bibaore holenaga ina baba wai bule ibira. Inaha ogoale bule ibira lalu ini manda bide. <sup>53</sup> Ainde inime ina biamogo nabiriyagua nde inanenaga hongome heyu holene karulape kemabe, lene. <sup>54</sup> Ani lalu tigua pilipe hongo howa pulalu wai huaru hongo howa ladagadaga bini.

<sup>55</sup> Ani bialu maha Yudasa ibugua ami agali biaru mo tale bigi buwa tidiyu haga haga bilene tidi yu haga haga biyadagua maru pinali (10) halu maru pira duria (50) halu maru handari mbira (100) halu maru daosini mbira (1,000) halu buwa ona tidiyu haga haga bilene. Ani buwa ti haru bamba holene agali maru tidi mbira mbira headagua mo taho helene. <sup>56</sup> Ani helowa ai mana mbuga wiagoha howa bi leadagua bialu agali anda gahenge bu dangila halu ibiyarubi wali aidege daubu berelalu ibiyarubi pu mbira lini

\* **3:48:** Ai Isaraele wali agali horo ogoningi henedaru tigua Anduane Homogonaga hame ngago hale holenaga tigua mbuga anga lowa bi gilibu ngago daga laga hene.

daga mini gerebi mabu aidege hangalu ibiyarubi maru wai pole gi hayarubi bibahende dai bidaba lene. <sup>57</sup> Ani bialu ibunaga ami agali uruni Emaiasa tano wiagonaga gibuni mbira unurahayagi balai anda bialu hene. <sup>58</sup> Ani bialu Yudasa ibugua ibunaga ami agali biaruhondo lamialu lalu, Aiore tigua agali Anduane Homogo mitangi nahaga bu karu baba wai bule manda manda bu halimu. Tigua Anduane Homogonaga anda bo gialo wahai halu inanebi mbira wanahe bibahende bo wahaiore hole ibu ka. <sup>59</sup> Ina bame howa ti birago de handaga bu kemaria inanaga dindibi Anduane Homogonaga anda kagobi bo gialo haecalabagabu wahai holigo wai beremagola ina waiha homolene karulape nga. <sup>60</sup> Anigo ainde Ngode Datagaliwabehanda ibunime hame ledadagua bulebira, lene.

## 4

### *Emaiasa tanoni wai binigo ogo*

<sup>1</sup> Gogiasa ibugua ami agali daosini dege duria (5,000) geni pialu wai biaga halu daosini mbira (1,000) nogo hosini biruwa wai biaga henego ai tigua tinaga balai anda bu hayagoria howa mbira tagira pene. <sup>2</sup> Agali maru Yarusalemeni anda hongohe biagoha mamage haga hearume ti hariga walia hene. Gogiasa ibugua Yuda ami kagoria mbiraga anda puwa wai mbiraga bu manda bini. <sup>3</sup> Ani bira layago Yudasa ibu abale hale ho bolangua halu ibugua ami agali haru halu Emaiasa tano wiagoria puwa kininaga ami biaru baba wai bialu hene. <sup>4</sup> Ogoningi Gogiasa halu ibunaga ami agali biaru kaundiaha heagola bialu hene. <sup>5</sup> Ai Gogiasa halu ibunaga ami agali biaru Yuda ami anda bu henedagoria anda pialu hemiria mbirali mbira naheoreyane hendene. Ai Yudasa halu ibunaga ami agaliru ibida piyabe toba howa ai hari bare wiaruha taya bima pene.

<sup>6</sup> Egerebagi gaolalu biyagola Yudasa halu ibunaga ami agali daosini tebira biaru hama tigabi wiagoria pu hene. Ani bialu ti dewali wai pialu karulagane agabi wai biagane ayu tibubi nawi hene. <sup>7</sup> Ai waitiginaga balai anda buwa ti haga wiago hongoheore mbira wiaria hendene. Agali ami nogo hosini biruwa wai biaga hearume ti daluha mamage ho hearia hendene. <sup>8</sup> Ani hondowa Yudasahanda ibunaga ami agali biaruhondo lamialu lalu, Tinaga ami agali timbuni dewaore bu karia handa hendedemigonigo ai tigua mogo nale halimu. Tigua porabupe halu wai birangi ti gi naheore elaho halimu. <sup>9</sup> Baya hangu mitangi bidaba. Bamba Iyibi kini heagome ibunaga ami agali haru halu ina mamaliru talima iba solowara mini Daramabi laga wiagoria ibiyagola Ngode Datagaliwabehanda ti mo wialu biamogo bini. <sup>10</sup> Ayu nde Ngode Datagaliwabehanda ina dara halu biamogo bilonaga ibu olama. Bamba ina mamaliru baba habo nalolene bi lo wiyago lone mitangi bu dai bialu iname wai hamani porabupe halu wai beremangi ibugua waitigi bame hingedopaya bilo iname ibuhondo bi lama. <sup>11</sup> Anidagua birago wali agali tara tara bu karu ti de hondowa Isaraele wali agalinaga Ngode Datagaliwabe mbiraore ogoni ibu hangu heneore howa ibunaga wali agaliru mo wialu baya hangu handaya ho haga ka lolebira, lene.

<sup>12</sup> Waitigi agali biarume Yudasa halu ibunaga ami agali biaru ibiyago de hondowa <sup>13-14</sup> tiguabi nde wai bule tinaga anda bu heagoria howa tagira ibini. Ai Yudasa halu ibunaga ami agali biarume wai bulenaga pilipe ale mini biguli pu layagola tigua pora bialu wai bini. Ani biyagola waitigi biarume ti ho gilgalalo howa ibida dindi tigabi bayale wiagoria piyai hene. <sup>15</sup> Ani pialu heaore dege maru gerai nale ha layaru Isaraele tigua minalu bogai hene. Ani bialu Isaraele tigua bama talima piaho wialu Gese tano pialu Idumia dindihayagi dindi tigabi wiagoha piaho wialu Asadodo tanobi Yabane tanobi wahalu talima pu dege bialu waitigi bo wahai henego daosini tebira (3,000) bibahende bo wahai hene.

✧ 3:56: Man 20.5-8, Hgn 7.3



<sup>16</sup> Ai Yudasa halu ibunaga ami agali biarume waitigi agali biaru talima pugupugu buwa talu wahalu lone dai bini. <sup>17</sup> Ani buwa Yudasahanda ibunaga ami agali biaru lamialu lalu, Iname wai bulene wia dege bidago tígua waitiginaga mbirale ngaru abale mo yule duru nale hadaba. <sup>18</sup> Gogiasa halu ibunaga ami agali weneore hari bare ngagoha kago ai tí hongo ho howa wai biai howa mbirale waitiginaga ngago tíni hame ledemigobi mo yuleberemi, lene. <sup>19</sup> Yudasahanda bi lai hayagola ami agali waitigi aria tidi mbira hari bare wiagoha howa tagira ibalu ibini. <sup>20</sup> Ibuwa handalu hemiria ira hagua timbuni dadaga hayago hondowa tinaga ami bu hearu bo wahai halu tinaga balai anda dai hayada lo manda bini. <sup>21</sup> Anidagua biniyago hondowa ti mogo lalu gi timbuni ho hene. Ani bialu Yudasana ami agali biarume hama bayale dindi tigabi wiagoria wai bule manda manda bu heago hondowa <sup>22</sup> ti ibida pora bialu Pilidia dindi wiagoha yagi piai hene. <sup>23</sup> Ani piya handala Yudasa ibu waitiginaga dabudabu wiaru mo pene. Ibugua muni silibabi ngolobi labolabo daramabi baya tara tarabi maru tara muni dewame yolo biaga wiarubi mo yai hene. <sup>24</sup> Yuda ami biaru tininaga balai anda heagoria dai bialu howa tigua Ngode Datagaliwabenaga mini yaraga halu iba gana lama dai bini. Anidaagua binidago irane Anduane Homogo ibu bayale howa ibunaga dara holene wiaabo haga ngagonaga iba gana lalu ibunaga mini yaraga hene. <sup>25</sup> Horo ogoningi Isaraele wali agali tigua wai bialu hongoheore halu mbiralime bope habe nahe hene.

*Isaraeleme Lisiasanaga ami agali bope halu ti wayali henego ogo*

<sup>26</sup> Ami agali tara ibida piyarume Lisiasa hearia puwa mbirale biyaruni bibahende te lamiai hene. <sup>27</sup> Ai te uruni hale hai howa ai ibunaga ami agali biarume kinihanda bilimu lalu lamiyadagua Isaraele wali agali mbira hangubi wanahe bo hilo wahai halu dindi anda bo labu halimu layadagua nabiyagola Lisiasa ibu mogo lalu miniha genda timbuni hene.

<sup>28</sup> Maha mali mendeni howa Lisiasa ibugua ami agali wai baya hangu bulenenaga tuguli bini bayaleore daosini dege pira waragaria (60,000) dabo helalu nogo hosini biruwa wai bulene daosini dege duria (5,000) helalu buwa ai ibugua Yuda wali agali bo hilo wahaiore holoboda lo manda bini. <sup>29</sup> Ai ami agali uruni tigua heyalu puwa dindi mbira mini Idumia wiagoha Bedesu tano wiagoria balai anda bu hene. Ani heagola Yudasahanda nde ibunaga ami agali daosini pira (10,000) haru halu wai bule ngola ho ibini. <sup>30</sup> Ani ibuwa waitigi ami hearunaga hongo gibiore heago hondowa ibugua Anduane Homogohondo bi lalu, Ngode Datagaliwabe-o iname ínaga mini yaraga holene hame ledema. Ína Isaraele wali agali mo wialu haru dai biagaore ke. Ína agali timbuni hongohe mbira heagonaga hongo agali ínaga biabe bia haga Debidinaga giha howa bope hariya. Ína Solo igini Yonadanala ibunaga agali danda timu ayagu yu ha haga heagola biamogo birigola libugua Pilidia ami hearu bai halu wayali haya.✧  
<sup>31</sup> Ayu anidagua dege ínaga wali agalime waitigi ibirago balu wayali holomaya ínime ina biamogo bibe. Ami agali dewabi tinaga hongo kagobi nogo hosi kagobi uruniha mini hana ho howa mine halu karuni mo taga habe. <sup>32</sup> Ti mo gi halu ibida piai helabe. Tinaga hongo mo gedaore helabe. Iname ti bai halu bo hengedo wahai helabe. <sup>33</sup> Wali agali ínaga mini mandabi karume ínaga mini yaraga halu iba gana lelo wali agali í gubalini ho haga bu karu ti giha howa waitigi uruni bo wahaiore habe, lalu Anduane Homogohondo bi lene.

<sup>34</sup> Ani lalu puwa wai bialu Lisiasanaga ami agali daosini duria (5,000) bibahende bai hene. <sup>35</sup> Ai Lisiasa ibugua handalu hearia ibunaga ami agali biaru hongo ibira hai halu Yudasa halu ibunaga ami agali biaru ti gi naheore waiha homai holeore lalu agali gibiore heago hendene. Ani hea handalu Lisiasa ibugua Andigo dai buwa ami agali

✧ 4:30: 1 Sml 14.1-23, 17.41-54

gahenge dewaore ibu biamogo bilonaga munime yolo bu helene. Ibugua ami agali dewaore haru halu Yudia dindiha wai daibule lo manda bini.

*Isaraele tigua Anduane Homogonaga anda lone mo bayale henego ogo*

<sup>36</sup> Ai Yudasa halu ibu hamene biarume lalu, Ai waitigi biaru bo talu pelai harimago ainde iname Yarusaleme dai buwa Ngode Datagaliwabenaga anda kago ibuninaga deni lone mo bayale halu ibunaga biabe bulene ngago bilo loma bu miadai bimija ma, lene.\*

<sup>37</sup> Ani lalu wali agali ibu ngoai halu hari Saiono nene irigi hene. <sup>38</sup> Puwa handalu hemiria Anduane Homogonaga anda biago bameore hearia hendene. Lomabu delaga dabu mo ko hene ko wiaria hendene. Panga heneru dai halu datani bolaga ko hearu timbuni anda hai halu anda hai biago yuladambi hai halu tano biago embera tegi ko mbira wiaria hendene. Anda biagoha hobane loma binigo mo miaga agalinaga tamu hobane henego bo giallo wahai hene wiaria hendene. <sup>39</sup> Mbirale uruni hondowa wali agalime dara timbuni halu tinaga aga minu lerelai hene. Tigua dugu hongo howa biai halu be abalu tinaga emboneni dugu wigi bini. <sup>40</sup> Ani buwa ti dindini bulupalu wuwa pilipe biguli layuago hale howa ti bibahendeme Ngode Datagaliwabe olai halu hene.

<sup>41</sup> Ai Yudasa ibugua Anduane Homogonaga anda lone mo bayale hole howa ibunaga ami agali marume Siria ami agali maru anda hongohe tini bu helayagoha hearu baba wai bule pudaba, lene. <sup>42</sup> Ani bialu agali loma binigo mo miaga maru mana ko nabiaga howa Anduane Homogonaga bi mana baya hangu talialu haga hearu dabalul <sup>43</sup> anda biago Ngode Datagaliwabenaga deni dodo nahe helo mo bayale helo dabo helene. Ani bialu lomabu delaga dabu bini ege tole Anduane Homogo deni dodohe wiaru mo tagira puwa dindi ko Anduane Homogo deni bayale ndo wiagoha bape haga bini. <sup>44-45</sup> Anigo loma bu delaya dabu kago ibuni agali Anduane Homogo mitangi nabiaga bu hearume mebia halu mo ko hayadago agua bimabe lowa tini bi lala bialu hene. Ani lowa tigua bi lo mbira halu, Ani ngelo kemaria inane taga pani nolene dege ngago mo wahamija lalu bi lo mbira hene. Ani lo mbira howa tigua Anduane Homogonaga lomabu delaga dabu ogoni gialalu <sup>46</sup> ege tole dabu ogoni bini ngago mo mogobu yalu puwa hari bare Anduane Homogonaga anda ogoni kago erembira handabe nahe ngagoha mo do hamija. Ege tole uruni ogoniha ngelo haabo howa agali Anduane Homogonaga bi mana latagi haga mbira ibalu ege tole uruni ogoale bidaba laradagua bimija ngelama, lowa ani wini. <sup>47</sup> Ani bialu tigua ege tole gahengeru agalime biabe maru bulenaga podala nahe ngago podalu bibe lowa Mosesenaga mana lo ngagome ledadagua tigua gahenge heago podo yuwa Anduane Homogonaga lomabu delaga dabu gahenge ala hayagobi dege bu aribia ho helene. <sup>48</sup> Ani buwa tigua Anduane Homogonaga anda tagiraha tamuhabi mo tiga biai howa dindi anda biago kawareni wiago bibahende Anduane Homogonagaore ngelo mo loma bia hai hene. <sup>49</sup> Lotunaga wiagane ale bibahende gahenge wabu aribia hai hene. Lamu hale delo ngelaga dabubi ira hagua nga bilo inisenesi lomabu delaga dabubi mberedi Ngode Datagaliwabe lomabu minigo mo wiaga dabubi gahenge wabiai howa Ngode Datagaliwabenaga andaha mo yu anda ibai hene. <sup>50</sup> Ani yu anda ibu wiai howa inisenesi lomabu delaga dabu wiagoria ogoni lomabu delalu lamu hale hedo wiaga wiagoria lamu hale hedo wialu biyagola Anduane Homogonaga anda tamuha wa holene hadai bini. <sup>51</sup> Mberedi wiaga tebolo dagia wiagoria mberedi mo wialu labolabo timbuni wiaga wiagoria labolabo ogoni ale dege wia aribia hene. Tigua mbirale urunidagua bialu biabe bulene wiago biai hene.

\* **4:36:** Agali Anduane Homogo mitangi nabiaga hearume ibunaga anda tamuha anda pialu mbirale maname tamuha yu anda napiaga lo wiago mo yu anda pialu bini. Ani bialu mana ko tara tara anda biago tamuha bialu hene. Anidagua bini wiagome Ngode Datagaliwabenaga deni anda dodohe hene. ☆ **4:47:** Har 20.25, Man 27.5-6

<sup>52</sup> Ai mali handari mbira pira mariani haliria (148) layagola ege dini mini Kisilebe-naga horo pira kirani duria (25) layagola<sup>†</sup> <sup>53</sup> tigua egerebahagiore gao layagola abale heyuwa maname ledadagua lomabu delaga dabu gahenge biagoria lomabu delene. <sup>54</sup> Horo abale waitigi Anduane Homogo mitangi nahaga hearume lomabu delaga dabu heago mo dodohe helayago horo ogoni dege tagira ibiyagola Isaraele tigua lomabu delaga dabu ogoni mo loma bia halu iba ganaru lalu ngida balu tabagaru balu iba gana lalu bini. <sup>55</sup> Ainde Anduane Homogohanda ti biamogo biyagola tigua wai buwa tigua waitigi bope halu wayali hayagonaga turu howa wali agali bibahende dindini bulupalu ibira howa Anduane Homogonaga mini yaraga halu ibuhondo lotu lene. <sup>56</sup> Horo halira bibahendeni tigua lotu lalu lomabu delaga dabu ogoni Anduane Homogonaga ngelo mo loma bia halu hene. Tigua turuore halu loma irani dai helolene lomaru yalu ibalu Ngode Datagaliwabela hogimbu bulenaga lomaru yu ibalu Ngode Datagaliwabehondo *ka* lolene lomaru yu ibalu bini. <sup>57</sup> Tigua ngolomo pu payuwa mo yaribia haga buwa wai biaga humbi wiaru mo yáribia howa Anduane Homogonaga anda haneni wini. Ani bialu tigua wai pabe panga hearu baya hangu arema bialu agali loma binigo mo miaga hearunaga anda hobane bo gialahole bini wiaru lone mo arema buwa biadai bialu pangaru baya hangu wabu helaga biai hene. <sup>58</sup> Wali agali tigua mbirale ti mo taga holenaga agali Anduane Homogo mitangi nahaga hearume mo yu íbu wini biaru mo wahai howa ti turu timbuni ho hene. <sup>59</sup> Ani howa ai Yudasa halu ibu hamene biarubi Isaraele wali agali bibahendebi tigua bi lo mbira halu mali bibahendeni horo Anduane Homogonaga lomabu delaga dabu mo loma bia haramago mitangi biaabo hamalo. Lotu lolene horo timbuni ogo ege mini Kisilebe laragola horo pira kirani duria (25) haragola ngoai howa horo halira bibahende lotu lalu hamiya lalu bi lo wini.‡

<sup>60</sup> Ai tigua Saiono neneni Anduane Homogonaga anda kagotha ege pabe hongohe daligaore bu mabu buwa pabe neneni mamageali anda hongohe bu helaga bini. Waitigi agali Anduane Homogo mitangi nahaga bu hearume abale ibalu mbirale Anduane Homogonaga mo loma bia hene wiaru hengeda hai halu mebia halu penedagua bulino pabe hongohe bini. <sup>61</sup> Ani buwa Yudasa ibugua ami agali maru dabalu Anduane Homogonaga anda mamage helo helene. Ani bialu Idumia dindi ngagohayagi handa daibu holenenaga tano hongohe Isaraele wali agalinaga tano Bedesu mo hongo howa ngelene.

## 5

### *Isaraeleme dindi tara tara kaware wiaru baba wai binigo ogo*

<sup>1</sup> Wali agali dindi kawareni bu hearu ti hale halu hearia Yuda wali agalime Anduane Homogonaga anda bo giallo wahayago lone hongohe biadai bialu Anduane Homogonaga lomabu delaga dabu biago lone biadai bialu mo bayale ho nga layago hale howa ti mogolo hene. <sup>2</sup> Ani howa Isaraele wali agali maru ti baba haga ti daluha hearu bibahende bo wahai holene manda bini. Ani buwa tigua Isaraele wali agali hearu mbira bo wahaga bialu hene.

<sup>3</sup> Iso hameigini Idumia dindiha bu hearume Isaraele henge nami tigua hapai hayagonaga ai Yudasahanda ti baba wai bini. Ibugua Agarabadene dindi wiagoria wai bialu ibugua ti bope halu ibu wayali howa tinaga mbirale wiaru mo yai halu pene. <sup>4</sup> Ani bialu mana ko abale Baiana hameiginirume binigo Yudasa ibu mitangi bu dai bini. Wali agali uruni tigua Isaraele wali agali mo ko halu genda tara tara deware mo mialu haga hene. Tigua harigani bira do howa wali agali harigani bolangua haga biaru minu balu mo

† 4:52: Mali 148 layagola horo ayu ogoningiore Kini Andiogusu ibugua dabu ogoriani bi pupu wule gime wabini wiagonaga loma Anduane Homogonaga anda ogoniha howa bu delene. Te 1 Magabi 1.49 ngago hondolene nga.

‡ 4:52: 1 Mag 1.54 † 4:59: Yuda wali agali tinaga lotu lagane horo timbuni ogoni mali bibahendengi tagira ibiragola ti mo ngoai howa lotu timbuni laga winigo ayu wiaabo ka. Tigua Horo timbuni ogoni mini Hanuka laga.

ko haga biaga hene. <sup>5</sup> Ani heago hondowa Yudasahanda wali agali bibahende Baiana tanoha hearu mamage haga tano pabe neneni anda daliga bu heagoha agali mamage hearu heba ho hagira bu yaanda hene. Bibahendeore homelo bo wahaiore hole lalu gi dolalu bi lene. Ani lalu puwa anda mamage haga daligaore bu helene hearu heba wali agali anda tamuha bini hearu bo heda hai hene. <sup>6</sup> Ani bialu mani Yudasa halu ibunaga ami agali biarume puwa Amono wali agali baba wai bule pene. Amono tinaga ami agali hongohe dewaore howa Timodi ibugua haru howa handaya ho haga hene. <sup>7</sup> Ani agali uruni beba Yudasa ibugua wai biaabo halu howa ibugua ti bope hai hene. <sup>8</sup> Ibugua wai buwa Yase tano karu lalu dindi emene wiapara para biarubi karu lalu bini. Ani biai halu Yudia dai bini.

<sup>9</sup> Ani biagola dindi hobane mbira mini Gileada agali buhearume Isaraele wali agali tinaga dindiha bu karu baba wai bialu bibahende bo wahai hene. Ani biyagola Isaraele wali agali ti Dadema dindiha ha do holene anda hongohe heagoha pu hene. <sup>10-11</sup> Ani pu howa tigua Yudasa halu ibu hamene biaruhondo beba gilibu pelalu howa lalu, Wali agali Anduane Homogo mitangi nahaga oali bu karu tigua Timodinaga ami agaliru baba ho biamaga haya. Ani biya handala ina ibida puwa anda hongohe ogoha ibu kema. Anigo agali ko uruni tigua anda hongohe ogonibi giala holebu wahai holebirago <sup>12</sup> ayu ogoni ina biamogo bule abale ibabe. Ina aria dewaore homai haya. <sup>13</sup> Ina damene dewaore tano mini Tobo wiagoria heneru bo wahai haya. Ani bialu wali waneiginiru garabaya helalu tinaga muni dabudabu wiaru mo page biai haya. Wali agali ogoniha henego bibahende daga daosini mbira (1,000) agima kaware dege henego homai haya, lalu bi lo wia hene.

<sup>14</sup> Yudasa ibu beba ogoni wene daga lalu heagola agali mbira Galiliha howa beba mende yalu ibini. Agali mani ibiyadaruni tigua dara ho kago walia halu biagadagua tinaga agaru budabaga bu yalu ibini. <sup>15</sup> Ani ibuwa tigua lalu, Agali bibahendeore tano tebira Tolemesebi Taiabi Saidonobi heba agali bibahendeore Galilina abene uyurahayagi haga hearume tinaga ami agali dewaore mo tago bialu ina bibahendeore mbiraorebi mbira pora bialu napelo bo wahaiore hole ibira laya, lene.

<sup>16</sup> Yudasa halu ibunaga wali agalirume bi ogoni hale howa ainde ti damene waitigi giha howa homai holobadago biamogo agua bimabe lole ti mo ngoai hene. <sup>17</sup> Ani mo ngoai howa Yudasa ibu hamene Saimonohondo lalu, Ina damene Galiliha haruago biamogo bule pelo agali maru abale dababe. Ai i Yonadana iyame Gileada porabago, lene. <sup>18</sup> Ani bialu Yudasahanda ami agali maru hearu tigua Yudiaha baya hangu handaya ho halimu lene. Ani lowa ibugua agali kirali wali agali Yudiani hayadaru handaya ho helonaga Segaraia igini Asariala Yosebela dabo helene. <sup>19</sup> Ibugua libuhondo lamialu lalu, Wali agali ogoria karu libugua handaya ho halibulo helarogoni. Waitigi maru karu baba wai bulumini nabilibu. Ina dai bulumaya hondo halibu, lene. <sup>20</sup> Ani lalu ami agali daosini tebira (3,000) bibahende Saimono heba Galili pole pene. Ani piyagola ami agali daosini haliria (8,000) bibahende Yudasa heba Gileada dindi pole pene.

<sup>21</sup> Saimono ibugua puwa Galiliha wali agali Anduane Homogo manda nabi hearu baba wai bialu bibahende bo podahana hai hene. <sup>22</sup> Ibugua bo padama pu dege bialu Tolomese tano tagira pialu daosini tebira (3,000) agima homene bo wahai hene. Ani bialu ami agali bo wahayarunaga danda timu yari tara wai pialu karulaga ale karulo haabore wiaru ti mo yai hene. <sup>23</sup> Ani bialu Yuda wali agali Galiliha bu hearubi Arabadaha hearubi bibahendeore mo mogo biai halu ti one waneiginibi tinaga dabudabu wiarubi heba yai halu Yudia dindiha dai bini. Ani biyagola wali agali uruni ti turu timbuniore hai hene.

<sup>24</sup> Ogoni dege Yudasa Magabeusu halu ibu hamene Yonadana halu ami agali biaru Iba Yodana domalu horo tebira pialu dindi ko wali agali nahaga wiagoha pene. <sup>25</sup> Puwa tigua Nabadia hemeigini bu hearu ngola hayagola uruni tigua ogolabohondo turu



timbuni howa mbirale bibahende Yuda wali agali Gileada dindiha hearunaga te baya hangu lamiai hene.\* <sup>26</sup> Tigua lalu, Yuda wali agali dindi ogoniha tano hongohe timbuni Bosora tanohabi Boso tanohabi Alema tanohabi Kasabo tanohabi Magede tanohabi Kanaimi tanohabi garabaya hai heleda. <sup>27</sup> Ani bialu Yuda maru Gileada dindiha tano emene ngaruha garabaya hai heleda, lalu lamini. Ani bialu Yuda wali agali lenego bibahende horo mbira hanguni bo wahai halu tinaga anda hongohe karu yawi dege bo gialo wahai hole tagira polebira, lalu lamini.

<sup>28</sup> Ani layago hale howa Yudasa halu ibunaga ami agali biaru tigua dindi ko iba dalu naibi dindi ko wiagoha tano Bosora wiagoha pole pene. Pialu tigua tano ogoniha hearu baba wai bialu wali agali tano ogoniha haga bu hearu bo wahai howa tano bo heda halu wali agalinaga dabudabu tara tara wiaru ti mo yai halu bini. <sup>29</sup> Ani ti mbiraga hangu puabo halu tano hongohe mini Dadema wiaga kawareha Isaraele wali agali anda bu hegoria anda pene. <sup>30</sup> Egabi layagola Yudasa halu ibunaga ami agali biaru tigua handalu hemiria ami agali dewaoreme tanoha anda hongohe heago bo gialaga laga bialu hearia hendene. Tigua wai bulene masini tara tarabi wai pabe irigi holenaga egageriabi mo yalu íbu howa wai bulenaga wai pabe hongohe heago bo giala hole biyago de hendene. <sup>31</sup> Yudasa ibugua mbirale uruni biyago de hondo howa hale halu hearia tanoha wali agalime ga hongo howa ladagadaga bialu pilipe layuagola ai wai biyada lo manda bini. <sup>32</sup> Ani hale howa ibunaga ami agali bu hearuhondo lamialu, Ayu ina hameneru biamogo bialu mo wulenaga wai hongo howa bimiya, lene.

<sup>33</sup> Ibugua ibunaga ami agali biaru halu tebira mo tale bialu waitigi erembira wiagohayagi wai bia aribia hene. Yuda tigua nai hongo howaore bialu waitigi bope howa tigua Anduane Homogohondo bi hongo howa lene. <sup>34</sup> Ai Timodinaga ami biaru tigua Yudasa Magabeusu ibiyago hondowa ti beregedalu ibida piai hene. Horo ogoningi Yudasa halu ibunaga ami agali biarume waitigi ami agali daosini dege halira (8,000) bibahende geme hengedai howa bogai hene.

<sup>35</sup> Ani bialu Yudasa ibugua Alema tanoha wai bule pene. Puwa ibugua wai bialu agali tano ogoniha haga hearu bo wahai hene. Wali agalinaga dabudabu wiaru ti mo yai halu tano bo heda hene. <sup>36</sup> Ani bialu Kasabo tano bo podalu Magede tanobi Boso tanobi Gileada dindiha tano maru wiarubi bo heda hai hene.

<sup>37</sup> Ani biyagola maha Timodihanda ami agali maru hearu lone mo ngoai howa Labono tanola hengene tubari iba gana emene wiago kawareni balai anda bialu hene. <sup>38</sup> Ani bialu heagola Yudasa ibunaga ami agali hearu aria marume waitiginaga balai anda bu heagoha baya hangu hondo wu pudaba lene. Ani laya handala marume hondo pialu dai buwa tigua lalu, Agali Anduane Homogo mitangi nahaga dindi ogoniha hearu bibahende tidiyu pialu Timodinaga ami agaliha hatago howa agali dewaore ka. <sup>39</sup> Timodihanda ami agali maru Arebia dindiha bu hearu ibu biamogo bule wai ibuha anda ibilo munime yolo bialu ibunaga ami agali dewaore hea. Ani howa tigua ina baba wai bule iba doma ederayagi balai anda buwa manda manda bu hea, lene. Ani laya handala Yudasa ibugua wai bule pene.

<sup>40</sup> Yudasa halu ibunaga ami agali biaru iba ange wiago kaware ibiyagola Timodihanda ibunaga ami agali haru halu bamba haga bu hearuhondo lamialu lalu, Yudasa-handa iba domalu ina kemagoha ibu ala ibiyagua nde iname ibu babe nahe ibugua ina bope holebira. <sup>41</sup> Anigo ibugua iba domalu naibi iba angeni hondo hayagua nde iname iba domalu puwa wai bialu ina ti bope halu wayali holeberema, lene. <sup>42</sup> Ai Yudasa halu ibunaga ami agali biaru bia ange wiagoria íbu howa ibunaga ami agali haru haga bu

\* **5:25:** Nabadia hameigini uruni agali hongoheore Iba Yodana doma ederaha ni tagira ibiragohayagi bamba Idomo hameigini dindi winigoria hene. Tinaga kini henerume tano hongohe bayaleru ogoniha bu helaga bini. Kini Aredasa ogoni aria mbira henegonaga te Polohanda 2 Korindi 11.32 howa Polohanda te ledago ogoni aria henegohondo leda.



hearuru iba angeni ibu hai helowa tihondo lamialu lalu, Ami agali tí bibahendeore wai pora biai halimu. Mbira hangubi hadai nabilimu, lalu lamini. <sup>43</sup> Ani lalu ai Yudasa ibuni wai pole bamba halu ibaha pora bialu piyagola ami agali bibahende piai hene. Ani piyagola ami agali Anduane Homogo mitangi nahaga bu hearuru ibida pugupugu biai hene. Danda timu timbuni yiaru wahai halu ibida puwa Kanaimi tanoha bi pupu wiaga gime wabini wiagonaga anda timbuni heagoha ibida pialu birado hai hene. <sup>44</sup> Ani biyagola Yudasa halu ibunaga ami agali biarume haruru talima puwa anda timbuni ogoni heba wali agali anda ogoniha birado hearuru bibahende bo heda hai hene. Yudasahanda Kanaimi tano bo podahana hayagola wali agali tano ogoniha hearume mo ko holene mbira Yudasahondo lone bibe nahe hene.

<sup>45</sup> Ani bialu Yudasahanda Isaraele wali agali Gileada dindiha hearuru bibahende mo mogo biai halu Yuda dindiha haru dai bini. Ti piyagola daga lamibe naheore dewaore tidiyu pene. Wali agali tara tarabi wali waneiginibi tinaga dabudabu wiarubi heba piai hene. <sup>46</sup> Ti pialu tano timbuni mbira mini Eberono ege pabe hongohe bu mabubi wiagoria pialu hemiria wali agali tano ogoniha hearume waipabe panga hongo howa payatagi hene. Ti hariga ogonidagua pialu tano ngago pu balalu pubagi halu polene henge nawiore hariga mbiraore hangu tano tamuha bolaangua halu polene mbiraore wini. <sup>47</sup> Anigo wali agali tano ogoniha haga bu hearume Isaraele wali agali bolangua halu pelo henge nami tigua ege tole timbuni wiaru muwa pabe panga hongo howa payatagi hene. <sup>48</sup> Anidagua biyagola Yudasa ibugua bi bayaleore lo pelalu lalu, Ina tí daluha hariga dege bolangua halu inane dalu pole polomaya henge ngidaba. Iname tíha ko mbira bulene manda nabi bame hariga dege bolangua halu poleberema, lene. Ani layago Yudasana bi hale nahe tigua panga payaho haabo hene.

<sup>49</sup> Anidagua biyagola Yudasahanda ibunaga wali agali ogoriani hondo hadaba lowa <sup>50</sup> ami agali biaru tigua danda timurubi wai biaganeale wiaru mo manda manda biai hene. Ani bialu anda puwa wai mbira horombebi biaho wialu tigua bo podahana halu tano ti karulene. <sup>51</sup> Yudasa ibugua agali bibahende bo wahai halu tano ogoni bo gialahole biai halu tanoha wali agalinaga mbirale bayale wiaru bibahende mo hilo yai halu bini. Ani bialu Yudasa halu ibunaga ami agali biaru agali tinime bo wahene wiaru tinginini ge haga bialu pene. <sup>52</sup> Pialu iba Yodana domaede halu dindi tigabi mbira Bedesana tano wiago abene mbirayagi tagira pene. <sup>53</sup> Ani pialu howa Yudasa ibugua agali maru hariga pole manga halu maha ibiyaru bime mo hongo haga bialu bime wali agalinaga bu miniha mo hongo hama dege ibalu Yuda dindiha anda ibini. <sup>54</sup> Tigua wai biyagohabi hariganibi mo ko halubi waiha homabi nabi dege haabo halu dai biyagonaga turu timbuni hama Saiono nene irigi halu Ngode Datagaliwabehondo turu howa kai lama pialu loma irani dai holene lomaru bu delole pene.

<sup>55</sup> Ai Yudasa Saimonola Gileada dindiha pu heagola libu hamene heagome Galili dindiha Tolemese tano wiagoria wai bialu hene. <sup>56</sup> Ani bialu heagola Yudanaga ami haru haga Yosebela Asariala libu hale halu hebiria tebirali hamenema biarume wai bialu tigua bo podahana haga bima pora layago te hale hene. <sup>57</sup> Ani hale howa libugua lalu, Iyame nde wali agali Anduane Homogo manda nabiaga wali agali kaware karu baba wai bialu wayali howa iyabi mini lene dege habiya wai bu mba, lene. <sup>58</sup> Ani lalu libugua ami agali bu hearuru haru haru halu Yabane tano wiagoha wai bule pene. <sup>59</sup> Gogiasahanda tano wahalu ogolabo baba harigani ngola howa wai bule pene. <sup>60</sup> Puwa Gogiasa halu ibunaga ami agali biarume wai bialu Yosebe Asariala aria biaru bama talima pialu Yuda dindiha taliari hene. Horo ogoningi dege Isaraele ami agali daosini kira agima (2,000) bo wahai hene. <sup>61</sup> Ami agali haru hagane haguane kirali biago labome Yudasa halu ibu hamenerunaga bi hale nahe libuninaga mini yaraga holene hame lo hebiria ani homai hene. <sup>62</sup> Ani bialu libu agali maru Ngode Datagaliwabe ibunime Isaraele wali agali mo wialu haru dai bilo dabo helene hayadaru aria ndo heagome bini.

<sup>63</sup> Anigo Yudasa Magabeusu halu ibu hameneru ti dege Isaraele wali agalinaga denibi wali agali tara tara bu hearu denibi mini lene daligaore hene. Wali agali bibahendeme biabe timbuni tigua biyaru hale hai ho howa <sup>64</sup> tininaga dengui handalu tinaga mini yaraga haga bialu haga hene.

<sup>65</sup> Mani howa Yudasa halu ibu hamene biaru heba dindi abene unurahayagi Iso hameigini palearu baba wai bule pene. Yudasahanda puwa Heberono tano wiagoria wai bialu tano emene emene wiaruhabi wai biai hene. Wai pabe hongohe biaru bo giallo wahai halu mamageali handa amunana bu haga anda daliga bima irigi hene bu hearu bo heda hai halu bini. <sup>66</sup> Ani bialu ibunaga wali wali agali haru halu Pilidia dindi wiadagua puabo halu Maresa tano wiago hanuni bolangua hene. <sup>67</sup> Ogoningi agali loma binigo mo miaga bu hearu tigua tinaga miniha emene mini ko wu howa tibi nde mini lene pari wayali dege holenaga wai pene. Ani pialu hearia waitigime tiha bogogo hana hai hene. <sup>68</sup> Ai Yudasa halu ibu damene biaru ti beregedalu Pilidia dindiha Asadodo tano wiagohayagi puabo hene. Ani puwa dindi ogoniha dama mitangi bialu bi pupu wiaga gime wabini wiarunaga lomabu delaga dabu hearu bo giallo wahai halu uruninaga bigiya wiaru mo delaga bini. Ani ogoniha wiaru bo giallo payabu wahai halu Yuda dindi dai bini.

## 6

### *Andiogusu mane homenego ogo* (2 Magabi 1.1-17, 9.1-29, 10.9-11)

<sup>1</sup> Kini Andiogusu mane ibu Pesia dindiha dindi timbuni Mesobodemia wiagoha howa hale halu hearia tano mbira mini Elimaisi nga layane hale hene. Tano ogoniha siliba ngoloru dewawi mini lene mbira nga layago hale halene. <sup>2</sup> Mbirale dama mitangi bialu bi pupu wiaganaga anda tano ogoniha hayadagoha mbirale bayale damene muni dewame yolo miaga dege dewaore nga layago hale hene. Wai humbi ngolome wabini wialu wai pole karulagane yari damene dewaore anda ogoniha nga layago hale hene. Mbirale uruni Masedonia Kini Alegesanda ibugua anda ogoniha mo winiya. Alegesanda ibu Pilibi igini howa Girigi dindiha kini timbuni mini lene pigane ibu henego ogonime mo wini. <sup>3-4</sup> Ani nga layago hale halu Kini Andiogusu ibugua Elimaisi tano puwa wai bialu mbirale uruni mo kayu bule manda bialu hearia wali agali tano ogoniha hayadarume te ala hale ho bolangua howa Kini Andiogusu ibiyagola tigua manda manda bu heneyago wai biadai bini. Ani biyago Andiogusu ibugua mbirale mo page bule piyago mibe nahe hene. Ani biya handala Andiogusu ibu beregedalu Babilono dai buwa ibunaga bu miniha genda timbuni ho hene.

<sup>5</sup> Pesia dindini hearia agali mbirane ibuwa Andiogusuhondo lamialu lalu, Inaga ami agali Yudia dindiha helariruni bo podahana haya. <sup>6</sup> Yuda ami agalime Lisiasa halu ami agali hongohe hearu bo talia togolaya. Ani bialu ayu ti hongoheore kago irane tigua wai bialu ami agali tigua bo wahaga biyarunaga wai biaga ale wiaru ti mo wiai halu dabudabu marubi dewaore mo wua howa ti hongohe gibiore ka. <sup>7</sup> Ina mbirale Hiriribi Hondolene Gibiore lomabu delaga dabu Yarusalemeni wiagoria mo wirigoni Yuda tigua mo wahaya. Ani bialu pabe hongohe daligaore ala hayagobi ndo lomabu delaga dabu kago bu mabu bida. Ani bialu ininaga tano Bedesu ngago tigua karulalu mo hongo howa ngeleda, lalu lamini.✧

<sup>8</sup> Ani layago hale howa kini ibunaga miniha genda timbuni howa mini burugulo berene. Ani biyagola ibu warago bamialu dagiani paliaabo henego irane mbirale ibugua bule mende bu wiyago damene bibahende mo habo lai hayagola ibunaga miniha mo ko hai hayagola dagiaha wiaabo hene. <sup>9</sup> Horo dewaore dagiaha ani wiaabo hearia genda mini burugu dewaore lone dambi haga bialu bope haabo hene. Anidagua

✧ 6:7: 1 Mag 1.54

biyago hondowa ibu homoleore ngogonida lo manda bini. <sup>10</sup> Ani manda buwa ibugua agali maru Kininaga Nenege laga hearu mogo buwa ibugua tihondo lala, I u palibe naheore genda timbuni ngagome inaga bu gubalini nedagome i mo ko kagoni. <sup>11</sup> Ainde inihondo hale halu genda tara tara iha tagira ibirago irane agidabe. Bamba nde iha mo palia holene karulo kagola wali agalime ihondo turu hai hagago. <sup>12</sup> Anigo ayu ina ko bialu mbirale lotunaga biabe biaga ngolo silibarume wabini Yarusalemeha wini mo yu pirugomeda. Ani bialu Yuda wali agali bame bo waharugomeda. <sup>13</sup> Ai ina mbirale uruni birugome genda uruni iha anda ibiyada lo manda bido. Ainde ayu inaga miniha ndibu lai harugo ai i dindi kaundia ogoha homoleda lo manda bido, lene.

<sup>14</sup> Ani lowa Andiogusuhanda agali mbira mini Pilibi ibu Kininaga Nenege laga heaga olo ibu lowa ibu dindi bibahende Andiogusuhanda hondo haga wiaru bibahende ibugua handaya ho helo dabo helene. <sup>15</sup> Ani helowa kininaga mandabi agabi gi hondene magibi Pilibihondo miai hene. Ani mialu ibu igini Andiogusu dauni kagobi nde mani kini helonaga mana baya hangu lawai helo lamini. <sup>16</sup> Ani lala Kini Andiogusu mane ibu mali handari mbira pira mariani dira (149) layagola dindi kaundia ogoniha wialu homene.

<sup>17</sup> Ani Andiogusu homaya layago Lisiasa ibu hale howa ibugua wali agali bu hearuhondo Andiogusu homayago ai ibu igini mini Andiogusu dege kagome ibu abanaga henge ibuni miya. Ani bialu ibu kini gahenge haribia halu ibu mini Yubado ka. Kini ogoni ibu wene igiri emene heangi Lisiasahanda baya hangu handaya ho haga hene.

<sup>18</sup> Ai Yarusalemeha wai pabeanda hongohe heagoha waitigi bu hearume Isaraele wali agali Anduane Homogonaga anda kaware pole pialu karia napole lowa hariga hapai haga hene. Horo bibahendengi wali agali genda mo mialu haabo hene. Ani bialu maru Anduane Homogo manda nabiaga hearu biamogo bialu haga hene. <sup>19</sup> Ani bialu kagonaga Yudasahanda agali uruni bialu kago balu bo biba helolebero laya. Ani lowa mali handari mbirani pira duria (150) layagola ibugua ami agali wai biaga hearu Yarusaleme wai pabe anda hongohe heagoha haga hearu baba wai bilo dabo helalu <sup>20</sup> wai biagane masini tara tara wai biagane wiaru ogoriani kaware mo wialu bini.

<sup>21</sup> Ai agali mine haga anda ogoniha haga hearu heba Isaraeleali Anduane Homogo mitangi nahaga hearubi tigua pora bialu kini hearia puwa ibuhondo lamialu lala, <sup>22</sup> Mana ko ina waitigime inanaga wali agali baba bialu kago angi pani mule kebe. <sup>23</sup> Ina i aba ibu andaneha howaibunaga bi mana lo ngago hale halu howa talialu harima. <sup>24</sup> Ani bialu harimago ainde mana o bialu haruagome ina biamogo agua bulubada. Ayu inane dameneore bu karume ina baba waitigi ho kago. Ani bialu tigua ina aria maru bo wahai haya. Ani bialu inanaga dabudabu bayale wimaru ti mo yu piai haya. <sup>25</sup> Tigua ina hangu mo ko ha ndo hameigini tara tara ina baba kaware palia parapara padaru bababi wai bialu ha dege bida. <sup>26</sup> Ani bialu howa ai ayu tigua agali maru wai pabe anda hongohe Yarusaleme tanoha haga haru baba wai bialu anda hongohe ogoni ti karulole manda bialu ka. Tigua Yarusalemeha Anduane Homogonaga anda hayago arema buwa mo hongo halu Bedesu tano mo ho ngeleda. <sup>27</sup> Ayu ogoniore ina mbirale mbira nabiriyagua tigua bialu kago pu hongo halu ina bo wahai haragola mani ina mbirale mbira tihondo bibe naheore wulebira, lene.

### *Andiogusu daunila Lisiasalame wai binigo ogo*

<sup>28</sup> Kini ibugua agali Yarusaleme howa ibiyarunaga bi layago hale howa ibu miniha tandaga timbuni ho hene. Ani howa ibugua agali haguane mini Kini Nenege laga bu hearubi ami agali haru haga haguane hearubi ami agali nogo hosini biruwa wai biaga haru handaya ho haga hearubi bibahende olo ngoai hene. <sup>29</sup> Ani bialu ami agali maru dindi tara tara wiaruha hearu yolo bu helalu maru dindi iba dege dombene wiagoha hearubi munime yolo bu helatago halu buwaibunaga ami agali dewaore hene. <sup>30</sup> Ami agali dindini howa wai bulene daosini dege handari mbira (100,000) nogo hosini biruwa

wai biaga daosini dege pira kira (20,000) nogo tara mbira mini elebana wai bilo agali baya hangu biawai heneru pira tebirani kira (32) bibahenderubi manda bu helalu bini. <sup>31</sup> Ani bialu Kini Andiogusu halu ibunaga ami agali biaru tigua Idumia dindi wiagoha pu bolangua halu puwa Bedesu tano wiagoha wai luore bialu haabo hene. Ani bialu howa tigua masini tara tara wai biaga wiaru wai pabe tagiraha wabu helaga biaria agali tano ogoniha haga hearume ibalu bo giala hole bialu bo heda hene.

<sup>32</sup> Ai Yudasa ibugua nde ibunaga ami agali Yarusalemeha wai pabeanda hongohu biagoha helayaru heba haru halu puwa dindi mini Bede Segaraia laga wiagoria balai anda bu hene. Kininaga ami agali ibulubadagoria hapai halu ogoriani pu hene. <sup>33</sup> Ani heagola kini halu ibunaga ami agali biaru tigua gao layagola heyalu Bede Segaraia polene hariga peadagua pialu howa ibunaga ami agali biarume pilipe biguli pu laga laga bialu danda timu yandareru wai biaga ale manda manda bu yai hene. <sup>34</sup> Ani bialu nogo elebana biarume wai bilonaga tinaga miniha mo noa halu mo tandaga holenaga gerebi liniru ira tara mini malaberi liniru mo nga helene. <sup>35</sup> Ani bialu nogo timbuni uruni ami agali mbira mbira tidiyu headagua mo tahaga bini. Ami agali daosini mbira (1,000) hearu bibahendeore manda boronosime wabini mo karulai halu aga senipume wabiradagua bini wiaru mo karulai halu nogo elebana mbira mbira headagua tidiyu haga haga bini. <sup>36</sup> Ani bialu ami agali nogo hosini biruwa wai biagaru tibi mo tale bialu handari duria (500) dege dege nogo elebana mbira mbira headagua tidiyu haga haga bini. <sup>37</sup> Tigua dabu wabuwa nogo elebana erekunini mo paga howa mandibuale hongohu mbirame daba hene. Ani buwa ami agali tebira heba mane nogo mo tiga bialu haru haga howa nogo elebana mbira mbirani ani dege berene. <sup>38</sup> Ani bialu Lisiasa ibugua ami agali nogo hosini biruwa wai biaga hearu ibunaga ami agali geni piaga hearu gi tigaha gi lehala helene. Ani buwa ti waitiginaga miniha mo tandaga holebi tinaga ami agali bayale helo haru holebi ani helene. <sup>39</sup> Tinaga wai humbi siliba ngolorume wabini wiaru yalu hari bare wiagoria heago ni daba hayagola ngiringara lalu ira hungu timbuni daradagua bini. <sup>40</sup> Kininaga ami agali maru hari bare wiagoha heagola maru dindi ulini wiagoria tidiyu haga haga bini. Ani bialu ti hondo ha nabi abale wai pora biai hene. <sup>41</sup> Agali hearume ami agali uruninaga danda timu humbiru kilingele layago hale howabi geme dindi kulu layago hale howabi ti gi timbuni hene.

<sup>42</sup> Ai Yudasa halu ibunaga ami agali biarume wai bialu kininaga ami agali handari waragaria (600) bibahende bo wahai hene. <sup>43</sup> Eleasa Abarana ibu de handalu hearia nogo elebana timbuni daligaore mbira kininaga agaru mo karulahe ibiyago hondowa kini ibuni nogo ogoriani biralu ibirabe toba hene. <sup>44</sup> Ani manda buwa Eleasahanda ibuninaga holene embeda halu ibunaga wali agali biamogo bialu homene. Ani biyagome ibunaga mini timbuni mo yaraga henego wiaabo ka. <sup>45</sup> Ibu gi nahene. Ibugua gerai lalu nogo elebana timbuni biago ami agali abene mende mendehala ibilowa dombeni ibiyago hondo yalu gerai tungulope hene. Ani buwa ami agali abene mende mendehabi heago bai hayagola maru mende mendebi ha migimigi bini. <sup>46</sup> Ani biyagola Eleasa ibugua nogo elebana biagonaga himuniha anda puwa yandareme nogo timbuni ogoni nogoba hayagola nogo ogoni ibira hayagome Eleasa bo dambi hayagola homene.

*Bedesu tanohabi Saiono nenenibi wai bialu henego ogo*

<sup>47</sup> Ai Yuda ami biaru tigua handalu hearia kininaga ami biarume wai tara mbira biyago hondowa ti emene hadai bini.

<sup>48</sup> Ani biyagola kininaga ami biarume Yuda ami Yarusalemeni hearu baba wai bini. <sup>49</sup> Ani bialu kini ibugua wali agali Bedesu tanoha hearu baba gi tigani bialu pene. Ani binidagoni ti wai lu bialu holenego tomo nalu holeme nawiyagola ani bini. Ani bialu mali ogoni Yuda wali agalinaga mabuha tomo hongolene nawi mali kane hayagola



tomo nawini.\* <sup>50</sup> Ani bialu kini ibugua Bedesu tano karu lowa ami agali maru tano ogoni handaya ho helo helene. <sup>51</sup> Ani bialu kini ibugua Anduane Homogonaga anda kagotha wai bu pialu horo dewa wai dege bialu hene. Ibugua masini tara tara ira hangu dedaore babe lolenebi ege tole bape lolenebi timu bape lolenebi wabu helowa wai bialu hene. <sup>52</sup> Ani biyagola agali Anduane Homogonaga anda heagohayagi hearu tiguabi nde wai biaga masini tara tara uruni ale wabuwa wai biadai bini. Ani bialu heagola wai luore bialu hene. <sup>53</sup> Ani bialu henego ai mali ogoni mali kane tomo nahanga biago howa Anduane Homogonaga andaha tomo nawi tubagi hene. Ani bialu Yuda wali agali wai togoloyu ibini hearume tomo emene wiago nawi heagola ti tomo nawiore hene. <sup>54</sup> Ani biyagola wali agali dewaore tini dalu dai biai hene. Ani biyagola Anduane Homogonaga andaha emene dege haabo hene.

*Kini ibugua Yuda baba gi tigani binigo ogo*

<sup>55-56</sup> Horo ogoni Pilibi ibu Pesia dindi Midia dindiruha howa dai andaga dai bini. Pilibi ogoni bamba kini Andiogusu mane biago ibu homalu ibu igini Andiogusu dauni kini ho aribia helo lawai halu haru habe lene biago dai bini. Ogoni ibugua Andiogusu mane biagonaga ami agali biaru heba dai buwa ibugua gabumane biabe damene bibahende handaya ho hai hole manda bini. Ai anidagua biru layago Lisiasa ibu hole howa <sup>57</sup> ibugua andaga dai bulenaga mbirale manda manda bini. Ani buwa ibugua igiri emene Kini Andiogusu daunibi ami haru haga hearubi ami agali bu hearubi lamialu lalu, Horo bibahendengi ina tomo nolene nawi howa inanaga hongo ibira haabo harago. Ai tano ina karulole manda birimagobi hongoheore nabibehe ngagoni. Ani bialu ina daluha gabumane biabe mo tiga bulene dewaore wiarua. <sup>58</sup> Ani wiaruago ai iname Yuda agali haguane karu baba gi tigani bialu bi lo tiga bulene karulapeda. <sup>59</sup> Ani bialu tinaga mana lo wini ngagobi tini bialu haga ngadaguabi bialu helo waholene karulapeda. Abale inaha genda tara tara tagira ibiyago irane iname tinaga bi mana lo wini wiago mo pugualu tinaga bialu haga wiago mo wahai harimagome ibiya, lene.

<sup>60</sup> Ani layagola kini halu ami agali haru haga hearume karulape lai lene. Ani lalu tigua Yuda wali agalihondo wai wahalu gi tigani lama lalu bi lo yalu pu lene. Ani layago hale howa Yuda wali agali tigua karulape lene. <sup>61</sup> Ani layago hale howa ai kini halu ami agali haru haga biaru tigua habo nalolene bi ogoni napugule lalu gi dolalu bi lo wini. Ani layagola Yuda ti anda hongohe wai pabeanda hongohe biago wahalu tagira ibini. <sup>62</sup> Ani lalu kini ibugua Saiono nene puwa handalu hearia wai pabe hongohe heago hondowa habo nalolene bi lo wiyago pugualu ibunaga ami agali biaruhondo wai pabe hongohe ogoni bo giallo wahai hadaba lene. <sup>63</sup> Ani lalu ibuni abale dai bialu Andiogo tano pene. Andiogo dai buwa handalu hearia Pilibi tanonaga agali haguane hearia hendene. Ani hondowa kini ibugua Pilibila wai bialu Andiogo tano ibuni mo yu dai bini.

## 7

*Alagimusu loma binigo mo miaga haguane henego ogo*  
(2 Magabi 14.1-36, 15.1-36)

<sup>1</sup> Mali handari mbira pira duriani mbira (151) layagola Selugusu igini kini Demidiri-asa halu ibunaga ami agali maru haru Lomo tano wahalu tano mbira iba solowara angeni wiagoria ibu hene. Ogoriani ibu howa ibu kini ko lalu latagi hene. <sup>2</sup> Ani lalu ibu mamalirunaga kini andaga wiagoha anda ibu biruwa ibunaga ami agali hearume Kini Andiogusubi Lisiasabi mini garabaya bu yalu Kini Demidiri-asa berearia pene. <sup>3</sup> Ogolabo garabaya bu yalu ibira layago Demidiri-asa ibu hale howa ibu agali ogoni

\* **6:49:** Yuda wali agali tinaga mana mali waragaria mabuha tomo hangalu bu wia bialu mali kane haragola tomo hongolene bu wulenebi nabiagaore wini. Te ogoninaga Haru Tagira Penego 23.10-11. Ani bialu Agali Loma Binigo Mo Miaganaga Biabe 25.2-7 ngago hondolene nga. Anidagua binigome mali kane piyai kagola mani gari timbuni tagira piaga wini.



labo dengui nahondoleore, lene. <sup>4</sup> Ani layago hale howa ami agali bu hearume ogolabo homelo bo wahayagola Kini Demidiriasa ibu hene.

<sup>5</sup> Yuda hameigini bi mana lo wini ngago hale nahaga mine haga agali maru hene. Agali uruni tinaga haguane Alagimusu henego ogoni ibu loma binigo mo miaga haguane holenaga hongo halu hene. Ani howa agali uruni aria maru Kini Demidiriasa hearia puwa tigua lalu, <sup>6</sup> Yudasa halu ibunaga ami agali hearume wali agali í gubalini haga hearu bo wahai halu inabi inanaga dindiha howa bo taliatagi haya. <sup>7</sup> Ai Yudasa ibugua ínaga dindi hobane wirigo mo ko halu inanaga mbirale wimaru mo ko hai hayadago de hendelo agali ínaga dabene mbira kago ibugua de hondole pu labelo hamelo kema. Ani bialu Yudasa halu ibu hamenerubi wali agali ibu biamogo biaga bu karubi bibahende pani nelu mibelu hame ledema, lene.

<sup>8</sup> Ani layago hale howa kini ibugua agali haguane mbira gabumane biabe iba Yuberedisi porago angeha dindi ngagoha bialu haga mini Bagidese henego ogoni dabene. <sup>9</sup> Dabalu kini ibugua Bagidese Alagimusu heba Isaraele wali agali pani nelu mule pudaba lene. Agali Alagimusu ogoni ibu Ngode Datagaliwabenaga bi mana lo wini ngago hale nahaga henegoyu kini ibugua agali ogoni Anduane Homogonaga loma binigo mo miaga agali haguane helo dabo helene. <sup>10</sup> Ai ti Andiogo wahalu ami agali dewaore pialu Yuda dindiha tagira pene. Ani pu howa Bagidese ibugua ohowa henene letingi halu ibugua Yudasa halu ibu hameneru baba gi tigani bule ko laya lalu agali marume lo yalu pelene. <sup>11</sup> Anigo ainde Yudasa halu ibu hameneru tigua handalu hearia Bagidese halu ami agali dewaore heago hondowa bi ogoni henene ndo layada lo manda bini.

<sup>12</sup> Agali mana ngago manda biahe agali maru Alagimusula Bagidesela hearia ibuwa tigua ogolabohondo lamialu, Wali agali bu karuhondo mana ko nabi bayale bulene ngadagua bilibu, lalu lamini. <sup>13</sup> Agali hameigini mini Hasidi hearu tigua Yuda mani ibilo bamba halu Alagimusu Bagidesela heba gi tigani bule pene. <sup>14</sup> Ai tigua manda bu handalu hemiria Alagimusu ibu agali loma binigo mo miaga Arono aria hayago. Ibugua ko mbira nabulubada lo manda buwa pene. <sup>15</sup> Alagimusu ibugua hongo howa gi doladaga halu lalu ibugua tini tinaga damene karubi mbira mo hole ndo tigatiga gi tigani bule laro lene. <sup>16</sup> Ani layagola tigua mo henene hene. Ani mo henene ho hearia ibugua agali pira waragaria (60) minu yania howa horo ogoningi dege bo wahai hene. O biyadagoni bamba Anduane Homogonaga mbuga ngagoha howa daga lalu,

<sup>17</sup> Waitigime wali agali íhondo mini mbiraorewi hearunaga tingini dindini bame bo ba ainai bialu piya.✧

Uruninaga darama Yarusalemeni iba poradagua biya.  
Tingini uruni mo hora holene mbirali naheoreya,  
lalu gilibu wini ngago lola haya.

<sup>18</sup> Ani biyagola wali agali bibahende bu hearume Alagimusu Bagideselahondo gi timbuni hai hene. Wali agali tigua lalu, Libugua bi henene lolenenaga iranebi bi tigatiga lolenenaga iranebi manda nabi libuore heneda. Libugua henene laro lalu gi dolalu bi lowa mana lo wiyago puguaya, lene. <sup>19</sup> Ani bialu Bagidese ibugua Yarusaleme wahalu puwa ibu balai anda Bedesaida wiagoria bini. Ibugua ami agali hearu lamialu, Yuda agali bayale bu karu garabaya biai halu Yuda agali ko ibu aria heagoha hatago hole turuho hearu heba garabaya hai helalimu, lalu lamini. Ani lowa lalu, Bialu bibahende homelo bai halu tinaga tingini gundu uli ngagoha bape hai halimu, lene. <sup>20</sup> Ani bialu Bagidese ibugua Alagimusu Yuda dindi handaya ho helo dabo helalu ami agali marubi talebu mialu ibuni kini hearia Andiogo dai bini.

✧ 7:17: Iba 79.2-3

<sup>21</sup> Ani helayagola loma binigo mo miaga agali haguane Alagimusu ibugua Yuda wali agalinaga ibu timbuni mini leneore hene. <sup>22</sup> Ani bialu heagola agali ko bu hearume ibuha halaga hene. Ani howa Yudia dindiha ti hongo gibihe tagira pialu tigua Isaraele wali agali genda dewa mo mialu hene. <sup>23</sup> Ai Alagimusu halu ibu aria bu hearume Isaraele wali agali bu hearuhondo mana ko ala ibu damene Anduane Homogo mitangi nahaga henerume bialu hagadagua dege bialu hearia Yudasa ibu hondo hene. <sup>24</sup> Ani handalu ibu Yudia dindi bibahende ha ibaga biai hene. Ani bialu Yuda wali agali maru waitigiha hatago hayaru pani migi bialu tanoha nahe tagira piai halimu lalu lamiai hene. <sup>25</sup> Ai Alagimusu ibugua handalu hearia Yudasa halu ibu aria hearu hongoheore tagira piyaria hendene. Ani hondowa ibugua Yudasa bope habe naheda lo manda bini. Ani handalu Alagimusu ibu kini hearia dai buwa ibugua kinihondo lalu, Yudasahanda mana ko dewa biya, lalu ke howa bi maru lene.

<sup>26</sup> Ani layago hale howa kini ibugua ami agali hongoheore howa Yuda wali agalinaga waitigi mini Nigano henegohondo lamialu, Yuda wali Yudia dindiha kago damene bibahende bo hilo wahai hole pu, lalu lamini. <sup>27</sup> Ani laya handala Nigano ibugua ami agali dewaore haru halu Yarusaleme anda ibini. Ani anda ibu howa ibugua ohowa Yudasa halu ibu hameneru baba gi tigani loleberogo ibalimu la bi lo pelene. Ibugua Yudasahondo lalu, <sup>28</sup> Ainde iya keba nahabiya. Ina i keria ibalu howa i nenege karia poro lalu ibulebero, lene. <sup>29</sup> Ani lalu ibu Yudasa hearia ibuwa libu gi tigani bialu libu mini mo mbiraore howa nenegeore haradagua bini. Anigo Yudasahanda waitigi bu hearume Yudasa minu yania hole manda manda bu hene. <sup>30</sup> Ani howa Yudasa ibu mani handalu hearia Niganohanda ibu mo hondo heneyane handa walia halu ibugua Niganohondo turu nahe howa ibuhondo gi timbuni halu ibu Nigano lone ngola nale manda bu hene. <sup>31</sup> Ai Nigano ibu ohayago wali agalime manda biai hayago hondowa ibugua Yarusaleme wahalu tagira puwa Yudasala wai dindi mini Kabasalama wiagoria wai bialu hene. <sup>32</sup> Wai ogoniha Niganonaga ami agali handari duria (500) bibahende homai haya handala maru ibida pora bialu Yarusaleme Debidinaga tano wiagoha piai hene.

<sup>33</sup> Wai bialu mani Nigano ibu Saiono nene wiagoha pene. Agali loma binigo mo miaga maru hearubi wali agali bu hearubi tigua, Nigano ibiridago bayuwa birida, lalu ibu ngola hole tagira ibini. Ani bialu Anduane Homogohanda kini biamogo bilonaga loma irame dai helo delole yu hearu ibuhondo walia hene. <sup>34</sup> Anigoyu ibugua tihondo mege bialu hondo oba halu ti hamiaga toloba halu loma yu heago Anduane Homogo deni mo dodohe helene. Ibugua mine howa <sup>35</sup> tihondo lai laede halu lalu, Yudasa ibu inaga gihaibunime ibalu mo ya holene nga. Anidagua nabiyagua nde ina ibu karia pialu wai buwa ibu pobe halu dai buwa Anduane Homogonaga anda o kago bo heda holebero, lene. Nigano keba timbuni howa ti ani helalu ibu pene.

<sup>36</sup> Ani puwa handala agali loma binigo mo miaga biaruru ti puwa lomabu delaga dabu heagobi Anduane Homogonaga anda heagobi handa amu howa hondo hene. Ani howa tigua dugu bialu Anduane Homogohondo bi hongo howa ladaga halu lalu, <sup>37</sup> Ai Anduane Homogo-o anda ogo ininagaore helo loma biaho helowa wali agali ini keria kaware ibalu ihondo lotu lalu bi lelonaga anda ogoni helarigoni ndobe. <sup>38</sup> Ai agali ko o kagohondo pani nelu mialu ibunaga ami agali karubi heba pani nelu mibe. Wai hamaha bo wahabe. Ihondo mege bialu bi ko layago manda bialu pani mibe, lalu bi lene.

<sup>39</sup> Ai Nigano ibu Yarusaleme wahalu tagira pialu Bedehorono tano wiagoria balai anda bini. Ani bialu Siria ami agali maru ogoriani ibalu hatago hene. <sup>40</sup> Ani heagola Yudasa halu ibunaga ami agali daosini tebira haru howa tinaga balai anda nde Adasa tano wiagoria bini. Ani bialu howa Yudasahanda Anduane Homogohondo bi lalu, <sup>41</sup> Anduane Homogo-o inaga mbuga ngagoha howa dagalalu, Kini mbirame agali maru ihondo mege bule pu lene ibiyaria inaga dahuliyalime ibalu ami agali uruni aria daosini

dege handari mbira pira halirani duria (185,000) bibahende bo wahai haya lo nga.\*<sup>☆</sup>  
<sup>42</sup> Anidagua dege wali agali bu karu bibahendeme ina Nigano ibugua inaga anda kago mege biyagonaga pani nelo mirida lo manda biai helo inime ami agali ayu inanaga deni karuni balu bo hengeda hai habe. Ibugua mana ko timbuniore biyagonaga pani nelo mialu minu bai habe, lalu Anduane Homogohondo bi lene.

<sup>43</sup> Ani lalu ege mini Adanaga horo halene (13) layagola tigua wai bini.† Ani lalu wai biyagola Nigano ibuni waiha homalu ibunaga ami agali hearume wai ibira hene.  
<sup>44</sup> Ai ibunaga ami agali hearume Nigano homaya handa danda timu giha yu hearu wahai halu ibida piai hene. <sup>45</sup> Piyagola Yuda tigua Adasa tano howa bama talima piaho wialu Gese tano tagira pene. Harigani talima pialu howa ami agalime hongo howa wai bilonaga pilipe biguli pu lama dege pene. <sup>46</sup> Ani biyagola Yuda wali agali haga haga bu hearu tagira ibai hene. Ani ibalu tigua wai gi leha howa gi tigaha howabi tagira ibugu bialu wai biai hene. Ani biyago hondowa waitigi ami agali biarume emene hadai bialu hearia ami agali ti bama talima ibiyarume tali minalu minu bogaiore hene.

<sup>47</sup> Ani bialu Yuda wali agali tigua waitiginaga mbirale wahearuru mo yai hene. Ani bialu Nigano ibugua ibu timbuni daligaore Ngode Datagaliwabe daligaore bolanguahe hene tingi howa ibunaga gi hongoru walia hayagonaga tigua ibunaga gi tiga pugu yalu haguane pugu yalu bialu dai bini. Yu dai buwa wali agali Yarusalemeni bu hearu bibahende hendelo walia hai hene. <sup>48</sup> Ani bialu Yuda wali agali turu timbuni hene. Ani bialu horo ogoni tinaga lotu lolene timbuni mbira wiabagiho ngelene. <sup>49</sup> Ani mo ngelowa mali bibahendenaga ege Adanaga horo halene (13) tagira ibiragola tinaga lotu laga wini. <sup>50</sup> Ani bialu tigi mbira hanguni Yudiaha wai nabi emene bayale wini.

## 8

### *Yuda wali agalime Lomo agaliru baba habo nalolene bi lo winigo ogo*

<sup>1</sup> Yudasa ibu hale hale halu hearia Lomo agaliru hongohe mini lene mbira howa hameigini mbira baba mini mo mbiraore howa gi tigani lalu libu nenege haga layago abale hale hene. Wali agali dindi tara tara ha karu bibahende lomo baba biabe mo mbiraore howa bialu haga kago ibunaga nenegeore lo haga ka layago hale hene.\*

<sup>2</sup> Yudasa ibu hale hale hearia Lomoali tigua wai timbuni biaga layagobi tigua Gala palearu baba wai bialu bope howa dagisi mialu ka layagobi hale hai ho hene. <sup>3</sup> Ani bialu lomo tigua Sebena dindiha biabe bayale bialu ogoniha ngolo silibaru dugualu kago baya hangu handaya ho ka layago hale ha dege bini. <sup>4</sup> Sebena dindi ogoni kaundiaha ngagoyu Lomonaga hongomebi mini gigabi wiagomebi dindi ogoni ibu karu lalu handaya ho ka layago hale hene. Dindi tara tara wiaruha howa kini dewaoreme Lomo agaliru baba wai bini. Ani biyagola Lomo amime wai hongo howa bialu kini dewa uruni bope hai halu ibugua tiha dagisi mali bibahendengi mialu haabo haga hene.

<sup>5</sup> Lomo tigua Masedonia dindinaga kini kira Pilibila Peseusula bope halu hameigini dindi tara taraha palearume Lomoaliru baba wai biyarubi bibahende bope halu bini.

<sup>6</sup> Sirianaga kini timbuni mini lene Andiogusu tebone henegomebi Lomo agaliru baba wai bini. Tinaga wai biagane nogo elebana handari mbira pira kira (120) halu ami agali nogo hosini biruwa wai biagabi garoale karisini heyu howa wai biagabi dewaore

\* **7:41:** Te ogoni 2 Kini 18.7-19.37 ngago hondolene nga. <sup>☆</sup> **7:41:** 2 Kin 19.35 † **7:43:** Isaraelenaga ege Ada ogoni inanaga ege mende tebonela (Pebuari Masila) hengeneha ibaga wini \* **8:1:** Magabi heangi Lomo dindi hongoheore mbira kaundiaha Yudia dindi ngago kaware ndo wini. Yuda tigua manda bialu dindi tara taraha wali agali tara tara padarume ibalu Yuda wali agali baba wai biyagua nde Lomome ti biamogo bulubada lo manda bialu ti Lomo baba nenege hole manda bini. Anigo mani howa Lomome hongo timbuni halu dindi wiaru bibahende bope hai howa iba solowara Medidereniana bedago ange ange palu yu pedago ibugua handame ho hai hene. Ani howa Yasu dindini ibu heangi Lomome Yuda dindibi handaya ho heagola Yuda tigua Lomo hame naleore hene. Tigua Lomo baba keba timbuni halu Lomoni hearu taliatagi hoa ho hene.

hene. Ani heago helowa Lomo tigua uruni mo emene howa bo haealabaga biai hene. <sup>7</sup> Ani buwa Andiogusu minalu garabaya helene. Ani buwa Andiogusu ibunihondo mali bibahendengi dagisi muni ngi lalu ibu igini aguane muni ho aribia hayarume heba dagisi mani dewaore Lomo tagu mialu haabo hene. Ani bialu tinaga agali haguane mini lene hearu minalu Lomo dindiha garabaya helaga bini. <sup>8</sup> Ani bialu Lomo agali tigua dindi baya maru Indiabi Midiabi Lidiabi ibunaga gabumane andaneha helaga bini Lomo tigua dindi uruni Kini Andiogusunaga wiago bo mialu Kini Yumenese giha ya haga bini.

<sup>9</sup> Ai Lomo tigua hale ho hearia Girigime Lomo baba wai buwa bo biba holebira laya hale howa <sup>10</sup> Lomo tigua ami agali dewaore tidi yalu Girigi baba wai bule pene. Puwa wai bialu Girigi bo podahana hene. Lomo tigua Girigiali one waneigini bu hearu garabaya haru hai lalu dabudabu wiaru mo pagebu yai lalu dindibi ti karulalu bini. Lomo tigua Girigi dindiha wai pabeanda hongohe wiaru bo gialo wahai lalu wali agali bu hearu garabaya biabe ale bia haga helalu binigo ayu ani wiaabo henego nga. <sup>11</sup> Lomo agali tigua dindi bibahendebi dindi iba dombeneha wiarubi wali agali Lomo agalihondo mine hayaru bibahende bope hai lalu bini. <sup>12</sup> Ai hameigini maru Lomo agali baba nenege howa ti heba mandagi haga bu hearume ti baya hangu handaya ho habe lalu olaga bialu hene. Tigua mana ogonidagua bialu kini kaware hearubi kaundiaha hearubi bibahende bo podahana hai lalu bini. Ani biyagola wali agali bi te uruni hale hayarume Lomo agalia gi howa mogo lalu hene. <sup>13</sup> Ani bialu Lomo tigua dindi mbiraha agali mbira kini heloa hayagua nde kini helaga biaga. Ani bialu mbirali kini henego dugu wahoa biyagua nde kini kago dugu wahaga ka. Ani bialu heagome Lomo agaliru ti hongoheore lalu mini lene hene. <sup>14</sup> Ai lomo agaliru ti mini lene hongohe ani ha howa tigua kininaga manda karulolebi kininaga manda karulolebi kininaga aga karulalu tininaga mini yaraga holene manda nabi haga hene. <sup>15</sup> Tinaga gabumane ngoai holene anda bialu anda timbuni ogoniha memba handari tebirani pira kira (320) bibahende ibu ngoai howa wali agali bayale helonaga biabe bulenenaga bi lalu dindi mo heya holenenaga bi lalu bule horo bibahendengi mo ngoai haga hene. <sup>16</sup> Mali bibahendengi tinaga memba mbirame gabumane biabe bulenebi dindi bibahende ngarubi handaya ho helo dabo helaga biaga hene. Wali agali bibahendeme agali haguane ogoninaga bi hale hai lalu mbirale mendealinaga ngago ti dimagoli nahaga hene.

<sup>17</sup> Ai Yudasa ibugua agali kirali Lomo pialu Lomo gabumane kagohondo nenege haba lama bi lalu pudaba lene. Agali mbirago Agoso aguane Yone igini Yubolemusu pialu mendego Eleasa igini Yasonola pudaba lene. <sup>18</sup> Yudasa ibugua ogonidagua binidagoni irane Girigi kini kagome ibalu Isaraele wali agali bo hilo waholobada lo manda buwa Lomo gabumaneme ibu biamogo bialu ibunaga genda ngago mo wahole ibilonaga manda buwa ani lene. <sup>19</sup> Yubolemusula Yasonola hariga luore pialu Lomo anda pene. Puwa Lomo gabumane anda heagoria anda puwa libugua gabumane agali biru wiaruhondo lalu, <sup>20</sup> Yudasa Magabeusu ibu hamenerubi Yuda wali agalibi tigua Lomo ti baba nenege lalu ina mini mo mbiraore ho hamiya habo nalolene bi lo wule pudaba laya handala ibiriba, lene.

<sup>21</sup> Ani layagola Lomo tigua bi ogoni karulape lalu, <sup>22</sup> Tigua habo nalolene bi uruni bi gili biaga boronosime wabini mbalape wiagoria gilibu wialu Yarusaleme yu dai bidaba, lene. Bi gilibuwi boronosime wabini ogoni hameigini kiralime habo nalolene bi lo winigonaga manane wini. <sup>23</sup> Habo nalolene bi lo gilibu winidagoni ogo, Iname mbirale bibahende bayale bulene dege Yuda Lomolanaga dindi ngagohabi iba solowara bedagohabi wiaabo helo hame ledema. Horo mbiru libuha ke nahelo. Ani bialu libu wai nabilo hame ledema. <sup>24</sup> Hameigini tara kagome Lomo baba wai biyaguabi Lomonaga

nenege kago baba wai biyaguabi <sup>25</sup> nde Yuda ibugua nenegeoreme biagadagua Lomo baba mo mbiraore halu waitigi ogoni baba wai bulebira. <sup>26</sup> Ani bialu Yuda tigua Lomo baba wai biragohondo tomobi munibi wai bulenealebi iba sibibi uruni ale mbirago mulene nawiore. Iname bi ogonidagua laramago Yuda tigua talialu howa inahondo yolo ngi lolene nawi.

<sup>27</sup> Anidagua dege hameigini tara kagome Yuda bayagua nde Lomo tiguabi Yudala libu hamenelaore haradagua bialu waitigi baba wai bulebira. <sup>28</sup> Ani bialu Lomo tigua Yuda waitigi kagohondo tomobi munibi wai biaga ngarualebi iba sibibi mbirago Yuda waitigi kago mulene nawi. Ina Lomome bi ogonidagua laramago ke halu mana mende bu aribia naholeberema.

<sup>29</sup> Bi ogonime ina Lomo kemagome Yuda wali agali baba habo nalolene bi lo werema. <sup>30</sup> Anigo mani howa libugua bi lo mbira howa habo nalolene bi maru latago holeyaguabi maru mo waholeyaguabi karulape dege. Mo iriari bulenego bayale heneneorego bulene wulebira.

<sup>31</sup> Ani bialu ina Lomome beba mbira gili bialu Kini Demidiriasa hearia ina Yuda wali agalihondo bialu hariyago mana ko biriya lalu gilibu pelarima. Ina bi ogodagua larima. Inanaga nenegebi ina heba hagabi Yuda kahondo mana ko biriyago aginaga biribe.

<sup>32</sup> Ina Yudahondo ko lone beregola tigua ina kemaria ibuwa ina biridago bi lalu ina Lomohondo langiyagua iyame wai dindinibi iba solowara bedagoriabi bibiya, lalu bi gilibu pelarima, lene.

## 9

### *Yudasa Magabeusu homenego ogo*

<sup>1</sup> Ai kini Demidiriasa ibu hale hayane Nigano halu ibunaga ami agalirubi homai haya layago hale howa ibugua Alagimusubi Bagidesebi Yudia pudaba lene. Libu ayu ogoni halu mende pialu ami agali marubi haru halu pene. <sup>2</sup> Tigua hariga Giligala tano wiadagua pialu wali agali Abela dindiha dindi emene Mesalodini bu hearu baba wai bule balai anda ogoriani bini. Ani buwa tigua wali agali dewaore bo wahai halu dindi ogoni karulo hene. <sup>3</sup> Mali handari mbira pira duriani kira (152) layagola mali ogoninaga ege mbira hayagola Yarusaleme baba wai bule puwa balai anda kaware bini.\* <sup>4</sup> Ani bialu mani ti heyalu Beria dindi wiagoria pene. Tinaga ami agali daosini dege pira kira (20,000) haru halu ami nogo hosini biruwa wai biaga daosini kira (2,000) haru halu bini.

<sup>5</sup> Yudasa ibu dindi mini Elasa wiagoria hene. Ami agali ibunime dabene daosini tebira (3,000) hene. <sup>6</sup> Ani howa waitigi dewaore ibiyago hondowa ti gi timbuni hene. Ani howa dewaore balai anda bu hayago wahalu ibida piai hene. Ani piai hayagola ami agali handari halira (800) hangu hene. <sup>7</sup> Ai Yudasa ibugua handalu hearia ibunaga ami agali ibida piai halu waitigi hapara hayago hondowa ibunaga ami agali biaru lone mo ngoai holene henge nawi ibida piai hayagola ibunaga bu miniha mini naibi ndibulo wahene. <sup>8</sup> Pigane ibunaga bu miniha duru lalu gi ho henego ai mani howa ami agali maru hadai bu hearuhondo lalu, Ayu iname wai bialu wayali holeberemabe toba ho kogo ai iname wai bimiya, lene.

<sup>9</sup> Ani layagola agali maru hearume ibunaga mini mo beregedalu lalu, Iname wai bibe nahedago ina hameneru heba howa wai bimiya emene hadai bima. Ayu ina emene dege kamagoni, lene.

<sup>10</sup> Ani layagola Yudasahanda ladai bialu lalu, Ani nabuleore. Ina waitigi handalu ibida polene nawi. Inanaga homolene horo ayu ibiyagua nde iname mogo lalu gi holene nawi. Inanaga damene bu karunaga homa haramagola inanaga mini bayale mini lene wiaabo holebira, lene.

\* **9:3:** Yuda tinaga ege mbira mini Nisana laga. Ege ogoni inanage ege tebone manelani (Masi Aiborolo) larago dombeneha haga wini.



<sup>11</sup> Ai Bagidese halu ibunaga ami agali biaru tinaga balai anda helalu Yuda baba wai bule manda manda bialu hene. Ani howa ami agali nogo hosini biruwa wai biaga hearu ti halu kira talebuki halu tidiyu haga haga bini. Ami agali maru ege tole puni yuwa baga hearubi danda timu yi hearubi tigua ami agali dewaore mani ibilo ti bamba hene. Ani bialu ami agali wai baya hangu biagaru tigua wai bamba howa hene. <sup>12</sup> Bagidese ibu gi tigahayagi hene. Waitigi halu kira biago pilipe biguli pu lama wai bule tidi yalu pene. Ani piyagola Yudasana ami agali hearu tiguabi pilipe biguli pu lalu wai pora bini. <sup>13</sup> Ani bialu wai gime minaga minaga biribiha geme dindi kulu lalu ema bilene. Wai egerebahagi howa binigo bialu hebine alendo ni palene.

<sup>14</sup> Ani bialu howa Yudasa ibugua handalu hearia Bagidese halu ibunaga ami agali haguane hearu gi tigahayagi hearia hendene. <sup>15</sup> Ani heago hondowa Yudasahanda ibunaga ami agali wai gi nahaga pari wayali hearu dabowa haru halu Bagidese halu ibunaga ami haru hagaru heagohayagi wai gialaanda howa balu bo hangedalu maru talima pugu pugu bialu Asadodo hari nene wiagoria talidaga hene. <sup>16</sup> Waitigi biarume handalu hearia ti aria gi tigahayagi hayago ibira hayago handalu tigua Yudasa halu ibunaga ami agali biaru erembiraha aribia howa wai bima talima pene. <sup>17</sup> Wai bu alendo halu ami agali mende mendehabi kirabaliha timu dewa hai halu dewa homalu bini. <sup>18</sup> Yudasa ibunibi homaya handala ibunaga ami agali hearu ibida piai hene. <sup>19</sup> Mani ibu hamene Yonadana Saimonolame libu hamene tingini mo yalu pene. Mo yalu puwa tinaga aba mamaliru homali wiagoha Modeini tanoha hora halu duguanda howa dugu bialu dara ho hene. <sup>20</sup> Isaraele wali agali Yudasa duguanda dugu bialu horo dewaore howa tigua lalu, <sup>21</sup> Darabiore ina Isaraele wali agali mo wialu haru dai biaga agali haguane biago nde aginaga hayada, lalu hene.

<sup>22</sup> Tigua Yudasahanda binigo damene bibahendeore biabe timuni bini ngarubi wai bini ngarubi bibahende te gili bulene dewaoreyagola tigua gilibu wiai nahe.

## **Yonadanahanda Yuda handaya ho hene**

*(Be 9.23-12.53)*

*Yonadanahanda ibu hamene Yudasana henge ibuni minigo ogo*

<sup>23</sup> Yudasa homayagola wali agali Anduane Homogonaga bi mana mo yo handaga hearu Isaraele dindiha lone tagira ibu hene. Ani bialu agali mana ko biaga hearu ti hongo lone miadai buwa hongo ho hene. <sup>24</sup> Ogoningi tomo gariangi howa tomo nalu holene nawiyagola Isaraele wali agali ti waitigi baba hama pugu pugu bini. <sup>25</sup> Ani heagola Bagidese ibugua Yuda agali Anduane Homogo gi nahaga hearu dabalulu tigua Yuda dindi handaya ho howa haru helo dabo helaga bini. <sup>26</sup> Agali haguane uruni tigua Yudasa aria hearu baya hangu taya buwa minu yalu Bagidese hearia pugu biyagola Bagidese ibugua agali uruni mo taga halu mo ko haga bialu hene. <sup>27</sup> Ai Isaraele wali agali mo ibu wini. Agali maru Anduane Homogonaga bi mana latagi halu mbiwia haga henegoria howa hama ibalu ayu ogoni dombeneha Isaraele dindiha genda timbuni ogonibi mbira nawinigo pigane ayu anda ibini.

<sup>28</sup> Ai Yudasa nenego hearu ti mo mogo bu biruwa tigua Yonadanahondo lalu, <sup>29</sup> I hamene Yudasa homayagola ainde ayu agali ko Bagidese halu ibu aria karu homelo bo waholene agali hongohe Yudasa ale mbira naheore harimada. <sup>30</sup> Ani manda buwa ayu iname ina i hamene Yudasana henge mialu agali haguane ibu hayadagua ha aribia howa ina ina wai haru bamba hagane habelo hame ledema, lene. <sup>31</sup> Ani layagola horo ogoningi Yonadana ibugua ibu hamene Yudasana henge ibuni mialu Isaraele wali agalinaga agali haguane hene.

*Yonadanahanda Isaraele haru halu wai penego ogo*

<sup>32</sup> Ai Yonadana Isaraele wali agalinaga haguane ka layago hale howa Bagidesehanda Yonadana bo wahole hariga taya bialu hene. <sup>33</sup> Anigo ai Yonadanabi ibu hamene

Saimonobi ibunaga agali bu hearubi tigua Bagidesehanda ibu bole ka layago hale halu ti ibida pialu dindi ko iba dalu naibaga Tegoa dindi wiagoha puwa iba hambiağa iba uli mini Asaba laga wiagoria anda bu hene. <sup>34</sup> Sabada horo mbirungi hayagola Bagidese ibu hale hayagola Yonadana halu ibu aria biaru oğoniha ka lene hale halu tigua abaleore iba Yodana domaede halu pene. <sup>35</sup> Ai Yonadana ibugua ibu hamene mbira mini Yone ami agalinaga biabe biaga hearunaga agali haguane henego oğonihondo lamialu, Yonadana ibu nenege maru Nabadia dindiha karu hondo pudaba. İnaga dabudabu ngaruni ti daluha ngeloabe, lalu hale hene. <sup>36</sup> Ani lama pialu hearia agali maru Yambiri aria Medeba tano howa ibalu tigua Yone garabaya haru halu dabudabu biaru ti mo page yalu pu wahene. <sup>37</sup> Emene howa Yonadanala ibu hamene Saimonola libu hale halu hebiria Yambiri hameigini bu hearu turu timbuni ho ka layago hale hene. Ayu dege mbirali wali dabu biyagola wali agali dewa Nadabada tano howa wali agalime dabu bilodago haru halu harigani ibira layago hale hene. Wali oğoni Kenanali agali haguane mbira heago wane berenego haru ibini. <sup>38</sup> Ani layago hale howa libu hamene Yone homayago mitangi bialu libugua abale puwa harigani hari bare wiagoha bira do howa yu berene. <sup>39</sup> Libugua bira do howa handalu hebiria agali dewaore ngoaiho hearia de hendene. Tigua bi ladagadaga bima dabudabu dewaore yalu ibiyago hendene. İgiri wali dabu bulene biago halu ibu hamenerubi ibu damenerubi ti wali damene harigani ngola hale ibini. Tigua ngida tara tara bi wai biaganealebi dewa yalu ibiyago hendene. <sup>40</sup> Ai Yonadana halu ibunaga agali biaru ti porabu tagi halu puwa Yambiriali uruni baba wai bini. Agali dewaore homai haya handala maru hari bare wiagoha ibida pora bialu piai hene. Ani biya handala Yudali biaru ti dabudabu wiaru mo yalu pene. <sup>41</sup> Anidagua biyagola wali dabu bialu turu holene winigo wiaribia halu dara halu dugu bulene wini. Ngidaru balu iba gana bayale lole wiyago mo beregedalu dara howa agali homenenaga kiabu dugu bia aribia hene. <sup>42</sup> Libugua oğonidagua bialu libu hamenenaga darame pelayago pani libugua tininaga daramama pani bu aribia helene. Ani bialu libuni Yodana ibahayagi iba pugua wiagoha pene.

<sup>43</sup> Libugua ani biya layago Bagidese ibu hale howa ibugua ami agali dewaore haru halu Sabada horoni iba Yodana peago angeni pu hene. <sup>44</sup> Ani İbu heagola Yonadana ibugua ibunaga ami agali biaruhondo lamialu lalu, Ayu genda yu kemago tara yu kemago ai wai bima, lene. <sup>45</sup> Ai hale halimu. Ayu ina homarimayaguabi nahome howa iname ti bai harimayaguabi karulape. Ayu waitigi tombehayagi ina halu iba Yodana erembiraha peda. Abene mende mendeħa iba pugua ngagome ina polene henge nawida. <sup>46</sup> Ani bidago manda bialu ai Ngode Datagaliwabeħanda ina biamogo bilo ibuhondo bi dege lamiya, lene.

<sup>47</sup> Ani lalu wai bialu howa Yonadanahanda Bagidese ayume taula dibaro lo manda biyaria Bagidese ibu igiladai biyagola bako hene. <sup>48</sup> Ani biya handala Yonadana halu ibunaga agali biaru iba Yodanaha pora bialu howa ange mendeħa dola ede hai hene. Anigo waitigi biarume iba domalu talima nape wahene. <sup>49</sup> Anidagua bialu horo oğonigi dege Bagidesenaga ami agali daosini mbira (1,000) agima homai hene.

<sup>50</sup> Ani bialu Bagidese ibu Yarusaleme dai buwa Yudia dindiha tano wiaru mo hongo haga bini. Ibugua anda İbu holene Yarigo tanohabi Emaiasa tanohabi Bedehorono tanohabi Bedele tanohabi Timinada tanohabi Piradono tanohabi Tebono tanohabi bu helaga biai hene. Ibugua wai pabe daligaore biai halu wai pabe panga hongoħe wabu helowa bengena aeane hongoħe wabu helai halu bini. <sup>51</sup> Ani buwa tano bibahendeni ibunaga ami agali maru Isaraele wali agali genda mo mialu helo helaga bini. <sup>52</sup> Ibugua tano kira Bedesula Gesela mo hongoho ngelalu Yarusalemeni wai pabeanda heagobi mo hongo halu buwa tano uruniha ibunaga ami agali dewa helalu tinaga dabudabu dewa tano uruniha mo wialu bini. <sup>53</sup> Ani bialu Yuda agali haguanneru igini hearu minu yalu puwa Yarusalemeħa wai pabeanda hongoħe biagoha garabaya helaga bini.

<sup>54</sup> Ai mali handari mbira pira duriani tebira (153) layagola mali ogoninaga ege mende heagola Alagimusuhanda agali bu hearuhondo, Wai pabe hongohe halu mende Anduane Homogonaga anda bu mabu bini heago wahalu gialo wahadaba, lene.† Ibugua anidagua bialu bamba agali Anduane Homogonaga bi mana latagi haga henerume biabe bini wiaru mo ko holenaga ani bini. <sup>55</sup> Anigo tigua biabe ogoni bule bialu heagola Alagimusu ibu warago timbuni bo wiagola ibunaga biabe bule bialu heago wahene. Warago wialu ibunaga ne hariga ndibulo wahai halu gi gebi homalu hongo naheore halu homai hene. Ani biyagola ibunaga ne hariga halalu bi mbira labe nahe halu ibu andagaha biabe bulene ngago gi ge ema bialu mbira bibe nahe hene. <sup>56</sup> Anidagua bialu Alagimusu tandaga timbuni nalu homene. <sup>57</sup> Ai Bagidese ibu hole halu hearia Alagimusu homaya layago hale halu ibu kini hearia dai biyagola Yuda wali agali ti mali kirani bayale hene.

<sup>58</sup> Ani biyagola agali mana puguaga bu hearume ti mo mogobu howa lalu, Handadaba. Ai Yonadana halu ibunaga wali agali tiha mo ko nahe bayale kagoni ndobe. Ai wali agali uruni mbi mbira hanguni minalu garabaya biai helo Bagidese haru dai bimiya, lene. <sup>59</sup> Ani lalu tigua Bagidese hondo piyagola <sup>60</sup> ibugua ami agali dewaore haru halu ibini. Ani ibu howa ibugua Yudiaha ibunaga nenege bu hearuhondo ohowa beba dindiha gilibu wia haga bialu, Tigua agali Yonadana halu ibu damene karu minalu garabaya helalimu, lalu lo pelaga bini. Ani layago Yonadana ibu hale ho bolangua ho heagola tigua minabe nahe hene. <sup>61</sup> Ani howa Yonadana halu ibu damene hearume agali haguane biabe ko uruni biaga pira duria (50) hearu minalu garabaya buwa homelo bo wahai hene. <sup>62</sup> Ani bialu Yonadanabi ibu hamene Saimonobi libu aria bu hearubi bibahende heyalu pialu dindi ko wali agali nahaga tano Bedebasi wiagoha hole pene. Tano ogoni bamba giala holebini winiyago ainde tigua puwa lone mo hongo halu arema buwa mo hongo halu hene. <sup>63</sup> Ai mbirale libugua bialu ka layago Bagidese ibu hale howa ibunaga ami agali hearu mo ngoai halu Yudia dindiha agali hearu ibidaba lalu bi lene. <sup>64</sup> Ani bialu mani ibuni dai buwa Bedebasiha wai bule balai anda bini. Ibugua wai biagane masiniru wabu ngelowa wai horo dewaore bialu hene. <sup>65</sup> Yonadanahanda ibu hamene Saimono wali agali baba tanoha helalu ibuni heba ami agali maru haru halu irabuha pene. <sup>66</sup> Puwa ibugua Odomera halu ibu damene bu hearu bo haealabaga bialu Pasirono halu ibu aria tinaga anda bu heagoria hemiria puwa bo wahai hene. Ani bialu puwa Yonadana halu ibunaga ami agali biarume Bagidese baba wai bini. <sup>67</sup> Ogoniangi Saimono halu ibu aria hayaru tigua tano howa tagira puwa wai biagane masini wabu wiaru irame heda hai hene. <sup>68</sup> Tigua Bagidese baba wai bialu Bagidese agali ami agali hearu bope howa bo hengeda hai halu bini. Ai Bagidese ibunaga miniha wai hono wiago bibahende mo habo lai halu biabe bule biyago habo lai hayagola ibu manga timbuni ho hene. <sup>69</sup> Ibugua Yudali agali ko maru ibu ibabe lalu bi yalu ibiyaru baba tandaga timbuni hene. Ani howa Yuda agali ko uruni maru homelo bo wahai halu mani ibuni dalu dai bulene hamelo hene. <sup>70</sup> Ai Bagidese ibu ibuni dalu dai bule ka layago hale howa Yonadanahanda agali maru Bagidese karia puwa lalu, Yuda agali garabaya helariru bibahende golope halu gi tigani bialu wai palima lama pudaba, lene. <sup>71</sup> Bagidese ibugua bi ogoni hale howa ibuguabi Yonadanahanda bi layadagua dege bima lene. Ibugua bi hongohe gi dolowa lalu, Ina Yonadana mo ko hole mbira nabi haabo halu homalu wahole, lalu bi lo wini. <sup>72</sup> Ani lalu ibugua garabaya agali Yudiaha howa haru peneru golope halu piai hadaba lene. Ani lalu ibuni dalu pu wahalu dai nabi wahene. <sup>73</sup> Anidagua binidagome wai timbuni

† 9:54: Wali agali tara tara Yuda ndo karu ti pabe hobane mbira kagoha anda pialu pabe mende tamuha bu mabu bidagoha napiaga wini. Halu mende ogoniha Isaraele wali agali tini dege biaga wini. Ai tigua waipabe halu mende ogoni gialo wahai hayagua Isaraele wali agali tigua manda bialu wali agali Ngode Datagaliwabenaga deni dodohe karu Ngode Datagaliwabenaga anda kago mo dodohe helobada lo manda bini. Isaraele wali agalinaga ege mende inanaga ege mane daunila (Aiborolo Mai) hengeneha ibaga.

Isaraele dindi biaga wiaru biba helene. Ai Yonadana ibu Migimasa tano wiagoria pu hene. Ani howa ibugua wali agali bibahende handame howa haru hai halu wali agali Ngode Datagaliwabenaga mana puguaga hearu bibahende bo wahai haga bini.

## 10

*Alegesanda Ebipanesehandanda Yonadana loma binigo mo miaga agali haguane dabo helene go*

<sup>1</sup> Mali handari mbira pira waragaria (160) layagola Kini Andiogusu igini Alegesanda Ebipanesehandanda Tolemese tano ibalu tano ibu karulo hene. Wali agali ogoniha hearume ibu ibiyago mo turu hayagola ibugua tanoha gabumane biabe bulene wiago handaya ho hai hene. <sup>2</sup> Ai Kini Demidiriasa ibugua mbirale biyadagonaga te layago hale howa ibugua Alegesandala wai bule ami agali dewaore ho manda bu hene. <sup>3</sup> Ani manda bu howa Demidiriasa ibugua Yonadana mo gede holenaga bi bayaleru gilibu pelole manda bini. <sup>4</sup> Ibutaga miniha hangu mitangi bialu, Yudasala ibu Alegesandala gi tigani lalu ibula ala nenege howa libu mo gimbu bialu i boligo ina Yudasala ala nenege halu gi tigani loliya, lo manda bini. <sup>5</sup> Ainde mana ko iname Yonadana halu ibu hamenerubi ibu dameneruhondobi birimago manda bu holebira, lo manda bini. <sup>6</sup> Ani manda buwa ainde harugo lowa Demidiriasahanda Yonadanahondo lawia halu ibugua lalu, Ami agali manda manda bu halu danda timubi wai pole yaga damene manda manda bu yu habe, lowa lalu, Yonadana iyaore mandagi haabo habiya, lalu lo pelene. Ani bialu Yuda agali maru Yarusaleme wai pabeanda hongohe biagoha garabaya hayaru golope halu Yonadana karia daibia lalimu lalu lo wia hene. <sup>7</sup> Yonadana ibugua beba ogoni yalu Yarusaleme ibuwa wali agali bu hearu denibi ami agali Yarusalemeha wai pabeanda hongohe heagoha mamage haga hearunaga denibi dagala tagi hene. <sup>8</sup> Ai kini ibugua Yonadana hongo mialu ami agali tidi mbira haru habe layayago hale howa ti mogolo hendene. <sup>9</sup> Agali wai pabeanda hongohe handaya ho haga biaru tigua bi uruni hale howa garabaya agali anda ogoniha helene biaru golope halu Yonadana hearia dai bidaba layagola ti aba aija hearia andaga piai hene.

<sup>10</sup> Ani bialu Yonadana ibu Yarusalemeni howa tano mo ko ho wiaru arema bialu mo tigua bialu hene. <sup>11</sup> Ibugua agali biabe biaga hearuhondo lamialu, Ege tole bayale tigabi ngaru mo yuwa tanonaga wai pabe baya hangu biatiga bialu Saiono nene ngago ege pabe hongohe bu mabu bulene nga, lalu lamini. Ani layagola tigua bilimu layadagua biai hene. <sup>12</sup> Ani biya handala agali maru dindi tara howa ibini Yarusalemeha wai pabeanda hongohe Bagidesehandanda bu helene biagoha heneru ibida piai hene. <sup>13</sup> Ti bibahende Yarusaleme wahalu tini dalu pugu pugu bini. <sup>14</sup> Agali maru bi mana lo wini ngaru mo wahaga heneru ti Bedesu tanoha haabo hene. Tinaga hado anda tano ogoni wini.

<sup>15</sup> Ai Kini Alegesanda ibu Demidiriasahanda Yonadanahondo ogoale bibiya lalu bi gili bu wia hayayago hale hene. Ani bialu Yonadana halu ibu hamenerume wai timbuni bialu henegobi biabe timbuni tigua bini wiarubi genda tara tara tigua yu henegobi bibahendenaga te ogoale bira lalu marume lo yalu ibiyago hale ho hene. <sup>16</sup> Ani hale ho howa ibuni hangu lo manda bialu lalu, Agali hongohe Yonadana ale mende nahe. Ibu inanaga nenegeore howa ina heba holene karulapeda, lene. <sup>17</sup> Ani manda buwa ibugua beba Yonadana hearia gilibu pelalu howa lalu, <sup>18</sup> Kini Alegesandahanda ibu hamene Yonadana bayale kebe lara. <sup>19</sup> Iname hale harimago i agali wai biaga hongohe pari wayaliore ke layago. Ainde inanaga nenege hamiya hamelo kema. <sup>20</sup> Ani howa ayu i inaga wali agalinaga Anduane Homogonaga loma binigo mo miaga agali habelo dabo helarama. Ani bialu inaga mini Kininaga Nenege larama. Ina baba mandagi haga inanaga nenegeore habe, lene. Ani lalu Kini Alegesanda ibugua kininaga aga daramabi mbira kininaga manda ngolome wabini mbirala Yonadana karulelo mo yalu poa helo



mo wia hene. <sup>21</sup> Ai Horo timbuni Anda Nemendaruha Palu Holene Horo ege kaneni Yonadana ibugua Anduane Homogonaga loma binigo mo miaga agali hagianenaga aga karulagane ale mo karulene.\*

*Yonadanahanda Alegesanda Ebipanese biamogo binigo ogo*

<sup>22</sup> Ai Yonadana ibu Anduane Homogonaga loma binigo mo miaga agali haguane ka layago Kini Demidiriasa ibu hale howa ibunaga miniha tandaga timbuni howa ibugua lalu, <sup>23</sup> Alegesanda ibu ala nenege helo harimadago agidabe. Ibu ala puwa Yuda baba nenege halu mandagi hayada. <sup>24</sup> Ai inabi nde bi dendebiore lo pelalu ibula nenege halu ibuha ina biamogo bulene maru yamuliya. Ani bialu ti mo turu halu mbirale bayale duniniore ngago mo wia holiya, lene.

<sup>25</sup> Ani lowa ibugua bi ogodagua gilibu wia hene. Kini Demidiriasa ibugua Yudia dindiha wali agali kemiruhondo horombe lalu bayale kemibe, lalu bi lo wia hara. <sup>26</sup> Ainde tígua ina baba bi pongo wirimago mo habo nale baya hangu yu haabo halubi ina baba nenege haabo halubi inanaga waitigi karu baba mandagi howa nenege nahebi kemigonaga ina turu ho kema. <sup>27</sup> Tígua ina baba nenege bayale haabo harimiyagua nde iname tíhondo bayale bulene ngago bialu haabo holeberema. <sup>28</sup> Iname tínaga dagisi ngiaga wirimigo mo wahalu tí mo turu halu mbirale bayale ngaru bame nguleberema. <sup>29</sup> Ayu ina Yuda tíhondo bi ogodagua laro. Ai tí dagisi maru wiaga wiyago ibi yolonaga dagisibi kininaga dagisi miaga wiyagobi mo wahai haro. <sup>30</sup> Tígua widi linibi ira lini nagane dedarubi halu tebonego ina ngiaga wirimigo ai ayu howa mani lone nangilimu. Ayu ogoni howa maniorebi ina Yudiaha howabi dindi tebira Samarianaga winibi Galilinaga winibi Yudiaha bo tago hene ngagoha howa dagisi ngi nalole ayu waharogoni. ✧ <sup>31</sup> Ina Yarusaleme ngagobi dindi emene maru kaware ngarubi bibahende loma biahe wiabagi hene nga lalu uruniha howa dagisi tara tara mulene nawiore lalu latagiho ngelaro. <sup>32</sup> Ai Yarusalemeha wai pabeanda hongohe hayago ina handaya ho haga wirugo yupe halu agali Anduane Homogonaga loma binigo mo miaga agali haguane timbuni kago ibu giha ya harogo. Ibunime ami agali maru dabalulanda ogoni mamage helo dabalul helolebira. <sup>33</sup> Inaga dindi ngogoha Yudanaga ami agali garabaya kago bibahende ayu ogoningi dege golope halu pudaba lolebero. Tígua yolobia dai bilimulo ndo bame golope holebero. Ani bialu agali uruninaga nogo bulumaga sibi hinu kagonagabi dabudabu tara tara ngagonagabi dagisi ngi nalolebero. <sup>34</sup> Ai Sabada horobi ege gahenge ngabulo kagonaga horo timbuni lotu laga ngago tagira ibirangibi horo lotu lagane timbuni maru ngago tagira ibirangibi wali agali tara tara karume Yuda wali agalihondo dagisi ngi nalole. Ani bialu horo timbuni lotu laga uruni mani ibilo horo tebirani dagisi nabi halu hai howa horo tebira degeni dagisi mulene nawiore, laro. <sup>35</sup> Horo ogoningi mendealime í kegoha ya lo hale holenebi tíha mo genda holenebi nawiore laro. <sup>36</sup> Yuda ami agali daosini pira tebira (30,000) kininaga ami agali baba hatago holene nga. Ani bialu tinaga yolo kininaga ami karu miradagua dege mulebira. <sup>37</sup> Maru ti kininaga pabe anda hongohe ngagoha halu marume gabumane biabe bulebira. Ani howa tinaga mamali mana bialu haga winidago abale kini ibuni bialu helo layadagua bialu holebira. <sup>38</sup> Dindi hobane tebira Samaria dindinaga winigo Yudia dindihayagi yamialu mo tago hayago Yudia dindiha wiaabo helo. Ani bialu bibahende gabumane mbiraore hangume handa gimbu buwa Anduane Homogonaga loma binigo mo miaga agali haguane timbuni kagonaga giha habelo. <sup>39</sup> Ani bialu muni maru Tolemese tanoha howa mo wigi bini ngogo tigua Yarusalemeni anda loma bia hene kagoha biabe bulene ngaru bilimulo ti mo turu halu bame ngulebero. <sup>40</sup> Ani bialu

\* **10:21:** Yuda wali agali tinaga ege kane ogoni inanaga ege dini pinila (Sebedemba - Ogodoba) hengeneha haga. Ani bialu ibugua ami agali dewaore mo mogo bu helowa ami agalinaga wai biagane ale dewaore ti yilo mo ta hene. Yonadana ibugua Alegesanda Ebipanese biamogo binigo ogoni. ✧ **10:30:** 1 Mag 11.34



kininaga muni andaha muni ngago aria siliba muni daosini nguira (15,000) biabe tara bulene ngaru bilimulo ngulebero. <sup>41</sup> Mali maru piyagoha muni maru gabumaneme anda loma bia hene Yarusaleme hayaha biabe bulenego mope howa bame ngelo hayago ogonibi ayu yupe halu tini mo ngulebero. Ai ayu ogoni howa maninaga tinaga yolo tigabi mialu holeberemi. <sup>42</sup> Ani bialu lotu biabenaga dagisi siliba muni daosini duria (5,000) miruligo waharogoni. Muni ogoni ibu agali loma binigo mo miaga Anduane Homogonaga andaha biabe biaga karu yolo bilo ngelo waharogoni. <sup>43</sup> Agali mbira dindi ina handaya ho howa haru kogoha karu aria mbirame kinila dano ho howayagua maru baba dano ho howayaguabi ibu dano hangabe nahedagola ohalu puwa Anduane Homogonaga andaha ha do heyagua nde agali ogoni ibu garabaya napolebira. Ani bialuibunaga mbirale ngago mo yulenebi nawi. <sup>44</sup> Ai anda biago kagonaga wai pabe biatiga bulenebi anda biatiga bulenebi uruni bulenenaga muni kini ibuniha howa ibulebira. <sup>45</sup> Ani bialu agali maru Yarusaleme wai pabe bu mabu biragonaga yolobi Yudia dindiha tano pabe biragonaga yolobi kini ibunime bulebira, lalu Kini Demidiriasahanda lene.

*Yonadanahanda Demidiriasa erembira minigo ogo*

<sup>46</sup> Ai Yonadana haluibunaga wali agali hearume Kini Demidiriasahanda bi layago mo henene nahe hene. Irane ala Kini Demidiriasa ibugua tihondo mana ko bini dewa wialu genda timbuniore tiha mo ya hene wiagome nakarulape wini. <sup>47</sup> Ai tigua Kini Alegesandala dege habo nalolene bi lo wiyago yu howa gi tigani layago manda bu holene manda bini. Ani bialu habo nalolene bi ogoni pugua nabi haabo halu homalu wahabiya layago manda bu hene.

<sup>48</sup> Ai Kini Alegesanda ibugua ami agali dewaore haru halu puwa Kini Demidiriasa deni balai anda bini. <sup>49</sup> Kini kirali biago wai bule ngola ho hebigola Demidiriasanaga ami agali hearu ibida piai hene. Ani biyagola Kini Alegesanda ibugua talima pugu pugu bialu bo wahai halu wayali hene. <sup>50</sup> Ani bialu wai hongo howa bialu bu alendo halu Kini Demidiriasabi waiha homalu bini.

*Alegesanda ibu wali Keleobadara dabu binigo ogo*

<sup>51</sup> Mani howa Alegesanda ibugua Iyibi Kini Tolemi hearia bi lama pudaba lowa lawia halu lalu, <sup>52</sup> Ai ininaga dindini daibu howa ayu i mamalirunaga kini biragane dagia ngagoria bedo. Inaga gabumane biabe mo tiga biai howa ayu dindi bibahende handameho ko. <sup>53</sup> Ayu dege ina Demidiriasanaga hongo bo podaluibunaga dindibi ina dege handame ho kogoni. <sup>54</sup> Ayu ila habo nalolene bi lo wibiya hame ledi. I wane i daubuliya ina karulape labelo hame ledi. Ani beregola ina wariabu libu harume tabaga nahalibulo karulapeore bulebero, lalu lo pelene.

<sup>55</sup> Kini Tolemi ibugua ladai bialu lalu, Ainde i lone dai bialu inaga mamalirunaga dagia wiagoria ini kini ti henegoria haaribia halu ini birariyangi ina wali agali bibahendeme turu timbuni harima. <sup>56</sup> Ina bi lariyago ina hale howa i wane bedago i dau bibelo karulape laro. Anigo ainde ina i baya hangu hondo manda bialu inabi nde i baya hangu hondo manda bibelo Tolemese tanoni ngola habiya, lene.

<sup>57</sup> Ani lalu Kini Tolemi halu ibu wane Keleobadarabi Iyibi wahalu Tolemese tano ibini. <sup>58</sup> Ani ibiyagola Kini Alegesanda ibu ibalu ti Tolemesenin gola howa Kini Tolemihanda ibu wane Keleobadara Alegesanda dabu bilo mini. Ani miyagola libu Tolemese tanoni yari baya tara tara kinime hamelaga wiaru karulowa ogoriani mo dabubia hene.

*Alegesanda ibugua Yonadana ami agali haru haga haguane helo helenego ogo*

<sup>59</sup> Alegesanda ibugua beba mbira gilibu wia halu Yonadana ibu ngola hole ibabe lalu lawia hene. <sup>60</sup> Ani layago hale halu Yonadana ibu yari bayaleru mo karulalu kini kirali biago labo Tolemese tanoni berebiria ngola hole pene. Puwa ibugua libu mo turu halu siliba ngolobi dewaore mini. Ani bialu libunaga ami agali haguane hearubi mo turu halu mbirale mia dege bini. Ani biyagola wali agali bu hearume Yonadana mo

turu halu bi laga bini. <sup>61</sup> Anigo horo ogoningi dege Isaraele agali ko maru heneyago tigua Yonadana mo ko holenaga bi marubi lalu hene. Ani layago Kini Alegesanda ibu hale nahene. <sup>62</sup> Kini ibugua lalu, Kininaga aga daramabi ngago Yonadana ibu karulelo mini. <sup>63</sup> Ani bialu kini ibugua Yonadana ibunaga gi tigahayagi berelalu buwa ibunaga agali haguane bu hearuhondo lamialu lalu, Yonadana haru halu tano hanuni pupe hole pudaba. Ani bialu tigua wali agali bu karu lamialu tí Yonadanahanda ko biya lalu ke howa bi mbira laremigo hale naholeore. Ani bialu mbiralime ibu mo genda naholeore, lene. <sup>64</sup> Ai agali marume ke howa Yonadana ko biya lalu bi bame laede haga hearu tigua handalu hemiria kinime Yonadanana mini mo yaraga hayayago de hondowabi kininaga aga daramabi wiago mo karula heago hondowabi ti gi halu ibida pene. <sup>65</sup> Anigo kini ibugua Yonadana mini timbuni mini lene helene. Ani bialu ibu mini Kininaga Nenege helalu ami agali haru haga agali haguane dabo helalu ibu daluha agali haguane ho bamba hene helo dabo helene. <sup>66</sup> Turu holene timbuni Yonadanaha tolatagi halu ibu hendore mo palia holene karulo biralu nde Yarusaleme dai bini.

*Yonadana ibugua Aboloniusu bope henego ogo*

<sup>67</sup> Mali handari mbira pira waragariani duria (165) hayagola Kini Demidiriasa mende ibu Demidiriasa mbira igini henego ibugua Kiridi dindi iba dege dombeneha wiago wahalu dai buwa ibuni dalu bamba ibu mamaliru berene wiagoria hole pene. <sup>68</sup> Ai Kini Alegesanda ibu Demidiriasa lone daibu ka layago hale howa ibunaga miniha genda timbuni halu ibu Siria dindinaga tano dunini Andiogo dai bini. <sup>69</sup> Demidiriasa ibugua Aboloniusu heago gabumane haru haga haguane Koesiria wiagoria helo dabo helene. Ani helegola ai Aboloniusu ibugua ami agali mo hongo ho helowa haru halu puwa Yabane tano kawareni balai anda bu hene. Ani buwa ibugua Yonadana hearia bi lowia halu lalu, <sup>70</sup> í hangume íla wai bialu howa wali agali bu karunaga deni ína í lo guralu kego aginaga bialu kebe. <sup>71</sup> Ainde ínaga ami agali kago para howa uruniha hongo hanaho howa lariyagua nde hari bareha kego wahalu dindi tigabi ngagoria howa hongo manda bialu wai bibiya daliape halu ibabe. Anigo manda ala bia handa. Tanoha ami agali hayadaru ti í baba hatagoho kema ndobe. <sup>72</sup> Ai ína í ai henedabe handalu í heba ai dege henedabe hondole hondo habe. Ína íla bulene hongo nakarulapeore kegoni ndobe. Bamba í aba mamaru tigua íla hongo manda bialu hearia nakarulapeoreya handala halu kira libu dindinaga wai hongo howa bia nabi ibida piyago í manda bide. <sup>73</sup> Ína í aguaore bope holene manda bidebe. Inaga ami agali ína bamibe nahe gibiore maru nogo hosini biruwa wai bulenebi ami agali damenebi dewaore haru kogo ainde dindi tigabi ngagoria wai bibiya tagira ibalu keria í erembira mulene ege tole hibaria mbira nawulebira ndobe. Ani bialu í ibida polene diri mbira nawioreni porabupe holebere, lene.

<sup>74</sup> Aboloniusu ibugua bi ogoni layayago Yonadana hale howa ibu keba timbuni hene. Ani howa ibugua ami agali pari wayaliru daosini pira (10,000) haru halu Yarusaleme wahalu tagira pene. Ani biyagola ibu hamene Saimono ibuguabi ami agali haru halu ibu dege bini. Pialu agali halu kira piyago bibahende Yoba tano wiago be tagiraha balai anda bini. <sup>75</sup> Ani bialu heagola wali agali tanoha hearume tanoha pabe panga payatagi hene. Anidagua binidagoni irane Aboloniusunaga ami agali maru tanoha heagola bini. <sup>76</sup> Ani biyago bilowa Yonadana ibugua wai Yoba tanoha giala anda halu wai bini. Ani biyagola agali tanoha hearu tigua gi howa tanoha panga dugupe hayagola tano ogoni Yonadana ibu mo wini. <sup>77</sup> Aboloniusu ibu hale hayaria Yoba tano Yonadana ibu mo wiya layago hale howa ibunaga ami agali nogo hosini biruwa wai biaga daosini tebirabi (3,000) ami agali dewaorebi heba tidi yalu ohowa Asadodo ibida pole petingi halu pene. Ibunaga ami agali nogo hosini biruwa wai biaga hearume wai bilonaga dindi tigabi bayale wiagoria henge ngelonaga ibu emene dogolo mialu amura pene. <sup>78</sup> Yonadana

ibugua Asadodo talima pialu ogoriani howa wai bini. <sup>79</sup> Anigo Aboloniusu ibunaga ami agali daosini mbira (1,000) nogo hosini biruwa wai biaga Yonadana erembiraha yagi wai tibini waraanda ho bereleago Yonadana nahende wai dombeni pora bini. <sup>80</sup> Mani howa Aboloniusunaga wai hanalu birayayago Yonadanahanda handa walia hene. Tigua Yonadanana ami agali wara dombe bia howa timu tombe mbiraha doba bayago ti heagoria ibai hene. Wai egerebahagi howa binigo bialu alendo hene. <sup>81</sup> Anigo Yonadanana ami agali biarume ibunaga bi hale halu hongo ho hai hene. Ani heagola waitiginaga nogo hosi biaru manga hai halu tinaga hongo pirilope hai hene. <sup>82</sup> Ani biyagola Saimono halu ibunaga ami agali biaru anda ibini. Ibalu wai abale pora buwa Aboloniusunaga ami biaru ba dege bialu bo hengeda hai hene. Ani biyagola waitigi biaru ibida pugu bialu piai hene. <sup>83</sup> Agali nogo hosini biruwa wai biaga biaru wai hama wiagoria pu luluya hama ibaga bialu hene. Ani bialu ti ibida pialu Asadodo tanoha mbirale dama mitangi bialu bi pupu wiaga gime wabini mini Dagononaga anda timbuni heagoha birado hai hene. <sup>84</sup> Ani biyagola Yonadanahanda Asadodo tano bibahende bo heda hai halu tano emene maru wiarubi heba bo heda hai hene. Ani bialu tano dabudabu tara tara wiaru mo yai halu bini. Ani bialu Dagononaga anda timbuni heago bo heda halu ami agali wai ibida pialu anda ogoniha birado hayago heba bo heda anda halu bini. <sup>85</sup> Waitigi waiha howa ayu tibume dibini homayagobi andaha waranda howa hedaanda hene homayagobi bibahende daosini halira (8,000) homene. <sup>86</sup> Mani Yonadana ibugua Asadodo tano wahalu puwa Asagelono tanoni balai anda bini. Agali tanoha haga hearu ibu ngola hole harigani tagira ibini. Ani ibuwa tigua ibunaga mini mo yaraga hai hene. <sup>87</sup> Ani bialu mani Yonadana halu ibunaga ami agali biaru tigua tinaga waitigi bo wahayarunaga mbirale bayale wiaru mo hilo yalu Yarusaleme dai bini.

<sup>88</sup> Yonadanahanda wai hongohe biya layago Kini Alegesanda ibu hale howa ibugua Yonadanana mini yaraga hene. <sup>89</sup> Ani bialu ibugua manda ngolome wabini mbira Yonadanana wia hene. Yari ogoniale kini ibuni damene darama mbiraore kago miaga winigo Yonadana mini. Ani bialu Egerono tanobi dindi emene ogoniha wiarubi bibahende Yonadana ibuninaga tanoore ogoni wilo kini ibugua Yonadana mini.

## 11

### *Alegesanda Ebipanese ibu wai ibira henego ogo*

<sup>1</sup> Uruni bialu henedangi Iyibinaga Kini Tolemi waragane ibugua ami agali dewaore mo mogo bialu hene. Iyunaga ami agali daga labe nahe iba angeni iba mu ngadagua hene. Ani bialu ibunaga iba sibi dewabi wini. Ibugua Alegesanda mohondo howa Alegesandanaga dindi wiaru ibu bo yamialu ibunaga dindi dege wiagimbu bu ngelo ani. <sup>2</sup> Ani howa ibugua Siria dindi pialu agali ogoniha hearu baya hanguore bime ladebodebo bini. Ani biyagola wali agali tanoha hearume wai pabe panga payago dugua halu tini tagira puwa Kini Tolemi ngola hole pene. Abale howa Kini Alegesanda ibugua ibunaga wali agalihondo lamialu Kini Tolemi ogoni ibu imane kago ibiragola ibiribe lalu mo bila halimu, lalu lamini. <sup>3</sup> Anigo ainde tano mbira mbira pugu pugu bialu ibunaga ami agali maru helaga bini. <sup>4</sup> Ani bialu tigua Asadodo tano wiagoria tagira puwa tigua dama mitangi bialu bi pupu wiaga mini Dagononaga anda timbuni henego bo heda hene wiago Tolemi mo walia hene. Asadodobi tano emene emene wiarubi bo heda hai hene labu wiago de hendene. Wai bialu agali bo wahai henedaru dewaore wiago dengui hendene. Ani bialu agali maru Yonadanahanda anda heba heda anda hene biarunaga tingini Tolemi ibu polene harigani daga labe nahe wiarua hendene. <sup>5</sup> Wali agali bu hearu tigua mbirale uruni Yonadanahanda bini lalu lamini. Ani layago hale howa kini ibugua bi mbira ladai nabi dege hene. <sup>6</sup> Yonadana ibugua kini ibiyagola Yoba tano wiagoria ngola hole puwa turu halu ibiridago bayuwa birida

lama pene. Libu gi tigani bialu turu haga bu howa libu haru tano ogoniha palene. <sup>7</sup> Ani bialu Kini ibu Yonadana libu haru pialu iba Eluderusu peagoria tagira pene. Ogoriani ngua halu Yonadana ibu Yarusaleme dai bini. <sup>8</sup> Anidagua bialu Kini Tolemihanda iba solowara angeange tano timbuni dunini wuyu pearu ibugua handame hai halu Selusia tano wiagoria handa tagi hene. Ibugua Alegesanda mohondo howa anidagua bini.

<sup>9</sup> Ani buwa Kini Tolemi ogoni ibugua Kini Demidiriasa hearia bi lo pelalu howa lalu, Habo nalolene bi mbira lo wibiya. I wane Alegesanda ibu dabu biyago wahalu haru dai berogola í dabu bibelo. Ani bialu dindi í abanaga winigo ínime handaya ho hai habelo. <sup>10</sup> Ainde Alegesanda ibugua í bo wahole manda bialu hearia nde i wane hono mirugo daraba. <sup>11</sup> Ibugua bi gendabi ogoni lenedago inane Alegesandanaga dindi baya wiago dimagoli ho howa anidagua lene. <sup>12</sup> Kini Tolemihanda ibu wane Alegesanda miyago lone haru dai bialu Kini Demidiriasa daubilo mini. Ibugua ogonidagua bialu habo nalolene bi lo wiribidago puguini. Ani bialu wali agali bibahende deni libu harume waitigi haga haga bini. <sup>13</sup> Mani howa Kini Tolemi ibu Andiogo tano ngagoria pialu ibu Sirianaga kini hene. Anidagua bialu ibu dindi kira Iyibi kini halu Siria kini halu bini.

<sup>14</sup> Ogoningi Kini Alegesanda ibu Silisia wali agalime gabumanenaga bi mo wahayaya handala ibu ogoniha hama pene. <sup>15</sup> Ani howa Alegesanda ibugua mbirale Tolemihanda ogoni biya layago hale halu ibu Tolemila wai bule pene. Ani pialu hearia Tolemi ibu ami agali dewaore daga lamibe nahe haru halu harigani ibalu Kini Alegesanda ngola hayagola Kini Alegesanda halu ibunaga ami agali ibida piai hene. <sup>16</sup> Ani piai hayagola Kini Alegesanda ibida pialu Arebia dindi ha do heagola ayu Kini Toleminaga mini daliga mini lene timbuni hene. <sup>17</sup> Ani pu hado hearia agali mbira Arebiaali mini Sabadieie henegome Kini Alegesanda balu ibu haguane Kini Tolemi hearia pugu yalu pu lalu mini. <sup>18</sup> Anigo horo tebiru hangu howa nde Kini Tolemi ibunibi homa dege bini. Ani homayagola wali agali dindi anduane tano bibahende bu hearume Toleminaga ami agali wai pabeanda hongohe haru bibahende bo wahai hene. <sup>19</sup> Anidagua biyagola mani mali handari mbira pira waragariani karia (167) hayagola nde Demidiriasa mende ibu kini pigane hene.

### *Yonadana ibu Demidiriasa mende nenege henego ogo*

<sup>20</sup> Ogoningi Yonadanahanda Yudia dindiha agali bu hearu mo ngoai hai howa wai biaga masini hongoheru Yarusaleme tanoha wai pabe hongohe hearu bo gialanda holenaga wabialu hene. <sup>21</sup> Ani bialu heagola Yuda agali ko maru Yuda tini aria turu nahaga hearume kini hearia puwa lalu, Yonadanahanda Yarusaleme wai pabeanda hongohe biago ho hagira bida, lene. <sup>22</sup> Kini Demidiriasa ibu bi ogoni layago hale howa keba timbuni halu abale heyalu Tolemese tano pole pene. Puwa ibugua beba mbira gili buwa Yonadana hearia pelalu howa lalu, Wai bialu harugoni wahalu bi midini mbira lamíya abale ibabe, lalu gilibu wia hene.

<sup>23</sup> Yonadana ibugua beba ogoni dagalo handa hondowa dege wai wanahe bialu haabo hene. Ani bialu howa dege ai agali haguane marubi Anduane Homogonaga loma binigo mo miaga marubi ti haru kini hondo pole dabene. Ibuha ko mbira anda ibulubadago gi naheore hene. <sup>24</sup> Ibugua ngolobi silibabi agabi dewaore bame talebu migi bulenaga yalu Tolemese tano pene. Anda piyago hondowa kini ibu turuore timbuni ho hene. <sup>25</sup> Yonadana ibuni aria hearu marume ibuhondo keba howa Yonadanahanda ko biya lowa bi laga laga bialu hemiria <sup>26</sup> kini ibugua Yonadanahondo mana bayale kini ale henerume biagadagua dege bini. Ani bialu ibuni damene bu hearu deni howa kini ibugua Yonadana mini yaraga hene. <sup>27</sup> Kini ibugua Yonadana ibu Anduane Homogonaga loma binigo mo miaga agali haguane timbuni helo mo hongo halu mini lene timbuni helo mo yaraga halu ibu mini Kininaga Nenege ho bamba hene ka, lalu bini.



<sup>28</sup> Ani bialu Yonadana ibugua kinihondo hale halu, Ibugua muni siliba daosini dege genda magi kilogarama pira (10,000) nguliya ina dagisi muni Yudia dindihabi dindi tebira Samariaha howa bo yu anda ibini biaruhabi nami wahabelo hameledo, lalu kini hale hene.

*Demidiriasahanda beba gilibu wia henego ogo*

<sup>29</sup> Ai kini ibugua bi Yonadanahanda ibuhondo hale hayago e lalu ibugua Yonadanahanda beba gilibu wia halu ladai bini. Ibugua bi lenedago ogo,

<sup>30</sup> Kini Demidiriasahanda ibu hameneore Yonadana halu Yuda wali agaliru bayale kemida lara.

<sup>31</sup> Iname beba mbira gili bialu inaga te gili buwa ina hanini Lasenesenaga wia harima. Beba ogoniha bi ogodagua gili birima.\*

<sup>32</sup> Kini Demidiriasahanda ibu hanini Lasenesehondo lalu, Bayale kebe. <sup>33</sup> Iname Yudia wali agalihondo mana bayale bimiya lalu bi lo wirimagoni tiore inanaga nenege howa tigua ina baba habo nalolene bi pongo winigo hongo howa yu ka. <sup>34</sup> Tigua Yudiaha dindi dewa bu ngarubi dindi tebira Eberaimibi Lidabi Arimadia ngagobi tigua handaya ho helo karulape larima. Dindi uruni iname Samaria dindiha howa mo bagi halu Yudiaha wiatago helarima. Wali agali Yarusalemeha lotu lole poragobi biamogo bimiya larima. Ani bialu mabuha tomo hingedagonaga dagisibi ira lini dedarunaga dagisibi kinihondo mani lone namule larima. Muni uruni wahalu tini yu howa Anduane Homogonaga anda kagoha biabe bulene ngago bule ti yu helo larima.☆ <sup>35</sup> Ani bialu dagisi maru tigua ngiaga wini mbirale bibahendenaga pinibi ibinaga dagisibi kini ibuninaga dagisibi uruni bibahende waharima. <sup>36</sup> Bi beba uruniha gilibu ngaruni mbirago maniorebi mbiralime mo iriari nabulebiraore.

<sup>37</sup> Iname ani ledemagoha bi mbiraore helo inabi beba mbira tigua dagalalu hari nene loma bia hene ngagoria handalu mo ngelelo gili bialu pelabe, lalu lo pelene.

*Yonadanahanda Demidiriasa mende heago biamogo binigo ogo*

<sup>38</sup> Dindi Kini Demidiriasa ibugua handaya ho howa haru hene wiago bibahendeha wali agali tini mabuha ira lini daga hearu andaneha mbirale mbira gi nahe hadapaya bu hearia hendene. Ani bialu ibula waitigi mbira naheore hene. Ani howa ibunaga ami agali bialu biabe wahalu tini andaga dai biai helene. Anigo ami agali iba dege dombeneha howa ibini hearu dege ibuni heba hole helene. Anigo ami agali maru ala ibu aba heba biabe bialu lu hene bu hearu tigua dege tinaga biabe nawiyagola tinaga miniha Kini Demidiriasa baba genda yu hai hene. <sup>39</sup> Ogonigo agali mbira mini Tiribo hene. Bamba ibu Alegesanda baba mandagi hagaore mbira henego ibu hondo hearia Demidiriasanaga ami agali bu hearume keba hai ho heago hendene. Ani handalu Tiribo ibu Arebia dindiha agali mbira mini Imalague ibu Alegesanda igini Andiogusu henego ogoni handaya ho haga henego ogoni hearia pene. <sup>40</sup> Tiribo ibugua Imalaguehondo hongo howa hale halu lalu, Andiogusu ibu haru dai buwa ibu aba Alegesandanaga henge mialu kini haaribia helo haru poliya inaga giha yaha, lene. Ani bialu Tiribo ibugua te maru Demidiriasanaga mana ogobi nga lalubi ibunaga ami agali hearume ibuhondo turu naheore hearubi lamiai hene.

<sup>41</sup> Ai Yonadanahanda Demidiriasa hearia bi lo pelalu, Kininaga ami agali Yarusaleme wai pabeanda hongohe ngagoha karu haru tagira pialu Yudiaha wai pabeanda hongohe maru ngaru ami agali bu karu bibahende hai tagira piyai habe. Agali uruni tigua Isaraele wali agali bu kagoha wai bule duru bialu haabo kago ani bibe, lalu lo pelene. <sup>42</sup> Ani layayago hale howa Kini Demidiriasa ibugua Yonadanahondo ladai bialu lalu, Mbirale ina hale haridaruni ina karulape laro. Ani bialu ina inaga mini yaraga holebi inaga

\* **11:31:** Yonadana ibu kini hamene henene ndo halu Lasenese ibubi kini hanini ndo hene. Anigo Kini ibugua agali kira ogoni labonaga mini mo yaraga halu bi ogonidagua gili bini. ☆ **11:34:** 1 Mag 10.30



dindininaga mini yaraga holebi harigabi taya bialu ko. <sup>43</sup> Anidagua buliya ainde inaga ami agali hearume inaga bi mo wahalu piai hayago ainde inaga ami agali i biamogo bule ibulene karulapeda, lalu lo pelene.

<sup>44</sup> Ani layayago hale halu Yonadana ibugua ami agali pari wayali wai hongohe biaga hearu daosini tebira (3,000) bibahende Andiogo tano pelene. Yudia howa ami agali biaru Andiogo tano anda piyagola Kini Andiogusu ibu turu timbuni hene. <sup>45</sup> Ayu dege wali agali dindi ogoniha howa daosini dege handari mbirani pira kira (120,000) ibu ngoai howa kini bo wahole bialu hearia ibiyagola kini ibu turu hene. <sup>46</sup> Ai kini ibu ibida ibuni andaga piyagola wali agali tano ogoni bi hearume hariga wiadagua tini gungu bima pugu pugu bini. <sup>47</sup> Ani bialu hearia Yudia ami agali biaru olayagola tigua ibalu kini biamogo bini. Ani bialu tigua tanoha hariga pearu bibahendeha piai halu wali agali bai halu horo ogonongi daosini handari mbira (100,000) bibahende bo wahai hene. <sup>48</sup> Tigua kini baya hangu handaya ho ha howa tano ba heda hai halu dindi anda bibahende bo heda hai halu mo labu hai halu dabudabu bayale wiaru ti mo yai hene. <sup>49</sup> Ai Yudia ami agali biarume tano timbuni wiago ti handaya ho heagola ti mogolo hendene. Ani hondowa tigua kinihondo wai wahalu ti daraha lalu hale hene. Tigua ibuhondo lalu, <sup>50</sup> Inaga miniha keba ho kegoni wahalu Yudia ami agali bu karume ina baba wai nabi mo palia halu gi tigani ladaba, labe, lene. <sup>51</sup> Ani lalu agali wai biaga tanoha hayadaru tinaga mbirale wai biaga wiyadaru wahai halu wai palene. Ani bialu kininaga denibi ibunaga wali agalinaga denibi Yudia ami agali biaru ti mini yaraga hene timbuni mbira hene. Ani bialu Yudia ami ti waiha howa dabudabu bayale tara tara mo yayaru yalu tini dalu dai bini. <sup>52</sup> Ai Kini Demidiriassa ibugua ibunaga dindi baya hangu handaya ho heagola ibunaga wali agali emene tigi mbirani hangu bayale hene. <sup>53</sup> Anigo mani howa kini ibugua habo nalolene bi lo wiyago mo habo lene. Ani bialu ibugua Yonadanala mandagi nahe wahalu Yonadanahanda ibuhondo bayale bialu hayarunaga yolo mbirale mbira nami wahalu ibugua Yonadana mo genda halu hene.

#### *Yonadanahanda Andiogusu waragane biamogo binigo ogo*

<sup>54</sup> Mani mbirungi Tiribohanda igiri emene Andiogusu haru dai buwa ibugua kininaga manda mo karula hene. <sup>55</sup> Ami agali maru Demidiriassa ibugua biabe wahalu tini andaga pudaba layaru ayu ti pialu Andiogusunaga ami anda piai hene. Ani puwa tigua Demidiriassa baba wai biyagola Kini Demidiriassa ibu ibida pora bialu pene. <sup>56</sup> Ani piyagola Tiribo ibugua nogo elebana dewaore haru howa Andiogo tanoha agali haguane howa handaya ho hene. <sup>57</sup> Ai igiri emene Kini Andiogusuhanda beba mbira gili bialu Yonadana hearia pelene. Ibugua lalu, í Anduane Homogonaga loma binigo mo miaga agali haguane timbuni habelo karulape lalu inaga dindi hobane maria ngago ina handaya ho habelo yupe halu ina í mini Kininaga Nenege lalu laro, lene. <sup>58</sup> Ani lowa ibugua beledi be ngolome wabini wiaru mo wia halu ibugua lalu, Yonadana ina kininaga aga daramabi ngago karulalu ngolome wabini mandibu kini ibuni aria darama mbiraoreme karulaga ngago mo karulalu bibe, lene. <sup>59</sup> Ani bialu Yonadana hamene Saimono ibu gabumane agali haguane dabo helalu ibugua tano maru iba solowara bedago angeange wuyu pedaru Ponisia howa pialu Iyibi dindila tubari ngagoria handatagi helo dabo helene.

<sup>60</sup> Ai Yonadana ibu dindi maru iba Yuberedisi doma ederahayagi wiaruha pole ibunaga ami agali hearu haru halu puwa dindi uruniha tano wiaruha anda pu haga bima pene. Ani piyagola Siria ami agali hearume ibu heba mini mbiraore halu ti heba mandagi haga bini. Ani bialu ibu Asagelono tano wiagoria anda piyagola wali agali tanoha hearume ibu ibiyagola turu howa ngola hole tagira ibai hene. <sup>61</sup> Anigo ai ibu Gasa tanoha anda piyagola wali agali tanoha hearume tano pabe panga payatagi hene. Ani biyagola ibugua ti baba wai bialu bo poda hana howa bope howa dindi emene

emene wiaru bo heda heda hai halu mbirale dabudabu bayale wiaru mo pagebu yaiore hene. <sup>62</sup> Ani biyagola wali agali Gasa tanoha haga hearume Yonadanahondo hale halu, Keba hadalu wahabe, lene. Ani layagola ibugua ti baba gi tigani lalu wahene. Anigo agali haguane hearu igini dege minalu Yarusaleme garabaya helo haru piaga hene. Ani bialu ibu pialu Damasagasa tano puabo hene.

<sup>63</sup> Ani pu howa Yonadana ibu hale halu hearia Demidiriasanaga ami agali dewaore haru halu ami agali haguane mbira hariga Yonadana dai bulebiyago hapai hole Galiliha Kadese tano wiagoria ibu ka layago hale hene. <sup>64</sup> Ani halu howa ibu hamene Saimono Yudia dindiha helalu Yonadana ibugua ngola halu wai bule pene. <sup>65</sup> Saimono ibugua Bedesua tano kawareni wai bialu luore biaho wini. <sup>66</sup> Ani bialu howa tigua Saimonohondo wai wahalu gi tigani lama layagola Saimonohanda karulape lalu anidagua bini. Ani bialu ibugua wali agali tano ogoniha haga hearu taliatagi hai howa ami agali marume tano ogoni handaya ho helo helene.

<sup>67</sup> Ai Yonadana halu ibunaga ami agaliru puwa iba kuyama Genesarete bereago angeni balai anda bialu hene. Ani bialu gao layagola heyalu dindi tigabi Haso tano wiagoria tagira pene. <sup>68</sup> Ani pialu hearia waitigi maru dindi tigabi bayale wiagoria ibu ngola hene. Anigo ti aria maru hari bare wiagoha hado heago Yonadana ibu manda nabi hene. <sup>69</sup> Ai ami agali maru hari bareha hado hayaru tagira ibalu waiha hatago hayagola <sup>70</sup> Yonadanana ami agali hearu ibida piyai hene. Ani biyagola ami agali haru haga haguane kiralu hangu Abasalomo igini Madadiasala Kalabisi igini Yudasala hangu Yonadana heba ona hene. <sup>71</sup> Ani biyagola Yonadanahanda taga timbuni halu be abalu ibunaga hagianeni dugu wialu ibugua Anduane Homogohondo bi lene. <sup>72</sup> Ani lalu ibu dai buwa waitigi baba wai bialu waitigi bope hayagola ibida piyai hene. <sup>73</sup> Ai Yonadanana ami agali abale ibida piyaru tigua handalu hearia Yonadana handalu ibida piyago hondowa tibi nde lone ibu dai bialu ami agali hatago hene. Waitigi talima pialu Kadese tano tinaga balai anda bu hene biagoria tagira pialu dindi ogoni Yuda ti karulene. <sup>74</sup> Ai waitigi daosini tebira (3,000) bibahende horo ogoningi dege homai hene. Ani biai halu Yonadana ibu Yarusaleme dai bini.

## 12

### *Yuda ti Lomo tanoalirubi Sabarada tanoalirubi heba ho gimbu binigo ogo*

<sup>1</sup> Ai Yonadana ibugua handalu hearia ibunaga biabe biyago bayale hai hayago hondowa agali maru ibunaga bi yalu Lomo tano timbuni ngagoha pudaba lene. Tigua habo nalolene bi ala lo wiyago lone mo hongo holenaga bi yalu pelene. <sup>2</sup> Ani bialu bi mbiraore dege gili bialu Sabarada tanohabi tano hongohe wiaruhabi pelai hene. <sup>3</sup> Agali bi yalu pene biaru Lomo pialu gabumane anda timbuni mana lagane anda heagoria anda pene. Anda puwa tigua lalu, Inanaga agali haguane Yonadana halu Yudiaha wali agali hearume ti baba habo nalolene bi ala lo wirimago mo hongo halu lone lo wule pudaba laya handala ibirima, lalu latagi hene. <sup>4</sup> Ani layagola Lomonaga gabumane agali haguane hearume beba gili buwa agali biaru ti giha ya hene. Beba uruni ti harigani Yudia dai bialu karia agali haguane dindi tara tarani bu karume ti harigani baya hangu handaya ho helonaga gilibu mini.

<sup>5</sup> Yonadanahanda Sabarada dindiha gilibu pelenedagoni ogodagua lene.

<sup>6</sup> Agali Anduane Homogonaga loma binigo mo miaga agali haguane timbuni Yonadana halu gabumane agali haguane bu karubi agali loma binigo mo miaga maru karubi Yudiaha wali agali bu karubi tigua ti hamene Sabarada dindiha karuhondo bi lo wia hara. <sup>7</sup> Bamba tinaga Kini Ariusuhanda beba mbira gili buwa inanaga Anduane Homogonaga loma binigo mo miaga agali haguane timbuni Oniasa hearia ibilaya. Ibugua lalu ina bibahende hamene hamene dege lo hamiya lalu langiya. Ayu iname bi ibunaga ogoni heba gilibu maga halu ti kemiria ibilaramago ai Ariusunaga bi ogoni

heba inanaga bi heba tí handalimulo ibilarama. <sup>8</sup> Oniasahanda agali tínaga bi yalu ibiyadago bayuwa ibirida lalu turu howa beba ogoni yamini. Beba ogoniha howa ina mandagi nenegeore ho hamiya lalu bi wáleore lo wia heneya. <sup>9</sup> Heneneore ina dindi mende karu baba nenege naheha howa ina hongo Anduane Homogonaga mbuga ngagoha hongo miadai beremali. <sup>10</sup> Anigo ainde iname tí baba habo nalolene bi lo wirimago lone mo hongo ina nenegeore halu mandagi hamiya manda bialu gilibu wia haramago irane iname tíore wanahole manda buwa larama. Anigo ai beba tigua gilibu ibilene mbira nami dege hemaria mali mbira pu bolangua hayada.

<sup>11</sup> Iname lotu lagane horo timbuni tagira ibirangibi inanaga horo timbuni maru tagira ibirangibi iname Anduane Homogohondo loma mialu howabi ina ibuhondo bi lalu howabi bibahendengi tí embeda nahe mitangi bu haabo haramali. Anidagua beremadago irane ina hamene mitangi holene duniniore mbira ngago manda bialu anidagua beremali. <sup>12</sup> Ani bialu tíore mini yaraga hene timbuni kemigonaga ina turu timbuni ho kema. <sup>13</sup> Anigo ina bayale nahe wai biabe bialu genda yu haabo haga kemago irane kini bu karume inahondo genda mo ngialu haabo halu kagome ina genda yu kema. <sup>14</sup> Ina wai beremago bialu howa tíbi ina baba nenege hene maru karubi tí genda mo mulene hame nalaramali. <sup>15</sup> Ina Ngode Datagaliwabe ibunime baya hangu handaya ho haga kagome ani beremali. Anidagua biaga kemagome inanaga waitigi ibira halu ina wayali hene kema.

<sup>16</sup> Ani howa iname agali kirali Andiogusu igini Numeniusu Yasono igini Andibadela Lomo dindiha bi lo yu pialu ina baba nenego halu mandagi holenaga habo nalolene bi ala lo wirimago lone mo hongo halu lo wima lama piribi. <sup>17</sup> Ani bialu libugua tí kemiria puwa tí mo biala halu beba habo nalolene bi ala lo winigo mo hongo halu gili bini ogoni milibu larima. <sup>18</sup> Ainde ayu inanaga beba gilibu wia haramago ladai bilimulo hame ledema, lalu pelene.

<sup>19</sup> Ai abale Sabaradali tigua Anduane Homogonaga loma binigo mo miaga agali haguane timbuni Oniasa hearia beba gilibu ibilenego ogo

<sup>20</sup> Ai nde Ariusu Sabaradali kini kagome loma binigo mo miaga agali haguane timbuni Oniasa bayale kebe, lara. <sup>21</sup> Tigua bi mbira gilibu winiyago ogodagua leneya. Ai Sabarada wali agalibi Yuda wali agalibi ti hamenelaore ka. Libunaga mamali mbiraore Abarahama hene. <sup>22</sup> Ayu iname mbirale ogoni handa walia halu ayu ai ti bayale dege kabe hako kabe manda nabi howa bame hale dege harama. <sup>23</sup> Ainde tigua inahondo beba gili bialu bi ladai birimiyagua nde iname beba gilibu dai bilalu nogo bulumagaru dindirur maru nde tí talebu nguleberema. Tigua nde anidagua bulene manda birimiyagua agali inanaga beba yalu ibirago tigua bi uruni baya hangu ogobi hea lalu lama dai bulebirago hale holeberema, lalu beba gilibu wia hene.

### *Yonadana Saimonolame wai maru bigi binigo ogo*

<sup>24</sup> Yonadana ibu hale ho hearia Demidiriasanaga ami haru haga agali haguane hearume ami agali ala haru emene lowa ami agali dewaore haru halu wai bule manda buwa íbu ka layane hale hene. <sup>25</sup> Ani hale halu Yonadanahanda waitigi ibu daluha anda ibilo hame nale howa ibugua abale Yarusaleme wahalu harigani ngola hole Hamada tano wiagoria pene. <sup>26</sup> Agali o pendaru tigua hondo wule penego ai tigua handalu dai buwa lalu, Waitigime wai ayu mbiraga bule mandabu hea, lalu lamini. <sup>27</sup> Ani hale howa Yonadana ibugua ami agali biaruhondo lamialu lalu, Ami agali karu lamialu ayu mbiraga u napale halimu lalu bibahende lamiai halimu. U napale wai biaganeale gime yai howa wai bule manda manda bu halimu lalu lamilimu, lene. Ani lowa agali mbira mamage hai helo dabalul delaga bini. <sup>28</sup> Ani bialu heago waitigi ti handa walia howa waitigi agali hearu ti gi hai ho hene. Tinaga ira delearu wene dalu helalu ti ibida piai hene. <sup>29</sup> Ainde mbiraga Yonadana halu ibunaga ami agali biarume agali biaru

warahanda howa handalu hearia ira hangu dalu heago dalu helalu tini piai hayayago hendene. Egabi lalu<sup>30</sup> ai gao layagola Yonadana halu ibunaga ami agali biarume waitigi talia minabe nahe iba Eluderusu domalu pu waore hayago hendene. <sup>31</sup> Ani piyaya handala Yonadanahanda uruni ti pelo wahalu puwa Sabarada tanoha Arebia hameigini hearu baba wai bialu hene. Wai bialu ibugua ti bo podahana howa tinaga mbirale wiaru ti aribia howa mo pagebu yai halu pene. <sup>32</sup> Ani bialu mani Damasagasa tano wiagoria tagira pene. Ani puwa dindi ogoniha wiaru baya hangu de handama ibaga biaiore hene.

<sup>33</sup> Ogoningi dege Saimono ibubi nde Asagelono tanoha dindi emene wiaru handama ibaga biai halu bini. Ani bialu lone beregedalu Yoba tano wiagoha puwa ibugua ami agali maru tano ogoni handaya ho helo dabo hene. <sup>34</sup> Ani dabo helenedagoni irane Yoba wali agalime tinaga tano hongohe ogoni Kini Demidiriasa mule ka layago hale howa ami dabo helene.

<sup>35</sup> Ai Yonadana ibugua gabumane agali haguane bu hearu olo mogo bialu tigua Yudi-aha wai pabeanda hongohe maru bu helole mitangi bini. <sup>36</sup> Ani bialu tigua Yarusaleme tanoha wai pabe daligaore helo biadaga halu wai pabe hongohe timbuni mbira tanola wai pabeanda kagola hengeneha bu hobaki ho bule manda bini. Anidagua biragome tigua mbirale yolo bulenebi mbirale tagulenebi nabilo manda bialu pabe ogonime bu tu wiaki hene. <sup>37</sup> Wali agali bibahendeme tanoha biabe bulene wiago bulenaga mo hilombira howa bialu hene. Ani binidago wai pabe amu ni tagira ibiragohayagi heago ko halu gialapaya bu wiago hondowa ani bialu hene. Ani bialu mendebi mini Kabenada laga heagobi dindini podo ibira ho wiago de hondowa ogonibi bule manda bialu hene. <sup>38</sup> Ani bialu heagola Saimono ibugua nde dindi abene amu ni paliragohayagi hari bare wiagoha tano wiaru mo hongo halu wai pabe hearunaga wai pabe panga payaga aeaneme bengena hongohe helaga bini.

### *Tiribohanda Yonadana garabaya binigo ogo*

<sup>39</sup> Ainde Tiribo ibuni Sirianaga kini holenaga ibugua Kini Andiogusu homelo bo wahale manda bu hene. <sup>40</sup> Anigo ainde Yonadanahanda ibunaga mini wu kago hame nale howa ibu baba wai bulino gi ho hene. Ani manda buwa Tiribo ibugua ibunaga ami agaliru haru halu Bedesana wiago pole pene. Ibugua Yonadana minalu homelo bo wahole manda bialu pene. <sup>41</sup> Anigo Yonadana ibuguabi nde ami agali wai baya hangu biaga pari wayaliru daosini dege pira maria (40,000) haru halu Bedesana tano pene. <sup>42</sup> Ani piyagola Tiribo ibugua Yonadanana ami agali dewaore haru heago hondowa ibugua Yonadana hamelo bole piyago gi halu wahene. <sup>43</sup> Wahalu ibunaga agali ho bamba hene haguane bu hearunaga deni howa ibugua Yonadana ibirida lalu mo bila halu hene. Ani bialu ibugua Yonadana mo turu howa mbiraleru bame mialu howa lalu, Wali agali bibahendeme kini ibuninaga mini yaraga haremilidagua Yonadanana mini yaraga halu halimu, lene. <sup>44</sup> Ani lowa ibugua Yonadanahondo lalu, Iyaore keba holene mbira nawiore kebagoni. Ani kebagodago irane aginaga inaga ami agali dewaore haru kebe. <sup>45</sup> Ti maru tini daluha hama dai bidaba la. Ini heba polene maru dege haru halu Tolemese tano ma. Ina tano ogonibi wai pabeanda hongohe maru ngarubi ami agali marubi ami agali haru haga haguane marubi tale bialu maru in ngulebero. Ani ngialu maha nde beregedalu ini dalu dai bulebero. Ainde in mbirale uruni dege bule ibinigo kogoni, lalu lamini. <sup>46</sup> Ani laya handala Yonadana ibugua Tiribonaga bi ogoni henene laya lo manda buwa ibunaga ami agali dewaore Yudia hole dai bidaba lene. <sup>47</sup> Ami agali daosini tebira (3,000) hangu ibuni heba hene. Ani howa lone mo tale bialu ami agali daosini kira (2,000) Galili helalu daosini mbira (1,000) ibuni heba pene. <sup>48</sup> Pialu Yonadana halu ibunaga ami agali biaru Tolemese tanoha anda piyagola agali tanoha hearume wai pabe panga payatagi howa Yonadana minu garabaya bialu ibunaga ami agali biaru homelo bo wahai halu tinaga wai biaga ayu tibu yu hearu tigua gingila miai hene.



<sup>49</sup> Ani bialu Tiribohanda ibunaga ami agali maru geni piaga hearubi maru nogo hosini biruwa wai biaga hearu Galili dindihabi dindi tigabi wiagohabi pialu Yonadanaga ami agali maru hearu bo wahai hole pudaba lene.

<sup>50</sup> Ainde Yuda ami agali maru biaru tigua manda bu handalu hearia Yonadana halu ibunaga ami agali maru piyaru bo wahayada lo manda bu hene. Ani manda buwa ainde tini degedege mo hongo haga haga bialu wai bule tidi yalu pene. <sup>51</sup> Waitigi biaru tigua handalu hearia Yudali biarume homolene gi nahe tigua wai bule hongo ho heago handalu ti ibida dai bini. <sup>52</sup> Ani biya handala Isaraele ami agali ti bayale dai bialu Yudia dindi anda pene. Ani bialu Yuda wali agalime Yonadana halu ibunaga ami agali homayagonaga dara timbuni howa dugu bialu duguanda luore hene. Tigua gi timbuniore ho howa dugu timbuni bialu hene. <sup>53</sup> Ai dindi bibahende ha hameigini tara tara palearume Yuda wali agali lenego mbiraore hangubi nahelo bo helo wahaiore manda bini. Tigua lo manda bialu, Ayu tinaga agali haguane ti haru bamba haga mbira nahebi agali ti biamogo bulenebi mbira naheore nga. Ani ngago ai mani howa Yuda wali agali dindi hene lalu tinaga te nalelo iname ti aria lenego balu bo amo lamiya, lene.

## **Saimono ibu Yudanaga agali haguane hene**

*(Be 13-16)*

# 13

### *Yudanaga agali haguane henego ogo*

<sup>1</sup> Ai Saimono ibu hale halu hearia Tiribohanda ami agali dewaore haru halu Yudiaha wali agali bu karu bo hilo wahai hole ibira layane hale hene. <sup>2</sup> Ani hale ho hearia wali agali bu hearume gi howa mogolalu duru timbuni lalu heago hendene. Ani hondowa ibu Yarusaleme pialu ti haru mandagi hene. <sup>3</sup> Ani howa ibugua tinaga miniha mo hongo halu lalu, Ai *ı* hamenerubi *ı* aba ibu damene bu hearumebi Anduane Homogonaga anda bayale ngelonaga baya hangu handaya ho halu Mosesenaga bi mana lo wini ngagobi bayale ngelonaga handaya ho halu buwa timbuni bialu harimago tinime handalu manda bu kemi. Ani bialu howa iname wai timbuni bialu harimagobi genda tara tara dewaore yu harimagabi *ı* manda biai kemi. <sup>4</sup> *I* hamene bibahende Isaraele wali agali biamogo bialu homai hayagoni ndobe. Ai *ı* hangu wahenego o kogonida. <sup>5</sup> Ai wai birimagoha *ı* ni hangu homolino wai bialu henebe toba holemini nahalimu. Ainde *ı* hameneru ti dindiha lowa *ı* daliga ndo ko. <sup>6</sup> Ayu agali dindi tara taraha bu hearume ina bo hilo wahaiore holenaga ti mo mogo biai halu wai mo miyadagola *ı* na nde inanaga dindibi Anduane Homogonaga anda kagobi tinaga wali waneigini biru karunagabi wai bulene hamelo kogoni, lene.

<sup>7</sup> Wali agali tigua Saimononaga bi ogoni hale howa tinaga bu mini ha lone hongo hadai bini. <sup>8</sup> Ani howa tigua hongo howa ladai bialu lalu, Saimono *ı* inanaga agali haguane kegoni. *I* hamene Yudasala Yonadanala libunaga henge mialu libu henedagua *ı* ni ha aribia ha. <sup>9</sup> Ani bialu inanaga wai bia ha. Ina bibahende *ı* hangu talima ibule kema, lalu bibahendeme lai hene. <sup>10</sup> Ai Saimonohanda ami agali hearu bibahende mo mogo biai howa Yarusaleme tanoha wai pabe hongo howa biai halu tano maru wiaruhabi lone mo hongo halu abale biai helo mo daila hene. <sup>11</sup> Ani bialu ibugua, Abasalomo igini Yonadana halu ami agali dewaore Yoba tano pole pudaba, lene. Ani laya handala puwa Yonadana ogoni ibugua wali agali tano ogoniha hagane hearu bo taliatagi hai halu tano ibu karulo hene.

<sup>12</sup> Ai Tiribo halu ibunaga ami agali dewaore Tolemese tano wahalu Yudiahayagi anda pene. Ogoningi Saimono hamene Yonadana garabaya helowa Tiribo heba mandagi Yudiaha pole pene. <sup>13</sup> Horo ogoningi Saimono halu ibunaga ami agali biarume puwa dindi tigabi mbira wiago gibuniha Adida tano wiagoria balai anda bialu hene. <sup>14</sup> Ai Saimono ibugua ibu hamene Yonadanaga henge mialu agali haguane ha aribia howa



wai bule manda manda bu ka layago Tiribo hale hene. Ani hale howa Tiribo ibugua Saimonohondo lawia halu lalu, <sup>15</sup> Ī hamene Yonadana ibugua Yarusalemeha agali haguane hayago howa kininaga dagisi muni namiyagonaga ibuni garabaya helowa ina haru mandagi kema. <sup>16</sup> Ainde tigua siliba muni dewaore genda magi kilogarama daosini tebira (3,000) ibilarimiyagua nde ibu garabaya kago golope halu pu loleberema. Anigo ai garabaya golalu pu laramagola mani lone mine holigo ibu igini kiralu kago labo ina baba howa libu aba henegoria ha aribia helo ibilalimu, lalu bi lo pelene.

<sup>17</sup> Ani lo wia hayayago hale howa Saimonohanda ami agali lo manda bialu, Yonadana igini kira ogoni labo haru ibidaba, lene. Saimono ibu Tiribohanda bi layadago henene ndo layada lo manda bu howa dege Yuda wali agali tigua ibuhondo keba howa lalu, <sup>18</sup> Saimonohanda siliba muni biarubi igiri kiralu ogoni labobi napelayagome nde Yonadana homaragonida, lalu ibuha bi podene ngelolobada lo manda bini. <sup>19</sup> Ani manda buwa ibugua munibi igiri kiralibi pelene. Ani pelayagola Tiribo ibugua henene bule lalu gi dolalu bi lo wiyago mo habo lalu ibugua Yonadana garabaya golope nahene.

<sup>20</sup> Ani bialu mani howa Tiribo ibugua Yudia dindiha dewaore mo ko hole emene hama anda ibugu bini. Ibugua hariga paulalu Adora tano pole piaga luore wiadagua pialu pene. Ani pialu hearia Saimono halu ibunaga ami agalirume hariga ogonidagua dege pialu Tiribo pole piyago hariga hapai hene. <sup>21</sup> Ani bialu heagola ami agali maru Yarusalemeha wai pabeanda hongohe wiagoha haga hearume Tiribo hearia bi lo pelalu, Ina tomo nawiore kemago tomo maru yalu hariga dindi ko wali agali nahaga ngagoha ibalu tomo yalu ibabe, lalu hongo howa bi lawia hene. <sup>22</sup> Anidagua layayago hale halu ibunaga ami agali nogo hosini biruwa wai biaga bu hearu tigua pole manda manda bu hadaba lalu lamini. Pole manda manda bu palearia mbiraga ogoningi dindi guni timbuni ibira howa hariga polebiyago wiapai hene. Anidagua biya handala ti emene hadai bialu Gileada polene hariga wiadagua pialu pene. <sup>23</sup> Pialu ibugua Basagama tano wiagoria tagira puwa Yonadana ogoriani howa homelo bo wahene. Ani biyagola ibunaga tingini dindi ogoniha mo hora hene. <sup>24</sup> Ani bialu Tiribo ibu ibuni dalu dai bini.

<sup>25</sup> Ani biyagola Saimonohanda agali maru ibu hamene Yonadananaga tingini mo pudaba lene. Mo yu dai biyagola ibu mamalirunaga tano Modeini tano wiagoria hora hene. <sup>26</sup> Ani bialu Isaraele wali agali ti Yonadana dara howa dugu bialu duguanda luore horo dewa berene. <sup>27</sup> Ani bialu Saimonohanda ibu aba hameneru mitangi bu haabo holenaga tinaga homalini anda mbira daliga bu gimbu bima irigi howa bu helene. Anda bu gimbu bima irigi hene ogoni dindi kaundiaha howa panaga handai habehe daliga dege hene. Anda ogoni erembirahabi tombehabi ege tole ngiringarale muni yolo dewaoreme miaga wiarume mo yaribia helene. <sup>28</sup> Ani bialu nde Saimono ibu aba aiyalabi ibu hamene marialirubi mitangi bialu ege tole timbuni karia mo dabadaba howa ogoriani dege ngelene. <sup>29</sup> Ege tole ogoni wiyadagoria ira timbuniru gombedo yu ibuwa ira ogoriani aminaga wai yari biaga wiaru gili buwa bigiya wabu ngelalu iba sabinaga bigiyabi wabu ngelalu buwa hengene. Ira timbuni dibu hangaga binidaruni agali wai pialu tigua bo poda hana haga bini mitangi bialu daga lowa helene. Saimono ibugua mitangi bialu. Wali agali dindi tara tarani bu karume ibalu de handai helo mitangi buwa ani wabu helene. <sup>30</sup> Ai mbirale uruni ayu Modeini tanoni homali kagoria haabo ka.

<sup>31</sup> Ai Tiribohanda Kini Andiogusu waragane igiri emene dege hayago mohondo howa homelo bo wahene. <sup>32</sup> Ani bialu Tiribo ibuni Sirianaga kini ho aribia howa ibugua dindi ogoniha mana ko dewa bialu hene.

<sup>33</sup> Saimonohanda Yudiaha tano wiaru dewaore mo arema bialu hongohe ngelaga bialu hene. Wai pabe neneni mamageali de handa pugubu hagane anda daliga bu helaga bialu wai pabe ege pabe hongoheore bu helaga bialu wai pabe panga bengena

aeane hongoheme helaga bini. Ani biai howa tano wai pabeanda hongoheme uruniha tomo dewaore bu ngelaga bini. <sup>34</sup> Ai Saimonohanda Kini Demidirasahondo bi agali kiralime lo yu pudaba lowa lalu, Tiribohanda ibu daluha mo ko halu mbirale mo page bialu haabo kago ainde ibu daluha howa dagisi muni miaga wirigo emene yupe harebe, lama pene. <sup>35</sup> Ani layago hale howa Kini Demidiriasa waragane heago ibugua beba gili bialu bi ladai binigo ogo,

<sup>36</sup> Kini Demidirasahanda agali Anduane Homogonaga loma binigo mo miaga haguane timbuni Saimonobi Yudia wali agali bibahendebi tinaga agali haguane rubi turu haro laro. <sup>37</sup> Tigua manda ngolome wabinibi ayage alenaga yunibi wia harimiyago mirimago ai iname ti baba gi tigani bule manda manda bu kema. Ani bialu inanaga agali haguane bu karuhondo tiha dagisi mulene nawi lalu abale lamirima. <sup>38</sup> Habo nalolene bi ala lo wirimago iname bi ogoni karulape lalu haabo kema. Tigua wai pabeanda hongoheme bu helaga bide migo tiniha ha helo laro. <sup>39</sup> Ai mana ko tigua abale howa bialu henego ayu bialu haabo kemigoni bibahende wahai harama. Ani bialu kininaga dagisi muni yolo bulene winingi nabi ngelo kemigobi waharama. Ani bialu dagisi muni Yarusalemeha miaga winigo nami harimagobi mo waharama. Ani bialu dagisi muni maru tara tara Yarusalemeha miaga wirimagobi waharama. <sup>40</sup> Ai Yuda agali wai biaga pari wayali kemiru ti maru kininaga ami agali hatago hoa biyagua nde ani bulene karulape ka. Ina kemagoha mo ko holene nawi bayale dege hamiya hamelo kema, lene.

<sup>41</sup> Ai mali handari mbira pira karia (170) hayangi howa Isaraele tiha wali agali Anduane Homogo mitangi nahaga hearume Isaraeleali abale haru henego ogoriani howa haru nahe wahalu pene. Isaraele wali agalirume tini hangu halu bayale hene. <sup>42</sup> Ai Saimono ibu Anduane Homogonaga loma binigo mo miaga haguane timbunibi ibu ami agalinaga agali haguane bi Yuda wali agalinaga agali haguane bi ibu pigane hayangi howa tigua habo nalolene bi lo wiaganerubi uruniale lo wiaganerubi horo ogoningi howaore tini hangu lalu gilibu wiaga hene.

<sup>43</sup> Ogoningi Saimono halu ibunaga ami agali heba pialu Gese tano wiagoria pialu balai anda buwa ami agalime tano ho mabubu hene. Ani howa tigua wai biagane masini mbira wabuwa tanoha wai pabe heagoha wiapara howa ngelowa pabe neneni mamageali handa amu nana bu holene anda pabe neneni heago tigatiga masini biagome pabe bo gialayagola anda daliga wai pabe neneni heago podope hene. <sup>44</sup> Ani biyagola Saimononaga ami agali bu hearume miyagola ami agali masini biagoria hearu abale tanoha porabu anda hayagola wali agali tanoha bu hearu bibahende ibida pora bialu piai hene. <sup>45</sup> Ai wali agali tanoha bu hearume tinaga aga minu budalu tanonaga wai pabe egeme bini heago neneni irigi hai halu tigua Saimonohondo wai wahalu gi tigani lama lowa hongo howa bi ladagadaga bialu hale halu hene. <sup>46</sup> Tigua lalu, Ainde ko iname birimago damene bibahende mitangi bialu pani nangi wahalu ina dara ha, lalu hene.

<sup>47</sup> Ani layagola nde Saimono ibugua wai wahalu tinaga bi layago hale hene. Anigo ibugua wali agali tanoha hearu bo taliatagi hai halu mbirale dama mitangi bialu bi pupu wiaga gime wabini wiarunaga anda hearuha mbirale ko uruniale wiaru mo wahai halu anda hearu lone mo bayale haga bialu hene. Ibu tano ogoniha anda pialu howa ibugua Ngode Datagaliwabhondo turu halu iba gana lama anda pene. <sup>48</sup> Ani bialu tano ogoniha mbirale Ngode Datagaliwabena deni dodohe wiaru bibahende mo wahai halu agali maru Mosesenaga bi mana hale howa talialu haga bu hearu haru halu ibuwa tano ogoniha helaga bini. Ani buwa wai pabe baya hangu mo hongo howa biatiga bialu ibunaga mbira tano ogoniha bu helalu bini.

✧ 13:43: 2 Mag 10.32-38

<sup>49</sup> Ogoningi Yarusaleme tanonaga wai pabe timbuni heagonaga pabe panga ndibulo waheagola agali wai pabe andaha haga bu hearu tomo taya magedi tagira pobe naheore wini. Ani wiagola ti tomo nalu holene mbira nawiore howa dewa hina garime homai hene. <sup>50</sup> Anidagua biyagola tigua Saimonohondo lalu, Waitigi wahalu gi tigani bima, lene. Ani layagola ibugua ti baba gi tigani lalu dege agali wai pabeanda hongohe ogoniha haga hearu bo talia tagi halu anda Anduane Homogonaga deni dodo nahe helo lone mo bayale hene. <sup>51</sup> Ai mali handari mbira pira kariani mbira (171) heagola mali ogoninaga ege mendenaga horo pira kirani tebira (23) hayagola Yuda tigua wai pabeanda hondole Yarusalemeni hayagoha pigane anda pene. Puwa Saimono halu ibunaga agali bu hearume Ngode Datagaliwabehondo turu timbuniore halu tigua ira maganeru podo yalu tigua ngidaru tabagerubi balu iba ganaru lama anda pene. Tinaga waitigi timbuni henego mo ko hayagola tigua Yarusaleme turu timbuni halu hene. <sup>52</sup> Ani howa Saimonohanda mana mbira ogobi wabu wini. Mali bibahendenaga horo ayu kemago dege tagira ibiragola turu ho holene horo ngelo dabaro, lene. Ani lowa ibugua Anduane Homogo andanaga wai pabe abene pabeanda hongohe heagohayagi heago baya hangu mo hongo howa hongoheore bialu agali marume obisianda dunini ogoniha bu helene. <sup>53</sup> Ani buwa ainde Saimono ibuni igini Yone anda halu agali hongohe dege heagola ibugua Yone ogoni ibu ami agali haru hagane agali haguane helo dabo helene. Ani helaya handala Yone ibu puwa Gese tanoha hene.

## 14

### *Saimono agali mini yaraga hene henego ogo*

<sup>1</sup> Mali handari mbira pira kariani kira (172) layagola Kini Demidiriasa mende ibugua ibunaga ami agaliru haru halu Midia pole pene. Midiali tigua ibu biamogo bialu Tiribola wai bima lole hondo pene. <sup>2</sup> Ani pialu hearia Midia Pesialanaga Kini Asagese ibugua ani ibira layago hale howa ibunaga ami agali haru haga agali haguane mbira heagohondo lalu, Ami agali maru haru halu abale harigani ngola halu Demidiriasa minalu garabaya bule pudaba, lene. <sup>3</sup> Ami agali haru haga agali haguane ogoni ibugua pialu wai buwa Demidiriasanaga ami agali bope halu ibuni minu garabaya bu yalu Kini Asagese hearia dai bini. Ani piyagola Asagesehanda Demidiriasa garabaya helo helene.

<sup>4</sup> Saimono ibugua Yudia dindi hondo howa haru heangi mbirale bibahende bayale dege wiai hene. Mali bibahendengi ibu Yudiaha agali haguane heangi ibugua agali haguane mini lene howa wali agali biamogo buleneale wiago biai halu hene. Ani bialu heagola tigua ibuhondo turu ho haabo hene. <sup>5</sup> Ibugua iba sibi ibu wiaga iba ange Yobani wiago bo podahana halu wali agali hariga ogoniha polene hearu ta nabi puibu bialu Girigi dindiha pelo hariga bope heagome ibunaga mini yaraga halu mini lene timbuniore hene. <sup>6</sup> Ibugua wai bigi bialu dindi maru ibunaga dindiha bo yu anda ibalu wiatago helaga biyagola ibunaga dindi dewaore waore wialu mo timbu howa dindi uruni bibahende ibuni handaya ho hene. Ani bialu waitigi dewa garabaya helaga bini. <sup>7</sup> Ibugua tano hongoheore Gese tanobi Bedesu tanobi handaya ho halu wai pabeanda hongohe Yarusalemebi handaya ho hene. Ani bialu ibugua pabeanda hongohe ogoni mo gini bialu heagola agali mbirame ibunaga bi layago mo wanahe hai hene.

<sup>8</sup> Ainde Yuda wali agali ti bayale howa tinaga mabuha tomoru hangalu hene. Mabuha tomo hengearu bayale anda hai halu lini bayale dalu ira lini dagane ale hengearume ira lini bayale dai haga bini. <sup>9</sup> Agali waheore ala hene hearume magedi hamani biruwa mbirale bamba ti heangi biniru te lamigi bialu berene. Igiri daliahe hearume ami agalinaga wai pole mo karulagane yari wiaru ti mo karulalu bame horongi yari karulole turu howa bame mo karulole haga bini. <sup>10</sup> Saimonohanda tano timbuni wiaruha bayale ngelonaga tomo dewa bu mialu wai biagane alebi dewa dege tano uruniha mo wigi bini. Dindi bibahendeha ibunaga mini yaraga hene mbira hene. <sup>11</sup> Saimonohanda Yudiaha

mo palia holene mo yu anda ibiyagola Isaraele wali agali turu timbuni ho hene. <sup>12</sup> Agali ti hangu hangu tini headagua mbirale mbira gi nahe tinaga ira lini daga ale gerebi andanehabi poge andanehabi ni gumba biraga bini. <sup>13</sup> Tigua kini biaru bope hai hene heagome Yuda dindiha wai anda ibulene waitigi mbira nahe wini. <sup>14</sup> Saimono ibugua yagibano karubi biamogo biaga hene. Ibugua Mosesenaga bi mana lo wini ngagome bibe lalu ledadagua wali agali mana ko biaga bu karu bo talialu purogo lelaga hene. <sup>15</sup> Ibugua Anduane Homogonaga anda baya hanguore mo yaribia halu ibugua gabo be belediru tigua lotunaga biabe bilo mo migi bialu hene.

*Yuda tigua Lomo dindialiru bababi Sabarada dindialiru bababi habo nalolene bi lone lo winigo ogo*

<sup>16</sup> Yonadana homayagola bi te loyogo lalu Lomo dindihabi Sabarada dindihabi piaiore halu hale hai howa tigua Yonadana dara timbuni hene. <sup>17</sup> Ani howa dege Sabaradali tigua Yonadana hamene Saimono ibu hamenenaga henge wiagoria ibuni ha aribia howa Anduane Homogonaga loma binigo mo miaga agali haguane timbunibi Yudia dindi bibahende haru howa handayaho hagabi tano ngaru bibahende handaya ho hagabi ibuni dege ha aribia ho ka layago hale howa ti turu hene. <sup>18</sup> Bamba tigua habo nalolene bi Yudasa bababi Yonadana bababi lo wini biago mbirale boronosime wabini mbalapaya mbirani lone gili bialu Yarusalemeha yalu pelene. <sup>19</sup> Ani yu piyagola tigua wali agalinaga deni howa bi ogoni daga lene. <sup>20</sup> Habo nalolene bi ogo Sabarada wali agalime gilibu wia heneya. Tigua lalu,

Agali haguane rubi Sabarada wali agali bibahendebi tigua Anduane Homogonaga loma binigo mo miaga agali haguane timbuni Saimonobi agali haguane bu kemiru bibahendebi agali loma binigo mo miaga kemiru bibahendebi ina hameneore Yudiaha kemiru tibi bibahendehondo bayale kemidago turu harama lalu lo ibi larama. <sup>21</sup> Agali maru ina hemaria bi yu pudaba larimiyaru tigua ina hemaria ibalu tinaga mini timbuni mini lene ngagobi ti dunini abogo ka lene kemigobi bibahende ina langiai haya. Ti ibiyagola iname ti hondowa turu timbuni harima. <sup>22</sup> Iname bi libugua layago damene bibahende mbuga mbiraha gilibu ngema. Bi ogodagua laya. Andiogusu igini Numeniusubi Yasono igini Andibadabi libugua ina nenege haabo holenaga bi lo winigo lone mo hongo hamiya bi yalu pudaba larimiyago libugua lama ibiya. <sup>23</sup> Inanaga wali agalime libu ibiyago ngola hole ibu ngoai howa ibirida lowa turu hai halu libunaga mini yaraga haya. Iname libunaga bi layago gabumane mbugaha bi pigane layagonaga beba mo wulenaga turu halu mo werema. Ani bialu Sabarada wali agali tinaga bi kira nga. Bi mendego bebani gili bialu Anduane Homogonaga loma binigo mo miaga agali haguane timbuni Saimono hearia pelarima, lene.

<sup>24</sup> Mani howa Saimonohanda Lomo dindialiru baba habo nalolene bi lo winigo lone mo hongo holenaga bi yalu Numeniusu Lomo pu lene. Ani laya handala Numeniusu ibugua wai humbi mbira ngolome wabini genda magi kilogarama handari duria (500) wiago mo yalu pene.

<sup>25</sup> Saimonohanda mbirale uruni bira layago Isaraele wali agali tigua hale howa turu timbuni halu tigua Saimono halu ibu iginiruhondo, Kaii agua loabedabe, lalu hene. <sup>26</sup> Ibunibi ibu hamenerubi ibu aba hamene maru hearubi tigua hongo howa haabo haya. Tigua wai bialu waitigi bu hearu balu bo taliatogo layagome dindi ogo hibaria golope hene ngagoni ndobe, lene. Tigua bi urunidagua lalu beba timbuni gili buwa Saiono neneni ira dibu hongowa ogoni handai helo bapara ho ngelaga bini. <sup>27</sup> Tigua bi gilibu winidaruni ogodagua lo wini.

Ai ege mini Elulu hayagola mali handari mbira pira kariani kira (172) layagola ege ogoninaga horo pira mbirani halira (18) hayangi Saimono ibu Anduane Homogonaga loma binigo mo miaga agali haguane timbuni pigane henego hama ibalu mali tebone

☆ 14:18: 1 Mag 8.22



hayagola <sup>28</sup> iname wali agali bu hearu bababi agali loma binigo mo miaga hearubi agali haguane bu hearubi ina bibahendeme bi mbira lo wirima. <sup>29</sup> Wai dewaore dindi ogoha beremaligo ainde agali loma binigo mo miaga Yahoiaribi aria Madadiasa igini Saimono halu ibu hamenerume tini homolenehayagi mo embeda haga hene. Ani howa tigua hongo howa dindi ngagonagabi Anduane Homogo anda kagonagabi bi mana lo wini ngagonagabi hongo howa wai bialu haga hene. Tigua ogonidagua bialu inanaga dindi ngagonaga mini mo yaraga haya. <sup>30</sup> Yonadanahanda wali agali bu hearunaga bu mini mo mbiraore ho helalu ibuni Anduane Homogonaga loma binigo mo miaga agali haguane timbuni halu buwa nde homaya. <sup>31</sup> Waitigime ibalu inanaga dindi ngagobi Anduane Homogonaga anda kagobi mo ko hai halu bo labu hole ibiyagola <sup>32</sup> Saimonoha abale heyalu wai biaga hene. Ibuninaga muni dewaore wahalu wai bulene ale danda timuru yolo bialu ami agali bu karubi yolo biaga hene. <sup>33</sup> Ani bialu ibugua Yudiaha tano timbuni wiaru mo hongo hai halu Bedesu tano Yudia dindi gibunihayagi waitiginaga wai biaganealeru mo wini tano biagobi mo hongo hai haya. Ani bialu ami agali maru tano ogoni mamage howa handaya ho helo heleda. <sup>34</sup> Ani bialu ibugua Yoba tano iba solowara bedago angeni ngago mo hongo ho ngelalu Asadodo tano ngagoria kaware Gese tano ngagobi mo hongo ho ngelalu bida. Tano uruni abale waitiginaga winigo ayu ibu mo yu daibu wini nga. Ibugua Yuda wali agali tano uruniha hai helalu tinaga biabe bulene ale ibunime mo miaga ka. <sup>35</sup> Wali agali tigua Saimono hondo hearia ibu agali hongohe mini lene timbuni hayago hondowa tigua ibu tinaga agali haguanebi tinaga Anduane Homogonaga loma binigo mo miaga agali haguane timbunibi helo dabo helaya. Ibugua biabe urunidagua bialu ibu daluha mana bayale tigabi bulenebi mini lene timbuni nga lolenebi mo yu anda ibiyagome tigua ibu mo yaraga haya. Heneneore laramago ibunaga wali agali mini mo yaragaore ho heleda.

<sup>36</sup> Ibu agali haguane heangi ibugua wali agali tara hearu bo taliatagi hai haya. Ani bialu waitigi Anduane Homogonaga anda kawareni bu hearu taliatagi haya. Waitigi uruni tigua wai pabeanda hongohe anda biago kawareni bu howa bibahendengi tigua tagira ibalu anda heago Anduane Homogonaga deni mo dodo haabo haya. <sup>37</sup> Ani biyagola ayu Saimono ibugua wai pabeanda hongohe ogoniha Yudiali dabo helalu ibugua anda ogoni arema bialu mo hongo howa dindibi Anduane Homogonaga andabi bayale helonaga ani biya. Ani bialu ibugua Yarusalemenaga pabe hongohe kago lone bialu daligaore heleda. <sup>38</sup> Kini Demidiriasahanda biabe Saimono ibugua biyago de hondowa Saimono Anduane Homogonaga loma binigo mo miaga agali haguane timbuni karulape kago ibu helo lalu helaya. <sup>39</sup> Ani bialu ibunaga mini Kininaga Nenege lalu ibu mini lene timbuni helo helaya. <sup>40</sup> Kini Demidiriasa ibugua o biyadagoni irane ibugua hale ho hearia Lomoalime Yudali ti nenegebi ti baba mandagi holenebi ti hamenebi layago hale howabi agali Saimononaga bi yalu piaga biarunaga mini yaraga hara layago hale howa ibugua anidagua biya. <sup>41</sup> Anidagua biyagola nde Yuda wali agalimebi agali loma binigo mo miaga bu hearumebi bi lo mbira halu agali Anduane Homogonaga mana latagi haganeore ibilo malia ho kemangi ibugua biabe bialu helo wahama larimi. <sup>42</sup> Tigua bi lo mbira halu Saimono ibugua gabumane agali haguane halu Ngode Datagaliwabenaga anda handaya ho halu ami agalibi haru helo helama larimi. Ani bialu agali gabumane handaya ho holenebi wai biaganeale ngarubi wai pabeanda hongohe tanoha wima pedarubi Anduane Homogonaga anda kagobi ibuni handaya ho helo waha lai harimi. <sup>43</sup> Ani bialu agali bu hearume lalu wali agali bibahendeme Saimononaga bi hale hai halimu laya. Ani bialu gabumaneme habo nalolene bi lo wigi birago bibahendeni Saimono ibunaga mini gilibu wialu dege ngelo laya. Ibugua kininaga aga ngago mo karulalu ngolome wabini mandibu ngago karulo halu bilo laya.

<sup>44</sup> Agali loma binigo mo miaga karu ariamebi agali marumebi Saimononaga bi ledago



mo waholenebi ibunaga aga kininaga aga karu laganeale ngago mendealime aribia howa mo karulolenebi ibunaga mandibu ngolome wabini ngago mo karulolenebi nawiore laya. Ani bialu agali dewa ibu ngoai howa bi midini mbira loleyagua nde Saimononaga bi ala hale howa ibugua karulape layagua midini lolebira. <sup>45</sup> Mbiralime mana ogoni mo bagi halu piyaguabi pugualu piyaguabi nde ogoni biaga kago ibu godi deni ibu holene nga.

<sup>46</sup> Wali agali bibahendeme bi lo mbira halu Saimono ibugua mana ogoni talialu bialu howa wali agali haru helo larima. <sup>47</sup> Ani larimago Saimono ibugua Anduane Homogonaga loma binigo mo miaga agali haguane holenebi ami agali haru bamba haga agali haguanebi loma binigo mo miaga agali bu karunaga agali haguane holenebi wali agalinaga agali haguane holenebi ibugua dege holene karulape laya, lene.

<sup>48</sup> Ai tigua bi lo e lalu bi uruni boronosime wabini mbalapaya mbirani gili buwa wali agali bibahendeme de handai helo Anduane Homogonaga anda biago tamuha anda háini gilibu derela hamíya. <sup>49</sup> Ani bialu bi ogoni halu mende gili buwa Saimono halu ibu iginiru tini de handaga bilonaga Anduane Homogonaga andaha muni wiaga ngagoha ngelamiya, lalu bi lene.

## 15

### *Saimonohanda Andiogusu kane biamogo binigo ogo*

<sup>1</sup> Andiogusu Kini Demidiriasa igini mbira ibu dindi mbira iba solowara dombeneha dindi mini Kiridi laga wiagoha hene. Ai agali Andiogusu ibugua beba mbira gili buwa loma binigo mo miaga agali haguane timbunibi Yuda wali agalinaga agali haguanebi wali agali ibugua handaya ho haga bu karunaga agali haguanebi Saimono heagohondo beba gilibu peleneya.

<sup>2</sup> Ibugua bi ogodagua lalu gili bini. Kini Andiogusuhanda Anduane Homogonaga loma binigo mo miaga agali haguane timbuni Saimono halu Yudia wali agalibi tihondo bayale kemibe larama. <sup>3</sup> Agali ko hearume i abanaga dindi ti karulai henego ai ayu inime hongo halu lone mo yu dai buwa mo hongo halu abale bayale wiagagobi ngelo biabe bialu ko. Ami agali tagira howa dewaore i biamogo bialu wai bilonaga yolo bialu haru halu ibu heledo. Ani bialu iba sibi dewa timbuniru mo manda manda bu wiai ko. <sup>4</sup> Iba sibi uruni yalu dindi mendehayagi puwa waitigi dewa inaga tanorubi dindi andaru bo labu hai halu mo ko haga biaru baba wai bulebero.

<sup>5</sup> Ayu inabi nde dagisi dewa tigua ngiaga wirimigo abale i aba ibugua biyadagua mo wahai halu tigua yolo maru i ngulene ngemigobi bibahende mo wahai haro. <sup>6</sup> Tí daluha munime biabe bulene ngago damene tinime bialu holene karulapego muni tini taya bialu biabe tinime bialu holene nga laro. <sup>7</sup> Yarusalemehabi Anduane Homogonaga andahabi dagisi muni miaga wirugo yupe halu ayu waharogoni. Wai biaganeale wabu wu kemiru bibahendebi tano wai pabe hongohe bu mabubi ngemirubi uruni bibahende tininaga giha ya harogoni. <sup>8</sup> Tigua kininaga muni andaha muni dano hole mo yiniyaguabi dano mani holenenagabi bibahende maniorebi ani wiaabo helonaga ayu mo waharogoni. <sup>9</sup> Mani inaga dindi ngago bibahende handameho howa haru kongi ina inaga mini yaraga howa mo daligaho helalu inaga wali agalibi Anduane Homogonaga andabi bibahende mini mo yaraga hai holebero. Anidagua beregola wali agali dindi bibahendeha karume tinaga mini mo yaraga hene mini leneore kemigo hondolebira, lene.

<sup>10</sup> Mali handari mbira pira kariani maria (174) hayagola Andiogusu ibu dindi ibu aba mamalirunaga winiore wiagoria birule dai bini. Ami agali dewaore ibalu ibuha hatago hayagola Tiribo baba emene daga lene dege mbira hene. <sup>11</sup> Andiogusuhanda Tiribo baba wai biyagola Tiribo ibu ibida pialu iba solowara timbuni bereago angeha Doru tano wiagoha hado hene. <sup>12</sup> Tiribo ibugua manda bu handalu hearia ibunaga

ami agali heneru dewaore piai hayagome ibugua wai bibe nahe ibu minalu boleneore wiayuane handalu ibu pora bialu pene. <sup>13</sup> Ani piyagola Andiogusu ibunaga ami agali wai biaga mugube pari wayaliru daosini handari mbirani pira kira (120,000) ami agali geni pialu wai biagabi daosini halira (8,000) nogo hosini biruwa wai biaga hearubi haru halu puwa Doro tano wiagoria wai bini. <sup>14</sup> Iibunaga iba sibi wiarume iba solowarani wai bialu heagola anidagua biyagome Andiogusuhanda Doro tano ho hagirabu yaanda hai hene. Ani bialu ibunaga ami agali hearume dindinibi solowaranibi wai biai hene. Ani bialu howa tano ogoniha mbiraoreli hangubi uba andatagi nabuleore lalu mamage baya hangu hai hene.

*Lomoalirume Yudaliru biamogo binigo ogo*

<sup>15</sup> Horo ogoningsi dege Numeniusu halu ibu baba haga hearume beba mbira gili buwa Lomo dindi wahalu dindi maruha kini hearunagabi dindi bibahendenagabi ta halu yu pugupugu bini. Beba ogoniha bi ogodagua lene.\*

<sup>16</sup> Lomonaga agali haguane Lusiusuhanda Kini Tolemihondo, Í bayale kebe, lara. <sup>17</sup> Ani bialu Anduane Homogonaga loma binigo mo miaga agali haguane timbuni Saimono halu Yuda wali agalime habo nalolene bi ala lo wirimago lone mo hongo howa ina nenege haabo halu mandagi howa ina hamene dege lo holenaga habo nalolene bi ala lo wirimago lone mo hongo hama lalu bi yalu agali kirali ibiniya. <sup>18</sup> Libugua wai humbi mbira ngolome wabini genda magi kilogarama handari duria (500) inanaga wabu wia heneyago yalu ibiya. <sup>19</sup> Iname bi lo mbira halu Yuda dindi mo ko halu bo labu haga kinibi agali haguane bu karubi bibahendehondo beba ogo gili bialu piai helarama. <sup>20</sup> Tigua wai humbi wabu yalu ibiyagobi ina yamulene karulapego yamima larima. <sup>21</sup> Agali ko maru ibida pora bialu tí kemigoha ibiyagua nde tígua minalu Anduane Homogonaga loma binigo mo miaga agali haguane timbuni Saimono giha minu ya halimu. Iibunime howa agali ogonialego ti Yuda maname biaga winidagoale bilo minu milimu, lene.

<sup>22</sup> Lusiusu ibugua bi ogoni dege gili bialu Kini Demidiriasahondobi Kini Adalusuhondobi Kini Ariadesehondobi Kini Asagesehondobi pelaga bini. <sup>23</sup> Bi ogoni dege gili bialu dindi maru Samasamesehabi Sabarada dindihabi Deloso dindihabi Mindoso dindihabi Sisiono dindihabi Karia dindihabi Samoso dindihabi Pambilia dindihabi Lisia dindihabi Haliganasusu dindihabi Lodese dindihabi Paselisi dindihabi Koso dindihabi Side dindihabi Aradusu dindihabi Godina dindihabi Nidusu dindihabi Saibarasa dindihabi Sairini dindihabi bibahendeoreha pelaiore hene. <sup>24</sup> Ani bialu beba mbira loma binigo mo miaga agali haguane timbuni Saimono hearia pelalu bini.

*Andiogusu kane ibugua Saimono erembira minigo ogo*

<sup>25</sup> Kini Andiogusu ibugua Doro tanoha wai halu mende bini. Ibugua ami agali dewaore haru howa wai biagane masini dewa wabu wialu buwa tano ogoniore bo gialanda hole lowa bu hondo wahalu hene. Ibugua tano ho hagara biai ho heagola Tiribo tagira pobe naheore wini. <sup>26</sup> Ani bialu heagola Saimono ibugua Andiogusu biamogo bialu ami agali ibunagaore haga heneru daosini kira (2,000) mialu muni silibabi ngolobi dewaore talebu mialu wai biaganeale danda timu yandare ayu tibu wai humbibibi dewaore tale bu mialu bini. <sup>27</sup> Ani biyagola Andiogusu ibugua mbirale uruni yamia nabi wahalu habo nalolene bi ala lo wiyago mo habo lalu bini. Ani bialu libu mo waitigi hene. <sup>28</sup> Andiogusu ibugua agali ibunaga nenege mbira mini Adenobiusu heago Saimonola bi lole pu lene. Ani laya handala ibugua puwa lalu, Ayu ina Yoba tanobi Gese tanobi wai pabe anda hongohe Yarusalemebi handaya ho kegoni. Ai tano uruni bibahende i daluha dege wiai ka. <sup>29</sup> Ina dindi uruni mo ko hai harigoni. Inaga dindiha mo ko halu genda holene dewa mo yu anda ibiri. Inaga dindi wiaru dewa í karulo ke. <sup>30</sup> Ai

\* 15:15: 1 Mag 12.16

ayu *ina inaga* tano timbuni wiwaru *i* karulariruni bibahende *ini* ngiadai bibe laro. Ani bialu tano Yudia be tagirahayagi wini *i* karulo kegonaga dagisi muni ngibe. <sup>31</sup> Anidagua nabuleyagua nde *ina* muni siliba genda magi kilogarama daosini nguira (15,000) tano uruni yolo ngialu muni ogonidagua dege halu mende dagisi mitangi bialubi mbirale mo ko hai haridagonagabi ngibe laro. Anidagua nabiriyagua nde wai bibiya laro, lalu bi lama pudaba lene.

<sup>32</sup> Ani laya handala Adenobiusu ibu pialu Yarusaleme anda puwa ibugua Saimono yari biarubiibunaga beledi ngolome wabinibi silibame wabinibiibunaga tebolo dagationi wiaru handalu mana Saimonohanda biaga wiarubi handa dege bialu ibu mogo lo hendene. Ani hondowa ibugua Kini Andiogusunaga bi layago Saimono lamini. <sup>33</sup> Ani layagola Saimonohanda ladai bialu lalu, Iname dindibi mbirale tara tara ngarualebi dindi mendenaga mo page nabiore henego kemagoni ndobe. Bamba inanaga mamali giha yu haga winiru dege inane mo yu dai bigi bini wu kema. Mbirale uruni waitigime bamba mo pagebu yu pugu binigo yu dai bigi binigo ngema. <sup>34</sup> Mbirale ina mamalinaga mo page bini uruni mo yu dai bulene hariga ayu dege handarima. <sup>35</sup> *Ina* Yoba tano Gese tanola hale haribe. Tano kira ogoni laboha karume inanaga wali agali kagoaha genda tara tara mo mialu inanaga dindi ngagobi mo ko haabo haga ka ndobe. Anidagua biagago ainde harugo tano kira ogonilabo yolo bialu muni siliba genda magi kilogarama daosini tebira (3,000) hangu nguliya, lene.

Ani layagola Adenobiusuhanda bi mbira ladai nabini. <sup>36</sup> Ibugua miniha tandaga timbuni halu kini hearia dai bini. Dai buwa ibugua kinihondo Saimonohanda bi layago lamiai halu Saimononaga yari biaria handayagobi andagaha wiarubi lamiai hene. Kini ibugua bi ogoni hale howa ibuguabi keba timbuni hene.

### *Yonehanda Sendebusu bope halu ibu wayali henego ogo*

<sup>37</sup> Horo ogoningi dege Tiribo ibu ohalu ibida iba sibi piyagoaha pora bialu Odosia tano wiagoaha pale pene. <sup>38</sup> Kini ibugua agali Sendebusu heagohondo ami agali geni pialu wai biaga dewabi maru nogo hosini biruwa wai biaga hearubi talebu mialu dindi iba solowara bedagoaha ngarunaga gabumane haguane hole pu lene. <sup>39</sup> Ani lowa Sendebusuhondo Yuda wali agali baba wai bibe lene. Ani bialu Kederono tano baya hangu arema bialu wai pabe pangaru baya hangu hongohe wabu helalu bibe lene. Wai bulenaga manda buwa ani lene. Ani lalu kiniibunime Tiribo talima pene.

<sup>40</sup> Sendebusu ibugua pialu Yabane tano wiagoria anda puwa anda bu hearu bo gialapaya bialu mbirale wiaru mo ko howa bo labu halu hene. Ani bialu Yudia dindiha anda puwa wali agali dewa minu garabaya bialu bo wahai halu hene. <sup>41</sup> Ani bialu ibugua Kederono tano mo hongo howa lone arema bialu ibugua ami agali geni piagabi nogo hosini piagabi dewa tano ogoniha howa Yudiaha hariga pedagoha mamage puibu bialu helonaga ani helene. Ibugua kini kagome bibe lalu lamiyadagua talialu ani bialu hene.

## 16

<sup>1</sup> Ai Saimono igini Yone ibu Gese tano wahalubialu ibugua Sendebusuhanda bialu heagonaga ibu aba Saimono lamule pene. <sup>2</sup> Puwa te layago hale howa Saimono ibugua ibu igini kirali Yudasala Yonela olowa libuhondo lamialu lalu, *Inibi i* hamenerubi *i* aba damene bu hearubi iname Isaraele wali agali biamogo bialu wai bamba *ina* igiri emene hewangi howa bialu haabo henego ayu kemagoni. Iname wai bialu howa Isaraele wali agali waitigi giha howa mo wialu haru dai bigi beremali. <sup>3</sup> Anidagua biaga henego ai ayu ina mbirale mbira bibe naheore agali miniwiore bedogoni. Ainde i igini kirali agaliore haribidago turu howa *ina* Ngode Datagaliwabhondo *kai* timbuni laro. Libugua *inaga* henge mialu *i* hamene homayarunaga henge mialu libu ho aribia halibu.

Ainde Ngode Datagaliwabehanda libu haru holebirago ai libugua inanaga dindi ngago karulole waitigi ibirago baba wai bule pudaba, lene.

<sup>4</sup> Ani laya handala Yonehanda ami agali daosini dege pira kira (20,000) geni pialu wai biaga hongohe pari wayaliru haru halu nogo hosini biruwa wai biagabi dewa dege haru hene. Tigua Sendebusu halu ibunaga ami agaliru ngola howa uruni baba wai bule pialu harigani mbi layagola Modeini tanoha palene. <sup>5</sup> Egerebalene galaki biyagola abale heyalu wai hama dindi tigabi wiagoria pene. Ogoriani ami agali nogo hosini biruwa wai biaga dewaorebi ami agali geni pialu wai biagabi dewa ngola hene. Anigo ogoriani iba mbira peagome libu mo tu wia howa amura haga haga bilene. <sup>6</sup> Ani biyagola Yone halu ibunaga ami agali biarume puwa waitigi bu hearu handaede ho hene. Ani howa Yone ibugua handalu hearia ami agali biaru waitigi hondowa tigua iba domaede halu wai polene gi hayane hendene. Ani biyago hondowa Yone ibunime pigane pora bialu iba ala domole pene. Ani domalu piyago hondowa ami agali bibahende iba domalu ubaede hai halu pene. <sup>7</sup> Yonehanda ibunaga ami agali nogo hosini biruwa wai biaga biaru dombeneha helowa ami tidiki helowa lene labolabo helene. Anidagua binidago irane waitigi tinaga nogo hosi dewaore haru heago hondowa anidagua bini. <sup>8</sup> Tigua pialu pilipe biguli pu lalu puwa Sendebusu halu ibunaga ami agali hearu bama talima pene. Ogoningi waitigi dewaore timu hai halu dewa wai hamani homai hene. Maru ibida pialu wai pabeanda hongohe Kederono tano wiagoha pene. <sup>9</sup> Wai ogoniha Yudas timu hene. Ani ho wia handala ibu hamene Yonehanda waitigi bama talima pialu wai pabeanda hongohe Sendebusu ibuni haga Kederono tano talima anda pene. <sup>10</sup> Ani bialu waitigi maru Asadodo tanoha anda bima irigi howa mamageali handa pugu bu haga heagoha puwa birado hene. Ani heago helowa Yone ibugua tano bo heda hayagola agali dege daosini kira (2,000) bibahende homai hene. Ani bialu mani Yudia dindi dai bialu ibu mo ko nahe karulape dai bini.

### *Saimonobi ibu igini kiralibi bayagola homenego ogo*

<sup>11</sup> Abubusu igini Tolemi ibu Yarigo tano ngago kawareha dindi tigabi ngagoha gabumane haguane hene. Ibugua muni ngolobi silibabi dewaorewi henego <sup>12</sup> irane ibu one Anduane Homogonaga loma binigo mo miaga agali haguane timbuni Saimono wane dabu henegome ani hene. <sup>13</sup> Tolemi ibugua mine timbuni halu ibugua dindi bibahende handame ho holene manda bu hene. Ibugua ibu imane Saimono mo hondo howa Saimonobi Saimono iginirubi bibahende homelo bo wahai hole manda bu hene. Ani manda bu howa mali handari mbira pira kariani karia hayagola (177) mali ogoninaga ege beaneni (11) mini Sebada heagola\* <sup>14</sup> Saimono ibu tano maru dindi ibugua hendedagoha wiaru halu mbira handama ibaga bule pene. Ani puwa wali agalinaga gendaru tinaga hameru agi dege wiaruabe handama pene. Ibu igini kirali Madadiasabi Yudasabi ti haru pialu Yarigo tano anda pene. <sup>15</sup> Ani pu bereagola Tolemihanda ibu imane Saimonobi ibu balibuni Madadiasa Yudasala mo hondo hene. Ibugua tihondo ibu andaga dindi emene mbira mini Dugu ibuni mo wini wiagoha nenege ibalimu lene. Ani lowa ibugua tomo timbuni dawalu badi bialu howa agali maru tamuha birado helene. <sup>16</sup> Ani bialu Saimono halu ibu igini biago labo waini iba dewa nowa luluyu wiagola Tolemi halu agali maru waraandaho birayarume danda timu yagayaga bialu tomo nalu bereagoha waraanda hene. Ani buwa Saimonobi ibu igini kirali biagolabobi agali maru biabe bia haga hearubi minalu homelo bai hene. <sup>17</sup> Tolemihanda ibu imane balibuni biaru mo hondo howa ogonidagua bini. Tigua ibuhondo mana bayale biaga wiagonaga pani ibugua tihondo mana kome emena hangalu biadai bini.

\* **16:13:** Yuda tinaga ege Sebada ogoni inanaga ege mbira mendela hengeneha tagira ibaga. (Yanuari Pebuari)

<sup>18</sup> Ani bialu mani howa Tolemi ibugua o biyadaruninaga te gili bialu kini hale helo yu pelene. Ani bialu dindi ogoni ibugua haru howa handaya holiyanaga ami agali dewaore ibilabe lalu kini hole hale halu bini. <sup>19</sup> Ani bialu Tolemihanda agali marume Yone bo wahole Gese tano pudaba lalu bini. Ibugua ami agali haru haga agali haguane hearuhondo beba gilibu pelaga bialu, Ina tí mo turu halu ngolo silibaru dewaore ngigi buliya ibalimu, laga bialu beba gilibu pelaga bini. <sup>20</sup> Ani bialu agali maru Yarusalemebi Anduane Homogonaga anda hari nene ngagobi karulole pudaba lalu bini. <sup>21</sup> Ani layago hale halu agali mbira ibu gerai lalu bamba halu Gese tano abale anda puwa Yonehondo lalu, Í ababi í hamene kirali biago labobi homaya. Ai Tolemihanda agali marume í bo wahole pudaba lenego ibira, lalu lamini. <sup>22</sup> Ani layago Yone ibu hale howa mogolo hene. Anigo ibugua Tolesinaga ohaga wiago manda bu howa agali maru Tolemihanda ibu minalu bole pudaba lene ibiyaru Yone ibugua tini minalu garabaya helaga bini. Ani helowa ibunime ti homelo bo wahaga bini.

<sup>23-24</sup> Ai Yone ibugua Anduane Homogonaga loma binigo mo miaga agali haguane timbuni howa bialu henego te maru mbuga ogoha daga lolebere. Mbuga ogoha Yonehanda wai bini ngagobi tanonaga wai pabe baya hangu arema bialu mo hongo haga bialu henegobi ibugua biabe maru bialu henegobi te gilibu nga. Mbuga ogoniha te gilibu ngago Yone ibu aba homayagola ibuni Anduane Homogonaga loma binigo mo miaga agali haguane timbuni ha aribia henegoria howa pigane lalu te lama peda.†

---

† **16:23-24:** Ai hobane ogoniha howa bi ledagome lalu, Mbuga ogoha howa Yonehanda biabe maru bialu henego gilibu nga, ledagoni mbuga ogoni ayu nawi. Abale mbuga mbira te ogoninaga gilibuwi mbira winigo ayu ereba haya. Mbuga ogoni ayure ndo bambaore ereba hene nga bada.



## 2 Magabi

### Mbuga ogoha gilibu ngarunaga nemandi ogo

Magabi damenenaga mbuga mende ogoniha howa te gilibu ngagome mbirale Yuda dindiha Oniasa tebone ibu Anduane Homogonaga loma binigo mo miaga agali haguane timbuni hengi howa binigo lama pialu Nigano homenegeria lairi ka. Mbuga ogo timbunihayagi te maru 1 Magabi Be 1-7 ngagoha bi te mbiraore dege lo nga.

Mbuga ogoha te lo ngagome wali agali tigua Anduane Homogonaga bi mana hongo howa yu ndibulo holene nga lo manda bilonagabi wali agali waitigi giha howa homa-yaru Ngode Datagaliwabehondo mini mbiraore wiaga ngago wa naholenagabi tinaga lotu mana ngago wa naholenagabi homayago. Ainde ti Ngode Datagaliwabehanda mo turu halu bayale helolebira lalu mo walia ka.

Mbuga ogoha mali dagaledago Siria dindi pigane heyinigeria howa pigane mbira lalu dagalaga nga. Mali ogoni Keriso dindini taba honolene mali handari tebira pira mbirani kira (312) ngelowa dagalene. Mbirale uruni mali pira kira (20) andaneha howa bialu hene. Siria heyinidagoria howa dagalalu mali handari mbira pira tebirani kira (132) peaha. Keriso dindini taba honolene mali handari mbirani pira halira (180) ngelowa bialu henego hama pialu Sirianaga mali handari mbira pira duriani kira (152) layagolabi Keriso dindini taba honolene mali handari mbira pira waragariani mbira (161) ngelo howabi bialu hene.

### Beba gili bialu Iyibi dindiha Yuda wali agali hearunaga pelaga binigo

(Be 1-2)

*Yuda wali agali Yarusalemeha hearume ti damene Iyibi dindiha hearunaga beba gilibu wia haga binigo ogo*

<sup>1</sup> Yuda wali agali Yudiaha bu hearumebi Yarusalemeha hearumebi ti damene Iyibi dindiha kemiru tí bi lo wia halu bayale kemibe lara. Mo palia holenebi bayale holenebi tí heba haabo helo larama.

<sup>2</sup> Ngode Datagaliwabehanda tí mo bayale ho helalu ibugua bamba inanaga mamali ibunaga biabe bia haga agali Abarahamalabi Aisagalabi Yagabalabi habo nalolene bi lo wiyago mitangi bialu helo iname tínaga bi Anduane Homogohondo la halu kema.

<sup>3</sup> Tígua Ngode Datagaliwabehondo lotu lalu halimulobi tígua ibunaga hame ngago tínaga bu minihabi dininimebi baya hangu yu howa talialu halimulobi Ngode Datagaliwabe ibunime tí mo hongo haabo helo larama. <sup>4</sup> Ibugua tí ibunaga bi mana lo wini ngago baya hangu talialu bule manda manda bu halimulobi ibugua tínaga holene bayale mo wia helonagabi iname tínaga bi Anduane Homogohondo la halu kema. <sup>5</sup> Ina ibuhondo tínaga bi laremigo hale halu tígua ko bialu harimidago mo wahabe lalu bi lahalu kema. Ai tíha mo ko holene mbira anda íbu wiagua nde ibugua tí wanahelo larama.

<sup>6</sup> Ina Yarusalemeha haga kemaru bibahendeme Anduane Homogohanda tí biamogo bilonaga iname ibuhondo tínaga bi la halu kema.

<sup>7</sup> Ai mali handari mbira pira waragariani huniane dira (169) layagola Demidiriasa mende ibu Sirianaga kini heangi ina Yuda wali agalime beba mbira gili bialu tínaga ibilarima. Beba ogoniha genda timbuni dewa inaha anda ibugu biyaru tí hale ho halimulo lo ibilarima. Ogoningi Yasono ibugua Ngode Datagaliwabehanda wali agali bu kemarunaga dindi wiago mo ko howa bo labu halu kininaga gabumane heagobi mo ko hai haya. Ani bialu heagola ibu heba haga hearume ibu biamogo biya. <sup>8</sup> Tigua Anduane Homogonaga andaha anda polene harabani dagia heago bo heda halu wali agali mana

ko nabiaga hearu homelo bameore bo wahai haya. Ani bialu heagola iname Anduane Homogohondo ina biamogo bia lalu bi larimagola ibugua hale halu ina biamogo biya. Iname balawa widime wabini wiarume lomabu mialu lamu hale wiaru hedalu birima. Ani bialu Anduane Homogo deni mberediru loma biaho ngelarima. <sup>9</sup> Ainde ayu tíbi ina heba mandagi Anda Nemendaruha Palu Holene Horo ege mini Kisilebe tagira ibiragola hamíya hame ledema. Iname beba ogo mali handari mbira pira halirani halira (188) hayagola gili berema, lene.

*BEBA GILI BIALU ARISIDOBULUSU HEARIA PELENEGO NGA*

*Kini Andiogusu homeneogo ogo*

<sup>10</sup> Ina Yarusaleme wali agalibi Yudiaha howabi gabumane agali bu karubi Yudasa ibubi iname Arisidobulusu í agali Kini Toleminaga loma binigo mo miaga howa lawai hagabi kego íhondo bayale kebe larama. Yuda wali agali Iyibi dindiha kemiruhondo bayale kemibe lowa tíha mo ko holene mbira naibi bayale dege halimulo hamelo kema.

<sup>11</sup> Ainde Ngode Datagaliwabehanda inaha mo ko holene mbira anda naibile howa iname kinila wai bulumaya biamogo biyagonaga iname Ngode Datagaliwabehondo kají lalu haabo kema. <sup>12</sup> Waitigi Yarusalemeha anda ibalu wai bialu hayaru ibugua bo taliatagi haya. <sup>13</sup> Ogoningi Kini Andiogusu halu ibunaga ami agali dewaore haru halu Pesia dindiha piya. Ani piyagola mbirali ibu baba wai biba lalu baede habe naheore pene. Ani pialu hearia dama wali beda lo manda bialu bi pupu wiaga mini Nanea gime wabini bigiya wiagonaga loma binigo mo miaga agali bu hearume Kini Andiogusu mo hondo howa tigua kininaga ami agali biaru heba kini ibuni bope hayaya. <sup>14</sup> Ai Andiogusu halu ibu aria hearu gime wabinigohondo bi pupu wiaga anda heagoha anda piyangi ibugua mbirale gime wabini mini Nanea ogoni dabu bule poradagua piya. Anigo ibu ke howa piya. Ibugua Nanea bi pupu wiaga anda heagoha mbirale bayale wiaru ibu dabuni mo yaradagua mo yule piya. <sup>15</sup> Agali anda ogoniha biabe bialu haga hearume mbirale bayale tara tara wiaru anda tamuha baya hangu mo tiga buwa wigi bini. Ani ngelo howa kini halu ibu aria maru anda ogoniha anda ibiyagola agali biabe biaga hearume anda panga payadai bini. <sup>16</sup> Ani buwa tini anda panga emene wiado hene wiagoha tagira puwa kini halu ibu aria maru tamuha hearu ege toleme balu home leneya. Ani bialu agali Naneanaga biabe biaga uruni tigua agali bayarunaga tingini bo budabaga biai halu tinaga haguane dege agali tagiraha de handa andaho heagoria mo batagi hene. <sup>17</sup> Mbirale bibahende bayale dege biai harigonaga Ngode Datagaliwabe ínaga mini mo yaraga heneore ngelo. Ani bialu ina agali ko uruni homai helarigonaga mini yaraga holene íha wiaabo helo, larama.

*Nehemaianaga loma irame dai henego ogo*

<sup>18</sup> Ainde lotu lagane horo timbuni ege mini Kisilebenaga horo pira kirani duria (25) kaware ibiragoni ndobe. Iname horo timbuni tigua mbirale bi pupu wiaga gime wabini Anduane Homogonaga andaha wiago mo wahenagonaga horo mitangiho kemago ainde tigua Anda Nemendaruha Palu Holene Horo mitangi howa turu ho halimu lalu langerema. Ani bialu tigua agali Nehemaia ibu Ngode Datagaliwabehanda anda lone biadai bialu lomabu delaga dabu lone biadai bialu haga agali biagome loma mbira bu delalu hearia ira timbuni minana kululadaga hayago mitangi bialu halimu.\* <sup>19</sup> Waitigime ina mamaliru garabaya bu yalu Pesia dindi piyangi agali Anduane Homogonaga loma binigo mo miaga agali bayale hearume lomabu delaga dabuni ira dene

✧ **1:13:** 1 Mag 6.1-4, 2 Mag 9.1-10 \* **1:18:** Babilonome ibalu Yarusaleme bo gialo wahai hene labu dindi wiagola mani Nehemaia ibugua puwa tano pabe gialaholebu wiaru lone mo arema buwa bialu hene. Anigo Anduane Homogonaga anda kago ibu agali marume puwa ala bu helene. Nehemaia ibugua anda ogoni bini ndo. Te hobane 18 howa lama pialu 36 lamaro bidago Nehemaia mbuga ngagoha howa lenebi Baibolo mbuga maruha howa lo ngadaguabi ndo leda. Te ogoni Yuda wali agalinaga mamali bi te hangu lagago gilibu wini nga.

deago aria mbira hedo yalu puwa iba hambiaga uli iba nabere yobi wiagoha hedo do henego manda bilimu. Tigua baya hangu mo do howa wiagola mbiralime ira hedo do hayadago handa walia nahene. <sup>20</sup> Mali dewaore halu Ngode Datagaliwabehanda horo pongo winidago tagira ibiyagola Pesianaga kini heagome Nehemaia Yarusaleme dai bia lene. Ani layagola Nehemaia ibugua agali loma binigo mo miaga ira dene hedo do henedaru aguane mbira ai kemibe lalu hale ira dene ogoni lone mo pudaba, lene. Ani laya handala tigua taya bu pialu dai buwa lalu ti ira ogoni taya bu waharima dindi gede ndobabi dege uliha wiaria handarima. Ani layagola Nehemaiahanda lalu dindi ogoni aria maru mo yu ibule pudaba lene. <sup>21</sup> Ai mo yu ibiyagola agali loma binigo mo miaga hearume dindi waru ogoni budaga buwa maru loma bu delaga dabuni ira gabu wini ngagoria wialu maru loma delole ngagoha hai ho ngelaga bidaba lene. Ani layagola tigua bia layago biai hene. <sup>22</sup> Mani emene howa ni hari beralibame gehu winigo ai beraliba pubagi heagola ni hongohe bayale dene. Ani biyagola aube tobane buwa lomabu delaga dabu heagoria ira hungu timbuni kilikulu lalu daga daga biyagola wali agali bu hearu mogo laiho hene. <sup>23</sup> Irame loma biago wene dalu heangi agali Anduane Homogonaga loma binigo mo miaga hearubi wali agali bu hearubi tigua Anduane Homogohondo bi lalu hene. Yonadana ibugua Anduane Homogohondo bi layagola Nehemaia halu wali agali tigua ladai bulene wiagohayagi ladai bialu hene.

#### *Yonadanahanda bi lenego ogo*

<sup>24</sup> Yonadanahanda Anduane Homogohondo bi ogodagua lene, Ngode Datagaliwabe-ona mbirale bibahende karubi ngarubi wabiai hariya. Mbirale bibahendeme ihondo gi hai halu i andaneha hai haga ka. I hongo haihebi i tigabiorebi howa dara holene irane nawini dara haganeore Ngode Datagaliwabe ke. Ini hangu kiniore howa mbirale bayaleru inime ina ngiaga ke. <sup>25</sup> Wali agali mbirale tubagiho karuale inime ti mo miaga ke. Ini hangu haluhe haabo haga ke. Hongo bibahende ini haiho kegoni. Isaraele wali agali tinaga genda ngelo karu mo wahai haga ini hangu kegoni. Inanaga mamali agali haguane heneru ti inaga dameneore helo dabaga biniya. <sup>26</sup> Ayu ininaga wali agalinaga minini howa loma ngeremago yamia. Tiore mamage baya hangu haabo halu mana bayale tigabi bulene ngaru bialu helo biamogo bibe. <sup>27</sup> Wali agali ina damene giligala lo haga haga bidaru mo mogo biai habe. Ani bialu ina damene wali agali tara Anduane Homogo mitangi nahaga bu karu ti daluha garabaya karu ina ti golope halu haru dai bibe. Wali agali i mitangi nahaga bu karume ini inanaga Ngode Datagaliwabeore heneda lo hendelo wali agali ina damene genda yu karu dara halu mo wahabe. <sup>28</sup> Waitigi ina hendedope halu ina mo ko halu karu pani nelu mialu bo wahai habe. Ti tandaga nolene timbuni mo mialu pani nelu miai habe. <sup>29</sup> Bamba bulebiraore lalu Mosesehanda bi lo wiyadagua bialu, Inaga wali agali dindi inime ti ngulebero, lalu abale lo wiridagua bialu haru dai biai habe larama, lene.

#### *Pesia kini heagome ira minana dayagonaga te hale henego ogo*

<sup>30</sup> Mani howa agali loma binigo mo miaga bu hearu tigua lotunaga iba gana maru lalu howa <sup>31</sup> loma biago irame dai hayagola Nehemaiahanda loma binigo mo miaga agali hearuhondo lamialu, Loma deledago dai kagola dindi ira minana daga biago ege tole mbirani dugu wilimu, lene. <sup>32</sup> Ani layagola tigua dindi ogoni duguwa ege tole biagoria wiyagola ira hungu o biagoria kilikulu lalu dene. Anigo ira lomabu delaga dabu heagoria ira hungu deago hongoheore dalu ege toleni dayago ibu emene dege dene.

<sup>33</sup> Ani biyago hondowa te dindi bibahendeha purogo lai hene. Agali Anduane Homogonaga loma binigo mo miaga garabaya helayaru tigua ira dene ogoni bamba mo doho heneya layago Pesia kini heago ibu hale hene. Ainde mani howa tigua ira dene hedo do hene uli biagoha dindi gede ibane bere wiaria hondowa tigua dindi uruni dugu

yuwa loma delaga bini. <sup>34</sup> Ani bialu ka layago hale howa kini ibugua agali maru mbirale uruni bi henene layadabe ke hayadabe hondole pudaba laya handala tigua de hondole ibini. Ani bialu kinihanda dindi ogoni hagira bu yaanda ho ngelalimu lene. <sup>35</sup> Ani bialu kini ibugua dindi ogoninaga dagisi muniru mialu howa muni maru ibu damene nenege bu karu talebu migi biaga hene. <sup>36</sup> Ai Nehemaia halu ibu damenerume dindi ginanebi ira daga ogoni mini Nebeda lene. Inanaga bi lalu, Domaga laga, wini. Anigo wali agali bibahende bu hearume dindi ogoni mini Nabada laga wini.

## 2

### *Yaremaiahanda mbirale lotunaga wiaru mo do henego ogo*

<sup>1</sup> Mbuga ala tawe ngagoha howa bi ogodagua leda. Agali Anduane Homogonaga bi mana latagi haga Yaremaiahanda wali agali garabaya hearuhondo ira dene hedo do hene lalu te ayu hale harimago dege lene nga. <sup>2</sup> Ani bialu bi mana lo wini ngago embeda nahalimu lalu ibugua lawai halu hene. Ani bialu tigua mbirale bi pupu wule bigiya gime wabini yari bayaleru ngolo silibarume mo yaribia howa ngeledago deme hondowa dimagoli holene nawi. Ani bialu bigiya urunime tinaga miniha mo luluya helo holene nawi. <sup>3</sup> Ani bialu ibugua bi hongo howaore tihondo lamialu bi mana lo wini ngagoore embeda holomini nahalimu lalu lamini.

<sup>4</sup> Ani bialu mbuga ogoniha te maru ledagome Yaremaia ibu mini Ngode Datagaliwabeha howa ibini mo yu howa ibugua latagi halu lalu tigua Ngode Datagaliwabenaga balai anda kago giallo yalu Habo Nalolene Bi lo winigonaga Mbogoyi ngagobi mo yalu ibu talima ibalimu leneya. Ani puwa hari nene bamba Mosese ibu irigi howa dindi Ngode Datagaliwabeanda Isaraele ti ngulebero lene biago handa amu halu hendene biagoria irigi heneya. <sup>5</sup> Ai Yaremaia ibu hari nene biagoha irigi howa handalu hearia ege gundu mbira ona wiaria hendene. Hondowa ibugua balai anda giallo yayagobi Habo Nalolene Bi lo winigonaga Mbogoyi biagobi ira hagua nga bilo inisenesi lomabu delaga dabu giallo yaygobi bibahende egeanda ogoniha mo do howa ege tole mbirame panga payadai biniya.

<sup>6</sup> Mani howa agali maru Yaremaia heba mandagi haga hearume hariga penedadagua pialu tigua mbirale uruni taya binigoyu tigua handa walia nahe dege hene. <sup>7</sup> Mani howa Yaremaia ibu hale halu hearia tigua mbirale uruni taya biyago handa walia nahe ka layago hale howa ibugua ti baba keba howa tihondo lalu, Wali agali mbirame mbirale uruni handa walia nahe dege kane Ngode Datagaliwabeanda ibunaga wali agali dara halu lone mo mogo bu heledangi handa walia holebira. <sup>8</sup> Horo ogoni birangi Ngode Datagaliwabeanda mbirale uruni panaga mo batagi ho ngelolebira. Ani bialu Ngode Datagaliwabenaga wa hongoheore tara bamba Mosese ibugua hendenegobi Kini Solomonohanda Anduane Homogonaga anda loma biahe kago ibunihondo mo loma bialu howa bi lalu hearia mo walia henegobibi mo walia harane hondolebere.\*☆

### *Solomonohanda Anduane Homogonaga anda bamba panga duguinigo te ngago ogo*

<sup>9</sup> Inanaga mamalirume te maru ogodagua laya. Agali manda bayalewi Solomonohendeyago ibugua Anduane Homogonaga anda gahenge panga dugualu howa horo timbuni ogoningsi loma bo delalu heneya. <sup>10</sup> Ani bialu howa ibugua Anduane Homogohondo bi layagola ira dene daligaha howa ibira halu loma wiaru minana dai hene laya. O binidagoni bamba Mosesehandu Anduane Homogohondo bi layagola ira dene minana ibira halu lama wiago dene yadagua dege biniya. <sup>11</sup> Mosesehandu lalu, Loma ogoninaga budini mbira agalime nane wiagome loma ogoni irame daiore haya, leneya.

\* **2:8:** Mbirale Yaremaiahanda bialu hene lalu ayu te ledagoni agali Anduane Homogonaga bi mana latagi haga henerunaga mbuga ngagoha te gili bu wia nabi. Baibolo mbugaha bi nagilibuwi dege. Ai hobane mbirani howa mbuga ala tawe lalu gilibu ngago iname manda nabi kemago ainde mbuga ogoni bambaore ereba hene bada. ☆ **2:8:** Har 16.10, 1 Kin 8.10-11

<sup>12</sup> Horo ogoningi Solomono ibu turu timbuni ho howa horo halira lotu dege lalu haabo heneya.

*Mbuga ala taweru Nehemaianaga mbuga anda heagoha wiaria hendeneo ogo*

<sup>13</sup> Bi ayu iname gilibu wia haramago mbuga mbira Nehemaianaga Te laga ngagoha daga lalu hondolebere, lene.† Nehemaia ibugua kini henerunaga te mo ngoai howa gilibu wiai halu bi Debidihanda lenegobi agali Anduane Homogonaga bi mana latagi haga henerume gilibu winirubi kini tigua mbirale lotunaga lalu bi laga binirubi bibahende mo ngoai ho winiya. <sup>14</sup> Ani buwa Nehemaiahanda ibu andagaha mo ngoai howa winiya. Mani howa nde Yudasahandabi anidagua dege biniyago irane wai timbuni biaru biyagome mbuga uruni mbira mbiraha wahaga biniyago ainde ibugua lone mo ilu mogobu wigi biniya. Mbuga uruni ayu iname yu kema. <sup>15</sup> Ainde tí mbuga uruni maru daga lole manda birimiyagua nde agali marume mo pu lalimu. Tigua mo yu dai bialu tini ngilo.

*Turu howa bi laraga halu huario lenego ogo*

<sup>16</sup> Ngode Datagaliwabenaga anda ibunihondo mo loma bia holene horo timbuni biago tagira ibiyadago. Ani ibiyadagola tiguabi nde horo ogoni tinaga turu ho holene horo mbira wiabagi hene wilimulonaga iname bi ogoni tí kemiria lo ibilarama.✧  
<sup>17</sup> Ngode Datagaliwabehanda ina garabaya hemaria haru halu dai biyago nai bialu ina mamalirunaga dindi wiago inanehondo ngiadai biya. Ibugua ina biamogo biyagome kini lone ho dai bialu loma binigo mo miaga agali hearume tinaga biabe bialu haga wiaru lone bialu ha biagola Anduane Homogonaga andaha lotu lolenebi lone wiadai biya. <sup>18</sup> Ainde Ngode Datagaliwabehanda wali agali abaleore dara halu wali agali dindi tara tara ngaruha haga haga bu kemaruni bibahende mo mogo bialu ibunaga dindi ibuhondo mo loma bia hene ngagoria haru dai bulebira lowa iname mini dunubia ho kema. Ibugua mbirale ko tara tara wiaruha hemaria haru dai bialu ibunaga anda kagobi lone mo bayale haya, lene.

*Bi mbuga ogoha ngarunaga irane ogo*

<sup>19</sup> Ayu iname te lamiyago damene mbirale Yudasa Magabeusuha biyarubi ibu hameneruha biyarubi Anduane Homogonaga anda mo gini bialu biabe bialu henerubi lomabu delaga dabu kago mo loma bia henegonaga tebi lamīya <sup>20</sup> Ani bialu wai timbuni Yuda tigua Andiogusu Ebipanese bababi ibu igini Yubadolabi binigonaga tebi hale hamīya. <sup>21</sup> Ani bialu Ngode Datagaliwabehanda Yuda wali agali tinaga mana ngago mo hongo holenaga wai bialu henerunaga tebi lamīya. Heneneore Yuda dewa ndo dege henego howa tigua waitigi bu hearu bope hai halu tinaga dindi bibahende bo yu dai baii halu waitigi hearu bo taliatagi hai halu bini. <sup>22</sup> Tigua Anduane Homogonaga anda dindi bibahende manda baiihe mini lene biago mo yu dai bini. Ani bialu waitigi Yarusaleme tanoha bu hearu bo hatagi halu bini. Ngode Datagaliwabehanda ibunaga dara holene timbuni inahondo mo walia hayagola birimagoni.

<sup>23</sup> Bi Yasono ibugua mbuga taratara duriani gilibu wiyayaru uruni ina mbuga mbiraoreha mo biamaga ho ngelarogoni. <sup>24</sup> Ai mbuga ogoni lu hayagola ainde mali dagabi bi mana marubi mbuga ogoniha mo ngeledema. Ani bidagome bi kuniore ngago mbirale urunime wiapai haragola bi kuni dunini ngago taya bialu handawalia ala awene habe nahe kema. <sup>25</sup> Ina mbuga mbira mbirali mbuga ogoni daga larago ibu turu helobi maru mbirale tara tara ngaru lo manda bu harago ibu lo manda bialu tinaga miniha hengelobi gili bulene manda birigo ai gili bulebero. Ani bialu ayu maru bame daga laga karu biamogo bulene hamelo ko. <sup>26</sup> Bi damenego mo mogobu ngelowa lone mo tubagi holeneo awedaga ndo ndelaheore mbira nga. <sup>27</sup> Marungi nde gendabiore

† 2:13: Mbuga ogoni ayu Baibolo mbuga ngagoha nawigo mbuga ogoni bamba ereba hene bada. ✧ 2:16: 1 Mag 4.59



wiagola mbiraga u napale biabe biaabo haruli. Mbiralime tomo timbuni wali agali ibu ngoai ho biruwa nole manda manda bialu biagadagua bialu biraruli. Biabe ogoni bulene awedaga ndo nga. Agali mbirago ibugua wali agali ibunaga tomo dawa ngago nalu birule ibiraru ti turu ho berelonaga baya hangu mo manda manda bu ngelaga ka. Manane ogonibi dege bialu ina wali agali mbuga ogoni dagalalu holebiraru mo turu hole manda buwa gili biru. <sup>28</sup> Agali mbuga ogoha te ngago gili binidago ibugua te luore gili lowa gilibu winiya. Anigo ina gili bialu howa mo tubagi howa gili bulene hame ledi. <sup>29</sup> I agali anda biaga mbirame anda bialu howa anda bulene aguaore buleda lowa miniha genda tara tara yu howa bialu hagagobi ndo ko. I agali anda bayale helo mo yari bia halu beni hiragogobi howa bero. <sup>30</sup> Mbiralibu mamalinaga bi te baya hangu hale hole hamelo heagua nde te gilibu ngaruni baya hangu dagalalu manda bulene nga. Ibugua beba daga layago te ogoni henene binigo ngabe bame dege gilibu winidabe lalu maru karu hale holene nga. <sup>31</sup> Anigo mbiralibu te ina larogodagua lole kago ibugua genda yu holene nawi. Te lo gili nale howa bime mo tubagi howa lolene nga. <sup>32</sup> Anigo ai ogoria haru lalu ininaga te gili bero. Bi damene mo walua halu ledagome te henene lo ngago bu dambi howa mo do holigo ai ogoria haru laro.

## **Agali marume Anduane Homogonaga loma binigo mo miaga agali haguane timbuni holenaga henge taya bialu hene**

*(Be 3-4)*

### 3

#### *Oniasa Saimonola lai lalu henego ogo*

<sup>1</sup> Oniasa ibu Anduane Homogonaga loma binigo mo miaga agali haguane timbuni heangi wali agali Yarusalemeha bu hearu ti bayale howa tigua bi mana lo wini wiaru baya hangu talialu hene. Oniasa ibu agali lotu lagane mbira howa mana ko bulene ngago damene ibu hame nalaga hene. <sup>2</sup> Kini agali maru dindi tara tara kaundia wiaruha howa Yarusaleme ibugu bialu tigua dabudabu muni dewaoreme yolo miaga wiaru Anduane Homogonaga anda mo yari bia helo migi bini. <sup>3</sup> Esia dindinaga kini mini Selugusu ibugua muni dewaore kini andaga muni wiaga wiagoaha wiaru aria agali Anduane Homogonaga loma binigo mo miaga hearu tinaga lotu lalu lomabu delalu biabe biaga wiaruale bulene ngago yolo bigi bilo mini.

<sup>4</sup> Ainde agali mbira Biliga aria mini Saimono henego ibu Anduane Homogonaga anda kagonaga gusugusu henego mbirale uruniha ngaru handaya ho haga henego ogoni ibugua loma binigo mo miaga agali haguane timbuni heago baba magedi ngago handaya ho hagane mana tiga nabi wiagola ogoninaga lai lalu hene. <sup>5</sup> Ani lalu howa Saimono ibugua loma binigo mo miaga agali haguane timbuni Oniasa kago ibugua bime bope habe naheyagola ibugua pialu Koelesiria dindinagabi Ponisia dindinagabi agali gabumane haguane Taraseusu igini mini Aboloniusu heago hondo pene. <sup>6</sup> Ani pialu Saimono ibugua Aboloniushondo Yarusaleme Anduane Homogonaga anda kagoaha muni dewaore mo do ho ngago ogodagua nga lalu lamini. Muni anda biago ngago bibahende agalime daga labe naheore nga. Ani bialu muni uruni wali agalime tinaga loma mini ngago bolangua howa daligaore nga. Ani ngago kini ibugua muni ogoni ibu handaya ho holene erekui nabioore nga, lalu lamini.

#### *Heliodorusu ibu Yarusaleme penego ogo*

<sup>7</sup> Aboloniusu ibugua bi ogoni hale halu puwa kinihondo muni ogonidagua nga laya lalu lamiyagola kini ibugua agali mbira mini Heliodorusu ibunaga agali ho bamba hene heago lamialu muni uruni mo pu lene. <sup>8</sup> Ani laya handala Heliodorusu ibu heyalu abale pene. Ibugua ke howa dindi maru Koelesiria tanobi Ponisia tanobi handama ibaga bule

poro lalu puwa ibunaga bu miniha biabe henene bule heago wiado howa tara pene tingi halu pene. <sup>9</sup> Ibu puwa Yarusaleme anda piyagola loma binigo mo miaga agali haguane timbuni heagomebi Yarusalemenaga agali haguane bu hearumebi ibunaga mini yaraga hene. Ani biyagola ibugua bi mo do nahe ibu ogoale bule ibiru lalu tihondo latagi hene. Ibugua agali haguane hearuhondo bi Saimonohanda layadago henene layabe bame layabe lalu tihondo hale hene <sup>10</sup> Ani hale hayagola Oniasahanda Heliodoruhondo lamialu lalu, Ina muni ayu te larego ogoni wali dalo ti agalini homene bedaru biamogo biagabi waneigini ti aba nahe karu biamogo biagabi nga. <sup>11</sup> Ani bialu muni uruni aria timbuni Tobaiasa igini Higanusu agali haguane heago ibunaga nga. Muni uruninaga genda magi manda kilogarama daosini nguira (15,000) wialu ngolo kilogarama daosini karia (7,000) nga. Ani ngago ainde agali Saimono ogoninaga bi layadagoni henene ndo layada, lene. <sup>12</sup> Ani lowa laabo halu lalu, Ainde wali agalinaga muni emene ngago ereba hayagua nde ko mbira tagira polebira. Tinaga muni Anduane Homogonaga andaha winidagoni irane anda ogoni mo loma biahene halu dindi bibahendeha mini leneore kago manda bialu winigo nga, lene.

*Heliodorusu ibugua Anduane Homogonaga anda tamuha anda pole manda binigo ogo*

<sup>13</sup> Heliodorusu ibu bi Oniasahanda layago hale howa dege ibugua hongo halu muni uruni kininaga muni andaha anda pelo lalu kinihanda bi lo wiyagoria howa lo hongo hene. <sup>14</sup> Ani lowa ibugua horo mbirangi Anduane Homogonaga andaha anda puwa muni mbirale uruni de hondole lalu horo ponggo wini. Ani layagola wali agalime mbirale ibugua biagadaru manga timbuni hene. <sup>15</sup> Agali Anduane Homogonaga loma binigo mo miaga hearu tigua tinaga biabe bialu karulaga aga wiaru mo karulowa Anduane Homogonaga lomabu delaga dabu heago kaware be abalu wiagoria palene. Ani paluwa Ngode Datagaliwabhondo wali agalinaga muni ibuhondo loma bia howa Anduane Homogonaga andaha mo wini ogoni baya hangu handaya ho habe lalu tigua bi lalu hene. <sup>16</sup> Wali agali tigua agali Anduane Homogonaga loma binigo mo miaga haguane timbuni heagonaga dengui hondowa ti gi timbuni hai hene. Ibugua dengui heagome ibu genda yu heago mo walia hene. <sup>17</sup> Ibu gi timbu howa duru lalu heago hondowa wali agali tigua mitangi bialu, Ibu tandaga timbuni ho ka, lo manda bu hene. <sup>18</sup> Ani hondowa wali agali dewaore tini andagaha howa gerai laga laga bialu ibu hondole ibu ngoai hene. Ani buwa tiguabi nde agali ko karume tinaga Anduane Homogonaga anda kagonaga mana ngago pugualino gi timbuni ho howa tigua Anduane Homogohondo bi hongo howa lalu hene. <sup>19</sup> Walime dara ho howa karu lagane agaru karulowa tinaga andu bu yi nahe bame ibagabu hene. Wali uruni dewaore howa tanoha hariga wiaru henge nawiore ti hangu tolai hene. Wandari mabuage tini andagaha birado ho biraga berenerume tini andaga wahalu tagira pialu gerai tanonaga wai pabe heagohabi wai pabe panga heagohabi pugu pugu biai hene. Maru tamuha biruwa windoha handatagi hai ho birama pene. <sup>20</sup> Bibahendeme gi doladaga hai halu Anduane Homogohondo bi laiore hene. <sup>21</sup> Dara holene wali agalinaga bu miniha tolai hayagaola tigua dindini be abalu wiagoria paluwa Anduane Homogohondo bi hongo howa lalu hene. Anduane Homogonaga loma binigo mo miaga agali haguane timbuni heago ibu gi timbuni ho howa durulalu hene.

*Ngode Datagaliwabehanda ibunaga anda handaya ho henego ogo*

<sup>22</sup> Anduane Homogohondo muni dabudaburu wali agalime ibunaga andaha ngaru baya hangu handaya ho habe lalu tigua bi hongo howa lalu hene. <sup>23</sup> Tigua Anduane Homogohondo bi ogoni lalu heagola Heliodorusu ibu gi nahe ibu bule manda bu heago bialu hene. <sup>24</sup> Ibuni heba ami agali ibuni mamage haga bu hearu haru halu Anduane Homogonaga andaha muni wiaga wiagoha anda pene. Ani piyagola Ngode Datagaliwabe ibu bibahendenaga hongo haihe howa dindi bibahendeha bu karu handaya ho

howa haru hai haga kago ibunime dama timbuni mbira ibiradagua ibini. Ani biyagola agali haguane maru Heliodorusu heba ibiyaru tigua Ngode Datagaliwabenaga hongo gibiore handa walia halu tini luluyu ibagabu hai hene. Ti gi timbuni howa dindini pilo ibiraho wiai hene. <sup>25</sup> Ai Ngode Datagaliwabe ibuni agali hongohe mbira haradagua bialu nogo hosini yári biahe mbirani berearia hendene. Nogo hosi ogonime gerai lalu ibuwa Heliodorusu pogola ba howa geni hengeda hene. Agali nogo hosini biralu ibiyagoni ibunaga wai biagane yári ngolome wabini karu learia de hendene. <sup>26</sup> Ani bialu igiri daliahe kiralí Heliodorusu hearia ibiyago hendene. Libu agali hongoheore howa libunaga yári bayaleore karuleago hendene. Agali kira ogonilabome Heliodorusu abene talebu howa mo ko howa balu hebiria hendene. <sup>27</sup> Ibunaga de mborere biyagola ibu dindini odope hene. Ani biyagola ibunaga agali haru hayarume balai anda danginime lebera buwa ogoriani mo pale lowa <sup>28</sup> mo yalu pene. Ani biyagola agali ibunaga ami agali dewaore haru halu muni andaha haru anda pole manda biyago ibuha mo ko holene abale ngola hene. Tigua agali homene tingini mo yu tagira poradagua bini. Ani biyagola Heliodorusu ibugua Ngode Datagaliwabe ibu bibahendenaga hongo haiheore ka lo manda bini.

*Oniasahanda Heliodorusu biamogo bilonaga Ngode Datagaliwabehondo bi lenego ogo*

<sup>29</sup> Heneneore Ngode Datagaliwabenaga hongome agali ogoni bope halu dindini paliape helaya. Ani bialu ibu bi labe naheore wialu ibu lone karulapobe nahe wini. <sup>30</sup> Anduane Homogo ibunime agalime nabiaganeale hongohe mbira ibuni andaga biagoha howa biyagonaga Yuda wali agali tigua Ngode Datagaliwabenaga mini mo yaraga halu hene. Pigane wali agalime tinaga miniha genda timbuni ho howa gi halu Anduane Homogonaga andaha ibalu tolai hene. Ani binigo mani mo beregedalu gi holene wiyago turu holene timbuniore anda biagoha tolatagi hene. Ngode Datagaliwabenaga mini yaraga halu henego irane Ngode Datagaliwabe Bibahendenaga Hongo Haiheore kagome ibunaga hongo taraore mo walia hayagonaga turu hene. <sup>31</sup> Agali maru Heliodorusu nenege hearu Oniasa hearia ibuwa Heliodorusu mo ko nahelo Ngode Datagaliwabehondo bi lahabe lama ibini. Ibu homoligo bi lahabe lalu lamini. <sup>32</sup> Ani layagola Anduane Homogonaga loma binigo mo miaga agali haguane timbuni Oniasahanda mitangi bialu Kinihanda Heliodorusu Yuda wali agalime bo wahayada lo manda buligonaga Oniasa ibugua Anduane Homogohondo Heliodorusu biamogo bibe lalu bi la hene. <sup>33</sup> Oniasahanda ko domolenenaga loma bo delalu heagola igiri daliahe kiralí biagolabo lone ibini. Libu yári mbiraoregobi karulowa ala hayagobi dege ibini. Libugua ibalu Heliodorusu deni heyu howa ibuhondo lamialu lalu, Anduane Homogonaga loma binigo mo miaga agali haguane timbuni Oniasahondo kaj lolene nga. Ibugua loma bo delayagome í Ngode Datagaliwabehanda bo wanahe helo yupe hayago ndobe. <sup>34</sup> Ayu ína pialu wali agali bu karu bibahende hale hai helo Ngode Datagaliwabenaga hongo ogobi winiyagome í pani ngialu baya lalu lamima pole pu, lene. Libugua bi ogonidagua lalu libuni pu ereba hene.

*Heliodorusu mini beregenego ogo*

<sup>35</sup> Ai Ngode Datagaliwabehanda Heliodorusu ibu homelo bo wahabehego nabayagonaga ibugua Ngode Datagaliwabehondo lomabu mini. Ani bialu ibugua Anduane Homogonaga loma binigo mo miaga agali haguane timbuni Oniasala gi tigani bialu kini hearia ibunaga ami agali biaru heba dai bini. <sup>36</sup> Dai buwa Heliodorusu ibugua te bibahende Ngode Datagaliwabe Daligaorene Daliga kagome agalime nabiagane ale ibuni deme hondo heagola biyaru bibahende wali agali hale hai helo lamiai hene. <sup>37</sup> Ai kini ibugua Heliodorusu hale halu, Ibugua agali abialeme Yarusaleme pu lolene karulapebe lalu hale hayagola Heliodorushanda ladai bialu lalu, <sup>38</sup> Agali ínaga waitigi ho mbira heaguabi ínaga gabumane mo ko hole manda bu mbira heaguabi ogoniale

kago dindi ogoniha pelo pu labe. Ani pelaregola ibu pu ereba nahe bayale dai biyagua nde mbirale tibume bo baulo wahe mbira ibiradagua bialu ibulebira Ngode Datagaliwabenaga hongo tara mbirame ibunaga anda ogoni mamage haga heagome ina bame agali dege kamarume polenego nakarulapeya. <sup>39</sup> Ainde Ngode Datagaliwabe dahuliya andagaha haga kagome ibunaga anda ogoni baya hangu mamage ho haga mbira wia. Ani wiagola agali mbira ibula mini ko wuyu ibirago mo ko howa minu bagaya, lalu lamini. <sup>40</sup> Ai Ngode Datagaliwabehanda Heliodorusu mini balu ibunaga andaha muni wiago baya hangu handaya ho henegonaga te ogoni hangu.

## 4

### *Saimonohanda Oniasa godini helenego ogo*

<sup>1</sup> Pigane Saimonohanda Aboloniusu hearia Anduane Homogonaga andaha muni ogodagua nga lalu bi dibudibu lo yu piyagome tiha mo ko holene dewa anda ibalu dindi bibahendeha ibai haya lalu te larugoni. Ainde Saimono ogoni ibugua dege wali agali mo hondo howa ke halu lalu, Oniasahanda Heliodorusu mo ko hayagome dindi bibahendeha mo ko holene anda ibu nga, lalu lamiai halu hene. <sup>2</sup> Ibugua bi ke holene urunialego Oniasahondo bameore laede holene gi naheore howa lalu hene. Ibugua lalu, Oniasahanda gabumanenaga biabe bulene ngago mo ko hai haga ka. Anigo Oniasa ogoni ibugua Yarusaleme ngago baya hangu mo bayale howa handaya ho halu ibu damene bu karu handaya ho halu buwa dindi ogoninaga mana ngago wali agalime baya hangu taluwa bialu helo mo hongo halu haga ka. <sup>3</sup> Saimononaga waitigi holene mana wiago pu timbu heagola ibu baba haga agali mbirame wali agali dewaore homelo bo wahaga bialu heagola <sup>4</sup> Oniasa ibugua manda bialu waitigi holene mana ogoni pu hongo hayada lo manda bini. Ani bialu Menesedesu igini Aboloniusu kago ibu Koelesirianaga gabumane agali haguanebi Ponisianaga gabumane agali haguanebi kago ibugua Saimonohanda mana ko ogonidagua bialu helo mo hongo hayada lo manda bu hene. <sup>5</sup> Ani bialu ibunime kini hondole pene. Ibugua wali agali ibu damenerume ko biya lole ndo ibugua ibunaga wali agalinaga mbirale wiarunaga genda yu howabi Yuda dindiha agali mbira mbira hearunaga genda yu howabi kini hondole pene. <sup>6</sup> Ibugua mitangi bialu, Ainde kini ibugua keba ogoni mo home lolenego mbira nabi heagua nde gabumane biabe bulene ngago damene bibahende mo ko hai halu Saimono ibugua lulu biabe bialu kago pu hongo holobada, lo manda bini.

### *Yasonohanda Girigi mana wiaru mo bia henego ogo*

<sup>7</sup> Kini Selugusu homayagola Andiogusu ibu mini Ebipanese lagago ibu kini ho aribia hene. Ani howa tigua Oniasa hamene Yasono ibu Anduane Homogonaga loma binigo mo miaga agali haguane timbuni helo dabo helene. Anigo Yasono ibugua biabe ogoni bulenaga kini mo hondo howa biabe ogoni mo yini. <sup>8</sup> Ibugua muni siliba daosini dege genda magi kilogarama haleria (13,000) ala mialu lone mani daosini dege tebira (3,000) ibunaga biyinaya biragome igini wirago mule lene. <sup>9</sup> Ani bialu kini ibugua ibunaga bi larago hale halu igiri dalihe bu karu tinaga gini biaga hama mbira godo wia layagua nde siliba muni daosini duria (5,000) lone tago halu mulebero lene. <sup>\*</sup> Ani bialu ibugua kinihondo hale halu, Yarusaleme wali agali tano dunini timbuni Andiogo ngagonaga dindi aba ka lalu latagi ha, lalu kini hale hene.

<sup>10</sup> Ani hale hayagola kini ibugua, Yasononaga bi layadago karulape, lene. Kini e lalu Anduane Homogonaga loma binigo mo miaga agali haguane timbuni dabo helayagola ibu agali haguane timbuni ani howa ibugua abaleore Yuda wali agalime Giriginaga mana ngago bidaba lowa wali agali genda mo ya halu hene. <sup>11</sup> Ani bulenaga pigane tigua bi bamba Yone heangi Yuda wali agalime karulape lo winidago ala mo waholene

✧ 4:7: 1 Mag 1.10 \* 4:9: Gini biagane hama ogoni ogoale lalu te maru 1 Magabi 1.14 ngagoria gilibu ngago de hondolene nga.

nga. Yone ogoni bamba Lomo wali agali baba Yuda wali agali nenege hamiya lalu habo nalolene bi lo wiyago lolenaga bi lo yalu Yone ogoni igini Yubolemusu ibugua pene. Ai Yasono ibugua mana lowinigo mo bagi howa mana maru bi mana ala lo winidagola wai bi wiaru mo wini. <sup>12</sup> Ibugua abaleore gini bulene hama mbira Yarusaleme hama wai pabeanda hongohe heago kawareni mo ngelowa igiri daliahe agali haguane hearu igini hearume gini tara tara maru biawai helo dabo helaga bini. <sup>13</sup> Ani bialu agali ko loma binigo mo miagaore ndo ke howa dabo helene Yasono ogoninaga biabe ko biyago bia timbu halu Giriginaga manabi dindi tara taranaga manabi pu timbuore hene. <sup>14</sup> Ani biyagogali Anduane Homogonaga loma binigo mo miaga agali hearumebi tinaga biabe lotunaga bialu haga wiaru manga halu wahai hene. Tigua Anduane Homogonaga anda erembira mialu loma bu miaga wiago embeda halu piai hene. Ai agali loma binigo mo miaga uruni tigua lotu maname gini tara tara nabibe lene ngaru bulenaga gini uruni bule mbelo pu larugola tigua ala gini hama ngagoria pu haga hene. <sup>15</sup> Tigua ti maru agalirunaga mbirale bayale wiaru damene yu wahai halu pene. Ani puwa tigua gini uruni bialu Girigi wali agalinaga mbirale wiaru mule hamelo haga hene. <sup>16</sup> Anidagua bialu hearia genda timbunioreme Yuda wali agali minini. Tigua hongo howa Giriginaga mana wiago bialu heago helowa ainde Girigi tigua Yuda wali agali baba waitigi ho hene. <sup>17</sup> Heneneore Ngode Datagaliwabenaga bi mana ngago mo wahalu polenego mana bayale ndo nga. Te ayu lolebiragome mo walia halu bi lolebira.

*Yarusaleme wali agalime Siria wali agalinaga mana talialu henego ogo*

<sup>18</sup> Mali duria bolangua haragola tigua gini tara tara biaga wini. Gini ogoni Taia tanoha birangi kini ibuni hondo pugu biaga hene. <sup>19</sup> Ai agali ko Yasonohanda gini ogoni bulene horo tagira ibirangi ibugua agali maru Andiogo dindi aba lalu heneru Yarusaleme minini howa maru gini ogoni bu pelo dabalul pelaga hene. Tigua mbirale dama mitangi bialu bi pupu wiaga mini Hegulusu ibunaga loma muni siliba genda magi kilogarama daosini dege pira (10,000) lomabu yu piaga wini. Anigo agali uruni tigua muni uruni loma mulene hame nale haga. Tigua muni ogonime biabe tara bulene karulapeda lo manda biaga hene. <sup>20</sup> Tigua muni ogoni mbirale bi pupu wiaga ogoninaga lomabu mule yu puwa ainde tigua wai biaga iba sibi wabini.

<sup>21</sup> Pilomedo ibu nde Iyibi dindiha kini hene. Ibu pigane kini hayangi Yuda wali agali tigua agali mbira mini Aboloniusu Menesedesu igini heago tinaga minini pu lene. Ainde Kini Andiogusu ibugua hale halu hearia Kini Pilomedohanda ibunaga gabumane biabe bialu kago turu nahe ibunibi handabe manga ho ka layago hale ho hene. Ani layago hale halu Kini Andiogusu ibugua miniha genda halu mini burugu timbuni lalu howa ai ibu Yoba tano pialu mani Yarusaleme puabo hene. <sup>22</sup> Ani piyagola Yasono halu Yarusaleme wali agali bu hearume ibu ibirida lalu mo turu timbuni hene. Tigua ira hungu dalu heoreru hedo yu howa tigua ibuhondo turu howa hoaro laga laga bialu hene. Ani pialu mani howa Andiogusu ibu andaga dai bialu howa ibunaga ami agali dewaore dindi mbira Ponisia wiagoria helene.

*Menelausu Anduane Homogonaga loma binigo mo miaga agali haguane timbuni henego ogo*

<sup>23</sup> Mani mali tebira howa Yasono ibugua Menelausuhondo muni maru kininaga yu pialu ibugua mbirale gahenge maru bide manda buwa kini ibugua bia e lelo hale hole pu lalu bini. Agali Menelausu ogoni ibu agali abale Saimono te larimago hamene hene. <sup>24</sup> Ani pu laya handala Menelausu ibugua kini berearia anda puwa ibugua kini bime baya hangu la debodebo bialu ibu agali haguane mini lene timbuni hene mbirame bi letingi howa bi lalu hene. Ani lalu howa ibugua kinihondo lalu siliba muni ala Yasonohanda kini ngule lalu bi lo wiyagodagua mialu ibugua siliba genda magi pira

✧ 4:11: 1 Mag 8.17



lone dambi howa ngulebero lalu kini lamini. Ani layagola kinihanda Menelausu ibu Anduane Homogonaga loma binigo mo miaga agali haguane timbuni helo layagola ibu ani hene. <sup>25</sup> Menelausu ibu kinihanda agali loma binigo mo miaga agali haguane timbuni holenenaga bi e lalu karulape laya handala biabe ogoni bule dai bini. Anigo ibu agali biabe ogoni bulene karulape ndo hene. Ibu agali keba abale tungulope halu biangome hayule dua lalu hagagobi hene. <sup>26</sup> Ainde Menelausu ibugua biabe Anduane Homogonaga loma binigo mo miaga agali haguane timbuni ogoni ibu hamenenaga winigo Yasonohanda mo pagebu yu hayadagua ibuguabi nde Yasononaga mo page bu yini. Ani biya handala Yasono ibu ibida Amono dindiha hama pene. <sup>27</sup> Ani peagola Menelausu ibu Anduane Homogonaga loma binigo mo miaga agali haguane timbuni howa biabe bialu hene. Ani bialu ha howa dege ibugua kinihondo muni ngule lalu bi lo wiyago nami dege hene. <sup>28</sup> Kininaga ami agali haguane mbira mini Sosaradusu Yarusaleme ami agali hearu haru haga henego ibugua Menelausuhondo hale halu ibugua dagisi mima ibaga bulene wiyadago ainde kini muni mule wirigo ngi, lene. Ani hale hayagola Menelausu ibugua nami hene. <sup>29</sup> Ani heagola kini ibugua libu haru mandagi bi lo tiga bule ibidaba lalu olene. Ani laya handala Menelausu ibugua agali mbira ibu hamene mini Lisimagusu heagome ibu pedaha ibunaga biabe bulene ngago bia aribia halu habe lene. Ani bialu ami agali haru haga agali haguane Sosaradusuhanda ami agali mbira mini Karadese ibu Saibarasali henego ogonime ami agali haru ha aribia howa handaya ho helo dabo helalu pene.

### *Oniasa homelo bo wahenego ogo*

<sup>30</sup> Uruningi kini ibugua tano kira Tasusula Malusula ibu one yapara hene halu mende berearu aria mbira mini Andiogisi bereago mo miyagola wali agali tano kira ogoniha haga bu hearume wai ho hene. <sup>31</sup> Ani ka layago ibu hale halu ibugua agali haguane mbira mini Andoronigusu heagome gabumane biabe ngaru handaya ho habe lalu ibunime wali agali tano kira biago laboha wai hayadago mo tiga bule abale pene. <sup>32</sup> Menelausu ibugua manda bialu kini bime baya hangu la debodebo bulene henge ayu o ngagonida lo manda bu hene. Ani manda buwa ibugua gabo be ngolome wabini Anduane Homogonaga andaha wiaru mo page buwa Andoronigusu mo mini. Ani bialu ibugua gabo be maru tanoha wali agali hearubi wali agali tano kaware wiaruha bu hearubi mo migi biriya. <sup>33</sup> Menelausu ibugua biyago Oniasa ibugua goaru handalu hearia henene anidagua biniyago handa walia haya handala Oniasa ibu ibida pialu Andiogo tanoha lotu anda mbira heagoha hado ho howa ibugua mana ko Menelausuhanda biyadago tiga tiga latagi halu hene. <sup>34</sup> Ani lalu heago Menelausu ibu hale howa ibugua ohowa Andoronigusula bi lene. Bi lalu ibugua hongo howa Oniasa homelo bo waholenaga bi lalu hene. Ani lalu Andoronigusu ibugua Oniasa hearia puwa ibugua mo gede howa bi lalu hene. Ani lalu, Hambi-o bayale kebe, lowa ibugua ke howa ohalu Oniasa ibuha mo ko holene mbira nawi lowa bi lene. Ani lalu heagola Oniasa ibu bi ogoni mo henene nahe howa dege Andoronigusu ibugua baya hangu la debodebo biyagola ibu lotu andaha howa tagira pene. Ani tagira ibiyagola Andoronigusu ibugua mana bayale ndo lehe ngago biruda lo manda nabi howa ibugua Oniasa homelo bo wahene.✧

### *Andoronigusu homenego ogo*

<sup>35</sup> Andoronigusu ibugua mana lehe ogoni bialu ka layago hale howa Yuda wali agalinaga miniha mogo timbuni lalu gi ho hai hene. Wali agali bi tara tara lagane dindi tara taraha bu hearubi mogo lalu gi ho hai hene. <sup>36</sup> Ani howa ai kini ibu Silisia dindiha lone dai biyagola Yuda wali agali Andiogo dindiha haga hearubi Girigi wali agali hearubi tigua mana lehe ko Andoronigusu ibugua Oniasahondo bialu ibu homelo bameore bo wayagonaga keba timbuni halu ti Oniasa dara ho kema lalu lamini.

<sup>37</sup> Andiogusu ibuguabi nde Oniasa dara timbuniore halu de iba ibu deha howa pugu lalu hene. Oniasahanda ibuni nahome heangi biabe bayalebi mana bayalebi bialu haga wiaru mitangi biai hene. <sup>38</sup> Ani howa Kini Andiogusu ibunaga miniha keba timbuni halu ibuni hunguale dalu heagola ibugua Andoronigusunaga mini daliga mini lene heago bope halu dinini daliga heago mo wahai hene. Ibugua Andoronigusunaga aga karulo haga karulo heago golo wahai howa tanoha wali agali bu hearume de handai helo haru ibaga biai hene. Ani bialu tigua haru puwa Andoronigusuhanda bi henene letingi howa Oniasa mo hondo howa bayagoria ibalu tigua Andoronigusu homelo bo wahene. Anidagua bialu Ngode Datagaliwabehanda Andoronigusu mana ko biyagonaga pani nelu anidagua mo mini.

### *Lisimagusu homenego ogo*

<sup>39</sup> Lisimagusuhanda ibu hamene Menelausunaga bi hale halu ibugua Anduane Homogonaga andaha biabe biaga gabo be bayale ngolome wabini wiaru mo kayu yaga bini. Ainde ibugua gabo ngolome wabini uruni ani mo page yai halu ka layago hale howa wali agali tigua Lisimagusu heagoria mo mogobu howa keba halu hene. <sup>40</sup> Tigua keba timbuni howa wai bule manda bu hene. Ani bule heagola Lisimagusuhanda ibunaga ami agali daosini tebira (3,000) wali agali baba wai bule ibidaba lalu olene. Ami agali uruni haru bamba haga agali waheale mbira ibu mini Auranusu hene. Agali Auranusu ogoni ibunaga mana ko ngubiore biaga hene. <sup>41</sup> Ami agali ibiyagola Lisimagusuhanda ibidaba lene ibiyada lowa Yuda wali agali ti manda biai hene. Ani manda buwa wali agali tigua ege tolebi namabi ira puna be abalurubi dugualu Lisimagusu halu ami agali uruni heagoha bape lalu uruni mo luluya hai hene. <sup>42</sup> Anidagua biyagola ami agali biaruru mo ko hai howa mo luluya hai hayagola dewa homai haya handala dewa ibida piai hene. Ani bialu Lisimagusu ibuni Anduane Homogonaga andanaga hobane muni anda heago kawareni balu bo homa hene.

### *Menelausu ibu godi hale haga heago munime yolo binigo ogo*

<sup>43</sup> Lisimagusuhanda mana ko bialu hayagonaga wali agalime Menelausu manani howa mo tale bini. <sup>44</sup> Ai kini ibu Taia tanoha ibu heagola Yarusalemenaga ganisolo hearume agali tebiralu dabalul Menelausuhanda ko biya lalu kini lamule pudaba lene. <sup>45</sup> Ani layagola Menelausu ibugua godi deni mo beregedalu bulene mbira nawioreyane hendene. Ani hondowa ainde ibugua Dorimenese igini Tolemi ibugua kininaga mini mo beregedalu ibu yupe hayagua nde ibugua muni dewaore mule manda bini. <sup>46</sup> Ani manda biyagola ai Tolemihanda kini ibu tamuha godi hale halu berenego ai tagira emeneore halo hole tagira ibu lalu lamini. Ani tagira ibiyagola kini ibunaga mini beregedo ka lo manda buwa Tolemihanda kini bime baya hangula debodebo bialu hene. <sup>47</sup> Ai agali mana ko biaga uruninaga anduane teneore Menelausunaga godi hale hai hene. Ani hale hai howa kini ibugua lalu agali tebiralu Menelausu godini haru piaga biaruru tini homelo bo wahadaba lene. Ani layadagoni mana ko nakarulapeore Sidia wali agali tigua binigo emene nira dege lowa ko timbuniore bini. <sup>48</sup> Tigua agali tigabi tebiralu tiha ko bini mbira nawiore howa tigua bi tigabiore lalu Yarusaleme biamogo bialubi wali agali biamogo bialubi Anduane Homogo andanaga gabo be ngolome wabini biarubi uruni biamogo bialu bi layago bameore homelo bo wahai hene. <sup>49</sup> Taia wali agali tigua mbirale urunidagua biyago de hondowa ti mogolo hai hene. Ani buwa tigua agali tebiralu uruninaga tingini ti daluha agali haguane heneru hora hagadagua mo hora hene. <sup>50</sup> Agali haguane bu hearu ti muni hangula garali bialu taya biaga heagome ai Menelausu ibu ibuninaga biabe bialu haga wiago bialu hene. Ani bialu heagola ibunaga mana ko wiago pu timbuore hene. Ani bialu wali agali ibuni damene bu hearunaga waitigi timbuni ho bamba hene ibuniore hene.

## **Andiogusu Ebipanesehanda Yuda wali agali Ngode Datagaliwabenaga bi mana talialu haga hearu pani nelu mialu hene**

*(Be 5-17)*

### 5

*Yarusaleme agali hearume emaga de hendene go*

<sup>1</sup> Ogoningi dege Andiogusu ibugua Iyibi baba wai lone bialu hene. <sup>2</sup> Yarusalemeha wali agali bu hearu tigua manane tara mbira harini hearia handa walia howa horo pira mariani (40) hondo haabo hene. Tigua hondo hearia ami agali dewaore nogo hosini biralu gerai lalu puibu bialu hearia de hendene. Ami agali maru nde danda timu yandareru wai biagane ayu tiburubi yu hearia de hendene. <sup>3</sup> Ami agali nogo hosini biruwa wai biaga hearume wai pora bule manda manda buwa ona tidiyu haga haga bini. Ani heagola ami agali maru geni pialu wai biaga hearu tigua lene labo laboha tidiyu haga haga bini. Ani howa wai bialu hene. Wai bialu howa wai biagane ayu tibubi yandare wai humbirume kilingele tilitola lalu wai timbuni uru ba hagahaga bini. Hona ni do wiagoria ami agalinaga wai yári taraore de mborerebi hene. <sup>4</sup> Ani biyagola wali agali tanoha bu hearume Anduane Homogohondo bi lalu mbirale manane ogoni heneneore mbirale bayale mbira mani tagira ibilonaga bi lalu hene.

*Yasonohanda Yarusalemeni wai binigo go*

<sup>5</sup> Bi dibudibu mbira lama ibiyagome lalu, Kini Andiogusu homaya lene hale hene. Ani biya handala Yasono ibugua ami agali daosini mbira (1,000) haru halu puwa Yarusalemeni wai bini. Wai bialu Yasono haluibunaga ami agali biarume Yarusaleme agali maru wai pabe neneni mamage haga hearu bo taliatogo lalu tano ti karulai hene. Ani biyagola Menelausu ibu ibida pialu tanoha ami agalinaga wai pabeanda hongohe heagoha ha do hene. <sup>6</sup> Ani biyagola Yasono haluibunaga agali biarume tano bibahendeha pugu pugu bialu tini aria bu hearu homelo bo wahi hene. Ainde Yasono ibugua wali agali ibuni dameneore bu karu homelo bo wahi haruyagua nde maniibunaga hongo pirilape halu ibira holobada lo manda nabi ibu mini tigabi nawiore hene. Ibu dameneore bu hearu waitigi handaradagua bini. <sup>7</sup> Anigo Yasono ibugua gabumane haru holenenaga hongo nawi hene. Ani howa ibugua mana lehe ogonidagua bialu henedagome ibuniha taga mo yu anda ibiyagola ibuni hado hole Amono dindiha puwa hado hene. <sup>8</sup> Ani pu heagola mani howa Arebia dindinaga agali haguane mini Aredasahanda garabaya andaha helowa mini bayagola mo ko hene kuduguhe hene. Ani howa mani ibu ibida pialu tano wiaruha hadoho haga hene. Ani howa ibugua mana pugualu hearia wali agali tano uruniha hearume ibu baba keba howa bo talima ibaga bialu hene. Ibugua mana ko bialu wali agali ibuni dameneore hearubi ibu baba dindi mandagi haga hearubi ta nabi bo hilo wahi haga hayago manda bialu tigua ibuhondo turu nahe hene. Ani biyagola mani ibu Iyibi dindiha ibida pialu hado hene. <sup>9</sup> Ani halu mani Yasono ibu Iyibi wahu iba sibini biralu Sabarada tano pole pene. Ibugua lo mitangi bialu Sabarada wali agali Yuda nenege kagome ibu dara halu baya hangu haru howa handaya ho holobabe toba howa pene. Anigo ibuni dindi kaundia ogoniha heaore dege homene. Agali ogoni ibugua ogonidagua bialu wali agali ibuni daluha ibu damene bu hearu bo talia hole bialu ibunibi agali mini nawi ko mbirago homaradagua bini. <sup>10</sup> Yasonohanda wali agali dewaore homelo bo wahi heneru mo hora habe naheore tingini bame dindini wialu wu togo biai helene. Ani binigonaga mani ibuni pani nolene wiago nene. Ibu homayagola dara holene mbira nahene. Iibunaga homali bulene mbira naheore wialu ibu mamalirunaga homaliha mandagi hora hole mo yu dai bulenebi mbira nahene.

### *Andiogusuhanda Yarusalemeha wai binigo ogo*

<sup>11</sup> Mbirale uruni biya layago te Andiogusu ibu hale ho howa ibugua lo manda bialu Yudiaha wali agali bu hearume wai bule heyu kada lo manda bini. Ani manda buwa ibunaga bu miniha tandaga timbuniore ira hungu ale bialu helo hene. Ani keba ho howa ibugua Iyibi wahalu abale puwa wai timbuniore u napalene Yarusalemeni bialu bo podahana halu tano karulene. <sup>12</sup> Ibugua ibunaga ami agaliruhondo lamialu lalu, Wali agali lenego bibahende harigani ngola haramigobi andagaha birado karia handa walia haramigobi bibahende dara nahe homelo bo wahai halimu, lalu lamini. <sup>13</sup> Ani layagola tigua puwa igini emene hearubi agali waheale biru wiarubi wali berearubi waneigini gali andu naga berearubi bibahende homelo bo wahai hene. <sup>14</sup> Horo tebira hanguni Yarusaleme wali agali daosini dege pira halira (80,000) bibahende amo lelene. Daosini dege pira maria (40,000) homelo bo wahai halu daosini pira maria (40,000) mende garabaya haru piai hene.

<sup>15</sup> Anigo Andiogusunaga keba ereba nahe wiaabo dege hene. Ani keba ho haabo howa Anduane Homogohanda dindi bibahende wiaru dege dombene anda ibunagaore loma bia hene helo loma biahe heagoha anda pene. Ani piyagola Menelausu libu haru anda pene. Menelausu ogoni agali Anduane Homogo erembira mialu ibuninaga damene biaru erembira miaga biago libu haru anda pene. <sup>16</sup> Andiogusu ibu Anduane Homogo deni bayale ndo dodohe heago howa ibugua andaga tamuha gabo wiaru gime mo yalu pene. Ani bialu mbirale bayale tara tara kini maru hearume Anduane Homogonaga mini mo yaraga halu bame migi bini ela nahaga loma biahene wiarubi mo ya dege bini. <sup>17</sup> Andiogusu ibugua mine gibiore hene. Ibugua Ngode Datagaliwabehanda Yarusaleme wali agalihondo keba emene tigi mbira hangu haga kago manda nabiore hene. Wali agali tigua mana ko bialu heagonaga Anduane Homogohanda ti mo ko helo Andiogusu ibilalu Andiogusuhanda Anduane Homogonaga anda mo ko helo yupe hene. <sup>18</sup> Ainde Yarusaleme wali agali tigua mana ko nabinidale nde Anduane Homogohanda Andiogusunaga miniha mo talola halu mo luluya ho heledale. Bamba Anduane Homogo ibugua agali mbira mini Heliodorusu heago Anduane Homogonaga andaha muni agua ngabe hondo wule pu lalu Kini Selugusuhanda pelayangibi nde ani dege bini. <sup>19</sup> Ngode Datagaliwabehanda wali agali Anduane Homogonaga anda biamogo bilo dabo helene ndo ibugua wali agali biamogo bialu Anduane Homogonaga anda helene. <sup>20</sup> Ani binigome anda biago wali agali heba mo ko hamaga halu mani lone wali agali heba bayale hadai biamaga halu mini lene hamaga hene. Anduane Homogo Bibahendenaga Hongo Haiheore kago ibugua keba ho kangi ibunaga anda kago mo embeda haga ka. Mani ibunaga keba holene ereba harangi ibunaga anda kago lone mo bayale haga ka.

### *Waitigime Yarusalemeha wai lone binigo ogo*

<sup>21</sup> Andiogusuhanda muni siliba daosini pira waragaria (60,000) Anduane Homogonaga andaha wiago mo pagebu yalu abale Andioho tano dai bini. Ibu lulu taraore mbirago howa ibugua mitangi bialu iba sibi bame iba mu ngatoria pialu ami agali iba solowarani gehalu polebira lo manda biniya. <sup>22</sup> Ibugua kiabe agali maru Yuda wali agali tandaga mo mialu helo dabo helene. Ibugua agali mbira Pirigiali mini Pilibi heago Yarusaleme kiabe helo dabo helene. Agali Pilibi ogoni ibu minehe koore howa mana ko ibugua biagago Andiogusuhanda biaga wiago bolanguahe hene. <sup>23</sup> Kini Andiogusuhanda agali mbira mini Andoronigusu heago hari bare Gerisimi heagoha kiabe helo dabo helene.\* Ani bialu agali mbirabi daba dege binigo mini Menelausu.

\* **5:23:** Hari Gerisimi ogoni Segeme tano kaware dege ngelowa Samaria dindiha wini. Samaria wali agalinaga lotu anda timbuni hari ogoriani hene. Te ogoninaga 2 Magabi 6.2 ngago hondolene nga. Samaria wali mbirame bi lenego Yone 4.20 ngagobi hari ogoni dege lalu leda.

Agali ogoni ibugua wali agali ibuni damene bu hearu genda timbuniore kiabe agali kira biago labome miyago emene dege lowa mo mialu haga hene.

Andiogusuhanda Yuda wali agalihondo keba timbuni halu howa <sup>24</sup> ibugua agali mbira mini Aboloniusu ibu Misia dindinaga ami agali haru haga haguane heago ibunaga ami agali daosini dege pira kirani kira (22,000) hearu haru halu Yarusaleme pelene. Pelalu howa Andiogusuhanda tihondo lamialu lalu, Agali damenego bibahende bo hilo wahai halu wali waneigini minalu garabaya haru hai halimu, lene. <sup>25</sup> Ani laya handala Aboloniusu ibu pialu Yarusalemeni anda pu howa ibugua ko mbira nabi bayale hole tingi ho hene. Ani howa Sabada horongi hayagola Yuda wali agali biabe nabi bame halo bereagola ibugua ami agali hearuhondo lamialu ibu de hondoliya tano tagirahayagi ho dugubu hole pudaba lene. <sup>26</sup> Ani howa wali agali ami agali biaru ti ho dugu buwa tidi yu ibaga bialu heago hondole tagira ibiyaru homelo bo wahai hene. Ani bialu mani ami agali biarume tanoha anda puwa wali agali dewaore homelo bo wahai hene.

<sup>27</sup> Anigo agali mbira hangu mini Yudasa Magabeusu henego ogoni dege agali diriali heba pora bialu ibida dindi ko wali agali nahaga wiagoha pene. Ti pialu hari bare ko wiagoha howa tomo ega tiarume nalu biraga wiaru nalu hene. Ti tomo irabuha minana ira yuni lini tara tara wiaru nalu hene. Tomo tanoha wini ngaru naramagola Yuda wali agalinaga mana lo wini ngaru mbirago pugualino ani hene.

## 6

*Yuda wali agali Anduane Homogohondo mini mbiraorewi hearu waitigime homelo bo wahai halu henego ogo*

<sup>1</sup> Tigi mbira dege howa mani kini ibugua Adene tanoha agali haguane mbira heagome Yuda wali agali tinaga mamali mana ngago wahai helonaga genda lone dege mo mule pelo dabalul pelene. Kini ibunaga hameme Yuda wali agali tigua Ngode Datagaliwabenaga mana ngago talialu nahelo hame lene. <sup>2</sup> Ani lowa kini ibugua agali ogonihondo lamialu, Yarusalemeni Anduane Homogonaga anda kago mo dodohe helalu Hari Olimbusunaga dama mitangi bialu bi pupu wiaga mini Susu anda ogoniha mo aribia ho wibe, lene. Ani laya handala puwa ibugua wali agali ogoniha hearunaga mana wiaru talialu Hari Gerisimini Susuhondo bi pupu wiaga anda heago mini, Anda ogoni Susunaga. Susu ibu tarali tagiraha howa ibu hene karunaga nenege kagoni, laga hene.

<sup>3</sup> Kini ibugua mana urunidagua bialu Yuda wali agali genda timbuni mo mialu hene. <sup>4</sup> Anidagua bialu howa wali agali tara tara ta nabi Anduane Homogonaga andaha anda ibai howa tigua lulu iba no howa mana ko tagabi ngaru bialu haga hene. Tigua anidagua bialu howa bayanda wali bedaru baba Anduane Homogonaga anda ibuninaga pabe bu yaanda henehayagi kayu yu paligi biaga hene.\* <sup>5</sup> Anidagua bialu howa dege mbirale maname Anduane Homogonaga andaha yu anda polene nawi lo wini wiaru anda biagonaga pabe tamuhayagi mo yu anda pialu tigua mbirale Anduane Homogo deni dodohe uruni lomabu delaga dabu heagoria mo lomabu ngelaga bialu haga hene.

*Wali agali tara ibu hene hearume mana lo wini ogoriani wiaru mo wahai henego ogo*

<sup>6</sup> Kini ibugua Yudanaga Sabada horongi lotu laga mana wiago mo wahalu horo timbuni tara tara lotu lolene tara tara biagaru mo wahai halu bini. Ani bialu Yuda wali agali tinibi Yuda wali agali nalalimu lalu bini. <sup>7</sup> Ani bialu Yuda wali agali tigua kini aiyahanda ibu taba henene horo timbuni tagira ibirangi nogo tara tara wali agali tara uruni tigua loma bo delararunaga tini garini Yuda wali agalime nolene nga lalu bini.

\* **6:4:** Wali agali Ngode Datagaliwabehondo mini mbiraore nawiaga karu tinaga mana ngagome lulu iba nowa lulu yuleneru wali agali kayu buleneru tinaga dama mitangi bialu bi pupu wiaga ngagonaga mana ogonidagua biaga hene.



Ani lowa waini ibanaga horo timbuni mbira tinaga dama mitangi bialu bi pupu wiaga mini Dionisusunaga horo lagago ogoni tagira ibirangi Yuda wali agali bibahende ho dugu bu mandagi howa ira yunime tinaga haguani yári bialu harigani ibagabu holene nga lene. <sup>8</sup> Ani bialu Girigi wali agali tano kaware wiaruha bu hearu tiguabi ani dege bulene nga lalu Kini Tolemi ibugua mana wabu wini. Ani bialu nogo tara tara loma bo delaga birarunaga maru Yuda wali agalime nalimu lalu mana hongohe lo wini. <sup>9</sup> Ai Yuda wali agali Giriginaga mana ogoni mo wahaga karu homelo bo wahalimu lo wini. Ai mo ko holene wia panaho ngagoni lalu panaga hendene wini. <sup>10</sup> Ai ogoninaga bi manane mbira mo walia halu laro. Tigua wali kira libu igininaga dongone poda mabu bulene mana biaria hondowa ogoni labo godini ibu helene. Tigua wali ogoni labo iginidago labo libuninaga anduni yaparaho yalu tanoha wali agali handai helo ibaga bu helene. Ani bialu mani tigua wali biago labo tanonaga wai pabe heagoria manogo bia howa mani hadope halu dindiha ibira halu homo tungulo mini. <sup>11</sup> Manane mende Sabada horongi Yuda wali agali ti Yarusaleme be tagiraha egeanda wiagoha lotu lole ngoai ho berene. Ani berearia handa walia halu tigua wali agali uruni Pilibi hearia minu yalu piyagola ibugua irani bo heda hene. Yuda wali agali uruni tigua Sabada horo ogoniore mitangi halu tigua wai biadai nabi wahene. Ani biyagome tini homene. <sup>\*</sup>

*Ngode Datagaliwabehanda Yuda wali agaliha mo ko holene ibilenego irane ogo*

<sup>12</sup> Wali agali mbuga ogo daga laregome mo ko holene mbirale ibilaga binidaru hondowa miniha genda holemini nahalimu. Ngode Datagaliwabehanda ina mo ko haiore halu bo amo lole binida lo manda bulumini nabilimu. Ibugua ina mo tiga bule dege manda buwa bini nga. <sup>13</sup> Ina Yuda wali agalime mana ko bialu hemago mo tiga bulenaga Ngode Datagaliwabe ibunaga dara holene irane nawini dara haga ngago mo walia holenaga mana ogonibe biaga ka. Ibugua lu hondo nahe abaleore mo tiga bule anidagua biaga. <sup>14</sup> Anigo wali agali tara tara bu karu tiha dege tinaga ko dewaore ngagola pani timbuni mialu bo waholenaga ko dewaore ngelo Ngode Datagaliwabe ibu hondo haga ka. Ai Ngode Datagaliwabe ibugua inahondo anidagua nabiaga ka. <sup>15</sup> Ibugua inanaga ko dewa nawi wene emene ngelo kemangi abale mo tiga biaga ka. <sup>16</sup> Ngode Datagaliwabehanda ina dara haabo haga ka. Heneneore genda tara tara ngarume inaha genda mo ibilalu mo genda ha hagago ainde ogonidagua bialu ina embeda nahaga kago ndobe. <sup>17</sup> Tigua ibu embeda nahalimulonaga ina tí bi mana ogo lawai harugo ai te lala harugo aria lone lo gililo merogoni.

*Waitigime Eleasa bo wahenego ogo*

<sup>18</sup> Agali wahealeore mbira mini Eleasa henego ibu mana lo winigo lawai haga agali haguane heagola wali agali bibahendeme ibu gubalini hai haga hene. Ani henego horo mbirungi ami agali bu hearume Eleasanaga ne hariga minu toala edene buwa nogo mbirini neha mo nahene. <sup>\*</sup> <sup>19</sup> Ani biyagola Eleasahanda nogo mbirini biago hayatagi halu ibuni hameme ami agali biarume ibu tibume badaba lene. Ibugua lo mitangi bialu bi mana lo wini ngago pugualu dindi ogoria emene tigimandi dege howa ibuha taga holigo manda buwa ibugua Ngode Datagaliwabehanda bi mana lo wini ngago baya hangu talialu holene karulapeda lo manda bini. <sup>20</sup> Ibugua mana ogonidagua biyagome wali agali bibahende waitigime bo waholene wiaguabi harugo lowa mbirale maname nolene nawi ledago nolene nawiore lalu mo walia hene. <sup>21</sup> Lomabu mini tomo ngago handaya ho haga agali bu hearu ti Eleasanaga nenege bayaleore bu hene. Tigua ohowa ibuhondo nogo mbirini ibuni nagane alego nole yalu ibuwa nabe lalu miaga hene. Ani nalu bedago kini ibu de hondowa lomabu mini biaru aria narabe toba helo anidagua bibe lalu lamini. <sup>22</sup> Tigua lalu, Anidagua biriyagua ibu homolene nawulebira, lalu

<sup>\*</sup> 6:10: 1 Mag 1.60-61    <sup>\*</sup> 6:11: 1 Mag 2.32-38    <sup>\*</sup> 6:18: LBM 11.7-8, Hi 11.35

lamini. Ainde agali uruni ti ibunaga nenege howa tigua ibu homelo hame nale howa ibu biamogo bialu bi ani lene.

<sup>23</sup> Ani layagola Eleasa ibugua lo mitangi bialu, I agali wahealeore daguahe kogoni ndobe. Ainde i wali agali bu karu dombeneha agali mini lene mbira kogonidago, lo manda bini. Horo bibahendengi ibugua igiri emeneni howa bayale dege hama ibaabo halu Anduane Homogonaga bi mana baya hangu talima ibalu haabo haga hene. Ani henego manda bialu ibunaga mini hongo howa manda bialu lalu, Wahalu i homeneru dalu humbirini andaha paliya pelolene karulape. <sup>24</sup> I agali waheore kogonidago ayu ina ohowa mana tara tara urunidagua bialu haruyagua nde wandari igiri daliahe bu karume de hondowa tigua lo manda bialu, Agali Eleasa ogoni ibu agali waheore howa ibunaga mali pira dira (90) bibahende hene kago howa ainde ibugua lotu mana wali agali tara tara bu karunaga ngago talialu kagonida, lolobada. <sup>25</sup> Ainde ininaga holene emene tigi mbira hangu ngagonaga hame lowa nogo mbirini ogoni nalu bere tingi howa ohowa tara nalu biraruyagua nde wandari igiri daliahe bu karu mohondo halu hariga koha pelo mo poa halu ininaga mini bayale mini lene ngago mo ko halu iniha taga holene mo yu anda ibuleberoda. <sup>26</sup> Ai agali uruninaga bi ko ladai biraru mobagi hai holiya. Anigo i haruyaguabi homaruyaguabi Anduane Homogo bibahendenaga Hongo Haiheore kagonaga bu miniha tandaga holene ngago ngelalu ina balalu pubagi naholeberoda. <sup>27</sup> Ainde ina hongo ho howa homaruyagua ogonime i dindini mali dewaore harugonaga kai lalu homolebero. <sup>28</sup> Ani bialubi nde wandari igiri daliahe bu karunaga bu miniha mo hongo halu Ngode Datagaliwabenaga bi mana ngago baya hangu turu howa yu halu homelonaga ina mo walia holebero, lene.

Ani laya handala ami agali biaru tigua Eleasa minu yalu puwa tibume mo ko howaore bo pailatangi bini. <sup>29</sup> Ami agali abale Eleasa biamogo biaga hayaru beregedalu lone ibu baba waitigi hene. Eleasa ibugua biyago agali mini wime ndo lulume lagadagua layagonaga tigua ibula waitigi hene. <sup>30</sup> Ani howa tigua ibu tibume lone dege balu haabo hayagola homabehe wini. Ani wuwa mani ibugua bi latagi halu lalu, Ngode Datagaliwabe bibahende manda biaihe kago ibugua tandaga timbuniore ayu narogoni ibu manda bida. Genda tandaga ayu iha ibiragoni hogorale bialu polene karulape kogo ibu manda bida. Anigo ina ibuni kago gi halu ibu andaneha haabo haga kogome genda ogoni ina yule kogo ibu hondowa manda bu ka, lalu Eleasahanda lene.

<sup>31</sup> Anidagua dege Eleasa ibu ani homene. Ibugua homenegome maru hearuhondo manane bayale mbira mo walia hene. Wandari igiri daliahe bu hearubi wali agali ibu daluha bu hearu bibahendebi tigua ibunaga mini bayale ogonihondo turu timbuni halu ibu mitangi ho haabo haga wini.

## 7

### *Wali mbira ibu igini karia heba homenego ogo*

<sup>1</sup> Horo mbirangi igiri karia hamenema heba ti aiya minu garabaya helene. Kini ibugua ti nogo nolene nga lowa nogo nelonaga tibumebi gewa tibumebi mo ko howa bo dambini.\* <sup>2</sup> Hamene kariama uruni mbirago ibugua tinaga bi lahaga howa lalu, Kini ina inahondo bi hale harego damene bibahende mbiraore hangubi mbira gi nahe ladai biai holeberema. I ina bo wahai holene manda bu heaguabi iname gi nahe elaheore howa ina mamalinaga mana lo wini ngago napuguleberema ndobe, lene.

<sup>3</sup> Kini ibu bi ogoni hale howa ibu keba timbuni howa ibunaga biabe biaga hearuhondo parabane timbuni wiago do kundi yakundi bilo ira timbuni delalu todobene be timbuni wiagobi dalu do kundiore bilo ira bo deladaba lalu lamini Kini ibugua bidaba layago hale halu agali biabe biaga hearume abale ira delai hene. <sup>4</sup> Tigua ira delo manda manda biai heagola kini ibugua agali biabe biaga hearuhondo lalu, Igiri kane bi laga

\* 7:1: Hi 11.35-36

biagonaga hége gandulalu embonenaga dongone bibahende lagalo wahai halu gi gebi minu gandulo wahai halu bidaba, lalu bini. Anidagua biyagola ibu hamene hearubi ibu aiyabi handaya ho hene. <sup>5</sup> Anidagua bialu ibunaga tingini podabaga biyago bilowa ibu buhe emene wiaabo hene. Ani wiagola kini ibugua agali biabe biaga hearuhondo lamialu, Igini ogoninaga tingini parabane timbuni do kundibu wiagoria mo deladaba, lene. Ani mo delayagola tingini biaga dalu do hagua bialu heagola ibu aiya hamene biaru tigua tininaga miniha gi nahe elahe howa homolenaga mini mo hongo haga bialu hene. <sup>6</sup> Tigua lalu, Inanaga Anduane Homogo Ngode Datagaliwabe ibunime ina ayu ogoni de handaya ho kago. Ani howa ibugua ina dara holebira, lene. Bi ogoni bamba Mosesehanda lo wini ngago heneneore tagira pelonaga bi layago ogo, Ngode Datagaliwabehanda wali agali ibunaga biabe bialu haga karu dara holebira, lalu lo winigo ngola haya.✧

<sup>7</sup> Hamene karia biaru hamene wahene biago homayagola ai mendegobi o biadagua dege bialu homelo bene. Tigua ibunaga haguane dongone poda lagalo wahalu nogo mbirini podo wiagoria lowa nanayagua tigua ibunaga tingini balu bo podahole buleberema lene.

<sup>8</sup> Ani layagola ibugua ibuninaga bi laga wiago lowa hongo howa ladaga halu lalu, I nogo mbirini ogoni nolene nawigo nanoleore laro, lene. Ani lalu ibubi nde tandaga timbuniore ibu hamene wahene biagome nayago dege nalu homene. <sup>9</sup> Ai ibu homoleore howa ibugua bi hongo howa lalu, Íore dama Heyolabe igini kegome inanaga dindini emene holene ngago ina bameore mo tubagi haregonida. Anigo dindi ogonaga Kini Ngode Datagaliwabe ibunime inanaga haabobo holene wia kago lone mo ngulebira. Ina homaramago irane iname ibunaga bi mana lo wini ngago pugua nabulenaga homarama, lene.

<sup>10</sup> Ani bialu ti hamene tebonego bene. Bole howa tigua igiri ogoni nogo mbirini wiago nelu mini. Ani miyagola ibugua nogo ogoni mo wahalu ibunaga hége dolatagi halu gi geru gandulo wahelo dogo ba amu hene. Ibugua gi nahe elahe howa ani bini. <sup>11</sup> Ani howa ibugua tihondo lalu, Inaga tingini ogoni Ngode Datagaliwabeha howa minigo ainde ibunaga bi mana inaga tingini ale ndo daligaore nga. Ani bialu Ngode Datagaliwabe ibunime inaga tingini ogoni lone ngiadai bulebira lo manda bido, lene. <sup>12</sup> Ani layagola kini halu ibunaga agali bu hearume handalu hearia igiri dalihae biagome homolene gi naheore howa ibunaga tingini embeda ho heago hondowa ti mogolo hene.

<sup>13</sup> Hamene tebone biago homayagola manego ibubi nde tandaga mbiraoregobi dege nene. <sup>14</sup> Ai ibu homole howa ibugua kini lamialu lalu, Wahalu ibi homoliya badaba. Anigo mani Ngode Datagaliwabehanda i lone mo heya howa inaga holene lone ngiadai bulebira. Anigo kini ihondo larogo. Íore lone mo heya naholebiraore ndobe, lene.

<sup>15</sup> Ai tigua igiri daunigo haru ibuwa ibu mo tandaga halu hene. <sup>16</sup> Ani bialu heagola ibugua kini de handaya howa lalu, Ayu wali agalihondo mbirale inime bua biragoale bialu kego mani inibi homa dege bulebere ndobe. Ngode Datagaliwabehanda ibunaga wali agali ina bu kemaru yu wahayada lo manda buleni nabibe. <sup>17</sup> Ai Ngode Datagaliwabe ibunime í pani nabelo mo ngialu ini waneigini aguane holebirarubi pani nalu haabo holebira, lene.

<sup>18</sup> Tigua igiri daunigo beagola igiri waraganego haru halu ibini. Ibuwa homole howa ibugua lalu, Ina minime ini mo hondo helo holeni nahabe. Inanenaga ko bini ngagome ina pani nalu kemago. Iname Ngode Datagaliwabehondo mana ko birimagome mo ko halu tandaga nolene tara tara inaha anda ibira. <sup>19</sup> Anigo ina Ngode Datagaliwabehanda tandaga holene ngagoria howa yo pialu pubagi holobada lo manda buleni nabibe. Yo pialu napolebereore ndobe, lene.

<sup>20</sup> Ainde iname wali bayale igiri uruni aiya bedago embeda nahamiyago irane ibunaga mana baya taraore ibu igini uruni bolanguahe berene. Ibu heyu howa deme hondo heaore dege ibu igini karia biaruni horo mbira ogoingi dege homai hayago hendene. Ibugua bu miniha hongoho howa ibugua tandaga uruni yai henego irane ibugua Ngode Datagaliwabhondo mini mbiraore hongohe wu heagome hongo ho hene. <sup>21</sup> Ibuninaga bi lalu ibu igini biarunaga bu miniha mo hongo halu hene. Wali ogoni ibugua hongo agalime ho hagagobi howa ibu igini biarunaga bi lowa lalu, <sup>22</sup> Inaga tombeha howa igiri uruni agua taba hanarube tobara. Ina tinaga holene buhe mo wia hene ndo. Tinaga tinginibi ina wabinibi ndo dege. <sup>23</sup> Anduane Homogo ibunime dindi harila wabialu ibugua ina wali agalibi wabini. Dindini karubi ngarubi bibahendenaga tene ibunioire ka. Ainde ibunaga dara holene irane nawini dara haga kagome tinaga buhe lolenebi holenebi lone ngiadai bulebira laro. Ani bulebirago irane ti ayu homaramigoni irane tini hangu bame homa ndo ibunaga bi mana ngago napugule lowa hongo ho kemigome homaramigonaga ngulebira, lene.

<sup>24</sup> Ani lalu heagola Kini Andiogusu ibu mitangi bialu wali ogoni ibugua kini ibu mege bialu ibu igini heyogone kago bime la debodebo birabe toba hene. Ani manda buwa ibugua igiri heyogone biagohondo lamialu heneneore laro lowa lalu, Igiri heyogone ogoni ibugua ibunaga mamali mana lo wini ngago wahayagua nde kini ibugua igiri ogonihondo muni dewa mialu ibu mo turu holebero. Ani bialu ibu mini Kininaga Nenege lagago ogoniale helalu ibu gabumane biabe timbuni mo mulebero, lalu bini. <sup>25</sup> Ani layago hale howa igiri heyogone biago ibu mogo nale hene. Ani heago hondowa ibugua igiri aiya biagohondo ibu igininaga mini mo iriari bule bi lamia, lene. <sup>26</sup> Ani lowa kini ibugua wali biagohondo bi laabo halu ibu igini mini mo beregeda layagola ainde wali biagome ibu igini mana lene. <sup>27</sup> Wali biago ibugua kini mo ohowa bi kinihanda ibu igini lamia layago letingi howa ibu igini geha duli hanga ho biruwa lalu, I igini-o inihondo dara habe. Iore ege dira inaga tombeha berelo bialu mali tebirani ina i andu ngialu toba yu bialu buwa baya hangu handaya ho birama ibinigo ayu kebagoni. <sup>28</sup> Ai mbirale deme handa edene buwa handalu keria uruniha karubi ngarubi handa. Ainde mbirale uruni Ngode Datagaliwabe ibunime wabiai howa wali agali dindi bibahendeha bu karubi ibugua wabiai hene ka. <sup>29</sup> Agali i bole kagohondo gi nahabe. I hamene maru biaru tigua i biawai hayago manda bialu tigua biyadagua bule kegoni. Homolenenaga gi nahabe. Mani ti bibahende dengui lone hondole manda bido. Anigo ainde i ti heba mandagi keria dengui lone nahandaruyagua nde i dara timbunioire howa turu ho ndo birulubada, lene.

<sup>30</sup> Aiyahanda bi ogoni lairi heagola igiri biagome abaleore ladai bialu lalu, Ai ti agile malia ho kemibe. I kininaga bi layago hale naholebero ndobe. Bamba Ngode Datagaliwabenaga bi mana Mosesenaga ne harigaha howa hayago hangu talialu holebero. <sup>31</sup> Anigo Kini Andiogusu ina ina Hiburu wali agalihondo mana ko dewaore bialu kegoni. Ai iore Ngode Datagaliwabenaga keba holene ngagoria howa i pora bialu yo pialu napolebere ndobe. Ai ogoni tagira ibilo hondo ha harene. <sup>32</sup> Heneneore iname ko bialu harimagonaga genda dewa yarimago. <sup>33</sup> Ai Ngode Datagaliwabhenda inahondo keba tigimbira hangu haragoni. Ani howa mani ina baba lone miniha dungu lo holebira. <sup>34</sup> Ina mitangi bialu i gibioire kobe toba ho ke. Anigo agali ko timbunioirego i kegoni ndobe. Ani howa ininaga mine hagane mana ko ngegome ini mo hondo heagola ina wali agali Ngode Datagaliwabenaga biabe biaga bu hearu homelo bameore bo wahalu kegoni ndobe. <sup>35</sup> Ani bialu howa nde Ngode Datagaliwabe Bibahende Hongo Haiheore howa mbirale bibahende karubi ngarubi de handai haga kago ibu kagoha hogorale bialu ibida pobe naheore i kegoni. <sup>36</sup> I hamene biaru tigua Ngode Datagaliwabenaga mana baya hangu taluwa bialu halu tinaga holene pelaya. Ti tandaga tigi mbira hanguni nayago ayu ti haabobo bu holene gahenge karulo ka. Ani kago ainde ina Ngode

Datagaliwabehondo mine timbuni harigonaga ibugua ina mana ko biri lalu godini helolebira. <sup>37</sup> Ayu ibi nde Ngode Datagaliwabenaga bi mana i mamaliruha howa lo wini ngago gubalini timbuniore ho hagaore kogome ibi hariga mbiraore i hameneru ti piyagoha pole kogoni ndobe. Ainde inanaga wali agali bu karu dara habe lalu Ngode Datagaliwabehondo bi laro. Ani lalu ibugua pani nolene timbuniore i mo ngirago hondowa inabi nde Ngode Datagaliwabe ibu hangu Ngode Datagaliwabe heneneore ka labelo ibugua i pani ngulebira. <sup>38</sup> Ayu ina Ngode Datagaliwabehondo bi lalu kogome i hamenerubi inibi homaramagome Ngode Datagaliwabenaga keba holene ngago biba habe lalu bi larogoni, lene.

<sup>39</sup> Igiri heyogone ogoninaga bi layagome kini mo tandaga hayagola ibugua igiri daliahe biago mo ko timbuni hayagola ibunaga tandaga daliga timbuniore ibu hamene maru biaru ti tandaga nayarubi ndo nene. <sup>40</sup> Igiri daliahe ogoni ibu homenedagoni irane ibu nogo mbirini maname nolene nawi lo wiago nanoleore layagonaga homene. Ibugua Ngode Datagaliwabe ibuni kawareore haga kago mini mbiraore hongohe wu haga hene.

<sup>41</sup> Ani bialu maniore wali biago ibu igini kariali biaru homai heagola ibuni mani homa maro bini.

<sup>42</sup> Ai Yuda wali agali tigua nogo dama mitangi bialu bi pupu wiago gime wabini ngaru loma bo mini ngagonaga tini garini nanaga hearu tandaga nelu mialu bo wahai haga binigo te ogoni hangu.

## **Yudasa Magabeusuhanda wai bialu wayali hene**

*(Be 8-15)*

### **8**

#### *Yudasa Magabeusuhanda wai binigo ogo*

<sup>1</sup> Ai Yudasa Magabeusu halu ibu aria bu hearu ti pialu dindi maru wiaruha hado hai hene. Tigua tini aria agali bu hearu bibahende olo mogo biai halu Yuda wali agalinaga lotu baya hangu handaya ho haga bu hearubi baya hangu mo mogo bu hai hene. Ani mo ngoai howa daosini dege waragaria bibahende (6,000) mo ngoaiho hene. <sup>2</sup> Ainde agali tara tara hearume ibalu tinaga wali agali mo ko howa haru kagonaga Ngode Datagaliwabehondo ti dara halu biamogo bilonaga bi lalu hene. Ani bialu wali agali tara urunime Anduane Homogonaga anda heago ibunaga deni mo dodohe hayagonagabi mitangi bibe lalu bi lalu hene. <sup>3</sup> Agali ko bu hearume tano mo ko halu bo gialhole bialu heagola Yarusaleme tanoore dara habe lalu tigua Ngode Datagaliwabehondo olalu bi lalu hene. Ani bialu Ngode Datagaliwabehondo agali homayarunaga dugu biyaru hale halu tinaga darama pelayagonaga darama dege peloleneme pani miadai bibe lalu bi lalu hene. <sup>4</sup> Agali ko uruni tigua ko mbira nawi waneigini darabi bu hearu bame bo wahayarubi mitangi bibe lalu tigua bi lene. Ani bialu waitigi hearu tigua Anduane Homogonaga mini mege bialu hayagonaga pani ndo mialu wali agali mine howa mana ko bialu karuni alego pani nelu agua miaga ko lalu mo walia habe lalu tigua ibuhondo bi lalu hene.

<sup>5</sup> Ai Yudasahanda ibunaga ami agali mo mogo bu heagola maru hearu baba ibula karulanape hene. Ani henedago irane Anduane Homogo ibunaga miniha tandaga timbuni ho heago karulape biba hai howa ayu ibunaga Isaraele wali agali dara ho heagome ani hene. <sup>6</sup> Yudasa ibunaga wai biagane mana ogobi hene. Ibugua tano ngaruha abale anda puwa anda bu karu abale bo heda haga hene. <sup>7</sup> Ibugua wai ogonidagua mbiraga bulene hame lo haga hene. Tano hongohe wai pabeanda bayale ngago ibu abale anda puwa karulai halu waitigi bu karu bo taliatogo laga hene.

*Nigano ibugua Yudasala wai binigo ogo*

*(1 Magabi 3.38-41)*



<sup>8</sup> Ai Pilibi ibugua Yudasahanda wai hongo howa bialu haabo heago hondowa ibugua beba mbira gili buwa Koelesiria dindinagabi Ponisia dindinagabi gabumane agali haguane mini Tolemi hearia yalu pu lene. Ibugua Tolemihondo ibu biamogo bialu kininaga gabumane biabe mo hongo holene nga lalu lo pelene. <sup>9</sup> Ani layago hale howa Tolemi ibugua ami agali dewaore dindi tara taraha howa ibu hene bu hearu olo ngoai howa mo mogo bialu daosini dege pira kira (20,000) bibahende haru Padorogolusu igini Nigano ibu Kininaga Nenege Dunini laga hearu aria henego ibugua haru lalu pole ibabe lene. Tigua wali agali Yudiaha bu karu bibahende bo amolo wahai halimu lene. Ibugua agali mende mini Yosiasa heagobi libu haru mandagi pudaba lalu dabo pelene. Yosiasa ogoni ibu wainaga mana manda biaihe pari wayali gibi mbira henego ogoni pudaba lene. <sup>10</sup> Nigano ibu kinihanda muni siliba daosini dege pira waragariani duria (65,000) Lomo dagisi mulebere layago hole howa ibu Yuda wali agali garabaya hearu garabaya biabe ale bia lalu haga helo pelalu muni ogoni ibu tubagi hayago mulene hame lene.

<sup>11</sup> Ani howa ibugua tano iba solowara bereago ange ange wima peagoha wali agali bu hearuhondo beba gilibu pelaga buwa lalu, Tigua Yuda wali agali garabaya karu maru tinaga garabaya biabe ale bialu helo yolo buleyagua nde ibugua wai bialu bope holeberogo ti maru yolo bilimulo, lalu lo pelene. Ibugua tihondo lo wia lalu, Hene-neore larogo. Tigua garabaya agali tebira siliba muni genda magi kilogarama mbiraore hangume yolo buleberemi, lene. Ibugua anidagua la layago ai Ngode Datagaliwabe Bibahende Hongo Haiheore kagome ibugua mana ko dewaore bialu hayagonaga pani nelu mule kago manda nabi howa lalu hene.

*Niganonaga miniha o heago Yudasa ibugua handa walia henego ogo  
(1 Magabi 3.42-54)*

<sup>12</sup> Yudasa ibugua Nigano lalu ibunaga ami agaliru wai kaware anda ibira laya hale howa ibu damene bu hearuha bi abale purogo lelene. <sup>13</sup> Ani hale howa agali maru gihe hearubi maru Ngode Datagaliwabehondo mini mbiraore nawiaga hearubi bibahende ibida piai hene. <sup>14</sup> Anigo agali maru elahe hadai biyaru tigua agalime tinaga mbirale wiaru munime yolo biyaru bilo hondo hene. Ani howa tigua Anduane Homogohondo bi lalu Yuda maru bamba wai nabi howa Nigano ibugua garabaya biabe ale biago helonaga muni taguigi binigo lone haru dai bilonaga bi hongo howa lalu hene. <sup>15</sup> Tigua Anduane Homogohondo bi lalu, Ainde ibugua mana bayale tigua bialu kago mitangi nabuleyagua nde habo nalolene bi bamba tinaga mamaliru baba lo wini ngago mitangi bibe, lalu bi lalu hene. Ibunime Isaraele wali agali ibunaga wali agaliore helo dabo helenege manda bialu ani bibe lowa bi lalu hene. <sup>16</sup> Ani bialu Yudasahanda ibunaga ami agali daosini waragaria (6,000) hearu mo mogo bu helene. Ani helowa ibugua tinaga miniha mo hongo lalu, Agali Ngode Datagaliwabe kago manda nabiaga bu karume ti baba wai bule dewaore tidi yu ibalu bame wai dege bule ibirago de hondowa gi nahalimu, lalu lamiai hene. Wai hongo howa biadai bilimu, lalu lamini. <sup>17</sup> Agali tara Anduane Homogo mitangi nahaga urunime ibunaga anda kago mebia lalu mo dodohe heledago mitangi buwa halimu. Waitigi tigua genda dewa ina mamali heneruhondo mo mialu hene ngarubi manda bilimu. <sup>18</sup> Ani lowa Yudasahanda tihondo lamialu lalu, Waitigi agali tigua wai biaga danda timu yandare humbi yidaru mo dunubia howa uruniha hana lalu wai bulene mana manda bu kago mo galone haga ka ndobe. Anigo iname Ngode Datagaliwabe ibu Bibahende Hongo Haiheore kagohondo mini mbiraore wiaga kema. Ai Anduane Homogo ibugua waitigi uruni ayu ogoni ina baba wai bule wene harigani ibalu kaore bo wahai hoa biyagua nde bo wahai lalu waitigi dindi bibahendeha bu karu bibahendeore bo wahai hoa biyagua nde bo wahai dege holebira, lene.

<sup>19</sup> Ani bialu Anduane Homogohanda tinaga mamaliru biamogo bini wiaru te lalu hene. Ai agali mini Senageribi heangi Ngode Datagaliwabehanda waitigi daosini dege

pira halirani duria (85,000) bibahende bo wahai hene. <sup>20</sup> Ai ti Babilononi heangi howa Yuda agali daosini halira (8,000) halu Masedonia agali daosini maria (4,000) hangu howa tigua Galesia bope halu dabu dabu bayale tara tara wiaru ti mo yai hene. Horo ogoningi Galesiame Masedonia baba wai bule tano wiago ho hagira bini. Ani bialu hearia Yuda ami agali daosini halira (8,000) uruni tigua ibalu wai biyagola Ngode Datagaliwabehanda ti biamogo biyagola tigua Galesia ami agali daosini dege handari mbirani pira kira (120,000) bibahende bo wahai hene.

*Yudasahanda Nigano bope henego ogo*  
(1 Magabi 3.55-4.27)

<sup>21</sup> Bi Yudasahanda layagome ami agali biarunaga miniha mo hongo hayagola tigua hongo ho howa tinaga lotu mananagabi tinaga dindinagabi wai bia halu homole manda manda bu hai hene. Ani heagola Yudasa ibugua ami agali biaru mahalumu talebu helowa <sup>22</sup> ibu hamene Saimonohanda ami agali halu mbira heago haru halu Yosebehanda halu mende heago haru halu Saimono Yonadanahanda halu tebone heago haru halu buwa ti mbira mbirame daosini mbirani handari duria (1,500) dege dege haru haga haga bini. <sup>23</sup> Ani howa Yudasahanda Eleasahondo, Bi mbira Ngode Datagaliwabenaga mbugaha gilibu wini wiago heyu howa hongo howa ladaga halu dagala, lene. Eleasahanda mbugahabi ogoni daga lai heagola Yudasahanda lalu, Ngode Datagaliwabe inime ina biamogo bibe, lene. Ani lalu wai porabupe halu wai bini. Yudasa ibunime ami agali halu mbira heago haru halu pora bialu Niganola wai bini.✧

<sup>24</sup> Ani bialu heagola Ngode Datagaliwabehanda Yuda ti biamogo biyagola tinaga waitigi agali daosini dira (9,000) bibahende horo ogoningi bo wahai hene. Tigua Niganonaga ami agali dewa biaru balu bo haealatago lalu dibu gombedapaya bialu bama talima piaho wini. <sup>25</sup> Ani bialu agali maru muni yalu Isaraele wali agali garabaya biabe ale bia haga helo munime yolo bule muni yalu ibiyaru Yuda ami agali biaru ti mo yai hene. Ainde tigua waitigi agali biaru luore ha bama talima piaho winigo alendo hayagola <sup>26</sup> yawi Sabada horo ngago manda buwa Sabadani wai bulene nawigo manda bialu ai wahalu dai bule manda bini. <sup>27</sup> Ani buwa tigua waitigi bo wahayarunaga wai biaganeale wahene wiaru mo mogo bu wiai halu dabudabu tara tara henearu taguai halu buwa mani Sabada horonaga lotu lene. Tigua lotu lalu howa Ngode Datagaliwabehanda ti lone dara halu baya hangu handaya ho hayagonaga tigua turu timbuniore howa Anduane Homogonaga mini yaraga halu hene. <sup>28</sup> Sabada horo piai hayagola tigua dabudabu mo yayaruni baya hangu mo tale bigi bialu maru agali tandaga timbuni nalu wiaru mialu maru wali ti agalini homene dalo berearu mialu maru waneigini aba aiyu homene bu hearu talebu mialu bini. Ani bialu maru ami agali tini talebu ta hene. <sup>29</sup> Ani bialu mani lone mo ngoai howa tigua Anduane Homogohondo bi lalu, Wali agali inaga biabe bia haga karu dara halu biamogo bibe, lene.

*Yudasahanda wai bialu Timodila Bagidesela bope henego te ogo*

<sup>30</sup> Yuda ami agali biarume Timodinaga ami agalibi Bagidesenaga ami agali hearubi ti baba wai bialu Yuda ami tigua waitigi daosini dege pira kira (20,000) agima bolangua howa bo wahai hene. Ani bialu tigua wai pabeanda hongohe wai pabe daligaore bu mabubi wiaru bo poda anda hai halu ti karulai hene. Ani karulowa tano uruniha dabudabu bayale wiaru mo yai howa tale bialu maru wali dalo berearu mialu maru wai timu howa tandaga nalu wiaru mialu maru wali agali waheale andaga berearu mialu bini. <sup>31</sup> Ani bialu tigua waitiginaga danda timu yandare wai humbi ayu tiburu wai hamaha mo yayaru baya hangu mo do hai hene. Ani bialu dabudabu maru ibira hene wiaru Yarusaleme yu dai bini. <sup>32</sup> Wai biyagoha Timodinaga ami agali haru haga agali haguane mbira bo wahalu bini. Agali ogoni ibu koore mbira howa ibugua Yuda wali

✧ 8:23: 1 Mag 3.48

agali genda timbuni mo mialu haga henego homene. <sup>33</sup> Ai Yuda ti Yarusaleme dai bu howa tigua waitigi bope hayagonaga turu timbuniore halu howa agali maru te Anduane Homogonaga anda panga heago irame heda haga agali hearu tini irani bo delai hene. Ani bialu agali mbira mini Kalisenese anda tamuha birado hearia handa walia howa ogonibi irani bo delalu bini. Anidagua biyagome ko ibuni bialu hayago karulape pani o nayadagoni.

<sup>34</sup> Anduane Homogohanda Yuda wali agali biamogo biyagola tigua Niganola wai bialu tigua Nigano bope halu ti wayali haya. Nigano ogoni ibu agali koore howa ibugua agali biyinaya biaga daosini mbira (1,000) agima Yuda wali agali garabaya biabe ale biaga helo munime yolo bule muni hanalu ibiyaru haru ibaga henego ogoni bope hene. <sup>35</sup> Yuda agali maru Niganohanda bamba ti mo ko hayaru tigua beregedalu Nigano ibuni mo ko hene. Niganohandaibunaga wai pole karu lagane aga karu learu golo wahalu ibuni hangu ibida pu tara halu agali mbira garabaya biabe bialu haga ibida puwa birado haradagua pialu bira do hene. Ibugua irabuha dege puabo halu Andioogo tano tagira pene. Iibunime biako heariaibunaga ami agali biaru bibahende amo lai hene. <sup>36</sup> Ainde Niganohanda Yarusaleme wali agali minalu muni muwa muni ogoni Lomo gabumane dagisi mule manda buwa ai nde ibugua Yuda baba wai bule pene. Ani pialu hearia ibuni bope hayagome Yuda ti biamogo biaga hongo gibihe mbira ka lalu tigatiga mo walia haya. Ainde Yuda wali agali ti bi mana Ngode Datagaliwabe ibunime minigo yu haabo haga kagome waitigi tara tara padarume ibalu Yuda baba wai bialu bope habe nahe holebira.

## 9

### *Anduane Homogohanda Andioogusu pani nelo minigo ogo (1 Magabi 6.1-7, 2 Magabi 1.11-17)*

<sup>1</sup> Ogoningi dege Andioogusu ibu Pesia dindi wahalu ibunaga ami agali maru hearu haru halu ibida dai bini. <sup>2</sup> Ani dai bialu howa harigani Pesebolisi tano wiagoria anda puwa tano ibu mo wialu tinaga lotu anda heagoha muni dabudabu wiaru mo kayu bule manda bini. Ani manda buwa ibunaga ami agali biarume anda puwa wai bule pialu hearia dindi anduane tanoha hearume wai biadai bialu Andioogusunaga ami agali bo taliatagi hai hene. Ani biya handala Andioogusu taga timbuni howa dindi ogoni wahalu ibida pene. <sup>3</sup> Ani puwa Egebadana tano tagira puwa hale halu hearia Yudame Nigano bope halu Timodinaga ami agali hearubi mo ko howa bo hengeda haya layago hale hene. <sup>4</sup> Te ogoni hale hayagola ibunaga bu miniha ira hungu ale bialu hene. Ani biyagola ai Yudame ibunaga mini lone yaraga halu helo hame lene. Ai wali agali Pesebolisi tanoha hearume ibu bo taliatagi hayangi ibunaga mini mo guya hayagonaga keba howa ani bini. Ai ibunaga nogo hosime garo ale karisi yaga heagohondo lamialu nogo hosi bo daila halu geraiore la lene. Harigani halo ha nabi piaho wialu Yarusaleme anda pobe lene. Ani lowa ibu gibiore tingi howa lalu, Ina Yarusaleme anda pialu tano ogoni Yuda wali agalinaga homali helolebero, lene.

Anigo ibu pialu Ngode Datagaliwabenaga godi lolene ngagoria pu holebira manda nabi howa ani lene.

<sup>5</sup> Anduane Homogo Isaraele wali agalinaga Ngode Datagaliwabe kagome warago ko tara ereba naholene mbira Andioogusuha ibilene. Ibugua mine halu bi uruni lalu heangi dege tandaga timbuni yandare aleme gubaliniha nogoba hayagola tandaga timbuni nalu hene. <sup>6</sup> Ibugua wali agali maru tandaga dewa mo mima ibaga bialu hayagonaga pani ibuniha dai bini. Anigo tandaga ogonime ibunaga miniha iriari nabini. <sup>7</sup> Iibunaga mine hagane mana ogoni wanahene. Ibugua mine timbuni hene. Yuda wali agali mo gi holenenaga bi hongoheru lalu hene. Ani lalu ibunaga nogo hosi yaga heago mo daila hene. Ani gerai lalu piyagola Andioogusu nogo hosime gili laga karisi biagoha howa

pilape halu dindini gi ge kuniru podo habolo baga biai hene. <sup>8</sup> Ibuha mine holene manda wiagome ibu hongo gibihe kobe toba hene. Ibugua miniha mitangi bialu ibugua solowara bedagohondo bi lamerogo hale holobabe toba ho hene. Ani bialu hari nene wedarunaga genda magi manda ogodaguada lalu ibugua hondolobabe toba ho hene. Ani manda bu haga biago bame pilape hayagola dindini wiaria agalime lebera buwa mo yalu pene. Anidagua biyagome wali agali bibahendeoreme Ngode Datagaliwabenaga hongo panaga handa walia hai hene. <sup>9</sup> Ani wiagola himi agali ko biagonaga de harigaha tagira ibalu tinginiha pugupugu bialu hene. Ani bialu heagola tandaga timbuni nalu wini. Ibu homo tungulo mia nabi wiaore dege ibunaga tingini bibahende togo biai hene. Tingini ngu timbuni biyagome ibunaga ami agali hearu odo yu pugupugu bialu <sup>10</sup> ibu biamogo bule kaware holene mbira nahene. Ai agali ogoni de handadaba. Abale harini yakundi karu ibunaga gime mo yu holene kobe toba ho haga hayago ogoni ndobe.

*Andiogusuhanda Ngode Datagaliwabhondo bi galone mbira lo winigo ogo*

<sup>11</sup> Andiogusu ibu tandaga timbuni nalu wuwa ai ibunaga mine holene mana wiago wahene. Ngode Datagaliwabhonda ibu pani nelo mo miyagola tandaga timbuniore nalu wuwa ai ibunaga mini bayale tigabi wiadai bini. <sup>12</sup> Ibuni tingini ngu biyagome ibunaga ngui harigoha ngu timbuni biyagola ibugua lalu, Ina wali agali bibahende Ngode Datagaliwabe andaneha hai halu iname ibuni ale dege kobe toba holene henge nawiore ndobe, lene. <sup>13</sup> Ani layago lelowa Ngode Datagaliwabenaga dara holene ibuha nawini. Anigo agali ko ogoni ibugua Anduane Homogohondo ko nabule lalu bi hongohe lo wini. <sup>14</sup> Ibugua bi lo wialu lalu, Bamba ina abale pialu Yarusaleme Ngode Datagaliwabenaga tano loma bia hene wiago Yuda wali agalinaga homaliore ngelole manda birugo ainde ayu lone lo beregedalu Yarusaleme tini handaya ho howa gabumane tinime helo hongo mialu tini haru halimu, laro. <sup>15</sup> Abale Yuda wali agali homararunaga tingini ngarubi waneigini homene tingini ngarubi nogo biangorume nalu togo lelo tano pabe tagiraha batagi helo manda bu haru. Wali agali ko uruninaga tingini horo holene galone nawida lo manda bu haru. Ani manda bu harugo ai lone mini beregedalu Adene tanoha wali agali bayale kadagua dege helo hameledo. <sup>16</sup> Bamba ina gabo be ela nahagane loma bia hene Anduane Homogonaga andaha wiaru mo yalu dabudabu tara tara anda biagoha wiarubi mo yalu biru. Ai ina mbirale bayale tara tara ala wini uruni ale ndo gahengeoreru Anduane Homogonaga andaha mo wia aribia halu tolatagi helolebero. Ina ininaga munime loma buleneru yolo biai holebero. <sup>17</sup> Ani bialu ini Yudali ho halu wali agali dindi bibahendeha karume hale hai helo i porogoha latagi haga bima polebero. Ani bialu Ngode Datagaliwabe ibu hongo gibiorehe ka lalu wali agali hale hai helo latagi holebero, lene.

*Andiogusuhanda beba gili bialu Yuda dindiha pelenego ogo*

<sup>18</sup> Ngode Datagaliwabhonda Andiogusu ibuni ko biyagonaga pani ndo timbuniore nelo miyagome Andiogusu tandaga timbuni nalu hayago ereba nahe wiaabo hene. Ani wiyagola ai ibu lone dabi naholoboda lo manda bialu ibugua beba gili buwa bi ogo Yuda dindiha lo pelene.

<sup>19</sup> Beba gilibu pelenedagoha bi ogodagua lene. I Andiogusu i kini howa ami haru haga agali haguane kogo ina inaga wali agaliore hene Yuda wali agali tihondo bayale kemida laro. Ina tinaga miniha mo palia holene karulo howa bayale halimulo hamelo ko. <sup>20</sup> Tinibi tinaga waneiginibi bibahende bayale howa mbirale bibahende tinaga mini ngemigoria talialu bayale dege wiagua nde ina Ngode Datagaliwabhondo turu halu kai lolebero. <sup>21</sup> Mana bayale tigua ihondo bialu haga wirimigo mitangi bialu turuho ko. I Pesia dindi howa ibirugola warago ko tara mbirame i minaya. Ani biyago manda bialu ayu ina ti bayale halimulo biamogo bulene manda bu ko. <sup>22</sup> Ainde i lone dabi holoboda lo manda bido. Ani bialu inaga warago ko ngago dabi holebira lo manda bido. <sup>23</sup> Anigo



ainde i aba ibugua dindi maruha wai bu puwa mana bialu hayaru manda bido. Ibugua agali mbirame gabumane biabe bialu helo dabo helaga hene. <sup>24</sup> Ani binigo manda buwa mbirale mo ko holene mbira tíha anda ibiyagua wali agalime mogo lolene nawi. Agali mendeme gabumane biabe bialu kago tí manda bidemi. <sup>25</sup> Ani bialu gabumane maru inaga dindi ngago gibuni gibuni hama pedarume mbirale mbira agile tagira ibirabe hondole handaya ho hai ka. Ani kago manda bialu ini homarogola i igini Andiogusu kago ibu kini ho aribia helo dabo heledo. Horo dewaore ini dindi hobane maru ngaruha de handama ibaga bule howa igiri ogoni ibugua tí haru helo helalu piruli. Ina beba mbira ayu tinaga gilibu wia harodagua dege gilibu pelaru. <sup>26</sup> Ai mbirale bayale tí mbira mbira kemigo biamogo bialubi bibahende biamogo bialu ina bayale bialu haruligo mitangi bilimu. Ainde tigua inihondobi i igini kagohondobi miniha bayale dungulo halimulo hame ledó. <sup>27</sup> I igini kini ho aribia hole kago ibuguabi nde tí baba biabe bayale bulene ngago bialu harulidagua bia aribia halu mo palia holene karulowa tí dara howa bialu harulidagua bialu holobada lo manda bido, lalu gilibu pelene.

<sup>28</sup> Ainde agali koore howa wali agali dewa homelo bo wahai halu Ngode Datagaliwabe kago mege bialu haga heago nde wali agali tandaga nelo ibugua mo miaga wiadagua ibuni nalu wini. Ani nalu ibu dindi kaundia mbiraha hari bare wiagoha agali ko mini nawi daga nalene agali maru karuale mbira homaradagua homene. <sup>29</sup> Ani homayagola agali ibunaga nenege Pilibi mbira heagome ibunaga tingini ibuni dalu mo ya dai buwa hora hene. Ani hora halu mani Pilibi ibu kini igini Andiogusu gi halu ibu ibida Iyibi Kini Tolemi Pilomedo hearia pene.

## 10

### *Anduane Homogonaga anda lone mo lomabia henego ogo (1 Magabi 4.36-61)*

<sup>1</sup> Ngode Datagaliwabehanda Yudasá Magabeusu halu ibu damene hearu biamogo biyagola ibugua waitigi giha howa Anduane Homogonaga andabi Yarusaleme tanobi mo yu dai bini. <sup>2</sup> Tigua lomabu delaga dabu agali tara íbu hayarume wali agali ngoai ho haga hama wiagoria bu helayago bo gialo wahai halu mbirale dama mitangi bialu bi pupu wiaga gime wabini wiarunaga anda bu helearubi bo gialo wahai halu bini. <sup>3</sup> Tigua Anduane Homogonaga anda lone Anduane Homogo deni dodo nahe helo mo loma bia halu biagane mana wiaru bialu anda timbuni biago mo loma bia halu tigua lomabu delaga dabu mbira gahenge bu helalu bini. Tigua ege tole kira ira delolenedagoria bo gingido helalu loma gahenge bo delene. Mali kirani tigua Anduane Homogonaga andaha loma bo delabe naheore hene. Ani bialu ira hagua nga bilo delaga mini inisenesiru lomabu delalu lamu hale wiaru hedo delalu mberedi Anduane Homogonaga deni ngelaga biaru lone mo wialu bini. <sup>4</sup> Ani biai howa mani mbirale mo ko holene ibiyaruale lone naibilelo tigua dindini paliapae hai howa Ngode Datagaliwabehondo bi lene. Tigua Ngode Datagaliwabehondo lalu, Ina ko lone birimayagua nde ina minalu wali agali tara Anduane Homogo mitangi nahaga karuhondo minu mialu wali agali mege biaga karu giha minu ya habe, lene. <sup>5</sup> Tigua ege mini Kislebenaga horo pira kirani duria (25) layagola Anduane Homogonaga anda ogoni lone mo loma bia hene. Ala egebi horobi ogoningi dege agali tara tagiraha howa ibiyarume anda ogoni Anduane Homogo deni mo dodohe helene wini. <sup>6</sup> Ai horo halirani Yuda wali agali tigua turu ho howa tomo dewaore dawa nalu Horo Timbuni Anda Nemandaruha Palu Holene Horo biagobi ogoningi dege halu bini. Ani bialu tigua horo uruni mali abale hayarunaga holene winigo mitangi bu dai bini. Mali uruninaga ti togolo yu ibida pialu dindi ko wali agali nahaga wiaruhabi egeanda hearuhabi biango gabuaru paliradagua palima ibaga bialu hene. <sup>7</sup> Ani bialu henego ayu tigua ira magane gahengeru bu yalu ayage yuniru bu yalu halimbu wiaru ira yunime mo yári bia halu bini. Ani buwa tigua



Ngode Datagaliwabehanda ibunaga anda ogoni lone mo loma bia helonaga henge ogoni mo wia hayagonaga tigua ibunaga mini yaraga howa turu halu iba gana lalu hene. <sup>8</sup> Ani bialu tigua mana gahenge mbira wabinigo mana ogoni ogodagua leda, Mali bibahendengi horo ayu kemago tagira ibiragola Yuda wali agalime Anduane Homogonaga anda lone mo loma bia haramago manda biaabo holene nga, lene.

*Tolemi Magaronohanda ibuni homole benego ogo*

<sup>9</sup> Ainde Andiogusu Epibanesenaga te abale larimago hale harimi. Ai ayu iname agali mende Andiogusu ko biago igini Andiogusu Yubadonaga te laramago hale hadaba. <sup>10</sup> Ayu iname te emene tigimandi dege lone ko tagira ibini ngarunagabi ibugua wai binirunaga tebi loleberema. <sup>11</sup> Ainde Andiogusu Yubado ibu kini ha aribia ho howa ibugua agali mbira mini Lisiasa heago ibu dindi kira Koelesiriala la Ponisialanaga gabumane agali haguane helo dabo helene. <sup>12</sup> Ani helowa ibugua agali bayale mini Tolemi Magarono ibu gabumane agali haguane howa ibugua Yuda wali agalihondo mana bayale biaabo halu ibugua gabumane mana bayale hendore bulene ngadagua bialu haga hene. <sup>13</sup> Ani biaga hearia agali Kininaga Nenege laga agali maru hearume Yubado hearia puwa Magaronohanda ko biya lalu ndelene. Ainde bamba Kini Pilomedohanda dindi mbira iba solowara dombeneha mini Saibarasa wiago ibugua handaya ho helo miyagola agali bu hearu bibahendeme agali ogoni kininaga waitigi ka laga hene. Anigo ibugua dindi ogoni wahalu puwa Andiogusu Epibanesela nenege ho haga hene. Ani bialu howa ibunaga mini abale gabumane biabe biaga bayale mbira ka lene haga wiago lone mo yu dai bibe naheyagola ai nde homagane tomia mbira ibunime nalu homene.

*Yudasa Magabeusuhanda Idumea hameigini bope henego ogo  
(1 Magabi 5.1-8)*

<sup>14</sup> Ai Gogiasa ibu dindi ogoniha gabumane haguane hene. Ani howa ibugua dindi tara tara wiaruha ami agali hearu munime yolo bialu haru ibuwa Yuda baba wai biaabo halu haga hene. <sup>15</sup> Ani bialu heagola Idumea hearu tiguabi nde dindi bayaleha wai pabeanda hongohe heagoha wai bulene hamabi bayale wiagoha howa tigua Yuda baba wai bule karali bialu hene. Idumea tigua wali agali ko bialu Yarusalemeha howa ibida pene hearu mo doho howa tigua wai bulenenaga mana lehe bialu haga hene. <sup>16</sup> Ainde Yudasa Magabeusu halu ibu aria hearume Ngode Datagaliwabehondo tigua wai bulumaya biamogo bibe lowa bi lalu hene. Ani lalu puwa tigua Idumea dindiha tano hongohe wai pabeanda haga wiaru karulole wai bule pene. <sup>17</sup> Puwa tigua wai hongo howaore bialu wai pabeanda uruni bo poda anda halu karulai hene. Tigua agali wai pabe neneni howa wai biadali halu biyaru baba hongo howa bialu bo taliatogo lai lalu tigua waitigi daosini dege pira kira (20,000) horo ogoningi bai hene.

<sup>18</sup> Ai waitigi ami agali daosini dira (9,000) agima ibida pialu mamageali hagane anda hongohe bima irigi hene kira heagoha ha do hai hene. Anda mamageali hagane ogoniale kagoha wai biaganeale mbirale damene mo wiaga hene. <sup>19</sup> Ainde Magabeusu ibugua Saimonobi Yosebebi Sagiusu heba wai bialu helalu ibugua wai hongoheore gime minaminaga bialu heago biamogo bule pene. <sup>20</sup> Ani biyagola Saimononaga ami agali maru hearume ti muni hame lowa agali anda hongohe biagoha waitigi birayarume siliba muni genda magi pira waragariani maria (64) tinaga giha mo ya hene. Tigua ogonidagua bialu munime de miniru minai ho berelalu tini ibida pora bialu piai hene. <sup>21</sup> Mbirale uruni biya layago Yudasa ibu hale howa ibugua ami haru hagane agali haguane hearu ibidaba lowa godi hale hene. Hale halu howa lalu, Ami agali waitigime muni miyago mo yalu hayadaru tigua ti hamene bu karu muni taguiyada. Ai tigua waitigi ibida pelo yupe hayadagome dai bialu ina aria bu karu bo wahai holobada, lene.

☆ 10:10: 1 Mag 6.17

<sup>22</sup> Yudasa ibugua anidagua lalu ami agali muni mo yaga biaru homelo bo wahai hene. Ani bialu gerai lalu wai dai buwa pabeanda hongohe kira anda pene. <sup>23</sup> Wai Yudasa ibu heba bialu kagoha tigua waitigi bo podahana haga hene. Ani howa ai ibugua wai pabeanda anda hongohe kira ogoniha giala anda halu wai biyadagoha waitigi daosini dege pira kira (20,000) bolangua howa bai hene.

<sup>24</sup> Abale nde Yuda tigua Timodi bope haya handala penego ainde Timodi ibugua puwa ami agali dewaore yolo buwaore yolo bu helowa ibugua ami agali maru Esiaha hearu baba mo mogo bialu dewaore agali Esia ami uruni nogo hosini biruwa wai biaga henego uruni heba mo mogo bini. Ani bialu puwa tigua wai hongo howa bialu Yudia karulai hole tidiyu pene. <sup>25</sup> Ani bialu ti wene harigani pialu hearia Yudasa Magabeusu haluibunaga ami agali hearume Anduane Homogohondo bi lalu hene. Tigua bi lalu howa dara howa aga karulaya wiaru karulalu be abalu ti hagianeni dugu wua hene. <sup>26</sup> Ani bialu tigua lomabu delaga dabu heago kawareni dindi wiagoria bu palu wuwa tigua Ngode Datagaliwabehanda wai bulebirago biamogo bilonaga ibuhondo bi lalu hene. Tigua Ngode Datagaliwabehondo tinaga waitigi kagoha pialu waitigi uruni bo hilo wahai habe lalu lamini. Tigua ani lalu henedagoni bamba Anduane Homogoibunimeibunaga bi mana lo wini ngagoha howa lo wialuibunaga wali agali baya hangu handaya ho holebero lo winigo manda bialu lene.

<sup>27</sup> Tigua Anduane Homogohondo bi lai halu tinaga wai biaganeale wiaru mo yai halu Yarusaleme howa tagira pialu kaundiaha pole pene. Puwa waitigi heagoria kaware dege handaya howa manda manda bu hene. <sup>28</sup> Ani howa ni tagira ibule manda biyangi mendeha mendaha howabi wai pora bigi bigi bini. Ani bialu howa Yuda ami ti tininaga hongo hanguni hana howa ndo wai bialu kema tigua Anduane Homogonaga hongoni howa wai bialu kemagome tigua wai bialu bo poda hana halu bope holeda lo manda buwa wai bialu hene. Waitigime tinaga keba holene hongoni howa wayali holeberema lo manda buwa wai bialu hene. <sup>29</sup> Wai hongo howaore kaware hapara howa gime minigi minigi bialu howa waitigi agali biarume de handadaga howa handalu hemiria agali bayaleore duriali nogo hosini bialu nogo mo tiga biagane pu ngolome wabiniyago ogonime nogo hosi mo tiga bima ibiyago de hendene. Agali durialu uruni tigua Yuda ami agali haru halu bamba hayaria de hendene. <sup>30</sup> Ani piyagola agali duria uruni ti Magabeusu heba mandagi howa tigua ibu ho hagira bialu tigua wai pole karulaga aga karulearume Magabeusu timu nabelonaga ge hai helearia de hendene. Ani buwa tigua danda timu tege lalu bayagome dabale harini kulukala lalu waitiginaga de minai haga bini. Anidagua biyagome waitigi mo luluya hayagola wai wahalu tini headagua ibida pugu pugu bai hene. Ani pugu pugu biyagola Yuda tigua waitigi minalu bai hene. <sup>31</sup> Yuda ami tigua waitigi ami agali geni pialu wai biagane daosini dege pira kirani handari duria (20,500) homelo bo wahai halu handari waragaria (600) nogo hosini biruwa wai biaga heneru homelo bo wahai halu bini.

<sup>32</sup> Ani biya handala Timodi ibuni ibida pialu Gese tanoha wai pabeanda hongohe wiagoha Kaireasahanda ami agali hongohe haru haga wiagoha anda pialu birado hene. <sup>33</sup> Ani piyagola Magabeusu haluibunaga ami agali biarume horo maru Gese tano wai pabeanda hongohe ogoniha wai bialu hole turuore howa bialu hene. <sup>34</sup> Ami agali wai pabe hongohe ogoniha hearume tinaga wai pabeanda hongohe ogoni bo gialalu podama anda naibulubada lo manda buwa ti ogoriani hongo hanaho howa tigua Yuda ami agali biaru hondobi Anduane Homogohondobi mege timbuni bialu bi koru latagi halu hene. <sup>35</sup> Ani lalu heagola horo dauningi egerebahagi ni tagira ibiyagola Yudali Magabeusunaga ami agali igiri daliaheru pira kira (20) hearumeore keba timbuni hene. Tigua homolene gi naheore elahé howa wai pabe hongohe ege pabe heago irigi hene. Ani pialu porabu anda howa gerai mo koheore pialu agali ti deni ngola hayago damene bibahende ayu tibume dibu gaibu paya biai hene. <sup>36</sup> Waitigime agali uruni baba hila

mialu wai bialu heagola Yuda ami halu mende anda puwa wai pabe anda hongohe heago ami agali mamage haga hearu baba wai bialu hene. Ani bialu tigua agali mamage haganaga anda ege pabe neneni bima irigi hene hearu bo heda hai halu ira gialo wahayaru mo mogo buwa ira timbuni bo delowa agali waitigiali mege biaga biaru minalu ira ogoniha do taulaha helene. Ani bialu Yuda ami tidi tebone lone tanoha anda puwa maru tagira hearu anda ibilonaga wai pabe hongohe heagonaga panga hongohe payatagi hearu bibahende bo gialai halu panga dugupe hai hene. Ani bialu tano Yuda ami agali biaru ti anda pialu karulai hene. <sup>37</sup> Ainde Timodi ibuni ibida pialu iba hambiaga iba uli tombo wiagoha birado hearia tigua handa walia halu minuwa homelo bo wahene. Ani bialu tigua Timodi hamene Kaireasa heago homelo ayu tibume dibu wahalu agali mende mini Abolobanese heagobi homelo bo wahalu bini.

<sup>38</sup> Wai biai howa Yuda ami agali tigua Anduane Homogonaga mini yaraga hene. Anduane Homogohanda ibunaga dara holene wiago Isaraele wali agali mo walia halu tigua waitigi bope helo hongo miyagonaga tigua turu timbuni halu kai lowa iba gana lalu Anduane Homogonaga mini yaraga halu hene.

## 11

### *Yudasa Magabeusuhanda Lisiasa bope henego ogo (1 Magabi 4.26-35)*

<sup>1</sup> Ainde mani howa Lisiasa ibu kini hanini howa gabumane agali haguane dege mende henego ibu te uruni hale howa keba timbuni hene. <sup>2</sup> Ani howa Lisiasa ibugua ami agali geni pialu wai biaga daosini dege pira halira (80,000) mo mogo bialu ami agali nogo hosini biruwa wai biaga dewaorebi mo mogo bu helalu bini. Ani bialu tigua Yuda hameigini baba wai bule tidiyu pene. Ani pialu howa Lisiasa ibunaga miniha Yarusaleme tano ngago Girigi dindi ngaru aria dege wiagimbu bu ngelo ibugua yamuleore manda bialu pene. <sup>3</sup> Ani bialu Ngode Datagaliwabenaga anda kagonaga muni dagisi dindi maru ngaruha howa dagisi biaga ngadagua dege ngi lole manda bialu pene. Anduane Homogonaga loma binigo mo miaga agali haguane mali mbira mbirani agali mbirame ibu muni mirago ibu ho aribia haga bilo hamelo hene. <sup>4</sup> Lisiasa ibugua Ngode Datagaliwabenaga hongo gibiore ngago mitangi nabiore hene. Ibugua ibunaga ami agali dewaore daga labe nahe hearubi nogo hosi hearubi nogo timbuni tara mini elebana wai biaga pira halira (80) hearubi uruninaga hongoni hana howa bialu hene. <sup>5</sup> Ani manda bialu Yudia dindiha anda ibuwa Bedesua tanoha wai bialu hene. Bedesua tano ogoni wai pabe hongoheore egeme bu mabubi emene kaundia dege Yarusaleme tanonaga abene unurayagi winigo ogoriani wai bialu hene. <sup>6</sup> Ai Lisiasahanda Yuda dindiha anda ibalu tano hongohe wiaru ho hagira bida layago hale howa Yudasa Magabeusu halu ibunaga ami agali bu hearubi Yuda wali agalibi tigua dugu timbuni bialu Anduane Homogohondo ti biamogo bule dahuliyali mbira ibila lowa bi lalu hene. <sup>7</sup> Ani lalu Magabeusu ibuni wai biagane ale wiaru mo yai halu wai bamba halu pene. Ibugua agali maru hearuhondo, Ti hamene baruago biamogo bialu wai bule maibidaba, lalu olene. Ani laya handala bibahende heyalu piai hene. Tini homolenehayagi mo embeda halu pene. <sup>8</sup> Tigua Yarusaleme tano kaware anda ibalu howa handalu hemiria agali mbira nogo hosini biralu gerai lalu bamba halu piyaria de hendene. Agali ogoni ibu aga pele karulalu wai biagane ale bibahende ngolome wabini hangu mo karulalu biaria de hendene. <sup>9</sup> Yuda ami agali bibahendeme de hondowa ti bibahendeme Ngode Datagaliwabehanda ti dara halu biamogo biyagonaga tigua ibunaga mini yaraga halu ibuhondo kai lene. Ani biyagola ibugua tinaga miniha mo hongo hai hene. Anidagua biyagome tinaga hongo gibiore ho howa waitigi ami agali baba wai bulene hongo karulape halu nogo tara gabua karu baba wai karulape bialu tigua tanoha wai pabe panga hongohe aeaneme bengena howa payatagi karu bo gialalu

anda polene hongo karulape hene. <sup>10</sup> Ai tigua tidi yalu duguniore agali nogo hosini biralu bamba halu piyago erembiraha pene. Ngode Datagaliwabehanda ti dara halu agali ogoni ti hearia ibilenego ti haru pene. <sup>11</sup> Ani pialu tigua wai taraore budiale gabua timbuni lainonome hongo hagadagua howa agalini pogolo paga halu balu bo budabaga bialu mo ko howaore balu waitigi ami agali daosini dege pira mbirani mbira (11,000) bibahende bai halu ami agali nogo hosini biruwa wai biaga daosini mbirani handari waragaria (1,600) bibahende bo wahai halu ami agali maru bo taliatogo lai hene. <sup>12</sup> Ami agali dewaore timu hai hayagola tinaga danda timu yu wahalu ibida piai hene. Anigo Lisiasa ibuni homolenenaga gi halu ibida piyagome ibuni nahomene.

*Lisiasahanda Yuda baba gi tigani binigo ogo*

<sup>13</sup> Lisiasa ibu ibida penedagoni ibu lulu howa ndo agalime ogoale bule lo manda bialu ibida pene. Ibugua wai bialu wayali habe nahe wiyago mitangi bialubi ibugua Hiburu hameigini uruni bope habe nahe kago manda bialubi ibida pene. Yuda tinaga Ngode Datagaliwabe hongohe gibiore kagome ti baya hangu handaya ho kago manda buwa ainde ibugua Yuda wali agali baba wai palima lalu bi lo mbira hole manda bini. <sup>14</sup> Ibugua Yuda wali agali baba bayale hole lowa bi bayale dewa lo wialu ibunaga kini kagomebi Yuda wali agali baba nenege holene karulape lelonaga ibugua baya hangu kini bime ladebodebo bialu haabo hene. <sup>15</sup> Magabeusu ibuguabi nde wali agali bayale helo biamogo bulene hamelo howa ibugua Lisiasahanda wai palima lalu bi layadagoni turu ho hene. Ani bialu Kini ibuguabi nde Magabeusuhanda wai palialu nenege hama lalu bi Lisiasa hearia gilibu pelenedago de hondowa karulapego ani bimiya lalu tigua bi lo pelayadaru bibahende karulape lai hene.

*Lisiasahanda Yuda wali agalinaga beba gilibu wia henego ogo*

<sup>16</sup> Lisiasahanda beba gili bialu Yuda wali agalinaga bi lo pelenedagoni ogo Lisiasahanda Yuda wali agalihondo horombeore lara. <sup>17</sup> Agali kirali tinaga bi i hewaria lo yalu pudaba lene Yonela Abasalomola libugua beba gilibu wia harimiyago yalu ibiya. Tigua bi bebani gilibu ibilarimigo ina e labe lalu bi lo wia harimiya. <sup>18</sup> Ani larimiyago hondowa bi tigua hale harimiyaruni bibahende kinihondo miai haru. Ani bialu mbirale ihondo hale harimiyaruni ina karulape lai haru. <sup>19</sup> Ainde tigua gabumane kago baba mini mo mbiraore ho harimiyagua nde inabi mbirale ti biamogo bulene inaga hongo tahe ngago bialu holebero. <sup>20</sup> Ina agali tinaga bi lahaga karubi agali inaga bi lahaga bu karubi tigua bi ogoni baya hangu dabo handalu lo tiga bidaba lalu lamiai haru. <sup>21</sup> Ai hondo halimu laro. Ina beba ogo mali handari mbira pira mariani halira (148) kagola ege mini Diosogorindiusunaga horo pira kirani maria (24) layagola gili bero, lalu lo wia hene.

*Kinihanda Lisiasa hearia beba gili bialu bi lo pelenego ogo*

<sup>22</sup> Kinihanda beba bo pelalu lalu,

Kini Andiogusuhanda ibu hamene Lisiasahondo, i bayale kebe, lalu mo bi la hara. <sup>23</sup> I aba ibu piyago ayu ogoni mbirale bi pupu wiaga dama karu baba mandagi beda. Ainde ayu wali agali ina daluha bu karu bibahende bayale dege hai howa tini daluha biabe bulene ngaru tini handaya howa bialu haga haga bilo hame ledo. <sup>24</sup> Yuda wali agali tigua i abahanda bilo hame layadagua ina Girigi dindinaga mana ngago taluwa bule hame nale tinaga mamali mana ngago bialu haabo holene hamelo ko. Ani howa tigua ihondo hale halu ti anidagua bulene hamelo kemago ina karulape labe laya. <sup>25</sup> Ani hale hayago ainde wali agali uruni ti gi nahe hendore dege wali agali hameigini tara tara dindi iname haru howa handayaho hene ngagoha karudagua dege helo hame ledo. Ti Anduane Homogonaga anda mo tiga bilo ina karulape lalu tinaga mamali mana bialu haga ngadagua bialu helobi ina karulape laru. <sup>26</sup> Aiore ina inaga bi ogoni tihondo lamialu ogodagua labe. Ina ti baba nenegeore hole hame ledema. Ani kemago tiha



mogolalu miniha gi ho holene nawi. Tí hadapeho howa t́ninaga biabe bulene ngago bialu holene nga, lalu kini ibugua bebani gilibu wia hene.

*Kini ibugua beba gili bialu Yuda dindiha pelenego ogo*

<sup>27</sup> Kinihanda beba mbira gili bialu Yuda dindiha yu pelene. Bi bebani gilibu wiyadag-  
oni ogo,

Kini Andiogusuhanda gabumane Yudiaha kagobi wali agalibi bibahendehondo bay-  
ale kemida lara. <sup>28</sup> Bibahende ale t́ daluha ngaru bayale dege ngelo hamelo ko. Inibi  
nde bayale dege ko. <sup>29</sup> Menelausu ibugua ihondo langialu ogodagua laya. T́ t́ni  
daluha dai bialu t́naga dindi andaru mbiraleru mo tiga bima polene hamelo kemi, laya.  
Anidagua bulene bayale. T́ni daluha dai biai halu t́naga dindi andaru mbirale wiyadaru  
mo tiga bima polene nga. <sup>30</sup> Bayalego wali agali bibahende ege ayu mini Sandigusu  
kagonaga horo pira tebira (30) naledaore dege t́ni dalu dai biai holene nga.\* Tigua  
mbirale mbira gi holene nawiore. <sup>31</sup> Ani bialu tomo Yuda wali agalime nolene nawi  
lene ngago bibahende nane halimu. Mbirale Yuda t́ni aria karu aria mbirame mana  
ogoni pugualu hene wiagua nde ayu howa ogoni ibu godi deni holene nawi. <sup>32</sup> Ayu  
ina Menelausu ibugua t́naga miniha mo palia holene karulo halimulonaga bi lelo ibu t́  
kemiria pu laro. <sup>33</sup> Hondo halimu laro. Ina beba ogo mali handari mbirani pira mariani  
halira (148) ogonaga ege mini Sandigusu kagonaga horo pira mbirani duria (15) howa  
beba ogo gilibu wia haro, lene.

*Lomoalime Yudaha beba gilibu pelenego ogo*

<sup>34</sup> Lomoali tiguabi nde Yuda dindiha beba mbira gilibu pela dege bini. Beba ogoniha  
bi ogodagua lalu gilibu wini.

Kuindiusu Memiusula Taidusu Maniusula libu Lomo wali agalinaga bi lagane howa  
libugua t́hondo bi lo wia hara. <sup>35</sup> Ai inamebi nde kininaga hanini Lisiasahanda bi layago  
karulape ledema. <sup>36</sup> T́gua bi uruni baya hangu mo tale bilimulo hame ledema. Ani bialu  
t́gua mbirale kini ibugua hangu bulene ngago ogo lalu Lisiasahanda t́hondo layago baya  
hangu mo tale bilimulu. Agali mbira t́naga bi la hagane ina baba bi lo tiga bulumaya  
abale ina kemaria ibilalimu. Ina Andiogo tanoha ibaga bialu polene kaware ngago  
abale ibilalimu. <sup>37</sup> Ainde t́naga mini ogobi wua harua lalu ina manda bu holomaya  
nde t́gua agali mbira mani ibilalimu. <sup>38</sup> Ai hondo halimu laro. Iname beba ogo mali  
handari mbira pira mariani halira (148) ogonaga ege mini Sandigusu kagonaga horo  
pira mbirani duria (15) layagola gilibu wia harama, lene.

## 12

*Yuda wali agali Yoba tanoha hearu bo wahai halu henego ogo*

<sup>1</sup> Tigua mandagi holenenaga habo nalolene bi uruni lai halu Lisiasa ibu kini hearia  
dai bialu Yuda ti tininaga mabuha biabe bialu hagadaru bima dai bini. <sup>2</sup> Anigo  
agalí haguane maru kinihanda dindi hobane mbira mbira wiaru handaya ho haga  
bilo dabo helene bu hearume Yuda wali agali baya hangu helo hame naleore hene.  
Agali uruninaga mini Timodibi Abolonusu ibu Geneusu igini henegobi Hieronimusubi  
Demobonobi uruni hene. Ani howa Nigano ibu ami agali maru dindi mini Saibarasa iba  
solowara dege dombene wiagoha haga hearu haru haga howa ibuguabi nde Yuda wali  
agalí bayale helo hame nale dege hene.

<sup>3</sup> Ayu Yoba tanoha wali agali bu hearume mana ko mbira bialu henegonaga te laro.  
Tigua Yuda wali agali tinaga tanoha haga bu hearuhondo tinaga iba talu ngagoria biralu  
ibaha ma lene. Walibi waneigini hearubi ma dege laga bini. Tigua mini ko wua howa ma  
lagadagua ndo tiga tiga howa ma laradagua bini. <sup>4</sup> Ainde Yuda wali agali tigua Yoba wali

\* **11:30:** Mini Sandigusu ledagoni Girigi tinaga ege mende tebonela hengeneha (Pebuari Masi) tagira ibaga nga. Ai ege ogoni dege mini mende Diosogorindiusu laga wini.



agali baba nenege holene bayaleda lo manda bialu tigua ma layagola ta nabi pu dege bini. Tigua mbirale mbira bulubada lowa gi nahe dege pene. Ani puwa iba solowara haunini puwa Yoba wali agali biarume iba talu mo ande lowa Yuda wali agali handari kira (200) bibahende iba nalu homai helene.

<sup>5</sup> Ai Yudasa ibu hale halu hearia Yoba wali agalime ibu damene Yuda wali agali anidagua ibaha homai helaya layane hale howa ibunaga ami agali mo mogo bini. <sup>6</sup> Ani buwa ibugua Ngode Datagaliwabe manani ngadagua tigatiga mo tale biaga kagohondo bi ala lalu mani wali agali ko ibunaga Yuda wali agali bo wahaga hayadaru bole pene. Mbiraga puwa iba angeni iba sibi bu wiaru delai halu iba togo wiarubi delalu wali agali biradoho berearu bo wahai halu bini. <sup>7</sup> Ani bialu howa Yudasa ibu handalu hearia tanoha wai pabe panga payatagi heago handalu ti dai bini. Ibugua mani halu mende dai bialu wali agali ogoniha haga bu hearu bo wahai hama dai bule manda bialu pene.

<sup>8</sup> Yudasa ibu lone dege hale halu hearia Yabane tanoha wali agali bu hearu tiguabi Yuda wali agali ani dege bo wahai hole ka layane hale hene. <sup>9</sup> Ani layago hale howa horo mbirangi mbiraga heyalu wai bule pene. Puwa ibugua tinaga iba togobi iba sibi bu wiarubi bo heda hai hene. Ani bo heda hayagonaga ira hagua timbuni dayago Yuda wali agali Yarusaleme tanoha hearume handa amu halu panaga handai hene.

#### *Yudasahanda Gileada dindiha puwa wai bialu wayali henego ogo*

<sup>10</sup> Ani bialu Yudasa halu ibunaga ami agali biarume Yabane tano wahalu Timodila wai bule pene. Harigani pole wene pialu hemiria hameigini tara Arebiali ami tidiyu howa wai bini. Arebia uruni ti tomo nolene taya ibaga bu hai haga hene. Agali uruni ti ami agali daosini duria (5,000) howa handari duria (500) nogo hosini biruwa wai biaga hene. <sup>11</sup> Ani heago baba Yudasa halu ibunaga ami agali biaru baba wai buwa Ngode Datagaliwabehanda ti biamogo biyagola ti wayali hene. Ani biyaola Arebia ami agali biaru Yudasahondo hale halu, Ai wai wahalu gi tigani bialu tigua nogo bulumaga sibiru talebu mialu biabe maru bulene ngarubi buleberema, lene. <sup>12</sup> Ani layagola Arebiali uruni tigua Yuda wali agali biamogo bialu tigua biabe dewaore bulebira lo manda bialu Yudasahanda karulape lene. Ani lowa tigua gi tigani biai halu Arebiali ti tininaga balai anda heagoha dai bini.

<sup>13</sup> Ani bialu Yudasa ibugua tano wai pabe hongohe bu mabubi mini Kasabini wiagoha wai bule pene. Tano ogoniha wali agali dindi tara taraha howa ibu hene dewaore haga hene. <sup>14</sup> Ani howa tinaga wai pabe hongohe bu mabu bini heagonaga hongoni hana ho hene. Ani bialu ti tomo nalu holene karulape tanoha wai kema lo manda bu hene. Ani howa ai tigua Yudasana ami agali biarume mbira buluba ndoda lo manda buwa tigua bime mo tandaga haga bialu hene. Agali uruni tigua bi ko lalu Ngode Datagaliwabe mege bialu hene. <sup>15</sup> Ani lalu heagola Yudasa ibugua dindi bibahende haru howa handame ho haga Ngode Datagaliwabehondo bi lene. Bamba Yosua heangi Ngode Datagaliwabehanda Yarigo tanoho ege pabe hongohe bu mabu bu heago bo gialape hai hene. Yuda tigua pabe ogoni masinimebi ege tole timbunime bo gialene ndo. Danda timumebi ndo dege. Ani binigo manda bialu Yudasa ibugua tano ogoni karulole manda buwa wai hongo howa bialu heagola <sup>16</sup> Ngode Datagaliwabehanda ibu biamogo biyagome ibugua wai ogoni bialu bo poda hana howa wayali hene. Yudasa halu ibunaga ami agali biarume wali agali dewaore bo wahai hayagola ibu kuyama mbira bereago wali agali bayaru daramame tolene. Iba kuyama ogoni timbuninaga magi manda mida handari maria (400) berene.

#### *Yudasahanda Timodinaga ami agali bope halu wayali henego ogo*

<sup>17</sup> Yudasa halu ibunaga ami agali biaru ti Kasabini tano wahalu hariga luore pialu Karagasa tano anda pene. Yuda agali maru dindi mini Daliga haga hearu tano ogoniha hene. <sup>18</sup> Ai Yudasa ibu puwa handalu hearia Timodi ibu abale wai mbira binigo ogo-nime ibu bo poda hana haya handala ibida peaha Yudasa pu aribia hene. Anigo Timodi

ibu pialu ibunaga ami agali hongoheoreru tidi mbira ogoniha helalu pene. <sup>19</sup> Ani helalu pearia Magabeusunaga ami agali haru haga kirali Dosideusula Sosibadalame Timodinaga ami agali uruni baba wai bialu bo podahana halu daosini dege pira (10,000) bolangua howa bene. <sup>20</sup> Ani bialu Yudasa ibugua ami agali dewa mo tale bigi bialu tidi yu haga haga bilowa tinaga wai haru bamba holene dabo helowa haru helaga bini. Ani bialu ibuni abaleore Timodi haruru talima pole pene. Timodi ibunaga ami agali nde daosini dege handari mbirani pira kira (120,000) haru halu ami agali nogo hosini biruwa wai biagane daosini kirani handari duria (2,500) haru hene. <sup>21</sup> Ani piyagola ibira layago Timodi ibu hale howa ibunaga wali waneigini dabudabu wiarubi Kanaimi tano yu pelene Kanaimi tano polene hariga emene dorogeore ngagola ogoniha wai anda polene nakarulape wini. <sup>22</sup> Ai Yudasana ami agali tidi mbirago pialu anda piyagola Timodi halu ibunaga ami agali biaru mogo lalu duru lo hai hene. Ti mogolo henedago irane Ngode Datagaliwabenaga manane mbira biyago handa walia howa mogolo hene. Ani bialu ti ibida hariga nawi de hendeagoha pugupugu bialu ibida piai hene. Pialu tini mo luluya heagola tini aria dege dege ayu tibume dibaga dibaga bini. <sup>23</sup> Ani biyagola Yudasa halu ibunaga ami agali biarume talima pugupugu bialu waitigi daosini dege pira tebira (30,000) bibahende homelo bo wahai hene. <sup>24</sup> Ai Timodi ibuni ibida pialu hearia hameigini kira Dosideusu hearumebi hameigini Sosibada hameigini hearumebi minu yania hene. Ani biyagola Yuda wali agali aba aiywa wahebi wandari igiri daliahebi ibunaga garabayaha helai hene. Ani kago ainde ibu andaga dai nabiruyagua nde wali agali uruni homo aribia hai holobada, lene. <sup>25</sup> Ani lalu Timodi ibu henene buleore howa lalu ibugua wali agali uruni mbirago mo bo nahe baya hangu handaya ho halu baya hangu tini karia dai bilolebero lalu latagi hene. Ani laya handala tigua Timodi pelo yupe hene.

### *Yudasahanda wai marubi bialu wayali henego ogo*

<sup>26</sup> Yudasa ibugua Kanaimi tanoha puwa dama wali beda mitangi bialu bi pupu wiaga mini Adagadisi laga waigonaga anda heagoria puwa wali agali daosini dege pira kirani duria (25,000) bibahende bo wahai hene. <sup>27</sup> Ani bo wahai halu Eberono tano hongohe wali agali dindi tara taraha howa ibini dewaorehe wiagoha pene. Ani biyagola igiri daliahe tano ogoniha haga hearume ege pabe neneni howa timu batagi halu wai hongo howa bini. Ai tano tamuha masini tara tara ege tole batagi holenebi timu batagi holenebi dewa wabu ngelowa wai bini. <sup>28</sup> Ani bialu heago helowa Yuda tigua Anduane Homogohondo ti biamogo bialu waitiginaga hongo bo podabe lalu bi hongo howa lene. Ani lalu tanoha gialalu anda puwa waitigi daosini dege pira kirani duria (25,000) ale bo wahai hene. <sup>29</sup> Ani bialu mani Eberono wahalu pialu tano mbira mini Bedesana Yarusaleme howa horo mbirani gao laragola heyalu puwa alendo ne laragola anda polene wiagoha pole pene. <sup>30</sup> Wali agali Yuda hameigini aria tano ogoniha haga hearume Yudasahondo lamialu lalu, Wali agali dindi aba tano ogoniha haga bu karume ina Yuda wali agali baya hangu handaya ho howa mo ko holene nganggi ina biamogo bialu haga ka lalu lamini. <sup>31</sup> Ani layago hale howa Yudasahanda bime hongo howa lalu, Horo bibahendengi anidagua biaabo halimu, lalu lamini. Ani lalu Horo Timbuni Mabuha Tomo Pigane Denegonaga biago kaware ibulene wiagola Yudasa halu ibunaga ami agali biaru heba Yarusaleme dai bini. <sup>32</sup> Horo timbuni ogoni mini Girigi bi lalu Pendigosi laga.\*

### *Yudasahanda Gogiasa bope henego ogo*

Yudasa halu ibunaga ami agali biaru tigua horo mini Pendigosi ogoni hai halu Idumea dindiha gabumane agali haguane mini Gogiasala wai bule abale heyalu pene. <sup>33</sup> Ani biyagola Gogiasa ibugua ibunaga ami agali daosini dege tebirabi (3,000) ami agali nogo

\* 12:32: Har 23.16

hosini biruwa wai biaga handari mariabi (400) mo mogo bu hene. <sup>34</sup> Ani howa wai bialu Yuda ami maru homene. <sup>35</sup> Yuda agali ami hongoheore pari wayali mini Dosideusu ibu tano mini Daliga howa ibini henego ogoni ibugua nogo hosini biruwa wai bialu howa Gogiasa talima pugu pugu bialu aga biagoria minu yania howa gililo yalu pubagi hene. Ani buwa ibugua homelo bolene hame nale hearia dege ami agali mende nogo hosini biruwa wai biaga Terese dindiha howa ibini heagome Dosidereusunaga gi ayu tibume gandulope hayagola Gogiasa ibu pora bialu ibida Maresa dindiha puabo halu pene.

<sup>36</sup> Ainde Esediriasa haluibunaga ami agali biaru heba wai luore biai howa tinaga hongo ibira hene. Ani heago Yudasa ibu de hondowa Anduane Homogohanda ibuni ti heba ko lalu manane mbira mo walia halu ibuni Yuda ami agali heba bamba habe lalu bi lene. <sup>37</sup> Ani lalu Yudasa ibuguaibunaga ami agaliru mo hongo halu lotunaga ibagana mbira mbira tininaga bi lalu lene. Ani lalu tigua wai pora bialu Gogiasanaga ami agali biaru balu bo taliatogo lai hene.

*Yuda tigua tinaga ami agali waiha homayarunaga Ngode Datagaliwabhondo bi la henego ogo*

<sup>38</sup> Wai biai halu Yudasahandaibunaga ami agali mo mogo bialu Adulama tano pole pene. Puwa Sarere ogoninaga horo kane tagira ibulene wiagola Yuda wali agalinaga maname biaga winidadagua tini Anduane Homogonaga deni dodo nahe holenenaga biaga mana wiago bialu Sabada horonaga mana bialu hene. <sup>39</sup> Horo mendeni Yudasa haluibunaga ami agali biaru tigua tinaga ami agali waiha homayarunaga tingini tini mamaliru hora heagoha dege mandagi tininaga tanoha hora hole mo pene. <sup>40</sup> Ani mo puwa handalu hemiria homayadarunaga gi adogeha Yabane wali agalinaga bi pupu wiaga gime wabini bigiya irame wabini wiaru mo yiarua de hendene. Ngode Datagaliwabenaga mana lowini ngagoha howa mbirale bi pupu wiaga gime wabini ogoniale Yuda wali agalime yulene nawi lalu lowini. Ai agali waiha homai hayadaruni irane ogonime homayada lo panaga hondo manda biai hene. <sup>41</sup> Ani biyagonaga mini panaga handai henego tigua Anduane Homogonaga mini mo yaraga halu hene. <sup>42</sup> Ai Yuda tigua Ngode Datagaliwabhondo bi lalu tinaga ko ogonime mo wia hayadago mo wahaiore habe lalu bi lene. Yudasa ibuguaibunaga ami agali biaruhondo lamialu, Konga pani ayu dege agali homai hayago ina de handarimagonigo ai taha mana ko ngelo kemigo wahai halimu, lalu lamiai hene. <sup>43</sup> Ani laluibunaga ami agali biaruhondo muni ngidaba lowa siliba muni kuni daosini kira (2,000) mo mogo bini. Ani buwa agali loma binigo mo miaga Yarusaleme tanoha hearume tinaga mana ko ngago domolene lomabu milonaga mo pelene. Mana Yudasa ibugua binidagoni bayale tigabiore binigo irane wali agali homayaru mani lone heyulebirago manda bialu mini mbiraore hongohe wu howa ani bini. <sup>44</sup> Yudasa ibugua agali homayarunaga bi Ngode Datagaliwabhondo la henedago ibugua mini mbiraore nawi howa lenedale ogoni mana tiga nabi dege bialu kale. <sup>45</sup> Anigo ainde Yudasa ibugua agali bayale tigabi howa mana bayale bialu haga homeneru ti mani yolo bayale mulebira lo manda bu hene. Ani manda buwa Yudasa ibugua agali wai bialu homararunaga ko Ngode Datagaliwabhonda domo wahai helonaga loma wia hene.

## 13

*Menelausu homelo bo wahenego ogo*

<sup>1</sup> Mali handari mbira pira mariani dira (149) layagola Yudasa haluibunaga ami agali biaru handalu hearia Andiogusu Yubadohandaibunaga ami agali haru halu Yuda dindiha anda ibira layago hale hene. <sup>2</sup> Agali mende mini Lisiasa ibu Andiogusu ibu aba hamene gabumane agali haguane mende henego ogoni libu haru mandagi ibini. Ani bialu Girigi ami agali bu hearubi ti haru ibini. Ami agali geni piaga dewaore daosini

✧ 12:40: Man 7.25

dege handari mbira pira mbira (110,000) ibalu ami agali daosini duriani handari tebira (5,300) nogo hosini biruwa wai biaga heba ibini. Ani bialu wai biagane nogo elebana pira kirani kira (22) haru halu wai biagane garo ale nogo hosime gili lagane wiarunaga ge bibahendeni wai biagane ayu nabi nene gadeleru wabu helaga binigo handari tebira (300) bibahende ibalu bini. <sup>3</sup> Ani pialu howa Menelausu ibu ohowa ti haru mandagi wai ma lalu ti heba petingi halu Andiogusu bime ladebodebo bima pene. Ibugua anidagua binidagoni ibunaga dindi mitangi halu ibu dindinaga oha ndo ibu agali mini lene timbuni mbira loma binigo mo miaga agali haguane timbuni kago dugu waholigonaga ibu ohowa ti heba mandagi pene. <sup>4</sup> Ani pialu heagola Kini haguaneore kago Ngode Datagaliwabe ibunime Andiogusunaga miniha mo tandaga timbuni helowa Menelausuore biba helelo mo bia hene. Ani biyagola Lisiasahanda kininaga deni howa tigatiga latagi halu lalu, Genda tara tara Kini Andiogusuha tagira ibugu biyago tene Menelausu kagome ibiya, lalu latagi hene. Anidagua layagola kini ibugua lalu, Menelausu ibu homelo Beria tanoha puwa tininaga maname homelo bagane ngadagua bole pudaba, lene. <sup>5</sup> Beria tano ogoniha dabu bima irigi hene magi manda daliganaga mida pira kirani duria (25) henego dabu ogoniha ira punga be abalu dewaore wini. Dabu bima irigi hene ogoni tamuhayagi bu yulopehe hene. <sup>6</sup> Ai wali agali tano ogoniha hagarume de hondo karia mbiralime mbirale lotunaga ngaru mo ko halu mana ko mbira birane handayagua tigua dabu daliga ogoriani haru irigi howa homelo dindiha be abalu ngagoria helope haga. <sup>7</sup> Ai agali Ngode Datagaliwabenaga mana lo wini ngago pugualu haga Menelausu ibu anidagua dege homene. Ani homayagola tigua ibunaga tingini mo hora nahene. <sup>8</sup> Ibugua mana ko biaabo halu Ngode Datagaliwabenaga dabu kagoria be abalu wiago mo ko halu haabo haga henegonaga pani ogoni karulape nene. Anidagua binigome ibuni lomabu delaga dabu kagoria be abalu wiagoria homadambi hene.

*Modeini tano kawareni wai binigo ogo*

<sup>9</sup> Ai Kini Andiogusu ibu ibalu heagola ibunaga bu miniha keba holene timbuni tagira ibini. Ibugua ibu aba henego bolangua howa Yuda wali agali tandaga nolene dewaore mo mule manda bini. <sup>10</sup> Ai Kini Andiogusuhanda anidagua bule manda bu ka layago Yudasa ibu hale howa ibugua Yuda wali agali lamialu, Mbiraga horombebi Anduane Homogohondo bi hongo howa laabo halimu, lalu lamini. Waitigime ibalu horo ogoningi tinaga mana lo wini ngagobi dindibi Ngode Datagaliwabenaga anda kagobi bo gialo wahai halu mo ko hai holebiragonaga bi lahalu halimu, lalu lamini. Ibugua lalu, Ngode Datagaliwabehanda ti abale biamogo biyadagua ayubi nde biamogo bulebira. <sup>11</sup> Tinaga dindi ala mo ko hene labu dindi winigo ayu emene bayale ngago mani agali ko Anduane Homogohondo mini mbiraore nawiaga karunaga hongo andaneha pilaede holigonaga bi lalimu, lalu lamini. <sup>12</sup> Ani layago lole howa wali agali bibahendeme Yudasahanda bi layago taliai halu bini. Tigua horo tebirani howa Anduane Homogo dara holene irane nawini dara timbuni haga kagohondo bi lalu haabo hene. Tigua tomo nane dindini dengui handa dindiho paluwa Anduane Homogohondo dugu bialu hene. Ani bialu heagola mani Yudasahanda ti olo mogo buwa lamialu, Wai bule manda manda bu halimu, lalu lamini.

<sup>13</sup> Ai Yudasa ibugua agali haguane hearu baba mandagi ngoai ho biruwa tigua bi lo mbira halu lalu, Tigua ayu ogoniore heyalu wai poramagola Ngode Datagaliwabe ibunime ti biamogo biragola wai kini karia bu yalu polebirago ai kini ibu wai Yuda dindihabi Yarusalemebi anda naibidaore iname wai ala anda polene nga, lene. <sup>14</sup> Ani lalu Yudasahanda mbirale bibahendeore dindi harilabi uruniha karubi ngarubi wabiaga Ngode Datagaliwabe ibuninaga giha mo ya hai halu ainde ibunaga ami agali hearume wai hongo howa bilo tinaga miniha mo hongo hene. Ani biyagola tigua nde Ngode Datagaliwabenaga mana ngagonaga manda bialubi ibunaga anda kagonagabi



Yarusaleme tano mitangi bialubi tinaga dindi bibahende mitangi bialu tinaga mamali mana ngago mitangi bialubi homole manda buwa hongo ho hai hene. Ani howa tigua tano Modeini wiagoria puwa balai anda bini. <sup>15</sup> Ani bialu Yudasas ibugua ibunaga ami agaliru wai bilonaga hoaro lalu howa lalu, Ngode Datagaliwabehanda wai bialu waitigi bope halu wayali holebira, lene. Ani lalu mbiraga howa igiri daliahe gi nahaga hearu haru halu Yudasahanda wai mbiraga kininaga balai anda bu paleagoha anda pene. Puwa mbiraga ogoningi kininaga ami agali daosini kira (2,000) bibahende homene bai hene. Ani bialu wai biagone nogo elebana duniniore heago heba nogo ogoriani mo tiga bialu biraga heago heba homelo balu bini. <sup>16</sup> Ani bialu tinaga waitigi bibahende mo luluya hai halu mo gi hai hene. Ani bialu ai Yuda ami tigua wai bialu wayali hayagonaga turu howa gao layagola waitigi dalu wahalu pene. <sup>17</sup> Anduane Homogo ibunime Yudasas baya hanguore handaya ho howa haru heagome mbirale tigua biyago bayale dege bai hene.

*Andiogusu dauni ibugua haabo nalolene bi lo winigo ogo  
(1 Magabi 6.48-63)*

<sup>18</sup> Ai kini ibugua wai Yudame biaga wiago baya hangu hondo manda biai howa ai Yuda dindiha tano wai pabe hongohe bu mabubi wiaru bo podahana halu karulole manda buwa ohowa wai henene. <sup>19</sup> Ani manda bialu puwa Yuda tinaga wai pabeanda hongohe Bedesu tano wiagoria anda pene. Ani puwa tano ogoni mulenaga wai hongo howa bialu hene. Ani bia biyagoyu Yudame ti bo heladai bini. Ani biyagola harugo lowa wai hongo howa biadaiore bialu hearia ibu lone boga hana hai hene. <sup>20</sup> Ani biyagola Yudasas ibugua tanoha wali agali wai bialu hearunaga dabudabu maru mo pelene. <sup>21</sup> Ani biyagola Yuda ami agali mbira mini Lodogusu henegome Yudasahanda ani biya lalu waitigi hearu lamini. Ani lamiyayago Yuda wali agalime handa walia howa agali Lodogusu ibuni minalu homelo bo wahene. <sup>22</sup> Ani biagola ai kini ibugua Bedesu wali agali baba baya hangu mandagi biruwa bi lalu, Ina wai nabi baya hangu hamiya, lalu habo nalolene bi lo wialu wali agali baba gi tigani bialu kini ibu pene. Ani bialu puwa kini ibugua Yudasas wai bialu hearia Yudasahanda kini bope halu wayali hene. <sup>23</sup> Ani bialu howa kini ibu hale halu hearia agali mbira mini Pilibi Andioغو tanoha gabumane biabe damene bibahende haru howa mamage habe leago lulu tagira piya layago hale hene. Ani hale howa ai kini ibunime ago bule harube toba halu mini naibiore ona hene. Ani howa ai ibugua Yuda wali agali baba bi lalu berene. Ani biruwa Yuda wali agalime bi ibuhondo bilonaga hale hayaru e lalu ibugua, Ai Yuda wali agali tininaga mana bialu haga winidago baya hangu talialu bialu halimu, lene. Ani lowa ti baba gi tigani bialu mbira lomabu delalu bini. Ani bialu ibugua Yarusalemeni Anduane Homogonaga anda heagobi anda ogoniha mbirale wiarubi bibahendenaga mini yaraga halu bini. <sup>24</sup> Ani bialu ibugua Yudasas Magabeusu ibu andagaha haru anda pialu libu nenegeore hene. Ani bialu agali mbira mini Hegemonidese heago dabalulu ibu gabumane haru haga haguane dege mbira helowa ibugua dindi maru mini Tolemese tano howa pialu amuraore Gera tano tagira pedago haru howa handaya ho helo helene. <sup>25</sup> Ani bialu kini ibuni Tolemese tano pole pene. Wali agali dindi uruniha hearume kinihanda habo nalolene bi Yuda wali agali baba lo wiyayago manga halu mo waha lo manda bu hene. <sup>26</sup> Anigo Lisiasahanda heyu howa habo nalolene bi lo wiyago mo hongo halu bi lone la dege bini. Ibugua wali agali baba bi hendore lalu tinaga bu mini mo beregedaga bialu hene. Ani lalu wali agalime ibu baba mini mo mbiraore hai haya handala ibu Andioغو dai bini.

Te ogoni kini ibugua wai bule pialu hearia ainde wai bibe naheya handala ibuni andaga dai binigonaga ogoni hangu.



## 14

### *Alagimusuhanda Yuda mo ko howa lo guralu kinila bi lenego ogo (1 Magabi 7.1-21)*

<sup>1</sup> Mali tebira howa Yudasa halu ibunaga agali hearu ti hale hayane Selugusu igini Demidiriasahanda ibunaga ami agali hongohe dewaore haru halu iba sibini biralu puwa Tiribolisi tano wiagoria iba sibi anda ibaga iba angeni ibu nga layago hale hene. <sup>2</sup> Ai agali Demidiriasa ogonime Kini Andiogusu homelo bo wahalu ibu aba hamene Lisiasabi bo wahalu ibunime gabumane haru halu handaya ho hene.

<sup>3</sup> Horo ogoningi agali mbira mini Alagimusu hene. Ala ibu agali loma binigo mo miaga haguane timbuni henego mani howa wai biyangi howa ibunaga mamali mana wiaru wahai ho hene. Ibu mitangi bu handalu Yuda wali agalime ibu pani ngulubada lo manda bialu gi ho howabi ibu loma binigo mo miaga agali haguane timbuni howa biabe bialu haga wiagobi lone ibuni mo yu dai buwa bialu habe nahe wiago manda bu hene. <sup>4</sup> Ani manda bu howa mali handari mbira pira duriani mbira (151) layagola Alagimusuhanda Kini Demidiriasa hondo pene. Ani puwa ogoningi ibugua manda mbira ngolome wabinibi ayage yunibi ira olibe maganebi Yuda wali agali tigua Anduane Homogonaga andaha bu yalu piaga mana winidagua yalu puwa kinihondo mini. Ani puwa ibunaga mini wiago kinihondo latagi nahe dege hene. <sup>5</sup> Mani howa Kini Demidiriasahanda ibu agali ganisolo hearu baba mandagi bi midini mbira lolene wiagola ibu heba lamiya ibu lene. Ani ibu lowa lalu, Yuda wali agalime mbirale mbira agi bule hamelo kabe, lalu hale hene. Ani hale hayagola Alagimusuhanda ibuha lulu mini wu hene ngelo heago latagi hene.

Ibugua lalu, <sup>6</sup> Yudasa Magabeusu ibugua Yuda hameigini aria maru ti mini Hasidi laga hearu haru halu ibuni mo haguane ko ka. Bibahendengi agali uruni tigua wali agalime wai bialu haabo helonaga tinaga bu miniha mo heya haabo haragome dindi mo bayale ngelonaga hondo ha nabiaga ka. <sup>7</sup> Tigua inaga biabe timbuni i abahanda ini giha mo ya halu homene yu hewago mo wahalu biya. Ayu i oali ibirudagoni <sup>8</sup> irane i mbirale bibahende kininaga ngago damene mitangi howa ibini. Ani bialu inaga wali agali bu karunaga genda yalu ibini. Agali ko o mini laruruninaga lulu mana bialu heagome i dindiha genda timbuniore mo yu anda ibiya. <sup>9</sup> Kini-o ina dara holene irane nawini howa wali agali bibahende dara hai halu ti heba miniha dungulo haga kegoni. Ina mbirale bibahende baya hangu dabo handai howa nde i daluha dindi ngago bayale helo biamogo bulene mitangi bialu inaga wali agali genda yu karu biamogo bulene mitangi bibe. <sup>10</sup> Agali Yudasa ogoni homa nabi haabo hayagua inaga dindiha wali agali bayale holene nawulubada, lene.

### *Demidiriasa ibugua Nigano Yudasala wai bule pelo pu lenego ogo*

<sup>11</sup> Alagimusuhanda bi lai hayagola abaleore Yudasa waitigi agali mini Kininaga Nenege laga hearume bi laga laga bialu Kini Demidiriasa mo tandagore hene. <sup>12</sup> Anidagua biyagola Kini Demidiriasa ibugua heyalu abaleore agali ami haguane mbira nogo elebana handaya ho haga heago dabalulu Yuda dindiha gabumane haguane howa haru hole pu lene. <sup>13</sup> Ibugua Yudasa homelo bo waholenebi agali Yudasa baba mandagi ibaga bu haga hearu bo taliatogo lolenebi. Alagimusu Anduane Homogonaga anda kagonaga biabe bialu helo loma binigo mo miaga agali haguane timbunibi helo dabo helalimu laga bialu bi lamiai hene. <sup>14</sup> Wali agali maru Anduane Homogohondo mini mbiraore nawiaga Yudiaha haga heneru ti Yudasa gi halu ibida pugupugu biniru ogoningi Niganola ho mbiraore hene. Tigua lo manda bialu Yuda dindi mo ko holene anda ibirangi tini mo ko nahe bayale holebirama lo manda bu hene.

<sup>15</sup> Yuda ti hale ho hearia Nigano heba agali Anduane Homogohondo mini mbiraore nawiaga hearu Yuda ti baba wai bule ibira layago hale hene. Hale howa Yuda tigua

be abalu tinaga haguane dugu wini. Ani buwa tigua Anduane Homogo ibu Yuda wali agali ti ibuninagaore haabo helo dababagi ho helene howa bibahendengi biamogo hongo howa biaabo hagabi kagohondo bi lalu hene. <sup>16</sup> Ani bialu tinaga agali haguane Yudasahanda bidaba layadagua bialu abale heyalu puwa tinaga waitigi dindi emene mbira mini Adasa wiagoria ngola hole pene. <sup>17</sup> Ani bialu ai Saimono ibu Yudasa hamene howa ibugua Niganola wai bini. Ani bialu heagola waitigi biarume abale ibalu wai biyagola ti emene bope hene. <sup>18</sup> Ai Nigano ibu hale halu hearia Yudasa halu ibunaga agali bu hearu ti gi nahe elaheore howa tinaga dindinaga wai hongo howa biaga ka layago hale howa Nigano ibu wai bulene hame nale hene. Ani howa tigua wai wahalu bi lalu mo palia hole hame lene. <sup>19</sup> Ani manda bialu ibugua agali maru bi lo tiga bilo Posidoniusubi Teododusubi Madadaiasabi dabalumu, Yuda wali agali baba bi lo tiga bule pudaba, lene.

<sup>20</sup> Ani laya handala puwa agali haguane kirabaliha howa ibalu bi lo tiga bule luore lalu hene. Ani lalu howa mani agali haguane mbirame ibunaga ami agali hearuhondo lalu, Ayu iname bi lalu inanaga waitigi bu karu baba mandagi mini mo mbiraore ho haminyanaga bi lole mo ngoai ho kemagonida, lene. <sup>21</sup> Ani lalu agali haguane biaru tigua mitini lone lone horo pongo wini. Agali haguane kirabaliha howa wai biagane garo ale mini karisi nogo hosime gili laga mbira mbira lowa biragane dagia kirawi yalu ibini. <sup>22</sup> Ani bialu ha howa dege Yudasahanda ibunaga ami agali dindi bibahendeha waitigime ohowa wai biyagua biadai bule manda manda bu hai helene. Ani heagola agali haguane kirabaliha howa bi bayale dege lai hene. <sup>23</sup> Ani lalu Nigano ibu luore Yarusalemeni biruwa ibugua mbirale mbira biako nahe bayale hene. Ani bialu agali tara tara Nigano heba ibu hene bu hearu tihondo lalu, Wahalu tina dalu pugu pugu bidaba, lene. <sup>24</sup> Ai Nigano ibu Yudasa gubalini timbuni ho howa ibu Yudasala mandagi haabo hene. <sup>25</sup> Ani howa Niganohanda Yudasahondo bi bayale lamialu, Ai Yudasa wali dau bialu waneigini hono wulene nga, lalu lamigi bini. Ani layago hale howa Yudasa ibu wali dau bialu waneiginiru hono wialu agali maru bu hearubi dege hene.

### *Niganohanda Yudasala lone waitigi henego ogo*

<sup>26</sup> Agali loma binigo mo miaga haguane timbuni Alagimusu ibugua handalu hearia agali kirali Nigano Yudasala mo nenegeho heago hondowa ibugua libunaga habo nalolene bi lo wibigo mo yalu Demidiriasa hearia puwa ibugua kini berearia puwa lamialu lalu, Nigano ibugua gabumane mo guya hole hariga taya bialu ka. Ani bialu ibugua agali waitigi gibiore heago Kininaga Nenege dabo heleda, lalu kini lamini. <sup>27</sup> Bi ke howa mege bialu layadagome kini mo tandaga timbuniore hayagola ibugua Niganonaga beba mbira gilibu wia hene. Ibugua lo wia halu lalu, Habo nalolene bi Yudasala lo wiriyago turu naheore ko. Ai agali Yudasa Magabeusu ogoni minu garabaya bu yalu Andiogo ibabe, lene.

<sup>28</sup> Ai beba gilibu wia hayago Nigano hearia anda piyagola Nigano mogolo hendenego irane ibugua agali ko mbira nabi kego baba habo nalolene bi lo wiyago mo habo lolene hame nale hene. <sup>29</sup> Ani howa ainde ibugua kininaga bi ledago mo waholene nawigo manda buwa ainde Yudasa mo ohowa mini ede hole hariga taya bialu hene. <sup>30</sup> Ani bialu heago Yudasa ibu de hondowa ainde Niganohanda Yudasa ibu baba mini mbiraore nahebi ibu baba nenegeme bi lo hagamaga nahebi heago de hondo hene. Ani hondo howa ainde agali ogonime ibu mo ko hole kagonida lo manda bu hene. Anidagua bule heagola Yudasahanda ibunaga ami agali dewaore haru halu mbirahayagi hado hole pene.

<sup>31</sup> Ai Nigano ibu handalu hearia Yudasahanda ibu mo hondo heneya handala ibu heyalu abale Anduane Homogo andaga agali loma binigo mo miaga hearu tigua lomabu mialu hearia anda pene. Anda puwa ibugua agali urunihondo lamialu, Yudasa abaleore

ibu minu ngilimu, lalu lamini. ✧ <sup>32</sup> Ani layagola agali uruni tigua ladai bialu, Heneneore Yudasa ibu agoha ha do kabe ina manda nabidama, lene. <sup>33</sup> Ai Niganohanda Anduane Homogonaga anda heago ibunaga gi tigame gi dola amu halu ibugua mbira buleore lowa hongo howa lalu, Tigua Yudasa minu yalu ibuwa inaga giha ya naharimiyagua ina anda o kago bo gialo wahai halu ibu kategoria mbirale mbira nawi dindi hangu wulebira. Tinaga lomabu delaga dabu bu heledemigo ina bo gialo wahalu inanaga bi pupu wiaga bigiya tara mbira mini Dionisusu ngagonaga anda baya tara mbira bu aribia ho helolebero, lene. <sup>34</sup> Ibugua bi ogoni lai halu ibuni andaga dai bini. Anidagua lalu piyagola agali loma binigo mo miaga hearume tinaga gi dahuliya andagaha dogoladaga howa Ngode Datagaliwabe ibu tinaga dindi ngago baya hanguore haru howa handaya ho haabo haga kagohondo bi lalu hene. Tigua lalu, <sup>35</sup> Anduane Homogo inha mbirale mbira tubagi nahaga ke. Anigo ini ina baba mandagiore holenaga inaga anda mbira ini dalu ngategoria bu helari. <sup>36</sup> Anduane Homogo i hangu baya tigabiore ke. Ainde ina anda ogo ayuore dege iname ina deni dodo nahe helonaga mo loma bia ho helarimago baya hangu handaya ho habe, lalu Anduane Homogohondo bi lene.

*Lasisi ibunaga dindi biamogo bialu homenego ogo*

<sup>37</sup> Agali mbira mini Lasisi ibu ganisolo Yarusalemeha henegonaga te ogo. Tigua ibu Nigano deni ibu helowa godi hale hene. Lasisi ibu agali bayale tigabiore mbira howa ibugua mana tara tara biyagome ibunaga wali agali baya hangu biamogo bialu haga heagola tigua ibunaga mini yaraga halu ibu Yuda wali agali aba ka laga hene. <sup>38</sup> Yuda ti baba wai nabi heaore dege Lasisi homenego irane ibugua Yuda wali agalinaga lotu mana wiadagua baya hangu taluwa bialu hearia homene. Ibugua homolene gi nahe howa lotunaga mana baya hanguore talialu bule kaware haabo hene. <sup>39</sup> Nigano ibugua ibu Yuda wali agali baba waitigiore ko lalu biyagome walia haga bini. Ani bialu howa ibugua ami agali dewaoreme Lasisi minu pelo pelene. Ami agali dewaore handari duria (500) agima bolangua howa pene. <sup>40</sup> Nigano ibu lo manda bu handalu hearia ibugua, Agali hongohe Lasisi ale bu karu minu garabaya biruyagua Yuda wali agali bibahendeme gi hai holebira, lo manda buwa ani bini. <sup>41</sup> Ai ami agali biarume puwa wai pabeanda hongohe heagoha Lasisi ha do heagola tigua wai hongo howa bialu hene. Ani bialu howa tigua wai pabe hongohe heago gialolenaga ira hedo yalu ibidaba lowa hongo howa olalu hene. Ainde Lasisi ibugua handalu hearia ami agali biarume ibu talialu ho mabu biai hearia hondowa ibunaga wai biaga ayu tibu yiagome ibuni homolenaga nogoba hene. <sup>42</sup> Ibugua mitangi bialu ami agali Anduane Homogo mitangi nahaga bu karume ibu mo taga holigo ai ibunaga mini bayale mini yaraga hene ngago ngaore homarayagua karulapeda lo manda bialu anidagua bini.

<sup>43</sup> Anidagua bialu hearia ibugua abale ala bigi bialu hearia ibuni dibayadagoha diba puda hearia homa nabini. Ani howa handalu hearia ami agali biaru wai pabe panga dugualu abale anda ibai hayago handalu Lasisi ibu dai lalu wai pabe nene wiagoria pole pene. Puwa unu dindiha wali agali bu heagoha porabupe hene. Ani bulene gi naheore howa pora bini. <sup>44</sup> Ani pora biyagola wali agali ti hamigi migi biyagola henge wiagoria ibira hene. <sup>45</sup> Ani biyagola ibu homa tongolo mia nabi dege buhe wiaabo howa ai lone heyalu darama timbu dibini wiagoha piago pialu helowa gerai lalu wali agali bu heagoha pene. <sup>46</sup> Ani puwa ege tole timbuni mbira wiagoria porabu paga hene. Ani biyagola nde ibunaga darama pu dege bialu pu maro bini. Ani biyagola ibuni gi kirabalime hongo howa ibuninaga tini tombene bibahende minu duguai howa wali agali heagoha ba pelene. Ani bialu ibugua Anduane Homogo buhe lolenebi holenebi miaga kagohondo olowa lalu, Inaga buhe lolenebi holenebi lone ngiadai bibe, lalu bi lene. Ainde agali bayale Lasisi ibu ogodagua homene lalu te ogoni hangu.

## 15

*Nigano ibu mini ko wu henego ogo*

<sup>1</sup> Yudasa halu ibunaga agali biaru Samaria dindihayagi ka layago Nigano ibu hale hene. Ani hale howa ai Nigano ibugua wai hanalu Yudasa halu ibunaga agalirume Sabadani wai biadai nabulubada lo manda buwa ibugua Sabada horoni wai bu pole manda bini. <sup>2</sup> Ani pole manda bu ha hearia dege Yuda agali maru Nigano heba hearume ibuhondo lamialu lalu, Agali lu mini nawime biagadagua wali agali homelo Sabada horongi wai nabulebere. Horo Ngode Datagaliwabehanda mbirale bibahende karubi ngarubi handai haga kago ibugua mbirale ibunaga ngelo dabaluhandaya ho haga kago ibunaga deni mana bayale hangubialu holene nga. <sup>3</sup> Ani bialu agali ko dama Heyolabe igini ogoni ibugua tihondo hale lalu, Agali haguane mbira hari daligaha howa ogoni ibugua inahondo Sabada horo dabo ngelalimu lene ngabe, lalu tihondo hale hene. <sup>4</sup> Ani layagola tigua ladai bialu lalu, E Anduane Homogo ibu holenehe yu howa mbirale bibahende karubi ngarubi haru hai haga kago ibugua inahondo langialu Sabada horo ogoni talialu halimu, lene.

<sup>5</sup> Ani layagola Niganohanda lalu, I hangu daliga howa dindi ogo ina handaya ho howa ina tihondo langialu tinaga wai biaganeale ngemiru mo yai halu kininaga biabe bule pudabalaru, lene. Anigo ibugua ibuninaga hame ko wiyadago talialu habe nahe hene.

*Yudasahanda ibunaga ami agaliru ti wai bule manda manda bu hadaba lalu laminigo ogo*

<sup>6</sup> Nigano ibuninaga mine halu biaga tingi hayagome ibugua lo mitangi bialu, Ina Yuda baba wai buwa Yuda ami karu bope halu tinaga dabudabu ngaru bibahende ibu mo yai halu puwa ege tole timbuni mbira ibugua wai bialu wayali henego mitangi biaabo holenaga hama dombeni hongole manda bini. <sup>7</sup> Ani bialu heago helowa Yudasa Magabeusu ibu mogo nale hene. Anduane Homogohanda ibu biamogo bulubada lo manda bu hene. <sup>8</sup> Ani howa ibugua ibunaga ami agali biarunaga bu miniha mo hongo ho howa lalu, Agali Anduane Homogo yu tiga nabiaga ina baba wai bule ibiragohondogi nahalimu. Ngode Datagaliwabehanda ina biamogo biaabo haga kago mitangi biadai bulene nga. Ani bialu ayubi nde Ngode Datagaliwabe Bibahende Hongo Haiheore kago ibunime ina biamogo bialu kagola iname wai bialu bo podahana holeberema lo manda bialu ibuhondo mini mbiraore hongohe wu holene nga, lalu lamini. <sup>9</sup> Ani bialu Yudasa ibugua ibunaga ami agali biaru bi bayale mana mbugaha howa lo wini wiarumebi agali maru Anduane Homogonaga bi latagi halu mbiwia haga henerunaga bi lo wini wiaru tinaga buminiha hongo ho helo mo hongo lalu hene. Ibugua tihondo lamialu lalu, Wai bialu ti wayali haga wirimigo baya hangumitangi bilimu, lene. Ibugua bi ogonidagua laga biyadagome ti wai hongo howa bilonaga mo hongo lalu laga bini. <sup>10</sup> Ani lai hayagola ibunaga ami agali biarume wai bule manda manda bu hene. Ibugua ti lamialu, Agali Ngode Datagaliwabe kagohondo mini mbiraore nawiaga howa bi henene lo wini ngago mo habo lalu mo hondo lalu ohaga bu kago baya hangude hondo halimu, lene. <sup>11</sup> Yudasahanda ibunaga ami agaliru mo hongo lalu danda timu humbiru mo mini ndo. Ibugua tihondo mo hongo lalu bi bayaleru dege lamialu mo hongo hene. Ani bialu emaga mbira Yudasa ibugua hendene tihondo lamialu bini. Agali bibahende emaga bini te layago hale howa henene layabe toba ho hai hene.

<sup>12</sup> Yudasa ibugua emaga handayadagoha agali loma binigo mo miaga haguane timbuni mini Oniasa bamba halu homenego ogoni hearia hendene.\* Agali Oniasa ogoni ibu bayale tigabiore howa ibuni mo dindiha ho howa hendore dege bulene ngago bialu haga hene. Ani bialu agali bi lagane gibiore mbira hene. Bamba igiri emeneni howa ibu mana bayale tigabi bulene ngaru hangubulenenaga sigulu bialu hene. Ani bini

\* 15:12: Oniasa ogoni ibu ala henego ibunaga te 2 Magabi 3.1-4.38 ogoniha gilibu nga.)



henego ai Yudasa ibugua emagaha handalu hearia Oniasahanda ibunaga gi doladaga howa Yuda wali agali bibahendenaga bi la halu hearia hendene. <sup>13</sup> Ani hondo heagola agali mende ha pana howa Oniasahanda bi layadagua dege lalu hearia hendene. Agali ogoni ibu waheoreni daguaheyago agali mini lene howa hongo tara yi heago hendene. <sup>14</sup> Ai Oniasahanda lalu, Agali ogoni ibu Ngode Datagaliwabenagabi mana latagi halu mbiwia haga ibu mini Yaremaia ka. Ibugua ibunaga wali agali Ngode Datagaliwabe ibuninaga tano Yarusalemeha bu karu gubalini timbuni ho haga ka laya, lene.

<sup>15</sup> Ani hondo hewagola Yaremaia ibunaga gi tigahayagi ayu tibu nene gadele wai biagane baya tara ngolome wabini wiago yu hearia handaru. Ayu tibu ogoni Yudasa mialu <sup>16</sup> ibugua lalu, Wai biagane ayu tibu ogo yamia. Ayu tibu ogoni baya buruguleore loma biahego Ngode Datagaliwabe ibunime í bameore mo turu halu ngrirago ogonime ínaga waitigi bo wahai habelo biamogo bulebira, laya lene.

<sup>17</sup> Ani layagola Yudasahanda bi bayale ogonime ami agali bu hearunaga bu miniha mo kula halu mo heya hai hene. Igiri daliahe hearu ti agali wahe hearuha howa hongo mini. Ani howa heyalu wai pora bima lalu bi lo mbira hai howa waitigi baba wai bule pene. Ami agali mbirame mo ta halu tinaga waitigi mbira mbira headagua wai biaho wialu wai bu maro bini. Tigua ogonidagua bulene wai henedagoni irane tinaga waitigime tinaga tano bo gialahole bu wahai halu tinaga lotu manabi Anduane Homogonaga andabi bibahende bo haealabaga biai halu mo ko hole ibiragola tigua wai ogoninaga pene. <sup>18</sup> Yuda ami agali uruni tigua ti onebi waneiginibi ti damenebi bibahende mo embeda hai halu Ngode Datagaliwabenaga anda kago mitangi halu wai pene. <sup>19</sup> Wali agali Yarusaleme tanoha hondo hearu tigua dindi tigabi wiagoria wai biyagola gi timbuni howa mini burugu lalu genda yu hai hene.

### *Nigano wai bialu howa homenego ogo*

<sup>20</sup> Wali agali tigua ai ibugua bo podahana harabe toba howa gi halu mini burugu lo hene. Ani hondo heagola waitigi ami ti ibalu wai bule amuna tidiyu hene. Nogo hosi wai biagame lene labolaboha heagola nogo elebana wai biaga hearume dombeneha hene. <sup>21</sup> Ainde waitigi ami agali iba ale timbuni íbu hearubi wai biagane masini tara tara yiarubi nogo elebana gabua haru hearubi bibahende Yudasa ibu de hondo hene. Ani hondowa ibugua gi yaraga halu Anduane Homogo ibuni mbirale agalime nabigane ale biai haga kagohondo bi lene. Anduane Homogonaga minini howa wai pora birago ibu pari wayali halu danda timuru hongoni howa wai birago ibu wayali nahaga ngago ti manda bini. <sup>22</sup> Ani manda buwa Yudasahanda Anduane Homogohondo bi lene. Ibugua lalu, Anduane Homogo-o ainde Hesegeaia ibu Yudanaga kini heangi ínime dahuliyali mbira ibilarigola ibugua Kini Senageribinaga ami agali daosini dege handari mbira pira halirani duria (185,000) bibahende homelo bo wahai hene. <sup>23</sup> Ainde Anduane Homogo-o ayubi nde ina waitigi karume de handalu mogo lowa duru lalu helo ínaga dahuliyali mbira ina haru halu bamba helo ibilabe. <sup>24</sup> Íninaga hongo gibiore kegome waitigi agali ínihondo bi ko ngubiru lalu oali ibuwa ínaga wali agali bu karu bo wahai hole karuni bo hilo wahaiore habe, lene. Yudasahanda Anduane Homogohondo bi lenego ogoni.

<sup>25</sup> Nigano halu ibunaga ami agali biarume wai porabupe halu howa pilipe biguli pu lalu wainaga iba gana laga laga bini. <sup>26</sup> Anigo Yudasa halu ibunaga ami agali biarume wai pora bialu waitigi ngola hole pialu howa tigua Anduane Homogo olalu ibunihondo bi lama pene. <sup>27</sup> Tinaga bu miniha howa Anduane Homogohondo bi lalu tinaga gime wai bialu hene. Anidagua bialu Yuda tigua waitigi agali daosini dege pira tebirani duria (35,000) bibahende horo ogoningi homelo bo wahai hene. Anidagua buwa Ngode Datagaliwabehanda ti biamogo biyagonaga tigua turu timbuni hene. <sup>28</sup> Wai biai howa ti turu timbuni hene. Ani bialu andaga dai bialu howa handalu hemiria Nigano homo



tungulo miniyago ibunaga wai pole mo karu laganealeru karulaabore wiaria handa walia hene. Ani handa walia howa <sup>29</sup> tigua huario laga laga bialu tininaga bi lalu Anduane Homogonaga mini mo yaraga hene.

<sup>30</sup> Yudasa Magabeusuhanda ibunaga wali agali biamogo bialu mo wulenaga wai bialu howa horo bibahendengi ibunaga mini dininibi tinginibi heba howa wai biaga hene. Yudasa ibu wene igiri emeneni howa hama ibinidagoha howa ibuore ibunaga dindi gubalini ho kago mo walia ho haga hene. Ai Yudasa ogoni ibugua ibunaga ami agali hearuhondo lamialu, Niganonaga gi tigabi haguanebi pugu yalu Yarusaleme pudaba, lene. <sup>31</sup> Ani lalu tigua ani pugu yalu Yarusaleme tano anda puwa ibugua wali agali bibahendeore ibu ngoai hadaba lowa agali loma binigo mo miaga hearu ti Anduane Homogonaga lomabu delaga dabu heago wanakuihayagi hadaba lene. Ani bialu ami agali wai pabeanda hongohe heagoha haga hearubi olalu ibu ngoai hadaba lene. <sup>32</sup> Ani layagola tigua ibu ngoai howa agali ko Niganonaga haguane pugu yu ibu wiago de handalu gi ko Anduane Homogo Bibahende Hongo Haiheore kagonaga anda ogo bo giallo wahai hole lo gi dola haga biago wiaria de hendene. <sup>33</sup> Ai Yudasa ibugua lalu Niganonaga hége minu duguwa ega bedarume nelo mialu gi biagola haguanela wai pabe neneneni amu Anduane Homogonaga anda kagoha handa daibu wilo mo paga hadaba layagola tigua anidagua ngelene. Niganohanda mine howa mana lehe bialu hayagonaga pani nenego te ogoni hangu. <sup>34</sup> Wali agali bibahendeme hongo howa hoaro ladaga daga bialu Anduane Homogohanda ibunaga hongo timbuni wiago tihondo mo walia hayagonaga tigua ibunaga mini yaraga halu lalu, Ngode Datagaliwabehanda ibunaga dindi ibunaga loma bia hene ngago ibunime baya hangu handaya ho hayagonaga iname ibunaga mini yaraga hama. Ibunaga anda ilili biagaore wiabagi hene wiago waitigi agalirume ibalu bo giallo wahai helo yupe nahaga ka, lalu hene. <sup>35</sup> Wali agali bibahendeme Anduane Homogohanda ti biamogo biyadago de handai helonaga Yudasahanda Niganonaga haguane biago wai pabeanda kago anda háini mo derela hene. <sup>36</sup> Ai wali agalime bi lo mbira halu lalu, Mali mbira mbirani howa iname horo timbuni ogoni mitangi biaabo hamiya. Horo ogoni ege hombenenaga (12) horo halene (13). Tinaga bi lalu ege mini Adu laga nga. Horo ogoni horo Modegainaga horo biago mani dege ibule ngelowa ogoni ibu ala mo bamba ho ngelene.†☆

<sup>37</sup> Ai Niganonaga binigo te ogoni hangu. Ogoni howa Yuda tinime Yarusaleme handaya ho henego hama ibalu ayu kemagonigo ainde ina te ogoria howa haru lalu lamaro bero. <sup>38</sup> Ina bite ogoni baya hangu gilibu ngogola te wáleni bayale dendene heyagua nde ini turu ko. Ai te ogoni wá naleyagua nde te nagalone dewa wiagua ina ogodagua laro. Gilibu manda dege biru laro. <sup>39</sup> Ainde waini iba hangubi iba henene mendego hangu nolene bayale dende bi ndo ngago ina manda biai kema. Dende bilonaga waini iba henene mo biamaga haramagola dende biaga ndobe. Anidagua dege te tara tara ngaru heba mo biamaga howa gili beremagola daga laga kagonaga te bayaleore hale hoabi hale holebira. Inaga bi lamaro ogoni.

† 15:36: Yudanaga ege mini Adu ogoni inanaga ege mende tebonela hengeneha ibaga nga. Modegainaga horo timbuni ledagoni Yuda wali agali horo timbuni mini Purimi lagane ngago leda. Te Eseda 9.20-32 ngago hondolene nga. ☆ 15:36: 1 Mag 7.49

## **Madiu**

### **Madiuhanda Bi Mana Debene gili binigo ogo**

### **Mbuga ogoha gilibu ngarunaga nemandi ogo**

Bi Mana Debene Madiunaga mbugani gilibu wini ngago ha ogodagua leda. Habo Nalolene Bi Bamba lo wini ngagoria Ngode Datagaliwabehanda, Bulebero, lalubi, Ngulebero, lalubi lo wini ngago Yasuha howa lola hai hene. Yasu ibu Yu wali agali hangu pele mule ndo wali agali ta nabi bibahende pele ngule ibini.

Madiunaga mbugani bi gilibu ngagome pigane tenialu Merihanda Yasu taba henene-gobi Yonehanda Yasu baboraya bia henegobi dama Heyolabeme Yasu ba hendene-gobi gilibu nga. Yasuhanda Galilini howa bi mana lawai haga bima penegobi wali agali warago bo wiaru mo dabi haga bima penegobi gilibu nga. Yasu ibu Galili dindi yu wahalu ibaga bialu pialu Yarusaleme anda penegobi Sarere mbirani bialu henegobi ibu homo aribia hayagola Ngode Datagaliwabehanda ibu mo heya henegobi uruni gilibu nga. Bi Mana Debene ogonime Yasu ibu lawai haga timbuniore henego ka walia ho nga. Yasuhanda Ngode Datagali wabe Bi Mana lowini ngago, Galone ogobi nga, lalubi Ngode Datagaliwabehanda Handame Ho Kagoria, Ogobi nga, lalubi hongo howa mo walia haga hene. Yasuhanda mana lawai henego Madiuhanda galone duria mo mogo bialu gilibu winigo uru.

Mbira

Yasuhanda dindi hari weagoria iraga ho biruwa wali agali Ngode Datagaliwabehanda Handame Ho Kagoria ho tene karu tinaga mini bayale wu holenebi biabe bulenebi bayale damenego karulolenebi mani Ngode Datagali wabe heba holenebi uruni-nga lawai halu hene. Be 5-7

Mende

Yasu ibunaga talima piaga heneru ti biabe bule purogo lelo Yasuhanda tihondo, Ogodagua bilimu, lalu lo nga. Be 10

Tebone

Yasuhanda, Ngode Datagaliwabehanda Handame Ho Kagoria ogobi nga, lalu bi yobage dewa lalu hene. Be 13

Mane

Yasu talima henemane piaga karu ogobi holene nga, lalu lene. Be 18

Dauni

Yasuhanda horo ha maro bialu bulenebi Ngode Datagaliwabehanda Handame Ho Kagoria anda polenebi te lalu lo nga. Be 24-25

### **Bulu бага бува кuni gilibu ngago**

1.1-2.23

Yasu Kerisonaga mamali hama ibiniru dabane ogodagua hama ibini lalubi ibu taba henene-gobi ngago 3.1-12

Baboraya biaga Yonehanda mana lawai halu henego 3.13-4.11

Yonehanda Yasu baboraya bia hayagola dama Heyolabeme Yasu bahendene-gobi 4.12-18.35

Yasuhanda Galilini howa biabe tara tara bialu henego 19.1-20.34

Yasu ibu Galili howa Yarusaleme penego 21.1-27.66

Sarere mbirani Yasuhanda Yarusalemehayagi howa bialu henego 28.1-20

Yasu homowa ibuni heyu howa ha pani haga binigo

*Yasu Keriso mamali hama ibiniru uru  
(Lugu 3.23-28)*

<sup>1</sup> Mini gilibu ngaruni Yasu Keriso mamali hama ibinirunaga nga. Debidi ibu Abarahama aguanene henego Yasu Keriso ibubi Debidi aguanene hene.✠

<sup>2-5</sup> Abarahama heneyangi howa handame haga kini maha Debidi henego dombeneha mamali heneru mini bimaga howa gilibu ngaru uru. Abarahama Aisaga Yagaba Yuda ibu hamenemabi hama ibini. Ti howa Perese Serala libu aiya Tama berenego Hesperono Lama Aminadaba Nasono Salomono Lahaba igini Boasa Obede Yasi Kini Debidi imaru uruni ti hama ibini.✠

<sup>6-11</sup> Debidi henego howa Isaraele wali agaliru Babilono dindini garabaya buwa ti uruni haru penego ogoningsi mamali heneru bimaga howa mini gilibu ngaru uru. Debidi Solomono ibu aiya Yuraia one ala berenego Lehoboama Abaya Asa Yihosabada Yihorama Usia Yodama Ahasa Hesegaia Manase Amono Yosaiia Yahoiajini ibu hameneru uruni ti hama ibini.✠✠✠

<sup>12-16</sup> Isaraele wali agaliru Babilono dindini garabaya buwa ti haru penego howa Yasu taba heneningsi mamali heneru lamaga howa tinaga mini gilibu ngaru uru. Yahoiajini Seadeli Serubabele Abiudu Eliagimu Asoro Sadogo Agimu Eliudu Eleasa Madana Yagaba Yosebe ibugua Yasu aiya Meri dabu binigo Yasu ibu Mbirali Dabo Helenego ibulebira lowinigonaga mini winigo uruni tibi hama ibini.✠

<sup>17</sup> Mini uruni Abarahama henego howa Debidi henego lamaga howa de daba hene. Debidi howa Isaraele wali agaliru Babilono dindini garabaya buwa ti haru penego howa lamaga howa de daba hene. Ogoningsi howa Mbirali Dabo Helenego ibulebira lowinigo ibu ibinigo howa lamaga halu de daba dege hene.

### *Merihanda Yasu Keriso taba henenego ogo*

*(Lugu 2.1-7)*

<sup>18</sup> Yasu Keriso ibu taba heneningsi ogodagua bini. Ibu aiya Meri Yosebe lawini biruwa Yosebehanda ibu dabu nabi berearia Ngode Datagali wabe Dinini ibugua gali wia hayago handa waliala ho berene.✠ <sup>19</sup> Yosebe ibu agali tigabi howa ibugua wali agali hearume Meri mo taga nahelo ibu ohowa Meri wahole lo manda bu hene.✠ <sup>20</sup> Ani manda bu hearia ibu emaga handalu hearia Anduane Homogonaga dahuliyali mbira ha pani howa Yosebehondo bi lalu, Debidi aguanene Yosebe-o ina Meri i one berelo dabu bulegi nahabe. Gali ibuha bedago Ngode Datagali wabe Dinini ibugua wia haya. Ibugua igiri mbira taba honolebira. <sup>21</sup> Maha igiri ogoni ibugua wali agali bibahendeme ko biyarunaga pele mialu domo wahai holebirago taba hanarangi ina ibu mini Yasu wibe, lalu lamini.✠

<sup>22</sup> Ani biyagola ala Anduane Homogohanda ibunaga bi mana latagi haga mbira heagoha howa mbiwia henego lola hai hene. <sup>23</sup> Mbiwia henego ogo, Wandari mabuage mbirame agali nape berenego gali bere biruwa igiri taba honolebira. Igiri ogoni ibu mini Emanuele wulebira, lalu gilibu nga. Emanuele inanaga bi lalu, Ngode Datagali wabe ina heba kagoni.✠

<sup>24</sup> Anduane Homogo ibunaga dahuliyalime bi layadagua Yosebe de ngala halu puwa ibugua Meri dabu bini. <sup>25</sup> Dabu biyagola Merihanda igiri gali taba nahene howa ibu Yosebela mandagi nahe berene. Igiri taba hanayagola Yosebehanda igiri ogoni mini Yasu wini.✠

## 2

### *Dindi kaundia ni tagira ibiragohayagi howa agali ibiniru ogo*

<sup>1</sup> Herodo ibu kini heangi Yuda dindiha tano mbira mini Bedelehemeni Merihanda Yasu taba henene. Taba hanayangi howa agali maru yakundi handagane mana

✠ **1:1:** Pig 22.18, 1 Bit 17.11 ✠ **1:2-5:** Pig 38.29-30, Lud 4.18-22 ✠ **1:6-11:** 2 Sml 12.24 ✠ **1:6-11:** 1 Bit 3.10-16  
 ✠ **1:6-11:** 2 Kin 24.14-15, 1 Bit 3.15, 2 Bit 36.10, Yar 27.20 ✠ **1:12-16:** Esr 3.2 ✠ **1:18:** Lg 1.27, 1.35 ✠ **1:19:**  
 Man 24.1 ✠ **1:21:** Lg 1.31, 2.21, Ab 4.12, 13.23, 13.38 ✠ **1:23:** Ais 7.14 ✠ **1:25:** Lg 2.7, 2.21

mandabi hearu ti dindi kaundia ni tagira ibiragohayagi howa ibalu Yarusalemeni anda ibini. <sup>2</sup> Ibuwa tigua, Yu wali agalinaga handame haga kini hole igiri gali taba hanayuago ibu agoha kabe. Ibunaga yakundime ni tagira ibiragohayagi howa darali hayagola de handarimago hondowa iname ibu mini yaraga hole ibirima, lalu lamini.\*

<sup>3</sup> Ani lamiyago hale howa Kini Herodo ibu mini burugulo hene. Wali agali bibahende Yarusalemeni hearumebi anidagua dege bu hene. <sup>4</sup> Ani howa Herodo ibugua loma binigo mo miaga haguane hearubi Mana lowinigo lawai haga hearubi mo ngoai howa ti mo bila lalu, Mbirali Dabo Helenego ibulebira lowinigo ibu dindi agoha taba honolebirabe, lalu lamini.

<sup>5</sup> Ani layagola tigua ladai bialu lalu, Yuda dindiha tano mbira mini Bedeleheme ogoriani ibu holebira. Ngode Datagaliwabe mana latagi haga mbira henegome mbiwia lalu lalu,

<sup>6</sup> Bedeleheme Yuda dindiha ngago Yudanaga tano timbuni ngaru emene nira lowa í ndo.\*

Íha howa haru haga haguane mbira tagira ibulebira. Ibugua inaga Isaraele wali agali haru holebira, lalu gilibu winigo nga, lene.

<sup>7</sup> Ani layagola Herodohanda ohalu agali tara kaundia ni tagira ibiragohayagi howa ibiyaruhondo olowa tigua yakundi biago angi handayadabe hale hole ti mo bila hene. <sup>8</sup> Tigua ibu lamiyagola ibugua tihondo lalu, Tigua igiri gali odago baya hangu tai bialu handa walía harimiyagua inabi ibu mini yaraga hole poliya langule dai bilimu, lene.

<sup>9-10</sup> Ani layago hale howa tigua igiri gali biago tai bima pialu hearia yakundi ala handayago lone de hendene. De hondowa tigua turu hene. Tinaga turu holene timbuniore ibu wini. Yakundi biagome bamba lalu igiri gali biago wiagoria pialu ema nabi hondo hene. <sup>11</sup> Agali biaru ti anda mbira heagoha anda pialu hearia tigua igiri galibi igiri aiyá Meribi de handalu ge duli hanga ho biruwa igiri biagonaga mini yaraga lalu hene. Tigua ngolobi mbirale mbira ira wagaya ngabiorebi ira mbiranaga ibane mini muwebi henenege Yasuhondo mini.\*

<sup>12</sup> Ani tagu miai lalu tigua tininaga dindi dai bule hariga mendeni pialu dai binigo irane ti emaga handalu hearia Ngode Datagaliwabehanda tihondo lalu, Herodo karia dai nabi hariga mendeha pialu tinaga dindi dai bilimu, lalu lamiyadagua dai bini.

### *Yo pialu Iyibi penego ogo*

<sup>13</sup> Ti piyagola howa Yosebe ibu emaga handalu hearia Anduane Homogonaga dahuliyali mbira ha pani hene. Ha pani howa lalu, Herodohanda igiri biago bo wahole tai bulebirago í heyalu igiribi ibu aiyabi tí yola lalu Iyibi pudaba. Pu kamigola ina tí dindi tarani pudaba loliya hondo halimu, lene.

<sup>14</sup> Ani layagola Yosebe ibu heyalu ibugua igiribi igiri aiyabi mbiraga howa yo pialu Iyibi haru pene. <sup>15</sup> Iyibi puwa tigua Herodo homelo lowa Iyibini haabo hene. Ani biyagola ala Anduane Homogohanda ibunaga mana latagi haga mbiragoha howa mbiwia ho winigo lola hai hene. Mbiwia henego ogo, I ígini Iyibi dindini howa tagira ibilo ina olarugo, Anduane Homogohanda lenego gilibu nga.\*

### *Waneiginiru bo wahai henego ogo*

<sup>16</sup> Herodohanda agali tara dindi kaundia ni tagira ibiragohayagi howa ibiyarume ibu mo hondo hayada manda buwa ibu keba timbuniore hene. Keba timbuni howa ibugua igiri emene mali kira henerubi mali kira bolangua nahe henerubi Bedelehemeni henerubi dindi kawareni henerubi bibahendeore homelo, Bo wahai halimu, lene. Agali tara biarume, Yakundi pigane darali haya, lalu lamiyago ibugua manda buwa ani lene.

<sup>17</sup> Ani binigo Ngode Datagaliwabe mana latagi haga Yaremaiahanda ala mbiwia ho winigo lola henegonaga lo ngago ogo,

<sup>18</sup> Lama dindiha bi mbira laruago bi ogoni gibi yiyi lalu dugu biarugo hale ho ka.✧ Leselohanda ibu waneiginirunaga dugu biarua.

Ti homai hayagola wali agalime ibu bu mini mo palia holenaga bi la debodebo bilo hame naleore beda, lalu gilibu nga.

*Yosebe halu ti Iyibi howa dai binigo ogo*

<sup>19</sup> Herodo homayagola howa Yosebe Iyibini howa emaga handalu hearia Anduane Homogonaga dahuliyali mbirame ha pani howa <sup>20</sup> ibuhondo lalu, Heya. Igiribi ibu aiyabi haru halu Isaraele dindini dai bidaba. Igiri biago bo wahole manda bialu hayago ti homayago tí dai bidaba, lene.✧ <sup>21</sup> Ani layagola Yosebe ibu heyuwa igiribi ibu aiyabi haru halu Isaraele dindini dai bini.

<sup>22</sup> Ti dai bialu howa Yosebehanda Agelasa ibu aba Herodonaga pani ha aribia howa Yudanaga kini ka layagola hale howa ibugua Yuda dai bulene gi hene. Gi ho hearia ibugua emaga mende handalu hearia Ngode Datagaliwabehanda ibuhondo bia layadagua bialu ibu Galilini pialu <sup>23</sup> Nasarete tanoni hole manda bialu ogoriani hondo hene. Ani binigo Ngode Datagaliwabe mana latagi haga henerume, Ibu Nasareteali ka lelebirago, lalu ala lenegonaga lola hene.✧

### 3

*Baboraya biaga Yonehanda bi mana lamialu henego ogo  
(Maga 1.1-8, Lugu 3.1-18, Yone 1.19-28)*

<sup>1</sup> Ani binidangi baboraya biaga Yonehanda Yudiani dindi ko yobi wali agali nahaga wiagoria howa ibalu mana lamialu hene.✧ <sup>2</sup> Ibugua lamialu lalu, Ngode Datagaliwabenaga Handame Holene kaware ngagonigo tígua ko birimigonaga mini beregedalimu.✧ <sup>3</sup> Ngode Datagaliwabe mana latagi haga Aisaiahanda ala mbiwia halu lalu,✧

Dindi ko yobi wali agali nahaga ngagoria howa mbiralime galalu, Anduane Homogo ibilo hariga ba hole manda bialu halimu.

Hariga ogoni tigabiore ba halimu, lenego

lalu bi ogoni Yone mitangi bialu lenego gilibu nga.

<sup>4</sup> Yone ibu nogo kamele irinime aga wabinigo karulowa nogo dongoneme mandibu wuwa hene. Ibugua pagayabi mone taranaga ibanebi naga hene.✧ <sup>5</sup> Wali agali Yarusaleme howabi Yudia dindi bibahende winigo uruniha howabi Iba Yodana peagoria dindi bibahende wiagoha howabi Yone hearia íbu ngoai haga bini. <sup>6</sup> Ibuwa tigua ko biyaru la pani hayagola Yonehanda Iba Yodanaha ti baboraya bini.

<sup>7</sup> Perisi agalirubi Sadiusi agalirubi dewali Yonehanda ti baboraya bilo ibalu hearia de hondowa Yone ibugua tihondo lalu, Tí ko nogombi ale kamigo Ngode Datagaliwabehanda pani áyuore wia holebirago nane yo poleberami lalu tí aiwa langiyabe.✧

<sup>8</sup> Tígua ko bialu harimigo wahalu mini beregedai kamigonaga irane walia hole lowa mana bayale bialu halimu. <sup>9</sup> Tígua, Inanaga mamali Abarahama hene, laramiligome pani nolene ngagoria nane yo pialu poleberama, lo mitangi nabilimu. Ina bi mbira langerogo hale hadaba. Ngode Datagaliwabehanda ege tole o ngaruni mo yuwa Abarahamanaga aguanene bu hinu helabehe kagoni laro.✧ <sup>10</sup> Ira karu teneha dibule ayu mo yu íbu nga. Ira lini bayale nadaga karu bibahende dibai howa ira dedagoria dolebira.✧ <sup>11</sup> Tígua ko birimigonaga mini beregedarimigo walia hole ina tí ibame

✧ **2:18:** Pig 35.19, Yar 31.15 ✧ **2:20:** Har 4.19 ✧ **2:23:** Ais 11.1, 53.2, Mg 1.24, Lg 2.39, Yo 1.45 ✧ **3:1:** Mg 1.4, 1.15, Lg 3.2-3, Yo 1.28 ✧ **3:2:** Md 4.17, Mg 1.15 ✧ **3:3:** Ais 40.3, Mg 1.3, Lg 1.76, Yo 1.23 ✧ **3:4:** 1 Sml 14.25-26, Seg 13.4, Mg 1.6 ✧ **3:7:** Md 12.34, 23.33, Lg 3.7, Lm 5.9, 1 Te 1.10 ✧ **3:9:** Yo 8.33, Ab 13.26, Lm 2.28-29, 4.1, 4.11-12, 4.16 ✧ **3:10:** Md 7.19, Lg 13.6-9, Yo 15.6



aboraya biruli. Maha mbirali ibulebirago ibugua Ngode Datagaliwabe Dininimebi ira hungu ale biragomebi tí aboraya bia holebira. Ibu ÿ emene kō kogobi ndo ibu daliga timbuniore kago ÿna ibunaga ge habe gamu mo ya holene nakarulape kogoni.✧  
 12 Ibugua ladi ale mini widinaga lini aeanela dambialu mo tale bilo mbirale baraga hagane nama taboli ale yu ka. Tale biai howa ibugua widi lini do hagane andaha do hole wuwa aeane biaru ira hundia nabiaga daabo kagoria delolebira, lalu Yonehanda lamini.✧

*Yonehanda Yasu aboraya bia henego ogo  
 (Maga 1.9-11, Lugu 3.21-22)*

13 Horo uruningi Yasu ibu Galili howa Iba Yodana peagoha ibalu ibu Yonehanda aboraya bilo lowa Yone hearia ibini. 14 Ibiyagola Yonehanda Yasu mini wia dai buwa aboraya nabule lelo ibuhondo lalu, ÿna ÿ aboraya bia holene ngago áyu ani ndo ÿna ÿ aboraya bia holiya ÿ kogoria ibirida, lene.

15 Ani layagola Yasuhanda ladai bialu lalu, Áyu aniore bibelo. Mana ogoni bialu howa Ngode Datagaliwabehanda ani bulene nga ledago biaiore holeberaba, lene. Ani layagola Yonehanda, Anidago aboraya bia haro, lene.

16 Yonehanda Yasu aboraya bia hayagola Yasu ibaha howa heyiyagola hari daliga buduwa Ngode Datagaliwabe Dinini ega malibu ale dalipe halu Yasuni ÿbu birayagola de hendene.✧ 17 Ani biyagola dahuliya andagaha howa bi mbira ladali halu lalu, ÿ Iginini ÿ gubaliniore ho kogo ogoni. Ibhondo turu timbuni ho kogoni, lene.✧

## 4

*Dama Heyolabeme Yasu ko mo bia habehedabe hondole ba hendenego ogo  
 (Maga 1.12-13, Lugu 4.1-13)*

1 Ani biyagola howa dama Heyolabeme Yasu ko mo bia habehedabe hondole Ngode Datagaliwabe Dinini ibugua Yasu dindi ko yobi wali agali nahaga wiagoria haru pu helene.✧ 2 Ani haru pu helearia Yasu ibu horo pira maria (40) mbiraga horombebi heba tomo nane dege howa garibi lo hene.✧ 3 Ibu ani garibi lo hearia dama Heyolabe ibuwa lalu, ÿ Ngode Datagaliwabe Iginioire keyagua nde ege tole o ngaru mo mberedi bu hina, lene.✧

4 Ani layagola Yasuhanda ladai bialu lalu, Anduane Homogonaga mbugani lo ngagome lalu, Wali agalime mberedi hangu nowa habe nahego Ngode Datagaliwabehanda bi bibahende ledaruoreme holene nga, lalu gilibu nga, lene.✧

5 Ani ladai biyagola dama Heyolabeme Yasu haru pialu Yarusaleme anda Ngode Datagaliwabhondo loma bia ho helenegoha puwa daligaoreni helowa 6 ibuhondo lalu, ÿ Ngode Datagaliwabe Iginioire keyagua nde ogoriani howa ÿnime pora bupe harene. Ogoninaga Anduane Homogonaga mbugani bi mbira lo ngagome lalu,✧ Ngode Datagaliwabehanda ibunaga dahuliyaliruhondo ÿ haru holenenaga ege toleme ÿnaga ge nanelo

tigua tinaga gini ÿ minu yaraga ho helo lamulebira, lalu gilibu nga, lene.

7 Ani layagola Yasuhanda ladai bialu lalu, Anduane Homogonaga mbugani bi mende lo ngagome lalu, Anduane Homogo ÿnaga Ngode Datagaliwabe kago ba hondolene nawi, lalu gilibu nga, lene.✧

✧ 3:11: Ais 4.4, Mal 3.2, Yo 1.26-27, 1.33, Ab 1.5, 2.3-4, 1 Ko 12.13 ✧ 3:12: Mal 3.3, 4.1, Md 13.30 ✧ 3:16: Ais 11.2, Mg 1.10, Lg 3.22, Yo 1.32-33 ✧ 3:17: Pig 22.2, Iba 2.7, Ais 42.1, Md 12.18, 17.5, Mg 1.11, Lg 9.35, Yo 12.28, 2 Pi 1.17 ✧ 4:1: Mg 1.12-13, Lg 4.1-13, Hi 2.18, 4.15 ✧ 4:2: Har 34.28, 1 Kin 19.8 ✧ 4:3: Yo 6.30-31 ✧ 4:4: Man 8.3 ✧ 4:6: Iba 91.11-12, Yo 7.3-4 ✧ 4:7: Man 6.16

<sup>8</sup> Ani ladai biyagola dama Heyolabeme hari timbuni weagoha Yasu haru iraga halu wali agali bibahende dindi tara tarani bu hearubi tinaga mbirale baya gibiore bu wiarubi walia hai hene. <sup>9</sup> Walia hai halu lalu, *Ína ì buha ge duli hanga ho biruwa ìhondo bi pupu wiriyagua nde uruni bibahende de hendederu karulai habelo ìhondo ngiai holebero, lene.*✠

<sup>10</sup> Ani layagola Yasuhanda ladai bialu lalu, Heyolabe ì wahalu puabo ha. Anduane Homogonaga mbugani bi lo ngagome lalu, Anduane Homogo ìnaga Ngode Datagaliwabe kago ìna ibuni hangunaga mini yaraga holenebi ibuni hangunaga biabe bulenebi nga, lalu gilibu nga, lene.✠

<sup>11</sup> Ani ladai biyagola dama Heyolabeme Yasu helalu pene. Piyagola dahuliyalirume Yasu biamogo bule ibu hearia ibini.✠

*Yasuhanda Galilini biabe pigane tenialu bialu henego ogo*  
(Maga 1.14-15, Lugu 4.14-15)

<sup>12</sup> Baboraya biaga Yone garabaya andaha ka layago hale howa Yasu ibu Galili pene.✠

<sup>13</sup> Puwa ibugua Nasareteni hondo nahe pu wahalu Galili iba timbuniore bereagoha Kabaniama tanoni hole pene. Dindi ogoni Sebulunu Nabadalila libunaga dindini wini.✠

<sup>14</sup> Ani biyagola Ngode Datagaliwabe bi mana latagi haga Aisaiahanda mbiwia henego lola hene. <sup>15</sup> Ibugua mbiwia henego ogo,✠

Sebulunu dindibi Nabadali dindibi  
hariga iba solowara bereagoha polene Iba Yodana ange edehayagi ngago  
Yualinaga ndo wali agali tara taranaga dindi mini Galili nga.

<sup>16</sup> Wali agali arumaha karume wá holene timbuniore de hondolebira.✠

Homaganenaga dindi arumaha karu kagoriani wá ha dali holebira,  
lalu gilibu nga.

<sup>17</sup> Horo uruningi Yasuhandaibunaga bi mana tenuwa lamialu lalu, Ngode Datagaliwabenaga Handame Ho Holene kaware ngago tigua ko birimigonaga mini beregedalimu, lalu lamini.✠

*Yasuhanda agali maria wena minagaru olenego ogo*  
(Maga 1.16-20, Lugu 5.1-11)

<sup>18</sup> Yasu ibu Galili iba timbuniore bereago angeni pialu howa ibugua wena minaga agali kirali Saimonobi ibunaga mini mende Pida ibu hamene Andurubi de hendene. Ogoni labome libu iba timbuni ogoniha howa wena nume wena minalu hene. <sup>19</sup> Ani hondowa Yasuhanda libuhondo lalu, Libugua agali minalibulo ìna minawai holiya ì porodagua talima ibidaba, lene.✠ <sup>20</sup> Ani layagola libugua libunaga wena nu ngelalu ibu talima pene.✠

<sup>21</sup> Yasu ibu pialu howa ibugua agali kirali libu hamenela dege Sebedi igini Yamese Yonela libu hearia de hendene. De hondowa Yasuhanda libu olayagola <sup>22</sup> libugua libu aba hela iba talu ngela bialu Yasu talima pene.

*Yasuhanda mana lawai ha warago bo wiaru mo dabi ha bialu henego ogo*  
(Lugu 6.17-19)

<sup>23</sup> Yasu ibu Galilini ibaga bialu pialu ngoai hagane andaruha bi mana lawai halu Ngode Datagaliwabehanda Handame Ho Kagonaga Bi Mana Debene lamialubi wali agali dewa warago tara tara bo wiaru mo dabi halubi hene.✠ <sup>24</sup> Ani bialu heago wali agali Siriani haame hearume hale hai howa tigua wali agali warago tara tara bo wiarubi tandaga halu wiarubi dama daragahe wiarubi biango bibi biaga wiarubi kuduguhe

✠ **4:9:** Yo 6.14-15 ✠ **4:10:** Man 6.13, 10.20, Yos 24.14 ✠ **4:11:** Hi 1.6, 1.14 ✠ **4:12:** Md 14.3, Mg 1.14, 6.17, Lg 3.19-20, Yo 4.43 ✠ **4:13:** Yo 2.12 ✠ **4:15:** Ais 9.1-2 ✠ **4:16:** Ais 42.7, Lg 2.32 ✠ **4:17:** Md 3.2, 10.7, Mg 1.14-15 ✠ **4:19:** Md 13.47, Lg 5.1-11 ✠ **4:20:** Md 19.27, Mg 10.28, Lg 18.28 ✠ **4:23:** Md 9.35, Mg 1.39, Lg 4.15, 4.44, Ab 10.38

wiarubi mo yalu ibu hearia ibiyagola ibugua ti bibahende mo dabi hai hene.✠ 25 Wali agali dewaore Galilini howabi Tano Piraha howabi Yarusalemeha howabi Yudiaha howabi Iba Yodana ange abene edehayagi howabi ibai halu ibu haruru pialu hene.✠

## 5

### *Yasuhanda hari weagoria howa bi mana laminigo ogo*

<sup>1</sup> Yasuhanda wali agali dewaore bu hearu de hondowa bare hari mbira weago iraga howa berene. Ani berearia ibunaga talima piaga biaru ti ibu bereagoria ibalu bira mabu bini. <sup>2</sup> Ogoriani berearia ibugua tihondo bi mana lawai halu berene.

### *Turu holene ngago ogo (Lugu 6.20-23)*

<sup>3</sup> I miniha nakarulape ko lo mitangi bu karu Ngode Datagaliwabehanda Handame Ho Kagoria tinagaore ngago ti turu ho holene nga.✠

<sup>4</sup> Dara ho karu Ngode Datagaliwabehanda ti mo turu holebiragonaga ti turu ho holene nga.✠

<sup>5</sup> Tini mo dindiha haga bu karu Ngode Datagaliwabehanda, Ngulebero, lowinigo tigua mo yulebiragonaga ti turu ho holene nga.✠

<sup>6</sup> Ngode Datagaliwabehanda hame ledadagua bua timbuni ho karu Ngode Datagaliwabehanda tini hame larago mo tolai holebiragonaga ti turu ho holene nga.✠

<sup>7</sup> Wali agali maruhondo dara howa biamogo biaga karu Ngode Datagaliwabehanda ti dara howa biamogo bulebiragonaga ti turu ho holene nga.✠

<sup>8</sup> Mini gahengewi ko bua nahaga karu tigua Ngode Datagaliwabe de hondolebiragonaga ti turu ho holene nga.✠

<sup>9</sup> Mo palia holenenaga biabe bialu karu Ngode Datagaliwabehanda tihondo, I waneigini, lolebiragonaga ti turu ho holene nga.✠

<sup>10</sup> Ngode Datagaliwabehanda hame ledadagua bialu howa tandaga nalu karume Ngode Datagaliwabehanda Handame Ho Kagoria tinaga ngago ti turu ho holene nga.✠

<sup>11</sup> Tigua i porodagua talima ibalu kamigonaga wali agali marume ti mege biragolabi mo tandaga haragolabi ke halu nde laragolabi mana urunibi biragola ti turu ho holene nga.✠ <sup>12</sup> Ngode Datagaliwabe mana latagi haga bamba henerume tandaga ogonidagua dege nalu hene. Dahuliya andagani tinaga emena timbuniore wia do kago turu timbuniore ho halimu.✠

### *Ibi wa holanelanaga galone ngago ogo (Maga 9.50, Lugu 14.34-35)*

<sup>13</sup> Wali agali tara tara bibahendenaga ibi ale ti kamigoni. Ibi ibuninaga dende ereba hayagua lone mo dende bia habe nahe nga. Ibi ko halu dindini waharagola wali agali geme hingedaga nga.✠

<sup>14</sup> Wali agali dindi bibahendeni tara tara karunaga wa holene ale ti kamigoni. Tano timbuni dindi bare hombeneni bu karu mo ge nahabehe ka.✠ <sup>15</sup> Mbiralime lamu delowa ndisi be timbuni ngago andaneha nawiaga. Ani biagadagua ndo anda ogoniha bedaru bibahende wa haame helo ibugua lamu dedago dagia daligani mo wiaga.✠

<sup>16</sup> Ogonidagua tinaga wa holene wali agalime de hendelo mo wa holene nga. Tigua

✠ 4:24: Mg 6.55 ✠ 4:25: Mg 3.7-8 ✠ 5:3: Iba 51.17, Ais 57.15, Lg 6.20 ✠ 5:4: Ais 61.2, Lg 6.21, Mo 7.17  
 ✠ 5:5: Iba 37.11, Ais 29.19 ✠ 5:6: Ais 55.1-2, 65.13 ✠ 5:7: Md 6.14, Mg 11.25, Hi 6.10, Ya 2.13 ✠ 5:8: Iba 15.2, 24.3-4, 51.10, 73.1, 1 Ko 13.12, Hi 12.14, 1 Yo 3.2-3 ✠ 5:9: Md 5.45, Lg 6.35, Lm 14.19 ✠ 5:10: 2 Ko 4.17, 2 Ti 2.12, Hi 12.4, 1 Pi 3.14 ✠ 5:11: Lg 6.22, Ya 1.2, 1 Pi 4.14 ✠ 5:12: 2 Bit 36.16, Lg 6.23, Ab 5.41, 7.52, 1 Te 2.15, Hi 11.32-38, Ya 5.10, 1 Pi 4.13 ✠ 5:13: Mg 9.50, Lg 14.34-35 ✠ 5:14: Min 4.18, Yo 8.12, 9.5, Pb 2.15 ✠ 5:15: Mg 4.21, Lg 8.16, 11.33

mana bayale beramigo de hondowa wali agalime tí Aba dahuliya andaga kagonaga mini yaraga helonaga ani mo wá halu holene nga.✧

*Mosese heneyangi Mana lowinigonaga te ogo*

17 Mosese heneyangi Mana lowinigobi Ngode Datagaliwabe mana latagi haga hene-yarume mana lawai henegobi ina mo wahole ibiruda mitangi bidamibe. Ina mo wahole ndo ibiru. Tigua bi lowinigo lola helonaga í ibu kogoni.✧ 18 Hari daligabi dindibi wiaabo kadagua Mosese heneyangi Mana lowinigonaga bi emeneorebi mbira ereba nahe maha bibahende hamaro birangi hangu ereba holebirago manda bilimu.✧ 19 Anigo mbiralime mana uruni lowiniyaria dunini ndo emeneorerubi ngago ibuni nabi howa marumebi nabilo biawai hayagua o biago ibu Ngode Datagaliwabehanda Handame Ho Kagoria dunini maru karubi ndo ibu niraore holebira. Ani biradagua ndo mbiralime mana uruni lowiniyadagua bialu maru karumebi bilo biawai hayagua ogoni ibu Ngode Datagaliwabehanda Handame Ho Kagoria timbuni duniniore holebira.✧ 20 Anidago ina bi mbira langero. Ngode Datagaliwabehanda mana tigabi tigua bilimulo hame ledago Mana lowinigo lawai haga karumebi Perisi agali karumebi biagadagua ndo tigua ti bolangua halu nabirimiyagua Ngode Datagaliwabehanda Handame Ho Kagoria anda napoleberami.✧

*Keba holenenaga mana ogo*

21 Bambaore wali agali hearuhondo bi laminigo ogo, Wali agali homelo nababe. Mbiralime ogonidagua biyagua godi lolene wulebira, lalu bi ogoni leneyago tí hale harimigoni.✧ 22 Anigo áyu ina tíhondo agua laro. Mbiralime ibu hamenehondo keba hayagua ogoninaga godi lolene wulebira laro. Agali mbirame ibu hamenehondo, í habane nabulene kegoni, layagua ibubi o layagonaga ganisolo agali kagoria haru polebira. Agali mbirame ibu hamenehondo, í koore mini nawi ke, layagua o layagonaga heli dindini ira dedagoria polene hengeibunime mo wulebira.✧ 23 Anigo í mbirale Ngode Datagaliwabehondo mule bo lomabu miaga dagiani mule bereria í hameneme íhondo mbirale mbiranaga keba ka lo mitangi biriyagua✧ 24 nde mbirale mulene biago bo lomabu miaga dagia kawareni ngelalu í hamene karia mo palia hole abale pobe. Mo palia halu dai buwa mbirale Ngode Datagaliwabehondo mule wirigo mibe.✧

25 Mbiralime íla godi lolenaga, íla godi labiya mba, layagua godi lagane andaha anda nape howa ibula abale mo tiga bulene manda bibe. Godi lola haru piyagua godi dabagane agali kagohondo í minu mulebira. Minu miragola godi dabagane biagome í dandayi gini ya haragola tigua í garabaya andaha helolebira.✧ 26 Ani biragola ina ko birigonaga yolo miaiore habelo garabaya andaha helaabo holebirago lalu langero.

*Wali agali kayu bulenenaga te ogo*

27 Bambaore bi lowinigo ogo, Wali agali kayu nabibe, lalu bi ogoni leneyago tí hale harimi.✧ 28 Anigo áyu ina tí langialu agali mbirame wali deme hondowa dimagoli hayagua ibugua miniha wali biagoni yaore biya laro.✧ 29 Ínaga de tigame í ko mo bia hayagua halu wahabe. Í tingininaga aria mbirago nahe howa holene bayale nga. Ínaga tingini bibahende hai howa heli dindiha mo bape holene nde koorego.✧ 30 Ínaga gi tigame í ko mo bia hayagua gi ogoni gandulo wahabe. Ínaga gi mende hangu howa holene bayale nga. Ínaga tingini bibahende hai howa heli dindiha polene nde koorego.✧

✧ 5:16: Yo 15.8, 1 Ko 14.25, Eb 5.8-9, 1 Pi 2.12 ✧ 5:17: Md 3.15, 9.13, 10.34-35, Lm 3.31, 10.4, Ga 3.24 ✧ 5:18: Lg 16.17, 21.33 ✧ 5:19: Ya 2.10 ✧ 5:20: Lm 9.31, 10.3 ✧ 5:21: Har 20.13, 21.12, LBM 24.17, Man 5.17 ✧ 5:22: Ya 1.19, 1 Yo 3.15 ✧ 5:23: Md 8.4, 23.19, Mg 11.25 ✧ 5:24: Md 18.15-20, 1 Ti 2.8, 1 Pi 3.8 ✧ 5:25: Md 6.14-15, 18.34-35 ✧ 5:27: Har 20.14, Man 5.18 ✧ 5:28: 2 Sml 11.2, Min 6.25, 2 Pi 2.14 ✧ 5:29: Md 18.9, Mg 9.47, 1 Ko 9.27, Kl 3.5 ✧ 5:30: Md 18.8, Mg 9.43

*Wali agali dabu buwa waharanaga mana ngago ogo  
(Madiu 19.9, Maga 10.11-12, Lugu 16.18)*

<sup>31</sup> Bambaore bi mende lowinigo ogo, Agali mbirame ibu one wahole manda biyagua ibugua bebani gili buwa ibu onehondo mulene nga, lalu leneya. <sup>32</sup> Áyu ina tí langerogo agali mbirame ibu one agali mendela kayu biragola ndo bame wahayagua ibugua ibu one biagome agali kayu bilo mo bia hara. Agali mbiralime agali mende one wahenego dabu biyagua o ibugua wali biago kayu dege biragoni. <sup>\*</sup>

*Mbirale mbira buleore bero lalu bi lowini ngago ogo*

<sup>33</sup> Bambaore wali agali hearuhondo bi laminiyago ogo, Bi mbira ina buleore lalu lo wirigo waholene nawi. Anduane Homogohondo mbirale mbira buleore bero lo wirigo bibe, lalu bi ogoni leneyagobi tí hale harimi. <sup>34</sup> Anigo ina áyu tí langerogo bi lo wialu howa mbirale mbiranaga mini lalu ndo wilimu. Dahuliya andaga Ngode Datagaliwabenaga handame ho biragane ngago tígua, Dahuliya andani ngadagua buleore bero, lalu nalo wilimu. <sup>35</sup> Dindini Ngode Datagaliwabehanda ibunaga ge dogolo wiaga ngago tígua, Dindi ngadagua buleore bero, lalu nalo wilimu. Yarusaleme handame haga kini timbuni kagonaga dindi ngago tígua, Yarusalemeni ngadagua buleore bero, lalu nalo wilimu. <sup>36</sup> Ínina haguani kadagua buleore bero, lalu nalo wibe. Irane ogo ínime mandari mbirago mo pela halubi mo mindi bia halubi nabibehe kegoni. <sup>37</sup> Tígua lalu, Ebi ndobi dege lalu lalimu. Bi marubi larimiyagua bi o larimiruni tene dama Heyolabeha howa ibiragola larimi. <sup>\*</sup>

*Pani badai bulenenaga mana ngago ogo  
(Lugu 6.29-30)*

<sup>38</sup> Bambaore bi lenego ogo, De mbira halu waharagonaga pani de mbira halu wahaga. Ne mbira hondo waharagonaga pani ne mbira hondo wahaga, lalu bi ogoni leneyago tí hale harimigoni. <sup>39</sup> Anigo áyu ina tí langerogo mbiralime tíhondo ko biyagua tígua ko bia dai nabilimu. Mbiralime ínaga pe tigahayagi bayagua pe lehayagibi belo beregedabe. <sup>40</sup> Mbiralime í godi lole haru pialu howa ínaga aga tingiliya ngulene nga layagua ínaga dagare tingiliyabi tago bialu mibe. <sup>41</sup> Ami agali tínaga dindini bu karu aria mbiragome, Ínaga togi nu mabu tu mbira poa nakeha hanalu pu layagua ina mabu tu ki hono bolangua habe. <sup>42</sup> Mbiralime, Mbirale ogoni i ngi, layagua nde mibe. Mendealime, Ogoni ya dai buliya i ngi, layaguabi nde ya dai bilo mibe. <sup>\*</sup>

*Waitigi karuhondo gubalini holenenaga mana ngago ogo  
(Lugu 6.27-28,32-36)*

<sup>43</sup> Bambaore bi leneyago ogo, Ínaga nenegeruhondo gubalini ho habe. Ínaga waitigi karuhondo handabe manga ho habe, lalu bi ogoni leneyago tí hale harimigoni. <sup>44</sup> Ani anigo ina tí ogodagua langerogo tínaga waitigi ho karuhondo gubalini ho halimu. Tí mo tandaga halu karu bayale helonaga tígua Ngode Datagaliwabehondo bi la halimu. <sup>45</sup> Ani bulene ngago irane tí Aba dahuliya andaga kagonaga waneigini hole ani bilimu. Aba ibugua wali agali ko bayalebi ta nabi kagoria ibunaga ni daame helaga ka. Ibugua wali agali ko biaga karubi bayale biaga karubi ta nabi bibahendehondo ta halu miaga ka. <sup>46</sup> Tí gubalini hagaru hangu gubalini harimiyagua Ngode Datagaliwabehanda tínaga emena aginaga ngulene ngabe. Dagisi muni ngi laga karume ti nde ani dege biaga ka. <sup>47</sup> Tígua tínaga nenegeru hanguhondo bi turubi larimiyagua tí mana biagane

<sup>\*</sup> **5:31:** Man 24.1-4, Yar 3.1, Md 19.7, Mg 10.4 <sup>\*</sup> **5:32:** Md 19.9, Mg 10.11-12, Lg 16.18, Lm 7.3, 1 Ko 7.10-11 <sup>\*</sup> **5:33:** Har 20.7, LBM 19.12, Dag 30.2, Man 23.21 <sup>\*</sup> **5:34:** Ais 66.1, Md 23.22, Ab 7.49, Ya 5.12 <sup>\*</sup> **5:35:** Iba 48.2, Ais 66.1 <sup>\*</sup> **5:37:** Kl 4.6, Ya 5.12 <sup>\*</sup> **5:38:** Har 21.24, LBM 24.20, Man 19.21 <sup>\*</sup> **5:39:** LBM 19.18, Ais 50.6, Lg 6.29, Yo 18.22-23, Lm 12.17-19, 1 Ko 6.7, 1 Pi 3.9 <sup>\*</sup> **5:40:** 1 Ko 6.7 <sup>\*</sup> **5:42:** Man 15.8-10, Lg 6.30, 6.35 <sup>\*</sup> **5:43:** Man 23.6, Iba 41.10 <sup>\*</sup> **5:44:** Har 23.4-5, Lg 23.34, Ab 7.60, Lm 12.14, 12.20, 1 Ko 4.12-13, 1 Pi 2.23 <sup>\*</sup> **5:45:** Yob 25.3, Eb 5.1



winiyadagua ndo bayale taraore mbira birimibe. Wali agali Ngode Datagaliwabe mitangi nabiaga karume tibi ani dege biaga ka. <sup>48</sup> Tí Aba dahuliya andaga kago ibu mini baya buruguleorewi kadagua tibi mini baya buruguleorewi holene nga.✧

## 6

### *Biamogo bia holenenaga mana ngago ogo*

<sup>1</sup> Tígua Ngode Datagaliwabe mitangi bialu mana beramiligo wali agali karume tí de hendelonaga ndo ti kagoria howa nabilimu. Mana ogoni wali agalinaga deni howa birimiyagua tí Aba dahuliya andaga kagome tihondo emena ngulene nawulebira.✧

<sup>2</sup> Mbirali buru pale kagohondo mbirale mbira mirimiyagua mine halu marume de hendelo lowa namilimu. Wali agali maru tombene hondo kihe karume ngoai hagane andahabi hariganibi ani biaga ka. Tigua wali agali marume ti mini yaraga helonaga biaga ka. Ina tihondo henene larogo o biarume tinaga emena mulene winigo áyu dege mo yai ka laro. <sup>3</sup> Tígua mbirali buru pale kago biamogo bule lowa tinaga nenegeru tí heba mandagi hagago manda nabilo o halu bilimu.✧ <sup>4</sup> Ani birimiyagua tini hangu hangume manda bu holeberami. Tí Aba tini hangu hanguore howa beramiligo ibugua de handaya ho howa tihondo emena ngulebira.✧

### *Ngode Datagaliwabhondo bi lolenenaga mana ngago ogo (Lugu 11.2-4)*

<sup>5</sup> Tí kamiru hangu hangume Ngode Datagaliwabhondo bi lalu howa wali agali maru tombene hondo kihe karume biagadagua tígua nabilimu. Wali agali maru karume ti de hendelo lowa tigua ngoai hagane andahabi hariganibi heyu howa Ngode Datagaliwabhondo bi laga ka. Ina tihondo henene larogo o biarume tinaga emena mani mulene winigo áyu dege mo yai ka.✧ <sup>6</sup> Ani biagadagua ndo tí hangu hangume Ngode Datagaliwabhondo bi lole howa tininaga anda hobane mbiraha anda puwa panga paya tagi howa tí Aba tinaga deme nahandabehe kamigo ibuhondo bi lalimu. Ani laramigola tí Aba ibugua tini hanguore howa beramigo de hondo kagome tihondo emena ngulebirago ani bilimu.✧

<sup>7</sup> Tígua Ngode Datagaliwabhondo bi lalu howa wali agali maru Ngode Datagaliwabe mitangi nabiaga karume bi dewa nagaloneru lagadagua nalalimu. O biarume bi lu laabo haragome hale holebira manda biaga kago✧ <sup>8</sup> tigua lagadagua nalalimu. Mbirale buru pale kamigonaga tígua Abahondo bi naledemiore ibugua ala manda biai ho ka.✧

<sup>9</sup> Ngode Datagaliwabhondo bi ogodagua lalu lolene nga.✧

Ina Aba dahuliya andaga kegoni.

Í mini baya gibiore ngego mo yaraga helobi

<sup>10</sup> inaga Handame Ho Holene ibilobi hamelo ko.✧

Ina hamelo kego dahuliya andagaha karume biagadagua ina dindini kamarumebi bulumaya biamogo bibe.

<sup>11</sup> Tomo áyu nolene buru pale kamago nolomaya ngibe.

<sup>12</sup> Marume inahondo ko birago bia dai nabi waharamalidagua✧

ina iname ko birimago domo wahabe.

<sup>13</sup> Ina kamagoria ba hondolene hongohe nangelabe.✧

Dama Heyolabeme ina ko mo bia holigo ina haru habe.

✧ 5:48: LBM 11.44, 19.2, Man 18.13, Lg 6.36, Kl 1.28, 1 Pi 1.15-16 ✧ 6:1: Md 6.5, 6.16, 23.5 ✧ 6:3: Md 25.37-40  
 ✧ 6:4: Md 6.6, 6.18 ✧ 6:5: Md 23.5, Mg 11.25, Lg 18.10-14 ✧ 6:6: 2 Kin 4.33, Md 6.4, 6.18 ✧ 6:7: 1 Kin 18.26-29, Ais 1.15 ✧ 6:8: Md 6.32 ✧ 6:9: Lg 11.2-4 ✧ 6:10: Iba 103.19-21, Md 7.21, 26.39, 26.42, Lg 11.2, 22.42, Ab 21.14 ✧ 6:12: Md 6.14-15, 18.21-35 ✧ 6:13: 1 Bit 29.11-13, Md 26.41, Lg 22.40, 22.46, Yo 17.15, 1 Ko 10.13, 2 Te 3.3, 2 Ti 4.18, Ya 1.13, 2 Pi 2.9

<sup>14</sup> Wali agali marume tíhondo ko biyaru bia dai nabi waharimiyagua tí Aba dahuliya andaga kagome tígua ko birimiru nde domo waholebira. ✠ <sup>15</sup> Anigo wali agali marume tíhondo ko biyaru mitangi bu wiaabo halu wa naharimiyagua nde tígua ko birimiru tí Abahanda domo wa naholebira. ✠

*Tomo nane holenenaga mana ngago ogo*

<sup>16</sup> Tígua Ngode Datagaliwabe mitangi bialu tomo nane howa wali agali maru tombene hondo kihe karume dengui darabini ale howa hagamaga nahalimu. Wali agali o biarume tomo nane agua biagada lelo tigua tinaga tingini wayawaya nabi haga ka. Ina tíhondo henenore larogo tinaga emena mani mulene winigo áyu dege mo yai kagoni. ✠

<sup>17</sup> Ani bidago tígua tomo nane howa tinaga dengui wayawaya bialu mandari perebi bialu halimu. <sup>18</sup> Ani buleberamigo irane wali agali maru karume tí handalu tomo nane kamigo manda nabilonaga bilimu. Tí Aba tínaga deme nahandabehe kamigo ibu hangu manda bulebira. Ani manda bialu tí hanguore howa beramiligo ibugua de handaya ho howa tíhondo emena ngulebira. ✠

*Dahuliya andagani homogo holenenaga mo do holene ngago ogo*  
(Lugu 12.33-34)

<sup>19</sup> Tígua dindini howa mbirale homogo holenenaga mo mogobu wia nabilimu. Dindi ogoriani bombome nalubi hagua bialubi pagealime ohalu anda ibuwa page bialu mo ko hagagoria do holene nawi. ✠ <sup>20</sup> Ani biagagoria ndo dahuliya andagani bombome nanaga ngagoriabi hagua nabiagagoriabi pagealime anda naibagagoriabi mbirale homogo holenenaga mo do halimu. ✠ <sup>21</sup> Mbirale homogo holenenaga mo do ho ngagoria tínaga gubalini íbu haabo holebira. ✠

*Tingininaga wá holene ogo*  
(Lugu 11.34-36)

<sup>22</sup> De libu tingininaga lamu hale ale ka. Tínaga de bayale kayagua tínaga tinginiha wá haame holebira. ✠ <sup>23</sup> Anigo tínaga de ko hayagua tingini arumahe holebira. Tínaga tinginiha wá holene kago hundiyagua aruma taraorehe holebira.

*Ngode Datagaliwabebi tínaga mbirale ngamirubi ogo*  
(Lugu 16.13, 12.22-31)

<sup>24</sup> Mbiralime anduane kiranaga garabaya biabe ale bia haga habe nahe ka. Ibugua anduane mendego handabe manga halu mendego gubalini holebira. Ani bialu howa anduane mendegome bi larago hale halu bialu mendegome larago hale halu mo waholebira. Tígua Ngode Datagaliwabenaaga biabebi muninaga biabebi kirabali gi tale bu howa bibe naheore kamigoni. ✠

<sup>25</sup> Irane ogonigo ina tí langerogo tígua tomo ibabi nalu holenenagabi tingini aga bu holenenagabi burupadamigo agua buledabe lowa mini dege dindi ho nahalimu. Tomo bagi hene lowa wali agali holeneo duniniore ndobe. Aga bagi hene lowa tingini duniniore ndobe. ✠ <sup>26</sup> Ega yagalo yu ibaga bialu poraru de handaramine. Ega uruni ti tomo egene nahangaga widi kago gandulowa do hagane andahabi nawiaga. Ani nabi kagola tí Aba dahuliya andaga kago ibugua egaru de handaya ho kagoni. Ega uruni emene niraore lowa wali agali tí duniniore kamigoni ndobe. ✠ <sup>27</sup> Tí kamigoni mbiralime dindini holenenaga mini dege dindi ho hayagua dindini haabo habehedabe.

<sup>28</sup> Aga agi bu holedabe lalu mini dege dindi ho holene aginagabe. Palawaya aleru mi-nana anda howa lini dedago agua anda halu haradabe mitangi bidaba. Tigua tini biabe

✠ **6:14:** Eb 4.32, Kl 3.13 ✠ **6:14:** Mg 11.25-26 ✠ **6:15:** Md 18.35, Ya 2.13 ✠ **6:16:** Ais 58.5-9 ✠ **6:18:** Md 6.4-6 ✠ **6:19:** 1 Ti 6.17, Hi 13.5, Ya 5.2-3 ✠ **6:20:** Md 19.21, Lg 12.33-34, 18.22, Kl 3.1-2, 1 Ti 6.19, 1 Pi 1.4 ✠ **6:21:** Lg 12.34 ✠ **6:22:** Lg 11.34-36 ✠ **6:24:** Lg 16.13, Ga 1.10, 1 Ti 6.17, Ya 4.4, 1 Yo 2.15 ✠ **6:25:** Iba 55.22, Pb 4.6, 1 Ti 6.6-8, Hi 13.5, 1 Pi 5.7 ✠ **6:26:** Yob 38.41, Iba 147.9, Md 10.29-31, Lg 12.6-7, 12.24

nabiagabi tininaga yári bule lowa agabi nawabiaga ka. <sup>29</sup> Anigo ina tí langerogo Kini Solomono ibunaga mbirale dewaorewi howa aga baya bu haga henego palawayanaga yári baya gibiore bidagobi ndo bu haga hene. <sup>30</sup> Ngode Datagaliwabehanda datani minana anda halu karuni mo yári bia haga ka. Datani uruni áyu kago yawi agalime ganda lowa irani delolebira. Ngode Datagaliwabe ibugua o biaru mo yári bia hagadagua tí kamirubi aga bilimulo ngulebira ndobe. Tígua mini mbiraore emene wu kamigo agi bulenaga wu kamibe.✠

<sup>31</sup> Anigo tígua tomo iba nolenebi aga bulenebi agiha howa ibulubadabe lowa mini dege dindi ho nahalimu. <sup>32</sup> Mana urunibi wali agali Ngode Datagaliwabe mitangi nabiaga karume mini dege dindi ho ka. Tí Aba dahuliya andaga kago ibugua tí mbirale uru ale bibahende buru pale kamilo manda bu ka.✠ <sup>33</sup> Ani mitangi bilimulo ndo Ngode Datagaliwabehanda Handame Ho Kagonagabi ibugua tí bilimulo hame ledagonagabi tígua duninida lowa mitangiore bialu haramigola ibugua uruni bibahende ngaru tihondo ngiai holebira.✠ <sup>34</sup> Anigo tígua yawinagabi áyu mini dege dindi ho nahalimu. Horo yawi haragola ibuni mini dege dindi ho holenenaga karulape wulebirago áyunaga mini dege dindi ho holene ngagoria marubi mo wia tago bia holene nawi.✠

## 7

### *Marume birago tígua daba ki bulene nawigo ogo* (Lugu 6.37-38,41-42)

<sup>1</sup> Yasuhanda laabo halu lalu, Ngode Datagaliwabehanda tí beramigo daba ki nabilo tígua wali agali marume biragobi daba ki nabilimu.✠ <sup>2</sup> Tígua wali agali marume birago hondowa daba ki beramilidagua Ngode Datagaliwabehanda tígua beramigobi hondowa daba ki bulebira. Tígua wali agali maru hondowa ti bulene nabulene bi ogo lalu lo weramilidagua Ngode Datagaliwabehanda tí hondowa ani dege lo wulebira.✠ <sup>3</sup> Anigo tígua tí hamenenaga deni kugi emene ede ngago laramiligo tininaga deni ira goba ale ngago mitangi nabi howa laramiligo agibe.✠ <sup>4</sup> Tígua tininaga deni ira goba ale wu kamigo dege howa tí hamenhondo lalu, Inaga deni kugi emene ede ngago mero, lalu agua labehedabe. <sup>5</sup> Tí tombene hondo kihe kamigoni. Tininaga deni ira goba ale ngago ala mo wahowa mani tí hamenenaga deni kugi emene ngago bayuwa handalu mibehe holeberami.

<sup>6</sup> Mbirale Ngode Datagaliwabehondo loma bia ho ngago tígua biangohondo namilimu. Mirimiyagua nde biango biarume beregedalu tí porabu para howa hayulebira. Tinaga gele mini pealo baya gibi ngamiru nogo ngui ngagoria ba amu nahalimu. Ba amu harimiyagua gurubu gele ale baya gibi biaru nogo geme hingedolebira.✠

### *Ngi, lolenebi tai bulenebi, Panga dugua, lolenebi ogo* (Lugu 11.9-13)

<sup>7</sup> Ngi, lalimu. Ngi, larimiyagua tígua yu holeberami. Tai bialu halimu. Tai bialu harimiyagua handa walia holeberami. Panga dugua, lalu halimu. Panga dugua, lalu kamigola tihondo panga dugua holebira.✠ <sup>8</sup> Ogoninaga bibahendeme, Ngi, lalu karuhondo miragola yulebira. Tai bialu karume handa walia holebira. Panga dugua, lalu karuhondo panga dugua holebira.✠ <sup>9</sup> Waneigini aba kamiru tí iginime, Hina mbira ngi, layagua mbiralime ege tole dugu muleberamibe.✠ <sup>10</sup> Ai ibugua, Wena mbira ngi, layagua tí mbiralime nogombi minu muleberamibe. <sup>11</sup> Tíni ko howa tí waneiginihondo bayale dege mulene manda bu kami. Ogonidagua ndo bolangua

✠ 6:30: 1 Kin 10.4-7, 2 Bit 9.3-6 ✠ 6:32: Md 6.8 ✠ 6:33: 1 Kin 3.13-14, Iba 37.4, 37.25, Lm 14.17 ✠ 6:34: Har 16.4, 16.19, Md 6.11 ✠ 7:1: Lg 6.37, Lm 2.1, 1 Ko 4.3-5, Ya 4.11-12 ✠ 7:2: Mg 4.24 ✠ 7:3: Lg 6.41-42 ✠ 7:6: Md 10.14 ✠ 7:7: Yar 29.13-14, Mg 11.24, Lg 11.9-10, Yo 14.13-14, 15.7, 15.16, 16.23-24, Ya 1.5, 1 Yo 3.22 ✠ 7:8: Min 8.17, Yar 29.12-13, Lg 11.10, Ya 1.5, 1 Yo 3.22-23, 5.14-15 ✠ 7:9: Lg 11.11

howaore tí Aba dahuliya andaga kagohondo mbirale ngi laragola o laragohondo Ngode Datagaliwabehanda bayaleore dege dege mulebira.✧

<sup>12</sup> Wali agali marume tíhondo bilo hame laramilidagua nde tígua maru biaruhondo ani dege bilimu. Mosese heneyangi Mana lowinigohabi Ngode Datagaliwabe mana latagi haga henerume bi lawai henegohabi bi uruniha mana ogoninaga tene bulene lo nga.✧

*Panga haraba dorogone anda polene ngago ogo*  
(Lugu 13.24)

<sup>13</sup> Anda polene panga haraba dorogone ngago ogoniha anda pilimu. Heli dindi anda polene panga haraba yangale nga. Panga haraba ogoni ngagoria polene hariga taibi ndo awadaga ngagoni hondowa wali agali dewaoreme hariga ogoriani pialu ka.✧ <sup>14</sup> Holene gahengeore mule anda polene panga haraba dorogone nga. Ani ngago panga haraba ogoni ngagoria anda polene hariga taibiore ngago wali agali mbira mbira hangume hariga ogoni handa walia haga ka.✧

*Irame lini daganegonaga te ogo*  
(Lugu 6.43-44)

<sup>15</sup> Ngode Datagaliwabe mana henene ngadagua ndo latagi haga agali karu de hondowa mamage halimu. Tigua tí kamigoria ibalu dongoneni nogo sibi dambole ale howa miniha ti biango duduore ale ka.✧ <sup>16</sup> Tigua ti mana birago hondowa tioreda manda buleberami. Mamunali anihe ale kagome pu mbira mini gerebi lini nadaga ka. Mamunalime pogoli nadaga ka.✧ <sup>17</sup> Ira bayale kagome lini bayale daga ka. Ogonidagua dege ira ko kagome lini ko daga ka.✧ <sup>18</sup> Ira bayale kagome lini ko nadabehe ka. Ogonidagua dege ira ko kagome lini bayale nadabehe ka.✧ <sup>19</sup> Ira damene lini bayale nadaga kago ani nadaragola ira uruni dibuwa ira dedagoriani delolebira.✧ <sup>20</sup> Anigo tígua Ngode Datagaliwabe mana henene ngadagua ndo latagi haga karume mana birago hondowa tioreda manda buleberami.✧

*Ina tí manda nabialu nabido lolebero, lenego ogo*  
(Lugu 13.25-27)

<sup>21</sup> Bibahendeme í olowa, Anduane-o Anduane-o, lalu karu Ngode Datagaliwabehanda Handame Ho Kagoria anda piai naholebira. Í Aba dahuliya andaga kago hame ledadagua bialu karu ti degeme anda polebira.✧ <sup>22</sup> Daba Ki Bulene Horo ibirangi wali agali dewalime lalu, Anduane-o Anduane-o í minini howa iname Ngode Datagaliwabenaga bi mana latagi harima. Í mini lalu iname dama dewa wara tagi halubi agalime nabiagane ale dewa bialubi harima, lolebira.✧ <sup>23</sup> Ani laragola ina tihondo lalu, Ina tí manda nabialu nabido. Wali agali mana ko hanguore mo tene haga kamiruni tí í denguni nahe puabo hadaba, lolebero.✧

*Agali kirame anda binigo ogo*  
(Lugu 6.47-49)

<sup>24</sup> Anigo ina bi o larogoni hale halu bialu kagome ibu agali mbira mini gigabiwime ege tołeni anda biyagoni ale ka.✧ <sup>25</sup> Anda ani biyagola dalu timbuni ibalu howa iba li piyagome dindi namu layagolabi puyabume anda biagoha hongo howa pu la anda hayagolabi anda ege tołeni ho ndibu lenegome poda nabi hene.

<sup>26</sup> Ina bi larogoni hale halu bia nabi kagome ibu agali mini nawi howa iba muni anda biyagoni ale ka. <sup>27</sup> Anda ani biyagola dalu timbuni ibalu howa iba li piyagome dindi

✧ 7:11: Lg 11.13, Ya 1.17 ✧ 7:12: Md 22.39-40, Lg 6.31, Lm 13.8-10, Ga 5.14, 1 Ti 1.5 ✧ 7:13: Lg 13.24, Yo 10.7-9  
✧ 7:14: Ab 14.22 ✧ 7:15: Ese 22.27, Md 24.4, 24.24, Mg 13.22, Lg 6.26, Ab 20.29, 2 Pi 2.1, 1 Yo 4.1 ✧ 7:16: Md 7.20, 12.33, Lg 6.43-44, Ga 5.19-22, Ya 3.12 ✧ 7:17: Yar 11.19 ✧ 7:18: Lg 6.43 ✧ 7:19: Md 3.10, Lg 3.9, Yo 15.2, 15.6 ✧ 7:20: Md 12.33 ✧ 7:21: Hos 8.2, Md 21.31, Lg 6.46, Ab 19.13, Lm 2.13, Ya 1.22, 1.25 ✧ 7:22: 1 Ko 13.2  
✧ 7:23: Iba 6.8, Md 10.33, 13.41-42, 25.12, 25.41, Lg 13.25-27, 2 Ti 2.19 ✧ 7:24: Lg 6.47-48

namu layagolabi puyabume anda biagoha hongo howa pu la anda hayagolabi anda podaiore hene. Ani podo ibira halu u emene agima ndo lowa kulu ndugu lalu podope hene.

*Yasu ibugua hongo taraore yu howa mana lawai henego ogo*

<sup>28</sup> Yasuhanda bi uruni bibahende lai hayagola wali agali dewaore bu hearume ibugua taraore lawai hayago hale howa mogo lai hene. ✧ <sup>29</sup> Mana lowinigo lawai haga hearume lawai hagadagua ndo ibugua hongo taraore howa lawai halu hene. ✧

## 8

*Yasuhanda agali mbira mo dabi henego ogo*

*(Maga 1.40-45, Lugu 5.12-16)*

<sup>1</sup> Yasu ibu hari bare biagoriani howa daliyagola wali agali dewaoreme ibu haruru pialu hene. <sup>2</sup> Ani pialu howa agali mbira ge hamuabi heago Yasu hearia ibalu ge duli hanga ho biruwa lalu, Anduane-o ina i mo dabi hoa biyagua nde mo dabi habehe ke, lene. ✧

<sup>3</sup> Ani layagola Yasuhandaibunaga gi dogola amu howa agali biago ela halu ladai bialu lalu, Ina i mo dabi hoabago dabi ha, lene. Ani layagola agali biagonaga ge hamuabi abale dabi haiore hene. <sup>4</sup> Ani buwa Yasuhanda ibuhondo lalu, Ai hale ha. Maru nalami loma binigo mo miaga agali kagome i de hendelo ibu kagoria abale puabo halu pole pu. Ani bialu i dabi haiore haridago wali agali karume de hendelo walia hole Mosesehanda bi lowini wiyadagua mbirale mbira Ngode Datagaliwabhendo bo mibe, lene. ✧

*Yasuhanda ami haru haganaga biabe bia haga mbira mo dabi henego ogo*

*(Lugu 7.1-10)*

<sup>5</sup> Yasuhanda Kabaniama anda pialu hearia Lomo ami haru haga mbirame ibu lola howa lalu, ✧ <sup>6</sup> Anduane-o inaga biabe bia haga ibu i andagani warago bo wuwa tandaga timbuni nalu ema nabibehe nga, lalu lamini.

<sup>7</sup> Ani layagola Yasuhanda ibuhondo lalu, Ibu mo dabi hole porogo, lene.

<sup>8</sup> Ani layagola ami haru biagome ladai bialu lalu, Anduane-o ani ndo. Agali ko i alego andaga i ibulene emene nakarulapego ina inaga biabe bia haga biago dabi helo bi dege labe. <sup>9</sup> Ami handa gimbu bu haga hongohe karu tigua ihondo, Bia, laradagua bialu haruli. Ani buwa ina ani agali maru karuhondo, Bidaba, larodagua biaga ka. Ina mbiralihondo, Pu, larogola ibu piaga. Mendeahondo, Ibu, larogola ibu ibaga. Ina inaga garabaya biabe ale bia hagahondo, Ogo bia, larogola ogoni biaga, lene.

<sup>10</sup> Ani layagola hale howa Yasu ibu mogo timbuni lowa wali agali ibu haruru ibalu hearuhondo lalu, Ina ti langerogo Isaraele dindini mbiralime mini mbiraore ogonidaguaore wu hearia i nahende ko. ✧ <sup>11</sup> Ogo heneneore larogo wali agali dewaore dindi ni tagira ibiragohayagi howabi ai ni paliragohayagi howabi ibuwa tigua Ngode Datagaliwabhenda Handame Ho Kagoriani ibuwa Abarahamabi Aisagabi Yagababi heba tomo timbuni dawa gimbu bu wulebirago mandagi nalu birulebira. ✧ <sup>12</sup> Wali agali maru Ngode Datagaliwabhenda Handame Ho Kagoria polene wini wahayaru ti arumahe ngagoria minu ba tagi ho helolebira. Ani minu ba tagi ho helarogola howa ti dugu yiyi lalubi ne gingirulo hayaga bialu holebira, lene. ✧ <sup>13</sup> Ani lowa Yasuhanda ami haru haga biagohondo lalu, Ina mini mbiraore wu kedagua bulebirago ai andaga pamia, lene.

Ani layaore dege ami haru haga biagonaga biabe bia haga biago dabi hene.

✧ 7:28: Mg 1.22, Lg 4.32 ✧ 7:29: Yo 7.46 ✧ 8:2: Md 9.18, Mg 1.40-44, Lg 5.12-14, Ab 10.25 ✧ 8:4: LBM 14.1-32, Md 9.30, Mg 5.43, 7.36, Lg 5.14, 17.14 ✧ 8:5: Yo 4.47 ✧ 8:10: Md 15.28 ✧ 8:11: Iba 107.3, Lg 13.29 ✧ 8:12: Md 13.42, 21.43, 22.13, 25.30, Lg 13.28, 2 Pi 2.17, Yu 13



*Yasuhanda wali agali dewa mo dabi haga binigo ogo  
(Maga 1.29-34, Lugu 4.38-41)*

<sup>14</sup> Yasu ibu Pidanaga andaga puwa ibu imane poboyogo bialu warago bo wiaria de hendeme. <sup>15</sup> De hondowa ibugua wali biagonaga gi ela hayagola poboyogo ala biyago ereba halu dabi howa wali biago heyalu ibu Yasu tomo nelo mule manda manda bini.

<sup>16</sup> Alendo ni gai layagola wali agali bu hearume dama daragahe hearu Yasu hearia haru ibini. Haru ibiyagola Yasuhanda bi layagome dama dewa wara tagi halu wali agali warago bo wiarubi mo dabi halu hene. <sup>17</sup> Ibugua ani binigo Ngode Datagaliwabe mana latagi haga Aisaiahanda ala mbiwia heneyago heneneore lola hene. Aisaiahanda bi leneyago ogo, Inanaga warago bayago ibuni mo yini. Warago tara tara inani bayaru ibugua mo yalu pene, lenego nga.

*Yasu piyadagua haruru poa ho heneru ogo  
(Lugu 9.57-62)*

<sup>18</sup> Yasuhanda wali agali dewarore ibu heba bu hearu de hondowa ibu talima piaga biaruhondo lalu, Iba timbuni o bedagoni ange abene edegohayagi ma, lene. <sup>19</sup> Ani layagola howa Mana lowinigo lawai haga mbira Yasu hearia ibuwa ibuhondo lalu, Lawai haga-o í porego ha ina talima ibaga bulebero, lene.

<sup>20</sup> Ani layagola Yasuhanda ibuhondo ladai bialu lalu, Biango dudu ale karu ti dindi haŋha paliaga ega bedaru tinaga andaha paliaga Agali Hole Ibiyago ibu halo paluene henge nawi ka, lene. <sup>21</sup> Agali mende heago ibu Yasu talima piaga howa ibugua Yasuhondo lalu, Anduane-o ina i aba ala hora hole dai berogo, lene.

<sup>22</sup> Ani layagola Yasuhanda ibuhondo ladai bialu lalu, Homene karu tinaga homene tinime hora holene ngago ina i porodagua talima mba ibu, lene.

*Yasuhanda puyabu ibalahondo bi lenego ogo  
(Maga 4.35-41, Lugu 8.22-25)*

<sup>23</sup> Yasu ibu iba taluni anda pu birayagola ibunaga talima piaga biaru ibu heba pene. <sup>24</sup> Ani pialu hearia puyabu hongo howa pu layagola iba yaribu biyagome iba talu biago guaneha iba anda ibalu ibame ti nai hole bini. Ani biyagola Yasu ibu iba talu guaneha palia hondo hene. <sup>25</sup> Palia hondo hearia ibunaga talima piaga biaru tigua puwa Yasu mo barila halu lalu, Anduane-o ina homai haramago ina biamogo bule heya, lene.

<sup>26</sup> Ani layagola Yasuhanda ladai bialu lalu, Tí aginaga gi ho kamibe. Tigua mini mbiraore emene wu kamigo agi bulenego wu kamibe, lene. Ani lowa ibugua heyuwa puyabubi iba yaribuhondobi bi layagola puyabu nale ibabi yaribu nabi nimu lowa bayaleore wini.

<sup>27</sup> Ani biyagola bibahende hearume mogo lai howa lalu, Agali ogoni ibu ara alidabe. Puyabumebi ibamebi ibugua bi layago hale hagada, lalu hene.

*Yasuhanda agali kiraha dama daraga hearia wara tagi henego ogo  
(Maga 5.1-20, Lugu 8.26-39)*

<sup>28</sup> Yasu ibu iba timbuni bereago doma ede halu puwa Gadara dindi anda pene. Anda pialu hearia homali egeanda wiaruha agali kira tagira ibalu hearia Yasu lola hene. Agali ogoni labo libuha dama daraga howa wali agali bo wahabehe heago hondowa wali agali hariga ogoriani napiaga hene. <sup>29</sup> Libugua Yasu lola howa ga lowa lalu, Ngode Datagaliwabe Igini-o ina iyahondo agi bule ibiribe. Iya pani nolene horo naibidaore dege pani abale ngule ibiribe, lene.

✧ 8:14: Mg 1.29-34, Lg 4.38-41, 1 Ko 9.5 ✧ 8:16: Mg 1.32, Lg 4.40-41 ✧ 8:17: Ais 53.4, 1 Pi 2.24 ✧ 8:19: Lg 9.57-58 ✧ 8:20: 2 Ko 8.9 ✧ 8:21: 1 Kin 19.20, Lg 9.59-60, Yo 5.25 ✧ 8:24: Iba 4.8 ✧ 8:26: Iba 65.7, 89.9, 107.29, Md 14.31, 16.8 ✧ 8:28: Mg 5.1-2, Lg 8.26-27 ✧ 8:29: Mg 1.24, Lg 4.34, 4.41

<sup>30</sup> Emene kaware ale nogo dewa bareni piã nalu bu hene. <sup>31</sup> Ani bu kago manda buwa agali biago laboha dama daraga hayagome Yasuhondo lalu, Ína ina wara tagi holeyagua ina nogo nai karuha anda pu holomaya hole pudaba la, lene.

<sup>32</sup> Ani layagola Yasuhanda dama biaruhondo lalu, Tí tagira pialu nogoha anda pudaba, lene. Ani layagola dama biarume agali biago labo helalu nogo biaruha anda pene. Anda piyagola nogo bibahendeore hayaru bareni dalipebe bialu iba timbuni bereagoha anda piai hayagola ibame nogo biaru nai hene.

<sup>33</sup> Ibame nogo ani nai hayago de hondowa nogo haru haga hearume gerai lalu tanoni wali agali dewa bu heagoria puwa bibahende biyago te lalu agali ala dama daragahe biago labonagabi te lalu lamiai hene. <sup>34</sup> Lamiai hayagola wali agali bibahende hearume tano biagoria howa tagira pialu Yasu lola hole pene. Ani pialu howa tigua Yasu de hondowa ibuhondo hongo howa lalu, Í inanaga dindi ogoriani nahe wahalu pu, lene.

## 9

### *Yasuhanda agali mbira kuduguhe mo dabi henego ogo* (Maga 2.1-12, Lugu 5.17-26)

<sup>1</sup> Yasu iba taluni bialu iba bereago doma dai bialu ibuni haga biagoha dai bu heagola <sup>2</sup> agali marume agali mbira kuduguhe henego ibu lebereni ira ho yalu ibini. Ani yalu ibiyagola tigua mini mbiraore wu howa biyago hondowa Yasuhanda agali kuduguhe biagohondo lalu, I igini-o ínaga ko birigo domai hayago gi nahe turu habe, lene.\*

<sup>3</sup> Ani layagola Mana lo winigo lawai haga hearume tini hangula la la bialu lalu, Ngode Datagaliwabe ibuni hangume wali agali ko biyago domo wahabehe kagodago agali ogonime Ngode Datagaliwabe mege bialu kagoni ibu aidabe, lo manda bialu berene. <sup>4</sup> Ti ani lo manda bialu bereago hondowa Yasuhanda tihondo lalu, Dama biangome mini wini manda bialu bedamigoni agibe.\* <sup>5</sup> Ínaga ko domai haya lolenego taibidabe be heyalu ibaga bu ha lolenego taibidabe.\* <sup>6</sup> Anigo Agali Hole Ibiyagome dindini howa wali agalime ko biyago domo waholene hongo yu kago tí manda bilimulo walia haro, lene. Ani lowa ibugua agali kuduguhe biagohondo lalu, Heyuwa ínaga lebere mo yalu andaga pamia, lene.\*

<sup>7</sup> Ani laya handala agali biago ibu heyalu andaga pene. <sup>8</sup> Ani biyagoni hondowa wali agali hearume gi hai howa agali biago Ngode Datagaliwabe ibugua hongo taraore miyiyagonaga tigua Ngode Datagaliwabenaga mini yaraga hene.

### *Yasuhanda Madiu olenego ogo* (Maga 2.13-17, Lugu 5.27-32)

<sup>9</sup> Yasu ibu ani bialu harigani pole pialu hearia agali mbira dagisi muni miaga mini Madiu ibu dagisi muni miaganenaga andaha berearia hondowa Yasuhanda ibuhondo lalu, I porodagua talima íbu, lene.

Ani layagola Madiu ibu abale heyalu Yasu talima pene.

<sup>10</sup> Puwa Yasu ibu Madiu andaga tomo nalu berearia dagisi muni miaga hearubi mana ko biaga dewali hearubi ti Yasubi ibunaga talima piaga biarubi tomo nalu berearia ibalu biraganeni bira para ho berene.\* <sup>11</sup> Ani bialu bereagola Perisi agali maru hearume hondowa ibunaga talima piaga biaruhondo lalu, Tí naga lawai haga ibu mana ko biaga karu heba mandagi tomo nalu bedago irane agibe, lene.\*

<sup>12</sup> Bi ani layago hale howa Yasuhanda lalu, Wali agali warago nabe karu anogodame ti biamogo bilo ibu karia napiagago warago bo ngaru hangula anogodame ti biamogo bilo ibu karia piaga.\* <sup>13</sup> Anduane Homogonaga mbugani lo ngago ogo, I mbirale tara tara

\* 9:2: Md 8.10, Mg 2.3-5, Lg 5.18-20    \* 9:4: Iba 94.11, Md 12.25, Lg 6.8, 9.47, Yo 2.25    \* 9:5: Mg 2.5, 2.9, Lg 5.20, 7.48    \* 9:6: Yo 5.8, 17.2    \* 9:10: Lg 15.1-2    \* 9:11: Md 11.19, Mg 2.16, Lg 5.30, 19.7    \* 9:12: Mg 2.17, Lg 5.31

bo ngulene hame nale howa dara halu biamogo bulene hame ledó, lalu gilibu nga. Bi ogoni irane aginaga layadabe dabo hondole pudaba. *I* ibirugo wali agali bayale karu olole ndo wali agali ko biaga karu olole ibirugoni, lene.✠

*Tomo nane hagane mana winigo ogo  
(Maga 2.18-22, Lugu 5.33-39)*

<sup>14</sup> Ani biyagola baboraya biaga Yonenaga talima piaga hearume Yasu hearia ibuwa ibuhondo lalu, Inabi Perisi agali karubi ina tomo nane haga beramaligo inaga talima piaga karume tomo nane nahagadago irane agibe, lene.✠

<sup>15</sup> Ani layagola Yasuhanda tihondo ladai bialu lalu, Tigua agali mbirame wali dabu biragola howa wali agali tomo nole ngoai ho hararume agali wali dabu biaga biago heba mandagi biruwa tomo nole lowa nane darabini ale ho heloleberamibe. Ani naberamili. Horo mbiru agali wali dabu biaga biago ti kagoria howa marume ibu haru poragola tigua tomo nane holebira.✠

<sup>16</sup> Mbiralime aga gobani aga gahengeme lebu para nahaga. Ani lebu para hayagua aga gahenge biago migimugu lalu aga ala tawe biago buda timbu holebira. <sup>17</sup> Ogonidagua dege mbiralime waini iba gahenge bedago be nogo dongoneme wabini bamba taweha odo bere nalaga. Mbiralime odo bere layagua waini iba biagome be mo lere lalu tagira polebira. Ani biragola be biagobi ko dege holebira. Ani buligo waini iba gahenge bedago be nogo dongoneme wabini gahenge degeha bere laragola libu haru bayale ogobi labolabo holebira, lene.

*Yairasa wanebi wali Yasunaga agani ela hayagobi te ogo  
(Maga 5.21-43, Lugu 8.40-56)*

<sup>18</sup> Yasu ibu anidagua lalu hearia Yu wali agalinaga hondo hagane agali mbira ibuwa Yasu hegoria wanakuihayagi ge duli hanga ho biruwa lalu, *I* wane áyu dege tongolo miyago ibu lone dabi helo ina gime ela habelo mba, lene.✠

<sup>19</sup> Ani layagola Yasu ibu abale heyuwa ibu piyadagua piyagola ibunaga talima piaga biaru tibi ibu piyadagua pene.

<sup>20-21</sup> Pialu hearia wali mbira mali pira mbirani kira (21) warago taraore baabo haga berenegome ibuni hangu lo manda bialu lalu, Ina Yasunaga agani ela haruyagua bayale holebero, lowa Yasu erembirahayagi puwa aga nguini ela hene.✠✠

<sup>22</sup> Ani biyagola Yasuhanda beregedalu wali biago hondowa lalu, *I* wane-o ini Ngode Datagaliwabhondo mini mbiraore wirigome í áyu mo dabi hayago turu halu hongoho habe, lene. Ani layaore dege wali biago warago dabi hai hene.

<sup>23</sup> Ani bialu Yasu ibu Yu wali agalinaga hondo haga agali biago andaga anda pene. Anda pialu hearia pilipe alebi gawa alebi hiliyula alebi lalu dugu anda howa lalu walime kiabu dugu bialu hearia hondowa <sup>24</sup> Yasuhanda lalu, Wandari emene ogoni ibu tongolo mia nabi palia dege bidago tí bibahende tagira piai hadaba, lene. Ani layagola tigua Yasu hondo oba halu hene.✠ <sup>25</sup> Wali agali bu hearuni tagira piai hayagola Yasu ibugua wandari biago paliaga hobane mbiraha anda puwa wandari biago gi yamiyagola ibu heyini. <sup>26</sup> Yasuhanda biyagoninaga dindi ogonihayagi hearunime hale ho yogo lai hene.

*Yasuhanda agali de kohe kira mo dabi henego ogo*

<sup>27</sup> Yasu ibu dindi ogoniha howa tagira puwa ibu harigani pialu hearia agali kira de kohe henego labome Yasu olama mama ibalu howa lalu, Debidi Igini-o iya hondowa dara harene, lene.✠

✠ 9:13: Hos 6.6, Md 12.7, Mg 2.17, Lg 5.32, 1 Ti 1.15 ✠ 9:14: Lg 18.12 ✠ 9:15: Yo 3.29 ✠ 9:18: Mg 5.22, Lg 8.41-42 ✠ 9:20-21: Mg 5.25, Lg 8.43 ✠ 9:20-21: Md 14.36 ✠ 9:24: Yo 11.11 ✠ 9:27: Md 15.22, 20.29-34

<sup>28</sup> Yasu ibu andaga anda pu heagola agali kira biago labome talima ibini. Ibiyagola Yasuhanda libuhondo lalu, Libunaga de o dabi habehe i kogo mini mbiraore wu kabibe, lene.

Libugua ladai bialu lalu, Anduane-o e iya mini mbiraore wu kabagoni, lene.

<sup>29</sup> Ani layagola Yasuhanda libunaga deni ela halu howa lalu, Libuni mini mbiraore wu kabigobi dabi hadaba, lene.✧ <sup>30</sup> Ani layagola libunaga de biago de ngalayagola Yasuhanda libuhondo hongo howa lalu, O birugoniore libugua mbirali nalamilibu, lene.✧

<sup>31</sup> Ani laya handala libu pialu howa Yasuhanda o biyagoninaga dindi ogonihayagi hearunime hale hai helo lo yogo lama pene.

*Yasuhanda agali mbira bi nalaga hene mo dabi henego ogo*

<sup>32</sup> Agali biago labo tagira pialu piyagola wali agali marume agali mbiraha dama daraga hayagola bi nalabehe henego haru ibini.✧ <sup>33</sup> Dama daraga ho hayago wara tagi hayagola agali biagome bi tenialu lene. Ani biyagola bibahende bu hearume mogo lo nga karu lai howa lalu, Ogonidaguaore mbira Isaraeleni biyaria nahandalu nahende hene kamagoni, lene.✧

<sup>34</sup> Ani layagola Perisi agali hearume mo yo hondowa lalu, Ogoni dama bibahende karunaga haguane mini Heyolabe ibugua dama maru karu wara tagi holenenaga hongo miyagola wara tagi hayadagoni, lene.✧

*Yasuhanda wali agali bibahende dara hai ho henego ogo*

<sup>35</sup> Yasuhanda tano wiaruhabi mabu andaga wiaruhabi wali agali nenege piai halu hene. Ibugua ngoai hagane andaha howa Ngode Datagaliwabehanda Handame Ho Kagonaga Bi Mana Debene lamiabi lawaibi ha bigi bialu howa dongone ko haga biarubi warago tara tara bo wiarubi mo dabi ha bigi bialu hene.✧ <sup>36</sup> Ibugua wali agali dewa bu hearu handalu hearia dara holene ibunaga gubaliniha tolai howa hene. Irane ti nogo sibi haru hagane nahe howa hagamaga lulu anda ho pe ho howa mini dege dindi ho heagola dara ho hene.✧ <sup>37</sup> Ani bu heago hondowa ibugua ibunaga talima piaga biaruhondo lalu, Tomo bialu mo mogo bulenego timbu halu ai tomo ogoni mo mogo bialu biabe bia hagane agali ndiada.✧✧ <sup>38</sup> Anigo mabu anduane ibunime tomo buwa mo mogo bialu biabe bia hagane maru dabalulu pu lelo tigua ibuhondo bi lolene nga, lene.

## 10

*Yasuhanda abosolo homberiali (12) dabenegro ogo  
(Maga 3.13-19, Lugu 6.12-16)*

<sup>1</sup> Yasuhanda ibunaga talima piaga homberiali (12) biaru olalu, Ibiidaba, lowa dama daragahe karu wara tagi helobi dongone ko hagabi warago tara tara bo ngarubi bibahende mo dabi helobi ibugua tihondo hongo holene mini.✧ <sup>2</sup> Abosolo homberia (12) uruni tinaga mini uru, Saimono mini mende Pida ibubi ibu hamene Andurubi Yamese ibu hamene Yonebi libu Sebedi igini henego <sup>3</sup> Pilibibi Badolomiubi Tomasabi dagisi muni miaga Madiubi Alibiasa igini Yamesebi Tadiasabi <sup>4</sup> Saimono ibu kaj mini mende Paidoro ibubi Yudasa Isagariodo ibu Yasu nde lenego ibubi uruni ti Yasuhanda dabene.

*Homberiali (12) biarume biabe bule purogo lenego ogo  
(Maga 6.7-13, Lugu 9.1-6)*

<sup>5</sup> Yasuhanda agali homberiali (12) uruni ani dabowa ti pelonaga bi ogodagua lamini. Ti puwa Yuali ndo wali agali tara tara karuhabi Samaria tano karuhabi napilimu.✧

✧ 9:29: Md 8.13 ✧ 9:30: Md 8.4 ✧ 9:32: Md 12.22 ✧ 9:33: Mg 2.12 ✧ 9:34: Md 10.25, 12.24, Mg 3.22, Lg 11.15 ✧ 9:35: Md 4.23, Mg 1.39, Lg 4.44 ✧ 9:36: Dag 27.17, 1 Kin 22.17, 2 Bit 18.16, Ese 34.5, Seg 10.2, Md 14.14, Mg 6.34 ✧ 9:37: Mg 6.34, Yo 4.35 ✧ 9:37: Lg 10.2 ✧ 10:1: Md 9.35, Mg 3.13-15, 6.7, Lg 9.1 ✧ 10:5: Ab 13.46

<sup>6</sup> Ogoniha poradagua tígua Isaraele wali agali ti nogo sibi pu ereba ho kagobi kagoria pilimu. <sup>7</sup> Puwa, Ngode Datagaliwabenaga Handame Ho Holene horo ha para holene kaware nga, lalu bi mana lamilimu. <sup>8</sup> Ani buwa warago bo ngaru mo dabi halubi tongolo mini ngaru mo heya halubi ge hamuabi karu mo dabi halubi dama daragahe karu wara tagi halubi bialu halimu. Tígua áyu yu kamigoni yolome mini ndo yu kamigo ogoni bialu howa yolo ngi nalalimu. <sup>9</sup> Tígua pialu howa ngolobi silibabi muni emene toea ale ngarubi mbira nayi pilimu. <sup>10</sup> Ani buwa harigani pialu howa muni ngi lowa mo hanagane nubi tingiliya hunianebi ge subi halimbubi nayiore pilimu. Biabe biaga kagohondo mbirale mbira ibu buru pale kago ale mulene nga.

<sup>11</sup> Tígua tano mbiranibi mabu andaga mbirahabi anda puwa mbiralime, Tí palimiya ibidaba, larabe hondole pilimu. Poramigola palima larago baba paliaabo halu polene tu haragola pilimu. <sup>12</sup> Tígua anda mbiraha anda pialu howa, Mo palia holene tí heba helo, lalu anda pilimu. <sup>13</sup> Wali agali anda ogoniha padarume, Tí palimiya ibidaba, layagua tígua mo palia holene tí heba helo larimigo ti yu helo milimu. Tigua tí palimiya ibidaba nalayagua tígua mo palia holene helo larimigo tíni yamilimu. <sup>14</sup> Anda mbiraha karumebi tano mbirani karumebi tí palimiya ibidaba nale tígua bi laramigobi hale nahayagua nde tínaga geni abalu para kago taulo wahalu pilimu. <sup>15</sup> Ina tí langerogo Daba Ki Bulene Horo harangi Ngode Datagaliwabehanda dara howa Sodomu wali agalihondobi Gomora wali agalihondobi dabaradagua ndo wali agali tano ogoniha karu hongo howaore dabolebira, lene.

*Mo tandaga holene tagira ibulebira, lenego ogo  
(Maga 13.9-13, Lugu 21.12-17)*

<sup>16</sup> Yasuhanda lalu, Hale hadaba. Nogo sibi aleore kamigo tí biango gabua ale bu karuha ina pudaba larogoni. Tígua pialu howa bayuwa tendore nogombime yolo hinalu piagadagua pialu ega malibu aleme baya hangu hau howaore piagadagua pilimu. <sup>17</sup> Agali karume tí minuwa godi lole haru polebiragobi ngoai hagane andaha howa tí bolebiragobi ogoniore bayuwa mamage ho halimu. <sup>18</sup> Tí inaga minini kamigo hondowa kini karubi gabumane haru haga karubi ti karia godi lama lalu minu yalu poragola tígua Bi Mana Debene tihondobi Yuali ndo wali agali tara tara karuhondobi lamilimulo haru polebira. <sup>19</sup> Tigua tí godi lama lalu haru poragola agi lole harudabe lowabi aguaore lolego harube lowabi mini dege dindi ho nahalimu. Lolene tu haragola lolene wiragobi loleberami. <sup>20</sup> Ogoninaga bi loleberamigo tíninaga bi ndo loleberami. Tí Aba Ngode Datagaliwabe Dinini ibugua tínaga miniha howa la lalu langirago loleberami.

<sup>21</sup> Agalime tini hameneore homelo belo minu mulebira. Waneigini aba karume ti waneiginihondo ogonidagua dege bulebira. Waneiginime ti aya aba baba hoba migimigi bialu homelo belo minu mulebira. <sup>22</sup> Ani buwa inaga minini kamigo hondowa bibahendeoreme tí handabe manga holebira. Anigo mbiralime hongo howa ho ununu lo haabo hayagua hamaro birangi Ngode Datagaliwabehanda ogoni ibu pele mulebira. <sup>23</sup> Tí tano mbirani kamigola mo tandaga hayagua tano mendeni hole gerai lalu pilimu. Ina tihondo larogo Agali Hole Ibiyago ibu naibida tagi howa tígua Isaraelenaga tano bibahendeni biabe bulene ngaru biai naholeberami.

<sup>24</sup> Bu manda biaga kagome ibunaga biawai haga kago bolangua nahaga. Ani biagago garabaya biabe ale bia haga kagome ibunaga anduane kago bolangua nahaga. <sup>25</sup> Anigo

✧ 10:6: Yar 50.6, Md 15.24 ✧ 10:7: Md 3.2, 4.17, Lg 10.9-11 ✧ 10:7: Lg 10.4-12 ✧ 10:8: Ab 20.33 ✧ 10:9: Lg 10.4 ✧ 10:10: Dag 18.31, Lg 10.7, 1 Ko 9.14, 1 Ti 5.18 ✧ 10:12: Lg 10.5-6 ✧ 10:14: Ab 18.6 ✧ 10:15: Pig 19.24-28, Md 11.24, Yu 7 ✧ 10:16: Lg 10.3, Yo 10.12, Ab 20.29, Lm 16.19, 1 Ko 14.20, Eb 5.15 ✧ 10:17: Md 24.9 ✧ 10:17: Mg 13.9-11, Lg 12.11-12, 21.12-15 ✧ 10:18: Ab 25.23, 27.24 ✧ 10:20: Yo 14.26, 1 Ko 2.4 ✧ 10:21: Mai 7.6, Md 10.35, 13.12, Lg 21.16 ✧ 10:22: Md 24.9, 24.13, Mg 13.13, Lg 21.17, Yo 15.18-21 ✧ 10:23: Md 16.28 ✧ 10:24: Lg 6.40, Yo 13.16, 15.20



bu manda biagame ibunaga biawai haga kagobi holene karulape mitangi bulene nga. Garabaya biabe ale bia haga kagomebi ibunaga anduane kagobi holene karulape mitangi bulene nga. Ani buwa tigua waneigini aba kago ibu mini Heyolabe laga kayagua ibunaga waneigini karubi ti mini koorene ko lolobada, lene.✧

*Ngode Datagaliwabhondo hangu gi ho holene ngago ogo*  
(Lugu 12.2-7)

<sup>26</sup> Anigo tigua wali agali hondowa gi nahalimu. Mbirale áyu do ho ngaru mani mo pani hai halu ohowa biniru manda biaihe lalu bulebira.✧ <sup>27</sup> Ina arumaha howa langigi berogoni tigua horombe wá haragoria howa larodagua loyane bialu halimu. Tíni hangu howa layane hale harimigo tigua anda dangini howa awa lalu lope halimu. <sup>28</sup> Dinini heba ndo tingini hangu homelo бага karu hondowa gi nahalimu. Ai dinini tinginila kirabali heli dindiha mo bape habehe Ngode Datagaliwabe kago ibuhondo hangu gi ho halimu.✧ <sup>29</sup> Ogoninaga tigua muni emene toea ale mbirame ega pimbi ale kira yolo bibehe kami. Anigo ega pimbi ale homane mbira tínaga Aba kagome dindiha pu ereba henalaga ka hendeni. <sup>30</sup> Ai tínaga hagianeni mandari kamigo bibahendeore daga lai howa heleda hendeni.✧ <sup>31</sup> Anigo ega pimbi ale biru ngaru goyane lowa tí duniniore kamigo gi nahalimu, lene.✧

*Kerisonaga kogoni lalu latagi holenebi Kerisohondo erembira mulenebi ogo*  
(Lugu 12.8-9)

<sup>32</sup> Mbiralime wali agali bu karu wanakuini howa i mini lalu, I Kerisonaga kogoni, lalu latagi hayagua ina nde i Aba dahuliya andagani kagonaga wanakuini howa o biagonaga mini lalu ani dege lolebero.✧ <sup>33</sup> Anigo mbiralime wali agali bu karunaga wanakuini howa i mini nale erembira ngiyagua ina nde i Aba dahuliya andagani kagonaga wanakuini howa o biagonaga mini nale erembira mulebero, lene.✧

*Ina mo palia holene yalu ndo mo wai bia holene yalu ibiru, lenego ogo*  
(Lugu 12.51-53, 14.26-27)

<sup>34</sup> Ina dindi bibahendeni mo palia holene wule yalu ibiyada manda nabilimu. Ina mo palia holene yalu ndo mo wai bia holene yalu ibiru.✧ <sup>35</sup> I ibirugo iginime ti aba baba hoba migi migi bu halu waneme ti aiyá baba hoba migi migi bu biralu igiri oneme igiri aiyá baba hoba migi migi bu biralu bilo ani mo bia hole ibiru.✧ <sup>36</sup> Agalinaga waitigi hiriribiore ibuninaga onene waneiginibi ti holebira.✧

<sup>37</sup> Mbiralime i gubalini harago goyane lowa ibu aiyá abala gubalini timbuniore hayagua ibu inaga talima piaga habe nahe holebira. Ani buwa mbiralime i gubalini harago goyane lowa ibu waneigini gubalini timbuniore hayagua ibubi nde inaga talima piaga habe nahe dege holebira.✧ <sup>38</sup> Ani buwa mbiralime ibuninaga ira banga yalu i porodagua talima naibiyagua inaga talima piaga habe nahe dege holebira.✧ <sup>39</sup> Mbiralime ibuninaga holene ngago mo tene hayagua holene ogoni ereba holebira. Ai mbiralime i mo tene howa ibuni holene hado wahayagua holene gahenge yu holebira, lene.✧

*Emena mulene ngago ogo*  
(Maga 9.41)

<sup>40</sup> Mbiralime tihondo, Ina hamiya ibidaba, layagua ibi ibula habiya ibu lara. Ani buwa mbiralime ihondo, Iya habiya ibu, layagua mbirali i pu layagobi ibula habiya ibu laragoni.✧ <sup>41</sup> Mbiralime Ngode Datagaliwabenaga bi latagi haga kago hondowa

✧ 10:25: Md 9.34, Mg 3.22, Lg 11.15 ✧ 10:26: Mg 4.22, Lg 8.17 ✧ 10:28: Ais 8.12-13, Lg 12.4, Ya 4.12, 1 Pi 3.14  
✧ 10:30: Lg 21.18, Ab 27.34 ✧ 10:31: Md 6.26, 12.12 ✧ 10:32: Lg 12.8, Lm 10.9-10, Mo 3.5 ✧ 10:33: Mg 8.38, Lg 9.26, 2 Ti 2.12 ✧ 10:34: Lg 12.49-53 ✧ 10:35: Mai 7.6 ✧ 10:36: Iba 41.9, 55.13 ✧ 10:37: Man 33.9, Lg 14.26 ✧ 10:38: Md 16.24, Mg 8.34, Lg 9.23, 17.33, Yo 12.25 ✧ 10:39: Md 16.25, Mg 8.35, Lg 9.24, 17.33, Yo 12.25  
✧ 10:40: Mg 9.37, Lg 9.48, 10.16, Yo 13.20

ibuhondo, Habiya íbu, layagua mani ibubi Ngode Datagaliwabenaga bi latagi haga kagobi libu harume ogoninaga emena yu holeberabi. Ani buwa mbiralime agali mini tigabiwi kago hondowa ibuhondo, Habiya íbu, layagua mani ibubi agali mini tigabiwi kagobi libu harume ogoninaga emena yu holeberabi.✠ 42 Mbiralime inaga talima piaga mbira nira kago ibunaga talima piaga kagodago hondowa ibuhondo iba libule nelo hambu miyagua ogoni ibuhondo Ngode Datagaliwabehanda emena mulebiraore laro, lalu Yasuhanda lene.✠

## 11

### *Baboraya biaga Yonehanda bi lawia hayago lamule penego ogo (Lugu 7.18-35)*

<sup>1</sup> Yasuhanda ibu talima piaga homberiali (12) biaruhondo ani bulebira lalu lamiai halu tano ogoni wahalu tano maru kaware wiaruhayagi ibaga bialu howa wali agalihondo bi mana lawai ha lamia bigi bule pene.

<sup>2</sup> Yone ibu garabaya andaha hearia Kerisohanda bialu hayuago hale howa Yone ibugua ibuninaga talima piaga maruhondo, Bi agua lalu Yasu karia lamule pudaba, lene. Ani laya handala Yasu hearia puwa✠ <sup>3</sup> ibuhondo lalu, Í baboraya biaga Yonehanda, Mbiralí ibulebira, layagoni íyagua ina langi. Be mbiralí mani ibirabe hondole holomabe, lene.✠

<sup>4</sup> Ani layagola Yasuhanda la dai bialu lalu, Yone karia dai buwa bi hale haramigobi de handaramigobi ibuhondo lamilimu. Lamialu lalu, <sup>5</sup> De kohe heneru de handalu ge kohe heneru ibaga bialu ge hamuabi heneru mo dabi halu hale tuluhe heneru hale halu homo tongolo mini wiaru mo heya ho helalu ani buwa wali agali yagibano hearuhondo Bi Mana Debene lamialu hea, lalu lamule pudaba. <sup>6</sup> Ihondo mini kira nawi karume turu taraore ho holene nga, lene.✠

<sup>7</sup> Yonenaga talima piaga ibiyago dai bialu heaore Yasuhanda wali agali bu hearuhondo Yone mitangi bialu lalu, Yone ibu dindi koni wali agali nahaga wiagoria ibu hangu heagoha puwa tígua minime agileore hondole manda bu yalu pirimibe. Tani puyabume elape howa hongo nahe yomagelo wiago hondole pirimibe.✠ <sup>8</sup> Tí penedago agi hondole penebe. Agalime aga bayale hangu bu heago hondole pirimibe. Wali agali aga bayale ogonibiore bu kagome homogo anda baya gibi kagoha paliaga ka. <sup>9</sup> Tígua hondo penedago ogo ale hondole pirima lalu í langidaba ndabe. Ngode Datagaliwabe mana latagi haga heago hondole pirimibe. E aniore handarimi. Anigo Ngode Datagaliwabe mana latagi haga karu nira lowa ibu daligaore hearia handarimi.✠

<sup>10</sup> Ogoninaga Yone mitangi bialu Anduane Homogonaga mbugani lowini ngago ogo, Ngode Datagaliwabehanda lalu, Inaga bi lamule piagago ibu í bamba halu inaga hariga ba hama pelo ibuhondo pu lolebero, laya, lalu gilibu nga.✠ <sup>11</sup> Ina tí langerogo agali bibahende heneru mbiralí baboraya biaga Yone kagobi ndo ti nira hangu hene. Anigo Ngode Datagaliwabehanda Handame Ho Kagoria mbiralí niraore kago ibu Yone bolangua howa duniniore ka. <sup>12</sup> Baboraya biaga Yonehanda mana lamialu hayangi howa lama íbu gimbu bialu áyu ogoni Ngode Datagaliwabehanda Handame Ho Kagoria mo tandaga halu agali ko karume tinaga hongome karulole manda biaga ka.✠

<sup>13</sup> Anigo Mosese heneyangi Mana lowinigomebi Ngode Datagaliwabe mana latagi haga bibahende henerumebi lama íbu gimbu bialu Ngode Datagaliwabehanda Handame Ho Kagonaga mana laabo halu Yone hayangi lairi hene. <sup>14</sup> Ani bialu tígua tinaga bi hale howa mini mbiraore wua biyagua Elaya ibulebira lalu mbiwia halu lowinigo Yone íbu kagoni.✠ <sup>15</sup> Ogonigo tí hale kamiyagua nde hale haramine.

✠ 10:41: 1 Kin 17.10, 2 Kin 4.8 ✠ 10:42: Md 18.5-6, 25.40, Mg 9.41, Hi 6.10 ✠ 11:2: Md 14.3 ✠ 11:3: Mal 3.1  
✠ 11:6: Md 13.57, 26.31 ✠ 11:7: Md 3.5 ✠ 11:9: Lg 1.76 ✠ 11:10: Mal 3.1, Mg 1.2, Yo 3.28 ✠ 11:12: Lg 16.16 ✠ 11:14: Mal 4.5, Md 17.10-13, Mg 9.11-13

<sup>16</sup> Wali agali áyu karuni ina bi agi ale lalu mo manda bu hondoabe. Ti waneigini magadi hamani mbolatola balu biru wiagago ale ka. Maru mbolatola balu bira wiyarume maru mbolatola balu bedaruhondo ola amu halu lalu, <sup>17</sup> Iname tínaga pilipe la halu wali dabu bialu howa iba gana lagane la harimagola tígua mali nali harimi. Ani birimigola iname homenenaga kiabu dugu bia halu iba gana la harimagola tígua dugu nabi dege harimi, lalu hagago ale ti ka. <sup>18</sup> Ani buwa baboraya biaga Yone ibu íbu howa tomo nane hagane mana bialu waini ibabi nane hene. Ibu ani biyago hondowa tí bibahendeme, Ibu dama daraga ho ka, larimi. ✧ <sup>19</sup> Ani buwa Agali Hole Ibiyago íbu howa ibugua tomobi waini ibabi ta nabi nalu hene. Ani biyago hondowa tí bibahendeme lalu, Agali o kago ibu tomo na gimbu bialu waini iba naabo haga ka. Ibu dagisi muni miagabi mana ko biagabi karu baba nenege hinu mandagi kagonigo de handadaba, larimi. Anigo Ngode Datagaliwabenaga mini gigabiwi holene bia pani haragome heneneore ngago walia holebira, lene. ✧

*Tano maruha wali agalime mini mbiraore nawi henego ogo  
(Lugu 10.13-15)*

<sup>20</sup> Yasuhanda tano maruha howa agalime nabigane ale dewaore biyagola wali agali uruniha bu hearume mini beregeda nabi hene. Ani biyagola Yasuhanda ti talialu lalu, <sup>21</sup> Korasini wali agali kamiru tínaga mo ko holene timbu gibiore wulebirago dara ho ko. Bedesaida wali agali kamirubi tínaga mo ko holene timbu gibiore wulebirago dara ho ko. Tí hemiruha agalime nabigane ale biyago Taia Saidonolani abale bidale nde ti ko binigo wahai harima lalu walia helo dara howa walia halu aga karulowa tinaga dongoneni be mo dugu hirame kaleda. ✧ <sup>22</sup> Ina tí langerogo Daba Ki Bulene Horo harangi Ngode Datagaliwabehanda dara timbuni howa Taia Saidonolanaga wali agalihondo dabaradagua ndo wali agali tano uruniha kamiruhondo hongo howaore dabilebira. <sup>23</sup> Ai tí Kabaniamani kamiru dahuliya togo wialu polenaga tínaga yaraga hoa kamibe. Tí heli dindiha minu bape ho helolebira. Tíhondo agalime nabigane ale biyago Sodomu wali agalihondo bidale Sodomu tano ogoni áyu haabo kale. ✧ <sup>24</sup> Anigo Daba Ki Bulene Horo harangi Ngode Datagaliwabehanda dara timbuni howa Sodomu wali agali dabaradagua ndo tí kamiru hongo howaore dabilebira, lene. ✧

*Yasuhanda, I kogoria halọ birule íbu, lenego ogo  
(Lugu 10.21-22)*

<sup>25</sup> Horo ogoningi Yasuhanda lalu, Aba-o hari daliganagabi dindinagabi Anduane Homogo í kegoni. Dindi mana manda bu karubi mini gigabiwi karubi tihondo walia nahe harigo mini nalene wali agali ta nabi karuhondo ínaga mana tara walia harigonaga turu halu kaj laro. ✧ <sup>26</sup> Eore. I Aba-o ini bule hame lededagua birida.

<sup>27</sup> Anigo í Abahanda mbirale bibahende ihondo ngiai haya. Bibahendeoreme Igini ibu ogo kalo manda nabi Aba ibuni hangu manda bu ka. Ani buwa bibahendeoreme Aba ibu ogo kalo manda nabi Igini ibuni hangu manda bu ka. Igini ibugua ibu Aba walia hoa biragohondo walia haragola tigua Aba ogooreda lowa manda bu holebira. ✧

<sup>28</sup> Tí bibahendeme mbirale gendabi ngaru erekui howa yu kamiru halọ bereloliya í kogoria ibai hadaba. ✧ <sup>29</sup> Ini mo dindiha haganebi hogorale bu haganebi kogonigo tígua iha howa bu manda bule ini dariba hamagamaga kogonaga ira nguini mende tínime yadaba. Ani mo yaramigola halo birulene handa walia holeberami. ✧ <sup>30</sup> Ani buleberamigo irane ina dariba hamagamaga kogonaga ira nguini mende nguleberogo awadaga ngago mbirale ina tını mo yalimulo ngerogo gendabi ndo yabiabi ngero, lene. ✧

✧ **11:18:** Md 3.4 ✧ **11:19:** Md 9.10-14, Lg 7.35 ✧ **11:21:** Ais 23.1-18, Ese 26.1-28.26, Yol 3.4-8, Amo 1.9-10, Yna 3.6, Seg 9.2-4 ✧ **11:23:** Pig 19.24-28, Ais 14.13-15 ✧ **11:24:** Md 10.15, Lg 10.12 ✧ **11:25:** 1 Ko 1.26-29 ✧ **11:27:** Md 28.18, Yo 1.18, 3.35, 10.15, 17.2, Pb 2.9 ✧ **11:28:** Yar 31.25 ✧ **11:29:** Yar 6.16, Seg 9.9, Yo 13.15, Pb 2.5, 1 Yo 2.6 ✧ **11:30:** 1 Yo 5.3

## 12

### *Sabada horongi biabe nabiaga winigo ogo (Maga 2.23-28, Lugu 6.1-5)*

<sup>1</sup> Lu ndo emene tigi mbira dege howa Sabada horongi Yasu ladi ale mini widi teha pialu howa ibunaga talima piaga biaru garibi layagola widi biagonaga lini deago dowo nama nama pene. <sup>2</sup> Ani biyagola Perisi agali hearume Yasuhondo lalu, Inanaga Mana lowini ngago Sabada horongi nabulene wini ngago inaga talima piaga biarume pugualu bialu karuni handa, lene.

<sup>3</sup> Ani layagola Yasuhanda tihondo ladai bialu lalu, Debidibi ibunaga agalirubi tomo nawiyagola garibi lowa Debidihanda bini gilibu ngago ti nahende kamibe. <sup>4</sup> Ibu Ngode Datagaliwabenaga andaha anda puwa mberedi Ngode Datagaliwabhendo loma bialu mini wiago muwa ibunibi ibunaga agalirubi heba nene. Ani binigo Mana lowini ngago mberedi ogoni nanolene wini nga manda buwa nene. Loma binigo mo miagane agali degeme nolene nga lowini. <sup>5</sup> Ani buwa Mosese heneyangi Mana lowini ngago de nahende dege kamibe. Bi ogodagua lalu bi lowini ngagoni. Sabada horo bibahendengi loma binigo mo miaga agali karume Ngode Datagaliwabenaga andaha howa Sabada horonaga bulene bi lo ngago pugualu haga howa, Ti ko birimida, nalagago manda nabi dege haabo kamibe. <sup>6</sup> Ngode Datagaliwabenaga anda goyane hene howa mbirale mbira ayu ogoria ngago duniniore nganenaga ti langero. <sup>7</sup> Anduane Homogonaga mbugani lo ngago ogo, Ina mbirale loma bialu irani bo delolene hame nale biamogo bulene hame ledogo, lalu gilibu nga. Anigo bi ina larogo irane ogo ale laralo manda bidamile tigua wali agali ko nabi karuhondo, Ti ko birimida, nalaga kamile. <sup>8</sup> Ogoninaga Agali Hole Ibiyago ibu Sabada horonaga Anduane ka, lene.

### *Agali mbira gi kohe henego ogo (Maga 3.1-6, Lugu 6.6-11)*

<sup>9</sup> Yasu ibu dindi ogoni wahalu puwa ngoai hagane anda mbiraha pene. <sup>10</sup> Anda ogo-niha agali mbira gi mbariane kohe henego ibu hene. Agali maru hearume Yasuhondo, Ina koore biri, loa howa tigua ibuhondo lalu, Inanaga Mana lowini ngagome Sabada horongi mo dabi holene lalu lo ngabe be nalowibe, lene.

<sup>11</sup> Ani layagola Yasuhanda ladai bialu lalu, Aniyagua tinaga nogo sibi mbira Sabada horongi uliha pilayagua agua buleberami. Nogo sibi anduaneme uliha howa Sabada horongi dugu baraga naholebirabe. <sup>12</sup> Nogo sibi emene bagi hene ale lowa agali dunini timbuniore ka hendedeni. Anigo inanaga Mana lowini ngagome Sabada horongi mbirali biamogo bulene nga laga ndobe, lene. <sup>13</sup> Ani lowa ibugua agali gi kohe biagohondo lalu, Inaga gi mbariane dogola, lene.

Agali biago ibugua gi dogo layagola lone bayale ho dai bialu gi mendeyagi heagobi dege hene. <sup>14</sup> Ani biyagola Perisi agali biarume ibu helalu puwa, Yasu homelo agi bimabe, lalu lo manda bialu hene.

### *Ngode Datagaliwabenaga Biabe Bia Haga dabo helenego ogo*

<sup>15</sup> Yasuhanda ibu bole lo manda bialu heago hale howa dindi ogoniha nahe wahalu piyagola wali agali dewa bu hearubi ibu piyadagua pene. Pialu howa ibugua bibahende warago bo wigi biaru mo dabi haga bima pialu howa <sup>16</sup> tihondo, Ina o beroruniore maru lamulemeni, laga bima pene. <sup>17</sup> Ibugua ogoni bima penedagoni Ngode Datagaliwabhenda ibunaga mana latagi haga Aisaiaha howa mbiwia henego lola hene. Bi mbiwia henego ogo,

✧ **12:1:** Man 23.25, Mg 2.23-28, Lg 6.1-5 ✧ **12:2:** Har 20.10, Md 12.10, Lg 13.14, Yo 5.10, 7.23 ✧ **12:3:** 1 Sml 21.1-6 ✧ **12:4:** LBM 24.9 ✧ **12:5:** Dag 28.9-10 ✧ **12:6:** Md 12.41-42, Lg 11.31-32 ✧ **12:7:** Hos 6.6, Md 9.13 ✧ **12:10:** Lg 14.3 ✧ **12:11:** Har 23.4-5, Man 22.4, Lg 14.5 ✧ **12:14:** Md 26.4, 27.1, Mg 3.6, Lg 6.11, Yo 7.1, 7.19, 11.53 ✧ **12:15:** Mg 3.7-10 ✧ **12:16:** Md 8.4, Mg 3.12

18 Inaga biabe bia haga ina dabarugo o kagoni.✠

Ina ibu gubalini howa turu ho kogoni.

Ina i Dinini ibuniore hole pu larogola

ibugua inaga daba ki bulene ogobiore nga lalu wali agali dindi tara tarani bu karuhondo lo pebe bialu holebira.

19 Ibugua lai lalubi ga lalubi nalolebira.

Harigani howa awa lalu nalolebira.

20 Gambe mbira podabehe ema bialu duru lalu kago podope naholebira.

Ira hale mbira hundibehe auhe dalu kago ba hundiaore naholebira.

Tigatiga bulene ngaru bolangua hai helo ibugua bia ho wiaabo holebira.

21 Wali agali dindi tara tarani karume ibu mitangi bialu mini dunu bia ho holebira, lalu gilibu nga.

*Yasu dama Heyolabelanaga te ogo*

*(Maga 3.20-30, Lugu 11.14-23)*

22 Ani biyagola howa wali agali maru hearume agali mbiraha dama daraga hayagola howa debi ko halu bibi nalabehe henego Yasu hearia haru ibini. Haru ibiyagola Yasuhanda dama wara tagi hayagola agali biago debi handabehe halu bibi labehe hene.✠ 23 Yasuhanda ani biyagoni hondowa wali agali dewa bu hearume miniha mogo lai howa lalu, Ibu Debidi Iginidabe, lene.

24 Ani layagola hale howa Perisi agali hearume lalu, Ani ago dama bibahende karunaga haguane Heyolabe kagome ani bilonaga hongo miyago yu howa biragoni, lene.✠

25 Yasuhanda tinaga miniha tongoyongo paluwa lalu hearuni manda buwa tihondo lalu, Dindi mbiraoreni howa tale bigi bigi bu howa wai bia ai nai biyagua lu bia ho wiaabo naholebira. Ogonidagua dege tano mbirani wali agali bu kayaguabi hameigini mbiraore bu kayaguabi tale bigi bigi bu howa wai biyagua hangu hangu haga haga bu holebira.✠ 26 Anigo dama Heyolabeme haru kagoria howa marume maru baba hoba migi migi bialu wai bialu kayagua ogoni abale tale bigi bigi bu henego bia ho wiaabo habe nahe holebira. 27 Bi o larogoni tigua ihondo dama daraga karu wara tagi holene hongo dama Heyolabeme miya larimigonaga laro. Anidago ti baba haga kamirume dama daraga karu wara tagi helo hongo miyadago aiwabe. Aniyagua tinaga aria karu biabe biragome ti kagua manda birimigo walia haga ka. 28 Anigo ogoninaga irane ina dama daraga karu wara tagi holiyanaga hongo dama Heyolabeme ngiya larimigo ndo. Ngode Datagaliwabe Dinini ibugua ihondo hongo ngiyagoni karulo howa bero. O berogoni Ngode Datagaliwabenaga Handame Ho Holene tini kamigoria abaleore ibu nga lalu walia haragoni.✠

29 Mbiralime agali hongohe kagonaga andahaibunaga mbirale ngaru mo kayu bule pobe nahe holebira. Ibugua agali hongohe biago ala gi gebi minu huba bu wiyagua nde mani ibunaga andaha mbirale ngaru mo kayu bule pobehe holebira.✠

30 Mbiralime i aria ndo kago ibu ila waitigi ibuni ho ka. Ani buwa mbirali ila mo mogo bulene hame nale kagome waro hila halu bo purogo la haga ka.✠ 31 Anigo ina ti langerogo wali agalime ko biyagobi mege biyagobi domo wahabehe holebira. Mbiralime Ngode Datagaliwabe Dinini mege biyagua ibunaga ko ogoni domo wa naholebira.✠ 32 Mbiralime Agali Hole Ibiyago mege biyagua ko ogoni biyago Ngode Datagaliwabehanda domo wahabehe ka. Mbiralime Ngode Datagaliwabe Dinini mege

✠ 12:18: Ais 42.1-4, Md 3.17, 17.5 ✠ 12:22: Md 9.32-33 ✠ 12:24: Md 9.34, 10.25, Mg 3.22, Lg 11.15 ✠ 12:25: Md 9.4, Yo 2.25, Mo 2.23 ✠ 12:28: Dan 2.44, 7.14, Lg 1.33, 17.20-21, Ab 10.38, 1 Yo 3.8 ✠ 12:29: Ais 49.24, Lg 11.21-23, 1 Yo 4.4 ✠ 12:30: Mg 9.40, Lg 9.50, 11.23 ✠ 12:31: Mg 3.28-29, Lg 12.10, Ab 7.51, 1 Ti 1.13, Hi 6.4-6, 10.26, 1 Yo 5.16



biyagua ko ogoni biyago Ngode Datagaliwabehanda áyubi awebi domo wa naholebi-raore.✠

*Irame lini daganegonaga te ogo*  
(Lugu 6.43-45)

<sup>33</sup> Ira bayale kagome linibi bayale dege daga ka. Ira ko kagome linibi ko dege daga ka. Ira bibahende lini darago hondowa ira ogobiore kalo manda beramili.✠ <sup>34</sup> Tí nogombi ale kamiru. Tígua t́ni ko ngubi howa bi bayale agua loleberamibe. Bu habaneha tolo ngagobi ne harigaha la tagi haga.✠ <sup>35</sup> Mbirali bayale kagome ibuninaga bu habaneha bayale ngagobi bia tagi haga ka. Mbirali ko kagome ibuninaga bu habaneha ko ngagobi bia tagi haga ka.

<sup>36</sup> Bi o langerogo wali agaliru t́gua nagalone larimigonaga irane Daba Ki Bulene Horo harangi hangu hangu howa ladai buleberami. <sup>37</sup> Horo ogoningi t́naga bi larimigome t́ dabalú karulape harimi nakarulape harimi lalu walia holebira, lene.

*Agalime nabiagane ale bia, lenego ogo*  
(Maga 8.11-12, Lugu 11.29-32)

<sup>38</sup> Ani layagola Mana lowinigo lawai haga maru hearumebi Perisi agali maru hearumebi laraga halu lalu, Lawai haga-o agalime nabiagane ale mbira hondoa ho kamago ina mbira bia, lene.✠

<sup>39</sup> Ani layagola Yasuhanda mogo lo hondowa lalu, Wali agali áyu karume ko dege bialu Ngode Datagaliwabe mo tene nahaga haabo kago agidabe. Tígua ihondo agalime nabiagane ale mbira bia larimibe. Agalime nabiagane ale mbira Ngode Datagaliwabe mana latagi haga Yonahondo biyago dege binigo mitangi bulene nga.✠ <sup>40</sup> Yona ibu wena timbu mbiranaga tombeha horo tebiru mbi tebiru lowa berenedagua Agali Hole Ibiyagome nde horo tebiru mbi tebiru lowa dindiha wiai holebira. <sup>41</sup> Daba Ki Bulene Horo harangi Nineba wali agalime wali agali áyu karu baba heyuwa tihondo. Tí nakarulapeore birimi, lalu hongo howa lolebira. Irane ti Yonahanda Ngode Datagaliwabe bi mana latagi hayago hale howa mini beregedalu ko bibahende wahai hene. Anigo ina tihondo heneneore larogo áyu ogoriani kago ibu Yona henegobi ndo ibu duniniore ka, lene.✠ <sup>42</sup> Daba Ki Bulene Horo harangi Siba wali agalinaga Kuini wali ibugua wali agali áyu karu baba heyuwa tihondo, Nakarulapeore birimi, lalu hongo howa lolebira. Irane wali ogonime Solomonohanda mini gigabiwi howa bi mana wále lawai hayagola hale hole ibuni dindi kaundiaore howa ibaabo hene. Anigo ina tihondo larogo áyu ogoriani kago ibu Solomonohanda henegobi ndo ibu duniniore ka, lene.✠

*Dama mbira lone dai binigo ogo*  
(Lugu 11.24-26)

<sup>43</sup> Agali mbiraha dama daraga hayago wara tagi haya handala dama biago ibu puwa ibuni holenaga dindi tuhe mbira agiha ngabe hondole dindi bibahendeha tai bialu haga. Tai bialu howa mbira handa walia naheyagua✠ <sup>44</sup> ibuni hangu lo manda bialu lalu, Ini andaga biagoriani dai bulebero, lo manda biaga. Ani lalu ibuni andaga biagoha dai buwa handalu karia mbira nahe bayale gini bu waho ngaria handa walia haga. <sup>45</sup> Hondo wialu lone tagira puwa ibuni ko kagobi ndo lowa dama karia koorene ko karu haru dai bialu anda puwa anda ogoniha haga. Ani buwa dama biarume ibuha karulai haragola agali biago abale ko hayago emene ko lowa mani ko timbuniore holebira. Wali agali ko ngubi áyu o karuha ogonidaguaore bulebira, lene.✠

✠ 12:32: Md 11.19, Lg 12.10, Yo 7.12, 7.52, 1 Ti 1.13 ✠ 12:33: Md 7.16-20, Lg 6.44 ✠ 12:34: Md 3.7, 15.18, 23.22, Lg 3.7, 6.45 ✠ 12:38: Md 16.1, Mg 8.11, Lg 11.16, Yo 6.30, 1 Ko 1.22 ✠ 12:39: Md 16.4, Mg 8.12, Lg 11.29-32 ✠ 12:41: Yna 3.5 ✠ 12:42: 1 Kin 10.1-10, 2 Bit 9.1-12, Md 12.6 ✠ 12:43: Yob 1.7, Lg 11.24, 1 Pi 5.8 ✠ 12:45: Hi 6.4, 2 Pi 2.20-22

*Yasu aija hamenerunaga te ngago ogo  
(Maga 3.31-35, Lugu 8.19-21)*

<sup>46</sup> Yasu ibu wali agali hearuhondo bi lamialu hearia ibu aija hameneru ibini. Ti tagirani howa, Ibu baba te lole kama, lene.✧ <sup>47</sup> Ani layagola wali agali hearuni mbiragome Yasuhondo lalu, Í aija hameneru í baba te lama lole li tagirani ka, lene.

<sup>48</sup> Ani layagola Yasuhanda ladai bialu lalu, I aija ago í hamenebi arube, lene. <sup>49</sup> Ani lowa ibugua ibunaga talima piaga biaruhondo gi dola amu howa lalu, I aija hamenerubi o karunigo de handadaba. <sup>50</sup> Wali agalime í Aba dahuliya andaga kagome hame ledadagua bialu karu í hamenebi í mbalinibi í aiyabi ka, lene.✧

## 13

*Bi yobage lowa tomo egene polama pene lenego ogo  
(Maga 4.1-9, Lugu 8.4-8)*

<sup>1</sup> Yasu ibu horo ogonongi dege andaga howa tagira pialu iba timbuni bereago angeni puwa mana lawai hole berene. <sup>2</sup> Berearia wali agali dewaore íbu ngoai howa ibu bereagoria ho mabu bupe hayagola ti iba angeni helowa ibu iba taluni uba ede ho berene.✧ <sup>3</sup> Ani biruwa ibugua bi yobage lowa mana dewaore lamialu lalu,

Agali mbirame ladi ale mini widi egene mabuni ba a*í* n*ai* bima pene. <sup>4</sup> Ba a*í* n*ai* bima piyagola howa egene maru hariga teneni ibira ho wiaria egame ibuwa mo nai hene. <sup>5-6</sup> Egene maru ege to*le* dindi emene mbaliahe wiagoriani ibira howa abale anda halu dindi emene pini unura puabo habe naheyagola yuni emene doai lalu tagira ibiyago ni daba hayagola gau lai hene. <sup>7</sup> Ani buwa egene maru ira anihe gandula anda hene wiagoria ibira howa ani heba mandagi anda hamaga howa ho gengedalu oge hayagola lini nadabehe hene. <sup>8</sup> Egene maru dindi bayale wiagoriani ibira howa anda halu irane marume pira pira (100) dene. Marume pira waragaria (60) dene. Marume pira tebira (30) dene, lene.

<sup>9</sup> Ani lowa Yasuhanda lamaro bialu lalu, Hale kamiyagua nde hale haramine, lene.

*Bi yobage lolene irane winini lenego ogo  
(Maga 4.10-12, Lugu 8.9-10)*

<sup>10</sup> Ani layagola Yasunaga talima piaga biarume Yasu hearia ibuwa lalu, Ína wali agalihondo bi lamialu howa bi yobage lowa hangu lamigi biriligoni aginagabe, lene.

<sup>11</sup> Yasuhanda ladai bialu lalu, Ngode Datagaliwabehanda Handame Ho Kagonaga manda bulene ala pani nahe ngelenego maru karu ndo tí manda bilimulo ngiya. <sup>12</sup> Ogoninaga mbiralime mbirale mbira yu kagohondo dewa mo tago halu mulebira. Ani miragola karulape dege yu helo ndo dewaore yu helo mulebira. Anigo mbiralime mbirale mbira nayi howa emeneore yidago yamulebira.✧ <sup>13</sup> Ina maru karuhondo bi lamialu howa bi yobage lowa laruligoni irane tigua handaya howa de handa nabulebiragonagabi hale howa manda nabulebiragonagabi laruli.✧ <sup>14</sup> Anigo Ngode Datagaliwabe mana latagi haga Aisaiahanda mbiwia henego tiha lola holebirago ogo,✧✧ Wali agali urunime hale haabo hara tiraga minime manda nabulebira. Tigua de handaya haabo hara tiraga galone handa walia naholebira.

<sup>15</sup> Irane tinaga mini ndibulo wahene ka.✧

Tinaga haleme hale holilono hale ndibulo wahene ka.

Tinaga deme hondolilono de ndibulo wahene ka.

Ngode Datagaliwabehanda lalu, Tigua ani nabidale ti deme handalu haleme hale halu minime manda bialu

✧ 12:46: Md 13.55, Mg 3.31, Yo 2.12, Ab 1.14 ✧ 12:50: Yo 15.14, Lm 8.29, Ga 5.6, 6.15, Kl 3.11, Hi 2.11 ✧ 13:2: Lg 5.1-3 ✧ 13:12: Md 25.29, Mg 4.25, Lg 8.18, 19.26 ✧ 13:13: Man 29.4 ✧ 13:14: Mg 4.12, Yo 12.40, Ab 28.26-27 ✧ 13:14: Ais 6.9-10 ✧ 13:15: Hi 5.11

ihondo mini beregedo kale.

Ani bidale nde ina ti mo dabi kole, lenego,  
lalu gilibu nga.

<sup>16</sup> Tí áyu turu taraore howa aëa kəəa bu kamigoni. Tínga deme hendedami. Tínga haleme hale kami. ✧ <sup>17</sup> Ina tí langerogo Ngode Datagaliwabe mana latagi haga dewaoremebi Ngode Datagaliwabenaga wali agali dewaoremebi tígua handaramidagua hondoa timbuni howa handa nabi hene. Tígua hale haramidagua hale hoa timbuni howa hale nahe hene, lene. ✧

*Bi yobage lenegonaga lone garealo minigo ogo*  
(Maga 4.13-20, Lugu 8.11-15)

<sup>18</sup> Yasuhanda ani lowa lalu, Egene polene biagonaga bi yobage larugoni irane aginaga layadabe hondole hale hadaba. <sup>19</sup> Ngode Datagaliwabehanda Handame Ho Kagonaga bi mana hale howa manda nabi karu ti egene harigani ibira hayago ale ka. Ani kagola dama Heyolabeme abale ibalu tigua bi mana hale hayago mo yalu piaga. <sup>20</sup> Tomo egene ege tole dindi mbaliaheni ibira hayago ale wali agali marume bi mana abale hale howa turu halu mo yaga. <sup>21</sup> Ani buwa tinaga bu habaneha anda puabo habe nahedagola ti ho wiaabo nahaga. Ani buwa marume tigua bi mana mo yayago hondowa ti mo tandaga haragolabi mo ko holene íbu ngagolabi ti abaleore yu wahalu piaga. <sup>22</sup> Tomo egene dindi ani gandula anda hene wiagoriani ibira hayago ale wali agali marume bi mana hale howa dindini holene mitangi bialu mini tumutumu wu holenebi dindinaga mbirale dewa ngaru minime wua hai ho holenebi urunime bi mana hale hayago ho gengedalu oge haragola lini nadaga ka. ✧ <sup>23</sup> Tomo egene dindi bayaleni ibira hayago ale wali agali maru karume bi mana baya hangu hale howa mo yai halu tiha lini dewa pira pira (100) da pira waragaria (60) da pira tebira (30) daga bigi biaga ka, lene.

*Bi yobage lowa egene ko mbira widi alenaga te lenego ogo*

<sup>24</sup> Yasuhanda bi yobage dege mende lowa lalu, Ngode Datagaliwabehanda Handame Ho Kagona ogobi nga. Agali mbirame ibuni mabuni ladi ale mini widi egene bayaleore ba aī nāī bini. <sup>25</sup> Ani biyagola mbiraga mbirungi ti bibahende palia hondo hai heagola waitigi agali mbirame ibuwa widi egene ba aī nāī bu wiyagoḥa egene ko mbira widi ale ba aī nāī bu ngelalu ibu pu wahene. <sup>26</sup> Widi anda halu lini dolene tuore hayagola egene ko widi ale biagobi mandagi anda ho hearia hendene. <sup>27</sup> Mabu anduanenaga biabe bia haga biarume abale dai buwa mabu anduane biago lamialu lalu, Anduane-o í mabuni widi egene bayale hangu ba aī nāī biribe toba harimago. Egene ko anda ho kagoni agoḥa howa ibinigo anda ho kabe. <sup>28</sup> Ani layagola mabu anduane biagome ladai bialu lalu, Waitigi karume hangayada, lene. Tigua ibuhondo lalu, Iname puwa egene ko widi ale uruni dugu wahole polomaya hame ledebe, lene. <sup>29</sup> Anduane biagome ladai bialu lalu, Ndo egene ko widi ale áyu dugualu kamiria widi ibuni heba dugumaga holigo helalimu. <sup>30</sup> Dolene tu wilo áyu widi alebi widi ibunibi mandagi ani anda ho helalimu. Ani helowa mani inaga biabe bia hagarume widi ale uruni ala dugualu kabu bigi buwa delai howa mani widi gandulalu mo mogo buwa inaga tomo bu wiagaha wilimu larongi wule helalimu, lene. ✧

*Bi yobage lowa ira masada egenenaga te lenego ogo*  
(Maga 4.3-32, Lugu 13.18-19)

<sup>31</sup> Yasuhanda bi yobage dege tebone lalu, Ngode Datagaliwabehanda Handame Ho Kagona ogobi nga. Agali mbirame ira masada egene mbira mo yalu puwa ibu mabuni hengene. <sup>32</sup> Egene ogoni emeneorego anda haragola ira timbuni anda ho haga. Anda hai kagola ega bedarume ibuwa ira maganeni tinaga anda biaga, lene.

✧ 13:16: Lg 10.23-24 ✧ 13:17: Yo 8.56, Hi 11.13, 1 Pi 1.10-12 ✧ 13:22: Md 6.19-34, Lg 12.16-21, 1 Ti 6.9-10, 6.17  
✧ 13:30: Md 3.12

*Bi yobage lowa yidi te lenego ogo  
(Lugu 13.20-21)*

<sup>33</sup> Yasuhanda bi yobage dege mane lalu, Ngode Datagaliwabehanda Handame Ho Kagoria ogobi nga. Walime balawa timbuni beha odape howa yidi ibira haragola balawa mo timbu hagago ogoni aleore nga, lene.

*Bi yobage hangu lowa laminigo ogo  
(Maga 4.33-34)*

<sup>34</sup> Yasuhanda wali agali bu hearuhondo bi lole howa bame mbira nale bi yobage lowa hangu lamigi bini. <sup>35</sup> Ibugua ani binidagoni Ngode Datagaliwabe bi mana latagi haga mbirame mbiwia halu lowinigo lola hene. Bi ala mbiwia halu lowinigo ogo,<sup>☆</sup> Ina tihondo bi lalu howa yobage lalu hangu lamulebero. Ina tihondo mbira pigane wabiyangi howa wini ngaruni manda nabininaga bi lamulebero, lenego gilibu nga.

*Egene ko mbira widi alenaga bi yobage lamiyago lone garealo minigo ogo*

<sup>36</sup> Yasu ibu mana lalu howa andaga pu bereariaibunaga talima piaga biaru ibuwa lalu, Egene ko mbira widi alenaga mabuni ba ai nai bima pene lalu yobage larigoni irane langi, lene.

<sup>37</sup> Ani layagola Yasuhanda lalu, Agali egene bayale ba ai nai biyago ibu Agali Hole Ibiyago ka. <sup>38</sup> Mabu biago dindi bibahendeore ngagoni. Egene bayalego Ngode Datagaliwabe Handame Ho Kagonaga wali agali kagoni. Egene ko mbira widi ale karu dama Heyolabenaga wali agali kagoni.<sup>☆</sup> <sup>39</sup> Waitigime egene ko mbira widi ale ba ai nai biyago ibu dama Heyolabe ka. Tomo ogoni dolene tu horo ha maro birangi holebira. Tomo do wulene biabe bia haga biaru ti dahuliyali holebira. <sup>40</sup> Widi ale duguwa kabu buwa irani delayadagua horo ha maro birangi aniore bulebira.<sup>☆</sup> <sup>41</sup> Ani bulebirago Agali Hole Ibiyago ibugua Handame Ho Kagoria howa wali agali ko mo bia haga karubi wali agali ko biaga bibahende karubi mandagi mo mogo bule peloibunaga dahuliyaliruhondo, Ani bule pudaba, lolebira.<sup>☆</sup> <sup>42</sup> Ani buwa dahuliyalirume wali agali o biaru ira timbuni dedagoria minu bape holebira. Ani biragola wali agali o biarume dugu bialu tininaga ne gingirulo hayaga bialu holebira.<sup>☆</sup> <sup>43</sup> Ani biragola Ngode Datagaliwabenaga wali agali karume ti Abahanda Handame Ho Kagoria howa ti ni wá tara hagadagua ho holebira. Hale kamiyagua nde hale haramine, lene.<sup>☆</sup>

*Bi yobage lowa muni dindiha do hene lenego ogo*

<sup>44</sup> Yasuhanda lalu, Ngode Datagaliwabehanda Handame Ho Kagoria ogobi nga. Agali mbirame muni dewaore mabu mbiraha do ho wiaria hendene. Hondowa ibuni karulolenaga lone yi ho dai bu ngelalu turu taraore howa mbirale ibuni yini biaru yolo migi bima pialu mani dai buwa mabu biago yolo bini.<sup>☆</sup>

*Mbirale mbira mini pealonaga yobage lowa lenego ogo*

<sup>45</sup> Ngode Datagaliwabe ibugua Handame Ho Kagoria ogobi nga, lowa, Agalime hale pangeha paliagago mini pealo ogoni bayaleore agiha ngabe hondole tai bume halu haga. <sup>46</sup> Ani buwa ibugua pealo mbira ngane baya burugule handarangi ibugua mbirale ibuni yini biaru yolo migi bima pialu mani dai buwa pealo baya burugule biago yolo biaga, lene.<sup>☆</sup>

*Bi yobage lowa wena nunaga te lenego ogo*

☆ **13:35:** Iba 78.2 ☆ **13:38:** 1 Ko 3.9 ☆ **13:40:** Md 7.16, Yo 15.6 ☆ **13:41:** Md 24.31, 25.31-46, Mg 13.27  
☆ **13:42:** Md 8.12 ☆ **13:43:** Dan 12.3, 1 Ko 15.42, 15.53, 15.58 ☆ **13:44:** Ais 55.1, Md 19.29, Lg 14.33, Pb 3.7-8, Mo 3.18 ☆ **13:46:** Min 2.4, 3.14-15, 8.10, 8.19

<sup>47</sup> Yasuhanda lalu, Ngode Datagaliwabehanda Handame Ho Kagoria ogobi nga. Wena minaga agali marume wena nu iba timbuni bedagoha ibira haragola wena dewa tara tara minaga. ✧ <sup>48</sup> Wena nu biago tolai haragola angeni yamu ngelowa daba ki halu howa bayale galone bibehago dabo bagi howa be timbuniha ngelaga. Wena ko galone nabibehago dabo wahaga. <sup>49</sup> Horo ha maro birangi aguani dege bulebira. Dahuliyali karume wali agali kagoria puwa ✧ karuni daba ki halu howa bayale biagaru helalu ko biagaru mo mogo bulebira. <sup>50</sup> Ani buwa wali agali ko biaga biaru ira timbuni dedagoria minu bape haragola ogoniha ti dugu taraore bialu tininaga ne gingirulo hayaga bialu holebira, lene. ✧

*Mana gahengebi ala tawebi ngago ogo*

<sup>51</sup> Yasuhanda tihondo lalu, Mbirale uruni ogo alenaga laya lalu manda bu kamibe, lene.

Ani layagola tigua ladai bialu lalu, E ina manda bu kamagoni, lene.

<sup>52</sup> Ani layagola Yasuhanda ladai bialu lalu, Anidago Mana lowinigo lawai haga bibahende karume Ngode Datagaliwabehanda Handame Ho Kagonaga talima piaga hararu ti agali anda anduaneme ibunaga wia do hagane andaha howa mbirale gahenge aiware tawe ala tawebi haru mandagi mo yalu tagira piagago ale uru ka, lene.

*Nasarete wali agalime Yasu hame nale henego ogo  
(Maga 6.1-6, Lugu 4.16-30)*

<sup>53</sup> Yasu ibu bi yobage uruni lai howa dindi ogoni wahalu ✧ <sup>54</sup> ibuni dalu anda pialu tano biagoria dai bini. Ani dai buwa ibugua ngoai hagane andaha mana lawai hayagola wali agali biru wiarume mogo lai ho berene. Tigua lalu, Ibu mini gigabi ngago ani howa minidabe. Agalime nabihagane ale birarubi agiha tawedabe. ✧ <sup>55</sup> Ibu anda biabe biaga biago igini ndoyagoda. Ibu ajiya Meri biralu ibu hamene Yamese Yosebe Saimono Yudasa imaru ndoyagoda. ✧ <sup>56</sup> Ibu mbaliniru ina heba o bedaruni ndobe. Ibu mbirale uruni wia agiha wiaria minidabe, lene. <sup>57</sup> Tigua ani lowa ibu handabe manga halu hame nale hene. ✧

Tigua ani biyago manda buwa Yasuhanda tihondo lalu, Ngode Datagaliwabe mana latagi haga dindi bibahende ngaruniha wali agali karume ibu lai haga ka. Ibuni dindi teneni karumebi ibu hameiginirumebi ti dege hame nale haga, lene. <sup>58</sup> Dindi ogoriani hearume ibuhondo mini mbiraore nawiyagola ibugua ogoniha agalime nabihagane ale dewaore nabi hene. ✧

## 14

*Baboraya biaga Yone homenego ogo  
(Maga 6.14-29, Lugu 9.7-9)*

<sup>1</sup> O bialu henedagoningi Galili wali agali handame haga Herodo ibu Yasuhanda bialu hayuagoni hale hene. <sup>2</sup> Hale howa ibugua ibunaga haru haga hearuhondo lalu, Ogoni baboraya biaga Yone ala homayago ho dai bu howa agalime nabihagane ale bulenaga hongo holene yu haruagoni ibudago, lene.

<sup>3</sup> Ogoninaga ala Herodohanda Yone minuwa pu senime dariba howa garabaya andaha helene. O binidagoni irane Herodo ibugua ibu hamene Pilibi one Herodiasa ibu dabu binigome ibugua Yone garabaya andaha helene. ✧ <sup>4</sup> Ala baboraya biaga Yonehanda homa nabi howa Herodohondo lamiaabo halu lalu, Wali Herodiasa ogoniore i one berelo dabu birigo nabulene biridagoni, lene. <sup>5</sup> Ani layagola howa Herodohanda Yone homelo bo wahole biyaria Yu wali agali hearu hondowa gi howa wahene. Irane Yu

✧ 13:47: Md 22.9-10 ✧ 13:49: Md 25.32 ✧ 13:50: Md 13.42, Lg 13.28 ✧ 13:53: Md 7.28 ✧ 13:54: Md 2.23, Mg 6.1, Lg 4.16, 4.22, Yo 7.15 ✧ 13:55: Yo 6.42 ✧ 13:57: Md 11.6, Mg 6.3-4, Lg 4.24, Yo 4.44 ✧ 13:58: Mg 6.5-6 ✧ 14:3: LBM 18.16, 20.21, Md 11.2, Lg 3.19-20



wali agali tigua, Yone ibu Ngode Datagaliwabe mana latagi hagaore ka, laga henegonaga wahene.✠

<sup>6</sup> Ani buwa Herodo ibu taba henenengi hayagola tomo nalu biruwa wali Herodiasa waneme wali agali biru wiagoria howa mali lini. Mali liyago hondowa Herodohanda turu taraore howa <sup>7</sup> wandari biagohondo lalu, Ina ngi larego ale ta nabi nguliya, lalu lowini.

<sup>8</sup> Ani layagola ibu aija Herodiasa ibugua ibu wanehondo lamialu lalu, Herodohondo au labe. Baboraya biaga Yonenaga ma puguwa haguane ndisini yuwa áyu ogoni ngi labe, lene.

<sup>9</sup> Ani labe layadagua layagola Kini Herodo ibu mogo lowa wali agali biru wiaru wanakuini howa, Ngi larego ale nguliya, lalu lo wiyago manda bialu mo habo lole ndoyagola ibugua maruhondo lalu, Wandari biagome hame laradagua bule pudaba, lene. <sup>10</sup> Ani layagola nde abule ndoyagola agali marume Yone garabaya andaha heago ma puguwa✠ <sup>11</sup> haguane ndisini pugu yalu dai buwa wandari biagohondo miyagola wandari ibugua ibu aiyahondo mule pene. <sup>12</sup> Ani biyagola Yonenaga talima piaga henerume ibuwa ibu dongone mo yalu pialu hora howa tigua Yasu lamule pene.

*Wali agali dewaoreme tomo no karula penego ogo  
(Maga 6.30-44, Lugu 9.10-17, Yone 6.1-14)*

<sup>13</sup> Yone bo wahaya layago hale howa dindi Yasu ibu hayagoni wahalu iba taluni biralu mbirali naheha ibuni hangu pene. Wali agali bu hearume Yasu piya layago hale howa tano uruni wahalu Yasu piyadagua talima mama dindi dindi pene. <sup>14</sup> Yasu iba taluni howa uba ede halu hearia wali agali dewaore bu hearu hondowa ibunaga gubaliniha dara holene tolai howa ibugua waragobe hearu mo dabi haga bini.✠

<sup>15</sup> Horo ogoningi alendo hayagola ibunaga talima piaga biaru Yasu hearia ibuwa ibuhondo lalu, Ai alendo hayadago ina dindi ko tomo nawini kamago wali agali o karuni pugu pugu bialu tini tomo yolo mule tano emene karuha taya bima pudaba la, lene.

<sup>16</sup> Ani layagola Yasuhanda tihondo ladai bialu lalu, Ti tomo nelu tñime midaba, lene.

<sup>17</sup> Tigua ladai bialu lalu, Iname mberedi duria wena kira hangu lowa dege henedama, lene.

<sup>18</sup> Ani layagola Yasuhanda lalu, I kogoria tagu yalu ibidaba, lene. <sup>19</sup> Yalu ibiyagola ibugua wali agali hearuni, Tanini biradaba, lowa mberedi duria biarubi wena kira biago labobi mo yuwa hari daligaha handa daga halu Ngode Datagaliwabehondo kai lene. Ani lowa ibugua mberedi gai bu бага buwa ibunaga talima piaga biaruhondo miyagola tigua wali agali biru wiaruhondo mo mini.✠ <sup>20</sup> Ani miyagola bibahendeoreme no karula pialu ibira hayago ibunaga talima piaga biarume nu homberia (12) hono tolai hene.✠ <sup>21</sup> Nenedaruni wali waneiginiru nale agali hangu daga la ai halu daosini duria (5,000) hene.

*Yasu ibani penego ogo  
(Maga 6.45-52, Yone 6.15-21)*

<sup>22</sup> Ani biyagola howa Yasuhanda wali agali bu hearu andaga pugu pugu bidaba lalu ibunaga talima piaga biaruhondobi lalu, Tigua iba taluni biralu ange edeyagi pole pudaba, lene. <sup>23</sup> Ibugua wali agali biaruhondo, Pudaba, lowa hambene mbira wiagoria iraga howa Ngode Datagaliwabela bi lole pene. Aruma hayahayagi Yasu ibu ibuni hangu hene.✠ <sup>24</sup> Ani bu hea handala iba talu biago iba hanunihayagi pialu hearia puyabu hongo howa pu ladai biyagome iba mo yaribu biyagola talu biago mo badele bini.

✠ 14:5: Md 21.26, Lg 20.6 ✠ 14:10: Md 17.12, Mg 6.27, Lg 9.9 ✠ 14:14: Md 9.36, Mg 6.34 ✠ 14:19: Md 15.35-39, Mg 8.6-10 ✠ 14:20: 2 Kin 4.44, Mg 6.42-43, Lg 9.17, Yo 6.11-13 ✠ 14:23: Lg 6.12, 9.28

<sup>25</sup> Egerebagi muna biyagoha Yasu ibu ibunaga talima piaga biaru bereagoria ibani ibini. <sup>26</sup> Tigua ibu ibani ibiyago hondowa mogo timbuniore lo berene. Ti mogo lo biruwa lalu, O ibiragoni homene dininida, lowa gi howa ga lene.✧

<sup>27</sup> Ani layagola Yasuhanda tihondo lalu, I Yasu kogo gi nahe mini mbiraore hongo howa wu holene nga, lene.

<sup>28</sup> Ani layagola Pidahanda hongo howa la daga halu lalu, Anduane Homogo-o íoreyagua í keria ibani ibuliya íbu la, lene.

<sup>29</sup> Ani layagola Yasuhanda, Pida-o íbu, lene. Íbu, layagola Pida ibu iba taluni howa tagira pialu ibani Yasu hearia pole pene.✧ <sup>30</sup> Ani pole piyaria puyabu hongo howa pu layago hondowa mogo layagola iba nalu namu lole biyaria Pida ibunime ga lowa lalu, Anduane Homogo-o í gi mia, lene.

<sup>31</sup> Ani layagola Yasuhanda abale gini yamuwa yani halu lalu, Mini mbiraore emene wirigo abiyenenaga mini kira wuwa kebe, lene.✧

<sup>32</sup> Ani buwa libu haru mandagi iba taluni biraribigola puyabu pu nale nimu lene. <sup>33</sup> Ani biyago hondowa ibunaga talima piaga iba taluni birayarume Yasunaga mini yaraga halu Yasuhondo lalu, Í Ngode Datagaliwabe Igini heneneore kegoni, lene.✧

*Yasuhanda wali agali Genesareteni warago bo wiaru mo dabi henego ogo  
(Maga 6.53-56)*

<sup>34</sup> Ani bialu ti iba timbuni bereago domade halu dindi mbira mini Genesarete wiagoria anda piyagola <sup>35</sup> wali agali hearume ibu de hondowa, Yasuore ibiragonida, lo manda bini. Ani manda buwa tigua ibu heagoha warago bo wiaruni dindi wu mabu biaruniha howa Yasu hearia haru ibai hene. <sup>36</sup> Haru ibuwa tigua ibuhondo hame lowa lalu, Warago bo ngaru ti ínaga aga nguni hanguni ela helo, lene. Ani layagola wali agali Yasunaga agani ela haga biyaru ti dabi hai haga bini.✧

## 15

*Mamalime ilili biagane winigo ogo  
(Maga 7.1-13)*

<sup>1</sup> Ani biyagola howa Perisi agali maru hearubi Mana lo winigo lawai haga maru hearubi Yarusaleme howa Yasu hearia íbu ngoai ho howa tigua ibuhondo lalu, <sup>2</sup> Ínaga talima piaga karume bamba inanaga mamalime ilili biagane wini ngago pugualu gi wayawaya nabi howa tomo nalu kagoni agidabe, lene.✧

<sup>3</sup> Ani layagola Yasuhanda tihondo ladai bialu lalu, Anidago tígua nde Ngode Datagaliwabehanda bi lo ngadagua bia nabi t́ninaga mana hangu yu tiga biaabo halu kamigo irane aginagabe. <sup>4</sup> Ogoninaga Ngode Datagaliwabehanda lalu, Ínaga aba aiyabi mo yo handa nabi laradagua hale halu bibe, lalu, Mbiralime ibu aba aiyabi ha hayagua nde ibu homelo bolene nga, lene.✧ <sup>5</sup> Anidagua ndo tígua agua lawai haramili. Mbiralime mbirale ibunaga winigome ibu aba aiyayaguabi biamogo bulene howa ibugua lalu, Mbirale uruni Ngode Datagaliwabhondo loma bia ho ngo, layagua <sup>6</sup> ibu aba aiyala biamogo bulene nawi lawai haramiligoni. T́gua mana ogoni beramigome Ngode Datagaliwabehanda mana lo winigo wahalu t́ninaga mana lawai halu kami. <sup>7</sup> Tí tombene hondo kihe kamirunaga Ngode Datagaliwabe mana latagi haga Aisaiahanda mbiwia halu tí layagoore tigatigada, lene. Mbiwia hene lo ngago ogo,

<sup>8</sup> Ngode Datagaliwabehanda lalu, Wali agali urunime tinaga mini do howa✧✧ bime dege ínaga mini yaraga haga ka.

✧ 14:26: Lg 24.37 ✧ 14:29: Yo 21.7 ✧ 14:31: Md 8.26 ✧ 14:33: Iba 2.7, Mg 4.39, Lg 4.41, Yo 6.69, Ab 8.37, Lm 1.4 ✧ 14:36: Md 9.20-21, Mg 5.27-28, Lg 8.44 ✧ 15:2: Mg 7.5, Lg 11.38 ✧ 15:4: Har 20.12, 21.17, LBM 20.9, Man 5.16 ✧ 15:8: Ese 33.31 ✧ 15:8: Ais 29.13

<sup>9</sup> Tigua Ngode Datagaliwabehanda bi lowinigo lawai harama lalu howa agalime mana lo winigo dege lawai haga ka.✠

Anigo tigua inaga mini nagalone halu mo yaraga habe nahe, lenego gilibu nga, lalu Yasuhanda lamini.

*Wali agali mo ko hagane tene ogo  
(Maga 7.14-23)*

<sup>10</sup> Ani lowa Yasuhanda wali agali dewaore bu hearu olalu, Ibidaba, lowa tihondo lalu, Ina bi o larogo hale halu manda bilimu. <sup>11</sup> Ne harigaha anda poragome wali agali mo ko nahaga. Bu miniha howa mitangi tagira ibiragome wali agali mo ko haga, lene.✠

<sup>12</sup> Ani layagola ibunaga talima piaga biarume Yasu hearia ibuwa lalu, Ina bi o lareruninaga Perisi agali karuha anda puwa ti miniha tandaga halu kagoni manda bidebe, lene.

<sup>13</sup> Ani layagola Yasuhanda ladai bialu lalu, Mbirale bibahende i Aba dahuliya andaga kagome hengene ndogo minu duguai holebira.✠ <sup>14</sup> Perisi agali biaru ti mitangi nabilimu. Tinibi de kohe howa de kohe dege maru karu haru piaga kago. De kohe mbiragome de kohe mende haru pialu kagola libu haru kirabali gana habaneha pilo pagupagu bu wulebira, lene.✠

<sup>15</sup> Ani layagola Pidahanda la daga halu lalu, Ina manda bulumaya bi yobage larigoni irane langi, lene.

<sup>16</sup> Ani layagola Yasuhanda ladai bialu lalu, Ti nde mini nawi maru karudagua dege kamigoni. <sup>17</sup> Ti manda nabioire kamibe. Mbirale ne harigaha anda porago pialu tombeneha puabo halu tagira piaga. <sup>18</sup> Mbirale ne harigaha howa tagira ibiragome bu miniha howa tagira ibalu urunime wali agali mo ko haga.✠ <sup>19</sup> Irane bu miniha howa tagira ibiragome ko manda bialu homelo bolenebi wali agali kayu yaga bulenebi tingininaga ko tara bulenebi dabudabu kayu bulenebi ke holenebi la hirulenebi✠ <sup>20</sup> mbirale urunibi bulene bu miniha howa tagira ibiragome wali agali mo ko haga. Anigo tigua ti gi wayawaya biagane winidadagua bulene nga lalu lalalidagua nabi howa tomo naramigome mbirali mo ko nahaga, lene.

*Wali mbirame Yasuhondo mini mbiraore winigo ogo  
(Maga 7.24-30)*

<sup>21</sup> Yasu ibu dindi ogoni wahalu dindi Taia tanohayagibi Saidono tanohayagibi pene. <sup>22</sup> Ani piyagola Kenana wali mbira dindi ogoniha berenego ibu Yasu hearia ibuwa ibuhondo lalu, Debidi Igini-o i dara howa biamogo berene. I waneha dama daraga howa mo ko harago, lene.

<sup>23</sup> Ani layagola Yasuhanda wali biagohondo bi mbira ladai nabioire hene. Ibu ema nabi heagola ibunaga talima piaga biarume ibu hearia ibuwa Yasuhondo lalu, Wali o ibiragome ina poramadagua bi hale pobobi lama ibirago ibuhondo, Pu, la, lene.

<sup>24</sup> Ani layagola Yasuhanda ladai bialu lalu, Isaraele wali agali nogo sibi pu ereba hene ale karu ti hangu karia i ibilenego ko, lene.✠

<sup>25</sup> Ani layagola wali biagome Yasu heagoria abale ibuwa ge duli hanga ho biruwa lalu, Mambo-o i biamogo bia, lene.

<sup>26</sup> Ani layagola Yasuhanda ladai bialu lalu, Waneigini emenenaga hina biangome nelo bape holene nawi, lene.

<sup>27</sup> Ani layagola wali biagome lalu, Mambo ina ogoni tiga tigaore lari. Ti anduanenaga hina habane dagiani howa ibira hararu biangome mo naga ndobe, lene.

✠ 15:9: Kl 2.18-22, Ta 1.14 ✠ 15:11: Md 12.34, Ab 10.15, Lm 14.14, 14.17, 1 Ti 4.4, Ta 1.15 ✠ 15:13: Yo 15.2, 1 Ko 3.7 ✠ 15:14: Ais 9.16, Mal 2.8, Md 23.16, Lg 6.39, Lm 2.19 ✠ 15:18: Md 12.34, Ya 3.6 ✠ 15:19: Pig 8.21, Min 6.14, Yar 17.9, Md 12.34, Mg 7.21 ✠ 15:24: Md 10.5-6, Ab 3.25-26, Lm 15.8

<sup>28</sup> Ani layagola Yasuhanda wali biagohondo ladai bialu lalu, Ína mini mbiraore marume wiagadagua ndo timbuniore wu kegome hame lededagua bulebiraore, lene. Yasuhanda bi ogoni layaore dege wali biagonaga wane bayaleore hene.✠

*Yasuhanda wali agali dewa mo dabi henego ogo*

<sup>29</sup> Yasu ibu dindi ogoni wahalu Galili iba timbuni bereago ange ange puabo halu bare hombene mbira wiago iraga howa berene. <sup>30</sup> Berearia wali agali dewa bu hearume ge kohebi de kohebi tingini kohebi ne hambu ndibulebi warago tara tarabe maru dewabi heba Yasunaga geha mo yalu íbu ngelayagola ibugua ti mo dabi hai halu hene. <sup>31</sup> Ani biyagola wali agali bu hearume ne hambu ndibule hearu bi lalubi tingini kohe hearu bayale hai halubi ge kohe hearu ibaga bialubi de kohe hearu de handalubi ani bialu heago hondowa mogo lowa tigua Isaraele wali agalinaga Ngode Datagaliwabe kaore lowa mini yaraga halu hene.✠

*Agali hangu daga lalu daosini mariame (4,000) tomo no karula penego ogo (Maga 8.1-10)*

<sup>32</sup> Yasuhanda ibunaga talima piaga biaru olalu, Ibidaba, lowa lalu, Wali agali o karu í heba horo tebiru haabo hayagome ai áyu tomo nolene nawidago dara ho ko. Ti andaga pole pialu karia harigani de mborere buwa odope holigo ína tihondo tomo nami howa, Pudaba, lolene hame naleore ko, lene.✠

<sup>33</sup> Ani layagola talima piaga biarume ibuhondo lalu, Dindi ko wali agali bu karuni no karula pelo ina tomo agohayagi tai buleberamabe, lene.

<sup>34</sup> Ti ani layagola Yasuhanda tihondo lalu, Mberedi agira henedamibe, lene.

Tigua lalu, Iname mberedi karia wena nde emene maru henedama, lene.

<sup>35</sup> Ani layagola Yasuhanda wali agali bu hearuni, Dindini birai hadaba, lowa <sup>36</sup> ibugua mberedi karia biarubi wena emene biarubi mo yuwa Ngode Datagaliwabehondo turu halu kaj lowa gai bu baga buwa talima piaga biaruhondo mini. Ani miyagola tigua wali agali biru wiaruhondo ta halu mini. <sup>37</sup> Ti bibahendeme tomo miyago karulape nalu no ibira hayago mialu ibunaga talima piaga biarume nu karia hono tolai hene. <sup>38</sup> Nenedaruni wali waneigini nale agali hangu daga lai halu daosini maria (4,000) hene.

<sup>39</sup> Ani bialu Yasuhanda wali agali hearuni, Andaga pudaba, lalu iba taluni bialu dindi mbira mini Magadana wiagoaha pene.

## 16

*Agalime nabiagane ale bia, lenego ogo (Maga 8.11-13, Lugu 12.54-56)*

<sup>1</sup> Perisi agali maru hearubi Sadiusi agali maru hearubi Yasu hearia ibuwa tigua Yasuhanda mbira agi larabe hondole ibuhondo lalu, Ngode Datagaliwabehanda íha howa heneneore birabe hondolomaya ína agalime nabiagane ale mbira bia handa, lene.✠

<sup>2</sup> Ani layagola Yasuhanda lalu, Ni darama bialu paliragola tigua, Aiore oali gaea bulubada, laramili. <sup>3</sup> Egerebagi haragola harini pobo darama bialu aruma haragola, Dalu ibulubada, laramili. Tigua harini hondowa ogo aleore bulubada lowa haramiligodago áyu ogoninaga birago ogo ale biarua lalu mo tale nabi kamigodago. <sup>4</sup> Wali agali áyu o karu ko dege bialu Ngode Datagaliwabe mo tene nahaga ka. Tigua, Agalime nabiagane ale mbira hondolomaya bia, larimibe. Nabuleyago. Yona hendelo agalime nabiagane ale mbira binigo ogoni dege walia hene mitangi bulene nga, lene.✠

Ani lame halu bialu ibu ti hea handala pu wahalu pene.

*Perisi agalibi Sadiusi agalibinaga yidi te laminigo ogo  
(Maga 8.14-21)*

<sup>5</sup> Iyunaga talima piaga biarume iba timbuni bereagoria ange abene edehayagi domade halu pu howa handalu hearia mberedi mbira nahene embeda halu pu hene. <sup>6</sup> Ani biyagola Yasuhanda tihondo lalu, Perisi agalinagabi Sadiusi agalinagabi yidi ngago de hondowa bayuwa mamage ho halimu, lene.✧

<sup>7</sup> Ani layagola hale howa ibunaga talima piaga biaru tini hangume laga laga bialu lalu, Ibugua o laragoni iname mberedi mbira nahene ibirimagonaga lara, lalu hene.

<sup>8</sup> Yasuhanda tini hangu howa lalu heagoni manda buwa lalu, Tígua mberedi nahene ibirimada lowa lalu kamigoni agibe. Mini mbiraore emene wu kamigonida. <sup>9</sup> Tí manda nabi dege kamibe. Mberedi homane duria agali daosini duriame (5,000) no karula pelo gai bu бага birugo mitangi nabi kamibe. Ani birugola ti nalu ibira hayagola nu agira hono to larimibe.✧ <sup>10</sup> Ani buwa mberedi homane karia hangu biaru agali daosini mariame (4,000) nelu gai bu бага birugola ti nalu ibira hayagola nu agira hono to larimibe. <sup>11</sup> Ina tihondo mberedi lalu mbira nalarugo manda nabi kamigo agibe. Ina tihondo Perisi agalinagabi Sadiusi agalinagabi yidi ngago dege de hondowa bayuwa mamage ho halimu lalu, lene.✧

<sup>12</sup> Ani layagola talima piaga biarume manda bialu hearia ibugua layago tinaga mberedinaga yidi lalu ndo Perisi agalimebi Sadiusi agalimebi mana lawai hagago bayuwa de hondowa mamage ho halimu lalu layada manda bini.

*Pidahanda, Mbirali Dabo Helenego ibulebira lowinigo íore kegoni, lenego ogo  
(Maga 8.27-30, Lugu 9.18-21)*

<sup>13</sup> Ani lalu bialu Yasu ibu dindi mbira Sisaria Pilibai tanohayagi pu howa ibugua ibunaga talima piaga biaruhondo lalu, Wali agali karume Agali Hole Ibiyago ai ka lalu kabe, lene.

<sup>14</sup> Ani layagola tigua ladai bialu lalu, Marume, Baboraya biaga Yone ka, lalu marume, Elaya ka, lalu marume, Ngode Datagaliwabe mana latagi haga Yaremaiabi marubi ka, lalu laga ka, lene.✧

<sup>15</sup> Ani ladai biyagola ibugua tihondo lalu, Tígua nde í ai ka lalu kamibe, lene.

<sup>16</sup> Ani layagola Saimono Pidahanda ladai bialu lalu, Mbirali Dabo Helenego ibulebira lowinigo Ngode Datagaliwabe haluhe kagonaga Iginí íore kegoni, lene.✧

<sup>17</sup> Ani layagola Yasuhanda ladai bialu lalu, Yone igini Saimono ina bayaleore lari. Áyu henene larigoni dindi agali karume langiyagola ndo í Aba dahuliya andaga kagome í bayuwa mo manda bia halu, La, layagolaore larigoni, lene.✧ <sup>18</sup> Ani lowa lalu, Anigo ina Pida í ege toleore kegoni laro. Tole ogoriani inaga wali agali Ngode Datagaliwabehanda olo holebiraru mo bimaga harogola homanaga hongome giala hole bialu karu nalolebira.✧ <sup>19</sup> Ngode Datagaliwabehanda Handame Ho Kagonaga panga duguagane gi ihondo ngulebero. Ina dindini howa nabulene nga lo werego dahuliya andagani nde nabulene dege wulebira. Ina dindini howa bulene nga lo werego dahuliya andagani nde bulene dege wulebira, lene.✧

<sup>20</sup> Ani lowa Yasuhanda ibunaga talima piaga biaruhondo lalu, Mbirali Dabo Helenego ibulebira lowinigo í kogonigo mbirali nalamilimu, lene.✧

*Yasuhanda ibuni tandaga nalu homolenenaga te lenego ogo  
(Maga 8.31, Lugu 9.22-27)*

<sup>21</sup> Horo ogoningi howa Yasuhanda ibunaga talima piaga biaruhondo tigatiga aguaore bulebero lalu, I Yarusalemeni puwa agali ala hene miniwi karumebi loma binigo

✧ **16:6:** Lg 12.1 ✧ **16:9:** Md 14.17-21 ✧ **16:11:** Md 15.34-38 ✧ **16:14:** Md 14.1-2, Mg 6.14-15, Lg 9.7-8  
✧ **16:16:** Yo 6.68-69, Ab 8.37, Hi 1.2, 1.5, 1 Yo 4.15 ✧ **16:17:** Md 17.5, 1 Ko 2.10, Ga 1.15-16, Eb 2.8 ✧ **16:18:** Yo 1.42, Eb 2.20, Mo 21.14 ✧ **16:19:** Md 18.18, Yo 20.23 ✧ **16:20:** Md 17.9, Mg 9.9



mo miaga haguane karumebi Mana lowinigo lawai haga karumebi i mo tandaga timbuniore holebira. Ani bialu tigua i homelo baragola horo kiru howa tebonengi ini mo heya holebero, lene.

<sup>22</sup> Ani layagola Pidahanda Yasu haru pu bagi howa talialu lalu, Anduane Homogo-o ina bi laregoni agi larebe. Bulebira larigo nabilo Ngode Datagaliwabehanda biamogo bulebira, lene.

<sup>23</sup> Ani layagola Yasu ibu beregedowa Pidahondo lalu, Dama Heyolabe i i kogoria nahe pu. Bi o larigoni Ngode Datagaliwabenaga ndo agalinagadago ina inaga harigani ha pai haregoni, lene.

<sup>24</sup> Ani lowa Yasu ibugua ibunaga talima piaga biaruhondo lalu, Mbiralime i porodagua ibua ho kayagua ibuni hame ledago mitangi nabi ibuninaga ira banga yalu i talima ibulene nga. <sup>25</sup> Ogoninaga mbiralime ibuni holene ngago mo tene hayagua holene ogoni ereba hai holebira. Mbiralime ibuninaga holene wahai halu i mo tene hayagua holene gahenge ibu handa walia holebira. <sup>26</sup> Mbiralime dindi bibahendeni ngaru mo tene ho kaore ibuninaga holene maro biyagua biamogo bulebirabe. Biamogo nabulebiraore. Ibuninaga holene lone mo yu dai bule ibugua mbira bibe naheore. <sup>27</sup> Agali Hole Ibiyago ibu Abanaga wa taraore holene karulalu dahuliyali heba ayu dege daibule kago. Dai birangi ibugua wali agali bibahendeme biyadaguaore tihondo emena mulebira. <sup>28</sup> Ina tihondo heneneore larogo maru ayu ogoria kamiru nahome haabo kamiore Agali Hole Ibiyago ibuni Handame Haga Kini howa ibiragola de hondoleberemi, lalu lene. <sup>\*</sup>

## 17

*Yasu mo tara ho hearia ti de hendene go  
(Maga 9.2-13, Lugu 9.28-36)*

<sup>1</sup> Horo waragaru howa Yasuhanda Pidabi Yamese Yone libu hamenela henego haru halu tini hangu hole hari mbira timbuni weagoria haru iraga ho hene. <sup>2</sup> Ani howa tigua handalu hearia Yasu ibuni mo tara halu ibunaga dengui biago mo tara dege howa ni hanuni howa daragola wa taraore haraligobi halu aga biago pele dege bialu taraore demborerebi hearia de hendene. <sup>3</sup> Ani de hondowa talima piaga tebira biarume handalu hearia Moses Elayala Yasu baba te lalu hearia de hendene. <sup>4</sup> Ani lalu heagola Pidahanda Yasuhondo lalu, Anduane Homogo-o ina ogoria kamagoni bayaledago ina anda nemanda mbira inaga mende Mosesenaga tebone Elayanaga lowa tebira hame lareyagua bia holebero, lene.

<sup>5</sup> Pida ibu wene bi lalu heaore beraliba pele taraore demborerebi ti heagoria tiga tiga ibuwa beraliba biagoha howa bi la dali halu lalu, I Iginioire ogoni gubalini ho kogo ibugua bi larago hale halimu, lene. <sup>\*</sup>

<sup>6</sup> Bi ani layuago hale howa Yasunaga talima piaga biarume mogo timbuniore lowa dindini bulu palu wigi wigi bini. <sup>7</sup> Ani bu wiaria Yasu ibuwa ela halu lalu, Gi nahe heyadaba, lene. <sup>8</sup> Ani layagola ti dengala howa handalu hearia mende nahe Yasu hangu hearia hendene.

<sup>9</sup> Ti harini howa dalialu howa Yasuhanda tihondo hongo howa lalu, De gandeba ale ayu handarimigoni mbirali nalami Agali Hole Ibiyago tongolo muwa mo heya haragola dege lamilimu, lene. <sup>\*</sup>

<sup>10</sup> Ani layagola ibunaga talima piaga biarume Yasuhondo lalu, Mana lo winigo lawai haga karume Elaya ibu ala ibulebira lalu kago irane agidabe, lene. <sup>\*</sup>

<sup>\*</sup> **16:24:** Md 10.38, Lg 14.27, Ab 14.22, 2 Ti 3.12    <sup>\*</sup> **16:25:** Md 10.39, Lg 17.33, Yo 12.25    <sup>\*</sup> **16:26:** Iba 49.7-8, Md 4.8-9    <sup>\*</sup> **16:27:** Iba 62.12, Min 24.12, Seg 14.5, Md 25.31, 26.64, Mg 8.38, Lg 9.26, Lm 2.6, 1 Pi 1.17, Mo 22.12    <sup>\*</sup> **16:28:** Mg 9.1, Lg 9.27    <sup>\*</sup> **17:1:** 2 Pi 1.17-18    <sup>\*</sup> **17:5:** Pig 22.2, Man 18.15, Iba 2.7, Ais 42.1, Md 3.17, 12.18, Mg 1.11, Lg 3.22    <sup>\*</sup> **17:9:** Md 8.4, 9.30, 12.16, 16.20    <sup>\*</sup> **17:10:** Mal 4.5

<sup>11</sup> Yasuhanda ladai bialu lalu, Bibahende mo manda manda bulenaga Elaya ibu ala ibulebiraore. <sup>12</sup> Anigo ina tí langerogo Elaya ala ibiya. Ibiyagola wali agali hearume ibu manda nabi tinime ibuhondo bua biyadagua bialu haya. Ani bialu hayadagua dege Agali Hole Ibiyagohondo tigua nde mo tandaga dege holebira, lene.✧

<sup>13</sup> Ani layagola talima piaga biarume tihondo bi o laragoni baboraya biaga Yonenaga laralo manda bu hene.✧

*Yasuhanda igiri mbiraha dama hearia wara tagi henego ogo  
(Maga 9.14-29, Lugu 9.37-43)*

<sup>14</sup> Ti wali agali bu heagoria dai bialu hearia agali mbirame Yasunaga wanakuihayagi ibuwa ge duli hanga ho biruwa <sup>15</sup> lalu, Anduane-o i iginihondo dara howa biamogo berene. Ibu biango bibi biaabo halu dindini pilaga bialu marungi ibu ira dedagohabi ibahabi pilaga biaga. <sup>16</sup> Ani biyagola ina inaga talima piaga biaru hearia haru ibirugola tigua ibu mo bayale nahabeheya, lene.

<sup>17</sup> Ani layagola Yasuhanda ladai bialu lalu, Wali agali tí mini mbiraore nawi howa mini pu tara ho haabo kamigoni. Ina tí kamiruha horo agiru haabo holiyadabe. Ina tí heba howa horo agiru tinaga genda yu haabo holiyadabe, lene. Ibugua ani lowa lalu, Igiri biago i kogoria haru ibidaba, lene.✧ <sup>18</sup> Haru ibiyagola Yasuhanda dama biagohondo, Tagira pu, layagola igiri biago helalu dama tagira piyagola igiri biago bayaleore hene.

<sup>19</sup> Ani biyagola ibunaga talima piaga biarume ibuni hangu hearia ibuwa lalu, Iname dama wara tagi nahabehe kamago agidabe, lene.✧

<sup>20</sup> Yasuhanda tihondo ladai bialu lalu, Tigua mini mbiraore emene wu kamigome dama wara tagi nahabehe kami. Ina tihondo heneneore larogo ira masada egene emeneore ngago ale mini mbiraore wu harimiyagua hari wedagohondo lalu, Ogoriani howa amugoria pu, laramigola ibu amugoha polebira. Ani buwa mbirale marubi ta nabi bibehe holeberami, lene.✧ [ <sup>21</sup> Anigo mbirale mbira beramigome ndo tomo nane howa Ngode Datagaliwabehondo bi laramigo hangume dama ogonibi wara tagi holene nga, lene.]

*Yasuhanda ibuni homolenenaga te halu mende lenego ogo  
(Maga 9.30-32, Lugu 9.43-45)*

<sup>22</sup> Talima piaga biaru Galilini mandagi ibu ngoai hayagola Yasuhanda tihondo lalu, Agali Hole Ibiyago agalihondo minu mulene tu haruagoni.✧ <sup>23</sup> Minu mialu tigua ibu homelo baragola horo kiru howa tebonengi ibuni mo heya holebira, lene.

Aniore layagola nde ibunaga talima piaga biarume daraore howa dugupeore ho hene.

*Ngode Datagaliwabenaga anda dagisi muni minigo ogo*

<sup>24</sup> Yasubi ibunaga talima piaga biarubi Kabaniama anda piyagola Ngode Datagaliwabenaga anda dagisi muni miaga hearume Pida hearia ibuwa lalu, Inaga lawai haga kagonime Ngode Datagaliwabenaga anda dagisi muni wiagabe, lene.✧

<sup>25</sup> Ani layagola Pidahanda lalu, E wiagaore, lene.

Ani lowa Pida ibu andaga piyagola Yasuhanda ala lalu, Saimono-o ina agi manda bu kebe. Dindi bibahende hangu hangu ho ngarunaga kini karuhondo dagisi muni miradago aiwabe. Dindi uruninaga wali agalirumebe be dindi tara howa ibinirume miagabe, lene.

<sup>26</sup> Ani layagola Pidahanda ladai bialu lalu, Dindi tara howa ibinirume miaga, lene.

Yasuhanda ladai bialu lalu, Anidago dindi uruninaga wali agalirume dagisi muni mulene nawidagoni. <sup>27</sup> Anigo iname o karuni mo pila holene hame nale kamago ina iba

✧ 17:12: Md 11.14 ✧ 17:13: Lg 1.17 ✧ 17:17: Man 32.5, 32.20, Yo 14.9 ✧ 17:19: Md 10.1 ✧ 17:20: Md 21.21, Mg 11.23, Lg 17.6, 1 Ko 12.9, 13.2 ✧ 17:22: Md 16.21 ✧ 17:24: Har 30.13, 38.26

timbuni bedagoha puwa wena pu iba bedagoha bape habe. Wena pinagane baregonaga ne hanganeha muni kuni mbira yulebirago ogonime Ngode Datagaliwabenaga anda dagisi muni inagabi inagabi wulene karula polebira. Kuni ogoni mo yalu iyanaga dagisi muni wule pobe, lene.

## 18

### *Bolangua ho kago aibe, lenego ogo* (Maga 9.33-37, Lugu 9.46-48)

<sup>1</sup> Horo uruningi talima piaga biarume Yasu hearia ibuwa lalu, Ngode Datagaliwabehanda Handame Ho Kagoria bolangua howa handape ho kago aibe, lene.✧

<sup>2</sup> Ani layagola Yasuhanda igiri emene mbira olowa tinaga wanakuihayagi helowa <sup>3</sup> lalu, Ina tihondo heneneore larogo tigua mini mo beregedalu igiri emene ogobi naharimiyagua Ngode Datagaliwabehanda Handame Ho Kagoria anda napoleberami.✧

<sup>4</sup> Mbirali ibuni mo dindiha halu waneigini ogobi hayagua Ngode Datagaliwabehanda Handame Ho Kagoria ibu bolangua howa duniniore ho holebira.✧ <sup>5</sup> Ani buwa mbiralime inaga minini howa waneigini emene ogobigohondo, Ila habiya ibu, layagua ihondobi ila habiya ibu lara, lene.✧

### *Ina ko mo bia holene te lenego ogo* (Maga 9.42-48, Lugu 17.1-2)

<sup>6</sup> Mbiralime waneigini ogonibigo ihondo mini mbiraore wu kago hado wahelo ko mo bia hayagua ege tole timbuni ngago pume ibunaga mani pongo bia howa iba timbuni bedagoha ibame nelo bape holene bayale nga.✧ <sup>7</sup> Wali agalime ihondo mini mbiraore wu kago hada hole bialu wahelo dindi bibahendeni mbirale bu payabu ngarume ani biagonaga dara emene ndoore ho kogoni. Mbirale uruni horo bibahendengi ani bia ho wiaabo holebirago mbiralime ti ko mo bia haragonaga pani emene ndoore nolebiragonaga dara ho kogoni.✧

<sup>8</sup> Ina ihondo mini mbiraore wu kego hado wahabelo inaga gi mendegomebi ge mendegomebi ko mo bia hayagua mendego gandulo wahabe. Gi gebi kirabali howa ira dalude daabo ho ngagoria penego nde kogo gi gebi mbiraore hangu howa haabobo holene ngagoria anda polene bayale nga.✧ <sup>9</sup> Ina ihondo mini mbiraore wu kego hado wahabelo inaga de mendegome ko mo bia hayagua halu wahabe. De kirabali howa heli dindi ira dalude daabo ho ngagoria penego nde kogo de mbiraore hangu howa haabobo holene ngagoria anda polene bayale nga, lene.✧

### *Bi yobage lowa nogo sibi mbira ereba hene lenego ogo* (Lugu 15.3-7)

<sup>10</sup> Tigua waneigini emene o karunibi mbirago handabe manga nahe bayuwa de hondo halimu. Ina ti langerogo waneigini uruninaga dahuliyali karuni ti i Aba dahuliya andagani kagonaga deni haabo haga ka.✧ [ <sup>11</sup> Agali Hole Ibiyagome wali agali pu ereba heneru pele mule ibini, lene.]

<sup>12</sup> Ani lowa lalu, Agali mbirame nogo sibi handari mbira (100) hinu kagola mbirago pu ereba hayagua agi bulebirabe. Ibugua nogo sibi pira dirani dira (99) biaru bareni tani nelo helalu mbira pu ereba hayago tai bu polebira. <sup>13</sup> Ina ti langerogo ibugua nogo sibi ogoni handa waliala howa maru pira dirani dira (99) pu ereba nahe karunaga turu kagobi ndo o biagonaga turu timbuniore holebira. <sup>14</sup> Ogonidaguaore ti Aba dahuliya andagani kagome nde emene o karunibi mbirago pu ereba helo hame naleore ka, lene.

✧ 18:1: Lg 22.24 ✧ 18:3: Md 19.14, Mg 10.15, Lg 18.17 ✧ 18:4: Md 20.27, 23.11 ✧ 18:5: Md 10.40-42, Lg 9.48, 10.16, Yo 13.20 ✧ 18:6: Md 17.27, Lg 17.1-2, 1 Ko 8.12 ✧ 18:7: Lg 17.1, 1 Ko 11.19, 1 Ti 4.1 ✧ 18:8: Md 5.30, Mg 9.43 ✧ 18:9: Md 5.29, 17.27, Mg 9.47 ✧ 18:10: Pig 48.16, Iba 34.7, Lg 19.10, Yo 3.17, 12.47, Hi 1.14

*Í hamene mbirame ko biragola bulenego ogo*

<sup>15</sup> Í hamene mbirame íhondo ko biyagua ibuni hangu karia puwa ko biyagonaga libuni hangu howa lo tiga bilibu. Ibugua ina bi larego hale hayagua ina ibu haru dai birigoni. ✧ <sup>16</sup> Ina bi laregola hale habe manga hayagua í heba kiralí tebirali agima puwa Anduane Homogonaga mbugani lo ngadagua, Ko ogo birigo larago kiralibi tebiralibi hendene karume aniore biya lelo, lo ngadagua haru puwa lo tiga bilimu. ✧ <sup>17</sup> Ani beramigolabi o biagome hale habe manga dege hayagua wali agali Ngode Datagaliwabehanda olo holebiraru ngoai ho biru ngagoria hale hai helo bibahende biyagoni lamiai habe. Wali agali o biarunime bi laragola hamene biagome hale habe manga dege hayagua nde ibu Ngode Datagaliwabe mitangi nabiaga karubi kago lowa dagisi muni miaga karubi kago lowa o biaruhondo birilidagua ibuhondo ani bibe, lene. ✧

*Bulene nabulenebi ngago ogo*

<sup>18</sup> Anigo ina tí bibahendehondo langerogo tígua dindini howa mbira nabulene nga lalu lo weramigo dahuliya andaganibi nde nabulene dege wulebira. Tígua dindini howa mbira bulene nga lalu lo weramigo dahuliya andaganibi nde bulene dege wulebira. ✧

<sup>19</sup> Anigo ina tíhondo bi marubi langi dege berogo. Dindini howa kiralime bi lo mbiraore howa Ngode Datagaliwabehanda mbirale mbira ogo bilo lalu Ngode Datagaliwabehondo bi larimiyagua í Aba dahuliya andagani kagome hale halu bia laramigo ale bulebira. ✧ <sup>20</sup> Ogonigo kiralí tebiralime í minini howa mandagi mo ngoai ho kagoha í ti heba kogoni, lene. ✧

*Bi yobage lowa biabe bia hagame ko doma nahaga hene lenego ogo*

<sup>21</sup> Ani layagola howa Pida ibu Yasu hearia ibuwa lalu, Anduane Homogo-o í hamene mbirame íhondo ko bia ho wiaabo hayagua ina agira halu domo waholene ngabe. Ka halu domo waholene ngabe, lene. ✧

<sup>22</sup> Ani layagola Yasuhanda ladai bialu lalu, Ka halu ndo. Domalu haabo habe. ✧ <sup>23</sup> Irane Ngode Datagaliwabehanda Handame Ho Kagoria ogobi nga. Ala kini mbirame ibunaga biabe bia haga baba dano ho henego mo tiga bule bini. <sup>24</sup> Ibugua mo tiga buleore biyaria ibunaga biabe bia haga mbirala muni au lole daga labe nahe dewaore dano ho henegome haru ibini. <sup>25</sup> Biabe bia haga ogonime kini biagonaga muni dewa dano ho hayiyago dano hangalu ya dai bibe nahe hene. Aniyagola kini biagome agali maruhondo lalu, Iubi ibu onebi ibu waneiginibi ibunaga mbirale ngarubi muni dano hangai helo garabaya biabe ale bia haganaga yolo muni miai halimu, lene. ✧ <sup>26</sup> Ani layagola hale howa biabe bia haga biagome kini biago bereagoria ge duli hanga ho biruwa lalu, Ina inaga biaruni dano hangai holiya emene hondo habe, lene. <sup>27</sup> Ani layagola nde kini biagome daraore timbuni howa dano dewa hayagoni la nabi, Wahalu pu, lene.

<sup>28</sup> Ani laya handala agali biagome puwa ibula mandagi biabe bia hagame agali ogoninaga muni mbiraore dano henego hearia lola howa mani yani howa lalu, Inaga muni dano harigoni ngi, lene. <sup>29</sup> Ani biyagola muni mbiraore dano haga biagome ibu geha bulu paluwa hame lowa lalu, Ina ya dai biai holiya emene hondo habe, lene. <sup>30</sup> Ani layagola danoali biagome, Nabuleorego áyu dege ngi, lowa ibunaga muni dano ho hayago ya dai biragolaore golope hole lowa garabaya andaha helaabo hene. <sup>31</sup> Ani biyagola biabe bia haga maru hearume nakarulapeore biyago hondowa tinaga kini biago hearia pialu biyaruni bibahende lamiai hene. <sup>32</sup> Ani lamiyagola kini biagome biabe bia haga biago, Íbu, lowa lalu, Í garabaya biabe ale bia hagane habane

✧ **18:15:** LBM 19.17, Lg 17.3, Ga 6.1, Ya 5.19-20, 1 Pi 4.8 ✧ **18:16:** Man 19.15, Yo 8.17, 1 Ko 13.1, 1 Ti 5.19 ✧ **18:17:** Lm 16.17, 1 Ko 5.9, 5.13, 6.1-6, 2 Te 3.6, 3.14 ✧ **18:18:** Md 16.19, Yo 20.23 ✧ **18:19:** Mg 11.24, Yo 15.7, 1 Yo 3.22, 5.14 ✧ **18:20:** Md 28.20, Yo 14.23 ✧ **18:21:** Lg 17.3-4 ✧ **18:22:** Pig 4.24, Md 6.14, Mg 11.25, Kl 3.13 ✧ **18:25:** 2 Kin 4.1, Neh 5.8

nabulenedago ina inaga dano ho harigo howa biamogo bialu la nabi waha larigola la nabi hila hole bialu waharugo. <sup>33</sup> Ina nde ina i dara halu hila hole birudagua i yangone ogoni dara halu la nabi hila hole bialu waharine, lene. <sup>34</sup> Ani lowa kini biagome keba emene ndoore howa ibunaga dano ho hayaru bibahende ya dai biai haragola golope hole lowa, Biabe bia haga biago garabaya andaha helaabo hole haru pudaba, lene.✧

<sup>35</sup> Yasuhanda la maro bialu lalú, Tí aria marume tihondo ko biragola hila hole bialu henemane wa naharimiyagua i Aba dahuliya andagani kagome nde tí bibahendehondo ogonidagauore bulebira, lene.✧

## 19

### *Agalinime one waholene nawi, lenego ogo (Maga 10.1-12)*

<sup>1</sup> Yasu ibu bi uruni lai halu Galili wahalu dindi mende Iba Yodana piyago domade halu Yudiaha pene. <sup>2</sup> Piyagola wali agali dewaoreme ibu piyadagua haruru ibiyagola ibugua ti waragoberu mo dabi haga bini.

<sup>3</sup> Ani biyagola Perisi agali maru hearume Yasu hearia ibuwa Yasu ibugua mbira agi larabe hondole tigua ibuhondo lalú, Galoneni galone ndonibi inanaga Mana lowini ngagome agali mbiralime ibu one waholene nga lalú lo ngabe nawibe, lene.✧

<sup>4</sup> Yasuhanda ladai bialu lalú, Anduane Homogonaga mbugani bi mbira lo ngago, Piganengi Ngode Datagaliwabehanda wali agalila kirali helo wabini, gilibu ngago handa nabi dege kamibe.✧ <sup>5</sup> Ngode Datagaliwabehanda lalú, Irane ogoninaga agali mbirame ibu aba aiyala helalu ibu onela mandagi howa libu mo mbiraore ho holebira, lene.✧ <sup>6</sup> Anigo libu kira henego ai kira ndo mo mbiraore ho haga ka. Ngode Datagaliwabehanda wali agali mo mbiraore henego mbiralime mo hangu hangu ho helolene nawi, lene.

<sup>7</sup> Ani layagola Perisi agali biarume ibuhondo lalú, Mosesehanda bi lo ngagome lalú, Agalinime ibu one wahole lalú bebani gili bialu ibu onehondo muwa waholene nga, lo ngago aguadabe, lene.✧

<sup>8</sup> Ani layagola Yasuhanda ladai bialu lalú. Anigo pigane wabinidangi howa ogonidagua bulene wini ndo. Mosesehanda tí one waholene nga lo winidagoni tinaga bu mini giambe ho hemigo hondowa ani lowini. <sup>9</sup> Anigo ina tí langerogo ogo. Agali mbirame ibu one agali mendela kayu biragola ndo ibu one bame wahalu wali mende dabu biyagua ibugua wali mende biago kayu biragoni laro, lene.✧

<sup>10</sup> Ani layagola ibunaga talima piaga biarume ladai bialu ibuhondo lalú, Wali agalime ogonidagua bulene wiyagua nde agalime wali dabu nabi holene karulapeda, lene.✧

<sup>11</sup> Ani layagola Yasuhanda ladai bialu lalú, Mana ogoni áyu lawai harogo wali agali bibahendenaga lalú ndo Ngode Datagaliwabehanda wali agali maruhondo dege laminigo uruni tini hangunaga laro. <sup>12</sup> Irane tara tara ngagola agalime wali dabu nabiaga ka. Maru ti aiyahanda taba hanayangí wali dabu bibe nahe taba henene. Maru agali marume ti dabu nabilo ogonibi helene. Maru Ngode Datagaliwabehanda Handame Ho Kago mitangi howa wali dabu nabi haga. Ogoni lawai harogoni hale halu manda bibehe kagome nde manda bila, lene.✧

### *Yasuhanda waneigini emene mo turu henego ogo (Maga 10.13-16, Lugu 18.15-17)*

<sup>13</sup> Wali agali maru hearume tinaga waneigini Yasu ibugua tini gi wialu Ngode Datagaliwabehondo bi la helo ibu hearia haru ibiyagola ibunaga talima piaga biarume

✧ 18:34: Md 5.25-26 ✧ 18:35: Md 6.12-15, Mg 11.25-26, Eb 4.32, Kl 3.13, Ya 2.13 ✧ 19:3: Md 16.1 ✧ 19:4: Pig 1.27, 5.2, Mal 2.15 ✧ 19:5: Pig 2.24, 1 Ko 6.16, 7.2, Eb 5.21, 5.31 ✧ 19:7: Man 24.1-4, Md 5.31 ✧ 19:9: Md 5.32, Mg 10.11, Lg 16.18, 1 Ko 7.10-11 ✧ 19:10: 1 Ko 7.1-2, 7.7-9, 7.17 ✧ 19:12: 1 Ko 7.32-34, 9.5, 9.15



ti talialu lalu, Haru naibidababe, lene. <sup>14</sup> Ani layagola Yasuhanda lalu, Waneigini i kogoria ibilo ha pai nahadababe. Ngode Datagaliwabehanda Handame Ho Kagoria waneigini urubi karunaga nga, lene.\*

<sup>15</sup> Ani lowa ibugua waneiginini ibunaga gi wialu bialu pene.

*Agali daliahe mbira homogo henego ogo  
(Maga 10.17-31, Lugu 18.18-30)*

<sup>16</sup> Horo mbirungi agali mbirame Yasu hearia ibuwa lalu, Lawai haga-o ina haabobo holene mo yule bayale mbira agi buabe, lene.\*

<sup>17</sup> Ani layagola Yasuhanda lalu, I bayale bulenenaga larigoni ihondo larigo agi. Mbiraore ibuni hangu bayale kago. Ina haabobo holene ngagoria anda poa keyagua bi mana lowini ngago biai holene nga, lene.\*

<sup>18</sup> Agali biagome lalu. Bi mana lowini ngago aginagabe, lene.\*

Ani layagola Yasuhanda ladai bialu lalu. Wali agali homelo nababe. Wali agali kayu nayabe. Mbirale page nabibe. Ke howa dibade nahabe. <sup>19</sup> I aba aiyala mo yo handa nabi laradagua hale halu bibe. Ina ini gubalini ho harilidagua maru karu ta nabi gubalini ho habe, lene.\*

<sup>20</sup> Ani layagola agali daliahe biagome ladai bialu lalu, Bi uruni bibahende lo ngago ina biai haruli. Ina maru agi bulene ngabe, lene.

<sup>21</sup> Yasuhanda ibuhondo lalu, I bayaleore hoa biyagua inaga mbirale wiruni bibahende yolo miai hole pu. Ani buwa muni ngirago yagibano karuhondo mo meregola dahuliya andagani homogo holene inaga wulebira. Ani buwa i porodagua talima ibabe, lene.\*

<sup>22</sup> Yasuhanda ani layagola agali daliahe biagome ibu agali homogo gibiore henego ibu genda halu pene.

<sup>23</sup> Ani biyagola Yasuhanda ibunaga talima piaga biaruhondo lalu, Ina tihondo hene-neore larogo. Homogo karume Ngode Datagaliwabehanda Handame Ho Kagoria anda polene erekuibiore wulebira.\* <sup>24</sup> Ina lone larogo nogo kameleme hali diriha anda polene erekuibi emene ale lowa homogo karume Ngode Datagaliwabehanda Handame Ho Kagoria anda polene erekuibi emene ndo timbu gibiore wulebira, lene.

<sup>25</sup> Ani layagola ibunaga talima piaga biarume hale howa ti abale mogo laiore howa lalu, Aiwa pele mulene yu holebirabe, lene.

<sup>26</sup> Yasuhanda ti handaya ho wuwa lalu, Wali agalime bibe nahedane kago Ngode Datagaliwabehanda mbirale bibahende biai habeheore kagoni, lene.\*

<sup>27</sup> Ani layagola Pidahanda lalu, Ai handa. Iname inanaga mbirale bibahende wahai halu i talima ibu kamagoni. Ai agilego yule kamabe, lene.\*

<sup>28</sup> Yasuhanda tihondo lalu, Heneneore larogo Holene Gahenge harangi Agali Hole Ibiyagome ibu haru holenaga biragane baya gibioreni birule ibirangi inaga talima piaga homberia (12) kamirume haru haganaga biragane homberiani (12) biruwa Isaraele hameigini homberiaru (12) hondo haore buleberamigoni.\* <sup>29</sup> Ani buwa bibahendeme ibunaga andabi hamenebi mbalinibi ababi aiyabi waneiginibi dindibi helai halu i hangu handaya ho yalu ibaabo hayagua helalu ibiyaruni goyane lowa dewaore mo yatago halu haabobo holene ngagobi mia dege bulebira.\* <sup>30</sup> Ayu bamba ho karu mani ti maha holebira. Ayu maha karu mani ti mo bamba ho holebira, lene.\*

\* 19:14: Md 18.2-3 \* 19:16: Mg 10.17, Lg 10.25, 18.18 \* 19:17: LBM 18.5, Lg 10.28 \* 19:18: Har 20.13-16, Man 5.17-20 \* 19:19: Har 20.12, LBM 19.18, Man 5.16, Lm 13.9, Ga 5.14, Ya 2.8 \* 19:21: Md 6.20, Lg 12.33, Ab 2.45, 4.34-37, 1 Ti 6.18-19 \* 19:23: Md 13.22, Mg 10.24, 1 Ti 6.9-10 \* 19:26: Pig 18.14, Yob 42.2, Yar 32.17, Seg 8.6, Lg 18.27 \* 19:27: Mg 10.28, Lg 5.11, 18.28 \* 19:28: Md 20.21, 25.31, Lg 22.30, 1 Ko 6.2-3, Mo 2.26, 3.21 \* 19:29: Mg 10.29-30, Lg 18.29-30, Hi 10.34 \* 19:30: Md 20.16, Mg 10.31, Lg 13.30

## 20

### *Agalime gerebi mabu biabe binirunaga te lenego ogo*

<sup>1</sup> Yasu ibugua lalu, Ngode Datagaliwabe ibugua Handame Ho Kagoria ogobi nga. Horo mbiru egerebagiore agali mbirame ibunaga gerebi mabu agali marume biabe bilo tai bule pene.✧ <sup>2</sup> Ani buwa agali maru handa walia howa ti baba lo mbiraore halu lalu, Horo mbiru biabe beramigonaga yolo bulene ngadagua kina mbira ale dege dege ta holiyago gerebi mabu biabe bule pudaba, lene. <sup>3</sup> Ani lowa ni do paya biyagola ibugua lone magedi hamani pialu hearia agali maru bame ho payapaya bu hearia hondowa <sup>4</sup> tihondo lalu, Ina muni yolo karulape nguliyago tibi inaga gerebi mabu biabe bule pudaba, lene. <sup>5</sup> Ani laya handala ti biabe bule pene. Ani buwa horombe hanuni hayagolabi maru heagola ani dege lalu alendo hayagolabi ogonidagua dege bini. <sup>6</sup> Ai alendoore hayahayagi lone magedi hamani pialu hearia ibugua agali maru bame ha dege biaria hendene. Hondowa ibugua tihondo lalu, Bamba horo lu biago bameore mohole bu kamigoni agibe, lene. <sup>7</sup> Ani layagola tigua ladai bialu lalu, Mbirame inahondo biabe bidaba nalayagola kama, lene. Ani ladai biyagola ibugua lalu, Tíbi inaga gerebi mabu biabe bule pudaba laro, lene.

<sup>8</sup> Ne lalu purogo lolene tu hayagola mabu anduane biagome ibunaga biabe hondo haga heagohondo lalu, Biabe bialu hayaruni ibidaba lowa ti yolo bialu howa alendoore ibuwa biyagoni howa yolo mima pialu egerebagiore ibuwa bialu hayaruhondo mia maro bibe, lene.✧ <sup>9</sup> Agali maru alendoore biabe bu maro bulebiyahayagi puwa biabe biyaruhondo muni kina mbira ale miyago hondowa <sup>10</sup> egerebagiore puwa bialu haabo hayarume tihondo emene bolangua howa ale ngulubada manda bu hearia kina mbira ale dege dege ta hai hene. <sup>11</sup> Egerebagiore ala puwa biabe bialu hayarume muni biago mo yalu puwa mabu anduane biagohondo gomogomo lalu hene. <sup>12</sup> Tigua ibuhondo lalu, Iname egerebagiore puwa ni tandaga biyaruni donge howa biabe bialu haabo harimago. Agali urume ibuwa biabe biyago hina guyini dugua nabiaore biabe bia maro birimigo tihondo inahondobi muni ogobi dege dege ta harigo agibe, lalu hene.

<sup>13</sup> Ani layagola anduane biagome mbirali biagohondo lalu, Hambiya-o ina ihondo kagua ndo biru. Biabe bia nabi howa iya lo mbiraore halu horo mbirani beregonaga kina mbira ale ngibelo biabe bero larigoni ndobe. <sup>14</sup> Anigo inaga muni mo yalu andaga pu. Agali ogome biabe maha ayuore ibuwa biabe biyagohondo yolo ogobi labolabo í ngerogobi dege mule manda bidogoni. <sup>15</sup> Inaga munime ini bule hame lewadagua ndo birudabe. Be í agali mbuni nabiaga howa ihondo mbiraore ngirudanenaga henge larebe, laya, lene.

<sup>16</sup> Yasu ibu te ogoni lowa ibugua lamaro bialu lalu, Anigo wali agali áyu maha karu mani mo bamba ho halu áyu bamba ho karu mani mo maha holebira, lene.✧

### *Yasuhanda ibuni homolenenaga te halu tebone lenego ogo*

*(Maga 10.32-34, Lugu 18.31-34)*

<sup>17</sup> Yasu ibu Yarusaleme pole pialu howa ibunaga talima piaga biaru haru pu bagi halu tini hangu te lama pialu howa lalu, <sup>18</sup> Hale hadaba. Ina Yarusaleme poramagoha loma binigo mo miaga haguane karubi Mana lowinigo lawai haga karubi tihondo mbiralime Agali Hole Ibiyago minu mulebira. Minu miragola tigua ibu homelo bolene nga manda buwa✧ <sup>19</sup> Yu agali ndo agali tara karuhondo minu miragola tigua ibu mege bialubi tibume balubi ira bangani ba para holebira. Ani biragola horo kiru howa tebonengi ibuni mo heya holebira, lene.

### *Igiri kiranaga aiyahanda Yasuhondo, Mbira bia, lenego ogo*

*(Maga 10.35-45)*

✧ **20:1:** Md 21.33 ✧ **20:8:** LBM 19.13, Man 24.15 ✧ **20:16:** Md 19.30, Mg 10.31, Lg 13.30 ✧ **20:18:** Md 16.21, 17.22-23

<sup>20</sup> Wali mbira Sebedi oneme ibu igini kira haru pialu Yasu heagoria ibuwa ge duli hanga ho biruwa lalu, Mbira biamogo bibelo hame ledo, lene.

<sup>21</sup> Yasuhanda ibuhondo lalu, Í agile hamelo bedebe, lene.✧

Wali biagome ladai bialu lalu, Í Handame Haga Kini harengi ì igini kira ogolabome ínaga gi le ticalaha berelo lalu ihondo langi, lene.

<sup>22</sup> Ani layagola Yasuhanda igiri biago labohondo lalu, Libu larabigoni manda nabi howa lope harabi. Ina beha howa tandagabi nole kogo libugua nabehe kabibe, lene.✧

Ani layagola libugua ladai bialu lalu, Iya ani nabehe kabagoni, lene.

<sup>23</sup> Ani layagola Yasuhanda lalu, Libugua ínaga beha howa dege noleberabiore. Anigo libugua mendealime ínaga gi tigaha mendealime ínaga gi leha lowa biralibulo dabolene ínaga ndo kogoni. Í Abahanda berelo manda manda bu winigo hangu birulebira, lene.✧

<sup>24</sup> Talima piaga pirali biarume Yone ibu hamene Yameselame bi ani layago hale howa keba ho hene. <sup>25</sup> Ani biyagola Yasuhanda, Tí bibahende ibai hadaba, lowa tihondo lalu, Yu wali agali ndo tara taranaga handame haga karume wali agali hongo howa handame haga ka. Ani buwa tinaga haru haga karume wali agali dara nahe hongo hangume haru hai haga ka manda bidami.✧ <sup>26</sup> Ani biradagonigo bilowa tí kamigome mbira ani bulene henge nawulebiraore. Tí kamigoni mbiralime timbuniore hoa biyagua maru karunaga biabe bia haga holene nga.✧✧ <sup>27</sup> Ani buwa tí kamigoni mbiralime ibu duniniore hoa biyagua ibugua tínaga garabaya biabe ale bia haga holene nga. <sup>28</sup> Ogonidagua Agali Hole Ibiyago wali agalime ibunaga biabe bia halimulo ndo ibugua tinaga biabe bia halu ibunaga holene wali agali bibahendenaga pela hole ibiya, lene.✧

*Yasuhanda agali de kohe kira mo dengala henego ogo*

*(Maga 10.46-52, Lugu 18.35-43)*

<sup>29</sup> Yasubi ibunaga talima piaga biarubi Yarigo howa tagira pialu pole biyagola wali agali dewaore bu hearume ti talima pene. <sup>30</sup> Agali de kohe kira hariga gibuniha bereagoria hearume, Yasu o bolangua halu poragoni, layuagola libu hale hene. Hale howa libugua abale olowa lalu, Debidi Igini-o iyahondo dara howa biamogo bia, lene.✧

<sup>31</sup> Libugua ani layagola wali agali bu hearume libu talialu lalu, Bi nale wahadaba, lene. Ani layagola libu donge howa dalimuore olalu, Debidi Igini-o iyahondo dara howa biamogo bia, lalu laabo hene.

<sup>32</sup> Ani olayagola hale howa Yasuhanda pu nabi hondo howa libuhondo lalu, Ina libuhondo agi buliya hamelo kabibe, lene.

<sup>33</sup> Libugua ladai bialu lalu, Anduane-o ínaga de mo ngala habelo hamelo kabagoni, lene.

<sup>34</sup> Ani layagola Yasuhanda libu dara howa libunaga deni ela hene. Ela hayagola abaleore dabi halu de handabehe howa libugua Yasu piyadagua talima pene.

## 21

*Yasu Handame Haga Kini ale howa Yarusaleme anda penego ogo*

*(Maga 11.1-11, Lugu 19.28-40, Yone 12.12-19)*

<sup>1</sup> Yasubi ibunaga talima piaga biarubi ti Yarusaleme anda polene kaware ngelowa Hari Olibe weagoria Bedabayani anda ibini. Anda ibuwa Yasuhanda ibunaga talima piaga kiralihondo, <sup>2</sup> Ogodagua bule bamba halu pudaba, lowa lalu, Dindi amugoha anda bu kagoria anda pialu kabiria nogo dongi igini angibuni dariba howa iginila halu karia de hondoleberabigo hadalu kirabali ì kogoria haru ibalibu. <sup>3</sup> Hadarabigola libuhondo mbirame aginaga hadarabibe layagua agua lalibu. Anduane Homogo ibu ogonioreme

✧ 20:21: Md 19.28, Lg 22.30 ✧ 20:22: Md 26.39, 26.42, Mg 14.36, Yo 18.11 ✧ 20:23: Md 25.34, Ab 12.2, Lm 8.17, 1 Ko 1.7, Mo 1.9 ✧ 20:25: Lg 22.25-26 ✧ 20:26: Mg 10.43, Lg 9.48 ✧ 20:26: Md 23.11, Mg 9.35, Lg 22.26 ✧ 20:28: Lg 22.27, Yo 13.14, Pb 2.7, 1 Ti 2.6, Ta 2.14, 1 Pi 1.19 ✧ 20:30: Md 9.27, 15.22

mbira bulene buru padane hadaraba, lalibu. Ani larabigola ibugua, Abale haru pudaba, lolebira, lene.✧

<sup>4</sup> Binidagoni Ngode Datagaliwabe mana latagi haga mbira henegome mbiwia halu lowinigo mo lola hene. Bi lowinigo ogo,

<sup>5</sup> Saiono wali agali karuhondo lalu,✧

Tínaga Handame Haga Kini biago tí kamigoria ibiragoni de handadaba.

Ibuni mini mo dindiha halu nogo dongini biralu ibiragoni.

Ibu dongi hungubalua mbirani biralu ibiragoni, lalu gilibu nga.

<sup>6</sup> Ani laya handala talima piaga kira biago labome Yasuhanda, Bilibu, layadagua bule pene. <sup>7</sup> Libugua nogo dongi biago labo haru dai buwa aga nogo dongi biago labo erekunini dungua hayagola Yasu ibu nogo dongi igini biagoria iraga ho berene.

<sup>8</sup> Ani bereagola wali agali dewaore bu hearu marume tinaga aga harigani dungua haga bialu marume ira magane yuni dewahe dandowa harigani tebara haga bini.✧

<sup>9</sup> Wali agali dewa bu hearume Yasu pole piyagohayagi bamba halu piyarumebi maha✧ ibiyarumebi awa lama pialu howa lalu, Debidi Igininaga mini yaraga hama. Anduane Homogonaga minini howa ibirago Ngode Datagaliwabeanda ibu mo turu helo larama. Ngode Datagaliwabenaga mini yaraga hama, lalu lama pene.

<sup>10</sup> Yasu ibu Yarusaleme anda piyagola wali agali bu hearume mogo lo hondowa laga bialu lalu, O ibiragoni aibe, lene.

<sup>11</sup> Ani layagola wali agali bu yalu ibiyarume ladai bialu lalu, Ogoni ibu Ngode Datagaliwabe mana latagi haga Nasareteali Yasu Galili howa ibiragoni, lene.✧

*Yasuhanda Anduane Homogonaga andaha anda puwa binigo ogo  
(Maga 11.15-19, Lugu 19.45-48, Yone 2.13-22)*

<sup>12</sup> Yasu ibu Anduane Homogonaga andaha anda puwa marume tamuha howa mbi-rale yolo bialubi yolo mulebi hearu bo ba tagitagi bialu hene. Ibugua muni ariari biaga hearunaga dagiabi ega malibu ale yolo biaga hearunaga biragane wiarubi mo hombeda haealabagabu wahai hene. <sup>13</sup> Ani bialu howa lalu, Ngode Datagaliwabeanda ibunaga mbugani bi lo ngago ogo, Inaga anda kago ihondo bi lagane anda kagoni lolebira, lalu gilibu nga. Tígua nde pagebibi karu ha do hagane anda bu hinu helarimidagoni, lene.✧

<sup>14</sup> Ani layagola howa de kohebi gi ge kohebi Anduane Homogonaga andaha Yasu hearia ibiyagola ibugua ti mo bayale haga bini.✧ <sup>15</sup> Ibugua agalime nabiagane ale biyago hondowa waneigini emene bu hearume Anduane Homogonaga andaha howa turu halu mambolo balu lalu, Debidi Igininaga mini yaraga hama, layagola hale howa loma binigo mo miaga haguane hearumebi Mana lowinigo lawai haga hearumebi keba hai ho hene.

<sup>16</sup> Keba howa tigua Yasuhondo lalu, Tigua laragoni ogo ale laralo í hale ho kebe, lene.✧

Ani layagola Yasuhanda ladai bialu lalu, E jí hale hoore kogoni. Anduane Homogonaga mbugani bi mbira lo ngagome, Waneiginirumebi waneigini galiorerumebi Anduane Homogonaga mini baya hanguore mo yaraga helo biawai hari, lalu gilibu ngago tí nahendeore kamigonibe, lene.

<sup>17</sup> Ani lalu ti hea handala Yasu ibu Yarusaleme tagira pialu Bedani palima pene.

*Yasuhanda poge ha henego ogo  
(Maga 11.12-14,20-24)*

<sup>18</sup> Horo mendengi Yarusalemeha dai bialu hearia Yasu ibu hina garibi lene. <sup>19</sup> Garibi layagola handalu hearia ibu poge mbira hariga gibuniha hearia de hondowa lini dedabe nadedabe hondo pene. Hondo piyaria lini mbira nade yuni hangu ma bu hearia

✧ 21:3: Md 26.18 ✧ 21:5: Ais 62.11, Seg 9.9, Yo 12.15 ✧ 21:8: 2 Kin 9.13 ✧ 21:9: Iba 118.25-26, Md 23.39

✧ 21:11: Md 21.46 ✧ 21:13: Ais 56.7, Yar 7.11, Mg 11.17, Lg 19.46 ✧ 21:14: 2 Sml 5.8, Ais 35.5-6 ✧ 21:16:

Iba 8.2

hendene. Nadeyagola ibugua poge biago ha halu lalu, *Ína* mani lini mbira nadoleore bere, lene. Ani layaore poge biago abale yongo bialu gau lene.✧

<sup>20</sup> Ani biyagola talima piaga biarume mogolo hondowa lalu, Poge biago abale yongo bialu gau layadagoni aguadabe, lene.

<sup>21</sup> Ani layagola Yasuhanda tihondo ladai bialu lalu, *Ina* tihondo heneneore larogo miniha toba toba nahe mini mbiraore wu harimiyagua *ina* áyu poge ogohondo larudagua tíguabi ani labehe holeberami. Ani buwa homane ogoni hangu ndo tígua hari hambene o wedagohondo, *Ínime* dugualu puwa iba solowara bedagoria ibiraha, labehe holeberami. Ani laramigola hari biagome hale halu ani bulebira.✧ <sup>22</sup> Tígua Ngode Datagaliwabhondo bi lalu howa mini mbiraore wuwa larimiyagua bia laramigo bulebira ngi laramigobi ngiaore bulebira, lene.✧

*Yasu í hongo yu kegoni aiwa ngiyabe, lenego ogo*  
(Maga 11.27-33, Lugu 20.1-8)

<sup>23</sup> Yasu ibu Anduane Homogonaga andaha lone dai buwa ibugua mana lawai halu hearia loma binigo mo miaga haguane hearubi agali ala hene miniwi hearubi ibuwa tigua ibuhondo lalu, *Ína* mbirale uruni bialu kegoni hongo aiwa ngiyane berebe. Ani bibelonaga *í* aiwa dabo helenego kebe, lene.✧

<sup>24</sup> Ani layagola Yasuhanda tihondo ladai bialu lalu, *Ina* bi mbira tihondo hale harogo tígua ladai birimiyagua *ina* mbirale uruni buliya hongo ngiyadagoni ogome ngiya lalu tí langulebero. <sup>25</sup> Yonehanda baboraya biyago bulene hongo miyago Ngode Datagaliwabhanda minibe be agalime minibe, lene.

Ani layagola tigua, Agi ladai bimabe, lowa tini dege dege laga laga bialu lalu, *Iname* Ngode Datagaliwabhanda mini larimiyagua ibugua inahondo lalu, O Yonehanda mana langiyago yu tiga nabi harimidago agibe, lolebira. <sup>26</sup> *Iname* agalime mini larimiyagua wali agali bibahende o biru ngarume Yone ibu Ngode Datagaliwabe mana latagi haga hayago lagago manda buwa tigua inahondo mbira buligonaga gi ho kamagoni, lene.✧ <sup>27</sup> Ani lowa tigua Yasuhondo lalu, *Ina* manda nabioire kama, lene.

Ani layagola Yasuhanda tihondo lalu, *Anidago* nde *ina* mbirale uruni berogo buliya hongo ngiyadago nalangulebero, lene.

*Bi yobage lowa igiri kirame bini te lenego ogo*

<sup>28</sup> Yasuhanda lalu, Tígua agi manda bu kamibe. Bamba agali mbira henego ibu igini kira hene. Agali biagome ibu igini wahene biagohondo lalu, *Igini-o* áyu ogoni mabuni puwa biabe bialu habe, lene.✧ <sup>29</sup> Ani layagola igiri wahene biagome lalu, *I* mangaba, lowa mani howa mini wia dai bialu biabe bule pene. <sup>30</sup> Ani bialu agali biagome ibu igini heyogonego hearia puwa ibuhondobi bi ala layadagua dege lene. Ani layagola igiri heyogone biagome ladai bialu lalu, *E* aba-o bule porogo, lowa bule pu nabi wahene. <sup>31</sup> Agali biagome bilo hame layadagua ibu igini agome hale halu binibe, lene.✧

Tigua ladai bialu lalu, Ibu igini wahenegome bini, lene.

Ani ladai biyagola Yasuhanda tihondo lalu, *Ina* tí langerogo dagisi muni ngi laga karubi bayanda wali kayu bule muni ngi laga bedarubi tí helalu bamba halu Ngode Datagaliwabhanda Handame Ho Kagoria anda poragoni. <sup>32</sup> Ogoninaga baboraya biaga Yone ibugua ibuwa tí hariga tiga tigaore pilimulo walia hayagola tígua yu tiga nabi harimigoni. Dagisi muni ngi laga karumebi bayanda wali kayu bule muni ngi laga bedarumebi Yonehanda mana lamiyago yu tiga biya. Urunime ani biyagola tígua hondowa mini beregedalu Yonehanda mana langiyago yu tiga nabi dege harimi, lene.✧

✧ 21:19: Lg 13.6 ✧ 21:21: Md 17.20, Lg 17.6, Yo 14.12, 1 Ko 13.2, Ya 1.6 ✧ 21:22: Md 7.7-11, 18.19, Mg 11.24, Lg 11.9, Yo 14.13-14, Ya 5.16, 1 Yo 3.22 ✧ 21:23: Yo 2.18 ✧ 21:26: Md 14.5, 21.46, Mg 6.20, Lg 20.6 ✧ 21:28: Lg 15.11 ✧ 21:31: Lg 7.29, 7.50 ✧ 21:32: Lg 3.12, 7.29-30



*Bi yobage lowa, Gerebi mabu hondo ha halimu, lenego ogo  
(Maga 12.1-12, Lugu 20.9-19)*

<sup>33</sup> Yasuhanda lalu, Bi yobage mende ogo nde hale hadaba, lene. Ani lowa lalu, Bamba dindi anduane mbirame pu mbira gerebi lini daganego dewa hongo dugudugu buwa gerebi ibane pingidope holenaga ege toleha uli guabuwa wini. Mabu mamage holenaga anda luni daliga bima iraga howa helene. Ani buwa ibugua agali maruhondo, Mabu biabe bia halu hondo ha halimu, lalu ibuni dindi mbiraha ibaga bialu pene.\*<sup>34</sup> Pu mbira lini daga mini gerebi dolene tu hayagola mabu anduane biagome ibunaga garabaya biabe ale bia haga maruhondo lalu, Inaga gerebi mabu hondo ha haga karuhondo lini maru do ngidaba lole pudaba, lene. <sup>35</sup> Ani laya handala ti pialu hearia mabu hondo ha haga biarume garabaya biabe ale bia<sup>36</sup> haga biaruru mbira minu balu mende toleme balu tebone homelo balu bini. <sup>36</sup> Ani biyagola anduane biagome garabaya biabe ale bia haga abale pu layadagua ndo mani dewaore pudaba layagola pialu hearia mabu hondo ha haga biarume abale bayadagua dege bene. <sup>37</sup> Mahaore anduane biago ibuni igini mbira henego mitangi bialu lalu, I igini ogoni pu larogola tigua ibu mitangi bialu ibuhondo tiga tiga bulebira manda bido, lene. <sup>38</sup> Ibu igini piyagola mabu hondo ha haga biarume hondowa tigua laga laga bialu lalu,<sup>39</sup> Mabu anduane biago iginiore ogonigo ibunaga paluni ina karulamiya homelo bama, lowa <sup>39</sup> tigua mabu tagirahayagi minu ba tagi howa homelo bene, lene.\*

<sup>40</sup> Ani lowa Yasuhanda tihondo lalu, Ani biyagola anduane biagome ibuwa mabu hondo ha haga biaruhondo agi bulebira, lene.

<sup>41</sup> Tigua ladai bialu lalu, Ibugua ibuwa mabu hondo ha haga agali koore uruni homelo bo wahai howa mabu ogoni marume lini dolene tu harangi do tale bu ngulebirago tihondo, Mabu hondo ha halimu, lalu mulebira, lene.

<sup>42</sup> Ani layagola Yasuhanda tihondo lalu, Anduane Homogonaga mbugani bi longago nahende hene kamigonibe.\*

Ege tole mbira anda biagame galone nabibehedago lowa dabo wahenego ege tole ogoniore mo timbuni duniniore heleda.

Ogoni Anduane Homogo ibunioreme mo yu dai bu helene  
iname de handalu handawa bu kamagoni,  
lalu gilibu nga, lene.

<sup>43</sup> Yasuhanda laabo dege halu lalu, Anigo ina tihondo larogo Ngode Datagaliwabehanda Handame Ho Kago ti kamigoria howa mo yalu puwa wali agali marume Ngode Datagaliwabe mana tigabiore biragohondo mulebira, lene. [<sup>44</sup> Ege tole ogoni ngagoriani wali agali pilo paga hararu tole ogonime ti bibahendeore budu бага bu waholebira. Ani buwa ege tole ogonime mbiralini podo dambi hayagua dambu gingirulo бага bu waholebira, lene.]\*

<sup>45</sup> Loma binigo mo miaga haguane hearumebi Perisi agali hearumebi Yasuhanda bi yobage layago hale howa, Yobage laragoni inahondo laragoni, lowa <sup>46</sup> tigua Yasu minule manda biyaria wali agali bu hearume Yasu ibu Ngode Datagaliwabe mana latagi haga ka laga lalu hea handala gi howa wahene.\*

## 22

*Bi yobage lowa, Wali dabu bialu tomo dawa wini, lenego ogo  
(Lugu 14.15-24)*

\* **21:33:** Yasuhanda bi yobage ogoni lenego ibu Aisaianaga mbugani 5.1-2 bi gilibu wini ngago mitangi bialu lene. Mabu anduane biago ibu Ngode Datagaliwabe lalu pu mbira gerebi lini dagane ibunaga mabuha hengeneru uruni Isaraele wali agali lalu bi yobage lene. ☆ **21:33:** Md 25.14 ☆ **21:35:** Md 22.6 ☆ **21:38:** Md 27.18 ☆ **21:39:** Hi 13.12 ☆ **21:42:** Iba 118.22-23, Ais 28.16, Mg 12.10, Ab 4.11, Lm 9.33, Eb 2.20, 1 Pi 2.6-8 ☆ **21:44:** Ais 8.14-15, 60.12, Dan 2.44-45, Seg 12.3, 1 Pi 2.8 ☆ **21:46:** Md 21.11, 21.26, Lg 7.16, Yo 7.40

<sup>1</sup> Yasuhanda wali agalihondo bi yobage lowa lamini. <sup>2</sup> Ani lowa lalu, Ngode Data-galiwabehanda Handame Ho Kagoria ogo ale nga. Kini mbirame ibu igini wali dabu biyagola tomo dawa manda manda bu wini. <sup>3</sup> Manda manda bu wiai howa ibugua ibunaga biabe bia haga hearuhondo, Wali agali ibalimu laruruhondo áyu ibilo lamule pudaba, lene. Ani lamule pialu hearia wali agali biaru ti ibulene manga hai hene. <sup>4</sup> Ani biyagola nde ibugua biabe bia haga maruhondo, Bi ogo lama pudaba, lowa lalu, Áyu tomo nole ibalimu. Nogo bulumaga timbunibi igini habanehebi podo бага buwa bibahendeore manda manda bu wiai kogo, laya lalu dabu beramagonaga tomo namiya ibalimu lole pudaba, lene.✧ <sup>5</sup> Ani layagola ti ibulene manga dege halu tininaga biabe bialu heneha biabe bima pugu pugu bini. Mbiragome ibuni mabuha biabe bima pene. Mendegome ibuni tirugu andaha biabe bima pene. <sup>6</sup> Marume biabe bia haga biaru minu balu homelo bene.✧ <sup>7</sup> Ani biyiyagola handame haga kini biagome keba taraore howa ibunaga wai biaga agali hearuhondo, Agali uruni bibahende bo wahai halu tinaga tanobi heda hai hole pudaba, lene. <sup>8</sup> Ani biyagola ibugua ibunaga biabe bia haga biaru olowa tihondo lalu, Ina tomo manda manda bu wiai howa wali agali ibai halimu larugo hale halu nole ibulene nakarulape hayada.✧ <sup>9</sup> Ai hariga emene pedaruhabi timbuni pedaruhabi puwa wali agali handaramigo bibahende haru ibai hole pudaba, lene. <sup>10</sup> Ani laya handala biabe bia haga biarume hariga emene timbunibi peadagua puwa wali agali ko bayalebi ta nabi mo mogo bialu haru ibai howa tomo nole wali agalime anda biagoni tǒlai hene.

<sup>11</sup> Wali agali ibai hayagola kini biagome wali agali bereago hondo pialu hearia mbirali dabu biagane aga nakarule berearia hendene.✧ <sup>12</sup> Hondowa ibugua lalu, Hambiya-o dabu biagane aga nakarule ogoria agua anda ibiribe, lene. Kini biagome ani layagola agali biagome mbira ladai nabioire berene. <sup>13</sup> Ladai nabiyagola kini biagome ibunaga biabe bia haga biaruhondo lalu, Ibugua gi gebi minu kabu buwa aruma kago ha ba tagi hadaba. Ogoniha howa ibugua dugu bialu ibunaga ne gingirulo hayaga bialu wulebirago wilo, lene.✧

<sup>14</sup> Ani lene lowa Yasuhanda lamaro bialu lalu, Dewa labe nahe ibalimu lenego mbira mbira hangu dabene, lene.✧

*Dagisi muni mulene ngabe nawibe, lenego ogo*  
(Maga 12.13-17, Lugu 20.20-26)

<sup>15</sup> Perisi agali hearume puwa, Iname Yasuhondo bi aguaore hale halu minamiyadabe, lalu ndi lalu hene.✧ <sup>16</sup> Ani lowa tigua tininaga talima piaga marumebi Herodonaga aria marumebi, Agua lole pudaba, lene. Tigua Yasu hearia puwa lalu, Lawai haga-o iname manda bialu hemaria ina mana lamiriligo tiga tigaore larili manda birima. Ani buwa ina agali mini timbuniwi hongohe karu hondowa gi nahe maru karumebi i hondowa larago mitangi nabi howa Ngode Datagaliwabehanda hame ledagonaga mana wali agalihondo lawai hariligo tiga tigaore larili.✧ <sup>17</sup> Ai bi mbira langibelo inanaga Mana lowini ngago manda bialu Lomonaga Kini kagohondo dagisi muni mulene ngabe be nawibe. Ina manda bidedagua ina langi, lene.

<sup>18</sup> Ani layagola Yasuhanda tinaga miniha dama mini wialu yageyage palu howa layagoni manda buwa tihondo lalu, Tí tombene hondo kihe kamiru-o tigua i aginaga minule nde larimibe. <sup>19</sup> Muni kuni dagisinaga meramiligo i hondoliya walia ha, lene.

Ani layagola tigua muni kuni biago mo yalu ibiyagola <sup>20</sup> ibugua tihondo lalu, Muni kuni ogoriani dengui ngagobi mini gilibu ngagobi ainagadabe, lene.

<sup>21</sup> Tigua ladai bialu lalu, Lomo Kini kagonagada, lene.✧

✧ 22:4: Md 21.36 ✧ 22:6: Md 21.35 ✧ 22:8: Md 10.11-13, Ab 13.46 ✧ 22:11: 2 Ko 5.3, Eb 4.24, Mo 3.4, 19.8  
✧ 22:13: Md 8.12, 25.30, Lg 13.28 ✧ 22:14: Md 20.16, 2 Pi 1.10, Mo 17.14 ✧ 22:15: Mg 3.6 ✧ 22:16: Mg 3.6, 8.15, 12.13 ✧ 22:21: Pig 1.27, Lm 13.7

Ani layagola Yasuhanda tihondo lalu, Anidago mbirale Lomo Kini kagonaga ngago nde ibunihondo milimu. Mbirale Ngode Datagaliwabenaga ngago nde ibunihondo milimu, lene.

<sup>22</sup> Ani layagola hale howa tigua mogo timbuniore lowa ibu helalu pene.

*Homenego agua heyuledabe, lenego ogo*  
(Maga 12.18-27, Lugu 20.27-40)

<sup>23</sup> Horo ogoningi Sadiusi agali maru hearume Yasu hearia ibuwa wali agali home-neyaru naheyulebira lole ibini. <sup>24</sup> Tigua lalu, Lawai haga-o Mosesehanda lalu, Agali mbira waneigini nahe howa homayagua homayago hameneme wali dalo biago dabu bu aribia howa waneigini homayagonaga hono wia holene nga, lo nga. <sup>25</sup> Anigo igiri karia hamenema ogoriani henego wahenegome wali dabu bu howa waneigini nahe heaore homayagola wali dalo bereagola ibula pagu bini biagome dabu bini. <sup>26</sup> Dabu buwa nde ogonidagua dege bialu ibu hamene tebonegobi ani dege bima pialu karia hamenema biaru homo mundula piaai hene. <sup>27</sup> Ani bialu mahaore wali biago homa maro bini. <sup>28</sup> Ani binigo igiri karia biaru bibahendeme wali o biago dege dabu biyago horo mbiru homeneru mo heya harangi wali biago agonaga one birulebirabe, lene.

<sup>29</sup> Ani layagola Yasuhanda tihondo ladai bialu lalu, Anduane Homogonaga mbugani bi lo ngagobi Ngode Datagaliwabe hongohe kagobi manda nabi kamigo mini pu tara ho kamigoni. <sup>30</sup> Ogoninaga wali agali homeneru mo heya harangi wali agali dabu bulene nawiore ndobe. Ti dahuliyali dahuliya andaga karu ale dege holebira. <sup>31</sup> Anigo wali agali homeneru mo heya holenenaga larogo Ngode Datagaliwabeanda tihondo ibunaga mbugani lowini ngago daga nale dege kamibe. Ibugua lalu, <sup>32</sup> I Abarahama Aisaga Yagaba imarunaga Ngode Datagaliwabe kogoni, lalu lo nga. Ngode Datagaliwabe ibu wali agali holenehe kagonaga kagoni homenenaga ndo ka, lene. <sup>33</sup> Ibugua mana ani lawai hayago hale howa wali agali bu hearume mogo lai ho hene. <sup>34</sup>

*Ngode Datagaliwabeanda mana lo wialu duniniore lo ngago ogo*  
(Maga 12.28-34, Lugu 10.25-28)

<sup>34</sup> Yasuhanda bi layagola Sadiusi biarume bi ladai bibe nahe heago hondowa Perisi agali hearu mandagi mogo buwa <sup>35</sup> ti aria mbira ibu Mana lowinigo lawai haga heagome Yasuhanda bi nakarulape larabe hondole bi maru Yasuhondo hale hene. <sup>36</sup> Ibugua lalu, Lawai haga-o Mana lowinigo ngagoni duniniore agobe, lene.

<sup>37</sup> Ani layagola Yasuhanda ibuhondo ladai bialu lalu, Ina Anduane Homogo inaga Ngode Datagaliwabe kago inaga gubalinimebi minimebi mandamebi gubalini ho habe. <sup>38</sup> Bi mana bibahende lowini ngago duniniore ogoni. <sup>39</sup> Bi mana duniniore mende ogonibiore lowini ngago ogo, Ini gubalini harilidagua maru karu ta nabi gubalini ho habe. <sup>40</sup> Mosesehanda Mana bibahende lowinigobi Ngode Datagaliwabe mana latagi henerume lawai halu howa lenegobi bi mana kira ogoni laboni lowini ngago mo tene howa lalu habe, lene. <sup>41</sup>

*Mbirali Dabo Helenego ibulebira lowinigonaga hale henego ogo*  
(Maga 12.35-37, Lugu 20.41-44)

<sup>41</sup> Perisi agali maru mandagi mogo bu hearia Yasuhanda tihondo lalu, <sup>42</sup> Tigua Mbirali Dabo Helenego ibulebira lowinigo ibu ai kalo manda bu kamibe. Ibu ainaga aguanene kabe, lene. <sup>43</sup>

Ani layagola tigua ladai bialu lalu, Ibu Debidi aguanene ka, lene.

☆ 22:23: Ab 23.8 ☆ 22:24: Man 25.5 ☆ 22:29: Yo 20.9 ☆ 22:30: 1 Yo 3.2 ☆ 22:32: Har 3.6, Md 8.11, Mg 12.26, Lg 20.37, Ab 7.32 ☆ 22:33: Md 7.28 ☆ 22:37: Man 6.5, 10.12, Lg 10.27 ☆ 22:39: LBM 19.18, Mg 12.31, Lm 13.9, Ga 5.14 ☆ 22:40: Md 7.12, Lm 13.10, Ga 5.14, 1 Ti 1.5 ☆ 22:42: Yo 7.42

<sup>43</sup> Ani ladai biyagola Yasuhanda tihondo lalu, Anidago Ngode Datagaliwabe Dinini ibugua Debidihanda mo bila hayagola Debidihanda ibu Anduane Homogo layago agidabe. Debidihanda lalu,✧

<sup>44</sup> Anduane Homogohanda inaga Anduane Homogohondo lalu, Inaga waitigi karu inaga geme hingedai habelo ina mo heloliya inaga gi tigahayagi ogoria birabe,

laya.✧ <sup>45</sup> Ani binidago Debidihanda ibu Anduane Homogo layagonaga Mbirali Dabo Helenego ibulebira lo wia ibu Debidinaga aguanene agua habehebe, lene.

<sup>46</sup> Yasuhanda ani layagola mbiralime ladai bibe naheoreyagola howa horo ogonongi howa be lirayagi tigua Yasuhondo bi mbira lone hale naheore hene.✧

## 23

*Yasuhanda, Mana lowinigo lawai haga karubi Perisi agali karubi de hondo halimu, lenego ogo*

*(Maga 12.38-39, Lugu 11.43,46, Lugu 20.45-46)*

<sup>1</sup> Ani lowa Yasuhanda wali agali dewaore bu hearuhondobiibunaga talima piaga biaruhondobi mana lamialu lalu, <sup>2</sup> Mana lowinigo lawai haga karumebi Perisi agali karumebi ti Mosese heneyangi Mana lowinigo mandabi heneru tigua bi lo ngago ogo ale lo nga lalu laga ka. <sup>3</sup> Ani biagago tigua larago hale halu bidaba laradagua buleneore nga. Anigo tigua mana langiragonaga bu manda nabiagago ti biradagua tigua bulemine.✧

<sup>4</sup> Tigua wali agalime gendabi nayabehe ngaru yu helo mo ya ho helaga. Ani buwa tinime gi dogolowa gendabi ngaru yamogo nabiaga ka. <sup>5</sup> Ani buwa tigua bibahende biraru wali agalime ti hendelo biaga ka. Ani buwa nogo dongone aleni Anduane Homogonaga mbugani bi polene ngaru gili buwa tinaga embonenibi tinaga ginibi bo bidago handalimu. Nogo dongone uruni timbuniore bo bidago handalimu. Tigua labolabo lu karulowa mbirale bayale ale ngaru labolabo ogoriani pingi pongo buwa girigerelo heledago handalimu.✧ <sup>6</sup> Ani buwa tigua tomo nole ngoai haragoriabi ngoai hagane andaruhabi agali hagianenaga biraganeni hangu birule gere biraga kago handalimu.✧

<sup>7</sup> Ani buwa tigua ibaga bialu magedi hamani wali agalime ti hondowa tinaga mini yaraga helobi tihondo, Lawai haga-o, lelobi hame laga ka. <sup>8</sup> Ti kamiruhondo, Lawai haga-o, lolene nawi irane ti mbiraore hamenema kamigo tinaga Lawai haga mbiraore hangu kagoni. <sup>9</sup> Ani buwa dindi ogoriani kago mbirahondo, Aba, lolene nawiore irane Aba mbiraore hangu ibu dahuliya andaga kagoni. <sup>10</sup> Tihondo, Haru haga-o, lolene nawiore irane tinaga haru haga Mbirali Dabo Helenego ibulebira lowinigo ibuni hangu kagoni. <sup>11</sup> Ti kamigoria mbirali timbuni bolangua howa dunini hoa kago ibu tinaga biabe bia haga holeneore nga.✧ <sup>12</sup> Mbirali ibuni mo dunini ho kago ibu mo dindiha halu mbirali ibuni mo dindiha ho kago ibu mo dunini ho helolebira, lene.✧

*Yasuhanda tombene hondo kihe hearuhondo bi hongo howa lenego ogo*

*(Maga 12.40, Lugu 11.39-42,44,52, 20.47)*

<sup>13</sup> Yasuhanda lalu, Mana lowinigo lawai hagabi Perisi agalibi ti tombene hondo kihe kamigoni. Tigua Ngode Datagaliwabehanda Handame Ho Kagoria tini anda pu nabi howa wali agali marume anda pole biraria tinaga wanakuini howa panga paya pai haramili. Anigo tinaga mo ko holene timbu gibiore wulebirago dara holene nga.✧

[ <sup>14</sup> Ani buwa tigua wali dalo bedarunaga andaga mbirale ngaru mo page biaga howa wali agali mo hondo hole Ngode Datagaliwabehondo bime dege bi lu laho wiaabo haga

✧ 22:43: Iba 110.1, Md 26.64 ✧ 22:44: Iba 110.1, Ab 2.34, 1 Ko 15.25, Hi 1.13 ✧ 22:46: Mg 12.34, Lg 14.6, 20.40  
 ✧ 23:3: Mal 2.7-8 ✧ 23:5: Md 6.1 ✧ 23:6: Md 6.5, Mg 12.38-39, Lg 11.43, 14.7 ✧ 23:11: Md 20.26-27, Mg 9.35, 10.43-44, Lg 22.26 ✧ 23:12: Yob 22.29, Min 15.33, 29.23, Ese 21.26, Lg 14.11, 18.14, Ya 4.6, 1 Pi 5.5 ✧ 23:13: Lg 11.52

kamigoni. Ani beramigonaga pani timbuniore ngia tago howa mulene nga. Anigo t́naga mo ko holene timbu gibiore wulebirago dara holene nga.]

<sup>15</sup> Mana lowinigo lawai hagabi Perisi agalibi t́ tombene hondo kihe kamigoni. T́gua mana beramigore mbiralime yu tiga bilonaga dindi kaundiaha dindi dindi pialu iba taluni biralu poramili. Mbiralali biagome t́naga mana yu tiga bu kagola t́gua ibu mo ko timbuniore hai halu t́ heli dindiha polene nira lowa ibu polene liraore wulebira. Anigo t́naga mo ko holene timbu gibiore wulebirago dara holene nga. <sup>16</sup> T́ dengalibi degeme dengalibi karu hariga ina hendedogo mbaibu lowa gililo yalu pialu kamiru t́naga mo ko holene timbu gibiore wulebirago dara holene nga. T́gua lawai haramigo ogo. Mbiralime Anduane Homogonaga anda mini lalu gi dolayagua ina larogoni heneneore laro lo wuwa ibuni bi laragonime ibuni dariba naholebira. Mbiralime ina larogoni heneneore laro lo wuwa Anduane Homogonaga andaha ngolo ngagonaga mini lalu lo wiyagua bi ogoni lo wiyagome ibuni dariba holebira, lalu lawai haramili. <sup>17</sup> T́ dengalibi mini nawi lulu yu ibaga bu kamigoni. Duniniore ngolo wiabe be Anduane Homogonaga anda ngolo Ngode Datagaliwabhondo loma bia ho ngelaganego duniniore wiabe. <sup>18</sup> T́gua mana mende lawai haramiligo ogo. Mbiralime Ngode Datagaliwabhondo mbirale bo lomabu miaga dagia ngago mini lalu ina larogoni heneneore laro lo wiyagua ibuni bi ogoni lo wiyago bame nagalone lowini. Mbiralime mbirale Ngode Datagaliwabhondo bo lomabu mini dagiani ngagonaga mini lalu ina larogoni heneneore laro lo wiyagua ibuni bi ogoni lo wiyago habo nalolene bi lowini, lalu lawai haramili. <sup>19</sup> T́ dengalibiore kamigoni. Duniniore mbirale Ngode Datagaliwabhondo minigobe be bo lomabu miaga dagia mbirale Ngode Datagaliwabhondo minigo mo loma bia haga biago duninibe. <sup>20</sup> Anigo mbiralime bo lomabu miaga dagiago mini lalu heneneore laro lo wirangi ibugua mbirale bibahende Ngode Datagaliwabhondo bo mini lomabu miaga dagiani ngarubi heba mini lara. <sup>21</sup> Ani buwa mbiralime Anduane Homogonaga anda mini lalu heneneore laro lo wirangi ibugua Anduane Homogonaga anda ogoniha haga kagobi mini lalu lo wira. <sup>22</sup> Ani buwa mbiralime dahuliya andaga mini lalu heneneore laro lo wirangi ibugua Ngode Datagaliwabenaga haru howa biraganebi biragane ogoriani mbiralali biragagobi mini lalu lo wira. <sup>23</sup>

<sup>23</sup> Mana lowinigo lawai hagabi Perisi agalibi t́ tombene hondo kihe kamigoni. T́gua tomo mo dende bia hagane palena ale tara tara hangarimigo pini pini Ngode Datagaliwabhondo loma bia halu muwa Mana lowinigo duniniore ngagonaga mo tiga bulenebi dara howa biamogo bulenebi tigabi holenebi yu tiga nabi kami. T́gua mana uruni bialu howa maru wa nahe mandagi bimaga howa bulene nga. Anigo t́naga mo ko holene timbu gibiore wulebirago dara holene nga. <sup>24</sup> T́ dengalibi degeme dengalibi karu hariga ina hendedogo mbaibu lowa gililo yalu pialu kamigoni. T́gua t́naga iba beha hinabibi ale emene koore bedago na nabi mo waharamili. Ani buwa nogo kamele ale mbedogo beramili.

<sup>25</sup> Mana lowinigo lawai hagabi Perisi agalibi t́ tombene hondo kihe kamiru t́gua bo waholenebi habua bulenebi mbirale mbirale yu kamigo t́naga iba bebi beledibi habanehayagi mo tolai ho ngaru dodo ho ngelowa tagirahayagi hangu wayawaya biaga kamigoni. Anigo t́naga mo ko holene timbu gibiore wulebirago dara holene nga. <sup>26</sup>

<sup>26</sup> Perisi agali de kohe kego ina iba be habaneha dodo agi kabe hondowa ala wayawaya biriyagua tagirahayagibi bayale dege holebira.

<sup>27</sup> Mana lowinigo lawai hagabi Perisi agalibi t́ tombene hondo kihe kamiru t́ homali tagirahayagi hangu bayuwa kau wuwa tamuhayagi homa kuni togo buwa himi tabulo wiagago ale kamigonigo t́naga mo ko holene timbu gibiore wulebirago dara holene nga. <sup>28</sup> Ogonidagua dege t́ dongone tagirahayagi wali agalihondo bayale hetingi howa

✧ 23:16: Md 5.33-34, 15.14 ✧ 23:22: Ais 66.1, Md 5.34 ✧ 23:23: LBM 27.30, Hos 6.6, Mai 6.8, Lg 11.42 ✧ 23:25: Mg 7.4 ✧ 23:27: Lg 11.44, Ab 23.3



tínaga bu habanehayagi tombene hondo kihe holenebi ko tara tarabi tołaihe kamigoni, lene.✧

*Tínaga pani nolene ogobi wulebira, lenego ogo  
(Lugu 11.47-51)*

<sup>29</sup> Mana lowinigo lawai hagabi Perisi agalibi tí tombene hondo kihe kamiru tígua Ngode Datagaliwabe mana latagi haga bamba heneru hora henegoria anda bayale bialubi agali mini bayale bamba heneru tí embeda naholenaga hora henegoria yári bayaleore bia halubi kamigonigo tínaga mo ko holene timbu gibiore wulebirago dara holene nga. <sup>30</sup> Ani buwa tígua agua lalu, Ina inanaga mamali henedangi henedale iname Ngode Datagaliwabe mana latagi heneru ti bo wahenedagua bo wa nahe kamale, laga kami. <sup>31</sup> Ani lowa tígua ina Ngode Datagaliwabe mana latagi haga heneru bo wahenerunaga aguanene kamagoni lo manda buore kamigoni.✧ <sup>32</sup> Ani binigo áyu tígua nde tínaga mamali henerume biala ho wiyadagoria howa bu maro bidaba laro. <sup>33</sup> Tí nogombibi nogombi iginibi kamigoni. Tí heli dindiha pani nole pu laragola agua pu yola holeberamibe.✧ <sup>34</sup> Ina tí langerogo tí kamigoria Ngode Datagaliwabe mana latagi hagabi agali mini gigabiwibi lawai hagabi pudaba larogola tígua uruni maru homelo balu maru ira bangani ba para halu maru ngoai hagane andaha karia minu balu ti dindi dindi ibida pugu pugu biragola minule talima poleberami.✧ <sup>35</sup> Anigo wali agali bolene irane nawi howa bame homelo bayagonagabi Abele bolene irane nawi howa homelo bayagonagabi Beregaia igini Segaraia ibu Anduane Homogonaga andala Ngode Datagaliwabehondo mbirale bo lomabu miaga dagiala dombeneha hearia tigua homelo bayagonagabi uruni biyagonaga pani wali agali áyu kamirume na holeberami.✧ <sup>36</sup> Ina tí heneneore langerogo uruni bima penedagoni bibahendeorenaga pani wali agali áyu karume na holebira.

*Yasu ibu Yarusalemeni hearu gubalini ho henego ogo  
(Lugu 13.34-35)*

<sup>37</sup> Yarusalemeni waliagali kamiru-o tígua Ngode Datagaliwabe mana latagi haga heneru homelo balubi Ngode Datagaliwabenaga mana lamule ibiniru tołeme homelo balubi kami. Ega gogologo angibunime ibu igini ibuni tombeha mo mogo bu ngelai howa babaganeme dungu dambi hagadagua ina inaga gime wali agali bu kamiruni tí mo mogo buwa tali wu mabu bua haabo harugola tígua, Ina ani bia, nale harimi.✧ <sup>38</sup> Anigo Anduane Homogonaga anda tীনaga laramiligo tabuanda halu tamuha mbirali nahe helo wahalu polebira.✧ <sup>39</sup> Ina tí langerogo tu áyu howa be lirahayagiore mbira tígua i nahende haabo howa, Mbirali Anduane Homogonaga minini howa ibirago Ngode Datagaliwabehanda ibu mo turu helo, laramingi i lone de hondoleberami, lene.✧

## 24

*Yasuhanda, Anduane Homogonaga anda gialo waholebira, lenego ogo  
(Maga 13.1-2, Lugu 21.5-6)*

<sup>1</sup> Yasu ibu Anduane Homogonaga andaha howa tagira pialu piyagolaibunaga talima piaga biarume puwa Yasuhondo lalu, Anduane Homogonaga anda bayaleore o bidago de handa, lene. <sup>2</sup> Ani layagola Yasuhanda lalu, E o bidagoni hendedamigo ogoni bulebiragonaga ina tí langero. Ege tołe wia gimbu gimbu bima iraga kagoni homane mbiraore winidagoria ngeladai nabi bibahendeore mo ibira ibira biai holebira, lene.✧

✧ 23:28: Lg 16.15 ✧ 23:31: Ab 7.52 ✧ 23:33: Md 3.7, 12.34, Lg 3.7 ✧ 23:34: Md 10.23, 1 Te 2.15 ✧ 23:35: Pí 4.8, 2 Bit 24.20-21, Hi 11.4 ✧ 23:37: 2 Bit 24.21, Iba 17.8, 91.4, Ab 7.59, 1 Te 2.15 ✧ 23:38: 1 Kin 9.7-8, Yar 12.7, 22.5 ✧ 23:39: Iba 118.26, Md 21.9 ✧ 24:2: Yar 26.18, Mai 3.12, Lg 19.44

*Mo ko holenebi mo tandaga holenebi wulebira, lenego ogo  
(Maga 13.3-13, Lugu 21.7-19)*

<sup>3</sup>Yasu ibu Hari Olibeni berearia ibunaga talima piaga biaru tini hanguore ibuwa lalu, O larigoni ogongi bulebira lalu ina langi. Agi birane hondowa í ibulenebi horo hamaro bulenebi ha para haragonida lolomabe, lene.✧

<sup>4</sup>Ani layagola Yasuhanda ladai bialu lalu, Mbiralime tí mo hondo holigo mamage halu de hondo halimu. <sup>5</sup>Agali dewaoreme í mini lowa lalu, Mbiralí Dabo Helenego ibulebira lowinigo í íbu kogoni, lowa wali agali dewaore mo hondo holebira.✧ <sup>6</sup>Ani buwa dindi kawareni wai biragonaga bi laruagolabi dindi kaundiaoreni wai bira laragolabi tí hale howa gi nahalimu. Mbiralé uruni ani bia bulebirago ani laragome ha maro bulene nga lalu ndo larago gi nahalimu. <sup>7</sup>Dindi mende mendela wai bia aí nái bialu gabumane tara tarala wai bia aí nái bialu holebira. Ogoningi dindi bibahendehá hina gari pume halu dindi dumbirumbi biame holebira.✧ <sup>8</sup>Mbiralé uruni bibahende biai haragola walime waneigini taba honole howa tandaga pigane nagago aleore bulebira.

<sup>9</sup>Ani buwa tí minuwa mo tandaga halu balu home lolene karuha minu mulebira. Ani biragola tígua inaga mini yu tiga bu kamigo hondowa wali agali bibahendeore karume tí handabe manga halu handa tara hai holebira.✧ <sup>10</sup>Horo uruningi dewaoreme Ngode Datagaliwabhondo mini mbiraore wu hayagoni wahalu tini handabe manga haga haga bialu ndelalu maruhondo minu migi bulebira.✧ <sup>11</sup>Ani biragola Ngode Datagaliwabe mana henene ngadagua ndo latagi haga dewaoreme ha pani howa wali agali dewaore mo hondo hai holebira.✧ <sup>12</sup>Ogoningi dege ko tara tara urunime anda haragola wali agali dewaoreme gubalini holene wu heneru ho amburi hama dai bulebira. <sup>13</sup>Ani bulebirago wali agali mbiralime wahalu pu nabi hongo howa ho ununu lo haabo hayagua hamaro birangi ogoni ibu pele mulene wulebira.✧ <sup>14</sup>Ani buwa Ngode Datagaliwabhanda Handame Ho Kagonaga Bi Mana Debene ogoni wali agali dindi bibahendeha karu hale hai helo lamiai halu kagola horo hamaro bulene ibulebira.✧

*Hiriribi Gibiore Hondolene tagira ibulebira, lenego ogo  
(Maga 13.14-23, Lugu 21.20-24)*

<sup>15</sup>Ngode Datagaliwabe mana latagi haga Danielehanda Hiriribi Hondolene Gibiore te lenego ogoni tagira ibuwa Ngode Datagaliwabhondo loma bia howa mini ngagoria ngagola tígua de hondoleberami lene. Bi ogoni daga lalu kamirume irane ogonaga layada lalu bayuwa manda bilimu.✧ <sup>16</sup>Yasuhanda ani lowa lalu, Uruni biragola de hondowa Yudiani karume hari hambene ngaruha hondo yalu gerai polene wulebira. <sup>17</sup>Ogoningi agali mbira ibuni anda dangini bedagome dalialu tamuha ibuninaga dabudabu wiyago mo anda polene henge nawulebira.✧ <sup>18</sup>Agali mende mabuni biabe bialu kagome ibuni andaga aga mo dai bulene henge nawulebira. <sup>19</sup>Horo uruningi wali gali bere bedarubi gali andu mialu bedarubi dara timbuniore holene wulebira. <sup>20</sup>Ira yuni gilope howa dagare biagane hororu ibirangibi Sabada Horongibi tí ibida napolenaga Ngode Datagaliwabhondo bi lalu holene wulebira. <sup>21</sup>Horo uruningi hiriribi emene ndoore bulebiradagoni ale mbira ala dindi bibahende✧ wabiyangi howa nabinigobi bialu mani nde lone ogonidaguaore mbira nabulebiragobi bulebira. <sup>22</sup>Ani buwa ogoni birangi Ngode Datagaliwabhanda horo mo tubagi hole manda bini. Ani manda nabi kale uruni birangi wali agali bibahende holene henge na mo ngale. Ngode

✧ **24:3:** Md 24.27, 24.37-39, Mg 13.3, 1 Te 5.1 ✧ **24:5:** Yar 14.14, 23.21, 23.25, Md 24.23-24, Yo 5.43, Ab 5.36-37, 1 Yo 2.18 ✧ **24:7:** 2 Bit 15.6, Ais 19.2, Hag 2.22, Seg 14.13, Ab 11.28 ✧ **24:9:** Md 10.22, Mg 13.9, Lg 21.12, Yo 15.18-20, Ab 4.2-3, Mo 2.10, 2.13 ✧ **24:10:** Md 11.6, 13.57, 2 Ti 1.15 ✧ **24:11:** Md 7.15, 24.5, 24.24, Ab 20.29, 1 Ti 4.1, 2 Pi 2.1, 1 Yo 4.1 ✧ **24:13:** Md 10.22, Mg 13.13, Hi 3.6, 3.14 ✧ **24:14:** Md 9.35, 10.18, 28.19, Lm 10.18, Kl 1.6, 1.23 ✧ **24:15:** Dan 9.27, 11.31, 12.11 ✧ **24:17:** Lg 17.31 ✧ **24:21:** Dan 9.26, 12.1, Yol 2.2, Mo 7.14

Datagaliwabehanda ibunaga wali agali dabeneru manda buwa horo uruni mo tubagi holebira.✠

<sup>23</sup> Anigo mbiralime tíhondo lalu, Mbirali Dabo Helenego ibulebira lowinigo o íbu kago de handadaba, layaguabi, Amu íbu kago de handadaba, layaguabi hale nahalimu.✠

<sup>24</sup> Agali marume ke halu, Mbirali Dabo Helenego ibulebira lowinigo i íbu kogoni, lole ibulebira. Marume ke halu, I Ngode Datagaliwabe mana latagi haga kogoni, lole ibulebira. Tigua wali agali Ngode Datagaliwabehanda dabeneru mo hondo habehedabe hondole agalime nabigane ale timbuniorebi nahendene alebi bialu holebira.✠

<sup>25</sup> Uruni bia nabidaore ina tí ala langerogoni hale halu mamage ho halimu.

<sup>26</sup> Anigo wali agalime lalu, Ibu dindi ko wali agali nahaga wiagoria íbu ka, layagua hondo napilimu. O tigua lalu, Ibu ogoni ha do kago, layaguabi hale nahalimu.✠

<sup>27</sup> Ogoninaga bialu ni tagira ibiragohayagi howa ni paliragohayagi hari daba mege lagadagua Agali Hole Ibiyago ibu ogonibiore ibulebira.✠

<sup>28</sup> Homenenaga tingini ngagoha ega bodo hariaweme nole íbu ngoai holebira, lene.✠

*Agali Hole Ibiyago lone ibulebirago ogo*

*(Maga 13.24-27, Lugu 21.25-28)*

<sup>29</sup> Ani lowa Yasuhanda laabo halu lalu, Horo uruningi mo ko holene uruni ngagola abaleore ni hundialu ege nadalu yapibiya hariha howa dugu ibira ibira bialu hari daligaha hongo haga karu tarame mo ema bia holebira.✠ <sup>30</sup> Ani biragola Agali Hole Ibiyagonaga manane tara walia halu harini ha pani holebira. Ani biragola wali agali dindi bibahendeni karume Agali Hole Ibiyago hongo timbuni holenebi wá timbuni taraore holene hebabi hari beralibani ibirago hondowa gi halu dugu taraore yi yi lalu biai holebira.✠ <sup>31</sup> Ani biragola mbelo biguli timbuniore laragola dindi bibahendenaga gimbuni maria ngagoniha howa ibugua ibunaga dahuliyalirume wali agali Ngode Data-galiwabehanda dabeneru dindi bibahende ha karu, Mo mogo bule pudaba, lolebira.✠

*Yasuhanda pogenaga te lenego ogo*

*(Maga 13.28-31, Lugu 21.29-33)*

<sup>32</sup> Tí mana mbira manda bilimulo pogenaga te langero. Poge mabirago hondowa ai ni poboyogobi dolene tu kawareda manda beramili. <sup>33</sup> Ogonidagua dege mbirale uruni bibahende bigi biragola tígua handalu kamiria horo kaware ha para kagonida manda buleberami.✠ <sup>34</sup> Ogoninaga tí manda biaabo halimulo ina bi heneneore laro. Wali agali áyu kamiruni nahome kamiore dege mbirale uruni bibahende bulebirago laro.✠ <sup>35</sup> Hari daligabi dindibi ereba hai holebirago inaga bi dege ereba nahe wiaabo holebira, lene.✠

*Horo ogo angiore bulebiralo mbiralime manda nabi ka, lenego ogo*

*(Maga 13.32-37, Lugu 17.26-30,34-36)*

<sup>36</sup> Ibugua ani lowa lalu, Uruni bibahende bulebirago horo ogo angiore bulebiralo mbiralime manda nabioire ka. Dahuliyali dahuliya andaga karumebi Igini ibuguabi manda nabi dege ka. Aba kago ibuni hangu manda bu ka.✠ <sup>37</sup> Agali Hole Ibiyago dahuliya andaga howa daibiragola Noa hayangi biyadaguaore bulebira.✠ <sup>38</sup> Iba li timbuni biago naibiaha Noa ibu iba talu biagoha anda piyago horo ha para naheaha wali agali bu hearume hina iba nalubi wali agali dabu bigi bialubi hene.✠ <sup>39</sup> Wali agali bu hearume ogo ale bulubadalo manda nabioire hearia iba li timbuni ibiyagome bibahendeore ibame nai hene. Agali Hole Ibiyago lone ibirangi ogonidaguaore bulebira.✠ <sup>40</sup> Ogoningi

✠ 24:22: Ais 65.8-9, Seg 14.2-3 ✠ 24:23: Md 24.5, 24.11, Mg 13.21, Lg 17.23, 21.8 ✠ 24:24: Man 13.1-3, Mg 13.22, 2 Te 2.8-9, Mo 13.13-14 ✠ 24:26: Lg 17.23-24 ✠ 24:27: Md 24.37-39 ✠ 24:28: Lg 17.37, 2 Pi 3.10 ✠ 24:29: Ais 13.10, 34.4, Ese 32.7, Yol 2.10, 2.31, 3.15, Mo 6.12-13 ✠ 24:30: Dan 7.13, Seg 12.10-14, Mg 13.26, Mo 1.7, 6.12-13 ✠ 24:31: Ais 27.13, Md 13.41, 1 Ko 15.52, 1 Te 4.16 ✠ 24:33: Ya 5.9 ✠ 24:34: Md 16.28, 23.36, Mg 13.30, Lg 21.32 ✠ 24:35: Iba 102.26, Ais 40.8, Md 5.18, Mg 13.31, Lg 21.33, Hi 1.11 ✠ 24:36: Seg 14.7, Ab 1.7, 1 Te 5.1-2 ✠ 24:37: Pig 6.5-8 ✠ 24:38: Pig 6.3-5, Lg 17.26, 1 Pi 3.20 ✠ 24:39: Pig 7.6-24, 2 Pi 3.6

agali kirali mabuha biabe mandagi bialu karia mendego helalu mendego yamulebira. <sup>41</sup> Wali kirali widi dambialu mandagi bedaria mendego berelalu mendego yamulebira. <sup>42</sup> Anigo tínaga Anduane Homogo ogongiore ibulebiraló manda nabioire kamigo tí mamage bayuwa ho halimu. <sup>43</sup> Ani buwa galone mbira tí manda biaabo halimulo laro. Anda anduaneme pageali ogongiore ibulebiraló manda bidale pagealime ibu andaga duanialu anda naibilo lowa palia nabi halu gaeabu hagadagua kale. <sup>44</sup> Anigo Agali Hole Ibiyago ogongi ibulebiraló tí manda nabi kamiria íbupe holigo tíbi horo bibahendengi manda manda bu haabo holeneore nga. <sup>\*</sup>

*Biabe bia haga mini bilinahe nahelanaga te ogo*  
(Lugu 12.41-48)

<sup>45</sup> Anigo biabe bia haga mini bilinahebi mini gigabiwibi haruago aibe. Ibunaga anduane biagome biabe bia haga biago ibugua biabe bia haga maru karu bayuwa hondo howa tomo tale bulene ngangi tale bilo helayago ogoni ibu haruagoni. <sup>46</sup> Anduane biago ibu andaga dai biragola ibunaga biabe bia haga biagome biabe ogonidagua bialu karia ibiyagua nde biabe bia haga biagome turu timbuniore holebira. <sup>47</sup> Anioire bulebiraogona ina tí langerogoni. Anduane ogonime biabe bia haga biagohondo, Inaga mbirale bibahende ngaru ina hondo habe, lolebira. <sup>48</sup> Ani laragola ibunaga biabe bia haga agali ko kayagua ibunime lo manda bialu lulu, I anduane luore howa dai bulebira, manda buwa <sup>49</sup> ibu biabe bia haga maru karu baba bo wahaga haga bialubi tomo na gimbu bialubi agali lulu iba naga karu baba lulu iba na gimbu bialubi holebira. <sup>50</sup> Ani bialu howa biabe bia haga biagome ibunaga anduane ogongi ibulebiraló manda nabi karia íbupe holebira. <sup>51</sup> Ani ibuwa anduane biagome biabe bia haga biago bo ba tagi howa tombene hondo kihe karu heba mandagi helaragola ibu dugu bialu howa ne gingirulo hayaga bialu holebira, lene. <sup>\*</sup>

## 25

*Bi yobage lowa wandari pirame binigo te lenego ogo*

<sup>1</sup> Yasuhanda ibunaga talima piaga biaruhondo bi laabo halu lulu, Horo uruni harangi Ngode Datagaliwabeanda Handame Ho Kagoria ogobi wulebira. Wandari pira berenego tigua lamu hale yalu agali wali dabu bule ibiyago lola hole pene. <sup>2</sup> Wandari duria miniwi bialu duria mende mini nawioire berene. <sup>3</sup> Wandari mini nawi biarume lamu hale yuwa delagane olibe lininaga weli huniane mbira nayioire pene. <sup>4</sup> Miniwi biaru ti hale lamu iranehabi behabi weli ogoni berelowa tolo yalu pene. <sup>5</sup> Pu biruwa agali wali dabu biaga biago abale naibiyagola wandari biaru ti umu layagola palia hondo hai hene.

<sup>6</sup> Mbi hanuni hayagola mbiralime hongo howa ga lulu, Ai agali wali dabu biaga biago ibiragonigo lola hole ibidaba, lene. <sup>7</sup> Ani layagola wandari pira palia hondo hayaru abale heyuwa tinaga lamu hale biago bayuwa hungu bilo mo tiga bini. <sup>8</sup> Ani bialu howa wandari duria mini nawi biarume duria miniwi biaruhondo lulu, Inanaga lamu hale hundirago tigua weli maru ina yobu ngidaba, lene. <sup>9</sup> Ani layagola duria miniwi biarume ladai bialu lulu, Tí ngialu inane halu bulene nakarulapedago tirugu anda puwa taya bu pudaba, lene. <sup>10</sup> Ani laya handala wandari mini nawi biarume tirugu andaha weli mo pene. Ti peaha agali wali dabu biaga biago ibini. Ibiyagola wandari duria manda manda bu birayaru ti agali biago heba tomo nole anda pialu panga paya tagi hene.

<sup>11</sup> Mahaore wandari duria mende biaru ibini. Tigua ibuwa lulu, Anduane-o ina anda eberamago panga dugua, lene. <sup>12</sup> Ani layagola agali wali dabu biaga biagome ladai bialu lulu, I tí manda nabidogo panga naduguleore bero, laya, lene. <sup>\*</sup>

<sup>\*</sup> 24:42: Md 25.13, Mg 13.33, Lg 21.36    <sup>\*</sup> 24:43: 1 Te 5.2, 2 Pi 3.10, Mo 3.3, 16.15    <sup>\*</sup> 24:44: Md 25.13, 1 Te 5.6  
<sup>\*</sup> 24:46: Mo 16.15    <sup>\*</sup> 24:47: Md 25.21-23    <sup>\*</sup> 24:51: Md 8.12, 25.30    <sup>\*</sup> 25:1: Lg 12.35, Mo 19.7    <sup>\*</sup> 25:11: Lg 13.25    <sup>\*</sup> 25:12: Md 7.23

<sup>13</sup> Ani lowa Yasuhanda lamaro bialu, Tígua ogongiore ibulebiraló manda nabiore kamigo bayuwa mamage holene nga, lene.✠

*Bi yobage lowa biabe bia haga tebiralime bini te lenego ogo  
(Lugu 19.11-27)*

<sup>14</sup> Yasuhanda la dege bialu lalu, Horo uruni harangi Ngode Datagaliwabehanda Handame Ho Kagoria ogobi wulebira. Agali mbirame ibu dindi taraha ibaga bialu pole lowa ibunaga biabe bia haga biaru olalu, Ibidaba, lowa, Inaga mbirale bibahende ngoru hondo ha halimu, lene.✠ <sup>15</sup> Ibugua ti hangu hanguhondo biabe bulene mugube headagua mbiragohondo muni daosini duria (5,000) mialu mendegohondo muni daosini kira (2,000) mialu tebonegohondo muni daosini mbira (1,000) mialu bini. Ani bialu ibuni dindi mbiraha ibaga bialu pene.✠ <sup>16</sup> Piyagola biabe bia haga muni daosini duria (5,000) yayagome abale mo yalu puwa muni biagome biabe bialu daosini duria (5,000) mende mo tago hene. <sup>17</sup> Ogonidagua dege biabe bia haga mende muni daosini kira (2,000) yalu piyagomebi daosini kira mende mo tago hene. <sup>18</sup> Biabe bia haga muni daosini mbira (1,000) mo yayagome ibu anduane biagonaga muni yayago mo yalu puwa dindiha uli wawa hora hene.

<sup>19</sup> Ani bu hemiria maniore tinaga anduane biago dai buwa ti haru biruwa lalu, Muni tihondo ngirugonaga lo manda bimija, lene. <sup>20</sup> Ani layagola biabe bia haga muni daosini duria (5,000) yayago ibugua muni daosini duria (5,000) mende mo yalu ibuwa mialu howa lalu, Anduane-o ina muni daosini duria (5,000) ngirigo ina daosini duria (5,000) mende mo tago ho yidogoni handa, lene. <sup>21</sup> Ani lalu miyagola ibunaga anduane biagome ladai bialu lalu, í biabe bia haga bayale mini bilinahe kegoni. Ai ina emene biago yuwa baya hangu bialu haridago timbunibi hondo habelo helaro. Inaga turu holene ngagoria iya haru mandagi turu ho habiya ibu, lene.✠

<sup>22</sup> Ani layagola biabe bia haga muni daosini kira (2,000) mo yalu piyagome ibuwa lalu, Anduane-o ina muni daosini kira (2,000) ngirigo ina daosini kira (2,000) mende mo tago ho yidogoni handa, lene. <sup>23</sup> Ani layagola anduane biagome lalu, í biabe bia haga mini bilinahe bayale kegoni. Ai ina emene biago yuwa baya hangu bialu haridago timbunibi hondo habelo helaro. Inaga turu holene ngagoria iya haru mandagi turu ho habiya ibu, lene.

<sup>24</sup> Ani layagola biabe bia haga muni daosini mbira (1,000) mo yalu piyagomebi ibuwa lalu, Anduane-o í agali tandagabi kegoni manda bido. Tomo ina hengene ndogo do nariligobi tomo egene ina polene ndogo mo mogo biriligobi kegoni. <sup>25</sup> í ogonibi kego i gi howa inaga muni biago mo yalu puwa uli wawa dindiha hora haru. Inaga muni biago o yidogo de handa, lene.

<sup>26</sup> Ani layagola ibunaga anduane biagome lalu, í agali ko mangaheda. Ina manda birigola howa ina hengene ndogo do naruligobi ina egene polene ndogo mo mogo biruligobi henene manda biribe. <sup>27</sup> Ani manda biriyagua nde ina inaga muni biago muni wiaga mbeniha wu howa i dai berogola mo tago howa ngule wirine agi biyane henebe. <sup>28</sup> Anigo muni daosini mbira (1,000) ogoni ibu yidagoni mo yu dai bialu agali muni daosini pira (10,000) yu kagohondo midaba. <sup>29</sup> Ogoninaga mbiralime mbirale mbira yu kayagua ibuhondo mia tago halu dewaore yu holebira. Mbiralime mbirale emene mbira yu howa nayi kolo kayagua emeneorebi yidago yamulebira.✠ <sup>30</sup> Biabe bia haga ogonibigo ibu galone nabulene kago arumaha minu ba tagi halimu. Ogoniha howa ibu dugu bialu ibuni ne gingirulo hayaga bialu holebira, lalu lene.✠

*Daba ki bumaro bulebirago ogo*

✠ 25:13: Md 24.42-44, 1 Te 5.6, 1 Pi 5.8 ✠ 25:14: Mg 13.34 ✠ 25:15: Lm 12.6 ✠ 25:21: Md 24.45-47, Lg 12.44, 16.10, 2 Ti 2.12, Hi 12.2, 1 Pi 1.8 ✠ 25:29: Md 13.12, Mg 4.25, Lg 8.18, Yo 15.2 ✠ 25:30: Md 8.12, 22.13, Lg 13.28



<sup>31</sup> Ani lowa Yasuhanda laabo halu lalu, Agali Hole Ibiyago ibu Handame Haga Kini howa dahuliyali bibahende karu heba mandagi ibirangi ibu handame haga biragane dagiani birulebira. ✧ <sup>32</sup> Ani bedaria wali agali dindi bibahendeoreha howa ibu wanakuihayagi mo mogo bu helolebira. Ani bu kagola nogo sibi haru haganeme nogo sibi memela daba ki hagadagua ibugua wali agali uruni mo daba ki ho helolebira. ✧ <sup>33</sup> Daba ki howa wali agali mini tigabi karu ibunaga gi tigahayagi helalu mini tigabi ndo karu ibunaga gi lehayagi helolebira. <sup>34</sup> Ani helowa Handame Haga Kini biagome wali agali ibunaga gi tigahayagi karuhondo lalu, I Abahanda mo turu howa helenedago ibidaba, lolebira. Dindi bibahende wabiyangi howa Ngode Datagaliwabeanda handame ho kagoa tí halimulo mo manda manda bu wini ngagoria hole ibidaba, lolebira. ✧ <sup>35</sup> I hina garibi lo hewagola tígua i hina ngirimi. I iba noa ho hewagola tígua i iba hambu ngirimi. I mbiraha howa íbu hewagola tí andaga palimiya íbu larimi. ✧ <sup>36</sup> I aga nabi tibabe hewagola tígua i aga mo bia harimi. I warago bo wiwagola tígua i ira to birimi. I garabaya hewagola tígua i nenege ibirimi, lalu lolebira. ✧

<sup>37</sup> Ani laragola wali agali mini tigabiwi karume ogodagua ladai bulebira, Anduane Homogo-o iname í hina garibi lo heria hina ngialu iba noa ho heria angi hambu ngialu birimabe. <sup>38</sup> I dindi mbiraha howa íbu heria hondowa ina andaga palimiya ma lalu tibabe heria angi aga mo bia halu birimabe. <sup>39</sup> Iname í warago bo wiriabi garabaya heriabi nenege angi ibirimabe, lolebira. <sup>40</sup> Ani laragola Handame Haga Kini biagome ladai bialu lalu, Ina tihondo heneneore larogoni. Tígua birimiangi bialu howa i hamene emene ko yagibanoruhondo birimigo ihondo birimigoni, lolebira. ✧

<sup>41</sup> Ani lowa ibugua ibunaga gi lehayagi karuhondo lalu, I kogoria nahe pudaba. Tí Ngode Datagaliwabe mo yo handaga karunaga pani nolene ngagoria harimidago ira hundia nabiaga dalude daabo ho ngagoria hole pudaba. Ogoriani dama Heyolabebi ibunaga dahuliyalirubi helo Ngode Datagaliwabeanda manda manda bu wini ngagoria hole pudaba, lolebira. ✧ <sup>42</sup> I hina garibilo hewagola tígua i hina nangirimi. Iba noa ho hewagola i iba nahambu ngirimi. <sup>43</sup> I dindi mbiraha howa íbu hewagola i tí andaga palimiya íbu nalarimi. I tibabe hewaria tígua i aga mo bia naharimi. I warago bo wiwagolabi garabaya hewagolabi tígua i nahondo ibirimi, lolebira.

<sup>44</sup> Ani laragola tigua ladai bialu lalu, Anduane Homogo-o iname í hina garibi lo heriabi iba noa ho heriabi dindi mbiraha howa íbu heriabi aga nabi tibabe heriabi warago bo wiriabi garabaya heriabi iname í angi hondowa biamogo nabirimayabe, lolebira. <sup>45</sup> Ani ladai biragola Handame Haga Kini biagome ladai bialu lalu, Ina tihondo heneneore larogoni. Tígua mbirali emene yagibanoru biamogo bulene hame naleore harimigo ihondo birimi, lolebira. ✧ <sup>46</sup> Anigo uruni pani naabo holene ngagoria helo pelolebira. Mini tigabiwi karu ti haabobo holene ngagoria polebira, lalu Yasuhanda hene. ✧

## 26

*Yasu homelo bole manda manda binigo ogo  
(Maga 14.1-2, Lugu 22.1-2, Yone 11.45-53)*

<sup>1</sup> Yasuhanda mana uruni lawai hai howa ibunaga talima piaga biaruhondo lalu, <sup>2</sup> Horo kiru hangu howa Bolangua Halu Penegonaga tomo nolene wulebirago manda bu kamigoni. Ogoningi Agali Hole Ibiyago ira bangani ba para helo minu mulebira, lene. ✧

<sup>3</sup> Loma binigo mo miaga haguane hearubi agali ala hene miniwi hearubi ti loma binigo mo miaga haguane timbuni mini Kaiabasa andaga mo ngoai hene. <sup>4</sup> Mo ngoai

✧ **25:31:** Seg 14.5, Md 16.27, 19.28, Ab 1.11, 1 Te 4.16, 2 Te 1.7, Mo 1.7, 20.11-13 ✧ **25:32:** Ese 20.38, 34.17, Lm 14.10, 1 Ko 5.10, Mo 20.12 ✧ **25:34:** 1 Ko 6.9, 15.50, Ga 5.21, Hi 4.3, 1 Pi 1.20 ✧ **25:35:** Ais 58.7, Ese 18.7, 18.16, Hi 13.2, Ya 1.27 ✧ **25:36:** 2 Ti 1.16, Ya 2.15-16 ✧ **25:40:** Min 19.17, Md 10.42, 18.5, Mg 9.41, Hi 6.10, Mo 22.12 ✧ **25:41:** Md 7.23, Mg 9.48, Lg 16.24, Mo 12.9, 20.10 ✧ **25:45:** Seg 2.8, Ab 9.5 ✧ **25:46:** Dan 12.2, Yo 5.29, Lm 2.7 ✧ **26:2:** Har 12.1-27, Md 20.18, Mg 14.1, Lg 22.1, Yo 13.1

howa tigua Yasu ohowa minalu bo wahole lo manda bialu hene. <sup>5</sup> Tigua lalu, Wali agali bu karume ina baba gungu buligo tomo nolene harangi iname ibu naminamiya, lene.

*Wali mbirame Yasu hagianeni weli ngabi odo winigo ogo  
(Maga 14.3-9, Yone 12.1-8)*

<sup>6</sup> Yasu ibu Bedani howa Saimono ge hamua mbira ala ibugua mo dabi henegonaga andaga pu berene. <sup>7</sup> Yasu ibu tomo nalu berearia wali mbirame weli ngabi baya muni dewaoreme yolo buwa beha berelo winigo mo yalu ibuwa Yasunaga hagianeni odo wia hene. <sup>8</sup> Wali biagome ani biyagola Yasunaga talima piaga biarume hondowa keba lalu, Bame oda hole biragoni agidabe. <sup>9</sup> Weli ngabi baya ogoni muni dewa mulene ngago midale muni mirago yagibano karuhondo talebu ta kaleda, lene.

<sup>10</sup> Tigua ani layago manda buwa Yasuhanda tihondo lalu, Wali ogome birago nabi waha laramigo aginagabe. Ibugua ihondo o biyagoni bayaore biya. <sup>11</sup> Wali agali yagibano karu ti heba mandagi haabo kamigoni. I ti heba mandagi haabo naholebero. <sup>12</sup> Wali ogome weli ngabi baya inaga tinginini odo wia hayagoni nde i hora holebiragona manda bialu biyagoni. <sup>13</sup> Anigo ina tihondo heneneore laro. Bi Mana Debene ogoni dindi bibahendeha lamialu howa ibugua ihondo biyago mitangi bu dai bialu te ogoni loyogo lolebira, lene.

*Yudasahanda Yasu ndelole penego ogo  
(Maga 14.10-11, Lugu 22.3-6)*

<sup>14</sup> Ani biyagola howa Yasunaga talima piaga homberiali (12) heneru mbirago mini Yudasa Isagariodo henegome loma binigo mo miaga haguane hearu hearia puwa <sup>15</sup> lalu, Ina Yasu tihondo ndelo ngiruyagua tigua i agi nguleberamibe, lene. Ani layagola agali biarume muni kuni pira tebira (30) daga lowa Yudasa mini. <sup>16</sup> Ani miyagola Yudasahanda ogoningi howa Yasu minu mulene henge aguaore ngabe hondole tai bialu hene.

*Yasu ibunaga talima piaga heba Bolangua Halu Penego Horonaga tomo nenego ogo  
(Maga 14.12-21, Lugu 22.7-14,21-23, Yone 13.21-30)*

<sup>17</sup> Mberedi Yidi Nahe Hirinigo nolene horo pigane hayangi ibunaga talima piaga biaru ibuwa Yasuhondo lalu, Bolangua Halu Penego Horonaga tomo i nabelo agoha manda manda bule polomaya hamelo kebe, lene. <sup>18</sup> Ani layagola Yasuhanda tihondo lalu, Yarusalemeha puwa agali mbira ogoniha holebirago ibu karia puwa ibuhondo agua lalimu. Inanaga Lawai Haga biagome lalu, Inaga horo ha para hayadago ibi inaga talima piaga karubi ina mandagi Bolangua Halu Penego Horonaga tomo i andaga nolomaya, laya lalimu, lene. <sup>19</sup> Ani laya handala howa ibunaga talima piaga biarume Yasuhanda layadagua bialu tigua Bolangua Halu Penego Horonaga tomo nole manda manda bu wule pene.

<sup>20</sup> Alendo tomo nolene tu hayagola Yasu ibunaga talima piaga homberiali (12) biaru heba tomo nalu berene. <sup>21</sup> Tomo nalu biruwa Yasuhanda lalu, Ina tihondo heneneore larogo. Agalime i minilo ti mbiraligome nde loleberami, lene.

<sup>22</sup> Ani layagola ibunaga talima piaga biarume mogo lowa ibuhondo hangu hangume lagalaga bialu lalu, Anduane Homogo-o ina o larigoni i ndo lari, lalu laga laga bini. <sup>23</sup> Ani lagalaga biyagola Yasuhanda ladai bialu lalu, Mbiral i heba ndisiha mberedi iba howa nalu bedagome i minilo nde lolebira. <sup>24</sup> Anduane Homogonaga mbugani lo ngadagua Agali Hole Ibiyago homolebira. Agalime ibu minilo ndelalu walia harago ibunaga mo ko holene timbu gibiore wulebiragonaga dara holene nga. Agali ogoni ibu aiyahanda taba nahenedale nde bayale kaleda, lene. <sup>25</sup>

<sup>25</sup> Alendo tomo nolene tu hayagola Yasu ibunaga talima piaga homberiali (12) biaru heba tomo nalu berene. <sup>26</sup> Tomo nalu biruwa Yasuhanda lalu, Ina tihondo heneneore larogo. Agalime i minilo ti mbiraligome nde loleberami, lene.

<sup>27</sup> Ani layagola ibunaga talima piaga biarume mogo lowa ibuhondo hangu hangume lagalaga bialu lalu, Anduane Homogo-o ina o larigoni i ndo lari, lalu laga laga bini. <sup>28</sup> Ani lagalaga biyagola Yasuhanda ladai bialu lalu, Mbiral i heba ndisiha mberedi iba howa nalu bedagome i minilo nde lolebira. <sup>29</sup> Anduane Homogonaga mbugani lo ngadagua Agali Hole Ibiyago homolebira. Agalime ibu minilo ndelalu walia harago ibunaga mo ko holene timbu gibiore wulebiragonaga dara holene nga. Agali ogoni ibu aiyahanda taba nahenedale nde bayale kaleda, lene. <sup>30</sup>

☆ 26:7: Lg 7.37-38 ☆ 26:11: Man 15.11, Yo 12.8, 14.19, 17.11 ☆ 26:14: Yo 11.57 ☆ 26:15: Seg 11.12, Md 27.3 ☆ 26:17: Har 12.6, 12.14-20, Mg 14.12, Lg 22.7-9 ☆ 26:18: Md 21.3 ☆ 26:23: Iba 41.9, Lg 22.21, Yo 13.18 ☆ 26:24: Ais 53, Dan 9.26, Mg 9.12, Yo 17.12

<sup>25</sup> Ani layagola Yudasa ndelaga biagome lalu, Lawai haga-o ina o larigoni i lalu larebe, lene.

Ani layagola Yasuhanda ladai bialu lalu, Inime o laregoni, lene.

*Anduane Homogonaga tomo nenego ogo*  
(Maga 14.22-26, Lugu 22.14-20, 1 Korindi 11.23-25)

<sup>26</sup> Ti tomo nalu biruwa Yasuhanda mberedi mbira yamuwa Ngode Datagaliwabhondo turu halu kaj lowa gai bu baga buwaibunaga talima piaga biaruhondo mialu howa lalu, Inaga tingini ogonigo ya mialu nadaba, lene.✧

<sup>27</sup> Ani buwa ibugua iba be yamuwa Ngode Datagaliwabhondo turu halu kaj lowa tihondo mialu howa lalu, Ogoni ti bibahendeme no gombedalunadaba. <sup>28</sup> Ngode Datagaliwabhonda habo nalolene bi gahenge lowinigo tene inaga darama ogonihanga. Ani bidago inaga darama pelarogome wali agalime ko birago domo wahelo pelaro.✧ <sup>29</sup> Ina ti langerogo waini iba lone nane i Abahanda Handame Ho Kagoria ti heba howa waini iba gahenge nolebero, lene.✧

<sup>30</sup> Ani lai howa tigua iba gana mbira lowa tagira pialu Hari Olibe weagoha pene.✧

*Yasuhanda, Pidahondo Ina i manda nabido lolebere, lenego ogo*  
(Maga 14.27-31, Lugu 22.31-34, Yone 13.36-38)

<sup>31</sup> Yasuhanda tihondo lalu, Ayu mbiraga ti bibahendeme i helalu ibida piai holeberami. Ogoninaga Anduane Homogonaga mbugani lo ngago ogo, Ina nogo sibi haru haga kago baro handala nogo sibi karu ibida purogo lai holebira, lalu gilibu nga.✧

<sup>32</sup> Anigo Ngode Datagaliwabhonda i mo heya hara handala ti maha ibalimulo i ala Galili bamba halu polebero, lene.✧

<sup>33</sup> Ani layagola Pidahanda Yasuhondo laraga howa lalu, Ti bibahendeme ani wahalu purogo layaguabi ina i wahalu napolebero, lene.

<sup>34</sup> Ani layagola Yasuhanda Pidahondo lalu, Ihondo heneneore larogo ayu mbiraga ega gogologome bi naledaore ina halu tebo, Yasu manda nabido, lalu lolebere, lene.✧

<sup>35</sup> Ani layagola Pidahanda ladai bialu lalu, I ila homole howayaguabi ogonidagua naloleore bero, lene.✧

Pidahanda layadagua talima piaga bibahende biarumebi ani dege lai hene.

*Yasu ibu Gedemani puwa Ngode Datagaliwabela bi lalu henego ogo*  
(Maga 14.32-42, Lugu 22.39-46)

<sup>36</sup> Yasu ibuibunaga talima piaga biaru heba Gedemani dindi wiagoria pu howa ibugua tihondo lalu, I Ngode Datagaliwabela amugoha bi lole porotagi ti ogoria hondo biralimu, lene. <sup>37</sup> Ani lowa ibugua Pidabi Sebedi igini kirabi haru halu puwa ibu dara ho howa mini burugulo hene. <sup>38</sup> Ani biyagola ibugua tihondo lalu, Genda timbuniore iha anda ibiragome i garali bialu budara. Ina haru mamage howa ti ogoria hondo biralimu, lene.✧

<sup>39</sup> Ani lowa Yasu ibu emene pu amu howa dindini bulu palu wuwa Ngode Datagaliwabhondo bi lalu, I Aba-o tandaga nolene ngago nanoliya mo yalu polene ngayagua mo yalu pobe. Anigo i hame ledodagua ndo i hame lededagua hangu bibe, lene.✧

<sup>40</sup> Ani lalu bialuibunaga talima piaga tebirali biaru bereagoria dai bialu hearia ti palia hondo hai hearia hondowa ibugua Pidahondo lalu, Ti tebirali kamirume i heba mamage emeneorebi habe nahedagola padamibe. <sup>41</sup> Ko ngagome ti ko mo bia holigo ti bayuwa mamage howa Ngode Datagaliwabhondo bi lalu halimu. Tinaga minime Ngode Datagaliwabe hame ledamigo lowa tinaga tingini gedaore ho kamigoni, lene.✧

✧ **26:26:** Md 14.19, 1 Ko 10.16 ✧ **26:28:** Har 24.8, Yar 31.31-34, Seg 9.11, Lm 5.15, 1 Ko 10.16, Hi 9.22 ✧ **26:29:** Mg 14.25, Lg 22.18, Ab 10.41 ✧ **26:30:** Lg 22.39, Yo 18.1 ✧ **26:31:** Seg 13.7, Yo 16.32 ✧ **26:32:** Md 28.7, 28.16, Mg 14.28 ✧ **26:34:** Md 26.69-75 ✧ **26:35:** Md 26.56 ✧ **26:38:** Yo 12.27 ✧ **26:39:** Md 6.10, 20.22, Yo 6.38, Hi 5.7-8 ✧ **26:41:** Md 6.13, Eb 6.18, Hi 2.14, 4.15

<sup>42</sup> Ani lowa Yasu ibu lone puwa lalu, Aba-o tandaga nolene ngago ogoni i nane howa mo yalu polene nawiyagua noleberogo ini hame lededagua hangu bibe, lene. <sup>43</sup> Ani lowa Yasu ibu lone dai bialu hearia ibunaga talima piaga biaru ti dengala nahe palia hondo dege hearia hendene.

<sup>44</sup> Ani palea handala ibugua puwa Ngode Datagaliwabehondo bi mbiraore layagobi dege halu tebone lene. <sup>45</sup> Ani lai howa ibunaga talima piaga biaru bereagoria dai buwa ti palearia hondowa lalu, Ti erekui dogolowa palia hondo dege kamibe. Agali Hole Ibiyago agali ko biaga karuhondo minu mulene tu kaware ha para haragonigo handadaba. <sup>46</sup> I minilo ndelaga biago kaware o kago de handadaba. Ai heyalu ma, lene. <sup>\*</sup>

*Yasu mininigo ogo*

*(Maga 14.43-50, Lugu 22.47-53, Yone 18.3-12)*

<sup>47</sup> Yasuhanda bi ogoni lalu heaore ibunaga talima piaga hombeane Yudasu ibu agali dewali haru ibini. Loma binigo mo miaga haguane biarumebi agali ala hene miniwi biarumebi, Yasu minule pudaba, layagola tigua wai biagane ayu tibu kangoru yalu Yasu hearia ibini. <sup>48</sup> Yasu minilo ndelaga Yudasahanda ala agali biaruhondo lalu, Ti manda bilimulo ina walia halu mbiralinaga peni nunu larogo ibu minalimu, lene.

<sup>49</sup> Ani layadagua bialu Yudasahanda Yasu heagoria hondo yalu puabo howa lalu, Lawai haga-o mo palia holene iha haabo helo, lowa ibu peni nunu lene.

<sup>50</sup> Ani biyagola Yasuhanda ibuhondo lalu, Hamene-o bule wiridago abale berene, lene.

Ani layagola agali hayarume abale ibuwa Yasu minalu gime bayuwa yu ndibu lene.

<sup>51</sup> Ani biyagola Yasu heba hayaru mbiragome wai biagane ayu tibu yayagome loma binigo mo miaga haguane timbuni heagonaga garabaya biabe ale bia haga heagonaga hale bagadape hene. <sup>52</sup> Ani biyagola Yasuhanda ibuhondo lalu, Wai biagane ayu tibu ogoni ibuni yaganeha ya dai bibe. Mbirali wai biagane ayu tibume bole manda biyagua ayu tibume dege ibuni nde homelo bolepira. <sup>53</sup> Ina i Abahondo biamogo bia laruyagua ibugua dahuliyali ami ale dewaore ibilabehe kagoni manda nabi kamibe. <sup>54</sup> Ani biruyagua Anduane Homogonaga mbugani ogonidagua bulebira lo ngago agua bialu lola holobadabe, lene. <sup>\*</sup>

<sup>55</sup> Ani lowa Yasuhanda agali dewa bu hearuhondo lalu, Pageali minaramilidagua tigua wai biagane ayu tibu kangoru yalu i minule ibirimibe. Horo bibahendengi i Abanaga andaha mana lawai halu haabo haruligo tigua i mina nabirimi. <sup>56</sup> Anigo uruni bibahende beramigo Ngode Datagaliwabe mana latagi haga henerume Anduane Homogonaga mbugani bi lo ngadagua lola hai haragoni, lene. <sup>\*</sup>

Ani layagola ibunaga talima piaga bibahende biaruni Yasu wahalu ibida purogo lai hene.

*Ganisolo agalirume godi lelo Yasu haru penego ogo*

*(Maga 14.53-65, Lugu 22.54-55,63-71, Yone 18.13-14,19-24)*

<sup>57</sup> Mana lowini lawai haga hearubi agali ala hene miniwi hearubi ti loma binigo mo miaga haguane timbuni mini Kaiabasa andagaha mo ngoai ho heagoria Yasu minu yalu pene. <sup>58</sup> Ani minu yalu piyagola Pida ibu emene kaundia howa loma binigo mo miaga haguane timbuni heago andaga pabe tagirahayagi mayulo handaga bima pene. Ibu pabe tamuha anda puwa agi birabe hondole lowa maru mamage ho hearu heba mandagi berene. <sup>59</sup> Loma binigo mo miaga haguane hearubi Ganisolo agali bibahende bu hearubi tigua Yasu homelo bole ibugua bini lenebi mbira agidabe handalu hearia <sup>60</sup> mbira nahendeore hene. Wali agali marume ke howa Yasuhanda agua biya lama

<sup>\*</sup> 26:44: 2 Ko 12.8    <sup>\*</sup> 26:45: Yo 12.27, 13.1    <sup>\*</sup> 26:46: Yo 14.31    <sup>\*</sup> 26:51: Yo 18.26    <sup>\*</sup> 26:52: Pig 9.6, Mo 13.10  
<sup>\*</sup> 26:53: 2 Kin 6.17, Dan 7.10    <sup>\*</sup> 26:54: Ais 53.7, Md 26.56, Mg 14.49    <sup>\*</sup> 26:55: Lg 19.47, 21.37    <sup>\*</sup> 26:56: Md 26.31

ibiyaru<sup>✧</sup> hale howabi mbira handa walia naheore hene. Mahaore agali kirame heyuwa<sup>61</sup> lalu, Agali o kagome Anduane Homogonaga anda gialowa horo tebiru hanguni lone bia dai bulebero laya, lene.<sup>✧</sup>

<sup>62</sup> Ani layagola loma binigo mo miaga haguane timbuni biagome heyuwa Yasuhondo lalu, Íhondo bi laragoni ladai bulene mbira nayi kebe, lene. <sup>63</sup> Ani layagola Yasu ibu bi nale hene. Ani hearia hondowa loma binigo mo miaga haguane timbuni biagome Yasuhondo lone lamialu lalu, Íhondo langerogo Ngode Datagaliwabe haabo kagonaga minini howa Mbirali Dabo Helenego ibulebira lowinigo Ngode Datagaliwabe Igini íyagua langi, lene.<sup>✧</sup>

<sup>64</sup> Ani layagola Yasuhanda ladai bialu lalu, Í ani larigoni. Anigo ina tí bibahendehondo laro. Áyu ogoni howa be lirahayagi Agali Hole Ibiyago ibu Hongo Haiheore Kagonaga gi tigahayagi biruwa hari beralibani bialu daliraria de hondoleberami, lene.<sup>✧</sup>

<sup>65</sup> Ani layagola loma binigo mo miaga haguane timbuni biagome ibuninaga aga lerelowa lalu, Ibugua Ngode Datagaliwabe mege bialu layago hale harimigo ai marume ina lamogo bia holene irane nawi.<sup>✧✧</sup> <sup>66</sup> Tí agi manda bu kamibe, lene.<sup>✧</sup>

Tigua ladai bialu lalu, Ibuni ko biyagonaga homoleneore nga, lene.

<sup>67</sup> Ani lowa tigua Yasu denguini hamiaga tolo ba halu gi habeme balu howa<sup>✧</sup> <sup>68</sup> lalu, Mbirali Dabo Helenego ibulebira lowinigo íoreyagua ina kamagoni manda bu ade halu í bayagoni ogame baya la, lene.

*Pidahanda, Yasu manda nabido, lenego ogo*

*(Maga 14.66-72, Lugu 22.56-62, Yone 18.15-18,25-27)*

<sup>69</sup> Pida ibu andaga pabe tamuhayagi berearia loma binigo mo miaga haguane timbuni biagonaga biabe bia haga wandari mbirame ibuwa lalu, Íbi Galiliali Yasula mandagi hariligo, lene.

<sup>70</sup> Ani layagola Pidahanda o bu hearuni hale hai heore ladai bialu lalu, Ína o laregoni agi larebe í manda nabido, lene. <sup>71</sup> Ani lalu bialu pabe harabani puwa hearia biabe bia haga wandari mende heagome Pida hondowa agali hearuhondo lalu, Ibu Nasareteali Yasula mandagi haga, lene.

<sup>72</sup> Ani layagola Pidahanda wanakui ela howa halu mende lalu, Agali ogoni í manda nabido, lene.

<sup>73</sup> Emeneore howa agali hayarume Pida heagoria ibuwa lalu, E mbira í anio reda. Íni bi laregone íni mo walia haragoni, lene.

<sup>74</sup> Ani layagola Pidahanda wanakui ela howa lalu, Heneneore laro. I ke haruyagua Ngode Datagaliwabe ibugua í pani ngilo, lalu, Agali odagoni í manda nabido laro, lene.<sup>✧</sup>

Bi ogoni layaore ega gogologome bi layagola <sup>75</sup> ala Yasuhanda, Ega gogologome bi nale daore halu tebo ina í manda nabido lolebere, layago Pida ibuni mitangi bu dai bini. Ani mitangi buwa Pida ibu tagira pialu dugu emene ndoore yi lalu dugu timbuni bialu hene.<sup>✧</sup>

## 27

*Yasu Pailate hearia haru penego ogo*

*(Maga 15.1, Lugu 23.1-2, Yone 18.28-32)*

<sup>1</sup> Egerebagiore hayagola loma binigo mo miaga haguane hearumebi agali ala hene miniwi hearumebi Yasu homelo bole lo manda bialu hene.<sup>✧</sup> <sup>2</sup> Tigua Yasu ege pume hende howa Lomonaga hondo haga Pailate hearia haru pene.

✧ **26:60:** Man 19.15, Iba 27.12, Mg 14.55, Ab 6.13    ✧ **26:61:** Md 27.40, Yo 2.19    ✧ **26:63:** Ais 53.7, Md 27.12  
 ✧ **26:64:** Iba 110.1, Dan 7.13, Md 24.30, Lg 21.27, Ab 7.55, 1 Te 4.16, Mo 1.7    ✧ **26:65:** Md 9.3, Mg 14.63, Yo 10.33, Ab 14.14    ✧ **26:65:** LBM 24.16    ✧ **26:66:** Yo 19.7    ✧ **26:67:** Ais 50.6, 53.5, Md 27.30, Yo 19.3    ✧ **26:74:** Mg 14.71  
 ✧ **26:75:** Md 26.34, Mg 14.30, Lg 22.61-62, Yo 13.38    ✧ **27:1:** Lg 22.66



*Yudasa homenego ogo  
(Abosolo 1.18-19)*

<sup>3</sup> Tigua Yasu homelo bole manda bu wiyago hondowa ndelaga Yudasa biago ibu mini burugu lowa muni kuni tara pale pira tebira (30) biago loma binigo mo miaga haguane hearubibi agali ala hene miniwi hearubi hearia yalu dai bini. ✧ <sup>4</sup> Yalu dai buwa mialu howa lalu, Agali ko mbira nabioire heago bame habe manga ndelarugo ko timbuniore biru, lene.

Ani lamiyagola tigua ladai bialu lalu, Inime birigodago ina mitangi nabi kama. Inaga koyane, lene.

<sup>5</sup> Ani ladai biyagola Yudasahanda muni biaruni Anduane Homogonaga andaha ba dai bialu tagira puwa ibuni eanogo dalu homene. ✧

<sup>6</sup> Ani biyagola loma binigo mo miaga haguane biarume muni biaru iluwa lalu, Muni ogoni agali darama pelalu belo mirimadago inanaga Mana lowini ngagome lalu, Anduane Homogonaga anda muni wiagaha wulene nawi, lo nga, lene. <sup>7</sup> Tigua, Aguaore bimiya, lalu lo mbiraore howa agali dindime be wabiaganaga dindi yolo buwa, Dindi ogoni wali agali mbiraha howa ibini homarago hora helonaga tu wimiya, lene. <sup>8</sup> Ani binigo manda buwa ayu dindi ogoni mini Darama Dindi lagane nga.

<sup>9</sup> Ani biyagome Ngode Datagaliwabe mana latagi haga Yaremaiahanda lowinigo heneneore lola hene. Ibugua lowinigo ogo, Tigua muni kuni tara pale pira tebira (30) biaru Isaraele wali agalime agali ogoninaga yolo buleberama layago mo yuwa ✧ <sup>10</sup> muni ogonime agali dindime be wabiaganaga dindi yolo bini. Anduane Homogohanda ihondo, Bia, lo wiyadagua tigua bini, lalu gilibu nga.

*Pailatehanda Yasuhondo, Yu wali agalinaga handame haga kini i kebe, lenego ogo  
(Maga 15.2-5, Lugu 23.3-5, Yone 18.33-38)*

<sup>11</sup> Tigua Yasu haru puwa Lomonaga hondo haga heagoria bi maru hale helo haru puwa helene. Ibugua Yasuhondo lalu, Yu wali agalinaga handame haga kini i kebe, lene.

Ani layagola Yasuhanda ladai bialu lalu, Ina o laregoni, lene. ✧ <sup>12</sup> Loma binigo mo miaga haguane hearumebi agali ala hene miniwi hearumebi ibuhondo bi maru ladai bilo lamiyagola Yasu ibu ladai nabioire hene. ✧

<sup>13</sup> Ladai nabiyagola Pailatehanda ibuhondo lalu, Tigua ihondo bi o laragoni hale nahe kebe, lene.

<sup>14</sup> Ani layagola Yasuhanda bi mbira ladai nabuleore hayagola Lomonaga hondo haga biagome mogolo hene. ✧

*Yasu homelo ba, lenego ogo  
(Maga 15.6-15, Lugu 23.13-25, Yone 18.39-19.16)*

<sup>15</sup> Bolangua Halu Penegonaga Horo harangi wali agali bu hearume mbira garabaya henego Lomonaga hondo haga heagohondo lalu, Golope ha larama, laragola ibugua golopeore haga hene. <sup>16</sup> Ani biaga henego ogonangi agali mini lene mbira mini Barabasa garabaya hene. <sup>17</sup> Wali agali bu hearu mo mogo bu hayagola Pailatehanda tihondo lalu, Barabasa golope hoabe be Yasu Mbirali Dabo Helene ka lagago golope hoabe, lene. <sup>18</sup> Yu wali agali haru hagame henge lowa Yasu ibu hearia minu yalu ibiyagoni Pailatehanda manda buore howa ani lene. ✧

<sup>19</sup> Pailate ibu daba ki bialu biraganeni berearia ibu oneme bi lawia hayagola mbirame lama ibalu howa lalu, Abale mbiraga emaga handalu hewaria agali ko mbira nabioire ogoni mitangi bialu tandaga emene ndo narugo ibuhondo mbira bulene nawiore, laya, lene.

✧ 27:3: Md 26.14-15 ✧ 27:5: 2 Sml 17.23 ✧ 27:9: Seg 11.12-13 ✧ 27:11: Mg 15.2, Lg 23.3, Yo 18.33, 18.37, 1 Ti 6.13 ✧ 27:12: Ais 53.7, Md 26.63, Yo 19.9 ✧ 27:14: Yo 19.9 ✧ 27:18: Yo 11.47-48, 12.19

<sup>20</sup> Loma binigo mo miaga haguane hearumebi agali ala hene miniwi hearumebi wali agali hearuhondo lalu, Pailatehondo Barabasa golope halu Yasu ira bangani ba para ha ladaba, lene. ✧ <sup>21</sup> Ani layagola Pailatehanda wali agali bu hearuhondo lalu, Agali kira kago labo ago golope hoabe, lene.

Tigua ladai bialu lalu, Barabasa golope ha, lene.

<sup>22</sup> Ani layagola Pailatehanda lalu, Anidago Yasu Mbirali Dabo Helene ka lagagohondo ina agi buabe, lene.

Ti bibahendeme ladai bialu lalu, Ibu ira bangani ba para habe, lene.

<sup>23</sup> Ani layagola Pailatehanda lalu, Anidago ibugua ko agi biyabe, lene.

Ani layagola tigua hongo howa dalimu laga laga bialu lalu, Ina nahondoleorego ibu ira bangani ba para habe, lene.

<sup>24</sup> Ani layagola Pailatehanda bulene mbira nawi ti gungu bibehe heago hondowa ibunaga bi emene hayagola wahalu wali agali bu hearuni wanakuini howa iba bereago gime tala muwa gi domo wahalu howa lalu, Ina agali ogoni gi ela halu homelo ba naloleberogo. Ogoni tinime beramigoni i ndo, lene. ✧

<sup>25</sup> Wali agali bu hearume ladai bialu lalu, Ibu homaragonaga pani nolene wiagua inanenibi ina waneigininibi ibira helo larama, lene. ✧

<sup>26</sup> Ani layagola Pailatehanda Barabasa golope howa ibugua ami agali hearuhondo, Yasu tibume badaba, lowa lalu, Ibu homelo ira bangani ba para hole haru pudaba, lene.

*Ami agalirume Yasu mege binigo ogo*

*(Maga 15.16-20, Yone 19.2-3)*

<sup>27</sup> Ani biyagola Pailatenaga ami agali hearume Yasu haru halu gabumane haru haganaga andagahayagi haru piyagola ami agali bibahende bu hearuni ibu heagoria ho mabu bupe hene. <sup>28</sup> Ani buwa tigua ibunaga labolabo golo wahowa labolabo daramabi mbira mo karula hene. ✧ <sup>29</sup> Ani buwa tigua pu aniheme bo buwa Yasunaga hagianeni karula howa Yasunaga gi tigahayagi gewa mbira mo ya ho helowa tigua ibu buhayagi bulu paligi bialu howa mege bigi bini. Mege bialu lalu, Yu wali agalinaga Handame Haga Kini haabo habelo, laga bini. ✧ <sup>30</sup> Ani lowa tigua hamiaga toloba halu gewa mo ya ho helayago yamuwa hagianeni бага bini. ✧ <sup>31</sup> Tigua mege biai howa labolabo daramabi karula hayago golowa ibuninaga labolabo biago karula dai buwa ira bangani ba para hole haru tagira pene. ✧

*Yasu ira bangani ba para henego ogo*

*(Maga 15.21-32, Lugu 23.26-43, Yone 19.17-27)*

<sup>32</sup> Ti tagira pole pialu hearia Sairiniali mbira mini Saimono ibalu hearia lola hene. Lola howa ami agali biarume ibu Yasunaga ira banga yilo ibuhondo, Ya ya, layagola yini.

<sup>33</sup> Ti pialu dindi mbira mini Gologoda ogoriani anda pene. Gologoda inanaga bi lalu, Haguane Kuni. <sup>34</sup> Ogoriani howa tigua waini ibabi marasini kaubibi mandagi bimaga maga buwa Yasu nelo miyagola ibu na hondowa na nabi wahene. ✧

<sup>35</sup> Tigua Yasu ira bangani ba para howa ibunaga labolabo biago ai ibu harabe hondole tadu bialu berene. ✧ <sup>36</sup> Ani buwa tigua ibu handadaga ho berene. <sup>37</sup> Ira banga daligani bi ogo gilibu wini. Yu wali agalinaga Handame Haga Kini Yasu ogoni, lalu gilibu wini.

<sup>38</sup> Ani buwa tigua agali ko biaga kirabi Yasu heba mendego gi tigahayagi mendego gi lehayagi lowa ti ira banga tebirani ba para hene. ✧

<sup>39</sup> Wali agali ti hearia bolangua haga bialu piyarume Yasuhondo ma bongge laga bialu tongoyongo bi laga bini. ✧ <sup>40</sup> Tigua lalu, Ina Anduane Homogonaga anda gialope howa

✧ 27:20: Ab 3.14 ✧ 27:24: Man 21.6-9, Md 27.4 ✧ 27:25: Yos 2.19, 2 Sml 1.16, Md 23.35, Ab 5.28 ✧ 27:28: Lg 23.11 ✧ 27:29: Iba 69.19, Ais 53.3 ✧ 27:30: Ais 50.6, Md 26.67 ✧ 27:31: Ais 53.7 ✧ 27:34: Iba 69.21, Md 27.48 ✧ 27:35: Iba 22.18 ✧ 27:38: Ais 53.12 ✧ 27:39: Iba 22.7, 109.25

horo tebira howa bia dai bulebero larigodago í Ngode Datagaliwabe Iginioire keyagua í nahomolenaga ira banga ogoriani howa íni pele mialu dalerene, lene.✧

<sup>41</sup> Ogonidagua dege loma binigo mo miaga haguane hearumebi Mana lowinigo lawai haga hearumebi agali ala hene miniwi hearumebi mege bialu lalu, <sup>42</sup> Ibugua wali agali maru nahomelonaga pele mialu kaligodago ibuni pele namibehedane wiaruabe. Ibu Isaraele wali agalinaga handame haga kini ndodabe. Áyu ogoni ibu ira bangani howa daliyagua iname ibuhondo mini mbiraore wuleberama.✧ <sup>43</sup> Ibugua Ngode Datagaliwabehondo mini mbiraore wuwa lalu, I Ngode Datagaliwabe Iginioire kogoni, layagodago áyu Ngode Datagaliwabehanda ibu pele mirabe handamiya, lene.✧

<sup>44</sup> Agali ko biaga kirali Yasu heba ira banga mendehayagibi mendehayagibi ba para hayago labomebi ogonidagua dege mege bini.

*Yasu tongolo minigo ogo*

*(Maga 15.33-41, Lugu 23.44-49, Yone 19.28-30)*

<sup>45</sup> Horombe hanunioire howa dindi ogoni bibahendeha aruma ha ho wiaabo howa <sup>46</sup> alendo ni gai layahayagi wá hodai bini. Ani biyagola Yasuhanda bi dalimu lowa lalu, Eloi Eloi lema sabagadanai. Inanaga bi lalu, Inaga Ngode Datagaliwabe-o inaga Ngode Datagaliwabe-o ina i aginaga wahalu piribe, lene.✧

<sup>47</sup> Bi layago hale howa wali agali maru ogoniha hearume lalu, Ibu Elaya olarua, lene. <sup>48</sup> Mbiragome abale gerai puwa mbirale tara dahundu ale waini iba kaubi bereagoha ibira howa ira ngunini mo gedo lowa Yasunaga ne hambuni ngelene.✧

<sup>49</sup> Ani biyagola marume lalu, Elaya ibu pele mule ibirabe handamiya emene hondo hama, lene.

<sup>50</sup> Ani layagola howa Yasuhanda bi dalimu halu mende lowa buhe ereba halu tongolo mini.

<sup>51</sup> Tongolo miyagola Anduane Homogonaga andaha labolabo timbuni gerela ho winigo hanuni daligani howa buda ki bini. Dumbirumbi emene ndo bialu tole timbuni kambulo бага bialu✧ <sup>52</sup> homali wiaruni tawa bu бага biyagola wali agali dewa Ngode Datagaliwabehondo mini mbiraore wu heaore homeneru mo heya hene. <sup>53</sup> Wali agali o biarume homali helalu puwa Yasu homowa mo heya hayagola ti Tano Mbira Loma Bia Hene wiagoria anda piyaria wali agali dewaoreme ti handai hene.

<sup>54</sup> Ami haru haga heagobi ibu heba ami agali hearubi Yasu handaya ho hayarume dumbirumbibi mbirale bibahende biyagoni hondowa gi halu mogo tara lowa lalu, Ibu Ngode Datagaliwabe Iginioire heneneoredago, lene.

<sup>55-56</sup> Ogoniha wali dewa Galili howa Yasu biamogo bima haruru ibiyarubi uruni heba Magadala wali Meribi Meri mende Yamese Yosebela aiyabi Sebedi onebi ti haru amura howa handaya ho hene.✧✧

*Yasu tingini hora henego ogo*

*(Maga 15.42-47, Lugu 23.50-56, Yone 19.38-42)*

<sup>57</sup> Horo ogoningi alendore hayagola Arimadia howa agali homogo mbira mini Yosebe ibu Yasu talima piaga henego dindi ogoriani anda ibini. <sup>58</sup> Ibuwa ibu Pailate hearia puwa, Yasu tingini mule poabe, lene. Ani layagola Pailatehanda maruhondo lalu, Yasunaga tingini Yosebe milalimu, lene.✧ <sup>59</sup> Ani layagola Yosebehanda Yasunaga tingini muwa labolabo peleore gahengeme kabu bini. <sup>60</sup> Ani buwa ibugua ibuninaga egeanda áyuore dege guabu winigoha yalu puwa hora hene. Hora howa ege tole timbuni wiago muwa panga paya anda halu pene.✧ <sup>61</sup> Magadala wali Meribi Meri mendegobi egeanda biagoha handa amu ho berene.

✧ 27:40: Md 26.61, Yo 2.19 ✧ 27:42: Yo 11.50 ✧ 27:43: Iba 22.8 ✧ 27:46: Iba 22.1, Hi 5.7 ✧ 27:48: Iba 69.21 ✧ 27:51: Har 26.31-33, Mg 15.38, Lg 23.45, Hi 10.19-20 ✧ 27:55-56: Lg 8.2-3 ✧ 27:55-56: Md 20.20 ✧ 27:58: Man 21.22-23 ✧ 27:60: Ais 53.9

*Egeanda mamage henego ogo*

<sup>62</sup> Horo mende Sabadangi loma binigo mo miaga haguane hearubi Perisi hearubi mo mogo bialu Pailate hearia puwa <sup>63</sup> lalu, Haru haga-o agali ke haga o biagoni homa nabi howa lalu, Horo kiru howa tebonengi ini mo heya holebero, layago manda bidama.✧

<sup>64</sup> Anigoibunaga talima piaga karume aribia halu ibu tingini mo yalu puwa wali agali karuhondo lalu, Ibu ibuni mo heya halu piyada, loligo horo tebiru ogoni bolangua heloibunaga egeanda mamage bayuwaore halimu labe. Tini ke abale hayago emene bayale lowa mani ke timbuniore holigo ina ani bilimu lalu lamibe, lene.

<sup>65</sup> Ani layagola Pailatehanda tihondo lalu, Tigua ami mamage haga agali maru haru puwa egeanda bayuwa mamage helo manda bilimu, lene.✧

<sup>66</sup> Ani laya handala puwa tigua ege tole panga paya anda hayago hada buwa mamage haga biaruhondo, Mamage bayuwaore ho halimu, lalu pene.✧

## 28

*Yasu ibuni mo heya henego ogo*

*(Maga 16.1-10, Lugu 24.1-12, Yone 20.1-10)*

<sup>1</sup> Horo Sandengi egerebagiore muna biyagola Magadala wali Meribi Meri mendebi libu Yasu egeanda horo hayagoha hondo pene. <sup>2</sup> Hondo pialu hebira dindi dumb-irumbi timbuniore bialu Anduane Homogonaga dahuliyali mbira dahuliya andaga howa dalipe halu ege tole panga payini biago dugu ai howa panga biagoriani berene. <sup>3</sup> Dahuliyali biagonaga dengui wa taraorehe hari daba aleibunaga aga biago demborerebi pele taraore hene.✧ <sup>4</sup> Ogonibi heago hondowa mamage ho hayaruni ti gi timbuni howa mogo lalu homene aleore wini.

<sup>5</sup> Ani bu wiagola dahuliyali biagome wali biago labohondo lalu, Gi nahalibu. Libu Yasu ira bangani ba para hayago tai berabigoni i manda bido. <sup>6</sup> Ibu oali nahe ibuni bulebero layadagua abale heyalu piya. Ibu wiyago dege de hondole ibidaba.✧ <sup>7</sup> Libugua abale puwaibunaga talima piaga biaruhondo au lalibu. Yasu ibuni mo heya halu ayu ogoni ibu bamba halu Galili pole piyago ogoriani ti de hondoleberami lalibu. O langerogoni embeda nahalibu, lene.✧

<sup>8</sup> Ani lamiyagola libu gi tago tago gerai pialu howa nde turu holene tolai ho yaluibunaga talima piaga biaru lamule pene.

<sup>9</sup> Libu pialu hebira abaleore Yasu libu lola howa lalu, Mo palia holene libu heba haabo helo, lene. Ani layagola libugua Yasu heagoria ha para howaibunaga geni yu huribale buwa ibu mini yaraga hene. <sup>10</sup> Ani biyagola Yasuhanda libuhondo lalu, Gi nahalibu. I amu Galilini koria tigua hondolebirago libugua i hamene biaru Galili pudaba lole pudaba, lene.✧

*Mamage hayarume lama piyagola hale howa binigo ogo*

<sup>11</sup> Wali biago labo harigani pialu hebi tagi agali egeanda mamage hayarume Yarusale-meha abale dai buwa biyago damenego bibahendeore loma binigo mo miaga haguane hearu lamiai hene. <sup>12</sup> Lamiai hayagola loma binigo mo miaga haguane biarubi agali ala hene miniwi hearubi mandagi mogo buwa bi lo mbiraore howa tigua ami agali biaruhondo muni dewa mini. <sup>13</sup> Mialu howa lalu, Tigua agua lalimu. Mbiraga ina palia hondo hemahaibunaga talima piaga biarume ibuwa ibu tingini mo page biyiya, lalimu.✧ <sup>14</sup> Gabumane haru haga kagome bi ogoni hale hayagua iname ibuhondo, O laragoni heneneore lara, laramagola ti agali tigabiore ka lalu ogoninaga mini dege dindi ho holene henge nawulebira, lene.

✧ 27:63: Md 12.40, 16.21, 17.23, 20.19, Mg 8.31, 9.31, 10.33-34, Lg 9.22, 18.31-33, Yo 2.19-21 ✧ 27:65: Dan 6.17

✧ 27:66: Dan 6.17 ✧ 28:3: Dan 10.6, Md 17.2, Ab 1.10 ✧ 28:6: Md 12.40, 16.21 ✧ 28:7: Md 26.32 ✧ 28:10:

Hi 2.11 ✧ 28:13: Md 27.64

<sup>15</sup> Ani layagola ami agali mamage haga biarume muni biago mo yalu puwa tigua bilimu layadagua bini. Ani binigo ndelene ogoni. Yu wali agalime loyogo lenego wali agali kamarume áyubi bi ogoni dege loyogo lalu kagoni.

*Yasu ibunaga talima piaga biaru hearia ha pani henego ogo  
(Maga 16.14-18, Lugu 24.36-49, Yone 20.19-23, Abosolo 1.6-8)*

<sup>16</sup> Yasunaga talima piaga beriali biaru Yasuhanda pilimu layagoha Galilinaga bare hambene wiagoha iraga halu pene. <sup>17</sup> Puwa tigua Yasu hondowa ibu mini yaraga halu howa marume mini kira kira wuwa hene. <sup>18</sup> Yasuhanda ti heagoria ha para howa lalu, Ngode Datagaliwabehanda harihabi dindihabi <sup>19</sup> hongo holene bibahende ihondo ngiai hayagoni. <sup>19</sup> Ogonigo tí dindi bibahende ha wali agali bu karuha puwa ti inaga talima ibaga helo helalimu. Ani buwa Aba mininibi Iginini mininibi Ngode Datagaliwabe Dinini mininibi howa ti baboraya bia halimu. <sup>20</sup> Ani buwa ina tí langirugo manda biai helo bayuwa lawai halimu. Tigua ani bialu kamigola hamaro bulene horo helo i tí heba haabo holebero, lene. <sup>20</sup>

☆ **28:16:** Md 26.32, 28.7-10, Mg 14.28 ☆ **28:18:** Dan 7.13-14, Md 11.27, Yo 3.35, 13.3, Ab 2.36, 1 Ko 15.27, Eb 1.20-22, Hi 1.2, Mo 17.14 ☆ **28:19:** Mg 16.15-16, Ab 1.8 ☆ **28:20:** Md 18.20, Yo 14.23



## Maga

### Magahanda Bi Mana Debene gili binigo ogo Mbuga ogoha gilibu ngarunaga nemandi ogo

Bi Mana Debene Maga mbugani gilibu ngagome pigane tenialu, Yasu Keriso Ngode Datagaliwabe Iginioarena Bi Mana Debene, lalu gilibu nga. Magahanda Yasu ibu biabe biaga henegobi hongo holene yu henegobi walia halu gili bini. Yasuhanda mana lawai henegobi dama daragahe hearu wara tagi henegobi wali agalime ko biyaru domo wahaga henegobi ogonidagua bigi bialu howa ibunaga hongo walia halu hene. Yasu ibuni mitangi bialu lalu, Agali Hole Ibiyagome ibunaga holene wali agalinaga pela hole ibiya, lene.

Yasuhanda mana bialu henego Magahanda mo duniniore ho hene. Ani bialu ibugua pigane howa baboraya biaga Yonenaga te gili buwa Yonehanda Yasu baboraya bia henegobi dama Heyolabeme Yasu ba hendenegobi bi nemandi hangu gili buwa Yasuhanda biabe hongo howa bialu henegobi walia halu gili bini. Wali agali Yasu haruru piaga henerume Yasuhanda bule ibinigo irane ogo ale bule ibiralo ti manda nabi hene. Ani bialu heagola Yasu handabe manga haga maru hearume pigane emene hongo nahe howa mani hongo timbuniore halu ti Yasula waitigi ho hene.

Magahanda gilibu maro bialu Yasu ibu Yarusaleme anda puwa Sarere mbirani bialu henegobi homo aribia halu mo heya henegobi gilibu winigo nga.

#### **Bulu бага бува кuni gilibu ngago**

*1.1-13*

Bi Mana Debene Pigane teninigo *1.14-9.50*

Yasuhanda Galilini howa biabe taratara bialu henego *10.1-52*

Yasu ibu Galili howa Yarusaleme penego *11.1-15.47*

Sarere mbirani Yasuhanda Yarusalemehayagi howa bialu henego *16.1-8*

Yasu homalu ibuni heyu henego *16.9-20*

Yasu ibu horo dewaru ha pani haga bima pialu dahuliya andaga iraga halu penego

*Baboraya biaga Yonehanda bi mana lamialu henego ogo*

*(Madiu 3.1-12, Lugu 3.1-18, Yone 1.19-28)*

<sup>1</sup> Bi ogo Ngode Datagaliwabe Iginu Yasu Kerisonaga Bi Mana Debene pigane teninigo ogo. <sup>2</sup> Ngode Datagaliwabe bi mana latagi haga Aisaiahanda mbiwia halu lowinigo ibunaga mbugani gilibu nga.✧

Ngode Datagaliwabe hadanda lalu, Hale hadaba. Inaga bi lamule pu larogome inaga hariga ba helo ibuhondo, Bamba ha, lolebero, lene.

<sup>3</sup> Dindi ko yobi wali agali nahaga wiagoria howa mbiralime olalu,✧

Anduane Homogo ibilo hariga ba hole manda manda bialu halimu.

Hariga ogoni tigabiore wilo ba halimu, lalu ka, lenego gilibu nga.

<sup>4</sup> Yone ibugua ogonidagua dindi ko wali agali nahaga wiagoria ibuwa bi mana lawai halu baboraya bia hole ibini. Ibugua ibuwa lalu, Ko birimigo domo wahelo ti bu mini beregedalu baboraya bulene nga, lalu lamialu hene.✧ <sup>5</sup> Wali agali Yudia dindi howabi Yarusaleme howabi bibahende hearu ibu hearia ibai hene. Tigua ibuwa ko biniru la pani haga biyagola Yone ibugua iba Yodanani ti baboraya biahaga bini.

<sup>6</sup> Yone ibu nogo kamele irinime aga wabinigo karulowa mandibu nogo dongoneme wuwa hene. Ibu pagayabi mone taranaga ibanabi naga hene.✧ <sup>7</sup> Ibugua mana lamialu

✧ **1:2:** Ais 40.3, Mal 3.1, Md 11.10, Lg 7.27 ✧ **1:3:** Ais 40.3, Md 3.3, Lg 3.4, Yo 1.15, 1.23 ✧ **1:4:** Ab 13.24, 19.4

✧ **1:6:** LBM 11.22, 2 Kin 1.8, Md 11.8

lalu, I ala ibu kogonigo maha mbirali i dindiha lowa ibu daliga timbuniore kago ibulebira. I bayale ndo kogome ina bulu paluwa ibunaga ge habe gamu pu hadolene nakarulapeore kogoni. ✱ <sup>8</sup> Ina ti ibame baboraya bialu kogo ibugua Ngode Datagaliwabe Dininime ti baboraya bia holebira, lene. ✱

*Yonehanda Yasu baboraya bia henego ogo*  
(Madiu 3.13-17, Lugu 3.21-22)

<sup>9</sup> Horo odarungi Yasu ibu Galili dindi Nasarete tano howa ibiyagola Yonehanda Yasu iba Yodanani baboraya bia hene. <sup>10</sup> Yasu ibaha howa hayayigola dahuliya andaga dugua hayago de hendene. Ani dugua hayagola Ngode Datagaliwabe Dinini ega malibu ale dalialu Yasuni birayago de hendene. <sup>11</sup> De handalu hearia dahuliya andaga howa bi ladali halu lalu, I Iginioire ina i gubalini ho howa ihondo turu timbuni ho kogoni, lene. ✱

*Dama Heyolabeme Yasu ko mo bia habehedabe hondole ibinigo ogo*  
(Madiu 4.1-11, Lugu 4.1-13)

<sup>12</sup> Ogoniore lai heagola Ngode Datagaliwabe Dinini ibugua Yasu dindi ko wali agali nahaga wiagoria haru pu hene. <sup>13</sup> Ani haru pu hayagoha ibu horo pira maria (40) hene. Yasu hearia dama Heyolabeme ibu ko mo bia habehedabe hondole ibini. Yasu nogo gabua tara tara bu heagoha hearia dahuliyalirume ibu biamogo bule ibini. ✱

*Yasuhanda Galilini biabe pigane tenialu bialu henego ogo*  
(Madiu 4.12-17, Lugu 4.14-15)

<sup>14</sup> Yone garabaya biya handala Yasu ibu Galili puwa Ngode Datagaliwabenaga Bi Mana Debene lamialu hene. ✱ <sup>15</sup> Yasuhanda lalu, Horo tu winigo ayu ogoni lola haragoni. Ngode Datagaliwabehanda Handame Ho Holene kaware ngagoni. Tigua ko birimigonaga mini beregedalu Bi Mana Debene yu tiga bilimu, lalu lamini. ✱

*Yasuhanda agali maria wena minagaru olenego ogo*  
(Madiu 4.18-22, Lugu 5.1-11)

<sup>16</sup> Yasu ibu Galili iba timbuniore bereago angeni pialu howa wena minaga agali kira Saimonobi ibu hamene Andurubi libugua wena nu ibaha ibira howa wena minalu hearia de hendene. <sup>17</sup> De hondowa Yasuhanda libuhondo lalu, Libugua agali minalibulo ina minawai holiya i porodagua talima ibidaba, lene. ✱ <sup>18</sup> Ani layagola libugua libunaga wena nu abale ngelalu ibu talima pene. ✱

<sup>19</sup> Yasu emene lu pu howa ibugua Sebedi igini Yamesebi ibu hamene Yonebi libu iba taluni howa wena nu mo tiga bialu hearia de hendene. <sup>20</sup> De hondowa abale olayagola libu aba Sebedibi yolo biabe biaga hearubi ti iba taluni helalu libu Yasu talima pene.

*Agali mbira dama daragahe hearia Yasuhanda waratagi henego ogo*  
(Lugu 4.31-37)

<sup>21</sup> Ti Kabaniama tano anda puwa Sabada horongi Yasu ibu ngoai hagane andaha ✱ puwa ibugua mana lawai halu hene. <sup>22</sup> Mana lowinigo lawai haga hearume lawai hagadagua ndo Yasuhanda hongo holene taraore yu howa lawai hayagola wali agali hearume hale howa ti miniha mogo lai hene. ✱

<sup>23</sup> Ani lawai halu heagola agali dama daragahe mbira ngoai hagane anda biagoha abale anda ibuwa ibugua ga lowa lalu, <sup>24</sup> Nasaretaeali Yasu-o ina kamagoha ina agi bule ibiribe. Ina bo wahole ibiribe. Ina i manda bido i agali bayale tigabi Ngode Datagaliwabe ibuni kagoria howa ibini kegoni, lene. ✱

<sup>25</sup> Ani layagola Yasuhanda dama biago talialu, Bi nale agali ogo helalu i tagira pu, lene.

✱ 1:7: Ab 13.25 ✱ 1:8: Ais 44.3, Yol 2.28, Ab 2.4, 10.45, 1 Ko 12.13 ✱ 1:11: Pig 22.2, Iba 2.7, Ais 42.1, Md 3.17, 12.18, Mg 9.7, Lg 3.22 ✱ 1:13: Iba 91.11-13 ✱ 1:14: Mg 6.17 ✱ 1:15: Dan 9.25, Md 3.2, Ga 4.4, Eb 1.10 ✱ 1:17: Md 13.47, Lg 5.1-11 ✱ 1:18: Mg 3.20, Md 19.27, Lg 5.11 ✱ 1:21: Mg 4.13 ✱ 1:22: Mg 7.28-29 ✱ 1:24: Mg 5.7

<sup>26</sup> Ani layagola damame agali biago mo biango bibi bia halu ga lo helalu tagira pene.✧  
<sup>27</sup> Ani biyagola wali agali bibahende bu hearume tini degedege lagalaga bialu lalu, O biyagoni agiyabe. Mana gahenge ogonida. Damarume ibugua bidaba laradagua bilo bidaba lolene hongo yu kagoni, lene.

<sup>28</sup> Yasuhanda biyaru Galili dindi bibahende ha wali agali bu hearume hale hai hene.✧

*Yasuhanda wali agali dewa mo dabi haga binigo ogo  
 (Madiu 8.14-17, Lugu 4.38-41)*

<sup>29</sup> Yasubi Yamese Yonebi ibunaga talima piaga maru biarubi ti ngoai hagane andaha howa pialu Saimono Andurula andaga pene. <sup>30</sup> Saimono imane warago bowa poboyogo timbuni bu winigo tigua Yasu ibiyagola abaleore lamini. <sup>31</sup> Lamiyagola Yasu ibu wali biago warago bo wiagoria puwa ibugua gini mialu mo heya hene. Ani biyagola poboyogo ala biyago ereba halu dabi howa wali ogonime ti tomo nelo mule manda manda bini.

<sup>32</sup> Alendo ni gai lalu paliyagola wali agali bu hearume warago bo wiaru mo yalu dama daragahe hearubi haru ibalu Yasu hearia ngoai hene. <sup>33</sup> Wali agali bibahende dindi ogoriani hearu anda ogoninaga haneni mo ngoai hene. <sup>34</sup> Ani biyagola Yasuhanda wali agali dewa warago tara tara bene wiaru mo dabi haga bialu dama dewa daraga hearu wara tagi haga bialu hene. Ani bigi biyagola dama biarume Yasu ibu ogoore kalo manda bu henego Yasuhanda dama biaruhondo, Bi naladababe, lene.✧

*Yasu ibu Galilini bi mana lamima penego ogo  
 (Lugu 4.42-44)*

<sup>35</sup> Gao nale aruma ho wiagoha Yasu ibu heyalu tagira pialu mbirali naheore wiagoha puwa Ngode Datagaliwabela bi lalu hene.✧ <sup>36</sup> Saimonobi ibu heba mandagi hayarubi tigua Yasu hai bima pene. <sup>37</sup> Ani buwa ibu handa walia howa tigua ibuhondo lalu, Bibahende karume í hai bialu ka, lene.

<sup>38</sup> Ani layagola Yasuhanda ladai bialu lalu, Dindi maru kaware ngagoria bi mana lawai holiya ma. I ani bule ibirugo, lene.

<sup>39</sup> Ani lowa Galili bibahendeni ibaga bialu ngoai hagane anda hearuha puwa Yasu ibugua bi mana lamialu dama daraga hearu wara tagi haga bialu hene.✧

*Yasuhanda agali mbira mo dabi henego ogo  
 (Madiu 8.1-4, Lugu 5.12-16)*

<sup>40</sup> Ani bialu hearia agali ge hamua mbira Yasu hearia ibuwa ge duli hanga ho biruwa lamialu lalu, Ina i mo dabi hoa biyagua nde mo dabi habehe ke, lene.

<sup>41</sup> Ani layagola Yasuhanda gubalinime dara howa gi dogola amu howa agali biago ela halu lalu, Ina í mo dabi hoabago dabi ha, lene. <sup>42</sup> Ani layagola ge hamua ereba hai halu bayale hene. <sup>43-44</sup> Yasuhanda agali biagohondo hongo howa lalu, Ai hale ha. Maru nalami loma binigo mo miaga agali kagome í de hendelo ibu kagoria abale puabo halu pole pu. Ani bialu í dabiore haridago wali agali karume de hendelo walia hole Mosesehanda bi lowini wiyadagua mbirale mbira Ngode Datagaliwabehondo bo mibe, lene.✧

<sup>45</sup> Ani laya handala ibu hale halu agali biagome pialu howa Yasuhanda nalamibe layago donge howa ibugua biyago lamigi bima pene. Ani layagola wali agali bu hearume bi layago hale hai hayagola Yasu ibu tano wiaruha tinaga deni pobe nahayagola wali agali nahaga wiagoria ha dai bu hene. Ani pu hearia wali agali dewa dindi bibahende wiaruha howa Yasu hearia ibugu ibugu bini.

✧ 1:26: Mg 9.26 ✧ 1:28: Md 4.24 ✧ 1:34: Mg 3.11-12, Lg 4.41 ✧ 1:35: Md 14.23, Mg 6.46, Lg 4.42 ✧ 1:39: Md 4.23, 9.35 ✧ 1:43-44: LBM 14.1-32, Mg 3.12, 7.36, Lg 5.14

## 2

### *Yasuhanda agali mbira kuduguhe mo dabi henego ogo (Madiu 9.1-8, Lugu 5.17-26)*

<sup>1</sup> Horo maru agima howa Yasu ibu Kabaniama dai bini. Dai bu heagola wali agali hearume, Yasu andaga daibu ka, layagola bibahendeme hale hai hene. <sup>2</sup> Hale howa wali agali dewaore Yasu hearia íbu ngoai howa ti anda tamuhabi harabanibi holene henge nawi gengeda tago bu heagola Yasuhanda bi mana ti lamialu hene. <sup>3</sup> Ani lamialu hearia agali marialime agali mbira kuduguhe winigo Yasu hearia mo yalu ibini. <sup>4</sup> Wali agali dewa ho gengeda tago bu heagola tigua agali biago Yasu hearia yalu anda pobe naheyagola anda dangini yalu iraga howa dangi gialowa agali ira ho yalu ibiyago Yasu heago tigatiga yarali hene. <sup>5</sup> Tigua mini mbiraore wu howa biyago hondowa Yasuhanda agali kuduguhe biagohondo lalu, *I* igini ína ko birigo domai haya, lene.✧

<sup>6</sup> Ani layagola Mana lowinigo lawai haga maru berearume minime dege mitangi bigi bialu, <sup>7</sup> Agali ogonime bi larago agi larabe. Ibugua Ngode Datagaliwabe mege bialu kagoni. Ngode Datagaliwabe ibu hangume wali agali ko biyago domo wahabehe kago, minime lo manda bialu berene.✧

<sup>8</sup> Ti ani mitangi bialu bereago hondowa Yasuhanda tihondo lalu, Tigua ogonidagua manda bialu bedamigoni agibe. <sup>9</sup> Ina agali kuduguhe biagohondo, Ina ko birigo domai haya, lolenego taibidabe be, Heyalu ínaga tamunguru mo yalu ibaga bu ha, lolenego taibidabe. <sup>10</sup> Anigo Agali Hole Ibiyagome dindini howa wali agalime ko biyaru domo waholene hongo yu kago tí manda bilimulo walia haro, lene. Ani lowa ibugua agali kuduguhe biagohondo lalu, <sup>11</sup> Íhondo larogo, Heyuwa ínaga tamunguru mo yalu andaga pamia, lene.

<sup>12</sup> Ani layagola wali agali bu hearu handai heaore ibu heyaluibunaga tamunguru mo yalu abale tagira pene. Ani biyagola ti bibahende hearume mogo lai howa Ngode Datagaliwabe mini yaraga halu lalu, O biragoni ale ina nahendene kamagoni, lai hene.✧

### *Yasuhanda Libai olenego ogo (Madiu 9.9-13, Lugu 5.27-32)*

<sup>13</sup> Yasu ibu iba Galili timbuniore bereagoha lone pene. Piyagola wali agali bibahende hearume Yasu hearia íbu ngoai hayagola ibugua bi mana lawai halu hene. <sup>14</sup> Ani lawai halu pialu hearia agali mbira muni dagisi ngi laga heago Alibiasa igini Libai ibu muni dagisi miaga andaha berearia de hondowa Yasuhanda lalu, *I* porodagua talima íbu, lene. Ani layagola Libai ibu heyalu Yasu talima pene.✧

<sup>15</sup> Ani bialu mani Yasu ibu Libai andaga tomo nalu berene. Agali dewa muni dagisi ngi laga hearubi mana ko biaga hearubi ti Yasu piyadagua haruru puwa Yasubiibunaga talima piaga biarubi tomo nalu berearia ibalu biraganeni biruyu pene. <sup>16</sup> Mana lowinigo lawai haga Perisi aria maru hearume Yasu ibu mana ko biaga biarubi muni dagisi ngi laga biarubi heba mandagi tomo mandagi nalu bereago hondowa tigua Yasunaga talima piaga biaruhondo lalu, Yasu ibu mana ko biaga karubi muni dagisi ngi laga karubi heba tomo mandagi nalu bedago aginagadabe, lene.✧

<sup>17</sup> Ani layago hale howa Yasuhanda ladai bialu lalu, Wali agali warago nabe karu anogodame ti biamogo bilo ibu karia napiaga. Warago bene karu hangu anogodame ti biamogo bilo ibu karia piaga. *I* ibirugo wali agali bayale karu olole ndo wali agali ko biaga karu olole ibirugoni, lene.

### *Tomo nane hagane mana winigo ogo (Madiu 9.14-17, Lugu 5.33-39)*

✧ 2:5: Lg 7.48 ✧ 2:7: Yob 14.4, Ais 43.25, 1 Yo 1.9 ✧ 2:12: Md 9.33 ✧ 2:14: Yo 1.43 ✧ 2:16: Md 11.19, Lg 15.1-2

<sup>18</sup> Tomo nane hagane horo hayagola baboraya biaga Yonenaga talima piaga biarubi Perisi agali hearubi ti tomo nane hene. Wali agali tigua Yasu hearia ibuwa ibuhondo lalu, Yonenaga talima piaga karubi Perisi agalinaga talima piaga biarubi tomo nane kago. Inaga talima piaga karume tomo nane holenengi nalu kago irane agibe, lene.

<sup>19</sup> Ani layagola Yasuhanda tihondo ladai bialu lalu, Agali mbirame wali dabu biragola wali agali tomo nole ngoai hararume tomo nane holene nga loleberamibe. Ani naloleberamiore. Agali wali dabu birago ibu ti heba mandagi biruwa tomo nolene nga. <sup>20</sup> Anigo horo mbira ibulebirago ibiragola agali wali dabu biaga biago ti kagoria howa marume ibu haru poragola ti tomo nane holene wulebira, lene.

<sup>21</sup> Ani lowa Yasuhanda bi mende lalu, Mbiralime aga gobani aga gahengeme lebu para nahaga. Ani biyagua aga gahengeme aga gobago budulebira. Ani buwa ala budayadagua ndo buda timbu holebira. <sup>22</sup> Ogonidagua dege mbiralime waini iba gahenge bedago waini iba hambu wiaga be meme dongoneme wabini bamba taweha odo bere nalaga. Mbiralime odo berelayagua waini ibame meme dongoneme wabini biago lere lalu waini iba piai halu biagobi ko holebira. Ani buligo waini iba gahenge bedago meme dongoneme wabini biago gahengeha odo berelolene nga, lene.

### *Sabada Horongi biabe nabiaga winigo ogo*

*(Madiu 12.1-8, Lugu 6.1-5)*

<sup>23</sup> Sabada horo mbirungi Yasu ibunaga talima piaga biarume widi biagonaga lini deago do nama pene. <sup>24</sup> Ani bialu hearia Perisi agali hearu tigua hondowa Yasuhondo lalu, Inanaga Mana lowini ngago Sabada horongi nabulene winigo inaga talima piaga biarume mana puguwa bialu karuni handa, lene. <sup>\*</sup>

<sup>25</sup> Ani layagola Yasuhanda tihondo ladai bialu lalu, Debidibi agali maru ibu heba henerubi ti tomo nolene nawiyagola garibi lowa Debidihanda bini gilibu ngago ti nahende kamibe. <sup>26</sup> Agali mini Abaiada ibu loma binigo mo miaga haguane timbuni henego heangi Debidihanda Ngode Datagaliwabenaga andaha anda puwa mberedi Ngode Datagaliwabehondo loma bialu mini wiago nole mini. Mberedi ogoni marume nolene nawi loma binigo mo miaga agali degeme naga winigo Debidi ibu mo nalu agali ibu heba hayarubi nelo mo mini, lene. <sup>\*</sup>

<sup>27</sup> Ani lowa Yasuhanda lamaro bialu lalu, Ngode Datagaliwabehanda wali agali bayale helonaga Sabada horo wini. Sabada horo bayale wilonaga wali agali wabini ndo. <sup>28</sup> Ani binigo Agali Hole Ibiyago ibu Sabada horonaga Anduanebi ka, lalu lamini. <sup>\*</sup>

## 3

### *Agali mbira gi kohe hearia Yasuhanda mo dabi henego ogo*

*(Madiu 12.9-14, Lugu 6.6-11)*

<sup>1</sup> Yasu ibu ngoai hagane andaha halu mende anda pene. Anda ogoniha agali mbira gi mbariane kohe hene. <sup>2</sup> Wali agali maru hearume Yasuhondo, Ina koore biri, loa howa tigua Yasuhanda Sabada horongi agali biago mo dabi harabe hondole ti ha para howa hondo hene. <sup>3</sup> Yasuhanda agali gi kohe biagohondo lalu, Heyalu i kogoria ibu, lene. <sup>4</sup> Ani lowa ibugua tihondo lalu, Sabada horongi inanaga Mana lowinigome bulene nabulenebi agi lo ngabe. Biamogo bulene lo ngabe be mo ko holene lo ngabe. Wali agali bayale helo pele mulene lo ngabe be homelo bolene lo ngabe, lene. <sup>\*</sup>

Ani layagola tigua ladai nabi hene. <sup>5</sup> Yasu ibugua wali agali biaru handalu hearia bu mini giambe ho heago hondowa keba halu agali biagohondo lalu, Inaga gi mbariane dogola, lene. Ani layagola agali biagome ibunaga gi mbariane dogo layaore bayale ho

<sup>\*</sup> 2:23: Man 23.25   <sup>\*</sup> 2:24: Man 23.25   <sup>\*</sup> 2:25: 1 Sml 21.6   <sup>\*</sup> 2:26: LBM 24.9   <sup>\*</sup> 2:27: Man 5.14   <sup>\*</sup> 2:28: Md 12.8   <sup>\*</sup> 3:4: Lg 14.3



dai bini.✧ <sup>6</sup> Ani biyago hondowa Perisi agali hearume tagira pialu Herodo aria hearia puwa, Yasu homelo agi bimabe, lalu lo manda bialu hene.✧

*Wali agali dewaore Galili iba angeni ngoai henego ogo*

<sup>7</sup> Yasu ibunaga talima piaga biaru heba ti o hayagoria wahalu Galili iba timbuniore bereagoria pene. Ti piyadagua wali agali dewaore Galili howabi Yudia howabi <sup>8</sup>Yarusaleme howabi Idumia howabi iba Yodana edeyagi howabi Taia howabi Saidono howabi dindi uruniha howa wali agali au lole labe nahe Yasuhanda biyago hale howa haruru puwa ibu hearia ibu ngoai hene.✧ <sup>9-10</sup> Ani ngoai hayagola ibugua wali agali dewa mo dabi hayago hondowa waragobe dewa hearume Yasu ela hole garere bima ibu hearia ibini. Ani biyagola ibiyarume ibu ho gengedoligo lowa Yasuhanda ibunaga talima piaga biaruhondo lalu, Iba talu kaware yalu ibu widaba, lene.✧✧ <sup>11</sup> Ani biyagola wali agali dama daragahe hearume Yasu de hondowa ti ibu geha bulu paluwa ga lalu, I Ngode Datagaliwabe Igini kegoni, lene.✧

<sup>12</sup> Ani layagola ibugua dama biaruhondo bi hongo howa lalu, I Ngode Datagaliwabe Igini kogonigo maru nalamilimu, lene.✧

*Yasuhanda abosolo homberiali (12) dabenegro ogo*

*(Madiu 10.1-4, Lugu 6.12-16)*

<sup>13</sup> Yasuhanda dindi hambene wiagoria iraga howa agali maru ibuni hamelearu olayagola ti ibu hearia ibini. <sup>14</sup>Ibiyagola ibugua agali homberiali (12) dabowa ogoningi tinaga mini abosolo wini. Ani buwa ibugua tihondo lalu, Ina ti i heba mandagi hamija dabarugo maha ina tigua mana lamule pudaba lolebero. <sup>15</sup> Ani larogola tigua dama daraga karu wara tagi holenenaga hongo karulo holeberami, lene.

<sup>16</sup> Yasuhanda agali homberia abosolo helo dabenedaru mini uru Saimono Yasuhanda ibu mini mende Pida winigo ibubi✧ <sup>17</sup> Sebedi igini Yamese Yonela henego Yasuhanda libu mini mende Boaneyisi inanaga bi lalu Hari Kulu igini winigo libubi✧ <sup>18</sup> Andurubi Pilibibi Badolomiubi Madiubi Tomasabi Alibiasa igini Yamesebi Tadiasabi Saimono ibu kai mini Paidoro ibubi <sup>19</sup> Yudasa Isagariodo ibu Yasu nde lenego ibubi homberiali (12) uruni Yasuhanda dabene. Ani dabai halu Yasu ibu andaga pene.

*Yasu dama Heyolabelanaga te ogo*

*(Madiu 12.22-32, Lugu 11.14-23, 12.10)*

<sup>20</sup> Wali agali dewaore lone ngoai hayagola Yasubi ibunaga talima piaga biarubi ti tomo nolene henge nawi hene.✧ <sup>21</sup> Wali agali hearume, Yasu lulu kago, layagola hale howa ibu dameneme Yasu damu pene.✧

<sup>22</sup> Yarusalemeni howa Mana lowinigo lawai haga ibiyarume lalu, Dama mini Heyolabe Yasunaga gubaliniha daraga ka, lalu, Yasu ibu dama bibahende karunaga haguane hongoni howa dama karu wara tagi haga ka, lene.✧

<sup>23</sup> Ani layagola Yasuhanda, Ibadaba, lowa tihondo bi yobage lalu, Dama Heyolabeme ibuni agua wara tagi habehe kabe.✧ <sup>24</sup> Dindi mbiraoreni howa tini tale bigibigi bu howa wai bia ai nai biyagua hangu hangu haga haga bu holebira. <sup>25</sup> Hameigini mbiraoreme tini tale bigibigi bu howa wai biyagua hangu hangu haga haga bu holebira. <sup>26</sup> Dama Heyolabeme haru kagoria tale bigibigi bu howa ti wai biyagua bia ho wiaabo habe nahe hangu hangu haga haga bu howa ereba hai holebira, lene.

<sup>27</sup> Mbiralime agali hongohe kagonaga andaha ibunaga mbirale ngaru mo kayu bule pobe nahe holebira. Ibugua agali hongohe biago ala gi gebi minu huba bu wiyagua nde mani ibunaga andaha mbirale ngaru mo kayu bule pobehe holebira, lene.✧

✧ 3:5: Yo 11.33 ✧ 3:6: Md 22.15-16 ✧ 3:8: Md 4.25 ✧ 3:9-10: Mg 4.1, Lg 5.1-3 ✧ 3:9-10: Md 9.21, 14.36, Mg 5.29, 6.56, Lg 7.21 ✧ 3:11: Mg 1.23-24, Lg 4.41 ✧ 3:12: Md 8.4, 12.16, Mg 1.34 ✧ 3:16: Yo 1.42 ✧ 3:17: Lg 9.54 ✧ 3:20: Mg 6.31 ✧ 3:21: Yo 7.5, 10.20 ✧ 3:22: Md 9.34, 10.25 ✧ 3:23: Md 4.10, Lg 11.17-22 ✧ 3:27: Ais 49.24, Md 12.29

<sup>28</sup> Ani lowa Yasuhanda lalu, Tíhondo heneneore larogo. Wali agalime ko bibahende birarubi mege bialu bi ko tara tara lararubi domo wahabehe holebira.✠ <sup>29</sup> Mbiralime Ngode Datagaliwabe Dinini mege biyagua domo wa nahe ibunaga ko ogoni ibuniha wiaaboboore wulebira, lene. <sup>30</sup> Tigua, Yasu gubaliniha dama daraga ka, layagola Yasuhanda bi ogoni lene.

*Yasu aiya hamenerunaga te ngago ogo*  
(Madiu 12.46-50, Lugu 8.19-21)

<sup>31</sup> Yasu ibu aiya hamenerume tagirani íbu howa lalu, Yasu tagira ibilo lamidaba, lene.✠ <sup>32</sup> Ani layagola wali agali Yasu heba biru mabu bu berearume Yasuhondo lalu, Í aiya hamene mbalinirume tagirani íbu howa í olara, lalu lamini.

<sup>33</sup> Ani lamiyagola ibugua ladai bialu lalu, I aiya hameneru ai imabe, lene. <sup>34</sup> Ani lowa ibugua wali agali biru mabu biaru handa deḷe buwa lalu, De handadaba. I aiya hameneru o bedaruni, lene. <sup>35</sup> Ani lowa lalu, Ngode Datagaliwabehanda hame ledadagua biaga karu ti i hamenebi i mbalinibi i aiyabi kagoni, lene.

## 4

*Bi yobage lowa, Tomo egene polama pene, lenego ogo*  
(Madiu 13.1-9, Lugu 8.4-8)

<sup>1</sup> Yasuhanda iba Galili bereago angeni howa bi mana lone lawai halu hene. Wali agali dewaore íbu ngoai howa ibu bereagoria ho mabu biyagola ibu iba taluni ubade ho biralu wali agali ti iba angeni hene.✠ <sup>2</sup> Yasuhanda bi yobage lowa mana dewaore tihondo lawai halu lalu,✠

<sup>3</sup> Hale hadaba. Agali mbirame ladi ale mini widi egene mabuni ba ai nai bima pene. <sup>4</sup> Ba ai nai bima piyagola egene maru hariga teneni ibira ho wiaria egame íbuwa mo nai hene. <sup>5-6</sup> Egene maru ege toḷe dindi mbaliahe wiagoriani ibira hayaru abale anda halu pini dindiha puabo naheyagola yuni emene doai lalu tagira ibiyago ni daba hayagola gau lai hene. <sup>7</sup> Ani buwa egene maru dindi pu kuabu anihe pini gandula anda hene wiagoriani ibira hayaru ani heba mandagi anda hamaga ho gengedalu oge hayagola lini nade hene. <sup>8</sup> Egene maru dindi bayale wiagoria ibira hayaru anda halu lini dewa dene. Irane marume lini pira tebira (30) dene. Irane marume pira waragaria (60) dene. Irane marume pira pira (100) dene, lene.✠

<sup>9</sup> Ani lowa Yasuhanda lamaro bialu lalu, Tí hale kamiyagua nde hale haramine, lene.

*Bi yobage lolene irane winini lenego ogo*  
(Madiu 13.10-17, Lugu 8.9-10)

<sup>10</sup> Yasuhanda bi ogoni layagola howa hale hayaru maru ibunaga talima piaga homberiali biaru heba Yasu ibu hangu hearia íbuwa tigua íbuhondo lalu, Bi yobage lalu larigo irane aginaga lalu laribe, lene. <sup>11</sup> Yasuhanda tihondo ladai bialu lalu, Ngode Datagaliwabehanda Handame Ho Kagonaga manda bulene ala pani nahe ngelenego áyu tí manda bilimulo langero. Wali agali tagira karuhondo bi yobage hangu lamialu kogo <sup>12</sup> irane ogo,✠

Tigua deme handaya haabo hara tiraga galone handa walia naholebira.

Tigua haleme hale hara tiraga minime manda nabulebira.

Tigua handa walia ha minime manda bia ani bidale tinaga mini beregedo kale.

Ani beregedale tigua ko biyago Ngode Datagaliwabehanda domo wa kale, lene.

✠ 3:28: Md 12.31-32, Lg 12.10, 1 Yo 5.16 ✠ 3:31: Mg 6.3, Yo 2.12, Ab 1.14 ✠ 4:1: Mg 3.7-9, Lg 5.1-3 ✠ 4:2: Md 13.34, Mg 4.33-34 ✠ 4:8: Md 13.8, Lg 8.8, Yo 15.5, Kl 1.6 ✠ 4:12: Ais 6.9-10, Yo 12.40, Ab 28.26-27

*Bi yobage lenegonaga lone garea lo minigo ogo  
(Madiu 13.18-23, Lugu 8.11-15)*

<sup>13</sup> Yasuhanda tihondo lalu, Bi yobage larugo galone manda nabi kamibe. Manda nabi kamiyagua nde bi yobage bibahende larogo agua manda buleberamibe. <sup>14</sup> Agali biagome tomo egene polayadagua Ngode Datagaliwabenaga bi mana polaga ka. <sup>15</sup> Wali agali maru tomo egene harigani ibira hayago ale karume bi mana hale haragola dama Heyolabeme abale ibalu bi mana bu habaneha polayago mo yalu piaga. <sup>16</sup> Ogonidagua wali agali maru tomo egene ege tole dindi mbaliaheni ibira hayago ale karume bi mana hale howa turu halu mo yaga. <sup>17</sup> Ani buwa tinaga bu habaneha anda puabo habe nahedagola ti ha wiaabo nahaga. Ani buwa marume tigua bi mana mo yayago hondowa ti mo tandaga haragolabi mo ko holene ibu ngagolabi ti abaleore yu wahalu piaga. <sup>18</sup> Wali agali maru tomo egene dindi anihe pini gandula anda hene wiagoria ibira hayago ale karume bi mana hale howa\* <sup>19</sup> dindini holene mitangi bialu mini tumutumu wu holenebi dindinaga mbirale dewa ngaru minime wua hai holenebi mbirale tara tara ngago dimagoli holenebi urunime bi mana hale hayago ho gengedalu oge haragola lini nadaga ka.\* <sup>20</sup> Anigo wali agali maru tomo egene dindi bayaleni ibira hayago ale karume bi mana hale howa mo yai halu tiha lini pira tebira (30) da pira waragaria (60) da pira pira (100) daga bigi biaga ka, lene.

*Lamu hale te ogo  
(Lugu 8.16-18)*

<sup>21</sup> Ani lowa Yasuhanda tihondo lalu, Mbiralime lamu hale delowa ndisime dambi ho wiagabe be paliagane dagia andaneha wia do hagabe. Lamu hale delowa dagia daligani wiaga ndobe.\* <sup>22</sup> Mbirale wia do kago mo pani hai halu mbirale yi ho ngago mo pani ho ngelolebira.\* <sup>23</sup> Ti hale kamiyagua nde hale haramine, lene.

<sup>24</sup> Ibugua laabo halu howa tihondo lalu, Mana hale haramigo bayuwa mitangi bilimu. Wali agali marume birago tigua hondowa dabaramilidagua Ngode Datagaliwabehanda tigua beramigobi hongo howa dabilebira.\* <sup>25</sup> Mbiralime mbirale mbira yu kagohondo Ngode Datagaliwabehanda dewa mo tago halu mulebira. Mendealime mbirale mbira nayi howa emeneore yidogoni karulape dege yidolo kago Ngode Datagaliwabehanda yamulebira, lene.\*

*Tomo egene anda haganenaga bi yobage lalu lenego ogo*

<sup>26</sup> Yasuhanda laabo halu lalu, Ngode Datagaliwabehanda Handame Ho Kagoria ogo ale nga. Agali mbirame tomo egene mabuni polalu howa <sup>27</sup> mbiraga pali egerebagi heya bigi bialu ka tambu tomo egene polayago doai lalu anda haga. Agua bialu anda harabe ibu manda nabi haga.\* <sup>28</sup> Tomo egene dindiha howa anda harago yuni ala anda halu mani pabua balu lini daga. <sup>29</sup> Ani buwa maniore boga bialu ladi ale mini widi lini dolene tu haragola agalime ayu tibu wangobime gandulaga, lene.\*

*Bi yobage lowa ira masada egenenaga te lenego ogo  
(Madiu 13.31-32,34, Lugu 13.18-19)*

<sup>30</sup> Yasuhanda ogonidagua dege lalu, Ngode Datagaliwabehanda Handame Ho Kagoria agi ale lamabe. Bi yobage irane aginaga lalu garea lo lamabe. <sup>31</sup> Ngode Datagaliwabehanda Handame Ho Kagoria ogo ale nga. Agalime ira masada egene mbira emene koore ngago mabuni hangaragola <sup>32</sup> egene ogoni anda halu maru kagobi ndo ibu timbuniore anda ho haga. Ani anda howa magane timbuni kagola egame gumbaha tinaga anda biaga, lene.

\* 4:18: Md 26.31    \* 4:19: Md 19.23-24, 1 Ti 6.9, 6.17    \* 4:21: Md 5.15, Lg 11.33    \* 4:22: Md 10.26, Lg 12.2  
\* 4:24: Md 7.2, Lg 6.38    \* 4:25: Md 13.12, 25.29, Lg 19.26    \* 4:27: Ya 5.7    \* 4:29: Yol 3.13, Mo 14.15-18

<sup>33</sup> Yasuhanda wali agali hearuhondo bi mana lamialu ti manda bua kadagua manda bilo bi yobage hangu dewa ogonidagua lalu lamialu hene. <sup>34</sup> Ibugua tihondo mana lamialu bi yobage dege lalu lawai hene. Yasubi ibunaga talima piaga biarubi tini hangu howa ibugua bi yobage layarunaga irane bibahende lamiai hene.

*Yasuhanda puyabu ibalahondo bi lenego ogo*  
(Madiu 8.23-27, Lugu 8.22-25)

<sup>35</sup> Horo ogoningi dege ni paliyagola Yasuhanda ibunaga talima piaga biaruhondo lalu, Iba timbuniore domalu ange edeyagi ma, lene. <sup>36</sup> Ani lowa wali agali dewa bu hearu helalu iba talu Yasu pu birayagoria ibunaga talima piaga biarubi ti haru biralu pene. Iba talu marubi ogoriani wini. Wali agali maru iba talu urunini biralu Yasu piyadagua haruru pene. <sup>37</sup> Pialu hearia puyabu timbuni hongo howa pulayagola iba yaribu buwa iba talu guaneha iba anda ibini. Iba anda ibuwa talu tolole bini. <sup>38</sup> Ani biyagola Yasu ibu iba talu ereneha haguanda howa palia hondo hearia tigua ibu mo barila halu lalu, Lawai haga-o heya. Ina homaramago nahende padebe, lene.

<sup>39</sup> Ani layagola Yasuhanda heyuwa puyabuhondo, Pu nalabe, lalu ibahondobi, Yaribu nabibe, lene. Ani layaore puyabu pu nale ereba halu ibabi yaribu nabi nimu lowa bay-aleore wini. <sup>40</sup> Ibugua tihondo lalu, Aginaga gi ho kamibe. Ngode Datagaliwabhondo mini mbiraore nawi kamibe, lene.

<sup>41</sup> Ani layagola tigua gi timbuni howa tini bi lagalaga bialu lalu, Puyabubi ibabi ibugua bi layago hale hagadago agali ogoni ibu aidabe, lalu hene.

## 5

*Yasuhanda agali mbiraha dama daraga ho hearia wara tagi henego ogo*  
(Madiu 8.28-34, Lugu 8.26-39)

<sup>1</sup> Yasubi ibunaga talima piaga biarubi ti iba Galili ange edeyagi pialu Gerasa dindi anda pene. <sup>2</sup> Yasu ibu iba talu ngelalu pialu hearia agali mbira dama daragahe egeanda homali wiaruha henego ibalu hearia lola hene.✧ <sup>3</sup> Agali biago ibu homali hearuha haabo haga hene. Mbiralime ibunaga gi gebi seni pume minu huba bibe nahe hene. <sup>4</sup> Tigua ibu gi gebi seni pume huba bu wiaabo hayagola ibugua seni pu tongo laabo haga hene. Ani henego tigua ibu mo tabila habe naheyagola helene. <sup>5</sup> Agali ogoni ibu horombe mbiragabi homali kagoriabi dindi hambenehabi ibaga bialu ga lalu areme ibunaga tingini podalu haga hene.

<sup>6</sup> Ani bialu hagago Yasu kaundiani ibiyaria hondowa ibu gerai lalu Yasu hearia ibuwa ge duli hanga howa bulu palene. <sup>7</sup> Ani buwa bi dalimu ga lowa lalu, Ngode Datagaliwabe Daligaorene Daliga Kagonaga Iginu Yasu ina ihondo agi bule ibiribe. Ngode Datagaliwabe mitangi bialu ihondo pani nangibe, lene.✧ <sup>8</sup> Bi layago irane Yasuhanda damahondo, Tagira pu, lalu heaore ani ladai bini.

<sup>9</sup> Yasuhanda ibuhondo lalu, I mini aibe, lene.✧

Ibugua ladai bialu lalu, I mini Dewa ina dewali kamago, lene. <sup>10</sup> Ani lowa ibugua Yasuhondo hongo howa laabo halu lalu, Ina dindi ogo wahalu pudaba nalabe, lene.

<sup>11</sup> Nogo dewaore bare kawareni pia nalu bu hene. <sup>12</sup> Anigo dama daraga ho hayarume Yasuhondo hongo howa lalu, Ina nogo nai karuha anda pu holomaya pudaba la, lalu lai hene. <sup>13</sup> Yasuhanda, Ani bidaba, layagola agali helalu dama biarume tagira pialu nogo dewa daosini kira agima (2,000) hayaruha anda pene. Anda piyagola nogo bibahende hayaru bareni dalipebe bialu dai lo yalu pialu iba timbuniore bereagoha anda piai hayagola ibame nogo biaru nai hene.

<sup>14</sup> Ani biyagola nogo haru haga hearume gerai lalu pialu tanohabi dindi anda bu wiaruhabi lopebe bima pene. O layago hale howa wali agali bu hearume agi biyadabe

hondole pene. <sup>15</sup> Ti Yasu hearia ibuwa agali ala dama dewa daragahe hayago aga karulowa ibu mini bayale wia dai bu bereago de hondowa ti bibahende gi hai hene.✧

<sup>16</sup> Maru handayarume wali agali ibu hearu hale helo dama dewa wara tagi hayarubi nogo ibaha puwa homayarubi te lalu lamiai hene.

<sup>17</sup> Ani lamiyagola tigua Yasuhondo lalu, í inanaga dindi ogoriani nahe wahalu pu, lene.

<sup>18</sup> Ogonidagua laya handala Yasu ibu iba taluni birule biyaria agali ala dama dewa daragahe hayagome ibuhondo lalu, í poredagua mba, lene.

<sup>19</sup> Ani layagola Yasuhanda agali biago ibuhondo lalu, í heba pobe nahedago Anduane Homogohanda ihondo biyagobi dara hayagobi í damene lamule andaga pu, lene.

<sup>20</sup> Ani layagola agali biagome Tano Pira wiaruha lamima ibaga bialu Yasuhanda ibuhondo biyago wali agali hearuhondo lamiai hayagola ti minime mogo lai hene.✧

*Yairasa wanebi wali Yasunaga agani ela hayagobi dabi henego ogo  
(Madiu 9.18-26, Lugu 8.40-56)*

<sup>21</sup> Yasu iba taluni biralu iba timbuniore domalu dai buwa ibu iba angeni hearia wali agali dewa ibu ngoai hene. <sup>22</sup> Ani ngoai hayagola ngoai hagane anda hondo haga mbira mini Yairasa ibuwa Yasu de handalu ibu geha bulu palialu <sup>23</sup> hongo howa ibuhondo lalu, í wane emene mbira homolene kaware ngago ibu nahome dabi helo inaga gime ela habelo mba, lene.✧

<sup>24</sup> Ani lowa libu haru pialu hearia wali agali dewa hearu Yasu haruru pialu gengeda tago bima pene.

<sup>25</sup> Pialu hearia wali mbira mali pira mbirani kira (12) warago taraore baabo haga berene. <sup>26</sup> Ibugua anogoda agali dewaoreme handalu ibunaga muni yolo bialu biyagola miai howa dabi nahe warago ibu timbuore hene. <sup>27</sup> Ani biruwa Yasuhanda mo dabi haga ka layago hale howa ibu wali agali Yasu haruru piyaru heba pene. <sup>28</sup> Ala ibuni hangu lo manda bialu, Ina Yasunaga agani ela haruyagua dabi holebero, manda bini.✧

<sup>29</sup> Ibugua Yasunaga agani ela hayagola warago bayago abaleore ereba halu ibunaga tingini dabi haiore hayada manda bini. <sup>30</sup> Anidagua biyagola Yasu ibunaga mo dabi haga hongo piyago manda buwa ibu beregedalu lalu, Inaga agani ela haya aiwabe, lene.✧

<sup>31</sup> Ani layagola ibunaga talima piaga biarume ibuhondo lalu, Wali agali dewali gengeda tago bu kamago de hendedego. Aiwa ela hayabe larigo aginaga laribe, lene.

<sup>32</sup> Ani layagola Yasuhanda aiwa ela hayabe hondole handa deḷe bini. <sup>33</sup> Wali biagome warago dabi hayago manda buwa gi howa duru lalu Yasu hearia ibini. Ibuwa ibu geha bulu paluwa bibahende ibuni biyago lamiai hene. <sup>34</sup> Ani lamiai hayagola Yasuhanda ibuhondo lalu, í wane-o ina Ngode Datagaliwabhondo mini mbiraore wirigome í mo dabi hayago ai warago lone nabolebereg mo palia holene karulo yalu pu, lene.✧

<sup>35</sup> Yasuhanda wali biagohondo bi lamialu heaore agali maru hondo haga Yairasa ibunaga andaga howa ibini. Ibuwa tigua lalu, í wane biago tongo lo miyago ai Lawai Haga kago la pugu nabibe, lene.

<sup>36</sup> Tigua bi ani layagola hale howa Yasuhanda hondo haga Yairasahondo lalu, Gi nahe Ngode Datagaliwabhondo mini mbiraore wibe, lene. <sup>37</sup> Ani lowa wali agali maru hearu helalu Yasuhanda Pida Yamese ibu hamene Yonema tihondo, Ina hangu hondo maibidaba, lene. <sup>38</sup> Hondo haga agali biagonaga andaga anda pialu hearia wali agali dewa ngoai ho hearume bi lagalaga bialu dugu timbuni bialu hearia Yasu ibu handa walia hene. <sup>39</sup> Handa walia howa ibu anda tamuha puwa tihondo lalu, Tí aginaga bi

✧ 5:15: Lg 8.27, 8.35 ✧ 5:20: Md 4.25, Mg 7.31 ✧ 5:23: Md 8.3, Mg 7.32 ✧ 5:28: Md 14.36 ✧ 5:30: Lg 5.17, 6.19, 8.46 ✧ 5:34: Mg 10.52, Lg 7.50, 17.19, Ab 14.9



laga bialu dugu timbuni bialu kamibe. Wandari emene ogoni ibu tongolo mia nabi palia dege bida, lene.

<sup>40</sup> Ani layagola tigua Yasuhondo oba halu hene. Ani biyagola ibugua ti bibahende wara tagi howa wandari aiya ababi agali tebira biarubi ti haru hobane mbiraha wandari moa heagoria pene. <sup>41</sup> Yasuhanda wandari biago gini yamuwa ibuhondo lalu, Talita kumi, inanaga bi lalu, Wandari emene heya laro, lene. <sup>\*</sup>

<sup>42</sup> Ani layaore wandari biago heyalu ibaga bini. Wandari ogoni ibu mali pira mbirani kira (12) berene. Ani biyagola wali agali hearume handawa bialu mogo timbuniore lai hene. <sup>43</sup> Yasuhanda tihondo hongo howa lalu, O birudagoni wali agali mbirali nalamilimu, lowa lalu, Wandari ogoni tomo nelo midaba, lene. <sup>\*</sup>

## 6

### *Nasarete wali agalime Yasu hame nale henego ogo (Madiu 13.53-58, Lugu 4.16-30)*

<sup>1</sup> Yasu dindi ogoni wahalu ibunaga talima piaga biaru heba ibunaga dindiha dai bini. <sup>2</sup> Sabada horo hayangi Yasu ngoai hagane andaha anda puwa ibugua mana lawai halu hene. Ibugua mana lawai hayago hale howa wali agali dewa hearume mini mogo lai howa lalu, Bi larago aiwa laminidabe. Ibu mini timbuni ngago aiwa mo wia henedabe. Ibugua biabe agalime nabiagane ale bialu kago agidabe. <sup>3</sup> Ibu anda biabe biaga agali Meri igini ndo kabe. Ibu Yamese Yosese Yudasa Saimonoma tinaga hamene ndo kabe. Ibunaga mbalibuniru ina heba o bedamagoni ndobe, lene. Tigua ani lowa ibu handabe manga halu hame nale hene. <sup>\*</sup>

<sup>4</sup> Ani biyagola Yasuhanda tihondo lalu, Ngode Datagaliwabe bi mana latagi haga kagome bi laragola dindi bibahendeni wali agali karu hale haga ka. Ibuni dindini howa bi mana lamiragola ibu damenebi hameiginibi ti degeme hale nahaga ka, lene. <sup>\*</sup>

<sup>5</sup> Ibugua biabe agalime nabiagane ale biyagonidagua dindi ogoriani nabibehe hene. Ibugua wali agali mbira mbira hangu warago bayago gime ela halu mo dabi hene. <sup>6</sup> Ani biyago hondowa ti mini mbiraore nawiyagola ibu mogo timbuni lo hene. <sup>\*</sup>

### *Yasuhanda homberiali (12) biaruhondo, Mana lama purogo ladaba, lenego ogo (Madiu 10.5-15, Lugu 9.1-6)*

Ani buwa ibu wali agali bu hearuha bi mana lawai hama ibaga bialu hene. <sup>7</sup> Yasuhanda ibunaga talima piaga homberiali (12) biaru olalu, Mo mogo bidaba, lowa ibiyagola tihondo lalu, Tí purogo lalu kirali kirali pugu pugu bidaba, lene. Ani lalu dama daraga karu tigua wara tagi helo ibugua tihondo hongo holene mini. <sup>8-9</sup> Ibugua tihondo lalu, Tí pialu howa dabudabu mberedibi muni ngi lowa mo hanagane nubi munibi mbira nahene pilimu. Halimbubi ge subi aga mbira hangubi uruni karulalu pilimu, lene. <sup>10</sup> Ibugua tihondo laabo halu, Dindi mbira anda poramigoria anda mbira paluene henge ngiragoria dege paliaabo halimu. Wahalu poramingi wahole. <sup>11</sup> Wali agali dindi mbirani karume, Naibidababe, lowa t'naga bi hale habe manga hayagua dindi ogoni wahalu pilimu. Wahalu pialu tigua biyagoni walia hole t'naga geni abalu para kago taulo wahalu pilimu, lene. <sup>\*</sup>

<sup>12</sup> Ani laya handala agali homberiali (12) biaru ti purogo lowa wali agali hearuhondo, Tí bu mini beregedo halimu, lalu lamima pene. <sup>13</sup> Tigua ani lamima pialu howa dama dewa daraga hearu wara tagi haga bima pene. Warago bo wiarubi tigua olibe lininaga weli odo wiyagola dabi haga bini. <sup>\*</sup>

<sup>\*</sup> 5:40: Md 9.25, Lg 8.54, Yo 11.11    <sup>\*</sup> 5:41: Lg 7.14    <sup>\*</sup> 5:43: Mg 1.44, 7.36, Lg 8.55    <sup>\*</sup> 6:2: Yo 7.15    <sup>\*</sup> 6:3: Yo 6.42    <sup>\*</sup> 6:4: Md 13.57, Lg 4.24, Yo 4.44    <sup>\*</sup> 6:6: Ais 59.16, Md 9.35, Lg 13.22    <sup>\*</sup> 6:7: Lg 10.1    <sup>\*</sup> 6:8-9: Md 10.9-10    <sup>\*</sup> 6:8-9: Lg 10.4-11    <sup>\*</sup> 6:11: Ab 13.51    <sup>\*</sup> 6:13: Ya 5.14

*Baboraya biaga Yone homenego ogo  
(Madiu 14.1-12, Lugu 9.7-9)*

<sup>14</sup> Wali agalime Yasu mini lo yogo lai hayago Kini Herodo hale hene. Marume lalu, Baboraya biaga Yone ala homayago lone ho dai bu howa agalime nabigane ale bialu kagoni, lene.✠

<sup>15</sup> Marume lalu, Ibu Elaya ka, lene. Ani layagola marume lalu, Ibu Ngode Datagali-wabe bi mana latagi hagaru aria mbira ka, lene.

<sup>16</sup> Herodohanda bi ogoni hale howa lalu, Yone ina ayu tibume ma pugu waharugo lone dai bu haruago, lene. <sup>17</sup> Ala Herodohanda agali hearuhondo lalu, Yone minule pudaba, layagola tigua ibu minuwa garabaya andaha ege pume dariba hene. Herodohanda ibu one Herodiasa turu helo ani bini. Herodiasa ibu ala Herodo hamene Pilibi one berenego mani Herodo ibu wali ogoni dabu bini.✠ <sup>18</sup> Ani biyagola Yonehanda Herodohondo lalu, Í hamene one heba kego nabulene ngago bialu kegoni, lene.

<sup>19</sup> Ani layagola Herodiasahanda Yonehondo keba halu ibu homelo boa howa agua boabe toba ho berene. <sup>20</sup> Ani bu bereagola Herodohanda Yone ibu agali bayalebi bu mini tigabibi kago manda buwa gi halu Yone nabelo mamage hene. Yonehanda bi layago Herodo hale hoa hene. Hale howa mini tumu tumu ho hene.

<sup>21</sup> Horo Herodo ibu taba henenengi hayagola gabumane haru haga hearubi ami haru haga hearubi Galili agali haguane hearubi ibugua tihondo lalu, Tomo namiya ngoai halimu, lene. Ani layagola howa tomo dawayangi Herodiasahanda Yone bolene henge wiaria handa walia hene. <sup>22</sup> Horo ogoningi Herodiasa wane ibuwa mali lini. Ibugua mali liyagola hondowa Herodobi agali biarubi ti turu hai hene. Turu hai hayagola Herodohanda wandari biagohondo lalu, Mali lirigonaga mbirale mbira hame larego ngi lareyagua nde nguliya, lene. <sup>23</sup> Ibugua wandari biagohondo wanakui minalu lalu, Mbirale ngi larego inaga dindi timbuni handame haruligo hanuni tu wa ngi lariyaguabi nguliya, lene.✠

<sup>24</sup> Ani layagola wandari biagome hale halu tagira pialu ibu aiyahondo hale howa lalu, Agi ngi loabe, lene.

Ani layagola ibu aiyahanda lalu, Baboraya biaga Yone haguane pugu ngi labe, lene.

<sup>25</sup> Ani layagola wandari biagome Herodo hearia gerai lalu dai buwa ibuhondo lalu, Baboraya biaga Yonenaga haguane gamiangini pugu wuwa áyu ngibelo hame lo ko, lene.

<sup>26</sup> Ani layagola hale howa Herodo ibu dara timbuni hene. Ibugua agali tomo nole ibiyaru hendeaore ala wanakui minalu bi layago mitangi buwa bi wahabe nahe manda bini.✠ <sup>27</sup> Ani manda buwa Herodohanda mamage haga mbirahondo lalu, Yonenaga ma ayu tibume puguwa haguane yalu dai bule pu, lene. <sup>28</sup> Ani layagola ibugua garabaya andaha puwa Yonenaga ma tibume puguwa haguane gamiangini wialu yalu dai buwa wandari biagohondo mini. Miyagola wandari biagome ibu aiyahondo mini. <sup>29</sup> Ogonidagua biya layago hale howa Yonenaga talima piaga hearu ibunaga tingini mo puwa ege andaha hora hene.

*Wali agali dewaoreme tomo no karula penego ogo  
(Madiu 14.13-21, Lugu 9.10-17, Yone 6.1-14)*

<sup>30</sup> Abosolo biaru Yasu hearia dai buwa tigua biyagobi mana lawai hayagobi bibahende lamiai hene.✠ <sup>31</sup> Wali agali dewa Yasu hearia pu íbu biaabo hayagola ti tomo nolene henge nawiyagola Yasuhanda tihondo lalu, Wali agali naheha ina hangu halo hamiya ma, lene.✠ <sup>32</sup> Ani lowa ti iba taluni biralu wali agali naheha pene.

✠ 6:14: Md 16.14, Mg 8.28, Lg 9.19 ✠ 6:17: LBM 18.16, 20.21, Md 14.4, Lg 3.19-20 ✠ 6:23: Esd 5.3, 5.6, 7.2

✠ 6:26: Md 14.9 ✠ 6:30: Lg 10.9-10, 10.17 ✠ 6:31: Mg 3.20

<sup>33</sup> Ti wene pialu heaore wali agali dewalime Yasu porago manda bini. Ani manda buwa ti dindi tara tara howa dindi dindi gerai lalu Yasubi ibunaga talima piaga biarubi ti polebiyaria bamba halu anda pene. <sup>34</sup> Ani biyagola iba talu angeni ibuwa Yasu ibugua iba taluni howa uba ede halu hearia wali agali dewaore uruni bu hearu de hendene. Ti nogo sibi haru hagane nahe howa hagadagua heagola handalu dara holene ibunaga gubaliniha tolai howa ibugua bi mana dewa ti lawai halu hene. ✧ <sup>35</sup> Horo ogoni alendo hayagola Yasunaga talima piaga biaru Yasu hearia ibuwa ibuhondo lalu, Ai alendo hayadago ina dindi koni tomo nawini kamago <sup>36</sup> wali agali o karuni pugu pugu bialu tini tomo yolo mule mabuni anda karuhabi tano emene karuhabi taya bima pudaba la, lene. ✧

<sup>37</sup> Ani layagola ibugua tihondo ladai bialu lalu, Ti tomo nelo tinime midaba, lene. ✧

Ani layagola tigua ibuhondo lalu, Muni kina handari kirame (200) mberedi ti nelo yolo bule poramabe, lene.

<sup>38</sup> Ibugua tihondo lalu, Mberedi agira henedamibe handadaba, lene.

Hondowa tigua ibuhondo lalu, Mberedi duriabi wena kirabi heneda, lene.

<sup>39</sup> Ani layagola ibugua tihondo lalu, Wali agali karu tanini bira dugu bu biradaba ladaba, lene. <sup>40</sup> Ani layadagua layagola ti maru handari mbira (100) bira dugu bialu maru pira duria (50) bira dugu bialu birai hene. <sup>41</sup> Ani bereagola ibugua mberedi duria biarubi wena kira biago labobi gime mo yuwa hari daligaha handa daga halu Ngode Datagaliwabhondo kaj lowa mberedi ibunaga talima piaga biarume wali agalihondo milo gai bu бага bu mini. Ani buwa ibugua wena kira biago podo бага buwa ti bibahende tale bu mini. ✧ <sup>42</sup> Wali agali bibahende bu hearume no karula pialu nene. <sup>43</sup> Ani biyagola ibunaga talima piaga biarume mberedi wenabi no ibira hayago mialu nu pira mbirani kira (12) hono tolai hene. <sup>44</sup> Mberedi wenabi nayaran agali hangu daga laaj halu daosini duria (5,000) hene.

### *Yasu ibani penego ogo*

*(Madiu 14.22-33, Yone 6.15-21)*

<sup>45</sup> Yasuhanda ibunaga talima piaga biaruhondo lalu, Ti iba taluni bialu iba ange edeyagi Bedesaida dindi bamba halu pudaba, lene. Ani lalu wali agalihondo, Ti andaga purogo ladaba, lowa <sup>46</sup> ibu hambene mbira wiagoria Ngode Datagaliwabela bi lole pene. ✧ <sup>47</sup> Yasu ibu hangu dindi o biagoria hea handala ibunaga talima piaga biaru iba taluni bialu iba hanuni pialu hearia aruma hene. <sup>48</sup> Ani aruma hayagola puyabu hongo howa pu ladai biyagola tigua iba talu tanguiyago nakarulapeyagola Yasu ibu de hendene. Muna biyagola ibu ti bereagoria ibule ibani ibini. Ibu ti berelalu bolangua holebiyaria <sup>49</sup> tigua Yasu de hondowa homene dininibe toba howa ga lene. ✧ <sup>50</sup> Ti bibahendeme handai halu gi timbuni hayago hondowa ibugua tihondo lalu, I Yasu kgonigo gi nahe hongo howa halimu, lene.

<sup>51</sup> Ibu ti haru iba taluha anda ibu birayagola puyabu pu nale ereba hene. Ani biyagola ti minime mogo timbuni lene. ✧ <sup>52</sup> Tinaga bu mini giambe howa Yasuhanda wali agalime nelo mberedi mo dewa hayago irane manda nabi hene. ✧

### *Yasuhanda wali agali Genesareteni warago bo wiaru mo dabi henego ogo*

*(Madiu 14.34-36)*

<sup>53</sup> Ani bialu ti iba timbuniore bereago doma ede halu dindi mbira mini Genesarete anda puwa iba talu pume pongo bia halu angeni ngelene. <sup>54</sup> Ani ngelalu ibalu hearia wali agali hearume ibu de hondowa, Yasuore ibiragonida, lo manda bini. <sup>55</sup> Ani manda buwa ti gerai lalu dindi wiagoha purogo lalu lamima pene. Ani lamima piyagola

✧ **6:34:** Dag 27.17, 1 Kin 22.17, 2 Bit 18.16, Ese 34.5, Md 9.36 ✧ **6:36:** Md 14.15, Mg 8.1-9, Lg 9.12 ✧ **6:37:** Dag 11.13, 11.22, 2 Kin 4.43, Md 14.16, Lg 9.13, Yo 6.7 ✧ **6:41:** Mg 7.34 ✧ **6:46:** Mg 1.35, Lg 5.16, 6.12, 9.28 ✧ **6:49:** Md 14.26, Lg 24.37, Yo 6.19 ✧ **6:51:** Mg 4.39 ✧ **6:52:** Mg 8.17

wali agali, Yasu ka, hale hayarume warago bo wiaru Yasu hearia ira ho yalu ibini. <sup>56</sup>Yasu ibaga bialu pialu anda mbira mbira heagoriabi anda dewa bu heagoriabi mabu wiagoriabi pialu wali agali hearume warago bo wiaru yalu ibuwa magedi hamani mo ngelene. Mo ngelayagola tigua Yasuhondo hame lowa lalu, Ínaga aga nguni hanguni warago bo ngaru ti ela helo, lene. Ani layagola wali agali Yasunaga agani ela haga biyaru ti dabi hai haga bini.✧

## 7

### *Mamalime ilili biagane mana winigo ogo* (Madiu 15.1-9)

<sup>1</sup> Perisi agali hearubi Mana lowinigo lawai haga maru hearubi ti Yarusaleme howa ibalu Yasu hearia ngoai howa ho mabu bini. <sup>2</sup> Ani buwa tigua Yasunaga talima piaga maru hearume gi wayawaya biagane winidagua nabi howa tomo nalu hearia hendene.✧

<sup>3</sup> Perisi agalibi Yu wali agali bibahendebi ti mamalime ilili biagane mana winigo mitangi bialu gi wayawaya nabi howa tomo nanaga hene.✧ <sup>4</sup> Ti tomo magedi howa mo yalu ibuwa tini tingini wayawaya biagane winidagua nabi howa tomo nanaga hene. Iba bebi ndisibi dini be alebi paliaganebi ilili bialu wayawaya biagane winidagua ilili bialu dewa biai haga wini.✧

<sup>5</sup> Ani biaga henego Perisi agali biarubi Mana lowinigo lawai haga biarubi tigua Yasuhondo lalu, Ínaga talima ibaga biarume inanaga mamalime ilili biagane mana wini ngadagua ndo pugualu gi wayawaya nabi howa tomo nalu kagoni agidabe, lene.

<sup>6</sup> Ani layagola Yasuhanda tihondo lalu, Tí tombene hondo kihe kamigoni. Bamba Ngode Datagaliwabe mana hale howa Aisaiahanda mbiwia henego áyu tíha howa lola haragoni, lene. Mbiwia halu lo ngago ogo.✧ Ngode Datagaliwabehanda lalu, Wali agali urunime tinaga mini kaundiaore howa bime dege lotu laga ka.

<sup>7</sup> Tigua Ngode Datagaliwabehanda bi mana lowinigo lawai harama lalu howa agalime mana lowinigo dege lawai haga ka. Anigo tigua ínaga mini nagalone halu mo yaraga habe nahe ka, lenego gilibu nga, lalu Yasuhanda lamini.

<sup>8</sup> Ibugua lalu, Tígua Ngode Datagaliwabehanda mana lowinigo wahalu agalime ilili biagane mana winigo hangu bialu kamigoni, lene.

<sup>9</sup> Ani lowa Yasuhanda tihondo laabo halu lalu, Tínaga ilili biagane mana bule Ngode Datagaliwabehanda mana lowinigo waharimigo bayuwa birimadalo manda birimida.

<sup>10</sup> Ogoninaga Mosesehanda lowialu lalu, Ínaga aba aiyala mo yo handa nabi laradagua hale halu bibe, lalu, Mbiralime ibu aba aiyaha hayagua nde homelo bolene nga, lalu lowini.✧ <sup>11-12</sup> Anigo tigua agua lalu haramili. Mbiralime mbiraleibunaga winigo ibu aiyaha abala biamogo bibehe howa ibugua lalu, Mbirale uruni Kobana, layagua o biago ibu aiyaha abala biamogo bulene nawi laramili, lene. Kobana inanaga bi lalu, Ngode Datagaliwabehondo loma bia ho ngo. <sup>13</sup> Yasuhanda ani lowa lalu, Mamalime ilili biagane mana biawai hayadagua biawai haabo halu Ngode Datagaliwabenaga bi mo wahalu mana dewa ogonibi biaabo haramili, lene.

### *Wali agali mo ko hagane tene ogo* (Madiu 15.10-20)

<sup>14</sup> Ani lowa Yasuhanda wali agali bu hearu lone olalu, Ibidaba, lowa tihondo lalu, Ina bi o larogo tí bibahende hale halu manda bilimu. <sup>15</sup> Ne harigaha anda poragome wali

✧ 6:56: Md 9.20, 14.36, Ab 19.12 ✧ 7:2: Lg 11.38 ✧ 7:3: Mg 7.5, 7.8, Yo 2.6, Ga 1.14 ✧ 7:4: Md 23.25 ✧ 7:6: Ais 29.13, Md 15.8-9 ✧ 7:10: Har 20.12, 21.17, LBM 20.9, Man 5.16, Md 15.4

agali mo ko nahaga. Bu miniha howa mitangi tagira ibiragome wali agali mo ko haga.✠ [ 16 Tí hale kamiyagua nde hale haramine, lene.]

17 Ani lalu wali agali biaru helalu ibu andaga tamuha pu heariaibunaga talima piaga biarume ibuhondo lalu, Bi yobage larigo irane agibe, lene. 18 Ani layagola ibugua tihondo lalu, Tíbi nde mini nawi maru karudagua dege kamigoni. Tomo bibahende tombeha puwa wali agali mo ko nahagago tí manda nabi kamibe. 19 Tomo bu miniha piaga ndo tombeha puwa tagira piaga, lene. Ibugua ani layagola tomo bibahende ta nabi nolene nga, lalu lene.

20 Ibugua lalu, Bu miniha howa mitangi tagira ibiragome wali agali mo ko haga.✠ 21 Bu miniha howa kagua mitangi buleneru dabu nabi howa kayu buleneru dabudabu page buleneru wali agali homelo boleneru 22 wali agali kayu buleneru habua buleneru mana ko bibahende ta nabi buleneru mo hondo holeneru mana ko ngubi buleneru nayido agini henge loleneru ke halu nde loleneru mine holeneru mini nawi howa buleneru 23 uruni ko bibahende bu miniha howa tagira ibiragome wali agali mo ko haga, lene.

*Wali mbirame Yasuhondo mini mbiraore winigo ogo  
(Madiu 15.21-28)*

24 Yasu ibu dindi ogoni wahalu dindi Taiahayagibi Saidonohayagibi pene. Pialu ibu anda mbira heago tamuha puwa wali agali hearume, Yasu ka, manda nabilo hame lo hene. Ibu ha do hoa howa ha do habe nahe hene. 25 Ani buwa wali mbirame ibunaga wane emene dama daragahe berenego marume, Yasu ka, layagola hale howa wali biago abale Yasu hearia ibuwa geha bulu palene. 26 Wali ogoni ibu Yu wali ndo Siria dindiha ibu dalu Penisia dindini berene. Ibugua Yasuhondo lalu, Dama i waneha daraga kago pelo wara tagi habelo hamelo ko, lene. 27 Ani layagola ibugua wali biagohondo lalu, Ala waneiginihondo hina mulene nga. Waneigininaga hina biangome nelo bape holene nawi, lene.

28 Ani layagola wali biagome ibuhondo lalu, Mambo. Í tiga tiga larigo. O ndo waneigini emenenaga hina habane dagiani howa ibira ho ngago biangome naga ndobe, lene.

29 Ani layagola Yasuhanda wali biagohondo lalu, Bi ogoni bayuwa larigo dama i waneha daraga hayago piya. Ai andaga dai bia, lene.

30 Wali biago andaga dai bialu hearia ibu waneha dama daraga hayago tagira piyagola wandari biago bayale palearia hendene.

*Agali mbira hale tuluhe bi libilabale bayale henego ogo*

31 Yasu Taia howa dai bialu Saidononibi Tano Piranibi ibaga bialu pialu Galili iba timbuniore bereagoria tagira ibini.✠ 32 Wali agali hearume agali mbira hale tuluhe bi libilabale heago Yasu hearia haru ibini. Tigua haru ibuwa Yasuhanda agali biago gime ela helo lamini.✠ 33 Ani lamiyagola Yasu ibu wali agali bu hearu helalu agali biagola libu haru emene pu hangu howa ibunaga gi hondoneme agali biagonaga hale ela hene. Ani buwa ibugua hamiaga tolowa agali biagonaga hégeni ela halu✠ 34 hari daligaha handa daga halu, Epata, lene. Epata inanaga bi lalu, Hale dugua ha.✠

35 Ani layagola agali biagonaga hale dugua halu ibunaga hége mo bayale hayagola bi bayale lene.✠ 36 Yasuhanda wali agali hearuhondo hongo howa lalu, Áyu handarimigoni wali agalihondo nalamilimu, lene. Wali agalihondo ogonidagua nalamilimu laabo hayagola tigua kedanda howa lamiaabo hene.✠ 37 Tigua mini mogo timbuniore lowa lalu, Ibugua bayuwa dege biyagoni. Hale tulu kago hale mo dugua halu bi libilabale kago bi bayale lelo mo bayale haga ka, lene.✠

✠ 7:15: Ab 10.14-15 ✠ 7:20: Md 15.18, Mg 7.23 ✠ 7:31: Md 15.29-31 ✠ 7:32: Md 9.32, Lg 11.14 ✠ 7:33: Mg 5.23, 8.23, Lg 4.40, 13.13, Yo 9.6 ✠ 7:34: Mg 6.41, Yo 11.33, 11.38, 11.41, 17.1 ✠ 7:35: Ais 35.5-6, Md 11.5 ✠ 7:36: Mg 1.43-45 ✠ 7:37: Ais 35.5



## 8

*Wali agali dewaore daosini mariame (4,000) tomo no karula penego ogo  
(Madiu 15.32-39)*

<sup>1</sup> Horo uruningi wali agali dewa lone ngoai howa ti tomo nolene nawiyagola Yasuhanda ibunaga talima piaga biaruhondo, Ibidaba, lowa tihondo lalu, <sup>2</sup> Wali agali dewa i heba horo tebiru haabo harimagome áyu tomo nolene nawidago dara ho ko. ✧  
<sup>3</sup> Ina, Tí andaga pudaba, laruyagua maru dindi kaundia howa ibini karu ti garibi timbuni lowa hariga obeneni pialu karia de mborere bialu odope habehe ka, lene.

<sup>4</sup> Iibunaga talima piaga biarume ibuhondo ladai bialu lalu, Ina dindi ko yobi wali agali nahaga tomo nawini kamago wali agali bu karuni tomo no karulape nelo iname tomo agiha taibu muleberamabe, lene.

<sup>5</sup> Ani layagola Yasuhanda tihondo lalu, Mberedi agira henedamibe, lene.

Tigua ibuhondo ladai bialu lalu, Mberedi karia henedama, lene.

<sup>6</sup> Ani layagola Yasuhanda wali agali bu hearuni, Dindini birai hadaba, lowa ibugua mberedi karia biaru mo yuwa Ngode Datagaliwabehondo turu halu kaj lowa gaibu бага буwa talima piaga biaruhondo mini. Ani miyagola tigua wali agali biru wiaruhondo ta halu mini. <sup>7</sup> Tigua wena emene mbira mbira heneneyagobi Yasuhanda kaj lowa, Wali agali nelo midaba, lene. <sup>8-9</sup> Wali agali bibahendeme karulape nalu no ibira hayago mialu ibunaga talima piaga biarume nu karia hono tolai hene. Ogoningi wali agali tomo nalu hayadaru dewaore daosini maria (4,000) agima hene. <sup>10</sup> Yasuhanda wali agalihondo, Andaga pudaba, lowa ibu ibunaga talima piaga biaru heba iba taluni bialu Dalamanda dindi pene.

*Agalime nabiagane ale bia, lenego ogo  
(Madiu 16.1-4)*

<sup>11</sup> Perisi agali maru hearu Yasu hearia ibuwa lai lalu hene. Tigua Yasuhanda mbira agi larabe hondole ibuhondo lalu, Ngode Datagaliwabehanda íha howa heneneore birabe hondolomaya ina agalime nabiagane ale mbira bia handa, lene. ✧ <sup>12</sup> Yasuhanda ibunaga bu habaneha mini burugu lowa hi he lowa lalu, Wali agali áyu karume agalime nabiagane ale dege hondole hai bialu kago irane aginagabe. Tihondo henene laro wali agali áyu karume agalime nabiagane ale de hendelo walia naholebira, lene. ✧

<sup>13</sup> Ani lowa ibugua Perisi agali biaru helalu iba taluni lone bialu iba timbuniore bereago domalu dindi edeyagi pene.

*Perisinagabi Herodonagabi mo hiwa hagane mini yidi te laminigo ogo  
(Madiu 16.5-12)*

<sup>14</sup> Yasunaga talima piaga biarume mberedi maru embeda halu mbira hangu hanalu iba taluni pene. <sup>15</sup> Ibugua tihondo hongo howa lalu, Perisi agalinagabi Herodonagabi mo hiwa hagane mini yidi ngago de hondowa bayuwa mamage ho halimu, lene. ✧

<sup>16</sup> Ani layagola hale howa tini hangume laga laga bialu lalu, Ibugua o laragoni iname mberedi nahene ibirimago lara, lalu hene.

<sup>17</sup> Tigua ani layagola manda buwa Yasuhanda tihondo lalu, Tigua mberedi nahene ibirimada lowa lalu kami agibe. Ti manda nabi haabo howa tinaga bu mini giambe hayabe. ✧ <sup>18-19</sup> Tinaga de bayale howa de nahende halu tinaga hale bayale howa hale nahe kamibe. Mberedi homane duria wali agali daosini duriambe (5,000) no karula pelo gaibu бага birugo mitangi nabi kamibe. Ti nalu ibira hayagola mberedi no ibira hayago nu agira hono tolo hanarimiyabe, lene. ✧

Ani layagola tigua ibuhondo ladai bialu lalu, Nu homberia (12) hanarima, lene.

✧ 8:2: Md 15.32-39, Mg 6.34-44 ✧ 8:11: Md 12.38, Lg 11.16, Yo 6.30 ✧ 8:12: Md 12.39, Lg 11.29 ✧ 8:15: Lg 12.1 ✧ 8:17: Mg 6.52 ✧ 8:18-19: Yar 5.21, Ese 12.2, Mg 4.12, Ab 28.26

<sup>20</sup> Tigua ani layagola ibugua lalu, Wali agali daosini mariame (4,000) nelo mberedi karia gaibu baga birugo no ibira hayago nu agira hono tolo hanarimiyabe, lene.

Tigua ibuhondo ladai bialu lalu, Nu karia hanarima, lene.

<sup>21</sup> Ibugua tihondo lalu, Tí manda nabi haabo kamigo agibe, lene.

*Agali mbira de kohe mo dabi henego ogo*

<sup>22</sup> Ti dindi ogoni yu wahalu Bedesaida anda pene. Anda piyagola agali marume agali mbira de kohe heago Yasu hearia haru ibuwa ibuhondo lalu, Agali ogoni í gime ela habelo haru íbu kama, lene. <sup>23</sup> Ani layagola Yasuhanda agali de kohe biago gime yalu anda bu heagoria howa tagira haru pene. Ibugua agali de kohe heagonaga deni hamiaga tolo ba howa ibu gime ela halu agali biagohondo lalu, Mbirale mbira hendedebe, lene.

<sup>24</sup> Ani layagola agali biagome dengalowa lalu, Agali ira ale ibaga bialu kago de hendedo, lene.

<sup>25</sup> Ani layagola Yasuhanda agali biagonaga deni lone ela hayagola ibunaga de bayale halu mbirale bibahende de handai hene. <sup>26</sup> Ani biyagola Yasuhanda agali biagohondo lalu, Anda dewa bu kagoria dai nabi íni andaga puabo habe, lene.

*Pidahanda, Mbiralí Dabo Helenego ibulebira lowinigo íore kegoni, lenego ogo*  
(Madiu 16.13-20, Lugu 9.18-21)

<sup>27</sup> Yasu ibunaga talima piaga biaru heba dindi ti hayagoni yu wahalu Sisaria Pilibai-hayagi ibaga bialu pene. Pialu howa ibugua ibunaga talima piaga biaruhondo lalu, Wali agali karume í ai ka lalu kabe, lene.

<sup>28</sup> Ani layagola tigua ibuhondo ladai bialu lalu, Wali agali marume, Baboraya biaga Yone ka, lalu marume, Elaya ka, lalu marume, Ngode Datagaliwabe bi mana latagi haga agali mbira ka, larago, lalu lamini.✧

<sup>29</sup> Ani lamiyagola ibugua tihondo lalu, Tígua í ai ka lalu kamibe, lene.✧

Pidahanda ibuhondo ladai bialu lalu, Mbiralí Dabo Helenego ibulebira lowinigo íore kegoni, lene.

<sup>30</sup> Ani layagola Yasuhanda tihondo hongo howa lalu, Íni kogonigo wali agali karu nalamilimu, lene.

*Yasuhanda ibuni tandaga nalu homolenenaga te lenego ogo*  
(Madiu 16.21-28, Lugu 9.22-27)

<sup>31</sup> Yasuhanda ibunaga talima piaga biaru lawai halu lalu, Agali Hole Ibiyago ibu tandaga timbuni nolebira. Agali ala hene miniwi karubi loma binigo mo miaga haguane karubi Mana lowinigo lawai haga karubi tigua ibu hame nalolebira. Tigua ibu homelo baragola homalu horo kiru howa tebonengi ibuni mo heya holebira, lene.✧ <sup>32</sup> Ibugua bi ogoni tigatiga lamiyagola Pidahanda Yasu haru pu bagi howa talialu lalu, Ani nalabe, lene.

<sup>33</sup> Ani layagola Yasu ibu beregedalu ibunaga talima piaga biaru handaya howa ibugua Pida talialu lalu, Dama Heyolabe í kogoria nahe pu. Ngode Datagaliwabehanda manda bidadagua ndo agalime manda biagadagua manda bide, lene.

<sup>34</sup> Ani lowa ibugua wali agali hearubi ibunaga talima piaga biarubi, Tí bibahende ibidaba, lowa tihondo lalu, Mbiralime í porodagua ibua ho kayagua nde ibuni hame ledago mitangi nabi ibuninaga ira banga yalu í talima ibulene nga.✧ <sup>35</sup> Mbiralime ibuninaga holene ngago mo tene hayagua nde holene ogoni ereba hai holebira. Mbiralime íbi inaga bi mana debenebi mo tene howa ibuni holene wahayagua ogoni ibu holene bayale yu holebira.✧ <sup>36</sup> Mbiralime dindi bibahendeni ngaru mo teneho kaore ibuninaga holene maro biyagua ibu biamogo bulebiraore. Biamogo nabulebiraore.

✧ 8:28: Mg 6.14-15, Lg 9.7-8 ✧ 8:29: Md 16.16, Mg 9.9, Yo 6.68-69, 11.27 ✧ 8:31: Md 17.22 ✧ 8:34: Md 10.38-39, Lg 14.27 ✧ 8:35: Lg 17.33, Yo 12.25

<sup>37</sup> Ibuninaga holenege lone mo yu dai bule ibugua mbira bibe naheore. <sup>38</sup> Wali agali Ngode Datagaliwabe mana hale nahaga karubi ko biaga karubi hondowa mbiralime *ĩ* minibi *ĩ*naga bi manabi lamulene taga hayagua Agali Hole Ibiyago ibu Abanaga wá holene taraorebi Ngode Datagaliwabenaga dahuliyali loma bia henerubi heba dai birangi ibugua nde o biago hondowa taga holebira, Yasuhanda lene.✧

## 9

<sup>1</sup> Ibugua tihondo lamialu lalu, Henene larogo. Tí maru kamigo nahome kamiore Ngode Datagaliwabehanda Handame Ho Holene hongo howa tagira ibiragola de hondoleberami, lene.✧

*Yasu mo tara ho hearia ti de hendenege ogo*  
(Madiu 17.1-13, Lugu 9.28-36)

<sup>2</sup> Horo waragaru howa Yasuhanda Pida Yamese Yone imaru tini hangu hole hari timbuni mbira weagoria haru iraga ho hene.✧ <sup>3</sup> Tigua handalu hearia Yasu ibuni tingini mo tara howa ibunaga aga pewele dindi bibahendeni karume aga wayawaya bo ngaligobi ndo pele de mborerebiore hene.✧ <sup>4</sup> Ani biyagola talima piaga tebira biarume handalu hearia Elaya Mosesela Yasu heba te lalu hearia tigua de hendene. <sup>5</sup> Ani bialu heagola Pidahanda Yasuhondo lalu, Lawai haga-o ina ogoria kamagoni bayaledago ina tebirali kamagome nemanda tebira beramabe. Nemanda mbira *ĩ*naga mende Mosesenaga tebone Elayanaga lowa bia harama, lene. <sup>6</sup> Ti tebirali biarume gi timbuni howa Pida ibugua agi loabe toba howa bi ogonidagua lene.

<sup>7</sup> Ani lalu heaore beraliba mbirame ti mo ge howa bi mbira beralibaha howa ladali halu lalu, *ĩ* Iginioire ogoni gubalini ho kogo ibugua bi larago hangu hale halimu, lene.✧

<sup>8</sup> Ani hale howa tigua abale de handa deḷe bialu hearia agali maru nahende Yasu dege hearia hendene.

<sup>9</sup> Ti harini dalialu howa Yasuhanda tihondo hongo howa lalu, Áyu handarimigo mbirali nalamilimu. Agali Hole Ibiyago tongolo muwa ibuni mo heya haragola dege lamilimu, lene.✧

<sup>10</sup> Yasuhanda ani layagola tigua hale howa maru nalami hene. Tini hangu howa, Agali tongolo minigo agua mo heya holobadabe, lowa te lalu hene. <sup>11</sup> Tigua ibuhondo lalu, Mana lowinigo lawai haga karume Elaya ala ibulebira lalu kago irane agidabe, lene.✧

<sup>12</sup> Ibugua tihondo lalu, Bibahende manda manda bule Elaya ibugua ala ibulebiraore. Anduane Homogonaga mbugani lo ngago ogo, Agali Hole Ibiyago ibugua tandaga timbuniore nalu maru karume ibuhondo handabe manga holebira, lalu gilibu ngago irane agibe.✧ <sup>13</sup> Elaya ala ibiyago langero. Ibu ibiyagola Anduane Homogonaga mbugani bi gilibu winigo ngadagua maru hearume ibuhondo tini hame leadagua bigibigi bini, lene.✧

*Yasuhanda igiri mbiraha dama daraga hearia wara tagi henego ogo*  
(Madiu 17.14-21, Lugu 9.37-43)

<sup>14</sup> Yasunaga talima piaga maru biarubi wali agali dewabi ti haru ngoai ho hearia Mana lowinigo lawai haga hearume ti baba lai lalu hearia Yasu Pida Yamese Yone imaru ibalu de hendene. <sup>15</sup> Wali agali dewa biarume Yasu hondowa mogo lalu ibu hearia gerai puwa tigua ibuhondo, Ani haribe, lene. <sup>16</sup> Ani layagola ibugua tihondo lalu, Tí aginaga lai lalu kamibe, lene.

<sup>17</sup> Agali mbirame ibuhondo ladai bialu lalu, Lawai haga-o *ĩ* iginiha dama daraga howa bi nalagago *ĩ* heria haru ibiru. <sup>18</sup> Dama igiri ogoniha daraga howa ibu mo pila halu

✧ 8:38: Md 10.33, Lg 9.26, Lm 1.16, 2 Ti 1.8 ✧ 9:1: Md 16.28, 24.30, 24.34, Mg 13.30, Lg 9.27, 22.18 ✧ 9:2: 2 Pi 1.17-18 ✧ 9:3: Dan 7.9 ✧ 9:7: Man 18.15, Md 3.17, Mg 1.11, Lg 3.22, Ab 3.22 ✧ 9:9: Md 12.16, Mg 8.30 ✧ 9:11: Mal 4.5, Md 11.14 ✧ 9:12: Iba 22.1-18, Ais 53.3, Dan 9.26, Mal 4.5, Lg 23.11, Pb 2.7 ✧ 9:13: Md 11.14, 17.12, Lg 1.17

ne harigaha hangiau pudu haea bialu ne gingiri gengero lalu ibunaga tingini hiribula haga. Inaga talima piaga biaruhondo, Dama daraga kago wara tagi hadaba larugola tigua wara tagi habe naheya, lene.

<sup>19</sup> Ani layagola Yasuhanda tihondo lalu, Wali agali tí Ngode Datagaliwabehondo mini mbiraore nawi kamiruha i horo agiru haabo holiyadabe. Ina tí heba howa horo agiru tínaga genda yu haabo holiyadabe, lene. Ani lowa, Igiri biago i kogoria haru ibidaba, lene. <sup>20</sup> Ani layagola tigua igiri biago ibu hearia haru ibini.

Haru ibiyagola damame Yasu hondowa igiri biago mo biango bibi bia hene. Igiri biago dindini pilowa pedere pedere bialu ne harigaha howa hangiau puda tagitagi bini. <sup>21</sup> Ani biyagola Yasuhanda igiri biago abahondo lalu, O biragoni pigane angi howa binibe, lene.

Ibu abahanda ladai bialu lalu, Ibu igiri emeneoreni howa bini. <sup>22</sup> Damame igiri ogoni homelo ira dedagoriabi ibahabi mo pila haabo hagago ina mbira bibeheyagua nde iya dara halu biamogo berene, lene.

<sup>23</sup> Yasuhanda ibuhondo lalu, Mbira bibeheyagua larigo mbiralime Ngode Datagaliwabehondo mini mbiraore wu kayagua bibahende biai habehe kagoni, lene.✧

<sup>24</sup> Ani layagola ibu abahanda lalu, Ngode Datagaliwabehondo mini mbiraore wia ngogo nakarulapedago mini mbiraore wuliya ina mo hongo halu biamogo biaha, lene.✧

<sup>25</sup> Wali agali dewa gerai lalu ibalu heago hondowa Yasuhanda dama talialu lalu, Hale mo tulu hagabi bi mo libilaba laga dama ihondo hongo howa larogo tagira pu. Igiri ogoni ibuha lone hole dai nabibe, lene.

<sup>26</sup> Ani layagola dama biagome ga lalu igiri biago homene ale ho ngelalu tagira pene. Igiri biago homene ale wiago hondowa wali agali dewame, Ibu tongolo miyada, lene.✧

<sup>27</sup> Ani layagola Yasuhanda igiri biagonaga gini yuwa mo heya hayagola heyini.

<sup>28</sup> Ani bialu Yasubi ibunaga talima piaga biarubi ti andaga puwa tini hangu howa tigua ibuhondo lalu, Iname dama wara tagi habe nahe harimago irane agidabe, lene.

<sup>29</sup> Ani layagola Yasuhanda ladai bialu lalu, Mbirale mbira beremigome ndo Ngode Datagaliwabehondo bi laramigome dama ogoni ale wara tagi holene nga, lene.

### *Yasu ibuni homolenenaga te halu mende lenego ogo*

*(Madiu 17.22-23, Lugu 9.43-45)*

<sup>30-31</sup> Yasu ibunaga talima piaga biaruhondo heba dindi ogoni wahalu Galilini puabo halu hene. Ibugua ibunaga talima piaga biaruhondo lawai halu heago wali agali hearume ti agoha kabe manda nabilo puabo halu hene. Ibugua tihondo lawai halu lalu, Agali Hole Ibiyago agalime minu mulebira. Minuwa tigua ibu homelo bolebira. Homelo baragola howa horo tebonengi ibuni mo heya holebira, lalu lamini.✧✧

<sup>32</sup> Ibugua bi ani layago hale howa tigua manda nabi howa ibuhondo, Irane langi, lolene gi hene.✧

### *Bolangua ho kago aibe, lenego ogo*

*(Madiu 18.1-5, Lugu 9.46-48)*

<sup>33</sup> Ti Kabaniama anda bu heagoria anda pene. Yasu anda mbira heago tamuha howa ibugua tihondo lalu, Harigani ibalu howa tini te agi dege lama ibirimibe, lene.

<sup>34</sup> Ani layagola ti harigani ibalu howa, Ina kamago bolangua howa duniniore ai ibu holobadabe, lama ibirimigo tigua ibuhondo ladai nabi hene.✧ <sup>35</sup> Ibu biruwa homberiali (12) biaruhondo, Ibidaba, lowa tihondo lalu, Mbira bolangua howa duniniore hoa biyagua nde ala ibu emene halu bibahende biamogo bulene nga, lene.✧ <sup>36</sup> Ani lowa ibugua igiri emene gini yamialu ti hearia haru ibuwa tinaga wanakuihayagi helowa

✧ 9:23: Md 17.20, 21.21, Mg 11.23, Lg 17.6, Yo 11.40 ✧ 9:24: Lg 17.5 ✧ 9:26: Mg 1.26 ✧ 9:30-31: Yo 7.1  
✧ 9:30-31: Mg 8.31, 10.32-34 ✧ 9:32: Lg 9.45, 18.34 ✧ 9:34: Lg 22.24 ✧ 9:35: Md 20.26-27, 23.11, Mg 10.43-44, Lg 22.26

tihondo lalu, <sup>37</sup> Mbiralime inaga minini howa igiri emene ogoni biagobihondo, Ila habiya ibu, layagua ihondobi, Habiya ibu, lara. Ani buwa mbiralime ihondo, Ila habiya ibu, layagua i, Pu, layagohondobi, Ila habiya ibu, lara, lene.\*

*Ina baba waitigi ndo karu ina aria ka, lenego ogo*  
(Lugu 9.49-50)

<sup>38</sup> Yonehanda ibuhondo lalu, Lawai haga-o agali mbirame inaga minini howa dama daragahe hearu wara tagi halu hearia iname hondowa, Nabi waha, larima. Irane agali ogoni ibu ina aria ndoyanenaga lamirima, lene.\*

<sup>39</sup> Ani layagola Yasuhanda tihondo ladai bialu lalu, Mbiralime ani biragola, Nabibe, nalalimu. Ibugua inaga minini howa agalime nabiagane alego biyagua nde mani i mege bibe nahe holebira.\* <sup>40</sup> Mbiralime ina baba waitigi ndo kago ina aria ka.\* <sup>41</sup> Tihondo henene larogo inaga minini kamiru hondowa mbiralime ti iba nalimulo ngiyagua ibuhondo emena mulene ngago mulebiraore, lene.\*

*Ina ko mo bia holene te lenego ogo*  
(Madiu 18.6-9, Lugu 17.1-2)

<sup>42</sup> Yasuhanda lalu, Mbiralime waneigini emene ogonibi ihondo mini mbiraore wu kago hado wahelo ko mo bia hayagua ege tole timbuni ngago pumeibunaga mani pongo bia howa agali ogoni tole heba iba timbuni bedagoha bape hayagua nde karulape ogoni.

<sup>43-44</sup> Ininaga gi mendegome ini mo pila hayagua gi ogoni gandulo wahabe. Gi mbiraore hangu howa haabobo holene ngatoria polene bayale nga. Gi kirabali howa heli dindi polene ogoni bayale ndo.\* <sup>45-46</sup> Inaga ge mendegome i mo pila hayagua ge ogoni gandulo wahabe. Ge mbiraore hangu howa haabobo holene ngatoria polene bayale nga. Ge kirabali howa heli dindi polene ogoni bayale ndo. <sup>47</sup> Inaga de mendegome i mo pila hayagua halu wahabe. De mbiraore hangu howa Ngode Datagaliwabehanda Handame Ho Kagoria polene bayale nga. De kirabali howa heli dindi polene ogoni bayale ndo.\*

<sup>48</sup> Dindi ogoriani himi nahomagabi ira hundia nabiagabi nga.\*

<sup>49</sup> Tomo mbira lomabu delalu howa Ngode Datagaliwabe deni bayale helo ibi tomoni ibira halu delagadagua ira dedagome wali agali bibahendeni ibira holebira.\*

<sup>50</sup> Ibi bayale ngago ibunaga dende ereba hayagua tigua agime mo dende bia holeberamibe.\*

Tinaga bu habaneha ibi halu wali agali heba howa mo palia holene karulo halimu, lene.

## 10

*Agalinime one waholene nawi, lenego ogo*  
(Madiu 19.1-12, Lugu 16.18)

<sup>1</sup> Yasuhanda bi ani lowa ibu dindi ogoni wahalu Yudia dindi anda pialu iba Yodana doma ede halu ange edeyagi pene. Piyagola wali agali dewa ibu hearia ngoai hayagola ibugua mana lawai hayadagua lone ti lawai halu hene.

<sup>2</sup> Ani biyagola Perisi agali maru hearume ibu hearia ibuwa Yasu ibugua mbira agi larabe hondole tigua ibuhondo lalu, Inanaga Mana lowini ngagome agali mbiralime ibu one waholene nga lalu lo ngabe nawibe ina langi, lene.

<sup>3</sup> Ani layagola ibugua tihondo ladai bialu lalu, Mosesehanda tihondo agi bilimu lowinibe, lene.

<sup>4</sup> Tigua lalu, Mosesehanda lo wialu lalu, Agalinime one wahole lalu bebani gili bialu ibu onehondo muwa waholene nga, lowini, lene.\*

\* 9:37: Md 10.40, Lg 10.16, Yo 13.20    \* 9:38: Dag 11.27-29, Lg 9.49    \* 9:39: 1 Ko 12.3    \* 9:40: Md 12.30, Lg 11.23    \* 9:41: Md 10.42    \* 9:43-44: Md 5.30    \* 9:47: Md 5.29    \* 9:48: Ais 66.24    \* 9:49: Ese 43.24  
\* 9:50: Md 5.13, Lg 14.34-35, Lm 12.18, Eb 4.29, Kl 4.6, Hi 12.14    \* 10:4: Man 24.1-4, Md 5.31



<sup>5</sup> Yasuhanda tihondo lalu, Mosesehanda t́naga bu mini giambe ho hemigo hondowa bi ogoni gilibu winida. <sup>6</sup> Ngode Datagaliwabehanda pigane wabiyangi ibunaga mbugani lo ngadagua ogo, Wali agalila kirali wabini.✧ <sup>7</sup> Irane ogonigo agali mbirame ibu aba aiyala helalu ibu onela mandagi howa✧✧ <sup>8</sup> libu mbiraore ho holebira, lalu gilibu nga. Anigo libu kira henego ai kira ndo mo mbiraore holebira. <sup>9</sup> Ngode Datagaliwabehanda wali agali mo mbiraore hayago mbiralime mo hangu hangu ho helolene nawi, lene.

<sup>10</sup> Ti andaga daibu biruwa Yasunaga talima piaga biarume ibuhondo lalu, Te larigo irane aginaga lalu laribe, lene. <sup>11</sup> Ani layagola ibugua tihondo lalu, Agali mbirame ibu one wahalu wali mende dabu bu aribia hayagua ibugua wali mende biago kayu biragoni.✧ <sup>12</sup> Wali mbirame ibu agalini wahalu agali mende piyagua ibugua agali kayu biragoni, lene.

*Yasuhanda waneigini emene mo turu henego ogo  
(Madiu 19.13-15, Lugu 18.15-17)*

<sup>13</sup> Wali agali maru hearume tinaga waneigini Yasuhanda gime ela helo ibu hearia haru ibiyagola ibunaga talima piaga biarume ti talialu lalu, Haru naibidababe, lene. <sup>14</sup> Ani layago hondowa Yasuhanda tihondo keba howa lalu, Waneigini i kogoria ibilo natalidababe. Ngode Datagaliwabehanda Handame Ho Kagoria waneigini urubi karunaga ka.✧ <sup>15</sup> Tihondo larogo manda bilimu. Waneiginime Ngode Datagaliwabehanda Handame Ho Kagoria hoa hagadagua hoa nahe karume nde anda napolebira, lene.✧ <sup>16</sup> Ani lowa ibugua waneigini hangu hangu taba yuwa gime ela lalu lalu, Ngode Datagaliwabehanda biamogo bilo laro, laga bialu hene.

*Agali homogo mbira henego ogo  
(Madiu 19.16-30, Lugu 18.18-30)*

<sup>17</sup> Yasu ibu wene harigani pole pialu hearia agali mbirame gerai lalu ibuwa ge duli hanga ho biruwa lalu, Lawai haga bayale-o i haabobo holene yule agi buabe, lene.

<sup>18</sup> Ani layagola Yasuhanda ibuhondo ladai bialu lalu, Ina i bayale larigo agibe. Mbirali bayale nahe Ngode Datagaliwabe ibuni hangu bayale ka. <sup>19</sup> Bi mana lowini ngago manda bu kegoni maru uru, Wali agali homelo nababe. Wali agali kayu nayabe. Mbirale page nabibe. Ke howa diba ede nahabe. Mbirale page bule mo hondo nahabe. Aba aiyala mo yo handa nabi laradagua hale lalu bibe, lo nga, lene.✧

<sup>20</sup> Ani layagola ibugua Yasuhondo lalu, Lawai haga-o bi o lariruni bibahende ina igiri emeneoreni howa biai harugoni, lene.

<sup>21</sup> Ani layagola Yasuhanda agali biago gubaliniore lalu ibu handaya howa lalu, Mbiraore dege nakarulape kego inaga mbirale wiruni bibahende yolo miai hole pu. Ani buwa muni ngiraru yagibano karu mo meregola dahuliya andagani homogo holene inaga wulebira. Ani buwa i porodagua talima ibabe, lene.✧ <sup>22</sup> Agali biagome Yasuhanda bi layago hale howa ibunaga wanakui hila dali hene. Irane ibu homogo gibi henegonaga genda lalu pene.

<sup>23</sup> Ani biyagola Yasuhanda ibunaga talima piaga biaruni de handaya howa tihondo lalu, Wali agali homogo karume Ngode Datagaliwabehanda Handame Ho Kagoria anda polene erekuibiore wulebira, lene.✧

<sup>24</sup> Ani layagola hale howa ibunaga talima piaga biarume mogo lene. Yasuhanda tihondo lalu mende lalu, I iginiru-o Ngode Datagaliwabehanda Handame Ho Kagoria anda polene erekuibiore wulebira. <sup>25</sup> Nogo kameleme hali diriha anda polene erekuibi lowa homogo karume Ngode Datagaliwabehanda Handame Ho Kagoria anda polene erekuibiore wulebira, lene.

✧ **10:6:** Pig 1.27, 5.2 ✧ **10:7:** 1 Ko 6.16, Eb 5.31 ✧ **10:7:** Pig 2.24 ✧ **10:11:** Md 5.32, 1 Ko 7.10-11 ✧ **10:14:** 1 Ko 14.20, 1 Pi 2.2 ✧ **10:15:** Md 18.3 ✧ **10:19:** Har 20.12-16, Man 5.16-20, 24.14, Ya 5.4 ✧ **10:21:** Md 6.19-20, 10.38, Mg 8.34, Lg 12.33 ✧ **10:23:** Md 19.23, Mg 4.19, Lg 18.24, 1 Ti 6.17

<sup>26</sup> Ani layagola ibunaga talima piaga biarume mogo lai howa tini hangu hangu laga laga bialu lalu, Aiwa pele mulene yu holebirabe, lene.

<sup>27</sup> Ani layagola Yasuhanda ti handaya howa lalu, Wali agalime bibe nahe ngago Ngode Datagaliwabehanda mbirale bibahende biai habeheore kagoni, lene.✧

<sup>28</sup> Ani layagola Pidahanda lalu, Ai handa. Iname inanaga mbirale bibahende wahai halu í piridagua talima ibirimagoni, lene.

<sup>29</sup> Ani layagola Yasuhanda tihondo lalu, Henene larogo mbiralime ibi inaga bi mana debenebi mitangi bialu ibunaga andaru hameneru mbalibuniru aiyaru abaru waneiginiru dindiriu yu wahalu piyagua <sup>30</sup> anda dewaru hamene dewaru mbalibuni dewaru aiyu dewaru waneigini dewaru dindi dewaru áyu dindini ka tambu Ngode Datagaliwabehanda ibuhondo dewaore mulebira. Ani wu kagola marume ibu mo tandaga holebira. Ani biragola nde awe ibugua haabobo holene yu holebira.✧ <sup>31</sup> Áyu bamba ho karu mani ti maha holebira. Áyu maha karu mani ti mo bamba ho holebira, lene.✧

*Yasu ibuni homolenenaga te halu tebone lenego ogo*  
(Madiu 20.17-19, Lugu 18.31-34)

<sup>32</sup> Yasubi ibunaga talima piaga biarubi ti Yarusaleme harigani pole pialu howa Yasu ibu mo bamba halu pene. Ani biyagola ibunaga talima piaga biarume mogo lowa handawa bima mama pene. Maru mahaore piyarume gi hama pene. Yasu ibunaga talima piaga homberiali (12) biaru ti hangu pu bagi howa ibugua awe agalime ibuhondo bulebiragonaga te tihondo lamini.✧ <sup>33</sup> Ibugua tihondo, Hale hadaba, lowa, Ina Yarusaleme poramagoha loma binigo mo miaga haguane karubi Mana lowinigo lawai haga karubi tigua Agali Hole Ibiyago minilo mbiralime minu mulebira. Minu miragola tigua ibu homelo bolene nga manda buwa Yu agali ndo agali tara karuhondo minu mulebira. <sup>34</sup> Minu miragola tigua ibu mege bialubi hamiaga tolo ba halubi tibume balubi homelo bolebira. Ani biragola horo tebonengi ibuni mo heya holebira, lalu lamini.

*Yamese Yonelame timbuni holene tai binigo ogo*  
(Madiu 20.20-28)

<sup>35</sup> Sebedi igini Yamese Yonela Yasu hearia ibini. Ibuwa libugua ibuhondo lalu, Lawai haga-o iyame mbira mitangi bidabagobi ina langibelo hamelo kabagoni, lene.

<sup>36</sup> Ani layagola ibugua libuhondo ladai bialu lalu, Agi languliyana hamelo kabibe, lene.

<sup>37</sup> Ani layagola libugua ibuhondo ladai bialu lalu, Ina Handame Ho Holenenaga mini daliga taraore karularengi iya mendealime inaga gi tighayagi biralu mendealime inaga gi lehayagi birulubaya biralibu labelo hamelo kaba, lene.

<sup>38</sup> Ani layagola Yasuhanda igiri biago labohondo lalu, Libugua bi laribigoni manda nabi howa lope haribi. Beha iba tandagabi bedago ina nole kogo libugua nabehe kabibe. I baboraya bule kogo libu bibehe kabibe, lene.✧

<sup>39</sup> Ani layagola libugua ibuhondo ladai bialu lalu, E ani bibehe kabagoni, lene.✧

Ani layagola Yasuhanda libuhondo lalu, Ina beha howa noleberogo libuguabi noleberabiore. I baboraya buleberogo libuguabi buleberabiore. <sup>40</sup> Anigo libugua mendealime inaga gi tigaha mendealime inaga gi leha lowa biralibulo dabolene i ndo kogoni. Ngode Datagaliwabehanda mbirali berelonaga manda manda bu ngago ibu hangu birulebira, lene.

<sup>41</sup> Talima piaga maru pirali biarume Yamese Yonelame bi ani layago hale howa keba ho hene. <sup>42</sup> Ani biyagola Yasuhanda, Tí homberiali (12) bibahende ibai hadaba,

✧ 10:27: Yar 32.17, Lg 1.37 ✧ 10:30: 2 Bit 25.9, Lg 18.30 ✧ 10:31: Md 20.16, Lg 13.30 ✧ 10:32: Mg 8.31, 9.31

✧ 10:38: Mg 14.36, Lg 12.50 ✧ 10:39: Ab 12.2, Mo 1.9

lowa lalu, Yu wali agali ndo tara taranaga handame haga karume wali agali hongo howa handame haga ka. Ani buwa tinaga haru haga karume wali agali dara nahe hongo hangume haru hai haga ka manda bidami.✧ 43 Ogoni biradagonigo ani bilowa tí kamigome mbira ani bulene henge nawiore. Tí kamigoni mbiralime timbuniore hoa biyagua maru karunaga biabe bia haga holene nga.✧✧ 44 Ani buwa mbiralime ibu mo duniniore hoa biyagua ibugua tinaga garabaya biabe ale bia haga holene nga. 45 Ogonidagua Agali Hole Ibiyago wali agalime ibunaga biabe bia halimulo ndo ibugua tinaga biabe bia halu ibunaga holene wali agali bibahendenaga pela hole ibiya, lene.✧

*Yasuhanda Badimaisa de kohe mo dengala henego ogo  
(Madiu 20.29-34, Lugu 18.35-43)*

46 Ani lalu howa ti ibalu Yarigo anda pene. Anda pu howa Yasubi ibunaga talima piaga biarubi wali agali dewa hearubi ti haru Yarigo wahalu pialu hearia agali mbira Dimaisa igini Badimaisa de kohe henego ibu tomo munibi ngidaba lalu hariga leneha biraabo haga berene. 47 Marume, Nasareteali Yasu ibira, layuagola hale howa ibugua olowa lalu, Debidi igini Yasu-o ñ dara howa biamogo bia, lene.✧

48 Ani layagola wali agali biarume ibu talialu lalu, Bi nale waha, lene. Tigua ani layagola ibu donge howa dalimu olalu lalu, Debidi igini-o ñ dara howa biamogo bia, lalu laabo hene.

49 Ibugua ani layagola Yasuhanda ema nabi hondo howa wali agali biaruhondo lalu, Ibu ñ kogoria ibilo oladaba, lene.

Ani layagola tigua agali de kohe biago olowa ibuhondo lalu, Ibugua ñ olalu íbu larago heya, lene.

50 Ibugua aga mbira yu biragago golo wahalu abale heyalu Yasu hearia ibini.

51 Ibiyagola Yasuhanda ibuhondo lalu, Ina íhondo mbira agi buliya hamelo kebe, lene.

Ani layagola agali de kohe biagome ibuhondo lalu, Lawai haga-o lone de hondoa ko, lene.

52 Ani layagola Yasuhanda ibuhondo lalu, Íni Ngode Datagaliwabhondo mini mbi-raore wirigome ínaga de mo ngala hayago ai pamia, lene.

Ani layaore agali biago ibunaga de abaleore dabi halu de handabehe howa ibu Yasu piyadagua talima pene.✧

## 11

*Yasu Handame Haga Kini ale howa Yarusaleme anda penego ogo  
(Madiu 21.1-11, Lugu 19.28-40, Yone 12.12-19)*

1 Ti Yarusaleme anda polene kaware ngelowa dindi Bedabayabi Bedanibi Hari Olibe weagoria emene kaware pene. Pialu howa ibugua ibunaga talima piaga kirali bamba halu pelo libuhondo, Ogodagua pudaba, lowa lalu, 2 Dindi amugoniha anda bu kagoria anda pialu kabiria nogo dongi igini mbira ala mbirame naberene dariba karia de hondoleberabi. Dongi ogoni hadalu ogoria haru dai bilibu. 3 Mbiralime libuhondo lalu, Agi bule hadarabibe, layagua ibuhondo bi ogodagua lalibu, Anduane Homogo kagome ogoriani biralu polene ngagola hadaraba. Ibugua abale haru dai bidaba lolebira, lalibu, lene.

4 Ani laya handala libu pialu hearia hariga gibuniha nogo dongi igini anda haneni dariba hearia de hondowa hadene. 5 Hadayagola wali agali hearume libuhondo lalu, Agi bule nogo dongi igini ogoni hadarabibe, lene.

6 Libugua Yasuhanda lamilibu layadagua lamiyagola tigua, Haru pudaba, lene.

7 Libugua nogo dongi igini biago Yasu hearia haru dai biyagola ti hearume nogo dongi igini biagoni aga dunga hayagola Yasu iraga ho berene. 8 Ani biyagola wali

✧ 10:42: Lg 22.25-26 ✧ 10:43: Lg 9.48 ✧ 10:43: Md 23.11, Mg 9.35, Lg 22.26 ✧ 10:45: Yo 13.14, Pb 2.7, 1 Ti 2.5-6 ✧ 10:47: Md 9.27, 15.22 ✧ 10:52: Md 9.22, Mg 5.34

agali marume tinaga aga harigani dunga haga bialu marume ira magane yuni dewahe dibuwa harigani dunga haga bini. <sup>9</sup> Wali agali dewa bu hearume Yasu piyago buhayagi bamba halu piyarumebi maha ibiyarumebi awa lama pialu howa lalu, Ngode Datagaliwabenaga mini yaraga hama. Mbirali Anduane Homogonaga minini howa ibirago Ngode Datagaliwabehanda ibu mo turu helo larama. ✧ <sup>10</sup> Ina mama Kini Debidihanda handame ho henedagua ibugua nde ani handame helo larama. Ngode Datagaliwabenaga mini yaraga hama, lalu lama pene.

<sup>11</sup> Yasu ibu Yarusaleme anda puwa Anduane Homogonaga anda heagoha anda pene. Ibugua bibahende wiaru de handai howa ne laya handala tagira pialu talima piaga homberiali (12) biaru heba Bedani pene.

*Yasuhanda poge ha henego ogo*  
(Madiu 21.18-19)

<sup>12</sup> Horo mendengi ti Bedani howa dai bialu hearia Yasu hina garibi lene. <sup>13</sup> Garibi layagola ibu emene kaundia howa poge mbira yuni dewahe heago de hondowa lini dedabe nadedabe hondo pene. Hondo piyaria lini mbira nade yuni dege dewa hearia de hendene. De handalu hearia poge lini dolengi ndo yuni hangu ma bu hearia hendene. ✧

<sup>14</sup> Ibugua poge biago ha halu lalu, Wali agalime inaga liniore lone nanolebira, lene. ✧  
Ani layagola ibunaga talima piaga biarume hale hai hene.

*Yasuhanda Anduane Homogonaga andaha puwa binigo ogo*  
(Madiu 21.12-17, Lugu 19.45-48, Yone 2.13-22)

<sup>15</sup> Yasubi ibunaga talima piaga biarubi ti Yarusaleme anda pene. Anda puwa Yasu ibu Anduane Homogonaga andaha anda pialu yolo mulebi yolo bialubi hearu bo ba tagitagi bialu hene. Muni ariari biaga hearunaga dagiabi ega malibu ale yolo biaga hearunaga biragane wiarubi mo indi ande lalu beregedai hene. ✧ <sup>16</sup> Ibugua wali agali hearuhondo lalu, Anduane Homogonaga anda ibule hariga ibidadagua tigua mbirale yalu naibalimu, lene. <sup>17</sup> Ani lowa ibugua tihondo mana lawai halu lalu, Anduane Homogonaga ibunaga mbugani bi lo ngago ogo, Inaga anda kago wali agali dindi tara tarani bu karume Ngode Datagaliwabehondo bi lagane anda kagoni, lolebira, lalu gilibu nga. Tigua pagebibi karu ha do hagane anda bu hinu helarimidagoni, lene. ✧

<sup>18</sup> Ani bira, layagola hale howa loma binigo mo miaga haguane hearubi Mana lowinigo lawai haga hearubi tigua Yasu bo wahole henge hai bialu hene. Yasuhanda mana lawai hayago hale howa wali agali bibahende bu hearume, Gibiore larago, lowa minime mogo lai ho berene. Ani mogo layago hondowa loma binigo mo miaga haguane biarubi Mana lowinigo lawai haga biarubi tigua Yasu hondowa gi ho hene. ✧

<sup>19</sup> Ne laya handala Yasubi ibunaga talima piaga biarubi ti Yarusaleme wahalu pene.

*Poge gau layagonaga te laminigo ogo*  
(Madiu 21.20-22)

<sup>20</sup> Horo mendengi egerebagiore hayagola ti dai bialu howa poge biago yunibi pinibi gau lai hayago de hendene. ✧ <sup>21</sup> De hondowa Pidahanda mitangi bialu Yasuhondo lalu, Lawai haga-o í de handa. Ina poge biagohondo ha halu bi larigome gau layada, lene.

<sup>22</sup> Ani layagola Yasuhanda tihondo ladai bialu lalu, Ngode Datagaliwabehondo mini mbiraore wu haabo halimu. <sup>23</sup> Tihondo henene laro. Hari hambene ogo wedagohondo, Inime dugualu puwa iba solowara bedagoria ibiraha, laragome dugu ibira holebirabe dugu ibira naholebirabe mini kira wuwa ndo mini mbiraore wuwa dugu ibiraha layagua dugu ibira holebiraore. ✧ <sup>24</sup> Ina irane ogoninaga bi langero. Tigua Ngode Datagaliwabehondo bi lamialu, Inanaga mbirale mbira bia, laramigola bulebiraore

✧ 11:9: Iba 118.25-26 ✧ 11:13: Mg 11.20 ✧ 11:14: Lg 13.6 ✧ 11:15: Mal 3.1-9 ✧ 11:17: Ais 56.7, Yar 7.11  
✧ 11:18: Mg 14.1 ✧ 11:20: Mg 11.14 ✧ 11:23: Md 17.20, Lg 17.6, 1 Ko 13.2

manda buwa mini mbiraore wuwa, Bia, laramiyagua bia larami ale bulebira.✧ <sup>25</sup> Tígua Ngode Datagaliwabehondo bi lamialu howa mbiralihondo keba ho kamiyagua tínaga Aba dahuliya andaga kagome tígua ko birimigo domo wahelo ala mbiralihondo keba ho kamigo mitangi bu wiaabo holemeni wahalimu, lene.✧ [ <sup>26</sup> Tígua mbiralihondo keba ho kamigo wa nahe keba ho wiaabo kamiyagua tínaga Aba dahuliya andaga kagome tígua ko birimigo domo wa naholebira, lene.]

*Yasu í hongo yu kegoni aiwa ngiyabe, lenego ogo*  
(Madiu 21.23-27, Lugu 20.1-8)

<sup>27</sup> Ani lalu ti Yarusaleme lone dai bini. Dai bialu Yasu ibu Ngode Datagaliwabenaga andaha pialu hearia loma binigo mo miaga haguane hearubi Mana lowinigo lawai haga hearubi agali ala hene miniwi hearubi ibu hearia ibini. <sup>28</sup> Ibuwa tigua ibuhondo lalu, Mbirale uruni ina bialu kegoni bialu habelo hongo aiwa ngiyane berebe. Ani bibelonaga hongo ogoni aiwa ngiyabe, lene.

<sup>29</sup> Ani layagola Yasuhanda tihondo ladai bialu lalu, Ina bi mbira hangu tihondo hale harogo tigua ladai birimiyagua ina mbirale uruni bialu haruruni buliya hongo ngiyadagoni ogome ngiya lalu tí langulebero. <sup>30</sup> Yonehanda baboraya biyago bulene hongo miyago Ngode Datagaliwabeha tawebe be agaliha tawebe ogoha tawe lalu langidaba, lene.

<sup>31</sup> Ani layagola tini dege degeme laga laga bialu lalu, Iname Ngode Datagaliwabeha tawe larimayagua ibugua lalu, Yonehanda mana lamiyago yu tiga nabi harimidago agibe lolebira, lowa. <sup>32</sup> Agaliha tawe, lolebiyaria wali agali dewa bu hearu hondowa gi howa bi ogoni lairi howa wahene. Bibahende bu hearume, Yone ibu Ngode Datagaliwabe mana latagi haga hayago, lai haga kago manda buwa gi hene.✧ <sup>33</sup> Gi howa tigua Yasuhondo ladai bialu lalu, Ina manda nabiore kama, lene.

Ani layagola Yasuhanda tihondo lalu, Anidago nde ina mbirale uruni berogo buliya hongo ngiyadago ogoha tawe nalangulebero, lene.

## 12

*Bi yobage lowa, Mabu hondo ha halimu, lene, lenego ogo*  
(Madiu 21.33-46, Lugu 20.9-19)

<sup>1</sup> Ani lowa Yasuhanda tihondo bi yobage lowa lamialu hene. Ibugua lalu, Agali mbirame pu mbira lini daga mini gerebi dewa hongo dugu dugu bini. Hongowa toleme pabe wa mabu biai halu gerebi lini ibane pingidope holenaga uli ege toleha guabuwa wini. Ani buwa mabu mamage holenaga anda mbira luni daliga bima iraga howa helene. Ani buwa ibugua agali maruhondo lalu, Mabu biabe bia halu hondo ha halimu, lalu dindi mbiraha ibaga bialu pene.✧ <sup>2</sup> Pu mbira mini gerebi lini dolene tu hayagola mabu anduane biagome ibunaga garabaya biabe ale bia haga mbiralihondo lalu, Inaga mabu hondo ha haga karuhondo lini maru do ngidaba lole pu, lene. <sup>3</sup> Ani lole piyagola hondo ha haga biarume ibu minu balu mbira nayiore dai bilene. <sup>4</sup> Ani biyagola mabu anduane biagome lone ibunaga garabaya biabe ale bia haga mendehondo, Pu, layagola mabu hondo ha haga biarume ibu hagianeni gaeo bialu ibu handabe manga halu mege taraore bini. <sup>5</sup> Ani biyagola mabu anduane biagome ibunaga garabaya biabe ale bia haga tebonehondo, Mo pu, layagola mabu hondo ha haga biarume ibu homelo bo wahene. Ani buwa agali maru piyagola mabu hondo ha haga biarume maru bowa maru homelo bo wahene. <sup>6</sup> Ani biyagola mabu anduane biagome ibu igini mbira hangu gubalini timbuniore haga henego ogoni ibuni hangu lini mo pole hene. Maniore ibugua ibuni igini biagohondo lalu, Mabu hondo ha haga kagoria lini mo pu, lalu, Tigua ibu mitangi bialu ibuhondo tiga tiga bulebira manda bido, lene.✧ <sup>7</sup> Mabu hondo ha haga

✧ 11:24: Md 7.7, Lg 11.9, Yo 14.13, Ya 1.5-6 ✧ 11:25: Md 5.23, 6.14-15, Kl 3.13 ✧ 11:32: Md 14.5, Mg 6.20

✧ 12:1: Ais 5.1-2 ✧ 12:6: Md 3.17



biarume tini hangu laga laga bialu lalu, Mabu anduane biago igini ogonigo ibunaga paluni ina karulamiya homelo bama, lowa <sup>8</sup> tigua igiri biago minuwa homelo bowa ibu tingini mabu tagirahayagi mo ba tagi hene, lalu Yasuhanda lene.✧

<sup>9</sup> Ani lowa Yasuhanda tihondo lalu, Ani biyago mabu anduane agi bulebirabe. Ibugua ibuwa agali mabu hondo ha haga biaru homelo bai howa mabu ogoni marume hondo ha helo mulebira. <sup>10</sup> Anduane Homogonaga mbugani bi mbira lo ngago tí nahende kamibe.✧

Ege tole mbira anda biagame galone nabibehedago lowa dabo wahenego ege tole ogoniore mo timbuni duniniore ho heleda.

<sup>11</sup> Ogoni Anduane Homogo ibunioreme mo yu daibu helenego iname de handalu handawa bu kamagoni, lalu gilibu nga, lene.

<sup>12</sup> Yu wali agali haru haga hearume Yasuhanda bi yobage ogoni layagonaga ti mitangi bialu layago manda buwa minule bialu hearia wali agali dewa bu hea handala gi howa wahalu pene.

*Dagisi muni mulene ngabe nawibe, lenego ogo*  
(Madiu 22.15-22, Lugu 20.20-26)

<sup>13</sup> Perisi agali maru hearubi Herodonaga aria maru hearubi tigua tinaga aria maru hearuhondo lalu, Yasu bi lalu kago bi ko lelo mo bila hole ibu karia pudaba, lene.✧ <sup>14</sup> Ani layagola ti Yasu hearia puwa tigua ibuhondo lalu, Lawai haga-o iname manda bialu hemaria ina mana lamiriligo tiga tigaore larili manda bidama. Ani buwa ina agali mini timbuniwi hongohe karu hondowa gi nahe maru karumebi i hondowa larago mitangi nabi howa Ngode Datagaliwabehanda hame ledagonaga mana wali agalihondo lawai hariligo tiga tigaore larili. Ai bi mbira langibelo inanaga Mana lowini ngago manda bialu Lomo dindinaga handame haga Kini kagohondo dagisi muni mulene ngabe be nawibe. Iname dagisi muni ogoni mulumabe be namulumabe, lene.

<sup>15</sup> Ani layagola Yasuhanda tinaga miniha yageyage palu howa layagoni manda buwa tihondo lalu, Tigua aginaga minule nde larimibe. Muni kuni mbira i de hondoliya mo yalu ibu, lene.

<sup>16</sup> Ani layagola tigua muni kuni mbira mo yalu ibiyagola ibugua tihondo lalu, Muni kuni ogoriani dengui muguni ngagobi mini gilibu ngagobi ainagadabe, lene.

Ani layagola tigua ladai bialu lalu, Lomo handame haga Kini kagonagada, lene.

<sup>17</sup> Ani layagola Yasuhanda tihondo lalu, Mbirale Lomo handame haga Kini kagonaga ngago nde ibunihondo milimu. Mbirale Ngode Datagaliwabe kagonaga ngago nde Ngode Datagaliwabe ibunihondo milimu, lene.✧

Ani layagola tigua mogo timuniore lene.

*Homenego agua heyuledabe, lenego ogo*  
(Madiu 22.23-33, Lugu 20.27-40)

<sup>18</sup> Sadiusi agali hearume wali agali homeneru naheyulebira lagane maru henerume Yasu hearia ibuwa lalu,✧ <sup>19</sup> Lawai haga-o Mosesehanda mana mbira ina bulumayanaga gilibu wini ngago ogo, Agali mbira waneigini nahe one dalo berelalu homayagua homayago hameneme wali dalo biago dabu bu aribia howa waneigini homayagonaga hono wia holene nga, lo nga.✧ <sup>20</sup> Anigo igiri karia hamenema howa kane wahenegome wali mbira dabu bu howa waneigini nahe heaore homene. <sup>21</sup> Homayagola ibula pagu bini biagome dabu bu aribia howa waneigini nahe heaore dege homene. Ani biyagola hamene tebonegome dabu buwa ani bima pu gimbu bialu <sup>22</sup> hamene karia bibahende biarume wali o biago dege dabu buwa waneigini nahe heaore homai hene. Ani bialu maniore wali biago home maro bini. <sup>23</sup> Ani binigo igiri karia biaru bibahendeme wali

✧ 12:8: Hi 13.12 ✧ 12:10: Iba 118.22-23 ✧ 12:13: Mg 3.6 ✧ 12:17: Lm 13.7 ✧ 12:18: Ab 23.8 ✧ 12:19: Man 25.5

o biago dege dabu biyago homeneru mo heya hagane horo harangi wali biago agonaga one birulebirabe, lene.

<sup>24</sup> Ani layagola Yasuhanda tihondo lalu, Tí mini pu tara ho kamigo irane Anduane Homogonaga mbugani gilibu ngagobi Ngode Datagaliwabe hongohe kagobi tí manda nabi kamigo mini pu tara ho kamigoni. <sup>25</sup> Ogoninaga wali agali homeneru mo heya harangi wali agali dabu bulene nawiore ndobe. Ti dahuliyali dahuliya andaga karu ale dege holebira.✧ <sup>26</sup> Anigo wali agali homeneru mo heya holenenaga larogo Mosese ibu ira mbira hungu biyagoria hearia Ngode Datagaliwabehanda Mosesehondo lalu, I Abarahama Aisaga Yagaba imarunaga Ngode Datagaliwabe kogoni, lenego Mosesehanda gilibu ngago tí daga nale dege kamibe.✧ <sup>27</sup> Ngode Datagaliwabe ibu wali agali holenehe kagonaga kagoni. Ibu homenenaga ndo kago tí kaguaore manda birimida, lene.

*Ngode Datagaliwabehanda mana lo wialu duniniore lo ngago ogo  
(Madiu 22.34-40, Lugu 10.25-28)*

<sup>28</sup> Mana lowinigo lawai haga mbira heago ibuwa tigua te layago hale halu Yasuhanda Sadiusi agalihondo bayuwa ladai biyago hondowa ibugua Yasuhondo lalu, Ngode Datagaliwabehanda Mana lowinigo dunini ala agoore mitangi bulene ngabe, lene.

<sup>29</sup> Ani layagola Yasuhanda ladai bialu lalu, Mana lowinigo dunini ala mitangi bulene ngago laro. Isaraele wali agali tí hale halimu. Anduane Homogo ibu inanaga Ngode Datagaliwabe kago ibu hangu Anduane Homogo kagoni.✧ <sup>30</sup> Ina Anduane Homogo inaga Ngode Datagaliwabe kago inaga gubalinimebi minimebi mandamebi hongomebi gubalini ho habe, lowinigo dunini ogoni ala mitangi bulene nga. <sup>31</sup> Mana duniniore mende ogonibiore lowini ngago ogo, Ini gubalini harilidagua maru karu ta nabi gubalini ho habe, lowia. Mana duniniore timbuniore kira ogoni lowinigo ngagobi maru nawi, lene.✧

<sup>32</sup> Ani layagola Mana lowinigo lawai haga biagome ibuhondo lalu, Lawai haga-o í tiga tiga larigo. Ngode Datagaliwabe mbira hangu kago heneneore lari. Mende nahe ibu hangu kagoni.✧ <sup>33</sup> Iuhondo gubalinimebi mandamebi hongomebi hame lowa ini gubalini harilidagua maru karu ta nabi ogonidagua gubalini hariyagua ogoni duniniore. Ngode Datagaliwabehondo mbirale tara tara lomabu delolenebi mbirale bo lomabu mulenebi ogonidagua bulene dunini ndo, lene.✧

<sup>34</sup> Yasuhanda agali biagome bayuwa layago hondowa ibuhondo lalu, Ngode Datagaliwabehanda Handame Ho Kagoria í kaware kegoni, lene.✧

Ani layagola marume Yasu ibu ladai bilo ibuhondo bi nalami wahene.

*Mbirali Dabo Helenego ibulebira lowinigonaga hale henego ogo  
(Madiu 22.41-46, Lugu 20.41-44)*

<sup>35</sup> Yasuhanda Anduane Homogonaga andaha howa mana lawai halu howa ibugua lalu, Mana lowinigo lawai haga karume, Mbirali Dabo Helenego ibulebira lowinigo ibu Debidinaga aguanene holebira, lagago agua hole biaruabe. <sup>36</sup> Debidihanda Ngode Datagaliwabe Dinini ibugua mo bila hayagola lalu,✧

Anduane Homogohanda inaga Anduane Homogohondo lalu, Inaga waitigi karu inaga geme hangedai habelo ina mo heloliya í inaga gi tigahayagi ogoria birabe, laya.

<sup>37</sup> Debidi ibunime ibuhondo Anduane Homogo layagobi Mbirali Dabo Helenego ibulebira lowinigo ibu aguanene hayagobi mbiraore agua habehebe, lene.

✧ 12:25: 1 Ko 15.42, 15.49, 15.52 ✧ 12:26: Har 3.2, 3.6 ✧ 12:29: Man 6.4-5 ✧ 12:31: LBM 19.18, Ga 5.14, Ya 2.8 ✧ 12:32: Man 4.35 ✧ 12:33: 1 Sml 15.22, Ais 45.21, Hos 6.6, Mai 6.6-8, Md 22.37, Lg 10.27 ✧ 12:34: Md 22.46 ✧ 12:36: Iba 110.1

*Yasuhanda, Mana lowinigo lawai haga karu de hondo halimu, lenego ogo  
(Madiu 23.1-36, Lugu 20.45-47)*

Wali agali dewaore ngoai hayarume ibugua bi mana layago turu howa hale hene. <sup>38</sup> Ibugua tihondo mana lawai halu lalu, Mana lowinigo lawai haga karu de hondo halimu. Tigua labolabo lu karulalu ibaga bialu magedi hamani puwa wali agalime ti hondowa tinaga mini yaraga helo hame laga ka. <sup>39</sup> Ani buwa tigua ngoai hagane andaruha agali haguanerunaga biraganeni hangu birulebi wali agali dewa tomo mandagi nole ngoai haragola tomo anduane heba birulebi hame laga ka. <sup>40</sup> Ani buwa tigua wali dalo bedarunaga andaga mbirale ngaru mo kayu biaga ka. Ani buwa wali agali mo hondo hole Ngode Datagaliwabhondo bime dege bi lu la ho wiaabo haga ka. Ani biragonaga ti pani timbuniore mia tago howa mulene nga, lene.

*Wali dalo mbirame muni winigo ogo  
(Lugu 21.1-4)*

<sup>41</sup> Anduane Homogonaga andaha muni wiaga wiagoria Yasu ibu kaware bira para ho bereria wali agali dewa ibiyarume muni wiagani wiyagola de hondo berene. Wali agali homogo hearume muni dewa wini. <sup>42</sup> Wali dalo mbira bereagome muni nayiore berenego ibuwa muni emeneore toea mbira ale wini. <sup>43</sup> Ani wiyagola Yasuhanda ibunaga talima piaga biaru olalu, Ibidaba, lowa, Ina tí langerogo wali agali bibahendeme Ngode Datagaliwabenaga muni wiagani wiyaru emene wiya. Wali dalo yagibano o bedagome muni dewaore wiya. <sup>44</sup> Tigua muni dewawi howa emene wiya. Wali dalo ogome mbira nayiore biruwa ibu tomo yolo bule yinigo bibahendeore wiai haya, lene.

## 13

*Yasuhanda lalu, Anduane Homogonaga anda gialo waholebira, lenego ogo  
(Madiu 24.1-2, Lugu 21.5-6)*

<sup>1</sup> Yasu ibu Anduane Homogonaga andaha howa tagira piyagola ibunaga talima piaga mbira heagome ibuhondo lalu, Lawai haga-o anda tara tara baya buruguleore ege tole timbunime bima iraga kago de handa, lene.

<sup>2</sup> Ani layagola Yasuhanda ibuhondo lalu, Anda timbuniore kago de hendedebe. Ege tole wia gimbu gimbu bima iraga kagoni homane mbiraore winidagoria ngeladai nabi bibahende gialo ibira ibira biai holebira, lene. <sup>\*</sup>

*Mo ko holenebi mo tandaga holenebi wulebira, lenego ogo  
(Madiu 24.3-14, Lugu 21.7-19)*

<sup>3</sup> Emene howa Yasu ibu Hari Olibe iraga halu Anduane Homogonaga anda handa dele heagoriani berene. Bereagoria Pida Yamese Yone Anduruma ibuwa tigua Yasuhondo lalu, <sup>4</sup> Bi larigoni angi bulebirabe. Iname ala agi birane hondowa henge karulolene horo ha para hayada lolomabe, lene.

<sup>5</sup> Ani layagola Yasuhanda tihondo ladai bialu lalu, Mbiralime tí mo hondo holigo mamage halu de hondo halimu. <sup>6</sup> Agali dewaoreme i mini lalu, Mbiralali Dabo Helenego ibulebira lowinigo i ibu kogoni, lalu ibuwa wali agali dewa mo hondo hole ibulebira. <sup>7</sup> Ani buwa dindi kawareni wai biragonaga bi laruagolabi dindi kaundiaoreni wai bira laragolabi tí hale howa gi nahalimu. Mbirale uruni ani bia bulebirago ani laragome ha maro bulene nga lalu ndo larago gi nahalimu. <sup>8</sup> Dindi mende mendela wai bia ai nai bialu gabumane tara tarala wai bia ai nai bialu holebira. Dindi bibahendeha dumbirumbi biame holebiragobi wali agali dindi tara tarani hina gari timbu holebiragobi. Ani biragola tandaga nolene ogoni walime waneigini taba honole howa tandaga pigane nagago aleore wulebira. <sup>\*</sup>

<sup>9</sup> Ani buwa tíni mamage halu de hondo halimu. Tigua tí minu yalu godi lole haru polebira. Ngoai hagane andaha howa tí bolebira. I mini yu tiga bu kamigo gabumane haru haga karubi kini karubi ti kagoria inaga Bi Mana Debene hale helo lamialu holeberami. ✨ ✨ <sup>10</sup> Ogoni bu maro nabidaore ala wali agali dindi tara tarani bu karu bi mana debene hale hai helo lamulene nga. <sup>11</sup> Tigua tí minuwa godi lole haru poragola miniha mbira agi loledabe ala lolenaga mini dege dindi ho nahalimu. Godi laramingi Ngode Datagaliwabehanda bi langirago lalimu. Bi laramigo tíni bi lole ndo berami. Ngode Datagaliwabe Dinini ibugua tí mo mitangi bia haragola bi loleberami. <sup>12</sup> Agali ibu hamene marume homelo belo minu mulebira. Ogonidagua dege abahandabi ibu igini minu mulebira. Waneiginimebi ti aya abalahondo hongo halu marume homelo belo minu mulebira. ✨ <sup>13</sup> I mini yu tiga bu kamigo hondowa bibahende karume tíhondo handabe manga holebira. Ani biragola uruni bu maro bilo wahalu pu nabi hongo howa ho ununu lo haabo ho kagome pele mulene yu holebira, lene. ✨

*Hiriribi Hondolene Gibiore tagira ibulebira, lenego ogo*  
(Madiu 24.15-28, Lugu 21.20-24)

<sup>14</sup> Ani lowa Yasuhanda tihondo lalu, Hiriribi Hondolene Gibiore íbu wulene nawi ngagoria ngagola tígua de hondoleberami, lene. Bi ogoni daga lalu kamiru irane ogo-naga layada lalu bayuwa manda bilimu. Yasuhanda ani lowa lalu, De handaramigola Yudia wali agali karu hari hambene ngaruha hondo yalu gerai polene wulebira. ✨ <sup>15</sup> Ogoningi agali mbira ibu anda dangini bedagome dalialu tamuha ibunaga mbirale mbira mule mo anda polene henge nawulebira. ✨ <sup>16</sup> Agali mende mabu biabe bialu kagome ibuni andaga aga mo dai bulene henge nawulebira. <sup>17</sup> Horo uruningi wali gali bere bedarubi gali andu mialu bedarubi dara timbuniore holene nga. ✨ <sup>18</sup> Uruni bulebíraru ira yuni gilope howa dagare ibagane hororu birangi nabilonaga Ngode Datagaliwabehondo bi lalu halimu. <sup>19</sup> Horo uruningi mo ko holene dewaore wulebira. Ani bulene wulebirago Ngode Datagaliwabehanda bibahende wabiyangi howa nawinigo mahabi nde lone ogonidagua nawulebira. ✨ <sup>20</sup> Anigo Anduane Homogohanda horo uruni mo tubagi hole manda nabi kale awe wali agali bibahende holene henge namo ngale. Wali agali ibugua dabeneru mitangi bialu horo uruni mo tubagi hole manda bini. <sup>21</sup> Anigo mbiralime tíhondo lalu, Mbiralí Dabo Helenego ibulebira lowinigo o ibu kago de handadaba, layaguabi, Ibu amu kago de handadaba, layaguabi hale nahalimu. <sup>22</sup> Agali marume ke halu Mbiralí Dabo Helenego ibulebira lowinigo i kogoni, lole ibulebira. Marume ke halu, I Ngode Datagaliwabe mana latagi haga kogoni, lole ibulebira. Ibiragola tigua wali agali Ngode Datagaliwabehanda dabo heleneru mo hondo habehedabe hondole agalime nabíagane alebi nahendene alebi bialu holebira. ✨ <sup>23</sup> Uruni bia nabidaore ina ala tí langerogoni hale halu mamage ho halimu, lene.

*Agali Hole Ibiyago lone ibulebira, lenego ogo*  
(Madiu 24.29-31, Lugu 21.25-28)

<sup>24</sup> Ani lowa Yasuhanda laabo halu lalu, Horo uruningi mo ko holene uruni ngagola howa ni hundialu ege nadalu ✨ <sup>25</sup> yapibiya hariha howa dugu ibira ibira bialu hari daligaha hongo haga karu mo ema bia hai holebira. ✨ <sup>26</sup> Ani biragola Agali Hole Ibiyago ibu hari beralibaha howa hongo timbuni holenebi wá timbuni taraore holenebi heba ha pani holebira. ✨ <sup>27</sup> Ha pani haragola dindi gimbuni bibahende ngagoniha howa ibugua ibunaga dahuliyalirume wali agali Ngode Datagaliwabehanda dabo heleneru dindi mbirahayagi howabi mendehayagi howabi, Mo mogo bule pudaba, lolebira, lene. ✨

✨ **13:9:** Mo 2.10 ✨ **13:9:** Md 10.17-20, Lg 12.11-12 ✨ **13:12:** Md 10.21 ✨ **13:13:** Dan 9.27, 11.31, 12.12, Md 10.22, Yo 15.21 ✨ **13:14:** Dan 9.27, 11.31, 12.11 ✨ **13:15:** Lg 17.31 ✨ **13:17:** Lg 23.29 ✨ **13:19:** Dan 12.1, Yol 2.2, Mo 7.14 ✨ **13:22:** Man 13.1-3, Mo 13.13 ✨ **13:24:** Ais 13.10, Ese 32.7, Yol 2.10, 2.31, 3.15, Mo 6.12, 8.12 ✨ **13:25:** Ais 34.4, Yol 2.10, Mo 6.13 ✨ **13:26:** Dan 7.13, Ab 1.11, 1 Te 4.16, Mo 1.7 ✨ **13:27:** Md 13.41

*Yasuhanda pogenaga te lenego ogo*  
(Madiu 24.32-35, Lugu 21.29-33)

<sup>28</sup> Ani lowa Yasuhanda tihondo laabo halu lalu, Tí mana mbira manda bilimulo poge biagane te langero. Poge mane mabiragola hondowa ai ni poboyogo dolene tu kawareda manda beramili. <sup>29</sup> Ogonidagua dege mbirale uruni bibahende bigi biragola tígua handalu kamiria horo kaware ha para kagonida manda buleberami. <sup>30</sup> Ogoninaga tí manda biaabo halimulo wali agali áyu kamiruni nahome ogobi dege dege kamiore mbirale uruni bibahende bulebirago laro. <sup>31</sup> Hari daligabi dindibi ereba hai holebira. Inaga bi mana dege ereba nahe wiaabo holebira, lene.

*Yasuhanda, Ogongiore bulebiralo bibahendeme manda nabi ka, lenego ogo*  
(Madiu 24.36-44)

<sup>32</sup> Ibugua ani lowa lalu, Horo ogoni ogongiore bulebiralo bibahendeme manda nabioire ka. Dahuliyali dahuliya andaga karumebi Iginí ibuguabi tí manda nabi dege ka. Aba kago ibuni hangu manda bu ka. <sup>33</sup> Bi larogoni ogongiore bulebiralo tí manda nabi kamigo de hondo mamage ho halimu. <sup>34</sup> Ogoni agali mbirame ibu kaundiaha poralidagua ngagoni. Ibunaga andaga wahalu ibunaga garabaya biabe ale bia hagaruhondo lalu, Biabe bia halu hondo halimu, lalu agali harabani haghondo, Mamage habe, lalu piaga. <sup>35</sup> Anda anduane ibu ne laragola dai bulebirabe be mbi hanuni haragola dai bulebirabe be ega gogologo bi laragola dai bulebirabe be egerebagi haragola dai bulebirabe tí manda nabioire kamigo mamage bayuwa ho halimu. <sup>36</sup> Tí palia hondo kamiria abale ibuligonaga mamage ho halimu. <sup>37</sup> Tíhondo bi larogonidagua wali agali bibahendehondo, Mamage hai halimu lalu larogoni, lene.

## 14

*Yasu homelo bole manda manda binigo ogo*  
(Madiu 26.1-5, Lugu 22.1-2, Yone 11.45-53)

<sup>1</sup> Horo kiru howa tebonengi Bolangua Halu Penego Horonaga tomo nolene wulebira lowa Mberedi Yidi Nahe Hirinigo Horonaga nolene nga lo manda bini. Ani manda biyangi loma binigo mo miaga haguane hearubi Mana lowinigo lawai haga hearubi ohalu tigua Yasu homelo bole minulene henge tai bini. <sup>2</sup> Tigua lalu, Wali agali bu karume ina baba gungu buligo tomo nolene harangi iname ibu naminamiya, lene.

*Wali mbirame Yasu hagianeni weli ngabi odo winigo ogo*  
(Madiu 26.6-13, Yone 12.1-8)

<sup>3</sup> Yasu ibu Bedani howa Saimono ge hamua ala henego andaga tomo nalu berearia wali mbira ibuwa weli baya ngabi mini nada muni dewaoreme yolo buwa beha berelo winigo ogoni yalu ibini. Yalu ibuwa wali biagome be pambu lowa Yasunaga hagianeni weli baya ngabi biago odope hene. <sup>4</sup> Ani biyagola wali agali maru hearume keba howa tini la ai nai bialu lalu, Weli ngabi biago bame mohole birago agi birabe. <sup>5</sup> Weli ngabi ogoni kina handari tebira (300) ale mulene ngago midale nde yagibano karuhondo tale bu ta kale karulapedale, lowa tigua wali biago guralu talini.

<sup>6</sup> Ani biyagola Yasuhanda tihondo lalu, Ibu aginaga taleremibe. Tí bi nale ibu helo wahadaba. Wali ogonime ihondo biyagoni baya buruguleore biya. <sup>7</sup> Wali agali yagibano karu tí heba mandagi haabo holeberemigo tihondo mbirale mbira bayale bua biragola bibehe kamigoni. I tí heba mandagi haabo naholebero. <sup>8</sup> Ibugua mbira bibehe wiagoore biyagoni. I nahome ko tagi inaga tinginini mani hora holenenaga weli baya ngabi ogoni odo wia hayagoni. <sup>9</sup> Ina tíhondo henene larogo bi mana debene dindi

☆ 13:32: Md 24.36 ☆ 13:34: Md 25.14, Lg 12.36-38 ☆ 13:35: Lg 12.38 ☆ 14:1: Har 12.1-27, Mg 11.18 ☆ 14:3: Lg 7.37-38 ☆ 14:7: Man 15.11 ☆ 14:8: Yo 19.40



bibahendeha lamialu howa ibugua ihondo biyago ibu mitangi bialu te loyogo lolebira, lene.

*Yudasahanda, Yasu ndelole penego ogo*  
(Madiu 26.14-16, Lugu 22.3-6)

<sup>10</sup> Talima piaga homberiali (12) henego hombeane Yudasa Isagariodo ibugua loma binigo mo miaga haguane hearu hearia Yasu minilo ndelowa, Walia holiya, lole pene. <sup>11</sup> Ani layagola hale howa tigua turu halu ibuhondo, Muni nguleberama, lene. Ani layagola ibugua Yasu minu mulene henge aguaore ngabe hondole tai bialu hene.

*Yasu ibunaga talima piaga biaru heba Bolangua Halu Penego Horonaga tomo nenego ogo*

(Madiu 26.17-25, Lugu 22.7-14,21-23, Yone 13.21-30)

<sup>12</sup> Mberedi Yidi Nahe Hirinigo Horonaga tu hayagola horo ogoningi Bolangua Halu Penego Horonaga nogo sibi igini bo mulene tu hene. Ani hayagola ibunaga talima piaga biarume ibuhondo lalu, Bolangua Halu Penego Horonaga tomo mitangi bialu i tomo nabelo agoha dawa manda manda bu wuledabe, lene.\*

<sup>13</sup> Ani layagola ibugua ibunaga talima piaga kiralihondo lalu, Yarusalemeha anda pialu kabiria agali mbira iba be yalu ibiragola lola holeberabigo agali ogoni ibu anda poradagua pilibu. <sup>14</sup> Anda puwa anda anduanehondo agua lalibu, Lawai haga kagome ihondo lalu, Inaga talima piaga karubi ibi iname Bolangua Halu Penego Horonaga tomo nolomaya anda hobane mbira agoha ngabe, laya, lalibu. <sup>15</sup> Ani larabigola ibugua tamu hobane mbira daligaha ngago dagia manda bu winigo walia holebirago ogoriani tomo dawa manda manda bu wilibu, lene. <sup>16</sup> Ani laya handala ibunaga talima piaga kira biago labome pialu Yarusaleme anda pene. Anda puwa mbirale bibahendeore Yasuhanda agua bulebira layadaguaore bu wiaria hondowa libugua Bolangua Halu Penego Horonaga tomo nole dawa manda manda bu wini.

<sup>17</sup> Alendo ni paliyagola Yasu ibunaga talima piaga homberiali (12) biaru heba ibini. <sup>18</sup> Ti tomo nalu biruwa Yasuhanda lalu, Ina tihondo henene larogo agalime i minilo ina tomo nalu bedamaru mbiraligome ndelolebira, lene.\*

<sup>19</sup> Ani layagola ibunaga talima piaga biarume ibuhondo hangu hangume ala la mani la bigi bialu lalu, Ina o larigoni i ndo lari, lalu laga laga bini.

<sup>20</sup> Ani laga laga biyagola Yasuhanda ladai bialu lalu, Ti homberiali (12) bedamigo hombeanego ila mandagi ndisiha mberedi ibuni gime mo nalu bedagome ani bulebira. <sup>21</sup> Anduane Homogonaga mbugani lo ngadagua Agali Hole Ibiyago homolebira. Agali Hole Ibiyago agalime ibu minilo ndelalu walia harago ibuni dara holene wulebira. Agali ogoni ibu aiyahanda taba nahenedale dege bayale awadaga hendedaleda, lene.

*Anduane Homogonaga tomo nenego ogo*  
(Madiu 26.26-30, Lugu 22.14-20, 1 Korindi 11.23-25)

<sup>22</sup> Ti tomo nalu berea tambu Yasuhanda mberedi mbira yamuwa Ngode Datagaliwabhondo turu halu kai lowa mberedi gaibu бага buwa ibunaga talima piaga biaruhondo mialu howa lalu, Inaga tingini ogonigo mialu nadaba, lene.

<sup>23</sup> Ani lowa ibugua iba be yamuwa Ngode Datagaliwabhondo turu halu kai lowa tihondo miyagola ti bibahendeme no gombedaga bialu nene. <sup>24</sup> Yasuhanda tihondo lalu, Ogo inaga darama. Wali agali dewa homai holilono inaga darama ogoni pela harogoni. Ngode Datagaliwabehanda habo nalolene bi lowinigo tene inaga darama ogoniha nga.\* <sup>25</sup> Ina ti langerogo ina waini iba lone nane Ngode Datagaliwabehanda Handame Ho Kagoriani howa waini iba gahenge nolebero, lene.

<sup>26</sup> Tigua Ngode Datagaliwabehanda iba gana mbira lowa Hari Olibe weagoha pene.

\* 14:12: Har 12.6, 12.14, 12.20, Md 26.17, Lg 22.7    \* 14:18: Iba 41.9    \* 14:24: Har 24.8, Yar 31.31-34, Seg 9.11, 1 Ko 10.16, Hi 9.20

*Yasuhanda Pidahondo, Ína i manda nabido lolebere, lenego ogo  
(Madiu 26.31-35, Lugu 22.31-34, Yone 13.36-38)*

<sup>27</sup> Yasuhanda tihondo lalu, Tí bibahendeme i helalu ibida piai holeberami. Anduane Homogonaga mbugani bi lo ngago ogo, Ngode Datagaliwabehanda nogo sibi haru haga kago bara handala nogo sibi karu ibida purogo lai holebira, lalu gilibu nga. <sup>28</sup> Anigo Ngode Datagaliwabehanda i mo heya hara handala tí maha ibalimulo i ala Galili bamba halu polebero, lene. <sup>29</sup>

Ani layagola Pidahanda ibuhondo ladai bialu lalu, Ti bibahendeme ani wahalu purogo layaguabi ina í wahalu napolebero, lene.

<sup>30</sup> Ani layagola Yasuhanda ibuhondo lalu, Íhondo langerogo áyu mbiraga ega gogologome bi halu ki naledaore ina halu teboore Yasu manda nabido lalu lolebere, lene.

<sup>31</sup> Ani layagola ibugua hongo howa ladai bialu lalu, Íla homole howayaguabi ogo-nidagua naloleberoore, lene. <sup>32</sup>

Pidahanda layadagua dege talima piaga bibahende biarubi ani lai hene.

*Yasu ibu Gedemani puwa Ngode Datagaliwabela bi lalu henego ogo  
(Madiu 26.36-46, Lugu 22.39-46)*

<sup>32</sup> Yasu ibunaga talima piaga biaru heba dindi mini Gedemani wiagoria pu howa ibugua ibunaga talima piaga biaruhondo lalu, I Ngode Datagaliwabela bi lole porotagi tí ogoria hondo biralimu, lene. <sup>33</sup> Ani lalu ibu Pida Yamese Yonema ti haru puwa Yasu ibu genda howa mini burugulo hene. <sup>34</sup> Ani buwa ibugua tihondo lalu, Dara bulene iha timbuniore anda ibiragome i garali bialu budara. Tí mamage halu ogoria hondo biralimu, lene. <sup>35</sup>

Ani lowa Yasu ibu emene pu bagi howa dindini bulu palu wuwa ibu tandaga nolene winigo Ngode Datagaliwabehanda yalu polene ngayagua nde yalu pelo lowa Yasu ibugua Ngode Datagaliwabela bi lalu berene. <sup>36</sup> Ibugua lamialu, Aba i Aba-o ina mbirale bibahende bibebe kegoni. Tandaga nolene beha bedago nanoliya mo yalu pobe. Anigo i hame ledodagua ndo ina hame lededagua hangu bibe, lene. <sup>37</sup>

Ani lowa ibunaga talima piaga tebiral biaru bereagoria dai bialu hearia ti palia hondo hai hearia hondowa ibugua Pidahondo lalu, Saimono-o í padebe. Ína mamage emene tigi mbira habe nahedane padebe, lene. <sup>38</sup> Ani lowa ibugua tihondo lalu, Ko ngagome tí ko mo bia holigo tí mamage howa Ngode Datagaliwabehondo bi lalu halimu. Tí naga minime Ngode Datagaliwabe hame ledamigo lo howa tínaga tingini gedaore ho kamigoni, lene. <sup>39</sup>

Ani lalu Yasu ibu halu mende Ngode Datagaliwabela bi ala layadagua dege lole pene. <sup>40</sup> Ani bialu ibu lone dai bialu hearia ti de muguli howa palia hondo hearia hendene. Tigua ibuhondo agi ladai bulebe toba howa manda nabi hene.

<sup>41</sup> Ibu halu tebone dai buwa tihondo lalu, Tí halo palia dege bidamibe. Ogoni karu-lape. Agali Hole Ibiyago ko biaga karuhondo minu mulene tu hayadago handadaba. <sup>42</sup> I minilo ndelaga biago kaware o ibu kago de handadaba. Ai heyalu ma, lene.

*Yasu mininigo ogo  
(Madiu 26.47-56, Lugu 22.47-53, Yone 18.3-12)*

<sup>43</sup> Yasuhanda bi ogoni wene lalu heaore ibunaga talima piaga agali hombeane Yudasa ibu agali dewa heba ibini. Loma binigo mo miaga haguane biarumebi Mana lowinigo lawai haga biarumebi agali ala hene miniwi biarumebi, Yasu minule pudaba, layagola tigua wai bulene ayu tibu kangoru yalu Yasu hearia ibini. <sup>44</sup> Yasu minilo ndelaga

☆ 14:27: Seg 13.7, Mg 14.50 ☆ 14:28: Md 28.16, Mg 16.7 ☆ 14:31: Yo 11.16 ☆ 14:32: Md 26.36, Yo 18.1  
☆ 14:34: Yo 12.27 ☆ 14:36: Mg 10.38, Yo 6.38, Lm 8.15, Ga 4.6, Hi 5.7 ☆ 14:38: Lg 11.4, Lm 7.23, Ga 5.17

biagome agali bu hearuhondo ala lalu, Tí manda bilimulo ina manane walia halu mbiralinaga peni nunu larogo ibu minuwa bayuwa haru pilimu, lene.

<sup>45</sup> Ani layadagua bialu Yudasahanda Yasu hearia pu tiga buwa, Lawai haga-o, lowa Yasu peni nunu lene. <sup>46</sup> Nunu layagola agali dewa hayarume Yasu minalu bayuwa gime yu ndibu lene. <sup>47</sup> Ani biyagola agali mbira heagome wai bulene ayu tibu yayagome loma binigo mo miaga haguane timbuni heagonaga garabaya biabe ale bia haga heagonaga hale bagadape hene. <sup>48</sup> Yasuhanda tihondo lalu, Pageali minaramilidagua tigua wai bulene ayu tibu kangoru yalu i minule ibirimibe. <sup>49</sup> Horo dewa tí heba Anduane Homogonaga andaha howa mana lawai halu hewangi tigua i mina nabirimi. Anigo Anduane Homogonaga mbugani bi lo ngadagua bilo, lene.✧

<sup>50</sup> Ani layagola ibunaga talima piaga bibahende biaruni Yasu wahalu ibida purogo lai hene.✧

<sup>51</sup> Agali mbira labolabo bobi heago Yasu haruru pialu hearia agali biarume ibu minini. <sup>52</sup> Minaya handala ibugua ibunaga labolabo bo biyago giha golo yu hea handala ti babe ibida pene.

*Yasu Ganisolo agalirume godi lelo haru penego ogo  
(Madiu 26.57-68, Lugu 22.54-55,63-71, Yone 18.13-14,19-24)*

<sup>53</sup> Loma binigo mo miaga haguane biarubi agali ala hene miniwi biarubi Mana lowinigo lawai haga biarubi ti loma binigo mo miaga haguane timbuni heago andagaha mandagi ngoai ho berearia Yasu haru pene. <sup>54</sup> Pida ibu emene kaundia howa Yasu haruru pialu loma binigo mo miaga haguane timbuni biagonaga anda pabeha anda pene. Anda puwa mamage haga hearu heba ira deagoria dagare dogo bu berene. <sup>55</sup> Loma binigo mo miaga haguane biarubi Ganisolo agali bibahende biarubi tigua Yasu homelo bolenaga ibugua ko binigobi lenegobi mbira agidabe hondole daba handalu hearia mbira nahendeore. <sup>56</sup> Agali dewa hearume Yasu ndelowa bi layagoyu tinaga bi layago lo iriari bini.

<sup>57</sup> Marume heyuwa ke halu lalu, <sup>58</sup> Ibugua au layagola hale harima. Anduane Homogonaga anda agali gime binigo gialo wahalu horo tebira howa agali gime ndo mendeale bu aribia holebero, laya, lene.✧ <sup>59</sup> Tigua bi ogoni lo iriari dege bini.

<sup>60</sup> Ani layagola Loma Binigo Mo Miaga Haguane Timbuni biagome agali berearunaga wanakuini heyu howa ibugua Yasuhondo lalu, Ihondo bi laragoni ladai bulene mbira nayi kebe, lene.

<sup>61</sup> Ani layagola Yasu ibu ema nabi howa bi mbira naleore hene. Nale heagola Loma Binigo Mo Miaga Haguane Timbuni biagome ibuhondo halu mende lalu, I Mbiral Dabo Helenego ibulebira lowinigo Ngode Datagaliwabe Baya Buruguleore Kagonaga Igini kegonibe, lene.✧

<sup>62</sup> Ani layagola Yasuhanda lalu, E i ogoni kogoni. Agali Hole Ibiyago ibu Mbiral Hongo Haiheore Kagonaga gi tigahayagi biruwa hari beraliba heba daliraria de hondoleberami, lene.✧

<sup>63</sup> Ani layagola Loma Binigo Mo Miaga Haguane Timbuni biagome hale howa keba halu ibuninaga labolabo lerelowa lalu, Marume lamogo bia helo hame naleore kama. <sup>64</sup> Ibugua Ngode Datagaliwabe mege biyago hale harimi. Tí agi mitangi bu kamibe, lene.✧

Ani layagola ti bibahendeme lalu, Ibugua ko biyagonaga homelo bolene nga, lalu lai hene.

<sup>65</sup> Maru hearume Yasu hamiaga tolo ba halu ibunaga dengui yi howa gime balu lalu, I bayagoni ogome baya lalu langi, lene. Agali mamage haga hearume ibu bo ariari bini.

✧ 14:49: Ais 53.7, Lg 19.47, 22.37, Yo 18.20 ✧ 14:50: Iba 88.8 ✧ 14:58: Yo 2.19 ✧ 14:61: Ais 53.7, Mg 15.5, Lg 23.9 ✧ 14:62: Dan 7.13 ✧ 14:64: LBM 24.16, Yo 19.7

*Pidahanda, Yasu manda nabido, lenego ogo*  
(Madiu 26.69-75, Lugu 22.56-62, Yone 18.15-18,25-27)

<sup>66</sup> Pida ibu anda pabe tamuhayagi berearia loma binigo mo miaga haguane timbuni biagonaga biabe bia haga wandari mbirame ibalu Pida ira deagoria dagare dogo bu berearia de hendene. <sup>67</sup> Ibugua Pida handa tiga howa lalu, Íbi Nasareteali Yasula mandagi hariligoni, lene.

<sup>68</sup> Ani layagola ibugua lalu, I ndo í bi laregoni i manda nabido, lene. Ani lalu ibu pabe harabani pialu hearia ega gogologome bi lene.

<sup>69</sup> Wandari biagome Pida hondowa agali biaruhondo lone lalu, Agali ogoni Yasu ibula haga, lene. <sup>70</sup> Ani layagola Pida ibugua halu mende lalu, I ndoyago, lene.

Emeneore howa agali biarume Pidahondo lalu, Í ndo larego nde í Galiliali kego ibulaore hariligoni, lene.

<sup>71</sup> Ani layagola Pidahanda wanakui minalu hongo howa lalu, Heneneore i ke haruyagua Ngode Datagaliwabe ibugua i pani ngilo, lalu, Agali mini larimigo i manda nabido, lene.

<sup>72</sup> Bi ogoni layagola ega gogologome halu mende layago hale howa ala Yasuhanda, Ega gogologome bi halu ki nale howa halu tebo ina Yasu manda nabido lolebere, layago Pidahanda mitangi bini. Mitangi buwa dara halu dugu bini.✧

## 15

*Yasu Pailate hearia haru penego ogo*  
(Madiu 27.1-2,11-14, Lugu 23.1-5, Yone 18.28-38)

<sup>1</sup> Egerebagiore hayagola loma binigo mo miaga haguane biarubi agali ala hene miniwi biarubi Mana lowinigo lawai haga biarubi Ganisolo agali bibahende biarubi urunime te lalu hene. Tigua Yasu pu senime hende howa Pailate hearia haru pene.✧

<sup>2</sup> Haru ibiyagola Pailatehanda Yasuhondo lalu, Yu wali agalinaga handame haga kini í kebe, lene.✧

Ani layagola ibugua ladai bialu lalu, Ína o laregonigo, lene.

<sup>3</sup> Loma binigo mo miaga haguane biarume lalu, Ibu ko dewa biya, lene. <sup>4</sup> Ani layagola Pailatehanda ibuhondo halu mende lalu, Ladai nabule dege kegonibe. Tigua ina ko dewa birigo layago hale haribe be nahebe, lene.

<sup>5</sup> Ani layagola Yasu ibu ladai nabiyagola Pailate ibu miniha mogo lowa Yasuni handaya hene.✧

*Yasu homelo ba, lenego ogo*  
(Madiu 27.15-26, Lugu 23.13-25, Yone 18.39-19.16)

<sup>6</sup> Bolangua Halu Penegonaga Tomo nolene horo harangi agali mbira garabaya kagola wali agalime, Gola, laragola Pailatehanda golaga hene. <sup>7</sup> Agali maru gabumane baba wai biyagola garabaya binigo mbira mini Barabasa hene. Ibugua agali homelo bayagola garabaya bini. <sup>8</sup> Horo ogoningi wali agalime Pailate hearia puwa ibuhondo lalu, Ína ala birilidagua áyu bibelo, lene. <sup>9</sup> Ibugua tihondo lalu, Yu wali agalinaga Handame Haga Kini kago gololiya hamelo kamibe, lene. <sup>10</sup> Loma binigo mo miaga haguane biarume henge lowa Yasu ibu hearia minu yalu ibiyagoni manda buore howa Pailatehanda ani lene.

<sup>11</sup> Wali agalime, Barabasa gola, lelonaga Loma binigo mo miaga haguane biarume mo la hene.✧ <sup>12</sup> Pailatehanda tihondo lone lalu, Yu wali agali kamirunaga Handame Haga Kini ka larimigo ibuhondo ina agi buabe, lene.

<sup>13</sup> Ani layagola tigua lone dalimu lalu, Ibu homelo ira bangani ba para habe, lene.

<sup>14</sup> Ani layagola Pailatehanda tihondo lalu, Ibugua ko mbira agi biyiyabe, lene.

Ani layagola tigua hongo howa dalimu lalu, Ibu homelo ira bangani ba para habe, lene.

<sup>15</sup> Ani layagola Pailatehanda wali agali biaru turu helo Barabasa golope howa ibugua ami agali hearuhondo, Yasu tibume balu ibu ira bangani homelo ba para hole haru pudaba, lene.

*Ami agalirume Yasu mege binigo ogo*

*(Madiu 27.27-31, Yone 19.2-3)*

<sup>16</sup> Ami agali biarume gabumane haru haganaga anda pabe tamuhayagi Yasu haru anda puwa ami agali bibahende hearu mo ngoai hene. <sup>17</sup> Mo ngoai howa tigua labolabo luni tagalitayabi Yasu karula howa pu aniheme bo buwa ibu hagianeni karula hene.

<sup>18</sup> Tigua gi hondone do lowa lalu, Yu wali agalinaga Handame Haga Kini haabo habelo, lene. <sup>19</sup> Ani lowa tigua ibunaga hagianeni gewame balu hamiaga tolo ba howa mine halu lalu, Í timbuni ke, lalu bulu paligi bini. <sup>20</sup> Ani mege bialu howa tigua labolabo tagalitayabi biago golowa ibuninaga labolabo karula hene. Ani buwa tigua ibu ira bangani ba para hole tagira haru pene.

*Yasu ira bangani ba para henego ogo*

*(Madiu 27.32-44, Lugu 23.26-43, Yone 19.17-27)*

<sup>21</sup> Ti harigani pialu hearia Sairiniali mbira mini Saimono ibu Aleganda Lubasala aba biago Yarusaleme ogoniha áyu dege anda ibalu hearia lola hene. Ibu lola howa ibu Yasunaga ira banga yilo ami agali biarume ibuhondo, Ya ya, dege layagola mo ya hene.✧

<sup>22</sup> Tigua Yasu haru pialu dindi mini Gologoda pene. Gologoda inanaga bi lalu, Haguane Kuni. <sup>23</sup> Puwa tigua waini ibabi ira mbiranaga ibane mini muwebi mandagi bimaga ho berelenego ibu nelu miyagola ibu nane wahene. <sup>24</sup> Ani buwa tigua ibu homelo ira bangani ba para hene. Ibunaga labolabo ai ibu mo harabe hondole tadu bialu berene.✧

<sup>25</sup> Yasu homelo ira bangani ba para hayago egerebagi ni do paya biyagola ba para hene.

<sup>26</sup> Tigua ibu ko biya lowa beba mbirani, Yu wali agalinaga Handame Haga Kini ogoni, gili buwa ira banga daligani ba para hene. <sup>27</sup> Ani buwa tigua agali ko biaga kirali Yasu heba mandagi mendego gi tigahayagi mendego gi lehayagi lowa ti ira banga tebirani ba para hene.✧ [ <sup>28</sup> Ani biyagome Anduane Homogonaga mbugani bi lo ngago ogo, Ibugua ko biaga heba pani nene, lalu gilibu winidagua lola hene.]

<sup>29</sup> Wali agali ti bolangua haga bialu piyarume Yasuhondo ma bongge laga bialu tongoyongo bi laga bialu lalu, Ehe. Anduane Homogonaga anda gialope halu horo tebira howa bia dai bulebero, larigo ída.✧ <sup>30</sup> Íni nahomolenaga íni pele mialu ira banga ogoriani howa dalerene, lene.

<sup>31</sup> Ogonidagua dege loma binigo mo miaga haguane biarubi Mana lowinigo lawai haga biarubi tini laga laga bialu Yasu mege bialu lalu, Wali agali maru nahomelonaga pele mialu kaligodago ibuni pele namibehedane wiaruabe. <sup>32</sup> Ina de hondolomayabi ibuhondo mini mbiraore wulumayabi Mbiralí Dabo Helenego Isaraele wali agali kamarunaga Handame Haga Kini kago ira bangani howa áyu ogoni dalilo, lene.

Ani layagola agali kira Yasu heba ira bangani ba para hayago labomebi ibuhondo mege dege bini.

*Yasu tongolo minigo ogo*

*(Madiu 27.45-56, Lugu 23.44-49, Yone 19.28-30)*

<sup>33</sup> Horombe hanuniore howa dindi ogoriani aruma ho wiane alendo ni gai layahayagi wá ho dai bini.✧ <sup>34</sup> Ani biyagola Yasuhanda bi hongo howa lalu, Eloi Eloi lema

✧ 15:21: Lm 16.13 ✧ 15:24: Iba 22.18 ✧ 15:27: Ais 53.12 ✧ 15:29: Iba 22.7, 109.25, Mg 14.58, Yo 2.19

✧ 15:33: Amo 8.9



sabagadanai. Inanaga bi lalu, Inaga Ngode Datagaliwabe-o inaga Ngode Datagaliwabe-o i aginaga wahalu piribe, lene.✧

<sup>35</sup> Bi layago hale howa wali agali maru ogoniha hearume lalu, Ibugua Elaya olaruago hale hadaba, lene. <sup>36</sup> Mbiragome gerai lalu puwa waini iba kaubi bereagoha mbirale tara dahundu ale ibira howa waini iba biru toleagola ira nguinini mo gedo howa Yasunaga ne hambuni ngelene. Ngelowa agali biagome lalu, Elayahanda ibu ira bangani howa golope hole ibirabe handamiya, lene.✧

<sup>37</sup> Yasu ibu bi dalimu lowa buhe ereba halu tongolo mini.

<sup>38</sup> Tongolo miyagola Anduane Homogonaga andaha labolabo timbuni gerela ho winigo daligani howa buda ki hene.✧ <sup>39</sup> Ami agali haru haga mbira heagome handade ho hearia Yasu tongolo miyagola hondowa lalu, Agali ogoni ibu Ngode Datagaliwabe Igini heneneoreda, lene.

<sup>40</sup> Magadala wali Meribi Yamese mende Yosesela aija Meribi Salaumibi wali maru heba emene kaundia howa handa amu ho hene.✧ <sup>41</sup> Ala Yasu Galilini hayangi wali urunime ibu poradagua puwa biamogo biaga berene. Wali maru dewa Yasu heba Yarusaleme ibiyaru tibi de hendene.

*Yasu tingini horo henego ogo*

*(Madiu 27.57-61, Lugu 23.50-56, Yone 19.38-42)*

<sup>42</sup> Ni palue dadai biyagola Sabada horo kaware howa tomo dawa manda manda bulene wini.✧ <sup>43</sup> Ogoningi Arimadia Ganisolo agali Yosebe ibu mini bayalewi henego ibu Ngode Datagaliwabehanda Handame Ho Holene tu helo hondo henego ibugua gi nahe elahé howa Pailate hearia puwa lalu, Yasu tingini mule poabe, lene. <sup>44</sup> Ani layagola Pailatehanda ibuni manda bialu abale tongo layabe nalebe manda nabi hene. Manda nabi howa ami haru haga biago olowa ibuhondo lalu, Ibu abale tongolo miyabe, lene. <sup>45</sup> Ani layagola ami haru haga biagome, Abale tongolo miya, lamiyagola Pailatehanda Yosebehondo, Yasu tingini mo pu, lene. <sup>46</sup> Mo pu, layagola Yosebe ibu labolabo pele bayaleore mbira yolo buwa mo winigome Yasunaga tingini ira bangani howa mo yalu daluwa labolabome mo kabu bini. Ani buwa ege andaha ala guabu winigo ogoniha hora howa ege tole timbunime paya anda hene. <sup>47</sup> Ani bialu hearia Magadala wali Meribi Yosesé aija Meribi libu Yasu hora heagoria de hendene.

## 16

*Yasu ibuni mo heya henego ogo*

*(Madiu 28.1-8, Lugu 24.1-12, Yone 20.1-10)*

<sup>1</sup> Sabada horo piai hayagola howa Magadala wali Meribi Yamesé aija Meribi Salau-mibi tigua Yasunaga tinginini hai hole weli tara ngabiore yolo bini. <sup>2</sup> Horo Sandengi egerebagiore ti ege anda biagoha pene. <sup>3-4</sup> Pialu howa tini lalu, Ege tole ege anda panga payiyago aiwa dugua helodabe, lama pene. Ege tole ogoni timbuniore winigo manda bialu ani lene. Pialu howa handa amu halu hearia ege tole panga biago dugua ho wiaria de hendene. <sup>5</sup> De hondowa ege anda biagoha anda pialu hearia agali mbira labolabo pele karule wali biarunaga gi tigahayagi bereago de hondowa ti mogo lowa handaya hene.

<sup>6</sup> Ani biyagola agali biagome tihondo lalu, Mogo naladababe. Nasareteali Yasu ira bangani ba para hayago hai bialu kamigo ibu ogoniha nawi ibuni mo heya halu piya. Ibu hora hayagoria ogoni ti de handadaba. <sup>7</sup> Pidabi Yasunaga talima piaga maru karubi ti karia pialu au lalimu. Yasu ibu bambaha halu Galili pole porago. Ibu ala langiyadagua goriani ti de hondoleberemigo, lamule pudaba, lene.✧

✧ 15:34: Iba 22.1 ✧ 15:36: Iba 69.21 ✧ 15:38: Har 26.31-33 ✧ 15:40: Lg 8.2-3 ✧ 15:42: Lg 2.25, 2.38  
✧ 16:7: Md 26.32, Mg 14.28

<sup>8</sup> Ani laya handala ti mogo lowa gi timbuni halu ege anda biagoha howa abale tagira pialu gerai lalu pene. Gi timbuni halu ti maruhondo bi nale puabo hene.

*Magadala wali Meri berearia Yasu ha pani henego ogo*  
(Madiu 28.9-10, Yone 20.11-18)

[<sup>9</sup> Horo Sandengi egerebagiore Yasu mo heya howa Magadala wali Meri ala de hendelo ibu bereria Yasu ha pani hene. Wali ogoni dama karia daragahe berearia Yasuhanda ala wara tagi hene.\* <sup>10</sup> Ha pani hayagola wali agali Yasu heba ala haga hearume dara howa dugu bialu hearia Meri ibugua lamule pene.\* <sup>11</sup> Puwa Merihanda lalu, Ibuni heyu heago ina de handaru, layagola hale howa tigua hawa larabe toba ho hene.

*Talima piaga kirali hearia Yasu ha pani henego ogo*  
(Lugu 24.13-35)

<sup>12</sup> Ani buwa agali kira harigani pialu hearia Yasu ibu ha pani hayagola libugua ibu agali tarabe toba ho hene. <sup>13</sup> Ani biyagola libugua wali agali maru Yasu heba ala haga biaru hearia dai buwa, Yasu handariba, lalu lamiyagola ti hawa larabe toba howa mini kira wu hene.

*Yasu agali bereali (11) biaru hearia ha pani henego ogo*  
(Madiu 28.16-20, Lugu 24.36-49, Yone 20.19-23, Abosolo 1.6-8)

<sup>14</sup> Ani buwa maniore ibunaga talima piaga bereali (11) biaru tomo nalu bereagoria Yasu ibu ha pani hene. Ha pani hayagola ibuni mo heya hayiyagola howa wali agali de handayarume bi layago ti hale howa mini mbiraore nawiyagobi bu mini giambe ho hayiyagolabi hondowa Yasuhanda ti talini.\* <sup>15</sup> Ibugua tihondo lalu, Dindi bibahendeni purogo lalu wali agali bibahendehondo bi mana debene lamima pilimu.\* <sup>16</sup> Bi mana debene yu tiga bu karume baboraya buwa pele mulene yu holebira. Yu tiga nabi karume pani nolebira.\* <sup>17</sup> Mo yai ho karume manane ogonibi walia holebira. Inaga minini howa dama daraga karu wara tagi holebiragobi wali agali taranaga bi lolebiragobi\* <sup>18</sup> tigua puya minayaguabi tomia iba nayaguabi nahomolebira. Tigua wali agali warago bo ngaru gime ela haragola dabi holebira, lene.\*

*Yasu dahuliya andaga iraga halu penego ogo*  
(Lugu 24.50-53, Abosolo 1.9-11)

<sup>19</sup> Anduane Homogo Yasuhanda tihondo bi layagola howa dahuliya andaga iraga halu Ngode Datagaliwabe gi tigahayagi pu berene.\* <sup>20</sup> Ani biya handala tigua purogo lalu dindi bibahendeni bi mana lamigi bima pene. Pialu howa Anduane Homogohanda ti biamogo bialu tigua bi mana lamiyago henene larago manda bilonaga manane walia hene.]\*

\* 16:9: Lg 8.2 \* 16:10: Lg 24.10 \* 16:14: 1 Ko 15.5 \* 16:15: Md 28.19, Ab 1.8, Kl 1.23 \* 16:16: Yo 3.18, 3.36, 12.48, Ab 2.38, Lm 10.9, 1 Pi 3.21 \* 16:17: Ab 2.4, 5.16, 8.7, 10.46, 1 Ko 12.10, 12.28 \* 16:18: Lg 10.19, Ab 5.15-16, 28.3-9, Ya 5.14-15 \* 16:19: Iba 110.1, Ab 1.2-3, 1.9-11, 2.33-34, 7.55 \* 16:20: Ab 5.12, 14.3, 1 Ko 2.4-5, Hi 2.3-4

## Lugu

### Luguhanda Bi Mana Debene gili binigo ogo

### Mbuga ogoha gilibu ngarunaga nemandi ogo

Bi Mana Debene Lugunaga mbugani gilibu ngago Isaraele wali agalibi wali agali tara tarabi ti bibahendenaga Pele Miaga Yasu ibu ka lalu lo nga. Yasu ibugua wali agali yagibano karuhondo Bi Mana Debene lamilo Ngode Datagaliwabe Dinini ibugua Lugu dabene lalu gilibu nga.

Yasu ibu homowa heyalu dahuliya andaga iraga halu peaha Keriso hameigini holene mana ogoni loyogo lalu anda henegonaga tebi Luguhanda dege mbuga mendeni Abosolo hearume biabe bialu henerunaga gilibu nga.

Yasunaga talima piaga marume bi mana nagilibi yu waheneyaru Luguhanda dewa gilibu winigo nga. Luguhanda gili binidagoni maru uru.

Yasu taba hanayangi dahuliyalirume bi lenegobi nogo sibi haru hagame Yasu taba hono berearia hondo penegobi Yasuhanda bi yobage lalu Samaria agali mbirame Yu agali mbira harigani bo wiaria hondowa biamogo binigobi igiri heyogone pu ereba halu lone ibu aba hearia dai binigobi te uruni mbuga maruni gilibu nawigo Lugunaga mbuga hanguni gilibu ngaria daga lolebere.

Mbuga ogoniha Ngode Datagaliwabehondo bi lolenebi Ngode Datagaliwabe Dinini mo tene holenebi Yasuhanda agali hangu ndo walibi mitangi bulenebi iname ko birimago ibugua domo wahaga kagobi te uruni mo dunini halu gilibu nga.

#### **Bulu бага бува кuni gilibu ngago**

*1.1-4*

Gili binigonaga irane nga *1.5-2.52*

Baboraya biaga Yone Yasula libu taba henegonagabi igirini bialu henegonagabi nga *3.1-20*

Baboraya biaga Yonehanda bi mana lamialu henegonaga nga *3.21-4.13*

Yasu baboraya binigobi dama Heyolabeme Yasu ba hendenegonagabi nga *4.14-9.50*

Yasuhanda Galilini biabe taratara bialu henegonaga nga *9.51-19.27*

Yasu ibu Galili howa Yarusaleme penegonaga nga *19.28-23.56*

Sarere mbirani Yasuhanda Yarusalemhayagi howa bialu henegonaga nga *24.1-53*

Yasu homowa heyinigobi wali agali de hendelo ibuni ha pani haga binigobi dahuliya andaga iraga halu penegonagabi nga

<sup>1</sup> Agali homogo Tiobilasa-o mbirale tara tara dewa ina hemagoria biyagonaga te agali dewalime gilibule manda bialu hene. <sup>2</sup> O biyadagoni tigua de handayarubi bi mana lawai hayarubi piganengi tenialu inahondo langiyadagua bebani gilibu wini. <sup>3</sup> Anigo ina o biyadagoni pigane tenialu biyadagua bayuwa manda buwa í de handalu daga labelonaga gilibu wia hole manda biru. <sup>4</sup> Ina ogoni birudagoni ala agali maru hearume bi ogoni ihondo lawai hayago heneneore biyagoni ina bayuwa manda bibelo ina te ogoninaga gilibu wia haro.

#### *Dahuliyalime, Ilisabedehanda Yone taba honolebira, lenego ogo*

<sup>5</sup> Yudia dindini wali agali hearu Herodo handame haga kini heangi loma binigo mo miaga agali mbira mini Segaraia hene. Ibu Abaya loma binigo mo miaga henego aria hene. Ibu one mini Ilisabede ibu Arononaga aguanene berene. <sup>6</sup> Ani buwa libugua Ngode Datagaliwabena deni howa bayale dege bialu Anduane Homogonaga bi mana lo wiago bulene wiadaguaore biai halu hene. <sup>7</sup> Ilisabede ibu waneigini taba hanabe nahe wali tabua berene. Libu waneigini nahe waheore labolabo hene.

<sup>8</sup> Horo mbirungi Segaraia ibu loma binigo mo miaga agali howa loma binigo mo miaga marume biabe bia aribia hagamadagua buwa ibugua bulene winingi Anduane Homogonaga andaha howa biabe bialu hene. <sup>9</sup> Delolenenaga dagia wiagoriani mbirale mini inisenesi Ngode Datagaliwabehondo nga bilo delolene winigo aiwa delolebadabe hondole loma binigo mo miaga hearume dabo handalu hearia Segaraiahanda bulene wini. Ani biya handala ibu Anduane Homogonaga andaha anda pene. <sup>10</sup> Anda puwa ibugua mbirale mini inisenesi hagua ngabiore bilo lowa delalu hea tambu wali agali dewa tagirani bu hearume Ngode Datagaliwabehondo bi lalu hene.

<sup>11</sup> Segaraia ibu ani bialu hearia mbirale mini inisenesi hagua ngabiore bilo delolenenaga dagia wiagoriani gi tigahayagi Anduane Homogonaga dahuliyali mbira ibalu ha pani ho hene. <sup>12</sup> Ha pani ho hearia de hondowa Segaraia ibu minime mogo lowa gi hene. <sup>13</sup> Gi hayago hondowa dahuliyali biagome ibuhondo lalu, Segaraia-o gi nahabe. Ina Ngode Datagaliwabehondo bi larigonaga Ngode Datagaliwabe ibu hale hayago í one Ilisabede ibugua igiri mbira taba honolebira. Taba hanaragola ina ibu mini Yone wibe, lalu lamini. <sup>14</sup> Ani lamialu, Igiri ogoni taba hanaragola íbi wali agali maru dewa bu karu tibi turu hai ho holeberami. <sup>15</sup> Taba hanaragola howa ibu Anduane Homogonaga deni howa agali timbuniore holebira. Ani bu howa ibugua waini ibabi lulu yagane iba marubi nolene nawi holebira. Ibu aiyahanda ibu taba hanarangiore howa Ngode Datagaliwabe Dinini ibuha ho tolaihe holebira. <sup>16</sup> Ho tolaihe howa ibugua Isaraele wali agali dewa Anduane Homogo tinaga Ngode Datagaliwabe kagoria haru dai biai holebira. <sup>17</sup> Ngode Datagaliwabe bi mana latagi haga Elaya timbuni hongohe henedagua ibubi ogonibi dege howa Anduane Homogo maha ibilo ibu ala bamba halu pialu holebira. Bamba halu pialu howa ibugua aba aiyabi waneiginibi mo mbiraore halu mandagi helalu wali agali Ngode Datagaliwabe bi mana wahalu piaga karu mini mo beregedai halu mini tigabiwi karume manda biagamadagua ti manda bilo ibugua mo manda bia holebira. Anduane Homogo ibilo tagi ibugua Anduane Homogonaga wali agali mo tiga bialu manda manda bu helolebira, lalu dahuliyali biagome lamini.

<sup>18</sup> Ani layagola Segaraiahanda dahuliyali biagohondo ladai bialu lalu, Ibi í onebi iya wali agali tabua labolabo kabagodago ina bi larigoni henene lari lalu ina agua manda buabe, lene.

<sup>19</sup> Ani layagola dahuliyali biagome ladai bialu lalu, I mini Gaberelo Ngode Datagaliwabe karia haabo haruli. Ina bi bayale áyu í langirugoni langule Ngode Datagaliwabehanda, Bi ogoni lama pu, layadagoria howa ibu kogoni. <sup>20</sup> Anigo ina bi larogo lola holene tu haragola lola holebiraore. Ina bi ogoni mo henene nahe mini kira wu harigo ogoni bulebira langirugo lola holene horo helo nde í bi nalabehe holebere, lalu lamini.

<sup>21</sup> Segaraia ani bialu hea tambu ibu tagira ibilo wali agali tagirani hayaru ti hondo haabo hene. Segaraia ibu Anduane Homogonaga anda tamuha hondo haabo hayagola tigua ibu agi bialu haabo kabe toba howa minime tai bialu hene. <sup>22</sup> Segaraia ibu tagira ibuwa bi labe naheyagola wali agali biarume ibu tara mbira de gandeba ale Anduane Homogonaga andaha handayadago manda bini. Ibugua tihondo bi nalabehe howa bi loa hayago ibuni gime walia halu hene.

<sup>23</sup> Emene halu ibunaga biabe bulene winigo biai halu Segaraia ibu andaga dai bini. <sup>24</sup> Mani howa Ilisabede ibu tombeha gali birayagola ibu ege duria andaga biraabo hene. <sup>25</sup> Biraabo howa lalu, Anduane Homogohanda ihondo bayale ogoni biamogo biyada. Ibugua í hondowa dara hayagome ai wali agali marume ihondo, Wali tabua bedego, nalolebira, lene.

*Dahuliyalime Merihondo, Yasu taba honolebere, lenego ogo*

<sup>26</sup> Ilisabede ibu tombeha gali bere berenego ege waraganengi Ngode Datagaliwabehanda dahuliyali mbira mini Gaberelohondo lalu, Í Galilina tano mini Nasarete

pobe, lene. <sup>27</sup> Wandari mbira mini Meri Yosebe ibu dabu bule lo berelenego berearia dahuliyali biagome ibuhondo bi lamule pene. Yosebe ibu Isaraele wali agalinaga Kini Debidinaga aguanene hene. <sup>28</sup> Ani bu berearia dahuliyali biagome puwa lalu, Meri-o mo palia holene íha wiaabo helo laro. Anduane Homogo ibu í heba mandagi howa turu timbuni habelo mo turu haya, lene.

<sup>29</sup> Dahuliyalime bi layago hale howa Meri ibu bi ogoni aginaga larabe toba howa mini burugu lowa tai timbuni bialu berene. <sup>30</sup> Ani bialu berearia dahuliyali biagome ibuhondo lalu, Ngode Datagaliwabehanda í mitangi bialu íhondo turu ho kago gi nahabe. <sup>31</sup> Í tombeha gali bere birulebere. Í igiri gali ogoni taba honowa ibu mini Yasu wibe, lalu lamini. <sup>32</sup> Ani lamialu lalu, Igiri ogoni ibu agali mini lene holebira. Wali agali bibahendeme lalu, Ibu Ngode Datagaliwabe Daligaorene Daliga Kagonaga Igini kagoni, lolebira. Anduane Homogo Ngode Datagaliwabehanda Yasu ibunaga mamali Debidi kini henedagua ibubi ho aribia ho helolebira. <sup>33</sup> Ibugua Yagaba aguanene karunaga kini haabobo bu holebira. Iyunaga handame ho holene wiaabobo bu wulebira, lalu lamini.

<sup>34</sup> Ogonidagua lamiyagola Merihanda dahuliyali biagohondo lalu, I wandari mabuage agalila nahene bedagodago bi áyu lariruni agua bialu bulubadabe, lene.

<sup>35</sup> Ani layagola dahuliyali biagome ladai bialu lalu, Ngode Datagaliwabe Dinini íha daluwa Ngode Datagaliwabenaga hongome í karula holebira. Ani bulebirago manda buwa igiri taraore ogoni ibu Ngode Datagaliwabe Igini ka lalu lolebira, lene.

<sup>36</sup> Dahuliyali biagome ani lamialu lalu, Ínaga damene Ilisabede bedago mitangi bibe. Tigua ibu waneigini hono wibe nahe lenego áyu ibu wali waheore biruwa ibunaga tombeha gali bere beda. Gali biru bereane ege waragaria pene. <sup>37</sup> Ngode Datagaliwabehanda mbirale mbira nabibehe nawi, lalu lamini.

<sup>38</sup> Ani lamiyagola Merihanda lalu, I Anduane Homogonaga biabe bia hagane wandari bedogo ína áyu langiridagua íhondo biai helo, lene. Ani laya handala dahuliyali biagome Meri berea handala pene.

### *Meri ibu Ilisabede nenege penego ogo*

<sup>39</sup> Dahuliyali biago ibu piya handala Meri ibu heyalu abale pialu Yudiani bare wiaru iri dali bigi bima pialu tano mbira wiagoria anda pene. <sup>40</sup> Tano ogoriani anda pialu Segaraianaga andaga Ilisabede bereria puwa Merihanda ibuhondo, Hagibunio í bederia nenege ibirugo, lene. <sup>41</sup> Merihanda Ilisabedehondo bi layago hale howa Ilisabedenaga tombeha gali birayagome ema bini. Ani bereria Ngode Datagaliwabe Dinini Ilisabede ibuha ho tolayagola <sup>42</sup> Ilisabedehanda bi dalimu lalu, Meri-o í wali maru bedarubi ndo Ngode Datagaliwabehanda íore mo turu timbuniore hayada. Ína gali taba honoleberegó ibubi mo turu holebira, lene. <sup>43</sup> Ani lowa lalu, Ina bayale agi birugonaga inaga Anduane Homogo kagonaga aya í í berewaria ibiribe. <sup>44</sup> Ína lalu, Í bederia nenege ibiru, larigo hale harugola inaga tombeha gali bedago ibu turu howa ema biya, lene. <sup>45</sup> Ilisabedehanda ogonidagua lamialu lalu, Anduane Homogohanda, Bulebero, layadagua henemane lola holebiragoni ína mini mbiraore wu bedegome í turu timbuni ho birulebere, lalu lamini.

### *Merihanda turu ho biruwa iba gana lenego ogo*

<sup>46</sup> Lamiyagola Merihanda lalu,

Inaga gubalinime Anduane Homogonaga mini yaraga harogoni.

<sup>47</sup> Ngode Datagaliwabe ibu inaga Pele Ngiaga kago inaga miniha turu ho bedogo.

<sup>48-49</sup> Iyunaga biabe bia haga wandari í habane nabulene berewaria Ngode Datagaliwabe ibugua í dara howa mitangi bini.

Ngode Datagaliwabe Hongo Gibihe kago ibugua galone dunini timbuni ogoni íhondo biyago mitangi bialu



áyu wali agali marumebi mani holebistarumebi, Meri ibu turu timbuni ho birulene nga, lolebira.

Ngode Datagaliwabenaga mini bayale honani ale ka.

<sup>50</sup> Wali agali dabane áyu hama pedarubi mani ho aribia holebistarubi ti bibahendeme Ngode Datagaliwabenaga mini mo yaraga halu karu

Ngode Datagaliwabehanda tihondo dara howa biamogo bialu ka.

<sup>51</sup> Wali agalime mine howa tini hangume bule lowa manda manda bu wu hearia ibugua ibunaga gi hongo timbunihegome dogola ai nai biyagola ti wahalu kilikala lalu purogo lai hene.

<sup>52</sup> Kini hongohe hearu handame ho hearia ibugua ti mo dindiha helalu wali agali dindiha hearu mo yaraga ho helene.

<sup>53</sup> Wali agalime tinaga miniha garibilo hearu bayale mbirale mbirale ibugua ti mo tol hai halu

wali agali mbirale mbirale dewawi hearu ibugua tini giha mbira nayi, Pudaba, lene.

<sup>54</sup> Ibugua inanaga mamalihondo, Bulebero, lowinidagua buwa ibunaga biabe bia haga Isaraele biamogo bule ibini.

<sup>55</sup> Ibugua Abarahamabi Abarahamanaga aguanene ala henerubi mani holebistarubi tihondo dara howa biamogo bulene mitangi bia ho wiaabo ka, lalu Merihanda bi ogonidagua lamaro bini.

<sup>56</sup> Meri ibu Ilisabedela ege tebira agima biralu nde ibuni andaga dai bini.

### *Ilisabedehanda baboraya biaga Yone taba henene go*

<sup>57</sup> Ilisabedehanda gali taba honolene tu hayagola ibugua igiri gali mbira taba henene.

<sup>58</sup> Taba hanayagola wali agali mandagi haga hearubi ibunaga damene hearubi ti ibu berearia ibuwa tigua Anduane Homogohanda Ilisabedehondo bayale gibiore biyagola hale howa ti ibu heba mandagi turu haga bu hene.

<sup>59</sup> Horo halini bolangua hayagola tigua igiri gali biagonaga dongone podo mabu bia hole pene. Puwa tigua igiri biago aba mini Segaraia winigo igiri biagonaga minibi Segaraia dege wule biyaria <sup>60</sup> ibu aiyahanda lalu, Ogoni ndo ibu mini Yone wimiya, lene.

<sup>61</sup> Ani layagola tigua ibuhondo lalu, Ínaga damene bibahende karu mbirali mini ogoni lalehe mbira nahe, lene. <sup>62</sup> Ani lowa tigua ibu abahondo, Í igini mini ai wule hamelo kebe, lalu gime walia hene.

<sup>63</sup> Ani biyagola Segaraiahanda beba gili buliya ngi la nabi gime dege walia hene. Ani walia hayagola tigua ibuhondo beba mini. Miyagola ibugua bebani gili bialu, Ibu mini Yone, gili bini. Ani gili biyago de hondowa tigua handaya hene. <sup>64</sup> Ani gili biyaore Segaraia ibu bi lone labehe hearia ibugua Ngode Datagaliwabe mini yaraga halu hene.

<sup>65</sup> Ani biyagola wali agali ti ibu heba mandagi haga hearume mogo timbuni lene. Yudia dindini bare bibahende wiaruniha tara ogoni biyiyagonaga te loyogo lalu hene.

<sup>66</sup> Bibahendeme te ogoni layago hale hayaru tigua mitangi bialu, Anduane Homogonaga hongo holene ibu heba haore biaruago igiri ogoni ibugua agi bulenaga holobadabe, lalu hene.

### *Segaraiahanda mbiwia halu bi latagi henene go*

<sup>67</sup> Yone aba Segaraia ibuha Ngode Datagaliwabe Dinini ho tol laihe howa ibugua mbiwia halu bi ogodagua latagi halu lalu,

<sup>68</sup> Iname Anduane Homogo Isaraele wali agalinaga Ngode Datagaliwabe kagonaga mini yaraga hama.

Ibugua ibunaga wali agali biamogo bulene wiagoria ibalu ti golope hole hayada.

<sup>69</sup> Ibunaga biabe bia haga Debidinaga aguanene mbirali ogoni ibu inanaga Pele Ngiaga hongohe helo ibugua dabo helayada.

<sup>70</sup> Ibugua ibunaga mana latagi haga lomo bia ho heleneruha howa bambaore ani bulebero lalu lowinigo ogo.

<sup>71</sup> Inanaga waitigi karume ina dariba nahelobi inahondo handabe manga ho karunaga hongo kagoha kamaria howabi ibugua, Ina pele ngulebero, lalu lowini.

<sup>72</sup> Ibugua inanaga mamalihondo dara howa, Biamogo bulebero, lalu, Habo nalolene bi baya taraore mbira ala lowinigo mitangi bulebero, lalu lowini.

<sup>73-74</sup> Ibugua inanaga mamali Abarahamahondo bi galone duniniore lowinigo ogo, Iname gi nahe horo bibahende howa ibunaga biabe bia halu holomaya inanaga waitigi karume ina dariba ho ngagoria howa ibugua ina pele ngialu haru dai bulebero, lalu lowini.

<sup>75</sup> Ani lenego irane ina dindini kamagola howa ibu deni iname bayalebi tigabibi howa ibunaga biabe bialu holomayanaga lowini.

<sup>76</sup> I igini-o tigua nde, I Ngode Datagaliwabe Daligaorene Daliga Kagonaga mana latagi haga kegoni, lolebira.

Anduane Homogo ibilo ina bamba halu ibunaga hariga ba halu mo tiga bima polebere.

<sup>77</sup> Ina ibunaga wali agali lamialu, Tigua ko birimigo ibugua domo wahai halu pele ngulebira, lamulebere.

<sup>78</sup> Inanaga Ngode Datagaliwabe ibu hendore howa dara halu biamogo biaga ka. Ibugua ina haabo holomaya pele mulene wa timbuniore holene aleme tagira ibalu

<sup>79</sup> wali agali homolenenaga aruma holene ngagoria karu ibugua hari daligaha howa wa hadali helolebira.

Ina mo palia holene ngagoria pole pialu holomayanaga ibugua bayuwaore haru holebira,

lalu bi ogoni Segaraiahanda mbiwia halu latagi hene.

<sup>80</sup> Ibu igini biago mini tinginibi boga bialu hongo halu anda hene. Ani buwa ibugua Israele wali agali hearume ibu de hendelo hamani ha pani holene tu wilo lowa ibu dindi ko wali agali nahaga wiagoha haabo hene.

## 2

### *Merihanda Yasu taba henene go ogo (Madiu 1.18-25)*

<sup>1</sup> Horo uruningi Lomo agali mini Ogasadasa ibu Kini howa ibugua wali agali handame ho hearu bibahendenaga mini gili biai holene nga lowini. <sup>2</sup> Gabumane agali mini Kuiriniasa ibugua wali agali Siria dindini hearu haru hearia mini gilibu wulene pigane ogoningi wini. <sup>3</sup> Ogonidagua howa wali agali bibahende tinaga dindi tene pugu pugu bialu bebani mini gilibu wule pene.

<sup>4</sup> Ani bialu Yosebe ibu Galiliahayagi Nasarete tano howa Yudiahayagi Bedeleheme tano ogoniha pene. Bedeleheme ogoriani bambaore handame haga Kini Debidi ibu hene. Yosebe ogoniha penedagoni ibu Debidinaga aguanene howa pene. <sup>5</sup> Yosebe ibu one Meri ayuore dege dabu bule lo berelene go libu haru mini wule pene. Meri ibu tombeha gali bere berene go <sup>6</sup> libu Bedelehemeni hearia Meri ibu gali taba honolene tu hene. <sup>7</sup> Ani hayagola Meri ibu igiri mbira pigane taba honowa labolabome huba buwa nogo bulumaga tomo naga mbogoyi wiagoha pale lene. Mbogoyi ogoniha pale lenedagoni irane wali agali palu ngoai hagane anda heago tola tagi hai howa henge nawiyagola bini.\*

### *Dahuliyalime nogo sibi haru hagaruhondo bi lenego ogo*

\* 2:5: Lg 1.27    \* 2:7: Md 1.25

<sup>8</sup> Dindi ogoninaga mbirahayagi nogo sibi haru haga maru hearume ti mbiragani tinaga nogo sibi tagirahayagi haru hene. <sup>9</sup> Ani haru hearia Anduane Homogonaga dahuliyali mbira ha pani hayagola Anduane Homogonaga wá taraore holene ti heagoria hadali hene. <sup>10</sup> Ani biyagola nogo sibi haru haga biaru ti gi howa mogo timbuniore lo hene. Ani gi ho heago hondowa dahuliyali biagome lalu, Gi nahadababe. Ina wali agali bibahende bu karu turu hai holenenaga bi bayale langule íbu kogo.✧ <sup>11</sup> Áyu mbiraga ogoni Debidinaga tano ngagoriani tinaga Pele Ngiaga íbu kago ibu Anduane Homogo Keriso ka.✧ <sup>12</sup> Ogoni heneneoreda manda bilimulonaga igiri gali ogoni ibu nogo bulumaga tomo naga mbogoyi ngagoha labolabome huba buwa pale ledaria handa walía holeberami, lene.

<sup>13</sup> Dahuliyali biagome bi ogonidagua lamiyagola abaleore dahuliyali dewaore dahuliyali mbira abale íbu hayago heba mandagi ha pani hene. Ha pani ho howa Ngode Datagaliwabenaga mini yaraga halu iba gana lalu,✧

<sup>14</sup> Ngode Datagaliwabe dahuliyali andaga daligaore kagonaga mini yaraga holene nga.✧ Wali agali dindi bibahendeni Ngode Datagaliwabehanda turu ho karu tinaga gubaliniha Ngode Datagaliwabehanda mo palia ho ka, lene.

### *Nogo sibi haru haga agali ti Yasu hondo penego ogo*

<sup>15</sup> Ogonidagua lalu dahuliyali biaru ti dahuliyali andaga dai bini. Dai biyagola nogo sibi haru haga biarume tini lo mitangi bialu lalu, Áyu ogoni Anduane Homogohanda galone mbira inahondo walía hayagoni handamiya Bedeleheme ma nalare, lene.

<sup>16</sup> Ani lalu ti abaleore Bedeleheme pialu Meri Yosebela berearia handa walía howa Yasubi mbogoyi nogo bulumaga tomo naga wiagoha paleria hendene.✧ <sup>17</sup> Tigua igiri gali biago handalu howa bi bibahende dahuliyali biagome ogoni agua bulebira layagola hale ho yayago Meri Yosebela lamiai hene. <sup>18</sup> Ogonidagua lamiai hayagola wali agali bibahende bu hearume nogo sibi haru haga biarume layago hale hai hene. Hale howa ti mini burugu lowa mogo lai ho hene. <sup>19</sup> Meri ibugua nde bi bibahende layane hale haluibunaga miniha mo pe hai howa mitangitangi bialu berene.✧ <sup>20</sup> Ani bialu nogo sibi haru haga biaru dahuliyali biagome aguaore bulebira lalu lamiyadaguaore biai hayagola hale hayagonagabi deme handayagonagabi ti dai bialu howa Ngode Datagaliwabenaga mini yaraga hama pene.

### *Yasu mini winigo ogo*

<sup>21</sup> Ogonidagua buwa horo halini bolangua hayagola igiri gali biagonaga dongone podo mabu bia halu howaibunaga mini Yasu wini. Yasu mini ogoni ibu aiya Meri tombeha gali nabere howa dahuliyalime ala, Yasu wibe, lalu lamiyadagua wini.✧

### *Ana Simionola libu Anduane Homogonaga andaha hearia Yasu yalu ibinigo ogo*

<sup>22</sup> Mosese heneyangi waneigini aiya abalame bulene winigo Mana lowinidagua bulene tu hayagola Yosebe Merila libugua igiri biago Anduane Homogohondo lomabu mule Yarusaleme yalu pene.✧ <sup>23</sup> Ogoni tene agi Anduane Homogoibunaga mana lowini ngago ogo, Igiri pigane wahene walime taba hanaragola howa igiri ogoni Anduane Homogohondo loma bia holene nga, lalu gilibu nga.✧ <sup>24</sup> Mana mende bi lowinidagua Yosebe Merila libugua bule pene. Mana mende lowini ngago ogo, Ega malibu ale kirayaguabi ega malibu ale dege emene tara igini kirayaguabi Anduane Homogohondo bo mulene nga lowinidagua bo mule pene.

✧ **2:10:** Pig 12.3, Md 28.19, Mg 1.15, Lg 24.47, Kl 1.23 ✧ **2:11:** Ais 9.6, Md 1.16, 1.21, Ab 2.36, Pb 2.11 ✧ **2:13:** Iba 103.20, Dan 7.10, Hi 1.14, Mo 5.11 ✧ **2:14:** Ais 57.19, Lg 19.38, Lm 5.1, Eb 2.17, Kl 1.20 ✧ **2:16:** Lg 2.10-12 ✧ **2:19:** Lg 1.66, 2.51 ✧ **2:21:** LBM 12.3, Md 1.21, 1.25, Lg 1.31, 1.59 ✧ **2:22:** LBM 12.1-8 ✧ **2:23:** Har 13.2, 13.12-15, Dag 3.13, 8.17

<sup>25</sup> Ogoningi agali mbira mini Simiono ibu Yarusalemeni hene. Agali ogoni ibu Ngode Datagaliwabe mitangi bialu bayale biagabi Ngode Datagaliwabehanda Isaraele wali agali pele milo manda bu hagabi hene. Simiono ibu Ngode Datagaliwabe Dininihe hene. <sup>26</sup> Ngode Datagaliwabe Dinini ibugua Simionohondo ala lowa lalu, Í nahome keore Anduane Homogohanda Mbirali Dabo Helenego ibulebira lowinigo íbu kagola hondolebere, lalu lamini. <sup>27</sup> Ani lamuwa Ngode Datagaliwabe Dinini ibugua Simiono Anduane Homogonaga anda heago tamuha haru anda pene. Haru anda piyagola Yasunaga aba aiyalame Mana lowinidagua libunaga igini Ngode Datagaliwabehondo lomabu mule taba yalu ibini. <sup>28</sup> Ani taba yalu ibiyagola Simiono ibugua Yasu gime taba yuwa Ngode Datagaliwabenaga mini yaraga halu kaj lalu ogodagua lene.

<sup>29</sup> Anduane Homogo ína bi bamba langirigo lola harago <sup>29</sup> ínaga biabe bia hagane o kogo ínaga gubalini mo palia howa í homolene karulape kogoni.

<sup>30</sup> Íninaga deoreme ína pele mulene ngulebero larigoni hendedo. <sup>30</sup>

<sup>31</sup> Ína ogoni mo manda manda bu wirigo wali agali bibahendeme de hendelo birigoni.

<sup>32</sup> Ibu wá holene howa Yu wali agali ndo tara tara karume ínaga mana manda bilo mo walia holebi <sup>32</sup>

ínaga Isaraele wali agali kamarunaga mini mo yaraga holebi kagoni, lalu Simionohanda lai hene.

<sup>33</sup> Simionohanda bi ogoni Yasu mitangi bialu layagola hale howa Yasunaga aba aiyala libunaga minime mogo timbuni lene. <sup>34</sup> Ani biyagola Simionohanda ti mo turu halu igiri aiyá Merihondo bi ogodagua lamini. Ibugua lalu, Hale ha. Igiri ogoni ibugua Isaraele wali agali dewa maru mo pila helo maru mo heya helobi Ngode Datagaliwabehanda ibu dabo helene. Ibu Ngode Datagaliwabenaga manane kago hondowa wali agali dewame ibuhondo bi ko lalu handabe manga howa <sup>35</sup> tinaga miniha manda bu kagobi la pani holebira. Ani biragola dara bulene ogoni wai bulene ayu tibu nehe aleme ínaga gubaliniha anda poragola tandaga biraligobi bulebira, lalu Merihondo lamini. <sup>33</sup>

<sup>36-37</sup> Ogoningi wali dalo mbira waheore mini Ana ibu Ngode Datagaliwabe bi mana latagi haga berene. Ibu Asa hameigini mbira mini Penuelenaga wane berene. Ala ibu agali puwa ibu agalinila bereane mali karia pene. Ani pu berearia ibu agalini homene. Ibu mali pira halirani maria (84) biraabo howa waheore berene. Ani biruwa ibu Anduane Homogonaga andaha horo mbira yu wa nahe biraabo haga berene. Ibugua Ngode Datagaliwabe mitangi bialu tomo nane howa ibuhondo bi laabo halu horombe mbiragabi ani biraga berene. <sup>38</sup> Ogonidagua biaga berenego Yosebe Merilame Anduane Homogonaga andaha Yasu taba yu hearia hondowa Ana ibu kaware ibalu ibugua Ngode Datagaliwabehondo kaj lene. Ani lowa ibugua wali agali Ngode Datagaliwabehanda pele ngilo Yarusalemeni hondo hearu tihondo igiri ogoninaga te lamiai hene. <sup>36-37</sup>

### *Ti Nasarete dai binigo ogo*

<sup>39</sup> Yosebe Merila libugua Anduane Homogohanda bi mana lowinidagua biai halu Yasu taba yalu ti tini andaga Galiliha tano mbira winigo mini Nasarete dai bini. <sup>40</sup> Dai bu heagola Yasu ibu anda halu hongo hayagola mini boga bialu mini gigabiwi holene ibuha tó laihe hene. Ani bu hayagola Ngode Datagaliwabenaga turu howa biamogo bia holeneru ibuha wini. <sup>39</sup>

### *Yasu igiri emene howa Anduane Homogonaga andaha pu henego ogo*

✧ 2:25: Ais 40.1, 49.13, Mg 15.43, Lg 2.38 ✧ 2:26: Iba 89.48, Hi 11.5 ✧ 2:29: Pig 46.30, Pb 1.23 ✧ 2:30: Ais 52.10, Lg 3.6, Ta 2.11 ✧ 2:32: Ais 9.2, 42.6, 49.6, 52.10, 60.1-3, Md 4.16, Ab 13.47, 28.28 ✧ 2:34: Ais 8.14, Hos 14.9, Md 21.42, Ab 28.22, Lm 9.32-33, 1 Ko 1.23, 1 Pi 2.7-8 ✧ 2:35: Iba 42.10, Yo 19.25 ✧ 2:36-37: Ab 26.7, 1 Ti 5.5 ✧ 2:38: Ais 52.9, Mg 15.43, Lg 2.25, 24.21 ✧ 2:39: Md 2.23 ✧ 2:40: Lg 1.80, 2.52

<sup>41</sup> Mali bibahendengi Bolangua Halu Penegonaga Horo haragola Yasu ajiya abala libu Yarusaleme piaga hene. ✧ <sup>42</sup> Yasu ibunaga mali pira mbirani kira (12) hayagola ibu ti heba pene. <sup>43</sup> Tomo nolene horo uruni piai hayagola libu andaga dai bialu hene. Yasu ibu Yarusalemeni helo wahalu manda nabi howa libu hangu dai bialu hene. <sup>44</sup> Ibu wali agali maru ibiradagua ibirabe toba howa libu horo mbiru puabo hene. Ani buwa libugua Yasu tai bialu libunaga damenerubi wali agali marubi tihondo, Yasu de handarimibe, lalu tai bialu hene. <sup>45</sup> Tai biaabo halu libugua Yasu handa walia nahe howa Yaruselemani ibu tai bima dai bini. <sup>46</sup> Horo kiru howa tebonengi Anduane Homogonaga andaha puwa libugua Yasu Yu agali lawai hagaru heba biralu tigua bi layago hale halu biruwa bi ladai bialu berearia handa walia hene. <sup>47</sup> Yasuhanda bi layago hale ho hayarume ibu mini timbuniwi howa ladai biyago hale howa ti minime mogo lo hene. <sup>48</sup> Ibu ajiya abalame Yasu de hondowa miniha mogo lowa ibu ajiyahanda ibuhondo lalu, Igini-o iyahondo ogoni birigo aginagabe. Í aba iyame mini burugu lowa í tai biaabo halu hariba, lene.

<sup>49</sup> Ani layagola ibugua ladai bialu lalu, Libugua i tai biribidago agibe. I Abanaga andaha i holene ngago manda nabi haribibe, lene. ✧ <sup>50</sup> Bi ani layago hale howa libu manda nabi irane aginaga larabe toba ho hene. ✧

<sup>51</sup> Ani biyagola howa Yasu ibu ajiya abala heba Nasarete dai buwa libugua bia layadagua ibugua biai halu hene. Urunidagua bigi biyagola ibu ajiyahanda ibunaga miniha mitangitangi bialu biraabo hene. ✧ <sup>52</sup> Yasu ibu tingini minibi boga bialu ibu mini gigabi wialu anda hayago hondowa Ngode Datagaliwabehandabi wali agali hearumebi ibuhondo turu hai ho hene. ✧

### 3

#### *Baboraya biaga Yonehanda bi mana lamialu henego ogo (Madiu 3.1-12, Maga 1.1-8, Yone 1.19-28)*

<sup>1</sup> Agali Taiberiasa ibu dindi dewa handame haga Kini howa mali pira mbirani duria (15) ibugua handame howa heangi Pondiasa Pailate ibu Yudia gabumane haru haga heangibi Herodo ibu Galili haru haga heangibi Herodo hamene Pilibi ibu Idureabi Taragonaidisibi haru haga heangibi Lisania ibu Abilene haru haga heangibi <sup>2</sup> Anasabi Kaiabasabi libu Loma Binigo Mo Miaga Haguane Timbuni heangibi ogoingiore Segaraia igini Yone ibu dindi ko wali agali nahaga wiagoria howa Ngode Datagaliwabehandabi ibuhondo bi lamini. ✧ <sup>3</sup> Ngode Datagaliwabehandabi ibuhondo bi lamiyagola Yonehanda dindi bibahende iba Yodana piyagohayagi ibaga bialu wali agalihondo mana lamialu lalu, Ngode Datagaliwabehandabi ti ko birimigo domo wahelo bu mini beregedowa baboraya bilimu, lalu lamini. ✧ <sup>4</sup> Ngode Datagaliwabe bi mana latagi haga Aisaiahanda mbiwia halu ibunaga mbugani bi gilibu wini ngago ogo, ✧ Dindi ko wali agali nahaga wiagoria howa mbiralime olalu, Anduane Homogo ibilo hariga ba hole manda manda bialu halimu. Hariga ogoni tigabiore ba halimu.

<sup>5</sup> Ulini hambene bibahende ngaru mo donde lai halu dindi hari emene timbunibi godo gege biai halimu. Hariga pidipodabi ngago tigatiga wilo bo tiga bialu hariga ko ngago bayuwa mbara lalu mo tiga bilimu.

<sup>6</sup> Wali agali bibahendeme Ngode Datagaliwabenaga pele mulene handai holebira, lalu ka, ✧ lenego gilibu nga.

✧ 2:41: Har 12.1-27, 23.14-17, 34.23, Man 16.1-8 ✧ 2:49: Yo 2.16 ✧ 2:50: Lg 9.45, 18.34 ✧ 2:51: Lg 2.19  
✧ 2:52: 1 Sml 2.26, Min 3.4, Lg 1.80 ✧ 3:2: Lg 1.80 ✧ 3:3: Ab 13.24, 19.4 ✧ 3:4: Ais 40.3-5 ✧ 3:6: Iba 98.2, Ais 52.10



<sup>7</sup> Wali agali dewaore Yonehanda ti baboraya bia helo ibu hearia iba ho wiaabo hene. Ani biyagola Yonehanda tihondo lalu, Tí ko nogombi ale kamigo Ngode Datagaliwabehanda pani áyuore wia holebirago nanole yo pialu polene nga lalu tí aiwa langiyabe.✧ <sup>8</sup> Tígua ko bialu harimigo wahalu mini beregedai kamigo walia holenaga mana bayale bialu halimu. Tínime lalu, Inanaga mamali Abarahama hene, lolene nawi. Ina tihondo bi mbira langerogo Ngode Datagaliwabehanda ege tole o ngaruni mo yuwa Abarahamanaga aguanene bu hinu helabehe kagoni laro.✧ <sup>9</sup> Ira karu dibule ayu ira teneha mo yu íbu nga. Ira lini bayale nadaga karu bibahende dibai howa ira dedagoria delolebira, lene.✧

<sup>10</sup> Ani layagola wali agali hearume Yonehondo lalu, Bi larigo iname agi bulene wiaruabe, lene.✧

<sup>11</sup> Ani layagola ibugua ladai bialu lalu, Mbiralime aga kira wu kago mendego nawi kayagua ogoni mulene nga. Mbiralime tomo nolene wu kayagua ibugua maruhondo talebu mulene nga, lene.✧

<sup>12</sup> Dagiya muni mo mogo biaga maru hearu Yonehanda ti baboraya bia helo ibuwa tigua ibuhondo lalu, Lawai haga-o iname agi bulene wiaruabe, lene.✧

<sup>13</sup> Ani layagola Yonehanda tihondo ladai bialu lalu, Dagiya muni tigatiga hangu ngi lolene nga, lalu lamini.

<sup>14</sup> Ani layagola ami agali maru hearume Yonehondo lalu, Inamebi agi bibehe kamabe, lene.✧

Ani layagola Yonehanda tihondo ladai bialu lalu, Wali agalinaga muni page bialu gingila namilimu. Godi lalu howa ke halu nde nalalimu. Amime yolo ngirago karulape ngira manda bulene nga, lene.

<sup>15</sup> Wali agali hearume ti miniha turu howa Yone mitangitangi bialu Mbiral Dabo Helenego ibulebira lenego Yone ibu ka bada lo mitangi bini. <sup>16</sup> Ogonidagua mitangi biyagola Yonehanda ti bibahendehondo lalu, Ina tí ibame baboraya bialu kogo maha mbirali í emene kō kogobi ndo ibu daliga timbuniore kago ibulebira. Í bayale ndo howa ibunaga ge habe gamu ina gololene nakarulapeore kogoni. Ibugua Ngode Datagaliwabe Dininimebi ira hungu biragomebi tí baboraya bia holebira.✧ <sup>17</sup> Ladi ale mini widi ibunaga lini aeanela dambialu mo tale bilo ibugua mbirale baraga hagane nama tabuli ale yu ka. Tale biai howa ibugua widi lini do hagane andaha do hole wuwa aeane biaru ira hundia nabiaga daabo kagoria delolebira, lalu lamini.✧

<sup>18</sup> Yonehanda wali agalihondo bi tara tara laga bialu Bi Mana Debene lamialu, Tígua bu mini beregedalimu, lalu lamialu hene.

### *Herodohanda Yone garabaya binigo ogo*

<sup>19</sup> Gabumanenaga haru haga Herodohanda ibu hamene Pilibinaga one Herodiasa dabu bialu heagolabi mana ko dewa bialu heagolabi de hondowa Yonehanda Herodo talini.✧ <sup>20</sup> Ani taliyagola Herodohanda ko timbuni bialu Yone garabaya bini.

### *Yonehanda Yasu baboraya bia henego ogo (Madiu 3.13-17, Maga 1.9-11)*

<sup>21</sup> Yonehanda wali agali bibahende hearu baboraya bia hai howa ibu Yasu baboraya bia hene. Ani biyagola Yasu ibu Ngode Datagaliwabela bi lalu hearia hari daliga budalu✧ <sup>22</sup> Ngode Datagaliwabe Dinini ega malibu alego Yasuni dalini. Ani biyagola dahuliya andaga howa bi ladali halu lalu, Í Iginore ina í gubalini ho howa ihondo turu timbuni ho kogoni, lene.✧

✧ 3:7: Md 12.34, 23.33 ✧ 3:8: Yo 8.33, 8.39 ✧ 3:9: Md 7.19 ✧ 3:10: Ab 2.37 ✧ 3:11: Lg 11.41, 2 Ko 8.14, Ya 2.15-16, 1 Yo 3.17 ✧ 3:12: Md 21.32, Lg 7.29 ✧ 3:14: Har 23.1, LBM 19.11 ✧ 3:16: Md 3.11, Ab 13.25 ✧ 3:17: Mai 4.12, Md 13.30 ✧ 3:19: Md 14.3-4, Mg 6.17-18 ✧ 3:21: Yo 1.32 ✧ 3:22: Pig 22.2, Iba 2.7, Ais 42.1, Md 3.17, 17.5, Mg 1.11, Lg 9.35, Yo 1.32

*Yasu mamali hama peneru uru  
(Madiu 1.1-17)*

<sup>23</sup> Yasuhanda ibunaga biabe pigane tenialu biyangi ibunaga mali pira tebira (30) agima hene. Wali agali hearume Yasu ibu Yosebe igini ka mitangi bu hene. Yosebe ibu Hilai igini hene. <sup>24</sup> Hilai ibu Maligi igini Maligi ibu Yanai igini Yanai ibu Yosebe mende igini hene. <sup>25</sup> Yosebe ibu Madadaiasa igini Madadaiasa ibu Amoso igini Amoso ibu Nahumu igini Nahumu ibu Eseli igini Eseli ibu Nagai igini hene. <sup>26</sup> Nagai ibu Meada igini Meada ibu Madadaiasa mende igini Madadaiasa ibu Semene igini Semene ibu Yosege igini Yosege ibu Yoda igini hene. <sup>27</sup> Yoda ibu Yoanana igini Yoanana ibu Lesa igini Lesa ibu Serubabele igini Serubabele ibu Sealadiele igini Sealadiele ibu Neri igini hene. <sup>28</sup> Neri ibu Melegi igini Melegi ibu Adi igini Adi ibu Kosama igini Kosama ibu Elemadama igini Elemadama ibu Ere igini hene. <sup>29</sup> Ere ibu Yosua igini Yosua ibu Eliese igini Eliese ibu Yorimi igini Yorimi ibu Madada igini Madada ibu Libai igini hene. <sup>30</sup> Libai ibu Simiono igini Simiono ibu Yuda igini Yuda ibu Yosebe tebone igini Yosebe ibu Yonama igini Yonama ibu Eliagimu igini hene. <sup>31</sup> Eliagimu ibu Melea igini Melea ibu Mena igini Mena ibu Madada igini Madada ibu Nadana igini Nadana ibu Debidi igini hene. <sup>32</sup> Debidi ibu Yasi igini Yasi ibu Obede igini Obede ibu Boasa igini Boasa ibu Salamono igini Salamono ibu Nasono igini hene. <sup>33</sup> Nasono ibu Aminadaba igini Aminadaba ibu Adamini igini Adamini ibu Arani igini Arani ibu Hesperono igini Hesperono ibu Perese igini Perese ibu Yuda igini hene. <sup>34</sup> Yuda ibu Yagaba igini Yagaba ibu Aisaga igini Aisaga ibu Abarahama igini Abarahama ibu Tera igini Tera ibu Neho igini hene. <sup>35</sup> Neho ibu Serugu igini Serugu ibu Leu igini Leu ibu Pelege igini Pelege ibu Ebere igini Ebere ibu Sela igini hene. <sup>36</sup> Sela ibu Kainana igini Kainana ibu Arabagada igini Arabagada ibu Seme igini Seme ibu Noa igini Noa ibu Lamege igini hene. <sup>37</sup> Lamege ibu Medusela igini Medusela ibu Inogo igini Inogo ibu Yarede igini Yarede ibu Mahalalele igini Mahalalele ibu Kenana igini hene. <sup>38</sup> Kenana ibu Inoso igini Inoso ibu Sede igini Sede ibu Adama igini Adama ibu Ngode Datagaliwabe igini hene. <sup>\*</sup>

## 4

*Dama Heyolabeme Yasu ko mo bia habehedabe hondole ba hendenego ogo  
(Madiu 4.1-11, Maga 1.12-13)*

<sup>1</sup> Yasu ibu iba Yodanaha howa dai biyagola Ngode Datagaliwabe Dinini Yasuha ho tolaihe howa ibugua dindi ko wali agali nahaga wiagoria Yasu haru pu hene. <sup>2</sup> Ani haru pu hearia dama Heyolabeme horo pira mariani (40) Yasu ko mo bia habehedabe hondole ba handalu hene. Ani ba handalu hearia Yasu tomo nane hangu heane horo ogoni piai hayagola Yasu ibu garibilo hene. <sup>\*</sup>

<sup>3</sup> Ani bu heago hondowa dama Heyolabeme Yasuhondo lalu, <sup>Í</sup> Ngode Datagaliwabe Iginu keyagua ege tole ogo mo mberedi bu hina, lene.

<sup>4</sup> Ani layagola Yasuhanda ladai bialu lalu, Anduane Homogonaga mbugani lo ngago ogo, Wali agalinaga holene tomo noleneme hangu miaga ndo, lalu gilibu nga, lene. <sup>\*</sup>

<sup>5</sup> Ani layagola dama Heyolabeme Yasu haru iraga halu wali agali dindi bibahendeni karu abaleore de pandi mugu laradagua ibuhondo walia hene. <sup>6-7</sup> Ani walia halu lalu, Bibahende ogoni ihondo ngiai henego ina mua biragohondo mibehe ko. Ina bulu paluwa ihondo bi pupu wiriyagua bibahendeore ogoni ina karulowa haru hai habelobi ti bibahende karume inaga mini yaraga hai helobi ngiai holebero, lene. <sup>\*</sup>

<sup>\*</sup> **3:23:** Lg 4.22, Yo 6.42   <sup>\*</sup> **3:27:** 1 Bit 3.17-19, Esr 3.2   <sup>\*</sup> **3:31:** 2 Sml 5.14   <sup>\*</sup> **3:32:** Lud 4.17-22, 1 Sml 16.1-13  
<sup>\*</sup> **3:33:** Pig 29.35   <sup>\*</sup> **3:36:** Pig 11.10-26   <sup>\*</sup> **3:38:** Pig 4.25-5.32   <sup>\*</sup> **4:2:** Har 34.28, 1 Kin 19.8   <sup>\*</sup> **4:4:** Man 8.3  
<sup>\*</sup> **4:6-7:** Md 28.18, Yo 12.31, 14.30, Mo 13.2, 13.7

<sup>8</sup> Ani layagola Yasuhanda ladai bialu lalu, Anduane Homogonaga mbugani lo ngago ogo, Anduane Homogo t́naga Ngode Datagaliwabe ibu andaneha haabo halu ibuni hangu mitangi bialu ibunaga minini howa lotu lalu halimu, lalu gilibu nga, lene.✧

<sup>9</sup> Ani layagola dama Heyolabeme Yasu Yarusaleme haru pialu Anduane Homogonaga anda daligaoreni helowa ibuhondo lalu, Í Ngode Datagaliwabe Iginini keyagua ogoriani howa ínime porabupe harene. <sup>10</sup> Ogoninaga Anduane Homogonaga mbugani bi mbira lo ngago ogo, Ngode Datagaliwabe handa ibunaga dahuliyaliru lamialu hondo hole pudaba lolebira, lalu✧ <sup>11</sup> bi mendebi ogodagua dege lo nga, Ege tole ngagome ínaga ge nabeheadagola dahuliyali uruni tinaga gime í taba yaraga holebira, lalu gilibu nga, lene.✧

<sup>12</sup> Ani layagola Yasuhanda ladai bialu lalu, Anduane Homogonaga mbugani ogodagua lo nga, Anduane Homogo t́naga Ngode Datagaliwabe ibunaga hongo abidabe hondole bahanda nabilimu, lalu gilibu nga, lene.✧

<sup>13</sup> Dama Heyolabeme Yasu ko tara tara mo bia habehedabe ba handayagola nabialu binini awe dai bule mitangi bialu ibu Yasu helalu pene.✧

*Yasuhanda Galilini biabe pigane tenialu bialu henego ogo*  
(Madiu 4.12-17, Maga 1.14-15)

<sup>14</sup> Ngode Datagaliwabe Dinini ibugua Yasu mo hongo hayagola ibu Galili dai bini. Yasuhanda biyagoni marume loyogo lalu howa wali agali bibahende ogoriani hearume hale hai hene. <sup>15</sup> Ani biyagola Yasuhanda ngoai hagane andaruha howa mana lawai hayagola wali agali bibahende hearume ibunaga mini yaraga halu hene.

*Nasarete wali agalime Yasu hame nale henego ogo*  
(Madiu 13.53-58, Maga 6.1-6)

<sup>16</sup> Yasu ibu Nasareteni halu anda henegoria pu howa ibu Sabada horongi biaga winidagua bialu ngoai hagane andaha anda pene. Anda puwa ibugua Anduane Homogonaga mbugani howa bi daga lole heyalu✧ <sup>17</sup> mbirali heagome mana latagi haga Aisaianaga mbuga ibuhondo miyagola Yasuhanda mbuga ogoni angalalu bi mbira gilibu wini wiago handa walía howa daga lalu henego ogo,✧

<sup>18-19</sup> Anduane Homogonaga Dinini ibu íha kagoni.✧

Irane ina wali agali yagibano karuhondo bi mana debene lamuliya ibugua í dabene.

Wali agali dariba ho ngaruhondo golope holene nga lalu lamulenebi

deme nahandabehe karu lone de hendelo mo bayale holenebi

garabaya biabe ale bia haga karu golope holenebi

Anduane Homogohanda ibunaga wali agalihondo pele mulene tu áyu nga lalu lamu-

lenebi ogoni bibahende ibugua, Ína ani bule pu, lalu

lenego gilibu nga, lene.

<sup>20</sup> Ani daga lai howa Yasuhanda mbuga biago payuwa hondo haga biagohondo mialu mana lawai hole berene. Ani biyagola wali agali bibahende biru wiarume ibu handaya ho berene. <sup>21</sup> Ani bu bereagola ibugua tihondo lalu, Bi ogoni Anduane Homogonaga mbugaha howa daga larugola t́gua hale ho birarimioire áyu ogoni lola haragoni, lene.

<sup>22</sup> Ani layagola wali agali biru wiarume miniha mogo lowa lalu, Bi baya gibiore lagadago ibu Yosebe igini ndobe, lene.✧

<sup>23</sup> Yasuhanda tihondo lalu, Bi mbira laramiligo t́gua íhondo lalu, Anogoda-o ínini mo dabi harene, loleberami. T́gua íhondo bi mendebi lalu, Kabaniamani howa mana bialu harigo hale harimago oali howabi bialu harene, loleberami.✧ <sup>24</sup> Galone mbira ogo ina langerogo. Ngode Datagaliwabe mana latagi hagame ibuni dindini howa bi laragola wali agali karume hale nahaga ka, lene.✧

✧ 4:8: Man 6.13-14, 10.20 ✧ 4:10: Iba 91.11 ✧ 4:11: Iba 91.12 ✧ 4:12: Man 6.16, 1 Ko 10.9 ✧ 4:13: Hi 2.18, 4.15 ✧ 4:16: Md 2.23, Mg 6.1, Ab 13.14, 17.2 ✧ 4:17: Ais 61.1-2 ✧ 4:18-19: Ais 61.1-2 ✧ 4:22: Iba 45.2, Md 13.54, Mg 6.2, Lg 3.23, Yo 6.42 ✧ 4:23: Md 4.13, Yo 2.12 ✧ 4:24: Yo 4.44

<sup>25</sup> Yasuhanda ani lowa lalu, Hale hadaba. Elaya ibu heneyangi Isaraele dindini howa wali dalo dewa biru winigo ogoni heneneore laro. Biru wiyangi mali tebira mane ogonaga ege waragaria dalu naibi gaea hangu bia ho wiaabo hene. ✧ <sup>26</sup> Ani biyagola Ngode Datagaliwabehanda Elayahondo, Isaraele wali agali biamogo bule pu, nale howa wali dalo mbira Saidono dindinaga tano mbira mini Sarebadani berenego, Biamogo bule pu, lene. ✧ <sup>27</sup> Ngode Datagaliwabe mana latagi haga Elaisa ibu heneyangi Isaraele dindini howa wali agali ge hamua dewa bu hene. Ani bu henego ti mbira mo dabi nahe Siria agali mbira mini Naimana ibu dege mo dabi hene, lene. ✧

<sup>28</sup> Yasuhanda ani layagola wali agali ngoai hagane andaha biru wiarume hale howa ti keba timbuni hene. <sup>29</sup> Tigua keba timbuni howa heyalu anda bu heagoriani howa Yasu minu yalu tagira pene. Tinaga tano ogoni hombeneni hene. Tigua Yasu hombeneni minu yalu puwa bare bayanoha howa bape hole manda biyaria <sup>30</sup> Yasuhanda wali agali dewa bu heagoha bolo бага bialu puabo hene. ✧

*Agali mbira dama daragahe henego ogo  
(Maga 1.21-28)*

<sup>31</sup> Yasu ibu puabo halu Galilinaga tano mbira mini Kabaniama anda puwa Sabada horongi ibugua wali agali hearuhondo bi mana lawai hene. ✧ <sup>32</sup> Yasuhanda hongo holene taraore yu howa lawai hayagola wali agali bu hearume hale howa miniha mogo lai hene. ✧ <sup>33</sup> Ngoai hagane andaha agali mbira dama koore daragahe hene. Ibugua ga timbuni lalu lalu, ✧ <sup>34</sup> Nasareteali Yasu-o ina kamagoha ina agi bule ibiribe. Ina bo wahole ibiribe. I mbira Ngode Datagaliwabenaga bi lamule piaga loma biahe biago kego mandabu kogoni, lene. ✧

<sup>35</sup> Ani layagola Yasuhanda dama biago talialu, Bi nalabe. Agali helalu i tagira pu, lene. Ani layagola damame agali biago wali agali hearu wanakuini howa mo pila halu mo ko nahe howa tagira pene.

<sup>36</sup> Wali agali bibahende bu hearume miniha mogo lai ho howa tini dege dege laga laga bialu lalu, Ibugua bi layagoni agi alebe. Damarume ibugua tagira pudaba laradagua pelo pudaba lolene hongo yu kagoni, lene. <sup>37</sup> Yasuhanda biyagoni wali agali dindi ogoriani hearume hale hai hene.

*Yasuhanda wali agali dewa mo dabi haga binigo ogo  
(Madiu 8.14-17, Maga 1.29-34)*

<sup>38</sup> Ani buwa Yasuhanda ngoai hagane andaha howa pialu Saimononaga andaga pene. Saimono imane ibu poboyogo warago timbuni bo winigo tigua Yasu lamini. <sup>39</sup> Lamiyagola Yasu ibu wali warago bo wiagoria puwa, Dabi ha, layagola poboyogo ala biyago ereba halu dabi hene. Dabi howa wali ogonime heyalu ti tomo nelo mule manda manda bini.

<sup>40</sup> Alendo ni paliyagola wali agalime tinaga damene warago tara tara bo wiaru Yasu hearia mo yalu ibini. Mo yalu ibiyagola Yasuhanda ti hangu hangu gime ela haga bialu ti bibahende mo dabi hai hene. <sup>41</sup> Wali agaliha howa damarubi tagira pugu bialu ga lalu, I Ngode Datagaliwabe Iginini kegoni, laga bini. ✧

Ani bigi biyagola dama biarume Yasu ibu Mbirali Dabo Helenego ibulebira lowinigo ibuore kalo mandabu henego Yasuhanda dama biaruhondo, Bi naladababe, lene.

*Yasuhanda ngoai hagane andaruha mana lamialu henego ogo  
(Maga 1.35-39)*

✧ 4:25: 1 Kin 17.1, 17.7, 1 Kin 18.1 ✧ 4:26: 1 Kin 17.8-16 ✧ 4:27: 2 Kin 5.1-14 ✧ 4:30: Yo 8.59, 10.39 ✧ 4:31: Md 4.13, Mg 1.21, Lg 4.23 ✧ 4:32: Md 7.28-29, Yo 7.46, Ta 2.15 ✧ 4:33: Md 8.29, Mg 1.23, Lg 8.28 ✧ 4:34: Lg 1.35, 4.41, Yo 6.69 ✧ 4:41: Md 8.29, Mg 1.25, 1.34, 3.11-12

<sup>42</sup> Muna biyagola Yasu heyalu dindi ogoniha howa tagira pialu mbirali naheore wiagoha pene. Wali agali hearume tai bima mama pene. Tigua ibu handa walia howa ibu napelo hongo hene. <sup>43</sup> Ani biyagola Yasuhanda tihondo lalu, Ngode Datagaliwabehanda Handame Ho Holenenaga Bi Mana Debene wali agali maruhondobi lamulene ngo. Ani buliya Ngode Datagaliwabehanda ihondo, Pu, laya, lene. <sup>44</sup> Yasuhanda ibaga bialu ngoai hagane andaruha bi mana lamigi bima pene.✠

## 5

### *Yasuhanda agali maria ibu talima ibilo olenego ogo (Madiu 4.18-22, Maga 1.16-20)*

<sup>1</sup> Horo mbirungi Yasu iba timbuni mini Genesarete angeni hearia wali agali dewame Ngode Datagaliwabe bi mana hale hole gengeda tago bu hene.✠ <sup>2</sup> Ani biyagola Yasuhanda iba talu kira iba angeni yu ibu wiaria de hendene. Agali wena minagarume iba talu o biago labo ngelalu wena nu wiaru wayawaya bialu hene. <sup>3</sup> Yasu ibu iba talu mbira Saimononaga wiagoria anda puwa ibugua Saimonohondo lalu, Iba angeni howa iba talu emene helo pela, lene. Saimonohanda ani biyagola Yasuhanda iba taluni biruwa wali agali dewa angeni ngoai ho hearu bi mana lawai halu hene.

<sup>4</sup> Yasuhanda wali agali bi mana lawai howa ibu Saimonohondo lalu, Ibi agali wena minaga í heba karubi tigua wena minule wena nu ibira hole iba talu emene edera pelo pelabe, lene.

<sup>5</sup> Ani layagola Saimonohanda Yasuhondo lalu, Anduane-o iname mbiraga minule haabo harimago mbira naminiore kamagoni. Ina ani laregodago ina wena nu ibaha ibira haro, lene.✠ <sup>6</sup> Ani lowa tigua wena nu ibaha ibira hayagola wena dewaore miyagola wena nu lerelabehe hene.✠ <sup>7</sup> Ani biyagola tigua hangu yaraga nahabeheyagola maru tini aria iba talu mendeni hearume yamogo bule ibilo lowa gime gibu mini. Ani layagola tigua ibai howa iba talu kira biago laboni wena baraga ho wiyagola iba talu biago labo ibaha namu lole bini. <sup>8</sup> O biyagoni hondowa Saimono Pidahanda Yasu buhayagi ge duli hanga ho biruwa lalu, Anduane Homogo-o i koorene ko kogo i helalu pu, lene.✠

<sup>9</sup> Pidabi maru ibu heba wena minalu hayarubi wena dewa minu wiyago hondowa mogo lai ho hene. <sup>10</sup> Ogonidagua dege Saimononaga aria Sebedi igini Yone Yameselabi mogolo hene. Ani biyagola Yasuhanda Saimonohondo lalu, Gi nahabe. Áyu ogoni howa ina agali minalu hagane holebere, lene.✠

<sup>11</sup> Ani buwa tigua iba talu biago labo angeni yalu puwa ngelalu mbirale marubi ngelai halu Yasu piyadagua talima pene.✠

### *Yasuhanda agali mbira mo dabi henego ogo (Madiu 8.1-4, Maga 1.40-45)*

<sup>12</sup> Horo mbiru Yasu tano mbirani hearia agali mbira ge hamuabi henego Yasu hearia ibuwa abale birape howa lalu, Anduane-o ina i mo dabi hoa biyagua nde mo dabi habehe ke, lene.

<sup>13</sup> Yasuhanda ibunaga gi dogola amu howa agali biago ela halu lalu, Ina í mo dabi hoabago dabi ha, lene. Ani layagola agali biagonaga ge hamuabi biago abaleore ereba hai hene. <sup>14</sup> Ani biyagola Yasuhanda ibuhondo hongo howa lalu, Maru nalami loma binigo mo miaga agali kagome í de hendelo ibu kagoria abale puabo halu pole pu. Ani bialu í dabiore haridago walia hole wali agali karume de hendelo Mosesehanda bi lowini wiyadagua mbirale mbira loma bialu Ngode Datagaliwabehondo bo mibe, lene.✠

✠ 4:43: Lg 8.1 ✠ 4:44: Md 4.23 ✠ 5:1: Md 13.1-2, Mg 3.9-10, 4.1 ✠ 5:5: Yo 21.3 ✠ 5:6: Yo 21.6 ✠ 5:8: 2 Sml 6.9, 1 Kin 17.18 ✠ 5:10: Md 4.19 ✠ 5:11: Md 4.20, 19.27, Mg 1.18, Lg 18.28 ✠ 5:14: LBM 14.1-32



<sup>15</sup> Anigo Yasuhanda biyagoni maru hearume lo yanga layagola wali agali dewaoreme Yasu ibugua bi layago hale hole ibalu howa warago bo wiaru mo dabi haga bilo ibini. <sup>16</sup> Ani biyagola Yasu ibu wali agali nahaga wiagoha pu bagi howa Ngode Datagaliwabela bi lalu hene.✧

*Yasuhanda agali mbira kuduguhe mo dabi henego ogo  
(Madiu 9.1-8, Maga 2.1-12)*

<sup>17</sup> Horo mbiru Yasu ibugua mana lawai halu hearia Perisi agali marubi Mana lowinigo lawai haga marubi ti tano bibahende Galili howabi Yudia howabi Yarusaleme howabi ibu ngoai ho berene. Ani bialu howa Yasuhanda warago tara tara bo wiaru mo dabi helo Anduane Homogonaga hongo Yasuha hene. <sup>18</sup> Ani biyagola agali maru hearume agali mbira kuduguhe henego ibu lebereni ira ho yalu ibuwa tigua anda Yasu heagoria ngelole lowa henge tai bialu hene. <sup>19</sup> Wali agali dewa ho gengeda tago bu heagola tigua anda tamuha yalu pobe nahe hene. Ani biyagola tigua agali biago anda dangini ira ho yalu iraga howa Yasu heago tigatiga anda dangi minu tidini. Tiduwa agali ira ho yayago lebere heba Yasunaga wanakuihayagi yarali hene. <sup>20</sup> Tigua mini mbiraore wu howa biyago hondowa Yasuhanda agali biagohondo lalu, Hamene-o ina ko birigo domai haya, lene.✧

<sup>21</sup> Ani layagola Mana lowinigo lawai haga biarumebi Perisi agali biarumebi tini minime manda bigi bigi bialu, Ngode Datagaliwabe ibu hangume wali agali ko biyago domo wahabehe kago. Agali Ngode Datagaliwabe mege bialu kagoni ibu aidabe, lomanda bialu berene.✧

<sup>22</sup> Ti ani lomanda bialu bereago hondowa Yasuhanda tihondo lalu, Tigua ogonidagua manda bialu bedamigoni agibe. <sup>23</sup> Ina ko birigo domai haya, lolenego tai bidabe be, Heyalu ibaga bu ha, lolenego tai bidabe. <sup>24</sup> Anigo Agali Hole Ibiyagome dindini howa wali agalime ko biyago domo waholene hongo yu kago ti manda bilimulo walia haro, lene. Ani lowa Yasuhanda agali kuduguhe biagohondo lalu, Ihondo larogo. Heyuwa inaga lebere mo yalu andaga pamia, lene.✧

<sup>25</sup> Ani layaore agali biagome tinaga wanakuini abale heyaluibunaga lebere biago mo yalu andaga pialu howa Ngode Datagaliwabenaga mini yaraga hama pene. <sup>26</sup> Ani biyagola ti bibahende hearume miniha mogo lai halu gi howa tigua Ngode Datagaliwabenaga mini yaraga halu, Mbirale baya burugule nahende tara aleore ayu de handarimadagoni, lene.

*Yasuhanda Libai olenego ogo  
(Madiu 9.9-13, Maga 2.13-17)*

<sup>27</sup> Ogoni biai halu Yasu pole pialu hearia dagisi muni miaga agali mbira mini Libai ibu dagisi muni miaganenaga andaha berearia hondowa Yasuhanda ibuhondo lalu, I porodagua talima ibu, lene. <sup>28</sup> Ani layagola Libai ibu mbirale bibahende ngelai halu abale heyalu Yasu talima pene.

<sup>29</sup> Ani buwa Libaihanda Yasu mitangi buwa ibu andagani tomo timbuni dawalu agali dagisi muni miaga dewalibi agali marubi, Tomo nole ibidaba, lene. <sup>30</sup> Ani layagola howa Perisi agali marumebi Mana lowinigo lawai haga maru Perisi aria hearumebi Yasunaga talima piaga hearuhondo bi gimigomo lalu, Ti dagisi muni miaga karu bababi ko biaga karu bababi ti heba mandagi tomobi ibabi nalu bedamigo agibe, lene.✧

<sup>31</sup> Ani layago hale howa Yasuhanda tihondo ladai bialu lalu, Wali agali warago nabe karu anogodame ti biamogo bilo ibu karia napiaga. Warago bo ngaru hangu anogodame ti biamogo bilo ibu karia piaga. <sup>32</sup> I ibirugo wali agali bayale karu mini beregedelo olole ndo wali agali ko biaga karu mini beregedelo olole ibirugoni, lene.✧

✧ 5:16: Md 14.23, Mg 1.35, 6.46 ✧ 5:20: Lg 7.48 ✧ 5:21: Iba 32.5, Ais 43.25, Lg 7.49 ✧ 5:24: Yo 5.8 ✧ 5:30: Lg 15.1-2 ✧ 5:32: 1 Ti 1.15

*Tomo nane hagane mana winigo ogo  
(Madiu 9.14-17, Maga 2.18-22)*

<sup>33</sup> Wali agali maru hearume Yasuhondo lalu, Yonenaga talima piaga biarumebi Perisi agalinaga talima piaga biarumebi Ngode Datagaliwabehondo bi lole tomo nane hagago inaga talima piaga biarume tomobi ibabi nalu hagadago agibe, lene.✧

<sup>34</sup> Ani layagola Yasuhanda ladai bialu lalu, Tigua agali mbirame wali dabu biragola howa wali agali tomo nole ngoai hararume agali wali dabu biaga biago ti heba mandagi biruwa tomo nane holene nga loleberamibe. Ani naloleberamiore.✧ <sup>35</sup> Anigo horo mbira ibulebirago ibiragola agali wali dabu biaga biago ti kagoria howa marume ibu haru poragola tigua tomo nane holene wulebira, lene.

<sup>36</sup> Ani lowa Yasuhanda bi yobage ogo lalu, Mbiralime aga gahenge lere lowa aga mende gobani lebu para nahaga. Ibugua ani biyagua aga gahenge biago lere lalu mo ko howa aga gahengeme aga gobani lebu para haragola bia tago naholebira. <sup>37</sup> Ogonidagua dege mbiralime waini iba gahenge bedago waini iba hambu wiaga nogo dongoneme wabini bamba taweha odo bere nalaga. Ani odo bere layagua waini iba gahengeme nogo dongoneme wabini biago mo lere lalu waini iba piai holebira. Ani biragola nogo dongone biagobi ko dege holebira. <sup>38</sup> Ani buligo waini iba gahenge bedago waini iba hambu wiaga nogo dongoneme wabini gahenge degeha odo bere lolene nga. <sup>39</sup> Mende larogo mbiralime waini iba ala tawego nowa waini iba gahengego noa nahaga. Ibugua lalu, Waini iba ala tawego karulapeore, lolebira, lene.

## 6

*Sabada horongi biabe nabiaga winigo ogo  
(Madiu 12.1-8, Maga 2.23-28)*

<sup>1</sup> Sabada horongi Yasu ibu ladi ale mini widi teha pialu howa ibunaga talima piaga biarume widi biagonaga lini deago dowa gime yigiyugu buwa nama nama pene.✧ <sup>2</sup> Ani biyagola Perisi agali maru hearume tihondo lalu, Tigua inanaga Mana lowini ngago Sabada horongi nabulene wini ngago puguaramigoni agibe, lene.✧

<sup>3</sup> Ani layagola Yasuhanda tihondo ladai bialu lalu, Debidibi agali maru ibu heba henerubi tomo nawiyagola ti garibi lowa Debidihanda bini gilibu ngago ti nahende kamibe.✧ <sup>4</sup> Ibugua Ngode Datagaliwabenaga andaha anda puwa mberedi Ngode Datagaliwabehondo lomabu mini wiago muwa maru ibuni nalu maru agali ibu heba heneru nelu mo mini. Anigo inanaga Mana lowini ngagoria mberedi ogoni loma binigo mo miaga agali degeme nolene nga lowinigo nga, lene.✧

<sup>5</sup> Ani lowa Yasuhanda lamaro bialu lalu, Agali Hole Ibiyago ibu Sabada horonaga Anduane ka, lene.

*Agali mbira gi kohe henego ogo  
(Madiu 12.9-14, Maga 3.1-6)*

<sup>6</sup> Sabada horo mendengi Yasu ibu ngoai hagane andaha anda pu howa ibugua mana lawai halu hene. Mana lawai halu hayagoha agali mbira gi tiganaga mbariane kohe hene. <sup>7</sup> Mana lowinigo lawai haga maru hearubi Perisi agali maru hearubi tigua Yasuhondo, Ina koore biri, lolene irane wilo ti ha para howa ibugua Sabada horongi mbirali mo dabi harabe hondole handaya ho hene.✧

<sup>8</sup> Tigua ogonidagua mitangi bialu heago hondowa Yasuhanda agali gi mbariane kohe biagohondo lalu, Heyalu i kogoria ibu, lene. Ani layagola agali biagome heyalu pu hene.✧

<sup>9</sup> Ani heyu heagola Yasuhanda tihondo lalu, Sabada horongi inanaga Mana lowinigo bulene nabulenebi agi lo ngabe. Biamogo bulene ngabe be mo ko holene ngabe. Agali

✧ 5:33: Md 9.14, Mg 2.18 ✧ 5:34: Yo 3.29 ✧ 6:1: Man 23.25 ✧ 6:2: Har 20.10, Yo 5.10 ✧ 6:3: 1 Sml 21.1-6  
✧ 6:4: LBM 24.5-9 ✧ 6:7: Lg 14.1 ✧ 6:8: Lg 5.22, 9.47

nahomelo pele mulene ngabe be homelo bolene ngabe, lene. <sup>10</sup> Ani lowa Yasu ibugua ti bibahendeni handa deḷe buwa agali biagohondo lalu, Ínaga gi mbariane dogola, lene. Ani layagola agali biagome gi mbariane dogolayaore bayale ho dai bini.

<sup>11</sup> Ani biyagola tigua keba timbuniore howa tini hangu laga laga bialu, Yasuhondo agi bimiyadabe, lalu hene.

*Yasuhanda abosolo homberiali (12) dabene go*  
(Madiu 10.1-4, Maga 3.13-19)

<sup>12</sup> Horo ogoningi Yasu ibu hambene mbirani iraga howa mbi mbiru Ngode Datagali-wabela bi lalu haabo hene. ✧ <sup>13</sup> Gao layagola Yasuhandaibunaga talima piaga biaru olalu, Ibidaba, lowa ibugua agali homberiali (12) dabalutina mini abosolo wini. ✧

<sup>14</sup> Saimono Yasuhanda ibu kai mini Pida winigo ibubi ibu hamene Andurubi Yamesebi Yonebi Pilibibi Badolomiubi <sup>15</sup> Madiubi Tomasabi Alibiasa igini Yamesebi Saimono ibu kai mini Paidoro winigo ibubi <sup>16</sup> Yamese igini Yudasabi Yudasa Isagariodo ibu Yasu nde lenego ibubi uruni ti Yasuhanda dabene.

*Yasuhanda mana lawai halu warago mo dabi halu henego go*  
(Madiu 4.23-25)

<sup>17</sup> Yasuibunaga abosolo agali biaru heba hambeneni henego daluwa yu dindi wiagoria ibu haruru piaga dewa ti heba bu hene. Wali agali dewaore Yudia bibahende ha howabi Yarusalemeha howabi solowara bereagoha Taia tano howabi Saidono tano howabi ibu ngoai ho hene. <sup>18</sup> Tigua Yasuhanda mana lawai hayago hale holebi warago bo wiaru mo dabi helobi ti ibini. Maru dama daragahe hearubi ibiyagola dama wara tagi halu mo dabi hene. <sup>19</sup> Yasuha howa hongo holene tagira ibiyagome ti bibahende mo dabi hai helo wali agali bibahendeme Yasu ela hoa hene.

*Turu holenebi dara holenebi go*  
(Madiu 5.1-12)

<sup>20</sup> Yasuhandaibunaga talima piaga biaru handaya howa lalu, Tí yagibano kamiru Ngode Datagaliwabe handa Handame Ho Kagoria tina ngago turu ho holene nga. ✧

<sup>21</sup> Áyu garibilo kamiru mani nabe manga bulebirago turu ho holene nga. ✧

Áyu dugu bialu kamiru mani oba holene wulebirago turu ho holene nga.

<sup>22</sup> Agali Hole Ibiyagonaga kamigo hondowa wali agalime tí handabe manga haragolabi bo pelaragolabi mege bialu tí ko ngubi laragolabi tí turu ho holene nga. ✧

<sup>23</sup> Ogonidagua biragola tina emena timbuniore dahuliya andagaha wia do kago manda buwa tigua kulo howa mali luyu ibaga bulene nga. Tina mamali hendarume Ngode Datagaliwabe mana latagi haga heneruhondo ogonidagua dege binigo manda buwa turu ho holene nga. ✧

<sup>24</sup> Anigo áyu homogo kamiru tí holene baya awadaga harimigo tina mo ko holene timbu gibiore wulebirago dara holene nga. ✧

<sup>25</sup> Áyu nabe manga ho kamiru mani garibilo howa tina mo ko holene timbu gibiore wulebirago dara holene nga. ✧

Anigo áyu oba howa kulo kamiru mani tí yi lalu dugu bialu holeberamigo tina mo ko holene timbu gibiore wulebirago dara holene nga.

<sup>26</sup> Wali agali bibahendeme tí kamirunaga mini mo yaraga haragola tina mo ko holene timbu gibiore wulebirago dara holene nga. Bamba tina mamali hendarume ke howa mana latagi haga heneru hondowa ogonidagua dege bialu hene. ✧

✧ 6:12: Md 14.23 ✧ 6:13: Md 10.3-4, Mg 3.13-19, Yo 6.70 ✧ 6:20: Md 5.3, 11.5, Ya 2.5 ✧ 6:21: Iba 126.5-6, Ais 55.1, 61.3, Mo 7.16-17 ✧ 6:22: Md 5.11, Yo 15.19, 16.2, 1 Pi 2.19, 4.14 ✧ 6:23: 2 Bit 36.16, Md 5.12, Ab 5.41, 7.52, Kl 1.24, Ya 1.2 ✧ 6:24: Amo 6.1, Md 6.2, 6.5, Ya 5.1 ✧ 6:25: Min 14.13, Ais 65.13, Ya 5.1-6 ✧ 6:26: Yo 15.19, 1 Yo 4.5

*Waitigi karuhondo gubalini holene ngago ogo  
(Madiu 5.38-48, 7.12)*

<sup>27</sup> Ina bi larogo hale haramigohondo laro. Tíngaga waitigi karuhondo gubalini ho halimu. Tíhondo handabe manga ho karuhondo tíngaga bayale dege bia dai bilimu.✧

<sup>28</sup> Marume tíhondo ha halu homabe layagua tíngaga tihondo bayale bia dai bilimu. Tíhondo ko bialu karu bayale helonaga tíngaga Ngode Datagaliwabehondo tinaga bi la halimu.✧

<sup>29</sup> Anigo mbiralime tínaga pe mendeyagi bayagua mendehayagibi belo beregedalimu. Ani buwa mbiralime tínaga dagare aga mo yalu piyagua aga mendebi tago bialu milimu.✧ <sup>30</sup> Mbiralime tíhondo mbirale mbira moga ngidaba laragola milimu. Ani buwa mbiralime tínaga mbirale mo yalu piyagua lone yadai bia nalalimu.✧ <sup>31</sup> Wali agali marume tíhondo bilo hame laramilidagua nde tíngaga maru biaruhondo ani dege bilimu.✧

<sup>32</sup> Tí gubalini hagaru hangu gubalini harimiyagua tíngaga turubini ngago aginaga yuleberamibe. Ko biaga karume tihondo gubalini hagaru tibi gubalini dege haga ka.✧ <sup>33</sup> Ani buwa marume tíhondo bayale biagaruhondo hangu tíngaga bayale bia dai birimiyagua tíngaga turubini ngago aginaga yuleberamibe. Ko biaga karumebi ogonidagua dege biaga kagoni. <sup>34</sup> Tíngaga mbirale mbira mialu howa mo yu dai bibehegohondo mirimiyagua tíngaga turubini ngago aginaga yuleberamibe. Ko biaga karume tibi lone mo yu dai bulenaga ani moga miaga kagoni.✧ <sup>35</sup> Anigo tíngaga tínaga waitigi karu gubalini howa tihondo bayale dege bialu mbirale mbira moga yilo meramigo yadai bia nalalimu. Ani birimiyagua tíngaga emena timbuni ngago yuwa Ngode Datagaliwabe Daligaorene Daliga Kagonaga waneigini holeberami. Ogoninaga ibugua kaj nalaga karuhondobi koore biaga karuhondobi bayale dege biaga ka.✧ <sup>36</sup> Tínaga Abahanda tí dara halu biamogo biagadagua tíngaga nde maru dara halu biamogo bilimu.

*Marume birago tíngaga daba ki bulene nawigo ogo  
(Madiu 7.1-5)*

<sup>37</sup> Tíngaga wali agali maru karume biragonaga daba ki nabilimu. Daba ki nabirimiyagua Ngode Datagaliwabehanda tíngaga beramigobi daba ki nabulebira. Tíngaga maruhondo hongo howa, Pani nabe, nalalimu. Nalarimiyagua Ngode Datagaliwabehanda tíhondobi nalolebira. Marume tíhondo ko biyago biadai nabi wahalimu. Anidagua birimiyagua Ngode Datagaliwabehanda tínaga ko birimigobi domo waholebira.✧ <sup>38</sup> Ani buwa maruhondo milimu. Ani beramigola Ngode Datagaliwabehanda tíhondo ngulebira. Ibugua ngulebirago emene ndo dewaore mo tago howa ngiragola tínaga gime yu tolo holeberami. Tíngaga maruhondo mbirale meramigo daba nabi mirimiyagua Ngode Datagaliwabehanda nde tíhondo daba nabi ngulebira, lene.✧

<sup>39</sup> Ani lowa Yasuhanda tihondo bi yobage lowa lalu, Agali de koheme de kohe dege mendeali haru pobe nahe. Haru piyagua libu haru ganaruaha pilo pagupagu bu wulebira.✧ <sup>40</sup> Lo manda biaga karu ti lawai haga kagobi ndo emene nira ale ka. Anigo lo manda biaga biagome lo manda biai howa ibu lawai haga kagobi dege holebira.✧

<sup>41</sup> Tíngaga tí hamenenaga deni kugi emene ngago handaramiligo tíninaga deni ira goba ale ngago nahende kamigo agibe.✧ <sup>42</sup> Tíngaga tíninaga deni ira goba ale wu kamigo nahandabehe howa tí hamenehondo lalu, Íngaga deni kugi emene ngago mero, lalu agua labehegabe. Tí tombene hondo kihe kamigoni. Tíninaga deni ira goba ale wu kamigo ala mo wahowa mani tí hamenenaga deni kugi emene ngago bayuwa handalu mibehe holeberami.

✧ 6:27: Har 23.4, Min 25.21, Md 5.44, Lm 12.20 ✧ 6:28: Lg 23.34, Ab 7.60 ✧ 6:29: Md 5.39, 1 Ko 6.7 ✧ 6:30: Man 15.7-10, Min 21.26, Md 5.42 ✧ 6:31: Md 7.12 ✧ 6:32: Md 5.46 ✧ 6:34: Md 5.42 ✧ 6:35: LBM 25.35-36, Iba 37.26, Md 5.45 ✧ 6:37: Md 6.14, 7.1 ✧ 6:38: Min 19.17, Md 7.2, Mg 4.24, Ya 2.13 ✧ 6:39: Md 15.14 ✧ 6:40: Md 10.24-25, Yo 13.16, 15.20 ✧ 6:41: Md 7.3

*Irame lini daganegonaga te ogo*  
(Madiu 7.16-20, 12.33-35)

<sup>43</sup> Ira bayale kagome lini ko nadaga. Ogonidagua ira ko kagome lini bayale nadaga. ✧  
<sup>44</sup> Ira bibahendeme lini darago hondowa ira ogobiore kalo manda beramili. Ira anihe kagome poge lini nadaga. Mamuni anihe ale kagome lini mbira mini gerebi nadaga. ✧  
<sup>45</sup> Mbirali bayale kagome ibuninaga bu habaneha bayale ngagobi biatagi haga ka. Mbirali ko kagome ibuninaga bu habaneha ko ngagobi biatagi haga ka. Mbiralime ibuninaga bu miniha tolo ngagobi ne harigaha howa latagi haga ka. ✧

*Agali kirame anda binigo ogo*  
(Madiu 7.24-27)

<sup>46</sup> Ina tihondo bidaba lalu langirugo bia nabi howa tigua ihondo, Anduane Homogo-o Anduane Homogo-o, laabo harimigo agibe. ✧ <sup>47</sup> Mbirali i kogoria ibuwa ina bi larogo hale howa biyagua ina ibu ogobi ka lalu walia holebero. <sup>48</sup> Agali mbirame ege toleni uli wawa anda bayuwaore bu heagola dalu ibalu iba li timbuni piyagome dindi namu layagola anda bayale binigo ema nabi hongo ho hene. Agali ogoni ibu ege toleni anda biyago ale ka. ✧ <sup>49</sup> Anigo ina bi larogoni hale howa bia nabi kagome ibu agali mende anda bialu gene bayuwa nawe biyago ale ka. Ani biyagola howa dalu ibalu iba li timbuni pialu anda biago abale gialo yayagola poda ibira halu u emene agima ndo lowa kulu hangu lalu podope hene, lalu lamini.

## 7

*Yasuhanda ami haru haganaga biabe bia haga mbira mo dabi henego ogo*  
(Madiu 8.5-13)

<sup>1</sup> Yasuhanda bi ogoni wali agalihondo lamiai halu ibu Kabaniama pene. <sup>2</sup> Lomo ami haru haga mbira ibunaga biabe bia haga ibu hamelo haga henego warago bowa tongolo mibeheore wini. <sup>3</sup> Ani wiagola marume Yasu ka layago hale howa ami agali biagome Yu agali ala hene miniwi hearuhondo lalu, Warago mo dabi helo Yasu i kororia ibilo damu pudaba, lene. <sup>4</sup> Ani layagola tigua Yasu hearia puwa lalu, Agali ogoni bayaleore ibu ina biamogo bulene irane timbuniore nga. <sup>5</sup> Ibugua inanaga wali agali karu gubalini halu inanaga ngoai hagane andabi ibuni hangu bia hene.

<sup>6</sup> Ani laya handala Yasu ibu ti haru pene. Pialu howa ami haru haga agali biagonaga anda kaware ibalu hearia ami agali biagome ibunaga nenege maru hearuhondo bi lamialu lalu, Tigua Yasu lola hole puwa ibuhondo bi ogodagua lalimu. Anduane-o i erekuibini i andaga ibuleni. Agali ko i alego andaga i ibulene emene nakarulapego <sup>7</sup> ibi i keria ibulenegobi emene nakarulape dege. Ina inaga biabe bia haga biago dabi helo bi dege labe. <sup>8</sup> Ami handa gimbu bu haga karunaga andaneha i kogoni. Inaga andaneha nde ami agali maru kagoni. Ina mbiraligohondo, Pu, larogola ibu piaga. Mendalihondo, Ibu, larogola ibu ibaga. Ina inaga garabaya biabe ale bia hagahondo, Ogo ale bibe, larogola ibu ogoni biaga, lalu lalimu, lene.

<sup>9</sup> Ani lalimu layadagua tigua layagola hale howa Yasuhanda mogo timbuni lene. Ibugua beregedowa ibu haruru ibalu hearuhondo lalu, Ina ti langerogo mbiralime mini mbiraore ogonidagua wu hearia i nahendeore Isaraele wali agalimebi mini mbiraore ogonidaguaore nawiaga, lene.

<sup>10</sup> Ani layagola bi lama piyaru ti ami haru haga biago andaga dai buwa biabe bia haga biago dabi ho hearia de hendene.

*Yasuhanda wali dalo igini mo heya henego ogo*



<sup>11</sup> Ani biyagola howa Yasu ibunaga talima piaga biarubi wali agali dewa bu hayaru heba Naina tano pene. <sup>12</sup> Tano o biagoria anda pialu hearia wali agali dewame homene tingini homaliha hora hole yalu pialu hearia hendene. Wali dalo mbira berenego ibu igini mbiraore ogoni hanguore henego homene. Ani biyagola wali agali dindi ogoniha hearume ibu heba dugu bima pene. <sup>13</sup> Wali biagome dugu bima piyago hondowa Anduane Homogohanda ibunaga bu miniha wali biago dara timbuniore howa ibugua wali biagohondo lalu, Dugu nabibe, lene.✧ <sup>14</sup> Ani lowa ibugua lebereni wiagoria puwa lebere biago ela hayagola agali ira ho yalu piyarume hondo hene. Ani biyagola Yasuhanda lalu, Igiri daliahe-o ina ihondo heya laro, lene.✧ <sup>15</sup> Ani layagola igiri homene biagome heyu biruwa bi layagola Yasuhanda igiri biago aiyahondo lalu, Í igini ogonida, lene.✧

<sup>16</sup> Ani biyagola bibahende hayarume mogo timbuniore lowa tigua Ngode Datagaliwabenaga mini yaraga halu lalu, Ngode Datagaliwabe mana latagi haga timbuniore ina kamagoria ha pani hayada. Ngode Datagaliwabehanda ibunaga wali agali pele ngule ibiyada, lene.✧

<sup>17</sup> Yasuhanda biyago te ogoni dindi ogoni bibahendeha wu mabu biarume hale ho yogo lene.

*Baboraya biaga Yonehanda bi lawia hayago lamule penego ogo  
(Madiu 11.2-19)*

<sup>18</sup> Yonenaga talima piaga biarume Yasuhanda o biyagoni Yone lamiyagola ibugua kirali olalu, Ibidaba, lowa, <sup>19</sup> Anduane Homogo kagoria agua lamule pudaba. Í Yonehanda mbirali ibulebira layagonibe be mbirali mani ibirabe hondole holomabe, lole pudaba, lene.✧

<sup>20</sup> Ani laya handala libugua Yasu heagoria puwa lalu, Baboraya biaga Yonehanda mbirali ibulebira layagoni íbe be mbirali mani ibirabe hondole holomabe, lole pudaba laya handala ibiriba, lene.

<sup>21</sup> Ogoningiore Yasuhanda wali agali dewa warago tara tara bo wini wiaru mo dabi haga bialu dama daragahe hearubi wara tagi halu de kohe hearubi de mo bayale halu hene. <sup>22</sup> Ani bialu hearia Yonehanda agali kira bi lamule pudaba lene ibiyago labohondo Yasuhanda lalu, Libugua Yone karia dai buwa hale haribigobi de handaribigobi ibuhondo lamilibu. Lamialu lalu, De kohe heneru de handalu ge kohe heneru ibaga bialu ge hamuabi heneru mo dabi halu hale tuluhe heneru hale halu homo tongolo mini wiaru mo heya ho helalu ani buwa yagibano hearuhondo Bi Mana Debene lamialu hea, lalu lamule pudaba.✧ <sup>23</sup> Ihondo mini kira nawi karume ti turu taraore ho holene nga, lene.✧

<sup>24</sup> Agali bi lamule ibiyago labo dai biaha Yasuhanda wali agali bu hearuhondo Yone mitangi bialu lalu, Yone ibu dindi koni wali agali nahaga wiagoria ibu hangu heagoha puwa tigua minime agileore hondole manda bu yalu pirimibe. Tani puyabume elape howa hongo nahe yomagelo wiago hondole pirimibe.✧ <sup>25</sup> Tí penedago agi hondole penebe. Agalime aga bayaleore bu heago hondole pirimibe. Wali agali aga ogonibi karulalu dongonenaga tomobi dabudabubi dewa wu karume homogo anda baya gibi kagoha paliaga ka. <sup>26</sup> Tigua hondo penedago ogo ale hondole pirima lalu í langidaba ndabe. Ngode Datagaliwabe mana latagi haga heago hondole pirimibe. E aniore handarimi. Anigo Ngode Datagaliwabe mana latagi haga karu nira lowa Yone ibu daligaore hearia handarimi.✧ <sup>27</sup> Ogoninaga Yone mitangi bialu Anduane Homogonaga mbugani lowini ngago ogo, Ngode Datagaliwabehanda lalu, Inaga bi lamule piagago ibu í bamba halu inaga hariga ba hama pelo ibuhondo, Pu, lolebero, lalu gilibu nga, lene.✧

✧ 7:13: Lg 8.52 ✧ 7:14: Lg 8.54, Yo 11.43, Ab 9.40, Lm 4.17 ✧ 7:15: 1 Kin 17.23, 2 Kin 4.36 ✧ 7:16: Lg 1.68, 19.44, 24.19, Yo 4.19 ✧ 7:19: Iba 40.7, Mal 3.1, Md 11.3, Mo 1.8 ✧ 7:22: Ais 35.5-6, 61.1, Md 11.4-5, Lg 4.18 ✧ 7:23: Ais 61.1, Lg 4.18 ✧ 7:24: Md 11.7 ✧ 7:26: Md 11.9, Lg 1.76 ✧ 7:27: Mal 3.1

<sup>28</sup> Yasuhanda lone latago halu lalu, Ina tí langerogo agali bibahende ala heneru mbirali Yone kagobi ndo ti nira hangu hene. Anigo Ngode Datagaliwabehanda Handame Ho Kagoria niraore kago ibu Yone bolangua howa duniniore ka, lene.

<sup>29</sup> Ani layagola wali agali bibahendeme hale hai hene. Tibi dagisi muni miaga hearubi tigua Ngode Datagaliwabenaga tigabi bialu holene winigo bialu howa Yonehanda ti baboraya bia heneru hene.✧ <sup>30</sup> Perisi agali hearumebi Mana lowinigo lawai haga hearumebi Ngode Datagaliwabehanda hame leago wahowa Yonehanda ti baboraya bia helo hame nale hene.

<sup>31</sup> Yasuhanda la ho wiaabo halu lalu, Wali agali áyu karuni ina ti agi ale ka lalu mo manda bu hondoabe.✧ <sup>32</sup> Ti waneigini magedi hamani mbolatola balu biru wiagago ale ka. Maru mbolatola balu biru wiyarume maru mbolatola balu bedaruhondo ola amu halu lalu, Iname tínaga pilipe la halu wali dabu bialu howa iba gana lagane la harimagola tígua mali nali harimi. Ani birimigola iname tínaga kiabu dugu bialu harimagola tígua dugu nabi dege harimi, lalu hagago ale ti ka. <sup>33</sup> Ani buwa baboraya biaga Yone íbu howa tomo nane hagane mana ngadagua nane howa waini ibabi nane hene. Ibu ani biyago hondowa tígua, Ibu dama daraga ho ka, larimi.✧ <sup>34</sup> Ani buwa Agali Hole Ibiyago íbu howa ibugua tomobi waini ibabi ta nabi nalu hene. Ani biyago hondowa tígua lalu, Agali o kago ibu tomo nagimbu bialu waini iba naabo haga ka. Ibu dagisi muni miagabi mana ko biagabi karu baba nenege hinu mandagi kagonigo de handadaba, larimi.✧ <sup>35</sup> Anigo wali agali Ngode Datagaliwabenaga mini gigabiwi holene yutiga bu karume ogoni heneneore walia haga ka, lene.

### *Wali ko biagame Yasu geni weli odo winigo ogo*

<sup>36</sup> Perisi agali mbirame Yasu ibu andaga tomo namiya ibabe layagola Yasu ibu puwa tomo nalu berene.✧ <sup>37</sup> Tano ogoniha wali mbira ko timbuniore biaabo haga berene. Ibu berearia Yasu ibu Perisi agali biago andaga tomo nalu beda layagola hale howa wali biagome weli baya taraore beha tolo winigo mo yalu ibuwa.✧ <sup>38</sup> Yasu erembira gehayagi íbu howa dugu bialu de ibame Yasunaga ge damilene. Ani buwaibunaga mandarime mo yobiahalu geni nunu lowa weli baya taraore nga tele yayago odo wini. <sup>39</sup> Ani biyago hondowa Perisi agali biagome ibuni miniha mitangi bialu, Agali ogoni ibu Ngode Datagaliwabe mana latagi hagaore kale wali ogoni ibu ela haragome ibu ko hangu bialu biraabo haga biago ibu manda bidaleda, manda bini.

<sup>40</sup> Ani manda bu bereagola Yasuhanda ibuhondo lalu, Saimono-o ina íhondo bi mbira loa ko, lene.

Ani layagola ibugua lalu, Lawai haga-o e langi, lene.

<sup>41</sup> Yasuhanda lalu, Agali kirali henego labome agali mbiranaga muni dano ho hene. Agali mendegome muni handari duria (500) dano halu mendegome pira duria (50) dano halu bini. <sup>42</sup> Libu kirabalime muni yadai nabibeheyagola muni dano helo miaga biagome libuhondo, Muni yadai bulene nawidago wahadaba, lene. Ani binigo agali agome dano helo miaga biagohondo turu timbuniore holebirabe, lene.

<sup>43</sup> Ani layagola Saimonohanda ladai bialu lalu, Muni dewa miyagome bada, lene.

Ani layagola Yasuhanda lalu, Tigatiga lari, lene. <sup>44</sup> Ani lowa ibu beregedowa wali biago de handalu Saimonohondo lalu, Wali ogo hendedebe. Ina í andaga ibirugola inaga ge wayawaya buliya ina iba nangiri. Wali ogome inaga ge ibunaga de ibame damilalu mandarime domayagoni.✧ <sup>45</sup> I ibirugola ina turu howa, Ibiribe, lalu gi tigali nabiri. Wali ogome i ibirugola howa ibugua inaga geni nunu laabo halu bedagoni. <sup>46</sup> Ina olibe lininaga weli i hagianeni odo wuliya nangiri. Wali ogome inaga geni weli baya taraore nga teleme odo hai haya.✧ <sup>47</sup> Anigo ina íhondo larogo ibugua íhondo gubalini taraore

✧ 7:29: Md 21.32, Lg 3.12 ✧ 7:31: Md 11.16-17 ✧ 7:33: Md 3.4, 11.18, Mg 1.6 ✧ 7:34: Md 11.19, Lg 15.2  
✧ 7:36: Md 26.6, Mg 14.3, Lg 11.37 ✧ 7:37: Md 26.7, Mg 14.3, Yo 12.3 ✧ 7:44: Pig 18.4 ✧ 7:46: Iba 23.5

howa biyagome ibunaga ko dewa bu birayago domo wahaya lalu walia haya. Anigo mbirali gubalini emene hayagome ibunaga ko emene biyago domaya lalu walia haga, lene.✧

<sup>48</sup> Ani lowa Yasuhanda wali biagohondo lalu, Ína ko biriru domo wahaya, lene.✧

<sup>49</sup> Ani layagola maru tomo nalu biru wiarume tini miniha mitangi bialu lalu, Ko domo wahaga ogoni ibu aidabe lomanda bialu berene.✧

<sup>50</sup> Ani mandabu bereagola Yasuhanda wali biagohondo lalu, Ína Ngode Datagaliwabhondo mini mbiraore wu birarigome í pele ngiyago mo palia holene karulo yalu pu, lene.✧

## 8

### *Wali marume Yasu talima penego ogo*

<sup>1</sup> Emene halu Yasu ibu tano emenebi timbunibi wiaruha ibaga bialu howa Ngode Datagaliwabhanda Handame Ho Kagonaga Bi Mana Debene lamima pene. Piyagola ibunaga talima piaga homberiali (12) biaru ibu talima piyadagua✧ <sup>2</sup> wali marubi pene. Wali biaru ti dama daragahe bereariabi warago bo wiariabi Yasuhanda mo bayale heneru ibu piyadagua pene. Magadala wali mbira mini Meri winigo abale ibu dama karia daraga hearia Yasuhanda wara tagi henego ibubi✧ <sup>3</sup> wali mende Yoanabi ibu agalini Tusa ibugua Kini Herodonaga haru haga henego wali tebone Susanabi wali marubi Yasu piyadagua pialu howa tigua munibi tomobi wiyagome Yasubi ibunaga talima piaga biarubi biamogo bima pene.

### *Bi yobage lowa tomo egene polama pene lenego ogo (Madiu 13.1-9, Maga 4.1-9)*

<sup>4</sup> Wali agali dewaoreme tano dewa wiagoria howa ala íbu maha íbu bigi bialu Yasu heagoria ngoai hene. Ngoai ho birai heagola Yasuhanda tihondo bi yobage lowa lamialu lalu,

<sup>5</sup> Agali mbirame ladi ale mini widi egene mabuni ba ai nai bima pene. Ba ai nai bima piyagola howa egene maru hariga teneni ibira hayagola wali agalime hengedo mbalapu wiaria egame ibuwa mo nai hene.✧ <sup>6</sup> Egene maru ege tole dindi emene mbaliahe wiagoriani ibira halu anda howa dindiha gomba naheyagola gau lene. <sup>7</sup> Egene maru ira anihe gandula anda hene wiagoria ibira hayaru ani heba mandagi anda hamaga howa ho gengedalu oge hayagola lini nadabehe hene. <sup>8</sup> Egene maru dindi bayale wiagoriani ibira hayaru anda halu irane hangu hangume lini pira pira (100) dene, lene. Yasuhanda lamaro bialu lalu, Tí hale kamiyagua nde hale halimu, lene.

### *Bi yobage lolene irane winini lenego ogo (Madiu 13.10-17, Maga 4.10-12)*

<sup>9</sup> Iibunaga talima piaga biarume Yasuhondo lalu, Bi yobage larigoni irane langi, lene. <sup>10</sup> Ani layagola Yasuhanda tihondo ladai bialu lalu, Ngode Datagaliwabhanda Handame Ho Kagonaga manda bulene ala pani nahe ngelenego tíni manda bilimulonaga ngiya. Anigo maruhondo bi yobage lalu lamulebirago tigua deme handara tiraga galone handa walia naholebira. Haleme hale hara tiraga minime manda nabulebira.✧

### *Bi yobage lenegonaga lone garealo minigo ogo (Madiu 13.18-23, Maga 4.13-20)*

<sup>11</sup> Bi yobage ogoninaga galone ogo. Ngode Datagaliwabenaga bi mana tomo egene ale nga.✧ <sup>12</sup> Wali agali bi mana hale hararu ti tomo egene harigani ibira hayago ale ka. Hale howa ti yu tiga nabilobi pele mulene nayilobi dama Heyolabeme tiha

✧ 7:47: 1 Ti 1.14 ✧ 7:48: Md 9.2, Mg 2.5, Lg 5.20-21 ✧ 7:49: Md 9.3, Mg 2.7 ✧ 7:50: Md 9.22, Mg 5.34, 10.52, Lg 8.48, 17.19, 18.42 ✧ 8:1: Lg 4.43 ✧ 8:2: Md 27.55-56, Mg 15.40-41, 16.9, Lg 23.49 ✧ 8:5: Md 13.3, Mg 4.3 ✧ 8:10: Ais 6.9-10, Mg 4.12 ✧ 8:11: Hi 4.12, 1 Pi 1.23

howa mo yalu piaga. <sup>13</sup> Tomo egene ege tole dindi mbaliaheni ibira hayago ale wali agali marume bi mana abale hale howa turu halu mo yai haga. Ani buwa tinaga bu habaneha anda puabo habe nahedagola ti tigi mbira hangu yu tiga bu howa kome ba handaragola wahalu piaga. <sup>14</sup> Tomo egene dindi ani pini gandula anda hene wiagoria ibira hayago ale wali agali marume bi mana hale howa mini tumutumu wu holenebi homogo holenebi dindini howa mo turu holenebi mana urunime bi mana tiha mo yayago ho gengedalu oge haragola lini boga nabiaga. <sup>15</sup> Tomo egene dindi bayaleni ibira howa lini dewa dayago ale wali agalime bi mana hale howa mini bayale wialu tinaga bu miniha yu tiga biaabo halu yu ununu lalu howa tiha lini dewa daga ka, lene.

*Lamu hale te ogo*  
(Maga 4.21-25)

<sup>16</sup> Ani lowa Yasuhanda lalu, Mbiralime lamu hale delowa ndisime wia dambi nahaga paliagane dagia andanehabi nawiaga. Ibugua wali agalime tamuha anda ibalu hendelo lowa dagia daligani wiaga ka.\*

<sup>17</sup> Mbirale wia do kago mo pani halu mbirale yi ho ngago handa walia howa mo pani ho ngelolebira.\*

<sup>18</sup> Anigo tí bayuwa hale howa hondo holene nga. Mbiralime mbirale mbira yu kagohondo Ngode Datagaliwabehanda dewa mo tago halu mulebira. Mendéalime mbirale mbira nayi howa emeneore yidogoni karulape dege yidolo mitangi birago ogoni Ngode Datagaliwabehanda yamulebira, lene.\*

*Yasu aiyá hamenerunaga te ngago ogo*  
(Madiu 12.46-50, Maga 3.31-35)

<sup>19</sup> Yasuhanda bi ani lalu hearia ibu aiyá hameneru ibalu hearia wali agalime ho gengeda tago buwa heagola ti ibu heagoria ha para nahabehe hene. <sup>20</sup> Ani bu hearia mbirali heagome Yasuhondo lalu. Í aiyá hameneru o tagirani howa í mo bila hole ka, lene.

<sup>21</sup> Ani layagola Yasuhanda ti bibahende berearuhondo lalu, Ngode Datagaliwabenaga bi mana hale howa yu tiga bialu karu ti í aiyá hameneru uruni, lene.\*

*Yasuhanda puyabu ibalahondo bi lenego ogo*  
(Madiu 8.23-27, Maga 4.35-41)

<sup>22</sup> Horo mbiru Yasu ibunaga talima piaga biarú heba iba taluni anda pu biruwa ibugua tihondo lalu, Iba kuyama timbuni o bedago domalu ange edeyagi ma, layagola ti ani pialu hene. <sup>23</sup> Ti iba talu yalu pialu howa Yasu ibu talu guaneha palia hondo hene. Palia hondo hearia puyabu hongo howa pu layagola iba yaribu timbuniore bialu talu guaneha iba anda ibalu ibame nai hole bini.\* <sup>24</sup> Ani biyagola ibunaga talima piaga biarume Yasu palearia puwa ibu mo barila halu lalu, Anduane-o Anduane-o, ina homai haramago nahende palia hondo kebe, lene.\*

Ani layagola Yasuhanda heyuwa puyabuhondobi iba yaribu biyagohondobi bi layagola iba yaribu nabi puyabubi pu nale nimu lowa bayaleore wini. <sup>25</sup> Ani biyagola ibunaga talima piaga biaruhondo lalu, Tíngaga mini mbiraore wirimigo agoha ngabe, lene.

Ani layagola howa ti mogo lowa gi howa tini minime laga laga bialu lalu, Ibugua puyabuhondobi iba yaribu biragohondobi bi laragola hale halu ema nabiagadago agali ogoni ibu aidabe, lene.

*Yasuhanda agali mbiraha dama daraga ho hearia wara tagi henego ogo*  
(Madiu 8.28-34, Maga 5.1-20)

\* 8:16: Md 5.15, Lg 11.33    \* 8:17: Md 10.26, Lg 12.2    \* 8:18: Md 13.12, 25.29, Lg 19.26    \* 8:21: Lg 6.47, 11.28, Yo 14.21    \* 8:23: Md 8.24, Mg 4.37    \* 8:24: Md 8.25, Mg 4.38

<sup>26</sup> Ani bialu Yasubi ibunaga talima piaga biarubi iba talu yalu Galili iba kuyama domalu Gerasa anda pene. <sup>27</sup> Yasu ibu iba angeni ge ha ade halu hearia agali mbira dama dewa daragahe heago lola hene. Agali ogoni ala howa aga nabi pialu andaga napale homali egeanda wiaruha hangu paliaga hene. <sup>28</sup> Ibugua Yasu de hondowa ga dalimu lowa Yasunaga ge ha birape howa hongo howa lalu, Ngode Datagaliwabe Daligaorene Daliga Kagonaga Iginu Yasu-o ihondo agi bule ibiribe. Ihondo pani nangibe, lene. <sup>29</sup> Ibugua bi ogoni lenedagoni Yasuhanda ibuha dama daraga hearuhondo, Pudaba, layagola lene. Ibu horo bibahendengi ibunaga gi gebi pu senime kabu bu ngagola damame ibuha karulowa pu seni tongo lalu ibu dindi ko wali agali nahaga wiagoha haru piaga hene.

<sup>30</sup> Ani layagola Yasuhanda ibuhondo lalu, Í mini aibe, lene. Ani layagola ibugua ladai bialu lalu, I mini Dewali, lene. Ani lenego irane dama dewa ibuha daraga ho hene. <sup>31</sup> Ani layagola dama biarume Yasuhondo hongo howa lalu, Ina dindi uli koha hole pudaba nalabe, lene.✧

<sup>32</sup> Nogo dewa bare kawareni pia nalu bu hene. Ani bu kago manda buwa dama daraga ho hayarume Yasuhondo hongo howa lalu, Nogo karuha anda pu holomaya pudaba la, lene.✧

Ani layagola Yasuhanda, Tí nogoha hole pudaba, lene. <sup>33</sup> Ani layagola dama biarume agali biago helalu nogo hayaruha anda pene. Anda piyagola nogo bibahende hayaru bareni dalipebe bialu dai lo yalu pialu iba timbuni bereagoha anda piyai hayagola ibame nogo biaru nai hene.

<sup>34</sup> Ibame nogo ani nai hayagola nogo haru haga hearume handalu gerai lalu pialu tanohabi dindi anda bu wiaruhabi lopebe bima pene. <sup>35</sup> O layago hale howa wali agali bu hearume agi biyadabe hondole pene. Ti Yasu hearia ibuwa tigua agali ala dama dewa daraga hayaru tagira piyai hayagobi agali biago ibu mini bayale wia dai biyagobi aga biyagobi ibu Yasu ge ha berearia hondowa ti bibahendeme gi hai hene. <sup>36</sup> Maru handayarume wali agali ibu hearu hale helo, Au bialu dama wara tagi haya, lalu lamiya. <sup>37</sup> Wali agali dindi ogoniha hearu bibahendeme gi hai howa Yasuhondo lalu, Í oali nahe wahalu pu, lene. Ani laya handala Yasu ibu iba taluni bialu pole biyagola <sup>38</sup> agali ala dama dewa daraga hene wara tagi hayagome Yasuhondo hongo howa lalu, Í poredagua mba, lene.

Ani layagola Yasuhanda ladai bialu lalu, <sup>39</sup> Í andaga dai buwa Ngode Datagaliwabe handa ihondo biyago lamule pobe, lene.

Ani layagola agali biagome tanoha pialu howa Yasuhanda ibuhondo biyago te lamima pene.

*Yairasa wanebi wali Yasunaga agani ela hayagobi te ogo  
(Madiu 9.18-26, Maga 5.21-43)*

<sup>40</sup> Ani buwa Yasu ibu iba ange edeyagi lone doma dai bialu heagola wali agali bibahendeme ibu ibilo hondo hearia ibiyago hondowa tigua, Yasu ibu, lai hene. <sup>41-42</sup> Ani bu hearia agali mbira mini Yairasa ibu ngoai hagane andaha hondo hagane henego ibini. Ibuwa ibugua Yasu heagoria birape howa lalu, I wane mbiraore mali pira mbirani kira (12) hangu berenego ai homarago iya i andaga porabane, lene.✧

Yasu ibu piyadagua wali agali dewaore gengeda tago bu yalu pene. <sup>43</sup> Ti heba pialu howa wali mbira mali pira mbirani kira (12) warago baabo haga berenego ibubi ti haru pene. Ibugua wia ale bibahende anogoda agalihondo miyagola tigua ibu mo dabi habe naheyagola biraabo hene. <sup>44</sup> Ibugua wali agali gengeda tago bu heagoria Yasunaga erembirahayagi ibuwa Yasunaga aga nguini ela hayagola warago bayago abaleore ereba hai hene.✧ <sup>45</sup> Ani biyagola Yasuhanda lalu, I ela hayago aiwabe, lene.



Ani layagola wali agali bu hearume, I nabi, I nabi, lai hayagola Pidahanda lalu, Anduane-o í wali agali dewa gengeda tago bu karuni ndobe, lene.

<sup>46</sup> Ani layagola Yasuhanda lalu, Mbiralime í ela hayagola ínaga hongo tagira pi-ayugola handaru, lene. <sup>47</sup> Ani layagola wali biagome ibu handa walia hayada manda bialu ibunaga miniha duru lama Yasu heagoria bira para hene. Wali agali bu hearume wanakuini biruwa lalu, Ogo ale biyane ínaga agani ela harugola íha warago bo wiaabo hayago abale ereba halu dabi haya, lene.

<sup>48</sup> Ani layagola Yasuhanda wali biagohondo lalu, I wane-o ína Ngode Datagali-wabehondo mini mbiraore wirigome í mo dabi hayago mo palia holene karulo yalu pu, lene. <sup>49</sup> Yasuhanda ani lalu hearia ngoai hagane andaha hondo hagane biagonaga andaga howa mbiralime bi lama ibalu howa lalu, Yairasa-o í wane biago tongolo miyago ai Lawai haga kago la pugua nabibe, lene.

<sup>50</sup> Ani layagola hale howa Yasuhanda Yairasahondo lalu, Gi nahe Ngode Datagali-wabehondo mini mbiraore wiriyagua ibu dabi holebira, lene.

<sup>51</sup> Ani lowa Yasu ibu andaga anda pialu howa maru anda polene hame nale Pida Yone Yamese imaru wandari biago aba aiyama ti hangu anda pene. <sup>52</sup> Bibahende bu hearume wandari emene biagonaga yiyi lalu dugu bialu hene. Ani bialu heagola Yasuhanda tihondo lalu, Dugu nabadababe. Wandari emene ogoni ibu tongolo mia nabi palia dege bida, lene. <sup>53</sup> Ani layagola tigua Yasu hondo oba halu hene. Irane ibu tongolo minigo manda buwa hondo oba hene. <sup>54</sup> Ani biyagola Yasuhanda wandari biago gini yamuwa lalu, I wane-o heya, lene. <sup>55</sup> Ani layaore wandari emene biago buhe ladai bialu heyayagola Yasuhanda tihondo lalu, Ibu mbirale mbira nelu mo midaba, lene. <sup>56</sup> Ani layagola wandari emene biago aba aiyalame miniha mogo timbuniore lo heagola Yasuhanda libuhondo hongo howa lalu, O birudagoni wali agali mbirali nalamilibu, lene. <sup>9</sup>

## 9

### *Yasuhanda homberiali (12) biaruhondo, Mana lama purogo ladaba, lenego ogo (Madiu 10.5-15, Maga 6.7-13)*

<sup>1</sup> Yasuhanda ibunaga talima piaga homberiali (12) biaru olalu, Mo ngoai hadaba, lowa tigua dama daragahe karu wara tagi helobi warago tara tara bo ngaru mo dabi helobi ibugua tihondo hongo holene mini. <sup>2</sup> Ani buwa Yasuhanda lalu, Ngode Datagaliwabehanda Handame Ho Kagonaga bi mana lamima pialu howa warago bo ngaru mo dabi hole pilimu, lene. <sup>3</sup> Bi ogoni nale howa ala Yasuhanda tihondo lalu, Pialu howa mbirale nayi pilimu. Halimbubi muni ngi lowa hanagane nubi tomobi munibi tingiliya hunianebi nayiore pialu halimu. <sup>4</sup> Mbirame tihondo, Palimiya ibidaba, larago andaga haabo halu polene tu haragola pilimu. <sup>5</sup> Tí poramigoha mbiralime tihondo, Palimiya ibidaba, naleyagua tigua biyagoni walia hole tínaga geni abalu para kago taulo wahalu pilimu, lene. <sup>6</sup> Ani laya handala ibunaga talima piaga biarume tagira pialu Bi Mana Debene dindi bibahende wiaruha lamigi bima pialu howa warago bo wiaru mo dabi haga bima purogo lene. <sup>Herodo ibu mini burugulo henego ogo (Madiu 14.1-12, Maga 6.14-29)</sup>

<sup>7</sup> Galili wali agali handame haga Herodo ibugua mbirale tara tara biayuago hale howa ibu mini burugulo hene. Irane wali agali marume lalu, Baboraya biaga Yone

✧ 8:46: Mg 5.30, Lg 6.19 ✧ 8:48: Lg 7.50 ✧ 8:52: Lg 7.13, Yo 11.11-13 ✧ 8:54: Lg 7.14, Yo 11.43 ✧ 8:56: Mg 7.36, Lg 5.14 ✧ 9:1: Md 10.1, Mg 3.13-15 ✧ 9:3: Lg 10.4-11 ✧ 9:4: Md 10.11, Mg 6.10 ✧ 9:5: Md 10.14, Mg 6.11, Ab 13.51 ✧ 9:6: Mg 6.12

lone heyu daibu ka, lalu<sup>✠8</sup> marume Elaya ibu lone ha pani ho ka, lalu marume, Ngode Datagaliwabe mana latagi haga mbiraligo lone heyu daibu ka, lalu lagalaga biyagola Herodo ibu mini burugulo hene. <sup>9</sup> Mini burugulo howa lalu, Yonenaga ma puguadaba, larugodago áyu mbirale tara tara biaruago agali aiwa biaruabe, lowa ibugua Yasu hondole henge tai bialu hene.✠

*Wali agali dewaoreme tomo no karula penego ogo  
(Madiu 14.13-21, Maga 6.30-44, Yone 6.1-14)*

<sup>10</sup> Abosolo homberiali (12) biarume dai buwa tini bialu hayaru bibahende Yasuhondo lamiai hene. Ani lamiyagola Yasuhanda ti haru pialu tini hangu hole tano mbira mini Bedesaida pene. <sup>11</sup> Ti ani piyago hale howa wali agali bu hearume ti piyadagua haruru mama pene. Haruru mama ibiyagola Yasuhanda, Tí ibidaba, lowa Ngode Datagaliwabehanda Handame Ho Kagonaga mana lamialu howa warago bo wiarubi mo dabi halu hene.

<sup>12</sup> Ni gai lole biyagolaibunaga talima piaga homberiali (12) biarume ibu hearia ibuwa lalu, Wali agali bu karu ogoria tomo nalu paluene henge nawidago tano emene ngaruhabi mabu anda bu karuhabi tai bima purogo lelo pudaba la, lene.✠

<sup>13</sup> Ani layagola Yasuhanda tihondo lalu, Ti tomo nelo tínime midaba, lene.

Ani layagola tigua ladai bialu lalu, Mberedi duria wena kira lowa hangu henedama. Wali agali bibahende bu karunaga tomo yolo bu polomaya hameledebe, lene. <sup>14</sup> Tigua ani layago irane agali dewaore daosini duria (5,000) agima hene.

Yasuhandaibunaga talima piaga biaruhondo lalu, Wali agali bu karuni berelo pira duria (50) dege dege bira dugu bigi bilo biradaba ladaba, lene.

<sup>15</sup> Ani layadagua talima piaga biarume biai hayagola <sup>16</sup> Yasuhanda mberedi duria biarubi wena kira biago labobi mo yuwa hariha handa daga halu Ngode Datagaliwabehondo turu halu kaj lowa mberedi gaibu бага buwaibunaga talima piaga biaruhondo mialu, Wali agali biru ngaru talebu midaba, lene. <sup>17</sup> Ani layadagua biyagola ti bibahende bu hearume no karula pialu ibira hayagoibunaga talima piaga biarume nu homberia hono tolai hene.

*Pidahanda, Mbiralidabo Helenego ibulebira lowinigo íore íbu kegoni, lenego ogo  
(Madiu 16.13-19, Maga 8.27-29)*

<sup>18</sup> Horo mbiru Yasu ibu hangu howa Ngode Datagaliwabela bi lalu heariaibunaga talima piaga biaru ibini. Ibiyagola ibugua tihondo lalu, Wali agali bu karume í ai ka lalu kabe, lene.✠

<sup>19</sup> Ani layagola tigua ladai bialu lalu, Marume lalu, Í baboraya biaga Yone kegoni, lalu marume, Í Elaya kegoni, lalu marume, Ngode Datagaliwabe mana latagi haga bambali hene lone heyu daibu kegoni, lalu ka, lene.✠

<sup>20</sup> Ani ladai biyagola ibugua tihondo ladai bialu lalu, Tígua nde í ai ka lalu kamibe, lene.✠

Ani layagola Pidahanda ladai bialu lalu, Ngode Datagaliwabenaga Mbiralidabo Helenego ibulebira lowinigo íore íbu kegoni, lene.

*Yasuhanda ibuni tandaga nalu homolenenaga te lenego ogo  
(Madiu 16.20-28, Maga 8.30-9.1)*

<sup>21</sup> Ani layagola Yasuhanda tihondo hongo howa lalu, Mbiralinamilimu, lene. <sup>22</sup> Ani lowa ibugua tihondo lone lalu, Agali Hole Ibiyago tandaga timbuni nalu agali ala hene miniwi karubi loma binigo mo miaga haguane karubi Mana lowinigo lawai haga

✠ 9:7: Md 16.14, Mg 8.28, Lg 9.19 ✠ 9:9: Lg 23.8 ✠ 9:12: Md 14.15, Mg 6.35-36, Yo 6.5 ✠ 9:18: Md 16.13, Mg 8.27 ✠ 9:19: Md 14.1-2, Mg 6.14-15, Lg 9.7-8 ✠ 9:20: Md 16.15-16, Mg 8.29, Yo 6.68-69

karubi tigua ibu hame nale howa homelo bolepira. Ani biragola howa horo kiru howa tebonengi Ngode Datagaliwabehanda ibu mo heya holebira, lene.\*

<sup>23</sup> Ani lowa ibugua ti bibahendehondo lalu, Mbiralime i porodagua ibua ho kayagua ibuni hame ledago mitangi nabi horo bibahendengi ibuninaga ira banga yalu i talima ibulene nga.\* <sup>24</sup> Ogoninaga mbiralime ibuninaga holene mo tene hayagua nde holene ogoni ereba hai holebira. Anigo mbiralime ibuninaga holene wahai halu i mo tene hayagua ogoni ibu holene gahenge yu holebira.\* <sup>25</sup> Mbiralime dindi bibahendeni ngaru mo tene ho kaore ibuninaga holene maro biyagua ibu biamogo bulebirabe. Biamogo nabulebiraore.\* <sup>26</sup> Mbiralime i minibi inaga bi manabi lamulene taga hayagua Agali Hole Ibiyago ibunaga wa holene taraorebi ibu Abanaga wa holene taraorebi dahuliyali loma bia henerunaga wa holene taraorebi heba dai birangi ibugua nde o biago hondowa taga holebira.\* <sup>27</sup> Ina tihondo heneneore larogo maru ayu ogoria karu nahome kaore Ngode Datagaliwabehanda Handame Ho Kagoria de hondolebira, lene.

*Yasu mo tara ho hearia ti de hendenego ogo  
(Madiu 17.1-8, Maga 9.2-8)*

<sup>28</sup> Yasuhanda bi ogoni lai ho howa horo karu agima howa Pida Yone Yamese imaru haru halu dindi hambene wiagoria iraga halu Ngode Datagaliwabela bi lole pene.\* <sup>29</sup> Ibugua Ngode Datagaliwabela bi lalu hearia Yasunaga dengui mo tara howa aga biagobi demborere bialu peleore hene. <sup>30</sup> Ani biyagola agali kira ibu heba te lalu hene. Agali kira hayago labo Mosese Elayalame <sup>31</sup> dahuliya andaganaga wa taraore holene karulo howa Ngode Datagaliwabenaga galone bulene bumaro bule Yarusalemeni howa Yasu ibu abale homolebiragonaga te Yasu heba lalu hene.\* <sup>32</sup> Pidabi agali kirali ibu heba hayago labobi palia hondo howa de ngala howa tigua Yasu ibu wa taraore holene karulo howa agali kirali ibu heba mandagi hearia de hendene.\* <sup>33</sup> Agali kira biago labo Yasu helalu pialu hearia Pidahanda Yasuhondo lalu, Anduane-o ina ogoria kamagoni bayaledago. Iname anda nemanda mbira inaga bialu mende Mosesenaga tebone Elayanaga lowa bia harama, lene. Pida ibu bi ogo ale laro nale bame lope hene.

<sup>34</sup> Ibu bi lalu heaore beraliba mbira ibiyagome ti gumba hayagola talima piaga tebirali biarume gi hene. <sup>35</sup> Beralibaha howa bi lowa lalu, I Igini ini dabo heledogo ogoni. Ibugua bi larago hale halimu, lene.\*

<sup>36</sup> Bi ogoni lai hayagola Yasu ibuni hangu hearia hendene. Talima piaga tebirali biarume o handayagoni horo uruningi maruhondo nalami ti bi nale hene.

*Yasuhanda igiri mbiraha dama daraga hearia wara tagi henego ogo  
(Madiu 17.14-18, Maga 9.14-27)*

<sup>37</sup> Horo mendengi Yasubi ibu talima piaga tebirali hayarubi ti bareni dalialu hearia wali agali dewali bu yalu ibuwa Yasu lola hene. <sup>38</sup> Wali agali bu heagoha howa agali mbirame laraga halu lalu, Lawai haga-o i igini mbiraore ogoni hangugo ina dara howa de handa. <sup>39</sup> Damame ga lalu ibu mo para howa biango bibi bia halu ne harigaha hangiau puda haea bialu mo tandaga haabo halu abale yu pe nahaga. <sup>40</sup> Ani biaabo hayagola inaga talima piaga biaruhondo, Wara tagi hadaba, larugola tigua wara tagi habe nahe haya, lene. <sup>41</sup> Ani layagola Yasuhanda ladai bialu lalu, Wali agali ti Ngode Datagaliwabehondo mini mbiraore nawi howa mini pu tara ho haabo kamagoni. Ina ti kamiruha horo agiru haabo holiyadabe. Ina ti heba howa horo agiru tinaga genda yu haabo holiyadabe, lene. Ani lowa agali biagohondo lalu, Inaga igini ogoria haru ibu, lene.

\* 9:22: Md 16.21, 17.22, Mg 8.31, 9.31, Lg 9.44, 18.32-33 \* 9:23: Md 10.38, 16.24, Mg 8.34, Lg 14.27 \* 9:24: Md 10.39, Lg 17.33, Yo 12.25 \* 9:25: Md 16.26, Mg 8.36 \* 9:26: Md 10.33, Mg 8.38, Lg 12.9, 2 Ti 2.12 \* 9:28: 2 Pi 1.17-18 \* 9:31: Md 17.3, 17.9, Mg 9.4, 9.9, Lg 9.22, 13.33 \* 9:32: Md 17.2-3, Mg 9.2-4, Yo 1.14, 2 Pi 1.16-18 \* 9:35: Ais 42.1, Md 3.17, 12.18, 17.5, Mg 1.11, 9.7, Lg 3.22

<sup>42</sup> Igiri biago haru ibalu hearia damame igiri biago dindini mo para howa biango bibi bia hene. Ani biyagola Yasuhanda dama biagohondo lalu, Tagira pu, layagola igiri biago bayale hayagola ibu abahondo, Í igini ebere ibirago, lene. <sup>43</sup> Ani biyagola wali agali bibahende bu hearume Ngode Datagaliwabenaga hongo hondowa mogo lai ho hene.

*Yasuhanda ibuni homolenenaga te halu mende lenego ogo*  
(Madiu 17.22-23, Maga 9.30-32)

Wali agali bu hearume Yasuhanda biyagonaga mogo dege lo heagola Yasu ibugua ibunaga talima piaga biaruhondo lalu, <sup>44</sup> Bi mbira o langerogoore embeda nahalimu. Marume Agali Hole Ibiyago minuwa agali hongo yu karuhondo mulebira, lene. ✧ <sup>45</sup> Ani layagola talima piaga biarume irane ogo alenaga laralo manda nabi hene. Ti manda nabilo lamia nabi ya do ho hayagola tigua ibuhondo hale hodai bulene giho hene. ✧

*Bolangua ho kago aibe lenego ogo*  
(Madiu 18.1-5, Maga 9.33-37)

<sup>46</sup> Ibutaga talima piaga biarume tini dege dege lalu, Bolangua howa duniniore ai ibu kabe, lowa lai lalu hene. ✧ <sup>47</sup> Yasuhanda tinaga miniha mitangibu heago manda buwa ibugua igiri emene mbira heago ibu adogeha helowa <sup>48</sup> tihondo lalu, Mbiralime inaga minini howa igiri emene ogobigohondo, Ila habiya ibu, layagua ihondobi, Ila habiya ibu, lara. Ani buwa mbiralime ihondo, Ila habiya ibu, layagua ihondo, Pu, layagohondobi, Ila habiya ibu, lara. Ogoninaga mbirali tí kamigoria howa mo dindi ho kago ibuore bolangua howa duniniore kagoni, lene. ✧

*Tí baba waitigi ndo karu tí aria ka, lenego ogo*  
(Maga 9.38-40)

<sup>49</sup> Ani layagola Yonehanda lalu, Anduane-o agali mbirame inaga minini howa dama daraga hearu wara tagi halu hearia iname hondowa, Nabi waha, lamirima. Irane agali ogoni ibu ina aria ndoyanenaga lamirima, lene. ✧

<sup>50</sup> Ani layagola Yasuhanda Yonehondobi talima piaga maru hearuhondobi lalu, Ibugua ani biragola, Nabibe, lole manda nabilimu. Mbirali tí baba waitigi ndo kago tí aria ka, lene. ✧

*Samaria wali agalime Yasu ibilo hame nale henego ogo*

<sup>51</sup> Yasu ibu dahuliya andaga iraga halu polene horo kaware ha para hayagola ibuni manda bialu Yarusaleme pole pialu hene. ✧ <sup>52</sup> Pialu howa ibugua Samaria dindini marume mbirale mbirale manda manda bialu helonaga, Lama bamba hadaba, lene. <sup>53</sup> Anigo wali agali amugoniha hearume ibu Yarusaleme puabo holeyagola ti hearia ibilo hame nale hene. ✧ <sup>54</sup> Ani biyago hondowa talima piaga biagolabo Yamese Yonelame lalu, Anduane Homogo-o wali agali uruni irame ti dai helo iyame hariha howa ira hungu ibiraha larababe, lene. ✧

<sup>55</sup> Ani layagola Yasuhanda beregedowa libu talini. <sup>56</sup> Ani lalu bialu Yasubi ibunaga talima piaga biarubi dindi mendehayagi pene.

*Yasu piyadagua haruru poa ho heneru ogo*  
(Madiu 8.19-22)

<sup>57</sup> Ti harigani pole pialu howa agali mbirame Yasuhondo lalu, Í poregotha ina talima ibaga bulebero, lene.

<sup>58</sup> Ani layagola Yasuhanda ibuhondo ladai bialu lalu, Biango dudu ale karu dindi hauha paliaga ega bedaru tinaga andaha paliaga Agali Hole Ibiyago ibu halo paluene henge nawi, lene.

✧ 9:44: Md 16.21, 17.22, Mg 8.31, 9.31, Lg 9.22, 18.32-33 ✧ 9:45: Mg 9.32, Lg 2.50, 18.34 ✧ 9:46: Lg 22.24  
✧ 9:48: Md 10.40, 23.11-12, Mg 9.37, Lg 10.16, Yo 12.44, 13.20 ✧ 9:49: Dag 11.28, Mg 9.38 ✧ 9:50: Md 12.30, Lg 11.23 ✧ 9:51: Mg 10.32, 16.19 ✧ 9:53: Yo 4.9 ✧ 9:54: 2 Kin 1.9-16

<sup>59</sup> Ani lowa Yasuhanda agali mendehondo lalu, I porodagua talima ibabe, lene.

Ani layagola agali biagome lalu, Anduane-o i aba ala hora hole dai berogo, lene.

<sup>60</sup> Ani layagola Yasuhanda ibuhondo ladai bialu lalu, Homene karu tinaga homene tinime hora holene ngago. Ina Ngode Datagaliwabehanda Handame Ho Kagonaga mana lamule pu, lene.

<sup>61</sup> Ani layagola agali mendeme Yasuhondo lalu, Anduane-o i talima ibuliya i damenehondo, Ti hondo halimu, ala lo porogo, lene.✧

<sup>62</sup> Ani layagola Yasuhanda ibuhondo lalu, Mbirali ibugua dindi aliagame dindi alialu howa erembirahayagi handa dai biaabo hayagua ogoni ibu Ngode Datagaliwabehanda Handame Ho Kagonaga galone nabulene holebira.

## 10

### *Yasuhanda agali pira kariani kirahondo (72), Pudaba, lenego ogo*

<sup>1</sup> Ani lowa Anduane Homogohanda agali pira kariani kira (72) dabalulu ibu dindi polebiragoha, Ti bamba halu kirali kirali pugu pugu bidaba, lowa✧ <sup>2</sup> ibugua tihondo lalu, Mabuni tomo dewaore ngago wali agalime tomo bialu mo mogo bulene ndia ka. Tomo mo mogo biagane maru ibilelo mabu anduanehondo bi lamulene nga.✧ <sup>3</sup> Ina ti nogo sibi igini ale kamiru biango dudu ale kagoria pudaba laro.✧ <sup>4</sup> Pialu howa muni pauiyibi muni ngi lowa hanagane nubi ge ge subi nayi pilimu. Pialu howa harigani waea naea nabi bola balu pilimu.✧✧ <sup>5</sup> Anda mbiraha anda poramigo pialu howa ala bi lalu, Anda ogoniha mo palia holene helo, lalimu. <sup>6</sup> Ogoriani kago mbirame mo palia holene hamelo heayagua tigua anda ogoniha mo palia holene helo larimigo ibu yu helo milimu. Ogoriani kago mbirame mo palia holene hame nale heayagua tigua mo palia holene helo larimigo tini yadai bilimu. <sup>7</sup> Ani buwa tigua ngira ale iba nalu hina nalubi anda mbiraore paleremigoria palu haabo halimu. Biabe biagame yolo nolene ngago. Anda mendeha palia anda anda nabilimu.✧ <sup>8</sup> Tano mbira anda poramigola maru karume, Palimiya ibidaba, layagua ogoniha puwa tomo ngirago nalu palilimu.✧ <sup>9</sup> Tano ogoniha warago bo ngaru mo dabi halu howa, Ngode Datagaliwabenaga Handame Ho Holene ti kamigoria kaware ibu nga, lalimu. <sup>10</sup> Anigo tano mbiraha anda poramigola, Palimiya ibidaba, nalayagua anda haneni hariga pedadagua pu tiga bialu howa lalu,✧ <sup>11</sup> Tano ogonaga abalume inanaga geni para hayadago tigua birimigoni walia halu taulo badai bialu porama. Ngode Datagaliwabenaga Handame Ho Holene ti kamigoria kaware ibu ngago manda bilimu, lalimu.✧ <sup>12</sup> Ina tihondo heneneore larogo Daba Ki Bulene Horo harangi Ngode Datagaliwabehanda dara howa Sodomu wali agalihondo dabaradagua ndo wali agali tano ogoniha karu hongo howaore dabilebira, lene.✧

### *Tano maruha wali agalime mini mbiraore nawi henego ogo (Madiu 11.20-24)*

<sup>13</sup> Yasuhanda lalu, Korasini wali agaliru tinaga mo ko holene timbu gibiore wulebirago daraho ko. Bedesaida wali agaliru tibi tinaga mo ko holene timbu gibiore wulebirago daraho ko. Ti harimigoha agalime nabiaga ale biyadagua Taia Saidonolaha abale bidale nde ti mini beregedalu ko binigo wahai harima lalu dara howa walia helonaga aga karulo biruwa tinaga dongoneni be mo dugu hirage kaleda, lene.✧ <sup>14</sup> Daba Ki Bulene Horo harangi Ngode Datagaliwabehanda dara timbuni howa Taia Saidonolanaga wali agalihondo dabaradagua ndo wali agali tano uruniha kamiruhondo hongo howaore

✧ 9:61: 1 Kin 19.20 ✧ 10:1: Md 10.1, Mg 6.7 ✧ 10:2: Md 9.37-38, Yo 4.35, 2 Te 3.1 ✧ 10:3: Md 10.16 ✧ 10:4: 2 Kin 4.29 ✧ 10:4: Md 10.7-14, Mg 6.8-11, Lg 9.3-5 ✧ 10:7: Md 10.10-11, 1 Ko 9.14, 10.27, 1 Ti 5.18 ✧ 10:8: 1 Ko 10.27 ✧ 10:10: Ab 13.51 ✧ 10:11: Md 10.14, Lg 9.5, Ab 18.6 ✧ 10:12: Pig 19.24-28, Md 10.15, 11.24 ✧ 10:13: Ais 23.1-18, Ese 26.1-28.26, Yol 3.4-8, Amo 1.9-10, Md 11.21-23, Seg 9.2-4



dabolebira. <sup>15</sup> Tí Kabaniamani kamiru dahuliya togo wialu polenaga t́ini yaraga hoa kamibe. Tí heli dindiha minu bape ho helolebira, lene.✧

<sup>16</sup> Ani lowa Yasuhanda ibunaga talima piaga biaruhondo lalu, Mbirali t́inaga bi hale haragome ínaga bibi hale haragoni. Mbirali t́ihondo handabe manga haragome ihondobi handabe manga haragoni. Mbirali ihondo handabe manga haragome ihondo, Pu, layagohondobi handabe manga haragoni, lene.✧

*Agali pira kariani kira (72) piyaru dai binigo ogo*

<sup>17</sup> Agali pira kariani kira (72) piyaru dai bialu howa turu hama dai bini. Dai buwa tigua Yasuhondo lalu, Anduane Homogo-o iname ínaga minini howa dama daraga hearu, Tagira pudaba, larimagola hale halu tagira piya, lene.

<sup>18</sup> Ani layagola Yasuhanda tihondo ladai bialu lalu, Ina handalu hewaria dama Heyolabe hari daba ale bialu hariha howa pilope hayago de handaru.✧ <sup>19</sup> Ai hale had-aba. T́igua puyabi alipiagobi ngago hangedalu pilimulobi dama Heyolabenaga hongo bolangua halimulobi t́i mo ko nahelonagabi ina t́ihondo hongo holene yu halimulo ngirugoni.✧ <sup>20</sup> Anigo damarume t́igua bi larimigo hale haragola ku nale howa t́inaga mini dahuliya andagani gilibu nga manda buwa ogoninaga kulo halimu, lene.✧

*Yasuhanda turu timbuni henego ogo  
(Madiu 11.25-27, 13.16-17)*

<sup>21</sup> Horo ogoningi Ngode Datagaliwabe Dinini ibugua turu holene Yasuha tolai hayagola Yasuhanda turu ho howa lalu, Aba-o hari daliganagabi dindinagabi Anduane Homogo í kegoni. Dindi mana manda bu karubi mini gigabiwi karubi tihondo walia nahe harigo dindi mana manda nabi karuhondo ínaga mana tara walia harigonaga turu halu kaj laro. Anigo í Aba íni bule hame lededagua birida.

<sup>22</sup> Anigo í Abahanda mbirale bibahende ihondo ngiai haya. Bibahendeoreme Igini ibu ogo kalo manda nabi Aba ibuni hangu manda bu ka. Bibahendeoreme Aba ibu ogo kalo manda nabi Igini ibuni hangu mandabu ka. Igini ibugua ibu Aba walia hoa biragohondo walia haragola tigua Aba ogooreda lowa mandabu holebira, lene.✧

<sup>23</sup> Ani lowa Yasuhanda beregedowa talima piaga biaru ti hanguhondo lalu, Mbirale biyaru de handaramigo turu timbuniore haramine.✧ <sup>24</sup> Ina t́i langerogo Ngode Datagaliwabe mana latagi haga dewa henerumebi kini dewa henerumebi t́igua de handaramigo hondoa howa nahandabehe hene. Mana t́igua hale haramigo hale hoa howa hale nahe hene, lene.✧

*Bi yobage lowa Samaria agalime binigo te lenego ogo*

<sup>25</sup> Mana lowinigo lawai haga mbirame Yasu mo hondo habehedabe hondole ibini. Ibuwa lalu, Lawai haga-o ina haabobo holene yule agi buabe, lene.✧✧

<sup>26</sup> Ani layagola Yasuhanda ibuhondo ladai bialu lalu, Anduane Homogonaga mbugani bi agi lo wiabe. Bi lo ngadagua handalu agua manda birilibe, lene.

<sup>27</sup> Ani layagola agali biagome ladai bialu lalu, Ina Anduane Homogo ínaga Ngode Datagaliwabe kago ínaga gubalinimebi minimebi hongomebi mandamebi gubalini ho habe. Ani buwa íni gubalini harilidagua maru karu ta nabi gubalini ho habe lo wia, lene.✧

<sup>28</sup> Ani ladai biyagola Yasuhanda ladai bialu lalu, Ina tigatiga larigo ogonidagua bialu hariyagua haabobo holene ngago yu holebere, lene.✧

✧ **10:15:** Ais 14.13-15 ✧ **10:16:** Md 10.40, Mg 9.37, Lg 9.48, Yo 5.23, 13.20 ✧ **10:18:** Yo 12.31, 16.11, Mo 9.1, 12.8-9 ✧ **10:19:** Iba 91.13, Mg 16.18, Ab 28.5 ✧ **10:20:** Har 32.32, Ais 4.3, Dan 12.1, Md 7.22, Pb 4.3, Hi 12.23, Mo 3.5, 21.27 ✧ **10:22:** Md 28.18, Yo 1.18, 3.35, 10.15, 17.2 ✧ **10:23:** Md 13.16-17 ✧ **10:24:** 1 Pi 1.10 ✧ **10:25:** Md 19.16, Lg 18.18 ✧ **10:25:** Md 22.35-40, Mg 12.28-34 ✧ **10:27:** LBM 19.18, Man 6.5 ✧ **10:28:** LBM 18.5, Neh 9.29, Ese 20.11-13, Lm 10.5, Ga 3.12

<sup>29</sup> Ani layagola Mana lowinigo lawai haga biagome ina birugo bayale biru lolenaga Yasuhondo lalu, Maru ta nabi ina nenege hinulene ti ai haruabe, lene.✧

<sup>30</sup> Ani layagola Yasuhanda ladai bialu lalu, Horo mbiru agali mbira Yarusaleme howa Yarigo pole dalipe halu pene. Pialu hearia pageali marume ibu de handalu minuwaibunaga dabudabu yiaru ti gingila mialu ibuni bo mbaulo wahowa tongolo mibehe heagola hariga teneni ngelalu pene. <sup>31</sup> Horo ogoningi dege loma binigo mo miaga agali mbira hariga ogonidagua dege pole pialu hearia agali homo wiago hondowa ibu hariga balalu bolangua halu pene. <sup>32</sup> Ogonidagua dege agali mende Libai aguanene henego ibubi pialu hearia agali wiagoria handa hondowa ibu hariga balalu pene. <sup>33</sup> Anigo agali tebone Samaria agali hariga ogoniha dege pialu hearia agali biago homo wiago hondowaibunaga miniha dara timbuniore hene.✧✧ <sup>34</sup> Ibugua agali biago wiagoria puwa dere biaruni welibi waini ibabi odo wia halu dere biaru huba biai haluibuninaga nogo dongini mo yalu pialu palu ngoai hagane anda mbira heagoha ngelowa ira to bule mo yalu pene. <sup>35</sup> Ani buwa horo mendengi Samaria agali biagome kina kira ale yalu puwa palu ngoai hagane anda hondo haga heagohondo mialu howa lalu, Ina agali ogo bayuwa hondo habe. Ini dai bialu howa ina agali ogohondo miridadagua ina ani bia holiya ira to bialu habe, laya, lene.

<sup>36</sup> Yasuhanda lamaro bialu lalu, Pagealime agali biago bo waho wiaria i agali tebone agome biyago nenege hinayalo mandabu kebe, lene.

<sup>37</sup> Ani layagola Mana lowinigo lawai haga biagome ladai bialu lalu, Agali tebone dara howa biamogo biyagome nenege hinaya, lene.

Ani layagola Yasuhanda lalu, O biyadagonidagua ina bule pu, lene.

### *Yasu ibu Mada Merila nenege penego ogo*

<sup>38</sup> Yasubiibunaga talima piaga biarubi ti harigani pole pialu howa tano emene mbira wiagoha anda puwa wali mbira mini Mada berenegome ibu andaga, Ibidaba, lene.✧

<sup>39</sup> Ibu hagibuni mende berenego mini Meri ibu Anduane Homogonaga geha bira para howa Yasuhanda mana lawai hayago bayuwa hale ho berene.✧ <sup>40</sup> Anigo Mada ibu tomo nolene biaru mo manda manda bialu howa miniha genda ho yalu Yasu berearia puwa lalu, Anduane Homogo-o i hangu erekuibi bialu kogo Merihondo i biamogo bule pu la, lene.

<sup>41</sup> Ani layagola Anduane Homogohanda ladai bialu lalu, Mada-o Mada-o mbirale dewa bu ngarunaga mini burugu lowa mini dege dindi ho kego <sup>42</sup> mbiraore hangu buru pade Merihanda mbirale ogoni dabayago ibuha yidago yamulene nawi, lene.✧

## 11

### *Yasuhanda Ngode Datagaliwabhondo bi lolene lawai henego ogo (Madiu 6.9-13, 7.7-11)*

<sup>1</sup> Horo mbiru Yasu ibu dindi mbiraha Ngode Datagaliwabela bi lalu hene. Ibugua Ngode Datagaliwabela bi lamaro biyagolaibunaga talima piaga mbiragomeibuhondo lalu, Anduane Homogo-o Yonehandaibunaga talima piaga biaru Ngode Datagaliwabhondo bi lelo lawai hayadagua iname ndeibuhondo bi lolomaya ina ina lawai ha, lene.✧

<sup>2</sup> Ani layagola Yasuhanda tihondo lalu, Tigua Ngode Datagaliwabhondo bi lalu howa ogodagua lalimu,✧

Ina Aba

i mini baya gibiore ngego mo yaraga helobi

inaga Handame Ho Holene ibilobi hamelo ko.

<sup>3</sup> Iname horo bibahendengi tomo nolene buru padamagola ngiaabo habe.

✧ 10:29: Lg 16.15 ✧ 10:33: Yo 4.9 ✧ 10:33: 2 Bit 28.15 ✧ 10:38: Yo 11.1 ✧ 10:39: Yo 12.2-3 ✧ 10:42: Iba 27.4, Md 6.33 ✧ 11:1: Lg 5.33 ✧ 11:2: Md 6.9-13

<sup>4</sup> Marume inahondo ko biragola bia dai nabi waharamalidagua  
ina iname ko birimago domo wahabe.

Ina kamagoria ba hondolene hongohe nangelabe,  
lalu lene.

<sup>5-6</sup> Ogonidagua lalimu lowa Yasuhanda ibunaga talima piaga biaruhondo lalu, Tí kamiru mbiralime mbi hanuniore tí nenege andaga puwa ibuhondo lalu, Nenege-o i nenege mbira dindi kaundia mbiraha howa i andaga ibu bedago i tomo nawi hewaria ibiyago mberedi homane tebira ngi, laragola <sup>7</sup> i nenege tamuha paliyagome latagi lalu, Ina i dalima nahabe. Panga payuwa howa i waneigini heba dagiani mandagi padama. I mbirale mbira ngule heyabe nahe, layagua <sup>8</sup> agua buledabe. Ina tihondo larogo ogoni tí nenegeore kago manda buwa ibugua heyuwa namo ngiyagua taga nahe donge howa haya lalu ngi laabo haramigola heyuwa ngi laramigo ale mo ngulebira, lene.✧

<sup>9</sup> Ani lowa, Tihondo laro. Ngi, lalimu. Ngi, laramiyagua tigua yu holeberami. Tai bialu halimu. Tai bialu haramiyagua handa walia holeberami. Panga dugua, lalu halimu. Panga dugua, lalu kamigola tihondo panga dugua holebira.✧ <sup>10</sup> Ogoninaga bibahendeme, Ngi, lalu karuhondo miragola yulebira. Tai bialu karume handa walia holebira. Panga dugua, lalu karuhondo panga dugua holebira. <sup>11</sup> Waneigini aba kamiru tí iginime, Wena ngi, layagua mbiralime nogombi muleberamibe.✧ <sup>12</sup> Be tí iginime, Ega haba ngi, layagua alipiago muleberamibe. <sup>13</sup> Tíni ko howa tí waneiginihondo bayale dege mulene manda bu kami. Ogonidagua ndo timbuni bolangua howaore tí Aba dahuliya andaga kagome ibuhondo, Ngode Datagaliwabe Dinini ngi, lalu karuhondo mulebiraore, lene.

*Yasu dama Heyolabelanaga te ogo  
(Madiu 12.22-30, Maga 3.20-27)*

<sup>14</sup> Agali mbiraha dama daraga ho howa bi labe nahe henego Yasuhanda dama biago wara tagi hayagola agali biagome bi lene. Ani biyagola wali agali dewa bu hearume miniha mogo lai ho hene. <sup>15</sup> Anigo wali agali maru hearume lalu, Ogoni dama bibahende karunaga haguane mini Heyolabe hongoni howa dama karu ibugua wara tagi haga ka, lene.✧

<sup>16</sup> Ani layagola agali maru hearume Yasu mo hondo habehedabe hondolenaga tigua Yasuhondo lalu, Ngode Datagaliwabehanda i hondowa turu ho ka walia hole agalime nabiagane ale mbira hondolomaya bia, lene.✧ <sup>17</sup> Ani layagola Yasuhanda tinaga miniha manda bu heagoni manda buwa tihondo lalu, Dindi mbiraoreni howa tale bigi bigi bu howa wai bia ai nai bigi biyagua lu bia ho wiaabo naholebira. Ogonidagua dege hameigini mbiraore tale bigi bigi bu howa hangu hangu haga haga bu holebira.✧ <sup>18</sup> Anigo dama Heyolabeme haru kagoria howa tale bigi bigi bu howa tini wai biyagua bia ho wiaabo agua habehebe. Bi o larogoni tigua ihondo dama daraga karu wara tagi holene hongo dama Heyolabeme miya laramigonaga laro. <sup>19</sup> Aniyagua dama Heyolabeme ina dama maru karu wara tagi holiya hongo ngiyagua tinaga aria karume dama daraga karu wara tagi holene hongo miyadago aiwabe. Tíni aria urunime tí kagua manda birimigo walia haga ka. <sup>20</sup> Anigo ina Ngode Datagaliwabehanda hongome dama daraga ho karu wara tagi haruli. O berogome Ngode Datagaliwabehanda Handame Ho Holene tí kamigoria abaleore ibu nga lalu walia haragoni.✧

<sup>21</sup> Agali hongoheme wai biagane ale manda manda bu yuwa ibuni andagani mamage haragola ibunaga mbirale ngaru bayale wulebira. <sup>22</sup> Anigo agali mbira hongo gibiorehe

✧ 11:8: Lg 18.1, 18.5 ✧ 11:9: Md 7.7, Mg 11.24, Yo 15.7, 1 Yo 3.22 ✧ 11:11: Md 7.9-10 ✧ 11:15: Md 9.34, 10.25, 12.24 ✧ 11:16: Md 12.38, 16.1, Mg 8.11 ✧ 11:17: Md 12.25, Mg 3.24, Yo 2.25 ✧ 11:20: Har 8.19

ibuwa agali biago bo mbera ho ngelalu wai biagane aleni hana ho henego gingila mo yalu puwa agali maru baba talebu ta holebira.\*

<sup>23</sup> Mbirali i aria ndo kago ibu ila waitigi ibuni ho ka. Ani buwa mbirali ila mo mogo bulene hame nale kagome waro hila halu bo purogo la haga ka.\*

*Dama mbira lone dai binigo ogo*  
(Madiu 12.43-45)

<sup>24</sup> Agali mbiraha dama daraga hayago wara tagi haya handala puwa ibu hole dindi tuhe mbira agiha ngabe hondole dindi bibahendeha tai bialu haga. Tai bialu howa mbira handa walia naheyagua ibuni hangu lo manda bialu lalu, Ini andaga biagoriani dai bulebero, lo manda biaga.\* <sup>25</sup> Ani lalu ibuni andaga biagoha dai buwa handalu karia bayale gini bu ngaria handa walia haga. <sup>26</sup> Hondo wialu lone tagira puwa ibuni emene bayale lowa dama karia koorene ko haru dai bialu anda puwa anda ogoniha haga. Ani buwa dama biarume ibuha karulai haragola agali biago abale ko hayago bayale lowa mani koorene ko holebira, lene.\*

*Turu holene henene ogo*

<sup>27</sup> Yasuhanda bi ogoni lai hayagola wali agali biru wiaru dombeneha wali mbirame laraga halu lalu, Wali i taba honowa andu miyago ibu turu holene wiarua, lene.\*

<sup>28</sup> Ani layagola Yasuhanda la dai bialu lalu, Anidago Ngode Datagaliwabe bi mana hale howa bialu karume turu gibiore holene wiaruagoni, lene.\*

*Agalime nabiagane ale bia, lenego ogo*  
(Madiu 12.38-42)

<sup>29</sup> Wali agali bu hearume Yasu ho mabu bu heagola ibugua tihondo lalu, Wali agali áyu karume ko dege bialu haabo kago agidabe. Tigua agalime nabiagane ale mbira bia lalu kago ti hendelo mbira bia nabi Yonahondo biyago dege walia henego mitangi bulene nga.\* <sup>30</sup> Ngode Datagaliwabe bi mana latagi haga Yona manane ibuni howa Nineba wali agali hearu hendelo walia ho henedagua Agali Hole Ibiyagome wali agali áyu karume manane hendelo ibuni walia hole ibu ka.\* <sup>31</sup> Daba Ki Bulene Horo harangi Siba wali agali handame haga kuini wali ibugua wali agali áyu karu baba heyuwa tihondo, Nakarulapeore birimi, lalu hongo howa lolebira. Irane wali ogonime Solomonohanda mini gigabiwi howa bi mana wále lawai hayagola hale hole ibuni dindi kaundiaore howa ibaabo hene. Anigo ina tihondo larogo áyu ogoriani kago ibu Solomonohanda henegobi ndo ibu duniniore ka.\* <sup>32</sup> Daba Ki Bulene Horo harangi Niniba wali agalime wali agali áyu karu baba heyuwa tihondo, Tí nakarulapeore birimi, lalu hongo howa lolebira. Irane ti Yonahanda Ngode Datagaliwabe bi mana lamiyago hale howa mini beregedalu ko bibahende wahai hene. Anigo ina tihondo heneneore larogo áyu ogoriani kago ibu Yona henegobi ndo ibu duniniore ka, lene.\*

*Tingininaga wá holene ogo*  
(Madiu 5.15, 6.22-23)

<sup>33</sup> Mbiralime lamu hale delowa do nahaga ndisi timbuni andanehabi nawiaga. Ani nabi wali agali maru tamuha anda ibirarume wá kago de hendelo dagiani ngelaga.\*

<sup>34</sup> Tínaga de libu tingininaga lamu ale ka. Tínaga de bayale kagola tínaga tinginiha wá haamehe holebira. Anigo tínaga de ko kagola tínaga tingini arumahe holebira.\* <sup>35</sup> Anigo tíha wá kago ereba halu aruma holigo handaramine. <sup>36</sup> Tínaga tinginiha wá holeneme tolo tagi ho kamiyagua gembone mbirahayagi aruma holene mbira nawi kamiyagua lamu wá taraore de mborerebi tíni mo wá haraligobi ho holeberami, lene.

\* 11:22: Kl 2.15 \* 11:23: Md 12.30, Mg 9.40, Lg 9.50 \* 11:24: Md 12.43 \* 11:26: Md 12.45, Yo 5.14, Hi 6.4, 2 Pi 2.20 \* 11:27: Lg 1.28, 1.42, 1.48 \* 11:28: Md 7.21, Lg 8.15, 8.21, Ya 1.25 \* 11:29: Md 16.4, Mg 8.12 \* 11:30: Yna 1.17, 2.10, 3.4 \* 11:31: 1 Kin 10.1-10, 2 Bit 9.1-12 \* 11:32: Yna 3.5 \* 11:33: Md 5.15, Mg 4.21, Lg 8.16 \* 11:34: Md 6.22

*Yasuhanda Perisi agalibi Mana lowinigo lawai hagabi hearuhondo, Kagua berami, lenego ogo*

*(Madiu 23.1-36, Maga 12.38-40)*

<sup>37</sup> Yasuhanda bi lai hayagola Perisi agali mbirame ibu andaga, Tomo nabiya íbu, layagola puwa tomo nalu berene. ✧ <sup>38</sup> Yasu ibu gi wayawaya biagane mana nabi howa tomo nalu bereago hondowa Perisi agali biagome mogo lo berene. ✧ <sup>39</sup> Ani manda bu bereago hondowa Yasuhanda ibuhondo lalu, Perisi agali kamiru tígua iba bebi beledibi tagirahayagi hangu wayawaya buwa tínaga bu habaneha bo wahaga haga bulenebi komebi tolaihe kamigoni. ✧ <sup>40</sup> Tí mini nawi lulu yu ibaga bu kamigo Ngode Datagaliwabehanda dongone daliga wabiyago wabialu howa bu habanehabi wabini ndobe. <sup>41</sup> Anigo tínaga iba behabi beledinibi ngaru yagibano karuhondo milimu. Ani bu meramigola tínaga wayawaya bulene ngaru bibahende Ngode Datagaliwabehanda deni bayale wiai holebira. ✧

<sup>42</sup> Perisi agali kamiru tígua tomo mo dende bia hagane palena ale tara tara hangarimigo pini pini Ngode Datagaliwabehondo loma bia halu muwa tigatiga bulenebi Ngode Datagaliwabehondo gubalini holenebi nahe kami. Tígua mana urunibi bialu howa maru wa nahe bibahende bimaga howa bulene nga. Ani nabirimiyagua tínaga mo ko holene timbu gibiore wulebirago dara holene nga. ✧

<sup>43</sup> Perisi agali kamiru tígua ngoai hagane andaruha agali haguane runaga biraganeni hangu birulebi magedi hamani puwa karume tínaga mini yaraga holenebi hame lo kami. Anigo tínaga mo ko holene timbu gibiore wulebirago dara ho ko. ✧ <sup>44</sup> Tí homali ngago wali agalime handa nabi howa pupe haga ngago ale kamiru tínaga mo ko holene timbu gibiore wulebirago dara holene nga, lene. ✧

<sup>45</sup> Ani layagola Mana lowinigo lawai haga mbiragome Yasuhondo lalu, Lawai haga-óna bi ogoni larigome inabi mege bere, lene.

<sup>46</sup> Ani layagola Yasuhanda la dai bialu lalu, Mana lowinigo lawai haga kamiru tíguabi ogonidagua dege bialu wali agali marunaga gendabi nayabehe ngaru yu helo, Mo ya, laramili. Ani buwa tínime gi dogo lowa gendabi ngaru ti yamogo naberamili. Anigo tínaga mo ko holene timbu gibiore wulebirago dara holene nga. ✧ <sup>47</sup> Tínaga mamali henerume Ngode Datagaliwabe mana latagi haga bo waheneru uruniorenaga homali tínime bia howa yari bia haramili. Anigo tínaga mo ko holene timbu gibiore wulebirago dara holene nga. ✧ <sup>48</sup> Ani buwa tínaga mamali henerume binigonaga, Karulape bini, larami. Mamali o biarume Ngode Datagaliwabe mana latagi haga heneru homelo benego hora henegoria tí kamirume tínaga homali anda baya gibi bia haramili. <sup>49</sup> Irane ogoninaga Ngode Datagaliwabehanda mini Gigabiwi howa lenego ogo, Ina ti karuha ínaga mana latagi hagarubi bi lamule piagarubi ibilarogola tigua maru homelo bo wahalu maru mo tandaga halu bigi bulebira, lene. <sup>50</sup> Anigo pigane wabiyangi howa Ngode Datagaliwabe mana latagi haga heneru homelo bo wahayagonaga wali agali áyu karume pani no aribia holebira. <sup>51</sup> Ogonidagua pigane Abele homelo bo wahayangi howa mani dewaore bo wahaga bialu howa Segaraia ba maro bini. Segaraia ibu Ngode Datagaliwabehanda andaha howa Anduane Homogonaga mbirale bo lomabu delaganela Loma Bia Hene Hobanela dombeneni hearia tigua Segaraia bo pe hene. Anigo tí heneneore langerogo bibahende homenerunaga pani wali agali áyu karume na holebira. ✧

<sup>52</sup> Anigo Mana lowinigo lawai haga kamiru tígua mana ogoni manda bulenaga andaha tını anda pu nabi howa marume anda pole biragola anda napelo tígua panganaga

✧ 11:37: Lg 7.36, 14.1 ✧ 11:38: Md 15.2, Mg 7.3 ✧ 11:39: Md 23.25, Mg 7.4, Ta 1.15 ✧ 11:41: Ais 58.7, Dan 4.27 ✧ 11:42: LBM 27.30, Md 23.23 ✧ 11:43: Md 23.6-7, Mg 12.38-39 ✧ 11:44: Iba 5.9, Md 23.27 ✧ 11:46: Md 23.4 ✧ 11:47: Md 23.29-31 ✧ 11:51: Pig 4.8, 2 Bit 24.20-21



duguagane gi mo do haramili. Anigo tínaga mo ko holene timbu gibiore wulebirago dara holene nga, lene.✧

<sup>53</sup> Yasu ibu ani lalu pole biyagola Mana lowinigo lawai haga biarumebi Perisi agali biarumebi ibuhondo la ade halu hongo howa mege bialubi, Irane agibe, lalubi lamialu hene. <sup>54</sup> Ani buwa tigua ibu mo hondo habehedabe hondole mo bila halu bi ko mbira au larabe hondowa minule hale ho hene.✧

## 12

### *Tombene hondo kihe karu de hondo holene ngago ogo* (Madiu 10.26-27)

<sup>1</sup> Wali agali daosini dewaore labe nahe gengeda tago buwa hēlo ya haga bu heagola Yasuhanda ibunaga talima piaga biaruhondo ala lamialu howa lalu, Perisi agalinaga mo hiwa hagane mini yidi lowa ti tombene hondo kihe karu larogo de hondo halimu.✧

<sup>2</sup> Mbirale bibahende yi ho winiru mo pana hai halu ohowa biniru manda biai helalu bulebira.✧ <sup>3</sup> Anigo arumaha howa bi larimigo bibahende wá kagoria lo yu tagira ibalu anda tamuha howa ohowa hagarerebi lalu larimigo anda dangini howa awa lowa lalu holebira, lene.

### *Ngode Datagaliwabhondo hangu gi ho holene ngago ogo* (Madiu 10.28-31)

<sup>4</sup> I nenegeru-o tihondo langerogo tingini hangu homelo бага karu mani mo koore nahabehego manda bialu ti hondowa gi nahalimu.✧ <sup>5</sup> Ina tí ogohondo gi halimu larogo Ngode Datagaliwabe hongohe kagome mbirali homelo bowa mani heli dindi bo pe holebirago ibuhondo hangu gi holene nga, lene.✧

<sup>6</sup> Ani lowa, Ega pimbi ale duria bedaru toea kirame yolo miaga ndobe. Anigo Ngode Datagaliwabehanda ega uruni ale homane mbira embeda nahaga ka hendeni. <sup>7</sup> Tínaga hagianeni mandari kamigo bibahendeore daga lai howa heleda hendeni. Anigo ega pimbi ale biru ngaru goyane lowa tí duniniore kamigo gi nahalimu.✧

### *Kerisonaga kogoni, lalu latagi holenebi Kerisohondo erembira mulenebi ogo* (Madiu 10.32-33, 12.32, 10.19-20)

<sup>8</sup> Ina tihondo heneneore larogo. Mbiralime wali agali bu karunaga wanakuini howa inaga mini lalu, I Kerisonaga kogoni, lalu la tagi hayagua Agali Hole Ibiyagome nde Ngode Datagaliwabehanda dahuliyali bu karunaga wanakuini howa o biagonaga mini lalu lolebira.✧ <sup>9</sup> Anigo mbiralime wali agali bu karunaga wanakuini howa i mini nale erembira ngiyagua Agali Hole Ibiyagome nde Ngode Datagaliwabehanda dahuliyali bu karunaga wanakuini howa o biagonaga mini nale erembira mulebira.✧

<sup>10</sup> Anigo mbiralime Agali Hole Ibiyago mege biyagua ko ogoni biyago Ngode Datagaliwabehanda domo wahabehe ka. Mbiralime, Ngode Datagaliwabe Dinini ibugua ko biaga, lalu mege biyagua ko ogoni biyago Ngode Datagaliwabehanda domo wa naholebiraore.✧

<sup>11</sup> Anigo tigua tí ngoai hagane andaruhabi gabumane hondo haga karuhabi haru haga maru karuhabi godi lole haru poragola gi halu toba toba howa tını, Bi agua la dai buabe be bi agi lalu holedabe, lowa mini dege dindi ho nahalimu.✧ <sup>12</sup> Ogoningi Ngode Datagaliwabe Dinini ibugua tınaga miniha mo manda bia holebirago ogoni lalu halimu, lene.

### *Bi yobage lowa homogo mbira mini nawi lalu ale henego te lenego ogo*

✧ 11:52: Md 23.13 ✧ 11:54: Lg 20.20 ✧ 12:1: Md 16.6, 16.12, Mg 8.15 ✧ 12:2: Md 10.26, Mg 4.22, Lg 8.17  
✧ 12:4: Ais 51.7, Yar 1.8, Md 10.28, Yo 15.14-15 ✧ 12:5: Hi 10.35 ✧ 12:7: Lg 12.24, 21.18, Ab 27.34 ✧ 12:8:  
Lg 15.10 ✧ 12:9: Mg 8.38, Lg 9.26, 2 Ti 2.12, 1 Yo 2.23 ✧ 12:10: Md 12.31-32, Mg 3.28-29, 1 Yo 5.16 ✧ 12:11:  
Md 10.19-20, Mg 13.11, Lg 21.14-15

<sup>13</sup> Agali mbira wali agali biru wiago dombenaha biruwa Yasuhondo lalu, Lawai haga-o i hamene iya abahanda paluni ngiyago talebu ki holobaya i hamene lamia, lene.

<sup>14</sup> Ani layagola Yasuhanda ibuhondo la dai bialu lalu, I nenege-o libu mo daba ki bule helolenebi libunaga mbirale uruni mo tale bia holenebi i aiwa helenebe, lene. <sup>15</sup> Ani lowa ibugua bibahende bu hearuhondo bi la ho wiaabo halu lalu, Tíni de hondo howa mbirale bibahende wu kago nale timbuni dege wua howa dimagoli holigo mamage holene nga. Irane ibu homogoore gibi kayaguabi ibuninaga holene heneneore ibunaga mbirale bu ngaruha ndo nga.✧

<sup>16</sup> Ani lowa Yasuhanda bi yobage ogo tihondo lamini. Agali homogo mbirame ibunaga mabuni tomo dewaore bayale wu hene. <sup>17</sup> Ani wu howa ibuni hangu lo manda bialu howa lalu, Inaga tomo bu ngogoni mbiraha wulene henge nawi kogoni. Ai agigo bule harudabe, lowa, <sup>18</sup> Ina ogodagua bulebero. Ininaga anda bidoru gialowa lone maru timbuniore buwa inaga ladi ale mini widi hingedogobi inaga mbirale marubi anda uruniha bu paya anda holebero, lene. <sup>19</sup> Ani bu howa ibunime lalu, Ogoni birugome ai i awadaga hondo kogoni. Ina mbirale bayale mali dewaore howa buru pale holeberago ale áyu wu hai kogoni. Ani buwa bame habane nabulene howa iba nalu tomo nalubi horo mohole bialu baya awadaga kogoni, ibuni lo manda bini.✧ <sup>20</sup> Ibuni ani lo manda bu heagola Ngode Datagaliwabehanda ibuhondo lalu, I mini nawi✧ lulu ale yu kegoni. Áyu mbiraga inaga holene ereba holebirago ini hangu mitangi bialu inaga mbirale bibahende bu wu keruni aiwa yu holebirabe, lene.

<sup>21</sup> Yasuhanda lamaro bialu lalu, Wali agali tini dindini homogo holenenaga mbirale mo mogo bu wu howa Ngode Datagaliwabe kagohayagi homogo nahe ti ogonibi kagoni, lene.✧

*Ngode Datagaliwabehondo mini mbiraore wu holene ogo  
(Madiu 6.25-34)*

<sup>22</sup> Ani lowa Yasuhanda ibunaga talima piaga biaruhondo lalu, Ina tí langerogo tígua tomo nalu holenenagabi tí tinginini aga bu holenenagabi buru padamigo agua buledabe lowa mini dege dindi ho nahalimu. <sup>23</sup> Tomo bagi hene lowa wali agali holene duniniore ndobe. Agabi bagi hene lowa tingini dunini wigi bidago ndobe. <sup>24</sup> Tí ega bedaru de handaramine. Ti tomo egene nahangaga ladi ale mini widi kago gandu lowa do hagane andahabi nawiagago ti nelo Ngode Datagaliwabehanda miaga ka. Ega uruni emene niraore lowa wali agali tí dunini kamigo ndobe.✧ <sup>25</sup> Tí kamigoni mbiralime dindini holenenaga mini dege dindi ho hayagua dindini haabo habehedabe. <sup>26</sup> Tí emene ngaru hondo habe nahe kamiyagua mbirale marunaga mini dege dindi ho abule kamibe. <sup>27</sup> Balawaya minana anda howa lini dedago agua anda halu haradabe mitangi bidaba. Tigua tini biabe nabiaga tininaga yári bule lowa agabi nawabiaga ka. Anigo ina tí langerogo Kini Solomono ibunaga mbirale dewa wu howa henego balawayanaga yári baya gibi bidagobi ndo ibugua aga emene nira hangu bu haga hene.✧ <sup>28</sup> Ngode Datagaliwabehanda datani minana anda halu karuni mo yári bia haga ka. Datani uruni áyu kago yawi haragola irani delolebira. Ngode Datagaliwabe ibugua o biaru mo yári bia hagadagua tí kamirubi aga bilimulo ngulebira ndobe. Tígua mini mbiraore emene wu kamigo agi bulenego wu kamibe.

<sup>29</sup> Anigo tí iba hinabi agi nalu holedabe lowa mini dege dindi ho nahalimu. <sup>30</sup> Wali agali Ngode Datagaliwabe mitangi nabiaga dindi tara tarani karume dindini holene hangu mo tene halu mbirale uruninaga mini dege dindi ho haabo haga ka. Tí ogonibi holene nawi irane tí Abahanda mbirale uru ale buru pale kamilo manda bu ka. <sup>31</sup> Anigo

✧ 12:15: 1 Ti 6.7-10 ✧ 12:19: Aga 11.9, 1 Ko 15.32, Ya 5.5 ✧ 12:20: Iba 39.6, 52.7, Yar 17.11, Ya 4.14 ✧ 12:21: Md 6.19-20, 1 Ti 6.18-19, Ya 2.5 ✧ 12:24: Yob 38.41, Iba 147.9, Lg 12.7 ✧ 12:27: 1 Kin 10.4-8, 2 Bit 9.3-6

ibugua Handame Ho Kagonaga tígua mitangi howa biabe beramigola ibugua mbirale uruni ngaru tihondo ngiai holebira.✧

*Dahuliya andagani homogo holenenaga mo do holene ngago ogo*  
(Madiu 6.19-21)

<sup>32</sup> I aria emene tí kamiru Abahanda turu howa Ngode Datagaliwabehanda Handame Ho Kagonaga tihondo ngulebirago gi nahalimu.✧ <sup>33</sup> Tí naga mbirale ngamiru yolo miai howa muni ngiragola wali agali yagibano karuhondo milimu. Ani buwa muni pauyi goba nahaga manda manda bialu dahuliya andagani ereba nahaga ngagoha mbirale homogo holenenaga mo do halimu. Ogoriani pagealime mo kayu bule anda pobe nahego wiaabo hagabi bombome nalu mo ko nahagabi nga.✧ <sup>34</sup> Mbirale homogo holenenaga mo do ho ngagoria tígua gubalini íbu haabo holebira.

*Biabe bia hagane bayuwa hondo holene ngago ogo*

<sup>35</sup> Agi birabe hondole manda manda bu howa lamu hale dela ho yalu dongoneni aga karulai ho howa bulene ngago bule halimu.✧ <sup>36</sup> Biabe bia haga agalime tinaga anduane íbu agali mbirame wali dabu biyagonaga tomo nalu howa dai birabe hondole manda manda bu hagadagua holene nga. Tí anduane o biagome íbalu, Panga duguadaba, laragola íbu anda íbilo tigua panga abale dugulebira.✧ <sup>37</sup> Biabe bia haga biarume palia hondo nahe dengala ho howa tinaga anduane íbilo manda manda bu karia íbiragola hondowa tí turu timbuniore holebira. Ina tí langerogo ibugua íbunaga dagare tingiliya ale golo ngelowa lalu, Tí tomo nalimulo manda manda bu nguliya biradaba, lolebira.✧ <sup>38</sup> Ibugua mbiraga mbi hanuni ibiyaguabi o mani howa ibiyaguabi tí manda manda dege bu karia ibiyagua nde tí turu timbuniore holebira. <sup>39</sup> Ani buwa galone mbira tí manda biaabo halimulo laro. Anda anduaneme pageali ogoningiore íbulebiraló manda bidale pagealime íbu andaga duanialu anda íbilo henge namidale.✧✧ <sup>40</sup> Ani buwa tígua Agali Hole Ibiyago ogongi íbulebiraló tí manda nabi kamiria íbu pe holigo horo bibahendengi manda manda bu haabo holeneore nga, lene.✧

*Biabe bia haga mini bilinahe bilina nahela ogo*  
(Madiu 24.45-51)

<sup>41</sup> Ani layagola Pidahanda lalu, Anduane Homogo-o yobage laregoni inahondo hangu larebe be maru bibahendehondo larebe, lene.

<sup>42</sup> Ani layagola Anduane Homogohanda ladai bialu lalu, Anidago biabe bia haga mini bilinahebi mini gigabiwibi haruago aibe. Íbunaga anduane biagome biabe bia haga biago ibugua anda baya hangu hondo helobi biabe bia haga maru baba tomo tale bulene ngangí tale bilobi helayago ogoni íbu haruagoni. <sup>43</sup> Anduane biago íbu andaga dai biragola íbunaga biabe bia haga biagome biabe ogonidagua bialu karia ibiyagua nde biabe bia haga biagome turu timbuniore holebira. <sup>44</sup> Aniore bulebiragonaga ina tí langerogoni anduane ogonime íbunaga biabe bia haga biagohondo, Inaga mbirale bibahende ngoru ina hondo habe, lolebira.✧ <sup>45</sup> Anigo biabe bia haga biagome íbuni lo manda bialu lalu, I anduane emene lu howa dai bulebirago, lowa íbu biabe bia haga wali agali maru karu baba bo wahaga haga bialu howabi tomo na gimbu bialubi lulu íba ngaru nagimbu bialu howa lulu yu hayaguabi <sup>46</sup> íbunaga anduane íbilo manda manda nabi howa íbu angí íbirabe manda nabi karia íbunaga anduane biago íbu pe holebira. Ani íbuwa anduane biagome biabe bia haga biago mo ko howa balu maru bí mo wahaga biarubi pani mbiraore dege mulebira.

<sup>47</sup> Biabe bia haga mbirame íbu anduaneme, Ogo ale bibe, laya lo manda buwa bia layadagua bule manda manda nabi hayagua íbu anduaneme íbu tibume hongo

✧ 12:31: Md 6.33 ✧ 12:32: Md 25.34, Lg 22.29, Mo 1.6 ✧ 12:33: Md 19.21, Lg 18.22, Ab 2.45, 4.34 ✧ 12:35: Har 12.11, Md 25.1-13, Eb 6.14, 1 Pi 1.13 ✧ 12:36: Mg 13.34-36, 1 Pi 1.13 ✧ 12:37: Yo 13.4 ✧ 12:39: 1 Te 5.2, 2 Pi 3.10 ✧ 12:39: Md 24.43-44 ✧ 12:40: Mg 13.33, 1 Te 5.6, 2 Pi 3.12 ✧ 12:44: Md 25.21-23

timbuniore howa bo mbera ho waholebira.✧ <sup>48</sup> Anigo biabe bia haga mbirame ibu anduaneme, Bibe, layago manda nabi howa tibume bolene irane wilonaga bialu hayagua ibu anduaneme emene hangu bolebira. Anigo marume dewa yu hayagua ya dai dewa dege bulene nga. Marume dewaore mo tago howa yu hayagua nde dewaore mo tago howa ya dai bulene nga.✧

*Yasuhanda wali agali mo tu wia hole ibinigo ogo*  
(Madiu 10.34-36)

<sup>49</sup> Ina dindi wiame kago heda hole ibirugo nde abaleore hungu bilo hame ledó. <sup>50</sup> I homolenenaga baboraya yu holeberogo tu wilo tagi ogoninaga genda yu kogoni.✧ <sup>51</sup> Dindi bibahendeni mo palia holene wule yalu íbu ka manda bu kamibe. Ina mo palia holene yalu ndo mo tu wia holene yalu ibiyada manda bilimu.✧ <sup>52</sup> Anidago áyu ogoni howa áya igini hameiginima duria howa tale bialu tebira mendeyagi kira mendeyagi lowa hoba migimigi bu haga haga buwa tebira biarume kira biago labohondo hoba migimigi bu halu kira biago labome tebira biaruhondo hoba migimigi bu haga haga bu holebira. <sup>53</sup> Ani buwa igiri abame ti igini baba hoba migimigi bialu igirime ti aba baba hoba migimigi bu holebira. Ani buwa wandari áyame ti wane baba hoba migimigi bialu wandarime ti áya baba hoba migimigi bu birulebira. Ani buwa igiri áyame igiri one baba hoba migimigi bialu igiri oneme igiri áya baba hoba migimigi bu birulebira, lalu Yasuhanda lene.✧

*Aguaore bulebiralo manda bu holene ngago ogo*  
(Madiu 16.2-3)

<sup>54</sup> Ani lowa Yasuhanda wali agali bu hearuhondo lone lalu, Ni paliragohayagi howa hari beraliba ibirago hondowa daluore ibulubada áyu dege lo kamigola dalu henene ibaga. <sup>55</sup> Ani buwa ni tagira ibiragohayagi howa puyabu ibirago hondowa aiore gaea bulubadalo manda bu kamigola gaeore biaga. <sup>56</sup> Tí tombene hondo kihe kamigoni. Tígua harinibi dindinibi dalubi nibi aguaore biralo handaramiligo hondowa áyu kamigonagaore birago irane ogo ale biralo manda nabi kamigo agibe, lene.

*Íla waitigi kago mo dambola holene ngago ogo*  
(Madiu 5.25-26)

<sup>57</sup> Tí tínime bayale tigabi ngagoore bulenaga daba nabi kamigo agibe. <sup>58</sup> Mbiralime í heba godi lolenaga, íla godi labiya mba, lalu haru pole biyagua ína harigani pialu godi lagane andaha anda nape howa ibu mo te la halu abale mo tiga bulene manda bibe. Ani nabiriyagua ibugua í godi dabaga agali karia hongo howa haru poragola godi dabaga biagome í dandayi agalihondo minu miragola dandayi biarume í garabaya andaha helolebira.✧ <sup>59</sup> Ani biragola ína ko birigonaga yolo miaiore habelo garabaya andaha helaabo holebirago ína langero, lene.

## 13

*Ko birimigonaga homoligo mini beregedolene ngago ogo*

<sup>1</sup> Horo ogoningsi dege agali marume Yasuhondo Pailatehanda Galiliali maru Ngode Datagaliwabehondo mbirale bo delalu hearia homelo bayagonaga te lamini. <sup>2</sup> Lamiyagola Yasuhanda ladai bialu lalu, Galiliali biaru ogonidagua bayagoni irane Galiliali marume ko biyago goyane lowa tigua ko gibiore biyagonaga bayago manda birimibe.✧ <sup>3</sup> Ani ndogo ína tí langerogo tigua ko birimigo wahalu mini beregeda nabirimiyagua ti homayadagua tí bibahendebi homai holeberami.✧ <sup>4</sup> Wali agali pira mbirani halira (18) Sailoamani anda daligaore podope howa bayagola homai hayaru

✧ **12:47:** Man 25.2, Ab 17.30, Ya 4.17 ✧ **12:48:** LBM 5.17, 1 Ti 1.13 ✧ **12:50:** Md 20.22, 26.38, Mg 10.38-39, Yo 12.27 ✧ **12:51:** Md 10.34 ✧ **12:53:** Mai 7.6 ✧ **12:58:** Min 25.8, Md 5.25 ✧ **13:2:** Yo 9.2-3 ✧ **13:3:** Iba 7.12

agua bulebirabe. Tigua ogoni biyadagoni Yarusalemeni heneru goyane lowa wali agali urunime koore henegonaga bayago manda birimibe. <sup>5</sup> Ani ndogo ina tí langerogo tigua ko birimigo wahalu mini beregeda nabirimiyagua ti homayadagua tí bibahendebe homai holeberami, lene.

*Bi yobage lowa pogeme lini nadaga te lenego ogo*

<sup>6</sup> Ani lowa Yasuhanda bi yobage ogo wali agali biru wiaruhondo lamialu lalu, Agali mbirame ibu mabuni poge mbira anda ho hene. Ani buwa ibugua lini dedabe hondo pialu hearia mbira nadeore hearia hendene. <sup>7</sup> Ani biyagola ibunaga mabu biabe bia hagahondo lalu, De handa. Ina mali tebira poge ogonime lini mbira dedabe hondo ibaabo harugo mbira dearia i nahendeore. Galone nabulene howa dindi bene bedago no biba harago dibu waholene nga, lene. <sup>8</sup> Ani layagola mabu biabe bia haga biagome ladai bialu lalu, Anduane-o diba nabi mali mbiraore hangu ani helabe. Ina teneha dindi godo mabu buwa nogo bulumaga time dugu homa buliya. <sup>9</sup> Ani berogola poge ogoninaga lini darabe hondole nadagayagua dibupe habehe holebere, laya, lalu lene.

*Yasuhanda Sabada horongi wali mbira mo dabi henego ogo*

<sup>10</sup> Sabada horo mbirungi Yasu ibu ngoai hagane andahabi mana lawai halu hene. <sup>11</sup> Wali mbira damame warago mo ba hayagola mali pira mbirani halira (18) ibunaga tingini tigatiga habe naheore pola ki bu yu ibaga bu berenego ibu ogoniha berene. <sup>12</sup> Yasuhanda wali biago hondowa ola amu howa lalu, Wali-o warago balu bedegoni dabi habelo, lowa <sup>13</sup> ibunaga gi wali biagonaga erekunini ela hayagola abaleore dabi howa wali biagome ibuni tigatiga ho howa Ngode Datagaliwabenaga mini mo yaraga hene. <sup>14</sup> Ani biyagola ngoai hagane anda hondo haga heagome, Yasuhanda wali biago Sabada horongi mo dabi hayago, lalu lembo howa wali agali biru wiaruhondo lalu, Horo waragaru wiyagoriani howa biabe bialu horo uruninaga howa warago bo ngaru mo dabi helo ibulene nga Sabada horongi ndo, lene. <sup>15</sup> Ani layagola Yasuhanda ibuhondo ladai bialu lalu, Anidago tí tombene hondo kihe kamiru tí mbiralime Sabada horongi nogo bulumaga andaha puwa nogo bulumagabi nogo dongibi iba nelo haru piaga ka. <sup>16</sup> Anigo Abarahamanaga aguanene wali o bedago dama Heyolabeme mali pira mbirani haliraore (18) erene mo pola ki hayagola biraabo henego ina Sabada horongi hadape holene ngagoni ndobe, lene. <sup>17</sup> Ani ladai biyagome ibu baba waitigi ho hayaru taga timbuni hayagola wali agali maru hearume Yasuhanda agalime nabiaga ale bibahende biyago hondowa turu timbuni ho hene.

*Bi yobage lowa ira masada egenenaga te lenego ogo*

*(Madiu 13.31-32, Maga 4.30-32)*

<sup>18</sup> Yasuhanda tihondo lalu, Ngode Datagaliwabehanda Handame Ho Kagoria agi ale ngabe. Ina ogo ale lole agi ale lalu manda buabe. <sup>19</sup> Ogo ale lalu agali mbirame ira masada egene mbira mo yalu puwa ibu mabuni hengene. Ani birago egene biago doai lalu ira anda ho kagola ega bedarume ira ogoni maganeni tinaga anda biaga. Ogoni ale Ngode Datagaliwabe Handame Ho Kagoria ngagoni, lene.

*Bi yobage lowa mo hiwa hagane mini yidi te lenego ogo*

*(Madiu 13.33)*

<sup>20</sup> Yasuhanda lone lalu, Ngode Datagaliwabehanda Handame Ho Kagoria ina agi ale lalu manda bu hondoabe. <sup>21</sup> Ogo ale lalu walime balawa timbuni beha odape howa mo hiwa hagane mini yidi mo bimaga haragola balawa hiwa hai hagago ogoni aleore nga, lene.

☆ 13:6: Ais 5.2, Md 21.19 ☆ 13:7: Lg 3.9 ☆ 13:8: 2 Pi 3.9, 3.15 ☆ 13:13: Mg 16.18, Ab 9.17 ☆ 13:14: Har 20.9-10, Man 5.13-14, Md 12.10, Mg 3.2, Lg 6.7, Yo 5.16 ☆ 13:15: Lg 14.5 ☆ 13:16: Lg 19.9



*Panga haraba dorogone ngago ogo  
(Madiu 7.13-14,21-23)*

<sup>22</sup> Ani lowa Yasu dindi wiaruhabi tano wiaruhabi wali agali bu hearuhondo bi mana lawai haga bima Yarusaleme pole pene. <sup>23</sup> Mbiralime Yasuhondo lalu, Anduane-o wali agali mbira mbira hangu pele mule beda agini, lene.

Ani layagola Yasuhanda wali agali hearuhondo ladai bialu lalu, <sup>24</sup> Anda polene panga haraba dorogone ngago ogoniha anda pialu pole tí hongo holene nga. Irane wali agali dewaoreme anda pialu pole lowa haruru biaabo haragola anda pobe naheoredane hondolebira. ✧ <sup>25</sup> Ani biragola anda anduane biagome heyuwa panga paya pai holebira. Ani biragola tígua haneni howa pangani ngilao ngilao balu howa lalu, Anduane-o ina anda ibulumaya panga dugua ha, laramigola ibugua tíhondo ladai bialu lalu, Ina tí manda nabidogo tí ani howa ibirimibe, lolebira. ✧ <sup>26</sup> Ani laragola tígua howa lalu, Ina í heba iba nalubi hina nalubi haramali. Ani buwa inanaga tanoni howa ina mana lawai hari, loleberami. <sup>27</sup> Ani laramigola ibugua halu mende lalu, Tí ani howa ibirimibe í toba ko, lolebira. Wali agali mana ko hanguore mo tene haga kamiruni tí bibahende í denguini nahe puabo hadaba, lolebira. ✧ <sup>28</sup> Ani laragola tígua tagirani howa Abarahamabi Aisagabi Yagababi Ngode Datagaliwabe mana latagi haga bibahende biarubi Ngode Datagaliwabehanda Handame Ho Kagoria kagola hondowa dugu tara bialu ne gingirulo hayaga bialu holebira. ✧ ✧ <sup>29</sup> Wali agali dewaore ni ibiragohayagi howabi ni paliragohayagi howabi uyurahayagi howabi unurahayagi howabi ibu ngoai howa Ngode Datagaliwabehanda Handame Ho Kagoria tomo nole birulebira. ✧ <sup>30</sup> Ani buwa wali agali áyu maha karu mo bamba halu áyu bamba ho karu mo maha holebira, lene. ✧

*Yasu ibu Yarusalemeni hearu gubalini ho henego ogo  
(Madiu 23.37-39)*

<sup>31</sup> Ani lalu heaore Perisi agali marume Yasu hearia ibuwa lalu, Herodohanda í bo wahole manda bialu kago í ogoria nahe mbiraha poleneore nga, lene.

<sup>32</sup> Ani layagola Yasuhanda tíhondo ladai bialu lalu, Ina dama daraga karu wara tagi halubi warago bo ngaru mo dabi haga bialubi áyu yawiru bialu howa luma inaga biabe ogoni biai holeberogo tígua biango dudu haruagoni biago lamule pudaba. <sup>33</sup> Anigo áyu yawi lumaru í harigani pialu holeberogo ogoni Ngode Datagaliwabe mana latagi haga karu mbirani howa bolene nawi Yarusalemeni dege bolene nga.

<sup>34</sup> Yarusalemeni kamiru-o Yarusalemeni kamiru-o tígua Ngode Datagaliwabe mana latagi haga heneru homelo balubi Ngode Datagaliwabehanda mana lamule ibiyagola toleme homelo balubi kami. Ega gogologo angibunime ibu igini ibuni tombeha mo mogo bu ngelai howa babaganeme dungu dambi hagadagua ina inaga gime wali agali bu kamiruni tí mo mogo buwa tali wu mabu bua haabo harugola tígua, Ina ani bia, nale harimi. ✧ <sup>35</sup> Anigo Ngode Datagaliwabehanda anda tíninaga laramiligo tabuanda helo wahalu polebira. Ina tíhondo henene larogo tu áyu howa be lirahayagiore mbira tígua í lone nahende haabo howa, Mbiralí Anduane Homogonaga minini howa ibirago Ngode Datagaliwabehanda ibu mo turu helo, laramingi í de hondoleberami, lene. ✧

## 14

*Yasuhanda agali mbira warago bo wiago mo dabi henego ogo*

<sup>1</sup> Sabada horo mbirungi Yasu ibu Perisi agali mini lene mbiranaga andaga tomo nole piyagola wali agali bu hearume Yasu handaya ho hene. ✧ <sup>2</sup> Agali mbira gibi gebi tohe

✧ **13:24:** Md 7.13, Yo 7.34, Lm 9.31, Pb 3.12 ✧ **13:25:** Iba 32.6, Ais 55.6, Md 7.23, 25.10-12, Lg 6.46 ✧ **13:27:** Iba 6.8, Md 7.23, 25.41 ✧ **13:28:** Md 13.42, 22.13, 24.51, 25.30 ✧ **13:28:** Md 8.11-12 ✧ **13:29:** Iba 107.3, Lg 14.15 ✧ **13:30:** Md 19.30, 20.16, Mg 10.31 ✧ **13:34:** Md 23.37 ✧ **13:35:** Iba 118.26, Ais 1.7, Yar 22.5, Mai 3.12, Md 21.9, Mg 11.9-10, Yo 12.13 ✧ **14:1:** Lg 11.37

henego ibuwa Yasu heagoria hayagola <sup>3</sup> Yasuhanda Mana lowinigo lawai hagabi Perisi agalibi hearuhondo lalu, Inanaga Mana lowinigo ngagome Sabada horongi mo dabi holene nga lagabe be nalagabe, lene.\*

<sup>4</sup> Ani layagola tigua bi mbira ladai nabioire hene. Ladai nabiyagola Yasuhanda agali biago yamuwa mo dabi howa, Ai í andaga pamia, lene. <sup>5</sup> Ani buwa Yasuhanda tihondo lalu, Tí kamiruni mbiraligonaga iginibi nogo bulumagabi Sabada horongi iba uliha pilayagua ogoningi abale duguleberamibe be naduguleberamibe, lene.\*

<sup>6</sup> Ani layagola tigua ladai bibe nahe hene.\*

*Mo dindiha holenebi wali agali biamogo bulenebi ngago ogo*

<sup>7</sup> Yasuhanda handalu hearia agali maru tomo nole tamuha anda ibiyarume dagia bayale wiagoria hangu birule dabayagola hondowa ibugua bi yobage ogo ti bibahen-dehondo lamini.\* <sup>8</sup> Lamialu howa lalu, Mbirame wali dabu bialu howa tomo namiya ibabe laragola puwa dagia bayale ngagoria habu lowa daligani birule manda nabibe. Tomo dawa wiaga biagome í dindiha lowa agali mende, Ibabe, laganego\* <sup>9</sup> agali ibabe laga biagome í bedegoria ibuwa, Dagia ogoriani ibu berela, lolebira. Ani laragola taga emene ndoore howa dindiha birape holebere. <sup>10</sup> Ibabe, laragola puwa dindini birabe. Ani birariyagua í ibabe laga biagome í bederia ibuwa, I hamene-o daligani iragaho bira, lolebira. Ani lalu maru íbu bedaruni heba howa bi ogoni laragome í mini yaraga holebira. <sup>11</sup> Mbiralime ibuni mo yaraga hayagua ibu mo dindiha ho helolebira. Mbiralime ibuni mo dindiha hayagua ibu mo yaraga ho helolebira, lene.\*

<sup>12</sup> Ani lowa Yasuhanda ibu tomo namiya ibabe laga biagohondo lalu, Ína horombe alendobi tomo nole howa í nenegebi hamenebi damenebi íla homogo handa ai nai padagobi urunibigo, Tomo namiya ibidaba, nalabe. Tigua nde mani í dano hangalu, Tomo nabiya íbu, lolebira. Ani laragome ína birigonaga yolo buwa haragoni. <sup>13</sup> Ína tomo mbira dawariyagua yagibano karubi kuduguhe karubi ge kohe karubi de kohe karubi, Namiya ibidaba, labe.\* <sup>14</sup> Ani lariyagua urunibime dano hangabe nahego, Namiya ibidaba, larigo í mo turu holene yulebere. Wali agali mini tigabiwi howa homayaru heyulene horo harangi Ngode Datagaliwabehanda ínaga yadai bulebira, lene.\*

*Bi yobage lowa tomo timbuniore dawa wini lenego ogo  
(Madiu 22.1-10)*

<sup>15</sup> Agali mbira tomo wiaga dagia wiagoria bira para heagome ogoni hale howa Yasuhondo lalu, Ngode Datagaliwabehanda Handame Ho Kagoria tomo nole birule birarume turu timbuniore holebira, lene.\*

<sup>16</sup> Ani layagola Yasuhanda ibuhondo ladai bialu lalu, Agali mbirame tomo timbuniore dawale manda buwa ibugua wali agali dewaore, Namiya ibalimu, lene. <sup>17</sup> Agali biagome tomo biagoni dawawa nolene tu hayagola ibunaga biabe bia haga heagohondo lalu, Wali agali ibalimu laruru tomo dawa ngago nole ibilo lamule pu, lene.\* <sup>18</sup> Ani lamiyagola tigua manila alala bialu lalu, I ogodagua bulebero i ogodagua bule ko, laga bini. Agali mbiragome lalu, I dindi mbira yolo birugo handa kia bu porogo naibagua larogioniore hale halu manda bibe, lene. <sup>19</sup> Agali mendegome lalu, Biabe bulenaga nogo bulumaga pira (10) áyu dege yolo birugo mandabu hondole porogo naibagua o larogioniore hale halu manda bibe, lene. <sup>20</sup> Tebonegome lalu, I wali áyu dege dabu birugo irane ogoninaga naibabehe ko, lene.\*

<sup>21</sup> Ani layagola biabe bia haga biagome dai buwa o layaruni ibu anduane biago lamule pene. Ani lamiyagola tomo dawa wiaga anduane biago lembo howa ibunaga biabe bia haga biagohondo lalu, Tanoha hariga emene pedagohabi timbuni pedagohabi abale

\* 14:3: Md 12.10, Lg 6.9    \* 14:5: Har 23.5, Man 22.4, Md 12.11, Lg 13.15    \* 14:6: Md 22.46    \* 14:7: Md 23.6  
\* 14:8: Min 25.6-7    \* 14:11: Min 29.23, Md 23.12, Lg 18.14, Ya 4.6, 1 Pi 5.5    \* 14:13: Man 14.29, Neh 8.10-12  
\* 14:14: Yo 5.29    \* 14:15: Lg 13.29, Mo 19.9    \* 14:17: Min 9.2, 9.5    \* 14:20: 1 Ko 7.33

puwa yagibano karubi kuduguhe karubi de kohe karubi ge kohe karubi haru dai bule pu, lene. <sup>22</sup> Ani layagola howa biabe bia haga biagome abale pialu dai buwa lalu, Anduane-o ina laridagua biai harugo birulene henge wia dege bida, lene. <sup>23</sup> Ani layagola tomo anduane biagome ibunaga biabe bia haga biagohondo lalu, Tamu henge ngago tolai helo hameore ledogo ina hariga pedadagua puwa tinaga mabu andaga karuha puwa haru ibai hole pu. <sup>24</sup> Ina ti bibahende langerogo wali agali uruni, Tomo namiya ibidaba, laruru ti bibahendeme naneore holebira laro, laya, lalu Yasuhanda bi yobage ogoni lene.✧

*Yasunaga talima piaga hole bulene ngago ogo*  
(Madiu 10.37-38)

<sup>25</sup> Horo mbirungi wali agali dewaoreme Yasu piyadagua mama ibalu hearia ibugua beregedowa tihondo lalu, <sup>26</sup> Mbirali i kogoria ibua kago inaga talima ibagane hole ibu abahondo gubalini howa ibu aiyahondobi ibu onehondobi ibu waneiginihondobi ibu hamenehondobi ibu mbalinihondobi ani bialu ibunihondobi gubalini hayago goyane lowa i ala gubalini nahayagua inaga talima ibagane habe nahe holebira.✧ <sup>27</sup> Ani buwa ibuninaga ira banga nayi howa i porodagua ibirago ibu inaga talima ibagane habe nahe holebira.✧

<sup>28</sup> Ti kamigoha mbiralime anda daligaore bima iraga hole mandabu kayagua anda daliga ogoni bumaro bulene muni karulape ngabe hondole ibugua ala biruwa muni agirame bulene karula polobadabe handalu ala manda manda biaga. <sup>29</sup> Ani nabiyagua anda gene wawa anda daliga biago biai habe nahe holebira. Ani biai nahe biala ho ngago handararume ibu hondo oba holebira. <sup>30</sup> Oba halu tigua lalu, Agali ogome anda bule biyago biai habe naheyane wahayada, lolebira.

<sup>31</sup> Kini mbirame agali daosini pira (10,000) haru halu kini mendeme agali daosini pira kira (20,000) haru halu ibirago baba wai bulenaga hongo karula polobadabe nakarula polobadabe manda bulebira. <sup>32</sup> Mandabu hondowa nakarula pobehe manda biyagua wene amura ibalu kaore agali marume wai mo palia hole pelo, Bi lama pudaba, laga, lene. <sup>33</sup> Yasuhanda lamaro bialu lalu, Ogonidagua ti mbiralime inaga talima ibagane hole ibuninaga mbirale ngaru bibahende wahai nahayagua inaga talima ibagane habe nahe holebira, lene.✧

*Ibiha dende irane napaliagago ogo*  
(Madiu 5.13, Maga 9.50)

<sup>34</sup> Ibi bayale nga. Ibi ibuninaga dende ereba hayagua lone mo dende bia habe nahe nga.✧ <sup>35</sup> Ibi ogonibigo dindi himu ngagohabi nogo bulumaga ti hilu mogo bu ngagohabi nawiagago waholene nga. Ti hale kamiyagua nde hale halimu, lene.

## 15

*Bi yobage lowa nogo sibi mbira pu ereba hene lenego ogo*  
(Madiu 18.12-14)

<sup>1</sup> Horo mbirungi dagisi muni miagarubi ko biaga marubi Yasuhanda bi layago hale hole ibiyagola✧ <sup>2</sup> Perisi agalibi Mana lowinigo lawai hagabi hearume bi gimigomo lalu, Agali ogome mana ko ngubi biaga karuhondo, Hamiya, lagabi ti heba tomo nalu biragabi ka, lene.✧ <sup>3</sup> Ani layagola Yasuhanda ti bi yobage ogo lamini.

<sup>4</sup> Ti mbirame nogo sibi handari mbira (100) hinuwa mbirago pu ereba hayagua ibu agi bulebirabe. Ibugua pira dirani dira (99) tani nalu helalu pu ereba hayago tai bima ibaga bialu handa walia haga.✧ <sup>5</sup> Handa walia howa ibu turu tara haga. Ani buwa

✧ 14:24: Md 21.43, 22.8, Ab 13.46 ✧ 14:26: Man 33.9, Md 10.37, Lg 18.29, Yo 12.25, Mo 12.11 ✧ 14:27: Md 10.38, 16.24, Mg 8.34, Lg 9.23, 2 Ti 3.12 ✧ 14:33: Pb 3.7-8 ✧ 14:34: Md 5.12, Mg 9.50 ✧ 15:1: Lg 5.29-30 ✧ 15:2: Ab 11.3, Ga 2.12 ✧ 15:4: Ese 34.11, 34.16, Md 18.12, Lg 19.10

ibuni payani yalu <sup>6</sup> andaga dai biaga. Dai buwa ibu nenegerubi ibula handa ai nai padarubi mandagi olo ngoai howa lalu, Inaga nogo sibi mbira pu ereba hayago handa walia harugo ai turu taraore ho kogo ina haru turu ho hama, lolebira. <sup>7</sup> Ogonidagua dege bulebiragonaga ina tí langerogo wali agali pira dirani dira (99) bayale howa mini beregedolene nawi karunaga ndo mbira koore biaga henego mini beregedalu dai biyagonaga dahuliya andagani turu taraore holene wulebira, lene. <sup>\*</sup>

*Bi yobage lowa muni ereba hene te lenego ogo*

<sup>8</sup> Ani lowa Yasuhanda lalu, Wali mbirame muni kuni pira winiru pinigo ereba hayagua ibugua agi bulebirabe. Ibugua lamu hale hedo yuwa tai bialu handa waliaore hole lowa durumbu hilo ba tagi howa baya hangu tai biame haga. <sup>9</sup> Ibugua handa walia howa ibu nenegerubi ibula handa ai nai padarubi olowa lalu, Muni kuni mbira ereba hayago handa walia harugo ai mandagi turu ho hamiya ibidaba, lolebira. <sup>10</sup> Ogonidagua dege ina tí langerogo mbira koore biaga henego mini beregedalu dai biyagua Ngode Datagaliwabenaga dahuliyalirume turu taraore holebira, lene.

*Bi yobage lowa igiri pu ereba hene lenego ogo*

<sup>11</sup> Yasuhanda la ho wiaabo howa lalu, Agali mbira ibu igini kira hene. <sup>12</sup> Ani howa igiri heyogonegome ibu abahondo lalu, Aba-o munibi mbirale marubi i ngule wiridago tale bialu áyu ogoni ngi, lene. Ani layagola agali biagome ibunaga mbirale wiyaruni ibu igini biago labohondo mo tale bia hene. <sup>13</sup> Ani buwa horo kiru tebiru agima howa igiri heyogone biagome ibunaga mbirale yayaruni yolo miami halu muni hangu yalu ibu andaga wahalu pene. Dindi kaundiaoreha pu howa ibuninaga mini bayuwa haru nahe howa muni yayago ko galone nabulene wiaru hanguni mohole bialu hene. <sup>14</sup> Ani buwa mbirale yayaruni bibahendeore biba hai hene. Ani bu hearia dindi ogoniha hina gari timbuniore piyagola igiri biago ibu mbirale mbira nayiore hene. <sup>15</sup> Ani biyagola agali mbira heagome ibunaga mabuha, Nogo haru hole pu, layagola nogo haru ha hole pene. <sup>16</sup> Haru hearia mbirame ibuhondo tomo emeneore namiyagola garibi timbuni lowa tomo hingilu wahayago noa timbuni ho hene. <sup>17</sup> Ani buwa mani mini wia dai bialu lalu, I abanaga biabe bia haga karume tomo timbuni nalu maru nabe manga ho kago i nde ogoria nane howa tongolo mibeheore kogoni. <sup>18</sup> Ina áyu ogoni heyalu i aba kategoria puwa ibuhondo lalu, Aba-o ina Ngode Datagaliwabehondobi ihondobi ko bialu hoba mu harugoni. <sup>19</sup> Ai áyu ina í igini labe nahe kogoni. Inaga biabe bia haga karuhondo bialu harilidagua ihondobi bialu habe lolebero. <sup>20</sup> Ani mitangi bialu ibu aba hearia pole heyalu andaga dai bini. <sup>\*</sup>

Ibu andagani anda ibu nabi wene amuraore ibalu hearia ibu abahanda hondowa ibunaga bu miniha daraore ho howa abale gerai puwa yu hurubale buwa yu nunu lene. <sup>21</sup> Ani biyagola ibu igini biagome lalu, Aba-o ina Ngode Datagaliwabehondobi ihondobi hoba mu howa koore birugo ndobe. Ai ina í igini labe nahe kogoni, lene. <sup>22</sup> Ani layagola ibu abahanda ibunaga biabe bia haga biaru, Ibai hadaba, lowa, Aga bayaleore abale mo puwa gi hondoneni magibi karula halu ge su mo karula halu bidaba. <sup>23</sup> Ani bialu nogo bulumaga igini habahe mbira kago bo puwa dawadaba. Ani buwa turu halu namiya. <sup>24</sup> I igini ogoni homayago ai dére ho kagoni. Pu ereba hayago ai handa walia kogoni, lene. Ani layagola howa ti tomo biagoni dawalu hene. <sup>\*</sup>

<sup>25</sup> Ani bialu hea tambu igiri wahene biago mabuha biabe bialu hene. Ibugua andaga kaware dai bialu howa hale halu hearia amu andaga biagoha mbira bi anda howa ibaganaru lalu mali lialu hayuane hale hene. <sup>26</sup> Ani biayuagola biabe bia haga mbira heago olowa hale halu lalu, O biaruagoni agi birabe, lene. <sup>27</sup> Biabe bia haga biagome ladai

<sup>\*</sup> 15:6: 1 Pi 2.10, 2.25    <sup>\*</sup> 15:7: Lg 5.32    <sup>\*</sup> 15:13: Min 29.3    <sup>\*</sup> 15:16: Min 23.21    <sup>\*</sup> 15:18: Iba 51.4, Yar 3.12-13    <sup>\*</sup> 15:20: Ab 2.39, Eb 2.13, 2.17    <sup>\*</sup> 15:21: Iba 51.4    <sup>\*</sup> 15:24: Lg 15.32, Eb 2.1, 2.5, 5.14, Mo 3.1

bialu lalu, í hamene biago andaga íbu dai biyagola í abahanda ibu igini biago homo ereba nahe heneda lowa nogo bulumaga igini habahe mbira heago bo dawalu ka, lalu lamini.\*

<sup>28</sup> Ani layagola hale howa igiri wahene biagome kera gibiore howa andaga anda pu nabi hene. Ani biyagola ibu abahanda abale tagira puwa yu hurubale buwa, Andaga mba, lene. <sup>29</sup> Ani layagola ibu abahondo lalu, Ina mali bibahende biagoni ina bi larigo mbira mo wa nahe garabaya biabe ale biaabo halu harugoni. Ina i agile ngiribe. I nenege karu baba nogo memebi mbira bo dawaliya nangiriligo manda berene. <sup>30</sup> í igini ogoni inaga mbirale wiriru mohole bialu walime kayu bibiya ngi layagola mialu andaga íbu dai biyagola nogo bulumaga igini habahe mbira heago ba harida, lene. <sup>31</sup> Ani layagola ibu abahanda lalu, I igini-o í horo bibahendengi ila haabo howa mbirale ina wu hewaru inaga ho haribagoni. <sup>32</sup> Anigo áyu nogo balu uru halu kamago nde í hamene biago homayago dére halu pu ereba hayago handa walía halu birimagonaga beramagoni, lene, lalu Yasuhanda lamini.

## 16

### *Bi yobage lowa biabe bia haga mini ohewi hene lenego ogo*

<sup>1</sup> Yasuhanda ibunaga talima piaga biaruhondo lalu, Agali homogo mbira hene-gome biabe bia haga mbirahondo ibunaga mbirale wiaru hondo helo helene. Ani hondo heagola mbiralime agali homogo biago lamialu lalu, Inaga mbirale wiru hondo helariyagome inaga muni bame biba helara, lene. <sup>2</sup> Ani lamiyagola ibugua biabe bia haga biago olalu, Íbu, lowa lalu, Ina biri layane hale harugo agibe. Inaga mbirale wiwaru hondo harigo baya hangu dagalo manda bialu gili biai hole pu, lene. Ani biai halu í inaga biabe bia haga habe nahedago wahalu tagira polebere, lene. <sup>3</sup> Ani layagola biabe bia haga biagome lalu, I anduaneme i biabe wahalu tagira pu lolebirago ai agi buabe, lalu ibuni hangu lo manda bini. I gana walenebi hongo nahego wali agalihondo muni mbiralebi ngi lolene taga ko. <sup>4</sup> Ai ina ogo ale bule lo manda bidogo buwa i biabe nabi kogola i nenege karume i ti andaga, Íbu, lolebira manda bido, lene.

<sup>5</sup> Ani lo manda buwa ibugua ibu anduanenaga agali dano ho hayaru olalu, Ibidaba, lowa mbiragohondo lalu, Ina i anduanela dano agira ho kebe, lene. <sup>6</sup> Ibugua ladai bialu lalu, Olibe lininaga weli be heba handari mbira (100) dano ho ko, lene. Ani layagola biabe bia haga biagome agali biagohondo beba mialu, Inaga dano harigonaga ogoni. Ina biruwa ogoriani pira duria (50) gili bibe, lene. <sup>7</sup> Ani lowa ibugua mendehondo lalu, Ina i anduanela dano agira ho kebe, lene. Ani layagola mendeali biagome ladai bialu lalu. Ladi ale mini widi nu heba daosini mbira (1,000) dano ho ko, layagola biabe bia haga biagome ibuhondo beba mialu lalu, Inaga dano harigonaga ogoni. Ina biruwa beba ogoriani handari halira (800) gili bibe, lene.

<sup>8</sup> Ani biyagola ibu anduane biagome biabe bia haga mini tigatiga ndo ohewi biagohondo lalu, Mini ohe harigo bayale birida, lene. Wali agali dindini holene hangu mitangi bu karume tinaga biabe bialu howa wali agali wá kategoria karume biabe biagadagua ndo tigua miniha o timbuniore howa biaga ka, lalu Yasuhanda ani lene.\*

<sup>9</sup> Ani lowa Yasuhanda la ho wiaabo halu lalu, Anigo ina tí langerogo dindinaga mbirale yu kamigome wali agali mo nenege hinulene nga. Ani bialu howa homaramingi Ngode Datagaliwabehanda haabobo holene ngategoria, Hole íbu, lolebira.\*

<sup>10</sup> Mbiralime mbirale emene ngago bayuwa hondo hayagua timbuni ngarubi bayuwa hondo holebira. Mbiralime emene ngago bayuwa hondo nahayagua timbuni ngarubi bayuwa hondo naholebira.\* <sup>11</sup> Aniyagua ina mbirale dindi yu holene ngago mohole

\* 15:27: Lg 15.2 \* 16:8: Yo 12.36, Eb 5.8, 1 Te 5.5 \* 16:9: 4.27, Md 6.19-20, Lg 14.14, 1 Ti 6.17-19 \* 16:10: Md 25.21, Lg 19.17-26



bialu hariyagua homogo holene henene ngago agua yu holeberebe. <sup>12</sup> Ani buwa ína mbiralinaga mbirale bayuwa hondo nahariyagua mbirale ínina yu habelo aiwa ngulebirabe.

<sup>13</sup> Biabe bia haga mbiraoreme anduane kiranaga garabaya biabe ale bia haga habe nahe ka. Ibugua anduane mendego handabe manga halu mendego gubalini holebira. Ani bialu howa anduane mendegome bi larago hale halu bialu mendegome bi larago hale howa mo waholebira. Tígua Ngode Datagaliwabenaga biabebi muninaga biabebi kirabali gi tale bu howa bibe naheore kamigoni, lene.✧

*Yasuhanda bi lagane maru lenego ogo*  
(Madiu 11.12-13, 5.31-32, Maga 10.11-12)

<sup>14</sup> Yasuhanda bi uruni layago hale howa Perisi agali hearume Yasu handabe manga howa talialu hene. Irane ti muniore gubalini timbuni haga hene.✧ <sup>15</sup> Ani biyagola Yasuhanda tihondo lalu, Tígua tíni wali agali maru karunaga deni howa, Bayaleda, lelo mo ho kamigo Ngode Datagaliwabehanda tínaga bu miniha mitangi bu kamigoni manda bida. Mbirale bayale timbuni hongohe ngaruni agalime mo dunu bia ho kagoni uruni Ngode Datagaliwabenaga deni howa galone nabulene nga.✧

<sup>16</sup> Mosese heneyangi Mana lowini ngagobi Ngode Datagaliwabe mana latagi hagarume bi gilibu wini ngagobi uruni baboraya biaga Yone hayangi winigo wima ibaabo halu Ngode Datagaliwabehanda Handame Ho Kagonaga Bi Mana Debene lamiaabo halu bibahendeoreme anda pelo hongo howa piaga ka.✧ <sup>17</sup> Anigo ogoni hari daligabi dindibi ereba holene tai nabi awadagago Mana lowini ngagonaga bi emeneorebi ereba nahe wiaaboore ho wulebira.✧

<sup>18</sup> Agali mbirame ibu one wahalu wali mende lone dabu bu aribia hayagua ibugua wali mende biago kayu biragoni. Ani buwa wali wahayago agali mendeme dabu biyagua ibugua wali kayu biragoni, lene.✧

*Agali homogola Lasarasila te ogo*

<sup>19</sup> Yasuhanda lowa, Agali homogo mbira henegome aga bayaleru muni timbunime muwa bu howa anda bayale hanguni palialu tomobi bayale hangu nalu hene. <sup>20</sup> Ani buwa agali mende mini Lasarasi ibu ko yagibanoore dereme dongoneni biamehego agali homogo biago anda haneni marume haru íbu biraabo helene.✧ <sup>21</sup> Biraabo howa agali homogo biago ibu tomo nalu hingilu dagiani howa ibira hayago Lasarasihanda noa howa biraabo hene. Biangomebi ibu dongoneni dere bidago domo naabo halu hene. <sup>22</sup> Lasarasi yagibano biago homoyagola dahuliyali hearume ibu Abarahama dahuliya andagani tomo dawa wiaru nalu bereagoria berelole yalu pene. Ani biyagola mani agali homogo biago homoyagola hora hene. <sup>23</sup> Ani buwa Heli dindi tandaga timbuniore nalu howa handa daga halu hearia Abarahama uyuraore Lasarasila berearia hendene. <sup>24</sup> Ani bu bereago hondowa ola daga howa lalu, Aba Abarahama-o íhondo dara ha. Ína Lasarasi ibu gi hondoneni iba mbira wai ho yalu ínaga hége dege mo gomba hole ibilo ibilabe. Í ira dedagoria howa tandaga timbuniore nalu kogoni, lene.✧

<sup>25</sup> Ani layagola Abarahamahanda ladai bialu lalu, Í igini-o í dindini haringi mbirale bayale hangu hanguni harigo Lasarasi ibu mbirale ko hangu hanguni hayago mitangi bibe. Í tandaga nalu kegola áyu Lasarasi ibuni turu ho ka.✧ <sup>26</sup> Ani buwa ina kamagoria tubari timbuniore ngago mbiralime ina kamagoria howa tí kamigoha bolangua halu naibilobi tí kamigoria howa ina kamagohayagi bolangua halu naibilonagabi tubari timbunioreme ngagoni, lene. <sup>27</sup> Ani layagola agali homogo biagome lalu, Ína íhondo

✧ **16:13:** Md 6.24 ✧ **16:14:** Md 23.14 ✧ **16:15:** 1 Sml 16.7, Iba 7.9, Min 6.16-17, Md 23.28, Lg 10.29, 18.9-14  
✧ **16:16:** Md 4.17, 11.12-13, Lg 7.29 ✧ **16:17:** Iba 102.26-27, Ais 40.8, Md 5.18, 1 Pi 1.25 ✧ **16:18:** Md 5.32, Mg 10.11, 1 Ko 7.10-11 ✧ **16:20:** Md 15.27 ✧ **16:24:** Ais 66.24, Seg 14.12, Mg 9.44 ✧ **16:25:** Yob 21.13, Lg 6.24

heneneore larogo aba Abarahama-o Lasarasi ibu i aba andaga pialu <sup>28</sup> i hamene duria kago uruni kagoria puwa tandaga nalu kogoria ti naibilo lamule pu labe, lene.

<sup>29</sup> Ani layagola Abarahamahanda ladai bialu lalu, í hamene uruni ti Mosese ibugua bi gilibu wini ngagobi Ngode Datagaliwabe mana latagi haga henerume bi gilibu wini ngagobi yu kagoni. Tigua agi larabe í hamene biarume hale holene ngagoni, lene.✧

<sup>30</sup> Ani layagola agali homogo biagome lalu, Aba Abarahama-o ogonime nakarulapeda. Mbiralime tongolo minigo lone heyalu ti kagoria piyagua dege nde ti ko bialu hayagoria howa mini beregedolebira, lene. <sup>31</sup> Abarahamahanda lalu, Anigo Mosesehanda bi gilibu wini ngagobi Ngode Datagaliwabe mana latagi haga henerume bi gilibu wini ngagobi tigua hale nahayagua mbirali tongolo minigo lone heyalu piyaguabi manda nabulebiraore, lamini, lalu Yasuhanda lene.✧

## 17

*Ko mo bia holene te lenego ogo*  
(Madiu 18.6-7,21-22, Maga 9.42)

<sup>1</sup> Yasuhanda ibunaga talima piaga biaruhondo lalu, Mbirale tara tara ngarume wali agali ko mo bia haga nga. Anigo mbiralime ko mo bia hagago ibunaga mo ko holene timbu gibiore wulebirago dara holene nga.✧ <sup>2</sup> Waneigini mini boga nabi karu ko bilo mbiralime ko mo bia hayagua ogoni ibu ege tole timbuni ngago pume ibunaga mani pongo bia howa iba timbu bedagoha bape hayagua ogoni karulape. <sup>3</sup> Anigo tigua beramigo tiga hondowa bulene nga.✧

Í hamene mbirame ko biyagua talibe. Ani buwa ibu mini beregedalu dai biyagua ibugua ko íhondo biyago la nabi wahabe. <sup>4</sup> Ani buwa ibugua íhondo horo mbiru hanguni ka halu ko buwa kane halugo bialu í keria ibuwa, Ai íhondo ko birugo wahalu mini beregedaru, layagua ibugua ko biyagoni la nabi wahabe.

*Mini mbiraore wu holene ogo*

<sup>5</sup> Abosolo agali biarume Anduane Homogohondo lalu, Iname mini mbiraore wu kamago mo timbu ha, lene.✧

<sup>6</sup> Ani layagola Anduane Homogohanda ladai bialu lalu. Tigua mini mbiraore masada egene emeneore ngago ale wu kamiyagua nde lini daga ira o kagohondo lalu, ína íni pini heba dugu yalu puwa iba solowara bedagoria ínime hangabe, laramigola hale halu bulebira, lene.✧

*Biabe bia hagame bulene ngago ogo*

<sup>7</sup> Tí kamigoni mbirame tínaga biabe bia haga mabu dindi alialu howayaguabi nogo sibi haru howayaguabi andaga dai biragola, Tomo abale nabe laramilibi. <sup>8</sup> Ani nalaramiligoyago. Tigua ibuhondo agua laramili, Inaga tomo manda manda bu dawabe. Ani buwa aga mbira mo bo buwa tomo i noliya dugu yalu ibabe. Ani buwa maniore íni tomo nolebere, laramili.✧ <sup>9</sup> Ani laramigo, Bibe, larimidagua biabe bia hagame biai haragola ibuhondo, Bayuwa birida turu halu kaj laro, lolene irane nawi. <sup>10</sup> Tíni nde ogonibi dege kamigoni manda buwa, Bulene nga, layago biaiore howa au labe. Ina biabe bia haga howa bia layagoni dege birima lolene nga, Yasuhanda lene.✧

*Yasuhanda agali pirali mo dabi henego ogo*

<sup>11</sup> Yasu ibu Yarusalem pole pialu howa Samaria Galilila tubari wiadagua pialu hene.✧ <sup>12</sup> Ibu tano emene mbira wiagoha anda pialu hearia agali pira ge hamuabi lola hene. Ti amura howa✧ <sup>13</sup> ladaga halu lalu, Yasu-o Anduane-o ina dara howa biamogo bia, lene.✧

✧ 16:29: Ais 8.20, Yo 5.39, 5.45, Ab 15.21 ✧ 16:31: Yo 11.44-48, 12.10-11 ✧ 17:1: Md 18.6-7, Mg 9.42, 1 Ko 11.19  
✧ 17:3: LBM 19.17, Min 17.10, Md 18.15, Ya 5.19 ✧ 17:5: Mg 9.24 ✧ 17:6: Md 17.20, 21.21, Mg 9.23, 11.23  
✧ 17:8: Lg 12.37 ✧ 17:10: Md 25.30, Lm 3.12, 1 Ko 9.16-17, Pm 11 ✧ 17:11: Lg 9.51-52, 13.22, Yo 4.4 ✧ 17:12: LBM 13.46 ✧ 17:13: LBM 13.45-46

<sup>14</sup> Ani layagola Yasuhanda ti hondowa lalu, Loma binigo mo miaga karume tí de hendelo ti karia pudaba, lene.✧

Ani laya handala pole harigani pialu hearia tinaga ge hamuabi biagoni ereba haiore hene. <sup>15</sup> Mbiragome ibunaga ge hamuabi biago ereba hayiyagola hondowa bi dalimu lalu Ngode Datagaliwabenaga mini yaraga halu Yasu hearia lone íbu dai bini. <sup>16</sup> Dai buwa ibugua Yasu heagoria dindini birape howa Yasuhanda ibu mo dabi hayagonaga kaj lene. Agali ogoni ibu Samariali hene. <sup>17</sup> Ani layagola Yasuhanda lalu, Agali pira dabi hayago dira biarú agoha kabe. <sup>18</sup> Agali mbiraore dindi tarali ogome dege ibu Ngode Datagaliwabehondo kaj lole dai biyago agibe, lene. <sup>19</sup> Ani lowa Yasuhanda ibuhondo lalu, Ini Ngode Datagaliwabehondo mini mbiraore wirigome í mo dabi hayago heyalu pamia, lene.✧

*Ngode Datagaliwabenaga Handame Ho Holene ibulebiragonaga te lenego ogo (Madiu 24.23-28,37-41)*

<sup>20</sup> Perisi agali maru hearume Yasuhondo lalu, Ngode Datagaliwabenaga Handame Ho Holene angi ibulebirabe, lene. Ani layagola Yasuhanda ladai bialu lalu, Ngode Datagaliwabenaga Handame Ho Holene panigi hendene naibaga.✧ <sup>21</sup> Mbiralime lalu, O kago handadaba amu kago handadaba, nalabehe. Irane Ngode Datagaliwabenaga Handame Ho Holene nde tí kamigoha íbu kagoni, lene.✧

<sup>22</sup> Ani lowa ibugua ibunaga talima piaga biaruhondo lalu, Agali Hole Ibiyago lone ibulene horroru harangi mbira hondoa ho howa handa nabuleberami.✧ <sup>23</sup> Marume tíhondo lalu, Amu kago handadaba, layaguabi, O kago handadaba, layaguabi o laragoni hale howa handa nabilimu.✧ <sup>24</sup> Hari daba bialu wá ho banga bialu mendehayagi howa mendehayagi ho bolangua hagadagua Agali Hole Ibiyagonaga dumbiyalu ogoingiore hondoleberami.✧ <sup>25</sup> Anigo ala ibu tandaga timbuni nalu wali agali áyu karume ibu handa tara halu erembira mulebira.✧ <sup>26</sup> Agali Noa heneyangi wali agalime bialu hayadagua Agali Hole Ibiyago lone ibulene horroru harangi wali agalime bialu holebira.✧ <sup>27</sup> Wali agali bibahende bu hearume hina nalubi iba nalubi wali agali dabu bigi bialu heaore horo ha para hayagola Noa ibu iba taluha anda piyagola ibali timbuniore ibalu bibahendeore ibame nai hene.✧ <sup>28</sup> Ani buwa Lode heneyangi biyadagua bulebira. Wali agali bibahende bu hearume hina nalubi iba nalubi mbirale yolo bialubi mbirale yolo mule wialubi tomo hangalubi anda bialubi hene.✧ <sup>29</sup> Ani bialu heagola horo mbirungi Lode ibu Sodomo wahalu tagira piyagola hariha howa ira hungu heba ege tole ale ambuabi mini saloba kundibi alebi ibira howa bibahendeore do mundulo wa helene. <sup>30</sup> Agali Hole Ibiyago lone ha pani harangi ogonidaguaore bulebira.✧

<sup>31</sup> Horo ogoningi agali anda dangini bedagome tamuha ibuninaga dabudabu mo anda pole daluene henge nawulebira. Ogonidagua dege agali mabuha mabu biabe bialu kagome ibuni andaga dai bulene henge nawulebira.✧ <sup>32</sup> Lode one biyago mitangi bayuwaore bilimu.✧ <sup>33</sup> Mbiralime ibuninaga holene ngago mo tene hayagua holene ogoni ereba holebira. Ai mbiralime ibuni holene hado wahayagua holene gahenge yu holebira.✧ <sup>34</sup> Ina tí langerogo mbiraga ogoniorengi kirali dagia mbiraoreni padaria mendego palelalu mendego yamulebira.✧ <sup>35</sup> Wali kirame ladi ale mini widi dambialu mandagi bedaria mendego berelalu mendego yamulebira. [<sup>36</sup> Ogonidagua agali kirame mabuha biabe mandagi bialu karia mendego helalu mendego yamulebira,] lene.

✧ **17:14:** LBM 13.2, 14.1-32, Md 8.4, Lg 5.14 ✧ **17:19:** Md 9.22, Mg 5.34, Lg 7.50 ✧ **17:20:** Yo 3.3, 18.36 ✧ **17:21:** Mg 13.21, Lg 17.23, Lm 14.17 ✧ **17:22:** Md 9.15, Yo 17.12 ✧ **17:23:** Md 24.23, Mg 13.21, Lg 17.21, 21.8 ✧ **17:24:** Md 24.27 ✧ **17:25:** Mg 8.31, 9.31, Lg 9.22 ✧ **17:26:** Pig 6.5-8, 7.1-24, Md 24.37 ✧ **17:27:** Pig 7.6-24 ✧ **17:28:** Pig 18.20-19.25 ✧ **17:30:** 2 Te 1.7 ✧ **17:31:** Pig 19.17, 19.26, Md 24.17-18, Mg 13.15-16 ✧ **17:32:** Pig 19.26 ✧ **17:33:** Md 10.39, 16.25, Mg 8.35, Lg 9.24, Yo 12.25 ✧ **17:34:** Md 24.40-41, 1 Te 4.17

<sup>37</sup> Ani layagola ibunaga talima piaga biarume ibuhondo lalu, Anduane Homogo-o o lariruni agohayagi bulebirabe, lene.✧

Yasuhanda tihondo ladai bialu lalu, Homenenaga tingini ngagoha ega bodo hariawe aleme nole ibu ngoai holebira, lene.

## 18

### *Bi yobage lowa wali dalo godi lagane agalila biyago te lenego ogo*

<sup>1</sup> Ani lowa Yasuhanda ibunaga talima piaga biarume, Wahalu poro, nale Ngode Datagaliwabehondo bi laabo halu helo ti lawai halu bi yobage ogo lamini.✧ <sup>2</sup> Ibugua lalu, Dindi mbiraha godi lagane agali mbira henego ibugua Ngode Datagaliwabehondo gi nahagabi agali hearu hondowa dara nahagabi hene. <sup>3</sup> Ani buwa dindi ogoniha dege wali dalo mbira berenegome godi lagane agali biago hearia puabo howa lalu, Inagaore bayuwa mo tiga bia halu ila hoba mu kagonaga i biamogo bia habe, lalu la debodebo biaabo haga berene. <sup>4</sup> Ani laabo halu berea tambu godi lagane agali biagome hale halu mbira bia nabiagaore henego mani howa ibuni hangu lo manda bialu lalu, Ngode Datagaliwabehondo i gi nahe wali agalihondobi dara nahaga kogo <sup>5</sup> wali dalo o bedagome horo bibahendengi lawanana biaabo halu i mo lulu ya harago ina tiga handalu wali ogoninaga genda yu bedagoni mo tiga bulebero. Ani nabiruyagua wali ogonime i koria iba ho wiaabo halu i mo genda holebira, laya, lene.✧

<sup>6</sup> Anduane Homogohanda laabo halu lalu, Godi lagane agali tigabi ndo ogonime biamogo bialu howa o layadagoni hale halu manda bilimu. <sup>7</sup> Anigo Ngode Datagaliwabehanda tigatiga hanuniore dabagane kagome ibunaga wali agalime horombe mbiragabi ibuhondo, Biamogo bia, laabo halu haragola biamogo nabulebirabe. Ibugua tendoreore biamogo bulebirabe.✧ <sup>8</sup> Ina ti langerogo ibugua hanuniore howa dabalubaleore ti biamogo bulebira. Anigo Agali Hole Ibiyagome dindini lone ibuwa wali agali mini mbiraore wu karia handa hondolebirabe, lene.✧

### *Bi yobage lowa Perisi agalibi dagisi muni miaga agalibi biyago te lenego ogo*

<sup>9</sup> Yasuhanda bi yobage lowa wali agali maru hearume tini bayale tigabi hangu biaga kama lalu wali agali maru karu ko biaga ka laga hearuhondo lalu,✧ <sup>10</sup> Agali kira mendego Perisi agali mendego dagisi muni miaga agali libugua Anduane Homogonaga andaha Ngode Datagaliwabehondo bi lole pene.

<sup>11</sup> Perisi agali biagome ibuni hanguore howa Ngode Datagaliwabehondo bi lalu, I ko nabiaga mbirale kayubi wali kayubi nabiaga marume ko biagadagua nabiruligonaga Ngode Datagaliwabe ihondo turu halu kai laro. Dagisi muni miaga nai kagome biagadagua ina nabiruligo ihondo kai laro.✧ <sup>12</sup> Ina Sarere mbiranaga horo kiru tomo nane haruli horo bibahendengi yolo merogo mialu pinigo inaga lowa wiruli, lalu Ngode Datagaliwabehondo bi lene.✧

<sup>13</sup> Ibu ani lalu hea tambu dagisi muni miaga biagome amuraore howa Ngode Datagaliwabehondo bi lalu hearia hariha handa daga nahe ibuni galu kunini balu lalu, I koorene kogo Ngode Datagaliwabe ina ihondo dara habe, laya, lene.✧ <sup>14</sup> Yasuhanda lalu, Ina ti langerogo libu andaga dai buwa Ngode Datagaliwabela mo mbiraore ho henego Perisi agali biago ndo dagisi muni miaga biago ibu hene. Ogoninaga mbiralime ibuni mo yaraga hayagua ibu mo dindiha helalu mbiralime ibuni mo dindiha hayagua ibu mo yaraga ho helolebira, lene.✧

### *Yasuhanda waneigini emene mo turu henego ogo (Madiu 19.13-15, Maga 10.13-16)*

✧ **17:37:** Yob 39.30, Md 24.28 ✧ **18:1:** Lm 12.12, Eb 6.18, Kl 4.2, 1 Te 5.17 ✧ **18:5:** Lg 11.7-8 ✧ **18:7:** Mo 6.10 ✧ **18:8:** Hi 10.37, 2 Pi 3.8-9 ✧ **18:9:** Lg 10.29, 16.15 ✧ **18:11:** Iba 135.2, Ais 1.15, 58.2, Lg 16.15, Mo 3.17 ✧ **18:12:** Pig 14.20, Ais 58.2-3, Md 23.23 ✧ **18:13:** Iba 51.1 ✧ **18:14:** Yob 22.29, Md 23.12, Lg 14.11, Ya 4.6, 1 Pi 5.5-6

15 Wali agali maru hearume Yasuhanda ti waneigini emene hagianeni gi wialu mo turu helo lowa taba yalu ibu hearia íbu ngoai hene. Ani biyagola íbunaga talima piaga biarume hondowa o biyagoni nabilo ti talini.✧ 16 Ani biyago hondowa Yasuhanda, Waneigini í kogoria ibidaba, lowa, Waneigini í kogoria ibiragola naibilo ha pai nahalimu. Irane Ngode Datagaliwabehanda Handame Ho Kagoria waneigini urubi karunaga ka.✧ 17 Tíhondo larogo manda bilimu. Waneiginime Ngode Datagaliwabehanda Handame Ho Kagoria hoa hagadagua hoa nahe karume nde anda napolebira, lene.✧

*Agali homogo mbira henego ogo  
(Madiu 19.16-30, Maga 10.17-31)*

18 Yu wali agali hondo haga mbirame Yasuhondo lalu, Lawai haga bayale-o ína haabobo holene mo yule agi buabe, lene.✧

19 Ani layagola Yasuhanda íbuhondo ladai bialu lalu, Ína í bayale larigo irane agibe. Mbiralí bayale nahe Ngode Datagaliwabe íbuni hangu bayale ka. 20 Bi mana lowini ngago ína manda bu kegoni. Wali agali kayu nabibe. Wali agali homelo nababe. Mbiralé page nabibe. Ké howa dibade nahabe. Aba aiyala mo yo handa nabi laradagua hale halu bibe, lene.✧

21 Ani layagola agali biagome ladai bialu lalu, Bi o lariruni bibahende lo ngago ína igiri emeneoreni howa biai harugoni, lene.

22 Ani ladai biyagola hale howa Yasuhanda agali biagohondo lalu, Ína mbiraore hangu bibehe kego ínaga mbiralé wiruni bibahende yolo miai hole pu. Ani buwa muni ngirago yagibano karu mo meregola dahuliya andagani homogo holene ínaga wulebira. Ani buwa í porodagua talima íbabe, lene.✧ 23 Bi ani layago hale howa agali biagome íbu homogo gíbi henego dara halu tingini biagoni bibahende pírla paya bini.

24 Yasuhanda agali biago darabi howa tingini pírla paya bu heago hondowa lalu, Homogo karume Ngode Datagaliwabehanda Handame Ho Kagoria anda polene erekuibiore wulebira.✧ 25 Nogo kameleme háli diriha anda polene erekuibi lowa homogo karume Ngode Datagaliwabehanda Handame Ho Kagoria anda polene erekuiore wulebira, lene.

26 Wali agali bu hearume Yasuhanda bi layago hale howa íbuhondo lalu, Ai imame pele mulene yu holebirabe, lene.

27 Ani layagola Yasuhanda ladai bialu lalu, Wali agalime bibe naheore ngago Ngode Datagaliwabehanda biai habeheore kagoni, lene.✧

28 Ani layagola Pidahanda lalu, Ai handa, Inanaga dindi andabi wahalu í talima íbirimagoni, lene.✧

29 Ani layagola Yasuhanda tíhondo lalu, E anigo ína tíhondo heneneore larogo mbiralime dindi andabi onebi hamenebí aba aiyabí waneiginibí helai halu Ngode Datagaliwabehanda Handame Ho Kagoria hangu handaya ho yalu poragola✧ 30 áyu dindini ka tambu timbuniore yu howa mani haabobo holene ngago yu holebira, lene.✧

*Yasuhanda íbuni homolenenaga te halu tebone lenego ogo  
(Madiu 20.17-19, Maga 10.32-34)*

31 Yasuhanda íbunaga talima piaga homberiali (12) biaru haru pu bagi howa tíhondo lalu, Hale hadaba. Ina Yarusaleme pole poramagoni. Puwa mbiralé bibahende Ngode Datagaliwabe mana latagi haga henerume Agali Hole Ibiyagonaga mbiwia halu gilíbu wini ngago lola hai holebira.✧ 32 Mbiralime Agali Hole Ibiyago Yu agali ndo agali tara

✧ 18:15: Md 19.13, Mg 10.13 ✧ 18:16: Md 19.14, Mg 10.14, 1 Ko 14.20, 1 Pi 2.2 ✧ 18:17: Md 18.3, Mg 10.15  
✧ 18:18: Md 19.16, Mg 10.17, Lg 10.25 ✧ 18:20: Har 20.12-16, Man 5.16-20, Lm 13.9, Eb 6.2, Kl 3.20 ✧ 18:22: Md 6.19-20, 19.21, 1 Ti 6.19 ✧ 18:24: Md 19.23, Mg 10.23, Min 11.28 ✧ 18:27: Yar 32.17, Seg 8.6, Md 19.26, Mg 14.36 ✧ 18:28: Md 4.19-20, 19.27, Mg 10.28 ✧ 18:29: Man 33.9, Md 19.29, Mg 10.29-30 ✧ 18:30: Md 19.29, Mg 10.30 ✧ 18:31: Iba 22, Ais 53, Md 16.21, Mg 10.32, Lg 24.44



karuhondo minu miragola tigua ibuhondo mege bialubi bi ko lalubi hamiaga tolo ba halubi bulebira. <sup>33</sup> Tigua ibu pu payini tibume balu tongolo milolebira. Ani biragola horo kiru howa tebonengi ibuni mo heya holebira, lalu lamini.✧

<sup>34</sup> Ibunaga talima piaga biarume o layagoni irane ogo alenaga laya lalu manda nabioire hene. Ti ogoninaga bi galone manda nabilo mo do hene. Ani biyagola tigua Yasuhanda layagoni ogo ale layalo manda nabioire hene.✧

*Yasuhanda agali de kohe mo dengala henego ogo  
(Madiu 20.29-34, Maga 10.46-52)*

<sup>35</sup> Yasu ibu Yarigo anda ibule biyagola agali mbira de kohego hariga leneha biruwa munibi mbiralebi, Ngidaba, laabo haga berene. <sup>36</sup> Ibugua wali agali dewa bi lama piayuago hale howa lalu, O laruago agidabe, lene.

<sup>37</sup> Tigua ibu lamialu lalu, Nasareteali Yasu o bolangua halu poragoni, lene.

<sup>38</sup> Ani layagola ibugua abale olowa lalu, Debidi Igini Yasu-o i dara howa biamogo bia, lene.✧

<sup>39</sup> Ani olayagola Yasu maha helalu wali agali bamba halu piyarume agali biago talialu lalu, Bi nale waha, lene. Ani layagola ibu donge howa dalimuore olalu, Debidi Igini-o i dara howa biamogo bia, lalu laabo hene.

<sup>40</sup> Ani olayagola hale howa Yasuhanda ema nabi hondo howa lalu, Agali de kohe amu bedago i koría haru ibidaba, lene. Ani layagola tigua ibu haru halu howa de kohe biago Yasu heagoria ha para hayagola Yasuhanda lalu, <sup>41</sup> Ina ihondo agi buliya hamelo kebe, lene.

Ibugua ladai bialu lalu, Anduane-o i lone de hondoa ko, lene.

<sup>42</sup> Yasuhanda ibuhondo lalu, De handa. Ini Ngode Datagaliwabehondo mini mbiraore wirigome inaga de mo ngala hayagoni, lene.✧

<sup>43</sup> Ani layaore de kohe biago ibunaga de abaleore dabi halu de handabehe hayagola ibugua Ngode Datagaliwabehondo turu halu kai lalu Yasu piyadagua pene. Wali agali bu hearume o biyago hondowa ti bibahendeme Ngode Datagaliwabenaga mini yaraga halu hene.

## 19

*Yasu Sagiasila te ogo*

<sup>1</sup> Yasu ibu Yarigo anda pialu bolangua halu pole pene. <sup>2</sup> Ani biyagola ogoniha agali mbira henego mini Sagiasi ibu dagisi muni miaga karunaga haguane howa homogo gibioire hene. <sup>3</sup> Ibu Yasu ibayuago aidabe hondole biyaria ibu agali tumagiore howa wali agali dewa gengeda tago bu heagoha Yasu handabe naheore hene. <sup>4</sup> Wali agali piyagoha ibu ala mo bamba halu gerai puwa Yasu o ibiyagohayagi poragola hondole lowa ira mbira heago hondowa iraga ho berene. <sup>5</sup> Yasu ibu bereagoria ibu pialu howa Yasuhanda ira mane biagoha handa daga howa Sagiasihondo lalu, Sagiasi-o i áyu í andaga holeberogo abale dalialu íbu, lene.

<sup>6</sup> Ani layagola Sagiasi abaleore dalipe halu turu taraore howa Yasu ibu andaga, Tomo nalu palibiya íbu, lene. <sup>7</sup> Ani layagola wali agali bu hearume bi gimigomo lalu, Agali ogoni ko ngubioire biaga biagonaga andaga nenege hole poragoni, lene.✧

<sup>8</sup> Ibu andaga puwa Sagiasihanda heyu howa Anduane Homogohondo lalu, Anduane-o hale habe. Ina mbirale bu ngoru hanuni talebu ki howa yagibano karu mulebero. Ani buwa mbiralinaga mulene wiadagua ndo dibaudu howa ngi larugonaga ina ibuhondo ma halu dewaore yadai bigi bulebero, lene.✧

✧ 18:33: Md 27.2, Lg 9.22, 9.44, 23.1, Yo 18.28, Ab 3.13 ✧ 18:34: Mg 9.32, Lg 9.45, Yo 10.6, 12.16 ✧ 18:38: Md 15.22 ✧ 18:42: Lg 7.50, 17.19 ✧ 19:7: Md 9.11, Lg 5.30, 15.2 ✧ 19:8: Har 22.1, Dag 5.6-7, 1 Sml 12.3, 2 Sml 12.6

<sup>9</sup> Ani layagola Yasuhanda ibuhondo lalu, Íbi í andagani hagarubi áyu pele mulene yu holeberami. Ogoninaga agali ogo ibu Abarahamanaga aguanene henene kagoni.✠  
<sup>10</sup> Agali Hole Ibiyagome wali agali pu ereba heneru haru dai bule tai bialu pele mule ibini, lene.✠

*Bi yobage lowa muni kuninaga lenego ogo  
 (Madiu 25.14-30)*

<sup>11</sup> Wali agali bu hearume bi layago hale ho bereagola Yasuhanda la ho wiaabo halu bi yobage lalu hene. Ibu Yarusalemeni ha para ho heagola tigua manda bialu howa Ngode Datagaliwabenaga Handame Ho Holene ha pani holene kawareore wiyada manda bini.✠ <sup>12</sup> Ani manda binigo Yasuhanda lalu, Agali haguane duniniore mbira henegome dindi kaundiaoreha kini mo helelo pialu ibuni andaga dai bulenenaga pongo bo wialu pene. <sup>13</sup> Ibu pu nabi howa ala ibugua ibunaga biabe bia haga pitali olowa tihondo muni kuni mbira kina pira kira (20) ale dege dege hangu hanguhondo ta halu lalu, I pedoha o ngerogome biabe bialu mo tago halu halimu, lalu pene. <sup>14</sup> Ani piyagola ibunaga dindini wali agali hearume ibu handabe manga howa tigua lalu, Agali ogonime inanaga kini helo hame naledamago, lowa marume lamilo, Lamule pudaba, lene.✠

<sup>15</sup> Ani biyagola howa agali biago kini mo helayagola dai bini. Ibu dai buwa ibunaga biabe bia haga biaruhondo muni miyagome ti biabe bialu mo tago au hayadabe hondole ibugua, I kogoria ngoai hadaba, lene. <sup>16</sup> Ti ngoai howa agali mbiragome ibuwa lalu, Anduane-o ína muni kuni mbira ngirigome ína biabe bialu mo tago howa muni kuni pira o mo yidogo handa, lene. <sup>17</sup> Ani layagola ibugua ogonihondo lalu, Bayuwaore biridagoni í agali biabe bia haga bayaleore ke. Ína emene biaru baya hangu hondo haridago ína íhondo tano timbuni pira hondo habelo nguliya, lene.✠ <sup>18</sup> Agali mendegome ibuwa lalu, Anduane-o ína muni kuni mbira ngirigome ína biabe bialu mo tago howa muni kuni duria mo yidogo handa, lene. <sup>19</sup> Ani layagola ibugua ogonihondo lalu, Ina tano timbuni duria ngago ína hondo habelo nguliya, lene.

<sup>20</sup> Agali tebonegome ibuwa lalu, Anduane-o ínaga muni kuni o yidogo agame huba bu do haru. <sup>21</sup> Irane í agali kerahe harigoyane í gi haru. Mbirale ínaga ndogo ína mo yalu pialu tomo íni hengene ndogo nariligo, lene.✠ <sup>22</sup> Ani layagola ibugua agali biagohondo lalu, í agali ko mangahe kegoni. Ina íninaga bi laregome pani nabelo ngulebero. Ina manda birigola í agali kerahe ka manda biridago mbirale ínaga ndogo ína mo yalu pialu tomo íni hengene ndogo naruligo manda birida.✠ <sup>23</sup> Anidago ínaga muni biago mbeniha wia nabiridago agibe. Mbeniha widele í dai berogola dewa mo tago howa ngidele, lene.

<sup>24</sup> Ani lowa ibugua heyu bu biaruhondo lalu, Ibugua muni kuni mbira amu yidagoni yamuwa biabe bia haga muni kuni pira yu kagohondo mo midaba, lene. <sup>25</sup> Ani layagola tigua ibuhondo lalu, Anduane-o ibugua kuni pira abale yayago yu ka, lene. <sup>26</sup> Ani layagola ibugua ladai bialu lalu, Ina tihondo larogo mbiralime mbirale yu kayagua yu kago nale mia tago dege holebira. Mbiralime mbirale nayi kayagua nde emeneore yidagoni yamulebira.✠ <sup>27</sup> Anigo í baba waitigi ho karu í tinaga kini nahole layaru tigua í kogoria haru ibuwa homelo bai halimu, laya lalu Yasuhanda lene.

*Yasu Handame Haga Kini ale howa Yarusaleme anda penego ogo  
 (Madiu 21.1-11, Maga 11.1-11, Yone 12.12-19)*

<sup>28</sup> Yasuhanda ani lalu bialu Yarusaleme pole ibugua ala ti mo bamba halu pene. <sup>29</sup> Ibu Bedabayabi Bedanibi kaware ibuwa Hari Olibe heagoria ha para howa ibugua ibunaga talima piaga kiralime bamba halu pelo <sup>30</sup> libuhondo, Ogodagua bule pudaba, lowa lalu, Dindi amugoniha anda bu kagoria anda pialu kabiria nogo dongi igini mbira ala

✠ 19:9: Lg 13.16, Ab 16.31, Lm 4.11-13, Ga 3.7 ✠ 19:10: Md 10.6, 18.11, Lg 15.4, Yo 3.17, 1 Ti 1.15 ✠ 19:11: Md 25.14-30, Ab 1.6 ✠ 19:14: Yo 1.11 ✠ 19:17: Md 25.21, Lg 16.10 ✠ 19:21: Md 25.24 ✠ 19:22: 2 Sml 1.16, Yob 15.6, Md 12.37, 25.26 ✠ 19:26: Md 13.12, 25.29, Mg 4.25, Lg 8.18

mbirame naberene dariba karia de hondoleberabi. Dongi ogoni hadalu ogoria haru dai bilibu. ✧ <sup>31</sup> Mbiralime libuhondo lalu, Ogoni agi bule hadarabibe, layagua libugua ibuhondo ogodagua lalibu, Anduane Homogo kagome ogoriani biralu polene ngagola hadaraba, lalibu, lene.

<sup>32</sup> Ani layagola libu hariga peadagua puabo halu hebiria Yasuhanda bulebira layadagua biai hearia hendene. ✧ <sup>33</sup> Talima piaga kira biago labome nogo dongi igini biago hadalu hebiria nogo dongi anduaneme libuhondo, Ogoni agi bulenaga hadarabibe, lene.

<sup>34</sup> Libugua ladai bialu lalu, Anduane Homogo kagome biralu polene ngagola hadaraba, lene. <sup>35</sup> Ani lalu libugua nogo dongi igini hadalu haru halu Yasu hearia dai bini. Dai buwa libugua aga nogo dongi biagoni dunga halu Yasu nogo dongini iraga ho berelo biamogo bini. ✧ <sup>36</sup> Ani biyagola ibu nogo dongi biagoria biralu piyagola wali agalime tinaga aga harigani dunga haga bini. ✧

<sup>37</sup> Ti Yarusaleme anda polene kaware ngelowa Hari Olibe weagoria hariga dalipe holenebi Yasu talima piaga dewaore biaru o biyagoria howa tigua agalime nabiagane ale handayarunaga hongo howa awa lalu Ngode Datagaliwabenaga mini yaraga hama pene. <sup>38</sup> Tigua lalu, Handame Haga Kini Anduane Homogonaga minini howa ibirago Ngode Datagaliwabehanda ibu mo turu helo. Dahuliya andagani mo palia holenebi Ngode Datagaliwabenaga mini yaraga holenebi wilo larama, lama pene. ✧

<sup>39</sup> Ani layagola Perisi agali marume wali agali heagoniha howa Yasuhondo lalu, Lawai haga-o inaga talima piaga karuni bi naladababe la, lene.

<sup>40</sup> Ani layagola Yasuhanda ladai bialu lalu, Ina tihondo larogo tigua bi nale hayagua ege tole wiaru tinime bi hongo howa lolebira, lene. ✧

### *Yasuhanda Yarusaleme mitangi howa dugu binigo ogo*

<sup>41</sup> Yasu ibu Yarusaleme kawareore pialu howa handaya howa dugu bialu ✧ <sup>42</sup> lalu, Mo palia holene ngogo mo yulenaga ti áyu ogonibi manda bua kamiyagua o haru. Ani nabirimigo ai manda bibe nahe kami. ✧ <sup>43</sup> Ti waitigime ti bolene horo ha para kago. Ti waitigime ti ho mabu biaiore howabi hariga hangai howabi bole holebira. ✧ <sup>44</sup> Tigua tibi wali agali bibahende ti mandagi kamirubi bo wahai howa ege tole pabe bu mabu bidamigobi anda bidamigobi bibahendeore gialo paya bulebira. Irane tigua Ngode Datagaliwabehanda ti pele mule ibiyangi manda nabi harimigoni, lene. ✧

### *Yasuhanda Anduane Homogonaga andaha puwa binigo ogo (Madiu 21.12-17, Maga 11.15-19, Yone 2.13-22)*

<sup>45</sup> Ani lowa Yasu ibu Anduane Homogonaga andaha puwa agalime mbirale yolo bialu wu berearubi bo ba tagitagi bialu ✧ <sup>46</sup> tihondo lalu, Anduane Homogonaga mbugani Ngode Datagaliwabehanda lo ngago ogo, Inaga anda kago Ngode Datagaliwabehondo bi lagane anda kagoni lolebira, lalu gilibu nga. Tigua nde pagebibi karu ha do hagane anda bu hinu helarimidagoni, lene. ✧

<sup>47</sup> Horo bibahendengi Yasu ibu Anduane Homogonaga andaha howa mana lawai halu haga hene. Ani lawai halu henego loma binigo mo miaga haguane hearumebi Mana lowinigo lawai haga hearumebi wali agali haru haga hearumebi Yasu homelo bole manda bialu hene. ✧ <sup>48</sup> Ani manda bu hearia wali agali bu hearume Yasuhanda mana lawai hayago bi mbira hale nahe holigo bayuwa hale ho ibaabo hayagola tigua Yasu bolene henge handa walia nahe hene. ✧

✧ **19:30:** Md 21.2-3, Mg 11.2-3 ✧ **19:32:** Lg 22.13 ✧ **19:35:** 2 Kin 9.13, Md 21.7, Mg 11.7, Yo 12.14 ✧ **19:36:** 2 Kin 9.13, Md 21.8 ✧ **19:38:** Iba 118.26, Lg 2.14, 13.35, Eb 2.14 ✧ **19:40:** Hab 2.11 ✧ **19:41:** Yo 11.35 ✧ **19:42:** Ais 6.9-10, Md 13.14, Lm 11.8 ✧ **19:43:** Ais 29.3-4, Yar 6.3, 6.6, Lg 21.20 ✧ **19:44:** Dan 9.24, Mai 3.12, Md 24.2, Mg 13.2, Lg 1.68, 21.6 ✧ **19:45:** Md 21.12, Mg 11.11, 11.15, Yo 2.14-15 ✧ **19:46:** Ais 56.7, Yar 7.11 ✧ **19:47:** Lg 21.37, 22.53, Yo 7.19, 8.37, 18.20 ✧ **19:48:** Md 21.46, Mg 14.1-2, Lg 20.19

## 20

*Yasu ina hongo yu kegoni aiwa ngiyabe, lenego ogo  
(Madiu 21.23-27, Maga 11.27-33)*

<sup>1</sup> Horo mbirungi Yasu ibu Anduane Homogonaga andaha howa wali agali berearuhondo bi mana lawai halu Bi Mana Debene lamialu howabi loma binigo mo miaga haguane hearubi Mana lowinigo lawai haga hearubi agali ala hene miniwi hearubi ti mandagi ibuwa tigua <sup>2</sup> Yasuhondo lalu, Mbirale uruni ina bialu kegoni bialu habelo hongo aiwa ngiyane berebe. Ogoni bibelonaga hongo ogoni aiwa ngiyabe. Ogome ngiya lalu ina hale holomaya langi, lene.✧

<sup>3</sup> Ani layagola Yasuhanda tihondo lalu, Ina bi mbira tihondo hale harogo <sup>4</sup> Yonehanda baboraya binigo bulene hongo miyago Ngode Datagaliwabeha tawebe be agaliha tawebe langidaba, lene.

<sup>5</sup> Ani layagola agi ladai bimabe lowa tini dege dege laga laga bialu lalu, Iname Ngode Datagaliwabeha tawe larimayagua o Yonehanda mana langiyago yu tiga nabi harimidago agibe lolebira. <sup>6</sup> Iname agaliha tawe larimayagua wali agali o biru ngaru tigua Yone ibu Ngode Datagaliwabenaga mana latagi haga hayago lagago ina homelo toleme bolebiru, lene.✧ <sup>7</sup> Aniyagola tigua ladai bialu, Ina manda nabioire kama, lene.

<sup>8</sup> Ani layagola Yasuhanda tihondo lalu, Anidago nde ina mbirale uruni berogo buliya hongo ngiyadago ogoha tawe nalangulebero, lene.

*Bi yobage lowa, Gerebi mabu hondo halimu, laya lenego ogo  
(Madiu 21.33-46, Maga 12.1-12)*

<sup>9</sup> Ani lowa Yasuhanda bi yobage ogo wali agalihondo lamini. Agali mbirame pu mbira lini daga mini gerebi dewa hongo dugu dugu bini. Ani buwa ibugua agali maruhondo lalu, Mabu biabe bia halu hondo ha halimu, lalu ibuni dindi mbiraha pu wahalu pene.✧

<sup>10</sup> Gerebi lini biago dolene tu hayagola mabu anduane biagome ibunaga garabaya biabe ale bia haga mbiralihondo, Inaga mabu hondo ha haga karuhondo, Lini maru do ngidaba, lole pu, lene. Ani laya handala ibu lole piyagola hondo ha haga biarume garabaya biabe ale bia haga biago minu balu mbira nayiore dai bilene.✧ <sup>11</sup> Ani biyagola mabu anduane biagome lone ibunaga garabaya biabe ale bia haga mendehondo, Pu, layagola hondo ha biarume mege taraore bialu minu balu mbira nayiore dai bilene. <sup>12</sup> Ani dege biyagola mabu anduane biagome ibunaga garabaya biabe ale bia haga tebonehondo, Pu, lene. Piyagola mabu hondo ha haga biarume ibu minu ba dege buwa tagirahayagi ba tagi hene. <sup>13</sup> Ani biyagola mabu anduane biagome, Ai nde agi buabe, lowa, ini igini ina gubaliniore ho kogonigohondo, Pu, larogola tigua ibu mitangi bialu ibuhondo tigatiga bulebira manda bido, lene. <sup>14</sup> Ibu igini biago piyagola hondo ha haga biarume ibu hondowa tigua lagalaga bialu lalu, Mabu anduane biago iginiore ogonigo ai ibunaga paluni ina karulamiya homelo bama, lowa <sup>15</sup> tigua mabu tagirahayagi minu ba tagi howa homelo bene, lene.

Ani lowa Yasuhanda tihondo lalu, Ani biyago mabu anduane biagome ibu mabu hondo ha haga biaruhondo agi bulebira. <sup>16</sup> Ibugua ibuwa hondo ha haga biaruni bibahende homelo bai howa mabu ogoni marume hondo ha helo mulebira, lene.

Wali agali biru wiarume bi ogoni hale howa tigua lalu, Ani bibe naheore, lene.

<sup>17</sup> Ani layagola Yasuhanda ti handaya howa lalu, Anidago Anduane Homogonaga mbugani bi ogo lo ngago irane agi lowa lo ngabe.✧

Ege tole mbira anda biagame galone nabibehedago lowa dabo wahenego ege tole ogoniore mo timbuni duniniore ho heleda,

✧ 20:2: Ab 4.7, 7.27 ✧ 20:6: Md 14.5, 21.26, Lg 7.29 ✧ 20:9: Ais 5.1 ✧ 20:10: 2 Bit 36.15-16 ✧ 20:17: Iba 118.22, Md 21.42

lalu gilibu nga. <sup>18</sup> Ege tole ogo ngagoriani wali agali pilo paga hararu tole ogonime ti bibahendeore budu бага bu waholebira. Ani buwa ege tole ogonime mbiralini podo dambi hayagua dambu mberegedo waholebira, lene.✧

*Dagisi muni mulene ngabe nawibe, lenego ogo*

*(Madiu 22.15-22, Maga 12.13-17)*

<sup>19</sup> Mana lowinigo lawai haga hearumebi loma binigo mo miaga haguane hearumebi Yasuhanda bi yobage ogoni layagonaga ti mitangi bialu layago manda buwa minule bialu hearia wali agali dewa bu hea handala gi howa wahene.✧ <sup>20</sup> Tigua ibu minulene henge agiha ngabe hondole tai dege bialu hene. Tigua agali maru hearuhondo lalu, Muni ngulumaya agali tigatiga hetingi ho yalu puwa Yasuhanda mbira agiore ladai birabe hondole baya hangu hale ho howa Lomonaga haru haga hongoyi kagohondo minu mimiya bi ogo ibuhondo hale hole pudaba, lene.✧ <sup>21</sup> Ani laya handala agali ohe biarume puwa Yasuhondo lalu, Lawai haga-o iname manda bialu hemaria ina bi lar-iligobi mana lawai hariligobi tigatigaore larili. Ani buwa iname manda bialu hemaria ina agali mini timbuniwi hongohe karu hondowa gi nahe Ngode Datagaliwabehanda hame ledago mana wali agalihondo lawai hariligo tigatigaore larili. <sup>22</sup> Ai bi mbira langibelo inanaga Mana lowini ngago manda bialu Lomonaga Kini kagohondo iname dagisi muni mulumabe be namulumabe, lene.

<sup>23</sup> Ani layagola Yasuhanda tinaga miniha yageyage palu howa layagoni manda buwa tihondo lalu, <sup>24</sup> Muni kuni mbira i hondoliya walia hadaba, lene. Walia hayagola ibugua tihondo lalu, Muni kuni ogoriani dengui muguni ngagobi mini gili bu ngagobi ainagadabe, lene.

Tigua ladai bialu, Lomonaga Kini kagonagada, lene.

<sup>25</sup> Ani ladai biyagola Yasuhanda lalu, Anidago mbirale Lomonaga Kini kagonaga ngago nde ibunihondo milimu. Mbirale Ngode Datagaliwabe kagonaga ngago nde ibunihondo milimu, lene.✧

<sup>26</sup> Ani layagola agali biarume bi o layagoria wali agali hearu wanakuini mo paga howa minabe naheyagola bi ladai biyago hale howa ema nabi ne ndogolo hinu hene.

*Homenego agua heyuledabe, lenego ogo*

*(Madiu 22.23-33, Maga 12.18-27)*

<sup>27</sup> Sadiusi agali hearume wali agali homeneru naheyulebira lagane maru hearume Yasu hearia ibuwa lalu,✧ <sup>28</sup> Lawai haga-o Mosesehanda mana mbira ina bulumayanaga gili bu wini ngago ogo. Agali mbira waneigini nahe one dalo berelalu homayagua homayago hameneme wali dalo biago aribia howa waneigini homayagonaga hono wia holene nga, lo nga.✧ <sup>29</sup> Anigo igiri karia hamenema howa wahenegome wali mbira dabu bu howa waneigini nahe heaore homene. <sup>30</sup> Homayagola ibula pagu bini biagome dabu bu aribia howa waneigini nahe heaore dege homene. <sup>31</sup> Ani biyagola tebonegome dabu buwa ani bima pu gimbu bialu igiri karia biarume wali o biago dege dabu buwa waneigini nahe heaore homai hene. <sup>32</sup> Ani bialu maniore wali biago homa maro bini. <sup>33</sup> Ani binigo igiri karia biaru bibahendeme wali o biago dege dabu biyago horo mbiru homeneru mo heya harangi wali biago agonaga one birulebirabe, lene.

<sup>34</sup> Anidagua layagola Yasuhanda tihondo ladai bialu lalu, Wali agali ayu ka tagi dabu bialu kagonigo <sup>35</sup> wali agalibi mini tigabi howa homeneru mani holeneha hole mo heya harangi wali agali dabu bulene nawiore ndobe. <sup>36</sup> Ti dahuliyali nahomaga karu ale dege holebira. Ti homayagoria howa mo heya hayago ti Ngode Datagaliwabenaga waneigini holebira.✧ <sup>37</sup> Ani buwa Mosesehanda baya hanguore walia howa lalu, Wali

✧ 20:18: Ais 8.14-15, Dan 2.34-35, Md 21.44 ✧ 20:19: Md 21.46, Mg 14.1-2, Lg 19.47-48 ✧ 20:20: Lg 11.54  
 ✧ 20:25: Md 22.2, Mg 12.17 ✧ 20:27: Md 22.21, Mg 12.18, Ab 23.8 ✧ 20:28: Man 25.5 ✧ 20:36: Lm 8.23, 1  
 Ko 15.42, 15.49, 15.52, 1 Yo 3.1-2



agali homeneru mo heya holene nga, lowini. Anduane Homogonaga mbugani ira mbira delo hungu biyagonaga bi te lo ngago Mosesehanda lalu, Anduane Homogo kago ibu Abarahama Aisaga Yagaba imarunaga Ngode Datagaliwabe kagoni, lenego gilibu nga. ✧ <sup>38</sup> Ani lenego ibu wali agali holenehe kagonaga Ngode Datagaliwabe kagoni homenenaga ndo kago ti bibahende homa nabi hai kagoni Ngode Datagaliwabehanda manda biaga ka, lene. ✧

<sup>39</sup> Ani ladai biyagola Mana lowinigo lawai haga maru hearume lalu, Lawai haga-o bayaleore ladai biri, lene. <sup>40</sup> Yasuhanda bi ani layago hale howa Sadiusi agali biarume bi maru hale holene gi howa la nabi wahene.

*Mbirali Dabo Helenego ibulebira lowinigonaga hale henego ogo*  
(Madiu 22.41-46, Maga 12.35-37)

<sup>41</sup> Yasuhanda tihondo lalu, Mbirali Dabo Helenego ibulebira lowinigo ibu Debidinaga aguanene holebira lagago agua hole biarube. <sup>42-43</sup> Ogoninaga nde Debidiibunime Iba Gana mbugani lo ngago ogo, ✧

Anduane Homogohanda inaga Anduane Homogohondo lalu, Inaga waitigi karu inaga geni malia ho wilo ina mo malia heloliya inaga gi tighayagi ogoria birabe, lene.

<sup>44</sup> Debidihanda ibuhondo Anduane Homogo layagobi Mbirali Dabo Helenego ibulebira lowinigo ibu Debidinaga aguanene hayagobi mbiraore agua habehebe, lene.

*Yasuhanda, Mana lowinigo lawai haga karu de hondo halimu, lenego ogo*  
(Madiu 23.1-36, Maga 12.38-40)

<sup>45</sup> Wali agali bu hearume ibugua bi layago hale ho heagola Yasuhanda ibunaga talima piaga biaruhondo lalu, <sup>46</sup> Mana lowinigo lawai haga karu de hondo halimu. Tigua aga lu karulalu ibaga bialu magedi hamani wali agalime ti hondowa tinaga mini yaraga helobi ngoai hagane andaruha puwa agali hagianerunaga biraganeni hangu birulebi wali agali dewa tomo mandagi nole ngoai haragola tomo anduane heba birulebi hame laga ka. ✧ <sup>47</sup> Ani buwa tigua wali dalo bedarunaga andaga mbirale ngaru mo kayu biaga howa wali agali mo hondo hole Ngode Datagaliwabehondo bime dege bi lu la ho wiaabo haga ka. Ani biragonaga pani timbuniore mia tago howa mulene nga, lalu lene.

## 21

*Wali dalo mbirame muni winigo ogo*  
(Maga 12.41-44)

<sup>1</sup> Yasuhanda handa ai nai bigi bialu hearia agali homogo hearume Anduane Homogonaga andaha muni wiagani muni wialu hearia hendene. ✧ <sup>2</sup> Ani buwa wali dalo mbirame muni emeneore kuni kira toea mbira ale ibira halu hearia ibu de handa dege bini. <sup>3</sup> Ani hondowa ibugua lalu, Ina ti langerogo marume muni wiyaru emene lowa wali dalo yagibano ogome muni dewaore wiya. ✧ <sup>4</sup> Marume homogoore howa maru tale buwa wiya. Wali dalo yagibano ogome mbira nayiore biruwa ibu tomo yolo bule yinigo bibahendeore wiai haya, lene.

*Yasuhanda, Anduane Homogonaga anda giallo waholebira, lenego ogo*  
(Madiu 24.1-2, Maga 13.1-2)

<sup>5</sup> Yasunaga talima piaga marume Anduane Homogonaga anda handaya howa lalu, Anda baya buruguleore ege tole timbuni hongoheme bidagoda. Mo yari bia karubi Ngode Datagaliwabehondo turu halu bame minida, lene. Ani layagola Yasuhanda lalu, <sup>6</sup> Mbirale uru tigua hendedamigo ege tole wia gimbu gimbu bima iraga karuni horo

✧ 20:37: Har 3.6 ✧ 20:38: Lm 6.10-11, 14.8-9 ✧ 20:42-43: Iba 110.1 ✧ 20:46: Md 23.5, Lg 11.43 ✧ 21:1: Mg 12.41 ✧ 21:3: 2 Ko 8.12

mbira ibulebirago ibirangi homane mbiraore winidagoria ngeladai nabi bibahendeore gialo ibira ibira biai holebira, lene.✧

*Mo ko holenebi mo tandaga holenebi wulebira, lenego ogo  
(Madiu 24.3-14, Maga 13.3-13)*

<sup>7</sup> Ibunaga talima piaga biarume lalu, Lawai haga-o ogoni angi bulebiragonaga ina langibe. Iname ala agi birane hondowa henge karulolene horo ha para hayada lolomabe, lene.

<sup>8</sup> Yasuhanda ladai bialu lalu, Marume tí mo hondo holigo mamage holene nga. Agali dewaoreme inaga mini lalu, Mbirali Dabo Helenego ibulebira lowinigo i íbu kogoni, lalubi, Horo ha para haya, lalubi ibulebira. O laragoni hale nahalimu.✧ <sup>9</sup> Wai timbuni tara tara bira, laragolabi, Dindi mbiraoreni talebu ki buwa mo ko hara, laragolabi hale howa gi nahalimu. Mbirale uruni ala ani bia bulebirago ani laragome horo hamaro bulene kawareore nga lalu ndo larago gi nahalimu, lene.

<sup>10</sup> Ibugua laabo halu lalu, Dindi mende mendela wai bia ai nai bialu gabumane tara tarala wai bia ai nai bialu holebira.✧ <sup>11</sup> Dumbirumbi emene ndoore mo ko howa bialubi hina gari timbuniore pialubi warago timbuni ba gimbu bialubi dindi bibahendehe bulebira. Nahendene alebi mo gi timbuni holene tara tarabi hariha howa ibulebira. <sup>12</sup> Uruni nabi howa marume tí minalu mo tandaga holebira. Ani buwa godi lole ngoai hagane andaruha minu yu puwa garabaya andaha helolebira. Ani buwa inaga mini yu tiga bu kamigo kini karubi gabumane haru haga karubi karia tí haru pu helolebira.✧ <sup>13</sup> Ogoningi Bi Mana Debene lamilimulonaga henge wulebira. <sup>14</sup> Minu yalu poragola miniha mbira agi ladai buledabe lolenaga ala mini dege dindi ho nahalimu.✧✧ <sup>15</sup> Irane ina tinaga ne hambuha howa bi lolenebi miniha manda bulenebi ngerogola tí waitigi karume bi ogoni mo wahabi hale nahabi nabulebira.✧ <sup>16</sup> Tinaga aba aiyalamebi hamenemebi damenemebi nenegemebi agali maruhondo tí minu mialu tí maru homelo bolebira.✧ <sup>17</sup> Tigua inaga mini yu tiga bu kamigo hondowa wali agali bibahendeme tí handa tara holebira.✧ <sup>18</sup> Anigo tinaga hagianeni mandari kamigo homane mbiraoreorebi tongolo wa naholebira.✧ <sup>19</sup> Tí hongo howa ema nabi ho ununu lowa tını pele mialu holeberami, lene.✧

*Yasuhanda, Yarusaleme mo ko holebira, lenego ogo  
(Madiu 24.15-21, Maga 13.14-19)*

<sup>20</sup> Tigua handalu kamira ami agali dewaoreme Yarusaleme ho mabu bu karia hondowa mo ko holene kaware wiarua manda bilimu.✧ <sup>21</sup> Ani buwa Yudiani karume hari hambene ngaruha hondo yalu gerai polene wulebira. Yarusaleme ogoriani padarume ibida piai holene wulebira. Ani buwa dindi udura amura ale padarume Yarusaleme ogoniha anda ibulene nawulebira. <sup>22</sup> Ogonigo horo uruni Pani Nolene Hororu wiragola Anduane Homogonaga mbugani bi lo ngadagua lola holebira.✧ <sup>23</sup> Horo uruningi wali gali bere bedarubi gali andu mialu bedarubi dara timbuniore holene nga. Ani buwa dindi ogoria mo ko holene timbuniore ibira halu Ngode Datagaliwabehanda wali agali uruni pani nelu wia holebira.✧ <sup>24</sup> Ani buwa wali agali maru wai bulene ayu tibume bo wahai halu wali agali maru garabaya wali agali haru poradagua bialu dindi tara tararu kaundiaoreha haru polebira. Ani buwa Ngode Datagaliwabe manda nabi hope hene karume Yarusaleme karulo halu Ngode Datagaliwabehanda horo hairi holene pongo bo winingi hairi helo helolebira, lene.✧

✧ **21:6:** Md 24.2, Mg 13.2, Lg 19.44 ✧ **21:8:** Md 24.4-5, Mg 13.5-6, Eb 5.6, 2 Te 2.3 ✧ **21:10:** Md 24.6-7, Mg 13.7-8 ✧ **21:12:** Md 24.9, Mg 13.9 ✧ **21:14:** Md 10.19, Mg 13.11 ✧ **21:14:** Lg 12.11-12 ✧ **21:15:** Ab 6.10 ✧ **21:16:** Mai 7.6, Md 10.21-22, Mg 13.12, Ab 7.59, 12.2 ✧ **21:17:** Md 10.22 ✧ **21:18:** 1 Sml 14.45, Md 10.30, Lg 12.7 ✧ **21:19:** Md 10.22, 24.13, Hi 10.36 ✧ **21:20:** Md 24.15, Mg 13.14 ✧ **21:22:** Man 32.35, Yar 5.29, 46.10, Dan 9.26-27, Hos 9.7 ✧ **21:23:** Md 24.19, Mg 13.17, 1 Ko 7.26 ✧ **21:24:** Esr 9.7, Iba 79.1, Ais 63.18, Lm 11.25, Mo 11.2

*Agali Hole Ibiyago lone ibulebira lenego ogo*  
(Madiu 24.29-31, Maga 13.24-27)

<sup>25</sup> Ani lowa Yasuhanda laabo halu lalu, Ninibi egenibi yapibiyani manane tara nahendene ale bulebira. Ani biragola dindini howa iba solowara timbuniore bedagome talā amu nana bima u lama ibiragola wali agali bibahende dindi tara tarani karume mogo taraore lowa gi timbuni holebira. ✧ <sup>26</sup> Hari daligaha hongo haga karu tarame mo ema bia haragola wali agalime hondowa dindi bibahendeha agua bulubadabe lowa gi halu mogo timbuniore lowa odo pebe bulebira. <sup>27</sup> Ani biragola Agali Hole Ibiyago hongo timbuniore holenebi wá taraore holenebi heba hari beralibaha ha pani halu ibulebira. ✧ <sup>28</sup> Mbirale uruni tongo hinalu biragola tígua heyalu handa daga ho halimu. Irane tínaga pele mulene abale ha para haragoni, lene. ✧

*Yasuhanda pogenaga te lenego ogo*  
(Madiu 24.32-35, Maga 13.28-31)

<sup>29</sup> Ani lowa Yasuhanda bi yobage ogo tihondo lamialu lalu, Poge kagobi ira maru karubi manda bilimu. <sup>30</sup> Yuni gahenge mabirago hondowa ni poboyogobi dolene tu kawareda manda beramili. <sup>31</sup> Ogonidagua dege tígua mbirale uruni bigi biragola handalu kamiria Ngode Datagaliwabenaga Handame Ho Holene áyu dege ibulebira manda bilimu.

<sup>32</sup> Ogoninaga tí manda biaabo halimulo wali agali áyu kamiru nahome ogobi dege dege kamiore mbirale uruni bibahende bulebirago laro. <sup>33</sup> Hari daligabi dindibi ereba hai holebira. Inaga bi mana dege ereba nahe wiaabo holebira, lene. ✧

*Mamage howa de hondo holene nga, lenego ogo*

<sup>34-35</sup> Mamage howa de hondo holene nga. Tomo timbuni dawa naabo halubi iba na gimbu biaabo halubi dindini mbirale ngaru mo te te hangu bialubi nahalimu. Ani bialu harimiyagua Horo ogoni tagira ibirangi gono ngagoha poragola dagadagua ti abale doligo. Horo ogoni wali agali dindi bibahendeha kagoria tagira ibulebira. ✧ ✧ <sup>36</sup> Urunidagua biragola horo bibahendengi tígua bayuwa hongo ho holebi Agali Hole Ibiyago deni holebi mamage howa Ngode Datagaliwabehondo bi laabo halu holene nga, lene. ✧

<sup>37</sup> Horo uruni bibahendeni Yasu ibu Anduane Homogonaga andaha mana lawai halu biraabo howa alendo haya handala Hari Olibe weagoria puwa mbiraga ogoniha palima piaga hene. ✧ <sup>38</sup> Wali agali bibahende hearume horo bibahendengi egerebagiore Yasuhanda bi mana lawai hayago hale hole Anduane Homogonaga andaha ibaabo haga hene.

## 22

*Yasu homelo bole manda manda binigo ogo*  
(Madiu 26.1-5, Maga 14.1-2, Yone 11.45-53)

<sup>1</sup> Mberedi Yidi Nahe Hirinigo Horonagabi Bolangua Halu Penegonaga Horonagabi kaware wini. ✧ <sup>2</sup> Ogoningi loma binigo mo miaga haguane hearumebi Mana lowinigo lawai haga hearumebi wali agali dewa bu heagola gi howa tigua ohowa Yasu bo donge hole henge tai bialu hene. ✧

*Yudasahanda Yasu ndelole penego ogo*  
(Madiu 26.14-16, Maga 14.10-11)

✧ **21:25:** Iba 46.2-3, 65.7-8, Ais 13.10, Ese 32.7, Yol 2.31, Md 24.29, 2 Pi 3.10-12, Mo 6.12-13 ✧ **21:27:** Dan 7.13, Md 24.30, 26.64, Mo 1.7, 14.14 ✧ **21:28:** Lm 8.19, 8.23, 13.11 ✧ **21:33:** Iba 102.26-27, Ais 40.8, Lg 16.17, 1 Pi 1.25 ✧ **21:34-35:** Md 24.48-50, Mg 4.19, Lg 17.27, Lm 13.13, 1 Te 5.3, 5.6, 1 Pi 4.7 ✧ **21:34-35:** 1 Te 5.2, 2 Pi 3.10, Mo 3.3, 16.15 ✧ **21:36:** Md 24.42, Mg 13.33, Lg 18.1, Eb 6.13, Mo 6.17 ✧ **21:37:** Lg 19.47 ✧ **22:1:** Har 12.1-27 ✧ **22:2:** Iba 2.2, Lg 20.19, Ab 4.27

<sup>3</sup> Ani biyagola Yasunaga talima piaga hombeanego Yudasa ibu mini mende Isagariodo laga henego ibuha dama Heyolabe anda pene.✧ <sup>4</sup> Ani piyagola Yudasahanda loma binigo mo miaga haguane hearubi Anduane Homogonaga anda mamage hagarunaga haru haga hearubi hearia puwa ti baba bi lalu, Ina Yasu aguaore berogola minalimu, lowa ndelalu hene. <sup>5</sup> Ani layagola agali biarume turu taraore howa tigua, Muni ngulumaya, layagome Yudasanaga mini bamini.✧ <sup>6</sup> Ani buwa ndelo waho ngelalu puwa Yudasahanda wali agalime nahendedaha tihondo Yasu minu mule lowa henge aguaore ngabe hondole tai bialu hene.

*Bolangua Halu Penego Horonaga tomo nole Yasuhanda manda manda binigo ogo (Madiu 26.17-25, Maga 14.12-21, Yone 13.21-30)*

<sup>7</sup> Mberedi Yidi Nahe Hirinigo Horonaga uruni mbirangi Bolangua Halu Penegonaga nogo sibi iginiru bolene tu hene.✧ <sup>8</sup> Ani hayagola Yasuhanda Pida Yonelahondo lalu, Bolangua Halu Penego Horonaga tomo ina nolomaya dawa manda manda bu wule pudaba, lene.

<sup>9</sup> Ani layagola libugua ladai bialu lalu, Agoha dawa wule pudaba laribe, lene.

<sup>10</sup> Ibugua lalu, Yarusalemeha anda pialu kabiria agali mbira iba be payani yalu pialu karia lola holeberabigo agali ogoni ibu anda poradagua anda pilibu. <sup>11</sup> Anda pu howa anda ogoni anduanehondo agua lalibu, Lawai haga kagome ihondo lalu, Inaga talima piaga karubi ibi iname Bolangua Halu Penego Horonaga tomo nolomaya anda hobane mbira agoha ngabe, laya lalibu. <sup>12</sup> Ani larabigola ibugua anda hobane mbira daligaha ngago dagia manda bu winigo walia holebirago ogoriani tomo dawa manda manda bu wilibu, lene.

<sup>13</sup> Ani laya handala libu pialu hebiria mbirale bibahendeore Yasuhanda agua bulebira layadaguaore bu wiai hearia hondowa libugua Bolangua Halu Penegonaga tomo nole dawa manda manda bu wini.✧

*Anduane Homogonaga tomo nenego ogo (Madiu 26.26-30, Maga 14.22-26, 1 Korindi 11.23-25)*

<sup>14</sup> Tomo nolene tu hayagola Yasu ibu biragane dagiani ibunaga abosolo agali biaru heba tomo nole berene. <sup>15</sup> Ani biruwa Yasuhanda tihondo lalu, I tandaga nane howa ti heba Bolangua Halu Penego Horonaga tomo ogo ala nole hame timbuni lalu haru. <sup>16</sup> Ogoninaga ti langerogo ina ayu narogonidagua lone nane Ngode Datagaliwabehanda Handame Ho Kagoriani howa ogoninaga galone lola harangi nolebero, lene.✧

<sup>17</sup> Ani lowa Yasuhanda iba be yamuwa Ngode Datagaliwabehondo turu halu kai lowa lalu, Ogo yamuwa tinime no gombedaga bidaba. <sup>18</sup> Ina ti langerogo waini iba ayu o narongi howa nane kone Ngode Datagaliwabehanda Handame Ho Kagola howa nolebero, lene.

<sup>19</sup> Ani lowa ibugua mberedi mbira yamuwa Ngode Datagaliwabehondo turu halu kai lowa gaibu бага buwa tihondo mialu howa lalu, Inaga tingini ogonigo ti pele ngialu ngerogo. Ogoni nalu howa i mitangi bialu nalimu.✧ <sup>20</sup> Mberedi ogoni nai howa ogonidagua dege ibugua iba be yamialu howa lalu, Be ogoniha bedago Ngode Datagaliwabehanda habo nalolene bi gahenge lowinigo tene inaga daramaha nga. Inaga darama ogoni tinaga pela harogoni.✧

<sup>21</sup> Anigo mbirali i minilo ndelalu walia holebirago i bedogoria tomo nalu bedagonigo de handadaba.✧ <sup>22</sup> Ngode Datagaliwabehanda manda bu winidagua Agali Hole Ibiyago homolebira. Ibu minilo ndelalu walia haragome ibunaga mo ko holene timbu gibiore wulebirago dara holene nga, lene.✧

✧ 22:3: Md 26.14, Mg 14.10, Lg 4.13, Yo 13.2, 13.27 ✧ 22:5: Seg 11.12 ✧ 22:7: Har 12.1-27 ✧ 22:13: Lg 19.32  
 ✧ 22:16: Lg 13.29, 14.15, Ab 10.41, Mo 19.9 ✧ 22:19: Md 26.26, Mg 14.22, Lg 24.30, 1 Ko 11.24 ✧ 22:20: Yar 31.31-34, 1 Ko 10.16 ✧ 22:21: Iba 41.9, Md 26.21-23, Mg 14.18, Yo 13.21-22, 13.26 ✧ 22:22: Md 26.24, Ab 2.23, 4.28

<sup>23</sup> Ani layagola tini dege dege la ai nai bialu lalu, O bulebira layagoni a bedagome bulebira layabe, lalu berene.✧

*Yasunaga talima piaga biarume, Bolangua ho kago aibe, lowa lai lenego ogo*

<sup>24</sup> Talima piaga biarume lai lalu howa, Ina bolangua hole haruago aibe, lalu hene.✧  
<sup>25</sup> Ani lalu heagola Yasuhanda tihondo lalu, Wali agali tara taranaga kini karume hongo yu howa handame haga ka. Ani buwa wali agali haru haga karu ti mini Wali Agalinaga Biamogo Biagaru laga ka.✧✧ <sup>26</sup> Anigo tigua ogonidagua holene nawiore. Tí kamigoni mbiralime bolangua ho kagome mo heyogone ale ho holene nga. Ani buwa haru haga kagome biabe bia hagane ale ho dai bulene nga.✧ <sup>27</sup> Timbuni kago aibe. Mbirali birape howa tomo nalu bedagodabe be ibu tomo nelo mo yu tono bialu kagodabe. Mbirali birape howa tomo nalu bedago ibuore timbuni kagoda. Anigo i tí baba mandagi howa biabe bia hagame kagodagua kogoni.✧

<sup>28</sup> I tandaga nalu harungi tí i heba haabo harimigoni.✧ <sup>29</sup> I Abahanda handame ho holenenaga hongo ihondo ngiyagobi ina nde tihondo ogonidagua dege ngulebero.✧  
<sup>30</sup> Ani buwa ina Handame Ho Holene ngagoria howa inaga dagiani tigua tomo ibabi nalu biruleberami. Ani buwa tigua haru hagane biraganeni biruwa Isaraele hameigini homberiaru (12) haru holeberami, lene.✧

*Yasuhanda Pidahondo, Ina i manda nabido lolebere, lenego ogo*  
*(Madiu 26.31-35, Maga 14.27-31, Yone 13.36-38)*

<sup>31</sup> Saimono-o Saimono-o ina hale habe. Tomo hangaga agalime ladi ale mini widi bogabidagola lini aeanela mo talebu ki biagadagua dama Heyolabeme tí bibahende ko bayalela talebu ki helo Ngode Datagaliwabehanda ibuhondo henge mini.✧ <sup>32</sup> Ani biragola ina mini mbiraore wu kego hado wa nahabelonaga ina Ngode Datagaliwabhondo inaga bi la halu ko. Ani buwa i kogoria daibu howa ina talima piaga maru karu mo hongooore habe, lene.✧

<sup>33</sup> Ani layagola Pidahanda ladai bialu lalu, Anduane Homogo-o i garabaya andaha poredagua pialu homaredaguabi mandagi homabiyaore manda bu kogoni, lene.✧

<sup>34</sup> Ani layagola Yasuhanda lalu, Pida-o ihondo langerogo áyu mbiraga ega gogologome bi naledaha halu teboore ina i manda nabido lolebere, lene.✧

*Muni pauyibi nubi wai bulene ayu tibubi yu holenenaga ogo*

<sup>35</sup> Ani lowa Yasuhandaibunaga talima piaga biaruhondo lalu, Ina tí bi mana lawai hama pilimulo tigua muni pauyibi nubi ge subi nayi pilimu larungi mbirale mbira buru palu harimibe, lene.✧

Tigua ladai bialu, Naburu paleore harima, lene.

<sup>36</sup> Yasuhanda lalu, Anidago áyu ogoni mbiralime muni pauyibi nubi yidago yalu polene nga. Ani buwa mbiralime wai bulene ayu tibu nayi kayagua ibuninaga dagare tingiliya bidagome yolo muwa mbira yolo bulene nga.✧ <sup>37</sup> Ogoninaga ina tihondo langerogo Anduane Homogonaga mbugani lo ngago ogo, Ko biagame pani nalu homagadagua ibuguabi homolebira, lalu gilibu ngadagua i mitangi bialu lola holeneore nga. Irane i mitangi bialu bi gilibu ngadagua áyu lola haragoni, lene.✧

<sup>38</sup> Ani layagolaibunaga talima piaga biarume lalu, Anduane Homogo-o iname wai bulene ayu tibu kira yidamago handarene, lene.

Ibugua lalu, Ogoni karulape, lene.

✧ 22:23: Md 26.22, Yo 13.22, 13.25 ✧ 22:24: Md 18.1, Mg 9.34, Lg 9.46 ✧ 22:25: Mg 10.42-45 ✧ 22:25: Md 20.25-27, Mg 10.42-44 ✧ 22:26: Md 23.11, Mg 9.35, Lg 9.48, 1 Pi 5.3 ✧ 22:27: Md 20.28, Lg 12.37, Yo 13.12-15, Pb 2.7 ✧ 22:28: 2 Ko 1.7, 2 Ti 2.12, Hi 4.15 ✧ 22:29: Lg 12.32 ✧ 22:30: Iba 49.14, Md 19.28, 1 Ko 6.2, Mo 3.21 ✧ 22:31: Amo 9.9, 2 Ko 2.11, 1 Pi 5.8 ✧ 22:32: Iba 51.13, Yo 17.9-11, 17.15, 17.20, 21.15-17 ✧ 22:33: Lg 22.54 ✧ 22:34: Md 26.34, Mg 14.30, Yo 13.38 ✧ 22:35: Md 10.9-10, Mg 6.8-9, Lg 9.3, 10.4 ✧ 22:36: Lg 22.49 ✧ 22:37: Ais 53.12, Mg 15.28, Lg 22.52



*Yasu Hari Olibe weagoria Ngode Datagaliwabela bi lalu henego ogo  
(Madiu 26.36-46, Maga 14.32-42)*

<sup>39</sup> Yasu ibu Yarusalemeni howa abale piagadagua pialu Hari Olibe weagoaha pialu howaibunaga talima piaga biaru ibu heba pene.✧ <sup>40</sup> Ti hari weagoria anda pu howa Yasuhanda ibunaga talima piaga biaruhondo lalu, Ko ngagome tí ko mo bia holigo Ngode Datagaliwabehondo bi lalu halimu, lene.✧

<sup>41</sup> Ani lalu Yasu ibu ti helalu ibuni hangu amura mbiraha ege tole agima ba amu haralidagua puwa ge duli hanga ho biruwa ibugua Ngode Datagaliwabela bi lalu, <sup>42</sup> Aba-o tandaga nolene beha ngago nanoliya mo yalu polene ngayagua mo yalu pobe. I hame ledodagua ndo í hame lededagua hangu bibe, lene.✧ <sup>43</sup> Ani lalu berearia dahuliya andaga howa dahuliyali mbirame ha pani howa ibu mo hongo hene. <sup>44</sup> Ibu mini burugu lowa tibalua howa bede labeheore howa donge halu hongo howa Ngode Datagaliwabela bi layagola tingini poboyogo bialu pingitigi darama ale dindini bondolope hene.✧

<sup>45</sup> Ibu Ngode Datagaliwabela bi lai halu talima piaga biaru birayagoria dai bialu hearia tini dara timbuniore hayagome palia hondo hearia hendene. <sup>46</sup> Hondowa ibugua tihondo lalu, Agi bialu padamibe. Ko ngagome tí ko mo bia holigo heyuwa Ngode Datagaliwabehondo bi lalu hadaba, lene.

*Yasu mininigo ogo*

*(Madiu 26.47-56, Maga 14.43-50, Yone 18.3-11)*

<sup>47</sup> Yasuhanda ibunaga talima piaga biaru heba bi lalu hearia ibunaga talima piaga hombeane Yudasa henegome agali dewa haru halu ibini. Yudasa ibu abale ibuwa Yasunaga peni nunu lole ibini.✧ <sup>48</sup> Ani ibiyagola Yasuhanda Yudasahondo lalu, Agali Hole Ibiyago minule beramidago ani nunu lowa minule beramibe, lene.

<sup>49</sup> Ibutaga talima piaga ibu heba hayarume ogo aleore bulubada manda buwa Yasuhondo lalu, Anduane Homogo-o ina wai bulene ayu tibu yidamagome agi bulumabe, lene.✧ <sup>50</sup> Ani lowa ti mbiragome loma binigo mo miaga haguane timbuni heagonaga garabaya biabe ale bia haga heagonaga hale tigago bagadape hene.

<sup>51</sup> Ani biyagola Yasuhanda lalu, Ogonidagua nabulene, lowa ibugua agali biagonaga hale biago ela howa lone mo heladai bini.

<sup>52</sup> Ani buwa Yasuhanda loma binigo mo miaga hagianerubi Anduane Homogonaga anda mamage hagarunaga haru hagarubi agali ala hene miniwirubi ibu minule íbu hearuhondo lalu, Tigua wai bulene ayu tibu kangoru yalu ibirimidago pageali minaramilidagua minule ibirimibe.✧ <sup>53</sup> I horo bibahende tí heba Anduane Homogonaga andaha haabo harungi mina nabirimi. Anigo áyu ogoni aruma holenenaga hongome bolangua ho kagoni howa bialu harimida, lene.✧

*Pidahanda, Yasu manda nabido, lenego ogo*

*(Madiu 26.57-58,69-75, Maga 14.53-54,66-72, Yone 18.12-18,25-27)*

<sup>54</sup> Tigua Yasu loma binigo mo miaga haguane timbuninaga andaha minu yalu piyagola Pida ibu amuraore howa mayulo handaga bima pene.✧ <sup>55</sup> Ani buwa pabe payanda heago tamuha anda puwa Pida ibu ira deagoria maru bira mabu bu bereagoria mandagi berene. <sup>56</sup> Ani bereago hondowa biabe bia haga wandari mbirame Pida handa kia biaabo howa lalu, Agali o bedagobi Yasula mandagi haga, lene.✧

<sup>57</sup> Ani layagola Pidahanda lalu, Wali í ndo. I mandabi heba nabido hendeni, lene.

<sup>58</sup> Ani layagola emeneore howa agali mbira heagome Pida manda buwa lalu, Íbi ibu heba hariligoni ndobe, lene.

Ani layagola Pidahanda lalu, Agali í ndoya hendeni, lene.

✧ 22:39: Lg 21.37, Yo 18.1 ✧ 22:40: Md 6.13, 26.41, Mg 14.38, Lg 22.46 ✧ 22:42: Md 6.10, Yo 5.30, 6.38 ✧ 22:44: Yo 12.27, Hi 5.7 ✧ 22:47: Md 26.47, Mg 14.43, Yo 18.3 ✧ 22:49: Lg 22.36 ✧ 22:52: Lg 22.37, Yo 7.30, 8.20, Kl 1.13 ✧ 22:53: Lg 19.47, 21.37, Yo 12.27 ✧ 22:54: Iba 31.11, Lg 22.33 ✧ 22:56: Ab 4.13

<sup>59</sup> Ani layagola emene howa agali mbira heagome hongo howa lalu, Agali ogoni Galilialiooredago Yasulaore haga, lene.

<sup>60</sup> Ani layagola Pidahanda lalu, Agali o laregoni agi larebe i tobaho ko hendeni, lene.

Ogonidagua lalu heaore ega gogologome bi lene. <sup>61</sup> Bi layagola Anduane Homogohanda Pida handa kia biyagola Pida ibugua Anduane Homogohanda, Áyu mbiraga ega gogologome bi naledaha halu teboore ina i manda nabido lolebere, ala layago mitangi bu dai bini. <sup>62</sup> Ani mitangi buwa Pida ibu tagira pialu dugu emene ndoore yi lalu dugu bialu hene.

*Tigua Yasu mege bialu benego ogo*  
(Madiu 26.67-68, Maga 14.65)

<sup>63</sup> Agali maru Yasu mamage ho hayarume mege taraore bialu hale toa бага bini.

<sup>64</sup> Ani buwa ibunaga de agame yi howa ibuhondo lalu, Ina manda biade halu i bayagoni ogame la, lene. <sup>65</sup> Ani lowa tigua ibuhondo bi ko dewa laga bini.

*Ganisolo agalirume godi lelo Yasu haru penego ogo*  
(Madiu 26.59-66, Maga 14.55-64, Yone 18.19-24)

<sup>66</sup> Egerebagi ni tagira ibiyagola agali ala hene miniwi hearubi loma binigo mo miaga haguane hearubi Mana lowinigo lawai haga hearubi mandagi mo mogo buwa ti Ganisolo agali hegoria godi lelo Yasu haru ibini. <sup>67</sup> Haru ibuwa tigua Yasuhondo lalu, Mbirali Dabo Helenego ibulebira lowinigo i ibu keyagua ina langi, lene. <sup>\*</sup>

Ibugua ladai bialu lalu, Ina ti langiruyagua tigua ihondo mini mbiraore nawuleberami. <sup>68</sup> Ani lalu ina tihondo bi maru hale haruyaguabi ladai nabuleberami. <sup>69</sup> Tu áyu ogoni howa be lirayagi Agali Hole Ibiyago ibu Ngode Datagaliwabe Hongo Haiheore Kagonaga gi tighayagi birulebira, lene. <sup>\*</sup>

<sup>70</sup> Ani layagola ti bibahendeme ibuhondo lalu, Ngode Datagaliwabe Iginioire i kegonibe, lene. <sup>\*</sup>

Yasuhanda ladai bialu tihondo lalu, Tigua ani larimigoni, lene.

<sup>71</sup> Ani layagola tigua lalu, Lamogo bia holene mbira hame naleore kamagoni. Inaneme ibuni layagoni hale hai ho kama, lene.

## 23

*Yasu Pailate hearia haru penego ogo*  
(Madiu 27.1-2,11-14, Maga 15.1-5, Yone 18.28-38)

<sup>1</sup> Bibahende bu hearunime heyai howa Yasu Pailate hearia haru pene. <sup>2</sup> Tigua haru puwa lalu, Yu wali agalime nabiagane wimaru agali ogo ibugua mo bia halu hearia handa walia harima. Ani bialu ibugua lalu, Lomonaga Kinihondo muni dagisi mulene nawi, lalu, ibu Mbirali Dabo Helenego ibulebira lowinigo handame haga kini ogoni i kogoni, laya, lene. <sup>\*</sup>

<sup>3</sup> Tigua ani layagola Pailatehanda Yasuhondo lalu, Yu wali agalinaga handame haga kini i kebe, lene. <sup>\*</sup>

Ani layagola Yasuhanda ladai bialu lalu, Ina o laregoni, lene.

<sup>4</sup> Ani layagola Pailatehanda loma binigo mo miaga haguane hearuhondobi wali agali dewa bu hearuhondobi, Agali ogame kagua biya lolene irane nawida, lene. <sup>\*</sup>

<sup>5</sup> Ani layagola tigua hongoore howa, Agali ogonime mana lawai haragonaga Yudiani wali agali bibahende karu mo gungu ale bia haga ka. Pigane ibu Galilini bialu henego áyu ogoriani ani bule ibiragoni, lene.

*Yasu Herodo hearia haru penego ogo*

<sup>\*</sup> 22:61: Lg 22.34   <sup>\*</sup> 22:67: Yo 3.12, 8.45, 10.24   <sup>\*</sup> 22:69: Ab 7.56, Hi 1.3, 8.1   <sup>\*</sup> 22:70: Lg 4.3, 4.9   <sup>\*</sup> 23:2: Md 17.27, Lg 20.25, Yo 19.12, Ab 17.7   <sup>\*</sup> 23:3: Md 27.11, 1 Ti 6.13   <sup>\*</sup> 23:4: 1 Pi 2.22

<sup>6</sup> Tigua bi layago hale howa Pailatehanda lalu, Agali otoni ibu Galilialibe, lene. <sup>7</sup> Ibugua manda bu handalu hearia Yasu Herodohanda handame ho kagoha howayane Herodo áyure dege Yarusalemé íbu hayuagola, Yasu Herodo karia haru pudaba, lene.✠ <sup>8</sup> Herodo ibu bambaore howa Yasu hondoa ho haabo henego haru ibiyago hondowa ibu turu timbuniore hene. Yasuhanda agalime nabigane ale biragola de hondole Herodo ibu hamelo hene.✠ <sup>9</sup> Ani buwa Herodohanda Yasuhondo bi maru hale hayagola Yasuhanda mbira ladai nabiore hene. <sup>10</sup> Loma binigo mo miaga haguane hearumebi Mana lowinigo lawai haga hearumebi íbu ha para halu hongo howa lalu, Agali ogonime ko gibiore biya, lalu hene. <sup>11</sup> Ani layagola Herodobi ibunaga wai biaga ami agali hearubi tigua Yasu mege taraore bialu handabe manga howa aga bayaleore mbira mo karula howa, Pailate karia haru dai bidaba, lene.✠ <sup>12</sup> Pailate Herodola waitigi ho haga haga biaga henego horo ogoningiore nenege hinini.✠

*Yasu homelo ba, lenego ogo*

*(Madiu 27.15-26, Maga 15.6-15, Yone 18.39-19.16)*

<sup>13</sup> Pailatehanda loma binigo mo miaga haguane hearubi wali agali haru haga hearubi wali agali hearubi, Mandagi ngoai hadaba, lowa <sup>14</sup> tihondo lalu, Tígua agali ogo i hewaria haru ibuwa lalu, Ibugua wali agali mo hondo halu kago, larimigo ina tinaga wanakuini helowa ibugua kagua mbira agi biyadabe hondole ibuhondo hale halu tai biaabo haru. Ani buwa ibugua kagua ogo biya larimiru mbira handa walia nahe ko. <sup>15</sup> Herodohandabi handa walia nahe dege howa ina hemaria dai bilayagoni. Anidago agali ogome ko mbira nabitago ibu homelo nababeheda. <sup>16</sup> Ina agali maruhondo, Ibu tibume bowa pelalimu, lolebero, lene.✠ [ <sup>17</sup> Bolangua Halu Penegonaga Horo harangi agali mbira garabaya heago wali agali hearume, Gola, laragola Pailatehanda golaga hene.]

<sup>18</sup> Pailatehanda ani layagola wali agali bibahendeme hongo howa dalimu lalu, Agali otoni homelo balu Barabasa inane kamaria golalu dai bila, lene. <sup>19</sup> Barabasahanda Yarusaleméni howa mo gungu bia hayagolabi agali mbira bo tongolo milayagolabi garabaya andaha garabaya bu helene.

<sup>20</sup> Ani layagola Pailatehanda Yasu, Wahalu pu, loa howa lone wali agali bu hearuhondo bi layagola <sup>21</sup> tigua hongo howa dalimu ladai bialu lalu, Ibu ira bangani ba para ha. Ibu ira bangani ba para ha, lene.

<sup>22</sup> Ani layagola Pailatehanda tihondo halu tebone lalu, Ibugua kagua agi biyabe. Ibu homelo bolenaga kagua biyago i handa walia nahe ko. Ogoninaga ina agali maruhondo, Ibu tibume bowa pelalimu laro, lene.

<sup>23</sup> Ani laya tiraga tigua, Ira bangani ba para habe, lalu bi hongo howa layagome Pailatenaga bi lo dambi hene. <sup>24</sup> Ani layagola Pailatehanda lalu, Tíni hame lowa bule harimidadagua bilimu, lene. <sup>25</sup> Ani lowa agali mbirame Lomo gabumane baba wai bialu agali mbira bo wahayagola garabaya andaha helene agali otoni tigua golelo hame layago Pailate ibugua golope hene. Ani buwa ibugua agali hearuhondo lalu, Tíni hame ledamidagua bilimu, lalu Yasu tihondo mini.

*Yasu ira bangani ba para henego ogo*

*(Madiu 27.32-44, Maga 15.21-32, Yone 19.17-27)*

<sup>26</sup> Ami agali hearume Yasu minu yalu pialu hearia Sairiniali mbira mini Saimono Yarusaleméha anda ibalu hearia harigani lola hene. Lola hayagola tigua ibu minuwa Yasunaga ira banga ibunaga payani mo ya hayagola ibugua yalu Yasu piyadagua mama pene.✠

✠ 23:7: Lg 3.1 ✠ 23:8: Md 14.1, Mg 6.14, Lg 9.9 ✠ 23:11: Ais 53.3 ✠ 23:12: Ab 4.27 ✠ 23:16: Md 27.15, Yo 18.39 ✠ 23:26: Md 27.32, Mg 15.21

<sup>27</sup> Wali agali dewaore Yasu piyadagua pialu howa wali marume Yasunaga dugu yiyi lama ibiyagola <sup>28</sup> Yasu ibu handa dai buwa lalu, Yarusaleme waliru-o inaga dugu bulemi ni tininagabi ti waneigininagabi dugu bilimu, lene. <sup>29</sup> Ani lowa ibugua lalu, Horo maru tagira ibirangi wali agali karume agua lolebira, Wali waneigini nahe bedarubi wali gali taba nahene bedarubi wali gali andu nami bedarubi ti turu taraore ho birulebira, lalu lolebira.✧ <sup>30</sup> Ogoni ibirangi wali agalime gi howa hari wedaruhondo, Ina bu dambi hadaba, lalu dindi hambene ngaruhondo, Ina ge hela, lalu holebira.✧ <sup>31</sup> Ira kago bayale mindibi gumbile kaore mbirale urunibi biyagua ira ogo gau laragola agua bulebirabe, lalu Yasuhanda lene.✧

<sup>32</sup> Agali kira mana ko biaga henego kirabali Yasu heba mandagi homelo bole haru pene. <sup>33</sup> Ti dindi mbira mini Haguane Kuni laga winigoria anda puwa tigua Yasu ira bangani ba para howa agali ko biaga biago labo mendego gi tighayagi mendego gi lehayagi lowa ti ira banga tebirani ba para hai hene.✧ <sup>34</sup> Ani biyagola Yasuhanda lalu, Aba-o tigua ogo ale berama nale bupe harago tinaga ko biragoni domo wahabe, lene.✧

Ani layagola tigua ibunaga aga ai ibu harabe hondole tadu bialu berene. <sup>35</sup> Wali agali bu hearume handaya ho hearia Yu wali agali haru haga hearume Yasu mege bialu lalu, Ibu Mbiralali Dabo Helenego ibulebira lowinigo Ngode Datagaliwabehanda dabene ibu kayagua ibugua wali agali maru pele miralidagua ibuni pele mila, lene.✧

<sup>36</sup> Ami agali biarumebi mege dege bialu ibu wiagoria ha para howa waini iba kaubi nelo yade halu✧ <sup>37</sup> lalu, Í Yu wali agalinaga handame haga kini keyagua inime ini pele merene, lene.

<sup>38</sup> Ira banga daligani bi ogo gilibu wini. Yu wali agalinaga Handame Haga Kini ogoni ibu, gili bini.

<sup>39</sup> Agali mana pugualu ko biaga ira bangani ba para hayago mendegome Yasu mege bialu lalu, Mbiralali Dabo Helenego ibulebira lowinigo i ndobe. Ini pele mialu iyabi pele ngerene, lene.

<sup>40</sup> Ani layagola mendegome o layago hale howa ibu talialu lalu, Ina Ngode Datagaliwabehondo mogo nale kebe. Ibu tandaga naradagua dege ibi naregoni. <sup>41</sup> Iyame kagua biribagonaga pani nolene winidaguaore narabago o tigabida. Agali ogome pani narago ibugua ko mbiraore nabioire howa naragoni, lene. <sup>42</sup> Ani lowa ibugua Yasuhondo lalu, Yasu-o i Handame Haga Kini howa eberengi i mitangi bibe, lene.✧

<sup>43</sup> Ani layagola Yasuhanda ibuhondo lalu, Ina buleberoore lalu langerogoni áyu dahuliya andaga iya haru pu holeberaba laro, lene.

### *Yasu tongolo minigo ogo*

*(Madiu 27.45-56, Maga 15.33-41, Yone 19.28-30)*

<sup>44</sup> Horombe hanuniore hayagola ni da nabi hundialu dindi ogoniha wiagoni bibahendeore aruma haho wiane alendo ni gai layagola ni dadai bini.✧ <sup>45</sup> Ani biyagola Anduane Homogonaga andaha labolabo timbuni gerela ho winigo daliga howa buda ki bini.✧

<sup>46</sup> Aniore biyagola Yasuhanda bi dalimuore lalu, Aba-o i dinini inaga gini ya harogoni, lowa tongolo mini.✧

<sup>47</sup> Ami agali haru haga heagome o biyago hondowa ibugua Ngode Datagaliwabe mini yaraga halu lalu, Ibu agali bayaleore haya, lene.

<sup>48</sup> Wali agali agi birabe hondole ibu ngoai ho hearume o biyaruni hondowa dara timbuni halu tinaga galuhombeneni bama andaga dai bini.✧ <sup>49</sup> Yasu ibu baba hagarubi

✧ 23:29: Md 24.19, Lg 21.23 ✧ 23:30: Ais 2.19, Hos 10.8, Mo 6.16 ✧ 23:31: Yar 25.29, Ese 20.47, 1 Pi 4.17  
 ✧ 23:33: Md 27.33, Mg 15.22, Yo 19.17-18 ✧ 23:34: Iba 22.18, Ais 53.12, Md 5.44, Ab 3.17, 7.60 ✧ 23:35: Iba 22.7, Seg 12.10, Md 27.39, Mg 15.29 ✧ 23:36: Iba 69.21 ✧ 23:42: Md 16.27-28 ✧ 23:44: Amo 8.9 ✧ 23:45: Har 26.31-33, 36.35 ✧ 23:46: Iba 31.5, Ab 7.59 ✧ 23:48: Lg 18.13

wali maru Galili howa Yasu ibiyadagua haru ibiyarubi o biyaruni amuraore howa handa amu ho hene.✧

*Yasu tingini hora henego ogo*

*(Madiu 27.57-61, Maga 15.42-47, Yone 19.38-42)*

<sup>50-51</sup> Agali mbira mini Yosebe ibu Yudianaga tano mbira mini Arimadia howa ibu hene. Ibu agali baya mini lene henego Ngode Datagaliwabenaga Handame Ho Holene ibilo hondo hene. Ani buwa ibu Ganisolo agali howa Ganisolo agali marume bulene manda biyadagua ibu bulene hame nale hene.✧ <sup>52</sup> Agali ogonime Pailate hearia puwa lalu, Yasu tingini mule poaba, lene. <sup>53</sup> Ani lowa Yasu tingini ira bangani howa mo yalu daluwa labolabo peleoreme kabu buwa ege andaha ala guabu wuwa mbirali hora nahene winigoha yalu puwa hora hene. <sup>54</sup> Ogoni ani biyagola Sabada horo holene kaware wini.

<sup>55</sup> Wali maru Yasu ibiyadagua Galili howa mama ibiyarume Yosebehanda Yasu tingini mo yalu piyago hondowa homali ege anda wiago hondole pene.✧ <sup>56</sup> Handalu andaga dai buwa welibi mbirale ngabioreru mo manda manda bini.✧

Ani buwa Sabada horongi Mana lowini ngadagua ti halo hene.

## 24

*Yasu ibuni mo heya henego ogo*

*(Madiu 28.1-10, Maga 16.1-8, Yone 20.1-10)*

<sup>1</sup> Horo Sandengi egerebagiore wali biarume mbirale ngabiru mo manda manda bu wiyago mo yalu Yasu hora hayagoha pene. <sup>2</sup> Homali egeanda wiagoria puwa handalu hearia panga biago dugua ho wiaria hendene. <sup>3</sup> Hondowa Anduane Homogo Yasu tingini ngabe hondole anda pialu hearia nawiyane hendene. <sup>4</sup> Ani biyiyagola wali biarume mini dege dindi howa o biagoria hearia agali kira aga pele de mborerebi ogobi labo labo ti heagoria abaleore ha pani hene.✧ <sup>5</sup> Ani biyagola wali biarume gi howa dindini bulu palene. Bulu paliyagola agali biago labome wali biaruhondo lalu, Agali heyu kago ti homene wiagaha tai beramigo agibe.✧ <sup>6</sup> Ibu ogoha nawi ibuni mo heya halu piya. Ibugua Galilini howa langiyago mitangi bu dai bilimu.✧ <sup>7</sup> Agali Hole Ibiyago ko biaga karuhondo minu mulebira. Ani minu miragola tigua ibu ira bangani ba para haragola horo kiru howa tebonengi ibuni mo heya holebira, layagoni, lene. <sup>8</sup> Ani layago hale howa wali biarume Yasuhanda bi ogoni ala layago mitangi buwa <sup>9</sup> homali biagoria howa dai buwa mbirale handayagobi hale hayagobi ibunaga talima piaga bereali biarubi maru hearubi lamiai hene.✧ <sup>10</sup> Wali uruni mini Magadala wali Meribi Yoanabi Yamese ajiya Meri imaru tibi wali maru heba piyarubi o biyaruni abosolo agali biaru lamiai hene.✧ <sup>11</sup> Wali biarume ani layagola abosolo agali biarume wali bame mini nawi howa lara manda buwa ti mini kira kira wu hene.✧ <sup>12</sup> Ani biyagola Pida ibu abale heyalu egeanda biagoha gerai puwa bulu paluwa handa anda halu hearia maru nahende labolabo ibu kabu bini biago dege wiaria hendene. O biyiyago hondowa ibu mini dege dindi ho yalu andaga dai bini.

*Agali kirali Emaiasa harigani pialu henego ogo*

*(Maga 16.12-13)*

<sup>13</sup> Horo ogoningi Yasu haruru piaga henego agali kirali Yarusaleme howa kilomida bearia (11) agima bolangua halu dindi mbira mini Emaiasa pole pene. <sup>14</sup> Harigani pialu howa mbirale biyarunaga libuni ladele bigi bima pialu hene. <sup>15</sup> Ani ladele bigi bima pialu hebiria Yasu ibuni kaware ibalu libu piyadagua pene.✧ <sup>16</sup> Ani biyagola handa

✧ 23:49: Iba 38.11, Lg 8.2-3 ✧ 23:50-51: Lg 2.25, 2.38 ✧ 23:55: Lg 23.49 ✧ 23:56: Har 20.10, Man 5.14  
 ✧ 24:4: Ab 1.10 ✧ 24:5: Lg 2.9 ✧ 24:6: Md 16.21, 17.22-23, 20.18-19, Mg 8.31, 9.31, 9.31, 10.33-34, Lg 9.22, 18.31-33 ✧ 24:9: Mg 16.10 ✧ 24:10: Lg 8.3 ✧ 24:11: Mg 16.11, Lg 24.25 ✧ 24:15: Md 18.20, Lg 24.36



handayago aguabe tobane buwa libugua ibu ogoore kagonilo manda nabi hene. <sup>17</sup> Ani buwa Yasuhanda libuhondo lalu, Harigani ibaabo halu howa agi dege ladele bigi bima eberabibe, lene.

Ani layagola libunaga dengui dara biniore howa ema nabi hondo hene. <sup>18</sup> Agali mendego mini Kiliobasa henegome ladai bialu lalu, Mbirale abe lebe dege biyago manda nabini í dege mbiraha howa áyu íbu kebe, lene. <sup>19</sup>

<sup>19</sup> Ani layagola ibugua ladai bialu lalu, Mbirale agilebe, lene. <sup>20</sup>

Libugua ladai bialu lalu, Nasareteali Yasuni mbirale biyaruni. Agali ogonime Ngode Datagaliwabe mana latagi haga howa ibugua mana lawai hayagobi biabe biyagobi bibahende hongo taraore howa biyagoni lowa Ngode Datagaliwabehandabi wali agali bibahende kamarumebi ani manda bu harima. <sup>20</sup> Inanaga loma binigo mo miaga haguane hearumebi haru haga hearumebi ibu minuwa wai biaga ami agali hearuhondo minu miyagola tigua ibu homelo ira bangani ba para haya. <sup>21</sup> Ani biyagola iname ibu Isaraele wali agali pele mialu golope holebira mitangi bu harima. Anigo mbirale uruni biyago horo áyu kamagoni tebone. <sup>22</sup> Ogonigo wali marume áyu egerebagi muna biyagola egeanda biagoha hondo pialu dai buwa ina mo mogola haya. <sup>23</sup> Tigua ibu tingini handa nabi dai bialu howa lalu, Ina de gandeba ale handalu dahuliyalirume ina langialu ibu heyu ka laya, lama dai biya. <sup>24</sup> Ani langiyagola ina heba haga marume egeandaha pialu hearia wali biarume layadaguaore hondowa tigua ibu handa nabi dege, lene. <sup>25</sup>

<sup>25</sup> Ani layagola Yasuhanda libuhondo lalu, Libu mini nawi haabo kabigo dege agidabe. Ngode Datagaliwabe mana latagi haga henerume mana bibahende lowini ngago tendoreore manda bigi berabigo dege agidabe. <sup>26</sup> Mbirali Dabo Helenego ibulebira lowinigo ibugua mbirale uruninaga tandaga nalu howa ibuninaga mini daliga taraore karulai holene irane ndo winibe, lene. <sup>27</sup> Ani lowa Yasuhanda Anduane Homogonaga mbugani Mosesehandabi mana latagi haga henerumebi gilibu wini wiaru pigane ogoriani howa lama pialu ibuninaga bibahende lowini wiaru libuhondo garealo miai halu hene. <sup>28</sup>

<sup>28</sup> Libu pole biyagoria anda polene kaware howa Yasu ibu bola balu pole biyagola <sup>29</sup> libugua bime mo luma howa lalu, Alendo halu ne lolebiaruago áyu oali iya baba ho hama, lene. Ani layagola ibu libu heba andaga pu hene. <sup>30</sup> Ibu libu heba tomo nole biruwa ibugua mberedi mo yuwa Ngode Datagaliwabehondo kai lowa gaibu ki howa libuhondo mini. <sup>31</sup> Ani biyagola libunaga de mo ngala hayagola ibu Yasuore bedagoni lole biyagola o birayagoriani howa ereba halu libugua ibu de nahende hene. <sup>32</sup> Ani biyagola libuni ladele bialu lalu, Harigani ibalu howa ibugua iyahondo Anduane Homogonaga mbugani bi lo wiaru bayuwa garealo ngiai hayagola iyanaga bu miniha irame daradagua biayua handarini, laga bialu berene.

<sup>33</sup> Ani biya handala libugua abale heyalu Yarusaleme ibunaga talima piaga beariali (11) biarubi wali agali marubi ngoai ho hayagoria abale dai biyagola <sup>34</sup> wali agali bu hearume libuhondo lalu, Anduane Homogo ibu heneneore heyu howa Saimono hendelo ha pani haya, lene. <sup>35</sup>

<sup>35</sup> Ani layagola libugua harigani biyagobi ibugua mberedi yamuwa gai biyagola ibu Anduane Homogoda lowa manda biribigobi baya hangu garealo miai haribi.

*Yasu ibunaga talima piaga biaru hearia ha pani henego ogo  
(Madiu 28.16-20, Maga 16.14-18, Yone 20.19-23, Abosolo 1.6-8)*

✧ 24:16: Yo 20.14, 21.4 ✧ 24:18: Yo 19.25 ✧ 24:19: Md 21.11, Yo 6.14, Ab 2.22 ✧ 24:20: Lg 23.1, Ab 13.27-28  
✧ 24:21: Lg 1.68, 2.38, 19.11, Ab 1.6 ✧ 24:22: Md 28.8, Mg 16.10, Lg 24.1-11, Yo 20.18 ✧ 24:24: Yo 20.3-10  
✧ 24:26: Lg 9.22, 24.44, Ab 17.3, 1 Pi 1.11 ✧ 24:27: Pig 3.15, Dag 21.9, Man 18.15, Iba 22.1-21, Ais 7.14, Dan 9.24, Mal 3.1, Yo 13.31, Ab 3.13 ✧ 24:30: Md 14.19, Lg 22.19 ✧ 24:34: 1 Ko 15.4-5

<sup>36</sup> Agali kira biago labome te lamialu hebiore Anduane Homogo ibuni ti heagoria abaleore ha pani howa lalu, Mo palia holene tí heba helo laro, lene.✠

<sup>37</sup> Ha pani hayagola ti mogo taraore lowa homayago dinini daibu kabe toba ho hene.✠

<sup>38</sup> Ani bu heago hondowa ibugua tihondo lalu, Aginaga gi ho kamibe. Tí naga miniha mini kira wulene ogoni wiyadagoni agibe. <sup>39</sup> I iniore kogo inaga gi gebi bayuwa handa beramine. Homene dininime dongonebi kunibi o kogobi nahagago tí manda bule tíni gime ela haramine, lene.

<sup>40</sup> Ani lowa ibuguaibunaga gi gebi tihondo walia hene. <sup>41</sup> Walia hayagola ti turu ha howa lulunda hope howa mini mbiraore wibe nahe hene. Ani bu heagola Yasuhanda tihondo lalu, Tomo mbira ngamibe, lene.✠ <sup>42</sup> Ani layagola tigua wena hiru winigo miyagola <sup>43</sup> ibugua tinaga wanakuini howa nene.

<sup>44</sup> Ani buwa ibugua tihondo lalu, Abale tí baba harimangi howa ina mbirale henene-ore biyaruni langiai harugoni. Ina ogonidagua bulebira lalu Mosese heneyangi Mana lowinigo gilibu ngarunibi Ngode Datagaliwabe mana latagi haga henerume gilibu ngarunibi Iba Gana mbugani gilibu ngarunibi bibahende lola hai helo lowini, lene.✠

<sup>45</sup> Ani lowa Anduane Homogonaga mbugani bi gilibu ngagoni manda biai helo ibugua tinaga mini mo wála hene.✠ <sup>46</sup> Ani buwa tihondo lalu, Anduane Homogonaga mbugani lo ngadagua ogo, Mbirali Dabo Helenego ibu tandaga noleneore wulebira. Tandaga nowa horo tebonengi tongolo miyagoria howa mo heya holebira.✠ <sup>47</sup> Ani biragola ibunaga minini howa wali agalime mini beregedalu dai bilobi ko biyago domo wahelobi mana ogoni Yarusaleme ala lamima pialu mani dindi bibahendeha lamima tagira polene nga.✠ <sup>48</sup> Mbirale uruninaga walia hagane tí kamigoni.✠ <sup>49</sup> I Abahanda ngulebero lo wiyadagua inime tíni hole dalilolebero. Anigo tíni hongo holene daliga howa dalu helo Yarusaleme ogoriani hondo holene nga, lene.✠

*Yasu dahuliya andaga iraga halu penego ogo*

*(Madiu 16.19-20, Abosolo 1.9-11)*

<sup>50</sup> Ani lowa Yasuhanda ti Yarusaleme howa haru tagira pialu amuraore Bedani puwa ibunaga gi yaraga halu Ngode Datagaliwabehanda ti biamogo bilo lalu ti mo turu hene. <sup>51</sup> Ibugua ti mo turu howa ti hea handala ibu dahuliya andaga iraga halu pene.✠

<sup>52</sup> Ani biyagola tigua ibuhondo mitangi bialu ibunaga mini yaraga halu turu timbuniore holene tiha tolai ho yalu Yarusaleme dai bini.✠ <sup>53</sup> Ani dai buwa tigua horo bibahendengi Anduane Homogonaga andaha howa Ngode Datagaliwabehondo kaj lalu haabo hene.✠

✠ **24:36:** 1 Ko 15.5 ✠ **24:37:** Md 14.26 ✠ **24:41:** Yo 21.5 ✠ **24:44:** Md 16.21, 20.18, Mg 8.31, Lg 9.22 ✠ **24:45:** Lg 24.27, Ab 16.14 ✠ **24:46:** Iba 22, Ais 50.6, 52.14-53.12, Hos 6.2, Lg 24.26, Ab 17.3 ✠ **24:47:** Ais 49.6, 49.22, Yar 31.34, Mai 4.2, Mal 1.11, Md 28.19, 1 Ti 3.16 ✠ **24:48:** Yo 15.27, Ab 1.8, 1.22, 2.32 ✠ **24:49:** Ais 44.3, Yol 2.28, Yo 14.16, 14.26, 15.26, 16.7, Ab 1.4 ✠ **24:51:** Yo 20.17, Eb 4.8 ✠ **24:52:** Yo 14.28, 16.22 ✠ **24:53:** Ab 2.46, 5.42

## Yone

### Yonehanda Bi Mana Debene gili binigo ogo

### Mbuga ogoha gilibu ngarunaga nemandi ogo

Bi Mana Debene Yonenaga mbugani gilibu ngagome Yasu ibu Ngode Datagaliwabenaga Biore dahuliya andaga haabobo howa ina kamagobi hole dindini daluwa wali agali heba hene lalu gilibu nga. Yonehanda mbuga ogoni gili binigo irane ogo. Ibugua lalu, Mbuga ogoniha bi gilibu ngago tí daga lalu howa Mbirali Dabo Helenego ibulebira lo winigo ibu Ngode Datagaliwabe Iginu Yasuoreda manda buwa mini mbiraore wialu halimulonaga gilibu wero, lene. Be 20.31

Yonehanda Yasu pigane binigonaga te gili biai howa Yasuhanda agalime nabigane ale bialu hayago Yone ibu mitangi bialu manane uruni biyagome Yasu ibu Ngode Datagaliwabe Iginuore ka lalu walia henego gilibu nga. Ani buwa wali agali marume Yasuhondo mini mbiraore wialu ibunaga talima piaga hene. Maru mini mbiraore nawi hearume Yasula waitigi ho hene.

Be 13-17 bi gilibu ngago ogo. Yasubi ibunaga talima piagarubi ti mandagi biruwa Yasuhanda homo aribia holene tu kaware nga manda buwa ti mini bogabi helobi hongo helobi galone dewa ti lamialu berene.

Yonehanda bi mana lamaro bialu gilibu ngagome Yasu minalu haru puwa godi lenegobi ibu ira bangani ba para hayagola tongolo minigobi Yasu heyu howa ibu talima piaga biaru de hendelo ha pani henegobi uruni lalu gilibu nga.

Yonehanda galone mbira mo duniniore halu Ngode Datagaliwabehanda Kerisoha howa haabobo holene bame ngirago wali agali ta nabi karume Yasu ibu harigabi henene lolenebi holene gahengebi ibu haore bida manda buwa haabobo holene ogoni yu holebira.

Mbuga ogoriani holene gahengegonaga mana henene ngaru mo walia hole lowa horo mbira mbira bibahendeni howa biaganego galone manda bulumayanaga ngaru uru. Mberedinaga lalubi ibanaga lalubi wá holenenaga lalubi nogo sibi haru haganaga lalubi pu mbira mini gerebi iranenaga lalubi gerebi lininaga lalubi gilibu nga.

#### **Bulu бага бува кuni gilibu ngago**

*1.1-18*

Bi ibu Ngode Datagaliwabeore ka lenego nga *1.19-51*

Baboraya biaga Yonebi Yasu talima piaga pigane henegobi nga *2.1-12.50*

Yasuhanda biabe tara tara bialu henego nga *13.1-19.42*

Horo maruni Yasuhanda Yarusalemhayagi howa bialu henego nga *20.1-31*

Yasu homowa ibuni heyu howa ha pani haga binigo nga *21.1-25*

Yasu Galilini howa talima piaga kirali heagoria ha pani henego nga

#### *Bi ibu holene tene henego ogo*

<sup>1</sup> Bibahendeore nawingi Bi hene. Bi ibu Ngode Datagaliwabela hene. Bi ibu Ngode Datagaliwabeore hene. <sup>2</sup> Bibahendeore nawingi Bi ibu Ngode Datagaliwabela hene. <sup>3</sup> Ngode Datagaliwabe ibugua Bila haru howa bibahendeore wabiai hene. Ngode Datagaliwabehanda Bila haru ndo ibuni hangu howa mbirale mbira wa nabi hene. <sup>4</sup> Bi ibuha holene wini. Holene ogonime wali agalinaga wá holene tene wini. <sup>5</sup> Wá holene ogonime arumaha mo wá halu kagoni. Aruma holeneme wá holene ogoni mo yi habe nahe ka.

✧ **1:1:** Min 8.22, 8.30, Yo 17.5, Pb 2.6, Kl 1.17, 1 Yo 1.1-2, Mo 1.2, 19.13    ✧ **1:2:** Pig 1.1    ✧ **1:3:** Yo 1.10, 1 Ko 8.6, Eb 3.9, Kl 1.16-17, Hi 1.2    ✧ **1:4:** Yo 5.26, 8.12, 9.5, 1 Yo 5.11    ✧ **1:5:** Yo 3.19

<sup>6</sup> Agali mbira Ngode Datagaliwabehanda ibilayago ibu mini Yone hene. <sup>7</sup> Wali agali bibahendeme Ngode Datagaliwabhondo mini mbiraore wilonaga Yone ibugua wá holene walia helo Ngode Datagaliwabehanda ibu ibilene. <sup>8</sup> Ibu wá holene ndo hene. Ibugua wá holene walia hole ibini. <sup>9</sup> Wá holene heneneore ogoni dindiha daluwa ibugua wali agali bibahendeni wá haame heleda.

<sup>10</sup> Bi ibu wali agali heba hene. Ngode Datagaliwabehanda Bi ibula haru howa bibahende wabinigo wali agali bibahendeme ibu manda nabi hene. <sup>11</sup> Ibuni dindini ibiyagola ibunaga damene hearume ibu hame nale howa turu nahe hene. <sup>12</sup> Wali agali maru hearume ibuhondo turu halu mini mbiraore wiyagola ibugua tihondo, Ngode Datagaliwabenaga waneigini tí halimu, lene. <sup>13</sup> Ti wali agalime waneigini taba hanagadagua taba honowa Ngode Datagaliwabenaga waneigini hene ndo. Ngode Datagaliwabe ibunime ti mo ibunaga waneigini hene.

<sup>14</sup> Bi ibu agali heneneore hole dalini. Agali hole daluwa ibugua ina heba hene. Ina heba hayagola howa iname ibu mini daliga wá holene taraore heneyane hondowa handawa biaabo harima. Aba Ngode Datagaliwabe Iginini mbiraore ibu dege howa ibuhondo mini daliga wá holene taraore miniyago handarima. Biamogo bia holenebi henene lolenebi ibuha tolaihe hene.

<sup>15</sup> Yonehanda ibu walia halu bi dalimu lowa lamialu lalu, Ina tí langialu howa agali mbira í nahewaha henego maha ibulebirago ogoni ibu daligaore ka larugo o ibu kagoni, lene.

<sup>16</sup> Ibuha bayale bulene tolaihe howa ina bibahendehondo biamogo bia holene ngia tago halu ngiaabo halu ka. <sup>17</sup> Ngode Datagaliwabehanda ibunaga mana Mosesehondo lamiyagola Mosese ibugua inahondo Mana lo wia hene. Biamogo bia holenebi henene lolenebi Moseseha ndo Yasu Kerisoha ngago ibugua inahondo ngule dalini. <sup>18</sup> Wali agali bibahendeme Ngode Datagaliwabe de nahendene ka. Ngode Datagaliwabe Iginini mbiraore ibu Ngode Datagaliwabe dege howa ibu Abala howa ibugua inahondo Ngode Datagaliwabe walia hene.

*Baboraya biaga Yonehanda mana lamialu henego ogo  
(Madiu 3.1-12, Maga 1.1-8, Lugu 3.1-18)*

<sup>19</sup> Yu agali Yarusalemeni hearume loma binigo mo miaga agalirubi Libai agalirubi-hondo lalu, Yone karia puwa ibuhondo í ai kebe lalimu, lene.

Ani layadagua tigua ibuhondo hale hayagola <sup>20</sup> Yonehanda mbira do nahe tiga tigaore latagi halu lalu, Mbirali Dabo Helenego ibulebira lowinigo í ndo ko, lene.

<sup>21</sup> Tigua ibuhondo lalu, Anidago í aibe. Í Elaya kebe, lene.

Ibugua ladai bialu lalu, I Elaya ndo ko, lene.

Tigua lalu, Ngode Datagaliwabe Mana Latagi Haga Mbirali ibulebira lowinigo ibu í kebe, lene.

Ibugua ladai bialu, I ogoni ndo ko, lene.

<sup>22</sup> Ani layagola tigua ibuhondo lalu, Í ogo ko, lalu langi. Ina dai buwa ina pudaba layaruhondo ibu agali ogo hea lalu lamulumaya, lene. Ínime íni agi lalu larilibe, lene.

<sup>23</sup> Ani layagola Yonehanda Ngode Datagaliwabe mana latagi haga Aisaiahanda mbiwia ho winigo lalu,

☆ **1:6:** Md 3.1, Mg 1.4, Lg 1.13-17, 1.76, 3.1-2, Yo 1.33 ☆ **1:7:** Ab 19.4 ☆ **1:8:** Yo 1.20 ☆ **1:9:** Ais 49.6, Yo 1.4, 8.12, 1 Yo 2.8 ☆ **1:10:** Yo 1.3, 17.25, Hi 1.2, 11.3 ☆ **1:11:** Lg 19.14, Ab 3.26, 13.46 ☆ **1:12:** Lm 8.15, Ga 3.26, 2 Pi 1.4, 1 Yo 3.1 ☆ **1:13:** Yo 3.3-6, Ya 1.18, 1 Pi 1.23 ☆ **1:14:** Ais 60.1-2, Md 1.16, 1.20, Lg 9.32, Yo 2.11, Lm 1.3-4, Ga 4.4, Pb 2.7, Kl 1.19, 1 Ti 3.16, Hi 2.11-16 ☆ **1:15:** Md 3.11, Lg 3.16, Yo 1.27-32, 8.58, Kl 1.17 ☆ **1:16:** Yo 3.34, Eb 1.6-8, Kl 1.19, 2.9-10 ☆ **1:17:** Har 34.28, Man 4.44, Yo 8.32, Lm 3.24, 6.14, 10.4 ☆ **1:18:** Har 33.20, Md 11.27, Lg 10.22, Yo 6.46, 1 Ti 1.17, 6.16, 1 Yo 4.9, 4.12, 4.20 ☆ **1:19:** Yo 5.33 ☆ **1:20:** Lg 3.15-16, Yo 3.28, Ab 13.25 ☆ **1:21:** Man 18.15-18, Mal 4.5, Md 11.14, 17.10-13, Yo 6.14, 7.40 ☆ **1:23:** Ais 40.3, Md 3.3, Mg 1.3, Lg 3.4

I dindi ko yobi wali agali nahaga ngagoria howa mbiralime olalu kago ko. Olalu howa Anduane Homogo ibilo hariga ba halu mo tiga bilimu, laruli, lalu ogonidagua lene.

<sup>24</sup> Ani layagola agali maru Perisi agalime pu laya handala ibiyaru tigua <sup>25</sup> ibuhondo lalu, Mbiralí Dabo Helenego ibulebira lowini biagobi Elayabi Ngode Datagaliwabe Mana Latagi haga biagobi i ndo ko larigodago ina baboraya biriligo irane agibe, lene.✧

<sup>26</sup> Yonehanda ladai bialu lalu, Ina ibame baboraya biruli. Mbiralí tí manda nabi kamigo ibu tí kamigoha ka. <sup>27</sup> Ibu maha ibalu ibu ala mo bamba holebirago i ko kogonigo inaibunaga ge su pu hadolenebi nakarulapeore kogoni, lene.✧

<sup>28</sup> Tigua bi ogoni Iba Yodana ange ederayagi Bedani dindini Yonehanda baboraya bia halu henegoria lalu hene.✧

### *Yasu ibu Ngode Datagaliwabenaga Nogo Sibi Igini ka lenego ogo*

<sup>29</sup> Egerebalene Yasu ibalu hearia Yonehanda hondowa lalu, Ngode Datagaliwabenaga Nogo Sibi Igini o ibiragoni de handadaba. Ibugua wali agali bibahendeme ko biyago mo yai holebira, lene.✧ <sup>30</sup> Agali mbira i nahewaha henego ibu daligaore kago maha ibulebira larugo o ibirago, lene.✧ <sup>31</sup> Ibu agali ai ibulebirabe ibi manda nabi howa dege tí Isaraele wali agalime ibu ka manda bilimulo ina tí ibame baboraya bule ibiru, lene.

<sup>32</sup> Yonehanda ibu walia halu lalu, Ngode Datagaliwabe Dinini ega malibu alego hariha howa dalialu Yasuni birayago de handaru.✧ <sup>33</sup> Ani birayagoni hondowabi ina ibu manda nabi dege hewaria Ngode Datagaliwabehanda, Ina ibame baboraya bule pu, layago ibugua ihondo lalu, I Dinini daluwa agali mbiralini birarago hondolebere. Agali ogoni ibugua Dinini ogonime baboraya bia holebira, laya.✧ <sup>34</sup> Ani bulebira layadagua heneneore biyago ina deme handarugo ibu Ngode Datagaliwabe Iginiore ka lalu tí langerogoni, Yonehanda lene.✧

### *Yasuhanda talima piaga mariali pigane dabeneo ogo*

<sup>35</sup> Egerebalene Yonebiibunaga talima piaga kiralibi ti hearia <sup>36</sup> Yasu piyaria Yonehanda de hendene. De hondowa lalu, Ngode Datagaliwabenaga Nogo Sibi Igini o poragoni de handadaba, lene.✧

<sup>37</sup> Ani layago hale howaibunaga talima piaga kira biago labome Yasu piyadagua talima pene. <sup>38</sup> Yasu ibu beregedalu de handa dai bialu hearia libu ibu talima ibiyago hondowa libuhondo lalu, Libu agi mo eberabibe, lene.

Ani layagola libugua ibuhondo, Labai, í ani harilibe, lene. Labai inanaga bi lalu, Lawai haga.

<sup>39</sup> Ani layagola Yasuhanda lalu, De hondole maibidaba, lene. Alendoreha ani lene. Ani layagola libu Yasu heba puwa ibu harayago de handalu Yasu heba ho hai hene.

<sup>40</sup> Agali kira Yonenaga bi hale halu Yasu talima piyago agali mendego mini Anduru ibu Saimono Pida hamene hene.✧ <sup>41</sup> Anduru ibugua abaleore ibu hamene Saimono hondo pene. Puwa ibuhondo lalu, Mbiralí Dabo Helenego ibulebira lowinigo biago handa walia hariba, lene. Mbiralí Dabo Helenego mini mende Keriso.✧ <sup>42</sup> Ani lowa ibu hamene Saimono Yasu hearia haru ibini. Ibiyagola Yasuhanda ibu de handalu lalu, Í Yone igini Saimono kegoni. Í mini Sibasa holebere, lene. Sibasa bi mende lalu Pida. Pida inanaga bi lalu, Ege Tole.✧

### *Yasuhanda Pilibi Nadanelela dabeneo ogo*

✧ **1:25:** Md 21.25, Yo 1.33 ✧ **1:27:** Yo 1.15, 1.30, Ab 13.25, 19.4 ✧ **1:28:** Md 3.6, Yo 10.40 ✧ **1:29:** Har 12.3, Ais 53.6-7, 53.11, Yo 1.36, Ab 8.32, 1 Ko 15.3, 1 Pi 1.19 ✧ **1:30:** Yo 1.15, 1.27 ✧ **1:32:** Md 3.16, Mg 1.10, Lg 3.22 ✧ **1:33:** Md 3.11, Lg 3.2-3, Ab 1.5, 2.4, 19.6 ✧ **1:34:** Md 3.17, 17.5, 27.54 ✧ **1:36:** Yo 1.29 ✧ **1:40:** Md 4.18-20 ✧ **1:41:** 1 Sml 2.10, Iba 2.2, Yo 4.25 ✧ **1:42:** Md 16.18, Mg 3.16



<sup>43</sup> Egerebalene Yasu ibu Galili dindi pole manda bini. Pilibi hearia hondowa ibuhondo lalu, *Ī* talima *Ī*bu, lene.✧ <sup>44</sup> Pilibiibunaga dindi Bedesaida wini. Anduru Pida libubi dindi ogoniali dege hene. <sup>45</sup> Pilibi ibugua Nadanele handa walia howa ibuhondo lalu, Mosese heneyangi ibugua Mana lowinigo gilibu ngarumebi Ngode Datagaliwabe mana latagi haga bamba henerumebi mbirali ibulebira lalu mbiwia ho wini gilibu wiagoni ibu hearia iname handa walia harima. Ibu Nasareteali Yosebe igini Yasuya, lene.✧

<sup>46</sup> Ani layagola Nadanelehanda ibuhondo lalu, Nasareteni howa mbirali bayale mbira ibabehebe, lene.✧

Ani layagola Pilibihanda ibuhondo lalu, De hondole mbaibu, lene.

<sup>47</sup> Yasuhanda Nadanele ibalu hearia de hondowa lalu, Isaraeleali tigabi ibunaga bu miniha mo hondo holene mbira nawi o ibiragoni de handadaba, lene.✧

<sup>48</sup> Ani layagola Nadanele ibugua Yasuhondo lalu, *Īna ĵ* agua manda biribe, lene.

Ani layagola Yasuhanda ibuhondo ladai bialu lalu, Pilibihanda *Ī*hondo bi layago naleaha *Ī* poge heago teneha beregoni handaru, lene.

<sup>49</sup> Ani layagola Nadanelehanda ibuhondo lalu, Lawai haga *Ī* Ngode Datagaliwabe Iginioire Isaraele wali agalinaga Handame Haga Kini kegoni, lene.✧

<sup>50</sup> Ani layagola Yasuhanda ibuhondo lalu, *Ī* poge heago teneha beregoni handaru larugo hale howa *Ī*hondo mini mbiraore wiribe. Hongo emene ogonigo mani hongo timbuniore de hondolebere, lene. <sup>51</sup> Ani lowa ibugua tihondo lalu, Heneneore larogo. Maha dahuliya andaga panga dugua ho ngagola Agali Hole Ibiyago kagoria Ngode Datagaliwabenaga dahuliyalirume iri dali bialu karia de hondoleberami, lene.✧

## 2

### *Kaina tanoni wali dabu binigo ogo*

<sup>1</sup> Horo kiru peha tebonengi Galiliha tano mbira mini Kaina ogoriani agali mbirame wali mbira dabu biyagoria Yasu aĵya ibu hondo pene. <sup>2</sup> Yasubi ibunaga talima pia-garubi, Ibalimu, lalu lawia hayagola tibi hondo pene. <sup>3</sup> Ti *Ī*bu ngoai ho biruwa waini iba bibahende nai hene. Nai hayiyagola Yasu aĵyahanda ibuhondo lalu, Waini iba naberada, lene.

<sup>4</sup> Ani layagola Yasuhanda ibuhondo lalu, Aĵya-o ogoni *Ī*naga biabe ndo. *Ī*naga biabego *Ī*na howa *Ī*hondo ogo bia lolene nawi. *Ī*naga biabe bulene tu nahego, lene.✧

<sup>5</sup> Ani layagola ibu aĵyahanda biabe biaga agali hearuhondo lalu, Yasuhanda bidaba laradagua bilimu, lene.

<sup>6</sup> Iba be timbuni ege toleme wabini waragaria wini. Yu wali agalime iba be uruniha howa iba hambialu tinaga ilili biagane mana winidagua wayawaya biaga hene. Iba be uruni homane mbirago mbagaya be nguira aleme hambu toĵabehe wini.✧ <sup>7</sup> Yasuhanda tihondo lalu, Iba be uruniha iba hambu toĵai hadaba, lene. Ani layagola tigua iba be bibahende hambu toĵai hene. <sup>8</sup> Ani biyagola Yasuhanda tihondo lalu, Iba uruni be emeneha odo yoroma buwa iba nelo mo tale bialu haru haga agali kagoria yalu pudaba, lene. Ani layadagua iba be emeneha odo yoroma bu berelayaru yalu pene. <sup>9</sup> Yalu puwa tomo nelo mo tale bialu haru haga agali biagohondo miyagola ibugua na handalu hearia waini ibayagola agoĵa tawebe toba hene. Biabe biaga agali iba odo yoroma bu yalu ibiyaru ti manda bu hene. Ani hearia ibugua agali wali dabu biaga biago oĵawa <sup>10</sup> ibuhondo lalu, Wali agali tomo namĵya ibalimu lene *Ī*bu bedarume waini iba bayalego ala nelo muwa haruore no bidagola nde waini iba ta nabi bedago nelo tale bu miraligo. *Ī*na ani ndo waini iba bayalego wu doho haabo howa *Ā*yu ogoni yalu ibirida, lene.

✧ 1:43: Md 8.22, Mg 2.14 ✧ 1:45: Pig 3.15, 49.10, Man 18.18, Ais 7.14, 9.6, Yar 23.5, Ese 34.23, Seg 6.12, Md 2.23

✧ 1:46: Yo 7.41, 7.52 ✧ 1:47: Iba 32.2, Yo 8.39, Lm 2.28, 9.6 ✧ 1:49: Md 14.33, 16.16, 27.42, Mg 3.11, Yo 12.13

✧ 1:51: Pig 28.12, Md 4.11, Lg 2.9, 2.13 ✧ 2:4: Md 12.48, Yo 7.6, 7.30, 8.20 ✧ 2:6: Mg 7.3-4

<sup>11</sup> Yasuhanda agalime nabiagane aleru dewaore binigo mbira pigane Galiliha tano mbira mini Kainani howa ogoni bini. Bialu howa ibunaga hongo taraore holene winigobi walia hene. Ani walia hayagola ibunaga talima piaga biarume ibuhondo mini mbiraore wini.✧

<sup>12</sup> Yasuhanda anidagua bialu ibunibi ibu aija hamenerubi ibunaga talima piaga biarubi ti Kabaniama puwa horo maru dauru agima ho hene.✧

*Yasuhanda Anduane Homogonaga andaha puwa binigo ogo  
(Madiu 21.12-13, Maga 11.15-17, Lugu 19.45-46)*

<sup>13</sup> Yu wali agali ti Bolangua Halu Penegonaga Horo mitangi bialu tomo nolene tu kaware wiagola Yasu ibu Yarusaleme pole dindi dindi pialu anda pene.✧ <sup>14</sup> Anda pialu hearia Anduane Homogonaga andaha nogo bulumagabi sibibi egabi agalime yolo mialu biyinaya bialu hearia handa walia hene. Muni mo ariari biagamebi bialu berearia handa walia hene. <sup>15</sup> Handa walia howa ibugua tandaga biaga tibu mbira pume wabini. Ani wabuwa agali biarubi nogo sibibi bulumagabi bibahende Anduane Homogonaga andaha howa bama pialu tagira bo ba tagi hai hene. Muni mo ariari biaga berearunaga muni be heba dagiani wiaruni mo haealo бага bu wahalu muni wiagane dagia wiaru mo beregedai hene. <sup>16</sup> Mo beregedai howa ega biyinaya biaga agali hearuhondo lalu, Uruni bibahende yalu tagira pudaba. Ogo i Abanaga anda mo magedi hama helolene nawi, lene.✧ <sup>17</sup> Ani layagola ibunaga talima piaga biarume Anduane Homogonaga mbugani lo wiago ogo, Inaga anda bayale haabo helo ina hame timbuni lalu kogome inaga bu habaneha ira daradagua biragola haruli, gilibu wiaria hendenego mitangi bini.✧

<sup>18</sup> Yasuhanda ani bo ba tagi hayagola Yu wali agali haru haga hearume ibuhondo lalu, Ina o birigonidagua bulene hongo ngo lalu inahondo agalime nabiagane ale mbira agi walia holeberebe, lene.✧

<sup>19</sup> Yasuhanda tihondo ladai bialu lalu, Anduane Homogonaga anda o kagoni gialo waharimiyagua ina horo tebiru hanguni bia dai bulebero, lene.✧

<sup>20</sup> Ani layagola tigua lalu, Ina horo tebiru hanguni bia dai bulebero laribe be. Iname Anduane Homogonaga anda ogoni bialu hemaria mali pira mariani waragaria (46) penego agua, lene.

<sup>21</sup> Yasuhanda Anduane Homogonaga anda layago ibuninaga tingini mitangi bialu lene.✧ <sup>22</sup> Ibu homalu heyu heangi ibunaga talima piaga biarume ibugua bi ogoni layago manda bini. Manda buwa Anduane Homogonaga mbugani bi lo ngagobi Yasuhanda bi laga biyagobi heneneore layada manda bini.✧

*Yasuhanda wali agali bibahendenaga mini manda biai kago ogo*

<sup>23</sup> Yarusalemeni Yu wali agalime Bolangua Halu Penegonaga Horo tomo nole ngoai hayangi Yasuhanda agalime nabiagane aleru walia hayago hondowa wali agali dewame ibuhondo mini mbiraore wini.✧ <sup>24</sup> Ani wiyagolabi Yasu ibugua ti bibahendenaga bu miniha wiago hondowa tihondo mini mbiraore nawi hene. <sup>25</sup> Yasuhanda wali agali bibahendenaga bu miniha wiago ibu manda biai ho henego mbiralime ibuhondo agali abogo ogobi ka lowa ibu lamulene irane nawini.✧

### 3

*Yasu Nigodimusila te lenego ogo*

✧ 2:11: Lg 9.32, Yo 1.14, 4.54, 11.40 ✧ 2:12: Md 4.13 ✧ 2:13: Har 12.1-27, Yo 6.4, 11.55 ✧ 2:16: Lg 2.49  
✧ 2:17: Iba 69.9 ✧ 2:18: Md 12.38, 21.23, Yo 6.30 ✧ 2:19: Md 26.61, 27.40, Mg 14.58, 15.29, Ab 6.14 ✧ 2:21:  
2 Ko 6.16, Kl 2.9, 2 Pi 1.14 ✧ 2:22: Lg 24.6-8, Yo 12.16, 14.26 ✧ 2:23: Yo 2.11, 7.31 ✧ 2:25: Md 9.4, Mg 2.8, Yo  
6.64, Ab 1.24, Mo 2.23

1 Perisi aria agali mbira Yu wali agali haru haga henego ibu mini Nigodimusi hene.✧ 2 Ibugua mbiraga mbirungi Yasu hearia ibuwa ibuhondo lalu, Í lawai hagaore Ngode Datagaliwabehanda pu lenego íbu ke lo manda bu kama. Mbiralime Ngode Datagaliwabela haru ndo ibuni hangu howa agalime nabiagane aleru ína walia haga biriligodagua bibe naheore ka, lene.✧

3 Ani layagola Yasuhanda ladai bialu lalu, Ina íhondo heneneore laro. Mbirali ibu halu mende nataba hene kayagua ibu Ngode Datagaliwabehanda Handame Ho Kagoria nahondolebiraore, lene.✧

4 Ani layagola Nigodimusi ibugua Yasuhondo lalu, Agali wahego lone halu mende agua taba hanabehebe. Ibugua ibu aiyá tombeha anda puwa halu mende taba hanabehebe, lene.

5 Ibugua ani layagola Yasuhanda ladai bialu lalu, Ina íhondo heneneore larogo mbirali ibu ibamebi Ngode Datagaliwabe Dininimebi halu mende nataba hene kayagua ogoni ibu Ngode Datagaliwabehanda Handame Ho Kagoria pobe nahe ka.✧ 6 Tinginime taba hanagago tingini dege haga. Ngode Datagaliwabe Dinini ibugua taba hanagago dinini haga.✧ 7 Ina í halu mende taba honolene nga larugonaga í mogo nalabe. 8 Puyabu pu larane hale hariligo agoha howa pu lo yalu ibalu agohayagi pu lo yu porabe í manda nabi ke. Ngode Datagaliwabe Dinini ibugua holene gahenge ngulene ogonibi nga, lene.✧

9 Ani layagola Nigodimusi ibugua ladai bialu lalu, Mana o larigonaga agua bialu bulebirabe, lene.

10 Ani layagola Yasuhanda ladai bialu, Isaraele wali agali lawai haga gibi í kego howa mana ogoni manda nabi kebe. 11 Ina íhondo heneneore laro. Iname mbirale manda biai howabi handai howabi nde maru lameramaligo áyu iname tíhondo bi mana ogoninaga langeramagola tigua yu tiga nabi haabo kami.✧ 12 Ina dindi tawe manda bidamigo langirugola yu tiga nabi kamigoria dahuliya andaga tawe langerogola agua yu tiga buleberamibe.✧ 13 Mbirali dindini howa dahuliya andaga iraga halu pu nabigo Agali Hole Ibiyago ibu dege dahuliya andagaha howa daliya, lene.✧

14 Mosesehanda dindi ko wali agali nahaga wiagoriani howa puya ege tole ale mini boronosime wabinigo irani ba para howa yaraga hayadagua Agali Hole Ibiyago ani yaraga holene wulebira.✧ 15 Iuhondo mini mbiraore wiragome haabobo holene yilo ani bulebira.✧ 16 Ngode Datagaliwabehanda wali agali bibahende gubalini timbuniore howa ibu Iginini mbira hangu henego ngini. Iuhondo mini mbiraorewi karu ti dinini koha nape haabobo holene yu holebira.✧ 17 Ngode Datagaliwabehanda ibu Iginini wali agali dindi bibahendeni karu tinaga daba ki biaga helo ndo ibilene. Ibu wali agali bibahende pele miaga helo ibilene.✧

18 Ngode Datagaliwabehanda ibu Iginihondo mini mbiraorewi karu daba ki nabulebira. Mini mbiraore nawi karume biyagonaga daba ki bini kago irane tigua Ngode Datagaliwabe Iginini mbira hangu kagonaga mini yu tiga nabiyagome ani bini.✧ 19 Daba ki bulene ngago irane ogo. Wá holene íbu wali agali dindini hearia ibiyagola mana ko biaga hearume arumaha hole hame lowa wá holene hame nale hene.✧ 20 Mana ko biaga karume wá holenehondo handabe manga howa wá holeneme tinaga ko biyago walia holilono wá holene kagoria naibaga.✧ 21 Mana henene biaga karu tigua biagago Ngode Datagaliwabenaga hongome biaga lalu wá holeneme walia helo lowa ti wá holenehayagi íbu haga, Yasuhanda lene.

✧ 3:1: Yo 7.50, 19.39 ✧ 3:2: Md 22.16, Yo 9.16, 9.33, Ab 2.22, 10.38 ✧ 3:3: Md 18.3, Ga 6.15, Ta 3.5, Ya 1.18, 1 Pi 1.23, 1 Yo 3.9 ✧ 3:5: Ese 36.25-27, Mg 16.16, Ab 2.38, Ta 3.5 ✧ 3:6: Iba 51.5, Yo 1.13 ✧ 3:8: Aga 11.5, 1 Ko 2.11 ✧ 3:11: Md 11.27, Yo 3.32, 7.16, 8.26 ✧ 3:12: Lg 22.67 ✧ 3:13: Min 30.4, Yo 3.6, 6.33, 6.38, Ab 2.34, Lm 10.6, 1 Ko 15.47, Eb 4.9-10 ✧ 3:14: Dag 21.9, Yo 8.28, 12.32 ✧ 3:15: Yo 3.36, 6.47, 20.31 ✧ 3:16: Yo 3.36, 10.28, Lm 5.8, 8.32, 1 Yo 4.9-10 ✧ 3:17: Lg 19.10, Yo 5.22, 5.45, 12.47, Ab 17.31, 1 Yo 4.14 ✧ 3:18: Yo 3.36, 5.24, 6.40, 6.47, 20.31 ✧ 3:19: Yo 1.4-5, 1.8-12, 8.12 ✧ 3:20: Yob 24.13-17, Eb 5.11-13

*Yonehanda Yasu ibu daliga holene nga lenego ogo*

<sup>22</sup> Ani lalu bialu Yasubi ibunaga talima piaga biarubi Yudia pu howa dindi ogoriani wali agali maru baboraya bini. ✧ <sup>23</sup> Yonehanda Salimi dindi kaware ngelowa Aenononi iba dewa bereagoria baboraya bialu hene. Wali agalime ibu hearia ibugu biyagola ibugua baboraya bigi bini. <sup>24</sup> Yone ibu garabaya nape heangi ani bialu hene. ✧

<sup>25</sup> Mbirungi Yonenaga talima piaga biarume Yu agali mbira heago heba wayawaya biagane mananaga te lowa lai lene. <sup>26</sup> Lai lalu bialu Yone hearia ibuwa ibuhondo lalu, Lawai haga-o agali mbira í heba iba Yodana ange ederayagi hebigola iname agali eberegoni aibe larimagola ina ibu ogo ka lalu langirigo agali o biagonime áyu wali agali baboraya bialu ka. Ani biragola wali agali bibahendeme ibu karia hangu pialu ka, lene. ✧

<sup>27</sup> Ani layagola Yonehanda ladai bialu lalu, Ngode Datagaliwabehanda mbiralihondo mbirale mbira namiyagua nde mbirali ogoni ibu mbirale nayi holebira. ✧ <sup>28</sup> Ina bi ala larugo tí hale harimi. Mbirali Dabo Helenego ibulebira lowinigo i ndo ko. Ngode Datagaliwabehanda i ala bamba halu pu lenego íbu ko larugoni. ✧ <sup>29</sup> Agali mbirame wali mbira dabu biragola nde wali ogoni ibu one biraga. Agali wali dabu biagagome bi larago hale howa ibunaga nenege igiri yango mende kagome kaware ibu heba howa turu timbuni haga. Ani biagadagua inaga turu holene tolai harago i turu timbuni ho ko. ✧ <sup>30</sup> Ibu daligaore holene ngago ani hela. I dindihaore nira holebero, lene.

*Daliga howa ibiyago ibu daligaore ka, lenego ogo*

<sup>31</sup> Mbirali daliga howa ibiyago ibu maru ale ndo ibu timbuniore ka. Dindini hene kago ibu dindiali ka. Ibugua bi larago lalu dindi tawe hangu laga ka. Mbirali dahuliya andaga howa ibiyago ibu daliga gibiore ka. ✧ <sup>32</sup> Ibugua handayagobi hale hayagobi wali agalihondo lamialu kagola tigua yu tiga nabi ka. ✧ <sup>33</sup> Yu tiga bidagome Ngode Datagaliwabe henene ka lalu walia ka. ✧ <sup>34</sup> Ngode Datagaliwabehanda mbirali ibilayagohondo ibu Dinini tolai helo miagago o biago ibugua Ngode Datagaliwabenaga biore laga ka. ✧ <sup>35</sup> Abahanda ibu Igini gubalini timbuniore howa mbirale bibahende ibuhondo miai hene. ✧ <sup>36</sup> Igini ogonihondo mini mbiraore wu kagome haabobo holene yu ka. Igini ogonime bi larago hale nahe donge ho kagome haabobo holene nayulebiraore. Ngode Datagaliwabenaga lembo holene ibuha wiaabo holebira, lene. ✧

## 4

*Yasu Samaria walila te lenego ogo*

<sup>1</sup> Yonehanda wali agali baboraya biyaru emene lowa Yasuhanda dewaore bialu ka, lalu marume layane Perisi agalirume hale hene. ✧ <sup>2</sup> Yasu ibunime mbirali baboraya nabi ibunaga talima piagarume dege ani bini. <sup>3</sup> Ogonidagua layago hale howa Yasu ibu Yudia wahalu Galili dai bini. <sup>4</sup> Galili pole Samariani pialu polene wini.

<sup>5</sup> Ani pialu Samariaha Saiga tano anda pene. Tano ogoni bamba Yagabahanda Yosebehondo dindi tu wa minigo ogoriani kaware wini. <sup>6</sup> Dindi ogoriani pialu howa horombe hanuni hayagola Yasu ibu bamba Yagabahanda iba hambigane uli wene wiagoria pialu ibunaga ge hi howa ogoriani halo berene. ✧

<sup>7</sup> Ani berearia Samaria wali mbira iba hambule ibiyagola Yasuhanda ibuhondo lalu, Iba noliya hambu ngi, lene. <sup>8</sup> Iibunaga talima piaga biaru ti tanoha tomo mo piyagola ibu berene.

✧ **3:22:** Yo 4.1-2 ✧ **3:24:** Md 4.12, 14.3, Mg 6.17, Lg 3.19-20 ✧ **3:26:** Yo 1.26-34 ✧ **3:27:** Yo 19.11, 1 Ko 4.7, Hi 5.4, Ya 1.17 ✧ **3:28:** Mal 3.1, Md 11.10, Mg 1.2, Lg 1.17, Yo 1.20, 1.23, 1.27 ✧ **3:29:** Md 9.15 ✧ **3:31:** Md 28.18, Yo 8.23, Lm 9.5, 1 Ko 15.47, Eb 1.21, Pb 2.9, 1 Yo 4.5-6 ✧ **3:32:** Yo 3.11, 8.26, 15.15 ✧ **3:33:** Lm 3.4, 1 Yo 5.10 ✧ **3:34:** Ais 42.1, Yo 1.16, 7.16 ✧ **3:35:** Md 11.27, Lg 10.22, Yo 5.20, 10.17, Hi 2.8 ✧ **3:36:** Lg 3.7, Yo 1.12, 3.16-18, 6.47, Lm 1.17, 1 Yo 5.10-12 ✧ **4:1:** Yo 3.22, 3.26 ✧ **4:6:** Pig 33.19, Yos 24.32

<sup>9</sup> Ani layagola Samaria wali biagome ladai bialu lalu, Í Yu agali ndobe. I Samaria wali bedogo iba noliya hambu ngi larigo agibe, lene. Yu wali agalime Samaria wali agali heba mandagi nahaga hene.✠

<sup>10</sup> Ani layagola Yasuhanda ibuhondo ladai bialu lalu, Ngode Datagaliwabehanda ngiagagobi agali ihondo iba noliya hambu ngi lalu kagonibi manda bidele nde ina ibuhondo iba ngi ledele. Ani ledele nde ibugua iba haabo holene ngiaganego ngidale, lene.✠

<sup>11</sup> Ani layagola wali biagome ibuhondo lalu, Agali-o í iba hambiangane be nayi kego iba ogo uli unuraha bedago haabo holene iba agoha hambuleberebe.✠ <sup>12</sup> Iba hambiangane uli ogoni bamba ina mamali Yagabahanda ina ngini. Ibunibi ibu iginirubi ibunaga nogo sibirubi ti iba uli ogoniha bedago naga hene. Ibu agali timbuni henego í ibu ale ndo agali daligaore kebe, lene.✠

<sup>13</sup> Yasuhanda ladai bialu lalu, Wali agali iba uli ogoha bedago narago lone noa holebira. <sup>14</sup> Mbirali iba ina miagane yidogo narago ibu lone noa naholebira. Inaga iba ibuha duguaho wiaabo haragola ibu iba noa nahe howa haabobo holene yulebira, lene.✠

<sup>15</sup> Ani layagola wali biagome Yasuhondo lalu, Agali-o í iba lone noa naholiyabi iba uli ogoha lone hambu dai nabuliyabi iba ogoni ngi, lene.

<sup>16</sup> Yasuhanda ibuhondo lalu, Í agalini damu puwa libu haru ogoria dai bilibu, lene.

<sup>17</sup> Wali biagome ladai bialu, I agalini nahe, lene.

Yasuhanda ladai bialu lalu, I agalini nahe larigo tiga tiga langiri. <sup>18</sup> Í agali duria pirigo mbira áyu pu bedegonibi í agaliniore ndola bedego heneneore langiri, lene.

<sup>19</sup> Ani layagola wali biagome ibuhondo lalu, Agali-o í Ngode Datagaliwabe mana latagi hagaoredane hendedo.✠ <sup>20</sup> Ina mamalime hari ogoria howa Ngode Datagaliwabe mitangi bialu lotu laga henego. Áyu tí Yu wali agalime Yarusalemeni howa hangu Ngode Datagaliwabe mitangi bialu lotu lolene nga laramili, lene.✠

<sup>21</sup> Yasuhanda ibuhondo lalu, Wali-o bi mbira larogo manda bialu yu tiga bibe. Emene howa wali agalime hari ogoriani howabi Yarusalemeni howabi Aba Ngode Datagaliwabe mitangi bialu lotu nalolebira.✠ <sup>22</sup> Tí Samaria wali agalime mbirali ai mitangi bialu lotu laramiligo tí manda naberamili. Ina Yu wali agalime Ngode Datagaliwabe kago manda buwa ibu mitangi bialu lotu laramaligo irane pele mulene Yualiha howa ibaga.✠

<sup>23</sup> Wali agalime Ngode Datagaliwabe Dinininaga hongome Aba henene ka lalu ibugua hame ledadagua tigua ibu mini yaraga holebira. Nde ani bulene tu áyu haragoni.✠

<sup>24</sup> Ngode Datagaliwabe ibuni Dinini kago wali agalime Ngode Datagaliwabe mini yaraga holene nga manda biyagua nde tigua ibu Dinininaga hongome Ngode Datagaliwabe henene kagobi ibu mitangi bialu lotu lolene nga, lene.✠

<sup>25</sup> Ani layagola wali biagome ibuhondo lalu, Mbirali Dabo Helenego ibulebira lowinigo ibiragola ibugua galone bibahende ngago langiai holebiralolo manda bido, lene.✠

<sup>26</sup> Yasuhanda ladai bialu lalu, Áyu í heba te lalu kagoni í ogoni kogoni, lene.✠

<sup>27</sup> Bi ogoni lalu heaore ibunaga talima piaga biaru dai bialu hearia Yasu ibu wali heba te lalu heago hondowa ti mogo lo hendene. Mogo lowa tigua wali biagohondo, Í agi mo ibiribe, lolenebi Yasuhondo, Í wali heba te lalu kego agibe, lolenebi ogoni latagi nahe hene.

✠ **4:9:** 2 Kin 17.24, Esr 4.1-5, 9.1-10.44, Neh 4.1-2, Lg 9.52-53, Ab 10.28 ✠ **4:10:** Ais 12.3, Yar 2.13, Seg 13.1, 14.8, Yo 4.26 ✠ **4:11:** Yo 7.37-38, Mo 21.6 ✠ **4:12:** Yo 8.53 ✠ **4:14:** Yo 6.35, 6.58, 7.38 ✠ **4:19:** Lg 7.16, Yo 6.14, 7.40, 9.17, 1 Ko 14.24-25 ✠ **4:20:** Man 12.5, 12.11-14, 1 Kin 9.3, Iba 122.1-5 ✠ **4:21:** Mal 1.11, 1 Ti 2.8 ✠ **4:22:** 2 Kin 17.29-41, Ais 2.3, Lg 24.47, Lm 9.4-5 ✠ **4:23:** Yo 1.17, Pb 3.3 ✠ **4:24:** Lm 12.1, 1 Ko 3.17, Pb 3.3 ✠ **4:25:** Yo 1.41 ✠ **4:26:** Md 26.63-64, Mg 14.61-62, Yo 9.37



<sup>28</sup> Wali biagome ibunaga iba be o biagoriani ngelalu tanoha dai buwa wali agali hearuhondo lalu, <sup>29</sup> Agali mbira kago ibugua ina biniru bibahende langiai hayago ibu Mbirali Dabo Helenego ibulebira lowinigo mbauleyago hondo ma, lene. <sup>30</sup> Ani layagola tigua tano biagoha howa Yasu hondole ibini.

<sup>31</sup> Wali biago peaha talima piaga biarume Yasuhondo lalu, Lawai haga-o tomo na, lene.

<sup>32</sup> Ibugua ladai bialu, I tomo nolene ngogo tí manda nabi kami, lene.

<sup>33</sup> Ani layagola talima piaga biarume tini degedege lagalaga bialu lalu, Ibunaga tomo mbiralime yu ibu miyadago aiwadabe, lene.

<sup>34</sup> Yasu ibugua tihondo lalu, Mbirali i pu layago ibugua bibe layadagua bulenebi biabe buliya ngiyago bu maro biai holenebi inaga tomo ogoni, lene. ✧ <sup>35</sup> Ibugua lalu, Tigua, Ege maria howa widi lini gandu lolene tu holebira, laramiligo ina tihondo au laro. Ayu mabu bayuwa handawa bidaba. Widi lini bogabidago gandu lolene tu hayada, lene. ✧

<sup>36</sup> Mbirali áyu widi gandu lalu kago ibu yolo mialu haabobo holenaga gandu lalu ka. Anigo mbirali egene polalu kagobi mendeali gandu lalu kagobi libu mandagi howa turu holebira. ✧ <sup>37</sup> Bi henene mbira laganego ogo, Mbiralime egene polaga mendealime gandu laga. <sup>38</sup> Tigua egene polene ndo wiagoria ina tihondo gandu lole pudaba laro. Maru ti biabe bu wiagoha tí karulo harimi, lene.

<sup>39</sup> Wali biagome, Ina bibahende biniru damene langiai haya, layago hale howa Samaria wali agali dewame Yasuhondo mini mbiraore wini. <sup>40</sup> Tigua Yasu hearia ibuwa ibuhondo lalu, I ina hebaore hamiya hame ledama, layagola Yasu ibu ti heba horo kiru hene.

<sup>41</sup> Wali agali dewaoreme Yasuhanda bi layago hale howa ibuhondo mini mbiraore wini. <sup>42</sup> Ani wuwa tigua wali biagohondo lalu, Ina bi larigo dege hale howa ndo ibuninaga bi layago hale harimagome ibuhondo mini mbiraore wu kama. Ibu wali agali bibahendenaga Pele Miagaore ka mandabu kama, lene. ✧

### *Gabumane agali heagonaga igini Yasuhanda mo dabi henego ogo*

<sup>43</sup> Yasu ibu horo kiru Samaria wali agali heba halu Galili pene. ✧ <sup>44</sup> Ala Yasuhanda lalu, Ngode Datagaliwabe mana latagi haga agaligo ibu damene ibuni daluni karume ibu mitangi nabiaga ka, lene. ✧ <sup>45</sup> Yasu ibu Galilini anda pialu hearia wali agali hearume turu howa ibu ngoai hene. Irane ala Bolangua Halu Penegonaga horo timbuni tagira ibiyangi wali agali urunime lotu lolebi tomo nolebi Yarusaleme puwa Yasuhanda biyago bibahende ti de handai henegonaga turu ho hene. ✧

<sup>46</sup> Ala Yasuhanda Galiliha tano mbira mini Kainani howa iba mo waini iba hayagoha ibu lone pene. Dindi ogoriani gabumane agali mbira heago ibu igini Kabaniama tanoni warago bo wini. ✧ <sup>47</sup> Ibugua Yasu Yudia howa Galilini ibu ka layago hale howa Yasu hearia ibini. Ibuwa ibugua Yasuhondo lalu, I igini áyu ogoni tongolo mibeheore ngago ibu nahome dabi helo Kabaniama mba, lene. ✧

<sup>48</sup> Yasuhanda ibuhondo lalu, Tigua agalime nabiagane alebi nahendene alebi nahende howa ihondo mini mbiraore nawuleberami, lene. ✧

<sup>49</sup> Gabumane agali biagome ibuhondo lalu, Agali-o i igini homoligo abale mba, lene.

<sup>50</sup> Yasuhanda ibuhondo lalu, I igini dabi holebirago pamia, lene. ✧

Ani layagola hale howa agali biagome Yasuhanda bi layago yu tiga bialu pene.

<sup>51</sup> Andaga dai bialu hearia ibunaga garabaya biabe ale bia haga hearume ha obeneni lola howa lalu, I igini dabi ho ka, lene.

<sup>52</sup> Agali biagome lalu, Angi dabi hayabe, lene.

✧ 4:34: Yo 6.38, 17.4, 19.30 ✧ 4:35: Md 9.37, Lg 10.2, Mo 14.15 ✧ 4:36: Iba 126.5-6, Dan 12.3 ✧ 4:42: Yo 17.8, 1 Yo 4.14 ✧ 4:43: Yo 4.40 ✧ 4:44: Md 13.57, Mg 6.4, Lg 4.24 ✧ 4:45: Yo 2.23 ✧ 4:46: Yo 2.1-11 ✧ 4:47: Md 8.5-6, Lg 7.1-10 ✧ 4:48: Yo 2.18, 20.29, 1 Ko 1.22 ✧ 4:50: Md 8.13, Mg 7.29

Tigua ladai bialu, Abe ni ande layagola warago dabi haya, lene. <sup>53</sup> Igiri aba biagome mitangi bialu Yasuhanda, Í igini dabi holebira, layangiore dabi hayadalo manda bini. Ani manda buwa agali biago ibunibi ibu damenebi ti bibahendeme Yasuhondo mini mbiraore wiai hene.✠

<sup>54</sup> Yasu ibu Yudia howa Galili ibuwa ibugua agalime nabiagane ale halu mende ogoni bini.✠

## 5

### *Yasuhanda agali mbira mo dabi henego ogo*

<sup>1</sup> Ani bialu howa Yasu ibu Yarusalemeni Yu wali agali ti bibahende lotu lolebi tomo nolebi ngoai hagane horongi ngoai hayagoria pene. <sup>2-4</sup> Yarusalemeni wai pabe haraba timbuni mbira mini Nogo Sibi Panga laga heago kawareni iba emene mbira berene. Hiburu bi lalu iba ogoni mini Bedeseda laga wini. Anda mbira haraba duria wi heagoria wali agali de koheru ge koheru kuduguheru dewaore iba ogoni angeni biru wini. [Mbiruore uliningi Anduane Homogonaga dahuliyalime daluwa iba ogoni mo lumulumu bigi bia haga berene. Lumulumu bialu kagotha ala pora birago ibu mo dabi haga wini. Ani biagago manda buwa wali agali urunime abale pora bule lowa nende bia ho biraga biaga wini.] <sup>5</sup> Agali mbira ibu warago bo wiane dege mali pira tebirani halira (38) pene wiago <sup>6</sup> Yasu ibu de handalu ibu bambaore howa warago bo wiaabo heneda manda buwa ibuhondo lalu, Í dabi holene hamelo bedebe, lene.

<sup>7</sup> Ani layagola ibugua ladai bialu lalu, Agali-o iba lumulumu bialu kaore ñ mo yalu puwa ibira holene mbira nahedagola wene pialu koore dege maru ti abale pora biaga, lene.

<sup>8</sup> Ani layago hale howa Yasuhanda ibuhondo lalu, Heyalu ñnaga tamunguru mo yalu pu, lene.✠ <sup>9</sup> Ani layangiore agali warago bo wiraligo mo dabi haya handala ibunaga tamunguru mo yalu pene.

Agali ogoni mo dabi hayadago Sabada horongi mo dabi hene. <sup>10</sup> Agali dabi hayagome ibunaga tamunguru mo yalu piyadago Yu wali agalinaga haguane hearume hondowa ibuhondo lalu, Áyu Sabadangidago inanaga Mana lowini ngagome mbirale mbira yalu polene nawi longago ñnaga tamunguru yalu porego agibe, lene.✠

<sup>11</sup> Ibugua ladai bialu, I mo dabi hayadago ibugua ñnaga tamunguru mo yalu pu laya handala yalu porogoni, lene.

<sup>12</sup> Ani layagola tigua lalu, ñnaga tamunguru mo yalu pu layadagoni agali aiwa layabe, lene.

<sup>13</sup> Agali dabi hene biagome lalu, I aiwa mo dabi hayabe manda nabido, lene. Yasuhanda agali biago mo dabi halu ibu wali agali dewa bu heagoha piyiyagola agali biagome agohayagi piyabe toba howa ani lene.

<sup>14</sup> Maha Yasu ibu Anduane Homogonaga anda tamuha pialu hearia ibugua agali biago hearia de hondowa ibuhondo lalu, Áyu Í dabi ho kegonigo mani mo ko holene mbira íha wuligo mana ko nabi bayale hangu bialu habe, lene.✠

<sup>15</sup> Ani layago hale halu agali biagome puwa Yu agali haguane hearuhondo lalu, I mo dabi haya larugo Yasuhandaya, lene. <sup>16</sup> Ani layago hale howa Yu agali biarume, Sabada horongi nabulene winigo birida, lowa Yasu mo tandaga halu hene.✠ <sup>17</sup> Ani bialu heagola Yasuhanda ladai bialu lalu, I Abahanda biabe biaabo halu kadagua ñnabi bialu kogoni, lene.✠

<sup>18</sup> Yasuhanda bi ani layagome Yu wali agalinaga haguane biaru ti mo kebaore hene. Keba henego Yasu ibugua Sabada horongi puguayagonaga hangu ndo. Ngode

✠ 4:53: Ab 16.14-15, 16.31 ✠ 4:54: Yo 2.11, 2.23 ✠ 5:8: Md 9.6 ✠ 5:10: Har 20.10, Neh 13.19, Yar 17.21, Md 12.2, Mg 2.24, Lg 13.14, Yo 9.14 ✠ 5:14: Yo 8.11 ✠ 5:16: Md 12.14 ✠ 5:17: Yo 9.4, 14.10

Datagaliwabe i Aba layago mine halu Ngode Datagaliwabela iya ogobi labolabo kaba lalu laya manda buwa tigua ibu homelo bo wahole manda bialu hene.✧

*Yasu ibugua ibu abahanda biragua biagago ogo*

<sup>19</sup> Ani bu heagola Yasuhanda tihondo lalu, Ina tihondo heneneore langerogo. Iginu ibuni hangume manda bialu mbira nabiaga. Ibu Abahanda birago hondowa ibugua biradagua hangu bulebira.✧ <sup>20</sup> Abahanda ibu Iginu gubalini timbuniore howa ibugua birago bibahende ibu Iginu walia haga. Ibu Iginime biabe hongohe taraore áyu birane handarimigobi ndo timbuniorebi bilo walia holebira. Anidagua birago hondowa tí mogo loleberami.✧ <sup>21</sup> Abahanda wali agali homenego mo heya halu holene gahenge miagadagua ibu Iginimebi ani dege bialu holene gahenge ibuni mua biragohondo mulebira.✧ <sup>22</sup> Aba ibunime wali agalime biragonaga daba ki nabulebira. Ibu Iginu hangume bibahende daba ki bilo heleda.✧ <sup>23</sup> Ani heledago irane wali agali bibahendeme Abanaga mini mo yaraga hagadagua ibu Igininaga minibi mo yaraga helo heleda. Mbirali Igininaga mini mo yaraga nahe kagome Aba ibugua i pu layagonaga minibi mo yaraga nahaga dege ka, lene.✧

<sup>24</sup> Tihondo heneneore laro. Wali agalime inaga bi larogo hale halu bialu kagobi i pu layagohondo mini mbiraore wialu kagobi ogoni ibu haabobo holene yu halu ibugua biyagonaga dabolene nawulebira. Ogoni ibu ala homaganehayagi henego áyu haabobo holenehayagi porabu ede ho ka, lene.✧

*Homaliha padarume Ngode Datagaliwabe Igininaga bi hale howa heyu holebira, lenego ogo*

<sup>25</sup> Yasuhanda laabo halu lalu, Tihondo heneneore laro. Horo mbira tagira ibulebira lowinigo áyu tagira ibiragonigo ibiragola homene homaliha padarume Ngode Datagaliwabe Igininaga bi hale holebira. Hale hararume heyulebira.✧ <sup>26</sup> Aba ibuniha holene tene ngagobi Iginu ibuhabi holene tene ngeleda. <sup>27</sup> Ani buwa Ngode Datagaliwabeanda wali agali biraligonaga dabolene ibu Iginu ibu Agali Hole Ibiyago ka lowa ibugua ibuhondo hongo mini.✧ <sup>28</sup> Áyu o larogo hale howa mini mogo nalalimu. Horo tara tagira ibulene kaware ngago tagira ibirangi homaliha hora heneru bibahendeme ibunaga bi hale halu <sup>29</sup> heyalu tagira ibai holebira. Bayale bialu haga heneru heyalu ti haabobo holenehayagi pu hadaba lolebira. Ko bialu haga heneru heyalu ti baba godi lowa pani nolenehayagi pu hadaba lolebira, lene.✧

*Yasu ibu Ngode Datagaliwabe Iginioire ka lenerume bi lenego ogo*

<sup>30</sup> Ini manda bialu agua labehedago lowa mbira nalaruli. I Abahanda, Agua lolene nga, lalu langirago hale howa hangu laruli. Dabolene ngadaguaore lo tiga biruli. Ini hameme mbira bupe halu nabiruli. I pu layagome hame ledadagua hangu biruli.✧

<sup>31</sup> Ina agua biruli lalubi i ogobi ko lalubi koyagua nde henene ndo lare lolene nga.✧ <sup>32</sup> Mbirale ina biaganego agua biaga lalu mbiralime lamialu kago henene biruligobi tiga tiga lamialu ka manda bu ko.✧ <sup>33</sup> Tinaga bi lamule piagarume Yone hearia piyagola ibugua tihondo bi lamiyagoni henene hangu lamiya.✧ <sup>34</sup> Ina agalime i kogobi henene ka lelo manda buwa ndo tí pele ngulenaga manda buwa laro. <sup>35</sup> Yone ibu lamu hale ale dalu howa wá timbuni hagadagua ibuni wá ho heago handarimingi turu ho harimi.✧

<sup>36</sup> Yonehanda i tihondo emene walia haya. I Aba ibunime mo hongo haragola biabe

✧ 5:18: Md 26.4, Yo 7.1, 7.19, 7.30, 10.30, 10.33, Pb 2.6 ✧ 5:19: Yo 5.30, 8.28-29, 12.49, 14.10 ✧ 5:20: Md 3.17, Yo 3.35, 2 Pi 1.17 ✧ 5:21: Man 32.39, 1 Sml 2.6, 2 Kin 5.7, Lg 7.14, 8.54, Yo 11.25, 11.43, Lm 4.17, Eb 2.5 ✧ 5:22: Md 11.27, Yo 3.17, 5.27, 9.39, Ab 10.42, 17.31, 1 Pi 4.5 ✧ 5:23: Pb 2.10-11, 1 Yo 2.23 ✧ 5:24: Yo 3.15-18, 6.40, 8.51, 1 Yo 3.14 ✧ 5:25: Yo 5.28, Eb 2.1, 2.5-6, Kl 2.13 ✧ 5:27: Dan 7.13-14, 7.22, Yo 5.22, Ab 10.42, 17.31 ✧ 5:29: Ais 26.19, Dan 12.2, Md 16.27, Yo 6.40, Ab 24.15, 1 Ko 15.52, 1 Te 4.16 ✧ 5:30: Md 26.39, Yo 4.34, 5.19, 6.38 ✧ 5:31: Yo 8.13-14, Mo 3.14 ✧ 5:32: Md 3.17, Yo 5.36-37, 8.18, 1 Yo 5.6-9 ✧ 5:33: Yo 1.19-34, 3.27-30, Eb 2.8, Ta 3.5 ✧ 5:35: Md 13.20-21, Mg 6.20, 2 Pi 1.19

buliya ngiyago bialu kogome i tihondo timbuniore ogonime walia haragoni. Ogoni hondowa i Abahanda i pu layagola ibinida manda bibehe kami. ✧ <sup>37</sup> I Aba i pu layago ibunime bi i henene kogobi lalu ka. Tigua ibunaga bi hale nahene halu ibunaga denguibi nahendene kami. ✧ <sup>38</sup> Ibugua pu layagola ibiyagohondo mini mbiraore nawi kamigome ibunaga bi mana ti bu miniha yu tiga nabi kami. <sup>39</sup> Anduane Homogonaga mbugaha haabobo holene handa walia hole manda buwa daga laabo haramiligo nde Anduane Homogonaga mbugani lo ngagome i tihondo walia haga nga. ✧ <sup>40</sup> Ani bidago ayu ina tihondo holene gahenge nguliya i kogoria ibulene manga halu kami. ✧

<sup>41</sup> Agalime inaga mini mo yaraga helo hame lowanaga ndo laro. ✧ <sup>42</sup> Anigo ina tinaga bu miniha kamigobi manda bidogo tigua Ngode Datagaliwabhondo gubalini holene tiha nawiore kamilo manda bido. <sup>43</sup> I Abanaga minini howa ibu kogo tigua ihondo turu halu ina hamiya ibinida lowa inaga bi yamia nabi kami. Agali tara mbira ibuninaga minini howa ibiyagua tigua ogoni ibunaga bi larago turu halu ina hamiya lowa abale yamuleberami. ✧ <sup>44</sup> Ngode Datagaliwabe mbiraore hangu kago ibugua tinaga mini mo yaraga helo ha nabi howa tinime tininaga mini mo yaraga haga haga bialu kami. Ani bialu haabo howa ihondo mini mbiraore agua wuleberamibe. ✧ <sup>45</sup> Tigua bialu kamigoni agua biya lalu manani dabelo ina i Aba lamulebiralu manda nabilimu. Mosesehondo tigua mini dunubia ho harimigo ogoni ibugua tigua bialu harimidagoni agua biya lalu manani dabelo i Aba lamulebira. ✧ <sup>46</sup> Iname Mosesenaga bi hale howa mini mbiraore wu kama, lalu kamigo ibuhondo mini mbiraore heneneore ngamile nde inaga bi hale howa ihondobi mini mbiraore ngamile. Ibugua i lalu bi te gilibu wini ngagoni. ✧ <sup>47</sup> Ibugua i lalu gilibu wini ngago hondowa mini mbiraore nawi kamigoria inaga bi hale halu mini mbiraore agua wuleberamibe, lene. ✧

## 6

### *Wali agali dewaoreme tomo no karula penego ogo (Madiu 14.13-21, Maga 6.30-44, Lugu 9.10-17)*

<sup>1</sup> Ani lalu Yasu ibu iba Galili doma edeyagi pene. Iba Galili mini mende Taiberiasa. <sup>2</sup> Ibugua wali agali warago bo winiru mo dabi halu agalime nabiagane ale dewa biyago hondowa wali agali dewaoreme ibu piyagoha haruru pene. <sup>3</sup> Yasu ibunaga talima piagaru heba hari mbira heagoria iraga ho berene. <sup>4</sup> Bolangua Halu Penegonaga tomo nolene tu kaware wini. ✧ <sup>5</sup> Wali agali dewaore ibiyaru hondowa Yasuhanda Pilibihondo lalu, O ibiraruni tomo karulape nelo iname tomo agua mimiyadabe, lene. ✧ <sup>6</sup> Ibugua tomo agua mule manda buwa Pilibi ba hondole lene.

<sup>7</sup> Pilibihanda ladai bialu lalu, Kina handari kirame (200) tomo yolo bu mirimayaguabi bibahende no karula napolebira, lene.

<sup>8</sup> Yasunaga talima piaga Saimono Pida hamene Anduruhanda lalu, <sup>9</sup> Igiri mbirame ladi ale mini balime mberedi hirini duriabi wena kirabi heneago nde ina tidini gibi kamago nakarulapeda, lene. ✧

<sup>10</sup> Ani layagola Yasuhanda lalu, Wali agali bibahende birai hadaba ladaba, layagola tani bayale heagoria birai hene. Agali hangu daga lowa daosini duria (5,000) hene. <sup>11</sup> Birai heagola Yasuhanda mberedi biago yamuwa ibu Abahondo kai lowa wali agali birayaru milo talebu tahene. Wenabi ani dege talebu muwa no karulapeore mini. <sup>12</sup> No karula pialu ibira hayaru ibugua ibunaga talima piaga biaruhondo lalu, Mbira

✧ **5:36:** Yo 3.2, 10.25, 10.38, 14.11, 1 Yo 5.9 ✧ **5:37:** Md 3.17, 17.5, Mg 1.11, Lg 3.22, Yo 5.32, 6.27, 8.18, 1 Ti 1.17, 1 Yo 4.12 ✧ **5:39:** Man 18.15-18, Lg 16.29, 24.27, 24.44, Yo 5.46, Ab 13.27, 17.11, 2 Ti 3.15, 1 Pi 1.10-11 ✧ **5:40:** Yo 1.11, 3.19 ✧ **5:41:** Yo 5.34, 1 Te 2.6 ✧ **5:43:** Md 24.5, 24.24 ✧ **5:44:** Yo 12.43, Lm 2.29 ✧ **5:45:** Man 31.26-27, Lm 2.12 ✧ **5:46:** Pig 3.15, Man 18.15-18, Yo 1.45, Ab 3.22, 26.22 ✧ **5:47:** Lg 16.31 ✧ **6:4:** Yo 2.13 ✧ **6:5:** Md 14.14, Mg 6.34, Lg 9.12 ✧ **6:9:** 2 Kin 4.43

waholigo bibahende mo mogo bidaba, lene. <sup>13</sup> Tigua mo mogo biai howa mberedi duria biaru nalu ibira hayaru nu homberia (12) hono tolene.

<sup>14</sup> Wali agali biarume Yasuhanda agalime nabiagane ale biyago hondowa tini laga laga bialu lalu, Ngode Datagaliwabe Mana Latagi Haga Mbirali dindini ibulebira lo harimago ibuoreda, lene. ✧ <sup>15</sup> Tigua bi degeme, Yasu í handame haga kini ha, lalu ibu mo yaraga hole heago hondowa ibu hari heagoha ha do hole ibuni hangu pene. ✧

*Yasu ibani ibinigo ogo*

*(Madiu 14.22-23, Maga 6.45-52)*

<sup>16</sup> Ne lanini Yasunaga talima piaga biaru ti ibaha dalipe halu <sup>17</sup> iba taluni biralu Kabaniama pole pene. Pialu hearia Yasu naibi heaore dege aruma hene. <sup>18</sup> Aruma howa puyabu timbuni pulalu ibiyagome iba mo yaribu bini. <sup>19</sup> Ti iba talu tanguima piyadagoni lunaga magi kilomida duria waragaria agima pialu hearia Yasu ibani ibalu iba talu biago kaware ibiyaria de hendene. Hondowa ti gi timbuniore hene. <sup>20</sup> Gi hayagola ibugua tihondo lalu, I kogonigo gi nahalimu, lene. <sup>21</sup> Ani layago hale howa iba taluha ibilo turu howa gi yamini. Ani biyaore ti polebiyagoria anda pene.

*Wali agalime Yasu hai binigo ogo*

<sup>22</sup> Egerebalene wali agali iba timbuni doma edeyagi paliyarume manda bialu hearia, Abe iba talu mbiraore hangu wiyagoria ibunaga talima piaga biaru piyadagua Yasu ibuni napiyagoda, manda bini. <sup>23</sup> Ani manda bu hearia iba talu maru Taiberiasa howa Anduane Homogohanda kai lowa ti tomo karulape nayagoria kaware anda ibini. ✧ <sup>24</sup> Tigua Yasubi ibunaga talima piaga biarubi nahe piai hayiyago hondowa iba talu urunini biralu Kabaniamaha Yasu hai bima pene.

*Holene gahengeore mberedi I ko, Yasuhanda lenego ogo*

<sup>25</sup> Tigua Yasu iba timbuni doma orayagi hearia handa walia howa ibuhondo lalu, Lawai haga-o í ogoria angi ibu haribe, lene.

<sup>26</sup> Ani layagola Yasuhanda ladai bialu lalu, Tihondo heneneore laro. I hai bima ibirimigo ina agalime nabiagane ale birugo hondowa ndo ibirimi. Tomo mo karula pirugola haruore narimigo manda buwa ibirimi, lene. ✧ <sup>27</sup> Ani lowa lalu, Ereba hagane tomonaga biabe nabialu halimu. Haabobo holene tomo Agali Hole Ibiyagome ngulebirago tomo ogoni mule biabe bialu halimu. Aba Ngode Datagaliwabehanda ibu ani helo loma bia ho heleda, lene. ✧

<sup>28</sup> Ani layago hale howa tigua ibuhondo lalu, Iname Ngode Datagaliwabehanda hame ledadagua bulumaya agua bibehebe, lene.

<sup>29</sup> Yasuhanda ladai bialu lalu, Ibugua pu layagola ibiyagohondo mini mbiraore wulene ogoni Ngode Datagaliwabehanda hamelo ka, lene. ✧

<sup>30</sup> Ani layagola tigua ibuhondo lalu, Ina agalime nabiagane ale bialu iname hondowa ihondo mini mbiraore wulumaya agi buleberebe. Ina biabe agi buleberebe. ✧ <sup>31</sup> Ina mamali dindi ko wali agali nahagaha howa mena nalu hene. Ogoni binigo Anduane Homogonaga mbugani lo ngago ogo, Ibugua ti nelu mberedi dahuliya tawe mini, lalu gilibu nga, lene.

<sup>32</sup> Ani layagola Yasuhanda lalu, Tihondo heneneore laro. Mosesehanda tihondo mberedi ngiyago dahuliya tawe ndo. I Aba ibugua dege mberedi dahuliya taweore ngiaga ka. <sup>33</sup> Mberedi Ngode Datagaliwabehanda ngiaga ogoni dahuliya andaga howa dalinigo kago ibugua wali agali dindini karuhondo holene gahengeore mialu kago Ngode Datagaliwabenaga mberedi ogoniore, lene.

✧ 6:14: Pig 49.10, Man 18.15-18, Md 11.3, Yo 1.21, 2.11, 4.19, 4.25, 5.46 ✧ 6:15: Md 14.23, Yo 18.36 ✧ 6:23: Yo 6.11 ✧ 6:26: Yo 6.11-12 ✧ 6:27: Md 3.17, Lg 3.22, Yo 1.33, 4.14, 6.48-58, Ab 2.22, 2 Pi 1.17 ✧ 6:29: 1 Yo 3.23 ✧ 6:30: Har 16.4, 16.15, Dag 11.7-9, Neh 9.15, Iba 78.24, Md 12.38, 16.1, Mg 8.11, Yo 2.18, 1 Ko 1.22, 10.3



<sup>34</sup> Tigua ibuhondo lalu, Anduane-o ina mberedi ogoni ina ngiaabo habe, lene.✧

<sup>35</sup> Ani layagola Yasuhanda tihondo lalu, Holene gahengeore mberedi ini kogoni. I koría ibaabo halu karu garibi nale holebira. Ihondo mini mbiraore wialu karu iba lone noa naholebira.✧

<sup>36</sup> Anigo tigua i de hondowa ihondo mini mbiraore nawi kami lalu langirugoni.✧ <sup>37</sup> I Abahanda ihondo ngiraru bibahende ibalu i kogo haho tago holebira. I koría ibiraru mbira ina wara tagi naholeberogo✧ <sup>38</sup> irane i dahuliya andaga howa ibuwa ini hame ledodagua bule ndo. I pu layago ibugua hame ledadagua bule ibiru.✧ <sup>39</sup> I pu layago ibugua ina buliya hamelo kago ogo. Ihondo ngiraru mbira ina yu wa nahe hamaro bulene horo harangi bibahende mo heya hai holiya hamelo ka.✧ <sup>40</sup> I Abahanda hamelo kago ogo. I gini i de hondowa ihondo mini mbiraore wialu karume haabobo holene mo yai helo hamelo ka. Hamaro bulene horongi haabobo holene yu karu ina mo heya hai holebero, lene.✧

### *Yu agali tini laga laga binigo ogo*

<sup>41</sup> Ibugua lalu, Mberedi dahuliya andaga howa dalinigo i ko, layago hale howa Yu agali tini bi gimigomo lalu, <sup>42</sup> Ibu ai howa lalu kabe. Ibu Yosebe igini Yasu ndodabe. Ibu ajiya abala ina manda bidamagoni. Ibugua lalu, Dahuliya andaga howa dalinigo i ko, lalu kago irane agibe, lowa laga laga bini.✧

<sup>43</sup> Ani layagola Yasuhanda tihondo lalu, Tini dege dege bi gimigomo lalu kamigo wahadaba. <sup>44</sup> I Abahanda i pu layago ibugua mbirali haru naibiyagua ibuni hangu howa i koría naibabehe. I Abahanda i koría haru ibirago hamaro bulene horo harangi ibu ina mo heya holebero.✧ <sup>45</sup> Ngode Datagaliwabe mana latagi haga henerume gilibu winigo ogo, Ngode Datagaliwabehanda wali agali bibahende lawai holebira, lalu gilibu wini. Abahanda ani lawai harago hale howa lomanda biraru bibahende i koría ibaga.✧ <sup>46</sup> Mbiralime Aba de hendene lalu ndo laro. Aba de hendene mbirali ibu hangu Ngode Datagaliwabe kagoria howa daliyago ibugua Aba de hendene ka.✧ <sup>47</sup> Ina tihondo heneneore laro. Ngode Datagaliwabehondo mini mbiraore wu kagome haabobo holene yu ka.✧ <sup>48</sup> Holene gahenge mberedi i ko.✧ <sup>49</sup> Ti mamalime dindi ko yobi wali agali nahaga wiagoria howa mena nalu henego ti haabo nahe homene. <sup>50</sup> Ai dahuliya andaga howa daliyago mberedi ogoni mbiralime nayagua ibu nahomolebira. <sup>51</sup> Holenenaga mberedi dahuliya andaga howa dalinigo i kogoni. Mberedi ogoni mbiralime nayagua ibu haabo holebira. Mberedi ina nguleberogo o inaga tingini. Dindi bibahendeni karume holene gahenge yilo ina inaga tingini mulebero, lene.✧

### *Yasuhanda, Inaga tingini nalu kago haabobo holene yu ka, lenego ogo*

<sup>52</sup> Ani layago hale howa Yu agalime keba howa tini dege dege laga laga bialu lalu, Agali ogonime ibunaga tingini ina nalimulo ngulebero lalu kago agua bialu ngulubadabe, lene.

<sup>53</sup> Ani layagola Yasuhanda lalu, Ina tihondo heneneore laro. Agali Hole Ibiyagonaga tinginibi daramabi nane kamiyagua tiha holene gahenge nawulebira.✧ <sup>54</sup> Inaga tinginibi daramabi nalu kago ibu haabobo holene yu kago ogoni ibu hamaro bulene horo harangi ina ibu mo heya holebero.✧ <sup>55</sup> Tomo heneneore inaga tingini. Iba heneneore inaga darama. <sup>56</sup> Inaga tinginibi daramabi nalu kago ibu iha ka. I nde ibuha ko.✧ <sup>57</sup> Aba holenehe kago ibugua i pu layagola ibirugo ibu kagome ibi holenehe kogoni. Ogonidagua i nalu kago ibu i kogome ibubi holenehe holebira.✧ <sup>58</sup> Mberedi

✧ **6:34:** Yo 4.14-15, 6.48-58, 7.37 ✧ **6:35:** Yo 4.14, 6.48-58 ✧ **6:36:** Yo 6.26, 6.64, 20.29 ✧ **6:37:** Md 11.28, Yo 10.28-29, 17.6-8, 2 Ti 2.19, 1 Yo 2.19 ✧ **6:38:** Md 26.39, Yo 4.34, 5.30 ✧ **6:39:** Yo 10.28-29, 17.12, 18.9 ✧ **6:40:** Yo 3.15, 6.27, 6.47, 6.54, 11.24 ✧ **6:42:** Md 13.55, Mg 6.3, Lg 4.22 ✧ **6:44:** Yo 6.65 ✧ **6:45:** Ais 54.13, Yar 31.34, Mai 4.2, Hi 8.10 ✧ **6:46:** Md 11.27, Lg 10.22, Yo 1.18 ✧ **6:47:** Yo 3.15-18, 3.36, 6.40 ✧ **6:48:** Yo 6.31-35, 6.58 ✧ **6:51:** Yo 3.13, Hi 10.5, 10.10 ✧ **6:53:** Md 26.26-28 ✧ **6:54:** Yo 4.14, 6.27, 6.40, 6.63 ✧ **6:56:** 1 Yo 3.24, 4.15-16 ✧ **6:57:** Yo 15.4-5, 1 Yo 3.24

ogoni dahuliya andaga howa dalini. Mberedi tí mamalime nalu howa homenego ogoni ale ndo. Mberedi ogoni áyu o larogoni mbiralime nayagua ibu haabo holebira, lene.

<sup>59</sup> Kabaniamani ngoai hagane andaha howa Yasuhanda mana lawai henego ogoni.

*Pidahanda lala, Haabobo holene bi ina dege yu ke, lenego ogo*

<sup>60</sup> Yasuhanda ani layago hale howa wali agali ibu haruru piaga marume lala, Bi ogoni larago haibioredago aiwa mo yulebirabe, lala hene.

<sup>61</sup> Ti bi gimigomo lala heago Yasu ibu minime manda buwa tihondo lala, Ina bi o larogoni hale howa tí genda howa wahalu poa kamibe. <sup>62</sup> Agali Hole Ibiyago ala hayagoria hole iraga harago handarimiyagua agi manda buleberamibe. ✧ <sup>63</sup> Ngode Datagaliwabe Dinini ibugua holene gahenge ngiagane. Wali agalinaga hongome habane nabulene nga. Ina tihondo bi langirugome holene gahenge ngiagane yalu Dinini ibaga. ✧ <sup>64</sup> Anigo tí marume ihondo mini mbiraore nawi kami, lene. Yasu ibugua ibuhondo mini mbiraore nawulebirarubi ibu nde lolebiragobi piganengi howa manda biai ho howa bi ani lene. ✧

<sup>65</sup> Ani lowa lala, Irane ogoni manda buwanaga ina tihondo lala i Abahanda mbirali ibu i koria ibilo mo mitangi bia nahayagua ibuni hangume ibabe nahe holebira lala langiru, lene. ✧

<sup>66</sup> Yasu haruru piaga wali agali hearume bi ogoni layago hale howa dewame ibu haruru nape wahene. <sup>67</sup> Ani biyagola Yasuhanda ibunaga talima piaga homberiali (12) biaruhondo lala, Tibi i wahalu piai holeberamibe, lene.

<sup>68</sup> Ani layago hale howa Saimono Pidahanda ladai bialu lala, Anduane Homogo-o ina ai karia polomayabe. Haabobo holenenaga bi ina dege yu kego. ✧ <sup>69</sup> I Mbirali Baya Buruguleore henego Ngode Datagaliwabe karia howa ibu kego manda buwa iname ihondo mini mbiraore wu kamago, lene. ✧

<sup>70</sup> Yasuhanda tihondo ladai bialu lala, Ina tí homberiali dabarugo tí mbira dege dama kami, lene. <sup>71</sup> Ibunaga talima piaga hombeane Saimono Isagariodo igini Yudasa henego ibugua nde lolebira manda buwa Yasuhanda ani lene.

## 7

*Yasu hamenerume ibuhondo mini mbiraore nawi henego ogo*

<sup>1</sup> Ani lowa Yu wali agali haru haga hearume ibu bole ka manda buwa Yasu ibu Yudia dindiha nape Galili dindihayagi hangu ibaga bu hene. ✧ <sup>2</sup> Yu wali agalinaga Anda Nemandaha Palu Holene Horo kaware hayagola ✧ <sup>3</sup> Yasu hamenerume ibuhondo lala, Ina biabe bialu kegoni i haruru ibirarume de handai helo dindi ogo wahalu Yudia pobe. <sup>4</sup> Mbirali ibugua birago bibahendeme manda biai helo manda biyagua ohowa nabi panigi biaga. Ina biabe bialu kego dindi bibahendeni karume i manda biai helo walia halu bule pu, lene. <sup>5</sup> Ibu hamenerume ibuhondo mini mbiraore nawi hene. ✧

<sup>6</sup> Ani layagola Yasuhanda tihondo lala, Inaga horo wene natagira ibi. Áyu tinaga horo hangu wiaabo ka. ✧ <sup>7</sup> Wali agali dindi bibahendeni karume tí handabe manga naholebira. Ina tihondo ko bialu kami lala lamiaabo harogola ti bibahendeme ihondo handabe manga halu kagoni. ✧ <sup>8</sup> Tí ngoai hagane biagoria ngoai hole pudaba. Inaga horo wene natagira ibigo i haro, lene. <sup>9</sup> Ani lala ibu nape Galilini hondo hene.

*Yasu ibu maha Yarusaleme penego ogo*

<sup>10</sup> Yasu ibu hameneru ngoai hole piyadagua ibubi maha pene. Ibu wali agalime nahendelo ohowa pene. <sup>11</sup> Wali agali ngoai hayagoria Yu wali agali haru haga haguane hearu tigua, Yasu agoa kabe, lala hai bialu hene. ✧

✧ **6:62:** Mg 16.19, Yo 3.13, Ab 1.9-11, Eb 4.8 ✧ **6:63:** 2 Ko 3.6 ✧ **6:64:** Yo 6.36, 13.11 ✧ **6:65:** Yo 6.44-45  
 ✧ **6:68:** Md 16.16, Mg 8.29, Lg 9.20 ✧ **6:69:** Md 14.33, Mg 1.24, Yo 1.49 ✧ **7:1:** Yo 5.18 ✧ **7:2:** LBM 23.24, Man 16.13 ✧ **7:5:** Md 13.55, Mg 3.21, Ab 1.14 ✧ **7:6:** Yo 2.4, 7.8, 7.30, 8.20 ✧ **7:7:** Yo 3.19, 15.18-19 ✧ **7:11:** Yo 11.56

<sup>12</sup> Wali agalime hagarerebi laga laga bialu marume, Ibu agali bayale, la marume, Ndo ibugua wali agali mo guya halu ka, laga bialu hene. ✧ <sup>13</sup> Yu wali agali haru haga hearu hondowa ti bibahendeme gi howa latagi nahe hagarerebi lowa lalu hene. ✧

<sup>14</sup> Mo ngoai holene horo uruni maru peha Yasu ibu Anduane Homogonaga andaha puwa mana lawai halu hene. <sup>15</sup> Yasuhanda mana lawai halu heago hale howa Yu wali agali bibahendeme ti mogolo hondowa lalu, Agali ogoni sigulu nabi howa manda timbuni taraore bidago agua manda binidabe, lene. ✧

<sup>16</sup> Ani layagola Yasuhanda ladai bialu lalu, Mana lawai halu kogo ini mitangi bialu ndo Ngode Datagaliwabe i pu layagonaga minini howa lawai halu ko. ✧ <sup>17</sup> Mbiralali ibu Ngode Datagaliwabehanda hame ledadagua bua kayagua ogoni ibugua ina lawai halu kogo ini mitangini howa lawai halu kobe Ngode Datagaliwabenaga mitangini howa lawai halu kobe manda bu hondolene nga. ✧ <sup>18</sup> Mbiralali ibuninaga mitangini howa lawai halu kagome ibuninaga mini mo yaraga helo lawai halu ka. Anigo ibu pu layagonaga mini mo yaraga helo hame lowa lawai halu kagome ogoni ibu tigabiore ibunaga miniha ke holene mbira nawiore ka. ✧ <sup>19</sup> Mosesehanda ibu heangi Mana tigua bilimulo lowinigo ti mbiralime bia nabi puguabo halu kami. I homoliya bole manda bialu kamigo irane agibe, lene. ✧

<sup>20</sup> Ani layagola tigua ladai bialu lalu, I dama daraga ho kebe. I homabelo aiwa bole kabe, lene. ✧

<sup>21</sup> Yasuhanda ladai bialu lalu, Ina agalime nabiagane ale mbira birugo hondowa mogolo handarimi. <sup>22</sup> Dongone podo mabu biagane mana Mosesehanda bilimu lene manda buwa Sabada horongi tigua ti iginiru dongone podo mabu beramili. Dongone podo mabu biagane mana ogoni tene Mosesehanda wabu wini ndo. Pigane bamba ti mamalirume tenini. ✧ <sup>23</sup> Mosese heneyangi Mana lowinigo napugule lowa tigua Sabada horongi igiri dongone podo mabu beramilidagua ina agali mbiranaga tingini ko heago mo dabi haiore harugonaga ihondo keba halu kamigo agibe. ✧ <sup>24</sup> Tigua de degeme hondowa daba ki nabilimu. Mana henene birago hondowa daba ki bialu halimu, lene. ✧

### *Mbiralali Dabo Helenego ibuoredabe, lenego ogo*

<sup>25</sup> Ani layago hale howa Yarusaleme wali agali marume lalu, Haru haga karume mbiralali homelo bole lalu kago agali ogoni ndobe. ✧ <sup>26</sup> Ibugua o nahe wali agali handai helo howa mana lalu kagoni. Tigua ibuhondo mbira nale helo wa kagoni. Ina haru haga karume ibu Mbiralali Dabo Helenego ibulebira lowinigo ibu ka manda buwa wahaya bada. <sup>27</sup> O ani ago Mbiralali Dabo Helenego ibiragola ibu ogoha howa ibinida manda nabi holeberamago ai agali ogoni ibu ogoha howa ibini ka manda bu kamagoni, lene. ✧

<sup>28</sup> Yasu ibugua Anduane Homogonaga andaha howa lawai halu dalimu lalu, Tigua ibi i ogoha howa ibini kabi bayuwa manda bu kamibe. Ini mitangini ndo ibiru. I pu layago ibu henene tene kagoni. Tigua ibu manda nabi kamigo ✧ <sup>29</sup> ina dege ibu manda bu ko. I pu layagola ibuha howa ibiru, lene. ✧

<sup>30</sup> Ani layago hale howa tigua ibu minule binigo ibunaga horo ogoningini ndo hayagola mbiralime gi yade halu ibu mina nabi wahene. ✧ <sup>31</sup> Wali agali ngoai ho hearu dewalime lalu, Agali ogoni ibugua agalime nabiagane ale bialu kago emene lalu Mbiralali Dabo Helenego ibu ibuwa ibugua dewaore bulebirabe, lowa ibuhondo mini mbiraore wini. ✧

### *Yasu minu pudaba, lenego ogo*

✧ 7:12: Md 21.46, Lg 7.16, Yo 10.19 ✧ 7:13: Yo 9.22, 12.42, 19.38, 20.19 ✧ 7:15: Md 13.54, Lg 2.47 ✧ 7:16: Yo 3.11, 8.28, 12.49, 14.10 ✧ 7:17: Yo 8.43 ✧ 7:18: Yo 5.41, 5.44, 8.50 ✧ 7:19: Har 24.3, Man 33.4, Md 12.14, Mg 3.6, Ab 7.38, 7.53, Lm 2.21-24 ✧ 7:20: Yo 8.48, 8.52, 10.20 ✧ 7:22: Pig 17.9-13, LBM 12.3 ✧ 7:23: Yo 5.8-10, 5.16 ✧ 7:24: LBM 19.15, Man 1.16-17, Ais 11.3-4, Yo 8.15, Ya 2.1 ✧ 7:25: Yo 5.18 ✧ 7:27: Md 13.55, Mg 6.3, Lg 4.22, Yo 7.41, 9.29 ✧ 7:28: Md 11.27, Yo 5.32, 5.43, 8.14, 8.26, 8.55 ✧ 7:29: Md 11.27, Yo 10.15 ✧ 7:30: Mg 11.18, Lg 19.47, Yo 7.44, 8.20, 8.37, 13.1 ✧ 7:31: Yo 2.23, 8.30, 10.42, 11.45, 12.11, 12.42

<sup>32</sup> Yasuhanda uruni biyagonaga wali agalime hagarerebi lowa laga laga bialu heago Perisi agalime hale howa tiguabi loma binigo mo miaga haguane hearumebi Anduane Homogonaga anda mamage haga agaliruhondo, Yasu minu pudaba, layagola tigua ibu minu ibini. <sup>33</sup> Ti ani ibu heagola Yasuhanda tihondo lalu, I tí heba emene tigi mbira hangu halu i pu layago karia dai bulebero. <sup>34</sup> Dai berogola tigua i hai buwa handa walia naholeberami. I poleberogoha tí haruru naibabehe kami, lene. <sup>35</sup>

Ani layago hale howa Yu wali agali haru haga haguane hearume tini dege dege la la bialu lalu, I handa walia naholeberami lalu kago ibu aniha pole howa lalu kabe. Ina aria maru Girigi dindi tara taraha purogolo karu uruni karia puwa Girigi wali agalihondo mana lawai hole pole howa larabe. <sup>36</sup> Ibugua lalu, Tigua i hai buwa handa walia naholeberemi, layagobi, I poleberogoha tí haruru naibabehe, layagobi irane agi manda bialu layabe, lene.

*Yasuhanda haabo holene ibanaga te lenego ogo*

<sup>37</sup> Horo timbuni ngoai hayaru hamaro biyangi Yasu heyuwa tihondo dalimu lalu, Mbiralí iba noa kamiyagua i koria ibalimu. <sup>38</sup> Anduane Homogonaga mbugani lo ngago ogo, Ihondo mini mbiraore wu karu tinaga gubaliniha howa haabo holene iba miagane duguabo holebira, lalu gilibu nga, lene. <sup>39</sup> Ibugua bi ogoni layago wali agali ibuhondo mini mbiraore wu haruru tihondo maha Ngode Datagaliwabe Dinini mulebira manda buwa lene. Ogoningi Ngode Datagaliwabe Dinini naibinigo irane Yasu ibu wá taraore holeneha mo yaraga nahe henegome ani lene. <sup>40</sup>

*Wali agali talebu ki binigo ogo*

<sup>40</sup> Ibugua bi ogoni layago hale howa wali agali marume lalu, Ngode Datagaliwabe Mana Latagi Haga Mbiralí ibulebira lo ngago agali ogoni ibuoreda, lene. <sup>41</sup>

Marume lalu, Mbiralí Dabo Helenego ogoni ibu kaoreda, lene.

Marume lalu, Mbiralí Dabo Helenego Galili dindi howa naibulebira. <sup>42</sup> Anduane Homogonaga mbugani lo ngago, Mbiralí Dabo Helenego ibu handame haga kini Debidi aguanene holebira, lalu, Debidinaga dindi Bedelehemeni taba honolebira, lalu gilibu nga, lene. <sup>43</sup> Wali agali bu hearume ani laga laga bialu Yasu ai kabe manda nabi howa talebu ki bini. <sup>44</sup> Marume ibu minule manda binigo ti mbiralime gi yade halu mina nabi wahene. <sup>45</sup>

*Yu wali agali haru haga hearume Yasuhondo mini mbiraore nawi henego ogo*

<sup>45</sup> Ani biyagola mamage haga agali biarume Yasu minule ibinigo mina nabi helalu Perisi agali hearubi loma binigo mo miaga haguane hearubi ti hearia dai bini. Dai biyagola tigua tihondo lalu, Agi biyagola wahalu ibu helalu ibirimibe, lene. <sup>46</sup>

<sup>46</sup> Ani layagola mamage haga biarume ladai bialu lalu, Agalime nalagagodagua layago hale halu ibirima, lene. <sup>47</sup>

<sup>47</sup> Ani layago hale howa Perisi agalime ladai bialu, Ibugua tíbi mo guya haya handala lulu yalu ibirimibe. <sup>48</sup> Ina Yu wali agali haru haga mbiramebi Perisi agali mbiramebi ibuhondo mini mbiraore wu hemaria handarimibe. <sup>49</sup> Wali agali urunime Mosese heneyangi Mana lowini ngago manda nabi kago tihondo Ngode Datagaliwabehanda, Tandaga nama pobe, lolene wulebira, lene. <sup>50</sup>

<sup>50</sup> Perisi agali mbira Nigodimusi Yasu hearia bamba penego ibugua ibuni aria biaruhondo lalu, <sup>51</sup> Inanaga Mana lowini ngadagua mbiralí ibugua biyadago hale nahe howa pani mia nalaramali, lene. <sup>52</sup>

✧ 7:33: Yo 13.33, 16.16 ✧ 7:34: Hos 5.6, Yo 8.21, 13.33, 13.36, 17.24 ✧ 7:37: LBM 23.36, Ais 55.1, Yo 4.10, 4.14, 6.35, Mo 22.17 ✧ 7:38: Ais 12.3, 58.11, Ese 47.1, Seg 14.8 ✧ 7:39: Ais 44.3, Yol 2.28, Yo 12.16, 16.7, 20.22, Ab 2.4, 2.17, 2.33 ✧ 7:40: Man 18.15-18, Yo 1.21, 2.11, 6.14 ✧ 7:41: Yo 1.46, 4.29 ✧ 7:42: 2 Sml 7.12, Iba 89.3-4, 132.11, Yar 23.5, Mai 5.2, Md 2.5-6, Lg 2.4 ✧ 7:43: Yo 9.16 ✧ 7:44: Yo 7.30 ✧ 7:45: Yo 7.32 ✧ 7:46: Md 7.29, Mg 1.22 ✧ 7:48: Yo 12.42 ✧ 7:50: Yo 3.1-2 ✧ 7:51: Man 1.16-17, 19.15

<sup>52</sup> Ani layagola tigua ibuhondo ladai bialu lalu, Íbi Galili howa ibini dege kebe. Anduane Homogonaga mbugani lo ngago handalu Ngode Datagaliwabe mana latagi haga mbira Galili howa ibulebira lalu gilibu ngaria handa walia naholeberego, lene. [ <sup>53</sup> Ani lalu ti bibahende andaga purogo lene.✠

## 8

### *Wali mbira kayu bialu hearia mininigo ogo*

<sup>1</sup> Yasu ibu Hari Olibe heagoria pene.✠ <sup>2</sup> Egerebalene ibu Anduane Homogonaga andaha dai buwa ibu hearia wali agali dewaore íbu ngoai hayagola Yasu ibugua biruwa ti lawai halu hene. <sup>3</sup> Mana lowinigo lawai haga hearubi Perisi agali hearubi tigua wali mbira kayu bialu hearia handa walia howa Yasuhanda mana lawai halu berearia wali ogoni minu yalu ibini. Minu yalu ibuwa dombeni helowa <sup>4</sup> tigua ibuhondo lalu, Lawai haga-o wali ogoni kayu bialu hearia handa walia howa minu yalu ibirima. <sup>5</sup> Inanaga Mana lowinigo ngagome, Mosesehandu lalu, Wali ogoni ale biagago homelo ege toleme balimu, lalu gilibu ngago ína au loleberebe, lene.✠ <sup>6</sup> Tigua ibu kagua laya lolenaga bi ko mbira lelo manda buwa mo la halu hene. Ti ani lalu helowa Yasu ibu ge dayama biruwa ibunaga gi hondoneme dindini gili bialu berene.✠

<sup>7</sup> Tigua ibuhondo layadagua loyane yane bialu haabo hayagola ho tiga buwa ibu tihondo lalu, Tí agali ko mbira nabiaga bayaleore mbira kamigome wali o kagoni homelo tole pigane ína babe, lene.✠ <sup>8</sup> Ani lowa ibu lone ge dayama biruwa dindini gili bialu berene. <sup>9</sup> Bi ogoni layago hale howa ti lo hende mbira pugu bialu agali wahe hearu ala pu yola halu maha igiri hearu pu yola hai halu piaí hene. Yasubi wali biagobi libu hangu hene.✠ <sup>10</sup> Yasu ho tiga buwa ibu wali biago hangu hearia de hondowa lalu, Wali-o í haru ibiyaru abiyabe. Í pani ngulene mbirali nahedabe, lene.

<sup>11</sup> Wali biagome lalu, Agali timbuni-o mbirali nahe, lene.✠

Ani layagola Yasuhanda ibuhondo lalu, Inabi í pani nanguleberogo pu. Ína ko lone nabibe, lene.]

### *Yasuhanda dindi bibahendeni karunaga wá holene í kogoni, lenego ogo*

<sup>12</sup> Maha Yasuhanda Perisi agaliruhondo lone lalu, Dindi bibahendeni karunaga wá holene í kogo. Wali agali í porodagua talima ibiraru arumaha nape holene gahengenaga wá holene yu ibaga bu holebira, lene.✠

<sup>13</sup> Ani layago hale howa Perisi agalirume ibuhondo lalu, Íni birigonaga ínime latagi halu lama ibaga bialu kego henene larebe ina manda nabi kama, lene.✠

<sup>14</sup> Ani layagola Yasuhanda tihondo ladai bialu lalu, Ina birugo ínime latagi halu langialu kogo heneneore langialu ko laro. Ini hangume í ogoria howa ibirugoni ai ogoha pole kogoni manda bu ko. Tigua í agoha howa ibini kabe agoha pole kobe tí manda nabi kamigoni.✠ <sup>15</sup> Tigua agalime daba ki biagadagua beramili. Ina mbirali daba ki nabiruli.✠

<sup>16</sup> Ina mbirali daba ki biruyagua heneneore hondowa bulebero. Irane ini hangu ndo kogoni. Í Abahanda í pu layago iya haru kabagoni.✠ <sup>17</sup> Tí naga Mana lowini ngagome lalu, Mbiralime layadagua dege mendealime layagua heneneore lara manda bilimu, lalu gilibu nga.✠ <sup>18</sup> Ini birugo latagi hagane ini kogo. Mende í Aba í pu layago ibugua ini birugo latagi haga ka, lene.✠

<sup>19</sup> Ani layago hale howa tigua ibuhondo lalu, Í Aba agoha kabe, lene.✠

Ani layagola Yasuhanda ladai bialu lalu, Ibi í Ababi tí manda nabi kami. Í ogo kalo manda bidamile í Ababi manda bidamile, lene.

✠ 7:53: Yo 7.41-42 ✠ 8:1: Lg 21.37 ✠ 8:5: LBM 20.10, Man 22.22-24 ✠ 8:6: Md 22.15 ✠ 8:7: Man 17.7, Lm 2.1 ✠ 8:9: Md 22.22 ✠ 8:11: Yo 3.17, 5.14 ✠ 8:12: Ais 49.6, Md 5.14, Yo 1.4-9, 3.19, 9.5, 12.46 ✠ 8:13: Yo 5.31 ✠ 8:14: Yo 5.31-32, 7.28-29, 9.29 ✠ 8:15: Yo 7.24, 12.47 ✠ 8:16: Yo 5.30, 8.29 ✠ 8:17: Man 17.6, 19.15, Md 18.16, 1 Ko 13.1, Hi 10.28 ✠ 8:18: 1 Yo 5.9 ✠ 8:19: Yo 8.55, 14.7, 16.3



<sup>20</sup> Yasuhanda Anduane Homogonaga anda loma muni wiaga hobane mbiraha howa bi ogoni lalu hene. Tigua ibu minule manda bu henego ibunaga horo ogoningi ndo hayagola mina nabi wahene.✠

*I poleberogoha tí naibabehe kami, lenego ogo*

<sup>21</sup> Ani lowa Yasuhanda tihondo lone lalu, I pole kogo porogola tígua i hai buleberami. Hai bialu tínaga ko birimigo nadome wiaabo ka handala tíni homoleberami. I poleberogoha tí haruru naibabehe kami, lene.✠

<sup>22</sup> Ani layago hale howa Yu wali agali haru haga biarume lalu, Ibugua i poleberogoha tí haruru naibabehe kami layago ibunime ibuni bo wahole howa lalu ka mbauleda, lene.✠

<sup>23</sup> Yasuhanda tihondo ladai bialu lalu, Tí dindini hene kami. I daliga howa ibini ko. Tí dindi ogoriani hene kamigo i dindi ogoriani hene ndo ko.✠ <sup>24</sup> Irane ogonigo ina tínaga ko birimigoni nadome wiaabo kaore tíni homoleberemi larugo. Tígua tíni minime I Ini Haluhe Henego Haabo Hole Kogo tí manda nabi mini mbiraore nawi haabo harimiyagua tí ko bialu kamigoria howa homai holeberami, lene.

<sup>25</sup> Ani layago hale howa tigua ibuhondo lalu, I ai howa lalu kebe, lene.

Yasuhanda tihondo ladai bialu lalu, I ogo ko lalu bamba piganeore howa langialu harugoni. <sup>26</sup> Tígua bialu kamigo ina langulenebi dabolenebi dewa mo yai ko. I pu layago ibu henene kago ibugua la laradagua hangu dindi bibahendeni kamiruhondo langialu kogoni, lene.✠

<sup>27</sup> Ani layagola tigua ibu Aba ka lalu langira manda nabi hene. <sup>28</sup> Manda nabi heagola Yasuhanda tihondo lalu, Ayu manda nabi kamigo maha Agali Hole Ibiyago tígua mo yaraga haramingi I Ini Haluhe Henego Haabo Hole Kogo manda buleberami. Ini hongoni howa mbira nabiaga i Abahanda labe lenedaguaore laga henedalo manda buleberami.✠ <sup>29</sup> I pu layago iya haru haabo kaba. Ina ibugua hameledadagua hangu biaabo haruligo i hangu helalu ibu napiaga ka, lene.✠

<sup>30</sup> Ani layago hale howa wali agali dewalime ibuhondo mini mbiraore wini.✠

*Henene loleneme tí golope holebira, lenego ogo*

<sup>31</sup> Yasuhanda ibuhondo mini mbiraore wiyaruhondo lalu, Ina bi lalu kodagua bialu harimiyagua inaga talima ibagane wali agali heneneore holeberemi. <sup>32</sup> Tígua henene lolene manda biai holeberami. Ani beramigola henene loleneme tí golope hai holebira, lene.✠

<sup>33</sup> Tigua ladai bialu lalu, Ina Abarahama aguanene hama ibinigo kama. Ina mbiralinaga garabaya biabe ale bia nahene kamago golope hai holebira larigoni agua laribe, lene.✠

<sup>34</sup> Ani layagola Yasuhanda tihondo lalu, Ina tihondo heneneore larogo. Wali agali ko bialu karu ti ko bulenenaga garabaya biabe ale bia haga ka.✠ <sup>35</sup> Garabaya biabe ale bia hagane kago ibu anduane andaga haabo nahaga. Aba igini henene kago ibu dege abala haabo haga ka. <sup>36</sup> Ngode Datagaliwabe igini ogoni ibugua tí golope hayagua tí golope heneore holeberami.✠ <sup>37</sup> Tí Abarahama aguanene hama ibinigo kama larimigo i manda bido. Ina bi mana lawai haruligo tígua tínaga miniha nayami kamigo howa i homelo bole manda bu kami.✠ <sup>38</sup> Ina i Abahanda walia hayaru langialu kogo tígua tí abahanda bilimu layadagua bialu kami, lene.✠

<sup>39</sup> Ani layagola tigua ladai bialu lalu, Ina aba Abarahama hene, lene.✠

✠ 8:20: Yo 7.30 ✠ 8:21: Yo 7.34-36, 8.24, 13.33 ✠ 8:22: Yo 7.35 ✠ 8:23: Yo 3.31 ✠ 8:26: Yo 7.28, 12.49  
 ✠ 8:28: Yo 3.11, 3.14, 5.19, 5.30, 12.32, Lm 1.4 ✠ 8:29: Yo 8.16, 16.32 ✠ 8:30: Yo 7.31 ✠ 8:32: Lm 6.14, 6.18, 6.22, 8.2, Ya 1.25 ✠ 8:33: Md 3.9, Lg 3.8 ✠ 8:34: Lm 6.16, 6.20, 2 Pi 2.19 ✠ 8:36: Lm 8.2, Ga 5.1 ✠ 8:37: Yo 5.38, 7.19, 8.40 ✠ 8:38: Yo 3.32, 5.19, 5.30 ✠ 8:39: Md 3.9, Lm 2.28, Ga 3.7, 3.29

Yasuhanda tihondo lalu, Tí Abarahama waneigini heneneore kamile Abarahama-handa binidagua tígua bialu kamile. <sup>40</sup> Ina langialu harugo Ngode Datagaliwabehanda bi henene ihondo langiyago tí langulenaga lalu kogola tígua i homelo bole manda bialu kami. Ogonidagua Abarahamahanda nabiaga hene. <sup>41</sup> Tí abahanda biagadagua bialu kami, lene. <sup>\*</sup>

Ani layagola tigua ibuhondo lalu, Ina Aba mbiraore Ngode Datagaliwabe ibuni dege kago ibu igini heneneore ina kamagoni, lene.

<sup>42</sup> Ani layagola Yasuhanda tihondo lalu, Tí Aba heneneore Ngode Datagaliwabe ibuni kale i Ngode Datagaliwabe howa íbu ka manda buwa tígua ihondo gubalini ho kamile. Iní hangu manda bialu ndo ibugua pu layagola íbu kogo. <sup>43</sup> Ina tihondo bi langialu kogo manda nabi kamigo irane agibe. Irane tígua inaga bi mana hale hoa nahe kamigome. <sup>\*</sup>

<sup>44</sup> Tí aba dama Heyolabe waneigini kamigo ibugua bia laradagua bua howa bialu kami. Piganengiore howa ibu bo wahaga henego áyubi bo wahalu haabo kagoni. Ibuha henene lolene mbira nawi howa ibu henene lolenehayagi nahaga ka. Ibu ke hagane howa ibunaga mini ogoni ka. Ke hagane tene ibu howa ke hagane bibahendenaga ababi ibu ka. <sup>45</sup> Anigo ina tihondo henene hangu langialu kogo hale howa tígua ihondo mini mbiraore nawi kamigoni. <sup>46</sup> Ina ko mbira biruria de hendene mbirali ai kamibe. Nahe ogoniyagua ina tihondo heneneore langialu kogola tígua ihondo mini mbiraore nawi kamigo irane agibe. <sup>47</sup> Mbirali ibu Ngode Datagaliwabeha howa íbu kayagua ibugua Ngode Datagaliwabeha bi hale hagane ka. Tígua Ngode Datagaliwabeha bi hale nahagane kamigo tí Ngode Datagaliwabeha howa ndo kamigoni, lene. <sup>\*</sup>

### *Yasu Abarahamala te ogo*

<sup>48</sup> Tigua Yasuhondo ladai bialu lalu, Iname lalu í Samaria agali dama daraga ho ke laramago henene ndo laramabe, lene. <sup>\*</sup>

<sup>49</sup> Ani layagola Yasuhanda ladai bialu lalu, I dama daraga naheore ko. Ina i Aba mitangi bialu ibu mini mo yaraga halu kogola tígua i mege bialu kami. <sup>50</sup> Ina ini mini mo yaraga holene manda nabi ko. Mbirali kago ibugua i mini mo yaraga holene hai bialu ihayagi dabalú ka. <sup>51</sup> Ina tihondo henene larogo. Inaga bi mana lawai haruligo hale halu bialu karu ti homolene nawulebira, lene. <sup>\*</sup>

<sup>52</sup> Ani layago hale howa tigua ibuhondo lalu, Í dama daraga ke larimago heneneore larimada. Abarahama ibu homene. Ngode Datagaliwabe mana latagi haga henerubi homene. Ina lalu inaga bi mana lawai haruligo hale halu bialu karu ti homolene nawulebira larigo. <sup>53</sup> Ina aba Abarahama homenego í ibu ale ndo í agali daligaore kebe. Ngode Datagaliwabe mana latagi haga henerubi homenego í ai ale hole manda bu kebe. <sup>\*</sup>

<sup>54</sup> Yasuhanda ladai bialu lalu, Ina ini mini mo yaraga halu kole habane ndo mbira o birarunida ledamile. I mini mo yaraga haga i Aba ibugua. I Aba tigua lalu tininaga Ngode Datagaliwabe ibu ka lalu kamigo. <sup>55</sup> Tigua ibu manda bidama lalu kamigo manda nabioire kami. Ina dege ibu manda bu ko. Ina ibu manda nabi ko ledole ibi ke hagane tí ale kole. Ina ibu manda buwa ibugua bia larago biai halu ko. <sup>56</sup> Tí aba Abarahamahanda i ibulene tu de hondole lowa turu halu hondo haabo henego. Ibiyago hondowa turu hene, lene. <sup>\*</sup>

<sup>57</sup> Ani layago hale howa tigua ibuhondo lalu, Í mali pira duria (50) agimabi ndo o kegodago Abarahama hendene kebe, lene.

<sup>\*</sup> 8:40: Yo 8.26, 8.37    <sup>\*</sup> 8:41: Man 32.6, Ais 63.16, 64.8    <sup>\*</sup> 8:42: Yo 16.28, 1 Yo 5.1    <sup>\*</sup> 8:43: Yo 7.17, Lm 8.7  
<sup>\*</sup> 8:44: Md 13.38, 1 Yo 3.8, Yu 6    <sup>\*</sup> 8:46: 2 Ko 5.21, 1 Pi 2.22, 1 Yo 3.5    <sup>\*</sup> 8:47: Yo 10.26-27, 18.37, 1 Yo 4.6    <sup>\*</sup> 8:48: Mg 3.21-22, Yo 7.20    <sup>\*</sup> 8:50: Yo 5.41, 7.18    <sup>\*</sup> 8:51: Yo 5.24, 6.40, 6.47, 11.26    <sup>\*</sup> 8:52: Seg 1.5, Hi 11.13    <sup>\*</sup> 8:53: Yo 4.12    <sup>\*</sup> 8:55: Yo 7.28-29    <sup>\*</sup> 8:56: Lg 10.24, Hi 11.13

<sup>58</sup> Ani layagola Yasuhanda ladai bialu lalu, Ina tihondo heneneore laro. Abarahama naheha I Haluhe ko, lene.✧

<sup>59</sup> Ani layago hale howa tigua ibu homelo bole ege tole miya handala Yasu ibu o biagoniha howa ho bilibale bialu Anduane Homogonaga anda howa tagira pene.✧

## 9

### *Yasuhanda agali mbiranaga de mo dabi henego ogo*

<sup>1</sup> Yasu pialu hearia agali mbira ibu aiyahanda de kohe ogonibi taba henene de kohe haabo heago de hendene. <sup>2</sup> Ibunaga talima piaga biarume ibuhondo lalu, Lawai haga-o agali ogoni de kohe henedago ibuni ko biyagonaga pani nalu de ko henedabe be ibu aba aiyalame ko biyagonaga pani nalu de ko henedabe, lene.✧

<sup>3</sup> Ani layagola Yasuhanda ladai bialu lalu, Ibuni ko biyagonagabi ibu aba aiyalame ko biyagonagabi pani ndo. Ngode Datagaliwabenaga hongo ibuni howa walia helonaga de ko hene.✧ <sup>4</sup> Ayu wa kangi i pu layagonaga biabe bialu hamiya. Aruma holene tagira ibirangi biabe bulene henge nawulebira.✧ <sup>5</sup> I dindini kongi dindi bibahendeni karunaga wa holene i ko, lene.✧

<sup>6</sup> Ani lowa Yasu ibu hamiaga dindini tolope howa dindi wiago gime mo waru howa agali de kohe biagonaga deni yiyu lalu howa ibuhondo lalu✧ <sup>7</sup> Sailoama Iba bedagoria inaga de domole pu, lene. Sailoama inanaga bi lalu, Pu lene. Ibugua layadagua domo pialu dai bialu dengala ho yalu dai bini.✧

<sup>8</sup> Dai biyagola ibula handa ai nai paliagarubi ibu tomo muniru ngi laabo halu berearia de hendene wali agali hearubi tigua lalu, Agali de kohe tomo muniru ngi laabo halu biraraligo agali ogoni ndoyagodabe, lene.

<sup>9</sup> Marume, O biagonioreda, lene. Marume, O biagoni aleda, lene.

Ani layagola agali biagoibunime lalu, I agali o biagoniore kogoni, lene.

<sup>10</sup> Tigua ibuhondo lalu, Inaga de agua buwa bayale hayabe, lene.

<sup>11</sup> Ani layagola ibugua ladai bialu lalu, Agali mbira mini Yasu ibugua dindi mo waru howa inaga deni yiyu lowa lalu, Inaga de Sailoama Iba bedagoria domole pu, layagola domo pirugola dengalalu bayale haya, lene.

<sup>12</sup> Tigua ibuhondo lalu, Ayu agali ogoni ibu agoha kabe, lene.

Ani layagola ibugua lalu, Ibu agoha piyabe i manda nabido, lene.

### *Perisi agalime de mo dabi hayagonaga guarinigo ogo*

<sup>13</sup> Wali agali biarume agali de mo baya hayago Perisi agaliru hearia haru pene.

<sup>14</sup> Yasuhanda mo waru howaibunaga de mo baya hayago Sabada horongi mo baya hene.✧ <sup>15</sup> Perisi agali tigua ibuhondo lalu, Inaga de agua buwa bayale hayabe, layagola ibugua tihondo lalu, Agali mbirame inaga deni warume yiyu laya ogoni domarugola dengala henego bayale handalu ko, lene.

<sup>16</sup> Ani layago hale howa Perisi agali marume lalu, Agali ogoni Ngode Datagaliwabe howa ibini ndoda. Sabada horo mitangi nabi howa puguayada, lene.✧

Marume lalu, Ibu ko biaga kale ibugua agalime nabiagane ale gibi o biyadagonidagua bibehe kalebe, lene. Ani layagola ti talebu ki hene.

<sup>17</sup> Ani bialu howa Perisi agalirume agali de ko hene biagohondo lone lalu, Inaga de mo ngala hayadago manda buwa ibu agi biaga agali ka manda bu kebe, lene.✧

Ani layagola ibugua ladai bialu lalu, Ibu Ngode Datagaliwabe mana latagi haga ka manda bido, lene.

✧ 8:58: Ais 43.13, Yo 1.1, Kl 1.17, Mo 1.8 ✧ 8:59: Yo 10.31 ✧ 9:2: Har 20.5, Ese 18.20, Lg 13.2-4 ✧ 9:3: Yo 11.4 ✧ 9:4: Yo 4.34, 5.17, 5.20, 11.9, 12.35, 17.4 ✧ 9:5: Md 5.14, Yo 1.5, 1.9, 3.19, 8.12, 12.35 ✧ 9:6: Mg 7.33, 8.23 ✧ 9:7: 2 Kin 5.10 ✧ 9:14: Lg 13.14 ✧ 9:16: Yo 3.2, 7.12, 7.43, 9.23, 9.31-33, 10.19 ✧ 9:17: Yo 4.19

<sup>18</sup> Ibu aiyahanda de kohe ogonibi taba henene ayure mo dabi haya layago Yu wali agali haru haga biarume hale howa ke harabe toba howa ibu aya abala ibilo olene. <sup>19</sup> Ibiyagola tigua libuhondo lulu, Libu igini de kohe taba henene larabiligo ogonibe. Ibuyagua de bayale howa handalu kago agua hendenebe, lene.

<sup>20</sup> Ani layagola ibu aya abalame ladai bialu lulu, Iyanaga igini ogoni de koheore taba henene manda bu kaba. <sup>21</sup> Ibu áyu de bayale howa handalu kago agua buwa bayale halu handayabe aiwa mo ngala hayabe iya manda nabi kaba. Ibu miniwi kago ibuni tí langulebirago ibunihondo hale hadaba, lene. <sup>22</sup> Ibu aya abalame Yu agali hondowa gi ho howa ani lene. Yu wali agali haru haga tigua ala lulu, Mbiralime Yasu ibu Mbiralí Dabo Helenego íbu ka lulu latagi hayagua iname agali ogoni ngoai hagane andaha howa bo ba tagi halu puabo heloleberama, lene. ✧ <sup>23</sup> Ani lenego manda buwa ibu aya abalame gi howa lulu, Ibu miniwi kago ibuni langulebirago ibunihondo hale hadaba, lene.

<sup>24</sup> Yu agali tigua agali de kohe hene biago halu mende olowa lulu, Í Ngode Datagaliwabe deni howa bi henene lolebero labe. Ina agali ogoni ko biaga ka manda bidamago, lene. ✧

<sup>25</sup> Ibugua ladai bialu lulu, Ibu ko biaga kabe nabiaga kabe í bayuwa manda nabido. Í mbira dege manda bidogo langero. Í de ko haabo henego ibugua mo dabi hayagome áyu de handalu kogoni, lene.

<sup>26</sup> Tigua ibuhondo lulu, Ibugua íhondo agi biyabe. Ínaga de ko henego agua mo ngala hayabe, lene.

<sup>27</sup> Ibugua ladai bialu lulu, Tíhondo abale langirugo hale naharimibe. Lone gonana bialu haabo kamigo agi. Tíbi ibunaga talima piaga dege holenaga lulu kamibe, lene.

<sup>28</sup> Ani layagola tigua ibu mege bialu lulu, Ibunaga talima piaga í kego ina Mosesenaga talima piaga kamago. <sup>29</sup> Ngode Datagaliwabeanda Mosesehondo bi laminigo ina manda biai kamago. Agali ogoni ibu ani howa ibinibe ina manda nabi kama, lene. ✧

<sup>30</sup> Ani layagola ibugua ladai bialu lulu, Aya. Ibugua ínaga de mo ngala haya hondowa ibu ani howa ibiyabe tí manda nabi kamigoni. <sup>31</sup> Ko biaganaga bi Ngode Datagaliwabeanda hale nahagane manda bidama. Mbiralime Ngode Datagaliwabeanda hame ledadagua bialu ibu mini yaraga hayagua ogoninaga bi ibugua hale hagane manda biai kama. ✧ <sup>32</sup> Dindi ogo pigane wabiniyangi howa mbiralime mbiralinaga de ko henego mo ngala haya lulu mbira layaria hale nahe harimago. <sup>33</sup> Agali ogoni Ngode Datagaliwabe howa ibini ndo kale ibu mbira bibe nahe kale, lene. ✧

<sup>34</sup> Ani layagola tigua ibuhondo ladai bialu lulu, Í aiyahanda í koha howa taba hanayagola koha howa anda ho daga hene kego. Í aleme ina lawai hole manda berebe, lene. Ani lowa tigua ibu ngoai hagane andaha howa bo ba tagi hene. ✧

### *Mininaga de kohe ogo*

<sup>35</sup> Ani bo ba tagi haya layago hale howa Yasu ibugua agali biago hearia puwa lulu, Agali Hole Ibiyagohondo mini mbiraore wu kebe, lene. ✧

<sup>36</sup> Ibugua ladai bialu lulu, Agali timbuni-o ibu ai kabe mini mbiraore wuliya langi, lene.

<sup>37</sup> Yasuhanda ibuhondo lulu, Ína ibu de hendedegoni. Ibugua áyu íla bi laragoni, lene. ✧

<sup>38</sup> Ani layagola ibugua lulu, Anduane-o ina íhondo mini mbiraore wero, lowa Yasu buhayagi ibu ge duli hanga ho berene.

<sup>39</sup> Yasuhanda lulu, Ina wali agali daba ki bule dindini íbu kogoni. De kohe karu de hendelo de handaga karu de ko helo ogoninaga íbu ko, lene. ✧

✧ 9:22: Yo 7.13, 16.2, 19.38, Ab 5.13 ✧ 9:24: Yos 7.19, 1 Sml 6.5 ✧ 9:29: Yo 8.14 ✧ 9:31: Yob 35.12, Iba 34.15, 66.18, Min 15.29, Ais 1.15, Yar 11.11, Mai 3.4, Seg 7.13 ✧ 9:33: Yo 9.16 ✧ 9:34: Iba 51.5, Yo 9.2 ✧ 9:35: Md 14.33, 16.16, Mg 1.1, 1 Yo 5.13 ✧ 9:37: Yo 4.26 ✧ 9:39: Md 13.11-15, Yo 3.17, 5.22, 8.15-16, 12.47

<sup>40</sup> Ani layago Perisi agali maru hale ho hearume ibuhondo lalu, Inabi de kohe dege kamane hondowa laribe, lene.✧

<sup>41</sup> Yasuhanda tihondo lalu, Tí de kohe kamile tínaga ko nangalego tígua lalu, Ina de handaga kama, lalu kamigome tínaga ko wiaabo kagoni, lene.✧

## 10

### *Bi yobage lalu nogo sibi haru haganenaga te lenego ogo*

<sup>1</sup> Yasuhanda lalu, Tíhondo heneneore laro. Mbiralí nogo sibi anda panga dugualu anda nape howa leneha iraga halu anda piagago ibu ohowa page biagane agalibi page bule bo wahagane agalibi ka. <sup>2</sup> Panga dugualu anda piagago ibu nogo sibi haru hagane agali ka. <sup>3</sup> Ibu anda ibilo panga mamage hagane agalime panga duguaga. Nogo sibi haru hagane ogonime ibuninaga nogo sibi hangu hangu mini olaragola tigua hale howa ibu poradagua haruru piaga. <sup>4</sup> Iunaga nogo sibi haru tagira puwa ti maha ibilalu ibuni ala bamba halu piaga. Nogo sibime ibunaga bi manda buwa haruru piaga.✧ <sup>5</sup> Agali taranaga bi hale halu haruru nape agali tarame olara manda bialu ibida piai haga.

<sup>6</sup> Yasuhanda tihondo bi yobage ogonidagua lamiyagola tigua irane manda nabi hene.✧

### *Nogo sibi haru haga bayale Yasu kago ogo*

<sup>7</sup> Ti manda nabi heago hondowa Yasuhanda halu mende lalu, Tíhondo heneneore laro. Nogo sabinaga panga í kogoni. <sup>8</sup> Í naibiwaha ala bamba halu ibiniru ti bibahende ohowa page biagane agalibi page bule bo wahagane agalibi ibini. Tinaga bi nogo sibime hale nahaga hene.✧ <sup>9</sup> Panga í kogoni. Í kogoria anda ibirago pele mulebero. Pele merogola anda íbu tagira pu bialu howa tani bayale handa walia holebira.✧ <sup>10</sup> Pagebibime page bulebi bo waholebi mo ko holebi hangu ibaga. Ina tíhondo holene gahenge ngule íbu kogoni. Holene gahenge tíha tolo tagi helo ngule íbu kogoni.

<sup>11</sup> Nogo sibi haru hagane bayale í kogo. Nogo sibi haru haga bayale ibugua ibunaga nogo sibi nahomelo ibuninaga holene pela holebira.✧ <sup>12</sup> Nogo sibi anduane ndo agali yolo hangu mitangi buwa haru haga kagome biango dudume nogo sibi bo nole íbira handala hondowa ibuni ibida piaga. Ibida poragola biango dudume nogo sibi hanu tali togo laga.✧ <sup>13</sup> Nogo sibi anduane ndo howa yolo hangu mitangi buwa haru hagame nogo sibi mitangi nabi howa ibu ibida piaga. <sup>14-15</sup> Nogo sibi haru hagane bayale í kogo. Í Abahanda í manda bia inabi ibu manda bia bu kabadagua inaga nogo sibi mbira embeda nahe manda biai ho ko. Tiguabi í manda biai ho ka. Ina ti nahomelo ininaga holene pela holebero.✧✧ <sup>16</sup> Nogo sibi anda o kagoha karunaga hangu ndo inaga nogo sibi maru tagiraha tara hama pedago tibi ina haru íbua ho ko. Haru eberogola tiguabi inaga bi hale howa ti mandagi mbiraore halu ale ha nogo sibi haru hagane mbiraore holebira.✧

<sup>17</sup> Ina inaga holene pela holeberogobi pela howa lone karuloleberogobi mitangi buwa í Abahanda íhondo gubalini timbuniore ho ka.✧ <sup>18</sup> Mbiralime inaga holene nayamulebira. Ini peloa howa pelolebero. Pelolenebi lone karulolenenagabi hongo yu kogo. Í Abahanda íhondo bibe lenedaguaore laro, lene.✧

<sup>19</sup> Ibugua ani layago hale howa wali agali hearu lone talebu ki buwa✧ <sup>20</sup> ti dewalime lalu, Ibu dama daraga ho howa lulu bi lalu kagodago agi bule hale haramibe, lene.✧

<sup>21</sup> Marume lalu, Ibugua bi lalu kago dama daragaheme lagadagua ndo lara. Damame wali agali de kohe de hendelo mo bayale hagabe, lene.✧

✧ **9:40:** Md 15.14, 23.26, Lm 2.19 ✧ **9:41:** Yo 15.22-24 ✧ **10:4:** Yo 10.27 ✧ **10:6:** Yo 16.25 ✧ **10:8:** Yar 23.1-2, Ese 34.2-3 ✧ **10:9:** Iba 118.20, Yo 14.6, Eb 2.18 ✧ **10:11:** Iba 23.1, Ais 40.11, Ese 34.11-23, Yo 15.13, Hi 13.20, 1 Pi 2.25, Mo 7.17 ✧ **10:12:** Seg 11.16-17, Ab 20.29 ✧ **10:14-15:** Yo 10.27, 2 Ti 2.19 ✧ **10:14-15:** Md 11.27, Lg 10.22, Yo 15.13, 1 Yo 3.16 ✧ **10:16:** Ais 56.8, Ese 34.23, 37.22-24, Yo 11.52, Eb 2.14, 1 Pi 2.25 ✧ **10:17:** Ais 53.7-8, 53.12, Pb 2.8-9, Hi 2.9 ✧ **10:18:** Yo 2.19, 5.26, 6.38, 14.31, 19.11, Ab 2.24, 2.32 ✧ **10:19:** Yo 7.43 ✧ **10:20:** Yo 7.20, 8.48, 8.52 ✧ **10:21:** Iba 94.9, 146.8, Yo 9.6-7, 9.32-33



*Yu wali agalime Yasu hame nalene go*

<sup>22</sup> Ira yuni gilope howa dagare biagane hororu hayagola Anduane Homogonaga anda Loma Bia Henegonaga horo hayangi Yarusalemeni ngoai ho hene. <sup>23</sup> Anduane Homogonaga andaha anda polene bugu hama mbira mini Solomononaga laga wiagoriani Yasu ibu pialu hearia <sup>24</sup> Yu wali agali ti ngoai howa Yasu ho mabu buwa lulu, Ini ogo ko lulu inahondo angi languleberebe. I Mbiralí Dabo Helenego íbu keyagua tiga tiga latagi halu langiai ha, lene.✧

<sup>25</sup> Ani layagola Yasuhanda tihondo ladai bialu lulu, Bamba ina langiai harugo tí yu tiga nabi haabo kami. I Abanaga hongoni howa biabe bialu kogome i tí walia haragoni.✧

<sup>26</sup> Tigua ina biabe bialu kogoni de hondowa ihondo mini mbiraore nawi kamigo inaga nogo sibi ndo kami.✧ <sup>27</sup> Inaga nogo sibi karu ini manda bido. Tigua inaga bi hale howa i talima ibaga.✧ <sup>28</sup> Ina ti mitangi bialu tihondo haabobo holene miruligo ti haabo howa nahomolebira. Ina ti inaga gime yani ho kogola mbiralime gingila mibe nahe holebira.✧

<sup>29</sup> Bibahende dindini ngaru emene nira lowa i Abahanda ihondo ngiyaru ti duniniore ka. Anigo ibunaga gime yani ho kagola mbiralime gingila mibe naheore ka.✧ <sup>30</sup> I Aba íbi iya mbiraore kaba, lene.✧

<sup>31</sup> Ani layago hale howa Yu wali agali tigua ibu ege toleme bole tole lone mini.✧ <sup>32</sup> Ani miyagola Yasuhanda tihondo lulu, Abahanda bia layadagua bialu ti hendedamiore ina bayale dewa bialu harugo ago birugonaga i bole kamibe, lene.

<sup>33</sup> Tigua ladai bialu lulu, Ina bayale bigi birigonaga ndo Ngode Datagaliwabe mege birigonagabi i agali howa ini mo Ngode Datagaliwabe bu hinarigonagabi iname i ege toleme bole kama, lene.✧

<sup>34</sup> Yasuhanda ladai bialu lulu, Tí naga Mana lowinigo ngagome, Ngode Datagaliwabehanda tí Daligaorene Daliganaga waneigini dege kami, lulu gilibu nga ndobe.✧

<sup>35</sup> Anduane Homogonaga mbugani lo ngago bibahende henene wiaabo holebira manda bu kama. Ngode Datagaliwabenaga bi wali agalihondo laminiru o biaruhondo, Tí Ngode Datagaliwabe waneigini kami, lene ndobe.✧ <sup>36</sup> I Abahanda mbiralí ibunaga helo loma bia howa dindini ibilenego i kogome, I Ngode Datagaliwabe Igini ko, lulu kogola tigua ina Ngode Datagaliwabe mege bialu ke larimigo irane agibe.✧ <sup>37</sup> Abahanda biabe ogoni bia laradagua ina nabi koria handarimiyagua ihondo mini mbiraore nawilimu. <sup>38</sup> Inaga bi hale howa mini mbiraore nawirimiyagua iha Aba kagobi i Abaha i kogobi manda bilimulonaga biabe ina beroru handalu tí mini mbiraore wulene nga, lene.✧

<sup>39</sup> Ani layago hale howa tigua ibu minule biyagola ibu pu yola halu pene.✧

<sup>40</sup> Yasu ibu Iba Yodana lone domalu ange ederayagi Yonehanda pigane baboraya bialu henegoria pu hene.✧ <sup>41</sup> Ani pu hearia wali agali dewa íbu ngoai howa tigua lulu, Yonehanda agalime nabí agane ale mbira nabi hayago agali ogome maha ogodagua bulebira, lulu Yone ibugua layaru uruni henene lola haiore haragoni, lulu <sup>42</sup> dewalime Yasuhondo mini mbiraore wini.✧

## 11

*Lasarasi homene go*

<sup>1</sup> Bedani tanoni Meri ibu hagibuni Madala berearia agali mbira mini Lasarasi warago bo wini.✧ <sup>2</sup> Meri ogoni ibugua Anduane Homogonaga geni weli baya taraore ngabime odo wialu howa ibunaga mandarime domene berene go ibunaga mbalini Lasarasi warago bo wini.✧ <sup>3</sup> Warago bo wiyagola ibu mbalini biago labome Yasu hearia bi lawia

✧ **10:24:** Ab 3.11, 5.12, Lg 22.67 ✧ **10:25:** Yo 3.2, 4.26, 5.36, 10.38 ✧ **10:26:** Yo 6.64, 8.45-47, 1 Yo 4.6 ✧ **10:27:** Yo 8.47, 10.3-4, 10.14 ✧ **10:28:** Yo 3.16, 6.37-39, 17.11-12, 18.9 ✧ **10:29:** Yo 14.28, 17.2, 17.6 ✧ **10:30:** Yo 17.11, 17.22 ✧ **10:31:** Yo 8.59 ✧ **10:33:** LBM 24.16, Md 26.65, Yo 5.18 ✧ **10:34:** Iba 82.6 ✧ **10:35:** Md 5.18 ✧ **10:36:** Yo 3.17, 5.17-18, 6.27, 9.35-37 ✧ **10:38:** Yo 14.10-11 ✧ **10:39:** Lg 4.30, Yo 8.59 ✧ **10:40:** Yo 1.28 ✧ **10:42:** Yo 7.31 ✧ **11:1:** Lg 10.38-39 ✧ **11:2:** Md 26.7, Mg 14.3, Yo 12.3

halu lalu, Anduane Homogo-o agali í nenege biago warago bo nga, lalu lawia hene.✠

<sup>4</sup> Ani layiyago hale howa Yasu ibugua lalu, Warago ogoni Lasarasi homelonaga ndo. Wali agalime Ngode Datagaliwabe mini yaraga helobi Ngode Datagaliwabe Iginini mini yaraga helobi ogoninaga warago bo nga, lene.✠

<sup>5</sup> Yasuhanda Madabi ibu hagibunibi Lasarasibi gubalini ho haga hene. <sup>6</sup> Lasarasi warago bo nga layiyago hale howa Yasu ibu heagoriani horo kira ho hondo ho hene. <sup>7</sup> Ani buwa ibugua ibunaga talima piaga biaruhondo lalu, Ina Yudia dai bima, lene.

<sup>8</sup> Ibunaga talima piaga biarume ibuhondo ladai bialu lalu, Lawai haga-o ayure dege agalime í ege toleme bole biyagoha í lone dai bule manda buwa larebe, lene.✠

<sup>9</sup> Ani layagola Yasuhanda ladai bialu lalu, Horo mbirunaga ni tagira ibiragola howa aruma helo wá haabo haga ndobe. Horombeni agali ibagabu hayagua ibu dindi ogonaga wá kago de hendedago pilolene nawi.✠ <sup>10</sup> Mbiraga agali ibuniha wá holene nawi howa ibagabu hayagua pilolene nga, lene.✠ <sup>11</sup> Yasuhanda ani lowa lalu, Ina hamene Lasarasi ibu padago ina pialu mo barila holebero, lene.✠

<sup>12</sup> Ibunaga talima piaga biarume ladai bialu lalu, Anduane Homogo-o ibu padayagua dabi holebira, lene.

<sup>13</sup> Yasuhanda ibu tongolo miya manda buwa lenego tigua ibu u henene pada lalu layabe toba howa ani lene. <sup>14</sup> Ani layagola Yasuhanda tihondo tiga tiga lalu, Lasarasi homo tongolo miya. <sup>15</sup> Ina dindi taraha hemaria tongolo miyago tigua ihondo mini mbiraore wilimulonaga manda buwa turu ko. Ai ibu hora kagoria ma, lene.

<sup>16</sup> Ani layagola Tomasa ibu kaj mini Hono Palu ibugua talima piaga maruhondo lalu, Inabi ibu heba homamiya ma, lene.✠

*Yasuhanda, Mo heya holenebi holene gahengebi tene i kogoni, lenego ogo*

<sup>17</sup> Yasu anda ibiyagola Lasarasi horo tebiru hora ho hene lowa horo maneni anda ibini. <sup>18</sup> Yarusaleme howa Bedani polene hariga lunaga magi kilomida tebira ale wini.✠

<sup>19</sup> Yudia wali agali dewalime Meri Madala libu mbalini homayagonaga dugu bialu biraabo hayagola dara holene embeda helo bi lamule ibu ngoai hene.

<sup>20</sup> Yasu ibira layago hale howa Meri andaga berelalu Mada ibu harigani lola hole pene. <sup>21</sup> Lola howa Madahanda Yasuhondo lalu, Anduane Homogo-o í oali henedale i mbalini nahomedale.✠ <sup>22</sup> Áyubi ina Ngode Datagaliwabehondo mbira bia lariyagua ibugua bulebiraore manda bido, lene.✠

<sup>23</sup> Yasuhanda ibuhondo lalu, í mbalini homayago heyulebira, lalu lamini.

<sup>24</sup> Ani layagola Madahanda ibuhondo lalu, E hamaro bulene horo harangi ibu mo heya holebira manda bido, lene.✠

<sup>25</sup> Ani layagola Yasuhanda ibuhondo lalu, Mo heya holenebi holene gahengebi tene i kogoni. Mbirali ihondo mini mbiraore wu henego homayaguabi ibu holebira.✠

<sup>26</sup> Mbirali nahome kagome ihondo mini mbiraore wu kago ibu nahomolebira. Hene-neore laralo manda buwa mini mbiraore ngebe, lene.✠

<sup>27</sup> Ani layagola Madahanda ibuhondo lalu, E Anduane Homogo-o í Mbirali Dabo Helenego Ngode Datagaliwabe Iginini dindini ibulebira lowinigoore ke manda buwa mini mbiraore wu bedo, lene.✠

*Yasu dugu binigo ogo*

<sup>28</sup> Ani lalu Mada dai buwa ibu hagibunibi Meri hendore olowa lamialu lalu, Lawai haga biago ibuwa í ibu layago pu, lene. <sup>29</sup> Ani layago hale howa Meri ibu abale heyalu Yasu hearia pene.✠ <sup>30</sup> Yasu ibu tano anda ibu nabi wene Mada lola hayagoria dege hene.

✠ 11:3: Yo 11.36 ✠ 11:4: Yo 9.3, 11.40 ✠ 11:8: Yo 8.59 ✠ 11:9: Yo 9.4-5 ✠ 11:10: Yo 12.35, 1 Yo 2.11  
 ✠ 11:11: Md 9.24 ✠ 11:16: Mg 14.31 ✠ 11:18: Md 21.17 ✠ 11:21: Yo 11.32 ✠ 11:22: Yo 9.31 ✠ 11:24: Lg 14.14, Yo 5.29 ✠ 11:25: Yo 6.35, Kl 3.4, 1 Yo 1.1-2, 5.10 ✠ 11:26: Yo 8.51 ✠ 11:27: Md 16.16, Yo 4.42, 6.14, 6.69 ✠ 11:29: Yo 11.20

<sup>31</sup> Meri dugu biaabo hayagola dara holene embeda helo bi lamule wali agali ibiyarume ibu piyago hondowa hora hayagoria howa dugu bule pora manda buwa haruru pene.

<sup>32</sup> Meri Yasu heagoria puwaibunaga ge ha bulu paluwa ibuhondo lalu, Anduane Homogo-o í oali henedale í mbalini nahomedale, lene.✧

<sup>33</sup> Merihandabi wali agali haruru ibiyarumebi dugu biai hayago de hondowa Yasu ibu miniha dara timbuni howa bu mini gengedai hene. <sup>34</sup> Gengedai howa lalu, Tígua ibu agoria hora kamibe, lene.

Tigua ladai bialu, Anduane Homogo-o hora kamago de handamiya ma, lene.

<sup>35</sup> Hondo puwa Yasu ibubi dugu bini.✧ <sup>36</sup> Dugu biyago hondowa wali agali biarume lalu, Lasarasi gubalini au ho heneda handa naberami, lene.

<sup>37</sup> Marume lalu, Agali de kohe heagonaga de mo ngala hayadago Lasarasi homolilono ibugua mbira bibe naheyagola wahayadabe, lene.✧

### *Yasuhanda Lasarasi mo heya henego ogo*

<sup>38</sup> Yasu ibu bu mini gengedai howa Lasarasi hora heagoria pene. Egeandaha hora howa ege tole mbirame mo hangai heago de hendene.✧ <sup>39</sup> Yasuhanda lalu, Ege tole ogoni mo yabagi hadaba, lene.

Agali homayagonaga mbalini Madahanda ibuhondo lalu, Anduane Homogo-o áyu horo manenidago ngu timbuni bulebira, lene.

<sup>40</sup> Ani layagola Yasuhanda ibuhondo lalu, Mini mbiraore wuwa bereyagua Ngode Datagaliwabenaga hongo taraore holene de hondolebere laru ndobe, lene.✧ <sup>41</sup> Tigua ege tole biago mo yabagi hayagola Yasuhanda de handadaga howa lalu, Aba-o inaga bi hale ho kego kaj laro. <sup>42</sup> Ina inaga bi hale haabo harili manda bu ko. Bi mbira larugo wali agali o karume hale helonaga laru. Ti hale howa ina í pu leneda manda bialu ihondo mini mbiraore wilonaga laru, lene.✧ <sup>43</sup> Ani lowa ibugua bi hongo howa lalu, Lasarasi tagira íbu, lene. <sup>44</sup> Ani layagola agali homene biago ibunaga gi ge denguihi dere kabu biaga aleme huba bu hora henego huba biaabo heaore tagira ibini. Ibiyagola Yasuhanda tihondo lalu, Ibu pelo hadape hadaba, lene.

### *Yasu homelo bole manda binigo ogo*

*(Madiu 26.1-5, Maga 14.1-2, Lugu 22.1-2)*

<sup>45</sup> Yu wali agali Meri bereria ibini biaru dewalime Yasuhanda biyago hondowa ibuhondo mini mbiraore wini.✧ <sup>46</sup> Marume Perisi agali hearia dai buwa Yasuhanda biyago lamini.✧ <sup>47</sup> Lamiyagola Perisi agalibi loma binigo mo miaga haguane agalibi Yu wali agalinaga Ganisolobi hearume bi lole ngoai howa lalu, Agali ogoni ibugua agalime nabiagane ale dewa bialu kago iname agi bimabe. <sup>48</sup> Ibugua ogonidagua bialu helo waharimayagua wali agali bibahendeme ibuhondo mini mbiraore wiai holebira. Ani biragola Lomo agali ti ibuwa ina wali agalibi bo wahalu inanaga anda loma bia hene kagobi bo gialo paya bulebira, lene.

<sup>49</sup> Ani lowa agali mbira mini Kaiabasa ibu mali ogoninginaga loma binigo mo miaga haguane timbuni henego ibugua lalu, Tí mini nawi kamigoni. <sup>50</sup> Ogodagua bulene nga manda bimiya. Ina hameigini bibahende bo wahi holigo mbiralime homa holene karulape, lene.✧ <sup>51</sup> Bi ogoni ibuninaga bi ndo lene. Ibu mali ogoninginaga loma binigo mo miaga haguane timbuni howa ibugua Yasuhanda Yu wali agali bibahende tinaga homa aribia holebiragonaga mbiwia halu lene.✧ <sup>52</sup> Yu hameigini hangunaga ndo Ngode Datagaliwabenaga waneigini dindi bibahendeha hama pedaru tinagabi heba homa aribia howa mo mbiraore holebiragonaga lene.✧

✧ 11:32: Yo 11.21 ✧ 11:35: Lg 19.41 ✧ 11:37: Yo 9.6 ✧ 11:38: Md 27.60 ✧ 11:40: Yo 11.4, 11.23-26

✧ 11:42: Yo 12.30 ✧ 11:45: Yo 4.48, 7.31 ✧ 11:46: Lg 16.31 ✧ 11:50: Yo 18.14 ✧ 11:51: Pig 50.20

✧ 11:52: Ais 49.6, Yo 10.16, 17.21, Eb 2.14-17, 1 Yo 2.2

<sup>53</sup> Ani lowa tigua horo ogoningi howa Yasu homelo bo waholenaga lo manda bialu hene. <sup>54</sup> Ani lalu heago hondowa Yasu ibu Yudia dindini ha pani nahe ogoriani howa pialu dindi ko wali agali nahagaha kaware ngelowa Eberaimi tanoni ibunaga talima piagaru heba pu hene.

<sup>55</sup> Pu heaha Yu wali agalime Bolangua Halu Penegonaga Horo kaware hayagola dewali tini dindi howa tomo ogoni nolenaga ala ti Ngode Datagaliwabe deni howa dodo nahe hole mana bulene winigo bule lowa Yarusaleme piai hene. <sup>56</sup> Ti puwa Yasu hai bialu howa Anduane Homogonaga andaha ngoai halu tinihondo hale haga bialu, Horo ogoningi ibu ogoria ibulebadabe naibulebadabe, lo manda bialu hene. <sup>57</sup> Loma binigo mo miaga haguane hearubi Perisi agali hearubi tigua hongo howa lalu, Ibu karia mbiralime handarimiyagua iname ibu minu polomaya langule ibalimu, lalu lamini.

## 12

### *Wali mbirame Yasu hagianeni weli ngabi odo winigo ogo (Madiu 26.6-13, Maga 14.3-9)*

<sup>1</sup> Horo waragaria howa Bolangua Halu Penegonaga Horongi tomo nolene ngelowa áyudagua Yasu ibu Bedani pene. Lasarasi homene Yasuhanda mo heya hayago ogoni ibunaga andaga pene. <sup>2</sup> Yasu ibiyagola tigua ibu tomo nelo dawa mini. Madahanda tomo tale bialu heagola Lasarasi Yasula maru heba tomo nalu berene. <sup>3</sup> Ani berearia Meri ibu weli tara baya ngabi muni dewame yolo binigo ogoni muwa Yasunaga geni odo hai howa ibunaga mandarime domalu berene. Weli tara ogoni gabo be kira ale tolabehe wini. Ani biyagola nga baya biyagome anda biagoha tolai hene. <sup>4</sup> Yasunaga talima piaga agali Yudasaa maha Yasu ndelole henego ibugua lalu, <sup>5</sup> Weli baya ngabi ogonime yolo kina handari tebira (300) muwa wali agali yagibano karu mibehego odo waharago agibe, lene. <sup>6</sup> Ibugua wali agali yagibano karu mitangi bialu ndo lene. Muni nu ibugua hono haga howa pagebibime maru mo haga henego ibu mo hole manda buwa lene.

<sup>7</sup> Ani layago Yasu hale howa ibugua lalu, Ibugua birago bilo waha. I hora holene tu holebiranginaga birago. <sup>8</sup> Horo bibahendengi wali agali yagibanoru tí heba haabo holeberami. I tí heba haabo naholeberama, lene.

### *Lasarasi homelo bamiya lenego ogo*

<sup>9</sup> Yasu Bedani pu ka layago Yu wali agali dewame hale howa ibu hearia pene. Lasarasi homenego Yasuhanda mo heya haya layago hale howa ogonibi heba de hondole pene. <sup>10-11</sup> Yu wali agali dewalime Lasarasi mo heya hayago hondowa loma binigo mo miaga haguane aria tinaga haru haga homogo henego wahalu Yasuhondo mini mbiraore wialu hene. Ani wialu henego hondowa loma binigo mo miaga haguane biarume Lasarasibi heba bo wahole lo manda manda bialu hene.

### *Yasu ibu Handame Haga Kini ale howa Yarusaleme anda penego ogo (Madiu 21.1-11, Maga 11.1-11, Lugu 19.28-40)*

<sup>12</sup> Egerebalene wali agali dewali Bolangua Halu Penegonaga Horongi ngoai hayarume Yasu Yarusaleme ibira layago hale hene. <sup>13</sup> Hale howa ti ayage yuni dibu yalu hariga obeneni lola hole pene. Lola howa tigua bi dalimu lalu, Ngode Datagaliwabe mini yaraga hama. Mbirali Anduane Homogonaga minini howa ibirago Ngode Datagaliwabehanda ibu mo turu helo larama. Ngode Datagaliwabehanda Isaraele wali agalinaga Kini mo turu helo larama, lalu hene.

✧ 11:53: Yo 5.18 ✧ 11:54: 2 Bit 13.19, Yo 4.1-4, 7.1 ✧ 11:55: 2 Bit 30.17, Yo 2.13, 5.1, 6.4, Ab 21.26 ✧ 11:56: Yo 7.11 ✧ 12:1: Yo 11.1, 11.43 ✧ 12:2: Lg 10.40 ✧ 12:3: Lg 7.37-38, 10.38-39, Yo 11.2 ✧ 12:4: Yo 18.3 ✧ 12:5: Md 19.21 ✧ 12:6: Yo 13.29 ✧ 12:7: Yo 19.40 ✧ 12:8: Man 15.11, Md 26.11, Mg 14.7 ✧ 12:9: Yo 11.43-44 ✧ 12:10-11: Yo 11.45, 12.18 ✧ 12:13: Iba 118.25-26, Md 27.42, Yo 1.49

<sup>14</sup> Yasuhanda nogo dongi mbira handa walia howa ogoni erembirani biralu ibini. Anduane Homogonaga mbugani lo ngadagua binigo ogo,

<sup>15</sup> Saiono tano kamiru tí gi nahalimu.✠

Tínaga kini ibu dongi iginini biralu tíni kamiria ibiragoni, lalu gilibu nga.

<sup>16</sup> Ani biyagola ibunaga talima piaga biaru ti irane manda nabi henego maha ibu mo yaraga halu wá taraore holeneha pu hayagola howa ani bulebira lalu Anduane Homogonaga mbugani gilibu wini ngadaguaore wali agalime ibuhondo ani biyadago ti lo manda bini.✠

<sup>17</sup> Ala Yasuhanda Lasarasi homenego, Homali egeanda howa tagira íbu, layagola heyalu ibiyago wali agali de hendenerume lalu, Ibugua agua biya, lalu wali agali hearu lamini.✠ <sup>18</sup> Anigo ibugua agalime nabiagane ale biya layago hale howa wali agali dewa de hondole ngoai hene. <sup>19</sup> Ani biyago de hondowa Perisi agalirume tini degedege lagalaga bialu lalu, De handadaba. Dindi bibahendehe karume ibu talima piai harago iname mbirale mbira nabibehe kamagoni, lene.✠

### *Girigi agali marume Yasu de hondole ibinigo ogo*

<sup>20</sup> Girigi agali maru hearume tomo biago nalu Ngode Datagaliwabe mini yaraga halu lotu lole Yarusaleme ibini. <sup>21</sup> Tigua Pilibi hearia puwa lalu, Hambi-o ina Yasu de hondoa birago walia ha, lene. Pilibi ibu Galili dindi mbira mini Bedesaidali hene.✠

<sup>22</sup> Ani layago hale howa Pilibi ibugua Anduru lamule pene. Lamialu libu haru Yasu lamule pene. <sup>23</sup> Lamiyagola Yasuhanda libuhondo ladai bialu lalu, Agali Hole Ibiyagonaga mini mo yaragaore holene tu íbu nga.✠ <sup>24</sup> Tíhondo heneneore laro. Widi lini hondene mbira dindini ibira howa homa nabiayagua lini mbiraore hangu ngagobi wiaabo holebira. Dindini ibira howa homayagua anda howa lini dewa dolebira.✠ <sup>25</sup> Mbiralime dindini howa ibuni holene hangu hame lalu hayagua holene ogoni yu waholebira. Mbiralime dindini howa ibuni holene hame nale hayagua ibu holene ogoni yu haabo howa haabobo holenebi yu holebira.✠ <sup>26</sup> Mbiralime ínaga biabe bia hoa ho kayagua í kogoria ibubi hole í porodagua talima ibulene nga. Ínaga biabe bia hagane karu í Abahanda tinaga mini mo yaraga holebira, lene.✠

### *Yasu ibu homolenenaga bi laminigo ogo*

<sup>27</sup> Yasuhanda lalu, Áyu ínaga miniha genda bialu burugu laruago ina agi loabe. Aba-o íhondo bulene ngago nabi wahelo mo wahabe loabe. Ndo í tandaga ogoni nole dindi ogoria dalirugoni.✠ <sup>28</sup> Aba-o ínaga mini mo yaraga helo bibe, lene.✠

Ani layagola dahuliya andaga howa bi ladali halu lalu, Ina mo yaraga harugo lonebi mo yaraga holebero, lene.

<sup>29</sup> Ani layuago hale ho hayarume lalu, Hari kulu lagadagua larua, lene. Marume lalu, Dahuliyali mbirame ibuhondo bi lamiarua, lene.✠

<sup>30</sup> Yasuhanda tihondo lalu, Bi o layuagoni í mitangi bialunaga ndo tí mitangi bialunaga layua.✠ <sup>31</sup> Áyu ogoni wali agali dindi bibahendeni karu daba ki bulene nga. Áyu ogoni wali agali dindi bibahendeni karunaga haguane kago bo talia tagi kaware nga.✠ <sup>32</sup> Í dindini howa mo yaraga haragola wali agali bibahende ínini kogoria yamiai holebero, lene.✠ <sup>33</sup> Ani layago ibu aguani homolebero lalu lene.✠

✠ 12:15: Seg 9.9 ✠ 12:16: Lg 18.34, Yo 2.22, 7.39, 14.26 ✠ 12:17: Yo 11.43-44 ✠ 12:19: Yo 11.48 ✠ 12:21: Lg 19.3, 23.8, Yo 1.44 ✠ 12:23: Yo 13.31-32, 17.1 ✠ 12:24: 1 Ko 15.36 ✠ 12:25: Md 10.39, 16.25, Mg 8.35, Lg 9.24, 17.33 ✠ 12:26: Yo 14.3, 17.24, 1 Te 4.17 ✠ 12:27: Iba 6.3, 42.5, Md 26.38, Lg 12.50, 22.53, Yo 18.37 ✠ 12:28: Md 3.17 ✠ 12:29: Ab 23.9 ✠ 12:30: Yo 11.42 ✠ 12:31: Md 12.29, Lg 10.18, Yo 9.39, 14.30, 16.11, Ab 26.18, Eb 2.2 ✠ 12:32: Yo 3.14, 8.28, Lm 5.18, Hi 2.9 ✠ 12:33: Yo 18.32



<sup>34</sup> Wali agali biarume ibuhondo ladai bialu lalu, Inanaga Mana lowini ngagome Mbiralí Dabo Helenego ibu haabo hagane lalu gilibu ngago manda bidama. Anigo ina lalu, Agali Hole Ibiyago mo yaraga holebira, larigo Agali Hole Ibiyago ibu aibe, lene.\*

<sup>35</sup> Ani layagola Yasuhanda tihondo lalu, Wá holene ibu tí heba emene tigi mbira hangu holebira. Wá holene tí heba kaore ibu heba ibagabu halimu. Tí arumaha naholenaga ani halimu. Arumaha ibagabu hagarume agoha porobe manda nabi howa pupe hagane.\* <sup>36</sup> Tí wá holenenaga waneigini halimulo wá holene tí heba kaore wá holene ogonihondo mini mbiraore wialu halimu, lene.\*

*Yu wali agalime mini kira wu henego ogo*

Yasuhanda ani lowa tigua ibu hondolilono ohowa ha do hole pene. <sup>37</sup> Tigua deme hendelo Yasuhanda agalime nabiagane ale dewa biyagola ti hondowa ibuhondo mini mbiraore nawi dege haabo hene.\* <sup>38</sup> Ngode Datagaliwabe mana latagi haga Aisaiahanda ani bulebira lalu mbiwia henego lola hene. Ibugua lalu,\*

Anduane Homogo-o iname bi mana lamirimago hale howa aiwa yu tiga biyabe.

Anduane Homogohanda ibunaga hongo aihondo walia hayabe, lalu gilibu nga.

<sup>39</sup> Tigua Yasuhondo mini mbiraore nawi henego irane Aisaiahanda bi mende lo ngago ogo,

<sup>40</sup> Tigua deme hondolilonobi minime galone manda bulilonobi\*

ina ti mo dabi holiya ihondo mini beregedolilonobi

Ngode Datagaliwabehanda tinaga de mo ko halu tinaga minibi mo ndibu leda, Ngode

Datagaliwabehanda lene, lalu gilibu nga.

<sup>41</sup> Aisaiahanda ani layago irane ibu Yasunaga wá holene ala de hondowa Yasunaga te lalu bi ogoni lene.\*

<sup>42</sup> Yu agali marume mini mbiraore nawi helowa Yu wali agali haru haga dewame Yasuhondo mini mbiraore wu hene. Ti ngoai hagane andaha nahe tagira puabo halimu lo wuligo Perisi agali hondowa ti gi howa latagi nahe ohowa lalu hene.\* <sup>43</sup> Ani binigo irane tigua wali agalime tinaga mini mo yaraga helo hame timbuni lowa Ngode Datagaliwabehanda tinaga mini mo yaraga helo hame emene lo hene.\*

*Yasuhanda bi layagome wali agali daba ki holebirago ogo*

<sup>44</sup> Yasuhanda bi dalimu lowa lalu, Ihondo mini mbiraore wu kagome i hanguhondo ndo i pu layagohondobi mini mbiraore wu ka.\* <sup>45</sup> I de hendedagome i pu layagobi de hendeda.\* <sup>46</sup> Ihondo mini mbiraore wu karume arumaheha haabo nahelo i wá holene howa dindini daliru.\* <sup>47</sup> Bi ina langialu kogo hale halu nabiaga kago ibuni biyagonaga daba ki nabulebero. Wali agali dindi bibahendeni karu daba ki hole ndo ibiru. Ti pele ngule ibirugoni.\* <sup>48</sup> Mbiralí ila habiya nale pelo wahaga kagobi ina bi langialu kogo yu tiga nabi kagobi ibuni biragonaga dabaga mbiralí ka. Ha maro bulene horo harangi bi ina langirugome o biyagonaga daba ki holebira.\* <sup>49</sup> Ogoni heneneore laro. Ini hangu manda bialu ndo laruli. I Aba i pu layagome labe lenego hangu laruli.\* <sup>50</sup> Ibugua bibe lenego hale halu biagago haabobo holene yulebira manda bu ko. I ani manda buwa i Abahanda labe lenedagua hangu laruli, lene.\*

\* 12:34: Iba 89.4, 89.36, 110.4, Ais 9.7, 53.8, Ese 37.25, Dan 2.44, 7.14, Mai 4.7 \* 12:35: Yar 13.16, Yo 1.9, 7.33, 8.12, 11.10, Eb 5.8, 1 Yo 2.10-11 \* 12:36: Eb 5.8 \* 12:37: Yo 2.11 \* 12:38: Ais 53.1, Lm 10.16 \* 12:40: Ais 6.9-10, Md 13.15 \* 12:41: Ais 6.1 \* 12:42: Yo 7.48, 9.22 \* 12:43: Yo 5.44 \* 12:44: Md 10.40, Mg 9.37, 1 Pi 1.21 \* 12:45: Yo 14.9 \* 12:46: Yo 3.19, 8.12, 9.5, 9.39, 12.35 \* 12:47: Yo 3.17, 5.45, 8.15, 8.26 \* 12:48: Man 18.19, Mg 16.16, Lg 10.16, Hi 4.12 \* 12:49: Man 18.18, Yo 8.38, 14.10 \* 12:50: Yo 8.26-28

## 13

### *Yasuhanda ibunaga talima piagarunaga ge wayawaya binigo ogo*

<sup>1</sup> Yawi Bolangua Halu Penegonaga Horo lowa áyudagua Yasu ibu minime, Dindi ogo wahalu i Aba karia polene tu haragoni, lo manda bu hene. Iibunaga wali agali dindi bibahendeni hearu ibugua gubalini haabo howa hamaro biyangibi gubalini ho haabo hene.✧

<sup>2</sup> Yasubi ibunaga talima piagarubi ti tomo nalu berene. Dama Heyolabeme Saimono igini Yudasa Isagariodonaga miniha Yasu ndelelo mo manda bia hene.✧ <sup>3</sup> Yasu ibu ogonigi, I Abahanda ihondo hongo bibahende ngiai hayagobi Ngode Datagaliwabe howa ibirugo nde ibu karia lone pole kogobi, ibu ani manda bu wiaabo hene.✧ <sup>4</sup> Ani manda buwa ibu dagiani berenego heyuwa ibugua ibunaga aga daliga biagane golo ngelowa dabero mbira muwa bo bini.✧ <sup>5</sup> Bo buwa ibugua iba ndisini odo berelowa ibunaga talima piagarunaga ge wayawaya bia halu daberome domaga bini. <sup>6</sup> Saimono Pida berearia bima ibiyago de hondowa Saimonohanda ibuhondo lalu, Anduane Homogo-o inaga ge ina wayawaya bia holeberebe, lene.✧

<sup>7</sup> Ani layagola Yasuhanda ladai bialu lalu, Ina o berogoninaga irane áyu manda nabidego maha manda bulebere, lene.

<sup>8</sup> Pidahanda ibuhondo lalu, Inaga ge ina wayawaya bulene nawiore manda bido, lene.✧

Ani layagola Yasuhanda ladai bialu lalu, Ina inaga ge wayawaya nabiruyagua inaga talima piaga nahabehe holebere, lene.

<sup>9</sup> Ani layagola Saimono Pidahanda ibuhondo lalu, Anduane Homogo-o aniyagua inaga ge hangu ndo inaga gibi embonebi wayawaya biai habe, lene.

<sup>10</sup> Yasuhanda ibuhondo lalu, Mbiralu ibu tingini bibahende wayawaya biai hene kago ibu dodo nahe kago lone buyane nabi ge dege bulene nga. Tí bibahende bayale kamigo mbiraoreli hangu bayale ndo kami, lene.✧ <sup>11</sup> Yasu ibu agali ogome i nde lolebira manda buwa, Mbiraoreli hangu bayale ndo kami, lene.

<sup>12</sup> Yasuhanda tinaga ge wayawaya biai howa ibunaga aga lone karulalu dagia bigoria✧ daibu biruwa tihondo lalu, Ina tihondo o birugoninaga irane manda bidamibe.

<sup>13</sup> Tigua ihondo, Lawai Hagabi Anduane Homogobi, laramiligo tiga tiga laramili nde i ogoniore kogoni.✧ <sup>14</sup> I tinaga Lawai Hagabi Anduane Homogobi howa ina tinaga ge wayawaya birudagua tiguabi tininaga ge wayawaya bia haga bia haga bialu halimu.✧ <sup>15</sup> Ina tihondo birudagua tigua maruhondo bilimulo biawai haru.✧ <sup>16</sup> Ina tihondo heneneore laro. Garabaya biabe ale bia haga kago ibunaga anduane kagobi ndo ibu nira haga. Bi lamule piaga kago ibuhondo pu lenego kagobi ndo nira haga.✧ <sup>17</sup> Ai galone ogoni manda bu kamigo manda bialu birimiyagua turu holene handa walia holeberami.✧

<sup>18</sup> Ina tí bibahendenaga lalu ndo laro. Tí agali ina dabene kamiru manda biai ko. Anduane Homogonaga mbugani lo ngadagua, Mbiraorelime iya haru tomo mandagi nalu biraga henego ogoni ibugua i handabe manga dege halu handa tara haya, lalu gilibu ngago lola holebira.✧ <sup>19</sup> Áyu ina tihondo langerogoni nabi ngaore langero. Ani langirudagua birago handalu I Ini Haluhe Henego Haabo Hole Kogoni manda buwa tigua ihondo mini mbiraore wilimulonaga laro.✧ <sup>20</sup> Ina tihondo heneneore laro. Mbiralu ina pu larogola ibirago mbirame habiya lalu yamiyagua ibi yamiragoni. I yamiragome i pu layagobi yamiragoni, lene.✧

✧ **13:1:** Md 26.2, Yo 7.30, 12.23, 15.13, 17.1, 17.11, Pb 2.8, 1 Yo 3.16 ✧ **13:2:** Lg 22.3, Yo 13.27 ✧ **13:3:** Md 28.18, Yo 3.35, 16.28, Ab 2.36, 1 Ko 15.27, Hi 2.8 ✧ **13:4:** Lg 22.27, Pb 2.7-8 ✧ **13:6:** Md 3.14 ✧ **13:8:** 1 Ko 6.11, Eb 5.26, Ta 3.5, Hi 10.22 ✧ **13:10:** Yo 6.64, 6.70-71, 15.3 ✧ **13:12:** Lg 22.27 ✧ **13:13:** Md 23.8-10, Lg 6.46, 1 Ko 8.6, 12.3, Pb 2.11 ✧ **13:14:** Md 20.28, Lg 22.27, Lm 12.10, Ga 6.1-2, 1 Pi 5.5 ✧ **13:15:** Md 11.29, Pb 2.5, Kl 3.13, 1 Pi 2.21, 1 Yo 2.6 ✧ **13:16:** Md 10.24, Lg 6.40, Yo 15.20 ✧ **13:17:** Md 7.24, Ya 1.25 ✧ **13:18:** Iba 41.9 ✧ **13:19:** Yo 14.29, 16.4 ✧ **13:20:** Md 10.40, 25.40, Mg 9.37, Lg 9.48, 10.16

*Yasuhanda, Tí mbiralime i nde loleberami, lenego ogo  
(Madiu 26.20-25, Maga 14.17-21, Lugu 22.21-23)*

<sup>21</sup> Yasuhanda ani lowa ibu miniha genda timbuni howa latagi halu lalu, Ina tihondo heneneore laro. Tí mbiralime i nde loleberami, lene.✧

<sup>22</sup> Ani layago hale howa ibunaga talima piaga biarume aiwa ani bulebira layabe toba howa tini handaya haga haga bini. <sup>23</sup> Ibunaga talima piaga mbira Yasuhanda gubalini ho haga henego ibu Yasunaga galu hombeni palu paga heago✧ <sup>24</sup> Saimono Pidahanda ibu de hondowa ibuhondo hendore gibu muwa lalu, Ogome buleberami lalu inahondo langi la, lene.

<sup>25</sup> Ani layagola ibugua Yasu bereagoha kaware bira para howa ibuhondo lalu, Anduane Homogo-o ogome bulebira lalu langi, lene.

<sup>26</sup> Yasuhanda ladai bialu lalu, Mberedi gai bini ogo nema ibanaha ibira howa muleberogo ogonime bulebira, lene. Ani lowa ibugua mberedi biago nema ibanaha ibira howa Saimono Isagariodo igini Yudasahondo mini. <sup>27</sup> Yudasa ibu mberedi biago yamiyaore ibunaga bu miniha dama Heyolabe anda pene. Yasuhanda Yudasahondo lalu, Ina bule kego abale bibe, lene.✧ <sup>28</sup> Ani layago ibu heba dagiani birayarume irane manda nabi berene. <sup>29</sup> Marume Yudasa ibu muni nu hono hagane henego ibugua tomo dawa nolene kaware wiyagonaga tomo yolo bu pu lalu layabe toba hene. Marume wali agali yagibanoruhondo mbirale mbira mule pu lalu layabe toba hene.✧

<sup>30</sup> Yudasa ibu mberedi gai bini miyago nalu abale tagira pene. Ibu arumaha tagira pene.

*Yasuhanda bi gahenge lowinigo ogo*

<sup>31</sup> Yudasa tagira pialu peha Yasuhanda lalu, Agali Hole Ibiyagonaga mini mo yaraga holene tu pana haragoni. Ngode Datagaliwabe mini mo yaraga holenebi ibuha howa pani haragoni.✧ <sup>32</sup> Ibuha howa Ngode Datagaliwabe mini mo yaraga hayagua Ngode Datagaliwabehanda ibuniha howa Agali Hole Ibiyagonaga mini mo yaraga holene áyu ogoni dege howa pani holebira.✧ <sup>33</sup> Iginiru-o i tí heba emene tigi mbira hangu holebero. I porogola tigua i hai buleberami. Ina Yu wali agali haru haga karuhondo lamirudagua tihondobi langero. I poleberogoha tí naibabehe kami.✧ <sup>34</sup> Ina bilimu lalu tihondo bi gahenge lowerogo ogo. Tíni gubalini haga haga bialu halimu. Ina tihondo gubalini ho harulidagua tíni gubalini haga haga bialu halimu.✧ <sup>35</sup> Tíni gubalini haga haga bialu harimiyagua wali agali bibahendeme tí de hondowa inaga talima piagada lolebira, Yasuhanda lene.✧

*Yasuhanda Pidahondo, Ina i manda nabido lolebere, lenego ogo  
(Madiu 26.31-35, Maga 14.27-31, Lugu 22.31-34)*

<sup>36</sup> Saimono Pidahanda ibuhondo lalu, Anduane Homogo-o i ani pole howa laribe, lene.✧

Ani layagola Yasuhanda ladai bialu, I poleberogoha áyu ogoni i haruru naibabehe ke. Awe haruru ibulebere, lene.

<sup>37</sup> Ani layagola Pidahanda ibuhondo lalu, Anduane Homogo-o aginaga i haruru naibabehe kobe. I mitangi buwa ina inaga homa holenebi karulape manda bu ko, lene.✧

<sup>38</sup> Ani layagola Yasuhanda ladai bialu lalu, Inaga homa holebero larigo heneneore ani bule manda bu kebe. Ihondo heneneore laro. Ega gogologome bi naledaha Yasu manda nabido ina halu tebo lolebere, lene.

✧ 13:21: Md 26.21, Mg 14.18, Lg 22.21, Yo 12.27, Ab 1.17, 1 Yo 2.19 ✧ 13:23: Yo 19.26, 20.2, 21.7, 21.20, 21.24  
✧ 13:27: Lg 22.3, Yo 6.70, 13.2 ✧ 13:29: Yo 12.6 ✧ 13:31: Yo 12.23, 14.13, 1 Pi 4.11 ✧ 13:32: Yo 17.5  
✧ 13:33: Yo 7.34 ✧ 13:34: LBM 19.18, Yo 15.12, 15.17, 1 Pi 1.22, 1 Yo 2.7-8, 3.23, 4.21, 2 Yo 5 ✧ 13:35: 1 Yo 2.5, 4.20 ✧ 13:36: Yo 7.34, 21.18-19, 2 Pi 1.14 ✧ 13:37: Md 26.33-35, Mg 14.29-31, Lg 22.33-34

## 14

### *Yasuhanda, Aba karia polenenaga hariga i ko, lenego ogo*

<sup>1</sup> Yasuhanda ti lamialu lalu, Tí mini tumutumu bu dara dege dindi ho nahalimu. Ngode Datagaliwabhondo mini mbiraore wialu kamidagua ihondobi mini mbiraore wialu halimu. ✧ <sup>2</sup> I Abanaga andagani hobane dewa ka. Hobane dewa nakale tí holene mo manda manda bule poro ala langirugo nalangidole. ✧ <sup>3</sup> Tí holene manda manda bu ngelalu i kogoria ina mandagi haabo hamiya tí damu dai bule poro. ✧ <sup>4</sup> I pole kogo hariga ogoha polebira manda biai kami, lene.

<sup>5</sup> Ani layago Tomasa hale howa ibuhondo lalu, Anduane Homogo-o i ani pole kebe ina manda nabi kamago i hariga ogoha polebere agua manda bibehebe, lene.

<sup>6</sup> Ani layagola Yasuhanda ladai bialu ibuhondo lalu, Harigabi henene lolenebi holene gahengebi i ko. Mbiralime Aba karia pole i koria naibiyagua pobe nahe. ✧ <sup>7</sup> Tígua i manda bidamigo i Ababi manda buleberami. Áyu ogoni howa ibu de handalu bayuwa manda bidami, lene. ✧

<sup>8</sup> Ani layagola Pilibihanda ibuhondo lalu, Anduane Homogo-o i Aba inahondo walia ha. Walia haregola karulape manda buleberama, lene.

<sup>9</sup> Yasuhanda ibuhondo ladai bialu lalu, Pilibi-o i tí heba luore haabo harimago howa ina i manda nabi dege kebe. I hendedagome i Ababi hendeda. Ani biagane ngago ina Aba inahondo walia ha larigo irane agibe. ✧ <sup>10</sup> Pilibi-o i Abaha i kogo iha i Aba kagobi manda bialu mini mbiraore nawi kebe, lalu Yasuhanda ibunaga talima piagaruhondo lalu, Ina tihondo bi langialu kogo ininaga hongome ndo langialu ko. I Aba iha kago ibugua biabe bialu ka. ✧ <sup>11</sup> I Abaha i kogo iha i Aba kagobi larogo hale howa mini mbiraore wilimu. Bi hale howa mini mbiraore nawi kamiyagua ina biabe bigi bialu kogoni hondowa mini mbiraore wilimu. ✧ <sup>12</sup> Ina tihondo heneneore laro. Ihondo mini mbiraore wialu kagome ina biabe bialu kodagua ibuguabi bulebira. I Aba kagoria porogome ibugua biabe timbuni tarabi bulebira. ✧ <sup>13</sup> Igini ina berogome Abanaga mini mo yaraga helo tígua inaga minini howa mbirale mbira bia larimiyagua ina biai holebero. ✧ <sup>14</sup> Tígua inaga minini howa mbirale mbira bia larimiyagua ina biai holeberoore, lene.

### *I Abahanda ibu Dinini tihondo ngulebira, lenego ogo*

<sup>15</sup> Tígua ihondo gubalini ho kamiyagua ina bilimu lalu kodagua bialu holeberami. ✧ <sup>16</sup> Ina i Abahondo lamialu lalu, Biamogo Biagane ibuni tí heba haabo helo i pani mia, lolebero. ✧ <sup>17</sup> Biamogo Biagane ogoni ibu Ngode Datagaliwabe kagobi heneneore lagane Dinini ka. Dinini ogoni dindi mana hangu biaga karume de nahandabehebi minime manda nabibehebi kago tigua ibu nayamibehe kagoni. Tígua dege ibu mandabu kami. Ibu tí heba haabo howa tíha holebirago mandabu kami. ✧

<sup>18</sup> Tí hono wahene ale halimulo yu wahalu napolebero. Tí kamiria i dai bulebero. ✧ <sup>19</sup> Emene howa dindi mana hangu biaga karume i de nahondolebira. Tígua dege i de hondoleberami. I kodagua tíbi holeberami. ✧ <sup>20</sup> Horo ogoningi i tíha kogobi i Abaha i kogobi iha tí kamigobi manda biai holeberami. ✧

<sup>21</sup> Ina bilimu lalu kodagua mo yai halu bialu kagome ihondo gubalini ho ka. Mbirali i gubalini ho kago i Abahanda ibuhondobi gubalini ho holebira. Inabi ibuhondo gubalini howa ini ibuhondo walia holebero, lene. ✧

✧ **14:1:** Yo 14.27, 16.33 ✧ **14:2:** Yo 13.33, 13.36 ✧ **14:3:** Yo 12.26, 17.24, Ab 1.11, 1 Te 4.17 ✧ **14:6:** Yo 1.4, 1.17, 8.19, 8.32, 10.9, 11.25, Lm 5.1-2, Hi 9.8, 10.20 ✧ **14:7:** Yo 8.19 ✧ **14:9:** Yo 12.45, Kl 1.15, Hi 1.3 ✧ **14:10:** Yo 7.16, 8.28, 10.38, 12.49, 14.24, 17.21-23 ✧ **14:11:** Yo 5.36, 10.38, 14.20 ✧ **14:12:** Md 21.21, Mg 16.16-20, Lg 10.17 ✧ **14:13:** Md 7.7, Lg 11.9, Yo 15.7, 15.16, Ya 1.5, 1 Yo 3.22 ✧ **14:15:** Yo 14.21-23, 15.10, 15.14, 1 Yo 5.3 ✧ **14:16:** Yo 14.26, 15.26, 16.7, Lm 8.15, 8.26 ✧ **14:17:** Md 10.20, Yo 16.13, Lm 8.26, 1 Ko 2.14, 1 Yo 2.27, 4.6 ✧ **14:18:** Md 28.20, Yo 14.3, 14.28 ✧ **14:19:** Yo 16.16, 1 Ko 15.20 ✧ **14:20:** Yo 10.38, 14.10, 17.21-26 ✧ **14:21:** Yo 14.15, 14.23, 15.10, 16.27, 1 Yo 2.5, 5.3

<sup>22</sup> Ani layago hale howa Yudasa Isagariodo ndo Yudasa mendeme ibuhondo lalu, Anduane Homogo-o inahondo ini mo walia halu dindi mana hangu biagaruhondo ini walia naholebero larigo irane agibe, lene.\*

<sup>23</sup> Ani layagola Yasuhanda ibuhondo ladai bialu lalu, Mbiralime ihondo gubalini ho kayagua inaga bi mana hale halu biai holebira. Ani bialu kago i Abahanda ibuhondo gubalini holebira. Ani buwa ogoni ibu karia ibi i Ababi iya ibuwa ibu heba haabo holeberaba.\* <sup>24</sup> Ihondo gubalini nahe karume inaga bi hale halu nabulebira. Tigua bi mana hale halu kamigo inaga bi mana ndo i Aba i pu layagonaga bi mana langirugoni.\*

<sup>25</sup> I nape ti heba kogo howa bi ogoni langiru. <sup>26</sup> Maha Biamogo Biagane ibu Ngode Datagaliwabe Dinini kago i Abahanda i minini howa ti kamiria pu lolebirago ibugua ibuwa mbirale bibahende tihondo lawai holebira. Ina tihondo langialu harugo damenego bibahende ibugua ti mo mitangi bia hai holebira.\*

*Inaga mo palia holene tihondo ngero, lenego ogo*

<sup>27</sup> I pole howa mo palia holene ti kamigo heba ngelalu polebero. Ininaga mo palia holene tihondo ngero. Dindi mana hangu biaganerume ngiagadagua ndo ngero. Ti mini tumutumu bu dara dege dindi hobi gi hobi nahalimu.\* <sup>28</sup> Ina tihondo lalu i Aba karia pialu ti kamiria dai bule larugo hale harimigoni. Hale howa ihondo gubalini ho kamile i Aba karia porogonaga turu ho kamile. Irane i Aba i kogobi ndo ibu timbuniore kago.\* <sup>29</sup> Ina tihondo langiai harugo ogoni nabi ngaore langiru. Ani langirudagua birago hondowa tigua ihondo mini mbiraore wilimulonaga langiai haru.\* <sup>30</sup> Ina ti heba bi lu lalu haabo habe nahego wali agali dindi bibahendeni karunaga haguane kago ibu i koria ibulene kaware nga. Ibuwa iha nakarulape mbira ngaria handa walia naholebira.\* <sup>31</sup> Nde dindi mana hangu biagane karume ina i Abahondo gubalini ho kogo ti manda bilonaga ibugua bibe laradagua hangu bialu ko.\*

Ai maliya heyadaba, lene.

## 15

*Yasuhanda, Pu mbira lini daga mini gerebi irane henene i kogoni, lenego ogo*

<sup>1</sup> Yasuhanda, Pu mbira lini daga mini gerebi irane henene i kogoni. Mabu anduane i Aba kagoni. <sup>2</sup> Iha magane kago aria mbira lini nadaga kago ibugua gandulo wahaga. Magane mende lini daga kagome lini dewa delo mane danda wabia haga.\* <sup>3</sup> Ina tihondo bi langirugome ti mo bayale henego kami.\* <sup>4</sup> Iha ho gimbu bu halimu. Ibi tiha ho gimbu bu holebero. Magane mbira iraneha gimbu nabi hayagua magane hangume lini nadabehe hagamaga tibi iha ho gimbu nabi harimiyagua lini nadabehe holeberami.\*

<sup>5</sup> Pu mbira lini daga mini gerebi irane i kogoni. Magane ti kami. Ti mbirali iha ho gimbu bia i nde ibuha ho gimbu bia bu kabayagua ogoni ibuha lini dewa dolebira. I wahowa tini hangu howa mbirale mbira bibe nahe kami.\* <sup>6</sup> Magane podo wahagamaga iha mbirali ho gimbu nabi hayagua ogoni podo waharagola gau lolebira. Magane podo winigo mo mogo buwa irani delagamaga delolebira.\* <sup>7</sup> Iha ti ho gimbu bia inaga bi manabi tiha gimbu bia bilowa ihondo mbirale mbira bia lalu langirimiyagua hale halu buleberoore.\* <sup>8</sup> Tiha lini dewa dedamigome i Abanaga mini mo yaraga holebira. Ani buwa ti inaga talima piagaore holeberami.\* <sup>9</sup> I Abahanda ihondo gubalini ho kadagua inabi tihondo gubalini ho ko. Ina gubalini ho kogoha ti halimu. <sup>10</sup> I Abahanda bibe

\* 14:22: Ab 10.41-42 \* 14:23: Md 18.20, Yo 14.15, 1 Ko 6.16, Eb 3.17, 1 Yo 2.24, Mo 3.20 \* 14:24: Yo 5.19, 5.38, 7.16, 12.49 \* 14:26: Lg 24.49, Yo 14.16, 15.26, 16.13, 1 Yo 2.20, 2.27 \* 14:27: Yo 14.1, 16.33, Pb 4.7, Kl 3.15 \* 14:28: Lg 24.51, Yo 14.3, 14.12, 14.18, 16.28, 20.17, Pb 2.6 \* 14:29: Yo 13.19, 16.4 \* 14:30: Yo 12.31, 16.11, Eb 2.2 \* 14:31: Md 26.46, Yo 10.18, 12.49, Hi 5.8 \* 15:2: Md 3.10, 15.13 \* 15:3: Yo 13.10, 17.17, Eb 5.26, 1 Pi 1.22 \* 15:4: Yo 6.56, Kl 1.23, 1 Yo 2.6 \* 15:5: Hos 14.8, Yo 15.16, 1 Ko 3.5, Pb 1.11, 4.13 \* 15:6: Md 3.10, 7.19, 13.42 \* 15:7: Md 7.7, Yo 14.13-14, 15.16, 16.23 \* 15:8: Md 5.16, Yo 8.31, Pb 1.11



lenedagua ina bialu howa ibugua gubalini ho kagoha i kodagua ina bilimu larogo bialu harimiyagua ina gubalini ho kogoha ti holeberami.\*

<sup>11</sup> Tihondo bi langialu harugo inaga turu holene tiha wilobi wiragola tinaga turu holene tiniha tolelobi langiru.\* <sup>12</sup> Ina bilimu lalu kogo ogo ina ti gubalini ho kodagua tini gubalini hagahaga bu halimu.\* <sup>13</sup> Agali mbirame ibu nenegealiru mitangi howa ibuninaga holene pela hayagua agali ogoni ibuha gubalini holene timbuniore nga.\* <sup>14</sup> Anigo ina bilimu lalu kodagua bialu harimiyagua inaga nenegeali ti holeberami.\* <sup>15</sup> Ina ti inaga biabe bia hagane kami lalu ndo ko. Biabe bia haganeme ti haru haga kago agi birabe manda nabi hagane. I Abahanda bule kago bibahende tihondo langiai harugo manda buwa ti inaga nenegeali kami lalu ko.\* <sup>16</sup> Tigua i dabarimi ndo ina ti dabaru. Tiha lini dewa dalu halimulo dabo helaru. Tinaga lini darago daabo helo helaru. Ani bu howa tigua inaga minini howa i Abahondo mbirale mbira bia larimiyagua ibugua biai holebira.\* <sup>17</sup> Ogonigo tigua bilimu lalu kogo ogo tini gubalini ho hagahaga bialu halimu, lene.\*

*Dindi mana hangu biaga karume ti handabe manga holebira, lenego ogo*

<sup>18</sup> Yasuhanda lalu, Dindi mana hangu biaga karume ti handabe manga hayagua pigane i handabe manga hayadagua ina handabe manga haragonida manda bilimu.\* <sup>19</sup> Tibi dindi mana hangu biaga kamile dindi mana hangu biagarume ina aria ka lowa tihondo gubalini ho kale. Ina ti dindiali hemiria dabarugo ti dindi mana nabiaga kamigoni. Ani kamigo dindi mana hangu biagarume ti hondowa handabe manga halu ka.\* <sup>20</sup> Tihondo ina bi mbira langirugo mitangi bilimu. Ina au larugo, Garabaya biabe ale bia haga kago ibu ibunaga anduane kagobi ndo ibu nira haga. Tigua i mo tandaga hayadagua tibi mo tandaga holebira. Tigua ina mana lawai harugo hale halu biyagua tigua mana lawai haramigobi hale halu bulebira.\* <sup>21</sup> Urunime ti mo tandaga holebira larugo i Aba i pu layago manda nabi karume ti inaga kamigo hondowa mo tandaga holebira laru.\* <sup>22</sup> Ina tihondo bi mana lamule naibidole tigua ko bialu kama manda nabi howa bialu kale. Ina lamirugo hale howa ko bialu kagonaga tigua ina manda nabi howa bialu harimada labe nahe holebira.\* <sup>23</sup> I handabe manga haga karume i Ababi handabe manga halu ka.\* <sup>24</sup> Ina agalime nabiagane aleru bialu harugo urunime de hendelo nabidole tigua ko bialu kama manda nabi howa bialu kale. Ogonidagua birugo ti de hondowa tigua ibi i Ababi handabe manga halu ka.\* <sup>25</sup> Tinaga Mana lowinigo ogo, Tigua handabe manga holene irane mbira nawini bameore i handabe manga haya, lalu gilibu ngadaguaore lola haragoni.\*

<sup>26</sup> Biamogo Biagane ibu ibulebira. Ogoni ibugua Ngode Datagaliwabe ogobi ka lalu heneneore lagane Dinini i Aba kagoria howa ibulebira. Ina ibu ti kamigoria pu loleberogo ibuwa ibugua i ogobi ka lalu langulebira.\* <sup>27</sup> Piganeore howa ti i heba haabo harimago tiguabi i ogobiore ka lalu lamuleberami, lene.\*

## 16

<sup>1</sup> Ina bi langialu harugo tigua Ngode Datagaliwabehondo mini mbiraore wu harimigo wahalu napilimulonaga langialu harugoni.\* <sup>2</sup> Tigua tihondo, Ngoai hagane andaha nahe tagira puabo halimu, lalu lolebira. Horo tara mbira tagira ibulebira. Ibiragola mbirame ti bo wahalu howa ibugua i Ngode Datagaliwabenaga biabe bia harogo manda bialu ti

\* 15:10: Yo 14.15, 14.21-23, 1 Yo 2.5 \* 15:11: Yo 16.24, 17.13, 1 Yo 1.4 \* 15:12: Yo 13.34, 15.17, 1 Te 4.9, 1 Pi 4.8, 1 Yo 3.11, 3.23, 4.21, 2 Yo 5 \* 15:13: Yo 10.11, Lm 5.7-8, Eb 5.2, 1 Yo 3.16 \* 15:14: Md 12.50, Yo 14.15, 14.23 \* 15:15: Yo 17.26, Ab 20.27 \* 15:16: Md 28.19, Mg 16.15, Yo 6.70, 14.13, 1 Yo 4.10, 4.19 \* 15:17: Yo 13.34 \* 15:18: Md 10.22, 1 Yo 3.1, 3.13 \* 15:19: Yo 17.14, 1 Yo 4.5 \* 15:20: Ese 3.7, Md 10.24, Lg 6.40, Yo 13.16 \* 15:21: Md 5.11, 10.22, 24.9, Mg 13.13, Yo 16.3 \* 15:22: Yo 9.41, Lm 1.20, Ya 4.17 \* 15:23: Lg 10.16, 1 Yo 2.23 \* 15:24: Yo 3.2, 7.31, 9.32, 9.41, 14.11 \* 15:25: Iba 35.19, 69.4 \* 15:26: Lg 24.49, Yo 14.26, 16.7, 16.13, Ab 2.33, 1 Yo 5.6 \* 15:27: Lg 1.2, 24.48, Ab 1.8, 1.21-22, 1 Pi 5.1, 2 Pi 1.16 \* 16:1: Md 11.6, 24.10, 26.31

bolebira. ✨ <sup>3</sup> Tigua i Ababi ibi manda nabi howa ani bulebira. ✨ <sup>4</sup> Ani bulebira larogo biragola layadagua biragonida manda bilimulo langero, lene. ✨

*Ngode Datagaliwabe Dininaga biabe ogo*

Ina ani bulebira lalu pigane biangi ini ti heba harimagoyane nalangi haru. <sup>5</sup> Ayu ogoni i pu layago karia dai buleberogo ti mbiralime ihondo i agoha poleberebe nale kami. ✨ <sup>6</sup> Ani polebero langirugo hale howa tinaga miniha dara timbuni ho kami. ✨ <sup>7</sup> Ina tihondo heneneore laro. Tinaga koyaneorenaga i pobeheore kogoni. Ti wahalu i napiruyagua Biamogo Biagane larugo ti heba hole ibu naibulebira. I piruyagua ibu ti heba hole ibilo pu lolebero. ✨ <sup>8</sup> Ibu ibirangi ibugua dindini karuhondo lalu, Tigua ko bulene ogoni lalu tigabi holene ogoni lalu Ngode Datagaliwabehanda dabaki bulene ogoni lalu laga beremiligo ti kagua manda birimi, lalu lamiai holebira. <sup>9</sup> Tigua ihondo mini mbiraore nawi kagome ko bulene tene ogonida ti manda nabi ka. ✨ <sup>10</sup> I Aba karia porogola tigua i lone de nahondoleberamigo tigua tigabi holene tene ogonida manda nabi ka. ✨ <sup>11</sup> Wali agali dindi bibahendeni karunaga haguane kago ibugua biyagonaga Ngode Datagaliwabehanda daba ki bini ka. Tigua daba ki bulene tene ogonida manda nabi ka. ✨

<sup>12</sup> Ina tihondo bi langulene dewa yidogo tigua ayu ogoni mo yai nahabehedago. ✨ <sup>13</sup> Ngode Datagaliwabe ogobi ka lalu heneneore lagane Dinini ibuwa ibugua ti heba howa henene lolene ogoni lalu mo walia holebira. Ibugua ibuni hangu manda bialu nalangulebira. Larane hale harago hangu langulebira. Mani bulebiragonaga agua bulebira lalu langulebira. ✨ <sup>14</sup> Ibugua inaga bi mo yalu ibalu ti langulebira. Ani biragome ibugua inaga mini mo yaraga holebira. <sup>15</sup> I Abanaga bibahende ngaru inagabi nga. Ani ngago manda buwa ina lalu inaga ngago Ngode Datagaliwabe Dinini ibugua mo yalu ibalu ti langiai holebira laru. ✨

*Dara holene wiaria mani turu holene wia aribia holebira, lenego ogo*

<sup>16</sup> Yasuhanda lalu, Emene howa tigua i nahondoleberami. Maha halu mende emene howa i hondoleberami. ✨

<sup>17</sup> Ani layago hale howaibunaga talima piaga marume tini degedegehondo hale haga bialu lalu, Ibugua emene howa tigua i nahondoleberami layagobi maha halu mende emene howa i hondoleberami layagobi ibu Aba karia polebero layagobi agi manda bialu layabe. <sup>18</sup> Ibugua emene howa layago agi manda buwa layabe irane ina manda nabi kama, lalu tihondo hale haga bialu hene.

<sup>19</sup> Tigua ibuhondo ladai bua ho heago manda buwa ibugua tihondo lalu, Tini degedegehondo hale haga birimigo ina lalu emene howa tigua i nahondoleberami larugobi maha halu mende emene howa i hondoleberami larugobi ogoninaga ladai bua ho kamibe. <sup>20</sup> Ina tihondo heneneore laro. Ogoningi ti dugu bialu dara timbuni holeberami. Dindi mana hangu biaga karu ti turu holebira. Ndo maha ti dara ho holene embeda halu tiha turu holene wia aribia holebira. <sup>21</sup> Wali ibu gali taba honole biruwa tandaga bulene tu harago ibu mini burugu lalu biraga. Ibu gali taba honowa tandaga biyago embeda howa ibu gali taba hanaru lalu turu timbuni haga. ✨ <sup>22</sup> Tibi ogonidagua holeberami. Ayu ogoni ti dara ho holeberami. Maha tigua i lone de hondowa tinaga bu

✨ **16:2:** Md 24.9, Lg 6.22, Yo 9.22, 9.34, Ab 8.1, 26.9-11 ✨ **16:3:** Yo 15.21, Lm 10.2, 1 Ko 2.8, 1 Ti 1.13 ✨ **16:4:** Yo 13.19, 14.29 ✨ **16:5:** Yo 7.33, 13.3, 13.36, 14.28, 16.10, 16.16 ✨ **16:6:** Yo 14.1, 16.22 ✨ **16:7:** Yo 14.16, 14.26, 15.26, Ab 2.33, Eb 4.8 ✨ **16:9:** Yo 3.18, 15.22, Ab 2.22-37 ✨ **16:10:** Yo 3.14, 5.32, Ab 2.32, 5.31, Lm 4.25 ✨ **16:11:** Hobane ogoni bi haguane kago gilibu ngago ibu dama Heyolabe manda bilimu. Wali agali dindi bibahendeni karume Yasu homayago hale howaibunaga godi dari haya manda biaga ka. Ani ndo. Ngode Datagaliwabe ibugua Yasu homayagonaga godi dama Heyolabela lalu dabaki binigo wayali howa dama Heyolabenaga hongo bo tongolope hene. ✨ **16:11:** Yo 12.31, Ab 26.18, Eb 2.2, Kl 2.15, Hi 2.14 ✨ **16:12:** Mg 4.33, 1 Ko 3.1-2, Hi 5.12 ✨ **16:13:** Yo 14.17, 14.26, 15.26, 1 Yo 2.20, 2.27 ✨ **16:15:** Md 11.27, Yo 3.35, 17.10 ✨ **16:16:** Yo 7.33, 14.19, 16.10 ✨ **16:21:** Ais 26.17

miniha turu timbuni holeberami. Turu holene ogoni mbiralime mo ereba habe nahe holebira.✧

<sup>23</sup> Horo ogoningi howa tígua ihondo mbirale mbira bia naloleberami. Ina tihondo heneneore laro. Tígua inaga minini howa i Abahondo mbirale mbira bia lam-eramidagua ibugua hale halu bulebiraore.✧ <sup>24</sup> Abale tígua i minini howa mbirale mbira bia lalu nalamiaga harimi. Turu holene tíha tolaiore helo áyu pigane tenuwa i minini howa lamilimu, lene.✧

*Dindi mana bope halu i wayali ko, lenego ogo*

<sup>25</sup> Ina tihondo langialu harugo bi yobage lalu langialu haru. Horo mbira tagira ibulene kaware ngago horo ogoningi howa lone bi yobage lalu ndo i Aba ogobiore ka lalu latagi holebero.✧ <sup>26</sup> Horo ogoningi howa tígua inaga minini i Abahondo lamuleberami. Ina i Abahondo tínaga la holebero ndo laro. <sup>27</sup> Ani lamuleberamigo irane i Aba ibunime tí gubalini ho kagoni. Tígua ihondo gubalini ho kamigobi i ibu kagoria henego íbu kogo manda buwa ihondo mini mbiraore wialu kamigobi hondowa i Aba ibugua tihondo gubalini ho ka.✧ <sup>28</sup> I Aba kagoria howa ibalu dindi ogoria ibiru. Ai dindi ogo wahalu i Aba karia dai bulebero, lene.

<sup>29</sup> Ani layago hale howaibunaga talima piaga biarume ibuhondo lalu, Ae. Ai yobage lalu ndo heneneore latagi haregoni. <sup>30</sup> Ina bibahende manda biai kego. Mbiralime bi larigo irane agi manda bialu laribe lalu ladai bulene nawi manda bidama. Bi o biagoni hale howa i Ngode Datagaliwabe kagoria howaore ibini ke manda buwa iname ihondo mini mbiraore wu kama, lene.✧

<sup>31</sup> Yasuhanda tihondo ladai bialu lalu, Tí mini mbiraore wu kama larimibe. <sup>32</sup> Horo mbira tagira ibulene kaware ngago ogoningi tí bibahende tini ala haramiligoha pugupugu bilimulo bo talia togo lolebira. Talia togo laragola i hangu helo wahalu tí ibida pugupugu buleberami. Ani beremigola i hangu ndo holebero. I Aba iya haru holeberaba.✧ <sup>33</sup> Ina agua bulebira lalu langirugo iha tí ho gimbu bu howa mo palia holene yu halimulonaga langiru. Dindi mana hangu biaganerume tí mo tandaga holebirago ani bilo tí elahe halimu. Ina dindi mana bibahende bope halu i wayali hene kogoni, lene.✧

## 17

*Yasuhanda ibunaga talima piagarunaga la halu ibu Abahondo bi laminigo ogo*

<sup>1</sup> Yasuhanda bi uruni lamiai howa ibu dahuliya andagaha handa daga howa lalu, Aba-o horo biago tagira ibiyago i igini ibugua ihondo mini daliga taraore lolene ngilonaga ina i iginihondo mini daliga taraore lolene ngibe.✧ <sup>2</sup> Ina wali agali ihondo ngiriru tihondo ina haabobo holene muliya wali agali bibahende hondo hai holiyanaga hongo ihondo ngiri.✧ <sup>3</sup> Ngode Datagaliwabe henene i hangu ke manda bia Yasu Keriso i ina pu larigola ibinida manda bia ani bialu kagome haabobo holene yu ka.✧ <sup>4</sup> Ina bibe lalu langirigo biai haru. Ani bialu harugome ina inaga hongo holene taraore walia haru.✧ <sup>5</sup> Aba-o bamba dindi wa nabingi i heba howa mini daliga taraorewi harugo ogoni áyu i inaga deni howa mini daliga taraore ogoni lone ngibe.✧

<sup>6</sup> Dindini hene agali maru ina ihondo ngiriru urunime i manda bilo walia halu haru. Ti inaga henego ina ihondo ngirigoni. Tigua inaga bi hale halu laridagua biya.✧

<sup>7</sup> Mbiralime bibahende ngirigo ina ihondo minida ti manda biai kagoni. <sup>8</sup> Ina ihondo bi

✧ **16:22:** Ais 66.14, Lg 24.41, 24.52, Yo 14.1, Ab 2.46, 1 Pi 1.8 ✧ **16:23:** Md 7.7, Yo 14.13, 15.16 ✧ **16:24:** Yo 15.11  
 ✧ **16:25:** Yo 10.6 ✧ **16:27:** Yo 14.21-23 ✧ **16:30:** Yo 2.25, 16.27, 17.8, 21.17 ✧ **16:32:** Md 26.31, 26.56, Mg 14.27, Yo 8.29, 20.10 ✧ **16:33:** Yo 14.27, Lm 5.1, 8.37, Eb 2.14, 2 Ti 3.12, 1 Yo 4.4, 5.4 ✧ **17:1:** Yo 11.41, 12.23, 13.32  
 ✧ **17:2:** Dan 7.14, Md 11.27, Yo 6.37, 1 Ko 15.25-27, Pb 2.10, Hi 2.8 ✧ **17:3:** Ais 53.11, Yo 5.36-37, 1 Ko 8.4, 1 Te 1.9, 1 Yo 5.20 ✧ **17:4:** Yo 4.34, 13.31, 14.13, 14.31, 15.10 ✧ **17:5:** Yo 1.1-2, 17.24, Pb 2.6, Kl 1.15-17, Hi 1.3, 1.10 ✧ **17:6:** Iba 22.22, Yo 6.37-39, 10.29

mana langirigo ina tihondo lamiai harugola tigua hale howa yu tiga bu ka. Yu tiga buwa i i kegoria howa henene ibinidalo ti manda biai ho ka. Ina i pu larigola ibini ka manda buwa yu tiga bu ka.\*

<sup>9</sup> Ti mitangi bialu ina tinaga la haro. Dindi mana hangu biagaru mitangi bialu ndo ina ihondo ngiriru ti inaga kago mitangi bialu tinaga la haro.\* <sup>10</sup> Inaga karu bibahende inagabi ka. Inaga karu bibahende inagabi ka. Tigua bialu kagome inaga hongo taraore holene walia haragoni.\* <sup>11</sup> Ayu ogoni i i kegoria ibule ko. I dindini naholebero. Ti dege dindini holebira. Aba Baya Buruguleore-o ina inaga mini ihondo ngirigonaga hongome ti haru halu mamage ho habe. Iya mbiraore kabadagua tibi mbiraore helo.\* <sup>12</sup> Ina dindini ti heba harungi inaga mini ihondo ngirigonaga hongome ti haru halu mamage ho haru. Ina ti mamage howa mbirali pu ereba nahe ka. Agali mbira pu ereba hole henene ibu hangu pu ereba haya. Ani biyagome Anduane Homogonaga mbugani bi gilibu ngadagua lola haragoni.\* <sup>13</sup> Ayu ogoni i i kegoria ebero. Inaga turu holene ti gubaliniha tolai helo i dindi ogoria howa bi ogoni tihondo lamiru.\* <sup>14</sup> Ina tihondo inaga bi mana lamialu haru. I dindi mana hangu biaga aria ndo kodagua tibi dindi mana hangu biaga aria ndo kago hondowa dindi mana hangu biagarume tihondo handabe manga ho hene.\* <sup>15</sup> Dindi ogoria howa ina ti haru pobelonaga ndo laro. Ko Bulene Anduane ibugua ti ko mo bia holigo mamage halu haru habelonaga langero.\* <sup>16</sup> I dindi mana biaga aria ndo kodagua tibi dindi mana biaga aria ndo ka. <sup>17</sup> Ti ininaga helo henene loleneme ti loma bia ho helabe. Henene lolenego inaga bi nga.\* <sup>18</sup> Ina i wali agali dindi bibahendeni kago pu laridagua inabi tihondo wali agali dindi bibahende ha pugupugu bidaba laru.\* <sup>19</sup> Ina ti mitangi bialu ti ininagaore loma bia hene helo inibi ininagaore loma bia ho ko.\*

<sup>20</sup> Ina agali uruni tinaga hangu mitangi bialu ndo la haro. Tigua bi mana lamiragola hale howa ihondo mini mbiraore wu holebilarunagabi heba la haro. <sup>21</sup> Ti bibahende mbiraore helonaga ina la haro. Aba-o iha i kedaguabi iha i kodaguabi iyaha ti helo hameledo. Wali agali dindi bibahendeni karume ina i pu larigola ibinida manda buwa mini mbiraore wilo ina ti mo mbiraore helabe.\* <sup>22</sup> Iya mbiraore kabadagua tibi mbiraore helonaga ina i hongo holene taraore ngirigo ina tihondo miru.\* <sup>23</sup> I tiha kogobi i iha kegobi ti nde mbiraore helo mo mbiraore helabe. Ti mbiraore kago hondowa wali agali dindi bibahendeni karume ina i pu larigola ibinida manda bilo. Ani manda buwa ina i gubalini ho kedagua tibi gubalini ho ke manda bilobi ti mo mbiraore helabe.\*

<sup>24</sup> Aba-o dindi bibahende wa nabi howa ina i gubalini timbuni ho harigoni. Ani howa ina agali ihondo ngirirume i mini daliga taraore ngirigo hendelo i kegoria tibi helo hameledo.\* <sup>25</sup> Tigabi Holene Aba-o dindi mana hangu biaga karume i manda nabi ka. Ina i manda bu ko. Agali o karumebi ina i pu larigola ibinida manda biai ka.\* <sup>26</sup> Ina i gubalini ho kego gubalini holene ogoni tiha wilobi ibi tiha holiyabi tigua i manda bilo ina tihondo walia harugo mahabi ani walia haabo holebero, Yasuhanda lene.\*

## 18

### *Yasu mininigo ogo*

*(Madiu 26.47-56, Maga 14.43-50, Lugu 22.47-53)*

\* **17:8:** Yo 8.28, 12.49, 14.10, 16.27, 16.30 \* **17:9:** Yo 6.37, 6.44, 1 Yo 5.19 \* **17:10:** Yo 16.15 \* **17:11:** Yo 10.30, 13.1, 17.21, 1 Pi 1.5, Yu 1 \* **17:12:** Iba 41.9, 109.8, Yo 6.39, 13.18, 18.9, Ab 1.20, Hi 2.13, 1 Yo 2.19 \* **17:13:** Yo 15.11 \* **17:14:** Yo 8.23, 15.18-19, 17.16, 1 Yo 3.13 \* **17:15:** Md 6.13, Ga 1.4, 2 Te 3.3, 1 Yo 5.18 \* **17:17:** Iba 119.142, Ab 15.9, Eb 5.26, 1 Pi 1.22 \* **17:18:** Yo 20.21 \* **17:19:** 1 Ko 1.2, 1.30, 1 Te 4.7, Hi 10.10 \* **17:21:** Yo 10.16, 10.38, 17.11, Lm 12.5, Ga 3.28 \* **17:22:** Yo 14.20, Ab 4.32, 1 Yo 1.3, 3.24 \* **17:23:** Kl 3.14 \* **17:24:** Yo 12.26, 17.5, 1 Te 4.17 \* **17:25:** Yo 8.55, 15.21, 16.3, 16.27 \* **17:26:** Yo 15.9, 15.15, 17.6

<sup>1</sup> Yasuhanda Ngode Datagaliwabehondo bi ogoni lai howa ibunaga talima piagaru heba tagira pialu iba Kidirono doma ede halu puwa mabu mbira winigoria ubanda hene.✧ <sup>2</sup> Mabu ogoriani Yasu ibunaga talima piagaru heba halu dewa ngoai haabo haga henego Yudasa ndelaga biago ibu manda bu hene.✧ <sup>3</sup> Ani manda buwa Yudasa ibu Anduane Homogonaga anda mamage haga marubi Lomo ami agali marubi ti Perisi agalirubi loma binigo mo miaga haguane biarume pudaba laya handala ti haru lamu halebi agali bagane alebi yalu mabu biagoria haru pene.✧ <sup>4</sup> Ibiyagola Yasu tigua ibuhondo bulebirago bibahende manda biai howa tihondo lalu, Tí áí hai bima eberamibe, lene.

<sup>5</sup> Tigua ibuhondo ladai bialu lalu, Nasareteali Yasu hai berama, lene.

Yasuhanda tihondo lalu, I o kogoni, lene.

Ndelagane Yudasa ibu ti mandagi hearia lamini. <sup>6</sup> Yasuhanda tihondo, I o kogoni, layago hale howa ti bibahende tiga bebege dai bialu hearia dindini pindipandulo pilo ibira hai hene. <sup>7</sup> Yasuhanda tihondo halu mende lalu, Tí áí hai bima eberamibe, lene.

Ani layagola tigua lalu, Nasareteali Yasu hai berama, lene.

<sup>8</sup> Ani layagola Yasuhanda tihondo ladai bialu lalu, I o kogoni lalu abale langirugoni. Tigua i hai beramiyagua agali o karu purogo lelo pudaba ladaba, lene. <sup>9</sup> Ibugua ala, Aba-o agali ina i ngiriru mbirali pu ereba naholebira, lalu layadagua lola helo ani lene.✧

<sup>10</sup> Saimono Pida ibu wai biagane ayu tibu yu henego ogoni yamuwa loma binigo mo miaga haguane timbuninaga garabaya biabe ale bia haga mbira mini Malagasa heagonaga hale tiga bo bagada pe hene.✧ <sup>11</sup> Ani biyagola Yasuhanda Pidahondo lalu, Inaga wai biagane ayu tibu andaneha da dai bia. I Abahanda ihondo ibabe nginigo ogoniha tandaga nolene bedago nolebero ndobe, lene.✧

### *Yasu Anasa hearia haru penego ogo*

<sup>12</sup> Ani layago hale howa Lomo ami agali biaru tinaga haru haga heba Yuali mamage haga biarubi tigua Yasu minuwa gi huba bialu <sup>13</sup> mali ogoninaga loma binigo mo miaga haguane timbuni Kaiabasa henego ibunaga imane Anasa hearia ala Yasu haru pene.✧ <sup>14</sup> Kaiabasa ogoni ala ibugua Yu wali agalinaga haru hagahondo lalu, Wali agali bibahende homoligo mbiralime homa holene nga, lalu lene.✧

### *Pidahanda, Yasu manda nabido, lenego ogo*

*(Madiu 26.69-70, Maga 14.66-68, Lugu 22.55-57)*

<sup>15</sup> Tigua Yasu minu yalu piyadagua Saimono Pidabi Yasunaga talima piaga mende bi libu haru mama haruru pene. Talima piaga mende biago ibu loma binigo mo miaga haguane timbunime mandabi henego ti Yasu minu yalu piyadagua pialu ibu loma binigo mo miaga haguane timbuninaga andaga anda pene.✧ <sup>16</sup> Pida ibu pabe tagirahayagi hene. Talima piaga mende loma binigo mo miaga haguane timbunime mandabi biago ibugua dai buwa panga mamage haga wandari heagohondo bi lamuwa Pida haru anda ibini.✧ <sup>17</sup> Haru ibiyago hondowa panga haru hagane wandari biagome Pidahondo lalu, Agali o haru poragonaga talima piaga mbira i ndobe, lene.

Ani layagola Pidahanda ladai bialu lalu, I ndo, lene.

<sup>18</sup> Dagare biyagola biabe bia hagane agalibi mamage haga agalibi tigua ira delowa dagare dogo bialu hearia hondowa Pida ibu puwa ti heba mandagi howa dagare dogo bialu hene.

### *Loma binigo mo miaga haguane timbuni biagome Yasuhondo bi hale henego ogo*

*(Madiu 26.59-66, Maga 14.55-64, Lugu 22.66-71)*

✧ **18:1:** 2 Sml 15.23, Md 26.36, Mg 14.32, Lg 22.39 ✧ **18:2:** Lg 21.37, 22.39 ✧ **18:3:** Md 26.47, Mg 14.43, Lg 22.47, Yo 7.45, Ab 1.16 ✧ **18:9:** Yo 17.12 ✧ **18:10:** Md 26.51, Mg 14.47, Lg 22.38, 22.49-50 ✧ **18:11:** Md 20.22, 26.39, 26.42, Mg 14.36, Lg 22.42 ✧ **18:13:** Md 26.57, Lg 3.2 ✧ **18:14:** Yo 11.49-50 ✧ **18:15:** Md 26.58, Mg 14.54, Lg 22.54, Yo 20.3, 21.20, Ab 3.1 ✧ **18:16:** Md 26.69, Mg 14.66, Lg 22.54



19 Loma binigo mo miaga haguane timbuni biagome Yasuhondo hale halu lalu, Ínaga talima ibaga agali ai kabe. Ína mana agi lalu lawai harilibe, lene.

20 Ani layagola Yasuhanda ladai bialu lalu, Wali agali karu bibahende ti hale hai helo panigiore howa lamialu haruli. Yu wali agali ngoai hagane andaha howabi Anduane Homogonaga andaha howabi ina mana lawai haruli. Mbira do howa nalaruli.✧

21 Ihondo aginaga hale harebe. Ina mana lamirugo hale hene karu ti manda biai kago tihondo hale habe, lene.

22 Ani layagola mamage haga agali mbira heagome hale howaibunaga gi habeme Yasu bowa lalu, Loma binigo mo miaga haguane timbunihondo ogonidagua ladai birilibe, lene.✧

23 Ani layagola Yasuhanda ladai bialu lalu, Kagua ago larugonaga baribe. Kagua mbira laruyagua ogo larigonaga baru lalu o karu hale helo lamia, lene.

24 Ani bialu Anasahanda, Loma binigo mo miaga haguane timbuni Kaiabasa karia haru pudaba, layagola Yasu gi huba biaabo heaore haru pene.

*Pidahanda lone lalu, Yasu manda nabido, lenego ogo  
(Madiu 26.71-75, Maga 14.69-72, Lugu 22.58-62)*

25 Pida ibu ira deagoria dagare dogo bu hearia tigua ibuhondo lalu, Agali o haru poragonaga talima piaga mbira í kegoni ndobe, lene.✧

Ani layagola ibugua lalu, I ndo, lene.

26 Pidahanda agali hale bagadape hayagonaga damene mbira loma binigo mo miaga haguane timbuni biagonaga garabaya biabe ale bia haga dege heagome Pidahondo lalu, Mabuni ibu heba heria handarugo í ndoyagoda, lene.✧

27 Ani layagola Pidahanda lone lalu, I ndoore, lene. Ogoni lope heagolaore ega gogologome bi lene.✧

*Pailate hearia Yasu haru penego ogo  
(Madiu 27.1-2,11-14, Maga 15.1-5, Lugu 23.1-5)*

28 Ani bialu tigua Yasu Kaiabasanaga andaga howa gabumanenaga haru haga andaga haru pene. Egerebagiore haru penego Yu agali ti áyu Bolangua Halu Penegonaga Horo nga manda buwa Anduane Homogonaga deni dodo nahe helo mana pugule ndoyagola ti anda biagoha anda nape tagirani hene.✧ 29 Tagirani hearia Pailate ibu tagira puwa tihondo lalu, Agali ogonime agi biyagola godi lole haru ibirimibe, lene.

30 Ani layagola tigua ladai bialu lalu, Ibugua ko mbira nabidale iname naharu ibidamale, lene.

31 Pailatehanda tihondo lalu, Tínga mana lo ngadagua godi lole ibu haru dai bidaba, lene.✧

Ani layagola Yu agali biarume ibuhondo lalu, Inane hangume godi lowa agali mbira bo waholene nawi lo ngago, lene.

32 Tigua bi ogoni bame ndo lene. Yasuhanda bi ala lalu, Ogodagua biragola homolebero, lenego henemane lola helonaga lene.✧

33 Pailate ibu gabumanenaga andaga dai buwa Yasu olowa lalu, Yu wali agalinaga Handame Haga Kini í kebe, lene.✧

34 Yasuhanda ladai bialu lalu, Íni manda buwa laribe be marume i ogoni ka layago hale howa laribe, lene.

35 Pailatehanda ladai bialu lalu, I Yu agali kobe. Í ariarumebi ínaga loma binigo mo miaga haguane hearumebi ina godi loliya í haru ibiyago ina agi birigola haru ibiyabe, lene.✧

✧ 18:20: Md 26.55, Lg 4.15, Yo 7.14, 7.26-28 ✧ 18:22: Yar 20.2, Ab 23.2 ✧ 18:25: Md 26.69-71, Mg 14.69, Lg 22.58  
✧ 18:26: Yo 18.10 ✧ 18:27: Md 26.74, Mg 14.72, Lg 22.60, Yo 13.38 ✧ 18:28: Md 27.2, Mg 15.1, Lg 23.1, Ab 3.13, 10.28 ✧ 18:31: Yo 19.6-7, Ab 18.15 ✧ 18:32: Md 20.19, Yo 3.14, 12.32-33 ✧ 18:33: Md 27.11 ✧ 18:35: Yo 1.11

<sup>36</sup> Ani layagola Yasuhanda ladai bialu lalu, I handame ho kogo dindi ogoali ndome handame ho ko. Dindi ogoalime handame ho kole Yu haru haga agalime i bolilono inaga haruru ibaganerume wai bidale. I handame ho kogo dindi ogoali ndome handame ho ko, lene.✧

<sup>37</sup> Pailatehanda ibuhondo lalu, Aniyagua i handame haga kini mbira kebe, lene.✧

Ani layagola Yasuhanda ladai bialu lalu, Ina handame haga kini kebe larigoniore ko. Henene lolene lamiai hole i dindi ogoria dalirugola taba henene ko. Wali agali henene lolene aria karu bibahendeme inaga bi hale hai haga ka, lene.

<sup>38</sup> Ani layagola Pailatehanda ibuhondo lalu, Henene lolene agilebe, lene.✧

*Yasu homelo ba, lenego ogo*

*(Madiu 27.15-31, Maga 15.6-20, Lugu 23.13-25)*

Ani lalu Pailate ibu Yu wali agali hearia tagira puwa tihondo lalu, Ibugua ko bini mbira nawidago <sup>39</sup> tina manani Bolangua Halu Penegonaga Horo harangi garabaya agali mbira golope holiya langeramiligo ayu Yu wali agalinaga handame haga kini golope holiya manda bidamibe, lene.✧

<sup>40</sup> Ani layagola tigua hongo howa ladai bialu lalu, Agali ogoni ndo. Barabasa ibu golope habe, lene. Barabasa ibu page bia agali ba biagane hene.✧

## 19

<sup>1</sup> Ani layago hale howa Pailate ibugua lalu, Yasu haru puwa pu payini tibume badaba, lene.✧ <sup>2</sup> Ani bialu ami agali tigua pu anihe bo buwa handame haga kininaga manda ogoni lowa ibu haguani karula hene. Karula howa labolabo luni tagalitaya ale karula hene.✧ <sup>3</sup> Karulo hearia ti ibugu bialu lalu, Yu wali agalinaga Handame Haga Kini haabo habelo, lalu бага bialu hene.✧

<sup>4</sup> Pailate ibu lone tagira puwa Yu wali agalihondo lalu, Agali ogonime ko bini mbira handa walia naheda manda bilimulo ti kamiria haru tagira ebero, lene.✧ <sup>5</sup> Ani lowa Yasu pu anihe mandabi labolabo luni tagalitaya ale biagobi karulo heaore haru tagira ibuwa Pailatehanda tihondo lalu, Agali biago ogo handadaba, lene.

<sup>6</sup> Loma binigo mo miaga haguanerumebi Anduane Homogonaga anda mamage haga agalirumebi de hondowa dalimu lowa lalu, Ira bangani ba para ha. Ira bangani ba para ha, lene.✧

Ani layagola Pailatehanda tihondo lalu, Ibugua ko bini mbira handa walia nahe kogo tni haru puwa ira bangani ba para halimu, lene.

<sup>7</sup> Ani layago hale howa Yu wali agali tigua ladai bialu lalu, Ibuni i Ngode Datagaliwabe Igin ko layagome inanaga mana lo ngago puguayago ibu homolene ngaore, lene.✧

<sup>8</sup> Bi ogoni layago hale howa Pailate ibu gi timbuniore hene. <sup>9</sup> Gi timbuniore howa gabumane andaga biago lone anda puwa Yasuhondo lalu, I ani howa ibini kebe, lene.✧

Ani layagola Yasuhanda ladai nabi hene. <sup>10</sup> Ladai nabiayagola Pailatehanda ibuhondo lalu, Ihondo mbira nalole kebe. I golo peha lolenebi i ira bangani ba para hadaba lolenebi i kogo manda bia, lene.

<sup>11</sup> Ani layagola Yasuhanda ladai bialu lalu, Ngode Datagaliwabehanda ina ihondo bulene hongo ngidago nangidale mbira nabibehe kele. Ina ihondo ko emene ale bere. I minilo nde layago ibugua ko timbuniore biya, lene.✧

✧ 18:36: Dan 2.44, 7.14, 1 Ti 6.13 ✧ 18:37: Yo 8.47, 1 Ti 6.13, 1 Yo 3.19, 4.6 ✧ 18:38: Md 27.24, Lg 23.4 ✧ 18:39: Md 27.15, Mg 15.6, Lg 23.17 ✧ 18:40: Lg 23.19, Ab 3.14 ✧ 19:1: Md 20.19, Mg 15.15, Lg 18.33 ✧ 19:2: Lg 23.11 ✧ 19:3: Yo 18.22 ✧ 19:4: Yo 18.38, 19.6 ✧ 19:6: Yo 18.31, Ab 3.13 ✧ 19:7: LBM 24.16, Md 26.65, Yo 5.18 ✧ 19:9: Ais 53.7, Md 26.62-63, 27.12-14, Lg 23.9 ✧ 19:11: Lg 22.53, Yo 7.30, 10.18, Ab 2.23, Lm 13.1

<sup>12</sup> Ani layago hale howa Pailate ibugua Yasu golope hole henge hai bini. Henge hai bialu hearia Yu wali agali tigua dalimu olalu, Agali ogoni golope hariyagua í Lomonaga handame haga Kininaga damene ndo ke. Agali mbira handame haga kini hole ibuni mo yaraga hayagua ibu Lomonaga handame haga Kinila waitigi ho ka, lene.✧

<sup>13</sup> Tigua ani layago hale howa Pailate ibugua Yasu haru tagira ibuwa hama mini Ege Tole Mbalape dewa para ho winigoria godi lalu daba ki haganaga biraganeni berene. Hama ogoni Hiburu bi lalu, Gabada, laga hene. <sup>14</sup> Bolangua Halu Penegonaga Horo yawi holebira lowa horo hanuni kaware hayagola Pailatehanda Yu wali agalihondo lalu, Tíngaga handame haga kini o kagoni, lene.✧

<sup>15</sup> Ani layagola tigua dalimu olalu, Homelo ba. Homelo ba. Ira bangani ba para ha, lene.

Ani layagola Pailatehanda tihondo lalu, Tíngaga handame haga kini ina ira bangani ba para holiya hamelo kamibe, lene.

Ani layagola loma binigo mo miaga haguane biarume ladai bialu lalu, Inanaga handame haga kini mende nahe Lomonaga handame haga Kini ibuni hangu ka, lene.

<sup>16</sup> Ani layagola Pailatehanda lalu, Tíngime ira bangani ba para hole haru pudaba, lene.✧

*Yasu ira bangani ba para henego ogo*

*(Madiu 27.32-44, Maga 15.21-32, Lugu 23.26-43)*

Ani layagola tigua Yasu haru pene. <sup>17</sup> Yasu ibuni ira banga yalu haru pialu dindi mini Haguane Kuni laga winigoria haru pene. Dindi ogoni Hiburu bi lalu, Gologoda, laga hene.✧ <sup>18</sup> Ogoriani tigua ibu ira bangani ba para hene. Yasu dombeni ba para howa agali kira lene labolabo ba para hene. <sup>19</sup> Pailatehanda ira mbalapeni bi ogo, Nasareteali Yasu Yu wali agalinaga Handame Haga Kini Ogoni, lalu gili buwa Yasunaga ira bangani ba para hene.✧ <sup>20</sup> Bi ogoni Hiburu bi lalubi Ladini bi lalubi Girigi bi lalubi gilibu wiai hene. Anigo Yasu ira bangani ba para hayagoria Yarusaleme kaware winigo Yu wali agali dewalime bi gilibu wiago hondowa daga lene. <sup>21</sup> Ani gilibu wiago hondowa loma binigo mo miaga haguane biarume Pailatehondo lalu, Yu wali agalinaga Handame Haga Kini Ogoni lalu nagilibu wibe. Ibuni degeme lalu, Yu wali agalinaga Handame Haga Kini í kogoni, laya lalu gilibu wia, lene.

<sup>22</sup> Ani layagola Pailatehanda ladai bialu, Ina o gili bidogoni gilibu wiaabo helo, lene.

<sup>23</sup> Ami agali tigua Yasu ira bangani ba para howa ibunaga labolabo ti marialime ta hene. Ta howa ibuninaga aga lu bia gimbu biago tigua muwa podolene henge nawi mbiraore ogonibiore wabini biniyagola✧ <sup>24</sup> ami agali biarume lalu, Gime lere nalamiya. Mbiralai ai ibu mirabe handamiya tadu bima, lene. Anduane Homogonaga mbugani lo ngago ogo.✧

Inaga labolabo maru tini tale bu ta howa

inaga aga lu biagonaga tadu bini,

lalu gilibu nga. Ani binigome bi ogoni lola hene.

<sup>25</sup> Yasu ba para heago ira banga kaware helowa ibu aiyabi ibu aiyaga hagibuni Kolobasa one Meribi Magadala wali Meribi ti hene.✧ <sup>26</sup> Yasuhanda ibu aiyabi ibunaga talima piaga mbiralai gubalini ho haga henegobi kaware heago de hondowa ibu aiyahondo lalu, Aiyaga-o í igini o kagoni, lene.✧

<sup>27</sup> Ani lowa ibugua ibunaga talima piaga biagohondo lalu, Í aiyaga o kagoni, lene. Ani layago hale howa ibunaga talima piaga biagome wali biago ibu andaga haru pu hene.

*Yasu homenego ogo*

*(Madiu 27.45-56, Maga 15.33-41, Lugu 23.44-49)*

✧ 19:12: Lg 23.2, Ab 17.7 ✧ 19:14: Md 27.62 ✧ 19:16: Md 27.26, 27.31, Mg 15.15, Lg 23.24 ✧ 19:17: Md 27.31-33, Mg 15.21-22, Lg 23.26, 23.33 ✧ 19:19: Md 27.37, Mg 15.26, Lg 23.38 ✧ 19:23: Md 27.35, Mg 15.24, Lg 23.34 ✧ 19:24: Iba 22.18 ✧ 19:25: Md 27.55-56, Mg 15.40, Lg 23.49, 24.18 ✧ 19:26: Yo 2.4, 13.23, 21.7, 21.20

<sup>28</sup> Yasuhanda ai bumaro bialu biai harugoni manda buwa, I iba noaba, lene. Anduane Homogonaga mbugani ani lolebira lalu gilibu winigo lola lalu lene.\*

<sup>29</sup> Ani layagola waini iba kaubi ndisi mbiraha tolo winigo tigua dahundu ale ira mbira mini hisobo magane mbira waini iba kaubi biagoha ibira howa Yasu nelu ibunaga ne hambuni mo paga hene.\* <sup>30</sup> Ani biyagola Yasu ibugua iba biago nai howa lalu, Ai bumaro bialu biai harugoni, lene. Ani lowa ibunaga ma podope lalu tongolo mini.\*

### *Yasunaga habianeni nogoba henego ogo*

<sup>31</sup> Yu wali agali haru haga tigua Sabada horo timbuni taraore helo loma bini yawi holebira lowa ti tomo mo manda manda biagane horo ogoningi Pailatehondo bi lamule pene. Tigua Sabada horo ogoningi tingini ira bangani wiaabo nahelo hame lowa Pailatehondo lalu, Ti abale homelo tinaga ge kuni podowa homaragola tinaga tingini mo yalu polomaya ani bidaba labelo manda bu kama, lene.\* <sup>32</sup> Ani layagola ami agali biarume agali pigane ba para hayagonaga ge kunibi mende maha Yasu gi lehayagi ba para hayagonaga ge kunibi podene. <sup>33</sup> Ani buwa ti Yasu wiaria ibalu hearia ibu abale homayiyago hondowa ibunaga ge kuni napode wahene. <sup>34</sup> Ami agali mbirame yandareme Yasunaga habianeni nogoba hene. Nogoba hayagola daramabi ibabi tagira ibini.\* <sup>35</sup> Tiguabi heneneore leada manda buwa mini mbiraore wilimulonaga ani biyago de hendene mbiralime ani biya lalu heneneore laro manda buwa lene.\* <sup>36</sup> Ogonidagua biyagola Anduane Homogonaga mbugani bi lo ngago ogo, Ibunaga kuni mbira napodolebiraore, lalu gilibu winigo ogoni lola hene.\* <sup>37</sup> Anduane Homogonaga mbugani bi mende lo ngago ogo, Tigua agali mbira nogoba hayago wali agalime handaya ho holebira, lalu gilibu winigobi lola lalu bini.\*

### *Yasu tingini hora henego ogo*

*(Madiu 27.57-61, Maga 15.42-47, Lugu 23.50-56)*

<sup>38</sup> Arimadiali Yosebe ibugua Yasu tongo layago hondowa Pailatehondo lalu, Yasunaga tingini ina mo yalu poabe, lene. Yosebe ogoni ibu Yasunaga talima piaga henego Yu wali agali haru haga hearu hondowa gi howa oho hene.

Yosebehanda bi ani layagola Pailatehanda lalu, E yalu pobe, lene. Ani layagola Yosebe ibugua Yasunaga tingini mo yalu pene.\* <sup>39</sup> Nigodimusi Yasu hearia bamba mbiraga ibinigo ibubi Yosebe heba pialu ira mbiranaga ibane mini muwebi ira mende mini alo ogoninaga ibanebi bimaga henego Yasu tinginini hai hole mo yalu pene. Ira ibane ogoninaga genda magi timbuniore wini.\* <sup>40</sup> Libugua Yasunaga tingini muwa Yu agalime hora hole biaganedagua ira ibane biago hai howa labolabo pele bayaleore mbirame huba bini.\* <sup>41</sup> Yasu ira bangani ba para hayago dindi ogoriani mabu winigo mabu ogoriani egeandaha hora holene uli ayure dege tombo goabu ede howa mbirali hora nahe gahenge wini. <sup>42</sup> Sabada horo yawi holebira manda buwa hora holene uli ogoni kaware wiago hondowa libugua Yasunaga tingini ogoniha abale hora hene.\*

## 20

### *Yasu ibuni mo heya henego ogo*

*(Madiu 28.1-8, Maga 16.1-8, Lugu 24.1-12)*

\* **19:28:** Iba 22.15, 69.21 \* **19:29:** Har 12.21-23, Md 27.48 \* **19:30:** Yo 17.4 \* **19:31:** Sabada horo timbuni taraore gilibu ngago ogoni Bolangua Halu Penegonaga Horo manda bibehe kama. Horo ogoni ta nabi wiaga henego Yasu homayangi horo o biago timbuni taraore holene tu hene. Anigo ogoningi ina ko birimagonaga nogo sibi igini Yasu manda bialu ibugua ibunaga darama pelowa inanaga homo aribia hene. \* **19:31:** Man 21.22-23, Mg 15.42, Yo 19.42 \* **19:34:** 1 Yo 5.6-8 \* **19:35:** Yo 21.24 \* **19:36:** Har 12.46, Dag 9.12, Iba 34.20 \* **19:37:** Iba 22.16-17, Seg 12.10, Mo 1.7 \* **19:38:** Md 27.57, Mg 15.42, Lg 23.50, Yo 7.13, 9.22 \* **19:39:** Yo 3.1-2, 7.50 \* **19:40:** Ab 5.6 \* **19:42:** Ais 53.9, Yo 19.31

<sup>1</sup> Horo Sandengi egerebagiore muna biyagola Magadala wali Meri ibu Yasu hora hayagoria puwa ege toleme panga payinigo dugua ho wiaria de hendene. <sup>2</sup> De hondowa ibugua Saimono Pidala talima piaga mende Yasuhanda gubalini ho haga henego ibula hearia wali biagome gerai lalu puwa libuhondo lalu, Anduane Homogo hora hayagoria nawiyago ti mo yalu piyiya. Agoha yalu puwa ngabe manda nabi kama, lene.

<sup>3</sup> Ani layago hale howa Pidala talima piaga mendela libu tagira puwa Yasu hora hayagoria de hondo pene. <sup>4</sup> Libu gerai lalu pialu talima piaga mende biagome Pida yu wahalu hora hayagoria ibu abale pene. <sup>5</sup> Abale puwa ngabe hondole bulu paluwa handa anda halu hearia labolabo pele bayaore biago dege wiago de hendene. Wiago hondowa anda nape tagira hearia <sup>6</sup> Saimono Pida ibu mama ibuwa egeanda biagoha anda puwa labolabo pele bayaore biagobi <sup>7</sup> mende Yasunaga embone huba binigobi mandagi nawi hangu hangu wiaria de hendene. <sup>8</sup> Talima piaga mende abale gerai lalu ala ibu hene biago ibubi hora hayago egeanda biagoha maha anda pene. Anda puwa ogoni de hondowa mini mbiraore wini. <sup>9</sup> Anduane Homogonaga mbugani lo ngago, Ibu homowa heyalu polebira, lalu gilibu wini biago irane libugua bayuwa manda nabi hene. <sup>10</sup> De handalu libu andaga dai bini.

*Magadala wali Meri hearia Yasu ha pani henego ogo  
(Madiu 28.9-10, Maga 16.9-11)*

<sup>11</sup> Yasu hora hayagoria Meri ibu tagira howa dugu bialu hene. Dugu bialu howa hora hayagoria bulu paluwa handa anda halu hearia <sup>12</sup> dahuliyali kira labolabo pele karule berearia de hendene. Yasunaga tingini winigoria mende Yasunaga embone winigohayagi bira mende Yasunaga ge winigohayagi bira biago de hendene. <sup>13</sup> Libugua ibuhondo lalu, Wali-o í dugu berego aginagabe, lene.

Ani layagola ibugua libuhondo lalu, Inaga Anduane Homogo tigua yalu piyadago agoha ngabe toba howa dugu bero, lene.

<sup>14</sup> Ani lowa ibu beregedalu hearia Yasu heago hondowa ibu Yasuda manda nabi hene. <sup>15</sup> Yasuhanda ibuhondo lalu, Wali-o í dugu berego aginagabe. Ái hai bialu kebe, lene.

Ani layagola ibu mabu biabe biaga agali kabe toba howa ibuhondo lalu, Agali-o ina yalu piriyauga ini mo poliya ogoha yalu pu ngo lalu langi, lene.

<sup>16</sup> Ani layagola Yasuhanda ibuhondo lalu, Meri-o, lene.

Ani layago hale howa Meri ibu beregedowa ibuhondo Hiburu bi lalu, Labonai, lene. Inanaga bi lalu, Lawai haga.

<sup>17</sup> Yasuhanda ibuhondo lalu, I Aba karia iraga nahe kogo i ela nahabe. Inaga hameneru kagoria puwa au labe. Inaga Ababi tina Ababi inaga Ngode Datagaliwabebi tina Ngode Datagaliwabebi karia iraga hole kogo laya labe, lene.

<sup>18</sup> Ani layago hale howa Magadala wali Meri ibugua talima piaga biaru hearia puwa tihondo lalu, Anduane Homogo de handaru, lalu ibuhondo layagobi lamiai hene.

*Yasu ibunaga talima piaga biaru hearia ha pani henego ogo  
(Madiu 28.16-20, Maga 16.14-18, Lugu 24.36-49)*

<sup>19</sup> Horo Sande ogoningi dege alendo ni gai layagola ibunaga talima piaga biaru Yu wali agali haru haga hearume ti hondoligo lowa gi halu panga paya tagi ho berene. Ani berearia Yasu ibuwa ti bereagoria dombeneni ibu hene. Ibugua tihondo lalu, Mo palia holene ti heba helo laro, lene. <sup>20</sup> Ani lowa ibugua ibunaga gi habebi habianebi tihondo walia hene. Tigua de hondowa, Ina Anduane Homogoodreda, lowa ti turu timbuni hene.

✧ 20:1: Md 28.1, Mg 16.1, Lg 24.1 ✧ 20:2: Yo 13.23, 19.26, 21.7, 21.20, 21.24 ✧ 20:5: Yo 19.40 ✧ 20:7: Yo 11.44 ✧ 20:9: Iba 16.10, Ab 2.25-31, 13.34-35 ✧ 20:11: Mg 16.5 ✧ 20:14: Md 28.9, Mg 16.9, Lg 24.16, 24.31, Yo 21.4 ✧ 20:17: Iba 22.22, Md 28.10, Lm 8.29, Eb 1.17, Hi 2.11-12 ✧ 20:19: Mg 16.14, Lg 24.36, Yo 19.38, 1 Ko 15.5 ✧ 20:20: Yo 16.22, 19.34, 1 Yo 1.1



<sup>21</sup> Yasuhanda tihondo halu mende lalu, Mo palia holene tí heba helo laro. I Abahanda i pu layadagua inabi tí pudaba laro, lene. <sup>22</sup> Ani lowa ibugua ti bibahendeha buhe pu la anda halu lalu, Ngode Datagaliwabe Dinini tíha helo ngero. <sup>23</sup> Mbiralime ko binigo tigua domarimiyagua domai holebira. Mbiralime ko binigo tigua nadomarimiyagua nadome wiaabo holebira, lene. <sup>\*</sup>

*Yasuhanda Tomasahondo bi lenego ogo*

<sup>24</sup> Yasu ibiyago ogonongi ibunaga talima piaga mbira mini Tomasa kai mini Hono Palu ibu nabereha ibinigo <sup>\*</sup> <sup>25</sup> maha talima piaga marume ibuhondo lalu, Iname Anduane Homogo de handarima, lalu lamini.

Ani layagola Tomasahanda tihondo lalu, I bunaga gi habeni nili motudu ngago de nahende howa inaga gi hondoneme ela nahe howabi ibunaga habianeni inaga gime ela nahe howabi ina mini mbiraore nawulebero, lene.

<sup>26</sup> Ani layago Sarere mbira peha ibunaga talima piaga biaru andagaha lone ngoai ho berenego Tomasabi ti heba berene. Panga paya tagi ho berenego ti bereagoria dombeneni Yasu íbu howa tihondo lalu, Mo palia holene tí heba helo laro, lene. <sup>27</sup> Ani lowa ibugua Tomasahondo lalu, Inaga gi hondoneme inaga gi habeni ela halu handa. Inaga gi dogolalu inaga habianenibi ela halu handa. Hondowa mini kira nawi mini mbiraore wialu habe, lene. <sup>\*</sup>

<sup>28</sup> Ani layagola Tomasahanda ibuhondo lalu, Inaga Anduane Homogobi inaga Ngode Datagaliwabebi íore ke, lene.

<sup>29</sup> Ani layagola Yasuhanda ibuhondo lalu, Ina inaga deme i de hondowa mini mbiraore werebe. Deme i nahende howa mini mbiraore wialu karu ti turu timbuniore halu ka, lene. <sup>\*</sup>

*Mbuga ogonaga irane ogo*

<sup>30</sup> Yasu ibugua ibunaga talima piagaru heba howa ti deni agalime nabiagane ale dewaore binigo mbuga ogoha gili nabini. <sup>\*</sup> <sup>31</sup> Mbuga ogoha bi gilibu ngago tí daga lalu howa Mbiral Dabo Helenego ibulebira lowinigo ibu Ngode Datagaliwabe Iginu Yasuoreda manda buwa mini mbiraore wialu halimulonaga gilibu wero. Tigua ibuhondo mini mbiraore wialu kamirume holene gahenge yu halimulobi gilibu wero. <sup>\*</sup>

## 21

*Talima piaga kariali hearia Yasu ha pani henego ogo*

<sup>1</sup> Maha Yasunaga talima piagaru iba Taiberiasa mini mende Galili angeni hearia Yasu ibuni ha pani halu ogodagua bini. <sup>2</sup> Saimono Pidabi Tomasa kai mini Hono Palu ibubi Galiliha Kaina tanoali Nadanele henegobi Sebedi igini kiralibi Yasunaga talima piaga kira mendebi ti mandagi hene. <sup>\*</sup> <sup>3</sup> Ti mandagi hearia Saimono Pidahanda tihondo lalu, I wena minu porogo, lene. <sup>\*</sup>

Ani layagola tigua ibuhondo lalu, Ina haru ma, lene. Ani lowa ti iba taluni puwa mbiraga wena minalu hearia homa mbira mina nabi hene. <sup>4</sup> Egerebagiore ni dole tiga biyagola Yasu iba angeni íbu hearia ibunaga talima piaga biarume Yasu kalo manda nabi hene. <sup>\*</sup> <sup>5</sup> Yasuhanda tihondo lalu, I giriru-o wena mbira minu ngamibe, lene. <sup>\*</sup>

Ani layagola tigua ladai bialu, Wena mbira naminuwioire, lene.

<sup>6</sup> Ibugua tihondo lalu, Wena nu gi tigahayagi yupe harimiyagua wena minuleberami, lene. Tigua wena nu yupe halu hearia wena dewaore anda piyagola nu yamibe nahe hene. <sup>\*</sup>

<sup>\*</sup> **20:21:** Md 28.18-19, Yo 17.18, 2 Ti 2.2, Hi 3.1 <sup>\*</sup> **20:23:** Md 16.19, 18.18 <sup>\*</sup> **20:24:** Yo 11.16, 14.5, 21.2 <sup>\*</sup> **20:27:** 1 Yo 1.1 <sup>\*</sup> **20:29:** 2 Ko 5.7, 1 Pi 1.8 <sup>\*</sup> **20:30:** Yo 21.25 <sup>\*</sup> **20:31:** Lg 1.4, Yo 3.15-16, 5.24, Lm 1.17, 1 Pi 1.8-9, 1 Yo 5.13 <sup>\*</sup> **21:2:** Md 4.21, Yo 1.45-51, 20.24 <sup>\*</sup> **21:3:** Lg 5.5 <sup>\*</sup> **21:4:** Yo 20.14 <sup>\*</sup> **21:5:** Lg 24.41 <sup>\*</sup> **21:6:** Lg 5.4-7

<sup>7</sup> Ani biyago hondowa talima piaga mbira Yasuhanda gubalini ho haga henegome Pidahondo lalu, O kagoni Anduane Homogoda, lene. Anduane Homogoda layago hale howa Pida ibunaga labolabo daliga biagane ala golo ngelenego mo bo bialu ibaha pora bialu Yasu hearia uba ede hene.✧ <sup>8</sup> Talima piaga maru ti iba taluni howa nuha wena dewa anda piyago gililo yalu angeni uba ede hene. Ti iba angeni uba ede halu polenego kaundia ndo ge lunaga magi mida handari mbira (100) ale hangu wini. <sup>9</sup> Iba angeni iraga halu hearia ira pungane hihoailo deagoria wena mberediru hiriago de hendene. <sup>10</sup> Yasuhanda tihondo lalu, Wena minarimigo maru yalu ibidaba, lene.

<sup>11</sup> Ani layagola Saimono Pida ibu puwa iba taluni howa wena nu yamuwa iba angeni gililo yalu ibini. Wena minayago timbuni dewaore daga handari mbirani pira duriani tebira (153) minini. Wena dewaore minayagome nu lere nalene.✧ <sup>12</sup> Ani biyagola Yasuhanda tihondo lalu, Tomo namiya ibidaba, lene. Ani layagola ibunaga talima piagaru tigua ibu Anduane Homogooore kagoni manda biai howa ti mbirame ibuhondo lalu, Í ái kebe, nalene. <sup>13</sup> Yasuhanda mberedi dugu yalu ibuwa tihondo talebu migi bini. Wenabi anidagua dege bini.✧

<sup>14</sup> Yasu ibu homalu heyu howa ibunaga talima piaga hearu hearia ha pani henego halu tebone ogoni.✧

### *Yasu Pidala bi lenego ogo*

<sup>15</sup> Tigua tomo nai howa Yasuhanda Saimono Pidahondo lalu, Yone igini Saimono-o ina o karume ihondo gubalini ho kagobi ndo ina ihondo gubalini timbuni ho kebe, lene.✧

Ani layagola Pidahanda ladai bialu lalu, E laro. Anduane Homogo-o ina ihondo gubalini ho kogo í manda bide, lene.

Ani layagola Yasuhanda ibuhondo lalu, Inaga nogo sibi iginiruhondo tomo mialu habe, lene.\* <sup>16</sup> Ani lowa ibugua Pidahondo halu mende lalu, Yone igini Saimono-o ina ihondo gubalini ho kebe, lene.✧

Ani layagola Pidahanda ibuhondo lalu, E Anduane Homogo-o ina ihondo gubaliniore ho kogo í manda bide, lene.

Ani layagola Yasuhanda ibuhondo lalu, Inaga nogo sibiru haru habe, lene. <sup>17</sup> Ani lowa Yasuhanda ibuhondo halu tebone lalu, Yone igini Saimono-o ina ihondo gubalini ho kebe, lene.✧

Ibugua ibuhondo halu tebone lalu, Ihondo gubalini ho kebe, layago hale howa Pida ibu emene genda howa lalu, Anduane Homogo-o í bibahende manda biai kego ina ihondo gubaliniore ho kogo manda bidegoni, lene.

Ani layagola Yasuhanda ibuhondo lalu, Inaga nogo sibiru haru habe, lene. <sup>18</sup> Ani lowa lalu, Ina ihondo heneneore laro. Í igiri hongohe haringi ininaga aga gambali buwa ini poa biyagoha pu pebe bialu hari. Ai í wahe harengi inaga gi dogo laregola mbiralime inaga gi minu huba bialu í napoa kegoha haru polebira, lene.✧ <sup>19</sup> Yasuhanda bi layadagoni Pida ibu ogonidagua bialu homalu Ngode Datagaliwabe mini mo yaraga holebira manda buwa lamini. Ani lowa Yasuhanda ibuhondo lalu, I porodagua talima ibabe, lene.✧

### *Yasuhanda talima piaga mendehondo bi lenego ogo*

<sup>20</sup> Pida ibu beregedo handalu hearia Yasunaga talima piaga mbira Yasu ibu gubalini ho haga hene biago Pidanaga mbirahayagi hearia hendene. Bamba ti tomo dawa nole ngoai ho birayangi agali mbira Yasunaga galu hombeni palu paga howa ibuhondo lalu,

✧ 21:7: Md 14.29, Yo 13.23, 20.2 ✧ 21:11: Lg 5.6 ✧ 21:13: Yo 6.11, Ab 10.41 ✧ 21:14: Yo 20.19, 20.26 ✧ 21:15: Md 26.33, Yo 1.42 \* 21:15: Marume bi ogoni ogodagua gili bulene nga manda bini. Yone igini Saimono-o mbirale uruni í gubalini ho kegobi ndo ina ihondo gubalini timbuni ho kebe, lene. ✧ 21:16: Ab 20.28, Hi 13.20, 1 Pi 2.25 ✧ 21:17: Yo 13.38, 16.30 ✧ 21:18: Yo 13.36, Ab 12.3-4 ✧ 21:19: Md 16.24-25, Mg 1.17, Yo 13.36, 2 Pi 1.14

Anduane Homogo í aiwa nde lolebirabe, lenego o biago hearia hendene.✠ 21 Hondowa Pidahanda Yasuhondo lalu, Anduane Homogo-o agali ogo agua bulebirabe, lene.

22 Ani layagola Yasuhanda ibuhondo lalu, I dai beroria ibu haabo helo hamelo koyagua nde agi. Inaga biabe ndo. Ina i porodagua talima ibulene ngago ibabe, lene.✠

23 Ani lenego hale howa Yasu talima pialu hearume lalu, Ibunaga talima piaga ogoni nahomolebira laya, lalu hene. Yasuhanda, Ibu nahomolebira, nale. I dai beroria ibu haabo helo hamelo koyagua nde agi. Inaga biabe ndo, lalu ogonidagua hangu lene.

24 Ogodagua biya ogodagua laya lalu talima piaga ogonime bebani bi gilibu ngago iname hondowa heneneore layadalo manda bu kama.✠

25 Yasuhanda biabe tara tara dewaore binigo bibahende hangu hangu gilibu wiai kole dindi bibahendeha mbuga dewaore uruni wibe nakale manda bido.✠

---

✠ 21:20: Yo 13.23-25, 20.2 ✠ 21:22: Md 16.27-28, 25.31, 1 Ko 4.5, Mo 22.7, 22.20 ✠ 21:24: Yo 19.35, 3 Yo 12  
 ✠ 21:25: Yo 20.30

## **Abosolo**

### **Abosolo hearume biabe bialu henego ogo**

### **Mbuga ogoha gilibu ngarunaga nemandi ogo**

Luguhanda Bi Mana Debene ala gili binigo gili biai howa mani mbuga mende Ngode Datagaliwabe Dinini ibugua abosolo agaliruha howa bialu henegonaga tebi gili bini.

Yasuhanda bi mbira lenego ogo, Ngode Datagaliwabe Dinini ibu tí kamigoha ibiragolaibunaga hongo holene tiha tolai holebira. Ani biragola tí Yarusalemehabi Yudia bibahendehabi Samariahabi dindi bibahende gibuni gibunihabi Yasuhanda agua laya agua biya lalu i mo walia hagane tí holeberami, lene. Be 1.8 Yasuhanda ani layadaguaibunaga talima piaga biarume Bi Mana Debene loyogo lalu lamima ibaga bialu hene. Ani lamiyagola ala Yu wali agali hangume Keriso hameigini hene. Mani dindi bibahendeoreni Keriso hameigini ho dame bini.

Mbuga ogoni Keriso hameiginirume Bi Mana Debene loyogo lalu hayagonaga tagalene tebira ngago uru.

**Mbira**

Yasu dahuliya andaga daibu heha Keriso hameigini hayarume Yarusaleme howa bi mana loyogo lalu lamiyagola wali agali dewa hearume Yasuhondo mini mbiraore winigonaga lo nga.

**Mende**

Tigua Yu wali agalinaga dindi bibahendehabi Samariahabi loyogo lalu lamima penegonaga lo nga.

**Tebone**

Tigua dindi kaundia maru wiaruhabi Lomohabi loyogo lalu lamima ibaga biai hayagonaga te gilibu nga.

Abosolo hayarume biabe bialu hayagonaga te gilibu ngago Ngode Datagaliwabe Dinini ibugua Keriso hameigini hearuha karulai howa ti haru hayagobi mo hongo hayagobi ogoni dunini timbuniore manda buwa gilibu nga.

#### **Bulu бага бува кuni gili bu ngago**

*1.1-26*

Yasunaga bi mana loyogo lelo manda manda binigo nga

*1-14*

Yasuhanda lalu, I Abahanda ibu Dinini ngulebira, lenego.

*15-26*

Yudasana pani ha aribia helo dabene. *2.1-8.3*

Yarusalemeni Yasunaga bi mana loyogo lenegonaga nga *8.4-12.25*

Yudiahabi Samariahabi Yasunaga bi mana loyogo lenegonaga nga *13.1-28.31*

Polohanda Yasu manani howa bialu henegonaga nga

*13.1-14.28*

Yasunaga bi mana wali agali tara tara hearuhondo halu mbira lamima penego

*15.1-35*

Keriso hameiginirume lo mbiraore hole Yarusalemeni ngoai henego.

*15.36-18.22*

Yasunaga bi mana wali agali tara tara hearuhondo halu mende lamima penego.

*18.23-21.16*

Yasunaga bi mana wali agali tara tara hearuhondo halu tebone lamima penego.

*21.17-28.31*

Yarusaleme howa Polo dariba halu Lomo haru penego.

*Ngode Datagaliwabehanda ibu Dinini ngulebero lenego ogo*

1-2 Tiobilasa-o Yasu ibunaga biabe pigane teniyagoria howa ibu dahuliya andaga iraga holene tu helo howa ibugua biabe biyagobi bi mana lawai hayagobi bibahende ina inaga mbuga mbira ala gili birugoriani gilibu wiai harugoni. Yasu ibu iraga nahe howa ibugua Ngode Datagaliwabe Dinininaga hongome agali abosolo helo dabayaruhondo, Ogodagua bilimu ogodagua lalimu, laga bialu lalu lamiai hene. ✧ ✧ 3 Yasu homalu mo heya howa horo pira mariani (40) halu dewaore ibuni walia hayagola tigua Yasu de handalu ibu heba haabo hene. Ibu heba halu tigua Yasu ibuniore heyu kagoni lowa manda biaiore hene. Yasu ti heba howa ibugua Ngode Datagaliwabehanda Handame Ho Kagonaga mana lamialu hene. ✧ 4 Ibugua tihondo hongo howa lalu, I Abahanda mbirali ngulebero lalu lo ngago ngulebira lalu abale langirudagua ogoni ngilo Yarusaleme wahalu napilimu. ✧ 5 Yonehanda wali agali ibame baboraya binigo horo marudaru mbira howa Ngode Datagaliwabehanda ibu Dininime tí baboraya bia holebira, lene. ✧

### *Yasu Dahuliya andaga iraga henego ogo*

6 Abosolo biaru Yasu heba mandagi ngoai ho biruwa tigua Yasuhondo lalu, Anduane Homogo-o Isaraele wali agali inaneme handame ho holomaya ina handame holene inahondo ngia dai bulenengi áyu ogonibe, lene. ✧

7 Ani layagola Yasuhanda tihondo lalu, Maha tara tara bulenenaga horo i Aba ibuni hangume ala manda manda buwa pongo bo wini ngago tina biabe ndo. ✧ 8 Ngode Datagaliwabe Dinini ibu tí kamigoha ibiragola ibunaga hongo holene tíha tolai holebira. Ani biragola tí Yarusalemehabi Yudia bibahendehabi Samariahabi dindi timbuni ogo gibuni gibunihabi Yasuhanda agua laya agua biya lalu i mo walia hagane tí holeberami, lene. ✧ 9 Yasuhanda bi ogoni lai hayagola tigua handaya ho hearia ibu dahuliya andaga yaraga hayagola beralibame ibu ge hayagome ti Yasu lone handabe nahe hene. ✧

10 Ibu piyagola tigua hari daligaha handa daga ho hearia aguabe tobane buwa agali kira aga peleorebi ogobi labolabo ti heagoria abale ha pani hene. ✧ 11 Ani ha pani howa agali biago labome lalu, Galilialiru-o tí hari daligaha handa daga ho kamigo aginagabe. Yasu tí heba mandagi hemira howa Ngode Datagaliwabehanda ibu dahuliya andaga helo mo yaraga hayago de handarimigo Yasu o piyagonidaguaore dai bulebira, lene. ✧

### *Mbirali Yudasani ho aribia helo dabenegro ogo*

12 Ani laya handala abosolo biaru Hari Olibe heagoria howa Yarusaleme dai bini. Hari Olibe weagoria heagoria howa Yarusaleme polene emene kaware dege wini. ✧

13 Ti Yarusaleme anda puwa tamu hobane daligani tini hagaha iraga halu anda pene. Pidabi Yonebi Yamesebi Andurubi Pilibibi Tomasabi Badolomiubi Madiubi Alibiasa igini Yamesebi Saimono kai mini mende Paidoro ibubi Yamese igini Yudasabi ✧ 14 agali urunime Ngode Datagaliwabehondo bi lole mandagi ngoai haga hene. Wali marubi Yasu aiya Meribi Yasu hamenerubi abosolo biaru heba ngoai howa Ngode Datagaliwabehondo bi laga hene. ✧

15 Horo maru howa Yasu mana yu tiga biaga hearu bibahende lamaga howa handari mbirani pira kira (120) agima ngoai ho heagola Pidahanda heyuwa tihondo lalu, 16 Hamene mbaliniru-o Ngode Datagaliwabe Dinini ibugua Debidaha howa lalu Yudasahanda bulebiragonaga mbiwia ho wini. Ani binigo agali hearume Yasu minilo Yudasahanda walia hayagola Anduane Homogonaga mbugani lo winidagua lola haya. ✧

✧ 1:1-2: Lg 1.1-4 ✧ 1:1-2: Mg 16.19, Lg 24.49-51 ✧ 1:3: Md 28.17, Mg 16.12, Lg 24.36-49, Ab 10.41, 1 Ko 15.5-7  
 ✧ 1:4: Lg 24.49, Yo 14.16-17, Ab 2.33 ✧ 1:5: Md 3.11, Mg 1.8, Lg 3.16, Yo 1.33, Ab 11.16 ✧ 1:6: Ais 1.26, Dan 7.17, Amo 9.11, Md 24.3, Lg 24.21 ✧ 1:7: Md 24.36, Mg 13.32, 1 Te 5.1 ✧ 1:8: Md 28.19, Mg 16.15, Lg 24.47-48, Yo 15.27, Ab 2.32, 3.15, 5.32 ✧ 1:9: Mg 16.19, Lg 24.50-51, Yo 6.62, 20.17 ✧ 1:10: Md 28.3, Mg 16.5, Lg 24.4, Yo 20.12, Ab 10.3, 10.30 ✧ 1:11: Md 24.30, 26.64, Lg 21.27, Yo 14.3, 1 Te 1.10, 4.16, Mo 1.7 ✧ 1:12: Lg 24.50 ✧ 1:13: Md 10.2-4, Mg 3.16-19, Lg 6.14-16 ✧ 1:14: Md 13.55, Lg 23.49, 23.55, 24.10, Yo 6.42, 7.5 ✧ 1:16: Iba 41.9



17 Ina heba biabe mandagi bulumaya Yasuhanda Yudasa dabayagola ibu ina aria hene, lalu Pidahanda lene.✧

18 Yudasa ibu ko biyagonaga muni yolo miyagome dindi mbira tu wini. Ani buwa dindi ogoriani ibuni homo ibira howa tombe tula lowa tini tagira ibiyagola tongo lene.✧✧

19 Wali agali Yarusalemeni hearu bibahendeme ogonidagua biya layago hale howa tigua tininaga bi lalu dindi ogoni mini Ageledama wini. Inanaga bi lalu Darama Dindi.

20 Pidahanda lalu, Iba Gana mbugani bi mbira lo ngago ogo, Ibunaga anda tabuanda helobi ibu anda ogoniha mbirali napalelobi, lalu gilibu nga. Bi mendebi lo ngago ogo, Biabe ibugua biaga wiyago mendealime bilo aribia holene nga, lalu gilibu nga, lene.✧

21-22 Bi ogoni gilibu ngago mitangi bialu agali mbira ogobi dabamiya. Ngode Datagaliwabehanda Yasu mo heya hayago de hendene helolene nga. Agali ogoni ibu Anduane Homogo Yasu heba ibaga bialu mandagi harimangi howa henegobi Yonehanda baboraya bialu hayangi howa Yasu hari daligaha Ngode Datagaliwabehanda mo yaraga hayangi howa henegobi bibahende biyago handai henego agali ogonibi mbira ina heba helo dabamiya, lene.✧

23 Pidahanda ani layagola tigua agali kiranaga mini mo wini. Agali mendego mini Yosebe maru hearume ibu mini Basabasa lalu marume Yasadasa laga hene. Mendego ibu mini Madaiasa. 24-25 Ani mo wuwa ti Ngode Datagaliwabhondo bi lene. Tigua lalu, Anduane Homogo-o wali agali bibahendenaga bu habaneha í handai ho kegoni. Agali ogo labo dabarimago mendealigome Yudasahanda abosolo biabe biala ho ngelayago bu yolo mialu helo ina mbira dabarigo ina walia habe. Yudasa ibuni pole heneyagoha pole abosolo biabe ogoni wahalu piyago, lene.✧ 26 Ngode Datagaliwabhondo bi lowa tigua o biago labonaga mini gilibu gambiruwa mo ema biyagola Madaiasa mini ala tagira ibiyagola ibu helene. Ani bialu abosolo beriali (11) biaruha ibu hombeane (12) ha tago hene.

## 2

### *Ngode Datagaliwabe Dinini dalinigo ogo*

1 Yu wali agalinaga horo timbuni mini Pendigosi hayangi Yasu mana yu tiga biaga hearu bibahende anda mbiraha mandagi ngoai ho berene.✧ 2 Ani ngoai ho berearia puyabu hongo howa u e lagadagua hari daliga howa ibayuago hale hene. U e layuagome anda ti bereagoha laanda hai hene.✧ 3 Laanda hayagola mbirale ira hungu hegene ale ibuwa ti emboneni dolo ibira ibira biyago tini de hendene.✧ 4 Ani biyagola Ngode Datagaliwabe Dinini ibugua tiha tolai hene. Tolai howa wali agali dindi tara taranaga bi lagalaga bilo Dinini ibugua ti mo la hene.✧

5 Yu wali agali Ngode Datagaliwabe mitangi biaga hearu dindi bibahendeha howa Yarusaleme íbu ngoai ho hene. 6 Wali agali urunime u e layuago hale howa bibahende ngoai hene. Ngoai ho hearu hangu hangume hale halu hearia Yasu mana yu tiga biaga hearume bi taratara lagalaga biayuago hale howa ti mogolo hendene. 7 Tigua mogo lowa lalu, Inanaga bi lalu karu ti bibahende Galili agali hangu ndoyagoda.✧ 8 Tigua ina hangu hangunaga bi lalu langirane haleho kamago agidabe. 9 Ina dindi tara tarali íbu kamagoni. Padia howabi Midia howabi Ilama howabi Mesobodemia howabi Yudia howabi Kadosia howabi Pondasa howabi Esia howabi✧ 10 Piriya howabi Pambilia

✧ 1:17: Md 10.4, Lg 6.16, Ab 1.25 ✧ 1:18: Md 26.15, 2 Pi 2.15 ✧ 1:18: Md 27.3-8 ✧ 1:20: Iba 69.25, 109.8  
 ✧ 1:21-22: Md 3.16, Mg 1.9, 16.19, Lg 3.21, 24.51, Yo 15.27, Ab 4.33 ✧ 1:24-25: 1 Sml 16.7, Yar 11.20, Yo 2.25, Mo 2.23 ✧ 2:1: Man 16.9-11, Ab 1.14 ✧ 2:2: Ab 4.31 ✧ 2:3: Md 3.11 ✧ 2:4: Mg 16.17, Ab 1.5, 4.31, 10.44-46, 1 Ko 12.10, 13.1 ✧ 2:7: Ab 1.11 ✧ 2:9: 2 Ti 1.15

howabi Iyibi howabi Libia dindi Sairini kaware howabi Lomo ariabi <sup>11</sup> Kiridi howabi Arebia howabi Yu wali agalibi wali agali maru ti Yu wali agali mana yu tiga biagarubi ina bibahende kamagohondo tigua inanenaga bi lalu Ngode Datagaliwabehanda biabe timbuni tara biyago langirago, lalu <sup>12</sup> ti mogo lowa lagalaga bialu lalu, Ogoni agidabe, lene.

<sup>13</sup> Maru hearume mege bialu lalu, Waini iba áyu dege wabu wiago timbuni nayadago lulu yaragoni, lene.

*Pidahanda bi mana laminigo ogo*

<sup>14</sup> Ani layago hale howa Pidabi abosolo maru beriali (11) biarubi ti heba howa ibugua tihondo bi hongo howa lalu, Ina Yu wali agali kamarubi Yarusalemeni kamirubi o biyagoni languliya bayuwa hale halimu. <sup>15</sup> Agali uruni lulu iba nayadago larimibe. Ani ndoyago. Horo áyu wene egerebagi dege kamago.✧ <sup>16</sup> O biragoni bamba Ngode Datagaliwabe mana latagi haga Yoelehanda mbiwia halu lowinidagua lola haragoni. Ngode Datagaliwabehanda layadagua Yoele ibugua lowinigo ogo,

<sup>17</sup> Ngode Datagaliwabehanda lalu, Ha maro bulene horo kaware haragola ina buleberogo ogo.✧

Ina inaga Dinini wali agali bibahendeha helolebero.

Tínaga waneiginime inaga bi mana latagi halu holebira.

Tínaga igiri daliaherume mbirale tara de gandeba hondolebira.

Tínaga agali waherume emaga hondolebira.

<sup>18</sup> E aniore buwa horo uruningi inaga biabe bia haga wali agalirubi ina inaga Dinini tiha helolebero.

Ani berogola tigua inaga bi mana latagi halu holebira.

<sup>19-20</sup> Hari daligaha biabe tara tara nahendene ale hongohe ina mo bia halu dindihabi manane tara tara mo walia halu holebero.

Anduane Homogonaga Horo timbuni gibi pongo bo winigo naibidaha daramaibunibi ira hungu hagua timbunibi heba hondoleberami.

Ni hundialu egebi darama ale dolebirago hondoleberami.

<sup>21</sup> Ani birangi Anduane Homogohondo, Pele ngi, lararume pele mulene yulebira,✧

lalu, Ngode Datagaliwabehanda lene lalu Yoele ibugua bi ogoni lowinigo, Pidahanda lene.

<sup>22</sup> Pidahanda lalu, Israele wali agaliru-o bi larogo hale halimu. Nasareteali Yasu ibugua agalime nabiagane alebi nahendene alebi taratara binigo Ngode Datagaliwabehanda Yasuha howa ani bini. Ani biyagome Nasareteali Yasu ibu Ngode Datagaliwabehanda loma bia hene howa biabe ogoni bule ibinigo bialu walia hene. Tí hemigoha howa biabe ogoni biyago hondowa tíni manda bidami.✧ <sup>23</sup> Yasu tí kamiruhondo minu ngulebirago Ngode Datagaliwabehanda ala manda manda bu howa ani bilo helene. Anigo Yasu homelo agali ko biaga hearume ibu ira bangani ba para helo tigua mo bia harimi.✧ <sup>24</sup> Yasu tongo layagola howa homanaga hongome ibu dariba nahabeheoreyagola Ngode Datagaliwabehanda ibu golope halu mo heya hene.✧ <sup>25</sup> Debidihanda Yasu mitangi bialu lenego ogo,

Ina Anduane Homogo ibu inaga deni haabo heago i de handaru.

Kome i mo ema bia holilono ibu i heba haabo haga ka.

<sup>26-27</sup> Ogoninaga i gubaliniha turu holene tolai halu ina bi turubi laro.✧

Ngode Datagaliwabe ina i dinini humbirini andaga naheloleberogo.

Inaga biabe bia haga loma biaho helarigonaga tingini togo nabilo heloleberogo.

Tingini áyu kogoni howa awe bayaleore holebero lo yu tiga bidogoni.

✧ 2:15: 1 Te 5.7 ✧ 2:17: Yol 2.28-32, Seg 12.10, Yo 7.38, Ab 10.45, 21.9 ✧ 2:21: Lm 10.13 ✧ 2:22: Yo 3.2, 14.10-11, Hi 2.4 ✧ 2:23: Md 27.35, Mg 15.24, Lg 23.33, Yo 19.18, Ab 4.28, 1 Pi 1.20 ✧ 2:24: Md 28.5-6, Mg 16.6, Lg 24.5, Ab 3.15, 4.10, 10.40, 13.30-31, 17.31, 1 Ko 15.15 ✧ 2:26-27: Ab 13.35

28 *Ína* *i* haabo holenenaga harigani poliya mo walia harigoni.

*Ína* *i* heba haabo kegome turu holene *i*ha *t*olai holebira, lalu Debidihanda ani laya, lene.✧

29 Pidahanda lalu, *I* hamene mbaliniru-o inanaga mamali mini lene Kini Debidi mitangi bialu *ina* *t*ihondo tigatiga laro. Ibu homenegobi hora henegobi ibunaga homali áyu wiaabo kagobi manda bu kama.✧ 30 Abale ibu Ngode Datagaliwabe mana latagi haga hearia Ngode Datagaliwabeanda ibuhondo bi heneneore lo wialu lalu, Mahaore *ina* ga aguanene mbiralime wali agalinaga kini *i* kedagua helolebero, lalu lowinigo Debidi ibu manda bu hene.✧ 31 Ngode Datagaliwabeanda mani ogodagua bulebira mitangi buwa Debidi ibugua bi ogodagua lalu,✧

Ngode Datagaliwabeanda ibu dinini humbirini andaga hela nabi

ibu tinginibi homaliha togo nabini,

lalu bamba lenego Ngode Datagaliwabeanda Mbiralí Dabo Helenego homowa mo heya holebiragonaga mitangi bialu ani lene. 32 Yasu ogoniore Ngode Datagaliwabeanda mo heya hayagola iname handaiore harima.✧ 33 Ngode Datagaliwabe

ibugua Yasu mo yaraga halu ibu Abanaga gi tigahayagi berelowa ibuhondo ibunaga Dinini ngulebero lowinidagua mini. Ayu handaramigobi hale haramigobi ibugua inahondo turu halu ngirago inaha hela hayago ogoni.✧ 34-35 Debidi ibuni dahuliya andaga iraga hene ndo ibugua lowialu lalu,

Anduane Homogohanda *ina* ga Anduane Homogohondo lalu, *Ína* ga waitigi karu *ina* ga geni malia ho wilo mo malia heloliya *i* *ina* ga gi tigahayagi ogoria birabe,

lalu laya, Pidahanda lene.✧

36 Pida ibugua ani lowa lalu, Isaraele wali agali *t*í bibahende kamiru manda bilimu. Yasu ogoniore *t*igua ira bangani ba para harimigo Ngode Datagaliwabeanda ibu Anduane Homogo helobi Mbiralí Dabo Helenego helobi helayagoni bayuwa manda bilimu, lene.✧

*Wali agali dewaoreme mini beregedalu baboraya binigo ogo*

37 Bi ogoni layago hale howa wali agali hearume tinaga gubaliniha nogobaore hayagola dara hene. Dara howa tigua Pidabi abosolo maru biarubi tihondo lalu, Hameneru-o ina agi bulene ngabe, lene.✧

38 Ani layagola Pidahanda ladai bialu lalu, *T*í bibahende ko birimigonaga mini beregedalu Yasu Kerisonaga minini howa hangu hangu baboraya bilimu. Ani beramigola Ngode Datagaliwabeanda *t*igua ko birimigo domo wahalu *t*ihondo ibu Dinini ngulebira.✧ 39 Ngode Datagaliwabeanda, Nguleberoore, lalu bi lowinidagua *t*ihondobi *t*í waneiginihondobi wali agali kaundia karuhondobi ti Anduane Homogo inanaga Ngode Datagaliwabe ibugua ibu karia ibilo ololebiraru uruni ti bibahendehondo ngulebiraore, Pidahanda lene.✧

40 Pidahanda bi galone dewa hongo howa lalu bi marubi lalu, *T*í ko biaga karu heba mandagi pani nolene ngagoria holemini, lene.✧ 41 Ibugua mana lamiyago hale howa wali agali dewalime yu tiga bialu baboraya bini. Horo ogonongi dege wali agali daosini tebira (3,000) Yasu aria hearuha ho gimbu bini.✧ 42 Tigua abosolo biarume mana lawai hayago hale halu Yasu aria hearu heba mandagi mini mbiraore howa biamogo bigibigi bialu tomo mandagi nalu Ngode Datagaliwabe hondo bi laabo halu mandagi ngoai haga hene.✧

✧ 2:28: Iba 16.8-11 ✧ 2:29: 1 Kin 2.10, Lg 1.32, 1.69, Ab 13.36, 2 Ti 2.8 ✧ 2:30: 2 Sml 7.12-13, Iba 89.3-4, 132.11  
 ✧ 2:31: Iba 16.10, Ab 13.35 ✧ 2:32: Ab 1.8, 2.24 ✧ 2:33: Yo 14.26, Ab 1.4, 5.31, 7.55-56, 10.45, Eb 4.8, Hi 10.12  
 ✧ 2:34-35: Iba 110.1 ✧ 2:36: Ab 5.30-31 ✧ 2:37: Seg 12.10, Lg 3.10-12, Ab 9.6, 16.30 ✧ 2:38: Lg 24.47, Ab 3.19 ✧ 2:39: Ais 57.19, Yol 2.28, Ab 10.45, 14.27, Eb 2.13, 2.17 ✧ 2:40: Man 32.5, Pb 2.15 ✧ 2:41: Ab 2.47, 4.4, 5.14 ✧ 2:42: Ab 20.7

*Keriso hameigini howa mana bayale binigo ogo*

<sup>43</sup> Ngode Datagaliwabehanda abosolo biaruha howa agalime nabigane alebi nahendene alebi biyagola wali agali bibahendeme handawa buwa mogolo hene. ✧ <sup>44</sup> Yasu mana yu tiga bu hearu bibahendeme mandagi mini mbiraore howa turu halu tinaga mbirale wiaru talebu migimigi bini. ✧ <sup>45</sup> Dindibi mbirale taratara wiarubi tigua yolo mialu muni miyaru tinaga aria biamogo bulene wiadagua biamogo bigi bini. <sup>46</sup> Horo bibahende ti Anduane Homogonaga andaha ngoai halu tinaga andaru pugupugu bialu bu mini hada howa turu halu tomo mandagi naga hene. ✧ <sup>47</sup> Tigua Ngode Datagaliwabe mini yaraga halu heago hondowa wali agali bibahende hearume ti mana tigabiore bialu kagoni laga hene. Horo bibahende wali agali maru mini mbiraore wigi biyaru Anduane Homogohanda ti Yasu aria hearuha ho gimbu bigi bilene. ✧

### 3

*Agali ge kohe mbira dabi henego ogo*

<sup>1</sup> Horo mbirungi alendo ni gai layagola Pida Yonela Anduane Homogonaga andaha pene. Alendo ogonidagua haragola ti Ngode Datagaliwabhondo bi lagane wini. ✧ <sup>2</sup> Agali mbira ibu aiyahanda taba hanayangiore howa kuduguhe wiaabo henego ibu Anduane Homogonaga anda haraba mbira mini Debene ogoriani berene. Horo bibahendeni ibu dameneme ibu mo yalu ibalu ogoriani berelaga hene. Ibugua Anduane Homogonaga andaha anda poraruhondo, Muni ngi, lelo ani berelaga hene. ✧ <sup>3</sup> Pida Yonela Anduane Homogonaga andaha anda pialu hearia de hondowa agali kuduguhe biagome libuhondo, Mbirale mbira ngidaba, lene. <sup>4</sup> Ani layagola Pida Yonela libugua ibu handaya halu lalu, Iya handaya ha, lene. ✧ <sup>5</sup> Ani layagola mbirale mbira ngulebiralo mitangi bialu ibugua libu handaya ho berene. <sup>6</sup> Ani handaya ho bereria Pidahanda ibuhondo lalu, I muni nayiorego mbira dege yu kogo ngero. Nasareteali Yasu Kerisonaga minini howa larogo i heyalu ibagabu ha, lene. ✧ <sup>7</sup> Ani lowa Pidahanda agali kudugu biagonaga gi tigani yuwa mo heya hayagola abaleoreibunaga ge hongo howa <sup>8</sup> porabu dagadaga bialu ibu ibagabu hene. Libu heba Anduane Homogonaga andaha pialu ibugua ibaga bialu porabu dagadaga bialu howa Ngode Datagaliwabe mini yaraga halu hene. ✧ <sup>9</sup> Ibu ani ibaga bialu Ngode Datagaliwabe mini yaraga halu hearia hondowa wali agali hearume lalu, ✧ <sup>10</sup> Anduane Homogonaga anda haraba mini Debene ngagoha muni ngi lalu biraabo haraligo ibu ndoyabe, lene. Ani lowa bibahendeme mogo lowa handawa bini.

*Pidahanda Anduane Homogonaga andaha howa mana laminigo ogo*

<sup>11</sup> Agali biago ibu Pida Yonela yaniho hearia hondowa wali agali hearume mogo lalu Anduane Homogonaga anda hane mbira mini Solomononaga Hane wiagoria ti hearia gerai lalu pene. <sup>12</sup> Wali agali ibiyago hondowa Pidahanda tihondo lalu, Isaraelealiruo ogoni biyago hondowa ti mini mogo lowa iya handawa bu kamigo agibe. Iyanaga hongome Ngode Datagaliwabe mana bayale yu kabagomebi agali ogo mo dabi hayadalo manda bidamibe. <sup>13</sup> Abarahamabi Aisagabi Yagababi inanaga mamalirubi tinaga Ngode Datagaliwabe ibuguaibunaga biabe biahaga Yasu mini daliga helo mo yaraga hene. Tigua tinaga haru haga hearia Yasu ogoni minu yalu pirimi. Tigua Pailate hearia ibu haru pialu Pailatehanda ibu golole manda biyaria tigua nagololeore lai harimi. ✧ <sup>14</sup> Ibu agali Ngode Datagaliwabhondo loma bia henebi tigabibi heago tigua, Ibu hame naledama, lalu Pailatehondo, Ina hame ledamadagua bialu ina homelo бага agali

✧ 2:43: Mg 16.17, Ab 4.33, 5.11-12 ✧ 2:44: Ab 4.32-35, 5.12, 6.8 ✧ 2:46: Lg 24.53, Ab 1.14, 20.7 ✧ 2:47: Ab 2.41, 4.33, 5.14, 6.7, 11.21, 11.24, Lm 14.18 ✧ 3:1: Iba 55.17, Ab 2.46, 10.3, 10.9, 10.30 ✧ 3:2: Yo 9.1, Ab 14.8 ✧ 3:4: Ab 14.9 ✧ 3:6: Ab 3.16, 4.10, 16.18 ✧ 3:8: Ais 35.6, Yo 5.14, Ab 14.10 ✧ 3:9: Ab 4.16, 4.21 ✧ 3:13: Har 3.6, 3.15, Md 22.32, Lg 23.13-25, Ab 2.23, 7.32

mbira golope habe, larimi. ✧ <sup>15</sup> Ani larimigome wali agali holene gahenge yilo miaga tene biago homelo belo tigua mo ba harimi. Homayagola Ngode Datagaliwabehanda ibu mo heya ho heleago iyameore de handaribago. ✧ <sup>16</sup> Yasu ogoni mininaga hongome agali ala kudugu ho wini ogohondo hongo mini. Áyu tí de hendedamigobi manda bidamigobi irane iyame Yasuhondo mini mbiraore wiribagome. Ibunibi Yasuhondo mini mbiraore wiyagome ibu áyu bayale kagoni tí de handai kamigoni. ✧

<sup>17</sup> I hameneru-o tiguabi tí haru haga karumebi Yasuhondo birimigo bayuwa manda nabi howa birimiya manda bido. ✧ <sup>18</sup> Bambaore Ngode Datagaliwabehanda ibu mana latagi haga bibahende hearuha howa lalu, Mbiralí Dabo Helenego ibulebira lowinigo ibu tandaga nolebira, lalu mbiwia halu lowini. Bi ani layadagua henene lola hene. ✧ <sup>19</sup> Anigo Ngode Datagaliwabehanda ko birimigo domo wahelo mini beregedalu ibuhayagi hole ibidaba. Ani birimiyagua <sup>20</sup> Anduane Homogo ibuha howa ibugua tí dininaga hongo holene ngulebira. Ani buwa Mbiralí Dabo Helenego tínaga helo bamba loma bia ho helenego Yasu o biagoniorego tí kamiria ibilolebira. ✧ <sup>21</sup> Bambaore Ngode Datagaliwabehandaibunaga mana latagi haga loma bia heneru tiha howa mbiwia halu layadagua Ngode Datagaliwabehanda bibahende mo gahenge hole horo pongo bo wiyago lola helo Yasu ogoni ibu dahuliya andagani hondo ka. <sup>22</sup> Mosesehanda bamba ani layadagua lalu, Anduane Homogo tínaga Ngode Datagaliwabehanda i helayadagua tí ariaha howa mbiralí Ngode Datagaliwabe mana latagi haga helo helolebira. Helaragola ibugua bi mana langirago damene bibahende tigua hale halu bulene nga. ✧ <sup>23</sup> Hale howa nabiaga karu ti Ngode Datagaliwabenaga wali agali heba nahelo bo waholebira, Mosesehanda lene. ✧ <sup>24</sup> Mosesehanda ani laya, lalu Pidahanda lalu, Ngode Datagaliwabe mana latagi haga henerubi Samuelebi maha hayarubi ti bibahende ha howa Ngode Datagaliwabehanda horo áyu kamagoria birarunaga mbiwia hene. <sup>25</sup> Ngode Datagaliwabehandaibunaga mana latagi haga heneruha howa bi lowinigobi tínaga mamalihondo habo nalolene bi lowinigobi áyu tí kamirume mo yalimulonaga nga. Ngode Datagaliwabehanda bamba Abaramahondo lalu, Ínaga aguaneneha howa ina wali agali dindini karu bibahende mo turu hai holebero, layadagua ani bini. ✧ <sup>26</sup> Anigo Ngode Datagaliwabehanda Yasu moibunaga Biabe Bia Haga helowa tí hemiria ala ibilene. Ani binigo irane ogo. Ibugua tí ko bialu kamigoria howa haru dai bialu mo turu holenaga ibilene, lalu Pidahanda lene. ✧

## 4

### *Pida Yonela garabaya andaha helenego ogo*

<sup>1</sup> Pida Yonelame wali agalihondo mana lamialu hearia loma binigo mo miaga agali hearubi Anduane Homogonaga anda mamage hagarunaga haguane heagobi Sadiusi agali hearubi ibini. ✧ <sup>2</sup> Abosolo agali biago labome wali agalihondo lawai halu lalu, Yasu homalu mo heya hayagome wali agali homeneru bibahende mo heyu holebira, lene. Ani lawai hayago hale howa agali ibiyarume keba howa ✧ <sup>3</sup> tigua Pida Yonela minu yalu puwa horo ogoningi alendoyagola yawi godi lola lowa garabaya andaha palelene. <sup>4</sup> Pida Yonela libugua bi mana lamiyago wali agali dewalime hale howa yu tiga bini. Ala yu tiga biyarubi mani yu tiga biyarubi lamaga halu daosini duria (5,000) agima hene. ✧

<sup>5</sup> Horo mende hayagola Yu wali agalinaga haru haga hearubi agali ala hene miniwi hearubi Mana lowinigo lawai haga hearubi ti Yarusalemeni ngoai hene. <sup>6</sup> Loma binigo mo miaga haguane timbuni Anasa heagobi ibu damene Kaiabasabi Yonebi Alegandabi

✧ **3:14:** Md 27.15-23, Mg 15.6-14, Lg 23.13-23, Yo 19.12-15 ✧ **3:15:** Ab 1.8, 2.24, 2.32, 2.36, 4.10 ✧ **3:16:** Md 9.22, Ab 4.10, 14.9 ✧ **3:17:** Lg 23.34, Yo 16.3, 1 Ko 2.8, 1 Ti 1.13 ✧ **3:18:** Ais 50.6, 53.5, Lg 24.27, 24.44, Ab 26.22, 1 Pi 1.10-11 ✧ **3:20:** Ab 2.38 ✧ **3:22:** Man 18.15-19, Ab 7.37 ✧ **3:23:** LBM 23.29 ✧ **3:25:** Pig 12.3, 18.18, 22.18, Lm 9.4, 9.8, Ga 3.8, 3.26 ✧ **3:26:** Md 10.5, Lg 24.47, Ab 13.32-33, 13.46 ✧ **4:1:** Lg 22.4, 22.52 ✧ **4:2:** Md 22.23, Ab 23.8 ✧ **4:4:** Ab 2.41



maru ibu baile hearubi ngoai ho berene. <sup>7</sup> Ti bereagoria Pida Yonela handade ho helowa tigua libuhondo lalu, Ogoni biribidagoni agua bialu biribibe. Ainaga mininibi hongonibi ogoni biribibe, lene.✧

<sup>8</sup> Ani layagola Pidahanda ibuha Ngode Datagaliwabe Dinini tolai howa tihondo lalu, Wali agali haru haga kamirubi agali ala hene miniwi kamirubi✧ <sup>9</sup> te áyu laramigo agali ala kuduguhe biago mo dabi hayagonaga laramiyagua <sup>10</sup> nde tí bibahendebi Isaraele wali agali bibahendebi irane manda bulene nga. Nasareteali Yasu Kerisonaga mini hongome agali ogoni mo dabi hayago ibu áyu tí heba bayale o kagoni de hendedamigoni. Tigua Yasu Keriso ogoni ira bangani ba para harimigo ibu homayagola Ngode Datagaliwabehanda mo heya hene.✧ <sup>11</sup> Anduane Homogonaga mbugani bi lo ngago ogo,✧ Tí anda biaga kamirume ege tole mbira handabe manga ho harimigo

ege tole ogoni timbuni duniniore ho heleda, lalu gilibu ngago ogoni ibu Yasu ka. <sup>12</sup> Ibuni degeme pele ngibehe ka. Dindi bibahendeni ina pele ngulene mende nahe Yasu ibu dege Ngode Datagaliwabehanda nginigo, lalu Pidahanda lene.✧

<sup>13</sup> Ganisolo agali biarume Pida Yonelame gi nahe hongo howa bi lalu heago libu agali damene dege sigulu nabini howa bi tara layago hondowa mogolo hendene. Ani hondowa tigua libu Yasu heba haabo haraligo manda bini. <sup>14</sup> Tigua agali ala kudugu ho wini biago Pida Yonela heba bayale heago hondowa bi ladai bibe nahe hene. <sup>15</sup> Anigo tigua Pida Yonelahondo, Tagira pudaba, lowa tini hangu lo manda bialu lalu, <sup>16</sup> Agali o biago labohondo agi bimiyabe. Libugua agalime nabiagane ale tara timbuni biyagonaga te Yarusalemeni wali agali karu bibahendeme hale hai kago. Iname galone ndo bameyago nalabehe kama.✧ <sup>17</sup> Mana ogoni anda haame holigo iname libuhondo, Yasu mini lalu wali agali lone nalamilibu, lalu hongo howa lamimiya, lene.

<sup>18</sup> Ani lowa tigua libu olowa ibiyagola libuhondo hongo howa lalu, Libugua Yasu mini lalu lone wali agali lawai holene nawiore, lalu lamini.✧

<sup>19</sup> Ani layagola Pida Yonelame ladai bialu lalu, Iyame tigua laramidagua bulene ngabe be Ngode Datagaliwabehanda laradagua bulene ngabe. Ngode Datagaliwabehanda ogoni tigatiga lolebirago agobe tinime dabadaba.✧ <sup>20</sup> Iyame de handaribagobi hale haribagobi lo wahabe nahe lamiaabo holeberaba, lene.✧

<sup>21</sup> Ani layagola Ganisolo agali biarume Pida Yonelahondo hongo howa lalu, Lamiaabo haribiyagua iname libu pani nalibulo boleberamaore, lene. Libugua biyago hondowa wali agali bibahende hearume Ngode Datagaliwabe mini yaraga halu heago hondowabi tigua bolene irane handa walía nahe howa wahalu golope hene. <sup>22</sup> Agalime nabiagane ale bialu agali kudugu ho wini mo dabi hayago biago ibunaga mali pira maria (40) agima hene.

*Yasu mana yu tiga biarume Ngode Datagaliwabhondo, Elahe holene ngi, lenego ogo*

<sup>23</sup> Golope haya handala Pida Yonela libu aria hearia dai buwa loma binigo mo miaga haguane biarumebi agali ala hene miniwi biarumebi libuhondo bi layago libugua ti lamiai hene. <sup>24</sup> Lamiai hayagola ti bibahendeme hale howa Ngode Datagaliwabhondo bi lalu, Anduane Homogo ina hari daligabi dindibi ibabi bibahende ogoniha ngarubi Wabiaga kegoni.✧ <sup>25</sup> Bamba inanaga mamali Debidi inaga biabe bia haga biago ibuha howa í Dininime bi lariyago ogo,✧

Yu wali agali ndo wali agali taratara hearume aginaga keba timbuni henebe.

Wali agali o biarume aguaore bamíya lalu ndi nde lalu karu irane aginagabe.

<sup>26</sup> Dindi bibahendeni wali agalinaga kini hearume wai bule manda manda bu hagahaga bini.

✧ 4:7: Md 21.23, Ab 7.27 ✧ 4:8: Md 10.19-20 ✧ 4:10: Ab 2.24, 3.6, 3.13-16 ✧ 4:11: Iba 118.22, Ais 28.16, Md 21.42 ✧ 4:12: Md 1.21, Ab 10.43 ✧ 4:16: Yo 11.47, Ab 3.9-10 ✧ 4:18: Ab 5.28, 5.40 ✧ 4:19: Ab 5.29 ✧ 4:20: Ab 1.8, 22.15, 1 Yo 1.1-3 ✧ 4:24: Har 20.11, Neh 9.6, Iba 146.6 ✧ 4:25: Iba 2.1-2

Haru haga dege degerume ngoai howa  
 Anduane Homogohondobi ibunaga Mbirali Dabo Helenegohondobi handabe manga  
 howa ani bini,  
 lariyago, lalu Pidahanda lene. <sup>27</sup> Pida ibugua laabo halu lalu, Ogonidagua Herodobi  
 Pondiasa Pailatebi libu haru Yu agalibi agali tara tara hearubi heba dindi ogoriani  
 ngoai hene. *Í*naga Biabe Bia Haga Loma Biahene Yasu *ína* ibu Mbirali Dabo Helenego  
 helo helarigo tigua ibuhondo handabe manga howa ti ani ngoai hene.✧ <sup>28</sup> Ti ani  
 biyagola bambaore *ína* *ínaga* hongomebi hamemebi bule manda manda bu wiridagua  
 bibahendeore lola hai hene.✧ <sup>29</sup> Anigo Anduane Homogo-o tigua ina bolenaga bi hongo  
 howa lalu hayago *í* manda bibe. Iname *ínaga* biabe bia haga kamago ti hondowa gi nahe  
*ínaga* bi mana elahé howa lolomaya mo hongo habe larama.✧ <sup>30</sup> Warago bo ngaru mo  
 dabi hole *ínaga* gi dogolabe. *Í*naga Biabe Bia Haga Loma Biahene Yasunaga minini howa  
 nahendene alebi agalime nabiagane alebi iname bulumaya mo hongo habelo hame  
 ledama, lene.

<sup>31</sup> Tigua Ngode Datagaliwabehondo bi lai hayagola anda ti ngoai ho bereago ema  
 bialu dumbirumbi ale bini. Ani biyagola Ngode Datagaliwabe Dinini ibugua tiha tolai  
 hayagola tigua Ngode Datagaliwabe bi mana hongo howa lamialu hene.✧

### *Tinaga mbirale wiaru tale binigo ogo*

<sup>32</sup> Yasu mana yu tiga bu hearu ti minimebi gubalinimebi mbiraore ho hene. Ti  
 mbiraore ho howa tinaga mbirale mbirale wiaru *ini* hangunaga nale buru pale hearu  
 talebu migi bini.✧ <sup>33</sup> Abosolo biarume Anduane Homogo Yasu ibu homowa mo heya ho  
 kaore lalu hongo howa lalu hene. Ani bialu heago hondowa Ngode Datagaliwabehanda  
 ti bibahende mo turu halu biamogo timbuniore bialu hene.✧ <sup>34</sup> Yasu mana yu tiga  
 biyaru ti mbira buru palia nabi hene. Tinaga aria marume dindibi andabi yolo muwa  
 muni miyago✧ <sup>35</sup> abosolo biaruhondo mini. Ani miyagola abosolo biarume wali agali  
 maru buru pale hearuhondo mulene wiadagua talebu migi bialu hene.

<sup>36-37</sup> Ogonidagua bialu agali mbira mini Yosebe ibu Saibarasali Libai aguanene howa  
 ibugua ibunaga dindi mbira yolo muwa muni miyago yalu ibalu abosolo biaruhondo  
 mini. Abosolo biarume Yosebe ibu *kai* mini Banabasa laga hene. Mini ogoni inanaga bi  
 lalu Mini mo hongo haga.✧

## 5

### *Ananaia Sabairala libugua binigo te ogo*

<sup>1</sup> Ani biyadagua agali mbira Ananaia ibu one Sabairala libugua dindi mbira winigo  
 yolo mini. <sup>2</sup> Muni muwa Ananaia ibu onela mini mo mbiraore howa ibugua muni  
 ogoni tale bialu maru ngelalu maru abosolo biaru hearia yalu pene.✧ <sup>3</sup> Yalu ibiyagola  
 Pidahanda Ananaiahondo lalu, *Í*na Ngode Datagaliwabe Dinini mo hondo hole dama  
 Heyolabeme *í* gubaliniha daraga helo henge mirigo agibe. *Í*naga dindime yolo mirigo  
 maru do harigome *ína* Ngode Datagaliwabe Dinini mo hondo hole biri.✧ <sup>4</sup> Dindi yolo  
 nami howa dindi *íninaga* wiri. *Í*na dindi yolo muwa munibi *íninaga* dege wiri ndobe. *Í*  
 bu miniha ogonidagua bule manda birigo agibe. Tindule larigo agalihondo ndo Ngode  
 Datagaliwabehondo lari, lene. <sup>5</sup> Pidahanda ani layagola hale howa Ananaia ibu odope  
 howa homo tongolo mini. Ogonidagua biya layago hale hayaru ti gi timbuni hene. <sup>6</sup> Ani  
 biyagola igiri daliahe hearume ibuwa ibunaga tingini labolabome huba bialu tagira mo  
 yalu puwa hora hene.

✧ **4:27:** Md 27.1-2, Mg 15.1, Lg 23.1, 23.7-11, Yo 18.28-29, Ab 3.13 ✧ **4:28:** Ab 2.23, 3.18 ✧ **4:29:** Ab 9.27, 13.46,  
 19.8, Eb 6.19 ✧ **4:31:** Ab 2.4, 4.29, 16.26 ✧ **4:32:** Ab 2.44-45, 1 Ko 13.11, 1 Pi 3.8 ✧ **4:33:** Ab 1.8, 1.22, 2.45-47  
 ✧ **4:34:** Ab 2.45 ✧ **4:36-37:** Ab 11.22-26, 13.2-3 ✧ **5:2:** Ab 4.34-37 ✧ **5:3:** Man 23.21, Lg 22.3, Yo 13.2

<sup>7</sup> Tomo dawa duguabehe ale hayagola howa Ananaia one ibu agalini homayago manda nabi howa ibini. <sup>8</sup> Ibiyagola Pidahanda ibuhondo lalu, Dindime yolo miribigo muni bibahende ogonibe, lene.

Ani layagola ibugua ladai bialu lalu, E muni miribago bibahendeore ogoni, lene.

<sup>9</sup> Ani layagola Pidahanda lalu, Ibi i agalinibi libu haru Anduane Homogonaga Dinini ibugua agi birabe hondole ba handaribigo agibe. I agalini hora hayarume ibi yalu pole anda harabani áyu tamuha anda ibule ibarua, lene. <sup>10</sup> Ani layago hale howa ibu Pida geha abale odope howa homo tongolo mini. Ani homayagola igiri daliahe biaru ibalu ibu tongo lo mu wiago hondowa tigua ibunaga tingini tagira yalu puwa ibu agalini hora hayagoria dege hora hene. <sup>11</sup> Ani biya layago hale howa wali agali Yasu mana yu tiga biaga hearu bibahende bi wali agali marubi ti gi timbuniore hai hene.

### *Agalime nabiagane alebi nahendene alebi binigo ogo*

<sup>12</sup> Wali agali heba howa abosolo biarume agalime nabiagane alebi nahendene alebi dewa bialu hene. Yasu mana yu tiga bu hearu bibahende Anduane Homogonaga anda hane mbira mini Solomononaga Hane wiagoria ti mandagi ngoai haga hene. ✧ <sup>13</sup> Ani ngoai haga biyagola wali agali hearume Yasu mana yu tiga biaru de hondowa ti bayaleore ka lalu tinaga mini yaraga halu hene. Ani biya tiraga wali agali maru tagira hearume Yasu mana yu tiga bu hearu heba holene gi hene. <sup>14</sup> Anigoyu wali agali dewa hearume Anduane Homogohondo mini mbiraore wigi bialu Yasu aria hearuha ha tago haga bini. ✧ <sup>15</sup> Abosolo biarume biabe ogoni bialu heago hondowa tigua wali agali warago bo wiaru yalu ibuwa harigani mo ngelaga bini. Paliagane dagianibi tamungurunibi mo pale lowa hariga ti paleagoha Pida ibalu hariga ti padagoha ibiragola ibunaga muninime ti ge helo lowa ani ngelene. ✧ <sup>16</sup> Dindi maru Yarusaleme kaware wiaruha howa wali agali dewaoreme tinaga damene warago bo wiarubi dama daragahe hearubi yalu ibiyagola bibahende mo dabi halu bayale hai hene. ✧

### *Dahuliyalime abosolo biaru garabaya golope henego ogo*

<sup>17</sup> Ani biyagola loma binigo mo miaga haguane timbuni heagobi Sadiusi agali hearu ibu heba hagarubi tigua abosolo biarume bialu heago hondowa henge timbuniore lowa mo tandaga hole manda bini. ✧ <sup>18</sup> Ani manda buwa tigua abosolo biaru minu yalu puwa garabaya andaha helene. <sup>19</sup> Ani helearia ogoningi mbiraga Anduane Homogonaga dahuliyali mbirame garabaya anda panga dugualu abosolo biaru tagira haru puwa lalu. ✧ <sup>20</sup> Anduane Homogonaga andaha puwa holene gahengenaga mana wali agali lamilimu, lene. <sup>21</sup> Ani layago hale howa muna biyagola abosolo biarume Anduane Homogonaga andaha anda puwa wali agalihondo mana lawai halu hene.

Loma binigo mo miaga haguane timbuni heagobi ibu heba haga hearubi tigua Ganisolo te lole Yu wali agalinaga agali ala hene miniwi hearu mo ngoai hene. Mo ngoai howa tigua lalu, Garabaya andaha howa agali biaru haru ibilo lamule pudaba, lene. <sup>22</sup> Ani layagola mamage haga biarume garabaya andaha puwa handalu hearia abosolo biaru naheya handala Ganisolo agali biaru lamule dai bini. Dai buwa tigua lalu, <sup>23</sup> Iname garabaya andaha puwa panga logo ndibu lo wiagobi mamage haga hearubi de handarima. Panga dugualu anda puwa agali biaru naheoreyane ti langule dai birima, lalu lamini. <sup>24</sup> Ani lamiyagola hale howa loma binigo mo miaga haguane hearubi Anduane Homogonaga anda mamage hagarunaga haru haga agali heagobi tigua abosolo biaru agua biyabe toba howa mini burugulo hene. <sup>25</sup> Ti mini burugulo hearia agali mbira ibuwa ibugua lalu, Hale hadaba. Agali garabaya andaha garabaya bu helarimiru ti Anduane Homogonaga andaha pu howa wali agalihondo mana lawai

✧ 5:12: Ab 2.43, 4.32, 14.3, Lm 15.19, 1 Ko 12.12 ✧ 5:14: Ab 2.41, 21.20 ✧ 5:15: Md 9.21, 14.36, Ab 19.12  
✧ 5:16: Mg 6.56, Ab 19.11-12 ✧ 5:17: Ab 4.1-2, 4.6 ✧ 5:19: Ab 12.7-10, 16.26

halu ka, lene. <sup>26</sup> Ani layagola mamage haru haga biago ibu mamage haga agali heba pialu abosolo biaru hearia puwa haru dai bini. Wali agali dewa hearume ina ege toleme bolebirago lowa tigua abosolo biaru hendore haru dai bini.✧

*Abosolo biarume gi nahe howa bi lenego ogo*

<sup>27</sup> Haru dai buwa tigua abosolo biaru Ganisolo agali biaru bereagoria handade ho helene. Helayagola loma binigo mo miaga haguane timbuni biagome tigua bi lelo mo bi la halu lalu, <sup>28</sup> Yasu mini lalu mana lawai holene nawi lalu hongo howa langirimago. Ogoni mo wahalu mana biagoni Yarusaleme wali agalihondo loyogo larimi. Inahondo, Agali o homayagoni tigua barimi, loa ho kamigoni, lene.✧

<sup>29</sup> Ani layagola Pidabi abosolo marubi tigua ladai bialu lalu, Agalime laradagua ndo Ngode Datagaliwabehanda laradagua buleberama.✧ <sup>30</sup> Tigua Yasu homelo ira bangani ba para harimigola howa ina mamalinaga Ngode Datagaliwabe kago ibugua Yasu mo heya hene.✧ <sup>31</sup> Yasu ibu Haru Hagabi Pele Ngiagabi helo Ngode Datagaliwabehanda ibu yaraga haluibunaga gi tigahayagi berelene. Ngode Datagaliwabehanda ani biyago irane ogo. Isaraele wali agalime mini beregedelobi ko biyago domo wahelobi ani bini.✧ <sup>32</sup> Inamebi Ngode Datagaliwabehandaibunaga bi mana biaga karuhondo Dinini miyago ibuguabi ani biyagoni de hondowa latagi halu hagaru ina kamagoni, lalu lamini.✧

*Gamalielehanda bi lenego ogo*

<sup>33</sup> Bi ani layago hale howa Ganisolo agali biarume keba timbuni halu abosolo biaru homelo bo waholene nga lo manda bini.✧ <sup>34</sup> Ani manda bialu hearia Perisi agali mbira Mana lo winigo lawai haga henego mini Gamaliele ibu heyini. Wali agali bibahende hearume ibu agali mini lene ka laga hene. Ibugua heyuwa lalu, Agali biaru tagira haru pudaba, lowa <sup>35</sup> Ganisolo biaruhondo lalu, Isaraelealiru-o agali uruni homelo bo waholene nga larimigo lone bayuwa manda bilimu. <sup>36</sup> Abale agali mbira mini Teudasa ibuwa ibugua lalu, I agali timbuniore kogoni, layagola howa agali dewa handari maria (400) agima ti ibuha ho gimbu bini. Gabumaneme ibu homelo bayagolaibunaga talima piaga biaru purogo lalu mana lawai hayagobi ereba hai hene.✧ <sup>37</sup> Ani biyagola howa mani gabumaneme yasia layangi Galiliali mbira mini Yudasa ibini. Ibuwaibunaga bime wali agali dewa ibuha yamiai halu hearia gabumaneme ibubi homelo bo wahayagolaibunaga talima piaga biarubi purogo lai hene.✧ <sup>38</sup> Ani binigo áyu agali o biaru heba te larimago tihondo mbira bia nabi wahalu helalimu. Agalime manda biagadagua bialu kayagua mana ogoni ereba holebira.✧ <sup>39</sup> Ani ndo mana ti bialu kago tene Ngode Datagaliwabe howa bialu kayagua iname Ngode Datagaliwabela waitigi howa wayali habe nahe holeberama, lalu Gamalielehanda lene.✧

Ibugua ani layagola hale howa Ganisolo agali biarume ibugua layadagua bulene nga manda bini.

*Abosolo biarume Yasu mininaga taga pani turu howa nenego ogo*

<sup>40</sup> Ani manda buwa tigua abosolo biaru olowa ibiyagola ti minu bowa lalu, Yasu mini lalu mana ogoni lone lawai nahalimu, lalu ti golope hene.✧ <sup>41</sup> Ani biyagola abosolo biarume Ganisolo bereagoria howa tagira puwa ti Yasu mininaga taga pani tandaga nolene Ngode Datagaliwabehanda ngiyago mitangi bialu turu timbuni halu pene.✧ <sup>42</sup> Ani buwa horo bibahendengi Anduane Homogonaga andaha howabi wali agali andagaruha howabi tigua Bi Mana Debene lawai halu, Yasu ibu Mbirali Dabo Helenega ka, lalu lamialu haabo hene.✧

✧ 5:26: Md 14.5, 21.26 ✧ 5:28: Md 27.25, Ab 2.23, 2.36, 4.18, 7.52 ✧ 5:29: Ab 4.19 ✧ 5:30: Ab 3.15, 10.39, 13.29, Ga 3.13, 1 Pi 2.24 ✧ 5:31: Ab 2.33-34, 3.15, Eb 1.20, Pb 2.9, Hi 2.10, 12.2 ✧ 5:32: Yo 15.26-27, Ab 1.8, 2.4, 10.44 ✧ 5:33: Ab 2.37, 7.54 ✧ 5:36: Ab 21.38 ✧ 5:37: Lg 2.1-2 ✧ 5:38: Ais 8.10, Md 15.13 ✧ 5:39: Lg 21.15, Ab 7.51, 9.5, 1 Ko 1.25 ✧ 5:40: Ab 4.18 ✧ 5:41: Md 5.10-12, 1 Pi 4.13 ✧ 5:42: Ab 9.22, 17.3

## 6

### *Biamogo biaga agali kariali dabene go*

<sup>1</sup> Horo uruningi Yasu talima piaga dewa ho tago haabo hayagola Yu wali agali Girigi bi laga maru hearume Hiburu bi laga maru hearu heba lai lalu hene. Lai lalu howa lalu, Tigua horo bibahendengi tomo mbiraleru tale bigi bialu howa inanaga wali dalo bedaru embeda haga beramili, lalu lai lene. ✧ <sup>2</sup> Ani layagola abosolo homberiali (12) biarume wali agali Yasu mana yu tiga bu hearu bibahende mo ngoai howa lalu, Ina abosolo kamarume tomo mbiraleru tale bule Ngode Datagaliwabenaga bi mana lamulene go yu waharimayagua nakarulapedago. <sup>3</sup> Anigo inanaga hamene mbaliniru tigua tí aria agali kariali mini leneru Ngode Datagaliwabe Dinini tolaihe mini gigabiwiru hondowa agali urunibi karu dabalimu. Dabowa biabe ogoni tigua haru helo helamiya, lene. ✧ <sup>4</sup> Ani lowa lalu, Iname nde Ngode Datagaliwabehondo bi lolenebi wali agalihondo ibunaga bi mana lamulenebi ogoni hangu bulumayanaga ani helamiya, lene.

<sup>5</sup> Ani layagola wali agali bibahendeme, Bi ogoni karulapedago, lai hene. Ani lowa tigua Sibeni dabene. Sibeni ibu Ngode Datagaliwabehondo mini mbiraore wulenebi Ngode Datagaliwabe Dininibi ibuha tolaihe hene. Sibeni dabowa tigua Pilibi Porogorasa Nigano imaru Timono Pamenasa Nigolasi uruni ti dabene. Nigolasi ibu Andio goali howa alaore Yu wali agalinaga mana mo yinigo ti heba ho gimbu bu hene. ✧

<sup>6</sup> Bibahende ngoai ho hearume agali ti dabayaruru abosolo hearia haru pu helayagola abosolo biarume Ngode Datagaliwabehondo bi lowa agali dabayarunaga hagianeni gi wini. ✧

<sup>7</sup> Ani biyagola howa Ngode Datagaliwabenaga bi mana loyogo lene. Yarusalemeni Yasu talima piaga wali agali dewaore ho tago haga bini. Loma binigo mo miaga agali dewa hearumebi Yasu mana yu tiga bini. ✧

### *Yu agali marume godi lole Sibeni minu yalu penego go*

<sup>8</sup> Ngode Datagaliwabenaga biamogo bia holenebi hongo holenebi Sibeniha tolai hayagola ibugua wali agali heba howa agalime nabiagane alebi nahendene alebi bialu hene. ✧ <sup>9</sup> Ani biyagola agali marume Sibeni baba lai lalu hene. Yu agali o biaru ti ngoai hagane anda mbira mini Golope Hene Agalirunaga Anda ogoninaga aria hene. Agali uruni ti Sairini howabi Alegandaria howabi agali maru Silisia howabi Esia howabi ibu howa tigua Sibeni baba lai lalu hene. \* ✧ <sup>10</sup> Lai lalu howa Ngode Datagaliwabe Dinini ibugua Sibeninaga mini mo gigabia hayagola Sibenihanda bi layago tigua bi layagome lo dambi nahabehe hene. ✧ <sup>11</sup> Lo dambi nahabeheyagola tigua agali marume nde lelonaga tihondo muni mini. Muni miya handala puwa tigua lalu, Sibeni ibugua Mosese Ngode Datagaliwabela mege bialu mana layago hale harima, lene. ✧ <sup>12</sup> Anidagua biyagome wali agali hearubi agali ala hene miniwi hearubi Mana lowinigo lawai haga hearubi mo keba hai hene. Mo keba hayagola tigua Ganisolo agali hearia Sibeni minu yalu pene. <sup>13</sup> Ani buwa tigua agali marume ke halu nde lelo haru ibini. Haru ibiyagola tigua ke howa lalu, Agali o kagonime Anduane Homogonaga anda loma bia hene biagobi Mosese heneyangi Mana lowinigobi mege bialu bi ko laabo haga ka. ✧ <sup>14</sup> Ibugua au laya, Nasareteali Yasuhanda Anduane Homogonaga anda ogoni giallo wahai halu mamalinaga mana Mosesehandu lowinigo mo aribia holebira, layago iname hale harima, lene. <sup>15</sup> Bi ani layagola hale howa Ganisolo agali bi lalu berearu bibahendeme Sibeni handaya halu hearia ibunaga dengui dahuliyalinaga ale hearia de hendene.

✧ **6:1:** Ab 2.41, 4.35, 5.14, 9.29 ✧ **6:3:** Man 1.13, Ab 1.21, 16.2, 1 Ti 3.7 ✧ **6:5:** Ab 8.5 ✧ **6:6:** Ab 13.3, 14.23

✧ **6:7:** Yo 12.42, Ab 2.41, 12.24, 16.5, Kl 1.6 ✧ **6:8:** Ab 2.43 \* **6:9:** Agali uruni ti ala garabaya biabe ale bialu henego mani golope howa tigua ngoai hagane anda ogoni bu hene. Ani buwa tigua anda ogoninaga mini Golope Hene Agalirunaga Anda wini. ✧ **6:9:** 2 Ti 1.15 ✧ **6:10:** Ais 54.17, Lg 21.15, Ab 5.39 ✧ **6:11:** Md 26.59-61

✧ **6:13:** Yar 26.11



## 7

*Sibenhanda Ganisolo agali biaruhondo bi lenego ogo*

<sup>1</sup> Loma binigo mo miaga haguane timbuni heagome Sibenhondo lalu, Tigua bi larago henene larabe, lene.

<sup>2</sup> Ani layagola Sibenhanda ladai bialu lalu, Aba hameneru-o bi larogo hale hadaba. Ina mamali Abarahama ibu Haranaha nape Mesobodemiani hearia Ngode Datagaliwabe mini daliga taraore baya buruguleore kago ibu ha pani hene. ✨ <sup>3</sup> Ha pani howa ibugua Abarahamahondo lalu, Inaga dindibi damenerubi helalu dindi mbira ina walia holeberogoha pobe, lene. <sup>4</sup> Ani layagola hale howa Abarahama ibu Kaladia dindi wahalu Haranani hole pene. Ibu aba homayagola howa Harana wahalu dindi áyu tí kamigoha Ngode Datagaliwabeanda, Hole pu, layagola ibu hene. ✨ <sup>5</sup> Ogoningi Ngode Datagaliwabeanda Abarahamahondo dindi tu wuwa emeneorebi mbira nami howa ibugua, Dindi ogoni íbi inaga aguanenebi tí halimulo ngulebero, lalu lowini. Ngode Datagaliwabeanda bi ogoni layago Abarahama waneigini naheangi lowini. ✨ <sup>6</sup> Ngode Datagaliwabeanda Abarahamahondo bi lenego ogo, Í aguaneneru mali handari maria (400) dindi tarani howa garabaya biabe ale bia halu kagola dindi tara agalirume ti mo tandaga holebira. ✨ <sup>7</sup> Ani bialu howa ti garabaya biabe ale bilo bia haga wali agaliru ina ti pani mulebero. Ani berogola í aguanene biaru ti dindi tara wahalu dindi ogoriani ibuwa tigua inaga mini yaraga halu holebira, lalu Ngode Datagaliwabeanda ani laya, lene. ✨ <sup>8</sup> Sibeni ibugua laabo halu lalu, Ngode Datagaliwabeanda habo nalolene bi ogoni lo wiai howa ogoninaga manane wialu ibugua Abarahamahondo dongone podo mabu biaga mana bulene mo wini. Anigo Aisaga ibu aiyahanda taba hanayagola howa horo haliningi Abarahamahanda Aisaganaga dongone podo mabu bini. Ani biyadagua maha Aisagahanda Yagabanaga dongone podo mabu bini. Mahaore Yagaba ibuguabi ina Yu wali agali kamarunaga mamali homberiali (12) biaru emene galini howa tinaga dongone podo mabu biai haga hene, lalu Sibeni ibugua lene. ✨

<sup>9-10</sup> Sibenhanda lalu, Inanaga mamali beriali (11) urunime hombeane Yosebehondo handabe manga howa henge lalu ibu Iyibi dindiha garabaya biabe ale bilo agali maru hearuhondo muni ngidaba lowa ti muni mini. Yosebe ibu genda yu holene dewa wiagoria hearia Ngode Datagaliwabeanda ibu heba howa biamogo bini. Yosebe ibu Iyibi wali agalinaga kini hearia haru piyagola ibugua mana bayale bilobi mini gigabiwi helobi Ngode Datagaliwabeanda mini. Ani biyagola howa Iyibi wali agali hearubi kini andagaha wali agali hearubi ti bibahende haru helo kini biago ibugua Yosebe dabo helene. ✨ <sup>11</sup> Ani biyagola howa Iyibihabi Kenanahabi gaea timbuni bialu hina gari piyagola wali agali hearu tandaga nalu hene. Inanaga mamali biarume tomo nolene hai bialu hearia mbira handa walia nahe hene. ✨ <sup>12</sup> Handa walia nahe howa Iyibini tomo nga layago hale howa Yagaba ibugua ibu igini inanaga mamali biaruhondo, Tomo mo pudaba, lene. ✨ <sup>13</sup> Maha halu mende mo pialu hearia Yosebeanda ibu hameneruhondo, Í Yosebe kogoni, lalu la pani hene. Ani layagola howa Yosebe dameneru ka layago kini biagome hale hene. ✨ <sup>14</sup> Yosebe aba Yagababi ibu damene heba lamaga halu pira kariani duria (75) ti Iyibi ibilo Yosebeanda bi lawia hene. ✨ <sup>15</sup> Lawia hayagola ti bibahende Iyibini anda pu haabo howa mani Yagaba ibu iginirubi ti halu homai hene. ✨ <sup>16</sup> Yagaba Yosebela libunaga tingini hora hole Segeme dindi yalu dai bini. Dindi ogoniha ala Abarahamahanda Hamo iginihondo muni mialu homa hora holenaga homali dindi tu wa minigoria hora hene. ✨

✨ **7:2:** Pig 11.31 ✨ **7:2:** Pig 12.1 ✨ **7:4:** Pig 11.31, 12.4 ✨ **7:5:** Pig 12.7, 13.15, 15.3, 15.18, 17.8, 26.3, 48.4, Man 2.5 ✨ **7:6:** Pig 15.16, Har 12.40, Ga 3.17 ✨ **7:6:** Pig 15.13-14 ✨ **7:7:** Har 3.12 ✨ **7:8:** Pig 17.10-14, 21.2-4, 25.26, 29.31-35.18 ✨ **7:9-10:** Pig 37.11, 37.28, 39.2, 39.21 ✨ **7:9-10:** Pig 41.37-41 ✨ **7:11:** Pig 41.54, 42.1-2 ✨ **7:12:** Pig 42.1-5 ✨ **7:13:** Pig 45.1, 45.16 ✨ **7:14:** Pig 45.9-10, 45.17-18, 46.27 ✨ **7:15:** Pig 46.1-7, 49.33 ✨ **7:16:** Pig 23.3-16, 33.19, 50.7-13, Yos 24.32

<sup>17</sup> Ngode Datagaliwabehanda Abarahamahondo bi lowinigo lola holene tu kaware hayagola ina mamali Iyibini hayaru dewaore au loabe tobahe ho dame bu hene. <sup>18</sup> Ani bu heangi kini mende ibu Yosebe manda nabi heagome Iyibi wali agali handame ho hene. ✠✠ <sup>19</sup> Ibugua ina mamali mo hondo halu ti tandaga nelu, Tínga waneigini galiru homelo tagiraha wahadaba, lene. ✠ <sup>20</sup> Ogoningi wali mbirame gali bayaleore mbira mini Mosese taba henene. Taba honowa ibu aiyahanda gali biago hondo halu ege tebirani ibu andaga tamuha bayuwa ngelo do ho berene. ✠ <sup>21</sup> Ani buwa tagiraha wahearia kini waneme ibu handa walia howa mondo bialu, I igini, lowa hondo hene. ✠ <sup>22</sup> Mondo buwa tigua Mosesehondo Iyibialinaga mana gigabi wiago lawai hayagola bi lolenebi mana bulenebi gibi manda biai howa ibu agali timbuniore hene.

<sup>23</sup> Moseseibunaga mali pira maria (40) hayagola howa ibu damene Isaraele wali agali abi kabe hondole ti hearia polene manda bialu pene. ✠ <sup>24</sup> Puwa ibugua Iyibi agali mbirame Isaraele agali mbira balu hearia de hendene. Hondowa ibugua Isaraele agali biago pele mialu Iyibi agali biago bo wahene. <sup>25</sup> Mosesehanda manda bialu, I togoni howa Ngode Datagaliwabehanda Isaraele wali agaliru golope holebira ti ani manda bu holebirago, Mosese ibu mitangi bini. Isaraele wali agaliru ti ani manda nabi hene. <sup>26</sup> Ani buwa egerebalene Isaraele agali kiralime gungu bialu hearia hondowa Mosesehanda mo hada hole manda bini. Ibugua lalu, Ogo labo-o hale hadaba. Libu gungu berabigo agibe. Libu hamenela ndobe, lene. <sup>27</sup> Ani layagola mendeali gungu biaga tene biagome Mosese hela amu howa ibuhondo lalu, Ina haru hagabi daba ki biagabi habelo helayadago aiwabe. <sup>28</sup> Abe ina Iyibi agali homelo bo waharidagua ibi bo wahole kebe, lene. <sup>29</sup> Bi ani layago hale howa Mosese ibu Iyibi wahalu Midiana dindiha hole ibida pu hene. Midianani howa ibu igini kira hene. ✠

<sup>30</sup> Mali pira maria (40) howa Mosese ibu dindi koni Hari Sainai kaware heagoria ira mbira hungu bialu hearia dahuliyali mbira Mosese hendelo ha pani hene. ✠ <sup>31</sup> Ani biyago hondowa Mosese mogo lalu bayuwa de hondole ira deagoria kaware pene. Kaware pialu hearia Anduane Homogonaga bi hale hene. <sup>32</sup> Anduane Homogohanda lalu, Inaga mamali Abarahama Aisaga Yagaba imaru tinaga Ngode Datagaliwabe i kogoni, lene. Bi ani layuagola Mosese ibu gi timbuni howa duru lowa de hondolene gi hene. <sup>33</sup> Anduane Homogohanda ibuhondo lalu, Dindi i kegoni ini loma bia ho winini kego i ge su hadalu wibe. ✠ <sup>34</sup> Iyibini howa inaga wali agali karu tandaga timbuni nalu kago ina de hendedo. Tigua ulu lalu kago hale howa ina pele mule daluwa ko. I Iyibi poleberegogo pole ibu, laya, lene.

<sup>35</sup> Sibenihanda layadagua laabo halu lalu, Mosese ogoni Isaraele wali agalime ibuhondo handabe manga howa lalu, I haru hagabi daba ki biagabi habelo helayadago aiwabe, tigua lene. Dahuliyali mbira ira hungu biyagoria ha pani hayagome biamogo bialu Mosese ogoni ti haru helobi pele milobi Ngode Datagaliwabehanda dabalu ibilene. ✠ <sup>36</sup> Iyibi howabi iba solowara mini Iba Daramabi bereagoria howabi mali pira mariani (40) dindi ko yobi wiagoria howabi Mosese ibugua agalime nabiyagane alebi nahendene alebi bialu Iyibi howa Isaraele wali agali haru tagira pialu howa ani bini. ✠ <sup>37</sup> Mosese ogoni ibugua Isaraele wali agalihondo lalu, Ngode Datagaliwabehanda i dabo helayadagua tini ariaha howa ibuguaibunaga mana latagi haga mbirali ti heba helo dabo helolebira, lene. ✠ <sup>38</sup> Mosese ogoni ibu Isaraele wali agali ti dindi ko yobiha ngoai ho heagoria ti heba hene. Mosese ina mamali heba heagola dahuliyali mbiralime Hari Sainai heagoria howa ibuhondo bi laminigo ibubi Mosese heba hene. Ngode

✠ **7:18:** Pig 15.5, Iba 105.24-25, Ab 7.5-7 ✠ **7:18:** Har 1.7-8 ✠ **7:19:** Har 1.10-22 ✠ **7:20:** Har 2.2, Hi 11.23  
 ✠ **7:21:** Har 2.3-10 ✠ **7:23:** Har 2.11-15 ✠ **7:29:** Har 2.21-22, 18.3-4 ✠ **7:30:** Har 3.1-10 ✠ **7:33:** Yos 5.15  
 ✠ **7:35:** Har 2.14, 14.11-12, Dag 20.16 ✠ **7:36:** Har 7.3, 12.41, 14.21, 16.1, 16.35, Dag 14.33, Iba 105.27 ✠ **7:37:** Man 8.15, 8.18, Md 17.5, Ab 3.22

Datagaliwabenaga haabo holene mana inahondo langule Mosese ibugua hale howa yu tiga bini.✠

<sup>39</sup> Mosesehanda bi layago ina mamali biarume hale habe manga howa ibu helope hene. Helope howa tiga tinaga minime Iyibi dai bule hamelo hene.✠ <sup>40</sup> Ani hame lowa tiga Aronohondo lalu, Iyibiha dai bulumaya mbirale mbirame ina haru helo bi pupu wulenaga gime wabibe. Ina Iyibi howa tagira ibulumaya Mosesehanda haru hayago ai ibu pu ereba hayadago. Agoha piyadabe manda nabi kama, lene.✠ <sup>41</sup> Ani lowa ogonongi tiga mbirale nogo bulumaga igini ale gime wabu helowa o biagohondo nogo bulumaga sibiru bo mialu hene. Inaneme bayale wabirimada, lowa ti bi pupu wialu tomo dewa dawa nene.✠ <sup>42</sup> Ani biyagola Ngode Datagaliwabehanda ti erembira mialu tiga hari daliganaga yakundiruhondo bi pupu wilo helene. Ogonidagua Ngode Datagaliwabe mana latagi haga hearume mbugani gilibu winigo ogo,✠ Isaraele wali agaliru-o mali pira mariani (40) dindi koha howa nogo bulumagabi sibibi bo mirimigo ihondo ndo bo ngirimi.

<sup>43</sup> Dama Molegenaga balai anda yalu piriimi.

Dama Lebananaga yakundi ale mbira ogonibi wabuwa yu ibaga bu harimi.

Dama uruni bi pupu wulenaga wabirimigo

awe marume ti minalu Babilono dindi amuraha haru pelo, Haru pudaba, lelebero, lalu gilibu nga, lalu Sibenihanda lene.

<sup>44</sup> Ibugua laabo lalu, Inanaga mamalime dindi koha howa Ngode Datagaliwabe ti heba kago manda bule tiga Balai Anda wabu helene. Balai Anda ogoni Ngode Datagaliwabehanda Mosesehondo, Ogobi wabibe, lalu walia hayagobi tiga wabini.✠

<sup>45</sup> Maha inanaga mamali iginirume ti aba pani ho aribia howa Balai Anda ogoni tiga yu aribia lalu Yosua heba pene. Yosua heba pialu heagola Ngode Datagaliwabehanda bamba howa dindi tarani wali agali hearu bo ba tagi haga biyagola tiga dindi karulama pialu Balai Anda biago yalu puabo hene. Ogonongi howa Balai Anda biago dindi ogoriani helenego Debidi heneyangi haabo hene.✠ <sup>46</sup> Debidihanda Ngode Datagaliwabe mo turu howa lalu, I Yagabanaga Ngode Datagaliwabe howa habelonaga anda buabago buabe, lene.✠ <sup>47</sup> Ani lenego anda nabi heagola Solomonu ibugua anda mbira Ngode Datagaliwabenaga helo lowa bini.✠

<sup>48</sup> Ngode Datagaliwabe Daligaorene Daliga kago ibu anda agali gime biniruha nahaga ka. Ibunaga mana latagi haga mbirali heagome bi lo ngago ogo,✠

<sup>49</sup> Anduane Homogo ibugua lalu, Dahuliya andaga ina haru holenenaga biragane wialu✠✠

dindi bibahende ngaru inaga ge dogolope ho wiagane ngago tiga ini holiyanaga anda abi ale buleberemibe.

I halo biruliya henge agoha ngelaho kamibe.

<sup>50</sup> Uruni bibahende ina wabirugo ndoyabe, lene lalu gilibu nga, lene.

<sup>51</sup> Sibeni ibugua lalu, Ti wali agali bu mini giambeore kami. Tinaga bu mini Ngode Datagaliwabe mitangi nabiaga kagobi kami. Ibunaga mana hale habe manga howa hale nahagaore kami. Ti tinaga mamali henegobiore howa tiga Ngode Datagaliwabenaga Dininihondo manga ho haabo kamigoni.✠ <sup>52</sup> Ngode Datagaliwabe mana latagi haga

✠ **7:38:** Har 19.1-20.17, Man 5.1-33, Ais 63.9, Ab 7.53, Lm 3.2, Ga 3.19, Hi 2.2 ✠ **7:39:** Dag 14.3 ✠ **7:40:** Har 32.1, 32.23 ✠ **7:41:** Har 32.2-6, Man 9.16, Iba 106.19 ✠ **7:42:** Iba 81.12, Yar 19.13, Ese 20.25, 20.39, 2 Te 2.11 ✠ **7:44:** Har 25.9, 25.40, 26.30, Hi 8.5 ✠ **7:45:** Yos 3.14-17, 18.1, 23.9, Neh 9.24, Iba 44.2, Ab 13.19 ✠ **7:46:** 1 Sml 16.1, 2 Sml 7.1-16, 1 Kin 8.19, 1 Bit 17.1-14, Iba 89.19, 132.1-5 ✠ **7:47:** 1 Kin 6.1-38, 8.20, 1 Bit 17.12, 2 Bit 3.1-17 ✠ **7:48:** 1 Kin 8.27, 2 Bit 2.6, 6.18 ✠ **7:49:** Md 5.34-35, 23.22 ✠ **7:49:** Ais 66.1-2 ✠ **7:51:** Har 32.9, LBM 26.41, Man 10.16, Ais 48.4, 63.10, Yar 6.10, 9.26

heneru mbirali t́naga mamalime mo tandaga nahe aiyabe. Bamba Ngode Datagaliwabe mana lama ibiyarume, Ngode Datagaliwabenaga Biabe Bia Haga mini tigabiwi ibuni ibulebira, laga biyagola t́naga mamalime bo wahaga bini. Ai t́gua nde agali mini tigabiwi o biago ndelowa homelo bo waharimi. ✧ <sup>53</sup> Ngode Datagaliwabehanda ibunaga mana lowinigo dahuliyali togoni howa ngingo ogoni t́gua yu howa nabiga kami, lalu Sibenihanda lene. ✧

*Sibeni homelo toleme bo wahenego ogo*

<sup>54</sup> Sibenihanda bi ogoni layago hale howa Ganisolo agali biarume keba timbuni howa ne gengero lene. ✧ <sup>55</sup> Ani biyagola Sibeniha Ngode Datagaliwabe Dinini tolaihe howa ibugua dahuliya andaga handadaga halu Ngode Datagaliwabenaga wá taraore holenebi Yasu ibu Ngode Datagaliwabenaga gi tigahayagi heagobi de hendene. ✧ <sup>56</sup> De hondowa ibugua lalu, De handadaba. Dahuliya andaga dugua ho ngago. Agali Hole Ibiyago ibu Ngode Datagaliwabenaga gi tigahayagi kago de hendedo, lene. ✧

<sup>57</sup> Ani layagola Ganisolo agali biarume ga timbuni lalu gi hondoneme hale hariga hangai hagahaga buwa ti bibahendeme ibu abale minini. <sup>58</sup> Sibeni minalu tanonaga pabe tagirahayagi gililo yalu puwa ibu homelo toleme bene. Bayarume tinaga labolabo daliga karulagane igiri daliha mbira heago mini Solo ibugua wu helo golo mini. ✧ <sup>59</sup> Tigua Sibeni toleme balu heagola dege ibugua Anduane Homogo olalu lalu, Anduane Homogo Yasu-o inaga dinini yamibe, lene. ✧ <sup>60</sup> Ani lowa ibugua ge duli hanga ho biruwa dalimu olalu, Anduane Homogo-o tigua ko biragoninaga pani nami wahabe, lene. Ani lowa ibu homene. ✧

## 8

<sup>1</sup> Sibeni bo wahayagonaga Solohanda, Karulape birima, lo manda bini. ✧

*Solohanda Keriso hameigini hearu mo tandaga henego ogo*

Horo ogoningi howa Yasu mana yu tiga biaga Yarusalemeni hearu tandaga timbuniore nalu hene. Ti bibahende ibida pialu Yudiahabi Samariahabi purogo lene. Abosolo biaru ti dege pu nabi Yarusalemeni hondo hene. <sup>2</sup> Agali maru mini tigabiwi hearume dugu timbuni bialu Sibeninaga tingini hora hene.

<sup>3</sup> Ani biyagola Solohanda Yasu mana yu tiga biaga bibahende biaru bo wahole manda bini. Ani manda buwa anda bibahendeha piai halu Yasu mana yu tiga biaga hearu wali agalibi gililo yalu tagira pialu garabaya andaha ba andanda bini. ✧

*Samaria wali agalihondo Bi Mana Debene laminigo ogo*

<sup>4</sup> Yasu mana yu tiga biaga biaru ibida purogo layarume Yasu mana lamima pene. ✧

<sup>5</sup> Pilibihanda Samaria dindini tano timbuni wiagoria puwa wali agali hearuhondo Mbirali Dabo Helene ibulebira lowinigo íbu ka lamialu hene. <sup>6</sup> Ani lamiyagola wali agali dewa hearume Pilibihanda agalime nabigane ale biyago de handalu ibugua bi layago bayuwaore hale ho hene. <sup>7</sup> Dama dewa daraga hearia wara tagi haga biyagola ga lalu tagira pugu bini. Wali agali kuduguhe wiarubi ge kohe hearubi mo dabi haga bini. ✧

<sup>8</sup> Ani biyagola tano ogoriani wali agali hearu turu timbuni ho hene.

<sup>9</sup> Dindi ogoriani agali gamuyi mbira mini Saimono henego ibugua gamu tara biaabo hayago hondowa Samaria wali agali hearume mogolo hene. Saimono ibugua, I agali timbuniore kogoni, layagola howa <sup>10</sup> wali agali mini lenebi mini nalenebi ta nabi bibahende hearume ibugua bi layago bayuwa hale hene. Bibahende biarume lalu, Agali o biago Ngode Datagaliwabenaga hongo holene karulo kago mini Hongo Timbuni ibu

✧ **7:52:** 2 Bit 36.16, Md 21.35, 23.31, 1 Te 2.15 ✧ **7:53:** Har 20.1, Ab 7.38, Ga 3.19, Hi 2.2 ✧ **7:54:** Ab 5.33 ✧ **7:55:** Md 22.44, Ab 2.33-34, 5.31, 6.5 ✧ **7:56:** Ese 1.1, Dan 7.13, Md 3.16, Ab 10.11, Kl 3.1 ✧ **7:58:** Man 13.9, Lg 4.29, Ab 6.13-14, 22.20, Hi 13.12 ✧ **7:59:** Iba 31.5, Lg 23.46 ✧ **7:60:** Md 5.44, Lg 23.34, Ab 9.40, 21.5 ✧ **8:1:** Ab 7.58, 8.4, 11.19, 22.20 ✧ **8:3:** Ab 9.1, 9.13, 9.21, 22.4-5, 26.9-11, 1 Ko 15.9, 1 Ti 1.13 ✧ **8:4:** Md 10.23, Ab 6.5, 11.19 ✧ **8:7:** Md 10.1, Mg 16.17



kagoni, laga hene. <sup>11</sup> Saimono ibugua bambaore howa gamu tara biaabo hayago wali agali biarume mogo lowa ibugua bi layago tigua bayuwa hale hene. <sup>12</sup> Pilibihanda tihondo Ngode Datagaliwabehanda Handame Ho Kagonaga bi mana debenebi Yasu Keriso ibu ka lalubi lamiyagola tigua yu tiga biyagola wali agali uruni baboraya bini. <sup>13</sup> Saimono ibubi yu tiga biyagola baboraya bini. Baboraya buwa ibu Pilibiha hapara ho howa Pilibihanda nahendene alebi agalime nabiagane alebi biyagola hondowa Saimono ibu mogolo hene.

<sup>14</sup> Samaria wali agalime Ngode Datagaliwabe bi mana yu tiga bu ka layago hale howa abosolo Yarusalemeni hayaru tigua Pida Yonelahondo, Libugua hondo pudaba, lene.

<sup>15</sup> Ani layagola libu Samaria wali agali Yasu mana yu tiga bu hearu hearia puwa tiha Ngode Datagaliwabe Dinini helo libugua Ngode Datagaliwabehondo bi la hene. ✧ <sup>16</sup> Ala Ngode Datagaliwabe Dinini tiha hole nadali ti Anduane Homogo Yasunaga mini degeni baboraya bu hene. ✧ <sup>17</sup> Ngode Datagaliwabehondo bi la howa Pida Yonela libugua wali agali biarunaga hagianeni gi wiyagola Ngode Datagaliwabe Dinini tiha hole dalini. ✧

<sup>18</sup> Abosolo biago labome wali agali hagianeni gi wiyagola Ngode Datagaliwabe Dinini tiha hole daliyago de hondowa Saimonohanda Pida Yonelahondo, Muni ngero, lalu, <sup>19</sup> Ina inaga gime wali agali hagianeni werogola Ngode Datagaliwabe Dinini tiha hole dalilo hongo ogoni ngilibulo, lene.

<sup>20</sup> Ani layagola Pidahanda ladai bialu lalu, Ngode Datagaliwabehanda turu howa bame ngirago munime mule manda birigo ibi inaga munibi libu haru heli dindi pilibulo. ✧ <sup>21</sup> Inaga bu mini tigabi ndo kego Ngode Datagaliwabehanda de hendedago biabe ogoni inaga ndogo ina bulene nawi. ✧ <sup>22</sup> Ko bulene manda birigonaga mini beregedalu Anduane Homogohanda domo wahelo ibuhondo bi labe. ✧ <sup>23</sup> Dimagoli holene kaubime iha tolai howa ko buleneme i dariba ho ngago de hendedo, lalu Pidahanda lene. ✧

<sup>24</sup> Ani layagola Saimonohanda Pida Yonelahondo lalu, Bi larigonidagua ihondo nabilo Anduane Homogohondo inaga la hadaba, lene. ✧

<sup>25</sup> Pida Yonela libugua Yasu Kerisohanda libuhondo biyago te lamuwa Anduane Homogonaga mana lamialu Yarusaleme dai bini. Dai bialu howa Samaria dindiha tano emene dewaruni wali agali hearuhondo Bi Mana Debene lamigi bima dai bini.

### *Pilibihanda Idiobia agali mbirahondo Bi Mana Debene laminigo ogo*

<sup>26</sup> Anduane Homogonaga dahuliyali mbirame Pilibihondo lalu, Yarusaleme howa Gasa dindi pole hariga pedadagua unurahayagi pole manda bibe, lene. Hariga ogoni dindi ko wali agali nahagaha pole peda. <sup>27-28</sup> Ani layago hale howa Pilibihanda manda manda bialu pene. Hariga o pobe layagoriani pialu hearia Idiobiali mbira de hendene. Idiobiali o biagoni ibugua agali timbuni howa Idiobia Kuini wali mini Kadesi berenegonaga muni mbirale wiaru de hondo haga hene. Ibu Yarusalemeha Ngode Datagaliwabehondo bi lole penego karisini nogo hosime gili lagane wiagoria biralu dai bialu hearia Pilibi ibu de hendene. Idiobia agali biagome karisi ogoriani biralu pialu howa Ngode Datagaliwabenaga mana latagi haga Aisaiahanda mbugani bi gilibu winigo ibugua daga lama pialu hene. ✧ <sup>29</sup> Daga lama pialu hearia Ngode Datagaliwabe Dinini ibugua Pilibihondo lalu, Karisi kaware hapara halu poradagua pialu haruru pobe, lene. <sup>30</sup> Ani layagola Pilibi ibu gerai lalu karisi piyadagua kaware hapara howa haruru pialu Idiobia agali biagome Ngode Datagaliwabenaga mana latagi haga Aisaiahanda mbugani bi gilibu wini wiago daga layuagola hale hene. Hale howa Pilibihanda ibuhondo lalu, Bi daga laregoninaga irane manda bidebe, lene.

✧ 8:15: Ab 2.38 ✧ 8:16: Md 28.19, Ab 10.48, 19.2 ✧ 8:17: Ab 6.6, 19.6, Hi 6.2 ✧ 8:20: Md 10.8, Ab 2.38, 10.45

✧ 8:21: Iba 78.37 ✧ 8:22: Dan 4.27, 2 Ti 2.25 ✧ 8:23: Hi 12.15 ✧ 8:24: Har 8.8, Dag 21.7, 1 Kin 13.6, Ya 5.16

✧ 8:27-28: Ais 56.3-7, Seb 3.10, Yo 12.20



<sup>31</sup> Ani layagola Idiobia agali biagome ladai bialu lalu, Mbiralime bi ogoninaga irane i langi nabiyagua agua manda bibehe kobe, lene. Ani lowa ibugua Pilibihondo lalu, Iya mbaliya karisini birule iraga ha, lene. <sup>32</sup> Anduane Homogonaga mbugani bi gilibu wini ibugua daga layago ogo,  
Ibu nogo sibi homelo bole haru poragolabi  
nogo sibi igini ibunaga irini podaragolabi dembola ho hagadagua  
ibu ema nabi bi nale hene. <sup>33</sup> Tigua ibu mo emene halu taga pani nelo ibunaga godi tigatiga la nahene.  
Ibu dindini holene hamaro binigo  
ibunaga aguanenenaga te aiwa labehe kabe,  
lalu gilibu wini.

<sup>34</sup> Hondo haga agali biagome Pilibihondo hale halu lalu, Ngode Datagaliwabe mana latagi haga ogonime bi o layadagoni ainaga lalu lenedabe. Ibuninaga lalu lenedabe be mendealinaga lalu lenedabe i langi, lene. <sup>35</sup> Ani layagola agali biago ibuni Anduane Homogonaga mbugani bi daga layagoria howa Pilibihanda irane lamialu Yasunaga Bi Mana Debene marubi lamima pene. <sup>36</sup> Libu harigani pialu howa iba mbira bereagoha pialu hearia hondo haga biago ibugua lalu, Iba o bedagoniha baboraya bua kogo nabulene irane mbira ngabe, lene. <sup>37</sup> Ani layagola Pilibihanda ladai bialu lalu, Inaga gubalinioreme Yasu Kerisohondo mini mbiraore wu keyagua baboraya bibehe kegoni, lene.

Ani layagola agali biagome lalu, E mini mbiraore wu ko. Yasu Keriso ibu Ngode Datagaliwabe Iginioire kagoni manda buwa yu tiga bido, lene.]

<sup>38</sup> Ani lowa hondo haga biago ibugua karisi yaga agalihondo, Hondo ha, lowa ibubi Pilibibi libu haru ibaha dalipe howa Pilibihanda ibu baboraya bia hene. <sup>39</sup> Libu ibaha howa iraga hayagola Anduane Homogo Dinini ibugua Pilibi abale minu yalu piyagola hondo haga agali biagome Pilibi lone de nahende howa ibu turu timbuniore hama pene. <sup>40</sup> Pilibihanda ibu Asododoni haruyane hondowa ibugua ibaga bialu tano bibahendeha Bi Mana Debene lamima pialu Sisaria tano anda pene. <sup>9</sup>

## 9

### *Solohanda Yasuhondo mini mbiraore winigo ogo (Abosolo 22.6-16, 26.12-18)*

<sup>1</sup> Ani bialu hea tambu Solohanda Anduane Homogonaga talima piaga hearuhondo keba howa bo wahole lowa de darama bu haabo hene. Ibugua loma binigo mo miaga haguane timbuni heago hearia puwa <sup>2</sup> lalu, Yu wali agalinaga ngoai hagane andaru hondo haga Damasagasani karuhondo muliya beba mbira gilibu ngibe. Yasunaga Harigani piaga karu wali agalibi ta nabi handa walua haruyagua minuwa Yarusaleme haru dai buliya beba ogoni gilibu ngibe, lene.

<sup>3</sup> Beba miyagola howa Solo ibu Damasagasa anda nape kaware pialu hearia abale aube tobane buwa hari daligaha howa wa timbuni hadali hene. <sup>4</sup> Ani biyagola Solo ibu odowa dindini pilope ho wiaria mbiralime lalu, Solo-o Solo-o ina i aginaga mo tandaga harilibe, layuagola ibu hale hene. <sup>5</sup> Ani layuagola Solohanda ladai bialu lalu, Anduane Homogo i ai kebe, lene. <sup>6</sup> I heyalu Damasagasa tano pobe. Anda poregola mbiralime ina bulene ngago langulebira, lene.

<sup>7</sup> Bi ani lalu hearia agali Solo heba piyaru ti bi nale ema nabi hondo halu bi layuago hale howa ti mbirali de nahende hene. <sup>8</sup> Solo ibu dindini wiaria howa heyalu de

☆ 8:31: Yo 16.13 ☆ 8:32: Ais 53.7-8 ☆ 8:35: Lg 24.27, Ab 18.28 ☆ 8:36: Ab 10.47 ☆ 8:39: 1 Kin 18.12, 2 Kin 2.16, Ese 3.12-14 ☆ 8:40: Ab 21.8 ☆ 9:1: Ab 8.3, Ga 1.13, 1 Ti 1.13 ☆ 9:3: Ab 22.6, 26.12, 1 Ko 15.8 ☆ 9:4: Md 25.40 ☆ 9:5: Ab 5.39, 1 Ko 15.8 ☆ 9:7: Ab 22.9, 26.13

ngalayagola mbirale mbira de nahandabehe hene. Nahandabeheyagola tigua ibunaga gini yalu Damasagasa haru anda pene. <sup>9</sup> Anda puwa horo tebiru Solo de nahandabehe howa tomo ibabi nane hene.

<sup>10</sup> Yasu talima piaga mbira mini Ananaiasa ibu Damasagasani hene. Ibu de gandeba handalu hearia Anduane Homogohanda, Ananaiasa, olene. Olayagola ibugua ladai bialu lalu, Anduane Homogo-o i o kogoni, lene.✧

<sup>11</sup> Ani layagola Anduane Homogohanda ibuhondo lalu, Hariga mini Tigatiga pedagoha puwa Yudasana andaga pole heyabe. Yudasana andagaha anda pialu ina Tasasali mbira mini Solo bedabe hale habe. Solo ogoni ibugua Ngode Datagaliwabhondo bi lalu bedagoni.✧ <sup>12</sup> Ibugua de gandeba mbira handalu hearia agali mbira mini Ananaiasa ibuwa ibunaga de bayale helo ibu gime ibuninaga hagianeni wiyaria handayago, lene.

<sup>13</sup> Ani layagola Ananiasahanda ladai bialu lalu, Anduane Homogo-o agali ogonime inaga wali agali Yarusalemeni hearuhondo ko timbuni biyagonaga te wali agali dewame i langiai haya.✧ <sup>14</sup> Loma binigo mo miaga haguane karume ibuhondo hongo miyagola ibugua i mitangi bialu lotu laga kamaru ina garabaya haru pole Damasagasa ogoriani minu ibiya, lene.✧

<sup>15</sup> Ani layagola Anduane Homogohanda Ananaiahondo ladai bialu lalu, Agali ogoni inaga biabe bia helo dabaru. Ibugua Isaraele wali agali karubi wali agali tara tara karubi kini karubi tigua i mini manda biai helo lamilo ina ibu dabo heledogo ina ibu karia pu.✧ <sup>16</sup> Ibugua inaga minini howa biabe bialu karia ibu tandaga timbuni nolebiragonaga inime ibu walia holebero, lene.✧

<sup>17</sup> Ani layago hale howa Ananaiasa ibu pialu Solo andaga berearia anda pene. Anda puwa ibugua Solo hagianeni gi wialu lalu, Hamene Solo-o inaga de lone bayale helobi Ngode Datagaliwabe Dinini iha tolai helobi Anduane Homogo Yasu ibuni i harigani ibalu heria ha pani hayago ibugua ihondo pu laya handala ibiru, lene.✧ <sup>18</sup> Ani layagola mbirale wena harene ale Solonaga deha howa ibira hayagola ibu lone bayale de handabehe hene. Ani biyagola Solo ibu heyuwa baboraya bini. <sup>19</sup> Baboraya buwa tomo karulape nowa ibunaga hongo ha dai bini.

### *Solo Damasagasani howa Yasu mana lamialu henego ogo*

Damasagasani howa Solo ibu Yasu mana yu tiga biaga hearu heba horo maru dauru agima hene. <sup>20</sup> Ibu ha nabi abaleore ngoai hagane andaruha pugu bialu ibugua, Yasu ibu Ngode Datagaliwabe Iginio ka, lalu hene.

<sup>21</sup> Ani layagola bibahende hale hayarume mogo lowa lalu, Yarusalemeni howa Yasu mitangi bialu lotu laga hearu bo wahalu hayago agali ogonime ndobe. Oali howabi ibugua wali agali Yasu mitangi bialu lotu laga karu loma binigo mo miaga haguane karu karia minu yu dai bule ibiya ndobe, lene.✧

<sup>22</sup> Ani layagola Solohanda hongo timbuniore howa mana lamialu hene. Lamialu howa ibugua lalu, Mbirali Dabo Helenego ibulebira lowinigo Yasu ibuore kagoni, layagola Yu agali Damasagasani hearu hale howa ibu heneneore walia harago manda buwa tigua ladai nabibehe hene.✧

<sup>23</sup> Horo dewa peagola Yu agali hearu ngoai howa tigua Solo homelo bole lo manda bialu hene.✧✧ <sup>24</sup> Ti ani lo manda bu heago hondowa mbiralime Solo lamini. Tigua Solo homelo bolenaga horombe mbiragabi Damasagasa pabe wa mabu biagonaga panga haraba bibahendeni yu haabo hene. <sup>25</sup> Ani bialu hearia mbiraga mbirungi Solonaga

✧ 9:10: Ab 22.12 ✧ 9:11: Ab 16.9, 21.39, 22.3 ✧ 9:13: Ab 8.3 ✧ 9:14: Ab 9.1-2, 9.21, 22.16, 1 Ko 1.2, 2 Ti 2.22  
 ✧ 9:15: Ab 25.13, 25.22, 26.17, 27.24, Lm 1.5, 1 Ko 15.10, Ga 2.7-8, 1 Ti 2.7 ✧ 9:16: Ab 20.23, 21.11, 1 Ko 11.23-28  
 ✧ 9:17: Ab 13.52, 22.12-13 ✧ 9:21: Ab 8.3, Ga 1.13, 1.23 ✧ 9:22: Ab 17.3, 18.5, 18.28 ✧ 9:23: Ab 23.12, 25.3, 1 Ko 11.23 ✧ 9:23: 1 Ko 11.32-33

talima piaga hearume Solo nuha berelowa ege tole pabe diri wiagoha puni hende howa yarali hene.

*Solo ibu Yarusaleme penego ogo*

<sup>26</sup> Solo ibu Yarusaleme puwa Yasu talima piaga hearu heba mandagi hole manda bini. Ani manda bu hearia tigua ibu Yasu talima piaga henene ndo ka mitangi buwa bibahendeme ibu hondowa gi ho hene. <sup>27</sup> Ani biyagola Banabasahanda Solo hearia puwa biamogo bialu abosolo biaru heba te lole ti hearia haru pene. Haru puwa Banabasa ibugua te lamialu Solo ibu harigani pialu hearia ibugua Anduane Homogo de handayagobi Anduane Homogohanda Solohondo bi layagobi lamini. Ibugua Solo ibu Damasagasani howa Yasu mini lalu mana hongo howa lamiyagobi ti lamini. <sup>28</sup> Ani lamiyagola Solo ibu ti heba mandagi howa Yarusaleme bibahendeha pume halu Yasu mini lalu mana hongo howa lamima ibaga bini. <sup>29</sup> Ani lamialu howa ibugua Yu agali Girigi bi laga hearu heba te lalu howa lai lene. Lai lowa tigua Solo homelo bole manda bialu hene. <sup>30</sup> Ani bule ka layago hale howa Yasu mana yu tiga biaga biarume Solo Sisaria haru puwa ibu Tasasa pelo ngua hene. <sup>31</sup> Ani biyagola howa Yudianibi Galilinibi Samarianibi Yasu mana yu tiga biaga bibahende hearu tandaga nane howa turu ho hene. Ngode Datagaliwabe Dinini ibugua ti biamogo biaabo hayagola hongo ho hearia wali agali marume Yasuhondo mini mbiraore wigi biyagola tiha ho gimbu bigi bini. Tigua Anduane Homogo mo tene haabo halu karulape hene.

*Pida ibu Lida tanonibi Yoba tanonibi howa bialu henego ogo*

<sup>32</sup> Pida ibu dindi dewa wiaruha ibaga bialu howa Ngode Datagaliwabena wali agali Lidani hearu hearia nenege pene. <sup>33</sup> Puwa ogoriani agali mbira mini Ainiasa kuduguhe wiarua Pida ibu de hendene. Agali ogoni ibu paliaganeni hangu mali halira wiaabo hene. <sup>34</sup> Pidahanda ibu de hondowa lalu, Ainiasa-o Yasu Kerisohanda í mo dabi harago heyalu inaga tamunguru huba bia, lene. Ani layago hale howa Ainiasa ibu abale heyini. <sup>35</sup> Heyayagola wali agali Lidanibi Sarononibi bibahende hearume Ainiasa hondowa mini beregedalu Anduane Homogohondo mini mbiraore wini. <sup>36</sup> Yasu mana yu tiga biaga wali mbira Tabida ibu mini Girigi bi lalu Dogasa ibu Yobani berene. Wali ogoni ibugua biabe bayale biaabo halu wali agali yagibano hearu biamogo biaga berene. <sup>37</sup> Ibu ani bialu berearia warago balu tongolo mini. Tongolo miyagola marume ibunaga tingini wayawaya buwa anda daliga hobane mbiraha moa hene. <sup>38</sup> Yoba tano ogoni Lida tano kaware wini. Ani winigo wali agali Yasu mana yu tiga biaga Yobani hearume Pida ibu Lidani ka layago hale howa agali kiralihondo lalu, Pida karia pialu agua lalibu. Hondo ha nabi ina kamaria abale ibu laya lalibu, lalu, Lama pudaba, lene. <sup>39</sup> Libugua bi ani layagola hale howa Pida ibu ti haru dai bini. Pida ibiyagola tigua anda daliga hobane mbira biagoha ibu haru pene. Haru ibiyago hondowa wali dalo dewa berearume dugu bigibigi bialu aga taratara Dogasahanda nahome biruwa lebini wiaru ibu de hendelo walia hene. <sup>40</sup> Ani biyagola Pidahanda ti bibahendehondo, Tagira pudaba, lowa ge duli hanga ho biruwa Ngode Datagaliwabehondo bi lene. Ani lowa ibugua tingini moa heagoria handade howa lalu, Tabida heya, lene. Ani layagola wali biago de ngalalu Pida hondowa ibu heyu berene. <sup>41</sup> Ani birayagola Pida ibugua wali biago heyilo gi mini. Ani buwa wali agali Yasu mana yu tiga biaga biarubi wali dalo biarubi ti bibahende, Ibidaba, lowa Pida ibugua, Wali biago heyu kago de handadaba, lene. <sup>42</sup> Wali agali bibahende Yobani hearume wali biago heyu ka layago hale howa dewalime Anduane Homogonaga mana yu tiga bini. <sup>43</sup> Ani biyagola Pida ibu horo

☆ 9:26: Ab 22.17, Ga 1.17-19 ☆ 9:27: Ab 4.36, 9.4, 9.20-22, 1 Ko 9.1, 15.8 ☆ 9:29: Ab 6.1, 9.23, 11.20, 1 Ko 11.26  
 ☆ 9:30: Ga 1.21 ☆ 9:34: Ab 3.6, 3.16, 4.10 ☆ 9:35: 1 Bit 5.16, Ab 11.21 ☆ 9:36: 1 Ti 2.10, Ta 3.8 ☆ 9:40:  
 Md 9.25, Mg 5.40-41, Yo 11.43, Ab 7.60

dewaru Yobani howa agali mbira mini Saimono ibunaga biabe nogo dongone bayale hongohe helo mo bia haga heago hearia puwa ibu heba hene.✧

## 10

### *Dahuliyali mbirame Koniliasa bi laminigo ogo*

<sup>1</sup> Ami agali pira pira (100) haru haga agali mbira mini Koniliasa ibu Sisariani hene. Ami agali uruni ti Lomo dindi howa ibinigo amime tinaga mini Idaliali Ami wini.✧

<sup>2</sup> Koniliasa ibu lotu laga howa ibubi ibu andagaha hagarubi tigua Ngode Datagaliwabe mitangi bialu lotu laga hene. Ibugua Yu wali agali yagibano hearuhondo mbuni nabi muni mbiralebi talebu migi bialu Ngode Datagaliwabehondo bi laabo haga hene.✧

<sup>3</sup> Horo mbirungi alendo ni gai layagola Koniliasahanda de gandeba mbira ibu handalu hearia✧ Ngode Datagaliwabenaga dahuliyali mbira ibu hearia ibiyagola ibugua bayuwa de hendene. Ibuwa dahuliyali biagome ibuhondo lalu, Koniliasa-o, lene.

<sup>4</sup> Ani layagola ibugua gi howa dahuliyali biago handawa bialu lalu, Agibe, lene.

Ani layagola dahuliyali biagome ladai bialu lalu, Ina Ngode Datagaliwabehondo bi lariligobi mbirale mbira yagibanoruhondo miriligobi mitangi buwa Ngode Datagaliwabe ibu turu halu ladai bule ka. <sup>5</sup> Anigo agali mbira mini Saimono ibu mini mende Pida ibu Yobani kago ibu í kegoria ibilo agali maruhondo, Damu pudaba, labe. <sup>6</sup> Agali mende mini Saimono dege ibu nogo dongone bayale hongohe helo mo bia haga kago ibu andagaha Saimono Pida ogoni nenege ibu kagoni. Saimononaga anda iba solowara angeni ka, lene.✧ <sup>7</sup> Ani lowa dahuliyali biago ibu piyagola Koniliasahanda ibuninaga biabe bia haga kira heago labobi ami agali mbira Ngode Datagaliwabe mitangi biaga ibu heba haga heagobi tebirali uruni olowa <sup>8</sup> tihondo bibahende biyago lamialu, Yoba pudaba, lene.

### *Pidahanda de gandeba hendenego ogo*

<sup>9</sup> Ani layago hale howa ti pene. Ani pialu howa ha anda mbira pialalu egerebalene Yoba kaware pialu hea tambu horombe hanuni hayagola Pidahanda Ngode Datagaliwabehondo bi lole anda dangi mbalapeni iraga hene.✧ <sup>10</sup> Ani lalu hearia Pida ibu tomo garibi lene. Marume tomo dawalu hea tambu Pida ibu de gandeba hendene.

<sup>11</sup> Handalu hearia hari daliga budayagola mbirale labolabo timbuni ale nguini mariani yuwa dindiha yarali hayago de hendene.✧ <sup>12</sup> Labolabo ale biagoriani nogo tara tarabi ega tara tarabi tombeme piagane ale tara tarabi heneria de hendene. <sup>13</sup> De handalu hearia bi mbirame ibuhondo lalu, Pida-o heyalu ina uruni bo nabe, layuago hale hene.

<sup>14</sup> Hale howa Pidahanda lalu, Anduane Homogo-o ina bo nabe larigo aihondo laribe. Ina ina deni mbirale kobi nanagane alerubi nanaruli, lene.✧

<sup>15</sup> Ani layagola bi biagome halu mende lalu, Ngode Datagaliwabehanda nolene nga lenego nanole nalabe, layuago hale hene.✧ <sup>16</sup> Ogonidagua halu tebo buwa mbirale biago hari daligaha yamu dai bini.

<sup>17</sup> De gandeba ogoni handayago Pidahanda irane agidabe lo mitangi bialu hearia agali tebira Koniliasa hearia howa ibiyarume ti ibalu, Saimono andaga agoha kabe, laga bialu handa walia howa panga tagiraha hene. <sup>18</sup> Tagiraha howa tigua olalu, Agali mbira mini Saimono Pida ibu o andaga bedabe, lene.

<sup>19</sup> Pida ibu de gandeba handayago mitangi biaabo halu berearia Ngode Datagaliwabe Dinini ibugua Pidahondo lalu, Hale ha. Agali tebira í hai bima ibiyago ibu ka.✧ <sup>20</sup> Ani bidago í heyalu dalia. Tigua, Ina maliya, laragola ti heba pobe. Í damu ibilo ina tihondo

✧ 9:43: Ab 10.6 ✧ 10:1: Md 8.5, Ab 27.1-3 ✧ 10:2: Ab 8.2, 10.22, 10.35, 22.12 ✧ 10:3: Ab 3.1, 10.30, 11.13

✧ 10:6: Ab 9.43 ✧ 10:9: Ab 11.5 ✧ 10:11: Ab 11.5-17 ✧ 10:14: LBM 11.1-47, Man 14.3, 14.7, Ese 4.14

✧ 10:15: Md 15.11, Mg 7.15, 7.19, Ab 10.28, Lm 14.14-20, 1 Ko 10.25 ✧ 10:19: Ab 11.12, 13.2

damu pudaba laru handala ibiyagoni, lene. <sup>21</sup> Ani layagola Pidahanda agali biaru hearia daluwa lalu, Agali hai bima ibirimigo i kogoni. Aginaga ibirimibe, lene.

<sup>22</sup> Ani layagola tigua ladai bialu lalu, Ami agali pira pira (100) haru haga Koniliasa ibugua inahondo, Pida damu pudaba, lalu langiya. Koniliasa ibu mini tigabiwi Ngode Datagaliwabe mitangi bialu lotu laga howa Yu wali agali bibahende karume, Ibu agali bayale ka, lai haga ka. I ibu andaga ibabelobi bi larego ibu hale helobi Ngode Datagaliwabenaga dahuliyali mbirame ibuhondo, Pida damu pu labe, laya, lalu Pida lamini. <sup>23</sup> Ani layagola Pidahanda agali tebira biaruhondo, O andaga palimiya tamuha ibidaba, lene.

Ti paluwa egerebalene Pida ibu manda manda buwa agali tebira ibiyarubi Yasu mana yu tiga biaga Yobani hearu marubi ti haru mandagi pene.

### *Pida ibu Koniliasa andaga penego ogo*

<sup>24</sup> Pialu howa ha anda mbira palialu mendeni Sisaria anda pene. Tano ogoniha Koniliasahanda ibu damene nenegebi hearu mo ngoai howa ti Pida ibilo lowa hondo hene. <sup>25</sup> Ti ngoai ho hearia Pida anda ibalu hearia Koniliasahanda ibu lola howa ibu geha bulu palu ibira hene. <sup>26</sup> Ani biyagola Pidahanda ibu mo heya halu lalu, Heya. Ibi agali i kegobi dege kogoni, lene. <sup>27</sup> Libu anda tamuha pialu howa Pidahanda ibuhondo bi lamima pialu hearia wali agali dewa ngoai ho hearia Pida ibu de hendene. <sup>28</sup> De hondowa Pidahanda tihondo lalu, Mbirali Yuali howa ibu wali agali tara tara heba mandagi holebi nenege holebi nawi lowinigo ngago ti manda bidamigoni. Anigo ina agali maru kobi nakarulapebi ka mandabu hewaria Ngode Datagaliwabehanda ani manda bulene nawi lalu walia haya. <sup>29</sup> Ani biyago i damu ibirimigola, Naibagua, nale abale ibirugo. Irane aginaga i damu ibirimibe laro, lene.

<sup>30</sup> Ani layagola Koniliasa ibugua lalu, Lebene alendo ayu kadagua ni gai layagola inaga andagani howa Ngode Datagaliwabhondo bi lalu berewaria agali mbira labolabo peleore karule i denguihayagi abaleore ibu heneya. <sup>31</sup> Ani howa ibugua lalu, Koniliasa o ina Ngode Datagaliwabhondo bi lariligo ibu hale hayagobi mbirale mbirale yag-ibanoruhondo miriligobi ibu mitangi bu ka. <sup>32</sup> Agali mbira mini Saimono Pida ibu Yobani kago i kegoria ibilo agali maruhondo, Damu pudaba, labe. Agali mende mini Saimono ibu nogo dongone bayale hongohe helo mo bia haga kago ibu andagaha Saimono Pida ogoni nenege ibu kagoni. Saimononaga anda iba solowara angeni ka, laya. <sup>33</sup> Ani layagola i hondoha nabi abaleore i ibabelo damu pudaba laru. Hale howa ibiridago bayale biri. Anduane Homogohanda ihondo labe layadadagua labelo hale hole ina bibahende Ngode Datagaliwabe deni howa ngoai ho bedamagoni, lene.

### *Pidahanda bi mana laminigo ogo*

<sup>34</sup> Pidahanda lalu, Ngode Datagaliwabehanda wali agali bibahende ta nabi mitangi biaga kago ogoni heneneoreda handa walia ko. <sup>35</sup> Wali agali ta nabioire dindi bibahendeni Ngode Datagaliwabe mitangi bialu lotu lagabi mana tigabi biagabi karu ti hondowa ibugua turu haga ka. <sup>36</sup> Ngode Datagaliwabenaga mo palia haga Bi Mana Debene Yasu Keriso togoni howa lalu Isaraele wali agali laminigo ti manda bu kami. Yasu Keriso ogoni ibu wali agali bibahendenaga Anduane Homogo ka. <sup>37</sup> Yonehanda baboraya bulene mana lamiyagola Galili dindi howa Isaraele dindi bibahendeha galone timbuni biyagoni ti manda biai kami. <sup>38</sup> Ngode Datagaliwabehanda Nasareteali Yasuha ibunaga Dinini tolai helo hongohebi helo mo bia henego manda bu kami. Ngode Datagaliwabe ibuni ibula howa Yasuhanda dindi ogoriani pume halu ibaga bialu howa

☆ 10:22: Ab 10.1-2, 22.12 ☆ 10:23: Ab 10.45, 11.12 ☆ 10:26: Ab 14.13-15, Mo 19.10 ☆ 10:28: Yo 4.9, Ab 15.8-9, Ga 2.12-14, Eb 3.6 ☆ 10:30: Ab 1.10, 3.1 ☆ 10:31: Dan 10.12, Hi 6.10 ☆ 10:34: Man 10.17, 1 Sml 16.7, Lm 2.11, Ga 2.6, Eb 6.9, Kl 3.25, 1 Pi 1.17 ☆ 10:35: Yo 9.31, Lm 2.13, 1 Ko 12.13, Ga 3.28, Eb 3.6 ☆ 10:36: Iba 107.20, Ais 52.7, 57.19, Md 28.18, Lm 10.12, Mo 17.14 ☆ 10:37: Md 4.12-17, Lg 4.14



wali agalihondo bayale dege bialu dama Heyolabe daragahe hearu wara tagi haga bima pialu hene. ✧ <sup>39</sup> Yasuhanda Yarusalemeni howabi Isaraele dindi mbira mbirani howabi biyago iname de handai harima. Ani biyagola tigua ibu homelo ira bangani ba para hene. ✧ <sup>40</sup> Ani biyagola horo kiru howa teboneni Ngode Datagaliwabehanda Yasu mo heya howa wali agalime ibu de hendelo mo walia hene. ✧ <sup>41</sup> Mo walia hayagola Yu wali agali bibahendeme de hendene ndo Ngode Datagaliwabehanda ina ibunaga walia hagane holomayanaga ala dabo helene kamaru inahondo ibu mo walia hene. Ngode Datagaliwabehanda ibu mo heya hayagola howa iname ibu heba tomo ibabi mandagi nalu harimago ina hangume ibu de handarima. ✧ <sup>42</sup> Yasuhanda inahondo lalu, Bi mana debene wali agalihondo lamialu wali agali ala homenerubi áyu karubi godi larangi bibahendenaga daba ki biaga holiya Ngode Datagaliwabehanda Yasu i dabo helenego kogoni lalu lamilimu, laya. ✧ <sup>43</sup> Ala Ngode Datagaliwabe mana latagi haga bibahende henerume ibu mitangi bialu mbiwia halu lalu, Ibhondo mini mbiraorewi karume ko biyaru Ngode Datagaliwabehanda Yasu ibu mininaga hongoni howa domo waholebira, lene. ✧

*Ngode Datagaliwabehanda wali agali tara tarahondo ibu Dinini minigo ogo*

<sup>44</sup> Pidahanda bi lalu heaore dege Ngode Datagaliwabe Dinini wali agali bi mana hale ho hearuha hole dalini. ✧ <sup>45</sup> Ngode Datagaliwabehanda ibu Dinini wali agali tara tarahondobi miyago hondowa Yu agali Yasu mana yu tiga biaga Pida heba Yoba howa ibiyaru ti miniha mogolo hene. ✧ <sup>46</sup> Wali agali biarume bi tara lagalaga bialu, Ngode Datagaliwabe timbuniore ka, lalu ibu mini yaraga halu heago hondowa Yu agali ibiyarume ti miniha mogolo hene. Ani biyagola Pidahanda lalu, <sup>47</sup> Ngode Datagaliwabehanda inahondo ibu Dinini ngiyadagua tihondobi miragoni. Mbiralime, Ti ibame baboraya bulene nawi, labehe kabe, lene. ✧ <sup>48</sup> Ani lowa Pidahanda lalu, Yasu Kerisonaga minini howa baboraya bilimu, lalu lamini. Ani biyagola howa tigua Pidahondo, Horo marubi ina heba hamija, lene. ✧

## 11

*Pidahanda wali agali Yasu mana yu tiga biaga Yarusalemeni hearuhondo bi laminigo ogo*

<sup>1</sup> Wali agali tara tara maru hearume Ngode Datagaliwabe bi mana mo yai halu ka layago abosolorubi Yasu mana yu tiga biaga Yudia bibahendeha hearubi ti hale hai hene. <sup>2</sup> Pida ibu Yarusaleme ibiyagola agali maru Yu agali hangunaga ndo agali tara taranaga dongone podo mabu bulene nga laga hearume Pida talini. <sup>3</sup> Talialu lalu, Ina Yu agali ndo agali tara dongone podo mabu nabiaga karunaga andaga nenege puwa ti heba tomo nalu harigo agibe, lene. ✧ <sup>4</sup> Ani layagola Pidahanda bibahende piganeore howa biyagoni te ti lamiai hene.

<sup>5</sup> Ibugua lalu, I Yobani howa Ngode Datagaliwabehondo bi lalu hewaria de gandeba mbira handaru. Handalu hewaria hari daligaha howa mbirale labolabo timbuni ale nguini mariani yuwa yarali haya. ✧ <sup>6</sup> Yarali hayagola ina labolabo ale biago bayuwa de handalu hewaria nogo tara tara hininibi gabuabi tombeme piagane ale tara tarabi ega tara tarabi de handaru. <sup>7</sup> De handalu hewaria bi mbirame ihondo lalu, Pida-o heyalu uruni ina bo nabe, layuago hale haru. <sup>8</sup> Hale howa ina ladai bialu lalu, Anduane Homogo-o ina bo nabe larigo aihondo laribe. Ina mbirale kobi nanagane alebi nanaruli, laru. <sup>9</sup> Ani larugola bi biagome halu mende hari daligaha howa

✧ **10:38:** Md 3.16, Lg 4.17-20, Yo 3.2, Hi 1.9 ✧ **10:39:** Ab 2.32, 5.30 ✧ **10:40:** Ab 2.24, 1 Ko 15.4-7 ✧ **10:41:** Lg 24.42-43, Yo 14.17-24, 15.27, Ab 1.8, 13.31 ✧ **10:42:** Md 28.19-20, Ab 17.31, Lm 14.9-10, 1 Ko 5.10, 2 Ti 4.1, 1 Pi 4.5 ✧ **10:43:** Ais 33.24, 53.5-6, 53.11, Yar 31.34, Dan 9.24, Mai 7.18, Seg 13.1, Lm 10.11, Ga 3.22 ✧ **10:44:** Ab 4.31, 8.15-16, 11.15, 15.8 ✧ **10:45:** Ab 2.4, 10.23, 11.18, 19.6, Ga 3.14 ✧ **10:47:** Ab 8.36, 11.17, 15.8-9, Lm 10.12 ✧ **10:48:** Ab 2.38 ✧ **11:3:** Ab 10.28, Ga 2.12 ✧ **11:5:** Ab 10.9-48

lalu, Ngode Datagaliwabehanda nolene nga lenego nanole nalabe, layuago hale haru. <sup>10</sup>Ogonidagua halu tebo buwa mbirale biago bibahende hari daligaha lone yamiai haya. <sup>11</sup>Yamiaiore heagola agali tebira Sisaria howa i damu ibiyaru ti i hewaria anda ibiya. <sup>12</sup>Anda ibiyagola Ngode Datagaliwabe Dinini ibugua i langialu, Miniha agali tale nabi ti heba pobe, laya. Ani layagola howa Yasu mana yu tiga biaga waragariali o karu tibi ina haru Sisaria pialu Koniliasa andaga pirima. <sup>13</sup>Anda pirimagola Koniliasa ibugua ina langialu lalu, Dahuliyali mbira i andagaha i bu hearia de handaru. Dahuliyali biagome lalu, Agali mbira mini Saimono Pida ibu Yobani kago i kegoria ibilo agali maruhondo, Damu pudaba, labe. <sup>14</sup>Saimono Pida ogoni ibugua bi mana langiragome i bi i andaga hagarubi ti bibahendeme pele mulene yuleberami, dahuliyalime laya lalu Koniliasahanda i langiya, Pidahanda lene. <sup>15</sup>Pida ibugua ani lowa lalu, Ina bi lalu hewaore dege Ngode Datagaliwabe Dinini ala inaha hole daliyadagua tihabi hole daliya. <sup>16</sup>Ani biyagola ina mitangi bialu hewaria ala Anduane Homogohanda bi lalu, Yone ibugua wali agali ibame baboraya bia henego Ngode Datagaliwabehanda ibu Dininime ti baboraya bulebira, layago mitangi budai biru. <sup>17</sup>Iname Anduane Homogo Yasu Kerisohondo mini mbiraore wirimagola Ngode Datagaliwabehanda ibu Dinini inahondo ngiyadagua ibugua Yu wali agali ndo tara tara uruni tihondo miragonida manda biru. Ani manda buwa ina Ngode Datagaliwabehondo, Ani mulene nawi, labehe harube, Pidahanda lene. <sup>\*</sup>

<sup>18</sup>Ani layagola hale howa tigua talia nabi Ngode Datagaliwabe mini yaraga halu lalu, Ngode Datagaliwabehanda Yu wali agali hangu ndo tara tara mini beregedelobi holene gahenge yu helobi ti henge miyada, lene. <sup>\*</sup>

#### *Keriso hameigini Andiogo dindini henego ogo*

<sup>19</sup>Sibeni homelo bayangi howa Yasu mana yu tiga biaga hearume tandaga nalu ibida purogo lene. Ti marume Pinisiabi Saibarasabi Andiogobi purogo lalu Yu wali agali degehondo Yasu mana lamima pene. <sup>20</sup>Yasu mana yu tiga biaga agali maru Saibarasalibi Sairinialibi ti marume Andiogoni anda puwa Yu wali agali hanguhondo ndo tara tarahondobi Anduane Homogo Yasunaga Bi Mana Debene lamialu hene. <sup>21</sup>Ani lamialu heagola Anduane Homogohanda ibunaga hongo walia hayagola wali agali dewaoreme mini beregedalu Anduane Homogohondo mini mbiraore wiai hene. <sup>\*</sup>

<sup>22</sup>Ani biyagola Yasu mana yu tiga biaga Yarusalemeni hearume hale howa tigua Banabasahondo, Andiogo pu, lene. <sup>23</sup>Ani layagola Banabasa ibu Andiogoni anda puwa Ngode Datagaliwabehanda wali agali biamogo timbuni biyiyago hondowa ibugua turu howa ti mo hongo halu lalu, Ti bibahende henemane howabi mini bilinahe howabi Anduane Homogohondo mini mbiraore wu haabo halimu, lene. <sup>24</sup>Banabasa ibu agali bayale howa Ngode Datagaliwabehondo mini mbiraorewibi Ngode Datagaliwabe Dinini ibuha tolaihebi henego hondowa wali agali dewaoreme Anduane Homogohondo mini mbiraore wini. <sup>\*</sup>

<sup>25</sup>Ani biyagola Banabasa ibu Solo hai bule Tasasa pene. <sup>26</sup>Handa walia howa ibugua Solo Andiogo haru dai bini. Dai bu howa mali mbirani libugua Andiogoni howa Yasu mana yu tiga biaga hearu heba ngoai haga bialu ti bibahendehondo mana lawai halu hene. Andiogo ogoriani howa Yasu mana yu tiga biaga hearu ti mini Keriso hameigini pigane wini. <sup>\*</sup>

<sup>27</sup>Horo uruningi Ngode Datagaliwabe mana latagi haga maru Yarusaleme howa Andiogo pene. <sup>28</sup>Ti mbirago mini Agabasa ibugua heyalu Ngode Datagaliwabe Dinin- inaga hongome mbiwia halu lalu, Dindi bibahendeni hina gari timbuni pume holebira,

<sup>\*</sup> **11:12:** Yo 16.13, Ab 10.19, 10.23, 10.45 <sup>\*</sup> **11:14:** Ab 16.31 <sup>\*</sup> **11:15:** Ab 2.4 <sup>\*</sup> **11:16:** Yol 2.28, Md 3.11, Yo 1.26, 1.33, Ab 1.5 <sup>\*</sup> **11:17:** Ab 10.47, 15.8-9 <sup>\*</sup> **11:18:** Ab 13.48, 14.27, Lm 10.12-13, 15.9, 15.16 <sup>\*</sup> **11:19:** Ab 8.1-4 <sup>\*</sup> **11:21:** Ab 2.41 <sup>\*</sup> **11:22:** Ab 4.36 <sup>\*</sup> **11:23:** Ab 13.43 <sup>\*</sup> **11:24:** Ab 2.41, 5.14, 6.5, 11.21 <sup>\*</sup> **11:25:** Ab 9.30 <sup>\*</sup> **11:26:** 1 Pi 4.16 <sup>\*</sup> **11:27:** Ab 13.1, 15.32, 21.9, 1 Ko 12.28, Eb 4.11

lene. Mbiwia ogoni hayago kini mini Kolodiasa heangi lola hene.✧ 29 Yasu talima piaga hearume lo mbiraore halu ti hangu hangume muni mibehe wiadagua mandagi wialu Yasu mana yu tiga biaga Yudiani hagahaga bu hearu biamogo bialu, Tihondo wia hamija, lene.✧ 30 Ti ani lo manda biyadagua bialu tigua Banabasa Sololahondo lalu, Keriso hameigini karunaga agali ala hene miniwi karuhondo muni ogoni mule yalu pudaba, lene.✧

## 12

### *Yamese homelo benegobi Pida dariba henegobi ogo*

1 Ogoningi Kini Herodo ibugua Keriso hameigini maru hearu mo tandaga halu hene. 2 Ibugua Yonenaga hamene Yamese homelo ami agali mbirahondo lalu, Wai biaga ayu tibume ibu bo wahabe, lene.✧ 3 Ani biyagola Yu agalime turu timbuni hayago hondowa Herodohanda lalu, Pidabi minule pudaba, lene. Mberedi Yidi Nahe Hirinigo Nolene Horo hayangi ani bini.✧ 4 Tigua Pida minuwa garabaya andaha helene. Garabaya andaha helowa ami agali wabuni maria ma halume (16) Pida mamage ho ariari bilo ibu heba helene. Ani helowa Herodohanda, Bolangua Halu Penegonaga tomo nai haragola Pidanaga godi lole Yu wali agali kagoria ibu haru tagira pole, mitangi bini.✧ 5 Ani binigo Pida ibu garabaya andaha hearia ami agali biarume mamage ho ariari bigi bini. Pida ibu ani hea tambu Keriso hameigini biarume ibu mitangi bialu Ngode Datagaliwabhondo ibunaga bi la haabo halu hene.✧

### *Pida golope henego ogo*

6 Yawi Herodo ibu Pidanaga godi lole wali agali karia haru tagira pole lowa áyu mbiragadagua Pida ami agali kira dombenaha palene. Pu seni kirame Pidanaga gi kirabalini hende howa palene. Ami agali marume garabaya anda panga tagirahayagi mamage ho hene.✧ 7 Anduane Homogonaga dahuliyali mbira abale ibu howa anda hobane ogoniha wá timbuni hadali hene. Dahuliyali biagome Pida balu mo barila howa lalu, Abale heya, lene. Ani layagola pu seni kira biago Pidanaga gini howa minalu hado ibira hene. 8 Ani biyagola dahuliyali biagome lalu, Ínaga nogo dongone ndibu lalu ge subi karula, lene. Ani layadagua Pidahanda biyagola dahuliyali biagome lalu, Ínaga labolabo daligani karulaganebi karulalu mba, lene. 9 Ani lowa ibu piyadagua Pida talima pialu garabaya andaha howa tagira pene. Pida ibu pialu howa dahuliyalime i henene haru porabe de gandeba handarobe ibu manda nabi howa pene.✧ 10 Libu pialu howa ami agali mariali halu mbira mamage hearia bolangua halu ami agali mariali halu mende mamage hearubi bolangua halu pene. Ani bolangua halu tanoha polenaga panga ege tole aeaneme wabini heagoria pene. Panga ogoni heagoria piyagola panga biago ibuni minalu duguayagola libu tagira pene. Tagira puwa hariga mbirani pialu howa dahuliyali biagome Pida helalu abale pu ereba hene.✧

11 Dahuliyali biago ereba hayagola Pidahanda ibu miniha mitangi bialu lalu, O biyagoni heneneore biyada manda bido. Herodohanda ihondo ko bulene manda biyagobi Yu agalirume i tandaga noliya bulene manda biyagobi nabilo Anduane Homogohanda i pele ngialu ibunaga dahuliyali ibilayadagoni, lene.

12 Ani manda buwa Pida ibu Yone Maga aija Meri andaga pene. Anda ogoniha wali agali dewa ngoai howa Pida mitangi bialu Ngode Datagaliwabhondo bi lalu berene.✧ 13 Pida ibuwa ibugua anda biago panga tagirayagi howa gime bayagola biabe bia haga wandari mini Loda de hondole ibini. 14 Ibuwa bi layuago hale howa ibugua Pidanaga biore manda buwa turu timbuni halu panga dugua nabi wali agali biaru berearia gerai

✧ 11:28: Ab 21.10 ✧ 11:29: Lm 15.26, 1 Ko 16.1, 1 Ko 9.1 ✧ 11:30: Ab 12.25 ✧ 12:2: Md 4.21, 20.23 ✧ 12:3: Ab 4.3 ✧ 12:4: Har 12.1-27 ✧ 12:5: Ya 5.16 ✧ 12:6: Ab 5.23 ✧ 12:9: Ab 10.3, 10.17, 11.5 ✧ 12:10: Iba 34.7, Dan 3.28, 6.22, Ab 5.19, Hi 1.14, 2 Pi 2.9 ✧ 12:12: Ab 4.23, 12.5, 12.25, 15.37

lalu dai bini. Dai buwa ibugua lalu, Pida ibu tagira ka, lamini. <sup>15</sup> Ani layagola tigua lalu, I lulu yarebe, lene.

Ani layagola Lodahanda ladai bialu lalu, I lulu ndo Pidaore ka, laabo hene.

Laabo hayagola wali agali biarume, Ibunaga dahuliyali ibu ka, ladai bini.✧

<sup>16</sup> Ti ani lalu hea tambu Pida gime panga baabo halu hene. Baabo hayagola hale howa tigua panga dugualu hearia Pidaore heago hondowa mini mogo lene. <sup>17</sup> Wali agali biaru ti bi nalelo Pidahanda gi gamu lalu Anduane Homogohanda ibu garabaya andaha howa haru tagira ibiyago te ti lamiai hene. Ani lamiai howa Pidahanda lalu, Bi o langirugoni Yamesebi Yasu mana yu tiga biaga karubi lamilimu, lene. Ani lowa Pida ibu dindi ogoni wahalu dindi mende pene.✧

<sup>18</sup> Egerebalene hayagola Pida pu ereba hayiyago hondowa garabaya anda ami agali biarume gi timbuni howa, Pida abiyabe, lagalaga bialu mini burugulo hene.✧ <sup>19</sup> Ani biyagola Herodohanda, Pida hai bu pudaba, layagola tigua hai bialu handa walia nahe hene. Handa walia naheyagola Herodohanda ami agali biaruhondo, Ibu ibida piyago agibe, lowa maruhondo, Ami agali o biaru bo wahalimu, lene.

Ani biyagola howa Herodo ibu Yudia wahalu Sisaria pu hene.

### *Herodo homenego ogo*

<sup>20</sup> Wali agali Taiani Saidonolani hearu baba Herodohanda keba timbuniore ho hene. Ani ho heagola dindi ogoni laboha howa agali maru tini ala mini mbiraore howa Herodo hearia polene manda bini. Ani manda bialu tigua Herodonaga anda hondo haga agali mini Balasadasa ala hondo pialu bi lo mbiraore hene. Bi lo mbiraore howa mani mo palia holene te lole ti Herodo hearia pene. Ani lole piyadago irane ti Herodonaga dindiha howa tomo yolo miaga henego manda buwa pene.✧

<sup>21</sup> Horo mbira pongo bo winingi Herodo ibu kininaga labolabo bayale karulowa haru haganaga biraganeni biruwa ibugua wali agalihondo te timbuni laga hene. <sup>22</sup> Ani laga henego lalu hearia hale howa wali agali biarume, Bi o larago agalinaga ale ndodago mbirali gibi taraorenagada, lalu dalimu laabo halu hene. <sup>23</sup> Ani layagola Herodohanda mine halu Ngode Datagaliwabe mini yaraga holene manda nabi hearia Anduane Homogonaga dahuliyali mbirame Herodo warago belo mini. Warago bo wiaria ngoeme Herodo nayagola ibu tongolo mini.✧

<sup>24</sup> Ngode Datagaliwabe bi mana loyogo lalu wali agali dewaoreme yu tiga bigi bini.✧

<sup>25</sup> Banabasa Solola libugua Yarusalemeni biabe bule penego biai halu Yone Maga libu heba pialu Andiogoni dai bini.✧

## 13

### *Banabasa Solola dabowa, Libu pudaba, lenego ogo*

<sup>1</sup> Keriso hameigini Andiogoni hearu maru Ngode Datagaliwabe mana latagi haga halu maru Ngode Datagaliwabe mana lawai haga hene. Tinaga mini Banabasabi Simiono ibu kaj mini Mindibi ibubi Sairiniali mini Lusiasabi Manaini ibu ala haru haga Herodo heba haga henego ibubi Solobi uruni hene.✧ <sup>2</sup> Keriso hameigini biarume Anduane Homogo mitangi bialu lotu lalu howa tomo nane hagane manani hearia Ngode Datagaliwabe Dinini ibugua tihondo lalu, Banabasa Sololame biabe bilo lo manda bu ngodagua tigua libu loma bia ho heladaba, lene.✧

<sup>3</sup> Ani layagola hale howa Keriso hameigini biaru tomo nane halu Ngode Datagaliwabehondo bi lowa tigua Banabasa Sololanaga hagianeni gi wialu lalu, Ai biabe bule pudaba, layagola libu pene.✧

✧ **12:15:** Md 18.10, Ab 26.24 ✧ **12:17:** Ab 13.16, 19.33, 21.40 ✧ **12:18:** Ab 5.22-24 ✧ **12:20:** 1 Kin 5.9-11, Ese 27.17 ✧ **12:23:** 1 Sml 25.38, 2 Sml 24.17, Iba 115.1, Dan 5.20 ✧ **12:24:** Ais 55.11, Ab 6.7, 19.20, Kl 1.6 ✧ **12:25:** Ab 11.29-30, 12.12, 13.5, 13.13, 15.37 ✧ **13:1:** Ab 11.27 ✧ **13:2:** Ab 9.15, Lm 10.15, Ga 1.15, Eb 3.7-8, 1 Ti 2.7, Hi 5.4 ✧ **13:3:** Ab 6.6



*Banabasa Solola Saibarasani howa binigo ogo*

<sup>4</sup> Ngode Datagaliwabe Dinini ibugua Banabasa Solola pudaba lamiyagola libu Selusia pialu iba solowara angeni dalini. Selusia howa libu iba taluni biralu pialu dindi mbira iba dege dombeneha wiago mini Saibarasa ogoniha pene. <sup>5</sup> Puwa tano mbira mini Salamisi anda puwa libugua Yu wali agalinaga ngoai hagane andaruha anda pialu Ngode Datagaliwabe bi mana lamialu hene. Yone Maga ibugua libu biamogo bule ti haru pene. <sup>\*</sup>

<sup>6</sup> Tigua lamima puabo halu Saibarasa dindi lene mendehayagi tano mini Paboso anda pene. Anda puwa gamugamu biaga agali mbira mini Ba-Yasu ti lola hene. Ba-Yasu ogoni ibu Yu agali howa, <sup>1</sup> Ngode Datagaliwabe mana latagi haga kogo, lalu ke halu laga hene. <sup>7</sup> Ani howa ibu gabumane haru haga agali Segiasa Polasa ibu manda timbunibi heago heba haga hene. Gabumane agali ogoni Ngode Datagaliwabe bi mana hale hoa howa ibugua Banabasa Solola ibilo olene. <sup>8</sup> Ani olayagola gamugamu biaga ibu mini Girigi bi lalu Elimasa laga ibugua gabumane agalime Yasu mana yu tiga bulilono mo perela hene. <sup>9</sup> Ani biyagola Solo marume ibu mini Polo laga henego ibuha Ngode Datagaliwabe Dinini tolai hayagola ibugua gamugamu biaga biago tiga tiga handade howa <sup>10</sup> lalu, <sup>1</sup> dama Heyolabenaga igini ke. Bayale bulene bibahende ngago ina waitigi ho kegoni. Mo hondo hagane mana bibahende ina biai harilibi Anduane Homogonaga mana tigabi ngago mo batara hole manda bu hariligobi kegoni. <sup>11</sup> Anduane Homogonaga gime <sup>1</sup> baragola horo dewaru ni darago de nahandabehe holebere, lalu Polohanda lene. <sup>\*</sup>

Ani layagola abaleore ginu arumahe aleme Elimasanaga de yi hayagola ibugua mbirali ibunaga gini yalu pelo hai bialu hene. <sup>12</sup> Ani biyago hondowa gabumane agali biagome Yasu mana yu tiga bini. Ibugua Anduane Homogonaga bi mana Polohanda lawai hayago mitangi bialu mini mogolo hene.

*Pisidia dindinaga tano Andiogo penego ogo*

<sup>13</sup> Polobi ibu heba hayarubi ti Paboso wahalulu iba taluni biralu Pambilia dindi pialu tano mini Pega anda pene. Tano ogoriani howa Yone Maga ibu Polo Banabasala helalu Yarusaleme dai bini. <sup>14</sup> Ani biyagola libu Pega wahalulu Pisidia dindinaga tano mbira mini Andiogo anda pene. Anda puwa Sabada horo hayangi libu Yu wali agalinaga ngoai hagane andaha pialu berene. <sup>15</sup> Ngoai hagane anda ogoniha berearia Mosesenenyangi Mana lo winigobi Ngode Datagaliwabe mana latagi hagarume mana gilibu winigobi beba uruniha howa agali marume dagalene. Dagalayagola howa ngoai hagane anda haru hagarume Polo Banabasalahondo bi lawia halu lalu, Hamene labo-o wali agali mini mo hongo holenenaga bi mana mbira yidabiyagua lamilibulo hame ledama, lene. <sup>16</sup> Ani layago hale howa Polo ibugua heyuwa gi gamu lowa lalu, <sup>\*</sup>

Israaeleali kamirubi wali agali tara tara Ngode Datagaliwabe mitangi bu haga kamirubi ina bi larogo ti hale hadaba. <sup>17</sup> Israaelealinaga Ngode Datagaliwabe kago ibugua bamba inanaga mamali ti Iyibi dindini mbira nabaile hearia dabowa mo dewa hene. Ani buwa Ngode Datagaliwabehanda ibunaga hongo timbunime Iyibini howa ti haru tagira puwa <sup>18</sup> dindi ko wali agali nahaga wiagoriani hearia mali pira mariani (40) ibugua donge halu tinaga genda yu haabo hene. <sup>19</sup> Ani buwa Israaeleali ti Kenana dindi anduane helo Ngode Datagaliwabehanda Kenanali hameigini tara tara kariaru Israaelealime bo wa helene. <sup>20</sup> Ani bialu heane mali handari mariani pira duria agima (450) hene. <sup>\*</sup>

<sup>\*</sup> **13:4:** Ab 15.39 <sup>\*</sup> **13:5:** Ab 12.12, 12.25, 13.13, 13.46, 15.37 <sup>\*</sup> **13:8:** 2 Ti 3.8 <sup>\*</sup> **13:10:** Md 13.38, Yo 8.44, 1 Yo 3.8 <sup>\*</sup> **13:11:** Har 9.3, 1 Sml 5.6, Ab 9.8 <sup>\*</sup> **13:13:** Ab 13.5, 15.38 <sup>\*</sup> **13:15:** Lg 4.16, Ab 13.27, 15.21, Hi 13.22 <sup>\*</sup> **13:16:** Ab 12.17 <sup>\*</sup> **13:17:** Har 1.7, 6.6, 12.5, Man 7.6-7, Iba 105.23-24 <sup>\*</sup> **13:18:** Har 16.35, Dag 14.34, Man 1.31, Iba 95.10, Ab 7.36 <sup>\*</sup> **13:19:** Man 7.1, Yos 14.1, Iba 78.55 <sup>\*</sup> **13:20:** Hgn 2.16, 1 Sml 3.20



Ani biyagola howa Ngode Datagaliwabe mana latagi haga Samuele ibilo Ngode Datagaliwabehanda agali haguaneume ti haru helo hela aribia haga bini. <sup>21</sup> Samuele heneyangi Isaraeali hearume tinaga kini hame lowa tigua Samuelehondo, Mbirali dabo hela, lene. Ani layagola Ngode Datagaliwabehanda Beniyamini hameiginiha howa agali mbira Kisi igini mini Solo dabo helene. Ani biyagola Solo ibu tinaga kini heane mali pira maria (40) hene. <sup>22</sup> Mani Ngode Datagaliwabehanda Solo dugualu Debidi ibu tinaga kini helo dabo aribia ho helene. Ibugua Debidi mitangi bialu bi lenego ogo, Yasi igini Debidiore ibu agali i hame ledogobi ka. Ibugua ina bia larodagua biaiore holebira, laya, lene. <sup>23</sup> Polohanda ani lowa lalu, Debidinaga aguanene mbirali Yasu ibu Isaraele wali agalinaga Pele Miaga helo Ngode Datagaliwabehanda bamba lo winidagua ibu helene. <sup>24</sup> Yasu ibuni biabe bule naibiha Yonehanda Isaraele wali agali lamialu, Ko birimigonaga bu mini beregedowa baboraya bilimu, lalu lamiaga hene. <sup>25</sup> Yone ibunaga biabe bumaro bulene tu kaware wiyagola ibugua wali agalihondo lalu, I ai ka lo mitangi bidamibe. Ti mbirali ibilo hondo kamigo i ndoore. Biabe bumaro berogola ibu ibulebirago de hondoleberemi. Ina ibunaga ge su hadole nakarulapeore kogoni, lalu Yonehanda laya, lene. <sup>26</sup>

<sup>26</sup> Polohanda lalu, I hamene mbaliniru-o ti Abarahama aguanene kamirubi wali agali tara tara Ngode Datagaliwabe mitangi bialu lotu lo haga kamirubi ina bibahendehondo Ngode Datagaliwabehanda pele mulenenaga mana lawia hayagoni. <sup>27</sup> Yarusalemeni wali agali hearumebi tinaga haru haga hearumebi Yasu ibu Pele Miaga ka manda nabi hene. Tigua Ngode Datagaliwabe mana latagi haga bamba henerume bi gilibu winigo ngago Sabada horo bibahendengi daga laabo hagago ogoni hale howa ti manda nabi dege hene. Manda nabi howa tigua Yasu homelo bolene nga layagola Ngode Datagaliwabe mana latagi haga biarume mbiwia halu lo winidagua lola hene. <sup>28</sup> Anigo Yasu homelo bolene irane handa walia nahe howa tigua Pailatehondo lalu, Ibu homelo ba, lene. <sup>29</sup> Andune Homogonaga mbugani Yasunaga te gilibu winigo ngadagua tigua biai hayagola maru hearume ibunaga tingini ira bangani wiaria yamuwa egeandaha hora hene. <sup>30</sup> Ani biyagola Ngode Datagaliwabehanda ibu mo heya hene. <sup>31</sup> Mo heya hayagola wali agali ala ibu heba Galili howa Yarusaleme piyarume ibu de hendelo horo dewani ibu ha pani haga bini. Ibu de handayarume áyu Isaraele wali agalihondo ibu walia hagane ti ka. <sup>32-33</sup> Anigo iyame tihondo Bi Mana Debene langule ibu kaba. Ngode Datagaliwabehanda Yasu mo heya hayagome ala ina mamalihondo buleberoore lo winidagua áyu ina tinaga aguanene bu kamarunaga bia hayagoni. Iba Gana mendeni bi gilibu ngago ogo,

I igini i kegoni.

Áyu i Aba i harogoni,

lenego gilibu nga. <sup>34</sup> Ngode Datagaliwabehanda Yasu mo heya howa ibunaga tingini homaliha togo nabilo lalu lenego ogo,

Turu holene wiaabo haga bayaleru ala Debidihondo muleore bero lalu lo wirudagua

Ngode Datagaliwabehondo mini mbiraorewi kamiru tihondobi ngulebero, lalu

lenego gilibu nga. <sup>35</sup> Ogonibi bi mende gilibu ngago ogo,

Inaga biabe bia haga loma biahe helarigo ibunaga tingini togo nabilo helolebere,

✠ 13:21: 1 Sml 8.5, 8.19, 10.1, 10.21 ✠ 13:22: 1 Sml 13.14, 15.23-26, 16.12-13, 2 Sml 2.4, Iba 89.20, Hos 13.11  
 ✠ 13:23: 2 Sml 7.12-16, Iba 132.11, Ais 11.1, Lg 1.32, 1.69, Lm 11.26 ✠ 13:24: Md 3.1-2, Mg 1.4, Lg 3.3, Lm 11.26  
 ✠ 13:25: Md 3.11, Mg 1.7, Lg 3.16, Yo 1.20-27 ✠ 13:26: Md 10.6, Lg 24.47, Ab 13.16, 13.46 ✠ 13:27: Lg 23.34, 24.20, 24.44, Yo 16.3, Ab 3.17, 15.21, 1 Ko 2.8 ✠ 13:28: Md 27.22-23, Mg 15.13-14, Lg 23.21-23, Yo 19.15 ✠ 13:29: Md 27.57-61, Mg 15.42-47, Lg 18.31, 23.50-56, Yo 19.28-30, 19.36-42 ✠ 13:30: Md 28.6, Ab 2.24 ✠ 13:31: Ab 1.3, 1.8 ✠ 13:32-33: Pig 12.3, Ab 13.23, Lm 4.13, Ga 3.16 ✠ 13:32-33: Iba 2.7, Lm 1.4, Hi 1.5, 5.5 ✠ 13:34: Ais 55.3

lenego gilibu nga.✧ 36 Debidihanda Ngode Datagaliwabenaga biabe bulene winigo ibugua biai halu homene. Homayagola maru hearume ibu mamali hora heagoria dege ibunaga tingini hora hayagoria togo bini.✧ 37 Ogoni biyadagua ndo Ngode Datagaliwabehanda mbirali homaliha howa mo heya hene biago ibunaga tingini togo nabini. 38-39 Ogonigo i hamene mbaliniru-o Yasu ibu togoni howa ko birimago domolenenaga mana tihondo langialu kabagoni ti bibahende kamiru manda biaiore halimulo hamelo kaba. Yasuhondo mini mbiraorewi karu ti bibahendenaga ko biyaru Mosese heneyangi Mana lowini ngagome nadomabehe wiaru ibugua domo wahai haga ka manda bilimu.✧✧ 40 Anigo Ngode Datagaliwabe mana latagi haga biarume ala mbiwia halu lenego tiha lola holigo mamage halimu. Tigua mbiwia halu lenego ogo,✧

41 Mege biaga kamiru ti de handadaba.

De hondowa mogo lalu homalimu.

Áyu ogoni ti kamiruha biabe bialu kogo hondowa tigua mini mbiraore nawuleberami. Mbiralime tihondo bayuwa langiragolabi tigua mini mbiraore nawuleberamiore, lalu lenego gilibu nga, lalu Polohanda lene.✧

42 Ani lai howa Polo Banabasala ngoai hagane andaha howa tagira pialu hearia wali agali biarume libuhondo lalu, Mana ogonibi hale holomaya Sabada horo mendengi langule dai bilibu, lene. 43 Ani lowa wali agali ngoai hayaru tagira pialu purogo layagola Yu wali agalibi wali agali tara tara Yualinaga mana yu tiga biagabi dewa hearume Polo Banabasala heba pene. Pialu howa libugua o biaruhondo bi lalu, Ngode Datagaliwabenaga biamogo bia holene ngagoria hana ho haabo halimu, lalu lamini.✧

44 Sabada horo mendengi tano ogoriani wali agali bibahende hearu Anduane Homogonaga bi mana hale hole ngoai hene. 45 Wali agali dewaore ngoai ho hearu de hondowa Yuali hearume Polohondo henge lowa ibu mege bialu ibu bi mana lamiyago, Mana ogoni kooreda, lalu hene.✧ 46 Ani layagola Polo Banabasalame hongo howa lalu, Ngode Datagaliwabe bi mana tihondo ala langulene wini. Tigua mana ogoni erembira mialu haabobo holene hame nalarimigo ti wahalu iyame Yu wali agali ndo tara tara karuhondo lamima poleberaba.✧ 47 Bulene mbira Anduane Homogohanda iya langiyago ogo,

Yu wali agali ndo wali agali tara tarame de hendelo ina i lamu hale ale heledogo.

I togoni howa wali agali dindi bibahendeni karu pele mulene yu helo ani heledo, laya, lene.✧

48 Ani layago hale howa wali agali tara tara biarume turu halu lalu, Anduane Homogonaga bi mana bayaleore, lene. Maru hearume haabobo holene ogoni yu helo Ngode Datagaliwabehanda dabo heleneru tigua Yasu mana yu tiga bini.✧

49 Dindi ogoriani Anduane Homogonaga bi mana loyogo lene. 50 Ani biyagola Yuali biarume tano ogoninaga agali timbuni hearubi wali timbuni mini lene Ngode Datagaliwabehondo mitangi bialu lotu laga berearubi tigua Polo Banabasalahondo keba helo mo ha hene. Mo keba howa ti gimbu buwa tigua Polo Banabasala mo tandaga halu dindi ogoriani howa wara tagi hene.✧ 51 Ani biyagola howa abosolo biago labome tigua biyagoni nakarulape birimi lalu walia halu abalu libunaga geni para hayago taulo wahalu Aigoniamana pene.✧ 52 Yasu mana yu tiga biaga Andiogoni hearu tiha turu holenebi Ngode Datagaliwabe Dininibi tolaihe hene.✧

✧ 13:35: Iba 16.10, Ab 2.27, 2.31 ✧ 13:36: 1 Kin 2.10, Ab 2.29 ✧ 13:38-39: Dan 9.24, Lg 24.47, Ab 10.43, 1 Yo 2.12 ✧ 13:38-39: Ais 53.11, Lm 3.28, 8.3, 10.4, Hi 7.19 ✧ 13:40: Ais 29.14 ✧ 13:41: Hab 1.5 ✧ 13:43: Ab 11.23, 14.22, Ta 2.11, Hi 12.15, 1 Pi 5.12 ✧ 13:45: Ab 14.2, 18.6, 1 Pi 4.4, Yu 10 ✧ 13:46: Ais 55.5, Lg 7.30, Ab 3.26, 18.6, Lm 1.16, 10.19 ✧ 13:47: Ais 42.6, 49.6, Lg 2.32 ✧ 13:48: Ab 11.18 ✧ 13:50: Ab 17.4, 17.12 ✧ 13:51: Md 10.14, Mg 6.11, Lg 9.5, 10.11, Ab 18.6 ✧ 13:52: Md 5.12, Yo 16.22, Ab 2.46

## 14

### *Polo Banabasaleme Aigoniama tanoni howa binigo ogo*

<sup>1</sup> Andiogoali biarume Polo Banabasalahondo biyadagua Aigoniamalimebi ani dege bini. Polo Banabasala Yu wali agalinaga ngoai hagane andaha puwa libugua mana hongo howa lamiyagola Yu wali agalibi Girigi wali agalibi dewaoreme Yasu mana yu tiga bini. <sup>2</sup> Yuali Yasu mana yu tiga bibe manga ho hearume wali agali tara tara hearu tiguabi Yasu mana yu tiga bu hearuhondo handabe manga helo mo ha hene.✧ <sup>3</sup> Aigoniamani Polo Banabasala horo dewaore hondo halu libugua Anduane Homogonaga mana hongo howa lamialu hene. Ani lamiyagola Anduane Homogonaga biamogo bia holene mana lamiyago heneneore langialu ka lalu walia helo Ngode Datagaliwabehanda agalime nabiagane alebi nahendene alebi libugua bilo libuhondo hongo mini.✧ <sup>4</sup> Ani biyagola howa wali agali Aigoniamani hearu talebu ki buwa maru Yuali biaruhayagi halu maru abosolo biago labohayagi halu talebu ki bini.

<sup>5</sup> Ani biyagola agali tara tara maru hearubi Yuali maru hearubi tinaga haru haga heba mandagi howa tigua abosolo biago labo tandaga nelo toleme bolene nga lo manda bini.✧

<sup>6</sup> Ani lo manda bu ka layago hale howa Polo Banabasala ibida pialu Laigonia dindinaga tano mini Lisidarabi Debibi ogoninaga dindi kaware kaware wiaruhabi pene.✧ <sup>7</sup> Dindi uruniha ibaga bialu libugua Bi Mana Debene lamima pene.

### *Polo Banabasalame Lisidarani howa binigo ogo*

<sup>8</sup> Lisidarani howa agali mbirali ge kohe hene. Ibu aiyahanda taba henenengi howa ge kohe ibaga bibe nahe berene.✧ <sup>9</sup> Ani berearia Polohanda bi layago ibu hale hene. Hale ho berearia ibu ge dabi helonaga mini mbiraore wu bereago hondowa Polohanda ibu handade halu✧ <sup>10</sup> bi dalimu lalu, Ini heyu ha, lene. Ani layago hale howa agali biago ibu porabu daga halu heyuwa ibaga bu hene. <sup>11</sup> Polohanda ogoni biyago hondowa Laigonia wali agali dewaore ngoai ho hearume tininaga bi lowa dalimu lalu, Ina damahondo bi pupu weramaliru ti agali ale howa ina kamaria daliyada, lene.✧ <sup>12</sup> Ani lowa tigua tininaga bi pupu wiaga mini wiadagua Banabasa ibu mini Susa wini. Polo ibu bi lagane tene ka manda buwa ibu mini Hemisi wini. <sup>13</sup> Tininaga dama mitangi bialu mini Susahondo bi pupu wulenaga anda Lisidara tano tagirahayagi bu hene. Susanaga loma binigo mo miaga agali heago ibugua palawaya pongo bu mabu biyago nogo bulumaga wangaberunaga mani karula howa bi pupu wulenaga anda panga haraba heagoria haru pene. Haru puwa loma binigo mo miaga agali biagobi wali agali dewa ngoai ho hearubi tigua Polo Banabasalahondo bo mulene manda buwa haru pene.

<sup>14</sup> Ani bule bialu ka layago hale howa abosolo biago labome ani bulene nakarulapeore manda buwa libunaga labolabo lerelalu wali agali ngoai ho heagoha gerai lalu puwa dombeneha pu hene. Pu howa libugua dalimu lalu, <sup>15</sup> Agaliru-o ogoni agi beramibe. Iyabi agali dege ti kamigobi kabago tigua mbirale tara galone ndo ogonihondo bi pupu nawi wahalu mini beregedowa Ngode Datagaliwabe haluhe kago mitangi bu halimulo iyame Bi Mana Debene langule ibiriba. Ngode Datagaliwabe haluhe kago ibugua hari daligabi dindibi ibabi uruni bibahendeha karubi ngarubi wa biai hene.✧ <sup>16</sup> Ala Ngode Datagaliwabehanda wali agali tini bua hayadagua bilo helene.✧ <sup>17</sup> Ibugua bayale bibahende biyagome tigua ibu kaore manda bilimulo walia hene. Ibugua bayale biaga urubi dalu ibilagabi tomo bibahende mo anda haga biagabi ti nolene ngiagabi turu holene tinaga bu habaneha mo tolai hagabi kagoni, lene.✧ <sup>18</sup> Ani lowa Polo Banabasala

✧ 14:2: Ab 13.45 ✧ 14:3: Mg 16.20, Ab 19.11, Hi 2.4 ✧ 14:5: Ab 14.19, 2 Ti 3.11 ✧ 14:6: Md 10.23 ✧ 14:8: Yo 9.1, Ab 3.2 ✧ 14:9: Md 8.10, 9.28-29, Ab 3.4 ✧ 14:11: Ab 8.10, 28.6 ✧ 14:15: Har 20.11, 2 Sml 12.21, Iba 33.6, 146.6, Ab 10.26, 1 Ko 8.4, 1 Te 1.9, Ya 5.17 ✧ 14:16: Iba 81.12, Ab 17.30, 1 Pi 4.3 ✧ 14:17: Iba 147.8, Yar 5.24, 14.22, Ab 17.27, Lm 1.20

libugua wali agali ngoai ho hearume libuhondo nogo bulumagaru ngia nabilo lowa bi hongo howa lalu hene.

<sup>19</sup> Yuali maru Pisidia dindinaga tano Andiogo howabi Aigoniama howabi ibuwa tigua tinaga bime wali agali dewaore tihayagi yamiai howa ti heba mini mo mbiraore hene. Mini mbiraore howa tigua Polo toleme bowa homaya mitangi buwa gililo yalu puwa tano tagirahayagi ngelene. <sup>20</sup> Ani biyagola Yasu mana yu tiga biaga biaruru Polo wiagoria ibuwa ho mabu biyagola Polo ibu heyuwa tanoha dai bialu anda pene. Egerebalene ibubi Banabasabi libu Lisidara wahalu Debi pene.

### *Siria dindinaga tano mini Andiogo libu dai binigo ogo*

<sup>21</sup> Debini howa Polo Banabasalame Bi Mana Debene lamiyagola wali agali dewame Yasu mana yu tiga buwa Yasu talima piaga hene. Ani buwa libu Debi wahalu Lisidarabi Aigoniama Pisidia dindinaga tano Andiogobi dai bini. <sup>22</sup> Dai bialu howa libugua Yasu mana yu tiga biaga dindi uruniha hearume Yasu mana yu haabo helo mo hongo halu, Aniore haabo halimu, lalu pene. Libugua lawai halu lalu, Ngode Datagaliwabehanda Handame Ho Kagoria anda polomaya iname dindini howa gai bibi dewaore hondoleberama, lalu lamini. <sup>23</sup> Ani lawai halu Keriso hameigini dindi tara tarani hearu Polo Banabasala ti heba howa libugua agali maru agali ala hene miniwi helo dabo helaga bini. Ani helowa libugua Ngode Datagaliwabehondo agali biarunaga bi la halubi tomo nane halubi wali agali Anduane Homogohondo mini mbiraorewi hearu Ngode Datagaliwabe ibugua ti biamogo bilo, Biamogo bia, lalu helalu libu pene. <sup>24</sup>

<sup>24</sup> Libugua Pisidia dindini ani bima pialu Pambilia anda pene. <sup>25</sup> Anda puwa libugua Pegani wali agali hearuhondo Bi Mana Debene lamialu howa Adeliyani dalini. <sup>26</sup> Libugua biabe biai halu Adelia howa iba taluni biralu libu Siria dindinaga tano Andiogo dai bini. Dindi ogoni libu biabe bilo ala Keriso hameigini biarume Ngode Datagaliwabe ibugua libu biamogo bia helo loma bia ho helayagoha ogoriani lone dai bini. Biabe ogoni bumaro biyagoni manda buwa dai bini. <sup>27</sup>

<sup>27</sup> Andiogo anda puwa Polo Banabasalame Keriso hameigini hearu mo ngoai howa Ngode Datagaliwabe ibugua libuha howa biyago te tihondo lamiai hene. Libugua lalu, Yu wali agali ndo tara tarame Yasuhondo mini mbiraore wilo Ngode Datagaliwabehanda henge miyiya, lalu lamini. <sup>28</sup> Libu Andiogoni howa ege dewani Yasu mana yu tiga biaga hearu heba hene.

## 15

### *Mana lo tiga bule Yarusalemeni ngoai henego ogo*

<sup>1</sup> Agali maru Yudia howa Andiogo ibuwa tigua Yasu mana yu tiga biaga hearuhondo lawai halu lalu. Mosese heneyangi Mana lo winigodagua dongone podo mabu biagane mana nabirimiyagua Ngode Datagaliwabehanda ti pele nangulebira, lene. <sup>2</sup> Ani layagola hale howa Polo Banabasalame, Bi nakarulape larimigo, lalu ti heba lai gibi lalu hene. Ani lowa tigua lo manda bialu Polobi Banabasabi Keriso hameigini maru Andiogoni hearubi tigua mana ogoni lo tiga bule abosolobi agali ala hene miniwibi Yarusalemeni hearu hearia polene nga lo manda bini. <sup>3</sup>

<sup>3</sup> Ani lo manda biyagola howa Keriso hameigini hearume tihondo, Pudaba, layagola ti pene. Tigua pialu howa Pinisiahabi Samariahabi Yasu mana yu tiga biaga hearuhondo lalu, Wali agali tara tara karume Ngode Datagaliwabehondo mini mbiraore wu ka, lalu lamima pene. Bi ogoni layago hale howa Yasu mana yu tiga biaga biarume turu timbuni ho hene. <sup>4</sup> Ti Yarusaleme anda piyagola Keriso hameigini hearubi abosolo hearubi agali

✧ 14:19: Ab 13.45, 17.13, 1 Ko 11.25, 2 Ti 3.11 ✧ 14:21: Md 28.19 ✧ 14:22: Md 7.14, Ab 11.23, 15.32, 18.23, 1 Te 3.3 ✧ 14:23: Ab 13.1-3, 15.40 ✧ 14:26: Ab 13.1-3, 15.40 ✧ 14:27: Ab 11.18, 15.4, 15.12 ✧ 15:1: LBM 12.3, Yo 7.22, Ga 2.12, 5.2, Kl 2.8, 2.11, 2.16 ✧ 15:2: Ab 11.30, Ga 2.1



ala hene miniwi hearubi tigua tihondo, Ibirimida, lowa turu timbuni hene. Ani biyagola Polo Banabasalame Ngode Datagaliwabehanda libuha howa biyago te tihondo lamiai hene.\*<sup>5</sup> Ani layago hale howa Perisi aria Yasu mana yu tiga bu hearume heyuwa lalu, Agali tara tara Yasu mana yu tiga bulene manda bu kayagua ti dongone podo mabu bulene nga. Mosese heneyangi Mana lo winigobi tigua bilo lamulene nga, lene.

<sup>6</sup> Bi ogoninaga lo tiga bule abosolobi agali ala hene miniwibi hearu ngoai hene. <sup>7</sup> Bi lagalaga biaabo halu howa Pidahanda heyuwa lalu, I hameneru-o wali agali tara tarame Bi Mana Debene hale howa yu tiga bilo ina tihondo lamuliya abaleore Ngode Datagaliwabehanda tíha howa i dabenegro manda bidami.\*<sup>8</sup> Ngode Datagaliwabe ibu wali agali ta nabi bibahendenaga bu mini manda biai kago ibugua wali agali tara tara Yasu mana yu tiga bu hearu tibi karulape ka walia halu ibu Dinini ina ngiyadagua tihondobi miya.\*<sup>9</sup> Ngode Datagaliwabehanda inabi tibi dombeni tu nawini. Tigua Yasuhondo mini mbiraore wiyagola tinaga ko biyago ibugua domo wahai hene.\*<sup>10</sup> Anigo tigua Ngode Datagaliwabe ba hondole lowa nu genda timbuniore inamebi ina mamalimebi nahanabeheore biago Yasu mana yu tiga biaga karume henelo mo hana haramigo aginagabe.\*<sup>11</sup> Ani bulene nawi. Iname Ngode Datagaliwabhondo mini mbiraore weramagola Anduane Homogo Yasunaga biamogo bia holeneme ina pele ngiyadagua ti nde pele miaga, Pidahanda lene.\*

<sup>12</sup> Ani layagola Banabasa Pololame Yu wali agali ndo tara tara heba howa Ngode Datagaliwabehanda libuha howa agalime nabiagane alebi nahendene alebi bibahende biyagoni libugua ngoai ho berearu lamini. Lamialu hearia ti bi naleore haleho berene.\*<sup>13</sup> Libugua bi lai hayagola Yamesehanda lalu, Hameneru-o ina bi larogo hale hadaba.\*<sup>14</sup> Ngode Datagaliwabe ibugua Yu wali agali ndo tara tara karu hame layago abale walia halu maru ibunaga helo dabayago Saimonohanda ina bayuwa langiya.\*<sup>15</sup> Langiyadagua Ngode Datagaliwabe mana latagi haga hearume bi ogoniore lowinigo nga. Anduane Homogonaga mbugani lo ngago ogo,  
<sup>16</sup> Anduane Homogohanda lalu, Awe i dai bulebero.\*  
Dai buwa ina Debidihanda ala handame ho henedagua lone mbiralime handame helo helolebero.

Handame ho holene ogoni podo ibira ho ngago muwa ina mo gini bialu mo hongo ho helolebero.

<sup>17</sup> Anigo wali agali tara tara bibahendeme i kogoria ibulebira.

Dindi tara tarali inaga helo ina olaruru bibahende ibai holebira.

<sup>18</sup> Bambaore Anduane Homogohanda wali agalime bi ogoni manda bilo anidagua lene, lalu, gilibu nga, lene.

<sup>19</sup> Yamesehanda bi laabo halu lalu, Ina manda bidogo ogo laro. Yu wali agali ndo tara tarame Ngode Datagaliwabhondo mini mbiraore wu karu ti iname mo genda holene nawi. <sup>20</sup> Ti genda nayilo iname tihondo beba gilibu pelamiya. Gili bialu lalu, Mbira ogo, Ne nolenebi nogobi damahondo bo minigo nolene nawigo nanalimu. Mende ogo, Wali agali kayu nayalimu. Tebone ogo, Nogo tara tararu egarubi ma gingima binigo darama heba nanalimu. Mane ogo, Darama ibuni nanalimu. Uruni hangu gilibu pelamiya.\*<sup>21</sup> Ogonigo bambaore howa Mosese heneyangi Mana lowinigo ngago Sabada horo bibahendengi ngoai hagane andaruha howa daga laabo haga. Mosese bi mana ogonibi tano bibahendeha agali marume lamiaabo haga, Yamesehanda lene.\*

*Wali agali tara tara Yasu mana yu tiga bu hearuhondo beba pelenego ogo*

\* 15:4: Ab 14.27 \* 15:7: Ab 10.1-43 \* 15:8: 1 Bit 28.9, Ab 1.24, 2.4, 10.44, 11.15 \* 15:9: Ab 10.15, 10.28, 10.34-35, Lm 10.11, 1 Ko 1.2, 1 Pi 1.22 \* 15:10: Md 11.30, 23.4, Lg 11.46, Ga 3.10, 5.1 \* 15:11: Lm 3.24, Ga 2.16, Eb 2.5-8, Ta 2.11 \* 15:12: Ab 14.27 \* 15:13: Ab 12.17, Ga 2.9 \* 15:14: Ab 15.7-9 \* 15:16: Amo 9.11-12 \* 15:20: Pig 9.4, Har 34.15-17, LBM 17.10-16, 18.6-23, 1 Ko 6.9, 6.18, 8.1, Ga 5.19, Eb 5.3, Kl 3.5, 1 Pi 4.3 \* 15:21: Ab 13.15



<sup>22</sup> Ani layagola howa abosolobi agali ala hene miniwibi Keriso hameiginirubi ti bibahende hearume lo mbiraore howa lalu, Ina kamaru aria agali maru Polo Banabasala heba Andiogo pelo dabamiya, lene. Ani lowa tigua Yudasa ibu mini mende Basabasa Sailasala ogoni labo dabene. Yasu mana yu tiga bu hearume agali ogoni laboha mini hana ho haga hene. <sup>23</sup> Beba ti yalu pelo gilibu minigo ogo.

Ina abosolobi agali ala hene miniwibi tinaga Keriso hamene kamarume ti Yu wali agali ndo tara tara Keriso hameigini Siria dindihabi Siria dindinaga tano Andiogohabi Silisia dindihabi kamiru tihondo turu howa beba ogo gilibu wia harama. <sup>24</sup> Ina aria marume tihondo bi mana nakarulape langiyiyagome ti mini burugulo halimulo mo lulu ya hayiyago hale harima. Tigua ogonidagua lelo iname ani lalimu nale. <sup>25</sup> Anigo ina ngoai howa agali kira dabalulu ti kamiria ibilo iname, Pudaba lamiya, lalu ina bibahende ani lo mbiraore harima. Libu inanaga hameneore Banabasa Polola heba ibulebira. <sup>26</sup> Banabasa Polola ogoni labome ina Anduane Homogo Yasu Kerisonaga biabe bialu homolene wiagoria kaware haabo hene. <sup>27</sup> Ani binigo Yudasa Sailasala dabarimago labome bebani bi gili birimadagua bime libugua langilo ti kamiria, Pudaba, larima. <sup>28</sup> Iname genda mbira tihondo mo tago holilono Ngode Datagaliwabe Dinini ibubi inabi mini mbiraore howa galone maria dege tigua nabilimulo langerama uru. <sup>29</sup> Mbira ogo, Ne nolenebi nogobi damahondo bo minigo nolene nawigo nanalimu. Mende ogo, Darama ibuni nanalimu. Tebone ogo, Nogo tara tarabi egarubi ma gingima binigo darama heba nanalimu. Mane ogo, Wali agali kayu nabilimu. Uruni nayalimu larimago nabi wandialu harimiyagua bayale holeberami. Ai ogoni ti mitangi timbuni bu kama larama.

Beba ogoni gilibu wia hene.

<sup>30</sup> Yasu mana yu tiga biarume agali o biaruhondo, Pudaba, layagola ti Andiogo pene. Anda puwa tigua Yasu mana yu tiga bu hearu bibahende mo ngoai howa beba biago tihondo mini. <sup>31</sup> Ani miyagola Yasu mana yu tiga bu hearume beba dagalowa bi bayale o daga layagonime ti mo turu hai hene. <sup>32</sup> Yudasa Sailasala biago labo libugua Ngode Datagaliwabe mana latagi haga howa Yasu mana yu tiga bu biaru elahelo mo hongo halu tihondo bi lamiaabo halu hene. <sup>33</sup> Libu Andiogoni Sarere dewa halu tinaga aria pigane, Pudaba, layaru hearia dai bilo Yasu mana yu tiga bu biarume turu howa, Dai bidaba, lene. [ <sup>34</sup> Sailasa ibu Andiogoni hole manda buwa nape hondo hene.]

<sup>35</sup> Polo Banabasala Andiogoni ege dewani howa libubi agali maru dewa heba tigua Anduane Homogonaga bi mana lawai ha lamigi bialu haga hene.

### *Polo Banabasalame lai lalu hangu hangu henego ogo*

<sup>36</sup> Ege maru howa Polohanda Banabasahondo lalu, Tano bibahende Anduane Homogonaga bi mana lamiribagoha Keriso hameigini karu ti agi bialu kabe handama mbaliya, lene. <sup>37</sup> Ani layagola Banabasa ibugua Yone ibu mini mende Maga mitangi bialu, Ina haru maliya hamelo ko, lene. <sup>38</sup> Ani layagola Polohanda ladai bialu lalu, Yone Maga ogoni ibu ala iya heba pialu ina biabe biai nahe hema handala Pambiliani howa ibu iya wahalu dai biyago lone polene nakarulape, lene. <sup>39</sup> Ani layagola Polo Banabasalame lai timbuni lalu mini mbiraore nahe howa Banabasahanda Magahondo, Mba, lowa libu Saibarasa pole iba taluni bialu pene. <sup>40</sup> Ani biyagola Polohanda Sailasa dabowa Yasu mana yu tiga biaga Andiogoni biarume libuhondo lalu, Ngode Datagaliwabenaga biamogo bia holene libu heba helo, layagola libu haru pene. <sup>41</sup> Polohanda Sailasa heba Siriahabi Silisiahabi ibaga bialu howa Keriso hameigini dindi uruniha hearu ti Yasu mana yu haabo helo mo hongo hama pene.

✧ 15:24: Ab 15.1 ✧ 15:26: Ab 13.50, 14.19, 1 Ko 15.30, 1 Ko 11.23, 11.26 ✧ 15:28: Md 23.4 ✧ 15:29: LBM 17.14, Ab 15.20, 21.25, Mo 2.14, 2.20 ✧ 15:32: Ab 11.27, 13.1, 14.22 ✧ 15:37: Ab 12.12, 12.25, Kl 4.10, 2 Ti 4.11 ✧ 15:38: Ab 13.13, Kl 4.10

## 16

### *Timodi ibu Polo Sailasala heba penego ogo*

<sup>1</sup> Polo ibu puabo halu Debibi Lisidarabi pialu anda pene. Lisidara ogoriani Keriso hameigini mbira mini Timodi hene. Ibu aiyabi Keriso hamewane howa Yu wali berene. Ibu aba Girigiali hene. <sup>2</sup> Yasu mana yu tiga biaga Lisidaranibi Aigoniamanibi hearume Timodi ibu agali tigabiore ka laga hene. <sup>3</sup> Timodi ibu heba pole hame lowa Polohanda Timodinaga dongone podo mabu bini. Ani binigo irane ogo. Dindi ogoriani Yuali bibahende hearume Timodi aba ibu Girigiali henego manda biai ka manda buwa ani bini. <sup>4</sup> Ti tano dewaha ibaga bialu hearia abosolobi agali ala hene miniwibi Yarusalemeni hearume mana lo wiyadagua tigua Yasu mana yu tiga biaga hearu lamima pialu howa lalu, Mana ogoni bulene nga, lalu lamini. <sup>5</sup> Ani biyagola Keriso hameigini hearu Yasuhondo mini mbiraore wuleneha mo hongo halu horo bibahendengi wali agali dewame Yasuhondo mini mbiraore wuwa tiha ho tago halu hene. <sup>\*</sup>

### *Polohanda Toroasani howa de gandeba hendene ogo*

<sup>6</sup> Tigua Esiaha bi mana lamule pole biyaria Ngode Datagaliwabe Dinini ibugua lamule polene nawi walia hayagola ti Piriyaabi Galesiabi tu wiagoria pene. <sup>7</sup> Misia dindi tu wiagoha pu hearia ti Bidiniaha anda pole manda biyagola Yasu Dinini ibugua polene nawi walia hene. <sup>8</sup> Ani walia hayagola ti Misiani puabo halu Toroasaha anda pene. <sup>9</sup> Anda pu howa mbiraga ogoningi Polo ibugua de gandeba handalu hearia Masedonia agali mbirame lalu, Ina biamogo bule Masedoniani ibu, lalu hearia de hendene. <sup>10</sup> Polohanda de gandeba ogoni handayagola iname Masedonia abale pole manda manda birima. Iname wali agali Masedoniani karuhondo Bi Mana Debene lamulumaya Ngode Datagaliwabehanda walia hayida manda birima. <sup>\*</sup>

### *Lidiahanda Yasuhondo mini mbiraore winigo ogo*

<sup>11</sup> Iname iba taluni biralu Toroasa wahalu pia ho wialu Samoderese anda pirima. Ha anda mbira paluwa puabo halu Neabolisi anda pirima. <sup>12</sup> Ogoriani iba talu ngelalu dindi dindi pialu Pilibai anda pirima. Tano ogoni Masedonia dindinaga mbira Lomo gabumaneme haru haga henego ogoriani ina horo maru harima. <sup>13</sup> Sabada horo hayangi Pilibai tanonaga pabe tagirahayagi pialu iba angeni Yu wali agalime Ngode Datagaliwabehondo bi laga mbira wulebira badago mitangi bialu ina iba o piyadagoha angeni pirima. Ani buwa ina wali maru ngoai ho berearu heba biruwa bi lalu harima. <sup>14</sup> Taiadaira tano wali mbira mini Lidia bereago iname bi larimago ibu hale haya. Wali ogonime labolabo tagalitayabi yolo timbuni miaganego ogoninaga biyinaya biabe biaga biruwa ibugua Ngode Datagaliwabe mitangi bialu lotu laga berene. Polohanda bi mana lamialu hearia Lidia ibu mana ogoni yu tiga bilo Anduane Homogohanda ibunaga mini mo dugua hene. <sup>15</sup> Ani biyagola Lidiabi ibu andagaha hagarubi baboraya bini. Baboraya buwa Lidiahanda inahondo lalu, Anduane Homogonaga bi mana ina henene yu tiga bu bedogo manda bu kamiyagua i andaga hamiya ma ibidaba, lene. Ibugua haya haabo halu ani layagola ina ibu andaga pirima. <sup>\*</sup>

### *Polo Sailasala Pilibaini garabaya binigo ogo*

<sup>16</sup> Horo mbirungi ina Ngode Datagaliwabehondo bi lolenaga anda heagoha pialu hemaria wandari garabaya biabe ale bia haga bereago ibuha dama daraga heagome halaga mo bia hagago wandari ogoni ina lola harima. Wandari biago halaga biyagonaga wali agali hearume ibunaga anduane hearuhondo muni timbuni miaga hene. <sup>17</sup> Ina Polo heba pialu hemaria wandari ogoni ibu haruru ibuwa bi dalimu lalu, Agali uruni ti

<sup>\*</sup> **16:1:** Ab 14.6, 2 Ti 1.5   <sup>\*</sup> **16:2:** Pb 2.19-22   <sup>\*</sup> **16:3:** 1 Ko 9.20, Ga 2.3-5   <sup>\*</sup> **16:4:** Ab 15.23-29   <sup>\*</sup> **16:5:** Ab 2.47   <sup>\*</sup> **16:6:** Ab 18.23   <sup>\*</sup> **16:7:** 2 Ti 1.15   <sup>\*</sup> **16:10:** 2 Ko 2.13   <sup>\*</sup> **16:15:** Ab 16.33, 18.8   <sup>\*</sup> **16:16:** Ab 19.24

Ngode Datagaliwabe Daligaorene Daliga Kagonaga biabe bia haga kagoni. Pele mulene yu halimulo tigua langialu ka, lene. ✧ <sup>18</sup> Wandari biagome horo dewani bi ogoni laabo hayagola Polohanda hembo howa beregedalu dama daraga heagohondo lalu, Yasu Kerisonaga minini howa tagira pu laro, lene. Ani layaore dama biago tagira pene. ✧

<sup>19</sup> Ani biyagola wandari ogoninaga anduane biarume maha muni mulene henge nawulebira manda buwa tigua Polo Sailasala minalu ngoai hagane hama wiagoha haru haga hearu hearia gililo yalu pene. ✧ <sup>20</sup> Tigua Lomo gabumane godi laga biaru hearia haru puwa lalu, Yuali ogo labome inanaga tanoni wali agali karu mo ko hara. ✧ <sup>21</sup> Iname nabulene lo ngago libugua, Bilimu, lalu lawai halu ka. Mana lawai harago ina Lomo ho tene hene kamagome ani bulene nawiore, lene. <sup>22</sup> Ani layagola hale howa ngoai ho hearumebi Polo Sailasala bole bini.

Gabumane haru haga biarume libunaga labolabo lerelo wahalu lalu, Gewame bad-aba, lene. ✧ <sup>23</sup> Tigua hongo halu baabo howa Polo Sailasala garabaya andaha gililo ba anda halu garabaya haru hagahondo lalu, Libu dariba halu bayuwa mamage habe, lene. <sup>24</sup> Ani layagola garabaya haru haga biagome libu garabaya anda hobane dombeneha gililo ba anda howa libunaga ge iraha gingidowa ngelene.

<sup>25</sup> Mbi hanuni ale hayagola Polo Sailasalame Ngode Datagaliwabehondo bi lalu iba ganabi lalu layuago garabaya maru hearume hale hene. <sup>26</sup> Ani lalu hearia dumbirumbi timbuniore abale bialu garabaya anda gene mo ema bini. Ani biyagola anda biagonaga pangaru dugua hai halu ege pu seni garabaya agali dariba hayagobi hado ibira hai hene. ✧ <sup>27</sup> Ani biyagola garabaya haru haga biago palia hondo henego de ngalalu heyuwa panga bibahende dugua hai ho wiago hondowa garabaya biaru bibahende ibida piai kada mitangi bini. Ani mitangi buwa ibugua ibunaga wai biagane ayu tibu yamialu ibuni homole bole biyaria ✧ <sup>28</sup> Polohanda bi dalimu lalu, Ina bibahende nape hai kamagonigo ina homole bolene nawi, lene.

<sup>29</sup> Ani layagola hale howa garabaya haru haga biagome, Lamu hale yalu ibidaba, lowa Polo Sailasala hearia gerai lalu puwa ibu gi howa duru lalu libunaga ge ha birape hene. <sup>30</sup> Ani buwa ibugua libu tagira haru puwa libuhondo lalu, Ogo labo-o Ngode Datagaliwabehanda i pele ngilo i agi buabe, lene. ✧

<sup>31</sup> Ani layagola libugua ladai bialu lalu, Anduane Homogo Yasu ibuhondo mini mbiraore wiriyagua pele ngulebira. Ibi i andagaha hagarubi yu holeberami, lene. ✧ <sup>32</sup> Ani lowa libugua ibubi ibu andagaha haga biarubi tihondo Anduane Homogonaga bi mana lamialu hene. <sup>33</sup> Mbi hanuni ogoningi garabaya haru haga biagome libu haru puwa gewame dongoneni bayagonaga dere wayawaya bia hene. Ani buwa ibubi ibu andagaha hagarubi ti baboraya bini. <sup>34</sup> Baboraya buwa ibugua Polo Sailasala ibu andaga haru puwa libu tomo nelo mini. Ibubi ibu andagaha hagarubi ti Ngode Datagaliwabehondo mini mbiraore wiyagonaga turu timbuni halu hene. ✧

<sup>35</sup> Egerebagi hayagola Lomo gabumane haru haga biarume dandayi haru haga hearuhondo bi lawia halu lalu, Agali o biago labo golope helo lamilimu, lene.

<sup>36</sup> Ani layagola hale howa garabaya haru haga biagome Polo lamialu lalu, Ina libu gololiya gabumane haru haga biarume bi lawia hayadago. Tigua ani layago libu garabaya wahalu bi nale tendore pobehe, lene.

<sup>37</sup> Ani layagola Polohanda dandayi haru haga ibiyaruhondo lalu, Iya Lomo ho tene howa kabago tigua godi nale wali agali dewa handaya ho helowa gewame iya bayago. Bowa garabaya andaha gililo ba anda haya. Anigo áyu iya pu yola halu polene

✧ **16:17:** Mg 1.24, 1.34 ✧ **16:18:** Mg 16.17 ✧ **16:19:** Ab 19.25-26, 1 Ko 6.5 ✧ **16:20:** 1 Kin 18.17, Md 5.11, Mg 13.9, Ab 17.6 ✧ **16:22:** 2 Ko 6.5, 11.23-25, Pb 1.30, 1 Te 2.2 ✧ **16:26:** Ab 4.31, 5.19, 12.7, 12.10 ✧ **16:27:** Ab 12.18-19 ✧ **16:30:** Lg 3.10, Ab 2.37, 9.6 ✧ **16:31:** Yo 3.16, 3.36, 6.47, 1 Yo 5.10 ✧ **16:34:** Ab 16.15

ogonidagua nakarulapeore laro. Iya golope hole Lomo gabumane haru haga biarume tini ibulene nga, lene.

<sup>38</sup> Polohanda layadagua dandayi haru haga biarume Lomo gabumane haru haga biaru lamiyagola, Polo Sailasala Lomo ho tene hene ka, layago hale howa ti gi hene.

<sup>39</sup> Ani buwa tigua Polo Sailasala hearia pialu, Kagua birima, lowa garabaya andaha howa haru tagira pialu, Tano ogoni wahalu pudaba, lene. <sup>40</sup> Ani layagola Polo Sailasala garabaya anda wahowa wali mini Lidia ibunaga andaga pene. Anda ogoniha Yasu mana yu tiga bu hearu heba halu libugua ti elahe helo mo hongo hagane bi lamialu pene.

## 17

### *Polo Sailasalame Tesalonaigani howa binigo ogo*

<sup>1</sup> Polo Sailasala libu ibaga bialu howa Ambibolisibi Aboloniabi anda pialu Tesalonaiga anda pene. Tano ogoriani Yu wali agalinaga ngoai hagane anda mbira hene. <sup>2-3</sup> Ala Polo dindi maruni howa ngoai hagane andaha piagadagua ibu ngoai hagane anda ogoniha anda pene. Ngoai hagane anda ogoniha Polo ibugua Sabada horo halu tebirani wali agali ngoai ho hearu heba Anduane Homogonaga mbugani bi gilibu winigo dagalalu lo manda bialu hene. Ani lo manda bialu howa ibugua Mbirali Dabo Helenego ibu tandaga nalu homowa mo heya holene winigo lamialu hene. Lamialu lalu, Yasu ogoni ibugua biyago te áyu langerogo ibu Mbirali Dabo Helenegoore ka lalu langero, Polohanda lene. <sup>4</sup> Ani lamiyagola wali agali maru hearume, Ibu bi heneneore laya, manda buwa ti Polo Sailasala heba ho gimbu bini. Wali mini lene dewa berearubi Girigi wali agali Ngode Datagaliwabe mitangi bialu lotu laga dewa hearubi ti bibahendeme ogonidagua dege bini. <sup>5</sup>

<sup>5</sup> Ani biyagola howa Yu agali hearume henge lowa agali ko bame hama hama ibaga bu haga hearu dewa mo ngoai hene. Mo ngoai howa Yu agali biarubi agali ko biarubi keba halu bi dalimu layagome wali agali dindi ogoriani bibahende hearume gungu bibehe hene. Ani buwa tigua Polo Sailasala wali agali hearia haru pole libu hai bialu howa agali mbira mini Yaisana ibunaga andagaha minalu anda pene. <sup>6</sup> Anda puwa libu handa walia nahe howa tigua Yaisanabi Yasu mana yu tiga biaga maru hearubi gililo yalu gabumane haru haga hearia puwa bi dalimu lalu, Agali urume dindi dewani ko timbuni biame halu hayago ai inanaga dindini anda ibiyada. <sup>7</sup> Ibiyagola Yaisana ibugua ibunaga andagaha ti haru puwa palelene. Tigua handame haga kini mende mini Yasu ka lowa Lomonaga Kini kagome bulene mana lowinigo ngaru pugualu kagoni, lene. <sup>8</sup> Tigua bi ogoni layagola wali agali bibahende hearubi gabumane haru haga hearubi mo keba howa gungu bibehe hene. <sup>9</sup> Ani biyagola gabumane haru haga biarume Yaisanabi agali maru ibu heba dariba hayarubi tihondo lalu, Iname ti golope holomayanaga muni ngulene lo ngadagua ngidaba, lene. Ani lowa muni miyagola gabumane haru haga biarume ti golope hene.

### *Polo Sailasalame Beriani howa binigo ogo*

<sup>10</sup> Horo ogoningi mbiraga hayagola Yasu mana yu tiga bu hearume Polo Sailasala Beria pelo, Pudaba, lene. Ani laya handala libu pialu Beriani anda puwa Yu wali agalinaga ngoai hagane andaha anda pene. <sup>11</sup> Wali agali Beriani hearu ti Tesalonaigani wali agali mini giambe hearubi ndo ti mini hade hene. Tigua Ngode Datagaliwabe bi mana turu halu hale hoa howa hale hene. Hale howa tigua Polohanda mana lamiyago henemanedabe hondole horo bibahendengi Anduane Homogonaga mbugani bi gilibu winigo dagalalu lo manda bialu hene. <sup>12</sup> Ani buwa ti dewalime Yasu mana yu tiga

✧ 16:39: Md 8.34 ✧ 17:1: 1 Te 1.1-2, 2.1-2 ✧ 17:2-3: Lg 24.26, Ab 3.18, 9.22, 18.28, Ga 3.1 ✧ 17:4: Ab 13.50, 15.22, 15.27, 15.40, 28.24 ✧ 17:5: Lm 16.21 ✧ 17:6: Ab 16.20 ✧ 17:7: Lg 23.2, Yo 19.12, 1 Pi 2.13 ✧ 17:11: Ais 34.16, Lg 16.29, Yo 5.39

bini. Girigi wali mini lene berearubi Girigi agalibi ti dewaoreme Yasu mana yu tiga bini. <sup>13</sup> Ani biyagola howa Polohanda Berianibi Ngode Datagaliwabe bi mana lamialu ka layago hale howa Yu agali Tesalonaigani hearume Beriani ibuwa tigua wali agali hearu mo didola halu keba helo mo ha hene.✧ <sup>14</sup> Ani biyagola Yasu mana yu tiga bu hearume Polohondo lalu, Iba solowara bedagohayagi abale polene nga, lene. Ani lowa agali marume ibu ngua ho pelo, Pudaba, lene. Ani buwa Sailasa Timodila libu nape Beriani hondo hene. <sup>15</sup> Polo haru piyarume ibu Adene tanoni ngua hayagola Polohanda bi lawia halu lalu, Sailasa Timodila i koría abale ibilo lamilimu, lene. Ani laya handala ti Beriani dai bini.

*Polo Sailasalame Adeneni howa binigo ogo*

<sup>16</sup> Polo ibu Sailasa Timodila ibilo Adeneni hondo hearia tano ogoriani mbirale dewa bi pupu wule gime wabini wiaru hondowa ibu miniha genda timbuni hene. <sup>17</sup> Genda howa ibugua ngoai hagane andaha puwa Yu wali agali hearubi wali agali tara tara Ngode Datagaliwabe mitangi bialu lotu laga hearubi ti heba bi mana lo manda bialu hene. Magedi hama wiagoriani horo bibahendengi wali agali ibugu bialu hale haga biyaruhondo ibugua Ngode Datagaliwabe bi mana lamialu hene.✧ <sup>18</sup> Agali maru ti Ebigurialirubi Sidoigialirubi mana tara ogoninaga lawai haga hearu tigua Polo baba ladai bigibigi bialu hene. Ti marume lalu, Miniwi tingi halu mine howa bi larago agi larabe, lene.

Ti marume lalu, Dindi tarani mbirale tara dahuliyali alenaga mana lamira bada, lene. Tigua ogonidagua layago irane ogo. Polo ibugua Yasu mana lamialu Yasu ibuni mo heya hayago te layagonaga ani lene. <sup>19</sup> Ani lowa tigua Polo haru puwa tano ogoninaga ganisolo agali Ariobagasa hama ngoai howa bi lalu hearia haru pene. Haru puwa tigua lalu, Ina mana gahenge tara lawai hariligo ina hale hoa kamagoni. <sup>20</sup> Bi maru larigo taraoreyago bi ogoninaga tene manda bulumaya langibelo, lene. <sup>21</sup> Adeneali hearubi dindi tarali ibu hearubi tigua mana gahenge tara tara hale halu lo manda bialu horo bibahendengi ani biaabo haga hene.

<sup>22</sup> Ani layagola Polo ibu tanonaga ganisolo agali biaru heba howa heyalu ibugua lalu, Adenealiru-o tigua mbirale mbirale beramiligo hondowa ti bi pupu wulene mana hame timbuni lo kamigo manda bido. <sup>23</sup> Tinaga tanoni ibaga bialu howa bi pupu wiagane anda dewa heane de handaru. De handalu hewaria mbirale lomabu miaga dabu mbira wabu wiagoriani bi mbira gilibu wiago ogo, Mbirali iname manda nabi kamago ibunaga, gilibu ngago ogoni ina de handaru. Tigua mbirali ogoni ti manda nabi howa ibuhondo mitangi beramiligo ibuninaga bi manaore ina ayu ti langerogoni. <sup>24</sup> Ngode Datagaliwabe ibu hari daligabi dindi bibahendebi dindi bibahendeni ngarubi karubi wabiai henego ibu hari daligahanagabi dindihanagabi Anduane Homogo ka. Ibu anda agalinaga gime wabini ruha nahaga ka.✧✧ <sup>25</sup> Ibu nakarulape ndo karulapeore kago iname ibu biamogo bialu mbirale mbira mulene henge nawi. Irane ogo. Ibunime inanaga holenebi buhe lolenebi bayale bibahende wali agali bibahendehondo mulene ngadagua ngiagane ibuni ka.✧ <sup>26</sup> Ibugua agali mbira pigane wabiyagoha howa wali agali tara tara bibahende dindi tara taraha ho dame bima pelo purogo lai helene. Ani nabi howa alaore ibugua manda manda biai howa wali agali ti ogongi ogoha helo lowa manda manda buwa pongo bo wini. <sup>27</sup> Ibugua ti wabiyago irane ogo. Tigua hai bialu ibu harualo manda bialu handa walia helonaga ibugua ti wabini. Ngode Datagaliwabe ibu ina kamagoria kaundia ndo kaware haga ka.✧ <sup>28</sup> Anigo mbiralime lalu,✧ Tene ibuha howa ibunaga hongome ina dindini halubi ema bialubi bu kamagoni, lene. Ogonidagua tinaga gawa laga ale maru hearume tinaga la halu lalu,

✧ 17:13: Ab 13.50, 14.19 ✧ 17:17: Ab 18.19 ✧ 17:24: Md 11.25, Ab 7.48, 14.15 ✧ 17:24: 1 Kin 8.27, Ais 42.5  
 ✧ 17:25: Yob 12.10, Iba 50.12, Seg 12.1, Ab 7.48 ✧ 17:27: Man 32.8, Iba 145.18, Ais 55.6, Yar 23.23, Ab 14.17, Lm 1.20 ✧ 17:28: Kl 1.17, Ta 1.12, Hi 1.3



Inabi ibunaga waneigini kamagoni, laga. <sup>29</sup> Anigo ina ibunaga waneigini howa iname Ngode Datagaliwabe ibu ngolomebi silibamebi ege tole taramebi agalime wabu wini ngaru ibu uruni ale ka lowa ani mitangi bulene nawi. <sup>30</sup> Ala wali agalime Ngode Datagaliwabe manda nabi howa biyagoni hondowa Ngode Datagaliwabeanda la nabi ka. Ai áyu ogoni ibugua, Wali agali dindi bibahendeni karu tigua ko biyagonaga mini beregedai halimu, lalu ka. <sup>31</sup> Ibugua agali mbirali dabayago ibu togoni howa wali agali dindi bibahendeni karu baba tigatiga daba ki bulenenaga horo mbira pongo bo winigo nga. Ibugua agali dabayago ogoni homayagola mo heya hayagome wali agali bibahendeore karu baba ogonidagua bulebiraore lalu walia hene, lalu Polohanda lene. <sup>32</sup> Polohanda mbirali homenego mo heya haya layago hale howa agali maru hearume oba halu Polo mege bini. Marume lalu, Bi áyu langirigo hale hoa kamago mani lone langibelo, lene. <sup>33</sup> Ani layagola Polo ibu ti helalu pene. <sup>34</sup> Piyagola wali agali maru hearu tigua Polo heba ha tago halu Yasuhondo mini mbiraore wini. Mini mbiraorewi agali mbira Daionisiasa ibu Ariobagasa ganisolo agali henego ibubi wali mbira Damarisi ibubi wali agali marumebi ani dege bini.

## 18

### *Polohanda Korindini howa Yasu mana lamialu henego ogo*

<sup>1</sup> Ani biyagola howa Polo ibu Adene wahalu Korindi pene. <sup>2</sup> Korindi anda pu hearia Yu agali mbira mini Aguila lola hene. Aguila ibu Pondasali hene. Kini Kolodiasa ibugua Yu wali agali bibahende Lomoni hearuhondo, Piai hadaba, layagola Aguila ibu one Pirisilala haru ayure dege Idali dindi wahalu Korindi ibini. Polo ibu libu andaga nenege pene. <sup>3</sup> Puwa ibu libu heba mandagi howa Polo ibubi Aguila Pirisilabi ti haru balai anda wabiaga howa tigua yolo biabe ogoni mandagi bialu hene. <sup>4</sup> Ani bialu howa Polo ibu Sabada horo bibahendengi ngoai hagane andaha puwa Yu agalibi Girigi agalibi hearu ti Yasuhondo mini mbiraore wilo lowa ibugua tihondo bi hongo howa lamialu hene.

<sup>5</sup> Sailasa Timodila libu Masedonia howa ibiyagola Polo ibu biabe bialu hayago wahalu ibugua Yu agali hearuhondo Yasu mana lamialu, Mbirali Dabo Helenego Yasu ibu ka, lalu bayuwa lamialu biabe ogoni dege bialu hene. <sup>6</sup> Ani lamigi biyagola agali hearume ibu gura bi ko la megebi bigi bialu hene. Ani biyagola Polohanda ti erembira mialu ibunaga labolaboni abalu para heago taulo wahalu tihondo bi hongo howa lalu, Tí koha pirimiyagua nde t́inaga biabe inaga ndo. Áyu ogoni howa ina Yuali ndo wali agali tara tara karuhondo Yasu mana lamule ti karia polebero, lene. <sup>7</sup> Ani lowa ti wahalu Polo ibu agali mbira Yuali ndo mini Tidiasa Yasadasa ibunaga andaga hole pene. Agali ogonime Ngode Datagaliwabe mitangi bialu lotu laga howa ibu andagabi ngoai hagane andabi emene kaware hene. <sup>8</sup> Ngoai hagane anda haru haga mini Karisibasabi ibu damenebi tigua Anduane Homogohondo mini mbiraore wu hene. Korindini wali agali maru hearu dewalime Yasu mana hale howa Yasuhondo mini mbiraore wiyagola ti bibahende baboraya bini. <sup>9-10</sup>

Mbiraga mbirungi Polo ibu de gandeba mbira handalu hearia Anduane Homogo ibugua Polohondo lalu. Gi nahabe. Í heba kogonigo wahalu pu nabi mana lamiaabo halu habe. Tano ogoriani wali agali dewa inaga wali agali kago mbiralime í babe nahe holebira, lene. <sup>11</sup> Ani layago hale howa Polo ibugua wali agali hearuhondo Ngode

✧ 17:29: Ais 40.18-20, 44.10-17, Ab 19.26 ✧ 17:30: Ab 14.16, Lm 3.25, Ta 2.11-12, 1 Pi 1.14 ✧ 17:31: Iba 9.8, 96.13, Ab 2.24, 10.42, Lm 2.16, 14.10 ✧ 18:2: Lm 16.3, 1 Ko 16.19, 2 Ti 4.19 ✧ 18:3: Ab 20.34, 1 Ko 4.12, 1 Te 2.9, 2 Te 3.8 ✧ 18:5: Ab 9.22, 17.3, 17.14-15, 18.28 ✧ 18:6: Ese 18.13, Ab 13.45-46, 13.51, 20.26, 1 Pi 4.4 ✧ 18:8: 1 Ko 1.14 ✧ 18:9-10: Ab 23.11, 1 Ko 2.3 ✧ 18:9-10: Yos 1.9, Ais 41.10, Yar 1.8, 1.18-19, Md 28.20, Yo 10.16

Datagaliwabe bi mana lawai halu mali mbira mendegonaga ege waragariani haabo hene.

<sup>12</sup> Lomo gabumaneme agali mbira mini Galio ibu Girigi wali agali Agaia dindini hearu haru haga helo helayangi howa Yuali hearu ngoai howa tigua Polo minalu godi laga andaha haru pene. <sup>13</sup> Haru puwa lalu, Wali agali karume Ngode Datagaliwabe mitangi bialu lotu lelo agali ogome mana lowinigo ngadagua ndo mana tara lalu lamialu ka, lene.

<sup>14</sup> Ani layagola Polo ibu bi lolebiyaria Galiohanda Yu agali biaruhondo lalu, Ibugua mana koore biyagonaga lole ibirimiyagua nde i keba nahe bayuwa hale holiya karu-lapeda. ✧ <sup>15</sup> Ai ani ndo tigua tininaga bibi manabi lo ngago uruninaga lai lalu kamigodago nde tini mo tiga bilimu. Ogoninaga dabagane i naholebero, lene. ✧ <sup>16</sup> Ani lowa ibugua ti godi lagane andaha howa wara tagi helo ami agali hearu lamini. <sup>17</sup> Ani biyagola tigua ngoai hagane anda haru haga mini Sosodenisi heago minalu godi lagane anda tagirahayagi howa balu hene. Ani bayagola Galio ibu tininaga biabe bira mitangi bialu ibu bi mbira nale hene.

### *Siria dindinaga tano Andiogo Polo dai binigo ogo*

<sup>18</sup> Polo ibu Yasu mana yu tiga bu hearu heba howa Korindini horo dewaru hondo hene. Ani buwa ibugua, Ti hondo halimu, lalu iba talu mbira Siria dindi pole wiagoha anda puwa Aguila Pirisilabi ti heba Siria dindi pene. Pole howa Sengiria tano iba solowara angeni howa Polohanda Ngode Datagaliwabehondo, Mbira bulebero, lalu lo wialu, Henemane laro, lowa walua halu ibunaga mandari podai hene. ✧ <sup>19</sup> Iba taluni biralu pialu Ebesa anda pene. Anda puwa Polo ibugua Aguila Pirisilabi ogoriani helalu pene. Helalu puwa ibu ngoai hagane anda heagoha anda puwa Yu agali hearu heba bi hongo howa lalu hene. ✧ <sup>20</sup> Ani layagola Yu agali maru hearume ibuhondo lalu, Ina heba mandagi haabo hamiya, lene. Tigua ani layagola Polohanda, E, nale howa <sup>21</sup> ibu pole howa ibugua tihondo lalu, Ngode Datagaliwabehanda i ti kamiria dai buliya walua hayagua nde dai bulebero, lene. Ani lalu ibu Ebesa wahalu pene. ✧ <sup>22</sup> Polo ibu iba taluni biralu puabo halu Sisaria tano anda pene. Anda pialu ibu Yarusaleme puwa Keriso hameigini hearuhondo, Bayale kamibe, lalu te lalu howa Andiogo pene. <sup>23</sup> Andiogoni emene hondo howa Polo ibu pialu dindi maru Galesiahabi Piriyaabi puabo halu wali agali Yasu mana yu tiga bu hearu mo hongo haga bima pene.

### *Aboloso ibu Ebesanibi Korindibi Yasu mana lamialu henego ogo*

<sup>24</sup> Ogoningi Yu agali mbira mini Aboloso ibu Alegandariali heago Ebesa ibini. Ibu bi lamulene mugubeyi howa Anduane Homogonaga mbugani bi gilibu ngago bayuwa manda bu hene. <sup>25</sup> Ibugua Anduane Homogonaga Harigani piagane mana lo manda binigo bi hongo howa lalu Yasu mana tiga tigaore lawai haga hene. Aboloso ibu Yonehanda baboraya biagane mana biawai henego dege manda bu hene. ✧ <sup>26</sup> Abolosohanda ngoai hagane andaha howa gi nahe tigatiga handade halu lamialu hene. Ani layago hale howa Aguila Pirisilame Aboloso libunaga andaga haru pene. Haru puwa libugua Aboloso ibu Ngode Datagaliwabenaaga Harigani piagane mana bayuwa manda biai helo tigatigaore lamialu hene. ✧ <sup>27</sup> Emene howa Aboloso ibu Girigi dindi Agaia polene manda bini. Ani pole manda biyagola wali agali Yasu mana yu tiga biaga Ebesani hearume ibu biamogo bialu Yasu mana yu tiga biaga Agaia dindini hearuhondo beba gilibu wia halu lalu, Aboloso ibu ti kamiria ibiragola ibuhondo turu halu, Hamiya, lalimu, lalu gilibu wia hene. Aboloso ibu Agaiani anda puwa wali agali Ngode Datagaliwabenaaga biamogo bia holeneme ti biamogo biyagola Yasu mana yu tiga bini hearu ibugua ti bayuwa biamogo bialu hene. ✧ <sup>28</sup> Wali agali dewa ngoai ho hearia ibugua Anduane

✧ **18:14:** Ab 23.29, 25.11, 25.19 ✧ **18:15:** Yo 18.31, Ab 23.29, 25.18-19 ✧ **18:18:** Dag 6.18, Ab 21.24, Lm 16.1

✧ **18:19:** Ab 17.17 ✧ **18:21:** Lm 1.10, 1 Ko 4.19, Hi 6.3, Ya 4.15 ✧ **18:25:** Ab 19.3, Lm 12.11 ✧ **18:26:** Ab 19.8

✧ **18:27:** 1 Ko 3.6, 1 Ko 3.1

Homogonaga mbugani bi gilibu wigi biagoria howa lalu Mbirali Dabo Helenego ibu Yasu ka walía haga bialu bi hongo howa layagome Yu agali ibu heba bi wai biaga hearu taga halu nimu lene.✧

## 19

### *Polo Ebesani howa Yasu mana lamialu henego ogo*

<sup>1</sup> Aboloso ibu Korindini heagola Polo ibu dindi hayagoria howa ibaga bialu hari dewa iri dali bialu pialu Ebesa anda pene. Ebesa ogoriani Yasu mana yu tiga biaga hearu lola hene.✧ <sup>2</sup> Lola howa ibugua tihondo bi lalu, Tígua Yasuhondo mini mbiraore wirimíngi Ngode Datagaliwabe Dinini ibu tíha hole ibiyabe, lene.✧

Ani layagola tigua ladai bialu lalu, Ngode Datagaliwabe Dinini ka larigo ina hale nahe harima, lene.

<sup>3</sup> Ani ladai biyagola Polohanda lalu, Baboraya birimiyago aginagabe, lene.✧

Ani layagola tigua ladai bialu lalu, Yonehanda baboraya biagane mana lawai henego ogoni hale howa birima, lene.

<sup>4</sup> Tigua ani ladai biyagola Polo ibugua lalu, Wali agalime ti ko biyagonaga mini beregedowa baboraya biagane mana Yonehanda lawai haga hene. Yonehanda Isaraele wali agaliruhondo lalu, I ala íbu kogo. Maha mbirali ibulebirago ibuhondo tígua mini mbiraore wulene nga, lene. Maha ibulebira layago o Yasu ibuni tí manda bilimu, lalu Polohanda lene.✧

<sup>5</sup> Polohanda bi ani layagola hale howa Ebesani o biaru Anduane Homogo Yasunaga minini baboraya bini. <sup>6</sup> Ani biyagola Polohanda tinaga hagianeni ibunaga gi wiyagola Ngode Datagaliwabe Dinini tíha hole dalini. Daliyagola tigua bi tara tara lalu Ngode Datagaliwabe bi manabi lamialu hene.✧ <sup>7</sup> Agali ani bialu biaru ti homberia (12) agima hene.

<sup>8</sup> Ani biyagola howa ege tebiruni Polo ibu Yuali ngoai hagane andaha puabo haga hene. Puabo howa ibugua bi mana hongo howa lamialu wali agali hearu heba ladai bigi bialu Ngode Datagaliwabehanda Handame Ho Kagonaga mana lamialu hayago ogoni heneneore layada manda bilo lamiaabo halu hene. <sup>9</sup> Ani lamiaabo hayagola agali maru hearume mana yu tiga bibe manga howa ngoai ho hearu hale helo tigua Anduane Homogonaga Harigani piagane mana mege bialu bi ko lalu hene. Tigua ani biyagola Polo ibugua ti helalu Yasu mana yu tiga biaga biaru haru pene. Ani buwa horo bibahendengi horombe howa bi mana lo manda biaga anda mbira Tiranasanaga heago ogoniha puwa Polohanda Yasu mana lawai halu ladai bigi bialu hene.✧ <sup>10</sup> Mali kirani Polohanda ani biaabo halu heagola Esia dindini Yu wali agalibi wali agali tara tarabi bibahende hearu tigua Anduane Homogonaga bi mana hale halu hene.✧

### *Sibanaga iginirume binigo ogo*

<sup>11</sup> Ngode Datagaliwabehanda Poloha howa agalime nabigane ale taraore bigi bialu hene.✧ <sup>12</sup> Wali agali hearume Polonaga hangiyabobi ibunaga labolabo ibuni karulene-gobi muwa wali agali warago bo wigi biagoria yalu pugu biyagola labolabo ogonime warago mo ereba halu dama daraga hearu wara tagi halu ani bini.✧ <sup>13</sup> Ani biyagola Yu agali marume dindi dindi ibaga bialu howa dama daraga hearu wara tagi halu haga hene. Maru hearume Anduane Homogo Yasunaga mini lalu wara tagi hagamada tigua nde ogonidagua bule manda bini. Tigua dama daraga hearuhondo lalu, Polohanda Yasu mana lamiagago Yasu ogoni mini lalu tagira pu larama, lene.✧ <sup>14</sup> Yu wali agalinaga loma binigo mo miaga haguane timbuni ibu mini Siba henego ibunaga iginini kariali henego tigua ani biaga hene.

✧ 18:28: Ab 9.22, 17.3, 18.5 ✧ 19:1: 1 Ko 1.12, 3.6 ✧ 19:2: Ab 2.38, 8.16 ✧ 19:3: Md 3.11 ✧ 19:4: Md 3.11, Mg 1.4, 1.7-8, Lg 3.4, 3.16, Yo 1.15, 1.26-30, Ab 18.25, 19.4 ✧ 19:6: Ab 2.4, 6.6, 8.17, 10.44-46 ✧ 19:9: Ab 9.2, 1 Ko 6.14-18, 2 Pi 2.2 ✧ 19:10: 2 Ti 1.15 ✧ 19:11: Ab 14.3 ✧ 19:12: Ab 5.15 ✧ 19:13: Mg 9.38

<sup>15</sup> Tigua ani bialu hearia dama daragahe mbira heagome tihondo lalu, Ina Yasubi Polobi manda bu kogo. Tí ai kamibe i manda nabido, lene.\*

<sup>16</sup> Ani layagola agali dama ogoni daragahe hayagome keba tara howa Siba igini kariali biaru baabo halu ibunaga hongome ti bope howa tinaga labolabo lerelo wahayagola tigua ibunaga andagaha howa gerai lalu ibida pene. <sup>17</sup> Ani biya layago hale howa Yu wali agalibi wali agali tara tarabi Ebesani hearume mogo timbuni lowa Anduane Homogo Yasunaga mini yaraga halu hene.\* <sup>18</sup> Yasu mana yu tiga biaga dewali hearu ibuwa tigua wali agali hearu hale helo, Iname ko ogoni birima, lalu tigua biyagoni la pani hai hene. <sup>19</sup> Gamugamubi ililibi biaga dewa hearume tinaga gamugamubi ililibi biagane mananaga mbugaru bibahende yalu ibalu wali agali bibahende hearu de hendelo delai hene. Mbuga delayarunaga muni ala minigo daga lamaga howa muni dewaore kina ngui laai daosini pira duria (50,000) ale mini. <sup>20</sup> Ogonidagua hongo howa biyagola Anduane Homogonaga bi mana loyogo lalu hongo timbuniore halu anda haga bini.\*

### *Ebesani howa gungu binigo ogo*

<sup>21</sup> Ani biyagola howa Polo ibuni lo manda bialu, Ala Masedoniabi Agaiabi pialu mani Yarusaleme puabo holebero, ibunaga miniha ani lo manda bini. Lo manda bialu, Ogonidagua piai howa ina Lomo tanobi nenege polene nga, lo manda bini.\* <sup>22</sup> Ani lo manda buwa ibugua ibunaga biamogo biaga Timodibi Erasadasabi libu ala Masedonia pelo, Bamba hadaba, lene. Libu ani pudaba lowa Polo ibu Esia dindini emene hondo hene.\*

<sup>23</sup> Esia dindini emene hondo hearia Anduane Homogonaga Harigani piagane mana lawai hayagome Ebesani ko holene emene ndo timbuniore wini.\* <sup>24</sup> Agali mbira heago mini Demidiriasa ibugua mbirale tara tara silibame wabiaga hene. Wali agalime mbirale tara bi pupu wilonaga mini Ademisi wali ale wabu winigo ogoninaga anda ale mbira mbira emeneore Demidiriasahanda silibame wabiaga hene. Ibunaga biyinaya ogonime ibubi ibunaga biabe biaga hearubi tigua muni timbuni miaga hene.\* <sup>25</sup> Ani biaga henego ibugua ibunaga biabe biaga biarubi agali maru biabe ogonibi biaga hearubi mo ngoai howa tihondo lalu, Agaliru-o iname biabe ogoni beramaligonaga muni timbuni meramaligo manda bidami. <sup>26</sup> Agali Polo biago ibugua bialu kago tinime de handabehebi hale habehebi kami. Ibugua agua laga, Mbirale agali gime wabiniru uruni galone ndodago bi pupu wulene nawi, laga ka. Ibugua ani laragome wali agali dewaore oali Ebesani karumebi Esia dindini karumebi mana ogoni yu tiga biai halu kagoni.\* <sup>27</sup> Ti ani bialu kago iname biyinaya beramaligo hondowa tigua, Ogoni koore, lolebira bada manda bido. Ogoni dege ndo. Inanaga dama wali timbuni Ademisi ibunaga andabi galone ndo lowa ibunaga mini yaraga naholebira. Ademisi ogoni Esia dindini karumebi dindi tara tara dewani karumebi tigua ibuhondo bi pupu wiame haga ndobe, lalu Demidiriasahanda bi ogoni lene.

<sup>28</sup> Bi ogoni layago hale howa agali ngoai hayarume keba timbuniore howa bi dalimu lalu, Ebesanaga Ademisi ibu timbuniore ka, laabo halu hene. <sup>29</sup> Ti ani layadagua wali agali maru dewa dindi ogoriani hearumebi lagalaga bialu loyogo lene. Masedoniali kira Gaiasabi Arisadagasabi Polo heba haga heago labo tigua libu minuwa Ebesalinaga ngoai hagane hama timbuniore wiagoria abale haru pene.\* <sup>30</sup> Polo ibugua wali agali dewa ngoai ho heagoria ibuni bi lole poa hayagola Yasu mana yu tiga biaga hearume, Napobe, lene. <sup>31</sup> Dindi ogonaga gabumane haru haga maru hearu ti Polo heba nenege ho haga henego tigua Polohondo bi lawia halu lalu, Ina ngoai hagane hamani bi

\* 19:15: Mg 1.24, 1.34    \* 19:17: Lg 7.16, Ab 2.43, 5.5, 5.11    \* 19:20: Ab 6.7, 12.24    \* 19:21: Ab 18.21, 20.22, 23.11, Lm 1.13, 15.24-28, Ga 2.1    \* 19:22: Lm 16.23, 2 Ti 4.20    \* 19:23: 2 Ko 1.8    \* 19:24: Ab 16.16-19    \* 19:26: Iba 115.4, Ais 44.10-20, Yar 10.3, Ab 17.29, 2 Ti 1.15    \* 19:29: Ab 20.4, 27.2, Lm 16.23, 1 Ko 1.14, Kl 4.10, Pm 24

lole napobeore, lene.✧ 32 Ti ani lalu hea tambu wali agali dewaore ngoai hayarume hongo timbuni howa bi dalimu lalu hene. Tigua irane aginaga ngoai harimabe manda nabi howa ti marume bi tara mbirago layagola marume bi tara mendego lo yu aribia hayagola bi lagalaga bialu hene. 33 Yu agali hearume Aleganda ibu wali agalihondo bi lelo, Lole pu, layiyago hondowa wali agali marume lalu, Ina bi lagalaga bialu kamago tene ibuda, lo mitangi bini. Ani mitangi biyagola Aleganda ibu heyu howa gi gamu lowa, O biyagoni tene ibi i heba hagarubi ina ndo, lalu walia hole bi lalu hene. 34 Bi lalu hearia wali agali biarume ibu Yu agaliyago hondowa bi dalimuore lalu, Ebesanaga Ademisi ibu timbuniore ka, lalu tomo dawa duguabehe ale hayagola howa ani laabo halu hene.

35 Ebesa tanonaga hondo haga heago ibugua wali agali bibahende hearuhondo, Bi hundiai hadaba, lene. Ani lowa ibugua tihondo lalu, Ebesa wali agaliru-o Ademisi timbuni kagonaga andabi ni habane hari daligaha howa ibira hene ngagobinaga mamage haga Ebesa tano dege ngago ina bibahendeme manda biai kamagoni. 36 Mbiralime ogoni mo yo handalu nahabane nalabehe ka. Anigo tí mini nawi howa nakarulape mbira buligo tígua keba wahalimu. 37 Agali ogo labome bi pupunaga andaruha winigo mbira kayu nabi inanaga dama wali Ademisi biago mege nabi wiagoria tígua libu bame haru ibirimida. 38 Demidiriasabiibunaga biabe biaga karubi tigua mbirali baba godi lole manda bu kayagua gabumane godi lagane agalime ogoninaga godi lolene horo maru pongo bo wini ngago ogonangi tigua godi labehe ka. 39 Ogoni dege ndo bi tarabi lolene manda bu kamiyagua nde gabumaneme Ebesani karuhondo, Bi galone lelo ngoai holene nga, larangi lolene nga. 40 Tí áyu birimigo Lomo gabumane karume inahondo, Tí gungu birimigoni, lalu ina baba godi labehe ka. Tí birimigo bulene nawi howa birimi. Mbiralime irane ogonaga birima lalu nalabehe ka, lalu guyuguyu biagome bi ogoni lene. 41 Ani lai howa ibugua bibahende ngoai ho hearuhondo, Purogo lai hadaba, lene.

## 20

### *Polo ibu Masedoniabi Agaiabi penego ogo*

1 Bi timbuni dalimu lagalaga biyago hundiai halu purogolo heagola Polohanda Yasu mana yu tiga biaga hearu mo ngoai howa mini mo hongo hagane bi ti lamialu, I porogo tí hondo halimu, lene. Ani lowa ibu Masedonia pene. 2 Dindi uruniha ibaga bialu Polo ibugua Yasu mana yu tiga bu hagahaga biaruhondo mini mo hongo hagane bi lamigi bima pene. Ani bima pialu ibu Agaia anda puwa 3 ege tebira hene. Ege tebira howa Polo ibu iba taluni biralu Siria pole manda biyaria Yuali hearume ibu homelo bole ndindi lalu ka layago hale howa ibu Masedonia hariga pole dai buliya manda bini. 4 Agali Polo heba penego uru Beria howa Pirasa igini Sobadabi Tesalonaiga howa Arisadagasa Segundasalabi Debi howa Gaiasabi Esia dindi howa Tiyagasabi Torobimasabi Timodibi uruni pene.✧ 5 Agali uruni ti bamba halu puwa ina ibulumaya Toroasani hondo heneya. 6 Mberedi Yidi Nahe Hirinigonaga Horo piai hayagola ina iba taluni biralu Pilibai wahalu pirima. Ani pialu horo dauru iba taluni pialu howa Toroasa anda pialu ti hearia puwa sarere mbira ti heba harima.

### *Polohanda Yudigasa mo heya henego ogo*

7 Horo Sarerengi ne lope heagola ina tomo mandagi nole ngoai harima. Ngoai howa Polohanda wali agali hearu bi mana lamialu hene. Ibugua, Yawi i polebero, lo mitangi buwa bi mana lamialu heane dege mbi hanuni hene.✧ 8 Anda hobane daliga ngoai ho beremagoha lamu hale dewa da ho wini. 9 Igiri daliahe mbira mini Yudigasa ibu anda ogoninaga windoni berearia Polohanda bi mana lamiaabo hayagola ibu umu timbuni lene. Umu timbuni lowa Yudigasa palia hondo ho wiaria anda daliga bima irigi hene biagonaga be teboneni howa tagirahayagi pilo ibira hene. Ani biyagola agali marume

✧ 19:31: 2 Ti 1.15 ✧ 20:4: Ab 19.29, 21.29, Eb 6.21 ✧ 20:7: Ab 2.42, 2.46, 1 Ko 16.2, Mo 1.10



Yudigasa yamialu hearia homo tongolo mu wiaria hendene. <sup>10</sup> Yamuwa homo tongolo miyada layago hale howa Polo ibu Yudigasa wiaria dalialu ibu tinginini palia dambi howa ibugua gime yania halu lalu, Ibu dére ngago gi nahadababe, lene.✧ <sup>11</sup> Ani lowa Polo ibu anda daligaha iraga halu puwa mberedi gaibu бага буwa ti haru nene. Nowa ti heba te lalu biraabo howa muna biyagola Polo ibu ti helalu pene. <sup>12</sup> Igiri biago dabi ho heago hondowa tigua ibu andaga haru puwa ti turu hai hene.

*Toroasani howa Miledasa penego ogo*

<sup>13</sup> Ina bamba halu iba taluni biralu Toroasa wahalu Asoso pirima. Ogoriani Polo ibu iba taluni berelo lola hole pirima. Ala Polohanda lalu, I dindi harigani porogo tí bamba halu Asosoni lola hamiya, layadagua pirima. <sup>14</sup> Puwa ina Asosoni Polo lola halu ibu iba taluni anda íbu biralu ina haru Midilini pirima. <sup>15</sup> Midilini wahalu puwa mbiraga paluwa egerebalene handalu hemaria iba talu biago Kaioso handa dele wiagoria pialu harimaya. Pialu howa mbi mende paluwa egerebalene Samoso anda pirima. Samoso wahalu puwa mbi tebone paluwa egerebalene Miledasa anda pirima. <sup>16</sup> Esia dindiha horo dewa bame mohole nabule lowa Polohanda Ebesa bolangua halu puabo hole manda bini. Yu wali agalinaga horo timbuni mini Pendigosi nakaore Yarusaleme abale anda pobeheyagua nde pole manda bini.✧

*Keriso hameigini Ebesani hearunaga agali ala hene miniwi hearuhondo Polohanda bi lamialu penego ogo*

<sup>17</sup> Miledasani howa Polohanda Keriso hameigini Ebesani hearunaga agali ala hene miniwi hearu ibu hearia ibilo bi lawia hene.✧ <sup>18</sup> Ti ibiyagola Polohanda tihondo lalu, Esia dindini pigane ibirungi howa tí heba bialu harugo manda biai kami.✧ <sup>19</sup> Yu agali hearume i bole manda manda bialu mo tandaga halu hearia ina Anduane Homogonaga biabe bia haga howa ini mini mo dindiha halu dugu bialu howa biabe bialu harugoni.✧ <sup>20</sup> Wali agali ngoai ho heagoria howabi tinaga andagaha howabi ina tí Anduane Homogo mana langi lawai ha bigi bialu tí biamogo bulene galonego mbira yu donge nahe bibahende langiai harugo tini manda bidamigoni. <sup>21</sup> Yu wali agalibi Yu wali agali ndo tara tarabi bu hearu ta nabi bibahendehondo, Ko birimigo erembira mialu mini beregedalu Ngode Datagaliwabehayagi halu inanaga Anduane Homogo Yasuhondo mini mbiraore wilimu, lalu hongo howa lamirugoni. <sup>22</sup> Ani bialu harugonigo ai Ngode Datagaliwabe Dinini ibugua ihondo bia laradagua bialu Yarusaleme pole ko. Yarusalemeni howa ihondo agi bulebirabe manda nabi howa pole ko.✧ <sup>23</sup> Dindi bibahende i haga birugoha hewaria Ngode Datagaliwabe Dinini ibugua i langigi bialu, Garabaya bulenebi tandaga nolenebi handa walia haga bulebere, lalu langigi biya.✧ <sup>24</sup> Anigo i holenebi homolenebi o galone ndo mitangi bido. Ngode Datagaliwabenaga biamogo bia holene Bi Mana Debene lamule polene biabe ogoni Anduane Homogo Yasuhanda ihondo ngiyago bu maro bulene galoneore ogoni mitangi bu ko, lene.✧

<sup>25</sup> Polohanda laabo halu lalu, Ngode Datagaliwabehanda Handame Ho Kagonaga mana lamigi bialu ina tí bibahende hemiruha ibaga bialu haru. Ai tigua i lone nahondoleberamiore manda bu ko. <sup>26-27</sup> Anigo ina áyu galone mbira hongo howa langerogo Ngode Datagaliwabehanda bulebiragonaga mana mbira yu donge nahe bibahende langiai harugo tí mbirali koha pirimiyagua nde tene i ndo holebira laro.✧ <sup>28</sup> Keriso hameigini nogo sibi ale karu tigua haru halimulo Ngode Datagaliwabe Dinini ibugua tí helayago uruni tinaga minibi tininaga minibi bayuwa de hondo halimu. Ngode Datagaliwabenaga wali agali karu ti ibu igini homayagonaga darama pelayagome mo ibunaga henego tigua nogo sibi haru hagadagua ti haru halimu.✧ <sup>29</sup> I pedoha agali

✧ 20:10: 1 Kin 17.21 ✧ 20:16: Ab 18.21, 24.17, 1 Ko 16.8 ✧ 20:17: Ab 18.21 ✧ 20:18: Ab 18.19, 19.10  
 ✧ 20:19: Ab 20.3 ✧ 20:22: Ab 19.21 ✧ 20:23: Ab 19.21, 21.4, 21.11, 1 Te 3.3 ✧ 20:24: Ab 21.13, Lm 8.35, 1  
 Ko 4.1, 4.16, Ga 1.1, 2 Ti 4.7 ✧ 20:26-27: Ab 18.6, 1 Ko 7.2 ✧ 20:28: 1 Ko 12.28, 1 Ti 4.16, Hi 9.14, 1 Pi 1.19, 5.2-4

maru biango dudu ale hongoheme tí kamigoha ibalu Yasu mana yu tiga biaga nogo sibi ale kamiru bo paya bulebira manda bido.✧ <sup>30</sup> Awe tíni mandagi hagane kamiru aria marume, Ina poramadagua ibidaba, lowa Yasu mana yu tiga biaga karu mo hondo holebira.✧ <sup>31</sup> Ani bulebirago de hondo halimu. Ina mali tebiruni horombebi mbiragabi tandaga nalu de iba ibalu howa tíni hangu hanguhondo lawai haabo harugo mitangi bilimu, lene.✧

<sup>32</sup> Polohanda lamaro bialu lalu, Ngode Datagaliwabehanda tí hondo helobi ibunaga biamogo bia holene bi maname ibugua tí biamogo bilobi ina tí heledo. Mana ogonime ibugua tí mo hongo habehebi ibunaga wali agalihondo bayale ngulene ngadagua tíhondo ngibehebi ka.✧ <sup>33</sup> Ina mbiralinaga mbirale munibi labolabobi mbira dimagoli nahe haru.✧ <sup>34</sup> Ininaga gime biabe birugome inibi i heba hayarubi ina tomobi mbirale mbiralebi karulape wu harimago tí manda bidamigoni.✧ <sup>35</sup> Anduane Homogo Yasuhanda ibuni bi mbira layago ogo, Mbiralime ihondo mbirale mbira ngiyagua o turu emene howa ina mendealihondo mbirale mereyagua o turu timbuni holebere, ani layago mitangi bimiya. Ani mitangi bialu howa ina bibahende bialu harugodagua biabe timbuni beramagome wali agali hongo nahe karu biamogo bulene ngago walia haru, lene.✧

<sup>36</sup> Polohanda bi ogoni lai howa ibugua ti bibahende heba ge duli hanga ho biruwa Ngode Datagaliwabehondo bi lene.✧ <sup>37</sup> Bi lai hayagola agali biaru bibahendeme Polo polebiragonaga dugu bialu yu nunu lalu hene. <sup>38</sup> Ala Polo ibugua, Tigua i lone nahondoleberami, layagonaga mitangi buwa ti dara timbuniore hene. Dara howa ti Polo heba iba talu wiagoria pene.✧

## 21

### *Polo ibu Yarusaleme penego ogo*

<sup>1</sup> Iname, Ai poramago tíni hondo halimu, lalu iba taluni bialu pia ho wialu Koso anda pirima. Koso yu wahalu Lode anda pirima. Ai Lode howa egerebalene pu dege bialu Padara anda pirima. <sup>2</sup> Padarani howa iba talu mende Ponisia dindi pole wiaria hondowa ina iba talu ogoriani bialu pirima. <sup>3</sup> Pialu howa iname Saibarasa dindi iba dege dombeneha wiago de hondowa gi lehayagi ngelalu bolangua halu Siria dindi puabo harima. Puabo howa Taia anda puwa dabudabu iba taluni wiyaru ogoriani tagu wulebirago manda buwa ina iba talu ngelalu tanoha pirima. <sup>4</sup> Taia tanoha anda puwa Yasu mana yu tiga biaga hearu handa walia howa iname ti heba sarere mbira hondo harima. Ngode Datagaliwabe Dinini ibugua Yasu mana yu tiga biaga o biaruha howa mo manda bia hayagola tigua Polohondo, Yarusaleme napobe, lene.✧ <sup>5</sup> Ani layagoyu ina polene tu hayagola ti helalu pirima. Pialu ti bibahende tinaga one waneiginirubi tanoha howa ina haru pialu solowara angeni pirima. Puwa ina bibahendeme iba muni ge duli hanga ho biruwa Ngode Datagaliwabehondo bi larima. <sup>6</sup> Lai howa iname, Ai hangu hangume poramago hondo halimu lagalaga bialu larimagola tigua nde inahondo, Pudaba, lalu bialu tini andagaru purogo laya handala ina iba sibini bialu pole pirima.✧

<sup>7</sup> Iba taluni bialu Taia yu wahalu puabo howa Tolesesi anda pirima. Anda puwa Yasu mana yu tiga biaga hearuhondo, Bayale kamibe, lalu ti heba horo mbira ho halu palirima. <sup>8</sup> Paluwa egerebalene iba taluni bialu pialu Sisaria anda pirima. Anda puwa Bi Mana Debene lamiaga mbira heago mini Pilibi ibu andaga puwa ibu heba harima. Ala Yarusalemeni howa agali karia biamogo biaga helo dabenege kane Pilibi ibu hene.✧

✧ **20:29:** Md 7.15, Yo 10.12, 2 Pi 2.1 ✧ **20:30:** 1 Ti 1.20, 1 Yo 2.19 ✧ **20:31:** Mg 13.37, Ab 19.8-10, 1 Te 2.11  
 ✧ **20:32:** Ab 26.18, Eb 1.18, Kl 1.12, Hi 13.9 ✧ **20:33:** 1 Sml 12.3, 1 Ko 9.11-12, 1 Ko 7.2 ✧ **20:34:** Ab 18.3, 1 Ko 4.12, 1 Te 2.9 ✧ **20:35:** Md 10.8, 1 Ko 11.9, 11.12, Eb 4.28, 1 Te 4.11, 2 Te 3.8 ✧ **20:36:** Ab 21.5 ✧ **20:38:** Ab 20.25 ✧ **21:4:** Ab 20.23, 21.12 ✧ **21:6:** Ab 20.36 ✧ **21:8:** Ab 6.5, 8.5, 8.26, 8.40, Eb 4.11, 2 Ti 4.5

<sup>9</sup> Ibunaga wane maria agali nape biruwa tigua Ngode Datagaliwabe bi mana latagi haga berene. ✧ <sup>10</sup> Ina ti heba horo maru ho hemaria Ngode Datagaliwabe mana latagi haga mbira heago mini Agabasa ibu Yudia howa ibini. ✧ <sup>11</sup> Ina hemaria ibuwa ibugua Polonaga nogo dongone yamuwa ibuninaga gi gebi huba bialu howa mbiwia halu lalu, Ngode Datagaliwabe Dinini ibugua agua laya, Nogo dongone ogoninaga anduanego Yu agali Yarusalemeni karume ogonidagua minu huba buwa Yuali ndo agali tarahondo minu mulebira, laya, lene. ✧

<sup>12</sup> Ani layagola hale howa inamebi wali agali hearumebi Polohondo lalu, Ina Yarusaleme puabo nahe waha, lalu la dege bialu lo erekui harima. ✧ <sup>13</sup> Ani laabo harimagola ibugua ladai bialu lalu, I mini burugu laruago tí dugu biaabo harimigo agibe. Ina Yarusalemeni howa inaga gi gebi huba bulene dege ndo Anduane Homogo Yasunaga mini yaraga helo i homolene ngayaguabi nde karulape manda bu ko, lene. ✧

<sup>14</sup> Ani layagola ibunaga mini bilinahe wiago mo beregedabe naheyagola wahalu iname lalu, Anduane Homogohanda hame ledadagua bilo, larima.

<sup>15</sup> Horo maru howa dabudabu huba bu yalu Yarusaleme pirima. <sup>16</sup> Yasu mana yu tiga biaga maru Sisaria howa ina heba yamaga halu pirima. Pialu howa Saibarasali mbira ibu Yasu mana yu tiga biaga bamba hene heago mini Nasono ibu andaga pu holomaya tigua ina haru pene.

### *Yarusaleme puwa Polohanda binigo ogo*

<sup>17</sup> Yarusaleme anda pirimagola Yasu mana yu tiga biaga maru hearume, Ibalu harimida, lowa turu timbuni hene. <sup>18</sup> Horo mendengi Polo ina haru Yamese hearia pirima. Pialu hemaria Keriso hameigini hearunaga agali ala hene miniwi hearu ti mandagi ibu heba ngoai ho hearia. ✧ <sup>19</sup> Polohanda tihondo lalu, Hameneru-o turuba, lowa Yuali ndo wali agali tara tara hearuha Ngode Datagaliwabehanda ibuha howa biabe bibahende biyaru te lamiai hene. ✧ <sup>20</sup> Ani lamiyagola hale howa ti bibahendeme Ngode Datagaliwabe mini yaraga halu hene. Ani buwa tigua Polohondo lalu, Hamene-o oalini emene tara nga manda bidego. Yu wali agali daosini dewaoreme Yasu mana yu tiga bu howa Mosese heneyangi Mana lowini ngago hongo howa yu haabo howa biaga ka. ✧ <sup>21</sup> Ani biaga karuhondo agali maru hearume lalu, Polo ibugua Yu wali agali dindi tara tarani karuhondo bi ogobi lamiaga. Mosese heneyangi Mana lowini ngagobi igirinaga dongone podo mabu biagane mana ngagobi Yu wali agalinaga mana ngagobi bibahende bulene nawiorego wahai halimu, lalu ina ogonidagua lawai haga ke, lalu tigua lamiyiya. ✧ <sup>22</sup> Marume í oali ibu ka larago tigua haleore holebirago agi bimiyabe. <sup>23</sup> Iname laramadagua bibelo lalu agali maria o karu ti hangu hangume, Mbira heneneore bulebero, lalu Ngode Datagaliwabehondo bi hongo howa lo wiya. ✧ <sup>24</sup> Ogonigo ti Ngode Datagaliwabenaga deni dodo nahe helonaga mana bule poradagua ibi ti heba mandagi pialu tigua Ngode Datagaliwabehondo mbirale bo mulebiragonaga yolo ina mia habe. Ani beregola agali mariali uru tinaga mandari podai habehe holebira. Ogonidagua biriyagua marume, Polo ibu nakarulape biaga, lalu lamiyago hale hayarume inahondo ke howa langiyada manda bialu Mosese heneyangi Mana lowini ngago ina biai haredane manda bulebira. ✧ <sup>25</sup> Yu wali agali ndo tara tara howa Yasu mana yu tiga biaga karu tihondo iname lo mbiraore howa beba gilibu pellarimago ogo Mbira ogo, Ne nolenebi nogobi damahondo bo minigo nolene nawi nanalimu. Mende ogo, Darama ibuni nanalimu. Tebone ogo, Nogo tara tararu egarubi ma gingima binigo darama heba nanalimu. Mane ogo, Wali agali kayu nayalimu. Ogonidagua lalu gilibu pellarima, lene. ✧

✧ **21:9:** Yol 2.28, Ab 2.17 ✧ **21:10:** Ab 11.28 ✧ **21:11:** Yo 21.18, Ab 20.23, 21.33 ✧ **21:12:** Md 16.22 ✧ **21:13:** Ab 20.24 ✧ **21:18:** Ab 15.2, 15.13, Ga 1.19, 2.9 ✧ **21:19:** Ab 15.4, 15.12, Lm 15.18-19 ✧ **21:20:** Ab 15.1, 15.5, 22.3, Lm 10.2, Ga 1.14 ✧ **21:21:** Ab 16.3, Ga 2.3 ✧ **21:23:** Dag 6.13-21 ✧ **21:24:** Ab 18.18 ✧ **21:25:** Ab 15.29

<sup>26</sup> Ani layagola Polohanda agali biaru heba pu paluwa egerebalene ti Ngode Datagaliwabenaga deni dodo nahe helonaga mana ti haru mandagi bini. Ani buwa Polo ibu Anduane Homogonaga andaha anda puwa tigua ti Ngode Datagaliwabenaga deni dodo nahe helonaga mana biala heago, Horo ogongi bumaro bulebira, lalu ibugua loma binigo mo miaga heago lamini. Mana ogoni bumaro buwa agali maria biaru hangu hangume Ngode Datagaliwabehondo mbirale bo mulene wini.✠

*Yu agali hearume Polo mininigo ogo*

<sup>27</sup> Mana ogoni bialu holenenaga horo karia winigo piai holene kaware wiagola Yu agali maru Esia dindiha howa ibiyarume Polo Anduane Homogonaga andaha hearia de hendene. De hondowa tigua wali agali bibahende hearume Polohondo keba helo tinaga bu mini mo heya hayagola tigua keba halu Polo minini.✠ <sup>28</sup> Minuwa tigua dalimu lalu, Isaraelealiru-o biamogo bule ibidaba. Agali ogome dindi bibahendeha pume halu ibugua wali agali hearu lawai halu Isaraele wali agalibi Mosese heneyangi Mana lowini ngagobi Anduane Homogonaga anda ogonibi uruni galone ndo lalu haga. Ogoni hangu ndo ayuore ibugua Yuali ndo agali tara tara maru hearu Anduane Homogonaga anda haru anda ibalu anda ogoni loma bia hene hayago mo mebia hayiya, lene.✠ <sup>29</sup> Tigua Ebesali mini Torobimasa ibu Polo heba tanoha hearia de hondowa Polohanda ibu Anduane Homogonaga andaha haru anda peda bada mitangi buwa bi ogoni lene.✠

<sup>30</sup> Ani layagola howa Yarusaleme ogoniha, Ba ba, lowa bi lame halu wali agali bibahende gerai lalu hearume hongo hai howa tigua Polo minuwa Anduane Homogonaga andaha howa gililo yalu tagira pene. Ani buwa tigua Anduane Homogonaga anda panga bibahende abale payai hene. <sup>31</sup> Ani biyagola agali dewaore bu hearume Polo homelo bole biyaria mbirali heagome Lomo ami haru haga haguane hearia puwa, Yarusaleme wali agali bibahendeme gungu timbuni bialu ka, lalu lamini. <sup>32</sup> Ani layagola ami haru haga haguane biagome ami haru haga maru hearubi ami agali maru hearubi ti haru puwa wali agali ngoai ho hearia gerai lalu abale pene. Ami haru haga haguane biago ami agali maru heba ibiyago hondowa wali agali biarume Polo nabe wahene. <sup>33</sup> Ami haru haga haguane biagome Polo hearia pialu ibu yani howa ibugua ami agali biaruhondo lalu, Pu seni kirame ibu dariba hadaba, lene. Ani lowa ibugua wali agali hearuhondo lalu, Agali ogo aibe. Ibugua agi biyabe, lene.✠ <sup>34</sup> Ani layagola wali agali ngoai ho hayarume ladai bialu bi taratara lagalaga bini. Ani lagalaga biyagola ami haru haga haguane biagome bi layaru irane handa walia nahe howa ami agali biaruhondo, Agali ogo aminaga andagaha haru pudaba, lene. <sup>35</sup> Ani haru pialu howa andaha irigi hagane wiagoria iraga halu pole biyaria wali agali ngoai ho hayarume keba timbuni haya handala ami agali biarume tinaga gime Polo yaraga ho yalu pene. <sup>36</sup> Wali agali biarume haruru pialu bi timbuni lalu, Ba homelo ba, lai hene.✠

*Polo ibunime, Agua biru, lalu bi tene lenego ogo*

<sup>37</sup> Ami agali biarume Polo ami andagaha yalu anda pialu hearia Polohanda haru haga haguane biagohondo, Ina ihondo bi mbira loa kogo loabe, lene.

Ani layagola haru haga haguane biago ibugua lalu, Í Girigi bi larilibe. <sup>38</sup> Iyibiali mbira ala gabumane heba wai bialu ibunaga wai biaga agali daosini maria (4,000) dindi ko wali agali nahaga wiagoria haru penego í ndoda, lene.✠

<sup>39</sup> Ani layagola Polohanda ladai bialu, I Yualiore ko. Silisia dindinaga tano dunini Tasasa ngago inaga dalu ogonigo i ogoni howa ibu ko. Wali agalihondo bi mbira loa kogo loabe, lene.

✠ 21:26: Dag 6.13, Ab 24.18, 1 Ko 9.20 ✠ 21:27: 2 Ti 1.15 ✠ 21:28: Ese 44.7, Ab 6.13 ✠ 21:29: Ab 20.4, 24.5-6, 2 Ti 4.20 ✠ 21:33: Ab 20.23 ✠ 21:36: Lg 23.18, Yo 19.15, Ab 22.22 ✠ 21:38: Ab 5.36-37



<sup>40</sup> Ani layagola ami haru haga haguane biagome, E la, layagola Polohanda ami anda togo wiagoriani howa bi hundilo gi gamu lene. Bi hundiayagola Polohanda Yu wali agalinaga bi lalu ogodagua lene.

## 22

<sup>1</sup> I aba hameneru-o tigua ihondo, Biri, larimigonaga ina nabi lalu ladai berogo hale halimu laro, lene. <sup>2</sup> Ani lalu hearia Yualinaga bi lowa layago hale howa agali hearume bi mbira nale nimulo hene. Nimulo heagola Polo ibugua lalu,

<sup>3</sup> I Yualiore ko. Silisia dindinaga tano Tasasa inaga dalu ogoni. Oali Yarusalemeni ibu hewaria Gamelielehanda i lawai haga hene. Ina mamali Mana lowinigo ngadagua bulene nga lo manda bialu haru. Ayu ti kamirume Ngode Datagaliwabehanda bia laradagua bialu kamidagua dege ibi ani bialu haru. <sup>4</sup> Hariga ayu ini pialu kogoriani ala marume pialu hearia ina mo tandaga halu maru homelo baru. Ina wali agali minuwa garabaya andaha ba andanda biru. <sup>5</sup> Loma binigo mo miaga haguane timbuni kagobi Ganisolo agali bibahende karubi tigua ina larogoni henene binigodagua laralo manda bulebira. Tigua Yu agali ti hamene Damasagasani karuhondo beba i yalu puwa muliya gilibu ngiya. Ngiyagola Hariga ayu ini pialu kogoriani piaga heneyaru ege pu senime dariba howa balu Yarusaleme haru dai bule minu piru, lene.

*Polo ibuni Yasuhondo mini mbiraore pigane winigo te laminigo ogo  
(Abosolo 9.1-19, 26.12-18)*

<sup>6</sup> Polohanda laabo halu lalu, Ina Damasagasa kaware ngelowa harigani pialu hewaria horombe hanuni hayagola hari daligaha howa abaleore wa timbuni harali haya. <sup>7</sup> Ani biyagola i dindini odowa pilope ho wiwaria mbiralime lalu, Solo-o Solo-o ina i aginaga mo tandaga harilibe, layuagola hale haru. <sup>8</sup> Ani layuagola ina, Anduane Homogo-o i ai kebe, ladai biru. Ani ladai birugola ibugua, Ina mo tandaga hariligo i Nasareteali Yasu kogoni, laya. <sup>9</sup> Agali i heba pirimaru ti wa hayago dege de handaya. Mbiralime ihondo bi layuago ibunaga bi ti nahalehe. <sup>10</sup> Ani biyagola ina lalu, Anduane Homogo-o i agi buabe, laru. Ani larugola Anduane Homogo ibugua ihondo lalu, i heyalu Damasagasa pu. Anda pialu keria ina bulene ngago Ngode Datagaliwabehanda manda manda bu kago mbirali kagome langiai holebira, laya. <sup>11</sup> Wa timbuni hayagome i de mo ko hayagola agali i heba pirimaru tigua i gini yalu haru pialu Damasagasa anda pirima.

<sup>12</sup> Agali mbira mini Ananiasa ibu Damasagasani hene. Ibu Ngode Datagaliwabe mitangi biaga howa inanaga Mana lowinigo ngadagua biaga henego Yu wali agali Damasagasani hearu bibahendeme ibu agali bayale tigabiore ka laga hene. <sup>13</sup> Agali ogoni ibugua i hewaria ibuwa ihondo lalu, Hamene Solo-o i de lone bayale handabe, laya. Ani layaore i de lone bayale handabehe howa ibu de handaru. <sup>14</sup> Ibugua lalu, Ina mamalinaga Ngode Datagaliwabe kago ibugua hame ledago ina manda buwa bibelobi ibunaga Biabe Bia haga bu mini tigabiwi kago ina de handabelobi ibunime bi larago hale habelobi i dabaya. <sup>15</sup> Ina de handarigobi hale harigobi wali agali bibahende lamule ibunaga walia hagane i holebere, laya. <sup>16</sup> Ani lowa ibugua ihondo lalu, Ai hondo holene nawi. Ayu ogoni i heyalu baboraya bulene nga. Ina ko birigo domo wahai helo Anduane Homogohondo bi labe, lalu laya, Polohanda lene.

*Anduane Homogohanda Polohondo, Wali agali tara tarahondo bi mana lamule pu,  
laminigo ogo*

✧ 22:3: Ab 5.34-39, 9.11, 21.39, 26.5, Lm 10.2, 1 Ko 11.22, Ga 1.14, Pb 3.5 ✧ 22:4: Ab 22.19, 26.9-11, Pb 3.6, 1 Ti 1.13  
✧ 22:4: Ab 8.3 ✧ 22:5: Ab 9.2 ✧ 22:6: Ab 9.3, 26.12-13 ✧ 22:12: Ab 9.17, 10.22, 1 Ti 3.7 ✧ 22:14: Ab 9.15, 1 Ko 9.1, 11.23, Ga 1.12 ✧ 22:15: Ab 23.11, 26.16 ✧ 22:16: Ab 2.21, 9.11, 9.18, Lm 10.13, Hi 10.22



<sup>17</sup> Polohanda lamiaabo howa lalu, Ani biyagola i Yarusaleme dai biru. Dai buwa Anduane Homogonaga andaha anda puwa Ngode Datagaliwabehondo bi lalu hewaria de gandeba mbira handaru. <sup>18</sup> Handalu hewaria Anduane Homogo ibuni ibu heneyago ibugua ihondo lalu, Ina inaga bi mana lameregola wali agali ogoriani karume hale habe manga holebirago i Yarusaleme abale wahalu polene nga, langiya. <sup>19</sup> Ani langiyagola ina ladai bialu, Anduane Homogo-o ina ngoai hagane anda bu hearuha pume lalu wali agali ihondo mini mbiraorewi hearu mini barugoni tini bayuwa manda biai ka. <sup>20</sup> Inaga walia hagane Sibeni bayangi ibi ti heba harugoni. Ibu homolene karulape lalu ibu homelo бага biarunaga labolabo daligani karulagane ina wu harugoni, laru. <sup>21</sup> Ani larugola Anduane Homogo ibugua ihondo lalu, I wali agali taratara kaundia karuha pobelo pu larogoni, laya, Polohanda lene.

<sup>22</sup> Polohanda bi layago wali agali bu hayarume bayuwa hale ho howa ibugua wali agali taratara karuha polene te layagola tigua keba lalu bi dalimu lalu, Agali ogonibi nahabehedago homelo bo waha, lene. <sup>23</sup> Tigua bi dalimuore lalu tininaga labolabo lerelalu abalu taulo ba dagadaga bialu hene. <sup>24</sup> Ani biyagola Lomo ami haru haga haguane biagome ami agali biaruhondo lalu, Ami anda tamuha Polo haru puwa Yu agali karume ibuhondo keba lalu bi dalimu larago irane langilo ibu tibume balimu, lene. <sup>25</sup> Ani layadagua bialu tigua Polo dariba howa tibume bole biyaria Polohanda ami haru haga mbira heagohondo lalu, Lomo ho tene hene kagome ko biyagonaga godi nale howa ibu tibume bolene karulape lowini ngabe, lene.

<sup>26</sup> Ani layago hale howa ami haru haga biagome ami haru haga haguane hearia puwa ibuhondo lalu, Agi berebe. Agali biagoni ibu Lomo ho tene heneyago, lene.

<sup>27</sup> Ani layagola ami haru haga haguane biagome Polo hearia puwa ibuhondo lalu, I Lomo ho tene hene kebe langi, lene.

Ani layagola Polohanda ladai bialu lalu, E, lene.

<sup>28</sup> Ani layagola ami haru haga haguane biagome lalu, I Lomo ho tene holenaga muni timbuni mirugoni, lene.

Ibu ani layagola Polo ibugua ladai bialu lalu, I aiyahanda i taba hanayangi howa ini Lomoali henego kogoni, lene.

<sup>29</sup> Ani layagola agali ibu mo bila hole hearume ibu hearia howa ha amu hene. Ami haru haga haguane biagome Polo ibu Lomo ho tene hene ka layago hale howa ege pu senime dariba harugoni mitangi bialu gi hene.

### *Polohanda Ganisolo agali hearuhondo bi lenego ogo*

<sup>30</sup> Yu agalime Polo ibugua ko ogoni biya lalu heago hale howa ami haru haga haguane biagome Polo ibu ko agi biyadabe hai bulebero lo manda bini. Ani lo manda buwa egerebalene ibugua, Ege pu seni Polo dariba hayago hadadaba, lowa loma binigo mo miaga haguane hearubi Yu wali agalinaga Ganisolo agali bibahenderubi mo ngoai hene. Mo ngoai ho heagoria ibugua Polo haru ibu helene.

## 23

<sup>1</sup> Polo ibu Ganisolo agali heagoria howa ibugua ti tigatiga handade lalu lalu, I hameneru-o. Bamba bialu harugobi áyu bialu kogobi mitangi bialu inaga miniha ko mbira do nahe kogonigo Ngode Datagaliwabe ibu de hendeda, lene. <sup>2</sup> Ani layagola loma binigo mo miaga haguane timbuni heago mini Ananaiasa ibugua agali maru Polo heagoria kaware hearuhondo lalu, Ibunaga ne hambuni badaba, lene. <sup>3</sup> Ani layagola Polohanda ibuhondo lalu, I anda hai tagirahayagi dege beni peleme hiraganegobi kego.

✧ 22:18: Ab 9.29-30 ✧ 22:19: Ab 8.3, 22.4, 26.9-11 ✧ 22:20: Ab 7.58, 8.1 ✧ 22:21: Ab 9.15, 13.2, 13.46, Ga 1.15-16, 1 Ti 2.7 ✧ 22:22: Ab 21.36 ✧ 22:25: Ab 16.37 ✧ 22:29: Ab 16.38 ✧ 23:1: Ab 24.16, 1 Ko 4.4, 1 Ko 1.12, 2 Ti 1.3 ✧ 23:2: 1 Kin 22.24, Yar 20.2, Yo 18.22-23

Ngode Datagaliwabe ibugua í bolebirá. Ína ihondo Mana lowinigo ngago puguari lalu í godi hale hole bedego. Ogonibi biruwa ína tihondo, Ibu badaba, larigome Mana lowinigo íni puguari, lene.✧

<sup>4</sup> Ibugua ani layagola agali Polo heagoria kaware hayarume ibuhondo lalu, Ína Ngode Datagaliwabenaga loma binigo mo miaga haguane timbuni o bedago mege berego agibe, lene.

<sup>5</sup> Ani layagola Polohanda ladai bialu lalu, Í hameneru-o ibu loma binigo mo miaga haguane timbuni ka laramigo í manda nabi haru. Wali agali tí kamirunaga haru haga kago tigua ibu mege bulene nawi, lalu Anduane Homogonaga mbugani gilibu ngago manda bido, lene.✧

<sup>6</sup> Polohanda agali maru hearu ti Sadiusi aria maru Perisi aria heago hondowa ibugua Ganisolo ngoai ho hearuhondo bi dalimu lalu, Í hameneru-o í aiyá abala Perisi aria howa íbi Perisi aria kogoni. Wali agali homeneru mo heya holebiragonaga í mini dunu bia ho kogonaga áyu godi laramagoni, lene.✧

<sup>7</sup> Ibugua ani layago hale howa Sadiusi aria biarubi Perisi aria biarubi ti lai lalu talebuki bu hene. <sup>8</sup> Sadiusi aria tigua wali agali homeneru mo heya nahagabi dahuliyal-ibi dininibi nahe laga henego Perisi aria tigua mana tebira uruni henemane yu tiga biai haga hene.✧ <sup>9</sup> Anigo agali biarume lai lalu bi dalimuore laabo hayagola Mana lowinigo lawai haga maru hearu tibi Perisi aria howa tigua heyuwa bi hongo howa lalu, Agali ogonime kagua mbira agi biyabe ina handa walia nahe kama. Dininimebe be dahuliyalimebe tobane mbiralime ibuhondo bi lamiaore biyada mitangi bidama, lene.✧

<sup>10</sup> Ani layagola tigua lai lowa gungu timbuniore bialu Polo yu gililo migimigi biraria Polo homabeheyane hondowa ami haru haga haguane biagome gi hene. Gi howa ibugua ami agali hearuhondo lalu, Ti gungu bialu karia puwa Polo ami anda tamuha haru pole damu pudaba, lene.

<sup>11</sup> Ani biyagola ogoningi mbiraga Anduane Homogo Polo hearia ibuwa lalu, Í gi nahe hongo ho habe. Oali Yarusalemeni howa ína inaga walia hagane harigodagua Lomo puwabi ani dege bulebere, lene.✧

*Yu agalirume Polo homelo bole manda manda bu henego ogo*

<sup>12</sup> Egerebalene Yu agali maru hearu ti ngoai howa Polo homelo bole manda manda bialu hene. Tigua, Ina tomo ibabi nane Polo yo pialu napelo bo tongolo milowa namiya, lalu hongo howa lowini. <sup>13</sup> Ogoni bulene lo mbiraore howa manda manda bu bereneru ti lamaga howa pira maria (40) agima hene. <sup>14</sup> Ani lo manda buwa tigua loma binigo mo miaga haguane hearubi agali ala hene miniwi hearubi ti hearia puwa tihondo lalu, Iname tomo ibabi nane Polo yo pialu napelo bo tongolo milowa namiya lalu hongo howa lo wirima, lene. <sup>15</sup> Ani lowa lalu, Anigo tigua Ganisolo agalinaga bi la halu ami haru haga haguane biagohondo bi lawia halu, Polo ibugua agi biyabe bayuwa hale holomaya ina kamaria ibu haru ibabelo hame ledama, lalu henemane hame lowa le tingi halu bi ogoni lawia halimu. Ani beramigola Polo oali anda naibi wene ibalu karia iname ibu homelo bole yu birulumago, lalu Yu agali biarume ani lene.✧

<sup>16</sup> Tigua bi ogoni lo manda biyago Polo ababuni mbirame hale hene. Hale howa ibugua ami anda tamuha puwa Polo lamini. <sup>17</sup> Lamiyagola Polohanda ami haru haga mbira heago olowa ibuhondo lalu, Igiri ogome ami haru haga haguanehondo bi mbira loa kago ibu karia haru pu, lene. <sup>18</sup> Ani layagola ami haru haga biagome igiri biago ami haru haga haguane hearia haru puwa ibuhondo lalu, Garabaya agali Polo ibugua í olowa igiri ogome ihondo bi mbira loa kago haru pu layagola haru ibiru, lene.

✧ 23:3: LBM 19.35, Man 25.1-2, Md 23.27-28, Yo 7.51 ✧ 23:5: Har 22.28 ✧ 23:6: Ab 4.2, 24.15, 24.21, 26.5, Pb 3.5  
 ✧ 23:8: Md 22.23, Mg 12.18, Lg 20.27 ✧ 23:9: Ab 5.39, 22.7, 22.17-18, 25.25 ✧ 23:11: Ab 18.9, 19.21, 27.23-24, 25.11, 28.16-23 ✧ 23:15: Ab 25.3

<sup>19</sup> Ani layagola ami haru haga haguane biagome igiri biagonaga gini yalu libuni hangu hole haru pu bagi howa ibuhondo lalu, Bi agi langule ibiribe, lene.

<sup>20</sup> Ani layagola igiri biagome lalu, Yu agali haru haga marume lo mbiraore howa ihondo bi lawia halu, Polo ibu agi biyabe bayuwa hale holomaya Ganisolo agali kamaria Polo haru ibabelo hame ledama, lalu tindule hamele tingi howa bi ani lawia holebirago <sup>21</sup> hale nahabe laro. Agali pira maria (40) agimame Polo ibilo hariga obeneni yu birulebirago. Tigua, Iname tomo ibabi nane Polo yo pialu napelo bo tongolo milowa namiya, lalu hongo howa lo wiya. Tigua ani bule kago. Ina bi larego hale hole ka, lalu igiri biagome lamini.

<sup>22</sup> Ani lamiyagola ami haru haga haguane biagome ibuhondo lalu, Ina bi o langirigoni mendeali nalamibe, lowa ibugua igiri biagohondo, Ai andaga pu, lene.

### *Gabumane haru haga Peligisi hearia Polo haru penego ogo*

<sup>23</sup> Ami haru haga haguane biagome ami haru haga kira olowa libuhondo lalu, Sisaria pole ami agali handari kirabi (200) nogo hosini biralu piaga agali pira kariabi (70) yandare yaga agali handari kirabi (200) ti bibahende mo ngoai howa áyu mbiraga u palueangi haragola pole manda manda bilimu. <sup>24</sup> Polo ibubi nogo hosini biralu pelonaga nogo hosi karulape haru ibalu ibu bayuwa mamage halu gabumane haru haga Peligisi karia haru pilimu, lene. <sup>25</sup> Ani lowa haru haga haguane biagome beba mbira gili bialu bi gili binigo ogo,

<sup>26</sup> I Kolodiasa Lisiasahanda ina gabumane haru haga timbuniore Peligisi ihondo beba ogo gilibu wia haro. Egerebagi laro. <sup>27</sup> Yu agali karume agali ogoni minuwa homelo bole biyaria ibu Lomo ho tene hene ka layago hale howa ibi inaga ami agalirubi iname ibu haru pirima.✧ <sup>28</sup> Yu agali biaru tigua ibu ko ogo biya lalu agi larabe hale hoa howa tinaga Ganisolo agali ngoai ho heagoria ina ibu haru piru.✧ <sup>29</sup> Haru puwa ibu homelo bolenenagabi garabaya bulenenagabi irane nawi ibugua ko mbira nabioyane handa walua haru. Tigua ibu ko biya layago tene tininaga mana lo ngagonaga laya.✧ <sup>30</sup> Yu agali hearume Polo homelo bole manda manda bu ka lalu mbiralime i langiyagola ina i keria ibu haru ibulene nga manda biru. Ibu ko biya layarume i hale habelo lamule pudaba laru. Ai bi ogoni lalu beba ogoni gilibu wia haro, lene.✧

<sup>31</sup> Ami agali biarume bilimu layadagua bialu tigua Polo damu puwa mbiraga ogonungi Andibadarisi tano haru pene. <sup>32</sup> Egerebalene ami agali dindidindi piaga biaru ti Yarusaleme ami andaga dai bini. Ami agali nogo hosini biralu piaga biaru ti Polo haru puabo hene. <sup>33</sup> Tigua Polo Sisaria haru pialu gabumane haru haga heagohondo beba mialu ibugua Polo handaya ho helo ibuhondo mini. <sup>34</sup> Ani biyagola gabumane haru haga biagome beba daga lowa Polohondo lalu, I anialibe, lene. Ani layagola Polohanda, I Silisiali ko, layagola <sup>35</sup> ibugua Polohondo lalu, I ko biri layaru ti ibiragola ina bi ladai berego hale holebero, lene. Ani lowa ibugua, Gabumane anda kagoha ami agalime ibu handaya ho helo haru pudaba, lene.

## 24

### *Yu agalime, Polo ko biya, lenego ogo*

<sup>1</sup> Horo duria howa loma binigo mo miaga haguane timbuni mini Ananiasa heago ibugua agali ala hene miniwi maru hearubi Lomo mana lo winidagua la haga mbira mini Tedalasa heago tinaga la helo tigua ibubi Sisaria haru pene. Puwa tigua gabumane haru haga Peligisi hearia pialu ibu hale helo Polohanda ko ogo biya lalu lamini. <sup>2</sup> Ani

✧ 23:27: Ab 21.30-33, 22.25-27, 24.7 ✧ 23:28: Ab 22.30 ✧ 23:29: Ab 18.14-15, 25.19, 26.31 ✧ 23:30: Ab 23.20, 24.5-8

lamiyagola godi lalu howa tigua Tedalasa olayagola ibugua Polohanda ko ogo biya lalu bi layago ogo,

Peligisi í timbuniore kego. Í mini gigabiwi howa ina haru haabo harigome ina kamagoria mo palia holene wiaabo kagoni. Ina kamaru bayale holomaya mo tiga bulene dewa bialu kego karulapeda. <sup>3</sup> Ogonibi bulene ngadagua biame halu kego hondowa ina turu timbuni halu ihondo kaj laabo haramali. <sup>4</sup> Inaga hale holene henge emene ngago manda buwa ina bi nemandi mbira hangu la harogo ina ina dara howa bayuwa hale habelo. <sup>5</sup> Ko bulene tene agali ogonimeyane handa walia kama. Ibugua Yu agali dindi bibahendeni karu mo gungu bia hagabi Nasareteali aria karunaga haru hagabi ibu dege ka.✧ <sup>6</sup> Ibugua Ngode Datagaliwabenaga anda mo ko holebiyaria minarima. [Inanaga Mana lo winigo ngagome godi lolene lo ngadagua lolene manda bu harima. Ani manda bu hemaria✧<sup>7</sup> ami haru haga haguane Lisiasa ibuwa ibugua hongo timbuniore howa ibu haru piya. <sup>8</sup> Ani buwa Lisiasahanda, Agali ogonihondo ko biri lalu kamiru tigua gabumane haru haga Peligisi ibu hale helo tí ibu karia lamule pudaba, laya.] Agali ogoni ina mo bila hariyagua iname ibu ko ogo biya laramago bibahende henene biyadane handa walia holebere, lalu Tedalasa handa lai hene. <sup>9</sup> Yu agali hearu tiguabi Polohanda ko ogoni biya layago heneneore lara lalu lagimbu bini.

*Polohanda Peligisi hale helo bi lenego ogo*

<sup>10</sup> Bi ogoni lai hayagola gabumane haru haga biagome Polo ibu bi lelo ibuhondo, Ai í la, lene. Ani layagola Polo ibugua lalu,

Dindi ogoria wali agali karunaga godi hale hagane mali dewaoreni í haabo hene kego manda bido. Ani manda bidogo tigua ihondo ko ogoni biri layagonaga í hale habelo ladai bule í turu ho ko. <sup>11</sup> Ala ina Ngode Datagaliwabe mitangi bialu lotu lole Yarusaleme pirungi howa horo áyu hombeane (12) kogo ini manda bibebe ke.✧ <sup>12</sup> Yu agalime í Anduane Homogonaga andaha mbirali heba lai lalu ndo hewaria de handaya. Wali agali hearu tinaga ngoai hagane andaruhabi tanohabi howa ina ti mo gungu bia nahe hewaria ti de handaya. <sup>13</sup> Tigua áyu ogoni ihondo, Ko ogo biri, lalu kago henene larago tí manda bilimulo walia holene mbira nawi. <sup>14</sup> Ina biruligo la pani harogo ogo. Tigua Hariga í pialu kogo ogoni mo hondo holenaga manada laga kago. Ina Hariga ogoriani pialu howa ina mamalinaga Ngode Datagaliwabe kago mitangi bialu lotu laruli. Mosese heneyangi Mana lowinigo ngagobi Ngode Datagaliwabe mana latagi haga hearume mbugani bi gili bu winigo ngagobi bibahende ina yu tiga bido.✧ <sup>15</sup> Agali o karume wali agali bibahende bayale biagabi ko biagabi ta nabi homaragola howa Ngode Datagaliwabehanda ti mo heya holebiragonaga mini dunu bia ho kadagua ibi ani dege mini dunu bia ho ko.✧ <sup>16</sup> Anigo ina Ngode Datagaliwabebi agalirubi inaga miniha ko mbira do nahe hendelo manda biaabo haruli, lene.✧

<sup>17</sup> Polohanda laabo halu lalu, Ala í Yarusaleme wahalu puwa mali dewa howa ina Yu wali agali yagibano hearu biamogo bialu tihondo muni mulebi Ngode Datagaliwabehondo mbirale bo mulebi í Yarusaleme dai biru.✧✧ <sup>18</sup> Dai buwa í Anduane Homogonaga andaha howa Ngode Datagaliwabe deni dodo nahe holenaga mana biai howa mbira bule ibirugo bialu hewaria tigua í de handaya. I heba wali agali ngoai nahe lai gungubi nabi. <sup>19</sup> Yu agali maru Esia dindini howa ibu hearu ti dege hayagoni. Agali urunime ihondo, í ko biri, lalu kayagua nde í hale habelo tinime bi ogoni lole oali ibulene nga.✧ <sup>20</sup> Ina Ganisolo agalihondo, I mbira nabi, lalu ladai birugo hale hene agali o karume ina ko binigo manda bu kayagua nde áyu langilo. <sup>21</sup> I Ganisolo agali biaru heba

✧ 24:5: Ab 6.13, 16.20, 17.6, 21.28, 1 Pi 2.12, 2.15 ✧ 24:6: Ab 21.28-30 ✧ 24:11: Ab 21.17, 21.26, 24.17 ✧ 24:14: Ab 24.5, 26.22, 28.23, 2 Ti 1.3 ✧ 24:15: Dan 12.2, Yo 5.28-29, Ab 23.6, 26.6-7, 28.20 ✧ 24:16: Ab 23.1 ✧ 24:17: Ab 11.29-30, 20.16, Lm 15.25-26, 1 Ko 8.4, Ga 2.10 ✧ 24:17: Ab 21.17-28 ✧ 24:19: Ab 23.30, 25.16, 2 Ti 1.15

howa bi mbira dege larugo ogo, Wali agali homeneru mo heya holebiragonaga i yu tiga bidogo, o larugonaga tigua godi horo áyu ogoni larimi laru, lalu Polohanda lene.✧

<sup>22</sup> Ani layagola Peligisihanda Anduane Homogonaga Harigani piagane mana manda timbuni binigo godi lalu heago lamaro bialu lalu, Ami haru haga haguane Lisiasa ibu ibiragola inaga godi lala kamago tigua, Í ko biri, layago biridabe nabitabe manda bulebero, lene.✧ <sup>23</sup> Ani lowa ibugua ami haru haga agali Polo handaya ho hayagohondo lalu, Polo mamage howa dege ibuni bua haradagua bilobi ibunaga nenege karume ibu biamogo bule ibilobi henge mibe, lene.✧

### *Polohanda Peligisibi ibu one Durusilabihondo bi lenego ogo*

<sup>24</sup> Horo maru howa Peligisi ibu one Durusila ibu Yu wali berenego libu haru ibini. Ibuwa Peligisi ibugua, Polo damu pu, layagola Polo haru ibini, Ibuwa ibugua Keriso Yasuhondo mini mbiraore wulene mana lamiyagola Peligisi ibu hale hene. <sup>25</sup> Hale ho berearia Polohanda tigabi holenebi mini haru holenebi ina bibahendeme ko birimagonaga Daba Ki Bulene Horo Ngode Datagaliwabehanda pongo bo winigo lola hole wene ibiragobi lalu lamiyagola Peligisi ibu gi howa lalu, Lone hale holene henge nganggi í ibabelo ololiya ai pu, lene. <sup>26</sup> Peligisi ibugua Polo heba bi lole olalu wiaabo hayago irane ibuhondo Polohanda muni ngilo hale howa ani bini.

<sup>27</sup> Mali kira howa Peligisinaga pani Posiasa Pesedasa ibu gabumane haru haga howa ha aribia hene. Peligisihanda Yu agali hearu mo turu hole hame lowa Polo garabaya andaha helaabo hene.✧

## 25

### *Polohanda, Lomonaga Kini karia godi lo polebero, lenego ogo*

<sup>1</sup> Dindi ogoriani Pesedasa ibu haru hole ibini. Ibuwa horo tebira howa ibugua Sisaria wahalu Yarusaleme pene. <sup>2</sup> Yarusalemeni pu heagola loma binigo mo miaga haguane hearubi Yu wali agali haru haga hearubi tigua, Polo ko ogo biya, lalu ibu lamini. Tigua hongo howa Pesedasahondo lalu,✧ <sup>3</sup> Ina biamogo bialu Polo Yarusaleme ibilo, Damu pudaba labe, lene. Ala tigua ndi lalu, Polo wene harigani ibalu kaore ibu homelo bole harigani yu biramiya, lalu biarume ani lene.✧

<sup>4</sup> Ani layagola Pesedasahanda ladai bialu lalu, Polo ibu Sisariani garabaya kago. I emene howa Sisaria dai buleberogo <sup>5</sup> agali ogoni ko mbira bidayagua tinaga haru haga karume godi lole i heba pobehe, lene.

<sup>6</sup> Ogoriani Pesedasa ibu ti heba horo halirabe pirabe agima halu Sisaria dai bini. Dai bu howa egerebalene Pesedasa godi laga andaha pu biruwa ibugua maru hearuhondo, Polo damu pudaba, lene. <sup>7</sup> Polo ibiyagola Yu agali Yarusaleme howa ibiyaru tigua Polo ho mabu buwa lalu, Agali ogoni ibugua ko timbuni dewaore biya, lene. Ko biya layago heneneore biya lalu walia habe nahe hene.✧ <sup>8</sup> Polohanda ladai bialu, Yu wali agalinaga Mana lowinigo ngagobi Anduane Homogonaga andabi Lomonaga Kinibi urunihondo ko mbira ina nabi ko, lene.✧

<sup>9</sup> Ani layagola Pesedasa ibugua Yu wali agali mo turu hole hame lowa Polohondo lalu, Í ko biri layagonaga godi i heba lole Yarusaleme poa kebe, lene.✧

<sup>10</sup> Ani layagola Polohanda lalu, Godi laga anda ogo Lomo kininagago anda ogoha howa godi lolene ngago lole ko. Ina Yu wali agalihondo ko mbira nabi kogo í manda biai kegoni. <sup>11</sup> Bi mana lo ngago puguaruyaguabi ko mbira biruyagua birugonaga pani homolene ngayaguabi o karulape laro. Tigua i ko biya layago henene ndo layagua nde

✧ 24:21: Ab 23.6, 28.20 ✧ 24:22: Ab 23.26 ✧ 24:23: Ab 27.3, 28.16, 28.30 ✧ 24:27: Ab 25.9, 25.14 ✧ 25:2: Ab 24.1, 25.15 ✧ 25:3: Ab 23.12, 23.15 ✧ 25:7: Ab 24.5-6, 24.13 ✧ 25:8: Ab 24.12, 28.17 ✧ 25:9: Ab 24.27, 25.20



mbiralime i tihondo mulene nawi. Ogonigo Lomonaga Kini kago ibunime inaga godi lo tiga bilo hame ledoro, lene.✧

<sup>12</sup> Ani layago hale howa Pesedasa ibunaga lamogo biaga agali heba lo manda buwa ibugua Polohondo lalu, Lomonaga Kini ibugua inaga godi hale helo larigo ibu karia lo polebere, lene.

### *Pesedasahanda Polonaga te Agiriba laminigo ogo*

<sup>13</sup> Sarere maru peha Kini Agiriba ibu one Benaisila libugua turu howa Pesedasa nenege hole Sisaria ibini. <sup>14</sup> Libu horo maru ogoriani howa Pesedasahanda Polonaga te kini biago lamialu lalu, Agali mbira Peligisihanda ala garabaya biyago oali haabo kago.✧

<sup>15</sup> I Yarusaleme pirungi Yualinaga loma binigo mo miaga haguanebi agali ala hene miniwi hearubi tigua lalu, Polohanda ko dewa biyago ibu pani mibe, laya. <sup>16</sup> Tigua ani layagola ina au ladai biru, Marume mbirali ko biya layagua handayadaru tigua lelobi o biagome ladai bilobi ti mandagi helowa ina Lomoalime lelo henge meramali. Ani nale howa iname pani nameramali, lamiru. <sup>17</sup> Ti godi lole oali ngoai hayagola ina egerebagi abaleore godi laga andaha pu biruwa tihondo, Polo damu pudaba, lalu. <sup>18</sup> Ibugua ko biya layarume heyalu ibu koore biya lolebira mitangi bu harugo tigua ani nale. <sup>19</sup> Ti Ngode Datagaliwabe mitangi biagane manabi agali mbira mini Yasu homenego Polohanda, Ibu heyu ka, layagonagabi tigua uruninaga lai laya.✧ <sup>20</sup> Lai layagonaga irane manda bule agi buabe toba howa ina Polohondo lalu, I ko biri layagonaga godi lole Yarusaleme polene karulape manda bu kebe, lamiru.✧ <sup>21</sup> Ani lamirugola Polohanda lalu, O ndo. Lomonaga Kini kago ibunime inaga godi lo tiga bilo garabaya holebero, lene. Ibugua ani layagola ina ibu kini biago karia haru polene manda bialu howa dege garabaya haabo habe lalu, lene.

<sup>22</sup> Ani layagola Agiribahanda Pesedasahondo lalu, Agali ogonime bi larago inime hale hoa ko, lene.

Ani layagola Pesedasahanda ladai bialu lalu, Yawi ibugua bi lolebirago i hale holebere, lene.

<sup>23</sup> Egerebalene hayagola agalime yari timbuni buwa danda gamu bialu hearia Agiriba Benaisila libu ibini. Ibuwa libu ami haru haga haguane hearubi tano ogoninaga agali haguane hearubi heba gabumanenaga ngoai haga andaha pene. Anda puwa Pesedasahanda, Polo haru ibidaba, layagola tigua ibu haru ibini.✧ <sup>24</sup> Haru ibiyagola Pesedasahanda lalu, Kini Agiribabi bibahende ina heba ngoai ho kamirubi agali o kagoni de handadaba. Yu wali agali Yarusalemeni karubi oali karubi ti bibahendeme ihondo, Ibugua ko timbuniore biyago ibu holene nawigo homelo bolene nga, lalu hongo howa ga lalu laya.✧ <sup>25</sup> Anigo ina manani ibu dabo handalu hewaria ibugua biyagonaga homelo bolene irane handa walua naheore haru. Lomonaga Kini kagome ibunaga godi lo tiga bilo Polohanda poa hayago ibu Lomonaga Kini karia haru polene manda bu ko. <sup>26</sup> Lomonaga Kini ibugua de hendelo ibu biyagonaga te bebani agi lalu gili buabe toba howa Agiriba iorebi bibahende kamirubi ibugua bi larago ti hale halimulo Polo haru ibiru. Iname hale howa ibugua biyadagonaga irane ina bebani gilibu wulene ngago manda bialu gili bulebero. <sup>27</sup> Mbirali garabaya kago ibugua ko biya laragonaga irane bayuwa bebani gili nabi howa bame haru polene nakarulapeore mitangi bu ko, lene.

## 26

### *Polohanda Agiriba hale helo bi lenego ogo*

<sup>1</sup> Agiribahanda Polohondo lalu, Inime lolene ngadagua labe, lene. Ani layagola Polohanda gi yaraga howa ibuni bialu hayadagua lalu laminigo ogo,

✧ 25:11: Ab 23.11, 23.29, 25.25, 26.31-32, 28.19 ✧ 25:14: Ab 24.27 ✧ 25:19: Ab 18.15, 23.29 ✧ 25:20: Ab 25.9 ✧ 25:23: Md 10.18, Mg 13.9 ✧ 25:24: Ab 25.2-3, 25.7, 22.22

<sup>2</sup> Kini Agiriba-o Yu agalime ihondo, Í ko biri, layagonaga áyu ina ihondo ladai bule turu timbuni ko. <sup>3</sup> Turu timbuni ko larugo irane ina Yu wali agali kamarunaga manabi iname taratara manda beramaligobi í manda biaiore kego. Áyu ina bi larogo bu ibira howa bayuwa hale habe.

<sup>4</sup> I igiri emeneni howa ina bialu harugo Yu wali agali bibahendeme manda bu ka. Pigane inaga dindini howabi Yarusalemeni howabi í haabo harugo ti manda bu ka. <sup>5</sup> Pigane howa ina Ngode Datagaliwabe mitangi bulenenaga mana hongo howa yu karu aria mini Perisi karu ti baba haruligo Yu agali ti manda bu haabo ka. Ti ani manda bu kago tinime loa kayagua langibehe ka. <sup>6</sup> Ala Ngode Datagaliwabehanda inanaga mamalihondo bi mbira lowinigo bilo ina mini dunu bia ho kogonaga áyu godi lalu kamagoni. <sup>7</sup> Bi lowinigo ogoni hondole inanaga hameigini hombearia (12) karume mini dunu bia ho howa horombe mbiragabi Ngode Datagaliwabe mitangi bialu lotu lalu ibuhondo bi laabo halu ka. Kini-o bi lowinigo ogoni ina hondole mini dunu bia ho kogonaga Yu agali tigua, Í ko biri, lalu ka. <sup>8</sup> Ngode Datagaliwabehanda wali agali homeneru mo heya haga kago mana ogoni tí áyu ngoai ho kamirume yu tiga nabibehe kamigo irane agibe.

<sup>9</sup> Nasareteali Yasu mini mo ko hole inime bulene nga ale biai hole ina mitangi bu harugoni. <sup>10</sup> Ani mitangi buwa ina Yarusalemeni howa ani bule harugoni. Loma binigo mo miaga haguane hearume í hongo ngiyagola ina Ngode Datagaliwabenaga wali agali dewa garabaya biru. Tigua wali agali uruni homelo bolene nga layagola inabi, E, larugoni. <sup>11</sup> Tigua, Yasu mana waharama, lelo ina ti mo la hole manda bialu ngoai hagane anda bibahenderuha pume halu ina maru hearuhondo, Ti balimu, laru. Tihondo keba timbuniore halu de darama buwa ina dindi tara tara kaundiaha pume halu ti mo tandaga halu harugoni, lene.

*Polo ibuni Yasuhondo mini mbiraore pigane winigo te laminigo ogo*  
(Abosolo 9.1-19, 22.6-16)

<sup>12</sup> Polohanda lalu, Ina ogonidagua buliya loma binigo mo miaga haguane hearume í hongo ngialu bebanibi gilibu ngiyagola Damasagasa yalu pole pirugoni. <sup>13</sup> Ai Kini-o ina pialu hemaria horombe hanuni hayagola ibi agali í heba pirimarubi ina hemagoria ni ale ndo wá timbuni taraore hari daliga howa hadali ho mabu biyago de handaru. <sup>14</sup> Ani biyagola ina bibahende dindini pilope howa odope ho wimaria mbiralime Yu wali agalinaga bi lowa lalu, Solo-o Solo-o ina í aginaga mo tandaga harilibi. Ira dehe ngago hangedalu kego inime ini mo tandaga hare, laya. <sup>15</sup> Ani layagola ina ladai bialu, Anduane Homogo-o í ai kebe, laru. Ani larugola Anduane Homogo ibugua lalu, Ina mo tandaga hariligo í Yasu kogoni. <sup>16</sup> Ini geme heyu habe. Inaga biabe bia haga habelo ina í dabo helole ha pani ho ko. Áyu ina í kogo de handarigobi mani walia holeberogobi wali agali lamulebere. <sup>17</sup> Yu wali agali karubi wali agali tara tara karubi ti karia í pu loleberogo tigua í bo waholilono ina pele ngulebero. <sup>18</sup> Ina tinaga de mo ngala halu aruma kagoria howa wá kagoria haru polenebi dama Heyolabeme ti haru kagoria howa Ngode Datagaliwabehanda haru kagoria haru polenebi ina ani bulebere. Ani beregola tigua ihondo mini mbiraore wiragome ina tinaga ko biyago domo wahowa ti wali agali Ngode Datagaliwabehanda dabene karuhayagi helo helolebero, laya, Polohanda lene. <sup>19</sup>

*Polo ibuni biabe bialu hene te Agiriba laminigo ogo*

<sup>19</sup> Polohanda laabo halu lalu, Kini Agiriba-o mbiralime dahuliya andaga howa walia halu bi layago ina mo wa nahe haru. <sup>20</sup> Ala Damasagahabi Yarusalemehabi ibaga

✧ 26:5: Ab 22.3, 23.6, 24.15, 24.21, Pb 3.5 ✧ 26:6: Man 18.5, Iba 132.11, Ais 7.14, Dan 9.24, Ab 23.6, 28.20 ✧ 26:9: 1 Ti 1.13 ✧ 26:9: Ab 8.3, 22.4-5 ✧ 26:10: Ab 9.14, 9.21, Ga 1.13 ✧ 26:12: Ab 9.3, 22.6 ✧ 26:16: Ab 22.15 ✧ 26:17: Ab 22.21 ✧ 26:18: Ais 35.5, 42.7, 42.16, Yo 8.12, Ab 20.32, 1 Ko 6.14, Eb 2.2, Kl 1.13

bialu mani Yudia dindi bibahendehabi Yuali ndo wali agali dindi tara tara hearuha puwa ina wali agali bibahende hearuhondo, Tí ko birimigonaga mini beregedowa Ngode Datagaliwabehondo mini mbiraore wuwa ani birimigo walia hole biabe tigatiga bialu holene nga, lalu lamiru. ✧ <sup>21</sup> Ani lamialu harugonaga Yu agali hearume i Anduane Homogonaga andaha hewaria minuwa homelo bole manda biya. ✧ <sup>22</sup> Alabi áyubi horo bibahendeni Ngode Datagaliwabehanda i biamogo biaabo hayagome ina oali howa wali agali emenebi timbunibi ta nabi karuhondo henene lolene lamialu ko. Ala Ngode Datagaliwabe mana latagi haga hearubi Mosesebi tigua ani bulebira lo winigodagua ina lalu ko. ✧ <sup>23</sup> Tigua lowinigo ogo, Mbirali Dabo Helenego ibuwa ibu homolebira. Homowa wali agali mani heyilo ibu ala heyu holebira, lenego gilibu nga. Irane ogonigo Yu wali agalibi wali agali tara tarabi ti wá holene hendelo ibugua haabobo holenaga pele ngulene mana lamule ibu ala heyu hene, Polohanda lene. ✧

<sup>24</sup> Polohanda ibu bialu hayagonaga te ani lamialu hearia Pesedasahanda ibuhondo dalimu lalu, Polo-o i lulu yu ke. Mana taibi dewaore lo manda biaabo harigome i mo lulu ya hayada, lene.

<sup>25</sup> Ani layagola Polohanda ladai bialu lalu, Pesedasa i timbuni kego. I lulu ndo. Ina bi o larogo palia hondo howa lulu bi ndo mini wuwa ogo ale larolo manda buwa heneneore lalu ko. <sup>26</sup> Kini Agiriba-o ogoni biyagoni i manda bidego donge nahe ina langiai habehe kogoni. O biyagoni arumaha howa ndo biyago i manda nabi ndo uruni bibahende manda biai kego manda bido. ✧ <sup>27</sup> Kini Agiriba-o Ngode Datagaliwabe mana latagi haga hearume bi mana lowinigo yu tiga bidebe. Yu tiga bidegoni manda bu ko, lene.

<sup>28</sup> Ani layagola Agiribahanda Polohondo lalu, i Keriso hameigini holiya áyu ogoni mo ha hole mitangi bu kebe, lene.

<sup>29</sup> Ani layagola Polohanda ladai bialu lalu, Áyu ogonibi karulape awebi karulape degego ibi bibahende ina bi larogo hale ho kamirubi ti i kogobi dege halimulo Ngode Datagaliwabehondo bi la halu kogoni. Ege pu seni urume i dariba kagola kogobi dege ti nahalimulo hamelo ko, lene.

<sup>30</sup> Ani layagola kini biagobi gabumane haru hagabi Benaisibi ti heba maru ngoai hayarubi bibahende biaru heyalu <sup>31</sup> tagiraha puwa tigua lagalaga bialu, Agali ogoni homelo bolenegobi garabaya bulenegobi ibugua ko bini mbira nawida, lene. ✧ <sup>32</sup> Ani layagola Agiribahanda Pesedasahondo lalu, Agali ogonime Lomonaga Kini kagome inaga godi lo tiga bilo naledale ibu golope kele, lene. ✧

## 27

### *Polo ibu iba sibini bialu Lomo pole penego ogo*

<sup>1</sup> Tigua ina iba sibini bialu Idali dindi polene nga lo manda biyagola ami haru haga hearume Polobi garabaya agali marubi Yuliasahanda mamage halu haru pelo ibuhondo mini. Lomo ami dege maru agali pira pira (100) ti mini Lomo Kininaga ami laga henego uruninaga haru haga Yuliasa ibu hene. ✧ <sup>2</sup> Ina Adaramidiamalinaga iba sibi wiagoria bialu pirima. Iba sibi ogoni Esia dindinaga tano wigi biaru ange ange polene wini. Tesalonaiga howa Masedoniali mbira mini Arisadagasa ibu ina haru pirima. ✧ <sup>3</sup> Egerebalene ina Saidono anda pirima. Anda puwa Yuliasa ibugua Polo dara howa lalu, Inaga nenege oali karume mbirale i buru paderu ale ngilo ti karia pobehe, lene. ✧ <sup>4</sup> Dindi ogoni wahalu pialu hemaria puyabu pu ladai biyagola dindi mbira iba dege dombeneha wiago mini Saibarasa puyabu pu nale wiagohayagi ina pu bagi halu pirima. <sup>5</sup> Pialu iba solowara timbuni Silisia dindibi Pambilia dindibi kaware bereago domowa ina Lisia

✧ **26:20:** Md 3.8, Ab 9.20, 9.28-29, 11.26, 13.14 ✧ **26:21:** Ab 21.30-31 ✧ **26:22:** Lg 24.27, 24.44, Yo 5.46, Lm 3.21

✧ **26:23:** Ais 42.6, 49.6, Lg 24.26, 24.44-47, 1 Ko 15.20, Kl 1.18 ✧ **26:26:** Yo 18.20 ✧ **26:31:** Ab 23.9, 23.29, 25.25

✧ **26:32:** Ab 25.11 ✧ **27:1:** Ab 25.12, 25.25 ✧ **27:2:** Ab 19.29 ✧ **27:3:** Ab 24.23

dindinaga tano mbira Maira anda pirima. <sup>6</sup> Ogoriani ami haru haga biagome iba sibi mende Alegandarialinaga ibu wiago Idali dindi pole wiaria hondowa ibugua ina iba sibi ogoriani maliya biradaba, lene.

<sup>7</sup> Horo dewaru ina iba sibini biralu tendeore pugu bialu polene erekui timbuni handa walia halu Nidusu tano handa deḷe wiagoria pirima. Puyabu pu ladai biyagome ina polene manda birimagoha pobe naheyagola dindi mbira iba dege dombeneha wiago mini Kiridi puyabu pu nale wiagohayagi pialu Salamone dindinaga gembone mbira wiago bolangua halu pirima. <sup>8</sup> Iba sibi biago iba ange ange pialu polene erekui timbuni handa walia halu puabo howa tano mini Iba Sibi Anda Pu Wiagane Bayale wiagoha anda pirima. Tano ogoni Lasea tano kaware wini.

<sup>9</sup> Ina ogoriani horo dewaore haabo harima. Ko Domo Waholenenaga Horo bamba pongo bo winigo horo ogoni abale bolangua hayago ina polene manda bu harimagoha puabo harimayagua puyabu timbuni ibaganengigo homoleberemada manda birima. Ani manda buwa Polohanda tihondo lalu, <sup>10</sup> Agaliru-o oali howa polene koore nakaru-lapedane hendedo. Dabudabu ngarubi iba sibibi mo ko hai holebira. Ina marubi homoleberamago, lene.✧ <sup>11</sup> Ani layagola hale howa ami haru haga biagome Polo nakarulape laya mitangi bini. Iba sibi yaga haguane heagobi iba sibi anduane heagobi libugua bi layago karulape laya mitangi bini. <sup>12</sup> Ira yuni gilo piai halu dagare biagane horo ibirangi dindi ogoniha iba sibi wiaabo holene nakarulape manda buwa agali dewa birayarume ti iba sibi wiagane biago yu wahalu iba hanuni pu ede halu Pinigisi tano anda pobehedabe hondo poa hene. Pinigisi tano ogoni Kiridi dindinaga iba angeni wiago ogoniha puyabu hongo howa naibaga wini. Anigo ira yuni gilo piai halu dagare biagane horo ibirangi ogoriani iba sibi wiaabo holene karulape nga ti manda bini.

*Iba sibi ibani wiaria puyabu timbuni ibinigo ogo*

<sup>13</sup> Puyabu tendeore gi lehayagi howa pu lalu ibiyagola agali biarume ala ti lo manda manda bu hayadagua bulene nga mitangi bini. Ani mitangi buwa mbirale gendabi ege toḷe aeaneme wabinigo iba sibi pu nabilo hende ho wiago ibaha ala mo ibira hayago tigua yaraga howa Kiridi dindi iba ange ange puabo hene. <sup>14</sup> Ani pialu hemaria puyabu hongohe timbuniore Kiridi dindihayagi howa bolangua halu ibini. <sup>15</sup> Ibalu howa puyabu ibiyagome iba sibi mo indi ande lene. Mo indi ande layagola puyabu pu ladai biaabo hayagome iba sibi pobe naheyagola puyabume pu lo yu piyadagua iba sibi biago yalu pelo birarima. <sup>16-17</sup> Dindi emene mbira iba dege dombeneha mini Koda wiago gi lehayagi bolangua halu hemaria puyabu emene biyagoha pirima. Pialu ina erekui timbuni howa iba sibi biagonaga iba talu emene hende ho iba iba yalu piaganego podolilono agali biarume iba talu o biago yaraga howa iba sibi timbuni biago daligani wuwa ema nabilo pongo bini. Iba sibi timbuni biagobi podolilono tigua pulimume dindiha daligahabi ndibuore lalu bayuwa pongo bini. Libia dindinaga ange kaware howa ibaha iba mu timbuni wiagome iba sibi yalu anda polilono ti gi hene. Gi howa iba sabinaga labolabo daliga yaraga ho helaganego tigua hado ibira howa puyabume pu lalu piyadagua iba sibi yalu pelo waho berene. <sup>18</sup> Puyabu hongo timbuni howa ibaabo hayagolabi iba yaribu timbuni biaabo hayagolabi horo mendengi tigua mbirale tara tara iba sibiha wiyaru ibaha mo pe hene. <sup>19</sup> Horo tebonengi iba sabinaga piagane mbirale maru pulimubi labolabobi irabi uruni ale wiaru tini gime ibaha mo pe hene. <sup>20</sup> Horo dewaru iname nibi yakundibi de nahende harima. Puyabu biago hongo timbuni howa ibaabo haya. Ani ibaabo hayagola ina bibahende homai holomada manda birima.

<sup>21</sup> Agali biarume tomo nane haabo hayagola Polo ibugua ti dombeneha heyu howa tihondo lalu, Agaliru-o ina bi ala larugo hale halu Kiridi wahalu naibidamale nde genda timbuni áyu ngago nangaleda. <sup>22</sup> Ogonigo áyu gi nahe turu halimu laro. Tí mbirali nahomoleberamigo iba sibi dege ko halu podai holebira.✧ <sup>23</sup> Ngode Datagaliwabe kago

ibunaga i kogonigo nde ina ibu mitangi bialu lotu lalu haruligo ogoni ibunaga dahuliyali mbira áyu mbiraga i hewaria ibiya.✧ 24 Ibuwa ibugua ihondo lalu, Polo-o i gi nahabe. Lomonaga Kini deni i pu holene nga. Ngode Datagaliwabe ibu mini bayale howa ibugua i biamogo bialu agali bibahende i heba iba sibini bialu poramiru mbirali nahome ti bibahende hai holeberami, laya lalu i langiya.✧ 25 Anigo agaliru-o gi nahe turu halimu laro. Bi ogoni i langiyadagua lola holebiragonaga ina Ngode Datagaliwabe ogoni ibuhondo mini mbiraore wu ko.✧ 26 Dindi mbira iba dege dombene ngagoha puyabume ina yalu pu waholebira, lalu Polohanda lene.✧

27 Horo pira mbirani maria (14) howa mbiraga hayagola ina iba solowara Medidere-niana ibani hemaria puyabume ina pulu yu puabo haya. Mbi hanuni hayagola iba sibi yaga agali biarume iba ange emene kaware nga bada mitangi biya. 28 Ani mitangi buwa tigua iba magi hondole pu luni nguini mendeni gendabi mbira pongo bia howa ibaha mo ibira haya. Mo ibira howa yamuwa handalu hearia iba ulinaga magi mita pira maria (40) ale hendene. Ani handalu emene puwa lone ibira howa magi handalu hearia iba uli magi mita pira tebira (30) ale hendene. 29 Hondowa iba sibi biago ege tole timbuni dewa wiagoria pu bedelaha holilono gi howa iba sibi pu nabilo tigua mbirale gendabi ege tole aeaneme wabinigo maria pulimume hende ho manda bu winigo iba sibi erenehayagi howa ibaha yarali hene. Yarali howa muna bilotagi howa tigua Ngode Datagaliwabehondo bi lalu hene. 30 Iba sibi yaga agali biaru ti pu yola halu pole manda bini. Ani manda bialu howa tigua iba talu emene ala wiyago hadalu ibani wilo pulimume mo yarali hene. Ani buwa iba sibi haguanehayagi howa mbirale gendabi ege tole aeaneme wabinigo maru ibaha mo ibira hetingi halu hearia 31 hondowa Polohanda ami haru hagabi ami agali biarubi tihondo lalu, Iba sibi yaga o karuni ti iba sibi ogoriani nahe piyagua ti homoleberami, lene.✧ 32 Ani layagola ami agali biarume iba talu emene biago pelo pu hende hayago gandulope hene.

33 Ega bi lolene emene kaware nga manda buwa Polohanda agali biaru tomo nelonaga tihondo lalu, Horo pira mbirani maria (14) ti tomo nane haabo harimigo 34 ai áyu ti hongo helo tomo nolene ngaore laro. Tínga mandari mbira dugu wa naholebiraore laro, lene.✧ 35 Ani lowa Polohanda mberedi mbira muwa ti bereagoria howa ibugua Ngode Datagaliwabehondo kai lowa budalu nalu hene.✧ 36 Ani biyagola ti gi hayago embeda howa bibahendeme tomo muwa naga naga bini. 37 Iba sibi ogoriani birarimaru daga lamaga howa handari kirani pira kariani waragaria (276) birarima. 38 Ina bibahendeme tomo karulape nai hemagola tigua iba sibi biago genda nahelo ladi ale mini widi bibahende winiru ibaha mo pebe bini.

### *Iba sibi podo бага binigo ogo*

39 Muna biyagola iba sibi yaga biarume dindi mbira wiago de hondowa dindi anibe toba hene. Anibe toba howa handalu hearia iba mu hama bayale wiago hondowa ogoriani iba sibi anda pu wibeheyagua wimiya lo manda bini. 40 Ani manda buwa tigua mbirale gendabi ege tole aeaneme wabini biarunaga pu gandulope hene. Ani bialu howa iba sibi tiga pelonaga mo tiga biagane ira pume pongo bini wiaru hadene. Puyabume iba sibi yalu pelo tigua iba sabinaga labolabo haguanehayagi yaraga halu pongo bini. Pongo buwa ti iba angeni iba mu hama bayale wiagoria anda pole tiga tiga pialu hene. 41 Pialu howa iba sibi biago iba mu timbuni ibaha wu haealo dagaho wiagoha anda piya. Ani buwa iba sibi haguane iba mu wu haealo dagaho wiagoha guya howa ema nabibehe wini. Ani bu wiagola iba yaribu timbuni biyagome iba sibi herenehayagi baabo hayagola podo бага bini.✧

✧ 27:23: Dan 6.16, Ab 23.11, Lm 1.9 ✧ 27:24: Ab 23.11 ✧ 27:25: Lm 4.20-21, 2 Ti 1.12 ✧ 27:26: Ab 28.1  
 ✧ 27:31: Ab 27.22 ✧ 27:34: 1 Kin 1.52, Md 10.30, Lg 12.7 ✧ 27:35: Md 15.36, Yo 6.11, 1 Ti 4.3-5 ✧ 27:41: 2 Ko 11.25



<sup>42</sup> Ani biyagola garabaya agali bu hearu iba dolo yalu puwa iba angeni iraga howa ibida polilono ami agali biarume garabaya bibahende bo wahai hole lo manda bini. <sup>43</sup> Ti ani manda bu hearia ami haru haga biagome Polo homelo hame nale howa ami agali biaruhondo, Nabalimu, lene. Ani lowa ibugua bibahendehondo lalu, Iba dolaga kamiru ti ala ibaha pora bialu dolo yalu iba angeha pudaba. <sup>44</sup> Ti maru iba nadolaga kamiru mani ibaha pora bialu iba sibi ira podo ngarunaga pagaho yalu iba iba pudaba, lene. Ani layadagua buwa ina bibahende nahome bayale iba angeni anda piai harima.✠

## 28

### *Polohanda Malada dindini howa binigo ogo*

<sup>1</sup> Ina nahome bayale howa iba angeni anda piai harimagola wali agali ogoriani hearume, Dindi iba dege dombeneha wiago ogo mini Malada, langiya. <sup>2</sup> Wali agali dindi ogoriani haga hearume ina dara halu biamogo biya. Dalu ibalu dagare timbuni biyagola tigua ira timbuni delowa inahondo, Dagare dogo bimiya ibidaba, laya.✠ <sup>3</sup> Polohanda ira gabuni wiaru mo yalu ibuwa ira delalu hearia ira poboyogo biyagola puya mbira ira gabuni biagoha paleneyago tagira ibalu Polonaga gini haya ho wiaabo haya. <sup>4</sup> Ani haya ho wiaria de hondowa wali agali biarume tini lagalaga bialu, Agali ogonime wali agali homelo bagada. Iba solowaraha nahomeyagola ibu homelo dama mbira mini Pani Baga kago ibugua pani mira, laya. <sup>5</sup> Ti ani lalu hearia Polohandaibunaga gi tanda layagola puya biago ira deagoha ibira howa dene. Polo ibu warago nabe bayale hene.✠ <sup>6</sup> Ani biyagola Polonaga tingini to harabe be homo ibira harabe hondole wali agali biarume handaya ho hene. Handaya haabo hearia Poloni mbira nabi bayale heago hondowa tigua mitangi budai bialu lalu, Ibu agali ndo mbira tara gibiore ka, lene.✠

<sup>7</sup> Dindi ogoriani kaware howa Malada dindinaga homogo mbira heago mini Pabaliasaibunaga mabu maru wini. Ibugua inahondo turu halu, I andaga hamiya, layagola horo tebiru ibu heba harima. <sup>8</sup> Pabaliasaibunaga aba warago bowa tingini poboyogo bialu ti darama pialu wini. Ani bu wiaria puwa Polo ibugua Ngode Datagaliwabhondo bi lowa gime ela howa agali biago mo dabi hene.✠ <sup>9</sup> Ani biyagola dindi ogoriani wali agali warago bo wiaru bibahende Polo hearia ibiyagola tibi ibugua mo dabi halu hene. <sup>10</sup> Ani biyagola tigua inahondo mbirale dewa ngiya. Maha ina pole birimaria polenenaga tomobi mbiralebi tigua inanaga iba taluni wia haya.

### *Polo Malada howa Lomo penego ogo*

<sup>11</sup> Malada dindi iba dege dombeneha wiago ogoriani ege tebira halu ina iba talu mbirani biralu pirima. Iba talu ogoni Alegandarialinaga wuwa ira yuni gilope howa dagare ibagane hororu birangi dindi ogoniha wu ge ho hagaha ngelo hene. Iba talu biago hagianeni mbirale mini Labo Laboli lalu irame wabu wini. <sup>12</sup> Pialu ina Sairagusu tanoha anda puwa horo tebiru hondo harima. <sup>13</sup> Horo tebira howa Sairagusu wahalu Legiama tano anda pirima. Pu paluwa egerebalene puyabu emene karulape ibiyagola ina pialu horo kira pialu howa Pudioli tano anda pirima. <sup>14</sup> Tano ogoniha howa Yasu mana yu tiga biaga hai bialu hemaria maru hearia handa walia harimagola tigua inahondo lalu, Sarere mbira hamiya, lene. Ani layagola nde ina harima. Ani halu pialu ina Lomo tano pole pirima. <sup>15</sup> Pialu hemaria Yasu mana yu tiga biaga Lomoni hearume, Polobi agali marubi harigani ibira, layago hale howa ti ina lola ho ibiyaria maru Abiasa magedi hama wiagoriani lola harima. Maru anda mini Halo Haga Anda Tebira heagoriani lola harima. Polohanda ti ibiyago de hondowa ibugua Ngode Datagaliwabhondo kaj laluibunaga bu mini dungu lene.

✠ 27:44: Ab 27.22-25 ✠ 28:2: Lm 1.14, 1 Ko 14.11, 1 Ko 11.27, Kl 3.11 ✠ 28:5: Mg 16.18, Lg 10.19 ✠ 28:6: Ab 14.11 ✠ 28:8: Ab 19.11, 1 Ko 12.9, 12.28, Ya 5.14-15

*Polohanda Lomoni howa Yasu mana laminigo ogo*

<sup>16</sup> Ina Lomo anda pirimagola gabumane agali heagome, Polo ibu anda mbiraha ibuni hangu helo habehe, lene. Polo ibida polilono ami agali mbirame mamage ho helene.✧

<sup>17</sup> Horo tebira howa Polohanda Yu wali agali Lomoni hearunaga haru haga hearu mo ngoai hene. Ngoai hayagola Polohanda tihondo lalu, I hameneru-o ina inanaga wali agali mo ko nahebi ina mamalinaga mana wirimago napuguibi hewaria Yarusalememi howa Yu agali hearume i dariba howa Lomo gabumane hearuhondo miya.✧ <sup>18</sup> Tigua godi lowa i homole bolene irane handa walia nahe howa golope hole manda biya.✧

<sup>19</sup> Ani manda biyagola Yu agali biarume, Ibu golope holene nawiore, layagola ina ininaga damene Yuali hearuhondo, Kagua birimi, lolene manda nabiore haru. Howa Lomonaga Kini ibugua inaga godi hale helo polene nga lalu ogoni hangu lolene nga manda biru.✧ <sup>20</sup> Anigo ina ti de hondolebi ti heba te lolebi hame laru. Nde mbirali ibilo Isaraele wali agali bibahendeme mini dunu bia ho kagonaga ege pu seni ogame i dariba kagoni.✧

<sup>21</sup> Ani layagola tigua Polohondo lalu, Yudiani haga hearume ina birigonaga beba inahondo wia nahe. Yudiani howa inanaga hamene ibiyarubi tigua te nale ina ko biri lalubi mbira nalangi. <sup>22</sup> Wali agali dindi bibahendeni karume, Mana ogoni yu tiga biaga i ke aria kamiru ti koore ka, lalu hagago ina manda bidamago ina manda bu kegonaga ina hale hoa kamago langibelo, lene.✧

<sup>23</sup> Ani lowa tigua Polo heba te ogoni lole horo mbira pongo bo wini. Horo ogoni lola hayangi Yu agali dewaore Polo heagoria ibu ngoai hene. Ngoai hayagola Polohanda egerebagi howa Ngode Datagaliwabehanda Handame Ho Kagonaga mana lamialu hayago irane lamialu heaore dege ne lene. Ibugua Mosese heneyangi Mana lowinigobi Ngode Datagaliwabe mana latagi haga hearume lowinigobi ngadagua lalu ti Yasu mana yu tiga bilo hame lowa lamialu hene. <sup>24</sup> Ani lamiyagola hale hayaru marume, Henene laya, manda buwa Yasu mana yu tiga bini. Ti marume Yasu mana yu tiga bibe manga hene. <sup>25</sup> Ani buwa ti bibahende mini mbiraore nahe howa bi lagalaga bialu pole biyaria Polohanda tihondo bi galone mbira laminigo ogo. Ibugua lalu, Ngode Datagaliwabe Dinini ibugua Ngode Datagaliwabe mana latagi haga Aisaiaha howa tinaga mamalihondo tiga tiga lene ndobe.✧ <sup>26</sup> Ibugua lenego ogo,✧✧

Wali agali uruni karia pialu tihondo lalu,

Tigua bayuwa hale hara tiraga minime manda nabuleberami.

Tigua de handaya haabo hara tiraga galone handa walia naholeberami.

<sup>27</sup> Irane wali agali uruninaga mini ndibulo wahene ka.

Tinaga haleme hale holilono hale ndibulo wahene ka.

Tinaga deme hondolilono de ndibulo wahene ka.

Ngode Datagaliwabehanda lalu, Tigua ani nabidale ti deme handalu

haleme hale halu

minime manda bialu

ihondo mini beregedo kale.

Ani bidale nde ina ti mo dabi kole, lalu

gilibu nga, lene.

<sup>28</sup> Polohanda tihondo lamaro bialu lalu, Ngode Datagaliwabenaga pele mulene bi mana ogoni wali agali tara tara karu lamule polene ngaore manda bilimu. Ti hale holebiraore, lene.✧ [ <sup>29</sup> Polohanda bi ogoni lai hayagola Yu agali biaru tini degedege hongo howa lai timbuni lagalaga bialu purogo lene.]

✧ **28:16:** Ab 24.23 ✧ **28:17:** Ab 21.33, 24.12-13, 25.8 ✧ **28:18:** Ab 22.24, 25.8, 26.31 ✧ **28:19:** Ab 25.11  
 ✧ **28:20:** Ab 24.15, 26.6-7, 26.29, Eb 3.1-2, 2 Ti 2.9, Pm 10, 13 ✧ **28:22:** Ab 24.5, 24.14, 1 Pi 2.12, 4.14 ✧ **28:25:**  
 Ais 6.9-10, Md 13.14 ✧ **28:26:** Yar 5.21, Ese 12.2, Lm 11.8 ✧ **28:26:** Ais 6.9-10 ✧ **28:28:** Iba 67.2, Lg 3.6, Ab  
 13.46-47, 18.6, 22.21, Lm 11.11

<sup>30</sup> Polo ibugua anda paliyagonaga yolo migi bialu ogoriani mali kira halu wali agali bibahende ibu hearia ibiyaruhondo turu timbuni halu hene.✧ <sup>31</sup> Ibugua Ngode Datagaliwabehanda Handame Ho Kagonaga mana ti lamialu Anduane Homogo Yasu Keriso manabi lawai halu hene. Lawai halu hearia mbiralime ibuhondo, Lawai nahabe, naleyagola ibugua bi hongo howa lalu lamialu hene.✧

## **Lomo** **Polohanda Keriso hameigini Lomoni hearuhondo beba ogo** **gilibu wia hene.**

### **Mbuga ogoha gilibu ngarunaga nemandi ogo**

Polohanda Keriso hameigini Lomoni hearuhondo beba gilibu wia henego irane ibu ti hearia mani nenege pole manda buwa gili bini.

Polo ibuni lo manda bialu, Keriso hameigini Lomoni karu heba howa ina ti biamogo bialu Yasunaga bi mana lawai holebero. Ani lawai harogola tigua nde i biamogo bialu dindi mini Sebenaha Bi Mana Debene lamima polebero, lo manda bini.

Polohanda Ngode Datagaliwabe Bi Mana Debene lawai henedagua Keriso hameigini Lomoni hearume bayuwa manda bilo ibu bebani gili bialu tihondo wia hene.

Ibugua lalu, Tí mitangi bialu Ngode Datagaliwabehondo tínaga bi la haruli, lalu lamini. Ani lowa Bi Mana Debenenaga teneore lamialu lalu, Ngode Datagaliwabehanda ibuhondo mini mbiraorewi karu tihondo, Í mini tigabiwi ke, lagago Bi Mana Debeneme walia haga ka. Be 1.17 gilibu nga.

Polohanda bi layagonaga irane agua lowa garealo mialu Yu wali agalirubi wali agali tara tararubi Ngode Datagaliwabehanda tihondo, Í mini tigabiwi ke, lelo bibahende ta nabi karume Yasu Kerisohondo mini mbiraore wulene nga. Mini mbiraore wiragome Yasu Kerisoha ho gimbu bu howa holene gahenge yu haga ka. Ani bu kagome Ngode Datagaliwabenaga mo palia holene yu howa ko bulenenaga hongomebi homolenenaga hongomebi daribaho ngaria Ngode Datagaliwabe Dinini ibugua golope haga ka.

Be 5.1-8.39 uruniha Polohanda Mana lowini ngagonaga irane langialu, Ko bulene koorene ko ngago walia hole Ngode Datagaliwabehanda Mana lowini ngago ngini, lene. Ani lowa ibugua bi mende lalu, Ngode Datagaliwabe Dinini ibunaga hongome ina Yasu Kerisoha ho gimbu bu helaga ka, lalu gilibu wini. Ani buwa Polohanda lo manda bialu Yu wali agalibi wali agali tara tarabi Ngode Datagaliwabehanda ti bibahende ta nabihondo pele mulene manda biaga ka. Yu wali agalime Yasuhondo mini mbiraore wulene hame nale hayagola Ngode Datagaliwabehanda manda biyadagua Yasu Kerisoha howa ibunaga pele mulene wali agali tara tarahondo mini. Yu wali agalime maniore Yasuhondo mini mbiraore wulebira Polohanda manda bini.

Gilibu maro bulene kaware ngelowa Keriso hameiginirume bialu holenenaga mana mitangi bialu Ngode Datagaliwabehondobi gabumane karuhondobi wali agali ta nabi karuhondobi gubalini howa bialu holene ngagonaga gilibu nga. Ani gili buwa Polohanda ibunaga nenegeruhondo turu holene bi lawia halu Ngode Datagaliwabe mini yaraga hene.

#### **Bulu бага буwa kuni gilibu ngago**

*1.1-17*

Gili binigonaga irane *1.18-3.20*

Wali agali bibahendeore nakarulape kama lenego *3.21-4.25*

Kerisohondo mini mbiraorewi kago mini tigabiwi ka, lenego *5.1-8.39*

Kerisoha howa gahenge holene ngago *9.1-11.36*

Ngode Datagaliwabehanda Isaraele wali agalihondo bule manda bu winigo *12.1-15.13*

Keriso hameiginime bialu holene mana ngago *15.14-16.27*

Lamaro bialu nenegeruhondo bi lawia henego

*Polohanda abosolo biabe binigo irane ogo*

1 I Polo Keriso Yasunaga biabe bia haga kogo howa Ngode Datagaliwabehanda i abosolo holiya dabowa ibunaga Bi Mana Debene lamuliya olo helene go kogni. 2 Bi Mana Debene ogoni bamba Ngode Datagaliwabehanda ibunaga mana latagi hagaruha howa, Ngulebero, lalu lowinigo Anduane Homogonaga mbugani gilibu winigo nga. 3 Bi Mana Debene ogoni Ngode Datagaliwabe Iginini inanaga Anduane Homogo Yasu Keriso henego kagonaga lo nga. Ibu dindi agalihayaginaga ibu Debidi aguanene hene. 4 Ibu Ngode Datagaliwabe hayaginaga walia halu ibunaga hongo gibioregome ibuni mo heya howa ibu Ngode Datagaliwabe Iginiore inanaga loma biaho helene go ka walia hene. 5 Wali agali dindi bibahendeni karu ina Keriso kagoria haru ibalu tigua ibuhondo mini mbiraore wilobi ibugua bia laradagua bilobi Ngode Datagaliwabehanda Keriso ha howa i abosolo kogo howa Kerisonaga biabe ogoni bia holiya ihondo ngiya. 6 Wali agali dindi bibahendeni karu larugo Lomoni kamirunagabi laru manda bilimu. Tibi Yasu Kerisonaga halimulo Ngode Datagaliwabehanda olene. 7 Irane ogonigo Lomoni bibahende kamiru Ngode Datagaliwabehanda ti gubalini howa ibunaga halimulo olayaru ina tihondo beba ogoni gilibu wia haro.

Ina Aba Ngode Datagaliwabe bi Anduane Homogo Yasu Kerisobi libugua tihondo biamogo bia holenebi mo palia holenebi ngilo hamelo ko.

### *Polohanda Ngode Datagaliwabhondo kaj lalu henego ogo*

8 Bi mbira ala lolene manda bidogo laro. Tigua mini mbiraore wu kamigoni wali agali dindi bibahendeni karume hale halu kagonaga ina ti bibahende mitangi bialu Yasu Keriso ha howa Ngode Datagaliwabhondo turu halu kaj lalu ko. 9-10 Bi larogo heneneore laralo Ngode Datagaliwabe ibu manda biai ka. Ina Ngode Datagaliwabe ogoni gubaliniore howa ibunaga biabe bia halu ibu Iginini Yasu Kerisonaga Bi Mana Debene lamialu ko. Ina Ngode Datagaliwabhondo bi lalu howa ti mitangi biaabo halu tinaga la haruligo ibu manda bu ka. Ibugua i ti kamiria ibulene hame ledayagua henge ngilo ibuhondo bi lamialu ko. 11 Ti de handalu Ngode Datagaliwabe Dinini ibugua mo bayale holene ngiaga ngaru ti heba lo manda bialu tinaga mini hongo helo langule i ibua ho ko. 12 Bi larogo irane tigua mini mbiraore ngamigome i biamogo bilimulobi ina mini mbiraore ngogome ti biamogo bialubi inane biamogo bia biamogo bia bialu hamiyana laro.

13 I hamene mbaliniru-o tigua mbira ogoore manda bilimulo laro. Ala ina ti hemiria nenege ibule lowa dewa halu manda bigi bu haabo harugo biabe bulene wiarume i yani haabo haya. Ina dindi tara tarani howa Yu wali agali ndo tara tara karume Yasuhondo mini mbiraore wilonaga biabe bialu harudagua ti kamiria ibu howa wali agali maru karume Yasuhondo mini mbiraore wilimulo biabe ogoni bule hamelo ko. 14 Wali agali dindini holenenaga manda timbunibi karubi manda nabi karubi beba de handaga karubi de nahandaga karubi ti ta nabi bibahendehondo Bi Mana Debene nalami kogome ina ti baba dano ho ko. 15 Ani dano ho kogo ina ti Lomoni kamiruhondobi Bi Mana Debene langua ho ko.

### *Bi Mana Debeneha Ngode Datagaliwabenaga hongo holene ogo*

16 Ina Bi Mana Debene karulapeore ngago hondowa taga naharuligo irane Bi Mana Debene ogoninaga hongo holene Ngode Datagaliwabehanda wali agali bibahende ibuhondo mini mbiraore wu karu pele miaga ngagonaga taga naharuli. Mana ogoni ala Yu wali agalime hale henego ayu Yu wali agali hangu ndo tara tara karu tibi hale

☆ 1:1: Ab 9.15, 13.2, 22.21, 1 Ko 1.1, Ga 1.15 ☆ 1:2: Ab 26.6, Lm 3.21, 16.25-26, Ga 3.8, Ta 1.2 ☆ 1:3: Md 22.42, Lg 1.32, Yo 1.14, Ab 2.30, Lm 9.5, Ga 4.4, 2 Ti 2.8 ☆ 1:4: Ab 13.33, Hi 9.14 ☆ 1:5: Ab 26.16-18, Lm 12.3, 15.18, 1 Ko 15.10, Ga 2.7-9, Eb 3.8 ☆ 1:7: Dag 6.25-26, 1 Ko 1.2-3, 2 Ko 1.1, Ga 1.3, Eb 1.2, 1 Te 4.7 ☆ 1:8: Pb 1.3, Kl 1.3-4, 1 Te 1.2, 1.8 ☆ 1:9-10: 2 Ko 1.23, Eb 1.16, Pb 1.8, 1 Te 2.5, 2.10, 3.10, 2 Ti 1.3 ☆ 1:9-10: Ab 19.21, Lm 15.23, 15.32, 1 Te 3.10, Ya 4.15 ☆ 1:13: Yo 15.15-16, Ab 19.21, Lm 15.23, 16.7, Pb 4.17



halu ka.✠ 17 Ngode Datagaliwabehanda ibuhondo mini mbiraorewi karu tihondo, Í mini tigabiwi ke, lagago Bi Mana Debeneme walia haga ka. Mini mbiraore wu haabo kagohondo hangu laga. Ani lagago Anduane Homogonaga mbugani lo ngago ogo, Ngode Datagaliwabehanda ibuhondo mini mbiraorewi kagohondo, Í mini tigabiwi ke, laga ka. Wali agali ani lene karu ti degeme holene gahenge yu holebira, lalu gilibu nga.✠

*Wali agali bibahende ko hai hene kamago ogo*

18 Wali agali Ngode Datagaliwabe erembira mialu tinaga ko biragome maru karume mana henene ngago manda bulilono hapai haabo halu karu tinaga kohondo Ngode Datagaliwabehanda dahuliya andaga howa ibunaga keba holene waliaho winigo nga.✠

19 Ani biragohondo pani mulene ngago irane ogo. Ngode Datagaliwabe ibuni kagonaga ibunime mo pani henego wali agalime manda bibehe panigi nga.✠ 20 Ngode Datagaliwabehanda bibahende wabiningi howa ibunaga nahandabehe winiyago ngarubi ibu hongo haabo kagobi ibuniore haabobo kagobi panigi wali agali bibahendeme handai habeheore ka. Ngode Datagaliwabehanda bibahende wabinigo wali agalime hondowa ani manda bibeheore ka. Anigo tigua, Ngode Datagaliwabe ka manda nabi harimadago, lolene henge nawi.✠ 21 Tigua Ngode Datagaliwabe ka manda bia bidagoyu ibunaga mini mo yaraga holene ngadagua mo yaraga nahagabi ibuhondo turu halu kai nalagabi ka. Tigua mbirale habane ndogo hangu mitangi biagabi tinaga mini lulu ale arumahe howa biagabi ka.✠ 22 Tigua, Mini gigabiwi kama, lagagoyu ti miniwi ndo lulu ale howa laga ka.✠ 23 Tigua Ngode Datagaliwabe haabobo kago mitangi bialu ibunaga mini mo yaraga holene ngago wahowa mbirale gime wabinigo agali alebi ega alebi nogo tara tara alebi tombeme piaga tara tara alebi uruni alego mitangi bialu bi pupu wiaga ka.✠

24 Wali agali uruni ale karume tinaga minime dimagoli hara alebi tinaga tinginime tini degedege baba mana tagabiorebi bima pelo Ngode Datagaliwabehanda ti yupe hene ka.✠ 25 Tigua Ngode Datagaliwabenaga henene lolene ngago yu wahowa ke holene ngago yu aribia haga ka. Ani buwa tigua mbirale tara tara wabiaga tene Ngode Datagaliwabe kago ibuni wahowa mbirale ibugua wabiniruhondo bi pupu wialu haga ka. Wabiaga tene Ngode Datagaliwabe kago ibunaga mini hangu mo yaraga haabobo holene ngago. Aniore bialu helo laro.✠

26 Tigua ko ogoni biaabo hagago miniha dimagoli holene tagabi koorene ko ngarubi bima pelo Ngode Datagaliwabehanda ti yupe haga ka. Walime agali heba howa waneigini holene mana winigo wahowa tini degedege mana ko ngubi taraore biaga beda.✠ 27 Agalime ogonidagua dege mana winigo wahowa agali tini degedege dimagoli gibiore howa tini mana ko ngubi taraore biaga ka. Ogonidagua ko tagabiore biragonaga Ngode Datagaliwabehanda pani ngi lalu tinime dano bialu kago mulebira.✠

28 Wali agalime Ngode Datagaliwabe mana henene ngago miniha yu holene manga haragome tini mini kome bua hara ale bilo ibugua ti yupe haga ka. Anigo tigua nabulene ngaru biaga ka. 29 Ti ko tara tarame tolaihe howa uru ale biaga ka. Miniha ko dohe hagabi dimagoli hagabi ko bule lo manda biagabi i nayido agini henge lagabi homelo bagabi gungu biagabi mo hondo hagabi ko andandabi hagabi diburibu lagabi 30 tini guraga guraga biagabi Ngode Datagaliwabe handabe manga hagabi mege biagabi miniha balagala hagabi mine hagabi ko bulene hariga hai biagabi aba aiyalanaga bi mo wahagabi 31 ti miniha ko dege mitangi biagabi buliya lalu lo wuwa lahondo hagabi maruhondo turubini nabiagabi dara nahagabi urunidagua bialu haga ka. 32 Tigua

✠ 1:16: Iba 119.46, Mg 8.38, Ab 3.26, 13.46, 1 Ko 1.18-24, 2 Ti 1.8 ✠ 1:17: Hab 2.4, Yo 3.36, Lm 3.21-22, Ga 3.11, Hi 10.38 ✠ 1:18: Ab 17.30, Eb 5.6, Kl 3.6, 2 Te 2.12 ✠ 1:19: Yo 1.9, Ab 14.15-17, 17.24-28 ✠ 1:20: Yob 12.7-9, Iba 19.1, Ab 14.17, 17.27, Hi 11.3 ✠ 1:21: Yar 2.5, Eb 4.17-18 ✠ 1:22: Yar 10.14, 1 Ko 1.20 ✠ 1:23: Man 4.16-18, Iba 106.20, Yar 2.11, Ese 8.10, Ab 17.29 ✠ 1:24: Ab 7.42, 14.16, 1 Ko 6.18, Eb 4.18, 1 Te 4.4 ✠ 1:25: Ais 44.20, Yar 13.25, 16.19, Amo 2.4, Lm 9.5, 1 Te 1.9, 1 Yo 5.20 ✠ 1:26: LBM 18.22-23, Eb 5.12 ✠ 1:27: LBM 18.22, 20.13, 1 Ko 6.9

Ngode Datagaliwabenaga mana lowini ngagome mana uruni ale bialu karu homolene nga lo ngago manda bia buwa kedange howa mana uruniore biaabo halu haga ka. Uruni hangu ndo maru karume birago hondowabi ti kulo haga ka.✧

## 2

### *Ngode Datagaliwabe ibu wali agalinaga dabaga kago ogo*

<sup>1</sup> Wali agali marume nakarulape biragola ina tí nakarulape birimi larilibe. Ani larilyagua nakarulape larili. Maruhondo tí nakarulape birimi lowa inibi ti ale dege howa tigua birago ale biriligome inibi ko dege ke lalu minida.✧ <sup>2</sup> Ngode Datagaliwabehanda dabaga howa wali agali urunidagua biagagohondo godi tigatigaore laga ka manda bidama. <sup>3</sup> Inibi ti bialu kadagua dege bialu howa ina maruhondo, Tí nakarulape birimi, lalu kego ogonidagua bialu howa í Ngode Datagaliwabenaga godi lolene ngagoria howa yo pialu polebero manda bu kebe. <sup>4</sup> Ngode Datagaliwabe ibugua ihondo baya gibiore biaga kagobi pani abale nangiaga kagobi í mitangi bialu ema nabi hondo haabo kagobi ina urunibi heba mo yo hondo dege kebe. Ngode Datagaliwabehanda ihondo bayale dege biaabo halu kagoni í mini beregedabelonaga ndo birabe.✧ <sup>5</sup> Ani biragoni bilowa í mini giambeore halu beregedolene manda nabioire haabo kegoni. Anigo Horo Mbira tagira ibirangi Ngode Datagaliwabehanda kohondoibunaga lembo holene walia halu godi tigabi lolebira. Larangi í pani timbuniore ngilonaga ini bialu kegome pani hiribiore nolene mo tago haga bialu kegoni. <sup>6</sup> Ogoninaga wali agali bibahendeme biabe bialu harimadagua Ngode Datagaliwabehanda emena karulape ngulebira.✧ <sup>7</sup> Wali agali marume Ngode Datagaliwabehanda tihondo bayale taraore holenebi mini lene holenebi holene ereba nahaganebi ngilonaga tai bialu biabe bayale biaabo halu ka. Tihondo Ngode Datagaliwabehanda haabobo holene mulebira. <sup>8</sup> Wali agali marume tini hangu mitangi bialu mana tigabi erembira mialu ko bulene dege mo tene haga ka. Ani biaga karu baba Ngode Datagaliwabehanda godi lowa tihondoibunaga keba holene walia halu pani mulebira.✧ <sup>9</sup> Wali agali ko biaga karu bibahendeme genda taraore holenebi tandaga nolenebi ngago nolebira. Yu wali agali karubi wali agali tara tara karubi ta nabi nolebira.✧ <sup>10</sup> Ani bulebiragoyu wali agali mana bayale biaga karu tihondo Ngode Datagaliwabehanda bayale taraore holenebi mini lene holenebi mo palia holenebi mulebira. Yu wali agali karubi wali agali tara tara karubi ta nabihondo ani mulebira. <sup>11</sup> Irane Ngode Datagaliwabehanda wali agali bibahende ta nabihondo ogobi degedege biaga kagoni.✧

<sup>12</sup> Yu wali agali ndo tara tara karume Mosese heneyangi Mana lowini ngago hale nahe hene ka. Tigua hale nahe howa ko bialu karu ti dinini kohayagi holebira. Yu wali agali karume Mana lowini ngago hale howa ko bialu karu mana ogoni ngagome ti dabaga. <sup>13</sup> Wali agalime Mana lowini ngago hale dege haragome Ngode Datagaliwabehanda tihondo, í mini tigabiwi ke, nalaga ka. Mana ogonime bibe lo ngadagua bialu kagohondo ibugua, í mini tigabiwi ke, laga ka.✧ <sup>14</sup> Yu wali agali ndo tara tara karume Mana lowini ngago hale nahe howa Mana ogonime bibe lo ngadagua bupe halu biyagua ogo bulene bere ogo nabulene bere lalu tininaga minime lamiaga. Ti Mana lowini ngago hale nahe howa ani bigi bialu haga ka.✧ <sup>15</sup> Tigua Mana lowini ngagome bibe lo ngadagua biragome mana ogoni tinaga miniha nga walia haga. Tinaga minimebi lamia dege bialu tigua birago marungi, Kagua biri, lalu mo mitangi bia halu marungi, Karulape biri, lalu mo mitangi bia haga ka.✧ <sup>16</sup> Ani biagago ina Bi Mana Debene lamirulidagua Horo Mbira

✧ **1:32:** Iba 50.18, Hos 7.3, Lm 2.2, 6.21 ✧ **2:1:** Md 7.1, Lg 6.37, Yo 8.7-9, Lm 1.20 ✧ **2:4:** Ais 30.18, Lm 3.25, Eb 1.7, 2.9, 2 Pi 3.9, 3.15 ✧ **2:6:** Iba 62.12, Min 24.12, Md 16.27, Yo 5.29, 1 Ko 3.8, 2 Ko 5.10, Mo 22.12 ✧ **2:8:** Lm 1.18, 2 Te 1.8 ✧ **2:9:** Amo 3.2, Lg 12.47-48, Lm 1.16, 1 Pi 4.17 ✧ **2:11:** Man 10.17, 2 Bit 19.7, Yob 34.19, Ab 10.34, Ga 2.6, Eb 6.9, Kl 3.25, 1 Pi 1.17 ✧ **2:13:** Md 7.21, Ya 1.22-25, 1 Yo 3.7 ✧ **2:14:** Ab 10.35 ✧ **2:15:** Md 25.31, Ab 10.42, 1 Ti 1.11, 2 Ti 2.8, 4.1, 4.8

lola harangi Ngode Datagaliwabehanda Keriso Yasuha howa wali agali bibahende baba godi lalu tinaga miniha ko mitangi bini wia do karubi mo pani halu godi lolebira.

*Yu wali agalibi Mana lowini ngagobi ogo*

<sup>17</sup> Anigo tí wali agali kamirume agua manda bulene wiaruabe. Tígua, Ina Yu wali agali kama, lowa Mana lowini ngago mo tiaga ho howa, Ina hangu Ngode Datagaliwabenaga wali agali baya kama, manda bu haramili. ✧ <sup>18</sup> Tígua Ngode Datagaliwabehanda hamelo kago manda buwa Mana lowini ngago lo manda biaabo harimigome mana ogo ko ogo bayale lalu daba ki bibehe kamigoni. <sup>19</sup> Tígua lalu, Ina wali agali de kohe karunaga hariga walia hagabi arumaha karunaga mo wá hagabi ✧ <sup>20</sup> mini gedaore karu mana biawai hagabi mana manda nabi karu lawai hagabi kamalo, manda bu kamigoni. Tígua lalu, Ina Mana lowini ngagoha bi mana bibahende manda bulenebi henene hangu lai holenebi ngago yu kamalo, manda bu kamigoni. <sup>21</sup> Tígua maru lawai haramiligo t́ninaga biagago lalu mbira nalaramiligo irane agibe. Tígua mana lawai halu howa, Mbirale page nabibe, lalu lawai haramiligo t́ni page naberamilini. ✧ <sup>22</sup> Tígua lalu, Wali agali kayu nayabe, laramiligo t́ni kayu nayaramilini. Mbirale tara tarahondo bi pupu wiaga karu tí handabe manga haramiligo t́ni mbirale tara tarahondo bi pupu wiaga anda kago ha howa kayu naberamilini. <sup>23</sup> Tígua lalu, Ina Ngode Datagaliwabenaga Mana lowini ngago manda bidamagoni, lowa mine halu, Ina hangunaga ngago, laramiligo. Wali agali tagira karume Ngode Datagaliwabe mege biloibunaga mana napuguaramilini. <sup>24</sup> Anduane Homogonaga mbugani lo ngago ogo, Yu wali agali t́gua bialu kamigome Yu wali agali ndo tara tara karume Ngode Datagaliwabe mege bialu kagoni, lalu gilibu nga. ✧

<sup>25</sup> Mana lowini ngagome bibe lo ngadagua bialu howa dongone podo mabu biagane mana bulene karulape. Anigo Mana ogoni bibe lalu lo ngago puguarimiyagua dongone podo mabu biagane mana bulene nakarulape. ✧ <sup>26</sup> Yuali ndo agali tara mbira dongone podo mabu nabini kago ibugua Mana lowini ngagome bibe lo ngadagua biyagua Ngode Datagaliwabehanda agali ogoni ibubi dongone podo mabu bini tí ale dege ka manda bulebira ndobe. ✧ <sup>27</sup> Tígua Mana lowini ogoni gilibu ngago dongone podo mabu bialu ha kamigo howa Mana ogoni pugualu kami. Anidago nde dongone podo mabu nabi karume Mana ogoni lo ngadagua bialu howa Ngode Datagaliwabehanda godi larangi tigua, Yuali tí nakarulapeore bialu harimida, lalu walia holebira. <sup>28</sup> Anidago Yuali heneneoreru dongone podo mabu henemane bini mbira ai kabe. Dongone bame tagirahayagi hangu podo mabu bini kago ibu Yuali heneneore ndo ka. ✧ <sup>29</sup> Mbiraliibunaga bu habane Ngode Datagaliwabehondo loma bia ho hene kago ibu Yuali heneneore ka. Biabe ogoni birago Mana lowini ngagome biaga ndo Ngode Datagaliwabe Dinini ibuni biaga ka. Agali ogonibigoibunaga mini agali yangoneme mo yaraga haga ndo Ngode Datagaliwabehanda mo yaraga haga ka. ✧

### 3

<sup>1</sup> Ani biagadago Yu wali agalime wali agali tara tara karu bolangua holenaga mbira ngabe. Dongone podo mabu biagane mana galone mbira ngabe. <sup>2</sup> E wiaore bida ndobe. Mbira ogo Ngode Datagaliwabehandaibunaga bi mana Yu wali agalime mo dunubia ho yu helo tihondo mini. ✧ <sup>3</sup> Ani binigo ti marume Ngode Datagaliwabe mitangi bialu mini bilina nahenedane handarimayagua iname agua lamiyabe. Ti ani birago hondowa Ngode Datagaliwabe ibuguabi mini bilina naholebira lolene ngabe. ✧ <sup>4</sup> Ani ndoyago.

✧ **2:17:** Ais 45.25, Yo 8.33, 2 Ko 11.22, Ya 2.19 ✧ **2:19:** Md 15.14, 23.16-19, Lg 18.9, Yo 9.34, 9.40, Lm 6.17, 2 Ti 1.13, 3.5, 3.15 ✧ **2:21:** Iba 50.16-21, Md 23.3-4 ✧ **2:24:** Ais 52.5, Ese 36.20-23 ✧ **2:25:** Yar 4.4, 9.25, Ga 5.3 ✧ **2:26:** Ga 5.6 ✧ **2:28:** Yo 7.24, 8.39, Lm 9.6-7 ✧ **2:29:** Man 30.6, 1 Ko 4.5, 2 Ko 10.18, Kl 2.11, 1 Pi 3.4 ✧ **3:2:** Man 4.7-8, Iba 147.19-20, Lm 2.18, 9.4 ✧ **3:3:** Lm 9.6, 10.16, 11.29, 2 Ti 2.13, Hi 4.2

Wali agali ti bibahendeme ke hai haga kayaguabi Ngode Datagaliwabe ibu henene dege laabo haga kagoni. Anduane Homogonaga mbugani lo ngago ogo,✠  
 Ina bi larego bibahende tigatiga hangu larili lalu walia holene nga.  
 Tigua í baba godi lole manda biyagua í bolanguaore holene nga,  
 lalu gilibu nga.

<sup>5</sup> Iname ko beramagome Ngode Datagaliwabenaga tigabi bulene panigiore walia hayagua agi manda bibehe kamabe. Ngode Datagaliwabehanda iname ko birimagonaga pani ngiragola ibu nakarulape bira labehe holeberamabe. Dindi wali agalime bi laralidagua ogoni laro.✠ <sup>6</sup> Ani nalabeheore. Ngode Datagaliwabe ibu tigabiore ndo kayagua ibugua wali agali bibahende agua mo daba ki bulebe.

<sup>7</sup> Anidago inaga ke holeneme Ngode Datagaliwabenaga henene lolene ngago panigiore walia helo lowa emene bogo para halu berogola Ngode Datagaliwabe ibunaga mini mo yaraga hayagua i ko biaganaga pani nolene irane aginagadabe. <sup>8</sup> Ogonidagua manda bu kamayagua Ngode Datagaliwabenaga mini mo yaraga holene wilo ina ko bima lolene ngabe. Wali agali marume, Polohanda ani lalu ka, lowa i mege biya. Ani biragonaga ti pani nolene ngadagua nolebiraore.✠

*Wali agali mini tigabiwi mbira naheorego ogo*

<sup>9</sup> Anidago wali agali tara tara karu ale ndo ina Yu wali agali bayale kamabe. Ani nalabeheore. Ina Yu wali agali kamarubi wali agali tara tara karubi ta nabi ina bibahendeore kome bope hai henego kama lalu abale langirugoni.✠ <sup>10</sup> Anduane Homogonaga mbugani lo ngago ogo,✠✠

Wali agali mini tigabiwi mbira naheore.

<sup>11</sup> Mini bayale gigabiwi hagabi

Ngode Datagaliwabe mini yaraga hoa hagabi mbira naheore.

<sup>12</sup> Wali agali bibahendeme Ngode Datagaliwabe erembira mialu piai haga ka.

Ti bibahende habane nabulene hangu bu hama peda.

Bayale biaga mbirali naheore.

<sup>13</sup> Tigua wali agali homelonaga bi lahondo hagabi✠

tinaga hégame ke gibi hagabi

homelo bolene bi puya tomia palego ale tinaga ne hambuha howa tagira ibagabi

<sup>14</sup> ha hiriribiore holene tinaga ne harigaha tolaihebi ka.✠

<sup>15</sup> Tigua wali agali mo tandaga holebi homelo bolebi abale manda biaga ka.✠

<sup>16</sup> Ti poragoha pialu ko dege bima puabo haga ka.

<sup>17</sup> Mo palia holenaga bulene mbira manda nabiniore ka.

<sup>18</sup> Ngode Datagaliwabehondo mogolo holenebi manda nabiore ka,✠

lalu gilibu nga.

<sup>19</sup> Mana lowinigo bibahende ngago wali agali mana ogoni andaneha karunaga lo nga manda bu kama. Ani manda buwa wali agalime, Ina Mana ogoni manda nabi harima, nalelonaga Ngode Datagaliwabehanda wali agali dindi bibahendeni karunaga dabagane helo Mana ogoni ngagome walia ho ngagonigo manda bu kama.✠ <sup>20</sup> Anigo mbiralime Mana lowinigo ogonime, Bibe, lo ngadagua biai hayagua Ngode Datagaliwabehanda ibu mini tigabiwi ka nalaga ka. Mana lowini ngagome ledago ogo, Wali agali ta nabi ko biaga kami, lalu walia ho nga.✠

*Kerisohondo mini mbiraorewi kago hondowa Ngode Datagaliwabehanda, Í mini tigabiwi ke, lagago ogo*

✠ 3:4: Iba 51.4, 62.9, Yo 3.33 ✠ 3:5: Lm 6.19, Ga 3.15 ✠ 3:8: Lm 5.20, 6.1, 6.15 ✠ 3:9: Lm 1.18-2.24, 3.23  
 ✠ 3:10: Aga 7.20 ✠ 3:10: Iba 14.1-3, 53.1-3 ✠ 3:13: Iba 5.9, 140.3, Ya 5.16 ✠ 3:14: Iba 10.7 ✠ 3:15: Min 1.16, Ais 59.7-8 ✠ 3:18: Iba 36.1 ✠ 3:19: Yo 10.34, Lm 1.20, 2.2, 3.9, 3.23 ✠ 3:20: Iba 143.2, Ab 13.39, Lm 7.7, Ga 2.16, Eb 2.8-9, Ta 3.5



<sup>21</sup> Anigo áyu ogoni Ngode Datagaliwabehanda wali agali agua biragola mini tigabiwi ke laganegonaga hariga walia ho nga. Ogoni lalu mana bulene lo ngagome bulene mbira ogoniha nawiore. Mosese heneyangi Mana lowini ngagomebi Ngode Datagaliwabe mana latagi hagarumebi hariga ogoni walia henego nga.✧ <sup>22-23</sup> Ani binigo Yasu Kerisohondo mini mbiraore wu kago hondowa Ngode Datagaliwabehanda wali agali ogoni ibu mini tigabiwi ka laga ka. Wali agali bibahende Yasu Kerisohondo mini mbiraore wu karu tihondo Ngode Datagaliwabehanda ani laga ka. Ina wali agali bibahende ta nabi ko birimagome ina pele ngulene Ngode Datagaliwabe kategoria kaundiaore kama.✧✧ <sup>24</sup> Ani bu kamagonaga Ngode Datagaliwabehanda Keriso Yasuha howa ibunaga biamogo bia holene turu halu bame ngiragome mini tigabiwi ke laga ka. Keriso Yasu ibugua ti golope haga ka.✧ <sup>25-26</sup> Keriso Yasu ibu homaragome ina wali agalinaga ko domolene henge wilo lowa Ngode Datagaliwabehanda ibu loma bia ho hene. Kerisohondo mini mbiraore wirarunaga ko Ngode Datagaliwabehanda domo wahelo ani loma bia ho hene. Ibugua ani binidagoni irane ibu mini tigabi kago walia holenaga ani bini. Alaore wali agalime ko biyago hondowa Ngode Datagaliwabehanda la nabi ibu mini timbuniwi howa ema nabi hene. Ai áyungi Ngode Datagaliwabehanda ibunaga tigabi holene walia halu wali agali bibahendeme ko birimaru ala nale henego áyu lalu ka. Ibugua ogonidagua bialu ibuni tigabiore ko lalubi Yasuhondo mini mbiraorewi karuhondo, Tí mini tigabiwi kami, lalubi walia haga ka.✧

<sup>27</sup> Anidago ina mine aginaga holebe. Mine holene irane nawiore. Nawioiredago irane agibe. Mana lowini ngagome, Bibe, ledadagua wali agalime biaganagabe. Ogoninaga ndo. Iname Yasuhondo mini mbiraore wu kamagonaga hangu.✧ <sup>28</sup> Wali agalime Mana lowini ngagome, Bibe, lo ngadagua biai haragola ndo tigua Yasuhondo mini mbiraore wu kagola hangu Ngode Datagaliwabehanda, Tí tigabiwi kami, laga kago manda bidama.✧ <sup>29</sup> Be Ngode Datagaliwabe ibu Yu wali agalinaga hangu kabe. Ibu wali agali tara tara karunagabi kagoni ndobe. Aniorego ibu bibahendenaga Ngode Datagaliwabe kagoni.✧ <sup>30</sup> Ti bibahendenaga Ngode Datagaliwabe mbiraore ibuni dege kago ibugua Yu wali agalibi wali agali tara tarabi bibahende ta nabi Yasu Kerisohondo mini mbiraore wu karuhondo, Tí mini tigabiwi kami, laga ka.✧ <sup>31</sup> Ani biagadago iname mini mbiraore wulene ogoni mo tene halu Mana lowini ngago mo waharamabe. Ani nalabeheore. Iname ani beramagome Mana lowini ngago mo hongo harama.✧

## 4

### *Ngode Datagaliwabehanda, Abarahama í mini tigabiwi ke, lenego ogo*

<sup>1</sup> Ogonidagua manda buwa iname inanaga mamali Abarahama mitangi bialu agi labehe kamabe. Ibugua agi bialu henebe. <sup>2</sup> Ibugua biabe biyago hondowa Ngode Datagaliwabehanda ibuhondo, Í mini tigabiwi ke, lenedale ibugua inime birugoni lowa mine holene irane ngale. Ani nalabeheore. Ibugua Ngode Datagaliwabenaga deni howa inime birugoni lowa mine holene irane nawiore ndobe.✧ <sup>3</sup> Anduane Homogonaga mbugani lo ngago ogo, Abarahamahanda Ngode Datagaliwabehondo mini mbiraore wini. Ani wu heago hondowa Ngode Datagaliwabehanda, Ibu mini tigabiwi ka, lenego gilibu nga.✧ <sup>4</sup> Wali agali biabe biragohondo yolo miaga. Yolo ogoni turu halu bame ngiyadalo manda nabi biabe birugonaga yolo ogoni ngiyadalo manda biaga.✧ <sup>5</sup> Mbiralime ibuninaga hongome mbirale bigi berogome ibu mini tigabiwi ka lelo lowa mo tene nahe Ngode Datagaliwabehondo mini mbiraore wulene mo tene ho kayagua

✧ **3:21:** Ab 10.43, 15.11, 26.22, Hi 11.4, 1 Pi 1.10 ✧ **3:22-23:** Lm 1.17, 10.12, Ga 2.16, 3.28, Kl 3.11 ✧ **3:22-23:** Lm 3.9, 5.2, 11.32, Ga 3.22 ✧ **3:24:** Lm 5.1, Eb 1.7, 2.8, Kl 1.14, 1 Ti 2.6, 1 Pi 1.18-19 ✧ **3:25-26:** Ab 13.38-39, 17.30, Eb 1.7, Kl 1.20, Hi 9.15 ✧ **3:27:** Lm 2.17, 2.23, 1 Ko 1.29-31, Eb 2.9 ✧ **3:28:** Ab 13.38-39, Lm 3.20-22, 8.3, Ga 2.16 ✧ **3:29:** Lm 10.12 ✧ **3:30:** Man 6.4, Lm 4.11-12, Ga 3.8, 3.20, 3.28 ✧ **3:31:** Md 5.17, Lm 8.4 ✧ **4:2:** Lm 3.20, 3.27-28 ✧ **4:3:** Pig 15.6, Ga 3.6, Ya 2.23 ✧ **4:4:** Lm 11.6



Ngode Datagaliwabehanda ibu ani bu kago hondowa o biagohondo, Ína ko biri, lolene winigo la nabi, Í mini tigabiwi ke, laga ka. <sup>6</sup> Mbiralí ibu mini tigabiwi ka lelo ibugua mana bayale bigi bulenego mo tene nahe kagohondo Ngode Datagaliwabehanda, Í mini tigabiwi ke, laragola turu holene ngago ogoninaga Debidihanda bi lenego ogo,

<sup>7</sup> Marume mana ko biniru Anduane Homogohanda domo wahalu✧  
mana liahe binirubi domo wahai henego ti turuore ho ka.

<sup>8</sup> Mbiralí ibugua ko biyago Anduane Homogohanda lone mitangi bu dai nabiaga kago ibu turuore ho ka,  
lenego gilibu nga.

<sup>9</sup> Debidihanda turu holene o layadagoni dongone podo mabu biagane mana biaga karu ti hangunaga lo ngabe. Ani ndo. Dongone podo mabu biagane mana nabini karunagabi heba lo nga. Irane ina Anduane Homogonaga mbugani lo nga lalu larugo ogo, Abarahamanda Ngode Datagaliwabehondo mini mbiraore wini. Ani wu heago hondowa Ngode Datagaliwabehanda, Ibu mini tigabiwi ka, lene, lalu gilibu nga.✧

<sup>10</sup> Abarahama ibu mini mbiraore angi howa winibe. Ibu dongone podo mabu bihabe be nabihabe. Mani ndo alaore wu hene. <sup>11</sup> Ibu dongone podo mabu mani bini. Abarahamaibunaga dongone podo mabu binigo irane ibu mini mbiraore wu heago hondowa Ngode Datagaliwabehanda, Ibu mini tigabiwi ka, lene lalu mani manane ogonime walia hene. Ani binigo dongone podo mabu bini nabibi wali agali bibahende ta nabi Ngode Datagaliwabehondo mini mbiraorewi karuhondo ibugua, Mini tigabiwi ke, leneru tinaga mamali Abarahama hene ka.✧ <sup>12</sup> Ogonidagua dongone podo mabu bini karu tinagabi mamali Abarahama dege ka. Ti dongone podo mabu biyagola tinaga mamali Abarahama ibu hene ndo. Abarahama ibu dongone podo mabu nabi howa ala Ngode Datagaliwabehondo mini mbiraore wu henedagua tiguabi ani wu hayagola ibu tinaga mamali hene.✧

*Ngode Datagaliwabehanda, Ngulebero, lalu lowinigo mini mbiraore wu howayamiaga ngago ogo*

<sup>13</sup> Ngode Datagaliwabe ibugua Abarahamahondo lalu, Íbi í aguanenebi tíhondo dindi bibahende ngulebero lalu, lowini. Ibugua bi ogoni lowinigo irane Abarahama ibu Yualinaga Mana lowini ngagome, Bibe, ledadagua biyago hondowa ndo. Ibu mini mbiraore wu heago hondowa Ngode Datagaliwabehanda, Ibu mini tigabiwi ka, lowa ani lamialu lowini.✧ <sup>14</sup> Ani lowinigo Ngode Datagaliwabehanda, Ngulebero, lalu lo ngago Mana lo wini ngagome, Bibe, ledadagua biagaruhondo mule kayagua nde wali agalime Ngode Datagaliwabehondo mini mbiraore wulene galone ndo lalu Ngode Datagaliwabehanda, Ngulebero, lalu lo winigohabi hongo nawi degeda.✧ <sup>15</sup> Mana lowini ngagome ko biragohondo Ngode Datagaliwabenaga keba holene mo yu anda ibaga. Anigo bi mana nalo wigoha wali agali karume bi napuguaga ka.✧

<sup>16</sup> Ogoninaga Ngode Datagaliwabe ibugua Abarahamahondo, Ngulebero, lalu lowinigo Abarahamanaga aguaneneru ti bibahendenagabi lalu turu lalu henene bame ngulebero lene. Ani lenego tene Abarahamahanda Ngode Datagaliwabehondo mini mbiraore pigane wu henegome. Ogoni miagago tene Mana lowini ngagome, Bibe, ledadagua bialu karuhondo hangu ndo. Ogoninaga Abarahama ibu Ngode Datagaliwabehondo mini mbiraore pigane wu henedagua wu karu tihondobi miaga dege ka. Tene Abarahama ibu Ngode Datagaliwabehondo mini mbiraore ala wu henedagua ina bibahendeme mini mbiraore mani wu kamagonaga mamali ibu hene ka.✧ <sup>17</sup> Anduane Homogonaga mbugani lo ngadagua ogo, Ina dindi tara tarani í hameigini dewa tara

✧ 4:7: Iba 32.1-2 ✧ 4:9: Lm 4.3 ✧ 4:11: Pig 17.10, Lg 19.9, Ga 3.7 ✧ 4:12: Md 3.9 ✧ 4:13: Pig 17.4-6, 22.17-18, Ga 3.29 ✧ 4:14: Ga 3.18 ✧ 4:15: Lm 3.20, 5.13, 5.20, 7.8, 2 Ko 3.7-9, Ga 3.10, 3.19 ✧ 4:16: Lm 3.24, Ga 3.7, 3.22

tara karunaga mamali habelo heledo, lalu gilibu nga. Ani lowa gilibu ngago Abarahamondo, Ngulebero, lalu lo winigoha hongo ngago tene Ngode Datagaliwabeanda bi lo winigome. Abarahama ibu mini mbiraore wu henego Ngode Datagaliwabe ogoni ibunioreme homeneru mo heya hagabi ibunaga bime mbirale ala nawiniru mo wia hagabi henego kagoni. ✧ <sup>18</sup> Abarahama ibu Ngode Datagaliwabeanda mini mbiraore wialu Ngode Datagaliwabeanda, Ngulebero, lalu lo wiyago ngulebira lowa mini dunubia ho habe naheore wiagolabi ngulebiraore manda buwa minime dunubia ho haabo hene. Ibu ani ho hayagome Anduane Homogonaga mbugani, Inaga aguanene dewaore yakundi li harini karunidagua holebira, lalu gilibu ngadagua lola lalu ibu hameigini tara tara dewaorenaga mamali hene. ✧ <sup>19</sup> Abarahama ibu mali handari mbira (100) agima howa ibunaga minime lo mitangi bialu. I tingini hongo nahe homene ale kogobi i oneme gali taba hanabe nahe dege bedagobi, lo mitangi bialu ibu Ngode Datagaliwabeanda mini mbiraore wu henego hadowa hama dai nabi mini mbiraore hongo howa wia ho haabo hene. ✧ <sup>20</sup> Ibugua mini mbiraore wu henego wa nahe Ngode Datagaliwabeanda, Ngulebero, lalu lo wiyagonaga mini kira nawi ngulebiraore layadagua manda bu haabo ho hene. Ibugua Ngode Datagaliwabeanda mini mbiraore wu henegome ibuni mo hongo haabo hayagola howa Ngode Datagaliwabenaga mini mo yaraga lalu hene. <sup>21</sup> Irane ogoni ibugua Ngode Datagaliwabeanda ibuhondo, Ngulebero, lalu lo wiyago heneneore ngulebira lo manda bu hene. ✧ <sup>22</sup> Anigo Abarahama ibu mini mbiraore wu heago hondowa Ngode Datagaliwabeanda, Ibu mini tigabiwiore ka, lene. ✧ <sup>23</sup> Ibu mini tigabiwiore ka, lalu gilibu winigo ogoni Abarahamanaga hangu lalu ndo gilibu winigo nga. <sup>24</sup> Ina Anduane Homogo Yasu homowa mo heya hene Ngode Datagaliwabe kago ibuhondo mini mbiraore weramagome ibugua, Ti mini tigabiwi kami, lalu lolebhiraruhondo inanagabi heba lalu gilibu winigo nga. ✧ <sup>25</sup> Iname ko birimagonaga Ngode Datagaliwabeanda Keriso ibu homo aribia helo helene. Ani binigo Ngode Datagaliwabe ibugua inahondo, Ti mini tigabiwi kami, lolenaga Keriso mo heya hene. ✧

## 5

### *Ngode Datagaliwabeanda inahondo, Ti mini tigabiwi kami, lalu lagago ogo*

<sup>1</sup> Ani binigo iname Ngode Datagaliwabeanda mini mbiraore wirimagona ibugua inahondo, Ti mini tigabiwi kami, lene kamago ina Anduane Homogo Yasu Kerisoha howa ina Ngode Datagaliwabeanda mo palia henego kamagoni. ✧ <sup>2</sup> Iname Ngode Datagaliwabeanda mini mbiraore wu hemago hondowa Yasu Kerisohanda ina Ngode Datagaliwabenaga biamogo bia holenehayagi ayu kamagoni holomaya haru ibu heledagoni. Ani bu howa iname Ngode Datagaliwabenaga baya taraore holene karuloleberama lowa mini dunubiaho kamagonaga turu ho kamagoni. ✧ <sup>3</sup> Ani bu kamaria gendabi mbira ngangibi turu ho kamagoni irane gendabi ngarume ina ema nabi howa hibu lalu holomayanaga mo hibu lahaga nga manda bidamagoni. ✧ <sup>4</sup> Ema nabi howa hibu lalu holene Ngode Datagaliwabeanda, Bayale bialu harimi, lolene mo yu anda ibaga. Ibugua ani laragome mini dunubia ho holene mo yu anda ibaga. <sup>5</sup> Mini dunubia ho holene ogonime ina mo taga nahagago irane Ngode Datagaliwabeanda ibu Dinini inahondo turu lalu bame ngiyago ibugua Ngode Datagaliwabenaga gubalini holene inanaga bu miniha tolai heledagome. ✧

✧ **4:17:** Pig 17.5, Ais 48.13, 1 Ko 1.28, Eb 2.1, 2.5, 1 Pi 2.10 ✧ **4:18:** Pig 15.5, Hi 11.1 ✧ **4:19:** Pig 17.17, 18.11, Hi 11.11-12 ✧ **4:21:** Iba 115.3, Hi 11.19 ✧ **4:22:** Pig 15.6 ✧ **4:24:** Ab 2.24, 13.30, Lm 15.4, 1 Pi 1.21 ✧ **4:25:** Ais 53.4-5, 1 Ko 15.17, 2 Ko 5.21, Ga 1.4, 1 Pi 1.21 ✧ **5:1:** Yo 16.33, Lm 3.24, 3.28-30, 4.24, Eb 2.14, Kl 1.20 ✧ **5:2:** 1 Ko 15.1, Eb 2.18, 3.12, Hi 3.6, 10.19 ✧ **5:3:** Ab 5.41, 2 Ko 12.10, Pb 2.17, Ya 1.2-3, 1 Pi 1.5-7, 3.14 ✧ **5:5:** Iba 22.5, 25.20, 2 Ko 1.22, Ga 4.6, Eb 1.13-14, Hi 6.18-19

<sup>6</sup> Inaneme hongo halu mbira bibe naheore hemaria Ngode Datagaliwabehanda horo pongo bo winiangi Kerisohanda ko biaga hemarunaga homo aribia hene.✧ <sup>7</sup> Mana tigabi biaga kago ibu nahomelo mbiralime lalu, Ina homo aribia haro, lolene mbira naholebira. Wali agali dara howa biamogo biaga kago ibu nahomelo mbiralime lalu, Ina homo aribia haro, lolene taibiore. <sup>8</sup> Anigo ina ko hemago hondowa Ngode Datagaliwabehanda inahondo ibunaga gubalini timbuni holeneore walia halu ina homai holilono Keriso ibugua homo aribia hene.✧ <sup>9</sup> Ibugua inanaga homo aribia hayagome Ngode Datagaliwabehanda inahondo, Tí mini tigabiwi kami, lelo mo wia hayagoni. Ani biyagome Ngode Datagaliwabehanda godi lalu ko biragohondo ibunaga keba holene walia harangi Kerisohanda ina pele ngialu inanaga la haganeore holebira.✧ <sup>10</sup> Ina Ngode Datagaliwabela waitigi ho hemaria ibugua ibu Igini homo aribia helayagome ina mo ibu damene helene. Anigo áyu ina Ngode Datagaliwabenaga damene kamago Keriso ibunaga holeneme ina au pele ngulubada.✧ <sup>11</sup> Ogoni dege ndo Anduane Homogo Yasu Keriso ibugua ina mo Ngode Datagaliwabenaga damene helene kama. Ibuha howa Ngode Datagaliwabehanda ani binigonaga ina turu ho kamagoni.

*Adamahanda mo homa hayagola Keriso ibugua mo heya henego ogo*

<sup>12</sup> Agali mbira hanguha howa ko bulene dindi bibahendeni anda ibini. Ibugua ko binigome homolene yu anda ibini. Ani binigo wali agali bibahende ko hai hene kamago homoleneme ina bibahende minai ka.✧ <sup>13</sup> Mana lowini ngago nalowiha howa ko bulene dindi bibahendeni wiame ho wini. Mana ogoni nalowiha howa wali agalime ko binigo Ngode Datagaliwabehanda nadagale hene.✧ <sup>14</sup> Ani binigo pigane Adama heneangi howa hama ibalu Mosese heneangi wali agali bibahende dombene ogoniha heneru homoleneme minai hene. Ngode Datagaliwabehanda, Nabibe, leago Adamahanda pugualu ko biyadagua nabini hearubi heba homoleneme minai hene.✧

Agali mbira maha ogobi ibulebira lalu walia halu Adama ibu ala ibini. <sup>15</sup> Anigo agali kira ogoni labo libu ogobi labo labo ndo tara taraore hene. Irane Ngode Datagaliwabehanda turu halu inahondo bame ngiyago Adamahanda ko binigo ale ndo. Adamahanda ko yu anda ibinigome wali agali dewaore homai hene. Ngode Datagaliwabenaga biamogo bia holene ibuni turu halu bame ngiyago goaile baya gibiore nga. Agali mende Yasu Keriso ibunaga biamogo bia holeneha howa Ngode Datagaliwabehanda wali agali bibahendehondo ngiyago goaile gibiore nga. <sup>16</sup> Ngode Datagaliwabehanda turu halu bame ngiyago ogoni agali mbira biagome ko binigobi mandagi ndo taraore nga. Tarago irane Adamahanda ko mbira binigome Ngode Datagaliwabehanda godi lowa, Ko birida, lene. Ai maha wali agali dewaore ko bialu harimago Ngode Datagaliwabehanda dara halu biamogo bia holene walia halu ibugua, Ina tí mo bayale haru, lolene nawi howa lene. <sup>17</sup> Bi ogo heneneore agali mbirame ko biyagola wali agali bibahende homoleneme minai henego kama. Agali mende Yasu Keriso ibugua biyago Adamanaga ko ogoni biyagobi ndo ibugua biyago goaile baya gibiore anda hene. Ngode Datagaliwabenaga biamogo bia holene goaile baya gibiore ngago ibugua wali agali ina bibahendehondo ta hayagobi mini tigabiwi holene turu halu bame ngiyagobi ina Keriso heba kamago howa hongo holeberama.

<sup>18</sup> Ani howa Adamahanda ko mbira binigome Ngode Datagaliwabehanda wali agali bibahendehondo, Tí ko kami, lolene mo winidagua Kerisohanda tigabi mbira biyagome wali agali bibahende golope hai halu tihondo holene gahenge miaga.✧ <sup>19</sup> Agali mbira ibugua Ngode Datagaliwabehanda, Nabibe, leago pugualu ko binigome wali agali

✧ 5:6: Lm 4.25, 5.8-10 ✧ 5:8: Yo 3.16, 15.13, 1 Pi 3.18, 1 Yo 3.16, 4.10 ✧ 5:9: Lm 1.18, 2.5, 2.8, 3.25, 1 Te 1.10, Hi 9.14, 1 Yo 1.7 ✧ 5:10: Yo 14.19, Lm 8.7-8, 2 Ko 4.10-11, 5.18-19, Kl 1.20-21 ✧ 5:12: Pig 2.17, 3.6, 3.19, Lm 6.23, 1 Ko 15.21 ✧ 5:13: Lm 4.15, 1 Yo 3.4 ✧ 5:14: 1 Ko 15.21-22, 15.45 ✧ 5:18: 1 Ko 15.22

bibahende mo ko hai hene. Ogonidagua biyagola agali mende ibugua Ngode Datagaliwabehanda layadagua biyagome Ngode Datagaliwabe ibugua wali agalihondo, Tí mini tigabiwi kami, lelo ani lolene mo wini.✧

<sup>20</sup> Ko bulene koorene ko ngago walia hole Ngode Datagaliwabehanda Mana lo winigo ngini. Ko bulene koorene ko hayagola Ngode Datagaliwabenaga biamogo bia holene ngago ko bulene koorene ko henedagua ndo timbuniorene timbu ho nga.✧ <sup>21</sup> Anigo wali agali homolene wiagome ko bulene hongo ho winidagua Ngode Datagaliwabehanda, Tí mini tigabiwi kami, laragome ibunaga biamogo bia holene hongo ho nga. Ngode Datagaliwabehanda biamogo bia holene ogonime ina haru halu inanaga Anduane Homogo Yasu Keriso ha howa haabobo holene yu holomaya haru halu ka.✧

## 6

### *Ina Keriso heba homowa ibuha howa holene gahenge yu kamago ogo*

<sup>1</sup> Ani binidago manda buwa iname agua labehe kamabe. Ngode Datagaliwabehanda ina biamogo bia ho wiaabo helo lowa ina ko bia to halu haabo habehe kama labehebe.✧

<sup>2</sup> Ani nalabeheore. Ina kohayagi homarimago lone ko bialu haabo agua habehe kamabe.✧ <sup>3</sup> Iname Keriso Yasu ibuha ho gimbu bialu baboraya birimangi ibu homayadagua inabi ibuha howa homarimagoni lo manda nabi kamibe.✧ <sup>4</sup> Ina baboraya birimagonime Keriso Yasu ibu heba homalu hora hamaga harimagoni. Ani birimago buwa Keriso ibu Abanaga hongo taraore holeneme ibu mo heya hayagola heyalu piyadagua inabi holene gahengeni howa heyalu pole holene nga.✧

<sup>5</sup> Ogonigo Keriso ibu homayadagua homarimagome ina ibuha ho gimbu bu kama. Ani ho gimbu bu howa ibu heyu kadagua inabi heyu holeberama.✧ <sup>6</sup> Ko bulenenaga garabaya biabe ale biahaga naholomaya iname ko bua holenenaga hongo Kerisohanda bo tongo lene. Ani biyagome inanaga mini ko ala tawe ngamago Kerisohanda ibuni heba ira bangani ba para ho wahenego ogoni manda bu kamagoni.✧ <sup>7</sup> Ani binigo mbirali homaragola ko bulenenaga hongome ibu lone haru dai bibe nahe holebira.✧ <sup>8</sup> Ina Keriso heba homarimago ina ibu heyu kadagua ibu heba holeberamago manda bu kamagoni. <sup>9</sup> Irane Keriso ibu homalu mo heya henego lone nahomolebiraore. Homoleneme ibu lone yani habe nahe holebira manda bu kama.✧ <sup>10</sup> Ibu homenego ko buleneme ibu haru habe nahe nga. Ani binigo ibu áyu kagoni Ngode Datagaliwabela mbiraore howa haga ka.✧ <sup>11</sup> Ogonidagua tígua, I ko bulenehondo homene. Keriso Yasuha ho gimbu bu howa Ngode Datagaliwabela mini mbiraore howa kogoni, manda bulene nga.✧

<sup>12</sup> Ani bialu tingini áyu kamigoni homaganenaga kamigo tíni mini kome hame ledadagua bulenaga ko buleneme tí haru helo helolene nawi.✧ <sup>13</sup> Tínaga tingini aria mbiragome ko bilonaga kohondo namilimu. Tí wali agali homaganehayagi hemiria holene gahengehayagi haru dai binigo hagadagua halu tíni Ngode Datagaliwabehondo lomabu milimu. Ani mialu howa tígua mana tigabi hangu bulenaga tínaga bulenerubi tínibi bibahende Ngode Datagaliwabehondo lomabu miai halimu.✧ <sup>14</sup> Mana lo ngagome tí haru ka ndo. Ngode Datagaliwabenaga biamogo bia holeneme tí haru kago manda buwa ko buleneme tí haru helo helolene nawi.✧

### *Iname mana tigabi anda helonaga biabe bia haga kamago ogo*

<sup>15</sup> Anigo mana lo ngagome ndo Ngode Datagaliwabenaga biamogo bia holeneme ina haru kago manda buwa iname ko bulene karulapebe. Ani nakarulapeore.✧ <sup>16</sup> Tígua

✧ **5:19:** Ais 53.11 ✧ **5:20:** Yo 15.22, Lm 3.20, 4.15, 7.8, Ga 3.19, 3.23, 1 Ti 1.14 ✧ **5:21:** Lm 6.23 ✧ **6:1:** Lm 3.5-8, 6.15 ✧ **6:2:** Lm 7.4, Ga 6.14, Kl 3.3, 1 Pi 2.24, 4.1 ✧ **6:3:** 1 Ko 15.29, Ga 3.27 ✧ **6:4:** Lm 8.11, Ga 6.15, Eb 4.22-24, Kl 2.12, 3.10 ✧ **6:5:** Pb 3.10-11 ✧ **6:6:** Ga 5.24, 6.14, Eb 4.22, Kl 2.11, 3.5, 3.9 ✧ **6:7:** 1 Pi 4.1 ✧ **6:9:** Mo 1.18 ✧ **6:10:** Lg 20.38, Hi 9.26-28, 1 Pi 3.18 ✧ **6:11:** Lm 6.2, 2 Ko 5.15, Ga 2.19, 1 Pi 2.24 ✧ **6:12:** Pig 4.7, Iba 19.13, 119.133 ✧ **6:13:** Lm 7.5, 12.1, Eb 2.5, 5.14, Kl 3.5, Ya 4.1 ✧ **6:14:** Lm 7.4-6, 8.2, Ga 5.18, 1 Yo 3.6 ✧ **6:15:** Lm 6.1



garabaya biabe ale bia haga hole mbiralihondo tíni muwa o biagome laradagua birimiyagua nde tínaga anduane ogoni ibu holebira. Ko bulenenaga bia harimiyagua nde tínaga anduane ogoni howa homolene wiaabo holebira. Ngode Datagaliwabehanda bia laradagua birimiyagua nde tínaga anduane ibu howa ibugua, Tí mini tigabiwi kami, lolene wulebirago manda nabi kamibe. ✧ <sup>17</sup> Ani ngago manda buwa ala tí ko bulenenaga garabaya biabe ale bia haga harimigo ai áyu mana lawai hayago hale howa bi henene ngago minime yu tiga bu kamigoni. Anigo iname Ngode Datagaliwabehondo turu halu kaj lamiya. <sup>18</sup> Tí ko bulenenaga garabaya biabe ale bia haga hemiria Ngode Datagaliwabehanda ko bulenenaga hongo tongolope halu tí golope howa mana tigabi bilimulo tí mo Ngode Datagaliwabeibunaga biabe bia haga helene. ✧ <sup>19</sup> tínaga mini gedaore kamigo manda buwa ina bi taibi ndo iname beramaligoria howa laro. Ala tígua mana dodohebi koorene ko wiarubi bialu tíni mo garabaya biabe ale bia haga halu tínaga bulenerubi tίνibi bibahendeore ko wiaruhondo miai halu harimigoni. O birimidagua dege áyu tígua mana tigabi buleneme tí biabe mo bia haga bialu howa tínaga bulenerubi tίνibi bibahendeore mana tigabi bulenehayagi loma bia ho holene nga.

<sup>20</sup> Tí ko bulenenaga garabaya biabe ale bia haga harimiangi Ngode Datagaliwabenaga tigabi bulene bia nabi harimi. ✧ <sup>21</sup> Anigo mana ala bialu harimirunaga áyu taga ho kamigo ala bialu harimiangi mana o biagoniha howa lini bayale mbira agi handa walia harimibe. Mana o biaruni aleme homolene hangu yu anda ibaga. ✧ <sup>22</sup> Anigo áyu Ngode Datagaliwabehanda tí ko buleneha howa golope hayagola tíibunaga biabe bia hagane wali agali kami. Ani kamigo howa tíni Ngode Datagaliwabehondo loma bia ho howa mbirale bibahende beramigo tene ibu mitangi bialu lini ogoni dalu kamigoni. Ani bu howa haabobo holene yu kami. <sup>23</sup> Irane ko bulene emena homolene nga. Ani manda buwa Ngode Datagaliwabehanda haabobo holene turu halu bame ngiagago inanaga Anduane Homogo Keriso Yasu ibuha ho gimbu bu howa yu holene nga. ✧

## 7

### *Dabu bulene teme mana walia kago ogo*

<sup>1</sup> I hamene mbaliniru-o tígua mana lo ngaru manda bu kamigo ina mana áyu langerogo manda buleberamiore. Mbiralí ibu dindini kataginaga dege mana lo ngarume ibu haru howa bulene ogo nga nabulene ogo nga lalu walia haga. <sup>2</sup> Ogoni ogodagua wali mbira agali one biruwa ibu agalini nahome kangi ibu agalinila biraabo helo mana lo ngagome wali biago dariba howa ibu agalinila berelaga. Ai ibu agalini homayagua mana lo ngagome ibu dariba hayago golope haragola wali biago hibaria biraga. ✧ <sup>3</sup> Anigo wali ogonime ibu agalini nahome helowa agali mendela pu bedayagua wali ogoni ibu agali kayu biaga beda. Ai ibu agalini homeneyagua wali hibaria biruwa ibu agali mende piyagua o karulape birulebira. ✧ <sup>4</sup> I hamene mbaliniru-o tibi ogonidagua dege kami. Tígua Mana lowini ngagohondo tí homene ale howa Kerisoibunaga tingini aria kami. Ani howa áyu ina Ngode Datagaliwabenaga biabe galone bialu holomaya Ngode Datagaliwabehanda Keriso mo heya hayago tíibunaga kami. ✧ <sup>5</sup> Anigo inanaga mini ala tawe ngamagome ina haru hayangi Mana lowini ngagome inaha howa ina ko bulumaya mo buahe haya. Ani mo buahe hayagola ina homolenenaga biabe bialu harima. ✧ <sup>6</sup> Mana lowini ngagome ala ina dariba henego áyu Ngode Datagaliwabehanda ina golope hai hayagola Mana ogoni lo ngagohondo homene ale kama. Mana ala tawe gilibu wini wiagonaga bialu harimago áyu nabi mana gahenge bialu kamago Ngode Datagaliwabe Dinini ibugua mo bia halu kagoni. ✧

✧ **6:16:** Md 6.24, Yo 8.34, 2 Pi 2.19 ✧ **6:18:** Yo 8.32, 1 Ko 7.22, Ga 5.1, 1 Pi 2.16 ✧ **6:20:** Yo 8.34 ✧ **6:21:** Lm 1.32, 7.5, 8.6, 8.13 ✧ **6:23:** Pig 2.17, Lm 2.7, 5.12, 5.15, Ya 1.15, 1 Pi 1.4 ✧ **7:2:** 1 Ko 7.39 ✧ **7:3:** Md 5.32 ✧ **7:4:** Lm 6.2, 6.11, 8.2, Ga 2.19, 5.22, Kl 2.14 ✧ **7:5:** Lm 6.13, 6.21, Ga 5.19, Ya 1.15 ✧ **7:6:** Lm 2.29, 6.4, 8.2, 2 Ko 3.6



*Mana lowini ngagome ko ngago mo walia haga ngago ogo*

<sup>7</sup> Anigo agua manda bibehe kamabe. Mana lowini ngago ibuni koda manda bibehe kamabe. Ani manda bibe naheore. Mana lowini ngagome ko ogo ale nga lalu *ḡ* mo manda bia hene. Mana lowini ngagome lalu, Menddealinaga mbirale ngago dimagoli nahabe, ledago nalo winidale *ḡ* dimagoli holene ogoni manda nabi kole.\* <sup>8</sup> Dimagoli nahabe, lalu lo wiagoha henge wiaria handa walia howa ko buleneme *ḡ*ha mbirale tara tara dimagoli holiya mo hamela haya. Mana nalo wiangi ko bulenego ibu hongo nahe homene ale wini.\* <sup>9</sup> Mana lo wiagome bulene ogo nga nabulene ogo nga lalu nalo wiaha howa *ḡ* dére hagadagua haabo haru. Ai bulene ogo nga nabulene ogo nga lalu lowini wiago lo manda birugola ko buleneme *ḡ*ha hongo halu heyaya.\* <sup>10</sup> Ani hongo howa *ḡ* bo home laya. Ani buwa bulene ogo nga nabulene ogo nga lalu mana lowini wiagome holene gahenge ngiagagome *ḡ* bo home laya.\* <sup>11</sup> Bulene ogo nga nabulene ogo nga lalu lowini wiagoha ko buleneme henge wiaria handa walia howa *ḡ* mo hondo halu bo home laya.\*

<sup>12</sup> Mana lowini ngago Ngode Datagaliwabehanda lowinigome debeneore nga. Bulene ogo nga nabulene ogo nga lalu lowiago Ngode Datagaliwabehanda lowinigome debeneorebi tigabibi bayalebi nga.\* <sup>13</sup> Anigo mana bayale ogonime *ḡ* bo home layabe. Ani labe naheore. Ko buleneme *ḡ* bo home laya. Wali agalime ko ogo aleoreda manda bilo ko buleneme mana bayale ogoniha howa *ḡ* bo home laya. Anigo bulene ogo nga nabulene ogo nga lalu lowini wiagome ko ibu koorene ko nga lalu mo walia haga nga.\*

*Inaha kirali wai bialu kago ogo*

<sup>14</sup> Mana lowini ngago tene Ngode Datagaliwabe howa longago manda bu kama. Ani manda buwa *ḡ* agali mini kowi kogoni howa ko bulene ngagome *ḡ* dariba kagola howa kome bia laradagua biruli.\* <sup>15</sup> Ani biruligo ogo ale bero manda nabi howa biruli. *ḡ*na bua birago manda bidogo nabiruli *ḡ* hame naledogo bu aribia haruli.\* <sup>16</sup> *ḡ*na nabuabi ngago beroangi Mana lowini ngago tigabi nga manda bido lalu walia haruli. <sup>17</sup> Ani biruligo ogoni *ḡ*nime ndo biruli mini ko *ḡ*ha ngagome biaga. <sup>18</sup> *ḡ*naga mini ala taweha mbirale mbira bayale nawigo manda bu ko. Bayale bua kogo howa bibe nahe kogoni.\* <sup>19</sup> Bayale bua kogo nabiruli ko *ḡ* nabuabi ngago bu aribia haruli. <sup>20</sup> Mbira nabuabi ngago biruyagua *ḡ*na ndo mini ko *ḡ*ha ngagome biaga.

<sup>21</sup> Anigo bulene mbira *ḡ*ha ngago handa walia ko. Bayale bua kogoni howa ko bulene hangu dabaabo haruli. <sup>22</sup> Ngode Datagaliwabenaga mana lowini ngago mitangi bialu *ḡ* bu habaneha turu biaga.\* <sup>23</sup> Bulene tara mende *ḡ*ha ngaria hendedo. Bulene ogonime *ḡ* minime hame ledagonaga bulene ogonila wai biaga ka. Bulene tara mende ogonime ko bulene *ḡ*ha biabe bialu kagome *ḡ* dariba helo mo dariba haga.\* <sup>24</sup> Ai *ḡ* agali turu naheore kogoni. *ḡ* dongone áyu kogo homolene ngagoria haru porago napoliya aiwa pele ngibehe kabe. <sup>25</sup> Ngode Datagaliwabehanda Anduane Homogo Yasu Kerisoha howa pele ngulebirago ibuhondo turu halu *ḡ*alu lalu ko.\*

Anigo *ḡ* ogobi ko. *ḡ*nime *ḡ*naga miniha mitangi hangume Ngode Datagaliwabenaga mana lowini ngago mitangi bibehe howa *ḡ*naga mini ala taweme ko bulene hangunaga biabe bialu kogoni.

## 8

*Ngode Datagaliwabe Dinini ibugua haru helowa holene ngago ogo*

\* **7:7:** Har 20.17, Man 5.21, Ab 20.33    \* **7:8:** Lm 4.15, 5.20, 1 Ko 15.56    \* **7:9:** Ya 1.15    \* **7:10:** LBM 18.5, Ese 20.11-13, 20.21, Lm 10.5, 2 Ko 3.7    \* **7:11:** Pig 3.13, Hi 3.13    \* **7:12:** Iba 19.8, 119.138, 1 Ti 1.8    \* **7:13:** Lm 5.20    \* **7:14:** Iba 51.5, Yo 3.6    \* **7:15:** Ga 5.17    \* **7:18:** Pig 6.5, 8.21    \* **7:22:** Iba 1.2, 2 Ko 4.16, Eb 3.16    \* **7:23:** Lm 6.13, 6.19, Ga 5.17, Ya 4.1, 1 Pi 2.11    \* **7:25:** Lm 6.13, 6.19, 1 Ko 15.57, Ga 5.17

<sup>1</sup> Anigo áyu wali agali Keriso Yasuha ho gimbu bu karu Ngode Datagaliwabehanda ti heba godi nalolebira. ✨ <sup>2</sup> Irane ogo Ngode Datagaliwabe Dinininaga bulene ngagome ina Keriso Yasuha ho gimbu bu kamagola holene gahenge ngiaga ka. Ko bulenenagabi homolenenagabi bulene wiagome ĭ dariba hearia Ngode Datagaliwabe Dinininaga bulene mana wiagome ĭ golope henego ko. ✨ <sup>3</sup> Wali agalinaga mini ala tawego gedaore ho winigo Mosese heneyangi Mana lowini ngagome mbira bibe nahe wiaria Ngode Datagaliwabehanda ibu Igini ibilayagome bini. Ani bialu Ngode Datagaliwabehanda mini ala tawe ko biagane wiagonaga godi lalu ko biagane ogoni wali agaliha wulene nawi lalu walia hene. Ani buwa ibu Igini ina ko kamago ale dege howa ko nabi inanaga ko birimago mo wahelo ibilene. ✨ <sup>4</sup> Ngode Datagaliwabehanda ogonidagua binigo irane ina mini ala tawe mo tene haramaligome ndo ibunaga Dinini mo tene ho kamarume Mana lowini ngagonaga tigabi bulene biai holomaya ibugua ani bini. ✨ <sup>5</sup> Wali agali tinaga mini ala tawe mo tene ho karu tinaga mitangi bulene mini ala tawenaga hame ledagome tini haru haga. Wali agali Ngode Datagaliwabe Dinini mo tene ho karu tinaga mitangi bulene ibunaga Dinini ibu hame ledagome ti haru haga. ✨ <sup>6</sup> Mini ala taweme tínaga mitangi bulene haru helowa harimigome homolene yu anda ibaga. Ngode Datagaliwabe Dinini ibugua tínaga mitangi bulene haru helowa harimigome holene gahengeorebi mo palia holenebi yu anda ibaga. ✨ <sup>7</sup> Mbiralali mini ala taweme ibunaga mitangi bulene haru helowa kayagua ibu Ngode Datagaliwabenaga mana lo ngago nabibehe howa nabiaga ka. Anigo ibugua Ngode Datagaliwabela waitigi ho ka. ✨ <sup>8</sup> Wali agali tinaga mini ala taweme hame laradagua biaga karume Ngode Datagaliwabe mo turu habe nahe ka.

<sup>9</sup> Ngode Datagaliwabe Dinini tíha henene kayagua tínaga mini ala taweme hame laradagua ndo Ngode Datagaliwabe Dinini ibugua hame laradagua bialu holeberami. Mbiralali ibuha Keriso Dinini naheyagua ogoni ibu Kerisonaga ndo ka. ✨ <sup>10</sup> Anigo ko buleneme tínaga tingini bo homolebirago Keriso tíha kayagua Ngode Datagaliwabe Dinini ibugua tihondo holene gahengeore ngiaga ka. Irane Ngode Datagaliwabehanda, Tí mini tigabiwi kami, lene kamigo. ✨ <sup>11</sup> Ngode Datagaliwabehanda Yasu homayagola mo heya henego ibu Dinini tíha kayagua Keriso homayagola mo heya henedagua dege ibugua tínaga tingini homolebirago mo heya holebira. Irane Ngode Datagaliwabehanda ibu Dinini tíha kagome ani bulebira. ✨

<sup>12</sup> Anigo ĭ hamene mbaliniru-o ina dano ho kamago manda buwa mini ala taweme hame laradagua bialu holene nawi. <sup>13</sup> tínaga mini ala taweme hame laradagua bialu harimiyagua homoleberami. Ai Ngode Datagaliwabe Dinini ibugua tínaga ko beramiligo mo homa helo helarimiyagua tigua holene gahenge yu holeberami. ✨ <sup>14</sup> Wali agali Ngode Datagaliwabe Dinini ibugua haru helowa karu ti Ngode Datagaliwabenaga waneigini ka. ✨ <sup>15</sup> Ngode Datagaliwabehanda ibu Dinini ngiyago ibugua tí garabaya biabe ale bilimulo mo bia hagabi mo gi hagabi ndo ka. Ngode Datagaliwabe Dinini ibugua tí Ngode Datagaliwabenaga waneigini halimulo mo helaga ka. Ani helaragola iname Dinini ogoninaga hongoni howa Ngode Datagaliwabhondo, Aba ĭ Aba, laramili. ✨ ✨ <sup>16</sup> Ina Ngode Datagaliwabenaga waneigini kamago walia hole ibu Dininibi ina dininibi ho gimbu bu howa, Tí Ngode Datagaliwabe waneigini kami, lalu walia haga. ✨ <sup>17</sup> Ina Ngode Datagaliwabenaga waneigini kamago ibugua turu holene tara tara ibu waneigininaga wu kago inahondo ngulebira. Ani bialu Ngode Datagaliwabehanda Kerisonaga wia hene ngagobi Keriso ibu heba howa ina haru mandagi ngulebira. Keriso ibu tandaga

✨ **8:1:** Lm 8.34, 8.39 ✨ **8:2:** Yo 8.36, Lm 7.23-25, 2 Ko 3.6, Ga 2.19 ✨ **8:3:** Ab 13.38-39, 15.10, Lm 3.20, 2 Ko 5.21, Pb 2.7, Hi 4.15, 7.18-19 ✨ **8:4:** Ga 5.16, 5.25 ✨ **8:5:** Yo 3.6, 1 Ko 2.14, Ga 5.22, 5.25 ✨ **8:6:** Lm 6.21, 8.13, Ga 6.8 ✨ **8:7:** Md 12.34, Yo 8.43, 12.39, 1 Ko 2.14, Ya 4.4 ✨ **8:9:** 1 Ko 3.16, 12.3, Ga 4.6, Pb 1.19, 1 Pi 1.11 ✨ **8:10:** Ga 2.20, Eb 3.17, 1 Pi 4.6 ✨ **8:11:** Ab 2.24, 1 Ko 3.16, 6.14, 2 Ko 4.14, Eb 2.5 ✨ **8:13:** Ga 6.8, Eb 4.22, Kl 3.5 ✨ **8:14:** Ga 5.18 ✨ **8:15:** 1 Ko 2.12, 4.6, 2 Ti 1.7, Hi 2.15 ✨ **8:15:** Ga 4.5-7 ✨ **8:16:** 2 Ko 1.22, Eb 4.30

nalu hayadagua inabi nalu harimayagua ina Keriso heba ibunaga bayale taraore holene mandagi karuloleberama.✧

*Awe bayale taraore holene karuloleberamago ogo*

<sup>18</sup> Áyu tandaga nalu kamagobi naabo halu naholeberama. Awe Ngode Datagaliwabehanda inahondo bayale taraore holene walia halu ngulebirago tandaga áyu nalu kamago emene lowa bayale taraore holene timbuni gibiore ngulebira manda bu kogoni.✧ <sup>19</sup> Ngode Datagaliwabehanda ibunaga waneigini kamaru mo walia helo mbirale ibugua wabiniru bibahendeme de hondoa howa hondo kagoni.✧ <sup>20-21</sup> Mbirale bibahende Ngode Datagaliwabehanda wabiniru pani nai halu habane nabulene hai henego irane tinime ani bulene hame lalu hene ndo. Ti ko hai hayagola Ngode Datagaliwabehanda ani bulene manda bini. Mbirale bibahende Ngode Datagaliwabehanda wabiniru dindini togo biaganeme dariba ho ngaru horo mbirungi Ngode Datagaliwabehanda golope holebira. Golope holenebi bayale taraore holenebi ibunaga waneigini karulo kadagua uruni tibi mandagi howa karulolebira. Ogoninaga ina minime dunubia ho holene nga.✧✧ <sup>22</sup> Mbirale Ngode Datagaliwabehanda wabiniru bibahendeme ulu laabo halu walime gali taba honole biruwa tandaga nalu biragadagua ulu laabo halu henego áyubi anidagua bialu haabo ka manda bidamagoni. <sup>23</sup> Mbirale Ngode Datagaliwabehanda wabiniru hangume ani lalu ka ndo inamebi lalu kama. Ibugua inahondo turu halu dewa bame ngulebirago aria pigane ibu Dinini ngiya. Ngode Datagaliwabe ibugua ina mo ibunaga waneigini halu inanaga bulenerubi inanebi bibahendeore golope hai helo kamatagi howa ani ulu lalu kama.✧ <sup>24</sup> Yasu Kerisohondo mini dunubia ho hemagola Ngode Datagaliwabehanda ina pele ngiya. Mbira hondole mini dunubia ho henego de handarimayagua mani mini dunubia ho holene nawiaga. Mbiralime mbirale de hendeneho mani de hondole lowa mini dunubia ho haga aibe.✧ <sup>25</sup> Iname mbirale deme nahende howa mini dunubia ho kamayagua ina ema nabi howa hondo holeberama. <sup>26</sup> Ogonidagua dege bialu ina hongo nahe kamaria Ngode Datagaliwabe Dinini ibugua biamogo bule ibaga. Iname Ngode Datagaliwabehondo biagua lolebe toba ho kamagola ibunaga Dinini ibugua bime ndo minime lalu Ngode Datagaliwabehondo inanaga la haga ka.✧ <sup>27</sup> Ani la halu howa Ngode Datagaliwabe Dinini ibugua Ngode Datagaliwabe hame ledadaguaore bialu ina Ngode Datagaliwabenaga wali agali kamarunaga la haga kagoni. Ani lagago wali agalinaga bu habaneha ngago ibugua de handagaore howa ibu Dinininaga miniha mitangi bidago manda biaga ka.✧ <sup>28</sup> Ngode Datagaliwabehanda wali agali ibuhondo gubaliniherume biabe mbira irane bilo olene karu tihondo mbirale bibahende tara tara biaganego mani bayale helonaga hangu bigi biaga ka manda bu kama.✧ <sup>29</sup> Ngode Datagaliwabehanda wali agali dabene karu ti ibu Igini ale helo daba bagi ho heleneho irane ibu Igini ibuni wahene howa hamene mbalini dewa buhe aria helo helene.✧ <sup>30</sup> Ani binigo Ngode Datagaliwabehanda wali agali daba bagi ho helene karu uruni ti olene. Ibugua olene karuhondo, Tí mini tigabiwi kami, lalu helene. Ani helowa ibunaga bayale taraore holene ti haru mandagi karulelo Ngode Datagaliwabehanda mo bimaga ho helene.✧

*Ngode Datagaliwabenaga gubalini holene Keriso Yasuha ngago inanaga wiaabo holebirago ogo*

<sup>31</sup> Uruni bibahende mitangi bialu ina agi manda bibehe kamabe. Ngode Datagaliwabe ibuni ina heba kagonigo ina baba waitigi ho habehe mbirali mbira ai kabe. Mbirali

✧ **8:17:** Ab 26.18, Ga 4.5-7, Pb 1.29, 2 Ti 2.11-12, Mo 21.7 ✧ **8:18:** Lm 5.2, 2 Ko 4.17 ✧ **8:19:** Kl 3.4, 2 Pi 3.13, 1 Yo 3.2 ✧ **8:20-21:** Pig 3.17-19 ✧ **8:20-21:** 2 Pi 3.13, 1 Yo 3.2 ✧ **8:23:** 2 Ko 5.2-4, Ga 5.5, Eb 1.14, 4.30 ✧ **8:24:** 2 Ko 5.7, Hi 11.1 ✧ **8:26:** Seg 12.10, Eb 6.18, Ya 4.3 ✧ **8:27:** Iba 7.9, 139.1, Ab 1.24, 1 Ko 4.5, 1 Te 2.4, 1 Yo 5.14 ✧ **8:28:** Lm 9.11, 9.23-24, Eb 1.11, 2 Ti 1.9 ✧ **8:29:** Yo 17.22, 2 Ko 3.18, Eb 1.5, 1.11, Kl 1.5, 1.11, 1.18, 2 Ti 2.19, Hi 1.6 ✧ **8:30:** Lm 9.24, 1 Ko 6.11, Eb 4.4, 1 Pi 2.9

mbira naheore.✧ <sup>32</sup> Ngode Datagaliwabehanda ibunaga Iginigine manga nahe howa inanaga homo aribia helo ngini. Ibu Iginigine ogonidagua nginigo bibahende ngulene ngaru turu halu bame ngulebiraore ndobe.✧ <sup>33</sup> Wali agali Ngode Datagaliwabehanda dabene karuhondo, Tí ko kami, lalu lolene ai kabe. Mbirali naheore. Ngode Datagaliwabe ibunime, Tí mini tigabiwi kami, leneoredago.✧ <sup>34</sup> Ngode Datagaliwabehanda ani lenego mbirali mbirame, Tí pani nolene nga, labehe ai kabe. Keriso Yasu ibu homa halu mo heya henego kago áyu Ngode Datagaliwabenaga gi tigahayagi pu biruwa ibugua Ngode Datagaliwabehondo inanaga la halu kago. Tí pani nolene nga, ani nalolebiraore.✧ <sup>35</sup> Anigo Kerisohanda inahondo gubalini ho kago nahelo agileme ina mo dala hangu hangu haga bibebehe. Nabibeheore. Gaj bibi hondolenebi genda yu holenebi mo tandaga holenebi garibilo holenebi yagibano holenebi mbirale hiriribi ngarubi homolenebi uruni bibahendeme ina mo dala hangu hangu haga nabibeheore.✧ <sup>36</sup> Anduane Homogonaga mbugani lo ngago ogo,✧ Ina Ngode Datagaliwabe inaga howa horo bibahendengi ina homolene hiriribi kaware ngagoria haabo kamagoni.

Ina nogo sibi bole kagobi kamaria hondowa tigua ina mo tandaga haga ka, lalu gilibu nga. <sup>37</sup> Uruni ale handa walia harimayaguabi Keriso ibugua ina gubalini hene kago ibuha howa ina wayali holene gibiore yu kamagoni.✧ <sup>38</sup> Keriso ibugua ina gubalini ho kago nahelo mbirale mbirame ina dala hangu hangu haga nabibeheore manda bu kogoni. Homolenemebi holenebi nabibehe. Dahuliyali karumebi hari daligaha haru haga karumebi hongo holene yu karumebi nabibehe. Áyu kaman-gibi mani holeberamangibi nabibeheore. <sup>39</sup> Mbirale daligaha ngarumebi dindiha ngarumebi nabibehe. Anduane Homogo Yasu Kerisoha howa Ngode Datagaliwabenaga gubalini holene inanaga ngago nawilo Ngode Datagaliwabehanda mbirale bibahende wabiniru mbiraoreme ina mo dala hangu hangu nahabeheore wulebira.✧

## 9

### *Polohanda Isaraele wali agali mitangi bialu genda henego ogo*

<sup>1</sup> Bi áyu larogo heneneore laro. I Kerisoha ho gimbu bini kogo lalu ke ndo haro. inaga mini Ngode Datagaliwabe Dinini ibugua haru kago mini ogonime ihondo heneneore lare lalu langiaga. <sup>2-3</sup> I aria inaga Yu wali agali bibahende karu ti mitangi bialu ina genda timbuni handalu gubaliniha tandaga naabo halu ko. Ti Kerisohondo mini mbiraore wilonaga Ngode Datagaliwabehanda i Kerisonaga kogonigo wahalu hariga koha polene ngale ina Ngode Datagaliwabehondo, Ina inihondo ani bia, labehe kole.✧ <sup>4</sup> Ngode Datagaliwabehanda ti ibunaga helo dabo helene. Ibugua ti mo ibunaga waneigini helowa ibunaga wá taraore holene tihondo walia hene. Ibugua tihondo ibunaga bi habo naloleneru lalu Mana lo wuwa tihondo mini. Tigua Ngode Datagaliwabehondo henene mitangi bialu ibunaga lotu lalu holene manda bu ka. Ibugua, Bulebero, lalubi, Ngulebero, lalubi lo ngago ti hale hene.✧ <sup>5</sup> Ti Hiburu agali mini leneore henerunaga aguanene ka. Keriso ibubi agali hole daluwa ti ariaha hene. Ngode Datagaliwabehanda mbirale bibahende handame ho kago ibunaga mini yaraga haabobo helo hamelo ko. Ani bialu helo laro.✧

<sup>6</sup> Ina bi o larogoni Ngode Datagaliwabehanda, Bulebero, lalu lo ngago habo laya lalunaga ndo laro. Ibugua, Bulebero, lalu lo ngadagua bini. Irane Isaraele wali agali ti bibahende ndo maru dege Ngode Datagaliwabenaga wali agali ka.✧ <sup>7</sup> Abarahamanaga

✧ **8:31:** Dag 14.9, Iba 118.6 ✧ **8:32:** Yo 3.16 ✧ **8:33:** Ais 50.8 ✧ **8:34:** Iba 110.1, Ab 7.55-56, Kl 3.1, Hi 7.25, 9.24, 1 Yo 2.1 ✧ **8:35:** Lm 8.38-39 ✧ **8:36:** Iba 44.22, 1 Ko 15.30-31, 2 Ko 4.11 ✧ **8:37:** Yo 16.33, 1 Ko 15.57, 2 Ko 2.14, 1 Yo 4.4, Mo 12.11 ✧ **8:39:** Eb 1.21, Kl 1.16, 2.15, 1 Pi 3.22 ✧ **9:2-3:** Har 32.32 ✧ **9:4:** Har 4.22, 9.4, Man 7.6, 14.1-2, Ab 3.25, 13.22, Eb 2.12, Hi 8.8-10, 9.1 ✧ **9:5:** Md 1.1-16, Yo 1.1, Lm 1.25 ✧ **9:6:** Dag 23.19, Yo 8.39, Lm 2.28, 3.3, Ga 6.16



aguaneneru ti bibahende ndo maru dege ibunaga waneigini ka. Ngode Datagaliwabehanda Abarahamahondo lalu, Aisaganaga aguaneneru dege inaga aguaneneru holebira, lalu lene. ✧ <sup>8</sup> Ani lenego dindi walime waneigini taba hanagadagua Isaraele aria taba henene karu ti Ngode Datagaliwabenaga waneigini ndo ka. Ibugua bi lalu lo ngadagua lola halu Abarahama aguaneneme taba henene karu ti Ngode Datagaliwabenaga waneigini ka. ✧ <sup>9</sup> Ogonigo ibuguabi lalu lo ngago ogo, Dai bulene tu harangi i dai bulebero. Dai berogola Sara ibu igiri gali taba honolebira, lalu lo wini. ✧

<sup>10</sup> Ogoni hangu ndo bi mendebi laro. Lebeganaga igini kira henego libubi aba mbiraore ina mamali Aisaga dege hene. ✧ <sup>11-12</sup> Anigo Ngode Datagaliwabehanda manda bu henegodagua igiri mende dabenegome bilo ibugua Lebegahondo lalu, Igiri wahenegome igiri heyogonenaga biabe bia holebira, lene. Ngode Datagaliwabehanda bi ogoni igiri biago labo taba naheneha libugua ko bayalebi mbira nabiha howa lene. Anigo libugua biabe biyago hondowa ndo Ngode Datagaliwabehanda mende dabenegome ibugua ani bini. ✧ <sup>13</sup> Anduane Homogonaga mbugani lo ngago ogo, Ina Yagaba gubalini halu Iso gubalini nahe haru, lalu gilibu nga. ✧

<sup>14</sup> Ani binidago manda buwa iname agi manda bibehe kamabe. Ngode Datagaliwabe ibu tigabi ndo harua manda bibehebe. Ani bibe naheore. ✧ <sup>15</sup> Ngode Datagaliwabehanda Mosesehondo lalu, Ina biamogo bua biragohondo biamogo bialu dara holene walia hoa biragohondo dara halu haruli, lenego gilibu nga. ✧ <sup>16</sup> Ani biagago tene wali agalime hame laragomebi biragomebi ndo Ngode Datagaliwabe ibunaga dara howa biamogo buleneme ani biaga ka. ✧ <sup>17</sup> Irane Anduane Homogonaga mbugani Ngode Datagaliwabehanda Iyibinaga kinihondo bi lene ngago ogo, inaga hongo holene walia habelobi wali agali dindi bibahendeni karume i manda bilobi ina i kini habelo helaru, lenego gilibu nga. ✧ <sup>18</sup> Anigo Ngode Datagaliwabe ibunime dara howa biamogo bua birago biamogo bialu mini mo giambe hoa biragohondo mo giambe haga ka. ✧

*Ngode Datagaliwabenaga keba holenebi dara holenebi ogo*

<sup>19</sup> Ani larogo manda buwa ti mbiralime ihondo lalu, Ngode Datagaliwabehanda wali agalihondo, i ko biri, lalu agua labehe kabe. Ibugua hame ledadagua nabule aiwa labehe kabe, lolebira. ✧ <sup>20</sup> Ti mbiralime Ngode Datagaliwabehondo mangaba lalu ladai bule manda biriyagua i ai kebe. Iba be dindime wabini ngagome ibu wabiaga biagohondo, Ina i o ngogobi wabiridago irane aginagabe, nalagane. ✧ <sup>21</sup> Anigo be wabiaga biagome ibu hame laradagua be tara tara wabibehe ka ndobe. Dindi mbiraoregome dege budalu be mende debene galone timbuniorego bule wabialu be mende horo bibahende ta nabinaga wabialu ibuni hame laradagua bibehe kagoni. ✧

<sup>22</sup> Ngode Datagaliwabehanda binigo ogonidaguaore bini. Wali agalime manda bilo ibugua kohondo ibunaga keba holenebi ibunaga hongo holenebi walia hoa ho hene. Anigo Ngode Datagaliwabehanda ko biagaruhondo ibunaga keba holene walia habeheore wiagola walia nahe pani mibeheore wiagolabi pani nami ibu ema nabi howa hibu lalu hondo haabo hene. <sup>23</sup> Ani buwa Ngode Datagaliwabehanda ibunaga bayale taraore holene gibiore walia hoa ho hene. Ibugua bayale taraore holene ogoni inaha tolai holomaya ngule mo manda manda bu helene go kamaru ina ibugua dara howa biamogo biyagome ogoni walia hene. ✧ <sup>24</sup> Ogonigo Ngode Datagaliwabehanda Yu wali agali hangu olene ndo wali agali tara tara karu ariabi oleneru ina kamagoni.

<sup>25</sup> Ogonidagua lalu Ngode Datagaliwabehanda Hoseanaga mbugani bi lo ngago ogo, ✧ Wali agali ala inaga ndo heneruhondo,

✧ **9:7:** Pig 21.12, Ga 4.23, Hi 11.18 ✧ **9:8:** Ga 4.23 ✧ **9:9:** Pig 18.10, 18.14 ✧ **9:10:** Pig 25.21 ✧ **9:11-12:** Pig 25.23 ✧ **9:13:** Man 21.15, Mal 1.2-3, Lg 14.26 ✧ **9:14:** 2 Bit 19.7, Yob 8.3, 34.10, Iba 92.15 ✧ **9:15:** Har 33.19 ✧ **9:16:** Eb 2.8 ✧ **9:17:** Har 9.16, Ga 3.8, 3.22 ✧ **9:18:** Har 4.21, 9.12, 14.4 ✧ **9:19:** 2 Bit 20.6, Yob 23.13, Dan 4.35 ✧ **9:20:** Ais 29.16, 45.9, 64.8 ✧ **9:21:** Yar 18.6, 2 Ti 2.20 ✧ **9:23:** Lm 8.28-30, Eb 1.3-12, Kl 1.27 ✧ **9:25:** Hos 2.23, 1 Pi 2.10



inaga wali agaliore kami, lolebero.  
Hameigini tara heneru ina ala gubalini nahe harugohondo,  
inaga gubalinioire kami, lolebero.

<sup>26</sup> Dindi mbiraha, Tí inaga wali agali ndo kami, lenego\*  
dindi ogoniha howa, Ngode Datagaliwabe haluhe kagonaga waneigini kami, lolebira,  
lalu gilibu nga. <sup>27</sup> Aisaiahanda Isaraele wali agali mitangi bialu mogo lowa lalu, Isaraele  
wali agali dewaore iba solowara angeni iba mu ale kayaguabi ti mbira mbira hangume  
pele mulene yulebira.\*<sup>28</sup> Wali agali bibahendeore baba Anduane Homogohanda godi  
larangi abaleore bi mbira hangulalu lo waholebira, lene. <sup>29</sup> Ogonidagua Aisaiahanda bi  
ala lene lo ngago ogo, Anduane Homogo Hongo Haiheore kagome ina hameigini maru  
yu wa nahelenedale Sodomu wali agalibi Gomora wali agalibi ti homai henedagua inabi  
homai kamale, lalu gilibu nga.\*

### *Isaraele wali agalibi Bi Mana Debenebi te ogo*

<sup>30</sup> Anidago iname agua manda bimabe. Agua manda bulene nga. Yu wali agali ndo  
tara tara hearume Ngode Datagaliwabehanda, Tí mini tigabiwi kami, lelonaga biabe  
bialu henegome ndo ti ibuhondo mini mbiraore wiyagola ibugua, Tí mini tigabiwi kami,  
lene.\* <sup>31</sup> Anigo Isaraele wali agalirume Ngode Datagaliwabehanda, Tí mini tigabiwi  
kami, lelonaga mana mbira bule hai bialu hearia handa walia naheore hene.\* <sup>32</sup> handa  
walia nahenego irane agimebe. Irane ogome tigua Ngode Datagaliwabehondo mini  
mbiraore wulene mo tene howa ndo tininaga bulene mana mo tene howa binigome ti  
handa walia nahe hene. Ani hai bialu hearia tole mbira ge bidi lagane wiagome tinaga  
ge bo bidi lowa pilene.\* <sup>33</sup> Bi ogoninaga lalu Anduane Homogonaga mbugani lo ngago  
ogo,\*

Hale hadaba. Ina tole mbira Saiono dindini ngeledo.

O ngeledogome wali agalinaga ge bo bidi lolebira.

Tole ogonime wali agali mo pila holebira.

Anidagua ndo mbiralime ibuhondo mini mbiraore wiyagua ibu mini burugulo na-  
holebiraore,  
lalu gilibu nga.

## 10

<sup>1</sup> I hamene mbaliniru-o Yu wali agali i damene bibahende karume Ngode Datagali-  
wabenaga pele muleneore yamia nabiragola hame timbuniore lo kogoni. Ani hame  
lowa ina hongo howa Ngode Datagaliwabehondo tinaga bi la haabo halu kogoni. <sup>2</sup> Ina  
ti ogobiore ka manda bu kogoni. Tigua Ngode Datagaliwabenaga biabe bulene hame  
timbuni lo kagoni howa biabe ogoni bia holene irane bayuwa manda nabi howa  
hamelo ka.\* <sup>3</sup> Ngode Datagaliwabehanda wali agali mini tigabiwi ka lagago hariga  
ogoni ti manda nabiaga henego ka. Ani hene kago howa mini tigabiwi holene hariga  
tini bo wule manda buwa Ngode Datagaliwabehanda wali agali mini tigabiwi ka lagane  
hariga walia henego tigua yu tiga nabiaga henego ka.\* <sup>4</sup> Wali agali Kerisohondo mini  
mbiraore wiraru tihondo Ngode Datagaliwabehanda, Tí mini tigabiwi kami, lelo Mana  
lowinigo ngadagua Keriso ibugua bu maro bilene.\*

### *Wali agali bibahendenaga pele mulene ngago ogo*

<sup>5</sup> Ngode Datagaliwabehanda, I mini tigabiwi ke, lelo Mana lowini ngagome, Bibe,  
laradagua bulene nga lowa Mosesehanda bi mbira gilibu wini ngago ogo, Mbiralime  
Mana lowini ngagome, Bibe, laradagua bialu kayagua nde ibu holene tene ogoni

\* 9:26: Hos 1.10 \* 9:27: Lm 11.5 \* 9:27: Ais 10.22-23 \* 9:29: Ais 1.9, 13.19, Yar 50.40 \* 9:30: Lm  
1.17, 4.11, 10.20 \* 9:31: Lm 10.2-3, 11.7, Ga 5.4 \* 9:32: Ais 8.14, Lg 2.34, 1 Ko 1.23 \* 9:33: Iba 118.22, Ais  
8.14, 28.16, Md 21.42, Lm 10.11, 1 Pi 2.6-8 \* 10:2: Ab 21.20, 22.3, Ga 1.14, 4.17 \* 10:3: Lm 1.17, 9.30-32, Pb 3.9  
\* 10:4: Md 5.17, Yo 3.18, Ga 3.24

holebira, lalu gilibu nga.✠ <sup>6</sup> Anigo Ngode Datagaliwabehanda wali agali mini mbi-raorewi karuhondo, Tí mini tigabiwi kami, lagagonaga bi mbira Anduane Homogonaga mbugani lo ngago ogo, Ínaga miniha bi mbira ogodagua mitangi bulene nawi. Dahuliya andaga aiwa iraga halu polobadabe, lo nga. Ani lo mitangi birimayagua ogoni Keriso dalilo damu polenaga mitangi berama.✠ <sup>7</sup> Bi mendebi lo ngago ogo, Humbirini andaga aiwa dalialu polobadabe, lo nga. Ani lo mitangi birimayagua ogoni Keriso iraga helo damu polenaga mitangi berama. <sup>8</sup> Bi kira ogoni laragonaga lo ngago ogo, Ngode Datagaliwabenaga bi mana ogoni tí kamigoha kaware nga. Tíni bu minihabi ne hambunibi nga, lalu gilibu ngago ogoni bi mana iname lameramaligo Ngode Datagaliwabehondo mini mbiraore wulenenaga lameramali. <sup>9</sup> Ína bime Yasu ibu Anduane Homogo ka latagi halu bu minime Ngode Datagaliwabehanda ibu mo heya hene kago yu tiga biriyagua Ngode Datagaliwabehanda í pele ngulebira. <sup>10</sup> Anigo iname Ngode Datagaliwabehondo mini mbiraore weramagola ibugua, Tí mini tigabiwi kami, laga ka. Iname mini mbiraore wirimadagua walía halu bime latagi haramagola Ngode Datagaliwabehanda ina pele ngiaga ka. <sup>11</sup> Anduane Homogonaga mbugani lo ngago ogo, Mbiralime ibuhondo mini mbiraore wiyagua ibu mini burugulo naholebiraore, lalu gilibu nga.✠ <sup>12</sup> Bi ogoni wali agali ta nabi bibahendenaga ngago irane Ngode Datagaliwabehanda Yu wali agalibi wali agali tara tarabi baba tu nawiaga ka. Ngode Datagaliwabe ibu bibahendenaga Anduane Homogo howa ibugua ibu olararu bibahendehondo turu holene timbuniore miaga ka.✠ <sup>13</sup> Anduane Homogonaga mbugani lo ngadagua ogo, Anduane Homogo mini olararu Ngode Datagaliwabehanda ti pele mulebira, lalu gilibu nga.✠

<sup>14</sup> Ani ngago tigua ibuhondo mini mbiraore nawiyagua ibu mini agua olabehebe. Bi mana hale naheyagua mini mbiraore agua wibehebe. Bi mana nalamidayagua hale agua habehebe. <sup>15</sup> Bi mana lamule piagahondo, Pu naledayagua bi mana agua lamibehebe. Anduane Homogonaga mbugani bi lo ngadagua ogo, Bi mana debene yalu ibiragola turu timbuniore holene nga, lalu gilibu nga.✠ <sup>16</sup> Anigo Bi Mana Debene yalu ibiyago hale howa ti bibahendeme yu tiga biai nahe hene. Aisaiahanda bi lo ngago ogo, Anduane Homogo-o iname bi mana lamirimago hale halu aiwa yu tiga biyabe, lalu gilibu nga.✠ <sup>17</sup> Anigo bi mana hale haramagome Kerisohondo mini mbiraore wulene mo anda haga. Bi mana ogoni Kerisohanda agua biya lalu lamulene nga.✠

<sup>18</sup> Anigo bi mana lamirimago ti hale nahayadago henenebe laro. Henene ndo ti hale haiore hayagoni. Anduane Homogonaga mbugani lo ngadagua ogo,✠ Tigua bi lenego dindi bibahendeha pume hene.

Tigua bi mana laminigo dindi gimbuni bibahendeha piai hene, lalu gilibu nga. <sup>19</sup> Ina lone laro, Isaraele wali agalime bi mana ogoni manda nabi henebe. Bi ogoni pigane Moseseibunime ladai bialu Ngode Datagaliwabehanda lenedagua lamialu lo ngago ogo,✠

Ina wali agali hameigini mbira ka lene ndo karuhondo bayale bigi berogo hondowa tí kamirume, Inahondo bayale nabira agini, henge lolene mini wilo mo wia holebero.

Ina wali agali dindiha marume yo hendene karu tiha howa bigi berogo hondowa tí kamiru mo keba holebero,

lalu lenego gilibu nga. <sup>20</sup> Aisaia ibugua Ngode Datagaliwabehanda lenedagua hongooore howa lalu,✠

I hai nabi hearume i handa walía haya.

Wali agali marume, Í agoha kebe, nale hearu hendelo ini ha pani haru,

✠ **10:5:** LBM 18.5, Neh 9.29, Ese 20.11-13, Lm 7.10, Ga 3.12 ✠ **10:6:** Man 30.12-14 ✠ **10:11:** Ais 28.16, Yar 17.7, Lm 9.33 ✠ **10:12:** Ab 10.36, 15.9, Lm 3.22, 3.29, Ga 3.28 ✠ **10:13:** Yol 2.32, Ab 2.21, 9.14 ✠ **10:15:** Ais 52.7, Nah 1.15 ✠ **10:16:** Ais 53.1, Yo 12.38, Hi 4.2 ✠ **10:17:** Yo 17.20 ✠ **10:18:** Iba 19.4, Md 24.14, Mg 16.15, Kl 1.6, 1.23 ✠ **10:19:** Man 32.21, Lm 11.11, Ta 3.3 ✠ **10:20:** Ais 65.1, Lm 9.30

lalu lenego gilibu nga. <sup>21</sup> Ngode Datagaliwabehanda Isaraele wali agali mitangi bialu lenedagua Aisaiahanda lenego ogo, Wali agali bi mo wahalu bi ko hangu ladai biaga hearu pele mule ina inaga gi dogolo tagi ho haabo harugola ti naibiya, lalu lenego gilibu nga.✠

## 11

### *Ngode Datagaliwabehanda Isaraele wali agali dara halu biamogo binigo ogo*

<sup>1</sup> Anigo au laro. Ngode Datagaliwabehanda ibuninaga Isaraele wali agali yu wahayabe. Yu wa naheore. Inibi Isaraeleali howa Abarahamanaga aguanene Beniyamini hameigini aria mbirago i kogoni.✠ <sup>2</sup> Ngode Datagaliwabehanda ibuninaga wali agali piganengi dabeneru mbira yu wa nahe henego ka. Isaraele wali agalime mbira nakarulape biyangi Elayahanda genda howa Ngode Datagaliwabehondo bi lamini lalu Anduane Homogonaga mbugani lo ngago ti manda bidamigo ogo.✠ <sup>3</sup> Anduane Homogoo tigua inaga bi mana latagi haga hearu bo wahaya. Inaga loma binigo bo ngiagane dabu winiru gialo wahaya. Homane mbira i dege ba nabi kogo tigua ibi bo wahole manda bialu ka, lenego gilibu nga.✠ <sup>4</sup> Ani layagola Ngode Datagaliwabehanda ibuhondo bi agi ladai binibe. Ibugua ladai bialu lalu, Mbirale tara gime wabini mini Balahondo bi pupu wule ge duli hanga nahene agali daosini karia (7,000) ininaga heledo, lalu ladai bini.✠ <sup>5</sup> Anigo ina kamangibi ogonidagua dege nga. Ngode Datagaliwabehanda dara halu biamogo bia henegome Isaraele wali agali dabo heleneru aria mbira mbira ka.✠ <sup>6</sup> Ngode Datagaliwabehanda wali agali dabeneru tigua biyagonaga dabene ndo ibugua ti dara halu biamogo bia henegome dabene ka. Wali agali tigua biyago hondowa Ngode Datagaliwabehanda ti dabenedale nde ibunaga dara halu biamogo bia holene ngago henene ndo ngaleda.✠

<sup>7</sup> Ani binidago agi manda bibehe kamabe. Isaraele wali agalime mbira hai binigo handa walia nahe hene. Wali agali mbira mbira Ngode Datagaliwabehanda dabeneru ti hangume handa walia hene. Maru ti Ngode Datagaliwabehanda olenego hale nahe hale paihe hene.✠ <sup>8</sup> Anduane Homogonaga mbugani lo ngadagua ogo, Ngode Datagaliwabehanda tinaga mini mo palia hondo helene. Ani hama ibinigo ayu ogoni tigua deme nahandabehebi haleme hale nahabehebi ka, lalu gilibu nga.✠ <sup>9</sup> Ogonidagua dege Debidihanda bi lene ngago ogo,✠✠

Ti ngoai howa tomo timbuni nagimbu bialu bedaria gono wedagoha tini delo.

Ti pilo ngaria pani milo.

<sup>10</sup> Ti de nahendelonaga tinaga de ndibu lelo.

Ti tandaga naabo halu kagome tini mo gangu lelo, lenego gilibu nga.

<sup>11</sup> Anigo ogo laro. Yu wali agali ti pilenego pilo wiaabo henebe. Ani nabi. Tigua ko binigome Yu wali agali ndo tara tara karu pele mulene henge wini. Ani pele miyago hondowa Yu wali agalime henge lolene mini wilo ani bini.✠ <sup>12</sup> Yu wali agali tigua ko binigome wali agali dindi bibahendeni hearuha turu holene bayaleoreru yu anda ibini. Tigua Ngode Datagaliwabe mitangi bulene emeneore wialu yagibano ale henegome Yu wali agali ndo tara tara hearuha Ngode Datagaliwabenaga turu holene bayaleoreru yu anda ibini. Anigo Yu wali agali Ngode Datagaliwabe karia dai bule karu dai biragola wali agali bibahendeore heba turu holene timbuniorene timbu tinaga wulebira.✠

### *Ngode Datagaliwabehanda Yu wali agali ndo tara tara pele minigo ogo*

✠ 10:21: Ais 65.2 ✠ 11:1: 1 Sml 12.22, Iba 94.14, Yar 31.37, 2 Ko 11.22, Pb 3.5 ✠ 11:2: Iba 94.14, Lm 8.29  
 ✠ 11:3: 1 Kin 19.10, 19.14 ✠ 11:4: 1 Kin 19.18 ✠ 11:5: Lm 9.27 ✠ 11:6: Lm 4.4-5, Ga 3.18 ✠ 11:7: Lm 9.31, 10.3 ✠ 11:8: Man 29.4, Ais 29.10, Yar 5.21, Yo 12.40, Ab 28.26-27 ✠ 11:9: Iba 35.8 ✠ 11:9: Iba 69.22-23  
 ✠ 11:11: Ab 13.46, 22.18, 22.21, Lm 10.19 ✠ 11:12: Ese 44.30

<sup>13</sup> Áyu ina Yu wali agali ndo tara tara kamiru tíhondo larogo. Ina tínaga abosolo kogoni howa biabe galone bialu kogoni turu howa bialu ko. <sup>14</sup> Ani bialu kogo ina wali agali ini aria karume tí turu holene yu kamigoni hondowa ti henge lolene mini wilo mo wia habehe kogoni. Ani wiraria Ngode Datagaliwabehanda ti maru pele mibehe holebira. <sup>15</sup> Ngode Datagaliwabehanda Yu wali agali yu wahayangi wali agali dindi bibahendeni karu ti Ngode Datagaliwabenaga waitigi ho hearia ibugua ti mo ibu damene helene. Anigo Ngode Datagaliwabehanda Yu wali agali lone ibuni karia haru dai birangi ti homaliha hora henego mo heya haradagua bu holebira.

<sup>16</sup> Mberedi pigane hirinigo mbira podowa Ngode Datagaliwabehondo loma bia ho miniyagua nde mberedi podoha hene biagobi ibunaga dege nga. Ira mbiranaga pini Ngode Datagaliwabehondo loma bia ho miniyagua nde maganerubi ibunaga dege ka. <sup>17</sup> Ira olibenaga magane maru podo wahowa ira olibe dege mende tagiraha minalu anda hene kagonaga magane podowa ogonime magane ala podo wahayagoria gimbu bini. Yu wali agali ndo tara tara kamiru tí ira olibe tagiraha minalu anda hene ogoni ale kami. Ai áyu tí Yu wali agalinaga holene bayaleore ngagoha ho gimbu bu kami. ✧ <sup>18</sup> Ani kamigo tígua wali agali ira magane podo wahene karu mitangi bialu mine ho holene nawi. Tí mine aginaga holebe. Tí bame ira magane dege kamigodago tígua pini mo tiaga ho kami ndo ira pinime tí mo tiaga ho daga kagola kamigoni. ✧

<sup>19</sup> Bi ani larogo hale howa tígua ogodagua ladai bialu lalu, Nde agi. Ira magane uruni podo wahenedago irane i ho aribia holiyanaga henge mo wialu ani binida, loleberami. <sup>20</sup> Ogoni henededa. Ti mini mbiraore nawiyagola podo wahenego tí mini mbiraore wialu kamigome ho gimbu bu kamigoni. Ogoninaga tí mine holene henge nawigo mogolo holene nga. ✧ <sup>21</sup> Yu wali agali tí ira magane ogoni aria henego Ngode Datagaliwabehanda ti podo wahenego ibugua tí kamiru poda waha nabi helolebira manda bidamibe. <sup>22</sup> Bi ogo bayuwa manda bilimu. Ngode Datagaliwabe ibu bayale biagabi hongo howa godi lagabi kagoni manda bilimu. Ibugua ko biaga karuhondo hongo howa godi laga kago howa tí kamiruhondo bayale dege bialu kagoni. Ibugua nde tíhondo bayale bilo henge miaabo harimiyagua ani bulebira. Ani henge nami haabo harimiyagua tíbi ibugua podo waholebira. ✧ <sup>23</sup> Yu wali agali mini mbiraore nawi henedagua haabo nahe lone mini mbiraore wiyagua nde Ngode Datagaliwabehanda ti ira tene biago ibuniha helo hela dai bulebira. Ibugua ti ani hela dai bilabeheore kagoni. ✧ <sup>24</sup> Yu wali agali ndo tara tara kamiru tí olibe ira tagiraha minalu anda henegonaga magane podowa olibe ira mende hengenegoha ho gimbu bini ale kami. Yu wali agali tí olibe ira hengenego ale kago Ngode Datagaliwabehanda ti ala tini henegoha gimbu bia halu hela dai bulene taibi ndoore nga.

*Ngode Datagaliwabehanda wali agali ta nabi bibahende dara halu biamogo binigo ogo*

<sup>25</sup> I hamene mbaliniru-o bi galone mbira ala tí nahalehe harimigo áyu tí manda bilimulo hameledo. Galone mbira ogoni manda birimiyagua tígua mine howa, Ina mini timbuniwi kamalo, mitangi nabuleberami. Bi ogoni galone ogo. Isaraele wali agalime Ngode Datagaliwabehondo mini mbiraore wulene manga ho kago ogonidagua haabo naholebira. Yu wali agali ndo tara tara karume Ngode Datagaliwabehondo mini mbiraore wule heneru ti mini mbiraore wialu anda ibai helo hondo ka. ✧ <sup>26</sup> Ti ogonidagua anda ibai haragola Ngode Datagaliwabehanda Isaraele wali agali pele mulebira. Anduane Homogonaga mbugani lo ngadagua ogo, ✧ Pele Miaga ibu Saiono howa ibulebira.

Ibiragola ibugua Yagaba aguanenerume ko bibahende bialu heneru domo waholebira. <sup>27</sup> Ina tinaga ko domo wahowa ✧

✧ **11:17:** Yar 11.16, Ab 2.39, Eb 2.11-19 ✧ **11:18:** Yo 4.22, 1 Ko 10.12 ✧ **11:20:** Ais 66.2, Lm 12.16, Pb 2.12  
 ✧ **11:22:** Yo 15.2-4, 1 Ko 15.2, Hi 3.14 ✧ **11:23:** 2 Ko 3.16 ✧ **11:25:** Lg 21.24, Yo 10.16, Lm 12.16, 2 Ko 3.14, Mo 7.9 ✧ **11:26:** Iba 14.7, Ais 59.20, Md 23.39 ✧ **11:27:** Yar 31.33-34, Hi 8.8, 10.16

tihondo habo nalolene bi ogo lo wulebero,  
 lalu gilibu nga. <sup>28</sup> Yu wali agalime Bi Mana Debene hame nalenegome ti Ngode Datagaliwabela waitigi ho ka. Ani biyagola Yu wali agali ndo tara tara kamiru tí Ngode Datagaliwabenaga pele mulene mana ala hale harimi. Anigo Ngode Datagaliwabehanda Yu wali agalinaga mamali agali mini leneore heneruhondo habo nalolene bi lo wialu ibugua ti dabenegro ti mo ibu damene ho heleneru ka. <sup>29</sup> Anigo Ngode Datagaliwabehanda wali agali dabeneru ibunaga turu holene tara tara winigo minirubi mani mini mende nawiaga tihondo miyaru mo yu dai nabiagabi ka. <sup>30</sup> Yu wali agali ndo tara tara tí kamigome ala Ngode Datagaliwabenaga bi mo wahalu harimi. Ai Yu wali agali tigua Ngode Datagaliwabenaga bi hale halu bia nabi wahaabo hayagola ibugua ibunaga dara halu biamogo bulene tíhondo ngiyago yu kamigoni. <sup>31</sup> Ogonidagua dege Ngode Datagaliwabehanda tíhondo dara halu biamogo biyago Yu wali agalime áyu ibunaga bi mo wahalu ka. Ibugua tibi dara halu biamogo bilo lowa tigua ani bialu ka. <sup>32</sup> Wali agali bibahendeme Ngode Datagaliwabenaga bi mo wahayagola ibugua ti garabaya ale helo helene. Ani helenego irane ibugua tihondo ibunaga dara halu biamogo bulene walia holenaga ani bini. <sup>\*</sup>

*Iname Ngode Datagaliwabenaga mini yaraga holene ngago ogo*

<sup>33</sup> Ngode Datagaliwabe ibugua bibahendeore mitangi bialu baya gibiore biaga kagoni. Ibu mini gigabiwibi manda timbuniorebi kagoni. Ibugua bule manda biagago tene mbiralime nalabeheore ka. Ibunaga biagane mana mbiralime manda nabibeheore ka. <sup>\*</sup>

<sup>34</sup> Anduane Homogonaga mbugani lo ngadagua ogo, <sup>\*</sup>

Anduane Homogonaga mini aiwa manda bidabe.

Ibuhondo, Agua bibe agua nabibe, lalu mbirali aiwa labehe kabe.

<sup>35</sup> Ibugua pani ngia dai bilonaga <sup>\*</sup>

ibuhondo mbirale mbira minigo mbirali ai kabe,

lalu gilibu nga. <sup>36</sup> Mbirale bibahende karubi ngarubi wabiaiore henego ibu ka. Ani howa ibugua mbirale karubi ngarubi bibahendeore haru hai halu uruninaga anduaneore ibuni ka. Ngode Datagaliwabenaga mini yaraga haaboboore helo hamelo ko. Aniore bilo laro. <sup>\*</sup>

## 12

*Iname Ngode Datagaliwabenaga howa bulene ngago ogo*

<sup>1</sup> I hamene mbaliniru-o Ngode Datagaliwabehanda inahondo dara howa biamogo timbuni biyago mitangi bialu ina tíhondo bi hongo howa laro. Ngode Datagaliwabe turu helo tigua ibuhondo tínaga bulenerubi tñibi loma bia ho helalimu. Tigua Ngode Datagaliwabe mitangi bialu tñinaga bu miniha ani birimiyagua lotu henene lolenego ogoni. <sup>\*</sup> <sup>2</sup> Dindi wali agali karume mana biagadagua bule ndo. Tí minibi mandabi gahenge helo Ngode Datagaliwabehanda tí mo tara helo halimu. Ani bialu howa ibugua hame ledago bayalebi ibu turu helo bulenebi baya buruguleore bulenebi manda bialu holeberami. <sup>\*</sup>

<sup>3</sup> Ngode Datagaliwabehanda i biamogo bulene nawi howa biamogo bialu ihondo mugube ngiyago mitangi bialu tíhondo bi laro. Tigua, Ina karulape kama, mitangi nabilimu. Mine holene nawi manda bialu tí hangu hangu howa, Ngode Datagaliwabehanda mini mbiraore wulene ihondo ngiyadagua dege kogoni, mitangi bialu halimu. <sup>\*</sup> <sup>4</sup> Ina tingini homane mbiraore kamago degeni howa aria tara tarame biabe

<sup>\*</sup> 11:30: Eb 2.2, Kl 3.7   <sup>\*</sup> 11:32: Lm 3.9, Ga 3.22, 1 Ti 2.4   <sup>\*</sup> 11:33: Yob 11.7, Iba 36.6, 92.5, Ais 55.8-9   <sup>\*</sup> 11:34: Yob 15.8, 36.22, Ais 40.13, 1 Ko 2.16   <sup>\*</sup> 11:35: Yob 35.7, 41.11   <sup>\*</sup> 11:36: 1 Ko 8.6, Ga 1.5, 2 Ti 4.18, Hi 13.21, 2 Pi 3.18   <sup>\*</sup> 12:1: Iba 50.13-14, Yo 4.24, Lm 6.11-13, 1 Ko 6.13, 6.20, Hi 10.20, 1 Pi 2.5   <sup>\*</sup> 12:2: Eb 1.18, 4.23, 5.10, 5.17, Kl 1.21, 1 Pi 1.14, 1 Yo 2.15   <sup>\*</sup> 12:3: 1 Ko 3.10, 12.7, 12.11, Ga 2.9, Eb 4.7



tara tara beremali. ✠✠ 5 Ogonidagua ina tingini dewa kamagoni howa Kerisoha ho gimbu buwa homane mbiraore kama. Tingini mbiraoreni hene dege aria tara tara howa gimbu bu kadagua ina Kerisoha ho gimbu bu kamagoni. ✠ 6 Ngode Datagaliwabehanda ina biamogo bialu mugube tara tara ta hayadagua iname biabe bayuwa bulene nga. Ngode Datagaliwabe mana lamulene mugube yu kamayagua iname ibuhondo mini mbiraore ngamadagua ibunaga mana lamialu hamiya. ✠✠ 7 Biamogo bulene mugube yu kamayagua nde biamogo bialu hamiya. Lawai holene mugube yu kamayagua nde lawai halu hamiya. ✠ 8 Ina bi laramagome wali agali marunaga mini elahe helo mo hongo holene mugube yu kamayagua nde wali agali marunaga mini elahe helo mo hongo halu hamiya. Mbiralime ibunaga mbirale ngago mbuni nabi howa wali agali maruhondo turu halu talebu mulene nga. Mbiralime haru hagane hongo yu kayagua nde wali agali mitangi bialu bayuwaore haru halu ibunibi biabe bulene nga. Mbiralime wali agali hondowa biamogo bulene irane ngago handayagua nde turu howa biamogo bulene nga. ✠

9 Tígua wali agalihondo gubalini hetingi nahe howa heneneore gubalini ho halimu. Ko ngago handabe manga halu bayale ngago yu tiga biaabo halimu. ✠ 10 Tí Kerisoha howa hamene mbalinima kamalo manda bialu turu howa gubalini hagahaga buwa wali agali maru ala mitangi bialu halimu. ✠ 11 Biabe bibe manga nahe hongo howa bialu halimu. Anduane Homogohondo gubalini heneneore howa ibunaga biabe poboyogobi bialu halimu. ✠ 12 Kerisohondo mini dunubia ho kamigome tí mo turu helo halimu. Mo ko holene tara tara tí kamigoria íbu ngagola ema nabi howa hibu lalu haabo halimu. Horo bibahendengi Ngode Datagaliwabehondo bi laabo halu halimu. ✠ 13 Keriso hameigini maru buru pale karuhondo tinaga mbirale ngamigo talebu milimu. Keriso hameigini ala nahendene tí kamiria ibiraruhondo, I andaga palima ma, lalimu. ✠

14 Wali agali marume tíhondo ko tara tara biragola tígua o biarunaga mini lalu Ngode Datagaliwabehondo, Biamogo bia habe, lalu tinaga la halimu. Ha halu pani mibe nale, Biamogo bibe, lalu lalimu. ✠ 15 Turu ho karu heba turu ho halimu. Dara howa dugu bialu karu heba dara howa dugu bialu halimu. ✠ 16 Wali agali ta nabi mitangi bialu bibahendehondo mana mbiraore ale dege biaga halimu. Mine nahe howa biabe emene emene bulene ngago ta nabi biai halimu. Tígua, I mini timbuniwi kogo, lo mitangi nabilimu. ✠

17 Mbiralime tíhondo ko biyagua tígua ko bia dai nabilimu. Wali agali bibahendeme mini mbiraore howa, Mana ogoni bayaleda, lai hagayagua o laragoni bialu halimu. ✠ 18 Wali agali ta nabi heba howa mo palia holene tene tí halimu. ✠ 19 I hamene mbaliniru-o pani ba dai nabi Ngode Datagaliwabenaga keba holeneme ba dai bilo tí wahalimu. Anduane Homogonaga mbugani bi lo ngago ogo, Anduane Homogohanda lalu, Pani mulene inaga ngago ina ba dai bulebero, lenego, gilibu nga. ✠ 20 Anduane Homogonaga mbugani bi mende lo ngago ogo, Íla waitigi kago garibilo kayagua tomo nelu mibe. Ibugua iba noa ho kayagua iba nelu mibe. Ani biriyagua ibugua ihondo ko biyago mitangi bialu ibuni taga pani nolebira, lalu gilibu nga. ✠ 21 Ko ngagome tí bope holani hondowa tígua bayale beramigome ko ngago bope halu wayali hole halimu.

✠ 12:4: Eb 4.16 ✠ 12:4: 1 Ko 12.12 ✠ 12:5: 1 Ko 12.27, Eb 4.25 ✠ 12:6: 1 Ko 12.28, 13.2, 1 Pi 4.10-11 ✠ 12:6: 1 Ko 12.4-11 ✠ 12:7: Ab 13.1, Ga 6.6, 1 Ti 5.17 ✠ 12:8: Ab 15.32, 20.28, 2 Ko 9.7, 1 Pi 5.2 ✠ 12:9: Iba 34.14, Amo 5.15, 1 Ti 1.5, 1 Pi 1.22 ✠ 12:10: Pb 2.3, Hi 13.1, 1 Pi 1.22, 2 Pi 1.7 ✠ 12:11: Ab 18.25, Mo 3.15 ✠ 12:12: Ab 2.42, Pb 3.1, 1 Te 5.16-17, Hi 3.6, 10.36, Ya 1.4 ✠ 12:13: 1 Ko 16.1, 2 Ko 9.1, 9.12, Hi 13.2, 13.16, 1 Pi 4.9 ✠ 12:14: Md 5.44, Lg 6.28, Ab 7.60, 1 Ko 4.12, 1 Pi 3.9 ✠ 12:15: Iba 35.13 ✠ 12:16: Iba 131.1-2, Min 3.7, Ais 5.21, Yar 45.5, Lm 11.20, 15.5 ✠ 12:17: Md 5.39, Lm 14.16, 2 Ko 8.21, 1 Te 5.15 ✠ 12:18: Mg 9.50, Lm 14.19, Hi 12.14 ✠ 12:19: Man 32.35, Min 24.29, Md 5.39, Lm 12.17, 13.4, 1 Te 1.6-7, Hi 10.30 ✠ 12:20: Har 23.4-5, Min 25.21-22, Md 5.44

## 13

### *Gabumane karu andaneha howa iname bulene ngago ogo*

<sup>1</sup> Ngode Datagaliwabe ibu bibahendenaga hongo holene tene kagome gabumane karu ti helo henge minigo tigua mana lo ngadagua iname bulene nga. <sup>2</sup> Gabumaneme bulene nga lalu lowinigo mbiralime nabiyagua ogoni ibugua Ngode Datagaliwabehanda gabumane helenegonaga mana puguara. Pugarago ibuni pani nolene nga. <sup>3</sup> Wali agali bayale bialu karume haru haga kago hondowa gi holene nawi. Ko bialu karume gi holene nga. Wali agali haru haga kago hondowa tí gi nahe hoa kamiyagua nde mana bayale ngaru bialu halimu. Ani bialu harimiyagua haru haga kagome tíhondo, Bayale birimida, lolebira. <sup>4</sup> Haru haga karu tigua Ngode Datagaliwabenaga biabe biahaga howa tí bayale halimulo biabe bialu ka. Tí ko birimiyagua haru haga biarume tíhondo hongo howa pani ngulebirago manda bialu gi ho halimu. Ti Ngode Datagaliwabenaga biabe biahaga howa Ngode Datagaliwabehanda pani mulene nga lowinigo haru haga urunime ko biaga karuhondo pani miaga ka. <sup>5</sup> Anigo iname Ngode Datagaliwabehanda ina pani nangilonaga hangu manda buwa bi larago hale halu bulene nga ndo. Inane minihabi dabalú gabumaneme larago hale halu buleneore nga manda bialu bulene nga.

<sup>6</sup> Tigua dagisi muni meramiligobi irane ogoninaga gabumane karu tigua tigatiga biyagua Ngode Datagaliwabenaga biabe biahalu kagonaga meramili. <sup>7</sup> Anigo tíhondo dagisi muni mulene ngadagua milimu. Tíinaga dagisi munibi mbirale tara tara ngamigonaga dagisi munibi milimu. Ti gabumane haru haga kago manda buwa yo handa nabi ti mitangi bulene ngadagua mitangi bilimu.

### *Gubalini holeneme mana tigabi walia hagago ogo*

<sup>8</sup> Tigua wali agali mbiralihondo dano ho nahalimu. Wali agali karuhondo gubalini holene dege dano ho halimu. Mbiralime wali agali karuhondo gubalini ho kayagua ibugua Mana lowini ngago bibahende biai haga ka. <sup>9</sup> Bi pira gilibu wini ngago aria maru ogo, Wali agali homelo nababe. Wali agali kayu nayabe. Mbirale page nabibe. Wali agali tinaga mbirale ngago dimagoli nahabe. Bi urunibi Ngode Datagaliwabe bi mana maru gilibu ngagobi bibahendenaga tene mbiraore ogo, Ina íni gubalini ho harilidagua maru karu ta nabi gubalini ho habe, lalu gilibu nga. <sup>10</sup> Ina mbiralihondo gubalini ho keyagua o biagohondo kagua nabulebere. Anigo Mana lowini ngago bibahende bulene tene gubalini holeneha nga.

<sup>11</sup> Tigua ogonidagua bialu holene ngago irane ogo. Horo áyu ogoni mitangi bialu palia hondo holene henge nawigo heyulene nga. Iname Yasuhondo mini mbiraore pigane wirimangi ina pele ngia maro bulene kaware ndo winigo áyu kawareore nga. <sup>12</sup> Ai aruma holene ereba halu egabi lalu wá holene kaware ha para haragoni. Ani birago arumaha howa mana bigi beremaliru áyu ogoriani biairi hamiya. Anigo wá kagoria howa wai biagane aleru karulo hamiya. <sup>13</sup> Wá holene kagoria howa tigatiga bialu hamiya. Badi ko dawé halu bulenebi lulu yu hole lulu iba nolenebi wali agali kayu yulenebi mana ko tara tara bulenebi gungu bulenebi henge lolenebi mana urunibi iname bulene nawiore. <sup>14</sup> Anigo Anduane Homogo Yasu Kerisoibunaga wai bulene hongo ngirago karulai halimu. tínaga mini ko ngamigome mana ko hame lagago bule nahinalimu.

☆ **13:1:** Min 8.15, Dan 2.21, Yo 19.11, Ta 3.1, 1 Pi 2.13 ☆ **13:3:** 1 Pi 2.13-14, 3.13 ☆ **13:4:** Lm 12.19, 1 Te 4.6  
 ☆ **13:5:** Aga 8.2, 1 Pi 2.19 ☆ **13:6:** Md 22.21, Mg 12.17, Lg 20.25 ☆ **13:8:** Md 22.39-40, Ga 5.14, Kl 3.14, Ya 2.8  
 ☆ **13:9:** Har 20.13-17, LBM 19.18, Man 5.17-21 ☆ **13:10:** Md 22.40, Lm 13.8, 1 Ko 13.4-7 ☆ **13:11:** 1 Ko 15.34, Eb 5.14, 1 Te 5.5-7 ☆ **13:12:** Eb 5.11, 6.11-13, Kl 3.8, 1 Te 5.5-6, 1 Yo 2.8 ☆ **13:13:** Lg 21.34, Eb 5.18, Pb 4.8, 1 Te 4.12, Ya 3.14, 1 Pi 2.12, 4.3 ☆ **13:14:** Ga 3.27, 5.16, Kl 3.10, 1 Pi 2.11

## 14

### *Iname ina hamene mbaliniru daba ki bulene nawigo ogo*

<sup>1</sup> Mbiralime Ngode Datagaliwabehondo mini mbiraore wu howa hongo nahe kayagua tígua ibu heba mandagi halimu. Mandagi howa ibugua bulene manda bidago laragola hale howa ibula lai nalalimu. ✧ ✧ <sup>2</sup> Mbiralali ibu Ngode Datagaliwabehondo mini mbiraore wu kagome tomo bibahende ta nabi naga ka. Mendealime Ngode Datagaliwabehondo mini mbiraore wu kago ibu mini hongo nahe howa nema dege naga ka. ✧ <sup>3</sup> Tomo bibahende ta nabi naga kagome nema dege naga kago hondowa mege bulene nawi. Nema dege naga kagome ibu nde tomo bibahende ta nabi naga kago hondowa, Ína ko bere, lolene nawi. Irane Ngode Datagaliwabehanda o biagohondo turu ho kago manda buwa tí ani lolene nawi. ✧ <sup>4</sup> Tígua mendealinaga biabe biahaga kagome birago hondowa, Ína ko bere, lolene tínaga biabe ndo. Ibunaga haru haga kagome ibu birago hondowa bayale bere ko nakarulape bere lolene tene ibuni holebira. Anigo Anduane Homogo ibugua o biago bayale bilo mo hongo holebira. ✧

<sup>5</sup> Wali agali marume manda bialu horo bibahende ogobi degedege ndo horo mbiru dabalú dunini nga manda biaga ka. Marume ani ndo horo bibahende ta nabi ogobi degedege nga manda biaga ka. Wali agali bibahende kamaru inane hangu hangume mitangi bulene karulape agodabe dabalú duniniore mbira manda beremago yu tiga bulene nga. ✧ <sup>6</sup> Mbiralime horo mbira dunini nga mitangi bu kayagua Anduane Homogo mini yaraga holenaga ani mitangi biaga ka. Mbiralime tomo bibahende ta nabi nalu howa Ngode Datagaliwabehondo kaj layagonaga ibugua Anduane Homogo mini yaraga halu tomo naga ka. Mendealime tomo maru nanaga kago Anduane Homogo mini yaraga holenaga ani bialu Ngode Datagaliwabehondo kaj laga ka. ✧ <sup>7</sup> Ina kamarume mbiralali ibu holene ibuni hangunaga halu ibu homolene ibuni hangunaga homalu ani bulene mbira nahe kama. ✧ <sup>8</sup> Ina harimayagua nde Anduane Homogonaga holeberama. Ina homarimayagua nde Anduane Homogonaga dege homoleberama. Anigo ina hari-mayaguabi homarimayaguabi ina Anduane Homogonaga dege kamagoni. ✧ <sup>9</sup> Keriso ibu wali agali karubi homayarubi tinaga Anduane Homogo hole ibugua homo tongolo mialu lone heyu ka. ✧ <sup>10</sup> Tí maru nema naga kamiru tígua tí hamene mbalinirume birago hondowa, Tí ko berami, laramiligo aginagabe. Tí maru tomo bibahende ta nabi naga kamiru nde tí hamene mbaliniru mege beramiligo aginagabe. Ina bibahendeore Ngode Datagaliwabehanda godi larangi ibu deni heyu holeberama. ✧ <sup>11</sup> Anduane Homogonaga mbugani lo ngago ogo, ✧

Anduane Homogohanda lalú, Í Ngode Datagaliwabe holenehe henene kodagua wali agali bibahende ñ geha bulu palu ibira holebira.

Ani buwa bibahendeoreme lalú, Í Ngode Datagaliwabeore kego, lalú latagi hai holebi-raore,

lalú gilibu nga. <sup>12</sup> Anigo ina bibahendeore kamaru iname bialu harimagonaga te hangu hangume Ngode Datagaliwabehondo lamiaiore holeberama. ✧

### *tínaga hamene mbaliniru mo pila holene nawigo ogo*

<sup>13</sup> Ani manda bialu inaneme, Ína ko bere, lalú lagalaga bialu nahamiya. Tígua ani nabi howa bulene ngago ogo. Mbira bulene mitangi bu kamigo bulene ogonime tínaga hamene mbaliniru mo pila habeheyaguabi ko mo bia habeheyaguabi tígua ogonibi nabule manda bilimu. ✧ <sup>14</sup> Í Anduane Homogo Yasuha ho gimbu bu kogome bibahende

✧ **14:1:** Lm 15.1, 15.7, 1 Ko 8.9-11, 9.22 ✧ **14:1:** Kl 2.16 ✧ **14:2:** Pig 1.29, 9.3, Lm 14.14, 1 Ko 10.25, 1 Ti 4.4  
 ✧ **14:3:** Kl 2.16 ✧ **14:4:** Md 7.1, Ya 4.11-12 ✧ **14:5:** Ga 4.10 ✧ **14:6:** 1 Ko 10.31, Ga 4.10, 1 Ti 4.3 ✧ **14:7:** 1  
 Ko 6.19-20, Ga 2.20, 1 Te 5.10, 1 Pi 4.2 ✧ **14:8:** Lg 20.38, Ga 2.20, 1 Te 5.10 ✧ **14:9:** Ab 10.36, 2 Ko 5.15 ✧ **14:10:**  
 Md 25.31-32, Ab 10.42, 17.31, 2 Ko 5.10 ✧ **14:11:** Ais 45.23, Pb 2.10-11 ✧ **14:12:** Md 12.36, Ga 6.5, 1 Pi 4.5  
 ✧ **14:13:** 1 Ko 8.9, 8.13, 10.32

ngaru ko ndo nga manda bido. Anigo mbiralime mbira bulene ngago hondowa ogoni ko nga manda bialu biyagua nde ogoni birago ko bira. ✧ <sup>15</sup> Tígua tomo mbira naramigome tínaga hamene mbalinirunaga mini mo genda harimiyagua tí gubalini howa ndo berami. Keriso ibugua homo aribia henegome mbirali mbira mo bayale henego tíni hangu mitangi bialu tomo narimigome ogoni ibu mo ko holani de hondo halimu. ✧ <sup>16</sup> Tígua mbira bulene bayale nga lo manda bialu beramigo marume hondowa bayale ndo ko nga lolani handalimu. ✧ <sup>17</sup> Ngode Datagaliwabehanda handame Ho Kagoria tomo tara tara nalubi iba tara tara nalubi ogonidagua bulenenaga ndo. Ogodagua bulene nga. Mini tigabi howa bulenebi mo palia holenebi turu holenebi Ngode Datagaliwabe Dinini ibugua ngiagago ogoninaga bulene nga. ✧ <sup>18</sup> Ani bulene ngadagua bialu howa mbiralime Kerisonaga biabe bia halu kago Ngode Datagaliwabehandabi wali agali marumebi ibu hondowa turu halu bayale birida lolene wulebira. ✧ <sup>19</sup> Anigo iname mo palia holene-nagabi mo hongo hole biamogo bulenenagabi mana ogonibi inane bia haghaga bialu holene nga. ✧ <sup>20</sup> Ngode Datagaliwabehanda biabe bialu kago tígua tomo naramigome mo ko nahalimu. Tomo bibahende ta nabi ngago nabehe kamigo tígua tomo mbira naramigome mendeali ko bilo mo bia habeheyagua tomo ogoni nolene nawi. ✧ <sup>21</sup> Mana tigabi bulene ngago ogo. Nogo tara tara naramigomebi waini iba naramigomebi mana mbira mbira beramigomebi tínaga hamene mbaliniru mo pila habeheyagua ogoni nabi wahalimu. <sup>22</sup> Mana ogoni manda bidedagua íbi Ngode Datagaliwabebi libuni dege manda bule ngelabe. Mbiralime mana mbira bulene karulape nga manda bu kago bialu howa ibuni miniha, I kagua berodabe, lo mitangi nabi bayale berogo mitangi biyagua ibu turu ho ka. <sup>23</sup> Ogonidagua ibugua tomo nalu howa mini kira wuwa nayagua ibu mini mbiraore nawi howa narago hondowa Ngode Datagaliwabehanda, Ína kagua bere, lalu lamiaga ka. Mana bibahende ngaru bulene tene mini mbiraore wu howa biagago mbiralime mini kira wu howa biyagua ogoni birago ko biya. ✧

## 15

### *Iname wali agali maru ala mitangi bulene ngago ogo*

<sup>1</sup> Ina Ngode Datagaliwabehondo mini mbiraore hongo howa wu kamarume maru mini mbiraore hongo nahe wu karunaga genda yidago yamogo bulene nga. Inane hangunaga hame ledamago mitangi biaabo holene nawi. ✧ <sup>2</sup> Ani nabi ina hamene mbaliniru bayale helonagabi Ngode Datagaliwabehondo mini mbiraore wu howa hongo ho helonagabi ti mini elahé helo iname mo hongo holene nga. ✧ <sup>3</sup> Keriso ibugua ibuni hame leadagua nabiaga hene. Ani nabi henegonaga Anduane Homogonaga mbugani bi lo ngago ogo, Wali agali karume íhondo mege bialu bi laragoni ini ibira ho nga, lalu gilibu nga. ✧ <sup>4</sup> Ina mini dunubia ho holene yu holomaya Anduane Homogonaga mbugani bi bibahende ala gilibu ngagome ina ema nabi howa hibu lalu holenebi ina mini elahé helo mo hongo holenebi inahondo lawai holenaga nga. ✧ <sup>5</sup> Tígua Keriso Yasu ibugua bialu hayadagua bialu howa ema nabi hibu lalu holene tenebi mini elahé helo mo hongo holene tenebi Ngode Datagaliwabe ibu kago ibugua tínaga mini mo mbiraore hai helo hameledo. ✧ <sup>6</sup> Ani buwa tí bibahende mandagi mini mo mbiraore howa tígua Ngode Datagaliwabe ibu inanaga Anduane Homogo Yasu Keriso Aba kago manda bialu ibunaga mini yaraga haabo halu holene nga. ✧

### *Bi Mana Debene Yu wali agali hangu ndo wali agali tara tarabi laminigo ogo*

✧ **14:14:** Ab 10.15, Lm 14.2, 14.20, 1 Ko 8.7-8, 1 Ti 4.4, Ta 1.15 ✧ **14:15:** 1 Ko 8.11-13 ✧ **14:16:** Ta 2.5 ✧ **14:17:** 1 Ko 8.8 ✧ **14:18:** 2 Ko 8.21 ✧ **14:19:** Lm 12.18, 15.2, 1 Ko 14.12, 1 Te 5.11 ✧ **14:20:** Md 15.11, Lm 14.14-15, 1 Ko 8.9, 8.13, Ta 1.15 ✧ **14:23:** Ta 1.15 ✧ **15:1:** Lm 14.1, Ga 6.1 ✧ **15:2:** Lm 14.19, 1 Ko 9.19, 9.22, 10.24, 10.33, 13.5, Pb 2.4-5 ✧ **15:3:** Iba 69.9, Md 26.39, Yo 5.30, 6.38 ✧ **15:4:** Lm 4.23-24, 1 Ko 9.9-10, 10.11, 2 Ti 3.16-17 ✧ **15:5:** Lm 12.16, 1 Ko 1.10, 9.9-10, Pb 3.16 ✧ **15:6:** Ab 4.24, 4.32

<sup>7</sup> Wali agalime Ngode Datagaliwabe mini yaraga helo Keriso ibugua tí ibu heba hamíya ibidaba lalu yamiyadagua tíguabi nde tíni Keriso aria kamiru hamíya ibidaba lalu ya migimigi bilimu.✧ <sup>8</sup> Ina bi langerogo ogo. Ngode Datagaliwabe ibu mini bilinahe ka walia halu Keriso ibu Yu wali agalinaga biabe bia haga hene. Ibugua ani bia haga howa Ngode Datagaliwabehanda Yu wali agalinaga mamali heneruhondo, Bulebero, lalu, Ngulebero, lalu bi lowinigo lola helobi ani bini.✧ <sup>9</sup> Ani bialu Yu wali agali hangu ndo tara tara hearu Ngode Datagaliwabehanda tihondo dara howa biamogo biyagonaga tigua Ngode Datagaliwabe mini yaraga helobi Keriso ibugua ani bini. Anduane Homogonaga mbugani lo ngadagua ogo.✧

Yu wali agali ndo tara tara karu kagoa howa ina kaj lalu inaga mini yaraga holebero. Ina inaga mini yaraga halu ihondo iba gana lolebero,

lalu gilibu nga. <sup>10</sup> Bi mendebi lo ngago ogo,✧

Yu wali agali ndo tara tara kamiru aibe. Tigua Ngode Datagaliwabenaga wali agali ibugua dabene karu heba turu ha gimbu bu halimu,

lalu gilibu nga. <sup>11</sup> Bi tebonebi lo ngago ogo,✧

Yu wali agali ndo tara tara kamiru aibe. Tigua Anduane Homogo mini yaraga ho halimu.

Wali agali bibahendeoreme ibunaga mini yaraga hai halimu,

lalu gilibu nga. <sup>12</sup> Aisaia ibuguabi bi lo ngago ogo,✧

Agali mini Yasi ibunaga aguanene mbira ibulebira.

Ibugua Yu wali agali ndo tara tara karu haru helo Ngode Datagaliwabehanda mo helolebira.

Ibiragola tigua ibuha mini dunubia ho holebira,

lalu bi uruni gilibu nga.

<sup>13</sup> Mini dunubia ho holene tene Ngode Datagaliwabe kago ibugua turu holenebi mo palia holenebi tigua ibuhondo mini mbiraore wu kamigome tíha tolai helo hameledo. Irane Ngode Datagaliwabe Dinininaga hongome tíha howa tina mini dunubia ho holene anda hai helonaga ogoni hame ledogoni.✧

*Polohanda gi nahe elae howa bi gilibu winigonaga irane ogo*

<sup>14</sup> I hamene mbaliniru-o ini manda bialu bayale bulenebi mana bayale tara tara bulenebi bibahende tíha tolai ho kamigo tinime karulape lawai hagahaga bibehe kamilo manda bido.✧ <sup>15-16</sup> Ani kami tiraga ina beba ogoni gilibu werogoni mana mbira mbira bulene tí mo mitangi bia halu gi nahe elae howa gilibu wero. I Keriso Yasunaga biabe bia haga howa Yu wali agali ndo tara tara karunaga biabe bia holiya Ngode Datagaliwabehanda biabe baya gibi ogoni ihondo ngiya. Irane ogoninaga i gi nahe elae howa gilibu wero. Ina loma binigo mo miaga agalime biabe biagadagua bialu howa Ngode Datagaliwabenaga Bi Mana Debene lamialu kogoni irane ogo. Yu wali agali ndo tara tara karu Ngode Datagaliwabe Dinini ibugua ti Ngode Datagaliwabenaga helo loma bia halu ibugua yamibeheore karulape helonaga ina Bi Mana Debene lamialu kogoni.✧ <sup>17</sup> I Keriso Yasuho ho gimbu bu howa Ngode Datagaliwabenaga biabe bia harogonaga i turu habehe kogoni. <sup>18-19</sup> Yu wali agali ndo tara tara karume Ngode Datagaliwabehanda bia laradagua bilo haru holiyanaga Kerisohanda iha howa biyago te ogoninaga dege ina gi nahe elae howa langero. Ina bi larugobi biabe birugobi agalime nabiagane ale birugobi nahendene ale bialu Ngode Datagaliwabe Dinininaga hongome ogoni bibahende bima ibirugo Keriso iha howa ani bini. Anigo ina Yarusaleme howa Kerisonaga Bi Mana Debene lamima pu gimbu bialu Iirigama dindi lamima anda pirugoni.✧ <sup>20</sup> Kerisohanda biyagonaga mana wali agali ala hale nahe

✧ 15:7: Lm 5.2, 14.1-3 ✧ 15:8: Md 15.24-25, Ab 3.25-26, 2 Ko 1.20 ✧ 15:9: 2 Sml 22.50, Iba 18.49, Yo 10.16, Ab 3.25, Lm 9.23, 11.30 ✧ 15:10: Man 32.43 ✧ 15:11: Iba 117.1 ✧ 15:12: Ais 11.1, 11.10, Mo 5.5, 22.16 ✧ 15:13: Lm 12.12, 14.17 ✧ 15:14: 1 Ko 8.1, 8.7, 8.10, 2 Pi 1.12, 1 Yo 2.21 ✧ 15:15-16: Lm 1.5, 11.13, 12.3, Ga 2.7-9, Pb 2.17 ✧ 15:18-19: Ab 19.18, 2 Ko 3.5, 12.12



karu karia puwa Bi Mana Debene lamulene ina hameore lo wiaabo harugoni. Agali mendealime biabe ala binigoria i bia aribia howa karulo nahole manda buwa ani bule hamelo haru. ✧ <sup>21</sup> Anduane Homogonaga mbugani lo ngadagua ogo, ✧ Ibugua biyagonaga te ala nalamini karume hondolebira. Ibunaga bi nahale hene karume manda bulebira, lalu gilibu nga.

*Polohanda Lomo pole manda manda binigo ogo*

<sup>22</sup> Irane ogonigo ina ti kamiria dewa halu ibua ho hewaria dege ibulene henge nawiya. ✧ <sup>23</sup> Ai ayu ina dindi orahayagi biabe biai halu ti kamiria mali dewani ibua ho haabo harugo <sup>24</sup> ai ayu ogoni ibule manda bialu kogoni. I Sebena dindi pialu howa ti mo bila hole hamelo ko. Ti heba turu howa nenege halu i Sebena poliyanaga tigua i biamogo bilimulo mitangi bu ko. ✧ <sup>25</sup> Ayu ogoni nde ina Ngode Datagaliwabenaga wali agali Yarusalemeni karu biamogo bulenaga mo yalu ti karia pole ko. ✧ ✧ <sup>26</sup> Keriso hameigini Masedoniani karubi Agaiani karubi tigua mini mbiraore howa Ngode Datagaliwabenaga wali agali yagibano Yarusalemeni karu dara howa biamogo bule lowa, Iname tihondo muni mimiya, lenego ogoninaga pole ko. ✧ <sup>27</sup> Ani bulene manda binigo nde tigua yagibano uruni biamogo bulene dano ho harimada manda buwa bini. Yu wali agalime dininaga turu holene wali agali tara tara karu lamialu biamogo binigo ai wali agali tara tara karume Yu wali agali dindini holenaga turu holeneme ti biamogo bulene nga. ✧ <sup>28</sup> Muni ogoni tigua ihondo wia hayago ina yalu pialu Keriso hameigini Yarusalemeni karuhondo mialu biabe ogoni biai halu i Sebena pole pialu howa ti kamiria nenege ibalu polebero. <sup>29</sup> Ani bialu ina ti kamiria ibalu Kerisonaga turu holene ihondo talebu ngiyago iha tolotagi howa ibuleberogo manda bido. ✧

<sup>30</sup> I hamene mbaliniru-o tihondo bi hongo howa larogo inanaga Anduane Homogo Yasu Kerisobi Ngode Datagaliwabe Dinini ibugua gubalini holene ngiyagobi mitangi buwa tigua i heba mini mbiraore howa Ngode Datagaliwabehondo inaga bi la haabo hamiya laro. ✧ <sup>31</sup> Yudiani wali agali Ngode Datagaliwabehondo mini mbiraore nawi karume i nabelobi ina Yarusalemeni howa Ngode Datagaliwabenaga wali agali karu biamogo bule biabe buleberogome mo turu helobi ogoninaga Ngode Datagaliwabehondo la haabo hamiya. <sup>32</sup> Ani buwa Ngode Datagaliwabehanda hame ledayagua iha turu holene tolai howa ti kamiria nenege eberogola tigua inaga mini mo hongo holeberami. <sup>33</sup> Inanaga mo palia holene tene Ngode Datagaliwabe kago ibu ti bibahende heba haabo helo hamelo ko. Aniore bilo laro.

## 16

*Polohanda wali agali hearu hangu hanguhondo bi lawia henego ogo*

<sup>1</sup> Ina aria Keriso hamewane Pibi ibugua Keriso hameigini Sengeriani karu biamogo biaga bedago manda buwa ibu ibiragola ibuhondo turu halimulo hameledo. <sup>2</sup> Anduane Homogo minini howa tigua Ngode Datagaliwabenaga wali agalime mana ogobi bulene ngadagua ibuhondo, Ina hamiya, lalu yamilimu. Ibugua wali agali dewa karubi ibi inahondo bayale biaabo haga bedago manda buwa tigua ibu biamogo bulene henge ngadagua biamogo bilimu.

<sup>3</sup> Keriso Yasunaga biabe bialu howa Pirisila Aguilabi libugua i heba biabe mandagi bialu harimago libuhondo, Libu mitangi bu ko, laro. ✧ <sup>4</sup> I nahomoliya libugua libunaga holene wahalu homa holene manda biya. Libugua ani biyagonaga inabi wali agali tara

✧ 15:20: 2 Ko 10.15-16 ✧ 15:21: Ais 52.15 ✧ 15:22: Lm 1.13 ✧ 15:24: 1 Ko 16.6 ✧ 15:25: Ab 19.21, 20.22, 24.17 ✧ 15:25: 1 Ko 16.1-4 ✧ 15:26: Ab 24.17, 2 Ko 8.1, 9.2, 9.12 ✧ 15:27: Lm 9.4, 11.17, 1 Ko 9.11, Ga 6.6 ✧ 15:29: Lm 1.11 ✧ 15:30: 2 Ko 1.11, Pb 2.1, Kl 4.3, 4.12, 2 Te 3.1 ✧ 16:3: Ab 18.2, 18.18, 18.26, 2 Ti 4.19

tara Keriso hameigini karu bibahendemebi kaj timbuni larama. <sup>5</sup> Keriso hameigini libu andagaha ngoai haga karu tihondo, Tí mitangi bu ko, laro.✧

I nenege agali turubi Ebinidasa ibu Esia dindini howa Kerisohondo mini mbiraore wu henego pigane ibu kago ina ibuhondo, Í mitangi bu ko, laro. <sup>6</sup> Meri ibugua tínaga biabe hongo howa bia hayago ibuhondobi, Í mitangi bu ko, laro. <sup>7</sup> I aria Yuali Andoronigasa Yuniasala libu i heba garabaya andaha mandagi harimago libuhondobi, Libu mitangi bu ko, laro. Abosolo agali karume libu bayuwa manda bu kago. I Keriso hameigini nahewaha libu ala Keriso hameigini henego ka.

<sup>8</sup> I nenege agali turubi Ambiliadasa iya Anduane Homogoha mbiraore ho haribago ibuhondobi, Í mitangi bu ko, laro. <sup>9</sup> Urubanasa ibu ina heba Kerisonaga biabe mandagi bialu harimago ibuhondobi i nenege agali turubi Sadagisi ibuhondobi, Libu mitangi bu ko, laro. <sup>10</sup> Abelese ibugua Keriso mitangi bu howa mini bilinahe ho haabo hayago walia henego ibuhondobi, Í mitangi bu ko, laro. Arisidobulusu ibu damene karu tihondobi, Tí mitangi bu ko, laro. <sup>11</sup> Yu agali Herodiono ibuhondobi Nasisa ibu damene Keriso hameigini karu tihondobi, Tí mitangi bu ko, laro.

<sup>12</sup> Taraibina Taraibosala libu Anduane Homogonaga biabe bia haga kago libuhondobi, Libu mitangi bu ko, laro. I nenege agali turubi Pesisu ibugua Anduane Homogonaga biabe timbuniore bia halu henego kago ibuhondobi, Í mitangi bu ko, laro. <sup>13</sup> Lubasa ibugua Anduane Homogonaga biabe bia halu howa marume biagadagua ndo ibugua ti bu bolangua halu biabe biaga kago ibuhondobi ibu aiyahondobi, Libu mitangi bu ko, laro. Ibu aiyahanda ibuni iginiore hondo hagamadagua ibi hondo hayagonaga laro.✧

<sup>14</sup> Asingiridasa Pelegono Hemese Padorobasa Hemasa imaruhondobi ti heba Keriso hameigini bibahende karuhondobi ina, Tí mitangi bu ko, laro. <sup>15</sup> Pilologasabi Yuliabi Nereasabi ibu mbalini bedagobi Olimbasabi ti heba Ngode Datagaliwabenaga wali agali bibahende karubi ti bibahendehondo, Tí mitangi bu ko, laro.

<sup>16</sup> Tíni bibahendeme gi tigali bialu halimu. Kerisonaga wali agali bibahende karume tihondo, Tí mitangi bu kama, lalu lawia hara.✧

### *Bulene ngago lalu lamaro binigo ogo*

<sup>17</sup> I hamene mbaliniru-o bi hongo howa larogo ogo. Agali maru karume Keriso hameigini mo talebu ki biagabi wali agali Ngode Datagaliwabhondo mini mbiraore wu karu mo pila hagabi ani biaga karu tí de hondo halimu. Tígua mana yu tiga birimigonaga waitigi ale karu ti heba mandagi nahalimu.✧ <sup>18</sup> Mana ogoni biaga karu tigua ina Anduane Homogo Kerisonaga biabe bia haga ndo tini hame ledagonaga biabe biaga ka. Tigua bi timbuni lalu laragomebi mo turu holenaga lalu bi laragomebi wali agali mini gedaore karu mo hondo haga ka.✧ <sup>19</sup> Tí kamirume Bi Mana Debene mitangi bialu mini bilinahe ho haabo kamigo wali agali bibahende karume hale hai ho ka. Irane ogoninaga ina tí mitangi bialu turu ho kogoni. Tígua bayale ngago hondowa mini gigabiwi halu ko ngagome tíni para holigo hogorale bu halimulo hame ledo.✧ <sup>20</sup> Inanaga mo palia holene teneore Ngode Datagaliwabe kago ibugua dama Heyolabe tígua geme hengedalimulo tí ge dindiha berelolebira.✧

Ina Anduane Homogo Yasunaga biamogo bia holene tí heba wiaabo helo hamelo ko.

<sup>21</sup> Timodi ibu ila biabe mandagi bialu kabago ibugua tihondo, Tí mitangi bu ko, lalu lawia hara. Lusiasa Yaisono Sosibada imarume ti Yu agali i aria howa tihondo, Tí mitangi bu kama, lalu lawia hara.✧

✧ **16:5:** 1 Ko 16.15, 16.19, Kl 4.15, 2 Ti 1.15, Pm 2 ✧ **16:13:** Mg 15.21 ✧ **16:16:** 1 Ko 16.20, 1 Pi 5.14 ✧ **16:17:** Md 7.15, Ab 15.1, 15.5, 1 Ko 5.9-11, 2 Ti 3.5, Ta 3.10, 2 Yo 10 ✧ **16:18:** Pb 3.19, Kl 2.4, 1 Ti 6.5, Ta 1.10, 2 Pi 2.3 ✧ **16:19:** Md 10.16, Lm 1.8, 1 Ko 14.20 ✧ **16:20:** Pig 3.15, Lm 15.33, 1 Ko 16.23, 1 Te 5.28, Mo 22.21 ✧ **16:21:** Ab 16.1, 19.22, 20.4

<sup>22</sup> Beba ogoni Tediassa ina gili bia harogo i Keriso hameigini howa tihondo, Ina ti mitangi bu ko, laro.

<sup>23</sup> I tomo ngialu haga Gaiasa ibu andagaha Keriso hameiginiru ngoai hagago ibugua tihondo, Ti mitangi bu ko, lalu lawia hara. Erasadasa ibu tano ogoninaga muni hondo haga kago ibubi inanaga hameigini Kodasabi libugua tihondo. Ti mitangi bu kaba, lalu lawia hara.✠

[ <sup>24</sup> Ina Anduane Homogo Yasu Kerisonaga biamogo bia holene ti bibahende kamigoha wiaabo helo hamelo ko. Aniore bilo laro.]

*Ngode Datagaliwabe mini yaraga halu ibuhondo bi lenego ogo*

<sup>25</sup> Ti Yasu Kerisohondo mini mbiraore wu kamigo hongo ho haabo halimulo Ngode Datagaliwabehanda ti mo hongo habehe ka. Yasu Kerisonaga Bi Mana Debene ina lamirulidaguabi bi heneneore ala mo pani nahe ngelenego ayu mo pani ho ngadaguabi Ngode Datagaliwabehanda ti mo hongo habeheore kagonaga iname ibunaga mini yaraga hamiya.✠ <sup>26</sup> Anigo Ngode Datagaliwabe mana latagi haga henerume bi gilibu wini ngagome mana heneneore ogoni latagi halu lo nga. Ngode Datagaliwabe haluhe nahomaga kago ibugua mana ogoni wali agali dindi bibahendeni karu hale hai helo lamule pudaba lene. Ani lenego wali agali uruni tigua Ngode Datagaliwabehondo mini mbiraore wialu helobi ibugua bia laradagua bialu helobi mana ogoni lamule pudaba lene.

<sup>27</sup> Yasu Keriso ibuha howa Ngode Datagaliwabe mbiraore kago ibu hangu mini gigabiwore kago ibunaga mini yaraga haaboboore helo hamelo ko. Aniore bilo laro.✠

## **1 Korindi**

### **Polohanda Keriso hameigini Korindini hearuhondo beba mbira ogo gilibu wia hene.**

### **Mbuga ogoha gilibu ngarunaga nemandi ogo**

Polohanda Keriso hameigini Korindini hearuhondo beba mbira ogo gili binigo irane Keriso hameigini Korindini hearunaga genda dewa nga layago hale howa ibugua, Agua bilimu, lalu gilibu wia hene. Polo heneyangi Korindi tano dunini timbuniore winigoria wali agali ko bayalebi ta nabi dindi tara taraha howa ngoai haga wini. Korindi tanoni biyinaya bulenebi mamali mana ilili bulenebi dama tara tarahondo bi pupu wulenebi uruni ale gibiore bu yanga lenegome Korindi tano mini lene wini.

Polo ibugua beba ogo gilibu pelenego irane Keriso hameigini tini degeme hoba migimigi bu halu wali agali kayu bialu uruni ale bialu hearu mo tiga bulene nga manda buwa gilibu wia hene. Ani buwa Polohanda Keriso hameiginirume bulene nabulenerunaga lalubi Ngode Datagaliwabe Dinini ibugua mugube taratara ta hanagerunaga lalubi homeneru Yasu dai birangi heyulenenaga lalubi uruni mitangi bialu beba ogoni gilibu wia hene.

Be 13 howa gubalini holene mugube maru ale ndo gubalini holene dunini timbuniore lo nga.

#### **Bulu бага бува кuni gilibu ngago**

*1.1-9*

Gili binigonaga irane lo nga *1.10-4.21*

Keriso hameigini tini degeme hoba migimigi bu henego *5.1-7.40*

Wali agali kayu nabi holenenagabi dabu bulenenagabi nga *8.1-11.1*

Keriso hameigini karubi Keriso hameigini ndo karubi nga *11.2-14.40*

Keriso hameiginirume bialu holenenaga nga *15.1-58*

Keriso homayagola Ngode Datagaliwabehanda mo heya henedagua wali agali mini mbiraorewi homeneru tibi mo heya holebira lenegonaga nga *16.1-4*

Keriso hameigini Yudianani buru pale hearu mbirale wia henego *16.5-24*

Lamaro bialu lenego

<sup>1</sup> I Polo. I Keriso Yasunaga abosolo holiya Ngode Datagaliwabe ibuni hame leagome i olene kogoni. Ibi inanaga hamene Sosodenisibi iyame beba ogo tihondo gilibu wia haraba.

<sup>2</sup> Keriso hameigini Korindini kamiru bibahende Ngode Datagaliwabenaga loma bia hene halimulo ibugua ti olayaru Keriso Yasuha ho gimbu bu howa Ngode Datagaliwabenaga kami. Tibi wali agali dindi bibahendeni karubi inabi ina bibahendenaga Anduane Homogo Yasu Kerisonaga mini olalu karume ti bibahendehondo<sup>☆</sup> <sup>3</sup> inanaga Aba Ngode Datagaliwabebi Anduane Homogo Yasu Kerisobi libugua biamogo bia holenebi mo palia holenebi ngilo hamelo ko.<sup>☆</sup>

#### *Mo turu hagane Kerisoha ngaru ogo*

<sup>4</sup> Ngode Datagaliwabehanda Keriso Yasuha howa ibunaga biamogo bia holene tihondo ngiyagonaga ina ti mitangi bialu inaga Ngode Datagaliwabehondo kai laabo halu ko. <sup>5</sup> Ani buwa ti Kerisoha ho gimbu bu howa mbirale bibahende karulapeore yu kami. Bi lolene bibahendebi manda bulene bibahendebi heba karulapeore yu kami.<sup>☆</sup>

<sup>6</sup> Kerisohanda biyago lamulene mana tigua hongo howa yu tiga bialu <sup>7</sup> Anduane Homogo Yasu Keriso lone ha pani helo hondo kami tambu turu holene mbira nayi ndo

☆ **1:2:** Ab 9.14, 18.1, 18.17, Lm 1.7, 10.12, 1 Ko 6.11, 2 Ti 1.9    ☆ **1:3:** Lm 1.7, 2 Ko 1.2    ☆ **1:5:** 1 Ko 2.1-2, 12.8, 2 Ko 8.7, 2 Ti 1.8, Mo 1.2

bibahendeore yu hai ho kami. ✧ <sup>8</sup> Anduane Homogo Yasu Kerisonaga Horo haragola tí mbiralime ko birimi nalelo ibugua tí hongo haabo halimulo haru halu hamaro bulebira. ✧ <sup>9</sup> Ngode Datagaliwabehanda ibu Igini inanaga Anduane Homogo Yasu Keriso heba tí mo mbiraore howa halimulo olayago Ngode Datagaliwabe ogoni ibu mini bilinaheore kagoni. ✧

*Keriso hameigini biaru ti talebu baga binigo ogo*

<sup>10</sup> Inaga hamene mbaliniru-o Anduane Homogo Yasu Kerisonaga hongoni howa ina tí bibahendehondo bilimulo hame ledogo ogo. Tí talebu baga nabilimu. Tí bibahendeme bi laramigo mini mbiraore howa bi lolene nga. Mitangi bulenebi hame lolenebi mo mbiraore haiore howa holene nga. ✧ <sup>11</sup> Kalowi ibunaga damene marume, Tí lai lagalaga bialu kami, lalu ihondo bayuwaore langiai haya. <sup>12</sup> Ani langiyadagua langero. Tí hangu hangu howa bi tara tara lalu kami laya. Mbirame lalu, I Polo aria kogoni, larimiya. Mendeme lalu, I Aboloso aria kogoni, larimiya. Teboneme, I Pida aria kogoni, larimiya. Maneme lalu, I Keriso aria kogoni, larimiya lalu langiya. ✧ <sup>13</sup> Keriso ibu dewa talebu baga bu kabe. Polohanda ira bangani ba para howa tinaga homa henebe. Tí Polonaga talima piaga howa baboraya birimibe.

<sup>14</sup> Ina tí baboraya nabi Karisabasa Gaiasala dege baboraya birugonaga Ngode Datagaliwabehondo turu haro. ✧ <sup>15</sup> Anigo tí mbiralime Polonaga talima piaga howa baboraya bini lolene nawi. <sup>16</sup> O mbira embeda harudago Sebanasabi ibu damenebi ti haru ina baboraya biru. Ani birugo maru baboraya birube be nabibe mitangi nabi ko. ✧ <sup>17</sup> Kerisohanda ihondo, Baboraya bule í pu, lene ndo. Ibugua, Ngode Datagaliwabe Bi Mana Debene lamima pobe, lene. Ani lowa Keriso ira bangani howa homa henegonaga hongo yu waholilono ibugua, Mini gigabiwi karume lalalidagua ndo lalu Bi Mana Debene lamima pobe, lene. ✧

*Ngode Datagaliwabenaga hongo holenebi mini gigabi wulenebi Kerisoha ngago ogo*

<sup>18</sup> Keriso ira bangani howa homa henegonaga mana hale howa hariga koha pialu karume mana ogoni lulu mana ale manda biaga. Anigo ina Ngode Datagaliwabenaga pele mulene yu kamarunaga mana ogoniha Ngode Datagaliwabenaga hongo holene nga. ✧ <sup>19</sup> Anigo Anduane Homogonaga mbugani bi lo ngago ogo, Mini gigabiwi karunaga mini gigabi wulene ina mo waholebero. Mana manda timbunibi karunaga manda bulene ina mo emene holebero, lalu gilibu nga. ✧ <sup>20</sup> Anigo wali agali mini gigabiwi karu mitangi bialu galone agi manda bibehebe. Mana manda timbunibi karu dindi bibahendenaga bime wai biaga karubi ti mitangi bialu galone agi manda bibehe kamabe. Dindinaga mini gigabiwi holene galone ndo mini nawi ale ngago lalu Ngode Datagaliwabehanda walia kagoni. ✧

<sup>21</sup> Ngode Datagaliwabehanda ibunaga mini gigabiwiore howa wali agali tininaga mini gigabi wulene ibuni manda nabibehe helo wini. Ani winigo irane iname lulu mana ale lameramaligome Yasu Kerisohondo mini mbiraorewi karu Ngode Datagaliwabehanda ti pele mule manda bini. ✧ <sup>22</sup> Yu wali agalime lalu, Agalime nabigane ale walia ha, laga. Girigi wali agalime mini gigabi wulene hai biaga. ✧ <sup>23</sup> Anigo iname mana lamialu howa, Keriso ira bangani homa henego, lameramali. Mana ogoni hale howa Yu wali agalime irane mitangi nabigaga ka. Girigi wali agalime hale howa galone ndo lulu mana aleda laga ka. ✧ <sup>24</sup> Ngode Datagaliwabehanda Yu wali agalibi wali agali tara tarabi

✧ **1:7:** Lg 17.30, Pb 3.20, 2 Te 1.7, Ta 2.13, 2 Pi 3.12 ✧ **1:8:** Pb 1.6, Kl 1.22, 1 Te 3.13, 5.23 ✧ **1:9:** Ais 49.7, Yo 17.21, 1 Ko 10.13, 1 Te 5.24, 1 Yo 1.3 ✧ **1:10:** Lm 12.16, 2 Ko 13.11, Pb 2.2, 3.16, 1 Pi 3.8 ✧ **1:12:** Yo 1.42, Ab 18.24-28, 19.1, 1 Ko 3.4 ✧ **1:14:** Ab 18.8, 19.29, Lm 16.23 ✧ **1:16:** 1 Ko 16.15 ✧ **1:17:** Md 28.19, Yo 4.2, 1 Ko 2.1, 2.4, 2.13, 2 Pi 1.16 ✧ **1:18:** Ab 17.18, Lm 1.16, 1 Ko 2.14, 15.2, 2 Ko 4.3 ✧ **1:19:** Ais 29.14, Yar 8.9 ✧ **1:20:** Yob 12.17, Ais 19.12, 33.18, 44.25, Md 11.25, Lg 10.21, Lm 1.20-21, 1.28 ✧ **1:21:** Md 11.25, Lg 10.21, Lm 1.20-21, 1.28 ✧ **1:22:** Md 12.38, Mg 8.11, Yo 4.48, Ab 17.18, 17.32 ✧ **1:23:** Ais 8.14, Md 11.6, Yo 6.60, 6.66, Lm 9.32, 1 Ko 2.14, Ga 5.11



olo heleneru tigua mana ogoni hale howa Keriso ibu Ngode Datagaliwabenaga hongo holenebi ibunaga mini gigabi wulenebi mana ogoniha nga ti manda biaga.✧ <sup>25</sup> Tigua Ngode Datagaliwabe ibu mini nawi ale ka mitangi beramilibe. Mini nawi ale ka mitangi birimiyagua ogoni wali agalinaga mini gigabi wiaga ale ndo ibu mini gigabiorewi ka. Ngode Datagaliwabe ibu hongo nahe ka mitangi beramilibe. Hongo nahe ka mitangi birimiyagua ogoni wali agalinaga hongo ale ndo ibu hongo gibiorehe ka.✧

<sup>26</sup> Ogonigo hamene mbaliniru-o Ngode Datagaliwabehanda tí Kerisonaga halimulo olayangi tí abi harimibe mitangi bilimu. Dindialirume mitangi biagadagua tí mini giga-biwibi hongohebi mini lenebi dewa nahe mbira mbira hangu harimigoni.✧ <sup>27</sup> Dindiali karume maru mini nawi ale ka laganego wali agali urunibi karu Ngode Datagaliwabehanda mini gigabiwi karu taga helonaga ti dabo helene. Dindiali karume maru hongo nahe ka laganego wali agali urunibi karu Ngode Datagaliwabehanda hongohe karu taga helonaga ti dabo helene.✧ <sup>28</sup> Dindiali karume lalu, Wali agali maru ko mini nawi nakarulape habane nabulenebi ka, lagaru wali agali urunibi Ngode Datagaliwabehanda dabo helene. Ani binigo irane dindialime galonedalo mitangi biaganego tini galone ndodane hendelo ani bini. <sup>29</sup> Ani binigo wali agali bibahendeoreme Ngode Datagaliwabe deni howa mbiralime mine holene henge nawiore.✧ <sup>30</sup> Ngode Datagaliwabe ibunime tí Keriso Yasuha ho gimbu bu howa ibugua inanaga mini gigabi wulene tene Keriso ibu helo hela hene. Keriso Yasu minini howa Ngode Datagaliwabehanda inahondo, Tí mini tigabiwi kami, lene. Kerisohanda ina mo Ngode Datagaliwabenaga wali agali hela halu ina golope hene kama.✧ <sup>31</sup> Ani binigo Anduane Homogonaga mbugani lo ngadagua ogo, Mbiralime mbiralinaga mini mo yaraga hoa kayagua Anduane Homogohanda biyago mitangi bialu ibunaga mini hangu mo yaraga holene nga, lalu gilibu nga.✧

## 2

### *Keriso ira bangani homenagonaga lamulene ngago ogo*

<sup>1</sup> I hamene mbaliniru-o ina tí hemiria pigane ibirungi Ngode Datagaliwabe bi mana henene ala mo pani nahe ngelenego langialu howa bi taibi manda timbuni bulenebi lalu ndo lawai haru.✧ <sup>2</sup> Ina tí heba howa mana maru mitangi nabi Yasu Keriso dege mitangi bialu ibu ira bangani homenego te ogoni hangu langulene nga manda bu harugoni.✧ <sup>3</sup> I tí heba íbu harungi hongo nahe gi halu duru lalu harugoni.✧ <sup>4</sup> Ina bi larugobi mana lawai harugobi mini gigabiwime tingi howa bi lalu ndo Ngode Datagaliwabe Dinininaga hongo tíhondo walía halu ogonime lawai harugoni.✧ <sup>5</sup> Ani biyago Kerisohondo mini mbiraore wu kamigo agalinaga mini gigabi wulene ndo tene Ngode Datagaliwabe ibunaga hongoni howa birugome tí mini mbiraore wu kami.✧

### *Ngode Datagaliwabenaga mini gigabi wulene ngago ogo*

<sup>6</sup> Anigo ina Ngode Datagaliwabenaga wali agali mini bogabi karu tihondo mini gigabi wulene bi mana lamiruli. Mini gigabi wulenenaga bi mana ogoni dindialinaga ndo dindini agali haguane karu tinagabi ndo. Tinaga hongo holene ereba haragoni.✧ <sup>7</sup> Mini gigabi wulenenaga bi mana laruligo o Ngode Datagaliwabenaga mini gigabi wulene bi mana ala mo pani nahe ngelenego laruli. Bi mana ogoni dindialirume nahendelonaga ani ngelene. Bamba dindi nawabi howa Ngode Datagaliwabehanda mini gigabi wulene bi mana ogoni inanaga baya taraore holene wilonaga ani dabo ngelene.✧

✧ **1:24:** Lm 1.4, 1.16, 1 Ko 1.18, Kl 2.3 ✧ **1:25:** 2 Ko 13.4 ✧ **1:26:** Md 11.25, Yo 7.48, Ya 2.1-5 ✧ **1:27:** Md 11.25, Ya 2.5 ✧ **1:29:** Lm 3.27, Eb 2.9 ✧ **1:30:** Yar 23.5-6, Yo 17.19, 2 Ko 5.21 ✧ **1:31:** Yar 9.23-24, 2 Ko 10.17 ✧ **2:1:** 1 Ko 1.17 ✧ **2:2:** Ga 6.14, Pb 3.8 ✧ **2:3:** Ab 18.9, 2 Ko 10.1 ✧ **2:4:** Lm 15.19, 1 Ko 1.17, 1 Te 1.5, 2 Pi 1.16 ✧ **2:5:** 2 Ko 4.7, 6.7 ✧ **2:6:** 1 Ko 1.28, Eb 4.13, Pb 3.15, Hi 5.14 ✧ **2:7:** Lm 16.25-26, Eb 3.5, 3.9, Kl 1.26, 2 Ti 1.9

<sup>8</sup> Dindini haru hagane hearume mana ogoni manda nabi hene. Manda bu henedale tigua mini daliga taraore lolenenaga Anduane Homogo ira bangani ba para nakale.✧

<sup>9</sup> Anigo Anduane Homogonaga mbugani lo ngadagua ogo, Mbirale wali agali tinaga deme nahendenegobi tinaga haleme hale nahenegobi tinaga miniha andape nabinigobi ogoninagaore Ngode Datagaliwabehanda ibuhondo gubalini ho karu tihondoore mule manda manda bu ngelene,

lalu gilibu nga.✧ <sup>10</sup> Ogonigo Ngode Datagaliwabehanda ibu Dininiha howa inahondo ibunaga bi mana ogoni ala pani nahe ngelenego mo pani haya. Ngode Datagaliwabe Dinini ibugua bibahende de handai howa Ngode Datagaliwabenaga mana pani nahe ngelenegobi de handai ho ka.✧ <sup>11</sup> Mbirali ibunaga mini ngago aiwa manda bidabe. Ibuni dege manda bu ka. Anigo Ngode Datagaliwabe ibunaga mini ngago ibu Dinini ibuni dege manda bu ka.✧ <sup>12</sup> Ngode Datagaliwabehanda inahondo dindialinaga dinini ngiya ndo ibuni Dinini ibilayago ngiya. Ngode Datagaliwabehanda inahondo bibahende ngiyaru iname manda bulumayanaga ibugua ibu Dinini ogoni inahondo ngiya.✧

<sup>13</sup> Anigo iname bi laramago dindialinaga mini gigabiwi howa lalu ndo kama. Ngode Datagaliwabe Dinini ibugua inahondo, La, laradagua iname Ngode Datagaliwabe Dininihe karu tihondo ibu Dininina mana lawai haramali.✧ <sup>14</sup> Ngode Datagaliwabe Dinini ibugua ngiaga ngaru mbirali ibunaga bu habaneha Ngode Datagaliwabe Dinini nahe kagome yu habe nahe ka. Ibugua ogoni galone ndodago lowa manda nabiaga ka. Wali agalinaga bu habaneha Ngode Datagaliwabe Dininihe karu tigua dege galonedalo manda biaga ka.✧ <sup>15</sup> Mbirali ibunaga bu habaneha Ngode Datagaliwabe Dininihe kago ibugua mbirale bibahende bayuwa manda bialu dababehe ka. Wali agali maru tinaga bu habaneha Ngode Datagaliwabe Dinini nahe karume Ngode Datagaliwabenaga wali agali ibunaga Dininihe karu bayuwa manda bialu nadababehe ka.✧ <sup>16</sup> Anduane Homogonaga mbugani lo ngadagua ogo, Anduane Homogonaga bu mini aiwa manda bidabe. Iuhondo, Agua bibe agua nabibe, lalu mbirali aiwa labehe kabe, lalu gilibu nga. Anigo Keriso hameigini kamarume ina Kerisonaga mini karulo kamag-  
oni.✧

### 3

#### *Ina Ngode Datagaliwabenaga biabe bia haga kamaru ogo*

<sup>1</sup> Ogonigo i hamene mbaliniru-o ina wali agali maru tinaga bu habaneha Ngode Datagaliwabe Dininihe karuhondo bi larulidagua ti kamiruhondo ani labe nahe haru. Ina dindi mana hangu biaga karuhondobi Keriso hameigini mini odahe ale karuhondobi larulidagua tihondo bi ani lalu haru.✧ <sup>2-3</sup> Ti waneigini gali ale mini boga nabi hemigo hondowa tomo daliahe nabe naheyagola ina tihondo andu iba ale hangu ngirugoni. Dindi mana biagame bialu hagadagua tiguabi ayu bialu howa tomo daliahe nabe nahe kamigoni. Tigua i nayido agini henge lalu bi wai bialu kamirume dindi mana biagame bialu hagadagua bialu kamigo walia haga ndobe.✧✧ <sup>4</sup> Ti mbirame lalu, i Polo aria kogoni, mendeme, i Aboloso aria kogoni, lalu kamigo ti dindialime lalu hagadagua lalu kami ndobe.✧

<sup>5</sup> Anigo Aboloso ibu ai kabe. Polo ibi ai kobe. Iya Ngode Datagaliwabenaga biabe bia haga agali haribagome tigua Anduane Homogohondo mini mbiraore wirimi. Anduane Homogohanda biabe tara tara tale bialu inahondo ngiyago iyahondo ngiyadagua bialu

✧ **2:8:** Lg 23.34, Yo 7.48, Ab 13.27, 2 Ko 3.14 ✧ **2:9:** Ais 64.4 ✧ **2:10:** Md 13.11, 16.17, Yo 14.26, 1 Yo 2.27 ✧ **2:11:** Min 20.27, Yar 17.9, Lm 11.33-34 ✧ **2:12:** Yo 16.13-14 ✧ **2:13:** 1 Ko 1.17, 2.4, 2 Pi 1.16 ✧ **2:14:** Md 16.23, Yo 8.47, 14.17, Lm 8.5-7, 1 Ko 1.18, 1.23 ✧ **2:15:** 1 Te 5.21, 1 Yo 2.20, 4.1 ✧ **2:16:** Yob 15.8, Ais 40.13, Yar 23.18, Yo 15.15, Lm 11.34 ✧ **3:1:** Yo 16.12, 1 Ko 2.14-15 ✧ **3:2-3:** Yo 16.12, Hi 5.12-14, 1 Pi 2.2 ✧ **3:2-3:** 1 Ko 1.10-11, 11.18, Ga 5.20-21, Ya 3.16 ✧ **3:4:** 1 Ko 1.12

harabali. <sup>6</sup> Ngode Datagaliwabe mana egene ale pigane ina hangaru. Aboloso ibugua egene hangarugoria iba odo mialu haya. Anigo egene ogoni mo anda haga Ngode Datagaliwabe ibuni hangu ka. <sup>7</sup> Agali egene hangayago ibubi agali iba odo miyago ibubi libu haru tene ndo ka. Ngode Datagaliwabe ibugua egene mo anda hagago ibuni teneore ka. <sup>8</sup> Egene hangayago ibubi egeneni iba odo miyago ibubi libu mbiraore kagoni. Libu biabe biyadagua Ngode Datagaliwabehanda yolo hangu hangu mulebira. <sup>9</sup> Ogonigo iya Ngode Datagaliwabenaga biabe mandagi bialu kabago wali agali tí Ngode Datagaliwabenaga mabu ale kami. <sup>\*</sup>

Tí Ngode Datagaliwabenaga anda alebi kami. <sup>10</sup> Ngode Datagaliwabehanda mugube ngiyadagua i anda bulenenaga mandabi howa ina anda gene waru. Mendealime anda gene wa wirugoriani anda bialu ka. Ina hangu hangume howa biabe bayuwa berolo manda buwa bulene nga. <sup>11</sup> Yasu Keriso ibuniore anda gene helo Ngode Datagaliwabehanda ibu helenego gene mende helolene nawiore. <sup>12</sup> Marume gene o wa helayagoriani anda bialu howa ngolomebi silibamebi tole tara tara muni dewa miaganemebi marume iramebi dangimebi widinaga iranemebi anda bulebira. <sup>13</sup> Kerisohanda dabolene Horo harangi biabe birimadagua bu pani holeberama. Horo ogonigi ira daragola ina hangu hangume biabe birimadagua walia holebira. Ira ogonime ina hangu hangunaga biabe birimadagua bo heda halu bayale birimadabe be ko birimadabe walia holebira. <sup>14</sup> Mbiralime anda gene o wa helayagoriani anda biyago nade haabo hayagua ibuhondo yolo mulebira. <sup>15</sup> Mendealime anda gene o wa helayagoriani anda biyago irame dai hayagua ibuhondo yolo nami ibu irame doligo lowa ibuni ibida tagira pu hagadagua pu holebiragonaga pele mia dege bulebira.

### *Keriso hameigini karu ti ibunaga anda ka lenego ogo*

<sup>16</sup> Tí bibahende Ngode Datagaliwabenaga anda kamigo Ngode Datagaliwabe Dinini tíha kago mitangi nabioire kamibe. <sup>17</sup> Anigo mbiralime Ngode Datagaliwabenaga anda mo ko hayagua Ngode Datagaliwabehanda o biago ibu nde mo ko holebira. Irane ibunaga anda loma bia hene kago nde ibunaga anda ogoni tíniore kamigoni.

<sup>18</sup> Mbiralime ibuni mo hondo holene nawi. Dindini karume mitangi biagadagua tí kamigoha mbiralime, I mini gigabiwi ko, mitangi bu kayagua ibu mini gigabiwioire holenaga ala ibu mini nawi ale ho dai bulene nga. <sup>19</sup> Irane dindini karume mini gigabi nga laganego Ngode Datagaliwabehanda handalu karia galone ndodane handaga ka. Anduane Homogonaga mbugani lo ngadagua ogo, Agalinaga mini gigabi wulene ngagome tini gono wu kago delo Ngode Datagaliwabehanda ngelo ka, lalu gilibu nga. <sup>20</sup> Ngode Datagaliwabenaga mbugani bi mende lo ngago ogo, Agali mini gigabiwi kagonaga mitangi bulene Anduane Homogohanda hondowa o ibu habane nabulenedane hondo ka, lalu gilibu nga. <sup>21</sup> Ogonigo mbiralime dindialiru tigua biaganeru hondowa mine holene nawi. Mbirale bibahendeore ngaru tí kamirunaga ngagoni ndobe. <sup>22</sup> Polobi Abolosobi Pidabi dindi bibahendeni karubi ngarubi holenebi homolenebi áyu ngagobi awe wulebiragobi bibahendeore ta nabi tínaga ngagoni. <sup>23</sup> Tí nde Kerisonaga kami. Keriso ibu nde Ngode Datagaliwabenaga ka. <sup>\*</sup>

## 4

### *Kerisonaga abosolo agalime bulene ngago ogo*

<sup>\*</sup> **3:6:** Ab 18.4-11, 18.24-28, 19.1, 1 Ko 1.30, 2 Ko 3.5, 10.14-15    <sup>\*</sup> **3:7:** 2 Ko 12.11, Ga 6.3    <sup>\*</sup> **3:8:** Lm 2.6, Ga 6.4-5, Mo 22.12    <sup>\*</sup> **3:9:** Md 13.3-9, Ab 15.4, 2 Ko 6.1, Eb 2.20-22, Hi 3.3-4, 1 Pi 2.5    <sup>\*</sup> **3:10:** Lm 15.20, 1 Ko 4.15, 15.10, 1 Pi 4.11, 2 Pi 3.15, Mo 21.14    <sup>\*</sup> **3:11:** Ais 28.16, Md 16.18, 2 Ko 11.4, Ga 1.7, 1 Pi 2.4-6    <sup>\*</sup> **3:13:** Lg 2.35, 1 Ko 4.5, 2 Te 1.7-10, 1 Pi 1.7, 4.12    <sup>\*</sup> **3:16:** 1 Ko 6.19, 2 Ko 6.16, Eb 2.21-22, Hi 3.6, 1 Pi 2.5    <sup>\*</sup> **3:18:** Min 3.7, Ais 5.21    <sup>\*</sup> **3:19:** Yob 5.13, 1 Ko 1.20, 2.6    <sup>\*</sup> **3:20:** Iba 94.11    <sup>\*</sup> **3:21:** 1 Ko 1.12, 3.4-6, 2 Ko 4.5, 4.15    <sup>\*</sup> **3:23:** Lm 14.8, 1 Ko 11.3, 2 Ko 10.7, Ga 3.29

1 Tígua ina Kerisonaga biabe bia haga agali kalo manda bilimu. Ngode Datagali-wabenaga bi mana henene ala mo pani nahe ngelenego ogoninaga haru hagane holomaya ina mo hela henego kamagoni.✠ 2 Biabe bia hagame bulene ngago ogo. Iibunaga Anduanehondo mini bilinahe holene nga.✠ 3 Tíguabi maru karumebi, Polo nakarulape ka, lalu dabaramiligo ogoni galone ndo manda bido. Inime karulape kobe nakarulape kobe dababe nahe ko. 4 Ina mbira birugo inaga miniha nakarulape biri nalangiaga. Ani nalangiragome i karulapeore kogo labe nahe dege kogoni. Aguani manda bulene karulape biri nakarulape biri lalu langiaganego inaga biabe ndo Anduane Homogo ibunaga nga.✠ 5 Anigo horo pongo bo winigo naibi ngaore tí áyu ogoni howa ko biri bayale biri laga bialu mbirali dabolene nawi. Anduane Homogo ibirangi hamaronaga daba ki ibuni bulebira. Ibugua ani bialu howa wali agalime mbirale arumahayagi do ho ngaru wá kagoria mo ngelalu bu miniha mbira bua ho ngaru ibugua latagi helalu bibahendeore mo pani hai holebira. Ani bialu Ngode Datagaliwabehanda wali agali hangu hanguhondo, Bayale biri, lolene ngadagua lolebira.✠

6 Hamene mbaliriru-o tí walia halu ina bi ogoni langirugo Abolosobi ibi iyanaga bi langirugoni. Iya walia haga ale howa bi mbira laganego tí lo manda bilimulo ogo, Wali agali mitangi bialu bulene lo winidagua manda bialu dege bulene nga, lalu gilibu nga. Tígua mine halu agali mbiranaga mini yaraga halu mendenaga mini mege bialu holene nawi.✠ 7 Wali agali maru dindiha helo tí daliga helayadago aiwabe. Bibahendeore yu kamiru Ngode Datagaliwabehanda ngiyago yu kamigoni ndobe. Ngode Datagaliwabehanda ngiyago yu kamiyagua nde aginaga mine halu kamibe.✠

8 Áyu ogoni tígua mbirale wulenego wuwa hai kamigoni. Áyu ogoni tí homogoore kami. Tígua ina bolangua halu kini ale ho kamibe. Anigo inabi tíbi kini ale howa mandagi haru hamiya tí kini heneneore halimulo ina hamelo ko.✠ 9 Ngode Datagaliwabehanda ina abosolo agali mahaore helayago mitangi bu ko. Wali agalibi dahuliyalibi bibahende de hendelo agali homelo bolene wulebira lenego ale ina kama.✠ 10 Ina Kerisonaga mini yaraga halu kamaria hondowa marume lalu, Tí mini nawi ale kami, laga ka. Tí ani ndo. Tí Kerisoha howa marume lalu, Tí miniwi kami, laga ka. Ina hongo nahe kama. Tí hongohe kami. Ina mini lene ndo kama. Tí mini leneore kami.✠ 11 Alabi áyubi ina tomo garibi lalu ibabi noa ho haga kama. Ina labolabo ko lerele bu hagabi marume ina bagagobi anda nahe palia andanda bu hagabi kama.✠ 12 Ina holenenaga biabe gime hongo howa bialu haramali. Marume inahondo bi magubi laragola iname tihondo bi dendebe ladai beramali. Marume ina mo tandaga haragola iname mbira bia dai naberamali.✠ 13 Marume ina mege biragola iname bi bayale dege ladai beramali. Ina dindi bibahendenaga ko ngubi ale howa wali agali bibahendenaga ti to waharagobi ho halu áyubi ani dege kamagoni.✠

14 Ina tí taga halimulo bi ogoni bebani gilibu wia ndo haro. Tí inaga waneiginiore kamigo manda bialu ina tí mana manda bilimulo gilibu werogoni. 15 Tí Kerisoha howa tínaga haru hagane dewa daosini pira (10,000) kayagua tínaga aba mbira hangu kagoni. Anigo tí Keriso Yasuha hemigola ina Bi Mana Debene langialu tínaga aba i harugoni.✠ 16 Ogonigo i kodagua tíbi halimulonagaore hame timbuni lo kogoni.✠ 17 Tí aguani halimulonaga ina Timodi tí kamiria ibilarogoni. Ibu Anduane Homogoha howa inaga iginiore mini bilinahebi kagoni. Keriso Yasuha howa ina holene gahenge yu howa

✠ 4:1: Lg 12.42, 1 Ko 3.5, 2 Ko 6.4, Ta 1.7, 1 Pi 4.10 ✠ 4:2: Lg 12.42 ✠ 4:4: Yob 9.2, Iba 143.2, Min 21.2, Lm 4.2  
 ✠ 4:5: Lm 2.1, 2.29, 1 Ko 3.8, 2 Ko 5.10, Mo 20.12 ✠ 4:6: Lm 12.3, 1 Ko 1.12, 3.4, 3.21 ✠ 4:7: Yo 3.27, Lm 12.6, Ya 1.17, 1 Pi 4.10 ✠ 4:8: Mo 3.17, 3.21 ✠ 4:9: Lm 8.36, 1 Ko 15.30-31, 2 Ko 6.9, Hi 10.33 ✠ 4:10: Ab 26.24, 1 Ko 1.18, 3.18 ✠ 4:11: Ab 23.2, Lm 8.35, 2 Ko 11.23-27, Pb 4.12 ✠ 4:12: Iba 109.28, Md 5.44, Ab 18.3, 1 Ko 9.14-15, 1 Te 2.9, 2 Te 3.8, 1 Ti 4.10 ✠ 4:13: Dug 3.45 ✠ 4:15: Ab 18.11, Ga 4.19, Ya 1.18 ✠ 4:16: 1 Ko 11.1, Pb 3.17, 1 Te 1.6, 2 Te 3.9

mana dunini yu haruligobi dindi uruni bibahendeni Keriso hameigini karuhondo lawai haruligobi uruni Timodi ibugua tí mo mitangi bia holebira.✠

18 Tí marume j tí kamiria nahondo ibulebira lowa mine halu kami. 19 Anduane Homogohanda pu layagua nde abale ibulebero. Ina ibuwa mine halu karume bi lararu hale hole ndo tinaga hongo holene abi ngabe hondole ibulebero.✠ 20 Irane Ngode Datagaliwabehanda Handame Ho Kagoria tene bi lolene ndo hongo holeneore nga.✠ 21 Tí agi hamelo kamibe. Ina tí tibume boliya hamelo kamibe be gubaliniore howa mini gedaore holene yalu ibuliya hamelo kamibe.

## 5

### *Keriso hameigini marume koore binigo ogo*

1 Keriso hameiginiru tí kamigoha wali agali maru kayu bialu ka lalu marume j langiya. Ogoni ko taraore birago Ngode Datagaliwabe mana manda nabi karumebi biagadagua ndo ko taraore bialu ka. Bi langiyagome lalu, Agali mbirame ibu aba one heba mandagi ibuni onela haradagua bialu ka, lalu langiya.✠ 2 Ani biragola tí mine halu kamigo irane agibe. Tígua mine nahe taga timbuni howa dara halu agali ogonime nakarulape bialu kago ibu tí baba mandagi nahe tagira helalimu. 3 Iní tingini kaundia kogonigo inaga bu mini dininibi tí heba helowa kogoni. Ina Anduane Homogo Yasunaga minini howa agali ogoni ibu ko timbuniore biya lalu dabarugoni. Ina bi o larogoni tí heba mandagi howa laradagua bero.✠ 4 Tí mandagi ngoai ho bedamigoria inaga bu mini dininibi tí heba mandagi biruwa inanaga Anduane Homogo Yasunaga hongo holene ina heba kagome✠ 5 tígua agali ogonimeibunaga mini ko bo pelo ibu dama Heyolabenaga giha ya halimu. Irane Anduane Homogonaga Horo harangi ibu dininina pele mulene yu helo.✠

6 Tí mine halu kamigo bayale ndo. Bi mbira laganego ogo, Yidi emeneme balawa timbuni helo mo timbu haga, ani laganego tí manda bu kami.✠ 7 Tí mberedi bayale aleore hole tígua yidi ko ala tawe ale ogoni mo wahalimu. Ani buwa tí mberedi bayale yidi nahe áyu dege hirini ale holeberami. Áyu nde tí ogonibi kamidalo manda bu kogoni. Bolangua Halu Penegonaga Horo mitangi bialu inanaga nogo sibi igini aleore howa Keriso ibuni loma bialu bo miagadagua ibugua homa hene.✠ 8 Anigo iname mo mitangi bulene tomo áyu nalu mberedi yidi ala tawenaga ko bulenebi wali agali kayu bulenebi heba ndo mberedi yidi nahe bayaleorenaga mini gahengebi henene lolenebi heba nalu hamiya.✠

9 Ina ala tihondo beba gilibu wia harugo wali agali kayu biaga karu heba tí mandagi nahalimu lalu gilibu wia harugoni.✠ 10 Ani gili birugo Ngode Datagaliwabe mitangi nabi karume wali agali kayu biagabi mbirale ngago dimagoli hagabi mbirale kayu bule mo hondo hagabi gime wabiniruhondo bi pupu wiagabi uruni mitangi bialu ndo laru. Tígua wali agali urunibi heba nahabehe mitangi bidamile nde dindi o kamigoria mandagi nahe wahalu polene ngale.✠ 11 Ina bi gili birugoni agua lalu gili biru. Wali agali mbiralime, I Keriso hameigini kogoni, lowa o biagome wali agali kayu biagabi dimagoli hagabi gime wabiniruhondo bi pupu wiagabi bi gungu biagabi lulu yule lulu iba timbuni nagabi mbirale kayu bule mo hondo hagabi urunibi biaga heba mandagi nahe tomobi ibu heba nane halimu.✠

12-13 Wali agali tagira karu tihondo ogobi kami lolenego inaga biabe ndo. Ngode Datagaliwabe ibugua tihondo tí ogobi kami lolebira. Keriso hameigini tí mandagi

✠ 4:17: Ab 19.22, Pb 2.19-22 ✠ 4:19: Ab 18.21, 19.21, 1 Ko 16.5, 2 Ko 1.15, 1.23, Hi 6.3 ✠ 4:20: 1 Ko 2.4, 1 Te 1.5  
 ✠ 5:1: LBM 18.7-8, Man 22.30, 27.20, Eb 5.3 ✠ 5:3: Kl 2.5 ✠ 5:4: Md 16.19, 18.18, Yo 20.23, 2 Ko 13.10 ✠ 5:5: Ab 26.18, 1 Ti 1.20, 1 Pi 4.6 ✠ 5:6: 1 Ko 3.21, 15.33, Ga 5.9, Ya 4.16 ✠ 5:7: Har 12.5, 12.21, 13.7, Ais 53.7, Yo 1.29, 1 Pi 1.19, Mo 5.6, 5.12 ✠ 5:8: Man 16.3, Md 16.6, 16.12, Lg 12.1 ✠ 5:9: Md 18.17, 2 Ko 6.14, Eb 5.11, 2 Te 3.14  
 ✠ 5:10: Yo 17.15, 1 Ko 1.20, 10.27 ✠ 5:11: Md 18.17, Lm 16.17, 2 Te 3.6, Ta 3.10, 2 Yo 10



kamiru dabolene t́ninaga biabe ndobe. Anduane Homogonaga mbugani lo ngadagua ogo, Wali agali ko bialu kago ibu tagira helalimu, lalu gilibu nga.✠✠

## 6

### *Keriso hameiginime tini aria haru tagira puwa godi lolene nawi ngago ogo*

<sup>1</sup> T́ mbiralime Keriso hameigini mendela godi lolene ngagola Ngode Datagaliwabe mitangi nabiagane karume daba ki bilo haru poramiligo agibe. Ngode Datagaliwabenaga wali agali t́nime mo tiga bulene nga ndobe. <sup>2</sup> Ngode Datagaliwabenaga wali agali iname dindi bibahendeni karunaga daba ki bulene inanaga wulebirago manda nabi kamibe. Anigo t́gua wali agali dindi bibahendeni karunaga daba ki bulene t́naga ngayagua t́gua áyu emene ngaru daba ki nabibehe kamibe.✠ <sup>3</sup> Dahuliyalirume biraru iname dabolene wulebirago manda nabi kamibe. Anigo áyu dindini karume mbirale mbira biraru iname dababeheore kama ndobe.✠ <sup>4</sup> Mbirale mbira biraru mo tiga bulene ngayagua Keriso hameigini ndo karume mo tiga bilo ti karia haru poleberamibe. <sup>5</sup> T́ taga habehe kamigoni. T́ kamigoria mbirale mbira biraru mo tiga bulene t́ni aria mini gigabiwi mbira nahedabe. <sup>6</sup> Ani nabi howa Keriso hameigini mbirali ibugua Keriso hameigini mendealigo heba godi lolenaga Ngode Datagaliwabe mitangi nabi karume mo tiga bilo ti karia haru poramili.

<sup>7</sup> T́gua ani bialu kamigome t́ bibahende hongo ibira hai kamigo lalu walia haga. Marume t́ mo hondo hayaguabi t́naga mbirale mo page yalu piyaguabi t́gua la nabi waholenego bayale ndobe.✠ <sup>8</sup> T́ ani nabi howa t́gua t́ni Keriso hameigini degedege howa mo hondo hagahaga bialubi t́ninaga mbirale page bigibigi bialubi kami.

<sup>9</sup> Ngode Datagaliwabe mana mo yo handagane karu t́gua Ngode Datagaliwabehanda Handame Ho Kagoria ti holene henge nawulebiraorego manda nabi kamibe. T́nime t́ni mo hondo nahalimu. Wali agali dabu nabi howa kayu biagabi gime wabiniruhondo bi pupu wiagabi wali agali dabu bu howa tara baba kayu biagabi agalime agali nenegene maru baba mana ko ngubi taraore biagabi✠ <sup>10</sup> mbirale page biagabi mbirale ngago dimagoli hagabi lulu yule lulu iba timbuni nagabi bi gungu biagabi mbirale page bule mo hondo hagabi uruni bibahende biaga karume Ngode Datagaliwabehanda Handame Ho Kagoria ti holene henge nawulebiraore. <sup>11</sup> Ala t́ maru ogonibi bialu harimigoni. Ani bialu hemiria Ngode Datagaliwabehanda t́gua ko birimigo domo wahai howa ibunaga wali agaliore helo t́ dabo bagi henego kami. Ngode Datagaliwabehanda t́hondo, T́ mini tigabiwi kami, lenego Anduane Homogo Yasu Keriso minini howabi inanaga Ngode Datagaliwabe Dinini ibuguabi t́ ani helene kami.✠

### *T́naga tinginime Ngode Datagaliwabenaga mini yaraga helo bulene ngago ogo*

<sup>12</sup> T́ mbiralime lalu, I mbirale bibahende ta nabi biai habehe kogoni, loleberami. E ani bibehegoyu bibahende ta nabi ngagome t́ mo bayale helonaga ndo nga. Ina bibahende ta nabi ngaru biai habehe kogoni labehe howa mbirale urunime i dariba habehe nga manda biruyagua nde nabulebero.✠ <sup>13</sup> T́ marume lalu, Tomo tombenaga ngago tombe nde tomonaga nga ndobe lolebira. E anigoyu Ngode Datagaliwabehanda tomobi tombebi kiroba mo wiamaro bilolebira ndobe. Inanaga tingini wali agali kayu bilo helene ndo Anduane Homogonaga biabe bilo helene. Anduane Homogo ibu nde ina tingininaga holene ngiaga ka.✠ <sup>14</sup> Ngode Datagaliwabehanda ibunaga hongome Anduane Homogo mo heya henego inabi ibunaga hongome mo heya holebira.✠

✠ **5:12-13:** Mg 4.11, 1 Ko 6.1-4, Kl 4.5, 1 Te 4.12, 1 Ti 3.7 ✠ **5:12-13:** Man 13.5, 17.7, 21.21, 22.21-24 ✠ **6:2:** Dan 7.22, Md 19.28, Mo 2.26, 3.21, 20.4 ✠ **6:3:** 2 Pi 2.4, Yu 6 ✠ **6:7:** Md 5.39, Min 20.22, Lg 6.29, Lm 12.17-19, 1 Te 5.15, 1 Pi 3.9 ✠ **6:9:** Ga 5.19-21, Eb 5.5, 1 Ti 1.9, Hi 12.14, Mo 22.15 ✠ **6:11:** Eb 2.2, Kl 3.7, Ta 3.3-7, Hi 10.22 ✠ **6:12:** 1 Ko 10.23 ✠ **6:13:** Lm 14.17, 1 Ko 6.15, 15.19-20, Kl 2.22-23, 1 Te 4.3-7 ✠ **6:14:** Lm 6.5, 6.8, 8.11, 1 Ko 15.20, 2 Ko 4.14, Eb 1.19-20

<sup>15</sup> Tíngaga tingini hangu hangu howa Kerisonaga tingini ho kamigo manda bu kami. Ina Kerisonaga tingini ogoni howa bayanda wali kayu biaga bedarunaga tinginiha gimbu bulene ngabe. Nawiore ndobe. ✧ <sup>16</sup> Agalime ibunaga tingini bayanda wali kayu biaga biago tinginiha gimbu biyagua libu tingini mo mbiraore hagago manda nabi kamibe. Anduane Homogonaga mbugani bi bayuwaore lo ngago ogo, Libu wali agali kira howa tingini mbiraore holebira, lalu gilibu nga. ✧ <sup>17</sup> Anigo mbiralime Anduane Homogoha gimbu biyagua libu dininiha howa mbiraore haga ka. ✧

<sup>18</sup> Wali agali kayu biaga kagoha nape ha bagi halimu. Wali agali mbirame ko maru birago ibunaga tingini tagirahayagi howa biaga. Wali agali kayu birago ibunime ibuninaga tingini mo ko haga. ✧ <sup>19</sup> Tíngaga tingini hangu hangu howa Ngode Datagaliwabe Dinininaga anda kamigo manda nabi kamibe. Ngode Datagaliwabehanda ibu Dinini ogoni turu halu bame ngiyago ibu tíha haabo kagoni. Ai tí tíngaga ndo tí Ngode Datagaliwabenaga kami. ✧ <sup>20</sup> Ngode Datagaliwabehanda tí ibuninaga halimulo lowa yolo binigo mitangi buwa tígua tíngaga tinginime Ngode Datagaliwabe mini mo yaraga haabo halu halimu. ✧

## 7

### *Wali agali dabu bulene te ladai binigo ogo*

<sup>1</sup> Ai tígua beba ihondo gilibu wia harimigonaga bi ladai bero. Agalime wali dabu nabi hole manda biyagua karulape. ✧ <sup>2</sup> Ani bibehego wali agali kayu dewa bialu kagodago agali bibahende hangu hangu howa tinaga one mbira mbira dabu bu berelolene nga. Wali bibahende tibi hangu hangu biruwa tinaga agalini mbira mbira heba birulene nga. <sup>3</sup> Agalime ibu onehondo bulene ngadagua bialu onemebi ibu agalinihondo bulene ngadagua bialu libuni mini hana haga bialu holene nga. ✧ <sup>4</sup> Ani howa one ibunaga tingini ibuni haru helonaga helene ndo ibu agalinime haru helonaga helene. Ogonidagua agalini ibubi ibunaga tingini ibuni haru helonaga helene ndo ibu oneme haru helonaga helene. <sup>5</sup> Ani buwa onene agalinila libuni degedege hame nale hagahaga bulene nakarulape. Oneme agalinila libu lo mbiraore howa, Iya Ngode Datagaliwabehondo bi galone maru lolene henge wilo emene hondo haba, laribiyagua o karulape. Ogoninaga bi galone maru ogoni Ngode Datagaliwabehondo lai howa onene agalinilame mandagi holene ngadagua holene nga. Tíngaga mini haru nahabehe kamigo hondowa dama Heyolabeme ko mo bia holene henge hondoligo de hondo holene nga. ✧

<sup>6</sup> Ani buwa bi larugoni tí ani buleberami manda buwa bi lo wialu ndo tí ani bua biyagua nde bibehe lalu laro. <sup>7</sup> Ani larogo tí bibahende ina harulidagua halimulo hamelo kogoni. Ani ndo Ngode Datagaliwabehanda ina hangu hanguhondo mugube tara tara ngiyadagua yu kamagoni. Ani yu howa mbiralime mugube tara mbira ale yida mendealime nde mende ale yida. ✧

<sup>8</sup> Ai agali wali dabu nabi karubi wali maru agali nape bedarubi wali dalo bedarubi tíhondo bi mbira larogo. I wali dabu nabi kodagua tíbi harimiyagua bayale dege. <sup>9</sup> Tí ani habe nahe kamiyagua nde wali agali dabu bulene nga. Tíni dimagoli ho holene nakarulapego dabuore bulene nga. ✧

<sup>10</sup> Wali agali dabu bu kamiru ina tí bilimulo bulene mbira ngago ina lenego ndo Anduane Homogohanda lowinigo ngadagua langero. Oneme ibu agalini wahalu polene nawi. ✧ ✧ <sup>11</sup> Ani bialu ibu wahalu piyagua agali mende polene nawi ibuni hangu birulene

✧ **6:15:** Lm 12.5, 1 Ko 12.27, Eb 4.12, 4.16, 5.30 ✧ **6:16:** Pig 2.24, Md 19.5, Eb 5.31 ✧ **6:17:** Yo 17.21-23, Lm 8.9-11, Eb 4.4 ✧ **6:18:** Lm 1.24, 6.12-13, 1 Te 4.3, Hi 13.4 ✧ **6:19:** Lm 14.7-8, 1 Ko 3.16, 2 Ko 6.16 ✧ **6:20:** 1 Ko 7.23, Ga 3.13, Pb 1.20, Hi 9.12, 1 Pi 1.18-19 ✧ **7:1:** 1 Ko 7.8, 7.26 ✧ **7:3:** Har 21.10, 1 Pi 3.7 ✧ **7:5:** Yol 2.16, Seg 7.3, 1 Te 3.5 ✧ **7:7:** Md 19.12, Ab 26.29, 1 Ko 12.11 ✧ **7:9:** 1 Ti 5.14 ✧ **7:10:** Mal 2.14-16 ✧ **7:10:** Md 5.32, 19.9, Mg 10.11-12, Lg 16.18

nga. Ani nakarulapeyagua ibu agalini karia lone dai bulene nga. Agalinime ibu one nogo dugualu pelolene nawi.

<sup>12</sup> Tí maruhondo ina bi larogo Anduane Homogo ibugua í langini ndo íni laro. Tí mbirali Keriso hameigini howa ibu one Keriso hamewane ndo biruwa one biagome ibu agalini heba birulene nga manda biyagua agalinime nogo dugualu ibu one pelolene nawi. <sup>13</sup> Wali mbira Keriso hamewane biruwa ibu agalini Keriso hameigini ndo kayagua agalini biagome ibu one heba holene nga manda biyagua oneme ibuhondo, Wahalu porogo í nogo dugu ngerogo, lolene nawi. <sup>14</sup> Ogonigo agalini Keriso hameigini ndo kagome ibu onela gimbu bu howa ibu Ngode Datagaliwabehayagi ka. Ogonidagua onene ibu Keriso hamewane ndo bedagome ibu agalinila gimbu bu howa ibu Ngode Datagaliwabehayagi beda. Ogonidagua bia nabiyagua libunaga waneiginiru Ngode Datagaliwabe mitangi nabiyaga wali agalinaga waneigini ale hangu holebira. Anigo uruninaga waneigini kadagua ndo ti Ngode Datagaliwabehayagi ka. <sup>15</sup> Agaliniyaguabi oneneyaguabi Keriso hameigini ndo howa ibugua, Wahalu poro, layagua nde ogoni pelo helalimu. Wahalu poragola howa agaliniyaguabi oneneyaguabi Keriso hameigini howa kagome ibuni hame ledadagua bibehe holebira. Irane Ngode Datagaliwabehanda ina mo palia holene yu holomaya olene kama. ✧ <sup>16</sup> Ani buwa onene í Keriso hamewane biruwa í agalini Keriso hameigini mo hela holene nga manda nabi bedebe. Agalini í Keriso hameigini howa í one Keriso hamewane mo bira holene nga manda nabi kebe. ✧

*Ngode Datagaliwabehanda tí olayangi bialu harimidagua áyu nde bialu holene ngago ogo*

<sup>17</sup> Ngode Datagaliwabehanda tí olayangi tí hangu hanguhondo mugube tara tara ngiyadagua biabe bialu holene nga. Ina Keriso hameigini dindi mbira mbirani ngoai ho karu ti bibahendehondo ogodagua bulene nga lalu lawai haruli. ✧ <sup>18</sup> Agali mbira Ngode Datagaliwabehanda ibu olayangi dongone podo mabubi heneyagua ibugua ogoni mo ereba holene nga mitangi bulene nawi. Agali mende Ngode Datagaliwabehanda ibu olayangi dongone podo mabu nabi heneyagua ibu dongone podo mabu bilo mitangi bulene nawi. <sup>19</sup> Dongone podo mabu bulenebi nabulenebi galone ndogo galoneore ogo. Ngode Datagaliwabehanda, Bilimu, lo winirudagua bulene nga. ✧ <sup>20</sup> Ngode Datagaliwabehanda tí olayangi bialu harimidagua áyu nde bialu holene nga. <sup>21</sup> Ngode Datagaliwabehanda í olayangi garabaya biabe ale bia haga hene hariyagua nde genda nahabe. Anigo golope holene henge ngane hondo keyagua nde golope helabe. <sup>22</sup> Mbirali garabaya biabe ale bia haga howa Anduane Homogohanda ibu olayago áyu ibu Anduane Homogonaga golope ho helene kagoni. Ogonidagua mbirali garabaya biabe ale nabi hene howa Kerisohanda ibu olayago ibu Kerisonaga garabaya biabe ale bia haga ka. ✧ <sup>23</sup> Ngode Datagaliwabehanda tí ibunaga halimulo yolo timbuniore binigo agalinaga garabaya biabe ale bia haga nahalimu. ✧ <sup>24</sup> Hamene mbaliniru-o Ngode Datagaliwabehanda tí olayangi hangu hangu howa bialu harimidagua Ngode Datagaliwabela ho gimbu bu howa ogonidagua bialu holene nga.

*Wali agali dabu nabirinubi wali dalorubi bulene ngago ogo*

<sup>25</sup> Ai wali agali dabu nabini karunaga te larimiyago laro. Anduane Homogohanda íhondo, Ogodagua bilo lamibe, lalu mbira í nalangi. Anduane Homogo ibugua í dara halu biamogo biyagome í mini bilinahe howa mitangi bidogobi langero. ✧

<sup>26</sup> Genda timbuniore yulene áyu ngago mitangi bialu mbirali ibu áyu kagobi hayagua karulape mitangi bido. <sup>27</sup> Í one bere keyagua dugule manda nabibe. Í wali dabu nabi igiri keyagua wali dabu bule tai nabibe. <sup>28</sup> O ndo ina wali dabu biriyagua kagua ndo

✧ 7:15: Lm 12.18, 14.19, Hi 12.14 ✧ 7:16: 1 Pi 3.1 ✧ 7:17: 1 Ko 4.17, 7.20, 7.24 ✧ 7:19: Yo 15.14, Lm 2.25, Ga 5.6, 6.15 ✧ 7:22: Yo 8.36, Ga 5.13, Eb 6.6, Pm 16, 1 Pi 2.16 ✧ 7:23: 1 Ko 6.20, 1 Pi 1.18-19 ✧ 7:25: 1 Ko 7.6, 7.10, 7.40, 2 Ko 8.8-10, 1 Ti 1.12-13, 1.16

biri. Wandari mbira agali nape bedago agali piyagua ibubi kagua biya ndo. Wali agali dabu bu karu genda yu halu kadagua tí genda urunibi yu halimulo hame nale ko.✧

<sup>29</sup> Hamene mbaliniru-o ina bi larugoni irane ogo. Áyu horo tumagiore ngago manda bialu ogoningi agalime wali dabu bu kamiru ti dabu nabini karu ale holene nga. <sup>30</sup> Dugu bialu karume dara nahe karu ale holene nga. Oba halu karume turu nahe karu ale holene nga. Mbirale tara tara yolome muwa yu karume mbirale nayi hagadagua holene nga.✧ <sup>31</sup> Dindi mana bialu karume mana ogoni mo tene nahe holene nga. Irane dindi mana áyu bialu karuni wiaabo nahe ereba holebira.✧

<sup>32</sup> Tí mini burugu nale halimulo hamelo kogoni. Igiri wali dabu nabi kagome Anduane Homogo mo turu holeibunaga biabe hangu bule mitangi biaga ka. <sup>33</sup> Agali wali dabubi kagome ibu one mo turu hole dindi mana mitangi timbuni biaga ka. <sup>34</sup> Anigo ibu mini kira wuwa biaga ka. Wandari mbira agali nape bedagobi wandari agalila nahene bedagobi ibu tinginibi minibi loma bia ho biruwa Anduane Homogonaga biabe bulene hangu mitangi biaga beda. Wali mbira agali pu bedago ibu agalini mo turu hole dindi mana mitangi timbuni biaga beda.✧

<sup>35</sup> Bi ogoni larogo ina tí mo hangai halu ndo tí biamogo bua howa lalu kogoni. Tígua mana tigabibi bayale bulene ngagobi bialu mini tale nabi tíni Anduane Homogohondo loma bia ho howa ibunaga biabe hangu bialu halimulo hamelo kogoni.

<sup>36</sup> Wandari igiribi libu lawini howa abale dabu nabule manda bu karia igiri ibugua ibunaga lawinihondo mitangi tigatiga ndo bialu ibu dimagoli halu dabu bulene nga manda biyagua o karulape libu dabu bilo. Dabu bulenego ko ndo. <sup>37</sup> Anigo igiri mendeme ibuni miniha mitangi bialu mini bilinahe howa dimagoli nahe ibunaga mini bayuwa haru halu wandari ogoni dabu nabi hole manda biyagua nde ogoni bayale dege. <sup>38</sup> Ogonigo igiri mbiragome lawini dabu biyagua ibu bayale bira. Igiri mendegome ibu lawini dabu nabi wahowa daloali hole manda biyagua ibu bayaleore bira.

<sup>39</sup> Wali mbira ibu agalini nahome kayagua wali ogonime agalini wahalu agali mende polene nawi. Ibu agalini homaragola agali mende poa biyagua nde polene karulape nga. Ta nabi polene nga lalu ndo laro. Wali o biago ibu Keriso hameigini kago hangu polene nga.✧ <sup>40</sup> Wali ogoni agali mende nape ibuni hangu birayagua ibu turu holebira. Bi ogoni larogo ini hangu mitangi bialu laro. Anigo bi o larogoni Ngode Datagaliwabe Dinini i heba howa laro mitangi bu ko.✧

## 8

### *Mbirale bi pupu wule gime wabiniruhondo tomo miaganego te ogo*

<sup>1</sup> Mbirale bi pupu wule gime wabiniruhondo tomo miaganego te larimiyagonaga ladai bero. Ina bibahende manda bulene yu kama laganego henene larimi. Anigo manda bulene ogonime mbirali mine holene mo anda haga nga. Gubalini holleneme ani biaga ndo biamogo bia holene mo anda haga nga.✧ <sup>2</sup> Mbiralime lalu, i manda biai ho kogoni, layagua ibu manda biai nahe wene dege manda bialu kagoni.✧ <sup>3</sup> Mbirali ibugua Ngode Datagaliwabehondo gubalini ho kayagua ogoni ibu Ngode Datagaliwabehanda manda bu ka.✧

<sup>4</sup> Anigo mbirale bi pupu wule gime wabiniruhondo tomo minigo nolene ngabe be nanolene ngabe manda bimija laro. Mbirale bi pupu wule wabini uruni holene nahe nga manda bidama. Ngode Datagaliwabe mbiraore hangu holenehe kago manda bu kama.✧ <sup>5</sup> Wali agali marume hari daligaha dindihabi haga karuhondo bi pupu wiagarubi tinaga anduanerubi dewaore ka lagagoyu <sup>6</sup> iname manda bialu inanenaga

✧ **7:28:** 1 Ko 7.38 ✧ **7:30:** Lm 13.11 ✧ **7:31:** Iba 39.6, Ya 1.10, 4.14, 1 Pi 1.24, 1 Yo 2.17 ✧ **7:34:** Lg 10.40  
 ✧ **7:39:** Lm 7.2-3, 2 Ko 6.14 ✧ **7:40:** 1 Ko 7.25, 1 Te 4.8 ✧ **8:1:** Ab 15.20, 15.29, Lm 14.3, 14.10, 14.14, 1 Ko 10.19  
 ✧ **8:2:** 1 Ko 13.8-9, 13.12, Ga 6.3, 1 Ti 6.4 ✧ **8:3:** Nah 1.7, Md 7.23, Ga 4.9 ✧ **8:4:** Man 4.35, 4.39, 6.4, Ais 41.24, 1 Ko 10.19, Ga 4.8, Eb 4.6, 1 Ti 2.5



Ngode Datagaliwabe mbiraore hangu kago ibu inanaga Aba ka manda bidama. Ibugua bibahendeore wabini howa ina ibunaga wali agali kamagoni. Anduane Homogo mbiraore hangu Yasu Keriso ibu ka. Keriso togoni howa Ngode Datagaliwabe bibahendeore wabinigo inabi Kerisoni howa kamagoni.✧

<sup>7</sup> Wali agali bibahendeme bi henene ogoni manda nabi ka. Marume ala mbirale bi pupu wule wabiniru mitangi timbuni biaga henego áyubi tigua tomo naragola tomo ogoni mbirale bi pupu wule wabinirunaga mitangi bialu naga biagadalo manda biaga ka. Ani manda bialu tinaga miniha hongo nahe howa tomo ogonime ti mo ko hayadalo manda biaga ka.✧ <sup>8</sup> Ina Ngode Datagaliwabela mini mbiraore hole tomo naramagome mo mbiraore holebira ndo. Tomo nane haramagome Ngode Datagaliwabe deni ina ko holeberama ndo. Tomo naramagomebi ina Ngode Datagaliwabe deni bayale holeberama ndo.✧

<sup>9</sup> Ogonigo tíni bua biradagua bibehego tigua Keriso hameigini hongo nahe karu ko mo bia holigo dege de hondowa halimu.✧ <sup>10</sup> Mana ogoni manda bulene yido larigo í mbirale bi pupu wule wabinigonaga andaha biruwa tomo nalu bederia Keriso hameigini mbirali ibu miniha hongo nahe kagome í narego de handayagua mbirale bi pupu wule wabinigohondo tomo minigonaga narego ibubi nelo mo na haregoni ndobe. <sup>11</sup> Anigo mbirali ogoni miniha hongo nahe kago ina manda bido larigome í hamene ogoninaga Keriso ibugua homa henego ina mo pila holebere.✧ <sup>12</sup> Ogonidagua biriyagua ina Keriso hameiginihondo ko bialu tinaga miniha hongo nahe kago mo tandaga haregome Kerisohondobi ko beregoni. <sup>13</sup> Anigo ina tomo narogome í hamene mbaliniru ko mo bia habeheyagua ina nogo mbirini lone nanolebero. Í hamene mbaliniru ko bilo mo bia holene tene í naholeberoore.✧

## 9

### *Abosolo agalirume bibehebi nabibehebi nga lenego ogo*

<sup>1</sup> Ina ini bua biradagua bibehe ndo kobe. Í abosolo agali ndo kobe. Ina inanaga Anduane Homogo Yasu deme handa nabiruyabe. Anduane Homogonaga biabe bialu harugome tí Keriso hameigini kamigoni ndobe.✧ <sup>2</sup> Wali agali marume lalu, Polo ibu abosolo agali ndo ka, layaguabi tigua ani nalabeheore kamigoni. Tigua Anduane Homogoha howa holene yu kamigome í abosolo agaliore ka lalu walia halu kami.✧

<sup>3</sup> Wali agali marume í guraragola ina bi ogodagua lalu ladai biruli. <sup>4</sup> Ina biabe bialu kogonaga tomobi ibabi noliya í ngulene nga ndobe.✧ <sup>5</sup> Abosolo agali marubi Anduane Homogonaga hamenerubi Pidabi ti biagadagua ibi ibaga bialu howa Keriso hamewane í one bedoyagua ibu í heba ibaga bialu polene nga ndobe. <sup>6</sup> Ani bulene ngabe be Banabasa iya tomo nalu holenenaga biabe iyane dege bulene ngabe. <sup>7</sup> Ami agali yolo nami howa biabe biaga mbirali kabe. Mbiralime pu mbira lini daga mini gerebi ibuni hengenagonaga lini nanagane mbirali kabe. Mbiralime nogo bulumaga hinuwa andu iba hambu nanagane mbirali kabe.✧

<sup>8</sup> Bi o langirugoni lairi hole hangu ndo larogoni. Mana lo winigome ani lo nga. <sup>9</sup> Mosese heneyangi Mana lowini ngago ogo, Widi gandulo winirunaga lini hondo ibira ibira bilo nogo bulumaga geme hangedama pelo haru pialu howa nogo bulumaganaga ne hangane hubua bulene nawi, lo nga. Ogonigo Ngode Datagaliwabehanda nogo bulumaga mitangi bialu lo winibe✧ <sup>10</sup> be ina mitangi bialu lo winibe. Ibugua inaore mitangi bialu lo ngago ndobe. Agali mbira ibu widi hangaga kagobi mende ibu widi gandulaga kagobi libugua biabe ogoni bialu howa tomo mo tale bulene tu haragola

✧ **8:6:** Mal 2.10, Yo 1.3, Ab 17.28, Lm 11.36, 1 Ko 12.6, Eb 4.5-6, Pb 2.11    ✧ **8:7:** Lm 14.14, 14.23, 1 Ko 10.28-29  
 ✧ **8:8:** Lm 14.17    ✧ **8:9:** Lm 14.13-15, 14.20, Ga 5.13    ✧ **8:11:** Lm 14.15-20    ✧ **8:13:** Lm 14.21, 2 Ko 11.29  
 ✧ **9:1:** Ab 9.3, 9.15-17, 18.9, 26.16, 1 Ko 15.8, 2 Ko 12.12, Ga 2.7-8    ✧ **9:2:** 2 Ko 3.2-3    ✧ **9:4:** Lg 10.8, 1 Ko 9.13-14  
 ✧ **9:7:** Man 20.6, 2 Ko 10.4, 1 Ti 1.18, 1 Pi 5.2    ✧ **9:9:** Man 25.4, 1 Ti 5.18



libunaga talebu wia holebira lowa mini dunu bia howa holene nga. ✧ <sup>11</sup> Iname dinini-naga egene tíha polarimago tígua inahondo tingininaga tomo karulape ngibehe ndobe. ✧ <sup>12</sup> Marume tíha howa ani ngulene nga manda bu kayagua iname nde tíhondo, Ngi, lolene irane timbuniore nga manda bu kama.

Ina ani manda bu howa nale harimagoni. Iname Kerisonaga Bi Mana Debene lamulenenaga hariga hangai holilono ina harugo lowa hongo halu biabe bialu haramali. ✧

<sup>13</sup> Agali Anduane Homogonaga andaha biabe biagaru tigua Anduane Homogonaga anda ogoniha howa tomo miaga manda bidamigoni. Wali agalinaga mbirale bo lomabu mulene dabuni bo mialu karu tigua mbirale bo miyaru tale bialu howa tini nolene mo ngelaga ka manda bu kami ndobe. ✧ <sup>14</sup> Ogonidagua Anduane Homogohanda lo wialu lalu, Bi mana debene lamiaga karume tinaga tingini haru holene go biabe ogoniha howa mulene nga, lowini. ✧

<sup>15</sup> Ina o laruruni mbira i yu haru lalu ndo larugoni. Ina beba o gili berogoni tígua ihondo mbira ngilimulo dano bialu ndo gili bero. Ogonidagua nabulego i homolene ala hamelo ko. Inaga miniha turu holene bayale ogoni marume mo galone ndo helo henge namuleberoore. ✧ <sup>16</sup> Ina bi mana debene lamiruligonaga miniha ku lolene irane nawi lo manda bido. Bi mana debene lamulenenaga biabe buliya ihondo nginigo. Bi mana debene ogoni nalami haruyagua i miniha genda ho holebero. ✧ <sup>17</sup> Ina biabe berogoni bule ini dabaluni bini bialu koyagua yolo ngi labehe kogoni. Aguani ndo. Biabe bulene winidagua buliya Ngode Datagaliwabehanda ihondo, Bia, lalu ngiyago bialu kogoni. ✧ <sup>18</sup> Ina ani berogonaga yolo agi mirulibe. Bi Mana Debene lamulene go galone gibiore yolo ina ngi labehe howa ngi nale bi mana debene lamerogoni yolo ogoni laruli. ✧

<sup>19</sup> Mbiralinaga garabaya biabe ale bia haga ndo i agali dariba nahe ko. Aguani howa wali agali dewaore ta nabi Yasu Kerisohondo mini mbiraore wilo i wali agali bibahendenaga garabaya biabe ale bia haga hole ini harogoni. ✧ <sup>20</sup> I Yu wali agali heba howa ti Yasu Kerisohondo mini mbiraore wilo ti hagadagua haruli. Mosese heneyangi Mana lowini ngago i mo tene nahaga howa ina wali agali maru bi lowini ogoni mo tene ho haga karu heba howa ti Yasu Kerisohondo mini mbiraore wilo ti hagadagua haruli. ✧ <sup>21</sup> Ogonidagua Yu wali agali ndo tara tara Yualinaga Mana lowini ngago mitangi nabi karu heba howa ina ti Yasu Kerisohondo mini mbiraore wilo ti hagadagua haruli. Bi larogoni Ngode Datagaliwabenaga mana lo winigo waharuli lalu ndo ina Kerisohanda mana lo winidagua biai haruli. ✧ <sup>22</sup> Keriso hameigini mini hongo nahe karu heba howa ti Yasu Kerisohondo mini mbiraore wilo ti hongo nahe hagadagua haruli. Ogonigo ina wali agali ta nabi bibahendehondo bialu holene ngadagua bialu ti marume Yasu Kerisohondo mini mbiraore wilo ina biruligome walia haruli. ✧

<sup>23</sup> Uruni bibahende biai haruligo bi mana debene hangu mitangi bialu biruli. Wali agali marubi ibi ina bi mana debene ogoniha howa turu holene yu holenaga biruli. <sup>24</sup> Gerai larangi bibahende gerai lararu mbiraore hangume bolangua halu yolo miagago mandaore bu kamigoni. Anigo tí hangu hangu howa bolangua halu yolo mule tigatiga geraiore lalu halimu. ✧ <sup>25</sup> Gerai lagane bibahenderume gerai lole manda manda bialu howa ibu minibi tinginibi hongo helo lowa bialu haga. Bolangua howa ereba holenenaga yolo mule manda biaga. Iname ani ndogo haabobo holenenaga yolo karulamija beramagoni. ✧ <sup>26</sup> Irane ogoninaga ina gerai lamaro bulene ngagoria hondo yalu tigatigaore gerai lalu piruli. Ogonidagua ina gime badene biaga ale

✧ 9:10: 2 Ti 2.6 ✧ 9:11: Lm 15.27, Ga 6.6 ✧ 9:12: Ab 20.33-35, 1 Ko 9.15, 9.18, 13.7, 2 Ko 11.7-9, 11.12 ✧ 9:13: LBM 6.16, 6.26, Dag 18.8, 18.31, Man 10.9, 18.1 ✧ 9:14: Md 10.10, Lg 10.7, Ga 6.6, 1 Ti 5.17 ✧ 9:15: Ab 18.3, 20.34, 2 Ko 11.10, 1 Te 2.9 ✧ 9:16: Yar 20.9 ✧ 9:17: 1 Ko 3.8, 3.14, 4.1, Ga 2.7, Kl 1.25 ✧ 9:18: 1 Ko 7.31, 10.33, 2 Ko 4.5 ✧ 9:19: Md 18.15, 20.26-27, Ga 5.13, 1 Pi 3.1 ✧ 9:20: Ab 16.3, 18.18, 21.20-26 ✧ 9:21: Lm 2.12-14, 1 Ko 7.22, Ga 2.3, 3.2, 5.13 ✧ 9:22: Lm 11.14, 15.1, 1 Ko 10.33, 2 Ko 11.29 ✧ 9:24: Ga 5.7, Pb 2.16, 3.14, 2 Ti 4.7, Hi 12.1 ✧ 9:25: Eb 6.12, Pb 3.14, 2 Ti 2.4-5, 4.8, Ya 1.12, 1 Pi 1.4, 5.4, Mo 2.10

howa bame bope naharuli. <sup>27</sup> Ina inaga tingini haru hai howa baruli. Ani biruligo irane ina wali agali maru Yasu Kerisohondo mini mbiraore wilo mana lamialu kogoni Ngode Datagaliwabehanda ihondo, í bolangua nahedago yolo nangule, loligonaga bialu kogoni.✠

## 10

### *Mbirale bi pupu wule gime wabiniru mitangi bulene nawi ledago ogo*

<sup>1</sup> I hamene mbaliniru-o ina mamalime Mosese talima peneru tigua binigo te ogoni tigua mitangi bilimulo hamelo kogoni. Beralibame ti bibahende haru penegobi iba solowara mini Iba Daramabi bereagoha bayuwa haru penegobi mitangi bilimu.✠ <sup>2</sup> Ti bibahende beralibahabi iba solowarahabi Mosesenaga talima piaga howa baboraya ale bialu pene. <sup>3</sup> Ti bibahendeme tomo mbiraore Ngode Datagaliwabe Dinini ibugua minigo ogoni dege nalu✠ <sup>4</sup> ibabi mbiraore ibugua minigo ogoni dege nalu hene. Ngode Datagaliwabe Dinininaga ege tole ti heba penego iba ogoniha howa minigo tigua nalu hene. Ege tole ogoni Keriso ibuni henego ka.✠ <sup>5</sup> Ani bialu howa Ngode Datagaliwabehanda wali agali dewalime mana nakarulape bialu heago hondowa turu nahe howa tinaga tingini dindi ko yobi homo paya paya bu wilene.✠

<sup>6-7</sup> O binidaruni bibahende iname manda buwa holomayanaga bini. Iname wali agali uruni tigua mini ko tara wialu dimagoli hayadaguabi marume mbirale gime wabiniruhondo bi pupu wiyadaguabi mbira bulemine nabimiyana bini. Anduane Homogonaga mbugani ledadagua ogo, Wali agalirume biru ibira howa tomo ibabi nalu heyuwa dawé halu wali agali kayu bigibigi bialu hene, lalu gilibu nga.✠✠ <sup>8</sup> Iname wali agali kayu nabimiya. Ti marume ani bialu hearia horo mbirani hangu wali agali daosini dege pira kirani tebira (23,000) homai helene.✠ <sup>9</sup> Anduane Homogohanda inahondo agi birabe hondolenaga iname ko bulene nawi. Ti marume ani bialu hearia puyame hayalu homelai hene.✠ <sup>10</sup> Iname Ngode Datagaliwabe la hirulene nawiore. Ti marume Ngode Datagaliwabe la hiralu hearia Mo Homa Hagane Dahuliyalime ti bo paya bini.✠

<sup>11</sup> Tihondo ani binigo te ogoni ina horo hamaro bulene tu kawareha kamarume nabulumayanaga Anduane Homogonaga mbugani gilibu winigo nga.✠

<sup>12</sup> Mbiralime ibu hongohe ko lo manda bu kago ibuni piloligo de hondo holene nga. <sup>13</sup> Ko mo bia holene bibahende ti kamiria ibiragoni wali agali bibahende ti karia ogonibi dege ibaga. Anigo Ngode Datagaliwabe ibu buleore lowinigo biaga kago ibugua lalu, Ko ngagome í ko mo bia hole ngagola ko nabibelo ina í biamogo bulebero, leda. Ani bialu ibida polene hariga walia holebira.✠

<sup>14</sup> Anigo inaga nenege turubiruore-o mbirale gime wabiniruhondo bi pupu wiaga ngagoria ha para nahalimu.✠ <sup>15</sup> Ti wali agali miniwi kamigo manda buwa ina tihondo bi langerogo tini dabalimu. <sup>16</sup> Iba be Ngode Datagaliwabehondo turu halu kaj laramaligo ina iba be ogoniha howa naramangi Kerisonaga daramaha howa ina Keriso heba mo mbiraore haramali ndobe. Mberedibi gaibu бага beramaligo naramangi Kerisonaga tinginiha howa ina mo mbiraore haramali ndobe.✠ <sup>17</sup> Mberedi homane mbiraore hangugo ina dewali howa mberedi homane mbiraore ogoniha naramaligo inabi dewali howa homane mbiraore kama.✠

✠ **9:27:** Lm 6.18-19, 8.13, 13.14, 2 Ko 13.5-6, Kl 3.5 ✠ **10:1:** Har 13.21-22, 14.22-29, Dag 9.18, Neh 9.12, Iba 78.13  
 ✠ **10:3:** Har 16.35, Neh 9.15, 9.20, Iba 78.24 ✠ **10:4:** Iba 78.15 ✠ **10:5:** Dag 14.16, 14.29-30, Iba 106.26, Hi 3.17, Yu 5 ✠ **10:6-7:** Dag 11.4, 11.34, Iba 106.14, 1 Ko 10.11 ✠ **10:6-7:** Har 32.6, 1 Ko 10.14 ✠ **10:8:** Dag 25.1-18, Iba 106.29, Mo 2.14 ✠ **10:9:** Har 17.2, 17.7, Dag 21.5-6, Man 6.16 ✠ **10:10:** Har 16.2, Dag 14.2, 14.29, 14.37, 16.41-49, 1 Bit 21.15, Hi 3.11, 3.17 ✠ **10:11:** Lm 15.4, 1 Ko 10.6, Pb 4.5, Hi 10.25, 10.37, 1 Pi 4.7, 1 Yo 2.18 ✠ **10:13:** Yar 29.11, 1 Ko 1.9, 2 Pi 2.9 ✠ **10:14:** 2 Ko 6.17, 1 Yo 5.21 ✠ **10:16:** Md 26.26-28, Mg 14.22-24, Lg 22.19-20, Ab 2.42, 2.46  
 ✠ **10:17:** Lm 12.5, 1 Ko 12.27, Eb 4.16

18 Isaraele wali agali tigua biaganego mitangi bilimu. Mbirale mbira mbira Ngode Datagaliwabehondo loma bialu bo minigo nagarume tigua bo lomabu mulene dabunaga mana biagadagua bialu Ngode Datagaliwabe heba mini mbiraore ho haga ndobe.✧ 19 Ina larogoni ogo ale laralo manda bilimu. Mbirale bi pupu wule gime wabini ogoni galonebe be mbirale ogonihondo bo mulenego galonebe laro.✧ 20 Ani ndoore laro. Bi larogoni irane ogo. Ngode Datagaliwabe mitangi nabiaga karume bo lomabu mulene dabuni mbirale mbira bo miraru Ngode Datagaliwabehondo ndo damahondo bo miaga. Anigo tí kamiru damala mo mbiraore halimulo i hame nale ko.✧ 21 Tigua Anduane Homogonaga iba beha howabi damanaga iba beha howabi kirabaliha howa nabe nahe kami. Anduane Homogonaga dagiani howabi damanaga dagiani howabi kirabalinaga tomo ngago nabe nahe kami.✧ 22 Anduane Homogohanda inahondo keba helo iname mo keba hoa kamabe. Ibu hongohe kagobi ndo ina hongo timbuniorehe kamalo manda bu kamabe.✧

23 Marume lalu, Iname ta nabi bulene ngaru biai habehe kamagoni, laga. E ani bibehego bulene bibahende ngaru bayale hangu ndo nga. Tigua, Iname ta nabi bulene ngaru biai habehe kama, laramiligo nde bulene bibahende ngarunime ina biamogo biai haga ndo nga.✧ 24 Mbiralime ibuni hangu bayale hole mitangi bulene nawi wali agali maru bayale helo bule mitangi bulene nga.✧

25 Nogo mbirini magedini minigo nalu howa i miniha damahondo bo minidalo manda nabi hariyagua ani tawebe nale howa nolene nga. 26 Anigo Anduane Homogonaga mbugani lo ngadagua ogo, Dindibi dindini ngaru bibahende bi Anduane Homogo ibunaga nga, lalu gilibu nga.✧

27 Mbiralime Ngode Datagaliwabehondo mini mbiraore nawi kagome ihondo lalu, I andaga tomo nabiya ibabe, layagua pole manda biriyagua ibugua tomo ngiragola i miniha damahondo bo minidalo manda nabi howa ani tawebe nale nolene nga.✧ 28-29 Ani bialu keria mbiralime lalu, Tomo ogoni mbirale bi pupu wule gime wabinigohondo mininaga nga, langiyagua nanabe. Ogoni nane waharegoni i miniha damahondo bo minidalo manda birigome ndo agali biago ibugua manda buwa langiyagome ibubi ibu miniha manda biyagonagabi nane wahabe.

Ani biagago mbiralime lalu, Agali mende ibunaga miniha mitangi biragome ina bua harogo mo hangai haganego irane agibe.✧✧ 30 Ina Ngode Datagaliwabehondo tomo ngiragonaga turu halu kai laruyagua tomo o ngiyagonaga kai larugo mendealime, Nakarulape bialu ka, lalu i gurayagua irane agibe.✧

31 Ani lolebirago tigua bulenegobi tomo nolenegobi iba nolenegobi ta nabi bibahende beramigo bialu howa Ngode Datagaliwabenaga mini yaraga hole hangu mitangi bialu bilimu.✧ 32 Tigua Yu wali agali karubi Yu wali agali ndo tara tara karubi Keriso hameigini karubi ti bibahende mo pila nahe bayuwa bialu halimu.✧ 33 Ina birulidagua tiguabi bialu halimu. Ina bibahende biruligo bialu howa wali agali ta nabi biamogo bulene nga mitangi bialu biruli. Ininaga holene bayale helo mitangi bialu ndo tinaga holene bayale helo mitangi bialu tigua Ngode Datagaliwabenaga pele mulene yu helonaga biruli.✧

## 11

1 Kerisohanda biagadagua ina biruligo ina birulidagua tigua bilimu.✧

*Wali agali Ngode Datagaliwabe mitangi bialu lotu lole ngoai ho biruwa tinaga hagua yi holenebi naholenebi ngago ogo*

✧ 10:18: LBM 7.6, 7.15 ✧ 10:19: 1 Ko 8.4 ✧ 10:20: Man 32.17, Iba 106.37, Mo 9.20 ✧ 10:21: Man 32.38, 2 Ko 6.15-16 ✧ 10:22: Man 32.21, Ese 22.14 ✧ 10:23: 1 Ko 6.12 ✧ 10:24: Lm 15.1-2, 1 Ko 13.5, Pb 2.4, 2.21 ✧ 10:26: Har 19.5, Man 10.14, Iba 24.1 ✧ 10:27: Lg 10.8 ✧ 10:28-29: 1 Ko 8.7 ✧ 10:28-29: Lm 14.16 ✧ 10:30: Lm 14.6, 1 Ti 4.3-4 ✧ 10:31: Kl 3.17, 1 Pi 4.11 ✧ 10:32: Lm 14.13, 1 Ko 8.13, 2 Ko 6.3, 1 Ti 3.5 ✧ 10:33: Lm 15.2, 1 Ko 9.20-22, 10.24 ✧ 11:1: 1 Ko 4.16, Eb 5.1, Pb 3.17, 2 Te 3.9

<sup>2</sup> Tígua ì mitangi biaabo halu mana lagane wiyaru ìna langirugodagua bialu kamigonaga ìna tìnaga mini yaraga halu kogoni. <sup>3</sup> Anigo galone mbira manda bu halimulo hamelo kogo ogo. Agali bibahende karunaga haguane Keriso ibu ka. Wali onenenaga haguane agalini ibu ka. Kerisonaga haguane Ngode Datagaliwabe ibu ka.✠ <sup>4</sup> Ogonigo wali agali Ngode Datagaliwabe mitangi bialu lotu lole ngoai ho biruwa agali mbirame ibunaga hagua yi howa Ngode Datagaliwabehondo bi layaguabi ibunaga bi mana latagi hayaguabi ibu Keriso mo taga haga ka. <sup>5</sup> Ogonidagua tí Ngode Datagaliwabe mitangi bialu lotu lole ngoai ho biruwa wali mbirame ibunaga hagua yi nahe howa Ngode Datagaliwabehondo bi layaguabi ibunaga bi mana latagi hayaguabi ibu agalini mo taga haga beda. Wali ani biragome ibu wali mende mandari podo wahaihe bedagobi dege beda. <sup>6</sup> Wali biago ibu hagua yi naheyagua ibunaga mandari kagobi podo wahai habehe beda. Anigo wali mandari podo wahai howa birulene tagabiorego ibu hagua yi ho birulene nga. <sup>7</sup> Agali ibu Ngode Datagaliwabe kagobi helo wabu helenego ibugua Ngode Datagaliwabenaga wá holene walia hatagi hagago ibunaga hagua yi holene nawi. Wali ibugua agalinaga wá holene walia hatagi haga beda.✠ <sup>8</sup> Irane ogoninaga Ngode Datagaliwabehanda waliha howa agali wabini ndo. Ibugua agaliha howa wali wabini.✠✠ <sup>9</sup> Mendebi ngago Ngode Datagaliwabehanda wali mitangi bialu agalime ibu biamogo bilo agali wabini ndo. Ibugua agali mitangi bialu walime ibu biamogo bilo wali wabini. <sup>10</sup> Ogoninagabi dahuliyali karunagabi mitangi bialu walime ibunaga agalini haguane ka walia halu ibunaga hagua yi holene nga. <sup>11</sup> Ina Anduane Homogoha ho gimbu bu howa wali ibuni hangu birabe nahe ogonidagua agali ibunibi hangu habe nahe. <sup>12</sup> Ngode Datagaliwabehanda agaliha howa wali wabinigodagua agali ibu walime taba hanaga. Bibahendeorenaga tene Ngode Datagaliwabe ibuni kagoni.

<sup>13</sup> Tí Ngode Datagaliwabe mitangi bialu lotu lole ngoai ho biruwa walime ibunaga hagua yi nahe biruwa Ngode Datagaliwabehondo bi lolene karulape be nakarulapebe tìni dabalimu. <sup>14</sup> Ina wali agali bibahendenaga mana ala biagane winigo ngarume ina agi walia hagabe. Agali ibunaga mandari lu helolene nakarulapeore walia haga nga. <sup>15</sup> Wali ibunaga mandari lu helolenego ibunaga yári bayaleore ogoni. Wali ibunaga hagua yi helonaga Ngode Datagaliwabehanda ibuhondo mandari lu minigo. <sup>16</sup> Ina bi o larogoninaga mbiralime lai loa hayagua ìna ladai berogo ogo. Inabi Keriso hameigini bibahende haga karubi ina bibahendeme Ngode Datagaliwabe mitangi bialu lotu lole ngoai ho biruwa mana tara ndo mbiraore ogoni beramali laro.

*Anduane Homogonaga tomo nolene mana ngago ogo  
(Madiu 26.26-29, Maga 14.22-25, Lugu 22.14-20)*

<sup>17</sup> Bulene nabulenebi languleberogo ìna tìnaga mini yaraga naholebero. Irane tí Ngode Datagaliwabe mitangi bialu lotu lole ngoai ho biruwa bayale bule hangu ndo tí ko dewa beremili. <sup>18</sup> Tí ngoai howa tìni talebu бага bialu haramili layago hale harugo bi ogoni henene dege layago ì manda bu ko.✠ <sup>19</sup> Tí talebu бага bialu kamigo irane marume mana tigabi yu karu mo pani hai helonaga tale bialu kami.✠ <sup>20</sup> Tí ngoai haramingi tígua Anduane Homogonaga tomo nolenaga ndo ngoai haramili. <sup>21</sup> Irane tígua nalu howa tìni hangu hangu naga naga bialu marume tomo nane garibilo berelowa marume waini iba timbuni nowa lulu yu haga kami. <sup>22</sup> Tìni andaga kamigoha howa tomobi ibabi nanabehe kamibe. Be tígua Keriso hameigini karuhondo handabe manga halu buru pale karubi mo taga hole manda buwa birimibe. Ogoninaga ìna tìhondo agi loliya manda bu kamibe. Ina tìnaga mini yaraga hoabe. Ina tìnaga mini yaraga holene nawi ndobe.✠

<sup>23</sup> Ogonigo bi mana abale tìhondo langirugoni Anduane Homogo ibugua ì langinigo ogo. Mbiraga mbirungi agalime Anduane Homogo Yasu nde layangi Yasuhanda

✠ **11:3:** Pig 3.16, 1 Ko 3.23, 15.27-28, Eb 5.23, 1 Pi 3.1, 3.5-6 ✠ **11:7:** Pig 1.26-27, Ya 3.9 ✠ **11:8:** 1 Ti 2.13 ✠ **11:8:** Pig 2.18-23 ✠ **11:18:** 1 Ko 1.10-12, 3.3 ✠ **11:19:** Man 13.3, 1 Yo 2.19 ✠ **11:22:** Ya 2.5-6



mberedi muwa<sup>✧</sup> 24 Ngode Datagaliwabehondo turu halu kai lowa mberedi ogoni gaibu бага бини. Gaibu бага bialu howa lalu, Inaga tingini ogonigo tí pele ngialu ngerogoni. Tígua ì mitangi bialu ani biaabo halimu, lene. 25 Mberedi miyadagua dege ibugua iba be mialu howa lalu, Iba be ogoniha habo nalolene bi gahenge lo winigo tene inaga daramaha ngagoni. Iba be ogoniha howa naramingi ì mitangi bialu nalimu, lene.<sup>✧</sup> 26 Tígua mberedibi iba be ogoniha bedagobi naramigome Anduane Homogo dai bilo tagi howa Yasuhanda inanaga homo aribia hene lalu mo walia haramili.<sup>✧</sup>

27 Anigo Anduane Homogonaga mberedibi iba be ogoniha bedagobi nalu howa mbi-ralime Yasuhanda pele ngialu ibunaga tingini nginigobe ibunaga darama pelenegobi mitangi nabi bame nope hayagua ko timbuniore bira.<sup>✧</sup> 28 Ala ìni agi bialu harube hangu hangu manda bimiya. Ani manda buwa mberedibi iba be ogoniha bedagobi nolene nga.<sup>✧</sup> 29 Mbiralime ani nalu howa irane Anduane Homogonaga tinginidalo manda nabi bame nope hayagua ibuni pani nole hariga tai bira. 30 Irane ogonidagua birimigome tí maru hongo nahe halu maru warago bo wialu maru homa bigi biyag-  
oni. 31 Ina ala agi bialu harimabe mitangi birimayagua Ngode Datagaliwabehanda inahondo, Nakarulape birimi, lolene nawulebira.<sup>✧</sup> 32 Ngode Datagaliwabehanda dindi mana biaga karuhondo, Tí nakarulape bialu harimigoni, lolene ngadagua inahondo nalolenaga Anduane Homogohanda ina birimagonaga áyu dabalú pani migi bialu ka.<sup>✧</sup>

33 Anigo inaga hamene mbaliniru-o ti Anduane Homogonaga tomo nole mandagi ngoai ho biruwa wali agali maru mitangi bialu ti haru mandagi nole hondo biralimu. 34 Tí ani ngoai ho biraramingi Ngode Datagaliwabehanda tíhondo, Nakarulape birimi, loligo mbirali ibu tomo garibilo kayagua ibuni andaga howa tomo ala nalu ibulene nga. Te maru larimigonaga ì eberongi mo tiga bulebero.

## 12

### *Ngode Datagaliwabe Dinini ibugua mugube tara tara bame ngiagane ngaru ogo*

1 Inaga hamene mbaliniru-o Ngode Datagaliwabe Dinini ibugua bame ngiagarunaga bi heneneore tígua bayuwa manda bilimulo hamelo kogoni. 2 Ngode Datagaliwabenaga mana manda nabi hemingi mbirale holene nahe bi pupu wule gime wabinirume tí haru pu tara haabo hayagola harimi.<sup>✧</sup> 3 Tígua manda bulene mbira ngago ogo, Ngode Datagaliwabenaga Dinini ibugua mbirali haru kagola o biagome Yasu mini lalu ha habe nahe holebira. Ogonidagua Ngode Datagaliwabe Dinini ibugua mbirali haru kagola ndo kayagua o biagome, Yasu ibu Anduane Homogo ka, nalabehe holebira.<sup>✧</sup>

4 Ngode Datagaliwabe Dinini mbiraore ogonime dege mugube tara tara bame ngiaga ka.<sup>✧✧</sup> 5 Biamogo bulene biabe tara tara ngago Anduane Homogo mbiraore ogoni hangunaga bia haga nga.<sup>✧</sup> 6 Biabe bulenenaga mugube tara tara ngago Ngode Datagaliwabe mbiraore hangu kagome biabe tara tara uruni bilo wali agali hangu hangu karunaga mugube tara tara mo ta haga ka. 7 Ibunaga Dinini ibu wali agaliha kago walia holenaga Ngode Datagaliwabehanda ti hangu hangu bayale helo miaga.<sup>✧</sup> 8 Dinini ogoni ibugua mbiralihondo mini gigabiwi howa mana lamialu holene miaga ka. Mendealihondo Dinini mbiraore ogonime dege manda bulenenaga bi lamialu holene miaga ka.<sup>✧</sup> 9 Ngode Datagaliwabe Dinini mbiraore ogonime dege mbiralihondo mini mbiraore hongo ho wulene mialu mendealihondo warago bo ngaru mo dabi holene hongo miaga ka.<sup>✧</sup> 10 Dinini ogoni ibugua mbiralihondo agalime nabiagane ale bilonaga

✧ 11:23: Md 26.26, Mg 14.22, Lg 22.19 ✧ 11:25: Har 24.6-8, Yar 31.31-34, Seg 9.11, Hi 8.8-13 ✧ 11:26: Yo 14.3, Ab 1.11, 1 Te 4.16, Mo 1.7 ✧ 11:27: Dag 9.10, 9.13, Yo 6.51, 6.63-64, Hi 10.29 ✧ 11:28: Md 26.22, 2 Ko 13.5, Ga 6.4 ✧ 11:31: Iba 33.5, 1 Yo 1.9 ✧ 11:32: Iba 94.12-13, Hi 12.5-6, 12.11 ✧ 12:2: Iba 115.5-7, Hab 2.18-19, 1 Ko 6.11, Eb 2.11-12, 1 Pi 4.3 ✧ 12:3: Md 16.17, Mg 9.39, 2 Ko 3.5, 1 Yo 4.2-3 ✧ 12:4: Eb 4.4, Hi 2.4, 1 Pi 4.10 ✧ 12:4: Lm 12.6-8 ✧ 12:5: Lm 12.6-8, Eb 4.11 ✧ 12:7: 1 Ko 14.26, Eb 4.7, 1 Pi 4.10-11 ✧ 12:8: 1 Ko 13.2, 2 Ko 8.7 ✧ 12:9: Md 17.19-20, 1 Ko 13.2, 2 Ko 4.13, Ya 5.14



hongo mialu mendealihondo Ngode Datagaliwabenaga bi mana lamulene mugube miaga ka. Tebonegome mugube tara tara midaruni hondowa ogo Ngode Datagaliwabe Dinini ibugua bira ogo dama ibugua bira lalu daba ki bulene mugube miaga ka. Ibugua mbiralihondo bi tara tara lelonaga mugube mialu mendealihondo bi tara tara larago hale howa ogoninaga irane garealo mulene mugube miaga ka. ✧ <sup>11</sup> Uruni bibahende Ngode Datagaliwabe Dinini mbiraore ogoni degeme biaga ka. Ibugua wali agali hangu hanguhondo mugube tara tara miagago ibuni mua biragohondo miaga ka. ✧

*Tingini mbiraoreni howa gebagene dewa bu karu ogo*

<sup>12</sup> Keriso ibu tingini mbiraore hangu ale howa ogoriani gebagene dewa wayida. Gebagene dewa tara tara uruni tingini mbiraore ogoniha hangu howa hatagi ka. ✧ <sup>13</sup> Ogonidagua Yu wali agali karubi Yuali ndo tara tara karubi garabaya biabe ale bia haga karubi nabini karubi ina bibahende tingini mbiraoreha holomaya Ngode Datagaliwabe Dinini mbiraore ogoni degeme ina baboraya bu helaya. Ani buwa Ngode Datagaliwabehanda ina bibahendehondo ibu Dinini mbiraore ogoni ina hangu hangunaga bu miniha helo ngiya. ✧

<sup>14</sup> Ngode Datagaliwabehanda tingini wabialu howa gebagene mbira hangu ndo dewa wabu helene. <sup>15</sup> Geme lalu, Irane i gi ndo kogodago i tingini aria mbira ndo kogoni, layagua aguani layagome ibu mo tingini aria ndo helonaga ndo laga. <sup>16</sup> Haleme lalu, Irane i de ndo kogodago i tingini aria mbira ndo kogoni, layagua aguani layagome ibu mo tingini aria ndo helonaga ndo laga. <sup>17</sup> Tingini homane mbiraoreme de dege kale hale agua holedabe. Ibu hale dege kale nga agua holedabe. <sup>18</sup> Ogonidagua ndo Ngode Datagaliwabe ibugua tingini mbiraoreni gebagene tara tara bibahende ibuni heloa biyagoria helene. ✧ <sup>19</sup> Gebagene mbiraore hangu kale nde tingini nakaleda. <sup>20</sup> Gebagene dewa karuninaga tingini homane mbiraore ka.

<sup>21</sup> Ani bidago deme lalu, i gila mbira bulene henge nawi, nalabehe. Haguamebi lalu, Gela mbira bulene henge nawi, nalabehe. <sup>22</sup> Ani ndo tingini gebagene maru heledaru hongo nahe mitangi bidamaru heba nahe howa ina bayale nahabehe holeberama. <sup>23</sup> Ani buwa tingini gebagene maru mitangi bidamaru uruni iname bayuwa hondo hara-mali. Ani buwa tingini gebagene maru de hondolene nawi manda buwa yi halu <sup>24</sup> maru baya burugule karu ani bulene nawi. Ngode Datagaliwabeibunime ina tingininaga gebagene maru galone ndodalo mitangi bidamaru mo galone halu tingini gebagene bibahende mo gimbu bu helene. <sup>25</sup> Anigo tinginini talebu baga nabi howa gebagene tara tara bibahenderume tini handaya hagahaga biaga ka. <sup>26</sup> Tingini gebagene mbiragome tandaga nayagua gebagene bibahende tandaga nai haga. Gebagene mbiranaga mini yaraga hayagua gebagene bibahende turu hai haga.

<sup>27</sup> Anigo ti bibahende Kerisonaga tingini kamigoni. Ani buwa ti hangu hangu howa tingini ogoninaga gebagene mbira mbira kami. ✧ <sup>28</sup> Anigo Ngode Datagaliwabehanda Keriso hameigini bibahende heleneru ti hangu hangu heloa biyagoria helene. Ala ibugua abosolo helalu mende bi mana latagi haga helalu tebone lawai haga helalu mane agalime nabiagane ale bilobi mahaore warago bo ngaru mo dabi helobi biamogo biagane helobi haru hagane helobi bi tara tara hale naheneru lelobi helaya. ✧ <sup>29</sup> Ti bibahende abosolo hangu ndo ka. Bibahende bi mana latagi haga hangu ndo ka. Bibahende lawai haga hangu ndo ka. Ti bibahende agalime nabiagane ale biagane hangu ndo ka. <sup>30</sup> Warago bo ngaru mo dabi hagane hangu ndo ka. Ti bi tara tara hale naheneru lagane hangu ndo ka. Ti bi tara tara lararunaga galone garealo miagane

✧ **12:10:** Ab 2.4, Lm 12.6, 1 Ko 14.5, 14.29, 1 Yo 4.1 ✧ **12:11:** Lm 12.4-8, 1 Ko 7.7, 2 Ko 10.13, Hi 2.4 ✧ **12:12:** Lm 12.4-5, 1 Ko 10.17, Ga 3.16, Eb 4.4, 4.16 ✧ **12:13:** Yo 6.63, Lm 6.5, Ga 3.28, Kl 3.11 ✧ **12:18:** Lm 12.3, 1 Ko 3.5, 12.11, 12.28 ✧ **12:27:** Lm 12.5, Eb 1.23, 5.30, Kl 1.24 ✧ **12:28:** Ab 13.1, Lm 12.6, Eb 2.20, 4.11-12

hangu ndo ka. Uruni bulenenaga hongo tini yu haga haga bu ka. <sup>31</sup> Mugube duniniore ngaru yule hame timbuniore lo halimu.

Uruni bulenenaga bayale gibiore bilimulo walia holebero.✠

## 13

### *Gubalini holene ngago ogo*

<sup>1</sup> Ina gubalini nahe howa wali agali tara taranaga bi laruyaguabi dahuliyalinaga bi laruyaguabi inaga bi bame mbelo ngilaḡo laganego alebi ga timbuni laganego alebi holebero. <sup>2</sup> Ogonidagua ina Ngode Datagaliwabe mana latagi holene mugube yu haruyaguabi manda bulene bibahende yai ho haruyaguabi Ngode Datagaliwabe manda ala mo pani nahe ngelenego bibahende manda biai ho koyaguabi hari wedaru ema bialu pelonaga mini mbiraore wulene yu koyaguabi uruni yu howa ina gubalini holeneore nayi koyagua i habane nabuleneore kogoni.✠ <sup>3</sup> Inaga mbirale bibahende ngoru tale bialu wali agalihondo miai haruyaguabi inaga tingini irame dai helo waharo laruyaguabi uruni gubalini howa ndoore biruyagua i mo bayale naholebira.✠

<sup>4</sup> Gubalini holene neme ema nabi hondo hagabi dara howa biamogo bia hagabi ka. Gubalini holene mendeali yidago i nayido agini henge nalagabi ibuni mini yaraga nahagabi mine nahagabi ka.✠ <sup>5</sup> Gubalini holene ogonime mana lehe nabiagabi habua nabiagabi abale kera nahagabi marume ibuhondo ko biyago mitangi bu wiaabo nahagabi ka.✠ <sup>6</sup> Gubalini holene mana ko birago hondowa turu nahe howa mana tiga tiga birago hondowa turu haga ka.✠ <sup>7</sup> Gubalini holene gendabi ngaru yu howa wahalu napiagabi ibunaga mini mbiraore wulenebi mini dunu biahe holenebi minime hibu laabo holenebi ereba nahaga nga.✠ <sup>8</sup> Gubalini holene wiaabore holebira. Ngode Datagaliwabe mana latagi holene yu karu lamaro bulebira. Bi tara tara lolene mugube mini yu karu lamaro bulebira. Manda timbuni bulene yu karu mo ereba holebira. <sup>9</sup> Ayu ina manda bulene mugube yu howa tigi mbira hangu manda bidama. Ngode Datagaliwabe mana latagi holene mugube yu howa iname tigi mbira hangu lalu kama. <sup>10</sup> Mbirale baya buruguleore ngago ibirangi tigi mbira yu harimaru ereba holebira.

<sup>11</sup> I igiri emene hewangi waneigini emeneme lalididagua lalu miniha mitangi biralidagua bialu mbirale bule manda biralidagua bialu harugoni. Ai ayu agali kogonigo waneigini emeneme biagadagua i nabi wahai haru. <sup>12</sup> Ayu dindini howa ina deme hendedamago iba waj auhe aleha handaredagua beramago. Awe dengui bayuwa handaya haga buleberama. Ayu tigi mbira hangu manda bidogo awe Ngode Datagaliwabe ibugua i manda biai ho kadagua inibi ibu manda biaiore holebero.✠

<sup>13</sup> Ani bilo tambu howa irane tebira ogo ngelo kamagoni. Uruni mbira mini mbiraore wulene mende mini dunu bia ho holene tebone gubalini holene ngelo kamagoni. Uruni bibahendenaga duniniore gubalini holene ngelo kama.✠

## 14

### *Ngode Datagaliwabe Dinini ibugua mugube bame ngirarunaga mana maru ngago ogo*

<sup>1</sup> Ogonigo tigua gubalini holene hongo howa tai bilimu. Ani buwa Ngode Datagaliwabe Dinini ibugua mugube bame ngiraru yule hamelo halimu. Ngode Datagaliwabenaga bi mana latagi holene mugube duniniore ogoni yule hamelo halimu.✠ <sup>2</sup> Mbiralime bi tara wali agalime hale nahene layagua ibugua bi laragoni wali agalime hale helo ndo Ngode Datagaliwabe hondo lamiaga ka. Ibugua bi henene lolene ala

✠ 12:31: 1 Ko 14.1 ✠ 13:2: Md 17.20, 21.21, Mg 11.23, Lg 17.6, 1 Ko 12.8-10, 12.28 ✠ 13:3: Md 6.2 ✠ 13:4: Min 10.12, 1 Pi 4.8 ✠ 13:5: 1 Ko 10.24, Pb 2.4 ✠ 13:6: Iba 10.3, Lm 1.32, 12.9, 2 Yo 4 ✠ 13:7: Lm 15.1, 1 Ko 9.12, Ga 6.2, 2 Ti 2.24, 1 Pi 4.8 ✠ 13:12: Md 18.10, 2 Ko 3.18, 5.7, Pb 3.12, Ya 1.23, 1 Yo 3.2 ✠ 13:13: 1 Te 1.3, 1 Yo 4.16 ✠ 14:1: 1 Ko 12.31, 14.39

la pani nahe ngelenego Ngode Datagaliwabe Dinininaga hongome laragoni. ✧ <sup>3</sup> Anigo maru Ngode Datagaliwabe bi mana wali agalihondo latagi haragome ti biamogo bilobi mo hongo helobi mo turu helobi latagi haga. <sup>4</sup> Mbirali bi tara hale nahene laga biagome bi larago ibuni hangu biamogo bilo laga. Anigo Ngode Datagaliwabe bi mana latagi halu kagome Keriso hameigini bibahende karu biamogo biaga.

<sup>5</sup> Ina tí bi tara hale nahene lalimulo hamelo kogoyu tí bibahendeme Ngode Datagaliwabe mana latagi holene mugubeore yu halimulo hame timbuni lo kogoni. Ngode Datagaliwabenaga bi mana latagi haga kago ibugua bi laragome Keriso hameigini karu manda biloore laga kago ibu duniniore ka. Anigo bi tara hale nahenego laga biago ibugua bi larago mendealime lo beregedalu agua lara lolene naheyagua Keriso hameigini karu bayuwa biamogo bilo ndo layagua ibugua bi larago dunini ndo holebira. ✧ <sup>6</sup> Hamene mbaliniru-o ogonidagua ina tí kamiria bi tara hale nahene lole ibiruyagua tí biamogo agua buliyadabe. Ngode Datagaliwabe handa ihondo walia hayago nalangiruyaguabi manda bulene mbira nalangiruyaguabi Ngode Datagaliwabe mana latagi holene naharuyaguabi mana mbira lawai naharuyaguabi ina tí biamogo nabibeheore.

<sup>7</sup> Pilipe alebi gawa alebi ngarume bi bayuwa taba nabi ngingia hangu layagua wali agalime iba gana ogo lara lalu ti agua manda bulebirabe. <sup>8</sup> Ami agalime mbelo biguli pu lalu bebe lalu galone ndonaga hangu layagua wai biaganeme wai bule manda manda agua bulebiradabe. <sup>9</sup> Ogonidagua tí kamirume bi tara hale nahenego lamirimiyagua marume agua laya lalu manda agua bilobe. Nde tígua bi larimiru puyabume yalu pelonaga larimi. <sup>10</sup> Dindi bibahende ha wali agali karume bi tara tara dewaore laga kago uruni bibahende bame lope nahaga galone lalu laga. <sup>11</sup> Anigo ibugua bi larago ina hale habe naheyagua agali bi layagoni ibu tarali holebira. Ibi nde tarali holebero. <sup>12</sup> Anigo tígua Ngode Datagaliwabe Dinini ibugua mugube ngiraru yuleore lo howa Keriso hameigini karu mo hongo helonaga mugube maru ngiraru bayuwa yu tiga bu howa biabe bulene nga.

<sup>13</sup> Bi hale nahene laragome lo beregedolenenaga mugube ngilo Ngode Datagaliwabe hondo ngi lolene nga. <sup>14</sup> Ina bi hale nahene lalu Ngode Datagaliwabe hondo lamiruyagua inaga dininime dege lalu minime manda nabi bame lope holebero. <sup>15</sup> Ogonidagua biarugodago ina agi bulene wiaruabe. Ina inaga dininime hangu ndo minila haru howa Ngode Datagaliwabe hondo bi lolebero. Ogonidagua ina iba gana loleberogobi inaga dininime hangu ndo minila haru howa lolebero. ✧ <sup>16</sup> Ina Ngode Datagaliwabe hondo kai lalu howa inaga dinini degeme lariyagua mbirali tí heba ngoai ho bedagome ina bi larego hale nahene biago lalu lariyagua ibugua, E ani bibe, agua lolobadabe. Ina bi larigo ogo ale lari lalu ibu manda bibe naheore bedagoni. <sup>17</sup> Ina Ngode Datagaliwabe hondo kai larigo bi bayaleore lariyaguabi bi larigome mendeali biago ibu miniha anda pelo ndo lari.

<sup>18</sup> Tígua bi hale naheneru laramili degego ina bi hale nahene lolene tí bolanguaore howa laruligonaga Ngode Datagaliwabe hondo kai lalu haruli. <sup>19</sup> Ani laruligo wali agali Ngode Datagaliwabe mitangi bialu lotu lole ngoai ho kagoria howa ina bi tara tara hale nahene dewa au lolebe tobahe lagimbu bulene hame nale kogoni. Wali agali ti bayuwa manda bilonaga ina bi dunini duria dege lawai hole laruyagua karulape ogoni.

<sup>20</sup> Inaga hamene mbaliniru-o waneigini emeneme mitangi biagadagua nabilimu. Galirume ko bulene mitangi nabi hagamadagua tígua nde ogonibi howa mini dege bogabi halimu. ✧ <sup>21</sup> Anduane Homogonaga mbugani bi gilibu ngago ogo, Anduane Homogo ibugua lalu, Inaga wali agali urunihondo bi tara lararunaga bime lamulebero.

✧ **14:2:** Ab 2.4, 10.46 ✧ **14:5:** Dag 11.29 ✧ **14:15:** Iba 47.7, Eb 5.19, Kl 3.16 ✧ **14:20:** Md 18.3, Lm 16.19, Eb 4.14, Pb 3.15, Hi 5.12-14, 1 Pi 2.2

Dindi tarani howa ibirarunaga bimebi lamulebero. Ani lamerogola lamilowa tigua hale naholebiraore, lenego gilibu nga. ✧ <sup>22</sup> Anigo bi tara tara hale naheneru lolene mugube Ngode Datagaliwabhondo mini mbiraorewi karume manda bilo walia holenaga ndo ibuhondo mini mbiraore nawi karume manda bilo walia holenaga yu ka. Ngode Datagaliwabe mana latagi holene mugube ibuhondo mini mbiraore nawi karume manda bilo walia holenaga ndo Ngode Datagaliwabhondo mini mbiraorewi karume manda bilo walia holenaga yu ka.

<sup>23</sup> Keriso hameigini kamiru tí bibahende lotu lole ngoai ho biruwa bi hale naheneru lagalaga birimiyagua maru Keriso mana bayuwa manda nabi haga karubi maru Kerisohondo mini mbiraore nawi karubi anda ibuwa tigua bi uruni laramigo hale howa tí lulu yu kamigoni lolebira ndobe. ✧ <sup>24</sup> Ani ndo tí bibahendeme Ngode Datagaliwabe mana latagi harimiyagua maru Keriso mana bayuwa manda nabi haga karumebi Kerisohondo mini mbiraore nawi karumebi anda ibuwa bi laramigo hale hararu tigua ko biyago miniha nogoba haragola tini hangu hangu ini ko haruda manda bulebira. ✧ <sup>25</sup> Tininaga miniha oholene wia do hayaru tihondo walia haragola tigua taga halu bulu paluwa Ngode Datagaliwabenaga mini yaraga halu lalu, Ngode Datagaliwabe tí heba heneneore kagoni, lalu lolebira. ✧

*Ngode Datagaliwabe mitangi bialu lotu lalu howa bulene ngago ogo*

<sup>26</sup> Anigo inaga hamene mbaliniru-o ina manda bidogo ogo. Tí Ngode Datagaliwabe mitangi bialu lotu lole ngoai ho biruwa mbirame iba gana lolenebi mendeme bi mana lawai holenebi teboneme Ngode Datagaliwabhanda ibuhondo bi lamiyago lamulenebi maneme bi tara hale nahene lalu lolenebi daunime bi tara hale nahene larago ogo ale lara lalu lamulenebi uruni yalu ngoai holeberami. Uruni bibahende birarume Keriso hameigini karu biamogo bilonaga dege bulene nga. ✧ <sup>27</sup> Marume bi tara hale nahene lole manda biyagua kirali tebiralime dege lolene nga. Mbiragome ala lai kagola maha mendealime laga bialu holene nga. Ani laragola mbiralime bi lo beregedalu ogo lara lalu lamulene nga. <sup>28</sup> Mbiralime bi ogo ale lara lalu lamulene nabereyagua o ngoai ho bedamigoria bi tara hale nahene laragome latagi nahe ibuni minime Ngode Datagaliwabhondo lamialu birulene nga. <sup>29</sup> Ani buwa kirali tebiralime dege Ngode Datagaliwabe mana lamulene yu kagome lamiragola tí bedamirume bi larago lo manda bialu birulene nga. ✧ <sup>30</sup> Ani bialu bedagoria Ngode Datagaliwabhanda mbirali hale halu birayaru ariahondo galone mbira mo walia hayagua bi lalu hayago ibu lala howa birulene nga. <sup>31</sup> Ani bialu ngoai ho bedamirume manda bilobi tinaga mini mo hongo holebi tí bibahendeme hangu hangu howa Ngode Datagaliwabe mana lamulene nga. <sup>32</sup> Ngode Datagaliwabe mana lamulene mugube yu kamirume bi laramigo tini haru howa lolene nga. <sup>33</sup> Ngode Datagaliwabe ibu mo libilaba lagane tene ndo kago ibu mo palia hagane Ngode Datagaliwabe kagoni. ✧

Ngode Datagaliwabenaga wali agali dindi bibahendeni ngoai hagane ngagoria <sup>34</sup> walime bi nale birulene nga. Yu wali agalinaga Mana lowinigo ngadagua walime haru holene nawigo tigua bi nalebi birulene nga. <sup>35</sup> Tigua galone mbira tai bialu handa walia hole manda bua biyagua andagani howa tini agalinihondo hale holene nga. Ogoni irane wali agali ngoai ho bedagoria walime bi lolene tagabiore.

<sup>36</sup> Ngode Datagaliwabenaga bi mana pigane Korindi wali agali tíha howa tagira ibinibe be tí hangunaga yalu ibinibe. <sup>37</sup> Tí mbirali Ngode Datagaliwabenaga bi mana latagi haga kolo manda bu hayaguabi mugube Ngode Datagaliwabe Dinini ibugua ngiyago yu kolo manda bu hayaguabi ina tihondo bi gilibu wia harogoni Anduane

✧ **14:21:** Ais 28.11-12, Yo 10.34 ✧ **14:23:** Ab 2.13 ✧ **14:24:** Yo 16.8 ✧ **14:25:** Ais 45.14, Seg 8.23, Yo 4.19  
 ✧ **14:26:** 1 Ko 12.7-10, 2 Ko 12.19, Eb 4.12 ✧ **14:29:** Ab 17.11, 1 Te 5.19-22 ✧ **14:33:** 1 Ko 11.3, 14.40, Kl 3.18, 1 Ti 2.11-12, Ta 2.5, 1 Pi 3.1

Homogohanda bi lo wia hayadalo ibugua manda bulene nga. ✧ <sup>38</sup> Mbiralime bi ogoni hale nahayagua tígua nde ibugua bi larago hale nahalimu.

<sup>39</sup> Anigo inaga hamene mbaliniru-o tígua Ngode Datagaliwabe bi mana latagi holene mugube hame timbuni lo halimu. Ani buwa mbiralime bi tara hale nahene lagaruhondo, Tígua bi ogoni lolene nawi, nalalimu. ✧ <sup>40</sup> Bibahende beremiru bayuwa tigabi hanguore bulene nga. ✧

*Keriso ibu homali howa heyinigo ogo*

## 15

<sup>1</sup> Ogonigo inaga hamene mbaliniru-o ina Bi Mana Debene tihondo langirugo hale howa tígua yu tiga birimigobi mini mbiraore wuwa mini bilinahe kamigobi ogoninaga ina tí lone mo mitangi bua kogoni. ✧ <sup>2</sup> Mana langirugoni hongo howa yu kamiyagua Ngode Datagaliwabeanda tí pele ngiragoni. Be ani ndo tí bame irane nahende howa yu tiga bu kamibe. ✧

<sup>3</sup> Galone timbuniore ihondo langiyadagua ina tihondo langirugo ogo. Anduane Homogonaga mbugani gilibu ngadagua Keriso ibugua iname ko birimagonaga homa hene. ✧ <sup>4</sup> Anduane Homogonaga mbugani gilibu ngadagua degeibunaga tingini hora hayagola horo teboneni Ngode Datagaliwabeanda ibu ho dai bilo mo heya hene. ✧ <sup>5</sup> Heyu howa ibu Pida de hendelo ala ha pani halu mani abosolo agali homberiali (12) biaru de hendelo ha pani hene. ✧ <sup>6</sup> Ani buwa ibu haruru ibaga biaga dewaore handari duria (500) agima ti mandagi hearia ibugua tibi de hendelo ha pani hene. Haruru ibaga biaga odaruni dewaore áyu kago mbira mbira dege homene. <sup>7</sup> Ani bialu ibu Yamese de hendelo ha pani howa abosolo maru bibahende hendelobi ha pani dege hene. ✧

<sup>8</sup> Maniore i Polo nakarulape ko waneigini hono wahene ale hewaria ibugua i de hondoliyabi ha pani haya. ✧ <sup>9</sup> Abosolo agali bibahende karu helowa i niraore kogoni nde ina Ngode Datagaliwabenaga wali agali heneru mo tandaga haga harugonaga i abosolo agali ka labe nahe harugoni. ✧ <sup>10</sup> Anigoyu Ngode Datagaliwabenaga biamogo bia holeneme i áyu kogodagua holiya mo heya hayago kogoni. Ngode Datagaliwabeanda ibunaga biamogo bia holene ihondo ngiyago yuwa bame hope nahe howa ina biabe timbuniore bialu abosolo agali bibahende ina biabe birugome bu bolangua haru. Ani birugoni ininaga hongome ndo Ngode Datagaliwabenaga biamogo bia holene iha heagola birugoni. ✧ <sup>11</sup> Ogonigo mana ogoni ina langiruyaguabi tigua langiyaguabi ina bibahendeme mana mbiraore hangu dege langeramaligo tígua hale howa yu tiga bidami.

*Ina homali howa heyu holeberamago ogo*

<sup>12</sup> Anigo iname mana lamulene tene Keriso ibu homalu Ngode Datagaliwabeanda mo heya henego kagonaga lameramaligo tí marume wali agali homenego naheyulebiraore laramiligo irane agibe. <sup>13</sup> Ogoni henene larimiyagua Ngode Datagaliwabeanda Keriso mo heya nahe laramida. <sup>14</sup> Ngode Datagaliwabeanda Keriso mo heya nahenedale nde iname mana mbira lamulene nangale. Tíguabi nde mana yu tiga bulene nangale. <sup>15</sup> Ogoni dege ndo. Mende larogo wali agali homeneru Ngode Datagaliwabeanda mo heya nahagayagua iname ibugua Keriso mo heya hene larimago mo heya naheneyagua nde tigua ina ke haga ka labehe holebira. ✧ <sup>16</sup> Wali agali homenego Ngode Datagaliwabeanda mo heya nahagayagua Kerisobi mo heya nahenedagoni.

✧ **14:37:** 2 Ko 10.7, 1 Yo 4.6 ✧ **14:39:** 1 Ko 12.31, 1 Te 5.20 ✧ **14:40:** 1 Ko 14.33, Kl 2.5 ✧ **15:1:** Lm 5.2, Ga 1.11 ✧ **15:2:** Ga 3.4 ✧ **15:3:** Iba 22.15, Ais 53.5-12, Dan 9.26, Seg 13.7, 1 Ko 11.2, 11.23, Ga 1.12 ✧ **15:4:** Iba 16.8-10, Md 12.40, Lg 24.26, 24.46, Ab 2.24-32, 13.33-35 ✧ **15:5:** Md 28.16-17, Mg 16.14, Lg 24.34-36, Yo 20.19 ✧ **15:7:** Lg 24.50, Ab 1.3-4 ✧ **15:8:** Ab 9.3-6, 22.14, 22.18, 1 Ko 9.1 ✧ **15:9:** Ab 8.3, 9.1, Ga 1.13, Eb 3.8, 1 Ti 1.13-15 ✧ **15:10:** Ab 8.3, Lm 15.18-19, 2 Ko 3.5, 6.1, 11.5, 11.23, Pb 2.13 ✧ **15:15:** Ab 1.22, 2.24-32, 4.10, 4.33, 5.32, 13.30



<sup>17</sup> Ngode Datagaliwabehanda Keriso mo heya naheneyagua tigua ibuhondo mini mbiraore wirimigo bame wuwa ko birimigo nadome ko bialu haabo kami. <sup>18</sup> Ani mitangi bu kamiyagua wali agali Kerisohondo mini mbiraore wu howa homeneru tibi hariga koha piya labehe kamagoni. <sup>19</sup> Iname dindini holene hangunaga Kerisohondo mini dunu bia ho kamayagua wali agalime maruhondo dara hagadagua ndo tigua inahondo dara timbuniore holene wulebira.

<sup>20</sup> Ogonidagua nalabeheore. Manane Keriso ibu homalu Ngode Datagaliwabehanda heneneore mo heya henedagua wali agali bibahende homeneru ibugua mo heya holebira. <sup>21</sup> Agali mbira ibuha howa homolene wali agali bibahendeni yu anda ibinidagua agali mende ibuha howa mo heya holene yu anda ibini. <sup>22</sup> Wali agali bibahende Adamaha howa homolene winidagua wali agali Kerisoha howa mo heya holene wulebiraore. <sup>23</sup> Bulebirago ogo. Keriso ibuni ala heyyadagua ibuni dai birangi ibunaga wali agali mo heya holebira. <sup>24</sup> Ani biragola hamaro bulene horo ibirangi Kerisohanda dama bibahende haru hagarubi hondo hagarubi hongohorubi ti bibahendenaga hongo bo podai holebira. Ani podai howa Keriso ibugua haru hayaruni ibu Aba Ngode Datagaliwabehondo miai holebira. <sup>25</sup> Ogoni irane Ngode Datagaliwabehanda waitigi bibahende biaruru tinaga hongo bo podalu Kerisonaga geha mo ngelai helo Kerisohanda haru holene ngaore. <sup>26</sup> Ngode Datagaliwabehanda ibuni wayali halu maniore waitigi homanaga hongo bo podolebira. <sup>27</sup> Anduane Homogonaga mbugame ledago ogo. Ngode Datagaliwabehanda mbirale bibahende karubi ngarubi Kerisonaga geha ngelai ho ka, lalu gilibu nga. Mbirale bibahende laruru uruni heba Ngode Datagaliwabe ibuni bimaga naheore howa ibugua mbirale karubi ngarubi bibahende Kerisonaga geha mo ngelai kagoni lenego manda bimiya. <sup>28</sup> Ani bidagola Ngode Datagaliwabehanda mbirale bibahende karubi ngarubi Keriso ibugua haru helo ibunaga andaneha mo ngelai holebira. Mo ngelai kagola nde Keriso ibu Ngode Datagaliwabe Iginioire howa Ngode Datagaliwabenaga andaneha ibuni helolebira. Ala Ngode Datagaliwabehanda mbirale hayarubi wiyarubi Kerisonaga geha mo ngelenego bibahende Ngode Datagaliwabe ibugua ibuni hangu daligaore howa hondo hagimbu biai holebira.

<sup>29</sup> Bi mbira laro. Wali agali maru karume wali agali homeneru mitangi bialu tinaga baboraya mo bia hagago ti aginaga biagabe. Ti marume lalu, Wali agali homeneru naheyulebira, laganego bi ogoni heneneoyagua wali agali homenerunaga baboraya bu wia haganego irane agibe. <sup>30</sup> Ogoni heneneoyagua inamebi homolene kaware ngagoria ha para haabo haramaligo irane agibe. <sup>31</sup> Hamene mbaliniru-o horo bibahendeni i homolene kaware ngagoria ha para haabo haruli. Ina ti mitangi timbuni biaabo halu inanaga Anduane Homogo Keriso Yasuha howa holene yu kamagonaga bi ogoni latagi haro. <sup>32</sup> Ina Ebesani howa nogo gabua tara tara baba gungu birugo dindi holene hangu mitangi bialu biruyagua agi karulolenaga bialu harube. Bi mbira laganego ngago ogo, Iya yawi dege homamiya kamago tomobi ibabi ayu kamaore nama nalarama, laga. Wali agali homeneru naheyulebirago lalu heneneoyagua bi ani lolene karulape ngagoni.

<sup>33</sup> Marume ti mo pila holigo manda bu holene bi lo ngago ogo. Wali agali mana ko biaga karu heba nenege hinu haabo harimiyagua tigua ti mo ko holebira, lagane lo nga. <sup>34</sup> Ti mini tigabi wiadai bialu ko bialu haramiligo yu wahalimu. Ina ti tagaore halimulonaga larogo ti marume Ngode Datagaliwabe manda nabioire kami.

### *Homali howa heyuwa tingini ogobi holeberama lalu langidago ogo*

✧ 15:20: Ab 26.23, 1 Ko 15.23, Kl 1.18, 1 Pi 1.3, Mo 1.5 ✧ 15:21: Yo 11.25, Lm 5.12, 5.17-18, 6.23 ✧ 15:23: 1 Te 4.15-17, Mo 20.5 ✧ 15:25: Iba 110.1, Md 22.44, Ab 2.34-35, Hi 1.13 ✧ 15:26: 2 Ti 1.10, Mo 20.14, 21.4 ✧ 15:27: Iba 8.6, Md 28.18, Hi 2.8, 1 Pi 3.22 ✧ 15:30: Lm 8.36, 2 Ko 11.26, Ga 5.11 ✧ 15:31: Lm 8.36, 2 Ko 4.10-11, 1 Te 2.19 ✧ 15:32: Aga 2.24, Ais 22.13, Lg 12.19-20, 2 Ko 1.8, 4.10-11 ✧ 15:34: Ab 26.8, Lm 13.11, 1 Ko 6.5, Eb 5.14, 1 Te 4.5

<sup>35</sup> Marume bi ogodagua lolebira, Wali agali homeneru agua bialu mo heya holobadabe. Tinaga tingini abi ale holobadabe, lolebira. ✧ <sup>36</sup> Tí mini nawi kamibe. Tígua mbirale egene dindiha hangaramigola egene ogoni togo buwa mani doai laga ndobe. ✧ <sup>37</sup> Widi egeneyaguabi egene tarayaguabi hangaramiligo egene ibuni hangu hangaramili ndobe. Mani holebiragobi homane bibahende ndo hangarimi. <sup>38</sup> Ngode Datagaliwabehanda ibuni manda bidadagua egene ogoniha howa irane anda helo miaga. Ibugua egene tara tara uruni tinaga irane hangu hangu holene ngadagua miaga. ✧

<sup>39</sup> Dindini kamaru bibahendenaga tingini mbiraore hangu ndo tara tara bu kama. Wali agalinaga tingini tara ale nogo tara tara karunaga tingini tara ale ega tara tara bedarunaga tingini tara ale wena tara tara ibaha bedarunaga tingini tara ale lowa bu kamagoni.

<sup>40</sup> Hari daligani mbirale tara tara karu tinaga tingini nde tara halu dindini mbirale tara tara karu tinaga tingini nde tara halu bidagoni. Hari daligani karu tinaga yári nde daligani kagobi halu dindini karu tinaga yári nde dindini kagobi kagoni. <sup>41</sup> Nibi egebi yakundirubi tinaga wá holene mbiraore hangu ndo tinaga wá holene tara tara kagoni. Yakundi uruni tinibi tinaga wá holene mbiraore hangu ndo wá holene tara tara haga bigi bidagoni.

<sup>42</sup> Ogonidagua wali agali homeneru Ngode Datagaliwabehanda ti mo heya holebirago ogo. Homene tingini hora haramagola togo biaga wiyagoni. Ngode Datagaliwabehanda mo heya haragola togo nabi haabobo bu holebira. ✧ <sup>43</sup> Homa hora halu howa de hondoa nabi hongobi naheore hora haramali. Ngode Datagaliwabehanda homali howa mo heya haragola hongohe baya gibiore heyulebira. ✧ <sup>44</sup> Homa hora halu howa dindinaga tingini hayagobi hora haramaligoni. Ngode Datagaliwabehanda homali howa mo heya haragola dinininaga tingini holebira. Dindinaga tingini kamadagua dinininaga tingini nde holebira ndobe. <sup>45</sup> Anduane Homogonaga mbugani ogodagua leda, Agali mbira mini Adama Ngode Datagaliwabehanda pigane wabinigo ibu dindini holenehe hene, lalu gilibu nga. Ogonidagua ndo Adama mende mani henego ibu Dinini howa holene gahengeore miagane ka. ✧ <sup>46</sup> Dinini holene ala íbu haga ndo. Dindini holene ala howa mani dinini holene íbu haga. <sup>47</sup> Adama ala íbu henego Ngode Datagaliwabehanda ibu dindime wabu helene. Adama mende maha henego ibu dahuliya andaga howa dalini. ✧ <sup>48</sup> Wali agali dindialinaga kamaru ina mbirali dindime wabini biagobi kama. Wali agali dahuliya andaganaga kamaru ina mbirali dahuliya andaga howa dalini biagobi holeberema. <sup>49</sup> Agali dindime wabu helenego ale kamadagua agali dahuliya andaga howa dalinigo ibu ale holeberema. ✧

<sup>50</sup> Hamene mbaliniru-o bi larogoni irane tinginimebi daramamebi wabini karume Ngode Datagaliwabehanda Handame Ho Kagoria nakarulolebiraore. Togo biaga tinginime togo nabiaga ngagoria nakarulabehe ka. ✧ <sup>51-52</sup> Galone mbira ala mo pani nahe ngele nego langerogo hale halimu. Ina bibahende homai nahe howa biguli mbira lamaro biragola ina abaleore de pandi mugu laradagua bialu Ngode Datagaliwabehanda ina mo tara holebira. Biguli ogoni laragola homene biaru bibahende ti Ngode Datagaliwabehanda mo heya howa haabobo bu holene tingini karulolebira. Ani bialu Ngode Datagaliwabehanda ina bibahende mo tara holebira. ✧ ✧ ✧ <sup>53</sup> Ani buwa tingini togo biaga biaru wahalu togo nabiaga haabobo bu holenenaga karulo aribia holebira. Homagane tingini wiyaru wahalu nahomagane ngaru karulo aribia holebira. ✧ <sup>54</sup> Tingini togo biaga wiyaru tingini togo nabiaga ngaru karulo aribia halu tingini homaga wiyaru tingini nahomagane ngaru karulo aribia hai holebira. Ani biai kagola Anduane Homogonaga

✧ 15:35: Yo 12.24, 1 Yo 3.2 ✧ 15:36: Yo 12.24 ✧ 15:38: Pig 1.11 ✧ 15:42: Dan 12.3, Md 13.43 ✧ 15:43: Pb 3.20-21 ✧ 15:45: Pig 2.7, Yo 6.33, 6.39-40, 6.54, 6.63, 2 Ko 3.4-6, 3.17, Pb 3.21 ✧ 15:47: Pig 2.7, 3.19, Yo 3.13, 3.31 ✧ 15:49: Lm 8.29, 2 Ko 3.18, Pb 3.21, 1 Yo 3.2 ✧ 15:50: Md 16.17, Yo 3.3-5, 1 Ko 6.13 ✧ 15:51-52: Pb 3.21 ✧ 15:51-52: 1 Te 4.15-17 ✧ 15:51-52: Seg 9.14, Md 24.31, 1 Te 4.16 ✧ 15:53: 2 Ko 5.4

mbugani lo wiyadagua, Ngode Datagaliwabehanda homagane mo wahai halu ibuni wayali haiore kagoni, lalu gilibu ngadagua heneneore lola holebira.\*

<sup>55</sup> Homa-o ínaga wayali holene agiha ngebe.\*

Homa-o ína bope holeneo í hongo agiha ngebe,

lenego gilibu nga. <sup>56</sup> Homa ibu hongo miagane tene ko buleneme. Ko bulenenaga hongo Mana lowini ngagotha howa miaga.\* <sup>57</sup> Ani biagago áyu inanaga Anduane Homogo Yasu Kerisotha howa Ngode Datagaliwabehanda inahondo wayali holene ngidagonaga iname ibuhondo turu halu kajore laabo hamiya.\*

<sup>58</sup> Anigo ínaga hamene mbalini turubiru-o tí mini bilinahe howa ema nabi hongo hoore halimu. Anduane Homogonaga biabe bulene galone timbuni ngago manda bialu tigua ibunaga biabe bule manga nahe ebebe buwa biaabo halu halimu.\*

## 16

### *Ngode Datagaliwabenaga wali agali munime biamogo bulene ngago ogo*

<sup>1</sup> Ai Ngode Datagaliwabenaga wali agali Yudia dindini karu munime biamogo bulene ngagonaga ína Keriso hameigini Galesia dindini hagahaga bidaruhondo bilimu larudagua tíhondobi ani bulene nga laro.\* <sup>2</sup> Horo Sande bibahendengi tigua hangu hangu howa tínaga muni mirimidagua tale bialu muni maru mo bagi ho ngelaga bilimu. Ani birimiyagua í tí kamiria eberoangi muni mo mogo bulene irane nawulebira.\* <sup>3</sup> Ina íbu howa agali maru tigua dabarimigo Keriso hameigini Yarusalemeni karu karia muni yalu pelo tihondo ína beba gilibu yalu pudaba lolebero. <sup>4</sup> Í polene ngayagua nde tí í heba poleberema.

### *Polohanda ibaga bulenaga manda manda binigo ogo*

<sup>5</sup> Ina Masedonia dindi polene ngaore manda bialu kogo pialu howa tí kamiria tagira ibagua.\* <sup>6</sup> Ibuwa tí heba emene lu holene mitangi bidogo íra yuni gilope howa dagare biagane horo bibahenderu tí heba haabo holebero bada. Aguani tí heba emene howa ína maha polene ngadagua poliya tigua í biamogo bialu ngua holeberami.\* <sup>7</sup> Í tí kamiria ibalu abale bolangua halu polene hame nale kogoni. Anduane Homogohanda í tí heba lu holene henge ngiyagua nde luore hamiya manda bu ko.\*

<sup>8</sup> Ina Pendigosi horo ibilo tangi í Ebesa ogoriani holene manda bu ko.\*\* <sup>9</sup> Waitigi dewa karuni helowa í ogoriani howa biabe bayuwa bulene henge timbuniore ngagoni.\*

<sup>10</sup> Timodi ibu tí kamiria ibiyagua tigua ibu mo turu halu nenege hinu halimu. Ina Anduane Homogonaga biabe bialu kodagua ibuguabi bialu kagoni.\* <sup>11</sup> Tigua Timodi handape nahe howa bayuwa de hondo halu í kogoria dai bilo ibu ibaga bialu kagoria tigua biamogo bialu mo turu halimu. Ibu Keriso hameigini maru heba í koria dai bulebira mitangi bialu kogoni.

<sup>12</sup> Ai inanaga hamene Aboloso mitangi bialu bi mbira laro. Ibu Keriso hameigini maru heba tí kamiria ibilo ína mo poa haabo haruli. Ani bialu hewaria ibu áyu ogoni polene mitangi nabi ka. Mani ibu henge wirangi ibulebira.\*

### *Bi lamaro bidago ogo*

<sup>13</sup> Tigua mamage halubi mini mbiraore wirimigo bilinahe ho halubi gi nahe howa hongohe halubi halimu.\* <sup>14</sup> Biabe bibahende beremigo gubalini howa bialu halimu.\*

\* 15:54: Ais 25.8, Hi 2.14-15, Mo 20.14    \* 15:55: Hos 13.14    \* 15:56: Lm 4.15, 5.13, 6.14, 7.5, 7.13    \* 15:57: Lm 7.25, 1 Yo 5.4-5    \* 15:58: 2 Bit 15.7, 1 Ko 3.8, 2 Pi 3.14, Mo 14.13    \* 16:1: Ab 24.17, Lm 15.25-26, 2 Ko 8.1-9, Ga 2.10    \* 16:2: Ab 20.7, Mo 1.10    \* 16:5: Ab 19.21    \* 16:6: Lm 15.24, Ta 3.12    \* 16:7: Ab 18.21    \* 16:8: LBM 23.15-21, Man 16.9-11    \* 16:8: Ab 19.8-10    \* 16:9: Ab 14.27, 19.8-10, 2 Ko 2.12, Kl 4.3, Mo 3.8    \* 16:10: 1 Ko 4.17    \* 16:12: 1 Ko 1.12, 3.6    \* 16:13: Iba 31.24, 1 Ko 15.1, Eb 6.10, Pb 1.27, Kl 1.11, 1 Te 5.6    \* 16:14: 1 Ko 14.1, 1 Pi 4.8

<sup>15</sup> Sebanasabi ibu damenerubi ti hayago manda bu kami. Tigua wali agali Agaia dindini howa Yasu Kerisohondo mini mbiraore ti pigane wialu Ngode Datagaliwabenaga wali agali biamogo bulenaga biabe bialu kagoni. ✧ <sup>16</sup> Inaga hamene mbaliniru-o uruni tigua biradagua tí kamirume nde talialu bialu halimu. Wali agali marubi ti heba biabe biamogo bialu karu de hondowa tigua biradagua tí kamirume nde talialu bialu halimu laro. ✧

<sup>17</sup> Sebanasa Podunadasa Agaigasa imaru ti j hewaria ibiyagola j turu timbuni harugoni. Tigua ibiradagua uruni tigua ibu aribia hayagoni. <sup>18</sup> Ti tebiralime tí mo turu hayadagua ibi mo turu hayago agali urunibi iname mitangi timbuni bulene nga. ✧

<sup>19</sup> Keriso hameigini Esia dindini hagahaga bu karume, Tí mitangi bu kama, lalu lawia hara. Aguila Pirisilala Keriso hameigini libunaga andagani ngoai hagarubi tigua, Ina Kerisoha howa turu halu tí mitangi bu kama, lalu lawia hara. ✧ <sup>20</sup> Keriso hameigini oali karumebi, Tí mitangi bu kama, lalu lawia hara. Tí bibahende kamiru gubalini halu gi tigani bialu mini yani howa turu haga bilimu. ✧

<sup>21</sup> I Polohanda ini gime gili bialu, Tí mitangi bu ko, lalu gili bero. ✧

<sup>22</sup> Mbirali Anduane Homogohondo gubalini naheyagua ibuhondo ha holene nga. Inanaga Anduane Homogo ibu-o. ✧

<sup>23</sup> Anduane Homogo Yasunaga biamogo bia holene tí heba wiaabo helo hamelo ko.

<sup>24</sup> I Keriso Yasuha howa inaga gubalini holene tí bibahendeha helaro.

## 2 Korindi

### Polohanda Keriso hameigini Korindini hearuhondo beba mende ogo gilibu wia hene

### Mbuga ogoha gilibu ngarunaga nemandi ogo

Polohanda Keriso wali agali Korindini hearuhondo beba mende ogo gilibu wia henego ibu genda timbuni ho howa gili bini. Genda henedagoni Keriso hameigini maru Korindini hearume Polo guralu henego genda ogoni Polohanda abale lo tiga bialu lone dai bu hamiyaore hame ledoleo lalu gili bini.

Ani gili buwa lalu, Keriso hameigini maru burupale Yudiani karu biamogo bialu mbirale wia hole manda bilimu, lene.

Ani lowa Polohanda la maro bialu ibuni abosolo heneneore henedagonaga te lene. Ogoni lenedagoni irane Korindiali dege maru hearume lalu, Polo ibu abosolo henene ndo ke haga ka. Ai abosolo heneneore ina kama, lalu hene. Polo abosolo harudagoni agalime dabalule, I ha, lene ndo. Ngode Datagaliwabehanda i dabo helene go, lalu lene.

#### **Bulu бага бува кuni gilibu ngago**

*1.1-11*

Gili binigonaga irane lo ngago *1.12-7.16*

Polobi Keriso hameigini Korindini henerubi te ngago *8.1-9.15*

Keriso hameigini maru burupale Yudiani hearunaga mbirale wia holene lenego *10.1-13.10*

Polo ibu abosolo heneneore ko, lalu lenego *13.11-14*

Lamaro bialu lenego

<sup>1</sup> I Polo Ngode Datagaliwabe ibuni hame leagome Keriso Yasunaga abosolo kogoni. Ibi ina hamene Timodibi iyame beba ogo tihondo gilibu wia haraba.

Keriso hameigini Korindini kamirubi Ngode Datagaliwabehanda wali agali bibahende Agaia dindini kamirubi tihondo beba gilibu wia haraba.✧

<sup>2</sup> Ngode Datagaliwabe ina Aba ibubi Anduane Homogo Yasu Kerisobi libugua biamogo bia holenebi mo palia holenebi tihondo ngilo hamelo kaba.✧

#### *Polohanda Ngode Datagaliwabehando turu halu kai lenego ogo*

<sup>3</sup> Ina Anduane Homogo Yasu Kerisonaga Aba Ngode Datagaliwabe ibu ina Aba howa dara halu biamogo biagabi biamogo bulene bibahende ibuha howa ibai hagabi kago ibuhondo iname turu halu kai lamiya.✧ <sup>4</sup> Genda bibahende ina kamagoria ibu ngagola ibugua ina biamogo biaga ka. Ani biradagua wali agali marunaga gendabi tara tara yu kagola Ngode Datagaliwabehanda inahondo biamogo biyadagua iname nde ti biamogo bibehe kama. <sup>5</sup> Keriso ibugua tandaga dewa nayadagua inamebi ibuha howa tandaga nolomaya ngeleda. Ogonidaguaibunaga biamogo bulene timbuniore ngago inamebi ibuha howa yu kama.✧ <sup>6</sup> Iname tandaga narimayagua Ngode Datagaliwabehanda ti biamogo bilonagabi pele ngilonagabi naramali. Ogonidagua Ngode Datagaliwabehanda ina biamogo biyagua nde tibi biamogo bulebira. Biamogo bialu howa tandaga iname nalu ema nabi hibu lalu haramadagua tiguabi ema nabi hibu lalu hongo haabo halimulo hongo holene ngulebira. <sup>7</sup> Anigo iname tihondo mini dunu bia ho wiaabo haramali. Iname tandaga naramadagua tiguabi nalu howa biamogo bulene yu kamadagua tiguabi yu kamidalo manda bu kama.✧

<sup>8</sup> I hamene mbaliniru-o ina Esia dindini howa tandaga nalu harimago ti manda bu halimulo langerama. Gendabi gibi timbunioreme ina mo genda bia hayagola ina

✧ **1:1:** Ab 18.1, 1 Ko 1.1 ✧ **1:2:** 1 Ko 1.3 ✧ **1:3:** Lm 15.5, Eb 1.3, 1 Pi 1.3 ✧ **1:5:** Iba 34.19, 94.19, Kl 1.24

✧ **1:7:** Lm 8.17, 2 Ti 2.12



homolene hangu nga manda birima.✠ <sup>9</sup> Ani manda bialu godi hale haganeme lalu, Tí homalimulo bolene nga, lagadagua layagola ina miniha gi ho hagamadagua harima. Anidagua birimadagoni irane Ngode Datagaliwabe ibugua wali agali homeneru mo heya haga biago ka manda bialu ibunihondo hangu mini dunubia ho holomayanaga ani bini. <sup>10-11</sup> Ina homolene gibi taraore wiagoria hemagola ina nahomolomayanaga Ngode Datagaliwabehanda pele ngiyadagua lone pele ngulebira. Tígua Ngode Datagaliwabhondo inanaga bi la haramigome ina biamogo beramigo ibugua ina pele ngiyadagua ngiaabo holebira manda buwa ibuhondo mini dunu bia ho wiaabo kama. Ani buwa wali agali dewalime inanaga bi la hararu Ngode Datagaliwabehanda hale howa ina biamogo bulebira. Ani biragola hondowa tigua bi laraga halu ibuhondo turu halu kaj lolebira.✠

*Polo ibu bi kira nalaga henego ogo*

<sup>12</sup> Iname dindini tí heba howa bialu harimagonaga bi tiga tiga lolenebi mini do nahe howa bulenebi Ngode Datagaliwabehanda nginigome ina haru hayagonaga ina miniha mitangi bialu turu ho kama. Dindinaga mini gigabi wuleneme ndo biamogo bia holene hongo Ngode Datagaliwabeha howa ibiyagonaga ina haru hene.✠ <sup>13-14</sup> Iyame tigua bi dagalabehegobi manda bibehogobi hangu gilibu wia haraba. Tígua áyu manda biai nahe kamigo manda biaiore halimulo hamelo ko. Ani manda buwa Anduane Homogo Yasunaga Horo ibirangi iname tí mitangi bialu turu timbuniore holeberamadagua tíguabi ina mitangi bialu turu timbuniore holeberami.✠

<sup>15</sup> Aniore manda buwa tí halu ki mo turu halu biamogo bulenaga tí hemiria ala ibule manda manda bu haru.✠ <sup>16</sup> I Yudia dindi mani polenaga tigua biamogo bilimulo mitangi buwa i Masedonia dindi pialu howabi dai bialu howabi tí kamiria ibule manda manda biru. <sup>17</sup> Aguani manda birudagoni i kudaga howa layadalo manda birimibe. Ina ibule manda bialu howa ini hangu mitangi bialu ebi ndobi lamaga halu larulibe. <sup>18</sup> Ngode Datagaliwabe ibu heneneore kadagua ina tihondo bi lo wirugo ebi ndobi lamaga halu ndo lo wiru. <sup>19</sup> Ogonigo Sailasabi Timodibi ibi iname Ngode Datagaliwabe Iginu Yasu Keriso ibuore ka lalu tihondo langialu harimago ibu ebi ndobi laga ndo ka. Ani ndo ibu e dege laga ka.✠ <sup>20</sup> Irane Ngode Datagaliwabehanda bi lowini ngaru bibahendenaga eore laga ibu kagoni. Irane ogoninaga ibu mini yaraga hole iname Yasu Keriso minini howa, Ani bibe, laramali.✠ <sup>21</sup> Iyabi tíbi Kerisoha mini bilinahe holomaya Ngode Datagaliwabehanda ina mo bia haga ka. Ibunime ina daba bagi ho helene kama.✠ <sup>22</sup> Ngode Datagaliwabe ibunime ina ibunaga kamago walía helobi ibugua yidaru bibahende inahondo ngulebiraore manda bulumayabi manane ibu Dinini inanaga bu habaneha heleda.✠

<sup>23</sup> Ngode Datagaliwabe ibu inaga miniha manda biai kago ibu inaga la hagane helaro. I tí hemiria Korindi naibirugoni irane ina bi larogome tí mo tandaga holeyane naibi harugoni.✠ <sup>24</sup> Tígua Ngode Datagaliwabhondo mini mbiraore wuwa hongo ho haabo kamigo iname tihondo, Mana ogobi yu tiga bidaba, lalu haru hole ndo kama. Ani biradagua iname tí turu halimulo tí heba biabe bialu kamagoni.✠

## 2

<sup>1</sup> Anigo ina manda bialu hewaria tí mo genda holeyane ina tí kamiria lone naibule manda biru.✠ <sup>2</sup> Ina tí mo genda haruyagua nde aiwa i mo turu holebirabe. Wali agali ina mo genda haruru tinime hangu mo turu holene wulebira. <sup>3</sup> Irane ogoninaga ina tihondo beba mbira ala gilibu wia harugoni. Ina tí hemiria ibiruyagua wali agali i mo

✠ **1:8:** Ab 19.23, 1 Ko 15.32 ✠ **1:10-11:** 2 Ti 4.18, 2 Pi 2.9 ✠ **1:12:** 1 Ko 1.17, 2.4, 2.13, 2 Ko 2.17, Hi 13.18  
 ✠ **1:13-14:** 2 Ko 5.12, Pb 2.16 ✠ **1:15:** Ab 19.21, 1 Ko 16.5-6 ✠ **1:19:** Ab 9.20, 18.5 ✠ **1:20:** Lm 15.8-9, Mo 3.14  
 ✠ **1:21:** 1 Yo 2.20, 2.27 ✠ **1:22:** Lm 8.16-17, 2 Ko 5.5, Eb 1.13-14, 2 Ti 2.19, 1 Yo 2.27, Mo 2.17 ✠ **1:23:** Lm 1.9, 2 Ko 11.31 ✠ **1:24:** 1 Pi 5.3 ✠ **2:1:** 1 Ko 4.21, 2 Ko 12.21

туру haga kamirume dege i mo genda halimulo hame nale haru. Mbira manda bu kogo laro. I turu ho koangi tibi turu howa kamidalo manda bu ko. <sup>4</sup> Inaga mini taulia ho howabi mini burugulo howabi de iba timbuni ibalu howabi ina tihondo beba ala gilibu wia haru. Ani birugo ina ti mo genda holenaga ndo ti bibahendehondo ina gubalini ogobiore ho kada lalu manda bilimulonaga gili biru.✧

*Mbiralime ko biyagonaga domolene ngago ogo*

<sup>5</sup> Ai ti kamigo aria mbiralime ti mbiraligo mo genda hayago ihondo ndo ti bibahendehondo mo genda hayagoni. O ndo ti maruhondo hangu mo genda hayagoni. Ogonigo ina ibuhondo bi hongo howa lolene hame nale ko.✧ <sup>6</sup> Ti dewalime o biagonihondo tandaga nelu mirimigo karulape birimi manda bido. <sup>7</sup> Ai ogonigo ibugua ko tihondo biyagonaga genda timbuni halu wahalu puabo holigo tigua ibugua ko biyago mitangi bialu la nabi dara halu biamogo bilimu. <sup>8</sup> Tigua ibuhondo gubalini ho henedane hendelo ani bilimu laro. <sup>9</sup> Ina beba mbira ala tihondo gilibu wia harugoni irane ogo alenaga. Ti agi bialu harimidabe hondolenagabi ina bi laruru bibahende tigua agua biaabo harimidabe hondolenagabi ti ba handarugoni.✧ <sup>10</sup> Mbiralime ko biyago tigua la nabi waharimiyagua ina nde la nabi wa dege holebero. Ina ani bulene ngayagua ina ti mitangi bialu Kerisonaga deni waharuli. <sup>11</sup> Ina ogonidagua biruligo irane dama Heyolabe ibugua ohowa ina bope holigo lowa biruli. Iname dama Heyolabe ibugua ohowa biaganeru manda bu kama.✧

*Polohanda Toroasa howa mitangitangi bu henego ogo*

<sup>12</sup> Ina Kerisonaga Bi Mana Debene lamule Toroasa anda pirugola ina biabe ogoriani buliya Anduane Homogohanda henge timbuni ngiyane handa walia haru.✧✧ <sup>13</sup> Anda ibu howa handalu hewaria inaga hamene Taidasa naheyane hondowa i mini burugulo haru. Ani bu howa ina Toroasa wali agalihondo, Hondo halimu, lalu Masedonia dindi pole piru.

*Kerisoha howa ina wayali holene ngago ogo*

<sup>14</sup> Ogonigo iname Ngode Datagaliwabehondo turu halu kai laabo hamiya. Irane ibugua ina Kerisoha howa Kerisonaga wayali holeneha puabo holomaya haru kagoni. Mbiralime ngabiame hagadagua Ngode Datagaliwabehanda wali agali bibahendeme Kerisonaga bi mana hale haame helo inaha howa ani biaga ka. <sup>15</sup> Anigo ina Kerisohanda mbiralime Ngode Datagaliwabehondo ngabilo delaga inisenesi miaga ale howa iname wali agali Ngode Datagaliwabenaga pele mulene yu karubi hariga koha pialu karubi ta nabihondo yo meremali.✧ <sup>16</sup> Mana ngabiaga ogoni hariga koha pialu karume ngubi homolenedane handa walia haga. Pele mulene yu karume ngabiore holene henedane handa walia haga. Biabe ogonibi bibebe ai kabe.✧ <sup>17</sup> Agali dewalime galone ndo mbiralime tara tara mitangi biagadagua Ngode Datagaliwabenaga bi mana ani mitangi bialu ibunaga biabe biaga ka. Ina ani ndoore beremali. Ngode Datagaliwabehanda ina biabe bule pu lenego iname ibunaga deni howa Kerisonaga biabe bia haga howa mini do nahe Ngode Datagaliwabenaga bi mana lameramali.✧

### 3

*Habo Nalolene Bi Gahengegonaga biabe biaga kama lenego ogo*

<sup>1</sup> Bi lone laramagoni iname mine halu ina bayaleore howa larimadalo mitangi bidamibe. Agali marume bebani ti bayaleore ka lalu gili binigo yalu ibagadagua iname tihondo beba ogoni ale gilibu yalu ibulene karulapebe be tigua inahondo beba

✧ 2:4: Ab 20.31 ✧ 2:5: 1 Ko 5.1, Ga 4.12 ✧ 2:9: 2 Ko 7.15, 10.6 ✧ 2:11: Lg 22.31 ✧ 2:12: Ab 14.27, 1 Ko 16.9 ✧ 2:12: Ab 20.1 ✧ 2:15: 1 Ko 1.18, 2 Ko 4.3 ✧ 2:16: Lg 2.34, Yo 9.39, 1 Ko 15.10, 2 Ko 3.5-6, 1 Pi 2.7-8 ✧ 2:17: 2 Ko 1.12, 4.2, 11.13, 1 Pi 4.11, 2 Pi 2.3

ogonibi yalu polomaya gilibu ngulene karulapebe.✠ <sup>2</sup> Inanaga beba gili bini ogonibi tiore howa wali agali bibahendeme manda bilobi de hendelobi tí inanaga bu habaneha gili bidagoni.✠ <sup>3</sup> Beba ogoni Keriso ibunime gili bialu inahondo, Yalu pudaba, lenego waliaore halu kami. Beba ogoni ege toleni gili bini ndo Ngode Datagaliwabe holenehe kago ibu Dinini ibugua wali agalinaga bu miniha gili bini.✠

<sup>4</sup> Bi ogonidagua laramago irane ina Kerisoha howa Ngode Datagaliwabe karulapeore ka lalu mini mbiraore wuwa kamagome.✠ <sup>5</sup> Inaha mbira hongo howa bayale bulene nawiorego inaneme biabe ogo bero nalabehe kama. Inanaga hongo holene tene Ngode Datagaliwabe ibuni ka.✠ <sup>6</sup> Ngode Datagaliwabenaga habo nalolene bi gahenge lo ngagonaga biabe bulumaya ibunime mo bia haragola iname bialu kama. Habo nalolene bi gahenge ogoni bi ala lowinigo biagadagua ndo Ngode Datagaliwabe Dinini ibugua biaga ka. Bi ala lowini ngagome homagane yu anda ibaganego Ngode Datagaliwabe Dinini ibugua holene gahenge yu anda ibaga ka.✠

<sup>7</sup> Ngode Datagaliwabehanda Mana lo winigo ege toleni gili bialu Mosesehondo miniyangi ibunaga wá taraore holene walia hene. Wá taraore holene ogoni Mosesenaga denguini ibalu ereba hama daidai biyagola wá tara hongo timbuniore dege hayagome Israele wali agalime Moses bayuwa handawa nabibehe hene. Mana lowini ngago ogonime homagane yu anda ibagago wá tara timbuniore holene ogonibi heba ibinigo✠ <sup>8</sup> Ngode Datagaliwabe Dinini ibugua biabe bialu howa wá tara timbuniore hatagi holebira ndobe.✠ <sup>9</sup> Mana ala taweme wá timbunihe howa, Tí koha polene nga, lolene yu anda ibinigo nde mana gahengeme, Tí mini tigabiwi kami, lolene yu anda ibalu wá tara timbuniorehe kago ndobe.✠ <sup>10</sup> Ogonigo áyu wá tara timbuniore íbu kagome wá tara timbuni ala henego ai mo ereba haya labehe kama.✠ <sup>11</sup> Mana ala tawe wiagoria wá tigi mbira hangu hayagobi ndo áyu wá taraore holene timbuni wiaabobo bu ngagoni ndobe.

<sup>12</sup> Ogoni mitangi bialu iname mini dunubiahe howa iname gi nahe hongo howa bi latagi haramali.✠ <sup>13</sup> Israele wali agalime Mosesenaga denguini wá taraore holene ibalu ereba halu heago de hondolilono ibugua ibunaga denguini labolabome yi hene. Moses ibunime ogoni biyadagua iname bulene nawi.✠ <sup>14</sup> Israele wali agali uruni tinaga mini ndibulo hene. Áyubi tigua habo nalolene bi bamba lo winigonaga mbuga daga lalu karia tinaga mini labolabo ogoni aleme yi kagola daga lalu ka. Labolabo ale ogoni wali agalime Kerisoha hangu ho gimbu bu kagola Ngode Datagaliwabehanda mini mo ndibu laga labolabo ale ogoni mo waholebira.✠ <sup>15</sup> Áyubi tigua Moses heneyangi Mana lowinigo daga lalu karia labolabo ogoni alegome tinaga mini ndibulo dambi ho wiaabo ka. <sup>16</sup> Ani bidago Anduane Homogonaga mbugani lo ngadagua ogo, Mbirali ibugua mini beregedalu Anduane Homogohondo mini mbiraore wiragola Ngode Datagaliwabehanda labolabo ogoni mo waholebira, lalu gilibu nga.✠ <sup>17</sup> Ai Anduane Homogobi Dininibi libu mbiraore kagoni. Anduane Homogo Dinini mbiralinaga bu miniha kayagua ibunaga mini ndibu layago duguape hene kagoni.✠ <sup>18</sup> Ogonigo ina bibahende kamaru dengui yi nahe iba wai ale howa Anduane Homogonaga wá holene baya taraore inaha howa hatagi haga. Anduane Homogo ibu Dinini kago ibu inaha howa wá holene baya taraore hatagi halu ogonime ina ibuni ale holomaya mo haga ka.✠

✠ **3:1:** Ab 18.27, Lm 16.1, 2 Ko 5.12 ✠ **3:2:** 1 Ko 9.2 ✠ **3:3:** Har 24.12, Yar 31.33, Ese 11.19, 36.26, 1 Ko 3.5, Hi 8.10 ✠ **3:4:** 2 Ko 2.16 ✠ **3:5:** Yo 15.5, 1 Ko 15.10, Pb 2.13 ✠ **3:6:** Yar 31.31, Yo 6.63, Lm 7.6, 1 Ko 11.25, Ga 3.10, Eb 3.7, Kl 1.25, Hi 8.6-8 ✠ **3:7:** Har 34.1, 34.28-30, Man 10.1, Lm 7.10 ✠ **3:8:** Ga 3.2, 3.5 ✠ **3:9:** Man 27.26, Lm 1.17, 3.21 ✠ **3:10:** Har 34.29 ✠ **3:12:** 2 Ko 7.4, Eb 6.19 ✠ **3:13:** Har 34.33-35, Lm 10.4, Ga 3.23 ✠ **3:14:** Ais 6.10, Yo 12.40, Ab 28.26-27, Lm 11.7-8, 11.25 ✠ **3:16:** Har 34.34, Ais 25.7, Lm 11.23, 11.26 ✠ **3:17:** Yo 8.32, 8.36, Lm 8.2, 1 Ko 15.45, 2 Ko 3.6, Ga 5.1 ✠ **3:18:** Har 16.7, 24.17, Lm 8.29, 1 Ko 13.12, 15.49, 1 Ti 1.11

## 4

*Abosolo agaliru ti be dindime wabinigo ale ka lenego ogo*

<sup>1</sup> Ngode Datagaliwabehanda ina dara howa biabe ogoni bulumaya nginigo ina genda howa wahalu pole mitangi nabi howa bialu haramali. ✧ <sup>2</sup> Iname mini ko do howa bulenebi mana tagabi bulenebi erembira meremali. Iname wali agali mo hondo nahe Ngode Datagaliwabe bi mana mo tara howa nalami haramali. Wali agali bibahendena miniha tiga tiga manda bilo iname henene hangu lalu Ngode Datagaliwabenaga deni howa lamialu haramali. ✧ <sup>3</sup> Bi mana debene lameramaligo wia do ho ngayagua wali agali hariga koha pialu karu manda nabilo wia do ho ngagoni. ✧ <sup>4</sup> Dindini ko biaganaga haru haga ibugua wali agali uruninaga mini mo aruma kagola tigua Kerisohondo mini mbiraore nawi ka. Tiha wá harago ti de nahendelona ibugua mo ge haga ka. Wá holene ogoni Keriso ibu Ngode Datagaliwabe kagobi kagonaga wá taraore holene Bi Mana Debeneha howa ibalu wá halu ka. ✧ <sup>5</sup> Iname inanenaga mana biaganego lameremali ndo. Iname Yasu Keriso ibu Anduane Homogoore ka lalubi Yasu mitangi bialu tínaga biabe bia haga ina kama lalubi ani lameremali. ✧ <sup>6</sup> Ngode Datagaliwabehanda lalu, Arumaha howa wá hatagi ha, lenego ogoni ibugua inanaga bu miniha mo wá hole ibunaga wá holene heledagoni. Ngode Datagaliwabe ibugua ibunaga wá taraore holene Kerisonaga denguini howa wá hatagi harago ina manda bulumayanaga bira. ✧ <sup>7</sup> Yasu Kerisonaga mana galoneore baya burugule ogoni yu kamaru ina nagalone be dindime wabini ale kama. Ani kamago irane hongo holene timbuniore tene ina ndo Ngode Datagaliwabe ibuniore ka inaha howa walia holenaga kamagoni. ✧ <sup>8</sup> Ina tandaga naga bialu haramaligo inanaga hongo podalu ibira nahaga. Mini burugulo howa wahalu pu naberamali. ✧ <sup>9</sup> Waitigi dewa kagolabi nenege mbira ha dege biaga. Marume ina bope haragola homa nabi kama. <sup>10</sup> Inanaga tinginiha howa Yasunaga holene wali agalime de hendelo iname horo bibahendeni inanaga tinginiha Yasunaga homolene yu haramali. ✧ <sup>11</sup> Inanaga tinginiha howa Yasunaga holene walia helo iname Yasunaga biabe bia halu homolene kaware ngagoria haabo haramali. ✧ <sup>12</sup> Ani bialu howa homoleneme inaha biabe bialu kagola holeneme tíha biabe bialu kagoni.

<sup>13</sup> Anduane Homogonaga mbugani bi lo ngago ogo, Ina Ngode Datagaliwabehondo mini mbiraore wu harugo bi latagi harugoni, lalu gilibu nga. Iname ogonidagua ibuhondo mini mbiraore wu howa bi latagi haramali. ✧ <sup>14</sup> Ngode Datagaliwabehanda Anduane Homogo Yasu mo heya henego inabi mo heya halu tíbi inabi ibu kagoria haru polebira. Ani bulebiraore manda bu kamagoni. ✧ <sup>15</sup> Ogoni bibahende tí mitangi bialu bulebira. Ngode Datagaliwabenaga biamogo bia holeneme wali agali dewaoreha ibalu karularagola tigua Ngode Datagaliwabenaga mini yaraga halu ibuhondo turu halu kai lalu holebira. ✧

*Ngode Datagaliwabehondo mini mbiraore wialu holene ngago ogo*

<sup>16</sup> Irane ogoninaga iname genda howa wahalu polene mitangi nabi haramali. Ina dininaga tingini holene goba halu kagola inanaga dinini holene horo bibahendengi mo gahenge halu ka. ✧ <sup>17</sup> Iname tandaga emene tigi mbira áyu dege nalu kamagome maha wiaabobo holenaga bayale taraore holene tandaga emene áyu dege nalu kamagobi ndo bayale taraore holene timbuniore inahondo mo ngulebira. ✧ <sup>18</sup> Iname mbirale deme handabehe ngaru ndo deme nahandabehe ngaru bayuwa mitangi bu kama. Mbirale

✧ **4:1:** 2 Ko 3.6, 1 Ti 1.13 ✧ **4:2:** 1 Ko 1.18, 2 Ko 2.17, 6.4, 6.7, 1 Te 2.3-5 ✧ **4:3:** 1 Ko 1.18, 2 Ko 2.15, 2 Te 2.10  
 ✧ **4:4:** Yo 1.18, 12.31, 12.45, 2 Ko 4.4, Eb 2.2, Pb 2.6, Kl 1.15, Hi 1.3 ✧ **4:5:** 1 Ko 1.9, 1.13, 1.19, 1.23, 2 Ko 1.24 ✧ **4:6:** Fig 1.3, Ais 9.2, 2 Ko 3.18, 1 Pi 2.9, 2 Pi 1.19 ✧ **4:7:** 1 Ko 2.5, 2 Ko 5.1, 12.9 ✧ **4:8:** 2 Ko 1.8, 7.5 ✧ **4:10:** Lm 8.17, 1 Ko 15.31, Pb 3.10, 1 Pi 4.13 ✧ **4:11:** Lm 8.36, 1 Ko 15.31, 15.49 ✧ **4:13:** Iba 116.10, Lm 1.12, 2 Pi 1.1 ✧ **4:14:** Lm 8.11, 1 Ko 6.14 ✧ **4:15:** 1 Ko 3.21, 2 Ko 1.3-6, Kl 1.24, 2 Ti 2.10 ✧ **4:16:** Lm 7.22, Eb 3.16, Kl 3.10, 1 Pi 3.4 ✧ **4:17:** Md 5.12, Lm 8.17-18, 1 Pi 1.6

deme hendedamaru wiaabo naholebira mbirale deme nahendedamaru wiaaboboore wulebira.✠

## 5

<sup>1</sup> Ogonigo áyu ina dindinaga tingini balai anda ale bu kamago goba haragola Ngode Datagaliwabehanda dahuliya andagani haabobo holene tingini anda ale agalinaga gime wabini ndoibunime wabinigo inanaga ngule wia kago manda bu kama.✠

<sup>2</sup> Inanaga tingini anda ale dahuliya andagani ngago áyu ogoni ina karulo hole hame timbuniore lowa karuore loliyago lalu hondo ho kama.✠ <sup>3</sup> Tingini anda ale ogoni iname karulo howa ina tingini nahe naholeberama. <sup>4</sup> Ina dindinaga tingini balai anda ale ogoniha kamago howa genda halu ulu lalu haramali. Ogonidagua beramaligo irane ina dindinaga tingini waha howa ndo dindinaga homagane tingini dahuliya andaganinaga tingini holene gahengeoreme ina karulai helo hamelo kama.✠ <sup>5</sup> Tara ogonibi holomaya Ngode Datagaliwabe ibugua inanaga mo manda manda bia howa inahondo bibahende ngulebiraru ngulebiraore manda bulumaya manane ibu Dinini ngidagoni.✠

<sup>6</sup> Ani bidagonaga iname turu halu hongo ho haabo kama. Ina tingini anda ale áyu kamago howa Anduane Homogonaga andaga nahende kama manda bidama.✠ <sup>7</sup> Irane iname áyu bialu kamago deme hondowa ndo mini mbiraore wuwa kamagoni.✠ <sup>8</sup> Iname turu halu hongo ho howa tingini anda ale áyu kamagoni wahalu Anduane Homogo heba hole poa ho kama.✠ <sup>9</sup> Áyu dindini howayaguabi dahuliya andagani howayaguabi iname Anduane Homogo turu helo ibu hame ledadagua bua kama.✠ <sup>10</sup> Ogonigo ina bibahendeme bialu harimadagua Kerisohanda ina dabeloibunaga deni ha pani hai holeberama. Ha pani howa inane dindini howa hanguhangu bayale bialu heneyaguabi kagua bialu heneyaguabi inane bialu harimadagua degedege ngulebira.✠

### *Kerisoni howa ina Ngode Datagaliwabe heba nenege hinu kamago ogo*

<sup>11</sup> Ina Anduane Homogohondo gi holene irane ngago manda buwa iname wali agali ibuhondo mini mbiraore wilonaga mo wua haramali. Ngode Datagaliwabehanda ina manda biaiore ho ka. Ibugua ani manda bidadagua tíguabi tínaga bu miniha i kogobi manda bidamilo hamelo ko.✠ <sup>12</sup> Iname tihondo, Ina bayale kama, lalu lone larama ndo. Tígua ina mitangi bialu turu holene iraneorego yu halimulonaga laramagoni. Irane ogonigo marume mbiralinaga miniha ndo tingini daliga hondowa mini yaraga halu bi larago hale howa tígua ladai bibehe halimulonaga larama.✠ <sup>13</sup> Ina lulu ale kamayagua ina Ngode Datagaliwabe mitangi bialu biabe ogonibi kamagoni ndobe. Ina lulu ndo miniwi kamayagua ina tí mitangi bialu biabe ogonibi kamagoni ndobe. <sup>14</sup> Anigo wali agali bibahende homai holilono agali mbiralime homa henego ogoni wali agali bibahendenaga homa hene. Ogoni manda buwa Kerisonaga gubalini holeneme ina haru kagoni.✠ <sup>15</sup> Keriso ibugua wali agali bibahendenaga homa henego irane wali agali bibahende kamirume tíni hangu mitangi bialu bua biradagua bialu halimulo ndo. Keriso ibugua tí mitangi buwa homalu heyinigo tígua ibu hanguore mitangi bialu talima pialu halimulonaga bini.✠

<sup>16</sup> Ogonigo wali agalime dindini howa tingini daliga hondowa dabagadagua áyu iname ogonidagua dabolene nawi. Ala iname tingini daliga hondowa Kerisobi ogonidagua dabarimago ibu áyu ogonidagua nadabaramali.✠ <sup>17</sup> Mbirali ibu Kerisoha ho gimbu bu kayagua ibu gahenge ka. Ala hayago wahowa holene gahenge yu ka.✠

✠ **4:18:** Lm 8.24, 2 Ko 5.7, Kl 1.16, Hi 11.1-3 ✠ **5:1:** 2 Ko 4.7, 2 Pi 1.13-14 ✠ **5:2:** Lm 8.23 ✠ **5:4:** 1 Ko 15.53-54  
 ✠ **5:5:** Lm 8.16, 8.23, 2 Ko 1.22, Eb 1.14, 2.10 ✠ **5:6:** Hi 11.13-16 ✠ **5:7:** Lm 8.24-25, 1 Ko 13.12, 2 Ko 4.18, Hi 11.1  
 ✠ **5:8:** Pb 1.23 ✠ **5:9:** Kl 1.10, 1 Te 4.1 ✠ **5:10:** Aga 12.14, Lm 2.16, 14.10, Ga 6.7, Kl 3.24-25, Mo 22.12 ✠ **5:11:**  
 2 Ko 4.2, Hi 10.31, Yu 23 ✠ **5:12:** 2 Ko 1.14, 3.1 ✠ **5:14:** Lm 5.15 ✠ **5:15:** Lm 14.7-8, 1 Ko 6.19, Ga 2.20, 1 Te  
 5.10, 1 Ti 2.6, 1 Pi 4.2 ✠ **5:16:** Yo 6.63, 15.14, Pb 3.7-8, Kl 3.11 ✠ **5:17:** Ais 43.18, Lm 8.1, 8.9-10, Ga 5.6, 6.15, Eb  
 2.15, Mo 21.5



<sup>18</sup> Agvani mo ha hagane tene Ngode Datagaliwabe ka. Iname ibula waitigi ho hemaria ibugua ina mo ibunaga damene helene. Ibugua ani binigo wali agali marubi ibu damene dege helo mo hela holene biabe ogoni inahondo ngida.\* <sup>19</sup> Ani ngidago iname bi lamulene ogodagua, Ngode Datagaliwabehanda Kerisoha howa wali agali bibahende mo ibunaga damene hene, lalu lameramali. Wali agalime ko birimaru Ngode Datagaliwabehanda mitangi bu wiaabo nahaga. Ibugua ina ogodagua mo ibu damene haya lalu lamulumaya inahondo lamulene ngiyagoni.\*

<sup>20</sup> Agvani bidago iname Kerisohanda bi la laradagua lalu kamagola Ngode Datagaliwabehanda iname bi langeramagoha howa tihondo bi langialu ka. Anigo iname Kerisohanda laradagua bialu tí Ngode Datagaliwabela waitigi ho harimigo ibugua tí mo ibu damene helo halimulo hame lowa larama.\* <sup>21</sup> Keriso ibugua ko mbira nabigaore howa Ngode Datagaliwabehanda ina mitangi bialu ina Kerisoha ho gimbu bu howa ibunaga mini tigabi wulene yu holomayanaga iname ko birimago ibugua Kerisohondo mial hene.\*

## 6

### *Abosolo agalime biabe gendabi yu heneru ogo*

<sup>1</sup> Iname Ngode Datagaliwabe heba biabe mandagi bialu howa tihondo bi laramago ogo. Iyunaga biamogo bia holene yu kamigo mohole bialu yu wa nahalimu larama.\*

<sup>2</sup> Ngode Datagaliwabehanda bi mbira larago hale hadaba.\*

Biamogo bia holene tu winingi bi larigo hale haru.

Pele ngulene horo winingi pele ngiru,

lenego lalu gilibu nga. Ai hale hadaba. Ngode Datagaliwabenaga biamogo bia holene yu holene tu áyu ngagoni. Pele mulene horo áyu ngagoni.

<sup>3</sup> Inanaga biabe bialu kamago mbiralime hondowa nakarulape bialu kamane nahendelo iname beramagome ti mo pila holigo lowa bayuwaore bialu haramali.\* <sup>4</sup> Ani bialu iname bibahende beremaligo bialu howa tandaga nalubi genda halubi tai bigi bialubi harugo lowa ema nabioore howa iname Ngode Datagaliwabenaga biabe biagaore kamagoni lalu walia haramali.\* <sup>5</sup> Marume ina kangome ba garabaya andaha haru puwa hela dewalime ina ho mabu buwa ba bia bigi bini. Iname halo nahe biabe biaabo halu ubi napale tomobi nane haabo harima.\* <sup>6-7</sup> Ani bialu mini gahengeore wuwabi Ngode Datagaliwabe mana bayuwa yani howabi ema nabi howa hibu lalubi maruhondo biamogo bialubi gubalini henene halubi uruni bibahende birimagomebi mana henene lameramagomebi Ngode Datagaliwabe Dininimebi Ngode Datagaliwabenaga hongomebi ina ibunaga biabe biagaore kamago lalu walia harimagoni. Iname mini tigabi wulenenaga wai biagane ale yu howa waitigi karia puwa balubi ti ina kamaria ibiragola ba dai bialubi haramali.\* <sup>8</sup> Marume ina mitangi bialu tigabi ka lalu haga marume ina guraga marume inahondo mege biaga marume inahondo kaj laga. Iname bi henene lalu kamagola marume. Tí ke haga kami, laga. <sup>9</sup> Agali bibahendeoreme ina manda biai haga howa marume ina nahendenedondo biradagua biaga. Ina homabeheore winigo nahome harimago dehendedemi. Ina mo tandaga dege henego homole ba nabi helene.\* <sup>10</sup> Marume ina mo genda haragola iname turu dege haabo haramali. Iname yagibano howa wali agali dewanaga bu mini mo homogo haramali. Ina mbirale mbira nayioore kamagoni howa bu mininaga ngagoni yu hai kama, laramali.\*

\* **5:18:** Lm 5.10, Eb 2.16, Kl 1.20, 1 Yo 2.2    \* **5:19:** Lm 3.23-25, Kl 1.19-20    \* **5:20:** 2 Ko 3.6, 6.1, Eb 6.20    \* **5:21:** Ais 53.6-12, Yo 8.46, Lm 5.19, 1 Ko 1.30, Ga 3.13, Pb 3.9, Hi 4.14-15, 1 Pi 2.22-24, 1 Yo 3.5    \* **6:1:** 1 Ko 3.9, 2 Ko 5.20, Hi 12.15    \* **6:2:** Ais 49.8, Lg 4.19-21    \* **6:3:** Lm 14.13, 1 Ko 9.12, 10.32    \* **6:4:** 2 Ko 4.2    \* **6:5:** Ab 16.23, 2 Ko 11.23-27    \* **6:6-7:** 1 Ti 4.12    \* **6:6-7:** 1 Ko 2.4, 2 Ko 10.4, Eb 6.11-13, 2 Ti 4.7    \* **6:9:** Iba 118.18, 1 Ko 4.9, 2 Ko 4.2, 4.9-10    \* **6:10:** 2 Ko 7.4, Pb 2.17, Kl 1.24

<sup>11</sup> Inanaga nenege turubiore Korindini kamiru-o iname inanaga bu miniha tí gubalini timbuniore halu tihondo tiga tigaore langialu harimagoni. <sup>12</sup> Iname inanaga bu mini tihondo hangai nahe harimago tigua tininaga bu mini inahondo hangai harimi. <sup>13</sup> Ina i waneiginihondo bi lamiradagua bialu tihondo bi langerogo. Iname tihondo gubalini haramadagua tigua nde inahondo aniore bilimu. Tinaga bu mini hada ho halimu.✠

*Ngode Datagaliwabe mitangi nabiaga karu heba mini mbiraore nahabehe ngago ogo*

<sup>14</sup> Ngode Datagaliwabehondo mini mbiraore nawi karu heba galone mandagi bule mini mbiraore nahalimu. Ani nabibeheore nga. Kagua biagala tigabi biagala mbiraore agua habehebe. Wá holenebi aruma holenebi mandagi agua ho habehebe.✠ <sup>15</sup> Keriso dama Heyolabela libu mini mbiraore agua habehe kabe. Ngode Datagaliwabehondo mini mbiraorewi kagobi mini mbiraore nawi kagobi libu hame mbiraore agua hagabe. <sup>16</sup> Ngode Datagaliwabenaga andala bi pupu wule gime wabu ngagola mo mbiraore agua habehebe. Ngode Datagaliwabe holenehe kagonaga anda ina kamagoni. Ngode Datagaliwabeibunime bi lenego ogo,✠ Inaga wali agali heba mandagi hole ina ti kategoria inaga anda bu holebero. Tinaga Ngode Datagaliwabe i holebero. Ti nde inaga wali agali holebira, lalu lene.

<sup>17</sup> Ani lowa Anduane Homogo ibugua lalu,✠

Tigua Ngode Datagaliwabe mitangi nabiaga karu helalu tini hangu ha bagi howa halimu.

Tigua Ngode Datagaliwabe deni ko ngago nabilimu.

Ogoni nabirimiyagua nde ina tihondo hamiya lolebero.

<sup>18</sup> Tinaga aba i holebero.✠

I waneiginiru tí holeberami,

lalu Anduane Homogo Hongo Haiheore kagome ani lenego, lalu gilibu ngagoni.

## 7

<sup>1</sup> Inenege turubiru-o bi uruni Ngode Datagaliwabehanda bule lowini ngaru inahondo lowini. Aniore bidago tinginibi minibi mo ko haga ngaru bibahende iname mo wahalu Ngode Datagaliwabe mitangi buwa gi halu ibuhondo inane loma bia ho hai hamiya.✠

*Polo ibu turu henego ogo*

<sup>2</sup> Tí bu miniha howa inahondo henge ngilimu. Iname mbiralihondo ko nabi mo ko nahebi mo hondo hole manda nabi kamagoni.✠ <sup>3</sup> Ina bi o larogo lalu tí ko nakarulape kami lalu ndo laro. Ala larudagua iname tihondo gubaliniore howa laro. Ina harimayaguabi homarimayaguabi ina haru mandagi haabo holeberama.✠ <sup>4</sup> Ina tihondo mini mbiraore wu howa inaga miniha yangalo kogoni. Ina gendabi dewa yu howa inaga miniha mo hongo holene tolalu turu holene tolo tagi ho kogoni.

<sup>5</sup> Ina Masedonia dindini anda pu howabi halo naheore harima. Gendabiru wiame halu tagiraha wali agali maru baba lai lolenebi miniha gi holenebi winiya.✠ <sup>6</sup> Ani bialu hemagola Ngode Datagaliwabehanda genda yu karu mo dabia bia haga kago Taidasa ibiyagola ina mo dabia bia hene.✠ <sup>7</sup> Taidasa ibiyagome hangu ndo tigua ibu mo turu harimigonaga te langiyagomebi i turu timbuniore biragola kogoni. Ibugua bi langiyago ogodagua laya, Iname Polo de hondoa ho kama, larimiyagobi tini nakarulape birimigo

✠ **6:13:** 1 Ko 4.14 ✠ **6:14:** Man 7.2-3, 1 Sml 5.2-3, 1 Ko 5.9, Eb 5.7, 5.11 ✠ **6:16:** LBM 26.12, Ese 37.27, 1 Ko 3.16, 6.19 ✠ **6:17:** Ais 52.11, Ese 20.34, 2 Ko 7.1, Mo 18.4 ✠ **6:18:** 2 Sml 7.14, 1 Bit 17.13, Ais 43.6, Yar 31.9, Mo 1.8, 21.7 ✠ **7:1:** 2 Ko 6.17-18, 1 Yo 3.3 ✠ **7:2:** Ab 20.33, 2 Ko 12.17 ✠ **7:3:** 2 Ko 6.11-12 ✠ **7:5:** 2 Ko 2.13 ✠ **7:6:** 2 Ko 1.3-4, 2.13

manda bialu taga harimiyagobi tígua inaga bi la hole kama larimiyagobi hale howa i turu timbuniore biragola kogoni.

<sup>8</sup> Ala tíhondo beba gilibu wia harugome tí mo genda haruyane hondowa ina ani gili birugonaga kagua biruda nalolebero. Beba ogonime tí mo genda emene tigi mandi hayane hondowa i tí dara habehe dege haru. <sup>9</sup> Ai áyu i turu ho kogo irane ina tí mo genda harugonaga ndo tí genda harimigome tínaga mini mo beregedayagonaga i turu ho kogoni. Tí genda harimigome Ngode Datagaliwabehanda tí mo bayale hayago ai iname tí mo ko nahe harima. <sup>10</sup> Genda holene ogonibi Ngode Datagaliwabehanda mo ha haganego mini mo beregedowa pele mulene yu holomayanaga biaga. Ani biagago nakarulape ndo karulapeore nga. Anigoyu dindinaga genda holeneme homolene yu anda ibaga. <sup>11</sup> Tígua genda harimigome Ngode Datagaliwabehanda biyago manda bilimu. Ani biyagome tí mini mo hongo halu kagua nabi lalu lo tiga bilimulonagabi mo bia haya. Ko hondowa keba holenebi mogo lolenebi hame lolenebi hongo holenebi ko biyagonaga tandaga nelu mulenebi uruni bibahende Ngode Datagaliwabehanda mo mitangi bia haya. Ani birimigome tíha ko mbira nawiore lalu walia harimi.

<sup>12</sup> Anigo ina tíhondo beba biago gilibu wia harugo mbiralime ko biyagonagabi ko biyagola mendealime tandaga nayagonagabi mitangi bialu ndo gili biru. Ani biradagua tígua Ngode Datagaliwabe deni howa inahondo mitangi timbuniore bu kamigo tíhondo walia holenaga gili biru. <sup>13</sup> Tígua aguani birimigome ina miniha turu ho harima.

Ogoninaga dege ndo. Tígua Taidasa biamogo birimigo ibugua tíhondo turu timbuni ho heago hondowa inabi turu timbuni ho harima. <sup>14</sup> Ala ina Taidasahondo te lalu tínaga mini yaraga harugo ina larudagua tígua bialu hemigo ibuhondo walia harimigonaga i taga nahe ko. Iname tíhondo henene hangu laabo halu harima. Ani larimadagua iname Taidasahondo te lalu tínaga mini yaraga halu harimago heneneore larimayane walia harimi. <sup>15</sup> Ogonigo ibugua tí bibahendeme bulene ngadagua bulebi Ngode Datagaliwabehondo gi halu nakarulape kama lalu ibu nenege hinarimigobi mitangi bialu tíhondo ibunaga gubaliniha yanga lalu ka. <sup>16</sup> Inaga mini tíhondo hana hai holedago turu timbuniore ho kogoni.

## 8

### *Keriso hameiginime Keriso hameigini maru biamogo bulene ngago ogo*

<sup>1</sup> Inanaga hamene mbaliniru-o Ngode Datagaliwabenaga biamogo bia holeneme Keriso hameigini Masedonia dindini hagahaga bu hearuha biyago tí manda bilimulo hamelo kamagoni. <sup>2</sup> Wali agali o biaru ba handalu genda timbuni hama pelene. Ani bu howa ti yagibanoore kamagoni nale turu timbuni halu muni dewaore mo mogo bialu mini. <sup>3</sup> Ina henene larogo tigua mulene wiadagua ndo tinaga minime biamogo buaore howa dewaore mia tago halu mini. <sup>4</sup> Tigua Ngode Datagaliwabenaga wali agali Yudia dindini karu biamogo berama, lalu inahondo haya halu, Merama, lene. <sup>5</sup> Iname tigua mulebira lo manda birimagobi ndo bolanguaore howa mini. Ala tini Anduane Homogohondo loma bia halu mani Ngode Datagaliwabehanda hame leadagua inahondobi ngia dege biya. <sup>6</sup> Ani binigo Taidasa ibu biabe ogoni pigane bialu hayadagua biaabo habe larima. Ibugua biamogo bialu gubalini holenenaga biabe ogoni tí heba bu maro bilimulo iname ibuhondo, inaore bibe, larimagoni. <sup>7</sup> Tígua bibahende yu kamigo mini mbiraore wulenebi bi lolenebi mana manda bulenebi biamogo bua holenebi inahondo gubalini holenebi dewaore yuwa bu mini homogo kami. Uruni yu howa gubalini holenenaga biabe ogoni tigua bia timbu halimulo hamelo kama.

✧ 7:8: 2 Ko 2.4 ✧ 7:10: 2 Sml 12.13, Min 17.22, Md 26.75, 27.3-5, Hi 12.16-17 ✧ 7:15: 2 Ko 2.9 ✧ 8:1: Lm 15.26 ✧ 8:4: 2 Ko 9.1-2 ✧ 8:7: 1 Ko 1.5, 12.13, 16.1-2, 2 Ko 9.8

<sup>8</sup> Ina tí ani bilimu lalu lo wia ndo bero. Wali agali marume biamogo timbuni bua haga ka lalu larugome tíguabi gubalini holene aguaore yu kamibe hondolenaga laro.

<sup>9</sup> Inanaga Anduane Homogo Yasu Kerisonaga biamogo bia holene tí manda bu kami. Ibugua mbirale bibahende yu hai howa homogoore henego tí mitangi bialu ibuni mo yagibano ho dai bini. Ibuni mo yagibano hayagome tí homogo halimulonaga ani bini.✠

<sup>10</sup> Ogoninaga ina manda bidodagua langero. Mali ala harimagonaga biabe biala harimigo áyu bu maro bulene nga. Tígua pigane muni mo mogo bulenenaga biabe ogoni hangu ndo tíni mua timbuniore howa mirimi. <sup>11</sup> Ogoni bu maro bule ala bigi bilimu. Pigane biabe ogoni bule hame lowa manda manda birimidagua áyu tínaga mini ngamidagua bu maro bule hame lalimu. <sup>12</sup> Tígua mbirale mua ho kamiyagua Ngode Datagaliwabehanda tí nayi kamigo manda bialu wu hayagobi ngira lalu turu holebira.✠

<sup>13-14</sup> Wali agali maru genda nayilo ina genda tíhondo hangu mo ngia ndo berogo tígua áyu dewa yu kamigodago maru burupale karu biamogo bulene karulape ngagoni. Ani beramigola mani tí burupale kamigola tigua dewa yu howa tí nde biamogo bulebira. Ogonidagua biamogo bigibigi beramigome ogobi degedege holeberami.✠ <sup>15</sup> Anduane Homogonaga mbugani lo ngadagua, Mbiralime tomo dewa mo mogo binigo nalu ibira nahe. Mendealime tomo emene mo mogo binigo no karulapene, lalu gilibu nga.✠

### *Taidasa heba agali maru Korindi polebirago ogo*

<sup>16</sup> Iname tí biamogo bua kamadagua Ngode Datagaliwabehanda Taidasa ibubi mo bua hayagola kago ina Ngode Datagaliwabhondo turu halu kaj lalu kama. <sup>17</sup> Iname Taidasahondo lalu, Ina Korindi wali agali karia polebe, larimagola ibugua turu howa lalu, E i ogoniha pole manda bu harugonigo polebero, laya. <sup>18</sup> Iname Taidasa heba Keriso hameigini mbirali ibu bi mana debene bayuwa lamiagago Keriso hameigini bibahende hagahaga bu karume, Ibu mini lene ka, laganego ibubi libu haru ibilarama. <sup>19</sup> Ogoni hangu ndo iname Anduane Homogonaga mini yaraga hole gubalini holene-naga biabe ogoni bialu howa biamogo bua kamaore lalu walia hole o biago ibu ina heba polomaya Keriso hameigini hagahaga bu hearume ibu dabo helayiya.

<sup>20</sup> Iname muni timbuni ogoni mua howa winigo mo mogo bialu howa tí marume, Nakarulape bialu kami, nalalimulonaga bayuwa hangu bialu kamagoni. <sup>21</sup> Ngode Datagaliwabenaga deni hangu ndo wali agalinaga denibi heba howa iname tigabi bulene ngadagua hangu beremali.✠

<sup>22</sup> Ogonigo iname Keriso hameigini mendebi ti haru ibilaramagoni. Iname ibuhondo ba handa dewa bialu hemaria ibuha biamogo bua holene hangu wiaria handa walia harima. Áyu nde ibugua tíhondo mini bilinahe howa biamogo bua timbuniore ho kagoni. <sup>23</sup> Tígua Taidasa mitangi bialu ibu i heba biabe mandagi bialu tí biamogo bule kabago mandabu harimidagua halimu. Keriso hameigini kirali Taidasa heba ibulebirago libu Keriso hameigini hagahaga bu karume tinaga pu helo dabayago libugua Kerisonaga mini yaraga halu kago manda bu halimu. <sup>24</sup> Iname tínaga mini yaraga haramaligo Keriso hameigini bibahende hagahaga bu karume heneneore leneda manda bilo agali ibiraruhondo tínaga gubalini holene walia halimu.✠

## 9

### *Keriso hameigini burupale karu biamogo bulene ngago ogo*

<sup>1</sup> Ngode Datagaliwabenaga wali agali Yudia dindini karu biamogo bialu muni mo mogo bu wia haragonaga te tíhondo gilibu wia holene irane nawi bada.✠ <sup>2</sup> Tígua biamogo bua ho harimigo manda buwa ina Keriso hameigini Masedonia dindini hearuhondo tí kamirunaga mini yaraga halu lalu, Keriso hameigini Agaia dindini hearu

✠ 8:9: Md 8.20, Lg 9.58, Pb 2.6-7 ✠ 8:12: Mg 12.43, Lg 21.3 ✠ 8:13-14: 2 Ko 9.12-13 ✠ 8:15: Har 16.18

✠ 8:21: Min 3.4, Lm 12.17, Pb 4.8, 1 Pi 2.12 ✠ 8:24: 2 Ko 7.13-14, 8.1-7 ✠ 9:1: 2 Ko 8.1-7

tigua mali ala harimagonaga howa biamogo bulene manda bu hayagoni, lalu lamiru. Tigua ani manda bu kamigo lamirugola ti maru ogonidagua dege bua haya. <sup>3</sup> Anigo iname tina mini yaraga harimago bi bame leneda nalelonaga ina Keriso hamene uru ti kamiria ibilarogoni. Ani berogo ina larudagua tigua biamogo bule kamidalo manda bido. <sup>4</sup> Ani ndo i Masedoniali heba ibuwa ti manda manda nabi kamiria handa walia harimayagua ina ti mini bilinaheore kamilo mitangi bu yalu ibirimagonaga taga paniore noleberama. Tini nde taga pani timbuniore noleberamigoni. <sup>5</sup> Irane muni ogoni tigua mule lo wirimigo abale mo mogo bilimulonaga ina Keriso hamene urunihondo, Bamba halu pudaba, lalu ini mani ibule manda biru. Ani buwa i anda eberogola muni mo mogo bu ngamigo hondowa. Ti mua nahe howa ndo mua howa mirimida, lalu manda bulebero.

<sup>6</sup> Mbira mitangi bulene ngago ogo. Mbiralime egene mbiraore hangu hangayagua tomo mbiraore hangu anda holebira. Mbiralime egene dewa hangayagua tomo dewa anda holebira. <sup>7</sup> Ogonigo ti hangu hangu howa mbirale mua nahe howa penge bialu, Mulene nawi harugo mero, lalu ndo ala hangu hangu mulene nga lo manda birimidagua milimu. Wali agali miniha turu howa miaga karu Ngode Datagaliwabehanda gubalini haga ka. <sup>8</sup> Ngode Datagaliwabehanda tihondo ngulene ngadagua hangu ndo ngia tago halu ngibehe ka. Ani buwa tini karulape yu halimulobi biabe bayale bibahende biamogo bilimulonagabi karulapeore ngia tago halu ngulebira. <sup>9</sup> Anduane Homogonaga mbugani lo ngago ogo,

Ibugua yagibanohondo dewaore miaga ka.

Ibunaga dara howa biamogo bia holene wiaabobo bida,

lalu gilibu nga. <sup>10</sup> Anigo Ngode Datagaliwabehanda mabu hangaga kagohondo egene mialu tomo nolenebi miaga. Ani bialu ibugua tihondo egene bibahende ngulene ngadagua ngialu mo anda halu tigua mbuni nabi dewa mirimigonaga ibugua mo timbuniore holebira. <sup>11</sup> Tigua inahondo muni ngirimigo meramagola wali agali dewalime Ngode Datagaliwabehondo turu halu kai lolebira. Ani laragola ti mbirale dewa miaabo halimulo Ngode Datagaliwabehanda tihondo mbirale ngiaabo holebira.

<sup>12</sup> Biamogo ogoni birimigome Ngode Datagaliwabenaga wali agali burupale karunaga dege ndo wali agali dewame turu howa ibuhondo kajore lelobi mo la harimi. <sup>13</sup> Tigua biamogo ogoni birimigome Ngode Datagaliwabehondo mini mbiraore wu kamigo walia harami. Ani walia haramigome Kerisonaga bi mana debeneha mini bilinahe kamigo hondowa wali agali dewalime Ngode Datagaliwabenaga mini yaraga holebira. Ti kamirume tihondobi maru karuhondobi dewaore talebu muleberamigonagabi Ngode Datagaliwabenaga mini yaraga holebira. <sup>14</sup> Anigo Ngode Datagaliwabehanda tihondo biamogo bia holene timbuniore ngiyago hondowa tigua ti kamiru gubaliniore howa ibuhondo tina bi la holebira. <sup>15</sup> Ngode Datagaliwabehanda inahondo baya burugule bame nginigo manda bialu iname ibuhondo kajore lamija.

## 10

*Polohanda, i Kerisonaga biabe biagaore kogoni, lalu walia henego ogo*

<sup>1</sup> I Polo ti mitangi bilimulo ina bi mbira laro. Marume i mitangi bialu lalu, Polo ibu ina heba howa hongo nahe gedaore hagago kaundiani howa inahondo hongo halu bi lalu ka, laga. Tigua ani laganegonaga ina ladai bialu Kerisonaga gedaore holenebi ibu biamogo bulenebi mitangi bialu tihondo langero. <sup>2</sup> Ina ti kamiria ibuwa bi hongo howa loliya tigua bi mo la nahalimu. Marume lalu, Ti dindini holene mitangi biaga kami, lagaru tihondo ina hongo howa bi labehe ko manda bido. <sup>3</sup> Ina heneneore

✧ 9:6: Min 11.24, 22.9, Lm 12.8, Ga 6.7-9 ✧ 9:7: Man 15.7, Min 11.25, Lm 12.8 ✧ 9:8: Min 28.27, Pb 4.19 ✧ 9:9: Iba 112.9 ✧ 9:10: Ais 55.10, Hos 10.12, Md 6.1 ✧ 9:11: 2 Ko 1.11, 4.15 ✧ 9:12: 2 Ko 8.14 ✧ 9:15: Ya 1.17 ✧ 10:1: 1 Ko 2.3 ✧ 10:2: 1 Ko 4.21



dindini hene kamagoyu wai bialu kamago dindialinaga hameme biagadagua ndo bialu kama. <sup>4</sup> Iname wai bialu howa dindialinaga wai biagane aleru yuwa ndo Ngode Datagaliwabenaga wai biagane aleru hongoheore yu haramali. Ogoni yu howa wai pabe hongohe wedaru dugu wahalu ke howa mana lamiaga ngarubi mo waharamali. <sup>5</sup> Wali agalime Ngode Datagaliwabe mana manda nabilo mine holene mana ngagome hangai ho ngaruni iname gialo wahalu tinaga mitangi bulene bibahende Kerisohanda bia laradagua bilo mo bia haramali. <sup>6</sup> Mo bia howa tigua bulene winigo biaiore kama lalu walia haramigola mana bulene ogoni hangai haga karuhondo iname pani mule manda bialu kama.

<sup>7</sup> Tigua mbirale hendedamigo agalime handagadagua handalu kami. Tí mbiralime lalu, I Kerisonagaore kogonilo, manda bu kayagua ibuni lone abiore harudabe hondole lone mitangi bu dai bulene nga. Irane ibu Kerisonaga kayagua nde ibu kadagua inabi Kerisonagaore kamagoni. <sup>8</sup> Anduane Homogohanda inahondo haru holene hongo ngiyago lalu inaga miniha yanga timbuni lo koyagua nde taga nahe kogoni. Haru holenenaga hongo ogoni Anduane Homogohanda inahondo nginigo ogonime tí mo ko holenaga ndo tí mini mbiraore wu kamigo mo anda haga bulenaga ngini. <sup>9</sup> Ina tihondo beba gilibu wia harurume tí mo gi hayadalo manda nabilimu. <sup>10</sup> Tí kamiru mbiralime lalu, Polohanda beba gili biyaru tandagabi hongoheda, lalu, Ibuni ina heba mandagi howa ibu hongo nahe howa ibunaga bi laragobi habane napaleda laga, lolebira. <sup>11</sup> Ani laga kagome ina kaundia howa tihondo beba gilibu wia haramarubi tí heba howa tihondo bule ibuleberamagobi tara ndo mbiraore ogonigo manda bu holene nga.

<sup>12</sup> Agali marume tini mitangi bialu lalu, Ina baya gibi daligaore kama, manda biagaru ina heba ogobi degedege hole bimaga naholeberamaore. Agalime daliga ogobi kama, lalu tini harimidagua dabaga dabaga bialu karu ti luluore yu ka. <sup>13</sup> Iname ani ndo ina mini yaraga holene tu wini ngadagua pialu bolangua naholeberama. Tu ogoni Ngode Datagaliwabehanda winigo iname tí kamigohabi biabe ogonidagua dege bialu kama. <sup>14</sup> Iname Kerisonaga Bi Mana Debene tí kamiria yalu ibirimangi tí tu ogoriani hemigola iname bolangua halu nape harimagoni. <sup>15</sup> Marume biabe biyagonaga iname bini tingi halu mini yaraga holene manda nabi haramali. Ani biradagua mini mbiraore wulene tíha ngago anda helobi tí kamigoha howa iname biabe timbuniore bia tago holebi Ngode Datagaliwabehanda hamedadagua dege bule hamelo kama. <sup>16</sup> Ani buwa iname wali agali dindi tara tara ni paliragohayagi Bi Mana Debene lamibehe holeberama. Ani bialu agali marume biabe ala bialu hene ngagoria iname inanaga mini yaraga halu, Biabe birima, lolene henge nawulebira.

<sup>17</sup> Anduane Homogonaga mbugani bi lo ngadagua ogo, Mbiralime mbiralinaga mini yaraga hoa kayagua ibugua Anduane Homogohanda biyago mitangi bialu ibunaga mini yaraga holene nga, lalu gilibu nga. <sup>18</sup> Ogoninaga mbiralime ibuni mitangi bialu, I bayale ko, manda biragome galone nahaga. Ngode Datagaliwabehanda mbirali mitangi bialu ibu bayale ka lelo holene o galoneore ngagoni.

## 11

### *Polobi agali ke howa ina abosolo kama lagarubinaga te ogo*

<sup>1</sup> Ina lulu bi ale emene lole manda bidogo loliya henge ngiaore bidaba larogoni. <sup>2</sup> Ngode Datagaliwabehanda tí hamelo kadagua ina tí hamelo kogoni. Tí wandari agalila nahene ale daba bagi ho berelowa ina tí agali mbiraore hangume dabu bilo mule lo wirugo agali ogoni Keriso ibu ka. <sup>3</sup> Puyame o tara howa Iba mo hondo henedagua kome

✧ 10:4: 1 Ko 2.5, Eb 6.13-17, 1 Te 5.8, 1 Ti 1.18 ✧ 10:5: 1 Ko 1.19, 3.19 ✧ 10:6: 2 Ko 2.9 ✧ 10:7: 1 Ko 3.23, 14.37, 2 Ko 5.12, 1 Yo 4.6 ✧ 10:8: 2 Ko 12.6, 13.10 ✧ 10:11: 2 Ko 7.14, 12.6, 13.2, 13.10 ✧ 10:12: 2 Ko 3.1, 5.12 ✧ 10:13: Lm 12.3 ✧ 10:14: 1 Ko 3.5, 3.10, 4.15, 9.1 ✧ 10:15: Lm 15.20 ✧ 10:17: Ais 65.16, Yar 9.24, 1 Ko 1.31 ✧ 10:18: Min 27.2, Lm 2.29, 1 Ko 4.4-5 ✧ 11:2: Hos 2.19-20, 1 Ko 4.15, Ga 4.17-18, Eb 5.26-27, Kl 1.28

tínaga mini mo ko halu tígua Kerisohondo mini tigabi wu kamigobi gubalini holene yu kamigobi waholilono i gi ho kogoni. ✧ <sup>4</sup> Irane agali tara tara ta nabi tí kamigoria ibuwa tigua Yasunaga bi mana lalu iname langirimagodagua ndo tara lalu langiragola tí turu halu hale hai haramiligonaga gi haro. Ani bialu tígua dinini tarabi bi mana debene tarabi yu tiga bu kamigoni. Ala Ngode Datagaliwabe Dininibi Bi Mana Debenebi ina heba howa yu tiga birimigobi ndo tara haluniore yu tiga bu kami. ✧

<sup>5</sup> Ina tínaga abosolo haluni tara karuni ti daligaore kagoda lowa i dindiha emene nira haruda mitangi nabi ko. ✧ <sup>6</sup> Ina mana bime lolenenaga mugube nayi koyaguabi mana manda biai holene nayi ndo yu haiore kogoni. Mana manda biai holene ogoni iname horo bibahendeni bayale wiangibi ko wiangibi tíhondo walia haabo halu harima. ✧

<sup>7</sup> Ina Ngode Datagaliwabenaga Bi Mana Debene tí langialu howa ina tíhondo yolo ngi nale haru. Tí mo bamba halimulonaga ini maha harugoni. Ani birugo kagua birudabe. ✧ <sup>8</sup> I tí heba howa biabe bialu harugo holiya Keriso hameigini marume ihondo yolo ngigi biya. Tiha howa kayu ale birugome tí kamiru biamogo bulenaga birugoni. <sup>9</sup> I tí heba harimangi buru pale harugoni howa ina tíhondo mbirale mbira ngi nale haru. Keriso hameigini Masedonia dindini howa ibiyarume i mbirale buru pale hewaru bibahende tigua yalu íbu ngiya. Ala ina tí mo genda nahe harudagua awebi ani dege bulebero. ✧ <sup>10</sup> Kerisonaga henene lolene iha ngagome ininaga mini yaraga haruligo Agaia dindi bibahendeni mbiralime hangai nahabehe holebira larogoni. ✧ <sup>11</sup> Ina tí gubalini nahe howa bi ogoni larudabe. Ina tí gubalini hoore kogoni Ngode Datagaliwabe ibu manda bu ka.

<sup>12</sup> Mana haluni tara lamiaga karume tininaga mini yaraga holene henge handa walia nahelobi iname biabe beramalidagua tiguabi, Beramali, nalelobi ina áyu biabe bialu kogodagua biaabo holebero. <sup>13</sup> Agali uruni ti abosolo henene ndo ke haga ka. Tigua tinaga biabe birago tindule lalu Kerisonaga abosolo henene karu ale tingi howa tini mo tara haga ka. ✧ <sup>14</sup> Bi ogoni hale howa mogo nalalimu. Dama Heyolabe ibuguabi mo wá haga dahuliyali bayale kagobi ale hole ibuni mo tara haga ka. ✧ <sup>15</sup> Ogoni ibunaga biabe biagarume biabe tigabi biaga ale hole tini mo tara holene go taibi ndo. Hamaro bulene wirangi tini biyagonaga pani nolene wiyadaguaore nolebira. ✧

*Polohanda abosolo biabe biaga howa tandaga nenego ogo*

<sup>16</sup> Ala larugo lone ladai berogo. Mbiralime lalu, Polo lulu ale ka, mitangi bulene nawi. Ani mitangi birimiyagua nde karulape dege inaga mini mo yaraga holiya irane emene wilo ani bilimu. ✧ <sup>17</sup> Nde áyu ina bi larogoni Anduane Homogohanda, La, laragola ndo laro. Ininaga mini mo yaraga harogonaga ina lulu ale howa bi laradagua lalu mini mo yaraga harogoni. <sup>18</sup> Wali agali dewalioreme dindi mana mitangi bialu tininaga mini mo yaraga hagago ogonidagua ina nde ininaga mini mo yaraga holebero. <sup>19</sup> Tí mini timbuniorewi kamigo tígua agali lulu ale karu mitangi bialu tinaga bi larago hale hole turu haramili. <sup>20</sup> Mbiralime hongo howa tíhondo, Ogo bidaba, layaguabi tínaga mbirale ngamiru ohowa karulai hayaguabi tí dalimulonaga gono wayaguabi tí mo dindiha helayaguabi tínaga denguini gi habeme bayaguabi tígua ema nabi ani bilo haramiligoni. <sup>21</sup> Ani biyagonaga i bia dai nabi haru lalu labe taga birago nde ina hongo nahe harimagomeda. ✧

Agali mbiralime gi nahe heyuwa ibuninaga mini yaraga halu kayagua ina nde gi nahe heyuwa lulume laradagua bialu ininaga mini yaraga holebero. <sup>22</sup> Ti Hiburuali kabe. Aniyagua ibi kogoni. Ti Isaraele aria kabe. Aniyagua ibi kogoni. Ti Abarahamanaga aguanene kabe. Aniyagua ibi kogoni. <sup>23</sup> Ti Kerisonaga biabe biaga kabe. Ina bi larogo

✧ **11:3:** Pig 3.1-5, 3.13, Yo 8.44, Hi 13.9, 2 Pi 3.17 ✧ **11:4:** Ga 1.7-9 ✧ **11:5:** 1 Ko 15.10, 2 Ko 12.11, Ga 2.6 ✧ **11:6:** 1 Ko 1.17, 2.1, 2.13, 2 Ko 4.2, 10.10, Eb 3.4 ✧ **11:7:** 1 Ko 9.12, 9.18 ✧ **11:9:** 2 Ko 12.13, Pb 4.15-18, 1 Te 2.9 ✧ **11:10:** 1 Ko 9.15 ✧ **11:13:** Lm 16.18, 2 Ko 2.17, Ga 1.7, Pb 3.2, 2 Pi 2.1, Mo 2.2 ✧ **11:14:** Ga 1.8 ✧ **11:15:** 2 Ko 3.9, Pb 3.19 ✧ **11:16:** 2 Ko 12.6 ✧ **11:21:** Pb 3.5

lulu bi laradagua ndo biaruabe. Ibi Kerisonaga biabe biaga howa ti helalu bu bolangua harugo i kogoni. Tigua biabe biyagobi ndo ina hongo timbuni howa biabe bialu harugoni. Garabaya biyagolabi tibume bayagolabi homolene kaware wiagoria howabi dewa halu ina tandaga narugome ti bolangua howa ko. <sup>24</sup> Yualime i mbiru бага bigi bialu dau halu nogo dongoneme pira tebirani dira (39) i bayagoni. <sup>25</sup> Lomoalime mbiru бага bigi bialu halu tebo i gewa tibume bayagoni. Marume halu mbira ege toleme i bayagoni. Iba taluni biralu pialu hewaria halu tebo iba talu budu бага biyagonibi halu mbira i iba solowaraha horo mbira mbiraga mbira lowa iba ogoniha ha ho wiru. <sup>26</sup> Ina ibaga dewa biruru bialu hewaria iba li wiarunagabi pagealime bo waholene hearunagabi homolene wiagoria tagira pugu bialu haabo harugoni. Yuali i aria hearumebi Yu agali ndo tara tara hearumebi i homelo bole bigi biyagoria haga biru. Tano timbuniruha hewagolabi tayandaha hewagolabi iba solowara yaribu biyagoria hewagolabi ke howa hamene laga bigi biaga hearu baba hewagolabi uruni bibahendeme i homolene kaware wiagoria haabo haru. <sup>27</sup> Ina biabe timbuni erekuibi tandagabibi bialu u napale halu gaea buwa bialu harugobi tomo ibabi nane garibi lowabi ha dege biru. Horo maruni tomo nolenebi u paliade holenebi labolabo karulolenebi henge handa walia naheore haga bigi birugoni. <sup>28</sup> Uruni hangu ndo maru ihondo bigi biyaru ina ti langiai nahabehedago horo bibahendeni Keriso hameigini hagahaga bidarunaga mitangi bialu ina gendabi uruni yu hai haruli. <sup>29</sup> Mbiralali ibu hongo nahe kagola ibi ibu mitangi bialu hongo nahe haruli. Mbiralime mendeali ko bilo mo bia haragola inaga bu miniha taulia haragola haruli. <sup>\*</sup>

<sup>30</sup> Ina ininaga mini yaraga holene ngayagua i gedaore hongo nahe ko haruda lalu walia holenaga mitangi bialu mini yaraga holebero. <sup>31</sup> Anduane Homogo Yasu ibu Aba Ngode Datagaliwabe kagonaga mini yaraga haabo holene ngago ibugua ina tindule lalu ndo laralo manda bu ka. <sup>32</sup> Ina Damasagasa hewaria Kini Aredasanaga haru haga heagome hama ogoriani pabe wearunaga harabani dandayi dewame i minilo helene. <sup>33</sup> Tigua ani minule biyaria maru hearume i nuha minu honowa ege tole pabe daliga diri wiagoha howa pulimume hende howa yarali hayagola i ibida puabo haru.

## 12

*Anduane Homogohanda Polohondo de gandebaha walia henegobi ibuninaga hame la pani henegobi ogo*

<sup>1</sup> Inime inaga mini yaraga harogome bayale mo bia nahagago nde harugo ininaga mini yaraga holeneore ngagodago haro. Ai Anduane Homogohanda ihondo de gandebaha walia hayagobi bi ala nahale henego la pani hayuagobi langero. <sup>2</sup> Ala mali deria (14) peha ogoningsi Keriso hameigini mbiralali dahuliya andaga daligaorene daligaha mo yaraga henego ibu manda bu ko. Heneneore penebe be agali ibu de gandeba hendenebe Ngode Datagaliwabe ibuni hangu manda bu ka. <sup>3-4</sup> Ina bi o larugoni lone ladai bero. Agali ogoni ibu dahuliya andaga mo yaraga halu penego manda bu ko. Larudagua dege lone larogo ibu henene penebe be de gandeba hendenebe Ngode Datagaliwabe ibuni hangu manda bu ka. Ani mo yaraga hayagola agali o biagome bi layago hale henego ina dindialime ogo ale layagoda lalu nalabehebi inanaga ne hambumebi nalabehe dege wulebira. <sup>5</sup> Ani biyago ina ininaga mini yaraga nahe agali o biagonaga mini mo yaraga holebero. Ina ininaga mini mo yaraga haruyagua nde i hongo nahe gedaore kogo lalu walia halu dege mo yaraga holebero. <sup>6</sup> Ina ininaga mini mo yaraga hoa haruyagua bi henene hangu lalu holeberogome i lulu ale howa ndo bi lolebero. Anigo tigua ina

<sup>\*</sup> 11:23: Ab 16.23, 1 Ko 15.10    <sup>\*</sup> 11:24: Man 25.3    <sup>\*</sup> 11:25: Ab 14.19, 16.22, 27.41    <sup>\*</sup> 11:26: Ab 9.23, 13.50, 14.15, 20.3, 23.10-11    <sup>\*</sup> 11:27: Ab 20.31, 1 Ko 4.11, 2 Ko 6.5    <sup>\*</sup> 11:28: Ab 20.18-21, 20.31    <sup>\*</sup> 11:29: 1 Ko 8.13, 9.22    <sup>\*</sup> 11:30: 2 Ko 12.5, 12.9-10    <sup>\*</sup> 11:31: 2 Ko 1.23    <sup>\*</sup> 11:32: Ab 9.23-25    <sup>\*</sup> 12:5: 2 Ko 11.30

biruligo de handalubi bi laruligo hale howabi inaga mini bame mo yaraga halimulo hame nale howa ina ininaga mini mo yaraga naholebero.\*

<sup>7</sup> Ina mbirale baya burugule tara tara de handarugonaga mine naholiyanaga Ngode Datagaliwabehanda inaga tinginiha tandaga timbuni nolene ngiya. Tandaga ogonime dama Heyolabenaga biabe biaga ale howa i mine naholiyanaga i mo emene haga.\* <sup>8</sup> Ani biyagola ina halu tebo Anduane Homogohondo bi lalu, Inaga tandaga ogoni ina mo yalu pobelo hamelo ko, laru.\* <sup>9</sup> Ani larugola ibugua ladai bialu lalu, Inaga biamogo bia holene karulape ngago i hongo nahe kegola howa inaga hongo holene timbuniore nga, lene. Ogonigo Kerisonaga hongome i haru kalo manda bu hole ini hongo nahe gedaore kogonaga mo yaraga hole turu timbuni ho ko.\* <sup>10</sup> Ina Keriso mitangi bialu hongo nahe holenebi bi ko ihondo laragolabi gendabi ngagolabi tandaga nolene ngagolabi taibi maru bulene ngagolabi uruni bibahende karulape laruli. Ini hongo nahe kogoni howa Ngode Datagaliwabeha hongo ho kogoni.\*

*Polohanda Korindi wali agali mitangi bu henego ogo*

<sup>11</sup> Ina lulu yu kagome biagadagua bialu kogoni tigua mo bia harimigoni. Tigua, Polo ibu karulape kago, lolene ngagoni. Anigo i agali habane nabulene koyagua tinaga abosolo haluni tara biaru ti daliga lowa i dindiha emene nira ndo kogoni.\* <sup>12</sup> Ina ti heba howa ema nabi haabo halu nahendene aleru bialubi agalime nabiyagane aleru bialubi manane uruni bigi birugome i abosolo kogoni lalu waliala ka.\* <sup>13</sup> Ina Keriso hameigini hagahaga bu karuhondo birudagua tihondo mbira bulenego waharudabe. Ina tihondo, I biamogo bialu mbirale ngidaba, nale harugo. Ogoni dege nabirugo ina kagua bialu harudago larogo tigua nde mitangi biaabo nahe wahalimu.\*

<sup>14</sup> Ai ayu halu tebonengi i ti kamiria nenege ibule manda bu kogoni. Ibuwa ina tihondo, Mbirale ngidaba, nale holebero. Tinaga mbirale ngamiru ina hame nalego tinioire hamelo kogoni. Waneiginime tinaga aba aiyala haru howa mbirale ngaru mo miaga ndogo aba aiyalame libunaga waneigini haru howa mbirale ngaru mo miaga kagoni.\* <sup>15</sup> Ina ti biamogo bulenaga inaga bibahende ngogobi inibi heba ngiai hole turu ho kogoni. Ina ti gubalini timbuniore ho haruligonaga tigua i gubalini emeneore ho holeberamibe.\*

<sup>16</sup> Ani larugome ina, Ti mo genda halu ndo, laruyagua tigua, E henene lari, loleberami. Anigo mbiralime dege lalu, Polo ibugua ohowa ke hayagome ina mo hondo haya, lolebira. <sup>17</sup> Ani biruyagua agua bialu mo hondo harudabe. Ngode Datagaliwabe mana lamiaga hearu ti hemiria ibilarugo agali uruni tiha howa ina ti mo hondo haruyabe. <sup>18</sup> Taidasa ti hemiria ibilo ina, Polene ngaore, lalu Keriso hameigini mbira Taidasa heba ibilo, Pilibu, laru. Taidasa ibu ti heba howa tinaga mbirale wimiru mbira ngi layabe. Ibi Taidasabi Ngode Datagaliwabe Dinini mbiraoreme iya haru kagola iyame mana mbiraore dege lalu harabali ndobe.\*

<sup>19</sup> Bi ogoni lalu harimago iname tihondo birimagonaga ladai bialu kalo mitangi bidamibe. Ani ndo. Ina Ngode Datagaliwabenaga deni howa Keriso ibugua hame ledadagua lalu harima. Nenege turubioreru-o iname bibahende beramaliru ti biamogo bulenaga hangu beramali. <sup>20</sup> I ti kamiria ibuwa ina ti halimulo hamelo kogobi ndo tara kamiria handa waliala holigobi tigua nde i holiyago hame ledamigobi ndo tara handa waliala holigonagabi gi ho kogoni. Ti kamigoha bi gungu bulenebi henge lolenebi keba holenebi habua bulenebi la hirulenebi diburibu lolenebi mine holenebi mo mbiraore naholenebi urunibi wu kamiria handa waliala holigo i gi ho kogoni.\* <sup>21</sup> I lone eberogola ti deni howa Ngode Datagaliwabehanda i mo taga halu wali agali dewalime ala ko biyago

\* 12:6: 2 Ko 10.8, 11.16    \* 12:7: Yob 2.6, Ese 28.24, Lg 13.16, Ga 4.13-14    \* 12:8: Md 26.44    \* 12:9: 2 Ko 11.30, Pb 4.11-13, 1 Pi 4.14    \* 12:10: Lm 5.3, 2 Ko 7.4, 13.4    \* 12:11: 2 Ko 11.5    \* 12:12: Lm 15.19    \* 12:13: 2 Ko 11.9    \* 12:14: 2 Ko 13.1    \* 12:15: Pb 2.17    \* 12:18: 2 Ko 8.6, 8.16-18    \* 12:20: 2 Ko 2.1-4

tigua mana nabulene biyarubi wali agalime kayu biyarubi dimagoli hayarubi urunibi biyarunaga mini beregeda nabi ha ho ngaru hondowa ina dugu bulebero.✠

## 13

### *Polohanda, Tí ko bulamini bayuwa halimu, lalu lenego ogo*

<sup>1</sup> Ina tí kamiria áyu halu tebone nenege eberogoni. Anduane Homogonaga mbugani lo ngadagua ogo, Mbiralime ko ogo biya, laragola kiralimebi tebiralimebi de hendene kayagua tigua henene handayadagua lo tiga bulene nga, lalu gilibu nga.✠ <sup>2</sup> Bamba ko bialu hayaruhondobi maruhondobi bi mbira loa kogo. Ala ina tí hemiria halu mende nenege ibu haruangi langirugonidagua áyubi kaundia howa lone ogo langero. Ina tí kamiria lone eberogola ko biaabo halu karu pani nane yo polene nawulebira. <sup>3</sup> Kerisohanda iha howa bi latagi hagago handa waliaore holeberami. Ibugua tihondo biagago hongo nahe howa ndo ibunaga hongo tihondo waliaore haga ka. <sup>4</sup> Yasu ibu hongo nahe ale heago tigua ibu homelo ira bangani ba para henegoyu Ngode Datagaliwabenaga hongo holeneme ibu mo heya henego haabo ka. Iname ibuha ho gimbu bu howa inabi hongo nahe kama. Iname Keriso heba howa Ngode Datagaliwabenaga hongome tí mo tiga bialu holeberama.✠

<sup>5</sup> Tí Kerisohondo mini mbiraore wu haabo harimidabe hondole tını miniha bayuwa dabalulu halimu. Keriso Yasu ibu tíha haore bidagoyu tını wahalulu tagira puabo harimiyagua hangulu naholebira.✠ <sup>6</sup> Iname wahalulu tagira nape haabo kamago tí manda bilimulu hamelo ko. <sup>7</sup> Tigua kagua nabi halimulu iname Ngode Datagaliwabehondo tınaga bi la halu kama. Ani la halu howa iname bayuwa lawai haga kamago walia holenaga ndo marume ina wahalulu tagira pene mbaulara layaguabi tí kamirume bayale tigabi hangulu bilimulonaga iname Ngode Datagaliwabehondo bi la halu kama. <sup>8</sup> Iname henene lolene mo wahowa mbira biabe bibe nahe howa henene lolenenaga biabe dege beramali.✠ <sup>9</sup> Ina hongo nahe kamagola tí hongohu kamigo ina turu haramali. Anigo tí mini bayaore wuwa Kerisoha hongohu halimulobi iname Ngode Datagaliwabehondo bi la halu kama. <sup>10</sup> Ina tí kamiria ibu nabi howa bi ogoni ala gilibu wia harogo irane ogo. Tí kamiria eberogola howa hongo holene Anduane Homogohanda ngiyagome ina tihondo hongo naholebero. Hongo holene ogonime tí mo ko holenaga ndo tí mini mbiraore wu kamigo mo anda haga bulenaga ngini.✠

### *Bi lamaru bialu lenego ogo*

<sup>11</sup> Ai i hamene mbaliniru-o hondo halimu laro. Mini bayaleore wuwa holene hai biaabo halu halimu. Tí bilimulonaga langiruru bayuwa yu halimu. Tını mini mbiraore haga bialu mandagi howa mo palia holene yu halimu. Ani bialu harimiyagua gubalini holenebi mo palia holenebinaga Ngode Datagaliwabe ibu tí heba holebira.✠

<sup>12</sup> Tını lola haga bigi bialu turu halu gi tigali bigibigi bilimu.

Ngode Datagaliwabenaga wali agali bibahende oali karume, Tí mitangi bu kama, lalu la wia hara.✠ <sup>13</sup> Anduane Homogo Yasu Kerisonaga biamogo bia holenebi Ngode Datagaliwabenaga gubalini holenebi Ngode Datagaliwabe Dinini ibugua tınaga mini mo mbiraore holenebi tíha wiaabo helo hamelo ko.

✠ 12:21: 2 Ko 13.2 ✠ 13:1: Man 17.6, 19.15, Md 18.16, 2 Ko 12.14, 1 Ti 5.19 ✠ 13:4: Lm 6.4, Pb 2.7-8, 1 Pi 3.18  
 ✠ 13:5: 1 Ko 9.27, 11.28, Ga 4.19 ✠ 13:8: 1 Ko 13.6 ✠ 13:10: 1 Ko 4.21, 2 Ko 2.3, 10.2, 10.8, 12.20-21, Ta 1.14  
 ✠ 13:11: Lm 15.33 ✠ 13:12: Lm 16.16, 1 Te 5.26, 1 Pi 5.14



## **Galesia** **Polohanda Keriso hameigini Galesiani hearuhondo beba** **ogo gilibu wia hene**

### **Mbuga ogoha gilibu ngarunaga nemandi ogo**

Yasunaga Bi Mana Debene lamiyagola loyogo lalu Yu wali agali ndo tara tara hearume hale howa turu halu yu tiga bini. Yu tiga biyagola agali marume Ngode Datagaliwabe mana henene ngadagua ndo lawai halu lalu, Ai Keriso hameigini heneneore hole Mosesse heneyangi Mana lowini ngadagua bulene nga, lene. Ani lawai halu ka layago hale howa Polohanda lalu, Ani bulene nawiore. Holene gahenge yule Kerisohondo mini mbiraore hangu wulene nga. Ani birimiyagua Ngode Datagaliwabehanda, <sup>1</sup> mini tigabiwi ke, lolebira, lalu gilibu wia hene.

Ngode Datagaliwabe mana henene ngadagua ndo lawai haga biarume wali agali hariga naleagoha haru peneni mini mbiraore wulene harigani haru dai bulenaga Polohanda beba ogoni Keriso hameigini Galesiani hearuhondo gilibu wia hene. Ani gilibu wia halu howa lalu, <sup>1</sup> abosolo harudagoni pigane dindi agalime olalu ihondo, <sup>1</sup> biabe ogoni bia, lene ndo biabe ogoni ina buliya Ngode Datagaliwabeibunime olene, lalu lo winigo nga.

Ani lowa Ngode Datagaliwabehanda iname ibuhondo mini mbiraore weramago hangu hondowa, <sup>1</sup> mini tigabiwi kami, laga lalu bi ogoninaga hongo howa lo yanga lalu leda. Ani lowa lamaro bialu lalu, Mini mbiraore weramagome gubalini holene yu anda ibiragola gubalini holene ge ho howa Keriso hameiginime bulenebi lolenebi aguada lalu bialu holeberama, lene.

#### **Bulu бага бува кuni gilibu ngago**

*1.1-10*

Gili binigonaga irane *1.11-2.21*

Polo ibu abosolo helo Ngode Datagaliwabehanda olenego *3.1-4.31*

Ngode Datagaliwabehanda ina biamogo bulene nawi howa biamogo bia hagagonaga bi mana debene ngago *5.1-6.10*

Garabaya ale hemaria golope henego iname bialu holene *6.11-18*

Lamaro bialu lenego

<sup>1</sup> <sup>1</sup> Polo. <sup>1</sup> abosolo agali holiya wali agalime <sup>1</sup> olalu, Ha, lene ndo. Tigua <sup>1</sup> dabo helenebi ndo. Aba Ngode Datagaliwabehanda Yasu homayagola mo heya henego ibubi Yasu Kerisobi libugua <sup>1</sup> abosolo holiya dabo helene.\* <sup>2</sup> Keriso hameigini <sup>1</sup> heba oali kamarume Keriso hameigini Galesiani ngoai haga bidamiruhondo, <sup>1</sup> <sup>1</sup> mitangi bu kama, lalu beba ogo gilibu wia harama.

<sup>3</sup> Ina Aba Ngode Datagaliwabebi Anduane Homogo Yasu Kerisobi libugua tihondo biamogo bia holenebi mo palia holenebi ngilo hamelo ko.\*

<sup>4</sup> Ina Aba Ngode Datagaliwabehanda hamelo henedagua iname ko birimagonaga Keriso ibugua homo aribia hene. Ayu ko bu ngarume ina dariba kagonaga ibugua ina golope hole ani bini.\* <sup>5</sup> Ogoninaga iname Ngode Datagaliwabe mini yaraga haabo halu holene ngago aniore bimija.

*Bi Mana Debene mbiraore hangu ngago ogo*

<sup>6</sup> Kerisonaga biamogo bia holene Ngode Datagaliwabehanda <sup>1</sup> t<sup>1</sup> olayago tigua ibu abaleore wahalu bi mana mende hale hole poramigo <sup>1</sup> mogolo ko. <sup>7</sup> Bi Mana Debene

\* **1:1:** Ga 1.11-12 \* **1:3:** Lm 1.7, Pb 1.2 \* **1:4:** Lm 4.25, Ga 2.20, 1 Ti 2.6, Ta 2.14, Hi 2.5, 1 Yo 5.19

mende nawiore lalu langerogoni irane ogo. Wali agali maru karume tí mini kira wu halimulo Kerisonaga Bi Mana Debene mo tara hole manda bialu ka.✠ 8 Iname Bi Mana Debene ala langirimagobi ndo maha ina mbiralimebi dahuliya andaga howa dahuliyalimebi bi mana mende ale langirimayagua ogoni ibuhondo, Heli dindi pu, lolene wulebira.✠ 9 Ala iname larimadagua áyubi ina lone larogo. Mbiralime Bi Mana Debene ala yu tiga birimigobi ndo mana mende ale tíhondo langiyiyagua ogoni ibuhondo, Heli dindi pu, lolene wulebira.✠

10 Wali agalime íhondo turu helonaga bi larobe. Aninaga ndo laro. Ngode Datagaliwabehanda íhondo turu helo hamelo ko. Wali agalime í hame lelo manda berobe. Ina wali agalime í hame lelo manda bu haabo kole nde í Kerisonaga biabe bia haga ndo kole.✠

### *Polo ibu abosolo henego te ogo*

11 Í hamene mbaliniru bi o langerogo hale halimu. Bi Mana Debene ina langigi biruligo agalinaga ndo.✠ 12 Agali mbirame í langini ndo. Mbiralime í lawai henebi ndo. Yasu Keriso ibunime í walia haya.✠

13 Ala ina Yu wali agalinaga manani howa bialu harugo te langiyago tí hale harimi. Ngode Datagaliwabenaga wali agali heneru ina ti dara nahe howa mo tandaga halu bo wahai hole manda buwa hongo howa bialu haru.✠ 14 Yu agali maru í mandagiali hearume Yu wali agalinaga manani henedagua ndo ina ti bolangua halu mamali mana gibi wiarubi bialu harugoni.✠

15 Ngode Datagaliwabehanda dara howa biamogo bia hole lowa í aiyahanda í nataba heneha ibugua í dabowa ibunaga biabe bia haga holiya loma bia ho heleneya.✠ 16 Yu wali agali ndo wali agali tara tarahondo ina Bi Mana Debene lamuliyana Ngode Datagaliwabehanda ibu Iginí ina de hondoliya ha pani helaya. Ani helayagola agali maru hearuhondo í agua buadabe lalu te nale haru.✠ 17 Abosolo agali ala hene Yarusalemeni hearu ti hearia í de hondo nape í Arebia dindi ala pialu mani Damasagasa dai biru. 18 Dai buwa mali tebira halu í Yarusaleme Pida hearia te lole puwa ibula Sarere kira agima ho hariba.✠ 19 Ogoriani abosolo agali maru í de nahende Anduane Homogo hamene Yamese dege hearia de handaru.✠

20 Ani biru lalu tíhondo bi gilibu wia harogoni tindule lalu mbira gili nabi tigatigaore gili berogo Ngode Datagaliwabe ibu de hendeda.

21 Emene howa ina Siriabi Silisiabi puwa uruniha ibaga bu haru.✠ 22 Ogoningi Keriso hameigini Yudiaha bu haga hearume í de nahende hene. 23 Tigua wali agali marume te layago dege hale ho hene. Te layago ogo. Agali mbira ala ina mo tandaga halu Yasuhondo mini mbiraore wulenenaga mana ala mo wahai hole haga biagome áyu lone ibuni Yasunaga bi mana lamialu ka, layago hale ho heneya. 24 Anigo Ngode Datagaliwabehanda íhondo biyiyago mitangi bialu tigua ibunaga mini yaraga halu hene.

## 2

### *Polobi abosolo agali hearubi ti mini mo mbiraore henego ogo*

1 Mali pira mbirani maria (14) howa Banabasa iya Yarusaleme dai bialu Taidasabi, Ma, lalu ina haru pirima.✠ 2 Ngode Datagaliwabehanda í polene nga lalu walia hayagola piru. Puwa wali agali haru haga hearu mo ngoai howa Bi Mana Debene Yu wali agali ndo tara tarahondo ina lamialu haruligo ti lamiru. Lamirugo irane ina biabe

✠ 1:7: Ab 15.1, 15.24, 2 Ko 2.17, 11.4, 11.13 ✠ 1:8: 1 Ko 16.22 ✠ 1:9: Man 4.2, Min 30.6, Mo 22.18-19 ✠ 1:10: 1 Te 2.4, Ya 4.4, 1 Yo 3.19 ✠ 1:11: Md 16.17, 1 Ko 15.1 ✠ 1:12: 1 Ko 15.1-3, Ga 1.1, Eb 3.3 ✠ 1:13: Ab 8.3, 9.1, 22.4-5, 26.9-11, 1 Ti 1.13 ✠ 1:14: Ab 22.3, 26.9, Pb 3.6 ✠ 1:15: Ais 49.1, Yar 1.5, 49.1, Ab 9.15, Lm 1.1 ✠ 1:16: Lm 11.13, 2 Ko 4.6, Ga 2.7 ✠ 1:18: Yo 1.42, Ab 9.26-30 ✠ 1:19: Md 13.55 ✠ 1:21: Ab 9.30 ✠ 2:1: Ab 11.30, 15.2

ala birugobi áyu bialu kogobi bame bu wahole bulene hame nale haru. <sup>3</sup> Taidasa ibu Girigiali howa ìla hagago dongone podo mabu biaga mana winigo ngadagua, Podolene nga, lalu tigua ina nalangiya.✧ <sup>4</sup> Agali maru ti Keriso hameigini hetingi howa ina baba mandagi hole ibiyaru tigua, Taidasanaga dongone podo mabu bimíya, lene. Ina Keriso Yasu heba ho gimbu buwa ibunaga golope hagane mana yu hemago agali ibiyarume ohowa de hondole ibini. Tigua ina lone dariba ho dai bule hame lene.✧ <sup>5</sup> Bi Mana Debenenaga henene lolene tí kamigoha wiaabo helo agali biaruhondo gedaore howa e lolene manda nabiore harima.✧

<sup>6</sup> Agali maru haru haga mini lene mbaule hearume ìhondo mana tara mbira nalangi. Agali maru haru haga mini lene mbauleya larugo henemane haru hagadalo manda nabido. Ngode Datagaliwabe ibu tingini dege de hondowa wali agali tale nabiga ka.✧ <sup>7</sup> Anigo Bi Mana Debene Yu wali agalihondo Pidahanda lamilo Ngode Datagaliwabehanda miya. Ani miyadagua Yu wali agali ndo tara tarahondo ìna lamuliya Ngode Datagaliwabehanda ìhondo ngiyago haru haga mini lene mbaule biarume ogonidagua manda biyiya.✧ <sup>8</sup> Ngode Datagaliwabenaga hongome Pida ibu Yu wali agalinaga abosolo helo Ngode Datagaliwabehanda ibu helayadagua ìbi Ngode Datagaliwabenaga hongome wali agali tara taranaga abosolo holiya ì heleda. <sup>9</sup> Ngode Datagaliwabehanda biabe ogoni ìhondo ngiyiyago hondowa Yamese Pida Yonema ti haru haga agali mini lene mbaule howa Banabasa iya gi tigali biya. Iyame wali agali tara tara heba biabe bulubaya tigua nde Yu wali agali heba biabe bilo ina mini mbiraore howa ani bimíya larima.✧ <sup>10</sup> Tigua iyahondo bi mbira layago ogo. Yu wali agali iname bi mana lamera-marua maru mbirale nawi buru pale karu mitangi bilibu, laya. O layadagonidagua mitangi bialu ani bule hame timbuni lowa ìna ala bialu harugoni.

### *Polohanda Pida talinigo ogo*

<sup>11</sup> Pida ibu Andiogo ibuwa nakarulape biyagola wali agali hearu hale hai helo ìna mana lalu Pida taliru. <sup>12</sup> Agali maru Yamese heagoria howa naibiha Pida ibu Keriso hameigini Yu wali agali ndo tara tara hearu heba mandagi tomo nalu haga hene. Agali biaru Yamese heagoria howa ibiyagola Pida ibugua agali o ibiyarume ti agali tara tara dongone podo mabu biagane mana bulene hame laga ka manda buwa gi halu ibu ala agali ta nabi heba mandagi tomo nayadagua nane wahene.✧ <sup>13</sup> Yu agali maru Keriso hameigini hearumebi Banabasa ibubi ti hondowa gi halu mini kira wuwa Pidahanda biyadagua bini. <sup>14</sup> Tigua Bi Mana Debene henene ngadagua bule hariga tigabini ndo piyane hondowa ti bibahende hale hai helo ìna Pida talialu bi larugo ogo, Í Yu agali howa Yu agali hagadagua ndo hari. Wali agali tara tara karu hagadagua harigoni. Ani buwa wali agali tara tara karuhondo ti Yu wali agalime hagadagua halimu lalu agua labehe kebe, laru.✧

### *Yasuhondo mini mbiraorewi karu ta nabi mini tigabiwi kago ogo*

<sup>15</sup> Wali agali tara tara ko biaga karu aria ndo kama. Ina Yu wali agali teneore kamagoni. <sup>16</sup> Ina Yu wali agali howa manda bidamago ogo. Mosese heneyangi Mana lowinigo ngadagua mbiralime bialu hayagua Ngode Datagaliwabehanda, Ibu mini tigabiwi ka, nalolebira. Mbiralime Yasu Kerisohondo mini mbiraore wu kayagua Ngode Datagaliwabehanda, Ibu mini tigabiwi ka, lolebira manda bidama. Ngode Datagaliwabehanda ìna hondowa, Tí mini tigabiwi kami, lelo inamebi Keriso Yasuhondo mini mbiraore wu kama. Mana lowinigo ogoni ngadagua bialu harimagome ndo iname Kerisohondo mini mbiraore wu kamagome Ngode Datagaliwabehanda ani lolebira. Mbiralime Mana lowinigo ngadagua bialu kayagua Ngode Datagaliwabehanda ibuhondo, Í mini tigabiwi

✧ 2:3: Ab 16.3 ✧ 2:4: Ab 15.1, 15.24, 2 Ko 11.20, 11.26, Ga 1.7, 5.1, 5.13 ✧ 2:5: Ga 3.1, 4.16 ✧ 2:6: Man 10.17, Ab 10.34, Lm 2.11, 2 Ko 12.11, Ga 6.3 ✧ 2:7: Ab 22.21 ✧ 2:9: Yo 1.42, Lm 1.5, Eb 3.8 ✧ 2:12: Ab 11.3 ✧ 2:14: 1 Ti 5.20

ke, nalolebira.✧ 17 Ina Kerisoha ho gimbu bidamagome Ngode Datagaliwabehanda inahondo, Tí mini tigabiwi kami, lolebira manda bu kama. Ani manda bu howa Yu wali agali ndo wali agali tara tara mini kowi karubi dege harimadane handa walia harimayagua nde tene Kerisohanda ina ko mo bia hayada labehe kamabe. Ani nalabeheore.✧ 18 Ina mana ala yu waharugo lone bu dai biruyagua Mana lowinigo puguaro lalu walia ko. 19 Ngode Datagaliwabeha bayale holiya Mana lowini ngagome i mo homa henego homene ale kogoni. I Kerisonaga ira bangani ibu heba ba para howa homarugoni.✧ 20 Ai i ndo kogoni. Keriso ibu iha kagoni. Holene áyu kogoni Ngode Datagaliwabe Iginihondo mini mbiraore wu kogome kogoni. Ibugua i gubalini howa homa aribia hayagoni.✧ 21 Ngode Datagaliwabehanda ibunaga biamogo bia holene ihondo ngiyago mangabago waharo nale ko. Mana lowinigo ngadagua biaga karuhondo Ngode Datagaliwabehanda, Tí mini tigabiwi kami, lagayagua nde Keriso ibu bame homayada manda bibehe kama.✧

### 3

#### *Ina mini tigabiwi holene mana ngago ogo*

1 Galesia wali agaliru-o tí mini nawi harimidago aiwa mo lulu ya hayabe. Yasu Keriso ibu agua bialu ira bangani homaya lalu te langirugo bayuwa hale hai harimigoni.✧ 2 Bi mbira ogo dege langilimulo hame ledó. Mana lowinigo ngadagua birimigome Ngode Datagaliwabehanda ibu Dinini ngiyabe be Bi Mana Debene hale howa mini mbiraore wirimigome ngiyabe.✧ 3 Tí mini nawiore kamigo agibe. Pigane tenuwa Ngode Datagaliwabe Dininina hongoi howa harimi. Ai tínina hongoi bia maro bule mitangi bu kamibe.✧ 4 Keriso hameigini harimigonaga tandaga ala narimigo bameyabe. Bame ndo galoneorenaga narimilo manda bido.✧ 5 Ngode Datagaliwabehanda tihondo ibu Dinini ngialu tíha howa agalime nabigane ale biagago tene Mosese heneyangi Mana lowinigo ngadagua birimigome biagabe be tigua Bi Mana Debene hale howa Kerisohondo mini mbiraore wirimigome biagabe.

6 Anduane Homogonaga mbugani bi lo ngago ogo, Abarahamahanda mini mbiraore wiyagola Ngode Datagaliwabehanda ibu mini tigabiwi ka, lene lalu gilibu nga.✧ 7 Ani lenego wali agali Ngode Datagaliwabehondo mini mbiraorewi karu ti dege Abarahama aguanene henemane kago manda bilimu.✧ 8 Anduane Homogonaga mbugani bi lo ngagome ala mbiwia ho wialu lalu, Wali agali tara tara Ngode Datagaliwabehondo mini mbiraorewi karu ti mini tigabiwi ka lolebira, lalu gilibu winigo nga. Bi mende lo ngago ogo, Iha howa Ngode Datagaliwabehanda wali agali bibahende mo turu hai holebira, lalu gilibu nga. Anibidago bi ogoni Ngode Datagaliwabenaga mbugani lo ngagome Bi Mana Debene Abarahamahondo ala lamini.✧ 9 Abarahamahanda Ngode Datagaliwabehondo mini mbiraore winigome turu holene yu hene. Ibugua turu holene yu henedagua iname Ngode Datagaliwabehondo mini mbiraore wu harimayagua turu holene yu holeberama.✧

10 Mini tigabi hole Mana lowinigo buleneha hana ho karuhondo, Tandaga nama pobe, lolene wulebira. Anduane Homogonaga mbugani bi lo ngago ogo, Mana lowini ngago biai nahaga karuhondo, Tandaga nama pobe, lolene wulebira.✧ 11 Mana lowinigo manda buwa bialu karuhondo Ngode Datagaliwabehanda, Tí mini tigabiwi kami, nalolebira manda bido. Anduane Homogonaga mbugani lo ngago ogo, Ngode Datagaliwabehanda ibuhondo mini mbiraorewi karuhondo, Tí mini tigabiwi kami, laga

✧ 2:16: Iba 143.2, Ab 13.38-39, 15.10-11, Lm 1.17, 3.20-28, 4.5, 11.6, Ga 3.11, Hi 7.18-19 ✧ 2:17: 1 Yo 3.8-9 ✧ 2:19: Lm 6.11, 6.14, 7.6, 2 Ko 5.15, 1 Te 5.10, Hi 9.14 ✧ 2:20: Yo 13.1, Lm 6.11, Ga 1.4, Eb 5.2, Ta 2.14, 1 Pi 4.2 ✧ 2:21: Ga 3.21, Hi 7.11 ✧ 3:1: Ga 2.13-14, 5.7 ✧ 3:2: Ab 10.47, 15.8, Lm 10.16-17, Hi 6.4 ✧ 3:3: Ga 4.9, Hi 7.16, 9.10 ✧ 3:4: Hi 10.35-36, 2 Yo 8 ✧ 3:6: Pig 15.6, Lm 4.3, Ya 2.23 ✧ 3:7: Yo 8.39, Lm 4.11-12, 4.16 ✧ 3:8: Pig 12.3, 18.18, 22.18, Ab 3.5, 3.25, Lm 9.17 ✧ 3:9: Lm 4.16 ✧ 3:10: Man 27.26, Yar 11.3

ka. Ani lene karu ti dege holene gahenge yu holebira, lalu gilibu nga.✧ <sup>12</sup> Mana lowini ngago bulene tene Ngode Datagaliwabehondo mini mbiraore wuleneme ndo. Anduane Homogonaga mbugani lo ngago ogo, Mbiralali Mana lowini ngadagua bibahende biai haragome ibunaga holene tene ogoni holebira, lalu gilibu nga.✧

<sup>13</sup> Mana lowini ngago nabiaga karuhondo, Tandaga nama pobe, lolene wulebira lowini. Iname tandaga nama polene wulebira lo wiyagome ina dariba ho wiaria Keriso ibugua pu aribia halu tandaga ogoni na halu ina golope hene. Anduane Homogonaga mbugani lo ngago ogo, Mbiralali ira bangani ba para haragohondo Ngode Datagaliwabehanda, Tandaga nama pobe, lolene wulebira, lalu gilibu nga.✧ <sup>14</sup> Ngode Datagaliwabehanda Abarahamahondo turu holene ngulebero lowinigo Keriso Yasuni howa wali agali tara tara karume yilonaga Keriso Yasu ibu homo aribia hene. Ani binigo Ngode Datagaliwabehanda, I Dinini ngulebero, lowinigo ina Yasuhondo mini mbiraore wu kamagome yidamagoni.✧

*Mana lowinigobi Ngode Datagaliwabehanda habo nalolene bi lowinigobi ogo*

<sup>15</sup> I hamene mbaliniru iname beramaligonaga bi yobage ale mbira larogo. Agali kiralime mini mbiraore howa ani bibiya lowa bi ogoni habo nalole lalu bebani gilibu wiribiyagua libu mendealime bi gilibu wiribigo napuguabehebi gilibu tago nahabehebi habo nalolene lalu bi gilibu wiribigodagua wiaabo holebira. <sup>16</sup> Ogonidagua Ngode Datagaliwabehanda Abarahamabi ibu aguanenegobi libuhondo ngulebero laga bialu lo wima ibini. Anduane Homogonaga mbugani lo ngagome bi ogoni aguaneneru lalu nale aguanenego lalu layago dewali lalu ndo mbiraoreli hangu lalu lenego gilibu ngago ogoni ibu Keriso lalu lene.✧ <sup>17</sup> Bi larogoni tene ogonaga laro. Ngode Datagaliwabehanda habo nalolene bi lo wialu, Nguleberoore, lalu lowini. Bi ogoni lo wu heane mali dewaore handari mariani pira tebira (430) peagola maha Mana lo wiyagome habo nalolene bi ala lo winigo napuguabehe wini. Ngode Datagaliwabehanda ala, Ngulebero, lo winigo nawahabehe wiaabo holebira.✧ <sup>18</sup> Ngode Datagaliwabehanda ngiagaru Mana lo winigo ngadagua biai haramagome ngiagadale nde Ngode Datagaliwabehanda ngulebero lo winigoria mo tene holene nangale. Ani bialu ndo Ngode Datagaliwabehanda bambaore Abarahama ibuhondo ngulebero lo winidaguaore mini.✧ <sup>19</sup> Ani biniyagua Ngode Datagaliwabehanda Mana lo wilo laminigo irane aginagabe. Irane wali agalime mana ko agodabe manda bialu dabelonaga Ngode Datagaliwabehanda Mana lowini. Abarahama aguanene biago ibilo mana lo wiyagoria lola helo wini. Abarahama aguanene o biagohondo Ngode Datagaliwabehanda bi ala lowini. Mani Ngode Datagaliwabehanda Mana lowinigo dahuliyaliruha howa lamiyagola Mosese ibu dombegua howa wali agaliru lamini.✧ <sup>20</sup> Mbiralali hangu howa mendeali naheyagua dombegua aginaga holebe. Anigo Ngode Datagaliwabe mbiraore ibuni dege howa lowini.✧

*Mana lo winigonaga irane ogo*

<sup>21</sup> Mana lo winigome Ngode Datagaliwabehanda ala, Ngulebero, lo winiru baba waitigi ho ngabe. Ani ndoyago. Mana lo winiru mbirame wali agalihondo holene gahenge mibehe winidale Ngode Datagaliwabehanda wali agalihondo, I mini tigabiwi ke, lolene mana ogoni ngale.✧ <sup>22</sup> Anduane Homogonaga mbugani bi lo ngago ogo, Wali agali dindi bibahendeni kamaru mana konaga hongome ina dariba hai ka, lalu gilibu nga. Ani bidago wali agali Yasu Kerisohondo mini mbiraore weramagome Ngode Datagaliwabehanda, Ngulebero, lowinigo yu holomayanaga nga.✧

✧ **3:11:** Hab 2.4, Lm 1.17, Ga 2.16, Hi 10.38 ✧ **3:12:** Lm 18.5, Neh 9.29, Lm 4.4, 10.5, 11.6 ✧ **3:13:** Man 21.23, Lm 8.3, 2 Ko 5.21, Ga 4.5 ✧ **3:14:** Ese 11.19, Yol 2.28-29, Seg 12.10, Ab 2.33 ✧ **3:16:** Pig 12.3, 12.7, Ab 7.5, 17.7, 1 Ko 12.12 ✧ **3:17:** Har 12.40, Lm 4.13-14, Ga 3.21 ✧ **3:18:** Lm 4.14, 8.17, 11.6 ✧ **3:19:** Man 5.5, 5.22-27, Yo 1.17, Ab 7.38, 7.53, Lm 5.20, Hi 2.2 ✧ **3:20:** Lm 3.29-30 ✧ **3:21:** Lm 8.2-4 ✧ **3:22:** Lm 3.9-19, 3.23, 4.11-12, 4.16, 11.32



<sup>23</sup> Yasuhondo mini mbiraore wulene tagira naibiha Mosese hene yangi Mana lowinigo ogonime ina dariba hai hene. Yasuhondo mini mbiraore wulene tu tagira ibilo ina dariba ho wiaabo hene. ✧ <sup>24</sup> Ina Yasuhondo mini mbiraore wirimagome Ngode Datagaliwabehanda inahondo, Tí mini tigabiwi kami, lelo Mana lowinigo ngagome ina haru haga ale howa Keriso ibilo ina ibu karia haru pole haru haabo hene. ✧ <sup>25</sup> Yasuhondo mini mbiraore wulene áyu íbu ngago mana ala ina haru hayagome lone áyu haru haabo holene nawi.

<sup>26</sup> Tí Keriso Yasuha ho gimbu bu howa ibuhondo mini mbiraore wirimigome Ngode Datagaliwabe waneigini kami. ✧ <sup>27</sup> Tí Keriso ha ho gimbu bu howa baboraya birimi. Ani birimigo Keriso ibuni kagobi holene ogoni karulo kami. ✧ <sup>28</sup> Yu wali agali karubi wali agali tara tara karubi garabaya biabe ale bia haga karubi garabaya nabini karubi wali bedarubi agali karubi tí bibahendeore ta nabi Keriso Yasuha ho gimbu bu howa mbiraore kami. ✧ <sup>29</sup> Tí Kerisonaga kamiyagua nde tí Abarahama aguanene kamigoni. Tí Abarahama aguanene howa Ngode Datagaliwabehanda ibuhondo, Nguleberoore, lo winigo tíbi yu holeberami. ✧

## 4

<sup>1</sup> Ina bi larogo ogodagua laro. Agali mbira ibu igini kayagua igini ogoni ibu abanaga mbirale bibahende ngaru awe ibunaga wulebirago lowa ibu igiri emene katagi garabaya biabe ale bia haga mbirale nawi hagagobi haga. <sup>2</sup> Ibu abahanda mbirale mulene horo pongo bo winigo lola helo ibu emene katagi agali marume igiri ogoni de hondo howa biamogo bialu haga. <sup>3</sup> Ogonidagua ina mini gahenge holenenaga boga nabi hemangi iname dindi tawenagabi damanagabi garabaya biabe ale bia halu hene harima. ✧ <sup>4</sup> Ibilolene tu hayagola Ngode Datagaliwabehanda ibuni Iginigini ibilene. Ibu dindini wali bereago igini howa Yu wali agalinaga Mana lowinigo Yu wali agalime bialu headagua ibuguabi bialu henego ✧ <sup>5</sup> irane ogo. Ina Ngode Datagaliwabe waneigini holomaya Mana lowinigo ogonime wali agali dariba karu ibugua golope hole ibini. ✧ ✧

<sup>6</sup> Tí Ngode Datagaliwabe waneigini kami lalu walia hole Ngode Datagaliwabehanda ibu Iginigini Dinigini ibugua, Aba í Aba, laga kago ina bu habaneha helo ibilene. ✧ <sup>7</sup> Ani binigo tí garabaya biabe ale bia haga ndo Ngode Datagaliwabe waneiginiore kami. Tí ibunaga waneigini kamigo ibugua ibu waneigini bibahendehondo mulene ngago tíhondo ngulebira. ✧

### *Polohanda Galesia wali agali hearu mitangi bialu genda ho henego ogo*

<sup>8</sup> Tí ala Ngode Datagaliwabe manda nabi harimingi dama hearunaga garabaya biabe ale bia haga harimigoni. ✧ <sup>9</sup> Ani binigo áyu tígua Ngode Datagaliwabe manda bu kamigo ogoni hangu ndo ogodagua laro Ngode Datagaliwabe ibuguabi tí manda bu kago helowa tígua ala mana ko hongo nahe dindi tawenagabi damanagabi garabaya biabe ale bia halu harimigo lone bule dai bialu kamigo agibe. ✧ <sup>10</sup> Tígua horo mbira mbiranibi ege mbira mbiranibi mali mbira mbiranibi Ngode Datagaliwabe mitangi bule ndo uruni hangu mo dunigini howa ngoai haramili. <sup>11</sup> Ani beramiligo mitangi bialu í gi ho kogoni. Tígua Ngode Datagaliwabe mana bilimulonaga biabe bialu harugo bibahende galone ndo bame bu wahole bialu harudabe. ✧

<sup>12</sup> Í hamene mbaliniru-o tí í ale halimulo hame ledó. Í nde tí ale dege harugo kogoni ndobe. Tígua íhondo kagua mbira nabi harimigoni. <sup>13</sup> Ala ina tíhondo bi mana debene pigane langirugo irane manda bu kami. Í warago bo wuwa langulene

✧ **3:23:** Ga 4.3 ✧ **3:24:** Ab 13.39, Lm 10.4, Ga 2.16, Kl 2.17, Hi 9.9-10 ✧ **3:26:** Yo 1.12, Lm 8.14-16, 1 Yo 3.1-2  
 ✧ **3:27:** Lm 6.3, 13.14 ✧ **3:28:** Yo 10.16, Lm 10.12-13, 1 Ko 12.13, Eb 2.14, Kl 3.11 ✧ **3:29:** Lm 4.13, 9.7, Ga 4.7, 4.28, 5.1, Eb 3.6, Hi 11.18 ✧ **4:3:** Ga 2.4, 3.23, Kl 2.20 ✧ **4:4:** Pig 3.15, Md 5.17, Lg 1.31, Yo 1.14, Lm 1.3, Eb 1.10, Hi 2.14 ✧ **4:5:** Md 20.28, Yo 1.12, Ga 3.13, Eb 1.5-7, 1 Pi 1.18-19 ✧ **4:5:** Lm 8.15-17 ✧ **4:6:** Lm 5.5 ✧ **4:7:** Ga 3.29 ✧ **4:8:** Lm 1.25, 1 Ko 8.4-6, 12.2, Eb 2.11-12, 1 Te 4.5 ✧ **4:9:** Lm 8.3, 1 Ko 8.3, Kl 2.20, Hi 7.18 ✧ **4:11:** Lm 14.5, Kl 2.16

henge mbira wiyagola ina tí langirugoni.✠ 14 I warago bo wiwagola tígua genda yu haabo howa i handabe manga nahe harimi. Handabe manga nahe howa tígua Ngode Datagaliwabenaga dahuliyalihondo turu holenedagua ihondo turu ho harimi. Keriso Yasuhondobi turu holenedagua ihondo turu ho harimi. 15 Tí turu timbuniore ho harimigo ai áyu tínaga turu holene biagoni agoha ngabe. Ina tí mitangi bialu bi ogo labehe ko. I biamogo bulene hame timbuniore lalu tíninaga de haluwa ngibehedale nde i halu ngidamile. 16 Anigo ina tihondo bi henene langirugome tí baba mo waitigi harudabe.✠

17 Agali maru karume tí kamiru mitangi timbuni ho kama lalu karuni henene ndo lalu ka. Tinaga miniha ke hagane do ho howa lalu ka. Tigua tí mitangi bu kadagua tigua ti mitangi bilimulo hame lowa ibi tí kamirubi ina mo dala hangu haga bule hame lowa bialu ka. 18 Tigua bialu kago galoneniore bialu kayagua ogonidagua bulene bayale. I tí heba haruyaguabi naharuyaguabi ogonidagua mitangi biaabo holene nga. 19 I waneiginioreru-o walime gali taba hanalu howa tandaga hagamada Kerisonaga mini tíha anda haabo helo tandaga naabo halu ko. 20 Ina tí heba henedale bi emene bayale ledolego ai tí heba naharugome tí mitangi bialu dara howa mini dege dindi ho kogoni.

*Abarahama one Hega Sarala te lalu bi yobage lenego ogo*

21 Mana lowini ngagome dariba helo hamelo kamiru tihondo laro. Mana lowinigo gilibu ngagome bi ledago tí bayuwa hale nahe harimibe. 22 Bi ledago ogo, Abarahama igini kira hene. Mendego ibu wali garabaya biabe ale bia haga berenego igini hene. Mendego ibu wali garabaya biabe nabini berenego igini hene.✠ 23 Garabaya biabe ale bia haga wali berenegome ibu igini walime gali taba hanagadagua taba henene. Garabaya biabe nabini wali berenego ibugua ogonidagua ndo. Ala Ngode Datagaliwabehanda, Ngulebero, lo winidagua lola halu wali ogoni ibugua igiri taba henene.✠ 24 Ogoninaga bi yobage ogo. Wali kira ogoni labo libu habo nalolene bi kira lowinigo ale manda bimiya. Mendego ibu mini Hega ibu Hari Sainai weagoha howa ibuwa ibunaga waneigini hararume garabaya biabe ale bia haga helo taba henene.✠ 25 Hega ibu Arebia dindiha Hari Sainai weagobi manda bimiya. Ibu Yarusaleme wali agali áyu garabaya biabe ale bia haga karubi berene. 26 Anigo Yarusaleme mendego ibu dahuliya andagani garabaya biabe nabinigo ibu ina aiyá beda.✠ 27 Anduane Homogonaga mbugani bi lo ngago ogo.✠

Dalo wali bedego i turu ho birabe.

Gali taba hanalu howa tandaga nahendene bedego i turu timbuni ho birabe.

Wali ibu agalinila biraabo kago ibu waneigini holebiragobi ndo lowa wali ibu agalinime wahalu pene bedago ibu waneigini dewaore holebira, lalu gilibu nga.

28 I hamene mbaliniru-o Ngode Datagaliwabehanda, Ngulebero, lo wuwa Aisaga miyadagua Ngode Datagaliwabehanda bi lo wiyagonaga ibu waneigini tí kamigoni.✠ 29 Ogoningi walime gali taba hanagadagua igiri taba henene biagome Ngode Datagaliwabe Dininiha howa igiri taba henene biago mo tandaga halu hene. Ogonidagua áyubi mo tandaga haabo halu ka.✠ 30 Anduane Homogonaga mbugani bi agi lo ngabe manda bimiya. Bi lo ngago ogo. Garabaya biabe ale bia haga walibi ibu iginibi wara tagi hadaba. Garabaya biabe ale bia haga wali biago iginibi garabaya nabini wali biago iginibi libu abanaga paluni talebu ki bulene nawi, lalu gilibu nga.✠ 31 Ani lenego i hamene mbaliniru-o ina garabaya biabe ale bia haga wali biago waneigini ndo kama. Ina garabaya nabini wali biago waneigini kama.✠

✠ 4:13: 1 Ko 2.3, 2 Ko 11.30, 12.7-9 ✠ 4:16: Amo 5.10, Ga 2.5, 2.14 ✠ 4:22: Pig 16.15, 21.2 ✠ 4:23: Pig 18.10-14, Lm 9.7-9, Hi 11.11 ✠ 4:24: Lm 8.15, Ga 5.1 ✠ 4:26: Hi 12.22, Mo 3.12, 21.2, 21.10 ✠ 4:27: Ais 54.1 ✠ 4:28: Ab 3.25, Lm 9.7-8, Ga 3.29 ✠ 4:29: Pig 21.9, Ga 5.11, 6.12 ✠ 4:30: Pig 21.10, Yo 8.35 ✠ 4:31: Yo 8.36, Ga 3.29, 5.1, 5.13

## 5

*Tí lone dariba nahelo de hondo holene ngago ogo*

<sup>1</sup> Ina garabaya ale hemaria Keriso ibugua ina golopeore hene. Ani binigo manda buwa golope holene ogoni hongo howa yu halimu. Maru karume tí lone garabaya biabe ale bia haga helelo henge namilimu.✧

<sup>2</sup> Bayuwa hale hadaba. I Polo ina tí langerogo ogo. Tí dongone podo mabu biagane mana bilo e larimiyagua Keriso ibu tínaga biamogo biaga ndo holebira. <sup>3</sup> Bi ogoni galoneore ngago lone larogo. Dongone podo mabu biagane mana bilo agali mbiralime e layagua Mana lowinigo ngadagua bibahende ibugua biai holene nga.✧ <sup>4</sup> Tígua Mana lowinigo beramigome Ngode Datagaliwabehanda, Tí mini tigabiwi kami, lolebira manda bu kamiru Keriso ha ho gimbu bu harimiru tínime yu wahalu pirimi. Tí Ngode Datagaliwabenaga biamogo bia holene ngagoria nahe tagirahayagi kami.✧ <sup>5</sup> Ina nde Ngode Datagaliwabe Dinini ibugua ina mo hongo haragola Yasuhondo mini mbiraore wirimagome Ngode Datagaliwabehanda inahondo. Tí mini tigabiwi kami, lolebira. Ani lolebirago manda buwa mini dunu bia ho kama.✧ <sup>6</sup> Ina Keriso Yasuha ho gimbu bu howa dongone podo mabu biagane mana bini nabiniyaguabi ta nabi howa iname Ngode Datagaliwabehondo mini mbiraore wuwa gubalini holene walia haga bialu kamago galoneore ogoni.✧

<sup>7</sup> Ala tí Kerisonaga harigani bayale pialu harimigo tígua henene bulene ngago nabilimulo aiwa hangai hayabe. Ibugua agigo bia lalu hangai hayabe.✧ <sup>8</sup> Ngode Datagaliwabe tí olaga kagome hangai haya ndo. <sup>9</sup> Yidi emeneme mberedi mo timbu haga ani lagane nga.✧ <sup>10</sup> Ina Anduane Homogoha ho gimbu bu kamago mitangi bialu ina tí mini tara nawuleberamilo manda bu ko. Mbirali tínaga mini mo kira haga kago ibu aibe tobarago Ngode Datagaliwabehanda ogoni ibuhondo pani mulebira.✧

<sup>11</sup> I hamene mbaliniru-o tígua lalu, Polo ibu dongone podo mabu biagane mana bulene nga lalu lawai halu ka, lagago ogoni heneneyagua i mo tandaga haabo harago irane aginagabe. Mana ogoni bulene ngale Keriso ira bangani homayagonaga lawai harogome tí mini mo burugula nakale.✧ <sup>12</sup> Tínaga mini mo burugula halu karume tininaga wangabe nahe hole mo wahai helo hame ledó.

<sup>13</sup> I hamene mbaliniru-o tí nde golope hene halimulo Ngode Datagaliwabehanda tí dabo heledagoni. Ina golope hene kamago lo mitangi bialu inanenaga minime ko hame ledadagua ta nabi bulene nga manda nabilimu. Ani nabi gubalini holeneme tíni biamogo bia haga haga bialu halimu.✧ <sup>14</sup> Mana lowinigo bibahende bimaga howa bi mbiraore ogo, Ina ini gubalini harilidagua maru karu ta nabi gubalini ho habe.✧ <sup>15</sup> Tí nogo gabua tara tararume gungu biagadagua birimiyagua tíni bo wahalu togo lolemeni de hondo halimu.

*Ngode Datagaliwabe Dininaga linibi mini konaga linibi te ogo*

<sup>16</sup> Ina bi larogo ogo. Ngode Datagaliwabe Dinini ibugua tí haru helo helalimu. Ani haru helo helarimiyagua tínaga mini ko ngagome dimagoli hara ale nabuleberami.✧ <sup>17</sup> Inanaga mini ko ngagome hame larago Ngode Datagaliwabe Dinini ibugua hame nalaga ka. Ngode Datagaliwabe Dinini ibugua hame ledago inanaga mini ko ngagome hame nalaga howa libu waitigi kagoni. Ani birago manda bialu tíni bua biradagua bibe nahe kami.✧ <sup>18</sup> Ngode Datagaliwabe Dinini ibugua tí haru hayagua Mana lowini ngago andaneha naholeberami.✧

✧ 5:1: Yo 8.32, 8.36, Ab 15.10, Lm 6.18, Ga 2.4, 5.13, 1 Pi 2.16 ✧ 5:3: Ga 3.10 ✧ 5:4: Lm 9.31-32, Hi 12.15 ✧ 5:5: Lm 8.24-25, 2 Ti 4.8 ✧ 5:6: 1 Ko 7.19, Ga 6.15, Kl 3.11, Ya 2.18-22 ✧ 5:7: 1 Ko 9.24, Ga 1.6, 3.1 ✧ 5:9: 1 Ko 5.6, 15.33 ✧ 5:10: 2 Ko 2.3, 8.22, 10.6, 11.15, Ga 1.7 ✧ 5:11: 1 Ko 1.23, 15.30, Ga 6.12, 6.17 ✧ 5:13: 1 Ko 8.9, 9.19, 1 Pi 2.16, 2 Pi 2.16-19 ✧ 5:14: Lm 19.18, Md 5.43, 7.12, Lm 13.8-9, Ya 2.8 ✧ 5:16: Lm 6.12, 8.4, 13.14, Ga 5.25, 1 Pi 2.11 ✧ 5:17: Lm 7.15-23, 8.6-7, 1 Pi 2.11 ✧ 5:18: Lm 6.14, 8.2, 8.14

<sup>19</sup> Mini kowi kagonaga mana ogobi nga. Wali agali dimagoli holenebi kayu bulenebi mana ko bulenebi<sup>✠</sup> <sup>20</sup> mbirale tarahondo bi pupu wulenebi hambu bolenebi nga. Wali agali handabe manga hagabi gungu biagabi henge lagabi keba hagabi ibuni hangunaga mitangi biagabi ka. Ani bialu tini mini mbiraore nahagabi haga haga biagabi <sup>21</sup> mendealinaga ngago dimagoli hagabi lulu yule lulu iba nagabi dawe hagabi mana ko uruni ale tara tara biaga ka. Ina bi ala langirudagua halu mende langerogo mana urunibi bialu karume Ngode Datagaliwabehanda Handame Ho Kagoria naholebiraore laro.<sup>✠</sup>

<sup>22</sup> Anigo Ngode Datagaliwabe Dinini ibugua lini ogobi daga. Gubalini holenebi turu holenebi mo palia holenebi ema nabi howa hibu lolenebi biamogo bulenebi bayale dege bulenebi mini bilinahe holenebi<sup>✠</sup> <sup>23</sup> mo dindiha holenebi mini haru holenebi Ngode Datagaliwabe Dinini ibugua lini urunibi daga ka. Urunibi bulene ngago mana lo ngagome hangai habe nahe nga.<sup>✠</sup> <sup>24</sup> Yasu Kerisonaga wali agali karume mini kobi mini konaga hame laganebi dimagoli haganebi ira bangani ba para hai hene.<sup>✠</sup> <sup>25</sup> Ngode Datagaliwabe Dinini ibugua inahondo holene gahenge ngiyago ibugua ina haru heloorebi helamiya.<sup>✠</sup>

<sup>26</sup> Ina mine nahe hamiya. Inane keba haga haga nabi hamiya. Mendealinaga ngago i nayido agini henge nale hamiya.<sup>✠</sup>

## 6

### *Inane genda ya haga haga bulene ngago ogo*

<sup>1</sup> I hamene mbaliniru-o tigua mbiralime mana ko mbira bialu karia handarimiyagua wali agali Ngode Datagaliwabe Dinini ibugua laradagua biaga kamirume mo tiga bialu halimu. Mo tiga bialu howa bi hongo howa nale gedaore howa bayuwa mo tiga bilimu. Tinibi ko mbira bulene hame loligo de hondo halimu.<sup>✠</sup> <sup>2</sup> Tininaga genda yu kamigo ya haghaga birimiyagua Kerisonaga mana lo ngadagua bialu holeberami.<sup>✠</sup> <sup>3</sup> Mbiralibu emene dindiha howa, I timbuni karulapeore ko, lo manda bu kayagua ibugua ibuni mo hondo hara.<sup>✠</sup> <sup>4</sup> Iname mana beramaligo bayalebe kobe inane hangu hangume dabamiya. Marume mana bialu kago hondowa ndo. Inane biaganego dege manda bialu, Mana ogoni bayaleda, manda biramayagua nde turu holene wulebira.<sup>✠</sup> <sup>5</sup> Ina hangu hangume inanenaga genda yulene ngadagua yu hamiya.<sup>✠</sup>

<sup>6</sup> Kerisonaga bi mana hale halu bialu kagome ibunaga mbirale bayale mbira wigi bidago ibunaga lawai haga kago talebu mulene nga.<sup>✠</sup>

<sup>7</sup> Tigua tini mo hondo nahalimu. Mbiralime Ngode Datagaliwabe mo hondo habe nahe ka. Mbiralibu tomo egene ibuni hangarago alenaga lini do nolebira.<sup>✠</sup> <sup>8</sup> Ibuni mini konaga dimagoli holene hangayagua ibu hangayagonaga lini homagane do nolebira. Ngode Datagaliwabe Dinini ibunaga hame ledago hangayagua ibugua hangayagonaga lini haabobo holene do nolebira.<sup>✠</sup> <sup>9</sup> Anigo iname biabe bayale bulene ngago manga nahe bialu hamiya. Wahalu nape biaabo halu harimayagua nde awe birimagonaga lini bayale dedagola do noleberama.<sup>✠</sup> <sup>10</sup> Ani manda buwa biabe bayale bulene henge nganggi wali agali bibahende ta nabihondo bayale bialu hamiya. Ngode Datagaliwabehondo mini mbiraorewi karu ina hameigini lowa tihondobi iname bayaleore bialu holene nga.<sup>✠</sup>

✠ 5:19: 1 Ko 3.3, 6.9-10, Eb 5.3, Kl 3.5, Ya 3.14-15 ✠ 5:21: 1 Ko 6.9, Eb 5.5, Kl 3.6, Mo 22.15 ✠ 5:22: 1 Ko 13.7, Eb 5.9, Kl 3.12, Ya 3.17 ✠ 5:23: 1 Ti 1.9 ✠ 5:24: Lm 6.6, 13.4, Kl 3.5, 1 Pi 2.11 ✠ 5:25: Lm 8.4-5, Ga 5.16 ✠ 5:26: Pb 2.3 ✠ 6:1: Md 18.15, 1 Ko 2.15, 4.21, 7.5, 2 Ti 2.25, Hi 12.13, Ya 5.19 ✠ 6:2: Yo 13.14-15, Lm 15.1, 1 Te 5.14, 1 Yo 4.21 ✠ 6:3: Lm 12.3, 1 Ko 8.2, 2 Ko 3.5 ✠ 6:4: 1 Ko 11.28, 2 Ko 13.5 ✠ 6:5: Lm 2.6, 14.12, 1 Ko 3.8 ✠ 6:6: Lm 15.27, 1 Ko 9.11, 9.14 ✠ 6:7: Yob 13.9, Lg 16.25, Lm 2.6, 1 Ko 6.9 ✠ 6:8: Hos 8.7, 10.12, Yo 3.6, 6.63, Lm 8.13, Ya 3.18 ✠ 6:9: 1 Ko 15.58, 2 Te 3.13, Hi 3.6, 3.14, Mo 2.10 ✠ 6:10: Eb 2.19, 1 Te 5.15, 1 Ti 6.18, Hi 3.6

*Keriso ira bangani homayagonaga Polo ibu turu henego ogo*

<sup>11</sup> Ina ini gime tihondo beba ogo gilibu wia harogo timbuni giligili berogo de handalimu. <sup>12</sup> Mine howa bi timbuni lalu dindini holene mana lalu karu ti degeme tihondo dongone podo mabu biagane mana bulene nga laga kagoni ndobe. Ani lalu kago irane Keriso ira bangani homayagonaga te lalu lamiaga karume tandaga nagadagua tibi nolilono bi ani lalu ka. <sup>13</sup> Dongone podo mabu biagane mana bialu karume Mana lo winigo ngadagua ti biai nahaga ka. Tí kamiru dindi mana mbira ogoni bilo bia larimiyagua tigua tininaga mini yaraga halu, Tíbi bia dege birimigoni, lolenaga, Tí dongone podo mabu biagane mana bulene nga, lalu ka. <sup>14</sup> Ai ina Anduane Homogo Yasu Keriso ira bangani homayagonaga irane larogo hangume ibunaga mini yaraga halu holebero. Ibugua ira bangani homayagome dindi mana ngago ihayagi howa homaya. I nde dindi mana ngagohondo homarugoni. <sup>15</sup> Dongone podo mabu biaga mana binibi nabinibi galone ndo. Ngode Datagaliwabehanda inanaga holene mo gahenge henego galoneore ogoni. <sup>16</sup> Wali agalime tinaga holene galoneore ogoni lowa mo tene ho karubi Ngode Datagaliwabenaga wali agali bibahende karubi tiha mo palia holenebi dara howa biamogo bulenebi wiaabo helo hamelo ko.

<sup>17</sup> Bi lamaro bialu laro. Agalime i bayago inaga tinginini motudu ngarume i Yasunaga garabaya biabe bia haga henene ko lalu walia hagago mbiralime i mo genda holene nawi.

<sup>18</sup> I hamene mbaliniru-o ina Anduane Homogo Yasu Keriso ibunaga biamogo bia holene tí bibahendeha wiaabo helo hamelo ko. Aniore bilo laro.



## **Ebesa**

### **Polohanda Keriso hameigini Ebesani hearuhondo beba ogo gilibu wia hene**

### **Mbuga ogoha gilibu ngagonaga nemandi ogo**

Polohanda Keriso hameigini Ebesani hearuhondo beba gilibu wia henegonaga irane ogo. Ngode Datagaliwabehanda manda bu winigo ogo. Ibugua hariha karubi ngarubi dindini karubi ngarubi bibahende wabinigo Keriso ibu haguane howa mo mbiraore halu mandagi helo manda bu henego ka, lalu lo nga. Be 1.10

Ogoni manda manda bu wini ngadagua tí Ngode Datagaliwabenaga wali agali kamirume mo mbiraore howa Keriso haguane helowa halimu, lalu bi hongo howa gilibu wia hene.

Pigane tenialu Ngode Datagaliwabehanda ibunaga wali agali dabowa tinaga ko domo wahene. Ani bialu ibunaga wali agaliruhondo ngulebero lo winigo heneneore ngulebero lalu manane ibu Dinini nginigo ogoninaga lo nga. Ani lowa ina Ngode Datagaliwabeha mbiraore kamago ogoni bime dege ndo horo bibahendeni kamagoria howa mbiraore hamiya lalu lo nga.

Ani manda buwa Ngode Datagaliwabenaga wali agalime Kerisoha ho gimbu bu holenege bi yobage lowa ogodagua lo nga.

Mbira

Keriso hameigini kamaru ina tingini ale lowa Keriso ibu inanaga haguane ale ka.

Mende

Keriso hameigini kamaru ina anda ale kama lowa Keriso ibu anda gene dunini ale ka.

Tebone

Keriso hameigini kamaru ina onene ale bedama lowa Keriso ibu agalini ale ka lalu lo nga.

Ina biamogo bia holene nawiore howa Ngode Datagaliwabehanda biamogo timbuni bia henego lalu lo nga. Kerisonaga gubalini holene ina walia henegobi ibuni inanaga koyane homo aribia henegobi inanaga ko bibahende birimago domo wahenegobi ina biamogo bulene nawi howa biamogo binigobi uruninaga lalu lo wigi bida.

### **Bulu бага бува кuni gilibu ngago**

1.1-2

Polohanda bi ala lenego 1.3-3.21

Kerisobi Keriso hameiginirubi 4.1-6.20

Kerisoha howa holene gahenge ngago 6.21-24

Lamaro bialu lenego

<sup>1</sup> I Polo. Ngode Datagaliwabe ibuni hame leagome Keriso Yasunaga abosolo kogoni. Ngode Datagaliwabenaga wali agali Keriso Yasuha ho gimbu bu haabo hene Ebesani kamiru tihondo laro.\*

<sup>2</sup> Ina Aba Ngode Datagaliwabebi Anduane Homogo Yasu Kerisobi libugua biamogo bia holenebi mo palia holenebi tihondo ngilo hamelo ko.\*

*Ngode Datagaliwabehanda Kerisoha howa dinininaga mo bayale holene ngaru nginigo ogo*

<sup>3</sup> Ina Anduane Homogo Yasu Kerisonaga Aba Ngode Datagaliwabehanda Kerisoha howa ina mo turu halu dinininaga mo bayale holene bibahende dahuliya andaga tawe ngago nginigonaga iname ibuhondo kai lamiya.\* <sup>4</sup> Ibugua dindi haribi mbirale bibahende uruniha karubi ngarubi wa nabi howa ina Kerisoha ho gimbu bu howa

ibunaga holomayabi ko mbira para nahe bayaleore ibu deni holomayabi ibugua ina dabene. Bambaore Ngode Datagaliwabenaga gubalini holeneme<sup>✧ 5</sup> ina Yasu Kerisoni howa mo ibu waneigini hole manda bu hene. Ibuninaga hame leagome anidagua bini.<sup>✧ 6</sup> Ngode Datagaliwabehanda ibunaga biamogo bia holene baya taraore ngago ibu Iginioha howa inahondo turu halu bame ngingo mitangi bialu iname ibu mini yaraga hamiya.<sup>✧ 7</sup> Keriso homayagome ina golope halu iname ko birimago domo wahai hene kama. Ngode Datagaliwabenaga biamogo bia holene timbuniore nga ndobe.<sup>✧ 8</sup> Biamogo bia holene ogoni ibugua mbuni nabi howa timbuniore inahondo ngini.

Ibu mini gigabiwi mani holene manda biahe howa<sup>9</sup> Ngode Datagaliwabehanda manda manda bu winidagua mana ala pani nahe ngelenego Kerisoni howa bia maro bulene manda bu winigo inahondo mo pani haya.<sup>✧ 10</sup> Ngode Datagaliwabehanda manda bu winigo ogo. Ibugua hariha karubi ngarubi dindini karubi ngarubi bibahende wabinigo Keriso ibu haguane howa mo mbiraore halu mandagi helo manda bu wini. Ogonidagua manda bu winigo bia maro bulene horo ibugua ala pongo bo winigo lola harangi bia maro bulebira.<sup>✧</sup>

<sup>11</sup> Ngode Datagaliwabehanda bulebero lo wuwa bulene manda bu winidagua biai hene. Ibugua ina Kerisoha ho gimbu bu howa ibunaga wali agali holomaya ina dabene. Ibugua ina dabenegro irane ogo. Ibugua piganengi manda bu winigo mo tene howa bulebero lo winidagua bini.<sup>✧ 12</sup> Anigo Kerisohondo pigane mini dunu bia ho hene kamaru iname ibunaga mini daliga taraore ngago yaraga halu hamiya.

<sup>13</sup> Henene lolene Bi Mana Debene ngagome tí pele mulene mo yu halimulonaga langinigo hale howa tí Kerisohondo mini mbiraore wirimigoni. Ani wirimigola Ngode Datagaliwabehanda ibu Dinini ngulebero lo winidagua tihondo ngiyagome tí ibuninaga kami lalu walia hene.<sup>✧ 14</sup> Ngode Datagaliwabehanda ibunaga wali agali karuhondo ngulebero lowinigo heneneore mo yuleberami lalu manane ibunaga Dinini ngini. Ngode Datagaliwabehanda ina ibunaga kamaru golope hai holebira lalu Dinini ngiyago ibugua ina langiaga. Anigo Ngode Datagaliwabenaga mini daliga taraore ngago yaraga halu hamiya.<sup>✧</sup>

### *Polohanda Ngode Datagaliwabehondo bi lenego ogo*

<sup>15</sup> Irane ogonigo tigua Anduane Homogo Yasuhondo mini mbiraore wu kamigobi Ngode Datagaliwabenaga wali agali bibahende karuhondo gubalini ho kamigobi hale harungi<sup>✧ 16</sup> ina Ngode Datagaliwabehondo tinağa kai laabo halu ko. Ina ibuhondo bi lalu howa tí mitangi bialu tinağa la halu<sup>✧ 17</sup> ina Anduane Homogo Yasu Keriso ibunaga Ngode Datagaliwabe wá taraore holene Aba kago ibugua tihondo ibu Dinini ngilo ina mibe lalu la haruli. Dinini ogoni ibugua tí mini mo gigabi halu Ngode Datagaliwabe manda bilimulo walia holebira.<sup>✧ 18</sup> Ina tinağa bi la halu kogo ogo. Tí mini duguahé howa ibunaga manda bulene ngago manda bilimulobi Ngode Datagaliwabehanda tí mini dunu bia ho halimulo olenegonaga irane manda bilimulobi la halu ko. Ibugua ibunaga wali agalihondo turu holene bayaleru ngulebero lowini uruni baya burugule ngago manda bilimulobi la halu ko.<sup>✧ 19-20</sup> Ibhondo mini mbiraorewi kamaru inaha ibugua hongo tara howa biabe birago hongo ogoni manda bilimulobi la halu ko. Ibugua hongo timbunime Keriso homayago mo heya howa dahuliya andagaha ibunaga gi tigahayagi berelenego hongo ogoni dege inaha ka.<sup>✧✧ 21</sup> Keriso ibu dahuliya andaga kagoria howa

✧ 1:4: Yo 15.16, 17.24, Lm 8.28, Eb 5.27, Kl 1.22, 2 Te 2.13, 2 Ti 1.9, Ya 2.5, 1 Pi 2.20 ✧ 1:5: Yo 1.12, Lm 8.29-30, 2 Ko 6.18, Ga 4.5 ✧ 1:6: Md 3.17, Yo 3.35, Lm 3.24, 5.15, Kl 1.13 ✧ 1:7: Ab 20.28, Eb 2.7, Kl 1.14, 1.20, Hi 9.12, 1 Pi 1.18-19 ✧ 1:9: Lm 16.25, Eb 3.4, 3.9-11, Kl 1.26, 2 Ti 1.9 ✧ 1:10: 1 Ko 3.22-23, Ga 4.4, Pb 2.9-10, Kl 1.16, 1.20, Hi 1.2, 1 Pi 1.20 ✧ 1:11: Lm 8.17, 8.28-29, Kl 1.12, Ta 3.7, Ya 2.5, 1 Pi 1.4 ✧ 1:13: 2 Ko 1.22, 6.7, Eb 4.30, Kl 1.4-6 ✧ 1:14: Lg 21.28, Lm 8.23, 2 Ko 1.22, 1 Pi 2.9 ✧ 1:15: Kl 1.4 ✧ 1:16: Pb 1.3-4, Kl 1.3, 1 Te 1.2 ✧ 1:17: Kl 1.9 ✧ 1:18: Ab 26.18, Eb 2.12, 4.4, Kl 1.12 ✧ 1:19-20: Eb 3.7, Kl 1.11, 1.29, 2.12 ✧ 1:19-20: Iba 110.1, 2 Ko 13.4, Kl 1.16, 2.10-12, 3.1, Hi 1.3

hari daligaha haru haga karubi hondo haga karubi hongo holene yu karubi homogo karubi ti bibahende bolangua hai halu Keriso ibu daligaore howa ibugua ti haru ka. Hongo tara taranaga mini dindini áyu ngarubi awe wulebirarubi bibahende bolangua hai halu ibu mini daligaore ka.✠ 22 Ngode Datagaliwabehanda bibahende karubi ngarubi Kerisonaga ge ha mo wuwa Keriso hameigini karunaga Haguaneore daliga helo Keriso helene.✠✠ 23 Keriso hameigini karu ti Kerisonaga tingini howa ibu heba homane mbiraore helo helaga ka. Homane mbiraore howa tinaga tene Keriso ibu howa mbirale bibahende ibuha hangu maro bida.✠

## 2

### *Ina homene ale hemaria Ngode Datagaliwabehanda mo hela dai bia henego ogo*

1 Ala tígua Ngode Datagaliwabehondo manga harimigonagabi ko birimigonagabi tí dinini homene ale harimigoni.✠✠ 2 Ani bialu harimigi dindini mana ko wiaru hamelo harimigoni. Hari daligaha damanaga hongo holene haru haga kagome bia layadagua tígua bialu harimigoni. Haru haga ogonime áyu wali agali Ngode Datagaliwabe mana wahaga karu ti haru haga ka.✠ 3 Ina bibahende kamarumebi tigua bialu henedagua dege harimagoni. Iname inanaga mini kome dimagoli holene wiadagua dimagoli halu inanaga tinginimebi minimebi hame layadagua bialu harimagoni. Wali agali bibahende hearubi dege hemaria Ngode Datagaliwabenaga lembo holene tibi inabi nolene wini.✠

4 Ani winigoyu Ngode Datagaliwabehanda inahondo gubalini timbuniore howa ibunaga dara halu biamogo bulene daliga gibiore nga.✠ 5 Ani ngago iname Ngode Datagaliwabehondo manga ho howa dinini homene ale hemaria ibugua ina Keriso heba holomaya hela dai bia hene. Ani biyago Ngode Datagaliwabenaga biamogo bia holeneme tí pele mulene yu kamigoni. 6 Ina Keriso Yasu heba ho gimbu bu howa dahuliya tawenaga iname Keriso heba haru holomaya Ngode Datagaliwabehanda ina Keriso heba mo heyamaga ho helene.✠ 7 Ibugua ani binigo irane ogo. Ibugua ina Keriso Yasu howa inahondo gubalini holene walia hayagome ibunaga biamogo bia holene daliga gibiore ngago walia ho wiaabo helo ani bini.✠ 8 Ngode Datagaliwabehanda biamogo bia henegome tí ibuhondo mini mbiraore wuwa pele mulene yu kami. Tíni bayale birimigome ndo Ngode Datagaliwabehanda turu halu bame ngini.✠ 9 Tíni biabe birimigonaga yolo ndogo tí mine holene henge nawi.✠ 10 Ngode Datagaliwabehanda ina áyu kamagobi holomaya wabini. Ina Keriso Yasu heba ho gimbu bu howa iname biabe bayale ibugua manda manda bu winigo ngaru bialu holomaya Ngode Datagaliwabehanda ina wabini.✠

### *Ina Kerisoha ho mbiraore kamago ogo*

11 Yu wali agali ndo tara tara kamiru tí hondowa Yu wali agalime, Tí dongone podo mabu biagane mana nabiaga kamigo ina biaga kama, laga kago agalime tinaga dongoneni biaganaga larago. Tí kamiruhondo larago tí ala howa bialu harimigo mitangi bu dai bilimu.✠ 12 O biagoningi tí Kerisola mbiraore ndo dala hangu ho harimigoni. Ngode Datagaliwabenaga wali agali ibugua dabeneru aria ndo tí tara harimigoni. Ngode Datagaliwabehanda ibunaga wali agalihondo, Ngulebero, lalubi, Bulebero, lalubi lowinigo mo tene howa habo nalolene bi lowiniru tíhondo ndo lowini. Tí dindi ogoria howa Ngode Datagaliwabe kagobi pele mulene yulenaga bi manabi

✠ 1:21: Lm 8.38, Pb 2.9-10, Kl 2.10, 2.15, Hi 1.4 ✠ 1:22: Iba 8.6, Md 28.18, Kl 1.18, Hi 2.7 ✠ 1:22: Kl 1.18 ✠ 1:23: Lm 12.5, Eb 4.10, 4.15, Kl 2.9, 3.11 ✠ 2:1: Eb 4.18, Kl 1.21 ✠ 2:1: Kl 2.13 ✠ 2:2: Yo 12.31, Eb 5.6, 6.12, Kl 1.21, 3.6-7, Ta 3.3 ✠ 2:3: Lm 5.12, Ga 5.16, Kl 3.6, Ta 3.3, 1 Pi 4.3 ✠ 2:4: Lg 15.24, 15.32, Ab 15.11, Lm 5.6-10, 6.4-5, 6.13, 10.12, Eb 1.7, 2.1, 2.7, Kl 2.12-13 ✠ 2:6: Eb 1.20, Kl 2.12 ✠ 2:7: Eb 1.7 ✠ 2:8: Yo 4.10, Lm 4.16, 10.14-17, Pb 1.29, 2 Ti 1.9, Hi 6.4 ✠ 2:9: Lm 3.20, 3.27, 4.2, 1 Ko 1.29-31, 2 Ti 1.9 ✠ 2:10: 1 Ko 3.9, 2 Ko 5.5, 5.17, Eb 4.24, Ta 2.14 ✠ 2:11: Lm 2.28-29, 1 Ko 12.2, Eb 5.8, Kl 1.21

manda nabi howa mini dunu bia ho holene irane nawi howa tíni hanguore harimigoni.✧  
 13 Tí ala kaundiaha harimigoyu Yasunaga darama pelayagome áyu tí Keriso ibu heba  
 ho gimbu bu howa tí kaware mo helene go kamigoni.✧ 14 Keriso ibunime Yu wali  
 agalibi wali agali tara tarabi mo mbiraore hayagome mo palia holene ina nginigo nga.  
 Tí ala hangu hangu howa waitigi ho harimigome tu winigo ibugua tinginime gialo  
 wahene.✧ 15 Yu wali agalibi Yu wali agali ndo tara tarabi howa wali agali mbiraore  
 ibu heba ho gimbu bu helo tiga bialu mo mbiraore hole ibugua Yu wali agalinaga  
 Mana lowinigome bia laradagua bulenebi mana mbira mbira bulenebi nabulenebi mo  
 wahene. Ani bialu ibugua mo palia hene.✧ 16 Keriso ibu ira bangani homayagome wali  
 agalinaga handabe manga holenebi keba holenebi bibahende winiru mo wahai hene.  
 Ibugua ani biyagome Yu wali agalibi wali agali tara tara bibahenderubi hameigini mo  
 mbiraore howa Ngode Datagaliwabe karia haru dai bini.✧ 17 Ani haru dai buwa Keriso  
 ibugua tí wali agali ala Ngode Datagaliwabe kategoria kaundia hene kamiruhondobi  
 wali agali Ngode Datagaliwabe kategoria kaware heneruhondobi mo palia holenenaga Bi  
 Mana Debene langule ibini. 18 Kerisoni howa ina Yu wali agalibi wali agali tara tarabi  
 bibahende kamaru Ngode Datagaliwabe Dinini mbiraore ibuha howa ina Aba karia  
 ibabehe kama.✧✧

19 Anigo Yu wali agali ndo tara tara kamiru tí hameigini tarabi dindi taralibi ala  
 harimigobi ndo kami. Áyu tí Ngode Datagaliwabenaga wali agali heba ho mbiraore  
 howa ibunaga waneiginiore kamigoni.✧ 20 Abosolobi Ngode Datagaliwabe mana latagi  
 haga henerubi tigua anda gumuni mo winigoria anda genedane Keriso Yasu ibuni howa  
 tibi anda bu gimbu bini kami.✧ 21 Anda ogoni Keriso ibugua yani ho howa anda Anduane  
 Homogohondo loma bia ho helo mo anda halu ka.✧ 22 Ibu heba ho gimbu bu howa  
 tibi wali agali marubi anda mbiraore ale bu gimbu bima iraga halu biala kami. Ngode  
 Datagaliwabe ibunaga Dinini anda ogoniha ho kagoni.✧

### 3

#### *Polohanda wali agali tara taranaga biabe bia henego ogo*

1 Irane ogoninaga j Polo tí Yu wali agali ndo tara tara kamirunaga koyane Keriso  
 Yasunaga garabaya agali kogoni howa ina Ngode Datagaliwabehondo tínaga bi la  
 haruli.✧ 2 Tí bayale halimulonaga Ngode Datagaliwabehanda ibunaga biamogo bia  
 holene nginigome biabe ogoni ina berogo bia holiya nginigo tí hale harimigoni.✧  
 3 Ngode Datagaliwabehanda manda manda bu winidagua mana ala pani nahe nge-  
 lenego ihondo mo pani haya. Ogoninaga tene nemandi tongolo бага buwa abale gili  
 birugoni.✧ 4 Tígua ogoni daga larimiyagua mana ala pani nahe Kerisoha do henego  
 j manda bu kodagua tí manda buleberami.✧ 5 Ngode Datagaliwabehanda mana ala  
 pani nahe ngelenego ogoni wali agali ala heneru ti nalamini. Áyu ibugua ibu Dininime  
 ibunaga abosolo loma bia hene karubi Ngode Datagaliwabe mana latagi haga karubi  
 tihondo mo pani ho nga. 6 Ibugua mana ala pani nahe ngelenego ogo. Bi mana  
 debene ngagome wali agali tara tarabi Yu wali agali heba Ngode Datagaliwabenaga  
 turu holene ngaru tihondobi miaga ka. Tibi inabi homane mbiraore kamago Ngode  
 Datagaliwabehanda Keriso Yasuha howa, Ngulebero, lalu lowinigo tibi mo yu ka.✧

7 Ngode Datagaliwabehanda ihondo biamogo bia holene turu halu bame ngialu j bi  
 mana debenenaga biabe biaga holiya mo helene. Ina ibunaga biabe bia holiya ibunaga

✧ 2:12: Lm 9.4, 9.8, Ga 4.8, Eb 4.18, Kl 1.21, 1 Te 4.5, 4.13 ✧ 2:13: Ga 3.28, Eb 2.17, Kl 1.20 ✧ 2:14: Ais 9.6, Mai  
 5.5, Yo 16.33, Ab 10.36, 1 Ko 12.13, Kl 1.20, 2.14 ✧ 2:15: 2 Ko 5.17, Ga 6.15, Eb 4.24, Kl 1.20-22, 2.14, 2.20 ✧ 2:16:  
 Seg 9.10, Lm 6.6, 8.3, Kl 1.20, 2.14 ✧ 2:18: Ais 57.19, Seg 9.10, Ab 2.39, Lm 5.1 ✧ 2:18: Lm 5.2, 1 Ko 12.13, Eb 3.12,  
 Hi 4.16, 1 Pi 3.18 ✧ 2:19: Ga 6.10, Eb 3.6, Pb 3.20, Hi 12.22-23 ✧ 2:20: Md 16.18, 1 Ko 3.9-11, Ga 2.9, Mo 21.14  
 ✧ 2:21: 1 Ko 3.16-17, 2 Ko 6.16, Eb 4.15-16, Kl 2.19 ✧ 2:22: 1 Pi 2.5 ✧ 3:1: Eb 4.1, Pb 1.7, 1.13, Pm 1, 9 ✧ 3:2:  
 Kl 1.25 ✧ 3:3: Eb 1.9-10, Kl 1.26 ✧ 3:4: Kl 1.26-27 ✧ 3:6: Ga 3.14, 3.28-29, Eb 2.13-19

hongome i mo hongo haya. ✧ <sup>8</sup> Ngode Datagaliwabenaga wali agali maru karubi ndo i dindihaore kogoni. I ogonibi kogoni howa Kerisonaga baya burugule wiaabo hagane ngarunaga Bi Mana Debene wali agali tara tara karu hale helo ina lamule poliyanaga Ngode Datagaliwabehanda ngiya. ✧ <sup>9</sup> Ngode Datagaliwabehanda manda manda bu winidagua wali agali bibahende karume ibunaga mana ala pani nahe ngelenego galone hendelo ina latagi holiyabi ibugua biabe ogoni ihondo ngiya. Ngode Datagaliwabe ibu bibahendeore wabiaga howa ibugua galone ogoni bambaore howa pani nahe ngelaabo henego irane ogo. ✧ <sup>10</sup> Ayu o kamangi Keriso hameigini kamarume hariha haru haga karubi hongo tara tara karubi Ngode Datagaliwabehanda ibu mini gigabinaga manda bulene tara tara ngaru manda bilo ibugua ibunaga mana ala pani nahe ngelaabo hene. ✧ <sup>11</sup> Ngode Datagaliwabehanda manda manda bu wiaabo henedagua ogoni binigo ina Anduane Homogo Keriso Yasu ibuha howa bumaro bini. <sup>12</sup> Ina Keriso heba ho gimbu bu howa ibuhondo mini mbiraore wirimarume ina Ngode Datagaliwabe deni gi nahe hada payabu howa pu holene henge nga. ✧ <sup>13</sup> Ina tinaga tandaga na harogo mitangi bialu ti genda nahalimulo hame ledogo ogoni. Tandaga ogoni narogo ti bayale halimulonaga nalu ko. ✧

### *Kerisonaga gubalini holene ogo*

<sup>14</sup> Ai bi ala lala harugo aria laro. Irane ogoninaga Aba deni ina ge duli hangu ho biruwa ibuhondo bi lalu ko. <sup>15</sup> Wali agali hameigini tara tara dahuliya andagani karubi dindini karubi bibahendenaga Aba ibu howa tinaga mini henene mo yu ka. ✧ <sup>16</sup> Ngode Datagaliwabenaga hongo taraore holene timbuniore ngago tininaga bu habaneha hongo halimulo hongo ogoni ibu Dininime ngilonaga ina ibuhondo mia lalu bi la halu kogoni. ✧ <sup>17</sup> Tigua ibuhondo mini mbiraore wu kamigome Keriso ibugua tinaga bu habaneha ibu helobi tinaga pinibi tenebi gubalini holeneha wiaabo helonaga bi la halu kogoni. ✧ <sup>18</sup> Tibi Ngode Datagaliwabenaga wali agali bibahende karubi tigua Kerisonaga gubalini holene magi lirahayagibi nirahayagibi lunagabi aranenagabi nguini maro nabi ngago ti manda bilimulonaga hongo ngilo ina Ngode Datagaliwabehondo mia lalu bi la halu kogoni. ✧ <sup>19</sup> Kerisonaga gubalini holene ogoni tigua manda biai nahabeheorego lowa ibunaga gubalini holene manda bu halimulo hame ledo. Ani manda beramigola Ngode Datagaliwabenaga mbirale baya burugule tara tara ibuniha ngaru tiha wu tolai holebira.

<sup>20</sup> Iname ngi laramadaguabi mitangi bidamadaguabi ndo ibugua ibunaga hongo inaha biabe bialu kagome ngia tago ha bia tago ha bigi bialu kago ✧ <sup>21</sup> Keriso hameigini karuha howabi Keriso Yasuha howabi Ngode Datagaliwabenaga mini mo yaraga haabobo bilo lalu aniore bilo hamelo ko. ✧

## 4

### *Keriso hameigini kamaru ina Kerisonaga tingini homane mbiraore kamago ogo*

<sup>1</sup> I Anduane Homogonaga biabe biaga kogonaga garabaya agali kogo ina tihondo hongo howa laro. Ngode Datagaliwabehanda ti olayangi howa tihondo agua bialu holene nga layadaguaore bialu halimu. ✧ <sup>2</sup> Tini mo dindi ho ha hogorale bu ha ema nabi howa hibula bigi bialu halimu. Tinaga gubalini holene walia halu tini biamogo bigi bigi bialu halimu. ✧ <sup>3</sup> Mo palia holeneme ti mo bimaga ho helaga ngagoni. Mo palia holene ogonime mini mbiraore holene Ngode Datagaliwabe Dinini ibugua ngiaganego bayuwa

✧ **3:7:** Kl 1.23-25 ✧ **3:8:** 1 Ko 15.9-10, Ga 1.16, Eb 1.7, Kl 1.27, 1 Ti 1.13-15 ✧ **3:9:** Lm 16.25, 1 Ko 2.7, Eb 1.9, Kl 1.16, 1.20, Hi 1.2 ✧ **3:10:** Lm 8.38, 11.33, Eb 1.21, 1 Pi 1.12 ✧ **3:12:** Yo 14.6, Lm 5.2, Eb 2.18, Hi 4.16 ✧ **3:13:** Kl 1.24 ✧ **3:15:** Eb 1.10, Pb 2.9-11 ✧ **3:16:** Lm 9.23, 2 Ko 4.16, Pb 4.19, Kl 1.11, 1.27 ✧ **3:17:** Yo 14.23, Eb 2.22, Kl 1.23, 2.7 ✧ **3:18:** Yo 1.16, Lm 10.3, 10.11-12, Eb 1.18, 1.23, Kl 2.2, 2.9-10 ✧ **3:20:** Lm 16.25, 1 Ko 2.9, Kl 1.29 ✧ **3:21:** Lm 11.36, 16.27, Hi 13.21 ✧ **4:1:** Eb 3.1, Pb 1.27, Kl 1.10, 1 Te 2.12, Pm 1, 9 ✧ **4:2:** Ab 20.19, Ga 5.22-23, Kl 3.12-13



yania ho halimu.✠ <sup>4</sup> Mini dunu bia ho holene tínaga wilo Ngode Datagaliwabehanda tí olenego ogoni mbiraore ngadagua tingini homane mbiraorebi ibu Dininibi mbiraore ka.✠ <sup>5</sup> Anduane Homogobi mbiraore ka. Mini mbiraore wulenebi mbiraore nga baboraya bulenebi mbiraore nga.✠ <sup>6</sup> Ngode Datagaliwabe mbiraore kago ibu wali agali bibahendenaga Aba howa ibu bibahendenaga Anduane Homogo ka. Ibugua ina bibahende ha howa biabe biaga ka.✠

<sup>7</sup> Keriso ibugua ibunaga biamogo bia holene ngadagua ina bibahende hanguhondo biamogo bulene muguberu ta halu ngini.✠ <sup>8</sup> Anduane Homogonaga mbugani lo ngadagua ogo,✠

Ibu hari daligahaore iraga halu pialu howa ibugua garabayaru dewa haru pene.

Ibugua wali agalihondo biamogo bulene muguberu ta halu mini, lalu gilibu nga. <sup>9</sup> Anigo, Ibu hari daligahaore iraga halu pialu, ledagoni irane agibe. Bi ogoninaga irane ogo. Ala ibu dindihaore dalini.✠ <sup>10</sup> Dindihaore dalinigo ogoni ibu dege hari daligahaore dahabaneha iraga halu penego mbiraore ibu ka. Ibugua daligahabi dindihabi bibahendeoreha ibuni haame holenaga ani bini.✠ <sup>11</sup> Ibunioreme wali agalihondo biamogo bulene muguberu ta halu mini. Mugube uru ale mini. Maru ti abosolo helo mialu maru ti Ngode Datagaliwabe mana latagi haga helo mialu maru ti Bi Mana Debene lamima piaga helo mialu maru ti wali agali haru haga helobi lawai haga helobi mialu bini.✠ <sup>12</sup> Keriso ibugua ani binigo irane ogo. Ngode Datagaliwabenaga wali agali bibahendeme ibunaga biabe bia helo mo manda manda bia howa Kerisonaga tingini mo anda halu hongo helonaga ibugua ani bini.✠ <sup>13</sup> Ani biyagome ina bibahende mandagi howa ina mini mbiraore wulenebi Ngode Datagaliwabenaga Iginini manda bulenebi mbiraore holeberama. Ina wali agali mini bogabi howa Keriso ibu daliga timbuniore kadagua inabi anda ho daga howa holeberama.✠ <sup>14</sup> Ani howa waneiginime mini dewa nawi hagadaguabi puyabume iba mo yaribu bia haragola mbirale ibani ngago pulo yu puibu daibu biagadagua bialubi agali mo hondo hagane bu karume wali agali ko ngagoha pelonaga mo guya halu mana tinime wabu wini ngaru hangu lawai haga bu karubi ndo holeberema.✠ <sup>15</sup> Ani ndo ina bibahendeme mana beramaligo bialu howa gubalini holenebi henene hangu lolenebi mo tene halu inanaga haguane Keriso ibuha anda ho daga holene nga.✠ <sup>16</sup> Ibugua ina haru haragola tinginini hene dege bibahende tigatiga gimbu buwa gimbu biaga kuni kagome tingini mo mbiraore haga ka. Tinginini hene degeru hangu hangu howa tini biabe bulene ngadagua bialu kagola gubalini holeneme tingini ibuni bibahende mo anda halu hongo halu haga.✠

### *Keriso ha holene gahenge ngago ogo*

<sup>17</sup> Anigo ina Anduane Homogonaga minini howa bi mbira buleneore ngago manda bialu larogo ogo, Wali agali Ngode Datagaliwabe manda nabi karume hagadagua nahalimu. Tigua galone ndo mitangi biagabi✠ <sup>18</sup> tinaga mini arumahebi ka. Tinaga miniha manda nawibi mangahebi kago holene gahenge Ngode Datagaliwabehanda ngiaganego tihondo namini ka.✠ <sup>19</sup> Ti taga holene embedahe howa tini mana ko bulene ngagohondo mialu mana ko tara tara nabuleneore ngaru biaabo halu haga ka.✠

<sup>20</sup> Kerisonaga mana lo manda birimigo ogonibi ndo. <sup>21</sup> Ibunaga mana tí hale harimigoni. Tí ibunaga talima piaga howa Yasuha henene lolene ngago tigua tí lawai hayagoni. <sup>22</sup> Tíbi nde mini ala tawenaga biaga wiaru dege bialu harimigoni wahalimu.

✠ **4:3:** Kl 3.14-15 ✠ **4:4:** Lm 12.5, 1 Ko 12.4, 12.11-12, Eb 1.18, 2.16-18 ✠ **4:5:** Yo 10.16, 1 Ko 1.13, 2 Ko 11.4, Ga 3.27-28, Hi 6.6 ✠ **4:6:** Lm 11.36, 1 Ko 12.6 ✠ **4:7:** Lm 12.3, 12.6, 1 Ko 12.11 ✠ **4:8:** Iba 68.18, Kl 2.15 ✠ **4:9:** Yo 3.13 ✠ **4:10:** Hi 4.14, 9.24 ✠ **4:11:** Lm 12.7, 1 Ko 12.28, 2 Ti 4.5 ✠ **4:12:** 1 Ko 12.7, Eb 1.23, 2 Ti 3.17 ✠ **4:13:** 1 Ko 14.20, Kl 1.28, 2.2 ✠ **4:14:** Ais 28.9, 1 Ko 14.20, 2 Ko 2.17, Hi 13.9 ✠ **4:15:** Eb 1.22, 4.25, Kl 1.18, 1 Yo 3.18 ✠ **4:16:** Kl 2.19 ✠ **4:17:** Lm 1.21, 1 Pi 1.14 ✠ **4:18:** Ab 26.18, Ga 4.8, Eb 2.12, 1 Te 4.5 ✠ **4:19:** Kl 3.5

Mini ala tawe ogonime tíni mo hondo halu mo ko holenebi mana ko ngaru bulenaga tínaga bu miniha dimagoli holenebi ngaru wahai halimu.✠ <sup>23</sup> Tínaga gubalinibi minibi mo gahengeore holene nga.✠ <sup>24</sup> Mini gahenge karulalimu. Ngode Datagaliwabehanda mini gahenge ibuni ale wabinigo ogonime holene heneneorebi mana tigabibi bayalebi walia haga.✠

<sup>25</sup> Anigo ina bibahende Kerisonaga tinginiha hene dege howa homane mbiraore kamagonaga tindule wahalu tí bibahendeme tíni Keriso hameiginiruhondo henene dege laga bialu halimu.✠ <sup>26</sup> Tí keba harimiyagua nde keba ogonime tí ko maru bilimulo mo bia holigo de hondo halimu. Tígua keba ho haabo ho kamiore dege ni paluani hondo halimu.✠ <sup>27</sup> Dama Heyolabe anda ibilo henge mbira namilimu.✠ <sup>28</sup> Wali agali ala pagebibi heneru ti lone page nabi ti henemane holenagabi wali agali yagibano karu biamogo bulenagabi ti yolo biabe bulene nga.✠ <sup>29</sup> Bi lalu howa mo ko holene bi nalalimu. Bi bayale biamogo bulene bibi mo hongo holene bibi tíni buru padamiru ale mo yu anda ibulene bibi bi uruni ale lalimu. Tígua bi ani laramigome wali agali hale hararu ti mo bayale holebira.✠ <sup>30</sup> Tígua Ngode Datagaliwabe Dinini mo tandaga nahalimu. Tí Ngode Datagaliwabenaga kami lalu walia holeneibunaga Dinini íbu ka. Hamaro bulene Horo ibirangi Ngode Datagaliwabehanda tí golope heneneore holebira lalu mananeibunaga Dinini íbu kagoni.✠ <sup>31</sup> Handabe manga ho haabo holenebi gungu abale porabu para holenebi keba holenebi wahai halimu. Bi ko dalimu lolenebi mege bialu lolenebi nalalimu. Bu habaneha lembo holene ale mbira nawilo halimu.✠ <sup>32</sup> Ani nabi turubini dege bigi bialu bu habane gedaore howa mbiralime emene liahe mbira birago la nabi wahaga haga bialu Ngode Datagaliwabehanda Kerisonaga minini howa tínaga ko birimigo domo wahayadagua tíguabi nde la nabi wahalimu.✠

## 5

### *Wá holene kagoria holene ngago ogo*

<sup>1</sup> Tí Ngode Datagaliwabenaga waneigini ibugua gubalinihe kamiru tí ibu ale hole manda bu halimu.✠ <sup>2</sup> Mbirale bayale ngabi Ngode Datagaliwabehondo loma bia haganebi bo miaganebi miragola Ngode Datagaliwabe turu haganego ogonidagua Keriso ibugua ina gubalini howa ina holomayanaga ibuninaga holene pela hene. Gubalini holene ogonibime tí haru helo holene nga.✠

<sup>3</sup> Tí Ngode Datagaliwabenaga wali agali kamigo howa wali agali kayu bulenebi tinginime ko maru ale bulenebi dimagoli holenebi uruni alenaga lalu bame tebi heba lolene nawiore.✠ <sup>4</sup> Tígua bi dodohebi bi ko tombe nahebi hegebi labe naheore kamigoni. Ani ndo tí Ngode Datagaliwabehondo turu halu kají lalu holene nga.✠ <sup>5</sup> Mbira heneneore larogo ogo. Wali agali kayu biagabi tinginime ko maru ale biagabi dimagoli hagabi dimagoli holene ogoni mbirale tarahondo bi pupu wiagane mana damenego mana uruni biagarume Ngode Datagaliwabebi Kerisobi libugua Handame Ho Kagoria ti holene henge nawulebira.✠

<sup>6</sup> Uruni alenaga lalu mbiralime tíhondo bi ko tombe nahe laragome tí mo hondo holigo de hondo halimu. Uruni aleni wali agali Ngode Datagaliwabehanda bia laradagua nabi karuibunaga lembo holene tiha wiaabo holebira.✠ <sup>7</sup> Anigo wali agali urunibi biaga karu heba mandagi nahalimu. <sup>8</sup> Ala tínibi arumaha harimigoni. Áyu tí Anduane Homogonaga

✠ **4:22:** Lm 6.6, 8.13, Eb 2.2-3, 4.17, Kl 3.9, Hi 12.1, 1 Pi 4.3 ✠ **4:23:** Lm 12.2, Kl 3.10 ✠ **4:24:** Pig 1.26, Lm 6.4, Eb 2.10, Kl 3.10 ✠ **4:25:** Seg 8.16, Lm 12.5, Kl 3.8-9 ✠ **4:26:** Iba 4.4, Ya 1.19-20 ✠ **4:27:** 2 Ko 2.10-11, Ya 4.7, 1 Pi 5.9 ✠ **4:28:** 1 Te 4.11, 2 Te 3.8, 3.11-12 ✠ **4:29:** Eb 5.4, Kl 3.8, 3.16, 4.6, 1 Te 5.11 ✠ **4:30:** Ais 63.10, Lm 8.23, Eb 1.13-14, 1 Te 5.19 ✠ **4:31:** Kl 3.8, 3.18-19, Ta 3.2-3, 1 Pi 2.1 ✠ **4:32:** Md 6.14, 18.22-35, Mg 11.25, 2 Ko 2.10, Kl 3.13 ✠ **5:1:** Md 5.48, Lg 6.36 ✠ **5:2:** Har 29.18, LBM 1.9, Iba 40.6, Yo 13.34, Lm 14.15, 2 Ko 2.15, Ga 2.20, Hi 7.27, 10.10, 1 Yo 3.11, 3.23 ✠ **5:3:** Lm 6.13, 1 Ko 5.1, 2 Ko 12.21, Kl 3.5, 1 Te 4.3 ✠ **5:4:** Md 12.35, Lm 1.28, Eb 4.29 ✠ **5:5:** 1 Ko 6.9-10, Ga 5.19-21, Kl 3.5 ✠ **5:6:** Lm 1.18, Kl 2.4, 2.8, 2 Te 2.3

wali agali kamigo tí wá holene kagoria ho kami. Ani kamigo tí wá holenenaga wali agali holene ngadagua halimu.✧ <sup>9</sup> Wá kagome bayale bulenebi mini tigabi holenebi henene lolenebi lini urunibi daabo haga ka.✧ <sup>10</sup> Anduane Homogo turu helo bulene mana lo manda bialu halimu.✧ <sup>11</sup> Wali agali aruma holenenaga mana ko biaga karu heba mandagi nahalimu. Tígua mana ko biraru wá holene mo pani halimu.✧ <sup>12</sup> Anigo tigua ohowa mana ko bialu karunaga te lolene tagabidago nale waharo. <sup>13</sup> Mana bibahende biraru wá holene kagoria mo pani haragola mana ko uruninaga teneore handai holebira.✧ <sup>14</sup> Mbirale mbira mo pani hayagua ogoni wá holene aria haga. Ogoninaga bi lo ngago ogo,✧

Padego í de ngalalu homolene ngagoria howa heyabe.

Ani beregola Keriso ibugua íni wá ha dali holebira, lalu gilibu nga.

<sup>15</sup> Anigo tíni bialu haramigo bayuwa manda bilimu. Tígua wali agali mini nawi karu hagadagua nahe mini gigabiwi karu hagadagua halimu. <sup>16</sup> Horo áyu kamaruni koangi kamago manda buwa bayale bulenenaga henge áyu ngagonigo bayale bilimu.✧ <sup>17</sup> Tí mini nawi ale nahe howa Anduane Homogohanda tígua bilimulo hamelo kago agidabe manda bilimu.✧

<sup>18</sup> Tígua lulu yule waini iba nagimbu nabilimu. Ogonime tí mo ko haga nga. Ani nabi Ngode Datagaliwabe Dinini ibugua tíha tolai helo halimu.✧ <sup>19</sup> Tígua Iba Gananaga bibi Ngode Datagaliwabenaga iba ganabi ibunaga Dinini ibugua iba gana tí lawai haragonagabi uruni alego lalu tínihondo lagalaga bialu halimu. Tínaga gubaliniha Ngode Datagaliwabe mini yaraga hoa howa Anduane Homogohondo Iba Gana bibi Ngode Datagaliwabenaga iba ganabi lalu halimu.✧✧ <sup>20</sup> Inanaga Anduane Homogo Yasu Keriso minini howa tígua Aba Ngode Datagaliwabehondo bibahende íbu ngarunaga kai laabo halu halimu.✧

### *Agalini onenela holene ngago ogo*

<sup>21</sup> Tígua Keriso ibu teneore ka mitangi bu kamigo howa tíni mo dindihaore hagahaga bilimu.✧

<sup>22</sup> Anduane Homogohanda bia larago beramilidagua onene bedamiru tígua tínaga agalinime bia laradagua bilimu.✧ <sup>23</sup> Keriso hameigini karunaga haguane Keriso ibu kadagua agalini ibu onenenaga haguane kagoni. Keriso hameigini bibahende karu ti ibunaga tingini howa Keriso ibu tinaga Pele Miaga ka.✧ <sup>24</sup> Keriso ibugua bia larago Keriso hameigini karu bibahendeme biagadagua oneneru tígua tí agalinime bia larago biaiore holene nga.

<sup>25</sup> Kerisohanda ibunaga wali agali gubalini howa ibuninaga holene pela hayagoni. Ani gubalini hayadagua agalini kamiru tí one gubalini holene nga.✧ <sup>26</sup> Keriso ibugua ani buwa Keriso hameigini karu bibahende ibame baboraya biyagomebi Ngode Datagaliwabenaga bi mana laminigomebi ti mo bayale howa ibugua ti Ngode Datagaliwabenaga helo ibuhondo loma bia ho mini.✧ <sup>27</sup> Ibugua ani binigo irane Keriso hameigini karu bibahende bayale helo ko mbira do nahebi ko mbira nawibi mana ko binigonaga motudu nawibi gahengebi baya buruguleorebi howa ti ibunaga helo ibugua ti ibunihondo mulenaga ani bini.✧ <sup>28</sup> Anigo ogonidagua agalinime ibuni tingini gubalini haralidagua ibu one gubalini holene nga. Ibu one gubalini hagagome ibuni gubalini haga ka.

✧ 5:8: Yo 12.36, Ab 26.18, Lm 1.21, 2 Ko 3.18, Eb 2.11-13, Kl 1.13, 1 Pi 2.9, 1 Yo 2.9 ✧ 5:9: Ga 5.22 ✧ 5:10: Lm 12.2, Pb 1.10, 1 Te 5.21, 1 Ti 2.3 ✧ 5:11: Lm 6.21, 1 Ko 5.9-11, Ga 6.8, 2 Te 3.6, 3.14, 2 Yo 10-11 ✧ 5:13: Yo 3.20-21, Hi 4.13 ✧ 5:14: Ais 26.19, 60.1, Lm 13.11 ✧ 5:16: Ga 6.10, Kl 4.5 ✧ 5:17: Lm 12.2, Kl 1.9, 1 Te 4.3, 5.18 ✧ 5:18: Min 20.1, Ais 5.11, 5.22, Lg 21.34 ✧ 5:19: Iba 33.2-3, Ab 16.25, 1 Ko 14.26 ✧ 5:19: Kl 3.16-17 ✧ 5:20: Iba 34.1, Ais 63.7, Hi 13.15, 1 Pi 2.5 ✧ 5:21: Pb 2.3, 1 Pi 5.5 ✧ 5:22: Pig 3.16, Eb 6.5, Kl 3.18, 1 Pi 3.1 ✧ 5:23: 1 Ko 11.3, Eb 1.22-23, Kl 1.18 ✧ 5:25: Ga 1.4, Kl 3.19, 1 Pi 3.7 ✧ 5:26: Yo 15.3, 17.17, Ta 3.5, Hi 10.10, 10.22, 1 Yo 5.6 ✧ 5:27: 2 Ko 11.2, Eb 1.4, Kl 1.22

29-30 Mbiralime ibuninaga tingini handabe manga nahaga. Keriso hameigini kamaru ina ibu tingini aria dege kamago Keriso ibugua bayuwa hondo hagadagua iname inanenaga tingini bayuwa hondo haramali. ✧ 31 Anduane Homogonaga mbugani bi lo ngadagua ogo, Irane ogonigo agali mbirame ibu aba aiyala helalu ibu onela mandagi howa libu mbiraore holebira, lalu gilibu nga. ✧ 32 Bi ogoniha ala pani nahe ngelenego áyu pani ho ngago galone heneneore timbuni aube tobahe nga. Galone ogoni Kerisobi Keriso hameigini bibahenderubi mbiraore holenenaga ngaria hendedo. 33 Galone ogoni tinagabi ngago ogo. Agalini bibahende kamiru tigua tini gubalini haramilidagua tinaga one gubalini halimu. Onene bibahende bedamiru tigua nde tí agalininaga bi hale halu bilimu. ✧

## 6

### *Waneiginirubi aba aiyarubi tigua bulene ngago ogo*

1 Waneiginiru-o tí Anduane Homogonaga kamigo tí aba aiyalame bi laradagua hale halu bulene ogoni tigabigo ani bialu halimu. ✧ 2-3 Bulene nabulenebi mana lowini ngarunaga Ngode Datagaliwabehanda la tago halu, Bulebero, lalu lowinigo pigane ogo. Tí aba aiyala mo yo handa nabi laradagua hale halu bilimu. Ani bialu harimiyagua tí bayale halu dindi ogoriani lu holeberami, lalu gilibu nga. ✧✧

4 Waneigini aba aiyaru-o tigua tinaga waneiginiru haru howa lawanana bialu mo keba nahalimu. Ani nabi howa Anduane Homogonaga mana lawai halubi mini wilo mana lolene ngadagua lalubi halimu. ✧

### *Garabaya biabe ale bia hagamebi tinaga haru hagamebi bulene ngago ogo*

5 Garabaya biabe ale bia hagaru-o tigua tinaga haru haga dindini karu mitangi bialu tigua bia laradagua mogo lowa baya hangu bilimu. Bialu howa Kerisonaga biabe bia harolo mitangi bialu henene minime bilimu. ✧ 6 Tinaga haru hagame tí de hendedaore bayale berami lelonaga hangu ndo tí de nahendedahabi bayale bialu halimu. Tí Kerisonaga garabaya biabe ale bia haga howa Ngode Datagaliwabehanda hame ledago tigua gubalini howa biai halimu. 7 Garabaya biabe ale bia haga howa biabe beramigo bame agalinaga bia harolo mitangi bialu ndo Anduane Homogonaga berolo mitangi bialu turu halu bilimu. 8 Garabaya biabe ale bia haga kamirubi nabini kamirubi ta nabi tigua biabe bayale beramigonaga yolo Anduane Homogo ibugua tí ngulebirago mitangi bialu halimu. ✧

9 Garabaya biabe ale bia hagarunaga haru hagaru-o tigua tinaga garabaya biabe ale bia hagaruhondo ogonidagua dege bialu halimu. Ani bialu howa tihondo, Nabirimiyagua bolebero larogoni, bi ogonibi nalalimu. Tinagabi garabaya biabe ale bia haganagabi tí bibahendenaga Haru Haga mbiraore dahuliya andaga kago manda bilimu. Ibugua tí birimigonaga dabaluhawa ta nabi mbiraore kami mitangi bialu dabaga ka. ✧

### *Ngode Datagaliwabenaga wai biagane aleru karulolene ogo*

10 Bi lamaro bialu larogo ogo. Anduane Homogoha ho gimbu bu howa ibunaga hongo holene timbuni ngagome tí mo hongo helowa halimu. ✧ 11 Dama Heyolabenaga ohowa mo hondo hagane mana ngagoria pi nale hongo howa bolangua hole tigua Ngode Datagaliwabenaga wai biagane ale ngiraru karulai halimu. ✧ 12 Iname wali agali baba wai berama ndogo dama tara tara hari daligaha karu baba wai bialu kama. Haru hagarubi hondo hagarubi hongo tara tara arumaheha karubi ti baba iname wai bialu kama. 13 Anigo Ngode Datagaliwabenaga wai biagane aleru áyu ogoni karulalimu. Ko

✧ 5:29-30: Lm 12.5, 1 Ko 6.15, 12.27, Eb 1.22-23 ✧ 5:31: Pig 2.24, Md 19.5, Mg 10.7-8, 1 Ko 6.16 ✧ 5:33: Kl 3.19, 1 Pi 3.6, Mo 19.7 ✧ 6:1: Min 23.22, Kl 3.20 ✧ 6:2-3: Md 15.4 ✧ 6:2-3: Har 20.12, Man 5.16 ✧ 6:4: Man 4.9, 6.7, 6.20-25, Iba 78.4, Min 19.18, 22.6, Kl 3.21 ✧ 6:5: 2 Ko 7.15, Pb 2.12, Ta 2.9-10, 1 Pi 2.18 ✧ 6:8: 2 Ko 5.10, Ga 3.28, Kl 3.11 ✧ 6:9: Man 10.17, Lm 2.11, Kl 3.25, 4.1 ✧ 6:10: 1 Ko 16.13, Eb 1.19, 3.16, Kl 1.11 ✧ 6:11: Lm 13.12, 2 Ko 6.7, 10.4, Eb 4.14, 1 Te 5.8

holene ngangi tígua waitigi baba hongo howa wai bu maro bialu hongohe dege haabo holeberami.✠✠

<sup>14</sup> Ani manda buwa wai bule nendebu halimu. Henene lolene tínaga mandibu ale ndibulo wuwa mini tigabi galuhombeneni karulowa✠ <sup>15</sup> mo palia holenenaga Bi Mana Debene lamima polene ge su ale karulo halimu.✠ <sup>16</sup> Ngode Datagaliwabehondo mini mbiraore wulene humbi ale yu haabo halimu. Ogonime dama Heyolabeme hungu biaga timume tí bole biragola mo hundia habehe holeberami.✠ <sup>17</sup> Pele mulene yu kamigo manda ale karulowa Ngode Datagaliwabe bi mana gilibu ngago ibunaga Dinini ibugua tíhondo ngiyago wai bulene ayu tibu ale mo yu halimu.✠ <sup>18</sup> Ani bialu howa tígua Ngode Datagaliwabehondo, Biamogo bia, lalu laabo halimu. Ngode Datagaliwabe Dinini ibugua la lalu langiradagua bibahendenaga Ngode Datagaliwabehondo bi la haabo halimu. Ani bulenaga mamage halu wahalu nape hibu lalu halimu. Ngode Datagaliwabenaga wali agali bibahende karunaga tígua ibuhondo bi la haabo halimu.✠ <sup>19</sup> Ngode Datagaliwabehanda ina bi lolenego langilo inagabi nde bi la halu halimu. Ani langiragola ina gi nahe elahé howa bi mana debenenaga galone ala pani nahe nge-lenego bayuwa lawai holiyanagabi bi la halimu. <sup>20</sup> Áyu nde i dariba kagola kogoni howa bi mana debene ogoni lamima piaga i kogoni. Anigo ina bi mana debene ogoni lamulene ngadagua gi nahe elahé howa lamuliyaganabi tígua Ngode Datagaliwabehondo bi la halimu.✠✠

*Lamaro bialu lenego ogo*

<sup>21</sup> Inanaga hameiginiore Tiyagasa ibu mini bilinahe howa Anduane Homogonaga biabe bia haga kago ibugua i bayale kogobi ina bialu kogobi tí hale halimulo te ogoni tí langulebira.✠ <sup>22</sup> Ibugua ani langilo ina tí kamiria ibu pu laro. Ibugua ina kamarume bialu kamagonaga te tí langiragola tínaga mini mo hongo holebira.

<sup>23</sup> Aba Ngode Datagaliwabebi Anduane Homogo Yasu Kerisobi libugua Keriso hameigini bibahende tíhondo mo palia holenebi gubalini holenebi mini mbiraore wulene heba ngilo hamelo ko. <sup>24</sup> Inanaga Anduane Homogo Yasu Kerisohondo gubalini holene wa nahe yu haabo karu tí heba Ngode Datagaliwabenaga biamogo bia holene wiaabo helo hamelo ko.✠

✠ **6:13:** Yo 12.31, 14.30, Lm 8.38, 1 Ko 15.50, Kl 2.15, 1 Pi 5.8-9 ✠ **6:13:** 2 Ko 10.4, Eb 5.16 ✠ **6:14:** Ais 11.5, 59.17, 2 Ko 6.7, 1 Te 5.8 ✠ **6:15:** Ais 40.9, 52.7, Nah 1.15, Lm 10.15 ✠ **6:16:** 1 Yo 5.4 ✠ **6:17:** Ais 49.2, 59.17, 1 Te 5.8, Hi 4.12, Mo 19.15 ✠ **6:18:** Md 26.41, Lg 18.1, Lm 12.12, Kl 4.2, 1 Te 5.17, 1 Ti 2.1 ✠ **6:20:** Ab 4.29, 2 Ko 3.12, Kl 4.3-4, 2 Te 3.1 ✠ **6:20:** 2 Ko 5.20, Pb 1.20, Pm 9-10 ✠ **6:21:** Ab 20.4, Kl 4.7-8, 2 Ti 4.12, Ta 3.12 ✠ **6:24:** 1 Pi 1.8



## **Pilibai** **Polohanda Keriso hameigini Pilibaini hearuhondo beba** **ogo gilibu wia hene**

### **Mbuga ogoha gilibu ngarunaga nemandi ogo**

Polohanda Keriso hameigini Pilibaini hearuhondo beba ogo gili binigo ibu garabaya andaha howa gilibu wia hene. Polohanda genda ho howa beba gili binigo irane Ngode Datagaliwabe mana henene ngadagua ndo lawai haga agali maru hearume Pilibaini Keriso hameigini hearu mo guya halu ka layagola ibugua mana mo tiga bule beba ogo gilibu wia hene. Genda ho henegoyu beba ogo gilibu wia henegome Polo ibuni Yasu Kerisoha mini hanahe holenebi turu holenebi handa walia henego mo walia ho nga.

Ala Polo ibu garabaya naheha Keriso hameigini Pilibaini hearume Polo ibu buru pale hearia biamogo bialu mbirale maru wia henego ogoninaga kaj lalu gilibu wia hene. Polohanda, Keriso hameigini ti mine nahe tini mo dindiha halu mini Yasu Kerisohanda wiyadagua wialu holene nga, lene. Wali agali Kerisoha ho gimbu bu howa holene gahenge yu hagago irane Yu wali agalinaga mamali mana biragome ndo Yasu Kerisohondo mini mbiraore wiragome holene gahenge yu haga, lene. Kerisoha ho gimbu bu karuhondo Ngode Datagaliwabehanda miniha turu holenebi mo palia holenebi ngiaga ka, ogoninaga lalu gili bini.

Beba ogoriani Yasunaga talima piagarume turu holenebi mini dungulo holenebi mo mbiraore ho holenebi hibu lalu hongo ho holenebi uruni bibahende tinaga nga lalu gilibu wini. Ai beba ogome Polohanda Keriso hameigini Pilibaini hearuhondo gubalini timbuniore ho henego mo walia ho nga.

#### **Bulu бага бува kuni gilibu ngago**

*1.1-11*

Polohanda wali agalinaga la henegonaga nga *1.12-26*

Polohanda, I ogobi kogoni, lalu lenego nga *1.27-2.18*

Kerisoha howa ogodagua holene nga, lenego nga *2.19-30*

Timodi Ebaborodaidasalame biabe bilo manda manda bu winigonaga nga *3.1-4.9*

Waitigi karu de hondo holene nga lenego nga *4.10-20*

Polohanda ibu nenegeruhondo bi lenego nga *4.21-23*

Lamaro bialu lenego nga

<sup>1</sup> Polo Timodibi iyame Keriso Yasunaga biabe bia haga howa Ngode Datagaliwabenaga wali agali Pilibaini Keriso Yasuha ho gimbu bu kamirubi Keriso hameiginiru haru haga kamirubi biamogo biaga kamirubi ti bibahendehondo beba ogo gilibu wia haraba.\*

<sup>2</sup> Ina Aba Ngode Datagaliwabebi Anduane Homogo Yasu Kerisobi libugua biamogo bia holenebi mo palia holenebi tihondo ngilo hame ledo.\*

*Polohanda Keriso hameigini Pilibaini hearunaga Ngode Datagaliwabehondo bi la henego ogo*

<sup>3</sup> Ina ti mitangi beroangi Ngode Datagaliwabehondo kaj laruli.\* <sup>4</sup> Ina Ngode Datagaliwabehondo bi lalu howa ti bibahende mitangi biai halu turu howa bi la haruli. <sup>5</sup> Irane tigua i biamogo bialu bi mana debene lamulene biabe ogoni pigane tehinaramangi howa bialu harimago ayubi bia ho wiaabo kamagonaga ibuhondo turu halu kaj lalu kogoni. <sup>6</sup> Ngode Datagaliwabehanda tiha biabe bayale pigane biyagoni Keriso Yasunaga Horo harangi bia maro bule lowa ibugua bia ho wiaabo holebiralu manda bu ko.

✧ 7 Horo bibahendengi tí inaga gubaliniha mitangi bu wiaabo hagago ogoni tihondo gubalini ho kogobiore bira. Biamogo bia holene biabe ogoni Ngode Datagaliwabe handa ihondo ngiyago inaga hangu ndo tibi i heba biabe mandagi howa bialu kama. I ala garabaya nahe hewangibi áyu garabaya bidagola kogo howabi wali agalime Bi Mana Debene yu tiga bilo lamulenaga wai bialu kogola tibi nde ina haru mandagi bialu harimago kamagoni. 8 Ina tihondo gubaliniore ho kogonigo gubalini holene ogoni Keriso Yasu ibuninaga gubaliniha howa ho kogoni larogola ina heneneore larogo Ngode Datagaliwabe ibu manda bu ka.✧

9 Ina Ngode Datagaliwabe hondo tinaga bi la haruligo ogo. Tinaga gubalini holene anda halu wiaabo helobi manda bulene henenebi daba ki bulene tiga tigabi heba anda halu wiaabo helonaga laruli.✧ 10 Mbirale dabolene ngagola bayaleorego dabalimulonaga bi la haruli. Ani dabarimiyagua Kerisonaga Horo harangi tini ko mbira para nahe tigatiga holeberami.✧ 11 Ngode Datagaliwabe mini daliga taraore lelonagabi ibu mini mo yaraga helonagabi mana tigabiore bulenenaga lini Yasu Keriso ibunime ngiyago ogoni tihato lai helo ina bi ogoni la haruli.

### *Ina Kerisonaga mini yaraga holenaga garabaya kogoni*

12 I hamene mbaliniru-o ihondo mbirale biyarume Bi Mana Debene heneneore lo yu lelonaga biyago manda bilimulo hamelo ko.✧ 13 Ani bidago haru haganaga ami agali mamage haga bibahende karubi maru bibahende ogoriani karubi tigua i garabaya kogoni irane Kerisonaga biabe bia haga harugome kogoni manda biai ka.✧ 14 Ai i garabaya anda kogome Keriso hameigini dewa karu tinaga miniha mo hongo kagola tigua Anduane Homogohondo mini mbiraore hongohe wu ka. Ani bialu tigua Ngode Datagaliwabenaga bi mana lamialu howa mo hongooore haragola gi nahe lalu ka.

15 Ti marume tinaga miniha lai lolenebi ponana mini wu howabi Keriso mini lalu lamiaga ka. Ti marume mini henemane wu howa Kerisonaga mana lamiaga ka. 16 Bi mana debene wali agalime heneneore winidago lalu bayuwa yu tiga bilonaga i garabaya andaha helayada manda buwa ti marume gubalini howa Kerisonaga mana lamiaga ka. 17 Marume mini henene wu howa ndo tini mini mo yaraga holenaga Kerisonaga mini lalu lamiaga ka. Tigua i garabaya andaha koria tandaga nolene lone mo tago helonaga lamiaga ka.

18 Nde abini. Ti mini ko wu howa layaguabi bayale wu howa layaguabi ta nabi tigua Kerisonaga mana dege lamiaga kago mitangi buwa i turu ho ko. Nde turu ha ho wiaabo holebero. 19 Irane tí kamirume Ngode Datagaliwabe hondo inaga bi la ho wiaabo haramiligobi Yasu Keriso Dinini ibugua i biamogo biaabo hagagomebi i golope holebiraore manda bido.✧ 20 Inaga bu miniha howa bule hame lalubi mini dunubia ho kogobiore ogo. Ina biruligobi bi laruligobi mitangi bialu yu wa naholeberoore. Horo bibahendengi áyu kogoni howa gi nahe mana lade haabo harulidagua laabo hole hame timbuni lo kogoni. I haruyaguabi homaruyaguabi ta nabi ina berogome Kerisonaga mini yaraga holenaga bialu holebero.✧ 21 Ina manda bidogo ogo. I haruyagua Kerisonaga mini yaraga halu holebero. Homaruyagua nde baya gibiore yu holebero.✧ 22 Ani ndo i tingini nahome haabo haruyagua ina biabe bayaleore biaabo holiyanaga biyadago loleberogoyu ago daboabe tobaho ko.✧ 23 Kirabalime i mini yani haga haga bidagola kogoni. Inaore dindi ogo wahalu homalu Kerisola haabo hole polenegoore bayaleoredane hondo ko.✧ 24 Ani bibehego tí mitangi bialu tí bayale halimulonaga i tí heba haabo kogoni. 25 Aniore bidalo manda bidogo i tí bibahende baba howa ina tí biamogo bialu Ngode Datagaliwabe hondo mini mbiraore wu kamigoha anda holenebi

✧ 1:6: Yo 6.29, 1 Ko 1.8, Pb 1.10, 2.13, 1 Te 1.3 ✧ 1:8: Lm 1.9, 2 Ko 1.23 ✧ 1:9: 1 Te 3.12, Pm 6 ✧ 1:10: Lm 12.2, Eb 5.10, Pb 1.6, 2.16, 1 Te 3.13, Hi 5.14 ✧ 1:12: 2 Ti 2.9 ✧ 1:13: Ab 28.30, Eb 3.1 ✧ 1:19: 2 Ko 1.11 ✧ 1:20: Lm 5.5, 8.19, Eb 6.19-20, 1 Pi 4.16 ✧ 1:21: Ga 2.20 ✧ 1:22: Lm 1.13 ✧ 1:23: 2 Ko 5.8, 2 Ti 4.6

туру holenebi wia tago helo holebero. <sup>26</sup> Ogonidagua i tí heba lone kogola tígua Keriso Yasuha howa i tínaga hameigini kogo mitangi bialu Kerisonaga mini yaraga holene irane timbuniore wulebira.

<sup>27</sup> Anigo galone buleneore ngago ogo. Wali agali baba howa tígua bi laramirubi mana beremirubi bibahende Kerisonaga bi mana debeneme ledadaguaore bialu halimu. Ina tí kamiria handama ibiruyaguabi naibiruyaguabi tí mini mbiraho ka larane hale holebero. Tí hongo howa biabe mandagi ogo bima lalu wali agali marume bi mana debene hale howa mini mbiraore wilonaga bialu kami manda bulebero.✧ <sup>28</sup> Ani beramigola tí baba waitigi haga birarume tini koha polene ngagobi tí kamiru pele mulene yu holene ngagobi walia holebira. Ogoni Ngode Datagaliwabe ibunimeore bulebira. <sup>29</sup> Ngode Datagaliwabe handa tígua Kerisohondo mini mbiraore wulene hangu ndo ngini. Ibugua tí Kerisonaga howa tandaga na holenebi tihondo ngini.✧ <sup>30</sup> Ala ina wai ogonidagua dege bialu hewaria tí de handarimigoni. Áyubi ogonidagua dege bialu kogoni hale ho kamigoni. Wai ogoni dege tíguabi bialu kamigo manda bilimu.✧

## 2

### *Ina Keriso hameigini howa mo mbiraore holene nga lenego ogo*

<sup>1</sup> Tí Kerisoha kamigome tí mo hongo hagabe. Ibunaga gubalini holene tínaga miniha mo turu hagabe. Tí Ngode Datagaliwabe Dininila mini mo mbiraore ho haramilibe. Tíni dara howa biamogo bia hagahaga beramilibe. <sup>2</sup> Turu holene iha tolai helonaga tínaga mitangi ogobi degedege wia gubalini hagahaga bia mini mbiraore ha mini mo mbiraore howa bi mbiraore la bigi bialu halimu. <sup>3</sup> Tígua tíninaga mini mo yaraga holene mine holene mbira bulene nawi. Tíni mo dindiha halu wali agali maru karu mitangi bialu halimu. Ina daliga kamagobi ndo ti dindiha ka manda nabilimu.✧ <sup>4</sup> Mbirale tíni hangunaga bule manda nabi howa wali agali maru karu mitangi bialu biamogo bule manda bilimu.✧

### *Keriso ibuni mo dindiha hayagola Ngode Datagaliwabe handa ibu mo daligaore helene go*

<sup>5</sup> Tígua Keriso Yasu ibugua mini wiyadagua wilimu.✧  
<sup>6</sup> Ibugua piganengi howa mini wiyago Ngode Datagaliwabeore hene.✧  
 Ibu Ngode Datagaliwabela ogobi labolabo haabo hole lowa yania ho wiaabo hole manda nabi hene.  
<sup>7</sup> Ani nabi ibuni ala hayago yupe halu ibu biabe bia haga ho dalini.✧  
 Ina kamaru taba henedadagua ibubi taba hanalu mo agali hene. Ibu agali ibuniore halu ha pani hene.  
<sup>8</sup> Ibugua bulene winigo biaore halu ibuni mo dindiha halu nde homolenebi karulape lalu ira bangani homole pene.✧  
<sup>9</sup> Irane ogoninaga Ngode Datagaliwabe handa ibu mo heya halu daligaore helo helenego ka. ✧  
 Ani bu helowa ibugua marunaga mini bibahende bolangua hai halu ibuhondo mini timbuni gibiore mini.  
<sup>10</sup> Ani bidago hari daligaha karubi dindini kamarubi dindi andanaha karubi bibahendeme✧✧  
 Yasunaga mini laragola hale howa ge duli hanga ho birai holebira.  
<sup>11</sup> Ani bu biruwa tigua latagi halu lalu,✧

✧ **1:27:** 1 Ko 1.10, Eb 4.1, Pb 4.3, Kl 1.10, 1 Te 2.12 ✧ **1:29:** Ab 5.41, Lm 5.3, Eb 2.8 ✧ **1:30:** Ab 16.19-40, Pb 1.13, Kl 2.1, 1 Te 2.2 ✧ **2:3:** Lm 12.10, Ga 5.26, Eb 5.21, Pb 1.15-16, Ya 3.14 ✧ **2:4:** 1 Ko 10.24, 10.33, 13.5 ✧ **2:5:** Md 11.29, Yo 13.15, 1 Pi 2.21, 1 Yo 2.6 ✧ **2:6:** Yo 1.1-2, 5.18, 10.33, 17.5, 2 Ko 4.4, Kl 1.15, Hi 1.3 ✧ **2:7:** Yo 1.14, 2 Ko 8.9, Ga 4.4, Hi 2.14, 2.17 ✧ **2:8:** Md 26.39, 26.42, Yo 10.17-18, Lm 8.3, Hi 5.8, 12.2 ✧ **2:9:** Yo 17.1-5, Ab 2.33, Eb 1.20-21, Hi 1.3-4 ✧ **2:10:** Md 28.18, Lm 14.11, Mo 5.13 ✧ **2:10:** Ais 45.23 ✧ **2:11:** Yo 13.13, Ab 2.36, Lm 10.9, 1 Ko 8.6

Yasu Keriso ibu Anduane Homogoore ka, lalu  
Aba Ngode Datagaliwabenaga mini yaraga halu lolebira.

*Dindini howa mo wá hagane ina holene ngago ogo*

<sup>12</sup> Ani bidago inaga nenege turubiru-o i tí heba harimangi ina bia larudagua hale halu tigua birimigoni. Áyu tîni hangu kamigoni howabi ina bia larodagua buleneore ngagoni. Ina bi larogo haleore halu beramine. Tigua biabe bialu howa Ngode Datagaliwabehondo gi halubi inane hangu nakarulape kama mitangi bialubi tîninaga pele mulene Yasuhanda ngiyago ya maro bule ani bilimu.✧ <sup>13</sup> Irane Ngode Datagaliwabe ibuni tînaga miniha howa biabe biaabo halu ka. Ibu turu helo biabe bulene tigua hame lalu bilimulo ibugua tí mo hamela halu biamogo bialu ka.✧

<sup>14</sup> Wali agali marume tigua beramigo hondowa, Tí kagua bialu kami, nalelo tigua mbira beramigo bibahende bialu howa manga halu lai lalu howa nabilimu.✧ <sup>15-16</sup> Ani birimiyagua wali agali mini kowibi mana ko biagabi karu ti heba howa tí Ngode Datagaliwabenaga waneigini baya burugule holeberami. Holenenaga bi mana lamialu kamiru yakundi harini dedagobi howa tigua mo wá halu holeberami. Ani bialu harimiyagua Kerisonaga Horo harangi ina harigani puabo halu harugobi biabe biaabo halu harugobi bame bu wahole ndo bialu harudagola tîhondo turu holebero.✧

<sup>17</sup> Tigua Ngode Datagaliwabehondo mini mbiraore wirimigo ibuhondo mbirale bo lomabu miagadagua mirimigoni. Ogoni Ngode Datagaliwabehondo mialu howa waini iba odo tago hagadagua inaga darama pela tago holene wiagua nde i turu holebero. I turu ho kodagua tibi turu hamaga holene nga.✧ <sup>18</sup> Ogonidagua dege tí turu ho kamigo ha ibi nde turu hamaga holebero.✧

*Timodi Ebaborodaidasala libugua binigo ogo*

<sup>19</sup> I turu holiya tigua bialu kamigo te hale hoa howa Anduane Homogohanda Timodi tí kamiria ibilolene nga layagua nde ina abale ibilagua. <sup>20</sup> Ina mitangi birulidagua marume mitangi nabiaga Timodihanda hangu mitangi biaga kago tibi mitangi bialuore ka. <sup>21</sup> Wali agali bibahendeme Yasu Kerisonaga biabe bulene mitangi nabi tininaga biabe bulene hangu mitangi bialu ka.✧ <sup>22</sup> Timodi ibu bayaleore kago tí manda bidami. Igiri mbirame ibu aba biamogo biagadagua Timodi ibu i heba bi mana debenenaga biabe bialu haribagoni tí manda bidami.✧ <sup>23</sup> I garabaya kogoni tigua agi birabe handamaro buwa nde Timodi tí kamiria abale ibilole manda bu ko. <sup>24</sup> Anduane Homogo ibugua hame ledadagua ihondo walia hayagua nde ibi abale ibule manda bido.

<sup>25</sup> Ina hamene Ebaborodaidasa ibubi tí kamiria dai bilo pu lolene nga manda bido. I buru pale hewaria tigua ibu, Pu, larimigome i biamogo bule ibiya. Ibalu ibugua ila Yasunaga biabebi waibi mandagi bialu hariba.✧ <sup>26</sup> Tigua ibu warago bo wiyago hale harimigo ibuni hale halu mini tumutumumu wu howa tí kamiria ibule hamelo ka. <sup>27</sup> Ibu warago timbuniore balu homolene kaware winigo ani wiaria Ngode Datagaliwabehanda ibu dara halu biamogo biya. Ani biyadagoni ibu hangu ndo ihondobi dara halu biamogo biyago irane genda timbuni iha wia tago ho winigo ibugua i dara halu biamogo biya. <sup>28</sup> Anigo tigua ibu lone de hondowa turu halimulobi inaga dara holene ereba helobi ibu tí kamiria ibilo pu lolene karulape manda bu ko. <sup>29</sup> Ibu ibiragola tibi ibubi Kerisoha howa tigua turu halu, Hama, lalimu. Agali ogonibihondo mitangi timbuniore bu holene nga.✧ <sup>30</sup> Tigua i biamogo bua ho hemigo tînime bibe naheyagola

✧ **2:12:** Iba 2.11, Eb 6.5, Pb 1.5, 1 Pi 1.17 ✧ **2:13:** Yo 15.5, 1 Ko 12.6, 15.10, 2 Ko 3.5, 1 Te 2.13, Hi 13.21 ✧ **2:14:** Lm 14.1, 1 Ko 10.10, 1 Pi 4.9 ✧ **2:15-16:** Man 32.5, Ais 49.4, Dan 12.3, Md 5.14-16, 5.45, 10.16, Ga 2.2, Eb 5.1, 5.8, Pb 1.10, 1 Te 2.19, 3.5, 1 Pi 2.12 ✧ **2:17:** Lm 15.16, 2 Ti 4.6 ✧ **2:18:** Pb 3.1, 4.4 ✧ **2:21:** 1 Ko 10.24, 10.33, 13.5, 2 Ti 4.10, 4.16 ✧ **2:22:** 1 Ko 4.17, 1 Ti 1.2, 2 Ti 1.2 ✧ **2:25:** Pb 4.18 ✧ **2:29:** 1 Ko 16.16-18, 1 Ti 5.17

Ebaborodaidasa ibugua bia aribia haya. Ani biyagola nde Keriso mitangi bialu biabe bialu hearia homolene kaware wini.✧

### 3

#### *Tigabi henene holene ngago ogo*

<sup>1</sup> Bi lamaro bialu larogo ogo. I hamene mbaliniru-o Anduane Homogoha howa turu haabo halu halimu. Bi ala larugodagua lone labe manga nahe howa tí bayuwa bialu halimulo biamogo bialu laro. ✧ <sup>2</sup> Agali maru biango gabua ale howa ohalu mana ko biaga karume dongone podo mabu biagane mana harugo lowa bulene nga lagago tí de hondo halimu. ✧ <sup>3</sup> Dongone podo mabu biagane mana henemaneyi ti ndo ina kamagoni. Ngode Datagaliwabe Dinini ibu ina haru kagome Ngode Datagaliwabe henemane mitangi bialuibunaga mini yaraga halu Keriso Yasuha howa ina turu haramali. Tingini tagirahayagi howa biaganego iname mo galone naharamali. ✧ <sup>4</sup> Tingini tagirahayagi howa biaganego galone ngayagua i gi nahe karulape bibehe kogoni. Mbiralime mana ogoni mo galone hayagua ina mo galone timbuniore holene manda bibehe kogoni. ✧ <sup>5</sup> I taba hanayangi howa horo halinini tigua i dongone podo mabu bini. I Isaraeleali howa Beniyamini hameigini mbirago kogoni. I aba aiyala libu Hiburu wali agaliore henego ibi Hiburu agaliore kogoni. I Perisi agali howa Yu wali agalinaga Mana lowini ngadagua bialu haga harugoni. ✧ <sup>6</sup> Perisi agalinaga mana ogoni yu tiga bu harugonaga hongo walia halu Keriso hameigini heneru balu mo tandaga haabo haru. Mana lowinigome bulenebi nabulenebi wiadagua biaiore harugo ihondo mbira nakarulape biri lolene nawini. ✧ <sup>7</sup> Ayu Kerisola howa ala galonedalo manda bialu harugoni ai nagaloneyane handa walia haru. ✧ <sup>8-9</sup> Ogoni dege ndo inaga Anduane Homogo Keriso Yasu manda bu holene bayale gibiore ngagome mbirale bibahendeore nagaloneyane handa walia hai kogoni. Aniyane ina Keriso mitangi bialu ala yu haruruni bibahende wahai haru. Inaga yolo Keriso ibu kago ina yu tiga buwa ila ibula mbiraore holenaga bibahendeore ala yu harugoni ko ngubidago manda buwa wahai harogoni. Mana lowinigome bia layadagua ina bialu harugome mini tigabi wu ko manda bu harugo. Ayu ogonidagua ndo ina Keriso yu tiga bu kogome Ngode Datagaliwabehanda ihondo, I mini tigabiwi kegoni, layagola ko. ✧ ✧ <sup>10</sup> Ina hameledogo hangu ogo i Keriso manda buwa ibu homowa mo heya henegonaga hongobi manda bua ko. Ibugua tandaga nayadagua ibi tandaga nalu ibu homoyadagua ibuha homolene hamelo ko. ✧ <sup>11</sup> Irane i ibuha homowa mo heya holebiraore lowa mini dunu bia ho kogoni. ✧

#### *Anda polene ngagoria hondo yalu polene ngago ogo*

<sup>12</sup> Ina larugoni áyu i bolangua howabi i bayaleore kogoni lalubi ndo laru. Ani nabigo i Keriso Yasu ibugua i mo ibunaga henego kogoni howa ai i hameledogo larugo muleore lalu hongo howa pialu kogoni. ✧ <sup>13</sup> Hamene mbaliniru-o heneneore larogo ina hameledo larugoni abale yu kogonidalo manda nabido. Galone mbiraore dege biruligo langero. Inaga erembiraha ngaru embeda halu deme ngane hendedogo mule bayuwa hendedogoria hondo yalu puabo haruli. ✧ <sup>14</sup> Ngode Datagaliwabehanda Keriso Yasuni howa, Dahuliya andagani holene mo yule íbu, lalu olenego ihondo ngilo ina pumaro bulene ngagoria hondo yalu puabo halu ko. ✧

<sup>15</sup> Keriso hameigini mini bogabi kamaru iname ogonidagua mitangi bialu holene nga. Tí maru kamirume ogonidagua ndo tara bialu kamiyagua Ngode Datagaliwabehanda

✧ **2:30:** 1 Ko 16.17, Pb 4.10 ✧ **3:1:** 2 Ko 13.11, Pb 2.18, 4.4 ✧ **3:2:** Iba 22.16, 22.20, Lm 2.28, 2 Ko 11.13, Ga 5.2, 5.15, Mo 22.15 ✧ **3:3:** Lm 2.29 ✧ **3:4:** 2 Ko 11.18, 11.21-29 ✧ **3:5:** Lg 1.59, Ab 23.6, 26.5, Lm 11.1, 2 Ko 11.22 ✧ **3:6:** Ab 8.3, 22.4, 26.9-11 ✧ **3:7:** Md 13.44-46 ✧ **3:8-9:** Yar 9.23-24, 1 Ko 2.2, Kl 2.2 ✧ **3:8-9:** Lm 3.21-22, 9.30, 10.3-6, Ga 2.16 ✧ **3:10:** Lm 6.3-5, 8.17, 2 Ko 4.10-11, Ga 6.17, 2 Ti 2.11-12, 1 Pi 4.13 ✧ **3:11:** Lg 14.14, Ab 4.2, 1 Te 4.16, Mo 20.5-6 ✧ **3:12:** Ab 9.5-6, 1 Ti 6.12, 6.19, Hi 12.23 ✧ **3:13:** 1 Ko 9.24-26, 2 Ko 5.16, Hi 6.1 ✧ **3:14:** 1 Ko 9.24, 2 Ti 4.7-8, Hi 3.1, 12.1



walia holebira. ✧ <sup>16</sup> Ogoni áyu kamagoni howa mana bayale ala mo yu harimagoni hongo howa yalu puabo hamija. ✧

<sup>17</sup> Hamene mbaliniru-o tí bibahendeme ina birulidagua biaabo halimu. Iname bialu haramalidagua marume bialu karu de handalu bilimu. ✧ <sup>18</sup> Ina tí ala langiaabo halu harugo áyu nde de ibala haru howa langerogo wali agali dewali tigua bialu kagome Keriso ira bangani homayagonaga mo waitigi haga ka. ✧ <sup>19</sup> Ani bialu karu ti heli dindi polene nga. Tini tinginime dimagoli holene hame lagabi ti taga holene ngagonaga mine halu karuni tigua dindini ngaru hangu mitangi buwa bialu haga. ✧ <sup>20</sup> Ai ina dahuliya andaganaga wali agali kamaru inanaga Pele Ngiaga Anduane Homogo Yasu Keriso dahuliya andaga howa daiore bilo lowa hondo kama. ✧ <sup>21</sup> Ibugua inanaga tingini hongo nahe kamagoni mo taraore halu ibuninaga tingini baya taraore kagobi dege mo karula holebira. Ibugua bibahende ngarubi karubi haru hai hole ibunaga hongo gibi kagome haru hagago hongo ogonime ina mo tara holebira. ✧

## 4

### *Mana bulene ngaru ogo*

<sup>1</sup> I hamene mbaliniru-o ina tí gubalini halu de hondole lalu ko. Tigua i mo turu haramiligonagabi ina biabe birugonaga lini tí kamigo hondowabi inaga mini yanga ledagola ko. Ani bidago inaga nenege turubiru-o tí Kerisoha howa ema nabi mini bilina ho halimu. ✧

<sup>2</sup> Yuodia Sindigila libuhondo bi mbira loa kogo ogo. Libu Keriso hamewane biruwa mini mbiraore nahe bedabigo mini mbiraore ho biralibu laro. <sup>3</sup> I hamene heneneore kego ina wali ogoni labo biamogo bia habe. Bi mana debenenaga biabe buliya libugua i biamogo bia haya. Libugua biyadagua Kelemendi ibuguabi maru kamirumebi ina haru biabe mandagi birimagoni. Tinaga mini Ngode Datagaliwabenaga mbugani haabobo holene yu kamarunaga mini bilibu ngatoria bilibu ngagoni. ✧

<sup>4</sup> Tí Kerisoha ho gimbu bu kamigonaga turu haabo holene nga. Lone loyane berogo turuore ho halimu. ✧

<sup>5</sup> Wali agali bibahende karume ti mini baya gibiwi gedaore kamigo manda bilo mini baya gibi wuwa halimu. Anduane Homogo dai bulene tu kaware ngagoni. ✧ <sup>6</sup> Tí mini burugu lo nahe howa mbirale nayi kamiru Ngode Datagaliwabehanda ngilo bi lamiaabo halimu. Ibhondo ngi lalu howa gubaliniore howa kai lalu ngi lalimu. ✧ <sup>7</sup> Ani larimiyagua tí Keriso Yasuha ho gimbu bu kamigo Ngode Datagaliwabenaga mo palia holene dindi agalinaga manda buleneme mitangi nabibehe ngago ogonime tinaga gubalinibi minibi haru holebira. ✧

<sup>8</sup> Bi ogo lamaro bialu laro. Hamene mbaliniru tinaga miniha bayale bulenebi mana bayalenaga mini yaraga holenebi henene lolenebi mini daliga wulenebi mini tigabi holenebi mini gahenge holenebi bayale holenebi mini lene holenebi urunibime tinaga miniha tolai helo halimu. ✧ <sup>9</sup> Ina bi larugobi mana birugobi handalu mo yu harimigodagua bu manda bialu halimu. Ani birimiyagua mo palia holene ngiagane Ngode Datagaliwabe kago ibu tí heba holebira. ✧

### *Tigua ihondo ngirimigonaga kai laro, lenego ogo*

<sup>10</sup> Bambaore tigua i mitangi bialu biamogo birimidagua áyubi lone mitangi bialu biamogo bulene wiaria handa walia harimigonaga i Anduane Homogoha howa turu ho

✧ **3:15:** 1 Ko 2.6, 14.20, Ga 5.10 ✧ **3:16:** Lm 12.16, 15.5, Ga 6.16 ✧ **3:17:** 1 Ko 4.16, 11.1, Pb 4.9, 1 Te 1.6-7, 1 Pi 5.3  
 ✧ **3:18:** 1 Ko 1.23, Ga 1.7, 2.21, 6.12, Pb 1.15-16 ✧ **3:19:** Lm 8.5-6, 16.18, 2 Ko 11.12, 11.15, 2 Pi 2.1 ✧ **3:20:** Eb 2.6, 2.19, 1 Te 1.10 ✧ **3:21:** Lm 8.29, 1 Ko 15.28, 15.43-53, Eb 1.19, Kl 3.4 ✧ **4:1:** 1 Te 2.19-20 ✧ **4:3:** Iba 69.28, Lg 10.20, Mo 3.5, 20.12 ✧ **4:4:** Lm 12.12, Pb 3.1, 1 Te 5.16, 1 Pi 4.13 ✧ **4:5:** Hi 10.25, 10.37, Ya 5.8-9, 1 Pi 4.7, 2 Pi 3.8 ✧ **4:6:** Min 16.3, Md 6.25-34, Lg 12.22-31, Kl 4.2, 1 Pi 5.7 ✧ **4:7:** Ais 26.3, Yo 14.27, Lm 5.1, Kl 3.15 ✧ **4:8:** Lm 12.17 ✧ **4:9:** Lm 16.20, 1 Ko 14.33, Pb 3.17, 1 Te 5.23, Hi 13.20

kogoni. Tígua ì mitangi nabi harimi ndo mitangi biaabo howa biamogo bulene henge dege handa walia nahe harimi manda bido. <sup>11</sup> Ani birimigola ì buru pale harugo lalu ndo larogoni. Ìni yidogoniore yuwa holene go karulapeoreyane handa walia kogoni.\* <sup>12</sup> Ì nayi buru pale howabi dewa yu howabi mini bilina ho kogoni. Mbira hangu ogodagua bulene wiaria handa walia haru. Mbiraha piruyaguabi haruyaguabi tomo karulape nowa haruyaguabi nane haruyaguabi emene yu haruyaguabi timbuni yu haruyaguabi ì turu haabo ho kogoni.\* <sup>13</sup> Keriso ibugua ìhondo hongo ngiragome ìna bibahende bulene go hongo karulape ho ko.\*

<sup>14</sup> Tígua nde ì genda dewa yu hewago hondowa biamogo birimigo bayaleore birimigoni. <sup>15</sup> Ala ìna Masedonia dindi wahalu Bi Mana Debene pigane lamima pialu hewaria biabe ogoni ìna buliyanaga Keriso hameigini Pilibai tanoni kamiru tí degeme ì biamogo bialu muni ngirimigoni.\* <sup>16</sup> Ì Tesalonaiga hewariabi ì biamogo bialu harimigo halu mbira hangu ndo halu kibi biamogo birimigoni.\* <sup>17</sup> Tígua ìhondo mbirale ngilimulo hame lowa hangu ndo tìnaga yu kamiru Ngode Datagaliwabehanda maru ngia tago helonaga hamelo ko. <sup>18</sup> Tígua ìnaga wia harimiyago mirugonaga laro. O biaruni dewaoreya maru ibira holene yu ko. Tígua Ebaborodaidasa ibuhondo ìnaga mbirale wia harimiyaru bibahende yalu ibalu ngiyago dewaore bolangua howa ngirimiya. Mbirale ngabi bayaleore Ngode Datagaliwabehondo miragola hondowa Ngode Datagaliwabehanda turu hagago ale tígua ì ngirimigoni.\* <sup>19</sup> Ìnaga Ngode Datagaliwabe kago ibugua ibunaga mbirale dewa baya gibi Keriso Yasuha ngaru tíhondo ngulene ngago karulapeore ngulebira.\* <sup>20</sup> Ngode Datagaliwabe ibu inanaga Aba kago ibunaga mini mo yaraga holene wiaaboboore bilo hamelo ko. Aniore bilo laro.\*

### *Lamaro bialu bi lenego ogo*

<sup>21</sup> Ngode Datagaliwabenaga wali agali Keriso Yasuha ho gimbu bu kamiru hangu hanguhondo mitangi bu ko lalu lawia haro. Keriso hameigini ì heba karu tiguabi, Tí mitangi bu kama, lalu lawia hara. <sup>22</sup> Ngode Datagaliwabenaga wali agali maru ogoria karubi maru Lomonaga Kini andagaha karubi bibahendeme, Tí mitangi timbuni ho kama, lalu lawia hara.\*

<sup>23</sup> Anduane Homogo Yasu Kerisonaga biamogo bia holene tí bibahende kamigoha wiaabo helo hamelo ko.

---

\* **4:11:** 1 Ti 6.6-8   \* **4:12:** 1 Ko 4.11, 2 Ko 6.10, 11.27   \* **4:13:** Yo 15.5, 2 Ko 12.9-10, 2 Ti 4.17   \* **4:15:** 2 Ko 11.9  
 \* **4:16:** Ab 17.1   \* **4:18:** Har 29.18, Ese 20.41, 2 Ko 9.12, Eb 5.2, Pb 2.25, Hi 13.16   \* **4:19:** Iba 23.1, 2 Ko 9.8, Eb 1.7  
 \* **4:20:** Lm 16.27, Ga 1.5   \* **4:22:** Pb 1.13

## **Kolosi**

### **Polohanda Keriso hameigini Kolosini hearuhondo beba ogo gilibu wia hene**

### **Mbuga ogoha gilibu ngarunaga nemandi ogo**

Kolosi tano ogoni Esia dindi haguane tano mini Ebesa howa uyura ni tagira ibirago hayagi wini. Polo ibugua ndo agali marume Kolosi wali agalihondo Bi Mana Debene lawai hayagola wali agali maru hearume mini beregedalu Yasuhondo mini mbiraore wini. Ani biyagola howa Keriso hameigini Kolosini hearuhondo, Agali marume Ngode Datagaliwabe mana henene ngadagua ndo lawai halu ka, layagola Polohanda hale howa beba ogo gilibu wia hene. Ngode Datagaliwabe mana henene ngadagua ndo lawai haga hearume lalu, Ngode Datagaliwabe kago bayuwaore manda bialu ibunaga pele mulene yu hai halimulo hari daligaha haru haga karubi haguane karubi mitangi bialu mini yaraga holene nga, lene. Tigua ogoni hangu ndo mana tara tara bulene nabulene lalubi dongone podo mabu bulene nga lalubi uruni ale dewa lawai haga hene. Bi ogoni layagola hale howa Polohanda o biarume ti Ngode Datagaliwabe mana henene ngadagua ndo lawai hayada manda buwa Ngode Datagaliwabe mana henene ngadaguaore bebani gili bialu tihondo wia hene.

Polohanda beba ogoni gilibu wia hayagola agali mini Tiyigasa ibugua Kolosi yu pene. Tiyigasa ibu Onisimasi heba pialu libu pene. Onisimasi ibu garabaya biabe ale biaga henego ibunaga anduane mini Pilimonohondo beba mende Polohanda gilibu wia henego ngagoni.

#### **Bulu бага бува кuni gilibu ngago**

*1.1-8*

Polohanda *kai* lalu lenegonaga nga *1.9-2.19*

Keriso ibuni kagobi ibu biabe binigonagabi nga *2.20-4.6*

Keriso ha howa gahenge holenenaga nga *4.7-18*

Lamaro bialu lenego nga

<sup>1</sup> I Polo Ngode Datagaliwabe ibuni hame leagome Keriso Yasunaga abosolo kogoni. Ibi ina hamene Timodi ibubi iyame<sup>2</sup> Ngode Datagaliwabenaga wali agali ti ina hameigini Keriso ha howa mini bilinahe haabo howa Kolosini kamiru tihondo beba ogo gilibu wia haraba. Ina Aba Ngode Datagaliwabe ibugua biamogo bulene nawi howa biamogo bia holenebi mo palia holenebi tihondo ngilo hame ledi.

#### *Ngode Datagaliwabehondo kai lalu bi lenego ogo*

<sup>3</sup> Iyame inanaga Anduane Homogo Yasu Kerisonaga Aba Ngode Datagaliwabe ibuhondo tinaga bi la halu howa *kai* laabo harabali.<sup>4</sup> Ti kamirume Keriso Yasuhondo mini mbiraore wiaabo howa kamigobi Ngode Datagaliwabenaga wali agali bibahende karuhondo gubalini ho haramiligobi iyame hale howa *kai* lalu harabali.<sup>5</sup> Bi lamulene heneneore ogoni Bi Mana Debene ti hemiria pigane ibiyagola mana ogoniha tigua mini dunu bia ho holene wiago hale harimi. Ani buwa tigua mini mbiraore wirimigobi gubalini harimigobi tene tinaga mini dunu bia ho kamigo dahuliya andagaha do ho ngane hendedamigo ogoni.<sup>6</sup> Bi mana debene ogonime turu holene lini dewa mo da halubi wali agali dindi bibahendeni kagoha anda halubi ka. Tigua Ngode Datagaliwabehanda biamogo bulene nawi howa biamogo bia holene ngiyago pigane hale howa heneneoreyane handa walia ho harimingi howa bi mana debene ogoni anda haabo halu ka.<sup>7</sup> Ebaorasana inanaga biabe biamogo biaga turubiore kago ibugua

✧ **1:1:** Eb 1.1 ✧ **1:2:** Lm 1.7 ✧ **1:3:** Eb 1.16, Pb 1.3 ✧ **1:4:** Eb 1.15, Hi 6.10 ✧ **1:5:** 2 Ti 4.8, 1 Pi 1.4 ✧ **1:6:** Yo 15.16, Eb 3.2, 1 Pi 5.12

Ngode Datagaliwabehanda biamogo bulene nawi howa biamogo bia hayago mana ogoni tihondo lawai hayagoni. Ibugua mini bilinahe howa Kerisonaga biabe bialu iyanaga bia haga ka.✧ <sup>8</sup> Ngode Datagaliwabe Dinini ibugua tihondo gubalini holene ngiyagoni Ebaborasahanda iyahondo langiya.

<sup>9</sup> Tí ogonibi kami lalu pigane hale haribangi howa iyame Ngode Datagaliwabehondo tínaga bi la haabo halu henego kaba. Ngode Datagaliwabehanda hame ledago manda bulene tíha tólai helobi mini gigabi wulenebi mitangi bulenebi bibahende ibunaga Dinini ibugua ngiaga ngaru tíha wilobi iyame Ngode Datagaliwabehondo bi la halu kaba.✧ <sup>10</sup> Ani larabago ibugua biragola tígua Anduane Homogohanda tí halimulo hame ledadagua halubi ibu turu helo bulene ngadagua bialubi holeberami. Ani bialu kamigola tíha howa lini bayale dewa datagi halu tígua biabe bayale tara tararu bialubi Ngode Datagaliwabe ogobi kagolo manda bulene anda halubi holeberami.✧ <sup>11-12</sup> Tínaga gendabiru ngagola ta nabi howa tí ema nabi hongo haabo halimulo Ngode Datagaliwabenaga hongo holene baya taraore kagome ibugua tí mo hongo helo laro. Ngode Datagaliwabehanda ibunaga wali agali wá holene kagoria kagola howa tihondo mule manda bu wini ngago Abahanda tí kamirubi ta halu ngule lowa tí mo karulape henego manda bialu tigua turu howa ibuhondo kaj lalimu.✧ <sup>13</sup> Aruma holenenaga hongome ina dariba ho wiaria hondowa Ngode Datagaliwabehanda ina gini mialu ibu Igini gubaliniore ho kagome handame ho kagoria ina bayuwa haru anda ibuwa heleda.✧ <sup>14</sup> Igini ogoni ibugua iname ko birimago domo wahalu ina golope ho helene kama.✧

### *Keriso ibunibi ibugua biabe biagagobi ogo*

<sup>15</sup> Keriso ibu Ngode Datagaliwabe iname de nahandabehe kagobi howa ibugua ina walia halu ka. Ibu Ngode Datagaliwabe Igini wahene howa mbirale bibahende wabini karunagabi ngarunagabi ibu haguaneore ka.✧ <sup>16</sup> Ngode Datagaliwabehanda ibu Iginaha howa hariha karubi ngarubi dindini karubi ngarubi bibahende wabini. Deme handabehe karubi ngarubi nahandabehe karubi ngarubi hari daligaha hongo tara tarahe karubi homogo karubi haru haga karubi hondo haga karubi bibahendeore ibuha howa wabini. Ngode Datagaliwabehanda ibu Iginaha howa uruni bibahendeore ibu Igininaga helo wabiai hene.✧ <sup>17</sup> Uruni bibahendeore ala hene ndo Keriso ibu alaore howa bibahendeore karubi ngarubi ti Kerisoha ho gimbu bu halu ibugua tinaga holene yamaga hai howa ka.✧ <sup>18</sup> Keriso hameigini bibahende karu ibunaga tingini howa ibuni haguane ka. Tingini ogoninaga holene tene ibuni ka. Bibahende karubi ngarubinaga haguane ibuni hanguore helo ibu Ngode Datagaliwabe Igini wahene henego homalu tongolo miyagola mo heya hene.✧ <sup>19</sup> Ngode Datagaliwabehanda ibuni manda binidagua ibu Igini ibuni kagobiore kagoni.✧ <sup>20</sup> Ani binigo Ngode Datagaliwabehanda ibu Iginaha howa mbirale bibahendeore karubi ngarubi ibu kagoria haru dai bule manda bini. Ibu Igini ira bangani homayagome Ngode Datagaliwabehanda dindini karubi ngarubi hari daligaha karubi ngarubi bibahendeore mo palia hai howa ibuni kagoria haru dai biai hene.✧

<sup>21</sup> Ala tígua Ngode Datagaliwabe erembira mialu kaundiaore pu harimi. Ogoni tígua mana ko bialu harimigomebi mini ko wialu harimigomebi Ngode Datagaliwabela waitigi ho harimigoni.✧ <sup>22</sup> Áyu nde ibu Igini ibugua tandaga nalu homayagome Ngode Datagaliwabehanda tí ibunaga mo nenege helene kami. Ani binigo irane tini ibuhondo

✧ **1:7:** Kl 4.12, Pm 23 ✧ **1:9:** Lm 12.2, 1 Ko 1.5, Eb 1.8-9, 1.15-17, 5.10, 5.17, Pb 1.9 ✧ **1:10:** Yo 15.16, Eb 2.10, 4.1, Pb 1.27, 1 Te 4.1, Hi 13.21 ✧ **1:11-12:** Eb 1.11, 1.18, 1.19, 3.16, 4.2 ✧ **1:13:** Lg 22.53, Eb 2.2, 1 Te 2.12, 2 Pi 1.11 ✧ **1:14:** Eb 1.6-7 ✧ **1:15:** Yo 1.18, 2 Ko 4.4, Hi 1.3 ✧ **1:16:** Yo 1.3, 1.10, Lm 8.38, 11.36, Hi 1.2, 2.10, 1 Pi 3.22 ✧ **1:17:** Yo 1.1-3, 8.58, 17.5, 1 Ko 8.6 ✧ **1:18:** Ab 26.23, 1 Ko 15.20, 15.23, Eb 1.10, 1.22-23, Mo 1.5 ✧ **1:19:** Yo 1.16, 3.34, Kl 2.9 ✧ **1:20:** Lm 5.1, 2 Ko 5.18, Eb 1.7, 1.10, 2.13, 2.16, 1 Yo 2.2 ✧ **1:21:** Lm 5.10, Eb 2.12, 4.18, Ta 1.15-16

loma bia hene howabi mini gahenge karulo howabi ko mbira tíha para nahebi kamigola ibunaga deni haru ibulenaga ani bini.✧ <sup>23</sup> Tígua nde Ngode Datagaliwabehondo mini mbiraore wirimigo ema nabi wiaabo ho halimu. Bi mana debene hale harimigome mini dunubiahe holene ngiyago yu wa nahe yani ho halimu. Bi mana debene ogoni wali agali dindi bibahendeni karuhondo lamiai henego ogoninaga biabe bia haga mo hela henego i Polo kogoni.✧

*Polohanda Keriso hameiginirunaga biabe bia haga henego ogo*

<sup>24</sup> Ina tínaga tandaga na harogonaga turu ho ko. Keriso hameigini bibahende karu Kerisonaga tingini kago ina ininaga tinginiha tínaga tandaga na harogome Keriso ibugua tandaga ala nala ho winigo ina na tago halu namaro bero.✧

<sup>25</sup> Keriso hameigini bibahende karunaga biabe bia haga holiya Ngode Datagaliwabe ibugua i dabo helenego kogoni. Tí bayale halimulonaga ibugua biabe ogoni ina buliya ihondo ngini. Biabe ogoni Kerisonaga bi mana galone ngaru lamiai holene i ngiya.✧

<sup>26</sup> Kerisonaga bi mana ogoni Ngode Datagaliwabehanda bambaore wali agali bibahende hearuhondo mo pani nahe ngelenego áyu ogoni ibunaga wali agaliruhondoore walia halu ka.✧ <sup>27</sup> Ngode Datagaliwabehanda bamba manda bu winigo ngago ogoni mana ala mo pani nahe ngelenego ibunaga wali agalihondo walia holene manda bu hene. Wá holene bi mana baya burugule ogoni wali agali taratara bibahendeore karunaga nga. Bi ala mo pani nahe ngelenedagoni Keriso ibu tíha kagoni. Ani bidagome Ngode Datagaliwabenaga baya taraore holene tínagabi wulebirago mini dunubia ho holene nga.✧ <sup>28</sup> Ani bidago iname Kerisonaga mana galone wali agali bibahendeore karu ta nabihondo lamiai haramali. Iname wali agali bibahendeore Kerisoha ho gimbu bu howa mini bogabiore helo ibuhondo mule ti hangu hangu Ngode Datagaliwabe deni haru poramali. Ani bulenaga iname Ngode Datagaliwabenaga mini gigabi wulene ngiyarume wali agali bibahendeore mana nakarulape bialu holigo lowa ti lawai halu haramali.✧ <sup>29</sup> Biabe ogoni biai holenaga Kerisonaga hongo tara iha howa biabe bialu kagome i mo hongo halu kagola ina hibu lalu biabe erekuibi bialu kogoni.✧

## 2

<sup>1</sup> Tí kamirubi wali agali Leodisiani karubi wali agali maru i de nahende karubi tí bibahendenaga biabe erekui ogobi howa bialu harugo lalu langua ko. <sup>2</sup> Tí bibahende bu habaneha gi nahe howa hongo holene tolai helobi tını gubalini hagahaga bu kamigome tí mo mbiraore helobi mini homogo holene manda bulene heneneoreme tí mini mbiraore wirimigo hongo helobi ina biabe ogoni bialu kogoni. Tí ogonibi kamigola Ngode Datagaliwabehanda bi ala mo pani nahe ngelenego Keriso ibuniore kago tí manda bu holeberami.✧ <sup>3</sup> Ngode Datagaliwabenaga mini gigabi wulenebi manda bulenebi baya burugule do ho ngaru uruni bibahende Keriso ibuni panga duguaga ki howa ibugua dugualu mo pani haga ka.✧

<sup>4</sup> Aniore bidago lalu langerogoni agali marume bi mana taranaga lalu ogoni heneneore larama laragola tí kamirume tigua bi laragoni baya gibiore larabe toba harimiyagua ogoni tí mo hondo holebirago de hondo halimu.✧ <sup>5</sup> Ini tí heba nahe kogonigo inaga mini dininila tí heba howa tigua Kerisoha mini mbiraore wuwa mini bilinahe haabo kamigo hondowa i turu timbuni ho kogoni.✧

*Ina Kerisoha howa holeneore inaha tolai hagago ogo*

✧ **1:22:** Eb 2.14-16, 5.27, 1 Te 4.7, Ta 2.14 ✧ **1:23:** Mg 16.15, Eb 3.17, 1 Ti 3.16, Hi 3.14 ✧ **1:24:** Lm 5.3, 2 Ko 1.5-6, Eb 1.23, 3.13, Pb 3.10, 2 Ti 1.8 ✧ **1:25:** Eb 3.2, 3.7-8 ✧ **1:26:** Lm 16.25-26, 1 Ko 2.7, Eb 3.3-5, 3.9-10, 2 Ti 1.10 ✧ **1:27:** Lm 9.23, 2 Ko 2.14, Eb 1.18, 3.8, 1 Ti 1.1 ✧ **1:28:** Eb 4.13, 5.27 ✧ **1:29:** Ab 20.20, 20.27, Eb 3.7, 3.20, Pb 4.13 ✧ **2:2:** 2 Ko 1.6, Eb 3.4, 3.18, Pb 3.8, Kl 1.26, 3.14 ✧ **2:3:** Ais 45.3, 1 Ko 1.24, 1.30, Eb 1.8, 3.19 ✧ **2:4:** Lm 16.18, Eb 4.14, 5.6, Kl 2.8 ✧ **2:5:** 1 Ko 5.3, 14.40, 1 Pi 5.9



<sup>6</sup> Tígua Keriso Yasu ibu tínaga Anduane Homogo ka lalu yu tiga birimigo ibu heba ho gimbu bu haabo halimu. <sup>7</sup> Tígua ira pini dindiha piagadagua tínaga pini Keriso ibuha pelowa halu anda geneni anda biagadagua tínaga holene Kerisoni tiaga ho halimu. Marume tihondo lawai hayadagua tígua Kerisohondo mini mbiraore wirimigo hongo ho wiaabo halu ka lolene tíha howa tolo tagi helo halimu.✧

<sup>8</sup> Agali marume agalinaga manda bulenemebi dambabi lalu mo hondo holenemebi tí minuligo de hondo halimu. Tigua Keriso mo tene howa ndo tini mamalime mana lawai henegobi dindi tawebi damanagabi mo tene howa laga ka.✧ <sup>9</sup> Keriso ibu agali hole dindini ibu heangi Ngode Datagaliwabe kagobiore howa ibu tinginihe ka.✧ <sup>10</sup> Tíbi Keriso ha ho gimbu birimigome holeneore yu hai kamigoni. Dama haru haga karubi haguane maru karubi uruni bibahendenaga haguaneore Keriso ibu ka.✧

<sup>11</sup> Keriso ha ho gimbu bu kamiru agalinaga dongone podo mabu biagadagua bialu ndo Kerisonaga dongone podayagome tínaga mini konaga hongo podo wahalu tí golope henego kami.✧ <sup>12</sup> Tí baboraya birimigi tí Keriso heba hora hamaga harimi. Ngode Datagaliwabe ibu hongo timbunihe kagome Keriso mo heya henego tígua ibuhondo mini mbiraore wuwa baboraya birimigome tíbi Keriso heba mo heyamaga henego kami.✧ <sup>13</sup> Ala tígua ko birimigomebi tí Yu ndo wali agali tara tara howa Mana lowinigo ha tagira harimigomebi tínaga dinini homene ale hemigola Ngode Datagaliwabe haanda tí Keriso heba mo hela dai binigo kami. Iname ko bibahende birimago Ngode Datagaliwabe ibugua domo wahai hene.✧ <sup>14</sup> Mana lo wiago pugualu iname ko bialu harimagome dano ho hemaria Ngode Datagaliwabe ibunime mo wahene. Mana lowini ogonime bulene nga leagome ina dariba ho wiaria Ngode Datagaliwabe haanda mo yalu puwa Kerisonaga ira bangani ba para ho wahene.✧ <sup>15</sup> Ira banga ogoriani Keriso ibugua hari daligaha haru haga hearubi hondo haga hearubi tinaga hongo holene wiaru bibahende tongolope hai howa wali agali bibahende de hendelo ibuni hangu wayali ko lalu ti hende howa haru halu puabo hene.✧

<sup>16</sup> Ani binigo wali agali marume tihondo tomo ogo na ogo nanabe lolene nawi. Horo maru Ngode Datagaliwabe hondo loma bia ho holene ngabe nawibe lolenebi Ege Mbira Ngabulo haragonaga tomo dawa nolene ngabe nawibe lolenebi Sabada horo mitangi bu holene ngabe nawibe lalu bi urunidagua tihondo lolene nawi.✧ <sup>17</sup> Mana uruni maha ibulebiragonaga manane walia hene nga. Galoneore Keriso ibuni ka.✧ <sup>18</sup> Mbiralime emaga ale tara mbira hendenege te mine halu langiragome tí mo guya nahelo halimu. Ogoni ibugua ke halu ibuni mo dindi hetingi howa lalu, Dahuliyalihondo bi pupu wuleneore nga, laga ka. Ani biaga kago ibu dindi mana hangu mitangi buwa irane nawi ngatoria mine halu <sup>19</sup> ibugua Keriso inanaga haguane kago yu wahaga ka. Kerisonaga tingini ina kamago tingini ogoni Keriso ibuni haru howa tomo mialu kuni gungubunibi mo gimbu buwa Ngode Datagaliwabe haanda anda helo hame ledadagua mo anda haga ka.✧

### *Keriso heba homalu holene ngago ogo*

<sup>20</sup> Tí Keriso heba homamaga harimigome dindini howa biaganemebi damanaga hongomebi tí ala dariba ho wiyago golope henego kamigoni. Anigo dindi mana biaga karume bialu kadagua dege bialu kamigo irane agibe. Dindini karume bulenebi nabulenebi ngarunaga bi larago hale howa bialu kamigo agibe.✧ <sup>21</sup> Tigua bi urubi laga, Ogo nanabe. Ogo nayabe. Ogo ela nahabe, laga.✧ <sup>22</sup> Uruni ala agalime dege wabuwa lawai halu biaga winigo áyu uruni bibahende bialu karia galone nabulene wiaga.✧

✧ **2:7:** Eb 2.20-22, 3.17, Kl 1.23 ✧ **2:8:** Ga 4.3, 4.9, Eb 5.6, Kl 2.3, 2.18-20, Hi 13.9 ✧ **2:9:** Yo 1.14-16, Kl 1.19  
 ✧ **2:10:** Eb 1.21-22 ✧ **2:11:** Lm 2.29 ✧ **2:12:** Lm 6.4, Eb 1.19-20, 3.7, Kl 3.1 ✧ **2:13:** Eb 2.1-5 ✧ **2:14:** Eb 2.14-16, 1 Pi 2.24 ✧ **2:15:** Kl 1.13 ✧ **2:16:** Lm 14.1-12, 1 Ko 8.8, Ga 4.10 ✧ **2:17:** Hi 8.5, 9.9, 10.1 ✧ **2:19:** Eb 2.21, 4.15-16 ✧ **2:20:** Ga 4.3-5, 4.9 ✧ **2:21:** 1 Ti 4.3 ✧ **2:22:** Ais 29.13, Md 15.9

<sup>23</sup> Tigua hibu lowa dahuliyalihondo bi pupu wiagabi kē halu mo dindi hetingi hagabi tingini tandaga helo biagabi karu mana urunibi birago hondowa mini gigabiwinaga manani howa bira bada manda buleberami. Anigo mana urunibi biragome tingininaga dimagoli holene ngago mo wahelonaga ndo biaga ka.

### 3

<sup>1</sup> Tí Keriso heba halimulonaga mo heyamaga henego kami. Ani bu kamigo tígua dahuliya andaga Keriso ibuninaga dagiani Ngode Datagaliwabenaga gi tighayagi bedagoha mbirale ngarunaga mitangi bialu ogoriani gubalini paga ho halimu. ✧

<sup>2</sup> Mbirale dindini ngaru mitangi nabi daligani ngaru mitangi bialu ogoriani mini paga ho halimu. ✧ <sup>3</sup> Irane tí homene howa tínaga holene Keriso heba Ngode Datagaliwabeha do howa kamigoni. ✧ <sup>4</sup> Tínaga holene gahenge Keriso ibuniore kago ibu ha pani harangi tibi ibu heba ha pani halu ibunaga baya taraore holene yu holeberami. ✧

#### *Holene ala tawebi gahengebi ngago ogo*

<sup>5</sup> Anigo tíha mini ala tawenaga hame lagane yu howa bialu kamiru mo homa halimu. Uruni wali agali kayu bulenebi mini ko wuwa bulenebi dimagoli holenebi hame lowa ela holenebi dimagoli howa í hangu wua holenebi uruni bibahende mo homa hai halimu. Í hangu wua holene larugo ogoni mbirale tarahondo bi pupu wiaga mana ale nga. ✧ <sup>6</sup> Mana urunibi bialu Ngode Datagaliwabenaga mana mo wahaga karu tiha Ngode Datagaliwabenaga keba holene wulebira. ✧ <sup>7</sup> Ala tingininaga hame lagane urunime tí haru howa tigua, Bidaba, layadagua bialu harimigoni. ✧

<sup>8</sup> Anigo áyu mana uru bibahende wahi halimu. Keba holenebi dimagoli holenebi handabe manga holenebi wahaiore halimu. Mege bulenebi bi ko lolenebi tínaga ne harigaha howa tagira ibulene nawi. ✧ <sup>9</sup> Tíni tindule lagalaga nabilimu. Mini ko wuwa bialu haramiligo golo wahowa ✧ <sup>10</sup> mini gahengenaga karulo harimigoore kami. Mini gahenge ogoninaga wabiaga Ngode Datagaliwabe ibugua ibuni ale helo wabialu haabo ka. Tigua ibu kago manda biaiore halimulo ibugua tí ani mo manda bia halu ka. ✧ <sup>11</sup> Ani biragome tí Yu wali agali ndo taratarabi Yu wali agalibi dongone podo mabu binibi nabinibi Girigi bi nalagabi mana nahendenego biagabi garabaya biabe ale bia hagabi nabia hagabi kamiyagua urunibi taratara ndo tí mbiraore hangu kami. Galoneorego Keriso ibuni hangu ka. Ibu ina bibahendeha hai ka. ✧

<sup>12</sup> Tí Ngode Datagaliwabenaga wali agali bu kamigoni. Ibugua tí gubalini howa ibunaga halimulo tí dabo helenebi kami. Anigo tigua dara holenebi biamogo bulenebi tíni mo dindiha ho holenebi bayuwa de hondowa bulenebi ema nabi howa hibu lolenebi urunibi karulai halimu. ✧ ✧ <sup>13</sup> Tígua wali agali maru karu mitangi bialu biamogo bulenebi marume tihondo ko biragola la nabi wahaga bialu halimu. Anduane Homogo ibugua tí ko birimigo domo wahayadagua tigua nde marume birago la nabi wahalimu. ✧ <sup>14</sup> Bayale bulene uruni heba gubalini holene wia tago holene nga. Gubalini holene ogonime bibahende hangu hangu ngaru mo mbiraore howa baya gibi halu mo gimbu biaga. ✧ <sup>15</sup> Kerisohanda mo palia holene tihondo ngiyagome tínaga bu miniha bayuwa dabalulimulonaga ngidagoni. Mo palia holene ogoni tínaga wilo Ngode Datagaliwabehanda tí tingini homane mbiraoreha howa olene. Ani binigo tí turu halu kaj̄ lalu halimu. ✧ <sup>16</sup> Kerisonaga bi mana baya burugule mini homogo holene ngago tínaga bu miniha helowa halimu. Mini gigabiwi howa tigua tíni lawai hagahaga bialu lo tiga bigibigi

✧ **3:1:** Iba 110.1, Mg 12.36, 16.19, Eb 1.20, Pb 1.30, Kl 1.29, 2.12, 1 Te 2.2 ✧ **3:2:** Md 6.33 ✧ **3:3:** Lm 6.2, 2 Ko 5.7, 5.14, Ga 2.20, Kl 2.20 ✧ **3:4:** Yo 11.25, 14.6, 1 Ko 15.43, Pb 1.21, 1 Yo 3.2 ✧ **3:5:** Lm 6.6, 6.11-13, 8.13, Ga 5.24, Eb 4.19, 5.3-5, 1 Te 4.5 ✧ **3:6:** Eb 5.6 ✧ **3:7:** Lm 6.19-20, 1 Ko 6.11, Eb 2.2 ✧ **3:8:** Eb 4.22, 4.25-31, 5.4, Hi 12.1, 1 Pi 2.1 ✧ **3:9:** Eb 4.22 ✧ **3:10:** Pig 1.26, Lm 12.2, Eb 2.10, 4.24 ✧ **3:11:** Lm 10.12, Ga 3.28, Eb 1.23 ✧ **3:12:** Ga 5.22, Eb 4.32, Pb 2.1, 1 Pi 2.9 ✧ **3:12:** Eb 4.2 ✧ **3:13:** Mg 11.25, Eb 4.32, 5.2 ✧ **3:14:** Lm 13.8-10, 1 Ko 13.13, Eb 4.3 ✧ **3:15:** 1 Ko 12.13, 12.27, Eb 2.16-17, 4.4, Pb 4.7

bialu halimu. Anduane Homogonaga mbugani iba gana ngagobi lotunaga iba ganabi Dinini ibugua tí iba gana lawai haragobi bayuwa bi tabalu t́naga bu miniha howa Ngode Datagaliwabehondo kaj̄ lalu halimu.✠✠ 17 T́gua beramirubi laramirubi bibahendeore Anduane Homogo Yasunaga minini howa bulene nga. Ani bialu Yasu togoni howa Aba Ngode Datagaliwabehondo kaj̄ lalu halimu.✠

### *Iname holene gahenge yu howa bulene ngago ogo*

18 Agali oneru-o tí Keriso hamewane biruwa t́naga agalinime bia laradagua hale halu bilimu.✠

19 Wali bereru-o t́naga onehondo bi tandagabi nale gubalini ho halimu.✠

20 Waneiginiru-o tí Keriso hameigini howa t́naga aba aiyalame bi laradagua hale halu biaabo holene nga. Ogonidagua beremigome Ngode Datagaliwabe mo turu halu kami.✠

21 Waneigini aba aiyaru-o t́gua t́naga waneiginime genda holigo lawanana nabilimu.✠

22 Garabaya biabe ale bia hagaru-o t́gua t́naga haru haga dindini karume bia laradagua biai halimu. T́naga haru hagame tí de hendedaore bayale biaga ka lelonaga hangu bulemeni. Ani ndo tí de nahendedahabi mini tigabi wu howa bayale dege bialu halimu. T́gua Anduane Homogo mitangi bu kamigonaga biabe bialu kamigo manda buwa bialu halimu.✠✠ 23 Mbirale beramigo bibahende ta nabi bialu howa t́gua agalinaga biabe bia harolo mitangi nabi Anduane Homogonaga biabe bia harolo mitangi bialu gubaliniore howa bilimu. 24 Anduane Homogo ibugua t́naga yolo ngule wu kago manda bu halimu. Yolo ogoni ibugua ibunaga wali agali karuhondo mulebero lowinigo do ho ngago t́gua yu holeberami. T́naga Haguane henene Keriso ibuniore kago t́gua biabe ogoni ibunagaore bia haramili.✠ 25 Ko bialu karu hangu hangu ta nabi ibuni ko biyadagua pani miadai bulebira. Ngode Datagaliwabe ibugua wali agali daba ki buwa tini biyadagua ogobi degedege daba ki bulebira.✠

## 4

1 Haguane kamiru-o t́naga garabaya biabe ale bia haga karuhondo tiga tiga bulene ngadagua bialu halimu. T́bi t́naga Haguane dahuliya andagaha helowa bialu kamigo manda buwa halimu.✠

### *Bulene ngarunaga lenego ogo*

2 Ngode Datagaliwabehondo bi la ho wiaabo halimu. Ani bialu howa mini palia hondo nahe howa horo bibahendengi ibuhondo kaj̄ laabo halimu.✠ 3 Ani lalu howa dege t́gua inanaga bi la halu halimu. Ani laramigola howa iname Ngode Datagaliwabenaga bi mana Kerisoha howa ala mo pani nahe ngelenego lamulumaya Ngode Datagaliwabe ibugua ina henge ngialu panga dugua helonaga bi la halu halimu. Irane ogoninaga i áyu garabaya kogoni.✠ 4 Ina bi mana lamialu howa wali agalihondo lamulene ngadaguaore ti bayuwa wálelo lamuliyana Ngode Datagaliwabehondo bi la halimu.✠

5 Wali agali Ngode Datagaliwabe mitangi nabi karu de hondowa tí mini gigabi wialu tihondo bayale bulene henge ngidaru mohole nabi halimu.✠ 6 T́gua bi lalu howa wali agalime hale hoa haabo helo bi bayuwa lalu halimu. Mbirame tí mo bila haragola t́gua bayuwa ladai agua bule lowa manda bu halimu.✠

### *Lamaro bialu bi lenego ogo*

✠ 3:16: 1 Ko 14.26, Eb 5.19, Kl 4.6 ✠ 3:16: Eb 5.19-20 ✠ 3:17: 1 Ko 10.31, Eb 5.20, 1 Te 5.18, Hi 13.15 ✠ 3:18: Eb 5.22, Ta 2.5, 1 Pi 3.1 ✠ 3:19: Eb 4.31, 5.25, 5.28, 1 Pi 3.7 ✠ 3:20: Eb 5.24, 6.1, Ta 2.9 ✠ 3:21: Eb 6.4 ✠ 3:22: 1 Ti 6.1, Ta 2.9 ✠ 3:22: Eb 6.5-8 ✠ 3:24: 1 Ko 7.22 ✠ 3:25: Man 10.17, Lm 2.11, Eb 6.9, 1 Pi 1.17 ✠ 4:1: LBM 25.43, 25.53, Eb 6.9 ✠ 4:2: Eb 6.18, Pb 4.6 ✠ 4:3: Lm 15.30, 1 Ko 16.9, Eb 6.19 ✠ 4:4: Eb 6.20 ✠ 4:5: Eb 5.15-16, 1 Te 4.11-12 ✠ 4:6: Mg 9.50, Eb 4.29, Kl 3.16, 1 Pi 3.15

<sup>7</sup> Ina hamene turubiore Tiyagasa ibu mini bilinahe howa biabe biaabo hagago iname Anduane Homogonaga biabe mandagi birimago ibugua ina bialu kogonaga te hale halimulo tihondo langulebira.✠✠ <sup>8</sup> Ibugua ani langilo ina ibu tí kamiria pu larogoni. Ibugua ina kamarume bialu kamagonaga te tí langiragome tinaga mini mo hongo holebira. <sup>9</sup> Ina hamene turubiore Onisimasi ibu mini bilinahe howa tí aria mbira hayagoni ibubi Tiyagasa heba ibulebira. Libugua ogoria biraru te bibahende tí hondo ibalu langiai holebira.✠

<sup>10</sup> Agali Arisadagasa mbira iya haru garabaya kabago ibugua, Tí mitangi bialu ko, lalu lawia hara. Banabasanaga hanini Maga ibuguabi anidagua dege lawia hara. Ibu tí kamiria ibiyagua ibuhondo, Hama, lalu bayuwa haru halimu lalu ala langirugoni.✠

<sup>11</sup> Yosua ibu kaj mini lalu Yasadasa ibuguabi, Tí mitangi bialu ko, lalu lawia hara. Agali tebirali uruni ti Yu agali howa Keriso hameigini hayago kagoni. Wali agali Ngode Datagaliwabehanda Handame Ho Kagoria helonaga tigua hangu i heba mandagi biabe bialu harima. Tigua i biamogo timbuniore bialu hayagoni.

<sup>12</sup> Eaborasa ibubi tí kamiru aria mende howa Keriso Yasunaga biabe bia hagane dege kago ibuguabi, Tí mitangi bialu ko, lalu lawia hara. Ibugua horo bibahendengi Ngode Datagaliwabehondo tinaga bi hongo howa la halu tí kamirume Ngode Datagaliwabehanda hame ledago biaiore halubi tí mini bilinahebi mini bogabibi howa mini mbiraore wu halimulonaga bi la haabo haga ka.✠ <sup>13</sup> Ibugua tinaga biabe erekuibiore bia hayago i de handarugo henemane bia haya labehe kogoni. Ibugua wali agali Leodisia karunagabi Hairabolisi karunagabi bia dege haya. <sup>14</sup> Inanaga anogoda agali turubi Lugu ibuguabi Dimasa ibuguabi, Tí mitangi bialu ko, lalu lawia dege haragoni.✠

<sup>15</sup> Iname Keriso hameigini Leodisiani karuhondo, Tí mitangi bu kama, laya lalimu. Wali mbira Nimba bedagobi ibu andagani Keriso hameigini ngoai haga karubi tihondo bi ani dege laya lalimu. <sup>16</sup> Beba ogoni tí daga lalu hale halimu. Daga lai kagola Keriso hameigini Leodisiani karubi hale helo ti ngoai ho bedagoria daga lope hole manda bilimu. Keriso hameigini Leodisiani karume tihondo beba wia holebirago daga lope dege halimu. <sup>17</sup> Tigua Agibasa ibuhondo bi ogodagua lalimu. Anduane Homogonaga biabe ina bibelo ngiyago biaiore hole manda bu habe, laya lalimu.✠

<sup>18</sup> Gili bumaro bialu ogo dege i Polo ininaga gime ina tí mitangi bialu ko, lalu gili bero. I pu senime garabaya binigo kogo embeda nahalimu. Ngode Datagaliwabenaga biamogo bia holene tíha wiaabo helo hamelo ko laro.✠

✠ 4:7: Ab 20.4, 2 Ti 4.12 ✠ 4:7: Eb 6.21-22 ✠ 4:9: Pm 10-12 ✠ 4:10: Ab 12.12, 12.25, 13.13, 15.37-39, 19.29, 27.2, Pm 24 ✠ 4:12: Kl 1.7, Pm 23 ✠ 4:14: 2 Ti 4.10-11, Pm 24 ✠ 4:17: Pm 2 ✠ 4:18: 1 Ko 16.21, 2 Te 3.17

# 1 Tesalonaiga

## Polohanda Keriso hameigini Tesalonaigani hearuhondo beba mbira ogo gilibu wia hene

### Mbuga ogoha gilibu ngarunaga nemandi ogo

Polohanda Keriso hameigini Tesalonaigani hearuhondo beba mbira gilibu wia henego irane ti mo hongo helobi ti mini dungulo helobi gili bini. Ti Ngode Datagaliwabhondo mini mbiraore wu haabo kagobi gubalini ho haabo kagobi Timodihanda layagola Polohanda hale howa Ngode Datagaliwabhondo kaj lene.

Ani lowa Polo ibuni ala ti heba mandagi hayangi ibu ogobi harugoni lalubi bi mbira Yasu dai bulenenaga ti hale hayagobi Polohanda ti mo mitangi bia hene. Ani mo mitangi bia halu lalu, Anduane Homogo dai birangi wali agali Kerisohondo mini mbiraore wu howa homayaru ti ala heyulebira. Ina nahome dindini kamaru ti heba mandagi hariha Anduane Homogo lola hole poleberama, lalu Polohanda gilibu wia hene.

Ani lowa bi mende hale hayagonaga Polohanda bi ogodagua ladai bialu lalu, Keriso ibu dai bilo tambu tigua t'ini miniha mo hongo hagahaga bialubi biamogo bigibigi bialubi áyu bialu kamigonidagua biaabo halu halimu, lalu gilibu wia henego nga.

#### **Bulu бага бува кuni gilibu ngago**

*1.1*

Polohanda bi ala lenego *1.2-3.13*

Ngode Datagaliwabhondo kaj lalu henego *4.1-12*

Keriso hameiginime bayale bialu holenenaga ngago *4.13-5.11*

Keriso ibu dai bulenenaga bi lenego *5.12-22*

Ogodagua bulene nga lalu lenego *5.23-28*

Lamaro bialu lenego

<sup>1</sup> Polo Sailasa Timodi iname Keriso hameigini Tesalonaigani kamiru t'hondo beba ogo gilibu wia harama. Tí ina Aba Ngode Datagaliwabenagabi Anduane Homogo Yasu Kerisonagabi kamigoni.\*

Biamogo bia holenebi mo palia holenebi tíha wilo hamelo kama.

*Keriso hameigini Tesalonaigani hearunaga holenebi mini mbiraore wulenebi winigo ogo*

<sup>2</sup> Horo bibahendengi iname tí bibahende mitangi bialu Ngode Datagaliwabhondo bi lalu howa kaj lalu t'naga minibi laabo haramali.\* <sup>3</sup> Ani lalu howa iname ina Aba Ngode Datagaliwabe naga deni howa tigua mini mbiraore wu howa biabe birimigobi gubalini howa biabe erekuibi birimigobi inanaga Anduane Homogo Yasu Kerisoha mini dunu bia howa mini bilinahe kamigobi mitangi bialu bi lameremali.\* <sup>4</sup> Ina hamene mbaliniru-o Ngode Datagaliwabhenda tí gubalini howaibunagaore halimulo tí dabene kamigo mandabu kama.\* <sup>5</sup> Irane iname Bi Mana Debene tí kamigoha bime dege ndo hongomebi Ngode Datagaliwabe Dinini ibu heba bi mana ogoni heneneore manda biai howa yalu ibirima. Ina tí heba mandagi howa bialu harimagoni agua birima tí manda bidamigoni. Ogoni tíore bayale halimulonaga bialu harimagoni.\* <sup>6</sup> Iname bialu harimagobi Anduane Homogo ibugua biyagobi tigua hondowa bialu harimi. Tigua tandaga timbuni halu harugo lowa Ngode Datagaliwabe Dininina turu holene ngiyagome bi mana hale halu yu tiga bialu harimi.\* <sup>7</sup> Ani bialu howa Masedonia dindinibi Agaia dindinibi Yasu mana yu tiga biaga bibahende hearuhondo mana bayale

\* **1:1:** Ab 17.1-13, 2 Te 1.1    \* **1:2:** Eb 1.16, Pb 1.3-4, Kl 1.3, 2 Te 1.11    \* **1:3:** 1 Ko 13.13, Ga 5.6, Kl 1.4-6, Hi 6.10

\* **1:4:** Kl 3.12, 2 Te 2.13    \* **1:5:** 1 Ko 2.4-5, 4.20, Kl 2.2, Hi 2.3    \* **1:6:** Ab 17.1-9, 1 Ko 4.16, 11.1, Pb 3.17, 2 Te 3.9



walia halu harimi. ✨ <sup>8</sup> Masedonia dindihabi Agaia dindihabi Anduane Homogonaga bi mana tíha howa lo yalu piyago ogoni hangu ndo tígua Ngode Datagaliwabehondo mini mbiraore wirimigonaga heba dindi bibahendeni karume hale haame ho ka. Ani bidago iname nde bi mbira latago holene nawida. ✨ <sup>9</sup> Ina tí hemiria ibirimagola tígua inahondo turu halu nenege hinalu, Hama, larimigonaga wali agali dindi uruni bibahendeni karume te lalu ka. Tí ala mbirale gime wabiniruhondo bi pupu wiaga harimigo ai mini beregedalu Ngode Datagaliwabe ibu hangu henenebi holenehebi kagonaga biabe bule tígua ibuhondo mini mbiraore wirimigonaga te lalu ka. ✨ <sup>10</sup> Ngode Datagaliwabe Igini dahuliya andaga howa dai bilo tí hondo kamigonaga te lalu ka. Ngode Datagaliwabe Igini Yasu ibu ala homowa Ngode Datagaliwabe handa ibu mo heya henego ogoni ibugua ina Ngode Datagaliwabe naga lembo holene wulebiragoha naholomayanaga gini mialu ka. ✨

## 2

### *Tesalonaigani howa Polohanda biabe binigo ogo*

<sup>1</sup> Hamene mbaliniru-o ina tí hemiria ibalu biabe bialu harimago bame bu wahole ndo birimayago tíni mandabu kamigoni. ✨ <sup>2</sup> Ina tí Tesalonaiga hemiria naibi Pilibai hemaore tano ogoriani hearume ina mo tandaga halu inahondo mege bialu hayagoni tí manda bu kami. Ani biyaruni bilowabi tí hemigoria inahondo handabe manga hayaruni helowabi iname tíhondo Bi Mana Debene Ngode Datagaliwabeha howa ibu ngago langulumaya Ngode Datagaliwabe handa ina mo hongo hene. ✨ <sup>3</sup> Ani binigo iname tíhondo bi laramago tene yolebi mini ko do howabi mbirali mo hondo holenagabi ndo laramagoni. <sup>4</sup> Ani ndo Ngode Datagaliwabe handa ina karulape hemane hondowa inahondo Bi Mana Debene lamulene biabe ngiyagola iname nde ibugua hame ledadagua laramali. Iname wali agali mo turu hole manda bialu ndo Ngode Datagaliwabe handa ina ogobiore howa bialu kagoda lalu miniha manda bu kago iname ibu mo turu holenaga manda bialu laramali. ✨ <sup>5</sup> Iname tí hemiria ibalu tí mo guya howa bi lalubi inanaga miniha dimagoli holene ngago yi howa bi lalubi ndo larimago manda bidamigoni. Ngode Datagaliwabe ibu ina de hondo kagoni. ✨ <sup>6</sup> Tí kamirumebi wali agali maru karumebi inanaga mini yaraga helo hame lowa ndo biabe birimagoni. ✨ <sup>7</sup> Ina Kerisonaga abosolo agali harimagoni howa tíhondo ina biamogo bulene ngago bidaba labehe howa nale harima. Ani nale howa waneigini aiyame ibu waneigini mitangi bialu bayuwa hondo hagadagua iname tí heba howa tíhondo ani bialu harima. ✨ <sup>8</sup> Iname tí gubalini timbuniore ho howa tíhondo Bi Mana Debene Ngode Datagaliwabeha howa ibu ngago hangu langule ndo tí inanaga gubaliniore harimigo iname inaneore tíhondo ngulenege karulape manda bu harima. <sup>9</sup> Hamene mbaliniru-o iname gime biabe erekuibi biaabo halu harimago tí mitangi nabi kamibe. Iname Bi Mana Debene Ngode Datagaliwabeha howa ibu ngago tí langialu harima. Langialu howa tí mo genda ya halu tígua mbira ngule manda nabilimulonaga ina horombe mbiragabi inane nalu holenenaga biabe erekuibi biaabo halu harima. ✨

<sup>10</sup> Iname bialu harimago Ngode Datagaliwabe handa handaya tíguabi de handarimigoni. Yasu mana yu tiga bu kamiru tíhondo iname mana bayalebi tigabibi hangu bialu kagua nabi harimagoni. <sup>11</sup> Waneigini abame ibu waneigini mitangi bialu tíhondo biagadagua iname tí hangu hanguhondo bialu harimago manda bidami. ✨ <sup>12</sup> Ani bialu howa iname tí mo hongo halubi mo turu halubi Ngode Datagaliwabe turu helo bialu holene ngadagua bialu halimu laabo halubi harimagoni. Ngode Datagaliwabe ibugua

✨ **1:7:** 1 Pi 5.3 ✨ **1:8:** Lm 1.8 ✨ **1:9:** Ab 14.15, 1 Ko 12.2, Ga 4.8, 1 Te 2.1 ✨ **1:10:** Ab 17.31, 1 Te 4.16, 5.9, Ta 2.13, 2 Pi 3.12 ✨ **2:1:** 1 Te 1.5, 1.9 ✨ **2:2:** Ab 16.19-24, 17.1-9, Pb 1.30, Kl 2.1 ✨ **2:4:** Yar 11.20, Ga 1.10, 1 Ti 1.11 ✨ **2:5:** Ab 20.33, Lm 1.9, 1 Te 2.10, 2 Pi 2.3 ✨ **2:6:** Yo 5.41, 5.44, 1 Ko 9.1-6, 2 Ko 11.9, 2 Te 3.8-9 ✨ **2:7:** 1 Ko 2.3, 2 Ko 13.4, 2 Ti 2.24 ✨ **2:9:** Ab 20.34, 1 Ko 4.12, 2 Ko 11.9, 12.15 ✨ **2:11:** Ab 20.31

Handame Ho Kagoria tí anda puwa ibunaga bayale taraore holene yu halimulo ibugua tí olenego kami.\*

<sup>13</sup> Iname Ngode Datagaliwabehondo kaj laabo haramaligo irane mende ogo. Iname Ngode Datagaliwabe bi mana tí hemiria yalu ibalu langirimagola tigua hale howa agalinaga bi mana ndo Ngode Datagaliwabenaga bi manaoreda lalu hale halu yu tiga birimigoni áyubi wiaabo kagoni. Bi mana ogoni yu tiga bu kamiru tíha Ngode Datagaliwabe ibugua biabe bialu ka.\* <sup>14</sup> Hamene mbaliniru-o Yudia dindiha Yu agalirume Ngode Datagaliwabenaga wali agali Keriso hameigini hearu ti mo tandaga hayadagua tí damenerume tí mo tandaga halu hayada.\* <sup>15</sup> Yu agali urunime Anduane Homogo Yasubi Ngode Datagaliwabe mana latagi haga agali hearubi bo wahenego tigua inabi nde mo tandaga henego kama. Ani bialu hagarume Ngode Datagaliwabe mo turu nahagabi wali agali bibahende baba waitigi halu hagabi ka.\* <sup>16</sup> Ogoni hangu ndo tigua Yu wali agali ndo tara tara karume pele mulene yu helonaga bi mana iname lamuligo lowa hangai haabo holene manda bu hene. Tigua ko bibahende biaabo halu hayadagua bia tago halu bima iraga henego ogoni. Ani binigo Ngode Datagaliwabenaga lembo holene tini ibiraho ngeleda.\*

*Polohanda lone nenege polene hame lenego ogo*

<sup>17</sup> Hamene mbaliniru-o iname nde tí helalu emene pu bagi harimagola de nahende howa minime dege mitangi bu wuwa tí hameore lalu de hondoa halu lone denguiore hondolego lowa hariga tai bialu harima.\* <sup>18</sup> Iname tí hemiria dai bua timbuni ho harima. Polo ina halu mbira hangu ndo halu mendebi dai bulebiriura dama Heyolabeme inanaga hariga mo hangai haya. <sup>19</sup> Anduane Homogo Yasu dai birangi ibu deni howa ina wayali harimagonaga mini yaraga holene irane wilobi inanaga mini dunu bia holenebi mo turu holenebi tí ndo holeberamiyagua nde ai holebirabe.\* <sup>20</sup> Iname tínaga mini mo yaraga holenebi ina mo turu holenebi irane tíore kamigoni.\*

### 3

<sup>1</sup> Iname tí de nahende howa ogoria ha ho wiaabo habe naheyagola iya hangu Adene dindini hondo holene nga manda birima.\* <sup>2</sup> Ani bialu howa iyame ina hamene Timodi tí hemiria ibilo pu lariba. Timodi ibu ina heba howa iname Kerisonaga Bi Mana Debene lamialu Ngode Datagaliwabenaga biabe mandagi bialu haramali. Ibugua tí mo hongo helobi mini mbiraore wirimigo biamogo bilobi tí hemiria ibilaribagoni.\* <sup>3</sup> Irane tí tandaga dewa nalu kamigo howa mini mbiraore wu harimigo yu wahalu napilimulona ibilaribagoni. Tandaga urunibi Ngode Datagaliwabehanda ina mo bayale holenaga ibilalu kago tını manda bidami.\* <sup>4</sup> Anigo ina tí heba mandagi harimangi iname maha tandaga noleberama lalu tí abale langirimagoni. Ani bulebira langirimadagua birago bayuwa manda bidami.\* <sup>5</sup> Irane ogoninaga ina Timodi tí kamiria ibilarugoni. Tigua mini mbiraore wiaabo halu kamibe be agua birimibe toba hayagola hondo pu laru. Ina mitangi birugola dama Heyolabeme tí ko mo bia halu iname biabe birimago mo ko halu ibira holigo ani mitangi biru.\*

<sup>6</sup> Ai Timodi ibu tí kamigoria howa ina kamaria lone daibu ka. Dai buwa ibugua tí mini mbiraore wu haabo kami lalubi tí gubalini hagahaga bu kami lalubi bi turubiore ogoni inahondo langiya. Ani langialu ibugua tí ina mitangi biaabo halu iname tí de hondoa ho kamadagua tiguabi ina de hondoa ho kama larimiyago hale harima.\* <sup>7</sup> Hamene mbaliniru-o ibugua ani bidami lalu langiyagome ina genda holenebi tandaga nolenebi

\* 2:12: Pb 1.27, Kl 1.10, 2 Ti 1.9, 1 Pi 5.10 \* 2:13: Ga 1.11-12, 4.14, 1 Te 1.2-3, 2 Te 2.13, 2 Pi 3.2 \* 2:14: Ab 17.5, Hi 10.33-34 \* 2:15: Ab 2.23, 3.15, 7.52, 9.23, 9.29, 13.45, 13.50, 14.2, 14.5, 14.19, 17.5, 17.13, 18.12 \* 2:16: Md 23.32-33, 24.6, Lg 11.52, Ab 13.50 \* 2:17: 1 Te 3.10 \* 2:19: Pb 2.15-16, 4.1, 2 Te 1.4 \* 2:20: 2 Ko 1.14, 1 Te 3.13, Mo 1.7 \* 3:1: Ab 17.15 \* 3:2: Ab 16.1-3 \* 3:3: Eb 3.13, 2 Ti 3.12 \* 3:4: Ab 14.22, 20.24 \* 3:5: Pb 2.16 \* 3:6: Ab 18.5

ngagoha howa tígua mini mbiraore wu haabo kami layago hale harimagome inanaga mini mo hongo haragola kama.✧ <sup>8</sup> Anigo tígua Anduane Homogoha ho gimbu buwa mini bilina ho haabo kamiyagua nde ina turu howaore kamagoni.✧ <sup>9</sup> Áyu iname tí mitangi bialu inanaga Ngode Datagaliwabehondo kajore labehe kama. Ina tí kamigo hondowa inanaga Ngode Datagaliwabe deni howa turu ho kamago ibuhondo kaj larama. <sup>10</sup> Iname horombe mbiragabi tí hameore lowa Ngode Datagaliwabehondo bí lalu ina tínaga dengui hondona kamago lalubi tígua mini mbiraore wu kamigo mo hongo ha tago holomaya lalubi lamiaabo halu haramali.✧

<sup>11</sup> Inanaga Aba Ngode Datagaliwabe ibunibi inanaga Anduane Homogo Yasu ibuguabi ina tí kamiria ibulumaya haru ibilo hame ledama.✧ <sup>12</sup> Anduane Homogo ibugua tíni gubalini hagahaga beramiligobi wali agali bibahende karuhondo gubalini haramiligobi mo anda haaboore helo larama. Tínaga gubalini holene ogoni iname tihondo gubalini timbuni ho kamadaguaore halimulo hamelo kama.✧ <sup>13</sup> Ogonidagua birimiyagua ibugua tínaga bu mini mo hongo holebira. Mo hongo haragola inanaga Anduane Homogo Yasu ibunaga wali agali heba bibahende dai biragola ina Aba Ngode Datagaliwabe deni howa tí ibunaga loma bia henebi tigabiore ko mbira para nahebi holeberami.✧

## 4

### *Iname Ngode Datagaliwabe turu helonaga bialu holene ogobi nga*

<sup>1</sup> Ina hamene mbaliniru-o lamaro bialu bi mbira langeramago ogo. Tígua Ngode Datagaliwabe turu helonaga agua bialu holene nga lalu abale langirimago mandabu kami. Ogoni manda buwaore bialu harimigoni. Áyu iname Anduane Homogo Yasunaga minini howa tihondo hongo howa lalu tígua bialu harimidagua dege bia tagoore halu bialu halimu larama.✧ <sup>2</sup> Anigo irane Anduane Homogo Yasunaga hongoni howa iname tihondo agua bialu holene nga lalu langirimago mandabu kamigoni. <sup>3</sup> Ani manda bialu Ngode Datagaliwabehanda tí mitangi bialu ibunaga loma bia hene howa wali agali kayu bulene tíha para nahe halimulo hame ledago ogoni.✧ <sup>4-5</sup> Agali tí hangu hangu howa tínaga one bedagohondo tigabi dege bialu wali agali Ngode Datagaliwabe manda nabi karume dimagoli halu biagadagua ndo tigabi bulene ngadagua hangu bialu haru halimu.✧✧ <sup>6</sup> Anigo mana ogoni mitangi bialu pugua nabi Keriso hameigini maruhondo mo hondo halu ko nabi halimu. Bi ogoni iname ala hongoore howa tí langialu harimagoni irane mana ko urunibi bialu karuhondo Anduane Homogohanda pani mulebira.✧ <sup>7</sup> Iname wali agali kayu bigibigi bialu holomaya ndo Ngode Datagaliwabehanda ibunaga loma bia hene howa bayale bialu holomaya ina olo heleneo kama.✧ <sup>8</sup> Ani bulene ngago mbiralime mana áyu lawai halu kamagoni puguayagua ogoni ibu agalinaga bi ndo pugualu ka. Ngode Datagaliwabe ibu Dinini tihondo ngiaga kago ogoni ibunaga bi pugualu kagoni.✧

<sup>9</sup> Keriso hameigini kamiru tíni gubalini hagahaga bulene ngago agua halimu lalu gilibu wia holene nawi. Irane tíni agua bialu gubalini hagahaga bialu holene nga lalu Ngode Datagaliwabehanda tihondo lawai hayago manda bidamigoni.✧ <sup>10</sup> Gubalini holene ogoni yuwa Keriso hamewaneigini Masedonia dindini hearu bibahendehondo biamogo bialu harimi. Hamene mbaliniru-o ani bialu harimigodagua hangu ndo bia tagoore halu haabo halimu.✧ <sup>11</sup> Ani bialu howa iname tihondo ala langirimadagua

✧ **3:7:** 2 Te 1.4 ✧ **3:8:** Pb 4.1 ✧ **3:10:** Ab 26.7, Lm 1.10, Kl 4.12, 2 Ti 1.3 ✧ **3:11:** 2 Te 2.16 ✧ **3:12:** 1 Te 4.9-10, 5.15, 2 Pi 1.7 ✧ **3:13:** Seg 14.5, 1 Ko 1.8, Pb 1.10, 2 Te 1.7, 1.10 ✧ **4:1:** Pb 1.27, Kl 1.10, 2.6, 1 Te 2.12, 2 Te 3.6 ✧ **4:3:** 1 Ko 6.15, 6.18, Eb 5.3, 5.17, 5.27, Kl 3.5, 1 Te 5.23, Hi 10.10, 1 Pi 1.16 ✧ **4:4-5:** Lm 6.19, 1 Ko 6.13-15, 6.18 ✧ **4:4-5:** Iba 79.6, Ga 4.8, Eb 2.12, 4.17-18, 2 Te 1.8 ✧ **4:6:** LBM 19.11-13, Iba 94.1, 1 Ko 6.8, 2 Te 1.8 ✧ **4:7:** 1 Ko 1.2, 2 Te 2.13-14, Hi 12.14, 1 Pi 1.14-16 ✧ **4:8:** Ese 36.27, 37.14, Lg 10.16, 1 Ko 2.10, 2 Ko 1.22, 1 Yo 3.24 ✧ **4:9:** Yo 13.34, 15.12, Hi 8.11, 1 Yo 2.20, 2.27, 3.11-13 ✧ **4:10:** 2 Te 3.4

miniha hogorale bu halu marunaga biabe birago hondowa hangu ndo t́inaga biabe beremigo mitangi bialu t́inaga gime tomo nalu holenego biabe bialu hole harudalo manda buwaore halimu. ✧ <sup>12</sup> Ani bialu harimiyagua wali agali Yasu mana yu tiga nabi tagira karume t́i hondowa bayaleore bialu kami lelobi t́ini mbirale buru pale kamigo wali agalime ngilo mini mo hana holene hangu nawilobi halimu. ✧

### *Anduane Homogo dai bulebirago ogo*

<sup>13</sup> Ina hamene mbaliniru-o wali agali Yasuhondo mini mbiraore nawi howa mini dunu bia holene nayi karume mbirali homaragola ti yi lalu dara timbuniore hagadagua t́i nahalimulo iname wali agali homeneru biagane mana henene manda bilimulo hame ledama. ✧ <sup>14</sup> Ani manda bidamagome Yasu ibu homowa lone heyu hayago yu tiga bidamagodagua Ngode Datagaliwabe ibugua wali agali Yasuhondo mini mbiraore wu howa homayaru ti Yasu heba haru dai bulebiragonaga yu tiga bu kamagoni. ✧

<sup>15</sup> Mana ogo Anduane Homogo ibugua lawai hayago langerama. Anduane Homogo dai birangi ina nahome dindini kamarume wali agali ala homayaru helalu ina abale napoleberama. ✧ <sup>16</sup> Horo ogonongi haragola Ngode Datagaliwabehanda bi dalimu lolebi-ragobi dahuliyali haguane mbira kagome bi lolebiragobi Ngode Datagaliwabenaga mbelo biguli lolebiragobi uruni ledagola Anduane Homogo ibuni dahuliya andaga howa dalipe holebira. Ani biragola wali agali Kerisohondo mini mbiraore wu howa homayaru ti ala heyulebira. ✧

<sup>17</sup> Ani bidagola ogonongi ina nahome dindini kamaru ibugua mo ngoai halu ti ala homene heyiyaru heba mandagi hari beralibaha Anduane Homogo lola hole poleberama. Ani bialu ina Anduane Homogo heba mandagi haabo holeberama. ✧ <sup>18</sup> Ani holeberamago bi ogoni lalu t́ini miniha mo hongo hagahaga bialu halimu.

## 5

### *Anduane Homogo dai bilonaga manda manda bu holene ngago ogo*

<sup>1</sup> Hamene mbaliniru-o ani bulebira lalu bi ogoni langirimago horo ogoangi ibulebira lalubi mbirale mbira ogo ale bialu kamaria ibulebira lalubi iname t́ihondo lone langu-lene nawi. ✧ <sup>2</sup> Irane ina mitangi nabi kamaria pageali mbiraga ibagadagua Anduane Homogonaga Horo ogonibi ibulebirago manda buwaore kamigoni. ✧ <sup>3</sup> Wali agalime lalu, Ina bayale wai nabi karulape hangu kama, lalu kaore mo ko holene abaleore ibira holebira. Waneigini aiyá gali taba honolene tu kaware haragola tandaga abale hagadagua ogonibi ibulebira. Ani biragola wali agalime yo polene henge nawulebira. ✧ <sup>4</sup> Hamene mbaliniru-o t́i arumaha ndo kamigo pageali ibiragola mogo laramilidagua Horo ogoni ibiragola t́i mogo lolene nawulebira. ✧ <sup>5</sup> T́i bibahende kamiru wá holenenaga kamigo t́i horombenaga kami. Ina mbiraganagabi arumanagabi ndo kamagoni. ✧ <sup>6</sup> Anigo wali agali maru ti palia hondo kadagua nahe ina dengala howabi mini haru howabi holene nga. ✧ <sup>7</sup> Mbiraga haragola wali agalime palia hondo hagabi lulu iba nalu lulu yu hagabi ka. ✧ <sup>8</sup> Ani biagadagua ndo ina horombenaga kamagome ina mini haru howa holene nga. Ani bialu wai biagame mbirale galuhombeneni karulagadagua iname mini mbiraore wulenebi gubalini holenebi karulo holene nga. Ani karulalu wai biaga manda karulagadagua ina pele mulene ngiragonaga mini dunu bia holene karulo holene nga. ✧ <sup>9</sup> Ngode Datagaliwabehandaibunaga lembo holene ngagonaga tandaga iname nolomaya ina dabo helene ndo. Anduane Homogo Yasu Kerisoha howa pele

✧ **4:11:** Eb 4.28, 2 Te 3.8, 3.12, 1 Pi 4.15 ✧ **4:12:** Lm 13.13, 2 Ko 8.21, Kl 4.5 ✧ **4:13:** Eb 2.12 ✧ **4:14:** Lm 14.9, 1 Ko 15.3-4, 15.12-13, 15.18, 15.23 ✧ **4:15:** 1 Ko 15.51-52 ✧ **4:16:** Md 24.30-31, Ab 1.11, 1 Ko 15.23, 15.52, 1 Te 1.10, 2 Te 1.7 ✧ **4:17:** Yo 12.26, Ab 1.9, Mo 11.12 ✧ **5:1:** Md 24.36 ✧ **5:2:** Md 24.42-44, Lg 12.39, 2 Pi 3.10, Mo 3.3 ✧ **5:3:** Ese 13.10, Hos 13.13, Md 24.39, Lg 21.34-35, Yo 16.21-22 ✧ **5:4:** Lm 13.12-13, 1 Yo 2.8 ✧ **5:5:** Lm 13.12, Eb 5.8-9 ✧ **5:6:** Md 24.42, 25.5, 25.13, 1 Pi 5.8 ✧ **5:7:** Lg 21.34-36, Lm 13.13, Eb 5.14 ✧ **5:8:** Ais 59.17, Eb 6.13-17

mulene yu holomaya ibugua ina dabo helene kama.✠ <sup>10</sup> Anduane Homogo Yasu Keriso ibu dai birangi ina dindini haabo kamaria ibiyaguabi homedamagola ibiyaguabi ta nabi ibu heba mandagi haabo holomaya ibugua inanaga homa hene.✠ <sup>11</sup> Ani bidago tigua tini miniha mo hongo hagahaga bialubi biamogo bigibigi bialubi áyu bialu kamigonidagua biaabo halu halimu.✠

*Bulene ngago lalubi tí mitangibu ko lalubi Polohanda bi lamaro binigo ogo*

<sup>12</sup> Ina hamene mbaliniru-o tí heba biabe mandagi bialu karu tigua tí Keriso ha kamiru haru howa hariga walia halubi lawai halubi kago manda bialu tihondo bayale hangu bialu halimulo hame ledama.✠ <sup>13</sup> Tigua biabe bialu kago galoneore mitangi bialu tihondo gubalini howa bayaleore bialu tini mo palia hagahaga bialu halimu.

<sup>14</sup> Ina hamene mbaliniru-o tigua bulene ngago ogo. Biabe bibe manga haga karuhondo bi hongo howa lamilimu. Gi haga karu tinaga miniha hongo helo mo hongo halimu. Mini gedaorewi karu biamogo bilimu. Bibahendehondo abale keba nahe bi tendore lalu ema nabi hondo halimu.✠ <sup>15</sup> Ani buwa mbiralime ko biragola ko dege bia dai bulamini de hondo halu tini degedege bayale bigibigi biaabo holebi wali agali bibahende karuhondo bayale dege biaabo holebi harimadalo manda buwaore halimu.✠

<sup>16</sup> Miniha turu haabo howa halimu.✠ <sup>17</sup> Bibahende ta nabi ngarunaga Ngode Datagaliwabhondo bi laabo halu halimu.✠ <sup>18</sup> Tí kamigoha bayale holene ibu ngayaguabi ko holene ibu ngayaguabi ta nabi bibahendengi Ngode Datagaliwabhondo kai lalu halimu. Tí Keriso Yasuha ho gimbu bu howa ani lalu halimulo Ngode Datagaliwabhonda hamelo ka.✠

<sup>19</sup> Ngode Datagaliwabe Dinini ibugua tíha howa hungu bialu kago mo hundia nahalimu.✠ <sup>20</sup> Mbiralime bi mana lamulene Ngode Datagaliwabhonda miyago langiragola hale habe manga nahalimu.✠ <sup>21</sup> Bi larago bibahende tigatiga larabe yole larabe bayuwa dabalulu bayalego dege mo yai halimu.✠ <sup>22</sup> Ko bulene tara tara bibahende ngaru tí kamigoha ibu ngagola tini para holani hondowa halimu.✠

<sup>23</sup> Mo palia holene ngiaga Ngode Datagaliwabe ibugua tíibunaga hai halimulo mo tiga bia helo laro. Ina Anduane Homogo Yasu Keriso dai bilonaga howa tinaga dininibi minibi tinginibi ko tara tara ngarume para nahe halimulo Ngode Datagaliwabe ibugua tí haru hai helo laro.✠ <sup>24</sup> Tí olo helayago ibu mini bilinahe kago ibunime ani bulebiraore.✠

<sup>25</sup> Hamene mbaliniru-o tigua Ngode Datagaliwabhondo bi lalu howa inanagabi la halimu.✠

<sup>26</sup> Keriso hameigini bibahende kamiru gi tigani bigibigi bilimu.✠

<sup>27</sup> Ina Anduane Homogonaga minini howa tihondo bi hongo howa lalu beba ogoni Keriso hameigini bibahende karu hale hai helo daga lope halimu laro.

<sup>28</sup> Anduane Homogo Yasu Kerisonaga biamogo bia holene tíha wiaabo helo hamelo kogoni.

✠ 5:9: Lm 9.22, 1 Te 1.10, 2 Te 2.13-14, 1 Pi 2.8 ✠ 5:10: Lm 14.8-9, 2 Ko 5.15, 1 Te 4.14 ✠ 5:11: Yu 20 ✠ 5:12: 1 Ko 16.18, Pb 2.29, 1 Ti 5.17, Hi 13.7, 13.17 ✠ 5:14: Ga 5.22, 6.1-2, Kl 3.12, 2 Te 3.6, 3.11, 3.15, Hi 12.12 ✠ 5:15: Min 20.22, Md 5.39, Lm 12.17, 1 Ko 6.7, 1 Pi 3.9 ✠ 5:16: 2 Ko 6.10, Pb 4.4 ✠ 5:17: Lg 18.1, Eb 6.18, Kl 4.2, 1 Pi 4.7 ✠ 5:18: Eb 5.20, Kl 3.17 ✠ 5:19: Eb 4.30, 1 Ti 4.14, 2 Ti 1.6 ✠ 5:20: 1 Ko 14.1, 14.39 ✠ 5:21: 1 Ko 2.11, 2.15, Pb 4.8, 1 Yo 4.1 ✠ 5:22: Yob 1.1, 1.8, 2.3 ✠ 5:23: Lm 15.33, 1 Ko 1.8, Pb 4.9, 1 Te 3.13, 2 Te 3.16 ✠ 5:24: 1 Ko 1.9, 10.13, 2 Te 3.3 ✠ 5:25: Kl 4.3, 2 Te 3.1 ✠ 5:26: Lm 16.16



## 2 Tesalonaiga

### Polohanda Keriso hameigini Tesalonaigani hearuhondo beba mende ogo gilibu wia hene

### Mbuga ogoha gilibu ngarunaga nemandi ogo

Polohanda Keriso hameigini Tesalonaigani hearuhondo beba mende gilibu wia henedagoni irane agali marume, Keriso dai bulene horo abale tagira ibiya, lalu lawai halu ka layagola ti mo tiga bule beba ogo gilibu wia hene. Keriso dai nabadaha mbira bulene wulebira layago ogo. Mbirali mana mo yo handagane kagome ibuwa ibuni haru haga bu hinalu mana koorebi ko bulene tara tarabi anda hatagi halu Keriso baba waitigi holebira. Ani bulebirago manda buwa Kerisohondo mini mbiraore wu karume genda holene ngangibi tandaga nolene ngangibi ema nabi howa hibu lalu biabe bayale bialu holene nga, lalu gilibu wia hene.

#### **Bulu бага буwa kuni gilibu ngago**

1.1-2

Polohanda bi ala lenego 1.3-12

Mini yaraga halu kaj lenego 2.1-17

Keriso dai nabadaha ogodagua bulebiragonaga lenego 3.1-15

Keriso hameiginime bayale dege bialu holenenaga ngago 3.16-18

Lamaro bialu lenego

<sup>1</sup> Polo Sailasa Timodi iname Keriso hameigini Tesalonaigani kamiru tihondo beba ogo gilibu wia harama. Ti ina Aba Ngode Datagaliwabenagabi Anduane Homogo Yasu Kerisonagabi kamigoni.\*

<sup>2</sup> Ngode Datagaliwabe ina Ababi Anduane Homogo Yasu Kerisobi libugua tihondo dara howa biamogo bia holenebi mo palia holenebi ngilo hamelo kama.\*

#### *Polohanda Ngode Datagaliwabhondo kaj lenego ogo*

<sup>3</sup> Ina hamene mbaliniru-o ti mitangi bialu iname Ngode Datagaliwabhondo kaj lalu haabo holeneore nga. Ogonidaguaore bulene irane tigua mini mbiraore wu kamigo anda ho yangaore lalubi tini gubalini ho hagahaga bialu kamigo ogoni timbuni anda ho yanga lalu kamigoni.\* <sup>4</sup> Irane ogoninaga Keriso hameigini dindi tara tarani karuhondo iname tinaga mini mo yaraga haramali. Waitigime tihondo gendabi tandagabi ngiragola tigua manga nahe donge howa hibu lalu kamigonagabi Ngode Datagaliwabhondo mini mbiraore wiaabo halu kamigonagabi ogoninaga iname tinaga mini mo yaraga halu kamagoni.\*

#### *Ngode Datagaliwabe ibu tigabi howa ina daba ki bulebirago ogo*

<sup>5</sup> Ngode Datagaliwabhenda tigabi hangu dabaga kagonaga walia halu waleore ogo. Ibugua Handame Ho Kagoria ho yanga lelo tigua tandaga uruninaga genda yu haramigola ogoni ti Ngode Datagaliwabhenda Handame Ho Kagoria anda polene karulape holeberami.\*

<sup>6</sup> Ngode Datagaliwabhenda tiga tiga hangu bulebira. Marume ti mo tandaga haragola ibugua nde ti mo tandaga holebira.\* <sup>7</sup> Ani buwa tibi inabi tandaga nalu kamagola ibugua tandaga mo ereba holebira. Anduane Homogo Yasuibunaga dahuliyali hongo gibiorehe karu heba dahuliya andaga howa dai birangi ani bulebira.\* <sup>8</sup> Ani bulebirago wali agali maru Ngode Datagaliwabhondo erembira mialu karubi inanaga

\* 1:1: Ab 17.1, 1 Te 1.1    \* 1:2: Lm 1.7    \* 1:3: 1 Te 1.2-3, 2 Te 2.13    \* 1:4: 2 Ko 7.4, 7.14, 1 Te 2.19, Mo 1.9  
\* 1:5: Pb 1.28    \* 1:6: Lm 12.19, Mo 18.6-7    \* 1:7: Md 25.31, 1 Te 3.13, 4.16

Anduane Homogo Yasunaga Bi Mana Debene ngaru mo tene nahaga karubi pani mule lowa ira hungu bima bima ibulebira.✧ <sup>9</sup> Ibiragola uruni ti koni haabo helo Anduane Homogo haganehayagi nahelobi ibunaga wá taraore holene ngago nahendelobi ibugua ti talebu ki howa pani tandaga nalu haabo helolebira.✧ <sup>10</sup> Ani bule Anduane Homogo ibu Horo Mbira pongo bo winigo ogoni lola harangi ibiragola wali agali ibuhondo mini mbiraore wiyarume ti turu tara howa ibu mini yaraga halu ibu daligaore hai helolebira. Tíguabi nde Anduane Homogonaga mana tigabi langirimago yu tigabu kamigo wali agali uruni heba bimaga ho holeberami.✧

*Polohanda Ngode Datagaliwabhendo bi la henego ogo*

<sup>11</sup> Ani manda buwa iname horo bibahendengi Ngode Datagaliwabhendo tínaga bi la haabo haramali. Ngode Datagaliwabhenda tí dindini howa bialu halimulo olayago holene ogoninaga tí bayale karulapeore halimulo iname ibuhondo bi la halu kama. Ibugua tigua bayale bulene bibahende bua kamigo ibunaga hongome mo bia helonagabi mini mbiraore wu howa biabe bibahende bialu kamigo bumaro bilonagabi iname bi la ho wiaabo halu kama.✧

<sup>12</sup> Biamogo bibe, lalu harimagome biamogo biragola tigua inanaga Anduane Homogo Yasu mini mo yaraga holeberami. Ibuguabi tínaga mini mo yaraga holebira. Inanaga Ngode Datagaliwabebi Anduane Homogo Yasu Kerisobi libunaga biamogo bia holleneme ani bulebira.✧

*Mo Yo Handagane ibulebira lenego ogo*

## 2

<sup>1</sup> I hamene mbaliniru-o ina Anduane Homogo Yasu Keriso dai bulenenagabi ibu heba hole mo ngoai holenenagabi ina tí heba bi lolene henge ngagoni.✧ <sup>2</sup> Anduane Homogonaga Horo Mbira pongo bo winigo áyu íbu nga lalu larago hale howa tí abale mini burugu lowa mogo nalalimu. Mbiralime Ngode Datagaliwabhenda ani bulebira lalu mbiwia hayaguabi mbiralime ibunaga mana lawai halu howa ani laya lalu layaguabi maru tigua bebani gili bialu howa ani laya lalu layaguabi hale nahalimu.✧ <sup>3</sup> Ti marume uruni layadagua tara tara lalu tí mo hondo helo holemeni. Horo Mbira pongo bo winigo ogoni abale tagira naibulebira. Wali agalime Ngode Datagaliwabe handabe manga howa erembira mulebiragobi ibunaga mana lowini ngaru Mo Yo Handagane Mbiralí ibu hapani holebiragobi ogonidagua ala tagira ibulebira. Mo Yo Handagane ogoni ibu mani heli dindi pelolene wulebira.✧ <sup>4</sup> Ani ibalu wali agalinaga bi pupu wiagane bibahende ngarubi wali agalime dama tara taranagaore mitangi buwa mo tene hagane ngarubi Mo Yo Handagane ogonime uruni waitigi howa hangedape holebira. Ibuni uruni bibahende bolangua hai howa daligaore halu Ngode Datagaliwabenaga andahabi anda puwa, I Ngode Datagaliwabe kogoni, lalu dagiani birulebira.✧

<sup>5</sup> I tí heba harungi uruni bibahende bulebiragonaga langiai harugodago tí mitangi nabi dege kamibe. <sup>6</sup> Ani kamiyagua mani tu wiragola Mo Yo Handagane Mbiralí ha pani holebira. Áyu ogoningi ha pani nahelo ibunaga hariga hangai kago ogoni nde ogo aledalo tí manda biai kami. <sup>7</sup> Bi mana lo ngaru Mo Yo Handaganeme áyu ohowa biabe bialu ka. Mbira bia pani holebira lenego nabilo hangai haga kago ibu haru poragola bia pani holebira.✧ <sup>8</sup> Bi mana lo ngaru Mo Yo Handagane Mbiralí ogoni ha pani kagola Anduane Homogo Yasu ibalu ibunaga ne harigaha howa bu he latagi haragome ogoni homelo bolebira. Ani bialu Anduane Homogo ibuniha wá taraore holene kagome

✧ **1:8:** Iba 79.6, Ais 66.15, Yar 10.25, Lm 2.8, 1 Pi 4.17 ✧ **1:9:** Ais 2.10, 2.19-21, Pb 3.19, 2 Pi 3.7 ✧ **1:10:** Iba 68.35, 89.7, Kl 3.4, 1 Te 3.13 ✧ **1:11:** Kl 1.9, 1 Te 1.2-3 ✧ **1:12:** Ais 24.15, Mal 1.11, 1 Pi 1.7, 4.14 ✧ **2:1:** Md 24.31, 1 Te 4.13-17 ✧ **2:2:** Md 24.4, Eb 5.6, 1 Yo 4.1 ✧ **2:3:** Yo 17.12, 1 Ti 4.1, 1 Yo 2.18, 4.3, Mo 13.11-14 ✧ **2:4:** Dan 7.25, 11.36, Ese 28.2, 1 Ko 8.5, Mo 13.6 ✧ **2:7:** 1 Yo 2.18, 4.3

ogoni bo wahai holebira. ✧ <sup>9</sup> Bi mana lo ngaru Mo Yo Handagane Mbiralime dama Heyolabenaga hongo yalu ibuwa agalime nabigane alebi nahendene alebi tara tara ke halu bule ibulebira. ✧ <sup>10</sup> Ani bialu ibugua ko tara tara bibahende ngarume wali agali koha polebiraru mo hondo halu hariga koha pelolebira. Ti koha polebirago irane pele mulene yu helo tigua henene lolene ngagohondo turu howa gubalini nahaga kago yu tiga nabi ka. ✧

<sup>11</sup> Ogoni birago hondowa Ngode Datagaliwabehanda tigua ke holenenaga mana yu tiga bilo ko hangu bulene hongohe tiha howa biabe bilo ibilayagoni. ✧ <sup>12</sup> Ani biragola wali agali henene lolene yu tiga nabi mana ko ngaru dege turu howa biaga karuni bibahende Ngode Datagaliwabehanda godi lalu pani mulebira. ✧

### *Ngode Datagaliwabehanda dabenego ogo*

<sup>13</sup> Hamene mbaliniru-o Anduane Homogohanda tí gubalini haga kagonaga iname horo bibahendengi Ngode Datagaliwabehondo kai loleneore nga. Ngode Datagaliwabe Dininiibunaga hongome tí loma bia ho helolebi tigua henene lolene yu tiga bu halimulobi Ngode Datagaliwabehanda tí piganeore pele ngule dabo helene. ✧ <sup>14</sup> Ogoninaga iname Bi Mana Debene tíhondo lawai harimagoha howa Ngode Datagaliwabehanda tí olene. Ibugua Anduane Homogo Yasu Kerisonaga baya taraore holene tíbi yu halimulo ngule olene. <sup>15</sup> Anigo ina hamene mbaliniru-o mana henene ngaru iname tí heba harimangi howa lawai harimagobi beba mbirani bi gilibu ibilalu howa lawai harimagobi ogoni hongo howa yani halimu. ✧ <sup>16-17</sup> Ina Aba Ngode Datagaliwabe ibugua ina gubalini halu biamogo bulene nawi howa biamogo bialu inahondo ela ho haabo holenebi mini dunu biaho holenebi ngiya. Iubi inanaga Anduane Homogo Yasu Keriso ibunibi tigua bayale bulene ngaru biai halimulo bayale lolene ngago lai halimulobi libugua tínaga bu miniha elahe holene me tolai howa tí mo hongo helo hamelo kama. ✧

## 3

### *Ngode Datagaliwabehanda ina biamogo bilo bi la halimu lenego ogo*

<sup>1</sup> Ina hamene mbaliniru-o Anduane Homogonaga bi mana tíha yulame hayadagua wali agali dindi tara tarani karume abale yu tiga bima pelonagabi tigua bi ogoni mo yaraga helonagabi tigua inanaga Ngode Datagaliwabehondo bi la halu halimu. ✧ <sup>2</sup> Bi mende ogonagabi lalimu. Wali agali bibahendeme bi galone ogoni yu tiga biaga hangu ndo manda buwa iname mini kowi karubi ko biaga karubi heba kamagola Ngode Datagaliwabehanda ina pele ngilo tigua ibuhondo bi la halu halimu. ✧

<sup>3</sup> Ani beramigola Anduane Homogo ibu mini bilinahe kago ibugua tí mo hongo halu ko biaga dama Heyolabeme tí ela nahelo mamage howa hondo holebira. ✧ <sup>4</sup> Ani buwa Anduane Homogo ibugua ina miniha mo mitangi bia hayagola tí mini mo wia haga kama. Ani biragola iname bia laramago áyu beramigo mani dege holeberemiore lo mitangi bidama. ✧

<sup>5</sup> Anduane Homogohanda tínaga bu mini Ngode Datagaliwabehanda gubalini holenehayagibi Kerisonaga ema nabi howa hibu laabo halu holenehayagibi manda biai halimulo haru pelo hame ledama.

### *Ina bibahendeme biabe bulene ngago ogo*

<sup>6</sup> Ina hamene mbaliniru-o iname Anduane Homogo Yasu Kerisonaga minini howa tíhondo ogodagua bilimu lalu langialu howa ina hamene mbalini maru biabe bulene

✧ **2:8:** Yob 4.9, Ais 11.4, Dan 7.10, Hi 10.27, Mo 19.15 ✧ **2:9:** Md 24.24, Yo 8.41, Eb 2.2, Mo 13.11-13, 18.23, 19.20  
 ✧ **2:10:** 2 Ko 2.15, 4.3 ✧ **2:11:** Md 24.5, 24.11, Lm 1.24, 1 Ti 4.1, 2 Ti 4.4 ✧ **2:12:** Lm 1.32 ✧ **2:13:** Lg 1.75, Yo 15.16, Eb 1.4, 1 Te 4.7, 5.9, 2 Te 1.3 ✧ **2:15:** 1 Ko 11.2, 16.13, Pb 4.1, 2 Te 3.6 ✧ **2:16-17:** 1 Ko 1.8, 1 Te 3.13, 1 Pi 5.10  
 ✧ **3:1:** Eb 6.19, Kl 4.3, 1 Te 5.25 ✧ **3:2:** Ab 28.24, Lm 10.16, 15.31 ✧ **3:3:** Yo 17.15, 1 Ko 1.9, 1 Te 5.24, 2 Pi 2.9  
 ✧ **3:4:** 2 Ko 7.16, Ga 5.10, 1 Te 4.10

manga hagabi iname ogodagua bulene nga laramagola nabiagabi karu heba tí mandagi nahalimu.✠ <sup>7</sup> Iname birimadagua tíguabi ogonidagua dege bule lowa bayuwaore manda biai ho kamigoni. Ina tí heba harimangi biabe bulenenaga manga nahe bialu harimago handarimi.✠ <sup>8</sup> Ani bialu hemagola tígua ina biamogo bialu tomo ngirimigoni iname bame nane yolo bialu dege narima. Bame nane inane gime biabe erekuibi pinditigi kaubibi bialu narima. Horombe mbiragabi tí mbiraligo genda yu nahelonaga inane biabe biaabo halu harima.✠ <sup>9</sup> Biamogo bilimu nalabehe howa ndo lolene wiagola dege inaneme birimago manane tígua bilimulonaga ogonidagua walia halu birima.✠

<sup>10</sup> Mbiralime biabe bulene hame nalaga kayagua ogoni ibu tomo nolene nawi lalu ina tí heba harimangi langialu harimagoni.✠

<sup>11</sup> Iname bi ogoni larimagoni irane wali agali maru tí heba kamirume biabe bulene manga haga howa tigua wali agali marunaga bulene ngaru hangu handama ibaga buwa te lalu ka layagola hale howa larama.✠

<sup>12</sup> Anduane Homogo Yasu Keriso ibunaga minini howa iname wali agali odaruni bame ibaga nabi howa tininaga biabe bayuwaore bialu mbirale tinime biabe biragome howa yu helonaga bi lo weramagoni.✠

<sup>13</sup> Anigo hamene mbaliniru-o tígua bayale bulenenaga erekui halu manga nahalimu.✠ <sup>14</sup> Tí kamigoria mbiralime bi galone beba ogoriani gilibu ibilaramago hale nahayagua ibu ogobi ka manda buwa ibuni taga helo tígua ibu heba mandagi nahalimu.✠ <sup>15</sup> Wali agali ogoni ibu inanaga waitigi ka manda nabi howa ina hameigini ka manda buwa ibu mini wilonaga bi lamialu mo tiga bigi bialu halimu.✠

### *Bi lamaro binigo ogo*

<sup>16</sup> Anduane Homogo ibuni dege inanaga mo palia hagane tene kagome horo bibahendengibi mbirale ta nabi tara tara lola haramingibi tí mo palia helo hamelo kama. Anduane Homogo ibu tí bibahendeha helo hamelo kama.✠

<sup>17</sup> Inaga beba bibahendeni inorenaga gi mugubeme gili biruligodagua beba ogorian-ibi inaga mini Polo ininaga gioreme gili bialu tí mitangibu ko laro.✠

<sup>18</sup> Ina Anduane Homogo Yasu Kerisonaga biamogo bia holene tí bibahendeha haabo helo hamelo ko laro.

✠ **3:6:** Md 18.17, Lm 16.17, 1 Ko 5.11-13, 1 Ti 6.5, 2 Yo 10 ✠ **3:7:** 1 Ko 4.16, Pb 3.17, 1 Te 1.6 ✠ **3:8:** 2 Ko 11.9, 1 Te 2.9 ✠ **3:9:** 1 Ko 9.4-6, 1 Te 1.6 ✠ **3:10:** 1 Te 4.11 ✠ **3:11:** 1 Ti 5.13, 1 Pi 4.15 ✠ **3:12:** 1 Te 4.11 ✠ **3:13:** Ga 6.9 ✠ **3:14:** 1 Ko 5.9-11 ✠ **3:15:** 1 Te 5.14, Ta 3.10 ✠ **3:16:** 1 Te 5.23 ✠ **3:17:** 1 Ko 16.21

## 1 Timodi

### Polohanda Timodihondo beba mbira ogo gilibu wia hene Mbuga ogoha gilibu ngarunaga nemandi ogo

Timodi aija ibu Keriso hamewane howa Yu wali berene. Ibu aba Girigi agali hene. Timodi ibu Keriso hameigini bayaleore hearia hondowa Polohanda Bi Mana Debene lo yogo lama pole ibu Timodihondo, Biamogo bule mba, lene. Puwa mani Polohanda Timodihondo lalu, Keriso hameigini Ebesani karu biamogo bialu ti heba habe, lene.

Polohanda Timodihondo beba mbira ogo gili bu wia henedagoni galone dunini tebiranaga gilibu wia hene.

**Mbira**

Ngode Datagaliwabe mana henene ngadagua ndo lawai haga karume Keriso hameigini mo hondo holigo de hondo habe, lalu lenego.

**Mende**

Keriso hameigini tigua agua bialu holene nga lalubi agua bialu Ngode Datagaliwabe mini yaraga holene nga lalubi wali agali haru hagame ogodagua bulene nga lalubi lamini.

**Tebone**

Polohanda Timodihondo lalu, Timodi í Keriso Yasunaga biabe bia hagane agali bayale hole ogobi holene nga, lalubi, Keriso hameigini dindi tara tarani karu ti ina hondo habelo hondo haganaga biabe ngiyago bayuwaore hondo howa bialu habe, lalu lamaro bini.

#### **Bulu бага бува кuni gili bu ngago**

*1.1-2*

Polohanda bi ala lenego *1.3-3.16*

Keriso hameiginimebi tinaga haru hagamebi ogobi bialu holene nga lenego *4.1-6.21* Timodihondo, Agua bibe agua habe, lalu laminigo

<sup>1</sup> I Polo Keriso Yasunaga abosolo kogoni. Inanaga Pele Ngiaga Ngode Datagaliwabehandabi Keriso Yasu ina mini dunubia ho hagane tene kago ibuguabi í abosolo helayagome kogoni.\*

<sup>2</sup> Timodi-o í mini mbiraore henene wu kegome í igini ale kegoni. Aba Ngode Datagaliwabebi inanaga Anduane Homogo Keriso Yasubi libunaga biamogo bia holenebi dara holenebi mo palia holenebi íhondo ngilo hamelo ko.\*

*Ngode Datagaliwabe mana henene ngadagua ndo mbira lawai halu kago de hondo habe lenego ogo*

<sup>3</sup> Masedonia pole pialu howa ina í Ebesani hondo habe larudagua hondo habelo hame ledi. Ebesali marume Ngode Datagaliwabe mana henene ngadagua ndo mbira lawai halu kago ina tihondo, Ogonidagua lawai nahalimu, lalu lamulene nga.\* <sup>4</sup> Tigua mamali te lalubi mamali mini dewa lo bila halubi tigua ogonidagua lalu kago bi ogoni aleme tini mo ko hagane nga. Bi ogoni ale laragome wali agalime Ngode Datagaliwabehondo mini mbiraore wilo biamogo nabiaga.\* <sup>5</sup> Bi larogo irane ogonaga laro. Bu mini gahenge holenebi miniha ko mbira do nahe holenebi Ngode Datagaliwabehondo mini mbiraore henemane wulenebi yu tigabu haramagome mana uruniha howa gubalini holeneore walia hatagi holebira.\* <sup>6</sup> Wali agali marume mana bayale ogoni wahalu bi galone nawini bi anda halu lulu yu ibaga bu ka. <sup>7</sup> Tigua Ngode Datagaliwabe mana lowinigo lawai haga hoa howa mine halu ogo ale larama lowa tene bayuwa manda nabi howa lawai haga ka.\*

\* **1:1:** Kl 1.27   \* **1:2:** Ab 16.1, Ta 1.4   \* **1:3:** Ga 1.6, Pb 2.24   \* **1:4:** 1 Ti 4.7, 2 Ti 2.14-16, Ta 1.14   \* **1:5:** Lm 13.8-10, Ga 5.14, 2 Ti 2.22   \* **1:7:** 1 Ti 6.4, 6.20, Ta 1.10



<sup>8</sup> Mana lowini ngago bulene ngadagua birimayagua bayale ogoni.✠ <sup>9</sup> Mana bulene nabuleneru wabu wiagago wali agali bayale biaga karunaga ndo wabu wiaga. Wali agali mana puguagabi ko biagabi Ngode Datagaliwabe mitangi nabiagabi mini kowibi Ngode Datagaliwabe mana hame nalagabi dindi mana dege mitangi biagabi aba aiyala homelo bo wahagabi wali agali maru homelo bo wahagabi✠ <sup>10</sup> wali agali kayu biagabi mana ko ngubi taraore biagabi yolo yalu damu ibilo lowa wali agali waneiginibi minu yalu piagabi ke hagabi ke howa henene laro lagabi mana henene ngago hame nale howa ko bulene ngago bia dege biagabi mana uruni ale biaga karunaga bulene nabuleneru wabu nga.✠

<sup>11</sup> Mana henene larugoni bi mana debeneha ngago Ngode Datagaliwabe ibunaga turu holenebi wá taraore holenebi Bi Mana Debene ogoni ina lawai holiya ngiya.✠

*Ngode Datagaliwabehanda i dara hayago mitangi bialu kai lalu ko, lenego ogo*

<sup>12</sup> Inanaga Anduane Homogo Keriso ibugua i mini bilinahe ka manda bialu ibunaga biabe bia holiya ihondo hongo ngiya. Ibugua ani biyago ina ibuhondo turu howa kai lalu ko.✠

<sup>13</sup> Ala ina ibu mini mege bialubi mo tandaga halubi bi ko marubi lalu harugoni. Ina Keriso Yasuhondo mini mbiraore nawi howa ko bero manda nabi bialu hewago hondowa Ngode Datagaliwabehanda i dara howa biamogo biya.✠

<sup>14</sup> Ani bialu Anduane Homogohanda biamogo bia holene timbuni gibiore ngialu mini mbiraore wulenebi gubalini holenebi ina Keriso Yasuha ho gimbu bu kamagonaga ngago ihondo ngiya.✠

<sup>15</sup> Iname bi henene hale halu yu tiga bulumaya ngago ogo. Wali agali bibahende mini kowi kamaru pele ngule Keriso Yasu dindini dalu hene. Ko biaga maru karubi ndo i ko timbuniore biaga harugo kogoni.✠

<sup>16</sup> Ani bialu hewagola wali agalime i handalu maha Keriso Yasuhondo mini mbiraore wialu haabobo holene yu holebiraru tihondo Keriso Yasuhanda ibunaga keba ala awane naholene iha howa walia haya. Ani walia holiya Ngode Datagaliwabehanda i dara howa biamogo timbuni biya.

<sup>17</sup> Handame Haga Kini haluhe nahomagabi iname de nahandabehebi ibuni dege Ngode Datagaliwabe ka lowa ibuhondo kai lolenebi ibu mini mo yaraga holenebi wiaabo halu holene nga. Aniore bilo laro.✠

<sup>18-19</sup> I igini Timodi-o ala i mitangi bu howa iname mbiwia halu bi lo wirimaru ngago manda buwa ina bibelonaga laro. Mini mbiraore wiaabo halu howa miniha ko do nahe Ngode Datagaliwabehanda wai bayuwa hongo howa bialu habe laro. Agali marume tinaga miniha ko biyago mitangi bialu bayale lamiyago hale halu bia nabi hayagome Ngode Datagaliwabehondo mini mbiraore wu hayaru wahai haya.✠✠

<sup>20</sup> Ani bialu hayaru aria agali kira Haimeniasa Alegandala kagoni. Libugua maha Ngode Datagaliwabe mege nabilonaga ina agali ogoni labo dama Heyolabenaga giha ya helaru.✠

## 2

*Ngode Datagaliwabehondo bi lolene mana lenego ogo*

<sup>1-2</sup> Ina mbira bibelo hame ledogo ala langero. Iname wali agali bibahende karubi kini karubi gabumane bibahende karubi mitangi bialu Ngode Datagaliwabehondo bi lolene nga. Iname Ngode Datagaliwabehondo mitangi bulene ngadagua mitangi bialu

✠ **1:8:** Lm 7.12, 7.16, 7.22 ✠ **1:9:** Ga 3.19, 5.23 ✠ **1:10:** Pig 19.4-5, 1 Ti 6.3, 2 Ti 4.3, Ta 1.9 ✠ **1:11:** Ga 2.7, Kl 1.25, 1 Te 2.4, 1 Ti 6.15 ✠ **1:12:** Ab 9.15, Ga 1.15-16 ✠ **1:13:** Ab 3.17, 8.3, 9.4-5, 1 Ko 15.9-10, Ga 1.13 ✠ **1:14:** Lg 7.47, Lm 5.20, 1 Ko 15.10, 2 Ti 1.13 ✠ **1:15:** Lg 15.2, 19.10, Lm 5.8, 1 Ti 3.1, 4.9, 2 Ti 2.11, 1 Yo 3.5 ✠ **1:17:** Dan 7.14, Yo 1.18, Lm 16.27, Hi 11.27, 1 Yo 4.12 ✠ **1:18-19:** 1 Ti 6.12, Yu 3 ✠ **1:18-19:** 1 Ti 3.9, 6.9 ✠ **1:20:** 1 Ko 5.5

mana tigabi bialu howa karulape holenebi mo palia holenebi yu holomaya Ngode Datagaliwabehondo, Biamogo bia, lolenebi, Ngi, lolenebi, Kai, lolenebi nga. <sup>3</sup> Bi bayale lolene ogonibime inanaga Pele Ngiaga Ngode Datagaliwabe mo turu haga. <sup>4</sup> Ibugua wali agali bibahende pele mulene yu helobi mana henene ngago manda bu helobi hamelo ka. <sup>5</sup> Ngode Datagaliwabe mbiraore hangu ka. Agali mbiraore Keriso Yasu kago ibu degeme dombegua howa Ngode Datagaliwabe wali agalibi mo mbiraore haga ka. <sup>6</sup> Keriso Yasuhanda wali agali bibahende haru dai biai hole horo pongo bo winigongiore ibugua ibuninaga holene pelene. Ogoningi Ngode Datagaliwabehanda wali agali bibahendeore pele mule hame lowa walia hoa ho winigobiore walia hene. <sup>7</sup> Irane ogoninaga Ngode Datagaliwabehanda i abosolo biabe buliya dabo helaya. Yuali ndo wali agali tara tara karuhondo henene lolene manabi Ngode Datagaliwabehondo mini mbiraore wulene manabi lawai haga holiya Ngode Datagaliwabehanda i dabo heleayago ko. Bi o larogo tindule ndo heneneore larogoni.

<sup>8</sup> Keriso hameigini dindi bibahendeni karume Ngode Datagaliwabehondo bi laabo helo hamelo ko. Agali urunime tini Ngode Datagaliwabehondo loma bia hene howa keba holenebi lai lolenebi mbira miniha do nahe howa Ngode Datagaliwabehondo bi lalu holene nga.

### *Walime mana bulene nga lenego ogo*

<sup>9</sup> Ai bi mende ogo laro. Walime mine nahe howa agabi mbirale dongoneni karuledaru bayuwa karulolene nga. Mandari yáribi tingini yáribi mbirale ngolome wabini ngarubi pealobi aga yolo timbunime minirubi bulene nawi. <sup>10</sup> Wali Ngode Datagaliwabenaga bi mana yu tiga biaga bedarume biabe bayale bulene nga. <sup>11</sup> Walime mine nahe biruwa bi nale Ngode Datagaliwabe bi mana hale halu yu tiga bulene nga. <sup>12-13</sup> Ina bi mbira larogo ogo. Ngode Datagaliwabehanda ala Adama wabuwa mani Iba wabini. Walime agali lawai helobi haru helobi helolene nawi. Walime bi naleore birulene nga. <sup>14</sup> Dama Heyolabeme Adama mo hondo nahe Iba ala mo hondo hayagola Ngode Datagaliwabe mana lowinigo wali biago ibugua puguai hene. <sup>15</sup> Ani binigo manda buwa walime waneigini taba hanalu biruwa Ngode Datagaliwabehondo mini mbiraore wu biruwabi gubalini ho biruwabi mini tigabi wu biruwabi mine nahe bialu birayagua Ngode Datagaliwabehanda ibu pele mulebira.

### *Keriso hameigini ogobime haru holene nga lenego ogo*

## 3

<sup>1</sup> Bi henene lo ngago ogo. Agali mbirame Keriso hameigini haru hoa ho kayagua ibu biabe bayale hamelo kagoni. <sup>2</sup> Agali Keriso hameigini haru haga hole manda biyagua ibu mini tigabi holene nga. Ibu one mbira hangu bereme holene nga. Ibugua mbirale bibahende ngaru minila haru howa biagabi ibuni mini haru howa mana tigabi biagabi wali agali ta nabi ibu andaga ibilo nenege hinagabi lawai holene mugubeyimebi holene nga. <sup>3</sup> Lulu yule waini iba timbuni nagimbu biagamebi gungu bule abale porabu para hagamebi holene nawi. Wali agali bayuwa mitangi biagamebi mo palia hagamebi muni dimagoli nahagamebi holene nga. <sup>4</sup> Ibu one waneigini bayuwa haru hagamebi ibugua bi laragola ibu waneiginime hale hagamebi holene nga. <sup>5</sup> Agali ogonime ibu one waneigini bayuwa haru nahagayagua nde Keriso hameigini karu haru habe nahe holebira. <sup>6</sup> Ibu Keriso hameigini ayure heneme holene nawi. Ibu mine halu karia Ngode

✧ **2:1-2:** Yar 29.7, Ese 6.10, Lm 13.1, Eb 6.18, Pb 4.6 ✧ **2:4:** Ese 18.23, Yo 3.16-17, 17.3, 1 Ti 4.10, 2 Ti 2.25, 2 Pi 3.9  
 ✧ **2:5:** Lm 3.29-30, Ga 3.20, Hi 8.6, 9.15, 12.24 ✧ **2:6:** Md 20.28, 1 Ko 1.6, Ga 1.4, Eb 1.7-9, 2 Te 1.10, Ta 1.3 ✧ **2:7:** Ab 9.15, Ga 1.16, 2.7-8, Eb 3.7-8, 2 Ti 1.11 ✧ **2:8:** Ais 1.15, Mal 1.11, Yo 4.21 ✧ **2:9:** 1 Pi 3.3-5 ✧ **2:10:** 1 Ti 5.10  
 ✧ **2:12-13:** 1 Ko 14.34 ✧ **2:12-13:** Pig 2.7, 2.21-22, 1 Ko 11.8-9 ✧ **2:14:** Pig 3.1-6, 2 Ko 11.3 ✧ **3:1:** Ab 20.28, Eb 4.12, Pb 1.1, 1 Ti 1.15 ✧ **3:2:** 1 Ti 5.9, 2 Ti 2.24 ✧ **3:2:** Ta 1.6-9

Datagaliwabehanda dama Heyolabe bo batagi ho helayadagua agali ogonibi ani buligo handalu habe. <sup>7</sup> Keriso hameigini ndo karume agali ogoni mini tigabi ka lene holene nga. Irane ibu Ngode Datagaliwabe mege bialu karia dama Heyolabeme gono ngagoha doligo.✧

*Biamogo biaga agali ogo bi holene nga lenego ogo*

<sup>8</sup> Biamogo biaga agaliruni ti mini bayalewi bi kira nalagamebi holene nga. Waini iba nagimbu nabiagabi ohowa muni dibaudu nahagabi <sup>9</sup> miniha ko do nahe howa Ngode Datagaliwabehanda bi henene walia hene ngago yu tiga biaabo hagame holene nga. <sup>10</sup> Ti agi birabe hondole ala ba handalu keria karulape ka manda biriyagua ti biamogo biaga agali helo helolene nga. <sup>11</sup> Wali ti onemebi nde miniha ko mbira do nahebi diburibu nalagabi mbirale bibahende minila haru howa biagabi mana bibahende tigabi hangu bialu birulene nga.✧ <sup>12</sup> Biamogo biaga agali ogoni ibu one mbiraore hangu bereme holene nga. Ani bialu ibu one waneiginibi bayuwa haru holene nga. <sup>13</sup> Biamogo biaga agali urunime biabe bayale birago wali agalime hondowa lalu, Agali uruni ti mini tigabiwi ka, lolebira. Ani laragola tigua Keriso Yasuha ho gimbu bu howa ibuhondo mini mbiraore wulene mana hongo howa lamulebira.

*Ngode Datagaliwabe bi mana nga lenego tene ogo*

<sup>14</sup> Ina beba ogoni gili bialu howa í kegoria abale ibulene mitangi bu ko. <sup>15</sup> Anigo emene ha dai bu haruyagua beba o gilibu wia harogoni daga lowa ina Ngode Datagaliwabenaga wali agali haru holene mana bayuwa manda bulebere. Ngode Datagaliwabenaga wali agali larogo ti Ngode Datagaliwabe holenehe kagome olo helayaru kagoni. Tigua Ngode Datagaliwabe mana heneneme anda gene dunini ale howa tini tiaga kagola kagoni.✧ <sup>16</sup> Mana tene ala mo pani nahe ngelenego galone dunini timbuniore ngago mbiralime galone ndo nalabeheore.

Ibu agali henene hole dindini dalini.

Ngode Datagaliwabe Dinini ibugua Yasu tigabiore ka lalu walia hene.

Dahuliyalirume ibu de hendene.

Ibunaga bi mana wali agali dindi tara tarani hearu bibahendehondo loyogo lene.

Wali agali dindi tara tarani hearume ibuhondo mini mbiraore wini.

Ngode Datagaliwabehanda ibu dahuliya andaga haru dai bini.✧

## 4

*Agalime mana henene ngadagua ndo lawai haga ka, lenego ogo*

<sup>1</sup> Ngode Datagaliwabe Dinini ibugua mo wála howa lalu, Maniore haragola wali agali marume Ngode Datagaliwabe mana wahalu polebira. Ti wahalu puwa mo hondo hagane mana hale howa damanaga mana lawai harago yu tiga bulebira.✧ <sup>2</sup> Mana ogoni mo hondo haga agalime ke howa lawai hagago irame dene motudu ngagoria amburi biagadagua tinaga miniha ko do ho haabo kagome tinaga mini amburibi ka.

<sup>3</sup> Agali urunibime lawai halu howa agalime wali dabu bulene nawi lalubi tomo maru nolene nawi lalubi lawai haga ka. Ngode Datagaliwabehanda tomo bibahende wali agalime nelo wabini. Ani binidago manda buwa Ngode Datagaliwabehondo mini mbiraore wu karume Ngode Datagaliwabehondo turu halu kaj lowa nolene nga.✧

<sup>4</sup> Ngode Datagaliwabehanda mbirale bibahende wabiniru bayale dege wabinigo uruni aria mbira waholene nawi. Iname Ngode Datagaliwabehondo turu halu kaj lowa mo nolene nga.✧ <sup>5</sup> Irane Ngode Datagaliwabehanda bi lowinigomebi iname ibuhondo bi laramagomebi Ngode Datagaliwabehanda, Ogoni bayaleda, lolebira.

✧ 3:7: Ab 22.12, 1 Ko 5.12, 2 Ko 8.21, 1 Te 4.12, 1 Ti 6.9 ✧ 3:11: Ta 2.3 ✧ 3:15: Eb 2.19-22, 2 Ti 2.20 ✧ 3:16: Mg 16.19, Yo 1.14, 16.8-9, 1 Pi 1.12, 3.18 ✧ 4:1: 2 Ti 3.1, 1 Pi 1.20, 2 Pi 2.1, 3.3, 1 Yo 2.18, Yu 18, Mo 9.20, 16.14 ✧ 4:3: Pig 9.3, Lm 14.6, 1 Ko 8.8, 10.30-31, Kl 2.20-21, Hi 13.4 ✧ 4:4: Pig 1.31, Ab 10.15, Lm 14.14, 14.20, 1 Ko 10.25, Ta 1.15

*Keriso Yasunaga biabe bia haga bayale ogobi holene nga lenego ogo*

<sup>6</sup> Ína bi uruni Keriso hameiginihondo lamialu hariyagua nde Keriso Yasunaga biabe bia haga bayale holebere. Ngode Datagaliwabe mana lo ngagobi mana henene lawai harugo yu tiga bu kego mini mo hongo holene tomo ogoni íni nalu haridane hondolebere. <sup>7</sup> Wali agali marume bi galone nawini bi anda howa lalu karu kagoria nahe í wandialu habagi ho habe. Ngode Datagaliwabenaga bi mana galone ngago hangu lo manda biaabo halu habe.✧ <sup>8</sup> Tingini hongo helonaga bia manda biriyagua o emene karulape. Áyu kamagonagabi awe holeberamagonagabi mini ibu hongo halu bayale helo Ngode Datagaliwabenaga bi mana lo manda biaabo harimayagua o karulapeore ogoni.✧ <sup>9</sup> Bi henene ogo hale haiore howa yu tiga bulumayanaga lo nga.✧ <sup>10</sup> Ngode Datagaliwabe ibugua wali agali bibahendeore Pele Miaga ka. Ibugua ani bialu kago iname nde ibuhondo mini mbiraore wu kamagonaga Pele Ngiagaore ka. Irane ogoninaga iname ibuhondo mini dunu bia ho howa biabe timbuni erekuibibi biaabo halu kamagoni.✧

<sup>11</sup> Ína wali agalihondo mana uruni, Bulene nga, lalu hongo howa lamialu habe. <sup>12</sup> Wali agalime í hondowa, í igiri emene ke, nalelo ína bi laregobi mana beregobi gubalini holenebi mini mbiraore wu kegobi mini gahengehe holenebi Keriso hameigini karume í de handalu tibi í kegobi helo habe.✧ <sup>13</sup> Í ibuliya ketambu Anduane Homogonaga mbugani bi lo ngago wali agali hale helo daga lowa mana ogoni lawai halu lamigi bialu habe. <sup>14</sup> Ngode Datagaliwabe mana latagi haga hearume mbiwia hayangibi agali ala hene miniwi hearume ínaga hagianeni gi wiyangibi Ngode Datagaliwabe Dinini ibugua íhondo mugube ngiyago yu kego ha do wa nahabe.✧ <sup>15</sup> Wali agali bibahendeme mana bayale íha anda harago hendelo ína mana uruni bu manda bialu hole íni hongoheore howa bialu habe.✧ <sup>16</sup> Ínibi ína mana lawai haregobi bayuwa de hondo habe. Ani bialu hariyagua íbi ína wali agali mana lamerego hale hararumebi pele mulene yu holeberami.✧

## 5

*Keriso hameiginihondo ogodagua holene nga lenego ogo*

<sup>1</sup> Agali wahe karuhondo talialu nalabe. Í abahondo larilidagua dege lalu lo tiga bibe. Agali daliahe karuhondo í hamenehondo larilidagua dege labe.✧ <sup>2</sup> Wali wahe bedaruhondo í aiyahondo birilidagua dege bibe. Wandari daliahe bedaruhondobi nde í mbalinihondo mitangi tigabi birilidagua dege bialu habe.

<sup>3</sup> Wali dalo bedaru biamogo biaga mbirali nahe ibu hangu bereagua biamogo bulene nga. <sup>4</sup> Wali dalo mendego ibunaga waneiginibi aguanebi kayagua tigua Ngode Datagaliwabe mana mitangi bialu wali dalo ogoni biamogo bulene nga. Irane ibugua ti ala emeneni biamogo biyago mitangi bialu biamogo bulene nga. Mana ogonidagua bialu karume Ngode Datagaliwabe mo turu haga ka.✧

<sup>5</sup> Anigo wali dalo ibuni hanguore bedagome ibu Ngode Datagaliwabhondo mini dunubia ho biruwa horombe mbiragabi ibuhondo bi lalu, Ína í biamogo bia, laabo halu biraga.✧ <sup>6</sup> Wali dalo tebonego ibu ibuninaga tinginini bulenego hangu hame lalu mo tene haga bereagua ibunaga mini dininila kiroba homene beda. <sup>7</sup> Wali agali marume wali dalo bedaru mana ko birago hondowa mege buligo ína wali dalo biarubi ibu damenebi tihondo bi ogodagua lamibe. <sup>8</sup> Mbiralime ibu damenebi hameiginibi de

✧ **4:7:** 1 Ti 1.4, 6.20, 2 Ti 2.16, 2.23, Hi 5.14 ✧ **4:8:** Iba 37.4, Md 6.33, Lm 8.28, Kl 2.23, 1 Ti 6.6 ✧ **4:9:** 1 Ti 1.15  
 ✧ **4:10:** Iba 36.6, 1 Ko 4.11-12, 1 Ti 2.3-4 ✧ **4:12:** 1 Ko 16.11, Ta 2.7, 2.15, 1 Pi 5.3 ✧ **4:14:** Ab 6.6, 8.17, 13.3, 19.6,  
 1 Ti 1.18, 2 Ti 1.6 ✧ **4:15:** 1 Ti 5.22 ✧ **4:16:** Ab 20.28, Lm 11.14, 1 Ko 9.22, Ya 5.20 ✧ **5:1:** LBM 19.32 ✧ **5:4:**  
 Md 15.4, Eb 6.1-2, 1 Ti 2.3 ✧ **5:5:** Lg 2.37, 18.1, 18.7, Ab 26.7, 1 Ko 7.32

handalu biamogo nabiyagua ibu Ngode Datagaliwabe mana lo ngago pugualu Ngode Datagaliwabe mitangi nabiyagua karubi ndo ibu koorene ko ka.\*

<sup>9</sup> Wali dalorunaga mini bebani gilibu ngegoha wali dalo maru mali pira waragara (60) nape bedaru tinaga mini gili biatago nahabe. Wali dalo ala agali mbira hangu penegobi <sup>10</sup> biamogo biaga wali abogo beda lenegobi berene. Ibu waneigini bayuwa haru hagabi wali agali tara tara ibu andaga ibilo nenege hinagabi Keriso hameigininaga wali agali genda yu karu biamogo biagabi mana bayale tara tara biagabi berene. Wali dalo mana urunibi biaga berene bedaru tinaga mini hangu gili biatago holene nga.\*

<sup>11-12</sup> Anigo wali dalo daliahe bedaru tinaga mini gili nabibe. Irane ogonaga larogo tigua agali maru polene hame lowa Kerisonaga biabe bialu biruliya lalu bi lowiyago pugualu Keriso erembira mialu polebira. <sup>13</sup> Ani bialu tigua tinaga horo pongo bo wiyago mohole bialu wali agali andaga ngaruha ge hai halu ko marubi bia tago halu bi diburibu loyu ibaga bialu wali agali mini lowa ndelalu bi nalene ngago lama ibaga bu haga.\*

<sup>14</sup> Inahondo handabe manga ho karume ina mege bulene henge nawilo ina hame ledogo ogo. Wali dalo wahe ndo daliahe bedarume agali mende puwa waneigini taba hanalu tinaga andagani biabe bayuwa bialu birulene nga laro.\* <sup>15</sup> Wali dalo marume hariga tigabi ngago wahalu dama Heyolabe talima piaga beda. <sup>16</sup> Keriso hamewane mbira bedago ibu damene maru wali dalo bedayagua Keriso hameigini karu ti genda nahelo damene tinime biamogo bulene nga. Ani bialu Keriso hameigini karume wali dalo tini hanguore bedaru biamogo bibeheore wulebira.

<sup>17</sup> Agali ala hene miniwi karume wali agali bayuwa haru howa mana lamialubi lawai halubi biabe erekuibi uruni bialu howa ti yolo karulape nolene nga.\* <sup>18</sup> Anduane Homogonaga mbugani bi lo ngago ogo, Widi gandulo winigo lini hondo ibira ibira bilo nogo bulumaga geme hangedama pelo haru howa bulumaganaga ne hangane huba bulene nawi, lalu gilibu nga. Bi mendebi lo ngago ogo. Biabe biaga kagome biabe biradagua yolo nolene nga, lalu gilibu nga.\* <sup>19</sup> Mbirame lalu, Agali ala hene miniwi abogohanda ko mbira biya, layagua ogoni hale nahabe. Kirali tebiralimebi, Henene ko biyaria de handarima, layagua o karulape mo tiga bulene nga.\* <sup>20</sup> Ani mo tiga bialu keria henene biniyagua Keriso hameigini bibahende karu deni helowa ti hale halu gi helo ina agali ko biyago hongo howa talibe.\*

<sup>21</sup> Ina Ngode Datagaliwabenaga denibi Keriso Yasunaga denibi dahuliyali loma bia henerunaga denibi howa ihondo bi hongo howa ogodagua laro. Ina bibelo bi maru o gilibu wia haroruni biai halu wali agali maru i hame nalederuhondo ko bialu i hame lederuhondo turubini bialu nabibe. Ani nabi bibahendehondo mana mbiraore hangu bialu habe.\* <sup>22</sup> Wali agali Anduane Homogonaga biabe bilo lowa loma bia helo hagianeni gi abale nawibe. Marume ko biyarunaga iha para holani i Ngode Datagaliwabenaga deni bayale hole manda buwa habe.\*

<sup>23</sup> Iba ibuni hangu nanabe. I tombeha warago baraligo manda buwa waini iba emene mbira naga bialu habe.

<sup>24</sup> Agali marume ko birago panigiore biagago wali agali bibahendeme manda biai howa lo tiga bule abale laga. Agali marume ko birago mendealime manda nabi bu donge ho kago maniore bia tagi haga. <sup>25</sup> Ogonidagua dege marume bayale birago wali agali bibahendeme manda biai haga. Bayale binigo maru manda nabini ngarubi do ho haabo habe nahe holebira.

## 6

### *Garabaya biabe ale bia haga henerunaga te ogo*

\* 5:8: Ais 58.7, Md 18.17, Ga 6.10, Ta 1.16    \* 5:10: Hi 13.2    \* 5:13: 2 Te 3.11    \* 5:14: 1 Ko 7.9    \* 5:17: 1 Ko 16.18    \* 5:18: Man 25.4, Md 10.10, Lg 10.7, 1 Ko 9.9    \* 5:19: Man 17.6, 19.15, 2 Ko 13.1    \* 5:20: Man 13.11, Ga 2.11, 2.14, Eb 5.11, Ta 1.13    \* 5:21: 1 Ti 6.13, 2 Ti 2.14, 4.1    \* 5:22: Ab 6.6, 13.3, 1 Ti 4.14, 2 Yo 11



<sup>1</sup> Agali marume Ngode Datagaliwabebi ibunaga bi mana iname lawai haramagobi mege nabilo garabaya biabe ale biahaga karume tinaga anduane mitangi bialu tigua bia laradagua bulene nga.✠ <sup>2</sup> Garabaya biabe ale bia haga karu tinaga anduane Keriso hameigini mbira heagua ogoni ibu agali dege kagoni lowa ibunaga bi larago mo waholene nawi. Tigua tinaga anduane biamogo birago ibu Keriso hameigini tini gubalini ho kago manda buwa biabe bayuwaore bulene nga.✠

*Kē hagane manabi homogo henene holenenagabi te ogo*

Mana uruni lamia lawai ha bigi bialu habe. <sup>3</sup> Mbiralime ina Anduane Homogo Yasu Kerisonaga bi henene lenego hame nale howa Yasu mana iname yu tiga bu kamagoni ngadagua ndo mana tara lawai hayagua✠ <sup>4</sup> agali ogoni ibu manda nabi howa mine halu lawai halu ka. Ibu mini nawi howa bi dewa la gimbu bialu lai lolenebi bi gungubi biaga. Ani bima pialu dimagoli mini wuwa wali agali karu talebu ki bidagobi agua biya bada lowa lahiragabi✠ <sup>5</sup> lai laabo hagabi mana urunibi hangu mo anda haga. Agali ogonibi biaga kago ibunaga mini ko howa mana henene ngaru yu wahai hene ka. Tigua manda bialu hearia Ngode Datagaliwabenaga mana lo ngagome ti mo homogo holebira manda biaga.✠

<sup>6</sup> Mbiralime Ngode Datagaliwabe mana yu tiga bu howa dimagoli nahe ibuni wini ngagoore wu hayagua homogo heneneore holebira.✠ <sup>7</sup> Ina aiyahanda ina taba hanayangi mbira agi yalu ibirimabe. Mbira nayi ibirima ndobe. Dindini howa mbira agi yalu poleberamabe.✠ <sup>8</sup> Mbira nayi poleberama. Aniyagua mbirale tinginini bulenebi tomo nolenebi karulape ngamayagua nde karulape ogoni.✠ <sup>9</sup> Anigo dindini dabudabu mo wia gimbu bule dimagoli ho karume ko mo bia holenenaga mana ngatoria pialu haga. Puwa mini nawi ale howa mo ko hole hame lolene gono ngagoha ti do wiaabo howa mo koore halu habane nabulene holebira.✠ <sup>10</sup> Muni gubalini holene ngagome ko tara tara bibahendenaga tene nga. Wali agali marume muni gubalini hayagome Ngode Datagaliwabehondo mini mbiraore ala wiyago wahaya. Ani biyagome tinaga gubaliniha nogoba howa tandaga gibi naabo halu ka.✠

*Haabobo holene hongo howa yu holene ngago ogo*

<sup>11</sup> Anigo í Ngode Datagaliwabenaga agali kegoni howa mana urunibi ngatoria wandialu habe. Ani bialu howa bulene ngaru uru. Mini tigabi holenebi Ngode Datagaliwabe mitangi bialu bulenebi Ngode Datagaliwabehondo mini mbiraore wulenebi gubalini holenebi hibu lolenebi bayale helo gedaore holenebi mana urunibi bialu habe.✠ <sup>12</sup> Wali agalime bolangua hole hongo howa gerai lagadagua ina Ngode Datagaliwabehondo mini mbiraore wirigome haabobo holene yu kegoni yu howa bolangua hole hongo howa gerai labe. Ina wali agali dewame hale helo Ngode Datagaliwabehondo mini mbiraore wu ko lalu lapani haringi Ngode Datagaliwabehanda haabobo holene ogoni yu habelo ngule í olayagoni.✠ <sup>13</sup> Bibahendenaga holene miaga Ngode Datagaliwabe kago ibu deni howabi Keriso Yasuhanda Pondiasa Pailatehondo lapani halu í Keriso kogoni lenego ibu deni howabi ina mbira bibelo ihondo hongo howa larogo ogo.✠ <sup>14</sup> Ngode Datagaliwabehanda ihondo bibe layago mbira pugua nabi latago nahebi bialu keore dege Anduane Homogo Yasu Keriso hapani holene Horo tagira ibilo ani bialu habe.✠ <sup>15</sup> Ngode Datagaliwabehanda Horo ogoni pongo bo winigo lola haragola Keriso ibu hapani holebira. Ngode Datagaliwabe ogoni ibu turu holene tene howa wali agali bibahende haru hai haga ibuni hangu ka. Dindini kini bibahende karunaga Handame

✠ **6:1:** Lm 2.24, Eb 6.5, Kl 3.22, Ta 2.5, 2.8-9, 1 Pi 2.18 ✠ **6:2:** Kl 4.1, 1 Ti 4.11, Pm 16 ✠ **6:3:** Ga 1.6-9, 2 Ti 1.13  
 ✠ **6:4:** 1 Ko 8.2, 1 Ti 1.4, 1.7, 2 Ti 2.23, Ta 3.9 ✠ **6:5:** 1 Ko 11.16, 2 Ti 3.8, 4.4, Ta 1.11, 1.14, 2 Pi 2.3 ✠ **6:6:** Iba 37.16, Min 15.16, Pb 4.11-12, 1 Ti 4.8, Hi 13.5 ✠ **6:7:** Yob 1.21, Iba 49.17, Min 27.24, Aga 5.15 ✠ **6:8:** Min 30.8, Hi 13.5 ✠ **6:9:** Min 23.4, 28.22, Md 13.22, 1 Ti 1.19, 3.7, Ya 5.1 ✠ **6:10:** Har 23.8, Man 16.19, Eb 5.5 ✠ **6:11:** 2 Ti 2.22 ✠ **6:12:** 1 Ko 9.25-26, 1 Ti 1.18, 2 Ti 4.7 ✠ **6:13:** Yo 5.21, 18.36-37, 19.11, 1 Ti 5.21, Mo 1.5 ✠ **6:14:** Pb 1.6, 1.10, 1 Te 3.13, 5.23

Haga Kinibi dindini anduane homogo bibahende karunaga Anduane Homogobi ibu dege ka.✠ 16 Ngode Datagaliwabe mbiraore hangu kago ogoni ibu nahomaga ka. Ibu wá holene teneore kago mbiralime ibu kago ha hapara habe nahe. Dindini karume Ngode Datagaliwabe de handabe nahe henego áyubi nde handabe nahe dege ka. Ibu mini mo yaraga habehebi ibu hongo haabo ka labehebi Ngode Datagaliwabe ibuninaga nga. Aniore wiaabo helo laro.✠

*Dindini dabudabu dewawi karuhondo bi lamulene nga lenego ogo*

17 Dindini dabudabu dewawi karuhondo bi uru hongo howa lamibe. Mine nahe howa dindi dabudabu ereba haga ngaruha mini dunubia nahe Ngode Datagaliwabe ha dege mini dunubia ho holene nga. Ngode Datagaliwabe ibugua mbuni nabi howa ina turu holomaya bibahende bayale ngiai haga ka.✠ 18 Dindi dabudabu dewawi biaruhondo bi hongo howa ogodagua lamibe, Biabe bayale dewa bulenebi biamogo bulenebi dabudabu ngamiru habua nabi tale bialu mulenebi mana uruninaga bulene ngadagua bialu halimu, lalu lamibe.✠ 19 Tigua ogonidagua biragome tininaga mani holene mo tiga bu wulebira. Ani buwa holene heneneore ngago yu holebira.✠

*Ina biabe berego bayuwa de hondo habe lenego ogo*

20 Timodi-o Ngode Datagaliwabe handa biabe ina bibelo ihondo ngiyago bayuwa de hondowa bialu habe. Wali agali marume bi galone nawini bi anda halu, Ina mana manda biai kama, lalu kagoria nahe í wandialu habe.✠ 21 Ti marume lalu, Ina mana manda timbuni bu kama, lowa Ngode Datagaliwabe hondo mini mbiraore wulene mo ba tara haya.

Ngode Datagaliwabenaga biamogo bia holene tí bibahende ha haabo helo hamelo ko.✠

---

✠ 6:15: Man 10.17, 1 Ti 1.11, 1.17, Mo 17.14, 19.16 ✠ 6:16: Har 33.20, Yo 6.46, Pb 4.20, Yu 25 ✠ 6:17: Iba 62.10, Mg 10.24, Lg 12.20-21, 1 Te 1.9 ✠ 6:18: Lm 12.13, Ga 6.6, Ta 3.8, Hi 13.16, Ya 2.5 ✠ 6:19: Md 6.19-20 ✠ 6:20: 1 Ti 4.6-7, 2 Ti 1.14, 2.14, Ta 1.9, Mo 3.3 ✠ 6:21: 1 Ti 1.16, 1.19, 2 Ti 2.18

## 2 Timodi

### Polohanda Timodihondo beba mende ogo gilibu wia hene Mbuga ogoha gilibu ngarunaga nemandi ogo

Polohanda Timodihondo beba mende ogo gilibu wia henedagoni Timodi ibu igiri daliahe howa bayale bialu holene mana manda bilo gilibu wia hene.

Bi haguane duniniore lenego, Ema nabi howa hibu lalu bialu holene nga, lalu lamini. Polohanda Timodihondo lalu, Tandaga nolene wiragolabi marume ihondo handabe manga haragolabi ogonidagua biragola Yasu Kerisohondo mini mbiraore wu harigoni hongo ho howa Yasu Kerisonaga Bi Mana Debene ngagobi Ngode Datagaliwabenaga Habo Nalolene Bi Bamba lowini ngagobi uruni yu dunu bia ho howa loyogo lama ibaga bialu haabo habe, lalu lamini.

Polohanda Timodihondo lalu, Wali agalime mini nawi lulu ale howa lai lalu karuni hale howa minime mo pe hararu koorene ko haga ngago ti kagoria nahe í habagi howa haluni habe, lalu bi hongo howa lawia hene.

Polohanda lamaro bialu lalu, Ina mana lawai haruligobi biabe bialu haruligobi haabo holene mo tene haruligobi mini mbiraore wu kogobi ema nabi haabo haruligobi maruhondo gubalini haruligobi ko ngagola hibu lalu haruligobi marume ihondo ko biragola tandaga naruligobi uruni bibahende í manda biai kegoni, lalu Timodi mo mitangi bia halu howa, Ina ogonidagua bialu holene nga, lalu lamini.

#### **Bulu бага бува кuni gilibu ngago**

1.1-2

Polohanda bi ala lenego 1.3-2.13

Kai lenegobi ogodagua bialu habe lenegobi 2.14-4.5

Mana ko bayalela dabolenebi mamage ho holenebi 4.6-18

Polo ibu biabe bialu henegoha ibuhondo binigo 4.19-22

Lamaro bialu lenego

<sup>1</sup> I Polo Ngode Datagaliwabe ibuninaga hame leagome Keriso Yasunaga abosolo kogoni. Iname Keriso Yasuha howa holene gahenge yu holomaya Ngode Datagaliwabehanda ala ngulebero lowinigo holene ogoni ibugua, Ina lamule pu, laya.\*

<sup>2</sup> Timodi i iginiore-o beba ogo ihondo gilibu wia haro. Aba Ngode Datagaliwabebi inanaga Anduane Homogo Keriso Yasubi libugua biamogo bia holenebi dara holenebi mo palia holenebi ihondo ngilo hamelo ko.\*

*Bi Mana Debene mitangi bialu taga holene nawigo ogo*

<sup>3</sup> Ina Ngode Datagaliwabehondo kai laro. Inaga mamalime miniha ko do nahe howa Ngode Datagaliwabenaga biabe bialu henedagua inabi ani bialu ko. Horombe mbiragabi ta nabi Ngode Datagaliwabehondo bi lalu howa í mitangi biaabo halu ibuhondo kai laruli.\*

<sup>4</sup> Inaga de iba ibiyago mitangi bialu turu holene iha tolai helo í lone de hondoa ho ko.

<sup>5</sup> Ina Ngode Datagaliwabehondo mini mbiraore wirigoni heneneore wu haabo kego ina manda bu kogoni. Í aguane Loisi í aija Yunisila libugua Ngode Datagaliwabehondo mini mbiraore winidagua inabi ani dege wu ke manda bu ko.\* <sup>6</sup> Irane ogonigo inaga gi inaga hagianeni wirugola Ngode Datagaliwabehanda mugube ngiyago anda helo ira hungu biagadagua mo hungu biahole mitangi bialu habe.\* <sup>7</sup> Ngode Datagaliwabehanda inahondo ibu Dinini ngiyago ibugua ina yurigihe holomaya helaga ndo ka. Ibu Dinini

\* 1:1: Eb 1.1    \* 1:2: Ab 16.1, 1 Ti 1.2    \* 1:3: Ab 22.3, 23.1, Lm 1.8-9, Pb 3.5, 1 Te 1.2, 3.10    \* 1:5: Ab 16.1, 1 Ti 1.5, 4.6    \* 1:6: 1 Te 5.19, 1 Ti 4.14

ogoni ibugua hongo holenebi gubalini holenebi mini haru holenebi inaha tolai helo ngiaga ka.✠

<sup>8</sup> Ogonigo inanaga Anduane Homogonaga mana walia hole ina taga nahe habe. I Anduane Homogonaga garabaya agali kogo mitangi bialu í taga nahe habe. Taga nahe howa Ngode Datagaliwabehanda hongo holene ngiradagua Bi Mana Debene lamulenenaga tandaga nolene ngagobi nalu habe.✠ <sup>9</sup> Ngode Datagaliwabehanda ina pele ngialu ibunaga wali agali holomaya ibugua ina olene. Ani binigo irane iname bayale birimagonaga ndo Ngode Datagaliwabe ibuninaga hame lolenemebi biamogo bia holenemebi ani bini. Bamba Ngode Datagaliwabehanda dindi wa nabi howa Keriso Yasuha howa ibunaga biamogo bia holene ogoni ngule lowini.✠ <sup>10</sup> Mani inanaga Pele Ngiaga Keriso Yasu ibuni hapani hayangi howa ibugua biamogo bia holene ogoni inahondo walia hene. Keriso ibugua homolenenaga hongo tongolo wahowa bi mana debeneha howa haabobo holene walia hene.✠

<sup>11</sup> I Bi Mana Debene lamulene abosolobi lawai hagabi holiya Ngode Datagaliwabehanda dabo helene kogoni.✠ <sup>12</sup> Anigo i tandaga nalu kogo irane ogoninaga nalu ko. Ani bidogo taga nahe mini bilinahe howa ina ibuhondo mini mbiraore wirugo wu howa Ngode Datagaliwabehanda Horo Mbira pongo bo wini ngago lola helo ibugua mbirale iha wia do hayago bayale wiaabo helo hondo holebirago yu tiga bidogoni.✠ <sup>13</sup> Ina ihondo bi mana tigatiga lawai harudagua biaabo hole hongo howa yu habe. Ani yu howa Keriso Yasuha ho gimbu bu howa mini mbiraore wulenebi gubalini holenebi inanaga ngago ogoniha howa haabo habe.✠ <sup>14</sup> Ngode Datagaliwabe Dinini inaha kago ibunaga hongome ihondo mbirale bayale ngiyaru yu habe.✠

<sup>15</sup> Pigelasa Hemoyanesila Esiali howa libu heba wali agali ogoniha hearu bibahendeme i wahalu piai hayago í manda bu kegoni. <sup>16</sup> Onesiborasa ibugua i mo turu haabo hayago ibubi ibu damenerubi ti Anduane Homogohanda dara howa biamogo bilo hamelo ko. I garabaya hewaria ibugua taga nahe howa✠ <sup>17</sup> Lomo tanoni anda ibalu ibugua i handa walia hole lowa hai biaabo haya. <sup>18</sup> Horo Mbira pongo bo wini ngago lola harangi Anduane Homogohanda ibuhondo dara howa biamogo bulene milo hamelo ko. Ebesa tanoni hewaria ibugua i biamogo biaabo hayago í manda bu kegoni.✠

## 2

### *Keriso Yasunaga ami agali mini bilinahe habe lenego ogo*

<sup>1</sup> I igini-o biamogo bia holene ina Keriso Yasuha ho gimbu bu howa kamarunaga ngago í nde ogoniha hongo ho habe. <sup>2</sup> Wali agali dewa hale ho helowa ina bi lawai haga biruruni í hale harigonigo ina bi o larugoniore agali mini bilinahe lawai haga mugube yu karuhondo lamigi bialu habe. Mani nde tigua maruhondo lamilo manda buwa lamibe.

<sup>3</sup> Anigo erekuibi mangabiru ngangì wahalu pu nabi howa hibu lalu Keriso Yasunaga ami agali mini bilinahe howa biabe bialu habe.✠ <sup>4</sup> Ani howa ami agalime biabe bialu howa tinaga haru haga kago mo turu hole hame lowa tigua biabe tara mende nabiaga.✠ <sup>5</sup> Mbiralime gerai lagago gerai langane mana lo ngadagua biai nahayagua ibu bolangua halu yolo miaganedagua namulebira.✠ <sup>6</sup> Mbiralime tomo hangagago erekui biabe biragome tomo hini ngago ibuninaga wiagane.✠ <sup>7</sup> Ina bi o laroru mitangi bibe. Ani mitangi bialu kegola Anduane Homogo ibugua ihondo mo manda bia holebira.

✠ **1:7:** Lg 24.49, Ab 1.8, Lm 8.15 ✠ **1:8:** Lm 1.16, Pb 1.7, Kl 1.24, 1 Ti 2.6 ✠ **1:9:** Lm 8.28, Eb 1.4, 2.8-9, 1 Te 4.7, Ta 3.5, Hi 3.1, 1 Pi 1.20 ✠ **1:10:** 1 Ko 15.54-57, Kl 1.26, Hi 2.14, 1 Pi 1.20 ✠ **1:11:** 1 Ti 2.7 ✠ **1:12:** Eb 3.1-2, 1 Ti 6.20, 2 Ti 4.8, 1 Pi 4.19 ✠ **1:13:** 1 Ti 1.10, 4.6, 6.3, 2 Ti 2.2, 3.14, Ta 1.9, 2.1, Hi 10.23 ✠ **1:14:** Lm 8.11, 1 Ti 6.20 ✠ **1:16:** 2 Ti 4.16, 4.19 ✠ **1:18:** Yu 21 ✠ **2:3:** 1 Ti 1.18, 2 Ti 1.8, 4.5 ✠ **2:4:** 1 Ko 9.25 ✠ **2:5:** 1 Ko 9.25-26, 2 Ti 4.8 ✠ **2:6:** 1 Ko 9.7, 9.10

<sup>8</sup> Yasu Keriso homalu lone heyu hayagobi ibu Debidi aguanene hayagobi Bi Mana Debene ogoninaga lawai haruligoni mitangi bialu habe. <sup>9</sup> Ina Bi Mana Debene ogoni lamialu haruligonaga agali marume i mo tandaga halu ka. Agali ko biaga karu garabaya dariba hagdagua tigua i dariba ho ka. Anigo Ngode Datagaliwabenaga bi mana dege dariba nahene. <sup>10</sup> Irane ogonigo wali agali Ngode Datagaliwabehanda dabayaru mitangi bialu pele ngulenebi bayale taraore haabo holenebi Keriso Yasuha ngago tigua yu helo ina hibu lalu ema nabi howa tandaga na halu ko. <sup>11</sup> Bi heneneore lagane ngago ogo

Ina ibu heba homarimayagua nde  
inabi ibu heba dege haabo holeberama.

<sup>12</sup> Ina hibu lalu ema nabi haabo harimayagua

inabi haru haga howa ibu heba haru holeberama.

Iname ibu erembira mialu ina ibu aria ndo kama larimayagua  
ibugua nde ina erembira ngialu, Ti inaga ndo kami, lolebira.

<sup>13</sup> Iname mini bilinaho naharimayagua

ibu mini bilinahe dege haabo kagome

ibuni mo hondo habe nahe ka.

lagane ngago gilibu nga.

*Biabe biaga henene Ngode Datagaliwabehanda manda bu kago ogo*

<sup>14</sup> Ina bi ogo wali agali mo mitangi bia haabo halu tigua bi tara tara nahabane ngarunaga bi mo anda howa gungu buligo ina Ngode Datagaliwabe deni howa tihondo, De hondo halimu, lalu lamibe. Bi ogoni aleme wali agali hale hararu mo bayale nahaga mo ko hagane nga. <sup>15</sup> Ina Ngode Datagaliwabenaga bi mana henene ngadagua tigatigaore lawai hole ibunaga deni howa taga nahe habe. Ngode Datagaliwabehanda ihondo turu howa, Bayuwaore bialu hari, lelo ani bialu habe. <sup>16</sup> Ani howa bi nagalone lalu kagoria i nahe wandialu habagi habe. Bi urunibi laragome wali agalime Ngode Datagaliwabe erembira mialu pelonaga mo manga haga. <sup>17</sup> Mana ogoni aleme dere bidadagua bialu mo timbu howa wali agali mo ko hagane. Agali kira Haimeneasa Piledasa lalibugua mana ogonibi lawai haga ka. <sup>18</sup> Libu hariga tigabi ngago wahalu ina homalu heyu holeberamagonaga libugua lalu, Ina abale heyu harimagoni, laga ka. Ani larago hale howa wali agali marume mini mbiraore ala wiyago wahowa mini tara mende wiaribia halu ka. <sup>19</sup> Anigo ina mini mbiraore wulene tene Ngode Datagaliwabehanda anda gene ale helenego ema nabibehe haabo kagoni. Ogoriani bi kira gilibu wini ngago mbira ogo, Anduane Homogohanda wali agali ibuninaga karu manda biai ho ka. Bi mendegome lalu, Mbiralime i Anduane Homogonaga ko, layagua ogoni ibu ko ngaruhondo erembira mialu wahalu polene nga, lalu gilibu nga.

<sup>20</sup> Anda timbuniha ndisi tara tara dewa wiaganego maru ngolo silibamebi wabini wiaga. Maru nde irame wabini wialu maru nde dindi dongomame wabini wialu biaga. Ndisi maru biabe tara bulenaga dabo bagi ho ngelaga maru horo bibahendengi bulenaga wiaga. <sup>21</sup> Mbiralime mana ko bibahende ngaru uruni wahai hayagua ibu ndisi bayale dabo bagi ho wiaganedagua ibu Ngode Datagaliwabehondo loma bia ho holebira. Ibugua ibunaga Anduane biamogo bia halu biabe bayale bibahende bule holebira. <sup>22</sup> Igiri daliahe karume tinaga bu miniha dimagoli hagdagua nahe i habagi howa agali bu miniha gahengeme Anduane Homogohanda ti biamogo bilo olaga karu baba howa mana tigabibi mini mbiraore wulenebi gubalini holenebi mo palia holenebi

✧ **2:8:** Lm 1.3, 2.16, 1 Ko 15.1, 15.4, 15.20 ✧ **2:9:** Ab 9.16, 28.31, Eb 3.1, 3.13, Pb 1.7, 1.12-14, Kl 4.3, 4.18 ✧ **2:10:** 2 Ko 1.6, Eb 3.13, Kl 1.24 ✧ **2:11:** Lm 6.5, 6.8, 2 Ko 4.10-11, 1 Ti 1.15 ✧ **2:12:** Md 10.33, Lg 12.9, Lm 8.17, 1 Pi 4.13 ✧ **2:13:** Dag 23.19, Lm 3.3-4, Ta 1.2 ✧ **2:14:** 1 Ti 1.4, 5.21, 6.4, Ta 3.9 ✧ **2:15:** 1 Ti 4.6, Ta 2.7-8 ✧ **2:16:** 1 Ti 4.7, 6.20, Ta 1.14 ✧ **2:17:** 1 Ti 1.20 ✧ **2:19:** Dag 16.5, 16.26, Ais 52.11, Nah 1.7, Yo 10.14, 10.27, Lm 8.35, 1 Ko 8.3, 1 Yo 2.19 ✧ **2:20:** Lm 9.21, 1 Ko 3.12, 1 Ti 3.15 ✧ **2:21:** 2 Ti 3.17, Ta 3.1



tai bialu habe.✠ 23 Wali agali marume mini nawi howa irane nawini bi anda halu kagoria nape ti gungu bulebirago manda buwa ti heba nahe wandialu habe.✠ 24 Ani howa Anduane Homogonaga biabe biaga karume gungu bulene nawiore. Tigua wali agali bibahende ta nabi karuhondo biamogo biagabi lawai haga mini bayalewibi kebabi nahe howa holene nga.✠ 25 Tigua wali agali Ngode Datagaliwabenaga bi mana mo wahaga karu ti bayale helonaga hendore howa mo tiga bia holene nga. Ani biyagua mani tigua mana henene ngago manda bilobi mini beregedelobi Ngode Datagaliwabehanda henge mulebira.✠ 26 Tigua mini wia dai bialu ala dama Heyolabeme hame layadagua bilo gono wedagoha ti mininigo mani gono ogoniha howa do gundu lalu ibida polebira.

### 3

#### *Hamaro bulene horo kaware harangi ko holene timbuni wulebirago ogo*

1 Bi mbira ogo manda bibe. Hamaro bulene horo kaware harangi ko holene timbuni wulebira.✠

2 Wali agalirume tini hangu mitangi bulenebi muni dimagoli holenebi mine holenebi mege bulenebi bi koorene ko nakarulapeore lolenebi aba aiyalanaga bi mo waholenebi kaj nalolenebi tigua Ngode Datagaliwabe mitangi nabi holenebi wulebira.✠ 3 Wali agalihondo gubalini naholenebi dara naholenebi gurulenebi bo waholenebi keba timbuni holenebi bayale bulenela waitigi ho halu ani bulene wulebira.✠ 4 Tigua tinaga damene waitigi karuhondo ndelo mulenebi mini nawi howa abale bulenebi, Ini mini timbuniorewi ko, lo mitangi bulenebi Ngode Datagaliwabe mo tene nahe tingininaga mana ngago dege mo tene holebira.✠ 5 Tigua Ngode Datagaliwabe mana ngaru tingini degeme bialu ibunaga hongo holene henene ngago manda nabi holebira. Timodi-o wali agali urunibi karu heba mandagi nahabe.✠ 6 Agali urunibi marume wali mini nawi ale bedaru andaga anda puwa wali uruninaga mini mo dariba haga. Wali urunime ko dewa ala biyagonaga genda howa lone dimagoli dege halu biraga.✠ 7 Tigua mana lo manda bua howa mana henene yu tiga nabibehe beda. 8 Bamba Yanese Yambereselame Mosesehondo handabe manga halu henedagua wali agali urunibime mana henene ngago manga howa wahaga ka. Tigua minime tigatiga mitangi nabiaga howa Ngode Datagaliwabe mana yu tiga nabibehe ka.✠ 9 Urunime ani bima puabo naholebira. Bamba heneyarume Yanese Yamberesela libu lulu ale nakarulape heago handa walia henedagua wali agali áyu karume uruni ti ogonibi dege kane handa walia holebira.

#### *Ngode Datagaliwabe mana hongo howa yu holene ngago ogo*

10 Anigo í ogonibi ndo harili. Ina mana lawai haruligobi biabe bialu haruligobi holene mo tene haruligobi ina ogonidagua bialu i talima ibalu kegoni. Ina Ngode Datagaliwabehondo mini mbiraore wu kogobi ema nabi haabo haruligobi gubalini ho haruligobi hibuu lalu haruligobi✠ 11 marume ihondo kagua biraligobi i tandaga naruligobi i manda bu ke. Andiogo tanobi Aigoniama tanobi Lisidara tanobi uruniha hewaria ihondo bibahende biyagonaga tandaga timbuni naabo halu harugo uruni bibahende i manda biai kegoni. Anigo bibahende biyarunaga tandaga nalu hewago hondowa Anduane Homogohanda i pele ngialu haru piya.✠ 12 Wali agalime Keriso Yasuha ho gimbu bu howa Ngode Datagaliwabe mo tene holene nga manda biragola maru karume ti mo tandaga holebira.✠ 13 Wali agali mana ko biagarubi bayaore tingi hagarubi ti ko howa hama pialu koorene ko holebira. Tigua wali agali mo hondo halu

✠ 2:22: Ab 9.14, 1 Ko 1.2, 1 Ti 1.5, 6.11 ✠ 2:23: 1 Ti 4.7, 2 Ti 2.16, Ta 3.9 ✠ 2:24: 1 Ti 3.2-3, Ta 1.7-9, 3.2 ✠ 2:25: Ga 6.1, 1 Ti 2.4, 6.11, Ta 1.1, 1 Pi 3.15 ✠ 3:1: 1 Ti 4.1, 2 Ti 4.3, 2 Pi 3.3, 1 Yo 2.18 ✠ 3:2: Lm 1.29-31, 1 Ti 1.20, 6.4, 2 Pi 2.3, 2.12 ✠ 3:3: Ta 2.3, 2 Pi 3.3 ✠ 3:4: Pb 3.19, 2 Pi 2.13, Yu 4, 19 ✠ 3:5: Md 7.15, 7.21, Lm 2.19-20, 2 Te 3.6, 1 Ti 5.8, 6.5, Ta 1.16 ✠ 3:6: Md 23.14, Ta 1.11 ✠ 3:8: Har 7.11, Lm 1.28, 2 Ko 13.5, 1 Ti 6.5, 2 Ti 2.25 ✠ 3:10: Pb 2.22, 1 Ti 4.6 ✠ 3:11: Iba 34.19, Ab 13.14-52, 14.1-20, 2 Ko 1.10 ✠ 3:12: Md 16.24, Yo 15.20, 17.14, Ab 14.22, 1 Te 3.3

kagola dama Heyolabeme tinibi mo hondo halu holebira. ✧ <sup>14</sup> Í nde mana henene lo manda bialu harigo yu tiga bu kegonigo hongo howa yu haabo habe. Íhondo mana lawai hayaru urumelo íni manda bu kegoni. ✧ <sup>15</sup> Anduane Homogonaga mbugani bi lo ngago í igiri emeneni howa lo manda biaabo halu harigo kegoni. Anduane Homogonaga mbugani bi lo ngagome mini gigabi mo wia halu Keriso Yasuhondo mini mbiraore wuleneme Ngode Datagaliwabehanda pele ngiaganego íni manda bu kegoni. ✧ <sup>16</sup> Anduane Homogonaga mbugani bi bibahende lo ngaru agalime gili bilo Ngode Datagaliwabehanda ti mo manda bia hene. Iyunaga mbuga ogoni bi lo ngarume mana henene lawai holebi mana yole ngago mo tiga bulebi mana nakarulape ngago mo waholebi hariga tigabini holene mana lamulenebi ngagoni. ✧ <sup>17</sup> Anigo ina Ngode Datagaliwabenaga biabe biahaga kamaru bi mana ogonidagua lo ngagome mo karulapeore helaragola biabe bayale tara tara bulene mugube yu howa bayuwa bialu holeberama. ✧

## 4

### *Ngode Datagaliwabe mana henene lawai holene ngago ogo*

<sup>1</sup> Keriso Yasu ibugua dabaga howa wali agali áyu karubi homenerubi heba godi lolebira. Ibugua dai bialu Handame Haga Kini howa wali agali bibahende haru holebirago mitangi bibe. Ngode Datagaliwabebi Keriso Yasubi libu deni howa ina íhondo bi ogoni hongo howa laro. ✧ <sup>2</sup> Mana ogoni lamialu howa horo bibahendengi lamiaabo habe. Wali agalime hale hoa hayaguabi nahayaguabi ta nabi harugo lowa ti hale hai helo lamiaabo habe. Ina ani lamialu howa mo tiga bialu talialubi mini elahe helo mo hongo halubi lolene ngadagua ema nabi howa hibu lalu lawai habe. ✧ <sup>3</sup> Awe wali agali marume bi mana henene hale habe manga howa tini hame ledadagua bulebira. Tigua bi mana tara nakarulape hale hoa howa bi mana ogoninaga lawai haga karu heba mandagi mo ngoai ho holebira. ✧ <sup>4</sup> Ngode Datagaliwabenaga bi mana henene ngago hale habe manga howa erembira mialu mamalinaga bi te tara tara nagalone ngaru hale hoa holebira. ✧ <sup>5</sup> Anigo ina horo bibahendengi mini haru haabo halu tandaga nolene ngayagua hibu lalu nalu habe. Bi Mana Debene lamiaga kego Ngode Datagaliwabenaga biabe bia haga howa biabe bibahende bulene ngaru bayuwa bialu biai habe. ✧

### *Polonaga biabe bumaro bulene winigo ogo*

<sup>6</sup> Í nde íni Ngode Datagaliwabehondo loma bialu bo mulene pongo bo winigo áyu ngagoni. Í dindini holene hamaro bule ko. ✧ <sup>7</sup> Ina hongo howa gerai lalu henego ai í pole winigoria pu maro biru. Ngode Datagaliwabehondo mini mbiraore wulene wa nahe wiaabo kogoni. ✧ <sup>8</sup> Anduane Homogo ibu Dabaga tigabi kago ibugua Horo Mbira pongo bo winingi ina bolangua harugonaga yolo wu kago íhondo ngulebira. Yolo ogoni Ngode Datagaliwabehanda íhondo, Í mini tigabiwi kego, lolene wulebira. Í hanguhondo ndo wali agali Anduane Homogo dai bilo hame lowa hondo karu tihondobi tinaga ngago mulebira. ✧

### *Bi galone maru Timodihondo lamaro bialu lenego ogo*

<sup>9</sup> Í kogoria abaleore ibule manda bibe. ✧ <sup>10</sup> Demasa ibugua dindini holene mbirale ngaru gubalini howa í wahalú ibu Tesalonaiga piya. Keresenese ibu Galesia piya. Taidasa ibu Dalamesia piya. ✧ <sup>11</sup> Lugu dege iya kaba. Maga ibu biabe biamogo bibehe kago ina ibu damu pialu libu haru ibalibu. ✧ <sup>12</sup> Ina Tiyigasa ibu Ebesa pelo ibuhondo pu

✧ **3:13:** 2 Te 2.11, 1 Ti 4.1, 2 Ti 2.16 ✧ **3:14:** 1 Ti 1.13, 1 Ti 2.2 ✧ **3:15:** Yo 5.39, 1 Pi 1.20-21 ✧ **3:16:** Lm 15.4, 2 Ti 2.21, 2 Pi 1.20-21 ✧ **3:17:** 1 Ti 6.11, 2 Ti 2.21 ✧ **4:1:** Ab 10.42, Lm 14.9-10, 1 Ti 5.21, 6.13 ✧ **4:2:** Ab 20.20, 20.31, 1 Ti 4.13, 5.20, Ta 1.13, 2.15 ✧ **4:3:** 1 Ti 1.10, 4.1, 2 Ti 1.13, 3.1, 3.6 ✧ **4:4:** 1 Ti 1.4, 4.7, Ta 1.14 ✧ **4:5:** Ab 21.8, Eb 4.11, 2 Ti 1.8, 2.3 ✧ **4:6:** Pb 1.23, 2.17, 2 Pi 1.14 ✧ **4:7:** 1 Ko 9.24-25, Pb 3.14, 1 Ti 6.12, Hi 12.1 ✧ **4:8:** 1 Ko 9.24-25, 2 Ti 1.12, Ya 1.12, 1 Pi 5.4, Mo 2.10 ✧ **4:9:** 2 Ti 1.4 ✧ **4:10:** 2 Ko 8.23, Ga 2.3, Kl 4.14, Pm 24, Ta 1.4, 1 Yo 2.15 ✧ **4:11:** Ab 12.12, 12.25, 13.13, 15.37-39, Kl 4.10, 4.14, Pm 24

laru. ✧ <sup>13</sup> I ibalu howa inaga aga luni Toroasani howa Kabasanaga andagani ngelarugo mo yalu mbuga ngelarugobi yalu ibabe. Mbuga maru nogo dongoneme wabinigo ngaru galone timbuniorego embeda holeni mo yabe. ✧

<sup>14</sup> Aleganda ibu ege tole mini gabame mbirale tara tara wabiaga biago ibugua ihondo handabe manga timbuniore haya. Ani biyagonaga Anduane Homogohanda ibuhondo pani karulape mulebira. ✧ <sup>15</sup> Iname Ngode Datagaliwabenaga bi mana lameramaligonaga ibugua keba timbuni howa ina bo wahole manda bu kago í nde de hondowa habe.

<sup>16</sup> Godi halu mbira larimangi ina ladai birugola agali mbira ihayagi nahe bibahende wahalu piai haya. Tigua nakarulape ogoni biyago Ngode Datagaliwabehanda mitangi nabilo hame ledó. ✧ <sup>17</sup> Anduane Homogo ibugua i wahalu pu nabi ila haabo howa mo hongo hayagola Yu wali agali ndo tara tara hearu ti hale helo ina Ngode Datagaliwabe bi

mana lamiai harugoni. Tigua i bo homelole biyaria Anduane Homogohanda i yamiya. ✧

<sup>18</sup> Anduane Homogohanda i ko bibahende ngagoria kogola i yamiaabo howa dahuliya andaga ibuni Handame Ho Kagoria i haru polebira. Ibunaga mini mo yaraga holene wiaaboboore bilo hamelo ko. Aniore bilo laro. ✧

<sup>19</sup> Pisisila Aguilabi Onesiborasa ibu damenerubi ina ti bibahende mitangi biaabo halu ko, layiya lalu lamibe. ✧ <sup>20</sup> Erasadasa ibu Korindini hondo haya. Torobimasa ibu warago bayagola Miledasani ngelalu piru. ✧ <sup>21</sup> Ira yuni gilope howa dagare ibagane hororu naibidaore i kogoria abale ibulene ngago ibabe. Yubulasabi Pudenesebi Lainasabi Kolodiabi Keriso hameigini bibahendemebi, Tí mitangi ho kama, layiya lalu lamibe.

<sup>22</sup> Anduane Homogo ibu inaga dinini heba halu Ngode Datagaliwabenaga biamogo bia holene tí bibahendeha wiaabo helo hamelo ko.

---

✧ **4:12:** Ab 20.4, Eb 6.21-22, Kl 4.7-8 ✧ **4:13:** Ab 20.6 ✧ **4:14:** Iba 28.4, 62.12, Min 24.12, Ab 19.33, Lm 2.6, 1 Ti 1.20, Mo 18.6 ✧ **4:16:** Ab 7.60, 2 Ti 1.15 ✧ **4:17:** Iba 22.21, Dan 6.22, Ab 23.11, 27.23, 2 Pi 2.9 ✧ **4:18:** Iba 121.7, Lm 11.36, Ga 1.5, Hi 13.21 ✧ **4:19:** Ab 18.2, 2 Ti 1.16-17 ✧ **4:20:** Ab 19.22, 20.4, 21.29, Lm 16.23

## **Taidasa**

### **Polohanda Taidasahondo beba ogo gilibu wia hene**

### **Mbuga ogoha gilibu ngarunaga nemandi ogo**

Taidasa ibu Yu agali ndo hene. Ibugua Kerisohondo mini mbiraore wu howa Polola Bi Mana Debene lawai hama ibaga bialu hene. Kiridi dindiha tano bibahendeni Keriso hameigini hearu hondo helo Polohanda Taidasahondo, í hondo habe, lalu helalu pene. Puwa mani Polohanda Taidasa biamogo bialu beba ogo gilibu wia hene.

Polohanda beba gili binidagoni irane tebira wiago hondowa mo walia halu gili bini.

Mbira

Keriso hameigini karu haru helo mbirali dabo helalu howa mana ogobi biagane holene nga manda buwa helabe, lalu gili bini.

Mende

Wali agalibi wandari igiribi garabaya biabe ale bia haga karubi urunihondo agua bialu habe ogodagua lalu habe lalu lawai habe, lalu gili bini.

Tebone

Keriso hameigini karume ogonidagua bialu holenebi mini mo palia hagane yu holenebi nenegene hinulenebi lowa marume handabe manga halu lai lalu karuhondo bi wai nabilimu lalubi Keriso hameigini karu mo tale bu baga nabilimu lalubi bayuwa hondo holene nga, lalu lamaro bialu gili bini.

### **Bulu бага бува кuni gilibu ngago**

1.1-4

Gili binigonaga irane 1.5-16

Keriso hameigini karu hondo hagane helo dabo helolenego 2.1-15

Keriso hameigini karume biabe tara tara bulenego 3.1-11

Keriso hameiginime bayale bulene mugubelo hondo holene 3.12-15

Lamaro bialu lenego

### *Polohanda Taidasahondo beba ogo gilibu wia hene*

<sup>1</sup> I Polo Ngode Datagaliwabenaga biabe biahagabi Yasu Kerisonaga abosolobi kogoni. Wali agali Ngode Datagaliwabehanda dabayaru ti ibuhondo mini bilina ho haabo helobi bi mana henene yu tiga biai helobi ina ti biamogo buliya ibugua i dabo helaya.

<sup>2</sup> Haabo holene yule mini dunubia ho holene tene mana henene ngagoria nga. Haabo holene ogoni Ngode Datagaliwabe ibu mini bilinahe howa bibahende nawabi heangi, Ngulebero, lalu heneneore lowini. <sup>3</sup> Ngode Datagaliwabehanda horo mbiru pongo bo winigo lola hayagola holene ogoni ibunaga bi mana langialu inahondo mo pani haya. Inanaga Pele Ngiaga Ngode Datagaliwabe ibugua bi mana ina wali agalihondo lamuliyana biabe ogoni ihondo ngiya. <sup>4</sup>

<sup>4</sup> Ngode Datagaliwabehondo mini mbiraore wu harabaligo manda buwa Taidasa-o i igini henene kego ihondo beba ogo gilibu wia haro. <sup>5</sup>

Aba Ngode Datagaliwabebi Pele Ngiaga Keriso Yasubi libugua ihondo biamogo bia holenebi mo palia holenebi ngilo hamelo ko.

### *Kiridini howa Taidasanaga biabe bulene winigo ogo*

<sup>5</sup> Biabe biai nahe bulene maru wiago biai habelo ina i Kiridi dindini habe lalu piru. Ina bialu habe larugo ogo. Tano bibahendeha Keriso hameigini karu haru helo agali ala hene miniwi karu mbira mbira dabo helabe, laru. <sup>6</sup> Agali ala hene miniwi uruni ti kagua

✧ 1:2: Lm 16.25, Kl 1.27, 2 Ti 1.1, 1.9, 1 Pi 1.20

✧ 1:3: Eb 1.9-10, 1 Te 2.4, 1 Ti 1.1, 1.11, 2.3, 2 Ti 1.10, Ta 2.10, 3.4

✧ 1:4: Lm 1.7, 2 Ko 8.23, Ga 2.3, 2 Ti 1.2, 4.10

nabiagamebi one mbira hangu beremebi tinaga waneiginime Keriso mana yu tiga biaga howa kagua nabi aba aiyalanaga bi larago hale hagamebi agali ogonibigo helolene nga, laru.✠<sup>7</sup> Agali Ngode Datagaliwabenaga wali agali haru holebirago mana tiga tiga biagago hangume haru helo dabo helabe. Ti mine nahagabi abale keba nahagabi lulu yule waini iba timbuni nanagabi gungu nabiagabi muni dibaudu nahagabi helolene nga.✠<sup>8</sup> Tigua wali agali nenege hinagabi bayale bibahende ngago bulene hame lagabi mini haru hagabi mini tigabiwibi Ngode Datagaliwabehondo tini loma bia henebi tinginime hame lagaru bibahende haru hai hagamebi holene nga. <sup>9</sup> Tigua bi mana heneneore lameramaligoni hangu hongo howa yu holene nga. Ogonibi howa tigua bi mana henene bayuwa lawai haragome wali agalinaga mini mo hongo halubi maru bi mana hame nalaga karu ti nakarulape harimadane hendelo walia halubi holebira.✠

### *Kiridi dindini ke haga agali dewa ka, lenego ogo*

<sup>10</sup> Agali dewa mana henenege yu tiga nabiaga howa tigua bi nahabane ale la gimbu bialu wali agali mo hondo halu ka. Ogoni Yuali dongone podo mabu biaga karume ani biaga ka.✠<sup>11</sup> Tigua muni dimagoli howa mana ko nakarulape ngaru hangu lawai halu damene dewa bu karu mo gura hangu hangu helo mini burugula halu ka. Agali urunibime bi larago nalalimu lolene nga.✠<sup>12</sup> Bamba Kiridiali mbira tininaga mana latagi halu mbiwia haga henegome lalu, Kiridiali ke hagabi nogo gabua ale ko hagabi tomo timbuni nagimbu buwa biabe manga hagabi ka, lene. <sup>13</sup> Ibugua bi ogoni lenego heneneore lene. Irane ogonigo ti Ngode Datagaliwabe mana hangu yu tiga biaabo helo ina ti hongo howa talialu lamibe.✠<sup>14</sup> Yualinaga mamali tebi agali degeme mana wabu wini ngarubi ti wahai helo ani talibe. Agali urunime mana henene ngaru hame nale wahai halu mana nakarulape ogoni lawai hagane tene ti ka.✠<sup>15</sup> Mini tigabiwi karume mbirale bibahende ngago tigabi dege mitangi biaga ka. Anigo Yasuhondo mini mbiraore nawi karume bibahende ngago ko dege mitangi biaga ka. Tinaga minibi mandabi ko hai hene ka.✠<sup>16</sup> Tigua bi degeme lalu, Ina Ngode Datagaliwabe mana manda biaihe kama, lagago tigua mana bia tagi haragome, Ina Ngode Datagaliwabe mana manda nabi kama, lalu walia haga. Tigua wali agalihondo handabe manga hagabi mana tigabi bibahende ngaru wahagabi ogonibi howa ti bayale mbira nabibehe holebira.✠

## 2

### *Wali agali wahe howa bulene nga lenego ogo*

<sup>1</sup> Ina Ngode Datagaliwabe bi mana henene lowini ngago bayuwa lawai halu habe.✠<sup>2</sup> Agali waheruhondo ogodagua lawai habe. Bayuwa mitangi bialubi mini wialubi mini haru halubi Yasuhondo mini mbiraore henene wiaabo ha gubalini ha hibulaabo halubi ani bialu holene nga, lalu lamigi bialu habe. <sup>3</sup> Wali waheruhondobi nde bi ogodagua lalu lawai habe. Diburibu lalu nalagabi waini ibame mini mo dariba nahelobi Ngode Datagaliwabehanda hame ledadagua bialu birulene nga. Tigua mana bayale biawai halu✠<sup>4</sup> wali daliaherume tinaga agalinibi waneiginibi gubalini holene nga. <sup>5</sup> Ti mini haru helobi mini gahenge wilobi andaga bayuwa hondo berelobi agalinime bi larago mo wa nahelobi ani bigi bilo lawai holene nga. Ani bialu bedayagua maru karume, Ngode Datagaliwabe mana ko nakarulapeda, lolene henge nawulebira.✠

### *Agali daliaherume bulene nga lenego ogo*

✠ **1:6:** 2 Ti 2.24-26 ✠ **1:6:** 1 Ti 3.2-7 ✠ **1:7:** LBM 10.9, 1 Ko 4.1, Eb 5.18, 1 Pi 5.2 ✠ **1:9:** 1 Ti 1.10, 1.15, 2 Ti 1.13, 2.15, 4.3, Ta 2.1 ✠ **1:10:** 1 Ti 1.6, 4.7 ✠ **1:11:** Md 23.14, Yo 10.12, 1 Ti 6.5, 2 Ti 3.6, 1 Pi 5.2 ✠ **1:13:** 2 Ti 4.2, Ta 2.2 ✠ **1:14:** 1 Ti 4.7, 2 Ti 4.4 ✠ **1:15:** Md 15.11, Lg 11.39-41, Lm 14.14, 14.20, 14.23, 1 Ko 6.12 ✠ **1:16:** Lm 1.28, 2 Ti 3.5, 3.8, 1 Yo 1.6, 2.4, Yu 4 ✠ **2:1:** 1 Ti 1.10, 6.3, 2 Ti 1.13, Ta 1.9 ✠ **2:3:** 1 Ti 3.11, 2 Ti 2.9-10, 1 Pi 3.3-4 ✠ **2:5:** Eb 5.22, Kl 3.18, 1 Ti 2.11, 6.1, 1 Pi 3.1, 3.5



<sup>6</sup> Agali daliaheruhondo, Mini haru holene nga, lalu ogodagua lamibe. <sup>7</sup> Inime mbirale bibahende berego bialu howa mana bayale berego marume hendelo biawai halu habe. Mana lawai halu howa í mini bilinahebi tigabibi habe. ✧ <sup>8</sup> Í baba waitigi ho karume í gurulene henge handa walia nahelo bi galone hangu lamialu habe. Tigua ina guralu bi ko lolene henge handa walia nahe howa taga pani nolebira. ✧

*Garabaya biabe ale bia haganaga bulene nga lenego ogo*

<sup>9</sup> Garabaya biabe ale biahaga karume tinaga anduane mo turu halu tigua bia laradagua bialu bi la dai nabi howa bibahende biai holene nga. ✧ <sup>10</sup> Ti anduanenaga mbirale ngago kayu nabi howa bayale hangu biaabo halu mini bilinahe karia marume hondowa inanaga Pele Ngiaga Ngode Datagaliwabe mana, Bayaleoreda, lelo biawai halu howa walia habe. ✧

<sup>11</sup> Ngode Datagaliwabehanda wali agali bibahende pele mulene yu helo ibunaga bi-amogo bia holene walia hene. ✧ <sup>12</sup> Ngode Datagaliwabehondo, Mangaba, lalu erembira mialu ko bibahende bulenebi waholomaya biamogo bia holene ogonime ina biawai haga. Mini haru holenebi tigabi holenebi Ngode Datagaliwabe mo tene holenebi dindini kamago howa ina ani bialu holomaya biamogo biaholene ogonime ina biawai haga. ✧

<sup>13</sup> Ina dindini ani bialu howa inanaga Yasu Keriso ibu Ngode Datagaliwabe timbuni howa Pele Ngiaga kago ibunaga wá taraore holene hapani helo hondo kama. Horo turubi ogoni hondole mini dunubia ho kama. ✧ <sup>14</sup> Ina ko bulene wiagoria hemaria pele ngialu golope holebi ibunaga wali agali dege howa bayale bulene hame lalu ina mini gahengewi hangu holomayabi ibugua ani homo aribia hene. ✧

<sup>15</sup> Mana ogoni wali agalihondo lawai halu habe. Ani lawai halu howa mini mo hongo halubi talialubi ani bigi bialu lolene ngadagua Ngode Datagaliwabena hongoi howa lalu habe. Wali agalime í mo yo hendelo nabialu habe. ✧

### 3

*Mana bayale bule hongo ho holene ngago ogo*

<sup>1</sup> Keriso hameigini í aria karu lone mo mitangi bia halu ina tihondo ogodagua lamibe. Tigua gabumane haru haga hongohe karume mana lo ngadagua bilobi mana bayale bibahende bulene manda bu helobi lamibe. ✧ <sup>2</sup> Tihondo agua lamibe, Mbiraligo guraga nabilimu. Bi gungu nabi howa mo palia halubi nenege hinalubi wali agali bibahendehondo gedaore howa bayale bialubi holene nga, lalu lamibe. ✧ <sup>3</sup> Au lamibe, Ala iname mini nawi howa mana pugualubi ko bialu tinginime hame lagane ko tara tara dewa wiarume dariba hayagola harima. Ani bialu howa iname wali agalihondo ko mitangi bialubi nayido agini henge lalubi harima. Wali agali marume inahondo handabe manga hayagola iname nde tihondo handabe manga ho harima. ✧ <sup>4</sup> Ani bialu hemagola dege ina Pele Ngiaga Ngode Datagaliwabehanda ibunaga biamogo bia holenebi gubalini holenebi inahondo walia halu pele ngiya. ✧ <sup>5</sup> Ibugua ina pele ngiyago irane iname biabe bayale mbira birimagonaga ndo ibunaga dara holene wiagome ina pele ngiya. Ngode Datagaliwabe Dinini ibugua ina wayawaya bialu mini gahenge taba hanalu holene gahengebi ngiya. ✧ <sup>6</sup> Ngode Datagaliwabehanda Pele Ngiaga Yasu Keriso togoni howa ibu Dinini inaha tolai helo ngiya. ✧ <sup>7</sup> Ani biyago irane Ngode Datagaliwabe

✧ **2:7:** Eb 6.24, 1 Ti 4.12, 1 Pi 5.3 ✧ **2:8:** 1 Ti 6.3, 2 Ti 3.14, 1 Pi 2.12, 2.15 ✧ **2:9:** 1 Ti 6.1-2 ✧ **2:10:** Md 5.16, Pb 2.15, Ta 1.3 ✧ **2:11:** Yo 1.9, Lm 5.15, 1 Pi 5.12 ✧ **2:12:** Lm 6.19, Eb 1.4, Kl 1.22, 1 Te 4.7, 1 Yo 2.16 ✧ **2:13:** 1 Ko 1.7, Pb 3.20, Kl 3.4, Hi 9.28, 1 Yo 3.2 ✧ **2:14:** Har 19.5, Man 4.20, 7.6, 14.2, Iba 130.8, Ese 37.23, Ga 1.4, 1 Pi 2.9 ✧ **2:15:** 1 Ti 4.12, 2 Ti 4.2 ✧ **3:1:** Lm 13.1-7, Kl 1.10, Hi 13.21, 1 Pi 2.13-14 ✧ **3:2:** Eb 4.2, 4.31, Pb 4.5, Kl 3.12, 2 Ti 2.24-25 ✧ **3:3:** 1 Ko 6.11, Eb 2.1-2, 5.8, Kl 1.21, 1 Pi 4.3 ✧ **3:4:** 1 Ti 2.3, Ta 1.3, 2.11 ✧ **3:5:** Yo 3.3-5, Lm 11.6, Eb 5.26, 2 Ti 1.9, 1 Pi 3.21 ✧ **3:6:** Yol 2.28, Ab 2.17-18, 2.33, Lm 5.5

ibugua Kerisonaga biamogo bia holeneme inahondo, Tí mini tigabiwi kami, laragola ina minime dunubia ho howa haabo holene yu hole kama.✠ 8 Bi ogoni heneneore lo nga.✠

Ngode Datagaliwabehondo mini mbiraorewi karume biabe bayale biaabo helo ina mana ogoni hongo howa lamialu haabo habelo hamelo ko. Biabe bayale ogonibi biragome wali agali bibahende biamogo bilonaga bulene nga. 9 Galone ndoni lai lolenebi mamali dewaru mini lo bila holenebi lai gungu bulenebi Mana lowinigonaga bi gungu bulenebi urunibi galone nabulene lagago ina urunidagua lalu kategoria nahe wandialu habe.✠ 10 Mbiralime Keriso hameigini karu talebu ki bule bi nakarulape mbira layagua halu kibi lo tiga bialu lamibe. Lameregola ibu hale nahayagua wahalu tagira pu labe.✠ 11 Agali ogonibi ibugua kagua biragome ibuni miniha ko ngagobi walia haga.✠

*Bi galone maru lamaro bialu lenego ogo*

12 Ademasadabe be Tiyagasadabe hondowa ina mendealigo í keria pu lagua. Libu mendealigo, Pu, laragola ina i Nigobolisi tanoni koria ibuleore manda bibe. Ira yuni gilope howa dagare ibagane hororu birangi Nigobolisi tanoni holebero manda bu kogoni.✠ 13 Mana bayale mo wála halu lamiaga Senasa ibubi Abolosobi libu ibaga bialu polebira. Libu harigani pialu karia buru pale holigo ina libu biamogo bule manda buwa habe.✠ 14 Keriso hameigini ina aria habane nabulene nahelo horo bibahendeni biabe bayale hangu bialu wali agali maru buru pale karu henene biamogo bulene nga manda bilo lamibe.✠

15 Wali agali i heba kamaru bibahendeme, Tí mitangi biaabo halu haramali, layiya lalu lamibe. Wali agali Ngode Datagaliwabe mana yu tiga bu karuhondo iname, Tí mitangi biaabo halu kamago, layiya lalu lamibe. Ngode Datagaliwabenaga biamogo bia holene tiha wiaaboboore wilo hamelo ko.

✠ 3:7: Lm 3.24, 8.23-24, Ga 2.16, Ta 2.11 ✠ 3:8: 1 Ti 1.14-15, Ta 2.14 ✠ 3:9: 1 Ti 1.4, 2 Ti 2.14-16, 2.23, Ta 1.14  
 ✠ 3:10: Md 18.15-17, 2 Ko 13.2, 2 Te 3.6, 3.14, 2 Ti 3.5, 2 Yo 10 ✠ 3:11: Ab 13.46, 1 Ti 6.3-5 ✠ 3:12: Ab 20.4, Eb 6.21-22, Kl 4.7-8, 2 Ti 4.12 ✠ 3:13: Ab 18.24, 1 Ko 3.5-6, 16.12 ✠ 3:14: Md 7.19, Lm 15.28, Eb 4.28, Pb 1.11, Kl 1.10, Ta 2.14

## **Pilimono**

### **Polohanda Pilimonohondo beba ogo gilibu wia hene**

### **Mbuga ogoha gilibu ngarunaga nemandi ogo**

Pilimono ibu Keriso hameigini Kolosini hearunaga aria hene. Pilimononaga garabaya biabe ale bia haga mbira mini Onisimasi henego ibu pu yola halu pene. Ani pu yola henego maha aguabe tobahe ibuwa Polo ibu garabaya hearia nenege hinu hene. Onisimasi ibu Polola howa Keriso hameigini hene. Keriso hameigini hayagola Polohanda, í anduane Pilimono karia dai bulene nga, lalu Onisimasi lamini. Ani lamuwa Polohanda Pilimonohondo beba gili buwa Onisimasi ibugua yalu pelo mini. Beba ogoniha bi gilibu wiyago galone ogo. Onisimasi ibu Kerisohondo mini mbiraore wu kago ibu garabaya biabe ale bia haga hangu ndo ibu Kerisoha howa í hamene heneneore kago manda buwa í keria dai bialu helo henge mialu habiya, labe lalu gilibu wia hene.

#### **Bulu бага бува кuni gilibu ngago**

1-3

Polohanda bi ala lenego

4-7

Pilimonohondo kaj lenego

8-22

Onisimasinaga la henego

23-25

Lamaro bialu lenego

1-2 I Polo Keriso Yasunaga biabe biahaga hewago hondowa marume i dariba hayago kogoni. Ibi ina hamene Timodibi iyame ina hameneore howa biabe mandagi beramali Pilimono ibi ina mbalini Abiabi Yasunaga ami agali Agibasabi Keriso hameigini í andaga ngoai hagarubi tihondo beba ogo gilibu wia haraba.\*

3 Inanaga Aba Ngode Datagaliwabebi Anduane Homogo Yasu Kerisobi libunaga biamogo bia holenebi mo palia holenebi tihondo ngilo hamelo ko.\*

#### *Pilimononaga gubalini holenebi mini mbiraore wulenebi winigo ogo*

4 Ina horo bibahendengi Ngode Datagaliwabehondo bi lalu howa í mitangi bialu kaj laruli.\* 5 Irane ina Ngode Datagaliwabena wali agalihondo gubalini ho kegobi Anduane Homogo Yasuhondo mini mbiraore wu kegobi hale haru. 6 Ina mini mbiraore wu kegonaga mana wali agali maruhondo lamialu kegoni howa ina Kerisoha hogimbu bu kamagonaga turu holene tara tara ngaru manda biai hamiya Ngode Datagaliwabehondo bi ani lalu ko.\* 7 Hamene-o inaga gubalini holene ngegome Ngode Datagaliwabena wali agali bibahendenaga gubalini mo turu hai hari. Ani birigome i mo turu halu inaga mini mo hongo hari.\*

#### *Polohanda Onisimasinaga la henego ogo*

8 Irane Kerisoha i inaga hamene howa mbirale mbira bulene nga ale ihondo hongo howa, Harugo bia, labehe kogonigo. 9 Nde abule ina í gubalini timbuniore ho kogodago bame la hangu bero. Ani larogoni i Polo Keriso Yasunaga bi lamiaga kogoni hewaria marume dariba henego áyu garabaya kogoni howa ani laro.\* 10 I garabaya howa Onisimasi ibu Kerisohondo mini mbiraore wilo lowa Ngode Datagaliwabe mana lawai haru. Ani lawai harugola ibu mini mbiraore wiyago Kerisoha howa i iginiore kago

\* 1:1-2: Eb 3.1, Kl 4.17, 2 Ti 2.3    \* 1:3: Ga 1.3    \* 1:4: Lm 1.8-9    \* 1:6: Pb 1.9, Kl 1.9    \* 1:7: 2 Ko 7.4, 7.13

\* 1:9: Pm 1

ibunaga la haro. ✧ <sup>11</sup> Ala ibu ıla habane mbira nabulene hayago áyu nde ınagabi ınagabi galone biaholene kagoni.

<sup>12</sup> Áyu ı kegoria daibi larogo. Ibu ibiradagua ınaga gubalini holene ibu heba ibilaro. <sup>13</sup> Bi mana debene lawai haruligonaga garabaya kogoni koria ına ı biamogo biradagua Onisimasi ibugua bilo ibu ıla, Haba, lole hame laru. ✧ <sup>14</sup> Anigo nde ına ı biamogo bia naloleberogo ını bua biradagua dege bibe larogoni. Harugo mbira bia nalolebero. ını hame lededagua bia labelo henge ngero. ✧

<sup>15</sup> ına manda berogola Onisimasi ibu emene tigimandi hanguni pubagi ho hayagonigo nde abule horo bibahendeni ibu ınıla haabo holeberabi. <sup>16</sup> Ai áyu ibu garabaya biabe ale biahaga hangu ndogo ibu Kerisoha howa iya hameneore kabagoni. Ibhondo gubalini howa mitangi timbuni ho kogoni. ına ibu garabaya biabe ale biahagabi Anduane Homogoha ınaga hameneorebi ka mitangi buwa ibuhondo gubalini timbuniore ho holebere. ✧

<sup>17</sup> ına iya mini mbiraore ho kabago manda biriyagua ı eberogola turu holenedaguaore Onisimasi ibiragola turu halu haru dai bibe. ✧ <sup>18</sup> Ibugua ıhondo kagua mbira biniyaguabi ıla dano mbira heneyaguabi ıha mo bade habe. <sup>19</sup> Ogoria ıninaga gime gili berogo. ı Polohanda yolo bia dai bulebero. ına ıhondo mo mitangi bia habe naheorego irane ınaga holene ıhondo dano ho kogoni ını manda bidegoni. ✧ <sup>20</sup> Anigo ınaga hameneore Anduane Homogo mitangi bialu ı mo turu habe. Iya Kerisoha hamenela kaba manda bialu ı mo wála habe.

<sup>21</sup> ına gili bialu howa manda berogola bi larugo hangu ndo bulebere. Maru biatago halu bulebere manda bido. <sup>22</sup> Ani bialu howa ı ibalu paluene anda hobane mbira manda manda bibe. Irane tıgua ınaga Ngode Datagaliwabehondo bi la halu kamigo ibugua ladai bialu ı tını kamiria haru dai bulebira lowa mini dunu bia ho kogoni. ✧

### *Bi lamaro binigo ogo*

<sup>23</sup> Ebaborasa ibubi Keriso Yasunaga biabe biyagola garabaya binigo ı heba kabago ibugua, ı mitangi bialu ko, laya. ✧ <sup>24</sup> Agali maru ı heba mandagi biabe biaga Maga Arisadagasa Dimasa Luguma tiguabi anidagua dege laya. ✧

<sup>25</sup> Anduane Homogo Yasu Keriso ibunaga biamogo bia holene tíha wiaabo helo hamelo ko.

---

✧ **1:10:** 1 Ko 4.15, Kl 4.9 ✧ **1:13:** Pb 2.30 ✧ **1:14:** 2 Ko 9.7, 1 Pi 5.2 ✧ **1:16:** 1 Ti 6.2 ✧ **1:17:** 2 Ko 8.23  
 ✧ **1:19:** Ga 6.11 ✧ **1:22:** Pb 1.25, 2.24 ✧ **1:23:** Kl 1.7, 4.12 ✧ **1:24:** Ab 12.12, 12.25, 13.13, 15.37-39, 19.29, 27.2, Kl 4.10, 4.14, 2 Ti 4.10-11

## **Hibururu** **Hiburuali Keriso hameigini hearuhondo beba ogo gilibu** **wia hene**

### **Mbuga ogoha gilibu ngarunaga nemandi ogo**

Hibururu wali agalihondo beba gili binigo ti heagoria gendabi timbuni tara tara wiyagola ti mini mbiraore wu hayaru wahalu polilono beba ogo gilibu wia hene.

Ngode Datagaliwabehanda wali agalime ibuni ogobi ka manda bilo ibugua Keriso ibilene. Ogoninaga iraneore tebira ngago ogo.

**Mbira**

Yasu ibu Ngode Datagaliwabe Iginioire haabo henego ka. Ani howa ibu Abanaga bi layadaguaore hale halu inanaga tandaga na halu howa wahalu pu nabi hiburu lalu inanaga na hene. Yasu ibu Ngode Datagaliwabe Iginioire howa Ngode Datagaliwabenaga mana latagi haga bamba henerubi dahuliyali karubi Mosese henegobi uruni ti dindiha lowa Yasu ibu daligaore ka, lalu gili bini.

**Mende**

Yasu ibu loma binigo mo miaga ha ho wiaabo henego ka. Habo Nalolene Bi Bamba lo winigonaga loma binigo mo miaga heneru ti dindiha lowa Yasu ibu daligaore ka, Ngode Datagaliwabehanda ani lene.

**Tebone**

Mbirali Yasuhondo mini mbiraorewi kago ibu ko bulenebi gi holenebi homolenebi urunibi bibahende wiagoha howa Yasu ibu loma binigo mo miaga haguane timbunioire howa ibugua o biago pele miaga ka, lalu lo nga.

Be 11 howa Isaraele wali agali marume Ngode Datagaliwabehondo mini mbiraore hongohe wu henegonaga te lo nga. Isaraele wali agali marume mini mbiraore hongohe wu henedagua beba ogo daga lararu tiguabi mini mbiraore wu halimunaga, lo nga.

Be 12 howa tihondo bi ogobi lalu, Mini mbiraore ngamigoni hongo ho wu haabo halu hamaro bulene harangi wiamaro bule wu halimu. Tinaga de Yasuni handaya ho howa tandaga tara tara narimiyaguabi marume ti mo tandaga hayaguabi donge howa hiburu lalu halimu, lo nga. Galone lamaro bu ngago daga lalu ti agua manda bialu, Yasuhondo mini mbiraore ngamigo wahalu pirimiyagua agua bulebirago de hondo holene nga, manda bilimu.

### **Bulu бага бува kuni gilibu ngago**

*1.1-3*

Ngode Datagaliwabehanda Kerisoha howa ibuni mo pani haiore ka *1.4-2.18*

Dahuliyali karu ti dindiha lowa Keriso ibu daligaore ka *3.1-4.13*

Mosesebi Yosubi henego libu dindiha lowa Yasu ibu daligaore ka *4.14-7.28*

Keriso ibu loma binigo mo miaga haguane timbunioire howa ibu daligaore ka *8.1-9.28*

Kerisohanda Habo Nalolene Bi Gahenge yu anda ibu ngelenego daligaore nga *10.1-39*

Keriso ibuni inanaga homo aribia howa binigonaga dunioire nga *11.1-12.29*

Mini mbiraore wulene dunini timbunioire nga *13.1-25*

Bilimu, lalu mo hongo henegobi lamaro binigobi nga

*Ngode Datagaliwabehanda ibu Iginia howa bi lenego ogo*

<sup>1</sup> Bambaore Ngode Datagaliwabehanda inanaga mamali heneruhondo bi dewa haluore lamigi bialubi walia dewa tara taraore halubi ibunaga mana latagi haga hearuha howa ani bigi bialu hene. <sup>2</sup> Ani binigo horo ayu kamarunaga Ngode Datagaliwabehanda ibu Iginia howa ina bibahendehondo bi langialu henego ka. Ngode Datagaliwabehanda ibu Iginia howa dindi bibahendehabi hari daligahabi bibahendehore wabiai hene. Ani bialu ibugua bibahende wabiniyaruni Iginioire ngoni ibuninaga hai



helo Ngode Datagaliwabe ibunime ibu dabo helene. ✧ <sup>3</sup> Ani bialu Ngode Datagaliwabe ibuni wá baya taraorehe kagobi ibu Iginihabi wá ogoni hatagi halu kagoni. Ngode Datagaliwabe ibuni kagobiore ibu Igini kagoni. Ibugua ibunaga bi gibi hongohe ngagome dindiha ngarubi hari daligaha karubi ina kamarubi bibahendeore ibuni yania hai ho kagoni. Ani bialu ibugua wali agali bibahendenaga ko domo waholenaga ibugua halu mbira hangu homo aribia halu ibu dahuliya andaga Ngode Datagaliwabe hongo gibiorehe kagonaga gi tigahayagi pu berenego beda. ✧

*Ngode Datagaliwabe Igini ibu daliga timbuniore kago ogo*

<sup>4</sup> Igini ogoni ibu dahuliyali karubi ndo daliga helonaga helene. Ogonidagua dege Ngode Datagaliwabehanda Igini ogoninaga minibi dahuliyalirunaga mini dindiha lowa ibunaga daligaore wini. ✧ <sup>5</sup> Anigo Ngode Datagaliwabehanda ibunaga dahuliyali karu mbiralihondo lalu, ✧

Í ñ Iginioire kegoni áyu í aba ñ harogo,

lalu ogonidagua naleore dege ka. Bi mendebi Ngode Datagaliwabehanda dahuliyali karu mbiraligo mitangi bialu lalu,

Í Igini ibu helo ibu aba ñ holebero,

lalubi ogonidagua nalene dege ka. <sup>6</sup> Ani nale howa Ngode Datagaliwabehanda ibu Igini mbiraoreore henego dindini ibilalu howa lalu, ✧

Ngode Datagaliwabenaga dahuliyali karu bibahendeme ibu mitangi bialu ibunaga mini yaraga halu holene nga,

lene. <sup>7</sup> Ai Ngode Datagaliwabehanda dahuliyali karunaga mitangi bialu ogodagua lalu, ✧

Ngode Datagaliwabehanda ibunaga dahuliyali karuni puyabu pulagane helalu

ibunaga biabe bia haga karu ira hungu biagane helaga,

lene. <sup>8</sup> Ani lenego Ngode Datagaliwabehanda ibu Igininaga mitangi bialu ogodagua lalu, ✧

Ngode Datagaliwabe-o ñna wali agali karu handame howa haru haabobo bu holebere.

Ína ñnaga wali agali karu handame howa haru halu tihondo tigatiga hanunigo bialu kegoni.

<sup>9</sup> Ína mana tigabi hanuniore bulenego gubalini howa mana ko bulenego hame naleore kegoni. ✧

Irane ogoninaga ñnaga Ngode Datagaliwabe ibugua í dabalalu

ñnaga nenege karuhondo turu holene midagobi ndo

ñnaga mini yaraga halu ñhondoore turu holene daliga ngidagoni,

lene. <sup>10</sup> Ibugua bi mendebi agua lalu, ✧

Anduane Homogo-o ñna piganengi dindi wabialu

ñnaga gime hari daligaha karubi wabirigoni.

<sup>11</sup> Uruni bibahende ereba hai holebira. ✧

Aga bu henego goba halu ereba hagadagua ereba haragola ñni ha ho wiaabo holebere.

<sup>12</sup> Dindibi hari daligabi bibahende ñna aga pau lagadagua pau lalu

aga karulenego golalu mendego karula aribia hagadagua aribia holebira.

Anigoyu ñni kegoni dege ha ho wiaabo halu ñnaga hamaro bulene nawuleore bira,

lene. <sup>13</sup> Ngode Datagaliwabehanda ibunaga dahuliyali karu mbiraligohondo ogodagua lene nawi, ✧

Ínaga waitigi karu ñnaga geme hengedai habelo ñna mo heloliya í ñnaga gi tigahayagi ogoria birabe,

✧ **1:2:** Iba 2.8, Yo 1.3, Eb 1.10 ✧ **1:3:** Ab 2.33-34, 2 Ko 4.4, Kl 1.15-17, 1.20, Hi 8.1, Mo 4.11 ✧ **1:4:** Eb 1.21, Pb 2.9-10 ✧ **1:5:** 2 Sml 7.14, 1 Bit 17.13, Iba 2.7, 89.26-27, Ab 13.33, Hi 5.5 ✧ **1:6:** Lm 8.29, Kl 1.18, 1 Pi 3.22, Mo 1.5, 5.11-14 ✧ **1:7:** Iba 104.4 ✧ **1:8:** Iba 45.6-7 ✧ **1:9:** Ais 61.1, Ab 4.27, 10.38 ✧ **1:10:** Iba 102.25-27 ✧ **1:11:** Ais 34.4, Md 24.35, 2 Pi 3.7, 3.10 ✧ **1:13:** Iba 110.1, Md 22.44, Mg 12.36, Lg 20.42

lalu ogonidagua nalagaore ka.

<sup>14</sup> Aniyagua dahuliyali karuni ti agi aledabe. Ti dinini howa Ngode Datagaliwabenaga biabe biaga mbira wali agalime pele mulene yu helo lowa dahuliyali urunime biamogo bia helo Ngode Datagaliwabehanda dalilenego ka.✧

## 2

### *Ngode Datagaliwabehanda ina pele timbuniore nginigo ogo*

<sup>1</sup> Galone ogoni heneneoreyane hale harimadagua hale ho dungu lo bayuwa yu ndibu lalu hamiya. Ani nabi howa yu hadogoea larimayagua inanaga pele mulene ngidagoni yu waholeore berama. <sup>2</sup> Inanaga mamali heneruhondo dahuliyaliruha howa mana ogoni heneneorego lalu Ngode Datagaliwabehanda lawia henego tihondo lamini. Ani lamialu heagola wali agali marume mana ogoni hale halu bia nabi mo wahayaru tini pani nolene wiadagua nelo mini.✧ <sup>3</sup> Ani bini ngago inahondo pele nginigo galone emene ndo timbuniore ngago lalu bayuwa hale nahe howa mo wahalu harimayagua nde ina yo polene nawulebiraore. Anduane Homogoibunime pele ngulene ogoni pigane lope heneya. Ani lope hayagola wali agali hale hayarume heneneore walia halu inahondo langidagoni.✧ <sup>4</sup> Ani langidagonaga Ngode Datagaliwabe ibugua agalime nabiaga alerubi nahendene ale tara tararubi bini. Ani bialu ibu Dinini kagonaga mugube tara tara ngaru ibuni hame ledadagua mo ta hene. Wali agali biarume ibu iginime langiyago mo henene helobi ibugua nde ani bia tago halu walia hayadagoni.✧

### *Iname pele mulene yu holomaya Yasu ibuni haru kago ogo*

<sup>5</sup> Ngode Datagaliwabehanda wali agalinaga gahenge holene mani wulebiragonaga te lalu kamago ibugua dahuliyali karume wali agali uruni ti haru helo nahelolebira.✧ <sup>6</sup> Ani nabulebiradagua Anduane Homogonaga mbugani bi ogodagua lo nga.✧✧

Ngode Datagaliwabe-o wali agali karu mitangi bu kegoni aginagabe.

Wali agali damene dege karu ina ti nenege hinalu mitangi bu kegoni aginagabe.

<sup>7</sup> Ina wali agali uruni ina emene tigi mbiranaga hangu dahuliyali karunaga andaneha helalu

mani ina mo dunini helalu inahondo wa taraore holenebi mini lene lolenebi ngialu helarigoni.

<sup>8</sup> Ani helalu bibahende karubi ngarubi ina urunime handame howa haru hai helo helarigoni,✧

lalu gilibu nga.

Bi ogoni ogodagua lalu lo nga, Ngode Datagaliwabehanda karubi ngarubi bibahende wali agali karume handame howa haru helo uruni helene ledagoni ibugua karubi ngarubi bibahendeore manda bialu lene. Ani lenedagua uruni bibahende wali agali iname handame howa haru karia ayu de nahende kamagoni. <sup>9</sup> Ani bidagoyu iname Yasu ibu emene tigi mbira hangunaga dahuliyali karu ti daliga helowa ibu mo dindiha helayagoni manda bidama. Ogoninaga Ngode Datagaliwabehanda ina biamogo bulene nawi howa biamogo bia halu Yasu ibugua ina bibahendenaga homa aribia helo lowa ani bini. Ibugua tandaga timbuni nalu homa aribia hayagonaga Ngode Datagaliwabehanda Yasu mo daliga gibiore helalu ibunaga mini mo yaraga henego ayu kago manda bidamagoni.✧ <sup>10</sup> Ngode Datagaliwabehanda bibahende karubi ngarubi wabuwa ibuni handaya ho ka. Ibugua mbirale ogoni binigo Yasu mo baya buruguleore holenenaga ibu tandaga naragome ibunaga waneigini dewaore ibuninaga baya taraore holene yu helo

✧ **1:14:** Iba 34.7, 91.11, Md 18.10, Ab 12.7, Lm 8.17, Ya 2.5, 1 Pi 3.7 ✧ **2:2:** Iba 68.17 ✧ **2:3:** Md 4.17, Mg 1.14, Lg 1.2, Hi 10.28-29, 12.25 ✧ **2:4:** Mg 16.20, Ab 2.22, 14.3, 1 Ko 2.4, 12.4, 12.7, 12.11, Eb 1.5, 1.9 ✧ **2:5:** Hi 6.5, 2 Pi 3.13 ✧ **2:6:** Yob 7.17, Iba 144.3 ✧ **2:6:** Iba 8.4-6 ✧ **2:8:** Md 28.18, 1 Ko 15.25-27, Eb 1.22 ✧ **2:9:** Yo 3.16, Lm 5.18, Pb 2.7-9, 1 Ti 2.6, 1 Yo 2.2, Mo 5.9

lowa ani bini. Ani binigome Yasu ibunioreme waneigini o biaru pele mulene ngagoria haru pialu ka.✠

<sup>11</sup> Yasu ibugua wali agalinaga ko bibahendeore domo wahai halu mo gahenge helaga ka. Ani biagago wali agali tinaga ko domo wahalu mo gahenge hene karu tibi Yasu ibubi ti Aba mbiraore hangu ka. Irane ogoninaga Yasuhanda taga nahe howa tihondo hamene mbalini laga kagoni.✠ <sup>12</sup> Yasuhanda Ngode Datagaliwabehondo ogodagua lo nga,✠

Ína biriru agua biri lalu ina inaga hamene mbaliniru lamulebero.

Ti mo ngoai ho bedagoria

ina inaga mini yaraga halu iba gana lolebero,

leda.

<sup>13</sup> Ibugua bi mendebi ogodagua lo nga, Inaga mini Ngode Datagaliwabe ibunini paga ho holebero, lalu bi tebonebi ogodagua dege lo nga, Ngode Datagaliwabehanda waneigini i baba holomaya ngiraru heba kogoni, lalu gilibu nga.✠

<sup>14</sup> Yasuhanda waneigini layaruni ti wali agali tinginhabi daramahabi howa hono winigo ibubi ogonidagua dege howa ibunaga mini tinginibi gali ibuniore bitagohe hene. Ogoni biyadagoni Yasu homayagome dama Heyolabe homanaga hongo yu kago bo wahole lowa ibugua ani bini.✠ <sup>15</sup> Ani biyagome wali agali homolenaga gi holeneme ti dariba ho haabo hayaru Yasuhanda golope hene.✠ <sup>16</sup> Ogoni Yasuhanda biabe ogoni biyago dahuliyali karu biamogo bule ndo biyagoni. Ogonidagua Anduane Homogonaga mbugani lo ngago ogo, Yasu ibugua Abarahamanaga aguanene karuore biamogo biaga, lalu gilibu nga.✠ <sup>17</sup> Anigo Yasu ibu mini bilinahebi dara halu biamogo biagabi howa ibu Ngode Datagaliwabenaga biabe bialu inanaga loma binigo mo miaga haguane timbuni kago helonaga ibuni agali hamene hearu baba mo mbiraore halu ti heagobiore hene. Ogoni binigo irane ina wali agalime ko bibahende birimago domo waholene wilonaga ani bini.✠ <sup>18</sup> Yasu ibu agali baba bitago ho hayangi ko bibahende wiarume ibu ba handayagobi mo tandaga hayagobi ibunaga wali agali kamaru ko ngaru bibahendeme ba handaragola ibunime ina biamogo bibehe kagoni.✠

### 3

#### *Mosese henegobi ndo Yasu ibu daligaore kago ogo*

<sup>1</sup> Keriso hameigini inaga hamene mbaliniru-o tí Ngode Datagaliwabehanda olo helayaruore kamigoni. Iname Ngode Datagaliwabehondo mini mbiraore wu kamagoninaga Yasu loma binigo mo miaga haguane timbuni helo Ngode Datagaliwabehanda ibu ibilenego Yasu ibuniore bayuwa mitangi bialu hamiya.✠ <sup>2</sup> Mosese ibugua Isaraele wali agali haru holene biabe bialu howa Ngode Datagaliwabehondo mini bilinaheore henedagua dege Ngode Datagaliwabehanda Yasu ibu biabe bilo dabo helenegonaga ibugua Ngode Datagaliwabehondo mini bilinahe howa biabe ogoni bialu hene.✠ <sup>3</sup> Anda mbira bidago hondowa agali anda ogoni biyago mini lene ka lalu anda ibuni mini lene nalabeheore nga. Ogonidagua Mosese nira helowa Yasu ibu timbuni daligaore kago ibu mini leneore helolene nga.✠ <sup>4</sup> Anda bu helama pedaruni agali mbirame binigo bu hama pedagoni. Ogonidagua mbirale bibahendeore Ngode Datagaliwabe ibunime wabu helai henego hai ka.✠ <sup>5</sup> Mosese ibu Ngode Datagaliwabenaga biabe biahaga mini bilinaheore howa ibugua wali agali haru hene. Ani haru howa ibugua Ngode Datagaliwabehanda maha lolebhiraru agua lolebira lalu lamigi bialu hene.✠ <sup>6</sup> Anigo

✠ **2:10:** Lg 24.46, Yo 20.17, Ab 3.15, Lm 8.29, 11.36, Hi 5.9, 10.10 ✠ **2:11:** Md 25.40, Mg 3.35, Yo 20.17, Ab 17.26, Lm 8.29, Hi 10.10 ✠ **2:12:** Iba 22.22 ✠ **2:13:** Iba 18.2, Ais 12.2, Yo 17.6, 17.9-12 ✠ **2:14:** Yo 1.14, 12.31, Lm 8.3, Pb 2.7, Kl 2.15, 1 Yo 3.8, Mo 12.10 ✠ **2:15:** Lm 8.15, 2 Ti 1.7 ✠ **2:16:** Ais 41.8-9 ✠ **2:17:** Pb 2.7, Hi 2.14, 4.15, 5.1-2, 1 Yo 2.2, 4.10 ✠ **2:18:** Hi 4.15-16, 5.2, 7.25 ✠ **3:1:** Eb 4.1, Pb 3.14, Hi 4.14, 5.5, 6.20, 7.26, 8.1, 9.11, 2 Pi 1.10 ✠ **3:2:** Dag 12.7 ✠ **3:3:** Seg 6.12, Md 16.18 ✠ **3:4:** Eb 2.10, 3.9, Hi 1.2 ✠ **3:5:** Dag 12.7

Keriso ibu Ngode Datagaliwabe Iginioire kago ibugua mini bilinaheore howa Ngode Datagaliwabenaga wali agali karu handa gimbu buwa haru kagoni. Iname mani bulebiragonaga mini dunubia howa mini bilinahebi hongohebi wiaabo harimayagua nde ina Ngode Datagaliwabenaga wali agaliore holeberama.✠

*Wali agali Ngode Datagaliwabenaga karu mini ibu halo birulene ngago ogo*

<sup>7-8</sup> Anigo Ngode Datagaliwabe Dinini ibugua bi ogodagua leda,✠✠

Tínaga mamali ala heneru tihondo Ngode Datagaliwabehanda bi lamialu heagola tigua hale howa nahe tingi halu tinaga bu miniha anda polani hondowa Ngode Datagaliwabela waitigi halu hene.

Dindi ko yobi wali agali nahaga wiagoria Ngode Datagaliwabehanda ti haru heagola tigua ibu ba handalu hene.

Ani binigo tigua nde Ngode Datagaliwabehanda tihondo bi larago horo áyu hale harimiyagua nde tí mamalime binidagua nabilimu.

<sup>9</sup> Ngode Datagaliwabehanda lalu,

Dindi ko o biagoria mali pira maria (40) ti haru halu ina bima ibiruru bibahende handai dege howa

tigua i abi kabe hondole ba handalu hene.

<sup>10</sup> Wali agali urunime ani bialu hayagola ina tihondo lemboore howa bi ogodagua laru, Wali agali urume horo bibahendengi hariga koha pialu haabo halu inaga bi lo wirugoni hale halu bibe manga haga karunida, laru.

<sup>11</sup> Ina ti hearuhondo lemboore howa bi hongohe mbira buleore lalu lowirugo,✠

Wali agali urunioire ina dindi ti mini ibu halo birulene muleberogoria naanda polebiraore,

lalu Ngode Datagaliwabe Dinini ibugua ani lene.

<sup>12</sup> I hamene mbaliniru-o tí kamiru aria mbiraliibunaga miniha mana koore bulene ngelo howa mini mbiraore wu hayago wahalu Ngode Datagaliwabe holenehe kago erembira mialu polenego dege de hondowa mamage ho halimu. <sup>13</sup> Ani nabilonaga áyu ogoni howa mana ko buleneme tínaga miniha mo giambe halu mo hondo nahe ngaore Anduane Homogonaga mbugani bi inahondo, Áyu ogonioire, lo ngadagua tíni biamogo bia hagahaga bialuore halimu. <sup>14</sup> Iname pigane howa mini mbiraore wirimagoni yu wa nahe hongo howa yani ho wiaaboore halu homalu waharimayagua nde ina Keriso ibuni heba mandagi haabo holeberama.✠

<sup>15</sup> Anduane Homogonaga mbugani bi lo ngago ogo,✠

Tínaga mamali ala heneru tihondo Ngode Datagaliwabehanda bi lamialu heagola tigua hale howa nahe tingi halu tinaga bu miniha anda polani hondowa Ngode Datagaliwabela waitigi halu hene.

Ani binigo tigua nde Ngode Datagaliwabehanda tihondo bi larago horo áyu hale harimiyagua nde tí mamalime binidagua nabilimu,

lalu gilibu nga.

<sup>16</sup> Ngode Datagaliwabehanda wali agalihondo bi lamialu heagola tigua hale howa nahe tingi halu tinaga bu miniha anda polani hondowa Ngode Datagaliwabe waitigi halu henedaruni arumebe. Uruni ti Isaraele wali agali Iyibi dindi howa Mosesehandanda haru tagira peneru bibahendeme ogonidagua bialu hene.✠✠ <sup>17</sup> Ngode Datagaliwabehanda mali pira mariani (40) keba haabo halu henedagoni wali agali aru bababe. Wali agalime mana ko biaabo halu hearia Ngode Datagaliwabehanda dindi ko biagoria wali agali uruni homo paya payabi lenedaruni baba keba halu hene.✠

<sup>18</sup> Ngode Datagaliwabehanda lemboore halu bi hongo howa lo wialu lalu, Wali agali

✠ **3:6:** Lm 5.2, Eb 2.21-22, Kl 1.23, 1 Ti 3.15, Hi 3.14, 6.11, 1 Pi 2.5 ✠ **3:7-8:** Iba 95.7-11 ✠ **3:7-8:** Har 17.7, Dag 20.2-5 ✠ **3:11:** Dag 14.21-23 ✠ **3:14:** Hi 3.6 ✠ **3:15:** Iba 95.7-8, Hi 3.7-8 ✠ **3:16:** Man 1.1-38 ✠ **3:16:** Dag 14.1-35 ✠ **3:17:** Iba 106.26, 1 Ko 10.10, Yu 5

uruniore ina dindi ti mini ibu halo birulene muleberogoria naanda polebiraore, lalu lenego aihondo lenebe. Wali agali Ngode Datagaliwabe ibula waitigi halu hene uruni tihondoore lene.☆ 19 Irane Ngode Datagaliwabehanda tihondo bi lamiyago hale halu tigua Ngode Datagaliwabehondo mini mbiraore nawi haabo hayagola tinaga miniha mo pe nahenegome Ngode Datagaliwabehanda tinaga dindi mini ibu halo berelo ngeleagoria ubanda holene nawiniyago hendedamagoni.☆

## 4

1 Ngode Datagaliwabehanda ina mini ibu halo berelolene ngulebero lalu lowinigo ogoni ai ayu inanehondo yade ho kagoni. Ani bidago ina mbiraligo mini ibu halo biralimulo ngulebero lalu lowini ngago ogoni dege habo lowa ubanda nahabehe holigo de hondo halimu.☆ 2 Ogoni wali agali ala heneru ti Bi Mana Debene hale henedagua dege ayu inamebi ogoni hale harimagoni. Ala hene uruni tigua bi galoneore ogoni hale howa Ngode Datagaliwabehondo mini mbiraore nawi henegome ti biamogo nabini. 3 Ogonigo ina galoneoreda lalu Ngode Datagaliwabehondo mini mbiraore wu kamarume ibugua mini ibu halo birulene ngulebero lo wiyagoria ibu heba birule ubanda holeberama. Ngode Datagaliwabehanda bi ala lenedagua ayubi lowialu lalu,☆ Ina tihondo kebaore howa bi hongoge mbira buleore lalu lowirugo ogo, Wali agali uruniore ina dindi ti mini ibu halo birulene muleberogoria naanda polebiraore, lenego gilibu ngagoni. Ngode Datagaliwabehanda bambaore dindihabi hari daligahabi wabiniyangi howa ibugua biabe bumaro buwa dege bi ogonidagua lene. 4 Anduane Homogonaga mbugani gilibu ngaru mbiragoha lalu horo kanegonaga ogodagua leda, Ngode Datagaliwabehanda ibunaga biabe bibahende biyaru biai howa horo kaneni mini ibu halo berene, lalu gilibu nga.☆ 5 Ani bini lalu bi ogoni dege Anduane Homogonaga mbugani halu mende ogodagua leda. Ina dindi ti mini ibu halo birulene muleberogoria naanda polebiraore, lo ngagoni.☆ 6 Wali agali ala henerume Ngode Datagaliwabehanda mini ibu halo birulene mo yulene winigo nayaminigo irane tigua Bi Mana Debene hale howa yu tiga nabiyagome ani bini. Ani binigo mini ibu halo birulene ogoni wali agali ibuhondo mini mbiraore wialu karume ubanda helonaga ayu panga dugua ho wiaabo kagoni. 7 Ogoni walia kago Ngode Datagaliwabehanda horo mende lone dabo ngelenego horo ogoni ayu kamagoniore leda. Ani lo hene lowa mali dewa peaha maniore Ngode Datagaliwabehanda Debidiha howa bi latagi henego Anduane Homogonaga mbugani abale gilibu wini langirugo ogo,☆ Ngode Datagaliwabehanda tihondo bi langirago horo ayu hale harimiyagua nde nahalehe tingi halu tinaga bu miniha anda polani hondowa giambe hatagi holamini nahalimu, lalu gilibu nga.

8 Yosua ibugua wali agali biaru dindi halo birulene Ngode Datagaliwabehanda mulebero lalu lo wiyago midale Ngode Datagaliwabe ibugua horo mende lalu naledaleore.☆ 9 Ani bidago Ngode Datagaliwabenaga wali agali karume Ngode Datagaliwabe ibuni horo kaneni mini ibu halo birayadagua tibi nde mini ibu halo birulene wia ho ngagoni. 10 Ngode Datagaliwabehanda mini ibu halo birulene ngulebero lalu lo wiyagoria mbirali ubanda haragome ibu ogodagua bulebira. Ngode Datagaliwabehanda ibuni bibahende wabiai howa mini ibu halo birayadagua ibubi ibuninaga biabe bialu hayagonaga mini ibu halo birulebira.☆ 11 Isaraele wali agalime Ngode Datagaliwabehanda tihondo bi lamiyago hale ha howa yu tiga nabiyagome tinaga mini ibu halo birulene mule lo wiyago

☆ 3:18: Man 1.34-35, Hi 3.11 ☆ 3:19: Hi 4.6 ☆ 4:1: Hi 12.15 ☆ 4:3: Iba 95.11, Hi 3.11, 3.14 ☆ 4:4: Pig 2.2, Har 20.11, 31.17 ☆ 4:5: Iba 95.11 ☆ 4:7: Iba 95.7-8 ☆ 4:8: Man 31.7, Yos 22.4 ☆ 4:10: Pig 2.2, Hi 4.4



habo lene. O habo layadagonidagua ina mbiraligo mini ibu halo birulene ogoriani ubanda naholene wuligo ina hangu hangume manga nahe hibuoire lalu hamiya.✧

<sup>12</sup> Ngode Datagaliwabenaga bi wai bulene ayu tibu ne kiroba gadeleore ngagobi ndo hongo taraorehe kagome biabe bialu kagoni. Bi ogonime tinginiha ne gadeleoregome mini dininila ngola haragohabi kuni dundugunila gimbu bidagohabi podama anda piaga. Bi ogonioreme wali agalinaga minime hame ledaru manda ngaru ogobiore wu kami lalu daba ki buwa langiaga.✧ <sup>13</sup> Ani biagago mbirale mbira do howa Ngode Datagaliwabe ibu de nahendene wia do hene mbira nawiore. Dindihabi hari daligahabi bibahendeoreibunaga deni panigi angala paya paya bu wiai kagoni. Ina bibahendeme mbirale beramaru Ngode Datagaliwabe ibunihondoore inane hangu hangu howa ogobiore biru lalu lamigi buleberama.✧

*Yasu ibu inanaga loma binigo mo miaga haguane timbuni daligaore kago ogo*

<sup>14</sup> Inanaga loma binigo mo miaga haguane timbuni daligaore kago ibu Ngode Datagaliwabe kagoria hole anda penego ogoni ibu Ngode Datagaliwabe Iginioire Yasu ka. Ani bidagonaga iname ibuhondo mini mbiraore wu kamagoni yu ndibu lowa haabo hamiya.✧ <sup>15</sup> Iname mana ko nabule lowa nabulenenaga hongo nahe kamaria inanaga loma binigo mo miaga haguane timbuni ogoni ibu hondowa dara nahaga ndo dara timbuniore haga kagoni. Ibugua ina hongo nahe kamago manda biai ho ka. Inanaga loma binigo mo miaga haguane timbuni ogoni ibuni mana ko bulene bibahende wiarume inahondo ko mo bia halu hagadagua ibuhondobi mo bia halu hearia ibugua ko uruni bia nabi hondo wandiai halu wayaliore henego ka.✧ <sup>16</sup> Anioirego ina mbirale buru padamagonaga Ngode Datagaliwabe ibugua ina biamogo bulene nawi howa biamogo bilo iname ibuhondo mini mbiraore wuwa bu miniha hada ho yalu kaware ibu kagoria hapara ho hamiya. Iname ogoriani poramagola ibugua dara holene ngirago yu howa gendabi mbira ngagola ibugua biamogo bulene nawi howa biamogo birago handa walia holeberama.✧

## 5

<sup>1</sup> Loma binigo mo miaga haguane timbuni bibahende tigua wali agali karume ko biragonaga nogo tara tara bo lomabu mia helobi mbirale tara tara Ngode Datagaliwabehondo miniru lomabu mia helobi Ngode Datagaliwabenaga biabe ogoni bilo ibuni aria karuha howa dabalul helaga ka. <sup>2</sup> Loma binigo mo miaga haguane timbuni ogoni ibuni nde mana maruha hongo nahe gedaore dege howa ibugua wali agali maru mana manda nabi hearubi mini pu tara howa mana mbira liahe bialu hearubi hondowa ibugua bayuwa bu miniha tihondo dara halu biamogo bibehe ka.✧ <sup>3</sup> Irane ibuni ogonibi dege kagonaga ibugua wali agali tinaga mana ko binirunaga nogo tara tara bo lomabu mia hagadagua ibuni ko biragonagabi bo lomabu miaga.✧ <sup>4</sup> Anigo mbiralime ibuni hangu mitangi bialu, Loma binigo mo miaga haguane timbuni i hole, laluibunime nadabaga. Ani nabi howa Ngode Datagaliwabe ibunime Arono loma binigo mo miaga haguane timbuni helo dabalul helenedaguaore mbira dabowa agali ogo helaro lalu Ngode Datagaliwabe ibuni hangume helaga ka.✧

<sup>5</sup> Ani biagadagua dege Keriso ibugua ibuni hangume loma binigo mo miaga haguane timbuni i holiya lowa ibuni dabene ndo ka. Anigo Ngode Datagaliwabehanda ibuhondo bi ogodagua leda,✧

Iginioire i kegoni. Ayu i Aba i harogoni,

lalu lene. <sup>6</sup> Ngode Datagaliwabehanda bi mendebi ogodagua dege leda,✧

✧ **4:11:** Hi 3.12, 3.18-19 ✧ **4:12:** Ais 49.2, Yar 23.29, Yo 12.48, 1 Ko 14.24-25, Eb 6.17, Mo 1.16, 19.15 ✧ **4:13:** Yob 26.6, Iba 33.13-14, 90.8, Min 15.11 ✧ **4:14:** Hi 3.1, 7.26, 10.23 ✧ **4:15:** 2 Ko 5.21, Hi 2.17, 7.26, 1 Pi 2.22, 1 Yo 3.5 ✧ **4:16:** Eb 2.18, 3.12, Hi 10.19-22 ✧ **5:2:** Hi 2.18, 4.15, 7.28 ✧ **5:3:** LBM 9.7, 16.6, Hi 7.27 ✧ **5:4:** Har 28.1 ✧ **5:5:** Iba 2.7, Yo 8.54, Hi 1.5, 1.8 ✧ **5:6:** Iba 110.4, Hi 6.20, 7.1, 7.17, 7.21

Loma binigo mo miaga Melegesedege ibu henegobi dege  
 íore loma binigo mo miaga haho wiaabo holebere,  
 lalu lenego gilibu nga.

<sup>7</sup> Yasu ala dindini dalu heneyangi howa ibuni nahomole Ngode Datagaliwabehanda biamogo bibehe kago manda buwa ibugua ibuhondo dugu bialu bi dalimu lalu hene. Ani lalu howa Yasu ibunaga hame mo dindiha halu Ngode Datagaliwabenaga mini mo yaraga hayagome Ngode Datagaliwabe ibugua Yasunaga bi layago hale hene.✧

<sup>8</sup> Ibu Ngode Datagaliwabe Iginioire howa ibugua tandaga nolene nawinini nayagome Ngode Datagaliwabehanda hame leadagua bialu holene manda bini.✧ <sup>9</sup> Ani buwa ibu baya buruguleore howa ibugua bi larago wali agalirume hale halu birarunaga pele miaabobo bulene tene Yasu ibuniore haabo henego kagoni. <sup>10</sup> Ani bidago Ngode Datagaliwabehanda loma binigo mo miaga haguane timbuni Melegesedege henegodagua Yasu ibubi loma binigo mo miaga haguane timbuniore ka lalu lowini.✧

*Yasuhondo mini mbiraore wu karu wahalú dai bulamini lalu te lenego ogo*

<sup>11</sup> Te ogoninaga tíhondo dewa langulene ngagoyu tigua hale halu abale mo yai nahe hendoreore mitangi bigi bialu kamigome bayuwa ogodagua lalu iname langiai habe nahe kamagoni.✧ <sup>12</sup> Tí áyu mana lawai haga hangu hama polenengigoyu lone mbiralime Ngode Datagaliwabe mana pigane lawai hene biago dege tí lawai ho dai bilo kamigonida. Tomo daliahego nama polene tu lone andu no dai bialu kamigoni.✧✧ <sup>13</sup> Mbirali andu no dai bialu kayagua ibu wene odahe dege haabo howa ibugua mana bayale ogoda ko ogoda lalu bayuwa dabolene mini nawi kagoni.✧ <sup>14</sup> Tomo daliahe nolene ngaru wali agali bogabi karunaga nga. Uruni ti bogabi howa tigua mana bayale ogoda ko ogoda lalu bayuwa dababehe kagoni.✧

## 6

<sup>1</sup> Ani bidago iname Kerisonaga mana pigane hale holene winidagua hale harimagoni ngelowa ai mini bogabi halu mana hongohe langiraru hale halu puabo hama. Iname mana ko habane nabulene ngarunaga biabe bialu harimaru erembira mialu Ngode Datagaliwabehondo mini mbiraore wu harimagonaga tene ogoni dege lone wu holene nawi.✧ <sup>2</sup> Wali agali baboraya bu holenenagabi wali agali dabo bagi ho helararu hagianeni gi wulenenagabi wali agali homeneru heyu holebiragonagabi haabobo bu hole daba ki holenenagabi mana uruninaga lone lawai ho dai bulene nawi. <sup>3</sup> Ani bidago iname hatagi halu puabo hama. Ani bulumaya Ngode Datagaliwabe ibugua henge ngiyagua ogodagua bimija.

<sup>4</sup> Ogonigo wali agali Yasuhondo mini mbiraore wu howa wahalú dai biyaru ti mini beregedalu lone haru dai agua bilabehebe. Uruni ti ala Ngode Datagaliwabenaga wá holenehayagi hayagobi tigua dahuliya andaga howa mbirale bame miyago dende handayagobi Ngode Datagaliwabe Dinini tiha ibu hayagoni.✧ <sup>5</sup> Tigua Ngode Datagaliwabe bi mana manda bu hondowa bayaledalo hendene. Ani buwa tigua mani holebiragonaga hongo ogobiore bi hongohe layago hendene. <sup>6</sup> Ani biaiore hayago howa tigua Yasuhondo mini mbiraore wu hayago wahalú dai biya handarimini. Wali agali uruni tigua Ngode Datagaliwabe Iginibiago ira bangani lone ba para halu ibunaga mini wali agali dewa bu kagoria mo taga haragoninaga ti mini beregedelo lone haru dai bibe naheore wulebira.

<sup>7</sup> Ngode Datagaliwabehanda dindi mo baya haragola dalu ibilalu dindi ogoniha anda poragola agali dindi ogoni alu payabu ngarume mbirale baya hangarago galone

✧ 5:7: Yo 12.27, 17.1 ✧ 5:8: Pb 2.8, Hi 3.6 ✧ 5:10: Hi 2.10, 5.6, 11.40 ✧ 5:11: Md 13.15, Yo 16.12, 2 Pi 3.16  
 ✧ 5:12: 1 Ko 3.1-3, Hi 6.1 ✧ 5:12: 1 Ko 3.2 ✧ 5:13: 1 Ko 13.11, Eb 4.14, 1 Pi 2.2 ✧ 5:14: Ais 7.15, Lm 16.19,  
 1 Ko 2.14-15, Pb 1.10 ✧ 6:1: Ab 8.14-17, 17.31-32, 19.4-5, Lm 2.16, Pb 3.12-14, Hi 5.12, 9.14 ✧ 6:4: Md 12.31, Ga  
 3.2, Eb 2.8, Hi 10.26-27, 10.29, 10.32, 1 Pi 2.3, 2 Pi 2.20-21, 1 Yo 5.16

bibehe anda haragola lini do naga. <sup>8</sup> Anigo dindi ogoriani mamunali aniherubi datanirubi hangu anda hayagua urunime galone nabibehedagola ogoni ibu Ngode Datagaliwabenaga ha holenehayagi kagola irame dalu do ereba haiore helolebira.✧

<sup>9</sup> Ani anigo nenege turubiru-o iname bi ogonidagua larimayagua tí bayale bulenehayagi kami mitangi bialu kamagoni. Iname manda bialu howa tí pele minigohayagi howa turu holene bayaore yu kamilo manda buwa laramagoni. <sup>10</sup> Ngode Datagaliwabe ibu maruhondo gubalini halu maru handabe manga haga ndo ka. Tígua Keriso hameigini karuhondo biamogo birimigo bia ho ngamigome Ngode Datagaliwabenaga gubalini holene ogobi nga lalu walia harimi. Biabe uruni bialu kamigonaga ibugua embeda naholebira.✧ <sup>11</sup> Tígua Ngode Datagaliwabehanda mani mbira bulebirago lowa mini dunubia ho kamigo heneneore bia pani holebiragonaga iname hame timbuniore lo kamago tí hangu hangu kamigome Ngode Datagaliwabe gubalini timbuni howa biabe bumaro bule bilimulo hame ledama.✧ <sup>12</sup> Tígua áyu bialu kamigoni howa bibe manga halimulo iname hame nale kamagoni. Tígua wahalu pu ndo wali agali marume mini mbiraore wuwa ema nabi howa hibu lalu kadagua tíguabi ani dege beramigola Ngode Datagaliwabehanda mbira ngulebero lowiyago yuleberami.✧

### *Ngode Datagaliwabehanda mbira biaore bulebero lowinigo ogo*

<sup>13</sup> Ngode Datagaliwabehanda Abarahamahondo mbira bulebero lowiningi ibugua mbira hongo howa lowialu bulebero lowiyago biaore bulebero lalu lamini. Bi ogoni lowule howa agali mbira Ngode Datagaliwabe ibuni timbuni mini daligawi kagobi mbira nahe ibuni hangu timbuni daliga henego ibuni mini lalu bulegobiore bi hongohe lowini.✧ <sup>14</sup> Ani lowa Ngode Datagaliwabehanda Abarahamahondo lalu, Ina í biamogo bialu íhondo aguanene dewaore ngulebero, lalu lowini.✧ <sup>15</sup> Abarahamahanda ema nabi howa hibu lalu ngilo lowa hondo haabo hene. Ani hondo hearia Ngode Datagaliwabehanda mbira ngulebero lalu lowiyago Abarahama ibugua mo yini. <sup>16</sup> Mbiralime mbira bule bi hongohe lowule howa agali ibuni kagobi ndo mende mini daligawi kagonaga mini lalu mbira bulegobi lowiaga. Ani lowiagago wali agalime bi o lowiyago mo wahole lowa bi anda nahelo mbirali biagome bi lowiyadaguore bule lowa ani biaga.✧ <sup>17</sup> Ani biagago Ngode Datagaliwabehanda bule lowiyago mani yu holebiraruhondo beregeda nabi lowiyadaguore bulebira manda bilo ibugua bi hongoheore lalu lo wiatago hene.✧ <sup>18</sup> Ani binigo bi kira ogoni Ngode Datagaliwabehanda bulebero lalu lowiyagobi hongo howa biaore bulebero lalu lo wiatago hayagobi bi mende lo aribia halu ibugua lahondo habe naheore ka. Anigo ina ibuha holene bayale winiyane handa walia howa kamaru ibugua inahondo ngule lowiyagoni ngiaore bulebiragonaga elahe howa ibuhondo mini dunubia holene yani ho hamíya.✧ <sup>19</sup> Ngode Datagaliwabehanda inahondo ngule lowiyagoria hole lowa iname mini dunubia ho kamagoni mbirale gendabi timbuni ema nabibeheme hende haradagua bidagola kama. Ani bidago ha do holenebi mini hana ho holenebinaga mini dunubia ho holene ogoni dahuliya andaganaga Hobane Loma Bia Heneore agame hobaki bu ngagoria anda pialu pu bo ledagoni.✧ <sup>20</sup> Ogoriani ina mani pu holomaya Yasu inanaga biamogo bia haga howa ibugua ala puwa loma binigo mo miaga haguane timbuni Melegesedege ibugua bialu henegodagua dege ibubi bialu ha ho wiaabo henego ka.✧

## 7

### *Loma binigo mo miaga Melegesedege henego ogo*

✧ **6:8:** Pig 3.17-18 ✧ **6:10:** Lm 15.25, 2 Ko 8.4, 1 Te 1.3, 2 Te 1.6-7, 2 Ti 1.18, Hi 10.32-34 ✧ **6:11:** Kl 2.2, Hi 3.6, 3.14 ✧ **6:12:** Hi 10.36 ✧ **6:13:** Pig 22.16-17 ✧ **6:14:** Pig 22.16-17 ✧ **6:16:** Har 22.10-11 ✧ **6:17:** Lm 11.29, Hi 11.9 ✧ **6:18:** Dag 23.19, 1 Sml 15.29, Hi 12.1 ✧ **6:19:** LBM 16.2-3, 16.12, 16.15, Hi 9.7 ✧ **6:20:** LBM 16.2-3, 16.12-15, Iba 110.4, Hi 3.1, 5.6, 5.10, 7.17, 8.1, 9.24

<sup>1</sup> Melegesedege ogoni ibu Saleme wali agalinaga kini howa Ngode Datagaliwabe Daligaorene Daliga kagonaga loma binigo mo miaga hene. Abarahama ibu wai bialu kini maria balu dai bialu hearia Melegesedege ibu Abarahama lola howa ibugua Abarahama biamogo bilo Ngode Datagaliwabehondo bi lahalu hene.✧ <sup>2</sup> Ani biyagola Abarahamahanda mbirale wai bialu howa mo yalu ibiyaru pini dege dege Melegesedegehondo mini. Melegesedegenaga mini winigo irane kira ngago mbirago ogo, Mini Tigabi Wulenenaga Kini, lalu wini. Ai irane mendego ogo, Ibu Saleme wali agalinaga kini howa ibu mini Mo Palia Holenenaga Kini, lalu wini. <sup>3</sup> Melegesedege ibu ajiya abala henegobi ibu mamali henegobi ogodagua hene lalu mbira nalowiore. Ibu hono winigobi homenegobi ogodagua bini lalubi nalowi dege. Ibu Ngode Datagaliwabe Iginini ale howa loma binigo mo miaga haho wiaabo holebira.✧

<sup>4</sup> Ani holebirago ibu agali daligaore henego mitangi bidamigoni. Inanaga mamali mini lene henego Abarahama ibugua mbirale wai bialu howa miyaru pini dege dege Melegesedege mini.✧ <sup>5</sup> Ani binigo Libainaga aguanene heneru ti loma binigo mo miaga agali howa Mosese heneyangi Mana lowini ngagome, Tigua Isaraele wali agaliha howa mbirale pini dege dege mo yaore bilimu, lo ngago ogoni tini ariaha howa mo yulene wini. Tini aria uruni Abarahama aguanene hene kayaguabi mo yulene wini.✧ <sup>6</sup> Melegesedege ibu Libai aguanene ndo howa ibugua mbirale pini dege dege Abarahamaha howa mo yuwa Abarahama biamogo bilo Ngode Datagaliwabehondo bi lahalu hene. Ngode Datagaliwabehanda agali mbiragohondo, Nguleberoore, lowiyaru miyagola mo yinigo Abarahama ibuniore ogoni. <sup>7</sup> Heneneore ogo mbiralime mendeali biamogo bialu mo turu hagago ibugua mendeali biago bolangua halu daligaore ibu ka. <sup>8</sup> Loma binigo mo miaga agali ti homagarume mbirale pini dege dege mo mogo bialu haga. Ani hagago ai Melegesedegenaga lalu Anduane Homogonaga mbugani bi ledadagua mbirale pini dege dege mo mogo biyago mbirali haho wiaabo holebiragome mo mogo bini.✧ <sup>9</sup> Bi ogoni ogodagua larama. Abarahamahanda mbirale pini dege dege minigodagua Libai ibuguabi mini. Mbirale pini dege dege minigo Libai aguanenerume ilu mogo bini. <sup>10</sup> Melegesedege ibu Abarahama lola henengi Libai nahono wiaha ibu mamali Abarahama tinginiha hene iname labehe kamagoni.

<sup>11</sup> Libai ariarume loma binigo mo miaga howa biaga wiadagua bialu Mana lowini ngago Isaraele wali agali mo mini. Libai ariarume loma binigo mo miaga howa biabe biaga wiadagua bialu baya buruguleore bidale Arono ariaha howa ndo Melegesedege ariaha howa hapani holene henge nangale. <sup>12</sup> Anigo loma binigo mo miaga Libai aria wahalu aria mende ho aribia haragola nde mana lo ngarubi lone lowia aribia holene nga. <sup>13</sup> Inanaga Anduane Homogo mitangi bialu bi uruni longago ibu hameigini tara hene. Ani binigo Anduane Homogo hameigini henego aria mbirali loma binigo mo miaga howa biabe bialu nahene. <sup>14</sup> Ibu hameigini Yuda aria howa taba heneneo manda biai kama. Mosese ibugua loma binigo mo miaganaga te lalu howa Yudanaga hameigini lalu nalene.✧

### *Loma binigo mo miaga Melegesedege hayagobi mende henego ogo*

<sup>15</sup> Ogoninaga galone mo waliaore halu loma binigo mo miaga tara hapani hayago ibu Melegesedege hayagobi ka. <sup>16</sup> Ibu loma binigo mo miaga heleneo agali bime bulene nabulene lalu lowinirume ndo haabobo holene hongoheoreme heleneo ogoni ibu haho wiaabo holebira. <sup>17</sup> Ogoninaga bi Anduane Homogonaga mbugani ogodagua longago, Iniore Melegesedege hayadagua loma binigo mo miaga ha ho wiaabo holebere, lalu gilibu nga.✧ <sup>18</sup> Bi ala lowini ngaru hongo nahalu biamogo bibe naheyagola mo wahene.✧ <sup>19</sup> Mosese heneyangi Mana lowinigome mbirale mbira mo baya buruguleore

✧ 7:1: Pig 14.17-20 ✧ 7:3: Iba 110.4 ✧ 7:4: Pig 14.20 ✧ 7:5: Dag 18.21 ✧ 7:8: Hi 5.6, 6.20 ✧ 7:14: Pig 49.10, Ais 11.1, Md 2.6, Mo 5.5 ✧ 7:17: Iba 110.4, Hi 5.6 ✧ 7:18: Lm 8.3, Ga 4.9

nahabehe wini. Ani binigo áyu mini dunubia ho holene bayaleoreme ngidago ogoniha howa ina Ngode Datagaliwabe kagoria kaware hapara habehe kamagoni.✧

<sup>20</sup> Loma binigo mo miaga tara ogoni Yasu helalu howa Ngode Datagaliwabehanda heneneore lowa bi hongohe lowialu helene. Anigo agali maru loma binigo mo miaga heleneru heangi ti henene bi hongoheore lowialu helene ndo. <sup>21</sup> Anigo Yasu ibu loma binigo mo miaga mbira helene kago Ngode Datagaliwabehanda bi hongo howaore lowinigome helene. Ani helalu Ngode Datagaliwabehanda ibuhondo lalu,✧

Anduane Homogo ibugua bi hongo howaore lowiyago wuwa lo beregeda nabuleore bira.

Ína loma binigo mo miaga ha ho wiaaboboore bulebere, lalu lowini. <sup>22</sup> Anigo Yasu ibu loma binigo mo miaga baya taraore hene kago lalu bi habo nalolene ala lowiyago bolangua howa wulebiragonaga manane Yasu ibu ka.✧

<sup>23</sup> Loma binigo mo miaga ala henego ti homenegome tigua biabe bia ho wiaabo nahabeheyagola dewa ha aribia haga hene. <sup>24</sup> Anigo Yasu ibu ha ho wiaaboore halu ibugua loma binigo mo miaga howa biabe bialu kago biairi halu mendealime ha aribia holene irane nawulebira. <sup>25</sup> Ani bidago Yasuhanda ha ho wiaabo howa Ngode Datagaliwabhondo wali agalinaga hongo howa lahalu kagome ibuniha howa bibahende Ngode Datagaliwabe karia poraru ibugua áyu ogonibi horo bibahendengibi pele miaaboore haga ka.✧

<sup>26</sup> Yasu ibu Loma Binigo Mo Miaga Haguane Timbuniore howa ibugua inanaga mbirale buru pale kamaru bibahendeore ngiaga ka. Ibu baya gibi taraore howa ibuha lehebi mana kobi mbira nawiorego ko biaga karu kagoria nahe ibu habagi howa hari daligahayagi bolangua ho heleda.✧ <sup>27</sup> Yasu ibu loma binigo mo miaga haguane timbuni maru karubi ndo. Tigua horo bibahendengi tininaga ko domelobi mani wali agalinaga ko domelobi mbirale bo lomabu miaga wini. Yasu ibuni bo loma bia hayangi halu mbira ogoni hangu biyagome horo bibahendenaga bo lomabu miai hene.✧ <sup>28</sup> Mosese heneyangi Mana lowini ngagome agali maru tigabi ndo hearu loma binigo mo miaga haguane timbuni helo dabo helaga. Ani helaga binigo mani Ngode Datagaliwabehanda, Mbira bulebero, lo wialu bi hongo howaore lo wiatago henegome ibu Igini loma binigo mo miaga Haguane Timbuniore baya buruguleore ha ho wiaabo helo dabo heleneo ka.✧

## 8

### *Yasu inanaga Loma Binigo Mo Miaga Haguane Timbuni kago ogo*

<sup>1</sup> Bi o larimaruni irane inanaga Loma Binigo Mo Miaga Haguane Timbuni ogonibi kago dahuliya andaga howa ibu Ngode Datagaliwabe Daligaorene Daliga kagonaga haru howa biragane gi tigahayagi beda lalu larimagoni.✧ <sup>2</sup> Yasu ibu Loma Binigo Mo Miaga Haguane Timbuni howa Balai Andaha Loma Bia Heneore Hobane heagoria howa biabe bialu ka. Balai anda henene ogoni agalime bini ndo Anduane Homogohanda helenego ka.

<sup>3</sup> Dindini howa loma binigo mo miaga haguane timbuni mbira mbira ha aribia hagarume Ngode Datagaliwabhondo mbirale tara tara bu milobi nogo tara tara bo loma bialu milobi dabo helaga. Ani biagago inanaga Loma Binigo Mo Miaga Haguane Timbuni kago ibuguabi Ngode Datagaliwabhondo mbirale bo mulene nga.✧ <sup>4</sup> Yu wali agalinaga Mana lowini ngadagua loma binigo mo miaga karu tigua Ngode Datagaliwabhondo mbirale lomabu mialu kagoni. Ani bialu kago Yasu ibu áyu dindini kale ibu loma binigo mo miaga holene nawidale. <sup>5</sup> Loma binigo mo miagame dindini howa bialu

✧ 7:19: Lm 8.3, Ga 2.16, Eb 2.18, Hi 6.18, 9.9 ✧ 7:21: Iba 110.4, Hi 5.6 ✧ 7:22: Hi 8.6, 12.24 ✧ 7:25: Lm 8.34, 1 Ti 2.5, Hi 9.24, 1 Yo 2.1 ✧ 7:26: Eb 1.20, Hi 3.1, 4.15, 8.1 ✧ 7:27: LBM 9.7, Lm 6.10, Hi 5.3, 9.12 ✧ 7:28: Hi 2.10, 5.1-2, 5.9 ✧ 8:1: Iba 110.1, Eb 1.20, Kl 3.1, Hi 1.3, 3.1, 10.12, 12.2 ✧ 8:3: Eb 5.2, Hi 5.1, 9.14



kagoni dahuliya andagani biagane tene ibuni ngagonaga manane ale bialu ka. Ani bialu kagoni Mosese heneyangi ogonibi dege wini. Ani winigo Mosese ibu Balai Anda bule manda biyagola Ngode Datagaliwabehanda ibuhondo lalu, Hari Sainaini howa walia harudaguaore bibahende biai holene nga manda bibe, lene.✠ 6 Anigo áyu tinaga loma binigo mo miaganaga biabe bulene miyago nira lowa Yasu ibunaga loma binigo mo miaga biabe daligaore nga. Ogonidagua dege Ngode Datagaliwabela wali agalila Yasu ibugua dombegua howa bolangua holenaga habo nalolene bi mo hongo ho lowinigo nga. Bolangua holenaga habo nalolene bi ogoni tene Ngode Datagaliwabehanda, Wali agali mo bayale holebero, lalu lowinigome nga.✠

7 Habo nalolene bi pigane lowinigo karulape lowinidale nde habo nalolene bi halu mende lowulene nangale.✠ 8 Anigo Ngode Datagaliwabehanda ibunaga wali agali karunaga ko mbira wiago hondowa ogodagua leda,✠ Anduane Homogohanda lalu, Ina habo nalolene bi gahenge Isaraele wali agalibi Yuda wali agalibi tihondo lo wuleberogo ogonaga horo kaware ibira.

9 Ina bambaore tinaga mamali Iyibini howa ti gini yalu haru tagira pirungi ala tawenaga habo nalolene bi lo wiru. Ai gahengenaga habo nalolene bi áyu lo wuleberogo ala tawenaga biagobi ndo lowulebero.

Ala tawenaga lowirugo tigua nabiyaagola ina ti handaya nahe yu pe haru.

10 Ina horo mani ibulebiragonaga Isaraele wali agalihondo habo nalolene bi lo wuleberogo ogo, Anduane Homogohanda lene.✠ Ina inaga bi lowini ngoruni tinaga miniha mo wialu tinaga bu habaneha gili bule dege bero.

I tinaga Ngode Datagaliwabe holebero. Ti nde inaga wali agali holebira.

11 Isaraele wali agali uruni tigua tinaga nenegealiruhondobi ti dameneruhondobi lalu,✠

Anduane Homogo manda bia, lalu lawai holene nawulebira. Ogoninaga irane ti bibahende emene karumebi timbuni karumebi i manda biai ho holebira.

12 Ani bulebirago ina tinaga ko biyaru domo wahalu✠ tigua nakarulape biyarubi mitangi bia dai nabulebero, lalu lene. 13 Ngode Datagaliwabehanda habo nalolene bi gahenge laragonime habo nalolene bi bamba lowinigo mo haragaya helara. Mbirale mbira haragaya hayagua abale togo bialu ereba holebira.

## 9

*Dindi ogoriani howabi dahuliya andagani howabi Ngode Datagaliwabe mitangi bialu lotu lolenenaga ngago ogo*

1 Habo nalolene bi ala tawe lowinigome, Lotu ogodagua lalimu, lo wialu Balai Anda agali degeme binigoria lotu lolenagabi bia dege bini.✠ 2 Balai Anda bu helowa hobaki henego hobane tagirahayagi Loma Bia Hene Hobane laga wini. Hobane ogoniha lamu hale wiagane iranebi tebolo dagiani mberedi Ngode Datagaliwabhondo lomabu mini wiaganebi wini.✠ 3 Balai Anda ogoniha labolabo timbunime hobaki binigo

✠ 8:5: Har 25.40, Dag 8.4, Ab 7.44, Kl 2.17, Hi 9.23 ✠ 8:6: 2 Ko 3.6-9, Hi 7.22, 9.15 ✠ 8:7: Hi 7.11, 7.18 ✠ 8:8: Yar 31.31-34 ✠ 8:10: Seg 8.8, Hi 10.16 ✠ 8:11: Ais 54.13, Yo 6.45, 1 Yo 2.27 ✠ 8:12: Lm 11.27, Hi 10.17 ✠ 9:1: Har 26.1-30 ✠ 9:2: Har 25.23-40, 26.1-30

hobane mende tamuhago mini Loma Bia Heneore Hobane laga wini.✧ <sup>4</sup> Hobane ogoniha dabu mbira ngolome wabu ngelenego ogoriani mbirale ngabilo mini inisenesi Ngode Datagaliwabehondo lomabu delagane winigobi Habo Nalolene Bi lowinigonaga Mbogoyi ngolome para haamehe biagobi wini. Mbogoyi ogoniha be mbira ngolome wabinigoha mena winigobi ala Arononaga ira halimbu ogoriani yuni doaille winigobi ege tole kirani bi pira gilibu winigobi heba mandagi wini.✧ <sup>5</sup> Mbogoyi wiagoria emene daligani dahuliyali handalehe kira babaganehe Ngode Datagaliwabe ka manda bilonaga ngolome wabuwa helene. Libunaga babaganeme Mbogoyi biagonaga panga wali agalinaga ko domaga laga ngagoria yula dambi ho helene. Anigo ogodagua bini lalu bibahende ngaru áyu garealo bagabu langiai holene henge nawi.✧

<sup>6</sup> Mbirale uruni mo tiga biagago ogodagua biaga. Horo bibahendengi loma binigo mo miaga biaru ti Balai Anda hobane tagirahayagi bulene winidagua bule piaga wini.✧ <sup>7</sup> Ani biaga winigo loma binigo mo miaga haguane timbuni ibuni hangume hobane mende tamuhayagi piaga winigo ogoni mali mbiranaga horo mbira hanguni piaga wini. Pialu howa ibugua nogo tara tara bo lomabu miyarunaga darama hambuwa ko ibuni binigonagabi wali agalinaga ko tinime bero lalu bini ndo manda nabi howa binirunagabi Ngode Datagaliwabehondo mia hole yalu anda piaga hene.✧ <sup>8</sup> Balai Anda biago haabo kagola Ngode Datagaliwabe Dinini ibugua mana biagane wini bibahende ngaru anda hobane mende tamuhayagi Loma Bia Heneoreha polene panga dugua nahe wene nga lalu bayuwa walia ka.✧ <sup>9</sup> Balai Anda ogoni te lalu lama ibirimagoni áyu kamagonaga manane lalu irane mo walia ka. Bi ogoni galone Ngode Datagaliwabehondo mbirale bu mulenerumebi nogo tara tara bo lomabu mulenerumebi uruni bibahendeme wali agali Ngode Datagaliwabe mitangi bialu lotu laga karunaga mini mo bayale nahagaore nga.✧ <sup>10</sup> Mana winidaruni irane tigua tomo iba naganebi wayawaya tara tara biaganebi mana uruni hangunaga wini. Urunidagua tingini tagirahayagi biagane winigo mani Ngode Datagaliwabehanda mana gahenge mo helolebiragonaga horo tu helo lowa ani biaga wini.✧

<sup>11</sup> Ani bialu henego Keriso ibu mbirale bayale ngarunaga Loma Binigo Mo Miaga Haguane Timbuni howa abale íbu hene. Ibuwa balai andaha biabe bialu kago balai anda ala henego nira lowa ai áyu balai anda daligaorebi baya buruguleorebi ogoniha bialu ka. Ani ha kago balai anda ogoni agali gime wabinibi bibahende wabini ngaru ariabi ndo ka.✧ <sup>12</sup> Keriso ibu balai anda biagoha anda piyangi Ngode Datagaliwabenaga Loma Bia Heneore Hobane wiagoria halu mbira hangu anda puwa haabo ka. O anda piyadagoni ibugua memenaga daramabi nogo bulumaganaga daramabi yalu Ngode Datagaliwabehondo mia hole ndo pene. Uruni miradagua ibugua ibuninaga daramame ina haabobo holomayanaga pele ngule yalu pene.✧ <sup>13</sup> Mana lowinigo ngadagua bule wali agali Ngode Datagaliwabenaga deni howa dodoheyagua loma binigo mo miaga agalime memenaga daramabi nogo bulumaga wangabenaga daramabi bulumaga igini bo delai henegonaga dangabi heba mo yalu puwa wali agali bu hearuni tindi tandalo ba haragola ogonime ti Ngode Datagaliwabe deni dodo nahe mo bayale haga laga wini.✧ <sup>14</sup> Anigo mana ogonidagua biaga winigo nira lowa Kerisonaga daramame ko birimago domo waharagome bolangua hai haga. Keriso ibuha ko mbira nawiore howa ibugua haabobo hagane Dinini hongoni howa ibuni holene Ngode Datagaliwabehondo mini. Ani biyagome ina Ngode Datagaliwabe holenehe kagonaga biabe bialu holomaya Keriso daramame mana galone nabulene o lama ibirimaru inanaga minini ngaru

✧ **9:3:** Har 26.31-33 ✧ **9:4:** Har 16.33, 25.10-16, 30.1-6, Dag 17.8-10, Man 10.3-5 ✧ **9:5:** Har 25.18 ✧ **9:6:** Dag 18.2-6 ✧ **9:7:** Har 30.10, LBM 16.2-34, Hi 5.3, 7.27 ✧ **9:8:** Yo 14.6, Hi 10.19-20 ✧ **9:9:** Ga 3.21, Hi 7.18-19, 10.1-2 ✧ **9:10:** LBM 11.2, 11.25, 15.18, Dag 19.7, 19.11-13, Eb 2.15, Kl 2.16, 2.20, Hi 7.16 ✧ **9:11:** Hi 3.1, 8.2, 10.1 ✧ **9:12:** Dan 9.24, Hi 9.26, 10.4, 1 Pi 1.19 ✧ **9:13:** LBM 16.3, 16.14-16, Dag 19.9, 19.17-19, Hi 10.4

domaioire holebira.✧

<sup>15</sup> Irane ogoninaga wali agali Ngode Datagaliwabehanda olo heleneru tigua Ngode Datagaliwabehanda, Turu ha ho wiaabo holene ngulebero, lowiniru yu helo Keriso ibu dombegua howa habo nalolene bi gahenge lowinigoria ge howa bialu ka. Ogoni bibehego irane habo nalolene bi ala lowinigome haru heangi wali agali ko biyago Keriso ibu homo aribia hayagome golope henego ka.✧

<sup>16</sup> Mbiralimeibunaga paluni, Ogodagua tale bibe, lalu bebani gilibu wialu ibu homaragola paluni tale bibe gilibu wiyadagua bulene wulebira. <sup>17</sup> Ibu nahomeha paluni tale bulene bebani gilibu wiyadagua tale bulene irane nawulebira. Homaragola dege tale bulene wulebira.✧ <sup>18</sup> Irane ogoninaga mbirale bo loma binigo daramame habo nalolene bi ala lowinigo dege mo hongo hene.✧ <sup>19</sup> Mosesehanda wali agalihondo Mana lowinigonaga bulene nabulenebi lo ngadagua ala lamiai hene. Ani buwa mani ibugua nogo bulumaganaga daramabi memenaga daramabi hambialu iba heba mo bimaga howa ira mbira mini hisobonaga magane emene yunihe pu mbira nogo sibi irini iba daramabiha guyinime bo binigo yuwa daramaha ibira halu ogonime Mana lowini ngagonaga mbuganibi wali agali bibahende bu hearunibi tindi tandalo ba haga hene.✧ <sup>20</sup> Ani bialu howa ibugua tihondo lalu, Habo nalolene bi tigua bialu halimulo Ngode Datagaliwabehanda lalu lowiyago darama ogonime mo hongo haragoni, lene.✧ <sup>21</sup> Ani binidagua dege Mosesehanda Balai Andanibi lotu lolenenaga mbirale bibahende wiarunibi daramame tindi tandalo ba hene.✧ <sup>22</sup> E heneneore Mana lowini ngadagua mbirale bibahende ko ngaru daramame mo bayale haga wini. Ko birimarubi bo loma binigonaga darama hangume domo wahai haga wini.✧

*Keriso ibuni loma bialu homayagome ko birimago domo wahaga ngago ogo*

<sup>23</sup> Mbirale uruni bibahende tene ibuni dahuliya andagani ngarunaga manane dindini ngaru mana ogonidagua bialu domolene wini. Ani biagago dahuliya andagani ngaru tini dege mbirale tara baya buruguleore bo lomabu mulene nga.✧ <sup>24</sup> Ogoni irane Keriso ibu Loma Bia Hene Hobane dahuliya andagani ngago arianaga manane ale agalime dindini wabu wiagoha naandape. Ibu dahuliya andaganioire anda puwa ibugua ogoriani Ngode Datagaliwabenaga deni hapara howa inanaga bi la halu ka.✧ <sup>25</sup> Yu wali agalinaga loma binigo mo miaga haguane timbunime Loma Bia Heneore Hobane ngelenegoha mali bibahendengi nogo tara taranaga darama hambu yalu piaga wini. Anigo loma binigo mo miaga haguane timbuni biagome dewa halu piaga winidagua Keriso ibugua ibuni lomabu mule dewa halu anda puabo nahene. <sup>26</sup> Ibu anda puabo holene winidale nde dindi bibahende wabiyangiore howa ibugua tandaga dewa halu nama ibaabo kale. Anigo ai bibahendenaga hamaro buleneru kaware harago Keriso ibugua halu mbira hangu wali agali bibahendeme ko birima domo wahole lowa ibuni lomabu mulenaga hapani hene.✧ <sup>27</sup> Ani binigo wali agali bibahende halu mbira hangu homolebira. Ani homaragola Ngode Datagaliwabehanda ti biyarunaga mo daba ki holebira.✧ <sup>28</sup> Ogonidagua dege Kerisohandabi ina bibahendeme ko birimaru domo wahole halu mbira hangu ibuni Ngode Datagaliwabehondo lomabu mini. Ani binigo ibugua abale hapani hayadagua halu mendebi hapani holebira. Ani hapani halu ko mo domo wahole ndo wali agali ibu ibilo lowa hondo ho karu ti pele mulenaga hapani holebira.✧

✧ 9:14: Lm 6.13, 6.22, Eb 5.2, Ta 2.14, Hi 6.1, 1 Pi 1.18-19, 1 Yo 1.7 ✧ 9:15: Lm 5.6, 1 Ti 2.5, Hi 3.1, 7.22, 8.6, 1 Pi 3.18  
 ✧ 9:17: Ga 3.15 ✧ 9:18: Har 24.6 ✧ 9:19: Har 24.3-8, LBM 14.4-7, 16.14-15 ✧ 9:20: Har 24.8, Md 26.28  
 ✧ 9:21: Har 29.12, 29.36, LBM 8.15, 8.19 ✧ 9:22: LBM 17.11, Eb 1.7 ✧ 9:23: Hi 8.5, 10.1 ✧ 9:24: Lm 8.34, Hi 6.20, 8.2, 1 Yo 2.1 ✧ 9:26: 1 Ko 10.11, Ga 4.4, Hi 7.27, 9.12, 1 Pi 3.18 ✧ 9:27: Pig 3.19, Aga 3.20, Ais 53.12, 2 Ko 5.10, Pb 3.20, 2 Ti 4.8, Hi 10.10, 1 Pi 2.24, Mo 20.12-13 ✧ 9:28: Ais 53.12, Lm 6.10, Ta 2.13, 1 Pi 2.24, 2 Pi 3.12, 1 Yo 3.5

## 10

<sup>1</sup> Yu wali agalinaga Mana lowini ngago mana ogoni tene ibuni mbirale henene mani holebirarunaga bayuwa walia nahe auhe ale dege wini. Ani winigo mali bibahendengi Ngode Datagaliwabehondo mbirale bo mulene winidagua bo mia ho wiaabo haga. Ani bo mia ho wiaabo halu howa Mana lowini ngagome wali agali Ngode Datagaliwabe karia ibiraru mo bayale agua habehebe.✧ <sup>2</sup> Wali agali Ngode Datagaliwabe mitangi bialu lotu laga hayarunaga ko biyaru domo wahenedale nde tigua biyaru miniha wini mbau nale howa bo mulenebi wakale. <sup>3</sup> Ani wa nahego bo lomabu miagane mana ngarume mali ibalu pugu biragola wali agalinaga ko biyaru mo mitangi bia haga nga.✧ <sup>4</sup> Irane nogo bulumaganaga daramamebi nogo memenaga daramamebi wali agalinaga ko domo wa nahagaore nga.✧

<sup>5</sup> Irane ogoninaga Keriso ibu dindini ibule howa ibugua Ngode Datagaliwabehondo lalu,✧✧

Bo lomabu ngulenerubi mbirale bu lomabu ngulenerubi í hame nale ke.

Anigo ina inaga tingini mo manda manda bu howa ngini.

<sup>6</sup> Nogo tara tara homa bibahende lomabu miaga dabuni bo delolenerumebi wali agali ko domo wahelonaga bo lomabu ngulenerumebi í mo turu nahaga.

<sup>7</sup> Aniyagola ina lalu, Ngode Datagaliwabe-o

Mana lowini ngagonaga mbugani gilibu ngadagua

ina í hame ledego bule o kogoni,

lalu gilibu nga. <sup>8</sup> Keriso ibugua bi pigane layago ogo, Bo lomabu ngulenerubi mbirale bu lomabu ngulenerubi nogo tara tara homa bibahende lomabu miaga dabuni bo delolenerubi wali agali ko domo wahelonaga bo lomabu ngulenerubi í hame nale turubi nahe kegoni, lalu lene. Ibugua bo lomabu mulene uruni bibahende Mana lowini ngadagua bo miaga ka manda buwa bi ogoni lene. <sup>9</sup> Ani lowa Keriso ibugua bi mani lenego ogo, Ngode Datagaliwabe-o ina í hame lededagua bule o kogoni, lalu lene. Ani layagola Ngode Datagaliwabehanda bo lomabu mulene mana ala winiru bibahende wahai halu Keriso ibuni lomabu miyagome mia aribia hene. <sup>10</sup> Ani binigo Yasu Keriso ibugua Ngode Datagaliwabehanda hame leadagua bialuibuninaga tingini halu mbira hangu lomabu miyagome ina bibahendeme ko birimaru domo wahai haya.✧

<sup>11</sup> Yu wali agalinaga loma binigo mo miaga mbira mbira kagome horo bibahendengi bulene wini wiadagua bialubi Ngode Datagaliwabehondo mbirale bo lomabu mulene wini wiadagua bia ho wiaabo haga ka. Mana anidagua biaganerume ko birimaru domo wa nahabeheore nga.✧

<sup>12</sup> Ani bidago Keriso ibugua ko birimaru domo waholene hongo ha ho wiaabo helonaga ibuni halu mbira hangu bo lomabu muwa ibu Ngode Datagaliwabenaga gi tigahayagi pu beda.✧✧ <sup>13</sup> Ani pu bedagoria ibugua Ngode Datagaliwabehanda Kerisonaga waitigi karuibuninaga geni malia ho wilo hondo beda.✧ <sup>14</sup> Ogonigo Keriso ibuni halu mbira hangu bo lomabu miyagome wali agalime ko biyago domo wahayaru ti mo bayaleore howa ha ho wiaabo heleda.

<sup>15</sup> Anigo Ngode Datagaliwabe Dinini ibugua inahondo ogodagua langida. Pigane layago ogo,

<sup>16</sup> Anduane Homogohanda lalu, Awe ina tihondo habo nalolene bi lo wuleberogo ogo.✧

Inaga mana lowini ngoru tinaga bu habaneha mo wialu

tinaga bu mininibi gili bulebero,

✧ **10:1:** Kl 2.17, Hi 8.5, 9.9-11, 9.23, 10.4 ✧ **10:3:** LBM 16.21, Hi 9.7 ✧ **10:4:** Mai 6.6-7, Hi 9.13, 10.11 ✧ **10:5:** Ais 1.11, Amo 5.21-22 ✧ **10:5:** Iba 40.6-8 ✧ **10:10:** Yo 17.19, Hi 9.12, 9.28, 13.12 ✧ **10:11:** Har 29.38, Dag 28.3, Hi 7.27, 10.4 ✧ **10:12:** Kl 3.1, Hi 1.3 ✧ **10:12:** Iba 110.1 ✧ **10:13:** Ab 2.35, 1 Ko 15.25, Hi 1.3 ✧ **10:16:** Yar 31.33, Hi 8.10

lalu lene. <sup>17</sup> Mani halu mende layago ogo, Tinaga ko biyarubi nakarulape hayarubi ina mitangi bia dai nabulebero, leda. ✧ <sup>18</sup> Anigo ko uruni domo wahai haragola mani ko domo wahelonaga mbirale bo lomabu mulene henge nawulebira.

*Iname Ngode Datagaliwabe kagoria hapara holene ngago ogo*

<sup>19</sup> I hamene mbaliniru-o ogoninaga manda buwa Yasu ibu homo aribia hayago togoni howa ina Loma Bia Heneore Hobane ngagoha áyu awadaga poleneore nga. ✧ <sup>20</sup> Loma Bia Heneore Hobane ogoniha ina anda polomaya Yasu ibugua hariga gahengebi holene tenebi aga gerelape ho wiyago ibuni togoni hariga ba hene. Aga ogoni mende ndo ibuninaga tingini wini. ✧ <sup>21</sup> Anigo ina loma binigo mo miaga timbuniore mbira Ngode Datagaliwabenaga wali agali handaya ho helowa kamagoni. ✧ <sup>22</sup> Irane ogoninaga iname inanaga bu miniha ko mbira do nahe howabi mini mbiraore wu kamagoria mini bilinahe howabi mana ko mbira wini mbau layago wahowabi ani bialu tinginiru iba gagaheme wayawaya bu howabi Ngode Datagaliwabe kagoria ha para ho hama. ✧ <sup>23</sup> Ani bialu Ngode Datagaliwabe handa mbira biaore bulebero lowiyago bulebiraore lowa Keriso aria ina kamago lalu iname hongo howa mini dunubia ho hamiya. ✧ <sup>24</sup> Ani bialu iname maru karubi mitangi bigibigi bialu gubalini holene walia halubi mana bayale bialubi biamogo bigibigi bialu hamiya. <sup>25</sup> Anigo iname mo ngoai haramaligo marume hado wahalu kadagua nahe mandagi ngoai haabo hamiya. Ani bialu inane hangu hangu mo hongo haga biaabo hamiya. Ogonidagua beramago irane Anduane Homogonaga Horo hamaro bulene kawareore ibiragonaga berama. ✧

<sup>26</sup> Anigo bi mana henene inahondo langidaha iname, Ko mbira bero, lalu birimayagua ko uruni domo waholene mbirale bo lomabu mulene nawulebiraore. ✧ <sup>27</sup> Ai anigo mbira hangu bulebirago. Ngode Datagaliwabela waitigi halu manga haga karu ti Daba Ki holenebi ira gibioreme do mundu lai holebiragobi lalu mogo lowa hondo ha dege bulebira. ✧ <sup>28</sup> Mbiralime Mosese heneyangi Mana lowini ngago puguarago kirali tebiralimebi handarima lalu laragola mana puguaga biago maru karume dara nahe howa homelo bo wahaga. ✧ <sup>29</sup> Ani biagago mbiralime Ngode Datagaliwabe Iginihondo erembira mialu mo yo handagabi Ngode Datagaliwabenaga habo nalolene bi lowinigonaga daramame ibunaga ko domayago nagalone manda bu hagabi Ngode Datagaliwabe Dinini ibugua biamogo bulene nawi howa biamogo bia hagagohondo mege biagabi o biagohondo pani abiore mulubada. ✧ <sup>30</sup> Ngode Datagaliwabe handa bi mbira lenego ogo, Pani mulene inaga ngago inime mia dai bulebero, lenego ina manda bu kama. Ibugua bi mende lenego ogo, Anduane Homogohanda ibunaga wali agali daba ki holebira, lalu gilibu nga. ✧ <sup>31</sup> Ngode Datagaliwabe holenehe kago ibugua wali agalihondo pani mule yu kago gi taraore ho holene nga. ✧

<sup>32</sup> Alaore tí bialu harimigo mitangi bu dai bilimu. Horo uruningi Ngode Datagaliwabenaga wá holene yu harimigo howa tigua tandaga timbuni nalu erekui handalu wa nahe yu ununu lo wiaabo harimi. ✧ <sup>33</sup> Horo marungi tí wali agali bu hearu deni howa marume mege bialu ba biyaru bilowa horo marungibi Keriso hameigini maru tandaga ogonibi dege nalu heagoha ti heba mandagi nalu holene nga manda birimi. ✧ <sup>34</sup> Ani buwa Keriso hameigini maru garabaya bu wiyaru tandaga nayadagua tiguabi tinaga tandaga biago namogo bia harimi. Ai tina dabudabu wimiru page bu yalu piyagola tigua haabobo holenenaga dabudabu yu kama manda bialu genda nahe turu

✧ **10:17:** Yar 31.34, Hi 8.12 ✧ **10:19:** Lm 5.2, Eb 2.18, 3.12, Hi 4.16, 9.8, 9.12 ✧ **10:20:** Md 27.51, Yo 10.9, 14.6, Hi 9.3, 9.8 ✧ **10:21:** 1 Ti 3.15, Hi 4.14 ✧ **10:22:** LBM 8.30, Ese 36.25, Eb 3.12, 5.26, Hi 9.14, Ya 1.6, 1 Yo 3.21 ✧ **10:23:** 1 Te 5.24, 2 Te 3.3, Hi 4.14, 11.11 ✧ **10:25:** Lm 13.11, Pb 4.5, Hi 3.13, 2 Pi 3.9-11, 3.14 ✧ **10:26:** Dag 15.30, Hi 6.4-8, 2 Pi 2.20-21 ✧ **10:27:** Ais 26.11, Hi 12.29 ✧ **10:28:** Man 17.6, 19.15, Yo 8.17, 2 Ko 13.1 ✧ **10:29:** Har 24.8, 1 Ko 11.29, Eb 4.30, Hi 12.25, 13.20 ✧ **10:30:** Man 32.35-36, Iba 50.4, 135.14, Lm 12.19 ✧ **10:31:** Lg 12.5 ✧ **10:32:** Ga 3.4, Pb 1.29-30, Kl 2.1, Hi 6.4 ✧ **10:33:** 1 Ko 4.9, Pb 1.7, 4.14, 1 Te 2.14



ho harimi. ✨ <sup>35</sup> Tígua ogonidagua bialu howa miniha mo hongo holene yu kamigonaga emena timbuniore mo yalu ibulebirago yu wa nahe hongo ho halimu. ✨ <sup>36</sup> Tígua Ngode Datagaliwabehanda hame ledadagua bulebi ibugua, Ngiaore bulebero, lowiyago yu holebi tí ema nabi hibu lalu holene nga. ✨ <sup>37</sup> Anigo Anduane Homogonaga mbugani lo ngadagua ogo, ✨ ✨

Emeneore howa mbirali ibulebira lenego ibulebiraore.

Ibu hondoha nabi abaleore ibulebira.

<sup>38</sup> Inaga wali agali mini tigabiwi karu tigua nde mini mbiraore wuwa holebira. ✨

Ti marume wahalu dai biyagua

ina tihondo turu naholebero,

lalu gilibu nga. <sup>39</sup> Ani bidago ina wahalu dai bialu pu ereba haga ndo kama. Anigo ina mini mbiraore wu howa pele mini kama. ✨

## 11

### *Mini mbiraore wu holenegro ogo*

<sup>1</sup> Mini mbiraore wu holenegro iname mbirale mani yu holeberamago mini dunu bia ho holenenagabi mbirale ngaru iname de nahende howa ngaore manda bu holenenagabi wu holene nga. ✨ <sup>2</sup> Wali agali bamba heneru tigua mini mbiraore wu henegome Ngode Datagaliwabehanda tihondo turu hene.

<sup>3</sup> Ngode Datagaliwabe ibugua bi lenegome dindibi haribi bibahendeore wabiniru áyu mbirale bibahende handabehe kamaru uruni mbirale nahandabeheha howa wabini. Ani binigo ina mini mbiraore wu kamagome manda bu kama. ✨

<sup>4</sup> Kenihanda Ngode Datagaliwabe ibuhondo mbirale bu minigo bagi hene lowa Abele ibugua mini mbiraore wu henegome dege Ngode Datagaliwabehondo bo lomabu minigo bolangua howa mini. Abelehanda mini mbiraore wu henego togoni howa Ngode Datagaliwabehondo bo minigo hondowa Ngode Datagaliwabehanda ibuhondo, Í mini tigabiwi ke, lalu, Karulape biri, lene. Abele ibu áyu nahe homenegro ibugua mini mbiraore wu henedagonime áyu bi la ho nga. ✨

<sup>5</sup> Inogohanda Ngode Datagaliwabe ibuhondo mini mbiraore wu henegome ibu na-home hene. Ibu nahome heaore dege Ngode Datagaliwabehanda ibuni heagoria helo yalu iraga hene. Ani biyagola wali agalime ibu tai bialu handa walia habe nahe henego irane Ngode Datagaliwabehanda ibu yalu iraga henedagonime. Anduane Homogonaga mbugani lo ngago ogo, Inogo ibu yalu iraga nahe howa ibugua Ngode Datagaliwabe mo turu hene, lalu gilibu nga. ✨

<sup>6</sup> Ani binigo mbiralime mini mbiraore nawi howa Ngode Datagaliwabe mo turu habe nahe ka. Mbirali Ngode Datagaliwabe karia ibiragome Ngode Datagaliwabe kaore manda bialubi ibu mitangi bialu lotu laga karuhondo ibugua emena miaga ka manda bialubi mini mbiraore wu howa ibulene nga.

<sup>7</sup> Ngode Datagaliwabe ibugua Noahondo awe bulebiragonaga mbira lamiyagola Noa ibugua de nahende howa mini mbiraore wu henegome hale halu yu tiga bu hene. Yu tiga bu howa ibugua Ngode Datagaliwabehanda, Bibe, layadagua bialu iba talu mbira wabuwaibunibi ibu onebi ibu iginirubi ti onerubi anda puwa nahome berene. Noahanda ani binigome wali agali bibahende dindini heneru ti nakarulapeore hene walia hene. Ani buwa Ngode Datagaliwabehanda Noa mini mbiraore wu heago hondowa, Í mini tigabiwi ke, lene. ✨

✨ **10:34:** Md 6.20, 19.21, 19.29, Lg 12.38, Ab 5.41, Pb 1.7, Ya 1.2 ✨ **10:35:** Md 5.12, 10.32 ✨ **10:36:** Lg 21.19, Ga 6.9, Kl 3.24, Hi 6.12, 9.15, 12.1 ✨ **10:37:** 2 Pi 3.9 ✨ **10:37:** Hab 2.3-4 ✨ **10:38:** Lm 1.17, Ga 3.11 ✨ **10:39:** 1 Te 5.9, 2 Te 2.14, 2 Pi 2.20-21 ✨ **11:1:** Lm 8.24-25, 2 Ko 4.18, 5.7 ✨ **11:3:** Pig 1.1, Iba 33.6, 33.9, Yo 1.3, 2 Pi 3.5 ✨ **11:4:** Pig 4.3-10, Hi 12.24, 1 Yo 3.12 ✨ **11:5:** Pig 5.21-24 ✨ **11:7:** Pig 6.13-22, 7.1, Lm 3.22, 4.13, 1 Pi 3.20

<sup>8</sup> Ngode Datagaliwabe ibugua Abarahamahondo, Dindi mbira ngiaore bulebero lalu lowirugoha hole pu, lenego Abarahama ibugua mini mbiraore wu henegome pole pene. Abarahama ibu, Ogoha poro, lalu pene ndo manda nabi howa ibunaga dindi wahalu pole pupe hene. <sup>9</sup> Abarahama ibu Ngode Datagaliwabehanda, Dindi ngiaore bulebero, lalu lo wiyagoria anda puwa ibugua kaundiali dindi ogoni bai nale howa mini mbiraore wu henedagonioreme ogoriani hene. Ani binigo Abarahama ibu balai andaha palu hagadagua mani Aisaga Yagabala libubi ani paliaga hene. Ngode Datagaliwabehanda, Dindi ngiaore bulebero, lalu Aisaga Yagabalahondobi lowiyago libugua mani yu tiga bu hene. <sup>10</sup> Irane Abarahama ibu tano mbira hongo ha ho wulenenaga geneni Ngode Datagaliwabe ibunime bia manda ala buwa binigoha anda pole hondo ho hene. <sup>\*</sup>

<sup>11</sup> Abarahama ibu waneigini nahabehe wahe henego ai Sara ibubi waneigini nahabehe berenego Abarahama ibugua mini mbiraore wu heagome ibu waneigini habehe hene. Ani binigo irane Ngode Datagaliwabehanda, Ngiaore bulebero, lalu lowiyago bulebiraore lowa Abarahamahanda mini dunubia ho hene. <sup>12</sup> Abarahama ibu waheore tingini homene ale henego agali mbiraore ogoniha howa yakundi hari daligaha bu karubi iba angeni iba mu daga labe nahe emene emene ngarubibi ibu aguanene dewaore ibu hene. <sup>\*</sup>

<sup>13</sup> Wali agali uruni bibahende mini mbiraore wu ha ho wiaabo howa homene. Mbirale mbirale Ngode Datagaliwabehanda, Ngiaore bulebero, lalu lowiyaru tigua dindini howa nayi henego mbirale uruni kaundiaore handa angua howa turu halu lalu, Ina dindini howa bai nale togolo yu ibaga dege biaga kamagoni, lene. <sup>14</sup> Wali agali ogonidagua lalu karume dindi mbira tini hangunaga hole tai birago mo walia haga. <sup>15</sup> Tigua dindi wahalu ibiyago mitangitangi biaabo nahego mitangi biaabo henedale dindi ogoriani dai bulene henge winidale. <sup>16</sup> Ani ndogo tigua dindi hame lalu minime handayago dindi bayale taraore winigo dahuliya andaganaga handa angua hene. Wali agali uruni tigua, Inanaga Ngode Datagaliwabe í ke, laragola ani lelo Ngode Datagaliwabehanda taga nahaga walia howa ibugua wali agali biarunaga tano wabu wini. <sup>\*</sup>

<sup>17</sup> Ngode Datagaliwabe ibugua Abarahama ba hondole biyangi Abarahamahanda mini mbiraore wu hayago togoni howa ibu igini Aisaga Ngode Datagaliwabhondo bo lomabu mule bini. Ala Ngode Datagaliwabehanda, Ngiaore bulebero, lalu lowiyago Abarahamahandoore lowiya. Ani layago manda bia buwa dege Abarahamahanda ibu igini mbiraore hangu henego bo lomabu mule lo manda manda bu hene. <sup>\*</sup>

<sup>18</sup> Ngode Datagaliwabehanda ala Abarahamahondo lamialu lalu, Inaga aguanene haore bulebira larugo Aisagaha howa hama tagira pu holebira, lalu lamini. <sup>19</sup> Ani lenego Abarahamahanda, Ngode Datagaliwabe ibugua Aisaga homedagola howa mo heya habehe ka, manda bu henegobiore Aisaga homene aleore biago Abarahamahondo ya dai bini. <sup>\*</sup>

<sup>20</sup> Ogonidagua binigo Aisagahanda mini mbiraore wu henegome Yagaba Isolahondo maha holebiragonaga mo turu holeneru, Ngiaore bulebero, lalu lowini. <sup>\*</sup>

<sup>21</sup> Yagaba ibu homolene kaware ngelowa ibugua mini mbiraore wu hayadagonime Yosebe igini kirali henego libu hangu hanguhondo mo turu holene bi lamigi bini. Ani lai howa Yagaba ibugua ibunaga halimbu ngunini malia howa Ngode Datagaliwabe mitangi bialu lotu lalu hene. <sup>\*</sup>

<sup>\*</sup> **11:8:** Pig 12.1-5, Ab 7.2-4   <sup>\*</sup> **11:9:** Pig 12.8, 13.3, 13.18, 18.1, 18.9, 26.3, 35.12, 35.27, Hi 6.17   <sup>\*</sup> **11:10:** Hi 3.4, 13.14, Mo 21.2, 21.10   <sup>\*</sup> **11:11:** Pig 17.19, 18.11-14, 21.2, Lm 4.21, Hi 10.23   <sup>\*</sup> **11:12:** Pig 15.5, 22.17, 32.12, Man 10.22, Lm 4.18-19   <sup>\*</sup> **11:13:** Pig 23.4, 1 Bit 29.15, Iba 39.12, 1 Pi 1.17, 2.11   <sup>\*</sup> **11:16:** Har 3.6, 3.15, Mg 12.26, Ab 7.32, Pb 3.20, Hi 13.14   <sup>\*</sup> **11:17:** Pig 21.12, 22.1-14, Lm 9.7, Ya 2.21-22   <sup>\*</sup> **11:19:** Lm 4.17-21   <sup>\*</sup> **11:20:** Pig 27.27-29, 27.39-40   <sup>\*</sup> **11:21:** Pig 47.31-48.20

<sup>22</sup> Yosebe ibu homolene kaware ngelowa ibugua mini mbiraore wialu anda hene-gome Isaraele wali agalime Iyibi dindi wahalu polebiragonaga lalubi ibuninaga kuni ogodagua bilimu lalubi lamiai hene.✧

<sup>23</sup> Mosese aba aiyala libugua mini mbiraore wu henegome Mosese taba honowa ege tebira wia do hene. Libugua handalu hebira igiri biago baya gibioreyagola hondowa kini heagome, Igiri gali bibahende bo waholene nga, lalu bi hongohe lowiyago mo wahole gi nahe hene.✧

<sup>24</sup> Mosese ibu anda halu mini boga bu howa ibugua mini mbiraore wu henegome lalu, Kini heago wanenaga igini i ndo ko, lene.✧ <sup>25</sup> Ibugua tigi mbira hangu ko bulenerunaga turu holene hame nale Ngode Datagaliwabenaga wali agali baba howa tandaga nolene dabenene. <sup>26</sup> Mosese ibugua Mbirali Dabo Helenego ibulebira lowinigo mitangi bialu taga pani nolene o galone ibuni nga lalu Iyibi dindini muni dabudaburu winigo bagi hene nagaloneore manda bu hene. Ani binigo awe emena yu holebiragoria minime handa anguahone hene.✧

<sup>27</sup> Mosese ibugua mini mbiraore wu hayagome kini biagome keba hayagola gi nahe Iyibi dindi wahalu pene. Ani binigo ibugua Ngode Datagaliwabe deme nahandabehe kago handayago hondo yalu puabo hene.✧ <sup>28</sup> Ogonidagua bialu ibugua mini mbiraore wu henedagonime Bolangua Halu Penegonaga tomo nolenenaga mana tenialu ogoingi bu wini. Ogonidagua bu wialu Homelo Baga Dahuliyalime Isaraele wali agalinaga igini waheneru homelo nabelo, Nogo sabinaga darama anda pangani tindi tandalo ba halimu, lalu lowini.✧

<sup>29</sup> Isaraele wali agali ti mini mbiraore wu henegome iba solowara mini Daramabi bereago dindi yobini ubade haradagua bialu pene. Ani piyadagua Iyibi agalime pole poramalo manda bimiria ibame namu lalu nai hene.✧

<sup>30</sup> Isaraele wali agali mini mbiraore wu henegome Yarigo tanonaga ege tole pabe bu gimbu bima iraga heago horo karu pu mabu biyagola podo ibira hai hene. <sup>31</sup> Bayanda wali mbira Lahaba ibugua mini mbiraore wu berenegome Isaraele agali kira dindi hondo wule ibiyagola ibugua turu howa libuhondo, Hamiya ibidaba, lene. Ani lenegome Ngode Datagaliwabehanda ibu biamogo bialu maru bo wahenedagua ibu nabe berelene.✧✧

<sup>32</sup> Te ogoni Gidionobi Baragabi Samasonobi Yabedabi Debidibi Samuelebi Ngode Datagaliwabe mana latagi hagarubi uruni bibahendenaga te lama puabo kolego lolene henge nawida.✧ <sup>33</sup> Tigua mini mbiraore wu henegome dindi tara tarani agali bu hearu baba wai bialu wayali hene. Tigua mana tigabi binigome Ngode Datagaliwabehanda, Ngiaore bulebero, lalu lowinigo yu hene. Tigua budi gabua ale timbuni mini laiononaga ne hariga mo ndibu lalubi✧ <sup>34</sup> ira hungu gibiore biyago mo hundia halubi hene. Marume wai biagane ayu tibume dibule biyagola ti nabe yo pialu pene. Ti hongo nahe henego mani mo hongo hene. Ani bialu tigua wai bialu howa hongo timbuni lalu dindi tarali ami hearu bope lalu ti wayali hene.✧ <sup>35</sup> Wali Ngode Datagaliwabehondo mini mbiraore wu berenerume Ngode Datagaliwabehanda tinaga damene homeneru mo heya hayagola ti haru mandagi hene.✧

Marume Ngode Datagaliwabehanda tihondo mo heya howa bayaleore holene milo ibuhondo erembira namule lowa tandaga timbuniore nalu homene. <sup>36</sup> Wali agali marume ti maru mege bialu maru tibume balu maru pu senime gi ge dariba howa garabaya andaha hela bigi bini.✧ <sup>37</sup> Ai maru ege toleme homelo balu maru ira podaga

✧ **11:22:** Fig 50.24-25, Har 13.19 ✧ **11:23:** Har 1.22, 2.2, Ab 7.20 ✧ **11:24:** Har 2.10-12 ✧ **11:26:** Hi 10.34-35, 13.13 ✧ **11:27:** Har 2.15, 10.28-29, 12.37, 12.51, 14.13, Lm 1.20, 1 Ti 1.17, Hi 11.1, 11.13 ✧ **11:28:** Har 12.21-30 ✧ **11:29:** Har 14.21-31 ✧ **11:31:** Yos 6.12-21 ✧ **11:31:** Yos 2.1-21, 6.22-25, Ya 2.25 ✧ **11:32:** Hgn 4.6-5.31, 6.11-8.32, 11.1-12.7, 13.2-16.31, 1 Sml 1.1-1 Kin 2.11 ✧ **11:33:** Hgn 14.5-6, 1 Sml 17.34-35, 2 Sml 7.11, Dan 6.1-27 ✧ **11:34:** Hgn 15.8, 15.15, 1 Kin 19.3, 2 Kin 20.7, Dan 3.1-30 ✧ **11:35:** 1 Kin 17.17-24, 2 Kin 4.25-37, Ab 22.25 ✧ **11:36:** 1 Kin 22.26-27, 2 Bit 18.25-26, Yar 20.2, 37.15, 38.6

tome podaki halu maru wai biagane ayu tibume homelo dibalu bini. Ti yagibano howa marume mo tandaga ha ba bigi biyagolabi tigua aga nogo sbinaga dongonebi memenaga dongonebi karulowa ibaga bu hene. ✧ <sup>38</sup> Ani bialu dindi ko yobi wali agali nahaga wiagoriabi hari barehabi tigua wai togolo yu ibaga bu hagadagua buwa ege andahabi dindi haḥhabi palu haga hene. Wali agali mini timbuni taraorewi uruni ti dindi wali agali maru hearu baba bia tago nahe hene. ✧

<sup>39</sup> Wali agali mini mbiraore wu henedaruni bibahendeme Ngode Datagaliwabe wanakuini howa mini lene holene karulene. Mini ogoni karulenegoyu Ngode Datagaliwabehanda, Ngiaore bulebero, lalu lowiyago tigua mo ya nabi dege hene. <sup>40</sup> Mo ya nabi henedagoni irane Ngode Datagaliwabehanda ina mitangi bialu mbira bayale daligaore manda manda bu winigome. Ogoni tini hangu ndo tibi inabi mandagi howa baya buruguleore hai helole lowa manda manda bu winigome ti nayi hene. ✧

## 12

### *Ina Aba Ngode Datagaliwabe ibugua ina handaya ho kago ogo*

<sup>1</sup> Anigo wali agali bibahende mini mbiraore wu henedarunime biyadagua iname nde bulumaya manane walia ho nga. Irane ogoninaga mbirale bibahende inani ngarubi ko inani para ho ngarubi wahai halu iname gerai lolene ngagoria wiape kagola hibulalu maliya. ✧ <sup>2</sup> Ani pialu howa iname mini mbiraore wulene tenialubi wu maro bialubi Yasuha mini hana ho kamago ibuni handaya ho yalu puabo hamiya. Ibugua ira bangani homolene manga halu wa nahe pene. Irane ogoni maha turu holene yu holebiragonaga ibugua taga nahe ira bangani homayagome ayu Ngode Datagaliwabenaga haru howa biraganeni gi tigahayagi pu beda. ✧

<sup>3</sup> Anigo ibu tandaga nama piyagobi ko biaga hearume ibu handabe manga hayagobi mitangi bilimu. Yasu ibugua ani biyago mitangi buwa tí tínime mo genda halu wahalu pu nabilimu. <sup>4</sup> Tigua ko ngaru baba wai hongo howa bialu kamigo tí mbiraligo bo home nale kami. ✧ ✧ <sup>5</sup> Ngode Datagaliwabehanda tí ibunaga waneigini howa elahe halimulo bi mo hongo holene tihondo larago embeda ho kamibe. Bi larago ogo, ✧

I igini-o Anduane Homogohanda í mo tiga biragola bayuwa hale ho habe.

Ani bialu ibugua í taliragola miniha genda nahabe.

<sup>6</sup> Irane Anduane Homogo ibugua gubalini hararu bibahendehondo mo tiga biaga ka. ✧

Ibugua bibahende ibu waneigini kagola mana laga, lalu gilibu nga.

<sup>7</sup> Ayu tandaga nalu kamigo abame baragola tandaga nagadagua nalu kami. Tigua tandaga nalu kamigoni Ngode Datagaliwabehanda tí ibunaga waneigini kami lalu walia haga. Iginu ibu abahanda mana nalaga mbira kabe. ✧ <sup>8</sup> Ngode Datagaliwabe ibugua ibu waneigini bibahende mana lalu bagadagua tí maru nabe kayagua tí ibu waneigini heneneore ndo aba nahe hono wahene ale kami. ✧ <sup>9</sup> Ai ina aba dindini hene karu tigua ina mana laragola iname ti mitangi bu haramali. Ani mitangi harimadagua ina dinininaga Aba daliga kagohondo mitangi timbuniore bialu ibunaga andaneha holene nga ndobe. ✧ <sup>10</sup> Ina aba dindini hene karu tigua ina mo tiga bulene manda biyadagua tigi mbira dege baga biaga. Ani binigo Ngode Datagaliwabe ibugua inane-naga koyane ibuni baya burugule kagoha mandagi ha tago ho holomayanaga mo tiga biaga ka. ✧ <sup>11</sup> Ibugua ina mana lalu barangu ina turu nahe keba dege dindi ho harima.

✧ **11:37:** 1 Kin 21.13, 2 Kin 1.8, 2 Bit 24.21, Ab 7.58, 14.19 ✧ **11:38:** 1 Kin 18.4, 19.9 ✧ **11:40:** Hi 5.9, 7.22, 8.6, Mo 6.11 ✧ **12:1:** Lm 7.21, 12.12, 1 Ko 9.24-25, Pb 3.13-14, Hi 10.36, 1 Pi 2.1 ✧ **12:2:** Pb 2.8, Hi 1.3, 1.13, 1 Pi 1.11, 3.22 ✧ **12:4:** Yo 15.20, Ga 6.9 ✧ **12:4:** 1 Ko 10.13, Hi 10.32-34 ✧ **12:5:** Yob 5.17, Min 3.11-12 ✧ **12:6:** Iba 94.12, Ya 1.12, Mo 3.19 ✧ **12:7:** Man 8.5, 2 Sml 7.14, Min 13.24, 23.13 ✧ **12:8:** Iba 73.15, 1 Pi 5.9 ✧ **12:9:** Aga 12.7, Ais 42.5 ✧ **12:10:** LBM 11.44, 1 Pi 1.15-16

Ani birimago maha mana lalu ogonidagua mo mini wia hene karu tigua mana tigabi biaganaga mo palia holene yu haga ka.✠

*Mana bulene nabulenebi ngago ogo*

<sup>12</sup> Irane ogoninaga tigua gi hi ho kamiru yaraga ho halu ge duli diri durulo kamiru mo hongo halu hadaba.✠ <sup>13</sup> Ani bialu ge kohe kamiru ko ha timbu nahe dabi helo tigua hariga tigabini pialu haabo halimu.✠

<sup>14</sup> Tigua mo palia holene yu howa wali agali karu baba ta nabi mandagi halimu. Holene baya burugule mbiralime nayi howa Anduane Homogo nahondolebirago tigua holene ogoni yu howa bialu hole lowa halimu.✠ <sup>15</sup> Ani howa Ngode Datagaliwabehanda biamogo bulene nawi howa biamogo bia harago yu wahalu dai buligo mamage ho halimu. Datani ko kaubi mbira anda ho kaligo ogoninaga kaume mo kau bia hagamaga ti kamiru aria mbirali ogonibi holigo de hondo halimu.✠ <sup>16</sup> Ani bialu ti mbiraligo wali kayu yagabi Ngode Datagaliwabenaga ngaru yo handagabi holigo de hondo halimu. Isohanda ogonidagua buwa halu mbira hangu nole lowa ibu igini wahene howa aba pani ha aribia holene wiagome yolo bini.✠ <sup>17</sup> Iso ibu maha ibu abanaga mo turu holene mo yua hayago tigua manda bidamigoni. Ani binidagoni irane ibugua biyago mbira balalu dai bule dugu bialu tai bia biyagolabi Ngode Datagaliwabehanda ibu yu wahenegome henge handa walia nahe hene.✠

<sup>18</sup> Isaraele wali agali Hari Sainai weagoha ibu heagola Ngode Datagaliwabehanda biyagodagua tihondobi nde bilo naibirimi. Isaraele wali agalime Hari Sainaini ibu howa ira hungu biyagobi aruma hayagobi hari biagoria mindi timbuni biyagobi puyabu hongohe u e layagobi.✠✠ <sup>19</sup> mbelo biguli bebe layuagobi mbiralime bi layuagobi uruni bibahende ti manda biai hene. Mbiralime bi o layuago tigua hale halu lalu, Bi mende inahondo nale waha, lene. <sup>20</sup> Ani lenego irane bime bilimu layuago ogo, Wali agalimebi nogo biangomebi mbiragome hari ogo ela hayagua homelo ege toleme balimu, layagola hale halu tigua gi howa, Bi nale waha, lene.✠ <sup>21</sup> O handayago handalu mogoleoreyagola Mosesehanda lalu, I diri durulalu gi taraore ho ko, lene.✠

<sup>22</sup> Tigua ibirimigo uruni hondole ibirimi ndo. Ti Hari Saiono Ngode Datagaliwabe holenehe kagonaga tano dahuliyana Yarusaleme dahuliyali daosini au lobebe tobahe kagoriabi ibirimi.✠ <sup>23</sup> Ngode Datagaliwabe waneigini wahene mini dahuliya andagani gilibuwi karu turu halu mo mogo bu kagoriabi tibi ibu waneigini wahene dege howa ibu kami. Ani bialu ti wali agali bibahende daba ki holene Ngode Datagaliwabe kagoriabi wali agali ala bayale halu homayarunaga dinini mo baya burugule heleneru kagoriabi ibirimi.✠ <sup>24</sup> Tigua habo nalolene bi gahengenaga dombegua Yasu kagoriabi ibunaga darama tindi tandalo ba hene ngagoriabi ibirimi. Darama ogoni Abelenaga darama ale ndo Yasunaga darama hongohe taraore ko domo wahi haga nga.✠

<sup>25</sup> Ani bidago ibugua bi lararu tigua hale habe manga nahe bayuwa hale halimu. Mbiralali dindini howa bi mana lamiyago hale habe manga hayaru ti yo pialu napene. Ani binigo Ngode Datagaliwabehanda dahuliya andagaha howa bi langirago hale howa iname mo waharimayagua yo pialu polene henge nawialu nawuleore bira.✠ <sup>26</sup> Ala Ngode Datagaliwabenaga bi layangi layadagonime dindi bibahende mo imi ema biai hene. Ai ayubi ibugua lowialu lalu, Ina halu mende mo imi ema bialu dindi hangu ndo hari daligahabi heba mo imi ema biaore holebero, lene.✠ <sup>27</sup> Ibugua, Halu mende, lenego bibahende wabini ngaru imi ema bilalu mo waholebiragonaga tigatiga walia ho nga.

✠ **12:11:** Ya 3.17-18 ✠ **12:12:** Ais 35.2 ✠ **12:13:** Min 4.26, Ga 6.1 ✠ **12:14:** Iba 34.14, Lm 12.18, 2 Ko 7.1, Eb 5.5, 2 Ti 2.22 ✠ **12:15:** Man 29.18, Ab 8.23, 2 Ko 6.1, Ga 5.4, Hi 3.12 ✠ **12:16:** Pig 25.29-34 ✠ **12:17:** Pig 27.30-40 ✠ **12:18:** Lm 6.14, 2 Ti 1.7 ✠ **12:18:** Har 19.16-22, 20.18-21, Man 4.11-12, 5.22-27 ✠ **12:20:** Har 19.12-13 ✠ **12:21:** Har 19.16, Man 9.19 ✠ **12:22:** Iba 68.17, Ga 4.26, Pb 3.20, Mo 5.11, 21.2, 21.10 ✠ **12:23:** Lg 10.20, Pb 4.3, Hi 11.40, Mo 13.8, 14.4 ✠ **12:24:** Pig 4.10, Hi 8.6, 10.22, 11.4, 1 Pi 1.2 ✠ **12:25:** Har 20.22, Hi 2.1-3, 3.17, 10.26-29 ✠ **12:26:** Har 19.18, Iba 68.8, Hag 2.6



Ani bulebirago irane mbirale bibahende mo imi ema bibe nahe ngaru wiaabo helonaga ani lene.✧

<sup>28-29</sup> Anigo Ngode Datagaliwabe ibugua Handame Ho Kago mo imi ema nabibehe ngago yama pialu haramagonaga iname ibuhondo kaj lalu hamija. Ani buleberamago irane inanaga Ngode Datagaliwabe ibu ira dalu do au lagane kago mitangi bialu ibu turu helo iname ibu mo dunini helalu gi holenemebi mogo lolenemebiibunaga mini yaraga halu lotu lalu hamija.✧

## 13

### *Ngode Datagaliwabe mo turu holene ngago ogo*

<sup>1</sup> Keriso hameigini howa tını degedege gubalini haghaga biaabo halu halimu.✧ <sup>2</sup> Ani bialu howa wali agali dengui nahendene ibiraru turu howa tí andaga palimiya ibidaba lalimu. Maru henerume ogonidagua bialu, Palimiya ibidaba, layago dahuliyali ibiyago manda nabi howa lene.✧ <sup>3</sup> Maru garabaya karu mitangi bialu minime ti heba mandagi haradagua bilimu. Ani bialu marume tandaga nalu kagoria mitangi bialu ti heba mandagi tandaga nalu haradagua bilimu.✧

<sup>4</sup> Tí bibahende kamirume wali agali dabu bu holenenaga mana bayaleore ngago manda bu holene nga. Agalinimebi onenemebi mini hana haga bu holene nga. Wali agali kayu biagabi wali agali ma handagabi karu Ngode Datagaliwabehanda ti pani mulebira.✧

<sup>5</sup> Muni dimagoli holeneme tí yania holani de hondo halimu. Tí holenenaga mbirale wu kamiru karulape ngama manda bu halimu. Ogoninaga irane Ngode Datagaliwabehanda ogodagua lo nga, Ina tí yu wa naholebero. Ina tí helalu napolebero, lalu gilibu nga.✧ <sup>6</sup> Ani manda buwa iname hongo howa bi ogodagua lalu,✧ Anduane Homogo ibugua i biamogo biaga kago

i gi naholebero.

Marume ihondo mbirale mbira agi bibehe kabe, labehe kamagoni.

<sup>7</sup> Tinaga haru haga ala hene biarume Ngode Datagaliwabehanda mana langiyago mitangi bialu halimu. Ti halu homayago mitangi bu dai bialu ti mini mbiraore wu hayadagua talialu halimu.✧ <sup>8</sup> Yasu Keriso ibu abebi áyubi maninagabi ibu hayagobi dege ha ho wiaabo haga ka.✧ <sup>9</sup> Ani bidago mana haluni tara tara lawai hararume ti hariga tigabini pialu kamigo wahalu haru pu tara nahelo halimu. Miniha mo hongo holene tomo nolene nanolenerume ngiaga ndo. Ngode Datagaliwabehanda biamogo bulene nawi howa biamogo biaganegome hongo ngirago iname mo yu holene bayale nga. Wali agali maru tomo nolene nanolenenaga mana uruni wiadagua bialu hayaru mana urunime ti biamogo nabini.✧

<sup>10</sup> Loma binigo mo miaga Yualinaga balai anda lotu laga kagoha biabe bialu karu tigua inanaga lomabu miaga dagiani lomabu mini ngago nolene nawi.✧ <sup>11</sup> Yualinaga loma binigo mo miaga haguane timbuni ibugua nogo tara taranaga darama hambu yalu Loma Bia Heneore Hobane ngagoha anda puwa wali agalime ko biyaru domelo Ngode Datagaliwabehondo mo miaga. Ani bialu howa wali agalinaga balai anda bu heagoria howa tagirahayagi nogo biagonaga tingini delaga wini.✧ <sup>12</sup> Irane ogoninaga Yasu ibugua wali agalime ko birimago ibunaga daramame domo wahalu mo gahenge hole lowa tano

✧ **12:27:** Iba 102.26, Md 24.35, 2 Pi 3.10, Mo 21.1 ✧ **12:28-29:** Man 4.24, 9.3, Iba 50.3, Ais 33.14, 2 Te 1.8, Hi 10.27  
 ✧ **13:1:** Yo 13.34, 1 Te 4.9, 1 Pi 1.22, 2 Pi 1.7, 1 Yo 3.11, 4.7, 4.20 ✧ **13:2:** Pig 18.1-8, 19.1-3, Md 25.35, Lm 12.13, 1 Ti 3.2, 1 Pi 4.9 ✧ **13:3:** Md 25.36, Lm 12.15, 1 Ko 12.26, Kl 4.18, Hi 10.34, 1 Pi 3.8 ✧ **13:4:** 1 Ko 6.9, Ga 5.19-21, Eb 5.5, Kl 3.5-6, Mo 22.15 ✧ **13:5:** Man 31.6-8, Yos 1.5, Md 6.25, 6.34, Pb 4.11-12, 1 Ti 6.8 ✧ **13:6:** Iba 118.6 ✧ **13:7:** 1 Ko 4.16, Hi 6.12 ✧ **13:8:** Yo 8.58, Eb 4.14, Hi 1.12, Mo 1.4 ✧ **13:9:** Lm 14.17, Eb 4.14, Kl 2.4, 2.8, 2.16, 1 Ti 4.3  
 ✧ **13:10:** 1 Ko 9.13, 10.18 ✧ **13:11:** Har 29.14, LBM 6.30, 16.27, Dag 19.3

timbuni wiago tagirahayagi homa hene. ✧ <sup>13</sup> O biyadagoni manda bialu ibu tagirahayagi howa ibu taga pani naradagua iname namogo bia hamīya ma. ✧ <sup>14</sup> Dindi o kamagoria tano ina ha ho wiaabo holene nawidago iname tano mbira mani ibulebirago ibilo handaya ho kamagoni. ✧ <sup>15</sup> Iname ani kamagoni Yasuni howa Ngode Datagaliwabe mini yaraga holene lomabu mialu haabo hamīya. Ani bialu ina bime ne hambuni howa, Ibu inanaga Anduane Homogo ka, lalu latagi haramagome biaga. ✧ <sup>16</sup> Títime mana bayale bialu biamogo bia hagahaga bialu halimu. Mana urunidagua bialu lomabu meramagome Ngode Datagaliwabe mo turu haga. ✧

<sup>17</sup> Tíntaga haru haga karume tihondo, Bidaba, laradagua bialu halimu. Tigua tí haru howa, Ogodagua birima, lalu Ngode Datagaliwabehondo lamulene wulebiragonaga tí mini halo ha nabi bayuwaore handaya ho haga ka. Anigo tigua, Bidaba, larago mo wa nahe bialu harimiyagua tigua biabe bialu kago turu howa bulebira. Ai tigua, Bidaba, larago mo waharimiyagua nde tí genda ho howa biragola ogonime tí biamogo bibe nahe holebira. ✧

<sup>18</sup> Ina mitangi bialu Ngode Datagaliwabehondo bi la haabo halimu. Iname horo bibahendengi tigabi bulene hangu hamelo kamago ina miniha ko mbira do naheore kamalo manda bu kamagoni. ✧

<sup>19</sup> Ani buwa tígua Ngode Datagaliwabehondo bi lalu ibugua ĵ tí kamiria abaleore daibilelo ina tí ogonidagua lalimulo hameore lo ko.

### *Lamaro bialu Ngode Datagaliwabehondo bi lenego ogo*

<sup>20-21</sup> Inanaga Anduane Homogo Yasu Nogo Sibi Haru Haga Timbuniore kago ibugua lomabu miagane mana bialu homo aribia hayagola Ngode Datagaliwabehanda ibu mo heya hene. Ogoni biyagome habo nalolene bi lo wia ho wiaabo holebirago mo hongo hene. Mo palia hagane Ngode Datagaliwabe ibu hame ledadagua tígua bilimulo ibugua tí kamigoria mbirale mbira mbira bayale mo wia helo hameledo. Ani bialu Ngode Datagaliwabe ibugua Yasu Kerisoni howa inaha ibu turu hara ale bilobi hamelo ko. Kerisonaga mini yaraga ha ho wia dege bidane wia ho wilo. Aniore bilo hamelo ko. ✧✧

### *Bi lamaro bialu lenego ogo*

<sup>22</sup> Ĵ hamene mbaliniru-o bebani tí mo hongo holenaga bi o gilibu wia harogo lu ndo nemandi degego bayuwa hale halimulo hame timbuni lo ko. <sup>23</sup> Ina hameigini Timodi garabaya golope halu tagira pelayago tí manda bilimulo hamelo ko. Timodi ibu abale ibiyagua ĵ tí kamiria eberongi iya haru ibuleberaba.

<sup>24</sup> Tíntaga haru haga bibahende tihondobi Ngode Datagaliwabeibunaga wali agali bibahende tihondobi, Iname tí mitangi bu kama, lalu lawia haramago lamilimu. Keriso hameigini Idali dindini karu tigua, Tí mitangi bu kama lalu, lawia hara.

<sup>25</sup> Ngode Datagaliwabe ibugua biamogo bulene nawi howa biamogo bia holene tí bibahende ha wiaabo helo hamelo ko.

✧ **13:12:** Md 21.39, Yo 19.17-18, Ab 7.58 ✧ **13:13:** Hi 11.26, 12.2, 1 Pi 4.14 ✧ **13:14:** Mai 2.10, Pb 3.20, Hi 11.10, 11.16, 12.22 ✧ **13:15:** 2 Bit 29.31, Iba 50.14, 50.23, 69.30-31, Hos 14.2, 1 Pi 2.5 ✧ **13:16:** Lm 12.13, Pb 4.18, Hi 6.10 ✧ **13:17:** Ese 3.17, 1 Te 5.12, 1 Ti 5.17 ✧ **13:18:** Ab 23.1, 24.16, Lm 15.30, 2 Ko 1.12, Kl 4.3 ✧ **13:20-21:** Ais 55.3, Yar 32.40, Ese 37.26, Seg 9.11, Lm 15.33, 1 Ko 6.14, Hi 10.29, 1 Pi 2.25 ✧ **13:20-21:** Ga 1.5, Pb 2.13, 2 Te 2.17, 1 Pi 5.10

## Yamese Yamesehanda Ngode Datagaliwabenaga wali agali dindi bibahendeni hearuhondo beba ogo gilibu wia hene Mbuga ogoha gilibu ngarunaga nemandi ogo

Yamesehanda beba ogo gilibu wia henedagoni Ngode Datagaliwabenaga wali agali dindi bibahendeni purogo lo hearuhondo gilibu wia hene. Beba ogoniha bi gilibu ngarume Ngode Datagaliwabe mana inanaga miniha anda ibilo mini mo giga bia helo lalu bi dewa gilibu nga. Keriso hameiginime wali agali heba howa mana tigabi bia tagi holene nga.

Bi maru gilibu ngago uru. Dindini kama tambu homogo yagibanola holenebi ko mo bia holenebi bayale bulenebi talebu ki bulenebi mini mbiraore wulenebi biabe bulenebi hége haru holenebi lo guraga guraga nabi holenebi mini mo dindiha holenebi mine nahe holenebi ema nabi howa hibulo lalu holenebi Ngode Datagaliwabehondo bi lolenebi urunidagua bialu holene nga, lalu gilibu nga.

Beba ogoniha bi galone duniniore gilibu ngago Ngode Datagaliwabehondo mini mbiraorewi karu tigua mana bayale biragome mini mbiraore wiyago mo walia haga ka, lalu gilibu nga.

### **Bulu бага бува kuni gilibu ngago**

#### *1.1*

Yamesehanda bi ala lenego *1.2-8*

Mini mbiraore wulenebi mini gigabiwi holenebi *1.9-11*

Homogo yagibanola holene *1.12-18*

Ba hondolenebi mo pila holenebi *1.19-27*

Bi mana hale halu bulenego *2.1-13*

Wali agali talebu ki bulene nawigo *2.14-26*

Mini mbiraore wulenebi biabe bia tagi holenebi *3.1-18*

Keriso hameiginime tinaga hége haru holenebi *4.1-5.6*

Keriso hameiginime dindi mana ko hame lolene nawigo *5.7-20*

Mana mbira mbira bulenego

<sup>1</sup> I Yamese Ngode Datagaliwabenagabi Anduane Homogo Yasu Kerisonagabi biabe bia haga kogo howa Ngode Datagaliwabenaga wali agali dindi bibahendeni purogo lo kamiru tí mitangi bialu beba ogo gilibu wia haro.✧

### *Mini mbiraore wulenebi mini gigabi wulenebi ogo*

<sup>2</sup> I hamene mbaliniru-o mo tandaga holene tara tara tí kamigoria íbu ngagola turuho halimu.✧ <sup>3</sup> Mo tandaga holene tara tara urunibi íbu ngagola tí agi mitangi beramibe hondolenaga ngago manda buwa Ngode Datagaliwabehondo mini mbiraore wirimigome bolangua ho halimulonaga nga. Genda dewa urunibi íbu ngagola yu howa hongo ho haabo holeberami.✧ <sup>4</sup> Hongo haabo howa hibulo kamigome mini bogabi baya buruguleorebi karulapeorebi holeberami. <sup>5</sup> Anigo agi buabe toba ho harimiyagua Ngode Datagaliwabehondo bi lolene nga. Bi lalu howa mini gigabi wulene ngi lalu kagohondo ibugua nangule nale turu howa mo tago halu mulebira.✧ <sup>6</sup> Anigo ngi lalu kamigo howa Ngode Datagaliwabehondo mini mbiraore wuwa ngulebiraore manda bialu bi lalimu. Mbiralime ibuhondo bi lalu howa mini dewa wuwa bi layagua ibu puyabu pu laragola iba yaribu bialu pu íbu dai bu biagagobi ka.✧ <sup>7-8</sup> Ibugua mini

✧ **1:1:** Md 13.55, Mg 6.3, Ab 15.13, Ga 1.19, 1 Pi 1.1 ✧ **1:2:** Ab 5.41, Lm 5.3-5, Hi 10.34, 1 Pi 1.6, 4.13, 4.16 ✧ **1:3:** 1 Pi 1.7 ✧ **1:5:** 1 Kin 3.9-12, Min 2.3-6, Yo 15.7, 1 Yo 5.14-15 ✧ **1:6:** Mg 11.24, 1 Ti 2.8

dewa wuwa hariga mbiraoreni polene manda nabi hariga dewani polene manda bialu kagoni. Ogonibime Anduane Homogohondo mini mbiraore nawi howa mbira ngi laragola ngulebira mitangi bulene nawi.✧

*Yagibano karunagabi homogo karunagabi te ogo*

<sup>9</sup> Mbiralí ibu Keriso hameigini howa yagibano kayagua Ngode Datagaliwabehanda ibu mo yaraga haragola turu holene nga.✧ <sup>10</sup> Mendeali ibu Keriso hameigini howa homogo kayagua Ngode Datagaliwabehandaibunaga mbirale ngaru mitangi nabi ibu mo dindi haragola turu holene nga. Irane balawaya minane anda hararu gau lalu ereba hagadagua mbirale dewawi karu homolebira.✧✧ <sup>11</sup> Balawaya dedago nime da ba haragola gau lalu dogolope hagadagua homogo karu uruninaga biabe bialu kaore homalu bibahende ngelalu polebira.

*Ba hondolenebi ko mo bia holenebi ogo*

<sup>12</sup> Mo tandaga holene tara tara ngagola tígua ema nabi hongo howa hibu lalu haabo howa Ngode Datagaliwabehondo gubalini ho karuhondo holene gahenge Ngode Datagaliwabehanda, Ngulebero, layadagua ngulebiraore manda buwa tí turu holene nga.✧ <sup>13</sup> Mo tandaga holene ngagome mbiralí ko mo bia haragola ibugua lalu, Ngode Datagaliwabehanda i ko mo bia halu ka, lolene nawi. Ko ngagome Ngode Datagaliwabe ko mo bia habe nahe nga. Ngode Datagaliwabe ibugua mbiralí ko mo bia nahaga ka. <sup>14</sup> Mbiralí ibuni dimagoli haragome ko mo bia holene tene nga.✧ <sup>15</sup> Ibuni dimagoli howa ko biaga. Ko biyago anda howa homolene wulebira.✧

<sup>16</sup> I hamene mbalini turubiru-o tíni mo hondo nahalimu. <sup>17</sup> Ngode Datagaliwabe ibunime mbirale bibahende baya buruguleore ngaru turu halu bame ngiaga ka. Ngode Datagaliwabehanda hariha wá haga bibahende karu Wabiaga ibu ka. Ngode Datagaliwabe ibu tara nahagabi de handa tara nahagabi mo aruma nahabehebi kagoni.✧ <sup>18</sup> Ngode Datagaliwabehanda bibahende wabuwa ina dunini holomaya hame lowa ibunaga bi mana henene lolene ngagome mo gahenge ho helenego kama.✧

*Bi mana hale halu bulene ngago ogo*

<sup>19</sup> I hamene mbalini turubiru-o mbira ogo mitangi bulene nga. Bibahendeme bi bayuwa hale hai hamiya. Anigo bi abale la nabi kebabi abale nahe hamiya. <sup>20</sup> Wali agalinaga keba holene ngagome Ngode Datagaliwabenaga tigabi bulene ngago mo bia nahaga.✧

<sup>21</sup> Anigo ko bulene bibahende ngaru wahai halimu. Ngode Datagaliwabehanda bi mana tínaga bu habaneha hangayago manga nahe howa bayuwa yu tigabu halimu. Ani birimiyagua Ngode Datagaliwabenaga pele mulene yu holeberami.✧

<sup>22</sup> Bi mana ogoni hale dege harimiyagua tíni mo hondo harami. Hale halu bulene nga manda bilimu.✧ <sup>23-24</sup> Mbiralime iba wayu handalu puwa mani ibunaga dengui abi kobe toba halu embeda haga. Ogonidagua mbiralime bi mana hale howa bia nabiyagua ibu ogonibi ka.✧ <sup>25</sup> Ngode Datagaliwabe bi mana baya buruguleore lowini ngagome wali agali golope haga. Mana ogoni mbiralime bayuwa mitangi bu haabo hayagua bi mana embeda nahe bulene ngadagua bialu ibugua Ngode Datagaliwabenaga turu holene handa walia holebira.✧

✧ **1:7-8:** Ya 4.8 ✧ **1:9:** Ya 2.5 ✧ **1:10:** Iba 37.2, 90.5-6, 1 Ko 7.31, 1 Pi 1.24, 1 Yo 2.17 ✧ **1:10:** Ais 40.6-7  
 ✧ **1:12:** Min 3.11-12, 2 Ti 4.8, Hi 12.5, Ya 2.5, 1 Pi 5.4, Mo 2.10 ✧ **1:14:** Lm 7.7-10 ✧ **1:15:** Iba 7.14, Lm 5.19-21  
 ✧ **1:17:** Mal 3.6, Md 7.11, Yo 3.27, Lm 11.29, 1 Ko 4.7 ✧ **1:18:** Yo 1.13, Eb 1.12, Ya 2.3, 1 Pi 1.23, Mo 14.4 ✧ **1:20:**  
 Min 10.19, 17.27, Aga 5.1-2, 7.9 ✧ **1:21:** 1 Ko 15.2, Kl 3.8, Hi 2.3, 1 Pi 1.9, 2.1 ✧ **1:22:** Md 7.21, 7.26, Lg 6.46, Lm  
 2.13, 1 Yo 3.7 ✧ **1:23-24:** Lg 6.47, Ya 2.14 ✧ **1:25:** Yo 13.17, Lm 8.2, 2 Ko 3.18, Ya 2.12

<sup>26</sup> Mbiralime, I Keriso hameigini ko, lowa ibunaga hége haru nahaga kayagua ibuni mo hondo hara. Mana yu kogo bamedago lowa ani laga ka. <sup>27</sup> Aba Ngode Datagaliwabehanda Keriso hameigini henemanebi tigabibi kayagua ti ogobiore holebira manda bu ka. Wali dalo bedarubi waneigini hono wahene karubi ti genda yu kagola biamogo bia holene nga. Ani bialu howa dindi mana ko ngarume tí mo pila holigo hondo wandialu halimu. <sup>\*</sup>

## 2

### *Iname wali agali talebu ki bulene nawigo ogo*

<sup>1</sup> I hamene mbaliniru-o Anduane Homogo Yasu Keriso ibu mini daliga lowa Anduane Homogo kago ibuhondo mini mbiraorewi kamiru tígua wali agali tale bialu homogo karuhondo turu halu yagibano karuhondo handabe manga halu bulene nawi. <sup>2</sup> Agali kira mendego ibu gi magibi aga bayalebi biai howa mendego ibu yagibano aga ko buda pugubi buwa libu tínaga lotu lagane andaha ibiyagua <sup>3</sup> tígua agali aga bayalebi kagohondo lalu, Biragane bayale ogoria birule ibu, lalu agali mende aga budu pugubi biagohondo lalu, Í kegoriani hoa biyagua nde habe. Biruabiyagua nde ogoriani birabe, <sup>4</sup> laramiligo tínaga mini ko ngamigome wali agali talebu ki bialu kami.

<sup>5</sup> I hamene mbalini turubiru-o tí hale halimu. Yagibano karume Ngode Datagaliwabehondo mini mbiraore wulene timbuni yu tiga bilobi Ngode Datagaliwabehanda handame ho kagoria ti helobi ibugua ti dabo helene. Ibihondo gubalini ho karu ibugua handame ho kagoria ti holebira lalu lowini. <sup>6</sup> Agali kira larugo yagibano biagohondo tígua handabe manga halu mo taga haramili. Homogo karume tí handabe manga halu, Godi lo ma, laga ndobe. <sup>7</sup> Tigua tí Yasu Kerisonaga mini bayale karulo kamigo hondowa tí mege biaga ka ndobe.

<sup>8</sup> Ngode Datagaliwabehanda Handame Ho kagonaga mana lowinigo ibunaga mbugani longago ogo, Ína íni gubalini ho harilidagua maru karu ta nabi gubalini ho habe, lalu gilibu nga. Ani lo ngadagua bialu kamiyagua ogoni bayaleore berami. <sup>\*</sup>

<sup>9</sup> Mbiralime kagohondo handabe manga ho kamiyagua Mosese heneyangi Mana lowini ngago puguvalu ko berami. <sup>10</sup> Ngode Datagaliwabehanda bi mana lowini ngago mbiralime mana ogoni mbira hangu puguayagua ibugua bi mana bibahende ngago puguai haragoni. <sup>11</sup> Ngode Datagaliwabehanda lalu, Wali agali kayu nayabe, lalu bi mende, Homelo nababe, lene. Tí wali agali kayu nabi howa mbiralime homelo barimiyagua Ngode Datagaliwabehanda bi mana bibahende lowinigo puguai harimi. <sup>12</sup> Ngode Datagaliwabe bi mana lowini ngagome wali agali golope hagago mana ogonime tí tale bulebirago tígua bi laramigobi mana beramigobi hondowa halimu. <sup>13</sup> Mbiralime wali agali maruhondo dara howa biamogo nabiyagua ogoninaga Ngode Datagaliwabehanda dabi ki birangi ibu dara naholebira. Anigo mbiralime wali agali dara halu biamogo bialu hayagua Ngode Datagaliwabehanda daba ki birangi ogoni ibu dara holebira. <sup>\*</sup>

### *Mini mbiraore wu howa bulene ogo*

<sup>14</sup> I hamene mbaliniru-o, Ngode Datagaliwabehondo mini mbiraore wu ko, lowa mana bayale biatagi naharimiyagua mana ogonibi beramigome tíni pele mibehedabe. <sup>15</sup> Keriso hameigini marume agabi tomo nolenebi nawi kagola <sup>16</sup> o biaruhondo aga tomobi nami howa tihondo lalu, Tí tomo karulape nalu aga bayale bialu turu halu hondo halimu, larimiyagua bayale beramibe. <sup>17</sup> Tí Ngode Datagaliwabehondo mini

<sup>\*</sup> **1:26:** Iba 34.13, 39.1, 141.3, 1 Pi 3.10 <sup>\*</sup> **1:27:** Ais 1.16-17, 58.6-7, Md 25.36, Lm 12.2, 1 Yo 5.18 <sup>\*</sup> **2:1:** Man 1.17, Min 24.23, Md 22.16, Ab 10.34, Ya 2.9 <sup>\*</sup> **2:5:** Md 5.3, Yo 7.48, 1 Ko 1.26-28, 1 Ti 6.18, 2 Ti 4.8 <sup>\*</sup> **2:6:** Ab 13.50, 18.12, 1 Ko 11.22, Ya 5.6 <sup>\*</sup> **2:8:** LBM 19.18, Md 19.19, 22.39, Lm 13.8-9, Ga 5.14 <sup>\*</sup> **2:9:** Man 1.17 <sup>\*</sup> **2:10:** Man 27.26, Md 5.19, Ga 3.10 <sup>\*</sup> **2:11:** Har 20.13-14, Man 5.17-18, Lm 13.9 <sup>\*</sup> **2:12:** Ga 6.2, Ya 1.25-26, 1 Pi 2.16 <sup>\*</sup> **2:13:** Min 21.13, Md 5.7, 18.32-35, 25.41-42, 1 Yo 4.17-19 <sup>\*</sup> **2:14:** Md 7.21, 7.26, Ya 1.23 <sup>\*</sup> **2:15:** Yob 31.19-20, Lg 3.11, 1 Yo 3.17



mbiraorewi kamiyagua nde mana beramigome walia halu biatagi halimu. Ibhondo mini mbiraore wu howa mana bayale biatagi naharimiyagua mini mbiraore wulene ogoni hangu galone naholebira.✧

18 Mbiralime lalu, Mbiralali ibu Ngode Datagaliwabhondo mini mbiraore wu haga ka mendeali ibu mana bayale bialu haga ka, lolebira. Ani laragohondo ina agua ladai bero. Mbiralime Ngode Datagaliwabhondo mini mbiraore wu ko lowa mana bayale nabiyagua ina ibu mini mbiraore wu ka agua manda buleberobe. I nde mana bayale berogome Ngode Datagaliwabhondo mini mbiraore wu ko, lalu walia holebero.✧ 19 Ngode Datagaliwabe ibu mbiraore kago manda biribe. Bayuwa manda birida. Dama karu ti nde anidagua dege manda bialu mogo lowa gi halu ka. I mini nawi kegoni.✧ 20 Ngode Datagaliwabhondo mini mbiraore wu howa mana bayale biatagi nahayagua ogoni galone ndo berego manda nabi kebe. 21 Inanaga mamali Abarahamahanda ibu igini Aisaga Ngode Datagaliwabhondo bo lomabu miaga dabuni mule biyagola Ngode Datagaliwabhanda, Ibu mini tigabiwi ka, lene.✧ 22 Ibugua mini mbiraore wu howa Ngode Datagaliwabhanda bia layadagua biatagi hayagome Ngode Datagaliwabhondo mini mbiraore ogobi wu ko lalu walia hene.✧ 23 Ani biyagola Anduane Homogonaga mbugani bi lowinigo lola henego ogo, Abarahamahanda Ngode Datagaliwabhondo mini mbiraore wu heago hondowa Ngode Datagaliwabhanda, Ibu agali mini tigabiwi ka, lowa, Inaga nenegeore ka, lalu gilibu nga.✧ 24 Anigo mbiralime Ngode Datagaliwabhondo mini mbiraore wirago hangume ndo mana bayale birago hondowabi Ngode Datagaliwabhanda, Ibu mini tigabiwi dege ka, lolebira.

25 Bayanda wali mbira kayu bule muni ngi laga mini Lahaba berenego ibugua Isaraele agali kirali taya ibiyago labo yo pialu pelo lowa ibu andaga bira do helalu hariga tarani dai bilo walia hayagome ibubi mini tigabiwi holene yini.✧

26 Anigo mbiralinaga tinginibi dininibi mandagi naheyagua nde ibu homene ka. Ogonidagua Ngode Datagaliwabhondo mini mbiraore wulenebi mana bayale bulenebi mo mbiraore nahayagua Ngode Datagaliwabhondo mini mbiraore wulene degego homene ale ka.✧

### 3

#### *Iname hége haru holenege ogo*

1 I hamene mbaliniru-o tí lawai hagane hole garere nabilimu. Daba ki birangi Keriso hameigini bibahende dabolebira. Dabalu howa lawai hagane kamaru inahondo hongo howaore dabolebira.✧ 2 Ina bibahendeme kagua dewa beramali. Mbiralime bi ko nalaga kayagua ibu baya burugule howa ibunaga mini tinginibi haru hai haga ka.✧ 3 Agalime nogo hosi gabua mo dambola howa nogo hosi ne hanganeha ege pu magui howa pume pongo buwa biabe hame ledamadagua bilo iname hosi haru haramali. 4 Iba sibi piagane mana manda bimija. Puyabu hongo howa pu laragola iba sibi timbuni ngago yagane agalime ibuni poa biragoha pole ira mbalape emeneme mo tiga biaga. 5 Hége emene koore howa bi biabe dege timbuniore biaga ka.

Ira dene emeneme irabu timbuni ngago bo dai haga.✧ 6 Hége ira dene ale ka. Ko bulene dewa ngaru hége ibuha howa tagira ibaga. Hégame tingini bibahende tomia biai haga ka. Hégenaga hungu biagane tene heli dindiha nga.✧ 7 Nogo ega tara tarabi dindini tombene piagane tara tarabi wena tara tarabi bibahendeore wali agalime mo dambola hagago 8 hége mo dambola habe nahe ka. Hége koorene ko ka. Hégame bibahende

✧ 2:17: Ya 2.20, 2.26 ✧ 2:18: Ga 5.6, Ya 3.13 ✧ 2:19: Md 8.29, Lg 4.34, Ab 16.17 ✧ 2:21: Pig 22.1-14 ✧ 2:22: Hi 11.17-18 ✧ 2:23: Pig 15.6, 2 Bit 20.7, Ais 41.8, Lm 4.3, 4.9, 4.22, Ga 3.6 ✧ 2:25: Yos 2.1-21, Hi 11.31 ✧ 2:26: Ya 2.17 ✧ 3:1: Md 23.8, 23.14, Lg 6.37, 12.47, 1 Pi 5.3 ✧ 3:2: 1 Kin 8.46, Min 20.9, Md 12.37, 1 Yo 1.8 ✧ 3:5: Iba 12.3, 73.8-9, Min 12.18, 15.2 ✧ 3:6: Min 16.27, Md 12.36-37, 15.11, 15.18-19, Mg 7.15, 7.20, 7.23

tomia biai haga. ✧ <sup>9</sup> Inanaga hégame Anduane Homogo ina Abahondo kaj laramali. Ani buwa hége ogoni degeme agali Ngode Datagaliwabehanda ibuni ale helo wabini karubi ha haramali. ✧ <sup>10</sup> Ne hariga mbiraoreha howa kaj lolenebi ha holenebi tagira ibaga. I hamene mbaliniru-o mana ogonibi karulape ndo. <sup>11</sup> Iba gendo mbiraoreha howa iba kaubi dendebila ibagabe. <sup>12</sup> I hamene mbaliniru-o pogeme hai dagabe. Pu mbira lini daga mini gerebi iraneme pogoli dagabe. Ogonidagua dege ibi iba kaubi bedagoha iba dendebi hambibehebe.

*Mini gigabi wulene dahuliya andaga tawe ngago ogo*

<sup>13</sup> Tí kamigoha mini gigabiwi manda timbunibi mbira ai kabe. Mini gigabiwi mbira kayagua mine nahe ibuni mo dindiha halu mana bayale biragome walia holebira. ✧ <sup>14</sup> Anigo tínaga bu miniha henge lolenebi bi ko lolenebi habua bulenebi wu kamiyagua, Mini gigabiwi kogo, laramigome henene lolene ngago mo ko haramigo nalalimu. ✧ <sup>15</sup> Mini ogonibi wulene dahuliya andaga tawe ndo dindi tawe damanaga mini koha howa íbu nga. ✧ <sup>16</sup> Henge lolenebi habua bulenebi ngagoria mini mo mbiraore naholenebi ko bibahende bulenebi wulebira. ✧ <sup>17</sup> Anigo mini gigabiwi holene dahuliya andaga howa íbu ngagome mini wálewí holenebi mo palia holenebi hogorale bu holenebi nenege hinulenebi dara halu biamogo bulenebi mana bayale biatagi holenebi nga. Mini gigabiwi holene ogoni wali agali hoba migimigi nabigabi tombene hondo kihe nahagabi nga. ✧ <sup>18</sup> Ani buwa mo palia haga kagome mo palia holene egene hongolebira. Anda haragola ibuhabi wali agali maruhabi mini tigabi holenenaga lini dolebira. ✧

## 4

*Dindi mana ko ngaru hame lolene nawigo ogo*

<sup>1</sup> Tí lai lalu gungu bialu kamigo agiha howa tagira ibagabe. Tíni mini ko ngamigoha howa tagira ibaga ndobe. ✧ <sup>2</sup> Tígua mbirale ngago hame lowa henge lalu nayido agini homelo baramili. Marume mbirale yu karunaga henge lowa lai lalu gungu bialu kami. Anigo Ngode Datagaliwabehondo ngi nalarimigome nayi kamigoni. <sup>3</sup> Tígua ngi lalu howa mini ko wuwa tíni hangu mitangi bialu Ngode Datagaliwabehondo ngi larimigome nayi kamigoni. ✧ <sup>4</sup> Tí wali agali mini tigabiwi ndo mini kirawi kami. Dindi mana ko ngaru nenege hinalu kamiyagua Ngode Datagaliwabela waitigi tínime haru anda eberamigo nahende kamibe. Halu mende laro. Tí dindi mana ko ngaru nenege hinalu kamiyagua Ngode Datagaliwabela waitigi tínime haru anda eberamigoni. ✧ <sup>5</sup> Anduane Homogonaga mbugani bi o lo ngago bame lo ngabe, Ngode Datagaliwabehanda dinini inanaga bu habaneha helayagome ina henge lalu hamelo ka, lalu gilibu nga. ✧ <sup>6</sup> Anigo Ngode Datagaliwabehanda ina biamogo bulene nawi howa guaileore biamogo biahaga ka. Anduane Homogonaga mbugani bi lo ngago ogo, Mine haga karu Ngode Datagaliwabehanda ti hela dai biaga ka. Tini mo dindiha haga karu ibugua biamogo biaga, lalu gilibu nga. ✧

<sup>7</sup> Anigo tígua Ngode Datagaliwabehanda bia laradagua bilimu. Tígua dama Heyolabehondo, Mangaba, larimiyagua ibugua tí wahu ibida polebira. ✧ <sup>8</sup> Ani buwa Ngode Datagaliwabe kagoria kaware hapara ho harimiyagua ibugua tí kamigoria kaware hapara ho holebira. Mana ko biaga kamigo wahi halimu. Tombene hondo kihe kamirume bu mini wálewí wu hole ko ngamigo wahi halimu. ✧ <sup>9</sup> Ko birimigo mitangi bialu

✧ 3:8: Iba 140.3, Lm 3.13 ✧ 3:9: Pig 1.26, 5.1, 9.6, 1 Ko 11.7 ✧ 3:13: Ga 6.4, Ya 1.21, 2.18 ✧ 3:14: Lm 2.17, 2.23, 13.13 ✧ 3:15: Pb 3.19, Ya 1.5, 1.17 ✧ 3:16: 1 Ko 3.3, Ga 5.20 ✧ 3:17: Lm 12.9, 1 Ko 2.6-7, 1 Pi 1.22, 1 Yo 3.18 ✧ 3:18: Min 11.18, Ais 32.17, Md 5.9, Pb 1.11, Hi 12.11 ✧ 4:1: Lm 7.23, Ga 5.17, 1 Pi 2.11 ✧ 4:3: Iba 66.18, Ais 1.15, Mai 3.4, Seg 7.13, 1 Yo 3.22 ✧ 4:4: Yo 15.19, 17.14, Lm 8.7, Ga 1.10, 1 Yo 2.15 ✧ 4:5: Pig 6.5, Har 20.3-5, Dag 11.29, Min 21.10 ✧ 4:6: Iba 138.6, Min 3.34, Lg 14.11, 1 Pi 5.5 ✧ 4:7: Eb 4.27, 6.11-12, 1 Pi 5.7 ✧ 4:8: 2 Bit 15.2, Ais 1.16, Seg 1.3, Mal 3.7, Ya 1.8, 1 Yo 3.3

dara halu dugu bilimu. Oba halu kamiru dugu bia aribia holene nga. Turu ho kamigo dara ho aribia holene nga. <sup>10</sup> Tígua Anduane Homogo deni howa tini mo dindi halimu. Ani beramigola ibugua tí mo yaraga holebira.\*

*Keriso hameigini maru karume birago daba ki bulene nawigo ogo*

<sup>11</sup> I hamene mbaliniru-o tini guraga guraga nabilimu. Mbiralime Keriso hameigini gurayaguabi ibugua birago daba ki biyaguabi ogonime Mosese heneyangi Mana lowini ngago guralu daba ki bialu ka. Mana lowini ngago daba ki birimiyagua tígua Mana lowini ngago hale halu biaga ndo tí daba ki biaga kami.\* <sup>12</sup> Ngode Datagaliwabe ibu mana lowini ngago tenebi daba ki biagabi ibu dege ka. Ibuni degeme holene ngiagabi holene yamiagabi ka. Tígua wali agali tale bialu dabaga agalime daba ki biagadagua beramigo tí ai kama manda bidamibe.\*

*Mine holene nawigo ogo*

<sup>13</sup> Áyu yawibi ina dindi mbiraha puwa biyinaya bialu mali mbira hondo holebero, lalu kamiru tíhondo bi larogo hale hadaba.\*\* <sup>14</sup> Yawi agi bialu holedabe tí manda nabi kami. Ginu ngago tígua de handaramigola abale ereba hagagobi tí kamigoni.\* <sup>15</sup> Tígua ogodagua labehe. Ina ogobi mendebi bialu holiya Anduane Homogo ibugua hame ledayagua nde ani bialu holebero, laramine.\* <sup>16</sup> Ani ndo tínime mine halu kudaga bi lagimbu bialu kamigo ko berami. <sup>17</sup> Mbiralime bayale bulene mbira ngago manda buwa bia nabi hayagua nde ko bialu ka.\*

## 5

*Homogo karunaga bi lo ngago ogo*

<sup>1</sup> Homogo kamiru tí hale hadaba. Mo ko holene dewa tínaga wulebirago mitangi bialu yi lalu dugu bilimu.\* <sup>2</sup> Dabudabu do harimigo goba haya. Aga tara tara wirimigo bombome naya.\*\* <sup>3</sup> Muni kuni ngolo silibabi wirimigo hagua biai haya. Hagua bidago hondowa tí ko birimigo lalu walia holebira. Irame dagadagua muni hagua bidagome tínaga tingini dolebira. Hamaro bulene horo kaware ngago ngelowa mbirale tara tara do harimi. <sup>4</sup> Mabu biabe bia hayaru mo hondo howa tinaga yolo nami ngamigome ko birimigo walia hara. Biabe bia hayaru maru mo hondo harimigonaga tigua bi larago Anduane Homogo Hongo Haiheore kagome hale halu ka.\* <sup>5</sup> Dindi ogoria howa tini hangu mitangi bialu nogo habahe kagola bo nolene tu haralidagua tí homolene kaware nga manda nabi howa bibahende ta nabi hame ledamidagua biai halu kami.\* <sup>6</sup> Ko nabi hayaru, Ko biya, lowa tigua nde ladai bulene henge nawi heagola homelo bo waharimi.

*Ema nabi howa hibu lalu Ngode Datagaliwabehondo bi lolenego ogo*

<sup>7</sup> I hamene mbaliniru-o Anduane Homogo dai bilo tagi ema nabi howa hibu lalu halimu. Agalime tomo hongowa anda helonaga dalu ibilo ema nabi malia ho hagago mitangi bilimu.\* <sup>8</sup> Anduane Homogo dai bulene horo kaware ngago tí turu halu mini dunubia ho howa ema nabi halimu.\*

<sup>9</sup> I hamene mbaliniru-o Ngode Datagaliwabehanda daba ki bialu howa, Tígua kagua birimi, loligo tini guraga guraga nabilimu. Daba Ki Biaga henemane ibu panga tagirahayagi howa tamuha ibule kago handalimu.\* <sup>10</sup> Ngode Datagaliwabe mana latagi haga agali bamba henerume Anduane Homogo mini lowa ti tandaga halu ema nabi

\* **4:10:** Yob 5.11, 22.29, Md 23.12, 1 Pi 5.6    \* **4:11:** Lg 6.37, Lm 2.1, Eb 4.31, 1 Pi 2.1    \* **4:12:** Md 10.28, Lm 2.1, 14.4, 14.13    \* **4:13:** Lg 12.18-20    \* **4:13:** Min 27.1    \* **4:14:** Iba 39.5, 39.11, 102.3, Ya 1.10, 1 Pi 1.24    \* **4:15:** Ab 18.21, 1 Ko 4.19, Hi 6.3    \* **4:17:** Lg 12.47, Yo 9.41, 15.22, Lm 1.20-21, 2.17-18, 2.23    \* **5:1:** Min 11.28, Lg 6.24, 1 Ti 6.9    \* **5:2:** Yob 13.28, Ya 2.2    \* **5:2:** Md 6.19    \* **5:4:** Man 24.14-15, Yar 22.13, Mal 3.5    \* **5:5:** Yar 12.3, 25.34, Amo 6.1, 6.4, Lg 16.19, 16.25, 1 Ti 5.6    \* **5:7:** Man 11.14, Yar 5.24, Hos 6.3, Yol 2.23, Seg 10.1, Lg 21.19    \* **5:8:** Lm 13.11-12, Pb 4.5, Hi 10.25, 10.37, 1 Pi 4.7    \* **5:9:** Md 24.33, 1 Ko 4.5, Ya 4.11

howa hibu lalu henego manda bimiya. ✧ <sup>11</sup> Tandaga timbuni halu ti hongo haabo howa turu holene handa walia hene laramali. Yobo te hale harimigoni. Ibugua Ngode Datagaliwabe mitangi bialu ema nabi howa hibu lalu haabo hayagola Anduane Homogohanda ibuhondo biyago manda bidami. Anduane Homogo kagome wali agali de hondowa dara timbuni halu biamogo biaga ka. ✧

<sup>12</sup> I hamene mbaliniru-o ai galone timbuniore laro. Dahuliya andaga mini lalubi dindi mini lalubi mbirale tara ngago mini lalubi wanakui minalu bi nalalimu. Ngode Datagaliwabehanda, I kagua lari, loligo ebi ndobi ogoni dege lalimu. ✧

<sup>13</sup> Ti kamigo mbirali genda yu kayagua Ngode Datagaliwabehondo bi lolene nga. Ani buwa mbirali ibu turu hayagua Ngode Datagaliwabe mini yaraga halu iba gana lolene nga. ✧ <sup>14</sup> Mbirali kamigo warago bayagua ibugua Keriso hameigini agali ala hene miniwi karu lolene nga. Tigua o biago mini lalu Ngode Datagaliwabehondo bi lalu Anduane Homogo minini howaibunaga tinginini olibe lininaga weli odo wulene nga. ✧

<sup>15</sup> Tigua Ngode Datagaliwabehondo mini mbiraore wuwa bi larimigome mbirali warago bo wiyago Anduane Homogohanda mo dabi holebira. Ani biragola ibugua ko biyago Ngode Datagaliwabehanda domo wahai holebira. ✧ <sup>16</sup> Wali agali maru kamigo dabi helo ko birimigo hangu hangu lapani hagahaga bialu ti mini lalu Ngode Datagaliwabehondo bi la haga bialu halimu. Mbirali mini tigabiwi kagome Ngode Datagaliwabehondo bi layagua Ngode Datagaliwabehanda hongo tara walia holebira. ✧ <sup>17</sup> Elaya ibu ina kamagobi dege howa ibugua dalu naibilo lalu Ngode Datagaliwabehondo mini dunubia ho howa bi layagola mali tebirani manegonaga ege waragaria dalu naibi gaea biaabo ho wini. ✧ <sup>18</sup> Ani biyagola howa ibugua Ngode Datagaliwabehondo bi lone lalu, Dalu ibila, layagola dalu ibalu dindi bayale halu tomo anda haga bini. ✧

<sup>19-20</sup> I hamene mbaliniru-o galone ogo ala manda bilimu. Ti kamigo mbiralime mana henene ngago wahalu poragola mendealime hariga tigabini haru dai biyagua homolene ngagoria pu karia haru dai bulebira. Mana ko biaga karume ko dewa biyago Ngode Datagaliwabehanda domo wahai helo haru dai biyagome ibu biamogo bini. ✧✧

✧ **5:10:** Md 5.12, Hi 11.35 ✧ **5:11:** Har 34.6, Yob 1.21-22, 2.10, 42.10, Iba 94.12, 103.8, 111.4, Md 5.10-11 ✧ **5:12:** Md 5.34-37 ✧ **5:13:** Eb 5.19, Kl 3.16 ✧ **5:14:** Mg 6.13, 16.18 ✧ **5:15:** Ais 33.24, Md 9.2, Mg 16.18 ✧ **5:16:** Man 9.18-20, 1 Sml 12.18, 1 Kin 13.6, Iba 34.15, Yo 9.31 ✧ **5:17:** 1 Kin 17.1, 18.1, Lg 4.25, Ab 14.15 ✧ **5:18:** 1 Kin 18.42-45 ✧ **5:19-20:** Md 18.15, Ga 6.1 ✧ **5:19-20:** Iba 51.13, Min 10.12, Lm 11.14, 1 Ko 9.22, 1 Ti 4.16, 1 Pi 4.8

# 1 Pida

## Pidahanda Keriso hameigini dindi tara tarani hearuhondo beba mbira ogo gilibu wia hene

### Mbuga ogoha gilibu ngarunaga nemandi ogo

Pidahanda Keriso hameigini Esia dindini hagahaga bu hearuhondo beba mbira ogo gilibu wia hene. Beba ogo gili binigonaga irane Keriso hameigini Yasuhondo mini mbiraore wu hearu tiha mo tandaga holene tara tara wiyagola ti mini elahe helobi ema nabi hongo ho helobi lowa gilibu wia hene. Beba ogo gili binigo tene Yasu Keriso homayagonagabi heyinigonagabi dai buleberoore lalu lo winigonagabi Bi Mana Debene ogoni mini dunu bia ho holene ngago lalu gili biaga biagome beba ogoni daga lenedaru ti mo mitangi bia hene. Ogoni mo mitangi bia halu gendabi damene ngagome ti mini mbiraore henene wirimigo ba handaragola ti hibu lalu hongo haabo harimiyagua Yasu Keriso ha pani harangi mini mo yaraga holenebi mini lene lolenebi tinaga wulebira lalu gilibu nga.

Ti Kerisonaga kamigo howa ibunaga mana bia pani halu holene nga lalu gilibu nga.  
**Bulu бага бува кuni gilibu ngago**

*1.1-2*

Pidahanda bi ala lenego *1.3-12*

Ngode Datagaliwabehanda ina pele ngingo mo mitangi bia holene *1.13-2.10*

Ina mini tigabi hole bulene ngago *2.11-4.19*

Tandaga nolene nganggi Keriso hameigini ogo bi holene *5.1-11*

Inane mo dindiha howa biabe bulene *5.12-14*

Lamaro bialu lenego

<sup>1</sup> I Pida Yasu Kerisonaga abosolo kogoni howa bi ogoni gilibu wia haro. Ti Ngode Datagaliwabehanda dabene harimiru tini dalu wahalu Pondasabi Galesiabi Kadosiabi Esiabi Bidiniabi dindi uruniha bai naleha hole ibida purogo lo kamiru tihondo bi ogo gilibu wia harogoni. <sup>2</sup> Aba Ngode Datagaliwabehanda manda bu winidagua ti dabowa heledagoni. Ibugua manda bu wialu ibu Dininime ti wali agali ibuninagaore loma bia hene howa Yasu Kerisohanda laradagua bilimulobi ibunaga daramame ti mo gahenge helobi ani dabo helayagoni.

Uru-o biamogo bia holenebi mo palia holenebi tiha tolai helo hame lo kogoni.

*Dahuliya andaga pole lowa mini dunu bia ho holene ogo*

<sup>3</sup> Uru-o iname Anduane Homogo Yasu Kerisonaga Aba Ngode Datagaliwabe kago-hondo kai lamiya. Ibugua ina dara timbuni howa biamogo bialu Yasu Keriso homayagola mo heya hayagome ibugua inahondo holene gahenge ngiya. Ani biyagome inabi mo heya holebiraore manda bialu mini dunu bia ho kama. <sup>4</sup> Ani bu howa Ngode Datagaliwabehanda turu holene tara tara baya gibiore wini ngaru ibunaga wali agaliruhondo mule lowa wia hene ngago iname muleore lowa minime dunu bia ho kamagoni. Uruni tinaga ngaru ko holilono Ngode Datagaliwabehanda dahuliya andagaha mo do ho kagoni. <sup>5</sup> Horo ha maro birangi Ngode Datagaliwabehanda pele mulene walia hole mo manda bu wini ngago ogoni mule hondo kamigoni. Ani hondo howa ti Ngode Datagaliwabehondo mini mbiraore weramigola ibunaga hongome ti mamage ho kago uruni tinaga lalu ibugua wia ka. <sup>6</sup> Anigo ayu mo tandaga holene tara tara dewa ngagola genda tandaga tigi mbira hangunaga nalu kamigonigoyu Ngode

✧ **1:1:** 2 Ti 1.15, Ya 1.1 ✧ **1:2:** Lm 1.7, 8.29, 2 Te 2.13, Hi 10.22, 12.24, 2 Pi 1.2 ✧ **1:3:** 1 Ko 15.20, 2 Ko 1.3, Eb 1.3, Ya 1.18 ✧ **1:4:** Kl 1.5, 1.12, 2 Ti 4.8, Ya 5.4 ✧ **1:5:** Yo 10.28-29, 17.11-15, Yu 1



Datagaliwabehanda t́naga uruni wia do hayago mitangi bialu turu ho halimu.✠ 7 Mo tandaga holene ngarume tí Ngode Datagaliwabhondo mini mbiraore henemane wu kamigo walia halimulonaga nga. Bi manane mbira ogo ala laro. Dindi tawe ngolo dudu бага bialu mo koore habehe ngago ogoni ngolo ibunioredabe be ngolo ibuni ndodabe hondole agalime irani delaga. Anigo t́gua Ngode Datagaliwabhondo mini mbiraore wirimigo ngolo ale ndo baya gibirego hongo ho wiaabo halimulonaga Ngode Datagaliwabehanda ba hondolene nga. Hongo ha ho wiaabo hararume Horo Mbira Yasu Keriso ha pani harangi mini mo yaraga holenebi wá taraore holenebi mini lene holenebi t́naga wulebira.✠ 8-9 T́naga deme ibu nahende howa ibuhondo gubalini ho haabo haramili. Áyubi deme ibu nahende dege howa ibuhondo mini mbiraore wu kami. Mini mbiraore wu kamigo irane ibugua t́hondo pele mulene ngiyagome. Ogonigo tí turu holene baya gibi nalabeheore yu kamigoni.✠ 10 Bamba Ngode Datagaliwabe mana latagi haga henerume pele mulene ogoni tini manda bule baya hangu tai biaabo halu begelo handalu howa Ngode Datagaliwabehanda t́hondo áyu ngirago ngulebira lalu ala mbiwia hene.✠ 11 Keriso Dinini ibugua Ngode Datagaliwabe mana latagi haga biaruha howa Keriso tandaga nolebira lalubi mani ibu mini lene daliga holene wulebira lalubi walia hayagola t́gua ogoni angi ibulubadabe agua ibulubadabe lowa tai biaabo halu hene.✠ 12 Ani bialu heagola Ngode Datagaliwabehanda o biaruhondo mo walia halu, Bi uruni tí manda bilimulonaga ndo wali agali mani hararume manda bilonaga nga, lalu mo walia hene. Anigo Ngode Datagaliwabehanda ibu Dinini dahuliya andaga howa ibilayagola ibunaga hongome Bi Mana Debene lawai haga karume t́hondo bi uruni langiya. Bi uruni dahuliyaliru tibi handawa bialu manda bua ka.✠

*Ina Ngode Datagaliwabenaga deni dodo nahe mini tigabi holenaga ibugua bilimu larago ogo*

13 Anigo t́naga miniha dengala howa biabe bule manda manda bu halimu. Ani bialu howa Yasu Keriso ha pani haragola Ngode Datagaliwabehanda tí biamogo bialu mo turu holebirago manda buwa mini dunubia ho halimu.✠ 14 Ngode Datagaliwabenaga bi hale halu bilimu. Ani bialu howa Ngode Datagaliwabe manda nabi hemingi hame laramiligome t́naga miniha lone karuloligo henge namilimu.✠ 15 Ngode Datagaliwabe ibugua ibu mini baya burugule taraore howa tí olayago t́gua mbirale tara tara bibahende beramigo bialu howa t́bi nde mini baya burugule taraore dege howa bialu halimu.✠ 16 Anduane Homogonaga mbugani lo ngagome lalu, I mini baya burugule taraore kodagua t́bi nde mini baya burugule taraore dege halimu, lalu gilibu nga.✠

*Ina dariba ho hemaria Ngode Datagaliwabehanda ina golope halu yolo binigo ogo*

17 T́gua Ngode Datagaliwabhondo bi lalu howa, Aba-o, laramiligo ibugua wali agali bibahende dabaga kago ibu mini kira nawiaga howa hangu hangume biyagonaga tigatiga dabaga ka. Ani dabaga kago manda buwa dindi ogoriani kamingi ibu mitangi bialu ibu andaneha haabo halimu.✠ 18 T́ mamalime mana nahabane lawai hayagome tí dariba hearia ibugua tí golope hole yolo biyago manda biai kami. T́ golope hole ngolo silibabi ko haga ogoni aleme tí yolo bini ndo.✠ 19 Nogo sibi igini duru nabirego Ngode Datagaliwabhondo bo miaga henego ale Kerisonaga darama baya buruguleoreme tí golope halu pele ngini.✠ 20 Ngode Datagaliwabehanda dindi wa nabi howa Keriso

✠ 1:6: Lm 12.12, 2 Ko 4.17, 6.10, Ya 1.2, 1 Pi 5.10 ✠ 1:7: Yob 23.10, Iba 66.10, Min 17.3, Ais 48.10, Seg 13.9, Mal 3.3, Lm 2.7, 2.10, Ya 1.3 ✠ 1:8-9: Lm 6.22, Yo 20.29, 2 Ko 5.7, Hi 11.1, 11.27, 1 Yo 4.20 ✠ 1:10: Dan 2.44, Hag 2.7, Seg 6.12, Md 13.16-17, 2 Pi 1.19-21 ✠ 1:11: Iba 22, Ais 53, Lg 24.26-27, 1 Pi 3.19, 2 Pi 1.21 ✠ 1:12: Dan 9.24, Eb 3.10, Hi 11.13, 11.39-40 ✠ 1:13: Lg 12.35, Lm 13.13, 1 Ko 1.7, 1 Te 5.6-8 ✠ 1:14: Lm 12.2, Eb 2.3, 4.17-18, 1 Te 4.5 ✠ 1:15: 2 Ko 7.1, Hi 12.14, 2 Pi 3.11 ✠ 1:16: LBM 11.44-45, 19.2, 20.7, Md 5.48 ✠ 1:17: Man 10.17, Md 6.9, Ab 10.34, Lm 2.11, 2 Ko 5.6, 7.1, 2 Ti 4.14, Hi 11.13, 12.28, Mo 2.23 ✠ 1:18: Ese 20.18, 1 Ko 6.20, 7.23, 1 Pi 4.3 ✠ 1:19: Har 12.5, Ais 53.7, Yo 1.29, 1.36, Ab 20.28, 1 Ko 5.7, Hi 9.12-14, 1 Pi 1.2, Mo 5.9

loma bia ho helenego maha tí biamogo bulenaga ibu ha pani helene.✧ 21 Ngode Datagaliwabehanda Yasu Keriso homenego mo heya howa ibu daliga taraore yaraga ho helene. Ani biyagola Yasu Keriso howa tígua Ngode Datagaliwabhondo mini mbiraore wu kami. Ogoninaga tígua mini mbiraore wulenebi mini dunubia ho holenebi Ngode Datagaliwabe ibuni kagoni.✧

*Inane gubalini hagahagabu holene ngago ogo*

22 Bi mana heneneore lo ngago biai harimigome tíni mo gahenge harimi. Ani buwa tígua Kerisohondo mini mbiraore wu kamidagua marumebi mini mbiraore wu kago ti heba turu howa nenege hinu kamigoni. Ani bu howa tíni gubalini hagahaga bu halimu.✧

23 Tí tingini togo biaga arianaga waneigini halimulo ndo tingini togo nabi haabo holene arianaga waneigini halimulo Ngode Datagaliwabe mana wiaabo hene ngagome tí halu mende taba henene kami.✧ 24 Anduane Homogonaga mbugani lo ngagome lalu,✧✧

Wali agali bibahende karu datani anda hagamadagua anda haga ka.

Tinaga yári bulene ngaru balawaya minane anda harago ale nga.

Datani biaru gau lalu balawaya lini dogolopebe biaga ka.

25 Ani biagamadagua ndo Anduane Homogonaga bi mana ngago dege wiaabo haga winigo nga,

lalu gilibu nga. Bi Mana Debene tí langiyago ogoni.✧

## 2

*Anduane Homogo ibu ege tole holenehe kago ogo*

1 Anigo mana ko bibahende wahai halimu. Ke holenebi tombene hondo kihe holenebi henge lolenebi mege bulenebi uruni bibahende nabilimu.✧ 2 Gali áyuore taba henenerume andu noa haabo haralidagua tíguabi tí dinininaga andu gagahe ibirago noa haabo halimu. Nalu howa anda hama irigi haramigola pele mulene yu holeberami.✧

3 Ogoninaga bi Anduane Homogonaga mbugani lo ngagome lalu, Anduane Homogonaga biamogo bulene ngago tínime nalu dende hendene kamigoni, lalu gilibu nga.✧

4 Anduane Homogo ibu ege tole holenehe kago ibu kagoria ibalimu. Ege tole ogoni wali agalime hondowa dabo wahayago Ngode Datagaliwabehanda, Bayale galone pale, lowa dabo helene.✧ 5 Dinininaga anda tíni halimulo tí ege tole holenehe kamigo ibuwa ibugua anda ogoni bule tíbi yamilo tíni henge mu halimu. Yasu Kerisoni howa anda ogoniha Ngode Datagaliwabe ibugua tíha biabe bilo helalu tígua loma binigo mo miaga baya taraore howa mbirale Dinininaga loma bia heneru Ngode Datagaliwabe ibugua turu howa yilo ibuhondo tíni miaabo halu halimu.✧ 6 Anduane Homogonaga mbugani lo ngagome lalu,

Ege tole mbira baya buruguleore dabarugo

ina Saiono dindini anda bialu kogo anda gimbunihanaga ege tole ogoni wero.

Mbiralime ege tole ogonihondo mini mbiraore wiyagua mini burugulo naholebiraore,✧ lalu gilibu nga. 7 Mini mbiraorewi kamiru tígua ege tole ogoni baya buruguleore nga mitangi beramili. Mini mbiraore nawi karu Anduane Homogonaga mbugani lo ngagome lalu,

Ege tole mbira anda biagame galone nabibehedago lowa dabo wahenego ege tole ogoniore mo timbuni duniniore ho heleda,

✧ 1:20: Ab 2.23, Ga 4.4, Eb 1.4, 1.10, Kl 1.26, Ta 1.2-3, Hi 9.26 ✧ 1:21: Yo 14.6, Ab 2.24, 2.33, Lm 4.24, 5.1-2, 10.9, Pb 2.9, Hi 2.9, 1 Pi 3.22 ✧ 1:22: Yo 13.34, Ab 15.9, Lm 12.9-10, 1 Ti 1.5, 2 Pi 1.7, 1 Yo 3.18 ✧ 1:23: Yo 1.13, Hi 4.12, Ya 1.18, 1 Yo 3.9 ✧ 1:24: Iba 103.15, Ais 51.12, Ya 1.10-11 ✧ 1:24: Ais 40.6-8 ✧ 1:25: Yo 1.1, 1.14, 1 Yo 1.1-3 ✧ 2:1: Eb 4.22, 4.25, Kl 3.8, Hi 12.1, Ya 1.21 ✧ 2:2: Md 18.3, Mg 10.15, 1 Ko 3.2, 14.20, Eb 4.15-16, Hi 5.12-13 ✧ 2:3: Iba 34.8, Hi 6.5 ✧ 2:4: Iba 118.22, Ais 28.16, Md 21.42, Ab 4.11 ✧ 2:5: Har 19.6, Ais 61.6, Hos 14.2, Mal 1.11, Lm 12.1, Eb 2.21-22, Pb 4.18, Hi 13.15-16, Mo 1.6 ✧ 2:6: Ais 28.16, Lm 9.33, Eb 2.20

lalu gilibu nga.✠

<sup>8</sup> Anduane Homogonaga mbugani bi mende lo ngagome lalu, Ege tole ogonime wali agali marunaga ge bo bidi lolebira. Ege tole ogonime wali agali maru mo pila holebira, lalu gilibu nga. Ti mo pilo ibira holobadago tene tigua Ngode Datagaliwabe bi mana wiago yu tiga nabi heago hondowa ani bilo Ngode Datagaliwabehanda helene.✠

*Ina Ngode Datagaliwabenaga wali agali kamago ogo*

<sup>9</sup> Ai tí ogonibi ndo hameigini daba bagi ho henego aria kami. Handame Haga Kininaga loma binigo mo miaga tí kami. Wali agali Ngode Datagaliwabehondo loma bia hene helayaru aria tí kami. Tí Ngode Datagaliwabe ibuni hangunaga wali agali kamigoni. Ngode Datagaliwabehanda tí arumaha hemiria ibunaga wá holene baya gibi kagoria halimulo olayago ibugua mbirale bibahende baya gibiore biyaru tigua lamima pilimulo dabaya.✠ <sup>10</sup> Abale tí ibunaga wali agali ndo harimigo áyu tí ibunagaore kamigoni. Abale tigua Ngode Datagaliwabenaga dara howa biamogo bulene manda nabi harimigo áyu tí ibunaga dara howa biamogo bulene yu kamigoni.✠

*Ina Ngode Datagaliwabenaga howa garabaya biabe ale bia haga kamago ogo*

<sup>11</sup> I nenegeru-o tí dindi tara taraha howa ogoria togolo yu íbu haradagua bidamigo ina tíhondo bi mbira ogo lawia harogo hale halu bilimu. Tingininaga hame ledamirume tínaga dinini baba wai biaabo haganego urunime tí bolangua halu wayali helo henge namilimu.✠ <sup>12</sup> Wali agali Ngode Datagaliwabe mana yu tiga nabi karu heba howa tigua mana bayale hangu biaabo halu kamigola tigua, Tí ko mbira ogo biya, nalelo halimu. Tí bayale dege biaga ka, lalu latagi helo bialu halimu. Ani beramigola Anduane Homogo dai bulene Horo harangi Ngode Datagaliwabe mana yu tiga nabia biarume Ngode Datagaliwabenaga mini mo yaraga holene hangu wulebira.✠

<sup>13</sup> Anduane Homogo mo tene halu dindini haru hagane tara tara bibahende karume mana lo ngaru hale halu bialu halimu. Kini kagome bia laradaguabi✠ <sup>14</sup> gabumane haru hagane ibugua helayarume laradaguabi bialu halimu. Urunime wali agali ko biaga karuhondo pani milobi wali agali bayale biagarunaga mini mo yaraga helobi heleda. <sup>15</sup> Tinaga biabe bayale beramigome wali agali mini nawi karume lulu bi larago mo hundia halimulo Ngode Datagaliwabehanda hame leda.✠ <sup>16</sup> Tí wali agali golope hene howa halimu. Ani buwa, I bame golope hene kogoda, lowa mana ko ohowa nabilimu. Ani nabi howa tí Ngode Datagaliwabenaga garabaya biabe ale bia haga halimu.✠ <sup>17</sup> Wali agali bibahende karuhondo mana bayale walia halu bialu halimu. Yasu mana yu tiga biaga karuhondobi gubalini ho halimu. Ngode Datagaliwabehondo gi ho haabo halimu. Tínaga kini dindini kagohondobi mana bayale walia halu bialu halimu.✠

*Yasuhanda tandaga nayadagua inamebi nolene ngago ogo*

<sup>18</sup> Tí maru biabe bia hagane kamirume biabe ogoninaga anduane ibugua laradagua hale halu bialu haabo halimu. Ani buwa anduane maru tí mitangi bialu darahe karume laradagua hangu ndo kuyama karume laradaguabi bialu haabo halimu.✠ <sup>19</sup> Ngode Datagaliwabehanda hame ledago mo tene howa tigua ko nabi kamigola mbirame tí mo tandaga haragola hibu lalu hongo haabo harimiyagua Ngode Datagaliwabehanda tí mo turu holebira. <sup>20</sup> Tigua ko birimigonaga pani mbirame minu baragola tigua hibu lalu hongo harimiyagua nde bayale biruda manda nabilimu. Ani ndo tigua bayale

✠ **2:7:** Iba 118.22, Md 21.42, Ab 4.11 ✠ **2:8:** Ais 8.14-15, Ab 4.11, Lm 9.22, 9.33, 1 Te 5.9 ✠ **2:9:** Har 19.5-6, Man 4.20, 7.6, 14.2, Ais 9.2, 40.20-21, 43.20-21, Yo 17.19, Ab 20.28, 26.18, Eb 5.8, Kl 1.13, Ta 2.14, 1 Pi 2.5 ✠ **2:10:** Hos 1.9-10, 2.23, Lm 9.25 ✠ **2:11:** 1 Bit 29.15, Iba 39.12, Ga 5.17, 5.24, Hi 11.13, Ya 4.1 ✠ **2:12:** Md 5.16, Lg 19.44, Lm 12.17, 2 Ko 8.21, Pb 2.15, Ta 2.8 ✠ **2:13:** Md 22.21, Lm 13.1, Ta 3.1 ✠ **2:15:** Ta 2.8, 1 Pi 2.12, 3.16 ✠ **2:16:** 1 Ko 7.22, Ga 5.1, 5.13 ✠ **2:17:** Min 24.21, Md 22.21, Lm 12.10, Pb 2.3, Hi 13.1, 1 Pi 1.22 ✠ **2:18:** Eb 6.5, Kl 3.22, 1 Ti 6.1

dege beramigola mbirame tí mo tandaga haragola hibu lalu hongo haabo harimiyagua nde ogoninaga Ngode Datagaliwabehanda tí mo turu holebira.✧ 21 Ngode Datagaliwabehanda tí tandaga ogonibi nalu halimulo olayagoni. Irane Keriso ibugua t́naga tandaga na hene. Ibugua o nenedagonidagua ina kamarume ibu talima pialu howa ani noleberama lalu walia ka.✧ 22 Ibugua ko mbira nabioire halu ke mbira hayanebi mbiralime hale naheore hene.✧ 23 Marume Yasu mege biyagola ibugua mege bia dai nabi hene. Ibu tandaga nalu howa ibugua tihondo lalu, T́ibi pani noleberami, naleore hene. Ani nale ibugua Ngode Datagaliwabe ibu ko bayalela Dabaga tigabi kago manda buwa ibuhondo mini dunubia ho hene.✧ 24 Iname ko bulenehayagi homene ale howa mana tigabi bulenehayagi dére holomayabi ogoninaga Keriso ibugua ira bangani iname ko birimaru ibunaga tinginiha mo yai hene. Ibugua tinginini motudu ngarume tí mo bayale henego kami.✧ 25 T́i nogo sibi pu ereba hagadagua harimi. Anigo áyu tí bu mininaga Haru Haganebi Mamage Ho Haganebi talima pilimulonaga haru dai bu helenego kami.✧

### 3

#### *Onene agalinilanaga ogo*

1 Agali oneru t́gua tí agalinime bia laradagua hale halu bilimu. Ani birimiyagua tí agalini Ngode Datagaliwabe bi mana yu tiga nabi karume wali t́gua mana bayale dege beramigo hondowa mini beregedolene manda bulelira. Ani bilo wali t́gua bi lolene nawulebirago✧ 2 irane t́gua tí agalinioire ka manda buwa mana tigabioire bialu bedamigo tí agalinime de hondolebira. 3 Wali tí bayaleore holenaga t́naga tinginini yári uru ale nabilimu. Mandari mo yári bia holenebi mbirale muni timbunime miaga gurubu gele gi pagidaru wulenebi dongoneni aga bidamirumebi t́naga tingini mo bayale hole lalu nabilimu.✧ 4 Ani nabi t́naga bayale holene teneore tí mini tigabioire wu birulenebi hogorale bialu biraabo holenebi mana uruni de hondowa Ngode Datagaliwabe ibugua, Baya gibioireda, lolebira.✧ 5 Ogonidagua wali maru bamba berenerume Ngode Datagaliwabe mana yu tiga buwa ibuhondo mini dunubia ho berene. Uruni t́gua tí agalinime bia layadagua biyagome tini mo bayale ho berene.✧ 6 Wali Sara ibu ogonibi bialu berene. Ibugua ibu agalini Abarahamahanda bia layadagua bialu, Inaga haguane ogoni ka, laga berene. T́i bedamirume gi nahe biruwa mana bayale dege birimiyagua tí Saranaga wane biruleberami.

7 Ogonidagua dege agalini kamiru tí one ibu tí hongohe kamigobi ndo bedagoni manda bilimu. Ani bialu tí one mo yo handa nabi bayale mitangi bialu halimu. T́i one baba howa Ngode Datagaliwabehanda haabobo holene bame ngirago libu ogobi labo-labo yule manda buwa ogonidagua bigi bialu halimu. T́gua Ngode Datagaliwabehondo bi laramigo mbirale mbirame ha pai nahelonaga ani bialu halimu.✧

#### *Mini mbiraore ho holenenaga ogo*

8 Bi lamaro bialu ogo laro. Keriso hameiginiru tí bibahendeme minibi mitangibi mbiraore howa t́ni hamene mbalini kama lalu gubalini ho hagahaga bialu t́ni mo dindi halu miniha dara howa biamogo bigibigi bialu halimu.✧ 9 Marume t́hondo ko biragola t́gua nde ko bia dai nabi halu ha haragolabi ha hadai nabi halimu. Ogonibi biragola t́gua turu holene bi ladai bilimu. Irane Ngode Datagaliwabehanda tí olayangi tí mo

✧ 2:20: 1 Pi 3.14, 3.17, 4.14-15 ✧ 2:21: Md 16.24, Yo 13.15, Ab 14.22, 1 Pi 3.18, 1 Yo 2.6 ✧ 2:22: Ais 53.9, Yo 8.46, 2 Ko 5.21, Hi 4.15 ✧ 2:23: Ais 53.7, Md 27.39, Yo 8.48-49, Hi 12.3, 1 Pi 3.9 ✧ 2:24: Ais 53.5, Lm 6.2, 6.11, 7.6, Hi 9.28 ✧ 2:25: Ais 53.6, Ese 34.5-6, 34.23, Md 9.36, Yo 10.14, Hi 13.20 ✧ 3:1: Md 18.15, 1 Ko 7.14-16, Eb 5.22, Kl 3.18, Ta 2.5 ✧ 3:3: 1 Ti 2.9, Ta 2.3 ✧ 3:4: Iba 45.13, 2 Ko 4.16 ✧ 3:5: Pig 18.12 ✧ 3:7: 1 Ko 7.3, 12.23, Eb 5.25, Kl 3.19, 1 Te 4.4 ✧ 3:8: Md 5.44, Lm 12.10, Pb 3.16, Kl 3.12, 1 Te 5.15, 1 Pi 2.17, 2.23

туру holene mbira nguleberoore lalu lowini.✧ 10 Anduane Homogonaga mbugani lo ngagome agua leda,✧

Mbirali ibu turu ho hangu hole hame lalu  
mbirale turubi hangu handama pole hame layaguabi  
ibugua bi kobi nale kebi naheore holene nga.✧

11 Ko bulene ngaru erembira mialu mana bayaleore bulene nga.

Ibunaga gubalinime mo palia holene henge tai bima puabo halu holeneore nga.✧

12 Irane Anduane Homogo ibugua wali agali mini tigabiwi karu handaya ho halu✧  
tigua ibuhondo bi lamirago ibugua hale haga kagoni.

Anigoyu ibugua ko biaga karu hondowa turu nahaga kagoni,  
lalu gilibu nga.

### *Mana tigabi bialu howa tandaga narimayagua turu holene ngago ogo*

13 Tigua mana bayale bua ho kamiyagua aiwa tihondo ko bulebirabe.✧ 14 Anigo tigua mana bayale bialu kamiria mo tandaga hayagua nde ti turu holene nga. Wali agali hondowa gi halu mini dege dindi nahalimu.✧ 15 Ani nabi tigua miniha Keriso mo yaraga howa, Inaga Anduane Homogoore ka, lalu halimu. Mbiralime ti mini dunubia ho kamigo hondowa, I nde manda buliya langi, laragola tigua aguaore lamule lowa tini ala manda manda bu halimu.✧ 16 Bi lamialu howa hendore bayuwa lamilimu. Tinaga miniha tigabi hole ko birimigo do nahalimu. Ani do nahe harimiyagua ti Kerisonaga talima piaga howa mana bayale beremigo hondowa marume mege bialu mana ogoni bayale ndo koda lararu mani tini taga pani nolebira.✧ 17 Tigua mana bayale bialu kamiria marume ti mo tandaga helo Ngode Datagaliwabehanda hamelo kayagua ogoni karulapeore nga. Ko bialu kamiria marume ti mo tandaga hayagua ogoni nakarulape.✧

### *Yasuhanda inanaga ko mo yai halu homo aribia henego ogo*

18 Wali agali bibahendeme ko birimagonaga homolene winigo Keriso ibuni homo aribia hene. Ina mini kowi hemago Ngode Datagaliwabe kagoria haru polenaga ibu agali mini tigabiorewi howa ibugua ina bibahendenaga halu mbira hangu homo aribia hene. Tigua ibu bayagola tingini homenego ibunaga dinini nahome hene.✧ 19 Ibuni dinini howa dinini dege maru humbirini andaha dariba ho wiaru mana lamule pene.✧ 20 Ala Noahanda iba talu wabialu heneyangi bi mana lamialu hene. Noa ibugua lamialu heagola wali agali mini beregedelo Ngode Datagaliwabe ibugua hondo haabo henego ti marume hale howa mo wahayago biaru homenego uruninaga dinini hearu lamule pene. Wali agali halirali iba talu biagoha berearu ti hangu nahome yo pene. 21 Ogoni binigo irane baboraya beremagonaga walia ho nga. Ngode Datagaliwabe ibugua ina ibaha baboraya beramagome pele ngiaga. Ina baboraya bialu howa ibame tinaga tingini wayawaya biragola pele ngiaga ndo. Pele ngirago tene tigua mini beregedalu Ngode Datagaliwabehondo, Ko birimago domabe, lowa mani tinaga miniha ko do nahole ledamigola howa pele ngiaga ka. Ani bialu Keriso homowa heyiyagome ti pele ngiya lalu walia haga beramili.✧ 22 Ayu Keriso ibu dahuliya andaga puwa Ngode Datagaliwabenaga gi tigahayagi biruwa ibugua dahuliyalirubi hari daligaha haru haganerubi hongo holenerubi haru howa handame hai ho ka.✧

## 4

### *Mana ko wahalu Ngode Datagaliwabehanda hame ledadagua bulene ngago ogo*

✧ 3:9: Md 25.34, Lm 12.14, 1 Te 5.15 ✧ 3:10: Iba 34.12-16 ✧ 3:10: Ya 1.26, 1 Pi 2.1, 2.22 ✧ 3:11: Ais 1.16-17, Lm 12.18, Hi 12.14 ✧ 3:12: Yo 9.31 ✧ 3:13: Min 16.7, Lm 8.28 ✧ 3:14: Ais 8.12-14, Yar 1.8, Md 5.10, Ya 1.12, 1 Pi 2.20, 4.14 ✧ 3:15: Ab 4.8, Kl 4.6, 2 Ti 2.25 ✧ 3:16: Ta 2.8, Hi 13.18, 1 Pi 2.12 ✧ 3:17: 1 Pi 2.20 ✧ 3:18: Lm 5.6, 6.10, 8.11, 2 Ko 13.4, Eb 2.18, Kl 1.21-22 ✧ 3:19: Pig 6.1-7.24, 8.18, Hi 11.7, 2 Pi 2.5 ✧ 3:21: Lm 10.10, Eb 5.26, Ta 3.5, Hi 10.22 ✧ 3:22: Iba 110.1, Md 22.44, Lm 8.34, 8.38, 1 Ko 15.24, Eb 1.20-21



<sup>1</sup> Keriso ibunaga tingini tandaga nayadagua inabi tandaga noleore kamagonida manda buwa tínaga miniha hongoho holene nga. Mbirali ibu tingininaga tandaga nayagua ibu mana ko bulenenaga henge nawulebira.✧ <sup>2</sup> Áyu dindi ogoriani kami tambu dindini holenenaga hame lagane ngarume tí haru helo henge nami Ngode Datagaliwabehanda hame ledagome tí haru helo halimu.✧ <sup>3</sup> Ngode Datagaliwabe mana manda nabi karume bua howa bialu kadagua tí nde bialu hemine horo karulapeore harimigoni. Mana ko tagabi bulenebi dongonenaga dimagoli holenebi lulu yule lulu iba nolenebi bimagamaga bu howa kayu yagayaga bulenebi lulu iba nolenebi dawwe holenebi mbirale tara tarahondo bi pupu koore loa nabi ngaru wulenebi mana urunibi bialu hemiria horo piái haya.✧ <sup>4</sup> Wali agali Ngode Datagaliwabe manda nabi karume mana urunibi bialu howa koda mitangi nabi tí bialu kadagua bule tígua áyu tí kagoria naporamiligo tí mogolo hondowa tí mege biaga ka.✧ <sup>5</sup> Ngode Datagaliwabehanda áyu karubi ala homenerubi daba ki bule manda manda bu kago daba ki birangi o biarume biyaru bibahende ibuhondo lapani holeneore wulebira.✧ <sup>6</sup> Irane ogoninaga wali agali ala homeneru tihondo Bi Mana Debene lamini. Uruni tí dindini heangi wali agali bibahende kobi bayalebi biyagonaga dabolene ngadagua tibi dabene. Bi Mana Debene tihondo lamiyago irane tibi dinini howa Ngode Datagaliwabe heba helonaga lamini.✧

*Ngode Datagaliwabehanda mugube ngiyagome iname biabe bayuwa bulene ngago ogo*

<sup>7</sup> Mbirale bibahendenaga hamaro bulene horo kaware ngago tígua Ngode Datagaliwabehondo bi loleore tíni mini haru howabi dengala howabi halimu.✧ <sup>8</sup> Mbirale maru dindiha lowa tíni gubalini ho hagahaga buleneore mo dunini ho halimu. Irane gubalini holeneore ko tara tara biniru la nabi biamogo bulebirago manda buwa ani bilimu.✧ <sup>9</sup> Manga nahe howa wali agali maru tí andaga nenege ibilo henge migimigi bialu halimu.✧ <sup>10</sup> Ngode Datagaliwabehanda tí hangu hanguhondo mugube tara tara ngiyadagua tí hangu hangume nde maru karu mo bayale hole tínaga mugube ngiyagome tíni biamogo bigibigi bulene nga.✧ <sup>11</sup> Mbirali mana lamiagane kayagua nde ibugua Ngode Datagaliwabe bi mana lamialu holene nga. Mbirali ibu biamogo biagane kayagua nde ibugua Ngode Datagaliwabenaga hongo miragome biamogo bialu holene nga. Uruni bibahende beramigo Yasu Kerisoni howa marume Ngode Datagaliwabenaga mini mo yaraga helo ani bialu halimu. Mini yaraga holenebi hongo holenebi kirabali ibunaga wiaaboboore bulebira. Aniore bilo laro.✧

*Keriso hameiginime tandaga nolene ngago ogo*

<sup>12</sup> Inaga nenege turubiru-o tandaga nolene mbirame tí ba handarago hondowa mogo nalalimu. Ogoni nabiagane ale mbira birago mitangi nabilimu.✧ <sup>13</sup> Ani ndogo Keriso ibugua tandaga nayadagua inabi nolomaya ngiragonida manda bialu turu ho halimu. Irane ogo ibunaga wá taraore holene ha pani haragola tínaga bu miniha turu holene tolai helo ani nalu halimu.✧ <sup>14</sup> Marume tí Kerisonaga talima piagane kamigo hondowa mege biyagua tí turu ho holene nga. Ogoni irane Ngode Datagaliwabe Dinini wáhe kago ibu daluwa tíha kagonaga bira.✧ <sup>15</sup> Tí tandaga naramigonaga mbirali bo wahalu kamiriabi dabudabu kayu bialu kamiriabi ko timbuni ngaru bialu kamiriabi wali agali marunaga ngago yamuwa lalu kamiriabi uruni ale birimigonaga tandaga tí nolene nawilo halimu.✧ <sup>16</sup> Ai tí Keriso hameigini kamigonaga tandaga narimiyagua ogoninaga

✧ **4:1:** Lm 6.2, 6.7, Ga 5.24, Kl 3.3-5 ✧ **4:2:** Yo 1.13, Lm 6.11, 2 Ko 5.15, Ga 2.20, 1 Yo 2.16 ✧ **4:3:** Ab 17.30, Eb 2.2-3, 4.17, Ta 3.3 ✧ **4:4:** Ab 13.45, 18.6, 1 Pi 3.16 ✧ **4:5:** Ab 10.42, 17.31, 1 Ko 15.51-52, Ya 5.9 ✧ **4:6:** Lm 8.10, 1 Ko 5.5 ✧ **4:7:** Md 24.13-14, Lg 21.34, Lm 13.11-12, 1 Ko 10.11, Pb 4.5, Kl 4.2, 2 Pi 3.9, 1 Yo 2.18 ✧ **4:8:** Min 10.12, 1 Ko 13.7, Kl 3.14, Hi 13.1, Ya 5.20, 1 Pi 1.22 ✧ **4:9:** 2 Ko 9.7, Pb 2.14, Pm 14, Hi 13.2 ✧ **4:10:** Lm 12.6-8, 1 Ko 4.1-2, 4.7, Ta 1.7 ✧ **4:11:** 1 Ko 3.10, 10.31, Eb 5.20, 1 Pi 5.11, Mo 1.6 ✧ **4:12:** 1 Ko 3.13, 1 Pi 1.6-7 ✧ **4:13:** Ab 5.41, Lm 8.17, 2 Ko 1.7, 2 Ti 2.12, Ya 1.2, 1 Pi 1.5-6, Mo 1.9 ✧ **4:14:** Iba 89.50-51, Md 5.11, 2 Ko 12.10, Ya 1.12, 1 Pi 2.20 ✧ **4:15:** 1 Te 4.11, 1 Ti 5.13, 1 Pi 2.20

taga nahalimu. Taga nahe howa Kerisonaga mini yu harimada manda buwa Ngode Datagaliwabehondo kaj lalimu.✧

17 Wali agalime biyagonaga daba ki bulene tehinaragoni. Ani birangi Ngode Datagaliwabenaga wali agali ala daba ki bulene wulebira. Ibugua ina ala daba ki bulene ngayagua maru Bi Mana Debene yu tiga nabiaga karu ti agua hamaro bulubadabe.✧

18 Anduane Homogonaga mbugani lo ngadagua ogo,

Wali agali bayale karu pele mulene yule erekuibiore nga.

Ngode Datagaliwabe mitangi nabi mini kowi karu ti agua holobadabe,

lalu gilibu nga.✧ 19 Anigo nde maru Ngode Datagaliwabehanda hame ledahayagi howa tandaga nararu tigua mana tigabi biaabo halu bibahendeore Wabiagane ibu mini bilinahe kago manda buwa ti dinini polenenaga ibugua hondo heloore holene nga.✧

## 5

### *Ngode Datagaliwabenaga nogo sibi haru holene mana ogo*

1 Ini agali ala hene miniwi kogoni howa tí agali ala hene miniwi kamirume mbira bilimulo langero. Ina ininaga deoreme Keriso ibu tandaga nayagonaga de handarugo mani ibuninaga wá taraore holene ha pani haragola i nde mbira ngulebira. Ani bulebiragonaga ina tihondo bi larogo ogo.✧ 2 Tigua nogo sibi Ngode Datagaliwabehanda haru halimulo ngiyago turu howa haru halimu. Manga nahe howa Ngode Datagaliwabehanda hame ledadagua haru halimu. Biabe ogoni bialu howa yolo mule mitangi nabi biamogo bule hame lowa biabe bilimu.✧ 3 Wali agali tigua haru halimulo ngiyago haru howa i haru hagane timbuni kogoni mitangi nabi haru halimu. Ani buwa mana bayale beremilidagua tiguabi bilo haru halimu.✧ 4 Nogo Sibi Haru Hagane Haguane ha pani haragola tigua wá taraore holenenaga emena guaileore wiaabo holene ngiragola yuleberami.✧

### *Mo dindi halu holene ngago ogo*

5 Ani buwa igiri daliahe kamiru tibi agali ala hene miniwi karume laradagua bialu halimu. Ani buwa tí bibahendeme tini mo dindi halu biamogo bigibigi bialu halimu. Irane Anduane Homogonaga mbugani bi lo ngagome lalu, Ngode Datagaliwabehanda mine haga karu hela dai bialu tini mo dindi haga karu ibugua biamogo biaga ka, lalu gilibu nga.✧ 6 Anigo Ngode Datagaliwabehanda bayuwa manda buwa horo pongo bo winingi ibugua tí mo yaraga helo tini mo dindi howa ibunaga gi hongohé andaneha halimu.✧ 7 Ngode Datagaliwabehanda tí mitangi bu kagonigo tigua mbirale tara tara bibahende mitangi bialu mini tumatuma ho kamigo ibu lamiai halimu.✧

8 Tí dengala howa mamage ho halimu. Budi ale gabua timbuni laionome mbira bo nole ohowa hai bialu taya ibagabu hagadagua tínaga waitigi dama Heyolabe ibugua ani bialu ka.✧ 9 Anigo tigua Ngode Datagaliwabehondo mini mbiraore hongoho wuwa dama Heyolabe hela tagi ho halimu. Keriso hameigini dindi tara tara bibahendeni karume tandaga ogonibi dege nalu kago manda bidami.✧ 10 Ngode Datagaliwabe ibu biamogo bia holene bibahendenaga tene kagome tí Kerisoha ho gimbubu howa ibunaga wá taraore haabobo holene mbira ngule olaga ka. Tí tandaga tigi mbira naramigola howa ibugua tí mo baya burugule howa tí ema nabi halimulo mo hongo halu gene

✧ 4:16: Ab 11.26, Pb 1.20 ✧ 4:17: Yar 25.29, Mal 3.5, Lg 10.12-14, 23.31, 2 Te 1.8 ✧ 4:18: Min 11.31, Lg 23.31  
 ✧ 4:19: Iba 31.5, Lg 23.46, 2 Ti 1.12 ✧ 5:1: Ab 1.8, 1.22, Lm 8.17-18, Mo 1.9 ✧ 5:2: Yo 10.11-13, 21.15-17, Ab 20.28, 1 Ko 9.17, 1 Ti 3.3, 3.8, Ta 1.7, 1.11, Pm 14 ✧ 5:3: Iba 74.2, 1 Ko 3.9, 2 Ko 1.24, Pb 3.17, 1 Ti 4.12, Ta 2.7 ✧ 5:4: 1 Ko 9.25, 2 Ti 4.8, Hi 13.20, 1 Pi 1.4 ✧ 5:5: Min 3.34, Ais 57.15, Eb 5.21, Pb 2.3, Ya 4.6 ✧ 5:6: Md 23.12, Lg 14.11, 18.14, Ya 4.10 ✧ 5:7: Iba 37.5, 55.22, Md 6.25-30, Pb 4.6 ✧ 5:8: Lg 22.31, 1 Te 5.6, Mo 12.12 ✧ 5:9: Ab 14.22, Eb 6.11-13, 2 Ti 3.12, Ya 4.7

napodaganeni helolebira.✧ <sup>11</sup> Ibunaga hongo holene wiaaboboore wilo hamelo ko. Aniore bilo laro.

*Bi lamaro bialu lenego ogo*

<sup>12</sup> Ina beba nemandi ogoni tihondo gilibu werogo Kerisoha i hamene mini bilinaheore Sailasa ibugua i biamogo biyagola ina tinaga beba gilibu wia harogo. Ngode Datagaliwabenaga biamogo bia holeneore ngago i hendenego ti mo hongo holenaga langerogoni. Ngode Datagaliwabenaga biamogo bia holene ogoniha hongo ho haabo halimu.✧

<sup>13</sup> Ngode Datagaliwabehanda dabo helene Keriso hameigini Babilononi karumebi i igini Maga ibuguabi tihondo, Ti mitangi bu kama, lalu lawia haragoni.✧ <sup>14</sup> Ti Kerisoha howa tini gubalini kamigo walia halu gi tigani bilimu.

Ti Kerisonaga kamiru tiha mo palia holene wiaabo helo hamelo kogoni.✧

---

✧ **5:10:** 2 Ko 4.17, 1 Te 2.12, 2 Te 2.17, 1 Ti 6.12, Hi 13.21, 1 Pi 1.6 ✧ **5:12:** Ab 15.22, 15.40, 2 Ko 1.19, 1 Te 1.1, Hi 13.22, 2 Pi 1.12 ✧ **5:13:** Ab 12.12, 12.25, 13.13, 15.37-39, Kl 4.10, 2 Ti 4.11, Pm 24 ✧ **5:14:** Lm 16.16, 1 Ko 16.20, Eb 6.23

## 2 Pida

### Pidahanda Keriso hameigini dindi tara tarani hearuhondo beba mende ogo gilibu wia hene

### Mbuga ogoha gilibu ngarunaga nemandi ogo

Pidahanda beba mende ogo gili binigo Keriso hameigini dindi tara tarani hagahaga bu hearuhondo gilibu wia hene. Gilibu wia henego irane Ngode Datagaliwabe mana henene ngadagua ndo lawai haga hearume mo hondo halu wali agali kayu biagane mana lawai halu ka layago Pida ibu hale howa mana ko ogoni wahai helo gili bini. Ani gili bialu lalu, Abosolo agali Yasu Keriso heba harimago iname Ngode Datagaliwabe ogobi ka lalu langirimago mana henene ogoni hangu yu tiga bulene nga, lalu gili bini. Ngode Datagaliwabe mana henene ngadagua ndo lawai haga hearume, Keriso dai nab-ulebira, layagola Pidahanda lalu, Ngode Datagaliwabehanda wali agali bibahendeore bo wahai hole hame nale howabi mini beregedai helo hame lowabi ibu ti mitangi bialu hondo haabo haga ka, lalu gilibu winigo nga.

#### **Bulu бага бува kuni gilibu ngago**

1.1-2

Pidahanda bi pigane lenego 1.3-21

Ngode Datagaliwabehanda ina dabowa olayago 2.1-22

Ngode Datagaliwabe mana henene ngadagua ndo lawai haga henego 3.1-18

Keriso ibuni dai bulebiragonaga lenego

<sup>1</sup> I Saimono Pida Yasu Kerisonaga biabe bia hagabi abosolobi kogoni. Yasu Keriso inanaga Ngode Datagaliwabebi Pele Ngiagabi kago mini tigabiwi howa inahondo mini mbiraore wulene ngiaga. Mini mbiraore wulene ogoni baya gibiore ngiyago yu kamadagua tí maru yu kamiruhondo beba ogo gilibu wia haro.\* <sup>2</sup> Tígua Ngode Datagaliwabebi Yasu inanaga Anduane Homogobi manda bu kamigo howa biamogo bia holenebi mo palia holenebi tíha tolaiore helo hamelo kogoni.\*

#### *Ngode Datagaliwabehanda ina dabowa olenego ogo*

<sup>3</sup> Keriso ibu Ngode Datagaliwabe howa ibunaga holene hongo taraore wialu wigome mbirale bibahende iname tigabiore bialu holomayanaga ngiai haya. Ibunaga wá taraore holenebi bayale holenebi ina ngule olayago iname ibu manda bidamago togoni howa ibugua uruni ngiya.\* <sup>4</sup> Ngode Datagaliwabehanda inahondo mbirale turu halu bame ngulebero leneru baya buruguleorebi dunini gibiorebi lowinigo ngulenaga tehinalu uruni ngiya. Tígua uruni mo yai howa wali agali bibahende mo ko helonaga dimagoli holene mana dindi bibahendeni wini ngaru wandialu bolangua halu pilimu-lobi Ngode Datagaliwabe ibunaga mini ngago tíha wilobi ibugua uruni ngiya.\* <sup>5</sup> Irane ogonigo tígua hongo halu mini mbiraore wirimigoriani bayale holene mo tago halu bayale holene yu kamigoriani manda bulene mo tago halu yu halimu.\* <sup>6</sup> Ani buwa manda bulene yu kamigoriani mini haru holene mo tago halu mini haru holene yu kamigoriani hibu lalu hongo holene mo tago halu yu halimu. Ani buwa hibu lalu hongo holene yu kamigoriani tigabiore holene mo tago halu yu halimu.\* <sup>7</sup> Ani buwa tigabiore holene yu kamigoriani Keriso ariago nenege hinulene mo tago halu yu halimu. Ani buwa Keriso ariago nenege hinulene yu kamigoriani gubalini holene mo tago halu yu halimu.\* <sup>8</sup> Mugube uruni yu holene ngago tígua yu yanga lowa yu kamiyagua tí bame nahe biabe bialu holeberami. Ani bialu howa inanaga Anduane Homogo Yasu

\* **1:1:** 2 Ko 4.13, Eb 4.5, Ta 1.4    \* **1:2:** Yu 2    \* **1:3:** Yo 17.3, 2 Te 2.14, 2 Ti 1.9, 1 Pi 2.9    \* **1:4:** 2 Ko 7.1, Eb 4.24, 2 Pi 2.18-20, 1 Yo 3.2    \* **1:5:** 1 Pi 3.7, 2 Pi 3.18    \* **1:6:** Ga 5.22-23    \* **1:7:** Ga 6.10, 1 Te 5.15, 1 Yo 4.21

Keriso bayuwaore manda buwa biabe biaabo hagabi lini bayale dagabi holeberami.✧  
 9 Mbirali mana uruni nayi kago ibu mininaga de auhe mbirale kaundia ngago handabe nahe ka. Ibugua ko ala biyaru Ngode Datagaliwabehanda domo wahai hayago manda bibehegoyu ibu ogoni embeda holebira.✧

10 Anigo hamene mbaliniru-o Ngode Datagaliwabehanda tí dabowa olene kamigo walia hoa haabo halu bayale bialu halimu. Tígua ani bialu harimiyagua mini mbiraore ala wirimigo wahalu hope howa naholeberami.✧ 11 Ani bialu Yasu Keriso inanaga Anduane Homogobi Pele Ngiagabi kago ibugua Handame Ho Haabo Kagoria anda polene tínaga ngagonigo anda poleberamiore.

12 Ani buleberamigo tí bi uruni langiyago manda biai howa bi ogoriani pini puwa hongo ho kamigonigoyu ina tí lone mo mitangi bia ho wiaabo holebero.✧ 13 I nahome koore howa tígua uruni mitangi bu dai bilimulo langiaabo holebero.✧ 14 Inanaga Anduane Homogo Yasu Kerisoibunime ihondo tigatiga langiyago ina inaga tingini togo biaga ogoni golo wahalu polene tu kaware ngago manda bido.✧ 15 Anigo tígua i homedohabi ina bi o laroruni mitangi bu dai biaabo halimulonaga áyu i nahome kongi bi uruni bayuwa hongo howa langiaabo holebero.

### *Kerisonaga wá taraore holene deme hendene go*

16 Inanaga Anduane Homogo Yasu Keriso ibu hongo gibiorehe howa dai bulebirago langirimagoni bame agali mbirame bi te lenego ilu yuwa ndo langirimagoni. Ina inanaga deoremeibunaga wá taraore holene baya burugule heagola de handarimagoni.✧

17 Iname de handalu hemaria Wá Taraore Holene Tene Ngode Datagaliwabe Ibuniore kagoria howa bi ladali halu lala. I Iginioire ogoni gubalini ho ko. Ibhondo turu timbuni ho kogoni, lowa Aba Ngode Datagaliwabehanda Yasu mini mo yaraga halu ibuhondo wá taraore holene miya. Ani miyagola ina handarima.✧✧ 18 Ina Yasu heba Ngode Datagaliwabenaga hari loma bia hene heagoriani hemaria bi ogoni dahuliya andagaha howa la dali hayago inanemeore hale harima.

19 Ani hale harimago Ngode Datagaliwabenaga bi mana latagi haga henerume mbiwia halu bi mana leneyaru heneneore leneya lowa iname yu tiga bu kamagoni. Ira hale arumaha wá hatagi hagadagua bi mana ogoni mo wála haga nga. Egabi naledaha yakundi mbira huririle tagira ibagadagua Horo Mbira pongo bo winigo tagira ibulebira. Tagira ibilobi Kerisonaga wá holeneme tínaga bu miniha wá hatagi helobi bi mana ogoni mo wála hagago yu tiga biaabo halimu.✧ 20 Ala manda bulene ngago ogo. Mbiraliibuninaga manda hangume Anduane Homogonaga mbugani bi gilibu ngago garealo mibe nahe kago manda bilimu.✧ 21 Bamba Ngode Datagaliwabenaga bi mana latagi haga henedaruni bi latagi halu howa mbiraibunime mbiwia hoa biyadagua mbiwia halu lene ndo. Agali henedarume Ngode Datagaliwabenaga bi mana latagi helo Ngode Datagaliwabe Dinini ibugua ti haru howa mo la hayagola tigua latagi haga bialu hene.✧

## 2

### *Ngode Datagaliwabe mana henene ngadagua ndo lawai haga ibulebirago de hondo halimu lenego ogo*

1 O henedaruningi wali agali hearuha howa Ngode Datagaliwabe mana henene ngadagua ndo latagi haga tingi halu maru hene. Uruni henedagua áyu tí kamigohabi agali marume mana henene ngadagua ndo lawai halu holebira. Tigua mana henene ndo mo koore hagane mana ngaru ohowa manda bu yalu ibulebira. Tigua Anduane

✧ 1:8: Yo 15.2, Ta 3.14 ✧ 1:9: Hi 9.14, 1 Yo 1.7, 2.9-11 ✧ 1:10: 2 Pi 3.17, 1 Yo 3.19 ✧ 1:12: Pb 3.1, 1 Pi 5.12, 2 Pi 3.1, 3.17, 1 Yo 2.21, Yu 5 ✧ 1:13: 2 Pi 3.1 ✧ 1:14: Yo 21.18-19, 2 Ko 5.1, 2 Ti 4.6 ✧ 1:16: 1 Ko 1.17, 1 Yo 1.1 ✧ 1:17: Md 3.17 ✧ 1:17: Md 17.1-5, Mg 9.2-7, Lg 9.28-35 ✧ 1:19: Iba 119.105, Yo 5.35, Mo 2.28 ✧ 1:20: Lm 12.6 ✧ 1:21: Ab 1.16, 3.18, 2 Ti 3.16, 1 Pi 1.11



Homogohanda ti golope hole biabe biyagonaga lalu, Ibu manda nabidama, lowa erembira mulebira. Ani biragome tini bo waholenebi kaware dege wulebira. ✧<sup>2</sup> Ani biragola dewalime tinaga mana ko tara tara ngaru biradagua bule talima polebira. Tigua ko birago hondowa wali agali marume Mana Henene ngago mege bulebira. ✧<sup>3</sup> Mana henene ngadagua ndo lawai hagane urunime dimagoli howa tigua muni milimulonaga ke howa áyu dege wabu migi bialu te dewa langulebira. Tigua biragonaga Dabaga ibu bamba howa dabole manda mandabu henego haabo ka. Ti Bo Wahaga kago ibu palia hondo nahe yange yangebu wiaabo ka. ✧

<sup>4</sup> Dahuliyali maru ko biyaru Ngode Datagaliwabehanda tihondo pani nami wahene ndo. Ibugua ti heli dindi arumaheha helalu biyagonaga Daba Ki Bulene Horo ibilo daribaho heleda. ✧<sup>5</sup> Ngode Datagaliwabehanda bamba wali agali bibahende dindini henedaruhondo pani nami wahene ndo. Wali agali ibu erembira mialu pendaru ti ibame nai helonaga ibugua iba li ibilene. Mana tigabi bulene lamiaga agali Noabi kariali ibu heba hayarubi ti hangu Ngode Datagaliwabehanda pele mini. ✧<sup>6</sup> Ngode Datagaliwabe wahalu piagaru pani nolene lola holebiragonaga manane walia halu ibugua bi lo wiyadagua Sodom Gomorabi bo heda halu do mundu lai helene. ✧<sup>7</sup> Anigo Ngode Datagaliwabehanda agali Lode ibu mini bayalewi howa mana puguagane hearume mana ko tara tara biyaru hondowa genda yu haga biago ibu pele mialu haru tagira pene. ✧<sup>8</sup> Agali bayale ogonime mana puguagane biaru baba howa horo bibahendengi tigua biyaru haleme hale halu deme handaga bialu howa ibugua tandagaore haabo halu hene. ✧<sup>9</sup> Wali agali Ngode Datagaliwabe mitangi bu karu tandaga nalu kagoria howa Anduane Homogo ibugua ti pele mulene manda bida. Ani manda bu howa mana ko biaga karubi tigua biyagonaga Daba Ki Bulene Horo ibilo pani noleneha helolenebi ibugua manda dege bida. ✧<sup>10</sup> Ani buwa marume dongonenaga dimagoli howa koorene ko ngaru bua howa biagabi Ngode Datagaliwabehanda bi lo ngaru yo handaga karubi ibugua pani guaileore mule manda bu ka. ✧

Mana henene ngadagua ndo lawai haga karu tigua donge halu bua biradagua bule elahe howa hari daligaha wáhe karu mitangi nabi mege biaga ka. ✧<sup>11</sup> Dahuliyali karu tigua lawai haga o biarunaga hongobi manabi bolangua ho howa tigua Anduane Homogonaga deni howa o biaru ko biaga lalu gurabi megebi nabiaga. ✧<sup>12</sup> Agali uruni ti tini bua biradagua bialu gabua tara tara irabuha hagadagua kagoni. Agalime gabua uruni bagadagua ti belo kagoni. Tigua mbiralenaga tene manda nabi ngaru mege bialu, Koorene koda, laga ka. Gabua tara tara agalime bo wahagadagua tibi ogonidagua dege Ngode Datagaliwabehanda bo waholebira. ✧<sup>13</sup> Tigua maru mo tandaga hayagobi dege tinibi nde tandaga nelo mulebira. Tigua horombe howa tinginime dimagoli hara ale ta nabi biragome mo turu holene ogoni laga ka. Agali urunime taga nahe tí Keriso hameigini kamiru heba tomo mandagi nole íbu biruwa ti mo hondo haga biala hayago bule dai biaga ka. ✧<sup>14</sup> Tigua wali dimagoli timbuniore howa tinaga deme wali handaya haabo halu kayu bule mitangi biaga ka. Ko bulene damene manga nahagaore ka. Wali agali maru miniha hongo nahe karu ko bilo tigua ndole bialu haru piaga ka. Tininaga miniha muni dimagoli mugubenego ka. Ngode Datagaliwabehanda ti pani nolene nga lenedagua naore bulebira. ✧<sup>15</sup> Tigua hariga tigatiga wiago wahalu puwa tini pu lulu yu ka. Beo igini Balama ibugua ko biyagonaga muni yuleneore nga manda binidagua tiguabi hariga ogoniha pialu haga ka. ✧✧<sup>16</sup> Balama ibugua ko biyagola nogo dongi bi nalaga biagome wali agalime bi laralidagua lalu Balama talini. Ngode Datagaliwabe

✧ 2:1: Md 24.11, Ab 20.30, 1 Ko 6.20, Eb 1.7, 1 Ti 4.1, 2 Ti 3.1-5, 1 Pi 1.18, Yu 4 ✧ 2:3: Lm 16.18, 2 Ko 12.17-18, 1 Te 2.5, 1 Ti 6.5, Ta 1.11, 2 Pi 1.16 ✧ 2:4: Lg 8.31, Yo 8.44, 1 Yo 3.8, Yu 6, Mo 20.2-3 ✧ 2:5: Pig 6.1-7.24, 8.18, Hi 11.7, 1 Pi 3.20, 2 Pi 3.6 ✧ 2:6: Pig 19.24, Dag 26.10, Yu 7 ✧ 2:7: Pig 19.1-16 ✧ 2:9: Iba 34.17-19, 1 Ko 10.13, Yu 6 ✧ 2:10: Yu 4-10, 16 ✧ 2:11: Yu 9 ✧ 2:12: Yu 10 ✧ 2:13: Lm 13.13, 1 Ko 11.20-21, Pb 3.19, Yu 12 ✧ 2:15: Yu 11, Mo 2.14 ✧ 2:15: Dag 22.4-35

mana latagi haga o biagome mini nawi howa ko bule harigani pialu heagoni ha pai holenaga ani lene.

<sup>17</sup> Mana henene ngadagua ndo lawai haga o biaru ti iba gendo hundiraligo alebi ginu puyabume yalu poraligo alebi ka. Ngode Datagaliwabehanda ti aruma gibioreha helo henge mo winigo nga.✧ <sup>18</sup> Tigua mine bi lalu bi nahabanebi lalu haga ka. Wali agali marume ko biaga karubi henego ai ko wahalu áyu dege tagira ibiraru pilelo o biarume tingininaga dimagoli holeneme ti mo pila hole gono waga ka.✧ <sup>19</sup> Ngode Datagaliwabe mana henene ngadagua ndo lawai haga uruni ti tini mana ko birarume tini dariba kago helowa tigua lalu, Iname tí golopeore holeberama, lalu haga ka. Irane mbiralime birago bu mugu balu ibuni paraho wahayagua mana ogonime ibu bope kagola garabaya helolebira.✧ <sup>20</sup> Wali agali marume Yasu Keriso inanaga Anduane Homogo Pele Ngiagabi kago manda biragome dindinaga mo ko hagane mana ngelalu wandialu ibida puwa maha dodo holene mana biarume ti lone minalu bolangua helo henge miyagua ti ko ala hayagobi ndo maha koorene ko holebira.✧ <sup>21</sup> Tigua tigabi holene manabi Ngode Datagaliwabehanda, Bulene nga, lo ngarunibi tihondo lamiyago manda bu howa wahalu piyago manda nabidale emene bayale kale.✧ <sup>22</sup> Tigua ani biyagonime bi lo ngadagua henene tagira piyadane hendedemagoni. Bi lo ngago mbira ogo, Biangome magu tagu wiyago lone no dai biaga ka. Bi mende ogo, Nogo wayawaya bo heledagola lone waruha bembo guyule piaga ka.✧

### 3

#### *Anduane Homogo ibu dai bulebirago ogo*

<sup>1</sup> Inaga nenege turubiru-o ina tíhondo beba halu mende ogoni gilibu wia harogoni. Tíngaga bu miniha manda tigabi bu dai bilimulonaga mo mitangi bia halu beba kirabalini gilibu wia harugoni.✧ <sup>2</sup> Ngode Datagaliwabe mana latagi haga loma bia ho henedarume bamba mbiwia halu bi lenedarubi Anduane Homogobi Pele Ngiagabi kagome bi lo wiyago tínaga abosolo agalidarume langiyagobi mitangi bu dai bilimulo hamelo ko.✧ <sup>3</sup> Tígua dunini ogoore ala mandabu halimu. Horo hamaro beremahayagi agali maru tinaga mini kome hame ledadagua biaganeru ha pani howa uruni tigua tí mege bulebira. Uruni tigua tí mege bialu✧ <sup>4</sup> au lolebira. Yasu ibu dai bulebero layabe. Ibu agoha kabe. Inanaga mamali homayangí howabi mbirale bibahende Ngode Datagaliwabehanda wabiyangi howabi wiyagobi dege wiaabo kagoni, lolebira.✧ <sup>5</sup> Tigua manda bibehego bua nahagago mbira ogo. Ngode Datagaliwabehanda bi layagome haribi dindibi wabini. Ani buwa dindi uruni ibaha howa wia pani helalu iba dombeneha ngelene.✧ <sup>6</sup> Iba ogonime dindi ogoriani henerubi winirubi bibahende namu layagola homai hene.✧ <sup>7</sup> Haribi dindibi áyu ngaru maha bo heda hai hole Ngode Datagaliwabe ibunaga bime dege yaniho wiaabo heleda. Wali agali Ngode Datagaliwabe mitangi nabi mo yo handaga karume biyagonaga dabalu bo wahai holene horo ibilo Ngode Datagaliwabehanda tigua biyago mo wu haabo ka.✧

<sup>8</sup> Ani bidago inaga nenege turubiru-o galone mbira ogo dege embeda nahalimu. Anduane Homogo ibugua horo mbira ogoni mali daosini mbira (1,000) ale manda bialu mali daosini mbira (1,000) ogoni horo mbira ale ogobi labolabo manda biaga ka.✧ <sup>9</sup> Marume manda bialu Anduane Homogo ibugua mbira bulebero lenego hendore bigi biaga kabe toba ka. Ani ndo bibahendeore bo wahai holene hame nale howabi mini beregedai helo hame lowabi ibugua tí mitangi bialu hondo haabo haga ka.✧

✧ 2:17: Yu 12-13 ✧ 2:18: Ab 2.40, 2 Pi 1.4, 2.20, Yu 16 ✧ 2:19: Yo 8.34, Lm 6.16, 1 Pi 2.16 ✧ 2:20: Md 12.45, Lg 11.26, Hi 6.4, 2 Pi 1.2-4 ✧ 2:21: Lg 12.47-48, Yo 9.41 ✧ 2:22: Min 26.11 ✧ 3:1: 2 Pi 1.13 ✧ 3:2: Yu 17 ✧ 3:3: 1 Ti 4.1, 2 Ti 3.1, 2 Pi 2.10, Yu 18 ✧ 3:4: Ais 5.19, Yar 17.15, Ese 12.22, 12.27, Md 24.48, Lg 12.45 ✧ 3:5: Pig 1.6-9, Iba 33.6, Kl 1.17, Hi 11.3 ✧ 3:6: Pig 7.11, 7.21, 2 Pi 2.5 ✧ 3:7: Md 25.41, 2 Te 1.8, 2 Pi 3.10 ✧ 3:8: Iba 90.4 ✧ 3:9: Ais 30.18, Hab 2.3, Lm 2.4, 1 Ti 2.4, Hi 10.37, 1 Pi 3.20

<sup>10</sup> Anduane Homogonaga Horo ibulebirago pageali ibiradagua ibulebira. Horo ogoningi hari daliga tula laho wiaabo halu ereba hai holebira. Ani biragola hari daligaha nibi egebi yakundibi karuni bibahende dalu do ereba haiore holebira. Ani biragola dindibi dindini mbirale ngaru bibahende ereba haiore holebira. ✧ <sup>11-12</sup> Mbirale uruni ogonidagua bialu mo ereba haiore helolebadago manda buwa tí wali agali abi ale holene wiaruadabe. Ngode Datagaliwabenaga Horo abale ibilo hondo howa tíni tigabi howa Ngode Datagaliwabhondo loma bia hene holene nga. Horo ogoningi hari daliga dalu do ereba halu hari daligaha nibi egebi yakundibi bibahende karuni pobo gibiore biragome do elai holebira. ✧ <sup>13</sup> Ani bulebirago Ngode Datagaliwabhenda hari gahengebi dindi gahengebi wabu ngelolebero lo wiyadagua bilo ina hondo kamagoni. Dindi gahenge ogoriani mana tigabi hangu bialu holene wulebira. ✧

*Anduane Homogo dai bilo dengala howa hondo holene ngago ogo*

<sup>14</sup> Anigo inaga nenege turubiru-o Horo odagoni ibilo kami tambu Ngode Datagaliwabenaga deni howa mini gahenge howabi ko mbira ya do naheorebi halimu. Ani buwa Ngode Datagaliwabela mo palia ho halimu. ✧ <sup>15</sup> Inanaga Anduane Homogo ibugua tí mitangi bialu hondo haabo kagoni irane tí pele mulene yu halimulonaga henge ngiyada manda bu halimu. Inanaga hamene turubi Polo ibugua mini gigabi wulene Ngode Datagaliwabhenda miyago wuwa ibugua ogonidagua dege tíhondo beba mbira gilibu wia hayiyagoni. ✧ <sup>16</sup> Ibugua beba bibahende gili bidagoniha galone uruninaga lalu ogonidagua dege gili biaga ka. Ibugua beba gili binidaruniha bi galone maru taibi ngago wali agali mini timbuni nawibi mini bilina nahebi karume galone lolene ngadagua ndo lawai haga ka. Tigua Anduane Homogonaga mbugani bi lo ngarubi maru tindule dege lawai haga ka. Ani biragome tini bo waholene tinime yu anda ibaga ka. ✧

<sup>17</sup> Ai inaga nenegeru-o tígua uruni abale manda biai ho kami. Tí mini bilinaho baya kamigoria howa pilalimulo mana yu tiga nabiaga karume tinaga ko biragome ndole bialu haru napelo mamage ho halimu. ✧ <sup>18</sup> Haru polani hondowa tí Yasu Keriso inanaga Anduane Homogobi Pele Ngiagabi kagonaga biamogo bia holenebi mini timbuniwi holenehabi tí anda ho howa yangalo halimu. Ibu wá taraore holene áyubi awebi wiaaboboore wilo hamelo ko. Aniore bilo laro. ✧

✧ **3:10:** Md 24.29, 24.35, 24.43, Mg 13.31, Lg 12.39, 1 Te 5.2, Hi 1.11, Mo 16.15, 20.11 ✧ **3:11-12:** Ais 34.4, Mai 1.4, 1 Ko 1.7, Ta 2.13, 2 Pi 3.10 ✧ **3:13:** Ais 65.17, 66.22, Mo 21.1, 21.27 ✧ **3:14:** 1 Ko 15.58, Pb 1.10, 1 Te 3.13 ✧ **3:15:** Lm 2.4, 1 Pi 3.20, 2 Pi 3.9 ✧ **3:16:** Lm 10.3, 1 Ko 15.51, 1 Te 4.15 ✧ **3:17:** Mg 13.5, 13.23, 13.33, 1 Ko 10.12, Eb 4.14, 2 Pi 1.10-12 ✧ **3:18:** Eb 4.15, 2 Ti 4.18, 1 Pi 2.2, Yu 25, Mo 1.6

# 1 Yone

## Yonehanda Keriso hameigini hearuhondo beba mbira ogo gilibu wia hene

### Mbuga ogoha gilibu ngarunaga nemandi ogo

Yonehanda beba mbira ogo gili binigo irane kiranaga gilibu nga.

Mbira

Wali agali beba ogo daga lararu ti Ngode Datagaliwabebi ibu igini Yasu Kerisobi heba hogimbu bu howa tinibi gubalini ho haga hagabu holene nga, lalu gili bini.

Mende

Ngode Datagaliwabe mana henene ngadagua ndo lawai haga henerume wali agali mo guya halu ti Ngode Datagaliwabebi Yasu Kerisobi heba gubalini haga bu holene mo ereba holigo de hondo holene nga, lalu gili bini. Ngode Datagaliwabe mana henene ngadagua ndo lawai haga heneru tigua lalu, Mbirale bibahende dindini ngaruni mbira ela harimiyagua ko yania ho kamigoni, laga hene.

Ani lowa lalu, Yasu ibu Ngode Datagaliwabenaga Iginioire howa dindini daluwa agaliore hene laramaligo ogonidagua nabini irane ibu ko ela holeda, lowa tigua mana ani lawai halu hene. Ngode Datagaliwabe mana henene ngadagua ndo lawai haga uruni tigua lawai halu, Mbirale ko ngago bayaleda lalu daba nabi bia gubalini haga haga bu holene gobi nahe waha birimiyagua ti Ngode Datagaliwabenaga pele mulene nayule ndo yuleberami, laga hene.

Tigua ogonidagua lawai hayagola Yone ibugua lalu, Ani ndo Yasu Keriso ibu Ngode Datagaliwabe howa agali heneneore hole dalini. Ai Yasu Kerisohondo mini mbiraore wu karume Ngode Datagaliwabehondo gubalini halu tinibi gubalini haga haga bulene nga, lalu hongo howa lalu gilibu nga.

#### **Bulu бага буwa kuni gilibu ngago**

*1.1-4*

Gili binigonaga irane *1.5-2.29*

Wá holenenagabi aruma holenenagabi *3.1-24*

Ngode Datagaliwabenaga waneiginibi dama Heyolabenaga waneiginibi *4.1-6*

Henene lolenebi ke holenebi *4.7-21*

Gubalini haga haga bu holene *5.1-21*

Mini mbiraorewi kagome wayali holene

#### *Haabo holene Bi ibu hapani henego ogo*

<sup>1</sup> Mbirale bibahende nawingi haabo holene Bi ibu hene. Iname Bi ogoni hale howabi deme hondowabi gime ela howabi tihondo beba gilibu wia haramagoni. <sup>2</sup> Holene ogoni hapani hayagola iname de hondowa ti langialu kama. Haabo holene ogoni ibu Abala henegobi ina de hondolomaya hapani hayagobi ogoninaga lalu langerama. <sup>3</sup> Ina Aba Iginila libuha ho gimbu bu kamadagua tibi inaha ho gimbu bu halimulo ibugua bi layago iname hale howabi de hondowabi ti langerama. <sup>4</sup> Turu holene tihabi inahabi tolai helo iname tihondo beba ogo gilibu wia haramagoni.

#### *Ngode Datagaliwabe ibu wa holene kago ogo*

<sup>5</sup> Yasu ibuha howa bi layago iname hale howa ti langeramago ogo. Ngode Datagaliwabe ibu wa holene kago aruma holene mbira ibuha nawiore. <sup>6</sup> Anigo iname, Ngode Datagaliwabe ha hogimbu bu kama, lalu howa aruma holenehayagi kamayagua

✧ **1:1:** Yo 1.1-4, 1.14, 20.27, 2 Pi 1.16, 1 Yo 2.13-14 ✧ **1:2:** Yo 1.14, 21.24, Ab 2.32, Lm 16.26 ✧ **1:3:** Yo 17.21, Ab 4.20, 1 Ko 1.9, 1 Yo 2.24 ✧ **1:4:** Yo 15.11, 16.24, 2 Yo 12 ✧ **1:5:** Yo 1.9, 9.5, 12.35-36, 1 Ti 6.16, Ya 1.17, 1 Yo 3.11

iname bi laramagobi mana beremagobi ke halu henene lolene nayi howa ko bialu kama.✧ <sup>7</sup> Ngode Datagaliwabe ibu wa holene kadagua inabi wa holenehayagi ibaga bu kamayagua ina Ngode Datagaliwabenaga wali agali maru heba mini mo mbiraore ho holeberama. Ani buwa ibu Igini Yasu darama pela hayagome ko bibahende birimaru domo waharagome ina ibuha ho mbiraore ho kama.✧

<sup>8</sup> Inaneme lalu, Ko mbira inaha nawiore kama, larimayagua Ngode Datagaliwabenaga henene lolene inaha nawi howa inane mo hondo halu kamagoni.✧ <sup>9</sup> Iname ko birimaru lapani harimayagua Ngode Datagaliwabeanda ibu mini tigabi howa domo waholebero layadagua domo waholebira. Mana ko bibahende birimarubi domo wahai haga ka.✧ <sup>10</sup> Inaneme, Ko nabioire kama, larimayagua Ngode Datagaliwabenaga bi inanaga bu habaneha nawi howa bi laramagome, Ngode Datagaliwabe ibu ke haga ka, larama.✧

### *Keriso ibu inanaga biamogo biaga kago ogo*

## 2

<sup>1</sup> I waneiginiru-o ti ko nabilimulo ina bi ogoni bebani gili bialu lawia haro. Ai ina mbiralime ko mbira birimayagua mini tigabiwi Yasu Keriso kagoni ibugua ibu Abahondo inanaga bi la haga ka.✧ <sup>2</sup> Iname ko birimagonaga hangu ndo wali agali bibahende karume ko biyarunagabi domo waholene Keriso ibuniore ka.✧

<sup>3</sup> Ngode Datagaliwabeanda mana lowini ngago iname hale halu birimayagua ina Ngode Datagaliwabe kago mandabiore kamagoni. <sup>4</sup> Ngode Datagaliwabeanda mana lowini ngago iname hale halu bia nabi howa, Ngode Datagaliwabe kago manda bido, larimayagua ina ke howa lalu kamago henene lolene inaha nawiore howa larama.✧

<sup>5</sup> Ngode Datagaliwabeanda, Bia, laradagua hale halu bialu kagome Ngode Datagaliwabenaga gubalini holene baya buruguleore ibuha ngagoni. Iname Ngode Datagaliwabeha hogimbu bu harimadabe manda bulumayanaga ogo.✧ <sup>6</sup> Mbiralime, I Ngode Datagaliwabeha hogimbu bu ko, lalu kagome Yasu Kerisohanda bialu henedagua bialu holene nga.

### *Mana gahenge bulene ngago ogo*

<sup>7</sup> I nenege turubiru-o Ngode Datagaliwabeanda mana lowini ngago iname bulumayanaga lowinigo ina tihondo gilibu wia harogo ogoni gahenge ndo gilibu wia haro. Mana ogoni bamba piganengi lowini ngago iname ti langirimagola ti hale hai harimi.✧

<sup>8</sup> Ai ayu lone gilibu wia harogo mana gahenge winidago mana ogoni henene ngago hendelo Kerisohanda biyagomebi tigua birimigomebi walia harimi. Anidagua bialu harimigome aruma holene ereba halu wa holene heneneore abale tagira ibu kagoni.✧

<sup>9</sup> Mbiralime, Wa holeneha kogo, lowa ibu Keriso hameigini karuhondo gubalini nahe kayagua nde ibu aruma holeneha haabo ka.✧ <sup>10</sup> Mbiralibu Keriso hameigini karuhondo gubalini ho kayagua ibu wa holenehayagi ka. Anigo ibugua marume mana ko bilo mo bia holene ibuha nawiore.✧ <sup>11</sup> Mbiralime Keriso hameigini gubalini nahe kayagua ibu aruma holeneha ibaga bialu ka. Ani ibaga bialu howa aruma kagome ibunaga de mo ndibula kagola ibu ogoha poro lalu ndo ibu pupe halu ka.✧

### *Ko bulene tara tara ngaru mo tene ho karume Ngode Datagaliwabe gubalini habe nahe kago ogo*

✧ **1:6:** 2 Ko 6.14, 1 Yo 2.4 ✧ **1:7:** Ais 2.5, Yo 3.21, Eb 1.7, Hi 9.14, 1 Pi 1.19, Mo 1.5, 7.14 ✧ **1:8:** Yob 9.2, Iba 32.5, Min 28.13, Ya 3.2, 1 Yo 2.4 ✧ **1:9:** Iba 51.2, Min 28.13, 1 Yo 1.7 ✧ **1:10:** 1 Yo 1.8 ✧ **2:1:** Lm 8.34, 1 Ti 2.5, Hi 7.25, 9.24 ✧ **2:2:** Yo 1.29, 11.52, Lm 3.25, 2 Ko 5.18, Kl 1.20, 1 Yo 4.10, 4.14 ✧ **2:4:** 1 Yo 1.6-8, 4.20 ✧ **2:5:** Yo 13.15, 14.21-23, 15.4-5, 1 Pi 2.21, 1 Yo 4.12-13, 4.17, 5.3 ✧ **2:7:** 1 Yo 2.24, 3.11, 2 Yo 5-6 ✧ **2:8:** Yo 1.9, 8.12, 13.34, Lm 13.12, Eb 5.8, 1 Te 5.5, 5.8 ✧ **2:9:** 1 Ko 13.2, 2 Pi 1.9, 1 Yo 3.10, 3.14-15, 4.20 ✧ **2:10:** Yo 11.9, Lm 14.13, 2 Pi 1.10, 1 Yo 3.14 ✧ **2:11:** Yo 11.10, 12.35



<sup>12</sup> I waneiginiru-o Kerisohanda biyagome tínaga mana ko birimiru domo wahi hayagonaga ina tihondo beba gilibu wia haro. ✧ <sup>13</sup> Wali agali wahe mini bogabiru-o mbirali ibu ala haluhe haabobo henego ha ho wiaabo kago tí manda bidamigo ina tihondo beba gilibu wia haro. Wandari igiri daliaheru-o tígua Ko Bulene Anduane kago bope halu tí wayali kamigo ina tihondo beba ogo gilibu wia haro. ✧

<sup>14</sup> I waneiginiru-o tí Aba kago manda bidamigo ina tihondo beba gilibu wia haro. Wali agali wahe mini bogabiru-o mbirali ibu haluhe haabobo henego ha ho wiaabo kago tí manda bidamigo ina tihondo beba ogo gilibu wia haro. Wandari igiri daliaheru-o tí hongohe kamigo Ngode Datagaliwabenaga bi lolene tínaga bu habanaha ngagome tígua Ko Bulene Anduane kago bope halu tí wayali kamigonaga ina tihondo beba ogo gilibu wia haro. ✧

<sup>15</sup> Dindini ko biaga karunaga manabi ko bulene tara tara ngarubi mo tene nahalimu. Mbiralime dindini ko biaga karunaga mana mo tene halu kayagua ibu Aba Ngode Datagaliwabe gubalini nahaga ka. ✧ <sup>16</sup> Dindini ko bulene tara tara bibahende ngarubi mini kome de hondowa dimagoli holenebi mbirali ibuninaga mini mo yaraga holenebi uruni Aba Ngode Datagaliwabe ha howa ibini ndo dindini ko biaga karunaga manaha howa ibini nga. ✧ <sup>17</sup> Dindini ko biaga karunaga mana ngarubi dimagoli holene bibahende ngarubi ereba hai holebira. Ani biragola Ngode Datagaliwabe ha, Bia, ledadagua bialu karu ti dege haabo holebira. ✧

#### *Kerisonaga Waitigi ibu kago ogo*

<sup>18</sup> I waneiginiru-o horo hamaro bulene tu kaware nga. Horo hamaro bulene tu kaware wiragola Kerisonaga Waitigi ibulebira layago hale harimadagua ibu waitigi dewa áyu ibu kago hondowa iname horo hamaro bulene tu kaware nga manda bidama. ✧ <sup>19</sup> Uruni ti ina kamaru aria ndogo ti ina helalu tagira piyiya. Ti ina aria heneneore kale ina baba mandagi mo mbiraore ho kamale. Ti bibahende ina kamaru aria ndo howa walia holenaga ti ina helalu tagira piyiya. ✧

<sup>20</sup> Kerisohanda tihondo Ngode Datagaliwabe Dinini ngiyago tí bibahendeme henene lolene mandabu kami. ✧ <sup>21</sup> Tí henene lolene manda nabi kami lalu ndo tí henene lolene mandabu kamigobi henene loleneha howa ke holene tagira ibabe nahe manda bidamigobi ogoninaga lalu ina tihondo beba gilibu wia haro.

<sup>22</sup> Anigo ke haga ka aibe. Mbiralime Dabo Helenego ibulebira lowinigo ibu Yasu ndo ka, laga karu ti ke haga ka. Tigua Abahondobi Iginihondobi erembira miaga kago ti Kerisola Waitigi ka. ✧ <sup>23</sup> Mbiralime ibu Iginihondo erembira miaga kago ibu Abahondobi erembira dege miaga ka. Mendealime ibu Iginihondo mini mbiraore wiaga kago ibu Abahondobi mini mbiraore dege wiaga ka. ✧

#### *Yasu Kerisoha hogimbu bu haabo holene ngago ogo*

<sup>24</sup> Tí nde pigane Ngode Datagaliwabe hondo mini mbiraore wialu harimingi ibunaga mana hale howa tínaga miniha yu tigabu harimigo yani ho haabo halimu. Ani yu harimiyagua tí Aba Iginilaha hogimbu bu haabo holeberami. ✧ <sup>25</sup> Ogoninaga Kerisohanda inahondo, Haabo holene ngulebero, lalu lowinigo nga. ✧

<sup>26</sup> Tigua tí mo hondo hole manda bialu karunaga ina tihondo bi ogoni bebani gilibu wia haro. <sup>27</sup> Kerisohanda tihondo ibu Dinini ngiya. Ibu Dinini tíha kagola howa mendealime tí lawai holene henge nawi. Keriso Dinini ibugua bibahende tí lawai halu howa ke halu

✧ **2:12:** Lg 24.47, Ab 4.12, 13.38, 1 Ko 6.11, 1 Yo 1.7 ✧ **2:13:** 1 Yo 1.1 ✧ **2:14:** Eb 6.10 ✧ **2:15:** Md 6.24, Lm 8.7, 12.2, Ga 1.10 ✧ **2:16:** Lm 13.14, Ya 4.16, 1 Pi 2.11 ✧ **2:17:** Md 7.21, 1 Ko 7.31, Ya 1.10, 1 Pi 1.24 ✧ **2:18:** Md 24.5, 24.24, 2 Te 2.3, 1 Ti 4.1, Hi 1.2, 1 Pi 4.7, 2 Pi 2.1, 2 Yo 7 ✧ **2:19:** Md 24.24, Yo 6.37, Ab 20.30, 1 Ko 11.19 ✧ **2:20:** Yo 10.4, Ab 3.14, 1 Ko 2.15, 2 Ko 1.21, Hi 1.9, 1 Yo 2.27 ✧ **2:22:** 1 Yo 4.3, 2 Yo 7 ✧ **2:23:** Yo 5.23, 14.7-10, 15.23, 1 Yo 4.15, 5.1, 2 Yo 9 ✧ **2:24:** Yo 14.23, 1 Yo 1.3, 2 Yo 6 ✧ **2:25:** Yo 3.15, 6.40, 17.3, 1 Yo 1.2, 5.11

ndo heneneore hangu lawai haga ka. Ibugua tíhondo lawai halu kadagua hale halu bialu Keriso ha hogimbu bu haabo halimu.✠

<sup>28</sup> Anigo ĵ waneiginiru-o Keriso ibu hapani holene Horo harangi ina taga howa ha do holene irane nawilo mini dunubia ho halu dungulo howa ibuha hogimbu bu haabo holene nga.✠ <sup>29</sup> Keriso ibu mini tigabiwi kago tí manda bidamigo wali agali mana tigabi bialu karu ti Ngode Datagaliwabe waneigini kago manda bidamini.✠

### 3

#### *Ina Ngode Datagaliwabe waneigini kamago ogo*

<sup>1</sup> Aba Ngode Datagaliwabe handa inahondo, Tí ĵnaga waneigini kamigo, lalu gubalini timbuni au ho kadabe ina handa nabi kama. Nde heneneore ina Ngode Datagaliwabe waneigini kamagonigo dindini ko biaga karume Aba Ngode Datagaliwabe manda nabi howa inabi manda nabi ka.✠ <sup>2</sup> Ĵ nenege turubiru-o ina áyu Ngode Datagaliwabe waneigini kamaru maha abi holeberamadabe toba ho kama. Iname mbira dege manda bidamago ogo. Keriso ibu hapani haragola ibu abi ale kabe ina de handalu ibu kagobiore holeberamalo manda bidama.✠ <sup>3</sup> Ibugua ina ogonibi helolebira lowa minime dunubia ho haabo kamarume Keriso ibu baya buruguleore kagobi ina nde mo baya buruguleore helelo mitangitangi bialu kama.

<sup>4</sup> Ko biaga karume Ngode Datagaliwabe mana lowini ngago mo wahaga ka. Ko bulene bibahende ngarume Ngode Datagaliwabe mana lowini ngago mo wahaga.✠ <sup>5</sup> Ani mo wahagago Keriso ibugua ko domo wahole hapani ho hayagobi ko bulene ibuha nawiore kagobi tí manda bidami.✠ <sup>6</sup> Keriso ha hogimbu bu karume ko nabiaga ka. Ko biaga karume Keriso handa nabi halu manda nabi ka.✠

<sup>7</sup> Ĵ waneiginiru-o mbiralime tí mo hondo holani de hondo halimu. Keriso ibu mini tigabiwi kagobi mbirali mana tigabi bialu kayagua ibubi mini tigabiwi ka.✠ <sup>8</sup> Dama Heyolabe piganengi howa ko biaabo halu haga kagobi mbirali ko biaga kayagua ibu dama Heyolabe aria ka. Dama Heyolabeme ko bibahende biyaru Ngode Datagaliwabe Igini ibugua bo podai halu mo ereba haiore hole hapani ho henego ka.✠

<sup>9</sup> Mbirali ibu Ngode Datagaliwabe waneigini hayayagua Ngode Datagaliwabenaga holene gahenge ibuha wia kagome ibu ko nabiaga ka. Ogoni ibu Aba Ngode Datagaliwabe bu hinu kagome ibu ko bibe nahe kagoni.✠ <sup>10</sup> Anigo Ngode Datagaliwabe waneigini ogobi ka dama Heyolabe waneigini ogobi kalo manda bibehego ogodagua. Wali agalime mana tigabi nabiaga kayaguabi Keriso hameiginiru gubalini nahaga kayaguabi ti Ngode Datagaliwabe waneigini ndo kagoni.✠

#### *Ngode Datagaliwabe waneigini tını gubalini hagahaga bu holene ngago ogo*

<sup>11</sup> Tígua pigane Ngode Datagaliwabe hondo mini mbiraore wialu harimigo howa mana hale hai harimigo ogo. Inane gubalini ho hagahaga bu haabo holene ngagoni.✠ <sup>12</sup> Ina Keni ale nahamiya. Keni ibu Ko Bulene Dama Heyolabe aria howa ibu hamene Abele homelo bene. Ibu hamene homelo benego irane agibe. Irane ibu hameneme mana tigabi biaga heagola Keni ibuni ko biaga henegome ibu hamene homelo bene.✠

<sup>13</sup> Anigo ĵ hamene mbaliniru-o wali agali ko biaga karume tí handabe manga ho kayagua tí mogo nalalimu.✠ <sup>14</sup> Iname ina hamene mbaliniru gubalini ho kamago ina homaganehayagi howa haabobo holenehayagi porabu ede ho kamagoni manda bidama. Mbirali ibu hamene mbaliniru gubalini nahaga kagome ibu homaganehayagi

✠ **2:27:** Yo 14.26, 16.13, Hi 8.10-11, 1 Yo 2.20 ✠ **2:28:** 1 Yo 3.2, 4.17 ✠ **2:29:** Ab 22.14, 1 Yo 3.7, 3.10 ✠ **3:1:** Yo 1.12, 3.16, 16.3, Lm 8.16, 1 Yo 4.10 ✠ **3:2:** Lm 8.18, 8.29, 1 Ko 15.49, 2 Ko 3.18, Pb 3.21, Kl 3.4, 2 Pi 1.4 ✠ **3:4:** Lm 4.15, 1 Yo 5.17 ✠ **3:5:** Ais 53.5-6, 53.11, Yo 1.29, 2 Ko 5.21, 1 Ti 1.15, Hi 4.15, 1 Pi 2.22-24, 1 Yo 2.2 ✠ **3:6:** Lm 6.1-2, 6.14, 1 Yo 2.4, 3.9, 4.8, 3 Yo 11 ✠ **3:7:** Lm 2.13, 1 Yo 2.26, 2.29 ✠ **3:8:** Pig 3.15, Lg 10.18, Yo 8.44, 16.11, Hi 2.14 ✠ **3:9:** 1 Pi 1.23, 1 Yo 5.18 ✠ **3:10:** 1 Yo 2.29, 4.8 ✠ **3:11:** Yo 13.34, 15.12, 1 Yo 1.5, 4.7, 4.21 ✠ **3:12:** Pig 4.8, Hi 11.4, Yu 11 ✠ **3:13:** Md 5.11-12, Yo 15.18-19, 17.14, 2 Ti 3.12

haabo ka.✧ <sup>15</sup> Mbirali ibu hamene mbalinibi gubalini nahe handabe manga haga kagome ibu wali agali homelo bagane ale kagoni. Anigo wali agali homelo bagane kago haabobo holene mbira ibuha nawiore kago tí manda bidami.✧ <sup>16</sup> Iname gubalini holene manda bidamago ogo. Keriso ibu inanaga homo aribia hayago manda buwa iname ina hamene mbalinirunaga homo aribia hole nendebu hamiya.✧ <sup>17</sup> Mbirali homogo howa ibu hamene burupale kago de hondowa dara halu biamogo nabiyagua nde ibugua, I Ngode Datagaliwabe gubalini ho ko, larago lolene nawiore ndodabe.✧ <sup>18</sup> I waneiginiru-o iname bame lope halu bime dege lalu gubalini holene nawi. Iname biabe bialu howabi pele mialu howabi inane gubalini henene ho hagahaga bu hamiya.✧

*Ngode Datagaliwabe deni howa ibu waneiginime gi holene nawigo ogo*

<sup>19-20</sup> Anigo iname henene lolene aria kamagoni manda bialu Ngode Datagaliwabe deni howa inanaga bu miniha, Ko beramagonaga pani nolene nga, lalu langiyagua inanaga mini mo dambola holene karulolene nga. Irane ina mini emenewi kamagola Ngode Datagaliwabe ibu mini timbuniorewi howa bibahende manda bulene damene ngago ibu manda biai kago ina manda bidama.✧ <sup>21</sup> Anigo i nenege turubiru-o inanaga bu miniha, Ko beramagonaga pani nolene nga, lalu nalangiyagua Ngode Datagaliwabe deni howa ina mini dunubia ho howa ho dungulo holene nga.✧ <sup>22</sup> Ngode Datagaliwabe mana lowini ngago iname bulumayanaga lowinigo hale halu ibugua hame ledadagua bialu kamagome ibuhondo, Mbirale bayale ogo bia, lamirimayagua ibugua hale halu abale bulebira.✧ <sup>23</sup> Ngode Datagaliwabe mana lowini ngago iname bulumayanaga lowinigo ogo. Iname ibu Iginu Yasu Kerisohondo mini mbiraore wuwa inane gubalini ho hagahaga bu holene nga. Keriso ibugua ogonidagua dege bulene nga lene.✧ <sup>24</sup> Ngode Datagaliwabe mana lowini ngago iname bulumayanaga lowinigo hale halu bialu karu ti Ngode Datagaliwabe hogimbu bu howa ibubi tiha hogimbu bu haga ka. Ibugua inahondo ibu Dinini ngiyagome Ngode Datagaliwabe ibu inaha hogimbu bu ka ina manda bidamagoni.✧

## 4

*Henene laga Dininibi ke haga dininibi dabalutale bulene ngago ogo*

<sup>1</sup> I nenege turubiru-o Ngode Datagaliwabe mana henene ngadagua ndo latagi haga dewa dindi bibahendeni purogo lo kago wali agali marume, Ngode Datagaliwabe Dinini inaha ka, lalu kagola tigua tihondo mini mbiraore nawilimu. Nawi howa ala dinini ogoni Ngode Datagaliwabenagadabe ainagadabe lowa dabo hondolene nga.✧ <sup>2</sup> Ibuha Ngode Datagaliwabe Dinini kabe be dinini tara kabe manda bulenego ogo. Mbiralime, Yasu Keriso ibu ina dindini agali kamagobiore daliniya, lalu latagi halu kago ibuha Ngode Datagaliwabe Dinini heneneore ka.✧ <sup>3</sup> Anigo mbiralime, Yasu Keriso ibu ina dindini agali kamagobiore dalini ndoyago, lalu kago ibuha Ngode Datagaliwabe Dinini nahe Keriso Waitigi kagonaga dinini ibuha kagoni. Dinini ogoni ibu ibulebira layago tí hale harimigoni ibu áyu dindini ibu ka.✧

<sup>4</sup> I waneiginiru-o tí Ngode Datagaliwabe aria kamirumeibunaga mana henene ngadagua ndo latagi haga karu bope halu wayali kamigoni. Dindini ko biaga karu tiha dinini kago ibu hongo nahe ka. Ngode Datagaliwabe Dinini tíha haga kago ibu hongoheore bibahendenaga hongo bolanguahe kagoni.✧ <sup>5</sup> Ngode Datagaliwabe mana

✧ **3:14:** Yo 5.24, 1 Yo 2.9-11 ✧ **3:15:** Md 5.21-22, Ga 5.21, Mo 21.8 ✧ **3:16:** Yo 3.16, 13.1, 15.13, Lm 5.8, Ga 1.4, Eb 5.2, 5.25, 1 Te 2.8 ✧ **3:17:** Man 15.7, Lg 3.11, 1 Yo 4.20 ✧ **3:18:** Lm 12.9, Ya 2.15-16, 1 Pi 1.22 ✧ **3:19-20:** Yo 18.37, 1 Yo 1.8 ✧ **3:21:** Hi 4.16, 10.22, 1 Yo 2.28, 4.17 ✧ **3:22:** Iba 34.15, Yar 29.12, Md 7.8, 21.22, Yo 9.31, 14.13 ✧ **3:23:** Yo 6.29, 13.34, 15.12, 15.17, 17.3, 1 Te 4.9, 1 Pi 4.8, 1 Yo 2.8-10 ✧ **3:24:** Yo 14.23, 15.10, 17.21, Lm 8.9, 1 Yo 4.12-13 ✧ **4:1:** Md 7.15, 24.4-5, 24.24, 1 Te 5.21, 2 Pi 2.1, 1 Yo 2.18, 2 Yo 7, Mo 2.2 ✧ **4:2:** 1 Ko 12.3, 1 Yo 5.1 ✧ **4:3:** 2 Te 2.7, 1 Yo 2.18, 2.22, 2 Yo 7 ✧ **4:4:** Md 12.29, Yo 16.33, 1 Ko 2.12, Eb 2.2, 6.12, 1 Yo 5.4-5

henene ngadagua ndo latagi haga karu tigua dindini ko biaga karu aria howa dindini ko biaga karume laralidagua dege laragola dindini ko biaga karume hale haga ka.✧  
 6 Ina Ngode Datagaliwabe aria kamarume bi laramangi wali agali Ngode Datagaliwabe manda bu karume inanaga bi hale haga ka. Wali agali Ngode Datagaliwabe aria ndo karume inanaga bi hale nahaga ka. Ogonidagua henene laga Dininibi ke haga dininibi iname dabaluu tale bibehe kama.✧

*Ngode Datagaliwabe ibuni gubalini holene kago ogo*

7 Inenege turubiru-o gubalini holene Ngode Datagaliwabe howa ibini ngago iname inane gubalini hagahaga bu hamija. Wali agali tinaga bu habaneha gubalini holene wi karu ti Ngode Datagaliwabe manda buwa ibu waneigini ka.✧ 8 Nde Ngode Datagaliwabe ibuni gubalini holeneore kagonigo mbiralime gubalini holene ibunaga bu habaneha nawi kago ibu Ngode Datagaliwabe manda nabi ka.✧ 9 Ngode Datagaliwabe inaga inaga gubalini ho kago walia halu ibu Iginu mbiraore hangu henego ibuha howa ina holene gahenge yulumayanaga ina dindini hemaria ibu Iginu ibilene.✧ 10 Gubalini holene tene ngago ogo, Iname Ngode Datagaliwabe gubalini harimane ndo. Ibugua ina gubalini howa ibu Iginime inanaga ko birimago domo wahole ibilene.✧

11 Inenege turubiru-o Ngode Datagaliwabe inaga inaga gubalini ogonibi hayadagua iname inane gubalini hagahaga bu holene nga.✧ 12 Ina bibahende kamagome Ngode Datagaliwabe nahende kamagoni. Anigo iname inane gubalini hagahaga bu hari-mayagua nde Ngode Datagaliwabe ibu inaha hogimbu bu howa inanaga bu habaneha ibunaga gubalini holene baya buruguleore ngeledagoni.✧

13 Ai ibugua inahondo ibu Dinini ngiyagome Ngode Datagaliwabe inaha hogimbu bu kagobi ina nde ibuha hogimbu bu kamagobi ina manda bidama.✧ 14 Ngode Datagaliwabe ibugua ibu Iginu ina dindi bibahendeni kamaru Pele Ngiaga helo ibilenego iname de hondowa lamialu kamagoni.✧ 15 Mbiralime, Yasu ibu Ngode Datagaliwabe Iginu ka, lalu latagi hayagua ibu Ngode Datagaliwabe hogimbu bu halu Ngode Datagaliwabe ibu nde ibuha hogimbu bu haga ka.✧ 16 Inaneme Ngode Datagaliwabe inaga inaga gubalini ho kalo manda buwa mini mbiraore wu kama.✧

Ngode Datagaliwabe ibuni gubalini holeneore ka. Mbiralime Ngode Datagaliwabe ibu hameiginibi gubalini haga kago ibu Ngode Datagaliwabe hogimbu bu kagoni. Ani buwa Ngode Datagaliwabe ibu nde mbirali ogoniha hogimbu bu ka. 17 Daba Ki Bulene Horo harangi ina bu minime hongo howa elaha holomaya inanaga bu habaneha gubalini holene baya buruguleorego ngeledagoni. Ani bidagome ina dindini kamaru Keriso kagobi kamagoni.✧ 18 Wali agalinaga bu habaneha Ngode Datagaliwabenaga gubalini holene baya buruguleore ngeledagonime gi holene bo talia tagi hagago mbiralime gubalini holenebi gi holenebi ogoni labo bimaga howa yu habe nahe ka. Gi holene tene pani noleneha ngagonigo mbirali gi ho kagonaga bu habaneha Ngode Datagaliwabenaga gubalini holene baya buruguleore ogoni nawi.

19 Ngode Datagaliwabe inaga inaga gubalini hayagonaga iname Ngode Datagaliwabe Keriso hameiginirubi gubalini habehe kamagoni. 20 Mbiralime Keriso hameiginu karuhondo handabe manga howa, Inenege Ngode Datagaliwabe inaga inaga gubalini ho ko, layagua ibu ke halu laragoni. Ibu Keriso hameiginu karu de hondowa ti gubalini nahe kayagua ibu Ngode Datagaliwabe de nahendene howa gubalini habe nahe ka.✧

✧ 4:5: Yo 3.31, 15.19, 17.14 ✧ 4:6: Yo 8.47, 10.27, 14.17, 1 Ko 14.37, 2 Ko 10.7 ✧ 4:7: 1 Yo 2.29, 3.10-11, 3.23  
 ✧ 4:8: 1 Yo 2.4, 3.6, 4.16 ✧ 4:9: Yo 3.16, Lm 5.8, 8.32, 1 Yo 5.11 ✧ 4:10: Yo 15.16, Lm 5.8-10, Ta 3.4, 1 Yo 2.2  
 ✧ 4:11: Md 18.33, Yo 15.12-13, 1 Yo 3.16 ✧ 4:12: Yo 1.18, 1 Ti 6.16, 1 Yo 2.5-6, 4.18-20 ✧ 4:13: Yo 14.20, 2 Ko 1.22,  
 1 Yo 3.24 ✧ 4:14: Yo 1.14, 3.17, 1 Yo 1.1-2 ✧ 4:15: Lm 10.9, 1 Yo 5.1, 5.5 ✧ 4:16: 1 Yo 3.24, 4.8, 4.12 ✧ 4:17:  
 Ya 2.13, 1 Yo 2.28, 3.3, 3.19-21 ✧ 4:20: 1 Yo 2.4, 3.17, 4.12



21 Kerisohanda mana iname bulumaya langiyago ogo. Iname Ngode Datagaliwabe gubalini ho kamadagua Keriso hameigini karubi gubalini ho holene nga.✠

## 5

*Ngode Datagaliwabe waneiginime ko bulene bibahende ngago bope halu wayali holene ngago ogo*

<sup>1</sup> Mbiral Dabo Helenego Yasu ibuore ka, lalu mini mbiraorewi karu ti Ngode Datagaliwabenaga waneigini ka. Mbiralime ibu aba gubalini ho kayagua ibu aba waneiginibi gubalini dege ho ka.✠ <sup>2</sup> Iname Ngode Datagaliwabe gubalini halu ibugua mana bulene nga lowinigo hale halu birimayagua ina Ngode Datagaliwabe waneigini karubi gubalini ho harimada manda buleberema. <sup>3</sup> Heneneore laro. Ngode Datagaliwabeanda mana bulene nga lowinigo iname hale halu beramagome ina ibu gubalini ho kamago walia halu kama. Ibugua mana lowinigo ndelahe ndo bibeheore ngagoni.✠ <sup>4</sup> Ogoninaga irane Ngode Datagaliwabe waneigini hangu hangu kamarume dindini ko bulene bibahende ngago bope halu ina wayali habehe kama. Yasu Kerisohondo mini mbiraorewi kamagome dindini ko bulene bibahende ngago bope halu ina wayali haramali.✠ <sup>5</sup> Dindi bibahendeni ko ngago bope halu wayali habehe ka aibe. Mbiralime, Yasu ibu Ngode Datagaliwabe Iginioire ka, lalu mini mbiraorewi kago ibu hangume wayali habehe kagoni.✠

*Ngode Datagaliwabeanda ibu Iginuha howa haabobo holene ngiyago ogo*

<sup>6</sup> Mbiral ibiyago Yasu Keriso ibugua ibame baboraya bulebi darama pelolebi ibiya. Ibugua ibame baboraya bule hangu ndo darama pela halu homolebi ibiya. Ani bule ibiyago Ngode Datagaliwabe Dinini ibu henene lolene tene howaibunime ogoni henemane biyagoni leda.✠ <sup>7-8</sup> Ani binigonaga Ngode Datagaliwabe Dinini ibubi ibame baboraya biyagomebi darama pelayagomebi tebira uruni galone mbiraore dege ogoni lalu langiaga.✠✠ <sup>9</sup> Wali agali degeme, De handarimago tigatiga ledamagoni, laragola iname, Henene lara, lowa mini mbiraore weramali ndobe. Ai tigua laralidagua ndo Ngode Datagaliwabe ibugua bi hongohe heneneore langialu ibu Iginihanda biyago langiya.✠ <sup>10</sup> Ani langiyago mbiralime Ngode Datagaliwabe Iginihondo mini mbiraorewi kagonaga bu miniha ibu Iginihanda biyago Ngode Datagaliwabeanda laminigo mo yu ka. Mendalime Ngode Datagaliwabeanda ibu Iginihanda biyago laminigo yu tiga nabiyagua nde ibu Ngode Datagaliwabeanda mini mbiraore nawi howa, Ngode Datagaliwabe ibu ke haga ka, manda bialu laragoni.✠ <sup>11</sup> Bi langiyagonaga tene ogo. Ngode Datagaliwabeanda inahondo haabobo holene ngiyago ibu Iginuha howa mo ngiya.✠ <sup>12</sup> Ani biyago Ngode Datagaliwabe Iginuha hogimbu bu karume haabobo holene ogoni yu ka. Ibu Iginuha hogimbu nabi karu ti haabobo holene ogoni nayi ka.✠

*Haabobo holene yu kamigo ogo*

<sup>13</sup> Wali agali Ngode Datagaliwabe Iginihondo mini mbiraorewi kamiru-o ti haabobo holene yu kamigo manda bilimulonaga ina tihondo beba ogo gilibu wia haro.✠ <sup>14</sup> Ina Ngode Datagaliwabe deni howa ina bu minime dunubia ho howa dungulo kamago ogo. Iname ibuhondo, Ina hame lededagua mbira bia, lalu hale harimayagua ibugua hale holebiralomandabu kama.✠ <sup>15</sup> Iname ibuhondo bi mbira laramagola ibugua hale holebiralomanda birimayagua ibuhondo, Mbira bia, lalu lameramagola ibugua hale halu bulebira manda bidama. <sup>16</sup> Tinaga hameigini mbirame ko mbira ibu dinini koha

✠ **4:21:** Md 5.44-45, Mg 12.29-31, Yo 13.34, 15.12, 1 Yo 3.23 ✠ **5:1:** Yo 1.12-13, 15.23, 1 Yo 2.22-23, 4.15 ✠ **5:3:** Mai 6.8, Md 11.30, Yo 14.15, 14.21-24, 2 Yo 6 ✠ **5:4:** Yo 16.33, 1 Yo 3.9, 4.4 ✠ **5:5:** Lm 8.37, 1 Ko 15.57, 1 Yo 4.4, 4.15 ✠ **5:6:** Yo 1.29, 1.34, 14.17, 16.13, 19.34, 1 Ti 3.16, 1 Yo 1.7 ✠ **5:7-8:** Yo 1.1, 10.30, Mo 19.13 ✠ **5:7-8:** Yo 15.26 ✠ **5:9:** Md 3.16-17, 17.5, Yo 5.32-37, 8.17-18 ✠ **5:10:** Yo 3.33, 5.38, Lm 8.16, Ga 4.6 ✠ **5:11:** Yo 3.36 ✠ **5:12:** Yo 3.36, 5.24 ✠ **5:13:** Yo 20.31, 1 Yo 1.1-2 ✠ **5:14:** Yo 14.13, 16.23, 1 Yo 3.21-22



polenaga ndo bialu karia de handarimiyagua Ngode Datagaliwabehondo ibunaga bi la halimu. Ani la haramigola Ngode Datagaliwabehanda tí hameigini o biagohondo haabobo holene mulebira. Ogoni larogo ko mbira birago dinini koha polenaga ndo laro. Ko timbuni mbira dinini koha polenaga ngago ko ogoni biaga karu Ngode Datagaliwabehondo tinaga la halimu ndo laro.✧ <sup>17</sup> Ko damene bibahende ko dege ngago lowa ko bulene maru ngago biragome dinini koha pelonaga ndo nga.

<sup>18</sup> Ngode Datagaliwabe waneigini bibahende karu tigua ko biaabo nahaga ka iname manda bu kama. Ngode Datagaliwabe Igini ibugua ti mamage ho kagola dama Heyolabe ibugua ti mo ko habe nahe ka.✧

<sup>19</sup> Dindi bibahendeni wali agali ko biaga karu dama Heyolabe ibugua ti handame ho kagoni helowa ina Ngode Datagaliwabenaga waneigini kamago mandabu kama.✧

<sup>20</sup> Iname Ngode Datagaliwabe henene kago manda bulumaya ibu Igini ibugua ina mo manda bia hole ibiyagoni mandabu kama. Ina Ngode Datagaliwabe heneneore kago ha hogimbu bu howabi ibu Igini Yasu Kerisoha hogimbu bu howabi ani bu kamagoni. Ngode Datagaliwabe heneneore kago ogoni. Haabobo holene tene ogoni ibuniore ka.✧

<sup>21</sup> Ai i waneiginiru-o tigua mbirale gime wabinirunaga bi pupu nawi habagi ho halimu.✧

---

✧ **5:16:** Md 12.31-32, Lg 12.10, Hi 6.4-6, Ya 5.14-15   ✧ **5:18:** Yo 17.15, Ya 1.27, 1 Pi 1.23, 1 Yo 3.9   ✧ **5:19:** Lm 8.10, 8.23, Ga 1.4, 1 Yo 4.6   ✧ **5:20:** Ais 9.6, Md 25.46, Yo 17.3, 1 Ti 3.16, Hi 1.8   ✧ **5:21:** 1 Ko 10.14

## 2 Yone

### Yonehanda beba mende ogo gilibu wia hene

### Mbuga ogoha gilibu ngarunaga nemandi ogo

Yonehanda beba mende gili binigo bi emene nemandi lalu lenego ogo. Keriso hameigini tini gubalini haga haga bialu holene nga, lalubi, Ngode Datagaliwabe mana henene ngadagua ndo lawai haga karume tí mo guya holigo de hondo halimu, lalu bi gilibu wia hene.

#### **Bulu бага бува кuni gilibu ngago**

1-3

Yonehanda bi ala lenego

4-6

Gubalini holene duniniore lenego

7-11

Ngode Datagaliwabe mana henene ngadagua ndo lawai harago de hondo holene nga

12-13

Lamaro bialu lenego

1-2 I agali ala hene miniwi howa Keriso hameigini ngoai ho kamiru-o tihondo beba gilibu wia harogoni. Henene lolene inaha ngagobi wiaaboore holebirago ina tí gubalini heneneore ho kogoni. I hangu ndo henene lolene ogoni aria bibahende karumebi tí gubalini ho kagoni.✧

3 Aba Ngode Datagaliwabebi ibu Iginu Yasu Kerisobi libugua inahondo biamogo bulene nawi howa biamogo bia holenebi dara holenebi mo palia holenebi ngilo hamelo ko. Uruni henene lolenebi gubalini holenebi heba inanaga wilo hamelo ko.

#### *Henene lolenebi gubalini holenebi ogo*

4 Aba Ngode Datagaliwabehanda mana bulene nga lowini ngadagua tí marume hale howa henene lolenehayagi kamigo hondowa i turu timbuni ho ko.✧ 5 Anigo Keriso hameiginiru-o tihondo mana gahenge ndo mana piganengi lowini ngago iname Ngode Datagaliwabehondo mini mbiraore wialu harimangi howa hale haabo harimago mana ogoni gilibu wia harogo ogo. Iname gubalini gagahaga bu hamiya.✧ 6 Ina gubalini holene langerogoni walia holenaga iname Ngode Datagaliwabehanda mana lowini ngadagua bialu holene nga. Mana lowiyagoni ina bibahende Keriso hameigini pigane harimangi howa hale harimago ogo. Iname gubalini gagahaga bu holene nga.✧

7 Mo hondo haga dewa dindi bibahendeni purogolo hayarume Yasu Keriso dindi agaliore hole ibiyago ibu dindi agali hene ndo laga ka. Ogonidagua laga kagome ibu mo hondo haga agali howa Kerisola Waitigi haga ka.✧ 8 Iname mbirale tí yu halimulo biabe birimagonaga yu waholigo Ngode Datagaliwabehanda tihondo emena mulene ngago bibahende yu hai hole tini mamage ho halimu.✧

9 Mbirali Kerisohanda lawai hayagohayagi howa tagiraha pogolo tagi hayagua ibu Ngode Datagaliwabela hogimbu nabi hene ka. Mendeali Kerisohanda mana lawai hayagoha ha ho wiaabo kayagua ibu Aba Iginilaha hogimbu bu hene ka.✧ 10 Anigo mbiralime Kerisohanda lawai hayadagua ndo bi tara lalu lawai hole ibiyagua ibugua, Ebero, laragola, tigua, Habiya ibu, nale andagaha nenege birule ibilo hengebi namilimu.✧ 11 Agali biagohondo, Habiya ibu, larimiyagua ko biaga biago heba ho bimagamaga bu holeberami.

✧ **1:1-2:** Yo 8.32, 1 Pi 5.1, 1 Yo 3.18, 3 Yo 1 ✧ **1:4:** 3 Yo 3 ✧ **1:5:** Yo 13.34, 15.12, 15.17, 1 Pi 4.8, 1 Yo 2.7-8, 3.11, 3.23 ✧ **1:6:** Yo 14.15, 14.21, 1 Yo 2.5, 2.24, 5.3 ✧ **1:7:** 1 Yo 2.22, 4.1-3 ✧ **1:8:** Mg 10.29-30, Ga 3.4, Hi 10.32, 10.35 ✧ **1:9:** 1 Yo 2.23 ✧ **1:10:** Eb 5.11, 2 Te 3.6

*Lamaro bialu bi lenego ogo*

<sup>12</sup> Tíhondo bi dewa lolene manda bia bidogo bebani gili bialu lowia hole hame nalego inane handaya hagabu howa tí baba bi la doba bialu ina turu ho hamíyanaga ĵ tí kamiria nenege ibule ko.✧

<sup>13</sup> Ina Keriso hameigini oali ngoai haga kamarume, Tíore mitangi bu kama, lalu lawia harama.

### 3 Yone

## Yonehanda beba tebone ogo Gaiasahondo gilibu wia hene Mbuga ogoha gilibu ngarunaga nemandi ogo

Yonehanda beba tebone ogo gili binigo Keriso hameigini hearunaga haru haga mbira mini Gaiasahondo wia hene. Beba gili bialu howa Yone ibugua Gaiasahanda Keriso hameigini karu biamogo biagonaga ibuhondo kaj lene. Kaj lowa lalu, Agali mbira mini Diodorebese nakarulape dege bialu kago de hondo igilo habe, lalu gilibu wia hene.

### **Bulu бага бува кuni gilibu nga**

1-4

Yonehanda bi ala lenego

5-8

Gaiasahondo kaj lenego

9-10

Diodorebese ibu nakarulape bialu ka, lenego

11-12

Demidiriasa ibu bayale bialu ka, lenego

13-15

Lamaro bialu lenego

<sup>1</sup> I agali ala hene miniwi howa Gaiasa ihondo beba ogo gilibu wia haro.✧

<sup>2</sup> I nenege turubi-o inaga dinini holene bayalehe kedagua i warago nabe turu halu bayale dege habelo ina hamelo ko. <sup>3</sup> Henene lolenehayagi haabo harilidagua mini bilinahe howa henene loleneyi haabo ke lalu Keriso hameigini marume ibuwa i langiyagola hale howa turu timbuni ho ko.✧ <sup>4</sup> Mbiralime lalu, I waneigini henene lolenehayagi anda pu haabo ka, laragola hale howa i turu timbuni ho haruli. Turu holene ogonime turu holene bibahende bolangua haga nga.✧

### *Gaiasahondo kaj lenego ogo*

<sup>5</sup> I nenege turubi-o mini bilinahe howa Keriso hameiginiruhondo biamogo bigi bialu ti maru i manda nabini hearubi biamogo bigi bialu kego nde baya hangu bialu kegoni laro. <sup>6</sup> Ti o biarume Keriso hameigini oali ngoai ho kamaruhondo langialu lalu, Gaiasa ibu gubalini hagane agalioreya, lalu langiya. Ani langiyaru ti ibaga bialu poradagua pelonaga Ngode Datagaliwabe mo turu helo ina ti biamogo bibe.✧ <sup>7</sup> Tigua Kerisonaga Bi Mana Debene lama pole lowa wali agali Ngode Datagaliwabehondo mini mbiraore nawi hearume tihondo mbirale mbira milo henge nami wahalu piyiya.✧ <sup>8</sup> Ani biyagonaga ina Keriso hameigini kamarume ti heba henene lolenenaga biabe bimaga hole ti biamogo bulene nga.

### *Diodorebese ibu nakarulape bialu henego ogo*

<sup>9</sup> Ina Keriso hameigini ngoai ho kamiruhondo beba mbira gilibu wia haru. Ani birugola Diodorebese ibugua ibuni mo haguane hoa howa inaga bi mo wahaiya. <sup>10</sup> Ibugua inanaga mini lalu wali agaliruhondo bi koorene kobi ke holenebi laga bialu kago i ti kamiria ibuwa ibugua mana ko ogoni biyagonaga ti manda biai halimulo ina latagi hai holebero. Ibugua ogoni hangu ndo biaga. Keriso hameigini marubi ibirangi ibugua, Ibirimida, lalu turu nahaga. Ani nabiaga howa wali agali marume ti ibiraruhondo, Andaga birule ibidaba, loa karu ti Keriso hameiginiru heba karia ibugua ti tagira pelo bo batagi hole manda biaga.

✧ 1:1: Ab 19.29, Lm 16.23, 1 Ko 1.14, 2 Yo 1 ✧ 1:3: 2 Yo 4 ✧ 1:4: 1 Ko 4.15, Pm 10 ✧ 1:6: Ta 3.13 ✧ 1:7: 1 Ko 9.12, 9.15

<sup>11</sup> I nenege turubi-o ko biaga karume biagadagua nabi bayale biaga karume biagadagua dege bialu habe. Wali agali bayale biaga karu ti Ngode Datagaliwabe aria ka. Ko biaga karume Ngode Datagaliwabe manda nabi ka.✧

<sup>12</sup> Wali agali bibahendeme Demidiriassa ibu bayale ogobiore ka lene haga. Ibugua henene lolenehayagi howa ibu henene loleneyi kagobi walia halu ka. Inamebi ibu de hondowa ibu ogobiore ka lene haramali. Ína nde inane laramago tigatiga laradalo manda bide. ✧

*Lamaro bialu bi lenego ogo*

<sup>13</sup> Íhondo dewa lolene manda bia bidogo bebani gilibu wialu lowia hole hame nale ko.✧ <sup>14</sup> Emene howa iyane dengui handaya hagabu howa bi la doba bibiya ina í keria abale ibule kogo.

<sup>15</sup> Mo palia holene íha wiaabo helo hameledo. Iya nenege oali karu bibahendeme íhondo, Iname íore mitangi bu kama, lalu lawia harama. Iya nenege í kegoria karu bibahende hangu hanguhondo iname, Tí mitangi timbuni bu kama, larama laya lalu lamibe.



## Yudi

### Yudihanda beba ogo gilibu wia hene

### Mbuga ogoha gilibu ngarunaga nemandi ogo

Yudihanda beba ogo Keriso hameiginihondo gilibu wia henego irane agali marume Ngode Datagaliwabe mana henene ngadagua ndo mana tara lawai hayagola gilibu wia hene. Ogoninaga Keriso hameigini henene heneru mo hondo holigo lowa Yudihanda bi ogodagua lene. Áyu Ngode Datagaliwabehanda daba bagi ho helenedarunaga mini mbiraore wulene Ngode Datagaliwabehanda ngiai hayago waitigi ibiraru baba hongo howa ladai bilimulonaga beba ogoni gilibu wia haro, lene.

#### **Bulu бага бува кuni gili bu ngago**

1-2

Yudihanda bi ala lenego

3-16

Ngode Datagaliwabe mana henene ngadagua ndo lawai hagago pani nolene wulebira

17-23

Mini bilina ho haabo holeneho

24-25

Lamaro bialu Ngode Datagaliwabe mini yaraga henego

<sup>1</sup> I Yudi Yasu Kerisonaga biabe biahaga Yamesenaga hamene kogoni. Wali agali Ngode Datagaliwabehanda olo helayaru tí Aba Ngode Datagaliwabe ibunaga gubalini holenehayagibi Yasu Kerisonaga haru holenehayagibi kamiru tíhondo beba ogo gilibu wia haro.✧

<sup>2</sup> Ngode Datagaliwabenaga dara howa biamogo bulenebi mo palia holenebi gubalini holenebi tíha tǒlairo helo hamelo ko.✧

#### *Agali marume mana henene ngadagua ndo lawai henego ogo*

<sup>3</sup> Inaga nenege turubiru-o Ngode Datagaliwabehanda ibi tíbi ina bibahende pele ngiyagonaga beba mbira gili bule mitangitangiore bialu haru. Ani birugoyu ina tíhondo bi mende gilibu wia holene manda bido. Áyu Ngode Datagaliwabehanda daba bagiho heledarunaga mini mbiraore wulene ngiai hayago ogoninaga waitigi ibiraru baba hongo howa ladai bulene mandabu halimulonaga beba ogo gilibu wia haro.✧ <sup>4</sup> Bi larogo irane agali maru Ngode Datagaliwabe mitangi nabiaga karume ohowa tí heba tagotago bu kagoni. Tigua mana koorene ko birago karulape berama lolenaga Ngode Datagaliwabenaga biamogo bia holene bi mana ngago mo tara haga ka. Ani bialu ina Haguane mbiraore Anduane Homogo Yasu Keriso ibu hangu kago tigua handa tara ho haga ka. Ani bialu karu tí koha pelo lalu bambaore Anduane Homogonaga mbugani mbiwia ho winigo lola haragoni.✧

<sup>5</sup> Galone uru nde manda biai ho kami tiraga ina tí mo mitangi bia hoa dege halu ko. Anduane Homogohanda Isaraele wali agali iyibi dindiha howa pele mialu haru tagira piyagome mani marume mini mbiraore nawiyagola howa bo home lai hene.✧

<sup>6</sup> Ani buwa dahuliyali marubi ti holeneniore helayago wahalu tarani pu hayaru Horo hamaro birangi ti heba godi lole Ngode Datagaliwabehanda seni pume uli arumaheha dariba ho haabo heleda.✧ <sup>7</sup> Dahuliyali biarume biyadagua wali agali Sodom Gomorani hearumebi wali agali maru kaware ha parapara bu hearumebi tinginime ko buleneho hangu mitangitangi bialu dimagoli howa kayu koore tara tara bialu hene. Ani bialu

✧ **1:1:** Md 13.55, Mg 6.3, Yo 17.11-12, 1 Pi 1.5 ✧ **1:2:** 1 Pi 1.2, 2 Pi 1.2 ✧ **1:3:** Pb 1.27, 1 Ti 1.18, 6.12, 2 Ti 1.13, Ta 1.4 ✧ **1:4:** Ga 2.4, Ta 1.16, Hi 12.15, 2 Pi 2.1, 1 Yo 2.22 ✧ **1:5:** Har 12.51, Dag 14.29-30, Iba 106.26, 1 Ko 10.5, 10.9, Hi 3.17-19, 2 Pi 1.12 ✧ **1:6:** Yo 8.44, 2 Pi 2.4, 2.9, Mo 20.10

hearu ti ira da ho wiaabo kagoria pani naabo halu kago ogoni manane ina bibahende hondolomaya tigatigaore biapani ho nga.✧

<sup>8</sup> Ogonidagua dege agali maru ohowa íbu bi tagotago bu karume de gandeba tara tara handararume tinime tinaga tingini mo ko helo handaga ka. Ani bialu tigua Ngode Datagaliwabenaga haru haga mana wiago mo nagalone hagabi dahuliyali wáhe karuhondo mege biagabi ka.✧ <sup>9</sup> Agali o biarume mege biyadagua dahuliyali bibahendenaga haguane mini Maigelo ibugua mege nabi hene. Maigelohanda dama Heyolabe baba Mosesenaga tingini aiwa mo yulebe lalu garere biyangi ibugua dama Heyolabe mege nabi howa lalu, Anduane Homogo ibugua í talilo helarogo, lene.✧ <sup>10</sup> Agali o biarume mbirale ngaru tene manda nabi howa tigua mege bialu, Koorene koda, laga ka. Gabua tara tarame bua harago biagadagua agali o biarume bua harago biragome Ngode Datagaliwabehanda tini pani nelo mulene ngagoria helolebira.✧ <sup>11</sup> Tigua Kenihanda bialu hayadagua dege bialu kagoni. Balamahanda biyadagua tiguabi muni mule mana ko bulenehayagi pialu kagoni. Korahanda dogo halu wali agali hoba migimigi bilo mo bia hayagola bo wahayadagua tiguabi hoba migimigi biyagome bo waholene yu anda ibiya. Anigo tinaga mo ko holene timbu gibiore wulebirago dara holene nga.✧ <sup>12</sup> Tigua Keriso hameigini gubalini holenenaga tomo nole ngoai haramingi taga nahe howa ta nabi bupe haragome ngoai holene uruni mo dodo haga ka. Tini dege mitangi bialu haga ka. Ginu maru dalu nayalu ibaga puyabume bame yalu poralidagua agali biaruni uruni ale ka. Wali agali uruni ti ira lini nadaga pini heba dugu wahene gabuniore wiagagobi ka.✧ <sup>13</sup> Ti iba hongo howa yaribu bima porago ale howa tigua mana tagabi koore bialu karu iba haingoda yatagi hagadagua biatagi haga ka. Ti yakundi maru hariha howa pupe haga karu ale ka. Ngode Datagaliwabehanda ti haaboboore helonaga arumaore dumbilini aleha henge mo manda manda bu winigo nga.✧

### *Pani nolenenaga ogo*

<sup>14</sup> Inogo ibu Adamanaga aguanene kane daba henegome uruninaga bambaore mbiwía halu lalu, Anduane Homogo ibuni dahuliyali loma bia hene daosini dewaore karu heba ibulebira.✧ <sup>15</sup> Ibalu ibugua bibahende daba ki bulebira. Wali agali ko Ngode Datagaliwabe mitangi nabiaga karume ibu mo tene nahe howa biyarunagabi ibuhondo handabe manga halu bi koore engengebi layarunaga ibugua ti pani mulebira, lene.✧

<sup>16</sup> Wali agali urunime horo bibahendengi guraga guraga bialubi marume biyada lalu ke halu goea bialubi tini minime ko bua kadagua biagabi tinime tininaga biyago mo yaraga hagabi ka. Ani buwa tini hame ledago bulenaga maruhondo bime la deborebo bialu haga ka.✧

### *Hongo howa mamage holene ogo*

<sup>17</sup> Anigo inaga nenegeru-o mbira mitangi bu dai bulene nga. Ina Anduane Homogo Yasu Kerisonaga abosolo karume ala langiyago mitangi bilimu.✧ <sup>18</sup> Ogoninaga tigua tihondo langialu howa lalu, Horo hamaro bulene kaware haragola agali maru tagira ibalu tí Ngode Datagaliwabenaga kamigo mege bialu mo tabirane holebira. Ani biaga uruni tini minime ko bua mitangi birago haruru pialu holebira, lene.✧ <sup>19</sup> Agali urunime wali agali mo guru hangu haga bialu ka. Ti Ngode Datagaliwabe Dinini ibugua haru helowa ndo dindini holene hame ledarume ti haru helo ka.✧ <sup>20</sup> Anigo inaga nenege uru-o tigua mini mbiraore wirimigoni Ngode Datagaliwabe mana baya gibiore yu tiga bu kamigo anda halu yanga lelo mo tagotago bigi bialu halimu. Ngode Datagaliwabe

✧ **1:7:** Pig 19.1-24, 2 Pi 2.6, 2.10 ✧ **1:8:** Har 22.28, 2 Pi 2.10 ✧ **1:9:** Man 34.6, Dan 10.13, 10.21, 12.1, Seg 3.2, 2 Pi 2.11-12, Mo 12.7 ✧ **1:10:** 2 Pi 2.12 ✧ **1:11:** Pig 4.3-8, Dag 16.1-35, 22.1-35, 2 Pi 2.15, 1 Yo 3.12 ✧ **1:12:** Ese 34.8, Md 15.13, 1 Ko 11.21, Eb 4.14, 2 Pi 2.13, 2.17, Mo 2.11, 20.14 ✧ **1:13:** Ais 57.20, Pb 3.19, 2 Pi 2.17 ✧ **1:14:** Pig 5.18-24, Man 33.2, Dan 7.10, Seg 14.5, Md 25.31, 2 Te 1.7, Mo 1.7 ✧ **1:15:** Iba 31.18, 94.4, Mal 3.13 ✧ **1:16:** Min 28.21, Ya 2.1, 2.9, 2 Pi 2.10, 2.18 ✧ **1:17:** 2 Pi 3.2 ✧ **1:18:** 1 Ti 4.1, 2 Ti 3.1, 2 Pi 2.1, 3.3 ✧ **1:19:** Hos 4.14, 1 Ko 2.14-15, Hi 10.25, Ya 3.15

Dinininaga hongoni howa Ngode Datagaliwabehondo bi laabo halu halimu.✧ <sup>21</sup> Ani bialu howa ina Anduane Homogo Yasu Keriso ibugua dara howa biamogo bialu tíhondo haabobo holene ngilo hondo kami tambu howa Ngode Datagaliwabenaga gubalini holenehayagi haabo halimu.✧

<sup>22</sup> Tígua wali agali maru mini kira kirawi howa tobatobaho karu dara howa biamogo bialu halimu. <sup>23</sup> Wali agali maru ti pele mialu ira dedagoria howa abale gilila milimu. Maruhondo dara howa biamogo bialu tíni gi howa dege ani bialu halimu. Tinaga mini ko dimagoli hayagonaga aga dodohe ale karulo karu manga ho halimu.✧

*Kai lolenenaga ogo*

<sup>24</sup> Uru-o Ngode Datagaliwabehanda tí pi nale halimulo bayuwa haru habehe ka. Ibugua tíha konaga motudu nawiore howabi turu timbuniore howabi ibunaga wá taraore kagoria haru íbu helabehe kagoni.✧ <sup>25</sup> Ngode Datagaliwabe ani bibeheore kagome ibu inanaga Pele Ngiaga mbiraore hangu kago Yasu Keriso ina Anduane Homogo togoni howa ibunaga mini yaraga holenebi handame ho holenebi hongohé holenebi haguane howa haru holenebi piganeoreni howa Ngode Datagaliwabe ibunaga winigo áyubi ngago awebi wiaaboboore wulebira. Aniore bilo laro.✧

---

✧ **1:20:** Lm 8.26, Eb 6.18, Kl 2.7, 1 Te 5.11, 1 Ti 1.4 ✧ **1:21:** Ta 2.13, 2 Pi 3.12 ✧ **1:23:** Amo 4.11, Seg 3.2-5, Lm 11.14, 1 Ko 3.15, Mo 3.4 ✧ **1:24:** Lm 16.25, Eb 3.20, Pb 1.10, Kl 1.22, 2 Pi 3.14 ✧ **1:25:** Lm 16.27, 1 Ti 1.17, 2.3, 2 Pi 3.18

## Mo Walia Henego

### Yasu Keriso ibugua Yonehondo mo walia henego

### Mbuga ogoha gilibu ngarunaga nemandi ogo

Anduane Homogo Yasu Kerisohondo mini mbiraorewi hearu ti mo tandaga haabo hayangi Yonehanda ibuhondo mana mo walia hayagola gilibu wini. Beba gili binidag-  
oni handararunaga mini mo dunu biahe helobi tandaga nalu howa wahalu napelobi  
gilibu wini.

Mbuga ogoni Yonehanda gili bialu de gandeba hendenegobi mo walia henegobi gili  
binigo Keriso hameigini hearuhondo wia hayagola tigua irane manda bini. Keriso  
hameigini ndo hearume manda nabibehe hene. De gandeba tara tara hendenegobi mo  
walia haga binigobi dunini mbiraore hangu nga lalu gili bini.

Dunini ogoni biyagonaga irane ogo. Hamaro bulene horo harangi Ngode Datagali-  
wabenaga waitigi bibahendebi dama Heyolabebi Ngode Datagaliwabehanda Anduane  
Homogo Yasu Kerisoha howa bolangua halu wayali hai holebira. Bi mbira gilibu ngago  
ogo, Ngode Datagaliwabehanda wali agalinaga deni de iba karu domo waholebira. Ani  
bialu homolene homabi dara holenebi dugu bulenebi tandaga nolenebi nawulebiraore.  
Mbirale ala tawe wiyaru mo ereba hai haya, lalu lene. Be 21.4

#### **Bulu бага бува кuni gilibu ngago**

1.1-8

Yonehanda bi ala lenego 1.9-3.22

De gandeba pigane hendenegobi Keriso hameigini dindi kariani hearuhondo beba  
gilibu wia henegobi nga 4.1-8.1

Mbuga mbira wagaya ale kariame mo ndibulo para henego 8.2-11.19

Mbelo biguli karia pu lenego 12.1-13.18

Abagua alebi nogo tara kirabi 14.1-15.8

De gandeba tara tara hendenegro 16.1-21

Ngode Datagaliwabenaga keba holene ndisi be kariaha winigo 17.1-20.10

Babilono podo ibira henegobi Ngode Datagaliwabe ibu wayali hai henegobi 20.11-15

Daba ki bumaro bulene 21.1-22.5

Hari daliga gahengebi dindi gahengebi 22.6-21

Yasu ibu dai bulebiragonaga nga

<sup>1</sup> Bi moana ala pani nahe winigo Yasu Kerisohanda mo pani hayago mo mogo buwa  
mbuga ogoniha gilibu ngagoni. Mo pani holene ogoni Yasuhanda ibunaga biabe bia  
haga karuhondo mbirale tara tara abaleore bulebiraru walia helo Ngode Datagali-  
wabehanda Yasuhondo mini. Kerisohanda mbirale uruni dahuliyali mbiralihondo, Bi  
ogoni inaga biabe bia haga Yonehondo lamule pu, layagola ibuwa langiya. <sup>2</sup> Yone ina  
handarudagua bibahende langiai halu Ngode Datagaliwabeha howa bi ogoni ibinigobi  
Yasu Keriso ibugua bi mana ogoni mo pani henegobi i Yone ina handarudagua bibahen-  
deore langiai halu gilibu wirugo nga. <sup>3</sup> Bi ogo daga lararumebi mani bulebiragonaga  
bi o lo ngadagua daga lowa hale halu yu tiga birarumebi turu hai holebira. Mbirale tara  
tara uruni bibahende lola hai holene kawareore nga.

*Esia dindiha tano kariani Keriso hameigini hearuhondo Yonehanda bi gilibu wia  
henego ogo*

✧ 1:1: Dan 2.28-29, Yo 3.32, 12.49, Mo 1.19, 4.1, 22.6, 22.16 ✧ 1:2: 1 Ko 1.6, 1 Yo 1.1, Mo 6.9 ✧ 1:3: Lg 11.28, Ya  
5.8, 1 Pi 4.7, Mo 22.7, 22.10

<sup>4</sup> Esia dindiha tano kariani Keriso hameigini kamiruhondo Yone ina bi ogo gilibu wia haro.✠

Ngode Datagaliwabe áyu kagobi bamba henegobi mani holebiragobi ibugua biamogo bulene nawi howa biamogo bia holenebi mo palia holenebi tihondo ngilo hamelo ko. Ngode Datagaliwabenaga handame ho biragane dagia ngagonaga wanakuihayagi dinini karia karu tigua biamogo bulene nawi howa biamogo bia holenebi mo palia holenebi tihondo ngilo hamelo ko. <sup>5</sup> Yasu Keriso ibu walia hagane mini bilinahe howabi homalu pigane mo heya henegobi dindi bibahendeni kini karunaga haguane kagobi ibugua biamogo bulene nawi howa biamogo bia holenebi mo palia holenebi tihondo ngilo hamelo ko.✠

Ko inane birimagome ina dariba henego hemaria Yasu ibunaga gubalini holeneba ina gubalini halu ibugua homo aribia hayagome ina golope hene. <sup>6</sup> Ani buwa ina Ngode Datagaliwabenaga handame ho kagoria howa Keriso ibu Aba Ngode Datagaliwabenaga biabe bia haga holomaya ibugua ina loma binigo mo miaga mo hela henego kama. Mini yaraga holenebi hongo holenebi Yasu Keriso ibunaga wia dege bidane wia ho wilo hamelo ko. Aniore bilo laro.✠

<sup>7</sup> Yasu ibu beralibani ibirago de handadaba. Ibirago ina kamarubi bamba ibu yandareme nogoba hayarumebi ina bibahendeme ibu de hondoleberama. Dindi bibahendeni wali agali kamarume ibu mitangi bialu dara howa dugu biai holeberama. Aniore buleberama.✠

<sup>8</sup> Anduane Homogo Ngode Datagaliwabe Hongo Haiheore kagobi bambaore haabo henegobi mani ha ho wiaabo holebiragobi ibugua lalu, I piganeorebi mahaorebi kogoni, lalu ka.✠

### *Yonehanda de gandeba handalu Keriso hendene go*

<sup>9</sup> I tina ga hamene mbalini Yone kogoni. I Yasu talima piaga kogoni howa ti heba mandagi Ngode Datagaliwabenaga Handame Ho Kagoria kamagome ina ema nabi hibulo howa tandaga nalu hongo ho haabo kamagoni. Ngode Datagaliwabenaga bi lo winigobi Yasuhanda bi mana henene walia hayagobi ina lamialu hewaria tigua i minuwa dindi emene Padamoso iba dege dombeneha wiagoria garabaya bu helaya.✠

<sup>10</sup> Ani bu helayagola hewaria Anduane Homogonaga horo hayangi Ngode Datagaliwabe Dinini ibu iha karula haya. Ani karula hayagola bi mbira dalimu mbelo biguli ale i erembirahayagi howa layuagola hale haru.✠ <sup>11</sup> Hale halu hewaria bi layuagome lalu, Ina deme handareru mbugani gili bibe. Gili buwa Keriso hameigini tano karia Ebesabi Simenabi Pegamamubi Taiadirabi Sadisibi Piladelebiabi Leodisiabi uruniha karuhondo gilibu pelabe, laya.

<sup>12</sup> Ihondo bi layuago aiwa layadabe hondole beregedaru. Beregedowa handalu hewaria lamu hale irane karia ngolome wabini wiaria handaru.✠ <sup>13</sup> Ani handalu hewaria lamu hale wiagane wiagoha mbirali agali handalehe hearia handaru. Ibu aga luniore geni bia hanahebi nogo dongone ngolome wabinigo galuhombeneni wuwabi hea.✠ <sup>14</sup> I bunaga mandari pewele nogo sibi iri alebi beraliba handalehebi ibunaga de ira hungu handalehebi.✠✠ <sup>15</sup> I bunaga ge ege tole boronosi demborere biaga handalehebi hea. I bunaga bi iba pugu laragola u lagadagua layuagola hale haru.✠ <sup>16</sup> I bunaga gi tigame yakundi karia yu hearia handaru. Handalu hewaria wai biagane ayu tibu mbira nene kiroba gadeleore ibunaga ne harigaha howa tagira ibiyaria handaru. I bunaga

✠ **1:4:** Har 3.14-15, Seg 3.9, Yo 1.1, Mo 1.8, 3.1, 4.5, 4.8, 5.6, 11.17, 16.5 ✠ **1:5:** Iba 89.27, Ais 55.4, Yo 15.9, 18.37, Eb 1.20, Kl 1.18, 1 Ti 6.13, Hi 9.14, 1 Yo 1.7, 4.10, Mo 3.14, 17.14 ✠ **1:6:** Har 19.6, 1 Ti 6.16, Hi 13.21, 1 Pi 2.5, 2.9, Mo 5.10, 20.6 ✠ **1:7:** Dan 7.13, Seg 12.10, Md 24.30, Mg 13.26, Lg 21.27, Yo 19.34, 19.37, Ab 1.11, 1 Te 4.17 ✠ **1:8:** Har 3.14, Mo 1.4, 1.17, 4.8, 11.17, 15.3, 21.6, 22.13 ✠ **1:9:** Pb 1.7, 2 Ti 1.8, 2.12, Mo 6.9 ✠ **1:10:** Yo 20.26, Ab 10.10, 2 Ko 12.2, Mo 4.1-2 ✠ **1:12:** Har 25.37, Seg 4.2, Mo 1.20 ✠ **1:13:** Ese 1.26, Dan 7.13, 10.5, Mo 15.6 ✠ **1:14:** Dan 7.9, Mo 2.18, 14.2, 19.12 ✠ **1:14:** Dan 10.6 ✠ **1:15:** Ese 1.24, 43.2, Mo 14.2



dengui ni hanuni ha daraligobi hearia handaru. Uruni bibahende ibuni hearia handai haru.✧ 17 Ani hondowa gi howa mogo lalu ibunaga geha i pilope howa homene ale ho wiruya. Ani buwa ibugua ibunaga gi tigame ini wialu howa lalu, Gi nahabe. I pigane henegobi maha holeberogobi kogoni.✧ 18 I holenehe kogoni. I ala homarugo ai áyu i ha ho wiaabo hole ko. Homaganenagabi humbirini andanagabi bibahende ininaga hongome haru haabo kogoni.✧ 19 Anigo mbirale bibahende hendederuni gili biai habe. Mbirale áyu íbu ngarubi mbirale maninaga wulebirarubi ina gili biai habe.✧ 20 Ai yakundi karia inaga gi tigame yidone hendedegobi lamu hale wiagane ngolome wabinigo karia ngaru hendedegobi uruninaga galone wia do hene ngago ina lapani harogo ogo. Yakundi karia uruni ti Keriso hameigini tano kariani biarunaga dahuliyali karia ka. Lamu hale wiagane karia biaruni Keriso hameigini tano kariani karu tini ka.✧

## 2

### *Ebesa tanoni Keriso hameigini hearuhondo bi gilibu wia henego ogo*

1 Ina Ebesa tanoni Keriso hameigini karunaga dahuliyali kagohondo bi ogo gilibu wia habe.

I mbirali yakundi karia biaru gi tigame yuwa lamu hale irane karia ngolome wabini biaru ngagoha ibaga bialu howa ina bi ogo tihondo lo wia haro.✧ 2 Tigua birimigoni manda bido. Ina ti erekui biabe birimigobi hongo ho haabo harimigobi manda bido. Ti agali ko biaga karu hame nalaga kamigo i manda bido. Tigua agali maru bi layaru ti abosolo henenedabe hondole ba handarimi. Ba hondowa ti abosolo henene howa ndo ke haga heneyane handa walia harimigoni.✧ 3 Ti ema nabi hibu lalubi i hame lewadagua bialu howa genda halu tandaga nalu howabi yu wa nahe haabo harimigoni.✧ 4 Tigua ogonidagua bialu ha kamigonigo mbirale mbira i hame naledogo ogo. Ala tigua i gubalini ho harimidagua áyu nahe kamigoni. 5 Ala ti bayale birimigo áyu ko agua birimidabe hondole mitangi bu dai bidaba. Ani mitangi buwa mini beregedalu ala birimidagua bia dai bidaba. Ti ogonidagua nabi ko birimigo wa nahe harimiyagua ina ti kamiria ibalu tinaga lamu hale irane biago ngagoria howa ini yamulebero.✧ 6 Ani anigo tigua mbira bayale bialu kamigo ogo. Nigolasi talima piagarume biaganego ina hame nalarulidagua tiguabi hame nale kamigoni.✧

7 Ti halehe kamiyagua Ngode Datagaliwabe Dinini ibugua Keriso hameigini kamiru ti bibahendehondo bi larago agi larabe hale haramine.✧

Keriso hameigini wai bialu wayali hararu ti hangu hanguhondo lamialu, Ina haabo holene ngiaganenaga ira Ngode Datagaliwabe mabuha kago ira ogoninaga lini do nabe, lolebero.

### *Simena tanoni Keriso hameigini hearuhondo bi gilibu wia henego ogo*

8 Ina Simena tanoni Keriso hameigini karunaga dahuliyali kagohondo bi ogo gilibu wia habe.✧

I mbirali pigane henegobi maha holeberogobi ala homowa ai heyu dai bu kogome ina bi ogo tihondo lo wia haro. 9 Tigua genda howa tandaga nalu kamigobi ti yagibano kamigobi manda bu kogoni. Ani bia bidamigo ti homogoore kamigoni. Marume, Ina Yu wali agali kama, lalu hetingi howa tigua ti mege bialu bi koore layago manda bido. Uruni ti dama Heyolabe aria ka.✧ 10 Ti mbirale ngarunaga tandaga noleberemigo gi nahe halimu. Hale hadaba. Dama Heyolabeme ti kamiru aria maru garabaya bu helalu

✧ 1:16: Eb 6.17, Hi 4.12, Mo 1.20, 2.1, 2.12, 2.16, 3.1, 19.15, 19.21 ✧ 1:17: Ais 41.4, 44.6, 48.12, Ese 1.28, Dan 8.18, 10.10, Mo 2.8, 22.13 ✧ 1:18: Iba 68.20, Lm 6.9, Mo 4.9, 5.14 ✧ 1:19: Mo 1.1, 1.11, 2.1, 4.1 ✧ 1:20: Seg 4.2, Pb 2.15, Mo 1.12, 1.16, 2.1, 3.1 ✧ 2:1: Mo 1.16, 1.20 ✧ 2:2: 2 Ko 11.13, 2 Pi 2.1, 1 Yo 4.1, Mo 2.9, 2.13, 2.19, 3.1, 3.8, 3.15 ✧ 2:3: Ga 6.9, Hi 12.3-5 ✧ 2:5: Md 21.41-43, Mo 2.16, 2.22, 3.3, 3.19 ✧ 2:6: Iba 139.21 ✧ 2:7: Pig 2.9, Ese 28.13, 31.8, Md 11.15, Mo 2.11, 2.17, 2.29, 3.6, 3.13, 3.22, 22.2, 22.14, 22.19 ✧ 2:8: Ais 44.6, 48.12, Mo 1.17, 22.13 ✧ 2:9: Lm 2.17, 2 Ko 11.14-15, 1 Ti 6.18, Ya 2.5, Mo 3.9

agi beramibe hondole ko mo bia holenaga bulebira. Genda halu tandaga nalu kamine horo pira polebira. Homolene wiyaguabi mini bilinahe howa ihondo mini mbiraore wiaabo halimu. Ani wiaabo howa wayali haramigonaga yolo haabo holene ngulebero.✧

<sup>11</sup> Tí halehe kamiyagua Ngode Datagaliwabe Dinini ibugua Keriso hameigini kamiru tí bibahendehondo bi larago agi larabe hale haramine.✧

Keriso hameigini wai bialu wayali hararu ti halu mende homolene ngagome ela naholebira.

*Pegamamu tanoni Keriso hameigini hearuhondo bi gilibu wia henego ogo*

<sup>12</sup> Ina Pegamamu tanoni Keriso hameigini karunaga dahuliyali kagohondo bi ogo gilibu wia habe.✧

Mbirali i wai biagane ayu tibu ne kiroba gadeleore yidogo ina bi ogo tihondo lo wia haro. <sup>13</sup> Tí dindini kamigo dama Heyolabe ibunaga haru haga biragane dagia ngagoria kamilo manda bido. Ihondo mini mbiraore wiaabo halu tigua inaga mini yu wa nahe hongo howa yani haabo kamigoni. Dama Heyolabe heagoria agali mbira mini bilinahe inaga mo walia haga Andibasi heago marume ibu homelo bayagolabi tigua ihondo mini mbiraore wiaabo harimigoni.✧ <sup>14</sup> Anigo mana maru tigua beramiligo i hame nale kogo ogo. Tí kamiru aria marume Balamahanda mana lawai henego bialu ka. Balama ibugua Balaga biawai halu ogodagua bia lalu Isaraele wali agalime ko bilo mo bia hene. Tomo tara tara damahondo bo minigo nelo mo noa halubi wali agali kayu bilo lawai halubi hene.✧ <sup>15</sup> Anidagua dege wali agali marume Nigolasi arianaga mana ngaru bialu haga tí heba mandagi bu ka. <sup>16</sup> Mana ko uruni bialu kamiru wahalu mini beregedadaba. Ani nabirimiyagua ina abale tí kamiria ibuwa inaga ne harigaha howa wai biagane ayu tibu tagira ibiragome wali agali uruni baba wai bulebero.✧

<sup>17</sup> Tí halehe kamiyagua Ngode Datagaliwabe Dinini ibugua Keriso hameigini kamiru tí bibahendehondo bi larago agi larabe hale haramine.✧

Wai bialu wayali hararu tí hangu hanguhondo mena wia do henego nelo mulebero. Ani mialu ina ege tole pele mbira mbirani mini gahenge gilibu ngago ti hangu hanguhondo mulebero. Mini gahenge gilibu ngago ogoni bibahendeme manda nabi kagola mo yarago ibuni hangume manda bulebira.

*Taiadaira tanoni Keriso hameigini hearuhondo bi gilibu wia henego ogo*

<sup>18</sup> Ina Taiadaira tanoni Keriso hameigini karunaga dahuliyali kagohondo bi ogo gilibu wia habe.✧

I Ngode Datagaliwabe Iginu inaga de ira hungu alebi inaga ge ege tole boronosi demborerebi ngaligobi kogo ina bi ogo lo wia haro. <sup>19</sup> Tigua bialu kamigo i manda bu ko. Tinaga gubalini holenebi mini bilinahe holenebi biabe bialu holenebi ema nabi howa hibu lolenebi tigua pigane bialu harimidagua ndo áyu timbuni bialu kamigo manda bu ko. <sup>20</sup> Anigo mbira nakarulape bialu kamigo ogo. Wali Yasebele ibugua ke howa lalu, I Ngode Datagaliwabe mana latagi haga bedo, larago tigua mo tiga nabi kamigonaga turu nahe ko. Ibugua mana lawai haragome inaga biabe bia haga karu wali agali kayu bilobi tomo damahondo bo mini ngaru nelobi haru pu tara haga beda.✧ <sup>21</sup> Ina ibu ko bialu kago wahalu mini beregedelo henge mia mirugolabi ibugua kayu bulene ogoni waha nahe beda.✧ <sup>22</sup> Ibu ogonibi bedagonaga ibubi agali ibu baba kayu biyarubi gai bibi timbuni hendelo ina ibu paliagane dagiani mo ba amu holebero. Tigua wali biago baba mana kooreru bialu haga wiyaru wahalu mini beregeda nabiyagua ina

✧ **2:10:** Md 10.22, 10.28, 24.13, 2 Ti 4.8, Ya 1.12, Mo 3.11 ✧ **2:11:** Mo 13.9, 20.14, 21.8 ✧ **2:12:** Ais 49.2, Mo 1.16  
 ✧ **2:13:** Mo 3.8 ✧ **2:14:** Dag 22-24, 25.1-3, 31.16, Man 23.4, Ab 15.29, 1 Ko 6.13, 8.9, 2 Pi 2.15, Yu 11 ✧ **2:16:** Ais 11.4, 2 Te 2.8, Mo 1.16, 3.11, 19.15, 19.21, 22.7, 22.12, 22.20 ✧ **2:17:** Har 16.4, 16.14-15, 16.33-34, Ais 62.2, 65.15, Yo 6.48-50, Mo 2.7, 2.11, 3.12, 19.12 ✧ **2:18:** Mo 1.14-15 ✧ **2:20:** 1 Kin 16.31, 2 Kin 9.7, Ab 15.20, 15.29, 1 Ko 10.19, Mo 2.14 ✧ **2:21:** Lm 2.4, Mo 9.20

abale ogonidagua bulebero. <sup>23</sup> Wali ogoni haruru piaga karubi homelo bo waholebero. Ani berogola Keriso hameigini tano bibahendeha bu karume ina wali agali bibahende hangu hangunaga mitangi bidarubi hame ledarubi manda biaiore ho kogo ti manda bulebira. Ina tí hangu hangume bialu harimidagua yolo ngia dai bulebero.✧

<sup>24</sup> Ani bia buleberogo tí maru Taiadairani kamirume mana ko ogoni haruru napirimi. Marume dama Heyolabenaga mana do ho nga lalaligo tígua lo manda nabi harimigo tíhondo gendabi maru yu halimulo mo ngia nabulebero laro. <sup>25</sup> Anigo i dai bule kogo dai nabido tambu tígua mbirale yu kamigo hongo howa yu ununu lo haabo halimu.✧ <sup>26-28</sup> Ani bialu howa wali agali wayali halu ina hame ledodagua bia ho wialu bia maro biraru tíhondo hongo holene i Abahanda ihondo ngiyadagua dege mulebero. Ani bialu tígua wali agali dindi tara tarani bu karu hongo taraore holene yu howa haru helobi be dindime wabini ngaru pambulo holobiradagua bilobi tíhondo hongo holene mulebero. Yakundi egabi naledaha huririle tagira ibaganego tíhondo mulebero.✧✧✧✧

<sup>29</sup> Tí halehe kamiyagua Ngode Datagaliwabe Dinini ibugua Keriso hameigini kamiru tí bibahendehondo bi larago agi larabe hale haramine.

### 3

#### *Sadisi tanoni Keriso hameigini hearuhondo bi gilibu wia henego ogo*

<sup>1</sup> Ina Sadisi tanoni Keriso hameigini karunaga dahuliyali kagohondo bi ogo gilibu wia habe.✧

I Ngode Datagaliwabe Dinini karia haru kogobi yakundi karia yu kogobi ina bi ogo lo wia haro. Tígua ogodagua bialu kamigo manda bu ko. Tígua lalu, Ina dére mini lene kama, la laganegoyu ina tí homene kamigo manda bido. <sup>2</sup> Anigo tígua heyuwa mbirale emene yu kamigo homai nakaore mo hongo hadaba. Tígua biabe bialu harimiru inaga Ngode Datagaliwabe wanakuini howa bu maro nabi dege kami. <sup>3</sup> Mana tíhondo lawai hayagobi hale harimigobi mitangi bu dai buwa, Bilimu, layadagua bialu tínaga ko wahalu mini beregedadaba. Ani nabirimiyagua ina pageali ohowa ibagadagua ibalu tígua ibulebira manda nabi kamingiore ibulebero.✧ <sup>4</sup> Ani anigo tí Sadisi tanoni kamiru mbira mbirame tínaga agani dodo para nahe harimigoni. Ai nde uruni tíore karulape howa aga pele mo karulalu i heba ibaga bialu holeberami.✧ <sup>5</sup> Maru wayali ho karume aga pele ogonibi karulolebira. Anigo tinaga mini wali agali haabo holene yu karunaga mini mbugani gilibu ngagoria ngaru doma nabulebero. Uruni i Ababi ibunaga dahuliyalirubi kagoria howa ina lalu, Ti inaga ka, lalu hale hai helo latagi holebero.✧

<sup>6</sup> Tí halehe kamiyagua Ngode Datagaliwabe Dinini ibugua Keriso hameigini kamiru tí bibahendehondo bi larago agi larabe hale haramine.

#### *Piladelebia tanoni Keriso hameigini hearuhondo bi gilibu wia henego ogo*

<sup>7</sup> Ina Piladelebia tanoni Keriso hameigini karunaga dahuliyali kagohondo bi ogo gilibu wia habe.✧

I mbirali baya buruguleorebi heneneorebi kogo ina bi ogo lo wia haro. Ibugua Debidinaga panga gi wiyago yu howa panga mbira duguaragola mbiralime payabe nahe halu ai ibugua panga biago payaragola mbiralime duguabe nahe holebira. <sup>8</sup> Tígua bialu haramiligo i manda bu ko. Tí hongo emene yu kamigobi inaga mana lawai haruligodagua bialubi ihondo mini bilinahe harimigobi manda bu ko. Ina tí buhayagi

✧ **2:23:** Iba 7.9, 62.12, Yar 11.20, 17.10, Lm 8.27, 2 Ko 5.10, 2 Ti 4.14, Mo 20.12-13 ✧ **2:25:** Mo 3.11 ✧ **2:26-28:** Md 19.28, Yo 6.29, 1 Ko 6.3, 1 Yo 3.23, Mo 20.4 ✧ **2:26-28:** Iba 2.8-9 ✧ **2:26-28:** Dan 7.22, Mo 12.5 ✧ **2:26-28:** Mo 22.16 ✧ **3:1:** Mo 1.4, 1.16, 2.2, 5.6 ✧ **3:3:** Md 24.43-44, Lg 12.39-40, 1 Te 5.2, 5.6, 1 Ti 6.20, 2 Pi 3.10, Mo 2.5, 16.15 ✧ **3:4:** Ab 1.15, Yu 23, Mo 6.11, 7.9, 7.13 ✧ **3:5:** Har 32.32-33, Iba 69.28, Md 10.32, Lg 10.20, 12.8, Pb 4.3, Mo 3.18, 19.8, 20.12 ✧ **3:7:** Yob 12.14, Ais 22.22, Lg 1.32, Ab 3.14, 1 Yo 5.20

panga mbira dugua ho ngelarugo mbiralime payabe nahe. ✧ <sup>9</sup> Hale halimu. Wali agali dama Heyolabe aria mandagi haga ti Yuali ndo howa ke halu, Ina Yuali kama, laga karu ina ti tinaga geha mo bulu palu helolebero. Ani berogola ti bibahendeme ina ti gubalini hagada manda bulebira. ✧ <sup>10</sup> Ina tihondo langialu, Ema nabi howa hibulalimu, larugodagua wa nahe haabo harimigonaga wali agali bibahende ba hondole dindi bibahendeni mo ko holene ibirangi ti bayale halimulo mo wulebero. ✧ <sup>11</sup> Emene howa i abaleore ibulebero. Wayali holenenaga yu kamigo mbiralime page nabilo bayuwa yani ho halimu. ✧ <sup>12</sup> Wayali ho karu ti Ngode Datagaliwabenaga andaha anda gene helo ina mo helolebero. Ina helaroru tigua wahalu tagira nape ha ho wulebira. Ina Ngode Datagaliwabe minibi ibunaga tano dahuliya andagaha howa daluebirago Yarusaleme gahengenaga minibi o biaru tini gili bulebero. Ina ini mini gahenegebi tini gili bu wulebero. ✧

<sup>13</sup> Ti halehe kamiyagua Ngode Datagaliwabe Dinini ibugua Keriso hameigini kamiru ti bibahendehondo bi larago agi larabe hale haramine.

*Leodisia tanoni Keriso hameigini hearuhondo bi gilibu wia henego ogo*

<sup>14</sup> Ina Leodisia tanoni Keriso hameigini karunaga dahuliyali kagohondo bi ogo gilibu wia habe. ✧

Walia hagane mini bilinahebi henenebi Aniore Biagane Tene i kogo i togoni howa Ngode Datagaliwabehanda bibahende wabinigo inimeore bi ogo lo wia haro. <sup>15</sup> Ti bialu harimigo i manda bu ko. Ani manda bu kogo ti ayu tambeheore ndo poboheorebi ndo hope ho kamigo ti pobeheoreyaguabi tambeheoreyaguabi mendego hangu habelo hame timbuni lo ko. ✧ <sup>16</sup> Anigo ti dombeni hope ho kamigonaga ina i ne harigaha howa ti magu tagu tagi holebero. <sup>17</sup> Tigua lalu, Ina karulape mbirale ngaru ale damene wiaihe homogo kamagoni, lalu kamigoni. Anidagua lalu ha kamigonigo ai ti nakarulapebi mini burugulebi kamigo tinime manda nabi kami. Ti yagibanobi tibabebi de kohebi kamigoni. ✧ <sup>18</sup> Anigo ina ogo bia laro. Ti homogo heneneore holenaga iha howa ngolo bayaleore ✧ helo irani delenego yolo bialu milimu. Ogoni hangu ndo ti taga howa tibabe harimigo yi hole aga peleore ngagobi yolo bialu karulalimu. Ani bialu ti de lone hondolenaga marasini deni hai hole yolo bialu hai halimu. <sup>19</sup> Ina gubalini haruliruhondo talialu mini wilo mana laruli. Ani biruligo ti hope kamigo wahowa mini wialu ko ngagoria howa mini beregedalimu. ✧ <sup>20</sup> Hale hadaba. Ina panga tagirahayagi howa panga dugua lalu ko. Mbiralime inaga bi larogo hale halu panga duguayagua i ibu andaga anda ibuwa i ibula tomo nalu ibubi ila tomo nolebira. ✧ <sup>21</sup> Anigo ina wayali halu i Abanaga handame ho biragane dagia ngagoriani ibula ayu bedodagua wali agali wayali hararu ina handame howa biragane dagia ngogoriani ti i heba mandagi birulene henge tihondo mulebero. ✧

<sup>22</sup> Ti halehe kamiyagua Ngode Datagaliwabe Dinini ibugua Keriso hameigini kamiru ti bibahendehondo bi larago agi larabe hale haramine.

## 4

*Dahuliya andagani hearume Ngode Datagaliwabe mini yaraga halu lenego ogo*

<sup>1</sup> Ani leagola dege ina de gandeba mende handalu hewaria dahuliya andagani panga mbira dugua ho wiaria handaru. Handalu howa hale halu hewaria bi mbira dalimu mbelo biguli ale ala hale harugo bi ogonime ihondo lalu, Mani mbira bulebiragonaga

✧ **3:8:** 1 Ko 16.9, 2 Ko 2.12, Mo 2.2 ✧ **3:9:** Ais 43.4, 45.14, 49.23, 60.14, Mo 2.9 ✧ **3:10:** Ais 24.17, Lg 21.19, 2 Ti 2.12, 2 Pi 2.9 ✧ **3:11:** Pb 4.5, Mo 2.10, 2.16, 2.25, 22.7, 22.12, 22.20 ✧ **3:12:** Ais 62.2, 65.15, Ese 48.35, Ga 2.9, 4.26, Hi 12.22, Mo 14.1, 21.2 ✧ **3:14:** Min 8.22, Ais 65.16, 2 Ko 1.20, Kl 1.15, Mo 1.5, 19.11, 22.6 ✧ **3:15:** Lm 12.11, Mo 2.2 ✧ **3:17:** Hos 12.8, Lg 12.21, 1 Ko 4.8 ✧ **3:18:** Ais 55.1, Md 13.44, 2 Ko 5.3, Ya 2.5, Mo 3.5, 4.4, 7.13, 16.15 ✧ **3:19:** Min 3.12, 1 Ko 11.32, Hi 12.6, Ya 1.12, Mo 2.5 ✧ **3:20:** Lg 12.37, Yo 14.23, 1 Yo 2.24 ✧ **3:21:** Md 19.28, Lg 22.30, 2 Ti 2.12, Mo 2.26-27

ina ihondo walia holiya i kogoria iraga ha, laya. ✧ <sup>2</sup> Ani lalu heaore dege Ngode Datagaliwabe Dinini ibu iha karula haya. Ani biyagola handalu hewaria dahuliya andagani Ngode Datagaliwabenaga handame howa biragane dagia wiagoriani mbirali berearia handaru. ✧ ✧ <sup>3</sup> Iunaga dengui domodomobi tole baya burugule mini yasabebi kanelianibi ale hearia handaru. Ani buwa Ngode Datagaliwabenaga handame howa biragane dagia wiago ni domo tole domo domobi mini emerolo aleme wa mabu biniya. <sup>4</sup> Ngode Datagaliwabenaga handame howa biragane dagia wiago dombeneha ngelowa haru haga biragane dagia pira kirani maria (24) wu mabu bu wiagoriani dahuliyali haru haga pira kirani maria (24) aga pele buwabi hagianeni haru haganaga manda ngolome wabinigobi karulo berearia handaru. ✧ <sup>5</sup> Ngode Datagaliwabenaga handame ho biragane dagia ogoriani howa hari daba bialu hari kilikulu timbuni lalu biya. Biragane dagia wiago buhayagi lamu hale karia dela heago uruni Ngode Datagaliwabe Dinini karia ka lalu dela hea. ✧ <sup>6</sup> Handame ho biragane dagia ogoni wiago buhayagi dege iba solowara handalehe wiago ogoni ibu ngalayi ale wia. ✧ ✧

Biragane dagia ogonaga lenelene maria wiagoria holenehe mariali helene hearu ti de buha halu erembirahabi halu de haamehe hearume ho mabu bu hea. <sup>7</sup> Ani biyadago aria mbira pigane timbuni heago budi gabua timbuni laiono handalehe hea. Mende heago nogo bulumaga wangabe handalehe hea. Tebone heago agalinaga dengui handalehe hea. Mane heago ega bodo hariawe ale yaga laluhe handalehe hea. <sup>8</sup> Holenehe mariali helene biaru ti hangu hangume babagane waragaria howa tinaga tingini babagane andanehabe de haamehe hea. Tigua horombe mbiragabi halo nahe iba gana la ho wialu lalu, ✧

Anduane Homogo Ngode Datagaliwabe Hongo Haiheore  
ala henegobi ayu kagobi mani holebiragobi  
ibu baya buruguleore baya buruguleore baya buruguleore kagoni,  
lalu hea.

<sup>9</sup> Holenehe mariali helene biaru tigua iba gana layuagome mini lene lolenebi mini yaraga holenebi kai lolenebi mbirali handame ho biragane dagia ogo wiagoriani bedago ha dege bidane ha ho wulebiragohondo laga ka. Ani biragola ✧ <sup>10</sup> dahuliyali haru haga pira kirani maria (24) biaru tigua mbirali handame ho biragane dagia wiagoria bereago ibunaga buha bulu palu ibira howa Ngode Datagaliwabe ibuni ha dege bidane ha ho wiaabo kagonaga mini yaraga haabo haga hea. Ani bialu tigua tinaga haru haga manda ngolome wabiniru golowa Ngode Datagaliwabenaga handame ho biragane dagia biago buhayagi ibira halu lalu, ✧

<sup>11</sup> Inanaga Anduane Homogo Ngode Datagaliwabe i kegoni. ✧

Ina wali agali bibahendeme mini lene lolenebi mini yaraga holenebi hongo holenebi  
inaga ngelolomaya  
i karulapeore kegoni.

Uruni inaga ngelabehe kamago irane ina mbirale bibahende wabiai harigo howa tinaga wulenebi holenebi inaga hameme mirigonaga labehe kama,  
lalu hea.

## 5

### *Yonehanda mbuga mbira hendeneho ogo*

<sup>1</sup> Mbirali handame ho biragane dagiani bereagonaga gi tigame mbuga mbira yu hearia handaru. Mbuga ogoni abene mendeha mendehabi gili bume howa wagaya

✧ **4:1:** Mo 1.1, 1.10, 1.19, 11.12, 22.6 ✧ **4:2:** Iba 47.8, Ais 6.1, Yar 17.12, Mo 4.9, 17.3, 21.10 ✧ **4:3:** Ese 1.26-28, 10.1 ✧ **4:4:** Mo 3.18, 6.11, 11.16, 19.14 ✧ **4:5:** Har 19.16, Ese 1.13, Seg 4.2, Mo 1.4, 8.5, 11.19, 16.18 ✧ **4:6:** Ese 1.5-10, 1.22, Mo 15.2 ✧ **4:6:** Ese 1.5-10, 10.14 ✧ **4:8:** Ais 6.2-3, Ese 1.18, 10.12, Mo 1.4, 1.8 ✧ **4:9:** Dan 4.34, 6.26, 12.7, Mo 1.18, 4.2, 4.10, 5.14, 15.7 ✧ **4:10:** Mo 4.4, 4.9, 5.1, 5.7-8, 5.13-14, 6.16, 7.15, 19.4, 21.5 ✧ **4:11:** Ab 17.24, Eb 3.9, Kl 1.16, Mo 5.12, 10.6



ale kariame mo ndibulo para heneya.✧ <sup>2</sup> Ani handalu hewaria dahuliyali hongohembirame bi dalimu lowa lalu, Mbuga ogoni wagaya aleme ndibulo para ho ngago ogoni mbirali aiwa laga lalu mo anga labehe kabe, laya. <sup>3</sup> Ani layagola dahuliya andagani karu ariamebi dindini karu ariamebi humbirini andagani karu ariamebi mbuga ogoni anga lalu hondolene mbira naheoreya. <sup>4</sup> Mbuga ogoni anga lalu de handabehe mbirali naheoreyagola ina yi lalu dugu timbuni biru. <sup>5</sup> Ani birugola dahuliyali haru haga biaru aria mbiralime ihondo lalu, Dugu nabibe. Yuda hameiginiha howa budi gabua ale timbuni Laiono ibu Debidinaga aguanene gibiore kago ibugua wayali howa mbuga wagaya ale kariame ndibulo para hene ngago laga lowa anga labehe ibuni dege kagoni handa, laya.✧

*Yonehanda Nogo Sibi Igini Mbira hendenego ogo*

<sup>6</sup> Ani handa layagola handalu hewaria Nogo Sibi Igini Mbira handame ho biragane dagia wiago hanuni helowa holenehe mariali helene biarubi dahuliyali haru haga pira kirani maria (24) biarubi ho mabu bu hearia handaru. Nogo Sibi Igini o hayadagoni ibu homelo bene handalehe hea. Nogo Sibi Igini biago ibu hagianeni ne gayane kariahebi de kariahebi hea. De karia uruni Ngode Datagaliwabe Dinini karia ka lalu ti dindi bibahendehe pelaame hayaruya.✧ <sup>7</sup> Nogo Sibi Igini biagome mbirali handame ho biragane dagiani bereagonaga gi tigame mbuga yu heago ibu berearia puwa yamiya.✧ <sup>8</sup> Ibugua ogonidagua biyagola holenehe mariali helene biarubi dahuliyali haru haga pira kirani maria (24) biarubi Nogo Sibi Igini biago heagoria buhayagi bulu palu ibira haya. Uruni bibahende hangu hangume gawa ale timbunibi ndisi ngolome wabini hayadaruha mbirale ira hagua ngabilo delaga mini inisenesiru yu hea. Mbirale ngabi uruni Ngode Datagaliwabenaga wali agalime ibuhondo bi laganeru nga.✧ <sup>9</sup> Tigua ibagana gahenge lalu,✧

Mbuga ogoni mo yuwa wagaya aleme ndibuledaru laga lalu anga labehe karulape í kegoni.

Irane ogoninaga í homabelo bayagola darama pela harigome wali agali hameigini tara tara karubi bi tara tara laga karubi dindi tara tarani bu karubi tingini tara tara karubi bibahendeoreha howa ti Ngode Datagaliwabenaga helo haru dai biri.

<sup>10</sup> Ani bialu ti Ngode Datagaliwabenaga biabe biaga helo ina Ngode Datagaliwabehanda handame ho kagoria loma binigo mo miaga mo hela harigo ka.✧

Ani biragome ti dindini howa wali agali haru holebira, lalu laya.

<sup>11</sup> Ina lone handalu hewaria dahuliyali daosini dege daga labe nahe dewaoreme bi layuago hale haru. Dahuliyali uruni tigua Ngode Datagaliwabenaga handame ho biragane dagiabi holenehe mariali helene biarubi dahuliyali haru haga pira kirani maria (24) biarubi ho mabu bupe ho howa✧ <sup>12</sup> iba gana laraga halu lalu,✧

Nogo Sibi Igini homelo bayago ibuhondo haru holenebi homogo holenebi mini gigabiwi holenebi hongo holenebi

mini yaraga holenebi mini lene holenebi kaj lolenebi uruni damenego mulene ibuni dege karulape ka, laya.

✧ 5:1: Ais 29.11, Ese 2.9-10, Dan 12.4 ✧ 5:5: Pig 49.9, Ais 11.1, 11.10, Lm 15.12, Hi 7.14, Mo 6.1, 22.16 ✧ 5:6: Ais 53.7, Seg 4.10, Yo 1.29, 1.36, Mo 1.4, 4.5, 5.9, 5.12, 13.8 ✧ 5:7: Mo 4.2, 4.10 ✧ 5:8: Iba 141.2, Mo 4.8-10, 8.3-4, 15.2 ✧ 5:9: Iba 33.3, 40.3, 96.1, 98.1, 144.9, Ais 42.10, Ab 20.28, Eb 1.7, Hi 9.12, 1 Pi 1.18-19, 1 Yo 1.7, Mo 14.3 ✧ 5:10: Har 19.6, Ais 61.6, 1 Pi 2.5, Mo 1.6, 20.6, 22.5 ✧ 5:11: Iba 68.17, Dan 7.10, Hi 12.22, Mo 4.4-6 ✧ 5:12: 1 Bit 29.11, Mo 5.6

<sup>13</sup> Hale ha ho wialu hewaria dahuliya andaga hearubi dindini hearubi humbirini andaga hearubi iba solowaraha berearubi mbira mbira tara tara haame hearubi uruni bibahendeoreme iba gana lalu,✧

Mbirali handame ho biragane dagiani bedagohondobi Nogo Sibi Igini kagohondobi kaj lolenebi mini yaraga holenebi mini lene lolenebi hongo taraore holenebi wia dege bidane wia ho wilo hame ledama, lalu laya.

<sup>14</sup> Ani layagola holenehe mariali helene biarume ladai bialu lalu, Aniore bilo, laya. Ani layagola dahuliyali haru haga pira kirani maria (24) biarume bulu palu ibira howa libunaga mini yaraga halu hene.

## 6

### *Wagaya aleme mbuga ndibulo para hene laga lenego ogo*

<sup>1</sup> Ani biyagola howa ina handalu hewaria Nogo Sibi Igini biagome wagaya ale kariame mbuga ndibulo para hayago aria mbirago laga laya. Ani laga layagola hale halu hewaria holenehe mariali helene biaru aria mbiragome bi hari kulu lagadagua lalu, Ibu, laya.✧

<sup>2</sup> Ani layagola handalu hewaria nogo hosi pagabua peleore mbira hearia handaru. Mbiral nogo hosi ogoriani bialu piaga ibu danda mbira yu bereago ibuhondo haru haganaga manda miyago handaru. Ani miyagola ibugua wayali haga howa wayali hole bialu piya.✧

<sup>3</sup> Ani buwa Nogo Sibi Igini biagome wagaya ale mbuga para hayago aria mendego laga laya. Ani laga layagola hale halu hewaria holenehe mariali helene biaru aria mendegome lalu, Ibu, layago hale haru. <sup>4</sup> Ani buwa nogo hosi mende hone tagira ibiya. Nogo hosi ogoriani bialu piaga biagohondo wali agaliru dindini howa tini dege dege wai bialu bo wahaga haga bilonaga hongo miya. Ani bialu ibuhondo wai biagane ayu tibu tara timbuni mbira miya.✧

<sup>5</sup> Ani buwa Nogo Sibi Igini biagome wagaya ale para hayago aria tebonego laga laya. Ani laga layagola hale halu hewaria holenehe mariali helene biaru aria tebonegome lalu, Ibu, layago hale haru. Ani layagola handalu hewaria nogo hosi mindi mbira hearia handaru. Mbiral nogo hosi ogoriani bialu piaga heago ibu mbirale genda magi handagane gime yu berearia handaru.✧ <sup>6</sup> Ina ani hondowa hale halu hewaria holenehe mariali helene hayaruha howa bi ogodagua layua, Ladi ale mini widi gi kirabalime halu ki tolo yuwa horo mbiranaga yolo mulene nga. Ladi ale mini bali gi kirabalime waraga halu tolo yuwa horo mbiranaga yolo mulene nga. Anigo ira olibe linibi pu mbira lini daga mini gerebibi mo ko nahabe, lalu layuagola hale haru.✧

<sup>7</sup> Ani buwa Nogo Sibi Igini biagome wagaya ale para hayago aria manego laga laya. Ani laga layagola hale halu hewaria holenehe mariali helene biaru aria manegome lalu, Ibu, layago hale haru. <sup>8</sup> Ani layagola handalu hewaria nogo hosi pagabuabi mbira hearia handaru. Mbiral nogo hosi ogoriani bialu piaga heago ibunaga mini Homa winigo ibalu maha Humbirinagabi kaware ibu piyadagua talima ibiya. Ogolabo ibugua wali ali dindi bibahende karu ma halu tu wuwa waimebi hina garimebi waragomebi nogo gabua tara taramebi wali agali manegonaga karu homelo belo tihondo hongo miya.✧

<sup>9</sup> Ani buwa Nogo Sibi Igini biagome wagaya ale para hayago aria daunigo laga laya. Ani laga layagola handalu hewaria wali agali dindini howa Ngode Datagaliwabe mana lamialu mini bilinahe howa walia hayagola homelo bayaru tinaga dinini lomabu miagane dabu andanaha hearia handaru.✧ <sup>10</sup> Tigua bi dalimu laraga halu lalu, Anduane

✧ 5:13: Lm 9.5, Pb 2.10, 1 Ti 6.16, 1 Pi 4.11, Mo 4.2, 4.10, 6.16, 7.10 ✧ 6:1: Mo 4.6-7, 5.1, 5.5-7 ✧ 6:2: Seg 1.8, Mo 6.3, 6.6, 14.14, 19.11 ✧ 6:4: Seg 1.8, 6.2 ✧ 6:5: Seg 6.2, 6.6 ✧ 6:6: Ese 5.12, 5.17 ✧ 6:8: Yar 15.1-3, Ese 5.12, 5.17, 14.21, 33.27, Seg 6.3 ✧ 6:9: 2 Ti 1.8, Mo 1.9, 8.3, 12.17, 19.10

Homogo Hongo Haiheore baya buruguleorebi heneneorebi kegoni. Wali agali dindini howa ina homolomaya bayarunaga pani ina angi daba ki halu muleberebe, laya. ✧ <sup>11</sup> Ani layagola Ngode Datagaliwabe ibugua ti ladai bialu lalu, Wali ali inaga inaga mana yu tigabu howa inaga biabe biahaga karu ti homole bayadagua dege tibi bo wahai helo ti emene halo biralimu, lowa tihondo aga peleru karulelo ta halu miya. ✧

<sup>12</sup> Ani buwa handalu hewaria Nogo Sibi Igini biagome wagaya ale para hayago aria waraganego laga laya. Ani laga layagola dumbirumbi timbuniore bialubi ni mindi mbege nu mindibi ale halubi ege darama ale darama bumehebi haya. ✧ <sup>13</sup> Poge li puyabu hongo howa pularagola hondopebe biagadagua yakundi daliga howa dindini ibira ibira biya. ✧ ✧ <sup>14</sup> Hari daliga mbiri mbere bialu ereba halu dindi hari bibahende wearubi dindi iba dege dombeneha wiaru bibahende bi hayagoria ndo tara mbirani pu haga biya. ✧ <sup>15</sup> Ani biyagola dindinaga kinirubi haru hagarubi ami agali hagu nerubi homogo karubi hongo timbunihe karubi wali agali garabaya biabe ale bia hagarubi nabinirubi bibahendeore ege andahabi hari weagoria tole wiaru andanehabi bira do hai haya. ✧ <sup>16</sup> Ani bira do hearia tigua dindi hari wearuhondobi tole wiaruhondobi olaraga halu lalu, Mbiral handame ho biragane dagiani bedagonaga deme ina hondoligonagabi Nogo Sibi Igini biagome inahondo keba howa pani nguligonagabi ina bu dambi halu mo ge hadaba, laya. ✧ <sup>17</sup> Libunaga keba holene horo gibiore ibu ngago hapai howa wai bialu wayali habehe ai kabe, laya. ✧

## 7

*Ngode Datagaliwabenaga wali agali daosini dege handari mbirani pira mariani maria (144,000) magi helenego ogo*

<sup>1</sup> Ani leagola ina handalu hewaria dahuliyali marialime dindi bibahendenaga gibuni maria ngagoniha howa puyabu maria dindinibi iba solowaranibi iranibi pu nalelo minu yania ho hearia handaru. ✧ <sup>2</sup> Ani hondowa handalu hewaria dahuliyali mende ni tagira ibiragohayagi howa Ngode Datagaliwabe holenehe kagonaga magi yalu ibiyaria handaru. Ibugua dahuliyali mariali biaru ti dindi bibahende mo ko halu iba solowarabi mo ko halu bilo Ngode Datagaliwabehanda hongo miyaru tihondo bi dalimu olaamu halu lalu, <sup>3</sup> Iname wali agali Ngode Datagaliwabenaga biabe bia haga karunaga wanakuini Ngode Datagaliwabenaga magi ala helolomaya tigua dindi bibahende iba solowarabi irabi mo ko nahalimu, laya. ✧ <sup>4</sup> Wali agali Ngode Datagaliwabenaga magi ti wanakuini helayaru daosini handari mbirani pira mariani maria (144,000) ka lalu langiyagola hale haru. Ti Isaraele hameigini homberiaha (12) howa heneya. ✧ <sup>5-8</sup> Hameigini mbira mbiraha daosini homberia (12,000) dege dege Yudabi Lubenebi Gadabi Asabi Nabadalaibi Manasebi Simionobi Libaibi Isagabi Sebulunubi Yosebebi Beniyaminibi hameigini uruni tini wanakuini Ngode Datagaliwabenaga magi ogoni helaya.

*Wali agali au lolebe tobaheme Ngode Datagaliwabe mini yaraga henego ogo*

<sup>9</sup> Ani biagola ina handalu hewaria wali agali au lolebe tobahe mbiralime daga labe naheore heago handaru. Ti tingini tara tara karubi hameigini tara tara karubi dindi tara tarani bu karubi bi tara tara laga karubi uruni ti Ngode Datagaliwabenaga handame ho biragane dagia wiagoria Nogo Sibi Igini biago heagoriabi buhayagi heyu heneya.

✧ **6:10:** Man 32.43, Iba 78.10, Mo 11.18, 16.7, 19.2 ✧ **6:11:** Hi 11.40, Mo 3.4-5, 3.18, 7.9, 7.13-14, 14.13, 19.14  
 ✧ **6:12:** Ais 13.10, Yol 2.10, 2.31, 3.15, Md 24.29, Mg 13.24-25, Lg 21.25, Ab 2.20, Mo 8.12, 11.13, 16.18 ✧ **6:13:** Mo 8.10, 9.1 ✧ **6:13:** Ais 34.4 ✧ **6:14:** Yar 4.24, Hi 1.12-13, Mo 16.20 ✧ **6:15:** Ais 2.10, 2.19-21 ✧ **6:16:** Hos 10.8, Lg 23.30, Mo 4.2, 4.10, 9.6 ✧ **6:17:** Iba 76.7, Ais 13.6, Yol 2.11, Nah 1.6, Seb 1.14, Mal 3.2, Mo 16.14 ✧ **7:1:** Yar 49.36, Dan 7.2, Seg 6.5 ✧ **7:3:** Ese 9.4-6, Mo 6.6, 9.4, 14.1, 22.4 ✧ **7:4:** Mo 9.16, 14.1-3

Ti bibahendeme aga pele karulalu turu howa ira magane yunihe tini giha yu hearia handaru.\*

<sup>10</sup> Ti ani hearia tigua bi hongo howa laraga halu lalu, Pele mulene inanaga Ngode Datagaliwabe ibunaga handame ho biragane dagiani bedagoha howabi Nogo Sibi Igini biagoha howabi ibaga, lalu laya.\* <sup>11</sup> Dahuliyali biaru bibahendebi dahuliyali haru haga biarubi holenehe mariali helene biarubi ti handame ho biragane dagia wiagoria ho mabu bupe haya. Ani bialu tigua handame ho biragane dagia biagoria buhayagi bulu palu ibira howa Ngode Datagaliwabe mini yaraga halu <sup>12</sup> lalu, Aniore bibe. Mini yaraga holenebi wá taraore holenebi mini gigabiwi holenebi kaj lolenebi mini lene holenebi hongo holenebi hongo tara timbuniore holenebi ina Ngode Datagaliwabenaga wia dege bidane wia ho wiaabo helo. Aniore bilo larama, lalu laya.\* <sup>13</sup> Ani layagola dahuliyali haru haga biaru aria mbiragome ihondo lalu, Wali agali aga pele bu karuni ti ai kabe. Ti ani howa ibu kabe, laya.\*

<sup>14</sup> Ani layagola ina ladai bialu lalu, I manda nabi kogo inime manda bidegoni, lalu ladai biru.\*

Ani larugola ibugua ihondo lalu, Wali agali uruni tigua gai mangabi gibiore wiagoria handalu howa pi nale ha ho wialu anda ibu kagoni. Uruni tigua tinaga aga Nogo Sibi Igini biagonaga daramame wayawaya bialu mo pele hayagola ibu kagoni. <sup>15</sup> Irane ogo-ninaga Ngode Datagaliwabenaga handame ho biragane dagia wiago wanakuihayagi howa tigua horombe mbiragabi ibunaga anda ogoniha howa ibunaga biabe biaabo haga hea. Mbirali handame ho biragane dagia ogoriani bereago ibugua ti hondo haga hea.\* <sup>16</sup> Ani bidagome ti mani hina garibi lolenebi iba noa holenebi nawulebiraore. Nimebi dolene tandagabi tara ngarumebi ti nadolebiraore.\* <sup>17</sup> Ani nabulebirago irane Nogo Sibi Igini ibu handame ho biragane dagia ngagoria hanuni howa ibugua tinaga haru haga howa ti haabobo holene miagane iba duguaragoria haru polebira. Ani buwa Ngode Datagaliwabe handa tinaga de iba ibiraru domo waholebira.\*

## 8

### *Wagaya ale mbuga ndibulo para henego aria kanego laga lenego ogo*

<sup>1</sup> Nogo Sibi Igini biagome wagaya ale ndibulo para hayago aria kanego laga layagola dahuliya andagaha bi mbira nale dege wiane hina guyini duguabehe wiya.\* <sup>2</sup> Ani biyagola ina handalu hewaria dahuliyali kariali Ngode Datagaliwabenaga wanakuihayagi hagaruhondo mbelo biguli karia mo miyane handaru.\*

<sup>3</sup> Dahuliyali mendeme mbirale nga biaga mini inisenesi ogoni delaga be ngolome wabini wiago yalu lomabu delagane dabu heagoria ibu haya. Ani heagola Ngode Datagaliwabenaga wali agali bibahendeme ibuhondo bi larago heba biamaga helo mbirale ira hagua ngabilo mini inisenesi delelonaga dewa ibuhondo miya. Ani miyadagoni ibugua lomabu delagane dabu ngolome wabini heago handame ho biragane dagia wiagoria buhayagi heago ogoriani delelo miya.\* <sup>4</sup> Dahuliyali biagome Ngode Datagaliwabe wanakuihayagi howa ngabilo delaga mini inisenesinaga haguabi Ngode Datagaliwabenaga wali agalime ibuhondo bi lararubi biamaga halu ibunaga gini howa iraga helaya.\* <sup>5</sup> Ani buwa dahuliyali biagome mbirale ngabilo mini inisenesi delaga be mo yuwa lomabu delagane dabu biagoria ira deago tabo gambiru tolowa be heba dindini ibira haya. Ani biyagola hari kilikulu lalu hari kulu timbuni lowa hari dababi bialu dindi dumbirumbibi bialu uruni bibahende biai haya.\*

\* **7:9:** Lm 11.25, Mo 3.5, 3.18, 4.4, 5.9 \* **7:10:** Ais 43.11, Yar 3.23, Hos 13.4, Mo 4.2, 4.10, 5.13 \* **7:12:** Mo 5.12-14, 11.17 \* **7:13:** Mo 3.18 \* **7:14:** Ais 1.18, Dan 12.1, Md 24.21, Mg 13.19, Hi 9.14, 1 Yo 1.7, Mo 1.5, 6.9 \* **7:15:** Ais 4.5-6, Mo 4.2, 4.10, 21.3 \* **7:16:** Iba 121.6, Ais 49.10, Mo 21.4 \* **7:17:** Iba 23.1-2, Ais 25.8, 49.10, Ese 34.23, Yo 10.11, 10.14, Mo 5.6, 21.4 \* **8:1:** Hab 2.20, Mo 6.1 \* **8:2:** 2 Bit 29.25-28, Md 18.10, Lg 1.19 \* **8:3:** Har 30.1-3, Amo 9.1, Mo 5.8, 9.13 \* **8:4:** Iba 141.2, Lg 1.10, Mo 5.8 \* **8:5:** Har 19.16-19, LBM 16.12, 1 Kin 19.11, Ese 10.2, Ab 4.31, Mo 4.5, 11.19, 16.18

*Mbelo biguli pu leneru ogo*

<sup>6</sup> Ani biyagola dahuliyali kariali biarume mbelo biguli karia yu hayaru pu lole manda manda biya.

<sup>7</sup> Dahuliyali uruni aria mbiragome ibunaga biguli yayago pulaya. Ani pu layagola dalu dindi gunibi ira deaorebi darama heba bimaga howa dindini ibira haya. Ani biyagola dindi bibahende halu tebo tu wuwa tebonego dindibi irabi datanibi daiore haya.\*

<sup>8</sup> Ani biyagola dahuliyali mendegome ibunaga biguli yayago pulaya. Ani pu layagola mbirale mbira deago dindi hari timbuniore handaleheni ira daradagua biaore iba solowaraha bape haya. Ani biyagola solowara bibahende halu tebo tu wuwa tebonego mo darama bia haya.\* <sup>9</sup> Ani biyagome ibaha wabu bereleneru halu tebo tu wuwa tebonego homai haya. Iba sibi ibani wiaru halu tebo tu wuwa tebonego mo ko hai haya.\*

<sup>10</sup> Ani biyagola dahuliyali tebonegome ibunaga biguli yayago pulaya. Ani pu layagola yakundi timbuni mbira ira hale daradagua deaore hariha howa iba piyagobi iba duguayagobi bibahende halu tebo tu wuwa tebonegoria ibira haya.\* <sup>11</sup> Yakundi biago mini Kau Bulene. Iba nolene bibahende halu tebo tu wuwa tebonego kaubi haya. Kau biyagola wali agali dewame iba ogoni nayaranu homai haya.\*

<sup>12</sup> Ani biyagola dahuliyali manegome ibunaga biguli yayago pulaya. Ani pu layagola ni halu tebo tu wuwabi ege halu tebo tu wuwabi yakundi bibahende halu tebo tu wuwabi tebonego dege degenaga wá holene hundiya. Ani biyagome horo mbirago halu tebo tu wuwa tebonegonaga wá holene nawiya. Ogonidagua dege mbi mbirago halu tebo tu wuwa tebonegonagabi wá holene nawiya.\*

<sup>13</sup> Ani biyagola ina handalu hewaria ega bodo hariawe ale mbira daligaha yagalalu pialu howa bi dalimu lalu, Hiriribiore hiriribiore. Dahuliyali dauni waragane kane biarume tinaga mbelo biguli yu karu pu laragola wali agali bibahende dindini bu karu abiore holobada, lalu layuagola hale haru.\*

**9**

<sup>1</sup> Ani hale harugola dahuliyali daunigome ibunaga biguli yayago pulaya. Ani pu layagola yakundi mbira dindini ibira hayagohondo dindi uli ko dama dege dariba ho wiaganegonaga panga gi miyaria handaru.\* <sup>2</sup> Yakundi biagome dindi uli ko dama dege dariba ho wiagane biagonaga panga duguayagola hagua timbuni ira daradagua bialu da tagitagi biya. Dindi uli ogoni wiagoha howa hagua tagira ibiyagome ni ge halu dindi yi howa do yulame halu aruma helaya.\* <sup>3</sup> Ani buwa pagaya aleru dewa haguaha howa dindini ibira hayaru tihondo mo tandaga bia holene alipiago alerume yu kagobi miya.\*

<sup>4</sup> Pagaya ale biarume datani irabi maru maru anda ho karubi, Mo ko nahalimu. Wali agali Ngode Datagaliwabenaga magi wanakuini naheru ti dege tandaga nelu milimu, lamini.\* <sup>5</sup> Pagaya ale biarume wali agali uruni homelo ba nabi ege duriani tandaga dege mo nela helene. Mo tandaga haragonaga tandaga ogoni alipiagome hayaragola tandaga biagadagua dege biaga.\* <sup>6</sup> Wali agali biarume ege duria urunini homolene taya bia biragolabi handa walia naholebira. Tigua homolene hamela ledaria homa ibu ti helalu ibida polebira.\*

<sup>7</sup> Handalu hewaria pagaya ale biaru ti nogo hosi wai bule manda manda bu hadadagua haya. Tinaga hagianeni haru haga manda ngolome wabini bu haradagua bialu tinaga dengui agali aleya.\* <sup>8</sup> Tinaga mandari luore handalehe ai tinaga nebi budi

\* **8:7:** Har 9.23-25, Ais 2.13, Ese 38.22, Yol 2.30, Mo 9.4, 16.2    \* **8:8:** Har 7.20-21, Yar 51.25, Ese 14.19, Amo 7.4, Mo 16.3    \* **8:9:** Ais 14.12    \* **8:10:** Ais 14.12, Mo 9.1, 16.4    \* **8:11:** Har 15.23, Yar 9.15, 23.15    \* **8:12:** Ais 13.10, Ese 32.7, Yol 2.10, 2.31, 3.15, Amo 8.9, Mo 6.12-13    \* **8:13:** Mo 9.12, 11.14    \* **9:1:** Lg 8.31, 10.18, Mo 8.10, 17.8, 20.1    \* **9:2:** Pig 19.28, Har 19.18, Yol 2.2, 2.10    \* **9:3:** Har 10.4, 10.12-15, Hgn 7.12, Mo 9.10    \* **9:4:** Ese 9.4, Mo 6.6, 7.3    \* **9:5:** Mo 9.10, 11.7    \* **9:6:** Yob 3.21, Ais 2.19, Yar 8.3, Mo 6.16    \* **9:7:** Dan 7.8, Yol 2.4, Nah 3.17



gabua ale timbuni mini laiononaga ne handaleheya.✧ <sup>9</sup> Tinaga galuhombeneni wai biaga humbi ale gabame wabini karule handalehe hea. Ani bialu tinaga babaganeme bi layuago nogo hosime garo ale mini karisi gili lalu wai bule pialu laradagua layuago hale haru.✧ <sup>10</sup> Tinaga erene haniaganerubi alipiago ale howa erene ogonime ege duriani wali agali mo tandaga holene hongo yu hea. <sup>11</sup> Dahuliyali mbira ibu dindi uli ko dama dege dariba ho helaga ngagonaga haru haga ka. Ibunaga mini Hiburu bi lalu, Abadono, Girigi bi lalu, Aboliono, inanaga bi lalu Mo Ko Haga.

<sup>12</sup> Hiriribi pigane biago biai hayago mani kira wene ibule nga.✧

<sup>13</sup> Ani biyagola dahuliyali waraganegome ibunaga biguli yayago pulaya. Ani pu layagola hale halu hewaria lomabu delagane dabu ngolome wabini Ngode Datagali-wabenaga wanakuihayagi heagonaga nguni mariaha howa bi layuago hale haru.✧

<sup>14</sup> Bi layuagome dahuliyali waragane biagohondo lalu, Dahuliyali mariali iba timbuni mini Yuberedisi poragoria dariba ho karu golope ha, lalu lamiayuago hale haru.✧

<sup>15</sup> Ani layagola dahuliyali mariali biaru golope haya. Irane áyu ogoniorenaga horobi ogoniorenaga egebi ogoniorenaga malibi tigua wali agali bibahende halu tebo tu wuwa tebonego homelo belonagahe lea.✧ <sup>16</sup> Ami agali nogo hosini biralu piaga la ai ai bialu daga au loabe tobahe (200 milyon ale) ka layago hale haru.✧ <sup>17</sup> De gandeba handalu hewaria nogo hosibi nogo hosini biralu piagarubi handaru. Tinaga galuhombeneni wai biaga humbi ale gabame wabini karulenege ira hungu daramabi alebi hari mindini alebi ege tole ale mini salobanaga ambuabi alebi karulo heago handaru. Nogo hosi uruninaga haguane budi gabua ale timbuni mini laiononaga haguane handalehe howa tinaga ne harigaha howa ira hungubi haguabi ege tole ale mini salobanaga haguabi tagira ibiya.✧ <sup>18</sup> Ira hungubi haguabi ege tole ale mini salobanaga haguabi nogo hosi ne harigaha howa tagira ibiyarume wali agali bibahende halu tebo tu wu wiyago tebonego homelo bai haya. <sup>19</sup> Ogoni irane nogo hosi uruni tinaga hongo ne harigahabi erenehabi hea. Tinaga erene puya haguane handalehe wiagome tigua wali agali mo tandaga helo hayaga.

<sup>20</sup> Wali agali maru homelo bayagola maru nabe heneru tigua bi pupu wulenaga tini gime wabiyaru yu wahalu mini beregeda nabi haya. Tigua mbirale dama mitangi bialu bi pupu wulenaga ngolomebi silibamebi boronosimebi ege tole ibunimebi iramebi wabini uruninaga deme nahandagabi haleme hale nahagabi geme ibaga nabigabi wabu wini. Urunihondo dama tara tarahondobi bi pupu wulene wa nahe yani ho wiaabo haya.✧ <sup>21</sup> Tigua wali agali homelo bolenerubi gamu gamu bulenerubi wali agali kayu bulenerubi mbirale page bulenerubi uruni bibahende biyarunaga mini beregeda nabi biaabo halu haya.

## 10

### *Dahuliyali mbirame mbuga emene mbira yu hearia Yonehanda hendenego ogo*

<sup>1</sup> Ani biyagola ina handalu hewaria dahuliyali hongohe mende dahuliya andagaha howa dalipe hayaria handaru. Dahuliyali ogoni beralibame ibu bo biyago ni domo ibunaga hagianeni bo bu mabubi hearia handaru. Ibunaga dengui ni daralidagua dalu ibunaga ge kiroba ira hungu ale hearia handaru.✧ <sup>2</sup> Ibugua ibunaga gini mbuga emene mbira angalo yu hea. Ibunaga ge tigago iba solowarani halu ge lego dindini howa <sup>3</sup> bi dalimu budi gabua timbuni laionome ngororo laradagua lalu layuagola hale haru. Ibugua bi dalimu layadago leaha hari kulu kahalu kilikulu lalu ladai biayua.✧

✧ 9:8: Yol 1.6 ✧ 9:9: Yol 2.5 ✧ 9:12: Mo 8.13 ✧ 9:13: Har 30.1-3, Mo 8.3 ✧ 9:14: Mo 16.12 ✧ 9:15: Mo 8.7-12 ✧ 9:16: Iba 68.17, Ese 38.4, Dan 7.10 ✧ 9:17: 1 Bit 12.8, Ais 5.28-29 ✧ 9:20: Man 31.29, Iba 106.37, 115.4-7, 135.15-17, Ais 2.8, 2.18-20, Dan 5.23, 1 Ko 10.19-20, Mo 16.9-11 ✧ 10:1: Ese 1.28, Md 17.2, Mo 1.15-16 ✧ 10:3: Mo 8.5

<sup>4</sup> Tigua o layadagoni layaore dege ina gili bule birugola dahuliya andaga howa bi mbira layuagome lalu, Hari kulu karia biarume bi layuago gili nabi wia do habe, laya.✧

<sup>5</sup> Ani layuagola dahuliyali ala ibanibi dindinibi hearia handarugo ibuguaibunaga gi tigago dahuliya andaga doladaga hene.✧✧ <sup>6</sup> Ani buwa ibugua Ngode Datagaliwabe ha dege bialu ha ho wiaabo kagome hari daligabi dindibi iba solowarabi bibahende uruniha ngaru wabiyagonaga minini howa bi mbira lo wialu lalu, Ai hondo ha dai bu holene nawiore.✧ <sup>7</sup> Ani anigo dahuliyali kane biagomeibunaga mbelo biguli pu laragola Ngode Datagaliwabe mana bule lowa do ho ngelenegoibunaga biabe bialu mbiwia halu mana latagi haga biaruhondo ala lamiyadagua áyu bia maro bulebira, laya.✧

<sup>8</sup> O layadagoni leagola ina hale halu hewaria bi ala dahuliya andaga howa layuane hale harugome lone ihondo langialu lalu, Mbuga biago dahuliyali biagome áyu iba solowaranibi dindinibi heyu kagoibunaga gini angalo yidago yamule pu, laya.✧

<sup>9</sup> Ani layagola ina dahuliyali biago hearia puwa, Mbuga emene biago ngi, laru. Ani larugola ibugua ihondo lalu, Yamialu í na. Naregola neha howa dende mone ibane dende ale bulebirago inaga tombeha howa kaubi bu hinulebira, laya.✧

<sup>10</sup> Ani layagola ina mbuga emene biagoibunaga giha howa yamuwa naru. Ani narugola neha howa dende mone ibane ale biya. Ani biyago mbedogo biwagola inaga tombeha howa kaubi bu hinaya.✧ <sup>11</sup> Ani biyagola ihondo ogodagua langialu laya, Wali agali dindi tara tarani bu karubi tingini tara tara bu karubi bi tara tara laga karubi dindi tara tarani kini karubi uruni tihondo Ngode Datagaliwabe mana bulebiragonaga lone lamialu habe, lalu langiya.

## 11

### *Ngode Datagaliwabe mana walia haga kirali holebirago ogo*

<sup>1</sup> Ani languwa ira kanogo mbira ale magi manda biagane gambe homane luni ale ngialu howa lalu, Ngode Datagaliwabenaga andabi lomabu delagane dabubi magi ogobi lalu manda bialu wali agali anda ogoni tamuha lotu lalu karu daga lalu bule pu.✧ <sup>2</sup> Ani bialu howa Ngode Datagaliwabenaga anda haneruha magi ogobi lalu manda nabibe. Irane wali agali Ngode Datagaliwabe mitangi nabiaga karu hane uruni tihondo mini nga. Wali agali uruni tigua Ngode Datagaliwabenaga Tano Loma Bia Hene ngagoriani ege pira mariani kira (42) hangedalu holebira.✧ <sup>3</sup> Ina inaga walia haga kirali libugua dara howa walia holenaga aga karulalu howa Ngode Datagaliwabe mana horo daosini mbira handari kirani pira waragariani (1,260) lamule pelo, Pudaba, lolebero, laya.✧

<sup>4</sup> Walia haga kirali ogonilabo libu ira olibe kirabi lamu hale irane kirabi ka. Libu dindi bibahendenaga Anduane Homogo kagoria heyu ka.✧ <sup>5</sup> Mbiralime libu bole biyagua libunaga ne harigaha howa ira hungu tagira ibiragome libunaga waitigi hararu homelo бага. Ogonidagua biaganego mbiralime libu bole biyagua ogoni ibu homelo bolebira.✧ <sup>6</sup> Libugua Ngode Datagaliwabe mana lamialu howa dalu naibilo hari daligaha panga payulene hongo yu ka. Libugua iba dugua tagi hararu mo darama bia helolenenaga hongobi wali agali dindini karu homolene tara tarame boa birangi bolenenaga hongobi yu ka.✧

<sup>7</sup> Libugua Ngode Datagaliwabe mana lamiai kagola nogo gabua gibi mbirame dindi uli ko dama dege dariba ho ngagoha howa tagira ibalu libu baba wai bulebira. Nogo

✧ **10:4:** Dan 8.26, 12.4, 12.9 ✧ **10:5:** Har 8.6 ✧ **10:5:** Har 20.11, Man 32.40, Dan 12.7, Amo 3.7 ✧ **10:6:** Neh 9.6, Iba 146.6, Mo 4.11, 14.7, 16.17 ✧ **10:7:** Dan 9.6, 9.10, Amo 3.7, Lm 16.25-26, Mo 11.15 ✧ **10:8:** Ese 2.8-3.3 ✧ **10:9:** Yar 15.16 ✧ **10:10:** Ese 2.10, 3.3 ✧ **11:1:** Dag 35.5, Ese 40.3, Seg 2.1-2, Mo 21.15 ✧ **11:2:** Ese 40.17-20, Dan 8.10, Lg 21.24, Mo 12.6, 13.5 ✧ **11:3:** Mo 12.6, 19.10, 20.4 ✧ **11:4:** Yar 11.16, Seg 4.11-14 ✧ **11:5:** LBM 10.2, 2 Sml 22.9, 2 Kin 1.10-12, Iba 97.3, Yar 5.14, Hos 6.5 ✧ **11:6:** Har 7.17-19, 1 Sml 4.8, 1 Kin 17.1

gabua gibi ogonime wayali halu libu homelo bolebir. ✧ <sup>8</sup> Ani baragola libunaga tingini tano timbuni biagonaga hamani libunaga Anduane Homogo ira bangani ba para hayagoria ngelolebira. Tano ogoninaga mini bi manane lalu Sodomobi Iyibibi labehe nga. ✧ <sup>9</sup> Horo tebiru howa manegonaga bu lowa wali agali dindi tara tarani bu karumebi hameigini tara tara bu karumebi bi tara tara laga karumebi tingini tara tara karumebi libunaga tingini handaga bialu, Hora holene nawi, lolebira. <sup>10</sup> Libu homaragola dindi wali agali biarume turu ho holebira. Ngode Datagaliwabe mana latagi haga kirali ogoni labome wali agali bibahendeore dindini bu heagoria tandaga nolene mo ibira hayago ai homayagonaga turu halu tigua mali lialu daweru halu mbirale mbirale bame migimigi bialu holebira. ✧ <sup>11</sup> Ani biyagola horo tebiru howa manego bu lowa holenenaga bu he mulene Ngode Datagaliwabe howa ibalu libuha anda pelayagola libu heyu hene. Heyu heago handayaru ti bibahendeme gi taraore haya. ✧ <sup>12</sup> Ani biyagola dahuliya andaga howa bi dalimu ladali hayuago Ngode Datagaliwabe mana latagi haga kirali biago labome hale halu hebiria, Ogoria ibidaba, layuago hale haya. Ani hale halu libu waitigi hayarume handalu hearia libu dahuliya andaga beralibaha biatago halu iraga hayaria hendene. ✧ <sup>13</sup> Ani iraga hayaore dumbirumbi timbuni biyagola tano pi halu tu wuwa pinigo bo poda paya bialu wali agali daosini karia (7,000) bo paya biai haya. Wali agali maru hearume ti gi taraore howa Ngode Datagaliwabe gibiore dahuliya andaga kagonaga mini yaraga haya. ✧

<sup>14</sup> Hiriribi mende biago biai hayago ai tebonego áyu ogoni dege ibulebira. ✧

### *Mbelo biguli kanego pu lenego ogo*

<sup>15</sup> Dahuliyali kanegome ibunaga mbelo biguli pu layagola dahuliya andaga howa bi dewa dalimu lalu ogodagua layua, Wali agali dindi bibahendeni karu haru hagimbu bulene hongo inanaga Anduane Homogohabi ibunaga Mbirali Dabo helenego kagohabi ngago ibugua haru ha dege bidane ha ho wiaabobo holebira, lalu layuago hale haru. ✧

<sup>16</sup> Ani leagola handalu hewaria dahuliyali haru haga pira kirani mariali (24) tinaga haru haga biragane dagiani Ngode Datagaliwabe buhayagi wiagoria biraga biaru tini bulu palu ibira howa Ngode Datagaliwabe mini yaraga halu ✧ <sup>17</sup> lalu, ✧

Anduane Homogo Ngode Datagaliwabe Hongo Haiheore í bamba henego áyubi kegoni.

Ína ínaga hongo holene yuwa

haru holene tenialu kegonaga ina kaj larama.

<sup>18</sup> Ínaga keba holene horobi ✧

homeneru mo daba ki bulene horobi íbu nga.

Ani ngago hondowa wali agali Ngode Datagaliwabe mitangi nabiaga karume keba taraore tólaihe ka.

Ínaga biabe bialu mana latagi haga karubi

ínaga wali agali emene timbuni ta nabi bibahende ínaga mini yaraga halu karubi

tihondo emena mulene horo áyu íbu ngagoni.

Wali agali dindi bo poda paya bialu hayaru tinaga bo paya bulene horo áyu íbu ngagoni, laya.

<sup>19</sup> Dahuliya andagani Anduane Homogonaga anda dugua ho wiagola Ngode Datagaliwabenaga Bi Habo Nalolene Mbogoyi wiago handabehe wia. Ani bialu hari daba

✧ **11:7:** Dan 7.7, 7.21, Seg 14.2, Lg 13.32, Mo 9.2, 12.17, 13.1, 13.5-7, 13.11, 17.8 ✧ **11:8:** Ais 1.9-10, Lg 13.34, Hi 13.12, Mo 14.8, 18.10, 18.24 ✧ **11:10:** Mo 12.12, 13.8, 16.10 ✧ **11:11:** Ese 37.5-14, Mo 11.9 ✧ **11:12:** 2 Kin 2.1, 2.5-7, 2.11, Ais 14.13, Ab 1.9, Mo 12.5 ✧ **11:13:** Mo 6.12, 8.5, 14.7, 16.9, 16.18 ✧ **11:14:** Mo 8.13, 9.12, 15.1 ✧ **11:15:** Har 15.18, Iba 10.16, Ais 27.13, Dan 2.44, 7.14, 7.27, Oba 21, Mo 10.7, 12.10, 19.6 ✧ **11:16:** Mo 4.4, 4.10, 5.8, 19.4 ✧ **11:17:** Mo 1.4, 1.8, 4.8, 15.3, 16.5, 19.6 ✧ **11:18:** Iba 2.1, 2.5, 46.6, 110.5, 115.13, Dan 7.9-10, Lm 2.5, Mo 6.10, 10.7, 13.10, 18.6, 19.5, 20.11-13

migimege lalubi hari kilikulu lagalaga bialubi dumbirumbi bialubi dalu dindi guni timbuni ibira halu bigi biya.✧

## 12

### *Wali mbira abagua ale mbiralanaga te ogo*

<sup>1</sup> Ani biagola handalu hewaria nahendene ale tara mbira hari daligani hapani haya. Hapani hayadagoni wali mbira ni aga karulagadagua karulebi ge egeni hana howa haru haga manda yakundi homberia (12) karulebi berea. <sup>2</sup> Ibu waneigini gali taba honolene kaware hayagola tandaga nalu yi layago hale haru.✧

<sup>3</sup> Ani handaya ho wiwaria dege nahendene ale tara mende hari daligani hapani haya. Hapani hayadagoni abagua ale mbira timbuni daramabi haguane kariahebi hagianeni ne gayane pirahebi hea. Haguane karia urunini kininaga manda karia karule hearia handaru.✧ <sup>4</sup> Abagua ale biago ibunaga ereneme yakundi halu tebo tu wuwa tebonego ndogayulo бага bialu dindini ibira helaya. Ani buwa waneigini gali taba hanaraore bo nole ibugua wali biago wanakuihayagi heyu howa hondo haya.✧ <sup>5</sup> Ani heagola wali biagome igiri mbira taba hanayago ibugua mani hongo taraore holene yu howa wali agali dindi tara tarani bu karu bibahende handame hai holebira. Ani bo nole biyaria dahuliyalime igiri biago yamialu Ngode Datagaliwabe kagoriabi ibunaga handame ho biragane dagia ngagoriabi yalu iraga haya.✧ <sup>6</sup> Wali biago ibu Ngode Datagaliwabe handa dindi ko yobi mbira wali agali nahagaha ibu berelo manda manda bu wiagoria ibida piya. Dindi ogoriani bedagola Ngode Datagaliwabe handa wali biago horo daosini mbira handari kirani pira waragaria (1,260) handaya ho holebira.✧

<sup>7</sup> Ogoni hondowa handalu hewaria dahuliya andagani wai biya. Ani biyagola dahuliyali Maigelobi ibunaga dahuliyalirubi tigua abagua ale biagobi ibunaga andaneha hagarubi ti baba wai bialu abagua ale biagobi ibunaga andaneha hagarubi tigua wai bia dai biya.✧ <sup>8</sup> Ani buwa Maigelobi ibunaga dahuliyalirubi tigua wayali howa abagua ale biagobi ibunaga andaneha haga biarubi ti dahuliya andagani holene nawi lalu bo batagi haya. <sup>9</sup> Ngode Datagaliwabenaga dahuliyali biarume abagua ale timbuni biago puya bambaore wini ibu mini dama Heyolabe dindi bibahendeni karu mo hondo hai halu ko haga biago ibuore bo batagi haya. Ibubi ibunaga andaneha haga biarubi dindini bo barali hayaria handaru.✧

<sup>10</sup> Ani biyagola ina hale halu hewaria dahuliya andaga howa bi mbira dalimu lalu, Ngode Datagaliwabenaga pele mulene áyu ogoni íbu nga. Ngode Datagaliwabe ibu Handame Haga Kiniore howa ibunaga hongo áyu mo walia ho nga. Ai Ngode Datagaliwabenaga Mbirali Dabo Helene kago ibunaga handame ho holene hongo walia ho nga. Irane ogoninaga mbirali Ngode Datagaliwabe wanakuihayagi howa ibugua horombe mbiragabi inanaga hamene mbaliniru ti nakarulape biaga lalu haga biago ibu dahuliya andaga howa bo batagi haya.✧ <sup>11</sup> Inanaga hamene mbaliniru tigua Nogo Sibi Igini biagonaga daramamebi mana henene lamiyagomebi o biago bolangua halu wayali haya. Ani bulenaga tigua tininaga holene mitangi nabi homolene winiyagua homabehe haya.✧ <sup>12</sup> Anigo dahuliya andagani kamiru-o tí turu ho halimu. Dindini kamiru iba solowaraha bedamirubi dindibi iba solowarabi tíha ko gibiore wulebiragonaga dara holene nga. Ogoni irane dama Heyolabe tí kamiria daliyago ibunaga holene horo henge emene hangu ngago manda buwa ibugua keba timbuni ho ka, lalu laya.✧

✧ **11:19:** Hi 9.4, Mo 8.5, 15.5, 15.8, 16.18, 16.21 ✧ **12:2:** Ais 66.7, Ga 4.19 ✧ **12:3:** Dan 7.7, Mo 13.1, 17.3, 17.9  
 ✧ **12:4:** Dan 8.10, Mo 9.10, 17.8 ✧ **12:5:** Iba 2.9, Ais 7.14, 66.7, Mo 2.27, 19.15 ✧ **12:6:** Mo 11.2-3, 12.4 ✧ **12:7:**  
 Dan 10.13, 10.21, 12.1, Yu 9, Mo 20.2 ✧ **12:9:** Pig 3.1, 3.4, 3.14, Lg 10.18, 22.31, Yo 12.31, Mo 9.1, 20.2-3 ✧ **12:10:**  
 Yob 1.9-11, Seg 3.1, Mo 11.15, 19.1 ✧ **12:11:** Lg 14.26, Lm 8.33-34, 8.37 ✧ **12:12:** Ais 44.23, 49.13, Mo 8.13, 10.6, 11.10, 18.20

<sup>13</sup> Abagua ale biago ibu dindini helo bope heneyane hondowa ibugua wali igiri taba hanayago biago piyadagua talima piya. <sup>14</sup> Ani talima piyagola wali biago dindi ko yobi wali agali nahaga wiagoha yaga lalu pelo ega timbuni bodo hariawe alenaga babagane kira ibuhondo miya. Dindi ogoriani abagua ale biagome wali biago nabelo Ngode Datagaliwabehanda mali tebirani manegonaga bu lowa handaya ho holebira. ✧ <sup>15</sup> Abagua ale biagome talima piyago pialu howa iba lime wali biago yalu pelo ibunaga ne harigaha howa iba li timbuni tagira ibilaya. ✧ <sup>16</sup> Ani berolo manda biaria dindime wali biago biamogo bialu ibunaga ne haria ha lalu abagua ale biagonaga ne harigaha howa iba tagira ibiyago nai haya. <sup>17</sup> Ani biyagonaga abagua ale biagome wali biagola keba timbuniore halu wali biagonaga aguanene baba wai bule piya. Aguanene uruni tigua Ngode Datagaliwabehanda, Bilimu, lowini ngadagua bialu Yasuhanda mana henene mo walua hayagoria mini bilina ho karu ti bibahendeore baba wai bule piya. ✧ <sup>18</sup> Abagua ale biago ibu iba solowara angeni heyu haya.

## 13

### *Nogo tara kiranaga te ogo*

<sup>1</sup> Ina ani handaya ho wiwaria dege nogo tara mbira iba solowaraha howa tagira ibiyaria handaru. Nogo gabua gibi ogoni ibu haguane kariahebi hagianeni ne gayane pirahebi hea. Ne gayane pira hearu mbira mbirani haru haga manda emene karu-lowabi haguane karia hearu mbira mbirani mini Ngode Datagaliwabe mege bialu gilibu wiarua handaru. ✧ <sup>2</sup> Nogo tara o biago ibu budi gabua ale timbuni mini lebadi handalehebi ibunaga ge biango gabua ale timbuni mini beanaga ge handalehebi ibunaga ne hariga budi gabua ale timbuni mini laiononaga ne hariga handalehe hea. Abagua ale biagome ibuninaga hongo mialu ibunaga haru haga biragane dagiabi haru holenenaga hongo gibiorebi nogo tara o biagohondo miya. ✧ <sup>3</sup> Nogo tara ogoninaga haguane biaru mbirago homelo beneyago dabi ho hea. Wali agali bibahende dindini bu hearume mogolo hondowa nogo tara ogoni piyadagua haruru piya. ✧ <sup>4</sup> Abagua ale biagome ibu haru holenenaga hongo nogo gabua gibi biagohondo miyago hondowa wali agali bibahendeme ibuhondo bi pupu wialu haya. Tigua nogo gabua gibi biagohondobi bi pupu wialu lalu, Nogo gabua gibi ogobi ai kabe. Ibu baba wai bibehe ai kabe, lalu lene. ✧

<sup>5</sup> Nogo gabua gibi ogonime mine howa Ngode Datagaliwabe mege bialu bi lelowa Ngode Datagaliwabe ibugua nogo gabua gibi biagohondo ibu haru holenenaga hongo ege pira mariani kira (42) yu helo henge miya. ✧ ✧ <sup>6</sup> Ani miyagola nogo tara ogoni ibugua Ngode Datagaliwabebi ibunaga minibi ibu haga wiagobi dahuliya andagani hearubi bibahendeore ha howa mege bialu hea. ✧ <sup>7</sup> Nogo gabua gibi ogonime Ngode Datagaliwabenaga wali agali hearu baba wai bialu ti bo hana helo helene. Ibugua hameigini tara tara hearubi wali agali dindi tara tarani bu hearubi bi tara tara laga hearubi tingini tara tara hearubi bibahende haru hai helo henge miya. ✧ <sup>8</sup> Dindi wa nabi howa wali agali haabo holene yu holebirarunaga mini mbugani gilibu ngaru heba wali agali bibahende dindini karu tinaga mini gili bimaga nahe tigua nogo gabua gibi ogoni mitangi bialu mo dunini ho helolebira. Mbuga ogoni Nogo Sibi Igini balu homelayago ibunaga nga. ✧

<sup>9</sup> Anigo tí halehe kamiyagua nde hale haramine. <sup>10</sup> Maru minu yalu pelo lowini karu minu yalu puore bulebira. Maru wai biagane tibume homelo belo lowini karu wai

✧ **12:14:** Dan 7.25, 12.7, Mo 12.6, 17.3 ✧ **12:15:** Ais 59.19 ✧ **12:17:** Pig 3.15, 1 Ko 2.1, 1 Yo 5.10, Mo 11.7, 13.7, 14.12, 20.4 ✧ **13:1:** Dan 7.2-3, 7.7, Mo 12.3, 17.3, 17.7-12 ✧ **13:2:** Dan 7.4-6, Mo 12.4, 12.9, 16.10 ✧ **13:3:** Mo 13.12-14, 17.8 ✧ **13:4:** Mo 18.18 ✧ **13:5:** Mo 11.2, 12.6 ✧ **13:5:** Dan 7.8, 7.25, 11.36 ✧ **13:6:** Mo 12.12 ✧ **13:7:** Dan 7.21, Mo 11.7, 11.18, 12.17, 17.15 ✧ **13:8:** Har 32.32, Iba 69.28, Dan 12.1, Pb 4.3, Mo 3.5, 5.6, 17.8, 20.12-15, 21.27



biagane tibu ogonime baore bulebira. Ani bulebiragonaga Ngode Datagaliwabenaga wali agali karu mini bilinahe ha ho wiaabo holenebi mini mbiraore wu holenebi nga.\*

<sup>11</sup> Ani handa ho wiwaria dege nogo gabua gibi mende dindiha howa tagira ibiyaria handaru. Nogo gabua gibi mende ogoni ibu hagianeni ne gayane kira nogo sibi igini-naga ne gayane handalehe howa bi abagua ale biagome bi laradagua layago hale haru.\*

<sup>12</sup> Nogo gabua gibi mende ogonime nogo gabua gibi mbira biagonaga haru holenenaga hongo gibiore yu heagoria howa yu haya. Ani yu howa ibugua dindi bibahende bi wali agali bibahende karubi nogo gabua gibi mbira bene dabi hayagohondo bi pupu wilo mo wia haya. <sup>13</sup> Nogo gabua gibi mende ogonime agalime nabiagane aleru bialu hari daligaha howa wali agali dindini bu hearu hendeaore ira hungu biaore ibira haya.\*

<sup>14</sup> Nogo gabua gibi mende ogonime nogo gabua gibi mbira biago heagoria agalime nabiagane aleru bilo bilayagome wali agali dindini bu hearu mo hondo haya. Nogo gabua gibi mende ogoni ibugua wali agali biaruhondo, Nogo gabua gibi mbira wai biagane ayu tibu biagome bene dabi hayago ibuni kagobi mbira bi pupu wulenenaga wa bidaba, lalu lamiya.\* <sup>15</sup> Ani layadagoni bi pupu wulenaga wabiyago ibugua bi lelobi wali agali ibuhondo bi pupu nawirago homelo belobi nogo gabua gibi mende biago ibugua nogo gabua gibi ala ibiyago ibuni kagobi mbirale wabu wiyago ibuha buhe pula anda helo helene.\* <sup>16</sup> Nogo gabua gibi mende biagome wali agali emene timbunirubi homogo yagibanorubi garabaya biabe ale bia hagarubi bia nahagarubi bibahende gi tiganiyaguabi wanakuiniyaguabi magi wilo hongo halu mo wia haya.\* <sup>17</sup> Ani biyago wali agali magi ogoni helayaru hangume yolo bialu mulenebi yolo ngilo mulenebi bibehe haya. Magi ogoni nogo gabua gibi mendegonaga miniyaguabi mini ogoninaga dagayaguabi nga.\*

<sup>18</sup> Ogoni manda bule lowa mini gigabiwi holene nga. Daga ogoni agalinaga mini walia ho ngago mbirali miniwiore kagome nogo gabua gibi mende biagonaga daga galone mo mini manda bibehe holebira. Daga ogoni handari waragariani pira waragariani waragaria (666) nga.\*

## 14

### *Nogo Sibi Igini biagobi ibunaga wali agalibi te ogo*

<sup>1</sup> Ina lone handalu hewaria Nogo Sibi Igini biago Hari Saiononi heyu hearia handaru. Nogo Sibi Igini ogoni baba mandagi wali agali daosini handari mbirani pira mariani maria (144,000) ti wanakuini ibunaga minibi ibu Abanaga minibi gilibu wu hearia handaru.\* <sup>2</sup> Ogoni hondowa hale halu hewaria dahuliya andagaha howa bi mbira iba pora bialu ue laradagua bialubi hari kilikulu dalimuore laradagua bialubi layuagola hale haru. Bi ogoni agali dewame gawa ale timbuniru laradagua layuagola hale haru.\* <sup>3</sup> Wali agali daosini handari mbirani pira mariani maria (144,000) biaru ti Ngode Datagaliwabenaga handame ho biragane dagiabi holenehe mariali helene biarubi dahuliyali haru haga biarubi uruni buhayagi heyu hea handaru. Tigua iba gana gahenge tini hangume labehe wiaru lalu hea. Wali agali bibahende bu hearuni aria tini dege Ngode Datagaliwabehanda pele mialu haru dai biya.\* <sup>4</sup> Agali uruni ti wali baba mandagi nahaga miniha ko mbira para naheore ka. Nogo Sibi Igini biago poradagua talima piaga ka. Ti wali agali bibahende bu hearuha howa Ngode Datagaliwabehanda

\* **13:10:** Ais 33.1, Yar 15.2, 43.11, Md 26.52, Mo 14.12    \* **13:11:** Mo 11.7    \* **13:13:** Man 13.1-3, 1 Kin 18.24-39, 2 Kin 1.10-12, Md 24.24, 2 Te 2.9    \* **13:14:** Man 13.1, 13.4, 2 Te 2.9-10, Mo 12.9, 19.20    \* **13:15:** Dan 3.4-6, Mo 16.2, 19.20, 20.4    \* **13:16:** Mo 14.9, 19.20, 20.4    \* **13:17:** Mo 14.9-11, 15.2, 16.2, 19.20, 20.4    \* **13:18:** Mo 15.2, 17.9, 21.17    \* **14:1:** Ese 9.4, Mo 3.12, 5.6, 7.3-4, 13.16    \* **14:2:** Ese 1.24, 43.2, Mo 1.15, 5.8, 19.6    \* **14:3:** Iba 149.1, Ais 42.10, Mo 5.9, 7.4, 15.3

pele mialu ibuhondobi Nogo Sibi Igini biagohondobi ti piganeore lomabu mini ka.\*<sup>5</sup> Tigua ke mbira hayaria nahende tiha ko mbira nawiore.\*

### *Dahuliyali tebiranaga te ogo*

<sup>6</sup> Ina handa ho dege wiwaria dahuliyali mbira hari daligani yagalo yalu piyaria handaru. Ibugua wali agali dindi bibahendeha tingini tara tara karubi hameigini tara tara karubi bi tara tara laga karubi wali agali dindi tara tarani karubi bibahendehondo haabobo holene Bi Mana Debene lope hole yagalo yalu piyaria handaru.\* <sup>7</sup> Dahuliyali ogoni ibugua bi hongo howa laraga halu lalu, Ngode Datagaliwabe mini lene ka lowa ibu timbuniore kagonaga mini yaraga hadaba. Ibugua wali agali bibahende daba ki bulene áyu íbu nga. Ngode Datagaliwabe ibunioreme hari daligabi dindibi iba solowarabi iba duguararubi wabinigo ibuhondo ge duli hangaho biruwa ibu mini yaraga hadaba, lalu layuane hale haru.\*

<sup>8</sup> Ai ina handa ho dege wiwaria dahuliyali biago piyadagua dahuliyali mendebi talima pialu hearia handaru. Ibugua pialu howa lalu, Babilono mini lene timbuni podo ibira haya. Ibu podo bagabu ibiraore haya. Ibugua wali agali bibahende hearu ibunaga waini iba nelu mo na haya. Ibunaga waini iba ogoni wali agalime dimagoli tara halu kayu bilonaga mo na haya, lalu layago hale haru.\*

<sup>9</sup> Ina handa ho dege wiwaria ai dahuliyali kira pigane ma bambala piyago piyadagua dahuliyali tebonego pialu bi hongo howa laraga halu lalu, Mbiralime nogo tara biagohondobi ibuni heagobiore wabu wini biagohondobi bi pupu wialu wanakuiniyaguabi giniyaguabi magi biago helayago\* <sup>10</sup> ogoni ibuni Ngode Datagaliwabenaga waini iba nolebira. Waini iba ogoni Ngode Datagaliwabenaga keba holene gibiore hada nabi howa beha odo bereleda. Ani bidago wali agali nogo tara biagohondo bi pupu wialu magi biago karule karu ti dahuliyali loma bia hene hearubi Nogo Sibi Igini biagobi wanakuinihayagi ira timbuni ege tole ale mini saloba heba da ho wiagoriani dalu tandaga taraore nalu holebira.\* <sup>11</sup> Ti tandaga taraore helo ira daragonaga hagua iraga ha dege bialu kane iraga ha ho wulebira. Ani buwa wali agali nogo tara biagohondobi ibuni heagobiore wabu wini biagohondobi bi pupu wialu nogo ogoninaga mini magihe karu ti mini íbu holene horombe mbiragabi nawulebira, lalu layago hale haru.\*

<sup>12</sup> Ani bulebiragonaga Ngode Datagaliwabenaga wali agali ibugua, Bilimu, lo wiyadagua bialu Yasuhondo mini bilinahe ho haabo karu ti hibu lalu hongo ha ho wiaabo holene nga.\*

<sup>13</sup> Ani hondowa hale ha dege bialu hewaria bi mbira dahuliya andagaha howa ladali halu lalu, Bi o larogo gili bia. Wali agali áyu ogoni howa Anduane Homogonaga biabe bialu kaore homararu ti turu ho holebira, lene.\*

Ani layagola Ngode Datagaliwabe Dinini ibugua ladai bialu lalu, E aniore bulebira. Tigua biabe erekuibi bialu hayago yolo ereba nahe tinaga wiaabo halu halo birulene karulowa turu howa mini íbu birulebira, lalu layago hale haru.

### *Dindini tomo ngaru mo mogo bulene ogo*

<sup>14</sup> Ina handa ho dege wiwaria hari beraliba pele mbira handaru. Beraliba pele ogoriani mbirali agali handalehe berea. Ogoni ibugua ibunaga hagianeni haru haga manda ngolome wabini karulo halu ibunaga gime ayu tibu widi gandulaga garayabi mbira ne gadele yu hearia handaru.\* <sup>15</sup> Handa dege bialu hewaria dahuliyali mende

\* **14:4:** Bi ogoni gilibu ngago marume mitangi bialu bi yobage gilibu nga mitangi biaga. Agali biaruni ti Ngode Datagaliwabehondo mini mbiraore wialu mini kira nawiyagabi ko nabiagabi hene. \* **14:4:** 2 Ko 11.2, Eb 5.27, Ya 1.18, Mo 3.4, 5.9 \* **14:5:** Iba 32.2, Seb 3.13, Eb 5.27 \* **14:6:** Eb 3.9-11, Mo 8.13, 13.7 \* **14:7:** Neh 9.6, Iba 124.8, Ab 17.24, Mo 10.6, 15.4 \* **14:8:** Ais 21.9, Yar 51.8, Mo 17.2, 18.2-3, 18.21, 19.2 \* **14:9:** Mo 13.12-17 \* **14:10:** Pig 19.24, Iba 11.6, 75.8, Ais 51.17, Yar 25.15, Ese 38.22, Mo 15.7, 16.19, 18.6, 19.20, 20.10, 21.8 \* **14:11:** Ais 34.10, Mo 13.12-17, 19.3 \* **14:12:** Mo 12.17, 13.10 \* **14:13:** 1 Ko 15.23, 15.58, 1 Te 4.16, 2 Te 1.7, Hi 4.10, Mo 20.6 \* **14:14:** Ese 1.26, Dan 7.13, Mo 6.2

Ngode Datagaliwabenaga andaha howa tagira ibalu ibugua agali handalehe beralibani birayagohondo bi dalimu olaraga halu lalu, Dindini widi boga biai halu gandu lolene tu áyu ibu ngagonigo ínaga ayu tibu garayabi yidegome widi gandula, laya. ✧ <sup>16</sup> Ani layagola mbirali beralibani birayago ibugua ibunaga ayu tibu garayabi biago yarali halu dindini widi hearu gandu laya.

<sup>17</sup> Handa ho wia dege biwaria dahuliyali mendego dahuliya andaga Ngode Datagaliwabenaga andaha howa tagira ibalu ibuguabi ayu tibu garayabi ne gadele yalu ibiyago handaru.

<sup>18</sup> Ani bialu dahuliyali mendebi ibugua lomabu delagane dabuni ira deago handaya ho haga heago ibu o heagoria howa tagira ibiya. Tagira ibuwa ibugua dahuliyali ayu tibu garayabi ne gadele yu hayagohondo laraga halu lalu, Pu mbira lini daga mini gerebi dedaru ibirayadago ínaga ayu tibu garayabi yidegome dindinaga mabuni howa gandula, laya. ✧ <sup>19</sup> Ani layagola dahuliyali ayu tibu garayabi yu hayagome dindini ya dali halu gerebi mini dearu gandu laya. Gandu lowa ibugua gerebi lini biaru Ngode Datagaliwabenaga keba holenenaga pingidagane wiagoha mo bape haya. ✧ <sup>20</sup> Ani biyagola tano timbuni tagirahayagi gerebi lini biaru pingidagane wiagoria pingida tagi haya. Ani biyagola gerebi lini pingidagane timbuniore ege tole wiagoha howa darama tagira ibiyago iba li timbuni magi lu kilomida handari tebira (300) alebi ulinaga magi mida kira alebi ibiyaria handaru. ✧

## 15

### *Dahuliyali karialime bolene hongo yu henego ogo*

<sup>1</sup> Ani hondowa handalu hewaria dahuliya andagani nahendene ale tara mende gibibi mogolebi dahuliyali karialime bolene hongo karia yu hearia handaru. Bolene hongo uruni bamaro buleneya. Irane bolene hongo urunime Ngode Datagaliwabe ibu keba ogobi ka lalu walia hamaro bulebira. ✧

<sup>2</sup> Ani handa ho wiwaria dege iba solowara ngalayi handalehe ira deaore bimaga ho wiaria handaru. Ogoni hondowa handalu hewaria wali agalime nogo tara biagobi ibuni kagobiore wabu wiyagobi ibunaga mini wiradagua daga mbira wia aribia helo wini kago ibunibi ti ibu baba wai bialu wayali hai hene bibahende hayaru hearia handaru. Tigua iba solowara ngalayi handalehe wiagoria heyu howa gawa timbuni Ngode Datagaliwabehanda tihondo miniru yu hea. ✧ <sup>3</sup> Yu howa tigua Ngode Datagaliwabenaga biabe bia haga Mosese ibunaga iba ganabi Nogo Sibi Igin biagonaga iba ganabi lalu hea. Iba gana layadagoni ogo, ✧

Anduane Homogo Ngode Datagaliwabe Hongo Haiheore kego

ína bialu hariliru gibiorebi timbuniorebi birili.

Wali agali dindi tara tarani bu karunaga kini íni kego

ínamana tigabiorebi heneneorebi birilida.

<sup>4</sup> Anduane Homogo-o í hondowa gi naholene mbirali ai kabe. ✧

Í timbuniore kego lalu latagi naholebirago aiwabe.

Íni dege baya buruguleore kegoni.

Wali agali bibahendeoreme ínaga tigabi buleneru handaya ho kamagonigo

wali agali dindi tara tarani bu karume ibalu

ínaga mini yaraga hole ibulebira,

lalu hearia hale haru.

✧ **14:15:** Yar 51.33, Yol 3.13, Mo 14.18, 16.17 ✧ **14:18:** Yol 3.13, Mo 16.8 ✧ **14:19:** Mo 19.15 ✧ **14:20:** Ais 63.3, Dug 1.15, Hi 13.12, Mo 11.8, 19.14-15 ✧ **15:1:** LBM 26.21, Mo 12.1-3, 14.10, 15.6-7, 21.9 ✧ **15:2:** Mo 4.6, 5.8, 13.15-17, 14.2, 21.18 ✧ **15:3:** Har 15.1, Man 31.30, Iba 92.5, 111.2, 139.14, 145.17, Mo 11.17, 14.3, 16.7 ✧ **15:4:** Iba 86.9, Ais 66.23, Yar 10.7

<sup>5</sup> Ogoni hondowa handalu hewaria dahuliya andagani Ngode Datagaliwabenaga anda panga dugua ho wia. Panga dugua ho wiyadagoni tamuha Ngode Datagaliwabe ka manda bilonaga Balai Anda Loma Bia Heneore heago handaru. ✧ <sup>6</sup> Dahuliyali kariali bolene hongo karia yu hayaru anda ogoniha howa tagira ibiya. Ti aga dodo nahe peweleore buwa nogo dongone ngolome wabiniru tinaga galuhombeneni wuwabi ibiyago handaru. ✧ <sup>7</sup> Ibiyagola holenehe mariali helene biaru aria mbiragome dahuliyali kariali biaruhondo ndisi ngolome wabini kariaru uruniha Ngode Datagaliwabe ha dege bidane ha ho wiaabo kagonaga keba holene tolaihe miya. ✧ <sup>8</sup> Ani miyagola Ngode Datagaliwabenaga wá taraore holeneha howabi ibunaga hongo holeneha howabi hagua ibunaga anda ogoniha tolai haya. Ani tolai hayagola howa bolene hongo karia dahuliyali kariali biarume yalu ibiyaru bamaro nabiaha mbirali anda biagoha anda pobe nahe haya. ✧

## 16

### *Ngode Datagaliwabenaga keba holene ndisi beha winigonaga te ogo*

<sup>1</sup> Ogoni hondowa hale halu hewaria Ngode Datagaliwabenaga anda biagoha howa dahuliyali kariali biaruhondo bi mbira dalimuore layuago hale haru. Hale halu hewaria ogodagua layua. Ngode Datagaliwabenaga keba holene ndisi be kariaha ngaru dindini odope hole pudaba, lalu layuago hale haru. ✧

<sup>2</sup> Ani layagola dahuliyali mbirago ibugua puwa ibunaga ndisi beha yayago dindini odope haya. Ani biyagola wali agali nogo taranaga magi ho hayarubi nogo tara ogoni ibuni kagobiore wabu wiyagohondo bi pupu wiyarubi uruni ti bibahendeni dere tiwa ale tandaga timbuni bialu bia pani haya. ✧

<sup>3</sup> Dahuliyali mendego ibugua ibunaga ndisi beha yayago iba solowarani odope haya. Ani biyagola iba solowara biago mbirali homenenaga darama ale bu hinalu iba solowaraha berelene biru wiaru bibahende homai haya. ✧

<sup>4</sup> Dahuliyali tebonego ibugua ibunaga ndisi beha yayago iba piyaruriabi iba duguaruriabi odope hayagola iba uruni darama bu hinaya. ✧ <sup>5</sup> Ani biyagola hale halu hewaria dahuliyali iba damene bibahende hondo heagome lalu, Ngode Datagaliwabe í Baya Buruguleore ala henegobi áyu kegoni. Ína daba ki birigo tiga tiga hangu dabarigoni. ✧ <sup>6</sup> Tigua Ngode Datagaliwabenaga wali agali henerubi Ngode Datagaliwabe mana latagi haga henerubi ti balu darama pelayagonaga ína ti darama nelo mo miri. Ani mirigo ti mulene wiadaguaore miri, lalu layuagola hale haru. ✧ <sup>7</sup> Ogoni hale howa hale halu hewaria mbirale lomabu delagane dabu heagoria howa bi mbira layuagome lalu ogodagua layua. Anduane Homogo Ngode Datagaliwabe Hongo Haiheore kego ínaga daba ki bulene henene ngagoriabi tiga tiga ngagoriabi hangu daba ki birili, lalu layuagola hale haru. ✧

<sup>8</sup> Dahuliyali manego ibugua ibunaga ndisi beha yayago nini odope haya. Ani biyagola ni poboyogo gibiore dayagome wali agali delo henge miya. ✧ <sup>9</sup> Wali agali uruni ni poboyogobi dayagome dayagola tigua bolene hongo uruninaga haru haga Ngode Datagaliwabe kago ibunaga mini ha haya. Ani biyago tigua tinaga ko biyaru wahaluh mini beregedowa Ngode Datagaliwabe gibiore kagonaga mini yaraga nahaya. ✧

<sup>10</sup> Dahuliyali daunigo ibugua ibunaga ndisi beha yayago nogo ko tara biagonaga haru howa biragane dagiani odope haya. Ani biyagola nogo tara biagonaga haru

✧ 15:5: Har 38.21 ✧ 15:6: Mo 15.1 ✧ 15:7: 2 Te 1.9, Mo 4.6, 4.9, 10.6, 14.10 ✧ 15:8: Har 40.34, 1 Kin 8.10-11, 2 Bit 5.13-14, Ais 6.4, Ese 44.4, 2 Te 1.9 ✧ 16:1: Iba 69.24, Ais 66.6, Yar 10.25, Ese 22.31, Seb 3.8, Mo 14.10, 15.1, 15.7, 16.17 ✧ 16:2: Har 9.10, Man 28.35, Mo 8.7, 13.12-17 ✧ 16:3: Har 7.17-21, Mo 8.8-9 ✧ 16:4: Har 7.17-21, Iba 78.44, Mo 8.10 ✧ 16:5: Iba 119.137, Mo 1.4, 1.8, 11.17, 15.3 ✧ 16:6: Iba 79.3, Ais 49.26, Md 23.34-35, Mo 11.18, 13.15, 18.20 ✧ 16:7: Iba 19.9, Mo 13.10, 15.3, 16.14, 19.2 ✧ 16:8: Mo 8.12, 14.18 ✧ 16:9: Dan 5.22-23, Mo 9.20-21, 11.13, 14.7, 16.21

holene wiagoria aruma haame hayagola wali agalime tandaga nalu tininaga hége neme pugu naya. ✧ <sup>11</sup> Ani bialu tigua tandaga nayagonagabi dere bu hayagonagabi dahuliya andaganaga Ngode Datagaliwabe ha halu haya. Ani bialu hayago howa tigua tinaga mana ko bialu hayaru wahalu mini beregeda nabiyá. ✧

<sup>12</sup> Dahuliyali waraganego ibugua ibunaga ndisi beha yayago iba timbuni mini Yuberedisi piyagoria odope haya. Ani biyagola ni tagira ibiragohayagi howa kini hearu ibilonaga hariga wilo iba o biago hundiai haya. ✧ <sup>13</sup> Ani biyagola handalu hewaria dama tebira yago handalehe hearia handaru. Dama tebira uruni ti abagua ale biagonaga ne harigaha howabi nogo tara biagonaga ne harigaha howabi mana henene ngadagua ndo latagi haga mbira heagonaga ne harigaha howabi tagira ibalu hearia handaru. ✧ <sup>14</sup> Dama uruni ti dama koore agalime nabiyagane ale bialu hagagonaga dama hea. Dama tebira urunime dindi tara taranaga kini bibahende karu karia piagago pialu kini uruni bibahende Ngode Datagaliwabe Hongo Haiheore kagonaga Horo timbuni harangi wai bilonaga haru íbu mogo bule piaga. ✧

<sup>15</sup> Anduane Homogo ibugua lalu, Ai hale hadaba. I pageali ohowa ibagadagua ibulebero. Ani buleberogo mbirali ibu wali agali bu kagoria ti babe napolebi taga naholebi ibunaga aga mamage halu palia nabi dengala ho kagome turu ho holebira, lalu laya. ✧

<sup>16</sup> Dama tebira biarume kini biaru dindi mbira Hiburu bi lalu mini Amagedono wiagoria haru íbu mogo biya. ✧

<sup>17</sup> Dahuliyali kanego ibugua ibunaga ndisi beha yayago daliga lira odope haya. Ani odope heagola Ngode Datagaliwabenaga andaha handame ho biragane dagia wiagoria howa bi mbira dalimu laraga halu lalu, Ai biaiore ogoni, layuago hale haru. ✧ <sup>18</sup> Uruniore biai heagola hari dababi hari kilikulubi hari kulu timbunibi dumbirumbi gibiorebi biya. Dumbirumbi o biyadagonibiore mbira wali agali wabiniyangi howa biyariabi nahendenego áyu o biyadagoni maru biraliru bagi hene lowa gibiore biya. ✧ <sup>19</sup> Tano timbuni wiago bula tebo bialu dindi bibahendenaga tano wiaru poda holobiya. Ani biyagola Ngode Datagaliwabeanda Babilono tano mini lene timbuni biago mitangi bu dai bialu ibunaga beha howa waini iba ibunaga keba gibiore holene nelu mo na haya. ✧ <sup>20</sup> Dindi iba dege dombeneha wiaru bibahende pu ereba halu hari wearubi bibahende ligua piyabe nigua piyabe toba halu nahandabehe haya. ✧ <sup>21</sup> Dalu dindi guni timbuniore genda tole timbuni genda magi kilogarama pira duria (50) ale hari daligaha howa wali agalini ibira haya. O ibira hayadagoni bolene hongo gibioreyago wali agali Ngode Datagaliwabe ha hayaru biarume tini ibira haya. ✧

## 17

### *Wali mbira kayu dege yaga mini lene berenego te ogo*

<sup>1</sup> Dahuliyali kariali ndisi be karia yu hayaru aria mbirago i hewaria ibuwa lalu, Wali mbira kayu dege yaga mini lene bedago pani ogodagua mulebira lalu walia holiya mba íbu. Wali kayu yaga mini lene ogoni tano timbuni mbira iba dewa poraru angeni bu kago ibuniore laro, lalu laya. ✧ <sup>2</sup> Dindi tara taranaga kini hayarume wali ogoni baba kayu yaga bialu haya. Ani biyagola wali agali dindi bibahendeni hearume ibunaga kayu yulene waini iba nalu no lulu yaga biya. ✧

✧ **16:10:** Har 10.21-22, Ais 8.22, Mo 9.2, 11.10, 13.2 ✧ **16:11:** Mo 9.20-21, 16.21 ✧ **16:12:** Ais 11.15, 41.2, 41.25, Yar 50.38, Mo 9.14 ✧ **16:13:** 1 Yo 4.1-3, Mo 12.3, 12.9, 19.20, 20.10 ✧ **16:14:** 2 Te 2.9, 1 Ti 4.1, Ya 3.15, Mo 16.7, 17.14, 19.6, 19.15, 19.19-20 ✧ **16:15:** Md 24.43-44, Lg 12.39-40, 2 Ko 5.3, 1 Te 5.2, 2 Pi 3.10, Mo 3.3, 3.18 ✧ **16:16:** Hgn 5.19, Seg 12.11, Mo 19.19 ✧ **16:17:** Mo 16.1 ✧ **16:18:** Dan 12.1, Mo 4.5, 8.5, 11.13, 11.19 ✧ **16:19:** Ais 51.17, Yar 25.15-16, Mo 14.8-10, 17.18, 18.5 ✧ **16:20:** Mo 6.14 ✧ **16:21:** Har 9.23-24, Mo 11.19, 16.9-11 ✧ **17:1:** Yar 51.12-13, Mo 16.19, 17.15, 18.16, 21.9 ✧ **17:2:** Ais 23.17, Yar 51.7, Mo 14.8, 18.3



<sup>3</sup> Ngode Datagaliwabe Dinini ibu iha karulo hayagola minime handalu hewaria dahuliyali biago ibugua i dindi ko yobi wali agali nahaga wiagoha haru piya. Dindi ogoriani haru anda piyagola nogo gabua gibi daramabi Ngode Datagaliwabe mini mege bialu bi gili biamehe heagonaga erembirani wali mbira berearia handaru. Nogo gabua gibi ogoni haguane kariahebi hagianeni ne gayane pirahebi hea. ✧ <sup>4</sup> Wali ogoni aga tagalitayabi darama biale bialehebi karulalu yári dewa ngolome wabinirubi tole tara tara muni dewame minirubi pealo yári bulenaga muni dewame minirubi ibunini biame howa berea. Ani buwa be ngolome wabini mbiraha ibu kayu yayagonaga mana ko tara tara ngubiore tolaihe ibunaga gime yu berea. ✧ <sup>5</sup> Wali ogoninaga wanakuini mini mbira galone manda bibe nahe dohe ogodagua gilibu wia. Babilono mini lene timbuni bayanda wali dindi bibahendeni bedarubi mana ko ngubi taraore biaga dindi bibahendeni karubi tinaga aya o beda, lalu gilibu wia. ✧ <sup>6</sup> Wali ogoni handalu hewaria Ngode Datagaliwabenaga wali agali tinaga daramabi Yasuhondo mini mbiraore wiyaru wa nahe wiaabo ho heagola homelo bayarunaga daramabi ibu no lulu yu berea. ✧

Ina ibu handalu mogo lowa handawa biru. <sup>7</sup> Ani birugola dahuliyali biagome ihondo hale lalu, I mogolohondo kego aginagabe. Ina ihondo wali biagonaga mini galone manda bibe nahe do hene wiyagobi nogo tara biago haguane kariahebi hagianeni ne gayane pirahebi ibuni wali ogoni berelaga kagonaga galonebi langulebero. ✧ <sup>8</sup> Nogo gabua gibi ogoni ala henego áyu nahe. Nogo gabua gibi ogoni ibu dindi uli ko dama dege dariba ho ngagoha howa áyu dege tagira ibule kago tagira ibiragola bo home lole haru polebira. Dindi wa nabi howa wali agali haabo holene yu karunaga mini mbugani gilibu ngaru heba gili bimaga nahe karu tigua nogo tara ogoni handaragola mogolo hondolebira. Nogo tara ogoni ala henego áyu nahegoyu lone hapani holebira. ✧

<sup>9</sup> Ogoni manda bule lowa mini gigabiwi holenebi mo manda bia holenebi nga. Nogo gabua gibi biagoria haguane karia hayarunaga galone dindi hambene kariaya. Dindi hambene karia ogoriani wali biago ibu berea. Haguane karia o biaru dege ti dindinaga kini karialiya. ✧ <sup>10</sup> Kini kariali biaru aria duriali homai ho lalu waraganego haru kago kanego ibu áyu nahego mani holebira. Mani ibu harangi ibugua tigi mbira hangu haru holebira. <sup>11</sup> Nogo gabua gibi ogoni ala mbiru ha henego áyu nahe. Ibu kini karia biaru aria dege kini halini kagola ibubi bo waholebira.

<sup>12</sup> Nogo gabua gibi biago hagianeni ne gayane pira hearia handarigo kini pira mani haru holebiraru handari. Ani handarigoni pirali o biarume nogo tara biago baba luore ndo nemandi dege haru helo hongo miragola kini holebira. ✧ <sup>13</sup> Kini pira uruni ti mini mbiraore howa tinaga hongobi haru holene hongobi nogo gabua gibi biagohondo miaga. <sup>14</sup> Tigua Nogo Sibi Igini biago baba wai bulebira. Wai bia bulebirago Nogo Sibi Igini biagobi ibugua wali agali dabo helene ibu talima piaga mini bilinahe karubi ibu heba mandagi howa wai bialu ti bibahende wayali holebira. Ani bulebirago irane ibugua anduane bibahende karunaga Anduane Homogobi kini bibahende karunaga Handame Haga Kinibi ibu ogonibi kagonaga ani bulebira, lalu dahuliyali biagome i langiya. ✧

<sup>15</sup> Dahuliyali biagome langia dege bialu lalu, Ibaru o piyane handarigoriani wali kayu yaga biago bedago iba uruni bibahende ti wali agali dindi tara tarani karubi wali agali ta nabi karubi wali agali tingini tara tara karubi wali agali bi tara tara laga karubi ka. ✧ <sup>16</sup> Ani bidago ai nogo gabua gihinaga hagianeni ne pira hearia handarirumebi nogo gabua gibi ogonimebi wali mbira kayu dege yaga ogoni handabe manga gibi holebira. Ani bialu ibunaga mbirale bibahende ngaru mo yalu pialu ibuni ti babe berelolebira.

✧ 17:3: Mo 12.3, 12.6, 12.14, 13.1, 17.9, 17.12 ✧ 17:4: Yar 51.7, Ese 28.13-16, Dan 11.38, Mo 14.8, 18.6, 18.12, 18.16  
 ✧ 17:5: 2 Te 2.7, Mo 14.8, 16.19, 18.2, 18.9-10, 19.2 ✧ 17:6: Mo 12.11, 13.15, 16.6, 18.24, 19.2 ✧ 17:7: Mo 13.1  
 ✧ 17:8: Iba 69.28, Dan 7.7, 12.1, Mo 11.7, 13.1-3, 13.8-10 ✧ 17:9: Mo 13.1, 13.18 ✧ 17:12: Dan 7.24, Seg 1.18-21, Mo 13.1 ✧ 17:14: Yar 50.44-45, 1 Ti 6.15, Mo 16.14, 19.19 ✧ 17:15: Ais 8.7, Yar 47.2, Mo 13.7

Ani bialu tigua ibunaga tingini nalu ibu irame do mundu lai helolebira.✧ <sup>17</sup> Ogoninaga tigua mandagi howa bilobi tinaga haru holene hongo nogo tara biagohondo milobi Ngode Datagaliwabehanda ibunaga bi mana lo wiyago henene lola helo lowa ibugua tinaga bu miniha bua holene mo helaya.✧

<sup>18</sup> Ai wali ina handarigo ibu tano mini lene timbuni mbira dindi bibahendenaga kini karu ibugua haru hai haga kago handarigoni, lalu langiya.✧

## 18

### *Babilono podo ibira henego ogo*

<sup>1</sup> Ani langiyagola handalu hewaria dahuliyali mende dahuliya andagaha howa dalialu hearia handaru. Ibu haru holene hongo timbuniore yu howa ibunaga wa holleneme dindi bibahendeore wa hagimbu biya.✧ <sup>2</sup> Ibugua bi dalimu laraga halu lalu, Podo ibira haya. Babilono mini lene timbuni biago podo ibira hayaore. Ani biyagoriani ayu dama damene tara tara koore karu ibuha haame ho ka. Ega ko bibahende ta nabi ogoriani biru nga.✧ <sup>3</sup> Ani bidagoni wali agali dindi tara tarani bu hearume ibunaga waini iba nalu hene. Waini iba hongohe ogoni wali agalime dimagoli tara halu kayu yulenaga wini. Dindini kinirume ibu baba kayu yaga bialu haya. Ibugua dimagoli gibiore holleneme dindini biyanaya biaga agaliru tigua tini mo homogo haya, lalu layago hale haru.✧

<sup>4</sup> Ogoni hondowa hale halu hewaria bi mende dahuliya andaga howa lalu,✧

Inaga wali agaliru-o tagira ibidaba.

Tigua ibunaga ko bulene ngagoha nahe

ibunaga pani nolene ngagoha nahe ibuha howa tagira ibai hadaba.

<sup>5</sup> Irane ibunaga mana ko buleneru wima iri iri bialu hari daliga wia iri haradagua bidago.✧

Ngode Datagaliwabehanda ibunaga mana ko bulene uruni embeda nahe mitangi bu ka.

<sup>6</sup> Ibugua tihondo biyadagua tigua nde ogonidagua dege bia dai bidaba.✧

Ibugua bibahende biyagonaga halu ki bia dai bidaba.

Ibugua waini iba hongohe ti nalimulo manda manda bu wiyagonaga

tiguabi ibu nelu waini iba hongo gibiorehe manda manda buwa ibunaga beha tolo bereladaba.

<sup>7</sup> Ibugua ibuninaga wa holenebi dindi dabudabu au lolebe tobahebi mo mogo bu wiyadaguaore.✧

tigua ibuhondo tandaga nolenebi genda holenebi mo midaba.

Irane ibugua ibunihondo laabo halu lalu,

I kuini wali bayale bedo.

I wali dalo ndo bedo.

I genda holene mbira manda nabiore birulebero, lalu beda.

<sup>8</sup> Ibugua o layadagoninaga horo mbiru hanguni bolene hongoharume ibu bolebira.✧

Bolene hongo uruni warago tara tarabi genda holenebi hina gari polenebi nga.

Ogoni ibu dabagane Anduane Homogo Ngode Datagaliwabe ibu hongo gibiorehe ka.

Ani bidagonaga irame Babilono dai holebira,

layago hale haru.

<sup>9</sup> Dindi bibahendenaga kini ibu baba kayu yulenebi dimagoli holenebi bialu hararume Babilono daragonaga hagua hungu biraru hondowa dugu yiyi lalu bulebira.✧✧

✧ **17:16:** Yar 50.41-42, Ese 16.37, Mo 18.8, 18.16 ✧ **17:17:** 2 Te 2.11, Mo 10.7 ✧ **17:18:** Mo 12.4, 16.19 ✧ **18:1:** Ese 43.2, Mo 17.1 ✧ **18:2:** Ais 13.21, 14.23, 21.9, 34.11, Yar 50.39, 51.8, Mo 14.8 ✧ **18:3:** Ais 23.17, 47.15, Yar 51.7, Mo 14.8, 17.2, 18.11, 18.15 ✧ **18:4:** Ais 48.20, Yar 50.8, 51.6, 51.45, 2 Ko 6.17 ✧ **18:5:** Pig 18.20-21, Yar 51.9, Mo 16.19 ✧ **18:6:** Iba 137.8, Yar 50.15, 50.29, 51.24, 51.49, 2 Te 1.6, Mo 14.10, 16.19 ✧ **18:7:** Ais 47.7-9 ✧ **18:8:** Yar 50.34, Mo 11.17, 17.16, 18.10 ✧ **18:9:** Yar 50.46, Ese 27.30-35, Mo 17.2, 18.3, 18.18, 19.3 ✧ **18:9:** Ese 26.16-17

<sup>10</sup> Tigua ibu heba tandaga namaga holene gi howa ti amura kaundiaha holebira. Ani howa tigua lalu, Daraore abida dara gibiore auda. Babilono tano mini lene timbuni gibiore hayago bame emene tigi mbira tomo dawa duguabehe hanguni pani miyada, lalu laga.✧

<sup>11</sup> Dindini biyinaya biaga agali hearumebi Babilono mitangi bialu hame lowa dugu biagago irane tinaga dabudabu yolo mulene wiaru henge nawiore wiya.✧ <sup>12</sup> Tinaga ngolo silibabi tole tara tara baya gibiorebi mbirale mini pealo muni dewa miagarubi tinaga aga labolabo baya tara tararu peleorebi tagalitayabi darama biale bialehebi ira tara tararu ngabibi nogo tara timbuni mini elebeninaga ne gayaneme wabinirubi ira yolo timbuni miagarubi ege tole boronosime wabinirubi aeaneme wabinirubi tole tara mini mabolome wabinirubi✧✧ <sup>13</sup> tomo mo dende bia hagane mini sinimonobi sibaisibi monodoro palena alebi mbirale hagua ngabilo delagane mini inisenesibi ira mbiranaga ibane mini muwebi mbirale ira wagaya ngabiorerubi nolenenaga waini ibarubi welirubi balawarubi widirubi nogo bulumagarubi sibirubi hosirubi nogo hosirume gili lagane garo mini karisirubi garabaya biabe ale biagarubi wali agalirubi uruni bibahendeore yolo namibeheyagola biyinaya biaga biarume hame lowa dugu biya. <sup>14</sup> Biyinaya biaga urunime Babilonohondo lalu, Mbirale dabudabu bibahende ina wua harigo damene ereba hai haya. Ani bialu inaga homogo holene damene biarubi yari yari biarubi pu ereba hayago lone handa walia naholebere, laga ka. <sup>15</sup> Dindini biyinaya biaga agali tano ogoriani howa biyinaya bialu homogo hayarume ibu heba tandaga namaga holene gi howa amura kaundiaha holebira. Ani howa tigua hame lowa dugu bialu✧ <sup>16</sup> lalu, Tano mini lene ogoni daraore abida dara gibiore auda. Ibu aga labolabo baya tara tararu peleorebi tagalitayaorebi darama biale bialehebi karulalu yari dewa ngolome wabinirubi tole tara tara muni dewame minirubi mbirale mini pealo muni dewame minirubiibunini biame haya.✧ <sup>17</sup> Ani buwa emene tigi mbira tomo dawalu duguabehe hanguni homogo holene uruni bibahende wahaiore haya, lalu laga.✧

Iba sibi hondo haga hearubi wali agali yolo buwa berearubi iba sibi yaga hearubi iba sibini howa yolo biabe biaga bibahende hearubi amura kaundia howa <sup>18</sup> ibu daragonaga hagua hungu biyaru hondowa bi hongo howa laraga lalu lalu, Tano mini lene timbuni ogonibi mende nawiore, laga.✧ <sup>19</sup> Ani lalu tinaga hagianeni be abalu dugua ba daga lalu ibu hame lowa dugu bialu lalu, Tano mini lene timbuni ogoni daraore abida dara gibiore auda. Iba sibi anduane iba sibi biabe solowarani bialu karu tano ogoriani bu wiarume ti mo homogo haya. Ani buwa emene tigi mbira tomo dawalu duguabehe hanguni homogo holene uruni bibahendeore wahaiore haya, laga.✧

<sup>20</sup> Babilono bo mundu layagonaga dahuliya andaga kamirume turu hadaba. Ngode Datagaliwabenaga wali agalirumebi abosolorumebi Ngode Datagaliwabe mana latagi hagarumebi turu hai hadaba. Irane tihondo biaga biago ibu Ngode Datagaliwabehanda pani tiga tiga mulene wiadagua miya.✧

<sup>21</sup> Dahuliyali hongo gibiheore mbirame tole timbuni mo yaraga howa iba solowaraha bape lalu lalu, O bape harogonidagua tano mini lene timbuni Babilono biagobi bope lalu mani lone handabe naheore holebira.✧ <sup>22</sup> Babilono iha gawa ale timbuni laraligobi wali agalime bi laraligobi pilipe laraligobi mbelo biguli laraligobi mani lone hale naholebiraore. Biabe tara tara bu manda buwa biagaru iha karia mani lone nahondolebiraore. Ani bialu balawa wabiaganaga widi lini dambiagane toleme bi larago mani lone hale naholebiraore.✧ <sup>23</sup> Iha lamu halenaga wa karia mani lone

✧ **18:10:** Ais 21.9, Dan 4.30, Mo 14.8, 18.17-19 ✧ **18:11:** Ese 27.31, 27.36 ✧ **18:12:** Mo 17.4 ✧ **18:12:** Ese 27.12-13, 27.22 ✧ **18:15:** Ese 27.31, 27.36 ✧ **18:16:** Mo 17.4 ✧ **18:17:** Ais 23.14, Ese 27.26-30 ✧ **18:18:** Ese 27.32, Mo 13.4 ✧ **18:19:** 1 Sml 4.12, Ese 27.30-34 ✧ **18:20:** Man 32.43, Ais 44.23, Yar 51.48 ✧ **18:21:** Yar 51.63-64, Ese 26.21, Mo 12.8, 16.20 ✧ **18:22:** Ais 24.8, Yar 25.10, Ese 26.13

nahondolebiraore. Ani bialu wandarirubi wandari uruni dabu biagarubi tigua dabu bialu howa bi larago mani lone nahale holebiraore. Dindi bibahendeni biyinaya biaga karu aria inaga biyinaya biaga agalirume ti bolangua howa hongoheore hea. Ani biago ina ke howa gamu gamu tara tara birigome wali agali dindi bibahendeni hearu mo hondo hari, lalu layago hale haru.✧

<sup>24</sup> Ngode Datagaliwabe mana latagi haga hearunaga darama Ngode Datagaliwabenaga wali agali hearunaga daramabi dindini howa wali agali bo wahayaru bibahendenaga darama Babilonoha wiaria handa walia hayagonaga Babilono pani miya.✧

## 19

<sup>1</sup> Ogoni hondowa mani hale halu hewaria bi timbuni wali agali dewaore laradagua bialu dahuliya andagani howa lalu, Pele mulenebi mini lene lolenebi hongo holenebi ina Ngode Datagaliwabenaga ngago ibunaga mini yaraga hama. <sup>2</sup> Ibunaga daba ki bulene henenebi tiga tigabi ngagoria ibugua daba ki biaga ka. Ani biaga kago ibugua wali kayu biaga biago ibunaga kayu yuleneme dindini wali agali mo ko halu hayago pani tiga tiga mulene wiadagua miya. Wali ogoni ibugua Ngode Datagaliwabenaga biabe bia haga hearu homelo bayagonaga Ngode Datagaliwabeanda ibuhondo pani miya, laya.✧ <sup>3</sup> Ani lowa tigua lone laraga halu lalu, Tano mini lene timbuni biago dayagonaga hagua iraga ha dege bidane iraga ha ho nga. Ani bidagonaga Ngode Datagaliwabenaga mini yaraga hama, lalu laya.✧ <sup>4</sup> Ani layagola dahuliyali haru haga pira kirani maria (24) biarubi holenehe maria helene biarubi tigua bulu palu ibira howa Ngode Datagaliwabe ibu ibunaga handame ho biragane dagiani bereagonaga mini yaraga halu lalu, Aniore bilo Ngode Datagaliwabenaga mini yaraga hama, laya.✧

### *Nogo Sibi Igini dabu bulebiragonaga tomo nolene ngago ogo*

<sup>5</sup> Ogoni hale howa hale ha ho dege bialu hewaria bi mbira handame ho biragane dagia wiagoria howa lalu, Ngode Datagaliwabenaga biabe bia haga bibahenderubi wali agali emene timbunibi ibuhondo henene mitangi biaga bibahenderubi iname inanaga Ngode Datagaliwabe mini yaraga hama, layuago hale haru.✧ <sup>6</sup> Hale ha ho wiwaria dege wali agali dewalime bi laradagua bialubi iba pora bialu ue laradagua bialubi hari kilikulu laradagua bialubi layuagoha howa tigua lalu, Anduane Homogo inanaga Ngode Datagaliwabe Hongo Haiheore kago ibu Handame Haga Kiniore kagoni. Ani kago iname ibunaga mini yaraga hama.✧ <sup>7</sup> Ani bidagonaga iname turu halu kaj lowa ibu gibiore kagonaga mini yaraga hama. Nogo Sibi Igini biago dabu bulene tu halu dabu biagagome ibu dabu bilo lowa manda manda bu halu biyadagoni.✧ <sup>8</sup> Wandari dabu bule biyagohondo aga labolabo pele dodo nahe demborerebi minigo bu ka, lalu layago hale haru. Aga labolabo ogoni Ngode Datagaliwabenaga wali agalirume mana bayale biniru lalu wini.✧

<sup>9</sup> Ogoni hale ho hewagola dahuliyali biagome ihondo lalu, Bi o larago gili bia. Nogo Sibi Igini dabu biragonaga tomo nole ibalimu leneru ti turu ho holene nga, laya. Dahuliyali ogonime ani lowa latago halu lalu, Bi uruni Ngode Datagaliwabenaga bi heneneore nga, lalu langiya.✧

<sup>10</sup> Ani langiyagola ina ibunaga geha duli hanga halu bulu paluwa ibuhondo lotu lolebiruria ibugua ihondo lalu, Ani nabibe. I ibi hamene mbaliniru Yasuhanda mana

✧ 18:23: Ais 23.8, 47.9, Yar 16.9, 33.11, Nah 3.4, Mo 17.2, 17.5 ✧ 18:24: Yar 51.49, Md 23.35, Mo 17.6 ✧ 19:2: Man 32.43, 2 Kin 9.7, Mo 6.10, 15.3, 16.7, 18.20 ✧ 19:3: Ais 34.10, Mo 14.11, 18.9, 18.18 ✧ 19:4: Neh 8.6, Mo 4.2-6, 4.10, 5.14 ✧ 19:5: Iba 22.23, 115.13, 134.1, 135.1, Mo 11.18, 20.12 ✧ 19:6: Iba 93.1, 97.1, 99.1, Ese 1.24, Mo 11.15-17, 14.2, 15.3, 21.2 ✧ 19:7: Md 22.2, 25.10, Eb 5.32, Mo 21.2, 21.9 ✧ 19:8: Iba 45.13-14, Ais 61.10, Ese 16.10 ✧ 19:9: Md 22.2-3, Lg 14.15-16, Mo 21.5

henene mo pani hayago yani ho karubi aria biabe bia haga kogoni. Ani bidogo Ngode Datagaliwabe hangu mitangi bialu lotu lolene nga, laya.✧

Yasuhanda mana henene mo pani hayagome Ngode Datagaliwabe mana latagi haga karu mo mitangi bia haga.

*Mbirali nogo hosi pagabuani biralu piagane heago ogo*

<sup>11</sup> Ogoni hale howa handalu hewaria dahuliya andaga dugua ho wiagoria nogo hosi pagabua mbira hearia handaru. Nogo hosi ogoriani biralu piagane heago ibu mini Bilinahebi Henenebi hea. Aniyago tiga tiga buleneme ibugua mo daba ki bialubi wai bialubi hagaya.✧ <sup>12</sup> Ibunaga de ira hungu ale howa ibunaga hagianeni haru haga manda dewa bu heneya. Ibuni mini mbira gilibu wiago ogoninaga irane ogo aledalo mbiralime manda bibe nahe ibuni hangume manda bida.✧ <sup>13</sup> Ibuni aga lu karulo heago darama hrame heya. Ibuni mini wiago Ngode Datagaliwabenaga Bi wia.✧ <sup>14</sup> Dahuliya andanaga ami bu hearume aga labolabo pele dodo nahe buwa nogo hosi pagabua dewani biralu ibu piyadagua talima piya.✧ <sup>15</sup> Ibunaga ne harigaha howa wai biagane ayu tibu ne gadeleheore mbira tagira ibiragome wali agali dindi tara tarani bu karu bo hana halu wayali holebira. Ani buwa ibugua hongo taraore holene yu howa wali agali biaru haru holebira. Ani bialu Ngode Datagaliwabe Hongo Haiheore kagonaga keba gibi holene gerebi lini pingidagane ege tole guabawa uliha howa waini iba ibilo hingedalu pingida tagi holebira.✧ <sup>16</sup> Ibunaga aga luninibi ge mbarianenibi mini ogodagua gilibu wia, Kini bibahende karunaga Handame Haga Kinibi anduane homogo bibahende karunaga Anduane Homogoorebi i kogoni, lalu gilibu wiago handaru.✧

<sup>17</sup> O handarudagoni hondowa handalu hewaria dahuliyali mbira nini heyu hearia handaru. Heyu howa ibugua ega yagalo yu ibaga bu hearu bibahendehondo bi laraga halu lalu, Ngode Datagaliwabenaga tomo timbuni nolene ngago nole mo mogo bu hole ibidaba. <sup>18</sup> Tigua ibuwa kinirunaga tinginibi ami haru haga hagianerunaga tinginibi ami agalirunaga tinginibi nogo hosirunaga tinginibi nogo hosini biralu piagarunaga tinginibi wali agali garabaya biabe ale bia hagarunagabi nabinirunagabi timbunirunagabi emenerunagabi uruni bibahendenaga tingini nole ibidaba, lalu laya.✧

<sup>19</sup> Handa dege bialu hewaria nogo tara biagobi dindinaga kinirubi tinaga ami agalirubi mo mogo buwa tigua mbirali nogo hosini biralu piaga biagobi ibunaga amirubi baba wai bulebiya.✧ <sup>20</sup> Ani bule biyagola nogo gabua gibi biagobi ibunaga wanakuini howa mana henene ngadagua ndo latagi haga agalime nabiagane ale biyago ibubi minaya. Mana henene ngadagua ndo latagi haga biago ibugua agalime nabiagane ale biyarume nogo gabua gibi biagonaga magihe hayarubi wali agali nogo gabua gibi ogoni ibuni kagobi wabu wiyagohondo bi pupu wiaga hayarubi ti mo hondo haya. Nogo tara ogonibi mana henene ngadagua ndo latagi haga biagobi minayadagoni minuwa ira hungu bialu ege tole ale mini salobame da ho wiagoria ti dere minu bape haya.✧ <sup>21</sup> Mbiralali nogo hosini biralu piaga biagonaga ne harigaha howa wai biagane ayu tibu mbira tagira ibiyagome tinaga ami agaliru bo home lai haya. Ani biyagola ega bibahendeme ibuwa tingini uruni nalu nabe manga haya.✧

## 20

*Mali daosini mbirani (1,000) dama Heyolabe garabaya helolebira lenego ogo*

<sup>1</sup> Ina ani handa ho dege wuwa handalu hewaria dahuliyali mbira dahuliya andaga howa dalipe hayago handaru. Ibunaga gini dindi uli ko dama dege dariba ho ngagonaga

✧ **19:10:** Ab 10.25-26, 1 Yo 5.10, Mo 22.6-9 ✧ **19:11:** Iba 96.13, Ais 11.4, Ese 1.1, Mo 1.5, 3.14, 6.2, 15.5 ✧ **19:12:** Dan 10.6, Mo 1.14, 2.17-18, 19.16 ✧ **19:13:** Ais 63.1-3, Yo 1.1, 1.14, 1 Yo 5.7-8 ✧ **19:14:** Md 28.3, Mo 4.4, 7.9 ✧ **19:15:** Iba 2.9, Ais 63.3, Yol 3.13, 2 Te 2.8, Mo 1.16, 2.27, 4.8, 12.5, 14.19-20 ✧ **19:16:** 1 Ti 6.15, Mo 17.14, 19.12 ✧ **19:18:** Ese 39.17-20 ✧ **19:19:** Iba 2.2, Mo 16.16, 17.13-14 ✧ **19:20:** Ais 30.33, Dan 7.11, Mo 13.1-18, 14.10, 16.13-14, 20.10, 20.15 ✧ **19:21:** Mo 17.16, 19.15-18



panga duguagane gibi pu seni timbuni hongohobi yalu daliya.✧ <sup>2</sup> Ogoni ibu daluwa ibugua abagua ale timbuni puya bambaore winigo ibu mini dama Heyolabe biago minuwa pu seni biagome mali daosini mbirani (1,000) dariba ho helaya.✧ <sup>3</sup> Mali daosini mbira (1,000) ogoni napedaha dama ogoni ibugua wali agali dindi tara tarani bu karu mo hondo nahelo lowa dahuliyali biagome dama ogoni dindi uli ko dama dege dariba ho wiaga biagoha minu bape halu panga logo ha anda howa duguabe nahe ndelaheore paya anda haya. Mali daosini mbira (1,000) pedagola dama ogoni ibu tigi mbira hangu tagira pu helolebira.✧

<sup>4</sup>Handa ho dege wuwa handalu hewaria haru howa biragane dagiaru handaru. Haru howa biragane dagia urunini berearuhondo mo daba ki bulene hongo miya. Ogoni hondowa wali agali Yasuhanda mana henene latagi hayagobi Ngode Datagaliwabenaga bi manabi tigua lamialu hayagola bo wahayarunaga dinini hearu handaru. Tigua nogo gabua gibi biagobi nogo ogoni ibuni kagobiore wabu wiyagobihondo bi pupu nawini. Nogo gabua gibi ogoninaga magi tinaga wanakuiniyaguabi giniyaguabi namia dege biya. Uruni ti homalu heyu dai bialu ti kini howa Keriso heba mali daosini mbirani (1,000) handame ho haya.✧ <sup>5</sup> Wali agali maru homene bibahenderu ti mali daosini mbira (1,000) piyai heagola mo heya halu dai bu helaya. O biyadagoni wali agali homayaru pigane mo heya halu heyi layadagoni. <sup>6</sup> Wali agali pigane o mo heya halu heyi layadagoniha howa mo heya hamaga hayaru ti mo bayale ho helayagola turu timbuniore ho ka. Ani bidago homagane homa mendeme ti home lolene hongo nawi. Ani bidago ti Ngode Datagaliwabebi Kerisobi libunaga loma binigo mo miaga howa tigua Keriso heba mali daosini mbirani (1,000) handame ho holebira.✧

#### *Ngode Datagaliwabehanda dama Heyolabe bope halu wayali henego ogo*

<sup>7</sup> Ai mali daosini mbira (1,000) ogoni piyai haragola dama Heyolabe logo ha anda howa garabaya helayago dugua halu yupe holebira. <sup>8</sup> Ani biragola ibugua dindi bibahendeni wali agali tara tara ho giligalalo karu mo hondo hole tagira polebira. Dindi bibahende ogoni mini Gogo Magogola nga. Dama Heyolabe ibugua uruni bibahende wai bilo mo mogo bulebira. Mo mogo biragola dewa au lolebe tobahe iba mu emene emene iba solowara angeni ngaligobi holebira.✧ <sup>9</sup> Uruni tigua dindi bibahendeha purogo lai halu Ngode Datagaliwabenaga tano ibu gubalini hagane wiagobi ibunaga wali agali tano ogoniha haga bu hearubi ho mabu biai holebira. Ani bu hearia dahuliyala andagaha howa ira deaore ibira halu ti do mundu lelaya.✧ <sup>10</sup> Ani bialu dama Heyolabe wali agali dindi tara tarani bu hearu mohondo haga biago minuwa ira hungu bialu ege tole ale mini saloba heba do kundi bu wiagoria bape haya. O bape hayadagoni nogo tara biagobi mbirali mana henene ngadagua ndo latagi haga biagobi bape hayagoria dege bape haya. Ani biyago ti ogoriani horombe mbiragabi da dege bialu heane da ho wiaabobo holebiraore.✧

#### *Daba ki bumaro bulene ngago ogo*

<sup>11</sup> Ina ani handa ho dege wuwa handalu hewaria handame ho biragane dagia timbuniore mbira pele wiagobi ogoriani mbirali bereagobi handaru. Ibu heagoria howa dindi bibahendebi hari daligabi pu ereba hai halu lone handabe nahe haya.✧✧ <sup>12</sup> Ani biyagola wali agali timbuni emenerubi ala homayaru handame ho biragane dagia wiago wanakuihayagi heyu hearia handaru. Ani handalu hewaria ogoriani mbuga dewa angala ho wia handaru. Mbuga urunini wali agali homene daibu hearu tini ala biyarunaga gilibu wiadagua mo daba ki biya. Ani buwa mbuga tara mbira haabo

✧ **20:1:** Mo 1.18, 9.1 ✧ **20:2:** Pig 3.1, 2 Pi 2.4, Yu 6, Mo 12.9 ✧ **20:3:** Dan 6.17, Yu 6, Mo 16.14-16, 20.8 ✧ **20:4:** Dan 7.9, 7.22, 7.27, 1 Ko 6.2, 2 Ti 2.12, Mo 6.9, 13.12-17 ✧ **20:6:** 1 Pi 2.9, Mo 1.6, 2.11, 20.4 ✧ **20:8:** Ese 7.2, 38.2, 38.9, 38.15, Mo 16.14, 20.10 ✧ **20:9:** 2 Kin 1.10, Ese 38.9, 38.16, 39.6 ✧ **20:10:** Pig 19.24, Iba 11.6, Mo 14.10-11, 19.20, 20.8, 21.8 ✧ **20:11:** Dan 2.35, 2 Pi 3.7, 3.10-11 ✧ **20:11:** Dan 7.9-10

holene yu karunaga mini gilibu wiagoria mbuga ogoni angalo wiya. ✧ <sup>13</sup> Iba solowaraha homayaru ti dai bu haya. Homagane homaha howabi humbirini andagaha howabi homeneru dai bu hai haya. Ani biyagola tini hangu hangume bialu hayadagua mo daba ki biya. ✧ <sup>14</sup> Ani buwa homaganenagabi humbirini andanagabi ira timbuni da ho wiagoria bape haya. Ira timbuni do ho wiagoria bape hayadagoni homagane homa mende ogoni. ✧ <sup>15</sup> Wali agali haabo holene yu karunaga mini mbugani gilibu ngaru heba gili bimaga naheru ti ira timbuni da ho wiagoria minu bape haya. ✧

## 21

### *Hari daliga gahengebi dindi gahengebi wia aribia holebirago ogo*

<sup>1</sup> Uruni bibahende biyago handai howa handalu hewaria hari daliga gahengebi dindi gahengebi wiago handaru. Hari daliga pigane wiyagobi dindi pigane wiyagobi pu ereba halu iba solowarabi ligua piyabe nigua piyabe toba haya. ✧ <sup>2</sup> Ani biyagola handalu hewaria Tano Loma Bia Hene Yarusaleme gahenge biago dahuliya andaga Ngode Datagaliwabe kagoha howa tagira ibalu daliya. O daliyadagoni wandarime ibu agalini lola hole yári buwa manda manda bialu howa ibiradagua bialu daliya. ✧ <sup>3</sup> Ani daliagola handame ho biragane dagia wiagoria howa bi mbira dalimu lowa lalu, Ai Ngode Datagaliwabenaga anda wali agali bibahende kagoria ka. Ani bidago Ngode Datagaliwabe ibu ti baba halu tiibunaga wali agali holebira. Ngode Datagaliwabe ibuni ti baba mandagi halu ibu tinaga Ngode Datagaliwabe holebira. ✧ <sup>4</sup> Ani bialu ibugua tinaga deni de iba karu domo waholebira. Homolene homabi dara holenebi dugu bulenebi tandaga holenebi nawuleore bira. Mbirale ala tawe wiyaru mo ereba hai haya, lalu laya. ✧

<sup>5</sup> Ani leagola handalu hewaria mbirali Ngode Datagaliwabenaga handame ho biragane dagia biagoriani bereagome lalu, Ai áyu ina mbirale bibahende gahenge wabu aribia haro, lowa ibugua ihondobi bi lalu, Bi ogo henene lara manda bialu mini bilinaho habehego gili bia, laya. ✧ <sup>6</sup> Ani lowa ibugua lalu, Mbirale biaruni biai haya. I ala harugobi mani holeberogobi piganeorebi mahaorebi ko. Mbirali iba noa haragohondo ina haabo holene ngiagane iba duguaragoha yolo nabi bame nelo henge mulebero. ✧ <sup>7</sup> Ani buleberogo wayali hararume bibahende iha howa mo yulebirago ogo. Tinaga Ngode Datagaliwabe i halu tibi nde inaga waneigini holebira. ✧ <sup>8</sup> Ani bulebirago dari karubi ke haga karubi mana ko taraore biaga karubi wali agali homelo bo wahaga karubi wali agali kayu biaga karubi tomia tara tara biaga karubi gime wabiniruhondo bi pupu wiaga karubi ke haga karubi ti bibahende ira hungu bialu ege tole ale mini saloba heba da ho wiagoria holebira. Ani bulebiragoni homagane homa mende ogoni, laya. ✧

### *Yarusaleme gahenge ibulebira lenego ogo*

<sup>9</sup> Dahuliyali karia ndisi be kariani bolene hongo toloyi biaru aria mbiragome i hewaria ibuwa lalu, Ina Nogo Sibi Igini biagonaga one dabu biyago i walia holiya mba ibu, laya. ✧ <sup>10</sup> Ani layagola Ngode Datagaliwabe Dinini ibu iha karulo hayagola minime handalu hewaria dahuliyali biago ibugua i hari timbuni weago neneni yalu pu helaya. Ani buwa ibugua Yarusaleme Tano Loma Bia Hene biago dahuliya andaga

✧ **20:12:** Dan 12.1, Md 16.27, 25.31-46, Ab 17.31, Lm 2.6, 2 Ko 5.10, Pb 4.3, Mo 13.8, 19.5 ✧ **20:13:** Lm 2.6, 1 Pi 1.17, Mo 2.23, 6.8, 20.12, 22.12 ✧ **20:14:** 1 Ko 15.26, 15.54-55, Mo 20.6, 21.8 ✧ **20:15:** Mo 13.8, 19.20 ✧ **21:1:** Ais 65.17, 66.22, 2 Pi 3.13, Mo 20.11 ✧ **21:2:** Ais 52.1, 61.10, Ga 4.26, Hi 11.10, 11.16, 12.22, Mo 3.12, 21.10 ✧ **21:3:** LBM 26.11-12, 2 Bit 6.18, Ese 37.27, 43.7, Seg 2.10, 2 Ko 6.16, Mo 7.15-17 ✧ **21:4:** Ais 25.8, 35.10, 61.3, 65.19, 1 Ko 15.26, 15.54, Mo 7.17, 20.14 ✧ **21:5:** Ais 43.19, 2 Ko 5.17, Mo 4.2, 4.9-10, 19.9, 20.11 ✧ **21:6:** Ais 55.1, Yar 2.13, Yo 4.10, 4.14, 7.37, Mo 1.8, 1.17, 16.17, 22.13, 22.17 ✧ **21:7:** 2 Sml 7.14, Iba 89.26-27, Seg 8.8, Hi 8.10 ✧ **21:8:** Md 25.41, Eb 5.5, 1 Ti 1.9, Hi 12.14, Mo 19.20, 20.14-15, 21.27, 22.15 ✧ **21:9:** Mo 15.1, 15.6-7, 19.7-9

Ngode Datagaliwabe kagoria howa dalipe halu hearia ihondo walia haya.☆ 11 Tano ogoriani Ngode Datagaliwabenaga wá taraore holeneme ngiringaralo yalu dalipe halu hea. Toḷe muni dewame miagane mini yasababi ngalayi handalehe mbirabi ngiringara laradagua lea.☆ 12 Tano ogoni pabe timbuni daliga bu mabubi panga haraba homberriaya (12). Panga haraba homberria (12) uruni dahuliyali homberialime (12) handaya ho hea. Panga haraba urunini Isaraele hameigini homberria (12) biarunaga mini gilibu wia.☆ 13 Ani buwa tano ogoni lene leneha panga tebira ni tagira ibiragohayagi tebira mende unurahayagi tebira tebone uyura leneha tebira mane ni paliragonaga leneha halu bia. 14 Tano ogoninaga pabe toḷe gene hongohe homberiani (12) bia. Toḷe gene ogoriani Nogo Sibi Igini biagonaga abosolo homberiali (12) biarunaga mini gilibu wia.☆ 15 Dahuliyali ihondo bi layago ibugua tano biagonaga magibi panga biarunaga magibi pabe biagonaga magibi manda bule kanogo mbira ngolome wabini mbirale manda biagane gambe homane luni ale yu hea.☆ 16 Tano ogoni yanganaga magibi luninaga magibi ogobi labolaboya. Dahuliyali biagome tano ogoninaga magi manda biagane yiagome magi manda bialu hearia timbu gibiore halu lunagabi aranenagabi daliganagabi magi urubi dege dege kilomida daosini kirani handari kira (2,200) agima haya. 17 Dahuliyali biagome pabe biago daliganaga magibi manda bialu hearia mida pira waragariani duria (65) agima haya. Magi iname manda beramalidagua ibugua manda biya.

18 Pabe bu mabu biago toḷe mini yasabame wabialu tano ibuni ngolo ngalayi handalehe hangume wabiniya.☆ 19 Tano ogoninaga pabe toḷe gene hongohe homberiani (12) toḷe tara tara muni dewa miaganerume yári bume hea. Toḷe gene hongohe bia aria toḷe mini uru. Mbirago yasababi mendego sabaiabi tebonego agadebi manego emeralabi 20 daunigo onegisibi waraganego kanelianabi kanego toḷe ambuabi mini kosibi halinigo berilibi dinigo tobasabi pinigo kelesedonibi beanego tegosibi hombeanego amedisibi uruni bibahendeni pabe biago bia. 21 Panga homberria (12) biaru pealo homberriame (12) wabiniya. Uruni aria mbira mbirago pealo homane mbira mbirame wabiniya. Tano biagonaga hariga piagane wiago ngolo ibuni ngalayi handalehe hangume wabiniya.☆

22 Tano o handarudagonioreha Ngode Datagaliwabenaga anda mbira naheoreya. Ani naheyago irane tano ogoninaga anda Anduane Homogo Ngode Datagaliwabe Hongo Haiheore kagobi Nogo Sibi Igini biagobi libuni haame ka.☆ 23 Ngode Datagaliwabenaga wá taraore holene kagome wá haba halubi Nogo Sibi Igini biago ibuni tano ogoninaga lamu halebi kago kagola tano ogoriani nibi egebi dolene henge nawiya.☆ 24 Anidagua bidagome wali agali dindi bibahendeni karume tano ogoninaga wá holeneha ibaga bu holebira. Ibagu bu howa dindinaga kinirume tinaga homogo holene mbiraleru yalu anda ibulebira.☆ 25 Tano ogoninaga panga biaru horo bibahendengi paya nabi dugua ho wiaabo holebira. Dugua ho wiaabo holebirago irane tano ogoriani mbi lolene nawigome ani wulebira.☆☆ 26 Wali agali dindi tara tarani bu karu tinaga baya tara holenebi homogo holenebi tano ogoniha yalu anda ibulebira.☆ 27 Ani bia bulebirago mbirale dodoherubi mbirali mana tagabi ngaru biaga kagobi ke haga kagobi tano ogoriani anda naibulebiraore. Haabo holene yu karunaga mini Nogo Sibi Igini biagonaga mbuga ngagoriani gili buwi karu ti dege ogoriani anda ibulebira.☆

☆ 21:10: Ese 40.2, Mo 1.10, 17.3, 21.2 ☆ 21:11: Ais 60.1-2, 60.19, Mo 21.23, 22.5 ☆ 21:12: Ese 48.30-35 ☆ 21:14: Md 16.18, Ga 2.9, Eb 2.20, Hi 11.10 ☆ 21:15: Ese 40.3, Seg 2.1, Mo 11.1 ☆ 21:18: Ais 54.11-12 ☆ 21:21: Mo 21.12, 21.18 ☆ 21:22: Yo 4.23, Mo 15.3 ☆ 21:23: Ais 60.19-20, Mo 21.11, 22.5 ☆ 21:24: Ais 60.3-5, 66.12 ☆ 21:25: Seg 14.7, Mo 22.5 ☆ 21:25: Ais 60.11 ☆ 21:26: Ais 66.12, Mo 21.24 ☆ 21:27: Ais 35.8, 52.1, 60.21, Ese 44.9, Yol 3.17, 1 Ko 6.9-10, Pb 4.3, Mo 13.8, 20.12, 21.8, 22.14-15

## 22

<sup>1</sup> Uruni walia howa dahuliyali biagome lone walia halu haabo holene ngiagane iba ngalayi ngiringara laradaguabi mbira Ngode Datagaliwabebi Nogo Sibi Igini biagobinaga handame ho biragane dagia ngagoria howa tagira ibalu<sup>☆</sup> <sup>2</sup> tano ogoninaga hama hanunini pialu heago walia haya. Haabo holene ngiagane iba biago ange mendeha mendehabi haabo holene ngiagane ira hea. Ira uruninaga lini mali mbiranaga ege mbira mbirani hombe (12) halu daga biagaya. Aniyago ira uruni yunirume wali agali dindi tara tarani bu karu mo dabi hagane hea.<sup>☆</sup> <sup>3</sup> Mbirale bibahende Ngode Datagaliwabehanda ha hene karubi ngarubi tano ogoriani nahondolebiraore.<sup>☆</sup>

Ngode Datagaliwabebi Nogo Sibi Igini biagobi libunaga handame ho biragane dagia wiago tano ogoriani wiragola Ngode Datagaliwabena biabe bia haga karume ibuhondo mitangi bialu lotu lolebira. <sup>4</sup> Wali agali uruni tinaga wanakuini Ngode Datagaliwabena mini gilibi howa tigua ibunaga dengui hondolebira.<sup>☆</sup> <sup>5</sup> Anduane Homogo Ngode Datagaliwabe ibu tinaga wá holene holebirago mbi lalu aruma holene nawiragola tigua lamu hale delolenebi ni dolenebi nawulebira. Ani biragola wali agali uruni kinime haru hagadagua tigua ogonibi howa ha ho wia dege bidane ha ho wiaabobo holebira.<sup>☆</sup>

### *Yasu ibu dai bulebirago ogo*

<sup>6</sup> Dahuliyali biagome ihondo lalu, Bi uruni henene lara manda buwa mini dunubia ho holene nga. Ani bidago Anduane Homogo Ngode Datagaliwabe ibunaga mana latagi haga biaruhondo ibu Dinini miaga kago ibugua ibunaga biabe bia haga karu mbirale mbira áyu dege bulebiragonaga walia hole ibunaga dahuliyali mbira, Pu, laya, lalu laya.<sup>☆</sup>

<sup>7</sup> Yasuhanda lalu, Ai hale ha. I áyu ogoni dege ibulebero. Ani ibuleberogo wali agali mbuga ogoniha mbirale mani bulebiragonaga gilibu ngarume laradagua bialu karu ti turu ho holene nga, lalu laya.<sup>☆</sup>

<sup>8</sup> I Yone kogo ina mbirale uruni bibahende halebi halu handabi bialu biru. Ina uruni bibahende halebi hale hai halu handabi handai howa dahuliyali ihondo mbirale o walia haga biago ibunaga ge ha duli hanga halu bulu paluwa ibuhondo mitangi bialu lotu lolebiruria<sup>☆</sup> <sup>9</sup> ibugua ihondo lalu, Ani nabibe. I íbi í hamene mbalini Ngode Datagaliwabe mana latagi haga biarubi wali agali bibahende mbuga ogoriani bi mana gilibu ngarume laradagua bialu karubi ina mandagi howa biabe bia haga kogoni. Ani bidogo ina Ngode Datagaliwabe hangu mitangi bialu lotu lolene nga, lalu laya. <sup>10</sup> Ani lowa ibugua la dege bialu lalu, Mbuga ogoniha mani bulebiragonaga bi lo ngaru bulene horo kaware harago wia do nahabe.<sup>☆</sup> <sup>11</sup> Anigo mbirali ko bialu kago ibu ko bialu haabo holene nga. Mbirali ibunaga miniha ko ngubiru mitangi biaga kago ibunaga miniha ko ngubi uruni mitangi bialu haabo holene nga. Mbirali bayale bialu kago ibu bayale bialu haabo holene nga. Ai mbirali Ngode Datagaliwabehondo loma bia hene kago ibu ibu loma bia ho wiaabo holene nga, lalu laya.<sup>☆</sup>

<sup>12</sup> Ani leagola Yasuhanda lalu, Ai hale ha. I áyu ogoni dege ibulebero. Ibalu wali agali ti hangu hangume biabe biyadagua emenaru mule yalu ibulebero.<sup>☆</sup> <sup>13</sup> I ala harugobi mani holeberogobi piganeorebi mahaorebi ko, lalu laya.<sup>☆</sup>

<sup>14</sup> Wali agali tinaga aga labolaboru dodo nahelo wayawaya biaga karume ti haabo holene ngiagane iranaga lini nolebi tano biagonaga panga haraba ngagoria bolangua

☆ **22:1:** Ese 47.1, Seg 14.8 ☆ **22:2:** Pig 2.9, Ese 47.12, Yol 3.18, Seg 14.8, Mo 2.7, 21.24, 22.14, 22.19 ☆ **22:3:** Ese 48.35, Seg 14.11, Pig 3.17, Mo 7.15 ☆ **22:4:** Iba 42.2, Md 5.8, 1 Ko 13.12, 1 Yo 3.2, Mo 3.12, 14.1 ☆ **22:5:** Ais 60.19, Dan 7.18, 7.27, 2 Ti 2.12, Mo 5.10, 20.6, 21.23-25 ☆ **22:6:** Mo 1.1, 19.9, 21.5 ☆ **22:7:** Mo 1.3, 3.11, 22.10-12, 22.20 ☆ **22:8:** Mo 19.10 ☆ **22:10:** Dan 8.26, 12.4, 12.9, Mo 1.3, 10.4 ☆ **22:11:** Ese 3.27, Dan 12.10, 2 Ti 3.13 ☆ **22:12:** Iba 28.4, Ais 40.10, 62.11, Yar 17.10, Lm 2.6, 14.12, 2 Ko 11.15, Mo 2.16, 2.23, 20.12 ☆ **22:13:** Ais 44.6, 48.12, Mo 1.8, 1.17, 2.8, 21.6

halu anda polebi hongo yu ka. Ani bidaru ti turu ho holene nga. ✧ <sup>15</sup> Anigo tano ogoni tagirahayagi wali agali mana ko taraore biagarubi tomia tara tara biagarubi wali agali kayu biagarubi wali agali homelo bo wahagarubi gime wabiniruhondo bi pupu wiagarubi ke halu bime lalubi biagaru ti tagiraha ka. ✧

<sup>16</sup> Yasuhanda lalu, I Yasu ina inaga dahuliyali mbirame mana uruni inaga hameigini tano kariani kamiruhondo lope hole pu, laru. I Debidinaga aguanene kogoni. I yakundi egabi naledaha huririle tagira ibaganego kogoni, lalu laya. ✧

<sup>17</sup> Ngode Datagaliwabe Dinini ibubi Nogo Sibi Igini biagonaga wandari dabu bulebiyagobi libugua lalu, Ibu, lara. ✧

Wali agali bibahende bi uruni hale hararumebi, Ibu, lolene nga.

Mbirali iba noa ho kego ibu. Haabo holene ngiagane iba Ngode Datagaliwabehanda bame ngirago noa ho kagome nole ibulene nga.

*Bi lamaronaga ogo*

<sup>18</sup> Ai i Yonego ina mbirale mani bulebirarunaga mbiwia halu mbuga ogoriani gilibu ngago wali agali hale halu biraruhondo bi ogo hongo howa lowia haro. Bi ogoni lo ngagoha mbiralime latago hayagua ibuhondo Ngode Datagaliwabehanda bolene hongo mbuga ogoha lo ngadagua pani miatago holebira. ✧ ✧ <sup>19</sup> Ani bialu bi ogoni mbiwia halu lowini ngarunaga mbiralime mbira mo wahayagua haabo holene ngiagane iranaga lin-ibi Tano Loma Bia Hene biagobi mbuga ogoha lo ngadagua Ngode Datagaliwabehanda ogoni ibunaga mbirale mulene talebu winigo mo waholebira. ✧

<sup>20</sup> Bi uruni bibahende ngaru, Heneneore nga, lalu walia haga kago ibugua lalu, E heneneore i áyu ogoni dege ibulebero, laya. ✧

Aniore bialu Anduane Homogo Yasu ibu. <sup>21</sup> Anduane Homogo Yasunaga biamogo bia holene ti bibahendeha helo hamelo ko, lalu Yonehanda gili bini. ✧

---

✧ **22:14:** Pig 2.9, 3.22, 1 Yo 3.24, Mo 7.14, 21.27, 22.2 ✧ **22:15:** Ga 5.19-21, Pb 3.2, Kl 3.6, Mo 21.8 ✧ **22:16:** Dag 24.17, Ais 11.1, 11.10, Seg 6.12, Lm 1.3, 2 Pi 1.19, Mo 2.28, 5.5 ✧ **22:17:** Ais 55.1, Yo 7.37, Mo 21.2, 21.6, 21.9 ✧ **22:18:** Mo 15.1, 15.6 ✧ **22:18:** Man 4.2, 12.32 ✧ **22:19:** Iba 69.28, Mo 13.8, 22.2 ✧ **22:20:** Md 16.27, 1 Ko 16.22, Mo 22.7, 22.12 ✧ **22:21:** Lm 16.20, 16.24, 2 Te 3.18